


Anumzamofo Ruotage

Avontafere



The Holy Bible in the Kamano-Kafe language of Papua New

Guinea

**Anumzamofo Ruotage Avontafere  
The Holy Bible in the Kamano-Kafe language of Papua New  
Guinea  
Buk Baibel long tokples Kamano-Kafe long Niugini**

copyright © 2022 Tyndale Bible Translators

© Tyndale Bible Translators

Language: Kamano-Kafe (Kamano)

Translation by: Tyndale Bible Translators

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2023-02-08

---

PDF generated using Haiola and XeLaTeX on 21 Feb 2024 from source files dated 13 Dec 2023

f1057ba4-e8d1-53e3-baf9-315ebf4a8836

## Contents

Jenesis-Agafa . . . . .	1
Ekssodas-Atiramine . . . . .	77
Levitikas-Pristi Eri'zane . . . . .	143
Nambas-Vahe Hamprine . . . . .	186
Diutronomi-Kasege . . . . .	248
Josua . . . . .	302
Jadses-Kva Vahe . . . . .	343
Rut . . . . .	380
1 Samuel . . . . .	386
2 Samuel . . . . .	435
1 Kin . . . . .	475
2 Kin . . . . .	524
1 Kronikol-Zamagi Zamagenke . . . . .	578
2 Kronikol-Zamagi Zamagenke . . . . .	627
Esra . . . . .	683
Nehemaia . . . . .	701
Esta . . . . .	727
Jop . . . . .	739
Sam-Zagame . . . . .	787
Proverb-Knare Nomaniza . . . . .	907
Ikrisisasatis . . . . .	946
Solomoni Zagame . . . . .	959
Aisaia . . . . .	967
Jeremaia . . . . .	1061
Lamentesen-Zavi Krafa . . . . .	1163
Izikel . . . . .	1173
Daniel . . . . .	1255
Hosea . . . . .	1284
Joel . . . . .	1298
Amos . . . . .	1303
Obadaia . . . . .	1314
Jona . . . . .	1316
Maika . . . . .	1320
Nahum . . . . .	1329
Habakuk . . . . .	1334
Zefanaia . . . . .	1339
Hagai . . . . .	1344
Zekaraia . . . . .	1347
Malakai . . . . .	1362
Matiu . . . . .	1367
Mak . . . . .	1423
Luk . . . . .	1459
Jon . . . . .	1519

Aposol . . . . .	1562
Rom . . . . .	1616
1 Korint . . . . .	1642
2 Korint . . . . .	1666
Galesia . . . . .	1682
Efesas . . . . .	1691
Filipai . . . . .	1699
Kolosi . . . . .	1705
1 Tesalonaika . . . . .	1711
2 Tesalonaika . . . . .	1716
1 Timoti . . . . .	1719
2 Timoti . . . . .	1726
Taitus . . . . .	1731
Filimon . . . . .	1734
Híbru . . . . .	1736
Jemis . . . . .	1754
1 Pita . . . . .	1760
2 Pita . . . . .	1767
1 Jon . . . . .	1771
2 Jon . . . . .	1777
3 Jon . . . . .	1778
Jut . . . . .	1780
Revalesen-Hufo Hu'ne . . . . .	1782

## Jenesis-Agafa

### Mose'se'ma Kre'nea Nampa 1ni Avontafere

#### *Anumzamo maka'za eri fore hu'nea naneke*

<sup>1</sup> Ese agafare Anumzamo'a monane mopane trohu'ne. <sup>2</sup> Ama mopama fore osu'nerera, mago zana omnetfa hu'neane. Hankino tusi'a hanimo tina refite'negeno, ana timofo agofetura Anumzamofo Avamumo vono nehiane. <sup>3</sup> Anante Anumzamo'a huno, Masa fore hino! higeno masa fore hu'ne. <sup>4</sup> Hagi masamo'a knare higeno Anumzamo'a keteno, masane haninena refko hu'ne. <sup>5</sup> Anumzamo'a masagura zagegane huno agi'a nemino, kumazukura hanine huno agi'a ami'ne. Hanki hani huno ko'matigeno'a, pusankna emente'ne.

<sup>6</sup> Hagi tinke me'negeno Anumzamo'a huno, Mago kankamu amu'nompina me'neno tina refko hanie. <sup>7</sup> Huteno Anumzamo'a tina refkohu fenka netreno, hunagamu atregeno, kankamu efore hu'ne. <sup>8</sup> Anumzamo'a ana kankmumofona agi'a mone huno ante'ne. Hanki haninkino masa higeno, nampa 2 kna emente'ne.

<sup>9</sup> Anante Anumzamo'a huno, Timo'a monamofo hinkanaga mago kaziga eri zogino evanigeno, ho'mu mopa fore hanie, huno higeno anaza efore hu'ne. <sup>10</sup> Anumzamo'a hagageme hianka zigagura mope nehuno, tima evazu huno omeri atruma hiantinkura, hagerine huno hu'ne. Anumzamo'ma anazama kegeno'a, e'i knare hu'ne.

<sup>11</sup> Hagi Anumzamo'a amanage huno hu'ne, Mopafinti maka'za hagesie. Za'ara zane zafane rumofo rumofo raga'a revava hanaza zantamimo'za hagesaze. Ragazmifina avima'a efore hanie! Hanige'za zafa rgama rentesazana e'i zamagu'afinka avima'amo'za zamagri'agna raga rentesaze. Hige'za mopafina ana zantamimo'za efore hu'naze. <sup>12</sup> Ana nehazage'za mopafina ruzahu ruzahu trazana erifore nehazageno, ruzahu ruzahu ne'zampina avima'a me'nea rentageno, avima'amo'a agragna raga fore nehigeno, zafa rgama renteana e'i agu'afinka avima'amo'za zamagri'agna huno nemegeno, avima'a rentetere hu'ne. Hanki Anumzamo'ma anazantamima kegeno'a knare hu'ne. <sup>13</sup> Haninkino masa higeno nampa 3 kna emente'ne.

<sup>14</sup> Hagi Anumzamo'a huno, Tavitamimo'za mona kankamumpi me'neza, masane haninena refko nehu'za, kafugi, zagegi, ko knagi hanagu nemesageno, <sup>15</sup> ana tavitamimo'za mona kankamumpi efore hu'za me'neza mopamofona remasa hanaze, hige'za ana zantamina fore hu'naze. <sup>16</sup> Anumzamo'a tusi'a tavi tre tro hu'ne. Rantavimo feru remasa hanigu zage tro nehuno, rankna tavi hanimpi remasa hanigu, ika tro nehuno, ofuntaminena tro hu'ne. <sup>17</sup> Anumzamo'a mopamofoma masama amisanagure huno mona kankamumpina tavitamina zamante'ne. <sup>18</sup> E'i ana tavi'mo'za hanimpine masafinema remasama hanagure huno zamante'ne. Anumzamo'ma anazantamima kegeno'a knare hu'ne. <sup>19</sup> Hagi haninkino masa higeno, nampa 4kna emente'ne.

<sup>20</sup> Anante Anumzamo'a amanage hu'ne, Timpina nozame zagane, zamasimu ante'za manisaza zagamo'za efore hu'za ruvinetesageno, mona kankamumpina namazagamo'za efore hu'za hare'za vano hugahaze.

<sup>21</sup> Hagi anante Anumzamo'a tusinasi nozameramine, osifaveramina trohuno hagerimpina zamagrite zamantenge'za timpina avite'za mani'neza kaza kaza hu'za vano nehaze. Hanki namazaga zamagri kna huno tro huzmantene'ne. Anumzamo'ma anazama keana knare hu'ne. <sup>22</sup> Anumzamo'a asomu ke hunezmanteno amanage hu'ne, kase hakare huta hagerimpina mani aviteta nemaninkeno, namamo'zanena mopafina kase hakare hu'za mani titipa hiho. <sup>23</sup> Hagi haninkino masa higeno, nampa 5fu kna emente'ne.

<sup>24</sup> Anumzamo'a amanage huno hu'ne, Mopafina miko zagagafa rumofo ru-mofo fore hanaze. Kumate zagagafagi, afi zagagafagi, ne'onse zagaramine, zamagragna rumofo rumofo fore hu anante anante hiho. Anage higeno maka ana zagaramina fore hu'naze. <sup>25</sup> Hanki Anumzamo'a zagagafa tro hu'neana, trampi mani zagagafa zamagri kna tro nehuno, nontegama mani zagagafa zamagri kna tro nehuno, mopafi ne'onse zagaramina zamagri kna tro hu'ne. Anumzamo'ma anazama kegeno'a knare hu'ne. <sup>26</sup> Hagi Anumzamo'a amanage huno hu'ne, Vahe tro hammena tagrikna hu'za manine'za, maka'za kva nehu'za nozameramine, hare'za vano nehaza namaramine, kumate zagagafane, mopafima kazama hu'za vanoma nehaza zagarami kegava hugahaze.

<sup>27</sup> Hagi Anumzamo'ma vahe'ma tro hu'neana, Agra'agna tro hu'ne. Vene a'ene tro huzanante'ne.

<sup>28</sup> Anumzamo'a asomu ke huneznanteno amanage huno zanasmi'ne, Mofavre kase hakare hanakeno, mopafina mani vitesaze. Ana nehuta mikiza kegava hi'o. Timpi nozame zagane, haren vano nehia nama zagine, hakare'a mopafi kaza huno vano nehia zagaramine ana makaza kegava hi'o.

<sup>29</sup> Anumzamo'a amanage hu'ne, Kma antahi'o! Mopafima nehagea zamofona avima'ane zafa raga'ane nezama nesa'aza tanami'noe. <sup>30</sup> Hanki mika ama mopamofo agofetu vonoma nehaza zagagafamo'zane, monafima hare'za vonoma nehaza nama'zaga'mozane, mika zagagafama zamasi-muma ante'za vanoma nehaza zagamo'zama nesaza zana, ruzahu ruzahu traza Nagra zami'noe, huno higeno ana zana fore hu'ne. <sup>31</sup> Anumzamo'a mika'za trohuteno keana knare huno hentofa zanke fore higeno keteno, muse hu'ne. Hagi haninkino masa higeno, nampa 6si kna emente'ne.

## 2

### *7ni knazupa efore hu'nea zamofo naneke*

<sup>1</sup> E'inahu huno monane mopane, anampima me'nea zantamina maka trohu vagare'ne. <sup>2</sup> Eri'za eri vagareteno, nampa 7ni knarerera Anumzamo'a manigasa hu'ne. <sup>3</sup> Anumzamo'a nampa 7ni knarerera manigasa nehuno, ana kna eri ruotge huno asomu hunte'ne. Na'ankure miko'a eri'zana eri vagarenegu huno manigasa hu'ne.

### *Anumzamo Vene A'ene Ideni hozafi trohu zanante'nea naneke*

<sup>4</sup> Ra Anumzamo'ma monane mopane eri fore'ma hunte'nea nanekea, amanahu me'ne. <sup>5</sup> E'i ana knafina za'ara zana fore ama mopafina osu'ne, na'ankure Ra Anumzamo'a ana knafina kora atregeno oru'ne. Ana higeno eri'za eri vhahera fore huno omani'negeno, <sup>6</sup> kampu'i tintamimo'za mopafinti hanati'za mika mopamofona tina ami'naze. <sup>7</sup> Ra Anumzamo'a kugusopa erino regripeteno vahe tro huno agonagampi Agra'a asimu'a huhu huvazigeno, vahe efore hu'ne. <sup>8</sup> Hanki Ra Anumzamo'a mago hoza zage hanati kaziga ante'neankino, ana hozagura Ideni hoze hu'nea hozamofo

agu'afi, ana nera avreno ome ante'ne. <sup>9</sup> Ra Anumzamo'a rumofo ru-mofo zafa higeno, mopafinti hage'ne. Hakare zafamo'za zamuma kete'ene ne'zama ne'arera knare hu'naze. Hagi ana hoza amu'nompina tare zafa me'ne. Mago zafa ofri manivava hu zafe. Hagi mago zafa knare zanki, havizanki huno'ma antahino keno'ma hu zafe. <sup>10</sup> Hagi Ideni hozafintira mago ti hanatino enevuno, hozafina tina nemino ana timo'a refko huno 4'afi ranti evu'ne. <sup>11</sup> Ese'ma evu'nea timofo agi'a Pisoni tinkino, maka Havira mopafi rugagino evu'ne. Ana mopafina knare goli me'ne. <sup>12</sup> Ana mopafima me'neana mago'zana ruokamre knare goline, mana nen-take'zane, mizama'amo mareri'nea oniksie nehaza havene me'ne. <sup>13</sup> Anante timofo agi'a Gihoni tinkino, Kusi\* mopafi rugagino evu'ne. <sup>14</sup> Hagi nampa 3a Taigrisi tinkino, zage hanati kaziga Asiria mopafi evu'ne. Hagi nampa 4a Yufretis tine.

<sup>15</sup> Hanki Ra Anumzamo'a ana ne'ma avreno Ideni hozafima ante'neana, hoza eri'zama enerino kegavama hanigure huno avrente'ne. <sup>16</sup> Hianagi Ra Anumzamo'a amanage huno kasegea hunagru hunte'ne, Kagra mika hozafima me'nea zafa raga amne negahane. <sup>17</sup> Hianagi knare'zanki havi'zanki huno antahino keno'ma hu zafa raga onetfa huo. Hanki kagrama ana zafa ragama nesnanana, tamage hunka anzupa frigahane.

#### *Anumzamo a'trohu'nea naneke*

<sup>18</sup> Hagi anante Ra Anumzamo'a anage hu'ne, Vemo'ma agrake maniazamo'a knare osianki'na, azahu vahera tro hanugeno knare hu'ne tragote'ne manigaha'e. <sup>19</sup> Nehuno mopa kateno mika zagagafane, namaramine, ne'one zagagafaraminena tro huzmanteteno zamavareno zamagi antezamisie huno aña nete vigeno, zamagi'a ante'zamigeno ana zamagima ante'nere me'ne. <sup>20</sup> Higeno ana ne'mo'a mika nontegama nemaniza zagagafagi, monafima hare'za vanoma nehaza nama'zagagi, mopafima nemaniza maka afi zagagafagi huno zamagi zami'neanagi, agri'ma azahu knampa'a omani'ne. <sup>21</sup> Ana higeno Ra Anumzamo'a ve mofona azeri avukoko higeno mase himre'negeno, magoke omete asoza'a avazu huteno, avufanu renkanirente'ne. <sup>22</sup> Ra Anumzamo'a ana ne'mofo asoza'ama eri'nereti a'trohuno avreno egeno,

<sup>23</sup> ana ne'mo'a huno, Ha e'ine! Nagri zaferinareti zaferina'a tro nehuno, nagri navufareti avufga'a tro hu'neanki'na, are hu'na agi antemue.

Na'ankure e'i ve'mofo avufafinti erino trohu'negu hu'ne.

<sup>24</sup> E'i ana agafare vemo'a nererane, nefanena atreno, a'ane hagerafino eri mago huke nemani'e. <sup>25</sup> Zanagra arave huke kena omasi zanavufga zanavapa manina'anagi, zanagazea osu'ne.

## 3

#### *Ana vene a'mo'ene Anumzamofo ke rutagrena'a naneke*

<sup>1</sup> Hanki Ra Anumzana Anumzamo'a maka zagagafama mopafima trohu zamante'nefintira, tamage huno masavenentake kema hu'arera osifa'vemofo antahi'zamo'a zamagatereankino, osifavemo'a ana a'mofona antahigeno, Hozafima me'nea zafa rgagura Ra Anumzana Anumzamo'a tamagerfa huno mika one'o huno huranante'nefi? <sup>2</sup> Higeno ana a'mo'a osifavemofo kenona huno, Hozafintira mika zafa raga amane ne'o huno hurante'ne. <sup>3</sup> Hu'neanagi mago zafa hoza amu'nompi me'nea

\* <sup>2:13</sup> Itopia (Ethiopia) kazigagu hu'ne.

zafa rgagura avako osuta one'o hurante'ne. Hagi ana zafa ragama nege, avako'ma huge'ma hanuta'a, frigaha'e huno tasami'ne. <sup>4</sup> Higeno osifavemo'a a'mofonkura amanage hu'ne, Tamagerfa hutna tanagra ofrigaha'e. <sup>5</sup> Na'ankure Anumzamo'a keno antahino hu'neankino, nesna'ana tanavumo'a hari hina Agri kna hutna antahi antahi tani'amofona eriamma hanigetna, knare zanki, havi zanki hutna keta antahita hugaha'e. <sup>6</sup> Higeno ana a'mo'ma ana zafa rgama keana ne'zama ne'amo'a knare higeno, zafa ragamo'a knare hu'neankino, ana a'mo'a amanahu antahintahi eri'ne. Ama zafa raga tagina nene'na knare antahi'za erisue nehuno, ana zafa raga tagino neneno, neve'ene mani'negukino, mago'a nevena amigeno ne'ne. <sup>7</sup> Netakeno zanavumo'a hari hige'ne, zanavufga zanavapa mani'nene, zanagazegu nehune fiki zafa anina anakike zanavufgarera kena masina'e.

### *Anumzamo Adamune, Ivikizni hanavege huzanante'nea naneke*

<sup>8</sup> Kinaga zasi anteno fruma higeno'a Anumzamo'a hozafi ne-egeno agasasanke'a nentahike hozafi mago'a zafa asoka frakike mani'nae. <sup>9</sup> Mani'nakeno Ra Anumzana Anumzamo'a vemofonkura kezatino anage hu'ne, iga mani'nane? <sup>10</sup> Higeno vemo'a huno, Hozafi neanke'na kagasasanke nentahi'na frakina mani'noe. Na'ankure navufga navapa mani'nena, koro hu'na fraki'noe. <sup>11</sup> Higeno Ra Anumzana Anumzamo'a huno, Iza hugantegenka kavufga kvapara mani'nane? Nagrama ono hu'na hunagru'ma hugante'noa zafa raga'a taginka ne'nampi? <sup>12</sup> Higeno vemo'a huno, Kagrama nami'nana a'mo ana zafa raga tagino neneno namige'na ne'noe. <sup>13</sup> Higeno anante Ra Anumzana Anumzamo'a ana a'kura huno, Kagra e'i zana na'a hu'nane? Huno antahigegeno a'mo'a kenona huno, Osifavemo renavatga hige'na tagi'na ne'noe. <sup>14</sup> Higeno Ra Anumzana Anumzamo'a amanage huno osifavemofona asami'ne, Osifavemoka e'inama hana nona'a, vahe'mo'zama kumate'ma kegavama nehaza zagagafane, trampi afi zagagafama mani'nafintira kazusi (kes) hugantoankinka, kagra zamageterenka rankna erinka kasaguregati regraro henka vano nehunka, mika knafina kugusopa nenenga manigahane.

<sup>15</sup> Nagra kagri'ene a'mofo amunompina ha'za nentena, tanagigomokizmi amu'nompina ha'za antesugen, a'mo'ma kasentesia mofavremo kasenia reopravazina, kagra agrira agamerumpafi amprigahane.

<sup>16</sup> Anage nehuno Anumzamo'a a'mofonkura amanage hu'ne, Mofavrema kasentenaku'ma hananke'na Nagra rama'a kata kamisugenka, ana katafi mani'enka mofavrea kasentegahane. Ana nehunka negavena tusiza hunka avesintegahane. Hianagi agra kagrira kegava krigantegahie.

<sup>17</sup> Hagi Anumzamo'a Adamuna amanage huno asmi'ne, A'kamofo ke antahinka Nagrama kase hugante'na hunagru'ma hugante'noa zafa raga ne'nanku mopamofona

Kazusi huntoankinka, kata negrindenka maka zupa hozaka'a e'nerisankeno nezanka'a fore hinkenka negahane.

<sup>18</sup> Hozafi ne'zana ave'ave zane agaso tra'zamo fore huno refinetena ne'zana anampinti erinka negahane.

<sup>19</sup> Kavugosafinti kamunasisi hutesigenka nezanka'a eri fore hunka negahane. Ana hume vunka kugusopareti tro hugante'nogu frinka ete mopafi ufregahane.

<sup>20</sup> Ana ne'mo'a nenaro agi'a Ivi'e \* huno antemi'ne. Na'ankure mikavahe'mokizmi zamarera'zama hanigure huno antemi'ne. <sup>21</sup> Hanki Ra Anumzana Anumzamo'a zagagafa akru'a tavrofeno Adamune, Ivinena kukena masizanante'ne. <sup>22</sup> Hagi Ra Anumzana Anumzamo'a amanage hu'ne, Ama ne'mo'a tagri kna huno knare zanki havi zanki huno hago keno antahino hie. E'ina hu'negu manivava hu'mofa zafa raga'a tagino nesannu'a manivava hu'zanku atresanunkeno ana zafarera urava'o osanie. <sup>23</sup> Anage nehuno Ra Anumzana Anumzamo'a, Ideni hozafintira huntegeno fegi'a agri'ma tro hu'nea mopare hoza eri'zama erisnigu huntegeno vu'ne. <sup>24</sup> Hagi Anumzamo'a ana ne'ma Ideni hozafinti ahenatigeno vutegen'o'a, zage hanati kaziga hankavenentike ankerozamantenge'za ana hoza kegava nehazageno, tevenefa tagivazu nehia bainati kazimo kagigagi nehige'za, ana manivava zafamofona kegava hu'naze.

## 4

*Kenine Abelikizni naneke*

<sup>1</sup> Adamu'a nenaro Ivi'ene masegeno amu'ene huno ne'mofavre kasenen-teno ana a'mo'a huno, Anumzamo naza hige'na ne'mofavre erifore hue, nehuno Keni'e huno agi'a antemi'ne. <sup>2</sup> Hagi henka Ivi'a Keni neganana Abeli kasentegeno ana ne'mo'a ra huno sipisipi afu kegava higeno, Keni'a mopafi eri'za erino hoza anteno kegava hu'ne. <sup>3</sup> Magokna Keni'a Ra Anumzamofo ofa hunteku hoza'afinti ne'za erino e'ne. <sup>4</sup> Ana higeno Abeli'a sipisipi afutamimpinti afovage hu'nea agonesa afu mago aheno eme Kresramana vun-teno, Ra Anumzamo'a negeno Abelina antahi muse hunte'ne. <sup>5</sup> Hianagi Keni'ma ofa hunte'neaza keteno, Anumzamo'a antahi musena huontegeno, Kenina tusi asi vazigeno avugosa rugriri'ne. <sup>6</sup> Ana higeno Ra Anumzamo'a negeno Keninkura amanage hu'ne, Nahigenka krimpagna nehunka kavugosa runegaririne? <sup>7</sup> Hagi kagra'ma knare kavu'kava'ma hantesina Nagra muse hugantosine. Hanki kagrama havizama hanankeno'a, kumimo'a kazeri kagateregahianki, kagra hankavetinka mani'nenga kumira azeri agatero.

<sup>8</sup> Hagi mago knazupa Keni'a nagana'amofo Abelinku hofa trampi vanu'e huno agi higeke, vukema ana hofa trampi umanineke, Keni'a nagna'amofo Abelina ahe fri'ne. <sup>9</sup> Anante Ra Anumzamo'a Kenina antahigeno, Negagna Abeli'a inantega mani'ne? Higeno Keni'a huno, Nagra onke'noanki, Kagrama kagesama antahinana nagra nagananimofo kva hunte ne' mani'nofi? <sup>10</sup> Higeno Ra Anumzana Anumzamo'a amanage hu'ne, Kagra na'a higenka kefo kavukvara hu'nane? Nagnakamofo koramo'a mopafi tagiramineno keaga hundo huno Nagritega krafage nehie. <sup>11</sup> Hagi nagna kamofoma ahenka eri taginana koramo'a, mopafi tagiramigeno mopamo ne'negu, ana mopa kazusi huntoankino ne'zana forera osugahie. <sup>12</sup> Hagi mopafima hozama erinka antesnana hozamo'a, hikazake huno nena ahenonte'na, nonka'a omanena kanke kanke hunka ama mopafina vano hugahane. <sup>13</sup> Keni'a amanage huno Ra Anumzamofo kenona hu'ne, Nagri'ma hunanta kemo'a tusi'a kna navesie! <sup>14</sup> Hanki kama antahio! Kagra ama mopafinti nagrira meni nazeri atranankina, Kagri kavuga omaninugeno,

\* <sup>3:20</sup> Ivi'e huno Hibru kefima hu'nea kemofo agafa'a, hakare vahe'ene zamasimu nentaza zagamok-izmi nezmarera kna hu'ne.

noni'a omane'nenigena ama mopafina kanke kanke neha'nena, aza'o nage-suno'a nahe frigahie. <sup>15</sup> Higeno Ra Anumzamo'a kenona'a huno, Kagri'ma kahesimo'a ana nona'a 7ni'a zupa kna'zana agetereno erigahie, nehuno Kenima vahe'mo'zama negezama ohesnagu mago avame'za agofetu antente'ne. <sup>16</sup> Ana higeno Ra Anumzamofo avugatira Keni'a atreno Ideni hozamofo zage hanati kaziga vuno, Nodi mopare umani'ne. \*

### *Kenimpinti'ma vahe'ma fore hu'naza zamofo naneke*

<sup>17</sup> Keni'a nenaro'ene masegeno amu'ene huno ne'mofavre kasenteno, agi'a Inoku'e huno ante'ne. Hagi anante mago rankuma erifore huno kiteno, ana kumamofo agi'a Inoku'e huno mofavre'amofo agire asamre'ne. <sup>18</sup> Hagi Inoku'a mago mofavre eri fore huno agi'a Iradi'e hu'ne. Iradi'a Mehusaeli nefaz'a higeno, Mehusaeli'a Metusaeli nefaz'a higeno, Metusaeli'a Lemeki nafa'za hu'ne. <sup>19</sup> Hagi Lemeki'a tare atre zanante'ne, mago'mofo agi'a Ada'e, mago a'mofo agi'a Zila'e. <sup>20</sup> Ada'a ne'mofavre kasenteno agi'a Jabali'e huno ante'neankino, fugagi noma ki'za nemase'za afu'ma kegava nehaza vahe'mokizmi nezamageho'e. <sup>21</sup> Hagi ngana'amofo agi'a Jubali'e. Jubali'a ese'ma agafa huno nofite zavena (harp) nehaza naga'mokizmi nezamageho'e. <sup>22</sup> Hanki Zila'a Tubalkein kasente'neankino, agra aenima, kopama tevefi krefizo huteno amasagino eri'zama eri'zantami tro nehia nere. Tubalkeini nesaro agi'a Na'ama'e.

<sup>23</sup> Mago zupa Lemeki'a nenaro kiznigura amanage huno zanasmi'ne, Adagane Zilagata'a kama antahi'o, mago nehaza ne'mo nahe kuzafa antege'na, agrira ete ahe fri'noe.

<sup>24</sup> Hagi mago ne'mo'ma, Kenima eme ahe frisanuno'a, 7ni'a zupa knazana eri agofetu huno erigahie. Hianagi tamage huno nagri'ma Lemeki'nama eme nahesanuno'a, 77ni'a knazana agofetu huno nona'a erigahie.

### *Abeli'a frigeno nona'a mago mofavre Seti kasente'nea naneke*

<sup>25</sup> Hagi Adamu'a nenaro'ene masegeno ne' mofavre kasenteno amanage hu'ne, Keni'ma Abelima ahe fri'nea nona'a Anumzamo'a ne'mofavrea nami-ankino agi'a Seti'e. <sup>26</sup> Henka'a Setina ne'mofavre fore humigeno agi'a Enosi'e huno antemi'ne. Ana knafi vahe'mo'za erigafa hu'za Ra Anumzamofo agihanta nevazi'za, Agrite mono hunte'naze.

## 5

### *Adamumpinti'ma fore hu'za e'naza naga'mokizmi naneke*

<sup>1</sup> Adamumpinti'ma vahe'ma fore'ma hu'za e'naza nanekea amanahu hu'ne. Anumzamo'ma vahe'ma trohu'neana, Agra'agna huno trohu'ne. <sup>2</sup> Agra vene, a'ene tro huzanante'ne. Ana nehuno asomu ke huzmanteno, vahere huno hu'ne. <sup>3</sup> Adamu'a 130'a Zagegafu nehuno agra avugosagna ne'mofavre kasenteno, agi'a Seti'e hu'ne. <sup>4</sup> Ananteti 800'a zagegafu agatereno mani'neno, ne' mofara mago'a kasezamante'ne. <sup>5</sup> Hagi Adamu'a 930'a zagegafu maniteno fri'ne.

<sup>6</sup> Hagi Seti'a 105fu'a zagegafu nehuno, ne' mofavre eri fore huno agi'a Enosi'e huno antemi'ne. <sup>7</sup> Hagi Enosima kasenteteno'a, ananteti Seti'a 807ni'a zagegafu nemanino, mago'a ne'mofara kasezamante'ne. <sup>8</sup> Ana huteno 912fu'a zagegafu Seti'a maniteno fri'ne.

\* **4:16** Nodie hu'nea kemofo agafa'a, Hibru kefina kanke kankere hu'ne.

<sup>9</sup> Enosi'a 60'a zagegafu nehuno ne' mofavre eri fore huno, agi'a Kenani'e huno antemi'ne. <sup>10</sup> Kenanima kasenteteno'a Enosi'a 815ni'a zagegafu maniteno mago'a ne'mofara zamante'ne. <sup>11</sup> Enosi'a 905fu'a zagegafu maniteno fri'ne.

<sup>12</sup> Kenani'a 70'a zagegafu nehuno, ne'mofavre eri fore huno agi'a Mahalari'e huno antemi'ne. <sup>13</sup> Mahalarima fore'ma hutegen'o Kenani'a 840'a zagegafu nehuno, mago'a ne'mofara kasezmantene. <sup>14</sup> Kenani'a 910ni'a zagegafu maniteno fri'ne.

<sup>15</sup> Mahalari'a 65'a zagegafu nehuno, ne' mofavre anteno agi'a Jareti'e huno antemi'ne. <sup>16</sup> Jaretimma kasenteteno, Mahalari'a 830'a zagegafu nehuno mago'a ne'mofara kasezmantene'. <sup>17</sup> Hanki Mahalari'a 895fu'a zagegafu maniteno fri'ne.

<sup>18</sup> Jareti'a 162tu'a zagegafu nehuno ne' anteno agi'a Inoku'e huno antemi'ne. <sup>19</sup> Enokuma kasenteteno Jareti'a 800'a zagegafu nehuno mago'a ne' mofara kasezmantene'. <sup>20</sup> Jareti'a 962'a zagegafu maniteno fri'ne.

<sup>21</sup> Inoku'a 65'a zagegafu maniteno, ne' mofavre Metusera kasente'ne. <sup>22</sup> Ananteti Metuserama kasenteteno'a Inoku'a 300'a zagegafufina knare huno Anumzane tragoteno mani'neno mago'a ne' mofara kase zamante'ne. <sup>23</sup> Hagi ana makara 365'a zagegafu Inoku'a mani'ne. <sup>24</sup> Inoku'a Anumzane tragoteno mani'negu, Anumzamo'a avre'ne. <sup>25</sup> Metusera'a 187ni'a zagegafu maniteno, ne'mofavre Lemeki kasente'ne. <sup>26</sup> Metusera'a Lemekima kasenteteno'a, 782'a zagegafu maniteno, mago'a ne'mofara kase zamante'ne. <sup>27</sup> Hagi Metusera'ma manino'ma e'nea kna'a, 969ni'a zagegafu huteno fri'ne.

<sup>28</sup> Lemeki'a 182'a zagegafu nehuno ne' mofavre kasente'ne. <sup>29</sup> Lemeki'a No'a huno agi'a antemi'ne. Ra Anumzamo'a mopamofona tusi hunte'negeta tusi'a eri'za erita nevunkeno tagri taza hanigu ama mofavre agi'a, mani fruhu nere nehuno, zamagra kefina No'a huno antemi'ne. <sup>30</sup> Hanki Noama kasenteteno'a Lemeki'a 595fu'a zagegafu maniteno, mago'ane ne' mofara kasezmantene'. <sup>31</sup> Lemeki'a ana maka kna'a, 777ni'a zagegafu maniteno fri'ne.

<sup>32</sup> No'a 500'a zagegafu maniteno, ne'mofavrea tagufa zamanteno zamagi'a Semi'e, Hamu'e, Jafeti'e huno zamante'ne.

## 6

### *Kefo avu'avazamo avite'nea naneke*

<sup>1</sup> Veamo'za ama mopafina vahera kase hakare hazageno, knare'nare mofa'nerami fore hu'naze. <sup>2</sup> Hanki vahe'mo'za rama'a mofane zaga kasezmantage'za, Anumzamofo mofavre naga'mo'za ke zamasane neh'u'za zamavesia a'ne eri'naze. \* <sup>3</sup> Ana hianagi Ra Anumzamo'a amanage hu'ne, Avamunimo'a vahe'mofompina mani'neno zamasimura zami vava osugahie. Na'ankure vahera fri'zaga mani'nazanki'za, 120'a zagegafua agateore'neza frigahaze. <sup>4</sup> Ana knafine henka'anena tusinasi vahe'mo'za ama mopafina mani'nazankino, Anumzamofo mofavremo'za e'za vahe'mokizmi mofane

\* <sup>6:2</sup> Anumzamofo ne'mofavreramine huno hu'nea kemofo agafa'a ama' osu'ne. Tagufa antahi'zana amanahure: 1. Zamagine vahe'mo'za a' tare tagufa hu'naze. 2. Anumzamo monafinti zama nati'nea ankeromo'za mopafi a'ne eri'naze. 3. Seti naga Anumzamofo neveririza naga'mo'za, negna ahe fri'nea ne' Keni naga havi avu'ava nehaza nagapinti a'nea eri'naze.

zagane emasageno mofavrea kasezmante'naze. Hanki'za fore'ma hazana korapa knafina hankavenentake hu'za hihamu'anee vahe fore hu'naze.

<sup>5</sup> Hianagi Ra Anumzamo'ma vahe'mokizmima zamage'neana, mika kna havi avu'avazamo ama mopafina ra huno vahe'mofo antahi antahifina, havi avu ava'zamo aviteno meno vu'ne. <sup>6</sup> E'ina nehazageno Anumzamo'a nezamageno rimpia haviza higeno muse osuno, nahige'na vahera trohu'noe huno asunke nehuno, <sup>7</sup> Ra Anumzamo'a amanage hu'ne, Vahe'ene, zagagafane, namaramine, mopafi ne'onse zagarami'nena zamahe fanane hugahue. Nagrama tro'ma huzmante'noa zankura nasunku hue hu'ne. <sup>8</sup> Hianagi Noa'a agrake Ra Anumzamofo avurera fatgo nera mani'negeno muse hunte'ne.

### *Noa nagamofo naneke*

<sup>9</sup> Hagi Noa nagamofo nanekea amanahu me'ne. Ana knafima mani'naza vahepinna Noa'a fatgo huno hazenke'zama'a omanegeno Anumzane tragoteno mani'neno amage anteno vu'ne. <sup>10</sup> Noa'a ne' mofavre tagufa zamanteno zamagi'a Semi'e, Hamu'e, Jafeti'e huno antezmi'ne.

<sup>11</sup> Ama mopamo'a Anumzamofo avurera haviza hu'ne, ha' zamo'ene, kefo avu'avazamo enena avite'ne. <sup>12</sup> Anumzamo'ma ama mopafima ke'neana, tamage huno makazamo'a haviza hu'ne, ama mopafima me'neazama keana kumike'za huvagare'naze. <sup>13</sup> Hagi Anumzamo'a anage huno Noana asmi'ne, Ke ontahizageno kefo avu'ava zamo'a aviteankina zamagr'iene mopazimine zamahe fanane huku Nagra nagesa nentahue. <sup>14</sup> Hagi kagra hanave zafareti ra ventea<sup>†</sup> tro nehunka, asa hutandenka hunaraginto. Timo'ma ufre'zankura agu'anen a meg'i'anena fukinu renkaniro. <sup>15</sup> Ana ventema kisanana, zanra'a 150'a mitagi, kahesa'a 25 mitagi, atrure'a 15 mitagi hunka neginka, <sup>16</sup> anagamu no amumpa tvaonte mago mitamofona agema'a hafu'a mita zasikana hagento. Magokaziga kaha hagentenka, ana ventemofo agu'afina ese nonki, anante nonki, agofetu nonki hunka kio.

<sup>17</sup> Hagi Nagra ha'nenkeno tusi'a ti hageno mopa refitena mani'ne'za zamasimu nentaza zane, maka'zanena zamahe fanane hugahue. <sup>18</sup> Hu'neanagi kagrane huhagerafinugu huvempa hu'na negasamue. Kagrane a'mofavre ka'ane knoferahe'zane tamagra maka ventefi marerigahaze. <sup>19</sup> Hagi rumofo rumofo zagagafama mani'nazafintira vene, a'ene zamavaretere huge'za kahefa hu'za mani'sagu ventefi mareriho. <sup>20</sup> Zgagafama nama, rumofo rumofo kumate zagane, mopafi ne'onse zagarmine, vene a'ene kasefa hu'za manisnagu kagrite egahaze. <sup>21</sup> Ana nehunka aru ne'za aru ne'zana, tamagrane maka zagagafanema nesazazana erinka eme eritru huo. <sup>22</sup> Higeno Anumzamo'ma asmi'neaza huno Noa'a maka'zana tro hu'ne.

## 7

### *Tusi'a ti hage'nea naneke*

<sup>1</sup> Hagi Ra Anumzamo'a anage huno Noana asami'ne, Maka ama mopafima menima mani'naza vahepinna kagrake fatgo nera mani'nanke'na negagoe. E'igu kagrane nagaka'anena ventefi mareriho. <sup>2</sup> Kase avima hanagu avusese zagagafafintira 7ni'a aravere aravere zamavarentetere huo. Ana nehunka avusese osu zagagafafintira magoke arave zanavrentetere huo. <sup>3</sup> Ana nehunka kase avima hanagu nama 7ni'a aravere aravere zamavarentetere

<sup>†</sup> 6:14 ark

huo. <sup>4</sup> Na'ankure 7ni'a zagegna manite'na Nagra ha'nenko kora rugahie. 40'a zagine hanine ko' nerinke'na, Nagrama mopafima trohu zamante'noa zana maka zamahe fanane hugahue. <sup>5</sup> Higeno Anumzamo'ma asmi'neaza huno Noa'a mika'zana hu'ne.

<sup>6</sup> Ana knafina Noa'a 600'a zagegafu mani'tegeno, timo'a mopa ahe refite'ne. <sup>7</sup> Ko' runaku nehige'za, Noa'ene nenaro'ene, mofavre zaga'ane anoferahe'zane ventefi mareri'naze. <sup>8-9</sup> Hagi agru osu zagaramimpinti'ene agruma hu'naza zagaramimpinti'ene namaramimpinti'ene, mika zagaramimpintira vene a'ene taretare hu'za Anumzamo'ma kema hu'neaza hu'za Noa'ene ventefi ufre'naze. <sup>10</sup> Hagi 7ni'a zagegna manitageno, kora erigafa huno rigeno, ti hageno refite'ne.

<sup>11</sup> Noa'a 600'a zagegafu manitegeno 2 ikana 17tini zupa mopamo'a ruhagro higeno mopa agu'afinti tina hanatino tusi'a ti hage'ne. Tusi'a ko' ruvava huno havi avufgafinti hatihati huno tusi'a ti hage'ne. <sup>12</sup> Ana nehuno masane, hanine 40'a knafi ruose kora ruvava huno vu'ne. <sup>13</sup> Noa'ma ventefi mareria zupa, mofavre naga'a Semiki, Hamuki, Jafeti'ma a'ne zamima nezmarerama hu'za mareri'naze. <sup>14</sup> Trampi zagagafane, kumate zagagafane, namane, rumofo rumofo mopafi ne'onse zagarmina, vene a'ene Noante etere hu'za ventefi ufre'naze. <sup>15</sup> Aravere aravere zamasimu nentaza zagagafamo'za ana maka Noante e'za ventefi ufre'naze. <sup>16</sup> Anante Anumzamo'ma kema hu'neaza huno aravere aravere mika ufre varetageno, Ra Anumzamo'a kafana erigi zamante'ne.

<sup>17</sup> Ranko'ma ru'neana zagine hanine 40'a knafi kora ruvava huno tusi'a ti hageno ana ventea mopafinti erisga huno mareri'nne. <sup>18</sup> Ana nehuno timo'a reviteno marenerino mopa refitegeno, ventemo'a timofo agofetu me'ne. <sup>19</sup> Hagi timo'a mago'ene hageno marerino osi agonaramine, zaza agonaraminenra mika erinakri vagare'ne. <sup>20</sup> Hagi timo'a mago'ene mareri aviteno, mika mopane mareri agatere'nea agonaraminenra 7ni'a mita aru agatereno refite'ne. <sup>21</sup> E'ina higeno mopafima mani'nea zagaramine, non-tega zagagafane, trampi zagagafane, namaramine, ne'onse zagarmino, vahe'ene, mopafima vanoma nehaza zagarmino zamahe fri vagare'ne. <sup>22</sup> Hagi mopafima zamasimu eri'za mani'naza zagagafana, maka fri hana hu'naze. <sup>23</sup> Anumzamo'a vahe'ene, ne'onse zagarmino, namaramine, zagagafanena zamahe fanane hige'za omanita hu'naze. Higeno Noa'ene ventefi mani'namo'za zamagrake kasefa hu'za mani'naze. <sup>24</sup> Hagi 150'a zagegnafi timo'a mopa refite'ne.

## 8

### *Timo taneno urami'nea zamofo naneke*

<sup>1</sup> Hagi timo'a mopa refite'negeno Anumzamo'a Noanku'ene mika zaga-gafama ventefi mani'nagu agesa nentahino, zaho atufegeno zaho erino tina retufegeno taneno urami'ne. <sup>2</sup> Anumzamo'a mopafinti'ma hanati'nea tina renkani nereno, monafinti ru'nea kora eri refitegeno ruse'ne. <sup>3</sup> Hagi 150'a knamofo agu'afi timo'a akoheno taneno urami'ne. <sup>4</sup> Hagi 7ni ikamofona, 17ni zupa ana ventemo'a eramino Ararati agonare eme runtrako hu'ne. <sup>5</sup> Timo'a akoheno taneno uneramigeno 10ni ikamofo ese knazupa, mago'a agonomo'za osi'a hanaku hazage'za ke'naze.

<sup>6</sup> Hagi henka 40'a zagegna maniteno Noa'a zaho'ma erikana eri anagino, <sup>7</sup> kotikoti nama huntege vuteno, vano vano nehigeno, timo'a taneno

uramigeno mopa efore hu'ne. <sup>8</sup> Hagi mopamo'ma ho'mu hu'nesigu, Noa'a mago maho nama huntogeno, <sup>9</sup> hareno vano hiana manisnia zana omaneno tinke me'negeno ete e'ne. Egeno Noa'a aza antegame teno ventefi avre vazi'ne. <sup>10-11</sup> Avrentegeno 7ni'agna manitegeno, Noa'a ete maho nama huntogeno hareno vu'ne. Hagi ana maho namamo'a kasefa olivi zafa asina atasino agipi haninkofino ana kinagage ehanati'ne. Ana higeno Noa keteno, hago timo'a taneno uramie huno agesa antahi'ne. <sup>12</sup> Mago'ene 7ni'agna maniteno, ana mahona huntogeno hareno vuteno ete ome'ne. <sup>13</sup> Noa'a 601ni'a kfafuna nehigeno, pusa ikamofona ese knazupa, mika ama mopafina timo'a ho'mu higeno, Noa'a ana ventemofona amumpafinti anasgeno keana, mopamo'a ho'mu huvagare'negeno ke'ne. <sup>14</sup> Anante 2 ikamofona 27ni knazupa mopamo'a ho'mu huvarenegeno Noa'a ke'ne.

### *Noa naga ventefinti atirami'naza naneke*

<sup>15</sup> Anumzamo'a amanage huno Noana asmi'ne, <sup>16-17</sup> kagrane nagaka'anena ventefintira atreta fegi'a atiramiho. Ventefima mani'naza zagagafane, namaramine, mika mopafi vano nehaza zagaramineno, zamavare atrege'za mopafi vu'za eza nehu'za kase hakare hu'za maniho. <sup>18</sup> Anage hige'za Noaki, nenaroki, mofavre naga'ane, anoferahe'zane atirami'naze. <sup>19</sup> Hagi ana zagagafane, ne'onse zagaramine, nama zagine, mika vanoma nehaza zagaramina, zamagrare zamagrare erizogi'za ventefintira atirmi'naze.

<sup>20</sup> Anantero, Noa'a Ra Anumzamofonte Kresramana vu ita trohuteno, mago'a avusese zagagafafinti'ene avusese namafinti'enena aheno mika Kresramana vu'ne. <sup>21</sup> Hagi Ra Anumzamo'a Kresramana vu'nea mana'a nentahino muse nehuno amanage hu'ne, vahe'mo'za kumi'ma hanaza zankura mago'anena ama mopa eri havizana osugahue. Hakare vahe'mo'za mofavrema mani'nazareti'ma eno ama knare'ma eana, havi antahi'zampinke mani'naze. Hakare zagaramima zamasimu nentaza zagaramina menima huaza hu'na zamahe refioteahue. <sup>22</sup> Ama ana mopa me'enkeno maka'zana me'nena hoza negri'za, kafigahaze. Zasi'ma hu kna ne'enkeno, amuhoma hu kna egahie. Ko' aru knane zagegnanena nemenkeno, zagine hanine nehanigeno ana maka'zana vaga oregahie.

## 9

### *Anumzamo Noa naga asomu huzmante'nea naneke*

<sup>1</sup> Noane mofavre naga'anena Anumzamo'a asomu hunezmanteno amanage huno zamasmi'ne, Mofavrea kase zamantenke'za ama mopa ruvite'za maniho. <sup>2</sup> Zafafima nemaniza zagaramima, timpima nemaniza zagaramima, namaramima, kazakaza hu'za vano nehaza zagaramina mika kegava hihogu tami'noanki'za tamagoro nehanageta kegava hugahaze. <sup>3</sup> Ana zagagafa nesnagu meni neramue. Kotera hagu' kamosa tami'noanki'na, menina maka'zana nesnagu neramamue. <sup>4</sup> Hianagi korama me'nea ame'a onegahaze, na'ankure korampina e'i asimu me'ne. <sup>5</sup> Tamage huankino, mago ne'mo'o, mago'a zagagafamo'zama tamaha'za tamagrikorama eri fegi tesige'na, Nagranena ahena agri korana eri fegi atrehahue. Mago'mo nefuma ahe frisnige'na, Ngaranena, agrira ahe frigahue. <sup>6</sup> Aza'o mago ne'ma ahe frisiana, ana nera ahe frigahaze. Na'ankure Nagra Anumzamo'na vahera Nagragna trohu zamante'noe. <sup>7</sup> Kagrane, kagehe'zane, vahera kase hakare huta miko'a mopafina mani viteho.

### *Anumzamo Noa'ene hagerfi'nea naneke*

<sup>8</sup> Hagi mago'ane Anumzamo'a Noanku'ene, mofavre naga'agu'enena amanage huno zamasami'ne, <sup>9</sup> Menina antahio, kagrane, nagaka'ane kagehe'zane hagerfita mani'sunegu huvempage nehue. <sup>10</sup> Hagi ventefinti'ma atiramiza kagranema mani'naza zagagafane namaramine, kumate zagafaramine, trampi zagagafaraminte'ene ana huvempa kea nehue. <sup>11</sup> Nagra huvempa ke'ni'a huama nehue, runena kora atresanugenzo zamasimu ante'za mani'naza zagaramine, mohanena tina Hageno zamahe fanane osugahie. <sup>12</sup> Anante Anumzamo'a huno, Nagrama amama nehuana huvempa ke nehue, Nagrane, tamagra'ene hakare zamasimu eneriza zagaramima tamagrane mani'nazane, henkama fore'ma hanaza vahe'ene amu'nontifi huvempa kea nehuanki'na, <sup>13</sup> mago avame'zana monare furageno ante'nanena, negeta antahi vava hugahaze. <sup>14</sup> Hampona huntesugenzo mopa refinetenkeno, furagenamo'a monare fore hugahie. <sup>15</sup> Nagrama kagri'ene maka ama mopa fima zamasimu eri'za nemaniza zagagafagu'ma huvempama hu'noa ke'ni'agu nagesa nentahi'na, ete tinura tamahe fanane osugahue. <sup>16</sup> Hagi monare'ma furage'nama Nagrama negesuna, maka zamasimu'ma eri'za nemaniza zagaramina huvempa kema huzamante'noa kegu nagesa antahigahue. <sup>17</sup> Mopafi vea'ene zagagafane huhagerafinogu avame'a, e'inahu'za fore hugahie, huno furagenakura Anumzamo'a Noana asami'ne.

<sup>18</sup> Hagi ama Noa mofavre naga'ma ventefinti atirami'namokizmi zamagi'a, Semi'e, Hamu'e Jafeti'e. Hagi Hamu'a Kenani nef'a'e. <sup>19</sup> Noana tagufa mofavre nagapinti mopa fima mani'nona vahera, forehu hakare hu'none.

### *Noa negi ti ne'nea naneke*

<sup>20</sup> Hagi tima hagetegeno henka, Noa'a hoza ne' mani'neno krepi hoza ante'ne. <sup>21</sup> Mago zupa waini tima'a neteno negineno kena omasi avufga avapa seli noma'afi mase'ne. <sup>22</sup> Kenani nef'a Hamu'a ome keana Noa'a avufa avapa mase'negeno keteno atiramino nempu'amokizni ome zanasmi'ne. <sup>23</sup> Hagi Semike, Jafetikea tavrave eri'ne zanafunte antetene zanamigati ana seli nompi vu'ne neznafana ome refitentena'e. Zanavugosa arugaziga hunte'ne nezanafa avufga onke'na'e.

<sup>24</sup> Hagi Noa'ma negineno mase'nefinti henka ruhari huno negeno Hamu'ma hunte'nea zana keno antahino huteno, <sup>25</sup> Noa'a amanage hu'ne, Kenani'a sifnafi nemanino, afuhe'mokizmi zamagafinka evuramino amane eri'za vahe'zami manigahie. <sup>26</sup> Hagi mago'ane Noa'a anage hu'ne, Semi Anumzamofo ra agi nemita agi'a ahentesga hanune. Kenaniga, Semi kato vahe manigahane. <sup>27</sup> Anumzamo'a Jafetina, mopa'a erira huntenko Semi'ene tragotene mani'ne snakeno Kenani'a Jafeti eri'za vahe manigahie.

<sup>28</sup> Timo'a tanetegeno Noa'a mago'ane 350'a Zagegafu mani'ne. <sup>29</sup> Hagi ana miko 950'a zagegafu Noa'a maniteno fri'ne.

## 10

### *Noa Mofavre naga'mokizmi zamagimofo naneke*

<sup>1</sup> Rantima hageno mika'zama ahe refitetegeno'a, Noana tagufa mofavre nagapinti maka'a vahera fore hu'naze. Ana kogna naga zamagi'a Semiki, Hamuki, Jafeti'e.

### *Jafeti mofavre naga zamagi'amofo naneke*

<sup>2</sup> Hagi Jafeti mofavre naga zamagi'a ama'ne, Goma'e, Magogi'e, Madai'e, Javani'e, Tubali'e, Meseki'e, Tirasi'e. <sup>3</sup> Hanki Goma amohe'i zamagi'a Asikenazi'e, Rifati'e, Togarma'e. <sup>4</sup> Hanki Javani mofavre naga zamagi'a Elisa'e, Tarsisi'e, Kitimi'e, Dodanimi'e. <sup>5</sup> Ana nagapintira refko hu'za hagerinkena mopa zamagerute zamagerute kognare, famote ranra kuma erifore hu'za kegava hutere hu'za mani'naze.

### *Hamu mofavre naga'mokizmi zamagimofo naneke*

<sup>6</sup> Hanki Hamu mofavre naga zamagi'a Kusi'e (Etopia), Mizrami'e (Isipi), Putie (Libya), Kenani'e (Palestine). <sup>7</sup> Hanki Kusi mofavre naga zamagi'a Seba'e, Havila'e, Sabta'e, Rama'e, Sabiteka'e. Hanki Rama'a tare ne'mofavre zanante'ne, zanagi'a Sebake Dedanike. <sup>8</sup> Kusi'a, Nimiroti nef'a'e. Nimiroti'a agra harafa nere. <sup>9</sup> Anumzamofo avurera knare harafa vahé fore huno mani'nea nere. E'ina'ma hu'negu menina vahé'mo'za rumofoma husga hunténakura, Nimiroti kna vahé mani'ne hu'za nehaze. <sup>10</sup> Nimiroti'ma kegava hu'nea moparera tagufa rankumara me'ne, zamagi'a Babelie, Erekie, Akatie, Kalne, e'i ana kumatmina Sinari (Babiloni) mopafi me'ne. <sup>11</sup> Nimiroti'a Babiloni rankumara atreno, Asiria kaziga vuno rankumazaga ome azeri otino ki'ne. Ana kuma zamagi'a Ninive, Rehobotirie, Kalae, Resenie. <sup>12</sup> Hanki Reseni rankumara Ninivene, Kala kumamofo amu'nompi me'ne. <sup>13-14</sup> Isipi'a amana vahé'mokizmi nezamageho'e, Luti vahé'ma, Anami vahé'ma, Lehabi vahé'ma, Naftu vahé'ma, Pasru vahé'ma, Kaslu vahé'ma, Kriti vahere. Filistia vahera Kriti vahepinti fore hu'naze. <sup>15</sup> Kenanina agonesa mofavrea Saidoni'e, hanki anazanke hu'za agripinti'ma fore'ma hu'nazana Hiti vahé'ma, <sup>16</sup> Jebusi vahé'ma, Amori vahé'ma, Girgasí vahé'ma, <sup>17</sup> Hivi vahé'ma, Arkisi vahé'ma, Sini vahé'ma, <sup>18</sup> Arvada vahé'ma, Zemari vahé'ma, Hamati vahé'mo'zanena Kenanimpinti fore hu'naze. Hanki henka Kenani, agehe'za mago mago hu'za ru mopare ru mopare umani emanı hu'naze. <sup>19</sup> Hanki Kenani vahé mopamo'a, Saidoni kumateti eri agafa huno Gerari vuno Gaza uhanatiteno, ananteti vuno Sodom Gomora kaziga uhanatino, Admane, Zeboim kaziga vuteno Lasa uhanati'ne. <sup>20</sup> Hamu agehe'za nagate nofite hu'za mani'neza ruzmegeru ruzmegeru neru'za rankuma trohu'za kegava hutere hu'za mani'naze.

### *Semi mofavre naga zamagimofo naneke*

<sup>21</sup> Hagi Semina mago'a ne'mofavre'a fore humi'neankino, Jafetina nempu amo'e. Semi'a Eberi nagamokizmi nezamageho mani'ne. <sup>22</sup> Semi mofavre naga zamagi'a, Elamu'e, Asari'e, Arpaksadi'e Ludiki, Aramu'e. <sup>23</sup> Aramu mofavre naga zamagi'a Uzi'e, Huli'e, Getari'e, Masi'e. <sup>24</sup> Arpaksadi'a Sela nef'a'e, Sela'a Eberi nef'a'e. <sup>25</sup> Eberi'a tare ne' mofavre zanante'ne. Mago'mofo agi'a Peleki'e, Peleki'e hu'nea agimofo agafa'a amanahu hu'ne, mopa refko hu'za nagate nofite hu'naze. Hanki nefu agi'a Joktani'e. <sup>26</sup> Joktani'ma zamante'nea naga zamagi'a, Almodati'e, Selepi'e, Hazarmaveti'e, Jera'e, <sup>27</sup> Hadoramuki, Uzaliki, Dikla'e, <sup>28</sup> Obaliki Abimaeliki, Seba'e. <sup>29</sup> Hagi Ofiriki, Havilaki, Jobabiki hu'za zamagra Joktani mofavre naga mani'naze. <sup>30</sup> E'i ana naga'ma kuma tro hu'za mani'naza mopamo'a Mesati agafa huteno vuno, Sefari zage hanatitega agona mopama me'neregua uhanatine.

<sup>31</sup> Hagi Semimpinti'ma fore hu'naza vahera nagate nofite mago mago hu'za manitere hu'ne'za zamagerute zamagerute hu'za mopa zamire mani'ne'za, rankuma trohu'za kegava hu'za manitere hu'naze. <sup>32</sup> Hagi tima hagetegeno ana amefi'a Noa ahi'mo'za mofavre naga'afinti forehu anante

anante nehu'za, hakare kaziga mopafina ranra kuma ante'za maniza vu'za e'za hu'naze.

## 11

### *Ruzahu ruzahu zamageru'ma ru'naza zamofo naneke*

**1** Korapa knafina ama mopafima mani'naza vahe'mo'za magoke zamageruke neru'za, magoke kege hu'naze. **2** Vahe'mo'za hage'za zage hanatitega nevu'za mago agupo mopa Sinar (Babiloni) ome kete'za, anante kuma ome ante'za mani'naze. **3** Mani'naza ke hugantugama hu'za anage hu'naze, Mopa kateta briki tro huta tevefi kre hanavenetita, kolta fuki erita simenia eri hanavetita tro huta nona kisune hu'za hu'naze. **4** Anante amanage hu'naze, Tagrati rankuma trohuta za'za no kita monafi marerisnunkeno, ana nomo'a ran tagi neramina, arurega vuta eta hu'zankura tazeri atru hanie. **5** Hianagi Ra Anumzamo'a rankuma'ene, zaza none, vahe'mo'zama ki'naza nonku'ma kenaku erami'ne. **6** Ra Anumzamo'a amanage hu'ne, Zamagra magoke naga mani'naza magoke zamageru neru'za, amazana eri agafa hazankiza, mago'zama hunaku'ma hanaza zana, amne tro hugahaze. **7** E'i zanku tagra uramita ke'zami eri savari hamamenke'za, zamagra zamageru'ma antahizankura amuho hugahaze. **8** Anage nehuno Ra Anumzamo'a zamazeri fragu vazige'za kumazimi tro huvaga ore'za atre'za maka moparega vu'za e'za hu'za umani'naze. **9** E'ina hu'nea agafare ana ran kumakura Babelie hu'za hu'naze. Na'ankure Ra Anumzamo ana mopafi vahe'mokizmi zamagerura zamazeri havia huteno, hakare moparega zamazeri atrege'za vu'za e'za hu'naze.

### *Semi agehe'mokizmi zamagimofo neneke*

**10** Tima hagetegeno tare kafuma evigeno'a, Semimpinti'ma fore'ma hu'naza vhahera amana hu'ne. Semi'a 100'a zagegafu huteno, Arpaksadina nef'a'za hu'ne. **11** Arpaksadi nafa'za huteno Semi'a 500'a zagegafu nehuno ne'mofara mago'ane zamante'ne. Semi'a 600'a zagegafu maniteno fri'ne. **12** Arpaksadi'a 35'a zagegafu huteno, Selana nef'a'za hu'ne. **13** Arpaksadi'a Sela nef'a'zama huteno'a, 403'a zagegafu nehuno mago'ane ne'mofara zamante'ne. Arpaksadi'a 438'a zagegafu huteno fri'ne. **14** Sela'a 30'a zagegafu maniteno, Eberina nef'a'za hu'ne. **15** Sela'a Eberi nef'a'za huteno 403'a zagegafu nehuno mago'ane ne'mofara zamante'ne, Sela'a 433'a zagegafu maniteno fri'ne. **16** Eberi'a 34'a zagegafu maniteno, Peleki nef'a'za hu'ne. **17** Eberi'a Peleki nefaza huteno, 430'a zagegafu nehuno mago'ane ne'mofara zamante'ne. Eberi'a 464'a zagegafu maniteno fri'ne. **18** Peleki'a 30'a zagegafu nehuno Reuna nef'a'za hu'ne. **19** Peleki'ma Reu nef'a'za huteno 209ni'a zagegafu maniteno mago'ane ne'mofara zamante'ne. Peleki'a 239ni'a zagegafu maniteno fri'ne. **20** Reu'a 32'a zagegafu maniteno, Serugina nef'a'za hu'ne. **21** Serugi'ma fore hutegen henka Reu'a 207ni'a zagegafu maniteno, mago'ane ne'mofara zamante'ne. Reu'a 239ni'a zagegafu maniteno fri'ne. **22** Serugi'a 30'a zagegafu maniteno, Nahona nef'a'za hu'ne. **23** Serugi'a Nahon nefaza huteno 200'a zagegafu maniteno, mago'ane ne'mofara zamante'ne. Serugi'a 230'a zagegafu huteno fri'ne. **24** Nahon'a 29ni'a zagegafu nehuno, Terana nef'a'za hu'ne. **25** Nahon'a, Terana nef'a'za huteno 119ni'a zagegafu maniteno, mago'ane ne'mofara zamante'ne, Nahon'a 148'a zagegafu maniteno fri'ne. **26** Tera'ma 70'a zagegafu nehuno'a Abrama, Nahoma, Haranikizmi nezmafa'za hu'ne.

### *Tera naga'mofo naneke*

<sup>27</sup> Tera nagara amanahu hu'ne. Tera'a Abrama, Nahoma, Haranikizmi nezmafa'e. Hagi Harani'a Loti nef'a'e. <sup>28</sup> Tera'a ofri mani'negeno, Harani'a kasente'naza kumate Ur kaziga Kaldi'a mopare fri'ne. <sup>29</sup> Hagi Abramu'ene Nahokea a' eri'na'e. Hagi Abramu a'mofo agi'a Sarai'e. Naho a'mofo agi'a Milka'e, agra Harani mofare. Milkane Iskakizni neznafa'e. <sup>30</sup> Hianagi Sarai'a mofavre onte narvo a' mani'ne.

<sup>31</sup> Hagi Tera'a mofavre'a Abramuma, negeho Lotima Abramu nenaro Sarainki huno nezmavreno Kaldi'a kaziga Ur kumara atre'za Kenani vunaku vu'naze. Hianagi Harani kumate'ma unehanati'za anante umani'naze. <sup>32</sup> Tera'a 205fu'a zagegafu huteno, Harani mopare fri'ne.

## 12

### *Anumzamo Abramu asmigeno ru kaziga mopare vu'nea naneke*

<sup>1</sup> Ra Anumzamo'a amanage huno Abramuna asami'ne, Mopakane, vaheka'ane negafa vahe'enena zamatreka Nagrama kaveri hanua mopare vuo. <sup>2</sup> Nagra kagripinti vahera zamazeri ra hanuge'za, rama'a vahe fore hu'za manigahaze. Nagra asomu hunegante'na, kagi'a eri ra neha'nena, kagripinti maka ama mopafi vahe'mo'za asomura erigahaze. <sup>3</sup> Kagri'ma asomu hugantesimofona Nagra asomu huntegahue. Hianagi aza'o kagri'ma kazeri haviza hanimofona, Nagra azeri haviza hugahue. Maka mopafi naga'mo'za kagripinti asomura erigahaze.

<sup>4</sup> Anumzamo'ma kema asmiaza huno Abramu'a Harani kumara atreno nevigeno, Loti'a agrane vu'ne. Abramu'a 75'a zagegafu nehuno Haranitira otino vu'ne. <sup>5</sup> Abramu'a nenaro Saraima, nagana'amofo mofavre Loti'ma, eri'za vahe'ane, nezmavreno maka afufenoma'ane e'nerino Harani kumara atre'za Kenani mopare vu'za, Kenani uhanati'naze. <sup>6</sup> Hanki Abramu'a Kenani mopa amu'nompi rugitagino eva eva huno Sekemu ra oki zafa me'nere More kumate ehanati'ne. Hanki ana knafina Kenani vahe'mo'za ana mopafina mani'nageno ehanati'ne.

<sup>7</sup> Ra Anumzamo'a Abramunte eno amanage huno eme asmi'ne, Maka ama mopa nagaka'a zamigahue, higeno Abramu'a Ra Anumzante Kresramana vunaku ita trohu'ne. <sup>8</sup> Ananteti atreno agonarega vuno Betel kumara agatereno, Ai zage hanati kaziga megeno, Betel kuma zage fre kaziga me'negeno amu'nompi seli nona ome ki'ne. Ana huteno Ra Anumzanku nentahino, have ita tro huno Ra Anumzamofo agihanta vazino monora hunte'ne. <sup>9</sup> Hagi Abramu'a mago'ene manitere hume vuno Negevi uhanati'ne.

<sup>10</sup> Ana knafina tusi'a agatonto kna fore higeno Abramu'a Isipi moparega vu'ne, na'ankure tusi'a agate kna fore higeno'e. <sup>11</sup> Hagi Isipima vu kofta nehuno nenaro Sarainkura amanage huno asami'ne. Kagri'ma kagoana kagra knare hunka soe a' mani'nananki'za, <sup>12</sup> Isipi vahe'mo'za kagesu'za Agri nenaro'e hu'za nahe fri'za kagrira a' kavre antegahaze. <sup>13</sup> E'ina hu'negu, nensaro mani'ne hunka huge'za onahe'za natre'sage'na mani'neno.

<sup>14</sup> Abramu'a anage huno nehuno Isipi uhanatige'za, Isipi vahe'mo'za Saraima kazana knare a' mani'nege'za ke'naze. <sup>15</sup> Fero eri'za vahe'mo'za Saraina kete'za Ferona ome asami'za, knare a' mani'ne hu'za nehu'za, Saraina avre'za Fero nompi ome ante'naze. <sup>16</sup> Fero'a Saraima muse

huntea kazigati, knare huno Abramuna kegava hunenteno, sipisipima, bulimakaoma, donkima, eri'za vahera vene a'ene nemino, a' donkine kemorine huno Abramuna ami'ne.

<sup>17</sup> Hianagi Ra Anumzamo'a tusi'a krirami atregeno Feronte ene, noma'afima nemaniza vahete'ene e'ne. Na'ankure Abramu nenaro Sarainteku e'inahura huzmante'ne. <sup>18</sup> Fero'a ke higeno Abramu'a egeno anage huno asami'ne, Na'a ama zana hunante'nane? Nahigenka Sarai'a a'ni'a mani'ne hunka onasmi'nane? <sup>19</sup> Nahigenka nensaro'e hankena ara avre'noe? Ama'ne negnaro'a! Ko avrenka vuo. <sup>20</sup> Fero'a hankave'ane ke vaher'a huzmanteno, Abramuna kegava hu'enkeno nenaro'ene mika afu fenoznia enerine, ama mopa atrene vi'o huno huzmante'ne.

## 13

### *Abramune Lotikizni naneke*

<sup>1</sup> Abramu'a Isipi mopareti hakare afufenoma'a enerino nendarone, Lotine neznavreno Negev vu'naku mareri'ne. <sup>2</sup> Menina Abramu'a afu'zagama, golima, silvama huno rama'a ante'nea ne'kino tusi'a feno ne' mani'ne. <sup>3</sup> Hagi masetere hume nevuno, Negev mopare vuno ko'ma mani'neno'ma hu'nere uhanati'ne. Mago kaziga Beteli kuma me'negeno, mago kaziga Ai kuma me'nere uhanati'ne. <sup>4</sup> Abramu'a ko'ma have itama tro hunte'nere anante uhanatino, Ra Anumzamofona mono hunte'ne.

### *Loti'a Abramu' atreno Sodomu vu'nea naneke*

<sup>5</sup> Abramu'ene vu'nea ne' Lotina sipisipi afu'zaga'ane, bulimakao afuzaga'ane seli noma'araminena me'nea ne' mani'ne. <sup>6</sup> Hianagi anama mani'a mopamo'a knareru huozanante'ne. Maka afuzaga zani'amo'a titipa huno ne'zama ne'zamo'a atupa higeno, magopi manigara osu'na'e. <sup>7</sup> Ana nehigeno Abramune, Lotikizni afu kva vahem'o'za fra vazi'haze. Ana knafina Kenani vaher'ene, Perisi vahem'o'za ana mopafina mani titipa hu'haze. <sup>8</sup> Abramu'a amanage huno Lotina asami'ne, Tagra mago kora mani'noku fra ovazisnue, bulimakao afut'iare kegavama nehaza vahem'o'zanena fra ovazisazanki, <sup>9</sup> rama'a mopa me'neanki kagra kavesite vanuema hanana kaziga vuo. Kagrama hoga kaziga vugahue hananke'na, nagra tamaga kaziga vugahue. Hanki kagrama tamaga kaziga vugahue hananke'na, nagra hoga kaziga vugahue. <sup>10</sup> Loti'ma kesga huno kegantugama nehuno Zoari kazigama keana, Jodani kokamo'a hakare kaziga masavenke huno Ra Anumzamofa Edeni hozagna nehuno, Isipi mopagna hu'negeno ke'ne. Anama hu'neana Sodomune, Gomoranema Ra Anumzamo'ma ahe fananema osu'nea knafi anara hu'ne. <sup>11</sup> Anante Loti'a mika Jodani agupoma hunehamprino'a zage hanatitega vu'ne. Ananteti naga'anee otre atre hu'na'e. <sup>12</sup> Abramu'a Kenani mopare manigeno, Loti'a ranku'ma zaga me'nefi Jodani agupofi Sodomu tva'onte seli noma' omegino mani'ne. <sup>13</sup> Sodomu vahem'o'za havi avu'ava nehu'za kumi huhakare hu'za, Ra Anumzamofa ha' rente'naze.

### *Abramu'a Hebronii kumate vu'nea naneke*

<sup>14</sup> Loti'ma, Abramu'ma atreno vutegen, Ra Anumzamo'a amanage huno Abramuna asami'ne, Kesga hunka zage hanatitegane, zage fretegane keganti kegama hunka ko. <sup>15</sup> Hagi mika kagri'ene, kagehe'ine tami vaganeroe. <sup>16</sup> Nagra kagehe'ina zamazeri hakare ha'nena, ama mopafina kugusopagna hanage'za, vahem'o'zahamprigara osugahaze. <sup>17</sup> Hagi otinka vunka enka nehunka, kamisua mopamofo agema'ko. <sup>18</sup> Higeno Abramu'a

otino seli noma'a tagna vazino erino vuno Mamre me'nea oki zafa tavaonte Hebronii kumate, Ra Anumzamofo ita ome tro hu'ne.

## 14

### *Kini vahe'mo'za ha'hu'naza naneke*

<sup>1</sup> Ana knafina ana mopafima nemaniza kini vahe'mo'zara ha' hu'naze. Mago kaziga mani'naza kini vahe'mokizmi zamagi'a, Amrafeli'a Babiloni kumate kini nere. Arioki'a Elasa kumate kini nere. Kedolaoma'a Elami kumate kini nere. Tidali'a Goimi kumate kini nere. <sup>2</sup> Hagi vu'za ha' ome huzmantene'nazana Bera'a Sodomu kumateti kini nere. Birs'a Gomora kumateti kini nere. Sinabu'a Adma kumateti kini nere. Semeba'a Zeboimi kumate kini nere. Hagi Bela kumaku'ma, Zoari kumarema nehaza kumateti kini ne'ene hara hu'naku hu'naze. <sup>3</sup> Hagi ana knafina e'i ana kumatera kini vahe'mo'za magopi hagerafi'za Sidimi krahopi nemani'zane. Ana kazigagura menina Fri Hagerine hu'za nehaze. <sup>4</sup> E'i ana kumatamimpi vahera 12fu'a zagegafufina Kedolaoma kegava huzmanteg'e'za mani'naze. Hagi 13nima hiankafufina zamasi vazige'za, ke'a antahi omi'naze. <sup>5</sup> Hagi 14nima hiankafufina Kedalaoma'ene hagerafi'za mani'naza kini vahe'mo'za eza Refaim vahe'ma, Astero-Karnaimi kumate'ene Zuzimi kumate'ene Hami kumate'ene, Emimi kumate'ene Save-Kiriataim kumate vahe'ene, <sup>6</sup> Horaeti kumate vahe'enena ha' eme huzmantenza zamavaririge'za Idomu mopa zamirega El-parani nevazage'za, zamarotgo hu'za hagege hu'nea ka'ma mopa me'nea tvaonte vu'naze. <sup>7</sup> Hagi ete rukrahe'ma hu'za En-mispatima ne'e'za, Amori vahe mopa zamahe'za nehanare'za, Hazazon-tamari nemaniza, Amori vahe'mokizmi mohanena ha' huzmante'za eri'naze. <sup>8</sup> Ananteria Sodomu kinigi, Gomora kinigi, Adma kinigi, Zeboim kinigi, Bela kiniki, Belagura menina Zoari hu'za nehzankino, ana 5fu'a kini vahe'mo'za eri mago hute'za, Sidim agupofi hara hunaku tro hu'naze. (Dead Sea) <sup>9</sup> Hagi Sidim agupofina ha'ma hazana, Kedolaoma'a Elami kini neki, Tidali'a Goimi kini neki, Amrafeli'a Sainari kinigi, Arioku'a Elasari kini ne'ki hu'za ana 4'a kini vahe'mo'za 5fu'a kini vahe'ene Fri Hagerima me'nea agupofi hara hu'naze.

<sup>10</sup> Ana agupofina koltama kafizama eneri'za keriramina hakare'a me'neankino, Sodomu kini ne-ene Gomora kini ne'ene sondia vahe'znine koro freza ne'eza ana keriramimpi tamizageno, mago'a amanema mani'zamo'za fre'za agonarega vu'naze. <sup>11</sup> Ha'ma hugateraza 4'a kini vahetamine sondia vahe'zmimo'za, Sodomu kumateti'ene Gomora kumatetira maka fenozmine hozafinti mika ne'zazminena eri'za vu'naze. <sup>12</sup> Ana nehu'za Abramuna nefu mofavre Loti'a Sodomu kumate mani'nege'za nevre'za, afufenoma'ane eri'za vu'naze. <sup>13</sup> Hianagi anampinti mago ne'mo zamatreno freno nevuno, Hibru ne' Abramuna ana mikozamofo nenekea ome asmi'ne. Ana knafina Abram'u'a Amori ne' Mamre oki zafa agafare mani'ne. Hagi Mamre'a Eskoline, Anelkizni'a neznafukino Abram'u'ene tragote'za mani'nazageno anara hu'ne. <sup>14</sup> Hagi ha' vahe'mo'zama Lotima avre'za vu'naza nanekema Abram'u'ma nentahino'a, agranema maninaza vahe'mo'zakasezmante'za ha'zama rempi huzamige'za antahi'naza vahetamina 318n'i'a vahe zamavare'za zamarotgo hu'za vuvava hu'za Dani uhanati'naze. <sup>15</sup> Abram'u'a eri'za vahe'a ana kenage zamazeri atru huno tarefi refko huzmanteg'e'za nevu'za, ha' vahera hara hu zamagatere'za zamarotgo hu'za Damaskas kumamofo noti kaziga Hobo uhanati'naze. <sup>16</sup> Hagi ha'ma eme hu'za maka fenone, negana

mofavre Lotine, maka'zane a'nene vahe'ene hapinti eri'za vu'naza zanena Abramu'a mika zana ete erino ene.

### *Melkizedeki Abramuna asomu hunte'nea naneke (Hibru 7:1-10)*

<sup>17</sup> Anantero Abramu'a Kedalaoma'ene mani'naza kini vahe ha' huzmagatereteno ete e'ne. Hanki Sodomu kini ne'mo'a Save agupofi eme agenaku e'ne. Ana agupogura kini vahe'mokizmi agupoe hu'za nehaze.

<sup>18</sup> Melkizedeki'a Salemi kinigino, bretine, wainine erino eme ami'ne, agra Marerisa Anumzamofo pristi nere. <sup>19</sup> Abramuna amanage huno asomu kea hunte'ne, Monane mopane eri fore hu'nea Marerisa Anumzamo'a kagrira asomura hugantegahie. <sup>20</sup> Ha' vahe ka'a kagri kazampima ante'nere Marerisa Anumzamofo ra agi amisune. Higeno Abramu'a mika zama eri'nefintira refko huno 10ni'a kevu anteteno, anampinti mago kevu Melkizedekina ami'ne.

<sup>21</sup> Sodomu kini ne'mo'a Abramunkura amanage hu'ne, mika vahe'zaga nagri nenaminka, Mika fenona kagraka'a erio. <sup>22</sup> Hianagi Abramu'a Sodomu kini nekura amanage hu'ne, Monane mopane tro'ma hu'nea Marerisa Anumzantega nagra huvempage hunte'noankina, <sup>23</sup> ru kagra nehunka Abramuna nagra hugeno feno nera mani'ne hunka hu'zanku nagra kukena hatinofiro, agia anomofo nofiro, e'oritfa hugahue. <sup>24</sup> Nagrani'a mago'zana e'orisoanagi, vahe'ni'amo'zama ko'ma ne'zama ne'nazareke mesie. Hanki nagranema hate'ma vu'namokizmi atrege'za Aneriki, Eskoliki, Mamreki hu'za mago'a zana zamagra'a eriho.

## 15

### *Anumzamo Abramu'ene huhagerafi'nea naneke*

<sup>1</sup> Henka'a Ra Anumzamo'a ava'na gnazampi amanage huno Abramuna asami'ne, Abramuga korera osu. Nagra hankoka'agna hu'na mani'noe. Ana nehu'na rama'a knare'nare zantamina kamigahue. <sup>2</sup> Hianagi Abramu'a anage hu'ne, Ra Anumzamoka hakare'za nam'i'nanke'na, mofavre onte'noanki, iza anazana erigahie? Frisugen'a Damaskasi kumat eri'za ne'nimo Eliesa erigahie. <sup>3</sup> Hanki mofavre onami'nanankino, noni'affima kasente'nea eri'za vahe'nimo ana afufenoni'a erigahie. <sup>4</sup> Hu'neanagi Ra Anumzamo'a kenona'a huno, Ao! Rum'o'a afufenonka'a e'origosie. Kagrama kasentesana mofavremo afufenonka'a erigahie. <sup>5</sup> Huno nehuno Abramuna avre atiramino meg'i vuno anage huno asmi'ne, monafi hanafitamina hampriga hunampi kesga hunka ko? Higeno kesga huno kegeno, Anumzamo'a huno, ana avamente kagripintira kagehe'za fore huhakare hu'za manigahaze. <sup>6</sup> Ra Anumzamo'a anage huno asmigeno, Abramu'a ana kea nentahino, amentinti nehigeno Anumzamo'a fatgo nere huno Abramunkura hu'ne.

<sup>7</sup> Hagi Ra Anumzamo'a amanage huno Abramuna asami'ne, Ur kumateti, Kaldia vahepinti Nagra Ra Anumzamo'na kavre'na e'nomo'na, ama mopa negamue. <sup>8</sup> Higeno Abramu'a huno, Marerisa Anumzamoka ama mopa kamigahue nehanana, inankna kazigati ama mopa erigahue hu'na ke'na antahi'na hunaku hugenaka nehane? <sup>9</sup> Higeno Ra Anumzamo'a amanage huno asami'ne, Tagufa kafu hu'nesia bulimakao a'anenta afu'ene, tagufa kafu hu'nesia a'anenta memene, tagufa kafu hu'nesia ve lama afu'ene, tare mahonamararene, zamavarenka Nagrite eno. <sup>10</sup> Higeno Abramu'a kema hia kante anteno ana zagaramina aheno rutne tare hugagufeno kanti kama nenteno, namararena taga osu aga' ante'ne. <sup>11</sup> Ana zana tumpa namamo'za

kete'za nenaku neageno Abramu'a keteno harige'za vu'naze. <sup>12</sup> Hagi zage ufregeno avukoko higeno Abramu'a mase himare'neno, avanama keana, tusi'a hanimo agrira refitente'negeno negeno koro hu'ne. <sup>13</sup> Ra Anumzamo'a amanage huno Abramuna asami'ne, Nagra amama negasamuua kea antahise huo. Kagehe'za ru vahe mopafi umani'nesage'za zamazeri haviza nehanage'za, kazokzo eri'zana 400'a zagegafu erigahaze. <sup>14</sup> Hianagi Nagra ana eri'za eri'zmantesaza kumate vahera keaga huzamantegahue. Ana amefiga'a zamagrama atirami'za esu'za, rama'a feno eri'za egahaze. <sup>15</sup> Hanki kagra Abramuga zaza kna so'e hunka manitenka, ozafa renka krimpa frune frisanke'za asegentesagenka kafahezane umanigahane. <sup>16</sup> Hanki kagehe'za 4'a zupa vahera forehu anante anante hute'za, ete ama mopalera egahaze. Ana knazupa Amori vahe'mo'zama hu'naza kumikura zamazeri haviza hugahue. Hianagi Amori vahe'ma zamazeri haviza hanua kna zahufa om'e'ne.

<sup>17</sup> Hagi zage ufreto hani higeno Abramu'ma keana, nezama kre kavofina tevegumo'a tusiza nehfinti, tevemo'a akrukru huno nerea tevemo afu'ma rutinenteno refko hunte'nea amunompi nevigeno ke'ne. <sup>18</sup> Ana zupage'za Ra Anumzamo'a Abramu'ene hagerfine manisa'a kea huvempa huno amanage hu'ne, ama mopa kagehe'i zamigahue. Isipi tima me'nereti agafa huteno vuvava huno, Jufretisi rantima me'nere vanige'na, ana maka mopa zamigahue. <sup>19</sup> Ana mopalre mani'naza vahe'mokizmi zamagi'a, Kenasi vahe'ene, Kin vahe'ene, Kadmo vahe'ene, <sup>20</sup> Hiti vahe'ene, Peresi vahe'ene, Refaemi vahe'ene, <sup>21</sup> Amori vahe'ene, Kenani vahe'ene, Gilgasi vahe'ene, Jebusi vahe'mokizmi mopa erisanti hategahaze.

## 16

### *Haga'ma Ismaelima kasente'nea naneke*

<sup>1</sup> Abramu nenaro agi'a Sarai'kino, mofavre onte narvo a' mani'ne. Hagi Isipi mopareti Sarai'a eri'za mofa'a Haga avregeno eri'zama'a enerino mani'ne. <sup>2</sup> Sarai'a amanage huno Abramuna asami'ne, Kama antahio. Ra Anumzamo'a mofavre kuni'a erigige'na mofavre kaseontoanki, vunka eri'za a'ni'ane umasegeno agripinti mago'a mofavrezaga eri fore hunamino, huno higeno Abramu'a a'amofonke antahino ana hu'ne. <sup>3</sup> Hagi Abramu'ma Kenani mopalre 10ni'a zagegafu manitegeno, Hagana Isipiti'ma avre'nea eri'za mofara Abramuna nenaro'za hanie huno Sarai'a avre ami'ne. <sup>4</sup> Higeno Abramu'a Hagana anteno masegeno, Haga'ma keno antahino'ma hiana amu'enema nehuno'a, kva'a Saraina ke azanava hu'ne.

<sup>5</sup> Hagi Sarai'a amanage huno Abramuna kesu'ne, Kagra haviza hu'nankeno eri'za a'mo'a antahi haviza hunenanteno avesinonante. E'i ana knazamo'a nagritetira kagrite vugahie. Nagra eri'za a'nia avre kamugenka antenka mase'nankeno amu'ene huteno antahi haviza hunenante. Kagra havizana hu'nampi, Nagra havizana hu'nofi, Ra Anumzamoke nerageno refko hurantegahie. <sup>6</sup> Hianagi Abramu'a amanage huno Saraina asami'ne, Antahio, knareki kagri eri'za a' mani'neanki kagri'ma kavesisaniaza hunto, huno higeno Sarai'a tusiza huno Hagana azanava higeno koro freno vu'ne. <sup>7</sup> Freno Suri kumatega nevia kamofo kampui ti me'nere ka'ma mopafi umani'ne. Anante Ra Anumza'mofo ankeromo eme negeno, <sup>8</sup> anage hu'ne, Hagaga, Sarai eri'za a'moka igati ne-enka, iga vu'za nefhane? huno higeno, Saraina eri'zama'ama eri nentoa a'mofo kvafinti fre'na e'noe. <sup>9</sup> Higeno Ra Anumzamofa ankeromo'a amanage huno asami'ne, Rukrahe hunka

vunka, umani'eneka ke'amofo amage antenka eri'zama'a omerinto, <sup>10</sup> huno nehuno anage hu'ne, Nagra kazeri ra ha'nena kagehe'za ohampriga'a vahé fore hugahaze. <sup>11</sup> Ra Anumzamofo ankeromo'a mago'ene huno, Kamu'ene hunankeno kna kavenesigenka ke hankeno Anumzamo'a antahi'negu ne'mofavre kasentenka ana mofavremofo agi'a Ismaeli'e hunka antegahane. \* <sup>12</sup> Hagi mofavre ka'amo'a ra huteno, afi' donki afu kna huno manigahie. Hagi agra mika vhahera nezmahenke'za agrira ahegahaze. Afu agna'zanena fru huno omanigosie. <sup>13</sup> Hanki Haga'a ke humia Ra Anumzamofo agi' neheno amanage hu'ne, Kagra nenagana Anumzane, na'ankure nagra kagoanagi ofri mani'noe. <sup>14</sup> Ana hu'negu ana tinkerimofo agi'a Bir Lahai Roie hu'ne. <sup>†</sup> Ana tinkerimo'a Beretine, Kadesine amunozanifi me'neankino, menina me'ne.

<sup>15</sup> Hanki Haga'a ne' kasentegeno, Abramu'a ana mofavre agi'a Ismaeli'e huno agi'a ante'ne. <sup>16</sup> Abramu'a 86'a zagegafu manitegeno Haga'a Ismaelina kasente'ne.

## 17

### *Abramu'a kasefa agi eri'nea naneke*

<sup>1</sup> Abramu'a 99ni'a zagegafu higeno, Ra Anumzamo'a agrite efore huno amanage huno asami'ne, Nagra Hihamu'ane Anumzamo'na kagrira negasmue. Nagri namagenentanku fatgo kavukava hunka manio. <sup>2</sup> Hanki Nagri huvempa keni'amo'a amu'nonti'afi me'nena, Nagra kagripinti vhahera zamazeri hakare hugahue.

<sup>3</sup> Abramu'a avugosaregati mopafi mase'negeno, Anumzamo'a mago'ene amanage huno asami'ne, <sup>4</sup> Nagra kagrane huhagerafi huvempa ke huankino, hakare'a kokantega vhahera kagripinti fore hu'za ku'ma ante'za mani avitesnagenka, kagra nafazami'za hugahane. <sup>5</sup> Hagi Abramuge hu'za mago'enena kagia ohegahaze. Menina Abrahamuge hu'za hugahaze. Na'ankure kagra hakare'a veamokizmi nafazamiza hugahane. <sup>6</sup> Nagra kazeri ra hanena kagripinti hakare'a kokankoka vhahera fore nehanageno, kini vahe'enena fore hugahaze. <sup>7</sup> Hanki'na Nagra amunonti'afi huhagerafi huvempage huankino, ama ana mevava huvempa ke'mo'a, kagrite'ene kagripinti'ma fore hanaza vahete'ene henkama fore hunante anante hu'za vanaza vahete'enena meno nevanige'na Nagra kagri Anumza mani'nena, kagripinti'ma fore hu anante ante'ma hu'za vanaza vahe'mokizmi Anumza manigahue. <sup>8</sup> Kagri'ene, kagehe'ine, henkama fore hanamokizmine kragama emanina Kenani mopa tamivianeroe. Ana mopamo'a tamagriza seno mevava nehina, Nagra zamagri Anumza manigahue.

### *Venenemofo agoza anom'a taga hania naneke*

<sup>9</sup> Hagi Anumzamo'a mago'ene amanage huno Abrahamuna asami'ne, Kagrane mofavrezaga ka'ane, kase anante anante hanamozanena huvempa keni'amofo amage anteho. <sup>10</sup> Nagranema huhagerafi'nonku amanahu hugahaze, ne' mofavretmia mika zamagozamofo amega anom'a taga hutregahaze. Henkama fore hu' anante anante'ma hu'za vanaza vahe'mo'zanena ana zanke hugahaze. <sup>11</sup> Abrahamuga, Nagrane huhagerafi'noa zamofo avame'zama mesiana, kagozamofo amega nom'a taga hutro. <sup>12</sup> Hagi

\* <sup>16:11</sup> Ana agimofo agafa'a Anumzamo keti'a nentahie, huno agi ante'ne. † <sup>16:14</sup> Kasefa huno mani'nea Anumzamofo tinkerie hu'ne.

maka ne' mofavre'ma kasentesamokizmia 8ti zage gnare, knane knanena henkama fore hanaza mofavre'mokizmi zamufga taga hugahaze. Nonka'afima eri'za vahe'mo'ma kasentesia vahe'pinti'ene zagoreti'ma mizasesana vahe'ma aruregati e'nesia vahe'enena zamufa taga huzmantegahaze. <sup>13</sup> Kagri nompima mani'ne'za kasentenesa vahepi, zagoreti miza hu'nenaza vahe'mo'zanena, zamagoza anoma'a taga hugahaze. E'inama hanaza zamo'a Nagranema huhagerafi'noa zamofo avame'za zamagri zamugarera mevava hugahie. <sup>14</sup> Hagi agoza anoma taga osanimo'a, Nagranema huhagerafi'noa kea ruhantaginigu, agrira naga'afintira avre atrehazae.

### *Anumzamo Saranku mofavre antegahane huno asami'nea naneke*

<sup>15</sup> Hanki Anumzamo'a amanage huno Abrahamuna asami'ne, koteranegnarona Sarai'e hu'nane. Hagi menina kasefa agi'a Sera'e hunka hugahane. <sup>16</sup> Nagra Serana asomu huntesugen, agra mofavre eri fore hunegamina, asomu huntanena hakare vahe'mokizmi antazmiza nehanigeno, agripinti kini vahera fore hugahaze. <sup>17</sup> Abrahamu'a rena reno kepri huno agu'afina kizanereno anage hu'ne, Nagra 100'a zagegafu hugeno Sera'a 90'a zagegafu higeta, ko' ozafa tavava re'noanki, inankna huta mofavre kasentenaku nehukeno nehie? <sup>18</sup> Abrahamu'a amanage huno Anumzamofo kenona hu'ne, knare Ismaeli'a kavure mani'neno asomura erigahie! <sup>19</sup> Hianagi Anumzamo'a amanage hu'ne, A'o tamage huno negnaro Sera'a mofavre kasentesigenka, agi'a Aisaki'e hunka antegahane. Nagra agrane huvempa hanugenana huvempa kemo'a agrite'ene, agripinti'ma henkama fore hu'anante anante'ma hanaza vahete'ene mevava huno vugahie. <sup>20</sup> Ismaeli kazigagu'ma nantahima kanana, hago antahuanki'na Nagra asomu huntesugen, agripintira rama'a vahe fore hu'za manigahaze. Ana nehanageno 12fu'a kva vahe'mokizmi nezmafaza hugahie. Nagra agehemokizmia zamazeri hankavetisuge'za hanvenentake vahe manigahaze. <sup>21</sup> Hianagi Nagra hu hagerafi huvempa ke'ni'a, Sera'ma kasentesia mofavre Aisakinte eri hanavetigahue. Ama ana knare anaga'ka kafufi kasentegahie. <sup>22</sup> Anumzamo'a anage huno Abrahamu'asmiteno, atreno vu'ne.

<sup>23</sup> Abrahamu'a Ismaeline, eri'za vahe'amokizmine zamazerino zamagoza anona taga huvagare zamante'ne. Agranema manine'za kasezmante'naza eri'za vahe'ane, ru mopareti miza se'nea vahe'ane miko zamagoza anona taga huzmant'e. Anumzamo'ma asmi'nea kante anteno ana zupage'za taga hu'ne. <sup>24</sup> Abrahamu'a 99ni'a zagegafu manino ozafa reteno, avufga taga hu'ne. <sup>25</sup> Hanki Ismaeli'a 13ni'a zagegafu huno nehzave seno manigeno avufga taga hu'ne. <sup>26</sup> E'i ana zupage Abrahamune, Ismaelikizni zanavufga taga huzanante'ne. <sup>27</sup> Miko eri'za vahe'ane, mofavrezimine agrane nemanziza kasente'nazampi, arurega vahe zagoreti miza sezmantenea vahe'ene ana mika zamagoza anona taga hu'naze.

## 18

### *Anumzamo Seranku ne'mofavre kasentegahie hu'nea naneke*

<sup>1</sup> Abrahamu'a zagemo tusi amuho higeno, Mamrea hunagru hu'nea oki zafa agafare seli nom'a kasante mani'negeno, Ra Anumzamo'a anante ehanati'ne. <sup>2</sup> Seli nom'a kasante mani'nereti kesga huno keana, taregi magoki vahe oti'nageno keteno, agareno viazamo zamagafi ome arena arenokpri

huno, <sup>3</sup> anage hu'ne, Ranimota nagrama knare nehanugeta musema ne-husuta eri'za vahetami mani'nogu muse huramantoanki nagatereta eovihio! <sup>4</sup> Muse huramantoanki ama zafa agafare manigsa hunenke'za osia tina afi'za eme tamina tamaga sese hiho. <sup>5</sup> Ana nehanage'na ne'zana uri'na eme taminena neneta manifru huteta kama vanarega vugahaze. Eri'za vahekamo'na noni'a kasante nantu ante nante'nagu ne'zana neteta vugahaze, hige'za knareki kema hanaza huo.

<sup>6</sup> Anage hazageno Abrahamu'a ame huno noma'afi umarerino amanage huno nenaro Serana asamine, Knare hu'nesnia flaua tagufa kevu urinka eme herunka bretia kro, <sup>7</sup> nehuno Abrahamu'a agareno vuno bulimaka'afinti anenta afu ome aheno eri'za vahe'a eme amigeno, hantka huno erino ome kre'ne. <sup>8</sup> Abrahamu'a meme'mofo ami rima'a tagino eme ante nezmanteno, ko'ma kragefe'neama'a erino kaone eme ante nezamanteno tv'aonte zafa agafare otino mani'nege'za ne'naze.

<sup>9</sup> Nene'za mani'ne'za Abrahamuna amanage hu'za antahige'naze, Neg-naro Sera'a iga mani'ne? Hazageno Abrahamu'a huno, Ami seli nompi mani'ne. <sup>10</sup> Higeno anampinti mago'mo'a amanage huno hu'ne, Henka'a ama ana knare'ma esnuana negnaro Sera'a ne' mofavre kasente'nena egahue. Huno nehigeno agu'afi Sera'a seli no kasama'are mani'neno ana ke antahi'ne. <sup>11</sup> Abrahamuke ozafa tavava rakeno, kafu zanimo'a agaterege'ne. Sera'a mofavre antega osu'negeno avufagamo ampasagigeno mani'ne. <sup>12</sup> Ana higeno Sera'ma ana kema nentahino'a agu'afi kiza nereno amanage huno agesa antahi'ne, Nagrane ranimo'enena ozafa tavava renoanki, inankna huno mofavrea fore huraminogu nehie? <sup>13</sup> Ra Anumzamo'a amanage huno Abrahamuna asami'ne, Nahigeno Sera'a kizana nereno, tavavamo'na inankna huna mofavrea kasenteku hugeno nehie huno nehie? <sup>14</sup> Nazamo Ra Anumzamofona amuho huntegahie? Anaga'a kafufina ama ana knare, Sera'a ne' mofavre kasente'nena egahie. <sup>15</sup> Sera'a amano vazigeno havige huno, A'o kizana ore nogenka nehane, huno higeno Anumzamo huno, A'o kagra kiza re'nane.

### *Abrahamu Sodom Gomora kumate vaheku Anumzamofo antahige'nea naneke*

<sup>16</sup> Ana tagufa vahe'mo'za oti'za vunaku nehu'za, Sodomu kuma me'nea kaziga zamavurga negageno (Abrahamu kantega ome zamatreteno enaku nevigeno), <sup>17</sup> Ra Anumzamo'a amanage hu'ne, Menima hunaku'ma ne-hua zana Abrahamu avurera eri frara okisue. <sup>18</sup> Tamage huno Abrahamumpinti tusi'a hankavenentake vahe fore hu'za kuma ante'za manigahaze. Kokankoka mika kumate vahe'mo'za agripinti asomura erigahaze. <sup>19</sup> Nagra Abrahamuna huhamprinte'noankino mofavre'an, agehe'ine hu-vempa keni'a rempi huzamisige'za, mani fatgo hu'za nemaniza fatgoma huno refkoma hu avu'ava zana nehu'za Ra Anumzamo'na kante vanazegu huhamprinte'noe. <sup>20</sup> Anante Ra Anumzamo'a amanage hu'ne, Sodomune Gomora vahe'mokizmia tusi'a kumizmimofo kezanke antahue, hankino kumi'zmimo'a tusi'a zampi mareri'ne. <sup>21</sup> E'ina hu'nagu kumi zmimofo zamagenkema antahi'noa zana tamagefi, urami'na ome zamage'na antahina hanue.

<sup>22</sup> Anage nehige'ne tare netremokea rukrahe hu'ne Sodomu kaziga vu'na'e. Nevakeno Abrahamu'a anante Ra Anumzamo'ene oti'ne. <sup>23</sup> Hagi Abrahamu'a erava'o huno Ra Anumzamofona anage huno antahige'ne, Ana kumapima fatgo vahe'ene, hazenke vahe'ene mani'nazana ana maka

zamahe fanane hugahano? <sup>24</sup> Hagi 50'a ana kumapima fatgo vahe'ma mani'nesazana, ana 50'a fatgo vahera zamahoke henka ana kumara zamahe fanane osugahano? <sup>25</sup> E'i kagri kavu kvara omane'neankinka, havi vahe'ene fatgo vahe'enema zamahe fanane hananke'za havi vahe'ene, fatgo vahem'o'zanena mago'zahu knazana e'origahaze. Mika mopafi vahe'mota mago'zanke hunka Kagra refko hunerantane. <sup>26</sup> Higeno Anumzamo'a amanage hu'ne, Nagra ma kesugenoma' 50'a fatgo vahe'ma Sodomu ran kumapima mani'nesazana, ana mika rankumara zamagriku hu'na zamahe fanane osugahue. <sup>27</sup> Anante Abrahamu'a mago'ane antahigeno, Nagra kugusopage hu'na tanefake vahe'mo'na Ra Anumzamokane naneke nehue. <sup>28</sup> Hagi 50'a fatgo vahe mani'nesafinti 5fu'a vahe'ma omanisnagenka, knare ama ana mika rankumara zamazeri havizana hugahampi? Higeno Ra Anumzamo'a ete ke nona'a amanage hu'ne, Kesugenoma 45'a fatgo vahe'ma mani'nesage'na Nagra zamazeri havizana osugahue. <sup>29</sup> Higeno Abrahamu'a mago'ene antahige'no, 40'a fatgo vahe mani'nesagenka knare zamahe fanane hugahano? Higeno Ra Anumzamo'a ete ke nona'a hunteno, Kesugenoma 40'a fatgo vahe'ma mani'nesage'na, Nagra zamazeri havizana osugahue. <sup>30</sup> Hagi Abrahamu'a mago'ane amanage hu'ne, Ra Anumzamoka mago'ane kea hugahuanki krimpa aheonanto, 30'a fatgo vahe mani'nesagenka knare zamazeri havizana hugahano? Higeno Ra Anumzamo'a ke nona'a amanage hu'ne, Kesugenoma 30'a fatgo vahe'ma mani'nesage'na, Nagra zamazeri havizana osugahue. <sup>31</sup> Higeno Abrahamu'a mago'ene hanave e'nerino Ra Anumzamofo antahige'ne, 20'a fatgo vahe'ma mani'nesagenka knare zamahe fanane hugahano? Higeno Ra Anumzamo'a kenona'a amanage hu'ne, Kesugenoma 20'a fatgo vahe'ma mani'nesage'na Nagra zamazeri havizana osugahue. <sup>32</sup> Higeno Abrahamu'a anage hu'ne, Ra Anumzamoka mago'ene kantahigegahuanki krimpa aheonanto, 10ni'a fatgo vahe'ma mani'nesagenka knare zamahe fanane hugahano? Higeno Ra Anumzamo'a ke nona'a amanage hu'ne, Kesanugenoma 10ni'a fatgo vahe'ma mani'nesage'na Nagra zamazeri havizana osugahue.

<sup>33</sup> Hagi Anumzamo'ma Abrahamu'ene keaga huvagama nereno'a atreno vigeno, Abrahamu'a kuma'arega ete vu'ne.

## 19

### *Sodom Gomora kumate vahe'mo'za kefoza hu'naza naneke*

<sup>1</sup> Tare ankeru tremoke kinagasegeke Sodomu kumate uhanati'na'e. Loti'a ana ra kumamofo kasante mani'nege'ne ome ke'na'e. Hanki Loti'a neznageno otino vuno zanagafi upari huno, arena ome nereno amanage hu'ne. <sup>2</sup> Muse huranantoanki ranimota'a eri'za vahetani'amo'na nompi marerita tanaga sese hi'o. Nagrane maseteta okina vugaha'e, huno hige'ne zanagra anage hu'na'e. A'o, megi'a kumapi masegahu'e. <sup>3</sup> Hianagi Loti'a hankavetigene agrane vu'na'e. Vakeno noma'afi ra ne'za ome kre neznanteno zo'ore bretia mago'akre znantegene ne'na'e.

<sup>4</sup> Hagi ne'zana nete'za omase mani'nageno, miko Sodomu kumate nehazavene ranra vahe'mo'zanena Loti nona eme regagi'naze. <sup>5</sup> Ana hute'za Lotina ke'za atimi'za, Iga nantu vahe'ma zanavrenkama nonka'afima ante'nana vahera mani'na'e? Zanavre kamategeta znanterta masamaneno. <sup>6</sup> Hazageno Loti'a atineramino amefiti kafana eri negino, <sup>7</sup> anage hu'ne, Muse hurmantoanki nafuheta kefo avu'ava zana huoznantegahaze. <sup>8</sup> Kama antahiho,

mofani'amokea vene omase mofatre manina'anki, zanagri zanavre'na eme tami'nena tamavesinia zama hunaku'ma hanuta anara huznanategahaze. Hagi muse (plis) hurmantoanki nantu vahe'ma noni'afima emanina'ana zanagrira mago'zana huoznantegehaze. <sup>9</sup> Huno nehige'za zamagra anage hu'naze, Kagra manigano! Ru Kazigati vahe'moka tagrikura nehananki, hago kagra refko hurante'za nehampi, kagrira kazeri havizantfa hugahaze. Lotina atufe'za kafama'are eme rentrako hu'za kafana anafe hu'za ufre'za hu'naze. <sup>10</sup> Ana netremokea Lotina avazuhu nompinka nente'ne, kafana erigi'na'e. <sup>11</sup> Maka vene'nema no kasante'ma oti'naza vahe'mokizmia zanagra ositeti vuno rante vu'nea nagara zamavurga erisu hige'za impane eneri'za, kafanku hakre'za vu'za e'za hu'naze.

### *Loti'a Sodom Kuma atreno hageno ru kaziga vu'nea naneke*

<sup>12</sup> Anama nehazage'ne ana netremokea amanage huke Lotina antahige'na'e, Ama kumapina vaheka'a mago'a mani'nazo? Ne'mofaka'an, neganemone, ruga'a vaheka'ane zamavarenka amafintira ko viho. <sup>13</sup> Ama kumara eri haviza hugahu'e. Zamagenkemo'a Ra Anumzamofonte marerigeno Ra Anumzamo'a ama rankumara omeri haviza hi'o huno hurantegeta e'no'e'. <sup>14</sup> Anagema hakeno'a mofa'amoke arave hugahaze hu'za huhampri znante'naza ne'trente Loti'a vuno amanage huno ome zanasami'ne, Anumzamo'a ama kumara ahe fanane huku nehianki otinketa ama kura atreta vamaneno, huno hige'ne, reravatga nehunka taginke nehane nehu'ne kiza re'na'e.

<sup>15</sup> Ko'atu afu'za rugeka nehigeno ankero netremokea amanage huke asami'na'e, Lotiga ame' hunka mofaka'ararene, negnarone zamavarenka vuo. Amafi vahe knaza mani'neta erizanku freta viho. <sup>16</sup> Hianagi Loti'a tare agesa nentahige'ne, ana netremokea Lotine, nenanore, mofa'ararene zamazante zamavazu huke, ana kumapinti vu'ne fegi'a ome zamatre'na'e. Anumzamo'a asuntagine'negu huno Lotina anara hunte'ne. <sup>17</sup> Fegiama atiramitageno'a, mago ankeromo huno, Frisagi ko' atreta freho! Magore huta rukrahera huta onkeho, ama agupomofo tvaontera omanita agonarega mareriho. Anama osanuta tamagranena frigahaze. <sup>18</sup> Hianagi Loti'a amanage hu'ne, A'o! Ranimota'a keke hurantanoki, anara osugahie! <sup>19</sup> Hanki antahio, eri'za vahekamo'na nagu'nevazinka, nahoke nehenka navrenka eme natrane. Hianagi agonamo'a afete me'neankina ovu'nenujeno knazamo'a nazeri haviza hanige'na, ama ana vahe'ene frigahue. <sup>20</sup> Hagi ko, antu onensa kumara tava'onte me'neanki, natrege'na ana osi kumapi fre'na umani'nena, ana knazana agatera'neno. <sup>21</sup> Higeno ankeromo'a huno, Knareki mago'ene nantahiganke'na keka'a antahigamuankina kema hana osi kumara eri havizana osugahuanki traginka ana kumapi vuo. <sup>22</sup> Ame hunka mago'zama osunesure ana kumate vuo. Ana hu'negu ana osi kuma'mofo agi'a Zoari hu'naze.

### *Ra Anumzamo Sodom Gomora kumate vahe zamahefanane hu'nea naneke*

<sup>23</sup> Hagi Loti'a Zoari kumate uhanatigeno zage hanatino rumasa hu'ne. <sup>24</sup> Ana higeno Ra Anumzamo'a tevene, teve nerea salfa haverami monafinti herafitregeno ko'ma riaza huno Sodomu kumate'ene Gomora kumate erami'ne. <sup>25</sup> Ana huno ana maka ranra kuma'ene, ranra kuma agu'afi mani'naza vahe'ene, hozane, trazane, mopafi nehagea maka'zana ahe fanane huvagare'ne. <sup>26</sup> Hianagi Loti nenaro'a henka ne-eno rukrahe huno

ana kumatega negegeno'a, avufgamo'a ruzahē higeno hagemo'ma hiaza huno krage feno anante oti'ne.

<sup>27</sup> Abrahamu'a masereti ame nantera otino Ra Anumzanema oti'neno keaga hu'nere vu'ne. <sup>28</sup> Vuno unemanino ke fenkamu teno Sodomu kuma'enē, Gomora kuma'enēma me'nea agupofima keana mago'zana onke'neanki teve kunke ke'ne. Kumo'a tusiza huno marenerino vemagu vemagu nehuno refite vagare'ne. <sup>29</sup> Anumzamo'a ana huno Loti'ma agupofima nemania kumatamima eri havizama nehuno'a, Abrahamu'enēma huvempama hu'nea kegu agesa nentahino, Lotina avreno rurega ome ante'ne.

### *Moabu vahe'ene Amori vahe'mokizmi naneke*

<sup>30</sup> Zoari kumapi mani'zanku Loti'a koro nehuno tare mofa'arare'ne hage'za agonarega havegampi umani'naze. <sup>31</sup> Umani'naze nuna'amo'a ngana'amofona amanage huno asami'ne, Nafati'amo'a ozafa re'ne. Amafi ve erita mofavre kasentesnu'a vahera omanitfa hu'ne. <sup>32</sup> Hagi antahio, tafati'amofo negi ti ami'manenkeno neteno negi nenena nagatimofo zamagi fanane hu'zankura anukita mase'neta, tafati'amofo mofavre kasentesanu'e. <sup>33</sup> Huno hige'ne ana kenage nafaznimofona hanave ti amikeno neteno, agesa ontahi negi neno mase'negene, nuna'amo'a anteno mase'ne. Anazama ha'ana neznafa'a antahino keno osu'ne.

<sup>34</sup> Nuna'amo'a nefama anteno masegeno komatia nanterana, nagana'amofona amanage huno asami'ne, Hago nagra kenage nerafa'ene mase'noanki meni kenage anahu kna huta hanave ti ami'manenkeno neteno, ete negi nenena anukinka masetegeta, nagati'amofo zamagi fanane huzankura nafati'amofo mofavre tamu'ene huta kasenta'maneno, huno hige'ne, <sup>35</sup> ana hu'ne nafa'zanimofona waini ti amikeno neteno agesa ontahi neginogeno masenegeno nagana'amo anteno mase'ne. Anazama hiana neznafa'a antahino keno osu'ne.

<sup>36</sup> E'ina nehuke, Loti mofa tremokea nafa'zanimofonteti zanamu'ene hu'na'e. <sup>37</sup> Kota mofa'mo ne'mofavre kasenteteno, agi'a Moapu'e huno ante'ne, agra Moapu vahe'mokizmi nezmageho'e. <sup>38</sup> Hagi nagana'amo enena ana zanke huno ne' mofavre kasenteno, agi'a Ben-Ammi'e huno ante'ne. Ana mofavrefinti'ma fore hu'nea vahekura Amoni vahere hu'za nehaze.

## 20

### *Abrahamu Abimelekigizni naneke*

<sup>1</sup> Abrahamu'a maka feno zama'a enerino kumara atreno, Negev kaziga vuno Gerar umani'ne. Ana kumara Kadesine, Surine amu'nompi me'nue.

<sup>2</sup> Hagi Abrahamu'a nenaro Serankura amanage huno zamasmine, Ama nensaro mani'ne. Higeno Gerari kumate kini ne' Abimeleki'ma ana nanekema nentahino'a, eri'za vahe'a huzmanteg'e'za Serana ome avre'za eme ami'naze. <sup>3</sup> Hianagi ana kenagera Anumzamo'a ava'nafe Abimelekina amanage huno eme asmi'ne, Antahio vereti a' avre'za eme kami'nazankinka frigahane. <sup>4</sup> Higeno Abimeleki'a Sera'enēma omase'negu huno amanage hu'ne. Ra Anumzamoka mago ke'a omane'nesia vahera knare amane kuma'ane naga'anena zamahe fanane hugahano? <sup>5</sup> Abrahamu'a agra nasmīno, ama ara nensaro'e nehigeno, Sera'a Abrahamunkura nagra nesarone huno hu'ne. E'ina hu'negu Serama avre'za eme nenamizage'nā nagra nagu'reti'ene antahi antahini'reti'ene fatgo avu'ava hu'noe hu'na nagesa antahi'noe. <sup>6</sup> Higeno Anumzamo'a ava'nafina amanage huno Abimelekina

asami'ne, Tamage hane, Nagra antahi'noe, kagra fatgo antahintahi antahinenka, anazana hu'nane. E'ina hu'nanke'na Nagra kase hugantogenka Serana avako osu'nane. E'igu kefozana osu'nane.<sup>7</sup> Hianagi ama a'mofo neve'a kasnampa ne' mani'neanki, huntogeno neve hirega vino. Nevanigeno negeno kagrama fri'zankura nunamu huno kza hino. Hanki hunte'nankeno ovaniiana, kagrane maka'a naga kanena frigahaze.<sup>8</sup> Nanterame Abimeleki'a maka kva vahera ke hige'za eme atru hazageno, Anumzamo'ma ava'nafima asami'nea nanekea huama huno zamasm'i'ne. Nezamasmige'za nentahi'za, tusi'za hu'za zamagogogu hu'naze.<sup>9</sup> Abimeleki'a ke higeno Abrahamu'a egeno amanage huno antahige'ne. Kagra naza hurante'nane? Nagra kagira mago'a kumira hugante'nogenka amanahu havizana ku-mani'ane vahe'nianena hurantano? Amanahu avu'avazama banana, fatgo osu avu'ava hane.<sup>10</sup> Nehuno Abimeleki'a amanage huno Abrahamuna asami'ne. Kagra nankna antahintahi hunka amanahu'zana hu'nane?<sup>11</sup> Higeno Abrahamu'a kenona amanage hu'ne, Na'ankure nagra amanage hu'na nagesa antahi'noe, ama kumapina Anumzamofonkura koro nosazanki'za, zamagra a'ni'areku hu'za nahe nefri'za a'nia erigahaze nehu'na anara hu'noe.<sup>12</sup> Hanki ami ara nenfa mofa nensaro mani'ne. Ana hu'neanagi nenrera mofa omani'negu huno a'ni'a mani'ne.<sup>13</sup> Hanki Anumzamo'ma hunantego'na nenfa noma netre'na amanage hu'na Serana asami'noe, hakare'a kaziga vanu'ana so'e kavukva hunantenka nensaro'e hunka huo hu'na asami'noe.<sup>14</sup> Anante Abimeleki'a sipisipine, bulimakaone, kazokazo eri'za vahera vene a'ene Abrahamuna avrenemino, nenaro Seranena avreno eme ami'ne.<sup>15</sup> Abimeleki'a amanage hune, Ko! Ama maka nagri mopa me'neanki, kavesinirera amne umanio.<sup>16</sup> Nehuno Serana amanage huno asami'ne. Kagri'ma kagazema eri kami'nogu hu'na negasro Abrahamuna ama mizana 1tauseni'a silva zagoa mika negazage'na amue. E'ina nehanuge'za mika vahe'mo'za nege'za, nagrikura havi zana osu'ne hu'za hugahaze.<sup>17</sup> Anage hutegeno Abrahamu'a Anumzamofontega nunamu higeno Anumzamo'a Abimelekine, nenarone, kazokzo eri'za mofanene, a'nenea zamazeri soe hige'za mofavre kasente'naze.<sup>18</sup> Na'ankure Abrahamu'nenaro Seranteku huno Ra Anumzamo'a Abimeleki naga'mofo a'nea zamarimpa erigi'neane.

## 21

### *Aisaki kasente'nea naneke*

<sup>1</sup> Ra Anumzamo'ma huvempa kema ko'ma Serama hunte'nere, Serana eri knare hunte'ne.<sup>2</sup> Sera'a amu'ene huno ne' mofavre kasente'ne. Abrahamu'a ozafa retegeno kasentegahane huno Anumzamo'ma asami'nea kna egeno kasente'ne.<sup>3</sup> Abrahamu'a Sera'ma kasentea ne'mofavregura Aisaki'e huno agi'a ante'ne.<sup>4</sup> Hanki Abrahamu'a nemofo Aisakina 8'a zagegna manitegeno, Anumzamo'ma asmi'nea kante anteno agoza anona taga hunte'ne.<sup>5</sup> Abrahamu'a 100'a zagegafu mani'tegeno Sera'a mofavre Aisakina kasente'ne.<sup>6</sup> Hagi Sera'a amanage hune, Anumzamo naza hige'na kizaneroe. Vahe'mo'za antahisu'za nagrane muse nehu'za kiza regahaze.<sup>7</sup> Anage huteno Sera'a amanage huno hune, Iza Abrahamuna, Sera'a mofavre'a ante omigahie huno hugahie? Ana hu'neanagi menina agra ozafare-finka mofavre kase amue.<sup>8</sup> Ana Mofavremo nena huno ami a'o nehigeno, Abrahamu'a ra ne'za kre'ne.

*Hegane, Ismaelizni tramema huznantege'ne vu'na'a naneke*

<sup>9</sup> Mago zupa Sera'a keana Haga, Isipi a'mofo mofavre Abrahamunteti ante'nea ne'mo avaharo nehigeno ke'ne. <sup>10</sup> Sera'a amanage huno Abrahamuna asami'ne, Erizanti'a e'neria a'ene mofavre'anena zanahenatigeke vi'o, eri'za a'mofo mofavremo'a fenonka'a e'origahie. Hagi mofavre'nimo Aisaki erigahie. <sup>11</sup> Anage nehigeno nentahino, Abrahamu'a mofavre'agura tusi rimpagna hu'ne. <sup>12</sup> Hianagi Anumzamo'a amanage huno asami'ne, Abrahamuga krimpa havizana osuo. Na'ankure mofavrene eri'za a' kagura kagesa ontahio, Sera'ma nanekema kasamiaza huo, Aisakimpinti kagehe'za fore hugahaze. <sup>13</sup> Eri'za a'mofo mofavrefintira Nagra zamazeri hakare ha'nena, rankuma ante'za manigahaze. Na'ankure zamagra kagri kageheze.

<sup>14</sup> Hanki Abrahamu'a nanterame otino bretine, zagagafa avufgare tro hu'naza tafempi tinafino Haga afunte nenteno, mofavre'a avrenemino hunte'ne. Hanki Haga'a atreno Berseba ka'ma kopi vuno umani'ne. <sup>15</sup> Hagi zagagafa avufgaretima tro'ma hu'naza tintafempi ti'mo'ma vagaregeno'a, mofavre'a osi zafamofo tonapi ome ante'ne. <sup>16</sup> Ana huteno kevema ahettregeno nevia avamente Haga'a umanineno amanage hu'ne, Nege-sugeno mofavreni'a fri zankura navresa hie, nehuno krafa huno zavi ate'ne.

<sup>17</sup> Hianagi ne' mofavremofo zavike'a, Anumzamo'a antahi'ne, Anumzamofo ankeromo monafinti amanage hu'ne, Hagaga kagripina na'a hu'ne? Korera osuo, antuma mani'neno ne'mofavremo'ma zavima neteana Anumzamo'a antahi'ne. <sup>18</sup> Otinka vunka ne'mofavre azante ome azeri otinka avro, Nagra azeri ra hanugen, tusi'a vahe fore huno rankuma antegahie. <sup>19</sup> Anage nehuno Anumzamo'a ana a'mofo avuruga azeri hari higeno keana, mago tinkeri me'negeno keteno vuno zagagafa avufgareti tro'ma hu'naza tafempi tina afino ana mofavrea ome amigeno ne'ne.

<sup>20</sup> Hagi Anumzamo'a ana ne'mofavrene mani'negeno nena huno, ka'ma mopafina atima ahe'zantera harfa ne' mani'ne. <sup>21</sup> Agra ka'ma mopafi Parani mani'negeno, nerera'a Isipi mopareti a' ome avreno eme ami'ne.

### *Abrahamu'a Abimeleki'ene huvempage hu'na'a naneke*

<sup>22</sup> Ana zupage Abimeleki'ene zugota sondia kva ne'a Fikoli'enena amanage hu'ne Abrahamuna asmi'na'e, Anumzamo'a kagrane mani'neno maka'zama hana zampina asomu hunegante. <sup>23</sup> Hanki kagra tamage hunka Anumzamofo avufi huvempa hunka nasamio. Nagri'ene, mofavre'niane, nagehe'inena reravatga hunka havizana huoranto. Hagi amama eman'i'ana mopafima knare navu'nava hugante'noaza hunka nagrira knare kavukva hunanto. <sup>24</sup> Higeno Abrahamu'a huno, Nagra huvempa huaniki'na kema hanaza hugantegahue. <sup>25</sup> Hagi mago zupa Abrahamu'a tinker'i'agu Abimelekina keaga hunte'ne. Na'ankure Abimeleki eri'za vahe'mo'za tinkeria hanare'nazagu anara hu'ne. <sup>26</sup> Abimeleki'a amanage hu'ne, Iza e'inahu'zana hu'nefi, kagra nasaminke'na ontahi'noe. Hanki meni ama nehanka nentahue. <sup>27</sup> Abrahamu'a mago'a bulimakaoram, sipisipiraminena refko huno Abimelekina eme nemino, anante raru hu'ne tragote'ne manisa'a nanekea huvempa (covenant) hu'na'e. <sup>28</sup> Abrahamu'a sipisipi kevu'afintira 7ni'a a' sipisipi anentatami avre arure ante'ne. <sup>29</sup> Ana higeno Abimeleki'a amanage huno Abrahamuna antahige'ne, Ami 7ni'a a' sipisipi anentatamina nankna kagukagesare avre rurera ante'nane? <sup>30</sup> Abrahamu'a amanage hu'ne, Kagra ama 7ni'a a' sipisipi anentatamina nazampinti kamuana erigeno, ana zamo huama huranteno, ama tinkeria nagriku kafinte'ne hino. <sup>31</sup> E'ingae nehuno ana kumara Besebe huno agi'a

ante'ne, na'ankure anante tarega'moke huvempa kea hu'n'a'e. <sup>32</sup> Hanki zamagra huvempa hu'za Berseba hute'za, Abimeleki'ene sondia kva ne'a Fikoli'ene otine mopa zaniarega Filistia vu'n'a'e. <sup>33</sup> Abrahamu'a tamariski zafa Berseba negrino, anante manivava Ra Anumzamofo agi hanta vazi'ne. <sup>34</sup> Abrahamu'a za'za kna Filistia vahe mopafina mani'ne.

## 22

### *Abrahamu'ma Aisakima aheno ofa hania zamofo naneke*

<sup>1</sup> Hagi mago'a kafua agateretegeno Anumzamo'a Abrahamuna reheno kenaku anage hu'ne, Abrahamuo higeno, ama mani'noe huno Abrahamu'a hu'ne. <sup>2</sup> Anumzamo'a anage huno asami'ne, Magoke mofavre, kavesi kavesi hunentana mofavrea Aisakina avrenka Morea moparega vuo, Nagrama kaverisua agonare anantega agrira ome ahenga tevefi Kresramana vuo. <sup>3</sup> Higeno amenantera Abrahamu'a otino donki afura azeri retro nehuno, Kresramana vu tevea ape huno krevare'are enerino, tare eri'za vahe'ane mofavre'a Aisakine zamavareno, Anumzamo asmi'nea kotega vu'naze. <sup>4</sup> Tare zagegna agateregeno, anante knarerera Abrahamu'a nevuno kesga huno anama asmi'nea kokana ke'ne. <sup>5</sup> Agra eri'za vahetrema'agura amanage hu'ne, Amare donki afura anteta mani'neke'na nagrane ne'n'i'anе anturega vuta Anumzamofona mono ome hunteteta ete egahu'e.

<sup>6</sup> Abrahamu'a Kresramana vu teve erino Aisaki kofinenteno, agra'a hugre tevene, kazine erige'ne vu'n'a'e. Zanagra kantega nevu'ne, <sup>7</sup> Aisaki'a anage huno nefana antahige'ne, Nenfa, higeno Abrahamu huno, voe, higeno, Hugre tevene, kre tevene eri'noe. Hagi inantegati Kresramana vu lama afura erigahu'e? Huno Aisaki'a antahige'ne. <sup>8</sup> Higeno Abrahamu'a kenona huno, Anumzamo Kresramanavu lama afura tamigahie, huno higeke vu'n'a'e.

<sup>9</sup> Anumzamo'ma asami'nea kaziga unehanati'ne, Abrahamu'a have erino ita tro huno teve hanavazine. Ana huteno nemofo, Aisakina agare azante nofi anakinteteno, ana ita agofetu azeri sga humasente'ne. <sup>10</sup> Abrahamu'a kazima'a erino Aisakina kazi refriku nehigeno, <sup>11</sup> monafinkati Ra Anumzamofo ankeromo kezatino, Abrahamu! Abrahamuo! Higeno Abrahamu'a huno, Ama mani'noe. <sup>12</sup> Higeno ankeromo'a huno, Mofavremofo avufgarera kazana onto, mago'zana huonto. Menima kagri'ma kagentoana Nagrite kamentinti nehunka, Anumzamofonku kore nehane. Na'ankure Nagri'ma nami'zantera magoke mofavreka' aze'orinane. <sup>13</sup> Higeno Abrahamu'a kesga huno osi zafa titipafi ve rama afumo pazive'afi rusi hu'negeni ke'ne. Ana ve rama afu ome azerino mofavre'amofo nona'a aheno tevefi kre fananehu ofa hu'ne. <sup>14</sup> Abrahamu'a ana agonagura Ra Anumzamo tamigahie huno agi'a ante'ne. Hankino eno menima mani'nona knafinena, Ra Anumzamofo agonare tamigahie hu'za nehaze. <sup>15</sup> Ra Anumzamofo ankeromo monafinkati Abrahamunku mago'ene kezatino, <sup>16</sup> Anage hu'ne, Nagrani'a Ra Anumzamo'na hankavenentake ke nehue, na'ankure ke'nia erizafa nehunka ne'mofavreka'a, magoke ne'mofavrea azeorinane. <sup>17</sup> Nagra asomu huneganta'nena kagri kagehe'impintira fore huhakare hu'za monafinka hanafi ene hagerinkenafi kasepangna nehanage'za, ha' vahe'zmi ranra kumara eri nafa'a hugahaze. <sup>18</sup> Na'ankure kagri kagehe'impinti mika kokankoka vahe'mo'za asomura erigahaze. Na'ankure nagri ke'mofo

avaririnanku anara hugahue. <sup>19</sup> Anage hutegeno, Abrahamu'ene Aisakikea eri'za ne'trentega ake'za, maka'mo'za kuma zamirega Berseba vu'naze. Abrahamu'a anante Berseba rama'a kna mani'ne.

### *Nahori agehe'mokizmi zamagi'amofo naneke*

<sup>20</sup> Hagi mago'a kna evutege'za, Abrahamuna eme asamiza, Negafu Nahori nenaro Milka'a mago'a ne'mofavre'zaga kasezmante'ne hu'za eme asami'naze. <sup>21</sup> Ana mofavremokizmi zamagi'a, Uzi'a pusa nere, Buzi'a agri negna'e, magora Kemuelikino Aramu nef'a.e. <sup>22</sup> Hagi mago'a mofavre nagara Keseti'e, Hazori'e Pildasi'e, Judlafi'e, Betueli'e. <sup>23</sup> Hagi Betueli'a Rebeka nef'a.e. Milka'a, Nahorintetira 8'a ne'mofavre zaga zamante'ne. Nahori'a Abrahamuna nef'u.e. <sup>24</sup> Hanki Nahorina mago kazokzo eri'za a'mofo agi'a Reumakino, Nahorintetira Teba anteno, Gahamu anteno, Tahasi anteno, Makakizmi zamante'ne.

## 23

### *Sera'ma frige'za asente'naza naneke*

<sup>1</sup> Sera'a 127ni'a zagegafu maniteno, <sup>2</sup> Kiriat-arba kumate fri'ne. Menina ana kumara Kenani mopafi me'neankino, Hebronie hu'za nehaze. Hanki Abrahamu'a tusi'za huno Serankura asunku nehuno zavi ate'ne. <sup>3</sup> Sera fri kerfare'ma Abrahamu'a mani'nereti netreno otino Hiti mofavre'zaga amanage huno ome zamantahige'ne. <sup>4</sup> Tamagra antahi'naze, nagra mopa agafa nera omani'noanki, amne tamagri mopafi eman'i'noe. Hagi a'nimo'a fri'nege'na mopa miza hu'na anampi ome asenteku tamantahine-goe. <sup>5</sup> Hige'za Hiti mofavre naga'moza amanage hu'za Abrahamuna asami'naze. <sup>6</sup> Kama antahio ra ne'moka, kagra ra kva ne' tagranena mani'nane. Knare'ma huno kavesinia matipi asenteku'ma hananketa, amne kamigahune. Hagi aza'o ana matimofo nafa'a mani'nenimo'a i'o osugahie. Amne kamina ana matimatipina ome asentegahane. <sup>7</sup> Abrahamu'a Hiti mofavre'mokizmi zamufi otino, Maka vahe zamufi kepri huno ange hu'ne. <sup>8</sup> Hanki antahihio! A' ka'ama asentesanee hanuta, nagri nagi erita vuta Zohari nemofo, Efroni'ene ome keaga hiho. <sup>9</sup> Ome antahigenkeno Makpela mopa naminke'na, ana mopa agentega havegampi Serana ome asentaneno. Ana mopamo'a nagri'za segahie. Hanki hu izoma hanige'na hakaremota tamufi ana mopa mizahu fatgo hugahue. <sup>10</sup> Hankino Efroni'a ana Hiti mofavre'mokizmi amunompi mani'ne. Efroni'a Hiti ne'kino rankuma'mofa kafante eman'i'naza vahe'mokizmi zamagesafi, ke nona'a huno Abrahamuna asami'ne, <sup>11</sup> Efroni'a amanage hu'ne, ra ne'moka kama antahio, havegana miza osegahane. E'i ana mopane haveganena maka'a naga'nimokizmi zamufi huvempa hu'na meni ana mopa kamigahue. Kamisnugenka anampi fri kerfa'a ome asente'gahane. <sup>12</sup> Anage higeno Abrahamu'a antahima ami'za kazigati maka vahe zamufi kepri hu'ne. <sup>13</sup> Abrahamu'a ana vahe zamufi amanage huno Efronina asami'ne. Efroniga muse (plis) hugantoanki kama antahio, nagra menina ana mopa miza hugahue. Hanki zagoma kamisnuana, erige'na ana mopafi a'nimofo fri kerfa ome asenta'neno. <sup>14</sup> Efroni'a ana naneke nentahino, amanage huno Abrahamuna kenona'a asami'ne. <sup>15</sup> Kama antahio, ra vahe'moka, ama mopamofo mizama'a 400'a silva me'neanagi amu'ronti'afina osi'zane. Amne fri kerfa'a ome asentegahane. <sup>16</sup> E'inage nehigeno Abrahamu'a mago rimpia nehuno, mago'a zago'a refko huno Efroni eme ami'ne. Efroni'a

agra'a kehia avamente 400 ti'a silva zago hakare vahe zamufi eme ami'ne. <sup>17</sup> Efroni mopa Makpela Mamre kazigama avugosama hunte'nea mopa erigeno, ana mopafima me'nea havegane, zafane, mopane, hakarezanena ami vagare'ne. <sup>18</sup> Hanki hakare'zana Abrahamu'ma eri nafa'a hanigu Hiti ne'mofavre naga'mo'za ran kuma'mofo kahante ke refko nehaza vahe'zmufi ami vagare'naze. <sup>19</sup> E'ina huteno Abrahamu'a Serana Makpela havegampi, Mamre kaziga avugosa hunte'nea havegampi ome asente'ne. Ana kuma agi'a Hebron hu'za nehaza kumakino, Kenani mopafi me'ne. <sup>20</sup> Mopane, havegane anampima me'nea zanena, Abrahamu naga'ma asezmente mope hu'za Hiti mofavre naga'mo'za ami vagare'naze.

## 24

### *Aisaki a' eri'nea naneke*

<sup>1</sup> Abrahamuna tusiza huno hakare'a zama'afina Ra Anumzamo'a asomu hunentegeno manino vuno ozafare'ne. <sup>2</sup> Korapa eri'za ne'a, maka'a fenonte'ene nonte kegava kri'nea ne'ku, Abrahamu'a amanage huno asami'ne, Muse (plis) hugantoanki kazana namo'mofo fenka antenenka, <sup>3</sup> monane mohanema tro'ma hu'nea Anumzante kagra huvempa hunantenka, Kenani mopafintira ara ne'nimofona avre omigahue hunka huo. <sup>4</sup> Hagi vunka mopa agafa'niare vahe'niafinti a' uvrenka Aisakina eme amio. <sup>5</sup> Higeno eri'za ne'amo'a Abrahamuna asamino, Hagi ana a'mo'ma navaririno'ma ama mopare omena, ete negamofona avre'na mopakare ome atregahufi? <sup>6</sup> Higeno Abrahamu'a eri'za ne'a asamino, I'o hue! Ne'nimofona avrenka ovutfa hugahane. <sup>7</sup> Hagi monafinkati Ra Anumzamo'ma nenfa vahepinti'ene fore hu'noa mopause'i ma nagima huteno, navareno eme nante'nea Anumzamo'a amanage huno huvempa huno nasm'i'ne, ama mopa nagakamofo zamigahue huno hu'neankino, Anumzamo'a mago ankeru vahera huntenko kagota huno vanigenka, Aisaki nenarona anantegati uvarenka egahane. <sup>8</sup> Hagi ana a'mo'ma ovugahuema hinkenka huvempama hu'nana kegura korora osunka atrenka eno. Hagi ne'nimofona ana moperera avrenka ovugahane. <sup>9</sup> Anage higeno, eri'za ne'amo'a azana Abrahamu amo'mofo fenka anteno, anankerera huvempa hu'ne.

<sup>10</sup> Eri'za ne'amo'a ozafa'amofo kemoriramimpintira 10ni'a kemori afu nezmavreno, mago'a knare'nare zana e'nerino, otino Nahori rankumate Mesopotamia vu'ne. <sup>11</sup> Eri'za ne'mo'ma anantegama vuteno'a, kemori afu'tmina zamazeri zamarena rezmantge'za, kinaga a'nemo'za ti nefiza knare rankuma'mofo fegi'a tinkerire mani'naze. <sup>12</sup> Eri'za ne'mo'a amanage huno nunamu hu'ne, Ra Anumzane, kvanimofo Abrahamu Anumzamoka muse (plis) hugantoanki, menina antahinaminka, ozafani'a Abrahamuna avesintenka azeri so'e hanane! <sup>13</sup> Ko, ama tinkerire nagra otina mani'noankino, rankumate vahe'mokizmi mofanemo'za ti afinakura egahaze. <sup>14</sup> Mago mofaku'ma hu'na, muse (plis) hugantoanki, ti afi kavoka'a ante mopafitege'na tina afi'na na'neno nehanugen, tina nenege'na kemorika'a tina afi zami'neno huno hanimo, eri'za neka'a Aisaki nenaro'za hugahie. Anama hinke'na ozafani'a Abrahamuna avesintenka azeri so'e hane hu'na hugahue.

<sup>15</sup> Ana eri'za ne'mo'a nunamuna huvaga ore'negeno, mago mofara Rebekakino agra ti afi kavo afunte kofi'neno rankumapintira atirmino e'ne. Rebeka'a Betueli mofa mani'neankino Milka kasente'ne. (Milka'a Abrahamu negna Nahori nenaro'e). <sup>16</sup> Ana mofara vemo ke asane hu'are, vene'nene

omase'nea mofamo, tinkerirega uramino kavo'afi ti omefirino marerino e'ne. <sup>17</sup> Abrahamu eri'za ne'mo'a, ana mofa'mo'ma ti afirino marenerigeno agia reno vuno anage huno ome antahigene, Muse hugantoanki kavoka'afinti osi'a tina namisnanke'na nesanue. <sup>18</sup> Higeno ana mofa'mo'a anage hu'ne. Ranimoka amne negahane, nehuno ana kavo'a anteramino azeri sga huntogeno ne'ne. <sup>19</sup> Amigeno netegeno, ana mofa'mo'a anage hu'ne, Kemorika'a ana zanke hu'na tina afi zami'nena nezmu hugahaze. <sup>20</sup> Huteno ame huno Rebeka'a tina kavo'afinti afu'moza ti nenaza zompafi taginte zamanteg'e'za nenageno, ufino ete ete huno neragige'za ana maka kemorimo'za nezamu hu'naze.

<sup>21</sup> Ana nehigeno Abrahanu eriza ne'mo ke osuno ana mofa'mofo avufi negeno, kama e'noa zamofona, Anumzamo'a ama naza hu'za nehifi huno agesa antahi'ne. <sup>22</sup> Kemorimo'za tina nehana hutageno, ana eri'za ne'mo'a golire tro hu'naza rini kna'amo'a 5fu'a gremi hu'neane, manogosane, golire tro hu'nea tare asana tarega azampi antaninte'neankino golimofo kna'amo'a 100'a grem hu'ne. <sup>23</sup> Nehuno ana mofaku huno, Muse (plis) hugantoanki iza mofa kagra mani'nampi nasamio? Knare negafa nompina kankamuna me'nesigu ama nagranema enaza vahe'enena umasegahuno? <sup>24</sup> Higeno ana mofa'mo'a anage huno asami'ne, Nagra Betuel mofa mani'noe. Milkane, Nahorigizni mofavremo kasenante'ne. <sup>25</sup> Ana mofa'mo'a mago'ane eri'za nera asmino, kemorimo'ma nesia ne'zane trazanena hakare'a megeno, mase kankamunena me'neankinka meni kenagera masegahane. <sup>26</sup> Higeno ana ne'mo'a kepri huno, Ra Anumza'mofona mono hunte'ne. <sup>27</sup> Ana huteno ana eri'za ne'mo'a anage hu'ne, Kvani'a Abrahamu Ra Anumzamofona ra agi amue. Ozafa'nimofona agekani onteno soe'za hunenteno aza nehie. Hanki nagrira Ra Anumzamo naza nehuno kana naverige'na, ozafanimofo afu'agna nompi efatgo hue. <sup>28</sup> Anage higeno ana mofa'mo'a agia reno nerera nompi mani'namokizmi ana naneke ome zamasmi'ne. <sup>29</sup> Hagi Rebeka nempu'amofo agi'a Lebani'e. Lebani'a agia reno rankumamofo fegi'a tifi kerire'ma mani'nea nete vu'ne. <sup>30</sup> Hagi nesaro Rebekama agonafima manogosane, azampima asama antani'neno ana eri'za ne'mo'ma asami'nea kema ome asamigeno nentahino'a, Lebani'a vuno ome keana tinkerire ana ne'mo'a kemori afu'zagane oti'negeno ome ke'ne. <sup>31</sup> Lebani'a ana nera asamino, Ra Anumzamo'a asomu hugantene'moka no agu'afi emarerio. Nahigenka fegira mani'nane, noma masesana zane kamorimokizmi kuma'enena nagra ko erise hunte'noe. <sup>32</sup> Hagi ana ne'mo'ma nompima marerigeno'a, anante Lebani'a kemori agumpinti fenoma'a erinenteno, osapa trazane ne'zane kemorimofona nezmino, agia sesehu ti tagi zamige'za agrane e'naza vahe'ene zamaga sese hu'naze. <sup>33</sup> Ne'za kre'za avuga eme antenentageno ana eri'za ne'mo'a amanage hu'ne, Kavera one'nena amafima e'noa zamofo agafa'a tamasamite'na ne'zana negahue. Higeno Lebani'a anage hu'ne, Knareki tasamisanketa antahisune.

<sup>34</sup> Higeno ana eri'za ne'mo'a anage hu'ne, Nagra Abrahamu eri'za ne'e'noe. <sup>35</sup> Ra Anumzamo'a tusiza huno ozafa'nimofona asomu hunentegeno afufeno ne' mani'ne. Ra Anumzamo'a sipisipima, bulimakaoma, silvama, golima, eri'za vene'nema, eri'za a'nema, kemorima, donkima huno ami'ne. <sup>36</sup> Hanki kva'nimofo nenaro Sera'a tavavateteno ne'mofavre kase amigeno, kvanimo'a mika zama'a ana mofavremofo ami vagare'ne. <sup>37</sup> Kva'nimo'a huvempa hunanteno, amama eman'i'noa Kenani vahe'mokizmi mopafintira ne' mofavreni'arera ara avre omigahane huno hu'ne. <sup>38</sup> Hianagi vunka

nenfa mopa agafareti, vahe'ni afinti ara ome avrenka ne' mofavreni'a eme amio. <sup>39</sup> Hige'na nagra kva'nimofonkura anage hu'noe. Ana a'mo'ma navaririno omenke'na na'a hugahue? <sup>40</sup> Hugeno agra huno, nagrama amage'ma nentoa Ra Anumzamo'a, Agra ankerö vahe'a huntenkeno kagrane nevina, kama vanana kamo'a knare hanigenka, vahe'ni'afinti nenfa napapinti ne'nimofo ara uvregahane hu'ne. <sup>41</sup> Hagi kagrama nagri vahepima vananke'za, ana a'ma onkamisnageno'a, nagrama huvempa hu'noa kemo'a kaze'origahie.

<sup>42</sup> Hige'na nagra tinkerire enehanati'na amanage hu'na nunamuna hu'noe, Ra Anumzamoka kvanimofo Abrahamu Anumzamoka naza nehanankeno kama e'noa kamo'a knare hugahianki, <sup>43</sup> amare nagra oti'na tinkerire mani'nesnugeno, ina mofamo'o ti afiku'ma esanige'na ana mofaku hu'na, muse (plis) hugantoanki tina kavoka'afintira osi'a namige'na na'neno hanugeno, <sup>44</sup> ana mofamo'ma nasmino, tina nenege'na kemorikamokizmi tina afi'na eme zami'neno huno hanimo, kvanimofo ne'mofo ara Kagra hampri nentane hu'na antahigahue. <sup>45</sup> Anage hu'na nagu'afinka nunamuna nehugeno, Rebeka'a kavo afunte kofino tinkerireti ti afinaku uramigena kete'na, muse (plis) hugantoanki ti afi namige'na na'neno. <sup>46</sup> Hugeno kavo'a afuntetira ame huno anteme neramino amanage hu'ne, Tina nenege'na, kemorika'aramina tina afi zamineno huno hige'na, nenogeno kemori naga ra ti afizamige'za ne'naze. <sup>47</sup> Ana higena nagra anage hu'na antahig'e'noe, kagra iza mofa mani'nane? Hugeno Nahori nenaro Milka'ma kasentenea mofavre Betueli mofa mani'noe huno higena, agonafi rinia renente'na, asana azantrempi antaninte'noe. <sup>48</sup> Ana hute'na kepri hu'na Ra Anumzamofona mono hunte'noe. Ra Anumzamofona agi ahesga hu'na, kvanimofo Abrahamu Anumzamo'a kva hunantege'na kvani'mofo afu'aganampinti ne'amofo ara kena erifore hu'noe. <sup>49</sup> Hagi menima kva'nimofoma antahimisuta, na'ane huna ome asamigahufi nasami fatgo hiho. Hagi anama osanuta nasaminke'na, nagra nentahi'na, nazano hunaku'ma haňua zana ha'neno.

<sup>50</sup> Anage hige'ne Lebanike, Betuelikea ana kemofo nona'a anage huke asami'na'e, Ra Anumzamo amanahu'zana higu, tagra mago kea osugahu'e. <sup>51</sup> Rebeka'a ama kavuga mani'neanki, Ra Anumzamo'ma kema hiaza hunka avrenka vugeno, kva kamofo ne'mofo nenaro'za ome hino. <sup>52</sup> Hagi Abrahamu eri'za ne'mo'ma ana kema nentahino'a, kepri huno mopafi rena reno Ra Anumzamofona muse hunte'ne. <sup>53</sup> Abrahamu eri'za ne'mo'a avasese hu'zana silvare'ene, golire tro hu'naza zane, kukanane Rebekana nemino, ana zanke huno mago'a knare'nare zantamina zago'amo mareri'nea zana nesarone, nererane zanami'ne. <sup>54</sup> Ana hutege'za ana eri'za ne'e'ne agrane e'naza naga'mo'zanena kave'ene tinena nete'za mase'naze. Ko'atige'za o'neti'za nanterampi Abrahamu eri'za ne'mo'a amanage huno zamasmi'ne, Nazeorita natrenke'na ete kvanimo'ma maninerega va'neno. <sup>55</sup> Hianagi nempu'amo'ene nererakea anage hu'na'e, A'o, atrenkeno mago'agna maniteno, 10ni'agna nazana agaterete'na avreta vugahaze. <sup>56</sup> Hianagi eri'za ne'mo'a huno, Ra Anumzamo naza higeno eri'zanimo'a knare hianki, nazeri onteta natrenke'na ete kvanima mani'nerega va'neno. <sup>57</sup> Higene, ana mofa'mofo avesi antahigeta kesune, <sup>58</sup> nehu'za Rebekana ke hakeno ege'ne antahig'e'na'e, Kagra ama ne'enena vugahano? Hazageno ana mofamo'a huno, ozo vugahue. <sup>59</sup> Anagema hige'za zamagra nezmasaro Rebekama, kegavama hunentea a'ene, Abrahamu eri'za ne'e'ne, agranema

e'naza naga'ene ana makamokizmia huzmante'naze. <sup>60</sup> Rebekana asomu ke hunente'za amanage hu'naze, Tagri nersaroga, kagripintira tusi'a vaher kerfa fore hugahaze. Hagi kagri kagehe'za zamesi ozmantesaza vahemokizmi rankumazmi zamahet'za hanaregahaze. <sup>61</sup> Hagi Rebeka'ene mago'a agri eri'za a'nene kemori agumpi mareri'za, ana ne'mofo amage vu'naze. Higeno Abrahamu eri'za ne'mo'a Rebekana avreno vu'ne.

### *Aisaki'a Rebekana a' eri'nea naneke*

<sup>62</sup> Hagi ana knafina Aisaki'a Ber-lahai-roiti eno, Negev eman'i'ne. <sup>63</sup> Aisaki'a mago kinaga vuno hofage kopi umani'neno agesa antahi antahi nehuno kesga huno keana, kemori'zaga neageno ke'ne. <sup>64</sup> Rebeka'a kesga huno Aisakina negeno, kemori agumpinti eramino, <sup>65</sup> eri'za nekura amanage hu'ne, Aza amanu nera tavrenakura ne-e? Higeno eri'za ne'mo'a huno, E'i nagri kvani'e, higeno Rebeka'a tavrave erino avugosa refite'ne.

<sup>66</sup> Hagi eri'za ne'mo'a hakare zama hu'nea zana Aisakina asami vagare'ne. <sup>67</sup> Ana hutegen Aisaki'a Rebekana avreno nerera Sera seli nompi ome antegenen nenero'za higeno, avesintene. Aisakina nerera'a fri'nere amena eme arentinti hu'ne.

## 25

### *Abrahamu'a ru a' eri'nen o kasezmante'nea mofavre'mokizmi zamagi'amofo naneke*

<sup>1</sup> Abrahamu'a aru a' eri'neankino, agi'a Katura'e. <sup>2</sup> Ana a'mo kase zamante'nea naga'mokizmi zamagi'a Zimranima, Joksanima, Medanima, Midianima, Ispakima, Suama huno zamante'ne. <sup>3</sup> Joksan'i'a, Sebane, Dedanikizni neznafaza hu'ne. Hanki, Dedani mofavre nagara Asurimi'e, Letusimi'e, Leumimi'e. <sup>4</sup> Hanki, Midiani mofavre zamagi'a Efa'ma, Eferi'ma, Hanoki'ma, Abita'ma, Elda'ma, Ana maka'mo'za Katura agehe'za mani'naze. <sup>5</sup> Menina Abrahamu'a maka zama'a Aisaki ami'ne, <sup>6</sup> ana hu'neanagi henka eri'nea a'nemokizmi mofavre nagara, Abrahamu'a kasefa'ma mani'neno muse'za nezmino huzmanteg'e'za, Aisakina atre'za afete'are zage hanati kaziga umani'naze.

### *Abrahamu fri'nea naneke*

<sup>7</sup> Ama'i Abrahamu'ma mika zagegafu mani'neana, 175'a zagegafu hu'ne. <sup>8</sup> Abrahamu'a ozafarfa reteno hakare'a zagegafu hu'nea zanku muse ne-huno, vagare asimu anteteno frino naga'ane umani'ne. <sup>9</sup> Hanki Hiti mopa Zohari nemofo Efroni ami'nea mopa Mamre kaziga avugosa hunte'nefi agri mofavre Aisaki'ene, Ismaelikea Abrahamu fri kerfa eri'ne Makapela havegampi ome asente'na'e. <sup>10</sup> Abrahamu'a Hiti mofavremofo mopa miza hu'nea mopalni nenaro Serama asente'nefi Abrahamuna ome asente'na'e. <sup>11</sup> Hanki Abrahamu'ma fritegeno'a Anumzamo'a agri ne'mofavre Aisakina asomu huntogeno, Aisaki'a Ber-hai-roi mani'ne.

### *Ismaeli agehemofo naneke*

<sup>12</sup> Hagi Haga'a Isipi a'mo Sera eri'za e'nerino Abrahamunteti Ismaelina kasente'nea mofavremofo naga'mokizmi naneke. <sup>13</sup> Ismaeli mofavre naga'mozama ese'ma fore'ma hu'nazareti'ma vuno henkamofonte'ma vu'nea nagamofo zamagi'a ama'ne, Ismaeli agonesa mofavrea Nebaioti'e, Kedariki, Adbiliki, Mibsam'i'e. <sup>14</sup> Misma'ma, Duma'ma, Masa'e. <sup>15</sup> Hadadiki, Temaki, Jetuki, Nafisi'ma, Kedema'e. <sup>16</sup> Ama'i Ismaeli ne'mofavre nagamofo

zamagigiza, 12fu'a kva vahe'mo'za kva huzamantazage'za mago'mago kuma'zmire'ene, nagate nositera hu'za mani'naze. <sup>17</sup> Hagi ama maka Ismaeli'ma mani'nea zagegafu'a 137ni'a zagegafu huteno, vagare asimu anteno frino, fri'naza naga'anе umani'ne. <sup>18</sup> Hanki Ismaeli agehe'za Havilati mani'za Suri uhanati'naze, zage hanati'tega Isipi tvaonte, Asiri'a kaziga vu kamofo, zamagonaru'za zamagraku arure umani'naze.

### *Aisaki mofavre'mokizmi naneke*

<sup>19</sup> Hagi Abrahamu'a Aisaki nef'a'e. Aisaki'pinti fore hu'naza naga'mokizmi naneke. <sup>20</sup> Aisaki'a 40'a zagegafu huteno Rebekana Betueli mofa eri'ne, Lebani'a Aramea nekino, Mesopotamia mopareti ne'mofo nesaro erigeno, nenaro'za hu'ne. <sup>21</sup> Rebeka'a mofavre ontogeno, Aisaki'a Ra Anumzamo-fontega nenaro agi erino nunamu higeno, Ra Anumzamo'a nunamuma'a antahi'migeno, Rebeka'a amu'ene hu'ne. <sup>22</sup> Hianagi tare mofavreraremoke arimpafintira kanive nerakeno anage hu'ne, amazana na'a nehie, nehuno Anumzamofona antahige'ne. <sup>23</sup> Ra Anumzamo'a amanage huno asami'ne, Tare kumamoke krimpfafina mani'na'e, hiankino tare'mokea arure arure kavufgafinti vu'ne e'ne hugaha'e. Mago'mo'a hanavetina, mago'mo'a hanave otigahie. Ese'ma fore'ma hanimo'a, henkama fore hanimofo eri'za vahne manigahie.

<sup>24</sup> Hagi mofavrema kasente knama egeno'a, tare kugaveza mofavre arimpafi mani'na'e. <sup>25</sup> Kota mofavrema kasenteana, koranke avufgane antegeno hakare avufgamo'a azokake hu'nege'za, agi'a Iso'e hu'za ante'naze. <sup>26</sup> Hanki amefiga'a negna kasentegeno, Iso agiare azerino atiramigeno, agi'a Jekopu'e hu'za antemi'naze. Ana knarera Aisaki'a 60'a zagegafu hutegeno, nenaro'a mofavrea kase zanante'ne.

### *Isona nefama manuma rentesnia zankura antahi amne hu'nea naneke (Hibrus 12:16, 17)*

<sup>27</sup> Hagi ana mofavre'mokea nena hute'ne, Iso'a zagagafa hofa trampinti ahe ne' mani'negeno, Jekopu'a rimpfa frune kazone ne' seli nompi mani'ne. <sup>28</sup> Aisaki'a Isona avesinte'ne, na'ankure agrama zagagafa aheno eme amigeno nenea zankure. Hagi Rebeka'a Jekopu avesinte'ne.

<sup>29</sup> Hagi mago zupa Jekopu'a ne'zana negregeno, Iso'a trampinti agaku nehuno e'ne. <sup>30</sup> Iso'a amanage huno Jekopuna asmi'ne, Ame'ama hunka antu koranke migri (sup) ne'zana eri namige'na na'neno, na'ankure naganetege'na nehue. E'inama hu'nea agafare mago agi'a Idomu'e hu'za ante'naze. <sup>31</sup> Hagi Jekopu'a amanage hu'ne, Zage mofavremo eri asomura kota'zana nagri namitege'no. <sup>32</sup> Higeno Iso'a amanage hu'ne, Negano nagra fri'za nehuanki, zage mofavremo eri asomumo'a na'a hunantegahie? <sup>33</sup> Higeno Jekopu'a amanage huno asmine, Kotazana huvempa hutegeno, higeno agra huvempa hunteno zage mofavremo eriga asomura Jekopu ami'ne. <sup>34</sup> Jekopu'a bretine, lentol koheki huno amigeno neteno atreno vu'ne. Iso'a ese mofavremo'ma eriga asomu'agura antahi amneza se'ne.

## 26

### *Aisaki'ma Gerari mopare mani'nea naneke*

<sup>1</sup> Agatekna ko'ma Abrahamu knafi fore hu'neankna huno ana mopa-fina fore higeno, Aisaki'a Gerari kumate Filistia kini ne' Abimelek-intega vu'ne. <sup>2</sup> Ra Anumzamo'a agrite efore huno amanage huno

asmi'ne. Nagrama kasmisua mopare manigahananki, Isipia ovuo. <sup>3</sup> Ama mopafi mani'nege'nna, Nagra asomu hunegantane'na kagri'ene kagehe'ine ama mopa mika nerami'na, Nagrama huvempa negafa Abrahamuma hunte'noa kea eri knare ha'neno. <sup>4</sup> Nagra kagehe'ina zamazeri ra ha'enke'za monafi hanafi kna hanage'nna, Nagra ama mopa kagehe'i zamisugeno, kagehe'impinti miko kokankoka vahe'mo'za asomura erigahaze. <sup>5</sup> Na'ankure kema huankea Abrahamu'a amagenenteno Nagri kasegene tra ke'nianena avariri'ne. <sup>6</sup> Ana higeno Aisaki'a Gerari mopare mani'ne. <sup>7</sup> Ana kumate vahe'mo'za Aisakina nenaronku antahi kageno agra a'nimo'e huno huzankura koro nehuno Nensaro'e hu'ne. Hagi agrama agesama antahiana Rebeka'a vahe'mofo anunu hu'are mani'negeno, ana kumate vahe'mo'za ahezanku anage hu'ne. <sup>8</sup> Za'za kna anampi umaniteno, Aisaki'a nenaro Rebeka agazafe'negeno, Abimeleki'a Filistia kini ne'mo nomofo zaho eri kampinti ke'ne. <sup>9</sup> Anante Abimeleki'a, Aisakina ke higeno egeno, amanage huno asami'ne, Antahio, tamage huno ami kagri a' mani'ne! Nahigenka kagra nensaro'e hunka hu'nane? Higeno Aisaki'a amanage huno asmi'ne, Na'ankure agriteku hu'za vahe'mo'za nahe fri'zanku anagea hu'noe. <sup>10</sup> Higeno Abimeleki'a amanage hu'ne, Amazana naza hunerantane? Mago vahe'mo'ma neganaro'ene maseresina, kagra mago knaza eri tamisine. <sup>11</sup> Anage huteno Abimeleki'a hakare vahe mago kasege antezman-teno amanage hu'ne, aza'o ama nero, nenarono avako'ma hanimofona ahe frigahaze. <sup>12</sup> Hagi Aisaki'a ana mopafina avimaza hozafima hankre'neana ana kafufina 100'a agatereno hamare'ne. Ana higeno Ra Anumzamo'a asomu hunte'ne. <sup>13</sup> Ana higeno Aisaki'a feno ne' fore nehuno, mago'ene ra huno tusi'a feno anteno, mika feno ante agatere'nea ne' mani'ne. <sup>14</sup> Aisaki'a sipisipi zagane, memeki zagane, Bulimakaone, eri'za vahe'ene, rama'a ante'nege'za, Filistia vahe'mo'za zamasigu hunte'naze. <sup>15</sup> Ana hige'za mika tinkerima agri nefä Abrahamu eri'za vahe'mo'zama ko'makafimante'nazana, Filisti'a vahe'mo'za mopa kate'za refite'naze. <sup>16</sup> Hagi henka Abimeleki'a amanage huno Aisakina asmi'ne, Kagra tagrira tagaterenka hanave'nentake hananki, tagri'pintira atrenka vuo. <sup>17</sup> Hazageno Aisaki'a atreno Gerari agupofi seli no omegino anantega mani'ne.

### *Tinkerigu hafra hu'naza naneke*

<sup>18</sup> Hagi Aisaki'a eteno korapa Abrahamu kafinte'nea tinkeriramina eri so'e hu'ne. Na'ankure nefä'ma fritege'za Filistia vahe'mo'za refite'naza tinkeri raminkino, kafiteno nefä'ma ami'nea agi'aramina erikasefa huno antetere hu'ne. <sup>19</sup> Aisaki eri'za vahe'mo'za ana agupofi tinkeri nesageno, anampinti ti hanatino mareri'ne. <sup>20</sup> Hianagi Gerari afu kva vahe'mo'za, Aisaki afu kva vahera frage huzmante'za amanage hu'naze. Ama tagri tine! Hazageno Aisaki'a agi'a Eseki'e huno ante'ne. \* Na'ankure zama-gra frage hunante'nazagu hu'ne. <sup>21</sup> Aisaki eri'za vahe'mo'za mago'ane ru tinkeri nesageno, esaza hu'za Gerari vahe'mo'za fra vazizmente'naze. Fra vazizageno negeno, Aisaki'a ana tinkerimofona Sitne huno agia ante'ne. † <sup>22</sup> Aisaki'a ana tinkeria atreno ru tinkeri ome kafige'za, hafra huontageno, ana tinkerimofo agi'a Rehoboti'e huno nenteno anage hu'ne, ‡ na'ankure Ra Anumzamo'a tazahuno kankamuna retro hurante'neankita, ama ana

\* **26:20** Ana agimofo agafa'a anahure, frage hu'naze. † **26:21** Ana agimofo agafa'a anahure, hafra hu'naza tinkerie. ‡ **26:22** Knare huno maniso'e hu'ku mare.

mopare manineta, maka zampina knare hugahune. <sup>23</sup> Hagi Aisaki'a ana kumara atreno marerino Berseba kumate uhanati'ne. <sup>24</sup> Ana'ma uhanati'ne kenegera Ra Anumzamo'a efore humino amanage huno asami'ne, Nagra Abrahamu nafaka'amofo Anumzane, e'igu korora osuo. Nagra kagranne mani'nena asomura hunegantena henka'a kagripinti kegehe'za fore hanamoki'zminena zamazeri hakare hugahue. Na'ankure Abrahamu'a Nagri eri'za vahe mani'negu anara hugahue. <sup>25</sup> Hutegeno Aisaki'a ana kumatera Kresramana vu ita trohuno, Ra Anumzamofo agi hanta vazino ana kumateke seli no azeri onetige'za, Aisaki eri'za vahe'mo'za mago tinkeri kafi'naze.

### *Aisakike Abimelekike huvempa ke huke hagerafina'a naneke*

<sup>26</sup> Hagi Abimeleki'a Aisaki ome kenaku Gerari nevuno, magora knare antahintahi nemia ne' agi'a Ahusati'e, hanki magora sondia vahe'amofo kva ne' Fikoligizni neznavreno vu'ne. <sup>27</sup> Aisaki'a amanage huno zamatihige'ne, Ko'ma mopa tamifintira tamavesra hunanteta nahe nati'nazanki, tamagra na'anku nagritega neaze? <sup>28</sup> Higeno ana kemofo nona'a anage hu'naze, Ra Anumzamo'a kagranne mani'neno kaza nehigeta negeta, tagra anage nehune, Kagri ene tagri ene amu'notifina tamage hunka huvempa naneke hugeta kagranne, tagranena hagerfita mani'maneno. <sup>29</sup> Kagra, tagrira tazeri havizana osugahane. Tagra kazeri havizana kagrira osuta, trimpa frune hugantonkenka e'nane. Menina Ra Anumzamo knare huneganteno asomura hunegante. <sup>30</sup> Hazageno ana kezmia nentahino, Aisaki'a ra kave kre zamentege'za tine ana ne'zana ne'naze. <sup>31</sup> Nanterame oti'za raruma hu'za manisaza huvempagea hute'za, anante Aisaki'a huno, Tamarimpa frune viho, huno huzmanteg'eza vu'naze. <sup>32</sup> Ana'ma huzamanteg'eza vaza zupa, Aisaki eri'za vahe'mo'za amanage hu'za eme asmi'naze. Hago mago tinkerima kafinompintira tina fore hie. <sup>33</sup> Ana tinkerimofo agi'a Sibae huno ante'ne. § Meninena ana kumamo'a rahige'za Berseba kumare hu'za nehaze. <sup>34</sup> Iso'a 40'a zagegafu maniteno, Hiti ne'mofo mofa' eri'ne, agi'a Juditi'e, nef'a Beri'e. Hanki mago a'amofo agi'a Basematikino Hiti ne' Eloni mofare. <sup>35</sup> Ana a'tremokizni mani'zamo Aisakine Rebekaginzia zanarimpa zanata zanami'ne.

## 27

### *Jekopu'a revtaga higeno, Aisaki'a asomu ke hunte'nea naneke*

<sup>1</sup> Hagi Aisaki'a ozafarfa reno avua keso'e osuno zage mofavre'a Isonku amanage huno asami'ne, Mofavrenige, higeno ama mani'noanki nahie huno higeno, <sup>2</sup> Aisaki'a agra anage hu'ne, Menina antahio, nagra ozafare'na fri knania ontahi'noe. <sup>3</sup> Hanki ati keveka'a erinka hofa trampinti vunka, zaga-gafa ome ahenga eme namio. <sup>4</sup> Nagri'ma navenesia ne'za kre haga hunka eme namige'na nene'na, nagu'areti hu'na manu regantete'na, mani'nene'na henka'a frineno.

<sup>5</sup> Hianagi Aisaki'a nemofo Isoma asmia kea Rebeka'a agesa anteno antahiteno, Iso'ma trampinka zaga aheno eme krenteku nefreana, <sup>6</sup> Rebeka'a mofavre'a Jekopuna anage huno asami'ne, Antahio, negafa'a negfu Isonkura nentahugenno amanage huno asami'ne, <sup>7</sup> zaga ome ahenga kre haga hunka eme namige'na nene'na Anumzamofo avure manuna regantete'na fri'neno,

§ **26:33** Agafa'a anahure, hanavege huvempa huza hagerfi'naza tinkerie.

nehigena antahi'noe. <sup>8</sup> Hanki mofavre'niga kasmisua kea antahinka kema kasami'nua zana ome huo. <sup>9</sup> Menina vunka afu kevufintira tare agaho mementre ome avrenka eme namigena, negafama avenesia ne'za kre haga hugami'nena, <sup>10</sup> negafa'na erinka ome amisnankeno neteno, manu aregenteteno mani'neno frino. <sup>11</sup> Hianagi Jekopu'a kenona'a Rebekana huntenu, Antahio, nempunimo'a avufga azokake ne' manigeno, nagrira navufgarera nazokara ore'ne. <sup>12</sup> Hagi nafanimo'ma navako'ma huno'ma kesi'na, agri avufina nagra havige revatga nehu'na, nagra navufare manuna e'origahuanki, kna eri kofigahue. <sup>13</sup> Anage higeno nerera'a amanage huno asmi'ne, Kagri knazamo'a nagrite egahie. Mofavre'nimoka ke'nia erizafa hunka, vunka ome azerinka eme namio.

<sup>14</sup> Higeno ke hiazza huno tare mementre ome avreno nererante egeno, nefama avenesia kavera kre haga huteno, <sup>15</sup> Rebeka'a zage mofavre'a Iso knare kukena nompima me'neana erino Jekopu hankrente'ne. <sup>16</sup> Rebeka'a meme akru'a taga huno, tarega azantrempi antenenteno, azoka onte avuf-gare anankempi antente'ne. <sup>17</sup> Rebeka'a kave'ma kre haga huntea ne'zane, bretima tro'ma hunteana nemofo Jekopu eri ami'ne.

<sup>18</sup> Hagi Jekopu'a nafa'amofonte uhanitino amanage ome hu'ne, Nenfa'o, higeno nafa'amo amanage hu'ne, kama ama mani'noanki, Kagra izage, Ina mofavrenimoka nehane? <sup>19</sup> Higeno Jekopu'a amanage huno nefana asmi'ne, Nagra Iso'na zage mofavre kam'o'na, ke hunantanaza hu'na ne'za krerigante'na neoe. Muse (plis) hugantoanki otinka mani'enka erinka nezanka'a nenenka manurenanto. <sup>20</sup> Hianagi Aisaki'a nemofonku amanage huno asami'ne, Mofavre nimoka mensi hugantogenka vu'nananki, inankna hunka ame' hunka neane? Higeno Jekopu'a huno, Ra Anumzana, kagri Anumzamo naza huno eri fore hunamige'ne.

<sup>21</sup> Higeno Aisaki'a amanage huno Jekopuna asami'ne, Muse hugantoanki tvaonte ege'na Isoga mani'nampi kavufgare kavako hu'na ka'neno. <sup>22</sup> Higeno Jekopu'a nefaa tva'onte egeno avufgare azerino negeno anage hu'ne, Kagerumo'a Jekopu ageru kna nehie. Hianagi kazamo'a, Iso azankna nehie. <sup>23</sup> Aisaki'a ke so'e Jekopuna osu'ne, na'ankure azamo'a azokake huno nefu Iso azankna hu'negeno, Aisaki'a Jekopuna manua rente'ne. <sup>24</sup> Aisaki'a mago'anee amanage hu'ne, Tamage hunka kagra mofavreni'a Isoga mani'nano? higeno, Jekopu'a revatga huno, Izo nagra anane. <sup>25</sup> Hanki Aisaki'a anage hu'ne, Ana ne'za erinka eme namige'na nene'na manu reganta'neno, higeno ana na'zane, waini tine erino eme amigeno ne'ne. <sup>26</sup> Anante nefaa Aisaki'a nemofonku anage hu'ne, Muse (plis) hugantoanki mofavre'nimoka nagrite enka eme nantako huo. <sup>27</sup> Higeno Jekopu'a eazamo eme antako nehigeno, kena'reti'ma mana nevigeno nentahino'a, anante manu renenteno amanage hu'ne,

Ko, mofavreni'amofo mana.

E'i ana mnamo'a Ra Anumzamo hozamofo asomu huntogeno, nevia kna mana nevie.

<sup>28</sup> Nagri'ma navesiana, menina Anumzamo'a monafinkati ata kora kamisigeno,  
mopa aru fru hanigeno,  
ne'zamo'a hakare nehuno, raga nerenko kasefa wainimo'enena hakare  
hugahie.

<sup>29</sup> Veamo'za kagri eri'za e'nerisageno,  
maka moparegati vahe'mo'za kagri kagorga manigahaze.

Kagra kafuhe'ina razimi manigahane.

Negrera mofavre zagamo'za zamarena re'za kepri hugantesaze.

Kagri'ma sifna hugantesamo'za zamagranena sifna erigahaze.

Asomu ke hugante'samo'za, asomu erigahaze.

<sup>30</sup> Aisaki'a Jekopuna manu rente vagaregeno, Jekopu'a Aisakina anama atreno atirmino arugagino nevigeno, Iso'a zaga zantetira e'ne. <sup>31</sup> Agranena haga'ane ne'za tro huno nefante erino e'ne. Iso'a anage huno eme asmi'ne, Nafa'nimoka otinka negamofona zagagafa netenka, henka manuna renanto. <sup>32</sup> Hianagi Aisaki'a kenona hu'no, Kagra azage? Higeno agra amanage hu'ne, Nagra Iso'na zage mofavre kamo'ne. <sup>33</sup> Higeno Aisakina tusi'a ahirahi neregeno amanage hu'ne, Iza zaga aheno kreno eme namige'na nete'na, asomura huntogeno vigenka, kagra henka neane? Ne'zama'a eri'na nete'na ko'ma manu rente'noa manuna anante megahie. <sup>34</sup> Iso'a nef'a'ma hianeke nentahino tusiza huno rimpamo'a haviza nehigeno, tusiza huno zavira neteno nafa'amofona anage huno asmi'ne, nafa'nimoka! Nagri'enena ana zanke hunka manurenanto! <sup>35</sup> Hianagi Aisaki'a huno, Naganakamo havige eme renavatga huno kagri'ma kamiku'ma hu'noa asomura ko emerino vu'ne. <sup>36</sup> Higeno Iso'a amanage hu'ne, Jekopu'e hunka agima ante'minanana tamage, tare zupa nagri ku'ma eri'ne? Kota mofavremo'na asomura agra eri'ne, menina ko, nagri asomura agrake e'nerie. Hagi menina mago'a asomura eri'nampi manua renanto. <sup>37</sup> Higeno Aisaki'a Iso ke'are nona huno, antahio, Hago kva vaheka'a azeri oti'noe. Hakare naga'a eri'za vhahere hu'na huzmante'noe, ana nehu'na hozare kave'ene kasefa wainimo'ena agri azeri sga hugahie hu'na hunte'noe. Hanki mofavre'niga, nagra na'a hugantegahue? <sup>38</sup> Iso'a nefana anage huno antahigene, Nafanimoke, kagra magoke manuntfana eri'nano? Nagri'ene manurenantogu nehue, nafao huno nehuno Iso'a krafa huno tusi zavi ate'ne.

<sup>39</sup> Anante nef'a Aisaki'a kenona huno,

Antahio, kagra msavema'a omanesia mopafi manigahane.

Anagamu monafinkatira, ata'mo'a mopakafina eoramigahie.

<sup>40</sup> Ama mopare manisnanana ha' nehunka manigahane,

ana nehunka naganakamofo katoza humigahane.

Hinkenka mani rva osunka, agra kaomofo anankempi agare namare zafa anteno azeri kante nehiankna zafa knankempima ante'neana, kagra eri hantagi atregahane.

<sup>41</sup> Aisaki'ma Jekopuma manuma rente'nea zanku, Iso'a nagna'amofona antahi haviza huntenu asi vazinenteno amanage hu'ne, nafa'nimofonku'ma nasunku'ma hanua kna egofta hie. Hankina henka'a nagra naganani'a Jekopuna kegahue. <sup>42</sup> Rebekana zage mofavre'a Iso'ma hianeke eme asmi'zageno, anante mofavre'a Jekopuna agi higeno egeno anage huno asmi'ne, kama antahio, negafu Iso'a rimpaa ante fru huteno, kagrira kahe frinaku kea retro hie. <sup>43</sup> E'ina higu menina mofavre'nimoka keni'a erizafa hunka, otinka frenka Harani nensaro Lebani'ma mani'nerega vuo!

<sup>44</sup> Mago'a gna agrane umani'negeno, negafuna rimpaa ahezamo'a rava-heno. <sup>45</sup> Kagri'ma arimpa ahegante'neama fru huno agekanina, anante ke ha'nenkenka egahane. Hagi nankna hu'na tarega'motna'a magoke'zupa frisnake'na nasunkura hugahue?

**46** Anage nehuno Rebeka'a anage huno Aisakina asami'ne, Hiti vahemokizmi mofa'negura, nagrira navesra huno nagote nagesahie. Na'ankure Jekopu'ma Hiti vahemokizmi mofanefinti'ma a'ma erisiana, nankna huno knarerera mani'zanimo'a hugahie?

## 28

**1** Hanki Aisaki'a ke higeno Jekopu'a egeno asomu ke hunenteno, hankavenentake ke asamino amanage hu'ne, Kagra mago Kenani vahemokizmi mofara ara e'origahane. **2** Hanki otinka Padan-Aram moparega (Mesopotemia), Betuel nontega vu'o. E'i negrerana nef'a'e. Anantegati a'ka'a erisanana negrera nesaro Lebani mofanefinti mago mofa ara erio! **3** Ana'ma hanankeno'a Hankavenentake Anumzamo'a asomu huneganteno, kazeri hakare hugante'na tusi'a vahé fore hunka manigahane. **4** Nagri'ma navesiana Anumzamo Abrahamu hunte'neaza huno kagri'ene, mofavreka'ane asomu hugantesnie. Ama vanoma nehana mopa, Anumzamo'a Abrahamu ami'nea mopa eri nafa'a kagra hugahane. **5** Aisaki'a Jekopuna huntogeno Padan-Aram (Mesopotemia) Lebani nemofo Betueli Aramia ne'mofontega vu'ne. Rebeka'a Jekopune Isonena neznarera'e.

**6** Hagi Aisaki'ma Jekopuma asomu hunenteno Padan-aramuti a' erinogu huntogeno nevigeno hankavenentake ke asmino, kagra Kenani vahemokizmi mofa'nefintira ara e'origahane hiankea Iso'a antahine. **7** Hagi Jekopu'ma nefane nerera kema erizafa huno Padan-Aram vu'nea zamofo kenena keno antahino hu'ne. **8** Iso'ma keana nef a Aisaki'a Kenani mofa'negura musena osu'ne. **9** Ana higeno Iso'a Ismaelintega vuno a'nema zamante'nefi mago'ene a' omeri'ne. Ismaeli mofa agi'a Mahalati'e, Ismaeli'a Abrahamu nemofo'e. Mahalati'a Nebaioti nenunkna'e.

### *Jekopu ava'na ke'nea naneke*

**10** Hagi Jekopu'a Berseba atreno Harani kaziga vu'ne. **11** Nevigeno kantega zage ufreño hani ome higeno, have fita erinteno mase'ne. **12** Anante mase'neno ava'nama keana, mago latamo'a mopareti agafa huteno anagamu monafinka mareri'hogeno, Anumzamofo ankeromo'za ana latarera mareri'za tam'i'za nehazageno ke'ne. **13** Ana huno nezmagegeno Ra Anumzamo'a anante otino mani'neno anage huno asami'ne, Nagra negageho Abrahamune, negafa Aisakine Anumzane, Menima mase'nana mopa kagri'ene, kagehe'ine tamigahue. **14** Kagripinti'ma fore'ma hanaza vahem'oz'a kasepankna hu'za fore huhakare hu'za manigahaze. Zage fre kazigane, zage hanati kazigane, ruga raga agentega vu'za e'za hu'za mani titipa hu'za manigahaze. Kagri'ene kagehe'impinti ama mopafi vahem'oz'a asomura erigahaze. **15** Hanki antahio, Nagra kagrane mani'nena inantego vanoma hananana kva hunegante'na, ete kavre'na ama ana mopare egahue. Ana nehu'na Nagra onkatre'na, huvempama hugante'noa kea eri knare huvagaregahue.

**16** Higeno Jekopu'a avu'ma masenereti otino anage hu'ne, Tamage huno Ra Anumzamo'a amafi mani'negena nagra ontahi'noane. **17** Agra amanogu nehuno amanage hu'ne. Ama mopa ruzahu hu'nea mopare e'noe! Ra Anumzamo mani'nea nompi e'noankino, ama mona kafa me'n'e. **18** Jekopu'a nanterame otino, fita aruno mase'nea havea erisga huno retru renteteno, masve tagino agofetu frenteno eri ruotge hunte'ne. **19** Agra ana kumakura

Beteli'e huno agia antemi'ne. \* Korapara ana kumamofo agi'a Lusie huno me'neane.

<sup>20</sup> Jekopu'a amanage huno huvempa hu'ne, Afete kama nevanugen Anumzamo'ma nagrane nevuno nagu'vazino ne'za ni'anekukena'n'i'aneku nazama nehanigeno, <sup>21</sup> mago knazamo navate'ma omesanige'na, nafa'nimofo kumate ete rukrahe hu'na uhanatisu'na, Ra Anumzana nagri Anumzane hu'na hugahue. <sup>22</sup> Ama havema eri retruroana, Anumzamofo no mesie. Mika'zama Anumzamo'ma namisifintira 10ni'ma hania kevua refko hu'na Anumzamofo amitere hugahue.

## 29

### *Jekopu'ma Lebani kumate uhanati'nea naneke*

<sup>1</sup> Jekopu'a masetere hume vuno, zage hanati kaziga vahe'mofo mopafi uhanati'ne. <sup>2</sup> Agra kesga huno trazampi keana, tinkerire tagufa afu kevu masenageno ke'ne, ana tikerireti sipisipiramina tina afi'za nezmize. Hanki ana tinkerimofo agitera ra have runkani rente'naze. <sup>3</sup> Anante mika sipisipi kva vahe'mo'za utru hute'za, kerimofo agiteti havea atufe ante'ne'za, tina afi'za sipisipi zamia zamite'za, ete ana havea atufe'za ana kerimofo avazare runkani rentetere nehazane.

<sup>4</sup> Hagi Jekopu'a zamagrikura amanage hu'ne, Nafuheta tamagra igatire? Hige'za kenona hu'za, Tagra Haranitire. <sup>5</sup> Hazageno Agra amanage huno zamasmi'ne, Nahori negeho Lebanonina ke'nazo? Hige'za zamagra kenona amanage hu'naze, Tagra agrira ke'none. <sup>6</sup> Hazageno Jekopu'a zamagrira amanage huno zamasmi'ne, Lebani'a knare huno mani'ne? Hige'za zamagra hu'za, Agra knare huno mani'ne. Hanki antu ko, agri'mofa Resoli'a sipisipi zaga'ane ne-e. <sup>7</sup> Hazageno Jekopu'a anage huno zamasmine, Keho, zagea anamifi megeno afu'zagarami eritru hukna omane'neanki, sipisipi afuzaga tina nezmita zamavareta vinke'za trazana ome neho, huno nehige'za, <sup>8</sup> zamagra amanage hu'naze, E'inahura osu'nenukeno mika'a emetru hute'nageta, tinkeriretira have avaza'a eritreta tina afi za-misunke'za negahaze.

<sup>9</sup> Hagi Jekopu'a nanekea zamagrane nehigeno, Resoli'a agra sipisipi kva nehia mofakino, nefu sipisipi zamavareno e'ne. <sup>10</sup> Jekopu'a nenogo Lebani mofa Resoli'ma sipisipi'ane ne-egeno, negeno vuno tin keriretira havea ome rekrehu huno, nerera nesaro Lebani sipisipia ti afizmi'ne. <sup>11</sup> Anante Jekopu'a Resolina antako hunenteno, ranke huno zavi ate'ne. <sup>12</sup> Jekopu'a Resolina amanage huno asamine, Nafakamofo nesaro Rebeka mofavre mani'noe, higeno Resoli'a agareno vuno nefu ome asmi'ne. <sup>13</sup> Hanki Lebani'a nesaro mofavre nenogo neneke nentahino'a, ome ke'naku agareno vuno, ome anukino antako hunenteno avreno noma'afi e'ne. Ana higeno Jekopu'a hakare'a kea asami vaga'rene. <sup>14</sup> Ana hutegeno Lebani'a amanage huno asami'ne, Kagra nagri kora mani'nane. Higeno Jekopu'a anante mago ika agrane mani'ne.

### *Jekopu Lebani eri'za enerino Resoligizni Liagizni a' eri'nea naneke*

<sup>15</sup> Hagi Lebani'a amanage huno Jekopuna asami'ne, Kagra nagri kora mani'nankure hunka amne eri'zana e'origahane. Nama'a kagrira miza hugantegahufi nasamio? <sup>16</sup> Lebani'a tare mofatre zanante'ne, kotamofo agi'a Lia'e, osi'mofo agi'a Resoli'e. <sup>17</sup> Lia avurgamo'a kazakiri'ne, hagi Resoli

\* <sup>28:19</sup> Anumzamofo none huno agra'a kefi nehuno Betel huno ante'ne.

avurgamo'ene, avufgamo enena knarezantfa hu'ne. <sup>18</sup> Jekopu'a Resolina avesinenteno amanage hu'ne, Nagra 7ni'a kafufi mofaka'a Resolima a'ma erinte'nakura erizanka'a erigantegahue. <sup>19</sup> Higeno Lebani'a amanage hu'ne, Ru vahe ami'zankura kagri'ma kamisuana knare hu'neanki nigrane manio. <sup>20</sup> Jekopu'a 7ni'a zagegfufi Resolima a'ma erikura eri'zana eri'neankino, ana knamo'a agritera osi knasente'ne. Na'ankure agrama Resolima avesinte'negu anara hu'ne.

<sup>21</sup> Hagi henka ana knamo'a vagaregeno Jekopu'a amanage huno Lebanikura hu'ne, Knama nami'nana knamo'a hago vagareanki, a'ni'a namige'na ara eri'neno. <sup>22</sup> Higeno Lebani'a ana kumate vahera miko zamare tru huno, aravema hu ne'za kre'ne. <sup>23</sup> Ana kenegera Lebani'a Lia avreno Jekopu ome amigeno anteno mase'ne. <sup>24</sup> Lebani'a eri'za erinentea a' Zilpa avreno mofa'a Lia katoza huminogu eme ami'ne. <sup>25</sup> Hanki Jekopu'a maseno kotigeno nanterama keana Lia mani'negeno keteno, agra amanage Lebanikura hu'ne, Resolinte eri'zana eri kantenoanki, kagra na'a amazana hunantane? Nahigenka renavatga hane? <sup>26</sup> Anage hianagi Lebani'a ana kenona amanage hu'ne, Tagri kumapina nagna'amo nuna'amofo agatereno ve' eri'zana omene'ne. <sup>27</sup> Mago sonta manitegeta, tagra mago'mofona kamisnunkenza ara erigahananki, ete mago'ene 7ni'a zagegafu eri'zana eri'nanterego. <sup>28</sup> Higeno Jekopu'a mago sonta Lia'ene mani vagare'tegeno, Lebani'a mofa'a Resolina avreno Jekopuna amigeno nenaro'za hu'ne. <sup>29</sup> Lebani'a, katozama'a e'neri a' Bilhana avreno Resoli katoza eri aminogu ami'ne. <sup>30</sup> Hanki Jekopu'a Resolina anteno mase'ne, agra Liama avesi nenteama'a agatereno Resolina tusiza huno avesintene. Agra ana nehuno Lebanina erizana 7ni'a zagegafu erinte'ne.

### *Jekopu mofavremokizmi naneke*

<sup>31</sup> Hanki Ra Anumzamo'ma keana Jekopu'a Liana avesi ontegeno, Anumzamo'a rimpa eri vasne'ne, ana hianagi Resoli'a narvo a' mani'ne. <sup>32</sup> Lia'aamu'ene huno ne' kasenteno agi'a Rubeni'e huno nenteno anage hu'ne, Na'ankure Ra Anumzamo natazani'a nazeri knare hiankino, nenave'a avesi nantegahie. \* <sup>33</sup> Anante Lia'a mago'ene amu'ene huno ne' kasenteno amanage hu'ne, nenave'a avesi onantegeno Ra Anumzamo antahi namin mago'ene ama mofavrea nemamie, nehuno Simioni'e huno agia antemi'ne. <sup>34</sup> Anante Lia'a amu'ene huno ne' kasenteno amanage hu'ne, Menina ama knarera, nenave'a tvaonire manigahie. Na'ankure nagra tagufa ne'mofavre kase amue. Ana hu'negu agi'a Levi'e huno antemi'ne. <sup>35</sup> Anante Lia'a mago'ene amu'ene huno, ne'mofavre kasenteno amanage hu'ne, Menina nagra Ra Anumzamofo agi'a erisga hue. Ana hu'negu agi'a Juda'e hu'ne. Ana huteno ana a'mo'a mago'ene mofavrea onte'ne.

## 30

<sup>1</sup> Resoli'a mofavrea Jekopuna kase omino nuna'amofo kaniverenenteno, amanage huno Jekopuna asami'ne, Mofavre onte manine'na frisugi, Mofavre eri fore hunamio. <sup>2</sup> Higeno Jekopuna asi vazigeno Resolina rinkfa henenteno amanage hu'ne, Nagra Anumzana omani'noanki, aza karimpa erikigenka mofavrea kamu'enena hunka kasenontane. <sup>3</sup> Higeno Resoli'a

\* <sup>29:32</sup> Jekopu a'nero'za kase zamante'naza mofavre'mokizmi zamagimofo agafa'a ana vesifi metere hu'neanki refko huta keho. Hanki mago'a agimo'a, zamagi ante'naza kante tavao hukna hu'ne. Zage mofavre'amofo agima Rubeni'e huno ante'neana, Anumzamo knazani'a negeno ne'mofavre nami'ne, hu'ne.

amanage hu'ne, Kato mofani'a Bilha'a ama mani'neanki, antenka masegeno mofavre kase naminkeno, agripinti nagranana ana zanke hu'na mofavrea eri fore haneno. <sup>4</sup> Anage nehuno kato mofa'a Bilhana amigeno anaroza higeno, Jekopu'a anteno mase'ne. <sup>5</sup> Ana higeno Bilha'a Jekopunteti amu'ene huno ne'mofavre kasente'ne. <sup>6</sup> Resoli'a amanage hu'ne, Anumzamo'a fatgoza hu'nane nehuno, nunamuni'a antahinamino ne'mofavre namie. Nehuno agi'a Dani'e huno ante'ne. <sup>7</sup> Resoli kato mofa Bilha'a ete mago'ene amu'ene huno Jekopuna ne'mofavre kase amigeno tare se'ne. <sup>8</sup> Resoli'a nevreno anage hu'ne, nuna nimofona tusiza hu'na kruno renente'na agateroe. Anage nehuno ana mofavremofo agi'a Naftali'e huno ante'ne.

<sup>9</sup> Hanki Lia'a mago'ene mofavre onte mani'neno keana higeno, kato mofa'a Zilpana avreno Jekopu nenaroza hinogu eme ami'ne. <sup>10</sup> Lia kato mofa Zilpa'a Jekopuna ne'mofavre kase ami'ne. <sup>11</sup> Anante Lia'a amanage hu'ne, Na knare'za hue, nehuno agi'a Gati'e huno antemi'ne. <sup>12</sup> Lia kato a'mo Zilpa'a ne'mofavre Jekopuna kase amigeno tare se'ne. <sup>13</sup> Ana higeno Lia'a anage hu'ne, Nagra muse huankino, a'nemo'za muse hu'mo'e hugahaze. Nehuno Asa'e huno agi'a antemi'ne.

<sup>14</sup> Witi taga hu'za eme vatu nehaza knare, Rubeni'a vano hiregati mago'a rone hunte flaua raga (Mandrake) erino nerera Lia hirega e'ne. Higeno Resoli'a amanage huno Liana antahige'ne, Muse (plis) hugantoanki Rubeni'ma rone hu flaua'mofo raga'a eme kami'nefintira mago'a namio. <sup>15</sup> Hianagi Lia'a amanage hu'ne, Kagrama nenavema hanre'nanana, e'i osi zampi? Hutenka menina ne' mofavrenimo'ma ronema hu flauama erino'ma e'nea erisue hunka nehano? Higeno Resoli anage hu'ne, Ha knarere, ana ronehu flauama namisana nona'a Jekopu'a meni kenage kagrane emasegahie. <sup>16</sup> Higeno ana zupa kinaga Jekopu'a hozaregati ne-egeno, Lia'a kantegati ome nevreno anage huno asmi'ne, mofavre'nimo'ma rone hu flauama erino e'nea flauateti Resolina nemina, kagrira ko miza se'noanki, kagra enka nagrane emasegahane. Higeno ana kenege Jekopu'a Lia'ene umase'ne. <sup>17</sup> Anumzamo'a Leana antahi amigeno, amu'ene huno 5fu'mofona ne'mofavre Jekopu'na kase ami'ne. <sup>18</sup> Lia anage hu'ne, Anumzamo'a mizani'a namie, na'ankure eri'za mofani'a nenave avre amugeno anteno masegeno mofavre kase nami'ne. Huteno agi'a Isaka'e huno antemi'ne. <sup>19</sup> Lia'a Isaka amageteti amu'ene huno 6simofona ne'mofavre Jekopuna kase ami'ne. <sup>20</sup> Lia'a anage hu'ne, Anumzamo'a mareri'nea miza muse hunanteno nami'neankino, menina nenave'a nagrira antahinamigahie. Na'ankure 6si'a ne'mofavre kase amue. Nehuno agi'a Zebuluni'e huno ante'ne. <sup>21</sup> Henka'a Lia'a Zebuluni amagetetira mofara mago anteno agi'a Daina'e hu'ne. <sup>22</sup> Ananteria Anumzamo'a Resoli nunamuna antahi'nemino mofavre ante ku'a eri vasanente'ne. <sup>23</sup> Ana higeno amu'ene huno ne'mofavre kasenenteno anage hu'ne, Anumzamo'a nagaze zana eri amne hunante huno nehuno, <sup>24</sup> agi'a Josefe'e huno antenemi'no anage hu'ne, Anumzamo'a ne'mofavrea mago'ene namisie.

### *Jekopu'a Lebani'ene keaga hu'na'a naneke*

<sup>25</sup> Hagi Resoli'a Josefema kasentetegeno Jekopu'a Lebanina amanage huno asami'ne, nonkuma'niare mopani'arega vunaku huanki hunantegena va'neno. <sup>26</sup> A'neni'ane mofavre nagani'ane zamagriku hu'na eri'zanka'a eri'na e'noanki natregena va'neno. Hagi kagrake'za eri'zama erigante'noa zana kenka antahinka hu'nane. <sup>27</sup> Hianagi Lebani'a amanage huno

Jekopuna asami'ne, Nagrama kasnampa hu'na kagri'ma kagoana, nagrane mani'nankeno Ra Anumzamo'a kagriku huno asomura hunenante. Hagi menima kagrama kavesi nantesunka nagrane manio. <sup>28</sup> Nehuno Lebani'a ru'ene kea avazu huno anage hu'ne, Kéma hananama'a ana avamente kamigahue. Hagi miza agi ahenanto. <sup>29</sup> Higeno Jekopu'a amanage huno asami'ne, nagrama eri'zanka'a eri'na neogeno maka afukamo knareke huno e'neana, kagra kenka antahinka hu'nane. <sup>30</sup> Nagrama ome'ngenoka, kagra osi'a sipisipi afuzaga ante'nananagi, nagrama erua eri'zampi Ra Anumzamo'a asomu hugantegeno rukazi huno rama'a fore hu'ne. Hagi ina zupa natre'nankena a' mofavreni'a zamaza hugahue? <sup>31</sup> Higeno Lebani'a amanage huno Jekopuna asmi'ne, Na'a nagra kamigahue? Higeno Jekopu'a anage hu'ne, Kagra mago zane hunka onamigahane. Kagra magoke zantfa nagrira hunantegahane, nagra mago'ene afuzagaka'a traza me'nesirega kegava hugantegahue. <sup>32</sup> Hagi menina natrege'na maka afu zagaka'a mani'nafi vano nehu'na, tupri tapri sipisipine, aganumpa lama anenta'ma tegre ramine'niane, tupri tapri hu'nenia memene avre rure ha'enkeno, e'i ana afu'zagamo nagri miza megahie. <sup>33</sup> Henka mizama naminaku banana zupa, havigema hu'zankura e'i anamo eriamma hunantegahie. Hakare'a agrono kre ramineni'ane, tupri tapri osu'nenia memempi, aganumpa osu'nenia lama anenta'enema, nagri afupima kenunka kumzafa se'nane huo. <sup>34</sup> Higeno Lebani'a amanage hu'ne, Ha knareki, kema hanaza huo. <sup>35</sup> Higeno ana zagekna zupage, agra'a Lebani'a vuno maka'a agrono krerami'neane, tupri taprima hu'nea ve memene tupri tapri hu'nea a' memene, efeke hu'neana, aganumpa sipisipi afura avrezamige'za amohe'za afete'are ome ante'za kegava hu'naze. <sup>36</sup> Lebani'a Jekopuna atreno taregi magoki zagegna vu'are afete afu'zaga'a avreno umanigeno, Jekopu'a ruga'a afu'zagare kegava krino mani'ne. <sup>37</sup> Hianagi kegava huno mani'neno tagufa ruzahu ruzahu zafamofo azankunatmi akafrino, ukari'za mago'a nehareneno nohareneno higeno efeke nehigeno, tupri tapri hu'ne. Ana zafa ukari'ma haregeno'a efeke hu'ne. <sup>38</sup> E'i ana zafa azankunatamina erino vuno sipisipine mememo'za ti nenazare zamavuga ana zotaramina mopafi ome rentetere hu'ne. Hagi tima nenaku esanu'za eme nege'za ve afu'moza a' afu'tamimofo zamagumpi marerihogu anara hu'ne. <sup>39</sup> Hanki e'i ana zafa azankunatamina rente'nea tva'ontema ve afu'mo'ma a' afumofo agumpima marerinkeno'a, ana afu'mo'a tupri tapri azoka'ene anenta antegahie. <sup>40</sup> Hanki Jekopu'a tupri tapri' azoka'ene ve afu'zaga agra'a suza refko huganti netreno, aganumpa ve afuzaga zamatrege'za Lebani afuzagafi mani'naze. <sup>41</sup> Hanki hankavenetake ve afu'zagamo'zama a' afumokizmi zamagumpima marerizama nehzageno'a, Jekopu'a ana zafa azankuna zamavuga tinkampi arentetere hu'ne. Ana hige'za zafa azankuna rente'nea tava'onte agumpina marerititere hu'naze. <sup>42</sup> Hianagi hankave'a omane'nea ve afu'zagamo'zama, a' afu'mokizmi zamagumpima marerizama nehzageno'a, Jekopu'a ana zafa azankunatamina zamavuga ome reonte'ne. Hagi hankave'a omne'nea afu'zaga e'i Lebani afu'zagagi, hanave afu'zaga Jekopu suzane. <sup>43</sup> Ana nehuno afu'amo hakare higeno, eri'za vene a'ene, kemorine, donkine, hakare'aza nenteno Jekopu'a feno ne'efore hu'ne.

<sup>1</sup> Lebani mofavre naga'mo'za agriku'ma nehaza ke'ma Jekopu'ma antahi'neana amanage hu'naze, Jekopu'a nerafa zana maka eri vaganereno, nerafa zanteti agra feno vahe fore huno manie. <sup>2</sup> Hanki Jekopu'a Lebani avu'ava'ma keana ko'ma nehiaza osuno, avugosa hunenanteno ha'vahe'mo hiaza hu'ne. <sup>3</sup> Ana nehigeno Ra Anumzamo'a anage huno Jekopuna asmi'ne, Nagra kagrane manigahuanki ete negafane vahek'a' moparega vuo. <sup>4</sup> Higeno Jekopu'a ana kema nentahino'a afu'zagama zamavareno ome zamate'nom a mani'nerega e'ogu, Resoline, Liagiznirega ke atrezantegeke, <sup>5</sup> anante akeno amanage huno zanasmi'ne, neranafa'a ko'ma nehiaza huno nagranena kiza zokago huno menina omarie. Hagi avugosamo'a ruzahu nehige'na negoe. Hianagi nenfa Anumzamo'a nagrane mani'ne. <sup>6</sup> Nagrama neranafa eri'zama tusi namu'na sisi nehige'na hanaveni'a atre'nama eri'noana, tanagra nageta antahita hu'na'e. <sup>7</sup> Anama hu'nogura agesa ontahino, renavatga huno mizani'a 10ni'a zupa eri antenaga henka hu'ne. Hianagi Anumzamo'a atregeno nazeri havizana osu'ne. <sup>8</sup> Kora Lebani'a amanage huno nasmi'neane, maka'a tupri tapri azoka'ene afu'zaga eri'za enerina mizanka'e, higeno tupri tapri ke'za fore hu'ne. Hagi agrono tegre ramira mizanka'e hiana, anazanke hu'ne. <sup>9</sup> E'ina higeno Anumzamo'a neranafa azampintira memeramine, sipisipiramine, rama'a nagri avre nami vagare'ne. <sup>10</sup> Hanki afu'zagamo'ma agafima ahea knafi amanahu ava'na ke'noe. Maka'a ve mememofo avufgarera tupri tapri ene agrono krerami krerami hu'nea azoka me'nege'na negogeno, a' mememofo agumpina mareri'ne. <sup>11</sup> Anumzamofo ankeromo'a ava'nafi amanage huno nagia ahe'ne. Jekopu! Hige'na ama mani'noe hu'na hugeno, <sup>12</sup> Anumzamofo ankeromo'a amanage hu'ne, tupri tapri'ene avon krerami'nea ve meme zagamo'a a' meme agumpima marerime neviana, kesga hunka ko, Lebani'ma maka'a avu'ava zama hunegante'mofona, Nagra ko ke'noe. <sup>13</sup> Nagra Bete-lima efore'ma hugenka have eri atru hunka masave taginka frenentenka navufi hvempa hu'nana Anumzamo'na nehuanki menina otinka ama kumara atrenka, fore'ma hu'nana kumatega vuo huno hu'ne. <sup>14</sup> Higeke Resolike, Liakea ana naneke nentahi'ne, amanage hu'na'e. Tagra nerafa afu fenompintira mago'zama erisu'a zana huhampri orante'neanki, na'a hugahu'e? <sup>15</sup> Hagi nerfa'ko hurantegeta ruregati emanı vahe kna hu'noe. Tagrira ko mizante tat're'ne, Tagriteti afufeno eriana ko ana afu fenona atre hana hu'ne. <sup>16</sup> Tamage nerfa azampinti Anumzamo'a maka zana kagri hanare kamiana, e'i ana maka zana tagri'ene mofavre'tine suzane. E'ina hu'negu Anumzamo'ma kasami'niazza huo. <sup>17</sup> Hagi Jekopu'a maka a'mofavre'a, kemori afutamimofo zamagumpi zamavarentere ne-huno, <sup>18</sup> maka'a afu'ane, fenoma'ane emanı'neno eritru hu'nea zana zogi hana huno Padan-Aram mopa atreno, Kenani moparega nefä Aisaki'ma mani'nerega vu'ne. <sup>19</sup> Hagi Lebani'a afete umani'neno, sipisipi azoka neharegeno, Kenanima vunaku'ma retrotra nehazageno'a, Resoli'a nompi marerino Lebani'ma havi anumzante mono hunentea zana, musufa seno erino vu'ne. <sup>20</sup> Jekopu'a Arameania nera Lebanonina osami revatga nehuno freno vu'ne. <sup>21</sup> Jekopu'a maka zama'a enerino otino fre'no vuno, Yufretis tina takaheno Gileati agonarega avugosa hunteno vu'ne.

### *Lebani'a Jekopu arotgo huno vu'nea naneke*

<sup>22</sup> Hagi taregna evutege'za anante knazupa mago'a vahe'mo'za, Jekopu'a hago katreno fre'ne hu'za Lebanonina ome asami'naze. <sup>23</sup> Lebani'a ananke

nentahino naga'a nezamavareno Jekopuna arotgo hu'za vu'naze. Hagi agene re'nazana 7ni'a hanine, zagene karanka mase'naze. Hagi Jekopu'a Gileati agonafi mani'nege'za ome azeri'naze. <sup>24</sup> Hianagi Anumzamo'a Arameanu ne' Lebanonina kenage ava'nafi efore humino anage huno asami'ne, Kva huo, Jekopuna magore hunka so'e kefi havigea huonto. <sup>25</sup> Jekopu'a seli no omegino agonafi mase'negeno, Lebani'a ana agonafi Jekopu'a ome azeri'ne. Hagi Lebani'a vahe'ane mago kaziga seli no omegino, Gileati agonafi mase'naze. <sup>26</sup> Lebani'a anage huno Jekopuna asami'ne, Kagra nahigenka renavatga hutenga mofani'ararena hapinti kina huzmante'za zamavare'za frazankna hunka zamavarenka e'nane? <sup>27</sup> Nahigenka okura frenka renavatga hu'nane, nasmink'e nasinia, muse nehu'za tambori'nine, zavena nehe'za hugantagenka tarenka asine. <sup>28</sup> Hagi nahigenka nasmink'e na nagehe'ine, mofani'ararena zamantako nehu'na huso'e huzmantogenka zamavarenka ome'nane? Kagra mago kefo avu'avaza hu'nane. <sup>29</sup> Nagrira hanaveni'a me'neankina, kagrira ha' kahenaku e'noanagi, meni kenagera masenogeno negafa Anumzamo'a amanage huno nasmi'ne, Jekopuna azeri koro osuo, magore hunka havi keo, so'e keo huonto huno nasmi'ne. <sup>30</sup> Nagra antahi'noe natrenka'ma anana, na'ankure negafa nonku tusiza huno kvenesigenke. Hianagi nahigenka anumzani'a noni'afintira kumzafa senka e'nane? <sup>31</sup> Higeno Jekopu'a ana kemofo nona'a amanage huno Lebanonina asami'ne, Na'ankure nagrama antahuana hanavetinka mofa trenka'a hanaregahane nehu'na koro hu'na oku'a e'no'e. <sup>32</sup> Aza'o mago'mo'ma ana anumzanka'a erino e'nesnimofona hakrenka erifore hanankeno'a, anamo'a frigahie. Nege'nagenka nagati'amofo zamufi mago'a kagri zama nagri fenompima me'neniana erigahane. Hagi Resoli'ma musufa seno e'negura Jekopu'a ontahi'neno, anahu kea hu'ne. <sup>33</sup> Lebani'a, Jekopu seli nompi ome agafa huno hakretno, Lia seli nompi ome keteno, tare eri'za a' tremokizni seli nompi keme viana onke'ne. Ananteria Lia seli nona atreno Resoli seli nompi umarer'i'ne. <sup>34</sup> Resoli'a ana havi anumza erino vuno kemorimomo agoftetu ante'za nemaniza tra'mofo agu'afinka ome anteteno, agoftetu manino rentrako hu'ne. Hagi Lebani'a hakreno vano hiana keno eri fore osu'ne. <sup>35</sup> Resoli'a amanage huno nefana asami'ne, O'maotisnua zankura ranimoka kea onasuo, ika kri'ma enerua kna ege'na mani'noe. Lebani'a maka zampina hakreno keno eviana ana havi anumzama'a kefore osu'ne. <sup>36</sup> Jekopuna asi vazigeno ke ha' Lebanonina renteno, Lebaninkura amanage hu'ne, Nagra mago zanka'a eri haviza hu'nogenka amanahura nehano? Naza mago havizana hugante'nogenka navaririnka ne-enka, haha'ene kea hunenantane? <sup>37</sup> Nagri feno zama re'nanana, naza magora kagri zana nonka'afintira eri'na e'nogenka hakrenka erifore hane? Hakrenkama erifore hu'nenuka, tavufi eri atru hugeta, nagri vahe'ene, kagri vahe enena negeta eri fatgo ha'mneno. <sup>38</sup> Hagi 20'a kafumofo agu'afima eri'za erigante'hoana a' sipisipimo'o, a' mememoo magore huno anentara kase havizana, nosige'na ve sipisipi afu zagaka'afintira magore hu'na ahena one'noe. <sup>39</sup> Hanki afi zagamo'ma afu'zagama aheno nege'na, kagrira eme onkasami'na, ferupi kenagepi afu'zagafinti kumazafa sazage'na, nona'a nagra'a suampinti avre'na kegina ka'afi eme antetere hu'noe. <sup>40</sup> Ana nehu'na zage knafina zage hara tusiza huno nave'nesigeno, kenagera tusiza huno zasimo'a nazeri kragenege'e'na, magore hu'na navura mase so'e hutere osu'noe. <sup>41</sup> Hagi nagra kagri nompina e'inhau zana 20'a zagegafu hu'noe. Nagra 14ni'a zagegufu tarega mofaka'ama eri'nakura eri'zana eri'noe.

6si'a kafufina afu'zagaka'ama kegava hu eri'za eri'noe. Ana nehugenka mizani'a 10ni'a zupa eri fenka anaga hu'nane. <sup>42</sup> Hianagi nenageho Abrahamu Anumzama, nafa'nia Aisaki'ma koro hunenteno mono'ma hunentea Anumzamo'ma nagranema omani'nesina, antahuana kagra menina naza navapa hunantanke'na osine. Hianagi narimpa knazampi mani'noa zane hanave eri'zama eri'noa zanena Anumzamo'a nenageno, kenagera hanavetino nanekea eme hugantene.

### *Jekopuke Lebanike ke hagerfi'na'a naneke*

<sup>43</sup> Lebani'a ke nona amanage huno Jekopuna asmi'ne, Tare mofatrena nagri mofatre mani'na'e. Hanki mofavre zaga nagri mofavre zage, afu'zaga nagri afu'zage, maka zama neganana nagrike zane. Hianagi mofatreni'ane mofavrema kase zamante'na'ana menina nagra inankna huzmantegahue? <sup>44</sup> E'ina hu'negu menina egeta, naneke huvempa huteta, have zogita emeri atru huntesukeno amu'nonti'afi me'nena, henka ama ana avamezama negenuta'a, amama huhagerafu'a zankura tagesa antahitere hugahu'e. <sup>45</sup> Jekopu'a mago avame'za za'za have ome erino anante retrureno asenen-teno, <sup>46</sup> naga'a ke hige'za mago'ene havea eri'za anante kevu vazintete'za, ana have kevumofo tvaonte kave ne'naze. <sup>47</sup> Lebani'a ana havemofo agi'a Jegar-sahaduta'e huno Aramea kefina nehuno, Ama have atrumo huragesa hugahie huno ante'ne. Hianagi Jekopu'a Hibru kefina Galitie huno agi'a nenteno, ama have atrumo hu tagesa hugahie huno ante'ne. <sup>48</sup> Lebani'a amanage hu'ne, amama eritru hu'a havemo menina avame'za amu'nonti'afina megahie. Hu'ne nehu'ne ana havemofo agi'a Galitie hu'ne ante'na'e. <sup>49</sup> Ete mago agi'a Mizpae hu'ne ante'na'e. Lebani'a amanage hu'ne. Tagra afete mani'neta oge age osuta mani'neta maka avu'ava'ma hanu'ana, Ra Anumzamo agrake tagegahie. <sup>50</sup> Hagi kagrama mofa'nimokizni hazenke ati zanamige, mago ru a'ne erige hananana, amunonti'afina magora vahera omani'nazanki Anumzamo agrake tagegahie. <sup>51</sup> Lebani'a mago'ene Jekopuna anage huno asami'ne, Antahio, za'za havema asento'a negenka, amama otu'no'a amu'nontiafima eri atru hu'a havea ko. <sup>52</sup> Amama mani'neta huvempa huta asento'a havemo, amu'nontiafi me'nena, nagra ama ana havea agatere'na krimpa eri haviza hu'zana osugahue. Hagi kagra eri atru hunto'a havene, asento'a havene agaterenka narimpa eri havizana osuo. <sup>53</sup> Hagi Abrahamu Anumzane, Nahori Anumzane, nez-nafa Anumzamo amu'nontiafina refko hurantegahie. Hagi Jekopu'a nefu Aisaki'ma koro hunenteno mono'ma hunentea Anumzamofonte huvempa hu'ne. <sup>54</sup> Jekopu'a e'i ana agonafi Kresramana vu ne'za kreno Anumzamofonte ofa hunenteno naga'a zamagi hutru hige'za nete'za, ana agonafi mase'naze. <sup>55</sup> Lebani'a nanterame otino mofatrema'ane, agehe'ine nezmagatagino zamantako nehuno, asomu ke huzmante'ne. Ana huteno, Lebani'a kuma'arega ete vu'ne.

## 32

### *Jekopu'a Isonku koro hu'nea naneke*

<sup>1</sup> Jekopu'a kantega nevigeno, Anumzamofo ankeromo'za agrite efore hu'naze. <sup>2</sup> Hagi Jekopu'ma nezmageno'a amanage hu'ne, Ama Anumzamofo nonkumare, nehuno agi'a Mahanaimie huno ante'ne. <sup>3</sup> Jekopu'a ke erino vu vahemantegahie vugote'za nefu Iso mani'nere Idomu moparega, mago agi'a Seirie nehzarega vu'naze.

<sup>4</sup> Hagi Jekopu'a mago'ene amanage huno huzmante'ne, Amanage huta ranimofo Isona ome asamiho, eri'za neka'a Jekopu'a anage hie, nagra Lebani mopafi mani'noreti menina noe. <sup>5</sup> Nagra bulimakao afutaminki, donkiraminki, memeramine, sipisipi kevuzagane, eri'za veanine zamavare'na neena ranimoka kagrama kasunku'ma hunantenka mago krimpama hunka antahinamisanku hunezmantoe, hie huta ome asmi'na. <sup>6</sup> Hige'za kema eri'za vu'naza vahe'mo'za ete e'za Jekopuna amanage hu'za eme asmi'naze, Negafu Isona ome asamunanagi kantega tutagiha hugantenaku ne-ege'za, 400'a vahe'mo'za avega hu'za neaze. <sup>7</sup> Hazageno Jekopu'na tusi amano vazigeno agu'amo tare nehigeno, miko'a zama'ane vahe'ane, bulimakao kevune, memeramine, sipisipiramine, kemoriramina tarefi refko huno kevu huzmantene. <sup>8</sup> Amanahu agesa agra antahi'ne, Iso'ma, mago kevuma ha'ma eme huzmantesigeno'a, mago kevu'moza fresnaze, huno nehuno tare kevua refako hunt'e'ne.

<sup>9</sup> E'ina nehuno amanage huno Anumzamofontega nunamuna hu'ne, Nenageho Abrahamu Anumzane, nafa'nimofo Aisaki Anumzana, Ra Anumzamoka Kagra nasaminka, ete kagra mopaka'are nagaka'arega vuge'na, kazeri knare hugantaneno hunka hu'nane. <sup>10</sup> Nagra knare osu vahe mani'nogenka vagaore kavesizane, kema hu'nante amage ante avu'avazanena Kagra eri'za vahekamo'na naveri' hu'nane. Hagi nagra magoke azompa eri'nena Jodani tina takahen'a vu'noe. Hanki menina nagra tare seli nonku'ma eme ki'na mani'noe. <sup>11</sup> Koro nagesa nehige'na, nagra nunamu nehuanki, nenfu Iso azampintira, nagu'vazio. Na'ankure eme nenaheno, mofavre ni'an, nezamareranena zamahegahianki naza huo. <sup>12</sup> Na'ankure Kagra hunka, Nagra kazeri ra neha'nena kagehe'za hagerikenafi kasepankna hanage'za, vahe'mo'zahampri hana hugara osugahaze, hunka ko nagrira hunante'nane.

<sup>13</sup> Hagi ana kenagera anante maseteno, kotigeno otino mika'zama erino e'nefintira ase'ma hu'neama'a refko huno muse'za nefu Iso ami'za eri atru hu'ne. <sup>14</sup> 200'a a' memeraminki, 20'a ve memeraminki, 200'a sipisipiraminki, 20'a ve sipisipiraminena zamavarenenteno, <sup>15</sup> 30'a kemori afuzagane anenta'zmine, 40'a a' bulimakaoramine, 10ni'a ve bulimakao afuzagagi, 20'a a' donkiraminki, 10ni'a ve donki afutaminki huno zamarente'ne. <sup>16</sup> Ana huteno eri'za vahe'amokizmi huzmantege'za afu'zaga kevure kevure refko hute'za rure rure zamavare'za nevazageno amanage huno zamasmi'ne, navuga vugoteta nevuta rure rure zamavareta viho, <sup>17</sup> huno nehuno, kotama vaza nagamokimire'ma vugotama hia eriza nera, amanage huno hankave ke asmi'ne, Nenfu Iso'ma eno emenegageno, igati vahe'moka, iga nevane, aza afu'zaga zamaregotenka neane? huno kantahigesigenka, <sup>18</sup> amanage hunka asmio, eri'za vahekamofo Jekopu afutamine. Muse'za ramofo nefu Iso ami'zane, hagi agra henka tamage'a ne-e hiho. <sup>19</sup> Hanki anante anante'ma hu'za henkama vutere haza afu kevuraminte'ma kvama hu'zama vaza eri'za vahe'tmina kantegama Iso'na kesuta anankege ome asamiho, huno huzmante'ne. <sup>20</sup> Anage nehuno mago'ene amanage huno huzmante'ne, Eri'za vaheka'a Jekopu'a agra tamefiga'a ne-e huta hiho. E'i anankema hu'neana, na'ankure kote'na museza ami'enkeno e'nerino rimpia fru hutena, henka avufima ome negesugen'o'a muse huno navregahie huno Jekopu'a agesa nentahino hu'ne. <sup>21</sup> Anage huno nentahino huzmantege'za ana musezama amisia afu kevua zamavare'za vugota hu'za vazageno, ana kenagera seli noma ki'za mase'nare Jekopu'a anante mase'ne.

### *Jekopu Anumzane oretufe aretufe hu'nea naneke*

<sup>22</sup> Ana kenage amu'nompi Jekopu'a otino a' trema'ane, eri'za mofatrene, 11ni'a mofavre'ane zamavareno Jabok osi tina kagata hu'nere ome zama-trege'za takahē'za vu'naze. <sup>23</sup> Zamavreno ome zamatreteno eri'za vahe'a huzmantege'za, maka afufenoma'a eri'za takahē'za vu'naze. <sup>24</sup> Anante Jekopu'a agrake mani'negeno, kenagera mago ne' anante ege'ne ogazafe agazafe hu'neke, oretufe aretufe nehakeno vuno kotu'za hu'ne. <sup>25</sup> Ana ne'mo'ma keama Jekopuma agate'marega osuno'a, amumazinare regri'nea zaferinare ahegen Jekopuna amumazinamo'a avazu hurami'ne. <sup>26</sup> Ana higeno ana ne'mo'a amanage hu'ne, Kotu'za hianki natrege'na va'neno, huno ana ne'mo'a higeno, Jekopu'a ana nekura huno, Katra'nena ame hunka ovugahananki, asomu hunantetenkage vugahane, huno higeno, <sup>27</sup> ana ne'mo'a antahigeno, Kagi'a azage, higeno, Nagra Jekopu'ne huno asamigeno, <sup>28</sup> ana ne'mo'a huno, Mago'ene kagrikura Jekopu'e hu'za osugahaze. Na'ankure Anumzane, mopafi vahe'ene hara hunka agatere'nanku menina kagi'a Isrelige. <sup>29</sup> Higeno Jekopu'a antahigeno, Muse (plis) hugantoanki kagika'a nasamio, huno antahigegeno, Na'anku Nagri nagigura nantahi negane? Nehuno anante asomu hunte'ne. <sup>30</sup> Higeno Jekopu'a huno, Nagra Anumzamofo avufi koanagi ofri manue, nehuno Jekopu'a ana kumakura Penielie huno agi'a ante'ne. <sup>31</sup> Penieli kumara agateretegeno, zagemo'a hanati anamifi tegeno, revazmu revazmu huno vu'ne. Na'ankure amumazinamo'a ruvazu hu'negu anara hu'ne. <sup>32</sup> Ana hu'negu menina Isreali vahe'mo'za zagagafamofo amumazinamo'ma agezafima eme regri'nerema me'nea ame'a nonaze. Na'ankure Jekopu amumzinama avako'ma hu'nea zanku hu'za nonaze.

## 33

### *Jekopu'a Iso ome kefore hu'nea naneke*

<sup>1</sup> Hagi Iso'a 400'a vahe'ane ne-ejeno, Jekopu'a kesga huno negeno mofavre naga'a refko huzmantege'za, nezmarera Liane, Resoline, tare eri'za a'trene zamavuga otitere hu'naze. <sup>2</sup> Ana huteno eri'za a'trema'ane mofavre'zanine huzmantege'za vugota hu'za vu'naze. Ananteria Lia'ene mofavre naga'ane vazageno, Resoli'ene Josefekea henka vu'na'e. <sup>3</sup> Hianagi Jekopu'a agra vugoteno vugofa nehuno, 7ni'a zupa rena ome reno mopafi kepri hume vuno nefu tava'onte uhanati'ne. <sup>4</sup> E'ina higeno Iso'a negeno agareno eno Jekopuna azante eme azerino agazafeno, azana anankempi rugagino antako hunentege'ne, zavi otente atente hu'na'e. <sup>5</sup> Ana huteke Iso'a ana a'nene mofavre ramine nezmageno anage hu'ne, Zamagra iza'za kagranena neaze? Huno antahigegeno, Jekopu'a amanage hu'ne, Anumzamo'a so'e hunanteno eri'za vahekamo'na nami'nea mofavreramine. <sup>6</sup> Anante Jekopu eri'za a'trene, mofavrezinine vu'za Iso agiafi ome zamarenare'za mopafi kepri hu'naze. <sup>7</sup> Anante Lia'ene mofavre naga'ane ne-eza anazanke hu'za Iso agiafi zamarena eme re'za mopafi kepri hazageno, Josefe'ene Resolike henka'a anazanke hune mopafi eme kepri hu'na'e. <sup>8</sup> Ana hutageno Iso'a amanage huno Jekopuna antahige'ne. Ese'ma afu'zaga avre'za e'naza vahe'ma zamage'noana nahigenka huzmantanek'za e'haze? Higeno Jekopu'a amanage hu'ne, ranimoka kazeri muse hunaku e'inara hu'noe. <sup>9</sup> Hianagi kenona Iso'a amanage hu'ne. Nagnanimoka, nagra hago rama'a feno ante'noanki, kagrama erinkama e'nana zanka'a kagra erio. <sup>10</sup> Hianagi Jekopu'a amanage hu'ne, A'o, muse (plis) hugantoanki nagri'ma kagu'areti'ma hunka antahi

nenamisunka amama negamua musezana (gift) nazampintira erio. Hagi musema hunka navrana zama koana, Anumzamofo avugosa keankna ne-hugenka nagrira krimpa naminka nenavrane. <sup>11</sup> Muse (plis) hugantoanki nagrama muse'zama (gift) negamuana eri'nangue navenesie. Na'ankure Anumzamo'a avesi nenanteno naza huno hakare'aza nami'nege'na, knare hu'ne'na eme negamue. E'inage huno Jekopu'a hankavetino kehigeno Iso'a ana zantamina eri'ne. <sup>12</sup> Iso'a ana museza (gift) enerino amanage hu'ne, Nagra vugota'nena magoka vugahunanki otinketa vamneno. <sup>13</sup> Hianagi Jekopu'a amanage huno Isona asami'ne, ranimoka kama antahio, mofavrenimo'za hanave oti'nazageno, afu zagamo'za ami anuntage nehaze. Hagi magoke zagefinke'ma afu kevuma harita zaza kama vanunke'za, ufrigahaze. <sup>14</sup> E'ina hu'negu (plis) muse hugantoanki ranimoka, eri'za nekamo'na natrenka vugota huge'na, afu kevu zagane, a'mofavremo'zanema kama vanaza avamente akoheta nevuta, Seiri kumate (Idom) ranimokare uhnatigahue. <sup>15</sup> Iso'a ana kenona amanage hu'ne. Muse (plis) hugantoanki mago'a eri'za vaheni'a zamatra'nena kavega hu'za vugahaze, higeno Jekopu'a amanage hu'ne. Ko' ranimoka nazeri so'e hunananki na'ante anara hugahane? <sup>16</sup> Higeno Iso'a netreno, ana zupage Seiri (Idom) moparega ete vu'ne. <sup>17</sup> Jekopu'a Sukoti kumatega vuno, e'i ana mopare nom'a negino, afu kevumokizmi none kine. E'ina hu'negu menina ana kumamofo agi'a Sukotie hu'za nehaze. <sup>18</sup> Hagi Jekopu'a Padan-aramu mopa atreno ne-eno Sekemu ehanatino, Kenani mopare ra kuma'mofo fegi'a nonkuma (kemi) eme anteno mani'ne. <sup>19</sup> E'i ana mopa Hamori amohe'impinti, Sekemu nefafa mopa 100'a silva zagoreti miza huno seli nona ki'ne. <sup>20</sup> Anante havere ita tro huntetenno agi'a El-Elohe Israeli vahe Anumzane, huno agi'a antemi'ne.

## 34

### *Sekemu'a Daina havi avu'avaza hunte'nea naneke*

<sup>1</sup> Daina'a Jekopune, Liagizni mofakino mago kna a'ne zamagenaku Sekemu kumate vu'ne. <sup>2</sup> Ana higeno Hivi vahe kva ne' Hamori nemofo Sekemu'a negeno monko'za huntenuku hankavetino avazu huno kefo avu'avaza hunte'ne. <sup>3</sup> Sekemu'a Jekopu mofa Daina avesinenteno, ako-heno masave kefinti kea humi'ne. <sup>4</sup> Sekemu'a amanage huno nefafa Hamorina asmi'ne, Ama mofara a' erinaku nehuanki avre namio. <sup>5</sup> Jekopu'a mofa'amofo Dainama kefo avu'avazama hunte'nea ke nentahino, ako-heno ke osu mani'nege'za, mofavre'amo'za afu kva nehzaregati e'naze. <sup>6</sup> Sekemu nefafa Hamori'a Jekopuntega ana hazenke'mofo keaga hunaku vu'ne. <sup>7</sup> Jekopu amohe'za sipisipi afu kegava hu'za mani'ne'za ana hazenke zamofo kema nentahiu'za, kumate ehanatizageno zamagu'amo'a kna ne-higeno tusi zamasi vazi'ne. Na'ankure e'inahu kefo avu'ava zana Israeli vahepinia osuga'za, Jekopu mofara hunte'naze. <sup>8</sup> Hianagi Hamori'a amanage huno zamasmi'ne. Sekemu'a agu'areti huno mofatamia avesinenteno, e'i ana avu'ava zana hu'negu, muse hurmantoanki aminkeno a' erinteno. <sup>9</sup> Mofane omi ami hugahunanki, atrenke'za namohe'za mofaneka'a a' erisageno, kamohe'za mofa'nenia a' erigahaze. <sup>10</sup> Tamagra, tagrane mani'neta mopalifina tamevesite vano nehutma, nazanoma tro'ma hunaku'ma hanutma amne tro nehutma mokane nonena miza hugahaze. <sup>11</sup> Hagi Sekemu'a Daina nefafa Jekopune asarahehe'gizmia amanage huno zamasami'ne. Tamagrama knarere hanage'na, inankna zanku tamavesisia

zana nagra tamamigahue. <sup>12</sup> Mofa tamimofonte zago fenonku'ma agima ahenantesazana, kema hanaza kante antena tamigahue. Hagi mofa tamia naminke'na a' eri'neno. <sup>13</sup> Jekopu amohe'za Sekemune nefa Hamorigizni reznavatga hu'naze, na'ankure nezmasaro Daina azeri haviza hu'negu zamesa nentahi'za, kea hufatgo osu'za havige hu'naze. <sup>14</sup> Zamagra amanage huza hu'naze, Oku avuffga taga osu vahe'mo'ma nerasaroma a' erisigeno'a, tagaze hugahiankita tagra e'inahuzana osugahune. <sup>15</sup> Hianagi mago'zana oku kvufama taga osu'nana kazigati nehunanki, tagrama hu'nonankna hu'za, kagri naga'mo'za oku'a zamufga mika'moza taga hutesageta, hu izo hugahune. <sup>16</sup> Ana hanunketa tamagra tagri mofane ara erisageta, tagra tamagri mofane ara enerita magoke vahe trohuta manigahune. <sup>17</sup> Hianagi tamagrama ketima antahita oku tamufga taga osnageta, nerasarona avreta ama kumara atreta vugahune. <sup>18</sup> Anage hazageno Hamori'ene nemofo Sekemu'ene ana kema nentahike hugnare hu'nae. <sup>19</sup> Sekemuna nefa naga'mo'za antahi nemiza nekino, anagema haza kea nentahino, Jekopu mofate agu'a me'negu hantaka huno ana kemofo amage' ante'ne. <sup>20</sup> Hamorike nemofo Sekemu'ene ran kumamofo kahante eke atru hu'za kenaneke eri fatgo nehaza kumate ana kea vahe eme zamasmike amanage hu'nae. <sup>21</sup> Hagi knare knampa hurantaze, zamatre sunke'za mopatimo'a ra hu'neaki'za mani'neza, inankna'zana mizante tro nehuta, mofanetia omeri emeri hugahune. <sup>22</sup> Hianagi oku tavufga taga hutesunke'za, ana zanku mago zamarimpa hu'za tagrane, mago vahere hu'za mani'gahaze. E'ina hu'negu zagrama hazankna huta maka'a vene'nemota oku tavufga taga hugahune. <sup>23</sup> Afu kevuzimine, feno zamimo'a tagri'za segahie. Hanki tagrama zamagri kemofoava avaririta oku tavufga taga hanunke'za, tagri'ene knare hu'za manigahaze. <sup>24</sup> Anage nehake'za hakare'a vahe'mo'za rankumamofo kahante atrami'za, Hamori'ene, nemofo Sekemugizni ke nentahi'za, mika rankumapi vene'nemo'za oku zamufgamofa anom'a taga hu'naze.

### *Dainana asarahe'za ha'ome hu'naza naneke*

<sup>25</sup> Hagi tagufa zage agateregeno anama oku zamufga taga hu'naza vahe'mo'za tusi zamatagu nehu'za mase'nageno, Daina nesaro Simioni ene, Livaikaea bainati kazi eri'ne, ana kumapi vu'ne maka'a vahera antri hazaza hu'ne zamahe hana hu'nae. <sup>26</sup> Hamorine nemofo Sekemu'giznia bainati kazinknonu zanahe nefri'ne, Sekemu nompinti neznsasaro, Dainana nevre'ne vu'naze. <sup>27</sup> Dainama kefo avu'ava'ma hunte'naza zanku, Jekopu mofavre naga'mo'za ana kumapi mareri'za, maka'a knare'zana eri vagare'naze. <sup>28</sup> Sipisipi afu kevuma, bulimakaoma, donkima, kuma agu'afi me'nea zama fegi'a me'nea zanena maka eri hana hu'naze. <sup>29</sup> Hakare'a razama, onensa zama, a' mofavrene nompinti zane eri hana hu'za vu'naze. <sup>30</sup> Jekopu'a amanage huno Simionine, Livaigiznia zanasmi'ne, Kenani vahe'ene, Peresi vahe'amu'nompina knaza erita eme nenamita nagrira naz-eri hi'mnava'e. Tagra onensa'a vahe'mani'nonanki'za, atru hu'za ha'ma eme hurantesu'za, nagri'ene maka zani'ane nazeri haviza hugahaze. <sup>31</sup> Hianagi kenona'a anage hu'nae, hanki nahigeno nersarona, monko a'nemofoma hunenteankna avu'avara hunte'ne?

<sup>1</sup> Anumzamo'a amanage huno Jekopuna asami'ne, Ko'ma negafu Isonku'ma koro frenka nevanke'na kagrite efore hugami'noa kumate otinka anagamu Beteli vunka anante umani'enka, anante Anumzamo'na ita tro hunanto. <sup>2</sup> Higeno Jekopu'a amanage huno naga'ane, Agranema nemaniza naga'mokizmia zamasmi'ne. Maka havi anumzantmina netreta, tamagu'a retro nehuta, agru kukena timia antaniho. <sup>3</sup> E'ina hutenketa anagamu Beteli vuta, antahima nenamino kna'zampinti'ma naza nehuno, hakare kazigama nevugeno nagranema nemania Anumzamofo Kresramanavu ita, e'i anante ome tro hugahue. <sup>4</sup> E'inage hige'za maka vahe'mo'za havi anumzazamine, zamegesafi renentaza rinine eri'za Jekopu'eme amizageno erino Sekemu rankuma tava'onte oki zafa agafafi keri kafino asente'ne. <sup>5</sup> Hagi Jekopu'ma karanka naga'anema nevigeno'a Anumzamo'a Kenani kumapima nemaniza vhahera zamazeri koro hige'za, mago'zana huozamante'naze. <sup>6</sup> Jekopu'ene vahe'ane ana maka vu'za Lusi uhanati'naze. Mago agi'a Beteligo ana mopa Kenani me'ne. <sup>7</sup> Jekopu'a havere ita tro huntenu agi'a El Betelie hu'ne. Na'ankure nefu Isonku koro'ma freno nevigeno, Anumzamo'a korapara anante fore humi'neane. <sup>8</sup> Anante mani'nageno Rebekana avate eri'za ara Debora'a frige'za oki zafa agafafi Betelia ohenkamu'a asente'naze. Nehu'za agi'a Alon Bakutie hu'za ante'naze. (Zamagra kefina, zavi zafe hu'naze.)

### *Anumzamo Jekopuna Israeli'e huno agi'a antemi'nea naneke*

<sup>9</sup> Hagi Padan-Aramuma atreno Jekopu'ma ete Kenani moparema egeno'a, Anumzamo'a mago'ene efore humino, asomu hunte'ne. <sup>10</sup> Anumzamo'a amanage huno asmi'ne, Menina kagi'a Jekopu'e huno me'ne. Hianagi mago'enena Jekopu'e hu'za osugahazanki, Israeli'e huno kagi'a megahie. Israeli'e huno Anumzamo'a Jekopu agi'a antemi'ne. <sup>11</sup> Anumzamo'a mago'ene amanage huno asami'ne, Nagra hihamu'ane Anumzane, mofavrea kasezmantege'za kokankoka mopafina fore huhakare hu'za rukazi hu'za rankumara ante'za nemaninage'za, mago'amo'za kini vhahera efore hugahaze. <sup>12</sup> Abrahamune, Aisaki'gizni Nagra zanami'noa mopa kagrira kamigahue. Hagi henka ama ana mopa Nagra kagehei' zamigahue. <sup>13</sup> Anage huteno Anumzamo'a Jekopu'enema keagama ha'a kumara atreno ete mareri'ne. <sup>14</sup> Jekopu'a ra have erino eme retru renenteno, ana haverera waini ti tagino ofa nehuno, oliv masave erino eme ragi'ne. <sup>15</sup> Ana nehuno Jekopu'a Anumzamo'enema keaga hu'nea kuma'mofo agi'a Betelie huno ante'ne.

### *Benjameni kasente'nea naneke*

<sup>16</sup> Hagi anantetira Jekopu'a naga'ane Betelia atre'za, Efrata kumate vunaku nevazageno, kantega Resolina mofavre ante kna'amo'a egofta higeno tusi atagu hu'ne. <sup>17</sup> Hagi Resolina mofavre'za negegeno tusi atagu ne-higeno anante mofavrema aza huno kase aminaku'ma avega huno mani'nea a'mo'a amanage huno asami'ne, mago' ne'mofavre kasentananki korora osuo. <sup>18</sup> Resoli'a kasenteteno fri'za nehuno ana mofavre agi'a Ben-oni'e nasunku mofavre huno ante'ne. Hianagi Jekopu'a Benzameni'e nazantamaga mofavre huno agi'a ante'ne. <sup>19</sup> Resoli'a frige'za Efrata vu kamofo ankenare asente'naze, (mago agi'a Betlehemue.) <sup>20</sup> Jekopu'a ra have erino vuno Resolima asente'nea kerimofo agofetu ome retru re'ne, menina Resoli kerire retru re'nea havea amne me'ne. <sup>21</sup> Hagi anantetira Israeli'a (Jekopu'a) viazamo mani'ne'za afu kva nehaza noma Ederi kumate'ma me'neana agatereteno vuno ogantu'a seli nonku'mara omegino mani'ne. <sup>22</sup> Anampi umani'nageno Israelina (Jekopu'na) agonesa ne'amo Rubeni'a, nefana mago

a'a, nenaro eri'za erinente'a a' Bilhama anteno mase'nea kea Israeli'a an-tahi'ne.

### *Israeli ne'mofavre zamagi'amofo naneke*

<sup>23</sup> Hagi ama'i Jekopuna 12fu'a ne' mofavre'amofo zamagi'e. Lia'ma kasezmante'nea ne'mofavrea Rubeni'a Jekopuna zage'e, ananter Simioni'e, Levi'e, Juda'e, Isaka'e, Zebuluni'e. <sup>24</sup> Hagi Resoli'ma kasemante'nea ne'mofavrea Josefe'ene Benzamenike. <sup>25</sup> Hagi Resoli eri'za a'mo Bilha'ma zanante'nea ne'mofavrea Dani'ene Naftalike. <sup>26</sup> Hagi Lia eri'za a'mo Zilpama kase zanante'nea ne'mofavrea Gati'ene Aselikie. Ana hu'nearkino Jekopu'a Padan-Aram mani'neno zamazeri fore hu'ne.

### *Aisaki'ma fri'nea zamofo naneke*

<sup>27</sup> Jekopu'a nefu hirega Mamre Kiriath-arba e'ne, e'i mago agi'e He-bronie, ana kumara nefu Abrahamu'ene Aisakike zoka umanina'a kumare. <sup>28</sup> Aisaki'a 180'a Zagegafu mani'ne. <sup>29</sup> Aisaki'a za'za kna maniteno ozafa reteno renteramino, vagare asimu anteteno frino agehe'zane agigomo'zama umani'nazarega vu'ne. Jekopuke, Isoke eri'ne ome asente'na'e.

## 36

### *Iso ne' mofavre naga zamagi'amofo naneke*

<sup>1</sup> Ama'i Isompinti fore hu'za vu'naza naga'mokizmi zamagi'e, Isona mago agi'a Idomu'e. <sup>2</sup> Iso'a Kenani vahe'mokizmi mofane ara eri'ne, Ada'a Hiti ne Eloni mofare. Oholibama'a, agra Ana mofakino Hivi ne' Zibeoni negeho'e.

<sup>3</sup> Hanki mago a'omo agi'a Basemati'e, Ismaeli mofa, Nebaioti nesaro'e.

<sup>4</sup> Ada'a Elifazi kasentegeno, Basemati'a Reueli kase ante'ne, <sup>5</sup> Oholibama'a Jesusima, Jalamuma, Korama huno kase zamante'ne. Iso'ma Kenani mopare mani'neno kasezmante'nea ne'mofavreramimofo zamagi'e. <sup>6</sup> Iso'a a'neane, ne'mofavre ane, mofa'neane, maka noma'afi nemaniza naga'ane, memene, sipisipi kevune, bulimakao kevune, mika fenona Kenani mani'neno erifore hu'nea fenoma'ane enerino, negna Jekopuna atreno afete moparega vu'ne.

<sup>7</sup> Maka zazanimo'a hakare nehigeno, afu kevu zinimo'a rukazi huno emanina'a mopamo'a avitegeno, Iso'a atreno vu'ne. <sup>8</sup> Higeno Iso'a Seiri agona moparega umani'ne. Isona mago agi'a Idomu'e. <sup>9</sup> Iso'a Seiri agona kokampi nemaniza Idomu vahe'mofa nezmageho'e. <sup>10</sup> Iso ne'mofavremokizmi zamagi'a, Elifazi'a Iso nenaro Ada ne'mofavre, Reueli'a Iso nenaro Basemati ne'mofavre. <sup>11</sup> Hanki Elifazi ne'mofavre zamagi'a Temani'ma, Omari'ma, Zefo'ma, Gata'ma, Kenasi'ma hu'za mani'naze. <sup>12</sup> Iso nemofo Elifazina, mago kazokzo eri'za a'amofo agi'a Timna'e. Timna'a mago ne'mofavre Elifazina kase ami'ne, agi'a Amaleki'e. Iso nenaro Ada ana ne'mofavre kase zamante'ne. <sup>13</sup> Hanki Reueli ne'mofavre zamagi'a, Nahati'e, Zera'e, Sama'e, Miza'e. E'i ne'mofavre nagara, Iso nenaro Basemati kase zamante'ne. <sup>14</sup> Isona mago a'amofo agi'a Oholibama'e. Ana mofakino Zibeon negeho'e. Ama Iso nenaro Basemati'ma kase zamante'nea ne'mofavre zamagi'a, Jeusi'e, Jalamu'e, Koranki huno Isona kase ami'ne.

<sup>15</sup> Hagi Iso nagapinti kva eri'za eri'naza vahe zamagi'e. Isona agonesa ne'mofavre Elifasi ne' mofavre naga'mo'za kva eri'za eri'naza vahe zamagi'a Temani'e, Omari'e, Zefo'e, Kenazi'e, <sup>16</sup> Kora'e, Gatami'e, Amaleki'e. E'i a kva vahe'tmina Idomu mopafi kegava hu'naze. Elifasi nagapinti, Isona nenaro Adakizni zanagehoze. <sup>17</sup> Hanki Isona mago a'amofo agi'a

Basemati'e, nemofo agi'a Reuelie. Hagi Reueli ne' mofavre nagamoza kva eri'za eri'naza naga'mokizmi zamagi'a, Nahati'e, Zera'e, Sama'e, Miza'e. Reueli naga Idomu mopafi kva eri'za eri'naza naga'mokizmi nezmageho'a Basemati'e. <sup>18</sup> Iso nenaro Oholibama ne' mofavre nagapinti kva eriza eri'namokizmi zamagi'e, Jalami'e, Kora'e. Oholibama'a Ana mofakino, Ison-teti kase zamante'nea tagufa mofavremo'za kva eri'zana eri'naze. <sup>19</sup> E'ina vahera Iso ne'mofavreraminki'za mago agi'a Idomu'e nehzankino agripinti fore hu'za kva eri'zana eri'naza vahe'mokizmi zamagi'e. <sup>20</sup> Ama Seiri ne'mofavre Horati ne'ko'ma ana mopa nafa'a hu'zama mani'naza vahepinti fore hu'za kva eri'za eri'zana mani'naza vahe zamagi'e, Lotani'ma, Sobali'ma, Zibeoni'ma, Ana'ma, <sup>21</sup> Disoni'ma, Eseli'ma, Disani'ma hu'za zamagra kva eri'za eri'naza Horaet' vahe, Seiri ne' mofavre Idomu mopafi mani'naza kva vahe zamagi'e. <sup>22</sup> Lotani ne'mofavre agi'a Hori ene, Hemani'enene. Hanki Lotani nesaro'a Timna'e. <sup>23</sup> Sobali ne'mofavre naga zamagi'a Alvani'ma, Manahati'ma, Ebali'ma, Sefo'ma, Onami'e. <sup>24</sup> Zibeoni ne'mofavre nagara, Aia'ene, Ana'enene. Ana'a agra amuho tinkeria ka'ma mopafina keno eri fore hu'ne. Nefa Zibeoni donki kegava huno vano nehuno ana tinkeria ke fore hu'neane. <sup>25</sup> Ana mofavrezaga zamagi'a, Disoni'ma, Oholibama'e. Oholibama'a, Ana mofare. <sup>26</sup> Disoni ne'mofavre zamagi'a Hemdani'ma, Esbani'ma, Itrani'ma Kerani'e. <sup>27</sup> Eseli ne'mofavre zamagi'a Bilhani'ma, Zavani'ma, Akani'e. <sup>28</sup> Disani ne'mofavre zamagi'a Usike, Aranike. <sup>29</sup> Horaet'i vahepi kva eri'za eri'naza naga zamagi'a, Lotani'ma, Sobali'ma, Zibeoni'ma, Ana'ma, <sup>30</sup> Disoni'ma, Ezeri'ma, Disani'e. Ama'i Horati vahepi fore hu'naza kva vhahere. Seiri mopare nagate nofite hu'za mani'neza kva eri'za eri'naza vahe zamagi'e. <sup>31</sup> Hanki ama'i Idomu mopafi kini vahe zamagi'e, Israeli ne' mofavre'mo'za kini vahe fore osu'naza knafi, Idomu moparera kini vahe fore hu'za mani'nazane. <sup>32</sup> Bela'a agra Beori nemofo kinia manino Idomua kegava kri'ne, rankuma'amofo agi'a Dinhabae. <sup>33</sup> Bela'ma nefrigeno'a, Zera nemofo Jobabu, Bozra kumate ne'mo Bela nona erino kinia mani'ne. <sup>34</sup> Jobabu'ma nefrigeno'a, Temati mopareti ne' Husamu kinia mani'ne. <sup>35</sup> Husamu'ma nefrigeno'a Bedati nemofo Hadadi kinia manino kegava hu'neankino, Midian vahe Moapu kumapi ha' huzamagatere'nea nekino, rankuma'amofo agi'a Avitie. <sup>36</sup> Hadadi'ma nefrigeno'a Samla, Masreka kumateti ne'mo, kinia manino kegava hu'ne. <sup>37</sup> Samla'ma nefrigeno'a Sauli, Yufretis timofo tva'onte Rehoboti kumate ne'mo agri nona eri'ne. <sup>38</sup> Sauli'ma nefrigeno'a Bal-hanan Akbor nemofo kinimofo nona erino kegava hu'ne. <sup>39</sup> Bal-hanani nemofo Akbori'ma nefrigeno'a, Pao rankumateti ne'mo Hadari kuma'a erino kini mani'neane, Nenaro agi'a Mehetabelikino, Matreti mofa Mezahab negeho'e. <sup>40</sup> Isompinti'ma fore hu'za kva eri'zama eneri'za nagate nofite'ma hu'za kuma ante'za mani'naza naga'zmire'ma kva huterema hu'naza vahe zamagi'a, Timna'ma, Alvani'ma, Jeteti'ma, <sup>41</sup> Oholiba'ma, Ela'ma, Pino'ma, <sup>42</sup> Kenazi'ma, Temani'ma, Mibzari'ma, <sup>43</sup> Megdili'ma, Irami'e. E'izamagra Idomu kva nagare, Iso'a Idomu vahe nezmafa'e. Ana hu'neanki'za nonku'ma ante'za nemani'za mopare kva hutere hu'za mani'naze.

<sup>1</sup> Menina Jekopu'a agri nefu zoka mani'neno hu'nea mopare Kenani mani'nene. <sup>2</sup> Ama'i Jekopu naga nofimofo naneke. Josefe'a 17ni'a zagegafu nehuno, nehaza ne' mani'neno nefu'zane afutami kegava hu'ne. Bilhane, Zilpagizni nefu a'tremokizini mofavre'mozane kegava hu'naze. Josefe'a nefu'za havizama nehazankea erino nezmafana ome asami'nene. <sup>3</sup> Hagi Israeli'a (Jekopu'a) miko ne'mofavre'afintira, Josefena tusiza huno avesinte'ne. Na'ankure agra ravusefinka ante'neankino, agra avasese'ane kena tro huno antantinte'ne. <sup>4</sup> Ana hige'za Josefe nefu'za, kazama nez-mafa'ma tusiza huno agri'ma avesinentege'za nege'za, zamagra avesi nonte'za knare hu'za fru keaga huomi'naze.

<sup>5</sup> Hagi mago kenagera Josefeta ava'na keteno, afuhe'mokizmi ana avana kea zamasmige'za, zamagra mago'ene tusiza hu'za zamarimpa ahente'naze. <sup>6</sup> Josefe'a amanage huno zamasami'ne, Muse (plis) hurmantoanki ava'nama ke'noa zamofo nanekea antahihio, <sup>7</sup> hozafi witi ananekunkeno nagri witimo'a oti fatgo higeno, tamagri witimo'za regagi'za, nagri witirera kepri hu'naze. <sup>8</sup> Anante nefu'za amanage hu'za antahige'naze, tagrira tagaterenka kagra kini mani'za nehano. Tamage hunka kegava hurante'za nehano, nehu'za mago'ene zamasigu hunente'za, agri avana kene, ke'anena on-tahi'naze.

<sup>9</sup> Anante mago'ene ava'na keteno afuhe'i amanage huno zamasami'ne, Antahihio, mago'ene ava'nagoana, zagene, ikane, 11ni'a ofumo'za nagrite kepri hunante'naze. <sup>10</sup> Josefe'a anage huno nefane, afuhe'inena nezmasmigeno, nafa'amo'a amanage huno kesune, Kagra nankna ava'na negane? Negrane, negrera'ene negafu'zanena tamage huta kagrite kepri hugahuno? <sup>11</sup> Agri afuhe'za amefi'a ke hunte'hazanagi, nefu'a hakare'a nanekea antahi antahifi atre'ne.

<sup>12</sup> Mago'zupa agri nefu'za, nezmafa afutami avre'za traza nehogu Sekemu vu'nazageno, <sup>13</sup> Israeli'a amanage huno Josefena asami'ne, Negafu'za afuzaga zamavare'za Sekemu traza me'nerega ome zamante'za mani'nazanki ege'na, huganta'nena vuo. Higeno Josefe'a amanage huno kenona hu'ne, Nagra vugahue. <sup>14</sup> Higeno nefu'a amanage huno Josefena asmi'ne, Menina vunka negafuzane, afuzaganena knare hu'za mani'nafi ome ketenka, ete enka kea eme nasmio. Anage nehuno huntogeno Hebron agupofinti vuno Sekemu uhanati'ne. <sup>15</sup> Anantega ome hakeno vano nehigeno mago ne'mo anampi negeno anage huno antahige'ne, na'anku kagra nehakrane? <sup>16</sup> Higeno Josefe'a anage hu'ne, Nagra nafulhemokizmigu nehkroanki, muse (plis) hugantoanki inantega afu'zmia kegava hu'za mani'nafi nasmio? <sup>17</sup> Higeno ana ne'mo'a anage huno asamine, Amafinti atre'za vunaku nehu'za, Dotani vanune nehazage'na antahi'noe. Higeno Josefe'a zamage zamavaririno vuno afuhe'ina Dotani ome zamageno erifore hu'ne.

### *Josefena miza se'za avre'za Isipi vu'naza naneke*

<sup>18</sup> Hagi Josefe'a afete ne-eno eravao osu'nege'za afuhe'za nege'za, ahe frigahune hu'za kea retro hu'naze. <sup>19</sup> Zamagra zamagra ke hugantugama hu'za amanage hu'naze, ava'na kege nera antu e! <sup>20</sup> Hanki menina enketa aheta keri kampi mate'vuta nevazita, amanage hugahune. Afi zagamo aheno ne'ne, nehuta avana ke'amo'a inankna hugahifi kesune! <sup>21</sup> Ana hianagi Rubeni'a ana naneke nentahino, aza hunaku anage hu'ne, atren-keta ahe ofrisanune. <sup>22</sup> Rubeni'a mago'ene amanage huno zamagrira zamasami'ne, Aheta korana eri oragi'sunanki, amima ka'ma kopima me'nea

kerifi oheta avre vazisanune. Ana hanageno agra aza huno avreno nefo ome amisigu hu'ne. <sup>23</sup> Hanki Josefe'ma eno afuhe'inte'ma ehanatige'za, zamagra azeriza, knare avasese'ane za'za kena nefo'ma antaninte'neana zafi netre'za, <sup>24</sup> zamagra azeri'za tinkeri kampi matevu atre'naze. Ana kerifina tina omnene.

<sup>25</sup> Ana hute'za, zamagra mani'ne'za ne'za nenaku nehu'za, kesga hu'za zamavua kazana, avazu hunte'za Ismaeli vahe'mo'za Giliatiti ne-eza, kemorizmifi gamune, fukinkna masave tusa masave kregefe'neane (bam) mana'nentake'za mere'ne eri'za Isipi zagore ome atrenaku e'naze. <sup>26</sup> Juda'a amanage huno afuhe'mokizigura hu'ne, Neregnama aheta korama'a eri tagisuta nankna miza erigahune? <sup>27</sup> Agra tagri kora mani'negu ohesunanki, enketa Ismaeli vahete Josefena mizante atramneno. Hige'za nefu'za ana nanekere mago zamarimpa hu'naze.

<sup>28</sup> Anante mago'a Midiani vahe'mo'za, fenozama zagore'ma netre'za eneri'za nehaza vahe'mo'za anante neazageno, zamagra Josefena kerifinti avazuhu naga'atre'za Ismaeli vahete 20'a sekel silva zagore atre'naze. Ana hazage'za Josefena avre'za Isipi vu'naze.

<sup>29</sup> Rubeni'a keri avazare eno keana Josefe'a kerifi omani'negeno kukena'a sgane sagnu hu'ne. <sup>30</sup> Aganahe'inte agra uhanatino amanage hu'ne, Ana mofavre'a omani'ne. Hanki nagra inankna hugahue? <sup>31</sup> Hige'za zamagra Josefe avasese'ane kena eri'za, ve meme ahe'za ana za'za kena'a korama'afi re'za ti'za hute'za, <sup>32</sup> anante ana avasese'ane za'za kena, mago'amo'za eri'za nezmafante uhanatiza anage hu'naze. Amama kefore'ma hu'na kena muse (plis) hugantonanki, kagri negamofo za'za kenafi ko. <sup>33</sup> Hazageno keteno amanage hu'ne, Ama'i nagri ne'mofavremofo za'za kene. Af'i zaggafamo aheno ne'ne, tamage huno Josefena amprino anitraga trogo hutre'negahie! <sup>34</sup> Anage nehuno Jekopu'a kukena'a braro bruru huno tanefa kateno kukena'are\* nefreno za'za kna ne'mofonkura huno zavira ate'ne. <sup>35</sup> Ana hige'za mika ne'mofa'amo'za, oti'za azeri avavasenaku hu'hazanagi, azeri vava sezankura ave'osi'ne. Hagi agra amanage hu'ne, Nenamofonku zavi netena fri'na fri vahe kumapi umanigahue. Nehuno nefo'a zavi ate'ne.

<sup>36</sup> Hagi Midiani vahe'mo'za Isipi uhanati'za Josefena mizante atrazageno, Isipi ne' Fero avate kva ne' Potifa miza se'ne.

## 38

### *Judane Temakizni Naneke*

<sup>1</sup> Mago zupa Juda'a afuhe'ina nezamatreno Adulami kumate ne' Hira'e nehaza ne'ene umani'ne. <sup>2</sup> Juda'a anantega Kenani ne' Sua'e nehaza ne'mofo mofa keteno, a' erino anteno mase'ne. <sup>3</sup> Ana higeno amu'ene huno ne' kasentegeno, agra Eri'e huno agi'a antemi'ne. <sup>4</sup> Anante mago'ene amu'ene huno ne' kasenteno, Onani'e huno agi'a ante'ne. Juda'a Kezipi mani'negeno nenaro'a ne'mofavrea kase ante'ne. <sup>6</sup> Hanki Juda'a agonesa ne'mofavre'a Erina mago a' avre ami'ne. Ana a'mofo agi'a Tema'e. <sup>7</sup> Ana hianagi Judana agonesa mofavre'a Eri'a Ra Anumza'mofo avufi havi avu'avaza higeno, Ra Anumzamo'a ahe fri'ne. <sup>8</sup> Juda'a amanage huno Onanina asami'ne, Nempuka'amofo kento ate vunka, nefu a' eneriankna avu'ava hunka, negafu a' erigeno, negafu mofavre kasenteno. <sup>9</sup> Hianagi Onani'a antahi'ne, kento a'mo kasentesia

\* <sup>37:34</sup> Toza kukena huno mani'ne.

mofavrea agri mofavre omanigahiankino, nempu'amofo a' ene nemaseno'a avufga rina, nefu mofavre antemi'zanku mopafi atre'ne. <sup>10</sup> E'inama agra hiazanku Ra Anumzamo'a musena osuno, ahe fri'ne. <sup>11</sup> Anante Juda'a nenofero Temana anage huno asmi'ne, Negafa nontega vunka kento a' umani'negeno, ne'niamo Sela'a ra hute'na'e. Higeno Tema'a vuno nefu nompi umani'ne. <sup>12</sup> Mago'a zagegafu evutegeno Sua mofa, Juda nenaro'a frigeno, zamaskunku hu'za zavi atazageno ana kna vagaretogeno, Juda'a sipisipi azoka neharerega Timna kumate agrane, arone'a Adulamu kumateti ne' Hira'ene vu'na'e. <sup>13</sup> Mago'a vahe'mo'za Temana ome asami'za, Konkeno negnofero'a sipisipi'a azoka hareku Timna kumate evu'ne. <sup>14</sup> Hazageno ana a'mo kento kukena hate netreno amne kukena huno, avugosa refiteno, Enaim kuma'mofo kasante Timna vu kante emani'neno, amanage huno agesa antahine, Sela'a hago ra hu'neanagi, a' ka'e huno navre omi'ne. <sup>15</sup> Hagi Juda'ma ana a'ma eme negeno'a, monko a' mani'ne huno agesa antahi'ne. Na'ankure ana a'mo'a avugosa refiteno mani'negeno keso'e osu'ne. <sup>16</sup> Agra kana atreno ana a'mofonte vugantuteno amanage hu'ne, Menina knare kagranena umasegahuo? Agra mofavre'amofo are huno ontahie'ne. Tema'a amanage huno antahige'ne, Na'a namitenka nagra'nena umasegahane? <sup>17</sup> Higeno agra kenona'a huno, Afuzaga ni'afinti mago ve meme avrentegantegahue huno asmi'ne. Ana a'mo'a amanage huno asmi'ne, Knare mago kamente'zana avame'za naminanke'ha azeri nenu-genka, henka'a avrente nantegahampi? <sup>18</sup> Higeno ana ne'mo'a amanage hu'ne. Avame'zana nagra na'a kamigahue? Higeno ana a'mo'a anage hu'ne, rinine, knankempi kvasese nofi'ene, kazampima eri'nana azompa ka'anee namigahane. Higeno ana miko'za nemino ome anteno masegeno agriteti amu'ene hu'ne. <sup>19</sup> Anante otino vuno avugosafi refite'neaza eri netreno, kento kukena omeri hankre'ne. <sup>20</sup> Juda'a rone'a Adulami ne'te, kasefa ve meme avre amigeno ana a'ma ami'neaza azampinti erinogu ome hakeana ana ara onke'ne. <sup>21</sup> Agra ana a'mofo kumate vahe zamantahigeno, Havi anumzamofo mono nompima monko a'ma Enaimima vu kantegama nemania ara ina'ne? Hige'za zamagra amanage hu'naze, Havi anumzamofo mono nompina, monko ara amafina omani'ne. <sup>22</sup> Ana ne'mo'a ete Judante vuno, amanage ome hu'ne, ana ara hake'na erifore osuge'za, ana kumapi vahe'mo'za amafina monko ara omani'ne hu'naze. <sup>23</sup> Anante Juda'a amanage hu'ne, Aru vahe'mo'za tagiza resagi atregeno ana a'mo erino. Hago ama'i ve meme avre kamugenka, ana ara ome hakenka eri fore osane. <sup>24</sup> Henka 3'a ikana evutegeno, Judana amanage hu'za asami'naze, neganofero Tema'a savri huno vano nehuno mofavre amu'ene hu'ne. Hazageno Juda'a anage hu'ne, Avre fegi atreta ana ara tevefi kre kasegeho! <sup>25</sup> Ana ara avazu hu'za fegi'a atirmizageno, ana a'mo'a huno, Nagrama namu'ene hu'noana ama zamofo nefanteti mofavrea eriri'noe. Nehuno ana zana zamige'za eri'za nenoferonte vu'za anage hu'za ome asami'naze, muse (plis) hugantoanki ko, ama rinine, anankempi avasese'zane, azompa aza suzane? <sup>26</sup> Higeno Juda'a ana zantmima keno antahino'ma nehuno'a amanage hu'ne, Tema'a nagrira nagatereno knare avu'avaza hu'ne. Haviza hu'na nagra nenamofo Selana avre omugeno anteno omase'ne. Nehuno Juda'a ete mago'ene ana a'enena uomase'ne. <sup>27</sup> Ana a'mo mofavre anteku nehigeno, keana kugave'za rimpafina mani'na'e. <sup>28</sup> Anante mofavre kasenentegeno mago'mo azana ante kamategeno, aza huno mofavre kasemi a'mo'a koranke osi nofi azante kinenteno, amanage hu'ne, Ama mofavremo koteno e'ne. <sup>29</sup> Hianagi eteno

azana anamagi agu'ategeno, ete mago'mo atiramine. Ana a'mo'a anage hu'ne, Inankna hunka kagra anafe hunka agaterenka ane, nehuno agi'a Peresi'e huno antemi'ne.<sup>30</sup> Hanki amefiga'a nefu osi koranke nofi'ma azante kinte'nemo atiramigeno, agi'a Zela'e huno antemi'ne.

## 39

### *Josefe'ma Potifa nompi eri'za eri'nea naneke*

<sup>1</sup> Josefena avre'za Isipi mopare vazageno, Fero avate vugota huno kegava nehia ne' Potifa'a Ismael vahe'mo'za avre'za vu'naza vahepinti miza huno avrente'ne. <sup>2</sup> Ra Anumzamo'a Josefe'ene mani'negeno, maka eri'zama'amo'a knare'zanke hu'ne. Josefe'a ozafa'amofo nompi Isipi mani'ne. <sup>3</sup> Ozafa'amo'ma keana Ra Anumzamo'a Josefe'ene mani'negeno, eri'za kama'amo'a agri azantero knare zanke hu'ne. <sup>4</sup> Ana higeno, ozafa'amo'a Josefena antahimino, avate eri'za ne' azeri oti'ne. Ana nehuno noma'ane maka'zama'a Josefe azampi antegeno kegava krinte'ne. <sup>5</sup> Isipi ne'mo'ma ana'ma hianknareti agafa huno Josefe'ma noma'afi mani'negu huno Potifana mika nompi zane, fegi'a hozafi zanena Ra Anumzamo'a asomu hunte'ne. <sup>6</sup> Maka'zana Potifa'a Josefe azampi antegeno kegava krigeno, maka zankura agesa ontahi'neanki, kave'ma nesia zankuke hu'ne.

Hagi Josefena agi'avvugosamo'ene, agia azamo'enene, avufgamo'enena knare'za huno soe zanke hu'ne. <sup>7</sup> Anazama nehifina ozafa'amofo nenaro'a Josefena kesane nehuno anage hu'ne, Enka nagrane emaso. <sup>8</sup> Hianagi agra ana kegura i'o nehuno, ozafa'amofo nenarona anage huno asami'ne, Antahio, nagrama ama nompima mani'nogeno'a ozafanimo'a maka'zankura agesa nontahie. Maka'zama ante'nea zana nagri nazampi kegava kri'nuegu ante'ne. <sup>9</sup> Mago agateresa nera ama nompina omani'ne, nagrake mani'noankino, mikazana nagri nazampi anteno kegava huo hu'heanagi, kagri kaziga antenka mase huno hu izo huonantene. Na'ankure kagra nenaroga mani'nane. Inankna hu'na nagra tusi'a kefo'zana erifore hu'na kumira Anumzamofo avufina hugahue? <sup>10</sup> Ana a'mo'ma maka knafima Josefenku'ma masesu'e huge, erava'o huoma nehigeno'a, ke'a antahi omi'ne.

<sup>11</sup> Hagi mago zupa Josefe'a eri'za erinaku nompi marerigeno, ruga'a eri'za vhahera ana nompina omani'nageno keteno, <sup>12</sup> ozafa'amofo nenaro'a nakre ku'are avazu nehuno anage hu'ne, Nagrane emaso, higeno ana nakre ku'a azampi zafi netreno, freno megi'a atiramino vu'ne. <sup>13</sup> Ozafa'amofo nenaro'ma keama Josefe'ma nakreku'ama azampi atreno freno fegi'a atiramigeno'a, <sup>14</sup> ana a'mo'a noma'afi eri'za e'neriza vahe ke hige'za eme atru hazageno anage hu'ne, Keho, Hibru ne'ma avrenoma eme ante'nea ne'mo, nagri zokago renanteku ege'na krafa hu'noe. <sup>15</sup> Antahige'na ranke hu'na krafama nehuana, nakre ku'a avateti zafitreno freno fegi'a vu'ne. <sup>16</sup> Anage huteno ana nakre ku'a ana a'mo'a tavaoma'are anteno mani'negeno neve'a nontega e'ne. <sup>17</sup> Anante Potifa'a egeno, nenaro'a amanage huno asmi'ne, Miza e'ori kazokazo Hibru eri'za ne' avrenka eme tam'i'nana ne'mo, nagrite eno zokago renantenaku nehige'na, <sup>18</sup> rankema hu'na krafage hugeno'a, nakre ku'a atreno atiramino fegi'a freno vu'ne.

### *Josefe kina hunte'naza naneke*

<sup>19</sup> Potifa nenaro'ma nevema asamino, miza e'ori kazokzo eri'za ne'kamo Josefe anahura nagrira hu'ne, hiankemo'a Potifa rimpamo'a teve re'ne.

**20** Ana higeno Josefena ozafa'amo'a avreno kini ne'mo'ma eri'za vahe'ama kinama hunezamantea kina nompi ome ante'ne. **21** Ana hianagi Ra Anumzamo'a Josefe'ene mani'neno avesinteno azeri so'e nehigeno, kina nonte vugota hu'nea ne'mo'ma keana knare'za hu'ne. **22** Kina nonte'ma vugote'nea ne'mo'a Josefena maka'a kina vahe'mokizmire kegava krinogu kva azeri oti'ne. Hagi inankna zama anampima haniazana agri azampi ante'ne. **23** Kina nonte'ma vugote'nea ne'mo'ma Josefe azampima ante'nea zankura agesa ontahine. Na'ankure Ra Anumzamo'a agrane mani'negu huno, maka'zama Josefem'a hiazana, aza nehigeno knare'zanke hu'ne.

## 40

### *Josefe'ma ava'na ke eri ama hu'nea naneke*

**1** Mago'a kna evutegeno anante Isipi kini ne'mofo ti tafente'ene breti kre'zante vugota huna'a ne'tremoke, ra zani Isipi kinimofona rimpia eri haviza hu'na'e. **2** Fero'a tare vugotena'a eri'za netrena, kinimofo tintfente'ene breti kre'zante vugota hu'na'a ne'tremokiznia tusi'a rimpia ahezanante'ne. **3** Ana netrena kinimofo avate kva hunente'nea ne' nompi, Josefe mani'nefi magopi kina ome huznantene. **4** Rankva ne'mo'a, Josefe kegava huznante'nogu ome zanantegeno, agra kegava kriznantegeke mago'a zaza kna kinafina mani'na'e.

**5** Hagi Isipi kinimofo tinkapure azeri nentea ne'ene breti negrea ne'enena kinafi mani'neke, tarega'moke rurerure ava'na ketere hu'na'e. Hianagi ana ava'na zanimoho agu agesamo'a ru kante rugante vutere hu'ne. **6** Nanterampi Josefe eno eme zanageana, zanagra zanasu zampi mani'nakeno zanage'ne. **7** Fero eri'za netre'moke kva'amofo kina nompi mani'nakeno zanantahigeno, Na'a higeta menina tanasu'zampina mani'na'e? **8** Higeno zanagra kenona anage hu'ne asami'na'e. Tagrama ava'na ke'hoa ava'namofo agu'agesama huama huno tasami vahera magore huno omani'ne. Hakeno Josefe'a ana kenona anage huno zanasami'ne, Anumzamo Agrake ava'na ketani'a eri ama hugahianki ava'nama kena'a zamofo naneke nasami'o.

**9** Kini ne'mofo tinkapure vugote'nea ne'mo'ma agrama ke'nea ava'na kea anage huno Josefena asmi'ne, Nagrama ava'nafima koana, navuga mago wain nofi me'ne, **10** ana waini nofitera 3'a azanku'na me'neankino, ani'na eri marenos amosrea aheno, raga'a reherafigeno knare'za huno afu arente'ne.

**11** Hagi Fero kapumo'a nazampi me'nege'na, waini raga tagi'na eri rati'na Fero kapufi nente'na, ana kapua Fero azampi eri'na ome ante'noe. **12** Higeno Josefe'a anage huno asami'ne, Ava'nama ke'nana zamofo agu'agesamo'a amana hu'ne, 3'a azankunamo'a 3'a kna huvame huno me'neankino, **13** 3'a knama evutesigeno'a, Fero'a ete erizanka'are kavrentenkenka ko'ma nehanaza hunka Fero azampi ti kapu'a erinka ome antegahane. **14** Hianagi knare'ma hunka umanisunka, muse hugantoanki nagrikura kagesa antahinenaminka, nagri nagenkea Ferona asmigeno ama'i kina nompintira navre fegi'a natreno. **15** Na'ankure nagrira musufa ase'za, Hibru vahe mopafinti navre'za eme nante'nage'ha, amafima ema mani'nofina magore hun'na antahi'na kena osu'noa zante navre'za eme kina hunante'naze.

**16** Ana zanke huno kini ne'mofo bretima vugoteno negrea ne'mo'a, Josefem'a knare'ma huno kini ne'mofo waini kapure'ma e'neria ne'mofo ava'na kema rukrahe humigeno nentahino'a, anage huno Josefena asmi'ne,

Nagranena ana zanke hu'na ava'na koana, 3'a eka'eka kupi bretia zogir-inte'naza nanunte me'ne. <sup>17</sup> Ana ekaeka kupina ruzahu ruzahu breti-rami Fero suza nanunte me'nege'za namamo'za eme nenazage'na ke'noe. <sup>18</sup> Anage higeno Josefe'kenona anage huno asmi'ne, Ava'nama kanazamofo agu'agesamo'a amana hu'ne, 3'a eka kumo'a, 3'a zagegnama hu avame hu'neankino, <sup>19</sup> 3'a zagegnama agteresigeno'a, Fero'a kazerisga huno ka-gena rukafriteno zafare hantigantesige'za, namamo'za kavufga negahaze.

<sup>20</sup> Hagi henka 3'a zagekna evutegeno, Feroma kasente'nea kna egeno maka eri'za vahe'amokizmia ra ne'za kre nezmanreno, vugoteno waini ti kapu'a erisga nemia ne'ene, bretima kre nentea ne'ene waini ti kapuama erino nemia ne'enena, ranra eri'za vahe'amofo zamavure, zanavre ama' hu'ne. <sup>21</sup> Ferona tinkapure vugoteno erisga hunentea nera, eri'zama'afi avrentegeno agra Ferona kapu'a azampi antente'ne. <sup>22</sup> Hianagi breti kre'zante vugota hu'nea nera, Josefe'ma ava'na kezanima zanasmi'nea kante ante'za zafare ahe'za hanti'naze.

<sup>23</sup> Hianagi kinimofo kapu'are vugota hu'nea ne'mo'a Josefena antahi omino, agekani ante'ne.

## 41

### *Fero'ma ava'na ke'nea zamofo naneke*

<sup>1</sup> Hagi tare zagegafu agateretegeno Fero'a ava'na keana, Naeli timofo ankenare oti'negeno, <sup>2</sup> ame huno Naeli timpintira 7ni'a masavenke huno afovage Bulimakao afu'tamimo'za hanati'za, tinnenafinti traza tragahu'za nenazageno ke'ne. <sup>3</sup> Anante'ma keana, ete 7ni'a zaferinage huno, vahe'mo kesane huga osu'nea Bulimakao afuzaga Naeli timpinti ehanati'za, tinnenafi ko'ma eman'iaza bulimakane magopi oti'za mani'naze. <sup>4</sup> Haviza hu'za zaferinage hu'naza Bulimakao afumo'za, 7ni'a knare'ma hu'za afovage'ma hu'naza Bulimakao afutamina zamahe'za nehana hu'naze. Anazama keteno'a Fero'a avu'ma mase'nefintira oti'ne.

<sup>5</sup> Ete mago'ene Fero'a mase'neno ava'nama keana, mago witi ramparera ome ahente eme ahente huno 7ni'a ranra nenage huno knare hu'nea witi me'negeno ke'ne. <sup>6</sup> Hanki ete henkama hanatia 7ni'a witi raga'amo'a osi higeno, zage hanatitegati ea zaho'mo azeri hagege higeno, nena'a fore hu'so osu'ne.

<sup>7</sup> Hagi osi witi ragamo'za 7ni'a ranra witi raga rente'neana asgahu nevazizageno ke'ne. Fero'a otino keana higeno ava'na koe huno hu'ne. <sup>8</sup> Hagi nanterame otino antahintahi hakare nehuno, vahe huzmantenge'za kasnampa vahezagane antahi'zane vahezagama Isipima nemaniza vahe ome zamasamige'za eme atru hu'naze. Fero'a ava'na ke'ama zamasmiana mago'mo'a eriama huno Ferona asamigara osu'ne.

<sup>9</sup> Hagi anante vugota huno Fero kapure kva hunentea ne'mo'a amanage huno Ferona asami'ne, Ko'ma nagrama ufre'noa knazamofo nanekea meni huama hu'na kasamigahue. <sup>10</sup> Feroga eri'za vahe ka'a karimpa aherantenka, kavate kva ne'mofa nompi, nagri'ene vugota huno breti negrea ne'ene kina hurante'nane. <sup>11</sup> Magoke kerageke tarega'mota ava'na ke'noe. Agrane nagra'ene, ava'na ti'afina taregamota rurerure av'ana ke'noankino, agu'agesa'a metere hu'ne. <sup>12</sup> Hibru nehzana magora anampina tagra'enena mani'neankino, kinimofo avate'ma kvama nehaza sondia vahe'mokizmi kva ne'mofa eri'za ne'mo kina hu'neno, ava'na keti'a agri asamukeno huama huno ana avana ketiamofa agu'agesa'a tasami'ne. <sup>13</sup> Hagi huama'ma huno

tasmi'nea kante anteno nagrira ete eri'zaniafi navrenenteno, agrira zafare aheno hanti'ne.

### *Josefe ava'na kea eriama hu'nea naneke*

<sup>14</sup> Hagi Fero'a huzmantenge'za Josefena mopa agu'a kina nompi mani'nege'za ame hu'za ome avre'za ageno, agi azoka hareno kena'a eri vasiteno, Fero avuga uhanati'ne. <sup>15</sup> Fero'a amanage huno Josefena asami'ne, Nagrama ke'noa ava'namofo agafa'a, magore huno eriama huno nasmiga vhahera omanitfa hu'ne. Hagi kagri kagenke nasami'za, ava'na kea eriama nehane hu'za hu'naze. <sup>16</sup> Higeno Josefe'a anage huno Ferona asami'ne, Nagra'a huamara osugahuanki, Anumzamo agrake Feroga ana avana keka'amofo agu'agesa'a eri ama huno kasamigahie.

<sup>17</sup> Nehigeno Fero'a anage huno Josefena asami'ne, Ava'nama ke'nofina, Naeli timofo ankenare, <sup>18</sup> ot'i'nenia negogeno, masavenke huno ra avufgane bulimakaona 7ni'a Naeli timpinti hanati'za traza nenazage'na ke'noe. <sup>19</sup> Negogeno ana timpinti mago'ene 7ni'a zaferinage huno kesane osuga hu'nea bulimakao afutamina, magore hu'na Isipi mopafina kora onke'noa afuzaga ke'noe. <sup>20</sup> Ana zaferinage huno asane huga osu'nea bulimakao afu'zagamo'za koteno'ma 7ni'a masavenke avufgane bulimakao afu'tmina zamahe'za ne'naze. <sup>21</sup> Hianagi ana afu'zagamo'za kote'za mani'naza kanteke vahe'mofa asane osu'are mani'nazage'na nege'na, navu'ma mase'nofintira ot'i'noe. <sup>22</sup> Hagi ete mago'ane mase'nena mago ava'na koana, mago witimofo rampa'arera, 7ni'a ranra nena raga'a ome ahente eme ahente hu'negena, <sup>23</sup> negogeno henka ete 7ni'a osasi rampa'ane witi hanatiana hagege hugege higeno, zage hanatitegati ea amuho'ane zaho'mo temagigeno hanati haviza hu'ne. <sup>24</sup> Ana osi rampane witimo 7ni'a ranra rampamo nenage huno ahente'nea witi rampa'a, aga assgahu nakri'ne. Hige'na ana ava'nagea kasnampa vahe'zaga zamasmuang mago'mo'a huama huno onasmi'ne. <sup>25</sup> Josefe'a amanage huno Ferona asami'ne, Feroga tare ava'nama ke'nana zamo'a magoke kampi vu'ne, Anumzamo hania zamofo eri ama huno Agra'a Feroga eri kaveri hu'ne. <sup>26</sup> Hagi 7ni'a knare zamavufagane bulimakamo'za 7ni'a kafu hu avame hu'nazankino, ana tarega ava'na kenamo'a magoke agu'agesage me'ne. <sup>27</sup> Hagi 7ni'a knare osu zaferinage Bulimakaomozama marerinagenka ke'nanana, 7ni'a kafue. Hanki 7ni'a osasi huno hagege hu'nea witi ramparamima zage hanatitegati amuhonentake zaho'moma eme temagigenka ke'nanana, e'i 7ni'a kafufina tusi'a agatonto kna fore hugahie. <sup>28</sup> Maka'zana meni fore hania zamofonku nagra huama huna Feroga negasamuankino, ama anazana fore'ma hania zamofo Anumzamo'a Agra'a eri ama huno Feroga kaveri hu'ne. <sup>29</sup> Hagi 7ni'a kafumofo agu'afina, maka Isipi mopafina, ne'zamo'a fore huhakare hugahie. <sup>30</sup> Hianagi 7ni'a kafumofo agu'afina tusi'a agatonto kna egahi-ankino, ana agatonto zamo'a Isipi mopafina kave'ma fore'ma hu'nea kna osanige'za, rama'a ne'zama fore'ma hu'nea kafuraminkura vahe'mo'za zamage kanigahaze. Hagi miko'zana ahe fanane hanigeno, mopamo'a haviza hugahie. <sup>31</sup> Ana mopafina kave'ma fore nehiaza osuno, agatereno tusi'a agate'za fore hanige'za, ko'ma knare kafuma mani'naza zankura zamagesa ontahigahaze. <sup>32</sup> Ete mago'ene Anumzamo'ma ana ava'na ke Ferogama tare zupa kasmi'neana amanahu hu'ne, Anumzamo hanigeno ame huno anazana fore hugahie.

<sup>33</sup> Hanki Feroga mago knare antahi'zane, agu'agesane ne' azeri otigeno Isipi mopa kegava hino. <sup>34</sup> Feroga mago'a vahe zamazeri otige'za, 7ni'a kafufina kegava hu'ne'za, ne'zamo'ma hakare hania knafina ne'zana eri'za 5fu'a kevu ante'ne'za anampinti mago kevua refko hu'za Isipi mopafina mago'zahu hu'za ne'zana eritru hiho. <sup>35</sup> Ne'zamo'ma hakare hania kafufina huge'za, maka'a ne'zana nompi eri tru hiho. Ferogama kegava hu'nana ranra kumate witi ragane ne'zanena eritru hute'za, vahe'mo'za kegava hiho. <sup>36</sup> Isipi mopafina 7ni'a kafufima agatontoma fore'ma hania kna'afina, e'i anama eritru hania nezamo zamaza hanige'za, zamagakura hu'za ama ana mopafina ofrigahaze.

### *Josefena Isipi mopare kva azeri ot'i'nea naneke*

<sup>37</sup> Hanki Fero'ene eri'za vahe'amozama ana nanekema antahi'zana knare hu'ne. <sup>38</sup> Fero'a eri'za naga'a zamasmino, Amanahukna huno, Anumzamofo Avamu'ene nera magora hakreta kegahuno? <sup>39</sup> Anante Fero'a anage huno Josefena asmi'ne, Anumzamo ana maka'zana kagra kasmi'negu, magora knare antahi'zane vahera omani'naze. <sup>40</sup> Kagra nagri nona kegava hune-nankena, ran tratera nagrake'za manisga hugantegahuanki, kema hanana kante vahenimo'za antahi kami'za kesga hugantegahaze. <sup>41</sup> Anage huteno Fero'a mago'ane anage huno Josefena asami'ne, Nagra mika Isipi mopa kegava huogu kva kazeri otue. <sup>42</sup> Anage nehuno Fero'a azampinti agra'a rinia zafino Josefe azampi vazinenteno, knare kasefa kena eri vasinenteno, anankempi golire ananke nofi hunte'ne. <sup>43</sup> Fero amagenare kva ne'mofo karisifi avrentegeno vano nehige'za, agri avufi kezati'za husga hunente'za, agrite zamarena re'naze! Nehuno maka Isipi mopa agri kvafi ante'ne.

<sup>44</sup> Mago'ene, Fero'a Josefena anage huno asmi'ne, Nagra Fero'na huankino kagripinti'ma kema e'orinesuno'a, mago'mo'e huno azana erisga huno mago'zana huge, maka Isipi mopafina aga rentegera osugahie. <sup>45</sup> Nehuno Josefenkura Zafenat-panea'e huno Fero'a agi'a antemine. Ana nehuno Oni kumate pristi\* ne' Potifera mofa Asenati ara avremine. Higeno Josefe'a agra Isipi mopa agu'afi vano nehige'za ke'naze. <sup>46</sup> Hagi Josefe'a 30'a Zagegafu huteno, Isipi kini ne' Ferontera eri'zana eri'ne. Ana huteno Josefe'a Fero enema mani'neretira atreno maka Isipi mopafina vano hu'ne.

<sup>47</sup> Hagi 7ni'a zagegafumofo agu'afina ne'zamo'a ana mopafina ampore'ne. <sup>48</sup> Hutegeni maka ne'zama 7ni'a kafufi Isipi mopafi fore'ma hiana eritru huno ranra kumapima me'nea nontamimpi ante'ne. Maka'a hozafinti ne'zama eri'za e'nazana, mago mago kumate'ma me'nea nompi eri atru hutere hu'ne. <sup>49</sup> Ana nehuno Josefe'a witi rgama eritru hu'neana, hagerinke-nafi kasepankna huno zogi atru higeno, mago'ene sigerirera erinte'za hanti-gara osu'naze. Na'ankure nompina aviteno herafi ramigeno anara hu'ne.

### *Josefe ne'mofavremofo naneke*

<sup>50</sup> Agate kna fore osu'negeno, tare ne'mofavre Josefena fore humi'ne. Oni kumate pristi ne' Potifera mofa Asenati ana mofavrerarena kase ami'ne. <sup>51</sup> Hagi Josefe'a zage ne'mofavre'amofo agi'a, Manase'e huno antenemino anage hu'ne, na'ankure knazama eri'noane, nenfa nonku'enena Anumzamo'a eri nagekani nante'ne. <sup>52</sup> Anantero mago ne'mofavre nenteno agi'a, Efraemi'e huno antenemino anage hu'ne, natazampi mani'noa mopafi Anumzamo nazeri raga renante'ne.

\* <sup>41:45</sup> Anumzamofo pristiompage, zagerema mono'ma hunentaza pristi ne'ku hu'ne.

<sup>53</sup> Hagi 7ni'a kafumofo agu'afi Isipi mopafima ne'zamo'ma ampomare'nereti vagaregeno, <sup>54</sup> Josefe'ma ke hu'nere, 7ni'a kafumofo agu'afina agate kna egeno miko'a mopa kaziga aga'zanku huva re'neanagi, Isipi mopamofo agu'afina ne'zana me'ne. <sup>55</sup> Tusi zamagazanku maka Isipi mopafina nehu'za, Ferontega rezanku zavike hazageno, Fero'a maka Isipi vahera zamasmino, Josefente vinkeno'ma na'anе nanekema tmasmisiana kema haniaza hoho. <sup>56</sup> Maka kaziga mopa kagi'afina zamagaku hazageno, Josefe'a mika feno nona anagige'za Isipi vahe'mo'za anampinti ne'zana miza se'naze. Ana nehigeno tusi'a agate'zamo miko Isipi mopafina fore hu'ne. <sup>57</sup> Zamagazamo maka kaziga mopafina hige'ze maka kaziga mopareti vahe'mo'za, Isipiti witi ne'zazmia Josefenteti eme miza hu'naze.

## 42

### *Josefe afuhe'mokizmi Isipi huzmantage'za vu'naza naneke*

<sup>1</sup> Jekopu'ma Isipi mopalrega witi me'ne hazankema nentahino'a, ne'mofavre naga'a anage huno zamasmi'ne, Na'a higeta ovufi avufina nehaze? <sup>2</sup> Isipi mopafina witi ne'zana me'ne hazage'na antahuanki, ofrita manisunema hanuta vuta ana mopalregati ne'zana ome mizaseta eho. <sup>3</sup> Hige'za Josefena 10ni'a afuhe'za witi miza senaku Isipi urami'naze. <sup>4</sup> Hianagi Jekopu'a Josefe negna Benzameni'ma hazenke erizanku koro nehuno, atregeno afuhe'zanena ovu'ne. <sup>5</sup> Hagi zamaga'zamo' a ana zanke Kenani mopafinena hige'za Israeli amohe'za ke hiaza hu'za witi ne'za miza senaku ruga'a vahe'ene urami'naze.

<sup>6</sup> Hagi Josefe'a ana mopafina gavana manino kegava kri'nege'za agritetike maka ana mopafi vahe'mo'za ne'zana eme miza se'naze. Hagi Josefe afuhe'za agrite e'za zamarena re'za kepri mopafi hu'naze. <sup>7</sup> Josefe'a afuhe'i zamavugosofi nezmageno, onke vahekna nehuno hanave'ane ke huzmanteno anage hu'ne, tamagra igati e'naze? Hige'za zamagra anage hu'naze, Kenani mopalregati ne'za miza senaku e'none. <sup>8</sup> Josefe'a afuhe'ina zamageni' hianagi, zamagra agrira keni' osu'naze. <sup>9</sup> Josefe'a ko'ma afuhe'inte ava'na kezamte'nea agesa nentahino anage huno zamasmi'ne, Tamagra mopati afureta kenaku e'naze. <sup>10</sup> Hianagi zamagra anage hu'naze, a'o, rantimoka kagri eri'za vahe'mota ne'za miza senaku e'none. <sup>11</sup> Tagra magoke ne'mofo mofavre nagakita, tamage vahe mani'none. Hagi eri'za nagaka'mota tagra mopa afure' vahera ome'none. <sup>12</sup> Anage hazanagi ke'zmi rezmanteno agra anage hu'ne, A'o, kegava osu'nona mopati afureta kenaku tamagra e'naze! <sup>13</sup> Hige'za zamagra anage hu'za asami'naze, Eri'za vahe'kamota maka 12fu'a vahekita magoke ne'mofo ne'mofavre naga mani'none. Hanki amitenamo'a Kenani mopal nerfa'ene manigeno, magotimo'a hago fri'ne. <sup>14</sup> Hianagi Josefe'a amanage huno rentase hu'ne, Tamagra mopati afure vahere hu'na neramasamue. <sup>15</sup> Tamagrama tamage nehaze hunama nagrama hanuana, amanahu hugahaze. Fero avufi hanave'ane ke huankita, ama kumara atreta ovu'nesageno, neramagna amare' e'nige'na kete'na, tamatrenueta mopalatirega vugahaze. <sup>16</sup> Hagi mago'mofo huntenko vuno neramagnana ome avreno eno. Hanki ruga'amota kinafi mani'nesageno, tamagenoka hugetama hunazana, tamagu'areti tamage hunafi kaneno. Havigema hanuta Fero avufina, tamage tamagra mopati afureta kenaku enaza vahere hu'na hugahue. <sup>17</sup> Ana nagara maka kina nompi 3'a zagegnafi zamavarentene.

<sup>18</sup> Hagi namba 3ma hia zagegnarera Josefe'a amanage huno zamasmi'ne, Nagra Anumzamofonku koro nehugu amana'ma hanazana manigahaze. <sup>19</sup> Hagi tamage vahe'ma mani'nesuta, atrenkeno mago neramafu kina huno mani'nena, ruga'amotma witi ne'zantmia erita zamaga zanku'ma nehaza naga tamirega viho. <sup>20</sup> Hianagi neramagnana ome avreta nagrite ehanatiho. Anama nehanageno ketamimo'a tamagesesigeta ofrigahaze. Hige'za kema zamasmiza hu'naze. <sup>21</sup> Zamagra zamagra amanage hu'naze, tamage neragnana haviza hunte'none. Na'ankure negonkeno agra o'e nehigeta antahiomuna nona'a ana knazamo'a tagritera fore nehie. <sup>22</sup> Rubeni'a ke nona'a amanage huno zamasami'ne, Nagra ontamasami'nofi, ana mofavrea azeri havizana osiho nehugeta ke'nia antahi onami'naza nona'a, menina agri'ma ahe fri'nona zamofo nona'a knazana enerune. <sup>23</sup> Zamagrama antahi'zana Josefe'a ketia nontahie hu'za hu'nazanagi, agra antahine. Na'ankure Josefema kema rekrahe humi vahe'mo'a amu'nozamifi mani'neno, nankeea akrehe huno zamasmi'ne. <sup>24</sup> Josefe'a zamatrevo vuno zavi ome atete'no, eno eme kema hunezmino'a, eri'za vahe'a zamasmige'za, Simeonina azeri'za negage'za azante nofi anakinte'naze.

### *Simeon nezmagnanteku hu'za azeri'za Isipi ante'naza naneke*

<sup>25</sup> Huteno Josefe'a hige'za witi ne'zana beki ku'zmifi eriri nezmante'za, zagozmia ana zanke hu'za beki kuzmifi eriri nezamante'za, kantega nevu'za nemema vanaza kave'ene eriri zamante'naze. <sup>26</sup> Hige'za donki afu'zmimofo agumpi witi ne'zama eririzmantaza erinte'za anantetira atre'za vu'naze. <sup>27</sup> Kantega umsenaku hazarega mago'mo donki afu'amofo ne'zama aminaku beki ku'a eriheta huno keana, beki ku'amofo avazare zago'a me'negeno ke'ne. <sup>28</sup> Afuhe'igizmia anage huno zamasami'ne, Beki ku'niafu zagonia eriri nante'nazanki keho. Hige'za zamahirahi nerege'za koro nehu'za rukre hu'za ovufi avufi nehu'za, anage hu'naze, Naza ama zana Anumzamo'a hunerante?

<sup>29</sup> Hagi zamagrama Kenani mopare unehanati'za, maka'zama fore huzmi'nea nanekea nezmafa Jekopuna amanage hu'za asmi'naze. <sup>30</sup> Ana nera, ana mopa kegava kri'nea ra nekino, hanave kefintike kea huno, tamagra mopati afureta ke vahe e'naze hu'ne. <sup>31</sup> Hianagi tagra anage huta asami'none, Tagra tamage vahe mani'nonanki, afure vhahera omani'none huta asami'none. <sup>32</sup> Tagra 12fu'a kogna nagakita, magoke ne'mofo mofavre nagare. Magotimo'a omanigeno, neragan'a nerafa'ene menina Kenani moparega mani'ne. <sup>33</sup> Anage hunkeno ana mopama kegava kri'nea ra ne'mo'a amanage huno tasami'ne, Mago nermafuna nagrite netretma, witi ne'za eneritma zamagaku'ma nehaza nagatamirega viho. E'inama hanage'na, tamage vahe mani'naze hu'na nagra antahigahue. <sup>34</sup> Hagi nagnatamimofona avreta enkena negena, tamagra tamage huta mopa afureta ke vhahera omani'naze hu'na antahi neramina, neramafuna avreraminena ama mopafina amne vute'ete huta ne'zana miza nehuta zagrera atregahaze huno hu'ne. <sup>35</sup> Anage hute'za beki ku'zmifinti ne'zama eri'za e'naza herafinaku nehu'za kazana ana kognamokizmi zago'zmia kona anakinare beki ku'zmifi metere hu'negeno, ana zogoma nezmafa'enema nege'za tusi koro hu'naze. <sup>36</sup> Nezmafa Jekopu'a amanage huno zamasmi'ne, Tamagra mofavre onte ne' kna hunenantaze. Josefe fanane higeno, Simeon fanane higeno, Benzamenina ana zanke huta avregahaze, ana maka zamo'a ha'renante. <sup>37</sup> Rubeni'a nefana anage huno asami'ne, Benzamenima avre'na

omesugenka tare ne'mofavreni'a zanahe frigahananki, nagri nazampi antege'na avre'na vute'na avre'na aneno. <sup>38</sup> Nehigeno Jekopu'a anage hu'ne, Nagri nenamofo'a kagranena uoramigahie. Nankure nefu'a frigeno, agrake mani'ne. Kama nevnageno kantegama hazenkema omeri'nige'na, efe nazokamate'nea vhahera nasuzamo nahefri'na fri'na fri vahe kumapi (Seol) umanigahue.

## 43

### *Ete Isipi vu'naza naneke*

<sup>1</sup> Ana knafina Kenani mopafina tusi zamagatontoza fore huno vu'ne. <sup>2</sup> Isipi mopareti'ma mizase'za eri'za e'naza ne'zama nehana hazageno, nezmafa'a amanage huno zamasmi'ne, Ete mago'ene vuta ne'zana ome mizaseho. <sup>3</sup> Hianagi Juda'a amanage huno nafa'amofona asami'ne, Ana kva ne'mo'a hankavenentake ke huranteno amanage hu'ne. Tamagra nagna tamimofoma avreta ome sanage'na tamavufina ontamagegosue huno higeta e'none. <sup>4</sup> Kagrama naganatima atresankeno'ma tagra'enema esaniana, tagra uramita nezanka'a ome miza huta egahune. <sup>5</sup> Hianagi kagrama Benzamenima atresankeno'ma tagra'nema omesniana tagra ovugahune. Na'ankure ana Isipi kva ne'mo'a amanage huno tasami'ne, Tamagna timimofoma avretama omesazana nagri navumo'a ontamagegahie hu'ne. <sup>6</sup> Anage nehzageno Jekopu'a (Israeli) amanage hu'ne, Tamagra nahigeta ana kva nera magora naganatia mani'ne huta asmi'nageno anankea hu'ne? E'ina'ma hu'naza zamo'a nagrira tusi'a zampi nazeri haviza haze. <sup>7</sup> Hianagi zamagra asami'za, Ana kva ne'mo'a ana maka'mota tantahige tantahige huno tagrik'u'ene, vahetigu'ene, tantahigeno amanage hu'ne, Nermafa'a ofri amne mani'nefi? Hagi magora naganatamimo'a mani'neo? Huno higeta tamagra naganatamimofona avreta eho hani'a nanekea ontahineta kenona'hu'none.

<sup>8</sup> Hutazageno Juda'a nafa'amofo Jekopuna amanage huno asmi'ne, Ana ne'mofavre Benzamenina huntegeno nagrane vanigeta, tagrane kagranne mofavre'zagatine tagakura huta ofrita mani'mneno. <sup>9</sup> Nagrani'a huvempa huanki'na Benzamenina kegava krintegahue, hanki kvama hu'so'e osanugenoma hazenkema eri'na ana knazana nagra erigahue. Hagi kagri kavure'ma avre'na omesuna nagra ana knazana erigahue. Nehanugeno ana knazamo'a nagrane mevava hugahie. <sup>10</sup> Hianagi tagrama avega ontetasina, menina tagra tare zupa vuta ete huta ne'zana erunesine.

<sup>11</sup> Nezmafa Israeli'a amanage huno zamasami'ne, Tamagrama Benzamenima avreta vunaku'ma hanuta amana hiho, mago'a knare'nare zafa rgama mopatifima me'neana kutamifina erinerita mago'a tusa masevene (balm), tumemofo rima'an, (honey) mananentake masavene, mananentake zafa rine, pistasios zafa ragane, almoni zafa raganena eri'neta vuta ana kva nera musezana ome amiho. <sup>12</sup> Ana nehuta mago'a zagoa eri aguheta tamazampina e'rineta, zamage kaniza e'ririnegahazanki, kutamifima eriranagetama erita e'naza zagonena erineta vuta ome amiho. <sup>13</sup> Ana nehutma nagna tami'mofona otita ame huta avretma ete ana kva nete viho. <sup>14</sup> Hagi nunamu huankino hihamu'ane Anumzamo ana ne'mofo avure asunku humaramantesuno'a, mago neramafune, Benzamenikinzia zanatre sanigeke ete egaha'e. Hagi nagrama mofavre ni'amokizmigu'ma nasunku'ma hanuna, nagra nasunku nehu'na manigahue. <sup>15</sup> Jekopu'a anage hige'za mofavre

naga'amo'za ana muse'zana (gift) e'neri'za, mago'ane zagoa eriguhe'za zamazampi e'neri'za, Benzamenina nevre'za ot'i'za Isipi moparega vu'za ana kva ne' Josefe avure uoti'naze.

### *Josefe'a Benjameni age'nea naneke*

<sup>16</sup> Hagi zamagranema nagana'amo Benzameni ne-egeno Josefe'ma negeno'a nom'aafi eri'za ne'a amanage huno hunte'ne, Ama vahera zamavarenka nompi ome nezmantenka, mago afu ome ahenka krenka ne'zana retro huo. Na'ankure zamagra nagrane feru ne'zana negahune. <sup>17</sup> Eri'za ne'amo'a agrama ke hiaza huno zamavareno Josefe nompi ome zamante'ne. <sup>18</sup> Anama huno Josefe eri'za ne'mo'ma zamavareno nompi vige'za kore nehu'za amanage hu'za hu'naze. Ko'ma kutifima eriri rante'nea zagoreku huno tavre nom'aafi tanteankino, tantahinegeno tazerino kazokzo eri'za vahe'a trohu neranteno mika donkitinena avre vagaregahie. <sup>19</sup> Anage nehu'za Josefe nompi eri'za nete, Josefe no kasante vu'za ome asami'za, <sup>20</sup> amanage hu'naze, ra netimoke, tagra ko'ma amare e'tama nezama eme miza senona naga e'none. <sup>21</sup> Hianagi ne'zama miza huteta, kantega umsenaku hunte kutima eriheta huta konana, magoke magokemota ne'zama mizase'nona kante zagotia kutimofo avazare me'negeta keteta ama erita e'none. <sup>22</sup> Aza ana zago'a eririranteneo e'i ana vahera onke'none. Antahita keta osu'neta ana zagona ete mago'ane ne'za miza hanune huta eritru huna zagonena erineta e'none. <sup>23</sup> Anage hazageno Josefe eri'za ne'mo'a amanage huno zamasmi'ne, Knare huta manigahazanki koro osuta akoheta maniho. Tamagri Anumzane, neramafa Anumzamo kutamifina zagoa eriramante'negahie. Nagra zagotmia ko namizage'na eri'noe. Nehuno Simeoni ome avreno eme zami'ne. <sup>24</sup> Ana huteno Josefe eri'za ne'mo'a nompi zamavareno eno, tina tagi zamige'za zamaga sese nehazageno, donki zamimofona ne'zana zami'ne. <sup>25</sup> Ana nehazage'za Josefe'ma agra nom'aafi ferura ne'za negahune hige'za antahi'nagu avega ante'za mani'ne'za musezana (gift) eri antente'naze.

<sup>26</sup> Hagi Josefe'ma nontegama ne-ege'za nege'za, musezama eri'za e'naza zana eme nem'i'za mopafi zamarena re'za avuga kepri hunte'naze. <sup>27</sup> Anante Josefe'a knare huta mani'nazo huno hu so'e hunezmanteno, anage huno zmantahige'ne, Ko'ma neramafanku'ma ozafa reno mani'ne huta nasmi'nazana, agra menina knare huno mani'nefi? Ofri mani'neo? <sup>28</sup> Hige'za zamagra anage hu'za asmi'naze, Nerafa'a eri'za nekamo'a knare huno ofri mani'ne. Anage hu'za nesami'za agafi kepri hu'za razampi antahimi'naze. <sup>29</sup> Ana hunentageno kesga huno nagna'amofo Benzameni, nerera mofavre negeno amanage huno hu'ne, Ama mofavrea neragana e'ma hutama nasmi'naza mofavrefi? Josefe anage nehuno, Anumzamo'a knare huno mofavrenimoka kaza huno asomu hugantegahie hu'ne. <sup>30</sup> Josefe'a negna negeno zavi atesia agesa higeno, hantka huno zamatreño zavi ate'sia kumaku hakreno nemasefinka asafi (rum) ufreno zavi ome ate'ne. <sup>31</sup> Zavitetenno avugosa sese huteno asu'zana eri rentrakto nehuno, megi'a atiramino amanage huno zamasmi'ne, ne'za atinketa namaneno. <sup>32</sup> Josefe ne'zana arure atimi'za, zamagrira arure atinte zamante'za, Isipi naga'mo'za zamagrugu ne'zana ne'naze. Na'ankure Isipi vahe'mo'za Hibru vahe'enena magopina bretia onegahaze. Isipi vahe'mo'za Hibru vahe'enema magopi kave ne'zankura zamesra huno zamagotegahie. <sup>33</sup> Hagi pusa mofavrereti agafa huno fore hu'nare, ranteti

vuno osite zamazeri rempi huzmantage'za mani'ne'za tusi'a zampi zamano nevazige'za zamagogogu nehu'za ovufi avufi hu'naze. <sup>34</sup> Josefe itareti eri'za vahe'mo'za ne'zana refko hu'za afuhi'e ome ante nezmante'za, Benzameni tafepina 5fu'a vahe'mo'za nega ne'za antente'naze. E'ina hige'za magopi mani'ne'za knare hu'za ne'zane, tine nene'za muse hu'naze.

## 44

### *Josefe'a negna kipi kapu'a eririnte'nea naneke*

<sup>1</sup> Anante Josefe'a noma'afi eri'za ne'amofona anage huno asmi'ne, Beki ku'zmifina eri'zama vanaza avamente ne'zana erivite nezmantenka, zago'zmia zamente zamente ku avazare eriri zamantetere huo. <sup>2</sup> Hagi Silvare kapuni'a nagana zami'mofo ku avazare eriri nentenka, witima mizase'nea zagonena eririnto, higeno eri'za ne'mo'a Josefe'ma asmiazza hu'ne. <sup>3</sup> Masa hu'za nehigeno, ana vahetmina huzmanteg'e'za donki zamine vu'naze. <sup>4</sup> Zamagra rankumara atre'za afete ovu'nageno, Josefe'a eri'za ne'amofona anage huno asami'ne, Otinka ana vahera zamavaririnka ome zamazerisunka anage hunka zamasnio. Na'a higeta knare'zama huma neramanteana havizana hunteta silvare kapu'a erita e'naze? <sup>5</sup> E'i ana kapufintira ranimo'a tinkera noneanki, henkama fore'ma hania zana ana kapufintike nege. Tamagra e'inahu'ma hazana havi tamavu'tamava hu'naze hunka ome zamasamio. <sup>6</sup> Higeno agra zamavaririno ome zamazerino, Josefe'ma hia nanekea ome zamasamige'za, <sup>7</sup> Zamagra anage hu'za asmi'naze, Na'a higeno rantimo'a amanahu kea nehie? Eri'za vahe kamota amanahu'zana huga osu'none! <sup>8</sup> Hagi beki ku avazare'ma me'negeta zagoma haketa eriteta Kenani mopareti eritama kagrite'ma e'nonana ko. Inankna huta kagri ramofo nompintira silivao, golia musufa segahune? <sup>9</sup> Ina eri'za vahe kamofo beki kupinti'ma hakenka eri fore hanunka, ana mofona ahe frisnanketa, tagra rantimofo kazokazo eri'za vahe manigahune. <sup>10</sup> Agra anage hu'ne, Menina kema hazaza hugahue, iza'o eri'nemige'na hakena eri fore hanumo nagri kazokazo eri'za ne' manigahie. Hanki anazama osu'namota knare hu'nazankita amne vugahaze. <sup>11</sup> Anage hige'za mago mago'moza ame hu'za ku'zmia hanti mopafi ante'za, eri hetu hazageno, <sup>12</sup> Josefe eri'za ne'mo'a nempu'zmimofo kuteti agafa huno haketeno vuno nagna zamimofo kute uhanatino, ana kapua Benzameni beki kipi me'negeno keno eri fore hu'ne. <sup>13</sup> Anante zamagra kukena zamia sagne nehu'za, hakarezazmia donki agumpi erinte'za ete rankumatega vu'naze. <sup>14</sup> Anante Juda'a afuhe'zane Josefe nonte enehanati'za, Josefe'a nompinka mani'nege'za avuga mopafi ruzagani'za mase'naze. <sup>15</sup> Josefe'a afuhe'ikizmi anage huno zamasmi'ne, na'a higeta havizana hu'naze? Tamagra ontahi'nazo, nagra kasnampa (divinesen) tro hu'na oku me'nenia'zana ke'na eri fore osugahuo? <sup>16</sup> Higeno Juda'a anage hu'ne, na'anee huta ranimoka hugahune. Inankna huta hazenkea osu'none huta hugahune. Anumzamo kagri eri'za vahe'mofo kumira keno eri fore hu'ne, Antahio, kapu eri'negenka kenka eri fore hu'namo'ene tagranena ranimofo kazokzo eri'za vahe manigahune. <sup>17</sup> Hianagi Josefe'a amanage huno zamasmi'ne, Nagra e'inahu'zana osugahue. Ina nemofo beki kupinti kapu ni'ama eri fore'ma hu'nemo, kazokazo eri'zana eri nantegahie. Hagi ruga'amota neramafa'ma mani'nerega tamarimpa frune vugahaze. <sup>18</sup> Juda'a Josefente erava'o huno anage hu'ne, ranimoke, muse (plis)

hugantoanki, knare kagri eri'za vahe'mo'na kagesafinkea hugahuo. Kagra, Fero'enena mago'zahu hu'na'anki, krimpa kna eri'za vahe kamo'na huananto. <sup>19</sup> rantomoka anage hu'nane, Tamagrira neramafa'ene neramagna enena mani'neo hunka eri'za vahekamota tantahige'nane? <sup>20</sup> Hanketa tagra rantomoka anage huta kasami'none, nerafa'a ranafa refinka neraganana ante'ne. Hagi nezanarerera'a tare zanante'neankino nempu'amo'a frigeno, agrake mani'negeno, nef'a tusiza huno avesinente. <sup>21</sup> Huta hunkenka kagra eri'za vaheka'motagura anage hu'nane, ana mofavrea avreta nagrite enke'na ka'neno hu'nane. <sup>22</sup> Hianagi tagra ranti'mokagura anage hu'none, osi ne'mo'a nefana otregahie. Hanki nefama atreno esigeno'a nef'a frigahie huta kasmi'none. <sup>23</sup> Hianagi kagra eri'za vahekamotagura anage hu'nane, neramagnama avreta omesuta, nagri navufina onke'gosaze. <sup>24</sup> Anankema hutanketa tagra nerfa hirega kagri eri'za vahete uhanatita, rantomokama hana kea ome asmi'none. <sup>25</sup> Hagi mago'a kna evutegeno nerafa'a anage hu'ne, ete vuta mago'a ne'zana ome miza seho hu'ne. <sup>26</sup> Hianagi tagra anage hu'none, tagranema neraganama'ma ovanigeta, tagra uoramigahune. Neraganama'ma tagranema ovanigeta ana ne'mofo avurera ovugahune hunkeno, <sup>27</sup> kagri eri'za vahe nerafa'a tagrikura anage hu'ne, a'nimo'ma tare ne'mofavrema kase nami'neana tamagra antahi'naze. <sup>28</sup> Mago'mo'a fanane hige'na nagra anage hu'noe, mago'a zagamo aheno tagana vazinegahie nehu'na, nagra mago'enena onke'noe hu'ne. <sup>29</sup> Nehuno mago'ene amanage hu'ne, Neganama avreta vanageno'ma, anahu hazenke erisigeta, nagrira efe nazokara nazeri ante henkma tesageno nasuzamo nahe frina, fri vahe kumapi (Seol) umanigahue huno hu'ne. <sup>30</sup> E'inage hu'negu kagri eri'za vahe nenfante nagra vanugen, ana mofavrema nagrane omesiana, nenfa'a agu'amena ana mofavrefi ante'neankino, <sup>31</sup> ana mofavrema nagranema ovanigeno'ma kesuno'a agra frigahie. E'inama eri'za vahe ka'mona hanuna, nenfana eri'za ne' ka'a efe azokara azeri ante henkma antesugeno asuzampi mani'neno, fri vahe kumapi (Seol) umanigahie. <sup>32</sup> Hanki'na eri'za vahe'kamo'na anage hu'na ana nekura huvempa hu'noe, nenfaga nagrama avre'na omesugen'o'na ana knazana nagrite mevava hugahie hu'na hu'noe. <sup>33</sup> E'ina hu'negu muse (plis) hugantoanki natrege'na nagra eri'za vahe kamo'na neragna nona hu'na kazo kazo eri'zana ranimoka eriganta'nena, neragnana atregeno nefuzane vino. <sup>34</sup> Na'ankure asuzamo nenfana azeri haviza huzanku nentahanagi, inankna hu'na nenfantera vugahue nenagama ovanige'na?

## 45

### *Josefe'ne huno afuhe'inte agra'a huama hu'nea naneke*

<sup>1</sup> Josefena asuzamo'a avitegeno asunku'zana azeriga osuno, anante oti'naza vahekura ranke huno anage hu'ne, Hakare'amota amafintira megi'a atiramiho, hige'za atiramizageno Josefe'a nefu'zane mani'neno huama huno, nagra Josefe'ne huno zamasi'ne. <sup>2</sup> Nezmasamino krafa huno zavi netege'za, Isipi vahe'mo'za nentahii'za vu'za Fero nompi nemaniza vhahera ana zamofo agenkea ome zmasamizage'za maka'moza antahi'naze. <sup>3</sup> Anante Josefe'a afuhe'mokizmia anage huno zamasmi'ne, nagra Josefe'ne! Hanki nenfa'a knare huno mani'nefi? Higeno afuhe'mokizmia tusi'a zama-gogo fege'za magore hu'za kea osu'za mani'naze.

<sup>4</sup> Anante Josefe'a afuhe'mokizmigu anage hu'ne, Muse (plis) hurman-toanki nagrite erava'o hiho. Zamagra anante erava'o hazageno anage huno zamasmi'ne, tamagrama zagore'ma natrage'za Mizase'za Isipima e'naza ne' tamagri neramafu Josefe'ne. <sup>5</sup> Hianagi tamagrama mizante'ma natregenama e'noa zankura, tamagra ramagra tamarimpa ohe ahea osiho. Na'ankure tamagra'a natrage'na amafina eomani'noanki, Anumzamo hunantege'na egota hu'na vahe'mo'za ofri manisagu emani'noe. <sup>6</sup> Na'ankure agate'zamo'a tare kafu evigeno, 5fu'a kafua amne me'neanki'za hoza eri'za kri'za onkafigahaze. <sup>7</sup> Hagi Anumzamo hunantegena ofrita manisagu egote'na e'noe. Ama mopare tamazerise nehu'na, agate kna'afina tamagrira tamazama hanuana tusi'a knare kankamumpinti tamaza hugahue. <sup>8</sup> E'ina hu'negu, tamagratmi hunantage'na amafina ome'noanki, Anumzamo hunantege'na e'noankino, Agra'a nazeri otige'na Ferona antahintahi nem'i'na, noma'a kegava nehu'na, mika Isipi mopanena kegava hu'noe. <sup>9</sup> Hagi menina ame huta nenfa'ma mani'nerega vuta, anage huta ome asmiho, negamofo Josefena, Anumzamo'a rankva vahe Isipia azeri oti'neanki, hantka hunka eno, huta ome asmiho. <sup>10</sup> Hagi kagrane mofavre naga ka'ane, kagehe'inena nezmvrenka, sipisipine, meme kevune, bulimakao kevune, mika feno zanka'anena enerinka enka nagri tvaonte Goseni mopare emanigahane. <sup>11</sup> Anantega emani'enage'na 5fu'a agatontoma hu kafumofo agu'afina, nagra ne'zana tamigahue. Hagi kagrane, mika nonka'afima mani'naza vahe'taminema omesutma tamunte omnena tamagaku hugahaze. <sup>12</sup> Hanki keho, tamagra negageno nagana'nimo Benzameni enena negege'na, nagra'a nagipinti Josefe'na ama kea tamagrira nerasmue. <sup>13</sup> Hagi Isipi mopafima ra nagima eri'na mani'noa zankue'ene, mika knare'zama Isipi me'negeta kaza zamofo nenekea nenzfana ome nesamita, ko ame' hutma avreta kama echo. <sup>14</sup> Anante negna Benzameni anankempi ome azeri anukino zavi atentegeno, Benzameni'a ana zanke huno zavi ate'ne. <sup>15</sup> Josefe'a miko nefugizmi zamantako nehuno zavi atezamantetege'za, henka nefu'zane keaga hu'naze.

<sup>16</sup> Josefena nefu'za e'naze kema, Fero'ene eri'za vahe'amozanena nentahiza muse hu'naze. <sup>17</sup> Anante Fero'a Josefenkura anage hunka negfu'gizmia zamasamio hu'ne, Kutuntamia donki afu agumpi erinteta avreta Kenani moparega viho, <sup>18</sup> vutma neramafane maka nontamifima nemaniza vahe'ene zamavareta nagrite enke'na, so'e mopa Isipi nagra tami'nena anampi maniho. <sup>19</sup> Menina nagra huneramantoe, karisia Isipiti erita vuta osi mofavre tamine, a'ne tamine, nermafanena ome avreta echo. <sup>20</sup> Tamagra miko zantamigura tamagesa ontahiho, Isipi moparetira knare'za erigahaze.

<sup>21</sup> Hige'za Israeli amohe'za Fero'ma ke'ma zamasmiaza nehazageno, Fero'ma asamia kante anteno Josefe'a karisia nezamino, kantegama ne-mema vanaza ne'zanena zami'ne. <sup>22</sup> Mago mago'mofona Josefe'a magoke kukena amitere nehuno, Benzamenina 5fu'a kukenagi, 300'a silva zagone ami'ne. <sup>23</sup> Nefana ama'a zantami antente'ne, 10ni'a donkimofo agumpina Isipi mopafima knare'nare zantamima me'nea zantamina eri antenenteno, 10ni'a donkimofo agumpi witi rgaramine, raisi rgaramine (grain) nezmino, nezmafa kantega ne-eno neme esia kave'enena antentege'za eri'za vu'naze. <sup>24</sup> Anante Josefe'a huzmantegge'za atre'za vu'za nehazageno, anage huno zamasmi'ne, Kantegama nevuta ha' fra osiho! <sup>25</sup> Hagi zamagra Isipitira e'za Kenani mopare nezmafa Jekopunte ehanati'haze. <sup>26</sup> Zamagra anage

hu'za nezmafana eme asmi'naze, Josefe'a ofri amne mani'ne, tamage agra Isipi mopa miko kegava kri'ne, nehazageno ana kegura agesa tra'nereno antahi ozami'ne. <sup>27</sup> Hianagi zamagra mika ke Josefe'ma huzmante'nea kea, nezmafā eme nesmizagēno nentahino, karisima negeno'a, nezmafā Jekopu agu'amo'a kasefa higeno muse hu'ne. <sup>28</sup> Anante Israeli'a anage hu'ne, ha knarere, mofavrenimo'a ofri amne mani'ne. Nagra vu'na ome kete'na henka frigahue.

## 46

### *Jekopu'a Isipi vu'nea naneke*

<sup>1</sup> Hagi anagema huteno'a Israeli'a afufenoma'a miko enerino Isipi vunaku nevuno Bersebama unehanatino'a, nefā Aisaki Anumzamofontega ofa Kresramana vunte'ne. <sup>2</sup> Ana kenagera Anumzamo'a ava'nagna zampi Israelina amanage huno asmi'ne, Jekopuo, Jekopu higeno, ama mani'noe. <sup>3</sup> Higeno Anumzamo'a anage hu'ne, Nagra Anumzamo'ne, nafakamofo Anumzane, Isipi vuzankura korera osuo na'anckre, nagaka'a Nagra zamazeri hakare hugahue. <sup>4</sup> Kagrane magoka Isipia uramitenā, ete kavre'na marerigahue. Hagi Josefe'a kavurga erisu huno asegtategahie.

<sup>5</sup> Anage higeno, Jekopu'a Bersebati otino nevige'za amohe'za Fero'ma ome avreta echo huno'ma zami'nea karisfi nezmafā Jekopune ne'onse mofavre nagazmine a'nane nagazmine, hu'za anampina zamavarente'za vu'naze. <sup>6</sup> Mika afuzagazmine, fenozminema Kenani mopareti'ma eritru hu'nazane eri'za Isipi e'naze. Jekopu'ene agehe'zane magoka maka erami'naze. <sup>7</sup> Maka mofavre'a zagane, agehe'zane, mofo'ne zaga'ane, agehemofone naga'ane, agripinti'ma fore hu'naza naga'ane zamavareno Isipi vu'ne.

### *Isipima e'naza nagamofo naneke*

<sup>8</sup> Jekopu mofavre naga'ma Isipima vu'nazana naga'mokizmi zamagi'a ama'ne, Rubeni'a Jekopuna agonesa mofavre. <sup>9</sup> Rubeni ne'mofavre naga'mokizmi zamagi'a, Hanoki'e, Palu'e, Hezroniki ananterā Karmi'e. <sup>10</sup> Simioni ne'mofavre naga zamagi'a Jemueli'ma, Jamini'ma, Ohati'ma, Jakini'ma, Zohariki'ma, Sauriki'za, Kenani kumate a'mofo mofavre naga mani'naze. <sup>11</sup> Hagi Livaē ne'mofavremokizmi zamagi'a, Gersoni'ma, Kohati'ma, Merari'e. <sup>12</sup> Hagi Juda ne'mofavre naga'mokizmi zamagi'a, Eri'ma, Onani'ma, Sela'ma, Perezi'ma, Zera'e. (Hianagi Erike, Onanikea Kenani mopare fri'na'e.) Hagi Perezi mofavrerenā Hezroni'ene Hamulike. <sup>13</sup> Hagi Isaka ne'mofavre naga'mokizmi zamagi'a, Tola'ma, Puva'ma, Iobu'ma, Simroni'e. <sup>14</sup> Hagi Zebuluni ne'mofavre naga'amokizmi zamagi'a, Seredi'ma, Eloni'ma, Jalili'e. <sup>15</sup> Ama'i Lia'ma Padan-Aram mani'neno Jekopunteti kase zmante'nea mofavreramine. Hagi mofara magoke anteneankino agi'a Daina'e. Hagi ana miko ne'mofavrene, mofo'ne naga'anena 33'a vahe forehu anante anante hu'naze.

<sup>16</sup> Hagi Gati mofavre nagara, Zifioni'ma, Hagi'ma, Suni'ma, Ezboni'ma, Eri'ma, Arodi'ma, Areli'e. <sup>17</sup> Hagi Asa ne'mofavre nagara, Imna'ma, Isva'ma, Isvi'ma, Beria'e. Hanki nezmasaro agi'a Sera'e. Beria ne'mofavremokizni zanagi'a, Heberiki, Malkiel'i'e. <sup>18</sup> Hagi ama'i Lia kato mofa Zilpa'ma Jekopunteti'ma kasezmante'nea ne'mofavre naga'mokizmi zamagi'e. Zilpama kasezmanteg'e zama fore hu anante anante'ma hu'nazana 16ni'a vahetami fore hu'naze. <sup>19</sup> Jekopu nenaro Resoli ne'mofavrerenā Josefe'ene, Benzamenike. <sup>20</sup> Josefe'a Isipi mofare umani'negeno Manaseke, Efraemikea

fore hu'na'e. Asenati'a Potifera Oni kumate (mago agi'a Heliopolis) mono kva ne'mofa mofa'mo, kase ami'ne. <sup>21</sup> Hagi Benzameni ne'mofavre naga, Bela'ma Besa'ma, Asbeli'ma, Gera'ma, Namani'ma, Ehi'ma, Rosi'ma, Mapimi'ma, Hapimi'ma, Ardi'e. <sup>22</sup> Hagi ama'i Resoli'ma Jekopunteti'ma kase zamante'nea mofavre nagamokizmi zamagi'e. Hagi Resolima kasezmante'nefinti'ma fore hu'anante'ne hu'nazana ana makara 14ni'a vahe fore hu'naze. <sup>23</sup> Hagi Dani'a magoke ne'mofavrea ante'neankino agi'a Husimi'e. <sup>24</sup> Hagi Naftali ne'mofavre naga, Jazili'ma, Guni'ma, Jezeri'ma, Silemi'e. <sup>25</sup> Hagi ama'i Lebani'ma mofa'amofo Resoli'ma ami'nea kato mofa Bilha'ma Jekopunteti'ma kasezmante'nea ne'mofavre naga'mokizmi zamagi'e. Bilha'ma kasezmante'nea mofavre naga'pinti'ma fore'ma hu'anante'ne hu'nazana ana makara 7ni'a vahe fore hu'naze. <sup>26</sup> Ana maka Jekopu naga'ma Isipima e'nazana, agri'pintima fore hunante'ne hu'naza nagaki'za, ana makara 66'a vahekino, anampina a'nene mofavreraminena ohampri'naze. <sup>27</sup> Hagi Josefe'a Isipi umani'neno mofavre eri'fore hu'neana, tare ne'mofavre kase zanante'ne. Ana hu'neankino Jekopu naga'ma Isipima mani'nazana ana makara 70'a vahe mani'naze.

### *Jekopu'a naga'ane Isipi uhanati'nea naneke*

<sup>28</sup> Hagi Jekopu'ma eravaoma nehuno'a, Josefe'ma kama eme averi hanigeno Goseni kumate'ma vanigu, Judana huntegeno Josefentega vugota hu'ne. <sup>29</sup> Ana higeno Josefe'a hosí afu'a retro huno karisifi marerino nefä Israeli ome kenaku Goseni vu'ne. Hagi nefama eme negeno'a, anankempi azerianukino zavirazanra kna atente'ne. <sup>30</sup> Anante, Israeli'a amanage huno Josefena asmi'ne, Ofrinka knare hunka mani'nanke'na kvugosafina eme koanki menina natrege'na mani'nena fri'neno.

<sup>31</sup> Higeno Josefe'a afuhe'inku'ene nefä nagaku'enena amanage hu'ne, Nagra mareri'na Feronte vu'na amanage hugahue, Nafuh'e'zane, nafa'nimofo naga'enena, Kenani mopareti nagritega e'naze hu'na ome asmigahue. <sup>32</sup> Hagi zamagra afuzaga kva nehaza vaheki'za, sipisipizmine, memezmine, bulimakao kevuzmine nezmauvre'za, maka feno zaminena eri'za e'naze, <sup>33</sup> hanugeno'ma Fero'ma nankna eri'za eneriza vhahere huno'ma tamantahima kenigeta, <sup>34</sup> amanage hiho, Tagrane nerafa zanena eri'za vahe kamota, afu' kva huta korapa nehazave mani'nonte eta meninena e'none huta tamagrama hanageno'a, tamagrira tamatresigetma Goseni mopare umanigahaze. Na'ankure Isipi vahe'mo'za trazama nenaza afutamima kegavama nehaza vahekura, zamesra huzmante'za zamagote'nezmantaza vahe mani'naze.

## 47

### *Jekopu naga kevumo'za Goseni umani'naza naneke*

<sup>1</sup> Anante Josefe'a amanage huno Ferona ome asami'ne, Nafani'ane, nafuh'e'zane maka sipisipi'zamine, Bulimaka'ozamine, maka zazmine Kenani mopa atre'za Goseni mopare eman'i'zane. <sup>2</sup> Anage huteno afuhe'impinti Josefe'a 5fu'a vahe zamavareno Fero avure vigeno, <sup>3</sup> Fero'a ana afuhe'mokizmia anage huno zamantahige'ne, Nankna eri'za e'neriza nagare? Hige'za Ferona anage hu'za asami'zane, Tagehemofonteti'ma eno nerafante'ma eno tagrite'ma e'neana eri'za naga kamota tagra sipisipi afu kva nehu'na naga mani'none, <sup>4</sup> nehu'za Feronkura anage hu'naze, Osi'a gna ama mopare maninaku tagra e'none. Eri'za vahekamota afu'mofo ne'zana,

trazana omanegeno aga'zamo Kenani mopare forehigu, menina muse (plis) hugantonanki, eri'za vahekamota tatregeta Goseni mopare umani maneno.

<sup>5</sup> Anante Fero'a Josefena anage huno asmine, Negafa'ene, kafuh'e'zanena kagritega e'naze. <sup>6</sup> Hagi Isipi mopamo'a kegava hankeno me'neanki, negafane kafuh'e'inena knare huno tre tre hu'nenia mopa zamige'za Goseni maniho. Hagi kegeno anampima knare vahe'ma mani'nesiana huge'za, nagri bulimakao afura kegava hiho. <sup>7</sup> Anage higeno Josefe'a nafa'amofo avreno Feronte egeno, Jekopu'a asomu ke Ferona hunte'ne. <sup>8</sup> Fero'a anage huno antahige'ne, Kagra nama'a zagegafu hu'nane? <sup>9</sup> Higeno Jekopu'a Feronkura anage hu'ne, Nafahe'za zaza kna maniza e'nazanagi, nagra atupa'a knafi natagura huna ne-ena, 130'a zagegafu hu'noe. <sup>10</sup> Jekopu'a asomu ke Ferona hunteteno atreno vu'ne. <sup>11</sup> Higeno Josefe'a nafa'amofone, afuhe'inena zamavareno Isipi mopamo'ma knare huno tretre hu'nerega, Rameses kaziga Fero'ma hu'nere mopa ome regori zamige'za mani'naze.

<sup>12</sup> Josefe'a nefane, afuhe'ine, nefaa nompima nemaniza vahe'ene, osi mofavre naga'enena, mani'naza avamente ne'zana zami'ne. <sup>13</sup> Hianagi Isipi mopafine, Kenani mopare'enena tusi'a zagereno mikazana tefanane higeno, mika mopafina ne'zana omnetfa hu'ne. <sup>14</sup> Josefe'a Isipi mopareti'ene Kenani mopareti'ma maka zagoma eri'za ne'zama eme mizasaza zagoa eritru huteno, erino Fero nompima zagoma nentazafi ana mika ome ante'ne.

<sup>15</sup> Hagi Isipi vahe'mo'zane Kenani vahe'mo'zama zagozmima ne'zante'ma maka atre'za eri hanama hutage'za, Isipi vahe'mo'za Josefente e'za anage hu'naze, zagotia hago atreta erihna hu'nonanki, frisunki ne'zanaramio.

<sup>16</sup> Anante Josefe'a anage huno zamasami'ne, Zago tamima omanea nona'a, afu'zagatmi eme naminke'na afu tamimofo nona hu'na ne'zana refko hurami'neno. <sup>17</sup> Hige'za hosiramima, sipisipiramima, memekiramima bulimakaoramima, donki afu'zagaramima hu'za zamavare'za Josefena eme nemizageno nona huno, ana kafufima nesaza ne'zana zami'ne.

<sup>18</sup> Ana kafuma vagarege'za mago zagegafurera Josefente ete e'za anage hu'naze, rantomoka kavurera fra okigahune. Zagotia hago kagrite atreta eri hana nehuta, mika afutamina ranti'moka kagrite atre vagare'none. Hagi rantomoka menina tagrane mopatige asizanke me'ne. <sup>19</sup> Nahanigeta tagra frisunkeno mopatimo'a havizana hugahie? Tagri'ene mopatinena nezanteti miza hugeta, tagra Feronte kazokazo eri'za erinenteta manimneno. Nehunka avimza tamigeta tagra ofrita mani'nesunkeno, ama mopamo'a, trankino megusa avu'avara osino. <sup>20</sup> Hazageno Josefe'a mika Isipi mopa ne'zanteti mizaseno Ferona eri ami'ne. Mika Isipi vahe'mokizmnia zamaga'zamo'a zamazeri havizantfa hige'za mopa zami'a ne'zante atrageno, ana mika mopamo'a Fero mopa sevare'ne. <sup>21</sup> Hagi Josefe'a ana mika vahetamina kazokazo eri'za vhahre huno, Isipi mopamofo ruga raga atupa'aregati zamavareno, ranra kumatmimpi ome zamante'ne. <sup>22</sup> Hianagi Josefe'a pristi vahe'mokizmnia mopa miza osegeno, Fero'a ana pristi vhahre ne'zana zamige'za nene'za mopa'zmia zagarera otre'naze.

<sup>23</sup> Hagi Josefe'a amanage huno maka veara zamasmi'ne, Keho, hago menina tamagri'ene mopatmi'nena Fero miza semi'noe. Menina mago'a avimza timinenia tamagra hoza eritma hankregahaze. <sup>24</sup> Hagi ne'zama hamare knarer 5fu'a ko'nama anaki'nuta, mago ko'na Fero nemita, 4'a ko'nafintira hozafi avi krisaza zane, nontamifi naga'ene ne'onse mofavre naga'mozanema nesazaza tamagra erigahaze. <sup>25</sup> Hige'za anage hu'naze,

Kagra knare kavukava hurantanketa ofrita mani'none! Knare agampu ra'nimofo avurera hiankita, Fero kazokzo eri'za vahe manigahune. <sup>26</sup> Anage hazageno, Josefe'a Isipi mopamofo tra kea anage huno ante'ne, Hozafi kave'ma hamare'za 5fu'a kevuma antesafintira mago kevua kini ne'mofo amitere hugahaze hu'nege'za, ana hume neazageno eno ama knarerha ehanati'ne. Hagi pristi vahe'mo'zage mopazmia otre zamagra'a eri'naze.

<sup>27</sup> Menina Israeli vahe'mo'za Isipi mopare, Goseni agu'afi mani'ne'za, mika zana erisanti nehare'za, rama'a vahe fore hu'naze. <sup>28</sup> Jekopu'a Isipi moparera 17ni'a zagegafu mani'ne. Jekopu'ma manino'ma e'nea zagegafu'a ana maka'a 147ni'a zagegafu hu'ne.

<sup>29</sup> Israeli'ma (Jekopu) frisnia knamo atupa higeno, mofavre'a Josefe ke huno amanage huno asmi'ne, Muse (plis) hugantoanki kagrama nagriku'ma kave'ma sinante'sunka, menina kazana fenka namopi antenka musezana hunaverinka tamage hunka huo. Muse (plis) hugantoanki Isipia ase onantegahane. <sup>30</sup> Hianagi nagrama frisnugenka, kagra Isipitira erinka vunka vahe'niama asema nezmanfa ome asenanto. Higeno Josefe'a huno, kema hanaza hugahue. <sup>31</sup> Agra anage hu'ne, Tamage hu'na hugahue hanunka, huvempa huo, higeno tamage hu'na ana hugahue huno Josefe'a asmi'ne. Anante Israeli'a (Jekopu) kepri huno sipare mani'neno Josefena muse hunte'ne.

## 48

### *Jekopu'a tare Josefe mofavre asomu ke huzanante'nea naneke*

<sup>1</sup> Hagi mago'a kna evutegeno Josefena anage hu'za asmi'naze, Negafa'ma kri eri'nea nanekea antahinano, hu'za Josefe asmi'zageno, Josefe'a tare ne'mofavre'a Manasene, Efraemikizni neznavreno vu'ne. <sup>2</sup> Vahe'mo'za Jekopuna ome asami'za, konkeno negamofo Josefe'a kagenaku ne-e, hu'za hazageno Israeli'a hanave enerino otino sipa'are mani'ne. <sup>3</sup> Anante Jekopu'a anage huno Josefena asmi'ne, Tusi'a Hanave'ane Anumzamo Lusi mofare Kenani fore hunamino asomu kea hunenanteno, <sup>4</sup> amanage huno Agra nasmi'ne, Antahio, Nagra hanugeno kagripintira vahera fore hunakare hu'za kumara ante'za nemanisage'za, vahe'mo'za hamprigara osughahaze. Ana nehu'na ana mopa kagehe'mofo zamisuge'za, erisanti hare'za mani vava hugahaze huno nasami'ne. <sup>5</sup> Hagi menina kagra tare mofavre znante'nane, Kenani mofare mani'nogenka, kamama Isipi mofare mani'enka, kase znante'nana mofavrea nagrire, Efraemike Manasekeia nagri mofavre manigaha'e. Rubeni'ene Simioni'enema mani'na'ankna hugaha'e. <sup>6</sup> Hanki henkama kasentesana mofavrea kagri mofavre manigahie, zamagra nezmafu zanagire makazana refko hu'za erigahaze. <sup>7</sup> Hagi korapara nagra Padan-Aramuti neogeno, Resoli'a frige'na nasunku hu'na afete Efrata me'nege'na, kantega Kenani mopafi Efrata vu kantega zavi eme nete'na asente'noe (E'i Betlehemicie).

<sup>8</sup> Anante Israeli'a Josefe ne'mofavrerarena neznageno anage hune, Ama aza mofavrerarene? <sup>9</sup> Higeno Josefe'a nefankura anage huno asmi'ne, Zanagra nagri mofavre'rarene Anumzamo'a amafi mani'nogeno nam'i'ne. Higeno Jekopu'a anage hu'ne, Zanavrenka nagrite eguna asomu kea huzantaneno. <sup>10</sup> Hagi Israeli'a hago ozafareno avurga keso'e osu'ne. Ana higeno Josefe'a ne'mofavrerarena zanavreno uravaao higeno, zananukino antako huzanante'ne. <sup>11</sup> Ana huteno Israeli'a anage huno Josefena asmi'ne, Nagra

kagrira kvugosafina onkagegahue hu'na nagesa antahi'noanagi, menina Anumzamo'a natrege'na kagri'ene, mofavreka'ararena tamagoe.

<sup>12</sup> Anante Josefe'a nef a moteteti mofavre'a rarena neznavreno, avugati mopafi kepri hu'ne. <sup>13</sup> Ana huteno Josefe'a ana mofavre'ararena zanavreno uravao huteno, tamaga azanura Efraemina avreno, Israelina aza hog a kaziga nemino, hog a kaziga azanura Manasena avreno Israelina azan tamaga kaziga ami'ne. <sup>14</sup> Manase'a nempu'amo mani'neanagi, Israeli'a henka ne'mofo Efraemi asenire tamaga azana, nenteno hog a azana, nempu'amofo asenire anteno, azana anteganti antegma huno zananunte ante'ne. <sup>15</sup> Ana huteno asomu ke Josefena hunenteno amanage hu'ne, korapa'ma nenfa Abrahamu'ene Aisakike Anumzamofo avure vano huna'a kna huno, nagrira Anumzamo mani'zaniafi sipisipi kva nehia kna huno kva hunanteno menina amagnare ehanatie.

<sup>16</sup> Havi zampinti naza hu'nea ankeromo, asomura huranantegahie.

Nagri nagimo tanagripi me'nigeno, nenfa Abrahamune Aisakikizani zanagimo'enena zanagripina meno vugahie.

Hanki zamagra tusi'a vahetami erifore hu'za miko mopafi manigahaze.

<sup>17</sup> Hagi Josefema kegeno nef'a'ma azan tamagama Efraemi asenire nentege no muse nosuno, nef a azana Efraemi aseniretira erino Manase asenire ante'ne. <sup>18</sup> Ana nehuno Josefe'a nefana anage huno asmi'ne, Nenfaga e'inahura osunka, amamo kota fore hu'neanki tamaga kazana amamofo asenire anto. <sup>19</sup> Ana hianagi nef'a'i o' nehuno anage hu'ne, Ne'nimoka nagra antahi'noe, Manasempintira rama'a vahe fore nehinkeno, rukazi huno tusi'a vahetami manigahie. Ana hu'neanagi Efraemipintira nefuna agatereno tusi'a vahetami fore huno, miko mopafina rukazi hu'za rankuma ante'za manigahaze. <sup>20</sup> Agra ana kna zupa asomu ke huneznanteno anage hu'ne,

Israeli vahe'mo'za vahe'ma asomu kema huzmante'nakura anage hu'za hugahaze.

Anumzamo'ma Efraemine, Manasekiznima asomu'ma huzanante'neaza huno Anumzamo'a asomura huramantegahie hu'za hugahaze!

Nehuno agra Efraemina, Manase avuga avrente'ne! <sup>21</sup> Ana huteno Israeli'a Josefena anage huno asmi'ne, Kama nago! Nagra hago fri'za huanagi Anumzamo'a tamagrane mani'neno, tamavreno ete tamafahe'i mopa bainati kazinkonteti'ene atireti'ene Amori vahera zamahe'na hanare'noa mopagi'na kafuhe'ina ozamigahuanki kagri negamue.

## 49

### *Jekopu'a mofavre naga'a asomu ke huzmante'nea naneke*

<sup>1</sup> Jekopu'a amanage huno mika ne'mofavre'amokizmi zamasmi'ne, Henkama tamagrite'ma fore hania zamofo nanekea tamasamigahuanki,

<sup>2</sup> Jekopu mofavre naga'nimota tamagra eme atru huneta tamagesa anteta nerafa'na Israeli'na hanua nanekea antahiho.

<sup>3</sup> Rubeniga nagonesa mofavremoka, ese hihamu ni'afinti kasegante'nogenka zamagaterenka mareri vahe mani'hanku, hanave kamo asaga hu'ne.

- 4** Hianagi timo hageno eviankna huno, nagakafina ran kagia omanegahie.  
 Na'ankure negafa sipare marerinka  
 haviza hunka mago a'ni'a avazu nehunka sipani'a eri hi'mna vu'nane.
- 5** Simioni'ene Livaikea kogna mani'na'e.  
 Bainati kazinkno zanimo'a, vahera zamazeri havizantfa hugahie.
- 6** Nagri knare antahi antahimo'a, tanagri antahi antahifina omanegahie.  
 Nagra kema anakisapina omanigahue.  
 Na'ankure zanarimpa ahenke'ne vahera akafrigaha'e.
- Zanagra musezampi vu'ne, Bulimakao agia agruna nofi akafrina'e.
- 7** Tanarimpa ahe'zantera tusi huneranantoe. Na'ankure tanarimpa  
 ahezamo'a arava ohegahie.  
 Tanarimpa nehena, hazenke vaher manigaha'e.
- Jekopu'na nagri'pintira tanatufe atra'nena, Israeli mopafina arure arure  
 huta manigahaze.
- 8** Judaga kafu kaganaza kagi erisga hugahaze.  
 Kagri kazamo'a ha' vaher ka'amokizmi zamanankempi megahie.  
 Kagri negafa ne'mofavremo'za kepri hu'za zamarena regahaze.
- 9** Judaga laioni anenta kna hu'nane.  
 Kagra nemamofoga laionimo ne'zaga aheno nenaku kva hiankna hu'nane.  
 Kagrikura vaher'mo'za kagoro hugahaze. Mago vaher'mo'a kvako osugahie.
- 10** Judaga kva vaher'mokizmi azompamo'a kagripi mevava hugahie.  
 Kini vaher azompamo'a agararemofo amu'nompi me'nesigeno,  
 Nafa'amo'a henka Sailo kumate ehanatigahie.
- Hanige'za hakare ranra kumate veamo'za agri kea erizafa hugahaze.
- 11** Donki anentara krepirenofiteti rentesnankeno manigahie.  
 Agaho donkima avesi'nesia krepitofite'ma arentesigura antahi muhara  
 osugahie.
- Kukena'a waini timpi sese hu'ne, na'ankure ne'zamo'a amporegeno nehana  
 huga osu'ne.
- 12** Agra rama'a waini tina nenegu huno tare avurgamo'a koranke hu'ne,  
 agra afu'mofo amirina rama'a nenegu huno, ave'mo'a efenentake hu'ne.
- 13** Zebuluniga hageri ankenare umanigahane.
- Umani'nesanke'za vente'mo'za efre'za vu'za hugahaze.  
 Mopa kamofo agemo'a Saidoni kuma atupare uhanatigahie.
- 14** Isakaga hankave donkie,  
 tare fenonku'mofo amu'nompi manigsa hugahane.
- 15** Agrama kegeno knare manigsa kuma me'negeno,  
 ana kumamo knare zantfa hu'negeno,  
 hanave'a erigoteno eri'za eri'ne.  
 Ana hu'neanagi henka'a kna'ane kazokzo eri'za erigahie.
- 16** Daniga kva (jas) vaher tro hunka vaheka'a kegava hugahane. Mago naga  
 Israeli kevufi manigahaze.
- 17** Ha' osifavemo kamofo ankenare mani'neno, hosimofo agamerumpafi  
 amprigeno, agumpifi vu'nea ne'mo amefigati asga hurami'ne.
- 18** Ra Anumzamoka nahoke ahesnanegu, kavega ante'na mani'noe.
- 19** Gatiga kumza vaher'mo'za kahegahaze.  
 Hianagi rukrahe hunka, zamagumpi zamarotgo hugahane.
- 20** Asaga hentofa ne'za eri fore hugahane.  
 Rankva vaher zame'nesia ne'za, hankregahane.
- 21** Naftaliga, ahi a' afu dia atregeno agareno viankna nehunkna,

knare so'e nanekege hugahane.

<sup>22</sup> Josefega zafa azankunamo raga renteankna hugahane, azankunamo ti ankenare me'neno raga reno, pagagi huno kegina refiteankna hugahane.

<sup>23</sup> Ha' vahekamo'za atireti hanaveti'za hara hunegante'za, kevea negahe'za, kazeri haviza hugahaze.

<sup>24</sup> Hianagi Jekopu Anumzamo'a Josefena hankavea aminkeno azamo'a oragesigeno, kevema ahesiana hantaga osugahie.

Ana Anumzamo'a Israeli vhahera sipisipi afu kegava hiankna nehuno, zamagu'vazi havegna hugahie.

<sup>25</sup> Na'ankure Jekopu'na negafa'na Anumzamo kaza nehuno, hilhamu'ane Anumzamo asomu huneganteno, anagamu monafinkati asomu huneganteno, mopa agu'afinti tina hanati'nigenka asomura e'nerinanke'za, karimpafinti'ma fore hanaza mofavre'mo'zanena asomura erigahaze.

<sup>26</sup> Kagri negafa'na asomumo'a nagri nagehe'i asomura agatereno mevava agonagna huno mareri'ne, ana asomumo'a, Josefega kokovite me'nenige'za, kafuhe'za kage anagamute'za kagegahaze.

<sup>27</sup> Benzameniga afi ha' kragna (wolf) hugahane.

Nanterampi freno zaga aheno traga hiankna nehunka,

kinaga'afi refko huno erino ome'mi eme'mi hiankna hugahane. <sup>28</sup> Ama ana maka 12fu'a Israeli nagakino, nezmafa'a mago mago naga nofi'ma mani'naza avamente asomu kea huzmantetere hu'nea naneke.

### *Jekopu fri'nea naneke*

<sup>29</sup> Jekopu'a amanage huno mofavre naga'amokizmia zamasmi'ne, Nagrama fri'na vahe'n'i'ane umani knanim'o' kofta nehie. Hagi nafahe'ima ase zamante'naza mopare, havegampi ome asenanteho. Hiti ne' Efroni mopama mizama se'nefi ome asenanteho. <sup>30</sup> Makapela havegampi Mamre kuma tvaonte Kenani mopa agu'afi, Abrahamu'ma ana mopane havegane vahe asente'zane huno Efroni'pinti'ma mizama se'neea mopafi ome asenanteho. <sup>31</sup> E'i anampina Abrahamune nenaro Serane ase'znante'naze. Aisakine nenaro Rebekagiznia anampi ase znante'nafi, anampinke a'ni'a Liana asente'noe. <sup>32</sup> Ana mopane havegane Hiti ne' mofavrefinti miza se'neane. <sup>33</sup> Anagema huno mofavre naga'amokizmi zamasmi vaga reteno, agiararena sipaye asuteno vagare asimu atreteno frino naga'ane umani'ne.

## 50

### *Israeli'ma fri'nea naneke*

<sup>1</sup> Anante Josefe'a nefi avugosafi umseno, zavi atenenteno antako hunte'ne. <sup>2</sup> Henka Josefe'a fri kerfare kva nehia eri'za vahe'a huzmantegge'za, kehiaza hu'za avufgamo'ma kasri'zanku agu'afina mago'a marasini nente'za eri so'e hute'za, Israelina (Jekopu) masave fre'za ante'naze. <sup>3</sup> 40'a zage gnafi e'i anazana huga hazankino, ana foti'a zagegnafina avufga eri so'e hu'naze. Ana hazageno Isipi vahe'mo'za 70'a zagegnafi zamasunku hu'za zavira ate'naze.

<sup>4</sup> Anante zavi'ma atekna agateregeno, Josefe'a anage huno Fero nompi eri'za vhahera zamasmi'ne, Tamagra menima nagri'ma antahi namisuta

muse huramantoanki, Ferona amanage huta ome asmiho, <sup>5</sup> Nenfa'a hvempa ke hunanteno amanage hu'ne, nagra ha fri'za huanki, nagrama Kenani mopafi kerigama kafinte'nofi anantega ome asenantegahane. Anage hu'negu natrege'na avufga'a eri'na mareri'na ome asentete'na, ete a'neno. <sup>6</sup> Higeno Fero'a amanage hu'ne, Anagamu vunka negafa'ma huvempa huno kasmi'neaza hunka ome asento.

<sup>7</sup> Hagi Josefe'a nefu asenteku anagamu marerigeno, Fero eri'za vahe'mo'zane, nomaf'i kva vahe'ene, mik'a Isipi mopafi kva vahe'ene, <sup>8</sup> mik'a Josefe naga'ene, nefu'zane, nefu naga'enena vu'naze. Hianagi osi mofavre naga'zmine afu kevu zaminena Goseni mopafi zamatre'za vu'naze. <sup>9</sup> Anama Josefe'enema vu'nazana rama'a sondia vahe'ene vu'nazankino, mago'a karisifi maniza nevazageno, mago'a hosi agumpifi mani'za vu'naze.

<sup>10</sup> Hagi ana vahe'mo'za vu'za Jordani timofo kantu kaziga ankenarega, witi honama neharaza kumate Atadi umani'naze. Anante 7ni'a zage gna zamagra umanine'za, zamagrama zamavuzmavapima nehazaza hu'za, nezman-fankura tusi zavi ate'naze. <sup>11</sup> Ana mopafima nemaniza Kenani vahe'mo'za kazama witi akru neharaza kumate Atadi mani"neza zavi netage'za nezmage'za anage hu'naze. Ama'i Isipi vahe'mo'za tusi'a zavi atetere, nehu'za agi'a Abel-mizraim hu'nazankino, zage hanati kaziga Jodani me'ne.

<sup>12</sup> Hagi Jekopu mofavre naga'mo'za nezmafa'ma zmasami'neaza hu'naze. <sup>13</sup> Agri mofavre'mo'za kerfa'a eri'za Kenani mopafi vu'za, Makapela haveg-ampi Mamre kuma tvaonte ome asente'naze, ko'ma Abrahamu'ma vahe asente mopae huno Hiti ne' Efroninteti, miza hu'nea mopafi asente'naze. <sup>14</sup> Ana'ma huno Josefe'ma nefama asentetege'za, afuhe'zane nefama asenteku mareri'naza vahe'ene maka ete Isipi moparega vu'naze.

### *Josefe'a afuhe'i kumi'zmi atre zamante'nea naneke*

<sup>15</sup> Hagi nezmafa'ma fritege'za, Josefe nefu'za anage hu'naze, tagrama havizama hunte'nona nona'a, tagrira na'a hurantegahie? <sup>16</sup> Nehu'za zamagra Josefena ke atrente'za anange hu'naze, Negafa'a frinaku nehuno, <sup>17</sup> anage huta Josefena asmiho hu'ne, muse (plis) hugantoanki, havi avu'ava hugante'nazana kumi zamia atre'zmanto. Menina muse (plis) hugantoanki, negafa Anumzamofo eri'za vahe'mota havi avu'ava hugante'none. Ana kema Josefe'ma nentahino'a zavi ate'ne.

<sup>18</sup> Anante afuhe'za e'za Josefe avuga zamugosaregati umase'za anage hu'naze, Antahio, tagra kagri kazokazo eri'za vhahere. <sup>19</sup> Hianagi Josefe'a anage huno zamasmi'ne, korora osih, nagra Anumzana omani'nogu keaga huoramantegahue. <sup>20</sup> Tamagra nagrira nazeri haviza hu'nazanagi, Ra Anumzamo'a rama'a vahe zamaza hunaku nentahino anara hu'neankino, menina ana zamo'a fore nehie. <sup>21</sup> E'ina hu'negu tamagra korora osih, nagra tamagri'ene, neone mofavre naga'enena tamazeri knare hugahue. Nehuno zamanukige antege nehuno, knare kegaga huzami'ne.

### *Josefe fri'nea naneke*

<sup>22</sup> Hagi Josefe'a Isipi mopare afu aganahezane mani'neno, 110ni'a zagegafu hu'ne. <sup>23</sup> Efraemi mofavremo mofavre antegeno negeno, Manase ne'mofavre'mo Makiri mofavre antegeno Josefe'a amote zamavarenteno keteno fri'ne.

<sup>24</sup> Josefe'a amanage huno afuhe'ina zamasmi'ne, Nagra fri'za hue, Anumzamo tamagrira kegava huneramanteno, tamavreno ama mopafintira marerino Abrahamuma, Aisakima, Jekopuma huvempa huzmant'e'nea

mopare vugahie. **25** Anante Josefe'a Israeli ne'mofavre nagara amanage huno huvempa huno zamasmi'ne, Anumzamo tamagrira kegava hura-mante'nena zaferinani'a erita mareriho. **26** Hagi Josefe'a 110ni'a zagegafu maniteno frige'za, avufgamo'ma kasrizanku agu'afina mago'a marasini ante'za eri so'e hute'za masave freza, zavoafi eri antageno Isipi mopafi me'ne.

## Eksodas-Atirami'naze Mosese'ma Kre'nea Nampa 2 Avontafere

*Israeli vahe'mo'za Isipi mani'neza rama'a vahe fore hu'naza naneke*

<sup>1</sup> Israeli ne' mofavre naga'mo'za a'mofavre zamine Isipima nezmafa Jekopu'enema vu'naza naga'mokizmi zamagi'a ama'ne, <sup>2</sup> Rubeni'ma, Simioni'ma, Levi'ma Juda'ma, <sup>3</sup> Isaka'ma, Zebuluni'ma, Benzamini'ma, <sup>4</sup> Dani'ma Naftali'ma, Gati ene Asa'e. <sup>5</sup> Hagi Josefe'a ko Isipi umani'nege'za, Jekopumpinti fore'ma hu'naza nagara maka 70'a naga'mo'za vu'naze. Hianagi Josefe'a ko Isipi umani'ne. <sup>6</sup> Hagi Josefe'ene ana maka afu'aganahе'zane ana knafima magokama vu'naza naga'a fri vagare'naze. <sup>7</sup> Hianagi Israeli vahe'mo'za mofavrea kase'za eri hakare hazageno, tusi hankvenentake vahe fore hu'za Isipi mopa mani avite'naze.

<sup>8</sup> Hagi henka Josefe'ma hu'nea zantmima keno antahino osu'nea ne'mo, Isipia kasefa kini efore huno kegava hu'n. <sup>9</sup> Ana kini ne'mo'a vahe'agura amanage huno zamsmi'n, Keho, Israeli vahe'mo'za tagrira tagatere'za, rama'a vahe fore nehazageno, hankave zamimo'a tagatenere. <sup>10</sup> E'ina hu'negu enketa mago'a kanku haketa zamazeri haviza hanunke'za vhahera fore huhakarea osnaze. Ha'ma fore hanige'za, ha' vahetirega ante'za ha' hunerante'za kumatia atre'za vugahaze.

<sup>11</sup> Anage hige'za, kazokzo eri'za kva vahe zamazeri otizageno, Isipi kini ne' Fero'ma fenoma antesnia rankumatre, Pitomu kuma'ene, Rameses kuma'enena Israeli vhahera zamazeri haviza nehazage'za ki'naze.

<sup>12</sup> Tusiza hu'za Israeli vhahera zamazeri haviza hazanagi, mago'ane ru-pazi hu'za rama'a nehazageno, Isipi vahe'mo'za Israeli vhahera koro huzmante'naze. <sup>13</sup> Israeli vhahera zamasunkura huozmantage'za eri'zana hanaveti'za eri'naze. <sup>14</sup> Tusi'a eri'za fukinteti briki trohu eri'zane, hozafi eri'zane mago'a eri'za zami'za, nomani'zazmia tusiza hu'za zamazeri amuho hazage'za zamarimpa akahezampi mani'naze. <sup>15</sup> Anante Isipi kini ne'mo'a, Hibru a'ne'mo'zama mofavre'ma kasenteku'ma nehzageno zamazama hukema kse nezmiia Hibru a'trena, Sifrane Puagiznia amanage huno zasmi'n, <sup>16</sup> Hibru ane'mozama mofavrema kasentenaku'ma nehanageta zamaza hutama kasezmantesuta,\* mofa'nema kasezmante-sagetma, zmatrenke'za maniho, hagi ne'mofavrema kasezmantesageta zamahe friho. <sup>17</sup> Hianagi ana a'tre'mokea Anumzamofonku koro ne-huke, Isipi kini ne'mo'ma hanave kema huno'ma ne' mofavre'ramima zamahe frihoma hu'neana, zamahe ofri zmatrege'za mani'naze. <sup>18</sup> Ana higeno Izipi kini ne'mo'a ana a'trena ke higeke akeno anage huno znan-tahige'ne, Na'a higetna ne' mofavre'rmina zamahe ofrita zmatrake'za mani'naze? <sup>19</sup> Mofavrema zamaza huke kasezmi a'tre'mokea amanage huke Ferona kenona'a hunte'na'e, Hibru a'ne'mo'za zamagra Isipi a'negnara osu'za hanavenentake hu'nazanki'za, uohanati'nonke'za hanatinonke'za ame'ama hu'za mofavrea kasenentaze. <sup>20</sup> Ana higeno Anumzamo'a mofavrema zamazama huke kasezami a'tre'na knare huznantegeno, Israeli vhahera kase hakare hazage'za hanavenentake vahetami rama'a

\* **1:16** Mofavrema kasente nompima vazana tare havere manineza kankamumpi mofavrea kase-nentaze.

fore hu'za vu'naze. <sup>21</sup> Ana a'tremokea Anumzamofonku koro nehaku huno Anumzamo'a asomu huznantegeke znagranena agafa huke mofavre kasente'na'e. <sup>22</sup> Anante Fero'a ana maka Isipi vahe'a amanage huno hanaventake ke huzmante'nne, Hibru a'nemo'zama ne' mofavrema kasezmanatesazana, zmvaretma Naeli timpi matevu nezmatreta, mofa'nema kasezmantesagetma ozmahe zmatrenke'za maniho.

## 2

### *Mosesema ksente'nea naneke*

<sup>1</sup> Ana knafina mago Livae nagapinti ne'mo'a, mago ara Livae nagapinti erigeno, <sup>2</sup> amu'ene huno ne' mofavre ksenteno, keana hiranto mofavre fore'ma higeno, 3'a ikamofo agu'afi frakino antegeno mani'ne. <sup>3</sup> Hianagi ana mofavre'mo ra huno 3'a ikama higeno mago'ane frakintega'ma nosuno'a, ekaeka ku tro huno, kolta fukinuti renkanireteno, ana mofavrea ana ekaekapi anteteno erino Naeli tinkenafi me'nea uha trazampi ome frakino ante'ne. <sup>4</sup> Ana mofavremofo nesaro'a agrite'ma fore haniaza kenaku ogantu'a mani'ne.

<sup>5</sup> Fero mofa'mo ti frenaku, eri'za mofa'nene Naeli tinte erami'za, ana tinkenare nevu'za ekaekara uha trazampi me'negeno negeno, eri'za mofa'a huntegeno omerino eme ami'ne. <sup>6</sup> Ana mofa'mo'ma ekaekama erinagino keana, ana mofavremo'a zavitegeno, asuntagi nenteno anage hu'ne, Ama Hibru vahe'mokizmi mofavre. <sup>7</sup> Anante ana mofavremofo nesaro'a, Fero mofara antahigeno, Knare vu'na mago Hibru ara ome avre'na anenkeno mofavrea kegava krigantegahifi? <sup>8</sup> Higeno Fero mofa'mo'a anage huno hu'ne, Vunka kema hanaza hunka ome avrenka eno huno huntegeno, ana mofa'mo'a vuno ana mofavremofo nerera ome avreno e'ne. <sup>9</sup> Fero mofa'mo'a amanage huno ana ara asmi'ne, Ama mofavrea avrenka ome kegava krinante'nege'na, miza segantaneno, higeno ana mofavrea avreno kegava krinte'ne. <sup>10</sup> Ana mofavre'mo'ma rama higeno avreno Fero mofate vigeno, Fero mofa'mofo zage mofavre'aza higeno, timpinti avre fegu'a atre'noe nehuno Mosese'e\* huno agi'a antemi'ne.

<sup>11</sup> Hagi ana knafina Mosese'ma nena huteno, mago zupa vahe'amo'zama tusiza hu'za kazokzo eri'zama enerizarega nevuno keana, mago Hibru nera, Isipi ne'mo nehegeno ome negeno, <sup>12</sup> omegi emegema hiana mago vahera omani'negeno keteno, ana Isipi nera ahe frino ksepampi asente'ne. <sup>13</sup> Anante knazupa Mosese'a nevuno keana tare Hibru ne'tremoke zanagra zanagra ha' nehakeno ome neznageno, hazenkema agafama hu'nea nera antahigeno, Na'a higenka negafuna nehane? <sup>14</sup> Hianagi ana ne'mo'a ke'non'a a huno, Iza kvati'a maninenka refko hurantegahane huno kazeriotine? Kagra Isipi ne'ma ahe fri'nanaza hunka nahe frinaku nehano? Higeno Mosese'a koro nehuno antahintahima hiana, vahe'ma ahe fri'noa zana hago e'ama hige'za antahi'naze hu'ne.

### *Mosese'a koro freno Midieni kaziga vu'nea naneke*

<sup>15</sup> Fero'ma ana kema nentahino, Mosesena ahe frinaku hianagi, Mosese'a atreno freno Midiani kumatega umaninaku vu'ne. Vuno mago tinkerire umani'nege'za, <sup>16</sup> mago Midiani pristi ne'mo'a 7ni'a mofa'nem zmanteneanki'za, nezmafa sipisipine meme afu'tmimo'zama tima nesnagu

\* <sup>2:10</sup> Mosese e'ma hu'neana, Hibru kefina, timpinti avre fegu'a atre'noe hu'ne.'

tinkerire neazageno, <sup>17</sup> ruga'a sipisipi afu kva vahe'mo'za eme zmahenati trazageno, Mosese'a otino ana mofa'nea ome zamaza huno nezmafa sipisipi afutamine, meme afutamina ana tina afi zamige'za netageno, <sup>18</sup> ana mofa'nemo'za nezmafa Ruelinte (Jetro) uhanatizageno anage huno zmantahigene, nahigeta menina hantaka huta aze? hige'za, <sup>19</sup> ruga'a sipisipi kva vahe'mo'zama tahemanenatiza vhahera, mago Isipi ne'mo taza huno zmahenenatino, sipisipiti'anena taza huno tina afizmi'ne. <sup>20</sup> Anante Rueli'a (Jetro) zmantahigene, ina ana nera mani'ne? Nahigeta atreta e'naze? Ome kehinkeno kave emeneno, hige'za ome avre'za azageno, <sup>21</sup> Mosese'a zmagranema manisigu mago arimpa higeno Rueli'a (Jetro) mago mofa'a, Zipora amigeno a' eri'ne. <sup>22</sup> Zipora'a amu'ene huno ne'mofavre ksentegeno, Mosese'a rurega ne'mo'na kragna emani'nogu agi'a Gesomu'e hu'na ante'mue.

<sup>23</sup> Za'za kna evutegeno Isipi kini nera fri'ne. Hianagi Israeli vahe'mo'za tusi'a knazama eri'za kazokzo eri'za eneri'za, Anumzamofontega zavi krafa hu'naze. Ana zavi krafa zimimo'a Anumzamofo avure marerigeno, <sup>24</sup> Anumzamo'a ana zavi krafazamia antahinezamino, Abrahane, Aisakine, Jekopunema huvempa huno huhagerafi'nea kegu agesa antahi'ne. <sup>25</sup> Anumzamo'a Israeli vhahera nezmageno, knazampima mani'nazazana keno antahino hu'ne.

### 3

#### *Zafati tevere'nea naneke*

<sup>1</sup> Mosese'a nenemo, Jetro Midiani pristi ne'mofo sipisipi afu tamine meme afutami kva nehiankino, mago zupa, ana sipisipi afutamine meme afutami zamavareno ka'ma mopamofona mago kaziga asoparega afete vuno Anumzamofo agona, Horepi mago agi'a Sainaie nehaza agonare uhanati'ne. <sup>2</sup> Anante Anumzamofo ankeromo'a, mago zafafina tevemo hagana hagana huno nerefi efore higeno, Mosese'ma keana tevemo'a hagana hagana huno te'neanagi, ana zafa tevea ore'ne. <sup>3</sup> Ana higeno Mosese'a amanage huno hu'ne, Ruzahu'za huno zafa tevea oreanki, anante vu'na ome kesue nehuno vu'ne. <sup>4</sup> Hagi Anumzamo'ma kegeno Mosese'ma kenaku vutava'o nehigeno'a, ana zafafinti Anumzamo'a kezatino, Mosesewe! Mosesewe! higeno Mosese'a ama mani'noe higeno, <sup>5</sup> Anumzamo'a asmino, Mago'anena eravao osunka, kagia anona kazufre atro, na'ankure menima ot'i'nana mopamoa' ruotage hu'nea mopare ot'i'ne. <sup>6</sup> Anante mago'ane Anumzamo'a amanage hu'ne, Nagra kafahe'i Anumzane, Abrahamu Anumzane, Aisaki Anumzane Jekopu Anumza mani'noe, huno higeno Mosese'a Anumzamofoma ke'zanku koro huno avugosa refite'ne. <sup>7</sup> Ra Anumzamo'a amanage hu'ne, tamage hu'na Isipi kumapi'ma vahe'niamo'zama mani'ne'za zmatazama e'neri'za zana, hago Nagra nege'na, zavi krafama hazana antahi'noe. Na'ankure kazokzo eri'za kva vahe zami'mo'za, zmatazama zamizazana ke'na antahi'na hu'noe. <sup>8</sup> E'ina hu'negu, Nagra erami'na Isipi vahe hanavefinti zamavre fegu'a zmatre'na, masavenke huno knare zantfa hu'nea mopama, kaomofo amirine tumerimo'ma avi'mate'nea mopa Kenani vahe mopama, Hiti vahe mopama Amori vahe mopama Perisi vahe mopama, Hivi vahe mopama Jebusi vahe mopa, ra mopa zamigahue. <sup>9</sup> Menina antahio, Israeli vahe'mokizmi zavira nentahi'na, Isipi ma zamazeri havizama haza zana hago ke'na antahi'na hu'noe. <sup>10</sup> E'ina hu'negu menina ege'na huganta'nenkenka Feronte vunka,

Israeli vahe'ni'a, Isipi kumapintira zmvrenka atiramigahane. <sup>11</sup> Hianagi Moses'a amanage huno Anumzamofona asmi'ne, Nagra iza'na Ferontera vu'na Isipitira, Israeli vahera zamavare'na atiramigahue? <sup>12</sup> Anumzamo'a anage hu'ne, Nagra tamage hu'na kagrane manigahue. Nagrama Israeli vaher zmvrenka atiramiogu'ma hugantoa zamofo avame'zana, Israeli vaher Isipit'i'ma ome zmvrenka atiramisunka, Nagrira monora ama agonare eme hunantegahaze. <sup>13</sup> Anante Moses'a amanage huno Anumzamofona asmi'ne, Antahio, nagrama Israeli vahetegama vu'na, anage hu'na ome zmasamigahue, tamafahe'i Anumzamo tamagritega hunantege'na oema hanuge'zama nantahige'za, agi'a iza'ema hanage'na? na'ane hu'na zamasamigahue? <sup>14</sup> Higeno Anumzamo'a amanage huno Mosesena asmi'ne, **Nagra mani vava nehumo'na Nagrake Mani'noe**, kagra amanage hunka Israeli vahera ome zamasamio, **Nagre nehia ne'mo**, hunantege'na tamagritega oe hunka huo. <sup>15</sup> Mago'ane Anumzamo'a Mosesena asmino, Israeli vahera amanage hunka ome zamasamio, Ra Anumzamo'na tamafahe'i Abrahamu Anumzane, Aisaki Anumzane, Jekopu Anumzamo'a tamagritega hunantege'na oe. Ama'i nagimo'a mevava hanigeno, henkama fore'ma hanaza vahe'mo'za ama ana nagimofona ahentesga hu'za antahinami vava hugahaze. <sup>16</sup> Israeli kva vahera ome zamazeri tru hunka zmasmio, Ra Anumzamo'a tamafahe'i Anumzane, Abrahamune Aisakine Jekopune Anumzamo efore huno amanage huno nasami'ne, Nagra tamage hu'na tamagrikura nentahi'na, Isipi vahe'mo'zama hurmantaza zana ke'noe. <sup>17</sup> Ana hu'negu Nagra huvempa hu'noa ke amage ante'na Isipi kumapima mani havizama hu'nazafinti tamavre fegu'ate'na tamavre'na Kereni vahe'ma, Hiti vahe'ma, Amori vahe'ene, Perisi vahe'ma, Hivi vahe'ma Jebusi vahe'mokizmi mopa masevenke huno knare zanfta hu'negeno, kaomofo amirimo'ene tumerimo avite'nea mopafi tamavreno vugahie hunka ome zamasamio. <sup>18</sup> Kema hananana, Israeli kva vahe'mo'za ke ka'a antahigahaze. E'ina hnageta kagra Israeli kva vahe zamavrenka Isipi rankva nete vuta amanage hut'a asamaho, Ra Anumzana Hibru vahe'mokizmi Anumzamo tagrite eama hu'ne. Hagi muse hugantonanki knare tatemanketa tagufa zagegnafina ka'ma kopina vuta Ra Anumzatimofontega ofa ome kre sramana vuntamaneno hutma asamaho. <sup>19</sup> Hianagi Nagra antahi'noe, Isipi kini ne'mo'a tamatresnigeta ovugosaze. Hagi mago hankvenentake azamo'ma ha'ma rentesnigeno'a tmatesnigeta vugahaze. <sup>20</sup> E'inama hanige'na Nagra nazana erisga hu'na maka ruzahu ruzahu kaguvezana eri fore amu'no zamifina ha'nenke'za, tamatresnigeta vugahaze.

<sup>21</sup> Nagra Isipi vahe zamufina rantamagi taminenketa Isipi vahe'ma zamatreta, vanuta amne tamavapara ovugahaze. <sup>22</sup> Hu'neanagi maka Israeli a'nemo'za no magote nemanisnaza a'nanene no zamifi nemsesnaza a'ne'mokizmia silvane golire'ma tro'ma hu'nesaza zantamine, kukenagu enena zmantahigesage'za tamisagetma, ne' mofatmimofona eri hankre zmanteho. E'inama hanutma Isipi vahe'mofona knare fenozazamia eri hana hutma vugahaze.

## 4

### *Anumzamo avame'za Mosesena huveri'nea naneke*

<sup>1</sup> Moses'a Ra Anumzamofo kenona hunteno, Ke'niama antahi onamige, zamentintima osanageno'a nankna hugahie? Na'ankure zamagra amanage

hu'za Kagrikura hugahaze. Ra Anumzamo'a kagriteria efore osu'ne hugahaze. <sup>2</sup> Anante Ra Anumzamo'a anage huno antahige'ne, Na'a kazampina me'ne? huno antahigegeno Moses'e'a azompani'e higeno, <sup>3</sup> Ana azompa mopafi atro, higeno Moses'e'a mopafi atregeno, ana azompamo'a osifave fore higeno, Moses'e'a atreno kore fre'ne. <sup>4</sup> Hagi Ra Anumzamo'a anage huno Mosesena asami'ne, Kazana antenka risonare azeri sga huo, higeno Moses'e'a aza antegantuteno risonare azeri sga higeno, ete azompa fore hu'ne. <sup>5</sup> Anumzamo asmino, e'inahu'za fore hanige'za, Ra Anumzana nez-mafa Abrahamu Anumzane, Aisaki Anumzane Jekopu Anumzamo kagrite efore hu'ne hu'za zamentinti hugahaze. <sup>6</sup> Mago'an Ra Anumzamo'a amanage huno asmi'ne, Hagi menina nakre kuka'afi kazana vazio, higeno Moses'e'a azana nekre ku'afi vaziteno erizafigeno, leprosi namumo ana azampina fore huno efenentake hu'ne. <sup>7</sup> Anante Ra Anumzamo'a amanage hu'ne, Hagi menina ana nakre kuka'afi kazana ete vazio, higeno Moses'e'a ana azana ana nakre ku'afi eteno vaziteno erizafigeno, ana leprosi namuna fanane huno avufgamo'a knare huno ruga'a avufga'mo'ma me'neaza hu'ne. <sup>8</sup> Ra Anumzamo'a Mosesenkura anage huno asami'ne, Zama-grama kota avame'zamofonku'ma zamentinti osuge, antahi ogamisagenka, henka avame'za hnanke'za negesu'za zamentinti hugahaze. <sup>9</sup> Hu'neanagi tare avame'zamofonte'ma nege'za zamentinti nosu'za keka'a ontahisagenka, Naeli timpinti mago'a tina afinka hagege mopafi tagi tro. E'ina'ma hanankeno'a ana timo'a hagege mopafina kora fore hugahie.

<sup>10</sup> Moses'e'a Ra Anumzamofona amanage huno asmi'ne, Muse hugantoanki Ra Anumzamoka nagra kea huso'e nosu'na, korapa anahu hu'na mani'na e'noe. Meninena nagrane kegaga hananagi nagefu'namo'a kema huzampina knarera osige'na, kea hu so'e nosue.

<sup>11</sup> Ra Anumzamo'a kenona huno, Iza vahe zamagira tro huzmante'ne? Iza ke osu vahero, zamagesa ankanire vahero, zamavu knarehu vahero, zamavu suhu vahera zamazeri nese? Nagra Ra Anumzamo'na e'inara hunezmantoe. <sup>12</sup> E'na hu'negu menina kagra vuge'na, Nagra kagrane mani'nena, kema hnana kea hugasmisnugenka hugahane.

<sup>13</sup> Hianagi Moses'e'a amanage huno ke'nona hu'ne, Ra Anumzamoka muse hugantoanki mago'a vahe huzmanto. <sup>14</sup> Anante Ra Anumzamo'a Mosesena rimpahenteno anage hu'ne, Anantega negafu Livae nera Aroni'a omaninefi? Nagra antahi'noankino agra knare zantfa huno kea hugahie. Hanki agra kantega eme tutagihua hugantenaku ne-eankino, eme kagesuno'a agu'areti huno musena hugantegahie. <sup>15</sup> Emema kagesnigenka, kema hania kea retro humige'na, Nagrani'a kagri kagite'ene agri agite'enen mani'nena inankna kea hugaha'e, rempi huranamisnugeta kea hugaha'e. <sup>16</sup> Aroni'a kagri kagi erino vahe'ma kema zmasami vahe mani'nigenka, kagra Anumzankna hunka agritera mani'enka vahe'ma zmasamisia kea asamigahane. <sup>17</sup> Hagi menina kagra kama vanohu azompa ka'a, avame'zama erifore'ma hananku erio.

### *Moses'e'a ete Isipi vu'nea naneko*

<sup>18</sup> Anantetira Moses'e'a atreno nenemo ne' Jetronte vuno amanage hu'ne, Muse hugantoanki natrege'na ete Isipima mani'naza nafu nganaheintega vu'na, ofri mani'nazo ome zamaga'neno, higeno Jetro'a krimpa frune vuo huno hunte'ne. <sup>19</sup> Moses'e'a Midiani kumate mani'negeno Ra Anumzamo amanage huno asmi'ne, Etenka Isipi vuo, na'ankure kahe fri'nakurema hu'naza

vahe'mo'za ko' fri'naze. <sup>20</sup> Anage higeno, Mosese'a tare mofavre'ane ne-narone zamavreno donki afu'mofo agofetu nezmantero, Anumzamofo azompa'a azampi azerige'za Isipi vunaku vu'naze.

<sup>21</sup> Ra Anumzamo'a Mosesena anage huno asmi'ne, Isipima ete uhanatisunka, kaguvazama erifore huogu'ma hankvema kami'noa hanavereti Fero avuga maka kaguvazana erifore huo. Hu'neanagi Nagra arimpa azeri hankvetisugeno Israeli vhahera zmatresnige'za ovugahaze. <sup>22</sup> Kagra anage hunka Ferona asamio, Ra Anumzamo'a amanage huno hu'ne, Israeli vhahera kota ne' mofavre'n'i'e. <sup>23</sup> E'ina hu'negu Nagra anage hu'na kasami'noe, Israeli vhahera zmatrege'za vu'za monora ome hunanteho. Hianagi kagra ke'n'i'a ontahinka zmatrake'za ovu'nazagu, antahio, Nagra kota ne' mofavreka'a ahe frigahue!

<sup>24</sup> Mosese'ene naga'amo'za Isipi vunaku karanka nevu'za hani hige'za masenaku hazare, Ra Anumzamo'a Mosesena emegeno ahe frinaku hu'ne.

<sup>25</sup> Hianagi anante Zipora'a mago asne'nea have kazi erino, nemofo oku avufamofo anom'a taga huno, Mosese agiafi ome netreno anage hu'ne, kagra tamagerfa hunka nagritera kora eri tagi nenavega mani'nane hu'ne. <sup>26</sup> Ana higeno Ra Anumzamo'a Mosesena ahe ofrigeno, Zipora'a amanage hu'ne, kora eri tagine'moka nenavezana hu'nane, na'ankure ne' mofavre'amofo oku avufga anom'a taga hu'neazanku hu'ne. (Jen-Agf 17: 9-14).

<sup>27</sup> Hagi Ra Anumzamo'a Aronina asmino, Ka'ma moparega vunka Mosesena omego, higeno Aronia vuno Anumzamofo agonare Mosesena omegeno agi antako nehuno, azeri frufra hu'ne. <sup>28</sup> Ra Anumzamo'ma maka kema Mosesema nesamino, avame'zantmima huvenerino, ana avame zantmima omeri fore huo huno'ma hunte'hea kante anteno, ana maka kene avame'zanena Aronina asami'ne. <sup>29</sup> Anante Mosese'ene Aronikea vuke maka Israeli vahe'mokizmi kva vahetmina ome zamazeri atru hu'na'e. <sup>30</sup> Anante Aroni'a Ra Anumzamo'ma Mosesema asmi'nea kea ana maka Israeli vahe'mokizmi nezmasamino, avame'zantamina zamavurera erifore hu'ne. <sup>31</sup> Israeli vahe'mo'za zamentinti nehu'za, Isipima zamazeri havizama hu'naza zama Anumzamo antahino keno'ma hu'nea nanekema Aroni'ma zamasamige'za nentahi'za, Israeli vahe'mo'za kepri hu'za Anumzamofo mono hunte'naze.

## 5

### *Fero'a Israeli vahe'mokizmi zamazeri haviza hu'nea naneke*

<sup>1</sup> Henka Mosese'ene Aronikea Feronte vuke amanage huke ome asmi'na'e, Ra Anumzana Israeli vahe'mokizmi Anumzamo'a amanage nehie, zmatrege'za vahe'n'i'amo'za vu'za kama mopafi ranagima nami ne'za ome retro hu'za neho. <sup>2</sup> Hianagi Fero'a ke'nona huno, Ra Anumzana i'za mani'nesigu ke'a antahi'na Israeli vhahera zmatresnuge'za ovugahaze? Nagra Ra Anumzana ke'na antahi'na osu'noanki'na, nagra Israeli vhahera zmatresuge'za ovugahaze! <sup>3</sup> Mosese'ene Aronikea huke, Hibru vahe'mofo Anumzamo eme tagrite eama huno, ka'ma kopi 3'a zagegnafi kana vuta, kresramna Ra Anumzantia hunteho hu'ne. Hanki anama osanunkeno'a knazintetiro, kazintetiro tahe frigahie. <sup>4</sup> Hianagi Isipi kinimo'a, ete kenona huznanteno, Na'ante Israeli vahe'mokizmia eri'za zmifintira zmavre rurega atre'za neha'e? Eteta eri'zantaniare vi'o! <sup>5</sup> Mago'anee Fero'a huno, ke'o, ama Israeli vahe'mo'za rama'a nehzageta, tanagra eri'za zmifinti zmatre'za neha'e. <sup>6</sup> Fero'a ana zagefinke kazokzo eri'za vahe'mokizmi Isipi kva vahe'ene, eri'za kva hu'naza Israeli vhahera zamasmino, <sup>7</sup> trazamofo

rampa'a zamizage'zama mopenema eri havia hu'ne'za heru'za briki'ma tro nehaza zana mago'ane ozmiho, hagi zmatrenke'za trazamofo rampa'a, zamagra'a ome eritru hu'za eri'za eho.<sup>8</sup> Hianagi korapara nama'a briki tro hutere nehaze, e'i ana kanteke tro hutere hugahaze. Hagi hinke'za erami'za osi'a trora osiho. Na'ankure zamagra feru vahe mani'nazagu, tatregeta vuta Anumzamofona ofa ome kresramna vuntamaneno hu'za krafa nehaze.<sup>9</sup> Ama ana vahera mago'ane knama hu'neni'a eri'za zaminke'za eneri'za, ama havige kemofona ontahihio!

<sup>10</sup> Kazokzo eri'za vahe'mokizmi kva ne, erizante vugagota hu'naza vahe'mo'za, Israeli vhete vu'za amanage hu'za zamasami'naze, Fero'a amanage huno hu'ne, Nagra magore hu'na trazamofo rampa'a ontamigahue. <sup>11</sup> Tamagra'a yuta inantegatiro trazamofo rampa'a ome haketa eriho. Hianagi korapa'ma tro'ma nehaza avamenteke brikia tro hinkeno brikimofo nampamo'a evuoramino. <sup>12</sup> Ana higeno Israeli vahe'mo'za ana maka Isipi mopa'afina brikia'ma tro'ma hu'zana traiza rampa eri atru hanagu, vu'za e'za hu'naze. <sup>13</sup> Kazokzo eri'za vahe'mokizmi kva vahe'mo'za, hutu huzmante'za, trazamofo rampama neramunketama mago zagefima eneriza avamente eri'zana eriho. <sup>14</sup> Isipi kva vahe'mo'za, Israeli eri'za kva vhete vu'za ome nezmahe'za anage hu'naze, nahigeta okine meninena ko'ma tro'ma nehaza avamentera brikia trora osu'naze? <sup>15</sup> Israeli eri'za kva vahe'mo'za Feronte vu'za krafage ome nehu'za, nahigenka eri'za vahekamota amanahu kavu kvara hunerantane? <sup>16</sup> Hanki eri'za vahekamota trazamofo rampa'a ontami'ne'za, brikia tro hiho huvava hunerantaze. Hanki ko, eri'za vahekamota sefu neramizanagi, hazenkea kagrika'a vahipi me'ne. <sup>17</sup> Hianagi Fero'a anage hunona huzmante'ne, Tamagra tusi'a tamavresrage vahere! E'ina hu'negu tamagra hutma, tatrengata vuta Ra Anumzamofontera ome kresramna vuntamneno hutma nehaze. <sup>18</sup> Eteta eri'zantamirega ko viho. Magore hu'za trazamofo rampa'a ontamigosazanki, nama'a brikia'ma troma huterema nehaze avamenteke maka brikia tro hugahaze. <sup>19</sup> Eri'zante'ma ugagota hu'naza Israeli kva vahe'mo'zama antahizageno, magoke magoke knare'ma tro'ma nehazankna avamente brikia tro hugahaze hige'za, hazenkefi manune hu'za hu'naze. <sup>20</sup> Feroma atre'za nevu'za, Moses'e'ene Aronikea zmavega anteke ot'i'nake'za ome nezanage'za, <sup>21</sup> anante amanage hu'za ome znamsmi'na'e, Ra Anumzamo neranegeno tanagrama ha'a avu'ava zanterea kea huno refko huranantesie. Na'ankure tanagra Fero avufine eri'za vahe'amokizmi zamavufina, tazeri himna nevuta tazeri haviza huta, tahe frihogu zamazampi kazinkano erinteankna hu'na'e.

<sup>22</sup> Moses'e'ete Ra Anumzamofonte vuno amanage ome hu'ne, Ra Anumzamoka, na'a higenka Israeli vahera hazenkefina zmavrenentane? Na'a higenka vuo hunka hunantanke'na e'noe? <sup>23</sup> Hanki Feronte'ma umahanati'ha Kagra kagima he'na kema humanantana kema huanknareti'ma e'neana, agra Israeli vahera rama'a hazenkea zami'neanagi, Kagra magore hunka ana knazampintira zamaza osu'nane.

## 6

### *Israeli vahe zmavrenaku Ra Anumzamo'a huvempa hu'nea naneke*

<sup>1</sup> Anante Ra Anumzamo'a anage huno Mosesena asmi'ne, Kagra menina na'anoo Feroma huntessua zana kegahane. Nagra hankaveni'aretii

atufenugeno, Fero'a hankavetino hunezmanteno, maka mopa'afinti'enena zamahe'natisige'za vugahaze.

<sup>2</sup> Mago'an Anumzamo'a Mosesena amanage huno asmi'ne, Nagrake Ra Anumzana mani'noe. <sup>3</sup> Nagra Abrahamune Aisakine Jekopukizmi zamavure'ma efore'ma hu'noa hanavenentake Anumzane, hianagi nagi'a Ra Anumzane hu'na ozamasmi'noe. <sup>4</sup> Hanki zamagra ruregati vahekna hu'za Kenani mani'nazage'na, Nagra huvempa ke huhagerafina Kenani mopa zamigahue hu'na hu'noe. <sup>5</sup> Mago'an Isipi vahe'mo'ma Israeli vahe'ma kazokzo eri'zampi zmante'nazage'za kragi'ma neru'za krafage'ma nehzama'a nentahi'na huvempa hu'na huhagerafina kegu nagesa antahi'noe. <sup>6</sup> E'ina hu'negu amanage hunka Israeli vahera ome zmasmio, Nagra Ra Anumzanki'na, Isipi vahe'mo'za kazokzo eri'zama tamigeta e'nerizafintira, Nagra'a nazana rusute'na rama'a hanave knazana Isipi vahera nezami'na, keaga huzmante'na Israeli vahera ete'na zamavaregahue. <sup>7</sup> Nagri vaheni'a mani'naze hu'na neramavrena, Nagra tamagri Anumza manisugeta, Isipi vahe'mofo kazokzo eri'za vahe mani'nonkeno tavreno atirami'nea Ra Anumzane hutma antahigahaze. <sup>8</sup> Nagra Abrahamu'ma Aisaki'ma Jekopuma zamigahue hu'na huvempama huzmante'noa mopare tamavre'na vugahue. Nagra ana mopa tamisugenno tamagri zane huno megahie. Nagra Ra Anumzamo'na hue!

<sup>9</sup> Mosese'a ama ana kea Israeli vahe zmasmi'neanagi, kema hiana ontahi'naze. Na'ankure Isipi vahe'mo'za tutu huzmantage'zama hanavenentake kazokzo eri'zama eri'naza zamo antahihazi zmimofona ahe haviza hige'za ontahi'naze. <sup>10</sup> Ana higeno Ra Anumzamo'a Mosesena anage huno asami'ne, <sup>11</sup> Vunka Isipi kini ne' Ferona ome asamigeno, Israeli vahera agra zmatrenke'za mopa'afintira viho. <sup>12</sup> Hianagi kenona'a Mosese'a Ra Anumzamofona anage huno asami'ne, Israeli vahe'mo'za kema hu'noa kea ontahi'nazanki, inankna huno Fero'a ke'ni'a antahi namigahie? Nagra kea hugara osu'noe. <sup>13</sup> Hianagi Ra Anumzamo'a Mosesene Aronigiznia ke huno, Isipi kini ne' Fero kvafintira, Israeli vahera zmvare'za Isipi mopa atre'za vnagu hanave ke huzanante'ne.

### *Aronine Mosesene naga nofi'mofo nanek*

<sup>14</sup> Ama'i Israeli naga nofi'mofonte ugagota hu'naza naga'mokizmi zmagi'e. Rubeni'a Israelina (Jekopu) kota mofavre'agino, Hanoku'ma Paru'ma Hesroni'ma Kami'ma, huno kasezmante'ne.

<sup>15</sup> Hagi Simioni'a Keleni a'ma erino kasezmante'nea mofavre'rmina, e'i Jemueli'ma Jamini'ma Ohati'ma Jekini'ma Johari'ma Sauri'e. Zamagra Simioni naganofire hu'za mani'naze. <sup>16</sup> Hagi ama'i Livae'ma kasezmante'nea naga nofi'mofo zamagi'e, Gesoni'ma Kohati'ma Merari'e. Livae'a 137ni'a kafu mani'ne. <sup>17</sup> Hagi Gesoni'ma kasezanante'nea mofavremokiznia znagi'a, Libini'ene Simeikegi'ne zanagra naga nofi zanirera ugagota hu'na'e. <sup>18</sup> Hagi Kohati ne'mofavreramimofo zamagi'a, Amrami'ma Izhari'ma Hebron'i'ma Uzieli'e. Hagi Kohati'a 133'a kafuzage mani'ne. <sup>19</sup> Merari ne'mofavre'mokizni znagi'a, Mali'ene Musike. Ama'i Livae naga nofi'mofo zmagi'a kasezmante'nereti agafa huno meno e'ne. <sup>20</sup> Amrami'a nefana nesaro Jokebetina ara erigeno, Aronine Mosesene kasezanante'ne. Amrami'a 137ni'a kafu mani'ne. <sup>21</sup> Hagi Izhari mofavreramina, Kora'ma Nefegi'ma Zikri'e. <sup>22</sup> Uzieli ne' mofavremokizmi zamagi'a, Misaeli'ma, Elzafan'i'ma Sitri'e. <sup>23</sup> Aroni'a Aminatapu mofa Erisebana Nasoni nesarona a' erigeno, Natapuma Abihuma Eriasama Itamama huno kasezmante'ne. <sup>24</sup> Kora ne'

mofavremokizmi zamagi'a, Asiri'ma Erkana'ma Abiasavi'e. Zamagra Kora naganofi mani'naze. <sup>25</sup> Aroni nemofo Eleaza'a Putieri mofa'nefinti mago mofa ara erino Finiasina kasente'ne. E'i naga'mokizmimpinti Livae nagara efore hu'naze. <sup>26</sup> Hagi ama ana Aroni'ne Mosesegizni Ra Anumzamo'a znamino, Israeli vahera Isipi mopafintira nagatenofite zmavreta atirami'o huno huzanante'nea ne'trene. <sup>27</sup> E'i ana ne'tremoke Israeli vahera Isipi mopafintira zamavareke atiraminaku, Isipi kini ne' Ferontera vu'ne ome keaga hu'na'e.

<sup>28</sup> Hagi Ra Anumzamo'ma Isipi mopafima Mosesema kema asami'nea knafina, <sup>29</sup> amanage huno Ra Anumzamo'a Mosesena asmi'ne, Nagra Ra Anumzane, Isipi kini ne' Ferona maka amama kasamua kea ome asmio. <sup>30</sup> Hianagi Mosese'a Ra Anumzamofo avufi amanage hu'ne, Antahio, nagra kema hu'areraknarera osu'noankino, inankna huno Fero'a keni'a antahihagie?

## 7

### *Ra Anumzamo Aronine Mosesegizni ke znamino'ne naneke*

<sup>1</sup> Ana hutegen Ra Anumzamo'a amanage huno Mosesena asmi'ne, Antahio, Nagra Fero avurera kazeri Anumzankna hanugen, negafu Aroni'a kasnampa neka'a manigahie. <sup>2</sup> Ana maka ke'ma Nagrama huoma hu'na hugantoa kea nehugen, Israeli vahe'ma Fero'ma zamatrengi'za mopa'afinti'ma atre'za vanaza kea negafu Aroni'a kini nera asamino. <sup>3</sup> Hianagi Nagra Fero antahintahia eri hanaveti'nugeno tamatrenigeta novanage'na, ruzahu ruzahu kaguvazane avame zani'anena Isipi mopafina erifore hugahue. <sup>4</sup> Hagi Fero'a keka'a ontahigahianki'na, Nagra nazana rusute'na Isipi moparera ranra knazanteti kegaga hunezmantena, Nagra Israeli vahe'ni'a zamavare'na atiramigahue. <sup>5</sup> Nagra nazama rusute'na Isipi vahe'ma ha'ma renezmanten, Israeli vahe'ma amuno zmifinti'ma zmavre'na atiramisuge'za, Isipi vahe'mo'za Ra Anumzamo'e hu'za ke'za antahi'za hugahaze. <sup>6</sup> Mosese'ene Aronikea Ra Anumzamo'ma hi'oma huno znamino'neaza hu'na'e. <sup>7</sup> Mosese'a 80'a kafu higeno, Aroni'a 83'a kafu hu'neke Ferontera kea ome hu'na'e.

### *Aroni azompamo osifave fore hu'ne naneke*

<sup>8</sup> Anante Anumzamo'a Mosesene Aronigizni amanage huno znamino'ne, <sup>9</sup> Fero'ma kaguvaza erifore hi'oma hanigetna'a, Aronina asmigeno azompamo'a matevuno mopafi Fero avuga atrenkeno, ana azompamo'a osifave efore hino. <sup>10</sup> Mosese'ene Aronikea Feronte vuke Ra Anumzamo'ma znamino'ne kante anteke anazana hu'na'e. Aroni'a azompamo Ferone eri'za vahe'amokizmi zamavuga atregeno, ana azompamo'a osifave fore hu'ne. <sup>11</sup> Higeno Fero'a agranena antahi'zane vahe'ene avotaga vahe'ene Isipi kumapi kaguvaza erifore nehaza vahe'ene zamagi hige'za, zamagrana ana zanke hu'za oku'a tro hu'za ante'ne'za vahe'ma rezmatagama nehaza zantaminuti Aroni'ma hiaza hu'naze. <sup>12</sup> Mago magomo'za azompazmia matevu mopafi atrazageno, ana azompamo zmimo'za osifavermi fore hazanagi, Aroni azompamo'a ana osivafermina zmasgahu nakri'ne. <sup>13</sup> Hianagi Fero antahintahimo'a hanavetigeno, Ra Anumzamo'ma hu'ne a kea ontahi'ne.

### *Timo kora fore hu'ne naneke*

<sup>14</sup> Hagi anante Ra Anumzamo'a Mosesena asmino, Fero antahintahimo'a hanavetigeno kea antahino Israeli vahera zmatreg'e'za ovu'naze. <sup>15</sup> Hagi oki

nanterama Fero'ma tintegama enevanire, osifavema fore hu'nea azompa kzampi eri'enka Naeli tinkenare Ferona ome kenka,<sup>16</sup> amanage hunka asmio, Ra Anumza, Hibru vahe'mofo Anumzamo kagrikura amanage hunka ome asamio huno hu'ne. Vahe'n'i'a zmatrege'za vu'za ka'ma mopafi monora ome hunanteho hu'ne. Hianagi kagra eseteti'ma eno meninena ke'a ontahinka zmatranke'za ovu'naze.<sup>17</sup> E'ina hanku Ra Anumzamo'a amanage hu'ne, amazama hanua zamo hinkenka, Nagrikura Ra Anumzane hunka antahigahane. Hagi nazampima azeri'noa azompanu, Naeli tina amasgismugeno timo'a kora fore hugahie.<sup>18</sup> Hagi Naeli timpima mani'naza nozamemo'za frisnageno, ana timo'a hinimna vanige'za, Isipi vahe'mo'za ana tina onegahaze.

<sup>19</sup> Anante Ra Anumzamo'a Mosesena asamino, Aronina amanage hunka asmio, azompaka'a erinka kazana rusutenga Isipi tintega nentenka, mika ranra tinte'ene, ne'one tintamintera kazana rusutegen, timo'za kora fore nehina, kerifima mare'ne'nia timo'ene, zafare kavofine havere kavofinema me'neni'a timo'enena ana zanke huno koranke hino.<sup>20</sup> Mosesene'e Aronikea Anumzamo hi'oma huno huzanante'hea zana hu'na'e. Aroni'a azompa'a erisga huno Fero avufine eri'za vahe'amokizmi zamufine, Naeli tina amasgigeno, ana maka timo'a kora fore higeno,<sup>21</sup> ana timpima mani'naza nozamemo'za frizageno, timo'a havizantfa huno hinimana vige'za Isipi vahe'mo'za tina onazageno, ana maka Isipi mopafima koramoke'za huvagare'ne.<sup>22</sup> Ana hianagi Isipi kumapi kaguvaza erifore nehaza vahe'mo'za, oku'a tro hu'za antene'za vahe'ma rezmatagama nehaza zantminuti Aroni'ene Mosesek'e'ma erifore ha'a kaguvazana, zmagranena ana zanke hu'za eri'fore hu'naze. E'i anama hazageno Ra Anumzamo'ma hu'nea kante Ferona antahintahi'amo'a hankvetigeno, ke'znia ontahino zmatrege'za ovu'naze.<sup>23</sup> Fero'a ana zantmima fore hiazankura ontahino, atreno rukrehe huno noma'arega vu'ne.<sup>24</sup> E'ina hige'za maka Isipi vahe'mo'za Naeli timpintira tina one'za tima nesagu Naeli ti ankenarega keria kafi'za tinkura hake'naze.<sup>25</sup> Hagi Ra Anumzamo'ma Naeli tirama amasagigeno, korama fore huteretira 7ni'a zagegna evu'ne.

## 8

### *Hogatamimofo knaza fore hu'nea naneke*

<sup>1</sup> Anante Ra Anumzamo'a Mosesena asmino, Feronte vunka amanage hunka ome asamio, Ra Anumzamo'a amanage hie, zamatrege'za vahe'nimo'za vu'za, monora ome hunanteho hu'ne hunka ome huo!<sup>2</sup> Hagi kagrama zamatresnanke'zama ovanage'na maka Isipi mopafina, Nagra hogatmi huntanenke'za Isipi mopatamifina avite'za eri haviza hugahaze.<sup>3</sup> Naeli timpina hogamoke'za hugahaze. Ana hogamo'za timpintira atirami'za nonka'afi unefre'za nemsanpinkanena unefre'za nem-sana sipaka'are enena umaneri'za nemaniza, eri'za vahe ka'amokizmi nompinena umaneneri'za vahe ka'amokizmi zmufgaregane umreneri'za, avenifinena unefre'za, witima krenaku'ma heneraza zompa'ramimpinenefra ufreqahaze.<sup>4</sup> Ana hanigeno hogamo'za kagri kagofetu takaundera'za, eri'za vahemofontera takauregahaze.

<sup>5</sup> Anante Ra Anumzamo'a Mosesena asmino, amanage hunka Aronina asmio, tira tintamimofone karaho tintmimofone tinkeriramimofo agofetu azompa ka'a kazampi erinka rusutegen, hogatmimo'za emareri'za Isipi mopafina avitegahaze.<sup>6</sup> Anage higeno, Aroni'a Isipi tintamimofo agofetu

azana rusutentere huno evigeno, Isipi mopafina hogatmimo'za tintamimpinti emrer'i'za avite'haze. <sup>7</sup> Hianagi Isipi kumapi kaguvazama nehaza vahemo'zanena, oku zama ante'n'e'za vahe'ma rezmatga nehaza zantminuti, ana zanke hazage'za Isipi mopafina hogatmimo'za fore hu'za emrer'i'zane. <sup>8</sup> Anante Fero'a Mosesene Aronigizni znagi huno amanage huno znasami'ne, Nunamu huta Ra Anumzamofona antahigekeno, noniafinti'e'ne vahe'niamokizmi nompintira, hogatamina Anumzamo'a zmatvretrenke'na, Israeli vhahera zmatrarenke'za vu'za Ra Anumzamofonte ome Kresramana vugahaze.

<sup>9</sup> Mosese'a amanage huno Ferona asami'ne, Kagra kna antege'na Ra Anumzamofontega nunamuna hanugen, nonka'afinti'e'ne eri'za vahe ka'amokizmi nompinti'e'ne vahe ka'amofo nompintira, ana hogatamina zamahe fanane nehuno, Naeli timpima mani'naza hogataminke zmatvretrenige'za manigahaze. <sup>10</sup> Fero'a okine higeno, Mosese'a amanage huno asmi'ne, kema hana kante anteno fore hanigenka, mago anumzamo'a tagri Ra Anumzanknara osu'ne hunka antahigahane. <sup>11</sup> Ana maka hogamo'za kagriteti'e'ne, nonka'afinti'e'ne, eri'za vahe ka'afinti'e'ne, vahe ka'afinti'enena omanisageno, Naeli timpinke manigahaze. <sup>12</sup> Ananteti Mosese'ene Aronikea Feroma atreke vute kea, hogama huntegeno Feroma azeri havizama hu'nea zanku, Mosese'a hanavetino Ra Anumzamofona antahig'e'ne. <sup>13</sup> Hagi Mosese'ma nunamuma huno antahigea kante anteno, Ra Anumzamo'a ana higeno, hogamo'za nontmimpinti'e'ne kumapinti'e'ne hozafinti'enena mika fri vagare'haze. <sup>14</sup> Ana hige'za Isipi vahe'mo'za kevure kevure ana hogatamina zogitru hazageza, kasri'za mika Isipi mopafina hinimma vu'naze. <sup>15</sup> Hianagi Fero'ma kegeno hogatamimofo knazama evigeno'a, Ra Anumzamo'ma Ágrama hu'nea kante anteno, Ferona antahinhahi'a azeri hanavetigeno, Mosesene Aronigizni kea ontahi'ne.

### *Umpe umpe knaza fore hu'nea naneke*

<sup>16</sup> Anante Ra Anumzamo'a Mosesena asmino, Aronina amanage hunka asmio, azompaka'a erinka kugusopa amasagigeno, maka Isipi mopafina ana kugusopamo'a umpe umpetmi fore hino hunka asamio.

<sup>17</sup> Mosese'ene Aronikea Ra Anumzamo'ma znamiaza hu'na'e. Aroni'a azompa'a erino kugusopa amasagigeno umpe umpetmi ana kugusopamo'a fore huno, vahe zamufgare'e'ne vahe'mo'ma kvama nehia zagaraminte'e'ne maka Isipi kuma'afi mani'naza zagaramimofo zmufgare'enena mani'naze. <sup>18</sup> Isipi kumapi kaguvaza erifore nehaza, oku'a tro hu'za antene'za vahe rezmatga nehaza zanteti, ana zanke hu'za umpe umpe eri fore hunaku hu'nazaragi, erifore hugara osazageno, umpe umpetmimo'za vahe zmufgare'e'ne kegavama nehaza zagaramimofo zamufgarega mani'naze. <sup>19</sup> Kaguvaza erifore nehaza vahe'mo'za Ferona amanage hu'za asmi'naze, Anumzamofo azamo ama zana hunerante, hu'za hazanagi Anumzamo hu'nea kante Ferona anthintah'i'amo'a hanavetigeno antahi ozami'ne.

### *Kosi knazamofo naneke*

<sup>20</sup> Anante Ra Anumzamo'a Mosesena asmino, Nanterame otinka Fero'ma tintegama enevanire avure ome otinka amanage hunka asmio, Ra Anumzamo'a huno zmatrege'za vahe'niamo'za vu'za, monora ome hunanteho hunka asamio. <sup>21</sup> Hagi kagrama vahe'n'i'ama zmatresnanke'za ovanazana antahio, Nagra kagrite'ne, eri'za vahe ka'are'ene, vahe ka'are'ene nonka'armimpine, Isipi vahe nontamimpine, mopafinena ana

zanke hu'za kosintamina hunt'a'nena mani avitegahaze. <sup>22</sup> Hianagi Nagra Goseni mopafima vahe'nima mani'naza kumara atresugenno ana kosimo'za omanigahaze. E'ina hanugenka kagra kenka antahinka hananana, Ra Anumzamo ama mopa kegava hu'neno makazana nehie hunka antahigahane <sup>23</sup> Hagi mago avame'zanu vahe ka'ane, vahe'niamokizmi amuno zmifina, ante'na refko okina hugahue. <sup>24</sup> Hagi Ra Anumzamo'a kema hu'neaza higeno, kosintmimo'za Fero nompine, eri'za vahe'amofo nontmimpina tusi'za hu'za vazipanini hu'za kizakiza hu'naze. Ana maka Izipi mopamofona kosimoke'za higeno havizantfa hu'ne. Na'ankure ana maka mopafina kosintmimo'za vazipanini hu'za kizaki'za hu'naze.

<sup>25</sup> Fero'a Mosesene Aronigizni zanagi huno anage huno znasm'i'ne, Isipi mopa'afi vutma Anumzantmimofontega ome Kresramana vunteho. <sup>26</sup> Hianagi Mosese'a asmino, e'inama hanunana knarerera osugahie. Na'ankure Isipi vahe'mofo zmavurera zmagoteno zmavresra haniaza hugahunankino, have knonu tahe frigahaze. <sup>27</sup> Hagi Ra Anumzanti'mo hurante'nea kante anteta tagufa zategna, ka'ma moparega vuta kre sramana vuntegahune. <sup>28</sup> Higeno Fero'a huno, Tamatranenketa ka'ma mopafi vuta Ra Anumzamofontera ome kresramna vuntegahazanagi, afetera ovutma, tavaonte nevutma nagrikura nunamu hutma antahigenkeno naza hino. <sup>29</sup> Mosese'a amanage hu'ne, kagritetira ufebu'a nevanu'na, Ra Anumzamofonte nunamu hane'na kagri'ene eri'za vahe'kane, vahekafintira kosina hunte'na okina omanigahaze. Hanki reravatga hunka Ra Anumzamofona ome kresramna vunteho hunka osuo. <sup>30</sup> Hagi Mosese'a Ferona atreno vuno Ra Anumzamofonte ome nunamu higeno, <sup>31</sup> Mosese'ma antahi'geaza huno, Ra Anumzamo'a Feronteti'ene eri'za vahe'areti'ene vahe'afintira ana maka kosintamina zamazeri atregeno magore huno omanitfa hu'ne. <sup>32</sup> Hianagi mago'anee ko'ma hu'neaza huno Fero antahintahia eri hanavetigeno, Israeli vahera zmatrege'za ovu'naze.

## 9

### *Isipi vahe'mokizmi afu'tmimo'za fri'naza knazamofo naneke*

<sup>1</sup> Anante Ra Anumzamo'a Mosesena asmino, Feronte vunka amanage hunka ome asamio, Ra Anumzana Hibru vahe'mokizmi Anumzamo amanage hie, zmatrege'za vahe'niamo'za vu'za, monora ome hunanteho hu'ne. <sup>2</sup> Hagi kagrama huo zmantenkama kazigazi hunkama zamazeri sanana, <sup>3</sup> antahi'o, Ra Anumzamofo aza'mo'a tusi knazanteti, hosi afu'tamine tonki afu'tamine, kemori afu'tamine kao afu'tamine meme afu'tamine sipisipi afu'tminka'a zamazeri havi'za hugahie. <sup>4</sup> Hianagi Israeli vahe'mokizmi sipisipiraminte'ene meme afutmimofone, Isipi vahe'mokizmi afutamimofo amu'nompina mago avame'zama eri fore'ma hanuana, Israeli vahe'mokizmi afu tamimo'za magore hu'za ofrigahaze. <sup>5</sup> Ra Anumzamo'a e'i ana zama hania kna huhamprinteno anage hu'ne, oki ana zana Isipi mopafina hugahue. <sup>6</sup> Kema hu'nea kante, anteno, ana knarerera Ra Anumzamo'a anazana higeno, maka Isipi vahe'mokizmi afu kevumo'za fri'nazaragi, Israeli vahe'mokizmi afu kevumo'za magore hu'za ofri'naze. <sup>7</sup> Fero'a vahe'a huzmanteg'eza vu'za ome kazana, magore huno Israeli vahe'mokizmi afu kevumo'za ofri'nazaragi, Fero antahintahimo'a hanavetigeno zmatrege'za ovu'naze.

### *Usgemofo knazamo Isipi vahera zamazeri haviza hu'nea naneke*

<sup>8</sup> Anante Ra Anumzamo'a Mosesena Aronigiznia anage huno znam'i'ne, Brikima kre teve tampinti tanefara ome kateta, Fero'a negenkeno ana tanefara Mosese'a matevu nagamu atreno. <sup>9</sup> Ana tanefamo'a mika Isipi mopa'afina kugusopage fore huno, Isipi vahete'ene agigu'agigu afu'zagamofo zmavufarera usge namu propru huno Isipi mopafina zamazeri haviza hugahie. <sup>10</sup> Higeke zanagra brikima kre tampinti tanefa kateke, Fero avure vuve, Mosese'a ana tanefara matevu anagamu atregeno, Isipi vahe'ene agigu'agigu afuzmimofo zmufarera usage namuntami propru huno fore hu'ne. <sup>11</sup> Isipi kumate havige kaguvazama nehaza vahe'mo'za Mosese avuga otigara osu'naze. Na'ankure zamagri zmavufare'ene, maka Isipi vahe'mokizmi zmavufare'enena usagentmi fore huno propru hu'ne <sup>12</sup> Hianagi Ra Anumzamo'ma ko'ma Mosesema asmi'nea kante anteno, Fero antahintahia Agra'a eri hanavetigeno, Mosesena Aroni kea ontahi'ne.

### *Ko'mopa ko aru'nea knazamofo naneke*

<sup>13</sup> Anante Ra Anumzamo'a Mosesena asmino, Nanterame otinka Fero avure uhanatinka amanage huo, Ra Anumzana Hibru vahe'mokizmi Anumzamo amanage huno hie, vahe'nia zmatrege'za vu'za monora ome hunanteho hu'ne. <sup>14</sup> Anama osnanke'na Nagra menina eri'za vaheka'are'ene, vahekafinen, Nagra tusi'a knaza zami'na zamazeri haviza hanugenka, kagra antahinka kenkama hananana magore huno Nagri kna anumzana, maka mopafina omani'ne hunka antahigahane. <sup>15</sup> Na'ankure ama knare'ma ehanatiana Nagra nazana rusute'na knazanteti tmazeri havizana hugetma ama mopafina omanizasine. <sup>16</sup> Hianagi tamuge hu'na ama agafare kagrira katrogenka mani'nane, hihamu hankveni'a kagrite eri'ama nehanugen, maka mopafi vahe'mo'za nege'za Nagri Nagi'a huama hugahaze. <sup>17</sup> Kagra kazikzi hunka kagi'a erisga nehunka, vahe'ni'a ha' rezmantenka zmatrake'za novaze. <sup>18</sup> E'ina hanku antahio, okina ama ana knarer, Isipi kuma'ma fore huno meno menima e'neregatira oru'nea kna ko'mopa ko huntanenkeno rugahie. <sup>19</sup> Ana hu'negu menina ame hunka huzmanteg'e'za sipisipine meme afu zagaka'ane fegu'ama kegavama nehanana zagaraminka'a ana maka zmavre nomofo agu'a zmanteho, na'ankure ko'mopa ko aruno fegu'ama mani'nesnaza vahe'ene sipisipine meme afutamina zamahe frigahie. <sup>20</sup> Fero eri'za vahe'mo'za Ra Anumzamofo kegu'ma kore'ma hzamo'za, ame hu'za vu'za kazokzo eri'za vahe'zmine, sipisipine meme afu zminena zmavre nogu'a zmante'naze. <sup>21</sup> Hianagi Ra Anumzamofo kema nentahi'za zmefi'ma humi'za eri'za vahe'mo'za kazokzo eri'za vahe'zmine sipisipine meme afu'zmia zmatrage'za fegu'a mani'naze.

<sup>22</sup> Anante Ra Anumzamo'a Mosesena asmino, Kazana rusute anagamu atregeno, vahete'ene zagagafare ene, ana maka Isipi hozaramipi hageno mane'nesnia zantero ko'mopa kora herafiramino runteno. <sup>23</sup> Mosese'a azompa'ama rusute nagamu atregeno'a, Ra Anumzamo atregeno monagea nehuno, ko'mopa kora herfineramigeno, kopsinamo'enena evuramino mika mopafina ru'ne. E'ina huno Ra Anumzamo'a atregeno ko'mopa kora Isipi mopa'afina ru'ne. <sup>24</sup> Hagi Ko'mopa komo'ene herfi'neramigeno tusi kopsina eri'ne. Isipi kuma'ma fore huno e'neretira e'inahu ko'mopa kora oru'neankna ko ru'ne. <sup>25</sup> Ana maka Isipi mopa'afina ko'mopa komo'a, vahete ene zagagafanena, zamahe haviza nehuno, hozaramimpima nehagea zantamina, ana maka zamahe haviza nehuno zafaramina rukrara krarupe

atre'ne. <sup>26</sup> Magoke kumatfama ko'mopa ko'mo'ma ruonte'neana, Goseni mopal'i Israeli vahe'mo'zama nemaniza kumate ruonte'ne.

<sup>27</sup> Anante Fero'a Mosesene Aronikizni ke higeke vakeno amanage huno znamsmi'ne, Menina hago nagra kumi hu'noe. Na'ankure Ra Anumzana Agrake fatgo hu'ne. Nagrane vahe'nianena kefo avu'ava nehuna vahe mani'none. <sup>28</sup> Hagi Ra Anumzamofontega nunamu ome hikeno, ko'mopa ko'ene monagenena eri amane hinke'na tamatra'hena viho. <sup>29</sup> Mosese'a kenona huno, Kumapinti'ma ufegu'ama nevanu'ha Ra Anumzamofonte nazana erintesaga hu'na nunamuna hanugen, monagema nehiazana vagarenkeno ko'mopago'ma neria ko'mo'a rusenkenka, maka mopa Ra Anumzamofo mope hunka antahigahane. <sup>30</sup> Hianagi nagra antahinoe, kigrane eri'za vahe ka'anena Ra Anumzamofonkura korora hunontaze.

<sup>31</sup> Hagi e'i ana knafina (flax) kafinamo'ene balimo'enena, havizantfa hu'ne. Na'ankure bali ragamo'za ko' uzate'nazageno kafinamo'a amosre ahe'naze. <sup>32</sup> Hianagi witine speltie nehaza zamo'za havizana osu'naze. <sup>33</sup> Anante Mosese'a Ferona atreno ra kumamofo fegu'a vuno, Ra Anumzamofontega azantrena omeri antesga higeno, monagemo'a vagaregeno, ko'mopa komo'enena ruse'ne. <sup>34</sup> Fero'ma kegeno monagene ko'mopa ko'enema rusegeno'a, Agrane eri'za vahe'amo'za antahintahizmimo'a hanavetigeno Fero'a mago'ane kumi hu'ne. <sup>35</sup> Ra Anumzamo'ma Mosese agipima huvazino hu'nea kante anteno, Fero antahi'zamo'a hanavetigeno Israeli vhahera zmatrege'za ovu'naze.

## 10

### *Kenu'tmimofo knazamofo naneke*

<sup>1</sup> Ra Anumzamo'a Mosesena asmino, Menina Feronte vuo, amama zmagri amu'nompima erifore nehua avame zantmi kesazegu agri antahintahizane eri'za vahe'amokizmi antahintahizana zamazeri hankveti'noe. <sup>2</sup> E'ina hu'nesnugeta kamohe'mofone kagehe'mofonenam zamasmige'za nen-tahi'za, Nagrama Izipi mopal'i vahe'ma zamazeri zmazanava nehu'na avame zantamima amu'nozmifima erifore hu'noazana nezamasmita, Nagrikura Ra Anumza mani'ne huta keta antahita hugahaze.

<sup>3</sup> Mosese'ene Aronikea Feronte vuke amanage huke ome asmi'na'e, Ra Anumzana Hibru vahe'mokizmi Anumzamo'a amanage huno hie, nama'a zupa Nagri navufina kagra kavufga anteraminka nomanine? Zmatrege'za vahe'ni'amo'za vu'za, monora ome hunanteho. <sup>4</sup> Hagi kagrama ke'nia on-tahinka Nagri vahe'ma zmatresnanke'zama ovanazana, antahio, okina ana maka mopa ka'afina kenutmi huzmanta'nena efregahaze. <sup>5</sup> E'ina hanuge'za mopamofona ana kenutamo'za maka refite vagaresage'za, vahe'mo'za mopa kegara nosnageno, ana kenutmimo'za ko'mopa ko'mo'ma aru haviza osu'nea zafaramimofo asi'nane, kasefa'ma hagesia zafa ramina zamagra nevagaregahaze. <sup>6</sup> Ana kenutmimo'za nonka'armimpine, ana maka eri'za vahe ka'amokizmi nontmimpine, ana maka Isipi vahe'mokizmi nontmimpinen mani avitegahaze. E'inahu zana kagehe'mofonteti eno kafahemofonte eno'ma menima kagrite'ma e'neana, ama mopalina fore hige'za onke'nazaza fore hugahie. Anage nehuno Mosese'a rukrahe huno Ferona atreno fegu'a vu'ne.

<sup>7</sup> Anante Fero eri'za vahe'amo'za amanage hu'za Ferona asmi'naze, Nama'a zupa Mosesena atrankeno mago karifugna huno mani'ne. Zmatrege'za vu'za Ra Anumzana zamagra'a Anumzamofona monora ome hunteho. Hagi kagra nonkano Isipi mopamo'ma havizama nehiana?

<sup>8</sup> Fero'a ke hige'za Mosesene Aroni'giznia ete znavre'za agrite azageno amanage huno znamsmi'ne, vuta Ra Anumzana tamagra'a Anumzamofona monora ome hunteho! Hianagi iza'za vugahaze? <sup>9</sup> Mosese'a kenona'a huno, Kasefa vahe'ene tavava ozafane, ne' mofavermine, mofa'neramine sipisipine meme afutamina zamavare vagareta vugahaze. Na'ankure Ra Anumzamofontega ne'za ome kreta neneta monora huntegahune. <sup>10</sup> Anante Fero'a amanage huno znamsmi'ne, Tamatre'snugetama a'mofavretamine vanazana, Ra Anumzamoma kegavama huramantesigu kesue. Hanki tamagra kefo antahintahi retro nehaze. <sup>11</sup> E'inara osugahazanki, tamagri'ma tamavesia kante anteta vene'nemotage vutma Ra Anumzamofona monora ome huntegahaze. Hutege'za Fero avuretira eri'za vahe'amo'za znatufe'za fegu'a eme znatre'naze.

<sup>12</sup> Anante Ra Anumzamo'a Mosesena asmi'ne, Isipi mopafina kazana rusutegeno kenutmimo'za e'za ko' mopa ko'mo'ma ru havizama nehuno atre'nea trazana eme nevagareho. <sup>13</sup> Mosese'a azompa'a erino Isipi mopafina rusutegeno, e'i ana zagefine hanimpina, Ra Anumzamo'a zage hanatitegati zaho retufegeno maka Isipi mopa'afina efregeno nanterama ko'ma tigeno'a, kenutmi zamavreno efre'ne. <sup>14</sup> Ana kenutmimo'za ana maka Isipi mopa'afina emanı avite'naze. Ana kenutmina, hamprigara osu'naze. E'inahu kenutmina kora fore osu'nazanki'za henka'anena fore osugahaze. <sup>15</sup> Na'ankure ana kenumo'za Isipi mopafina mani vitazageno mopamo'a avugosa osuno haninke hu'ne. Hagi ko'mopa ko'mo'ma ahe havizama nehuno atre'nea zafa rgarmine trazantmina ne'za erivagara'zageno magore huno Isipi mopa'afina tra'za aninane zafani'nanena omnetfa hu'ne.

<sup>16</sup> Anante Fero'a ame huno Mosesene Aronigizni ke higeke akeno amanage hu'ne, Hago tamagrite'ene Ra Anumzana tamagri Anumzamofontera kumi hu'noe. <sup>17</sup> E'na hunogu keke huanki kumi'n'i'a meni mago'ene atrenanteta, Ra Anumzana tamagri Anumzamofontega nunamu hikeno, nahe fri knazampintira naza hino. <sup>18</sup> Higeno Mosese'a Fero nompinti atirmino Anumzamofona ome antahigegeno, <sup>19</sup> Ra Anumzamo'a zage fretegati han-kavenentake zaho huntengen eno, ana maka kenutmina Isipi mopa'afintira eme zmavrehna huno koraneko hagerimpi ome zamatrege'za, magore hu'za maka Isipi mopafina omanitfa hu'naze. <sup>20</sup> Hianagi Ra Anumzamo'a Fero antahintahi'a azeri hankvetigeno, Israeli vahera zmatrege'za ovu'naze.

### *Kumzu hani fore hu'nea knazamofo naneke*

<sup>21</sup> Anante Ra Anumzamo'a Mosesena asmino, Kazana rusute anagamu atregeno, Isipi mopafina kumazu hani huno vahe'mo avako huga hanintiri hino. <sup>22</sup> Higeno Mosese'a azana rusute anagamu atregeno, 3'a zageknafi ana maka Isipi kokampi haninkino, tusi'a hanintiri hu'ne. <sup>23</sup> Isipi vahe'mo'za 3'a zageknafina magore hu'za no zmia atre'za fegu'a vano hu'za zamagra'a zamavufina oge'agea osu'naze. Hianagi Israeli vahe'mo'zama nemanizafina masa me'n'e.

<sup>24</sup> Anante Fero'a Mosesena ke higeno egeno amanage huno asami'ne, A'mofavretamine avreneta vuta Ra Anumzamofona monora ome huntegahazanagi, sipisipine meme afutamine ruga'a afutamina zmatrenke'za maniho.

<sup>25</sup> Hianagi Mosese'a amanage hu'ne, Ra Anumzana tagri Anumzante'ma Kresramanavunte afutamine, tevefima krefnane hu ofa hanuna afutamina tatregeta avreneta vammeno. <sup>26</sup> E'ina hu'negu, maka afu kevuti'a magore huta ozmatria zmavreha'na huta vugahune. Na'ankure tagra mago'a ana afutamimpintira zmavreta Ra Anumzamofonte monora ome huntegahune. Ina afutami aheta monora huntegahune ontahi'nonankita anante nevuta kegahune. <sup>27</sup> Hianagi Ra Anumzamo'a Ferona antahintahi'a azeri hankvetigeno zmatrege'za ovu'naze. <sup>28</sup> Anante Fero'a Mosesena asamino, Natrenka maniganenka vuo! Mago'ane omo. Hagi henkama kagrama eme nagesanana kahe frigahue! <sup>29</sup> Mosese'a amanage hu'ne, Ha tamage hane, mago'anena kavufina eme onkegahue!

## 11

### *Vagaretega agonesa mofavrerami zamahe fri'nea knazamofo nanake*

<sup>1</sup> Anante Ra Anumzamo'a amange huno Mosesena asmi'ne, Nagra mago'ane Ferone Isipi vahe'enena knaza zami'na zamazeri haviza hugahue. Anama hutesugen Fero'a tamatrenigeta kuma'afintira (kantri) atreta vugahaze. Tamage agra kazigazi huno tamahenatina vugahaze. <sup>2</sup> Hagi maka Israeli vahetamina zmasamige'za, silvareti'ene golireti'ma tro'ma hu'nesaza zantaminkura tava'ozmire nemanisaza Isipi vahe'mokizmia, vemo'a ve-mofo antahigenkeno, a'mo'a, amofo antahigenkeno amitere hino. <sup>3</sup> Hagi Ra Anumzamo'a Isipi vahera zamarimpa zamazeri otige'za, Israeli vahetamina so'e zamavu'zamava hunezmantageno, Fero eri'za vahe'amo'zane Isipi vahe'mo'zanema ke'za antahi'zama hazana, Mosese'a ra vahe mani'ne hu'za Isipi mopafina antahimi'naze.

<sup>4</sup> Higeno Mosese'a amanage huno Ferona asami'ne, Ra Anumzamo'a amanage hie, meni kenagera Nagra Isipi vahe'mofo mopafi nevu'na, <sup>5</sup> maka Isipi vahe'mokizmi zmagonesa mofavre'mokizmia zamahe frigahue. Fero'ma kini trate'ma mani'nea ne'mofo agonesa ne' mofavrereni uramino, witima neganaza kazokzo eri'za a'nemokizmi agonesa ne' mofavrerenimo'za fri vaganeresageno, anahukna huno maka zagagafamofo agonesa anenta'mozanena frigahaze. <sup>6</sup> Anama hanigeno'a tusi'a zavi maka Isipi mopafina ategahaze. E'inahu zavira korapara ote'nazankna zavi ategahazanki'za, henkanena otegahaze. <sup>7</sup> Hianagi Israeli vahepina magore huno agasasana omnenkeno, kramofo ageru'nazana omanesigeta, tamagra Isipi vahe'mota keta antahita hanazana Ra Anumzamo'a Israeli vahera knare huzmantino, tagripintira zamazeri ruotage hie hutma hugahaze. <sup>8</sup> Hagi Feroga maka eri'za vahekamo'za e'za nagrite zmarena eme nere'za anage hugahaze, maka kagri kazigama mani'naza vahera zmavrenka vuo hanage'na, maka zmavere'na atirami'na vugahue, nehuno tusi arimpa nehegeno, Fero avugatira rukrahe huno Mosese'a atiramino vu'ne.

<sup>9</sup> Ana higeno Ra Anumzamo'a anage huno Mosesena asmi'ne, Fero'a kagri kea ontahigahianki'na, mago'ene Isipi mopafina kaguva zantamina eri fore hugahue. <sup>10</sup> Mosese'ene Aronikea maka kaguvazana Fero avuga eri fore hu'na'anagi, Ra Anumzamo'a Fero antahintahia eri hanavetigeno, Isipi mopafintira Israeli vahera zmatrege'za ovu'naze.

## 12

### *Anumzamo'ma ozmahe zmagatere'nea naneke*

<sup>1</sup> Hagi Ra Anumzamo'a anage huno Mosesene Aronikiznia Isipi mopafina znasami'ne, <sup>2</sup> Tamagritera ama ikamo'a ese ika eri agafa hiankino, mago kafumofona ese ika megahie. <sup>3</sup> Hagi maka Israeli vahera anage hutma zmasamaho, ama ikamofo 10ni zupa magoke magoke naga'mofo amente nezmafa'a sipisipi anenta avretere hino. <sup>4</sup> Hagi osi'a naga'ma mago nompina manine'za mago sipisipi anenta'ma nehana huga'ma osu'nesu'za, osi'a naga'ma tava'ozmire nemasaza naga'ene refko hu'za neho. <sup>5</sup> Anama ahesnaza ve sipisipio meme afu anentamo'a, mago kafuma hu'nesigeno, afuhe afahе osu'nesia su'za azerigahaze. <sup>6</sup> Hagi zamagra ana afutamina kegavahume vu'za ama ana ikamofona 14ni knare'ma uhanatinu'za, maka Israeli vahe'mo'za kinaga zagema unefrea knare ahegahaze. <sup>7</sup> Ana nehu'za ana afu'ma nesaza nozmimofo kantigma kafa zafarera mago'a korana tagi'za nefre'za, anagamu kaziga kafa zafarera fregahaze. <sup>8</sup> Zamagra ana kenageke afura tevefi kre'za aka nasene nene'za, isti onte bretinena negahaze. <sup>9</sup> Hagi onte'nenia afuro, kavofima kre'nesaza afura onetma, aseni'ane, agigo'ane agusu agese zama'anena, maka tevefinke kregahaze. <sup>10</sup> Hagi ana afu'ma kreta neneta atresazama'a me'nenkeno masa osino. Hianagi neneta atre'nazama'a, kora otu'nena tevefinke kre vagareho. <sup>11</sup> Hagi ana ne'zama nenenutma, amanahu hutma retrora hiho. Kukenatamia eri atupa nehutma, tamagia anona nevazita, azompanena tamazampina eri'neta ame'ama hutma ana ne'zana neho. E'i ana ne'zana Ra Anumzamo'na ontamahe'na tamagateresua ne'zane. <sup>12</sup> Na'ankure Nagra maka Isipi mopafi ana kenagera nevu'na, mago'mago nagapintira ese zamagonesa ne' mofavrea zamahe nefri'na, maka afutamimofo ese've anentara zamahe'noa Ra Anumza mani'noanki'na, maka havi anumzantamina refko huzmant'e na, zamazeri haviza hugahue. <sup>13</sup> Hagi tamagrama manisaza nontera kafante fre'naza koramo'a, mago avame'za me'nesige'na, Isipi vahe'ma zamazeri havizama hu'na enevu'na, ana korama eme kesu'na knazana tami'na tamazeri havizana osu'na tamagatereghue. <sup>14</sup> Menina magna Ra Anumzamo'na antahinamita, musema hutma ne'zama nesaza kna me'nena, fore hu anante anante hu'zama esaza vahe'mo'zanena trake me'nena, ama ana knarerera ne'zana kre'za nene'za musena hunante'za vugahaze.

<sup>15</sup> Hagi 7ni'a knamofo agu'afina zo-ore bretige negahazankita, ese knazupa nompintira zore bretia eri atregahaze. Na'ankure ana 7ni'a knamofo agu'afima zore bretima nesimofona, Nagri vahepintira ahe megi'a atregahaze. <sup>16</sup> Hagi ese kna zupa atru hutma monora hunenanteta, nampa 7ni knare'enena monora hunantegahaze. Ana tarega knarerera eri'zana e'origahazanagi, ne'zama nesaza zanke retrora hugahaze. <sup>17</sup> Hagi istima onte bretima nenaza knagura antahita musenkase hugahaze. Na'ankure ama ana knare tamagri Isipiti tamavre'na atirami'noe. E'ina hu'negu ama ana knagura maka knafina fore hu anante hunante hu'zama esaza vahe'mo'za tra kegura zmagera okanitfa hiho. <sup>18</sup> Hagi ese ikamofo 14tini knamofo kinaga, isti onte bretia agafa hutma nenenkeno vuno ana ikamofona 21ni knare kinaga uhanatiho. <sup>19</sup> Ana 7ni'a knamofo agu'afina, magore huno zore bretia nontamifina omaneno. Na'ankure istima ante bretima Israeli vahepintiro megi'a vahe'ma tamagranema mani'nesaza vahepinti'ma nesimofona, vahe'n'i'afintira zamahe anati atreho. <sup>20</sup> Tamagra zore bretia onegahaze. Hagi mika nompina zo-ore bretige neho.

<sup>21</sup> Anantero Mosese'a maka Israeli kva vahera zamagi huno anage huno zamasami'ne, Vutma naga tamimofo avamente Anumzamo ozmaheno zam-

agateresia ne'zama kre sipisipi anentara ome huhampriho. <sup>22</sup> Hagi hisopu zafa azankuna erita zompa fima taginte'naza korampi reteta, kafamofo kantigama zafare nefreta, anagami kaziga zafare'ene nefreta mani'naza nona atreta megi'a ovihio. <sup>23</sup> Na'ankure Ra Anumzamo'a kenage'ma Isipi vahe'mokizmi zmahenaku'ma enevanuno'a, ana korama kantigama kafa zafare'ene, anagamu kafa zafare'ma ke'nuno'a, ana nona agatereno nevanigeno, vahe'ma zamahe fri ankeromo'a ana nompi vahera ozmaheno zmagatereno vugahie. <sup>24</sup> Hagi ama avu'avazamo'a mago kasege me'n'e'na, tamagrane mofavretamine tamagehe'zanena amanahu avu'ava zana huvava huta vugahaze. <sup>25</sup> Hagi Ra Anumzamo'ma huvempama huno'ma taminaku'ma hu'nea mopafima umanisutma, Ra Anumzamo'ma ontame-heno tamagatere'nea zankura ne'zana kretma nenetma muse nehutma tamagesa antahigahaze. <sup>26</sup> Hagi henkama mofavretamimo'zama tamantahige'za, ama ne'zama kretama neneta musema nehunana, na'a agafarere hu'za tamantahigesageta? <sup>27</sup> Tamagra anage huta zmasamihi, Isipi nontifima mani'nonkeno Ra Anumzamo'ma oraheno tagatereno enevuno, Isipi vahe'ma zamahe'negu antahimita musenkase hutā nenona ne'zane hiho. Higeno vahe'mo'za antahite'za, mopafi zmare'nare'za Ra Anumzamofona mono hunte'naze. <sup>28</sup> Anante Israeli vahe'mo'za vu'za, Mosesene Aronikiznima Anumzamo'ma hihoma huno znasami'nea kante ante'za ome retrotra hu'naze.

<sup>29</sup> Hagi ana kenage amu'nompina, Ra Anumzamo'a maka Isipi mopafi vahe'mofo zmagonesa mofavre'zmine, kini trate'ma mani'nea ne' Fero agonesa mofavrereti vuno, kina nompima mani'naza vahe'mofo mofavrene, maka afu zugazmimofo ese anentatmintema vu'neana zamahe fri vagare'ne. <sup>30</sup> Hagi Fero'ene maka eri'za vahe'ane, maka Isipi vahe'mo'za ana kenagera ot'i'za tusi'a zavite'naze. Na'ankure mikha nompina zmagonesa mofavremo'za fri vagare'naze. <sup>31</sup> Ana kenage amu'nompia Fero'a Mosesene Aronikizni ke higeke akeno, Atreta otita vi'o. Vahe'n'i'afintira maka Israeli vahera zmavreta kema huna'a kante anteta, Ra Anumzamofona monora ome hunteho. <sup>32</sup> Hagi maka afu'zaga taminena avreta nevutma, asomu kea hunanteho.

### *Isipiti'ma atre'za Israeli vahe'ma atirami'naza naneke*

<sup>33</sup> Hagi Isipi vahe'mo'za Israeli vahera tutu huzmante'za, ru maka vahe'mota frisunki tatareta ama mopafintira atiramita ko viho. <sup>34</sup> Hagi Israeli vahe'mo'za istima onte'naza flaua zompa fima herunte'nazana tavaravefi eri antegafi'za zamafunte erinte'naze. <sup>35</sup> Hagi Israeli vahe'mo'za Mosesese'ma zmasami'nea kante ante'za, silvareti'ene golireti'ma tro hu'naza zantaminku'ene kukenagura Isipi vahera zmantahigazageno, <sup>36</sup> Ra Anumzamo'a Isipi vahe'mofo zmavurera Israeli vahera zamazeri knare hige'za, nazankuro ome zmantahima kazazana Isipi vahe'mo'za ana maka zami'naze. Ana hige'za maka Isipi vahe'mofo zana eri vagare'naze.

### *Israeli vahe'mo'za Izipi mopa atre'naza naneke*

<sup>37</sup> Hagi Israeli vahe'mo'za Ramasese kumara atre'za Sukoti kumate'ma uhanati'nazana, 600 tauseni'a naza vahera vu'naze. Anampina a'nene mofavreraminena ohampri'naze. <sup>38</sup> Hagi Israeli vahekera ovu'nazanki, rama'a ru vahe'ene afu'zagane vu'naze. <sup>39</sup> Israeli vahe'mo'za Isipiti'ma eri'za e'naza flauateti, zo-ore bretia kre'naze. Na'ankure Isipi vahe'mo'za tutu

hu'za huzmantage'za, ne'zama retro'ma hukna omanege'za isti onte eri'za e'naza flauateti, zo-ore bretia kre'naze.

<sup>40</sup> Hagi Israeli vahe'mo'za Isipima mani'nazana 430'a kafu mani'naze. <sup>41</sup> Hagi 430'a kafuma vagamarea kna fatgore, Ra Anumzamofo vahe'mo'za Isipi mopa atre'za atirami'naze. <sup>42</sup> Hagi anama Isipitima zamavreno'ma atirami'nea kenagemo'a, Ra Anumzamofo kenage me'nenkeno, mika Israeli vahe'mo'zane zamagripinti'ma fore hu anante anante'ma hu'zama vanaza vahe'mo'za, Ra Anumzamofo kenagere nehu'za, ne'zana kre'za nene'za monora huntegahaze.

<sup>43</sup> Hagi Ra Anumzamo'a anage huno Mosesene Aronikiznia zanasami'ne, ontamahe'na tamagatere'noa ne'zama ne'knamofo kasegemo'a amana hu'ne, megi'a vahe'ma tamagranema emanine'naza vahe'mo'za ana ne'zana onetfa hugahaze. <sup>44</sup> Hianagi maka ve kazokzo vahe'ma mizasetma avre'nesaza vahe'mokizmima zmavufama taga hu'nesaza vahe'mo'za amne negahaze. <sup>45</sup> Hagi megi'a vahero, zago eri'zama tamagrite'ma emenerisaza vahe'mo'zanena, ana ne'zana onegahaze. <sup>46</sup> Hagi ana ne'zana ana nompinke neneta mago'a avufga'a eritma megi'a atioramige, ana afumofo zaferinanena rufu otagogahaze. <sup>47</sup> Mika Israeli vahe'mo'za ne'zana kre'za nene'za, ana knagura musenkase hugahaze. <sup>48</sup> Hianagi ru vahe'mo'zama tamagranema emani'nenamo'za, Ra Anumzamo'ma ontamahenoma tamagatere'nea knare'ma muse ne'zama nenaku'ma hanu'za, maka vene'nemo'za oku zmufga anom'a tagahute'za, zamagra tamagrikna hu'za erava'o hugahaze. Hagi zamavufagama taga osu'nesaza vahe'mo'za, ana ne'zana onegahaze. <sup>49</sup> Hianagi megi'a vahe'ma tamagranema emani'nesaza vahe'mo'zane Israeli vahe'mo'zanena ana kasegea, amage antegahaze. <sup>50</sup> Anante Ra Anumzamo'ma Mosesene Aronikiznimma hihoma huno maka kema znasami'nea kante ante'za maka Israeli vahe'mo'za ana hu'naze. <sup>51</sup> Ana knazupage Ra Anumzamo'a Israeli vahera Isipi mopafintira nagate nofite, zamavareno atiramino vu'ne.

## 13

### *Zmagonesa ne' mofavre Anumzamofo amisaza naneke*

<sup>1</sup> Ra Anumzamo'a Mosesena amanage huno asmi'ne, <sup>2</sup> Israeli vahe'mota mika tmagonesa ne' mofavrene, mika zagagafa timimo'zama ese anenta'ma kase zmantesiana, azeri otage hanageno, Nagrike su'za manigahaze.

<sup>3</sup> Anante Mosese'a amanage huno veara zamasmi'ne, kazokzo eri'zama e'nerita kinama hutma Isipi mopare mani'nazareti'ma atiramita e'naza knagura timageira okaniho. Na'ankure Ra Anumzamo'ma hanavenentake azanu Isipitira tamavre fegu'a atre'negu, antahimita zore bretia onegahaze. <sup>4</sup> Ese ikamofona (Abibie) amana knare tamagra atretma vughaze. <sup>5</sup> Ra Anumzamo'ma timagehe'mokizmima huvempa huzmanteno, amirine, tumerimo'ma avite'nea mopama Kenani vahe'mokizmi mopane, Hiti vahe'mokizmi mopane, Amori vahe'mopama, Hivi vahe'mokizmi mopama tamigahuema hu'nea mopare'ma tamavreno vanigeta, kafugu kafugura ana knagura nentahita musenkase hiho. <sup>6</sup> Hagi 7ni'a zagemofo agu'afina zo-ore bretige neta nevinkeno, 7ni knareru uhanatina ne'za trohuta neneta, Ra Anumzamofona monora huntegahaze. <sup>7</sup> Zo-ore bretia ana 7ni'a zage knamofa agu'afinke neta vughahaze. Hagi ana knafina, zisti ante bretia nontimifine, kumapine non tva'ontamirera onteho. <sup>8</sup> Hanki

kafune kafunena ama ana knarerera mofavretimia amanage hutma zmas-miho, Ra Anumzamo'ma Isipi mopare kina huta mani'nonkeno tavreno e'nea knagura antahimita musenkase nehune huta zmasmiho.<sup>9</sup> Ama ana knamo'a tamazante'ene kokovite'na avame'za me'nena, tamagera okanitma tamagesa nentahinkeno, Ra Anumzamofo kasegemo'a tamagipi meno. Na'ankure Ra Anumzamo'a tusi'a hanavenentake azanu Isipitira tamavreno atirami'ne.<sup>10</sup> E'ina hu'negu mika kafune kafune ama knama ne-ena, huhampriteneta ne'za kreta neneta musenkase hugahaze.<sup>11</sup> Hanki Ra Anumzmo'ma tamagri'ene tmagehemokizmi hvempa huno, zamigahue hu'nea Kenani mopare'ma tavreno'ma vanigeta,<sup>12</sup> mika tmagonesa ve mofavreramine, mika'a afu'zagama kegava nehaza afu'mo'zama kasezman-tesaza ese' ve anenta'a, Ra Anumzamofo amiho. Na'ankure e'i ana ese anenta'a Ra Anumzamofo su'zane.<sup>13</sup> Hianagi ve sipisipi anenta aheta maka donki afutamimofo ve anentara nona hutma miza hugahaze. Ana'ma hutma mizama osenutma, ana ve donki afura ananke eri vamagita ahe-gahaze. Maka tmagonesa ve mofavreramina ete miza hugahaze.<sup>14</sup> Hagi mofavretamimo'zama henkama tamantahige'zama amazana nazane han-agetma, kina hu'neta kazokzo eri'zama e'nerunkeno, hanavenentake azanu Ra Anumzamo'a Isipi mopafinti tavreno atirami'ne hutma hugahaze.<sup>15</sup> Hagi Fero'ma tatagetama ovunkeno, Ra Anumzamo'ma Isipi vahe'mokizmi ese zmagonesa mofavreramine, maka afu'zagamofo anentara zamahe'ne. E'ina hu'negu maka ese ve anenta'ma kasentesazana Ra Anumzamofo kresramna vunentonanagi, tagonesa ve mofavretia ete nona huta miza nehune hutma hugahaze.<sup>16</sup> Ana hu'negu mago avame'za tazartera nofi anakinenteta kokovitera anakinenteta, Ra Anumzamo'ma hanavenentake azanu'ma Isipiti'ma tavreno'ma atirami'nea zankura antahimigahune.

### *Anumzamo zamavreno vu'nea naneke*

<sup>17</sup> Hagi Fero'ma Isipiti'ma zmatrege'za vu'nazana, Filistia mopafima vu kana tavaonte me'neanagi, Anumzamo'a zmatrege'za ana kantera ovu'naze. Na'ankure Israeli vahera ha' humzantesage'za rukrehe hu'za Isipi e'zanku Anumzamo'a zmatrege'za ovu'naze.<sup>18</sup> E'ina hu'negu ka'ma kokampi koranke hagerima me'nea kantega Anumzamo'a zamavreno kagino vige'za sondia vahe viaza hu'za vu'naze.

<sup>19</sup> Hagi ko'ma Josefe'a Israeli nagara zamsamino, Anumzamo'a Isipitira henka tamavreno vugahiankita zaferinani'a eri'neta vugahaze hige'za hvempara hunte'nazare, amage anteno Moses'e'a zaferina'a erino vu'ne.

<sup>20</sup> Anante Sukoti kumara atre'za ka'ma kokamofo atumparega, Etamu seli nona ome ki'naze.<sup>21</sup> Hagi Ra Anumzamo'a hampompi manineno msar-era zamavreno nevuno, hanimpina tevefi mani'neno zamavreno vu'ne. E'ina hige'za kenage'ene masare'enena amne vugara hu'naze.<sup>22</sup> Israeli vahe'mofo zmavugatira masarera hampomo'a zamatrengi ovigeno, hanimp-inia tevemo'a zamatrengi ovu'ne.

## 14

### *Fero'a Israeli vahe zamazerinaku zamarotago hu'nea naneke*

<sup>1</sup> Ra Anumzamo'a anage huno Mosesena asami'ne,<sup>2</sup> Zmasamige'za Israeli vahe'mo'za rukrehe hu'za vu'za, Pihahiroti kumamofo avuga Mikdoli kuma'ene hagerinke'namofo amu'noznifi, nona ome kinkeno mago kaziga Ba'al Sifoni kuma meno.<sup>3</sup> Na'ankure Fero'ma agesama antahi'niana, Israeli vahe'mo'za ka'ma kokana agatere'za vugara osu'za, hazagre'za vano nehaze

huno antahigahie. <sup>4</sup> Nagrani'a Fero antahintahia eri hanaveti'nena, agri'ene sondia vahe'anena zamahe vagaresuge'za, Isipi vahe'mo'zama antahi'za ke'za hanazana, Nagrikura Ra Anumza mani'ne hu'za ra nagia namigahaze. Hige'za anante Israeli vahe'mo'za nona ki'za mani'naze.

<sup>5</sup> Israeli vahe'mo'za hago atre'za vu'naze kema Isipi kini ne'mofoma eme asamizageno'a, Fero'ene eri'za vahe'amo'za antahi'zazmia ete rukrahe nehu'za, amazana naza hunke'za eri'zama erinerantaza zana zmatronke'za Israeli vahe'mo'za tatare'za vu'naze? hu'za hu'naze. <sup>6</sup> Anagema hute'za, kini ne'mo'a ha'ma hu'zana karisi'a retro nehuno, sondia vahe'a zamazeri retro, <sup>7</sup> nehuno 600'a knare'ma hu'nea karisiramina e'nerino, maka Isipi mopafima me'nea karesiramina erige'za, ana maka karisiramintera ugagota hu'naza sondia vahe'amo'za mareri'za manitere hu'naze. <sup>8</sup> Hagi Ra Anumzamo'a Isipi kini ne' Ferona antahintahia eri hanavetigeno zmartago huno vu'neanagi, Israeli vahe'mo'za korera osu muse hu'za vu'naze. <sup>9</sup> Anantero maka Isipi vahe'mo'zane, Fero karisi ramine, hosiramina e'neri'za nevazageno, sondia vahe'mo'zanena zamarotago hu'za Pihahirotine Ba'ale Zefone avuga, koranke hageri ankenarega Israeli vahe'ma mani'nazare vu kofta hu'naze. <sup>10</sup> Hagi Israeli vahe'mo'za kazageno'ma, Fero'ene sondia vahe'amo'zama vu tava'oma nehige'za, zamagra tusi zamagogogu nehu'za, zamazama hanigu Ra Anumzamofonku kezanke hu'naze. <sup>11</sup> Anantero anage hu'za Mosesena asami'naze, Isipia matira omnegenka frisunegura ama ka'ma mopafina tavrenka e'nano? Nagafare tavrenka ama ka'ma kopina e'nane? <sup>12</sup> Isipima mani'neta ko kasamita anage hu'none, tataregeta Isipi vahe kazokzo eri'za e'nerita manimneno hu'none. Na'ankure Isipi vahe'mokizmi kazokzo eri'zama e'nerita manusina knare hisinagi, ama ka'ma mopafima fri'zamo'a knarera osu'nene.

### *Hagerimo rupapa huno vuno eno hu'nea naneke*

<sup>13</sup> Hianagi Moses'a anage huno Israeli vhahera zamasami'nene, Korora osuta Anumzamo'ma menima tamagu'ma vazisia zana oti hanavetineta keho! Na'ankure Isipi vhahera menina nezmagazankita, mago'enena ozmagetfa hugahaze. <sup>14</sup> Hagi tamagra akoheta mani'enkeno, Ra Anumzamo tam-agritega anteno hara hugahie.

<sup>15</sup> Anante Ra Anumzamo'a Mosesena anage huno asami'nene, Nahigenka Nagritega krafagea nehane? Zmasamige'za Israeli vahe'mo'za viho. <sup>16</sup> Hagi kagra azompaka'a erisga hunka, hagerintega kazana rusutegeno, hagerimo'a rupapa huno vuno eno hinkeno, hagege mopa fore hinke'za, Israeli vahe'mo'za viho. <sup>17</sup> Hagi Nagra Isipi vahe'mokizmi antahintahia eri hanavetsuge'za, tamarotago hu'za tamefi nevanage'na, Ferone maka sondia vahe'ane, hosima e'neri'za vahe'ene, karisizmine, zamahe refitesua zanteti, Nagra Ra nagia erigahue. <sup>18</sup> Ana'ma hu'na Ferone maka sondia vahe'ane, hosima e'neri'za vahe'ene, karisizmine, zamahe refitesuge'za Isipi vahe'mo'za nege'za, Nagrira Ra nagi namigahaze.

<sup>19</sup> Anantero Anumzamofo ankeroma, Israeli vahe'ma ugagotama huzmanteno'ma nevia ankeromo'a zimagef'i'ma evigeno'a, ana zanke huno ugagotama huno'ma nevia hampomo'a' zamagefi eme refite'ne. <sup>20</sup> Ana kenagera Israeli vahe'ene Isipi vahe'mokizmi amu'nompina ana hampomo'a me'neno, Isipi vahe'mokizmi kaziga rehani nehuno, Israeli vahe'mokizmi remsa huzmantege'za Isipi vahe'mo'za erava'o osu'naze.

<sup>21</sup> Anante Moses'a hagerintega azana rusutegeno, Ra Anumzamo'a zage hanatitegati zaho huntegeno, ana kenagera zaho erino hagerina eri rupapa huno vuno eno higeno, mopamo'a hagege hu'ne. <sup>22</sup> Ana higeno hagerimo'a

kantigma hihi huno vihu gna huno mreri'nege'za, Israeli vahe'mo'za ana hagerimofo amu'nompi hagege hu'nea mopare vu'naze.

<sup>23</sup> Anante Isipi vahe'ma, Fero hosima e'neriza vahe'ma, karisima e'neri'za vahe'ma, sondia nena, zamazeri naku zimagefi zmarotago hu'za hagerimofo amu'nompi vu'naze. <sup>24</sup> Kotu masama nehigeno, Ra Anumzamo'a hampompine, tevefine mani'neno kefenkateno Isipi sondia vahe'ma nezmageno, antahintahizmia zamazeri savri hu'ne. <sup>25</sup> Ra Anumzamo'a karisizmia zamazeri ge'za rut'i'zama vezankura mragu'zati'za nevu'za, Isipi vahe'mo'za anage hu'naze, atrenketa Israeli vahera zmatreta framneno. Na'ankure Anumzamo'a zamaza huno ha' hunerante. <sup>26</sup> Hagi Ra Anumzamo'a anage huno Mosesena asami'ne, Kazana hagerintega rusutegeno, hagerimo'a ete evuno Isipi vahe'ene karisizmine hosima eneri'za vahe'enana refitezmanteno. <sup>27</sup> Higeno Mosese'a ko'matigeno'a hagerintega azana rusutegeno, hagerimo'a evuno ru hamprigeno, Isipi vahe'mo'za ete rukrehe hu'za koro frenaku hazanagi hagerimofo agika frazageno, Ra Anumzamo'a hageri amu'nompi zmaheno refite'ne. <sup>28</sup> Hagi maka hosima e'neriza vahe'ene, maka Fero sondia vahe'ene karisi zminena hagerimo'a zmaherefitegeno, mago'mo'e huno omani'ne.

<sup>29</sup> Hianagi Israeli vahe'mo'za hageri amu'nompina hagege hu'nea mopare vazageno hagerimo'a, kantigma kegina huzmanteankna hige'za amu'nompi vu'naze. <sup>30</sup> Ana zupa Israeli vahera Isipi vahe'mokizmi zamazampintira Ra Anumzamo'a zmagu'vazino zamaza hige'za, Isipi vahe'ma hagerinke'nfima fri'naza vahera Israeli vahe'mo'za zimage'naze. <sup>31</sup> Hagi Ra Anumzamo'ma havenantake zama tro'ma huno Isipi vahe'ma ha'ma huzmantea zama, Israeli vahe'mo'za nege'za, Ra Anumzamofona kore hunte'za zamentinti hunente'za, eri'za vahe'a Mosesenena zamentinti hunte'naze.

## 15

### *Mosese'ene Israel vahe'mo'za zagame hu'naza naneke*

<sup>1</sup> Ana hige'za Mosese'ene Israeli vahe'mo'za ama'na zagame Ra Anumzamofonte hu'za amanage hu'naze, Nagra Ra Anumzamofonte zagame hugahue, na'ankure Agra tusi'a ha' hu agatereneno, mareri sga hu'ne. Hagi hosi agumpi mani'za aza vahera zamasga huno hagerimpi matevutre'ne.

<sup>2</sup> Ra Anumzamo'a hankveni'ane zagame'ni'a mani'neno, Agra nagu'vazi'ne. Agra nagri Anumza mani'negu, agi hentesga nehue. Nenfa Anumzamofona agi'a hentesga hugahue. <sup>3</sup> Ra Anumzamo'a harafa nere, Ra Anumzana agri agi me'ne. <sup>4</sup> Ferone sondia vahe'amokizmine karisi zminena, hagerimpi zmamahere'ne. Ave'masinezmantea kva vahe'amo'za koranke hagerimpi ti nakri'naze. <sup>5</sup> Zamagra amefenkame hagerimofo agu'afina havemo hiaza hu'za urami'naze. <sup>6</sup> Kagri kzan tmagamo'a Ra Anumzamoka hanavenantake hu'negenka, ha' vaheka'a zamahenati tre'nane. <sup>7</sup> Kagra himamuka'reti'ene fatgo kavukavaka'reti ha'ma hugante ku'ma haza vahera zamazeri agatenerane. Krimpa teveha'zamo'a, ha' vahe ka'a tevemo traza tefanene hiaza huno tefanane nehie. <sup>8</sup> Kagona gampinti himamu kasimu zaho'mo tina azerimohili higeno marerigeno, tima enevia timo'a moriri huno mareri'ne. <sup>9</sup> Ha' vahetimo'za hu'za, zmarotago huta ome zamazeri ta feno zazmia refako hanune hu'naze. Zamagrama antahizaza hunerante'za, kazinteti tahe nefriza zmazanu tahe frinaku hu'naze. <sup>10</sup> Kagra zaho ka'a huhu hankeno hagerimo'a

refite'zamante'ne. Zamagra tusi'a hanavenentake timofo agu'a tami'naze. <sup>11</sup> Iza anumza tamimpintira magora Kagrikna Anumzana mani'ne, Ra Anumzamoka? Iza magora Kagrikna huno Hankveka'ane Ruotgera hu'ne? Nagru hu'nanke'za Kagi hesga nehazagenka, Kagra kaguvara nehane? <sup>12</sup> Kagra tamaga kazana rusutankeno, mopamo'a zamazeri nakri'ne. <sup>13</sup> Kagrama vaheku'ma kavesi zmantenka kasuma tagizmante kavukava zanka'areti, mizasenka zmavre'nana vahera zmavrenka vu'nane. Kagraka'a hankave ka'afi kegava huzmantenka nagru hu'nea kumate ome zamante'nane. <sup>14</sup> Vahe'mo'za ana agenkema nentahi'za zmahirahiku hu'naze. Filistia vahe'mo'za tusi'a zamanogu hu'naze. <sup>15</sup> Itomu kumate ugagota hu'naza vahe'mo'za, tusi koro hu'naze, Moapu kumate kegava hu'naza vahe'mofona, tusi zamano vazi'ne, mikä Keneni nemaniza vahe'mofa zamagu'amo'a, ti se'ne. <sup>16</sup> Ra Anumzamoka tusi'a hankave ka'a zamagra nege'za, tusi korozamo zmagrira refitezmantenge'za, kaza osu'naze. Zamagra zafa mneankna hu'enageta, Kagri vahe'mota vugahune. Ra Anumzamoka isipiti tavrenka anketa kinafintira katufeta e'none. <sup>17</sup> Kagra zamavarenka erisanti harerantenku'ma hu'nana kumakare emetantegahane. Kagraka'a manigahue hunka kazanuma tro'ma hu'nana kumapi, Ra Anumzamoka ome tantegahane. <sup>18</sup> Ra Anumzamo'a kinia manivava hugahie.

<sup>19</sup> Na'ankure hosifi maniza nevaza Fero sondia vahe'mo'za hagerimpi ufrazageno, Ra Anumzamo'a hagerina atregeno refitezmantenge'ne. Hinagi Israel vahe'mo'za hagerimofo amu'nompi hagege hu'nege'za vu'naze. <sup>20</sup> Kasnampa a' Miriamu, Aroni nesaro'a nase'nasepa azampi erige'za, mikä a'nemo'za nase'nasepa erihanati'za nase'nasepa ati'za avo hage'naze. <sup>21</sup> Higeno Miriamu'a mago zagame huno, Ra Anumzamofonku zagame hiho, na'ankure Agra marerisga hu'ne. Hosi agumpi mani'naza vahe'ene hosizmine hagerimpi zamasgahu re'ne.

### *Anumzamo'a ti zamige'za ne'naza naneke*

<sup>22</sup> Ananteti Moses'a koranke hagerina atreno Israeli vahe'mo'za Sulue nehaza ka'ma kopí zamavareno, 3'a zageferu nevige'za, tina ke'za erifore osu'naze. <sup>23</sup> Zamagra Marae nehazare'ma ne-eza tina Maratira one'naze. Na'ankure ana timo'a aka hu'ne, E'ina hu'negu (aka hu'ne) Mare hu'za hu'naze, <sup>24</sup> Ana hige'za vahe'mo'za Mosesena kehakare hunte'za anage hu'naze, ina'na ti negahune? <sup>25</sup> Anage hazageno Moses'a Ra Anumzamofo antahigegeno, Anumzamo'a mago zafa averi higeno hantagino ana timpi atregeno, ana timo'a knare hige'za ne'naze. Anante Ra Anumzamo'a mago'a tra kenenteno amage'ma antesagu rezamaheno ke'ne. <sup>26</sup> Ana nehuno anante Ra Anumzamo'a anage hu'ne, Rantimi Anumzamofo ageru'ma antahitama fatgo zama Agri avufima nehutma, kasege'agu'ma tamagesa anteta nentahitma, mikä ke'ama amage'antesazana, magore hu'na kria tamavatera ontegahue, Isipi vahe'ma zmi'noankna kria ontamigahue. Na'ankure Nagra Ra Anumzamo'na, kritamima eri netromo'ne. <sup>27</sup> Ananteti Elimie nehaza kumate 12fu'a ti nehanatigeno, 70'a tonazafa me'nere nona emeki'za tin-kenare mani'naze.

## 16

### *Ra Anumzamo mana ne'zane hifa nama zami'nea naneke*

<sup>1</sup> Hagi menina nampa 2 ikamofo 15ni knazupa Israeli vahe'mo'za Isipima atre'za atirami'naza emaninaretira Elimia atre'za Sinie nehaza ka'ma

kokampi, Elimine Sainai amu'nompi e'naze. <sup>2</sup> Hagi maka Israeli vahe'mo'za mago zamarimpa osu'za Mosesene Aronikiznia ka'ma kokampina ke hakare huznante'naze. <sup>3</sup> Hagi Israeli vahe'mo'za anage hu'za zanasami'naze, Isipima mani'neta tavesite afu kavone, bretinena neramu nehuta maninonte Ra Anumzamo'ma tahe friresina knare hisine. Hianagi tagaku nehuta frisunegu ka'ma kokampina tavreta e'na'o. <sup>4</sup> Ananter Ra Anumzamo'a anage huno Mosesena asami'ne, ko, Nagra maka kna monafinti bretia ko'mariaza hu'na tamagritega atresugeno eraminige'za, vahe'mo'za vu'za mago mago knamofo agu'afima nesaza avamente erisage'na, keni'a amagera antegahazafi rezmahe'na kegahue. <sup>5</sup> Hagi 6si knazupa, tare knamofo agu'afima nesaza avamente zogihio. <sup>6</sup> Ana higeno Moses'e'ne Aronikea maka Israeli vahera zamasami'ne, meni kinagama ketma antahitama hanazana Ra Anumzamo Isipitira tavreno atirami'ne nehutma, <sup>7</sup> nanterana Ra Anumzamofo hanave'a kegahaze. Na'ankure Ra Anumzamofoma mago tamarimpama nosuta kehakarema huntazana antahi'ne, hagi tagra izagata mani'nonketa ke hakarea hunerantaze? <sup>8</sup> Anante Mosese'a anage hu'ne, Ra Anumzamo'a nanterana neramu'ma hu'are bretia neramimino, afu ame'a erifore huno kinaga tamamigahie. Na'ankure Agri'ma ke hakarema hunentaza zana agra ko keno antahino hu'ne. Tagra izagata mani'nonketa ke hakarea hunerantaze. Tagri ke hakarea hunorantazanki, Ra Anumzamofo kehakarea hunentaze.

<sup>9</sup> Anante Mosese'a anage huno Aronina asmi'ne, Maka Israeli vahe'mokizmia anage hunka zamasamio, Ra Anumzamofo tava'onte avuga eta antahiho, na'ankure ke hakare'ma hazana Agra antahine. <sup>10</sup> Hagi Aroni'a maka Israeli vahe'mokizmima anankema nezmasamige'za, nentahi'za kegamute'za ka'ma kokantega kazana, Ra Anumzamofo msamo'a hampompinti remsa hu'ne. <sup>11</sup> Anante Ra Anumzamo'a anage huno Mosesenu hu'ne, <sup>12</sup> Nagra Israeli vahe'mo'zama ke hakare'ma hazana ko antahi'noanki anage hunka zamasamio, kinaga afu ame'a negahaze. Hagi nanterana bretia neramu nehuta, tamagra keta antahitama hanazana, Nagrikura, Ra Anumzana tagri Anumza mani'ne hugahaze.

<sup>13</sup> Hagi ana zupa kinaga segeno'a, Hifa namazagamo'za e'za seli nomagi'za mani'naza kumara emanı avinetazageno, nanterana ata ko aru'ne. <sup>14</sup> Ana ata ko'mo'ma hagegema higeno'a, ka'ma kokampina efeke huno breti retoza'agna'za fore huno mopa refite'ne. <sup>15</sup> Anante Israeli vahe'mo'zama ana zama nege'za, zamagra zamagra anage hu'naze, ama zana na'zane? Na'ankure anazana Israeli vahe'mo'za ke'za antahi'za osu'nazagu hu'naze. Anante Mosese'a anage huno zamasami'ne, ama'i Ra Anumzamo bretilma nesazaza tami'ne. <sup>16</sup> Hagi amanage huno Ra Anumzamo'a hanave ke hu'ne, tare lita tima afiga'ma hu'nesia kavofi, mago mago'mo'a seli nompima mani'nesaza avamente zogihio. <sup>17</sup> Hagi Israeli vahe'mo'za kema zamasamiaza hu'za zogi'nazana, mago'amo'za rama'a zonegizageno, mago'amo'za osia zogi'naze. <sup>18</sup> Henka ana ne'zana erinte'za refko hu'za kazana, rama'ama eri'namo'za agateorazageno, osi'ama eri'namo'za atupara osu'naze. Maka'mo'za ana ne'zana negnare hu'naze.

<sup>19</sup> Anante Mosese'a anage huno zamasami'ne, Mago'a ne'zana atrenkeno me'enkeno nanterana oseno. <sup>20</sup> Hianagi zamagra Moses'e'ma hiankea ontahi'za, nene'za mago'a ante'nazageno ko'ma atigeno, anampintira kani fore huno himna vigeno, Moses'e'rimpa ahezmante'ne. <sup>21</sup> Maka nanterana Israeli vahe'mo'za nesaza avamente zogi'nazanagi, mago'ama atrageno'ma meama'a zagemo'ma amuhoma nehuno'a, teze'ze higeno fnanene hu'ne.

<sup>22</sup> Hagi 6si knazupa tare lita tima afiga'ma hu'nesia kavofi, mago mago'mo'a tare knafima nesaza avamente tare kavo eri avitetere hino. Maka Israeli vahe'mokizmi kva vahe'mo'za e'za anazama fore'ma hiazana Mosesena eme asmi'naze <sup>23</sup> Anante Moses'a anage huno zamagrira zamasmi'ne, Ra Anumzamo'a amanage hie, okina mani fruhu (Sabat) knagino, Ra Anumzamofo ruotage kne, tegefima kresazama'a tevefi negretma, kavofima kresazama'a, kavofi kreho. Hagi mesiama'a eri otage hutma ante'enkeno, ko atuno. <sup>24</sup> Hige'za meama'a ante'nageno ko atuneanagi, ana ne'zampina knina fore osigeno, himna ovu'ne. <sup>25</sup> Moses'a amanage huno zamasmi'ne, mani fru hu'zupagita omnenketa e'origosaze. Krente hanaza ne'za neneta maniho. <sup>26</sup> Hagi 6si'a knafi ne'zana zogigahaze. Hianagi 7ni kna mani fruhu knagino, ne'zana omanegahie. <sup>27</sup> Hagi mani fruhu knama (sabat) ege'za, mago'a vahe'mo'za ne'za erinaku vu'za ome hakazanagi, onke'naze. <sup>28</sup> Anante Ra Anumzamo'a anage huno Mosesena asami'ne, Nama'a kna tamagra Nagri kasege hihoma hua ke'nena amagera nontaze? <sup>29</sup> Hagi keho, Ra Anumzamo'a mani fruma hanaza kna tami'noe. E'ina hu'negu ne'zama nesaza zana, tare knamofo agu'afima nesaza avamente 6si knazupa Nagra tami'noe. Hagi mago'mo'e huno mani fruma huknarera meg'i a nezankura hakeno ovuno, maka vahe'mo'za nozamire manitere hiho. <sup>30</sup> Hige'za Israeli vahe'mo'za, 7ni knarera manigasa hu'naze. <sup>31</sup> Ana hige'za Israeli vahe'mo'za, ana ne'zankura manae hu'za agi'a ante'naze. Hagi ana manamo'a osisi huno kolianta zafa rgagna huno efeke higeno, haga'amo'a tumerima'reti tro hu'nea basketigna hu'ne. <sup>32</sup> Anante Moses'a anage huno zamasami'ne, Ra Anumzamo'a anage hie, tare lita tima afiga avamente mana antenkeno me'nena henkama fore hunante anante'ma hu'za esaza vahe'mo'za ana mana nege'za, Isipiti'ma tamavre-megi atre'na tamavre'na ne-ena tami'noa mana kegahaze. <sup>33</sup> Hagi Moses'a anage huno Aronina asami'ne, tare lita tima afiga avamente ana mana erivitenka Anumzamofo avure'ma ante'nea kavofina antegeno me'nena, henkama fore hunante ante'ma hu'zama esaza vahe'mo'za kegahaze. <sup>34</sup> Ra Anumzamo'ma Mosesema asmi'nea kante amage anteno, Aroni'a ana mana henkama fore hunante anante'ma hanaza vahe'mo'za nege'za antahimisagu antegeno me'nena.

<sup>35</sup> Hagi Israeli vahe'mo'za 40'a kafufi ana mana ne'zana ne'za nevu'za, vahe'ma mani'naza mopafina uhanati'za, ana mana ne'za nene'za Keneni vahe'mokizmi mopafi ufre atuparega uhanati'naze. <sup>36</sup> Hagi ana knafima ne'zama refko'ma hu'zama negaza kavoa tare me'ne, (magora osikino oma tare lita ti afiga hu'ne). Hagi magora efetie nehaza rankavogino, 20'a lita tina afiga hu'ne.)

## 17

### *Havefinti ti fore hu'nea naneke (Nam-Ham 20:1-13)*

<sup>1</sup> Ananteria maka Israeli vahe'mo'za Anumzamo'ma zmasamino, vihoma hige'za Sinie nehaza hagege ka'ma kokana atre'za, seli nona ome ki'za masete masete hu'za vu'naze. Hagi ana hu'za nevu'za henka Refitimie nehaza kumate uhanati'za seli nona ome ki'naze. Hianagi nesaza tina ana kumatera omane'ne. <sup>2</sup> E'ina hige'za Israeli vahe'mo'za Mosesena ke hara hunte'za, anage hu'naze. Tina tamigeta namneno, hazageno Moses'a anage huno zamasami'ne, nahigeta nagrira ke hara hunentaze?

Nahigeta Ra Anumzamofona rehetma negaze? <sup>3</sup> Hianagi vahe'mokizmia tinkura tusiza huno zmagege'za, Mosesena ke hakare hunte'za, nahi-genka Isipitira tavrenka amafina e'nanketa, tagrane maka mofavrezagatine, afu'zagatinena ti ne'zankura nehuta frigahune? <sup>4</sup> Anama hazageno Mosese'a Ra Anumzamofontega krafa huno nunamu nehuno, Hago have-knonu nahe frigahazanki, na'a nagra ama vahera huzmantegahue huno antahige'ne? <sup>5</sup> Anante Ra Anumzamo'a amanage huno asami'ne, Naeli tima amasagi'nana azompa eri'enka, Israeli vahe'mokizmi zmavuga kva vahvezaga zamavarenka ugagota hutma viho. <sup>6</sup> Hagi antahio, Horepi agonafi havemofo agofetu Nagra otina manigahuanki, kagra ana azompanu havea ome amasagigeno, timo'a anampinti hanatina negahaze. Higeno Mosese'a Israeli kva vahe'mokizmi zmavuga ana zana hu'ne. <sup>7</sup> Ana kumakura Mosese'a Masae\* nehuno, Meribae† hu'ne, na'ankure Israeli vahe'mo'zama haframa nehu'za, Ra Anumzamofona rehē'za nege'za, Ra Anumzamo'a tagri amu'nompina mani'nefi omani'ne?

#### *Israeli vahe'mo'za Ameleki vahe'enema ha'ma hu'naza naneke*

<sup>8</sup> Ananteria Ameleki vahe'mo'za e'za, Israeli vahera Refitimie nehzafi hara huzmante'naze. <sup>9</sup> Ana hazageno Mosese'a anage huno Josuana asmi'ne, Mago'a vahera tagripintira huhamprizmantegē'za Ameleki vahe'enena hara ome hiho. Okina nagra Anumzamofo azompa nzampi eri'ne'na ag-onarera otigahue. <sup>10</sup> Mosese'ma asamia kante anteno, Josua'a Amaleki vahe'enena hara nehige'za, Mosese'ma, Aroni'ma, Huri'ma hu'za agonarega mрreri'naze. <sup>11</sup> Hagi Mosese'ma azama erintesga hige'za, Israeli vahe'mo'za hara Amaleki vahera huzmangatere'naze. Hagi Mosese'ma aza'ma erinte fenka atrege'za, Ameleki vahe'mo'za Israeli vahera hara huzmagetere'naze. <sup>12</sup> Hianagi Mosese azamo'a arageramigeno, Aroni'ene Hurikea have erike, mopafi ante'nakeno anante mani'nege'ne, rugaraga mani'neke azana erisga hu'nakeno kinagaseno zagea urami'ne, <sup>13</sup> Josua'ene Israeli vahe'mo'za bainati kazinu Ameleki vahera zmahege'za kazimofo ne'za se'haze.

<sup>14</sup> Ananteria Ra Anumzamo'a anage huno Mosesena asami'ne, Ama ha'mofo agenke'a avontafepi kretenegeno avame'za me'nenke'za nege'za zmagera okaniho. Hagi Josuana hamprinka ama ana nanekea asamio, Nagra ama mopafintira Ameleki vahera zamahe fanane hanugenzo zmagi zimagekeia ama mopafina omanegahie. <sup>15</sup> Mosese'a anante Kresramanavu ita tro huno, Ra Anumzamo'a nagri krauvefani'e (frekie) huno agia antemi'ne. <sup>16</sup> Mosese'a anage hu'ne, Ra Anumzamofo hanave eritre'za hazankino, Amaleki vahera henkama fore hunante anante hu'za esaza vahera, Ra Anumzamo'a huvempa hu'neankino ha' huzmantegahue hu'ne.

## 18

#### *Jetro'a Mosese ome ke'nea naneke*

<sup>1</sup> Jetro'a Mitieni vahe'mokizmi pristi neokino, Mosesena nenemo'e. Maka'zama Ra Anumzamo'ma Mosesena Agri'a vahe Israeli vahe'ma huzmante'neazana Jetro'a antahi'ne. Ra Anumzamo'ma Israeli vea'ene Mosesenema huzmanteno Isipiti'ma zamavreno atirami'nea zamofo nanekea antahi'ne. <sup>2</sup> Mosese'a nenaro Ziporama huntogeno agranema umani'nenereti Jetro'a nevreno, <sup>3</sup> tare ne' mofavre'ararena znavreno

---

\* <sup>17:7</sup> Masa hu'nea kemofo agu'agesa' a tagerupina rehene hu'ne. † <sup>17:7</sup> Meriba hu'nea kemofo agu'agesa' a tagerupina fravazine hu'ne.

e'ne. Mosese'a huno, Ru vahe'mofo mopafi eman'i'noe nehuno, agonesa mofavre'amofo agi'a Gesomu'e huno ante'ne. <sup>4</sup> Hagi Mosese'a anante mofavre'amofo agi'a Eliese'a hu'ne. Na'ankure nafa'nimofo Anumzamo naza higeno, Isipi kini ne'mofo bainati kazimo'a onahe'negure hu'ne. <sup>5</sup> Hagi anantero Mosese nenemo Jetro'a, Mosese nenanore mofavre'ararene nezamavreno, ka'ma mopafi Mosese'ma Anumzamofo agona me'nerega seli noma kino mani'nere vu'ne. <sup>6</sup> Jetro'a amanage huno Mosesentega kea atrente'ne, Nagra neganemo'na aka'ane tare mofavreka'ane zamavare'na kagenaku neone. <sup>7</sup> Hagi Mosese'a ana nanekema nentahino vuno nenemo ome negeno, rena omenereno, otino antako hunenteno, hu frufra huntetege'ne, Mosese seli nompinka ufre'na'e. <sup>8</sup> Hagi Ra Anumzamo'a zamaza huno Isipi kini ne' Fero azampinti'ene Isipi vahe zamazampinti'ma zamahokeno zmavre fegi atre'nea naneke, karanka zamavreno ne-e'za maka knazama eri'za neageno, Ra Anumzamo'ma Israeli vahe'ma zamazama huno e'nea naneke'a Mosese'a nenemo nera Jetrona asmi'ne. <sup>9</sup> Anumzamo'ma knare'zantfa huno Isipi vahe'mokizmi zamazampinti zamahokeno zamavreno atirami'nea nanekea Jetro'a nentahino, fus'i'a muse hu'ne. <sup>10</sup> Anante Jetro'a amanage hu'ne, Isipi vahe'mofo azampinti'ene Fero azampinti'ene Isipi vahe'mofo kvafinti'ma tamahokeno'ma tamavreno atirami'nea Ra Anumzamofona ra agi'a hentesga hue. <sup>11</sup> Hagi menina nagra antahi'noe, milka havi anumzantamina agtereno, hihamu'ane Ra Anumzana tamage huno Agrake mani'ne. Na'ankure Isipi kva vahe'mo'zama zmavufga ra nehu'za, Agri vahe'ma Israeli vahe zamazeri haviza huzmante'naza vahera, zamazeri haviza hu'ne. <sup>12</sup> Hagi Mosese nenemo Jetro'a tevefima kre fananema hu ofa erino, Anumzamofo Kresramana vunentegeno, anante Aroni zane, Israeli kva vahe'mo'za Jetro'ene emetru hu'za Anumzamofo avurera ne'zana ne'naze. <sup>13</sup> Hagi maseno nanterana Mosese'a keagama refkohu trate mani'nege'za, Israeli vahe'mo'za emetru hu'za regagi'za oti'nazageno, mago'magomofo nanekea refko huno nentahigeno, vuno kinaga ome ase'ne. <sup>14</sup> E'inahu'zama Mosese'ma vahe'mokizmima hunezmantegeno, nenemo Jetro'a negeno amanage hu'ne, nankna'za ama vahe'mofona hunezmantane? Na'a agafare kagrakera mani'enka nanekea refko nehankeno, ama vahe'mo'za oti'za mani'nazageno vuno kinaga omenese? <sup>15</sup> Mosese'a ana kemofo nona'amanage huno nenemo Jetrona asami'ne, Na'ankure zamagra Anumzamofo avesi'za antahinaku nagritera emetru hu'za mani'naze. <sup>16</sup> Hagi tava'ozmire'ma mani'naza vahe'enema zmagrama ha'frama nehu'za, nagrite azage'na zamaza hu'na naneke'zimia antahi'na refko nehu'na, Anumzamofo tra kene, kasegenena eri ama hu'na nezmasamue.

### *Jetro'a antahintahi Mosese ami'nea naneke*

<sup>17</sup> Higeno Jetro'a anage huno nenemo nera Mosesena asami'ne. E'inahu zama nehanana knare zana nosane. <sup>18</sup> Ama eri'zana kna'a me'neankinka, kagrakera e'origahane. Kagrane vahe'ka'anena tamage huno tamavesra hugahie. <sup>19</sup> Hagi menina ke'ni'a antahio, nagra antahintahia kamisugen Anumzamo'a kagrane manigahie. Kagra vahe'mokizmi zmagi erinka Anumzamofo avure mani'enka, vahe'mo'zama ha'frama hanaza zana erinka Anumzamofo ome asamigahane. <sup>20</sup> Ana nehunka kagra Anumzamofo tra kene kasegenena vahera rempi hunezminka, mani'zazimi eri fatgo hu'za kama nevu'za, eri'zama erisaza zamofona zmaveri hughane. <sup>21</sup> Hagi mago'ane Jetro'a huno, Vahepintira tamagema huno eri'zama

eriga'ma nehuno, Anumzamofonku'ma kore'ma hunenteno, krunage'ma huno fenoma eri'zanku avesra nehia vahe'ene, huhampri zamanteg'e za 1 tauseni'a vhahete kva manina, 1 hantreti'a vhahete kva manina, 50'a vhahete kva manina 10ni'a vhahete kva manitere hoho. <sup>22</sup> E'i ana kva vahe'mokizmi zamatrege'za maka knafina, vahe'mokizmi knazana refko huzmanteho. Hianagi ra hazenke'zana kagrite eri'za esagenka refko huzmanto. Hianagi ne'one knazazamia ana kva vahe'mo'za eri fatgo nehanageno, knama e'nerina zamo'a osi'a o'za hugantegahie. <sup>23</sup> Amama negasmua kema amage nentesankeno, Anumzamo kama kaverima hanigenka kazikazi hunka mika eri'zana knare hunka e'nerisankeno, vahe'mo'za muse nehu'za zamarimpa fru'ne nozinirega vu'za e'za hugahaze. <sup>24</sup> Mosese'a, Jetro'ma asmi'nea kea antahino, ana maka kea amage ante'ne. <sup>25</sup> Hagi Israeli vahepinti knare'nare vahe'a Mosese'a huhampri zmanteg'e za, kva vahera mani'za 1 tauseni'a vhahete'mokizmi kva nemanizageno, 100'a vhahete'mokizmi kva nemanizageno, 50'a vhahete'mokizmi kva nemanizageno, 10ni'a vhahete'mokizmi kva manitere hu'za kegava hu'naze. <sup>26</sup> Ana kva vahe'mo'za maka knafina, refko'ma huga knazana zamagra'a refko hu'naze. Hianagi amuhoma hianknazamofo keaga eri'za Mosesente vu'naze.

<sup>27</sup> Anante Mosese'a nenemo nera Jetrona hu frufra huntogeno mopa'arega ete vu'ne.

## 19

### *Mosese'a Sainai agonafi mreri'nea naneke*

<sup>1</sup> Israeli vahe'mo'zama Isipima atre'zama atiramiza e'nazana, 3 ikamofo ese knare ka'ma kokampi Sainai ehanati'naze. <sup>2</sup> Zamagrama Refitimi kuma'ma netre'za Sainai ka'ma kokampi e'za Sainai agonamofo agafi seli nozamia emegi'naze. <sup>3</sup> Hagi Mosese'a Anumzamofo ome kenaku agonafi mrerigeno, Ra Anumzamo'a agonafinti anage huno hu'ne, Menina amanage hunka Jekopu nagamofona Israeli vahe'mokizmia zamasamio, <sup>4</sup> Nagrama Isipi vahe'mofoma navu'nava'ma hunezmante'na tumpa namamo mofavre'a agekonare avrenteno avreno eaza hu'na, tamavre'na e'noazana tamagra'a ke'naze. <sup>5</sup> Hagi menima tamagra ke'nima nentahitma, huvempama hu'noake'ma tamage hutma amage'ma ante'nuta, maka mopane mopane vahepintira tamagrake Nagri vahera manigahaze. Na'ankure maka mopa Nagri mopa me'ne. <sup>6</sup> Tamagra Nagrini'a pristi eri'za eri vahe mani'netma, ruotage hu'neni'a kuma vahe manigahaze huno hu'ne hunka Israeli vahera zmasamigahane. <sup>7</sup> Ana hutegeno Mosese'a agonafinti eramino, Israeli kva vahe'zaga eme zamagihu atru huno, Anumzamo'a ome zamasamio huno hunte'nea nanekea zamasami'ne. <sup>8</sup> Hige'za maka vahe'mo'za kenona hu'za, Ra Anumzamo'ma hugantegenka eme hana kea maka amage antegahune hu'za hazageno, Mosese'a anankea erino Ra Anumzamofonte vu'ne. <sup>9</sup> Ra Anumzamo'a anage huno Mosesena asmi'ne, Antahio, Nagra hampogino antrako hu'ne'nia hampompi e'na kagranena keaga eme nehanuge'za, nentahi'za kagrama hana kerera maka knafina zamentintia huvava hugahaze. Anante Mosese'a Israeli vahe'mokizmi nanekea Ra Anumzamofona asami'ne. <sup>10</sup> Higeno Ra Anumzamo'a mago'ene Mosesena asamino, Menine okinena zamagra zamazeri ruotage nehu'za, kukena zimia sesehu agru nehu'za, <sup>11</sup> nampa 3 knareretra retro hoho, na'ankure e'i ana knareretra Ra Anumzamo'a maka vahe'mokizmi zmagvuga Sainai agonafi eramigahie. <sup>12</sup> Hagi kagra avame'za agonamofo agafina anteganeginka anage huo, tamagra kva hu'netma agafina agatereta ovutma, ana avame'zantema

uravaao huno avako huge, agonafima mrerige'ma hanimofona ahe frigahaze. <sup>13</sup> Tamazanura avako hutma anamofona ahe ofrita, have knonu matevutma ahefrige, kevereti aheho. Vahe'mozafi afu'zagamo'zama anama hanazana frigahaze. Hagi mememofo pazivenu'ma za'zate'ma ufemare-sageta, agonarega mrerigahaze. <sup>14</sup> Anante Mosese'a agona atreno uramino zamazeri ruotage nehige'za, kukena zamia sese hu'naze. <sup>15</sup> Mosese'a anage huno zamasami'ne, Nampa 3 knama esigu retro hutma nemanitma, a'netaminena omaseho.

<sup>16</sup> Hagi nampa 3knama eanknamofo nanterana, monage nehigeno kopsi-namo'a trage huno enevigeno, antrako hu'nea hampomo ana agona refitegeno, ufenkrafa nehigeno, nomaki'za maka mani'naza vahe'mokizmia tusi'a zmahirahitene. <sup>17</sup> Anante Ra Anumzamofo ome kehogu Mosese'a kumazmifinti zmvare fegi'a atreno zamavreno vige'za, agonamofo agiasi oti'naze.

### *Ra Anumzamo Sainai agonafi erami'nea naneke*

<sup>18</sup> Hagi Sainai agonamofona toki'mo'a miko refitevagare'ne. Na'ankure Ra Anumzamo'a tusi'a tevefi eramino emani'negeno, tuki'mo'a tusi'a tevefinti'ma nehiaza huno kamogamo nehigeno, tusi'a imi erino ana agona eri tore'vare hu'ne. <sup>19</sup> Hanki ufemofo agerumo'ma rura huno nevigeno'a, Mosese'ma kema nehigeno, Anumzamo'a monagema hiaza huno kenona'a humi'ne. <sup>20</sup> Ra Anumzamo'a Sainai agona morusate eneramino, Mosesena ke higeno mareri'ne. <sup>21</sup> Ananter Ra Anumzamo'a Mosesena anage huno asami'ne, uraminka vahe'mokizmia kore ke huzmanteg'e'za, avame'zama tafinte'za kagi'naza zana agatere'za emreoriho. Anama hanaza vahe'mo'za frigahaze. <sup>22</sup> Hagi pristi vahe'mo'zama Ra Anumzamo'nare'ma erava'oma hunaku'ma hanu'za, zamagra'a zamazeri ruotage nehu'za zamazeri agru hoho. Ana'ma osnage'na Nagra zamazeri haviza hugahie. <sup>23</sup> Mosese'a anage huno Ra Anumzamofona asami'ne, vahe'mo'za ama agonafina omegahaze. Na'ankure Kagra ko nasaminke'ha avame'za ante'nogenka ana avame'zamofona agateretma emreoriho hunka hunagru hunte'nane. <sup>24</sup> Hagi Ra Anumzamo'a anage huno Mosesena asami'ne, Uraminka Aronina ome avrenka eno. Hianagi zmatrege'za pristi vahe'ene, mago'a vahe'mo'za avame'zana agatere'za agonafina Nagritega omeho. Hagi anama hanage'na, Nagra zamazeri haviza hugahue. <sup>25</sup> Mosese'a uramino ana vahetamina, Ra Anumzamo'ma huntea kea ome zamsami'ne.

## 20

### *10ni'a kasegemofo naneke*

*(Diu-Kas 5:1-21)*

<sup>1</sup> Anante ana miko nanekea Ra Anumzamo'a amanage huno hu'ne. <sup>2</sup> Nagra Isipi mopafima kazokzo eri'za vahe'ma mani'nazage'na tamavre'na atiram'i'noa Ra Anumzanki'na, tamagri Anumza mani'noe.

<sup>3</sup> Nagrake tamagri Anumzana mani'noanki, ru anumzatmintera monora huonteho.

<sup>4</sup> Tamagra mago'azamofo amema'a antretma tro huntege, monafima me'nne'nia zamofo amema'a antretma tro huntege, mopa agu'a me'nne'nia zamofo amema'a antretma tro huntege, tigu'a me'nenia zamofo amema'a antretma kaza osu havi anumzana tro huntegera osiho.

<sup>5</sup> Ana zantmintera monora huntege, tamarenaregera osiho. Na'ankure Nagra Ra Anumzana, tamagri Anumzana kanivere Anumza

mani'noanki'na, zmafahe'mo'za zamavaresrama hunenante'za kumi'ma hu'ne'saza kumitera, mofavretamine agehe'mofone, agigomofonena knaza zamigahue. <sup>6</sup> Hianagi iza'zo Nagri'ma zamavesinenante'za kasegeni'ama amage'ma ante'za vanaza vahe'mokizmia, vagaore navesi'zanteti zmavesinezmant'e'na, ana vahepinti'ma 1000ni'a zupama fore hunante anante'ma hu'za vnaza vahe'mokizminena zamavesi zmantegahue.

<sup>7</sup> Nagra Ra Anumzana tamagri Anumza mani'noanki, amnenena nagi'a oheho. Na'ankure amnenema nagima ahesimofona Nagra azeri haviza hugahue.

<sup>8</sup> Mani fruma hu knamofona (Sabatia) tamagesa are'are nehuta, ruotge hu'ne hutma kegava hiho. <sup>9</sup> Tamagra mago sontamofona 6si'a knafinke miko eri'zantmia erigahaze. <sup>10</sup> Hianagi 7ni knazupa Ra Anumzana tamagri Anumzamo'na mani fruhu kna (Sabati) me'negu ana knarera, kagrane neka'ane, mofaka'ane, ve kazokzo eri'za vaheka'ane, a' kazokzo eri'za vaheka'ane, afu kevuka'ane, emanı vahemo'zanena eri'zana e'oriho. <sup>11</sup> Na'ankure Ra Anumzamo'a 6si'a knafi monane, mopane, hagerine miko zama ana agu'afima me'nia zantamina tro huteno, 7ni knarera manigasa nehuno, Agra ana kna erinte ruotge huno asomu hunte'ne.

<sup>12</sup> Neramarera nermafa ke'zni antahizmitma zmagorgama manisazana, Ra Anumzana, tamagri Anumzamo'nama tami'noa moparera zazate mantima vugahaze.

<sup>13</sup> Tamagra vahera ahe ofriho.

<sup>14</sup> Tamagra aravema hu'nesaza vahe'motma, rumofo a'eneno rumofo venena monkozana osiho.

<sup>15</sup> Tamagra musufa oseho.

<sup>16</sup> Tamagra tava'ontmire'ma nemanisia vahe'mo'ma keagare'ma ot'i'nenigeta, osu'nesia zankura havigea huonteho.

<sup>17</sup> Tamagra tava'ontmire'ma nemanisaza vahe'mofo nonkuro, a'amofonkuro, ve eri'za vahe'o, a' eri'za vahe'o, bulimakao afu'o, donki afu'o, inankna inankna zantamima ante'nesniana keramasanea osiho.

<sup>18</sup> Hagi monagea nehuno, kopasi'na e'nerigeno, ufenkrafa nehigeno, agonafinti'ma tevegumo'ma nehigeno'a, miko vahe'mo'za nege'za zamahirahiku nehu'za, ogantu'a ot'i'ne'za, <sup>19</sup> amanage hu'za Mosesena asmi'naze, kagra'a kea hugeta antahimaneno. Hagi Anumzamo'a keaga ontasamino. Na'ankure Agrama keagama hanigeta, tagra frigahune. <sup>20</sup> Moses'a zmasmino, tamagra korora osiho. Na'ankure menina Anumzamo'ma e'neana, reramaheno ke'ningetma, Agri'ma kore'ma hunte'zamo'a tamagripi me'nenigetma kumira osanazegu e'ne. <sup>21</sup> Anage hige'za ana veamo'za ogamu'a ot'i'nageno Moses'a, haninentake hampomagino antrako'ma hu'nefima Anumzamo'ma mani'nerega vu'ne. <sup>22</sup> Anante Ra Anumzamo'a amanage huno Mosesena asmi'ne, Israeli vahera amanage hunka ome zamasnio, tamagratmia negazage'na monafintira nanekea tamasami'noe.

<sup>23</sup> Negrake Anumzana mani'noanki, tamagra magore hutma golire havi anumzano, silvarera havi anumzantmina trorahunteta monora huonteho.

<sup>24</sup> Hagi Nagrite'ma Kresramanama vunantesaza ita mopareti tro huteta, ana itare sipisipi afu'ene bulimaka afu'nutira tamarimpa fruhu ofane, kre fnanene hu ofa Kresramana vugahaze. Hagi miko kazigama Nagrama hu'nama e'ire Nagrira antahinamita monora hunantegahaze hu'nam'a hanure, ana ita trohuta kre'sramna nevinke'na, Nagra eme asomura hurmanta'neno. <sup>25</sup> Hagi kresramanama vu itama havereti'ma tro hanutma, vahe'mo'ma tagama osu'nesia havereti tro hiho. Na'ankure vahe'mo'ma

tagama hu havereti'ma Kresramana vu itama tro'ma hanazana, ana itamo'a ruotagera huno agru osugahianki, haviza hugahie. <sup>26</sup> Hagi Nagritegama kresramna vu itama tro'ma hanuta, zaza ita tro hu'neta lata anteta ofa hunakura mrenerinke'za, vahe'mo'za tamariga onkeho.

## 21

### *Israeli vahe'mokizmi tra kemofo naneke*

<sup>1</sup> Mosesega ama'na kasegea Israeli vahe'mokizmi zamigahane. <sup>2</sup> Kagrama Hibru vahepinti'ma kazokzo eri'za vahe'ma mizama asenunka, 6si'a ka-fufinke kagri kazokazo eri'za vahera manite'na, 7ni kafurera atregeno mizana osu amne fru huno vino. <sup>3</sup> Ana kazokzo eri'za ne'mo'ma a'ma e'orinenigenka mizama hu'nununka, anama hunte'nana kafurera atregeno agrake vino. Hianagi ko'ma a'ma ante'nenia ne'ma mizama se'nesunka, ana a'ene atregeno vino. <sup>4</sup> Hagi kazokzo eri'za ne'ma mizama se'ne'nia venafo'ma a'ma miza humi'nenigeno mofavrema ante'nunuo'a, ana a'ane ne'mofa'anena ana venafo azampi netreno, agrake vugahie. <sup>5</sup> Hianagi ana kazokzo eri'za ne'mo'ma huama'ma huno, nagri'ma mizaseno nafa'a hunante'nemofonku'ene a'ni'agu'ene mofavreni'agura tusiza huno navenesiankina nagra zamatre'na fru hu'na amne ovugahue huno'ma hanigeno'a, <sup>6</sup> mizama hunte'nea kva'amo'ma avreno Anumzamofonte vuteno, ete avreno kafa zafarero ete kafantero vuno hakare vahe avufi vahe'ma zamagesa rerapone zota erino agesa reraponenkeno agri kazokzo eri'za vahe mani'neno ufrigahie. <sup>7</sup> Mago ne'mo'ma, mofa'ama kazokazo eri'za mofa manisie huno'ma zagore'ma atresige'noma mizamasesiana, ve kazozko eri'za vahe'ma nehiaza huno, 7ni kafurera atresigenora frua huno amnea ovugahie. <sup>8</sup> Ana mofa'ma a'nie huno miza hu'ne'nia venafo'ma muse osania zama hanigeno'a, ana venafo'a ana mofara atrenkeno ete nef'a'ma miza hino. Hagi ana mofa'ma miza hu'nenia venafo'ma mago'enena ru kaziga vahetera mizantera ozmino, na'ankure, kva'amo'a agra'a ana mofa'mofo so'e manizama'a eri haviza hu'ne. <sup>9</sup> Hagi ana mofa'ma miza hu'nea ne'mo'ma, ne'mofonte'ma a'e huno huntenesuno'a, agra mofa'ama kegava nehiaza huno kegava hunteleno. <sup>10</sup> Hagi henka'ama, ana ne'mo'ma ru a'ma erisnuno'a, pusa a'enena ko'ma nehiaza huno nemaseno, knare huno kukena'ane kave'are'enena kegava huntegahie. <sup>11</sup> Hagi ana 3'a zama huntega'zama, ana a'mofoma huontesigeno'a, ana a'mo'a zagoa miza osu amne atreno vugahie.

### *Hazenkezama eri fatgoma hanaza zamofo naneke*

<sup>12</sup> Iza'o vahe'ma ahe frisia nera, agri'enena ahe frigahaze. <sup>13</sup> Hianagi mago ne'mo'ma mago'azama hanifi hantaga huno mago vahe'ma ahe frisiana, Anumzamo atresigeno ana zana fore hugahiankino, agu'vazi kuma'ma retro'ma huntenerga ana ne'mo'a freno vugahie. <sup>14</sup> Ana hu'neanagi mago ne'mo'ma vahe'ma ahe friku'ma, oku'ama antahintahi retro huteno, ana ne'ma ahe frina, ana nera Kresramana vu itaretienena amne avazu huta ahe frigahaze. <sup>15</sup> Iza'o nefano nererano ahensia nera, ahenkeno frino. <sup>16</sup> Iza'o mago vahe'ma musufa avreno eme frakino antege, zagore atrege'ma hania nera ahe friho. <sup>17</sup> Iza'o nererano nefanoma huhaviza huntlesia nera ahenkeno frino. <sup>18</sup> Tare netremoke'ma fra nevazisapinti'ma, mago'mo'ma azanknonuro have knonuro ahenkeno ofrigahianagi, ana zanku'ma krima erino'ma mani'nenigeno, <sup>19</sup> kri'amo'ma osi'a knare hinkeno'ma azompare megi'a vanoma hanigeno'a, ahe'nea nera kanazana omigahie. Hianagi

krima maseneno kna'ama atre'nea zantera miza hunenteno kegava hunetenkeno kriamo'a knare ome huntegahie. <sup>20</sup> Mago ne'mo'ma kazokzo eri'za ne'amofono, kazokzo eri'za a'amofoma kanonu'ma ahenkeno frisiana, ana kazokzo eriza vahe'mofo nafa'amofo kanazana amiho. <sup>21</sup> Hianagi ana kazokazo eri'za vahe'mo'ma mago kano, tare kanama manite'no'ma knamare'niana, anama ahe'nea kva nera kna omigahaze. Na'ankure ana kazokzo eri'za nera mizamase'nea ne'mofo su'za mani'ne. <sup>22</sup> Tare netremoke'ma ha'nehu'ne mago'ma amu'ene hu'nesnia a'ma ahesigeno nena osu'nesia mofavrema kasenenteno, ana a'mo'ma hazenke'ma e'orisigeno'a, ana a'mofo neve'ma zago agima ahentesiama'a miza neseno nanekema refkohu kva vahe'mo'ma e'i'a amio hanazama'a amino. <sup>23</sup> Hianagi ana a'mo'ma ra hazenke'ma erinkeno'a, anahukna hazenke agri'enena amiga-haze. Ahe fri'nirera, agri'enena ahe frigahaze. <sup>24</sup> Hagi avurgama repro haniana, agri'enena avurga repro hoho. Hagi ave'ma ru tafrina, agri'enena ave ru tafriho, hagi agia azama ruhantgina, agri'enena anazanke huta agiaza ruhantgiho. <sup>25</sup> Tegefima kre kasage'na, agri'enena tevefi kre kasageho, avufga rutraga hu'nena, ana zanke huta agri'enena avufga rutraga hoho. Hagi aheno avufgama ru korampamagi'nena, ana nera aheta avufga ru korampagih. <sup>26</sup> Kazokzo eri'za nero, kazokzo eri'za aro mizama sentenesia kva'amo avurgama repro hutrenkeno'a, agra ana nona'a atresigeno ana kazokzo eri'za vahe'mo'a zagoa miza osu fru huno amne vugahie. <sup>27</sup> Hagi kazokzo eri'za ne'amofono, a'amofoma mizama se'nesia venafo'ma aheno mago ave'ma ru tafrisiana, ana kazokzo eri'za vahe'a ana nona'a atreneno mizana oseno fru huno amne vino. <sup>28</sup> Mago ve bulimakao afu'mo'ma mago nero, aro pazive anuti'ma ahe frinketa, ana ve bulimakao afura have knonteti ahefrinkeno frina avufaga'a oneho. Hianagi ana ve bulimakamofo venafona keaga hunteta kna omiho. <sup>29</sup> Hianagi ana ve bulimakamofo vahe'ma nehe'nigenoma kegina huno antenogu eme asamisage'noma, ana kema eritreno bulimaka'ama keginafima avre onte'nenigeno mago veo aro ahefrisigeno'a, ana ve bulimakao'a havenkanonu ahenefritma, bulimakao nefanena ahefriho. <sup>30</sup> Ana hugahianagi bulimakaomo'ma ahefrinesia vahe'mofo nona hinogu'ma naga'amozama miza agima ahente-sazama'a mizaseno. <sup>31</sup> Mago mofaro, ne'mofavreo, bulimakao afu'mo'ma pazive'anuma ahe frinkeno'a anazanke huno mizaseno. <sup>32</sup> Bulimakao afu'mo'ma mago kazokazo eri'za aro veoma pazive'anuti'ma ahe frinkeno'a, ana eri'za vahe'mofo kva nera bulimakaomofo venafo'a 30'a silva zago nemino, ana bulimakao afura have knonu ahe frino. <sup>33</sup> Mago' vahe'mo'ma keri kafinenteno'o kafinte'nesia kerima eri hagarо huteno refi otetenige'noma mago' ne'mofo bulimakao afumo'o donki afumo'ma ana kerifima uramina, <sup>34</sup> kerima asente'nesnimo'a ana bulimakaono, tonki afutera nona huno miza hinkeno, anama frisia zagamo'a agriza segahie. <sup>35</sup> Mago ne'mofo bulimakao afumo'ma, mago ne'mofo bulimakao afu'ma ahefrina, ana bulimakao afutremofo nafa'amokea amnema manisia bulimakao afura zagore atreke ana zagoa amu'nompinti refako nehuke, anama fri'nea bulimakao afura amu'nompinti arutanekе refako hi'o. <sup>36</sup> Hianagi ko'ma pazive'anuti'ma ha'ma nehania bulimakao afumofo venafo'ma antahi'neno keginafima onte'nenigeno, rumofo bulimakao afu'ma ahefrisiana, anama frisia bulimakao afu'mofo venafo'na ete bulimakao afuteti nona huno miza senenteno fri'nesia bulimakao afura erigahie.

## 22

*Kagra'a zama kegava hu'zamofo naneke*

<sup>1</sup> Mago ne'mo'ma ru vahe'mofo bulimakao afuro sipsipi afu'ma kumazafa aheno tragahuge, kumazafa seno zagore ome atrege'ma hu'nenimo'a, mago bulimakao afu'ma kumzafa asenenirera venafona 5fu'a bulimakao nona huno mizasenteno. Mago sipsipi afu'ma kumzafa asenesirera 4'a sipsipi afu venafona nona huno mizasentegahie. <sup>2</sup> Hagi mago kumzafa ne'mo noma anafe huno ufreto kumzafa nesena, ageno erifore huno ahe frisiana, anama ahe frisia ne'mofo korankumimo'a agritera omanegahie. <sup>3</sup> Hianagi ko'ma zagema hanati'noma masama hu'nesifima kumzafa nesena nomofo venafo'ma keno erifore huno'ma ahe frisiana, agritera ana ne'mofo korankumi'mo'a megahie.

Hagi kumzafama nesenigeno keno eriforema haniana ana mika zama kumzafa se'nenia zanteria mizaseno. Hagi ana zante'ma temaosinigeno'a, ana kumzafa nera zagore atre'za ana zagoa eri'za kumzafama eri'nea zamofo nona'a mizaseho. <sup>4</sup> Mago ne'mo'ma rumofo bulimakao afuro, sipsipi afuro, donki afuro kumzafaseno ome ante'enkeno keno erifore'ma hina, anama kumzafa se'nenia ne'mo'a ana nona'a ante tragoteno kumzafama ase'nenia zaga venafona amino. <sup>5</sup> Mago ne'mofo sipsipi'amo'o bulimakao'ama atrenkeno trazama neno vano haniregama rumofo kaziga traza omenege, waini hozafi vuno waini hoza ome eri haviza haniana, ana bulimakao afu'mofo nafa'amo'a, knare hoza'areti'ene knare waini'areti'ene anama hoza'ama eri haviza hu'nea nera nona'a amino. <sup>6</sup> Hagi mago'mo'ma hoza'afima trazama negresigeno tevemo'ma terakaheno rumofo witi hoza vasage ante'nenia witima tena, tevema hugre'nenimo'a ana zantmintera nona'a huno mizasenteno. <sup>7</sup> Mago ne'mo'ma tavaoma'are nemanisimofoma zago'afi fenoma'ama, kegava huntenogu ami'nesigeno kegava hunte'nesigeno, kumzafa ne'mo'ma anazama noma'afinti musufama se'nenia ne'ma ke'za erifore hanageno'a ana kumzafa ne'mo'a ante tragoteno miza seno. <sup>8</sup> Hanki kumzafa ne'ma keno erifore'ma osina, nomofo nef'a keaga refkohu kva vahe'tmimofo avuga eno eri'neo e'o'rimeo eme huama hugahie. <sup>9</sup> Hagi mago'mo'ma bulimakao afuro, donki afuro, sipsipi afuro, kukeno, mago'a zantmima fanane hu'nenia zantmima tavaoma'are nemanisimo'ma ante'enkeno, ama nagri suzane huno'ma ome hanige'noma antahima omisigeno'a keaga refkohu kva vahete e'nakeno keaga refkohu kva vahe'mo'ma, kagra havi kavukava hu'nanema hanimo'a ante tragoteno mizaseno. <sup>10</sup> Mago ne'mo'ma tava'oma'are'ma nemanisimo'ma donki afuro, bulimaka afuro, sipsipi afuro, mago'a zagagafama kegava huntenogu'ma ami'nesia zagamo'ma frige, hazenke erige, vahe'mo'ma onkesigeno avreno frege'ma haniana, <sup>11</sup> ana zagarmima kegava hu'nesnia ne'ene ana zagaramimofo venafoke Ra Anumzamofo avuga vanakeno kegavama hu'nemo'a huvempa huno, tamage hu'na nagra onke'noe hanigeno'a, venafo'ma mago rimpama hanigeno'a ana zagaramintera miza osegahie. <sup>12</sup> Hianagi tamagema huno musufama se'nesageno'a, fenozama'ama kegava hu'nesimo venafona mizasenteno. <sup>13</sup> Hanki afi zagamo'ma aheno'ma neneno, avufga'ama ani kafritre'neniam'a erino, ana zagamofo venafoma ome averi'nuno'a ana zagarera miza osegahie. <sup>14</sup> Hanki mago ne'mo'ma, tava'oma'are'ma nemanisimofoma zagagafama avreno eme kegava hu'enkeno'ma, ana

zagagafamofo venafo'ma omani'nensire'ma avufgare hazenkema erige frige'ma hinkeno'a, ana zagama avreno kegava hu'ne'nia ne'mo'a nona huno venafona mizasenteno. <sup>15</sup> Hanki ana zagamofo venafo'ma mani'neno negenkeno, eri'za e'nerino hazenkema erinkeno'a, miza osegahie. Eri'zama erinogu'ma zagoma amino avre'neniana, e'i ana zagomo aza hugahie. <sup>16</sup> Mago'ma vene ovase'nesia mofa'ma mago ne'mo'ma avreno ome anteno vase'nena afufeno huno mizasenkeno ana mofamo'a agri a' manino. <sup>17</sup> Hanki ana mofa'mofo nef'a, ana vere omanigahiem a hinkeno'a, ana ne'mo'a afufenoma nehaza avamente afufenona huno ana mofa'mofo nefana amigahie. <sup>18</sup> Avuatgama nehania a'nea zamahe friho. <sup>19</sup> Iza'o zagagafanema monko'zama hanimofona ahe friho. <sup>20</sup> Ra Anumzamofonte'ma kresramna vuonteno, havi anumazante'ma kresramnama vuntesimofona ahe friho. <sup>21</sup> Mago'ma ru mopareti vahe'ma kagrane emani'nena, azeri havi zana osuge knazana omio. Na'ankure koteri kagranena Isipi moparera umani vahe mani'enka hu'nane. <sup>22</sup> Mago'ma kento aro, megusa mofavrema mani'nesiana azeri haviza osiho. <sup>23</sup> Hagi zamazeri haviza hanage'za, Nagritegama krafa hanage'na, Nagrama tamage hu'na krafagezmi antahisu'na, <sup>24</sup> tusi nasivazinke'na tamahe fanane hanenke'za a'netamimo'za kento mani'nageno, mofavre tamimo'za megusa manigahaze. <sup>25</sup> Nagri vahe'mo'za zamunte omanena atupa hu'ne'za zagoma kagripinti nofi'ma hu'nenagenka, anante ante agofetu hunka namio hunka osuso. <sup>26</sup> Tava'onkare'ma nemanisimo'ma zagoka'ama nofi nehanigenka huvempa hana'a avame'zana anakre ku'a eri'nesunka, zagea uofre'nenkena ana zupage amio. <sup>27</sup> Na'ankure agra magoke nakreku ante'neankino, kenagera e'i ana anakre ku kofino zasi korora vasegahie. Hagi ko'ma eme ominakeno'ma Nagritegama kezatina, Nagra nasunku Anumzanki'na nentahi'na eme aza hugahue. <sup>28</sup> Nagrira huhaviza hunantege, kva vahetamia huhaviza huntegera osiho. <sup>29</sup> Hozatamifinti'ma Nagri'ma ofama naminaku'ma vasagesaza ne'zano, zafa rgamofo tima'a za'za kna azerita oviho. Tamagonesa ne'mofavre'tamia Nagri namigahaze. <sup>30</sup> Anahukna hutma ese anenta'ma bulimakao afu'mo'ene sipisipi afu'mo'enema antenigeta Nagri avretma eme namiho. Nerera'ma ese anentama antena atrenkeno nerera'enena 7ni'a kna manite'na, 8ti knarerera avreta eme namiho. <sup>31</sup> Tamagra Nagri ruotge naga mani'nazagu, ahi zagagafamo'ma aheno neneno'ma atre'nesia zaga onetma kra aminkeno neno.

## 23

### *Ruzahu ruzahu tra kemofo naneke*

<sup>1</sup> Vahe'mo'ma osu'nesiazankura krunagea hutma vano osiho. Hazenke vahetega anteta havi kea keagafina huamara osiho. <sup>2</sup> Rama'a vahera avaririnka kefo avu'ava zana osuso. Hagi mago'mo'ma keagare'ma ot'i'nenama, rama'a vahe'mo'za havi kema hunente'nagenka kagranena zamavaririnka havi kea osuso. <sup>3</sup> Hanki mago zanarimpa osu'neke ke ha'ma nehanankenka, amunte omane nere hunka agri kazigagera onto. <sup>4</sup> Ha' vahekamofo bulimakao afuro donki afumo'ma hazagre'nena kesnunka, ete avrenka nafa'amofo ome amio. <sup>5</sup> Avesinogantesnia ne'mofo tonki afumo'ma, tusi'a knaza erino nevanifintima ome traka huno'ma masenenkenka, ana nera aza hunka donki afu'a azeri otio. <sup>6</sup> Hanki amunte omne vahe'mo'ma keagafima ot'i'nesigenka amunte me'nea vahetega

antenka azeri havizana osunka keaga antahi so'e huo. <sup>7</sup> Havigea hunka hazenkema osu'nesia vahera keagafina avrentege ahe frigera osunka ogantu'a manio. Na'ankure Nagra e'inama hanaza vahetamimofo kumira atre ozmantegosue. <sup>8</sup> Keagafima mani'neno'ma aza huogu'ma masavema huno kamisia zana e'orio. Na'ankure masavema huno aza hinogu'ma ami zamo'a, keagama refkohu vahe'mofo avurga eri asu higeno, fatgo vahe'mofo kea eri rukrahe nehie. <sup>9</sup> Ru moparettima tamagranema eman'i'naza vahera zamazeri havi zana osiho. Na'ankure tamagramma Isipi moparema mani'netama eri'naza knazana antahi'naze.

### *Mani fruhu knane (Sabat) mopamofo naneke*

<sup>10</sup> Tamagra hoza 6si'a kafumofo agu'afi erita nenteta, ne'zama'a vasageho. <sup>11</sup> Hianagi 7ni kfurera ana mopafina hoza onteta atrenkeno manigsa hino. Hagi ana mopafima agra'ama hagesia ne'zana atrenkeno zamunte omane vahe'mo'za eri'za nenenko, mago'a afi zagagafamo'za neho. Ana zanke huta olivi zafa hozane waini zafa hozanena onkrita atrenkeno mopamo'a amne meno. <sup>12</sup> Miko erizantamia 6si'a zage knafi erigahaze. Hianagi 7ni zageknia zupa manigsa hinkeno bulimakao afutamimo'ene donki afutamimo'ene, tamagri kazokzo eri'za a'mofo mofavretamine, eman'i vahe'mo'zama eri'zama e'nerisaza nena manigsa hugahaze. <sup>13</sup> Nagrama huogu'ma kasami'noa kea antahi ankere'enka, havi anumazantmimofo agiramina ahege, ana anumzatmimofo agigenke'a huama osiho. Nehinke'za zamagra ontahilo.

### *Mago kafufina 3'a zupama nezama kre'za ne'zamofo naneke*

<sup>14</sup> Mago kafufina 3'a zupa atru huta ne'zana kreta neneta, monora huanantetere hiho. <sup>15</sup> Nagrama hurmante'noaza hutma ese ne'zama nesazana 7ni'a zageknafi zo-ore bretia neho. E'i ana ne'zana Avibi (March-April) ikante netere hiho. Na'ankure e'i ana ikante Isipitira atreta atiramita e'naze. E'na hu'negu ana mika'mo'za amnea ome'za zamente zamente kresramna vu musezana eri'za echo. <sup>16</sup> Ananteria ne'zama hamare'zamofo musema hu knarera, ese'ma hozafima nenama hania kavera emeritru hutma ne'zana neneta musena nehutma, ana hukna huta ne'zama vasage nompima ante vagare knarera, ne'zana neneta musena hugahaze. <sup>17</sup> Mago kafufina 3'a zupa mika venene'motma Hankavenentake Ra Anumzamo'na navuga etere hiho. <sup>18</sup> Nagritegama kresramnama vunantesaza zagamofo koranpina zistima me'nesiazana erinteta Kresramana vuonanteho. Hianagi ana zagagafamofo afovamo'a me'nenko kora otino, hanki ana zupage tevefi kre fanane hiho. <sup>19</sup> Ese ne'zama hozatamifinti'ma vasagesazana eritma Rantami Anumzamofo nompi eme amaho.

Hagi anenta meme afura nerera ami rimpina onkreho.

### *Anumzamo'ma kegava huzmantesia zanku huvempa hu'nea naneke*

<sup>20</sup> Antahilo, Nagra ankerio vahe'ni'a huntoankino, ugota hurmanteno nevuno kantega kegava hurmanteno retro'ma hurmantente'noa kumatera vugahie. <sup>21</sup> Ana ne'mo'ma mika'a kema kasmisiana, hara reontenka ke'a antahinka erizafa huo. Na'ankure Nagri nagimo'a agripi me'nena, ha'marentesanana kumika'a atreogantegosie. <sup>22</sup> Hianagi Nagrama asamisua kema tamasm'i'na ke'ama antahita avaririsage'na, Nagra ha' vahetamimofona ha' hunentena, ha'ma rezmantesaza vahera ha' rezamantegahue. <sup>23</sup> Na'ankure ankeronimo'a ugagota hurmanteno tamavreno Amori vahepine, Hiti vahepine, Perisi vahepine, Kenani vahepine, Hivi vahepine,

Jebusi vahe'mofo mopafinena nevina, Nagra ana kumatmimpi vahetmina zmahehana hugahue. <sup>24</sup> Zamagri anumzatmintera tamarenarege monora huntege, zamavu'zmavara avaririta osih. Hagi mika havi anumzazmia erita rurako hutreho. <sup>25</sup> Hagi Anumza Rantamimofona Agrike monora hunentenke'na, ne'zama nesaza zane, tima nesaza zana asomu huneramante'na kria amu'notmifintira eritra'neno. <sup>26</sup> Hagi mofavrea kase ofri knare hu'za kse nezmante'nageno, magore huno naravora ana mopafina omanigahie. Hagi ana mopafina tamagra zaza kna manitetma frigahaze. <sup>27</sup> Nagra vugota hu'na ana ha' vahetimia zamazeri kore neha'nena antahintahi zamimo'a savri nehina rukrahe hu'za kore fregahaze. <sup>28</sup> Nagra tume huntanenko ugota hurmanteno Hivi vahe'ma, Kenani vahe'ma, Hiti vahera zmarotago hinke'za ana mopafina omanigosaze. <sup>29</sup> Hianagi magoke kafufinkera zamahe kasos'opegosue, na'ankure e'inama hanugen'a, afi zagagafamo'a forehu hakare huno mika kaziga avite'neno, zamazeri havizantfa hugahie. <sup>30</sup> E'igu akohe'na, ha' vahetimia osi'a zamazeri atretere nehanugeta, hakare vahe'ma fore huta miko mopa mani aviteghaze. <sup>31</sup> Mopatimimofo atupa'ama ometre emetrema hu'neana, koranke hgerinteti eri agafa huno vuno Medeterenia hagerinte ome atregahie. Hagi mago kaziga asopa'amo'a ka'ma mopareti erigafa huno vuno Yufretisi tinte ome atregahie. Hagi e'i ana mopafima nemaniza vahera Nagra tamaza nehane'na mopazmia zamaheta hanaregahaze. <sup>32</sup> Hanki mago hvempa kea ana mopare vahe'eneno, anumzazmirera huta eri hageorafiho. <sup>33</sup> Zamatrene'za tamagri mopafina omaniho. Na'ankure zamazeri savari hanageta havi anumzante monora hunenteta kumi hanageno, kukomo tamazeriankna hugahie.

## 24

### *Anumzane hagerfi hvempa kemofo hu izo hu'naza naneke*

<sup>1</sup> Ra Anumzamo'a amanage huno Mosesena asami'ne, Kagrama, Eroni'ma, Natabu'ma, Abihu'ene 70'a Israeli kva vahe'enena Nagrama mani'noa agonare emarerita ana mikomota ogantu'a emani'neta monora hunanthe. <sup>2</sup> Hianagi Mosesega kagrake Ra Anumzamo'narera erava'oa hugahananki, kagranema maka e'naza kva vahe'mo'za ogantu'a maniho. Hagi magomo'e huno Moses'enena emareorino. <sup>3</sup> Anante Mosese'a eazamo Ra Anumzamo'ma asamia nanekene, tra kea eme zamasamige'za maka veamo'za ot'i'za mago zamagi ante'za, maka kema Ra Anumzamo'ma Mosesema asamino hihoma hiazana hugahune hu'za hu'naze. <sup>4</sup> Ananterea Mosese'a ana miko kema Ra Anumzamo'ma asmi'nea nanekea avontafepi krente'ne. Nanterame otino ana agonamofo agafinka 12fu'a Israeli naga nofi'mofo agire 12fu'a have eri atru huno kresramana vu ita trohu'ne. <sup>5</sup> Ana huteno Israeli vahepinti nehzavermi huzamanteg'e'za tevefima kre fanane hu kresramna negre'za, agaho ve bulimakao afu'nuti rimpa fru hu ofa Ra Anumzamofona hunte'naze. <sup>6</sup> Anama hutageno'a Mosese'a ana bulimaka afu'mofo korana amu'nompinti tagi fako huno mago'a zuomparamimpi nenteno mago'a korana kre sramanama vu itare aru tri hu'ne. <sup>7</sup> Ana'ma huteno'a Mosese'a eri hagerafi hvempa kema krente'nea avontafe erino hampritege'za veamo'za, nentahi'za amanage hu'naze, ana miko zama Ra Anumzamo'ma hihoma hiazana amage nenteta, miko ke'a amage antegahune. <sup>8</sup> Anagema hazageno'a Mosese'a zuomparamipima taginte'nea

bulimaka afu korana reno ana vahetamimofo zamagofetu aru tri ne-huno amanage hu'ne, antahihi Ra Anumzamo'ma ke'anut'i'ma eri hager-afi huvempa kema hu'nea korane huno eri ama hu'ne. <sup>9</sup> Ana hutege'za Aroni'ma Nadabu'ma, Abihu'ma, 70'a Israeli kva vahetamimo'zañena Mosese'ene agonafi mareri'za, <sup>10</sup> Israeli vahe'mofo Anumzana ome ke'naze. Ana Anumzamo'ma agiama reno'ma oti'neana safie nehaza havereti tro huntegeno pehe huno hokonke huno mona kna hu'nea zante otinege'za ke'naze. <sup>11</sup> Hu'neanagi Agri'ma kazazankura, ana Anumzamo'a Israeli kva vahetamina zamahe ofrige'za mani'ne'za ne'zane tinena ne'naze.

<sup>12</sup> Ana'ma nehazageno Ra Anumzamo'a amanage huno Mosesenkura hu'ne, marerinka agonare'ma mani'nore enka emani'nege'na, rempima huzami'nana kasegene hihogu'ma havere'ma krente'noa nanekea kami'neno. <sup>13</sup> Anage'ma higeno Mosese'a otino eri'za vahe'a Josuana avregeke Anumzamofo agonarega mareri'na'e. <sup>14</sup> Hianagi Mosese'a amanage huno Israeli kva vahetminkura hu'ne. Ama anante tavega antetma mani'enketa vuteta ete a'mneno. Hagi amu'notmifima hafra hu'zama fore'ma hanigeta, Aroni'ene Hurike manina'ankike tamazeri fatgo hugaha'e.

<sup>15</sup> Anage huteno ana agonafi Mosese'a marerigeno hampomo'a ana agona refite'ne. <sup>16</sup> Ra Anumzamofo hihamu masazamo'a Sainai agonare eramino me'negeno, hampomo'a refite'negeno 6si'a zagegna evutegeno, 7ni knarera ana hampompinti Mosesena kea humi'ne. <sup>17</sup> Hagi Israeli vahe'mokizmi zamavurera Ra Anumzamofo himamu masa'amo'a anamu ana agonafina keonke'za tefanane hu tevenefa kna hu'ne. <sup>18</sup> Hagi Mosese'a ana agonafima marerino tusi'a hampompi ufreno 40'a zagegnagi 40'a keregeki huno umani'ne.

## 25

### *Seli mono noma kisaza ofama ami'naza zamofo naneke*

<sup>1</sup> Hagi Ra Anumzamo'a amanage huno Mosesena asmi'ne. <sup>2</sup> Israeli veara zamasmige'za ofa eri'za eme namiho. Iza'o ofama nami musezamo'ma agu'afima avitenkeno eme kamisia ofage erio. <sup>3</sup> Ana ofama eri'za esazana amanahu'za eri'za echo, golima silvama, bronsima, <sup>4</sup> hokonke nofi'ma, fitunke'ma, koranke'ma efeke nofi'ma, meme azoka'ma, <sup>5</sup> eri korankre hunte ve sipisipi akru'ama, hage rimpi bulimakofo frufru huno zmana'zmana hu'nea ukri'ma akasia zafama, <sup>6</sup> tavi taginte olivi masavema, knare mana neviazama masavefima eri havia huno'ma vahe'ma asenire'ma taginteno asomu'ma hunenteazama, tevefima kregenoma manavu'zama, <sup>7</sup> ugagota pristi vahe'mo amega antani kukenare'ma ante'zana oniksi nehaza haveramine, mago'a zago'amo mareri'nea haveramine animizare antani'za eri'za echo. <sup>8</sup> Hagi Israeli veamo'za ruotage seli mono noni'a kinantek'e na Nagra zamagri amu'nompi eman'i'nen. <sup>9</sup> Nagrama kaveri'ma hanua kante antenka, ana seli mono none maka agu'afima me'nia zantamina trohuo.

### *Kasegema ante vogisima tro hu'zamofo naneke*

<sup>10</sup> Hagi huge'za akasia zafareti mago vogisi tro hiho. Ana vogisimo-fona zaza'amo'a 110 sentimita hinkeno, atupa'amo'a 66 sentimita hinkeno, mareri'amo'a 66 sentimita hino. <sup>11</sup> Ana vogisimofo agu'afine fegi'anena golinutike'za eri anonevazita agema'aramintera golinutike eri avozaze hutma eri pehe hiho. <sup>12</sup> Hanki 4'a rinire golire tro huta fenkami kaziga agente agentera tare tare hutma ome rekamarente eme arekamarente hiho.

<sup>13</sup> Ana nehuta Akasia zafa antrenteta tare zota trohuta golinuti eri ano vazinteho. <sup>14</sup> E'i ana tare zafa ana vogisima erisga huno vu'zana anama 4'a rekamarente'naza rinifinka antaninteho. <sup>15</sup> Hagi ana zotarerena, huhagerafi vogisimofo rinifinkatira avazuhu otreta atrenkeno anante meno. <sup>16</sup> Ana vogisima trohu vagaresnunka, tare havere'ma kasegema kregamisuana, ana vogisimofo agu'afi anto. <sup>17</sup> Hanki ana vogisimofona, asunku zamofo trare hutma avaza'a goliretike tro hinkeno, zaza'amo'a 110ni'a sentemita hinkeno, atupa kaziga'amo'a 66si'a sentemita hino. <sup>18</sup> Hanki hamanu golia ruguta huta tare serabimie nehaza ankerontre tro huteta, vogisimofo avaza'are asunku tra'mofo agofetu rugaraga agentera anteho. <sup>19</sup> Serabimie nehaza ankerontre'ma tro'ma hanazana, anama asunku zamofo tra'ma tro'ma hanaza golinutike, rugaraga agentera ana ankerontrena trohuntehו. <sup>20</sup> Ana Serabim ankeroremokea zanavugosa ohumi ahumi nehuke, kepri huke asunku tra'mofo negenakeno zanageko'namo'a, rufanara huno ana vogisia refiteno. <sup>21</sup> Hagi tare havere'ma huhagerafi huvempahu kasegema kre tamami'noa erita ana vogisimofo agu'afinka nenteta, asunku tra'mofo avaza'are erita refitehו. <sup>22</sup> Nagra e'i ana asunku tra'mofo agofetu'ma Serabim ankerontremofo amu'nompi emani'ne'na maka kasegeni'a negasm'i'nena, Israeli veara zamasmigahane.

#### *Anumzamofo avure'ma ante bretima ante tramofo naneke*

<sup>23</sup> Anantero mago tra akasia zafareti tro hiho. Ana tra'mofona zaza'amo'a 88'a sentimita hinkeno, atupa'amo'a 44'a sentimita hinkeno, mareri'amo'a 66'a sentimita hugahie. <sup>24</sup> Ana tra'mofona golinutike eri ano nevazita agema'aramintera ana golinutike eri avozaze hutma eri pehe hutma avareho. <sup>25</sup> Hagi ana tra'mofo atumpa'are'ma eri agu'a huno rugagisiana 8'a sentimita hina, golinutike eri avozaze hutma avareho. <sup>26</sup> Ana huteta 4'a golire rini tro huta 4'a atuparera 4'a agamofo tavaontera mago mago rekamarenteho. <sup>27</sup> Ana 4'a rimima rekamarentesaza tra'mofona anagami rugaraga agentega rekamarente'nenkeno ana riniramimpina erisga huno vu'zana tare zota antanitegahaze. <sup>28</sup> Ana huteta akasia zafareti tare zotarare antreta tro huteta golinuti masavena frentenkeno, e'i ana zotararenteti ana trara zafa hu'za vugahaze. <sup>29</sup> Hanki tima taginte zuomparamine waini tima tagi'zama ofama hanaza tintafene kapunena golinutike'za tro huntenkeno ana tratera meno. <sup>30</sup> Hagi Nagri navure'ma antesageno me'nia bretia, ana trate antenkeno mika zupa meno.

#### *Tavi'ma rekru hunte golire azotamofo naneke*

<sup>31</sup> Tavi'ma rekru hunte azota tro'ma hanazana, retarure agi'agi, rampa'agi, azankuna'araminki asina'agna'ma hutma tro'ma hunteszama'agi, amosre'agna'ma hutma tavi'ma rekruhunte'ama tro'ma hnazana hamanteti aruta magoke golinutike trohuntehו. <sup>32</sup> Hagi ana tavi zotamofona 6si'a azankuna tro huntehו. Rugaraga 3'a azankuna metere hugahie. <sup>33</sup> Hagi ana zotamofona 6si'a tavi'ma rekru hunte azankunatamimofo atumparega, almoni zafamofo an'i'na'ane amosare'agna hunka tavi'ma rekruhunte'a tro hunto. <sup>34</sup> Hanki amu'nompima mareri'nea zotarera, almoni zafamofo 4'a amosare'agna hutma tavi'ma rekruhunte'a tro huntehו. <sup>35</sup> Hanki ana zotamofoma rugaraga azankunatrema tro hunte'narera almoni zafamofo an'i'na' a trohutere hiho. <sup>36</sup> Ana tavi zotama azankuna'aramima, anina'ama, mosare'anema tro'ma hanazana magoke golinutike, arukuta huta trohiho. <sup>37</sup> Ana 7ni'a azotaramintera lamu tavi

tro huta antenkeno, seli nompina avuga remsa hino. <sup>38</sup> Hanki ana lamu tavimofo osama hampage tu'zane osama erinte tafe'enena golinutike tro hiho. <sup>39</sup> E'i ana tavi zotamofoma mika zantamima'ama tro'ma hanaza zana kna'amo'a 34'a kilo hu'nenia golireti tro hiho. <sup>40</sup> Hanki e'i ana mika'zama tro'ma hanazana, Nagrama ama agonafi kaveri'ma hu'noa kante antenka tro hiho.

## 26

### *Seri mono nomofo rufite'za tro hnaza zamofo naneke*

<sup>1</sup> Hagi Seli mono noma kisazana knare huno zmana zmanama hu'nesia hokonkenofiki, fitunkenofiki, korankenofi avazu huno zagi'nesia osinofiteti 10ni'a tavrave trohutenke'za, ana zama trohu antahi'zama eri'naza eri'za vahe'mo'za, Serabimi ankeroramimofo zamema'ana tavraveram-intera hati'za tro hanageno, <sup>2</sup> ana maka tavaravea mago avamenteke nevuna, za'za amo'a 12fu'a mita hanigeno, atupa'amo'a tare mita hutere hino. <sup>3</sup> 5fu'a erimagopinteta nehatita ruga'a 5fu'amofona anahutma magopi erintetma rehatihi, <sup>4</sup> ana 5fu'a tavravea erintetma rehatisaza kevumofo atupa'arega, hokonke tavravereti erihagerafi atupa'a tro nehutma, mago kevumofona megia'atuparera anazanke hugahaze. <sup>5</sup> Mago kevu tavravemofo atumparera 50'a eri hagerafi atupa'a tro nehutma, mago kevumofonena anazanke hutma trohinkeke, ana tarega tavravemokizni atumpa'amokea zamavugosa ohumi ahumi hugaha'e. <sup>6</sup> Ana tare kevu tavravema erinteno vazirusi hanigeno erintrako hu'zana, gorileti erikorave huta 50'a rinia eri hagerafi atumparamintera tro hunte'nageno, ana seli mono nomo'a magoke megahie.

### *Meme afu azokateti tavravema tro'ma hnaza zamofo naneke*

<sup>7</sup> Ana seli mono noma rufite tavravea meme afu'mofo azokateti maka 11ni'a tavrave tro hugahaze. <sup>8</sup> Ana maka 11ni'a tavravea mago avamenteke'za trohinkeno, zaza'amo'a 13ni'a mita hina, atupa'amo'a tare mita hutere hugahie. <sup>9</sup> 5fu'a tavravea erinteta rehati rehati hinkeno mago tavrave nesena, 6si'a tavravemofona anazanke hutma rehatinkeno mago erisena, anampinti 6simofona repasi hinkeno ete eme ruhamprino seli nomofo avuga ufre kaziga, ana tavravemo'a taparino meno. <sup>10</sup> Hanki eri mago hutama hatinte'naza tavravemofona eri hagerafi atumpa'a, 50'a tro nehutma, mago'ma hatinte'naza tavravemofonena anazanke hutma tro hugahaze. <sup>11</sup> Anantero tare tavravere'ma 50'a eri hagerafi atupa'ama troma hunte'nafima, erihagerafino eri ruhampri'zana bronsireti erikorave huta 50'a rini kana tro hutenenkeno, ana tare tavravea erirusi hinkeke seli mono nomo'a erimago huno megahie. <sup>12</sup> Ana seli mono nomofo agofetu'ma refite'nia tavravemo'ma agatereno vania atupa'a atrenkeno amefiga uramino ruhananeno. <sup>13</sup> Ana seli mono nomofoma rufite tavravema tro'ma hanazana, sugaruga asoparega 50'a sentimita atrenkeno vugatereno tare kaziga asopa nomofona rufiteno. <sup>14</sup> Hanki ana nomofoma rufite selima tro'ma hanazana, ve sipisipi afumofo akrute erikoranke huta rufineteta, ana agofetura hagerimpi bulimakaomofo amega akru eritma rufite vagaregahaze.

### *Seli mono noma reharereno kizamofo naneke*

<sup>15</sup> Ana seli noma ki zafa akasia zafaraminteti tro hugahaze. <sup>16</sup> Ana seli noma eri otino ki'zafaramimofo zaza'amo'a, 4'a mita hina, kuta'amo'a

66'a sentemita hutere hugahie. <sup>17</sup> Ana seli mono noma vazisgama hania zafa zazate taga hutma tro hunte'nenkeno tra'afina ome rusi huno meno. Anazanke hutma maka asopa zafa tro hiho. <sup>18</sup> E'i anama hutama tro'ma hanaza zafaramimpintira 20'a zafaretira seli nomofona sauti kaziga retrureho. <sup>19</sup> Hagi ana asopa zafaramimofo agafafima azerikona hina oti fatgo hania zana, mago zafamofo agafafina silvareti tare tra trohutere hinkeno, ana maka tra'mo'a 40'a fore hino. <sup>20</sup> E'i anahukna huta noti kaziga 20'a zafaretira seli noma azeri oti'zafa retrureho. <sup>21</sup> Hagi ana asopa zafaramimofo agafafima azerikona hina oti fatgo haniazana, mago zafamofo agafafina silvareti tare tra trohutere hinkeno, ana maka tra'mo'a 40'a fore hino. <sup>22</sup> Seli nomofo amefira zage fre kazigama vazisgamahu zafaramina 6'a tro nehutma, <sup>23</sup> seli nomofo amefi'ma ome renegente eme renagente tu tare atupatrentera retruresaza tare zafa tro hugahaze. <sup>24</sup> Anama renagente'ma marerisa'a tare zafamokea, magoke trate regriteke anagamu atupa'amokea rinifinka ufre'nakeno znazeri tragotegahie. Mago kaziga renagentetera anazanke hiho. <sup>25</sup> E'inama hanageno'a makara 8'a zafa mena, ana zafa azeri oti trara silvareti mago mago zafarerai tare agi'a trohutere hinkeno ana makara 16ni'a tra megahie. <sup>26</sup> Ana zanke hutma seli mono nomofo asoparegama rugekahu zafa akasia zafareti 5fu'a tro hiho. <sup>27</sup> Hagi mago kaziga (saut) asopareganena 5fu'a rugeka zafa tro nehuta, seli mono nomofo atupa kaziga zage fre (west) kaziganema me'nea zafarerai anazanke huta 5fu'a rugeka zafa tro hiho. <sup>28</sup> Amu'nompi rugeka'ma hanaza zafamo'a mago asopamofo atuparetira vuno, mago atupare uhanitino. <sup>29</sup> Ana zafaramimofona goliretike erinona vazinezamanteta, rugekama hanaza zafaramima erirusi hu'zana goliretike erikorave hutma retrure zafarerai tro huntiegahaze. <sup>30</sup> Mosesega ama agonafima kaveri'ma huankante amage antenka ana seli mono nona azeri otio. <sup>31</sup> Seli mono nomofo hunaragisaza tavravema tro'ma hnazana knare huno zmana zmanama hu'nesia efekenofiki hokonke nofiki, fitunke nofiki, koranke nofi avazu huno zagi'nesia osi nofifeti tavravea tro hutenke'za, ana zama trohu antahi'zama eri'naza eri'za vahe'mo'za, Serabimi ankeroramimofo amema'a ana tavraveramintera hati'za tro hunteho. <sup>32</sup> Ana tavravema hantisazana, 4'a akasia zafarerai golireti eri ano nevazita, ana zafarerai golireti eri rusi hu'zana tro nehuta zafama retrure trara silvaleti 4'a tro hiho. <sup>33</sup> Ana tavravea erirusihu rinire hantinkeno evuno hunaragintena ana tavravemofo amefiga'a, ruotage huno ruotgetfa hu'nefinka huhagerafi huvempa kasege vogisia anampinka antenkeno meno. <sup>34</sup> Anama ruotage huno ruotagetfa hu'nea asama hunaragintepinka kasegema me'ne vogisimofo agofetura asunku tra trohuta rufiteho.\* <sup>35</sup> Hanki hunaragine tavaravemofo avuga ruotage'ma hu'nefina, noti kaziga mago Nagri navure'ma antesageno me'nia bretimofo trara nentetma, ana seli mono nomofo sauti kaziga tavi'ma rekaruhunte lambe tavi zota anteho. <sup>36</sup> Ana seli nomofo kahama ufrete'ma tafi tavravema tro hanazana, hokonke nofiki, fitunke nofiki, koranke nofiki hutma, kapokureti'ene avazu huta osite nekazareti hanetma tro hiho. <sup>37</sup> Kafante tavravema hanti'zana 5fu'a retrure zafa akasia zafare golireti ano nevazita, ana zafarerai golireti eri rusi hu'zana tro nehuta, zafama retrure trara bronsireti 5fu'a tro hiho.

\* <sup>26:34</sup> Anumzamo'ma asunku huno kumi'ma eri atre trare.

# 27

## *Bronsireti Kresramana vu ita tro hu'zamofo naneke*

<sup>1</sup> Akasia zafareti'ma kresramnavu itama tro'ma hanazana, mareriamo'a 1 mitagi 30'a sentemita hina, zaza'amo'ene kahesa'amo'enena mago avamenteke 2 mitagi 20'a sentemita hino. <sup>2</sup> Hanki 4'ama omerenagete emerenagentema hutera mago pazive tro huntetere hinkeno, ana pazivetamimo'za ana itare rutragote'za erimago zanke nehina, ana ita bronsireti amega'a anovazinteho. <sup>3</sup> Ana itare'ma eri'zama eri'zantamina bronsireti'ma tro'ma hanazana, tanefa'ma katekre kavoraminki, osama kate sipe-tiraminki, ru tritri hu zuomparaminki, revazuhu zotaraminki, tevema tagi osi zuomparaminki hutma tro hiho. <sup>4</sup> Bronsireti rama'a karami hagente'za strena tro hutma anaga tevema hugre itamofo antenkeno agu'afi uraminoamu'nompi me'nena, anante 4'a bronsire rini tro huta zotama vazinteno erisga hu'zana tro huta 4'a renagentetera rukamregahaze. <sup>5</sup> Anama Bronsireti rama'a karami hagente'za strena tro huta kresramna vu itamofo amu'nompi fenka kaziga trate rukamrentenkeno meno. <sup>6</sup> Ana kresramna vu itama vazino erisagahu azotarerena akasia zafareti tro hutetem amega'a bronsireti anovazihi. <sup>7</sup> Ana azotarerena kresramna vu itamofo rugaraga asoparega riniramima tro'ma huntepinka erita vazintenkeno, erisgama huno yu'za meno. <sup>8</sup> Ana kresramna vu itarera kuta zafareti tro hinkeno, agu'afina hagro huno mena, ana itama tro'ma hanazana, Mosesega agonafima kaveri'ma hu'noa kante amage anteta tro hiho.

## *Seli mono nomofo keginama tro hu'zamofo naneke*

<sup>9</sup> Seli mono nomofo kuma keginama hanaza tavravea, sauti kaziga zaza'amo'a 44'a mita hina, keginarera osi nofiteti zagi'za hati'nesaza tavaravereti tafinteta eviho. <sup>10</sup> Keginama azeri oti zafaramina 20'a tro nehutma, kegina zafamofo tra'a bronsireti 20'a tro nehutma, tavravema erirusi huno tafinte'zantamine nofi'ma rente'zantamina silvareti ana azeri oti zafamofo avozarera tro huntaho. <sup>11</sup> Ana zanke huno noti kaziga keginahu tavravene azeri oti zafaramina 20'a tro nehutma, kegina zafamofo tra'a bronsireti 20'a tro nehutma, tavravema erirusi huno tafinte'zantamine nofi'ma rente'zantamina silvareti ana azeri oti zafamofo avozarera tro huntaho. <sup>12</sup> Ana seli mono nomofo keginare tavravea zage ufre kaziga kahesa'amo'a 22'a mita hina, keginama eri oti'zafa 10ni'anetra zamianena, 10ni'a tro hiho. <sup>13</sup> Hanki zage hanati kaziga avugosama hunte'nea kumamofo kahesa'amo'a 22'a mita hina. <sup>14</sup> Kama ufret'e'ma tamaga kaziga hanti tavravea, zaza'amo'a 6 mitagi 60 sentimita hina, kegina retrure zafa 3'a tro nehuta tra'aramina 3'a tro huta anantera ana tavravea tafinteta eviho. <sup>15</sup> Hanki kama ufretema hogakazigama tafi tavravemofona zaza'amo'a 6'a mitagi 60 sentimita hina, 3'a retrure zafagi 3'a tra'aramina tro nehuta anantera ana tavravea tafinteta eviho. <sup>16</sup> Hanki ana kumapima ufre kante'ma ruhi'zamahu tavaravema tro'ma hanazana, hokonke'ene, fitunke'ene, koranke nofiteti'ene, ana eri'zama eri antahi'zama eri'nesia vahe'mo osite zagino ana tavravemofona konariri'a hunentena, ana tavravemofona zaza'amo'a 9'a mita hina, 4'a retrure zafane 4'a trazamia tro huta ana tavravea kafanteratafinteho. <sup>17</sup> Ana kuma'mofo maka kegina zafaramintera, erirusi hunte zantamine nofi'ma anaki'zana silvaretike tro nehuta, keginama eri oti tratamina bronsireti tro hugahaze. <sup>18</sup> Ana kumamofona zaza'amo'a 44'a mita hina, kahesa'amo'a 22'a mita hina, keginare'ma tafinte tavravea, knare huno osite

zagi'nesia nofiteti trohinkeno mareri'amo'a 2'a mitagi 20'a sentemita ne-hina, bronsireti keginama retrure trataminena tro hugahaze. <sup>19</sup> Ana maka ruga'azama seli mono nompima eri'zama eri'zantamine, ruzahu ruzahu eri'zama eriterehu zantamine, seli nompi zantamine, meg'i a tavravere'ma avazuhumpi huno rente zotane, seli mono nomofo tavravema avazuhumpi huno rente azotaramina, ana maka zantaminena bronsiretike tro hugahaze. <sup>20</sup> Kagra hanavege Israeli nagara huzamantege'za olivima regatati hu'zama eri agruma hu'nesaza masavena lampe tavima tagintena tevava hania zana eri'za echo. <sup>21</sup> Ana seli mono nompima, huvempa huno huhager-afi vogisima ante asama hunaraginte tavravemofo avuga, Aroni'ene ne' mofavre naga'amo'za Anumzamofo avurera kinagane nanteranena tavira tagintenko tevava nehina, ama'i ana avu'avara Israeli vahe'mota huvava hutma nevinke'za henkama tamagehe'za fore hanamo'za ana zanke hu'za vugahaze.

## 28

### *Prisi vahe'mo'za hnaza kukenamofo naneke*

<sup>1</sup> Hagi Mosesega negafu Aronine ne' mofavre naga'a Nadabuki, Abihuki, Eleazaki, Itamatilki, Israeli vahepintira ke huge'za kagrite e'za Nagri pristi eri'za vahe maniho. <sup>2</sup> Negafu nera Aronina ruotage huno avasese'amo'ma mareri'neni'a kukena tro huntetenkeno, vahe'mo'za kesga hunente'za antahimoho. <sup>3</sup> Anahu eri'zama erigahaze hu'nama knare antahi'zama zamuge'za e'neri'za vahera mika ke huge'za, Aroni'ma antani'enigeno azeri ruotage hanigeno, pristi eri'zani'a erisia kukena tro hunteho. <sup>4</sup> Ana kukenama zagita tro'ma hnazana amanahua kukena tro hugahaze, amimizare'ma 12fu'a havema rekamre'nia tavravegi, amimizare'ma hania kukenagi za'za kukenagi, agu'afi avate kenagi, asenire naki tavravene amu'nofi'ene tro-hinke'za, negafu ne' Aroni'ene ne' mofavre naga'amo'zanena antanine'za, pristi eri'zani'a erigahaze. <sup>5</sup> Ana kukenama tro hanaza nofitamina, hokonke nofiki, golire nofiki, fitunkeki, koranke nofi'ene knare zantfa hu'za zagi'nesia nofiteti'ene tro hiho. <sup>6</sup> Amega amimizare'ma hania kukenama tro'ma hnazana, golire nofiki, hokonke nofiki, fitunke nofiki, koranke nofi'ene knare zantfa hu'za osite zagi'nesaza nofiteti hinke'za ana zante eri'za vahe'mo'za trora hugahaze. <sup>7</sup> Afumpinti'ma krerami'nigeno amefigama anakisnia nofira anaga kaziga tare atumparega tafinteho. <sup>8</sup> Amu nofi'ma zagita tro'ma hnazana, golire nofiki, hokonke nofiki, fitunke nofiki, koranke nofi'ene knare zantfa hu'za osite zagi'nesaza nofiteti eri so'e hu'za tro hanageno, amimizare'ma hu kukenamo'enena magoke fore hugahie. <sup>9</sup> Oniksie nehaza have tare eritma 12fu'a Jekopu ne' mofavre'mokizmi zamagi, ana haverarentera taga huta krenteho. <sup>10</sup> Ese'ma kase zamante'neregati vuno osite'ma vanigeta zamagima krentesazana, 6si'a zamagia mago ha-vare krenteta, mago haverera 6si'a zamagi'a krenteho. <sup>11</sup> Ana tare haverera, tagama hu'za avame'zama havere'ma tro'ma nehzaza huta, Jekopu ne' mofavre'mokizmi zamagi'a taga huta krenenteta, golireti rinia tro hinkeno ana haverarena znazeri antrako hino. <sup>12</sup> Ana havererena ruga raga afunte'ma me' tavravere hagerafintenkeno antahizami avame zankna huno me'negeni, Aroni'a Jekopu ne' mofavre naga'mokizmima Ra Anumzamo antahizaminogu maka zupa Anumzamofo avurera vugahie. <sup>13</sup> Ana havererema znazeri antrakohu rinia golireti tro nehutma, <sup>14</sup> seni nofikna hutma golireti hanetma eri hagerafi hagerafi hutma tare nofitre,

tro hutma ana rinirarentera renteho. <sup>15</sup> Amimizare'ma hania kukenama tro'ma hanazankna hutma, asunte'ma hu'neno Anumzamofo avesi'zama kefore'ma hu'zana, ana zama trohu knare antahi'zama eri'naza vahe ke hinke'za, hokonkenofiki, fitunkenofiki, koranke tavravereti'ene knare hu'za zagi'nesaza osi nofifiti tro hiho. <sup>16</sup> Ana tavravemofo zaza'amo'a 44'a sentimita hina, atupa kaziga'amo'a 22'a sentimita hinketma erinteta repasi hinkeno, ana maka asopamo'a mago avamenteke vino. <sup>17</sup> Miza zama'amo'ma mareri'nesia have raminteti ana tavraverera 4'a isa'are rekamarenteta evugahaze. Hanki kotama evania isarera rubi havegi, topasi havegi, berilie nehaza have evina, <sup>18</sup> anante'ma evania isa'arer terkoise nehaza havegi, safaire nehaza havegi, emererie nehaza zafasi'nage havemo evina, <sup>19</sup> anante nampa 3 isare'ma evaniana, jasintie nehaza havegi, agaties nehaza havegi, ametistie nehaza have evina, <sup>20</sup> anante nampa 4 isa'ama evanirera, krisolaetie nehaza havegi, oniksies nehaza havegi, jaspe nehaza havemo ene evino. Ana maka haveramima regrinte anom'aaramina Goliletike tro huntenkeno azeri antrako hino. <sup>21</sup> Ana maka 12fu'a haverera Israelina (Jekopu) 12f'u'a ne' mofavre'mokizmire huhamprino magoke magoke have'a me'nena, ana havere mago magomokizmi zamagi'a anante taga hu'za krentegahaze. <sup>22</sup> Amimizare'ma 12fu'a havema ante'ne tavravema rentesaza seni nofira goliretike haneho. <sup>23</sup> Hanki goliretike tare nofi'ma rente rinia ana tavravemofona anagamu atumpamofo ruga raga kaziga ometre emetrema hutega renteho. <sup>24</sup> Anama anakintesaza rinirarentera golire tare seni nofi'ma tro'ma hanaza nofinu anante hagerafin-teho. <sup>25</sup> Hanki ana seni nofitremofo atupa'arerera erita rugaraga azonare'ma ante havema eri anovazi'nea golire renteho. <sup>26</sup> Hanki mago ene tare golire rini tro hutma amimizare'ma 12fu'a havema ante'ne tavravemofo henkamu kaziga omete emete hutega, agu'afi amimizare'ma hu kukenamofo tvaonte tafinteho. <sup>27</sup> Hanki mago'ene golireti tare rinia tro hutma azonareti'ma kreramino amimizare tavravema hagerafi'nere ruga raga avasase'ane nofi'numa avamare'nere renteho. <sup>28</sup> Hanki hokonke nofi'nu amimizare'ma 12f'u'a havema me' tavravemofo fenkamu kaziga rugaraga atumparega me'nea rinirarente anakintenko, amimizare hu kukenare rukamreno meno. <sup>29</sup> Aroni'ma Ruotage'ma hu'nefinkama ufresuno'a Israeli ne' mofavre naga'mokizmi zamagia tumo'amofo agofetu amimizare'ma hu'neno ufresige'na, Ra Anumzamo'na nagerakni ozamante'noe hu avame'za meno vugahie. <sup>30</sup> Ana zanke hunka amimizare'ma 12fu'a havema me' tavravemofo kasagu'afinka, tare havemofo zanagi'a urimie nehaza havene, tamimie nehaza haverare eririgeno Aronina tumo'amofo agofetu amimizare hanti'neno, Ra Anumzamo'na navure'ma vaniana, e'i ana haveraremake Nagri navesira eri ama' hugaha'e. <sup>31</sup> Agu'afi antani'neno agofetu'ma amimizare kukena hania za'za kukena, hokonke tavraveretike'za tro hiho. <sup>32</sup> Hanki ana za'za kukenamofo ananke kana amu'nompi hagenentetma, ana kamofoma hatigagisazana tavravea ante taparita zagita hatinkeno tagatora osino. <sup>33</sup> Hanki ana za'za kukenamofo agiaregama rugagi atumparega, pomigreneti zafa rgagna huta hokonke nofiki, fitunke nofiki koranke nofi'nuti tro hutetma ana za'za kukenarera rentekagiteta, ana zantamimofo amu'no zmifina golireti belotami tro huta renterente hiho. <sup>34</sup> Hanki ana zantamima rente kagisazana, golireti'ma tro'ma hu'naza belora renenteta, pomigreneti zafa rgama tro'ma hu'nazana rente rente hutere hutma, ana kenamofona kagiho. <sup>35</sup> Seli mono nompima

hunaragintegeno ruotage'ma hu'nefinkama Aroni'ma, Ra Anumzamo'na navure'ma ruotagema hu'nefinka eri'za eri'naku ana kukena hu'neno ufreto atiramino'ma nehanige'za, Ra Anumzamo'ma ahe ofri'enigura ana arente'naza belotamimofo agerura antahigahaze.<sup>36</sup> Hanki goliretike mago kuta preti tro huteta ananter Ra Anumzamofontega ruotage hu'ne hutma taga huta krenteho.<sup>37</sup> Ananter hokonkenofi'nu ana nanekema krente'naza gorile pretia asenire'ma anaki tavravemofo agofetu anakinteho.<sup>38</sup> Aroni'ma ana tavravema asenire maka zupa anaki'nena, Israeli vahe'mo'zama ruotage hu'nea musezama eri'zama eme namisafima hantagama hanazana, Nagra Ra Anumzamo'na ana pretilma nege'na hazenkezmia atre zmantegahue.<sup>39</sup> Hanki agu'ama antani kukena knare tavravenuti zagita tro nehuta, anunte'ma anaki tavravenena ana zantetike tro hiho. Azonaregati'ma rugreramino asoparegama evunofira konaririane nofi tro hiho.<sup>40</sup> Hanki zamazeri ruzahu'ma hu'nesige'za vahe'mo'za antahizami'za husga huzmantesa za kukena zamu'nofi ki tavrave nofiki, kankriki meg'iama antani kukena (tunik) Aroni ne' mofavre zagamo'za hanaza kukena tro hiho.<sup>41</sup> Mosesega ana kukenaramima negafu Aronine ne' mofavre naga'anema eri huzamantetenka, ananter zmanumpina masave taginka fre zmentetenka, huham-prizmanteka zamazeri ruotage nehunka, pristi vahe zamazeri otige'za Nagri eri'zana eriho.<sup>42</sup> Hanki efeke tavravereti zamagaze zmauvufga eri frakisia atupa kena, zmaratimpireti urami fenkamuteno zamotega ome atre kena tro hiho.<sup>43</sup> Hanki Aroni'ene ne' mofavre naga'anema seli mono nompima ruotage'ma hu'nefinkama ufre'za Kresramanavu itare'ma eri'zama erinaku'ma vanu'za, zamagaze eri'za frizankura ama ana atupa kena antanine'za ufregahaze. Ama'i ana kasegemoa'mevava huno Aroninteti agafa huno zimagehe'inte meno vugahie.

## 29

### *Prisi vahe huhamprino zamazeri ruotage'ma haniazamofo naneke*

<sup>1</sup> Mosesega amanahu hunka Anumzamo'na Nagri pristi eri'zama erisagura Aronine ne' mofavre'aramima'a zamazeri ruotage hananke'za pristi eriza erisazana mago a' anenta ve agaho bulimakaogi, tare afuhe afahe osu ve sipisipi afu anentatrenki,<sup>2</sup> knare'ma hu'nesia witi flauateti zo-ore bretia tro nehunka, zisti onte flauateti keikia, masavene eri havia hunka tro nehunka, olivi masavenu eri havia hunka zisti onte flauateti haganentake basketiramina tro huo.<sup>3</sup> Anante mago ekaeka kupi ana zisti onte flauate'ma troma hu'nana zantamina eriritenka, ana eka eka kuki ve bulimakaonki, tare ve sipisipirerene erita Nagrira eme namiho.<sup>4</sup> Ana hutenka Aronine ne' mofavre naga'anena zamavarenka, seli mono nomofo kahante tina frezamantetenka,<sup>5</sup> ananter kukena ramima zaginka tro'ma hunte'nampinti amega kukena'a Aronina eri huntetenka anante zaza kena'a huntetenka ana agofetura amimizare kukena huntetenka, ana agofetura 12fu'a havema me'nea tavrave antanitetenka hentofazama huno tavraveretima tro'ma hu'nea amu'nofiteti erinka anakinto.<sup>6</sup> Aronima asenire anakinte tavravema tro'ma hunte'nazana erintani nentetma, ana tavraverera ruotage'ma hu'nea golire pretia rukamrenteho.<sup>7</sup> Anumpima taginte masave erinka Aronina asenire taginka huhamprintegahane.<sup>8</sup> Aroni ne' mofavre nagara hinke'za esagenka amega efeke kukena erintani nezamantenka,<sup>9</sup> zamasenirera tavravereti anaki nezmanantenka, Aronine ne' mofavre nagara zamu'nofira anaki zmantenke'za, Nagri pristi

eri'za vahe zamagra manivava hugahaze. Ana hukna kante Aronine, ne' mofavre'anena huhampri zmantegahane.

<sup>10</sup> Ve agaho bulimakao avrenka seli mono nomofo avuga ege'za, Aroni'ene ne' mofavre naga'amo'za asenire zamazana anteho. <sup>11</sup> Ana hutesagenka seli mono nomofo kahama ufrete, Ra Anumzamofo avure ana bulimakaoa aho. <sup>12</sup> Ana ve bulimakamofo korama'a kazankoreti erinka kresramna vu itamofo pazivetamima tro'ma huntetera nefrenka, mago'a korama mesiama'a erinka kresramna vu itamofo agafi tagi netrenka, <sup>13</sup> agu'afinti maka afova'anee asumanane tare kresoane anomaa vazintenea afovaneena erinka kresramna vu itarera kregeno teveguna mrerino. <sup>14</sup> Hianagi kumi'mofo ofama hnanana bulimakaomofo ame'agi, amega ukri'agi rimp'a'a erinka kumamofo megi'a ome krerasago.

<sup>15</sup> Mosesega tare ve sipisipintira mago azerisanke'za Aroni ene ne' mofavre naga'amo'za asenirera zamazana antetesagenka, <sup>16</sup> ahenga korama'a taginka kresramna vu itamofona maka sopa'arega rutri tri hundo. <sup>17</sup> Ana sipisipia tagarago hunka, rimp'a'anee agiazama'anena sese hunka aseni'ane ruga'a avufganena magopi erinto. <sup>18</sup> Ana hutenga ana maka zama'a kresramna vu itare krerasago. E'ina ofa tevereti'ma Ra Anumzamo'nare'ma kre mana vanageno Nagri navure'ma knare mnama vania ofe. <sup>19</sup> Mago sipisipi anenta'ma atre'nana su'anu Mosesega kagra azeri nesanek'za Aroni ene ne' mofavre naga'amo'za asenire zamazana antesnagenka, <sup>20</sup> ana sipisipia ahenga mago'a korama'a taginka Aronine ne' mofavre naga'amokizmia tamaga kaziga zamagesamofo atumparega frenezmantenka, tamaga kaziga zamazamofo zmazafa zamazankore fre frenezmantenka, tamaga kaziga zamagamofo zamagafa zamagigore frenezmantenka, mago'a korana taginka kresramna vu itamofo maka asoparega ru tri tri nehunka, <sup>21</sup> kresramna vu itareti mago'a korana e'nerinka, zamanunte'ma tagi masavenena erinka Aronine mofavre naga'a kukena zimirera, korane masavenena rutri tri hinkeno, ana kukenane zamagranena Nagri su'za meno. <sup>22</sup> Ana ve sipisipi anentamofo afova'anee, risonafi agusane agu'afinti afovama, azamopama eri anomaa vazi'nea afovane, tare kres'are'ma anomaa vazi zanante'nea afova'anee, tamaga kaziga amumazina'anee erinka pristi vahe'ma Nagrite huhampri zamanteno zamazeri routage hu ofa eme huo. <sup>23</sup> Ra Anumzamo'na navure'ma zisti onte bretima eka ekapi kupima ante'nafintira mago ko'na e'nerinka, masavereti'ma kre'naza keikine, magora hagege bisketine erinka, <sup>24</sup> ana maka'zana bretine ame'anena Aronine ne' mofavre naga'amokizmi zamazampi antenke'za erisga hu'ne'za Ra Anumzamo'na navurera erivereve hu ofa hiho. <sup>25</sup> Anama hutesagenka, Mosesega zamazaptintira bretine ame'a erinka Ra Anumzamofonte'ma kre fananene hu ofa kresramna vu itare kregeno knare mana Nagri navurera vino. <sup>26</sup> Ve sipisipi ahenga Aronima azeri ruotage'ma hu'naza sipisipimofo ahihiza'a erinka, Ra Anumzamo'na navurera erisga hunka eri veravehu ofa hutenga, ana ahihiza'a Mosesega nesanu su'anu. <sup>27</sup> Ana ve sipisipimofo amumazina'anee ahihiza'anema huhampri zmanteku'ma erisga hunkama eri verave hankeno'ma ruotage'ma hu'neana e'i, Aronine, mofavre naga'amo'zama nesaza su'anu. <sup>28</sup> Israeli vahe'mo'za Nagri'ma arimpa fru ofama, amumazina'anee ahihiza'anena namisaza su'ana, Aronine mofavre naga'amokizmi suzanki, maka zupa zamitere hiho. <sup>29</sup> Aronina ruotge hu'nea pristi kukena'a ante'enkeno, agri naga nofipima agri noma

erisimofona erita ana kukena antaninteta asomu huta, azeri ruotage hiho. <sup>30</sup> Mago mofavre'amo'ma agri noma erino seli mono nompima ruotage'ma hu'nefinkama pristi eri'zama erisimo'a, ana kukena hu'neno 7ni'a zage knafina eri'zana erigahie. <sup>31</sup> Aronine ne' mofavre naga'anema huham-prinka zamazeri ruotage hu ofama hanana sipisipifintira, ame'a erinka seli mono nomofo atruhu kumapi kavofi kregahane. <sup>32</sup> Seli mono nomofo kafanteria Aroni'ene ne' mofavre naga'amo'za sipisipi afu'mofo ame'ane eka eka kupima bretima me'heanena eri'za negahaze. <sup>33</sup> Ana ne'zana pristi vahé manihogu'ma huhampri zamante'naza zupama zamagri'a kumiku'ma hu'naza ofagi'za zamagra'ake nesage'za, ru vahe'mo'za oneho. Na'ankure e'i ruotagetfa hu'ne. <sup>34</sup> Anama huhamprino zamazeri ruotage hu ofama hu'nea ve sipisipi afu ame'afi, bretio me'nesigeno'ma nanterasenigeta, onetma tevefi kre fanane hiho. Na'ankure e'i ana ne'zamo'a ruotage hu'ne. <sup>35</sup> Seveni'a zagegnafi Aronine ne' mofavre naga'arema huzmantoma hu'nama hugante'noa zantamina maka huzmante vagaro. <sup>36</sup> Mago mago zagegnarera bulimakao ahenka kumi'ma atre ofa hutere hutenka, Kresramana vu itama azeri agruma hu ofa nehunka, masevena frentenka eri ruotage hugahane. <sup>37</sup> Ama ana itarer 7ni'a zage knafi itama azeri agruma hu ofa nehugen, ana itamo'a me ruotagetfa huno me'nena, na'zamo'o ana itama avako'ma hania zamo'enena ruotage hugahie. <sup>38</sup> Mika zupama mago mago zage knare'ma ana itare'ma ofama hanunka, amanahu hunka ofa huo, tare sipisipirare mago zagegafu hu'nesa'a zanazerinka, <sup>39</sup> mago'mofona nantera ofa nehunka, hanki mago'mofona zagema ufrenaku'ma nehani-genka kinaga ofa huo. <sup>40</sup> Kota sipisipine ofama hananana, witi flauapintira mago kilo erinka, olivi masavea mago litafi eri hava hunka, ana sipisipinena ofa huo, ana nehunka mago lita wainia ofagna hunka tagi tro. <sup>41</sup> Hagi witigi, masavenki, waini tinema nanterama ofama hu'nana hunka, mago sipisipinena zagema ufrenaku'ma hanigenka Kresramana vuo. E'i ofa tevereti'ma kre fananehu ofa hunantage'na Ra Anumzamo'nama manama nentahi'na musema nehua ofae. <sup>42</sup> Menine henkama fore'ma hanaza naga'mo'za, maka zupa tevereti'ma kre fananehu ofa seli mono nomofo ufre kahanteria Ra Anumzamo'na navurera kresramna vuvava nehanage'na, anante kegaga eme tamasamigahue. <sup>43</sup> E'inama hanage'na anante Israeli naga'enena emanisugen Ra Anumzamo'na hankave masa'nimo anankumara azeri ruotage hugahie. <sup>44</sup> Ana hinke'na Ra Anumzamo'na nagra seli mono none, Kresramana vu itanena azeri ruotage nehu'na, Aronine mofavre naga'anena anahukna hu'na zamazeri ruotage ha'nena, nagri pristi eri'zana erigahaze. <sup>45</sup> Ana nehu'na Nagra Israeli vahe'mokizmi amu'nompi mani'ne'na, zamagri Anumza manisuge'za, <sup>46</sup> zamagra ke'za antahi'zama hanazana, nagrikura Ra Anumzanti mani'neno Isipitira tavareno e'neane hu'za nehanage'na, nagranena zamagri amu'nompi nemani'na nagrake'za zamagri Ra Anumzana manigahue.

## 30

### *Mnamavu zantamima kre mna vu itamofo naneke*

- <sup>1</sup> Mnama vu zantamima kre mnama vania ita, akasia zafareti tro hiho.
- <sup>2</sup> Ana itamofo za'za'amo'a 45'a sentimita hina, kahesa'amo'a 45'a sentimita huno, mika asopa'amo'a mago avamenteke mena, atrure'amo'a 90'a sentimita marerinkeno, ana itamofona 4'ama renagentetera ana itama

tro'ma hanana zafaretike pazivera tro huntetere huo. <sup>3</sup> Ana itamofona agofetu'agi, maka asopa'agi pazivetaminena goliretike anovazi nezmanteta, ana itamofo agema'aramintera goliretike avaretma avasasea hu kaginteho. <sup>4</sup> Golireti'ma avasasema hunte namofo henka kaziga, golireti tare rinia vimago azotama vazino eri sgama hu'zana ruga ruga asoparega tro huo. <sup>5</sup> Ana itama eri sgama huno vu vimago azota akasia zafareti tro hutenga golireti erinovazinto. <sup>6</sup> Ana itama antesazana seli mono nompima kasege ante vogisimofo agofetu asunku tra'ma refko'ma hige'na, Nagra'ma e'na nanekema eme hanua tra'ma refko hu'nea tavravemofo avuga anteho. <sup>7</sup> Aroni'ma maka nanterama lamu tavi'ma erinte fatgo hunaku'ma esuno'a, ana itarera mnanentake zantamina kresnigeno knare mana vugahie. <sup>8</sup> Kinaga zagema ufre'za nehanigeno Aroni'ma ete tavi'ma eme eri fatgo hunaku'ma esuno'a, ana itarera mnanentake zantamina eme kreno. Ana mnanentake zana menine henkama mani'zama vanaza vahe'mo'za kre'za nevinkeno, Ra Anumzamo'na navurera ana mnamo'a mevava huno vugahie. <sup>9</sup> Anama mnanentake zama kre mnama vu itarera, hu izo osu'nesua mana zano, kre fanana hu ofafi, witifi waini ti ofa ana itarera osiho. <sup>10</sup> Mago kafufina magoke zupa Aroni'a ama ana kre mnnavu itarera mago kafufima hu'naza kumizmi atre'zmante ofama hanaza sipisipi afu'mofo koranteti ana itamofo 4'a pazivetera frentena Ra Anumzamo'na navurera ana itamo'a ruotage huno meno. Ama ana avu'avazamo'a menine henkama fore'ma hanaza vahepina mevava huno vugahie.

### *Seli mono nompima zagoma antezamofo naneke*

<sup>11</sup> Hagi anante Ra Anumzamo'a Mosesenku amanage huno asami'ne, <sup>12</sup> Kagra Israeli naga'ma hamprinkama zamagima erisana zupa mago mago'mo'za knare'ma hu'za manisagura, Ra Anumzamo'narera mago'a zagoa miza hiho. Anama osnageno'a, anama hamprisaza knazupa zamazeri haviza hu'zamo'a zamagritera egahie. <sup>13</sup> Ko'ma ana maka vene'nema zamagima ante'nesamo'za, silvamofo kna'amo'a 6'a gremi hu'nesia silvareti Ra Anumzamo'na ofa eri atru hu'za eme namiho. <sup>14</sup> Kafu zamimo'ma 20reti mreri anagamate'nesia vene'nema zamagi erisnamo'za ana ofa zagoa zamigahaze. <sup>15</sup> Zmasimu'ma mizama hanazana, feno vahe'mo'za rugatere'za otrenkeno, zamunte omane vahe'mo'za erami'za osi'a otreho. Hagi mago'zahu avamente 6'a gremi hu'nesia silva eme atreho. <sup>16</sup> Israeli vaheteti'ma kumi'zamima apaseno mizase zagoma erisana zagoretira, seli mono nomofo erizante atresageno, e'i ana zamo'a Israeli vahe'mokizmi kumi atre'zmantena mizama sezmant'e noa avame'za Ra Anumzamo'na navurera me'nena antahi zamigahue.

### *Bronsire zuompamofo naneke*

<sup>17</sup> Ananter Ra Anumzamo'a Mosesena amanage huno asami'ne, <sup>18</sup> Kagra zamasamige'za bronsireti ra zuompamofo aga'ama tro'ma hanazana bronsireti tro hu'za, ana zuompamofo kresramna vu itamofo amu'no zanifi nente'za, anampina tina afinteho. <sup>19</sup> E'i ana zuompafina Aroni'ene ne' mofavre naga'amo'zanena zamagia zamazana sese hugahaze. <sup>20</sup> Aroni'ene ne' mofavre naga'mozanema Seri mono nompima ufrekupi, Kresramana vunaku'ma vanu'za, ana zuompafina zamagia zamazana sese hugahaze. Ana osanu'za frigahaze. <sup>21</sup> Zamagra zamagane zamazanema sese hanu'za ofrigahaze. Ama'i ana kasegemo'a Aroninteti agafa huno ne' mofavre

naga'are vanigeno, henkama zamagripinti'ma fore'ma hnamozanena ama ana kasegea amege ante vava hugahaze.

### *Masevama taginteno frenteno azeri ruotage'ma hunte'zamofo naneke*

<sup>22</sup> Ananter Ra Anumzamo'a amanage huno Mosesena asami'ne, <sup>23</sup> Kasamisua kante antenka mnanentake zantamina, kna'amo'a 6si'a kilo hu'ne'nia mananentake meregi, 3'a kilo hu'nesia sinamoni pauragi, mana nentake kurumpa karamusie nehaza kurumpa e'nerinka, <sup>24</sup> kna'amo'a 6'a kilo hu'nesia kasia traza rafunareti trohu pauragi, ana maka'zana seli mono nompima erigahane hu'nama kasami'noa avamenteke'za erinka, olivi masavema 4'a lita taginto. <sup>25</sup> Anazama eri haviamma huno'ma vahe'ma frezmanteno zamazeri ruotage'ma hu masavema tro'ma hu' antahi'zama eri'nea vahe ke hugeno, ana maka zana erihavia hinkeno mnanentake hute'na, ana masavemo'a me ruotage huno Nagri eri'za erisu'a meno. <sup>26</sup> Hagi ana masaventetira taginka seli mono nonki, kasegema ante vogisirera frenentenka, <sup>27</sup> itane ana itare'ma eri'zama eri zantaminki, tavi'ma rekru hunte zotane ana tavi zotare'ma eri'zama erizantaminki, mananentake zantamima kre mana vu itagi, <sup>28</sup> tevefima kre fanane hu ofama hu itane, ana itare'ma e'rizona eri zantamine, zamagia zamaza sesehu zuompane agianena, <sup>29</sup> masave fre zamantenka eri ruotage huzamantegeno, me ruotage huno me'nena mago zamo'ma ana zantaminte'ma avako'ma hania zamo'enena ruotageke'za hugahie. <sup>30</sup> Aronine ne' mofavre naga'anena masave taginka fre zamantenka zamazeri ruotage huge'za Nagri pristi eri'za vahe maniho. <sup>31</sup> Israeli nagara amanage hunka zamasamio, ama'i masavema frentesigeno Nagrite'ma zamazeri ruotage hu maseve menina me'neno, henkama fore'ma hanaza nagatera mevava hugahie. <sup>32</sup> Amne vahe'mofo avufgarera freontege, Nagrama tamasamugeta tro'ma hazankna hutma tamagra'a masavema trora osiho, agra ruotage hu'negu ruotage hu'ne hutma antahiho. <sup>33</sup> Nagrama kasamua kante anteno iza'o mnanentake masavema tro huge, tagino amne vahe'ma frentege hanimo'a, Israeli vahepintira maniganegahie.

### *Kre mnauv zantamimofo naneke*

<sup>34</sup> Huteno Ra Anumzamo Mosesena amanage huno asami'ne, Mnanentake paurama tro'ma hu zantamima erisnana, stetikie nehaza mnazanki, onikae nehaza mana zanki, galbanamue nehaza mana zane frenkinsies nehaza mnazantamina mago avamenteke'za erio. <sup>35</sup> Anazama tro hu antahi'zama eri'nesia eri'za vahe huntegeno, hagene ana paura ramina mago'za evu ofre zamagri'age eri hava huno kre mana vu paura tro hina mane ruotage huno meno. <sup>36</sup> Ana mana zantamimpintira mago'a erinka kanegeno paura forehina seli mono nompima, kasege ante vogisimofo avuga, nagrama kagranema keagama hanure anto. E'i ana pauramo'a ruotage hu'ne huta tamagra antahiho. <sup>37</sup> Ama'ima tamasamua kante anteta tamagra'a amanahukna mana vu paurana trora osutma, Ra Anumzamo'na navurera ruotage hu'ne hutma hiho. <sup>38</sup> Nagrama kasamua kante anteno iza'o mnanentake masavema tro huge, tagino agra'a frege'ma hanimo'a Israeli vahepintira maniganegahie.

<sup>1</sup> Hagi Ra Anumzamo'a Mosesena asamino, <sup>2</sup> Ko, Bezalelina, Uri nemofo Hurina negeho mofavre Juda nagapinti, Nagra agiae'na huhamprinte'na, <sup>3</sup> Nagra'a Avamuteti antevi antentenogeno mika'zama tro'ma hu antahi'zana erineno, tro hugara hu'neno, knare antahi'zanena eri'neankino, <sup>4</sup> goliretiki, silvaretiki bronsireti'enema eri avugosa huno avasesezama tro hu'zama, <sup>5</sup> havema taga hu eri'zane, regari tra'ma tro hu eri'zane, zafareti'ma eri eri'zama, ruzahu ruzahu zama azanuti'ma trohu antahintahia agu'afi ante avitente'noe. <sup>6</sup> Hanki Dani nagapinti Ahisameki ne'mofavre \*Oholiapuna, Bezalelima azama hanigura Ra Anumzamo'na huhamprinte'noe. Anahukna hu'na Nagra mika zama zmazanuti'ma tro'ma hu vahetamina, antahintahia nezami'na huhampri zmante'noankiza tro huo hu'nama hugante'noazana mika tro hugahaze. <sup>7</sup> Seli mono none, ruotage kasegema ante vogisine, asunku trarema nehaza avaza'ane seli nompi zantamine, <sup>8</sup> itane ana itare'ma eri'zama eri zantamine, goliretike trohu tavi azotane, ana azotare'ma eri'zama eri zantamine, mnanentake zama kre mnnavu itane, <sup>9</sup> kre fanane hu ofama hu' itane, ana itare'ma mika eri'zama eri zantamine, agazama sesehu zuompame ana zuompamofo aga'anee, <sup>10</sup> zagi'zama tro'ma hu'naza kukenaramine, pristi ne' Aroni'ma antanisia ruotage za'za kukenane, ne' mofavre'amozama antanine'za pristi eri'zama eri'za vnaza kukenaramine, <sup>11</sup> huhamprinteno frenentea masavene, ruotage hu'nefinka ante mnnavu zane, Nagrama tro hoho hu'na huramantoa kante anteta tro hugahaze.

### *Sabati knamofo naneke*

<sup>12</sup> Anante Ra Anumzamo'a Mosesena asamino, <sup>13</sup> Israeli vahera zamasmige'za mani fruhu knani'a (Sabat) kegava hoho. Na'ankure amu'nontinfina avame'za me'nena Ra Anumzamo tazeri ruotage hu'ne hutma nentahisageno, henkama fore'ma hu'za esaza vahe'mo'za ana zanke hu'za antahihahaze. <sup>14</sup> Hagi tamagra Sabatia ruotage hu'negu kegava hoho. Iza'o Sabatima kegavama osanimofona ahenefrita, mani fru knani'ama Sabati knare'ma eri'zama erisimofona naga'afintira ahenantitreho. <sup>15</sup> Eri'zama eri'sazana 6si'a zage knafi erigahazanagi 7ni kna zupa mani fru hugahaze. Ra Anumzamofontera ruotage hu'nea knagino, iza'o ana mani fruhu kna (Sabat) zupama mago eri'zama erisimofona ahe friho. <sup>16</sup> Israeli vahe'mo'za mani fruhu kna (Sabat) kegava nehanageno, henkama mani'zama esaza zamagehe'mo'za muse nehu'za ana mani fruhu huvempa knamofona kegava huvava hu'za vugahaze. <sup>17</sup> Ana Sabati knamo'a Nagri'ene Israeli vahe amu'nompine mevava avame'za megahie. Na'ankure 6si'a zagegnafi Ra Anumzamo'a monane mohanena tro huteno, 7ni kna zupa eri'zana atreno mani fru hu'ne. <sup>18</sup> Ra Anumzamo'ma nanekema Mosesema Sainai agonafina asami vagareteno'a, tare haverarente Anumzamo'ma azankonu erivakokino kre'nea kasege tafetrena Mosesena ami'ne.

## 32

### *Kaza osu anumza golireti bulimakao tro hu'naza naneke*

<sup>1</sup> Israeli vahe'mo'zama kazama Sainai agonaregati'ma koma Moses'e'ma omeno za'za knama umanige'za, Aroninte emeri atru hu'za amanage hu'naze, ugota huno tavreno'ma vania anumzantia tro huranto. Na'ankure

\* <sup>31:6</sup> Oholiapu'ema hu'nea agimofo agafa'amo'a, nenfa seli none hu'ne. Bezaleli'ema hu'nea agimofo agafa'a, Ra Anumzamofo kvafine huno hu'ne.

Isipiti'ma tavreno'ma atirami'nea nera Mosesena naza fore huntefi ontahune. <sup>2</sup> Aroni'a kenona huzmanteno, a'ne nagatamimo'zane ne' mofavretamimo'zane mofa'netamimo'za zamagesafima antani'nesaza golire rinia zafita nagrite erita eho. <sup>3</sup> Anagema hige'za mika vahe'mo'za zamagesare antani'naza golire rinia zafi'za Aroninte eri'za azageno, <sup>4</sup> ana golire riniramina zamazampinti erino kre ze'ze huno kaza osu havi anumza bulimakao afu tro hutege'za, anage hu'naze, Israeli vahe'mota Isipiti'ma tavre fegiteno e'nea anumzantie hu'naze. <sup>5</sup> Aroni'ma anazama keteno'a, Kresramana vu itare ana golire tro hu'naza bulimakao avuga tro hunteteno amanage hu'ne, okina Ra Anumzamofontega muse hunenteta ne'za negahune. <sup>6</sup> Mase'za nanterampina Israeli vahe'mo'za oti'za kre fanane hu ofa nehu'za, zamarimpa fru ofa hute'za, mani'za ne'zane tine nene'za tusia muse nehu'za, monko zamavu'zmava hu'naze.

<sup>7</sup> Anante Ra Anumzamo'a Mosesena asamino, Ame hunka uramio, na'ankure Isipiti'ma zamavare atirami'nana vaheka'amo'za havi avu'ava haze. <sup>8</sup> Nagrama zamasami'noa kasegea ame hu'za zamefi hunemi'za, kaza osu anumzana golire kre ze'ze hute'za bulimakao afu'mofo amema'a tro huntene'za, ana zante zamarena re'za mono hunente'za Kresramana vunente'za amanage hu'naze, Israeli vahe'mota ama anumzantimo Isipitira tamavre fegiteno e'ne hu'za hu'naze. <sup>9</sup> Ra Anumzamo'a Mosesena asamino, Israeli vahe'ma Nagrama zamagoana ke'ontahi vahe mani'aze. <sup>10</sup> Menina tusi narimpa aheanki'na natrege'na zamahe fanene hute'na, kagripinti rankumuva vhahera azeri fore ha'neno.

<sup>11</sup> Hianagi Ra Anumzama'amo asunku'ma hanigu Mosesea' hanavetino antahigeno anage hu'ne, Ra Anumzamoka na'ante tusi'a hanaveka'areti ene kaguvaazanteti Isipiti zamavare fegi atre'nana vaheka'a krimpa hezamantegahane? <sup>12</sup> Na'a hanige'za Isipi vahe'mo'za Ra Anumzamo'a havi agu'agesaregati ama mopafintira zamahe fanene hu'naku agonarega zamavare fegi atreno vu'ne hugahaze? Nagaka'a krimpa heozmantenka, krimpa fru hunezmanutenka vaheka'a zamahe ofrio. <sup>13</sup> Eri'za vaheka'aramima Abrahama, Aisakine, Israelima (Jekopu) Kagraka'are'ma huvempa huzmantenka, tamagehe'mo'za rupazi hu'za monare me'nea hanafitaminkna nehanage'na, ama mopa huvempsa hu'na zamisuge'za tamagehe'mo'za erisanti hare'za manivava hugahaze hu'nana kegu kagesa antahio. <sup>14</sup> Higeno Ra Anumzamo'a rimpa ahezmanento zamahe fanane hugahue hu'nea knazampintira antahintahi'a rukrahe huno vahe'a zamahe fanane osu'ne.

<sup>15</sup> Ana agonareti Mosesea' tare haverarente tarega kaziga Ra Anumzamo avoma krente'nea kasege e'nerino ete urami'ne. <sup>16</sup> Ana have tafetrena Anumzamo Agra'a trohu'ne. Avoma kre'nea avona Anumzamo tagahuno ana have tafetretera krente'ne.

<sup>17</sup> Israeli vahe'mo'zama rankegemha hazza zamagasasa kema Joshua'ma nentahino'a, kumapina ha' nehugahaze huno Mosesena asami'ne. <sup>18</sup> Mosesea' ke nona huno, Ha' vahe'mokizmi ha'ma huzmante'za zamazeri zmagatere'naza zmagasasa omane'ge no, ha' vahezmi'mo'za ha' huzmante'za zamazeri zmagatere'naza zamagasasa omane'neanki zagame nehaza zamagasasa nentahue.

<sup>19</sup> Mosesea'ma ana kumate uravao nehuno, ana golire bulimakaonte'ma vea'mozama avoma nehagazama'a ome negegeno, tusi rimpa hegano ana kasegemha me'nea have tafetrena mate'vuno atregeno ana agonomofo agafi ru frege'ne. <sup>20</sup> Anama tro'ma hu'naza golire bulimakaona Mosesea' erino

tevefi kreteno ana goli'a ru fuzafupegeno tanefa setegeno, erino timpi rupopo hutreteno, Israeli vaheku neho hige'za, ana tina ne'naze.

<sup>21</sup> Anama huteno Mosese'a Aronina antahigeno, Ama vahe'mo'za na'a hugantazagenka tusi'a kumpipina zamavarenka ufrane? <sup>22</sup> Aroni'a kenona Mosesena hunteno, ranimoka krimpa heonanto, kefo avu'avazanke hu vahe mani'nazagenka kagra antahi'nane. <sup>23</sup> Na'ankure zamagra amanage hu'za nasami'naze, vugotama huranteno vania anumzantamina tro huranto, Isipiti'ma tavre fegi'a atreno e'nea nera Mosesena na'a fore hifi ontahi'none. <sup>24</sup> Nagra zamasami'na golire riniramima hu'nesamota zafinamaho huge'za zafinamizage'na tevefi krogeno, ana golire bulimakao efore hu'ne.

<sup>25</sup> Mosese'a keama ana Israeli vahe'ma Aroni'ma kegava huso'e huozman-teno, zamatrege'za tuzisa hu'za avoma nere'za kefo zamavu'zmavazama nehazageno, ana zamavu'zmavama hazazamo'a ha' vahe'mokizmi zmavurera kiza zokago hu'za neginagi vahekna hu'naze. <sup>26</sup> Mosese'a ana kumamofo efre kafante otino amanage hu'ne, Ra Anumzamofo kazigama mani'nesamoka nagrite eno, higeno mika Livae naga'mo'za Mosesente e'naze. <sup>27</sup> Anante Mosese'a Livae nagara zamasamino, Israeli vahe'mokizmi Ra Anumzamo'a amanage huno nehie, magoke magoke vahe'mota bainati kazinknona anomaa'fi vazinteta zmasoparega anakintenko me'nena kumamofo atumparega vuta eta nehuta, magoke magoke'mota nermafune knampatamine, tava'ontamire'ma maninazamokizmia zamahe friho. <sup>28</sup> Mosese'ma huzmanteaza hu'za Livae naga'mo'za, ana zupa 3 tauseni'a Israeli vahe zamahe fri'naze. <sup>29</sup> Anama hutageno Mosese'a anage huno zmasamine, menina Ra Anumzamo'a tamagrira tamazeri ruotage hie. Na'ankure tamagra'a ne' mofavretamine nermafugazmine zamahe fri'nazagu Ra Anumzamo'a menina asomu huramante.

<sup>30</sup> Anante knazupa Mosese'a Israeli vahera zamasmino, Tusi'a kumi hazanagi menina Ra Anumzamofonte vu'na kumitamima atrermantessia zankura keaga ome hu'na kegahue. <sup>31</sup> Mosese'a Ra Anumzamofonte ete vuno anage hu'ne, Israeli vahe'mo'za ana osuga vahe'mo'za tusi'a kumi hu'za golire havi anumzazmia tro hu'naze. <sup>32</sup> Hianagi menina Kagrama kasunku'ma huzmantesunka kumi'zmina atrezmanto, anama osanunka avontafepima nagima krente'nanana rehanano. <sup>33</sup> Ra Anumzamo'a Mosesena kenona'a hunteno, iza'o kumi'ma hu'nesimofonke avontafen'i afintira agia rehanenegahue. (Rev-Hufo Hu'ne 3:5) <sup>34</sup> Hagi menina vunka, kema hu'noa kumatera zmavrenka nevugeno ankeronimo'a vugota hurmanteno tamavreno vugahie. Hianagi zamazeri havizama hanuanknama esige'na, kumi'ma hazarera nona hu'na zamazeri haviza hugahue.

<sup>35</sup> Aroni'ma golire bulimakao tro'ma hunte'nege'za musenkasema hu'naza zantera, Ra Anumzamo'a knazanteti Israeli vahera zamahe'ne.

## 33

### Sainai agona atre'za vnaza naneke

<sup>1</sup> Anante Ra Anumzamo'a Mosesena asamino, Abrahamuma, Aisakima, Jekopuma hvempa hu'na tamagehe'ima zamigahue hu'noa moparega, ama kumara atrenka kagrane Isipiti'ma zamavare fegi atrenka e'nana vahe'enena viho. <sup>2</sup> Ankero vahe huntesugenno vugota hurmanteno Kenani vahe'ma, Amori vahe'ma, Hiti vahe'ma, Perisi vahe'ma, Hivi vahe'ma, Jebusi vhahetamina ana mopafintira zamahe natitregahie. <sup>3</sup> Hagi amirimo'ene

tumerimo'ma avi'mate'nea moparega mareriho. Hianagi Nagra tamagranena ovugahue. Na'ankure tamagra ke ontahi vahe mani'nazanki'na kantega tamahe frigahue. <sup>4</sup> Israeli vahe'mo'za ana zamazeri havizama hania nanekema nentahi'za zavi krafa nehu'za mago'mo'e huno avufgara era avasesezana osu'ne. <sup>5</sup> Na'ankure Ra Anumzamo'a Mosesena asamino, Israeli vhahera zamasamio, zamagra ke ontahi vahe mani'nazanki'na Nagrada zamgranema vanu'na ame hu'na tamahegahuanki menina tamavugareti tamavasese zana erinetrenke'na Nagrada huramante'nua zankura antahi'neno. <sup>6</sup> Hige'za Israeli vahe'mo'za zmavasesezama hu'naza zana, Horepi agonafi zaftrete'za amane vu'naze.

<sup>7</sup> Hagi Moses'a nehiaza huno kuma'mofo fegia ogantu mago seli no azeri otino kinenteno, Ra Anumzane atruhu seli mono none huno agia antem'i'ne. Ra Anumzanema keaga hunaku hanimo'a, kumamofo fegi'a ana seli nonte vugahie.

<sup>8</sup> Ana seli nontegama Moses'e'ma nevigeno'a, mika Israeli vahe'mo'za seli nozamimofo kahante otine'za negazageno, Anumzanema atru huno keagama hu seli nompina ufretere hu'ne. <sup>9</sup> Moses'e'ma ana seli nompima anama ufreterema nehigeno'a vimago hampomo eramino seli no kafante eman'i'negeno, Ra Anumzamo'a Moses enena keaga hu'ne. <sup>10</sup> Israeli vahe'mo'za ana hampomo'ma Anumzanema atruhuno keagamahu seli nomofo kafante oti'nege'za nege'za, mika'mo'za oti'za seli nozamimofo kafante zamarena re'za monora huntetere hu'naze. <sup>11</sup> Ra Anumzamo'a Moses ene oge age nehuno rone'anema keaga hiankna huno nanekea hu'ne. Moses'e'a anama huteno eteno kumapi vugahianagi, azama nehia nera, Nuni nemofo Josua'a ana seli nompina maka kna nemanie.

### *Mosesene Ra Anumzamofo hihamu masa'amofo naneke*

<sup>12</sup> Moses'e'a Ra Anumzamofona asamino, Ko ama'i vahetamina vugota huzamantenka zmavrenka mrerio hunka Kagra nasami'nane. Hianagi iza'ene hurantegahane, Kagra onasami'nane. Navesinegante'na kagika'a antahi'noe hunka hu'nane. <sup>13</sup> Kagrama tamage hunka kavesima nantesunka, Kagraka'a kavukavara rempi hunamige'na nentahi'na kavesi zankura hakevava haneno. Hagi Israeli vhahera Kagri vaheki kagesa antahizamio. <sup>14</sup> Ra Anumzamo'a kenona huno, Nagra kagrane mani'na nevu'na manifrua kamigahue. <sup>15</sup> Hagi Kagrama, tagranema ovannuka, tatregeta ama kumara atreta ovamneno. <sup>16</sup> Nagri'ene Israeli vahe ka'anema Kagrama ovananke'za, inankna hu'za ru vahe'mo'za tavesinerantane hu'za antahigahaze? Kagrama tagranema vananke'za mika ama mopafima mani'naza vahe'mo'za tagrikura ruzahu vahe mani'naze hu'za hugahaze. <sup>17</sup> Hagi Ra Anumzamo'a Mosesena asamino, Anama nantahigana zana hugahue. Na'ankure Nagra muse hunegante'na kagika'a antahi'noe. <sup>18</sup> Anante Moses'e'a huno, Menina hanave nentake masaka'a naveri huo higeno, <sup>19</sup> Ra Anumzamo'a huno, maka knare navu'nava zani'ane kavuga enevu'na, nagini'a huama hu'na Ra Anumza mani'noe hu'na hugahue. Hagi nasuma raginte'naku'ma hanumofona, nasu raginente'na, nasuma raginte'na azama hunaku'ma hanumofona, agampu hunte'na aza hugahue. <sup>20</sup> Hianagi Nagri navugosa kagra onkegahane. Na'ankure nagesimo'a frigahie. <sup>21</sup> Hagi ko, antu have agofetu oti'nesanke'na, <sup>22</sup> hanave nentake masani'ane kavuga evu kagatenere'na enevu'na, have kankamunpinka kavre'na nazanu rufitegante'nena kagatere'na enevu'na, <sup>23</sup> nazana erisga ha'nena namefi'age kegahane. Hianagi navugosafina onagegahane.

## 34

*Havere kasege rutma huteno kasefa kasege kre'nea naneke (Diut-Kasege 10:1-5)*

<sup>1</sup> Ra Anumzamo'a Mosesena asamino, Ese tare have tafeckna hunka tare have tafe taga huge'na, ese'ma tare have tafete'ma me'nea nanekema ruta-mana'ma hu'nana nanekea krentaneno. <sup>2</sup> Oki nanterana retro hunka Sainai agonafi mani'nesurega emarerio. <sup>3</sup> Magomo'e huno kagranena ana agona-fina omege, bulimakao afu'zagane sipisipi afu'zaganena ana agonamofo agafina trazana apri'za oneho. <sup>4</sup> Higeno Mosese'a Ra Anumzamo'ma huo huno'ma hunteaza huno, ese tare havegna have tafe taga huno azampi e'nerino, nanterampi Sainai agonarega mareri'ne.

<sup>5</sup> Anante Anumzamo'a hampompi eramino Mosese ene eme oti'neno, Ra Anumza mani'noe huno agi'a huama hu'ne. <sup>6</sup> Mosese avuga Ra Anumzamo'a evu agatereno nevuno, huama huno Nagra Ra Anumzane, Nagra Ra Anumzane, vaheku nasuragint'e na zmazahu Anumzane. Ame hu'na narimpa ohe'na, vaheku zmavesi zmante'na hugahuema hu'nama huaza hufatgo hu'na nehua Anumzane. <sup>7</sup> Nagra rama'a tausen'i vahe zamavesi zmante'na, kefo avu'ava'ma nehu'za, kema nontahi'za kumi'ma nehaza vahera kumi'zmia atrenezamantao Anumzane. Hianagi kefo zama-vu'zmavama nehaza vahera ozamatre'na, anama haza zantera kna nezami'na, mofavre'amokizmine agehemofone agigomokizminena zma-hegahue. <sup>8</sup> Mosese'a ame huno mopafi arena reno mono hunteno, <sup>9</sup> Ra Anumzamoke, Kagri kavure'ma kavesi'nea navu'nava'ma nehanu-genka, muse hugantoanki tagranena vuo, ke ontahi vahe mani'nonanagi Ra Anumzamoka kefozantine kumitinena atrenerantenka, kagraka'a va-heka'agna hunka tavro.

<sup>10</sup> Anante Ra Anumzamo'a huno, Nagra kagrane huvempa nehue, mika Israeli vaheka'afina korapara mika mopane mopane kumapina osu'noa kaguvaaza erifore hugahue. Tamagrane manisaza vahe'mo'za Nagrama Ra Anumzamo'na hanuazana nege'za antahintahi hakare hu'za koro hanazaza kagripina eri fore hugahue.

<sup>11</sup> Menina huoma hu'na hugantoaza amage anto. Nagra esera Amori vahe'ma, Kenani vahe'ma, Hit'i vahe'ma, Perisi vahe'ma, Hivi vahe'ma, Jebusi vahera zamahenati atregahue. <sup>12</sup> Kva hu'neta anama nevaza mopafi vahetaminena eri hagerafitma mani huvempa kea osiho. Ana vahe'mo'za amu'nontamifina krifugna hu'za tamazeri haviza hugahaze. <sup>13</sup> Hianagi kresramnavu itazmia anafe nehuta ruotage'ma hu'nea havezmira rutamana nehuta zafare antre'za tro huntene'za mono huntentza asera zafram-inna antagitreho. <sup>14</sup> Ruga'a anumzantera monora huontheho, na'ankure ru anumzante'ma mono'ma huntesageno'a Ra Anumzamofo agia kanivere Anumzankino, kanive reramantegahie. <sup>15</sup> Ana mopafi nemaniza vahetam-nena eri hagerafino mani huvempa kea osiho. Na'ankure anumzazmire'ma kresramna nevu'za, ru vene ome savri hiankna hu'za havi anumzante mono hunente'za, tamagima hanageta kresramna vanaza ne'za zamia negahaze. <sup>16</sup> Ana nehuta Israeli vahe'mota ne'mofavretamire'ma ana mopafi a'nema erizamisaza a'nemo'za, ru vene savri hiankna hu'za anumzazmire monora hunente'za, ana ne'mofavretamia zamazeri savri hanage'za, ru vene savri hiankna hu'za zmagranena Anumzamo'na natre'za ru anumzante monora huntegahaze.

<sup>17</sup> Kaza osu anumzantamina aenia kre mra'mra hutma trora osutfa hiho.

<sup>18</sup> Zisti onte bretima nenaza knarera tamagera okanitma ne'za tro huta neneta musena hiho. Hanki 7ni'a zagegnafina zisti onte breti neho hu'na huramante'noe. Na'ankure Abib\* ikampi huhamprinte knare anara hiho hu'na huramante'noe. Na'ankure ana ikampi Isipitira etirami'naze.

<sup>19</sup> Ese'ma kasentesia ne'mofavrene, ese'ma kasentesia bulimakao afuro sipisipi afutamina, Nagri su'zane. <sup>20</sup> Ese'ma kasentesia ve donki afura, sipisipi afu anenta aheta ofa hutma ete mizaseho. Hianagi aheta ofa hutma miza osesuta, ana ve donki afura anankema'a eri vamagita ahe friho. Hagi ana miko ese ne'mofavretamimofo nona'a huta mizaseta zamavareho. Mago'mo'e huno Nagri navurera aza avapakora omeno.

<sup>21</sup> Hagi 6si zage knafi eri'zana eriho. Hianagi 7ni zageknarera mani fru hiho. Hozama hagolino ante knarero, ne'za hamare knare enena mani fru hiho.

<sup>22</sup> Ese ne'zama hamare musema hanaza knarera, ese witireti ne'zana kreta neneta, musena nehuta kafumofo atuparega witima hamare vagare ne'zana kreta neneta musena hiho.

<sup>23</sup> Mago kafufina 3'a zupa mika Israeli vene'nemo'za tusi'a hihamu'ane Israeli Ra Anumzamofo avurera eho. <sup>24</sup> Tamagrama ana huta mago kafumofo agu'afima 3'a zupama Ra Anumzamo'na navure'ma vanage'n'a, Nagra mopatamia erira nehu'na, ana mopafi vahe'mokizmia zamahe natira'nena, mago vahe'mo'a ana mopatamia kenunu nehuno, hara huramanteno mopatamia e'origahie.

<sup>25</sup> Hagi korane zistima me'nlesia zanura Nagritera ofa huta Kresramana oviho. Ra Anumzamo Israeli vahetamia ozmaheno zamagatere'nea knagu antahimiza, muse ne'za kre'za nesaza kenegera, nege'atreg'e'ma hanaza ne'zamo'a me'nenkeno masa osino.

<sup>26</sup> Ese zana Ra Anumzanka'amofo nontega ese'ma knare ne'zama mopafinti fore'ma haniana erinka vuo. Hagi meme afu anentara nerera amirimpina onkro.

<sup>27</sup> Anante Ra Anumzamo'a Mosesena asamino, Ama nanekeramina krento, na'ankure ama ana nanekeraminteti kagri'ene Israeli vahe'enena eri hagerafi huvempa kea nehue. <sup>28</sup> Moses'e'a 40'a zagegnagi 40'a haninki huno nezane tinena oneno ana agonafi maninegeno, Ra Anumzamo'a 10ni'a kasegea tare have tafetera avona krente'nne.

### *Mosese avugosamo masanentike hu'nea naneke*

<sup>29</sup> Moses'e'ma Sainai agonaregati'ma kasegema krente'nea tare have tafe'ma azampi eri'neno e'neramino'a, avugosamo'ma masanentike hu'nema'a antahinokenora osu'ne. Na'ankure Ra Anumzane keaga hu'ne. <sup>30</sup> Aroni'ene mika Israeli vahetamimo'zama Mosesema kazana, avugosamo'a masanentike hu'nege'za, ta va'oma'are'ma Israeli vahe'mo'za e'zankura kore hu'naze. <sup>31</sup> Hianagi Moses'e'a ke hige'za Israeli vahe'mo'za erava'o hazageno, Sainai agonafigma Ra Anumzamo'ma mika ami'nea kasegea Moses'e'a zamasami'ne. <sup>32</sup> Ana hutazageno, mika Israeli vahe'mo'za Mosesente erava'o hazageno, Sainai agonafigma Ra Anumzamo'ma mika ami'nea kasegea Moses'e'a zamasami'ne. <sup>33</sup> Moses'e'ma nanekema zmasami vagarete'noa tavrave erino avugosa refite'ne. <sup>34</sup> Hianagi Ra Anumzamo'enema keagama hunaku'ma atruhu seli nompima Moses'e'ma ufreterema nehuno'a, ana tavravea eritreteno unefreno, ete

\* <sup>34:18</sup> Abib ikanema hu'neana, tagri ikamofona, 7ni ikana vagaretegati vuno 8ti ikamofona agafa hutegagu hu'ne.

atineramino'a, Ra Anumzamo'ma ome zamasamio hu'nomā asami'neā kea Israeli vahetamina nezmasamige'za,<sup>35</sup> avugosamo'ma masanentike hu'neama'a kazageno, ete tavravenuti avugosa refite'neno keaga huteno, ete Anumzanema keagama hunakura eri atre'ne.

## 35

### *Mani fru hukna Sabatimofo naneke*

<sup>1</sup> Mosese'a mika Israeli vahera zamazeri atru huno zamasamino, Ra Anumzamo'a ama kasege amage anteho huno huramante'ne. <sup>2</sup> Sigisi'a zageknafi eri'zana eriho, hianagi 7ni zageknarera Ra Anumzamo'ma mani fru hihō huno'ma huramante'nea ruotage hu'nea knagita mani fru hugahaze. Iza'o ana zageknafima eri'zama erisimofona ahe friho. <sup>3</sup> Mani fru knazupa Sabatirera nemaniza kumatamimpina tevea huonkreho.

### *Seri mono none agu'afi zantamimofo naneke*

<sup>4</sup> Mosese'a mika Israeli vahera zamasmino, amanahu'za hihō huno Ra Anumzamo'a hurmante'ne. <sup>5</sup> Tamagra Ra Anumzamofontera ofa erita echo. Iza'o agu'areti'ma huno ofama hunaku'ma Ra Anumzamofonte'ma hanimo'a, goline, silvane bronsine, <sup>6</sup> hokonkenofiki, fitunkenofiki, korankenofite ene, zmanazmananofite tro hu'nesia tavravene, meme afu'mofo azoka'ene, <sup>7</sup> ve sipisipi afutamimofo akrutami eri korankre hu'nesazane, hagerimpi bulimakao afutamimofo akrutamine akasia zafane, <sup>8</sup> tavi'ma rekru hunte olivi masavene, vahe'ma huhampinte masavempima antegenomnanentake nehia zantamine, krewnama vu'zane, <sup>9</sup> oniksie ne-haza havene, pristi vahe'mo amega antani kukenane amimizare'ma antani kukenare'ma rekamrente havea ofa erita echo.

### *Seli nomā kisaza vahe'mokizmi naneke*

<sup>10</sup> Amu'nontamifinti'ma mika'zama knare'ma huno trohu antahi'zama eri'naza vahe'mota eta Ra Anumzamo'ma mika zama tro hihō huno'ma huramante'nea zana eme tro hugahaze. <sup>11</sup> Hagi Seli mono none, ana nomofo refite tavraveramine, eri fagaginte'nē tavrave hanti riniramine, no zafaramine, rugeka zafaramine, retrure zafane, regrinte tra'an, <sup>12</sup> kasegema ante vogisine, erisgama huno vu zafararene, ana vogisimofo avaza'a e'i asunku trarema nehaza avaza'anē seli nompima hunaragintegeno ruotage'ma hu'neama'ama refitenia tavravene, <sup>13</sup> bretima ante itane, eris-gama huno vu azotararene, maka ana itare'ma eri'zama eri'zantamine, Anumzamofo avure'ma me' bretine, <sup>14</sup> tavi'ma rekruhu azota'anē mago'a zantamima'ene tavitamine, tavi'ma rekruhu masavene, <sup>15</sup> mnanentike zantami kre itane ana itama erisgahu zafararene tagino frenteno huhampinte masavene, kre mnauv zantamine, seli mono nomofo ufre kahante tafinte tavravene, <sup>16</sup> kresramnavu itane, bronsireti rama'a karami hagente'za strena knaza tro huta anaga tevema hugre'afina runekamareta erisgahu azotararene ana itare'ma eri'zama eri'zantemine agi'ama me'ne bronsire zuompane, <sup>17</sup> seli no kumamofo avazagi kagi tavraveramine, retrure zafaramine, ana zafaramima regri tra'aramine, seli nomofo kumapi ufre kafante tavravene, <sup>18</sup> seli mono nomofo tavravene, kuma'ma avazagi kagi keginamofo tavravema avazuhumpi huno anaki azotane nofi'anē, <sup>19</sup> pristi vahe'mo'za antanine'za ruotage hu'nefinka eri'za erisaza ruotage kukena haneta tro nehuta, Aronine ne'mofavre'aramimo'za antanine'za pristi eri'zama erisaza kukena tro hihō.

<sup>20</sup> Anante mika Israeli vahe'mo'za Mosese'enema mani'nazaretira atre'za vu'za e'za hazageno, <sup>21</sup> mika zmagu'amo'ma otige'za amisunema hu'zama haza vahe'mo'za atrumahu seli mono nomi kisaza zane, ruotage hu'nea kukanaramine eri'za Ra Anumzamofonte ofa e'naze. <sup>22</sup> Mika zmagu'amo'ma otia vene'nemo'zane a'nemo'zanena golireti ruzahu ruzahu avasase zama tro'ma hu'nea zantamina, zmanankempi antani'nazane, zmagesafi taf'i'zana rinine, zamazampi antani'naza rinine, zamanankempi hu'zane, eri'za e'za Ra Anumzamofonte eri verave hu ofa hu'naze. <sup>23</sup> Mika hokonkero, fitunkero, koranke nofiro knare huno zamana'zmana hu'nesia nofiro, memekimofo azokaro, ve sipisipi afu akru'mofo eri koranke hu'nesia akrutamino, hagerimpi bulimakao afu'mofo akrutamima ante'namo'za eri'za e'naze. <sup>24</sup> Mago'a vahe'mo'zama silvane bronsine ofa Ra Anumzamofonte eri'za eme nemizageno, akasia zafama ante'naza vahe'mo'za eri'za e'naze. <sup>25</sup> Nofi'ma zamazanu'ma zagi'ama antahi'nesaza a'nemo'zama hokonkero fitunkero koranke nof'i'ma zmanazmana nofiteti tro hunte'nesaza tavravea eri'za echo. <sup>26</sup> Nofi'ma zamazanu'ma zagi antahi'zama eri'naza a'nemo'zama, maka zmagu'amo'ma otinke'za nof'i'ma zaginaku'ma hanu'za meme afu'mofo azokatetinofira zagiho. <sup>27</sup> Hagi kva vahe'mo'za oniksie nehaza hav'eramine, mago'a zago'amo'ma marerisa haveramina pristi vahe'mo'zama amega antani kukanare'ene amimizare'ma antani kukanare'ma rekamrente'zana erita echo. <sup>28</sup> Ana kva vahe'mo'za mnama vu tanefatamine, tavi rekruhu olivi masavene, vahe'ma tagino frenteno huhamprinte masavene, kregeno mnama vu'zane eri'za e'naze. <sup>29</sup> Mika Israeli vene'nemo'zane a'nemo'zanema, zamagu'amo'ma oti'nea vahe'mo'za Ra Anumzamofonte ofa eri'za e'naze. Ra Anumzamo'ma eriho huno'ma huzmante'nea eri'za erisagu eri'za e'naze.

### *Anumzamo eri'zama kegava hanaza vahe huhamprizmante'nea naneke*

<sup>30</sup> Anante Mosese'a Israeli vahera zmasamino, Keho, Ra Anumzamo'a Bezalelina Uri nemofo Huri negeho Juda nagapinti huhamprinenteno, <sup>31</sup> Anumzamofo Avamu antevitenenteno, knare antahi'zane, ama' antahi'zane, mika zama azanu'ma tro'ma hu antahi'zane, <sup>32</sup> golireti'ene, silvareti'ene, bronsireti'ma avasesezama trohu antahi'zana ami'ne. <sup>33</sup> Ana nehuno havema tagahuno eri ante fatgohu antahi'zane, zafare'ma hanagatino eri'zama eri antahi'zane, mika ruzahu ruzahu kasefa zantamima tro'ma hu antahi'zane ami'ne. <sup>34</sup> Bezaleline Ahisameki nemofo Oholi-apu, Dani nagapinti ne'enena vahe'ma rempima huzami antahi'zana Ra Anumzamo'a znam'i'ne. <sup>35</sup> Ra Anumzamo'a maka ruzahu ruzahu zante'ma azanu'ma hanagatino tro'ma hu antahi'zane, eri'zama retrohu antahi'zane, hokonke'ma, fitunke'ma koranke tavravere'ma hatino avoma kreno avasese zama'ama tro'ma hu antahi'zane, nofi'n'u'ma haneno zamana zamana tavravema trohu antahi'zana zanami'ne.

## 36

### *Seri mono nomi kisaza zama eritru hanaza zamofo naneke*

<sup>1</sup> Hagi Bezaleli'ene Oholiapu ene mago'a naga'enema Ra Anumzamo'ma antahintahima zamige'za seli mono nomi ki' eri'zama antahi ankere'naza vahe'mo'za, Ra Anumzamo'ma hihoma huno hu'nea kante ante'za ana maka zana tro hugahaze.

<sup>2</sup> Anante Mosese'a Bezaleline Oholiapune Ra Anumzamo'ma antahintahima zamige'za eri'zama antahi ankere'ne'za eri'zama eriku zame'nesia vahe'mokizmia zamagi huno eri'za erigafa hihohu'ne. <sup>3</sup> Israeli vahe'mo'za

Anumzamofo seli mono noma kisnazegu'ma eri'za eme ami'naza muse zantamina, Moses'a ana maka'zana erino eri'zama eri vahera zami'nne. Hagi maka nanterana Israeli vahe'mo'za zmagu'am'o'ma otimo'za zamesi zante musezana eri'za eme amitere hu'naze. <sup>4</sup> Anumzamofo seli mono noma ki eri'zama antahi ankere'naza vahe'mo'za mono noma ki eri'za zamia atre'za, <sup>5</sup> Mosesena eme asami'za, Ra Anumzamo'ma erita ehoma hu'nea avamena rugatere'za Israeli vahe'mo'za rama'aza eri'za azageno eri'zana eri vagarega hu'nege'za, ete mago'ane rama'a eri'za neaze. <sup>6</sup> Moses'a amanage huno kea Israeli vahetega atre'ne, mago a'mo'o vemo'o Anumzamofo seli mono no ki'zane huno mago'ane musezana erino eme otreno, hige'za anankea Israeli vahe'mokizmi amu'nompi hugantigama hazage'za, mago'anena Israeli vahe'mo'za mono noma ki zantamina eri'za ome'naze. <sup>7</sup> Na'ankure, ko'ma Israeli vahe'mo'zama eri'za emetre emetre hu'naza zantamimo'a Anumzamofo seli mono noma ki' avamentera ko agateregeno, mago'a zantamina amne mega hu'ne.

### *Anumzamofo seri mono no ki'naza naneke (Ekso-Atr 25:10-22)*

<sup>8</sup> Tavravema hane antahi'zama antahi'naza vahe'mo'za 10ni'a tavrave hati'naze. Ana tavrave nofi'nu avonkreno hati antahi'za eri'nea ne' Bezaleli'a ana tavraveramintera hokonkenofiki, fitunkenofiki, koranke nofinu'ene hatino seravimie nehaza ankeromokizmi zmema'a tro hunte'ne. <sup>9</sup> Ana maka tavravemofo zaza'amo'a 12 mita higeno, atupa'amo'a 2 mita higeno urefa erefa'amo'a mago zanke hu'naze. <sup>10</sup> Hagi 5fu'a atupa'aramina rehatigeno, magoke za'za tavrave fore higeno, anahukna huno ru 5fu'a tavravemofo atupa'aramina rehatigeno, magoke za'za tavrave fore hu'ne. <sup>11</sup> Anante ana za'za tavravereremofo tupa'arera tare tavravere'ma eri hagerafi atupa'ama tro'ma hu'neana hokonke tavravenuti tro hu'ne. <sup>12</sup> Mago za'za tavravemofo atupa'arera tavravereti tro hu'neana 50'a hagerafi atupa'ama tro'ma hu'neana, anakinte anakinte huno evu'ne. Ete mago zaza tavravemofo atupa'are enena ana zanke huno ru 50'a eri hagerfi atupa'ama tro hunte'nea anakinteno evigeno eri hagerafi atupa'aramina, rugaraga mago trente metere hu'ne. <sup>13</sup> Anantereta tare tavravere'ma 50'a eri hagerafi atupa'ama tro'ma huntenefina, eri hagerafino eri ruhamprigeno, golireti eri korave huno 50'a rini kana tro huteno, ana tare tavravea eri rusi higeno, ana tavraveraremokea erimago huke me'na'e.

<sup>14</sup> Anante seli mono nomofo agofetu'ma refitesia zana, meme afu'mofo azokateti 11ni'a tavraverami tro hu'ne. <sup>15</sup> Ana 11ni'a tavraveramimofo zaza'amo'a 13 mita hazageno, atupa kizaga'amo'a 2 mita hu'za mago zanke hu'naze. <sup>16</sup> Ana 11ni'a tavravefintira 5fu'a tavraveramina erinte mago huno hatigeno magoke za'za tavrave fore higeno, ana zanke huno 6si'a tavraveramina erinte mago huno hatigeno magoke za'za tavrave fore hu'ne. <sup>17</sup> Anante mago za'za tavravemofo atupa'arega eri hagerafi atumpa'a 50'a tavravereti trohu nenteno, ete mago za'za tavravemofo atumparega ana zanke hu'ne. <sup>18</sup> Anante 50'a eri hagerafino eri ruhampri'zana bronsireti eri korave huno 50'a rini kana tro huteno, ana tare tavravea eri rusi higeno ana tavraveraremokea erimago huke me'na'e. <sup>19</sup> Anante seli mono no refite tavravemofo agofetu mago'ane refite'zana ve sipisipi afutamimofo akрутами eri koranke hu'nea akru'anu refite'ne. Mago'ane ete ana agofetu'ma refite'neana hagerimpi bulimakao afutamimofo akрутети tro hu'nea zanu refite'ne.

<sup>20</sup> Hagi seli mono nomofo retrure zafama tro'ma hu'neana, akasia zafareti tro hu'ne. <sup>21</sup> Ana seli noma eri otino ki'nea zafaramimofo zaza'amo'a, 4'a mita higeno, kahesa'amo'a 66si'a sentimita hutere hu'ne. <sup>22</sup> Ana seli mono noma vazisgama hania zafarera, tare rusima hu'zana taga huno tro huntogeno, tra'afina ome regrino rusi huno tragoteno me'ne. <sup>23</sup> E'i anama huno'ma tro'ma huteno'a 20'a zafaramina seli nomofona sauti kaziga retrure'ne. <sup>24</sup> Ana zafarmimofo tra'azmia silvareti 40'a tro hu'ne. E'i tare tra'mokea tare zafa znazeri tragotesakeno mago nozaferina fore hutere hu'na'e. <sup>25</sup> Ana hukna huno mago kaziga asoparega noti kaziga noma reharere zafaramina 20'a tro nehuno, <sup>26</sup> regri tra'zmia silvareti 40'a tro nehuno, mago zafamofona tare regri tra'a tro huntetere hu'ne. <sup>27</sup> Hagi ana seli mono nomofo amefi'a zage ufre kaziga reharere zafaramina 6si'a tro nehuno, <sup>28</sup> ana seli mono nomofona rugaraga kazigati renagentetera tare reharere zafareret tro hu'ne. <sup>29</sup> E'i ana renagente zafarerena, fenkama kaziga atupamokea magoke regri tra'afi regrike ruhamprikeno, anagamu kaziga atupa'araremakea magoke rini kampi ome rusihuke ruhaprike eri magoke hu'na'e. Anazanke huno mago kaziga renagetetera tro hu'ne. <sup>30</sup> E'inama higeno'a ana makara 8'a zafa megeno ana zafaramima regri trara silvareti mago'mago zafarera tare tra trohutere higeno, ana makara 16ni'a tra me'ne. <sup>31</sup> Ana zanke huno seli mono nomofo rugekahu zafaramina, akasia zafareti 5fu'a tro hu'ne. <sup>32</sup> Hagi ana zanke huno mago kaziga asopareganena (saut) rugeka zafa 5fu'a tro nehuno, seli mono nomofo atupa kaziga zage fre kaziganema (west) me'nea zafarerera ana zanke huno 5fu'a rugeka zafa tro hu'ne. <sup>33</sup> Ana 5fu'a rugeka zafaramimpintira amu'nompima rugeka'ma hu'nea zafamo'a, mago asopamofo atuparetira vuno, mago atupare uhanitine. <sup>34</sup> Ana zafaramimofona goliletike erino nevazino, goli rinima asopa zafafima tro'ma hunte'nenefi vazintegeno, mago atupareti mago atupare uhanatine.

<sup>35</sup> Seri mono nona zamana zamana'ma hu'neanofiki, hokonkenofiki, fitunkenofiki, korankenofi avazu huno zagi'nea osinofiteti tro hu'neatavravereti hunaragi'ne. Serabimie nehaza ankeroramimofo zmema'a hentofaza huno tavravere'ma nophiteti'ma avoma kre antahi'zana eri'neankino ana tavraverera hatino tro hunte'ne. <sup>36</sup> Ana tavravema hanti'zana, 4'a akasia zafa golireti eri ano vaziteno, ana zafarerera eri rusihu rini'a golireti tro huteno, retrure tra'a silvaleti 4'a tro hu'ne. <sup>37</sup> Mago rantavravea knare'zantfa hu'nea tavravereti seli mono nomofo kahana tro huteno sipisipi zokateti tro hu'nea koranke ene hokonke treti nophituti ene ruzahu ruzahu knare treti nophituti avasese zama'a tro hunte'ne. <sup>38</sup> Ana 5fu'a retrure zafarerera tavravema hanti'zana golireti eri fagigino tro hunenteno, ana zafaramimofo asenire ene rinire'enena golireti eri ano nevazino, retrure tra'zamia bronsireti 5fu'a tro hunte'ne.

## 37

### Kasegema ante vogisima tro hu'zamofo naneke

<sup>1</sup> Hagi Bezaleli'a akasia zafareti kasegema ante bokisia tro hu'ne. Ana bokisimofo zaza'amo'a 110ni'a sentimita higeno, atupa kaziga'amo'a 66si'a sentimita higeno, anagamuma mareri'amo'a 66si'a sentimita hu'ne. <sup>2</sup> Fegi'ane agu'afinena goliretike eri anovaziteno anagama avazarera goliretike avazarenogagi'ne. <sup>3</sup> Hanki 4'a golire rini tro huno fenkami kaziga agente agentera tare tare huno ome arekamarente eme arekamarente

hunte'ne. <sup>4</sup> Ana huteno akasia zafa antreno tare zota trohuteno golinuti eri ano vazinte'ne. <sup>5</sup> E'i ana tare zafararena, ana vogisima erisga huno vu'zana 4'a rinima rekamarente'nefinka rugaraga vazinte'ne.

<sup>6</sup> Hagi ana vogisimofona, asunku zamofo trare huno avaza'a goliretike tro huntegeno, zaza'amo'a 110ni'a sentemita higeno, atupa kaziga'amo'a 66si'a sentemita hu'ne. <sup>7</sup> Anante ana avaza'arerara hamanu golia ruguta huno tare serabimie nehaza ankerontre rugaraga atupa'ararentera tro huzanante'ne. <sup>8</sup> Serabimie nehaza ankerontre'ma tro'ma hu'neana, ana asunku tra'ma tro'ma hu'nea golinutike, rugaraga agentera ana ankerontrena magoke golinutike tro huntegeno eri mago hu'ne. <sup>9</sup> Ana Serabimi ankeroraremokea zanavugosa ohumi ahumi nehuke, kepri hu'ne asunku tra'mofo negakeno zanageko'namo'a rufanara huno ana vogisia refite'ne.

### *Anumzamofo avure ante bretimofo itama tro hu'naza naneke*

<sup>10</sup> Ananteria Bezaleli'a akasia zafareti mago tra tro hu'ne. Ana tra'mofona zaza'amo'a 88'a sentimita higeno, atupa'amo'a 44'a sentimita higeno, mareri'amo'a 66si'a sentimita hu'ne. <sup>11</sup> Ana tra'mofona golinutike eri ano nevazino, agema'aramintera ana golinutike eri avozaze huno eri pehe huno ava regagi'ne. <sup>12</sup> Hagi ana tra'mofo atumpa'arema eri agu'a huno rugagi'neana 8'a sentimita higeno, golinutike eri avozaze huno eri pehe huno avarente'ne. <sup>13</sup> Ana huteno 4'a golire rini tro huno 4'a agamofo tavaonte agente agentera rekamarente'ne. <sup>14</sup> Ana 4'a rinima rekamarente'neana ana tramofo anagami rugaraga agentega rekamrente'neankino ana rini-ramimpi erisga huno vu'zana tare zota vazinte'ne. <sup>15</sup> Ana tra'ma erisga huno vu'zana, akasia zafa antreno tare azota tro huteno, ana azotararena golireti eri anovazi'ne. <sup>16</sup> Hanki tima taginte zuomparamine waini tima tagi'zama ofa hu'zane tintafene kapunena golinutike'za tro huntegeno ana tratera me'ne.

### *Tavima rekru hunte azotama tro hu'naza naneke*

<sup>17</sup> Hagi tavi'ma rekru hunte azotama Bezaleli'a tro'ma hu'neana, hamanteti aruguta huno magoke golinutike, retrure'agi, nenarampa'agi, azankuna'ane asi'na'anena tro hunenteno, amosre'agna huno tavi'ma rekruhunte'a tro hunte'ne. <sup>18</sup> Hagi ana tavi zotamofona 6si'a azankuna tro hunte'ne. Rugaraga 3'a azankunakna huno tro hunte'ne. <sup>19</sup> Hanki ana azotamofo 6si'a tavi'ma rekru hunte azankunatamimofo atuparega, almoni zafamofo anina'ane amosare'agna huno tavi'ma rekruhunte'a tro hunte'ne. <sup>20</sup> Hanki amu'nompima mareri'nea zotarera, almoni zafamofo amosare'agna huno 4'a tavi'ma rekruhunte'a trohunte'ne. <sup>21</sup> Hanki ana zotamofoma rugaraga azankunatrema trohunteterema hu'nerera tare almoni zafamofo anina'a rugaraga trohuntetere hu'ne. <sup>22</sup> Ana tavi azotama, azankuna'aramima, ani'na'ama, amosare'anema tro'ma hu'neana magoke golinutike, arukuta huno tro hu'ne.

<sup>23</sup> Ana 7ni'a zotarera lamu tavi tro huno nenteno, ana lamu tavi-mo osama hampage tu'zane osama erinte tafenena maka golinutike tro hu'ne. <sup>24</sup> E'i ana tavi zotamofoma mika zantamima'ama tro'ma hu'neana kn'amo'a 34'a kilo hu'nea golireti tro hu'ne.

### *Kremnavu ita tro hu'naza naneke*

<sup>25</sup> Ana huteno'a mnama vu zantamima kre snageno'ma mnama vania ita, magoke akasia zafaretike'za tro hu'ne. Ana itamofo zaza'amo'a 45'a sentimita higeno, kahesa'amo'a 45'a sentimita higeno, mika asopa'amo'a

mago avamenteke megeno, atrure'amo'a 90'a sentimita mrerigeno, ana itamofona 4'ama renagentetera pazive tro huntetere hu'ne. <sup>26</sup> Ana itamofona agofetu'agi, maka asopa'agi pazivetaminena goliretike erinovazinenteno, ana itamofo agema'aramintera goliretike avarenno avasase'a hugagi'ne. <sup>27</sup> Kolireti'ma avasasema hunte'nemofo henka kaziga, zotama vazino eri sgama huno'ma vu'zana golireti tare rinia ruga ruga asoparega tro hunte'ne. <sup>28</sup> Ana itama eri sgama huno vu'zana akasea zafareti tare azotarare tro huno golireti erinovazinte'ne.

<sup>29</sup> Anantera ruotage masavena pristi vahete'ene mago'azante'ma tagi'za frenente'za huhampri nezmantaza masavene, mnanentake zama tro'mahu antahintahima erine'zama tro'ma nehazankna huno, mnanentake'zana tro hu'ne.

## 38

### *Bronsireti kresramna vu ita tro hu'nea naneke*

<sup>1</sup> Hagi Bezaleli'a akasia zafareti kresramnavu itama tro hu'neana, mareri'amo'a 1 mitagi 30'a sentemita higeno zaza'amo'e kahesa'amo'enena mago avamenteke 2 mitagi 20'a sentemita hu'ne. <sup>2</sup> Hanki 4'a omerenagente eme renagente'ma hutera mago pazive tro huntetere higeno, ana pazivetamina itama tro'ma hu'neana zafareti tro higeno rutragote no erimago zanke higeno, ana ita bronsireti amega'a anovazinte'ne. <sup>3</sup> Ana itare'ma eri'zama eri'zantamina bronsireti tro'ma hu'neana, tanefa'ma katetre kavoraminki, osama kate sipetiraminki, ru tritri hu zuomparaminki, afu'ma revazuhi zotaraminki, tevema tagi osi zuomparaminki huno tro hu'ne. <sup>4</sup> Bronsireti rama'a kantami hagente'za strena tro huno tevema hugre itamofo anagati'ma urami'nea agu'afi antegeno uramino amu'nompni me'ne. <sup>5</sup> Anante 4'a bronsire rini tro huno azotama vazinteno erisga huno vu'zana 4'a renagentetera rukamre'ne. <sup>6</sup> Hagi agra akasia zafareti tare azota antreno tro huteno bronsireti eri anovazine. <sup>7</sup> Ana azotarerena kresramna vu itamofo asoparega riniramima tro'ma huntepinka erino vazinte'ne. Ana vogisi'a kuta zafareti tro higeno, agu'afina hagro huno me'ne.

### *Tifre zuompa bronsire tro hu'nea naneke*

<sup>8</sup> Anumzanema atruhu seli mono nomofo kafante'ma eri'zama e'neri'za a'nemo'za zmavugosa negaza bronsire kapo Bezaleli'a erino, ti fre zuompane aga'anena tro hunte'ne.

### *Seli mono nomofo keginama tro hu'nazazamofo naneke*

<sup>9</sup> Anantera seli mono nomofo kuma keginama hu'neana, sauti kaziga zaza'amo'a 44'a mita higeno osinofiteti zagino hati'nea tavaravereti keginarera tafinteno enevuno, <sup>10</sup> Keginama azeri oti zafaramina 20'a tro nehuno, kegina zafamofo regri tra'a bronsireti 20'a tro nehuno, tavravema erirusi huno tafintezantamine rininen silvareti tro hunte'ne. <sup>11</sup> Ana zanke huno noti kaziga keginahu tavravene seli mono noma azeri oti zafaramina 20'a tro nehuno, kegina zafamofo tra'a bronsireti 20'a tro nehuno, tavravema erirusi huno tafintezantamine nofi'ma rentezantamina silvareti ana zafaramimofo avozarera tro hunte'ne. <sup>12</sup> Ana seli mono nomofo zage ufre kaziga tavravenu'ma keginama hu'neana kahesa'amo'a 22'a mita higeno, keginama eri oti'za 10ni'ane tra zamia, 10ni'a silvareti tro hu'ne. <sup>13</sup> Hanki zage hanati kazigama avugosama hunte'nea kaziga

kuma'mofo kahesa'amo'a 22'a mita hu'ne. <sup>14</sup> Kama ufrete'ma tamaga kaziga hanti tavravea, zaza'amo'a 6gis mitagi, 60 sentimita higeno, kegina retrure zafa 3'a tro nehuno tra'aramina 3'a tro huno ana zafarerava tafinteno evu'ne. <sup>15</sup> Hanki kama ufrete'ma hogarazigama tafi tavravemofona zaza'amo'a 6gis mitagi 60 sentimita higeno, 3'a retrure zafagi, 3'a regri tra'aramina tro huteno anante tavravea tafinteno evu'ne. <sup>16</sup> Ana kuma keginama maka hugagi'neana zmana'zmana nofiteti zagino tro hu'nea tavravereti kegina huno kagi'ne. <sup>17</sup> Ana kumamofo maka kegina zafaramintera, erirusi hunte zantamine riniraminena silvaretike tro nehuno, keginama regri tratamina bronsireti tro hu'ne.

<sup>18</sup> Hanki ana kumapima ufre kante'ma ruhiza'mahu tavaravema haneno tro'ma hu'neana, hokonke'ene fitunke'ene koranke nofiteti'ene, tro hunte'ne. Ana tavravemofo zaza'amo'a 9ni'a mita higeno, kahesa'amo'a 2 mitagi 2'a sentamita higeno maka kaziganena ana zanke hu'ne. <sup>19</sup> Hagi 4'a retrure zafane regri tra'zamia bronsireti 4'a tro hunenteno tavaravema erirusihu zantamine, ana zafaramimofo asenire ene rinire'enena silvareteti tro hu'ne. <sup>20</sup> Kuma keginamofo tavraverarene seli mono nomofo tavaravema avazuhumpi huno rente azotaramina bronsiretike ana maka tro hu'ne.

### *Anumzamofo seli mono noma eri'za ki'naza zantmi'mofo naneke*

<sup>21</sup> Anumzamofo seli mono noma kasegema ante noma kinaku eritru hu'naza zantamina, Mosesi'a Livae nagaku hampriho higeno, Aroni ne'mofo Itama ana eri'zantera vugota hu'nege'za hampri'naze. <sup>22</sup> Juda nagapinti ne' Bezaleli'a Uri ne'mofo Huri negeho ana maka zantmima Anumzamo'ma tro huo huno Mosese'ma hunte'nea zantamina tro hu'ne. <sup>23</sup> Hagi Dani nagapinti ne' Ahisamaki ne'mofo Oholiapu'a ruzahu ruzahu zante'ma azanteti'ma hanagatino tro'ma hu antahi'zane, hokonke'ma, fitunke'ma, koranke tavarere'ma hatino avoma kre antahi'zane, zmana'zmana nofinu'ma haneno tavrave'ma trohu antahi'zama eri'nea ne'mo aza hu'ne.

<sup>24</sup> Anumzamofo seli mono noma kisazegu'ma eri vereve hu ofama eri'za azageno ana noma kivagare'nea golimofo kna'ama monompima refko'ma nehaza avamente'ma hampri'nazana, kna'amo'a 998'a kilogremi hu'ne. <sup>25</sup> Hagi silvama eri'za azageno'ma seli mono nompima kna'ama refko'ma nehaza avamente'ma refko'ma hu'naza, kna'amo'a 3tausen 4 hantre 30'a kilogremi hu'ne. <sup>26</sup> Hagi 20'a kafuma agatereno mareri anagamu atre'nea vene'neramimo'za, zamagire'ma eri'za e'naza silvamofo kna'ama mono nompima refko nehaza avamente refko hu'za ke'nazana 6'a gremi hu'nea silva eri'za eme atre'naze. Hagi ana makara 603, tausenigi 550'a vene'nemo'za eri'za e'naze. <sup>27</sup> Anumzamofo seli mono nomofo retrure zafaramimofo regri tra'ama tro'ma hu'nazana, 100'a tro hazageno, ana tra'ma tro'ma hu'naza silvamofo kna'amo'a 34'a kilogremi huterere hu'ne. <sup>28</sup> Kna'amo'ma 30'a kilogremima hu'nea silvama amnema meama'areti, eri fagagi'za tavaravema tafinte'zane, rinine tro nehu'za retrure zafaramimofo aseni'anena erinovaziza tro hu'naze.

<sup>29</sup> Hanki Anumzamofoma eri vereve hu ofama eme ami'naza bronsimofo ana maka kna'amo'a 2 tausenigi 425fu'a kilogremi hu'ne. <sup>30</sup> E'i ana maka bronsireti seli mono nomofo kahante retrure zafaramimofo regri trazamine, bronsireti tro hu'nea Kresramanavu itane, rama'a kantami hagente strenane, ana itare'ma eri'zama eri zantamina tro hu'ne. <sup>31</sup> Ana bronsiretike seli mono nonkuma'mofo kegina zafaramima regri tra zamine, kahama

ufrete zafaramimofo tra zami'ne, maka tvaravema avazuhumpi huno anaki azotaraminen tro hu'ne.

## 39

### *Pristi vahe kucken tro hu'naza naneke*

<sup>1</sup> Hagi Ra Anumzamo'ma Mosesema asami'nea kante ante'za kuckenama hatino tro hu antahintahima eri'naza vahe'mo'za, hokonkeki fitunkeki koranke nofiteti tro hu'naza zmana'zmana tavravereti, Aroni'ma antani'neno ruotage hu'nefinka eri'zama eri'nia za'za kucken hati'za tro hu'naze.

<sup>2</sup> Amega amimizare'ma antanisia ku kenama tro'ma hu'neana, golirenofiki hokonke nofiki, fitunke nofiki, koranke nofitetiki zmana'zamna hu'nea tavravereti'ene tro hu'ne. <sup>3</sup> Hanki kuckenama hatino tro hu antahintahima eri'nea ne'mo, golia aruguta huno erita'ori huteno, taga huno treti nofikna huteno hokonke ene fitunke ene koranke treti nofiteti'ma tro'ma hu'nea tavravene, efeke zamana'zamana tavravereti'ene tro hu'ne. <sup>4</sup> Amimizafima hania kuckenamofo nofi'mo'ma afumpinti'ma kreraminigeno amefigama anakisnia nofira, anaga kaziga tare atumparega hatinte'ne. <sup>5</sup> Amu'nofi'ma zagine'ma tro'ma hu'neana, golirenofiki, hokonke nofiki, fitunke nofiki, koranke nofi'ene knare zantfa hu'za zmana'zmana nofiteti hati'naza tavaravereti Ra Anumzamo'ma Mosesema asami'nea kante anteno tro hu'ne. <sup>6</sup> Anante tare oniksie nehaza have erino 12fu'a Israeli ne' mofavre'mokizmi zamagia, ana haverarentera taga huno krente'ne. <sup>7</sup> E'i ana haverarena Ra Anumzamo negeno Israeli (Jekopu) ne' mofavre nagare huno antahi'zmi have huno afunte tavraverera Ra Anumzamo'ma Mosesema asami'nea kante anteno renteno evu'ne.

### *Vugota pristi vahe'mo amimizare antanisia tavrave tro hu'nea naneke*

<sup>8</sup> Kukenama tro hu antahi'zama eri'naza vahe'mo'za, amimizare kuckenama tro'ma hu'nazankna huno, hokonke nofiki, fitunke nofiki, koranke tavravereti'ene knare huno zmana'zmana hu'nea nofiteti tro hu'nea amimizare antani'nia kuckenamofo agofetu'ma antani kucken tro hu'ne.

<sup>9</sup> Ana tavravema za'za kazigati'ma erinteno repasi'ma higeno'a ana miko asopa'amo'a 22'a sentemita huno mago avamenteke me'ne. <sup>10</sup> Mizama'amo mareri'nea haveraminteti ana tavraverera 4'a isa'are rekamarenteno evu'ne. Hanki kotama evu'nea isarera rubi havegi, topasi havegi, emerelie nehaza haverami rekamrenteno enevuno, <sup>11</sup> anante isa'arer, tekuoisie nehaza havene, safaa hu'za nehaza havene, daimonie nehaza have rekamrenteno evu'ne. <sup>12</sup> Hagi nampa 3 isarera jasintie nehaza havene, agatice hu'za nehaza havene ametistie nehaza have rekamrent'eza evu'naze. <sup>13</sup> Hagi nampa 4 isarera berilie nehaza havene, oniksie nehaza havene, jaspae hu'za nehaza have rekamre'za evu'naze. Ana maka haveramima azeri anomama'ama troma hu'nazana goliletike tro hu'naze. <sup>14</sup> Ana maka 12fu'a haverera Israelina (Jekopu) 12fu'a ne' mofavremokizmire huhamprino magoke magoke havea me'negeno, mago mago mokizmi zamagi'a anante taga hu'za krente'naze.

<sup>15</sup> Ana amimizare'ma 12fu'a havema ante'naza tavravema rente seni nofira, goliretike tro hu'naze. <sup>16</sup> Hanki goliretike tare nofi'ma rente rinia ana tavravemofona anagamu ruga raga kaziga ometre emetrema hutega anakinte'naze <sup>17</sup> Ana amimizare antani tavravemofoma rugaraga atumpare'ma anakinte'naza rinirarentera, goliret'ma tare seni nofi'ma tro'ma hu'naza nofi'nu hagerafinte'naze. <sup>18</sup> Hanki ana seni nofitremofo tagina'rarena eritma rugaraga azonare'ma ante havema

eri novazinea golire rentegahaze. <sup>19</sup> Hanki mago ene tare golire rini trohu'za amimizare'ma 12fu'a havema ante'naza tavravemofo henkamu kaziga ometre emetre hutega, agu'afi amimizare'ma hu kukenamofo tvaonte tafinte'naze. <sup>20</sup> Hanki mago'enе golireti tare rinirarena tro hu'za azo'nareti'ma kreramino amimizare tavravema hagerafi'nere ruga raga avasase'ane nofi'nu'ma avamare'nere anakinte'naze. <sup>21</sup> Hagi Ra Anumzamo'ma Mosesema asami'nea kante ante'za, mago'enе golireti tare rini tro hute'za, azonareti'ma kreramino amimizare tavravema avasase'ane nofi'nu avama are'nere ruga raga hokonke nofi'nu anakintazageno hanavetino me'ne.

### *Pristi vahemokizmi za'za kukena tro hu'nea naneke*

<sup>22</sup> Hagi antanine'zama amimizare kukenama ana agofetu'ma hania za'za kukena, hokonke tavraveretike'za tro hu'naze. <sup>23</sup> Hanki ana za'za kukenamofo ananke kana anagamu kaziga amu'nompi hagenente'za, ana kamofoma avazama regagi'nazana tavravea ante tapari'za zagi'za hatigagi'naze. <sup>24</sup> Hanki ana za'za kukenamofo agiaregama rugagi atumparega, pomigreneti zafa rgagna hu'za hokonke nofiki, fitunke nofiki, koranke nofinuti tro hute'za ana zaza kukenarerera rentegagi'naze. <sup>25</sup> Ana pomigreneti zafa rgaramimofo amu'nozmifina, golireti belotami tro hu'za rentetere hu'naze. <sup>26</sup> Hanki Ra Anumzamo'ma Mosesema asami'nea kante ante'za ana zantamima rente kagi'nazana, golireti'ma tro'ma hu'naza belora renente'za, pomigreneti zafa rgama tro'ma hu'nazana rentere hu'za ana kenamofona aga kaziga atuparega rente kagi'nazane.

<sup>27</sup> Hanki nofi'nu'ma kukena hati eri'zama eri antahi'zama eri'naza antahi'zane vahem'o'za nehzaza hu'za Aronine mofavre na'agamo'zama agu'ama antanisaza kukena zmana'zmana huno efeke tavravenutu zagi'za tro hu'naze. <sup>28</sup> Ana zmana'zamana tavraveretike zmanunte'ma anaki tavravene kankri'zamine agu'a kukena zaminena tro hu'naze. <sup>29</sup> Hanki Ra Anumzamo'ma Mosesema asami'nea kante ante'za, nofi'nu'ma kukena hati eri'zama eri antahi'zama eri'naza vahem'o'za nehzaza hu'za, azo'naregati'ma rugreramino asoparegama evunofira zmana'zmana huno efeke nofi'ene, hokonke nofi'ene, fitunke nofi'ene, koranke nofinuti tro hu'naze.

<sup>30</sup> Anante goliletike mago kuta zompa tro hu'za, **Ra Anumzamofontera ruotage hu'ne** hu'za taga hu'za ananterera krente'naze. <sup>31</sup> Ananterera Anumzamo'ma Mosesema asami'nea kante ante'za hokonke nofi'nu ana nanekema krente'naza golire zompa asenire'ma anaki tavravemofo agofetu kokovite avona anakinte'naze.

### *Mika eri'za eri 'naza naneke*

<sup>32</sup> Ra Anumzamo'ma Mosesema asami'nea kante ante'za Israeli vahem'o'za seli mono none Ra Anumzanema atruhu seli nomofo eri'zana maka eri vagare'naze. <sup>33</sup> Ana seli mono noma ki'naza zantamima tro'ma hunte'naza, eri'za Mosesente'ma e'nazana, seli nomofo tavravema hanti zantamine, retrure zafaramine, rugeka zafaramine, regri tra'aramine, <sup>34</sup> hagi ana seli mono nomofoma rufite'zana, ve sipisipimofo akruteti eri korankre hu'za tro hu'naza tavravene, hage rimpi bulimakaomofo akruteti tro hu'naza tavravene, ruotage'ma hu'nefinka rente'za hunaragi tavravene, <sup>35</sup> kasegema ante vogisine ana vogisima erisga huno vu azotarerene, ana vogisimofo avaza'agu'ma asunku trarema nehaza avaza'ane, <sup>36</sup> Anumzamofo avure'ma bretima ante itane, ana itare'ma

eri'zama eri'zantamine, Anumzamofo avure'ma ante bretine, <sup>37</sup> goliretike tro hu tavi zotane, ana tavi azotare'ma tavi'ma rekru hunte'ama tro hunteterema higeno me' fatgoma hu'nea zane, ana tavi azotare'ma eri'zama eri zantamine, tavi'ma rekruma hu masavene, <sup>38</sup> golire tro hu'nea kresramna vu itane, tagino frenenteno Anumzamofo zanema huno huhamprinte masavene, knare mnanentake toki'ma hu' tanefa'ene, Anumzamofo seli mono nomofo kahante hanti tavravene, <sup>39</sup> bronsireti tro hu'naza kresramnavu itane, anaga tevema hugre'afima rekamrente zana bronsireti rama'a karami hagente'zana strenane, erisga huno vu azotararene, ana itare'ma eri'zama erizantamina bronsire tro nehu'za zuompane, aga'anee, <sup>40</sup> ana seli mono no kumamofo kegina hugagi tavraveramine, retrure zafarmine, regri trazmine, ana kumapima ufre kahante tafinte tavravene, renteno avazuhumpi hu nofitamine, ana nofi'ma avazuhumpi huno rente zotaramine, maka ana seli mono nompima eri'zama eri zantamine, <sup>41</sup> pristi vahe'mo'za antani'ne'za ruotage hu'nefinka eri'za erisaza ruotage kukenaramine, pristi ne' Aroni ruotage kukenaramine, ne'mofavre'aramimo'za antanine'za pristi eri'zama erisaza kukenane tro hu'naze.

<sup>42</sup> Ana maka eri'zana Anumzamo'ma Mosese'ma hunte'nea kante ante'za Israeli vahe'mo'za eri vagare'naze. <sup>43</sup> Mosese'ma ana maka eri'zama eri'naza eri'zama keana Anumzamo'ma hu'nea kante ante'za eri vagazageno, Mosese'a asomu kea huzmante'ne.

## 40

### *Anumzamofo seli mono noma azeri oti'saza naneke*

<sup>1</sup> Ra Anumzamo'a amanage huno Mosesena asmi'ne, <sup>2</sup> Nagranema atruma hanaza seli mono nona, kasefa kafumofo ese ikamofona ese zage knare azeri otio. <sup>3</sup> Huhagerafi hvempa kasege vogisia anampinka nentetma, tavravenuti hunargintenkeno agu'afi meno. <sup>4</sup> Anampinka ita erinka ome nentenka, ana itare'ma ante zantamina erinka ome antese nehunka, tavi'ma rekru hunte zota erinka ome nentenka, ana zotarera tavitamima rekru hunte'a retro huntetere huo. <sup>5</sup> Hanki mnanentake zama kre mnavu golire ita Anumzane hagerafi kasege ante vokisimofo avuga'a nentetma, ana seli mono nomofo kahantera tavravea renteho. <sup>6</sup> Anumzane atruhu seli mono nomofo avuga kahantera, kresramna vu ita nentenka, <sup>7</sup> bronsireti'ma ra tifre zuompa tro'ma hu'nazana, Anumzane atruhu seli mono nomofone, Kresramanama vu itamofo amu'nompi nentenka tina ana zuompa fina taginto. <sup>8</sup> Hagi anante ana seli mono nomofo meg'i'a kumara tavrave kegina huganeginka, ana meg'i'a kumamofo kahantera tavravea hantinto. <sup>9</sup> Ana hutenga, tagino frenteno Anumzamofo zanema huno huhamprinte masave erinka ana seli mono none, ana seli mono nomofo agu'afima me'nea maka zantamina ana masavea taginka frenezmantenka, Anumzamofo zantamine hunka huhamprinezmantenka zamazeri ruotage huge'za ana seli mono none, ana seli mono nompima me'nea maka zantmimo'za me ruotage hu'za megahaze. <sup>10</sup> Anazanke hunka Kresramanama vu itane ana itare'ma eri'zama eri zantaminena ana masave taginka frenezmantenka, Anumzamofo zantamine hunka huhamprizmantenka zamazeri ruotage hugeno, ana itamo'a me ruotage huno meno. <sup>11</sup> Anazanke hunka tifre ra zuompane aga'anena ana masaveretike taginka frenezmantenka, Anumzamofo zane hunka huhamprintegeno meno. <sup>12</sup> Hagi anante Aronine,

ne' mofavrermima'anena zmavrenka Anumzane atru hu seli mono nomofo kahante tina frezmanto.

<sup>13</sup> Anante Aronina ruotage hu'nea pristi kukena eri hankrentenka, huhamprinte masave taginka frenentenka, Anumzamofo nere hunka huhamprintenka azeri ruotage hugeno mani ruotage huno mani'neno, Nagri pristi eri'zana ergahie. <sup>14</sup> E'ina nehunka Aronina ne' mofavrermima'a zmavrenka agu'afi avate antani kukena eri hankre zmanto. <sup>15</sup> Nezmafama hunte'nana kna hunka ana masave taginka frezmantenka, huhampri zmantege'za Nagri pristi eri'zana eriho. E'i ana zama hanana zamo'a henkama ana nagapinti fore hunante anante hu'za vanaza vahe'mo'za pristi eri'za, eri'za vugahaze. <sup>16</sup> Hagi Mosese'a Anumzamo'ma huoma huno'ma hunte'nea kante anteno, ana maka eri'zana eri'ne.

<sup>17</sup> Hagi namba 2 kafumofona, ese ikamofo ese zage knare Anumzamofo seli mono nona azeri oti'za ki'naze. <sup>18</sup> Mosese'a ana seli mono noma azeri oti'nea regri zafarmimofo tra'zmia anteteno, retrure zafaramina regrineteno, nomofo asoparegama rugekahu zafaramina erirusi hunteteno, no zaferina'a azeri retrurene. <sup>19</sup> Hagi Mosesi'a Ra Anumzamo'ma huoma huno hunte'nea kante anteno, seria eri atareno seli mono nona refiteteno, ana agofetura mago anteno refite'ne.

<sup>20</sup> Hagi anante Mosese'a 10ni'a kasegema me'nea havererena erino Anumzane huhagerafi vogisimofo agu'afi anteteno, ana vogisima erisga huno vu azota zafararena ana vogisire me'nea riniramimpi vazinteteno, ana vogisimofo avaza'a asunku zamofo trarema nehaza avaza'a erino ana vogisia runkanire'ne. <sup>21</sup> Ana huteno Ra Anumzamo'ma huo huno'ma hunte'nea kante anteno Mosese'a vogisia erino ana seli mono nompinka ome nenteno, hunaragi tavrave hantintegeno ana vogisia azeri agu'a ate'ne.

<sup>22</sup> Ra Anumzane atruhu seli mono nompima ana hunaragi tavravemofo meg'i a noti kaziga ita erino ome nenteno, <sup>23</sup> Ra Anumzamo'ma huo huno'ma hunte'nea kante anteno Mosese'a Ra Anumzamofo avure'ma ante bretia ana itare ome ante'ne.

<sup>24</sup> Anante seli mono nompima bretima ante itamofo kantu sauti kaziga, tavi'ma rekru hunte zota erino ome nenteno, <sup>25</sup> Ra Anumzamo'ma huo huno'ma hunte'nea kante anteno, Mosese'a tavi'ma rekru hunte zotama ra Anumzamofo avure me'nere tavitamina rekru hunte'ne. <sup>26</sup> Ra Anumzane atruhu' seli mono nompinka hunaragi tavravemofo avuga golireti'ma tro hu'nea ita erino ome anteteno.

<sup>27</sup> Ra Anumzamo'ma huo huno'ma hunte'nea kante anteno Mosese'a, ana itarera mnanentake zana kre mana vu'ne. <sup>28</sup> Anante ana seli mono nomofo kahanterava rente'ne. <sup>29</sup> Ana huteno kre fnanehu ofama kre ita Ra Anumzane atruhu seli mono nomofo kahante anteno ana itare Ra Anumzamo'ma huo huno'ma hunte'nea kante anteno Mosese'a kre fanene hu ofane witi ofanena hu'ne. <sup>30</sup> Anante tifre ra zuompa Ra Anumzane atruhu seli mono none kresramnama vu' itamofo amu'noznifi nenteno anampina tima fre'zana taginte'ne. <sup>31</sup> Ana hutege'za Mosese ene Aroni ene Aroni ne' mofavrermima'anena ana timpi zmazane zmaganena sese hu'naze. <sup>32</sup> Ra Anumzane atruhu seli mono nompima ufrege Kresramana vu itare'ma vu tavao hunaku'ma hanu'za, Ra Anumzamo'ma huo huno'ma Mosesema hunte'nea kante ante'za zamagra ana timpi tina fregahaze. <sup>33</sup> Anante Mosese'a ana seli mono nomofo kuma kegina tavravea hantintegagi vagareteno ana kuma'mofo kahante tavravea hantinte'ne. E'inahu kna huno ana maka eri'zana eri vagare'ne.

*Ra Anumzamofo hanavenentake msamo seli mono nompi eme avite'nea naneke*

<sup>34</sup> Ana hutegeno hampomo ana atruhu seli mono nona eme refitegeno, Ra Anumzamofo hanavenentake msaa'amo'a ana seli mono nona eme avite'ne. <sup>35</sup> E'ina higeno Mosese'a ana seli mono nompina uofregeno, Anumzamofo hanavenentake masa'amo'a avite'ne. <sup>36</sup> Israeli vahe'mo'za negageno seli mono noma eme refite'nea hampomo'ma atreno marerige'za ana seli mono nona tagana vazi'za renamagi'za e'neri'za, ana hampomo'ma virega avariri'za vutere hu'naze. <sup>37</sup> Hianagi ana hampomo seli mono noma refiteten'o'ma mege'za, Israeli vahe'mo'za anama mani'naza kumara atre'za ovu mani'nazageno, ana hampomo'ma vige'za avariri'za vu'naze. <sup>38</sup> Ra Anumzamofo hampomo'a msarera seli mono nona refiteno me'negeno, hanima higeno'a, ana hampomo'a tevenefa higeno, ana maka Israeli vahe'mo'za ke'naze. Israeli vahe'mo'zama ana mika kama vazafina e'i ana hu'za fore huno vu'ne.

## Levitikas-Pristi Eri'zane Moses'e'ma Kre'nea Nampa 3 avontafere

*Ra Anumzamofontega kre fanane hu ofama hunte kasegemofo naneke*

<sup>1</sup> Ra Anumzamo'a atruhu seli nompinti Mosesenkura ke huno anage hu'ne, <sup>2</sup> Israeli vahe'mokizmia zamasamige'za Ra Anumzamo'nare'ma ofama kresramana vunante'naku hanu'za, kegavama nehania sipisipio meme afu kevufinti avreno kresramana vunanteno.

<sup>3</sup> Kre fanane hu ofama hu'zama bulimakao afu'zamifinti'ma avre'za esu'za, ve bulimakao afu afuhe afahe osu'nesia su'za avre'za atru'ma nehaza seli mono nomofo kafante omentesageno, Ra Anumzamo'a antahimigahie.

<sup>4</sup> Agra ana ofama hania bulimakao afu'mofo asenire kumi'amofo nonama hanigu azana antenkeno, Ra Anumzamo'a antahinemino kumi'a atrente-gahie. <sup>5</sup> Hagi ana ve bulimakao anenta afura Ra Anumzamofo avuga ananke akafritesigeno, Aroni mofavremo'za pristi eri'zama e'nerizamo'za korama'a tagi'za vu'za seli mono nomofo avugama me'nea kresramana vu itare ome rutri rutri hugagaho. <sup>6</sup> Hagi anamo'a ana bulimakaomofona akru'a kararu vaziteno, avufga'a tagahu osi osi hutesigeno, <sup>7</sup> Aroni mofavre naga pristi eri'zama e'nerizamo'za kresramana vu itarera tevea erise hu'za agofetura ante fatgo hugahaze. <sup>8</sup> Anantero Aroni mofavreramima pristi eri'zama e'nerizamo'za kresramana vu itare'ma tevema hanavazisare, tagahu osi osi'ma hanaza ame'ane, aseni'ane, afova'anena, eri antefatgo hugahaze.

<sup>9</sup> Agazama'ane agusu'agesezama'a timpi sese hutesigeno, pristi vahe'mo'a kre sramana vu itarera ome kresageno mana'amo'a marerinkeno, Ra Anumzamo'a knare mana nentahino muse hugahie.

<sup>10</sup> Hagi sipisipio meme afu kevu'afinti'ma kresramana vunaku'ma hanimo'a, afuhe afahe'ma osu'nesia ve afu avregahie. <sup>11</sup> Kresramana vu itamofona noti kaziga Ra Anumzamofo avuga ana afura anankena akafrisigeno, Aroni mofavreramima pristi eri'zama e'nerizamo'za korama'a tagi'za kresramna vu itamofona rutri tri hugagahaze. <sup>12</sup> Agra tagahu osi osi hutkeno, pristi vahe'mo'a erino kresramana vu itamofona agofetu tevema nerea trate omerintese huteno, anazanke huno aseni'ane afova'anena erino kresramana vu itare ome kregahie. <sup>13</sup> Agiazama'ane agusu'agese'zama'a timpi sese hutesigeno, pristi vahe'mo'a kresramana vu itarera mika ome kresageno, manamo'a marerinkeno, Ra Anumzamo'a knare mana nentahino musena hugahie.

<sup>14</sup> Hagi Ra Anumzamofonte'ma kre fanene hu ofama hu'zama namaramima avreno'ma esuno'a, maho namao kugofa kna namafinti, mago avreno kresramana vu itarera egahie. <sup>15</sup> Hagi pristi vahe'mo'a kresramna vu itare ana nama avreno vuteno, ananke eri vamagino eri akafritenko kresramana vu itare kresramana nevuno, korama'a erino kresramana vu itamofa asoparega tagitregahie. <sup>16</sup> Ana namamofona azoka'ane, azanku'anena kresramana vu itamofona zage hanati kaziga tanefama katenetrazafi atregahaze. <sup>17</sup> Hagi pristi ne'mo'a ana namamofona agekonare azeri'neno eri taganavazino erizuzu huteno, kresramana vu itare'ma tevema neref'i mika, ome kresigeno mana'a marerinkeno, Ra Anumzamo'a knare mana nentahino musena hugahiankino, e'i ana ofa tevefi kre fanene hu ofe.

**2***Witine balinema ofama kresaza zamofo naneke*

<sup>1</sup> Mago'mo'ma Ra Anumzamofonte'ma witi ofa'ma hunaku'ma erino esuno'a kaneno eri osi huteno, erino eno. Anampina masavene taginentenno frenkinsensi nehaza mnanentake'zana erinteno, <sup>2</sup> erino Aroni mofavrererima pristi eri'zama e'neriza vahete vino. Ana masavene frenkinsensinema eri haviamma hu'nea witifintira mago aza huno, kresramana vu itare ome kresigeno Ra Anumzamo'a mana'a nentahino musena hugahie. <sup>3</sup> Hagi mago'ama mesia witia Aronine mofavre'amokizmi su'a megahie. Anama Ra Anumzamofonte'ma kre sramana vunente'za atresazama'amo'a ruotagetafaza hu'ne. <sup>4</sup> Avenifima kre'nesaza bretima ofama hunaku'ma erita esazana, zisti onte breti masaventeti eri havia huno kre'ne'nia kekio, hagege bisketire masave fre'ne'nia erita echo. <sup>5</sup> Kuta fraimpenifima kre'ne'nia witireti'ma ofama hunaku'ma hanutma, kaneosi'ma hu'nesia flaua'ene olivi masavene erihavia nehuta, anampina zistia onteho. <sup>6</sup> Hagi ana bretia goli osi osi huteta, anampina masave taginteho. E'i witi ofa hugahaze. <sup>7</sup> Kresramana vu witi ofama kre hagage hu kavofima kresazana, kaneosi osi'ma hu'nesia flauateti masavene eri havia huteta kregahaze. <sup>8</sup> Hagi ana ana zantetima witi ofama kreta erita Ra Anumzamofonte'ma esuta, pristi vahе оme aminkeno, erino kresramna vu itarera vino. <sup>9</sup> Ana bretifintira pristi vahе'mo'za huvame hu'za mago zamaza hu'za eri'za kre manavu itare tevefi kresageno, Ra Anumzamo'a mana'a nentahino musena hugahie. <sup>10</sup> Hagi anama Ra Anumzamofonte'ma tevefima kresramana vunente'za atresaza bretimo'a, ruotgetfa hu'neankino Aronine mofavre'amokizmi su'a megahie.

<sup>11</sup> Kresramana vu witima ofama erita vanazana, zistia onteho, na'ankure zistima antege tumerima antege'ma hu'nesia witiretira tevefina kreta Ra Anumzamofona ofa huontegahaze. <sup>12</sup> Hozafinti'ma e'sema ne'zama ne-nama hania ofama hanutma, zistine tumerinena amne tamagra erita Ra Anumzamofonte egahazanagi, e'i ana ofa kremnavu itarera Ra Anumzamo muse hanie huta onkregahaze. <sup>13</sup> Miko ofama hanaza witifina hagea antenageno, e'i ana zamo'a Anumzamo'enema huhagerafi huvempa ke'ma hu'naza kemofo huramagesa nehanigetma, tamagera okanigahazanki maka ofama hanaza witifina hagea atintegahaze. <sup>14</sup> Ana nehuta ese'ma nena hania witi raga Ra Anumzamofonte'ma ofa huku'ma erita esutma, refuzafupeta eritma ege' tevefi kre hagage hutma erita egahaze. <sup>15</sup> Ana ne'zampina olivi masavene, mnanentake'za insensi antegahazankino, e'i witi ofa hugahaze. <sup>16</sup> Ana Witima kne'za masavene mnanentake'za insensinema eri haviamma hunte'nazafinti osi'a eri'za, Pristi vahе'mo'za knare manavu ofa Anumzamofontega huntegahaze.

**3***Rimpa fru ofama hu'zamofo naneke*

<sup>1</sup> Hagi mago'mo'ma rimpa fru ofama bulimakao afu kevu'afintima hunaku'ma hanuno'a, afuhe afahе'ma osu'nesia ve bulimakao afuro, a' bulimaka afura avreno Ra Anumzamofo avuga vino. <sup>2</sup> Agra ana ofama hunaku'ma hania afu'mofo asenire azana anteteno, atrumahu seli nomofo kafante anankena akafrinkeno, Aroni mofavre'mo'zama pristi eri'zama

e'nerizamo'za korama'a tagi'za, kresramna vu itamofona rutri tri hugagigahaze. <sup>3</sup> Anumzanema rimpma fru ofama hania afu'mofona, miko afova'ane, rimpama eri anovazi'nea afovane, <sup>4</sup> tare kreso'ane anante'ma eri anoma vazi'nea afova'ane, asumna'anena eritagatino erino, <sup>5</sup> Aroni mofavre'ramima Pristi eri'zama e'neri'za naga eme zaminige'za kresramna vu itare'ma tevema hanavazi'naza agofetu, kre fananehu ofane kresramana vanageno, Ra Anumzamo'a sramna mana nentahino musena hugahie. <sup>6</sup> Hianagi anzakanze huno Anumzanema arimpa fru ofama mago'mo'ma sipisipi kevu'afinti'ma hunaku'ma hanuno'a, ve sipisipi afuro a' sipisipi afu'ma afuhe afahе'ma osu'nesia su'za azerino Ra Anumzamofontega ofa hugahie. <sup>7</sup> Hagi sipisipi afu anenta'ma ofa huno aminaku'ma hanuno'a, avreno Ra Anumzamofo avuga vino. <sup>8</sup> Agra ana ofama hunaku'ma avrenoma esia sipisipi afumofo asenire azana anteteno, atrumahu seli nomofo avuga anankena tagahinkeno, Aroni ne' mofavre'mo'za pristi eri'zama e'neri'zamo'za korama'a tagi'za kresramna vu itamofona maka asoparega rutri tri hugagigahaze. <sup>9</sup> Rimpma fru ofama hunaku'ma hania afuteti'ma erisia, afova'ane risona agu'sama, amagenafinti ahe futagi'ane, rimpama eri anovazi'nea afova'ane, ana maka afova'ane, <sup>10</sup> tarega kreso'ane, anante'ma erino vazi'nea afova'ane, asumna'ane, kreso'anena ana maka tagatin-tenigeno, <sup>11</sup> pristi vahe'mo'za eri'za kresramna vu itare ne'zama ofama nehazaza hu'za Ra Anumzamofontega kresramana vuntegahaze.

<sup>12</sup> Hagi meme afu'ma azerino ome ofama hunaku'ma hanuno'a, agra Ra Anumzamofo avuga erino vuteno, <sup>13</sup> atru'ma hu seli nomofo avuga agra ana ofama hu'naku'ma azerino esia meme afu'mofo asenire azana anteteno, anankena akafrinkeno, Aroni ne' mofavre'zamo'zama pristi eri'zama e'neri'zamo'za korama'a tagi'za erite'za kresramna vu itamofo maka asoparega rutri tri hugagigahaze. <sup>14</sup> Ana afupintira arimpama erinovazi'nea afovane, maka agusu agesezama'anena, tevefi negreno, <sup>15</sup> tare kreso'ane, erinoma vazi'nea afovane, asumnane, eri tagatino erino, <sup>16</sup> Pristi vahe amisigeno, ne'za ofama hiazza huno kresramna vu itare Ra Anumzamofontega tevefi kresramna vuntenigeno, Ra Anumzamo'a knare sramna nentahino muse hugahiankino, miko afova'amo'a Ra Anumzamofo su'a megahie. <sup>17</sup> Ama tra kea mevava trake me'nena, tamagr'i'ene ana miko fore hunante anante hu'za esaza vahe'mo'za, magore hu'za agusa'ane, korama'anena onetfa hugahaze.

## 4

### *Kumi'ma hu'ne'za kresramana vanaza zamofo naneke*

<sup>1</sup> Hagi Ra Anumzamo'a Mosesena asamino, <sup>2</sup> Mago vahe'mo'ma mago'azama hanifima, ana hugahuema huno ontahi'neno Ra Anumzamo'ma osihoma huno'ma hu'neazama hania kumimofonkura amanage hunka zamasamio. <sup>3</sup> Ugagota pristi ne'mo'ma kumi'ma haniana, miko vahe'mokizmi zamazeri haviza hugahie. Ana hugahiankino nagra mago agaho ve bulimakao afu afuhe afahе'ma osu'nesia avreno, agrama hu'nenia kumitera kumi ofa hugahie. <sup>4</sup> Hagi ana bulimakao afura avreno atruhu seli nomofo ufre kafante Ra Anumzamofo avuga ome anteno, azana asenire anteteno, anankena akafrigahie. <sup>5</sup> Anama hutena ugagota pristi ne'mo mago'a korana erino atruhu seli nompi ufregahie. <sup>6</sup> Hagi ana korampi azankoa reteno, Ra Anumzamofo avuga hunaragintegeno

ruotage'ma hu'nea tavravemofo avuga, 7ni'a zupa rutri tri hugahie. <sup>7</sup> Hagi ana pristi ne'mo'a, mago'a korana tagino atrumahu seli nompi Ra Anumzamofo avuga mnanentake'za kresramana vu itamofo pazivetaminte ome frentegahie. Hagi mago'a mesia korana, atru'ma hu seli nomofo avuga me'nea kresramana vu itamofo agafi miko tagi atregahie. <sup>8</sup> Hagi kumite'ma ofama hunaku'ma hania bulimakaomofona mika afovane, arimpama eri anovazi'nea afova'an, <sup>9</sup> tarega kreso'ane, eri anomia vazi'nea afovane asumnane, ana mika kreso'anena eri tagatitregahie. <sup>10</sup> Ana huteno bulimakao afovareti'ma arimpa fru ofama kresramna neviankna huno ugagota Pristi ne'mo'a tevefi kre fanene hu ofama nehaza itare kresramna vugahie. <sup>11</sup> Hianagi mika akru'agi, ame'agi amumazina'ane, azonane aseni'ane agusu'agese zama'ane, <sup>12</sup> maka erino kuma'mofo fegi'a agruma hu'nea kumapi tanefa'ma ome netrazafi, teve hanavazino kregahie.

<sup>13</sup> Mika Israeli vahe'mo'zama Ra Anumzamofo kemo'ma i'oma huno'ma hu'nesia zama mago'azama hanaregama hantagama hu'za hanu'za kumire hu'za ontahisazanagi, zamagra kumi hugahaze. <sup>14</sup> Zamagrama antahisazama kumi hu'nonema hanu'za, mago ve agaho bulimakao afu avre'za kumizamiguma kresramana vu'zana, Anumzanema atru'mahu seli nomofo avuga ome anteho. <sup>15</sup> Hagi kva vahe'zmimo'za ana bulimakao afu'mofo asenire zamazana antetenageno, Ra Anumzamofo avuga ana bulimakaona anankena akafrifo. <sup>16</sup> Hagi ana hutesageno ugagota pristi ne'mo korama'a erino atrumahu seli nompi ufreno, <sup>17</sup> azankoa ana korampi reteno, tavaravema Ra Anumzamofo avugama hantintegeno me'nerega 7ni'a zupa rutri tri hugahie. <sup>18</sup> Hagi ana pristi ne'mo'a, mago'a korana tagino atrumahu seli nompi Ra Anumzamofo avuga mnanentake'za kresramana vu itamofo pazivetaminte ome frentegahie. Hagi mesia korana, atrumahu seli nomofo avugama me'nea kresramna vu itamofo agafi miko tagitre-gahie. <sup>19</sup> Hagi agra miko afova'a tagatino kresramana vu itare negreno, <sup>20</sup> kumi'mofo ofama hu'neaza huno, ugagota pristi ne'mo ana ve bulimakao erino, mika vahe'mokizmi kumizmimofo nona huno kresramna vanigeno, Ra Anumzamo'a kumizmia atrezmantegahie. <sup>21</sup> Anantero ana bulimakaona erino kumamofo fegi'a ese bulimakaoma hu'neaza huno ome kregahie. E'i mika vahe'mokizmi kumi atrezmante ofe huno kresramana vugahie.

<sup>22</sup> Hagi Israeli kva vahe'mo mago'azama hanafima hantga huno Ra Anumzamo'ma osuoma hu'nea zama e'i kumire huno ontahi'nenoma hanuno'a, kumi hugahie. <sup>23</sup> Hagi kumi hu'noe huno'ma antahisuno'a, kumi'aguma kresramana vu'zana ve meme afu afuhe afahe osu'enenia avreno ofama hu'zana vugahie. <sup>24</sup> Ana ve meme afu'mofo asenire azana anteteno, Ra Anumzamofo avugama me'nea kresramana vu itamofo avuga, anankena akafrigahie. E'i kumi'ma hu'nea zamofonte ofa hugahie. <sup>25</sup> Hagi kumite kresramana vu mememofo korana pristi ne'mo'a azankoreti reno Ra Anumzamofo avuga kresramana vu itare'ma me'nea pazivete ome frentegahie. Hagi mesia korana ana kresramna vu itamofo agafi miko tagitre-gahie. <sup>26</sup> Arimpa fru ofama kresramna vu'neankna huno afova'a miko kre vagareno. E'in'a ma pristi ne'mo'ma hanuno'a, ana ne'mofo kumi'mofo nonahina kumi'a atrentegahie. <sup>27</sup> Ra Anumzamo'ma osihoma huno hu'nea ke'ma Israeli vahepinti'ma mago'mo'ma mago'azama hanafima, e'i kumire huno ontahi'neno ana ke'ma runetagreno, kumira osu'noe huno antahigahianagi agra kumi hugahie. <sup>28</sup> Hagi agrama kumi hu'noema huno

antahisuno'a, kumi'ma hu'nea zankura a' meme afuma afuhe afahe'ma osu'nesia avreno eno, kumi'arera ofa eme hugahie. <sup>29</sup> Hagi anama kumite'ma kresramna vunaku'ma hania meme afu'mofo asenire azana anteteno, kresramna vu afu'ma nehzare anankena akafrigahie. <sup>30</sup> Pristi vahe'mo'a azankoa ana korampi reteno, kresramana vu itare me'nea pazivetaminte ome frenenteno, mago'a mesia korana kresramana vu itamofo agafi mika tagitregahie. <sup>31</sup> Anantera arimpa fru ofama hu'neankna huno, maka afova tagatitregahie. Ana hanigeno pristi vahe'mo'za ana afova'a eri'za kresranma vu itare vu'za, Ra Anumzamofonte ome Kresramana vanageno, knare sramna nentahino muse hugahie. E'ina'ma pristi ne'mo'ma hanigeno'a, ana ne'mofo kumi'amofo nona hinkeno, Ra Anumzamo'a kumi'a atrentegahie. <sup>32</sup> Hianagi kumi'mofo ofama hunaku'ma sipisipi afu'ma avreno'ma esuno'a, a' sipisipi afu'ma afuhe afahe'ma osu'nesia su'za avreno eno, <sup>33</sup> ana sipisipi afu'mofo asenire azana anteteno, kresramna vu ofamahu afu'ma zmanankema nekafrizare, anankena akafrigahie. <sup>34</sup> Pristi ne'mo'a azankore mago'a korana reteno, kresramana vu itare me'nea pazivetaminte ome frenenteno, mesia korana kresramana vu itamofo agafi maka tagitregahie. <sup>35</sup> Ana'ma hutenu'o a arimpa fru ofama hu'neankna huno, maka afova tagatitregahie. Ana hanigeno pristi vahe'mo'za ana afova eri'za kresranma vu itare vu'za, Ra Anumzamofonte ome kresramna vuntegahaze. E'ina'ma pristi ne'mo'ma hanigeno'a, anama kumi'ma hu'nea ne'mofo kumi'amofo nona huno krenkeno, Ra Anumzamo'a kumi'a atrentegahie.

## 5

### *Kumi'ma atrentesigu kresramana vu kasegemofo naneke*

<sup>1</sup> Mago'mo'ma keno antahino hu'nesia zanku'ma huama hinogu ke refako hu trateti'ma antahigesigeno huama'ma osaniana, agra kefoza hugahiankino, anazamofo kna'a agra'a erigahie. <sup>2</sup> Hagi iza'o agruma osu'nesia zagama avako huge, agruma osu'nesia zagagafamo'ma fri'nesia avufgare'ma avako huge, fri'nenia afu'mofo avufgare avako huge, asiguregatima regrarohero vanoma nehania zagararamima fri'enigeno avako'ma haniana, agrira azeri pehena hugahiankino, kna'a agra'a erigahie. <sup>3</sup> Huge vahe'mofo azeri pehenama nehiazama antahino keno osu'neno avako'ma huteno, henkama antahino keno'ma haniana, agrira azeri pehena hanigeno, ana kefozamofo kna'a erigahie. <sup>4</sup> Hagi mago vahe'mo'ma agesa antahi so'e osu'neno, ame'ama huno knare'zantero havizantero huvempama huteno, henkama ke'amama haniana, haviza hugahiankino, agra'a kna'a erigahie. <sup>5</sup> Hanki iza'o ama ana avu'ava'ma nehuno haviza hu'noe hanuno'a, agra kumi hu'noe huno huama nehuno, <sup>6</sup> kumi'ma hia zamofo nona'a, afuzaga'afinti a' sipisipio, a' meme afuro avreno Ra Anumzamofontera vanigeno, pristi vahe'mo'a agri kumitera nona huno kresramna vugahie. <sup>7</sup> Hagi agrama kumi'amofo nonama huno kresramna vu sipisipi afu'ma avrega'ma osa-nuno'a, agra tare mahonamao, tare kugofa nama kumi'amofo nona huno Ra Anumzamofonte avreno vuno magora kumi'are ome Kresramana nevuno, magora tevefima krefanene hu ofa ome hugahie. <sup>8</sup> Agra pristi vahete tare namararena avreno vanigeno, ese nama kumi'agu huno kresramna vugahie. Hagi ana namamofona ananke erivamagasigeno frigahianagi, anankena tgahu otregahie. <sup>9</sup> Hagi anama kumite'ma ofama hania namamofo korana, mago'a erino kresramana vu itamofo asoparega, rutri tri

hugahie. Hagi mesia korana ana kresramna vu itamofo agafi tagitregahie. E'i kumi'ma hu'nea zamofonku huno hu ofe. <sup>10</sup> Hagi tra kemo'ma hu'nea kante anteno, mago nama kre fananehu ofa hanigeno, pristi vahe'mo erino tevefi ana ne'mofo kumi nona huno, kresramna vanigeno Ra Anumzamo'a kumi'a atrentegahie. <sup>11</sup> Hagi agrama tare maho namao, tare kugofa nama erino ega'ma osnuno'a, kumi'agu nona huno kresramna vu'zana, 10ni'a kiloma knare hu'nenia flauama ante'nenifintira, mago kilo erino kresramna vino. Hagi agra ana flauapina masavenna ontege, mnantake'zana onteno. Na'ankure e'i kumite'ma hu ofe. <sup>12</sup> Hagi pristi vahete erino vanigeno, ana flauapinti huhamprino osi'a mago aza huno Ra Anumzamofontega tevefi kre mana vugahie. E'i kumite'ma kremana vu ofe. <sup>13</sup> E'inahukna kanteke kumi'ma hu'nesia zantera, pristi vahe'mo'a azahuno kumi'amofo nona huno kre mnana vanigeno, Ra Anumzamo'a ana ne'mofo kumi'a atrentegahie. Hagi mago'a mesiama'a, witi ofama hu'neaza huno pristi vahe'mo erigahie. <sup>14</sup> Hagi ananteria Ra Anumzamo'a Mosesena asmino, <sup>15</sup> Mago vahe'mo'ma Ra Anumzamofo ruotage zama hanifima hantagama haniana, e'i kumi hugahiankino, ve sipisipi anentama afuhe afahem'a osu'nesia avreniana, zago'amo'a seli mono nompi mago silva zagomofo kna'a avamente kumi'ma hu'nerera avreno egahie. <sup>16</sup> Mago vahe'mo'ma Ra Anumzamofonte'ma ruotage'ma hu'nea zama hanifima hantagama haniana, 5fu'a zama eri havizama hu'nesuno'a, ana 5fu'a zana ami'neno, magora ante agofetu huno 6si'a pristi vahera aminkeno, azahuno kumi'amofo nona ana sipisipia kresramana vanigeno, Ra Anumzamo'a kumi'a atrentegahie. <sup>17</sup> Ra Anumzamofo tra kemo'ma osuo hu'nenia kema rutrageno kumi'ma haniana, agra antahino keno osu'neno hugahianagi, agra haviza hugahiankino, kna'a erigahie. <sup>18</sup> Hagi kumi'ma hu'nea zankura afu zaga'afinti pristi vahe'mo'ma hu'nenia avamente mago ve sipisipia afuhe afahem'a osu'nenia avreno vinkeno, pristi vahe'mo'a aza huno kumi'amofo nona huno kresramna vinkino, ontahinenoma hu'nenia kumira, Ra Anumzamo'a anamofona atrentegahie. <sup>19</sup> E'i Ra Anumzamofo avufima havizama hu'nea zante hania ofagino, kumi ofa hugahie.

## 6

### *Kefozama hu'enire'ma ofama hu'zamofo naneke*

<sup>1</sup> Ra Anumzamo'a amanage huno Mosesena asami'ne, <sup>2</sup> Mago'mo'ma Ra Anumzamofo kema amagema ante fatgo nosuno, tava'oma'are'ma nemanisimofoma mago'azama kegava hunantegahie huno antahimino ami'enkeno kegava huso'e huontegi, musufasege revatga huno omnene'nia miza agima ahentege, <sup>3</sup> fanane hu'ne'nia zama hakeno eri'enomena havigema huno onketfa hu'noe huge, eme kamigahue huno eri'ne'nia zama eme nomino, mago'a anahukna kumi'ma nehuno, <sup>4</sup> haviza hu'noe huno antahi'amama hanuno'a, agra kumzafama se'nenia zano, kegava hunanto huno antahimino ami'eneniaza eri havia hu'neniano, havige huno eri'enenia zano, fanane hu'nesiazza eri'nesia zantera ete nemino, <sup>5</sup> havige'ma huno huvempa hu'noma mago'zama eri'enenia kumite'enena, ofama hunaku'ma hania knareria 5fu'a zama eri'enenu'o ana 5fu'a ami'neno, magora ante agofetu hinkeno, 6si'a hina ana zamofo venafona amino. <sup>6</sup> Hagi ana kumi'ma hu'nea zante'ma ofa'ma Ra Anumzamofonte'ma hunaku'ma hanuno'a, kumi'amofo avamente afu kevu'afinti ve sipisipia

afuhe afahem'a osu'nesia avreno pristi vahete vina,<sup>7</sup> pristi vahe'mo'a aza huno ana sipisipia erino kumi'amofo nona Ra Anumzamofo avuga ofa hanigeno, kumi'a apasentegahie.

### *Tevefima kresramana vu'zamofo naneke*

<sup>8</sup> Ra Anumzamo'a anage huno Mosesena asami'ne,<sup>9</sup> Aronine mofavre naga'a amana hiho hunka zamasamio, kre fananema hu ofama hanaza zamofo tra kea amanahu me'nne, ana ofamo'a kresramana vu itare tevefi me'nlenkeno, ana tevemo'a tevava nehinkeno vuno masa hino.<sup>10</sup> Hagi pristi vahe'mo'a efeke za'za kukena nehuno, agu'a avufa avatera efeke kukena nehuno, kresramna vanigeno tevemo'ma tevagaresia tanefara erino, ana itamofona asoparega ome anteno.<sup>11</sup> Hagi ananterera anama antani'nea kukena hatetreteno, ru kukena nentanino ana tanefara kuma'mofo fegi'a avusese huno agruma hu'ne hu'zama nehazafi ome atregahie.<sup>12</sup> Kresramna vu itare'ma nerea tevemo'a asura osuno, tevava hino. Maka nanterana pristi vahe'mo'a teve erinegreño, tevefima kre fananene hu ofa nehuno, afova'a rimpafra ofa kresramna vugahie.<sup>13</sup> Kresramna vu itarera, tevemo'a tevava nehuno asura osino.

### *Witi ofama hu'zamofo naneke*

<sup>14</sup> Hanki ama'i witi ofama kre mnauv zamofo tra ke. Aroni ne' mofavre zagamo'za Ra Anumzamofo avuga kremna vu itamofo avuga eri'za egahaze.<sup>15</sup> Pristi vahe'mo'a flaua'ene masavene mnanentake insensine eri havia huteno anampinti hu avame huno mago aza huno kresramna vu itare, kre'nigeno sramma'amo'a marerinkeno, Ra Anumzamo'a knare mana nentahino musena hugahie.<sup>16</sup> Kresramna nevu'za atresazama'a Aroni'ene mofavre'amo'za negahaze. Hagi zisti onte kekia atru'ma hu seli nonkumapi ruotagema hu'nefinke negahaze.<sup>17</sup> Ana flauapina zistia anteta onkreho, nagri'ma Ra Anumzamona kremna vu nantesafinti zamagrama nesazama'a zami'noe. Kumi'mofo ofamo'a, kefozamafo ofamo'ma hu'neankna huno ruotagetafha hu'ne.<sup>18</sup> Aronimpinti fore'ma hu'nesaza vene'ne'amozagane ana ne'zana negahaze. Zamagra Ra Anumzamofonte'ma tevefima kremna vunte'nafinti'ma mesiama'a, e'i zamagrini'e'za megahiankino, e'i ana zamo'a kasege me'nlenkeno henkama fore'ma hu anante anante'ma hu'za esaza vahe'mo'zanena negahaze. Ruotage'ma hu'nesia zama avako'ma hanimo'a ruotage hugahie.<sup>19</sup> Ra Anumzamo'a amanage huno Mosesena asami'ne,<sup>20</sup> Aroni mofavre naga'mo'za pristi eri'zama eri'nazegu'ma masavema frezmante'za huhampri zmantesaza zupa, Ra Anumzamofontera ama'na kremna vu'za eri'za echo, knarema hu'ne'ni 10ni'a kilo flauapintira mago kilo refako hu'za maka zupama witi kremna nevazankna hu'za, amu'nompinti refako hu'za nanterana negre'za, kinaga mago'a kregahaze.<sup>21</sup> Ana ne'zama retro'ma hanazana heru so'e huteta, ana ne'zama kre sazana kuta fraipanire masavena tagita kreteta ana ne'zana erita Ra Anumzamofo avuga ome golita witi ofa krenkeno knare mana nentahino, Ra Anumzamo'a musena hugahie.<sup>22</sup> Nefa noma erino pristi ne'ma manigahie huno'ma huhampintesia ne'mo'a Ra Anumzamofontera ofa hugahie. E'i Ra Anumzamo'ma erisiama'agi krenkeno tevefi tevagaren. Ama anahukna avu'avazamo'a trake me'nena fore hu anante anante'ma hanaza vahe'mo'za amage ante-vava hugahaze.<sup>23</sup> Pristi vahe'mo'zama miko witi ofama hanafintira, magore hu'za one'za, miko tevefi krenkeno tevagaren.

### *Kumite'ma kresramna vu'zamofonku mago'ane hu'nea naneke*

<sup>24</sup> Ra Anumzamo'a Mosesena anage huno asami'n'e, <sup>25</sup> Aronine ne' mofavre naga'a amanage hunka zamasamio, kumite'ma kresramna vu zamofo tra kea ama'n'e, kresramna vu afu'ma avreno'ma esuno'a, Ra Anumzamofo avuga kresramna vu afu'ma zamanakema taga nehazafi anankena eme tagahinkeno, ana zamo'a ruotagetafha huno Nagri su'a megahie. <sup>26</sup> Ana afu'ma kresramana vania pristi ne'mo, ana afu'ma kresramna vanifintira, mago'a amne negahie. Ana ne'zama nesiana, ruotage'ma hu'nefi atruma nehaza seli nomofo kumapinke negahie. <sup>27</sup> Iza'o anama kresramna vania afute'ma avako'ma hanimo'a, agra ruotage hugahie. Hagi ana afu'mofo koramo'ma ruotage'ma hu'nefima za'za kukenare'ma akamenkeno'a, anampinke sesera hino. <sup>28</sup> Hagi pristi ne'mo'ma ana afu'ma mopa kavofima kresuno'a, ana kavo'a rurako hugahie. Hianagi bronsire'ma tro'ma hu'nesaza kavofima kresuno'a, ana kavoa vazagateno sese hino. <sup>29</sup> Ana ne'zamo'a ruotagetafha hu'neankino, pristi naganofipintira venene'amozaage ana ne'zana negahaze. <sup>30</sup> Hianagi kumi'mofo nona huno ofama hu'naku korama'a erino atru'ma nehaza seli nompima ruotage'ma hu'nefinkama vania afu'mofo ame'a mago'mo'a oneno. Hagi ana miko kre fanane hino.

## 7

### *Kefozama hu'nea zanku'ma kresramna vu'zamofo naneke*

<sup>1</sup> Ama'i kefozama hu'nea zamofonku kresramna vu'zamofo trakegino, ruotagetafha hu'ne. <sup>2</sup> Kefozama hu'nesire'ma erino esia ofa, tevefima kresramna vu zagagafama anankema nekafrizafi ananke'na eme akafriteno, korama'a erino kresramna vu itamofo asoparega ome rutritri hugahie. <sup>3</sup> Anantero miko afova'a kresramna nevuno, risonafima me'nea agusa'an, rimpama eri anovazi'nea afova'an, <sup>4</sup> tare kreso'ane anante'ma eri anoma vazi'nea afova'an, asumna'an, asumnare'ma erino vazi'nea afovanena, maka eritagati atregahie. <sup>5</sup> Ana zana pristi vahe'mo kresramna vu itamofo avuga Ra Anumzamofonte tevefi kresramna vuntegahie. E'i kefozama hu'nea zanku'ma kresramnama vania ofe. <sup>6</sup> Ana ne'zana ruotagetafha hu'neanki'za ruotage'ma hu'nea kumapi, pristi nagapinti venene'amozaage negahaze. <sup>7</sup> Hagi kefozama hu'nere'ma kresramma vania ofamo'a, kumite'ma kresramna vu ofagna hu'neankino, trakezni'amo'a magoke trake me'neankino, ina pristi vahe'mo'ma kumi'mofo nona huno kresramna vania pristi vahe'mo, agra'ama nesia su'zana, anampintira erigahie. <sup>8</sup> Anahukna huno tevefima kresramna vu ofama eri'za esageno kresramna vania pristi ne'mo, ana afu'mofo akru'a erigahie. <sup>9</sup> Anahukna huno avenifi kre hagage hu'nesia witio, kuta kavofi kre'nesia witio, kuta fraipanire kre'nesia witima ofama eri'za esazana, ofama hania pristi vahe'mofo su'za megahie. <sup>10</sup> Hagi mika witi ofama masavene eri havia huge, hagage hu'nesia witia miko Aroni ne' mofavre'mokizmi su'za megahie.

### *Rimpa fru ofama hu'zamofonku mago'ane hu'nea naneke*

<sup>11</sup> Ama'i rimpa fru ofama Ra Anumzamofoma huntesaza zamofo trake. <sup>12</sup> Hagi mago'mo'ma Ra Anumzamofoma muse hunteno ofama huntenaku'ma hanuno'a, zo-ore bretima masavene eri havia huno kre'nenia bretine, masave frente bisketine, kne'nesia flauapima masavene eri havia huno krente'nesia kekine amigahaze. <sup>13</sup> Hagi Ra Anumzamofoma susu

hunteno rimpa fru ofama huntесifina, zisti ante bretine kre mana vunteno. <sup>14</sup> Hagi breti ofama hunaku erino esifintira, Ra Anumzamofo suzane huno mago'mago'ma erinoma eme amisia bretimo'a, kresramana vu itare korama rutri tri hania pristi ne'mofa su'za megahie. <sup>15</sup> Hagi rimpa fru ofama susu'ma hunteno amite'noma atresia avufga'a, kresramnama vania zupage negahie. Hagi magore huno atrenkeno, mago'a avufgamo'a me'nenko kora otino. <sup>16</sup> Hianagi huvempa hu'nesire'ma kresramna vu ofama huge, agra'a avesite'ma hania ofa, ana ofama kresramnama vania knare neneno, mesiama'a okina negahie. <sup>17</sup> Hianagi Kresramanama nevuno'ma atresageno 3'a zageknama ome haniana, ana avufga'a tevefi kre fanane hino. <sup>18</sup> Hagi rimpa fru ofama kresramna vu afu'mofa ame'ama mesiama'a, namba 3 knazupama nesiana ana ofama haniazamo'a, amnezankna hugahie. Iza'o ana afu'ma nesimo'a kefoza hugahiankino, kna'a agra'a erigahie. <sup>19</sup> Hagi ana afu'mofa ame'amo'ma agruma osu'nesia zama avako'ma hania avufga'a onetma, tevefi kre fanane hiho. Hagi mago'a ame'ama mesiama'a agruma hu'nesaza vahe'mo'za negahaze. <sup>20</sup> Hagi izo'a agruma osu'neno, rimpa fru ofama Ra Anumzamofonte'ma hanifinti'ma nesiana, Anumzamofo vahepintira ahe natitregahaze. <sup>21</sup> Hagi mago'mo'ma vahe'ma azeri pehanama nehiazama avako huge, agruma osu'nesia zaga-gafafa avako huge, agoteno agruma osu'nesia zama avako'ma nehuno, Ra Anumzamofontegama rimpa fru ofama kresramna vuntesnifinti'ma nesiana, Anumzamofo vahepintira ahe natitregahaze. <sup>22</sup> Anante Ra Anumzamo'a Mosesena asamino, <sup>23</sup> Israeli vahe'mokizmia anage hunka zamasamio, Magore huta Israeli vahe'mota bulimakao afumofono, sипи si Afumofono, meme afu'mofa afova'a onetfa hugahaze. <sup>24</sup> Anahukna huta fri'nesia zagagafao, mago'a zagagafamo aheno tapage hu'nesia zaga-gafanena, mago'a eri'za kante erinenteta, onetfa hiho. <sup>25</sup> Na'ankure Ra Anumzamofonte'ma tevefima kresramna vuntesaza zagagafamofo afova'a nesia vhhera, Anumzamofo vahepintira ahe natitregahaze. <sup>26</sup> Hagi tamagrama manitama vanafina, namamofone, mago'a zagagafamofo korama'a onegahaze. <sup>27</sup> Hagi izo'a korama nesimofona, Anumzamofo vahepintira ahe natitregahaze.

### *Pristi vahe'mo'za erisaza zamofo naneke*

<sup>28</sup> Anante Ra Anumzamo'a Mosesena asamino anage hu'ne, <sup>29</sup> Israeli vhhera anage hunka zamasamio, izo'r rimpa fru ofama kresramna vunaku'ma haniana, rimpa fru ofama Ra Anumzamofonte hunaku'ma hanifinti, mago'a erino egahie. <sup>30</sup> Ra Anumzamofonte'ma tevefi kre fananehu ofa agra'a azampinti erino egahie. Agra afova'a ane amimizane erino egahiankino, ana amimiza'a eri veravehu ofa Ra Anumzamofonte erino egahie. <sup>31</sup> Hagi pristi vahe'mo'za afova'a kresramna vu itare kregahazanagi, amimiza'a Aroni mofavre naga'mokizmi su'zane. <sup>32</sup> Hagi rimpa fru ofama hunaku'ma eri'nomia esia afu'mofona, tamaga kaziga amumazina pristi vahe'mokizmi zamigahaze. <sup>33</sup> Hagi Aroni mofavre nagapinti pristi ne'mo'ma, rimpa fru ofama afova'an, korama'ama hanimo, tamaga kaziga amumazina erigahie. <sup>34</sup> Na'ankure maka Israeli vahe'mo'zama rimpa fru ofama hu'naku'ma eri'zama esaza kresramna vu ofafintira, eri verave hu ofama hu amimizane, kresramna vu ofama hu tamaga kaziga amumazina Aro-nine mofavre naga'amokizmi Nagra zami'noanki'za, maka kna zamagrake

nevava hugahaze. <sup>35</sup> Ra Anumzamofonte'ma kresramna vu ofama hanafintira, ana'ma'a Aronine mofavre'naga'amokizmi su'za megahiankino, e'i ana ne'zamo'a zamagri su'za megahie huno pristi eri'zama erisazegu'ma Mosese'ma masavema frezmantero huhampria zupa, Ra Anumzamo'a eri-gahaze hu'neankino, zamagra erigahaze. <sup>36</sup> Hagi pristi vahe'ma huhampri zmanteno masavema frezmanteria zupa, Ra Anumzamo'a Israeli vahe'mokizmigura ofama hanafintira ama anama'a pristi vahera zamitere hugahaze huno huzmante'neanki'za, Israeli vahe'mo'za fore hu anante anante'ma hanaza vahe'mo'za ofama hanaza zupa, ama anama'a amitere hugahaze. <sup>37</sup> Ama'i kresramna vu'zamofo kasege, witima kre mana vu ofagi, kumite'ma kresramna vu ofagi, kefozama hu'nesire'ma Kresramana vu ofagi, masavema frezmantero huhamprinte ofagi, rimpfa fru ofama, <sup>38</sup> Israeli vahe'mo'zama Sainai hagage kokampima mani'nazageno, Ra Anumzamo'ma kresramna vunanteho huno nezmasamino, Sainai agonafi Mosesema ami'nea kasege.

## 8

### *Pristi eri'za erisaza vahe'mokizmi huhampri zamante'nea naneke*

<sup>1</sup> Ananter Ra Anumzamo'a anage huno Mosesena asmi'ne, <sup>2</sup> Menina Aronine mofavre naga'ane, efeke za'za kukena zamine, huhampri nezmante'za tagi'zama frenezmantaza masavene, kumite'ma ofama hanaza ve bulimakaone, tare sipisipine, mago ekaeka kupi zo-ore bretia e'nerinka, <sup>3</sup> atrumahu seli nomofo avuga, maka Israeli vahera ke hutru huo. <sup>4</sup> Mosese'a Ra Anumzamo'ma asami'nea kante anteno, ke hige'za atruma hu seli nomofo ufre kanfante omeritru hazageno, <sup>5</sup> amanage huno Israeli vahera zamasami'ne, Ra Anumzamo'a amana hiho huno hurante'ne. <sup>6</sup> Anage huteno Mosese'a Aronine, mofavre naga'a zamavareno ome zmanteno tina frezamante'ne. <sup>7</sup> Ana huteno agra agu'a kukena Aronina antaninento, za'za kukena hunenteno anazama tro'ma nehaza vahe'mo'za knare hu'za tro hu'naza zaza nofi rugagino amu nofira hunenteno, amimizafina tavrave antaninento, ana tavravere efot'ema nehazaza amimizarera anakinte'ne. <sup>8</sup> Hagi onasi tavrave amimizafina anakinteten, ananter Ra Anumzamofo avesizama keno eri fore'ma nehia haverare urimi havene tamimi havene rente'ne. <sup>9</sup> Hagi asenirera mago tavrave nofi anakinenteno, ana nofimofo avuga golire kuta zoumpa tro hu'naza anakinenteno, Ra Anumzamo'ma Mosesema asmi'nea kante anteno tavravea anakinte'ne. <sup>10</sup> Anante Mosesea'tagino'ma frenezmanteno zamazeri ruotage'ma nehia masavena erino seli none, hakare'a zama agu'afima me'nea zantamina, masave frenenteno Ra Anumzamofo zane huno azeri ruotage hunte'ne. <sup>11</sup> Hagi mago'a masavena 7ni'a zupa kresramna vu itarera rutri tri hunenteno, kresramnavu itane anampima ne'zama krezantamima me'nea zana azeri ruotage nehuno, bronsire zuompane, tra'anena azeri ruotage hu'ne. <sup>12</sup> Hagi mago'a masavena Aroni asenifi frenenteno azeri ruotage hunte'ne. <sup>13</sup> Ana huteno Aroni mofavre'mokizmia zamavreno kukena hunezmanteno, zamunofira hunezamanteno, Ra Anumzamo'ma asmi'nea kante anteno zamasenire tavrave nofira anakizmante'ne. <sup>14</sup> Ana huteno Mosesea' kumi'mofo ofama hu'zana ve bulimakao afu avreno egeno, Aroni ene mofavre'amo'za ana bulimakaomofo asenirera zamazana ante'naze. <sup>15</sup> Mosese'a ana bulimakao afura ananke akafriten, mago'a korana erino

Kresramana nevaza itare me'nea pazivetaminte azankonu reno frenento, mago'a korama meama'a ana kresramnavu itamofo agafi tagitreno azeri ruotage hunte'ne. <sup>16</sup> Hagi rimpafima me'nea mik'a afova'an, asumnare'ma refite'nea afova'an tarega kres'o'anena Moses'e'a tagatino kresramna vu itare kresramna vu'ne. <sup>17</sup> Hianagi ana bulimakaomofo avufagi, ame'agi, agruna nofi'a erino kumamofo fegi'a Ra Anumzamo'ma asami'nea kante Moses'e'a ome kre'ne. <sup>18</sup> Hagi anantera Moses'e'a tevefima kresramna vu'zana ve sipisipi afu avrezamige'za, ana sipisipimofo asenire Aroni'ene mofavre'amo'za zamazana ante'naze. <sup>19</sup> Hagi Moses'e'a ana sipisipia ananke akafrino korama'a erino kresramna vu itamofo maka asoprega rutri tri hu'ne. <sup>20</sup> Ana sipisipima tagahu osi osi huteno'a aseni'agi, ameagi, afova'agi huno kre manavu'ne. <sup>21</sup> Hagi agusu'agese zama'an, agazama'anena tinu sese huteno, Moses'e'a Ra Anumzamo'ma asami'nea kante anteno, ana maka kresramna vigeno Ra Anumzamo'a mana'a nentahino antahi musena hu'ne. <sup>22</sup> Hagi Aronine mofavre'amokizmima huham-pri zamanteno zamazeri ruotage hunaku Moses'e'a mago sipisipia zamige'za asenire zamazana ante'naze. <sup>23</sup> Moses'e'a ana sipisipia ananke akafrino mago'a korama'a erino Aronina tamaga kaziga agesa atupare'ene, tamaga kaziga azafa azankore'ene, tamaga kaziga agafa agigore'ene frente'ne. <sup>24</sup> Moses'e'a Aroni mofavre nagara kehige'za azageno anahu kna huno ana sipisipimofo korana tamaga kaziga zamagesa atupare'ene, tamaga kaziga zamazafa zamazankore'ene, tamaga kaziga zamagafa zamagigore'ene frezamante'ne. Hagi korama'a erino kresramana vu itamofo asoprega rutri tri hugagi'ne. <sup>25</sup> Hagi ana huteno afova'an arisona afovane, maka arimpama erino vazi'nea afovane, asumnane, tarega kres'o'ane erinoma vazi'nea afovane tamagakaziga amumazinane eri'ne. <sup>26</sup> Zisti onte bretima Ra Anumzamofo avugama ekaeka kopi antegeno me'nefinti, Moses'e'a zisti onte kekia mago e'nerino, masavenema eri havia huno flauateti kre'nea bretine, masave frente bisketine eriteno sipisipi afova'an tamaga kaziga amumazinama me'nere ante'ne. <sup>27</sup> Ra Anumzamofonte'ma eri veravehu ofa huntehogu, ana zantamina Moses'e'a erino Aronine mofavre'amokizmi zamazampi ante'ne. <sup>28</sup> Ana'ma huteno'a Moses'e'a zamazampinti ana zantamina erino kresramna vu itare kresramna vu'ne. E'i pristi vahe'ma zamazeri otage hu ofagino, tevefi kregeno Ra Anumzamo'a mana'a nentahino musena hu'ne. <sup>29</sup> Anahukna huno Moses'e'a Ra Anumzamofo avuga ana sipisipimofo ahihiza'a eriverave hu'ne. E'i Ra Anumzamo'ma asami'nea kante anteno anara hu'neankino Moses'e'ma nesia ne'za megahie. <sup>30</sup> Hagi Moses'e'a vahe'ma huhamprinte masavena mago'a erino, kresramna vu itareti korana mago'a erino Aroni za'za kukenaregane, mofavre'amokizmi za'za kukenaregane rutri tri hu'nezmanteno, Aronine kuken'a'ne, mofavreramima'ane, kukenazami'nena eri ruotage hu'ne. <sup>31</sup> Hagi Moses'e'a Aronine mofavre'aramina amanage huno zamasamine, Sipisipi afu ame'a atruma hu seli nonte'ma ufre kahante kavofi kretetama, zo'ore bretima zamazeri ruotage'ma nehia bretima ekaeka kupima me'nea bretine Ra Anumzamo'ma hu'nea kante anteta, negahaze. <sup>32</sup> Ana hute'nageno mesia bretine ame'anena tevefi maka kre vagaregahaze. <sup>33</sup> Seveni'a zagegnamofo agu'afina atruma nehaza seli nona atreta atioramaho, na'ankure 7ni'a knamofo agu'afi, agra tamazeri ruotagera hugahie. <sup>34</sup> Ra Anumzamo'ma zamazeri agrumahu avu'avazama hugahanema hu'nea zana menina hago

huvagarone. <sup>35</sup> Tamagra 7ni'a knafina hanine zagenena atrumahu seli nomofo kafante mani'neta, Ra Anumzamo'ma huramantesia zana ne-huta, ofri kasefa huta maniho. <sup>36</sup> Hige'za Aroni'ene mofavre'amo'za Ra Anumzamo'ma Moses'e'ma asamigeno zamasami'nea zana maka hu'naze.

## 9

*Aroni'ene mofavre naga'amo'za erigafa hu'za kresramna vu'naza naneke*

<sup>1</sup> Anazama huvaretogeno 8ti knazupa Moses'e'a Aronine mofavre naga'anee Israeli kva vahetaminena ke hutru huteno, <sup>2</sup> amanage huno Aronina asami'ne, Kumite'ma ofama hu'zana mago afuhe afahе osu'nesia agaho ve bulimakao afu nevrenka, kre fananehu ofama hu'zana mago ve sipisipia afuhe afahе osu'nesia avrenka Ra Anumzamofona avuga ofa ome huntegahane. <sup>3</sup> Hagi Israeli vahe'mokizmia kagra anage hunka zamasamio, kumizmigu'ma kresramna vunakura, ve meme afu nevreta, tevefima kre fananehu ofama hu'zana mago kafu huno afuhe afahе osu'nesia agaho bulimakaone, mago sipisipi afuteti kresramna nevuta, <sup>4</sup> mago ve bulimakaone mago ve sipisipireti arimpa fru ofa kresramana Ra Anumzamofo avuga nehuta, masavenu'ma eri havia hu flauateti witi ofa hugahaze. Na'ankure menina Ra Anumzamo'a tamagrite efore hugahie. <sup>5</sup> Hagi Moses'e'ma hu'nea zantamina Israeli vahe'mo'za eri'za atruhu seli nomofo avuga Ra Anumzamofo avure eme oti'naze. <sup>6</sup> Anante Moses'e'a amanage hu'ne, Ra Anumzamo'a huno amanahu'za hanageno Ra Anumzamofo masazamo'a tamagridera efore hugahie hu'ne. <sup>7</sup> Anante Moses'e'a anage huno Aronina asami'ne, Kumite'ma nona huno kresramna vu ofaka'ane tevefima kre fanane hu ofaka'a erinka enka kagra'a kumitera nona hunka ofa nehunka, Anumzamo'ma hu'nea kante antenka ruga'amokizmi kumi'zamirera nona hunka kresramna vu zamattegahane. <sup>8</sup> Hagi Aroni'a kresramna vu itare vurava'o huno kumi'agu kresramna vanigu agaho bulimakao anankena akafri'ne. <sup>9</sup> Hagi anante mofavrezaga'amo'za korama'a eri'za ageno, azanko ana korampi reteno, kresramna vu itare'ma me'nea pazivetaminte frenenteno, mago'ama meama'a kresramna vu itamofo agafi tagitre'ne. <sup>10</sup> Hagi Ra Anumzamo'ma Mosesema asami'nea kante anteno afova'agi, tarega kresoagi, asumanama erinovazi'nea afova'a kresramna vu itare kumi'mofo nona huno tevefi kresramna vu'ne. <sup>11</sup> Ame'ane ukri'anena kumamofo fegi'a ome kre'ne. <sup>12</sup> Ananter Aroni'a kresramna vu sipisipi afura ananke akafritege'za, mofavre'amo'za ana korana eri amizageno, kresramna vu itamofo asoparega rutritri hugagi'ne. <sup>13</sup> Hagi kresramna vu afu'ma tagahu osi osi'ma hunte'nefinti magoke magoke erinemi'za asenianena erimizageno kresramna vu itarera kre'ne. <sup>14</sup> Hagi agusu agese zama'anee agazama'anena tinu sese huteno kresramna vu itare kre'ne. <sup>15</sup> Hagi ananter Aroni'a veamokizmi ofa kresramna vu afura erino ome kresramna nevuno, agra veamokizmi kumite'ma kresramna vu meme afu avreno ananke akafrino ese'ma hu'neaza huno kresramna vu'ne. <sup>16</sup> Hagi kresramna vu'zana erino eno kresramna vu trake'mo'ma hu'nea kante anteno kresramna vu'ne. <sup>17</sup> Hagi mago'a witia azampina eriviteno eno, kre mna vu itare nanteran eme krempna vu'ne. <sup>18</sup> Hagi agra veamozama Anumzanema mago zamarimpa hanaza ofa bulimakaone, sipisipi afu'enena anankena akafri'ne. Hagi Aronina mofavre naga'amo'za

korama'a erimizageno, kresramna vu itamofo asoparega rutri tri hu'ne. <sup>19</sup> Hianagi bulimakaomofo afova'ane, sipisipimofo risonarega me'nea agusa'ane, tarega kreso'ane asumanama eri novazi'nea afovane, <sup>20</sup> ana afu'mofo amimizafi eri antageno Aroni'a kresramana vu itare kre'ne. <sup>21</sup> Aroni'a Mose'se'ma hu'nea kante anteno amimiza'ane tamaga kaziga amumazinanenam erino Ra Anumzamofo avuga eriverave hu ofa hu'ne. <sup>22</sup> Hagi Aroni'a kumite'ma kresramna vu ofane, kre fanane hu ofane, rimpia fru ofama huteno'a, veamokizmirega ana azana rusuteno asomu ke huzmanteteno, anantetira atreno erami'ne. <sup>23</sup> Mose'se'ene Aronikea atruma nehaza seli nompi mareriteke atiramike eke veamokizmia asomu ke eme hunezmantakeno, Ra Anumzamofo masamo'a veamokizmire e'ama hu'ne. <sup>24</sup> Ra Anumzamo'a tevea atregeno eramino ana kresramna vu'zane, afova'a kresramana vu itaretira tefanane hu'ne. E'i anazama vahe'mo'za nege'za muse hu'za kezaneti'za, zamavugo saregati mopafi mase'za mono hunte'naze.

## 10

### *Natapu'ene Avihuke fri'na'a naneke*

<sup>1</sup> Natapu'ene Avihukea Aroni ne' mofavregi'ne, Ra Anumzamo'ma i'oma hu'nea kea rutagreke, mnanentake'zama insensima kre fraipanifi Ra Anumzamofontega ome kremina vu'na'e. <sup>2</sup> Ana hakeno Ra Anumzamo'a teve atregeno hagnahagna huno znavufga terasagegeke, Ra Anumzamofo avuga fri'na'e. <sup>3</sup> Ana hutakeno Mose'se'a Aroninku anage hu'ne, Ra Anumzamo'a amanage hu'ne, nagrite'ma eravao'ma hanaza vahe'mo'za Nagrikura ruotage hu'ne hu'za nehanage'na, masani'a zamaveri hugahue hu'ne. Aroni'a anante kea osuno oti'ne. <sup>4</sup> Hagi Mose'se'a anage'ma huteno, Aroni nenogo Uzari mofavre Miseline Elsafanikizanigu zanasamino, ner-anafu fri kerafa emerita atruhu seli mono nomofo avugatira kuma'mofo fegi'a afete ome atre'o, <sup>5</sup> anage higeke anama fri'na'a netre'na za'za kukena znavufare me'negeke Mose'se'ma zamasami'nea kante anteke erike fegi'a vu'na'e. <sup>6</sup> Anante Mose'se'a amanage huno Aronine tare mofavre'arare Eleasane, Itamarinena zamasmi'ne, Ama zankura tamasunkura huta tamazokate'ma refite'naza tavrave eritrege, kukanatamia tagotora osiho, ru ete frisageno Ra Anumzamo'a mika vahekura arimpa ahezamantegahie. Hinagagi mika Israeli vahe'mo'za Ra Anumzamo'ma tevereti'ma znahe fri'nea netretrenkura amane zavira ategahaze. <sup>7</sup> Hagi atrumahu Seli nompintira frigahazanki atiramita oviho. Na'ankure Ra Anumzamo huhampritaman-teno masavea freramante'ne. Hige'za Mosesema hiankante ante'za anazana hu'naze. <sup>8</sup> Ana hutageno, Ra Anumzamo'a anage huno Aronina asami'ne, <sup>9</sup> Aroniga kagrane mofavre nagaka'anema Atrumahu Seli Nompima vunaku'ma hanaza knarerwa waini tina nege, hanave tina neteta uofreho, ana'ma hanazana frigahaze. Hagi henkama fore hunante anante'ma hu'zama vanaza vahe'mo'za anazana hu'za vugahaze. <sup>10</sup> Hagi hanave tima oneta knare huta manisuta, e'izamo'a ruotage higeno, e'izamo'a ruotagera osu'ne nehuta, e'izamo'a agru higeno, e'izamo'a agru osu'ne huta rezageneta kegahaze. <sup>11</sup> Ana nehutma Ra Anumzamo'ma mika trakema Mosesema ami'neana, Israeli vahera rempi huzamigahaze. <sup>12</sup> Mose'se'a amanage huno Aronine tare mofavre'ama ofri'ma mani'namokizni Eleasarine, Itamarinena zamasmi'ne, Witi ofama nehazageno kre mana vu ita me'nere zistima onte bretima me'neana erita neho, na'ankure e'i ruotage hu'ne.

<sup>13</sup> Hagi ruotage'ma hu'nea kumapi neho. Na'ankure Ra Anumzamofoma kresramna vuntenafintira kagrane kagripintima fore hanaza vahe'mo'za negahaze huno huramante'neankino, tamagri ne'za me'ne. <sup>14</sup> Hagi Israeli vahe'mo'zama eriverave hu ofama hanaza amimiza'ane, arimpa fru ofama hanaza amumazina'anena kagrane maka ne'mofakanena agruma hu'nea kumapinke amane negahaze. Na'ankure Ra Anumzamo'a negahaze huno huramante'neankino tamagri ne'za me'ne. <sup>15</sup> Hagi amo'ane amimiza'ane eri verave'ma hutesuta, afova tevefi kresramma nevuta Ra Anumzamo'ma hu'nea kante, amo'ane amimiza'anena kagri'ene mofavre nagakamofo suzankita, amne eri vava huta vugahaze. <sup>16</sup> Hagi Moses'e a kumite'ma ofama hu'n'a meme afu'mofo agenkema zamantahigeno keana, maka ana meme afura tevefi krevare'na'e hu'naze. Anankema Moses'e ma nentahino'a, Aroni nemofo Eleazane Itamalikiznia tusi arimpa ahenezzanteno, <sup>17</sup> nahigeta kumite'ma kresramna vu afura ruotage'ma hu'nefina one'na'e? Na'ankure e'i ruotage hu'neankino, vahe'mofo kefovante nona huta kresramna vanageno, Ra Anumzamo'a kumizmia eritrezmantiesiegua eri'za e'naze. <sup>18</sup> Hanki keho, ruotage'ma hu'nefinkama korama'a erita uofreneta huramante'noa kante ana ame'a nazasine. <sup>19</sup> Hianagi Aroni'a ange huno Mosesena asami'ne, Menina kumite ofane tevefima krefanane hu ofanena Ra Anumzamofa avurera kresramna vu'na'anagi, amanahu zana nagritera fore nehie. Kumite'ma kresramna vu'nesaza zama nesuana Ra Anumzamo'a menina musena hugahifi? <sup>20</sup> Anankema Moses'e a nentahino, Aroni'a tamage hie huno hu'ne.

## 11

### *Avusesu hu'nea zagagafane avusesu osu zagagafamofo naneke*

<sup>1</sup> Ra Anumzamo'a amanage huno Mosesene Aroninena zanasmi'ne, <sup>2</sup> Mopafima mani'naza maka zagagafafinti'ma nesaza zagamofo tra kea Israeli vahera zamasnio. <sup>3</sup> Hagi agigomo'ma tarefi atanesigeno, trazama neteno, ete ome revarino nenesia zagagafa amane negahaze. <sup>4</sup> Mago'a zaga-gafamo'za revari'za ne'zana nenazageno, zamagigomo'a hatanara nosigeno, mago'a zagagafamofona zamagigomo'a hatnama hanigeno ne'zama revarino nonesia zagagafa onegahaze. E'i magora kemoli afure, ne'zana varino neneanagi agiamo'a tarefina hatnara osu'neankino agrua osu'ne. <sup>5</sup> Havefi krofamo'a anahukna huno ne'zana revarino neneanagi, tarefi agigomo'a ruotaneneankino agru osu'ne. <sup>6</sup> Rebitimo'a anahukna huno ne'zana revarino neneanagi, tarefina agigomo'a hatnara osu'neankino agru osu'ne. <sup>7</sup> Afu'mofona agigomo'a hatna hu'neanagi, ne'zana revarino noneankino, agru osu'ne. <sup>8</sup> Hagi tamagra ana zagagafaramima fri'nesiana avakora osuge ame'a onegahaze, na'ankure agrua osu'ne. <sup>9</sup> Hanki miko hagerimpine, amane timpinema nemanisia zagama iri'ane agekonanema hunte'nesiana amane negahaze. <sup>10</sup> Hianagi mika zagama hagerimpima nemanzia Zagane, amane timpima iri'ane ageko'nanema huonte'nesia zagama mani'neniana, himnage huno havizantfa hu'neankita onegahaze. <sup>11</sup> Hagi e'i ana zagamo'za kasri'za havizantfa hu'nazanki, ame'a noneta fri'nesaza zamavufarera avakora osuta onegahaze. <sup>12</sup> Hagi timpima mani'nenaza zagamofoma iri'ane agekonanema huonte'neniana, tamago-tenteta haviza hu'neankita onegahaze. <sup>13</sup> Mago'a nama haviza hu'neankita onegahaze. E'i ana namazaga tumpanki, zagagafama nenea namagi,

haninke namama zagagafama nenea namagi, <sup>14</sup> korankre za'za agekonane tumpanki, kazi tumpanki, <sup>15</sup> haninke namaramima ra ageruma neria namagi, <sup>16</sup> mananinkna zaza arenane namagi, rankrafama nehia komutonki, hagerinkenaf nemaniza efeke namazagagi, hagerinkena tumpanki, <sup>17</sup> osi komutonki, hagerimpi hareno vano nehuno nozameza nehia namagi, ra komutonki, <sup>18</sup> efeke komutonki, hagage kopi komutonki, kasari zama nenea tumpanki, <sup>19</sup> za'za aginkunane efeke namagi, afi patonki, funtariki tampranena onegahaze. <sup>20</sup> Tare ageko'nama hunte'nenigeno agareti'ma mopafima regraroheno vanoma nehania ne'onse zaga knarera osu'neankita onegahaze. <sup>21</sup> Agekona'ma huntogeno mopafima vanoma nehu'za, takaire takourema hu'zama vanoma nehaza zagaramina amane negahaze. <sup>22</sup> E'i ranra kenuki, asukenki, onensi kenura amane negahaze. <sup>23</sup> Hianagi mago'a zagramima agiazama hunte'nenigeno ageko'nama me'nenia zagaramina, tamagotententeta onegahaze. <sup>24</sup> Amanahu'ma hanuta tamagra'a tamavufga tamazeri pehana hugahaze. Fri'nenia zagaraminte'ma avakoma hanimofona, azeri pehana hanigeno, anazamo'a meno vuno kinaga ome vagaregahie. <sup>25</sup> Iza'o frizagama avakoma hanimo'a, kukena'a sese huteno mani'nenigeno, vuno kinaga senkeno anamo'a agrua hugahie. <sup>26</sup> Agigoma me'nenia zagaramima, agigomo'ma hatanama osu'nesigeno trazama revarino nonenia zagaramina agru osu'ne huta hoho. Iza'o ana zagaramima avako'ma hanimo'a agru osugahie. <sup>27</sup> Rama'a agigoma hunte'nenigeno mopafima vanoma nehania zagaramina, agrua osu'naze. Hagi fri'nesageta zamavufarera avako osiho. Hagi avako'ma hanazana agru osu mani'nenageno vuno kinaga segahie. <sup>28</sup> Iza'o anama fri'nesia zagamofo avufa'ama erisaga hanimo'a, kukena sese huteno mani'nenigeno vuno kinaga segahie. E'i ana zagamo'a agrua osu'ne. <sup>29</sup> Hagi neonse zagaramima, mopafi vano nehaza zagaramimpinti'ma agruma osu'nazana, barenki, kafagi, neonse'ene ranra tagovi zagarami'ne. <sup>30</sup> Hagi efeke tagovi kekogi, pupukigi zampavenki, amuho kopi nemaniza tagoviki, sgoramure. <sup>31</sup> Hagi ana zagaramima mopafima vanoma nehia zagaramimpinti'ma agru'ma osu'nesia zagama, fri'nenagenoma iz'a' zamavufare'ma avako hanimo'a, agru osugahiankino, agru osu mani'nena vuno kinaga segahie. <sup>32</sup> Ana zagaramimo frino evuramino zafareti'ma tro hu'nesia zantero, kukenarero, zagagafamofo akrutero, tapa kukenare'ma evuramino avako'ma haniana, agru osanigeno ana'ma hania zantamina timpi reta sese hinkeno meno vuno kinaga senkeno agrua hugahie. <sup>33</sup> Ana zagagafainti mago'mo'ma mopa kavofima evurami'niana ana kavofima me'nenia zantamimo'a agru osugahianki, ana kavoa rurako hutreho. <sup>34</sup> Hagi ana kavofinti'ma tima tagiramino avakoma hania ne'zamo'a agru osanigeno, ana kavofinti'ma tima ne'zamo'a, agru osugahie. <sup>35</sup> Hagi ana zagamofo fri avufgamo'ma evuramino avako'ma hania teve hugre stofumo'o avenimo'a agru osugahianki, rurako hutreho. <sup>36</sup> Hagi tinkampui nehantisirero tifi kerifi ana zagamofo fri avufamo'ma me'neniana amane agru hu'neanagi, iz'a' azama avako'ma hanimo'a agru osugahie. <sup>37</sup> Hagi krinaku'ma ante'nenaza avimzampima fri'nesia zagamo'ma evuramisiana, ana avimazamo'a agru hugahie. <sup>38</sup> Hianagi fri'nenia zagamo'ma avimazama me'nenia timpima evuraminiana, ana avimzamo'a agrua osugahie. <sup>39</sup> Hagi negahazema hunama huramante'noa afuzagafintima fri'nenigeno avako'ma hanimo'a, agru osu mani'nena vuno kinaga segahie. <sup>40</sup> Hagi anama fri'nenia

zagama nesimo'o, erisga hanimo'a agru osugahiankino kukena'a sese ne-huno, agru osu mani'nenigeno vuno kinaga segahie. <sup>41</sup> Hagi moparema vanoma nehia zagaramina agru osu'neankita, tamagotenteta onegahaze. <sup>42</sup> Hagi mopafima zamasaguregati vano nehaza zagaramine, rama'a agiaza hunte'nenia zagamo mopafi vano nehania zagaramina agru osu zagagita tamagotenenteta tamagra onegahaze. <sup>43</sup> Hagi ama ana zagaramina avako nehutma, tamagra'a tamazeri pehana osiho. <sup>44</sup> Na'ankure Nagra Ra Anumzana tamagri Anumza mani'noanki, tamagra'a tamazeri avusese ne-hutma, tamazeri ruotage hiho. Na'ankure Nagra ruotage hu'nogu, zamasaguregati'ma vanoma nehaza zaga avakora hutma tamazeri pehena osugahaze. <sup>45</sup> Nagra'a Ra Anumzamo'na Isipitira tamavre fegu'a atre'na, tamavre'na e'noa tamagri Anumza mani'nogu, tamagra mani ruotage hutma maniho. Na'ankure Nagra ruotage hu'na mani'noe. <sup>46</sup> Mopafima vanoma nehaza zagaramimofone namaramimofone, miko timpima ne-maniza zagaramimofone, mika mopafima regrarohe'za vano nehaza zagaramimofo tra ke. <sup>47</sup> Hagi tamagra rezaganeta negetma, e'izamo'a agru osu'neanki, e'izamo'a agru hu'neanki nehutma, negahunanki, onegahu-nanki huta hugahaze.

## 12

### *A'nemo'ma mofavre kasente tenigenoma azeri agruma hu'zamofo naneke*

<sup>1</sup> Hanki anantera Ra Anumzamo'a Mosesena asamino, <sup>2</sup> Amanage hunka Israeli vhahera zamasamio, mago a'mo'ma ne' mofavre'ma kasentenuno'a, namunkama freneno'ma nehiaza huno 7ni'a zagegna maniteno agrua hugahie. <sup>3</sup> Hagi ne' mofavremofona 8 zagekna zupa agoza anom'a taga hutregahaze. <sup>4</sup> Hagi ana a'mo'a ne' mofavrema kasente'nea zankura, 33'a zagegna agruma hanigura avega anteno manigahie. Hagi ana a'mo'a ruotage'ma huno me'neazantamina avakora nosuno, ruotagema hunefina ovuno mani'nenigeno agruma hu knamo'a egahie. <sup>5</sup> Hianagi mofa'ma kasentesigeno'a ana a'mo'a tare sontamofo agu'afi agrua osuno maniteno, ete mago'ane 66'agna maniteno agrua hugahie. <sup>6</sup> Hagi ne'mofavre, mofa mofavre'ma kasente'nesia zanku'ma azeri agruma hu knama evutenkeno'a, tevefima kresramna vu ofa mago kafu hu'nesia sipisipi nevreno, kumi ofama hu'zana maho namao kugofa nama avreno pristi vahete seli nomofo avuga egahie. <sup>7</sup> Hagi ana nama pristi ne'mo'a avreno, ana a'mo'ma agruma osu'nea zanteria nona huno Ra Anumzamofontera ofa hina, ana a'mo'ma mofavrema kasenteteno azeri agru hugahie. Hagi ama'i a'mo'ma mofavrema kasentete'noma azeri agruma hania zamofo trake. <sup>8</sup> Hianagi ana a'mo'ma sipisipima avrenoma ega'ma osanuno'a, tare maho namao, tare kugofa nama avreno e'nigeno, mago nama Ra Anumzamofonte kresramana nevuno, mago nama ana a'ma azeri agru hu ofa pristi ne'mo'a hugahie.

## 13

### *Namuma zamavufafima re'nenia zamofo naneke*

<sup>1</sup> Ra Anumzamo'a amanage huno Mosesene Aroninena zanasami'ne, <sup>2</sup> Mago'mofo avufare'ma zorege, zuke namurege, ahehema fore'ma hanigeno, anazamo'ma fugo namuma rege'ma hanige'za avre'za pristi ne' Aroninte vuge, mofavre zaga'are avre'za viho. <sup>3</sup> Hagi Pristi vahe'mo'za ana namuna rezagane'za kesageno'ma, namuma me'nenifima azokamo'ma

efeke'ma huno ana namumo'ma hanagatino ufre'nesigeno, pristi ne'mo'ma reprosi namune hanigeno'a, ana vahe'mo'a agru osugahie. <sup>4</sup> Hagi ana namumo'ma efeke huno avufgare'ma fore'ma nehuno, rama huno agu'a uofrenkeno namuma re'nere'ma me'nea azokamo'ma efeke'ma osu'nena pristi vahe'mo'za ana nera 7ni'a zagegna azeri frakiza antegahaze. <sup>5</sup> Hagi 7ni' zupama pristi vahe'mo'ma kesigeno ana namumo tera osuge, te osi osugema hu'enkeno'a, ete mago'ane 7ni'a zagegna azeri frakigahie. <sup>6</sup> Hagi 7ni' zupama kesigeno'ma ana namumo'ma tera osuno teganinkeno'a, pristi ne'mo'a amne namune nehuno huntenko, kukena'a ome sese nehuno, agra'a azeri agru hugahie. <sup>7</sup> Hianagi pristi vahe'mo'ma ana namuma te onasima hanigeno agru hune huno huntesige'noma umani'nenigeno, ana namumo tera hanigeno'a eteno pristi vahete vino. <sup>8</sup> Hagi pristi vahe'mo'ma avonta huno rezaganeno keteno, ana namumo'ma terama hu'enkeno'a, agru osu'neankino fugo krie huno hugahie. <sup>9</sup> Hagi mago vahe'ma avufafima fugo namuma me'enke'za, ko pristi vahete avre'za viho. <sup>10</sup> Hagi ana namuma pristi vahe'mo'za kesagenoma efeke hanigeno, azokamo'enema efeke'ma nehanigeno, avo timo'ma herafineramina, <sup>11</sup> e'i zazate meno vania fugo namunkino, pristi vahe'mo'a agra agru osune huno huama nehuno azeri fore hugahie. <sup>12</sup> Hagi pristi vahe'mo ana fugo ri'ma kesigeno tera huno asenireti agiare'ma uhanatisigeno'a, <sup>13</sup> pristi vahe'mo'a rezagane so'e huno kesigenoma ana fugo namumo'ma mika avufare'ma tenenko, avufamo'ma efeke hanigeno'a, agra agru hu'ne huno huntegahie. <sup>14</sup> Hianagi kesigeno kasefa namuma avufafima fore'ma hanigeno'a, agra agru osugahie. <sup>15</sup> Hagi pristi vahe'mo'ma kesigeno avo'mo rupro hanigeno, agu'afinti ame'amo'ma etiramisigeno kesuno'a, agru osu'neankino fugo namune huno huntegahie. <sup>16</sup> Hianagi ana namumo'ma fananema huno efeke'ma hanigeno'a, ete pristi vahete vino. <sup>17</sup> Hagi pristi vahe'mo'a kesigeno'ma, namumo'ma efeke hu'enkeno'a, namuma re'nesia vahekura agru hu'nane huno hunteno. <sup>18</sup> Usagema ahenesia vahe'ma vagamarentesigeno'a, <sup>19</sup> ana namumo efeke huge koranke huge, zomaoresigeno'a, agra'a avufa pristi vahete eme averi hino. <sup>20</sup> Hagi pristi vahe'mo'ma kesageno'ma ana namumo hanagatino fre'neno, ana namumpima me'enenia azokamo'ma efeke hu'enigeno kesuno'a, ana namunkura usagempinti fore hu'nea fugo namune nehuno, agru osu'nane huno hugahie. <sup>21</sup> Hianagi pristi vahe'mo'ma kesigeno, ana namumo efeke osuno hanagatino ofreno terama osanigeno'a, 7ni'a zagegna azeri frakinkeno manigahie. <sup>22</sup> Hagi ana 7ni'a knama evutenko'ma ana namumo'ma rura huno avufafima vuno enoma hanigeno'a, pristi vahe'mo'a ana nekura agru osu'nane huno hugahie. <sup>23</sup> Hianagi ana namumo rura osuno me'nena, pristi vahe'mo'a amane usagemo ana hu'neanki agru hu'nane huno huntegahie.

<sup>24</sup> Hagi tevemo'ma mago'mofo avufgama terasgene'nigeno, namumo'ma avoke huno efeke'ma nehuno koranke'ma hu'nena, <sup>25</sup> pristi vahe'mo'ma ana namumpima me'enenia azokama kesigeno'ma efeke hanigeno, namumo'ma ra huno hanagatino agu'ama ufre'nenkeno'a, agrua osu'nane huno pristi vahe'mo'a hugahie. <sup>26</sup> Hianagi pristi vahe'mo'ma kesigeno'ma, ana namumpima me'enenia azokamo'ma efeke'ma osanigeno, ana namumo'ma hanagatino uofreno, teganzama nehanigeno'a, 7ni'a zagegna azeri frakisigeno manigahie. <sup>27</sup> Hagi 7ni' zupa pristi vahe'mo'ma

kesigeno'ma ana ne'mofo namumo'ma avufafima terama hanigeno'a, ana nekura agru osu'nane huno huntegahie. <sup>28</sup> Hianagi ana namumo'ma tera huno avufafima vuno enoma osanigeno'ma, pristi vahe'mo'ma kennuno'a, amane tevemo te'neazamo'e nehuno, agru hu'ne huno huntegahie. <sup>29</sup> Hagi mago vemofono a'mofoma, zuke namuma asenifi rege, ameragempima rege'ma hu'enigeno'a, <sup>30</sup> ana zuke namuma pristi vahe'mo kesigeno'ma terama huno hanagatino ufrerenigeno, azokamo'ma kaninkruke hu'nena pristi vahe'mo'a ana vahekura, agru osu'nane huno huntegahie. <sup>31</sup> Hianagi ana zuke namuma pristi vahe'mo'ma kesigeno'ma ana namumo'ma terama huno hanagatino uofrenigeno, haninke azokama anampima omanena, pristi vahe'mo'a ana nera 7ni'a zagegna avre frakisigeno manigahie. <sup>32</sup> Hagi 7ni knare'ma pristi vahe'mo'ma kesigeno ana zuke namumo'ma tera osanigeno, azokamo'ma kaninkruke'ma osanigeno, ana namumo hanagatino uofre'nenkeno'a, <sup>33</sup> ananteria azokara haregahianagi, namuma re'neniam'a ohareno atrenenkeno, pristi vahe'mo'a mago'ane 7ni'a kna avre frakinkeno ana vahe'mo'a manigahie. <sup>34</sup> Hagi 7ni' kna zupa pristi vahe'mo'a keteno, namumo'ma terama huno hanagatino'ma uofre'nenkeno'a, agru hu'ne huno ana vahera huntenko, kukena'a sese nehuno agru hugahie. <sup>35</sup> Hianagi agru hu'nane huno'ma huntetesigeno, umani'nenigeno ana zuke namumo'ma terama hanigeno'a, <sup>36</sup> pristi vahe'mo'ma anamofoma kesigeno'ma, ana zuka namumo'ma tera huno vuno enoma hanigeno, hago tera hu'neankino pristi ne'mo'a kanikruke azokakura onkeno, agru osu'nane huno ana ne'kura huntegahie. <sup>37</sup> Hianagi pristi vahe'mo'ma kesigeno ana zuke namumo'ma tera osanigeno, haninke azokama anampima me'nena pristi vahe'mo'a agru hu'ne huno hugahie. <sup>38</sup> Hagi mago ne'mofono a'mofoma efeke kiraremo'ma avufaregama hu'nesigeno'a, <sup>39</sup> pristi vahe'mo'ma ana kirarema re'nea avufafima kesigeno efeke hu'nea zamo'ma amanema hanigeno'a, amne namunkino, agru hu'ne huno huntahie. <sup>40</sup> Hagi mago ne'mofoma anumpi azamoma erisiana, agra agru hu'ne. <sup>41</sup> Hagi mago ne'ma tinke azokama pupusenigeno azokamo'ma omanesiana, agra agru hu'ne. <sup>42</sup> Hianagi azamompima namumo'ma efeke nehuno koranke'ma hu'eniana, e'i fugo namune. <sup>43</sup> Hagi pristi vahe'mo'ma kesigeno'ma azamompino, kokovipima namumo'ma efeke huge, koranke huge huno'ma fugo namunknama haniana, <sup>44</sup> ana ne'mofona fugo namu re'neankino, agru osu'ne. Hagi pristi vahe'mo'a agru osu'ne huno huntegahie. Na'ankure asenifina namu re'ne. <sup>45</sup> Hagi e'inahu fugo namuma re'nesia vahe'mo'a, tagato'ma hu'nesnia kukena ne-huno, azokara refraoteno, avugosa refiteno avugama'age netreno kezatino, nagra agru osu'noe nagra agru osu'noe huno hino. <sup>46</sup> Hagi ana fugo namuma avufare'ma me'nenigeno'a ana ne'mo'a agru osu'neakino, agraku kumamofo fegi'a manigahie.

### *Kukenama eri haviza nehia zamofo naneke*

<sup>47</sup> Hagi sipisipi azokateti tro hu'nesia kukenarero, efeke kukenarero, <sup>48</sup> sipisipi azoka zagino haneno tro hu'nenia kukenarero, efeke kukenama hanenifino, bulimakao akrutema tro'ma hu'nesaza kukenare'ma, <sup>49</sup> zafa sinage huge koranke avame'zama efore'ma ana kukenare'ma hu'nena, e'i tontore zamofo avame'zanki, pristi vahe averi hugahie. <sup>50</sup> Hagi ana kukena pristi vahe'mo'a keteno, erino frakino ante'nenkeno 7ni'a

zagegna megahie. <sup>51</sup> Hagi ana kukenaramimo'ma meno vuno 7ni zu-pama uhanatinigeno pristi vahe'mo'ma kesigeno'ma sipisipi azoka zagino hanenenifino, efeke kukenama hanenenifino, bulimakao akrutema tro'ma hu'nea kukenare'ma tontomo'ma ra huno vuno eno'ma hu'nenko'a, agru osu'nne huno hugahie. <sup>52</sup> Hianagi sipisipi azokate tro hu'nesia kukeno, bulimakao akrutema tro hu'nesia kukeno, kukenare'ma ana avame'zama fore'ma hanigeno'a, tevefi krenkeno tevareno. <sup>53</sup> Hianagi pristi vahe'mo'ma kesigeno kukenare'ma anazamo'ma rama osu'nena, <sup>54</sup> pristi vahe'mo'ma ana vahera zamasaminige'za ana kukena sese hute'za, 7ni'a zagegna mago'an fraki'za antesageno megahie. <sup>55</sup> Hagi ana avame'zama sesema hutesageno'a ete mago'ane kesigenoma ana kukenamofo tontomo'ma vaga'orenigeno rura ana avamezamo osu'nenianagi, agru osu'neanki amegao agu'afima tontoma re'nena tevefi kre vagaregahie. <sup>56</sup> Hagi ana kukena sese'ma hanigeno, ana zamo'ma sipisipi azokate kukenaretiro, efeke kukenaretiro, bulimakao akrute kukenaretima fananema haniana, anama havizama hu'nema'a tagato hutreno. <sup>57</sup> Hagi henkama ana tonto fore'ma hina, ana kukenamofo nef'a tevefi krenkeno, te fanane hino. <sup>58</sup> Hagi henka'ama anazama fore'ma osanigeno'a, ete mago'ane sese hina agrua hugahie. <sup>59</sup> Ama'i tra kea sipisipi azokateti zagino hane'n'e'nia kukenama, efeke kukena hane'za tro hu'ne'nazano, bulimakao akruteti hane'za tro hu'nenaza zama tontomo'ma eri havizama hu'nenia kukenamofoma pristi vahe'mo'ma agru hu'ne, agru osu'nema huno'ma hania trake.

## 14

### *Fugonkrimo vagarenkeno azeri avusese hu'zamofo naneke*

<sup>1</sup> Ra Anumzamo'a Mosesena amanage huno asmi'ne, <sup>2</sup> Fugonkrima eri'nesaza vahe'mo'zama ana krimo'ma atrezantesige'za zamagra'ama zamazeri avusesema hanaza zama eri'za pristi vahete'ma vanaza zamofo trake. <sup>3</sup> Hagi Pristi vahe'mo'makumamofo fegia vuno, ana fugo namumo'ma attrentesigura ana fugo vahe'ma ome kesigenoma, ana fugo namumo'ma attrentesigeno'a, <sup>4</sup> pristi vahe'mo'ma ana fugo vahera asamisigeno, agruma hu'nesia namafinti tare namarare nevreno, sida teve e'nerino, korankenofira e'nerino, hisopu zafa azankuna e'nerino, pristi vahete esigeno ana nera azeri agru hugahie. <sup>5</sup> Hagi pristi vahe'mo'ma zamasamisige'za enevania timpinti mopa kavofi tina afi'za esageno, ana kavomofo agofeto mago nama anankena akafrinigeno, koramo'a ana kavofi evuramigahie. <sup>6</sup> Hagi avu'agama mania namagi, sida tevegi, korankrenofiki, hisopu zafa azankunaki huno ana korama rente'nenia timpina reteno atigahie. <sup>7</sup> Anama azeri agruma hania vahe'mofo avufarega namamofo korana 7ni'a zupa pristi vahe'mo'ma rutri tri hunenteno, hago agru hane huno ana fugo nera hunenteno, avuga'ma mani'nea nama atresigeno hareno vugahie. <sup>8</sup> Hagi ana'ma agruma hania ne'mo'a, kukena'a sese nehuno avufaretira mika azokara vazagatenetreno, tina freno agrua hino. Ana'ma hutesuno'a, agru hugahiankino kuma agu'afina ufregahianagi, 7ni'a kna maniteno seli noma'afina ufregahie. <sup>9</sup> Hagi ete 7ni kna zupa agra'ama azeri agruma hania vahe'mo'ma agi azokora neharenlo, avu azokora neharenlo, maka avufga azoka'ene neharenlo, kukena'a sese nehuno, timpi tina freno agra'a avufga sese huno azeri agru hugahie. <sup>10</sup> Hagi 8ti kna zupa afuhe afahesosuno mago kafu hu'nesia tare ve sipisipigi, mago a' sipisipi nevreno, 3'a kilo flaua olivi masavene eri

havia hu'ne'nia witi ofa e'nerino, mago kapu olivi masave kre sramanama vu'zana erigahie. <sup>11</sup> Hagi azeri agruma hania pristi ne'mo'a, anama agru'ma hania nera nevreno ofa'anena erino Ra Anumzamofo avuga atru'ma hu seli nomofo kahante vugahie. <sup>12</sup> Hagi ana'ma hutesuno'a, pristi vahe'mo'a kumi ofa mago ve sipisipine, olivi masavene eri verave hu ofa Ra Anumzamo-fontega hugahie. <sup>13</sup> Hagi ana ve sipisipia ruotage'ma hu'nere'ma kumite'ma hu ofane, kre fanane hu ofanema nehazare ome aheno. Hagi kefozama hu'nere'ma kresramana vu'zane kumite'ma kresramana vu'zana ruotage hu'neankino pristi vahe'mofiza megahie. <sup>14</sup> Hagi kefozama hu'nere'ma erino e'nea sipisipi afu'mofo korana, pristi vahe'mo'a mago'a erino ana vahe'mofo tamaga kaziga agesare'ene, tamaga kaziga azafare'ene tamaga kaziga agigore'ene frentegahie. <sup>15</sup> Hagi pristi vahe'mo'a mago'a olivi masavene hoga aza agu'safi taginteteno, <sup>16</sup> tamaga kaziga azankoreti ana masavempi reteno, Ra Anumzamofo avuga 7ni'a zupa rutri trira hugahie. <sup>17</sup> Hagi mago'ama mesia masavene pristi vahe'mo'a erino anama agruma hania vemoftona, tamaga kaziga agesa atupareki, tamaga kaziga azafa azankoreki, tamaga kaziga agamofo agafa agigore frentegahie. <sup>18</sup> Hagi pristi vahe'mo'a aza agu'safima mesia masavema'a erino azeri agruma hania vahe'mofo asenirera frentegahiankino, e'i ana ofama hania zamo'a kumi'amofo nona hinkeno, Ra Anumzamo'a azeri agru hugahie. <sup>19</sup> Hagi anantero pristi vahe'mo'a kumitera kresramana nevuno, anama agruma osu'nesia vhahera azeri agru hugahie. Ana'ma hutesuno'a, pristi vahe'mo'a tevefima kre fananehu kresramna vu sipisipi afura ahegahie. <sup>20</sup> Hagi pristi vahe'mo'a kre fanane hu ofane, witi ofanena kresramna vu itare kregahie. Pristi ne'mo'a e'ina hanigeno, anama kumi'ma hu'nesia vhahem'o'a agru hugahie. <sup>21</sup> Hagi amunte'ma omnennenko maka ofama erino'ma ega'ma osanuno'a, mago ve sipisipi nevreno, olivi masavene erihavia hu'ne'nia 1 kilo witi ofa e'nerino, mago kapu olivi masavene kumite'ma nonama huno eri veravema hu ofa erino egahie. <sup>22</sup> Hagi erino ega'ma hu'ne'nia avamente tare maho namarareno, tare agaho kugofa namararena azerino eno, magora kumite Kresramana nevuno, magora tevefi kre fanane hu ofa hugahie. <sup>23</sup> Hagi 8ti knazupa anama azeri agruma haniazana erino pristi vahete atru'ma nehaza seli nomofo kahante Ra Anumzamofo avuga vino. <sup>24</sup> Ana'ma hanigeno'a, pristi vahe'mo'a ana ve sipisipi afu'ene mago kapu olivi masave erino Ra Anumzamofo avuga eri veravehu ofa hugahie. <sup>25</sup> Hagi pristi vahe'mo'a kefozama hu'naza zante kresramna vu ofa, ve sipisipi aheno korama'a tagino tamaga agesa atupare frenenteno, tamaga kaziga azafa azankore frenenteno, tamaga kaziga agamofo agigorera frentegahie. <sup>26</sup> Hagi pristi vahe'mo'a hoga kaziga aza agusafi olivi masavene taginteteno, <sup>27</sup> tamaga kaziga azankoreti ana masavempi aren 7ni'a zupa Ra Anumzamofo avuga rutri tri hugahie. <sup>28</sup> Hagi aza agusafima mago'a masavema me'neftira ko'ma kefozama hu'nere'ma ofama hu'nea afumofo korama frentenere, tamaga kaziga agesamofo atumpareki, tamaga kaziga azankoreki, tamaga kaziga agafa agigoreki, huno frentegahie. <sup>29</sup> Hagi pristi vahe'mo'a aza agusafima mago'ama me'nia masavema'a ana vahe'mofona kumimofo nona huno asenifi frenteno Ra Anumzamofo avuga azeri agru hugahie. <sup>30</sup> Hagi pristi vahe'mo'a ana tare namafinti'ma maho namao, kugofa namama avreno esifinti kresramna vugahie. <sup>31</sup> Mago nama kumite kresramana nevuno, magora tevefima kre fananehu kresramna vu witine

erinteno kregahie. E'inahukna kante pristi vahe'mo'a agru'ma osu'nesia vahe'mofo agira erino, Ra Anumzamofontera kumi nona hanigeno, anamo'a agru hugahie. <sup>32</sup> Ama'i avufafima fugo namuma re'nesia vahe'mo'ma ante'nesia avamente erino esigeno'ma azeri agruma hania zamofo trake.

### *Nomofoma azeri haviza hania zamofo naneke*

<sup>33</sup> Ra Anumzamo'a anage huno Mosesene Aroninena znasami'ne, <sup>34</sup> Tamagrama erisanti haregahazema hu'na tamisua mopafi Kenenima vanage'na, mago'a nona azeri haviza hanena ana nomo'ma tontore'na, <sup>35</sup> ana nomofo nef'a vuno pristi vahe ome zamasamino, noni'afina tontore avame'za fore hu'ne huno hugahie. <sup>36</sup> Hagi pristi vahe'mo'a ana nompina efreno rezaganeno onke'neno, ana nomofo venafona hanigeno makazana eri fegi atretenkeno, pristi vahe'mo'a henka ufreno ana nona kegahie. <sup>37</sup> Hagi pristi vahe'mo'a ana nompima ufreno rezageno'ma kesiama zafaninage zano, korankre zamo'ma fore'ma huno hanagatino fre'nesigeno'a, <sup>38</sup> ana nompintira pristi vahe'mo'a atiramino ana nonkafana erigino, ahe kanirentesigeno 7ni'a zagegna megahie. <sup>39</sup> Hagi 7ni'a zage gnama manitesigeno'a, pristi vahe'mo'a ete eno eme kesiama, ana tontomo'ma ana nomofo asoparegama rurama huno vuno eno'ma hu'nena, <sup>40</sup> pristi vahe'mo'a mago'a vahe huzmantesige'za ana tontoma manesi'a havea ana nontetira eri keri'za kumamofo fegu'a agru'ma osu'nefi ome atregahaze. <sup>41</sup> Hagi ana tontomo'ma me'nenia nomofo asoparega havema azerinogu'ma rukamarente'naza zantamina vazagate'za eri'za rankumofo fegi'a agruma osu'nefi ome atregahaze. <sup>42</sup> Hagi anama krima me'negeta eritraza haveramimofo nontera, ru have eri'za eme runekamare'za, ana havema azeri'zana kasefa hapa ati'za erihapa hu'za rukamrenteho. <sup>43</sup> Hagi anama hutesagenoma henkama ana tontoma fore'ma hina, <sup>44</sup> ete pristi vahe'mo'a vuno mago'anemogeno. Ome kesigeno ana nonte'ma tontomo'ma rurama hu'nena, nomo'a haviza hu'neankino agru osu'ne huno hugahie. <sup>45</sup> Hagi ana noma ki'nesia havema, zafama, rekamre'nesaza zana tapage hu'za eri'za kumamofo fegi'a agruma osu'nefi ome atreho. <sup>46</sup> Hagi kahama eringesia kna'afima ana nompima ufresimo'a, agru osu mani'nenigeno vuno kinaga segahie. <sup>47</sup> Hagi anahunkna huno iza'o, ana nompima mase'nimo'a kukena'a sese nehanigeno, iza'o ana nompima ne'zama nesimo'a, kukena'a sese hino. <sup>48</sup> Hianagi ana noma eri fatgo hutesageno'ma pristi vahe'mo eme kesigeno, ana tontoma orenenigeno'a ana nonkura kria omane'neanki, agru hu'ne huno pristi vahe'mo'a hugahie. <sup>49</sup> Hagi ana noma azeri agruma hunakura, pristi vahe'mo'a tare namarare nevreno, sida zafa e'nerino, koranke nofi enerino, hisopu zafa azankunatetiki huno azeri agru hugahie. <sup>50</sup> Hagi mago nama zasi ti me'nenia mopa kavomofo agofetu agra ahenigeno, koramo'a ana kavofi avitegahie. <sup>51</sup> Hagi anama hutesuno'a, sida teve zafa atupa'agi, hisopu zafa azankunaki, korankre nofiki, mago'ma kasefa huno mani'nea nama anama korama me'nea timpi reteno atisga huno, ana nomofona 7ni'a zupa rutri tri hugahie. <sup>52</sup> E'ina hukanama huno timpima me'nea namamofo korantetiki, kasefa'ma mani'nea namaretiki, sida zafaretiki, hisopu zafa azankunaki, korankre nofitetiki, huno ana noma azeri agru hutesuno'a, <sup>53</sup> kasefa'ma huno mani'nea nama avreno kuma'mofo fegia ometresigeno hareno vugahie. E'ina huno pristi vahe'mo'a havizama hu'nesia nomofona nona huno azeri agru hugahie.

*Krima eri'nesia vahe'mo'ma hania tra kemofo naneke*

<sup>54</sup> Ama fugonkri eri'nesazo, zuka kri eri'nesaza zamofo tra ke, <sup>55</sup> kukenare tontore'nesio, nonte tontore'nesio, <sup>56</sup> zamavufagamo zorenegeno kirareki namu fore hu'enio, efeke kirere eri'nesaza, <sup>57</sup> vahe'ma rempima huza-misage'za zamagra'ama agru hu'neanki, agru osu'neanki hu'zama rezag-nezama kesaza zamofo tra ke. Ama'i fugo krimofo tra ke.

## 15

*Krimo'ma vahe'ma zamazeri pehana hu'zamofo naneke*

<sup>1</sup> Ra Anumzamo'a anage huno Mosesene Aroninena znasami'ne, <sup>2</sup> Tanagra Israeli vhahera zamasamih, mago ne'mofoma agozafinti'ma efeke avo'ma haniana, e'i agrua osugahie. <sup>3</sup> Hagi vemofoma agozafinti avo'ma atirami vava hanio, avimarekama renkaniresigeno avufarima eovaniana, agra agru osu'ne. <sup>4</sup> Hagi ana krima eri'nesia ne'mo'ma masesia tafemo'a maka agru osanigeno, maka manisia tra'mo'enena agrua osugahie. <sup>5</sup> Hagi ana krima eri'nesia ne'mofo tafe'ma avako'ma hanimo'a, agrua osugahiankino, kukena'a timpi sese nehuno, tina freteko mani'nenigeno vuno kinagasegahie. <sup>6</sup> Hagi iz'a'ana kri ne'mo'ma mani'nesia zante'ma avako'ma hania vahe'mo'a, agrua osugahiankino kukena'a timpi sese nehuno, tina freteko mani'nenigeno vuno kinagasegahie. <sup>7</sup> Hagi ana krima eri'nesia vahe'ma avako'ma hania vahe'mo'a, ana zanke huno agrua osugahiankino, kukena'a timpi sese nehuno, maninesigeno vuno kinaga segahie. <sup>8</sup> Hagi ana krima eri'nesnia ne'mo'ma agruma hu'enienia vahe'ma avetu'ma ahentesiana, anazanke huno agrua osugahiankino, kukena'a timpi sese nehuno, tina freteko mani'nenigeno vuno kinagasegahie. <sup>9</sup> Hagi ana krima eri'nesia ne'mo'ma hosi afu agofetu'ma ante'za manizama nevaza tafete'ma (satel) manino vanigeno'a, anazamo enena, agrua osugahie. <sup>10</sup> Hagi ana kri ne'mo'ma agofetu'ma mani'nenia zantamimo'a miko agru osu'ne. Iza'o avako'ma huno erino vanimo'a, agrua osugahiankino, kukena'a timpi sese nehuno, tina freteko mani'nenigeno vuno kinagasegahie. <sup>11</sup> Anahukna huno anankri'ma eri'nesia ne'mo'ma azama timpi sese osu'neno, agruma hu'enenia vahe'ma avakoma hanimo'a, agrua osugahiankino, kukena'a timpi sese nehuno, tina freteko mani'nenigeno vuno kinagasegahie. <sup>12</sup> Hagi ana krima eri'nenia ne'mo'ma avako'ma hu'nesnia mopa kavoa takohu netretra, ne'zama atino ne'zantamima zafare'ma tro hu'nesia zantamima avoko hu'nesia zana timpi sese hiho. <sup>13</sup> Hagi ana ne'ma agozafintima namureno avo'ma nehiazama atrente'na, 7ni'a zagegnama evanigeno'a kukena'a enevania timpi sese nehuno, tina freno agrua hugahie. <sup>14</sup> Hagi 8kna zupa tare maho namarareno, tare kugofa namarare avreno atruhu seli nomofo kahante Ra Anumzamofo avuga, pristi vahe eme aminageno, <sup>15</sup> pristi vahe'mo'a ana namararena avreteno, magomofona kumite kresramna ne-vuno, mago'mofona tevefima kre fanane hu ofa hugahie. Hagi pristi vahe'mo'a ana krimofo nona huno Anumzamofo avuga ofa hugahie. <sup>16</sup> Hagi mago ne'mo'ma mase'nena agozarima esiana agru osugahiankino, ti freteko mani'nena vuno kinagasegahie. <sup>17</sup> Hagi ana ne'mofo avufga rimo'ma kukenare avako huge, bulimakao akruteti'ma tro hu'nesaza kukenare'ma avako'ma haniana, agrua osugahiankino, timpi sese huteno mani'nenigeno vuno kinagasegahie. <sup>18</sup> Hagi mago vemo'ma mago a'enema monko'zama hanuno'a, timpi tina freteko agru osu mani'nenakeno vuno kinagasegahie. <sup>19</sup> Hagi mago a'mo'ma ikankrima eri'siana agru osu mani'nenigeno 7ni'a

zagegna evugahie. Hagi iza'o ana ika krima eri'nesia a'ma avako'ma hanimo'a, agru osu mani'nenigeno vuno kinagasegahie. <sup>20</sup> Ana a'mo'ma tafe'ma masino nemasesia zamo'o, tra'ma anteno nemanisia miko zama'amo'a, agru osugahie. <sup>21</sup> Hagi ana ikankrima erinesia a'mo'ma mase'nesia tafe'ma avako'ma hanimo'a, agru osugahiankino kukena'a sese nehuno, ti freteno mani'nenigeno vuno kinagasegahie. <sup>22</sup> Hagi ana krima eri'nesia a'ma nemanisia zama avako'ma hanimo'a, agrua osugahiankino, kukena'a timpi sese nehuno, tina freteno mani'nenigeno vuno kinagasegahie. <sup>23</sup> Hagi ana krima eri'nesia a'mo'ma nevasesia tafero, neman'i'nea tra'ma avako'ma hanimo'a agru osugahiankino, agru osu mani'nenko vuno kinagasegahie. <sup>24</sup> Hagi ikankrima eri'nesnia a'enema monko'zama hania ne'mo'a, ana krimo azeri pehena hugahiankino, ana ne'mo'a 7ni'a zagegnafi agru osu manigahiankino, ana mase'nea sipamo'enana agrua osugahie. <sup>25</sup> Hagi ana ikankrima eri'nea a'mofoma ana kri'amo'ma zazate'ma menoma ikankrima vagama nereanknama agateresiana, ana a'mo'a agrua osu manino vugahie. <sup>26</sup> Hagi ana korankri'ma eri'nenoma manino vania kna'afima masesia tafero, manisia tra'mo'enena agru osugahie. <sup>27</sup> Hagi anahukna huno iza'o, ana krima eri'nesia a'mofa tafe'ma avako huge, nemanisia zama avako'ma hanimo'a, agrua osugahianki kukena'a sese nehuno, ti freno mani'nenko vuno kinagasegahie. <sup>28</sup> Hagi ana a'mofoma kri'amo'ma atrentenkeno'a, krima atrentenia knaretira 7ni'a gna maniteno agrua hugahie. <sup>29</sup> Hagi 8 knazupa tare maho namarareno, tare kugofa namararena avreno atruhu seli mono nomofo kafante pristi vahe ome amigahie. <sup>30</sup> Hagi mago nama pristi vahe'mo'a kumi' apase ofa nehuno, mago nama tevefima krefanane hu ofa hugahie. E'inahu kante korankrima e'rinea zanteria pristi vahe'mo'a aza huno Ra Anumzamofo avuga nona huno ofa hanigeno, azeri agru hugahie. <sup>31</sup> Hagi Israeli vahera zamazeri ruotage huge'za, agru osu zanena aru havia hu'za mani'ne'za seli mono nonimofona eri havizana osugahaze. Hagi zamagrama ana'ma hu'za mani'ne'za seli mono noni'a eri pehanama, hanage'na zamahe frigahue. <sup>32</sup> Hagi ama'i venenemofoma agozafinti'ma avufga rima esia zamo'ma azeri pehana haniazanki, <sup>33</sup> a'nemokizmi ikankrimo'ma zamazeri pehana hu'nesiazanki, a'nemofono venenemofono oku avufgafintima avoma nehania zamofone, ikankrima eri'nesia a'enema mase'nesia vahe'enema azeri pehanama hania zamofo trake.

## 16

### *Kumimofo nonama hania zamofo trake*

<sup>1</sup> Hagi Aroni ne' mofavre'moke'ma Ra Anumzamo'ma Mosesema asmi'nea kema rutagreke i'oma hu'nea teveretima ofama hakeno znahe friteno, <sup>2</sup> Ra Anumzamo'a amanage huno Mosesena asami'ne, Negafu Aronina asamigeno ruotagema huno ruotagetafama hu'nefinka hunaraginte'nea tavravemofo amefima huhagerafi huvempage vogisimofo avaza'a, asunku trarema nehaza tra'ma me'nerera ahe frigahuanki, amanenena agra'a avesitera omeno. Na'ankure Nagra ana asunku tratera hampompi eramina eama nehue. <sup>3</sup> Hagi ruotage huno ruotagema hu'nefinka Aroni'ma ufrenaku'ma hanuno'a, agaho ve bulimakao afu avreno kumitera ome kresramna nevuno, agaho ve sipisipi avreno tevefima kre fanane hu ofa ome hino. <sup>4</sup> Hagi anampinkama ufrenaku'ma hanuno'a, tifreno agra'a avufga sese huteno, ruotage'ma hu'nea efeke za'za kukena'a nehuno,

agu'afima avufgare'ma antani efeke kukena'a nehuno, anantera afafafima amu'nofima hu efeke tavravereti afafafina ananekino, asenire'ma ki efeke tavravereti asenirera kino. Hagi e'i ana kukena ruotage hu'neankino tifretre antanigahie. <sup>5</sup> Hagi Israeli vahe'mo'za tare ve meme afutrena kumite'ma kresramma vu'zana nevre'za, mago ve sipisipi afu tevefima krefanane hu ofa hu'zana avre'za Aroninte eho.

<sup>6</sup> Hagi Aroni'a agra'a kumite'ene, nomafima nemaniza nagamofo kumite'enena mago ve bulimakao kresramma vugahie. <sup>7</sup> Anama hutesuno'a ana tare ve meme afura avreno Ra Anumzamofo avuga atrumahu seli mono nomofo kafante eno, <sup>8</sup> ana tare meme afutrentera taisi zokago reno kesigeno, Ra Anumzamofo agima me'nea suzama efore hanigeno'a, anama Ra Anumzamofo agima fore'ma hania meme afukura Ra Anumzamofo su'zane nehuno, magora Asaseli su'zane hugahie. <sup>9</sup> Hagi Ra Anumzamofo su'zanema hania meme afura, Aroni'a avreno Israeli vahe'mokizmi kumite ofa hugahie. <sup>10</sup> Hagi Asaseli su'zane huno'ma hu'nenia meme afura, avu'aga avreno Ra Anumzamofo avuga eno kumite nona huteno, ana meme afura avreno ome atrenkeno, ka'ma kopi Israeli vahe'mokizmi kumira erino vugahie.

<sup>11</sup> Hagi anama hutesuno'a, Aroni'a agra kumite'ene naga'amofo kumite nonama hu ve bulimakao afura aheno kumite kresramna vu ofa hugahie.

<sup>12</sup> Hagi Ra Anumzamofo avugama me'nea kresramna vu itareti tanknuza tevea kavofi hanagenenteno, mananentake'zana insensia tare aza huno erino, hunaraginte tavravemofo amefi'a ruotage'ma hu'nefinka vugahie.

<sup>13</sup> Hagi Ra Anumzamofo avuga ana mananentake insensia tevefi krenkeno tok'i'amo'a huhagerafi hvempage vogisimofo avaza'a asunku trarema ne-haza trara refitenkena ahe ofrineno. <sup>14</sup> Hagi ana ve bulimakao afu'mofo korampi azanko reteno, huhagerafi hvempage vogisimofo avazagu'ma asunku trarema ne-haza tra'mofona, zage hanati kaziga asoparega 7ni'a zupa rutri tri hugahie.

<sup>15</sup> Ana huteno Aroni'a Israeli vahe'mokizmi kumite'ma kresramna vu meme afura aheno, korama'a tagino hunaraginte'nea tavravemofo amefi'a ruotage huno ruotagetafama hu'nefinka bulimakao afumofo korama hu'neaza huno, ana korana asunku tra'mofo avuga rutri tri hino. <sup>16</sup> E'inahukna kanteke ruotage huno ruotage'ma hu'nefinkama hu'zama hunaraginte nona azeri agru hugahie. Na'ankure Israeli vahe'mokizmi kumizamimo ana nona eri haviza hu'ne. Ana hukna kanteke kumi'mo'ma amu'nontamifima atruhu seli mono'ma eri pehanama hu'neana eri agru hugahie. <sup>17</sup> Hagi ruotage huno ruotage'ma hu'nefinkama Aroni'ma, agra'a kumimofone, naga'amofo kumiku'ene, Israeli vahe'mokizmi kumimofonte'ma nona huno ofa hunaku ufre'nesigeno'a, mago vahe'mo'e huno atruhu seli mono nompina omani'nenkeno, ofa ome huteno atiramino eno. <sup>18</sup> Hagi ana'ma hutesuno'a atiramino eno Ra Anumzamofo avugama me'nea kresramna vu itare, kumimofo nona huno ofa huteno, ve bulimakaomofo korane mememofo koranena erino kresramana vu itare me'nea pazivetamintera frentegahie. <sup>19</sup> Hagi Israeli vahe'mo'za haza kumimo'ma kresramana vu itama azeri pehana hu'ne zana, ana korampi azanko reteno, 7ni'a zupa ana itareru rutri tri huno azeri agru hugahie.

<sup>20</sup> Hagi ruotage huno ruotage'ma hu'nefinkane, atruhu seli mono none, kresramana vu itanema Aroni'ma azeri agru hutesuno'a, anama am-nema mani'nea meme afura seli nomofo avuga avreno eno, <sup>21</sup> asenirera

tarega azana Aroni'a anteno, Israeli vahe'mokizmi kumizmia ana afumofo agumpi hu hatazafenteteno, ana meme afura huhamprinte'nesia vahe aminkeno, avreno ome atrenkeno ka'ma kopimia kumira erino vugahie. <sup>22</sup> Hagi ana meme afu'ma ka'ma kopima ome atresigeno vaniana, miko Israeli vahe kumira erino ka'ma kopimia kumira erino vugahie. <sup>23</sup> Aroni'ma ana eri'zama erivarettesuno'a, ete atruhu seli mono nompi ufreno ruotage huno ruotagetafama hu'nefinkama ufre'naku'ma antani'nea efeke kukena ome hatentegahie. <sup>24</sup> Hagi ruotage'ma hu'nefinkama Aroni'a tina fretno, ko'ma antani'nea kukena eri huteno, atiramino eno agra'are ene Israeli vahe'mokizmi kumimofo nona huno kre fanene hu ofa hugahie. <sup>25</sup> Ananteria kumi ofama hu'nea bulimakaone, meme afu'mofo afova'a kresramna vu itare kre fanane hu ofa hugahie.

<sup>26</sup> Hagi Asaseli suzane huno ka'ma kopima meme afu'ma avreno vanimo'a, ti freno kukena'a sese huteno, henka kumapina efregahie. <sup>27</sup> Hagi korama'a tagino ruotagema huno ruotage'ma hu'nefinkama kumimofo ofama hu'nea bulimakaone, meme afu'mofo, akru'agi, ame'agi, rifa'anena kumamofo megi'a tevefi ome kreho. <sup>28</sup> Hagi ana zama eri'noma ome kresria vahe'mo'a, kukena'a sese nehuno timpi tina fretno kumamofo agu'afina efreno.

<sup>29</sup> Hagi ama'i mevava hania trake, tamagrane emani vahe'enena kafugu kafugura 7ni ikamofona 10ni knazupa nezane makazana a'o nehuta eri'zana e'oriho. <sup>30</sup> Na'ankure ana knarera kumima apaseramanteno tamaz-eri agruma hu ofa hanigeno, tamazeri agru hina Ra Anumzamofo avufina agru huta manigahaze. <sup>31</sup> Hagi ana kna mani fruhu kna zupa Sabatigita ne'zane maka'zanena a'o huta mani'neta eri'zana e'origahaze. Ama mevava trake. <sup>32</sup> Hagi henkama fore hu anante anante hu'za esaza vahepinti, nefi noma erino pristi eri'zama erisiegu'ma huhamprinte'nimo, ruotage'ma hu'nea zaza kukena nentanino, kumite'ma nona hu ofa hugahie. <sup>33</sup> Hagi ruotage huno ruotage'ma hu'nefinkane, atruhu seli mono none, kresramana vu itane, pristi vahe'ene maka Israeli vahe'mofo kumite nona huno ofa hugahie.

<sup>34</sup> Ama'i Israeli vahe'motama maka kafufima magoke knare'ma hanaza zankino, mevava trake. Mosesea miko Ra Anumzamo'ma hunte'nea tra kea amage anteno hvare'e.

## 17

### *Koranteti kumi'mofo nona hu'zamofo naneke*

<sup>1</sup> Ra Anumzamo'a Mosesena asamino, <sup>2</sup> Aronine, mofavre naga'ane, maka Israeli vahera Ra Anumzamo'a amanage hie hunka zamasamio, <sup>3</sup> Mago Israeli vahe'mo'ma bulimakao afupi, sipisipifi afu'ma, meme afu'ma kuma agu'afino, fegu'ama aheno'ma kresramna nevuno, <sup>4</sup> ana bulimakao afupi, sipisipi afupi, meme afuma erino atruhu seli mono nomofo kafante'ma Ra Anumzamofo avugama omesiana, e'inahu vahe'mo'a kora eritagino kumi hu'neankino, kuma agu'afintira ahenatitregahie. <sup>5</sup> Ama'na agafare ana zana hugahaze, Israeli vahe'mo'za amane megi'a kokampi ofazimia kresramna nevazankiza, menina kresramna vu ofazimia eri'za atruhu seli mono nomofo kafante Ra Anumzamofo avuga pristi vhahete esageno, agra erino arimpa fru ofa Ra Anumzamonarega hugahie. <sup>6</sup> Hagi atruhu seli mono nomofo kafante'ma kresramna vunte itama Ra Anumzamofo avugama

me'nere, pristi vahe'mo ana korana rutri tri hunenteno afova'a tevefi kresigeno Ra Anumzamo'na mna'a nentahina musena hugahue. <sup>7</sup> Zamagra meme afu havi anumzante kresramna vunente'za, a'ne'mo'za savari hu'za monko avu'ava nehazankna osugahaze. Hagi ama'i mevava trake me'nena henkama fore hunante anante'ma hanaza Israeli vahe'mo'za amage antegahaze. <sup>8</sup> Anantero anage hunka zamasamio, Israeli vahepintiro ru vahe'ma tamagranema emani'nenaza vahe'mo'zama ofama nehu'za, <sup>9</sup> atruhu seli mono nomofo kfantie Ra Anumzamofonte'ma eme kresramna ovanimo-fona, Israeli vahepintira ahenatitregahaze.

<sup>10</sup> Israeli vahepintiro rurega vahe'ma enemanisia vahe'mo'zo korama nesage'na, Nagra anama korama nesia vhahera namefi hunemi'na vahe'niafintira ahenatitregahue. <sup>11</sup> Na'ankure korampi asimu'ma erino mani'zana me'nne. Ana hu'negu kumite'ma nona huno apasente'zana koranuti Nagritera ofa hugahaze. E'na hu'neankino koranuti kumimofo nona huno asimura amigahie. <sup>12</sup> E'na hu'negu Israeli vahe'ene ruregati vahe'ma tamagranema emani'naza vahe'motanena korana oneho hu'na nehue. <sup>13</sup> Israeli vahe'mo'zo ruregati vahe'ma tamagranema emani'nesaza vahe'mo'zanema zagagafao namama ahe'za nesu'za, korama'a mopafi tagitre'za mopanu refiteho. <sup>14</sup> Na'ankure asimu'ma anteno mani'nea zagaramimofona asimura korampi me'nne. E'i ana agafare Israeli vahekura korana oneho hu'noankino, iza'o korama nesimofona Israeli vahepintira ahegasopegahaze. <sup>15</sup> Hagi Israeli vahero, ruregati vahe'ma tamagranema emani'nesaza vahe'mo'zama fri'nesia zagagafao, afi zagagafamo aheno traga hu'nesia zagagafamo nesimo'a, kukena'a sese nehuno, timpi ti freteno agru osu mani'enkeno vuno kinagasenkeno agrua hugahie. <sup>16</sup> Ana hu'neanagi kukena'ama sese osuno, timpima tima ofresimo'a, agra'a anazamofo knazana erigahie.

## 18

### *Knare osu monko'zamofo nanek*

<sup>1</sup> Ra Anumzamo'a Mosesena anage huno asmi'ne, <sup>2</sup> Israeli vhahera zmasimio, Nagrake Ra Anumzana tamagri Anumzana mani'noe. <sup>3</sup> Hagi ko'ma Isipi mani'nage'za Isipi vahe'mo'zama hu'naza avu'ava zana osuge, menima Nagrama Kenani tamavre'na vanugeta umani'naza mopafi vahe'mo'za hanaza avu'vara zamavaririta osiho. <sup>4</sup> Miko trakeni'a amage nenteta, kegava hiho. Na'ankure Nagrake Ra Anumzana tamagri Anumzana mani'noe. <sup>5</sup> Nagri tra kene kasegeniama amage'ma tamagrama antezazana, anazamo'a tamasimu tamigahie. Nagra Ra Anumzana mani'noe. <sup>6</sup> Tamagra'a kora naga nofipina monko avu'ava zana osugahaze. Na'ankure Nagra Ra Anumzane. <sup>7</sup> Negrera'enena monko avu'ava zana osuo, agra kagri negrera'e. Hagi e'inama hanunka negafana agaze erimigahane. <sup>8</sup> Negafa a'enena monko avu'ava zana osuo, e'inama hanunka negafana agaze erimigahane. <sup>9</sup> Hagi negasaro eneno, negafano negarera mofa'eneno, negsaroma ru nagapima mani'nesia mofa'enena monkozana osuo. <sup>10</sup> Hagi mofakamofo mofaro, ne'kamofo mofa'enena negagehoki monko'zana osuo, e'inama hanana kagraka'a kazeri haviza hugahane. <sup>11</sup> Negafa a'nemo'zama kasezmante'nesaza mofananea, negasrozagi monkozana huozamanto. <sup>12</sup> Negafa nesar'enena monkozana osuo, agra negafana nesarokino, negamomo mani'ne. <sup>13</sup> Negrera anunkna he'zanena monko'zana osuo,

na'ankure zamagra negrerana korama'a mani'naze. <sup>14</sup> Negafa afu'aganahe a'enena monkozana osuo, e'inama hananana negafa afu'aganahe'ina zamagaze erizamigahane. <sup>15</sup> Negamofo a'enena monko'zana osuo, na'ankura agra negamofo a'kino neganofero'e. <sup>16</sup> Nempu kamofono negagna a'enena monkozana osuo, na'ankure agra koranka'amofo a'kinka nempu kamofono negagnana azeri haviza hugahane. <sup>17</sup> Hagi mago a'ma erinenana a'mofo mofa'enena monko'zana osuo. Hagi ana a'mofo agehe'inena monko'zana osuo, na'ankure zamagra negagehozaginka kefozantfa hugahane. <sup>18</sup> Mago a'ma antenankeno ofrino mani'nena ana tapina, ete nenunknana ara e'orio krunoregaha'e. <sup>19</sup> Namunka mani'neno agru osu'nesia a'enena monko'zana osuo. <sup>20</sup> Ru ne'mofo a'enena monkozana hunka, kagra'a kazeri pehana osuo. <sup>21</sup> Hagi Moreki havi anumzanterea mofavreka'a ahenga kresramna nevunka Anumzanka'amo'na nagi'a erihaviza osuo. Na'ankure Nagra Ra Anumza mani'noe. <sup>22</sup> Hagi vene'nemo'a vene'nenena monkozana osino, na'ankure kasrino himna vu'nea kumi hugahaze. <sup>23</sup> Hagi zagagafanena monko'zana vahe'mo'a osinkeno, a'nemo'za zamagra'a zamavufaga ve zagagafa zaminage'za monkozana hu ozamanteho, haviza huno kasri'nea kumi hugahaze. <sup>24</sup> Amanahukna tamavu tamava huta tamagra'a tamazeri havizana osiho, Na'ankure ko'ma ama ana mopafima mani'naza vahe'ma zamahenatisua vahe'mo'za ama ana zamavu'zmavaza hu'za zamagra zamavufaga zamazeri haviza hu'naze. <sup>25</sup> Na'ankure ama ana agafare mopamo'a havizana hu'ne. E'ina hu'negu ama mopafinti vahera zamazeri haviza hanena, mopamo'a amuti zamatregahie. <sup>26</sup> Hagi tamagra miko'a kasegeni'an, trakeni'a kegava hu'neta amage nenteta, ama ana kasri avu'ava zana tamagrene, rurega vahe'ma tamagranema emani'naza vahe'mo'zanena osiho. <sup>27</sup> Na'ankure ko'ma ama mopafima mani'naza vahe'mo'za, ana kasri avu'ava hazageno mopamo'a hi'mnavu'ne. <sup>28</sup> Tamagrama ama ana mopama eri havizama hanageno'a, ko'ma ama ana mopafima mani'naza vahe'mo'za mopama eri havizama hazageno amuma atizamat're'nea kna huno amu ati tamatregahie. <sup>29</sup> Hagi ama anahu kasri avu'ava'ma hania vahera, Israeli vahe'pintira zamahe natitregahaze. <sup>30</sup> Anahu'negu kva huneta kasegeni'a amage nenteta, ko'ma ama anampima mani'naza vahe'mo'zama hu'naza kasri zamavu'zamavara nosuta, tamagra zamagranena ruhavia huta mani'neta zamagra'a tamavufga eri pehena osiho. Nagrake Ra Anumzana tamagri Anumzana mani'noe.

## 19

### *Mani ruotage'ma huno mani'zamofo naneke*

<sup>1</sup> Ra Anumzamo'a amanage huno Mosesena asami'ne, <sup>2</sup> Ama nanekea Israeli vahera zamasamio, mani ruotage huta maniho, na'ankure Ra Anumzana tamagri Anumzamo'na ruotage hu'noe. <sup>3</sup> Mago magomota tamarera tamafa ke antahita agoraga'a nemanita, Sabatia mani fruhu kna kegava hiho. Nagra Ra Anumzana tamagri Anumzane.

<sup>4</sup> Kaza osu havi anumzanterea tamentintia osuge, tamagra ainiretira kreta havi anumzantamia trora osiho. Nagra Ra Anumzana tamagri Anumza mani'noe.

<sup>5</sup> Rimpa fru ofama Ra Anumzamofonte'ma kresramna nevanutma, kasege avariritma fatgo huta ofa hinke'na musena ha'neno. <sup>6</sup> Anama ofama hanaza ne'zana ana knare'e'ne anante knareke neho. Hagi nege atrege'ma hanaza ne'zamo'ma tagufa knama mesia ne'zana erita kre fanane hiho. <sup>7</sup> Hagi

tagufa knama mesia ne'zamo'a haviza hugahiankino, ana ne'zama nesimo'a agru osugahiankino, Ra Anumzamo'a musena huontegahie. <sup>8</sup> Iza'o ana ne'zama nesimo'a ruotage hu'nea ne'zankino Ra Anumzamofo agi'a eri haviza hugahiankino, vaheni'afintira ahenatitregahaze.

<sup>9</sup> Hagi hozatamifinti'ma ne'zama nehamaresuta refaregama me'nesiama'a netreta, nehamaresage'noma evuraminiam'a zo'onkita atrenkeno meno. <sup>10</sup> Hagi waini rgama ko'ma tagita vutesuta, ete eta mago'anena eme oragige, tagita nevanageno mopafima evuramisiama'a zoraonkita, atrenke'za zamunte omane vahero, rurega vahe'ma tamagranema enemanisaza vahe'mo'za zogilho. Nagra Ra Anumzana tamagri Anumzamo'na nehue. <sup>11</sup> Tamagra kumazafa oseta, havige havage huta rumofozana avazua osuta, rumokizmia havigea huozmanteho. <sup>12</sup> Hagi havige huta Nagri nagirera huvempa huta kea osiho, ana'ma hanuta tamagra'a Anumzamofo agi eri haviza hugahaze. Nagra Ra Anumzamo'na nehue.

<sup>13</sup> Hagi iz'a tavaontamire'ma nemanisimofona azeri havizana nehuta, kumazafa seta nanazazmia e'oriho. Zagore'ma eri'za eri'nesia ne'mofo zagoa azerigeno zazatera kagranena me'nenkeno hanina huno nanterana oseno. <sup>14</sup> Zamagesama ankanirennesia vahera huhavizana huozmantegi, zamavu asuhu vahera zamazeri tanafa hania zane huta kampina onteho. Hagi tamagra'a Anumzamofo korora huntaho. Nagra Ra Anumzamo'na nehue.

<sup>15</sup> Keagama refko hu trate'ma keagama refkoma hanazana afufenozi mi omne nesnia vahetega antege, afufenozi mi me'nesnia vahetega antegera osutma, mago avamenteke refko huzmanteho. <sup>16</sup> Ru vahe'mofo amefi agenkea huta vano osu tava'ontamire nemanisimofoma keagama hunentesagenka, azahunka keaga huga'ma hu'nesigenka amne aza hunka hugahane. Na'ankure Nagra Ra Anumzamo'na nehue.

<sup>17</sup> Hagi negafuna kagu'afina antahi havizana huontenka, havizama nehanigenka ana havi avu'avazama'a eri ama hunka haviza nehane hunka azeri fatgo huo. Ru antahi haviza huntesunka kumi hugahane. <sup>18</sup> Hagi havi avu'ava'ma hugantesia zante'ma nonama hu kankura ohakenka, kagragu'ma kavesintanaza hunka rumofona kavesinto. Nagra Ra Anumzamo'na nehue. Hianagi tava'onkare'ma nemanisimofona kagragu'ma kavesintana kna hunka avesinto. Nagra Ra Anumzamo'na nehue.

<sup>19</sup> Tamagra tra keni'a amage'anteta, magopina ruzahu ruzahu zagagafa kegava hu'enkeno ru zagagafamo'a ru zagagafa oharareno. Magoke hozafina ru avimzana ru avimzana oseho. Tare nofitetima hatino tro'ma hu'nesia kukena ontaniho.

<sup>20</sup> Hagi kazokzo eri'za mofa'ma mago nete'ma manigahiema hu'nesia mofa'ma anteno mase'nia ne'mofona, ahe ofriho. Na'ankure ana mofara miza osazageno, eri'zama'afintira katufeno fru huno omani'ne. <sup>21</sup> Hagi ana'ma hania ne'mo'a ve sipisipi afu avreno, atruhu seli mono nomofo kafante kefozama hu'nea zanter Ra Anumzamofontera ome ofa hugahie. <sup>22</sup> Hagi anama avreno'ma esia sipisipia, pristi vahe'mo'za ahe'za Ra Anumzamofontera kumi'a apasente ofa hinkeno, ana nera kumi'a Ra Anumzamo'a atrentegahie.

<sup>23</sup> Hagi ana mopare'ma umanisuta, ese 3'a kafufina, rgama rente zafama krisaza zafamofo raga tagita oneho. <sup>24</sup> Hagi nampa 4 kafufima rentesia zafa rgaramina ruotage hugahiankita, mika erita Ra Anumzamofo Ra agi ami

ofa hugahaze. <sup>25</sup> Hagi nampa 5fu kafufima rentesia zafa raga negahaze. E'inahua hanageno ne'zamo'a rama'a hugahie. Nagra Ra Anumzana tamagri Anumzamo'na nehue.

<sup>26</sup> Korama me'nenia ame'a oneho. Zagoma reno ke avu'ava zana osuge, afa avu'ava zana osiho. <sup>27</sup> Hagi kagesa tavaonte'ma me'nea kazoka'enekage-mazampa kazokara ase rampagera osuo. <sup>28</sup> Hagi frisia vahetera kasunkura hunka kavufga taga osuo. Hagi kavufga taga hunka avona onkro. Nagra Ra Anumzamo'na nehue.

<sup>29</sup> Mofanetami'a zamatreke'za mizantera monko avu'ava zana osiho. Ana'ma hanazana monko avu'avazamo'a avitenkeno, ama mopamo'a haviza hugahie. <sup>30</sup> Hagi mani fruhu knani'a Sabatia kegava nehuta, seli mono non'i a kegava hiho. Nagra Ra Anumzamo'na nehue.

<sup>31</sup> Hagi iza'o fri'nea vahe'enema keaga nehanaza vahetero, havi avamu'enema keagama nehanaza vahetera, vuta knare antahintahigura ome zamantahi onkeho. Tamagra'a tamazeri haviza hugahaze. Nagra Ra Anumzana tamagri Anumzamo'na nehue.

<sup>32</sup> Hagi ranra vahe'mokizmi kea antahizamita eri'zafa nehuta, Nagri agorga'a maniho. Nagra Ra Anumzamo'na nehue.

<sup>33</sup> Hagi tamagri mopafima rurega vahe'ma eman'i'ne'naza vahera, zamaz-eri havizana osiho. <sup>34</sup> Hagi miko vahe'ma antahi zaminankna hunka antahi neminka, kagra'agu'ma kavesinentanankna hunka avesinto Tamagesa antahiho, Isipia e'nahukna huta rurega vahe umani'nazane. Nagra tamagri Ra Anumzamo'na nehue.

<sup>35</sup> Hagi vahe'mofozama sigerima huta kna'ama kesazano, zaza'ama mesarimima hanazano, afiviteta kesazana havige kazigatira anara osiho.

<sup>36</sup> Hagi sigeritamimo'ene mesarimima hu zantamimo'a fatgo huno meno. Hagi ne'one zantamima refakohu tamavutamavamo'a, fatgo huno meno. Nagra Isipiti'ma tamavre'na e'noa Ra Anumzamo'na tamagri Anumzamo'na nehue. <sup>37</sup> Hagi miko tra keniane, kasegeni'anena amage anteho. Nagra Ra Anumzamo'na nehue.

## 20

### *Kema rutagresia vahe'mo'ma knazama erisia zamofo naneke*

<sup>1</sup> Ra Anumzamo'a anage huno Mosesena asmi'ne, <sup>2</sup> Ama'na trakea Israeli vahe'mokizmia zamasimio, Israeli vahe'mo'o rurega vahe'ma tamagranema eman'i'nesaza vahe'mo'za, mofavrezmia Moreki havi anumzamofona omiho. E'nahuma hania vahera have knonu ahefriho. <sup>3</sup> Nagra ana vahera ha'renezmante'na, vahe zmifintira zamavare atregahue. Na'ankure agra mofavre'a havi anumzamofa ofa hunenteno ruotage'ma hu'nea noni'a eri haviza nehuno, Nagri nagi eri haviza hu'ne. <sup>4</sup> Hagi ana kumap-inti vahe'mo'zama nege'zama havi anumzama Morekinte'ma mofavre'a kresramna vania nera ahe ofrisazana, <sup>5</sup> Nagra ana vahera ha'renente'na amage'ma ante'zama havi anumza Morekinte'ma mono'ma huntesaza vahe'enena vaheni'afintira zamahenatigahue. <sup>6</sup> Hagi amu'notamifintima mago'mo'ma antahiza aminogu'ma fri'nesia vahe'mofo hankro ene keagaga nehania vahete vuge, monko avu'avazama hiaza huno havi anumzante mono'ma hunentesia vahera, Nagra ha'arente'na vahe'hiafintira ahenati atregahue. <sup>7</sup> Anahu'negu tamagra'a tamazeri agru huta mani ruotage huta maniho, na'ankure Nagra Ra Anumzana tamagri Anumzamo'na nehue. <sup>8</sup> Hagi miko kase keni'a kegava huta nevaririta, agoraga'a maniho, na'ankure Nagra Ra Anumzamo'na tamazeri ruotagera hu'noe. <sup>9</sup> Hagi

iza'o nerera nefama huhavizama hentesimofona ahefriho. Agra nererane nefanema huhavizama huntlesia knazana agra'a erigahie. <sup>10</sup> Hagi rumofo a'enema savri'ma hania nera, ana ne'ene anama savri'ma hania a'enena zanahe friho. <sup>11</sup> Hagi nefo nenaro enema savrima hania nera, nefo agi eri haviza hu'negu, anama savrima hania ne'ene a'ene zanahe friho. <sup>12</sup> Hagi nenofero enema savri'ma hania nera, anama savri'ma hania a'ene zanahe friho. Na'ankure zanagra kefo zanavu'zanava ha'ankino anazamofa nona'a zanagra'a knazama'a erigaha'e. <sup>13</sup> Hagi venenemo'ma venenenemema monkozama hania vhahera, kefoza huno kasri'nea kumi hugaha'anki, ana knazamofa kna'a zamahe frigahaze. <sup>14</sup> Hagi mago ne'mo'ma mago a'ene ana a'mofa mofa anema monkozama huzanantesiana, e'inahu avu'ava'ma hu'zamo'a tusi haviza hu'ne. E'i ana avu'ava'ma hanamokizmia tevefi kre tasegenke'za frisageno anahukna avu'avazamo'a tamagripina omaneno. <sup>15</sup> Hagi zagagafanema monko avu'ava'ma hania nera, ahe nefrita ana zaganema ahefriho. <sup>16</sup> Hagi mago a'mo'ma monko'zama hentesiegum'a, ve zaganafrema vanigeno'ma ana zagagafamo'ma hararesiana, ana a'ene ana zaganema zanahe friho. Na'ankure zanagra haviza hugaha'ankino knazana zanagra 'a erigaha'e. <sup>17</sup> Hagi izo'nesaroma a'ma erintesimo'a, havizantfa erifore hugaha'anki, vahenifintira znahe anati atregahaze. Agra nesar'o'ene monkoza higu, ana knazana agra'a erigahie. <sup>18</sup> Hagi ikankrima eri'nesia a'enema monko'zama hania nera, havi avu'avaza erifore hugahiankino, vahenifintira zanahenati atregahaze. <sup>19</sup> Hagi negrera anunkna'hezaneno, negafa asarahehezanena kamomohe'moki, monkozana osuo. E'inama hana'ana havizantfa hugahiankino knazama'a erigaha'e. <sup>20</sup> Hagi nenogo ne-naro'enema monkozama hania ne'mo'a, nenogo a'mofo kena'a hategahiankino, havi avu'ava nenogona huntegahie. Hagi ana ne'ene ana a'mo'enena mofavrea onte'neke frigaha'e. <sup>21</sup> Hagi nefu a'ma rehanaresia ne'mo'a, havi avu'ava huno nefu a'mofo kena'a hategahiankino mofavre ontegaha'e. <sup>22</sup> E'ina hu'negu kva hu so'e huneta, miko kasegeni'an'e tra keni'a amagera anteta agorga'a maniho. Ana'ma osanageno'a anama tamavre'na vanua mopamo'a amu'ati tamatreankna hanigeta knareru huta ana mopafina omanigahaze. <sup>23</sup> Hagi anama vanaza mopafima ko'ma mani'naza vahe'ma zamahenati atresua vahe'mokizmi zamavu'zamava zana osiho. Na'ankure anama vanaza mopafi vahe'mo'za kefoza huno kasri'nea zamavu'zamava nehazage'na nagote'na navesra huzmante'noe. <sup>24</sup> Hianagi vahe'mokizmi amu'nompinti Nagra Ra Anumzana tamagri Anumzamo'na tamavre'na ko huuvempa hurmantene'r erisanti haregahaze hu'noa mopagino, ana mopafina tumerimo'ene amirimo'a avite'nea mopa erigahaze. <sup>25</sup> E'ina hu'negu refkohu so'e huta negeta, e'i zagagafamo'a agru hu'neanki, e'i zagagafamo'a agru osu'neanki, e'i namamo'a agru hu'neanki, e'i agru osu'neanki hiho. Hagi agruma osu'nesia zagagafo, namaramino, zmasaguregati'ma regro-rohe'za vanoma nehaza zagaraminen, neneta tamagra'a famazeri havizana osiho. <sup>26</sup> Tamagra mani ruotage huta Nagri vahe maniho, na'ankure Nagra Ra Anumzamo'na ruotage hu'nogu miko kokankoka vahepintira Nagri vahe maniho hu'na tamagrira tamazeri ruotage hu'noe. <sup>27</sup> Hagi mago ne'mo'o a'mo'ma fri'nea vahe'eneno kefo avamu'enema keagama hania vhahera zamahe friho. Zamagri korankumimo'a zamagripi megahianki havenknonu zamahe friho.

*Pristi vahe'mokizmi tra kemofo naneke*

<sup>1</sup> Ra Anumzamo'a Mosesena amanage huno asmi'ne, Pristi ne' Aroni mofavre nagara amanage hunka zamasamio, pristi vahe'mo'a vahe'afima mago vahe'ma frisigeno'a, vahe'ma frige'za nehaza zana hu'za zamagra'a zamazeri pehana oshiho. <sup>2</sup> Hagi nerera'o nefo'o ne' mofavre'o mofa'amo'o afu agana'o, <sup>3</sup> ve e'orino vene omasenesia nesaroma agranema nemanisigeno amema rentinti huno nemanisimo'ma frisigeno'a, amane ana avu'avara avaririgahie. <sup>4</sup> Hagi a'amofo kazigati vahe'ma fri'n'a ana avu'avara huno agra'a azeri havizana osino. <sup>5</sup> Hagi pristi vahe'mo'za zmasunkura hu'za zamaseni zamazokara oharege, zamagi zamazokara oharege, zamavufaga taga osugahaze. <sup>6</sup> Anumzamo'na nagi'a tamagra eri havizana osuta, mani ruotage huta maniho. Na'ankure tamagra Anumzamo'na ne'zana tevefi ofa kresramna vugahaze. <sup>7</sup> Hagi pristi vahe'mo'za savri huno vanoma nehania a'neo, vema atre'nenia ara e'oriho. Na'ankure pristi vahe'mo'za Anumzamofo avurure ruotage hu'naze. <sup>8</sup> Tamagra pristi vhahera Anumzamofo vhahera hutma zamazeri ruotage hiho, na'ankure zamagra Anumzamofo ne'za ofa hu vaheki, mani ruotage hu'za maniho. Nagra Ra Anumzamo'na ruotage hu'nogu, mani ruotage hutma maniho. <sup>9</sup> Anahukna huno mago pristi vahe'mofo mofa'mo'ma savri avu'ava huno'ma vanoma haniana, nefana azeri agaze hugahianki, azerita tevefi krefanane hiho. <sup>10</sup> Hagi mago'a pristi vahetaminte'ma ugagota hu'nesia pristi ne'ma asenifi masave taginte'za azeri ruotage hanageno, za'za pristi kukenama hu'nesia pristi ne'mo'a fri'nesia vahetera za'za kukena'a tagatora osuno azokara ohareno. <sup>11</sup> Hagi Agra'a azeri haviza hugahianki, fri vahe tava'ontera ovino. Nerera'o nefo'enena frisakeno'a ovutfa huge, <sup>12</sup> ruotge'ma hu'nea kumara atreno ovino, na'ankure Anumza ma'amofo huhamprinteno masaventeti asenirera frenteno huhampri ante'ne. Nagra Ra Anumzamo'na nehue. <sup>13</sup> Vugota pristi vahe'mo'a venema omasenenia mofa ara erigahie. <sup>14</sup> Hagi pristi vahe'mo'a kento aro, ve atre'nesia aro, savri avu'ava nehania ara, ara e'orino pristi nagapinti vene ovase'nesia mofa ara erigahie. <sup>15</sup> E'ina'ma hanuno'a agripinti'ma efore hu anante anante'ma hu'za esaza vhahera zamazeri havizana osugahie. Na'ankure Ra Anumzamo'na azeri ruotage hu'noe. <sup>16</sup> Ra Anumzamo'a Mosesena amanage huno asmi'ne, <sup>17</sup> Aronina asamio, agripintima forehu anante anante hanaza vahepinti'ma zamavufagamo knare'ma osu'nesia vahe'mo'a Anumzamofo ne'zana ofa kresramna ovugahie hunka asamio. <sup>18</sup> Na'ankure avufgamo havizama hu'nesia vahe'mo'a, ruotage'ma hu'nefinka pristi eri'zana e'origahie. Hagi avu asuhu vahe'ma, agamo'ma havizama hu'nenia vahe'ma, avugosamo'ma havizama hu'nesia vahe'ma, agazamo'ma havizama hu'nesia vahe'ma, <sup>19</sup> agamo'o azamo'ma fri'nenia vhahero, <sup>20</sup> amage'na fagagi vhahero, atupa vhahero, avu havizahu vhahero, namunke namanke vhahero, agonknazamo haviza hu'nesia vhahero, zmatrenke'za pristi eri'zana e'oriho. <sup>21</sup> Hagi Aroni nagapinti fore hu'nesamoza zamavufagamo havizama hu'nesigeno'a, Ra Anumzamo'narera tevefina kresramna eme vuonanteho. Na'ankure agra avufgamo'a haviza hu'neankino, Ra Anumzamo'narera ofa eme osugahie. <sup>22</sup> Hagi ana vahe'mo'za ruotage huno ruotage'tfama hu'nea ne'zane, ruotage'ma hu'nenia ne'zanema Ra Anumzamonare'ma eri'za esazana amane negahaze. <sup>23</sup> Hianagi avufgamo'a haviza hu'nesimo'a, ruotage'ma hu'nefinka uravao osuge, kresramna vu itarera uravao osugahie. Ana'ma hanuno'a Nagri mono nona eri haviza hugahie. Na'ankure Ra

Anumzamo'na zamazeri ruotage hu'noe. <sup>24</sup> Mosese'a ana mika nanekea Aronine mofavre naga'ane, miko vahe'enena zamasmi'ne.

## 22

### *Pristi vahe'mo'za miko zupa hanaza trakemofo naneke*

<sup>1</sup> Ra Anumzamo'a Mosesena amanage huno asmi'ne, <sup>2</sup> Aronine mofavre naga'anena zamasamio, Israeli vahe'mo'zama nagrite'ma eri'za esaza ofa, ruotage hu'neanki kva hu'neza Ra Anumzamo'na ruotagema hu'nea nagi'a eri havizana osugahaze. Nagra Ra Anumzamo'na nehue. <sup>3</sup> Hagi anage hunka zamasamio, Aroni nagapintima agruma osu'nesimo'a, Nagrite'ma Israeli vahe'mo'zama ofama hunaku eri'za esaza ofamofo tava'ontera erava'o osino, ana'ma hanimofona Nagri navure'ma pristi eri'zama e'neria eri'zampintira ahenati atregahaze. Nagra Ra Anumzamo'na nehue. <sup>4</sup> Hagi Aroni nagapinti pristi vahe'mofoma fugo krima re'nesigeno'o, agoza krima eri'nesigeno avo'ma enevania vahe'mo'a, Israeli vahe'mo'za ofama emema hanaza ne'zana oneno mani'neno agrua hugahie. Hagi magomo'ma fri'nenia zagama avako hanigeno azeri pehanama haniano, mase'nenigeno avufga rima evuge haniano, <sup>5</sup> mopafima agruma osu zagaramima regaroheno vanoma nehania zagaramima avako'ma hanigeno azeri pehanama huge, agru'ma osu'nenia vahe'ma avako'ma haniana, <sup>6</sup> e'i anazantamima avako'ma hanimo'a, agru osuno, mani'nenkeno kinagassenkeno ti freteno, ruotage'ma hu'nea ne'zama eme nami'naza ne'zana negahie. <sup>7</sup> Hagi mani'nenkeno zugema uramina, agru nehuno otage ofama hanaza ne'zana negahie. Na'ankure e'i ana ne'zana agri'a ne'za me'ne. <sup>8</sup> Hagi agra'a fri'nesnia zagafi, afi' zagamo'ma aheno traga hu'nenia zagagafa ono. Ana zagama nesunka, Ra Anumzamo'na navurera agru osugahane. Ra Anumzamo'na nehue. <sup>9</sup> Hagi pristi vhahera zamasamige'za miko tra keni'a avariri fatgo nehu'za, kumi'zmimofo knazana eri'za ofriho. Nagra Ra Anumzamo'na zamazeri ruotage hunomo'na nehue. <sup>10</sup> Hagi amne vahe'mo'o, ru vahepinti pristi naga'ene eman'i'nesimo'o, zagore eri'za erinentesimo'a ruotage'ma hu'nea ofama hanaza ne'zana pristi vahe'enena onegahie. <sup>11</sup> Hianagi pristi vahe'mo'ma agra'a zagoreti'ma mizama se'nenia kazokazo eri'za vahe'mo'a, ana pristi ne'mofo ne'zampintira amane negahie. Hagi ana kazokazo eri'za ne'mo'ma kasente'nesia mofavre'mo'ma ante'nesigeno'a, amane ana mofavremo'a ana ne'zana negahie. <sup>12</sup> Hagi pristi vahe'mofo mofamo'ma amne nagapima vema eri'nesuno'a, ruotage'ma hu'nea ofama hanaza ne'zana onegahie. <sup>13</sup> Hu'neanagi ana pristi ne'mofo mofa'ma neve'ma frisigeno kento manige, neve'ma atresigeno mofavrema onteno mani'nesia a'mo'a ete nef a nontega vuno umani'nenu'n'a, amane nef a nezampintira negahie. Hianagi amne vahe'mo'za ana ne'zana onegahaze. <sup>14</sup> Hianagi iza'o keno antahino osu'neno pristi vahe ne'zama nesimo'a, hafu'ama ne'nesuno'a 5fu'a ami'neno mago'ane ante agofetu huno 6si'a pristi vhahera amino. <sup>15</sup> Hagi Israeli vahe'mo'zama ruotage ofama Ra Anumzamo'naregama eri'za esaza ofa, mago pristi vahe'mo'a eri havizana osino. <sup>16</sup> Hagi ana ne'zama zamisage'zama nesu'za ana ne'zama nesaza zamofo knazama'a eri'za mizaseho. Nagra Ra Anumzamo'na zamazeri ruotage hu'noe.

### *Anumzamo'ma musema osnia ofama hu'zamofo naneke*

<sup>17</sup> Ra Anumzamo'a amanage huno Mosesena asmi'ne, <sup>18</sup> Aronine mofavre naga'anee, mik'a Israeli vahera amanage hunka zamasamio, Israeli vahe-moto, rurega vahe'mo'ma tamagranema emani'enaza vahe'mo'zanema hvuempahu ofa hunakuro, amane musema huno ami ofama Ra Anumzamo-fonte'ma hunakura, <sup>19</sup> afu kevu'afintira afuhe afahe'ma osu'nenia ve bulimakao afuro, ve sipisipi afuro, ve meme afuro, avreno vuno kresramna vino. Hagi ana'ma osanazana ana ofagura antahi ozamigahue. <sup>20</sup> Hagi afuhe afahe'ma hu'nesia su'ana avrenka omo. Na'ankure e'i ana ofa, Ra Anumzamo'na antahi omigahue. <sup>21</sup> Hagi arimpa fru ofa afu kevu'afintima Ra Anumzamo'narega agra'a avesite ofa hunakuro, hvuempa hu'nere ofama hunakura, bulimakao afu kevu'afintiro sipisipi afu kevu'afintira afuhe afahe'ma osu'nlesia avreno ome ofa hinke'na, ana ofa'a antahimi'neno. <sup>22</sup> Hagi avusu hu'neniano, aga rehantagi'eneniano, avufgamo knare osu'enonio, namu re'neniano, zukake hu'nenia zaga ahenka kresramnavu itarera Ra Anumzamo'narera kresramna oviho. <sup>23</sup> Hagi agiamo'ma zaza huge, agiamo'ma atupama hu'nenia ve bulimakano, ve sipisipiretira musema huta tamagra'a tamavesite hu ofa amne hugahaze. Hagi hvuempama Nagrite'ma hu'nesaza ofa, e'inahu suzantetira osiho. <sup>24</sup> Hagi agonknazama pro hu'nesiano, agonknazama hari'nesia, sipisipio bulimakao afutetira Ra Anumzamo'narera ofa huonantegahaze. Hagi anahukna ofa tamagra mopafina osiho. <sup>25</sup> Hagi e'inahu sipisipi afuro bulimakao afura, meg'i vahepintira mizana huta Anumzamo'na ofa huonanteho. Na'ankure inahu zamo'a afuhe afahe huno haviza hu'neankina, tamage hu'na Anumzamo'na antahi ozamigahue. <sup>26</sup> Anante Ra Anumzamo'a anage huno Mosesena asami'ne. <sup>27</sup> Hagi sipisipi afuro, bulimakao afuro, meme afu'mo'ma anenta'ma ante'niana, ana anenta'amo'a nerera'enena 7ni'a zagegna manino. Hagi 8 knaret'i'ma vaniana, amane Ra Anumzamonarera ofa hunantegahaze. <sup>28</sup> Hianagi menima mofavrema antesia bulimakaono, sipisipi afura nererane anenta'anena magoka oznaheho. <sup>29</sup> Hagi Anumzamonare'ma susu nehuta musenkase ofama hunaku hanuta, ke'ma tamasamua kante anteta hanage'na, ana zankura muse nehu'na antahiramigahue. <sup>30</sup> Hagi ana zupage mik'a ana ofama hanaza ne'zana nehna nehuta, mago'a atrenkeno me'nenkeno vuno masa osino. Nagra Ra Anumzamo'na nehue. <sup>31</sup> E'ina hu'negu kasegeni'a tamagra kegava nehuta amage anteho. Nagra Ra Anumzamo'na nehue. <sup>32</sup> Hagi ruotage'ma hu'nea nag'i' eri havizana osiho. Israeli vahe'mota nagrikura ruotage hu'ne huta nag'i' erisaga hiho. Nagra Anumzamo'na tamagrira tamazeri ruotage hu'noe. <sup>33</sup> Nagra tamagri Anumzama mani'naku'ma Isipiti'ma tamavre'na atirami'noa Ra Anumza mani'noe.

## 23

### *Mani fru knare'ma hanaza zamofo naneke*

<sup>1</sup> Ra Anumzamo'a amange huno Mosesena asami'ne, <sup>2</sup> Israeli vahera anage hunka zamasamio, ama'na knare mono'ma hunante'naza kna huhampruankita, ana knagura ruotage hu'ne huta nentahita atru huta monora hunanteho. <sup>3</sup> Sigisi'a zagegna eri'za kna meno, hagi 7ni zagegna manifru knagi mani fru hu'neta eme atru hutma monora hunanteho. Inaregama manita vanafina ana Sabati knareraga mago eri'zana e'orita, amane eritru huta maniho.

<sup>4</sup> Mago kafumofo agu'afina eme atruma huta mono'ma hunteszankna Ra Anumzamo'a ama'na knarami huhamprinte'ne. <sup>5</sup> Hagi ese ikamofona 14nigna zupa kinaga Ra Anumzamo'na Ontamahena tamagatere'noa knamo'a agafa hugahie. <sup>6</sup> Hagi ana ikamofo 15ni zupa zo-ore bretima nekna eghiahinkita, 7ni'a knafi zo-ore bretia negahaze. <sup>7</sup> Hagi ana sontamofo ese kna zupa atru huta monora nehinkeno mago'mo'e huno eri'zana ana knarerera e'o'rigahie. <sup>8</sup> Hianagi 7ni'a knamofo agu'afina tevefima kre fananehu ofa Ra Anumzamofona huntegahaze. Hagi 7ni knarerera atru huta monora hunenteta erizana e'origahaze.

### *Ese hozama hamreno ofama eme hu'zamofo naneke*

<sup>9</sup> Ra Anumzamo'a Mosesena asamino, <sup>10</sup> Israeli vahera zamasamige'za, zaminaku'ma hu'noa mopare'ma vanu'zama witima krisage'noma ese raga'ama rentesiana, mago kona anaki'za pristi vahete eri'za viho. <sup>11</sup> Hagi pristi vahe'mo'a mani fru knamofo amefi'a, Ra Anumzamo'na navure ana witi kona eri veravehu ofa hinke'na, Ra Anumzamo'na antahimigahue. <sup>12</sup> Hagi ana ne'zama eri veravemahu ofama hanaza zupa, mago kafu hu'enigeno afuhe afahе osu'nenia ve sipisipi afu aheta tevefi kre fananehu ofa Ra Anumzamofonte huntegahaze. <sup>13</sup> Hagi witima ofa eri'za esafinti 2'a kilo erifako hu'za, olivi masavene erihavia hute'za kre mna nevu'za, waini tinena eri'za 1ni'a lita tagi'za ofa hanageno Ra Anumzamo'a mna'a nentahino musena hugahie. <sup>14</sup> Hagi ese ne'zama hamaresazana Ra Anumzamonare erita etetma, tamagra henka breti tro hutma nege, kre hagage huge kasefara nege hugahaze. E'inahu avu'avara henkama fore hu'anante anantema hu'zama esaza vahe'mo'zanena trake me'nena manitama vanafina ana avu'avara huta viho.

### *Ne'zama hamresaza knamofo naneke*

<sup>15</sup> Hagi anama witi ko'nama eri veravemahu ofama hanazana Sabati knaretira 7ni'a sonta hampriho. <sup>16</sup> Hagi 7ni'a mani fruhu knama Sabatima vagamaretesigeta, 50'a kna maniteta, Ra Anumzamofontera ru kasefa witi ofa hugahaze. <sup>17</sup> Hagi eri veravema hu ofama hu'zana, tare bretia erino eno tare kilo kna'amo'ma hu'nesiama'a flauara erita ana flauapina zisti anteteta, ana bretia tro hiho. E'i ese ne'zama hozafima nenama hania ne'zamofo ofa Ra Anumzamofontega hugahaze. <sup>18</sup> Hagi ana bretinema ofama hanazana, mago kafu huno afuhe afahе osu'nesia 7ni'a ve sipisipi anentataminki, bulimakao afu kevufinti mago ve bulimakao afuhe afahе osu'nesiane, tare ra ve sipisipi afutre afuhe afahе osu'nesia avreta Ra Anumzamo'narera kresramna viho. Hagi witi ofane, waini ofa krenkeno knare mana vanige'na nentahina antahi musena hugahue. <sup>19</sup> Hagi mago ve meme afura kumite ofa kresramna nevuta, tare ve sipisipi afutrena mago kafu hu'nesa'a zanavreta arimpa fru ofa hiho.

<sup>20</sup> Hagi Pristi vahe'mo'a bretine ana tare sipisipia Ra Anumzamo'nare eri verave hu ofane, ese ne'za rgamofo ofa eri verave hutena, e'i ana ne'zamo'a Ra Anumzamonarera ruotage hu'neankiza pristi vahe'mo'zage negahaze. <sup>21</sup> Hagi ana knarerera maka eri'zana atreta omeri atru huta monora hugahaze. Ana knamo'a mevava tra ke me'nena henkama fore hu anante anante hu'zama vanaza vahe'mo'za avaririgahaze.

<sup>22</sup> Hagi hozatamifinti ese ne'zama nehamaresuta, agentegama mesiama'a atrenkeno nemena, evuramisiama'a zo-ogihu. Ana hu'enage'za zamunte

omane vahe'ene rurega vahe'ma enemaniza vahe'mo'za ome zogihio. Nagra Ra Anumzana tamagri Anumzamo'na nehue.

### *Ufe reno muse hu'zamofo naneke*

<sup>23</sup> Mago'ane Ra Anumzamo'a Mosesena asmino, <sup>24</sup> Israeli vahera zamasamige'za 7ni ikamofona ese knarerera manigasa hiho. Ana knarerera ranknatamigi ufena nereta atru huta monora hiho. <sup>25</sup> Hagi mago vahe'mo'a ana knarerera eri'zana e'orino. Hianagi ana knarerera tevefima kre ofa eri'za Ra Anumzamo'nare eme kresramna viho.

### *Kumite'ma nonama huno ofama hu knamofo naneke*

<sup>26</sup> Ra Anumzamo'a Mosesena amanage huno asmi'ne, <sup>27</sup> 7ni ikamofona 10ni kna fatgorera kumi'mofo nonama hu ofa hugahaze. Ana knarerera ne'zana a'o nehutma, eritru huta monora nehuta tevefima kre ofa Ra Anumzamo'nare hugahaze. <sup>28</sup> Hagi ana kna zupa mago vahe'mo'a eri'zana e'origahie, na'ankure Ra Anumzana tamagri Anumzamo'nare kumimofo nonama huno apaseramante ofa hugahaze. Ana hanage'na kumitamia atrezmantegahue. <sup>29</sup> Hagi ana knare'ma ne'zama nesaza vahera vahe'niafintira zamahe anati atregahue. <sup>30</sup> Iza'o e'i ana knare'ma eri'zama erisia vahera, Nagra vahe'niafintira ahe frigahue. <sup>31</sup> Hagi ana knarerera mago eri'zana e'oritfa hugahaze. Ama tra kemo'a menine henkanema fore hu anante anante hu'zama esaza vahetera meno nevanige'za avaririgahaze. <sup>32</sup> Hagi anankna mani fruhu kna Sabatigita, mani fru hutma nemanitma, ana ikamofona 9ni zupa kinaga ne'zana a'o hutma mani'enkeno vuno 10ni knamofona kinaga uhanatino.

### *Fugagi noma kisaza zamofo naneke*

<sup>33</sup> Mago'ene Ra Anumzamo'a amanage huno Mosesena asmi'ne, <sup>34</sup> Israeli vahera zamasamige'za, 7ni ikamofona 15tini knazupa fugagi noma kiza maniza e'naza zamofo ne'zana kre'za nene'za, 7ni'a knamofo agu'afi Ra Anumzamo'na antahi namigahaze. <sup>35</sup> Hagi ese kna zupa ruotage hu'nea knagita eri'zana e'orita eta emeri tru huta monora hugahaze. <sup>36</sup> Hagi ana 7ni'a knafina tevefi kre fanene hu ofa Ra Anumzamo'narera hiho. Hagi 8 knazupa eri'zana atreta eme atru hutma monora hunenanteta, tevefi kre fanene hu ofa Ra Anumzamo'nare hugahaze.

<sup>37</sup> E'i ana kna ruotage hu'ne huno Ra Anumzamo'a huhampri'nea knagita, eme atru huta monora hunenteta mago mago knama huhamprinte'nenia knarerera kre fanane hu ofane, witi ofane, kresramna vu ofane, waini ofa Ra Anumzamofontega hugahaze. <sup>38</sup> Hagi emeritru huta mono'ma hu knaramina amage'ma nente'nuta, mani fru hu kna Sabatigura tamagesa nentahita, muse'zana erita ne-eta, huvempa hu ofa nehuta, tamagra'a tamavesite'ma hu ofanena Ra Anumzamo'narera hunantegahaze.

<sup>39</sup> Hagi ne'zama eri tru huteta ana knamofo amefi'a, 7ni ikamofo 15ni knazupa 7ni'a knafi ne'zana kreta neneta monora Ra Anumzamofona hunteta musena hunteho. Hanki ese knazupane, 8ti knanena manifru hu kna me'ne. <sup>40</sup> Hagi ese kna zupa muri zafa azankunaki, tofe ani'nagi, ani'na kuronkuroma hu zafa azankunaki, ankre huta e'nerita, amiramira huta Ra Anumzana tamagri Anumzamofona 7ni'a zagegnafina musena hunanteho. <sup>41</sup> Hagi maka kafufina 7ni ikampi 7ni'a zagegnafni ne'zana neneta musena hugahaze. Ama anahu avu'avazamo'a menina me'nena henkama fore'ma hu anante anante'ma hu'zama vanaza vahe'mo'za avririgahaze. <sup>42</sup> Hagi

7ni'a knamofo agu'afina Israeli vahe'mota fugagi noma ki'nesaza nompi manigahaze. <sup>43</sup> E'i anazama huteremä nehanage'za henkama fore'ma hunante anante'ma hu'zama vanaza vahe'mo'za nege'za, Nagrama Isipiti'ima tamagehe'ima zamavare'na ne-eoge'zama fugagi'noma ki'zama maniza'e'naza zanku antahigahaze. Nagra Ra Anumzana tamagri Anumzamo'na nehue. <sup>44</sup> Hanki Moses'a Israeli vhahera Ra Anumzamo'ma ne'za neneta mono hunanteta muse hutere hugahazema hu'nea knaramina eriamma huno zamasami'ne.

## 24

### *Seli mono nompima antesia tavi azotane bretinemofo naneke*

<sup>1</sup> Ra Anumzamo'a amanage huno Mosesena asmi'ne, <sup>2</sup> Israeli vhahera zmasamige'za agruma huno'ma knare'ma hu'nesia olivi masavena eri'za esagenka, lamufina tagintenka rekrus huntegeno tavi'mo'a seli nompina asura osuno tevava hino. <sup>3</sup> Atruhi seli mono nompima hunaragi tavravemofo avuga, ruotage hu'nefina Aroni'a tavima taginte zantamina eri ante fatgo nehuno, kinaga tavira tagintenko asu osuno Ra Anumzamofo avurera me'neno vuno kotugahie. Hagi ama anazamo'a mago kasege me'nena tamagehezama fore hu anante anante'ma hanaza vahe'mo'za amage antegahaze. <sup>4</sup> Hagi goliretike'ma tro'ma hu'naza tavi rekruhunte azotarera, tavira me'nena Aroni'a miko zupa ana tavimofo osa'a renkanufeno erise hugahie.

<sup>5</sup> Hagi kaneno eri osi hanigeno fuza fupenenia flaua erinka 12fu'a breti trohuo. Hagi tare kilo eri fako hutere hunka, mago mago bretia trohuo. <sup>6</sup> Hagi ana bretia refako hunka golireti'ma tro'ma hu'naza itama Ra Anumzamofo avugama me'nere tare isare 6si'a antetere huo. <sup>7</sup> Hagi tare isare'ma refko huta antesaza bretire frenkinsensi mnamentake zana antekeno bretimofo nona erinigeta Ra Anumzamofo ofa tevefi kre mna viho. <sup>8</sup> Hagi mika mani fruhu Sabati knarerha pristi vahe'mo'a bretia erino, Ra Anumzamo'na navuga eme antetere hugahie. Hagi ama ana avu'avazamo'a, huhagerafi tra ke me'nena avarirahaze. <sup>9</sup> Hagi ana ne'zana Aronine agripinti'ma fore hu'zama esaza naga'mokizmi ne'zankiza, ruotage'ma hu'nefinka negahaze. Na'ankure ana ne'zana Ra Anumzamofonte ofa hazageno ruotage hu'ne.

### *Ra Anumzamofo huhaviza huntlesia vahe'ma have knonu zamahe'naza naneke*

<sup>10</sup> Mago nera nerera'a Israeli a' manigeno, nef'a Isipi ne' mani'ne. Hagi ana ne'mo'a Israeli vahe kumapi mago Israeli ne'ene hara hu'na'e. <sup>11</sup> Ana a'mofo agi'a Selomiti'e. Selomiti'a Dibri mofakino Dani nagapintire. Hagi ana Israeli a'mofo mofavremo'a Ra Anumzamofo agi huhaviza nehuno, Ra Anumzamofo agifi sifna ke huntege'za Mosesente avre'za vu'naze. <sup>12</sup> Hagi ana nera avre'za kina nompi ome ante'ne'za, Ra Anumzamo'ma kema Mosesema asaminigu avega ante'za mani'naze. <sup>13</sup> Anante Ra Anumzamo'a amanage huno Mosesena asami'ne, <sup>14</sup> nagima huhavizama hunante'nea nera kumamofo agu'afintira avrenka fegi'a vugen, huhavizama nehanige'zama antahi'nesaza vahe'mo'za zmazana anunte antetesageno, miko vahe'mo'za have knonu ahe friho. <sup>15</sup> Hagi Israeli vhahera zamasamio, iza'o Anumzamo'nama huhavizama hunantesimo'a, agra'a knazama'a erigahie. <sup>16</sup> Hagi iza'o Ra Anumzamo'na nagima huhavizama hanimofona ahe friho. Maka Israeli vahe'mo'zo eman'i'enaza vahe'mo'zama huhavizama hanazana vhahera havenknou zamahe frighahaze. <sup>17</sup> Hagi vahe'ma

ahe frisnia vahera ahe friho. <sup>18</sup> Hagi mago'mo'ma rumofo zagagafama ahe frisiana, ana ne'mo'a, anama ahefrisia zagagafa nona huno agra'a zagagafa avremigahie. <sup>19</sup> Hagi iza'o tava'oma'are'ma nemanismofoma ina avufgarero kuzafa ahesigeno'a, ana zanke huta agri'enena ana avufgarera ahegahaze. <sup>20</sup> Hagi mago vahe zaferinama ruhantagisimofona, ana zanke huta agrira zaferina'a ruhantagaho. Avuma ruproma hina, ana zanke huta avu rupro hiho. Ave'ma rutafrina, agri'enena ana zanke huta ave rutafroho. <sup>21</sup> Hagi iza'o mago vahe zagagafama ahesimo'a, nona huno mago avaremimo. Hianagi vahe'ma ahe frisimofona, ahe friho. <sup>22</sup> Hagi ruregati'ma tamagranema emani'nesaza vahe'ene Israeli vahe'mo'zanena ama ana kasegea avariraho. Nagra Ra Anumzana tamagri Anumzamo'na nehue. <sup>23</sup> Hagi Ra Anumzamo'ma hu'nea kante anteno Moses'a Israeli vahera huzmanteg'e'za, Ra Anumzama huhavizama huntea nera ome avre'za kumamofo fegia havenknonu ome ahe fri'naze.

## 25

### *Manigsama hu kafumofo naneke*

<sup>1</sup> Ra Anumzamo'a Sainai agonare Mosesena asamino, anage hu'ne, <sup>2</sup> Israeli vahera amanage hunka zamasamio, Nagrama tamisua mopafima ufsresa 7ni kafurera atrenkeno mopamo'a manigasa hinketa, magozane huta mopafina onkrinkeno mopamo'a Ra Anumzamofo Sabati'e huno mane fru huno mago kafu meno. <sup>3</sup> Hagi 6si'a kafufina mopatamifina avimza neseta, waini azankunara akafrita erise nehuta, hoza hamaregahaze. <sup>4</sup> Hianagi 7ni kafua Sabati kafugino mopamo'a atrenkeno mane fruhu huno Ra Anumzamo'nare meno. Hagi ana kafufina hoza e'orige, waini azankunara akafrita eri fatgoa osugahaze. <sup>5</sup> Hagi ana kafufima agra'ama hageno raga'ama ahe'nesia witia akafrita nompina onteta, azanku'nama akafrita erise'ma osu'nesaza wainia tagita waini tina tro huta onteho. Hagi ana kafua mani fru hu kafugino, atrenkeno mopamo'a fru huno amne meno. <sup>6</sup> Hianagi tamagrane ve kazokzo eri'za vahe'ene, a' kazokzo eri'za vahe'ene, zogore'ma eri'zama erinermantesaza vahe'ene, ruregati vahe'ma tamagranema nemanisia vahe'mo'zanena amne anampintira eri'za negahaze. <sup>7</sup> Anahukna hu'za maka kegavama nehaza zagagafatamimo'zane, afi zaga-gafamo'zanena anampinti ne'zana negahaze.

### *Eri'nenia zama eteno ami'nia kafumofo naneke*

<sup>8</sup> Hagi 7ni'a zupa 7ni'a kafu'a hamprinkeno ana maka kafumo'a 49'a kafu hino. <sup>9</sup> Hagi ana kafumofona 7ni ikamofo 10ni zupa, kumi'mofo nona huno apasezmane knagita mememofo pazivete ufe erita, ufena omereta mopatamifina viho. <sup>10</sup> Hagi 50'a kafuma hanigeta e'i ana kafumo'a ruotage hu'neanki, huama huta eri'za vahera zamatresage'za fru hu'za nagazimirega vugahaze. Hagi mikamota mopatamirega vugahaze. <sup>11</sup> Hagi 50ma hania kafua eri'nesaza zama eteno ami kafugita, hoza ontege agra'ama hagesia witia akafrita eri ontege, waini azankuna'a akafrita erise osu'nesaza waniretira raga'a tagita waini tina trora huontegahaze. <sup>12</sup> Na'ankure e'i eri'nesaza zama etenoma omi ami hu kafugino, tamagridera ruotage hugahiankita ana hozafintira ne'zanke eritma negahaze. <sup>13</sup> Hagi eri'nesaza zama eteno'ma ami kafuma hanigeno'a, miko vahe'mo'a mopa agafarega miko zama'ama me'nerega vugahie. <sup>14</sup> Hagi

mopatamima zagore atrazage'za mizase'nenaza vahero, mopazmima zam-agripinti mizase'nesaza vahera rezmatga huta mopazmia eri savarira osiho. <sup>15</sup> Hagi tamagrama mopama mago'amokizmire'ma atrenesuta, nama'a kafu mani'nageno vuno mani fruhu kafurera uhanatine, ana kafu'amofo avamente zagoa mizasegahaze. <sup>16</sup> Hagi rama'a kafuma ana mopafima manitesageno eri'nesazazama eteno ami kafuma ena, zagoa eri antesga huta mizasegahaze. Hagi ana mopafima osi'a kafuma mani'tesageno eri'nesaza zama eteno ami kafuma ena, anteramita osi'a zago mizasegahaze. Na'ankure ne'zama ana mopafinti'ma erifore'ma hu'nesaza avamente mizasegahaze. <sup>17</sup> Mago'mofoma orevatage arevatage huta nanazama eri avu'avara zana osiho. Hagi atrenkeno Anumzamo'na kore'ma hunante zamo tamagu'afina meno. Hagi Nagra Ra Anumzana tamagri Anumzamo'na nehue. <sup>18</sup> Hagi Nagri tra kene kasegeni'a avaririsuta, knare huta ama mopafina nemanisageno, <sup>19</sup> ana mopafina ne'zana fore hanigeta neramamu nehuta hazenkea e'ori so'e hutma manigahaze. <sup>20</sup> Hianagi mani fruhu 7ni kafure'ma, hozama erita ontege, ne'zama eri atruma osanuta, na'a negahune? huta antahintahi hakarea osiho. <sup>21</sup> Hagi 6si kafufina Nagra asomu ha'nenkeno, 3'a kafufima ne'naza avamente ne'zamo'a ampore-gahie. <sup>22</sup> Hagi 8ti kafufima agafa huta hozama nentesuta, ko'ma 6si kafufima hamarente'naza ne'za me'nena nenesageno, 9ni kafufina ne'zamo'a ne-nahinketa vasagegahaze. <sup>23</sup> Hagi mopa zagrera erivaga rehogura otreho, na'ankure mopa Nagri mopa me'negeta, tamagra rurega vahe emaniankna huta mani'naze. <sup>24</sup> Hagi ana mopama miza hanazegu'ma zagore'ma atre-sageno'a, ana mopamofo nafa'amo mizana hugahie. <sup>25</sup> Hagi mago Israeli vahe'mo'ma amunte'ma omanenigeno mopa'ama zagore'ma atre'nesige'za, mizama hu'enageta, ana ne'mofo naga'afinti ana mopa ete mizasegahie. <sup>26</sup> Hagi naga'afinti'ma mago'mo'ma mizaseno ana mopama erigama os-anigeno'a, me'nenkeno zagoa eritru huteno agra'a mizasegahie. <sup>27</sup> Hagi zagoma keno erifore huteno mizamasenaku'ma hanuno'a, nama'a kafufima ana mopafina hoza anteno ne'ne, hamprino eri fatgo huteno, hozama ante'nesia kafu'are mizasenenteno ete mopa erigahie. <sup>28</sup> Hianagi mopa nef'a'ma zagore'ma atre'nesia mopa'ama erinaku'ma hanianagi zago'ama omanesigeno'a, avega anteno mani'nenkeno eri'nesia zama eteno ami kafuma esigeno'a, ana ne'mofo azampintira amne mopa'ama mizama sene-niama'nemino erigahie. <sup>29</sup> Hagi mago ne'mo'ma kegina hugagi'nenia rankumapima me'nenia noma'ama zagore'ma atresigeno ru ne'mo'ma eri'nesigeno'a, ete ana noma'a erinaku'ma hanuno'a, mago kafufinke miza-senenteno ana nona erigahie. <sup>30</sup> Hianagi ana noma mago kafufima mizase-vaga'oresigeno'a, eri'nesia zama ami kafuma esigeno'a, ana nomofo nef'a'a, ana nona e'origahie. <sup>31</sup> Hagi kegina osu kumapima me'nenia nona mopama hu'nazankna hu'za hugahazankita, zagoreti amne mizasege, eri'nesiazama ete ami kafuma esigeta, amne ana nomofo nef'a erigahie. <sup>32</sup> Hagi Livae naga'mofo rankumapima mago Livae ne'mo'ma noma'ama zagore'ma atre-sigeno mizama se'nesage'za, agra amne inaknarero ete'no noma'a mizaseno erigahie. <sup>33</sup> Hagi Livae naga'mo'za nozamima zagore'ma atre'nesageno rumo'zama mizasenengen' noma, eri'nesiazama eteno ami kafuma esige'za, amane nozmia erigahaze. Na'ankure zamagra mago'zana onte'nazanki nonke'za ante'naze. <sup>34</sup> Hianagi Livae naga'mo'zama afuzagama kegavama nehaza mopama kuma tavaonte'ma me nesige'za zagrera otreho, e'i ana mopa zamagri'a mopa megahie.

*Zamunte omane vahe'mofo naneke*

<sup>35</sup> Hagi Israeli vahepinti'ma mago'mo'ma amunte'ma omanesigeno agra'ama aza huga'ma osanigeta, ruregati vahe'ma mopatamifima emani'negeta azama nehazaza huta azahinkeno, tamagranena manino. <sup>36</sup> Hagi mago'azama zagoretima mizasenaku'ma hanigenka, Anumzamofo korozamo kagu'afi me'enkenka, mago'a rukamrenka ra zago agia aheonto. Ana hinkeno tamagrane ana vahe'mo'za manigahaze. <sup>37</sup> Hagi zagoma amisunka, anante ante aguheno namisigure hunka omige, ne'zama amisunka, ne'zama ante aguheno namisigure hunka omio. <sup>38</sup> Nagra Ra Anumzana tamagri Anumzane, Isipiti'ma tamavre'na e'na Keneni mopama tami'noana, tamagri Anumza mani'naku tamavre'na e'noe. <sup>39</sup> Hagi Israeli nagapinti magotamimo'ma agra'a aza huga osuno, agra avufgama zagore'ma atresigenka mizasenunka, kazokzo eri'za vahekhnara hunka kva huonto. <sup>40</sup> Hagi agrira zagore'ma zamavrazage'za eri'za erige, ruregati vahe'ma emani'ne'za eri'zama e'nerizankna huno mani'ne'nigeno, eri'nea zama eteno nemino musenkasema hu kfurera uhanatigahie. <sup>41</sup> Hagi ana kfurera agri'ene mofavre'araminena zamatrenke'za nagazmima mani'nare mopa agafava viho. <sup>42</sup> Na'ankure Israeli vahera Nagri'a eri'za vahe Isipitira tamavre'na e'noankita zagrera zmatrenage'za kazokzo eri'za vahera ozmavregosaze. <sup>43</sup> Hagi zamage fenkamu atreta zamazeri havizana osiho. Hu'neanagi Ra Anumzamofonku kore huntegahaze. <sup>44</sup> Kazokzo eri'za veo, kazokzo eri'za a'ma avre'sazana ru vahe'ma tava'ontamire'ma mani'nesaza kumapintike zamavareho. <sup>45</sup> Hagi rurega vahe'ma tamagranema enemani'naza vahepinti enena amne zamavaresage'za tamagri'za se'za manigahaze. <sup>46</sup> Hagi frisage'za ana kazokzo eri'za vahera mofavretamimo'za zamazeri santiharesageno tamagri eri'za vahe segahaze. Hianagi Israeli vahera anara huta kazokzo eri'za vahera ozamavaregahaze. <sup>47</sup> Hagi Israeli vahe'ma zamunte omanesige'za, rurega vahe'ma tamagrane emani'nenaza vahetema zamagra zamavufagama zagore'ma atresageta, <sup>48</sup> ete amne naga'amo'za mizaseza ana nera avregahaze. Hagi afu agana'o, <sup>49</sup> nenogo'o, nefo'amo'o korama'amo'a ana nera mizasegahaze. Hagi ana ne'mo'ma agra'ama mizasega hanuno'a, amne mizasegahie. <sup>50</sup> Agrane mizamase'hea ne-enena eri'zama erisia kafu'a hamprike nevikenno eri'neazama eteno nemino musenkasema hu kfure uhanatino. Hagi anama mani'nesia kafumofo avamente erinte'za mizama'a keho. Hagi ana knama refko huno keteno, mizamasentesiana zagore'ma hige'za vahe'mo'za eri'zama erige'zama mizama senezmantazankna kante miza sentegahie. <sup>51</sup> Hagi eri'nesiazama etenoma ami kafuma zazate'ma me'enkeno'a, ana vahe'mo'a kva'amofona agra'a avufgarera rama'a zago miza sentegahie. <sup>52</sup> Hagi eri'nea zama eteno ami kafumo'ma erava'o hunenkeno'a, ana avamente osi'a zago mizasegahie. <sup>53</sup> Hagi emani vahe'mofo eri'za vahe'ma mani'enkeno'a, kafugu kafugu'ma zagore'ma avrazageno eri'zama erige'zama kegavama hunentazankna hu'za kegava hunteho. Hagi atrenke'za ana vahe'mo'za mopatamifina kazokzo eri'za vahe'ma zamazeri haviza hazankna hu'za kegava huozmanteho. <sup>54</sup> Hagi ana ne'mo'ma agra'ama mizasegama osanigeno eri'nea zama eteno nemino musenkase hu kafuma esigeno'a, ana ne'ene mofavre'zaga'anena zamatresige'za fru hu'za vugahaze. <sup>55</sup> Na'ankure Israeli vahe'mo'za Nagri eri'za vahe mani'nazage'na, zamavare'na Isipitira e'noe. Nagra Ra Anumzana, tamagri Anumzane.

**26***Kema antahino asomu'ma eri'zamofo naneke*

<sup>1</sup> Mago kaza osu anumzantero, zafa antreta mago anumzana trora huon-tege, zaza havea retrurente'neta monora huntege, havea antreta havi anumzamofo amema'a tro hunte'neta monora huonteho. Nagrake Ra Anumzana tamagri Anumzana mani'noe. <sup>2</sup> Mani fruhu knani'a Sabatia kegava huta manifru nehuta, mono noni'a kegava hiho. Nagra Ra Anumzamona nehue. <sup>3</sup> Tamagrama tra keni'ane kasegeni'ama kegava hu'neta nevaririta agorgia'ama manisazana, <sup>4</sup> Nagra kora atre'nugeno neranigeno, mopamo'a ne'zana renentesigeno, hozafi zafamo'za raga'a rentegahaze. <sup>5</sup> Hagi witia vasageta nevanageno wainima tagi kna esigeta, wainia tagita nevanageno, hozama ante kna e'nigeta, miko ne'zana neramu nehuta mopatamifina knare huta manigahaze. <sup>6</sup> Hagi Nagra tamagrira tamarimpa fru tami'nena, masenuta mago vahekura korora osugahaze. Mopatamifintira afi ha' zagagafa ahenatinetre'na, ha' vahetamimo'za tamahe zankura kegava huramantegahue. <sup>7</sup> Hianagi ha' vahetamima ha'ma huzmanteszana, zamarotago huta zamahe frigahaze. <sup>8</sup> Hagi 5fu'a vahe'mota 100'a ha' vahera zamarotago hanage'za fresageno, 100'a vahe'mota 10 tauseni'a ha' vahetamina zamarotago huta kazinteti zamahegahaze. <sup>9</sup> Nagra tamagrira navesineramante'na tamazeri hakare ha'nena rama'a vahe fore nehanagena tamagranema huhagerafi huvempa kema hu'noa keni'amo'a nena raga regahie. <sup>10</sup> Hagi ko kafufima eritruma hu'naza ne'zana nenesageno, kasefa kafufina ne'zamo'a avitena, ko kafufima eritru hu'nenaza ne'zana eritrehaz. <sup>11</sup> Nagra tamagrane nemanina, namefira huoramigahue. <sup>12</sup> Nagra tamagrane vano nehu'na, tamagri Anumza mani'nesugeta, tamagra Nagri vahera manigahaze. <sup>13</sup> Nagra Ra Anumzana, tamagri Anumzamo'na Isipiti'ma tamavre'na ogeta, mago'anе kazokzo eri'za vahera omani'naze. Hagi agarenamare zafama tamanankempi anakinte'nazageta kazokzo eri'zama e'nerizage'na, Nagra ana zafa eri atrogeta fru huta e'naze.

*Ke rutagre vahe'mo erisia knazamofo naneke*

<sup>14</sup> Hianagi keni'a antahi onamige, kasegeni'amofo amage ontege, <sup>15</sup> tra keni'a ovaririta, huhagerafino'a huvempa ke'ma rutagresazana, <sup>16</sup> Nagra amanahu knaza tamigahue. Ame hu'nа ranknaza atre'na, tamazeri kore nehu'na, onkanamre krine, avufga amuho krine atranena tamavurga azeri asu nehina, tamatafi manime nevuta ufrigahaze. Hagi hozama antesazana amne zankna hugahie. Na'ankure ha' vahetamimo'za hamare'za negahaze. <sup>17</sup> Nagra namage'na hurami'nena ha' vahetamimo'za hara huramagaterahaze. Tamavesrama hunermantaza vahe'mo'za kegava hunermante'na, mago vahe'mo tamarotago osu'nesianagi, tamagra kore fregahaze. <sup>18</sup> Hagi ana knazama tamisugetama ontahitama mago'anema ana kumima huta vanazana, nona'a 7ni'a zupa agaterena knazana tamigahue. <sup>19</sup> Nagra tamavufga rama nehaza tamavutamavara tamahe pasaru nehu'na, mona azeri'nugeno aenigna huno hanavetino kora norina, mopamo'a hanavetino bronsigna hugahie. <sup>20</sup> Hanavetamimo'a amane zanka hugahie. Na'ankure mopatamimo'a ne'zana ahe ontesigeno, zafamo'a raga reontegahie. <sup>21</sup> Hagi ana knazama esigeta mago'anema ana keni'ama rutagresazana, Nagra 7ni'a zupa agatere'na kumi'ma hu'nesaza avamente knazana tamigahue. <sup>22</sup> Nagra afi zagagafa huzmanta'nena mofavretamia zamahe nefrisageno,

afu zagatamia zamahe nefrina, tamazeri atupa hanugeta, osia vahe manusageno, kampina vahe'mo'za vano osugahaze. <sup>23</sup> Hagi ana'ma hanua zama rempi hutama ontahita, ana zanku'ma tamarimpama aheta keni'a hantagita vanazana, <sup>24</sup> Nagra kumi'ma hanarera narimpa ahe'na hara reramante'na, kumi'ma hanaza nona'a knazana 7ni'a zupa agatere'na tamigahue. <sup>25</sup> Ana nehu'na ha' vahetami huzamanta'nena huhagerafi huvempa ke'ma hantagi'naza zantera ha' eme huramantegahaze. Hagi fretama rankumapima ufrresazana, kri atra'nena anampinka tamahe nefrina, ha' vahetamimoza hara hurmante'za hara huramagateregahaze. <sup>26</sup> Hagi ne'zama e'neri'za kankamuna eri havizama ha'nena avenifima kresaza bretia 10'a naga'mo'za nesageno tamura osina tamagaku hugahaze. <sup>27</sup> Hagi ana'ma huramantesugeta, tamarimpa ahenanteta, kenia ontahi ana zanke'ma huta vanazana, <sup>28</sup> Nagra tusi'a narimpa aheneramante'na, kumi'ma hu'nesaza avamente, agatere'na 7ni'a zupa knazana tamigahue. <sup>29</sup> Tamage ana knafina, ne'zankura atupa nehuta ne' mofavre tami'ne mofa'netaminena zamaheta negahaze. <sup>30</sup> Hagi agonaregama havi anumzante'ma mono'ma hunentaza kumatamia Nagra eri haviza nehu'na, mnantentake zama kre mnama kaza osu havi anumzante'ma nevaza ita tamia tagnavazi netre'na, kaza osu havi anumzana, eri haviza huntene'na ana agofetu tamahe'na fri tamavufga eri agofetu agofetu hanugenno moriri huno marerigahie. Na'ankure e'inahu tamavutavama hazazankura nagote'zmante'na namefi huramigahue. <sup>31</sup> Nagra rankumatamia eri haviza nehu'na, mono non-taminena eri haviza hugahie. Hagi mnantentake zama kre mnama vnaza ofa, Nagra antahi oramigahue. <sup>32</sup> Hagi nagra mopatamia eri haviza ha'nena, mopatamima erisaza vahe'mo'za anazana nege'za, antri hu'za zmagogogu hugahaze. <sup>33</sup> Nagra ha' vahetamia hanuge'za tamahe savri hanageta, ru vahe kumapi savri huta umanisageno, kumatamimo'a amne zankna hugahie. <sup>34</sup> Nagra tamazeri panini hanugeta ru vahe kumapi umani'enageno, Sabati kafurema mopatamimofoma atrazage'noma mani fruma osu'nea nona'a anantega umani'nenageno mopamo'a mani fru hugahie. <sup>35</sup> Hagi ana mopafima mani'neta atrageno'ma mopamo'ma mani fruma osu'nea zankura mopamo'ma haviza huno mesia knafina, mopamo'a fru huno megahie. <sup>36</sup> Hagi ana vahe mopafima umanisamo'za tamagrira tamazeri kore ha'nena, vahe'mo'tamarotago osanianagi, zafaninamo tamage'ma hania zankura kore fregahaze. <sup>37</sup> Ha vahe'mo'za zamavaririzage'za ha'pima oretufe aretufema hu'za frazaza huta vahe'mo'za ontamavariri nazanagi ozeri tanafa azeri tanafa huta fregahaze. Hagi hanavetamia omnena oti hanavetineta ha' vahetamia hara huozmantegahaze. <sup>38</sup> Hianagi ru vahe mopafi frisage'za, ha' vahetamimofo mopafi aseramantegahaze. <sup>39</sup> Hagi manisamota amane zankna huta ha' vahetamimofo mopafi haviza hugahaze. Na'ankure tamagra'a kumiku'ene neramafa kumiku anara hugahaze. <sup>40</sup> Ana'ma hutesu'za manisamo'za kumizmigu'ene zamagehe'i kumiku'ma zamagesa nentahi'za ana zanku'ma zamasuku nehu'za, huhavizama hunante'naza zanku'ma huama hu'za zamasunku'ma hanage'na, <sup>41</sup> Narimpa eri haviza hazazanku ha' vahetamimofo mopafina tamatrogeta umani'naze. Hagi tamagra'ama anteramita ana zanku'ma tamagu'ama rukrahe'ma huta nemanita, kumi'ma hu'naza zankuma nonama hanazana, <sup>42</sup> Jekopune, Aisakine Abrahamunema huhagerafi huvempa kema Nagrama huzmante'hoa nankegu nagesa nentahi'na, mopama zamigahuema hu'noa zanku'enena nagesa antahigahue. <sup>43</sup> Hagi Sabati kafurema manigasama

osu'nea zanku mopamo'ma amnema menoma vania knafina mopamo'a fru huno me'nena, tamagra Nagri kema rutagrenaza zantero vahe mopafina kna erigahaze. <sup>44</sup> Hagi ana huta ha' vahetamimofo kumapina manigahaz-anagi, Nagra zamaretufe otre'na, zamazeri havi zantafana osu'na, huhager-afi'noa keni'a ruotagregosue. Na'anckure Nagra Ra Anumzana, zamagri Anumza mani'noe. <sup>45</sup> Hagi ko'ma zamagehe'inema huhagerafinoa kegu nagesa nentahina, zamagri Anumza mani'naku ru vahe'mo'za negazage'na Isipitira zamavare'na e'noe. Nagra Ra Anumza mani'noe. <sup>46</sup> Ama tra kene kasegenena Ra Anumzamo Sainai agonafi Moses asamigeno Israeli vhahera zmasaminia naneke.

## 27

### *Ra Anumzamo'enema huvempa hnaza naneke*

<sup>1</sup> Mag'o'ane Ra Anumzamo'a Mosesena amanage huno asami'ne, <sup>2</sup> Israeli vhahera zamasamige'za Anumzamofoma huvempa hu'za ami'nesaza vahe'ma mizama senaku'ma hanu'za, vahe'mofo avamente nege'za mizasegahaze. <sup>3</sup> Mono nompima erinte'zama refkoma nehaza kante anteta, kafuzamimo'ma 20tireti'ma vuno, 60re'ma ometre'nenia veneneramintera 50'a silva zago mizaseho. <sup>4</sup> Hagi kafuzmimo'ma 20reti'ma vuno 60re'ma vu'nesia a'mofara, 30'a silva zagoreti mizasegahaze. <sup>5</sup> Hagi 5fu'a kafuretimi vuno 20'a kafuma hu'nenia venene'a, 20'a silva zago mizase nezamanteta, 5fu'a kafuretimi vuno 20'a kafuma hu'nenia mofane zagarera 10ni'a silva zagoreti mizasegahaze. <sup>6</sup> Hagi mago ikama hu'neniretimi vuno 5fu'a kafuma hu'nenia ne mofavrerera, 5'a silva zago mizaneseta, mago ikama hu'neniretimi vuno 5fu'a kafuma hu'nenia mofanerera 3'a silva zago mizasegahaze. <sup>7</sup> Hagi 6'a kafuma agatererenia venenerera, 15tini'a silva zago miza nehuta, 60'a kafuma agatere'nenia anerera 10ni'a silva zago mizasegahaze. <sup>8</sup> Hagi zamunte omane vahe'mo'zama huvempa hu'nenuzama zamagrama mizasega avamente zagoma e'ori'nesu'za, pristi vahete vanageno pristi vahe'mo zamagrama mizamasega avamente zago agi ahezamantesige'za mizasegahaze. <sup>9</sup> Hagi mago'mo'ma agruma hu'nenia zagagafafinti'ma Ra Anumzamonare'ma huvempa huno ofama hu'naku'ma hania zagagafamo'a ruotage hu'ne. <sup>10</sup> Hagi ana ruotage'ma hu'nea zagagafa haviza hu'neanki, knare hu'neanki nehuta ru zagagafa avreonteho. Hianagi anama hanageno'a, ana tarega zagagafamokea ruotage hugaha'e. <sup>11</sup> Hianagi agruma osu'nenia zagagafama Ra Anumzamona'ma antahimina e'orisua ofama huvempama hanuta, ana zagagafa erita pristi vahete viho. <sup>12</sup> Ana hanage'za knare hu'neo, haviza hu'neo pristi vahe'mo'za refako hu'za nege'za, mizama'amo'a e'inahu avamente me'ne hu'za tamasamigahaze. <sup>13</sup> Hagi ana zagama ete nona huta miza huku'ma hanuta, pristi vahe'mo'ma tamasamisia mizante 5fu'a kevurera mago kevune ante agofetu hutma mizana asegahaze. <sup>14</sup> Hagi mago ne'mo'ma noma'ama ruotage hu'ne huno Ra Anumzamo'na nazampima ante'nigeno'a, pristi vahe'mo'zage nege'za knare hu'ne huge, haviza hu'ne hu'za miza agia ahentegahaze. <sup>15</sup> Hagi ana noma Ra Anumzamo'na nazampima antesia ne'mo'ma eteno mizama senaku hanuno'a, pristi vahe'mo'zama ahentesaza 5fu'a kevua ante'neno, mago kevunena ante agofetu huno mizasegahie. <sup>16</sup> Hagi mago'mo'ma mopa'ama Ra Anumzamo'na nami'nenia mopamomo mizama'amo'a, bali avimzama ana mopafima negria avimzama 100'a kiloma hu'nenirera 50tia silva zago miza hutere hugahie. <sup>17</sup> Hagi erinesiazama eteno ami

kafumofo agu'afima huvempa huno mopa'ama Ra Anumzamofoma amisiana, anama agima ahente'naza kante ana mopa miza hugahie. <sup>18</sup> Hianagi eri'nenia zama eteno ami kafumo'ma vagareno evanigeno'a, Nagri'ma nami'nenia mopamo'ma nana kafu agri'enena me'nenigeno eteno eri'nenia zama ami kafua egahie, ana avamente pristi vahe'mo'a refko huno miza agi erinteramino ahentegahie. <sup>19</sup> Hagi agrama ana mopa'ama eteno miza huku'ma hanuno'a, pristi vahe'mo'ma ahentesia mizantera 5fu'a zagofintira mago zago ante agofetu huno ana mizantera mizana asenigeno, ana mopamo'a eteno agri mopa megahie. <sup>20</sup> Hagi anama Ra Anumzamofo ami'nenia mopa'ama eteno mizama osu'neno, ru vahetema atrenigeno mizama hu'nena, eteno ana mopa'a mizana osugahie. <sup>21</sup> Hagi eri'nesia zama ami kafuma esigeno'a, ana mopamo'a ruotage huno Nagri'za segahie. E'igu ana mopamo'a pristi vahe mopa megahie. <sup>22</sup> Hagi mago vahe'mo'ma mizama hu'nesia mopama agri mopa omanene'nianagi, Ra Anumzamo'na namiku'ma hanige'za, <sup>23</sup> pristi vahe'mo'za refko hu'za kete'za, nama'a kafu me'nenigeno eri'nesia zama eteno ami kafua egahie, miza agima ahentesia kante mizasenigeno, ana zagomo'a ruotge huno Ra Anumzamo'na zago megahie. <sup>24</sup> Hagi eri'neniazama eteno ami kafuma esigeno'a, ana mopamo'a, mopa agafa ne'mofo azampi eteno vugahie. <sup>25</sup> Hagi mika'a zamofo miza agima ahentesazana, mono nompima refko hu'za mizama nesaza avamente fatgo hu'za mizana hugahaze. <sup>26</sup> Mika'a zagagafa tamimofo agonesa anentara Ra Anumzamo'na su'za me'ne. E'igu' agonesa bulimakao anentaro, sipisipi anentara ko Nagri su'a me'neanki huhampri onantegahaze. <sup>27</sup> Hianagi agruma osu'nesaza afuka'amofo agonesa anentara pristi vahe'mo'ma ahentesia mizantera 5fu'a zagofintira mago zago ante agofetu hunka, ana afura ete miza segahane. Hagi kagrama miza osenankeno'a, ru vahe'mo ana miza fatgore mizasegahie. <sup>28</sup> Hianagi vahero, zagagafao, mopao, maka'zama Ra Anumzamona'ma huvempa hunka nami'nenana zana, zagoreti mizasenka e'orige, ete zagrera atregera osugahane. Hagi ana mika'zama eri ruotage'ma hunka huvempa hunana zamo'a, ruotage huno Nagrike'za megahie. <sup>29</sup> Mago vahe'ma Ra Anumzamo'ma ahe frihoma hu'nesia vahera, ete mizaseta ovregahazanki ahe friho. <sup>30</sup> Hagi hoza tamifinti'ma witio, zafa rgama tagita eri atruma hinkeno 10ni'a kevuma huterema hina, 10ni kevua ruotage hu'negu Ra Anumzamo'na namigahaze. <sup>31</sup> Hagi ama ana ne'zama ete kagrama miza hunaku'ma hanunka, pristi vahe'mo'ma miza agima ahentesire mizanesenka 5fu'a zagofintira mago zago ante agofetu hunka miza hugahane. <sup>32</sup> Hagi bulimakao afu'ene, sipisipi afu'ene, meme afu ka'ama nehampri' nankeno'ma 10nima huterema hanimofona ruotage hu'negu, e'i Nagri su'za megahie. <sup>33</sup> Hagi haviza hu'ne knare hu'ne hunka ru su'zana nona hunka avre onto. Hagi nonama hunka ru su'zama avrentesankeno'a, ana taregamokea ruotage hugaha'ankinka, ete mizasenka ovregahane. <sup>34</sup> Ra Anumzamo'a amana kasegene tra kenena Moses'e'ma Sainai agonafi mani'negeno amigeno erino Israeli vahe'ma ome zmasami'nea naneke.

## Nambas-Vahe Hamprine Mose'se'ma Kre'nea Nampa 4 Avontafere

### *Israeli veama hampri'nea naneke*

<sup>1</sup> Israeli vahe'ma Isipitima atre'za Sainai ka'ma kopima eman'i nazageno, tare kafuma enevigeno 2 ikana ese kna zupa atruhu seli nompinti Ra Anumzamo'a anage huno Mosesena asami'ne, <sup>2</sup> Kagrane Aroni'enena maka Israeli vahe'mokizmi zamagi'a nagate nospite kognare huta maka venenemokizmi zamagi'a krente'o. <sup>3</sup> Hagi sondia vahe'ma fore huga vahe'ma 20'a kafureti mareri nagamuteno Israeli vahepima iza'o hate vuga hu'nesiana, kagrane Aroni'enena hamprita sondia kevu'zmire zamatetere huta krente'o. <sup>4</sup> Ana nehuta, mago mago naga nospipiti kvazmia huge'za tanaza hutere hiho. <sup>5</sup> Tanagrima tanaza hu'za eri'zama erisaza vahe'mokizmi zamagi'a ama'ne, Rubeni nagapintira, Sedeu nemofo Elizuri'e, <sup>6</sup> Simeon nagapintira, Zurisadai nemofo Selumieli'e, <sup>7</sup> Juda nagapintira, Aminadab nemofo Nasoni'e, <sup>8</sup> Isaka nagapintira, Zuari nemofo Netaneli'e, <sup>9</sup> Zebulun nagapintira, Helon nemofo Eliabu'e, <sup>10</sup> Josefe amohe'i Efraemi nagapintira, Amihud nemofo Elisama'e. Manase nagapintira Pedasuri nemofo Gamalieli'e, <sup>11</sup> Benjamen nagapintira, Gideoni nemofo Abidani'e. <sup>12</sup> Dani nagapintira, Amisadai nemofo Ahieza'e. <sup>13</sup> Aseli nagapintira, Okran nemofo Pagieli'e, <sup>14</sup> Gati nagapintira, Deuel nemofo Eleasafi'e. <sup>15</sup> Nafatali nagapintira, Enan nemofo Ahira'e. <sup>16</sup> Amama zamagima fore hu'nemo'za, naga'zmire kva hutere hu'naza vaheki'za, Israeli vahepi vugote'za kevu'zmire kegava hutere hu'naze. <sup>17</sup> Hige'ne Moseseka Aronikea Ra Anumzamo'ma zamagi ahe zanasmia kante antekе zamavare atru hu'na'e. <sup>18</sup> Hagi 2 ikamofona ese zage gnare kema hiaza hu've, maka vhahera zamavare atru hu'na'e. Zamagehonte zamagehonte, nagate, famote zamagima metere hu'nere, 20'a kafureti mareri anagate'nea vhahera, mago mago vahe'mofa zamagi kre'ne eri fatgo hu'na'e. <sup>19</sup> Hagi Ra Anumzamo Mosesema asami'nea kante anteno Sainai ka'ma mopafi hamprino zamagi'a kre'ne. <sup>20</sup> Israeli agonesa mofavre Rubeni, ne' mofavre nagara agehontetima eno, nezmafante e'nea vahe zamagi'ane magoke magoke hate vuga hu'nea vahe'ma, kafu'zmimo 20reti mareri anagate'nea, vahe zamagi kre'neana, <sup>21</sup> maka Simeon naga'ma hampri'nazana 59 tausen 300ti'e. <sup>22</sup> Gati ne'mofavrea agehontetima eno, nezmafante e'nea vahe zamagi'ane magoke magoke vahem'a hate'ma vuga hu'nea vahe'ma, kafu'zmimo 20reti mareri anagate'nea, vahe zamagi kre'neana, <sup>23</sup> maka Gati naga'ma hampri'nazana 45tausen 650ti'e. <sup>24</sup> Juda ne'mofavrea agehontetima eno, nezmafante e'nea vahe zamagi'ane magoke magoke vahem'a hate'ma vuga hu'nea vahe'ma, kafu'zmimo 20reti mareri anagate'nea, vahe zamagi kre'neana, <sup>25</sup> maka Juda naga'ma hampri'nazana 74 tausen 600ti'e. <sup>26</sup> Isakar ne'mofavre age'hontetima eno, nezmafante e'nea vahe zamagi'ane magoke magoke

vahe'ma hate'ma vuga hu'nea vahe'ma, kafu'zmimo 20reti mareri anagate'nea, vahe zamagi kre'neana,<sup>29</sup> maka Isakar naga'ma hampri'nazana 54 tausen 400ti'e.<sup>30</sup> Zebuluni nemofavre nagama agehontetima eno, nezmafante e'nea vahe zamagi'ane magoke magoke hate vuga hu'nea vahe'ma, kafu'zmimo 20retima mareri anagate'nea, vahe zamagi kre'neana,<sup>31</sup> maka Zebuluni naga'ma hampri'nazana 57tausen 400ti'e.<sup>32</sup> Josefe ne'mofavre Efraemi naga'ma agehontetima eno, nezmafante e'nea vahe zamagi'ane magoke magoke hate vuga hu'nea vahe'ma, kafu'zmimo 20reti'ma mreri anagate'nea, vahe zamagi kre'neana,<sup>33</sup> maka Efraemi naga'ma hampri'nazana 40tausen 500ti'e.<sup>34</sup> Josefe ne' mofavre Manase naga'ma age'honteti'ma eno, nezmafante e'nea vahe zamagi'ane magoke magoke hate vuga hu'nea vahe'ma, kafu'zmimo 20reti mareri anagate'nea, vahe zamagi kre'neana,<sup>35</sup> maka Manase naga'ma hampri'nazana 32 tausen 200ti'e.<sup>36</sup> Benzameni naga'ma agehontetima eno, nezmafante e'nea vahe zamagi'ane magoke vahe'ma hate vuga hu'nea vahe'ma, kafu'zmimo 20reti'ma mareri anagate'nea, vahe zamagi kre'neana,<sup>37</sup> maka Benjamen naga'ma hampri'nazana 35tausen 400ti'e.<sup>38</sup> Dani nagama agehontetima eno, nezmafante e'nea vahe zamagi'ane magoke magoke vahe'ma hate vuga hu'nea vahe'ma, kafu'zmimo 20reti'ma mareri anagate'nea, vahe zamagi kre'neana,<sup>39</sup> maka Dani naga'ma hampri'nazana 62tausen 700ti'e.<sup>40</sup> Aseli naga'ma age'hontetima eno, nezmafante e'nea vahe zamagi'ane magoke magoke vahe'ma hate vuga hu'nea vahe'ma, kafu'zmimo 20reti'ma mareri anagate'nea, vahe zamagi kre'neana,<sup>41</sup> maka Aseli naga'ma hampri'nazana 41tausen 500ti'e.<sup>42</sup> Nafatali naga'ma agehontetima eno, nezmafante e'nea vahe zamagi'ane magoke magoke vahe'ma hate vuga hu'nea vahe'ma, kafu'zmimo 20reti'ma mareri anagate'nea, vahe zamagi kre'neana,<sup>43</sup> maka Naftali naga'ma hampri'nazana 53 tausen 400ti'e.<sup>44</sup> Ama'i Mosesekе Aronikema Israeli venenene 12fu'a naga nofimokizmi kva vahe'ene hamprike zamagi'a kre'na'e.<sup>45</sup> Hige'za maka Israeli vahe'mo'za kognare, famote kafuzmimo 20reti mareri anagatre'nea vahe'ma hate vuga hu'naza Israeli vahe zamagi kre fatgoma hu'nazana,<sup>46</sup> maka eri mago huno'ma hampriana 603 tausen 550ti'e.

### *Livae nagara ohampri zamatre'naze*

<sup>47</sup> Livae nagara zamagehe'inteti eno nezmafante'ma ehnati'neana zamagi'a onkre'naze.<sup>48</sup> Na'ankure Ra Anumzamo'a Mosesena amanage huno asami'ne,<sup>49</sup> Israeli vahe'mokizmi zamagima kresampina, Livae nagara zamagi'a hamprinka anampina onkregahane.<sup>50</sup> Kagra Livae nagara zamazeri otige'za noni'afi eri'za eneri'za, maka'za agu'afi me'nea zane, eri'zama eri nenantaza zante kegava hiho. Seli mono nomofo (Tabernacle) agu'afi me'nea zana eri'za vano nehu'za, kegava hugahaze. Ana seli noni'amofo tvaonte nozmia ki'neza kva krigahaze.<sup>51</sup> Hanki kama vunakura, seli noni'a Livae naga'moza tagna vaziza repsi hu'za, umanisarera ete'za azeri otigahaze. Ana eri'zante huhampri onte'nesia vahe'ma ana tvaonte'ma esazana zamahe fri'gahaze.<sup>52</sup> Israeli ne'mofavre'moza kumama antesazana mago mago naga kevumo agragu agragu kumara nenteno, sondia vahe'zmine, krauefa nerfi'za manitere hugahaze.<sup>53</sup> Hanki Livae naga'moza seli mono noni'amofona tavaontera kumara ante kagigahaze. Hagi Israeli vahe'mo'za efresage'na nasivazi zmante'zanku, Livae naga'moza seli mono noni'a

vugote'za kegava krigahaze. <sup>54</sup> Israeli ne'mofavre'mo'za Ra Anumzamo Moseese asmia kante ante'za, maka'moza zamagra ana hu'naze.

## 2

### *Nonkuma antesagu retro hu'naza naneke*

<sup>1</sup> Ra Anumzamo'a Mosesene Aroninena anage huno zanasami'ne, <sup>2</sup> Israeli vahe'mo'za nagate nagate rure rure hu'za nona negi'za, nezmageho krauefa (flag) avame'za zamente rentetere nehu'za, atrumahu Seli mono noni'amofona ante ogantute'za seli no kumazmia antegahaze. <sup>3</sup> Hanki zage hanati kaziga Juda naga kuma menigeno, sondia vahe'zmine Juda ne'mofavre nagapinti Aminadab nemofo Nasoni kegava huzamantegahie. <sup>4</sup> Hagi sondia kevu'ane, ana miko zamagima kre tru'ma hu'nazana 74 tausen, 600'a vhahere. <sup>5</sup> Agri asoparema kisazana Isaka agehe'ze, Isaka nagate'ma kegava hu'neana, Zuar nemofo Netanieli'e. <sup>6</sup> Hagi sondia kevu'ane, ana miko zamagima kre tru hu'nazana 54 tausen 400'a vhahere. <sup>7</sup> Ananteria Zebuluni agehe'ze, Zebuluni ne'mofavrefinti Heloni nemofo Eliabu kva mani'ne. <sup>8</sup> Hagi sondia vahe'ane, ana miko zamagima kre tru hu'nazana 57 tausen, 400'a vhahere. <sup>9</sup> Juda nagapima agrane mani'nazana ana mika 186 tausen, 400'a sondia vhahere. Kama vunaku'ma hnageno'a, zamagra vugota hugahaze. <sup>10</sup> Henkamu sauti kaziga Ruben naga'mo'za krauefazamia ante'za kumara ante'za manigahaze. Rubeni nagama kvama huzmantesiana Sedeur nemofo Elizuri'e. <sup>11</sup> Hagi sondia vahe'ane ana miko zamagima kre tru hu'nazana 46 tausen, 500'a vhahere. <sup>12</sup> Hanki asoparegama mani'nazana Simeon agehe'ze, Simeon naga'ma kegava huzmantesiana, Surisadai nemofo Selumieli'e. <sup>13</sup> Hagi sondia kevu'ane ana miko zamagima kre tru hu'nazana 59 tausen 300'a vhahere. <sup>14</sup> Ananteria Gati agehe'ze, Gati nagama kegava huzmantesiana, Deuel nemofo Eleasaf'i'e. <sup>15</sup> Hagi sondia kevu'ane ana miko zamagima kre tru hu'nazana 45 tausen, 650'a vhahere. <sup>16</sup> Rubeni agorga kuma ante'za agrane mani'nazana ana maka'a 151 tausen, 450'a sondia vhahere. Juda naga'mokizmi zamefi zamagra vugahaze. <sup>17</sup> Hanki Livae vahe'mo'za kuma ante'za mani'nare atruhu seli mono nona amu'nompi kofi'za vugahaze, kuma ante'za mani'naza avamente avamente nevu'za mago mago'mo'za kumazmimofo krauefa amefiga eri'za vutere hugahaze. <sup>18</sup> Zage fre kaziga Efraemi krauefane, sondia vahe'zmine, kuma megahie. Ana agu'afi Efraemi ne'mofavremo Amihuti nemofo Elisama kvazmia manigahie. <sup>19</sup> Hagi sondia kevu'ane ana miko zamagima kre tru hu'nazana 40 tausen, 500'a vhahere. <sup>20</sup> Efraemi naga asoparema kuma ante'sazana, Manase agehe'ze. Manase nagama kegava huzmantesiana, Pedasuri nemofo Gamalieli'e. <sup>21</sup> Hagi ana miko sondia vahe zamagima kre tru hu'nazana 32 tausen, 200'a vhahere. <sup>22</sup> Anante'ma esnazana Benjamen agehe'ze, Benjamen nagama kegavama huzmantesiana, Gideoni nemofo Abidani'e. <sup>23</sup> Hagi ana miko sondia vahe zamagima kre tru hu'nazana 35tausen, 400'a vhahere. <sup>24</sup> Hagi anante'ma esnazana Efraemi nagare. Hagi ana miko sondia vahe zamagima kre'nazana 108tausen, 100'a vhahere. Ama ana naga'mo'za nampa trire kevu hu'za vugahaze. <sup>25</sup> Anagamu noti kazigama kumama ante'za krauefa zaminema manisazana, Dani naga sondia vahe'mo'za kumara ante'za manigahaze. Dani nagatema kegava haniana, Amisadai nemofo Ahieza kvazmia manigahie. <sup>26</sup> Hagi ana mika sondia vahe zamagima kre tru hu'nazana 62tausen, 700'a vhahere. <sup>27</sup> Dani

asopare kumama antesazana Aseli agehe'ze, Aseli nagama kegava huzmantesiana, Okran nemofo Pagieli'e. <sup>28</sup> Hagi sondia vahe ana miko zamagima kre tru hu'nazana 41 tausen, 500'a vhahere. <sup>29</sup> Anante'ma esazana Naftali agehe'ze. Naftali nagama kegava huzmantesiana, Enan nemofo Ahira'e. <sup>30</sup> Hagi ana maka sondia vahe zamagima kre tru hu'nazana 53 tausen, 400'a vhahere. <sup>31</sup> Dani naga'ma mani'neregama kumama ante'za mani'naza vahe'ma zamagima kre'neana, ana maka 157tausen, 600'a vhahere. Zamagra atuparega henka krauefa zamine vugahaze. <sup>32</sup> Ama'i Israeli vahe'ma nagate nagate, kumate kumate eri magoma hu'za hampri'nazana, ana maka vhahera 603 tausen, 550'a vhahere. <sup>33</sup> Ana hianagi, Ra Anumzamo Mosesema asmi'nea kasegere amage ante'za, Livae nagara Israeli vahepina eri mago hu'za ohampri'naze. <sup>34</sup> Israeli vahe'mo'za Ra Anumzamo Mosesema asmi'nea maka kasegere amage ante'za, kevure kevure krauefana (flag) nezamageho avame'za renente'za, seli nonkuma antetere hu'za nagate nagate eri zogiza vutere hu'naze.

### 3

#### *Aroni ne'mofavre naga zamagi'*

<sup>1</sup> Ama'i Mosesene, Aronikizni naga'mokizmi naneke, Ra Anumzamo Sainai agonafi Mosese asamigeno krente'nea naneke. <sup>2</sup> Ama Aroni ne'mofavre'mokizmi zamagi'e, Agonesa'a Nadabuki, Abihuki, Eliesaki, Itamarie. <sup>3</sup> Ananter Aroni ne'mofavre zamagi eri otage huno huhampri zamanteg'eza, Ra Anumzamofo avufi veamokizmire te vugote'za mani'ne'za pristi eri'za eri'naze. <sup>4</sup> Hianagi Nadabu'en Abihukea Ra Anumzamofo avuga agra ragisa teve i'o hu'nea teve heghe amiteke, Sainai hagage mopafi zanagra mofavrea onte'neke Ra Anumzamofo avuga fri'na'e. Hakeno Eliesa'ene Itamarikea, Aroni pristia mani'negene neznafa azahuke maka zupa pristi eri'zana eri'na'e. <sup>5</sup> Ra Anumzamo Mosesena amanage huno asami'ne, <sup>6</sup> Livae nagara zamavarenka pristi ne'Aroninte egofa huge'za, aza hu'za mono eri'zana eriho. <sup>7</sup> Zamagra eri'zama hantagi zami'nere Aroni eri'zane, veamokizmi eri'zane eneri'za, seli mono nomofo fegi'a eri'zanena erigahaze. <sup>8</sup> Seli mono nomofo agu'afima me'nea maka'zana kegava nehu'za, Israeli vahe'mokizmi eri'za eri nezmante'za, seli mono nompima hantagi zami'nea eri'zana erigahaze. <sup>9</sup> Hanki kagra Livae nagara Aronine amohe'ine zami vagarenka Israeli vahepintira zamige'za eri'zana eriho. <sup>10</sup> Hagi kagra Aronine ne'mofavre naga'anena huhampri zamanteg'eza pristi eri'zana eriho. Hagi huhampri onte'nesia vahe'ma seli mono nonte eravao hanazana zamahe frigahaze. <sup>11</sup> Ra Anumzamo mago'ene Mosesena anage huno asami'ne, <sup>12</sup> Menina ko, Nagra Israeli vahepinti Livae nagara agonesa ne'mofavre'gna hu'na zamavarena Nagrarega zamantoge'za nagri vahe fatgo mani'naze. <sup>13</sup> Na'ankure maka'a pusa ne'mofavrea Nagri zane, Isipi mopafi pusa ne'mofavre zamahe fri'noa zupa, Nagra su'zane hu'na pusa ne'mofavre Israeli vahepi fore haniane, zagagafanena huhampri'noe. Maka Nagri zane, Nagra Ra Anumzamo'na nehue. <sup>14</sup> Anante Ra Anumzamo Sainai ka'ma mopafi Mosesena anage huno asami'ne, <sup>15</sup> Levai ne'mofavre nagara nagate famote, maka venene mago ikanteti marerinesima'a hamprinka zamagia krento. <sup>16</sup> Higeno Ra Anumzamo asmia kante anteno Mosese'a venene'a zamagia kreno eri fatgo hu'ne. <sup>17</sup> Ama'i Livae ne'mofavre naga zamagie, Gersoni'e, Kohati'e, Merari'e. <sup>18</sup> Ama'i Gersoni ne'mofavre

naga nofipintira Libnike, Simeike, <sup>19</sup> Kohati ne'mofavre naga'nofipintira Amramu'e, Izhari'e, Hebron'i'e, Usiel'i'e. <sup>20</sup> Merari naga nofipintira Malike, Musike. Livae nofipinti fore hu'naza naga nofi mani'naze. <sup>21</sup> Hagi Gerson-impinti fore hu'naza nagara Libni naga'enе, Simei naga'enemo'za, zamagra Gersoni vhahere hu'za mani'naze. <sup>22</sup> Makama hampri'nazana venenema, mago ikanteti mreri anagate'neana, maka seven tausen 500'a vene'ne. <sup>23</sup> Gersoni vahe'mo'za zamagra seli mono nomofo amefiga'a zage fre kaziga seli nonkumara ante'za manigahaze. <sup>24</sup> Hagi Gersoni naga'mokizmi kvazamia Laeli ne'mofo Eleasafi manigahie.

### *Pristi naga'mokizmi eri'za kankamune*

<sup>25</sup> Hagi Gersoni ne'mofavremokizmi eri'za kankamuna amana hu'ne, seli nomofo agu'afine, seli noma refimate'zane, kafa zafare refite'nea tvaravene, kegava hu'neza erigahaze. <sup>26</sup> Vahe atru hu kumapi, meg'i a ruvanre'naza tvaravene, kahante seli nompi renentaza tvaravene, kresramna vu itare avuga me'nea tvaravene, nofitamine, agima hentea zama'a zamagrake kegava hu'neza erigahaze. <sup>27</sup> Hagi Kohati naga nofipintira, Amramu nagaki, Ishara nagaki, Hebron'i nagaki, Usiel nagaki, <sup>28</sup> ana maka vene'ne mago ikanteti mareri anagate'nea hampri'nazana, 8tausen 600'a vahe'mo'za hunagru hunte tva'oma'arera kegava hu'neza eri'zana erigahaze. <sup>29</sup> Kohati nagapinti fore hu'naza naga'mo'za, seli mono nomofo sauti kaziga seli nonkumara ante'za manigahaze. <sup>30</sup> Hagi Kohati nagapintima kvaza erino kegava huzmante'neana, Uzieli nemofo Elizafani'e. <sup>31</sup> Eri'zama erisazana amanahu hu'za erigahaze, huhagerafi hvempage vogisine, teboline, tevi reku hunte zotane, Kresramana vu itaramine, kresramna vu eri'za zantamima kazima, kavoma, sipunima, foku'ma, zompama (utensils), nagru hu'nea agu'afi me'nea zantamine, tvaravene kema huntea zama'a kegava hugahaze. <sup>32</sup> Hagi Pristi ne'Aroni nemofo Eleasa vugoteno Levai nagate kva mani'neno, seli mono nomofo agu'afi eri'zana kegava huzmante'ne. <sup>33</sup> Merari naga'enе Musa naga'enena, zamagra Merari nagare hu'za mani'naze. <sup>34</sup> Hagi hampri'ma zamante'nazana, mago ikanteti mreri anagate'nea vene'nea 6 tausen 200ti'e. <sup>35</sup> Merari nagama kegava huzmante'neana, Abihail nemofo Zuliel'i'e. Zamagra seli mono nomofona noti kaziga kuma ante'za manigahaze. <sup>36</sup> Hagi Merari naga'mokizmi eri'zana, seli mono nomofo reharere zafarmine, arunkre hu zafagi, antani kantugma hu' zafarmine, azeri hanaveti zafane, eriza'zane kegava hu'neza eri'zama zami'nare eri'naze. <sup>37</sup> Hagi agu'afinka megagi'nea posi zafarmine, no azeri hanaveti zafarmine, seli no avazu huno nofi ome rentere hania azotaramine, nofi'ma rente'zantamine kegava hugahaze. <sup>38</sup> Hanki zage hanati kaziga seli mono nomofo avuga'a kuma ante'za mani'naza nagara, Moseseki, Aroniki, ne'mofavre naga'zniane mani'neza, hunagruma hu'nea nomofo agu'afina Israeli vahe'mokizmigu hu'za eri'zana eri nezmante'za mani'naze. Hagi huhampri ozmantre vahe'ma ana tva'onte esnimofona ahe frigahaze. <sup>39</sup> Livae naga'ma Ra Anumzamo Moses'e'ne Aronigizni znam'i'nea kasegere amage ante'ne, mago ikanteti mareri anagate'nea naganofiteti, ese agonesa mofavre nona huke hamprina'ana maka 22 tauseni'a vene'ne.

### *Livae naga'moza agonesa ne'mofavremofo nona hu'naze.*

<sup>40</sup> Hagi Ra Anumzamo Mosesena amanage huno asami'ne, Israeli vahepi pusa ne'mofavre fore hanigeno mago ikanteti mareri anagate'nesiana, eri-gafa hunka zamagi'a krento. <sup>41</sup> Israeli vahe'mofo ese agonesa mofavrema

avregazana netrenka Livae nagara zamavare namio, Nagra Ra Anumzane, Livae vahe'mofo bulimakao afuzmimo'ma pusama antesia anentara, Israeli nagamokizmi pusa bulimakamofo nona hugahie. <sup>42</sup> Ana higeno Israeli vahe'mokizmi maka pusa ne'mofavre'a Ra Anumzamo asmi'nea kante anteno Mosese'a hampri'ne. <sup>43</sup> Pusa ne'mofavre mago ika agatereno mareri anaga te'nea naga zamagi eri'neana, 22 tausen, 273'a vene'ne. <sup>44</sup> Anante Ra Anumzamo'a Mosesena anage huno asami'ne, <sup>45</sup> Israeli vahepintira pusa ne' mofavre'mokizmi nona hunka, Livae vahera nezmavrenka, Israeli vahe agonesa bilmakao nona hunka Livae naga bulimakaone erio. Huge'za Livae vahera zamagra Nagri naga manigahaze. Nagra Ra Anumzane. <sup>46</sup> Hagi 273'a Israeli vahe'mokizmi pusa ne'mofavre'moza, Livae naga'ma zamagtere'nare miza segahaze. <sup>47</sup> Seli mono nomofo zagoomofo kna'a avamente kagra 5fu'a silva zago magoke magoke vahetera eritere hugahane. <sup>48</sup> Livae naga zamagtere'naza nona huta miza sezmente zago, Aronine ne'mofavre'ane zamio. <sup>49</sup> Higeno Mosese'a zagoa zogino Israeli vahe'mokizmi pusa ne'mofavre'mokizmi nona huno Livae naga nona huno miza sezmente'ne. <sup>50</sup> Pusa ne'mofavre Israeli vahepinti fore'ma hu'naza nagapintira Mosese'a 1tausen, 365'a silva zagoa erino, hunagru hu'nea seli mono nomofo kna'amo hu'nea avamente ana zago'a zogite'no <sup>51</sup> Mosese'a ana zagoma mizama sezmantasia zagoa erino Aroni'ne, ne'mofavre naga'a Ra Anumzamo'ma asami'nea kante erino zamazampi ome ante'ne.

## 4

### *Kohati naga'mokizmi eri'za kamofo naneke*

<sup>1</sup> Anante Ra Anumzamo'a amanage huno Mosesene, Aronikizni zanasmi'ne, <sup>2</sup> Kohati agehe'impinti fore hu'naza vahera nagate, famote, hamprinka Livae nagara zamagi'a krenka eri fatgo huo, <sup>3</sup> maka 30'a kafureti marerino 50'a kafuma hu'nesaza vahe'ma, seli mono nompima eri'zama eriga hu'nesaza venene'a hampri'o. <sup>4</sup> Hagi Kohati naga'moza seli nompina hakare zupa amanahu eri'za erigahaze, seli mono nompima, hunagru hunte nomofo agu'afi ruotgema hu'nea zantminte kegava hugahaze. <sup>5</sup> Hagi Israeli vahe'mo'za kumazmi atre'za vunaku hanageno'a, Aroni'a mofavre naga'anе mareriz'a kafanteti tvarave hantiza huhagerafi huvempage vogisia ana tvaravereti eri ano vazigahaze. <sup>6</sup> Hagi anantero hagerimpi bulimakao akru'anu refinete'za, ana agumpina hokonke tvaravenu refinete'za, tare azota antanintegahaze. <sup>7</sup> Hagi ana'ma hutesu'za bretima nentaza itamofona hokonke tvarave eri'za tafera hute'za, ofama hu'zantamina ana agofetura nente'za zuompama, kavoma, tima tagi tafe taminena nente'za, bretinena antekeno maka zupa itamofo agofetura mevava hino. <sup>8</sup> Ana hute'za koranke tvarave reti ana makazana refiteho, ete'za ana agofetura hagerimpi bulimakao afu'mofo ukri'anu refinete'za, tare kaziga kampi erisgahu zota antanintegahaze. <sup>9</sup> Mago hokonke tvarave eri'za tavi'ma reku hunte'zamofo zota'ane, lamune, teve anefa resu hu'zane, zuompane, tevemofo masave tintfene, eri'zama eneriza zanena refitegahaze. <sup>10</sup> Hagi ana maka'zana hagerimpi bulimakao ukri'afi eri anakite'za afunte kofi azotare erinte'za anakintetere hugahaze. <sup>11</sup> Kolire itamofo agofetura hokonke tvaravenu refite'za, hagerimpi bulimakaomofo ukirira ana agofetu erinte'za anakite'za, tare vimago zafa antanintegahaze. <sup>12</sup> Anantero hokonke tvarave masine'za ana maka agu'afi eri'za eneriza zantamina

(utensils) anakite'za, ana agofetura hage rimpi bulimakaomofo ukri'areti refitete'za, tare vimago zafa, zafama hu'zana vazintegahaze. <sup>13</sup> Ana nehu'za, bronsire itaretira (alta) ta'nefara katenetre'za fitu tvarave eri'za ome refitegahaze. <sup>14</sup> Anazanke hu'za eri'zama eneriza zantamina antesazana tevefi kre kavoma, foku'ma, savolima, zompama, maka itare'ma (alta) me'nea zanena, hagerimpi bulimakao afumofo ukriteti agofetura refite'za anakite'za, zafama hu'za vanaza zafa antanintegahaze. <sup>15</sup> Aroni'ene ne'mofavre naga'amo'zane seli nomofo agu'afi maka ruotge'ma hu'nea zantamina anakiza erise hutesage'za, ana kumateti hage'za vunaku hanage'za, Kohati ne'mofavre'moza emerigahaze. Hanki ruotge zantamina avako osugahazanki, avakoma hanazana frigahaze. Ama'i ruotge seli nompi me'nea zana, Kohati ne'mofavremoza zamagrake'za eri'za vugahaze. <sup>16</sup> Hagi pristi ne' Aroni nemofo Eleasa kva hania'zana tavi'mofo masavene, mnanentake zama kremna vu'zane, maka zupa ofa nemiza witi ragane, asomu humzante'za frenezmantaza masavene, seli nomofo eri'za zantamine, agu'afima maka'za me'neane, hunagru hunte'nea nomofo agu'afi me'nea zanena agrake maka kegava hugahie. <sup>17</sup> Hagi Ra Anumzamo'a Mosesene, Aronikizni anage huno zanasmi'ne, <sup>18</sup> Livae naga nofipintira, Kohati ne'mofavre nagara zamatrengle'za fri hana osiho. <sup>19</sup> Kohati naga'mo'za ruotge hu'nea zama kege vu kofta hu'za avako huge, hanuza fri hana huzanku Aroni'ene, ne'mofavre naga'amo'za mareri'za erise hutesage'za, eri'za kankamu zamire kofiza vugahaze. <sup>20</sup> Hu'neanagi Kohati naga'mo'za osi'a knafinena agu'afina mareri'za ruotge'ma hu'nea zantamina onkegahaze. Hanki anazantamima kesuza frigahaze. Ama'i Gersoni naga'moza eri'naza erizamofo naneke.

### *Gersoni naga'mofo eri'zankamofo naneke*

<sup>21</sup> Hagi Ra Anumzamo amanage huno Mosesena asami'ne. <sup>22</sup> Gersoni ne'mofavre nagara anazanke hunka zamagia krenka nagate famote, eri fatgo huo, <sup>23</sup> maka 30'a kafureti marerino 50'a kafuma hu'nesaza vene'nea, seli mono nompima eri'zama eriga hu'nesaza venene'a hampri'o. <sup>24</sup> Hagi Gersoni naga'moza, seli mono nomofo agu'afi eri'za eneriza, eri'za vano hanazana amana hugahaze, <sup>25</sup> zamagra seli mono nomofo ra tavaravene, agofetu refite'nea tavaravene, hagerimpi bulimakao ukarinu agofetu refite'neane, seli mono nomofo kasante ra tvarave hanti'naza zama'a erigahaze, <sup>26</sup> meg'i a refite kagi'naza tavaravene, mareri kahante'ene kresramna vu itare (alta) hanti'naza tavaravene,nofi tmire, ana miko eri'za zantamina Gersoni naga'mo'za erigahaze. <sup>27</sup> Hagi Gersoni naga nofi'mo'za maka'a zupa, Aroni'ene ne'mofavre naga'amozama hanaza kemofo amage ante'za kofi'za vutere hugahaze. <sup>28</sup> Gersoni naga'mokizmi ne'mofavre'moza seli mono nomofo eri'zama eri'sazana, pristi ne' Aroni nemofo Itamari Merari nagara kegava hu'nena ana eri'zana erigahaze.

### *Merari naga'moza eri'za erisaza naneke*

<sup>29</sup> Livae nagapinti Merari ne'mofavre nagara, kagra zamagi krenka nagate, famote, eri fatgo huo. <sup>30</sup> Maka 30'a kafuma hu'nesaza vahetetima marerino 50'a kafuma hu'nesaza vahe'ma, seli mono nompima eri'za eriga hu'nesaza venene'a hamprio. <sup>31</sup> Zamagra amanahu eri'za erigahaze, maka seli mono noma ahiegagi'naza zafane, zaza zafane, re trure zafane, rusihu (soket) zafane eri'za vugahaze. <sup>32</sup> Vahe'ma atru nehzafii retrumare'nea

zafane, rusihunte (soket) zafane,nofi tafinteno omo azeri eme azeri hu zafane (pegs),nofi'tamine, maka'a eri'za zane, zamagire zamagire kegava hu'nesaza zane eri'za vugahaze.<sup>33</sup> Merari naga'mokizmi ne'mofavremo'za seli mono nompi eri'zama zamasmia kante ante'za erigahaze. Hagi pristi ne' Aroni nemofo Itamari kegava ana eri'zana hu'nena erigahaze.

### *Livae naga hampri'naza naneke*

<sup>34</sup> Hige'za Mosese'ene, Aroni'ene, vahe kevure kva hu'naza vahemo'zane, Kohati naga nofira, nagate famote,<sup>35</sup> maka 30'a kfureti marerino 50'a kfuma hu'naza vahe'ma, seli mono nompi eri'zama eriga hu'naza vene'nea hampri'za eri fatgo hu'naze.<sup>36</sup> Ana maka'ma nagate famote hampri'naza venene'a, 2 tausen 750'e.<sup>37</sup> Ama'i maka Kohati ne'mofavre, seli nomofo agu'afi eri'zama eriga hu'naza vahe zamagi hamprike eri fatgo hu'na'e. Mosese'ene Aronike hampri'ne Ra Anumzamo'ma Mosese asmi'nea kante anteke avaririna'e.<sup>38</sup> Gersoni ne'mofavrema, nagate famote hamprina'ana,<sup>39</sup> maka 30'a kfureti marerino 50'a kfuma hu'nesaza vahe'ma, seli mono nompima eri'zama eriga hu'naza vene'nea,<sup>40</sup> maka nagate famote zamagima krene eri fatgoma hu'na'a vene'nea, 2 tausen 630ti'e.<sup>41</sup> Ra Anumzamo'ma Mosese asmi'nea kante anteke Gersoni ne'mofavre naga seli mono nompi ana maka eri'za eri'naza vene'ne zamagi'a, Mosese'ene Aronike hampri'ne eri fatgo hu'na'e.<sup>42</sup> Merari mofavre nagate famote hu'za zamagima krente'nazana,<sup>43</sup> maka 30'a kfureti marerino 50'a kfuma hu'nesaza vahe'ma, seli mono nompima eri'zama eriga hu'naza vene'ne,<sup>44</sup> zamagima nagate famotema hu'za kre'nazana 3tausen 200ti'e<sup>45</sup> Ra Anumzamo'ma Mosesema asmi'nea kante anteke Merari ne'mofavre naga seli mono nompima ana maka eri'za eri'naza vene'ne zamagi'a, Mosese'ene Aronike hampri'ne eri fatgo hu'na'e.<sup>46</sup> Higeno Mosese'ene, Aroni'ene, Israeli vahe'mokizmi kva vahe'mo'za Livae naga nofira, hampri'za nagate famote eri fatgo hu'nazana,<sup>47</sup> maka 30'a kfureti marerino 50'a kfuma hu'naza vahe'ma, seli mono nompima eri'zama eneri'za, ana zantamima kofiza vuga vene'nerami hampri'na'e.<sup>48</sup> Maka Livae venene'a zamagima kre'nazana, 8 tausen 580'e.<sup>49</sup> Ra Anumzamo'ma Mosesema asmi'nea, kante anteke zanagra seli mono nompi eri'zama e'neriza zantamima kofizama vanaza vahe zamagi'a krente'na'e.

## 5

### *Anumzamofo avure sese hu'za mani otage hanaza naneke*

<sup>1</sup> Anante Ra Anumzamo amanage huno Mosesena asmi'ne,<sup>2</sup> Israeli vahe'ma fugo namu kri eri'nesazane, avo' herafineramisiane, korankri eri'nesiane, fri' vahe avufgare avako hu'nesaza vhahera, huzmanteg'e'za kumamofo fegi'a umaniho.<sup>3</sup> Vene, a'nene huzmante'gahane, Nagra kumazmimofona amu'nozmifi nemantuankino, zamagra ana kuma eri kasri'zankura huzmante'geza fegi'a umaniho.<sup>4</sup> Israeli vahe'mo'za Ra Anumzamo'ma Mosesema asmia kante ante'za kri eri'naza vhahera huzmantage'za kumamofo fegi'a umani'naze.

### *Kumi'te miza hanaza naneke*

<sup>5</sup> Anante Ra Anumzamo anage huno Mosesena asmi'ne,<sup>6</sup> Israeli vhahera zamasamige'za vemo'o, a'mo'o vahe'mo nehiaza huno Ra Anumzamofo antahi omimo rumofoma azeri haviza huno kumi hanimo'a, haviza hugahie.<sup>7</sup> Hagi vemo'a inazano hu'nesia kumira hufore nehuno, kumi'amofo mizana

kna'amo nankna hu'nesio miza sevaga nereno, mago nazatigati mago kevu ruguheno ana agofetu kumi huntene'snimofona amigahie.<sup>8</sup> Hianagi kumi hunte'nea ne'mofo afu'agnama fri hana hu'nesigeno'a, miza senaku hu'nesia mizane, kumi atrente ve rama afura avreno Ra Anumzamofo aminkeno pristi ne'mo erigahie.<sup>9</sup> Israeli vahe'mo'za ruotge hu'enicia ofa hu'zama pristi nete eri'za esazana, ana miko pristi ne'mo erigahie.<sup>10</sup> Maka ofama vahe'mo'ma hanageno pristi ne'mo'ma erisiana agriza segahie. Hagi mago a'mo'ma ru venema savri hania zamofo kasege.

### *Vemo nenaro hugofi nente'mofo naneke*

<sup>11</sup> Ananter Ra Anumzamo'a anage huno Mosesena asami'ne,<sup>12</sup> Israeli vahera ke hunka zamsasmio, mago ne'mofo a'mo neverku ontahi havi avu'ava nehuno,<sup>13</sup> mago ve'nne ana a'mo monko'za hu'nesigeno, neve keno erifore osanigeno vahe'mo'enena before huno eri ama osnianagi, ana a'mo'a agr'a agu'a eri haviza hugahie.<sup>14</sup> Hagi neve'ma ana a'mofoma hugofinte antahi antahimo agateresigeno nenaro havi avu'ava hu'nesia zanku, hu'neo osu'neo agenoka huno antahi anke'renaku, nenaroma antahi havizama huntesuno'a,<sup>15</sup> ana ne'mo nenarona avreno pristi nete vuno, ofama hu'za witi flaua mago kilo erino, olivi masvene, kremla vu pauranena ana agofetura ontenu, hugofinte ofamofo witigino kumi' hu'neazamo agekni zanku, antahi antahi hugeke hu'mofo ofe.<sup>16</sup> Anante pristi ne'mo ana ara avreno eno Ra Anumzamo'na navuga eme azeri otinteno.<sup>17</sup> Hagi pristi ne'mo ruotge hu'nea tine, mopare kavone erino, seli mono nomofo agu'afinti kugusopa kateno ana timpina atregahie.<sup>18</sup> Hagi pristi ne'mo'a ana ara Ra Anumzamo'na navuga azeri otineno, hanigeno azokara vasane netreno, antahi antahi hu'mofo witi ofa azampi erinenteno, nazinkere'ma hu ofa witi pristi ne'mo'a akake ti tusi hunte tina azampina erigahie.<sup>19</sup> Pristi ne'mo'a ana ara antahigeno, tamagema nehanunka huama huo, mago ne'mo kagranse omse'nena havi avu'ava osu'nesunka, negave kemofo amage antenka mani'nesunka, ama akake timo tusi hugantenaku hniana agateregahane.<sup>20</sup> Hagi kagrama savri ka nentenka, negave amage antenka omaninka, negave'ene hugaza ru vene monko'zama hunesunka, kagra kagu'a azeri haviza hu'nanankino Anumzamo kazeri haviza hugahie.<sup>21</sup> Pristi ne'mo'a ana ara huvempa huntenu anage hugahie, vahetamimo'ma keno antahinoma haniana, Ra Anumzamo'a kazusi huntenu mofavregura erigigenu amu'mo'a zore hu'za hugahaze.<sup>22</sup> Hankino ama timo tusi hugantenku kagupafi ufreno, ana timo eri'za erinkeno kamumo zonerena, kamo'ma osasi hugahie hanigeno, ana a'mo'a huno, ana hugahie. Ana hugahie.<sup>23</sup> Hagi pristi ne'mo'a anama kazusima huntlesia kea avompi krentetenu sese hinkeno ana timo'a akake timpi tagi ramigahie.<sup>24</sup> Anante pristi ne'mo'a tusi hunte'nea akake tina ana a'ra ami'nigeno, tusi huntenea akake tina nenkeno agu'afi aka hugahie.<sup>25</sup> Pristi ne'mo ana a'moma azampima eri'nea ofa erino, ana ofa Ra Anumzamo'na navure marerino amira amira nehuno, erino kresramna vu itare (alta) vugahie.<sup>26</sup> Anama hute'na pristi ne'mo ana ofahu witia, mago aza eri viteno antahi antahihu ofa Kresramana vu itare (alta) krenkeno kumpi marerino. Ana hutenu henka ana a'mofo aminkeno ana tina negahie.<sup>27</sup> Ana tima aminkeno netena, ana a'mo monkoza hutenu neve revatga hu'nesigeno'a, ana tusi hunte'nea (kes) tima nesnia timo'a akake agu'afina nehinkeno, amu'mo'a zorenkeno, amo'mo'a osasi hanigeno, ana a'mo'a vahe'amokizmi zamufina kefo a' manigahie.<sup>28</sup> Hianagi a'mo'ma

agu'a eri pehena osu mani fatgo hu'nesnigeno'a, ana tusi (kes) hu'enicia kemo'a agaterenko, mago zamo avate osnigeno mofavre kasentegahie. <sup>29</sup> Ama'i nazinkemofo kasege, vere a'mo neve'ene mani fatgo osuno atreno vuno ru vene ome savri haniano, <sup>30</sup> neve'ma nenaro antahi haviza hunteno nazinke huntesuno'a, Ra Anumzamofo avure neve'a ana ara avreno vinkeno pristi ne'mo ana maka kasegea a'mofona hantagi amigahie. <sup>31</sup> Hagi vemo'a hzenke osugahianki, a'mo agra'a ana kumi'mofo knazana erigahie.

## 6

### *Ruotge'ma hu'za manisaza vahe'mofo naneke*

<sup>1</sup> Mago'ene Ra Anumzamo'a Mosesena anage huno asami'ne, <sup>2</sup> Israeli va-hera amanage hunka zamasmio, mago vemo'o, a'mo'o mani ruotge huno Ra Anumzamo'nare huvempa huno ruotge hu'na Nazareti\* vene a'ene manisue hanuno'a, <sup>3</sup> waini tine, hankave tine aka tine, waini reratiza hankave ti tro hunte'nesazo, grepimofo tima'o, nena raga'o, hagege hune'sia raga'anena onegahie. <sup>4</sup> Mani ruotge hugahue huno'ma hu'nesia kna'afina, krepire-tima tro hu'nesia wainine, avima'ane ukri'anena onegahie. <sup>5</sup> Huvempama hu'nesia kna'afina maka zupa resanura anu azokara oharegahie. Ra Anumzamofonte huvempa hunte'nenia kna'afina ruotge huno mani'neno, anu azokara atrenkeno metoku aseno zaza hino. <sup>6</sup> Ra Anumzamofonte mani ruotge huno mani'nesia kna'afina, agra fri vahe tvaontera ovugahie. <sup>7</sup> Hagi nefo'o, nerera'o, nefu'o, nesar'o frisigeno'a agrira azeri pehena hugahianki avakora osino. Na'ankure Anumzamofonku huno mani ruotge hu'nea avame'zana agri anunte me'ne. <sup>8</sup> Mani ruotge huno mani'nia kna'afina maka'a zupa, Ra Anumzamo'nare mani ruotge hugahie. <sup>9</sup> Hianagi mago vahe'ma tvaoma'are mani'neno antrima haniaza huno frino, huvempama hu'nea azokama eri pehanama hinkeno'a, <sup>7</sup>ni'a zagegna maniteno azeri agruma huknarera anu azokara haregahie. E'inama hanuno azeri agru huno manigahie. <sup>10</sup> Hagi anante nanterana 8 zage knarera tare hohopa namao, tare maho namo azerino pristi ne' avuga seli mono nomofo kahante vugahie. <sup>11</sup> Pristi ne'mo'a mago nama kumi'ma apasente ofa nehuno, mago nama kre fanene hu ofa hugahie. Na'ankure fri vahe tva'onte mani'neno kumi' hu'negu mizaneseno, ana zupa anunte azokara eri ruotge hanigeno hagegahie. <sup>12</sup> Ana nehuno Ra Anumzamofonte ete agu'a nenteno, mani ruotge huno Nazareti ne'ma manisuema hanuno'a, mago kafu hu'nesia ve sipisipi anenta avreno kumi'mofo ofa hino. Na'ankure ko'ma mani ruotge hu'nea zama fri'zamo eri haviza hunte'negu, eteno mago'ene huvempa kea eri agafa hugahie. <sup>13</sup> Hagi mani ruotge huno Nazareti vahe tro huno mani'nea kna'ama vagare'na, agra seli mono nomofo kafante eno, <sup>14</sup> Ra Anumzamo'nare kre fanenema hu ofama eri'noma esiana, mago kafu hu'nesia ve sipisipi afuhe afuhe osu'nesia su'a avreno ne-eno, kumi'ma apasente ofama haniana, mago a' sipisipi mago kafu huno afuhe afahe osu'nesia avreno ne-eno, rimpia fru ofama haniana, mago kafu huno afuhe afahe osu'nesia sipisipine avre'no eme ofa hugahie. <sup>15</sup> Hagi witi ofama hu'zana, mago eka eka kupi, zo-ore breti krenenaza eri'za ne-eza kaneza eri knare hu'naza flaua masavene eri havia huza kre'naza kekine, waini ofanena hugahaze. <sup>16</sup> Hagi ana ofama pristi ne'mo'ma Ra Anumzamofo

\* <sup>6:2</sup> Naziraeti hu'nea kemofo agafa'a, Anumzamofo avririgahune hu'za kna antete'za huvempa hu'za mani ruotge hu'naza vaheku hu'ne.

avuga erino eme haniana, esera kumi' apasente ofa huteno, ananteria tevefi kre fanene hu ofa hugahie. <sup>17</sup> Ana nehuno rimpia fru ofa ve sipisipi Ra Anumzamofonte kresramna nevuno, zo-ore bretia eka eka kupi ante'nea ofa nehuno, pristi ne'mo'a anazanke huno witi ofane, waini ti ofanena hugahie. <sup>18</sup> Ana hutena Nazareti vahe manisuema huno'ma mani ruotagema hu'nea ne'mo anuntetira azokara seli mono nomofo kahante ome hareteno, ana azokara rimpia fru ofama kre'nenifi fenka kaziga krenkeno tegahie. <sup>19</sup> Hagi ana'ma hute'na pristi ne'mo'a ve sipisipimofo azona'a kavoma krenenafinti e'nerino, ekaeka kupinti zo-ore bretia mago e'nerino, mago zo-ore ta'ori kekine erino, azokama hare'nea ne'mofo azampi antegahie. <sup>20</sup> Anante pristi ne'mo'a erisga huno Ra Anumzamonare eri veravema hu ofa hugahie. Hagi eri veravema hia ofane ve sipisipi ahihizane agianena ruotge hugahankino pristi vahe'mo'zage eri'za negahaze. Pristi ne'mo'ma ana'ma hutena azokama hare'nea ne'mo'a waini tina negahie. <sup>21</sup> Ama'i Nazareti vahe mani ruotge hu'na Ra Anumzamofo avufi manikurema huno'ma huvempama hania vahe'mofo kasege. Hagi anampima mago'a ofama eri agofetuma huza eriza ega'ma hanige'za amne eri'za egahaze. Nazareti vahe mani ruotge hugahune hu'za huvempama hu'nesaza kemofo amage ante'za anazana hugahaze. Ana'ma hanageno'a, Pristi vahe'mo'za asomu kea huramantegahaze.

### *Pristi vahe'mo'za asomu ke huzmantesaza naneke*

<sup>22</sup> Ra Anumzamo'a anage huno Mosesena asami'ne, <sup>23</sup> Aronine, ne'mofavre naga'anena amanage hunka zamasmio, Israeli vahe'ma asomu kema huzmantekura, amanage hunka asomu kea huzmanto. <sup>24</sup> Ra Anumzamo'a asomu huneramanteno, kegava huramantegahie. <sup>25</sup> Ra Anumzamo muse huneramanteno, tamazeri knare hugahie. <sup>26</sup> Ra Anumzamo'a rukrahe huno avugosa huramino tamazeri knare nehuno, Agra'a rimpia fruzana tamigahie. <sup>27</sup> Hagi Nagri nagifi Israeli vahera asomu kea hu'zmantenkena, Nagra'nia asomura huzmantegahue.

## 7

### *Kva vahe'mo'za Seli mono no renagiza zupa ofa hu'naza naneke*

<sup>1</sup> Mosese'ma seli noma ki vagareteno'a, ana nomofo agu'afi me'nea zane ana nonena eri fatgo huno hu ruotge hunteteno, agu'afi me'nea (utensil) zane, kresramna vu itane, eri'za zanena masaveragino frententeno hunagru hunte'ne. <sup>2</sup> Hagi Israeli vahepinti'ma 12fu'a naga nofimokizmi kva vahe'ma huhampri zmantage'za vahe'ma hampri'zana kva vahe'mo'za ofazmia eri'za seli mono nonte e'naze. <sup>3</sup> Hagi ana makamo'za 6si'a refitente'nea karisine, 12fu'a bulimakaone avre'za seli mono nomofo avuga Ra Anumzamofonte e'naze. Hagi mago karisia tare kva vahe'moke eri tragotetere huke erike neakeno, mago mago bulimakaona mago mago kva vahe'mo erino etere hu'ne. <sup>4</sup> Ra Anumzamo'a anage huno Mosesena asami'ne, <sup>5</sup> Anama eri'za eme kami'naza zantamina erinka, eri'zama eneri'za avamente Livae naga zamige'za seli mono nona tagana vazite'za eri'za viho. <sup>6</sup> Higeno Mosese'a ana karisiramine, bulimakao afu'zaga Livae naga eri zami'ne. <sup>7</sup> Tare karisine, 4'a bulimakao afura Gersoni ne'mofavre eri'za eneriza avamente eri'zami'ne. <sup>8</sup> Hagi 4'a karisine, 8'a bulimakao afu'zaga, eri'za eneriza avamente Merari ne'mofavre naga eri zami'ne. Hagi pristi ne' Aroni nemofo Itamari ana nagatera kegava huzmante'nege'za

ana maka eri'zana eri'naze. <sup>9</sup> Hianagi Kohati nagara mago zana Moses'a ozami'ne. Na'ankure zamagri eri'zana hunagru hunte'nea zama seli mono nompi me'nea zantmima zamafunte kofi'za vanaza eri'za me'ne. <sup>10</sup> Hagi kresramna vu itama hunagru'ma hunte'za masavema frentaza zupa, Israeli kva vahe'mo'za muse ofazmia eri'za vu'za kresramna vu itamofo avuga omente'naze. <sup>11</sup> Hianagi Ra Anumzamo'a amanage huno Mosesena asmi'ne, Huzmantegeno magoke kva ne'mo muse ofa'a erino mago knarerera etere hino. <sup>12</sup> Kagota huno ese zagegnare'ma agafa huno'ma ofa'a erino vu'neana, Juda naga nofi'mokizmi kva ne' Aminadabu nemofo Nasoni'e. <sup>13</sup> Agrama ofa hu'neana, mago silvare kagata hu'nea zuompa kna'amo 130'a sekel (1.5 kilo) hu'nea zuompane, mago silvare keri hu'nea zuompa hunagru hu'nea seli mono nomofo zago miza nesaza avamente, 70'a sekels (800 grem) hu'nea zuompane erino e'ne. Hagi ana tarega zoumpafina kaneza eri knare hu'naza flaua masavene eri havia hu'nea witi ofa erino e'ne. <sup>14</sup> Hagi mago golire tro hu'naza kagata hu'nea zuompa kna'amo'a 10ni'a sekel (110 grem) hu'nea zuompane erino e'ne. <sup>15</sup> Ana nehuno tevefima kre fanenema hu' ofama hu'zama mago ve bulimakao afu'ene, mago ve sipisipine, mago kafu hu'nea, sipisipi anenta'ene avreno ne-eno, <sup>16</sup> kumi'ma apasente ofa mago ve meme afu avreno e'ne. <sup>17</sup> Hagi rimpa fru ofama hu'zama avreno e'neana, tare bulimakaone, 5fu'a ve sipisipine, mago kafu hu'nea sipisipi anentataminena 5fu'a avreno e'ne. Ama'i Aminadabu nemofo Nasonima erino e'nea ofaramine. <sup>18</sup> Hagi nampa 2 zagegnarera, Zuari nemofo Natanieli, Isaka naga'mokizmi kva ne'mo, ofa erino e'ne. <sup>19</sup> Agrama ofa hu'neana, mago silvare kagata hu'nea zuompa kna'amo 130'a sekel (1.5 kilo) hu'nea zuompane, mago silvare keri hu'nea zuompa hunagru hu'nea seli mono nomofo zago miza nesaza avamente, 70'a sekel (800 grem) hu'nea zuompane erino e'ne. Hagi ana tarega zoumpafina kaneza eri knare hu'naza flaua olivi masavene eri havia hu'nea witi ofa erino e'ne. <sup>20</sup> Hagi mago golire tro hu'naza kagata zuompa kna'amo'a 10ni'a sekel (110 grem) hu'nea zuompfafi mnanentakeza insensia ante aviteno erino e'ne. <sup>21</sup> Ana nehuno tevefima kre fanenema hu' ofama hu'zama mago ve bulimakao afu'ene, mago ve sipisipine, mago kafu hu'nea, sipisipi anenta'ene avreno ne-eno, <sup>22</sup> kumi'ma apasente ofa mago ve meme afu avreno e'ne. <sup>23</sup> Hagi rimpa fru ofama hu'zama avreno e'neana, tare bulimakaone, 5fu'a ve sipisipine, mago kafu hu'nea sipisipi anentataminena 5fu'a avreno e'ne. Ama'i Zuari nemofo Natanieli'ma erino e'nea ofaramine. <sup>24</sup> Hagi nampa 3 zagegnarera Zebuluni naga nofi'mokizmi kva ne' Heloni nemofo Eliabu ofa erino e'ne. <sup>25</sup> Agrama ofa hu'neana, mago silvare kagata hu'nea zuompa kna'amo 130'a sekel (1.5 kilo) hu'nea zuompane, mago silvare keri hu'nea zuompa hunagru hu'nea seli mono nomofo zago miza nesaza avamente, 70'a sekel (800 grem) hu'nea zuompane erino e'ne. Hagi ana tarega zompaafina kaneza eri knare hu'naza flaua masavene eri havia hu'nea witi ofa erino e'ne. <sup>26</sup> Hagi mago golire tro hu'naza kagata zuompa kna'amo'a 10ni'a sekel (110 grem) hu'nea zuompfafi mnanentakeza insensia ante aviteno erino e'ne. <sup>27</sup> Ana nehuno tevefima kre fanenema hu' ofama hu'zama, mago ve bulimakao afu'ene, mago kasefa ve sipisipine, mago kafu hu'nea, sipisipi anenta'ene avreno ne-eno, <sup>28</sup> kumi'ma apasente ofa mago ve meme afu avreno e'ne. <sup>29</sup> Hagi rimpa fru ofama hu'zama avreno e'neana, tare bulimakaone, 5fu'a ve memene, mago kafu hu'nea sipisipi anentataminena 5fu'a avreno e'ne. Amai' Helon nemofo Eliabu, Zebuluni

naga'mokizmi kva ne'mo erino e'nea ofe. <sup>30</sup> Hagi nampa 4 zagegnarera Rubeni naga nofi'mokizmi kva ne' Elizuri nemofo Sedeuri ofama erino e'neana, <sup>31</sup> mago silvare kagata hu'nea zuompa kna'amo 130'a sekel (1.5 kilo) hu'nea zuompane, mago silvare keri hu'nea zuompa hunagru hu'nea seli mono nomofo zago miza nesaza avamente, 70'a sekel (800 grems) hu'nea zuompane erino e'ne. Hagi ana tarega zompa fina kaneza eri knare hu'naza flaua masavene eri havia hu'nea witi ofa erino e'ne. <sup>32</sup> Hagi mago golire tro hu'naza kagata zuompa kna'amo'a 10ni'a sekel (110 grems) hu'nea zuompa fi mnanentakeza insensia ante aviteno erino e'ne. <sup>33</sup> Ana nehuno tevefima kre fanenema hu' ofama hu'zana, mago ve bulimakao afu'ene, mago ve sipisipine, mago kafu hu'nea, sipisipi anenta'ene avreno ne-eno, <sup>34</sup> kumi'ma apasente ofa mago ve meme afu avreno e'ne. <sup>35</sup> Hagi rimpfa fru ofama hu'zama avreno e'neana, tare bulimakaone, 5fu'a ve memene, mago kafu hu'nea sipisipi anentataminena 5fu'a avreno e'ne. Amai' Elizuri nemofo Sedeuri Rubeni naga'mokizmi kva ne'mo erino e'nea ofe. <sup>36</sup> Hagi nampa 5 zagegnarera Simioni naga nofi'mokizmi kva ne'Selumieli nemofo Zulisa daima ofama erino e'neana, <sup>37</sup> mago silvare kagata hu'nea zuompa kna'amo 130'a sekel (1.5 kilo) hu'nea zuompane, mago silvare keri hu'nea zuompa hunagru hu'nea seli mono nomofo zago miza nesaza avamente, 70'a sekel (800 grems) hu'nea zuompane erino e'ne. Hagi ana tarega zompa fina kaneza eri knare hu'naza flaua masavene eri havia hu'nea witi ofa erino e'ne. <sup>38</sup> Hagi mago golire tro hu'naza kagata zuompa kna'amo'a 10ni'a sekel (110 grems) hu'nea zuompa fi mnanentakeza insensia ante aviteno erino e'ne. <sup>39</sup> Ana nehuno tevefima kre fanenehu ofama hu'zana, mago ve bulimakao afu'ene, mago ve sipisipine, mago kafu hu'nea sipisipi anentataminena 5fu'a avreno e'ne. Amai' Zuri Sadaia nemofo Serumiel Simioni naga'mokizmi kva ne'mo erino e'nea ofe. <sup>40</sup> Hagi nampa 6gisi zagegnarera Gati naga nofi'mokizmi kva ne' Deueli nemofo Eliasafu'ma ofama erino e'neana, <sup>41</sup> mago silvare kagata hu'nea zuompa kna'amo 130'a sekel (1.5 kilo) hu'nea zuompane, mago silvare keri hu'nea zuompa hunagru hu'nea seli mono nomofo zago miza nesaza avamente, 70'a sekel (800 grems) hu'nea zuompane erino e'ne. Hagi ana tarega zompa fina kaneza eri knare hu'naza flaua masavene eri havia hu'nea witi ofa erino e'ne. <sup>42</sup> Hagi mago golire tro hu'naza kagata zuompa kna'amo'a 10ni'a sekel (110 grems) hu'nea zuompa fi mnanentake'za insensia ante aviteno erino e'ne. <sup>43</sup> Ana nehuno tevefima kre fanenehu' ofama hu'zana, mago agaho ve bulimakao afu'ene, mago ve sipisipine, mago kafu hu'nea, sipisipi anenta'ene avreno ne-eno, <sup>44</sup> kumi'ma apasente ofa mago ve meme afu avreno e'ne. <sup>45</sup> Hagi rimpfa fru ofama hu'zama avreno e'neana, tare bulimakaone, 5fu'a ve sipisipine, 5fu'a ve memene, mago kafu hu'nea sipisipi anentatamina 5fu'a avreno e'ne. Amai' Deueli nemofo Elisafu Gati naga'mokizmi kva ne'mo erino e'nea ofe. <sup>46</sup> Hagi nampa 7ni zagegnarera Amihud nemofo Elisama, Efraemi naga'mokizmi kva ne'mo'ma ofama erino e'neana, <sup>47</sup> mago silvare kagata hu'nea zuompa kna'amo 130'a sekel (1.5 kilo) hu'nea zuompane, mago silvare keri hu'nea zuompa hunagru hu'nea seli mono nomofo zago miza nesaza avamente, 70'a sekels (800 grems) hu'nea zuompane erino e'ne. Hagi ana tarega zompa fina kaneza eri knare hu'naza

flaua masavene eri havia hu'nea witi ofa erino e'ne. <sup>50</sup> Hagi mago golire tro hu'naza kagata zuompa kna'amo'a 10ni'a sekel (110 grems) hu'nea zuompafi mnanentake'za insensia ante aviteno erino e'ne. <sup>51</sup> Ana nehuno tevefima kre fanenema hu' ofama hu'zana, mago agaho ve bulimakao afu'ene, mago ve sipisipine, mago kafu hu'nea, sipisipi anenta'ene avreno ne-eno, <sup>52</sup> kumi'ma apasente ofa mago ve meme afu avreno e'ne. <sup>53</sup> Hagi rimpfa fru ofama hu'zama avreno e'neana, tare bulimakaone, 5fu'a ve sipisipine, 5fu'a ve memene, mago kafu hu'nea sipisipi anentataminena 5fu'a avreno e'ne. Amai' Amihudi nemofo Elisama Efraemi naga'mokizmi kva ne'mo erino e'nea ofe. <sup>54</sup> Hagi nampa 8 zagegnarera Peduzuri nemofo Gamalieli, Manase naga'mokizmi kva ne'mo'ma ofama erino e'neana, <sup>55</sup> mago silvare kagata hu'nea zuompa kna'amo 130'a sekel (1.5 kilo) hu'nea zuompane, mago silvare keri hu'nea zuompa hunagru hu'nea seli mono nomofo zago miza nesaza avamente, 70'a sekels (800 grems) hu'nea zoumpane erino e'ne. Hagi ana tarega zompaefina kaneza eri knare hu'naza flaua masavene eri havia hu'nea witi ofa erino e'ne. <sup>56</sup> Hagi mago golire tro hu'naza kagata zuompa kna'amo'a 10ni'a sekel (110 grems) hu'nea zuompafi mnanentake'za insensia ante aviteno erino e'ne. <sup>57</sup> Ana nehuno tevefima kre fanenema hu' ofama hu'zana, mago agaho ve bulimakao afu'ene, mago ve sipisipine, mago kafu hu'nea, sipisipi anenta'ene avreno ne-eno, <sup>58</sup> kumi'ma apasente ofa mago ve meme afu avreno e'ne. <sup>59</sup> Hagi rimpfa fru ofama hu'zama avreno e'neana, tare bulimakaone, 5fu'a ve memene, mago kafu hu'nea sipisipi anentataminena 5fu'a avreno e'ne. Amai' Peduzuri nemofo Gamalieli Manase naga'mokizmi kva ne'mo erino e'nea ofe. <sup>60</sup> Hagi nampa 9ni zagegnarera Gidioni nemofo Abitani Benzameni naga'mokizmi kva ne'mo'ma ofama erino e'neana, <sup>61</sup> mago silvare kagata hu'nea zuompa kna'amo 130'a sekel (1.5 kilo) hu'nea zuompane, mago silvare keri hu'nea zuompa hunagru hu'nea seli mono nomofo zago miza nesaza avamente, 70'a sekel (800 grems) hu'nea zoumpane erino e'ne. Hagi ana tarega zompaefina kaneza eri knare hu'naza flaua masavene eri havia hu'nea witi ofa erino e'ne. <sup>62</sup> Hagi mago golire tro hu'naza kagata zuompa kna'amo'a 10ni'a sekel (110 grems) hu'nea zuompafi mnanentake'za insensia ante aviteno erino e'ne. <sup>63</sup> Ana nehuno tevefima kre fanenema hu' ofama hu'zana, mago agaho ve bulimakao afu'ene, mago ve sipisipine, mago kafu hu'nea, sipisipi anenta'ene avreno ne-eno, <sup>64</sup> kumi'ma apasente ofa mago ve meme afu avreno e'ne. <sup>65</sup> Hagi rimpfa fru ofama hu'zama avreno e'neana, tare bulimakaone, 5fu'a ve sipisipine, 5fu'a ve memene, mago kafu hu'nea sipisipi anentataminena 5fu'a avreno e'ne. Amai' Gidioni nemofo Abitani'ma Benzameni naga'mokizmi kva ne'mo'ma erino e'nea ofe. <sup>66</sup> Hagi nampa 10ni zagegnarera Amisadai nemofo Ahiezeri, Dani naga'mokizmi kva ne'mo'ma ofama erino e'neana, <sup>67</sup> mago silvare kagata hu'nea zuompa kna'amo'a 130'a sekel (1.5 kilo) hu'nea zuompane, mago silvare keri hu'nea zuompa hunagru hu'nea seli mono nomofo zago miza nesaza avamente, 70'a sekel (800 grems) hu'nea zoumpane erino e'ne. Hagi ana tarega zompaefina kaneza eri knare hu'naza flaua masavene eri havia hu'nea witi ofa erino e'ne. <sup>68</sup> Hagi mago golire tro hu'naza kagata zuompa kna'amo'a 10ni'a sekel (110 grems) hu'nea zuompafi mnanentake'za insensia ante aviteno erino e'ne. <sup>69</sup> Ana nehuno tevefima kre fanenema hu' ofama hu'zana, mago agaho ve bulimakao afu'ene, mago ve sipisipine, mago kafu hu'nea, sipisipi anenta'ene avreno ne-eno, <sup>70</sup> kumi'ma

apasente ofa mago ve meme afu avreno e'ne. <sup>71</sup> Hagi rimpfa fru ofama hu'zama avreno e'neana, tare bulimakaone, 5fu'a ve memene mago kafu hu'nea sipisipi anentataminena 5fu'a avreno e'ne. Amai' Amisadai nemofo Ahiezeri Dani naga'mokizmi kva ne'mo erino e'nea ofe. <sup>72</sup> Hagi nampa 11ni zagegnarera Okrani nemofo Pekieli Asa naga'mokizmi kva ne'mo'ma ofama erino e'neana, <sup>73</sup> mago silvare kagata hu'nea zuompa kna'amo'a 130'a sekel (1.5 kilo) hu'nea zuompane, mago silvare keri hu'nea zuompa hunagru hu'nea seli mono nomofo zago miza nesaza avamente, 70'a sekel (800 grems) hu'nea zuompane erino e'ne. Hagi ana tarega zoumpafina kaneza eri knare hu'naza flaua masavene eri havia hu'nea witi ofa erino e'ne. <sup>74</sup> Hagi mago golire tro hu'naza kagata zuompa kna'amo'a 10ni'a sekel (110 grems) hu'nea zuompafi mnanentakeza insensia ante aviteno erino e'ne. <sup>75</sup> Ana nehuno tevefima kre fanenema hu' ofama hu'zana, mago ve bulimakao afu'ene, mago ve sipisipine, mago kafu hu'nea, sipisipi anenta'ene avreno ne-eno, <sup>76</sup> kumi'ma apasente ofa mago ve meme afu avreno e'ne. <sup>77</sup> Hagi rimpfa fru ofama hu'zama avreno e'neana, tare bulimakaone, 5fu'a ve sipisipine, 5fu'a ve memene, mago kafu hu'nea sipisipi anentataminena 5fu'a avreno e'ne. Amai' Okrani nemofo Pekieli Asa naga'mokizmi kva ne'mo'erino e'nea ofe. <sup>78</sup> Hagi nampa 12fu zagegnarera Enani nemofo Ahira Naftali naga'mokizmi kva ne'mo'ma ofama erino e'neana, <sup>79</sup> mago silvare kagata hu'nea zuompa kna'amo 130'a sekel (1.5 kilo) hu'nea zuompane, mago silvare keri hu'nea zuompa hunagru hu'nea seli mono nomofo zago miza nesaza avamente, 70'a sekel (800 grems) hu'nea zuompane erino e'ne. Hagi ana tarega zoumpafina kaneza eri knare hu'naza flaua masavene eri havia hu'nea witi ofa erino e'ne. <sup>80</sup> Hagi mago golire tro hu'naza kagata zuompa kna'amo'a 10ni'a sekel (110 grems) hu'nea zuompafi mnanentakeza insensia ante aviteno erino e'ne. <sup>81</sup> Ana nehuno tevefima kre fanenema hu' ofama hu'zama erino'ma e'neana, mago ve bulimakao afu'ene, mago agaho ve sipisipine, mago kafu hu'nea sipisipi anenta'ene avreno ne-eno, <sup>82</sup> kumi'ma apasente ofa mago ve meme afu avreno e'ne. <sup>83</sup> Hagi rimpfa fru ofama hu'zama avreno e'neana, tare bulimakaone, 5fu'a ve sipisipine, 5fu'a ve memene, mago kafu hu'nea sipisipi anentataminena 5fu'a avreno e'ne. Amai' Enani nemofo Ahira Naftali naga'mokizmi kva ne'mo erino e'nea ofe. <sup>84</sup> Hagi kresrmana vu itama masavema freno eri otagema hianknarema Israeli vahe'mokizmi kva vahe'mo'za eri'zama e'nazana 12fu'a ra silvare kagata zoumpagi, 12fu'a silvare keri zoumpagi, 12fu'a golire kagata zuompagi hu'za, kresrmana vu ita masave frente'za eri otagema hazanknarea eri'za e'naze. <sup>85</sup> Hagi mago mago silvare kagata hutere hu'nea zuompa kna'amo 130'a sekel (1.5 kilo) hu'nea zuompane, mago mago silva zuompa keri hu'nea zuompamofo kna'amo'a hunagru hu'nea seli mono nomofo zago miza nesaza avamente, 70'a sekels (800 grems) hu'nea zuompane eri'za etere hu'naze. Hagi ana mika silva zuomparamimofo kna'amo'a seli nomofo zago avamente 2 tauseni 400'a sekel hu'ne. <sup>86</sup> Hagi mago'mago 12fu'a golire kagata zoumpa kna'amo'a seli nomofo zago avamente 10 sekeli hu'nea zuompafi mnanentake'za insensia ante avite'za eri'za e'naze. <sup>87</sup> Hagi tevefima kre fanenema hu' ofama eri'zama e'nazana, 12fu'a ve bulimakaonki, 12fu'a ve sipisipigi 12fu'a mago kafu hu'nea sipisipi anentataminki hu'za avre'za ne-e'za anama huzmante'nea kante ante'za witi ofa eri'za e'naze. Hagi kumi'ma apasente ofa 12fu'a ve meme afu avre'za e'naze. <sup>88</sup> Hagi rimpfa fru ofama hu'zama

avre'zama e'nazana ana makara 24'a bulimakaonki, 60'a ve sipisipigi, 60'a ve memenki, 60'a mago kafuma hu'nea ve sipisipi anentataminki hu'za avre'za e'naze. Ama'i kresramna vu itama masavema frente'za eri otage'ma haz a knare'ma eri'za e'naza ofaramine.<sup>89</sup> Anante Moses'e'ma seli mono nompima ufreto Ra Anumzamo'enema nanekema hunaku'ma nehigeno'a, Ra Anumzamofo huhagerafi huvempage vogisimofo asunku trarema huza nehazare tare ankeromofo zanamema'a tro hunte'naza amu'nozanifinti Ra Anumzamo'a kea Mosesena humi'ne.

## 8

### *7ni'a tavimofo naneke*

<sup>1</sup> Anante Ra Anumzamo'a amanage huno Mosesena asmi'ne, <sup>2</sup> Amanage hunka Aronina asmio, 7ni'a tavi'ma retro huteno, ruotgema hunefinkama tavima tagintesigeno'a, masa'amo'a ana tavi azota'mofo avuga remsa hugahie. <sup>3</sup> Ra Anumzamo'ma Mosesema asami'nea kante anteno Aroni'a tavi'ma retro hunte'nea tavira tagintegeno, masa'amo zota'mofo avuga remsa hutre'ne. <sup>4</sup> Tavi'ma rekrhu azotama tro'ma hu'nazana amana hu'naze, hama eri'za golia amasagiza lamu tavimofo zota'a tro nehu'za, azankuna'a tro nehu'za anina'anema troma hunazana, Ra Anumzamo'ma Mosesema asami'nea kante ante'za tro nehu'za, Livae nagara zamazeri otage hu'naze.

### *Livae naga'ma zamazeri agru hanaza naneke*

<sup>5</sup> Ru'ene Ra Anumzamo'a amanage huno Mosesena asmi'ne, <sup>6</sup> Israeli vahepintira Livae nagara zamavarenka, zamazeri agru huo. <sup>7</sup> Hagi zamazeri agruma kagrama hananana anahu hugahane, agru hu'nesia ti erinka ru ani'ani hunezmantesanke'za, maka zamufa zamazokara resanu nehare'za, kukena zamia sese hute'za, zamagra avusese hugahaze. <sup>8</sup> Ana'ma hutagenenka huge'za mago bulimakaona witi ofa zami'ne, kanenea flaua masavempi erihavia hu'nesazane ofa nehu'za, mago bulimakao kumi'ma apasezamante ofa hugahaze. <sup>9</sup> Hagi Mosesega kehuge'za mika'a Livae vahera seli mono nonte etru nehanagenka, maka Israeli vea'ene zamazeri atru hugahane. <sup>10</sup> Livae nagara zamavarenka Ra Anumzamo'na navure vuge'za, Israeli vahe'mo'za Livae naga'mokizmi zamagofetu zamaza anteho. <sup>11</sup> Aroni'a Israeli vahepintira Livae nagra Ra Anumzamofo avuga aza ante'sga huno amira amira ofama nehiaza huzmantetena, Ra Anumzamo'na eri'zana erigahaze. <sup>12</sup> Henka'a Livae naga'mo'za tare bulimakaomofo agenopare zamazana antetesage'za, mago bulimakaona kumi'apase ofa nehu'za, mago bulimakaona kresramna vanage'na Ra Anumzamo'na Livae nagara kumizmifintira mizasezmanategahue. <sup>13</sup> Hagi Livae nagara huge'za Aronine, ne'mofavre naga'ane zamuga oti'nesage'za, amira amira ofama nehazaza hu'za Ra Anumzamo'na ofa hu'za namigahaze. <sup>14</sup> E'ina hunka Israeli vahepintira Livae nagara zamazeri otage hananke'za Nagri vhahera manigahaze. <sup>15</sup> Hagi anama huzmanteteskuna, Livae naga'mo'za seli mono nompina eri'zana erigahazanki, zamazeri agru nehunka, kazana antesga hunka amira amira ofa huzmantegahane. <sup>16</sup> Israeli vahepinti'ma pusa ne' mofavre antesazama onamisaza nona hu'na, Livae nagara maka Nagrani'a zamavare'noe. <sup>17</sup> Hagi Isipi vahe'mokizmi zamagonesa ne'mofavrema nezmahe'na, mika'a Israeli vahe'mokizmi zamagonesa mofavrene, zaga-gafa zimimofo ese anentara Nagri suzane hu'na zamavare otage hu'noe. <sup>18</sup> Hu'neanagi menina Israeli vahe'mokizmi pusa ne'mofavre nona hu'na,

Livae nagara Nagra huhampri'na zamavare'noe. <sup>19</sup> Israeli vahepintira, Livae nagara muse'zane hu'na Aronine, ne'mofavre naga'a seli mono nompi Israeli vahe'mokizmi kumi' apaseza miza sezmanteseaza eri'za eneri'za, seli mono nomofo tvaonte'ma Israeli vahe'mo'zama ne-esageno krimo zamazeri haviza huzanku kva krigahaze.

<sup>20</sup> Mosese'ene, Aroni'ene mikä Israeli vahe krerfamo'zanena Ra Anumzamo'ma Mosesen asmi'nea kante ante'za Livae nagara anara huzmantegahaze. <sup>21</sup> Livae naga'mo'za zamagrazmi zamazeri agru nehu'za, kukena zmia sese hutazageno, Aroni aza ante sga huno Ra Anumzamofonte zamavareno amira amira hu ofa hunezmantero, kumi apase ofa huzmante'ne. <sup>22</sup> Ana'ma hutege'za Livae vahe'mo'za seli mono nompina, Aronine, ne'mofavre naga'anena zamaza hu'za Ra Anumzamo'ma Mosesema asami'nea kante ante'za eri'zana eri'naze.

### *Livae vahe'mo'za eri'zampinti vagaresaza naneke*

<sup>23</sup> Ra Anumzamo'a amanage huno Mosesena asmi'ne, <sup>24</sup> Livae naga'mo'za amanahu hugahaze, <sup>25</sup>a kafureti mareri'nesnamo'za, mareri'za seli mono nompina eri'zana erigahaze. <sup>25</sup> Hianagi 50'a kafuma nehanu'za eri'zampintira vagare'za mago'ene eri'zana e'origahaze. <sup>26</sup> Hu'neanagi eri'zazamifinti vagaresu'za nezmafuna amne zamaza hu'za seli mono nompi eri'zana kankamu zamire erigahaze. Hagi mago eri'zana zamagra zamävesitera e'origahaze. Hagi Livae vahe'mo'za amage ante'za eri'za kankamu zamire erigahaze.

## 9

### *Isipi mani'nageno knazamo zamagatere'nea knagu nentahi'za ne'za ne-naza naneke*

<sup>1</sup> Israeli vahe'mo'za Isipi mopa atre'za Sainai ka'ma hagage kokampima eman'i-naza kafua tare agateregeno ese ikantera, Ra Anumzamo'a amanage huno Mosesena asmi'ne, <sup>2</sup> Menina Israeli vahe'mo'za Isipi mani'nageno knazamo zamagatere'nea knagu'ma antahimi'za ne'za (Pasova) nesaza knama ante knarera, mani fru hu'neza ne'zana neho. <sup>3</sup> Hagi ese ikamofona 14ni zagegna zupa, hinki'za kinaga eri agafa hu'za Isipi mani'nageno knazamo zamagatere'nea knagu antahimi ne'zana (Pasova) retro nehu'za, muse hu'zamofo tra kema ante'noa kasege'mofo amage antegahaze. Maka zupa ana knama ne-ena ana knagu antahigahaze. <sup>4</sup> Higeno Moses'e a Israeli vahera zamasmige'za Isipi mani'nageno knazamo zamagatere'nea knagu antahimi ne'zana (Pasova) retro hu'naze. <sup>5</sup> Sainai hagage ka'ma mopafi, pusa ikamofona 14tini zagegna zupa hanima hu'za nehigeno, Isipi mani'nageno knazamo zamagatere'nea knagu antahimiza nezama nenaza knazupa (Pasova) agafa hu'za musena hu'naze. Ra Anumzamo Mosesema maka kasegema asmi'nea kante ante'za Israeli vahe'mo'za anara hu'naze. <sup>6</sup> Hu'neanagi mago'a vahe'mo'za avu sese osu'nagu Isipi mani'nageno knazamo zamagatere'nea knagu antahimi'za nezama nenaza knazupa (pasova)ohanati'naze. Na'ankure fri vahe avufare avako hu'nazagu, ana zagegna zupage Mosesene Aronikiznire vu'za amanage ome hu'naze. <sup>7</sup> Hagi tagra fri'hea vahe'mofo avufare avako hu'neta avusese osu'nonanagi, na'anku Ra Anumzamofonte ofa huntegahaze hu'za Israeli vaheku'ma hu'naza knare'ma neonana kasea hunerantaze? <sup>8</sup> Hazageno Moses'e a amanage huno zamasmi'ne, navega mani'enke'na Ra Anumzamo'a na'anee huno tamagrirkura hugahifi seli mono nompina vu'na ome antahiteno.

<sup>9</sup> Hagi Ra Anumzamo'a amanage huno Mosesena asmi'ne, <sup>10</sup> Israeli va-hera amanage hunka zamasamio, tamagro, nagatamifinti forehu anante anante hana'mo'za fri vahe'mofo avufare avakoma hanu'za agru osuge, mago kaziga afete kama vugema hu'nesu'za, Isipi mani'nageno knazamo zamagatere'nea knagu antahimiza ne'za nenaza knarerera (Pasova) amne negahaze. <sup>11</sup> Hagi nampa 2 ikamofona 14tini zage knarerera kinagama haninki'za nehanige'za, zamagra erigafa hu'za Isipi mani'nageno knazamo zamagatere'nea knagu antahimi (Pasova) ne'zana retro hugahaze. Hagi zamagra nezama nesazana zo'ore bretine, akake ani'naza negahaze. <sup>12</sup> Hagi zamagra ana ne'zana nege'za atrenkeno ru nanterana omanege, lama afumofo zaferina'a ruha'ontagaho. Hagi maka kasegema tamasmua ke avariraho. <sup>13</sup> Hianagi mago'mo agru huno mani'neno, afete nantu kama onte kumate mani'neno, Isipi mani'nageno knazamo zamagatere'nea knagu antahimiza neza nenaza (Pasova) knagu agesa ontahisimofona, huntenkeno naga'afintira mani otage huno manino. Na'ankure agra Ra Anumzamofona ana knarerera ofa huonte'neankino, kumi'amofo knazana agra'a erigahie. <sup>14</sup> Hagi ru mopareti eman'i'za vahe'mo'za Isipi mani'nageno knazamo zamagatere'nea knagu antahimiza ne'za nenaza knare (Pasova) Ra Anumzamofa muse hunte'nakura magoke kasegene tra kere eman'i'vahe'ene, mopa agafa vahe'mo'zanena avaririgahaze. Hampomo seli nona refite'hne.

### *Seli mono nomofo agofetu me'nea hampomofo naneke*

<sup>15</sup> Seli noma azeri oti'za zupage hampomo ana seli nona refitegeno, zagema ufregeno'a ana hampomo'a teve anefa kna huno remsa kenagera hu'ne. <sup>16</sup> Ana zanke huno mika zupa hampomo zagefina refitegeno, han-impina teve anefa huno remsa hu'ne. <sup>17</sup> Hagi ana hampomo'ma ruotge seli nomofo agofetuti atre'noma vige'za, Israeli vahe'mo'za hage'za rurega nevu'za, ete mago kaziga ana hampomo'ma umanige'za, anante Israeli vahe'mo'za seli nona ome ki'za mani'naze. <sup>18</sup> Hagi Ra Anumzamo'ma zamasamia kante ante'za Israeli vahe'mo'za kana nevu'za, Ra Anumzamo'ma zamasamia kante ante'za seli nonku'ma zamia ome ki'za mani'naze. Hampomo ruotge seli nomofo agofetu umanire, anante seli nona ome ki'za mani'naze. <sup>19</sup> Ana zanke'ma huno hampomo ruotge seli nomofo agofetu hakare gna mege'za, Israeli vahe'mo'za Ra Anumzamo'ma kema hanigu avega ante'za mani'naze. <sup>20</sup> Hagi mago'a knafina hampomo ruotge seli nomofo agofetu mege'za, Ra Anumzamo'ma zamasami'nea kante ante'za avega ante'za ana nonte mani'nazageno, hampomo'ma vige'za ete Ra Anumzamo'ma zamasami'nea kante ante'za hage'za vu'naze. <sup>21</sup> Hagi mago'a knarerera hampomo'a kinagareti meno vuno nanterama uhanatisigeno, hampomo'ma vanige'za zamagra hage'za vugahaze. Hagi masarero hanimpino, ina knarema hampomo'ma vanige'za, zamagra ana hampo avriri'za hage'za vugahaze. <sup>22</sup> Tare zageo, mago ikano, mago kafuo hampomo ruotge seli nomofo agofetu'ma mege'za, Israeli vahe'mo'za seli no kumazmifintira hage'za ovu'za mani'naze. Hianagi hampomo'ma ana kuma'ma atreno'ma vige'za hage'za vugahaze. <sup>23</sup> Hagi Ra Anumzamo'ma zamasamia kante ante'za seli nona ki'za mani'naze. Ra Anumzamo zamasamia kante ante'za hage'za vu'naze. Hagi Ra Anumzamo'ma Mosesema asami'nea kante ante'za amage ante'naze.

# 10

## *Tare silvare ufemofo naneke*

<sup>1</sup> Hagi Ra Anumzamo'a mago'ene amanage huno Mosesena asmi'ne, <sup>2</sup> Tare ufena tamagra hamanteti amasagitma silvare tro huteta, uferenkeno vea kevu'moza nentahiza eritru hu'za seli nozmia taganaviza vugahaze. <sup>3</sup> Hagi tarega ufentetima resageta, maka vea kevu'moza kagrite e'za seli nomofo kahante eme atru hiho. <sup>4</sup> Magoke ufentetima resageta, Israeli kva vahe'ma, nagate nagate zamazeri oti'naza kva naga'mo'za kagri kavuga etru hugahaze. <sup>5</sup> Magoke ufenkrafa hina, zage hanati kaziga ki'nesaza naga'mo'za hage'za oti'za vugahaze. <sup>6</sup> Anante ufema tare zupa rena, henkamu (saut) kaziga ki'naza vahe'mo'za hage'za oti'za vugahaze. Hagi ufema re'zamo zamazeri otina hage'za vugahaze. <sup>7</sup> Vahe'ma zamazeri atruma hunakura, kema fore hanige'za ufema resaza agerumo'a zazate ufena re'za viho. <sup>8</sup> Aroni ne'mofavrema pristi eri'zama e'neriza naga'mo'za ufentera zamagrake'za azerine'za, ana ufena regahaze. Hagi maka knafina zamagrip-intima fore hu anante antante'ma hu'za vanaza vahe'mo'zage ana hugahaze. <sup>9</sup> Henkama mopatamirema umani'nesageno ha' vahe'mo'za ha'ma huramante'za tamazeri havizama hanageta, hazenkemofo ufe renage'na, Ra Anumzana tamagri Anumzamo'na nentahi'na, ha' vahe zamazampinti tamagu vazigahue. <sup>10</sup> Hagi muse nehuta, mago'a ranknama ante zupo, mikamofe ese zagegna zupama kresramna vu ofa nehanuto, rimpal fruhu ofa kresramna vanaza zupa, Anumzamo'narega ana ufe resage'na nentahi'na tamaza hugahue. Nagra Rana, tamagri Anumzane. Hagi Israeli vahe'mo'za Sainai agona atre'za e'naze.

## *Israeli vahe'mo'za Sainai atre'za vu'naza naneke*

<sup>11</sup> Hagi tare kafuma evigeno, tu ikamofona, 20ti knazupa, seli mono nomofo agofetu'ma me'nea hampomo'a atreno vu'ne. <sup>12</sup> Ana hige'za Israeli vahe'mo'za nege'za ka'ma hagage mopa Sainai atre'za hage'za nevu'za, kumara ante'za manite manite hu'za nevazageno, ka'ma hagage mopare Parani ana hampomo'a umani'ne. <sup>13</sup> Ra Anumzamo'ma Mosesesema pusante'ma asmi'nea kante ante'za atre'za vu'naze. <sup>14</sup> Hagi Juda naga'moza sondia vahe'zmine kota hu'za krauefa (fleg) zami'ne eri'za nevazageno, Am-inadabu nemofo Nasoni kva huzmante'ne. <sup>15</sup> Hagi Zuari nemofo Natanieli Isaka sondia nagatera kva huzmante'ne. <sup>16</sup> Hagi Helon nemofo Eliabu, Zebulun naga'mokizmi sondia nagatera kva hu'ne. <sup>17</sup> Anante seli nona tapage hu mopafi atrageno, Gersoni naga'ene, Merari naga'mo'za ana seli nona kofi'za zamage'a vu'naze. <sup>18</sup> Ana zamage'a Rubeni naga'moza krauefa eri'za sondia vahe'zmine nevazageno, Sedeuri nemofo Elizur ana sondia vahera kva huzmante'ne. <sup>19</sup> Hagi Zurisadai nemofo Selumieli, Simeon sondia nagatera kva hu'ne. <sup>20</sup> Gati naga'mokizmi sondia nagatera, Deueli nemofo Eleasafu kva hu'ne. <sup>21</sup> Anante Kohati naga'ma nevu'za, seli nompinti ruotge hu'nea zana eri'za kantega nevzage'za, seli nona azeri oti'tage'za, anapinka ruotge zantamina eri'za ome ante'naze. <sup>22</sup> Hagi ana amagera Efraemi sondia naga'mo'za krauefa (fleg) zamine eri'za nevazageno, Amihud nemofo Elisama kegava huzmante'ne. <sup>23</sup> Hagi Pedasur nemofo Gamalieli, Manase naga'mokizmi sondia nagatera kva hu'ne. <sup>24</sup> Hagi Benzameni sondia nagatera Gideoni nemofo Abidani kva hu'ne. <sup>25</sup> Henka zamefiga'a Dani naga'moza vugote'za, zamagra krauefa (fleg) eri'za henka nevu'za, ha' vahe'ma zamefiti esagu kegava huzmante'za

vu'naze. Hagi sondia naga'zamirera Amisadai nemofo Ahieza kva hu'ne. <sup>26</sup> Hagi Okran nemofo Pagieli, Aseli naga'mokizmi sondia nagatera kva hu'ne. <sup>27</sup> Hagi Enan nemofo Ahira, Naftali naga'mokizmi sondia nagatera kva hu'ne. <sup>28</sup> Mika zupa Israeli vahe'mo'za noma hage'za kasefa kumate'ma nevu'za, ana kante ante'za sondia vahe'zmine vutere hu'naze. <sup>29</sup> Mosese'a anage huno Midieni ne' Reueli nemofo Hobabuna asami'ne, Ra Anumzamo'a Nagra ana mopa tamigahue huno huhampri tant'eana mopare nevunanki, tagrane egeta so'e tavutava huganteta vamaneno. Na'ankure Ra Anumzamo'a Israeli vahe'mofona knare'za huhampri zamante'ne. <sup>30</sup> Hianagi Hobabu'a amanage hu'ne, nagra ovugahuanki, areti rukrahe hu'na mopani'aregane, naga ni'arega vugahue. <sup>31</sup> Higeno mago'ene Mosese'a amanage hu'ne, muse hugantoanki (plis) tatreka ovugahane. Na'ankure kagra ka'ma hagage mopafima nonkuma ante'zana antahinkakenka hu'nanku, tagrane nevunka kana taverigahane. <sup>32</sup> Hagi kagrama tagrane esnanketa, Ra Anumzamo'ma knare'zama tamisigeta, anazanke huta kagrira mago'a zana kamigahune. <sup>33</sup> Hagi anantetira Israeli vahe'mo'za erigafa hu'za Ra Anumzamofo agona Sinai atre'za tagufa zage gnamofo agu'afi kana vu'naze. Ra Anumzamofo huhagerafi hvempage vogisia kofi'za tagufa zagegnafi vugote'za nevzageno, kuma'ma ome ante'za manisare zameri hutere huno vu'ne. <sup>34</sup> Seli nonkumazmima atre'za nevzageno'a, Ra Anumzamofo hampomo'a zagegnafina turuna huzmant'e. <sup>35</sup> Hagi huhagerafi hvempage vogisima kofi'za vunaku nehzageno'a, Mosese'a anage hu'ne, Ra Anumzamoka otinka ha' vahetia zamahe panini huge'za nefreser'za, kagrime ha'ma renegantaza vahe'mo'za koro freho. <sup>36</sup> Hagi huhagerafi hvempage vogisima inaregoma umanigeno'a, Mosese'a anage hutere hu'ne. Ohampriga'a Israeli vahe'motarera ete eno.

## 11

### *Israeli vahe'mo'za kehakare hazageno Anumzamo zamazeri haviza hu'nea naneke*

<sup>1</sup> Hagi Israeli vahe'mo'za knazama eneriza zanku zamesra hige'za Ra Anumzamofo agesafi kehakare hazageno, Ra Anumzamofona tusi asi vazigeno mago'a atuparega meno evu'nea kumara teve tagintegeno teme vu'ne. <sup>2</sup> Ana'ma hige'za vea'moza nege'za, Mosesente taza huo hu'za zavi krafa eme hazageno, Mosese'a Ra Anumzamofontega nunamu higeno, ana tevemo'a asu hu'ne. <sup>3</sup> Hagi ana kuma'mofo agi'a Taberae hu'za agia ante'naze. Na'ankure zamagrama ke hakarema hazageno Ra Anumzamofo tevemo zamagri amu'nompi teve re'negu anage agia ante'naze. <sup>4</sup> Mago'a ru vahe'ma Israeli vahe'enema emeri havia hu'za vu'naza vahe'mo'za masave ne'za nenaza vaheki'za, ne'zama nesagu nehage'za, Israeli vahe'mo'zanena zamagranena ke hakare hu'za, tananke zana iza tamisnigeta negahune? <sup>5</sup> Tagra Isipi mani'neta nozama, konomia, merenima, aka osu ani'ani'ma (leek), ani'ani'ma, galikima miza oseta amne nenona zankura tagesa nentahune. <sup>6</sup> Hianagi menina hanavetia omanegeno, ne'zantia omnegeno, manage me'ne! <sup>7</sup> Manamo'a, ampori'e ragagna huno kani kruke hu'ne. <sup>8</sup> Hagi ana mana nantera ot'i za eka eka kupi zogi ante'za, mago have tra ante'neza mago havenu atufe'za vu'za eza nehzageno refuzafupeno ta'nefa sege, magru riga onaginefi rentra hazageno tanefa asege'za kavofi krete'za, kuta keki tro hu'naze. Haga'amo'a olivi masavempi kre'naza kekimofo haga gna hu'ne. <sup>9</sup> Kenage'ma seli nonkumapima atako'ma eneramigeno'a

ana manamo'a magoka herafirami'ne. <sup>10</sup> Israeli vahe'mo'za seli nozamimofo kahante mani'ne'za maka'mo'za zavi netageno, Ra Anumzamofo rimp ahe'zamo otigeno, Mosese'a ana zama negeno musena huozmante'ne. <sup>11</sup> Anante Mosese'a amanage huno Ra Anumzamofona asmi'ne, Na'ante Ra Anumzamoka kagri eri'za vahekamo'na ama zana erifore hune nami'ne? Nagrira musena huonantenka, maka vahe'mokizmi knazana nagrira eri kofi nenantano? <sup>12</sup> Nagrake ama ana vahera kase zamante'nofi? Nagra nezmafana mani'nofi? Kagra nagrikura hunka, kasumpinka zamanukinka, a'nemo'za mofavre zamasunte zamanu'nekiza kna hunka, zamatavarenka zamafahe'i huhampri zamante'nana moparera vuo hankena neo? <sup>13</sup> Zamananke zana inantegati ama ana maka veara eri fore hu'na zamigahue? Zamagra navufi zavi ate'za anage nehaze, tananke zana tamigeta namneno hu'za nehaze! <sup>14</sup> Ama ana eri'zamo'a tusi'a kna navenesiankina, mika'a veara nagraker, inankna hu'na kva huzmantegahue? <sup>15</sup> Amanahu hunka nagri'ma nazeri haviza hunaku'ma hanunka, muse hugantoanki Kogra kyufima knare'ma hu'nesugenka, ame' hunka nahe nefrinka, atregeno ama knazamo'a nazeri haviza osino.

### *Mosese'a azahu vahera 70'a huhampri'nea naneke*

<sup>16</sup> Hagi Ra Anumzamo'a ana kema nentahino amanage huno Mosesena asmi'ne, Israeli vahe'ma kva eri'zama enerisaza vahepintira 70'a vahe zamavarenka kagrane seli nomofo avuga eme otiho. <sup>17</sup> Hagi anante Nagra eramina kagra'ene keaga eme nehu'na, kagripintira mago'a Avamura eri zami suge'za, kaza hu'za veamokizmi knazana mago'a erisagenka, mago'ene maka knazana kagraker e'origahane. <sup>18</sup> Veara zamasamige'za, okina zamananke'zana (mit) negahazanki, zamazeri agru hu'za zamavufaga eri otage hiho. Na'ankure zavi krafagema hazana Ra Anumzamo'na antahi'noe. Iza magora tananke zana tamisigeta negahune! Isipi mani'nonana knare'zantfa huta mani'nonane hutama hazanke, Ra Anumzamo'na antahinoankina tmananke'zana taminugeta negahaze. <sup>19</sup> Ne'zama tamagrama nesazana, magoke zagefino, tare zagefino, 5fu'a zagefino 10ni'a zagefino, 20'a zagefino, <sup>20</sup> mago ikampina tamagra nenesageno, tamagona kampinti katati huno tamagoteno tamavresra hugahie. Na'ankure tamagrane nemanua Ra Anumzamo'na tamage'na humanita zavi neteta anage hu'naze, Nahigeta Isipi'a atreta e'nesunane? huta hu'naze. <sup>21</sup> Hianagi Mosese'a ana kemofo nona'a amanage hu'ne, 600,000ni'a sondia vahe'ene menina nagra mani'nogenka, Kagra anage hane, Nagra zamananke'za zamisanuge'za mago ikamofo agu'afina negahaze nehane. <sup>22</sup> Sipisipi kevune, bulimakao kevu aheta tragafeta zaminsuna zamo'a, maka vahe'mokizmi agu hezman-tegahifi? Hifi maka hagerimpinti nozame azeri atru huta zamisunazamo, agua ahezman-tegahio? <sup>23</sup> Ra Anumzamo'a amanage huno Mosesena ke nona'a asmi'ne, Ra Anumzamo'na hanavemo'a atupa hu'nefi? Nagri kemo'a tamage huno nena raga'a before hugamigahio, huogamigahio menina kagra kegahane. <sup>24</sup> Mosese'a vuno Ra Anumzamo'ma asmi'nea naneke'a ana maka veara ome nezamasamino, 70'a kva vahe huhampri zamante'nea zamavareno seli nonte ome zamante kagi'ne. <sup>25</sup> Hagi Ra Anumzamo'a hampompi eramino keaga hunezamino, mago'a Mosesempi mani'nea Avamura erino ana 70'a kva vahete ante'ne. Higeno ana Avamura zamagrite emanige'za zamagra kasnampa kea osi'a knafi hu'naze. Hianagi ete anama hute'za mago'enena ana kasnampa kea osu'naze. <sup>26</sup> Ana hianagi tare kva netrena seli mono nompina mareorina'e, mago'mofo agi'a Eldati'e, hagi

mago'mofo agi'a Medati'e. Zanagra kumapi mani'nakeno, Ra Anumzamofo Avamumo zanagrite emanige'ne, ana zanke hu'ne kasnampa keaga ana kumapina hu'na'e. <sup>27</sup> Ana nehakeno mago nehzavate ne'kanomo agareno vuno Mosesena anage huno ome asami'ne, Eldatike Medatikea kasnampa keagaga kumapina neha'e. <sup>28</sup> Nun ne'mofavremo Josua, nehzazama'are Mosesena aza nehia ne'mo huno, Mosesega ranimokagi zanatregeke ana keaga osi'o. <sup>29</sup> Hianagi Mosesea' ke nona amanage hu'ne, kagra nagritega antenka kasnampa kea osi'o nehampi? Ra Anumzamofonte maka kasnampa vahera tro hanazegu nagesa nentahuankino, Ra Anumzamo'a Avamura Agra'a zamigahie! <sup>30</sup> Ana'ma hute'za ete Mosese'ene Israeli kva vahe'mo'zanena kumapi vu'naze.

### *Ra Anumzamo hifa' nama zami'nea naneke*

<sup>31</sup> Mago zupa Ra Anumzamo'a hankavenentake zaho huntegeno hager-integati mika'a hifa' nama zaga renatigeno hareno Israeli vahe'ma kuma kiza mani'nazarega emani avite'ne. Mago zage gna anagamu (not) kazi-gane, henkamu (saut) kazigane vuga'are kumamofona agofetu emani emani higeno, ana hifa' namamo mopa aviteno mreri'neana tare kiubits (1 mita gna hu'nea avamente emani'naze). <sup>32</sup> Hagi veamo'za mago zagegi, mago kenageki, anante zagegi hu'za ana hifa nama zogi'naze. (Iza'o osi'ama zogitere hu'nemo'a 1tauseni'a kilo mago mago'mo'a zogitere hu'ne) ana hifa' nama zogite'za kumamofo refarega zagere ante hagege hu'naze. <sup>33</sup> Hagi ana namama agafama hu'za ani'za nakriku nehzegeno, Ra Anumzamofo rimpa he'zamo'a mrerigeno, tusi kri vahe'mokizmi zamavate atregeno eme za-mazeri haviza hu'ne. <sup>34</sup> Hagi memema ase'za zamagraguke'ma antahi'naza vahera zamahe hana hige'za fri'naze. Ana vahera anampi asene zamante'za ana kuma agi'a Kibrot-hatava hu'naze, (meme vahre asente kumare hu'za agi'a ante'naze). <sup>35</sup> Kibrot-hatavatira Israeli vahe'mo'za atre'za Hazeroti vu'za, anantega Hazeroti mopare zaza kna umani'naze.

## 12

### *Aroni'ene Miriamu'ke kehakare Moses huntena'a naneke*

<sup>1</sup> Mosese'ma Kusa (Itiopia) kumate a'ma eri'nea zanku huke Miriamuke, Aronikea kehakare hunteke, <sup>2</sup> zanagra anage hu'na'e, Ra Anumzamo'a Mosesenke kegaga hunemifi? Anazankera huno tagri'enena Agra kea huoramigahio? Anage nehakeno Ra Anumzamo antahi'ne. <sup>3</sup> Mosese'a menina avufga antermimo agazone huno mani nera mago'a nagara zamagatereno agrake mani'ne. Magore huno agri kna vahera ama mopafina omani'ne. <sup>4</sup> Ana'ma hakeno'a ame huno Ra Anumzamo'a Mosesene, Aronine, Miriamunku'enena anage hu'ne, ana maka 3'a nagamota atiramita seli mono nomofo avuga echo. Hige'za ana 3'a naga'mo'za eme atru hu'naze. <sup>5</sup> Hagi anante Ra Anumzamo'a vimago hampompi eramino seli mono nomofo kasante eme otineno, Aronine, Miriamu kiznigu ke higeke tarega'moke avuga akeno, <sup>6</sup> anante Ra Anumzamo'a amanage huno zanasmi'ne, Menina Nagri nanekea antahi'o. Tamagri amu'nompi mago kasnampa vahe'ma mani'negena Nagra Ra Anumzamo'na ava'nafi efore hunemina, avanagna zampi efore hu'na kea hunemue. <sup>7</sup> Hagi Nagri eri'za vahe Mosesena anara huontegahue. Nagra antahi nemina hakare eri'za zanteria knare huno kva hugahie hu'na Ra Anumzamo'na antahinemue. <sup>8</sup> Nagra fronka kea agri'enena osu'na, amate tagipinti kea ohumi ahumi nehu'e. Tanagra nahigeta korora nosuta, Nagri eri'za ne' Mosesena amefiga'a kea nehuta,

hu havizana hunenta'e? <sup>9</sup> Ra Anumzamo'a tusi rimpa nehegeno zamatreno Agra vu'ne.

<sup>10</sup> Ana'ma higeno'a seli mono nomofo agofetuti hampomo atreno vigeno, keana fugo namu Miriamuna re'geno efeke hu'ne. Aroni'a rukrahe huno'ma keana, Miriamuna fugo namure'negeno ke'ne. <sup>11</sup> Anante Aroni amanage huno Mosesena asmi'ne, ranimoke tusiza hu'na nasunku hue, ama'na kumitera tagirira tazeri haviza osuo, negi vahe kna huta hago kumi hu'no'e. <sup>12</sup> Hagi Miriamu avuufga atregero haviza huno, kase nefria mofavremofo avufgangmo knopeneramia knara osino. <sup>13</sup> Anante Moses'a zavi neteno ranke huno nunamuna Ra Anumzamofontega huno, muse hugantoanki Miriamuna kri'a eri atrento. <sup>14</sup> Hianagi Ra Anumzamo'a Mosesena anage huno ke nona'a hunte'ne, Nefa'ma avufima avetu ahentesigeno'a, 7ni'a zage gnafina agaze zana e'orisio? Atrenkeno 7ni'a zage gna kumamofo fegi'a umani'nena, ana kna vagarena ete avreta kumapina efreho. <sup>15</sup> Miriamuna kumamofo fegu'a 7ni'a zagegna atrazageno mani'nege'za, hage'za ovuza mani'nageno Miriamu'a ege'za ete avre'naze. <sup>16</sup> Henka'a, anazama vagarege'za, Israeli vahem'o'za Hazeroti'a atre'za ka'ma hagage mopafi Parani hage'za kumara ome ki'za mani'naze.

## 13

### *Kenani mopa oku ome afure'za kesaza naneke*

<sup>1</sup> Anante Ra Anumzamo'a amanage huno Mosesena asmi'ne, <sup>2</sup> Nagrama Israeli vahe'ma zamiku'ma hu'noa mopa, 12fu'a naga nofipinti magoke magoke kva vahezmi huzmanteg'e'za oku'a vu'za Kenani mopa ome afure'za keho. <sup>3</sup> Higeno Parani ka'ma hagege mopafi mani'nafintira Moses'a Ra Anumzamofon te amage anteno, Israeli vahepintira kva vahezmi huzmanteg'e'za vu'naze. <sup>4</sup> Anama vu'namokizmi zamagi'a ama'ne, Rubeni naga pintira, Zakuri nemofo Samua'e. <sup>5</sup> Simeon naga pintira, Hori nemofo Safati'e, <sup>6</sup> Juda naga pintira, Jefune nemofo Kalepi'e. <sup>7</sup> Isaka naga pintira, Josefe nemofo Iga'e, <sup>8</sup> Efraemi naga pintira, Nuni nemofo Hosea'e, <sup>9</sup> Benjamen naga pintira, Rafu nemofo Palti'e. <sup>10</sup> Zebuluni naga pintira, Sodi nemofo Gatieli'e, <sup>11</sup> Josefe ne'mofavre Manase naga pintira, Susi nemofo Gati'e, <sup>12</sup> Dani naga pintira, Gemali nemofo Amiel'i'e, <sup>13</sup> Aser naga pintira, Maikol nemofo Seturi'e, <sup>14</sup> Nafatali naga pintira, Vofsi nemofo Nabi'e, <sup>15</sup> Gad naga pintira, Masi nemofo Geueli'e, <sup>16</sup> Ama'i oku'a vu'za mopa afure'za kehogu huzmanteg'e'za vu'naza vene'ne zamagi'e. Hianagi Nun nemofo Hoseanku, Moses'a Josua'e huno agi'a antemi'ne. <sup>17</sup> Moses'a Kenani mopa vu'za ome afure'za kehogu, agra anage huno huzmanteg'e'ne, Anagamu Negev mareriteta, anantetira agona moparega mareriho. <sup>18</sup> Mopamo'a inankna hu'nefi ome negeta, ana mopafima nemaniza vahera hanave vahipi hanavezamia omne'ne vahepi, osi'a mani'nafi, rama'a vahe mani'nafi ome keho. <sup>19</sup> Inankna hu'nea mopafi nemanizo, ana mopamo'a knare hu'nefi, haviza hu'nefi? Ranra kuma'zamimo'a inankna hu'ne, ruherafi'za kumara ante'za mani'nafi, hanave vihu kegina hu'nazafi keho? <sup>20</sup> Mopamo'a inankna hu'ne, masvema'anе mopafi hagege hu'ne? Anampina zafa me'nefi omene'ne? Ete eku'ma hanuta mago'a zafa raga eri'neta echo. Ana'ma huzmanteg'e'neana kreplimo ese agafa huno afure'nea knafi huzmanteg'e'za vu'naze. <sup>21</sup> Zini ka'ma hagege kokampi mareri'za ana mopa oku'a afu omere'za nege'za, Rehob vu'za Lebo-hamati kaziga uhanati'naze.

<sup>22</sup> Hagi Negevi mareri'za uhanatite'za, Anaki agehe'za Ahimanima, Sesai'ma, Talmai'zama hu'za, Hebron mani'nazare vu'naze. (Hebron kuma erifore hu'naza kna 7ni'a kafu agateretege'za, Zoan kumara Isipi'a erifore hu'naze). <sup>23</sup> Anantetira Eskol agupofi uhanati'za, anampinti krepimo mago azankunate manumanu huno te'nea akafri'za, zafare taremove zafa hutere nehu'za, mago'a pomigrenet ragane, fiki ragane eri'za e'naze. <sup>24</sup> Ana kokankura Eskol agupoe hu'za hu'naze. Na'ankure mago'pima (manu manuma huno zafa rgama re'nege'za Israeli vahe'mo'za akafri'za) eri'za e'nagu hu'naze.

### *Kenani mopa ome kerga hute'za ke eri'za e'naza naneke*

<sup>25</sup> Hagi 40'a zage gnamofo agu'afi mopa oku'a vano hu'za afure'za kete'za e'naze. <sup>26</sup> Mosesene, Aronine, maka'a Israeli vahe kevune Paran ka'ma hagege mopafi, Kades mani'nage'za, Kenani mopafima me'nege'za kete'za aza zamofo nanekea eme nezmasmi'za, ana mopafinti zafa ragama eri'za e'nazana eme zamaveri nehu'za, <sup>27</sup> amanage hu'za Mosesena asmi'naze, Hurantanketa vu'nona mopafina, tamage huno ami rine, tume rinena avite'ne. Hagi anampinti'ma zafa rgama erita e'nonana ama'ne. <sup>28</sup> Hianagi ana mopafina hanavenentake vahe manine'za, ranra kuma'zamirera tusinasi vihu hu'naze. Hagi anampina Anaki nezmagehoza mani'nageta zamage'none. <sup>29</sup> Ameleki vhahera Negev mopafi mani'naze, Hiti vahe'ene, Jebusi vahe'ene, Amori vahe'enena agona mopafi mani'naze. Hagi Kenani vhahera hageri ankenane, Jodani timofo ankenarega mani'za evu'naze. <sup>30</sup> Hagi Mosesen avuga, Kalepi'a otino amanage hu'ne, Kea tagane'neta antahihio, inazano fore hania zankura ontahita, otinketa marerita ana mopa omeri maneno. Na'ankure tagra hara huzmagatereta mopa erigahune. <sup>31</sup> Hianagi mago'a vahe'ma agrane vu'naza vahe'mo'za amanage hu'naze, tagra ana vhahera zamahega osu'none. Na'ankure hanavea zamimo'a tagri hanavea agatere'ne! <sup>32</sup> Ana mopa ome afure'za kete'za e'naza vahe'mo'za, koro nehu'za Israeli vhahera havige rezmatga hu'za anage hu'naze, anama ome ke'nona mopamo'a aza'o ana mopare umani'simofona aheno nehna hugahie. Hagi ana mika vahe'ma zamage'none vhahera tusinasi vahe mani'naze. <sup>33</sup> Ana mopafinke Nefilim vhahera nezmageta, Anaki vhahera, Nefilim vahe'mokizmi zamage-hezagita, tagrama zamagonana kenu kna tagra hu'none. Hagi zamagrama taga'zana ana zanke hu'none. \*

## 14

### *Israeli vahe'mo'za ke ruhantagi'naza naneke*

<sup>1</sup> Ana maka vahe kevu'moza ana nanekema antahite'za, Israeli vahe'mo'za ana kenagera tusi zavi ate'naze. <sup>2</sup> Israeli vahe'mo'za Mosesene, Aronikiznia keha' reznante'za maka vahe'mo'za anage huznante'naze, Tagra Isipima mani'neta frunte'sina knare hisine! Nahanigeta ama ka'ma hagege mopafina frigahune! <sup>3</sup> Ra Anumzamo'a ama moperera kazinknonu tahe frihogu tavreno e'nefi? A'nene, mofavretinena tahe'za hanaresagi, eteta Isipima vanunkeno'a knare hugahie? <sup>4</sup> Zamagra zamagra ke ohumi ahumi hu'za anage hu'naze, tagra'a tavesite mago kva ne' azeri otisunkeno, ete tavreno Isipi mopare vanie! <sup>5</sup> Anante Mosesen'ene Aronikea maka Israeli vahe'mokizmi zamufi zanavugosaregati mopafi mase'na'e. <sup>6</sup> Ana hakeno Nun nemofo Josua'ene, Jefune nemofo Kalepike, zanagra ana mopa vu'ne

\* <sup>13:33</sup> Nefilim hu'naza vahe'mofo agafa'a Jen-Agafa 6:2 kegahane.

ome ke'na'a netre'moke, kukenaznia vararo varuru nehu'ne, <sup>7</sup> amanage hu'ne maka Israeli vahe kevua zamasmi'na'e, Ana mopama ome ke'nona mopamo'a knare zantfa hu'ne. <sup>8</sup> Ra Anumzamo'ma muse (plis) hurantesuno'a, henka tagirira ana mopare tavreno vuno, ami rine tumemofo rimo'ene avite'nea mopa ome tamigahie. <sup>9</sup> Ra Anumzamofo kea magore huta ru ha'ontagihio. Ana mopafima nemaniza vaheku'enena korera osiho, zamagra tagri nezasegahaze. Zamagri'ma refiteno kegava krizmante'nea zana eri atregahie. Hagi Ra Anumzamo'a tagrane mani'neanki zamagrikura korera osiho, <sup>10</sup> Hianagi ana maka vahe'mo'za have kano eri'za zanahe fri'za nehazageno, anante Ra Anumzamofo msazamo seli mono nonte eramino Israeli vahe zamavuga efore hige'za ke'naze.

### *Mosese'a veamokizmigu asunku huno nunamu hu'nea naneke*

<sup>11</sup> Hagi Ra Anumzamo'a amanage huno Mosesena asmi'ne. Nama'a zupa ama vahe'mo'za Nagrira zamagena hunenam'i'za, zamesi nonantaze? Nenagage'nna maka kaguvaaza amu'no zamifi eri fore hu'noa zankura, Nagrikura zamentintia nosazo? <sup>12</sup> Nagra kri atrena zamahe fanane nehu'na, Mosesega naga ka'afinti kazeri ra ha'nena zamagatere'za hanave'nentake vaher fore hu'za, Israeli vahera zamagatere'za manigahaze. <sup>13</sup> Hu'neanagi Mosese'a ana kemofo nona'a Ra Anumzamofona amanage huno asmi'ne, ana kea Isipi vahe'mo'za antahigahaze, na'ankure Kagra hanavefi ama vahera, Isipi vahe amu'no zamifinti zamarenka e'nane. <sup>14</sup> Isipi Kenani mopafima nemaniza vahera zamasamigahaze. Kagrama Ra Anumzamoka ama vahe amuno zamifima nemaninana, zamagra hago antahi'naze. Kagra Ra Anumzamoka zamufinti negagazagenka Kagra hamponu refite nezman-tenka, Kagra Israeli vahe'mokizmi vugotezman-tenka vimago hampompi nevunka, zagefina refite nezman-tenka, hanimpina ana vimago hampomp-intira teve anefa hunka remsa huzmantenka nevane. <sup>15</sup> Menima Kagrama, magoke vahe aheaza hunkama ama vahe'zaga zamahe sanke'za, maka ama mopama megaginefinti Kagri kagenkema nentahi'za vahe'mo'za amanage hugahaze, <sup>16</sup> Ra Anumzamo huhampri zamanteno huvempa huzmante'nea mopare zamavareno vugara osuno, ka'ma mopafi zamahe fanane hie hu'za hugahaze. <sup>17</sup> Hianagi menina, nagra nunamu hue, Kagrama hunana kere, Ra Anumzamoka atregeno hihamu hanavekamo'a eama hino. <sup>18</sup> Ra Anumzamofo rimpa ahe'zamo'a ame huno oranotigeno, rimpa fru huno avesinte zamo'a mareri avitegeno, kumi'ene kefozantine eri atre'nerante. Hianagi az'a'o kasege'ama agatere'simofona, kumi'mofo nona'a nezmafan-teti vuno, nemofonte vuteno henkama fore'ma hu anante ananterma huno 3'o 4'a vahe'enema fore hu anante anante'ma hanaza vahete ana havizamo'a meno vugahie. <sup>19</sup> Kagra vagaore kavesizanka'agu nentahinka nunamu huanki kumi'zmi ama vahera atrezmanto. Ama vahe'ma Isipima mani'nagenka Kagrama kumizamima eri atrenka menima e'nana kna hunka eri atre zamanto.

### *Ra Anumzamo Israeli vahe kumi'zmi eri atre'zmanteno, zamazeri fatgo hu'nea naneke*

<sup>20</sup> Anage higeno Ra Anumzamo'a amanage huno Mosesena asmi'ne, Nagra kema nasm'i'na'na hu'na kumi'zmia eri atre zamantegahue. <sup>21</sup> Hianagi tamage hu'na Nagra kasefa hu'na mani'noa Anumzamo'na huankino, Ra Anumzamo'na hihamune, msazamo e'nena maka mopafi vuno eno huno avitegahie. <sup>22</sup> Tamage hu'za maka vahe'mo'za Nagri masane kaguvaazana

Isipine, ka'ma hagege mopafine eri fore huge'za nege'zagi, anazankura ontahi'za 10ni'a zupa Nagrira renahe'za nege'za, Nagri kemoftona amagera onte'naze. <sup>23</sup> Ana hu'nazagu tamage hu'za nezmafama huvempa hu'na Nagrani'a zami'noa mopa, namefiga'a ke nehzamo'za onke'tfa hugahaze. <sup>24</sup> Hianagi Nagri eri'za ne' Kalepi'a kegahie. Na'ankure agripina ruzahu avamu me'negeno maka agu'reti huno Nagrira maka zampina namage ante'negu ana mopare Nagra avre'na vanugeno, ana mopa agehe'za eri nafa'a hugahaze. <sup>25</sup> Menia Ameleki vahe'ene Kenani vahe'mo'za ana aguporamimpina mani'nazagu, okina rukre hunka ka'ma hagage mopafi ru kitaginka Koranke Hageri me'nerega vuo.

<sup>26</sup> Ra Anumzamo'a anage huno Mosesene, Aronikizni znasami'ne, <sup>27</sup> Nama'a zupa ama'i kumike vea kevumo'za, Nagri'ma huhaviza hunenantaza vahe'mokizmi knazana erigahue? Israeli vahe'mo'za Nagri'ma hunenantaza kea nentahue. <sup>28</sup> Menina zamasmio, tamage hu'na kasefa hu'na mani'noa Ra Anumzamo'na nehue, nagesa kami'nogenka hankena antahuankina inankna zanku'ma hana zana amne hugahue. <sup>29</sup> Kagrama hampri'nana vahe'ene, maka 20'a kafureti mareri anagate'nesia vahe'ene, Nagri'ma namefi'age hu'nesaza vahe'mo'za ka'ma hagege mopafi fregahaze. <sup>30</sup> Tamage huvempa hurmante'na tamagri tamamigahuema hu'noa mopafina ovugahaze. Hianagi Jefune nemofo Kalepi'eنه Nuni nemofo Josuake, zanagrake vugaha'e. <sup>31</sup> Hianagi tamagrama huta, mofavreti zamahe fanane hugahaze huta koro'ma hu'naza mopare, ana mofavremokizmi Nagra zamavare'na vanuge'za, i'oma hu'naza mopa ome erigahaze. <sup>32</sup> Hagi tamagra, ama ka'ma hagage mopafi frigahaze! <sup>33</sup> Hagi tamagrama Nagri kemofto amage onte'naza nona'a, mofavretmimo'za ama ka'ma hagage mopafi 40'a kafufina knazana eri'za vano nehu'za, anama maka'mo'za ama ka'ma hagage kokampi frigahaze. <sup>34</sup> Zamagrama ana mopafi 40'a zagegnafi vano nehu'za oku'a afure'za kenazankna huta, kumi'tmimofo nona mago mago knamo'a mago mago kafu huvame hanigeta, 40'a kafufi knazana erita vano hugahaze. Nagrama hurmantesua navu'navara kegahaze. <sup>35</sup> Nagra Ra Anumzamo'na kea nehue, kumike vahe'mo'za atru hu'za Nagri'ma hu haviza nehzana tamage hu'na kna zamigahue. Ama ka'ma hagage mopafi zamazeri haviza ha'nena fri hana hugahaze. <sup>36</sup> Mosese'ma huzmanteg'e za oku'a vu'za mopa ome afure'za kete'za e'naza vahe'mo'za maka vahe kevu havige eme zamasm'i'ne. <sup>37</sup> Hagi mopa afureho huno huzmanteg'e za vute'za, ete eza havige eme hu'naza vahera, Ra Anumzamo'a kri atregeno zamahe fri'ne. <sup>38</sup> Hianagi huzamanteg'e za vuza mopama ome afure'za ome kete'za e'naza nagapintira, Nun nemofo Josuane, Jefune nemofo Kalepikizni znatregke zanagrake mani'na'e.

### *Israeli vahe zamahe'za zamarotgo hu'naze*

<sup>39</sup> Mosese'ma ana kema Israeli vahe'ma nezmasmige'za, vahe kevumo'za tusiza hu'za zavira nete'za zamasunku hu'naze. <sup>40</sup> Hianagi ame' nanter-ampi oti'za mika'zazimia tro hu'za agonarega mareri'za nevu'za anage hu'naze, Tagra ama one, tamage kumi' hu'nonanagi, Ra Anumzamo'ma huhampri tante'nea moparega vugahune. <sup>41</sup> Hagi Mosese'a amanage huno zamasm'i'ne, Tamagri antahizamo'a eri'zana e'origahie. Tamagra Ra Anumzamofo ke ruha'nentagize. <sup>42</sup> Anantega Anumzamo'a tamagranena ovanigeno ha' vahetamimo'za tamahegahazanki tamagra mareorigahaze.

**43** Tamagri ha' vahe'mo'za Ameleki vahe'ene Kenani vahe'mo'zatamavuga mani'nazeanki'za kazinknonteti tamahegahaze. Hagi Ra Anumzamofo ke'a tamefi hunte'naza nona'a, Ra Anumzamo'a tamagra'nena ovugahie.

**44** Hianagi mago'a Israeli vahe'mo'za Mosesea kea eri amne nehu'za, ag-onarega mareri'za vu'naze. Ra Anumzamofo huhagerafi hvempage vogisimo'a anampi me'negeno, Mosese'enena kumara atreno ovu'n'e.

**45** Hagi Ameleki vahe'ene Kenani vahe'ma ana agona mopafi nemaniza vahe'mo'za erami'za zamahe'za zamarotgo hazage'za fre'za Homa kumate ehanati'naze.

## 15

### *Ofama hanaza zamofo naneke*

**1** Ra Anumzamo'a amanage huno Mosesena asmi'n'e, **2** Israeli vahera zasmig'e'za taminaku'ma nehua mopafima umanisu'za avaririsaza kasegea ama'ne. **3** Hagi tamagratami tamavesite kresramna vu ofa hugahaze, hvempa hunesare hu ofo, ranra knare'ma hu ofa hanazana, tamagra'a afu kevufinti bulimakaone, sipisipine, memene aheta kresramna tevefima nevazage'nama mna'ama nentahina Ra Anumzamo'na musema nehua ofa hugahaze. **4** Hagi mago'mo'ma sipisipio memema ofama erinoma Ra Anumzamo'narema esuno'a mago kilo hu'nesia witia 1lita olivi masavene eri havia huno herunesia witi ofama hu'zana erino egahie. **5** Hagi kresramna vu ofama hanazana, mago sipisipine 1lita wainine kresramna vugahaze. **6** Hagi ve sipisipima kresramna vunaku'ma hanuta, 2kilo hu'nesia witine 1litagi hafu'a lita olive masavene herugahaze. **7** Hagi waini ofama hanuta, 1litagi hafu'a lita waininu sipisipinenofahanage'na mna'ama nentahina musena hugahue. **8** Hagi agaho bulimakaoma aheta kre fanenema hu ofama hunakuma hanuto, hvempama hunesarema ofama hunaku'ma hanuto, rimpafru ofama hunaku'ma hanuta, **9** witia 3'a kilo hu'nesia herafinteta, 2'a lita hu'nesia olivi masavene herugahaze. **10** Hagi 2 lita waini enerita mago ve bulimakaone erita echo. Nagra Ra Anumzamo'na e'ina hu ofamofo mna'ama nentahina musena hugahue. **11** E'ina huta witima, olivi masavema, waini ofanena mago'mago ve bulimakaone, ve sipisipine, sipisipi anenta'ene meme anenta'ene ofa Nagritega hugahaze. **12** Hagi e'inahukna huta maka ofa hugahaze. **13** Maka Israeli vahepima kasezmantesaza vahe'mo'za kresramna vanage'na mana'ama nentahina musema hanua ofama hanuza anahukna hugahaze. **14** Hagi tamagranema emani'naza vahe'mo'za kremna vanagena mna'ama nentahina musema hanua ofama hanuza, ana zanke' hu'za ama kasegea avaririho. **15** Hagi magoke tra ke me'nena rurega vahe'ene Israeli vahe'motanena avaririgahaze. Ama'i ana tra kemo'a mevava huno vugahie. Na'ankure Nagra Ra Anumzamo'na Israeli vahe'ma tamagoana magoke avamenteke vahe mani'naze. **16** Hagi ama magoke tra ke me'nena rurega vahe'ma tamagranema emani'nenzaza vahe'mo'za avaririgahaze. **17** Ra Anumzamo'a anage huno Mosesena asami'n'e, **18** ama nanekea Israeli vahera zamasamio, nagrama taminaku'ma nehua mopafima uhanatita, **19** mopafima hozama ome antesageno ne'zamo'ma nenama hina, ese ne'zana refko huta ofa eme namiho. **20** Hagi witi hozama antesageno ese'ma nenama hania witia erita witima refuzafunepaza kumapi ome refuzafupeteta, kekia kreta eme namiho. **21** Hagi henkama fore hu anante anantema hu'za vanaza vahe'mo'za, ama ana tra ke avariri'za bretia kre'za

ofa hugahaze. <sup>22</sup> Hagi Ra Anumzamo'nama Mosesema asami'noa tra kema mago vahe'mo'ma mago'azama hanirega hantga huno runetragenigeno, <sup>23</sup> henkama fore hu anante anantema hanaza vahe'mo'za Ra Anumzamo'na Mosesesema asami'noa tra kema mago'a zama haniregama hantga huno runetragenigeno, <sup>24</sup> ana mikamotama mago'azama hanaregama hantga huta tra ke'nima ruhantagisuta, mago ve bulimakao afu kre fanene hu ofa nehinkena mna'a nentahina musena haneno. Hagi ana ofama hanazana witine, wainine nehuta mago ve memena aheta kumima apasente ofa kresramna yugahaze. <sup>25</sup> Hagi pristi vahe'mo ama ana ofa nehanige'na, Israeli vahe'mokizmi kumizmia apasenezmantena kumizmia atrezmantegahue. Na'ankure zamagra kumi hugahune hu'za ontahi'neza hu'naza kumite Ra Anumzamonare'ma eme hanaza ofa hugahaze. <sup>26</sup> Ana hanagena mika Israeli vahe'ene ruregati tamagranema enemaniza vahe'mofo kumi'zmima apasezamantenu'a ofa hugahaze. <sup>27</sup> Hagi mago'moma kumi hugahuema huno ontahineno mago'azama hanirega hantaga huno'ma hania kumitera, magoke ve meme anenta aheta kresramna vanageno, <sup>28</sup> pristi ne'mo'a kumi'ma hu'nesia nemofonteku huno krenkena, kumi'a apasentegahue. <sup>29</sup> Hagi ama'i tra kea maka Israeli vahe'motane rurega vahe'ma tamagranema enemaniza vahemo'zanena avaririgahaze. <sup>30</sup> Hagi Israeli vahe'mo'o, rurega vahe'ma tamagranema emani'enaza vahe'mo'za kumi'ma hanamo'za, Anumzamofo huhavat hunteankna hugahazanki'za, Israeli vahepintira zamahe'natregahaze. <sup>31</sup> Na'ankure anamo'a amefi humamino agra'a avesite tra keni'a rufutagi'ne. Ana hu'negu Sabati tra ke rufutaginea kumimo'a agrite meghianki, anamofona ahe frigahaze.

### *Sabati manifru hu knare teveza hu'nea ne'a he fri'naza naneke*

<sup>32</sup> Israeli vahe'mo'za mago Sabati knarera ka'ma hagege kokampi mani'nazageno mago ne'mo'a teve'za nehige'za ke'naze. <sup>33</sup> Ana nera azeri'za Mosesene Aronikiznire'ene mika Israeli vahete vu'naze. <sup>34</sup> Hagi ana ne'mofona nankna hazenke amigahaze ontahinazanki'za ana nera atrageno ovu'neanki kina huntazageno man'ine. <sup>35</sup> Hagi Ra Anumzamo'a amanage huno Mosesena asmi'ne, mika veara zamasmige'za kuma'mofona fegi'a avre'za vu'za have knonu ome ahe friho. <sup>36</sup> Ra Anumzamo'ma Mosesema asmia kante ante'za, ana nera avare'za seli no kumofona fegia vu'za haveknonu ome ahe fri'naze. Nofima kukenarema renentaza kasege.

### *Kukena zimirenofima rente'naza naneke*

<sup>37</sup> Ra Anumzamo'a Mosesena amanage huno' asmi'ne, <sup>38</sup> Israeli vahera zamasmige'za kenazmimofo agenteganofira rente'za eviho. Hagi kukenamofo agentega haninke nofi rente'za evugahazanki anazana mika knafima henkama fore hu anante anante'ma hu'za vanaza vahe'mo'za kukenazmimofo atuparega rente'za evugahaze. <sup>39</sup> Hagi ana nofi'ma negesuta Ra Anumzamo'nama tami'noa mika kasegegu tamagesa antahita nevaririta, tamagra'a tamavesizana avaririta havi tamavutamavara osugahaze. <sup>40</sup> Hagi ana nofi'ma negesageno huramagesa nehina kasege'ni'ane naneke'ni'anena avaririta mani ruotge huta manigahaze. <sup>41</sup> Nagra Ra Anumzamo'nama Isipiti'ma tamavre'na e'noana, tamagri Anumza maniku tamavre'na e'noa Anumza mani'noe.

<sup>1</sup> Kora'a Iza nemofokino Kohati negeho, Livae naganofipinti neki Datan'iene Abiramukea Eliabu nemofokegi Pereti nemofo Oni Rubeni nagapinti neki hu'za eri mago hu'za antahintahia retro hu'naze. <sup>2</sup> Hagi ana venenemo'za 250'a Israeli kva vahe'mo'zane eri mago hu'za Mosesena hararente'naze. <sup>3</sup> Hagi ana vahe'mo'za emeri atru hu'za Mosesene Aronikiznia keha'reznante'za anage hu'naze, Tanagrakera ugagota vahera omani'na'e. Hagi miko vahe'mo'za ruotage hu'naze. Hu'neankino Ra Anumzamo'a tagrane mani'ne. Tanagra hago havifi tavreta vu'na'e. <sup>4</sup> Mose'se'ma ananke nentahino'a avugosaregati mopafi umase'n. <sup>5</sup> Ananter Korane mika agri'enema emehageraf'naza naga'mokizmia Mose'se'a zamasamino, Oki nanterana Ra Anumzamo'a iza Agri nagara mani'neno, ruotagera hu'nefi tamaveri hanigeta keta antahita hugahaze. Hagi Ra Anumzamo'ma huhampri zamantesimo'za Agri tavaonte ruotage'ma hu'nefina urava'o hugahaze. <sup>6</sup> Koraga, kagrane kagri kamagema nentaza vahe'enena Mananentake paura kremna nevaza taferora retro hiho. <sup>7</sup> Hagi okina tevea hugreta mnanentake'zana Ra Anumzamofo avuga krenkeno, Ra Anumzamo'ma huhampri zamante'nea vahe'mo'za, ruotage hu'za agru hugahazanki, tamagra Livae nagamota havi avu'avara huta havifi vu'naze! <sup>8</sup> Mose'se'a Korankura anage hu'ne, Livae naganofira antahiho, <sup>9</sup> Israeli vahe Anumzamo'ma Israeli naganofipinti tamagrira refako huno huhampiramantergeta, Ra Anumzamofo Seli mono nompima eri'zama'a enerita, Israeli vahe zamavugama eri'zama eneri'za zamo'a knarerera huoramanteneo? <sup>10</sup> Koragane maka kafuhe'za Livae nagamota Israeli vahepinti'ma tamazeri ruotage huno'ma Agra'a tavaonte'ma tamavrente'nea zankura ontahita, tamagra nahigeta pristi eri'zanena erinakura nehaze? <sup>11</sup> E'ina hu'negu kagrane kamage'ma ante'naza naga'enena eritru'ma hazana Ra Anumzamofo ha'renentaze. Hianagi Aroni'a iza mani'negeta kehakerea hunentaze? <sup>12</sup> Anante Mose'se'a Eliabu nemofozni Datanine Abiramunena e'ogu ke hianagi zanagra omegahu'e nehuke, <sup>13</sup> tumerimo'ene amirimo'ma avimate'nea mopafinti'ma tavrefegi atrenka e'nanana, ka'ma kopi frisunegu anara hu'nano? Hagi kagra ranti mani'enka, kva hurante'za nehano? <sup>14</sup> Hagi kagra tamage hunkatumerine amirimo'ma avimate'nea mopafina tavrenka omenka, erisantihare'saza zane hunka mopane waini hozanena huorante'nane. Kagra ama vahera rezamatga hu'za nehampi? I'o, tagra kagranena omegahune. <sup>15</sup> Anage'ma hazageno'a Mose'sena tusi'a asivazigeno amanage huno Ra Anumzamofona asmi'ne, Ofama hanazana antahi ozamio. Hagi magore hu'na donki afura zamagripintira e'ori'noe. Nagra mago vahera havizana huozmantehoe. <sup>16</sup> Anante Mose'se'a Korana anage huno asami'ne, kagri'ma kavaririza naga'en, Aroni'enena okina Ra Anumzamofo avuga eme atru hiho. Kagrane maka ana vahe'ene Aroni'enana eme atru hiho. <sup>17</sup> Hagi mago magomota mananentake paurane erineta anampina mnanentake'za insensia eri havia huta erita Ra Anumzamofo avuga eho. Hagi mika 250'a mananentake paura kre manavu taferotamia erineta Aroni'enena magoka Ra Anumzamofo avuga erita egahaze. <sup>18</sup> Anage'ma hutege'za nanterana mago mago'mo'a mananentake paura kre mnauvuza taferopi teve taginte'za paura kre mna vu'za, eri'za seli mono nompima ufre kafante Mose'se'ene Aroni'ene oti'za mani'naze. <sup>19</sup> Hagi Kora'a agri'ma amage'ma antage'za Mose'sene Aroninema ha'ma rezmante'naza vahera atruhu seli mono nomofo kafante zamazeri atru higeno, Ra Anumzamofo

hihamu masa'amo'a ana miko Israeli vahetera efore hu'ne. <sup>20</sup> Anante Ra Anumzamo'a Mosesene Aronikiznia anage huno znasami'ne, <sup>21</sup> Hagi amama atruma hu'naza vahepintira tanagra ame huta maniganeta vike'na, zamahe fanane huvagararaneno. <sup>22</sup> Anage hu'neanagi Moses'e'ne Aronikea zanavugosaregati mopafi maseke nunamu huke anage hu'nae'. Anumzana miko vahe'mokizmi zamasimu'ma nezamina Anumzamoka, magoke ne'mo'ma hu'nenia kumitera miko vahe'mokizmia karimpa ahezmanategahano? <sup>23</sup> Anante Ra Anumzamo'a Mosesena anage huno asami'ne, <sup>24</sup> Mika'a vahera zmasmige'za Korama, Tatanima, Abiramukizmi seli no tava'ontetira maniganeho. <sup>25</sup> Anante Mosese'a otino Datanine Abiramu kizanirega nevige'za, Israeli kva vahe'mo'za avariri'za vu'naze. <sup>26</sup> Hagi Mosese'a miko vahera anage huno zamasami'ne, ama kumike vahe'mokizmi seli nozmimofo tava'ontetira atreta ogantu vuta eta nehuta, mago'a zazmirera avakora osiho. Hagi ana kema ontahita avako'ma hanazana zamagri kumimofo knaza erita frigahaze. <sup>27</sup> Anage hige'za Korama, Datanima, Abiramukizmi seli mono nomofo tava'ontetira atre'za ogantu mani'naze. Higeke Datani'ene Abiramukea seli nozanimofo kahante mika a'mofavre'znine oti'za mani'naze. <sup>28</sup> Anante Mosese'a amanage huno zamasami'ne, Amanahukna zama fore'ma hanigeta negesus Ra Anumzamo' huntengenoma eri'zana e'herie huta hugahaze. Na'ankure nagra'a navesi zanterama ana eri'zana e'norue. <sup>29</sup> Hagi zamagra vahe'mo'zama nehzaza hu'za frige, knazama e'orisageta, nagrikura Ra Anumzamo'a eri'zama'a erinogura huhampri onte'ne huta hugahaze. <sup>30</sup> Hianagi Ra Anumzamo'a ruzahuma huno zamahe frisiana, mopamo'a ru aka huno maka zazimine zamasagahu vazisige'za, zamavu agama fri vahe kumapima uramisageta, tamagra antahi ama'ma hanazana ama vahe'mo'za Ra Anumzamofo kefenkami atre'naze huta hugahaze. <sup>31</sup> Hagi anankema huvama neregeno amehuno anama oti'naza mopamo'a hagro huno keriga efore hu'ne. <sup>32</sup> Hagi anama oti'naza mopamo'a ru'aka huno mika Korane agranema hagerafi'naza naga'ene a'mofavrezmine, makaza zaminena zamasaga huvazi'ne. <sup>33</sup> Hagi zamavuaga mani'nageno mopamo'a zamasaga huvazino, maka'zazmine refite'zamantge'za mopafi fanane hazage'za Israeli vahe'mo'za ozamage'naze. <sup>34</sup> Hagi miko manigagi'naza Israeli vahe'mo'za mopafima urami'za vahe'mokizmi zavi krafa nentahiza, mopamo'a tasaga huvazi zankure nehu'za koro fre'naze. <sup>35</sup> Hagi Ra Anumzamo' tevea atregeno hagana hagana huno eramino mika 250'a vahe'ma manantake paurama kre'za ofa nehaza vahera terasage vagare'ne. <sup>36</sup> Ra Anumzamo'a Mosesena anage huno asami'ne, <sup>37</sup> Pristi ne' Aroni nemofo Eliazana asamigeno manantake zama negraza taferote'ma tevema nereana hampageno. Na'ankure e'i ruotage hu'neanki eri ruotage nehuno, tevema nerea tankanuzanena eri faka hino. <sup>38</sup> Kumizmimofo nona'ama fri'za vahe'mo'zama manantake paurama kremnamavaza taferozamia, erino hamanteti arukuta huteno, kresramna vu ita refitente'za tro hino. Na'ankure Ra Anumzamofo amizageno anazamo'a ruotage huno me'neanki'za Israeli vahe'mo'za nege'za koro hugahaze. <sup>39</sup> Higeno pristi ne' Eleasa'a tevemo'ma zamahe fananema hia vahe'mokizmi 250'a manantake paurama kre manavu bronsire tafero zamia erino, ruguta huno kresramna vu itama refite'za tro hu'ne. <sup>40</sup> Ra Anumzamo'ma Mosesema asami'nea kante anteno, anazamo'a mago avame'za me'nena Israeli vahe'mo'za nege'za, Aroni nagamoke manantake paurana

kremania vugahazanki, Kora'ene naga'amo'zama hu'nazaza huta rumota ke rutagreta anara osugahune hu'za antahigahaze.

### *Israeli vahe'mo'za ke ruhantagi'naza naneke*

<sup>41</sup> Hianagi anante knazupa Mosesene Aronikiznia Israeli vahe'mo'za ke hakare huznante'za, Tanagra Ra Anumzamofo vahe zamahe frie. <sup>42</sup> Hagi mika vahe'mo'zama atru hu'za Mosesene Aronikiznima ke ha'ma hunezanante'za rukrahe hu'za kazageno, hampomo'a atruhu seli nona refitegeno Ra Anumzamofo masamo efore hu'ne. <sup>43</sup> Anante Moses'e'ene Aroni'enena atruhu seli nomofo kafantega vuke ome oti'hakeno, <sup>44</sup> Ra Anumzamo'a Mosesena anage huno asami'ne, <sup>45</sup> ama vahepintira maniganeke'na ame hu'na miko zamahe fanane huvagara'neno. Anage higeke Moses'e'ene Aroni'enena zanavugosaregati mopafi mase'na'e. <sup>46</sup> Anante Moses'e'ene Aronina asmino, mananentakezama kre taferoka'a erinka antuma atruma hu'za mani'naza vahepi vunka, zamagri kumitera nona hunka mananentake paurana kremania vuo. Na'ankure Ra Anumzamofo rim-pahe'zamo'a ama agafa higeno hazenkezamo'a agafa nehie. <sup>47</sup> Higeno Moses'e'ma asamiaza huno Aroni'a agareno ana vahe amunompi vu'ne. Hianagi ko zamazeri havizahu knazamo'a agafa huno ana vahepina efore hu'negeno ome negeno, mananentake paurana Ra Anumzamofontega kremna vunenteno, ama vahe'mokizmi kumira atrezamanto huno hu'ne. <sup>48</sup> Hagi Aroni'a fri'naza vahe'ene ofri'ma amnema mani'naza vahe'mokizmi amu'nompi' kremna vu paurana azerineno ome otigeno ana knazamo'a ame huno vagare'ne <sup>49</sup> Hianagi Kora'ene amage'ma ante'naza vahe'ma fri'nare ete mago'ane Israeli vhahera 14 tausen, 700'a vahe ana knazamo'a zamahe fri'ne. <sup>50</sup> Hagi ana knazamo'ma vagamaregeno'a, Aroni'a ete Moses'e'ma atruhu seli mono nomofo kafante'ma mani'nerega vu'ne.

## 17

### *Aroni azompare amosre ahente'nea naneke*

<sup>1</sup> Hagi Ra Anumzamo'a Mosesena anage huno asami'ne, <sup>2</sup> Israeli vhahera zamasamige'za mago'mago naga nofimo'fonte kva vahe'mokizmi azompa zamente zamente 12fu'a eri'za eme kaminagenka, zamagi'a krentetere ana azomparera nehunka, <sup>3</sup> Livae naga'mokizmi azomparera Aroni agi krento. Na'ankure mago'mago naga'nofitema ugota hu'naza vahe'mokizmi azomparera zamagia krentegahane. <sup>4</sup> Hagi mika ana azomparamina erinka atrumahu seli mono nompima huhagerafi huvempage vogisimofo avuga keagama nehute eme anto. <sup>5</sup> Hagi Nagrama huhamprintesugenro pristi eri'zama erisia ne'mofo azomparera agata hagegahie. Hagi ana zama fore'ma haniretira mago'ene Israeli vahe'mo'zama ke hakar'ma hugantesazana keznnia ontahigahue. <sup>6</sup> Anage higeno Moses'e'na miko Israeli vhahera 2fu'a naga nofi'mokizmia zamasamige'za mago'mago naga nofimo'za vugotama huzmante'nemofo azompa eme nemiza, Aroni azompanena anampi eri'za eme ami'naze. <sup>7</sup> Moses'e'na mika ana azomparamina erino atruhu seli mono nompri Ra Anumzamofo avugama ome ante'ne. <sup>8</sup> Hagi anante knazupa Moses'e'na atruma hu seli mono nompima vuno ome keana, Livae nagapinti ne' Aroni azumparera agata hageno amosare'a ahenteno, almoni zafa raga rente'no uzate'ne. <sup>9</sup> Moses'e'na Ra Anumzamofo avugatira ana azomparamina erino atiramino Israeli vhahete vige'za, anampinti ke'za zamagra'a azompare eritere hu'naze. <sup>10</sup> Hianagi Ra Anumzamo'a Mosesena anage

huno asmi'ne, Aroni azompa ete erinka huhagerafi huvempage vogisimofo avuga ome ante'negeno, ana azompamo'a avame'za me'nena Nagri'ma ke hakarema hunenantaza zana vagarenke'za, ofri maniho. <sup>11</sup> Higeno Mosese'a Ra Anumzamo'ma huoma huno asmi'nea zana amage anteno hu'ne. <sup>12</sup> Hagi Israeli vahe'mo'za Mosesena asami'za, mika vahe'mota frita fanane hu vagaregahune! <sup>13</sup> Hagi Ra Anumzamofo seli nomofo tava'onte'ma vanuta, tagra mika vahe'mota frita haviza hugahune.

## 18

### *Livae naga'mozama eri'zama erisaza zamofo naneke*

<sup>1</sup> Anante Ra Anumzamo'a amanage huno Aronina asmi'ne, Kagrane Li-vae naga'mo'zane mofavre nagakamo'zanema ruotage'ma hu'nea seli mono noni'afima pristi eri'zama eriso'ema osnazana, kna'a tamagra'a erigahaze. <sup>2</sup> Hagi tamafuhe'i Livae nagara zamavareta enke'za, tamagrane erimago hu'za tamaza hanageta seli mono nomofo avuga eri'zana eriho. <sup>3</sup> Hagi zamagra maka tamagrama zamisaza eri'za e'neri'za, seli mono nomofo eri'zana eriho. Hianagi ruotage'ma hu'nea zantaminte'ene, kresramna vu itarera erava'o osiho. Hagi erava'oma hanazana tamagrane, zmagrana frigahaze. <sup>4</sup> Livae vahe'mo'zage seli mono nompina eri'zana tamaza hu'za eriho. Hianagi ru vahe'mo'za erava'o osuge, eri'zana tamaza hu'za e'origahaze. <sup>5</sup> Hagi kagrake seli mono nompi eri'zane, kresramna vu itare'enena eri'zana erigahane. E'inahukna hanankeno Ra Anumzamo'a Israeli vahe'mota arimpa aheoramantegahie. <sup>6</sup> Hagi ko, Nagra'a Israeli vahep-intira Livae nagara zamavare'na mago museza zamiazza hu'na negamina, zamazeri ruotage huge'za seli mono nompina eri'zana e'nerize. <sup>7</sup> Hianagi kagrane mofavreka'aramine pristi eri'zane, kresramna vu itare'ene, hunagru'ma hu'nefinka eri'zana erigahaze. Hagi muse'za tamiankna hu'na pristi eri'zana tami'noanki, ru vahe'mo'zama seli mono nomofo tavaonte'ma erava'oma hanazana zamahe friho.

### *Pristi vahe'mo'zama zamagra'a suzama erisaza zamofo naneke*

<sup>8</sup> Anante Ra Anumzamo'a anage huno mago'ane Aronina asmi'ne, Veamo'zama ofama eri'za esaza ofaramina kegavama hu eri'zana, kagri kammaunkinka ruotage'ma hu'nea ofama Israeli vahe'mo'za eri'za esazana kagri'ene mofavre zagaka'ane tamamuankita anampintira tamagra'a suzana maka kna erigahaze. <sup>9</sup> Ama'i ruotage'ma hu'nea ofama tevefima negrenka atresanama'ane, muse ofane, witi ofane, kumizmire'ma hu ofane, hazenk'e'ma hu'nesaza zante'ma hu ofama eri'za eme namisazana, ruotage hu'neakino kagri'ene mofavre nagakamofo su'a megahie. <sup>10</sup> E'i ruotage hu'nea ofagita kagrane, ne' mofavre nagakamo'zane ruotage hu'ne hutma nentahita negahaze. <sup>11</sup> Hagi eri verave hu ofama Israeli vahe'mo'zama eri'zama esaza ofa kagri'ene ne'mofaka'ane miko nagaka'ane zamue. Hagi ana ne'zana, Nagri navure'ma agruma hu'nesaza nagakamo'zage negahaze. <sup>12</sup> Hagi maka knare'ma hu'nea olivi masavene, knare'ma hu'nea wainine, knare'ma hu'nea witine, ese ne'zama hamare'za Ra Anumzamo'na eme namisazana, kagri kamue. <sup>13</sup> Hagi ese ne'zama afumaresige'za eri'za esazana, agruma hu'nesaza nagaka'amozae negahaze. <sup>14</sup> Maka'zama Ra Anumzamo'nama nami'nesaza zana, amne kagra erigahane. <sup>15</sup> Hagi ese mofavre'ma Israeli vahe'mozo, zagagafamo'zama kasentesage'za, Ra Anumzamonare ofa eme namisazana kagri'za megahie. Hagi Israeli vahe'mo'zane

zmagonesa mofavrene, agruma osu'nesia zagagafarera nona hu'za miza-seza avreho. <sup>16</sup> Hagi Israeli vahe'mo'za mago ikama hu'nesia agonesa mofavrere'ma ete mizase'za zamavaresaza mizana, seli mono nompi zago-mofo avamente erinte'za 5fu'a silva zagoa mizasegahaze. <sup>17</sup> Hianagi bulimakao'o, sipisipio meme afumo'zama ese kasezmantesa anentara, ruotage hu'nankindo ete Israeli vahe'mo'za mizana osegahaze. Hagi kagra kresramna vu itare korazmia taginka ru tritri nehunka, afova'a tevefi kregeno, sramnamo'a kumpi marerinke'na Ra Anumzamo'na mna'a nentahina musena haneno. <sup>18</sup> Hagi ana ofama hu afumofo ame'a tamagri suza mesigeno, eri verave hu ofama nehaza ahihiza'ane, tamaga kaziga amo'anena tamagri su'za megahie. <sup>19</sup> Hagi meninteti'ma agafama huno'ma vaniana, Israeli vahe'mo'zama Ra Anumzamo'nare'ma eri'za esaza ofamo'a tamagri'ene, ne'mofatamimofo suza mevava hugahie. Hagi ama ana zamo'a mevava huhagerafi huvempage Nagrite'ene henkama tamagripinti fore'ma hanaza vahetera meno vugahie. <sup>20</sup> Hagi Ra Anumzamo'a Aronina amanage huno asami'ne, Israeli mopafina tamagra mago mopa erinafa'a osugahaze. Tamagrama eri santima hare'nazazana Nagrake'za manigahue.

<sup>21</sup> Hagi Livae naga'nofimo'za atruma hu seli mono nompima eri'zama erisa mizana, Israeli vahe'mo'zama 10ni'a kevu ante'nenafinti mago kevuma namisaza zantaminteti, ana eri'zama erisarerera erisantima hare'saza zana zamigahue. <sup>22</sup> Hagi meninteti'ma agafama huno vaniana Israeli vahepinti'ma Livae naga'ma omaningesimo'a, atruma hu seli mono non-terra uravaoa osino. Hagi urava'o'ma hanimo'a kumi hugahiankino, ana nona'a frigahie. <sup>23</sup> Hagi Livae naga'mozage atruma hu seli mono nompina vahe kumima apasezmante eri'zana erigahaze. Hagi ama tra kemo'a mevava hugahianki'za, henkama fore'ma hanaza vahe'mo'za amage antegahaze. Hagi Israeli mopafina Livae vahe'mokizmia mopazamia omanegahie. <sup>24</sup> Na'ankure Israeli vahe'mo'za 10ni'a kevu antenenafinti mago kevuma ofama Ra Anumzamo'na namisaza zantamina erisante'maharesaza zana zamigahue. Hagi e'i ana agafare Israeli vahepina, Livae naga'mozama erisantima haresaza mopa omanegahie.

### *Livae naga'mo'za Ra Anumzamofo amisaza zamofo naneke*

<sup>25</sup> Ra Anumzamo'a Mosesena amanage huno asami'ne, <sup>26</sup> Kagra Livae nagara ke hunka zamasamige'za Israeli vahe'mo'zama 10ni'a kevu ante'nenafinti mago kevuma eri'za emema namisafintira eri'na tamagrira tamigahuanki, anampintira ete hamprinkeno 10nima hania kevua namigahaze. <sup>27</sup> Hagi ana ofama hanage'na, Ra Anumzamo'na nege'na, hoza tamifinti ese witi hamareta ofa haze nehu'na, wainima regatitima nehzafinti ese waini ofa nehzaze hu'na hugahue. <sup>28</sup> E'inahu kante Israeli vahe'mo'zama 10ni'a kevuma ante'nafinti mago kevuma eme tami'nazana refko huta Ra Anumzamo'na ofa hunantegahaze. Hagi ana ofama Ra Anumzamo'nama namisazana pristi ne' Aroni erigahie. <sup>29</sup> Hagi maka musezama taminafintira knare'zantfama hu'nesiam'a Ra Anumzamo'na namigahaze. <sup>30</sup> Ana hu'negu Livae nagara zamasamio, anama knare'ma hu'neama'ama ofama hanage'na, Ra Anumzamo'na nege'na, hoza tamifinti witi hamareta ofa haze nehu'na, wainima regatiti'ma nehzafinti waini ofa nehzaze hu'na hugahie. <sup>31</sup> Hagi Livae naga'mota seli mono nompi eri'zama e'neriza zamofo mizama'agita, a'mofavre taminena inantegama ana ne'zama nenaku'ma hanarega amne negahaze. <sup>32</sup> Hagi knare'ma hu'nesia ne'zama ofama hanuta, kumira osugahaze. Hianagi Israeli vahe'mo'zama eme tamisaza

ruotage ne'zama amnezane huta eri havizama hanuta, haviza hugahazankita knazama'a tamagra'a erita frigahaze.

## 19

### *Kumi'ma apase zamofo naneke*

<sup>1</sup> Ra Anumzamo'a Mosesene Aroninena anage huno zanasami'ne,  
<sup>2</sup> Ama'na trakea Israeli vahera zamasaminke'za korankre agaho bulimakaomofo foma afuhe'afehe osu'enigeno, agumpina agare namare zafa reonte'nenaza su'za avre'za eho. <sup>3</sup> Hagi ana agaho bulimakaona pristi eri'za ne' Eliesa eme amisageno, mago'a vahe'mo'za avre'za kumamofo fegi'a vu'za, agri avuga anankena akafrigahaze. <sup>4</sup> Hagi pristi ne' Eliesa'a ana bulimakaomofo korampi azankoretano, atruma hu seli mono noma me'nerega 7ni'a zupa rutritirira hugahie. <sup>5</sup> Hagi ana bulimakaomofo akruagi, ame'agi, korama'agi, rimp'a'anena rifa'aga tevefi kregahaze. <sup>6</sup> Hagi ana pristi ne'mo'a, sida zafagi, hisopu zafamofo azankunaki, korankre nofi'ene erino, ana tevema nerea amu'nompi kregahie. <sup>7</sup> Hagi ana pristi ne'mo'a kukena'a sese nehuno, tina fregahie. Ana'ma hutesuno'a kumapina efregahianagi, Nagri navurera agrua osu mani'enigeno vuno kinagasegahie. <sup>8</sup> Hagi ana bulimakaoma tevefima krenia ne'mo'enena kukena'a sese nehuno, tina fregahie. Hianagi Nagri navurera agrua osu mani'enigeno vuno kinagasegahie. <sup>9</sup> Hagi Nagri navure'ma agruma hu'nenia ne'mo ana bulimakaomofo tanefara erino, kumamofo fegia agruma hu'nefina ome antegahie. Hagi Israeli vahe'mo'za ana tanefara tima fre'za zamazeri agruma hanaza timpima atrenagu erintesageno megahie. E'inahu hanageno kumizmia eritre zmantegahie. <sup>10</sup> Hagi ana ta'nefa'ma kateno omema atrenia ne'mo'a agru osugahiankino kukena'a sese nehuno, mani'enkeno vuno kinagasegahie. Hagi ama'i mevava kasege Israeli vahete'ene emanı vahete'enena megahie.

### *Fri'nia zama avako'ma huteno azeri agruma hania zamofo naneke*

<sup>11</sup> Hagi iza'o fri vahe avuvgare'ma avako'ma hanimo'a, agra'a azeri pehana hu'neakino, 7ni'a zageknafi agru osuno manigahie. <sup>12</sup> Hagi nampa 3 knare'ene nampa 7ni knarerera tina freno agru hugahie. Hianagi nampa 3 knare'ma nampa 7ni knare'enema tima ofrenu'za agru osugahaze. <sup>13</sup> Hagi iza'o fri vahe avuvgama avako huteno, agra'ama azeri agruma osania ne'mo'a, Ra Anumzamo'na seli mono nona azeri pehana hugahie. E'inama hania vahera, Israeli vahepintira ahenatitreho. Na'ankure agritera azeri agruma hu tina ru tritri huonte'neankino, agra agru osu'ne. <sup>14</sup> Hagi seli nompima mago vahe'ma frisigeno'a, ana nompima mani'enaza vaheki, efresaza vahe'mo'zanena agrua osu mani'enageno vuno 7ni'a zagegna evugahie. <sup>15</sup> Hagi ana nompima avaza'a eri onki kavoramima me'enaza kavomo'za agru osugahaze. <sup>16</sup> Hagi iza'o kazinknonteti ahe'nenia vahe avako hania vahero, agra'a fri'nenia vahe avako hania vahero, fri vahe zaferinare avako hania vahero, fri vahe mati mati'ma avako'ma hania vahe'mo'a, 7ni'a knamofo agu'afi agru osugahie. <sup>17</sup> Hagi agra'ama azeri pehanama hu'nesia zama azeri agru'ma hunakura, kresramana vu itareti tanefa kateno kavofi anteteno, enevania tinteti afino anampina taginteno. <sup>18</sup> Hagi agruma hu'nenia vahe'mo'a hisopu traza erino, ana tempireteno seli nonte'ene agu'afima me'enenia zantamintera rutri tri hunenteno, anampima

mani'nenia vahetera rutri tri huntiegahie. Hagi ana zanke huno kazin-konteti ahe fri'nenia vahero, fri vahe zaferina avako hu'nenia vahero, fri vahe kerigante avako hu'nenia vahero, fri'nenia vahe avako hu'nenia vahera ana tinuti rutri tri huzmanteno. <sup>19</sup> Hagi agruma hu'nenia vahero, agruma osu'nenia vahera nampa 3 knare'ene nampa 7ni knareke ana tina rutri trira huzamanteno. Hagi agruma osu'nenia zankura kukena'a sese nehuno, tina freno mani'nenigeno vuno kinagasesena, Nagri navurera agrua hugahie. <sup>20</sup> Hianagi agruma osu'nenia vahe'mo'ma agra'ama azeri agruma osu'nena, Israeli vahepintira ahenatitreho. Na'ankure Ra Anumzamo'na seli mono nona azeri pehana hugahie. Hagi azeri agruma hu tinutike rutri tri huntesageno, agru hugahie. <sup>21</sup> Hagi amanahu avu'avazamo'a mevava kasege me'nena, tima rutri tri huzmantenza zamazeri agruma hu eri'zama eri'naza vahe'mo'za, tina nefre'za, kukenazmia sese hiho. Hagi zamazeri agruma hu tima avako'ma hanaza vahe'mo'za agru osu mani'nenageno vuno kinaga segahie. <sup>22</sup> Hagi agruma osu'nesia vahe'mo'ma, mago'za avako huge, mago vahe'ma avako ma haniana, ana vahero ana zantamimo'a, agru osu me'nenigeno vuno kinagasesahie.

## 20

### *Miriamu' fri'nea naneke*

<sup>1</sup> Hagi ese ikantera miko Israeli vahe'mo'za Zini hagege kokampi ehanati'za Kades kumate eman'i nazageno, Miriamu'a frige'za anante asente'naze.

<sup>2</sup> Anampina tima ne'naza zana omanege'za, Israeli vahe'mo'za eritru hu'za Mosesene Aronikiznia kehakare huznante'naze. <sup>3</sup> Ana vahe'mo'za Mosesena ke ha'rente'za anage hu'naze, tagrira tatranketa Ra Anumzamofo avuga tafuhe'zane fruntresina knare hisine! <sup>4</sup> Hagi nahigenka Ra Anumzamofo vahe'mota tavrenka hagege ka'ma kokampina anketa, tagrane zagagafatinena fri'zana nehune? <sup>5</sup> Hagi nagafare Isipitura tavrenka ama havizama hu'nea kokampina e'nane? Fikima, wainima witi ragama, pomigreneti zafa ragama, tima nesunazanena amafina omene mopafina tavrenka e'nane. <sup>6</sup> Mosese'ene Aronikea seli nomofo avuga zanavugosaregati mopafi umaseke, Ra Anumzamofontega nunamu hakeno, Ra Anumzamofo hanavenentake msamo'a efore hu'ne. <sup>7</sup> Anante Ra Anumzamo'a Mosesena amanage huno asami'ne.

### *Havefinti tima hanati'nea zamofo naneke*

<sup>8</sup> Azompaka'a enerinka mika vahera kehuge'za atru hanagenka negafu Aroni'enena ana vahe zamavuga havemofona nanekea asamigeno, ana havefinti tina herafiramino e'na, miko vahe'mo'zane zagagafa zmi-mozanena tina negahaze. <sup>9</sup> Anage higeno Mosese'a Ra Anumzamofo avugama Aroni azompama me'neana erino, Ra Anumzamo'ma huoma huno hunteaza hu'ne. <sup>10</sup> Hagi anante Mosese'ene Aronikea havemofo avuga Israeli vahera zamazeri atru nehuke, Mosese'a anage huno hu'ne, kehakare'ma hu vahe'mota kama antahiho, ama havefinti tina erifore huramigahupi? <sup>11</sup> Anante Mosese'a azana erintesaga huno ana havere tare zupa azompa'aretira amasagigeno ana havefintira tina herafino ege'za vahe'mo'zane zagagafazaminena ne'naze. <sup>12</sup> Anante Ra Anumzamo'a Mosesene Aronikiznia zanasamino, Nagrikura antahionamitna, ruotge hu'ne huta Israeli vahe zmavufina osu'naku, Nagrama tami'noa mopafina

ama vahera zamavareta uofregaha'e. <sup>13</sup> E'ina tinkura \*Meribe hu'za nehaze. Na'ankure Israeli vahe'mo'za, tinkura kehakare hazageno Ra Anumzamo'a Agra'a ruotage hu'noe huno zamaveri hu'naze.

### *Israeli vahe'mofonku Idomu vahe'mo'za mopatifi eovugahaze hu'naza naneke*

<sup>14</sup> Hagi Mosese'a Kadesi kumate mani'neno Idomu kini ne'tega ke erino vu vahera huzmanteg'e'za amanage hu'za ome asami'naze. Kafuhe'za Israeli vahe'mo'za kea huu'za, Knazama tagrite'ma e'neana, hago kenka antahinka hu'nane hu'za hu'naze. <sup>15</sup> Hagi neragehoza Isipi mopare urami'za rama'a kafu umani'naze. Anantega umani'nonke'za Isipi vahe'mo'zama tafahe'ine tagri'enena tazeri haviza hu'naze. <sup>16</sup> Hianagi tagrama Ra Anumzamo-fontega krafa huntonkeno ana krafama huna ketia nentahino, ankerio vahe'a huntogeno, Isipitira tavreno atirami'ne. Hagi antahio, menina kagri mopamofo agentega me'nea kumate Kadesi eman'ihone. <sup>17</sup> Hagi muse hugantoanki tatregeta mopakafina ufretta vamaneno. Hagi tagrama vanuta hozatamifine waini hozatamifinena ovugahune. Anahukna huta tinkeri tamifintira tina onegosune. Hagi kini vahe kanema nehaza karanka nevuta,rukrahe huganti hugama osugahunanki, karanka fatgo huta nevuta mopatamia ome agatereta vugahune. <sup>18</sup> Hianagi Idomu kini ne'mo'a kenona huzamanteno, tamagra mopatifina eovugahaze. Hagi anama hanageta, kazinteti hara eme huramantegahune. <sup>19</sup> Ete Israeli vahe'mo'za mago'ane kenona hunte'za, tagra rankama avaririta nevanunkeno zaga-gafatimo'zo, mago vahe'mo'ma tamagri tinkerifinti'ma tima nesigeta, tagra miza hugahune. Hagi tattrenketa mopatamifi rankamofo avariri fatgo huta nevuta mago'zana avakora osugahune. <sup>20</sup> Hianagi Idomu kini ne'mo'a kenona huno, amafina eovugahaze, huno nehuno hanavenentake sondia vahe zamavreno ha'eme huzmante'naku e'ne. <sup>21</sup> Hagi Idomu kini ne'mo'ma mohanifima e'ovugahazema huno hiazanku, Israeli vahe'mo'za atre'za, ru kampi vu'naze.

### *Aroni'ma fri'nea zamofo naneke*

<sup>22</sup> Hagi miko Israeli vahe'mo'zama Kadesi kumara atre'za Hori agonarega vu'naze. <sup>23</sup> Hagi Idomu mopa atuparega Hori agonare Ra Anumzamo'a Mosesene Aronikiznia zanasamino, <sup>24</sup> Aroniga Nagrama Israeli vahe'ma zaminaku'ma hu'noa mopafina uofregahananki, kafu kafahe'zama nehaza hunka frigahane. Na'ankure e'ina hi'o huu'na tanagri'ma hurananta kerera Meriba tintera avariri fatgo osu'na'e. <sup>25</sup> Hagi Aronine ne' mofavre'a Elieasanena zanavrenka Hori agonare mareri'o. <sup>26</sup> Hagi ana agonare Aronima antani'neno pristi eri'zama eneria kukena'a, hatenka ne'mofo Elieasana antanintegahane. Hanankeno Aroni'a anante frigahie. <sup>27</sup> Hagi Ra Anumzamo'ma hunteaza huno Mosese'a ana famotrena miko vahe'mo'za nezamageno agonarega zanavreno mareri'ne. <sup>28</sup> Hagi Mosese'a Aroni'ma antani'neno pristi eri'zama eneria kukena'a hateno nemofo Elieasa antante'ne. Ana higeno Aroni'a ana agonare frigeke, Moseseke Elieasakea ana agonaregati erami'na'e. <sup>29</sup> Hagi Aroni'ma fri'nea zamofoma maka Israeli vahe'mo'zama ke'za antahi'zama nehu'za, 30'a zage knafi zamasunkura hu'za zavira ate'naze.

\* <sup>20:13</sup> Meribe hu'zama hu'naza zamofo agi'a ke hakare hu'naze hu'naze.

## 21

### *Israeli vahe'mo'za Kenani vahe'enema ha'ma hu'naza naneke*

<sup>1</sup> Hagi Kenani kumate kinia Arati kumate Negevi nemania kini ne'mo antahiamma Israeli vahe'mo'za Atarimi karanka neaze hazankema nentahino'a, ha'o me huzamanteno mago'a Israeli vhahera kina huzamanteno zamavareno vu'n'e. <sup>2</sup> Anante Israeli vahe'mo'za Ra Anumzamofonte huvempa ke hu'za, Kagrama ana vahe'ma tagri tazampi zamavarentesanketa rankumazmia eri haviza hugahune. <sup>3</sup> Hagi Ra Anumzamo'a Israeli vahe'mokizmi ke antahizamino Kenani vhahera avrezamigeno, kumazmine, ana kumapi vhahera zamahe fanane hu'naze. Ana hu'negu ana kuma'mofo agi'a Homae nehaze.

### *Moses'a bronsire osifa've tro hu'nea naneke*

<sup>4</sup> Hagi Israeli vahe'mo'za Hori agona atre'za koranke hagerintega nevaza kantega, Idomu mopa rugagi'za vu'naze. Hianagi rama'a vahe'mo'za zaza ka nevu'za, zamavaresragu hu'naze. <sup>5</sup> Hagi ana vahe'mo'za Anumzamofone Mosesenena ke ha'reneznante'za anage hu'naze, Nahigeta Isipitira tavreta ama hagege kokampina frisunegura e'nae? Bretima ne'zana omanegeno, tima ne'zana omanegeta ama kefozama hu'nea mana nezankura tavresra hie! <sup>6</sup> Anage hazageno Ra Anumzamo'a ha' osifave huntogeno rama'a vahe zamaprige'za fri'naze. <sup>7</sup> Hagi Israeli vahe'mo'za Mosesente e'za anage hu'naze, kagri'ene Ra Anumzamofonema huhavizama hunte'nonana, hago kumi hu'none. Hagi nunamu hugeno Ra Anumzamo'a osifavea tagripintira avretreno. Anage hazageno Moses'a ana vhahera nunamuna huzamante'ne. <sup>8</sup> Hagi Ra Anumzamo'a Mosesena anage huno asami'ne. Mago ha' osifave bronsireti trohunka zaza zafare hantintenege'za osifavemo'ma zamaprisia vahe'mo'za ana osifavema kesga hu'za kesamo'za ofri'za manigahaze. <sup>9</sup> Anage huno asamigeno Moses'a bronsireti mago osifave tro huno za'za zafare ahekamarente'ne.

<sup>10</sup> Israeli vahe'mo'za vu'za Oboti kumate seli nonkumara omek'i'za mani'naze. <sup>11</sup> Hagi Oboti kumatetira atre'za vu'za Moapu mopamofo kama zage hanati kaziga hagege kokampi Ia-abarim seli nonkumara ome ki'za mani'naze. <sup>12</sup> Anantetira vu'za Wadi Zere agupofi seli nonkumara omek'i'za mani'naze. <sup>13</sup> Hagi anantetira rugitagiza vu'za kantu kaziga Arnoni timofo Amori vahe'mokizmi hagage mopamofo agentega seli nonkumara ome ki'za mani'naze. Na'ankure Moapu vahe'mokizmi mopane, Amori vahe'mokizmi mopa Arnoni timo refko hu'nere seli nonkumara omek'i'za mani'naze. <sup>14</sup> E'ina hu'negu Ra Anumzamofo hapinema hu'nea avontafemo'a huno, Wahepu Safa kaziga me'nea kumaku'ene tinkrahoku Arnoni tinku hu'ne. <sup>15</sup> Hagi ana karahomo'a Ari kumateti vuno, Moapu vahe kumate ome atre'ne. <sup>16</sup> Anantetira mago'ane vu'za Beri tava'onte me'nea tin kerire vazageno Ra Anumzamo'a Mosesena asamino, vahetamina kehutru huge'na tina zami'neno. <sup>17</sup> E'i anante Israeli vahe'mo'za anage hu'za zagamera hu'naze, henami ti kerimoka hanatinka marerio, tinkerimoka! Zgame hugantone! <sup>18</sup> E'ina tinkeria ranra kva vahe'mo'za kafinte'naze. Hagi rankva vahe'mo'za avame'za me'nea azompareti'ene kama vanoma nehaza azompareti anankeria hanagati'za kafinte'naze. Ana hagege kokampintira Israeli vahe'mo'za atre'za Matana kumate vu'naze. <sup>19</sup> Hagi Matanatira Nahaliel vute'za, Nahalielitira Bamota vu'naze. <sup>20</sup> Hagi Bamotitira Moapu kaziga me'nea agupofi Piska agonamo'ma hagege kokantega avugosama hunte'nerega e'naze.

*Israeli vahe'mo'za Amori vahe' mokizmi kini ne' Sihoni ha'hu agatere'naza  
naneke*

<sup>21</sup> Israeli vahe'mo'za amanage hu'za Amori kini ne' Sihonintega kea atrente'naze, <sup>22</sup> Tatregeta mopakafina rugitagita vamaneno. Hagi tagra hoza tamifino, waini hozatamifina ovuta, agentega nevuta, tinkeri tamifintira tina oneta kinimofo rankantega nevuta, mopaka'a agatereta vu-gahune. <sup>23</sup> Hianagi Sihoni'a Israeli vahe'mo'zama mopa'afima rugitagiza evu'zankura i'o huno hunezmantero, sondi'a vahe'a kehu atru hige'za, ana hagege kokampi vu'za Israeli vahe'mokizmia Jehasi kumate hara eme huzamante'naze. <sup>24</sup> Hianagi Israeli naga'mo'za kazinteti hara huzamagatere'za, ana vahe mopama Amoni tinte'ma vuno Jaboku tinteti'ma uhanati'nea mopa'zmia eri'naze. Hagi Amoni vahe'mokizmi mopafina uofre'naze. Na'ankure Amoni vahe'mo'za hanavenentake vihu hu'za mani'naze. <sup>25</sup> Hu'negu Israeli vahe'mo'za ana mopafima me'nea ranra kuma'ene, neone kumara eri'za ana kumatamimpi mani'naze. <sup>26</sup> Na'ankure Hesboni rankumara Amori kini ne' Sihoni nemania rankumare. Hagi ana mopa korapara Moapu kini ne'mo kegava hu'nea mopa aheno hanare'neankino, ana mopamo'a meno Arnoni uhanati'ne. <sup>27</sup> E'ina agafare zagamema hazafina hu'za, enketa Hesboni kumara negita, Sihoni kumara erigafa hamaneno hu'za nehaze. <sup>28</sup> Na'ankure Hesboni rankumatedti tevea reno nevие. Teve anefara Sihoni kumateti huno nevuno, Moapu mopafima Ar kumama me'neana tefanane nehuno, teno vuno Arnoni tingama marerinerega ome atre'ne. <sup>29</sup> Moapu vahe'moka nasunku hugan-toe! Kemosi havi anumzamofo vahe'mota haviza haze! Ne'mofavretami zamazeri haviza hige'za fre'za vano nehu'za hazanke erinentazageno, mofanezmia Amori kini ne' Sihoni'ma zamavareno kina huzmantankna ne-haze. <sup>30</sup> Hianagi Hesboni kumatetima agafa huno vuno Dibonima uhanati'nea kumatamimpi vahera tagra nezamaheta, kumazmia zamazeri haviza hu'none. Hagi Nofa kuma'enena azeri havizantfa huta vuta Medeba kumate uhanati'none. <sup>31</sup> E'ina hute'za Israeli vahe'mo'za Amori vahe mopa-fina mani'naze. <sup>32</sup> Hagi Jazeri kumama afure'za kesazegu Mosese'a huz-mantege'za yute'za ageno, Jazeri kuma tava'onte'ma Amori vahe'ma mani kagi'naza vhahera Israeli vahe'mo'za ha'huzamante'za zamahe natitre'naze. <sup>33</sup> Hagi anantetira rukrahe hu'za Basani kaziga karanka mareri'za vu'naze. Hagi nevazageno Basani kini ne' Ogi'a ha'huzamante'naku sondia vahe'a ke-hutru hige'za Ederi kumate e'naze. <sup>34</sup> Hianagi Ra Anumzamo'a anage huno Mosesena asmi'ne, Ko agri'ene vahe'anen mopa'anena kagri kazampi avrentoanki korera huonto. Kagra Amori vahe'mokizmi kinima Sihoni'ma Hesboni kumate'ma nemania nete'ma hu'nanaza hugahane. <sup>35</sup> Hu'negu Israeli vahe'mo'za Ogine ne' mofavre'ane naga'anen vahe'anena ha'huzamante'za zamahe vagarazageno, mago vahere huno ana mopafina omanige'za ana mopa eri'naze.

## 22

*Moapu kini ne'mo, Balamu ome avresagu huzmante'nea naneke*

<sup>1</sup> Hagi Israeli vahe'mo'za Jodani timofona kama zage hanati kaziga Moapu agupofi, Jeriko kumamofo kama kaziga eman'i'aze. <sup>2</sup> Hagi Balaki'a Zipori nemofokino Israeli vahe'mo'zama Amori vahe'ma maka'zama huzmantaza zana ke'ne. <sup>3</sup> Hagi Moapu vahe'mo'za tusi koro hu'naze. Na'ankure Israeli vhahera rama'a vahekrefa mani'nagu koro hu'naze. <sup>4</sup> Hagi Moapu

vahe'mo'za Midieni ranra vahera zamasami'za, ama tusi'a vahe krefamo'za bulimakaomo traza neno revrino neankna hu'za mika zantia eri havizahaze. Hagi ana knafina Zipori nemofo Balaki'a Moapu vahe kinia mani'nea knafi anara hu'naze. <sup>5</sup> Hagi agri vahepi Pethor Beori kumara Yufretis ranti-mofo kantu kaziga me'nea kumatega, Balaki'a Beori nomofo Balamuntega kea atrenteno anage hu'ne, ko, Isipitima e'naza vahe'mo'za mopani'afina emanii avite'naze. <sup>6</sup> E'ina hu'negu menina zamagra tagrira tagatere'za hanaveti'za tusi'a vahe mani'nazanki, eme naza hunka kazusi ke huzmantegeta, tagra zamarotago hamnena freho. Nagra antahi'noe, izano sifanama ahentamo'a haviza nehigeno, asomu kema huntamo'a, asomu e'nerimoka mani'nane. <sup>7</sup> Hagi Moapu kva vahe'ene Midiani kva vahe'mo'za Balamuma miza sentesaza zagoa eri'za vu'naze. Hagi Balamuma eme nege'za Balaki'ma hu'nea nanekea asami'naze. <sup>8</sup> Hagi Balamu'a ana vahera anage huno zamasami'ne, meni kenagera mase'enkena ana kemofo nona'a, Ra Anumzamo'ma nasami'nia nanekea oki'na tamasami'neno, hige'za ana ranra vahe'mo'za ana kenagera agrane mase'naze. <sup>9</sup> Hagi ana kenagera Anumzamo'ma Balamunte eno anage hu'ne. Ama vahera iga vahe'mo'za kagranena emanii'naze? <sup>10</sup> Balamu'a Anumzamofona anage huno asami'ne, Balaki'a Zipori nemofo Moapu kini ne'mo ama vahera huzmantegeta'za nagritega ke eri'za e'naza vahe mani'naze. <sup>11</sup> Hagi zamagra anage hu'za nasami'naze, Isipiti'ma e'naza vahe'mo'za mopa mani avite'nazanki enka nagri kaziga eme antenka kazusi huzmantegeta ha'huzamanteta zamahe natitramnena atre'za freho hu'naze. <sup>12</sup> Hianagi Anumzamo'a Balamuna anage huno asami'ne, Zamagranena ovuo. Hagi e'i ana vahe'enena vunka Israeli vahera kazusi kea ome huo zmantegahane. Na'ankure nagra Israeli vahera asomu ke huzmantegate'noe. <sup>13</sup> Hagi nanterana Balamu'a otino Balakima huzmantegeta'za e'naza kva vahera anage huno zamasami'ne, tamagrade kumatamirega viho. Na'ankure Ra Anumzamo'a ovugahane huno hi-anki'na tamagranena ovugahue. <sup>14</sup> Anage higeno Moapu kini ne' Balaki'ma huzmantegeta'za e'naza kva vahe'mo'za ete vu'za Balamu'ma omegahuema hia nanekea Balakina ome asmi'naze.

<sup>15</sup> Hagi Balaki'a mago'ene kote'ma huzmantegeta'za vu'naza ranra vahem'a zmagatere'nea ranra vahetami rama'a huzmantage'za ete vu'naze. <sup>16</sup> Ete Balamunte e'za, amanage hu'za asmi'naze, Zipori nemofo Balaki'a anage huno hurantegeta one, muse hugantoanki nagritegama enoma huana atregeno mago'zamo'a kazerionte'na amne eno. <sup>17</sup> Na'ankure knare hu'na rama'a fenoza mizana negami'na, na'ankuro hananana amane hugantegahue. Hagi enka ama Israeli vahera kazusi kea eme huzamanto huno hu'ne. <sup>18</sup> Hianagi Balamu'a Balaki eri'za vahe'mokizmi kenona zamirera anage hu'ne, Silvane golinena avite'enenia noma'a Balaki'a amne namigahianagi, nagra Ra Anumzanimofona agatere'na razano osi'zano osugahue. <sup>19</sup> E'ina hu'negu muse huramantoanki kote'ma e'naza vahe'mo'za hu'nazaza huta meni kenagera nagrane mase'enkena Ra Anumzamo'a na'ane hugahifi antahiteno. <sup>20</sup> Hagi ana kenage Ra Anumzamo'a Balamunte eno amanage huno asmi'ne, Ana kva vahe'mo'zama kagri'ma kema hunaku esagenka, otinka zamagrane vugahananagi, Nagrama hanua ke'age zmasamigahane.

### *Balamu'ene Donki afu'ane ankerovahe tutagiha hu'na'a naneke*

<sup>21</sup> Hagi Balamu'a nanterana otino donki afu'a retrotra nehuno, kini ne'mofo eri'za vahe'ane Moapu vu'ne. <sup>22</sup> Hianagi Balamu'ma ana vahe'enema viazanku Ra Anumzamo'a rimpaa ahentegeno, Ra Anumzamofo

ankeromo'a ha'hunte'naku kampi eme oti'ne. Agra donki afu'amofo agumpi manino nevigeno, tare eri'za netremokea agrane vu'na'e. <sup>23</sup> Hagi Balamu donki afu'mo'ma Ra Anumzamofo ankeromo'ma azampi bainati kazinknoma eri'neno otinegeno ome negeno'a, ana donki afu'mo'a kana atreno trampi evu'ne. Hianagi ana donki afu'a kante evinogu Balamu'a ruharakimi'ne. <sup>24</sup> Higeno tare waini hozamofo keginamo kanti kamati eri onasi hu'nea kankamunte, ana ankeromo'a oti'ne. <sup>25</sup> Hagi donki afumo'ma Ra Anumzamofo ankeroma negeno'a, keginare Balamu agia eme runkasisino evigeno ete mago'anе Balamu'a ana donki afura ahe'ne. <sup>26</sup> Anantetira Ra Anumzamofo ankeromo'a atreno vuno keginagamo'ma ome ositfama higeno agaterenoma vuganti kamama osu'are umani hiza huno oti'ne. <sup>27</sup> Hagi donki afumo'ma Ra Anumzamofo ankeroma anante eme negeno'a, mopafi renarenō emanigeno, Balamu'a rimpā ahegeno ana donki afura azompa'areti ahe'ne. <sup>28</sup> Anante Ra Anumzamo'a higeno ana donki afu'mofo Balamuna anage huno asami'ne, Na'a hugantogenka 3'a zupa nenahane? <sup>29</sup> Higeno Balamu'a ana donki afu'mofo kenona anage huno asmi'ne, Kagra nagrira nazeri neginagi vahe kna hu'nananki'na nazampima kazinknoma eri'noresina kagrira meni kahe frusine. <sup>30</sup> Hagi ana donkimo'a ana kemofo nona'a anage huno asami'ne, kagra nagumpima maninke'na kora kavre'na vano osu'nofi? Kora amanahu navu'navara hugante'noaza hunegantofi? Huno higeno, i'o kora e'inahu'zana osu'nana zehane. <sup>31</sup> Hagi anante Ra Anumzamo'a Balamuna avurga eri hari higeno, Ra Anumzamofo ankeromo'ma azampi kazinknoma eri'neno oti'nea zana negeno, mopafi avugosaregati kepri hu'ne. <sup>32</sup> Hagi Ra Anumzamofo ankeromo'a Balamuna anage huno asami'ne, Nahigenka 3'a zupa donki afuka'a amasagi'nane? Nagra ha'hugante'naku e'noe. Na'ankure kagrama nevana kamo'a, Nagri navurera knarera nosie. <sup>33</sup> Hagi donki afumo'a 3'a zupa nageno rukagese'ne. Hagi anara osiresina nagra ko kagrira kahe nefri'na, ama ana donki afura ohe'na atrogeno manisine. <sup>34</sup> Anante Balamu'a Ra Anumzamofo ankeronkura huno, Nagra kumi hu'noe. Kampina ha hunantenaku mani'nane hu'na nagra kena antahi'na osu'noe. Hagi menina kagrama musema osnanke'na, nagra ete rukrahe hu'na kumanirega vugahue. <sup>35</sup> Hagi Ra Anumzamofo ankeromo'a anage huno asmi'ne, Ama ana venenezagane vugahananagi, nagrama kasamisua nanekege ome hugahane. Higeno Balakima huzmanteg'e'za e'naza vahe'ene Balamu'a vu'ne.

<sup>36</sup> Balamu'a ne-e kema Balaki'ma nentahino'a, Arnoni mopamo ometretega Moapu kumate ome tutagiha hunte'naku vu'ne. <sup>37</sup> Hagi Balaki'a amanage huno Balamuna antahige'ne, antahio, ame hunka enogu'ma kema hu'noana nahigenka ome'nane? Kagesama antahinana nagrikura mizana seonantegahie hu'nampi? <sup>38</sup> Higeno Balamu'a kenona huno, hago kagritega menina e'noanki natrenanke'na osia kegaga hugahufi? Hagi nagra nage-safintira mago nanekea osugahuanki, Anumzamo'ma huo huno'ma hania naneke'age hugahue. <sup>39</sup> Anante Balamu'a Balaki'ene vige'ne, Kiriath Huzoti kumate vu'na'e. <sup>40</sup> Hagi anante Balaki'a bulimakao afu'ene sipisipi afura aheno kresramna nevuno, ke'ma huzmanteg'e'za vute'za e'naza vahe'ene Balamunena zami'ne.

<sup>41</sup> Hagi anante nanterana Balaki'a Balamuna avreno Bamot-Ba-al kumate mrerino mago'a Israeli vahe'ma nemanizama'a ome averi higeno, ke henka-muteno ke'ne.

## 23

### *Balamu'a Israeli vahe e'se asomu ke huzamante'nea naneke*

<sup>1</sup> Balamu'a anage huno kini ne' Balakina asmi'ne, amare 7ni'a kresram-nama vu ita tro hunentenka, 7ni'a bulimakao afu'ene 7ni'a ve' sipisipi afutamine uvrenka eno. <sup>2</sup> Higeno Balaki'a Balamu'ma asamiaza hu'ne. Higeke Balaki'ene Balamukea magoke magoke kresramna vu itarera mago bulimakaone mago ve sipisipine kresramna yutere hu'na'e. <sup>3</sup> Hagi Balamu'a anante Balakina asamino, ofaka'ama kresramna vunante otinka mani'nege'na, mago'a kaziga nagrake umani'nanenkeno Ra Anumzamo'a kea nasamigahifi emeriamma hu'na anankea tamasami'neno. Anage huteno anantetira Balamu'a zamatreно mago'za omane agonarega marerine.

<sup>4</sup> Hagi Anumzamo'a Balamuna tutagiha huntogeno, Balamu'a anage huno asami'ne, nagra 7ni'a kresramna vu itarera mago'mago kresramna vu itarera mago bulimakaone, mago ve sipisipine ahe'na kresramna vu'noe. <sup>5</sup> Anante Ra Anumzamo'a Balamuna nanekea asamino, Ete vunka Balakina amama kasamu kea ome asamio. <sup>6</sup> Higeno Balamu'a rukrahe huno vuno, ome keana Balaki'a miko Moapu kva vahetamine kresramnana vu itare oti'negeno vu'ne. <sup>7</sup> Anante Balamu'a amanage huno kasnampa kea huama huno zamasami'ne, Aramu zage hanati kaziga agonafi mani'nogeno Moapu kini ne' Balaki'a Israeli vahe'mokizmi kazusi ke eme hunezman-tenka, Jekopu nagara huhaviza huzmantogu kea hige'na e'noe. <sup>8</sup> Hagi na-gra inankna hu'na Anumzamo'ma kazusima huontoma huno hu'nenia va-hera, kazusinkea hunentena, Ra Anumzamo'ma huhaviza huonto huno'ma hu'nenia vahera, inankna hu'na huhaviza huntegahue? <sup>9</sup> Nagra have agonareti kefenkamu atre'na Israeli vahera zamage'noe. Zamagra mani ruotage hu'za Anumzamofo vahe mani'ne'za zamarimpa frune mani'naze. <sup>10</sup> Israeli agehe'za hagera hu'za kahepankna hu'za rama'a vahe nemanis-age'za, 4'afi refko hanage'za mago kevu manigahazanagi zamagrira ham-prigara osugahaze. Hagi ama mopafima nasimu'ma eri'na mani'nenurera, nagra Anumzamofo agorgia nemanina, zamagrikna hu'na narimpa frune frizankura nave'nesie. <sup>11</sup> Anante Balaki'a amanage huno Balamuna antahige'ne. Kagra na'a hunenantane? Nagra ha'vahe'ni'a kazusi huzmantogu kavrena amafina e'noe. Hagi ko! Kagra mani soe'ma hu'zama manis-agu asomu ke hunezmantane! <sup>12</sup> Hianagi Balamu'a kenona hunteno, Ra Anumzamo'ma huoma huno hunantesia ke'age nagra hugahue hu'ne.

### *Balamu'a nampa 2 asomu ke Israeli vahe huzmante'nea naneke*

<sup>13</sup> Anante kini ne Balaki'a Balamuna anage huno asmi'ne, Nagrane egeta Pisga agonare umanineta rama'a Israeli vahera ozmagegahane. Hianagi osi'a nezmagenka anama zamagesanama'a kazusi kea huzmanto, <sup>14</sup> Huteno anantetira Balamuna avreno Zofim agupofi me'nea Piska agonare, 7ni'a kresramna vu ita ome tro huno, ve bulimakaone ve sipisipinenä mago'mago kresramna vu itarera ofa hu'ne. <sup>15</sup> Hagi Balamu'a Balakina asamino, ama kresramna vu itare mani'nege'na Ra Anumzamofona anturega vu'na ome tutagiha huntaneno. <sup>16</sup> Anante Ra Anumzamo'a Balamuna tutagiha hunteno amanage huno nanekea asami'ne, Ete vunka Balakina ama ana naneke ome asamio. <sup>17</sup> Higeno Balaki'a anama ofama hu'nere Moapu kva vahe'mo'zane otino mani'neno, na'ane huno Ra Anumzamo'a kasami'ne huno Balamuna antahige'ne? <sup>18</sup> Ra Anumzamo'ma asami'nea kasnampa nanekea Balamu'a amanage huno asami'ne, Zipori nemofoga kama antahio, <sup>19</sup> Anumzamo'a

tagrikna vahera omari'neankino, havigea osugahie. Agra kema hia kere amage anteno anaza nehia ne' mani'ne. Agrama kema nehuno'a, ana kemofo amage anteno eri so'e nehia ne' mani'ne.<sup>20</sup> Hagi Ra Anumzamo'a ana vahera asomu ke huzamanto huno nasami'neanki'na, nagra ana kea eritrena ru kea osugahue.<sup>21</sup> Israeli nagapina koana mago havizana kena eriforera osugeno, mago zamazeri haviza hu'zana omanene. Hagi Ra Anumzamo'a zamagranie mani'nege'za, zamagra hu'za Ra Anumzana tagri kinie hu'za nehaze.<sup>22</sup> Ra Anumzamo Isipitira zamavareno atirami'neankino zamagripina afi' ve bulimakaomofo hanavegna hanave me'ne.<sup>23</sup> Ha' vahe'mo'zama Israeli vahe avuatga hu'zo, sankuma hu'za zamaheku'ma hanazana, anazamo'a amne'za segahie. Hanige'za menina Israeli vahe'mokizmi nezmage'za maka veamo'za, Anumzamo'a zamahoke neheno ruzahu'za erifore nehianki, keho hu'za hugahaze.<sup>24</sup> Hagi keho, Israeli vahe'mo'za laionimo eaza hu'za ne-eza, laionimo ahenaku hia zagama otre ronato huwava huno aheno asgahu nevazino korama'a neankna hute'za, manigsa hugahaze.<sup>25</sup> Hagi anante Balaki'a anage huno Balamuna asmi'ne, Kazusi kema huozamante'nunka asomu kea huozamanto.<sup>26</sup> Hianagi Balamu'a amanage huno Balakina asami'ne, Ra Anumzamo'ma huoma huno hunante'nia zana hugahue hu'na kasami'nofi onkasami'noe?

### *Balamu'a nampa 3 zupa Balaki asmi'nea naneke*

<sup>27</sup> Hagi Balaki'a anage huno Balamunkura hu'ne, Antureti'ma Ra Anumzamo'a musema huno'ma kazusima huzamantenigu ege'na kavre'na vaneno. <sup>28</sup> Hagi Balamuna avreno Peori agonare vigeno, ka'ma kokana ke'ne<sup>29</sup> Balamu'a anage huno Balakina asmi'ne, amare 7ni'a kresramna vu ita tro hunentenka, 7ni'a bulimakao afu'ene 7ni'a ve sipisipi afutamine uvrenka eno. <sup>30</sup> Higeno Balamu'ma asmiaza huno Balaki'a, Ana 7ni'a itareramago mago ve bulimakaone, mago mago ve sipisipine aheno kresramna vutere hu'ne.

## 24

<sup>1</sup> Hagi Ra Anumzamo'ma Israeli vahe asomu kema huzamantea zama Balamu'ma keno antahino'ma nehuno'a, Agra mago'anena nehiaza osu'neanki, avugosa rukrahe huno hagege ka'ma kokantega hunte'ne. <sup>2</sup> Hagi Balamu'a anama Israeli vahe'mo'zama nagate nofite'ma seli nonkuma'ma antetere hu'naza kuma'ma negegeno, Ra Anumzamofo Avamumo agripi emanigeno,<sup>3</sup> amanage huno kasnampa nanekea huama hu'ne, ama nanekea Beori nemofo Balamu miko'zama keama huno negea ne'mofo kasnampa naneke. <sup>4</sup> Hagi ama Anumzamofo kea nentahina, hanave'ane Anumzamo'ma ava'nagna zana naverige'na nege'na, mikazana keama hu'na negoe. <sup>5</sup> Israeli naga'mota seli no kumatamimo'a knare'zantfa hu'ne. Jekopu nagamota nomani zantamimo'a knare zantfa hu'ne. <sup>6</sup> Hagi agupo kokamo me'no viankna nehigeno, tinkenare me'nea hozagna nehuno, Alovera traza Ra Anumzamo kriankna nehu'no, sida zafamo tinkenare hageanka hu'ne. <sup>7</sup> Timo'a zamagri tafempintira tagiramigahie. Zamagri mofavremo'za rama'a tina erigahaze. Tamagri kinima fore'ma hanimo'a Ameleki kini nera Agakina agatereno himamu hanave'ane kini ne manisige'za agrama kegavama hania kumara husga huntegahaze. <sup>8</sup> Hagi afi bulimakaomofo hanavemo'ma hiaza huno Ra Anumzamo'a Isipitira zamavareno atiramino e'ne. Hagi miko kumate vahera zamahe fananene nehu'za, ha' vahe'zamia kevereti zamaheno zaferinazamia rugorigahie. <sup>9</sup> Hagi Israeli vahe'mo'za

laionimo avu mase'nege'za vahe'mo'za azeri oti'zanku kore nehzankna vahere. Hagi iza'o asomu ke'ma huzamantesimo'a, asomu erigahie. Hagi iza'o kazusi kema huzamantesimo'a, agra'a haviza hugahie. <sup>10</sup> Hagi Balaki'a ana nanekema nentahino'a tusi rimp ahegeno agra'a azana rupro nehuno anage hu'ne, antahio kagra ha' vaheni'a kazusi huzamantesanegu ke hugenka amafina e'nananagi, 3'a zupa asomu kea huzamantane. <sup>11</sup> E'ina hanku menina kagra amafintira maniganenka ame hunka kumaka'arega vuio. Hagi rama'aza kaminaku huanagi, mizama kaminaku'ma huazana Ra Anumzankamo asevazigantegu, mizama onkamigosue. <sup>12</sup> Higeno Balamu'a ana kenona Balakina asamino, kema huzamantanke'za ome nasami'naza vahera nagra anage hu'na zamasami'noe. <sup>13</sup> Balaki'a silvane golinema avite'nenia noma'a namigahianagi, Ra Anumzamofona rimp ari haviza hu'na nagra navesitera ra zano osi'zano osugahuanki, Agrama huo huno'ma hania ke'age hugahue. <sup>14</sup> Hagi nagra menina vahe'nirega vugahuanki, ege'na henka'ama Israeli vahe'mo'zama vahekama huzamantesaza zamofo naneke kasami'neno.

#### *Balamu'a nampa 4 zupa Balakina asmi'nea naneke*

<sup>15</sup> Hagi Balamu'a anage huno kasnampa kea Balakina asami'ne, ama Beori nemofo Balamu avureti amate keni'ma hu'nea ne'mofo kasnampa ke. <sup>16</sup> Hagi nagra Ra Anumzamofa kea nentahina, Mrerisa Anumzamofo antahintahi'a antahi ama nehu'na, Hankave'ane Ra Anumzamo ava'hagna zampi naveri hige'na, keama nehu'na mopafi mase'noanagi navumo'a hari hu'ne. <sup>17</sup> Hagi nagra ana avanagna zampina mago vahe ke'noanagi, henka fore hugahie. Jekopumpinti masanentake hanafira hanatino remsa hanigeno, kinimo'ma e'neria azotamo'a Israeli vahepinti enkeno, Moapu vahe'mota tamaha vaganereno, Seti mofavreramina zmasenia ruprovazino zamahegahie. <sup>18</sup> Hagi Israeli vahe'mo'za Idomu vahera hahuza-mante'za mopazmia erinafa'a nehu'za, ha' vahe'zami Seiri vahe'mokizmi mopa erinafa'a hugahaze. Ana nehu'za Israeli vahe'mo'za hihamu vahe manigahaze. <sup>19</sup> Hagi Jekopu nagapinti mago'mo ana mopa kva mani'neno, mago'ama mesia rankumara erihaviza hugahie. <sup>20</sup> Hagi anante Balamu'a Ameleki vahe'ma mani'nazarega nezmageno, anage huno kasnampa kea hu'ne, Amelekie hanave kuma meno ugota hu'neanagi, eri haviza hanigeno haviza hugahie. <sup>21</sup> Hagi anante Kin vahe'ma mani'nazarega nezmageno kasnampa kea anage hu'ne, tamagra vahemo tamazeri haviza osaniegu namamo'ma havefi noma kiaza hu'naze. <sup>22</sup> Hianagi Asuri vahe'mo'zama eme zamavare'za kinama ome hunezamantesageno, tamagerafa huno Kin kumatamimo'a haviza hugahie. <sup>23</sup> Hagi Balamu'a huvagare kasnampa kea anage hu'ne, Anumzamo'ma ama zama erifore'ma nehanigeno'a, iza amafina manigahie? <sup>24</sup> Hianagi Saiprusi kazigati ventemo'a eno Asuri vahe'ene, Eberi vahera zamahe'nige'za fanene hugahaze. Hianagi zamagri'enena zamahe fanene hugahaze.

<sup>25</sup> Hagi anantetira Balamu'a oti'no, kuma'arega vigeno, Balakia kuma'arega vu'ne.

#### *Israeli vahe'mo'za havi anumza Balinte mono hunte'naze naneke*

<sup>1</sup> Hagi Israeli vene'nemo'za Sitimima seli nonkuma ome ki'za mani'ne'za, agafa hu'za Moapu a'nene monk'za hu'naze. <sup>2</sup> Na'ankure ana a'nemo'za havi anumzazmire'ma kresramma nevu'za, Israeli vene'nea ke hazage'za

anampina vu'za ne'zana ome nene'za, ana havi anumzantera zmarenare'za monora hunte'naze. <sup>3</sup> Hagi ana nehu'za Peori agonafi Bali havi anumzante Israeli vahe'mo'za monora hunte'naze. Ana hazageno Ra Anumzamo'a tusi'a rimpahenzante'ne. <sup>4</sup> Hagi Ra Anumzamo'a Mosesena asamino, Ama anazama nehaza vahe'mokizmi kva vhahera zamavarenka Ra Anumzamo'na navuga vahe'mo'za nezmagesageta amate ome zamahe nefrinke'nai Israeli vhahera Narimpa aheozmantaneno. <sup>5</sup> Hagi Mosese'a kema refako hu Israeli kva vahe'mokizmia amanage huno zamasmi'ne, Mago'magomota naga'tamifinti'ma Bali havi anumzante'ma Peori agonafima mono'ma hunte'nenaza veneneramina maka zamahe friho. <sup>6</sup> Hagi Mosese'ene mika Israeli vahe'mo'za seli mono nomofo avuga zavinete'za zmasunku nehu'za negazageno, mago Israeli ne'mo'a Midieni ara naga'ama maninarega avreno vuno seli noma'afi ufre'ne. <sup>7</sup> Hagi pristi ne' Aroni negeho Elieaza nemofo Finiesi'a ana vene a'enena negeno'a vahepintira atreno vuno karugru kevea azampi omenerino, <sup>8</sup> ana nera amage vuno seli noma'afi ufreno ana kevereti matevuno vemofona renkro huno a'mofona rimpia retragufene. Ana higeno Israeli vahepina ana knazamo'a vagare'ne. <sup>9</sup> Hianagi ana knazamo'a 24 tauseni'a Israeli vahe ko zamahe fri'ne. <sup>10</sup> Ra Anumzamo'a Mosesena anage huno asmi'ne, <sup>11</sup> Eleasa ne'mofo Finiasi pristi nagapinti ne'mo, Nagri narimpa haviza hu'zana eri fru hu'ne. Na'ankure agirira Nagri'ma hiankna huno rimpahegeno anara hianki'na, Israeli vhahera mago'ane kanivea razmante'na zamahe ofrigahue. <sup>12</sup> E'ina hu'negu antahio, Nagra agri'ene narimpa fru hu'na manisua huvempa kea hue. <sup>13</sup> Hagi Finiasi enena huvempa huankino agripinti'ma forehu anante anante hu'zama esaza vahe'mo'za pristi eri'zana erigahaze. Na'ankure Israeli vahe'mokizmi kumima atrezmantesugu kumite nona huno mizase'ne. <sup>14</sup> Hagi Midieni a' enema Israeli ne'ma ahfri'nea ne'mofo agi'a, Zimrikino Salu nemofo'e. Hagi Salu'a Simioni naga nofipina ugota kva nere. <sup>15</sup> Hagi ana ne'mo'ma avreno vu'nea Midieni a'mofo agi'a Kozbikino, Zuri mofare. Hagi Zuri'a Midieni vahepina ugota hu'naza nagapinti ne'mani'ne. <sup>16</sup> Anante Ra Anumzamo'a Mosesena asmino, <sup>17</sup> Midieni vhahera ha' vahetami mani'nazanki zamahe friho. <sup>18</sup> Na'ankure zamagra ha' vahetamimo'za hazaza hu'za reramatga hazageta, Peori agonarera havi anumzantera monora hunentazageno, anazanteku Finiasi'a keve'areti Midieni kva ne'mofo mofa Kozbina karugru regeno fri'ne.

## 26

### *Israeli vahe'mo'za vahe hampri'naza zamofo naneke*

<sup>1</sup> Hagi ana knazama evutegen'o'a Ra Anumzamo'a Mosesene pristi ne' Aroni nemofo Eleasakiznia amanage huno zanasami'ne, <sup>2</sup> Menina Israeli vahepintira 20'a kafuma agaterenesia vahe'ma ha'ma huga hu'nesaza vhahera hamprinka refako huzamanteg'e za Israeli vahe'mokizmi sondia vahe maniho. <sup>3</sup> E'ina knafina Israeli naga'mo'za Moapu agupofi Jodani timofo ankenarega, Jeriko kantu kaziga me'nege'za kama kaziga kumara ome ki'za mani'naze. Hu'negu Moseseko Pristi ne' Elieasakea Israeli kva vahetaminkura anage huke zamasami'na'e, <sup>4</sup> Ra Anumzamo'ma hu'nea kante anteta 20'a kafuma agatere'nesia vhahera hampriho. Hagi Isipiti'ma atre'za e'naza vahe'mokizmi zamagima kreno eri fatgoma hu'neana ama'na hu'ne. <sup>5</sup> Hagi Rubenimpinti'ma forehu anante anante hu'za e'naza vhahera Hanoki nagatetira eno Palu nagate eme atre'ne. <sup>6</sup> Hezroni naga'mofona nezmageho

agire, Hezroni naganofire huno asamre'ne. Hagi Kami nagara, nezmageho agire, Kami nagare huno asamre'ne. <sup>7</sup> Hagi Rubenimpinti'ma forehu anante anante hu'zama mani'nazana 43 tausen 7 hantre 30'a vahe mani'naze. <sup>8</sup> Hagi Palumpinti'ma fore hu'neana Eliapue. <sup>9</sup> Hagi Eliapumpintima forehu anante anante hu'nazana Nemueliki, Dataniki, Abiram'u'e. Hagi ana nagap-intira Abiramuke Datanike kva eri'zana eri'na'a netremoke Mosesene Aroni-nena kehara rezanante'ne Ra Anumzamofo kea rufutagi'na'e. <sup>10</sup> Hagi ana hakeno mopamo'a agira aka huno zamasaga huvazigeno, anampina Kora'a fri'ne. Hagi 250'a vah'e'ma zamagema ante'naza vene'nea Ra Anumzamofo tevemo eme te fanane hu'ne. Hagi e'inazamo'a Israeli vahe huzmagesa hu avame'za me'ne. <sup>11</sup> Hianagi Korampinti'ma fore hu'naza vene'nemo'za ofri'naze. <sup>12</sup> Hagi Simionipinti'ma forehu naza nagara ama'na hu'naze, Nemueli nagara, nezmageho agire Nemueli nagare huno asanemreno, Jamini nagara nezmageho agire Jamini nagare nehu'za, Jakini nagara nezmageho agire Jakini nagare hu'za nehu'za, <sup>13</sup> Zera nagara nezmageho agire Zera nagare hu'za asanemare'za, Sauli nagara nezmageho agire asamre'za Sauli nagare hu'ne. <sup>14</sup> Hagi ama'i Simioni nagaki'za ana miko'a 22tausen 200'a venene mani'naze. <sup>15</sup> Hagi Gatipinti'ma fore hu'naza nagara ama'na hu'ne, Sefoni nagara nezmageho agire Sefoni nagare hu'za asanemare'za, Haggi nagamokizmia, nezmageho agire Haggi nagare hu'za asanemare'za, Suni nagara nezmageho agire, Suni nagare hu'za asanemare'za, <sup>16</sup> hagi Ozni nagara nezmageho agire Ozni nagare hu'za asanemare'za, Eri nagara nezmageho agire, Eri nagare hu'za asamre'ne. <sup>17</sup> Hagi Aroti nagara nezmageho agire, Aroti nagare hu'za asanemare'za, Areli nagara nezmageho agire, Areli nagare hu'za asamre'ne. <sup>18</sup> Hagi Gatimpinti'ma fore'ma hu'nazana ana maka vahera 40 tausen 500'a vene'ne mani'naze. <sup>19</sup> Hagi Juda'a tare mofavrea, Erine Onanine kasezanante'ne. Hianagi zanagra ko Kenani mopafi fri'na'e. <sup>20</sup> Hagi Judampinti'ma fore'ma hu'naza nagara ama'ne, Sela nagara nezmageho agire, Sela nagare hu'za asanemare'za, Peresi nagara nezmageho agire, Peresi nagare hu'za asamre'ne. Hagi Zera nagara nezmageho agire Zera nagare hu'za asamre'ne. <sup>21</sup> Hagi Peresi mofavreramofo zamagi'ama'ne, Hezroni nagara nezmageho agire, Hezroni nagare hu'za asamre'ne. Hagi Hamuli nagara nezmageho agire, Hamuli nagare hu'za asamre'ne. <sup>22</sup> Hagi Judampinti'ma fore'ma hu'naza naga'ma hampri'nazana 76 tausen 500'a vah'e fore hu'za mani'naze. <sup>23</sup> Hagi Isakapinti'ma forehu anante anante'ma hu'naza nagara ama'ne, Tora nagara nezmageho agire asamre'za Tora nagare nehu'za, Puva nagare nezmageho agire asamre'za Puva nagare hu'za zamasamre'ne. <sup>24</sup> Hagi Jasubu nagara nezmageho agire, Jasubu nagare hu'za asanemare'za, Simroni nagara nezmageho agire, Simroni nagare hu'za asamre'ne. <sup>25</sup> Hagi ana maka Isakampinti'ma fore hu'naza vahera 64 tausen 300'a venene mani'naze. <sup>26</sup> Hagi Zebulonimpiti'ma forehu anante anante'ma hu'za e'naza vahera ama'ne, Seredi nagara nezmageho agire Seredi nagare hu'za asanemare'za, Eloni nagara nezmageho agire Eloni nagare hu'za asanemare'za Jeleli nagara nezamageho agire Jeleli nagare hu'za zamasamre'ne. <sup>27</sup> Hagi ama'i Sebuluni naganofikiza zamagra 60 tausen 500'a venene mani'naze. <sup>28</sup> Hagi Josefimpinti'ma fore hu'na'ana Manase'ene Efremike fore hu'na'e. <sup>29</sup> Hagi Manasempinti'ma fore hu'anante anante'ma hu'naza nagara Makirimpinti'ma fore hu'za Makiri nagare hu'za mani'naze. Hagi Makirimpinti'ma fore hu'naza vahe'mo'za, Giliati vahere hu'za mani'naze. <sup>30</sup> Hagi ama'i Giliatimpinti'ma fore hu'nazana nagamofo zamagi'e, Iez-

eri'e, hagi Iezeri nagapinti'ma fore hu'naza vahe'mo'za Iezeri nagare hu'za mani'naze. Hagi magora Helekikino, Heleki nagare hu'za mani'naze. <sup>31</sup> Hagi Asirempinti fore hu'naza naga'mo'za Asiri nagare huza mani'naze. Hagi Sekemimpinti fore'ma hunaza nagamoza, Sekemi nagare hu'za mani'naze. <sup>32</sup> Hagi Semidapinti'ma fore'ma hu'naza naga'mo'za Semida nagare hu'za mani'naze. Hagi Hefampinti'ma fore hu'naza naga'mo'za Hefa nagare hu'za mani'naze. <sup>33</sup> Hagi Hefa nemofo Zelofehadi'a mofavrea onte'ne. Hianagi mofo'neraminke ante'neankino zamagi'a Malaki, Noaki, Hoglaki, Milkaki, Tirsae hu'za mani'naze. <sup>34</sup> Hagi ama'i ana miko Manasempinti'ma fore hu'naza vahera 52 tausen 700'a vene'ne mani'naze. <sup>35</sup> Hagi Efraemimpinti'ma fore'ma hu'naza nagara amane, Suterampinti'ma fore'ma hu'naza nagara, Sutera nagara hu'za manizageno, Bekelimpinti'ma fore hu'naza nagara, Bekeli nagare hu'za mani'zageno, Tahanimpinti'ma fore'ma hu'naza nagara, Tahani nagare hu'za mani'naze. <sup>36</sup> Hagi Sutelampinti'ma fore hu'naza vahera ama'ne, Eranimpinti'ma fore hu'naza nagara, Erani nagare hu'za mani'naze. <sup>37</sup> Hagi e'i maka Efraemimpinti'ma fore hu'naza nagaki'za hapri'nazana 32 tausen 500'a vene'ne mani'naze. <sup>38</sup> Hagi Bezamenimpinti'ma fore hu anante anante'ma hu'za e'naza vahera ama'ne, Belampinti'ma fore hu'nazana nagara, Bela nagare hu'za manizageno, Asbelimpintima fore'ma hu'naza nagara, Asbeli nagare hu'za manizageno, Ahirimpinti'ma fore'ma hu'nazana nagara, Ahiri nagare hu'za mani'naze. <sup>39</sup> Hagi Sefufamumpinti'ma fore hu'naza vahe'mo'za Sefufamu nagare hu'za mani'naze. Hagi Hufamumpinti'ma fore hu'naza vahe'mo'za, Hufamu nagare hu'za mani'naze. <sup>40</sup> Hagi Bela'a Adine Namakizni kasezanante'ne. Hagi Adipinti'ma fore hu'naza vahe'mo'za, Adi nagare hu'za mani'zageno, Namimpinti'ma fore hu'naza vahe'mo'za, Namani nagare hu'za mani'naze. <sup>41</sup> Hagi ama'i miko Bezamenimpinti'ma fore hu'naza vene'negi'za zamagra 45 tausen 600'a vene'ne mani'naze. <sup>42</sup> Hagi Danimpinti'ma fore'ma hu'naza vahera ama'ne, Suhamupinti'ma fore'ma hu'nazana vahekura, Suhamu nagare hu'naze. <sup>43</sup> Hagi suha naga'ma mani'nazana miko 64 tausen 400'a vahe mani'naze. <sup>44</sup> Hagi Asapinti'ma fore hu anante anante'ma hu'za mani'naza nagara ama'ne, Imnampinti'ma fore hu'naza naga'mo'za, Imna nagare hu'za manizageno, Isvimpintima fore hu'naza naga'mo'za, Isvi nagare hu'za mani'naze. Hagi Beriampinti'ma fore hu'naza vahe'mo'za, Beria nagare hu'za mani'naze. <sup>45</sup> Hagi Beriampintima fore hu anante anante'ma hu'nazana ama'ne, Hebapinti'ma fore hu'naza naga'moza, Heba nagare hu'za mani'zageno, Malkimpinti'ma fore hu'naza naga'mo'za, Malki nagare hu'za mani'zageno, magora Malkielkino, Malkiel nagare hu'za mani'naze. <sup>46</sup> Hagi Asa mofamofo agi'a Sera'e. <sup>47</sup> Hagi ama'i Asa nagamokizmima hampri'nazana 53 tausen 400'a vahe mani'naze. <sup>48</sup> Hagi Naftarimpinti'ma fore hu'naza nagara ama'ne, Jazerimpinti forema hu'naza naga'mo'za Jazeri nagare hu'za manizageno, Gunimpinti'ma fore'ma haza vahe'mo'za Guni nagare hu'za mani'naze. <sup>49</sup> Hagi Jezerepinti fore hu'naza vahe'mo'za, Jezeri nagare hu'za manizageno, Silemumpinti fore hu'naza vahe'mo'za, Silemu nagare hu'za mani'naze. <sup>50</sup> Hagi ama'i miko Naftarimpinti'ma fore hu anante anante hu'naza vahe'ma hampri'nazana 45 tausen 400'a vene'ne mani'naze. <sup>51</sup> Hagi ama'i mik'a Israeli vahe'ma hampri'neana 601tausen 700 30'a vahe mani'naze. <sup>52</sup> Hagi anante Ra Anumzamo'a Mosesena asamino, <sup>53</sup> ama'i zamagima hampriza vahe'mofo avamente nagate nofite

hunka ana mopa refako hunka erisintima haresazana zamatere huo.<sup>54</sup> Hagi mopama refkoma hananana, rama'a vahe'ma mani'nesamokizmia rama'a mopa refko hunka nezaminka, osi'a vahe'ma mani'nesamokizmia osi'a mopa zamatere huge'za erisantihare'za maniho.<sup>55</sup> Hianagi satu zokagore'za kesageno nezamageho zamagina efore'ma hania nagamofo mopa refko huzamitere huge'za erisantihare'za maniho.<sup>56</sup> Hagi miko mopa refkoma huzamisanana rama'a mani'naza nagateti vuno, osi'ama mani'naza nagate'ma vaniana satu zokago renka negenka refako hunka mopa zamige'za erisantihare'za maniho.

### *Livae naga'ma hampri'naza naneke*

<sup>57</sup> Hagi Levai naganofi'ma hampri'nazana ama'na hu'ne, Gesonimpinti'ma fore'ma hu'naza vahe'mo'za Gesoni nagare hu'za mani'zageno, Kohatimpinti'ma fore hu'naza vahe'mo'za, Kohati nagare hu'za manizageno, Merarimpinti'ma fore hu'naza naga'mo'za Merari nagare hu'za mani'naze.<sup>58</sup> Hagi amai'mago'a Livae nagapinti'ma fore'ma hu'nazana, Libnikino, Libni nagare hu'za manizageno, Hebronimpinti'ma fore'ma hu'naza vahe'mo'za, Hebroni nagare hu'za mani'zageno, Maharimpinti'ma fore hu'naza vahe'mo'za Mahari nagare hu'za mani'zageno, Musimpinti'ma fore hu'naza vahe'mo'za Musi nagare hu'za manizageno, Kora nagapinti'ma fore'ma hu'naza vahe'mo'za Kora nagare hu'za mani'naze. Hagi Kohati'a Livae nagapinti ne' Amrami nefae'.<sup>59</sup> Hagi Amrami nenaro'a Livae nagapinti a' Jokabetie. Hagi Isipi mani'ne'za Livae nagapinti ana ara ksentegeno, ana a'mo'a Mosesene Aroninena kaseneznanteno, magoke mofa Miriamunke kasente'ne.<sup>60</sup> Hagi Aroni ne' mofavreramina Natapu'ma, Abihu'ma, Ereasa'ma Itamarie.<sup>61</sup> Hu'neanagi Abihu'ene Natapu'enena Ra Anumzamo'ma e'ina hiho huno'ma hu'nea ke'a rutagreke Agri avuga mnmanentake'za kre mnnavakeno zanahe fri'ne.<sup>62</sup> Hagi Livae nagama mago ikama hu'nea mofavrereti'ma mareri'nea venenema hampri'nazana 23 tauseni'a venene mani'naze. Hianagi ana Livae nagamokizmia Israeli vahe'ma mopama zami'naku zamagima erinte fatgoma hu'za hamprizafina ohampri'naze. Na'ankure zamagra mopa erisanti oharegahaze.<sup>63</sup> Hagi Jodani tinte Jeriko kumamofo kanti kaziga Moapu agupofi mani'nageno Mosesene'ne pristi ne' Eleasarikea Israeli vahera hampri'na'e.<sup>64</sup> Hu'neanagi Mosesene'ne pristi ne' Aronikema ko'ma Sainai ka'ma kokampima hamprina'a vahepintira magore huno omani'negene, menina hampri'na'e.<sup>65</sup> Na'ankure Ra Anumzamo'a anage huno ana vahekura hu'neane, tamagerfa hu'za zamagra kama kokampi frisageno, Jefuni ne'mofo Kalepi'ene Nuni nemofo Josua'enena ofri manigaha'e hu'ne.

## 27

### *Mopama erisanti'ma haresaza kasegemofo naneke*

<sup>1</sup> Hagi Serofehati'a Hefa mofavre manigeno, Hefa'a Giliati mofavre manigeno, Makiri'a Manase mofavre manigeno, Manase'a Josefe mofavre mani'ne. Hagi Selofehati'a a' erino 5fu'a mofanege zmante'neankino zamagi'a ama'ne, Malaki, Noaki, Hoglaki, Milkaki Tirs'a'e.<sup>2</sup> Hagi ana mofanemo'za Mosesene Pristi ne' Eleasane Israeli vahete kva vahe zagamofo zamavuga atrumahu seli mono nomofo kasante vu'za amanage hu'naze,<sup>3</sup> nerafa'ma ka'ma kopima fri'neana Kora naga'mo'zama Ra Anumzamofoma ha'ma rentazageno zamahe fri'nea vahe'enena ofri'neanki

ne'mofavre'a kaseonte'neno agra'a kumi huno fri'ne. <sup>4</sup> Hagi nahanigeno nerafa agimo'a agri'a nagapintira fanane hugahie? Na'ankure agra ne'mofavrea kase onte'nene. Hagi nerafa nagamokizmi mopafintira mago'a mopa refako huramigahaze. <sup>5</sup> Hazageno Moses'e'a ana kezamia erino Ra Anumzamofonte vigeno, <sup>6</sup> Ra Anumzamo'a amanage huno Mosesena asmi'ne, <sup>7</sup> Selofehati mofa'nne naga'mo'za fatgo kante kea nehaze. Hagi nezamafa nagapintira nezmafa mopama me'neniam'a erizamige'za, erisantihare'za nezmafa afuhe'zama marisafina maniho. <sup>8</sup> Hagi mago'anee Israeli vahera zamasamio, mago ne'mo'ma ne' mofavre ote'neno fri'nesigeta, ana ne'mofo mopa erita mofa'amofo aminkeno erisantiharen. <sup>9</sup> Hagi ana ne'mo'ma mofa'ma onte'neno frinige'za, afuhe'i erizamaho. <sup>10</sup> Hagi afuhe'zama omuni'nena zama agrama erisantima harenia mopa, nefu afu'agna eri zamigahaze. <sup>11</sup> Hagi ana ne'mofo nefu afu'aganah'e'zama omuni'nesazana, agri'a nagapi vahe eri zamige'za erisantihareho. Ama anankemo'a Ra Anumza'mo'ma Mosesema hunte'nea kante Israeli vahepina trake megahie.

### *Israeli vahe kva Josuana huhamprinte'nea naneke*

<sup>12</sup> Ra Anumzamo'a Mosesena amanage huno asami'ne, Abarimi agonare marerinka Israeli vahe'ma zami'noa kokana ko. <sup>13</sup> Hagi ana mopama ketenunka negagana Aroni'ma hu'neaza hunka frigahane. <sup>14</sup> Na'ankure Zini ka'ma kopina Nagrama hi'oma hu'na tanasamu'a keni'a amagera onte'na'e. Hagi Israeli vahe'mo'zama zamarimpa knama hunenantageta'a, Nagrikura ruotage hu'ne huta Israeli vahepina erinte amara osu'na'e. (E'ina tina Kadasi ka'ma kopi Meriba me'ne.) <sup>15</sup> Anante Moses'e'a Ra Anumzamofona anage huno asami'ne, <sup>16</sup> Ra Anumzana maka'zama zamasimu'ma nezamina Anumzamoka, Israeli vahe'ma kegavama hania nera mago az-eri otigeno, <sup>17</sup> ana ne'mo ugota huzmanteno zamavareno vuno eno nehanige'za, Ra Anumzamofo vahe'mo'za sipisipimo'za kegava huzmante vahe omuni'nege'za savri hu'za manizanknara osugahaze. <sup>18</sup> Hagi Ra Anumzamo'a Mosesena anage huno kenona hunte'ne, Agripima avamu'ma mani'nea ne' Nuni nemofo Josuana asenira kazana antenka nunamuna hundo. <sup>19</sup> Hagi mika vahe zamavufi pristi ne' Eleasa avuga Josuana avrenka vunka eri'zama erisia eri'zana ome huhamprinto. <sup>20</sup> Anante eri'zama eneri'na hihamu mago'a amige'za, miko Israeli vahe'mo'za ke'a antahimi'za avariraho. <sup>21</sup> Hagi Josuama maka zampima Nagri navesi'ma kenaku'ma hanuno'a Eleasa pristi ne'mofo avuga vanigeno, Eleasa'a urimi havea erino Nagri navesi zana keno erifore hugahie. Hanigeno Eleasa'a mika nanekea Josuana asami'nigeno, Israeli vahera zamavareno vuno eno hugahie. <sup>22</sup> Hagi Ra Anumzamo'ma huoma huno hunteaza huno Moses'e'a Josuana avreno pristi ne' Eleasane Israeli vahe zamavuga vu'ne. <sup>23</sup> Hagi Moses'e'a Ra Anumzamo'ma hunte'nea kante anteno Josuana asenirera azana anteno huhamprinte'ne.

## 28

### *Mika zupama kresramna vu'zamofo naneke*

<sup>1</sup> Ra Anumzamo'a Mosesena amanage huno asmi'ne, <sup>2</sup> Israeli vahera zmasamige'za kegava hu'ne'za ne'zama ofama hunaku'ma hanu'za huhamprinte'noa knarera eri'za tevefina kresageno, knare mana vinke'na mna'a antahi'neno. <sup>3</sup> Hagi kagra anage hunka zamasamio, ama anahukna huta Ra

Anumzamofontera ofama hanaza zana erita egahaze. Tare ve sipisipima mago kafu huno afuhe afahе osu'nesia avreta tevefina magoke magoke knarera eme kresramana vuvava hugahaze.<sup>4</sup> Hagi mago ve sipisipia nantera ofa nehuta, magora kinaga ofa hugahaze.<sup>5</sup> Hagi ana nehuta mago kilo kane osi hu'nesia flaua'ene mago lita olivi masavene erihavia huta witi ofa hugahaze.<sup>6</sup> Hagi ama ana ofama hanazana ko'ma Sainai agona fima Ra Anumzamo'ma mnama nentahino musema hanigu eri agafa huta hu'naza ofagita, maka knafina hvavava hugahaze.<sup>7</sup> Hagi ana kresramnama vanafina, waini tina ofa hugahaze. Hagi anama ofa hunaku'ma hanaza waini tina ruotage'ma hu'nefinka Ra Anumzamofontega waini ofe huta ome tagitreho.<sup>8</sup> Hagi witine waini tima'a ofama nanterama hu'nazankna huta kinagama ofa hanaza sipsipia tevefi kre fanene hu ofa hinkeno, Anumzamo'ma mna'a nentahino musena hino.

<sup>9</sup> Hagi mani fruhу kna Sabati knarera mago kafu huno afuhe afahе osu'nesia tare ve sipisipia nevarenka, mago kilo flaua olivi masavene eri havia hu'nesiane, eri havia hunka waini ofanena hugahane.<sup>10</sup> Hagi e'i mika mani fru Sabati knare'ma tevefima kre fanenema hu ofagita, maka zupa waini ti ofane, tevefima kre fanene hu ofama mika zupama nehazaza hugahaze.

#### *Kasefa ikamofo ese kna zupama kresramna vu' ofamofo naneke*

<sup>11</sup> Hagi mago'mago ikamofo ese kna zupa tare ve bulimakaogi, mago ve sipisipigi, mago kafu hu'no afuhe afehe osu'nenia 7ni'a sipisipi anenta ana maka Ra Anumzamofonte'ma tevefima kre fanene hu ofama hu'za avre'za egahaze.<sup>12</sup> Hagi ana witi ofama hanazana mago mago bulimakaoma ofama hanarera, 3'a kilo hu'nesia flauama masavene eri havia hu'nesiane, mago mago ve sipisipi ofama hanarera 2kilo hu'nesia flaua masavene eri havia hu'nesiane, erinteta ofa hugahaze.<sup>13</sup> Hagi mago kilo hu'nesia flaua masavene erihavia huta mago mago agaho sipisipine tevefima kre fanenehu ofa hinkeno, Ra Anumzamo'ma mna'a nentahino musena hugahie.<sup>14</sup> Hagi ofama hunaku'ma hanafima waini ofama hanuta, mago'mago bulimakaoma ofama hanarera, 1 lita waini ofa nehuta, mago mago sipisipima ofama hanarera, 1 litagi hafu'a waini tine erita ofa hugahaze. Ama ana ofa mago mago ikamofona ese knazupa eme huterema hanaza ofe.<sup>15</sup> Hagi mago ikamofona ese kna zupa, mago ve meme kumi ofa Ra Anumzamofontera hoho. Hagi mika zupama nehaza ofagino waini tine magopi erinteta ofa hugahaze.

#### *Ra Anumzamo'ma ozamahe zamagatere'nea zanku'ma antahimi ofa huzamofo naneke*

<sup>16</sup> Hagi ese ikamofona 14ni zupa Ra Anumzamo'ma ozamahe zamagatere'nea zanku'ma ne'zama retro hu'za nene'za antahimi kne.<sup>17</sup> Hagi ana ikamofo 15zupa ne'zana kreza nene'za musena nehu'za, zisti onte bretia 7ni'a knamofo agu'afi negahaze.<sup>18</sup> Hagi ana ikamofo ese knazupa, mika vahera zamazeri atru nehinke'za monora nehu'za, zamagra ana kna zupa eri'zana e'origahaze.<sup>19</sup> Hagi Ra Anumzamofonte'ma tevefima kre fanenehu ofa erita esazana, tare bulimakaogi, mago ve sipisipigi, 7ni'a sipisipi anentatami mago kafu huno afuhe afahе osu'nesia zamavare'za egahaze.<sup>20</sup> Hagi mago'mago bulimakaonena 3kilo hu'nenia flaua masavene eri havia huta ofa nehuta, tare kilo hu'nesia flaua masavene eri havia huta ve sipisipinena ofa hugahaze.<sup>21</sup> Hagi 7ni'a sipisipi anentatamima mago

magoma ofama huterema hanarera, masavenema erihavia hu'nenia flaua mago kilo ofa hutere hugahaze <sup>22</sup> Anahukna huta mago ve meme kumimofo nona huno apasente ofa Ra Anumzamofontera hugahaze. <sup>23</sup> Hagi ama ana ofa maka nanterama hutere'ma nehaza ofane, ana ofa hugahaze. <sup>24</sup> Ama ana kanteke avaririta 7ni'a zagegnamofo agu'afina tevefima kre fanene hu ofane, waini ofanena hanageno Ra Anumzamo'a knare mana nentahino musena hugahaze. <sup>25</sup> Hagi 7ni knarerera mani fru huta mono nehuta, ranra eri'zana e'origahaze.

### *E'se ne'zama hamare knamofo muse ne'zama retro huno ne'zamofo naneke*

<sup>26</sup> Anahukna huta hozafinti ese ne'zama hamareno muse hu knamofona ese knazupa, Ra Anumzamofontera ese witi ragama nenama haniana erita ne-eta, mago'a knafima e'neri'za eri'zana ama ana knarerera e'origahaze. <sup>27</sup> Hianagi tevefi kre fanenehu ofama hanageno Ra Anumzamo'ma knare mana nentahino musema nehia ofa, tare agaho bulimakaonki, mago sippisipigi, 7ni'a sipsipi anentatami mago kafu hunenia avreta tevefi kre fanenehu ofa ne-eta, <sup>28</sup> ana ofanema witi ofa hanazana, knare huno'ma kane osi'ma hu'nenia flaua masavene eri havia hu'nesiana, 3'a kilo hu'nenia flaua'ene mago mago bulimakonena tevefina kresramna nevunka, ve sippisipinen 2kilo hu'nesia flaua'ene kresramana vugahane. <sup>29</sup> Hagi 7ni'a sipsipi anentatamima mago mago'ma ofama hutere'ma hanarera, masavenema erihavia hu'nenia flaua mago kilo hu'nesia ofa hutere hugahaze <sup>30</sup> Ana nehunka mago ve meme afuteti kagra'a kumimofo nona huno apasente ofa hugahane. <sup>31</sup> Hagi waini ofane eri mago hunka ana ofa retrorma hanazana, witi ofane tevefi kre fanene hu ofa megahie. Hagi mika ofama hanaza zugaramimofona afuhe afahera osu'nesia su'zanu ofa hugahane.

## 29

### *Ufenkrafa hu'nea ofa huntezamofo naneke*

<sup>1</sup> Hagi 7ni ikamofo ese knarerera mikomota eri atru nehuta, mago'a knafima e'neri'za eri'zana ama ana knarerera eorigahaze. Na'ankure e'i ufere kna me'ne. <sup>2</sup> Hagi ana knarerera Ra Anumzamofonte'ma tevefi kre fanenema hu ofama hazageno knare manama nentahino musema nehia ofama hanuta, mago agoho bulimakaonki, mago ve sippisipigi, 7ni'a anenta sippisipirami mago kafu hu'nenageno afuhe afaher osu'nenia avreta ofa hugahaze. <sup>3</sup> Hagi ana ofa witi ofane magoka erinteta hugahazankino, knare huno'ma kane osi'ma hu'nenia flaua masavene eri havia hu'nesiana, 3 kilo hu'nenia flaua'ene bulimakonena tevefina kresramna nevuta, 2 kilo hu'nesia flaua'ene ve sippisipia kresramana vugahaze. <sup>4</sup> Hagi 7ni'a sipsipi anentatamima ofama hanazana 1 kilo hu'nenia flauwa masavene eri havia hu'nenia flauateti mago mago sippisipi anenta'enena ofa hugahaze. <sup>5</sup> Hagi anampina mago ve meme avrenteta, tamagra'a kumite'ma nona huno kre ofa hugahaze. <sup>6</sup> Hagi ama ana ofama hanazana, mago mago ikante'ma tevefima kre fanene hu ofama nehaza ofane, mago mago knare'ma nehaza ofane, witi ofane, waini ofanena Ra Anumzamofontega tevefi kremna vanageno Anumzamoma knare manama nentahino musema nehia ofa hugahaze.

### *Kumimofo nona huno apase knare'ma kresramna vu'zamofo naneke*

<sup>7</sup> Hagi 7ni ikamofo 10ni knarerera atru huta monora nehuta, ana knafina ne'zana a'o huta mani'neta, mago'a knafima e'neri'za eri'zana ama ana knarerera e'origahaze. <sup>8</sup> Hagi ana knarerera Ra Anumzamofonte'ma tevefi kre fanenema hu ofama hazageno knare manama nentahino musema nehia ofama hanuta, mago agoho bulimakaonki, mago ve sipisipigi, 7ni'a anenta sipisipi mago kafu hu'enageno afuhe afahe osu'nenia avreta ofa hugahaze. <sup>9</sup> Hagi ana ofa witi ofane magoka erinteta hugahazakino, knare huno'ma kane osi'ma hu'nenia flaua masavene eri havia hu'nesia, 3'a kilo hu'nenia flaua'ene bulimakaonena tevefina kresramna nevuta, 2 kilo hu'nesia flaua'ene ve sipisipima kresramana vugahaze. <sup>10</sup> Hagi 7ni'a sipisipi anentatamima ofama hanazana 1 kilo hu'nesia flaua masavene eri havia hu'nenia flauateti mago mago sipisipi anenta'enena ofa hugahaze. <sup>11</sup> Hagi maka zupama witi ofane, waini ofama hanafina, kumite nona huno apase ofa, mago ve meme afu avreta ome kre fanane hu ofa ome hugahaze.

### *Tona nomofo musema hu knare'ma kresramna vu naneke*

<sup>12</sup> Hagi 7ni ikamofona 14ni zupa erigafa huta atru huta monora nehuta, mago'a knafima e'neri'za eri'zana ama ana knarerera e'origahaze. Hagi Ra Anumzamofonte'ma ne'za kreta neneta muse'ma hanazana 7ni'a knafi hugahaze. <sup>13</sup> Hagi tevefima kre fanenehu ofama hanazana, Ra Anumzamo'ma knare mana vanigeno nentahino musema hania ofama hanazana, 13ni'a ve bulimakaonki, tare sipisipigi, 14ni'a afuhe afahe osu'nenia ve sipisipi anentatami ofa hugahaze. <sup>14</sup> Hagi ana 13ni'a bulimakaoma ofama hanafima witi ofama hanaza, knare huno kaneno eri osi hu'za masavempi eri havia hu'ne'naza flauara 3 kilo erinteta mago bulimakaorera kresramna nevuta, tare ve sipisipima kresramnana vanarera, mago mago sipisipirera 2 kilo kretere hugahaze. <sup>15</sup> Hagi 14ni'a sipisipima ofama hanazana, mago mago sipisipirera kaneno eri osi hu'nenia flaua masavempi eri havia hu'nenia 1 kilo erinteta kresramna vugahaze. <sup>16</sup> Hagi maka zupama witi ofane, waini ofama hanafina, kumite nona huno apase ofa, mago ve meme afu avreta kre fanane hu ofa ome hugahaze. <sup>17</sup> Hagi anante knazupama ofama hanazana 12fu'a agaho bulimakaonki, tare sipisipigi, afuhe afahe osu'nenia 14ni'a ve sipisipi anentera mago kafu hu'nenia avreta egahaze. <sup>18</sup> Hagi ana bulimakaone sipisipinema ofama hanazana, ko'ma e'ina hiho huno tra kefima hunenia avamente waini ofane, witi ofanena kresramna vugahaze. <sup>19</sup> Hagi maka zupama witi ofane, waini ofama hanafina, kumite nona huno apase ofa, mago ve meme afu avreta kre fanane hu ofa ome hugahaze. <sup>20</sup> Hagi nampa 3 knazupa 11ni'a bulimakaonki, tare ve sipisipigi, 14ni'a anenta sipisipi afuhe afahe osu'nesiana ofa hugahaze. <sup>21</sup> Hagi ana bulimakaone sipisipinema ve sipisipima ofama hanazana, ko'ma e'ina hiho huno tra kefima hu'nenia avamente waini ofane, witi ofanena kresramna vugahaze. <sup>22</sup> Hagi maka zupama witi ofane, waini ofama hanafina, kumite nona huno apase ofa, mago ve meme afu avreta kre fanane hu ofa ome hugahaze. <sup>23</sup> Hagi nampa 4 knazupama ofama hanazana, 10nia agoho bulimakaonki, tare ve sipisipigi, afuhe afahe osu'nenia 14ni'a ve sipisipi anentera mago kafu hu'nenaza avreta egahaze. <sup>24</sup> Hagi ana bulimakaone ve sipisipine sipisipi anentatamima ofama hanazana, ko'ma e'ina hiho huno tra kefima hu'nenia avamente waini ofane, witi ofanena kresramna vugahaze. <sup>25</sup> Hagi maka zupama witi ofane, waini ofama hanafina, kumite nona huno apase ofa, mago ve meme afu avreta kre fanane hu

ofa ome hugahaze. <sup>26</sup> Hagi nampa 5fu knazupa 9ni'a bulimakaonki, tare ve sipisipigi, 14ni'a anenta sipisipi afuhe afahе osu'no mago kafu hu'nesia ofa hugahaze. <sup>27</sup> Hagi ana bulimakaone ve sipisipine, sipisipi anenta'enema ofama hanazana, ko'ma e'ina hiho huno'ma tra kefima hu'nenia avamente waini ofane, witi ofanena kresramna vugahaze. <sup>28</sup> Hagi maka zupama witi ofane, waini ofama hanafina, kumite nona huno apase ofa, mago ve meme afu avreta kre fanane hu ofa ome hugahaze. <sup>29</sup> Hagi nampa 6 knazupa 8'a bulimakaonki, tare ve sipisipigi, 14ni'a anenta sipisipi afuhe afahе osu'no mago kafu hu'nenia ofa hugahaze. <sup>30</sup> Hagi ana bulimakaone ve sipisipine, sipisipi anenta'enema ofama hanazana, ko'ma e'ina hiho huno tra kefima hu'nenia avamente waini ofane, witi ofanena kresramna vugahaze. <sup>31</sup> Hagi maka zupama witi ofane, waini ofama hanafina, kumite nona huno apase ofa, mago ve meme afu avreta kre fanane hu ofa ome hugahaze. <sup>32</sup> Hagi nampa 7ni knazupa 7ni'a ve bulimakaonki, tare ve sipisipigi, 14ni'a anenta sipisipi afuhe afahе osuno mago kafu hu'nesia ofa hugahaze. <sup>33</sup> Hagi ana bulimakaone sipisipinema ofama hanazana, ko'ma e'ina hiho huno tra kefima hu'nenia avamente waini ofane, witi ofanena kresramna vugahaze. <sup>34</sup> Hagi maka zupama witi ofane, waini ofama hanafina, kumite nona huno apase ofa, mago ve meme afu avreta ome kre fanane hu ofa hugahaze. <sup>35</sup> Hagi 8ti knazupa atru huta nemanita mago'a knafima e'neri'za eri'zana ama ana knarera e'origahaze. <sup>36</sup> Hagi ana knarera Ra Anumzamofonte'ma tevefi kre fanenema hu ofama hazageno knare manama nentahino musema nehia ofama hanuta, mago agoho bulimakaonki, mago ve sipisipigi, 7ni'a anenta sipisipi afuhe afahе osuno mago kafu hu'nenia avreta kresramna vugahaze. <sup>37</sup> Hagi ana bulimakaone sipisipinema ofama hanazana, ko'ma e'ina hiho huno tra kefima hunenia avamente waini ofane, witi ofanena kresramna vugahaze. <sup>38</sup> Hagi maka zupama witi ofane, waini ofama hanafina, kumite nona huno apase ofa, mago ve meme afu avreta kre fanane hu ofa ome hugahaze. <sup>39</sup> Hagi e'i ana zantamina huvamprinte knare Ra Anumzamofontera erita eme ofa nehuta, huvempama hanare'ma hanaza ofane, musema huta nemiza ofane, kre fananehu ofane, witi ofane, waini ofane, tamarimpa fru ofanena hugahaze. <sup>40</sup> Higeno Ra Anumzamo'ma asamia kante anteno Mosese'a maka nanekea Israeli vahera zamasami'ne.

## 30

### *Ramofonte huvempa hu'zamofo naneke*

<sup>1</sup> Hagi Mosese'a Ra Anumzamo'ma asamia kea Israeli naganofite kva vahezaga zamasamino, amanage huno Ra Anumzamo'a hunante'ne, <sup>2</sup> Mago ne'mo'ma Ra Anumzamofonte'ma huvempa huge, e'ina hugahuema huno mago kema eri anakisuno'a, ananke'are ot'i'nenio hugahuema hu'nenia zana amage anteno ana maka'zana hugahie. <sup>3</sup> Hagi mago mofamo'ma nefo agoragama mani'neno Ra Anumzamofonte'ma huvempa huge, e'ina hugahuema huno mago kema eri anakisuno'a, <sup>4</sup> nefo'ma ana ke'ma nentahino mago kema anante'ma huontesigeno'a, anama huvempa nehuno erinaki'nesia kemo'a ana maka megahie. <sup>5</sup> Hu'neanagi nefo'ma ananke'ma nentahino i'oma huno huntesiana, anama huvempama hu'nea kerera kna'a e'origahie. Hagi anama huvempama hu'nea kemofo kinafintira Ra Anumzamo'a atrentesigeno amane fru huno manigahie.

<sup>6</sup> Hianagi mago mofamo'ma ontahi'neno agiteti'ma ame'ama huno huvempa hu'nesia mofa'mo'ma vema omerisigeno'a, <sup>7</sup> neve'ma ananke'ma nentahino mago'zama osanigeno'a, ana huvempa ke'amo'a megahie. <sup>8</sup> Hianagi neve'ma ananke'ma nentahino, i'oma huno huntesiana, anama huvempama hu'nea kerera kna'a e'origahie. Hagi Ra Anumzamo'a kefozama'a atrentenigeno ana huvempa ke'afintera amane fru huno manigahie.

<sup>9</sup> Hianagi kento a'mo'o, neve'ma atresigeno mani'nenia a'mo'ma Ra Anumzamofonte huvempa hu'nesiana, mika huvempa kema hu'nenia ke'amo'a megahie. <sup>10</sup> Hianagi vema eri'nesia a'mo'ma neve agorga mani'neno, Ramofonte'ma huvempa hanigeno, <sup>11</sup> neve'ma ana nanekema nentahino, mago nanekema osaniana, miko huvempa ke'amo'a megahie. <sup>12</sup> Hianagi neve'ma ana kema nentahino mago rimpama osanigeno'a, ana huvempa ke'amofo kinafintira Ra Anumzamo'a atrentegahie. <sup>13</sup> Hagi mago'a huvempa ke'ma hunaku'ma ana a'mo'ma hanigeno'a, neve'a antahino keno huntenko, huvempa hino. <sup>14</sup> Hianagi ana a'mo'ma huvempama hania zupama neve'ma ana huvempa ke'ma nentahino, mago kema osaniana neve'a ana huvempa ke'arera mago arimpa hugahie. <sup>15</sup> Hianagi neve'ma ana huvempama hania ke'ma antahiteno, mago arimpama osaniana neve'a ana knazana agra'a erigahie <sup>16</sup> Ama'i tra kea vene a'enema aravema hana'anki, mofamo'ma nefu nompima manizamofo trakema Ra Anumzamo'ma Mosesema hunte'nea naneke.

## 31

### *Midieni vahe nona hu'za ha'huzamante'za zamahe hana hu'naza naneke*

<sup>1</sup> Hagi Ramo'a amanage huno Mosesena asmi'ne, <sup>2</sup> Hagi Israeli vahe'motama tamazeri savri hazageta havi anumzante'ma mono'ma hunte'narera nona huta Midieni vhahera zamahe vagaregahaze. Hagi anama hutesunka kagra frinka naga ka'ama mani'narega vugahane. <sup>3</sup> Higeno Mosese'a vhahera zamasamino, amu'nontamifinti mago'a veneneramina ha'zana eri retro huzmantenke'za, Ra Anumzamo'ma rimpama ahezmantere'nea zamofo nona hu'za Midieni vhahera hara ome huzmanteho. (Nam-Ham 25:16-17) <sup>4</sup> Hagi Israeli vahepintira magoke magoke naga nofipinti 1 tauseni'a vahe huzmantetere hinke'za hatera viho. <sup>5</sup> Hige'za Israeli vahepinti mago mago naga nofi'mo'za 1 tauseni'a vahe hu'zamantetere hazage'za ana makara 12 tauseni'a vahe'mo'za hatera vu'naku retro hu'naze. <sup>6</sup> Hagi Mosese'a magoke magoke nagapintira 1 tauseni'a venene hatera huzamante'ne. Hagi anampina pristi ne' Eleasa nemofo Finiasi'a ruotage'ma hu'nege'za seli mono nompima eri'zama e'neriza zantamine, ufene eri'neno, vugoteno nevige'za vu'naze. <sup>7</sup> Hagi zamagra Ra Anumzamo'ma Mosesema asami'nea kante ante'za Midieni vahe hara huzmante'za, miko venenea zamahehana hu'naze. <sup>8</sup> Hagi ana vahepina 5fu'a Midieni kini vahe'ma zamahe'nazana, Evima, Rekemima, Zurima, Hurima, Rebama huza zamahe'naze. Hagi anampinke Beoli nemofo Balamuna kazinkonteti ahe fri'naze. <sup>9</sup> Ana nehu'za Israeli vahe'mo'za, Midieni vahe'mokizmi a'nene, mofavrene, bulimakao afuzagane, sipisipi afutamine, feno zazzminena mika eri vagare'naze. <sup>10</sup> Hagi mika ranra kumazamine neone kumazamia teve taginte'za kre vagare'naze. <sup>11</sup> Hagi vahe'ene afu'zaga zaminena miko Israeli vahe'mo'za zamavare vagare'naze. <sup>12</sup> Anama zamavraza vahezagagi, afu feno zamigi, afuzagaramina zamavare'za Moapu agupofi Mosese'ene pristi

ne' Eleasake'ma mani'natega Israeli vahe'mo'za seli nonku'ma ki'za mani'narega, Jeriko mopamofo kantu kaziga Jodani tinte mik'a eri'za vu'naze. <sup>13</sup> Hagi Moseseki Pristi ne' Eleasaki, Israeli kva vahe'zagagi hu'za ome tutagiha huzamantenaku seli no kumazmimofo feg'i'a atirami'za vu'naze. <sup>14</sup> Hianagi 1tauseni'a sondia vahetema kvama hu'naza vahe'e'ne, 100'a sondia vahetema kvama hu'naza vahetamima hateti'ma azageno'a Mosese'a tusi arimpa ahezmante'ne. <sup>15</sup> Hagi Mosese'a anage huno zamasami'ne, Nahigeta tamagra maka a'neramina ozamahe zamatrage'za mani'naze? huno Mosese'a zamantahige'ne. <sup>16</sup> Zamagra e'i ana a'nemo'za Balamu kea antahi'za Peori agonafina tagri vhahera zamazeri savri hazageno, Ra Anumzamofona hara rente'za zamefi humi'naze. Anama hazageno Ra Anumzamofona vahe'mo'za knazana eri'naze. <sup>17</sup> Menina miko ne' mofavre'zaga nezamaheta, venenezaganema monko'zama hu'nesaza a'nezaga miko zamahe friho. <sup>18</sup> Hianagi venema monko'zama osu'nesaza mofo'nea mika zamatreke'za tamagri su'za maniho. <sup>19</sup> Iza'o ana vahe'ma zamahe frige, fri'nesaza vahe'ma zamavako'ma hu'nesnamota, kumamofo feg'i'a 7ni'a kna manigahaze. Hagi nampa 3 knare'ene, nampa 7ni knarerata magrane hapinti'ma zamavareta e'naza vahe'enena tamagra'a tamazeri agru hugahaze. <sup>20</sup> Hagi mika kukenama, bulimakao akruteti tro hunenia kukenama, sipisipi azokateti tro hu'nenia kukenanena, mika azeri agru hugahaze.

<sup>21</sup> Anante pristi ne' Eleasaki'a amanage huno hate'ma vu'naza vhahera zamasami'ne, Ama tra kea hate'ma vute'za esaza vahe'mo'zama zamazeri agruma hanaza zanku Ra Anumzamo'ma Mosesema asami'nea naneke. <sup>22</sup> Hagi golireti'ma, silvaretima, aenireti'ma, bronsireti'ma, tinireti'ma, lediretimi, \* <sup>23</sup> tro'ma hu'nesaza zantamine, tevemo'ma tegama osune'nia aeniraminenka miko tevefi kreta azeri agru hugahaze. Ana huteta ete timpi mago'anee sesehuta zamazeri agru hugahaze. Hianagi tevemo'ma te fanenema hugazantamina, tinteti sesehuta zamazeri agru hugahaze. <sup>24</sup> Hagi 7ni knarerata kukenatamia sese nehuta, tamagra'a tamazeri agru hugahaze. Hagi anama hutesutma seli nonkumapina ufregahaze hu'ne.

### *Hapinti'ma eri'naza zama refko hu'naza zamofo naneke*

<sup>25</sup> Ra Anumzamo'a Mosesena asamino, <sup>26</sup> Kagrane pristi ne' Eliasa'ene mike naga nofipima vugote'naza kva vahe'mota, ha'ma ome hu'za eri'za e'naza zantamine, vahe'ene zagagafanena hamprigahaze. <sup>27</sup> Ana'ma huteta hapinti'ma eri'za e'naza feno zantamina tarefi refko huta, ha'ma ome hu'naza sondia vhahera nezamita, mesiama'a mago'a vahetami zamiho. <sup>28</sup> Hagi vhahero, bulimakaono, sipisipio, meme afuro donki afu'ma hamprisageno'ma 500timi huterema hanifintira, Ra Anumzamo'na suzana magoke namitere hugahaze. <sup>29</sup> Hagi Nagri'ma Ra Anumzamo'nama nami'naza ofa erita pristi ne' Eliasa ome amigahaze. <sup>30</sup> Hagi Israeli vahe'ma refko huzamizage'za eri'naza zampinti'ma hamprisageno mago 50timi huterema hania vhahero, bulimakaono, sipisipio, meme afu'tamimpintira mago avretere huta, livae nagama Ra Anumzamo'na seli mono noma kegava hu'naza nagaara zamigahaze. <sup>31</sup> Hanki Moseseka pristi ne' Elieasaki Ra Anumzamo'ma huzanante'nea zana hu'na'e. <sup>32</sup> Hagi hapintima sondia vahe'mo'zama eri'za e'naza zantamima miko hampri'nazana 675 tauseni'a sipisipigi, <sup>33</sup> 72 tauseni'a bulimakaonki, <sup>34</sup> 61 tauseni'a donkigi, <sup>35</sup> 32 tauseni'a vene omase

\* <sup>31:22</sup> Tinie nehuno Lediema hu'nea aenigu hu'ne.

a'nenenava're'naze. <sup>36</sup> Hagi hate'ma vu'naza vahe'mokizmi zantamima amu'nompinti'ma refko huzami'nazana, 337tausen 500'a sipisipifintira, <sup>37</sup> Ra Anumzamofo 675'a sipisipi nemiza, <sup>38</sup> 36tauseni'a bulimakaoma avre'hafintira, Ra Anumzamofona 72'a nemiza, <sup>39</sup> 30tausen 500'a donki afutamima avre'nafintira 61ni'a Ra Anumzamofo ami'naze. <sup>40</sup> Hagi 16tauseni'a vahe'ma zamavare'nafintira, 32'a vahe Ra Anumzamofo ami'naze. <sup>41</sup> Ana hazageno ana zantamina Mosese'a erino Ra Anumzamo'ma asami'nea kante anteno, Ra Anumzamofo ofagino pristi ne' Eleasa ami'ne. <sup>42</sup> Hagi ha'ma ome hu'naza sondia vahe'mofo zampinti'ma, Israeli vahe'ma Mosesema refko huno zami'neana, <sup>43</sup> 337tausen 500'a sipisipigi, <sup>44</sup> 36tauseni'a bulimakaonki, <sup>45</sup> 30tausen 500'a donki afuki, <sup>46</sup> 16tauseni'a mofa'nema venema omase'naza mofa'negi huno refko huzami'ne. <sup>47</sup> Hagi Israeli vahe'ma refko huzamizage'za eri'naza zampinti'ma hamprizageno mago 50ma hutere'ma hia vahero, afuzagafintira mago avretere huno Ra Anumzamofo seli mono noma kegava nehaza Livae nagara Mosese'a zami'ne. <sup>48</sup> Anante 1tauseni'a sondia vahete ugota hu'naza kva vahe'mo'zane, 100'a sondia vahete ugota hu'naza kva vahe'mo'za Mosesente e'za, <sup>49</sup> anage hu'naze, Eri'za vahekamotama sondia vahetima hampritama eri antefatgo hutama konana, mago'mo'e huno fanene osu'neanki miko mani'none. <sup>50</sup> Ana hu'negu mago mago sondia vahe'mo'za eri'naza zampintira, goliretimatro'ma hu'naza avasese zantaminki, zamazampasafima nehaza asagi, zamazampima nentaniza asagi zamazankofima huvame hu'za nentaniza rinigi, zamagesafima renentaza rinigi, zamanankempima nehaza pasesua Ra Anumzamofontega tagra'arema ete nona huta mizase ofa erita neone. <sup>51</sup> Moses'e'ne pristi ne' Eleasarike goliretimatro'ma hu'naza zantamina sondia vahete kva vahepintira, ana miko eri'na'e. <sup>52</sup> Hagi ana maka golima tausenia'sondia vahete kva vahe'mo'zane, 100'a sondia vahete kva vahe'mo'zama ofama eme Ra Anumzamofonte'ma hu'naza golimofo kna'amo'a ana makara 190'a kilo hu'ne. <sup>53</sup> Hagi hapinti'ma eri'naza zantamipintira mago mago sondia vahem'za eritere hu'naze. <sup>54</sup> Hagi Moseske Eleasarike ana goliramina 1tauseni'a sondia vaheta ugota kva vahe'ene 100'a sondia vahete kva vahepintira eri'na'e. Ana huteke Ra Anumzamo'ma Nagri vahere huno antahizaminigu ana golia erike seli mono nompi ome ante'na'e.

## 32

### *Jodani ti'mofo zage hanati kaziga me'nea mopafi umani'naza naneke*

<sup>1</sup> Hagi Rubeni naga'ene Gati naga'mo'za tusi sipisipine bulimakaone ante'naze. Ana hu'nazanki'za Jaseli mopane Giriati mopane ke'nazana zagagafama kegava hu' mopa knare mopa me'nege'za ke'naze. <sup>2</sup> Hagi Gati naga'ene Rubeni naga'mo'za Mosesema pristi ne' Elieasama, Israeli ranra vahe'enena amanage hu'za eme zamasami'naze, <sup>3</sup> Atarotigi, Dibonigi, Jazerigi, Nimragi, Hesbonigi, Elealagi, Sibamugi, Nebogi, Beoni'kumatamimofo tava'ontema me'nea moparamina, <sup>4</sup> Ra Anumzamo'ma ha'ma huno Israeli vahe'motama eritami'nea mopamo'a zagagafama kegavama hanunana knare hu'ne. E'ina hu'negu tagra tamagri eri'za vahekamota rama'a zagagafa ante'none. <sup>5</sup> Ana hu'negu musema hunerantesunka ama ana mopa atregeta kagri eri'za vahe'mota erisanti harammeno. Hagi tataregeta Jodani timofo kantu kaziga takaheta ovugahune. <sup>6</sup> Hagi Moses'a Rubeni naga'ene Gati nagara zamasamino, tamagra kama kaziga mani'enage'za mago'a tamafuhe'za kantu kaziga hara ome hanazegu nehazo? <sup>7</sup> Hagi

Ra Anumzamo'ma kantu kazigama tami'nea mopafina Israeli vahe'ma tima takahē'za vu'zama nehazageta, tamagra na'a agafare kama kaziga manita zamarimpa kna eri'zaminakura nehaze? <sup>8</sup> Hagi Kades-Baneati'ma tamafahē'ima huzamantoge'za ama ana mopama nege'za hu'nazankna huta tamagra ana nehaze. <sup>9</sup> Hagi zamagra mareriza Eskoli agupo mopama ome kete'za, e'za Israeli vahe'mofo antahintahi eme zamazeri savri hazage'za amuhazazmnia omnege'za Ra Anumzamo'ma zami'nea mopafina uofre'naze. <sup>10</sup> Ana knazupage Ra Anumzamofona tusi arimpa ahegen, amanage huno huvempa kea hu'ne, <sup>11</sup> na'ankure Nagrira zamagu'reti hu'za namagera onte'nazagu, Isipiti'ma e'naza vahepintira kafuzamimo'ma 20'a kafuma agatere'nesia vahe'mo'za Abrahamura, Jekopuma, Aisakima huvempama huzmantē'noa mopa ome onkegosaze huno hu'ne. <sup>12</sup> Hagi mago'mo'e huno agu'aretira namagera onte'neanki, Jefune nemofo Kalepiki, Nuni nemofo Josuakea zanagrake zanagu'aretira navesi nenanteke namagera ante'na'e. <sup>13</sup> Ana hu'negu Ra Anumzamo'a Israeli vahera arimpa ahezamantege'za 40'a zagegafufina ka'ma kopina vanovano nehazageno, Ra Anumzamofonte'ma kumima hu'naza vahe'mo'za fri 'naze. <sup>14</sup> Hianagi menina keho, kumike vahe'mokizmi mofavre'rmina, tamagra neramafazama hu'nazaza huta kumira nehuta, mago'ane Ra Anumzamofona azeri arimpahazageno Israeli vahe'motagura rimpia aheneramante. <sup>15</sup> Hagi tamagra mago'anema Ra Anumzamofoma tamage'nama humisaza zamo hanigeno, Ra Anumzamo'a ka'ma kopina mago'ane tamatresigeta havizana hugahaze. <sup>16</sup> Hianagi Mosesente e'za anage hu'naze, Tagra amafi afu kevutima antesuna kumara negita, a'netine ne'one mofavretinema mani'nuna kumara kigahune. <sup>17</sup> Hianagi a'mofavretia hanave vihufi mani'enageta tagra ha'pina ugota Israeli nagatia zamavareta nevamanena, erisanti haregahaze'ma hu'nea mopa ome erigahaze. <sup>18</sup> Hagi tagra kumatirega ometa mani'nesunke'za, mika Israeli naga'mo'za erisantima haregahazema hu'nea mopa erivarete-sageta kumatirega vugahune. <sup>19</sup> Hagi Jodani timofo kantu kazigama me'nea mopafintira mago mope huta erisanti oharegahune. Na'ankure kama zage hanati kazigama me'nea mopa ko erisanti'hare'none. <sup>20</sup> Anante Mosesē'a zamasamino, Tamagrama kema hazaza huta, ha'ma hunaku'ma Ra Anumzamofo avugama retro'ma hanuta, <sup>21</sup> tamagra Ra Anumzamofo avuga Jodani tina takaheta nevanageno, Ra Anumzamo agra'a hara huno ha' vahe'a zamazeri agateregahie. <sup>22</sup> Hagi Israeli vahe'mo'zama ana mopama erivagaretesageta eteta kuma tamirega e'nageno, kema anaki'naza kemo'a vagaregahie. Hagi Jodani timofo zage hanati kaziga mopa Ra Anumzamo taminigeta erisanti'hareta tamagra kegava hugahaze. <sup>23</sup> Hianagi anazama osanazana tamagra Ra Anumzamofontera kumi hugahazankino ana kumi'mofa nona'a, tamagra knazama'a erigahaze. <sup>24</sup> Hu'negu a'netamine mofavre'tamimo'za mani'naza ranra kumara kinezamanteta afutamima antesaza kumara retro hiho. Hianagi huvempa hu'naza zana huvareho. <sup>25</sup> Hige'za Gati naga'ene Rubeni naga'mo'za Mosesena kenona hunte'za, Kagri eri'za vahe'mota ramokama hanazana hugahune. <sup>26</sup> Hagi neone mofavrette a'netine afu kevutia kama rankumapi Gileati maniga-haze. <sup>27</sup> Hianagi kagri eri'za vahetamimo'za Jodani timofo kantu kaziga ha'zazmi eri'ne'za takahē'za vu'za Ra Anumzamofo avuga ramokama banana kante ante'za hara ome hugahaze. <sup>28</sup> Hazageno Mosesē'a Elieasane Josuane mago'a Israeli naga nofite'ma vugota huterema hu'naza vahera

zamasmino, <sup>29</sup> Rubeni naga'ene Gati naga'mo'zama ha'zama retro hu'za Jodani tima takahē'zama Ra Anumzamofo hatema tamagranema vu'za ha'ma ome hu'za mopama omeritamisageta erisuta, Giliati mopa zamigahaze. <sup>30</sup> Hu'neanagi ana naga'mo'zama ha'zazmima eri'ne'za tamagranema Jodani tima takahē'za ha'ma ome osanazana, tamagra Giliati mopa ozamita, Kenenima manisafi mopa zaminke'za maniho. <sup>31</sup> Anante Gati naga'ene Rubeni naga'mo'za kenona hu'za, kagri eri'za vahe'mota Ra Anumzamo'ma hu'neankea eri'zafa huta amage antegahune. <sup>32</sup> Hagi tagra Ra Anumzamofo ha'ma hanuna zantia erineta, Jodani tina rakaheta Ra Anumzamofo avuga Kenani mopafī vanunkeno, erisantiharesu'na mopa Jodani timofo kama kaziga manegahie. <sup>33</sup> Higeno Mosese'a Gati nagaki, Rubeni nagaki, Josefe nemofo amu'nompinti'ma refko hu'naza Manase nagara Amori kini ne' Sihoni ranku'ma'ene Basani kini ne' Ogi rankuma'ene, mopane megagi'nea kuma'enena zami'ne. <sup>34</sup> Hagi Gati naga'mo'zama ki'naza kumatamina, Dibonima Atarotima, Aroelima, <sup>35</sup> Atrot-Sofani kuma'ma, Jaseli kuma'ene, Jogobehati kuma'ene, <sup>36</sup> Bet-Nimra kuma'ma Bet-Hara kuma'enena hanave ku'ma negi'za sipisipi afu'ma kegava hanaza kegina hu'naze. <sup>37</sup> Hagi Rubeni naga'mo'zama ki'naza kumatamina Hesbonima, Elealema, Kiriataimima, <sup>38</sup> Neboma Bal-Meonima Sibma kuma'ene negi'za ana kumatamimofo zamagia, ru zamagi antemi'naze. <sup>39</sup> Hagi Manase nemofo Makirimpintima fore'ma hu'naza naga'mo'za Giliati vu'za, ana kumapima nemaniza vahera ha' ome huzmante'za e'neriza, anampima nemaniza Amori vahera zamahenatitre'naze. <sup>40</sup> Ana hazageno Mosese'a Giliati rankumara Manase nemofo Makiri naga zamige'za ana kumapina mani'naze. <sup>41</sup> Hagi Manase nemofo Jairi'a osi kumatamima Giliati meagi'neana ha' huno ome'nerino, Havot Jaire huno agi'a antemi'ne. <sup>42</sup> Hagi Noba'a Kenati rankum'aene neone kumatamima meagi'nea kumatamina erino ana kumataminkura Nobae huno agrā'a agire asamare'ne.

### 33

#### *Israel vahe'mo'za Isipiti Jodanima kama e'nazazamofo krezugage hu'naza naneke*

<sup>1</sup> Hagi Mosese'ene Aronike'ma Israeli vahera Isipitira zamavare atimaramike'za nagatenofite'ma hu'za e'nazana ama kante vu'naze. <sup>2</sup> Hagi Ra Anumzamo Mosesena asamigeno manite manite'ma hu'za vu'naza kumatamimofo zamagia ese'ma atre'naza kumateti agafa huno krente'ne. <sup>3</sup> Hagi Israeli vahe'mo'za Rameses kumama atre'za vu'nazana ese ikamofona 15tini zupa Anumzamo ozamahe zamagatere'nea ne'zama nete'za nanterana, miko Isipi vahe'mo'za nezamagage'za Isipitira atiramiza nevazageno, <sup>4</sup> Isipi vahe'mo'za Ra Anumzamo'ma zmagonesa mofavrema kenagema zamahe fri'nea mofavreramina asezmant'e'ne. Hagi ana nehuno Ra Anumzamo'a Isipi vahe'mokizmi havi anumzantaminena zamahe fanene hu'ne. <sup>5</sup> Hagi Israeli vahe'mo'za Rameses rankumara atre'za vu'za, Sukoti seli nonkumara ome ki'za mani'naze. <sup>6</sup> Hagi anantetira hage'za vu'za hagege mopamofo atumparega Etamu seli nonkuma ome ki'za mani'naze. <sup>7</sup> Hagi anantetira ete rukrahe' hu'za Pi-Hahirotia vu'za Bal-Sefonia zage hnati kaziga seli nonkumara Miggordi tava'onte ome ki'za mani'naze. <sup>8</sup> Hanki Pi-Hahirotia atre'za Koranke hagerina takahē'za, Etamu hagege mopafina 3'a zagegnafi vu'za, seli nonkumara Mara ome ki'za mani'naze. <sup>9</sup> Hagi anantetira hage'za vu'za Elimi seli nonkumara ome

ki'za mani'naze. Hagi ana kumatera 12fu'a kampu'i tina megeno 70'a tofe zafa me'nere seli nonkumara eme ki'naze. <sup>10</sup> Hagi Elimia atre'za vu'za Korankre hageri ankenare seli nonkumara ome ki'za mani'naze. <sup>11</sup> Hagi korankre hagerina atre'za vu'za Sainai hagege kokamofona, zage ufre kaziga Seli nonkuma ome ki'za mani'naze. <sup>12</sup> Hagi Sainai hagege kokana atre'za Dofka seli nonkumara ome ki'za mani'naze. <sup>13</sup> Hagi Dofkatira atre'za Alusi seli nonkumara ome ki'za mani'naze <sup>14</sup> Hagi anantetira atre'za Refitim seli nonkumara ome ki'za mani'naze. Hagi e'i ana kumapina vahe'mo'zama tima nesaza zana omane'ne. <sup>15</sup> Hagi Refitimia atre'za Sainai hagege kokampi seli nonkumara ome ki'za mani'naze. <sup>16</sup> Hagi Sainai hagege kokampintira atre'za, Kibrot-Hatava seli nonkumara ome ki'za mani'naze. <sup>17</sup> Hagi Kibrot-Hatava atre'za Hazeroti seli kumara ome ki'za mani'naze. <sup>18</sup> Hagi Hazerotitira atre'za Ritma seli nonkumara ome ki'naze. <sup>19</sup> Hagi Ritmatira atre'za Rimon-Peresi seli nonkumara ome ki'za mani'naze. <sup>20</sup> Hagi Rimon-Peresitira atre'za Libna seli nonkura ome ki'za mani'naze. <sup>21</sup> Hagi Libnatira atre'za Risa seli nonkumara ome ki'za mani'naze. <sup>22</sup> Hagi Risa atre'za Kehelata seli nonkumara eme ki'za mani'naze. <sup>23</sup> Hagi Keheratitira atre'za Sefa agonare seli nonkumara eme ki'naze. <sup>24</sup> Hagi Sefa agonaretira atre'za Harada seli nonkumara ome ki'za mani'naze. <sup>25</sup> Hagi Haradatira atre'za Makheloti seli nonkumara ome ki'za mani'naze. <sup>26</sup> Hagi Makherotitira atre'za Tahati seli nonkumara ome ki'za mani'naze. <sup>27</sup> Hagi Tahatitira atre'za Tera seli nonkumara ome ki'za mani'naze. <sup>28</sup> Hagi Teratitira atre'za Mitka seli nonkumara ome ki'za mani'naze <sup>29</sup> Hagi Mitkatira atre'za Hasmona seli nonkumara ome ki'za mani'naze. <sup>30</sup> Hagi Hasmonatira atre'za Moseroti seli nonkumara ome ki'za mani'naze. <sup>31</sup> Hagi Moserotitira atre'za Bene-Zakan seli nonkumara ome ki'za mani'naze. <sup>32</sup> Hagi Bene-Zakanitira atre'za Hor-Hagidgati seli nonkumara ome ki'za mani'naze. <sup>33</sup> Hagi Hor-Hagidgatira atre'za Jotbata seli nonkumara ome ki'za mani'naze. <sup>34</sup> Hagi Zotbatatira atre'za Abrona seli nonkumara ome ki'za mani'naze. <sup>35</sup> Hagi Abronatira atre'za vu'za Ezion-Geba seli nonkumara ome ki'za mani'naze. <sup>36</sup> Hagi Ezion-Gebatira atre'za vu'za Zini hagege kokampi Kadesi seli nonkumara ome ki'za mani'naze. <sup>37</sup> Hagi Kadesitira atre'za vu'za, Edomu mopa atuparega Hori agonare seli nonkumara ome ki'za mani'naze. <sup>38</sup> Hagi Isipitima Israeli vahe'ma attiramiza e'nazaza, 40'a kafu evigeno 5fu ikamofona ese knazupa Ra Anumzamo'a Aronina huntegeno Hori agonare marerino anantega ufri'ne. <sup>39</sup> Hagi Aronima fri'neana 123'a kafu huteno, Hori agonafina ufri'ne. <sup>40</sup> Hagi Aradi vahe kini nera Kenani ne'kino Kenani mopafi Negevi nemania ne'mo Israeli vahe'mo'za neaze kea antahi'ne. <sup>41</sup> Hagi Israeli vahe'mo'za Hori agonaretira atre'za vu'za Zalmona seli nonkumara ome ki'za mani'naze. <sup>42</sup> Hagi Zalmona atre'za vu'za Punoni seli nonkumara ome ki'za mani'naze. <sup>43</sup> Hagi Punonitira atre'za Oboti seli nonkumara ome ki'za mani'naze. <sup>44</sup> Hagi Obotira atre'za Moapu mopa atuparega Ie-Abarimi seli nonkumara ome ki'za mani'naze. <sup>45</sup> Hagi zamagra Ie-Abarimitira atre'za vu'za Dibon-Gati seli nonkumara ome ki'za mani'naze. <sup>46</sup> Hagi Dibon-Gatitira atre'za vu'za Almon-Diblataim seli nonkumara ome ki'za mani'naze. <sup>47</sup> Hagi Almon-Diblataimitira atre'za vu'za zage hanati kaziga Nebo tava'onte Abarimu agonare seli nonkumara ome ki'za mani'naze. <sup>48</sup> Hagi Abiramu agonaretira atre'za urami'za Jodani timofo kantu kaziga Jeriko megeno kama kaziga

Moapu agupofi seli nonkumara ome ki'za mani'naze.<sup>49</sup> Hagi Moapu agupofi Jodani timofo akenare Bet-Jeshimotitira seli nonkumara ki'za Abel-Sitimi uhanati'naze.

### *Kenani kumama omerisaza naneke*

<sup>50</sup> Hagi Jodani timofo kantu kaziga Jeriko megeno, kama kaziga Moapu agupofi Ra Anumzamo'a Mosesena asamino, <sup>51</sup> Israeli vhahera zamasamige'za Jodani tima takahe'za kantu kazigama Kenani vanu'za, <sup>52</sup> tamavugama me'nea mopafima mani'naza vhahera maka zamahenati trevareho. Hagi zafare'ma antre'za tro'ma nehu'za, aeni krenare'za tro'ma hu'enaza havi anumzantamina maka ruhantagita eri haviza nehuta, havi anumzante'ma mono'ma nehanaza kumazamia maka eri tapage hutreho. <sup>53</sup> Hagi tamagra ana mopa omerita maniho. Na'ankure Nagra ana mopa erita mani'nazegu neramue. <sup>54</sup> Hagi mopama refkoma huta erisanti haresazana, nagate nofite satu zokago reta kesageno, ina nagamofo agimo'ma eama'ma hanimo'a ana mopa eritere hino. Hagi rama'a vahe'ma mani'nenaza nagategati refako huta osi'ama mani'nenaza negate uhanatiho. <sup>55</sup> Hagi ana mopafima mani'naza vahe'ma zamahe onati'nage'za tamagrira tamavurgafi rampaza fre'neno tamata tamiaza nehu'za, ave'ave trazamo tamaopafi reankna hugahaze. <sup>56</sup> Hagi tamagrama zamahe onatinage'na zamagrira zaminaku'ma retro hunte'noa knazana tamagri tamigahue.

## 34

### *Anumzamo Israeli vahe'ma zami'nea mopamofo naneke*

<sup>1</sup> Hagi Ra Anumzamo'a amanage huno Mosesena asami'e, <sup>2</sup> Amanage hunka Israeli vhahera zamasamio, Israeli vahe'ma erisanti hategahaze hu'noa mopafima Kenanima ufresaza mopamofo ometre emetrema hu agema'amo'a amanahu hugahie. <sup>3</sup> Sauti kaziga mopamofo agema'amo'ma vu'neana, Zini hagege mopafi vuno Idomu vahe mopa atupare ometre'ne. Hagi sauti kaziga mopa agema'amo'a Fri Hagerimofona zage hanati kazigati agafa hugahie. <sup>4</sup> Hagi anantetira Kades Bania mopamofona sauti kaziga Skopion Pasi vuno Zini uhanatigahie. Hagi anantetira Haza Ada vuno Azmoni uhanatigahie. <sup>5</sup> Hagi anantetira rugitagino Isipi tinkrahote vuteno, Mediterenia Hagerinte uhanati'ne. <sup>6</sup> Hagi zage fre kaziga mopa atupamo'a, Ra Hagerintetira vuno Hora agonare uhanatigahie. <sup>7</sup> Hagi noti kaziga mopama nof'i'ma avazu huta eri antefatgoma hanazana, Mediterenia hagerintetira Hora agonare vugahie. <sup>8</sup> Lebo Hamati vuteno Zedati uhanatigahie. <sup>9</sup> Hagi anantetira Zifoni vuteno, Hazar-Enan kaziga vugahie. E'ire noti kaziga mopamofo atupamo'a ome atregahie. <sup>10</sup> Hagi zage hanati kaziga mopama eri ante fatgoma hanazana, Hazaritira Sifami vuteno, <sup>11</sup> Riba uhanatiteno anantetira Aina vuteno, uramino Kenareti hagerimofona (Galili) zage hanati kaziga uhanatigahie. <sup>12</sup> Anantetira Jodani ti avaririno uramino Fri Hagerima me'nea kaziga eri ante fatgo huno vugahie. E'ire mopatamomo agema'amo'a ome atregahie. <sup>13</sup> Hagi Mose'e'a mika Israeli vhahera huzmanteno, Ra Anumzamo'a 9ni'agi hafu'a naga nofimota ana mopa erisanti hategahaze huno hu'ne. <sup>14</sup> Na'ankure Rubeni naga'ene Gati naga'ene amu'nompinti'ma refako hu'naza Manase naga'mo'za nezmafa zamagire mopa eritere hu'naze. <sup>15</sup> Hagi Jerikoa kantu kaziga megeno, Jodani timofo kama zage hanati kaziga mopa ana taregi hafu'a naga nofimo'za erigahaze.

### *Mopama refkohu kva vahe'mofo naneke*

<sup>16</sup> Ra Anumzamo'a amanage huno Mosesena asami'ne, <sup>17</sup> Erisantiharesaza mopama refko huzamisaza vahe zamagi'a, pristi ne' Eleasariki, Nuni nemofo Josuake mopa refako huke zamigaha'e. <sup>18</sup> Hagi mika' naganofipintira mago mago kva vahe huhampri zamantenke'za zanaza hu'za erisantiharesaza mopa refko hiho. <sup>19</sup> Hagi ana netrema zanaza hu'za mopama refko hanaza vahe zamagi'a ama'ne, Juda nagapintira Jefune nemofo Kalepiki, <sup>20</sup> Simioni nagapintira Amihudi nemofo Semueliki, <sup>21</sup> Benzameni nagapintira Kisloni nemofo Elidadi'e. <sup>22</sup> Hagi Dani nagapintira Jogli nemofo Bukiki, <sup>23</sup> Josefe nagapintira Efoti nemofo Manaseki, <sup>24</sup> Efremi nagapintira Siften nemofo Kemueliki, <sup>25</sup> Zebuluni nagapintira Panaki nemofo Elizafaniki, <sup>26</sup> Isaka nagapintira Azari nemofo Paltieliki, <sup>27</sup> Asa nagapintira Selomi nemofo Ahikutiki, <sup>28</sup> Naftali nagapintira Amihuti nemofo Pedaheli'e. <sup>29</sup> Hagi Ra Anumzamo'a ama ana vahetami Kenani mopama ome erisantiharesaza mopama refako huzamisaza vhahera huhampri'zamante'ne.

## 35

### *Livae naga'mokizmi kumamofo naneke*

<sup>1</sup> Hagi Jodani timofo mago kaziga Jeriko megeno kantu kaziga Moapu agupofi Ra Anumzamo'a amanage huno Mosesena asami'ne, <sup>2</sup> Israeli vahera huge'za erisanti haresaza mopafintira, Livae nagama mani'naza rankumatami'ne, tava'ozamire'ma me'nenia mopa sipisipine bulimakao afu'zamima kegava hanaza mopanena zamiho. <sup>3</sup> Hagi Livae naga'mo'za ana ran kumatamimpi nemani'za, tava'ozamire'ma me'nesia mopafi sipisipine bulimakao afu'zamia kegava hugahaze. <sup>4</sup> Hagi Livae nagama afu'zamima kegava hanaza mopama refko huzamisazana, rankuma keginaretira maka asoparega 450'a mita vuno eno hinkeno, ran kumamo'a amu'nompi megahie. <sup>5</sup> Hagi kuma keginamofo fegiatim'a \*nofi'ma avazu hanageno zage hanati kaziga vuno, zage fre kazigama vuno kazantamaga kaziga vuno, kaza hoga kazigama vaniana miko 900 mita hanigeno, e'i ana mopa sipisipine bulimakao afutami kegava hu mopa menkeno, rankumamo'a amu'nompi megahie. <sup>6</sup> Hagi 6si'a kuma'ma Livae naga'ma zamsazana, mago vahe'mo'ma mago'azama hanirega hantagama huno vahe'ma ahefriteno, agu'vazinigu freno umanisia kuma nezamita, ana agofetura 42'a kuma'ene zamigahaze. <sup>7</sup> Hagi Livae nagama zami'nazana maka 48'a rankumatamine, afu'zamima kegavama hanaza mopagi huta refko huzamigahaze. <sup>8</sup> Hagi Israeli vahe'mo'zama erisantima haresaza mopafintira Livae nagara mopa eri zamigahane. Hagi rama'a mopama eri'nesaza nagapintira, rama'a mopa eri'nezamita, osi'a mopama eri'nesaza nagapintira osi'a mopa eri zamigahaze.

### *Zamagu'vazi kumatamimofo naneke*

<sup>9</sup> Anante Ra Anumzamo'a amanage huno Mosesena asami'ne, <sup>10</sup> Israeli vahera zamasmige'za Jodani tima takahē'za Kenani mopafima unefresu'za, <sup>11</sup> mago vahe'mo'ma mago'azama haniregama hantaga huno mago vahe'ma ahe frisuno'ma freno vuno ome agu'ma vazisia kumatamina mago'a huhampintesageno megahie. <sup>12</sup> Hagi ana kumatamina tamagu'vazi kuma

\* <sup>35:5</sup> Nofi avazu hugahiemu hu'neana mesarimi huzanku hu'ne.

me'nena anama ahe frisaza vahe'mofo naga'mo'za nona hu'za ahe ofrisageno mani'neno keagarera otigahie. <sup>13</sup> Hagi ana 6si'a kumatamina tamagu'vazi kuma megalie. <sup>14</sup> Hagi tamagu'vazi kumara 3'a Jodani kaziga huhamprinteta, 3'a Kenani kaziga huhamprintegahaze. <sup>15</sup> Hagi e'i ana 6si'a kumamo'a Israeli vaheki, emani vaheki, mago'a erizante vanoma nehania vale'mo'ma mago'azama hanirega hantga huno vahe'ma ahe friteno, freno ome agu'mavazi'nia kuma megahie.

<sup>16</sup> Hianagi aeni kanonteti'ma vahe'ma ahesigeno frisia vhahera, agri'enena ahe friho. <sup>17</sup> Hagi mago vahe'mo'ma have kanonuma vahe'ma ahefrisia vhahera, hazenke hugahianki agri'enena ahefriho. <sup>18</sup> Hagi kanonteti'ma vahe'ma ahefrisia vhahera, hazanke hugahianki agri'enena ahe friho. <sup>19</sup> Hagi vahe'ma ahefrisia nera anama frisia vahe'mofo korama'amo'za ana ne'ma kesu'za ahefriho. <sup>20</sup> Hagi vahe'mo'ma magomofo arimpa ahenenteno retufetrege, agona zantetima matevuno ahesigeno frisiana, agra hazenke hugahie. <sup>21</sup> Hagi mago vahe'mo'ma, mago'mofoma rimpia ahenenteno azankanonu'ma ahesigeno frisiana, agra hazenke hugahianki, ana zante'ma nona hu vahe'mo'za kesu'za ahe friho. <sup>22</sup> Hianagi mago'mofoma arimpa aheonte'neno amne retufetresio, mago'a agonazama mate vanirega hantaga huno ahenigeno frisiana, <sup>23</sup> ha' vahe'a omani'neanagi avu onkeno have atresigeno ahefrisiana, agra antahino keno osu'neno anara hugahianki, <sup>24</sup> kumapi vahe'mo'zane anama ahenageno frisia ne'mofo avate korama'amo'za atruhu'za ana nanekea antahiza refko hugahaze. <sup>25</sup> Hagi ana kumapi vahe'mo'za, anama fri'nea vahe'mofo naga'mo'zama ahefrizama nehanage'za, ana nera avre'za agu'vazi kumatega ome atregahaze. Hagi ana ne'mo'a ana kumapi mani'nesigeno, ruotage'ma hu'nea masavema anunte'ma frente'nesia ugota pristi ne'ma fritesigeno, ete kuma'arega vugahie <sup>26</sup> Hianagi ana pristi ne'ma ofri'enenigeno, ana ne'mo'ma agu'vazi kumama atreno fegi'ama mani'nenigeno, <sup>27</sup> ahe fri'nesia ne'mofo avate korama'amo'ma tutagihama hunteno ahefrisigeno'a keaga omanegosie. <sup>28</sup> Hagi ana hazenke'ma hu'nenia vahe'mo'a agu'vazi kumapi mani'nenigeno ana pristi nera fritenigeno kuma'arega vugahie. <sup>29</sup> Hagi tamagrane henkama fore hu anante anante'ma huta vanaza vahe'mota, ama ana nanekea kasege me'nena avariri vava hugahaze. <sup>30</sup> Hagi mago vahe'mo'ma vahe'ma ahe nefrisige'za tareo tagufamo'zama kene'za huama'ma huntesage'za ana vhahera ahe frigahaze. Hianagi magoke vahe'mo'ma ke'neno'ma huamama hania zanteria, ahe ofrigahaze. <sup>31</sup> Ana hukna huno vahe'ma ahe fri'nenera, fruma huno manizankura zagoretira mizaseno omanigahie. Anahukna huta vahe'ma ahe fri'nesirera, ana vahe ahefriho. <sup>32</sup> Hagi pristi ne'ma ofri'enenkeno agu'vazi kumapintima atiramino fru huno mani'nakura, zago mizaseno kuma'arega ovugosie. <sup>33</sup> Hagi e'inama hanageno'a mopatamimo'a havizana osugosie. Na'ankure vahe'ma ahefrigeno korama tagirami zamo'a, mopa eri haviza nehie. Hagi ana nona'a, anama vahe'ma ahe fri'nesia vahe'mofo koramoke'za mopa eri agru hugahie. <sup>34</sup> Hagi ana'ma umani'naza mopa eri havizana osugahaze. Na'ankure Nagra Ra Anumzamo'na Israeli vahe'mokizmi amu'nompina manigahue.

<sup>1</sup> Hagi Giliati nagara Makirimpinti fore hazageno, Makiri'a Manase ne'mofokino Josefe nagapinti fore hu'ne. Hagi mago zupa Giliati naga'mokizmi kva vahe'mo'za Mosesente'ene, Israeli vahe'mokizmi kva vahete'ene keaga hu'naku vu'naze. <sup>2</sup> Hagi zamagra amanage hu'za zamasami'haze, Ra Anumzamo'a kagrikura Israeli vahe'mo'za erisantima haresaza zana zamio hu'ne. Hagi rantimoka, Ra Anumzamo'a kagrira kasamino Serofehati'ma erisantima hare'nea mopa mofane zaga'a zamiho huno hunte'ne. <sup>3</sup> Hianagi ana mofanemo'za Israeli vahepima mago nagapi ne'ma vema erisageno'a, zamagra erisantihare'naza mopamo'a vema eri'saza venenemofo naganofipi mopamo'a vugahie. <sup>4</sup> Hagi vahe zama eri'nea zama ami kafuma esige'za vema eri'nea nagamofo mopasena mago'ane eri aguhesageno tagehe'i mopamo'a ana nagapi mevava huno vugahie. <sup>5</sup> Hagi Ra Anumzamo'ma huntea kante anteno Moses'e aamanage huno Israeli vhahera zamasami'ne, Josefe naga'mozama ama kema nehazana tamage nehaze huno hu'ne. <sup>6</sup> Hagi Ra Anumzamo'a amanage huno Jerofehati mofane nagakura hu'ne, Zamavesite zamagra ina vema erinaku'ma hanu'za nezamafa naga nofipintinke erigahaze hu'ne. <sup>7</sup> Hagi e'inahu'ma hanageno'a mago nagamofo mopamo'a ru nagapina ovugosie. Na'ankure mikä Israeli naga nofimo'za nezamafa mopa erisantiharetere hugahaze. <sup>8</sup> Hagi Israeli naga nofipintima mago mofa'mo'ma mopama erisanti hare'nesuno'a agra'a naga nofipi vea erisigeno mopamo'a ru nagapina ovugahie. <sup>9</sup> Hagi mopatamia atrenkeno ru nagapi ru nagapina huno vuno eno osino. Hagi tamagrama erisantima hare'nesaza mopamo'a, tamagri mopa megahie. <sup>10</sup> Ra Anumzamo'ma Mosesema asami'nea kante ante'za Zerofat mofa'nemo'za anara hu'naze. <sup>11</sup> Hagi Zerofat mofa'nemokizmi zamagi'a, Mahalaki, Tirsaki, Hoglaki, Milkaki, Noa'e. Hagi ana maka'mo'za nezmafohemokizmi vea eri'naze. <sup>12</sup> Hagi zamagra Josefe nemofo Manase nagapi vea erizageno, erisantima hare'naza mopazmimo'a ru nagapina ovuno nezmafa nagapi me'ne. <sup>13</sup> Hagi Jodani timofo kantu kaziga Moapu agupofi eman'i'nagano, Ra Anumzamo'a ama ana tra kea Mosesena asamigeno, Israeli vhahera zamasami'ne.

## Diutronomi-Kasege

### Mosese'ma Kre'nea Namba 5 Avontafere

*Israeli vahe'ma Isipiti'ma atirami'za e'naza vahe'mofo zamagenkemofo naneke*

<sup>1</sup> Ama avontafepi nanekea Mosese'a maka Israeli vahema Jodani timofo kantu zage hanati kaziga ka'ma kopi Jodani agupofi Sufu kuma tavaonte, Parani kumaki, Tofeli kumaki, Labani kumaki, Hazeroti kuma'ene Disahap kumatamimofo amu'nompi seli nozamia ome ki'za mani'nazageno zmasami'nea naneke. <sup>2</sup> Hagi Horepi\* agonareti'ma Kades-Barnea vunaku Seili agonama me'nea kante'ma vananana, 11ni'a zagegna vugahane. <sup>3</sup> Hianagi Israeli vahe'mo'zama Isipi mopama atre'zama vu'nazareti'ma, e'nea kna'a 40'a kafu manizageno, 11ni ikamofona ese knarer Ra Anumzamo'ma Israeli vahe'ma zamasamioma huno Mosesema asami'nea kante anteno, ana nanekea zamasami'ne. <sup>4</sup> E'i ana nanekea Hesboni kumate mani'neno, Amori mopama kegava hu'nea kini ne' Sihonine, Astarot kumate'ene, Edrei kumate'ma mani'neno Basani mopama kegavama hu'nea kini ne' Ogine hara huznagatereteno zamasami'nea naneke. <sup>5</sup> Joda timofona zage hanati kaziga, Moapu mopafima Israeli vahe'ma mani'nazageno'a Mosese'a Ra Anumzamo'ma asami'nea nanekea amanage huno eriamma huno zamasami'ne. <sup>6</sup> Horepi agonafima mani'nonkeno'a Ra Anumzana Anumzantimo'a amanage hu'ne. Hago za'za kna ama agona fina manize. <sup>7</sup> Kama vanazana rukrahe huta Amori vahe'mofo agonage kokampine, tavaozmire'ma nemaniza vahe'mofo mopama, Araba agona mopafine, agupo mopafine, Negevi mopafine, hagerinkena mopafine, Keneni vahe mopafine, Lebanoni vahe mopafine, Yufretisi rantima me'neregane vugahaze. <sup>8</sup> Keho ama maka moparamina neramuanki, ufreta omeriho. Na'ankure Nagra tamagehe'ima Abrahamune, Aisakine, Jekopunema huvempa huzamante'na ama mopa tamagehe' i zamigahue hu'noe.

#### *Mosese'a azama hanaza kva vahe zamazeri ot'nea naneke*

<sup>9</sup> Ana knazupa nagra amanage hu'na tamasami'noe. Rama'a vahe mani'nazanki'na nagrake knatamia eri'na tamavre'na vugara osu'noe. <sup>10</sup> Ra Anumzana tamagri Anumzamo'a menina tamazeri rama'a higeta, monafi hanafikna huta tusi vahekrefa fore huta mani'naze. <sup>11</sup> Hagi Ra Anumzana tamafahe'i Anumzamo'a huvempama hu'nea kante tauseni'a zupa agatereno tamazeri rama'a nehuno, asomura huramantesie. <sup>12</sup> Hanki inankna hu'na nagrakera tamagri knazana e'neri'na, ha' frama hanaza zana tamazeri fatgo hugahue? <sup>13</sup> Hagi naga nofitamifintira knare antahi'zane vahe'ma, vahe'mo'zama kesga huzmantesage'za manine'za, havi zanki knare zanki'ma hu'za knare antahi'zanteti'ma refkoma huga vahe zamazeri otinke'na nagra huhampri zamantanena kvatamia manigahaze. <sup>14</sup> Hagi tamagra amanage huta ana ke'nirera nasami'naze, kagrama hana antahintahimo'a knare hu'ne huta hu'naze. <sup>15</sup> Anagema hazage'na knare antahintahine vahe'ma zamagesgama nehaza vahera mago'a zamavare'na tauseni'a vahete kva vahe huhampri nezamante'na, mago'a handreti'a vahete kva vahe huhampri nezamante'na, mago'a 50'a vahete kva vahe

\* <sup>1:2</sup> Horepie hu'neana Sainai agonagu hu'ne.

huhampri nezamante'na, mago'a 10ni'a vahete kva vahe huhampri nezamante'na, magoke magoke naganofipi kva vahetami, huhampri zmantere hu'noe. <sup>16</sup> Anagema hute'na amanage hu'na ana kva vahetmina zamasami'noe, tamagra keagama refko'ma hanazana, tamagra'a vahetmimofo kegaga refko nehuta, ru vahe'ma tamagranema enemaniza vahe'mofo kegaga refko hugahazanki, fatgo huta kegaga refko hiho. <sup>17</sup> Hagi kegagama refkoma hanafina, magomofo kazigagera onteho. Agi me'nea vahero, agi omene vahera mago'zanke hutma refkoa hugahaze. Mago vahekura korera osiho, na'ankure fatgoma huno refkoma hu'zana Anumzamofo avu'ava me'ne. Hagi amuhoma huramantenia kegaga nagrite erita e'nage'na nagra refkoa hugahue. <sup>18</sup> Ana'ma hute'na maka tamagrama hanaza zantamina, e'inahu'za hiho hu'na huhankaveti'na humante'noe.

### *Mosese'a mopa afure'za kehogu huzmantege'za vu'naza naneke*

<sup>19</sup> Hagi anama huteta Horepia atreta Ra Anumzamo'ma hu'nea kante anteta, Amori vahe agona kokampine, tusi'a hagage ka'ma kokampi Kades Banea ehanati'none. <sup>20</sup> Hagi nagra amanage hu'na zamasami'noe, Amori vahe agona mopama Ra Anumzana tagri Anumzamo'ma tamigahuema hu'nea mopafi ehanatize hu'na zamasami'noe. <sup>21</sup> Keho! Ra Anumzana tamagri Anumzamo mopa tam'i'ne. Hagi korera osuta Ra Anumzana tamafahe'i Anumzamo'ma zamasami'nea kante anteta mopa omerita maniho. <sup>22</sup> Anante miko vahe'mota nagrite eta amanage hu'naze, mago'a vahe huzmantesunke'za vu'za ana mopa ome nege'za, inankante vuta, ina kuma kora omerigahune ome kete'za eme tasamihou huta hu'naze. <sup>23</sup> E'i ana ketamima antahuana knare hige'na, mago mago naga nofipinti mago vahe avaretere hugeno, ana mika 12fu'a hazage'na, <sup>24</sup> ana vahera huzmantoge'za agona kokantegati agafa hu'za mopa afure'za vu'za, Eskoli agupofi uhanati'naze. <sup>25</sup> Hagi ana mopafintira mago'a zafa raga tagiza e'za amanage hu'za eme tasami'naze, Ra Anumzana tagri Anumzamo knare mopa neramie hu'naze.

### *Israeli vahe'mo'za Anumzamofo ke rutagre'naza naneke*

<sup>26</sup> Hianagi Ra Anumzana tamagri Anumzamo'ma hurmantea kea ruta-greta, ana mopafina ovu'naze. <sup>27</sup> Tamagra seli nontmifi mani'neta ke hakare huta amanage hu'naze, Ra Anumzamo'avesra huranteno, Amori vahe'mofo zamazampi tatresige'za, tazeri haviza hanazegu Isipi mopafintira tavreno atiramino e'ne huta hu'naze. <sup>28</sup> Tagra iga vugahune? Ner-afu'zama hu'za ana mopafima mani'naza vahe'mo'za tagrira tagatere'za za'za hu'za ranra vahe manizageno, ranra kumazamimofona hankavenen-take vihu hugagizageno, Anaki ranra vahetamimofo mofavrezaga ke'none hu'za eme tasami'naza kemo'a tagu'amofona tazeri fakro fakro hu'ne. <sup>29</sup> Anante nagra amanage hu'na zamasami'noe, ana vahekura antri huta korera osiho. <sup>30</sup> Ra Anumzana tamagri Anumzamo'ma tamavugama nevia Anumzamo'a, Isipima mani'neta negazageno ha'ma huno tamavareno'ma e'neaza huno tamagritega anteno hara hugahie. <sup>31</sup> Hagi Ra Anumzana tamagri Anumzamo'ma ka'ma kokampima, mago ne'mo mofavrea avresga huno eankna huno tamavareno eno, ama kumate'ma ehanati'neana hago ke'naze. <sup>32</sup> Hianagi anama hu'nea zankura tamagra Ra Anumzana tamagri Anumzana antahimita tamentintia hunonteta, <sup>33</sup> vugota huno hanimpima tevefi manino tamavreno nevuno, masafina hampompi manino tamavreno nevuno, seli noma kisaza kumara tamaveri nehuno, kama

vanaza kana tamaveri huno vu'nea Ra Anumzana tamefi hunemize. <sup>34</sup> Hagi ke hakarema hu'naza kea Ra Anumzamo'a nentahino, tusi rim-pahegeno amanage huno huvempa kea hu'ne. <sup>35</sup> Amama mani'naza vahe'motagura Ra Anumzamo'a huno, Maka kefo tamavutmava'ene vahek-itma, knare mopama tamagehe'mofoma zamigahue hu'nama huhapriza-mante'noa mopafina, ovutfa hugahaze. <sup>36</sup> Hagi Jefune nemofo Kalepike'za ana mopa ome kegahie. Agrama ome keteno'ma e'nea mopa agri'ene mofavre naga'amokizmi zamigahue. Na'ankure agra Ra Anumzamofo kea agu'areti huno avariri fatgo hu'ne. <sup>37</sup> Hagi tamagrama haza avu'avazante Ra Anumzamo'a nagri'enena rimpia ahenanteno amanage huno nasami'ne, kagranena ana mopafina uofregahane hu'ne. <sup>38</sup> Hagi Nuni nemofo Josua'ma kazama huno eri'zama e'neria ne'mo, ana mopafina ufregahie. Hanki antahintahia aminka azeri hanavetio, na'ankure agra Israeli vhahera za-mavareno ufrenige'za, ana mopa omerigahaze. <sup>39</sup> Hagi havizane knare zanema antahi ama'ma osu'naza neonse mofavretami zamatresuge'za ana mopafina ufresage'na, ana mopa zamisuge'za eri'za manigahaze. <sup>40</sup> Hianagi tamagra rukrahe huta ka'ma mopafi koranke hagerima<sup>†</sup> me'nea kantega vu'naze. <sup>41</sup> Anante tamagra amanage huta kenona hu'naze, tagra Ra Anumzamofontera kumi hu'nonanagi, Ra Anumzana tagri Anumzamo'ma hu'nea kante anteta hara ome hugahune. Anagema nehuta ha' zan-tamina retro huta fru hu'neankita amane hara ome huta agona mopa omerigahune huta hu'naze. <sup>42</sup> Hianagi Ra Anumzamo'a amanage huno nasami'ne, zamasamige'za mareri'za hara ome osiho. Na'ankure ha'ma ome hanazana Nagra zamagranena ovugahuankino, ha' vahe'zmimo'za hara huzmagatereghaze hige'na tamasami'noe. <sup>43</sup> Hianagi kea ontahita tamagra Ra Anumzamofo kea eri atreta tamagra tamavesi avaririta ha' ome hunaku agonage kokampina mareri'za. <sup>44</sup> Hianagi Amori vahe'ma ana agona kokampima nemaniza vahe'mo'za, tumemo'ma erintaguma huno eaza hu'za Seiri kumateti tamahe'za tamarotgo hute'za Homa kumate uha-nati'naze. <sup>45</sup> Anama hazageta ete etma Ra Anumzamofo avuga zavira eme ate'nazanagi, Ra Anumzamo'a ana zavi krafa tamia antahi ontami'ne. <sup>46</sup> E'ina higeta Kades Banea kumate zazakna mani'naze.

## 2

### *Ka'ma kokampi hazagre'za vano hu'naza naneke*

<sup>1</sup> Anantetira Ra Anumzamo'ma nasami'nea kante anteta ete rukrahe huta, Koranke Hagerima me'nerega ka'ma kokampi vano vano nehuta, rama'a kna Seiri agonomofona kagikagia hu'none. <sup>2</sup> Hagi anante Ra Anumzamo'a amanage huno nagrikura hu'ne, <sup>3</sup> tamagra rama'a kna ama agonage kokampina kagikagi hazanki, rukrahe huta anagamu noti kaziga mareroho. <sup>4</sup> Hagi amanage hunka zamasamio huno nasami'ne, tamagra tamafuhe'i Iso naga'ma nemaniza Seiri mopafi ufrete nevanage'za, zam-agra koro tamagrikura hugahazanki, kva hu'neta viho. <sup>5</sup> Hianagi tam-agrafintira hara huozamanteho, na'ankure zamagri mopafintira magore hu'na mopa ontamitfa hugahue. Na'ankure Seiri agona mopa Isone hu'na ami'noe. <sup>6</sup> Hagi zamagri mopafi ufrete nevanuta, ne'zane tinena zamagrip-inti mizasegahaze. <sup>7</sup> Na'ankure Ra Anumzana tamagri Anumzamo'a ama tusi ka'ma kokampima vanazama'a antahi'neankino, maka zama hu'naza

<sup>†</sup> **1:40** Koranke hagerinema hu'neana varozamoke hu'nea hagerinku hu'ne.

zana asomu huramante'ne. Ama'i 40'a zage kafufina Ra Anumzana tamagri Anumzamo'a tamagri'ene mani'negeta mago zankura atupara osu'naze. 8 E'ina higeta Iso naga'ma Seiri kumate'ma nemaniza tafuhe'ina ome zam-agatereta Araba kamo'ma Elatine, Ezion-Gebama vu'nea kana atreta noti kaziga rukrahe huta Moapu ka'ma kokama me'nerega vu'none. 9 Hagi anante Ra Anumzamo'a amanage huno nasami'ne, Tamagra Moapu va-hera zamarimpa nereta, tamagraregatira hara huozmanteho. Na'ankure Ar mopa Loti naga zami'noanki'na, magore hu'na ana mopa ontamitfa hugahue. 10 (Hagi e'i ana mopafima ko'ma Moapu vahe'ma omani'nazarera, Emi vahe'mo'za Anaki vahekna hu'za za'za hu'za tusinasi vahe rama'a fore hu'nazane. 11 Hagi Anaki vahe'ene Emi vahekura mago'a vahe'mo'za Rafaimi vhahere hu'za nehaze. Hianagi Moapu vahe'mo'za, Emi vhahere hu'za nehaze. 12 Hagi Seiri mopafina Hori vahe kora nemanizane. Hi-anagi Ra Anumzamo'ma Israeli vahe'ma zamige'za mopama eri'nazaza hu'za, Iso naga'mo'za Hori vahe ome zamahenati'za, ana mopa omeri'za mani'naze.) 13 Hagi menina otita vuta Zareti agupofi viho, huno Ra Anumzamo higeta vu'none. 14 Kades Baniama atreta e'nontetima eno Zareti tima takahenonte'ma e'neana, 38'a zagekfu manita ehanati'none. Ana hunkeno maka ha'ma huga vahe'tmina Ra Anumzamo'ma huvempama hu'nea kante ante'za fri vagare'naze. 15 Tamage huno seli noma ki'zama maniterema hu'za neazafi, Ra Anumzamo ha'rezamanteno ana vhahere zamahetere hume eno eme zamahe vagare'ne. 16 Ana'ma higeno'ma maka ha'ma huga vahe'ma fri vagaregeno'a, 17 Ra Anumzamo'a amanage huno nasami'ne, 18 Tamagra menina Ar rankumapinti rugitagita Moapu vahe mopafi vugahaze. 19 Hagi Amoni vahe mopafima ufresuta, zamazeri za-marimpamahe zana osinke'za, hara huoramanteho. Na'ankure Amoni vahe mopa tamagrira ontamigahue. Na'ankure e'i Loti mofavre naga zami'noa mopa me'ne. 20 (Korapara ana mopafina Refaim vahe mani'nazageno, Refaimi mopa vhahere hu'za nehzane. Hianagi Amoni vahe'mo'za ana vahekura Zamzumu vhahere hu'za nehaze. 21 E'ina Zamzumu vahe'mo'za Anaki vahe kna hu'za zaza hu'za tusinasi vahetami fore hu'za hanave vahe fore hu'za rama'a mani'naze. Hianagi Ra Anumzamo'a zamahe hana hige'za Amoni vahe'mo'za menina ana mopafina mani'naze. 22 Hori vahe'ma Ra Anumzamo'ma zamahe hana hige'za, Iso naga'mo'za Seiri mopafima mani'naza kna hu'za mani'naze. Hagi ananteti'ma eno'ma meninena e'neana, ana mopafina Iso naga'mo'za mani'naze. 23 Hagi Avi vahe'ma mani'za Gazama uhanati'naza vhahere, Kaftori vahe'ma Kritima nemaniza vahe'mo'za eme zamahe hana hu'za ana mopafina mani'naze.) 24 Anante Mosese'a mago'ane huno, Ra Anumzamo'a amanage huno nasami'ne, otita Anoni agupofi viho. Keho, Hesboni kinia Amori ne' Sihonina tamazampi avrenente'na, mopa'anena tamazampi nentoe. Hanki vuta hara ome huzmanteta mopazamia eriho. 25 Ama knareti'ma vaniana agafa hu'na kokankokama mani'naza vahepin, korzo anta'nenke'za tusi koro tamagrikura nehu'za, tamagenkema antahisu'za zamahirahikura nehu'za, za-manogu hugahaze.

### *Hesboni kini ne' Sihonima Israeli vahe'mo'za ha'hunte'naza naneke*

26 Anante Ketemoti ka'ma kokampi mani'neta mago rimpama nehuno, knare'ma huno mani nanekea Hesboni kumate kini ne' Sihonintega ange hu'na kea atre'noe, 27 tatregeta mopaka'afina rugitagita vamaneno. Kama nevanuta anteganti antegama osuta, kante vu fatgo huta vugahune.

<sup>28</sup> Ne'zane tinena zagore atrenketa mizaseta neneta, mopatamifina ufreta amne vamaneno. <sup>29</sup> Iso naga'ma Seiri kumate'ma nemaniza naga'mo'zane, Moapu vahe'ma Ari kumate'ma nemaniza vahe'mo'zama hu'nazaza huta tarenketa mopatamifina rugitagita vuta Jodani tina ome takaheta Ra Anumzamo'ma tami'nea mopa omerimaneno hu'naze. <sup>30</sup> Hianagi Hesboni kini ne' Sihoni'a mopa'affima rugitagitama vuzankura i'o huno hurante'ne. Na'ankure Ra Anumzana tamagri Anumzamo'a menima tazampima avrentesigeta ha' hugateresunku antahintahi'a eri hanaveti'ne. <sup>31</sup> Anante Ra Anumzamo'a amanage huno nasami'ne, Antahihi! Sihonine mopa'anena tamazampi nentoe. Hanki ana mopa erita maniho. <sup>32</sup> Hagi anante Sihoni'ene naga'amo'zanena Zahasi mopafi hara eme hurante'naku e'nazanagi, <sup>33</sup> Ra Anumzana tagri Anumzamo'a Sihonine mofavre naga'ane, maka vahe'anena avreramigeta, zamahe hana hu'none. <sup>34</sup> Hagi mika Sihoni'ma kegavama hu'nea kumara eri haviza nehuta, mika vene'nene, a'nene mofavreraminena magore huta ozmatreta zamahe hana hu'none. <sup>35</sup> Anama ha'ma hupintira afu'zagane, mago'a zantamineda eri'none. <sup>36</sup> Hagi Arnoni agupomofo atumparega Aroeri kumateti vuno Kireatima uhanatigeno, ana amu'nompima me'nea kumazmimofo vihumo'a ha' vahe'timofona zamagura ovazi'ne. Hagi Ra Anumzana tagri Anumzamo taza higeta zamahe vagare'none. <sup>37</sup> Hianagi Amoni vahe'mofo mopa tava'ontera, Jaboki ti ankenare'ene, agona kumatamimpinena Ra Anumzana tagri Anumzamo'a zamatreho hu'nea kante anteta ovu'none.

### 3

#### *Basani kini ne' Oгима ha' hu'za azeri agatere'naza naneke*

<sup>1</sup> Hagi ananteti'ma rukrahe'ma huta Basanima vunaku'ma nevunkeno'a, Basani kini ne' Ogi'a mika sondia vahe'a zamavreno hara eme hurante'naku Edrei kumate e'ne. <sup>2</sup> Hianagi Ra Anumzamo'a amanage huno nasm'i'ne, Mosesega, Oginkura korora osuo. Na'ankure agri'ene, sondia vahe'ane mopa'anena Nagra ko kagri kazampi ante'noankinka, Hesbonima nemania Amori kini ne' Sihonima hu'nazaza hunka, agri'ene mika vea'enena zamahe vagaregahane. <sup>3</sup> Hagi Ra Anumzana tagri Anumzamo'a taza higeta Basani kini ne' Oгine mika vahe'anena avreramigeta magore huta ozmatreta, maka zamahe vagare'none. <sup>4</sup> Hagi Basani kini ne' Ogi'ma ana knafima 60'a ranra kumatmima miko Argob mopafima me'negeno kegava hu'nea kumatamine mohanena magore huta otreta, maka zamahe hanare vagare'none. <sup>5</sup> Hagi e'i ana mika kumazmia tusinasi vihu hugagine'za, kaha hagente'za ana kahana aenireti resihuntetere hu'naza kumatami zamahe nehanareta, rama'a kumatamine, vihuzmia omane neonse kumazmia hara huzmanteta eri'none. <sup>6</sup> Hagi Hesboni kumate'ma nemania Amori kini ne' Sihonima hu'nonaza huta, Basani kini ne'ene mika vene'nene, a'nanene mofavreramine mika zamahe vagare'none. <sup>7</sup> Hianagi maka zagagafa zamine mago'a zantaminena ana ha'ma hu'na kumazmifintira eri'none. <sup>8</sup> Ana knafima mopama eri'nonana, tare Amori vahe'mokizmi kini ne'tremofo zanazampintira mopaznia, Jodani timofona zage hanati kaziga Arnoni tinteti erigafa huno vuno, Hermoni agonare vu'nea mopa ana mika eri vagare'none. <sup>9</sup> Saidoni vahe'mo'za Hermoni agonagura Sirioni agone hu'za ne-hazageno, Amori vahe'mo'za Seniri agone hu'za nehaze. <sup>10</sup> Hagi avapafima maka me'nea kumatamine, maka Giliati mopareti vuno Sareka kuma'ene Edrei kuma'ma Basani me'nakeno Ogi'ma kegavama hu'nea rankumatrena

eri vagare'none. <sup>11</sup>(Maka Refaimi ranra vahepintira Basani kini ne' Ogike'za agrake henkarfana fri'ne. Hagi agrama frige'zama erinte'naza sipa aimireti tro hu'neankino, upa'amo'a 2 mita higeno, zaza'amo'a 4 mita hu'ne. Hagi ana sipa Raba kumate me'nege'za, Amoni vahe'mo'za negaze.)

### *Israeli mopa refko hu'za eri'naza naneke*

<sup>12</sup> Ana'ma eri'nona mopa Arnoni agupomofo atumparega Aroeri kumateti agafa huno vuno, Giliati mopamofona amu'nompinti refko huno mago kazigane anampima me'hea ranra kumataminena, Rubeni naga'ene Gati nagamokizmi zami'noe. <sup>13</sup> Hagi Giliati mopama amu'nompinti'ma refko hutre'noa mago kaziga mopane, Basani kini ne' Ogima kegavama hu'nea mopanena, Manase nagara amu'nompinti refko hu'ne'na, magokaziga maniza naga zami'noe. Hagi maka Argopu mopa Basani kaziga me'nea mopagu Refaimi vahe mopae hu'za nehaze. <sup>14</sup> Hagi Manase nagapinti fore hu'nea kva ne' Jaeli'a Argopu mopa Basani kazigati agafa huno vuno, Kesuri vahe'ene Makati vahe mopa atupama eme atreteti maka mopa eri vagareteno, ana moparamina Havot Jaire huno agra'a agire asamre'nege'za meninena ana agi nehaze. <sup>15</sup> Hagi Giliati mopamofo noti kaziga'a Makiri naga zami'noe. <sup>16</sup> Hagi ana Giliati mopamofona Sauti kaziga mopa Rubeni naga'ene, Gati nagamokizmi zami'noe. E'ina mopamo'a Giliatitira vuno Arnoni agupofi uhnatiteno, ete rukrahe huno Amoni vahe mopa atupare Jaboku tinkenare uhanati'ne. <sup>17</sup> Hagi Galili hagerinkenati'ma vuno fri'nea hageri ankenare'ma vigeno, Jodani timo'ma zage fre kaziga rugitagigeno, zage hanati kaziga Pisga agonamo rugitagigeno, Jodani agupoa ana nag-amoke'za eri'naze. <sup>18</sup> Hagi anankna zupa Jodani timofo kantu kazigama manisaza nagara amanage hu'na zamasami'noe, Ra Anumzana tamagri Anumzamo'a ama mopa tamagra eriho huno tam'i'ne. Hagi maka ha'ma huga vahe'mota ha'zantamina eri'neta tina takaheta, ugagota huta tama-fuhe'ina hara ome huzamaza hiho. <sup>19</sup> Hianagi a'netamine, mofavretamine zagagafatamimo'za zamavega ante'za Nagrama zami'noa kumatamimpi manigahaze. (Hagi rama'a zagagafa ante'nazana nagra antahi'noe.) <sup>20</sup> E'ina huta hara huta tamafuhe'ina zamaza nehanage'za, Ra Anumzamo'ma za-magri'ma Jodani timofo kantu kazigama zami'nea mopa eritesageta, tam-agri'ma tami'noa moparera emanigahaze. <sup>21</sup> Hagi ana zupa nagra Josuana amanage hu'na asami'noe, Ra Anumzana tamagri Anumzamo'ma tare kini ne'trente'ma hu'nea zana hago kagra'a kavufinti ke'nane. E'ina hu'kna'za amama unefraza moparamimpi kini vahetmina huzmantegahie. <sup>22</sup> E'ina moparamimpi nemaniza vahetminkura korora osiho, na'ankure Ra Anumzana tamagri Anumzamo'a tamaza huno hara huzamantegahie.

### *Anumzamo'a Mosesenku Kenani mofafi ovugahane hu'nea naneke*

<sup>23</sup> Ana zupa nagra hankaveti'na nunamuna hu'na Ra Anumzamofona amanage hu'na antahige'noe, <sup>24</sup> Ra Anumzana kagra miko'zama kegavama hu'nana Anumzane, kagra agafa hunka eri'za vahe kamo'na himamu hankaveka'a naveri hane, na'ankure monafine ama mopa finena kagrama nehanankna zama huga anumzana omani'ne. <sup>25</sup> Ra Anumzamoka muse hugantoanki, natrege'na Jodani tina takahet'na kantu kaziga knare mopane, knare agona mopane Lebanoni mopanena ome ka'neno. <sup>26</sup> Hianagi tamagrama ke'ama ontahi'naza zanku, Ra Anumzamo'a nagrira arimpa ahenanteno amanage hu'ne, ha'e! Keka'ama antahi'zankura navresrahianki mago'anena ama anankea osuo hu'ne. <sup>27</sup> Hagi Pisga agonare marerinka zage hanati kazigane, zage fre kazigane ruga raga kaziga omeye emege huo.

Na'ankure antu ana mopafina takahenka ovugahane. <sup>28</sup> Hianagi Josuana azeri hankavetike nesaminka huntogeno, Israeli vahera zamavareno Jodani tina takaheno vino. Na'ankure agra Israeli vahetera vugota hu'neno, kagrama kana mopa refko huno zamigahie. <sup>29</sup> Ana higeta Beti-Peori tavaonte me'nea agupofi mani'none.

## 4

### *Israel vase'mo'za Anumzamofo ke'a avaririsaza naneke*

<sup>1</sup> Israeli vase'mota ama kasegene tra kenema rempima huramisiana antahi so'e hiho. Hagi ama ana nanekema antahitama avaririsuta, knare huta nemanita, Ra Anumzana tafahe'i Anumzamo'ma huhampri ramante'nea mopa omerigahaze. <sup>2</sup> Hagi mago'a nanekea ama ana kasegerera erinte sotu huge, kasegefintira eritrege osuta, Ra Anumzana tamagri Anumzamofo kasegena avaririhoma hu'nama tamasamuua kea avaririho. <sup>3</sup> Hagi Ra Anumzamo'ma Ba'al-Peori kumate'ma hu'nea zana tamavufinti ko ke'naze. Peori vase havi anumza Balima mono'ma huntaza vahera tamagripintira Ra Anumzana tamagri Anumzamo'a zmahehana hu'ne. <sup>4</sup> Hianagi Ra Anumzana tamagri Anumzamofoma, azeri hanavemati'naza nagara maka tamatregeta menina mani'naze.

<sup>5</sup> Keho, Ra Anumzana nagri Anumzamo'ma tamagriku'ma zamasmo huno'ma hu'nea kante ante'na kasegene tra kenena amama unefraza mopafima umani'neta avaririsagu rempi hunerami'noe. <sup>6</sup> Ana hu'negu amà ana kasegene tra kenena kegava nehuta avaririho. E'inama hangeno'a, knare antahi'zane maka'zama antahi ani'hu antahizamo tamagripina eama nehinke'za, ana mopafi vase'mo'za ana kasegene tra ke'ma nentahi'za neramagesu'za zamagra amanage hugahaze, tamage ama vahera, mareri vaheki'za knare antahi'zane vase mani'ne'za, maka zamofo antahi ani'hu vase mani'naze hu'za hugahaze. <sup>7</sup> Na'ankure ruga'a vase'mokizmi anumzamo'a tagri Anumzanknara osu'ne. Ra Anumzana tagri Anumzamo'a tava'ontire mani'neno nunamuntia nentahie. <sup>8</sup> Hagi ruga'a vase'mokizmi tra kene kasegemo'a, tagri tra kene kasegenemo'ma fatgo hu'nege'na menima neramua kasegene tra kegnara osu'ne. <sup>9</sup> Hagi kva hu'neta, Ra Anumzamo'ma huramante'nea zama tamagra tamavufinti'ma ke'naza zana tamagera okaniho. Hagi manita vanafina, anama ke'naza zana atrenkeno antahintahi tamifintira fananea osina, maka zupa mofavretamine tamagehe'inena zamasmitere hiho.

<sup>10</sup> Hagi Sainai agonamofo agiafima Ra Anumzana tamagri Ra Anumzamofo avugama ot'i nazageno amanage huno nasami'ne, Mosesega Israeli vahera zamavarenka amare ege'na nanekea zamasmi'nena antahite'za, Nagri'ma kore'ma hunanteno nagoraga'ama mani zana rempi nehu'za, ete mani'zama vanafina mofavre'zimia rempi huzamigahaze. E'i anagema hu'nea nanekea tamagera okaniho. <sup>11</sup> Anama Sainai agonamofo agafima eme ot'i nazageno'a, ana agonafina tusi teve nereno hagana hagana nehigeno hokonke hampomo mona refite'negeno hanintiri hu'ne. <sup>12</sup> Anama ot'i nageno'a, Ra Anumzamo'a ana tevefinti nanekema neramasamigeta Agrira onke'nazanagi ageru'age antahi'naze. <sup>13</sup> Hagi Ra Anumzamo'a avaririhogu huhagerafi hvupempa ke'a e'i 10ni'a kasege tare have tafete'ma kre'neana huama hu'ne. <sup>14</sup> Hagi e'i ana knazupage Ra Anumzamo'a nasmino, Israel vahera ama kasegene trakenena rempi huzamige'za omeriza manisaza mopafima vanu'za avaririho huno nasami'ne.

*Kaza osu havi anumzamofoma mono'ma huntezanku kva hanaza naneke*

<sup>15</sup> Hagi Ra Anumzamo'ma teve amu'nompi mani'neno Sainai agonafinti'ma nanekema neramasamigeta, Agrira onke'nazagu tamagra kva huneta, <sup>16</sup> havi anumzana tro hunteta monora hunenteta, tamagra'a tamazeri havizana osiho. E'i ana havi anumzana vemofo amema'arero a'mofo amema'arero, <sup>17</sup> mopafi vanoma nehaza zagagafamofo amema'o, haren vano nehia namamofo amema'o, <sup>18</sup> mopafi regraroheno vano nehia zagamofo amema'o, timpima nemaria nozamemofo amema'a tro huonteho. <sup>19</sup> Hagi zugene ikane ofunema mika monafima me'neazama kesuta, monora huonteho. Ra Anumzana tamagri Anumzamo'a ruga'a vahe'mo'za monora huntehogu tro hunte'ne. <sup>20</sup> Hianagi Ra Anumzamo'a Isipi vahe'mofo kinafintira tusi'a aini teve amuhofinti tamavreaza huno Agri vahe manihogu tamavreno atiramino egeta menina Agri vahe mani'naze.

<sup>21</sup> Hianagi tamagrama hazazanku Ra Anumzamo'a tusi rimpia ahenenan-teno, knare mopama tamagri'ma tami'nea mopafina Jodani tina takahenka ovugosane huno huvempa hunante'ne. <sup>22</sup> E'ina hu'negu nagra Jodani tina takahe'na ovu, ama mopafi frigahue. Hianagi tamagra vuta anama tami'nea knare mopa omerigahaze. <sup>23</sup> Hagi Ra Anumzana tamagri Anumzamo'ma huhagerafi huvempa kema tamagranema hu'nea zana, tamagekaninketa mago zamofo amema'are kaza osu havi anumzama tro'ma osihoma hu'nea havi anumzana kva huneta trora osiho. <sup>24</sup> Na'ankure Ra Anumzana tamagri Anumzamo'a haganahagana huno keonke'za tefananehu tevegino, Agra kanivere Anumza mani'nne.

<sup>25</sup> Hagi ana mopafima zanra kna umani'nuta mofavrema kasezmante'nage'za tamagehe'ima kasezmante'nageta, kaza osu havi anumzana tro huta monora hunteta tamagra'a tamazeri havizana huta, Ra Anumzana tamagri Anumzamofo avurera havi avu'ava zana huta arimpa ahe'zana osinkeno arimpa aheoramanteno. <sup>26</sup> E'ina hu'negu menina monane mopane ke hugeke negakena, ama nanekea huama hue. Hagi tamagrama keni'ama ontahisuta, Jodani tima takahetama ufresaza mopafintira ame huno tamahe fanane hugahie. Osi'agna ana mopafina umani'nageno, ana mika'a veara tamahe fanane hugahie. <sup>27</sup> Hagi Ra Anumzamo'a tamazeri panini hanigeta, vahe mopafi freta osi'osi hutma umani emanı hugahaze. <sup>28</sup> E'ina moparega umani'netma vahe'mo'za havereti'ene zafareti'ene tro huntazageno avu onke, agesa ontahi, ne'za one, mna ontahi anumzantaminte monora huntegahaze. <sup>29</sup> Hianagi e'i anantegama mani'neta Ra Anumzana tamagri Anumzamofonku'ma ana maka tamagu'areti'ma huta hakresuta, Agrira hakreta erifore hugahaze. <sup>30</sup> Hagi hazanke knama henkama efore'ma hina, tamagra ete rukrehuta Ra Anumzana tamagri Anumzamofonte eta ke'a antahimigahaze. <sup>31</sup> Na'ankure Ra Anumzana tamagri Anumzamo'a asunku Anumzankino, amefira huoantamige, tamahe fanane osuge, huhagerafi huvempa kema tamagehe'inema hu'neana agera okanigahie.

*Ra Anumzana Agra'a tamage Anumza mani'nea naneke*

<sup>32</sup> Hagi ese'ma vahe'ma tro'ma hu'nea knareti'ma eno menima ehanati'neana, amanahu knare hentofazana fore higeta ke'nafi? Monane mopafinena maka haketa keho. <sup>33</sup> Hagi mago'a vahetera anumzamo'a tevefintira kea huzamige'za tamagrama hazaza hu'za mani'nazafi? <sup>34</sup> Hagi Ra Anumzana tamagri Anumzamo'ma Isipima mani'nazageno knazane

kaguvazanteti'ma ruzahu ruzahu avame'zanteti'ma hapinti'ma korezamp-inti'ma hankaventake azanteti negazageno ha'ma huno tamavreno'ma atiramino e'neaza huno, mago'a anumzamo'a anara hu'nefi? <sup>35</sup> Hagi Ra Anumzamo'a Agrake Anumzana mani'ne huta antahihogu e'i ana zantamina tamaveri hu'ne. Hagi magore huno Agrikna anumzana omanitfa hu'ne. <sup>36</sup> Monafinti'ma naneke'ma neramasigeta ageru'ma antahi'nazana, e'i tamazeri fatgo hunaku hu'ne. Hagi mopafina tusi teve neregeta, negazageno ana tevefinti nanekea neramasamigeta ageru'a antahi'naze. <sup>37</sup> Na'ankure Ra Anumzamo'a tamafahemofoma zamavesi zamante'neno zamagripinti'ma forehu anante anante'ma hu'za esaza vahera huhampri zamante'nea zanku huno Isipitira Agra'a himamu hankave'reti tamavreno atiramino ne-eno, <sup>38</sup> hanave'zmimo'ma tamagri hanavema agatere'nea kumatamina tamagrama erisantiharegahaze hu'nea mopafintira zamahe natitrenigeta, menina ana mopa erisintihareta manigahaze. <sup>39</sup> E'igu menina tamagera okanita Ra Anumzamo'a monafine mopafinena Agrake'za Anumzana mani'ne huta antahintahi tamifina maka zupa antahigahaze. Hagi magore huno Agrikna anumzana omanitfa hu'ne. <sup>40</sup> È'ina hu'negu Anumzamofo tra kene kasegenema avaririko hu'nama menima tamasamua kasegene trakenena nevaririnkeno tamagri'ene mofavretmimofonena tamazeri knare nehina, Ra Anumzana tamagri Anumzamo'ma tamisnia mopafina zaza kna manigahaze.

### *Frakisaza kumatmimofo naneke*

<sup>41</sup> Hagi anante Mosese'a fra'makisaza kumara Jodani timofona zage hanati kaziga 3'a rankuma huhamprinogeno me'ne. <sup>42</sup> Iza'o ha' vah'e' omani'nesianagi mago'a zama haniregama hantga huno vah'e'ma ahe frisuno'a, ana kumatamintega freno vuno aguravazigahie. <sup>43</sup> E'i anama huhamprinte'nea kumatmina, Rubeni naga'mokizmi agona mopafima me'nea kuma Beserigi, Gilieti kazigama Gati nagamokizmi mopafima me'nea kumara Ramotigi, Basani kazigama Manase nagamokizmi mopafima me'nea kuma Golanie.

### *Kasegemofoma eri ama'ma hu'nea naneke*

<sup>44</sup> Mosese'a ama'na kasege Israeli vahera zami'ne. <sup>45</sup> Hagi Mosese'a ama'na kasegene trakene mani'zama erizo'ema hu'za manisaza kenena Israeli vahera Isipima atre'za atirami'za azageno'a zamasami'ne. <sup>46</sup> Israeli vah'e'mo'za Jodani agupomofona zage hanati kaziga Bet Peoria, Amori vah'e'ne Sihonima Hesboni kumate mani'neno kegava hu'nea mopa, Mosese'e'ne Israeli vah'e'mo'zanema Isipiti'ma atirami'za ne-eza eme zamahe'za hanare'nazemopare eman'inazageno ana nanekea Mosese'a zamasami'ne. <sup>47</sup> Kini ne' Sihoni mopane Basani kini ne' Ogi mopanena zanahe'za hanare'za erisanti hare'naze. E'i ana kini netrena Amori vah'e'ne Jodani timofo zage hanati kaziga mopa kva hu'na'ane. <sup>48</sup> Hagi Israeli vah'e'mo'zama ana mopama eri'nazana Arnoni agupomofo atuparega Aroeri kumateti erigafa huno vuno Sirion agonare ome atre'nea mopa eri'naze. (Hagi Sirioni agonamofo mago agi'a Hemonie). <sup>49</sup> Hagi Jodani timofo zage hanati kaziga mopane, Fri Hagerimofo mago sopa'aregati vuno Pisga agonamofo agafi ome atre'ne mopane eri'naze.

<sup>1</sup> Moses'e'a mika Israeli vahera kehutru huno amanage huno zamasami'ne, Israeli vahe'mota ama kasegene trakenema tamasamisuuna rempi huta antahini nehuta avariri so'e hiho. <sup>2</sup> Ra Anumzana tagri Anumzamo'a Sainai agonafi tagri'enena huhagerafi huvempa kea hu'ne. <sup>3</sup> Ana huhagerafi huvempa kema Ra Anumzamo'ma hu'neana tafahe'inena osu'nearki, tagra menima mani'nona vahe'motane hu'ne. <sup>4</sup> Ana agonare Ra Anumzamo'a teve anefapinti Agra'a kea tamasmi'ne. <sup>5</sup> Hianagi tamagra ana tevenefakura koro nehuta, agonarega mareori'naze. E'ina' hazage'na ana zupa nagra Ra Anumzamofone tamagri'ene amu'nompi mani'nena Ra Anumzamo'ma hia nenekea eri'na tamasami'noe. Hagi Agra amanage hu'ne, <sup>6</sup> Nagra Ra Anumzana tamagri Anumzane, Isipi mopafima kina huta mani'neta kazokazo eri'zama e'nerizage'na tamavare atiramina e'noa Anumzane. <sup>7</sup> Mago'a anumzantamintera monora huonteta Nagrike monora hunanteaho. <sup>8</sup> Hagi tamagra monafima me'nenia zamofo amema'o, mopafi me'nenia zamofo amema'o, timofo agu'afima me'nenia zamofo amema'o mago'zamofo amema'arera kaza osu havi anumzana tro huontheho. <sup>9</sup> Hagi ana kaza osu havi anumzantamintera monora huntge, tamarena rentegera huozmanteho. Na'ankure Nagra Ra Anumzana tamagri Anumzamo'na kanivere Anumzankina, afahe'mo'ma hu'nenia kumitera mofavre'areti'ma vuno agigomofonte'ma vaniana kna zamigahue. <sup>10</sup> Hianagi iza'zo Nagri'ma zamavesi nenante'za kasegeni'ama nevariri'za vahera, navesi nezamantesuge'za kasezamantesage'za forehu anante anante hu'za 1,0000ni'a vanaza vahete enena navesi nezamante'na, knare huzmantegahue. <sup>11</sup> Nagra Ra Anumzana tamagri Anumaza mani'noanki Nagi'a amne zampina oheho. Na'ankure amnezampima nagima ahesimofona agegema otregosue. <sup>12</sup> Mani fruhu kna Sabatia, Ra Anumzana tamagri Anumzamo'ma tamasami'nea kante anteta kegava hinkeno ruotge huno meno. <sup>13</sup> Tamagra 6si'a zagegnafi miko eri'zantmia erigahaze. <sup>14</sup> Hianagi 7ni zagegna Ra Anumzana tamagri Anumzamofo manigsa hu knagita, ana zagegnarera eri'zana e'origosaze. Kagrane, neka'ane, mofaka'ane, ve eri'za vaheka'ane, a' eri'za vaheka'ane, bulimakao afuka'ane, donki afuka'ane, ruga'a afuzagaka'ane, rurega vahe'ma tamagrane enemaniza vahe'enena eri'zana e'oriho. Hagi kazokazo eri'za vahetamia zamatreke'za ana knarerera eri'zana e'ori tamagrama hanazaza hu'za manigasa hiho. <sup>15</sup> Hagi Isipima kazokazo eri'zama e'nerita mani'nazageno Ra Anumzana tamagri Anumzamo'a hanavenen-take azanut'i'ma tamavreno'ma atiramino e'nea zankura tamagera okaniho. E'ina hu'negu Ra Anumzana tamagri Anumzamo'a mani fruhu kna Sabatia kegava hiho hu'ne. <sup>16</sup> Hagi Ra Anumzana tamagri Anumzamo'ma hihoma hu'nea kante anteta tamarera tamafana kesaga huta antahinezamita, ke'zamia antahizamiho. E'ina'ma hanuta Ra Anumzana tamagri Anumzamo'ma tamisia moparera knare huta za'zate manita vugahaze. <sup>17</sup> Tamagra vahera ahe ofriho. <sup>18</sup> Tamagra rumofo a'ene venene-nena savri avu'vazana osiho. <sup>19</sup> Tamagra musufa oseho. <sup>20</sup> Hagi mago vahe'mo'ma keagare'ma oti'nenigeta tamagra havigea hutma huamara huontheho. <sup>21</sup> Tamagra ru vahe'mofo aro, noma'o, mopa'o, ve eri'za vahe'o, a' eri'za vahe'o, bulimakao afu'o, donki afu'o, maka nanazama'agura keramanunua osiho. <sup>22</sup> Hagi agonamofo agafima atru huta mani'nonkeno, Ra Anumzamo'a hanintiri hampomofo agu'a teve nefapi mani'neno ranke huno ama ana kasegea neramasamino, mago kea anantera hunonteno, tare kuta haverera kreteno nami'ne. <sup>23</sup> Hagi ana agonamofona hanintiri

hampomo regaginte'nege no hagana hagana huno teve nerefinti ana kema hia kea nentahizageno kva vahe'mimo'za nagrite erava'o hu'za,<sup>24</sup> amanage hu'naze, Antahio, Ra Anumzana tagri Anumzamo'a agra'a hankave'anee avasase'anena taveri nehuno hagana hagana huno nerea tevefinti keaga huramigeta antahi'none. Hagi menina Anumzamo'a vahe'mota keaga huramianagi tagra ofri'none.<sup>25</sup> Hianagi nagafare tagra frigahune? Hagi Ra Anumzana tagri Anumzamo'ma mago ane keagama huramisigeta tagra frigahune. Na'ankure e'i ana teve nefam'o'a tagrira tefanane hugahie.<sup>26</sup> Hagi ina vahe'mo kasefa huno mani'nea Anumzamo'ma tevenefa'pinti'ma ageru'marigeta antahiteta ofrita mani'nonaza huno Anumzamofo agerura antahiteno mani'ne?<sup>27</sup> Mosesega kagrake vugeno Ra Anumzana tagri Anumzamo'a nanekea kasaminkenka eme tasamio. Tagra kema haniankea antahita avaririgahune.<sup>28</sup> Hagi tamagramma haza nanekea Ra Anumzamo'a antahiteno amanage huno nasami'ne. Mosesega vea'mo'zama kagri'ma kasamiza nanekea zamagra tamage hazage'na Nagra hago antahi'noe.<sup>29</sup> Hagi Nagri'ma nave'nesiana, e'na hu'za Nagrira koro hunenante'za maka kasegeni'a avaririhogu hu'noe. E'inama hanu'za zamagrane zamagrip-inti'ma fore hu'za vanaza vahe'mo'za maka zama hanafina knare hu'za mani vava hu'za vughahaze.<sup>30</sup> Hagi menina ome zamasmige'za seli nozimirega vu'za e'za hiho.<sup>31</sup> Hianagi kagra amare otinege'na kasegeni'ane tra keni'anena kasami'neno. Hagi ama ana kasegene tra kenena rempi huzamige'za antahite'za mopama zami'nua mopama omerisantima hare'za umaninu'za ana tra keni'ane kasegenianena avaririgahaze.<sup>32</sup> E'i ana hu'negu Israel vahe'mota Ra Anumzana tamagri Anumzamofo kasegene trakenena kegava huneta ufrege efregera osuta avariri so'e hiho.<sup>33</sup> Hagi Ra Anumzana tamagri Anumzamo'ma hihoma huno huramantea kema avaririsuta, tamamisigeta omeri santimahareta manisaza mopafina knare huta zazate manigahaze.

## 6

### *Ra Anumzama avesinte'zamofo naneke*

<sup>1</sup> Ra Anumzana tamagri Anumzamo'a nasamino, Ama'na kasegene trakenena rempi huzamige'za mopama zami'nua mopafima umaninu'za avaririhogu huno hunante'ne.<sup>2</sup> Hagi Ra Anumzana tamagri Anumzamo-fona koro hunenteta, agoraga'a mani'netma maka kasege'ane trake'anema avaririhogu huna'huna huneramantoa ke'a zamagrane mofavretamine tamage-hemo'zanena avaririhogu. E'i anama hanutma knare hutma za'zate ana mopafina manigahaze.<sup>3</sup> Hagi Israeli vahe'mota antahihi! Ama ana kasegene trakenena kegava nehuta avariri so'e nehinkeno, Ra Anumzana tamafahe'i Anumzamo'ma huhampri tamante'nea kante, amirine tume rimo'ma avite'nea mopafina knare hutma nemanita rama'a vahe fore hutma manigahaze.<sup>4</sup> Israeli vahe'mota antahihi! Ra Anumzana tagri Anumzamo'a agrake Ra Anumzana mani'ne.<sup>5</sup> E'na hu'negu Ra Anumzana tamagri Anumzamofona mika tumotamireti'ene, mika tamagu tamenteti'ene, mika hanavetamireti avesinteho.<sup>6</sup> Hagi menima hihoma hu'nama tamasamua nanekemo'a antahintahitamifi me'nena,<sup>7</sup> nompi manisazano, kantesazano, masesazano, otisazano, ama ana nanekea mofavretaminena maka zupa huge antahige nehutma rempi huzami vava hiho.<sup>8</sup> Hagi huramagesa hanigu ama ana nanekea kretma tamazante'ene tamasenire'enena anakinteho.

<sup>9</sup> Hagi no kafa zafatamire'ene kumapima ufre kafantaminte'enena ama ana nankeea kretma arukmarenteho.

<sup>10</sup> Hagi Ra Anumzana tamagri Anumzamo'a tamagehemofo, Abramuma, Aisakima, Jekopuma zamigahue huno huhampri zmante'nea mopafi tamavareno ufregahie. E'i ana mopafina knare huno hentofaza hu'nea ranra kumatamina tamagra'a hanaveretira onki'naza kumatami me'nea mopa tamigahie. <sup>11</sup> Hagi nontamimpina fenomo'a avite'neni'a nontami tamigahie. E'i ana fenona tamagra eri onte'naza feno tamigahie. Hagi tamagra aseonte'nesaza tinkerifinti tina nefita, ohankre'naza hozaramipinti wainine olivia tagita negahaze. Hagi ana kave'ma nessageno tamu'ma hanigeta, <sup>12</sup> Isipima kina huta mani'neta kazokazo eri'zama enerizageno tamavreno atiramino'ma e'nea Ra Anumzama tamage'ma akaninte zankura kva hu'neni hiho. <sup>13</sup> Hagi Ra Anumzana tamagri Anumzamofo korora hunteta agoraga'a mani'neta, Agrike monora hunteho. Hagi mago'a zanku'ma huvempama hunaku'ma hanutma, Agri agifinke huvempa hiho. <sup>14</sup> Hagi anama umani'naza mopafi vahe'mo'zama mono'ma hunentaza havi anumzantamintera monora huonteho. <sup>15</sup> Na'ankure Ra Anumzana tamagri Anumzamo'ma amu'nontamifima mani'nea Anumzana kanivere Anumzankino, havi anumzante'ma mono'ma huntesageno'a rimpia ahezama'amo'a tevereankna huno ana mopafintira tamahe fanane hugahie.

<sup>16</sup> Hagi Masa kumate'ma hu'nazaza huta, Ra Anumzana tamagri Anumzamofona reheta onkeho. <sup>17</sup> Ra Anumzana tamagri Anumzamo'ma tami'nea kasegene tra kenena kegava huneta avariri so'e hiho. <sup>18</sup> Hagi knare huno fatgo hu'nesia zanke Ra Anumzamofo avurera nehinkeno, maka'zama hanaza zamo'a knarehina tmafahe'ima knare mopama huvempa huno huhampri zmante'nea mopa e'nerita, <sup>19</sup> Ra Anumzamo'ma hu'nea kante anteta ha'vahe'tmia ana mopafintira zamahenati atregahaze.

<sup>20</sup> Hagi henkama mofavretamimo'zama tamantahige'za, Ra Anumzana tagri Anumzamo'a nagafare ama kasegene tra kenena tamigeta nevararune hu'za tamantahigenageta, <sup>21</sup> tamagra amanage huta hiho, Fero kazokazo eri'za vahe tagra Isipi mani'nonkeno, Ra Anumzamo'a hankavenentake azanuti tavreno atiramino e'ne. <sup>22</sup> Hagi tagra tavufinti negonkeno Isipi kuma'ene, Feronte'ene vahe'are'enena Ra Anumzamo'a tusi'a kaguvazane hazenkezanutira zamazeri haviza hu'ne. <sup>23</sup> Hagi Agra Isipitira tavre atiramino'ma e'neana, tagehe'ima huvempa huno huhampri zmante'nea mopa taminaku tavreno e'ne. <sup>24</sup> E'ina hu'negu Ra Anumzana tagri Anumzamo'a huno, Koro hunanteta maka kasegene tra ke'ninenam age'nenteta agorga'a maniho huno hu'ne. Na'ankure tagrama e'ina'ma hanuta knare huta nemani'nunkeno, Agra menima nehiaza huno kegava hurantenketa knare huta manigahune. <sup>25</sup> Hagi Ra Anumzana tagri Anumzamo'ma avaririhoma hu'nea kasegema avaririsunkeno'a, fatgo vahere huno hugahie.

## 7

### *Israeli vahe'mokizmi zamavumro nanke*

<sup>1</sup> Hagi amama ufrenuku'ma nehaza mopafima Ra Anumzana tamagri Anumzamo'ma tamavreno'ma unefreno rama'a kumatmippi mani'naza vhahera zamahe natitregahie. Hagi e'i ana 7ni'a kumapi vhahera, Hiti vaheki, Kirgasi vaheki, Amori vaheki, Kenani vaheki, Perisi vaheki, Hivi

vaheki Jebusi vahe'mo'za rama'a vahe manizageno hanavezmimo'a tamagatere'ne.<sup>2</sup> Hagi Ra Anumzana tamagri Anumzamo'ma ana mopafi vahe'ma tamazampima zamavarentena ha'ma huzmagaterenuta, magore huta ozmatreta zamahehana nehuta, mago'a vahe'enena huhagerafi nanekea osuta, tamasunkura huozmanteho.<sup>3</sup> Hagi ana vahetera zamatreneke'za mofanetmimo'za vea e'orinkeno, ne' mofavretmimo'za ana vahepintira ara e'oriho.<sup>4</sup> Na'ankure mofavretmia zamazeri rukrahe hanage'za, havi anumzamofo avaririgahaze. E'i ana'ma hanageno'a, Ra Anumzamo'a rimpa aheramanteno ame huno tamaha fanane hugahie.<sup>5</sup> Hianagi havi anumzante'ma Kresramanama vunentaza ita taganavazi netreta, mono'ma hunentaza haveramina ru fuzafupe netreta, Asera havi anumzamofo amema'ama me'nea zafaramima retruma re'nazana antaginetreta, havi anumzantmimofo amema'ama antre'za tro'ma hunte'nezama mono'ma hunentaza zana erita tevefi kreho.<sup>6</sup> Na'ankure Ra Anumzana tamagri Anumzamofontera ruotge hu'naza vahe mani'naze. Maka ama mopafima mani'naza vahe'pintira tamagra Ra Anumzana tamagri Anumzamofo Agri'a mareri fenozama'a manisaze huno huhampritamante'ne.

<sup>7</sup> Hagi ra huta ruga'a vahera zmagatereta rama'a vahe mani'naza zankure huno Ra Anumzamo'a avesiramanteno huhampri oramante'ne. Hagi osi'a vahe mani'nazanagi,<sup>8</sup> Ra Anumzamo'a avesi neramanteno tamafahe'ima huvempa huno huhampri zamante'nea zanku huno, kazokazo eri'zama enerita Isipima mani'nazageno'a hankavenentake azanura tamaza huno Isipi kini ne' Fero azampintira tamavreno atirami'ne.<sup>9</sup> E'ina hu'negu tamagra antahini hiho, Ra Anumzana tamagri Anumzamo'a Agrake Anumzana mani'neankino, kema hu'nea kere oti Anumzankino huhagerafi huvempa ke'a nevaririno Agri'ma avesinte'za kasege'ama avaririza vahera vagaore avesi'zanu zamavesi nezmanteno, zamagripinti'ma fore hu anante anante'ma hu'zama tauseni'a zupama vanaza vahe'enena avesi zamantegahie.<sup>10</sup> Hianagi Agrima avesima nontaza vahera, ame huno zamahe fanane hugahie.<sup>11</sup> E'ina hu'negu maka kasegene tra kenema menima neramasmuana kegava nehuta, avariri so'e hiho.

### *Anumzamo'ma huhampri zamante'nea zamofo naneke*

<sup>12</sup> Hagi tamagrama ama ana trakema antahiteta avariri so'ema hanageno'a, Ra Anumzana tamagri Anumzamo'a tamavesiramante vava hugahue huno'ma huhagerafi huvempa kema tamafahe'ima huhampri zamante'nea kea avaririno avesi ramantegahie.<sup>13</sup> Agra avesi neramanteno, asomura huneramanteno, tamaza hanigeta rama'a mofavrerami kasentegahaze. Ana nehuno tamafahe'mofoma huhampri zamante'nea mopamofona azeri knare hanigeno, witimo'ene wainimo'ene olivi masavemo'enena rama'a nehinkeno, sipisipi afu'mo'ene bulimakao afu'mo'ene meme afu'mo'zanena anentara kase hakare hugahaze.<sup>14</sup> Hagi maka ama mopafi vahera zamagatereno asomura huramantesigeno, magore huno naravo ara omanigahanki, ana maka a'nemo'za mofavrege nentesageno, a' afu'zagaramima kegavama hanaza afu'zagamo'za naravo afura omani anentake'za antegahaze.<sup>15</sup> Hagi Ra Anumzamo'a maka kriramina tamagripintira eritrenketa Isipima me'negetama ke'nazankna kefo kriramina e'origahaze. Hianagi iza'zo tamagri'ma ha'ma reramante'naza vahepi ana kria eri atrenkeno zamazeri haviza hugahie.<sup>16</sup> Hagi Ra Anumzana tamagri Anumzamo'ma tamazampima avrentesia ha'vahetmia, magore huta tamasunkura huzmanteta ozamatretma zamahe fri

vagareho. Hagi ana vahe'mofo anumzantera monora huonteho. Na'ankure krifufi zaga kafamo aheankna hugahaze.

<sup>17</sup> Hagi tamagrama tamagu'afima huta, ama mopafi vahe'mo'za tagrira tagatere'za rama'a vahe mani'nazanki inankna huta zamahe natitregahune, <sup>18</sup> huta hugahazanagi, ana vahekura korora osiho. Ra Anumzana tamagri Anumzamo'ma Feronte'ene Isipi vahete'ma hu'neazana tamagera okaniho.

<sup>19</sup> Hagi Ra Anumzana tamagri Anumzamo'ma tusi'a knazane avu'avazane kaguvazanema erifore'ma hankave nentake azanuti'ma nehuno, Isipiti'ma tamavreno atirami'neana tamagra ke'naze. E'inahukna huno Ra Anumzana tamagri Anumzamo'a amama koro'ma nehaza vahera hara huzmantegahie.

<sup>20</sup> Hagi mago'a vahe'ma fre'za ome fra'makisaza vahera, Ra Anumzana tamagri Anumzamo tumerami huzmantenke'za ome zamampri frigahaze. <sup>21</sup> E'i ana hu'negu ama ana vahekura korora huozamanteho. Ra Anumzana tamagri Anumzamo'a tusi'a himamu'ane Anumza amu'nontamifina mani'ne.

<sup>22</sup> Hagi ana mopafi vahera Ra Anumzana tamagri Anumzamo'a akohen osi'a zamahe natitretere hugahie. Hagi ana maka vahera magoke knafinkera zamahe onatigahie. Na'ankure anama hanageno'a, afi zaga gafamo'za forehu hakare hu'za tamagrira tamazeri haviza hugahaze.

<sup>23</sup> Hianagi Ra Anumzana tamagri Anumzamo'a ana mopafi vahetmina antahintahi zmia zamazeri savari hina tusi negi nagi nehanageno, tamazampi zmavrentenketa zamahe hana hugahaze. <sup>24</sup> Hagi ana mopafi kini vahetamina tamazampi zmavrentesigeta zamahe vagaresageno, ama mopafina zama'gi'a omanesige'za fananehu vagaregahaze. Magore huno vahe'mo'a hara huramagate oregosianki, ana maka vahera zamahe hana hugahaze. <sup>25</sup> Hagi ana vahe'mokizmi havi anumzantamima antre'za tro'ma hunte'nazana tevefi krenkeno tefanene hino. Hagi goline silvanema ana havi anumzantminte'ma me'neana, e'i krifugna hu'neanki ke tamanunua huta e'oriho. E'ina zankura Ra Anumzana tamagri Anumzamofona agoteno avesra nehie.

<sup>26</sup> Hagi anama kasrino havizama hu'nea zantamina, erita nontamifina eme onteho. Na'ankure e'ima hazaza huno tamagri'enena tamahe fanane hugahie. Hagi e'i ana zankura amu'tiaza huta tamefi huzamiho, na'ankure e'ina zantamina Ra Anumzamo'a fanane hanaza zane huno hunte'ne.

## 8

### *Ra Anumzamofona kagerakni onto hu'nea naneke*

<sup>1</sup> Ama maka kasegema menima neramuana kegavahu so'e huta avariraho. E'i anama hanutma vahera kase hakare nehuta, Ra Anumzana tamagri Anumzamo'ma tamagehe'ima huhampri zmante'nea mopa omerita mani avitegahaze. <sup>2</sup> Hagi ana nehuta Ra Anumzana tamagri Anumzamo'ma anteramino'ma mani avu'ava'ma hutamaveri hunaku'ma 40'a kafufima hagage kokampima tamavreno'ma ne-eno, kasege'a avaririgahazafi ovaririgahaze huno'ma reramaheno'ma ke'nea zankura tamagera okaniho. <sup>3</sup> Hagi anteramino'ma mani avu'ava'ma hu tamaveri hunakura tamatregeta tamagakura nehzageno, tamafahe'mo'ene tamagranena neta onke'naza ne'zana mana tamami'ne. E'i ana'ma hu'nea avu'avamo'a huno, vahe'mo'za bretige nene'za zmasimura eri'za nomanizanki, Ra Anumzamofa agipinti'ma atirami'nia nanekereti'ene vahe'mo'za zamasimura eri'za maniga-haze huta antahisagu anara hu'ne. <sup>4</sup> Hagi 40'a kafufima ka'ma mopafima e'nazana, kukenatamimo'a tamavugaretira tagatora huoramigeno, tamagamo'enena zoreno prora osu'ne. <sup>5</sup> Tamagrama antahisazana, arera afa'ma

mofavre'ama aheno azeri fatgo nehiankna huno, Ra Anumzana tamagri Anumzamo'a tamazeri fatgo nehie. <sup>6</sup> E'ina hu'negu Ra Anumzana tamagri Anumzamofonku koro hunteta agoraga'a nemanita, avu'ava'a nevaririta, kasege'a avaririho. <sup>7</sup> Na'ankure Ra Anumzana tamagri Anumzamo'a rama'a tinkagomu megeno, agonafine agupofinena rama'a ti kampui hanatino enevia knare mopafi tamavreno unefre. <sup>8</sup> Hagi ana mopa witima, balima, waini ragama, fiki zafaramima, pomegreneti zafa rgaramima, olivi zafane, tumerimo'ma avite'nea mope. <sup>9</sup> Hagi ana mopafina ne'zamo'a avitegeno, ne'zanku atupa osu mope. Ana nehigeno ainima e'neri'za havemo'e'ne kopama e'neri'za havemo'a agonaramimpina me'neankita kafita erigahaze. <sup>10</sup> Hagi tamagrama ne'zama neramu'ma nehanuta, Ra Anumzana tamagri Anumzamofo agi'a erisga hiho. Na'ankure Agra knare mopa tami'ne.

<sup>11</sup> Hianagi Ra Anumzana tamagri Anumzamofo kasegene tra kenema menima amage'ma antesazegu'ma neramasmu kema tamage'ma akanita rutagre zankura kva hiho. <sup>12</sup> Hagi knare nompi mani'neta hakare ne'za nenesnageno tamura nehina, <sup>13</sup> bulimakao afu'mo'zane sipisipi afu'mo'zanena anentara kase hakare nehanageta, silvane golinena rama nenteta maka fenoma antesaza fenomo'a ome rama'a hugahie. <sup>14</sup> Hagi ana zankura musena huta tamavufga ra nehuta, Ra Anumzana tamagri Anumzamo'ma Isipima kazokazo eri'zama e'nerita mani'nazageno tamazama huno tamavreno'ma atirami'nea Ra Anumzankura tamagera okaniho. <sup>15</sup> Agrama vugota huramanteno hagage huno tusi amuho hu'nea ka'ma kokampima ha' osifavemo'zane ha' segintavemo'zanena hakare hu'nefi nevuno, havefinti'ma tima erifore'ma hurami'nea zanku'enena tamagera okaniho. <sup>16</sup> Hagi ka'ma kokampima tamafahé'mo'za ne'za onke'naza ne'za manama tami'neana, anteramino'ma mani avu'ava'zane tamagrama knare huta manisagu reramaheno kenaku anara hu'ne. <sup>17</sup> Hagi ru tamagra huta tagra hankavereti ama fenona eritru hune hutama huzanku, e'i anara hu'ne. <sup>18</sup> Hu'heanagi Ra Anumzana tamagri Anumzamo hankavea tami'nigeta feno vhahera manigahazanki, tamagera akanioteho. E'i ana'ma haniana tamafahé'ima huvempa huno huhageraf'nea kea eri knare hugahie. <sup>19</sup> Hagi Ra Anumzana tamagri Anumzamofoma tamagekani nenteta, havi anumzantamima nevaririta, tamarenareta mono huzmantesazana, Ra Anumzamo'a tamage huno tamahe fanane hugahanki, kva hiho hu'na nehue. <sup>20</sup> Hagi Ra Anumzana tamagri Anumzamofo kema ontahisageno'a, tamavugama me'nea mopafi vahe'ma zamahe fananema hu'neaza huno, tamahe fanane hugahie.

## 9

### *Israeli vahe'mo'za Anumzamofo azeri arimpa ahe'naza naneke*

<sup>1</sup> Israeli vahe'mota antahihi! Menina Jodani tina takaheta rama'a vahe mani'nazageno hankave zamimo tamagri hankavema agatere'nea vahe'mokizmi mopa omerigahaze. Hagi ana vahe'mo'za kumazmimofoma hugagi'nazana vihumo'a za'za huno mona avako hu'za nehigeno, <sup>2</sup> Hagi ana kumatmimpina za'za hu'za tusinasi vahetami Anaki mofavrerami mani'nazanki, ina vhahera knareru hu'neno hara huzamantegahie higeta ko antahi'naza vahetami mani'naze. <sup>3</sup> E'ina hu'negu menima keta antahitama hanazana, Ra Anumzana tamagri Anumzamo'a Agra ugota huno keonke'zama tefananehu tevegna huno ana mopafina nevuno, vhahera

zamahe rava nehanigeta, Ra Anumzamo'ma huhampri tamante'nea kante, ana mopafi vahe'tmina ame huta zamahe fanane hugahaze.

<sup>4</sup> Hagi tagri fatgo avu'ava zanku huno Ra Anumzana tagri Anumzamo'a ana vahetmina zamahe natitregeta mopazmia erune huta tamagesa ontahaho. Hianagi Agra ana vahe'mokizmi kefo avu'avazamigu huno zamahe natitregahie. <sup>5</sup> Ana mopama omeri santima haresuta, tagri fatgo avu'ava zante Ra Anumzana tagri Anumzamo'a taza higeta erune huta tamagesa ontahaho. Agra zamagri kefo avu'ava zanku mopa zamifintira zamahe natinetreno, tamagehe'i Abrahamuma, Aisakima, Jekopunema huvempa huno huhampri zamante'nea kea eri knare hugahie. <sup>6</sup> Tamagrama antahisazana, tagri fatgo avu'avazante Ra Anumzana tagri Anumzamo'a ama knare mopa tamigeta erune huta tamagesa ontahaho. Na'ankure tamagra keontahi vahe mani'naze.

<sup>7</sup> Ra Anumzana tamagri Anumzamofoma ka'ma kokampima azeri arimpama ahe avu'avazama huta e'nazazana tamagera okanita tamagesa ontahaho. Isipiti'ma atiramitama e'naza knaretimma eno amare'ma ehanati'nazana, Ra Anumzamofona hara rentevava huta neaze. <sup>8</sup> Hagi Sainai agonare'enena Ra Anumzamofo rimpa eri haviza hazageno, tusi arimpaa heramanteno tamahe fanane hunaku hu'ne. <sup>9</sup> Hagi anazama fore'ma hu'neana, Ra Anumzamo'ma tamagranema hu hagerafi huvempa kema have tafete'ma kre'nea kasege erinaku agonafima mreri'nogeta anara hu'naze. Ana agona fina 40'a zagegi 40'a haninki hu'na ne'zane tinena one umani'noe. <sup>10</sup> Hagi anante'ma umani'nogeno'a Ra Anumzamo'a tare have tafete'ma Agra'a azanuti'ma eri vakokino krente'nea kasegea nami'ne. Ana maka kasegema agonamofo agafima mani'nazageno, teve anefapintimma tamasami'nea kasegea ana have tafetrente krente'ne. <sup>11</sup> Hagi 40'a zagegi 40'a hanima evigeno'a, Ra Anumzamo'a anama huhagerafi huvempa kasegema krente'nea haverarena nenamino, <sup>12</sup> amanage huno hu'ne, otinka ame hunka uramio. Na'ankure Isipiti'ma zamavarenkama etiraminka e'nana vahekamo'za kefo zamavu'zmava hu'za havia nehaze. Zamagra avaririhoma hu'noa kemofona ame hu'za zamefi hunami'za, golire havi anumza tro hu'naze.

<sup>13</sup> Mago'ane Ra Anumzamo'a amanage huno nasami'ne, Nagrama Israeli vahe'ma zamagoana, tamage huno zamagu'amo'a tusiza huno hankaveti vahe mani'naze. <sup>14</sup> Hagi natrege'na zamahe hana hu'na ama mopafintira zamagi'a eri fanane nehu'na, kagripinti hankavenentake huno zamagri hankavema zamagatereno tusi'a ohampriga'a vahera zamazeri fore ha'neno. <sup>15</sup> Hagi ana agona fina tevenefamo'a hagana hagana nehige'na, have tafetre'na nazampi eri'ne'na erami'noe. <sup>16</sup> Hagi enerami'na koana tamagra Ra Anumzana tamagri Anumzamofo avurera kumi hu'naze. Tamagra ame huta tamefi Ra Anumzamofona hunemita, ke'a ovaririta, havi anumzana golireti bulimakao anenta'mofo amema'a tro huntetma, monora hunte'naze. <sup>17</sup> E'ina hazage'na ana have tafetre'na negazage'na mate'vu'na atrogeno, rufrage'ne. <sup>18</sup> Ana hute'na 40'a zagine, 40'a hanine ne'zana one ko'ma hu'noaza hu'na Ra Anumzamofo avurera navugosaregati mase'noe. Na'ankure tamagra maka kumi'ma hu'nazana Ra Anumzamo'ma ago'netia avu'ava huta azeri arimpaa ahe'naze. <sup>19</sup> Ana'ma hazage'na nagra tusi koro hu'noe. Na'ankure Ra Anumzamo'a tusi arimpaa ahe'neramanteno tamahe fanane hu'za hu'ne. Hianagi Ra Anumzamo'a mago'ene nagri kea antahi'ne. <sup>20</sup> Hagi Aronina Ra Anumzamo'a tusi arimpaa ahenteno ahe fri'za hu'neanagi,

tamagri'ma huramantoaza hu'na Aronina nunamu huntogeno ahe ofri'ne.  
<sup>21</sup> Anante tro'ma huntetama kumi'ma hu'naza bulimakao anenta'mofo amema'a eri'na tevefi krete'na, rufuzafupogeno tanefa setege'na, ana agonaregati'ma uneramia timpi aruherafit're noe.

<sup>22</sup> Hagi Tabera kumate'ene Masa kumate'ene Kibrot-Hatava kumate'enema mani'neta Ra Anumzamofona arimpa eri haviza hazageno, tusi arimpa aheramante'ne. <sup>23</sup> Hagi Kates-Barneama mani'nazageno'a Ra Anumzamo'a amanage huno huramante'ne, Mareritma mopama neramamua mopa omeriho. Hianagi tamagra Ra Anumzana tamagri Anumzamofa kemofontera tamentintia nosuta ovariri'naze. <sup>24</sup> Hagi tamagri'ma tamage'na antahi'nama hu'noa knareti'ma e'no'ma menima e'neana, tamagra Ra Anumzamofo kea ontahita, tamagefi humi vahe mani'naze. <sup>25</sup> Ana'ma hazageno Ra Anumzamo'a tamahe fanane hugahuema hige'na, <sup>40</sup>a zagegi <sup>40</sup>a haninki navugosaregati Ra Anumzamofa avuga umase'ne'na, <sup>26</sup> amanage hu'na nunamuna hu'noe, Ra Anumzamoka Isipima mani'nazagenka hankavenentake kazanuti'ma Nagri vahe fatgo manisaze hunka zamavarenka atirami'nana vaheka'a, zamahe fananea osuo. <sup>27</sup> Kagri eri'za vahe Abrahamuma, Aisakima, Jekopuma, antahi nezaminka, ama vahetmimofo kumiku'ene ke ontahi zamavu'zmavakura ontahio. <sup>28</sup> Hagi kagrama vaheka'a zamahe fananema hananke'za, Isipi vahe'mo'za amanage hugahaze, Ra Anumzamo'a zamigahue huno'ma huvempama hu'nea mopafina zamavareno ufregara osuno zamahe fanane hie hu'za huge, avesra huzamanteteno eme zamavareno atiramino ka'ma mopafi zamahe fanane hie hu'za hugahaze. <sup>29</sup> Hianagi ama ana vahera ihamu hankavekareti'ene hanavenentake kazanuti'ma Nagri vahe fatgo manisaze hunka Isipiti'ma zamavarenka atirami'nana vaheka'a mani'naze.

## 10

### Nampa 2 kasegema kre'nea naneke

<sup>1</sup> E'i ana knarera Ra Anumzamo'a amanage huno nasami'ne, ese havema ko'ma kami'noankna hunka antrenka tro nehunka, zafare vogisine trohuo. Hagi ana have tafetrena erinka agonare'ma mani'nenure marerige'na, <sup>2</sup>Ese have tafetrente'ma krente'nogenka arurakoma hu'nana nanekea krentankenka ana zafare vogisifi ana have tafetrena anto huno nasm'i'ne. <sup>3</sup> Anagema hige'na akasia zafare vogisia tro hute'na, kote'ma arurakoma hutre'noa kna have antre'na, eri pehe hunte'na, ana have tafetrena eri'na ana agonarega mareri'noe. <sup>4</sup> Hagi Ra Anumzamo'a mago'ane 10ni'a kasegea, agonamofo agafinkama tevenefapinti'ma tamasamigetama antahi'naza kasegea ana have tafetrentera krenami'ne. <sup>5</sup> Ana'ma hutege'na ete ana agona fintira erami'na anama akasia zafare'ma trohunte'noa vogisifi ana kasegema kre'nea have tafetrena Agrama nasm'i'neaza hu'na ome atogeno, meninena anante me'ne.

<sup>6</sup> Hagi anantetira Israeli vahe'mo'za Jakani vahe'mofo tinkeria atre'za Mosera mopafi vu'naze. Aroni'a anante frige'za asentazageno, nemofo Eleasa agri nona erino ugagota pristi eri'zana eri'ne. <sup>7</sup> Hagi anantetira Mosera mopa atre'za Gudgota mopafi vute'za, Gudgotatira rama'a ti me'nea kumate Jotbaha vu'naze. <sup>8</sup> Hagi Sainai agonamofo agafima mani'nazageno'a Ra Anumzamo'a kasegema ante vogisima zafama huno vu vahe'ene, Agri avugama mani'ne'za eri'zama'ama eri vahera Livae naga

zamazeri ruotge hige'za Anumzamofo eri'za amarera ehanati'naze. <sup>9</sup> E'ina hu'negu Livae vahe'mo'za, zamafuhe'mozama mopama eri'zafina zamagra mopa e'origahaze. Na'ankure Ra Anumzana tamagri Anumzamo tamasami'nea kante anteno zamaza hanige'za manigahaze. <sup>10</sup> Nagra anante ese'ma hu'noankna hu'na, mago'an'e 40'a zagegi, 40'a haninki hu'na ana agonafina manugen, Ra Anumzamo'a keni'a antahino tamahe fananea osu tamatregeta mani'naze. <sup>11</sup> Anante Ra Anumzamo'a amanage huno nasami'ne, otinka Israeli vhahera zamavarenka vugota hunka vuge'za zamage'hemokizmima huhampri zamante'noa mopa omeriho.

### *Ra Anumzamofonku koro'ma hu'zamofo naneke*

<sup>12</sup> Hagi menina Israeli vhahera antahiho, Ra Anumzana tamagri Anumzamo'a amana hihohuno nehie. Ra Anumzana tamagri Anumzamofona koro hunteta agorga'a nemanita, Agri avu'ava nevaririta, avesinenteta, maka tamagu tamenteti huta monora hunteho. <sup>13</sup> Hagi tamagra knare'ma huta mani'naku'ma hanuta, Ra Anumzamofo kasegene trakenema menima nagrama neramasmuana antahita avariraho. <sup>14</sup> Hagi keho! Anami monafine onagamuma me'nea monafine, mopafinime maka zama me'neana Ra Anumzana tamagri Anumzamofo zanke me'ne. <sup>15</sup> Hagi Ra Anumzana tamagri Anumzamo'a mika ama mopafi vahepintira tamagehe'ina tusiza huno avesi nezmanteno, huhampri zamantenge'za mani'neza kaseramantagetma menina manita neaze. <sup>16</sup> E'ina hu'negu ke ontahi tamavutamavara atreta tamagu'a rukrahe huta kea antahiho. <sup>17</sup> Na'ankure Ra Anumzana tamagri Anumzamo'a mika havi anumzantmimofo zamagatere'nea Anumzane mani'neno, ra vahetamimofona Ra zimi mani'ne. Agra Ra Anumzana tusi'a hihamu'ane vahe'mo'za koro huntega Anumzamo, maka vhahera mago avamenteke zamaza nehia Ne' vahe'mo'a mago'a zanteti masave huno azeri savari huga Anumza omani'ne. <sup>18</sup> Agra megusa mofavreramine, kento a'nanea zamahokino zamaza nehuno, kragna'ma enemaniza vahe'mofona ne'zane kukenanena nezamie. <sup>19</sup> E'ina hu'negu tamagranema eman'i'zana kragna vhahera tamavesi zamanteho, na'ankure koteratamagranena Isipia ana huta kragna vahe mani'nazane. <sup>20</sup> Ra Anumzana tamagri Anumzamofonke korora hunentetma, agorga'a mani'neta, Agri monora hunentetma, azerikona hu'netra Agri agifinke huvempa kea hihohi. <sup>21</sup> Agrike ra agia amigahaze. Agrake tamagri Anumzankino, hihamu'ane zama nehuno, ranra kaguva zantmima hu'neana tamagra ke'naze. <sup>22</sup> Tamagehe'zama Isipima urami'nazana, 70'a vahe vu'nazanagi Ra Anumzana tamagri Anumzamo'a, monafi hanafitaminkna huno zamazeri rama'a higeta, menia tusi'a vahe'krerafa fore huta mani'neze.

## 11

### *Ra Anumzamofoma avesinteno ke'ama antahizamofo naneke*

<sup>1</sup> Hagi Ra Anumzana tamagri Anumzamofona tamavesi nenteta kasege'ane, tra ke'anena amage antetma avariraho. <sup>2</sup> Hagi tamagesa antahiho, menina ama nanekea ke'za antahi'za osu'naza mofavretamigura nosuanki, maka zama Ra Anumzana tamagri Anumzamo'ma himamu hankave'ane azanutu'ma tazeri fatgoma hia zama ke'naza vahe'motagu nehue. <sup>3</sup> Hagi Isipi kini ne' Feronte'ene maka Isipi mopafinema erifore'ma hu'neua avame'zane kaguvazanena tamagra ke'naze. <sup>4</sup> Hagi Isipi sondia vahe'mo'za hosi afu'zmine, karisi zaminema eri'za tamavariri'za

neazageno, Ra Anumzamo'ma Koranke hagerimpi zamahe fanane hu'nea zana tamagra'a ko ke'naze. <sup>5</sup> Hagi ka'ma kokampima kegava huramanteno tamavreno amare'ma e'neana ko ke'naze. <sup>6</sup> Hagi Rubeni nagapinti Eliapu mofavrerare Datanine Abiramukiznima, Ra Anumzamo'ma mopama eri aka'ma higeno maka a' mofavreznine fenoznine seli nozninema mopa agu'ama fre'naza zana tamagra'a ko ke'naze. <sup>7</sup> Hianagi tamagra'a tamavufinti, Ra Anumzamo'ma hihamu'anee zama erifore hu'neazana ke'naze. <sup>8</sup> E'ina hu'negu menima avariraho hu'nama neramamua kasegea kegava nehuta, avariri so'e hiho. E'ina hanutum tamagra hankavetita anama omerinaku'ma nehaza mopa omerigahaze. <sup>9</sup> Kema antahitama avaririsuta, amirimo'ene tumerimo'enema avite'nea mopama Ra Anumzamo'ma tamagehe'ine, tamagri'enema tamigahue huno'ma huhampri tamante'nea mopa omeritma za'zate manitma vugahaze. <sup>10</sup> Na'ankure omeri santiharenu'ka'ma unefraza mopa Isipi mopama atretma e'naza mopagna osu'neankita, hozama antesaza hozafina ne'zamo'ma hagenogura tina afita ontagahaze. <sup>11</sup> Hianagi menima ufre'zama nehaza mopafina, agonaramine aguporaminena me'negeno, kora runente. <sup>12</sup> Hagi e'i ana mopa Ra Anumzana tamagri Anumzamo'a kafuma agafa huno kafuma vagamareno'ma hania knafina, avunteno kegava nehia mopa me'n. <sup>13</sup> Hagi menima neramua kasegema avariri so'e nehuta, Ra Anumzana tamagri Anumzamofoma tamagu tamenteti'ene huta avesinteta mono'ma huntesageno'a, <sup>14</sup> Agra mopatamifina ko'ma ru knarera atresigeno kora rugahie. Hagi ese' ko'ene henka kora nerinketma, witine wainine olivi masavetaminena eri nompina antegahaze. <sup>15</sup> Ana nehuno mopatamifina zagagafamo'zama nesaza trazana tami'nigeno hage'za rama'a nehanageta, tamagra ne'zana neramu hugahaze. <sup>16</sup> Hagi antahintahitamimo'ma savari'ma hanigetama Ra Anumzama atreta havi anumzama nevaririta mono hunte'zankura kva hiho. <sup>17</sup> Hagi ana'ma hanuta Ra Anumzamofona azeri arimpa ahesageno, mona kahana eriginkeno, kora orina, ne'zamo'a fanane hinketa, Ra Anumzamo'ma knare mopama tami'zama nehia mopafina ame huta frigahaze. <sup>18</sup> E'ina hu'negu amama neramasmuu nanekea antahintahi tamifine tamagu'afine eri antenkeno meno. Ana nanekea tamazante'ene kokovite'ene anakinte'enkeno avame'za me'neno tamagemakani zankura, mika zupa huramagesa huvava hino. <sup>19</sup> Mofavretmimofona ama ana nanekea rempi huzmiho. Hagi nontmifi manisarero, kama vano hanafino, mase'narero, otisarera ama nanekea huge antahige hiho. <sup>20</sup> Ama ana nanekea no kaha zafare'ene kuma keginamofo kafante'ene krenteho. <sup>21</sup> E'i ana'ma hanageno'a, Ra Anumzamo'ma tamagehe'ima huvempa huno zamigahue huno'ma hu'nea mopafina, tamagrane mofavre nagataminena za'za kna manitma vugahaze. Monamo'ma mesga huno mopa agofetu meaza hutma manigahaze. <sup>22</sup> Hagi nagrama menima avaririhoma hu'na neramua kasegema tamage hutma nevariritma, Ra Anumzana tamagri Anumzamofoma avesinenteta, avu'avazama'a nevaririta, Agri'ma azeri hankavematisageno'a, <sup>23</sup> Ra Anumzamo'a ana mopafi vhahera zamahe natitresigetma, tamagri'ma tamagatere'za rama'a hu'za tusi'a hankave vahetami mani'naza vahe'mofo mopa omerigahaze. <sup>24</sup> Hagi maka kumapima tamagiama rentesaza mopamo'a, tamagri mopa megahie. Sauti kaziga ka'ma mopareti vuno noti kaziga Lebanon agonare uhanatigahie. Hagi zage hanati kaziga Yufretisi tinteti vuno, zage fre kaziga Mediterenia hagerinte uhanatigahie. <sup>25</sup> Hagi

mago vahe'mo'e huno hankavetino hara hu tamagateoregahze. Na'ankure Ra Anumzana tamagri Anumzamo'a huvempama hu'nea kante anteno mika vahera kama vanarega zamazeri koro hinke'za, tamagrikura tusi koro hugahaze. <sup>26</sup> Hagi keho, menina asomu'ma eri kane, sifnafima mani kane tamaveri nehue. <sup>27</sup> Hagi tamagrama Ra Anumzana tamagri Anumzamofo kasegema menima neramasamua kema avaririsuta, asomu erigahaze. <sup>28</sup> Hianagi Anumzamofo kema menima neramasamua kema atreta havifima nevuta, keta antahita osu'nesaza havi anumzama avaririsuta, kazusifi manigahaze. <sup>29</sup> Hagi Ra Anumzana tamagri Anumzamo'ma tamavreno ana mopafima ufrena, ana mopama omenerisuta, Gerisimi agonareti asomu kea huama nehutma, Ebali agonareti kazusi hunte kea huama hiho. <sup>30</sup> (E'ina agonararena Jodani timofo zage fre kaziga Araba, Kenani vahe'ma nemaniza mopamofo mago kaziga asoparega Gilgal Moreama me'nea oki zafaramimofo tava'onte me'n'a'e.) <sup>31</sup> Hagi kofa'a knafi Jodani tina takaheta, Ra Anumzana tamagri Anumzamo'ma tami'nea mopa omeriku nevaze. Hagi ana mopa omerita umanisuta, <sup>32</sup> amama neramasamua kasegene tra kenena avariri so'e nehutma, kegava hiho.

## 12

### *Ra Anumzama mono hunte kumamofo naneke*

<sup>1</sup> Ra Anumzana tamagehe'mofo Anumzamo'ma tami'nea mopafima umanisuta, ama'na kasegene trakenena avariri so'e hiho. <sup>2</sup> Hagi e'i ana mopafima mani'naza vahe'ma zamahe natitre'nta, maka havi anumzama mono'ma hunentaza kuma'zmima, ra agonaramimpine, neone agonaramimpine zafarigane, me'neniana tagana tagana vazita eri haviza hutreho. <sup>3</sup> Hagi havi anumzante'ma Kresramanama vu itaramina tagana vazinetreta, mono'ma hunentaza haveramina rufuzafupenetreta, vimago zafama retrurente'ne'za Asera havi anumzama mono'ma hunentaza zafaramina antagitma tevefi kreho. Maka havi anumzantmimofo amema'ama zafare'ma antre'za tro'ma hunte'nesaza zana antagita kre fanane hinkeno, zamagi'a omneno.

<sup>4</sup> Zamagrama nehzaza hutma, Ra Anumzamofona tamagra monora huontegahaze. <sup>5</sup> Hianagi tamagra ama nanekea erita tamagu'are'ene antahintahire'enena nenteta, kokovite'ene tamazante'ene anakinte'neta ama ana nanekegura tamagera okaniho. <sup>6</sup> E'ina kumateke tevefima kre fanane hu ofane, kresramna vu ofane, 10ni'a kevufinti mago kevuma ami ofane (tait), ruga'a ofane, huvempahu ofane, avesite'ma ami ofane, bulimakaone sipisipi afutamimpinti'ma ese'ma kasentesia anenta'ma ami ofa avretma egahaze. <sup>7</sup> Hagi e'i ana kumateke tamagrane a'mofavrenena Ra Anumzana tamagri Anumzamofo avure ne'zana ome kretma nenetma, maka zama asomu huno eri'ampoma reramante'nea zankura musena hugahaze.

<sup>8</sup> Hagi menima tamagra tamavesite mono'ma nehzaza huta, monora osugahaze. <sup>9</sup> Na'ankure manigasahu kuma'ma Ra Anumzana tamagri Anumzamo'ma erisantiharesaze huno'ma hu'nea mopafina zahufa uofre'naze. <sup>10</sup> Hianagi Jodani tina takahetma Ra Anumzana tamagri Anumzamo'ma erisantihareshogu'ma neramamia mopafina umanigahaze. Hagi ana mopafina Ra Anumzamo'a tamazeri fruhina hara osutma fru hutma umanigahaze. <sup>11</sup> Hagi Ra Anumzana tamagri Anumzamo'ma mono'ma huntehogu'ma huhampri'nenia kumate, ofama ome hihoma hu'nere tevefi kre fananehu ofane, kresramna vu ofane, 10ni'a kevufinti

mago kevuma ami ofane (tait), tamagra tamavesite ami'ofane, mago'a zama huvempama huno hu ofa eritma ome huntaho. <sup>12</sup> Ana nehutma tamagrane, a'mofavretamine, ve eri'za vahetamine, a' eri'za vahetamena, Ra Anumzana tamagri Anumzamofo avurera ne'zana nenetma musena nehutma monora huntiegahaze. Hagi tamagri'enema mani'naza Livae nagara tamagerakan ozmanteho, na'ankure zamagra mago mopa e'ori'naze. <sup>13</sup> Hagi kva hu'netma kresramna vu ofama hanazana, tamagra'a tamavesitera rufi rufina kresramna oviho. <sup>14</sup> Hianagi tamagri amu'nompinti'ma mago naga nofi'mofo mopafima mono hunantegahaze huno'ma Ra Anumzamo'ma hania kumateke'za, nagrama tamasm'i'noa kante avaririta kresramna vu ofa nehutma, maka'zama hugahazema hu'noaza hutma monora huntiegahaze.

<sup>15</sup> Hianagi Ra Anumzana tamagri Anumzamo'ma asomu'ma huramante'nia kante ina kumatero afu'ma ahegisita nenaku'ma hanutma ahegisita negahaze. Ana afu'ma ahegisita nesazana, afi zagakafama kezeline dianema nehzaza hutma agruma osu vahe'mo'ene agruma hu vahe'mo'enena amane ana ne'zana negahaze. <sup>16</sup> Hianagi korama'a onetfa nehuta, tima tagitreankna huta mopafi tagitreho. <sup>17</sup> Hianagi 10ni'a kevufinti mago kevuma ami ofama hunaku'ma witio, wainio, olivi masaveno, bulimakaone sipisipi afutamimo'ma ese'ma kasente'nia afu anenta'ma ofama eritma esazano, tamagratmi tamavesite aminaku eritma esaza ofo, mago'a zante'ma huvempama huta ami ofa, ruga'a ofanema eritma esuta tamagrama nemaniza kumapina onetfa hugahaze. <sup>18</sup> Hianagi Ra Anumzana tamagri Anumzamo'ma hunte'ne'nia kumateke negahaze. Ana ne'zama nenetma musema hanazana tamagrane, a'mofavretamine, ve eri'za vahetamine, a' eri'za vahetamine, tamagranema nemaniza Livae naga'enena, Ra Anumzana tamagri Anumzamofo avurera ne'zana nenetma, musena hutma monora huntiegahaze. <sup>19</sup> Hagi ana mopatamifima manita nevanutma, Livae nagara tamagera kaniozamanteta zamaza hoho.

<sup>20</sup> Hagi henkama Ra Anumzana tamagri Anumzamo'ma huvempama huramante'nea kante anteno, mopatmimofo agema'ama eri rama hania knafima, afuku'ma tamanankema hanigeta, afu negahune hanutma tamavemasi'nia knazupa amne negahaze. <sup>21</sup> Hagi Ra Anumzana tamagri Anumzamo'ma mono hunantegahaze hunte'nigeno me'n'e'nia kuma'mo'ma afete'ma me'neniana, nagrama huramante'noa kante anteta Ra Anumzamo'ma tamami'nea bulimakao afutamifintiro, sipisipi afutamifintira kumatamifina amne ahetma negahaze. <sup>22</sup> Hagi ana afu'ma ahetma nesazana, afi zagakafama kezeline dianema nehzaza hutma, agruma osu vahe'motane agrumahu vahe'motanena amne ana ne'zana negahaze. <sup>23</sup> Hianagi korama'a me'n'e'nia afura onetfa hoho, na'ankure koranpina asimu me'neankitma, korama'a onegahaze. <sup>24</sup> Hagi korama'a onegosazanki tima hiaza hutma mopafi tagitregahaze. <sup>25</sup> Anama ahegisaza afu'mofo korama one'nageno'a, maka zama hanazazamo'a tamagrite'ene mofavretmire'enena knare hugahie. Na'ankure e'i Ra Anumzamo'ma musema nehia avu'avaza hugahaze. <sup>26</sup> Hianagi ruotage'ma hu'nesia zantamine, Ra Anumzamofo huvempa hunka aminakurema hu'n'e'nana ofa, Agrama hunte'nenia kumate eritma viho. <sup>27</sup> Hagi tevefima kre fanenehu ofa ome hanazana, Ra Anumzana tamagri Anumzamofonte kresramna vu itarera, avufgane korama'anena eritma viho. Hagi mago'a Kresramanama vu afu'mofo korama'a, Ra Anumzana tamagri Anumzamofo kresramna vu

itamofo asoparega taginetretama, ame'a negahaze. <sup>28</sup> Amama hihoma hu'na neramasmu nanekeea kva hu'netma avariri so'e nehinkeno, maka zama hanaza zamo'a tamagrite'ene mofavretmire'enena knare huno vugahie. Na'ankure e'ina'ma hanazana Ra Anumzana tamagri Anumzamofo avurera knare huno fatgo hu'nesia avu'avaza hugahaze.

<sup>29</sup> Ra Anumzana tamagri Anumzamo'ma vugota huno ana mopafima mani'naza vahe'ma zamahe fananema hanigeta, mopazmima eritma manisutma, <sup>30</sup> tamazeri savari'ma hanigetma zamagri zamavu'zamava nezmavaririta, anumza zamigu'ma mono hunte'za nehunanki inankna hu'za monora hunentaze hutama hu'zankura kva hiho. <sup>31</sup> Hagi zamagrama havi anumza zamire'ma mono'ma hunentazanknara huta Ra Anumzana tamagri Anumzamofona monora huontegahaze. Na'ankure Ra Anumzamo'ma ago'mateno avesrama hunentea avu'ava hu'za monora nehu'za, havi anumza zimirera mofavrezmia tevefina ahe'za krerasage'za monora hunentaze.

<sup>32</sup> Hagi maka avaririhoma hu'na tamasmua nanekeea kegava hu'netma avaririhō. Hagi ana nanekerera agema'a aseta rukamrege eri tregera osiho.

## 13

<sup>1</sup> Hagi kasnampa vahero, ava'nama ke vahe'ma amu'notmifima fore huno henkama fore'ma hania avame'zanku tamasamige, kaguvazanku tamasamige hanigeno, <sup>2</sup> ana avame'zano kaguvazama efore hina, ana ava'nama ke vahe'mo'zama tamagrama antahita keta osu'n'e'naza anumzanku'ma enketa mono huntamneno hanagetma, <sup>3</sup> ana kasanampa vahe keo, ava'na vahe'mofa ava'na kea ontahaho. Na'ankure Ra Anumzana tamagri Anumzamo'a tumotamireti'ene tamagu'areti huta avesintegahazo, reramaheno kegahie. <sup>4</sup> Ra Anumzana tamagri Anumzamofona amage'nentetma, koro huntetma agorga'a nemanitma, kasege'a neveraritma, ke'a nentahitma monora hunentetma, Agrira azeri kona hiho. <sup>5</sup> Hianagi e'i ana kasanampa vahero ava'na kema nehaza vahe'mo'zama tamazeri savari'ma hanaza vahera, zamahe friho. Na'ankure Ra Anumzana tamagri Anumzamo'ma Isipima kazokazo eri'za e'neritma mani'nazageno tamavreno atirami'nea Anumzana ha'renente'za, Agrama avaririhoma hu'nea kefintira tamazeri rukrahe hu'za havigante tamavrente'za nehaze. E'ina hu'negu kefozana amu'no tamifintira eritretma agru hiho. <sup>6</sup> Hagi negafu'o, neka'amo'o, mofaka'amo'o, kavesinente'nana a'ka'amo'o, tavaonte roneka'amo oku'ama eme kasamino, egeta ru anumzama kagri negageho'ma keno antahino osu'nenia anumzante'ma mono ome huntamneno hu'za hanagenka, <sup>7</sup> e'i ana anumzantmina mago'a tavaontamire'ma manigagi'naza vahe'tmimofo anumzantminku hugahaze. Hagi mago'a anumzantmina afete moparega anumzantminku mono huzmantene'nune hu'za hugahaze. <sup>8</sup> Hianagi kezmia ontahaho. Tamasunkura huzamanteta zamazeri frakinezmanteta zamagura ovaziho. <sup>9</sup> Hianagi tamagra zamahe friho. Ina a'mo'o ne'mo'ma tamavazuma hunaku'ma hanimofona tamagra ese havenknona zmahetenke'za, mago'a vahe'mo'za henka eme zamaheho. <sup>10</sup> E'ina hu'negu ana vahetmina havenknouna zamahe frinke'za friho. Na'ankure Isipima kazokazo eri'za e'nerita mani'nazageno tamavreno atiramino'ma e'nea Ra Anumzana tamagri Anumzamofontetira tamavre havifi netre. <sup>11</sup> E'ina hinkeno mago'a Israeli vahe'mo'zama ana nanekema antahisu'za, koro nehu'za mago'enena anahu kefo avu'ava zana amu'nontamifina osugahaze. <sup>12</sup> Hagi Ra Anumzana tamagri

Anumzamo'ma neramia kumatamimpi umani'neta antahi'nazana, mago kea anage huta antahigahaze. <sup>13</sup> Hagi mago'a hazenke vahe'mo'za tamagri amu'nompinti ot'i'za ruga'a kumapi vu'za, enketa vuta ru anumzantami keta antahitama osu'nesaza anumzaante monora ome humzamtamneno hu'za antahintahitamia tamazeri savari hugahaze. <sup>14</sup> Hagi e'inama hanaza kema antahisuta, havigefi tamagefi tamagra'a hakreta antahi so'e nehuta, kasri avu'avazama tamagema hu'ne'naza vahe'ma haketa erifore'ma hanuta, <sup>15</sup> ana kumapi vahe'tamine bulimakao afutaminena, kazinteti maka zamahe fri vagareho. <sup>16</sup> Maka ana kumapinti'ma erisaza zantamina ana kuma amu'nompi eritru hutetma, Ra Anumzana tamagri Anumzamofontega ofagna hutma ana kuma'enena krefanane hinkeno, mago'anena eri fatgo hu'za ana kumapina omaniho. <sup>17</sup> Hagi krefanane hihoma hu'nenia zana magore hutma e'oriho. E'na hutama ana zantmima e'orisageno'a, Ra Anumzamo'a rimpaa heoramantegosianki, asunku huramantegahie. Agra asunku huramanteno, tamagehe'ima huhampri zamante'nea kante tamazeri ra hina, rama'a vahekrerfa fore hutma manigahaze. <sup>18</sup> Hagi Agra e'inama haniana tamagrama menima neramasmuu kema antahitama Ra Anumzana tamagri Anumzamofo kasegema nevariritma, Agri avure'ma fatgo hu'nesia avu'avazama hanageno'a, e'nahura hugahie.

## 14

### *Agruhu zagagafane Agru osu zagagafamofo naneke*

<sup>1</sup> Hagi Israeli vahe'motma tamagra Ra Anumzana tamagri Anumzamofo mofavre mani'nazagu, fri'nesia vahetera tamasunkura hutma tamavufgane tamasenireti tinke tamazoka'enena taga osiho. <sup>2</sup> Na'ankure Ra Anumzana tamagri Anumzamo'a ama mopafi vahepintira tamazeri ruotge huno, Agri vahe manisaze huno higeta maka ama mopafima mani'naza vahepintira tamagra Agri ruotge vahe mani'naze.

<sup>3</sup> Kefoza huno agruma osu'nesia zagagafa oneho. <sup>4</sup> Hagi ama'na zagagafa negahaze, bulimakaoma, sipisipima, memema, <sup>5</sup> diama, gaze-lima, robakie nehaza diama, afi' memema, ibeksie nehaza afu'ene diagna afuku antiropue nehaza afu'ene agonafima nemania sipisipi afu'enena amne negahaze. <sup>6</sup> Hagi agigomo'ma tarefima hatna hu'nesigeno, ne'zama azanku'afinti'ma revrino nenesia zagagafane, amne negahaze. <sup>7</sup> Hianagi agigomo tarefi hatna hu'nesigeno azanku'afinti revrino'ma nonesia zaga, ete azanku'afinti revrino nenesia zagama agigomo hatna osu'nesiana onetfa hiho. Hagi kemorine, rebitine, havefima nemania varenena onetfa hiho. Na'ankure zamagra azanku'zmia huzamante nege'za revriza nenazanagi, tarefina zamagigomo'za hatnara osu'neanki'za agrua osu'naze. <sup>8</sup> Hagi afura magore hutma oneho, na'ankure zamagigomo'a tarefi atne'neanagi, azanku'a huonte'neankino agrua osu'ne. Avufga'a onetfa nehutma, fri'nesia afu'mofo avufgarera avakora osiho! <sup>9</sup> Hagi timpima nemania zagarimpintira, iri'ama meno, agekona'ama me'nesia zagaramina amne negahaze. <sup>10</sup> Hianagi iri'ane ageko'nanema omne'nesia zagaramina agru osu'neanki, onetfa hiho. <sup>11</sup> Agruma hu'nea namaramina amne negahaze. <sup>12</sup> Hianagi agru osu namaramima onesazana, kazintumpaki, frizagama nenea tumpanki, osa tumpanki, <sup>13</sup> kenage'ma hare'za vanoma nehaza maka

namaraminki,<sup>14</sup> haninke namaramima ra zamageru'ma neraza nama zاغagi,<sup>15</sup> mananinkna za'za arenane nama zagagi, rankrafama nehia komutonki, hagerinkenafi nemaniza efeke namazagagi, hagerinkena tumpanki,<sup>16</sup> neonse'ene ranra komutone, efeke maniravene,<sup>17</sup> hagerimpinti'ma nozamema aheno nenea ra agi'ene nama zagagi, hagerimpi hareno vano nehia tumpaki, hagerimpi ruga'a tumparaminki,<sup>18</sup> za'za agia hunte namane, afi patone, tamprataminena oneho.<sup>19</sup> Hagi zamageko'na me'nesia neonse zagaramina zamasaguregati'ma regraro'za vanoma nehaza zaga maka oneho.<sup>20</sup> Hianagi agruma hu'nesia namaramina maka amne negahaze.<sup>21</sup> Hagi agra'ama fri'nesia zagaramina oneho. Hianagi tamagranema emani vahera amne zamige, ru vahetera zagrlera zamige hugahaze. Na'ankure tamagra Ra Anumzana tamagri Anumzamofo ruotge vahe'a mani'naze. Hagi meme anentara nerera amirimpina onkregahaze.

### *Teni'a kevufinti mago kevuma ami' zamofo naneke*

<sup>22</sup> Mika kafune kafunema hozatamifinti'ma hamare'naza ne'zana, 10ni'a kevufintira refko hutma mago kevua Anumzamofo amigahaze.<sup>23</sup> Hagi anama refkoma hanaza kevua, Anumzamo'ma mono hunantegahazema huno hu'ne'nia kumateke eritma egahaze. E'ina kevuma erita esaza witima, wainima, olivi masavema ese'ma kasentesia bulimakaone, sipisipi anenta'ene, avretma eta Ra Anumzana tamagri Anumzamofo avuga Agrama huhamprinte'nea kumapi, ana ne'zana neneta koro'ma huntenu agorga'ama hakaregnama manizana rempi hugahaze.<sup>24</sup> Hagi Ra Anumzamo'ma mono hunanteho huno hunte'ne'nia kuma'ma afete'ma me'nena, Ra Anumzana tamagri Anumzamo'ma asomu huramante'nigeno, 10ni'a kevuma hanifinti'ma mago kevuma refkoma hanaza zamo'ma rama'a hina erita vuga'ma osanutma,<sup>25</sup> ana zantamina zagore atrenkeno mizasesagetma, ana zagoa eritma Ra Anumzamo'ma mono hunanteho huno'ma hu'ne'nia kumate'ma ana zugoma eritma uhanati'nutma, ana kumapima zagore'ma atre'nesaza bulimakaono, sipisipi afuro, wainio, akatinena tamagra tamavesite mizasetma maka nagataminena Ra Anumzamofo avuga kreta neneta musena hugahaze.<sup>26</sup> Anama nehanutma tamagranema mani'naza Livae nagara mopazimia omneno nozamine mago'a zazmia omne'negu, tamagera akani ozmanteho.<sup>27</sup> Hagi maka namba 3 kafumofo atumparega ana kafufima 10ni'a kevuma eritruma hanaza zana maka eritma eta tavaontamire'ma me'nenia rankumate emeritru hugahaze.<sup>28</sup> Hagi Livae naga'ra mopazmi omne nagaki, kraga vahe'tmima tamagranema nemanisaza vaheki, megusa mofavrereraminki, kento a'nema kumatamifima nemanisamo'za emeri atru hu'za ana ne'zana nezamamu hanageno, Ra Anumzana tamagri Anumzamo'a maka eri'zama erisaza zana asomu huramantegahie.

## 15

### *Nofi'ma hu'nenia vahe'mofo knazama eritre zamofo naneke*

<sup>1</sup> Hagi mago vahe'mo'ma mago'a zama tamagripinti'ma nofi'ma hu'nesaza zana 7ni kafurera, maka ana nofi'ma hu'nesia zana atrentegahaze.<sup>2</sup> Hagi kagripinti'ma mago'mo'ma nofi'ma hu'nesia zama atrentesanana amana hugahane. Tamagri vahe'mo'zama tagripinti'ma zagoma nofi hu'za eri'nesaza vahera, atrenezmantetma mago'enena vuta ome zamantahi onkegahaze. Na'ankure Ra Anumzamo nofi'ma hu'naza

zana ko katuferamante'ne. <sup>3</sup> Hagi ru vahe'mo'ma tamagripinti'ma nofi'ma hu'nesiana amne ome kehuta zagotamia erigahazanagi, tamagri vahe'ma Israeli vahe'mo'zama nofi'ma hu'nesageta atrezamantegahaze. <sup>4</sup> Hianagi amu'notamifina magore huno amunte omne vhahera omanigahie. Na'ankure Ra Anumzamo'a mopama erisantiharegahaze huno'ma neramia mopafina asomu huramantegahie. <sup>5</sup> Hanki Ra Anumzana tamagri Anumzamofo kasegema menima neramamu kasegema kegavahu so'e hutma tamagrama avaririsuta, e'ina asomura erigahaze. <sup>6</sup> Hagi Agra hvempama huramante'nea kante anteno, Ra Anumzana tamagri Anumzamo'a asomu huramante'nigeno, vahe'mo'za tamagripinti zagoanofira eme hanageta, tamagra zamagripintira magore huta zagoanofira osugahaze. Hianagi tamagrira mago'a vahe'mo'za kegava huoramantesageta, tamagrake'za kegava zamagrira huzmantegahaze. <sup>7</sup> Hagi Ra Anumzana tamagri Anumzamo'ma tami'nia mopafima umani'n'e'nageno, kumatmifima mago neramafu'ma amunte'ma omane'nesiana, tamage'na humitma zamage henkamia otreta zamaza hiho. <sup>8</sup> Hianagi tamazana reonamagitama, nazanoma atupa'ma hu'nesaza zana zamaza hiho. <sup>9</sup> Hagi 7ni kafumo hago atupa nehie nehutma, amunte omne vahe'mo'ma tamagripinti'ma nofi'ma hunaku'ma esia vahe'ma zagoma ozamizankura kva hiho. Na'ankure amunte'ma omne vahe'mo'ma Ra Anumzamofontegama krafama hanagetma, tamagra kumi hugahaze. <sup>10</sup> E'ina hu'negu zamunte omne vahe'mo'za atupa'ma hu'nesaza zana tamagu'reti muse nehutma zamiho. Na'ankure Ra Anumzana tamagri Anumzamo'a maka zama hanaza zana asomu huneramanteno, eri knare huramantegahie. <sup>11</sup> Na'ankure ana mopafina zamunte omne vhahera manigahaze. E'ina hu'negu nagra ama nanekea hu'na, tamazana reonamagitma, rusuteta mopatamifima mani'nesaza zamunte omne vhahera zamaza hiho.

### *Kazokazo eri'za vahe'ma katufezamante zamofo naneke*

<sup>12</sup> Hagi tamagripinti mago Hibru vemo'o a'lmo'ma eno'ma agra'a avufgama zagore'ma atresigetma kazokazo eri'za vahe'ma mizase'nesutma, 6si'a kafufinke kazokazo eri'za vahetamia manigahazanki, 7ni kafurera zamatrenke'za fru hu'za amne vugahaze. <sup>13</sup> Hagi ana kazokazo eri'za vahe'ma fru huno mani'nogu huntesankeno vaniana, amne aza avapakora atresankeno ovugahie. <sup>14</sup> Hagi Ra Anumzana tamagri Anumzamo'ma asomu'ma huramante'nea zampintira, sipisipi afu'ene, witine, waininena refko hutma nemitma huntegahaze. <sup>15</sup> Tamagrama Isipi mopafima kazokazo eri'za vahe'ma mani'nazageno, Ra Anumzana tamagri Anumzamo tamavreno atirami'nea zankura tamagera okaniho. E'ina agafare ama nanekea neramasamue. <sup>16</sup> Hianagi kazokazo eri'za vahekamo'ma kavesi neganteno, katre'na ovugosue huno'ma hanigeta, <sup>17</sup> ana kazokazo eri'za veo, aro avreta fegi'a kuma kafante omenteta, agesama rerapoma neraza azotanu agesa reraponesageno tamagri kazokazo eri'za vahe mani vava hugahie. <sup>18</sup> Hagi kazokazo eri'za vaheka'a zamatrenanke'za vanaza zankura krimpa havizana osuo. Na'ankure zagore'ma eri'zama e'neriza vhahera rama'a zago miza senezmantazanagi, eramita osi'a zago 6si'a kafufina miza sente'nane. E'ina hu'negu atresankeno'ma vanageno'a, Ra Anumzana tamagri Anumzamo'a maka'zama hanafina asomu huramantegahie.

### *Zgagafamofo agonesa anenta'mofo naneke*

<sup>19</sup> Hagi bulimakao afu'mo'o sipisipi afu'mo'o meme afu'tmimo'ma ve zamagonesa anentama antenagetma, Ra Anumzana tamagri Anumzamofo su'a zamazeri ante ruotge hinkeno meno. Hagi bulimakamofo ve agonesa anenta'a eri'zana omitma, ve agonesa sipisipi anenta'mofo azokara ohareho. <sup>20</sup> Hagi maka kafurera ese anentara avretma, Ra Anumzamo'ma hunte'nia kumate vutma, kagrane maka nagaka'anena ana afura ome ahegovitama Ra Anumzana tamagri Anumzamofo avuga negahaze. <sup>21</sup> Hianagi ana agonesa ve afu'mofo agiazamo haviza huge, avu asuhuge avufgamo'ma haviza huno afuhe afahe hu'nesia afura Ra Anumzana tamagri Anumzamofontega ofa huonteho. <sup>22</sup> Hagi ana afura tamagra'a kumatmifi ahegovitama negahaze. Anama ahegisazana gezeline dia afu'ma nehzaza hu'za ahegisageno, agruma hu vahe'ene agruma osu vahe'mo'zanena amne negahaze. <sup>23</sup> Hagi anama hanaza afu'mofo korama'a onetfa nehutma, mopafi tima hiazza hutma tagitreho.

## 16

### *Ozmahe zmagatere'nea knagu zmagesa antahisaza zamofo naneke*

<sup>1</sup> Hagi \*Abibi ikantera Ra Anumzana tamagri Anumzamo'ma ontamahe tamagatere'nea zanku antahimita ne'zana kreta nenetma musena hunteho. Na'ankure e'i ana ikante Isipitira Ra Anumzana tamagri Anumzamo'a kenagera tamavreno atirami'ne. <sup>2</sup> Hagi otamaheno tamagatere'nea knagu'ma antahimitama Ra Anumzana tamagri Anumzamofontega ofa hunaku'ma eritma esaza bulimakao afuro, sipisipi afuro, meme afuro avretma Agrama huno mono hunantegahazema hu'nesia kumate ome kresramna vuntega-haze. <sup>3</sup> Hagi ana ne'zama nesazana zisti onte bretine negahaze. Hagi Isipima knazampi mani'nazageno tamavreno atirami'nea zanku antahimitma 7ni'a knafi zisti onte bretia kreta nenetma tamagesa antahimigahaze. <sup>4</sup> Na'ankure ana 7ni'a knafina nontamifina zistia omnetfa hino. Hagi ese knamofo kinagama ahegisaza afu'mo'a me'enkeno koratuno masa osino. <sup>5</sup> Hagi ontamaheno trmagatere'nea zanku'ma antahimi ofama hanazana, Ra Anumzana tamagri Anumzamo'ma tami'nigeta manisaza kumapina kresramna oviho. <sup>6</sup> Hianagi Ra Anumzana tamagri Anumzamo'ma huno, Nagri'ma mono hunantegahaze hu'nea kumateke ontamaheno tamagatere'nea zanku'ma antahimino hu ofa, Isipima atretma e'naza knare zagma ufre-sigetma kresramna viho. <sup>7</sup> Hagi ana ne'zana Ra Anumzana tamagri Anumzamo'ma hunte'nia kumate kretma nenetma, nanterana nontimirega viho. <sup>8</sup> Zisti onte bretia 6si'a knafi negahaze, hagi 7ni knarerera atru hutma Ra Anumzana tamagri Anumzamofona monora huntegahaze. E'i ana knarerera mago eri'zana e'oriho.

### *Atru huno ne'zama kreno neneno musema hu'zamofo naneke*

<sup>9</sup> Hagi ese witima agafa hutama hamare'naza knareti agafa huta 7ni'a sonta hamprigahaze. <sup>10</sup> Ra Anumzana tamagri Anumzamofoma ne'zama kreno neneno musema hunte sontaramimpina, ne'zana kreta neneta musena hiho. Hagi ana'ma nehanuta tamagra tamavesite'ma ami ofa Ra Anumzana tamagri Anumzamo'ma asomu'ma huramante'n'e'nia avamente eme amigahaze. <sup>11</sup> Hagi tamagrane ne'mofavretamine mofa'netamine, ve kazokazo eri'za vahetamine, a kazokazo eri'za vahetamine, tamagranema

\* **16:1** Israeli vahe'mofo kalentafina Abibi ikana, ese ikankino, tagri kalentafina 3 ikana vahare'ene 4 ikana eri agafama hu'arega fore nehia ikanku hu'ne.

nemaniza Livae vahetamine, ru vahe'ma tamagranema enemaniza vahetamine, megusa mofavretamine, kento a'nenena Ra Anumzana tamagri Anumzamo'ma mono hunantegahazema hunte'nenia kumate ana ne'zana kreta neneta musena huntegahaze. <sup>12</sup> Hagi ko'ma Isipima kazokazo eri'za vahe'ma mani'naza zanku tamagesa nentahita ama' trakeramina kegava huta avariri so'e hiho.

### *Seli mono nomofo musenkase hunte'zamofo naneke*

<sup>13</sup> Hagi seli nompima manita e'naza zamofo antahimita musenkasema hanazana, mika'a hozafi ne'zama hamare vaganereta, krepima eritru huta regatati huvagaresuta, 7ni'a knafi ne'zana kreta neneta musena hugahaze. <sup>14</sup> Maka ne' mofavretamine mofanetamine, ve kazokazo eri'za vahe'time, a' kazokazo eri'za vahe'tamine, Livae naga'ene, ruregati'ma tamagrane emaniza vahe'ene, megusa mofavreramine, kento a'nemo'zanena ne'zana neneta, musena hugahaze. <sup>15</sup> Hagi Agrama hunte'n'nia kumate 7ni'a knafi ne'zana kretma neneta, Ra Anumzana tamagri Anumzamofona monora huntegahaze. Na'ankure Ra Anumzana tamagri Anumzamo'a hozatamine, maka'zama hanazana asomu huntesigeno knare hanigeta, makamota muse hugahaze.

<sup>16</sup> Mika kafufina 3'a zupa Ra Anumzana tamagri Anumzamo'ma mono hunantegahaze huno'ma huhamprinte'nia kumate mika Israeli vene'nemo'za ome atru hu'za monora hunteho. Ana 3'a zupama atruma hanaza atru-mofo zamagi'a zisti onte bretima neno musema hu knagi, magora ne'zama hamareno musema hu knagi, seli nompima manitma e'naza zamofo antahimita musenkasema hanazana knae. Hagi ana knafina, Ra Anumzamofona avurera mago'mo'e huno aza avapakora omeno. <sup>17</sup> Mago mago vahe'mo'a Ra Anumzamo'ma asomu'ma hute'nenifintira, agrama amiga hania avamente, musezana erino Ra Anumzana tamagri Anumzamofona eme amigahie.

### *Keagama refko hu kva vahe'ma azerioti zamofo naneke*

<sup>18</sup> Ra Anumzana tamagri Anumzamo tamisia mopafima umanisuta, mika rankumatera mago mago naga nofimo'a nanekema refko'ma hu kva vahe'ene ugagota kva vahetima zamazeri otitere hinke'za mani'ne'za, fatgo hu'za mago avamenteke'za vahe'mofo keaga refko hiho. <sup>19</sup> Hagi keagama refko'ma hanuta, fatgo huta tarega kaziga refko hiho. Mago'mo'ma agritega antenka keaga refko huogu'ma masavema huno mago'a zama eme kami'niana, ana zana e'orio. Na'ankure mago'azama hunte'nogu'ma masavema huno ami'zamo'a, knare antahi'zana eritrenkeno haviza huno keaga refko hugahie. <sup>20</sup> Maka knafima fatgo huta keagama refkoma hanuta, Ra Anumzana tamagri Anumzamo'ma tami'nia mopa erisantihareta mani-gahaze.

<sup>21</sup> Hagi Ra Anumzana tamagri Anumzamofono kresramna vu itamofo asoprega, Asera havi anumzamofo amema'a antre'za tro hunte zafa retru reonteho. <sup>22</sup> Hagi mono hunte'zane huta havea retru oreho. Na'ankure Ra Anumzana tamagri Anumzamo'a e'i anahu zankura tusiza huno agoteno avesra nehia Anumza mani'ne.

## 17

<sup>1</sup> Hagi Ra Anumzana tamagri Anumzamofontegama kresramna vunte-sazana, kri e'ori afuhe afaha osu'nesia bulimakaono, sipisipio, aheta kresramna vuonteho. Na'ankure kri erino afuhe afuhem'a hu bulimakaono, sipisipima kresramnama vuntezankura Agrira agoteno avesra nehie.

<sup>2</sup> Hagi Ra Anumzana tamagri Anumzamo'ma tamisia rankumapima amu'nontamifinti mago vemo'o, a'mo'ma kefo avu'ava'ma huno, Ra Anumzamo'enema huhagerafi huvempa kema runetagreno, <sup>3</sup> mono huonterehoma hu'nue'hua zante'ma vuno havi anumzantero, zagerero, ikantero, monafi hanafitamintero, mono ome huntenera kema, <sup>4</sup> mago'a vahe'mo'ma eme kasami'nigenika, hakenka antahigeso'e hutenga, tamage ana kasri avu'ava'ma Israeli vahe amu'nompima hu'nennenka, <sup>5</sup> ana a'ro veo avreta kumamofo kafante havenknou ome zamahe frinkeno frino. <sup>6</sup> Hagi havi avu'ava'ma nehanigeno tare tagufa vahe'mo'zama kete'zama huama'ma huntesagetage, ahe friho. Hagi magoke vahe'mo'ma keteno huama'ma hania zantera vahera zamahe ofrigahaze. <sup>7</sup> Hagi kefo avu'ava'ma nehanigeno ke'nesimo, ese havenknona ana vahetera atretenkeno, anante miko vahe'mo'za havenknona atre'za ahefrigahaze. E'ina hanuta kefo zana amu'nontmifintira eri atregahaze.

<sup>8</sup> Hagi mago'a ranra knazamofo nanekeo, vahe'ma ahe fri'zamofo nanekeo, vahe'mofo zama eri savri hu'zamofo nanekeo, ha'ma huno keonke'zama eri havizama hu'nesia zante refko huno antahi kemo'ma amuhoma hanigeta, erita ana knazana Ra Anumzana tamagri Anumzamo'ma huhamprinte'nenia kumate viho. <sup>9</sup> Hagi Livae naga'ma pristi eri'zama e'neriza vahetero, kema refko'ma hu kva vahete ana knazana omeriamma hinkeno, zamagra naneketmia refko hu'za eri fatgo huramanteho. <sup>10</sup> Ra Anumzamo'ma hunte'nenia kumate ana nanekema refko hute'za, hazenkemofo avamente e'ina huo huno'ma asami'nia nanekeea avariri fatgo hiho. <sup>11</sup> Nanekema refko hute'za, ana hazenkemofo agofetu'ma na'anema hanaza nanekeea avariri fatgo hiho. Hagi kva vahe'mo'zama hanaza nanekeea ame'a aseta rukamarege, mago'a kea eritregera tamagra tamavesitera osiho. <sup>12</sup> Hagi mago'mo'ma avufga ra nehuno, Ra Anumzana tamagri Anumzamofo avugama mani'ne'nia pristi vahe'mo'o, kva vahe'mo'ma hania kema ontahi'nia vahera ahe frinkeno frino. E'inama hanuta kefo zana amu'nontmifintira eri atregahaze. <sup>13</sup> Hagi e'inama hanageno'a mika vahe'mo'za nentahi'za koro nehu'za, mago'enena ana avu'avara osugahaze.

### *Kini vahe'mokizmi naneke*

<sup>14</sup> Hagi Ra Anumzana tamagri Anumzamo'ma neramia mopama omerisantihareta umanisuta amanage hugahaze, mago'a kuma'ma manigagi'naza kuma'mozama hazaza huta kini azeri oti'nune huta hugahaze. <sup>15</sup> E'inagema hanutma Ra Anumzana tamagri Anumzamo'ma kini manigahie huno'ma hania ne'kinia azeri otiho. Tamagra vahepintike kinia azeri otigahaze. Hagi ruregati vahe'ma tamagranema enemanisia vahera kinia azeri oraotigahaze. <sup>16</sup> Hagi ana kini ne'mo'a rama'a hosi afutamina ontege, vahera huzmantenko hosi afukura hakre'za Isipia oviho. Na'ankure Ra Anumzamo'a huno, e'i kantega ru'enena rukrahe hutma oviho huno hu'ne. <sup>17</sup> Hagi rama'a a'nea ana kini ne'mo'a onteno, ru agu'a azeri rukrahe hinkeno Ra Anumzamofo amefi humigahie. Hagi rama'a silvane golinena onteno. <sup>18</sup> Ana kini ne'mo'ma kini trate'ma umanisuno'a, Livae nagate vuno negesageno, ama avontafeppinti kasegea erino agr'a'a avontafeppina krenteno. <sup>19</sup> Ana huteno ana avontafera erino ome ante'neno maka kna hampri vava nehuno, Ra Anumzana Anumzama'amofoma koro'ma hunte'zana rempi nehuno, kasege'ane tra ke'anena nevaririno, <sup>20</sup> avufga ra huno afuhe'ina kefenkamia oteno,

kasegemofona ha'ontagino, kasegemo'ma hu'nea kante mani fatgo hugahie. E'ina hanuno'a za'zate kini tratera manino nevina, agripinti'ma fore hu anante anante'ma hu'za vanaza vahe'mo'za ana kini tratera mani'za vugahaze.

## 18

### *Livae naga'ma ne'zama zamisaza zamofo naneke*

<sup>1</sup> Hagi maka Israeli ma mopama erisantimaharesafintira Livae pristi naga'mo'za mago mopa erisanti oharegahaze. Hagi tamagrama Ra Anumzamofonte'ma ofama eritama esaza ne'za nene'za manigahaze. <sup>2</sup> Hagi zamafuhe'zama mopama eri santima haresafintira zamagra mopa e'origahaze. Na'ankure Ra Anumzamo'ma huhampri zmante'nea kante zamagra Agri pristi eri'za vahe mani'nenageno, Agra'a kegava huzamantegahie. <sup>3</sup> Hagi amanahu hutma pristi vahera ne'zana zamigahaze. Bulimakao afuro, sipisipi afu'ma ahetma kresramna vanuta, azona'an, tarega ameragema'an agupa'anena pristi vahe zamigahaze. <sup>4</sup> Hagi ese'ma hamaresaza witio, wainio, olivi masaveno, ese'ma haresaza sipisipi azokara pristi vahe erita eme zamigahaze. <sup>5</sup> Na'ankure Ra Anumzana tamagri Anumzamo'a tamagripintira Livae naga'nofi'mofo huhampri zmante'neanki'za, maka knafina oti'za Agri eri'zana eri vava hu'za vugahaze. <sup>6</sup> Hagi Israeli agu'afima ina kumapima Livae ne'mo'ma mani'nesia kuma'ma atreno agra avesite'ma Ra Anumzamo'ma mono hunanteho huno'ma hu'nenia kumatera amne umani'neno, <sup>7</sup> ruga'a Livae afuhe'zama nehazaza huno Ra Anumzana Anumzama'amofo avuga Agri eri'zana erigahie. <sup>8</sup> Hagi nefä fenozama zagore'ma atreno erinia zagoa eri'ne'nianagi, ofama hanaza ne'zana ruga'a pristi vahe'enena mago avamente refko huno erigahie.

### *Havi anumzante mono'ma huontesaza zamofo naneke*

<sup>9</sup> Ra Anumzana tamagri Anumzamo'ma neramamia mopafima vanutma, ana mopafi vahetmimo'zama kasrino hi'mnama vu'nea avu'ava zama nehaza avu'avara ovariraho. <sup>10</sup> Hagi amu'nontmifintira magomo'e huno ne'afi, mofa'a aheno ofagna huno kresramna ovino. Havi kasnampa kema hu'zampi, avu'ataga zampi, zagoma re'zampi, fri vahe'ene keagama hu'zane, <sup>11</sup> mago'a zampima hvuzino kaguvaza fore hugahiema huno'ma hu'zampi, fri vahe hankro'enema keaga hu'zampi, havi avamu'eneno, ko vahe'enena keaga osutfa hiho. <sup>12</sup> Iza'o ana avu'ava'zama hanimo'a Ra Anumzamofontera kasrino hi'mnage avu'ava hugahie. Na'ankure e'ina hi'mnage avu'ava zanku, Ra Anumzana tamagri Anumzamo'a ana mopafi vahera zamahenati atregahie. <sup>13</sup> Hianagi Ra Anumzana tamagri Anumzamofo avurera e'inahu avu'ava'zana osuta, agru huta maniho.

### *Kasnampa vahe'mofo naneke*

<sup>14</sup> Na'ankure anama omeri'naza mopafima mani'naza vahe'mo'za, zamagra havi avamu'ene nanekea nehu'za, havi kasnampa vahe'mokizmi ke nentahiza vahe mani'naze. Hianagi Ra Anumzana tamagri Anumzamo'a e'inahura osiho hu'ne.

<sup>15</sup> Hagi Ra Anumzana tamagri Anumzamo'a tamagri amu'nompinti mago nagri kna kasnampa ne'azeri otigahianki, ke'a antahaho. (Aposolo 3:22, 7:37) <sup>16</sup> Na'ankure Sinai agonamofo agafima ome atruma haza zupa Ra Anumzana tamagri Anumzamofonkura amanage hu'naze, tagra fri'nunki kagerura ru'enena nontahita, mago'anena teve anefaka'a onke'nune huta

hu'naze. <sup>17</sup> Anante Ra Anumzamo'a amanage huno nasami'ne, zama-gra tamage nehaze. <sup>18</sup> Hagi zamagripinti mago kagri kna kasnampa ne, Nagra azeri oti'na naneke'n'i'a huo hu'nama hanua nanekege huama huno tamasamigahie. <sup>19</sup> Ana'ma asami'nua nanekema nehinama mago vahe'mo'ma ke'ama ontahina, Nagra e'i ana vahera kegahue. <sup>20</sup> Hianagi iza'o Nagri nagifi havige kasanampa vahe fore huge, havi anumzantmimofo agifi kasnampa vahe'ma fore'ma hania vahera zamahe friho. <sup>21</sup> Hagi antahintahii tmifima tamagra anage hutma antahigahaze, inankna huta, e'i Anumzamofo kasnampa vaheki, havige kasanampa vaheki huta antahigahune? <sup>22</sup> Mago kasnampa ne'mo'ma mago'za fore hugahie huno hinkeno, ana zama fore'ma osina, e'i nanekea Anumzamo'a osu'neanki kasnampa ne'mo'a agra agesafinti kea hugahianki, korora osho.

## 19

### *Hazenkema hanaza ma fre'za zamagu'ma vazi'naza kumamofo naneke*

<sup>1</sup> Ra Anumzana tamagri Anumzamo'ma tami'nia mopafi vahe'ma zama-hehana hanigetma kuma'zmifine nozmifinema umani'nuta, <sup>2</sup> hazenkema hanaza vahe'mo'zama zamagu'ma vazisaza kumara tagufa kuma huhamprintenkeno meno. <sup>3</sup> Ra Anumzana tamagri Anumzamo'ma tami'nia mopa tagufa'afi rehantagitma, agu'vazi kumara ana mopafina mago kuma tro huntetere nehuta, kana anantera varita viho. E'i ana hu'enkeno, mago vahe'mo'ma mago'azama hanifima ahefrigahue huno'ma ontahi'neno hantga huno vahe'ma ahefrisia vahe'mo'a, ana kumapi freno vuno ome frakigahie. <sup>4</sup> Hagi mago vahe'mo'ma mago'azama hanifima ahefrigahue huno'ma ontahi'neno hantga huno vahe'ma ahefrisia vahe'mo'a, freno vuno agu'mavazisia kumapi ufregahie. <sup>5</sup> Hagi vahe'mo'ma zafafi zafa ome antagisirega sau'me rugatitre'nigeno mago tavaoma'are maninesimofo ahe frisigeno'a, agra freno ana kumatmimpi ufreno agura vazigahie. <sup>6</sup> Hagi agu'vazi kuma'ma afetema me'nena, ana vahe'ma hantga huno ahefrisia ne'mo'a, karanka zahufa nevinke'za hazenkea osu'nesianagi frisia ne'mofo naga'amo'za ome azeri'za ahegahaze. Ana nera hazenke'a omne'ne. Na'ankure ahenakure huno ahefria nera ohe'neanki, ru eri'za erirega ruhantga huno ahefri'ne. <sup>7</sup> E'ina hu'negu agu'vazi kumara tagufafi retro huntaho hu'na huramantoe. <sup>8</sup> Hagi tamagehe'ima huvempa huno huhampri zamante'nea kante'ma Ra Anumzana tamagri Anumzamo'ma tami'nia mopama erirama hina, <sup>9</sup> tagufa agu'vazi kuma'ma me'nerera mago'ene tagufa agu'vazi kuma tro hugahaze. Na'ankure nagrama tamasamua kasegea amage anteta neveririta, Ra Anumzana tamagri Anumzamofo avesinenteta, Agri avu'ava'ma avariri'nazagu anara hugahie. <sup>10</sup> E'ina hanageno Ra Anumzana tamagri Anumzamo'ma tami'nia mopafina hazenke'a omne vahera amane zampina ohe'nageno, agri korankumi'mo'a maka vahe'motarera omegosie. <sup>11</sup> Hianagi mago'mo tava'oma'are'ma nemanisimofoma antahi haviza hunenteno, kafonteno mani'neno ahefriteno freno ama ana kumapima ufresigeno'a, <sup>12</sup> ana hazenke ne'mofo kumapinti kva vahe'mo'za vahe huzmanfesage'za vu'za ome avre'za esage'za, anama ahe fri'nea vahe'mofo vahe'mo'za ana nera ahefrigahaze. <sup>13</sup> E'i ana hazenke nera tamasunkura hunteta atrenkeno amanea omanino. Hanki ahe frinkeno Israeli mopafina hazenkea omnena, vahe'ma ahefri vahera omani'nageta knare hutma manigahaze.

### *Fatgo huno'ma refko hu'zamofo naneke*

<sup>14</sup> Ra Anumzana tamagri Anumzamo'ma tamisia mopafima umanisutma, tamagehe'mozama kri'nesaza kanagi kana eri havia huta tava'ontmire'ma nemanisamokizmi mopa e'oriho.

<sup>15</sup> Hagi mago'mo'ma hazenke hu'enkeno magoke vahe'mo'ma ke'neno, huama hanirera knazana amiho. Hagi hazenke vahe'ma knama amisazana, tare tagufa vahe'mo'zama ke'ne'za huama'ma huntesageta, knazana amiho.

<sup>16</sup> Hagi mago'mo'ma, magomofoma azeri haviza hunaku'ma, havige huno kasege ru hantgi'ne huno huntesiana, <sup>17</sup> ana knare'ma pristi eri'zama eri'naza vahete'ene, keagama refko hu kva vahete Ra Anumzamofo avuga ana taregamoke vugaha'e. <sup>18</sup> Hagi kva vahe'mo'za nanekeznima refko hu'za kesageno, havigema ana ne'ma hunentena, <sup>19</sup> nefuma havigema huntesigeno aminaku'ma hanaza knazana, agri amiho. E'ina'ma hanutma kefo avu'ava zana amu'notmifintira eritregahaze. <sup>20</sup> E'inahu hinkeno mago'amo'za antahi'za koro nehu'za, anahukna havi avu'ava zana amu'nontamifina osugahaze. <sup>21</sup> Hanki tamagra tamasunkura huozmantegahaze. Vahe'ma ahe frisia vahera, ahe nefritma, avuma rupro'ma hania vahera, agri'enena avu rupro nehuta, ave'ma rutafrisia vahera, agri'enena avera runetafrita, azama rukafrisiana agri'enena aza runekafrita, agiamra ru kafrisiana, agri'enena agia rukafriho.

## 20

### *Hate'ma vanaza kasegemofo naneke*

<sup>1</sup> Hagi ha' vahetaminema ha'ma hunaku'ma vanuta, hosi afuzmine, karisizmine, rama'a ha' vahetamima mani'nesageta kesuta, korora osiho. Na'ankure Ra Anumzana tamagri Anumzamo'ma Isipiti'ma tamavre atiramino tamavreno'ma e'nea Anumzamo'a tamagrane mani'ne. <sup>2</sup> Hagi ha'ma hunaku'ma urava'oma hanageno'a, pristi vahe'mo eramavugateno amanage huno tamasamino, <sup>3</sup> Israeli vahetamimota antahiho, ha' vahetamine ha'hunaku erava'o hazanki atrenkeno tamasumnamo'a fakro fakroa osina, tamahirahikura huta ha' vahetamigura korora osiho. <sup>4</sup> Na'ankure Ra Anumzana tamagri Anumzamo'a tamagrane nevuno, tamagri kaziga anteno ha' vahetmia hara huzmantesigeta hara huzmagateregahaze. <sup>5</sup> Hagi sondia vahete (ofisa) kva vahe'mo'za sondia vahera amanage hu'za zamasamigahaze, kasefa nomina kinte'neta ana nomina nunamuma huta Anumzamofo azampima onte'nesuta, ete nontega viho. Na'ankure ha' kampima tamahena frisageno'a, tusi'a amuho huta kinte'nesaza nona, ru vahe'mo'za ana nompina manigahaze.

<sup>6</sup> Hagi kasefa waini hoza kri'neta, ana hozafinti tagita one'nesamota, ete kumatega viho. Ha'ma hanafima tamahesageno ru vahe'mo'zama ana waini hozatamifinti'ma tagi'za nesageno'a, knarera osugahie. <sup>7</sup> Hagi izano a' erigahane hu'za huhampri' tamante'nesimota ete kumatega vuta umani'neta ana ara eriho. Ru ha'pima tamahesageno ru vahe'mo'za ana a'ma erisageno'a, haviza hugahie. <sup>8</sup> Hagi mago'ane sondia vahe'mofo kva vahe'mo'za amanage hihio, koro'ma hanankeno kasumnamo'ma fakro fakromta hanimoka, mago'a tagri sondia vahetimofo zamazeri koro hugahazanki, ete kumatega viho. <sup>9</sup> Hagi vugota sondia kva vahe'mo'za nanekema huvaretenu'za, sondia vahera kevure kevure refko hunezmante'za kva vahe zamazeri oti'nage'za, mago mago kevurera kegava hugahaze. <sup>10</sup> Hagi mago kumate'ma ha'ma hunaku'ma vurava'o hanuta,

ese'zana tamarimpa fruge huta hara huormantesunanki amne kumatmia tamigahazo huta zamantahigeho. <sup>11</sup> Hagi zamagrama ana kema antahi'za mago zamarimpa hu'za kuma kafazmima anagisageta ufresuta, ana kumapi vahera maka'mokizmugura hinke'za kazokazo eri'za vahe mani vagareho. <sup>12</sup> Hianagi ana kumapi vahe'mo'zama i'o nehu'za ha'ma huramantena, ana kumapi vahera ha' humzmanteho. <sup>13</sup> Hagi ana'ma hanageno'ma Ra Anumzana tamagri Anumzamo'ma ana kuma'ma tamazampima antena, maka venene'age bainati kazinteti zamahe frivagareho. <sup>14</sup> Hianagi maka a'nene, mofavreramine, zagagafane, maka zantamina ana kumapinti'ma erisaza zantamina tamagri su'ane. Hagi Ra Anumzana tamagri Anumzamo tamigahankita, e'nerita musena hugahaze. <sup>15</sup> Hianagi tamagri kuma'mofo afete'ma me'enenia kumatmi anara hiho. Hanki anama ufre'naza mopafi kumatmina anara osiho. <sup>16</sup> Hianagi Ra Anumzana tamagri Anumzamo'ma tamami'nia mopafima me'nea kumatamimpima vahe'ene zagagafane zmasimu'ma eri'za nemanisaza zagaramina, magore hutma ozmatreta zamahehna hiho. <sup>17</sup> Hagi Ra Anumzana tamagri Anumzamo'ma hu'nea kante anteta, mika Hiti vahe'ma, Amori vahe'ma, Kenani vahe'ma, Perisi vahe'ma, Hivi vahe'ma, Jebusi vahera zamahe hana hiho. <sup>18</sup> E'ina hinke'za kasrino havizama hu'nea avu'ava'ma hu'za havi anumza zmimofoma mono hunentaza zamavu'zmavara rempia huoraminketa, Ra Anumzana tamagri Anumzamofo avurera kumira osugahaze. <sup>19</sup> Mago kuma'ma za'zate'ma avazagi kagita ha'ma humzantesuta, nezafa ragama renentea zafaramina raga'a negahazanki amne zampina sa'umenura antagi otreho. Na'ankure zafaramina e'itamagri ha' vahera omani'naze! <sup>20</sup> Hagi zafama antagisazana raga'ama one' zafage antagita hagina tro nehutma, hara hutma ana kumara erigahaze.

## 21

### *Vahe'ma ahe fri zamofo kumi'ma eri agruma hu'zamofo naneke*

<sup>1</sup> Hagi Ra Anumzana tamagri Anumzamo'ma tamami'nia mopafima umani'enageno mago vahe'ma ahetre'nesageta haketa erifore hugahazanagi, anama ahe'nesia vahe'ma onkesageno'a, <sup>2</sup> ranra vahe'mo'zane kva vahe'mo'za e'za, e'ina kuma tava'onte ana vahera ahe fri'ne hu'za rezagane'za keho. <sup>3</sup> Hagi rezagane'za kesageno, ina kuma'mo ana vahe'ma ahefrinea tavaontera me'nne, ana kumate kva vahe'mo'za eri'zama e'ori'nesia a' bulimakao afu ome avre'za, <sup>4</sup> tima enevanigeno, hozama eri'za onte'nesaza agupofi vu'za, ana bulimakao afura anankena omeri vamagi'za ahegahaze. <sup>5</sup> Anama hanageno'a pristi vahe Livae ne' mofavre naga'mo'za e'za mago'a kea eme hanageno, vahe'ma ahe'nea knazamo'a vagaregahie. Na'ankure Ra Anumzana tamagri Anumzamo eri'zani'a eneri'za Nagri nagifi vahera asomu kea huzmantegahaze huno huhampri zamante'ne. <sup>6</sup> Hagi ana kumate kva vahe'mo'za anankema eri vamagi'za ahe'naza bulimakao afu'mofo agofetu zmazana sese nehu'za, <sup>7</sup> tagri tazamo'a amama fri'nea vahe'mofo korana erifegira otege, aheno korama'ama erifegi'mate'nea vahera tavumo'a onke'ne hugahaze. <sup>8</sup> Hagi Ra Anumzamoka vaheka'a Israeli vahe'ma zamagu'mavazinka ete zamavare'nana vahera kumi'zmia atrezmanto. Hanki hazenke'a omne vahe'ma ahe fri'nea vahe'mofo kora kumira eri zamagofetu onto. E'i anagema hanageno'a, vahe'ma ahe fri'nea knazana tamagripintira Anumzamo'a eritregahie. <sup>9</sup> Hagi ama ana nanekema antahita

avaririsuta fatgo avu'ava Ra Anumzamofo avufina nehanageno, vahe'ma ahe fri knazana tamagripina omnegahie.

### *Hapinti a'nema Israeli vahe'mo'za eri'saza zamofo naneke*

<sup>10</sup> Hagi hate'ma vanageno Ra Anumzana tamagri Anumzamo'ma ha' va-hetmima tamazampima zamavarentena, kina vahe zamavareho. <sup>11</sup> Hagi anama kina vahe'ma zamavarema e'nafima, mago knare a'ma kesageno tamanunuma hina, a'ma erinaku'ma hanutma, <sup>12</sup> avreta nontamirega vinkeno, aseni azokara neharen, azankoa neharen, <sup>13</sup> antani'negeta ki-nama hunteta avreta e'naza kukena hatenetreno, mago ikamofo agu'afi nefane nerera kizinigura zavira neteno asunkura hugahie. Anama hinkeno mago ikama evina, ana ara a' eri'nankeno kagri a' manigahie. <sup>14</sup> Hanki henkama, ana aku'ma kavesra hinkenka, huntegeno amne inantegama avesi'nirega vino. Hianagi zagorera ana ara otrege, kazokazo eri'za a'nema hunentanankna avu'avara huonto. Na'ankure kagra ko antenka mase'nane.

### *Agonesa ne' mofavre'mofo naneke*

<sup>15</sup> Hagi mago' ne'mo'ma tare a'ma ante'neno, mago'mofonku avesi nente, mago'mofoma avesi nontesigeno, ana taregamokema ne' mofavrema antesa'ana, avesi nontesimo'ma agonesa ne' mofavre'ma antenkeno'a, <sup>16</sup> fenoma'ama refko'ma hania knarer, henka a'ma avesimanentea a'mofo agonesa mofavremofona, kota a'mofo agonesa mofavre'mo'ma eriga fenona e'origahie. <sup>17</sup> Hianagi ave'masinonte a'mofo agonesa ne' mofavrea maka fenoma'afintira ante agofetu huno tare vahe'mo'ma eriga avamente amino. Na'ankure agonesa mofavregino, e'inahu avamente nefu fenona eriga hu'ne.

### *Keontahi mofavremofo naneke*

<sup>18</sup> Hagi mago ne'mo'ma ke ontahi hazenke ne' mofavrema ante'enkeno, nerera nefu kema nontahisigeno, kanoma amino azeri fatgoma nehanigeno kema ontahisiana, <sup>19</sup> nerera'ene nefu'enena ana ne' mofavrea avreke kumamofo kafante'ma ranra vahetmima mani'nare vuke, <sup>20</sup> amanage huke ana kva vahera zamasamigaha'e, ama mofavretimofona asenimo'a han-kavetigeno ha'reneranteno keti'a nontahino ne'zana nehana nehuno, aka tinte nehie. <sup>21</sup> Anagema hanakeno'a ana mofavrea maka ana kumapima nemaniza venenemo'za have knonu ahe frighaze. E'inama hanuta kefu avu'ava zana amu'notmifintira eritresageno, e'i ana zamofo kema maka Israeli vahe'mo'za nentahisu'za, korora hu'za ana zmatu'zamavara osiho.

### *Hazenke vahe'mofo fri kerfa'a asentezamofo naneke*

<sup>22</sup> Hagi mago vahe'mo'ma hania hazenkemo'ma ahefrigahie hu'ne'ni'a avamente'ma vu'enigetma, ana vahera ahe friteta, avufga'a zafare hantiho. <sup>23</sup> Hagi anama aheta hanti'nageno'a avufga'amo'a me'enkeno hani huno kora otino. Hianagi ana avufga'a ko erita anama ahetama hanti'naza knafinke asenteho. Na'ankure Ra Anumzamo'a havi avu'avazamigu kazusi huzmante'nea vahe zafarera zamahe'za nehantize. Ana hu'negu Ra Anumzana tamagri Anumzamo'ma eri santihareho huno'ma tamamisia mopa eri pehana osiho.

## 22

<sup>1</sup> Negafu bulimakao afuro, sipisipi afuro, meme afu'mo'ma hazamagreno meg'i'ma vano nehinama kesunka, kegenka otrenka avrenka negafuna ome

amio. <sup>2</sup> Hagi ana afu'mofo nef'a'ma tava'onka'are'ma omanige, ete ana afu'mofo nefama kenka antahinka osu'nesunka ana afura avrenka, keginaka'afi ome ante'negeno iza'o afu venafo'ma eno'ma eme hakesigenka avremio. <sup>3</sup> Hagi tava'onka'are'ma nemanisimofo donki afuro, kukena'o, inankna zama'ama fanane hu'nenama kesunka kegenka otrenka, ana zanke huo. <sup>4</sup> Hanki tava'onka'are'ma nemanisimofo donki afu'mo'o, bulimakao afu'mo'ma traka huno mase'nena kesunka, kegenka otrenka aza hunka ana afura azeri otio.

<sup>5</sup> A'nemo'a venenemofo kukena osinkeno, venenemo'a a'nemofo kukena osino. Na'ankure iza'o e'inahu avu'ava'ma hania vahe'mo'a Ra Anumzana tamagri Anumzamofo avufina kasrino havizantfa hu'nea avu'ava hugahie.

<sup>6</sup> Hagi namamo'ma zafarero, mopafino nomagino amu'arero, anenta'are'ma anukino mase'nesigenka, nererane anenta'anena aze'orio.

<sup>7</sup> Hagi amne anenta'aramina azerigahazanagi, arerana atrenkeno freno. E'ina'ma hanageno'a Ra Anumzamo'a asomu hurmantena za'zate manitma vugahaze. <sup>8</sup> Hagi kasefa noma kisuta ana nomofo agofetura, vahe'ma mani'afina kegina hugagihio. Hagi keginama hugagi'nesageno mago vahe'mo'ma takaireno'ma fri'niana, ana knazamo'a tamagrriteria omegahie.

<sup>9</sup> Wainima kri'nesana kankamumpina ru avimzana ohankro. Hagi ana huta wainima kri'ne'naza kankamumpima ru avimzama hankresuta, ana avimzama hankresaza avimzamofo raga'ane, waini zafa raganena hamareta onegahaze. <sup>10</sup> Bulimakao afu'ene donki afu'enena magoke karenamare zafarera reznantenegeke hoza reko'ori'o. <sup>11</sup> Hagi sipisipi azokateti'ene, efeke tavravereti eri havia huno tro'ma hu'ne'nia kukena ontaniho. <sup>12</sup> Zamanunte'ma antazage'no'ma uneramia tavravema tro hanunka, 4'a agentera avasese'a tro huntaho.

### *Monko avu'ava zama hu zamofo naneke*

<sup>13</sup> Hagi mago ne'mo'ma a'ma erino anteno maseteno'ma ana a'ma avesionteno, <sup>14</sup> havige hugofinteno, ama a'mo'a vene mase'nea a' eri'noe huno'ma hi'na, <sup>15</sup> ana a'mofo nerera'ene nef'a'enena venema omase'nea nanekea ranra vahe'mokizmi zmavuga kuma'mofo kafante vu'ne ome eri'ama hi'o. <sup>16</sup> Ana nehuno ana a'mofo nef'a amanage hino, nagra mofa'ni'a ama ne'mo erisie hugeno eri'neanagi, menina avesinonteno avesra hunenteno, <sup>17</sup> vene mase'nea mofa ara eri'noe huno nehie. Hianagi agra havige ne-hianki, ama'na tamage zana me'ne huno nehuno, ranra vahe zamavuga ese zupama ana mofa'ene nevekema masike mase'na'a tvaravea eri rutare-gahie. <sup>18</sup> Anama hanigeno'a anante ranra vahe'mo'za ana nera azeri'za sefu amiho. <sup>19</sup> Anama hutenko'a ana a'mofo nefana 100'a silva zago amigahie. Na'ankure agra Israeli mofa'mofona havi agi eri ami'ne. Hagi ana ara otregahianki, a' erintegahie. <sup>20</sup> Hianagi tamagema huno ana mofa'mo'ma venema maseteno'ma emare'nenigeno'a, <sup>21</sup> ana ara avre'za nef a nonkahante vu'za ana kumapi venenemo'za have knonu ome ahe friho. Na'ankure Israeli vahepin a knare osu hazenke eri fore huno nerera nef a nompima mani'neno venena mase'ne. E'i ana hutma amu'notmifintira kefo avu'ava zana eri atregahaze.

<sup>22</sup> Hagi ru ne'mofo a'enema mago ne'mo'ma savri avu'ava'ma nehanige'za ke'za erifore hanazana, ana taregamokizni zanahe frisageke frigaha'e. Einahu avu'ava'ma hanuta Israeli vahe amu'nompintira kefo avu'avar a eritregahaze. <sup>23</sup> Hagi vene omase mofa'ma mago ne'mo a' erigahie huno

huhampri ante'nesia mofa'ma kuma'mofo agu'afima, ru ne'mo'ma azeri savri'ma huno monko'zama nehanakeno'ma zanageno eri fore'ma hina,<sup>24</sup> anantarega zanavreta kuma'mofo kafante vuta, have knonu ome zanahe friho. Na'ankure mofa'mo'a aze'manerigeno'a krafa osu'nne. Hagi vemo'a ru ne'mofo a'ene monko'zana hu'ne. E'ina'ma hanuta amu'nontmifintira kefo avu'ava zana eri atregahaze.<sup>25</sup> Hianagi vene omase'nesia mofa'ma mago ne'mo a' erigahie huno huhamprinte'nesia mofa'ma, ru ne'mo'ma kuma'mofo feg'i kazigazi huno azerino monkozama hunte'nenigeno keno eri fore'ma haniana, ana ne'mofonke'za ahe friho.<sup>26</sup> Hianagi ana mofara mago'zana huonteho, agra vahe'ma ahefriga hazenkea osu'nne. Na'ankure ama ana hazenkemo'a, mago ne'mo'ma tava'onte'ma nemanimofoma hafra huntenu ahe nefriankna hu'ne.<sup>27</sup> Na'ankure ana a'mo'a kumamofo megia agrake vahe omani'afi vano nehigeno, ana ne'mo'a keteno aze'nerigeno krafage hu'neanagi, azahu vhahera omani'neno vuno aza osu'nne.<sup>28</sup> Hagi vene omase mofa'ma mago vere'ma huhampri onte'nesia mofama, mago ne'mo'ma azerino monko'zama hunentesigeno keno eri fore'ma haniana,<sup>29</sup> ana ne'mo'a ana mofa'mofo nefana 50'a silva zago mizasenenteno, ana mofara a' erintegahie. Na'ankure agra ko anteno maseno azeri haviza hu'ne. Hagi manino vanifina ana ara otrefta hugahie.<sup>30</sup> Hagi mago ne'mo'a nefaa aza azeri savrira huno nefana agaze eri omino.

## 23

### *Atruma huno mono hu tra kemofo naneke*

<sup>1</sup> Hagi agonkna'za harige, agoza akafrige'ma hu'nesia ne'mo'a, Ra Anumzamofo vahe'ma atruma hu'ne'nafina omanigahie.<sup>2</sup> Hagi havi kankamunteti'ma fore'ma hu'ne'ni'a vahe'mo'a, Ra Anumzamofo vahe'ma atruma hanafina omanigahie. Hagi agripinti fore hu anante anante hu'za 10ni'a zupa fore hanaza vahe'mo'zanena Ra Anumzamofo vhahera omanigahaze.<sup>3</sup> Amori vahe'ene Moapu vahe'mo'zanena Ra Anumzamofo vahe'mo'zama atru'ma hanafina eofregosaze. Hagi zamagripinti fore hu anante anante hu'za 10'a zupa fore hanaza vahe'mo'zanena, Ra Anumzamofo vhahera omanigahaze.<sup>4</sup> Na'ankure Isipiti'ma neageno'a ne'zane tinena eme ontami'naze. Hagi zamagra Beori nemofo Balamu Mesopotamia kaziga Petori kumateti ne' tamagr'i'ma kazusi ke huno tamazeri haviza hinogura ke hu'naze.<sup>5</sup> Hianagi Ra Anumzana tamagri Anumzamo'a Balamunkea on-tahino, tamagr'i'ma kazusima huramantea zana eri rukrahe higeno, asomu efore hu'ne. Na'ankure Ra Anumzana tamagri Anumzamo'a tusiza huno avesi tamante'ne.<sup>6</sup> E'ina hu'negu manitama vanafina, Moapu vahe'ene Amori vahe'enena mago tamarimpa huta nomanita zamaza osinke'za, maka zampina knarerera osiho.<sup>7</sup> Hagi Idomu vhahera tamavresra huozamanteho. Na'ankure zamagra tamagri neramafuze. Hagi Isipi vhahera tamavresra huozamanteho. Na'ankure zamagri mopafi umani vhahera mani'neta hu'naze.<sup>8</sup> Hagi fore hu anante anante hu'za 3'a upama fore'ma hanaza vahe'mo'za, Ra Anumzamofo vahe'ma atruma hanafina amne efregahaze.

### *Sondia vahe'mo'ma hate'ma vu'neno kegava hania naneke*

<sup>9</sup> Hate'ma vuta seli nomi kita mani'nesuta, maka tamazeri pe-hanama hu'zankura kegava hiho.<sup>10</sup> Hagi kenage'ma mago ne'mo'ma

mase'neno'ma ava'nama negeno avufgarima tagi atreno agra'ama azeri perhanama hanuno'a, seli nonkumapintira atreno fegi'a mago zagegna umanigahie. <sup>11</sup> Hagi eofre meg'i'a mani'enigeno, zagea freno kinaga senkeno, tina freno agru huteno, seli nonkumapina egahie. <sup>12</sup> Hagi seli nonkuma'mofo fegi'a avirifa hu kumara tro hunte'neta, anampi avirifa ome hiho. <sup>13</sup> Hagi sondia vahe'mo'zama hate'ma vu'za fenozama erisafina, sipetine erine'za vano nehu'za, arifagu'ma zamavesina arifama resu'za keri kafi'za asenteho. <sup>14</sup> Na'ankure Ra Anumzana tamagri Anumzamo'a seli nonku'ma amu'hompi vano nehuno, kegava huneramanteno tamaza hanigetma ha vahe'tmia hara huzmagateregahaze. E'ina hu'negu mika zupa seli nonkuma'mo'a ruotge hina, Ra Anumzamo'a kumatmifina tamagazema hu'zana onkeno, tamefira huoramigahie.

### *Ruzahu ruzahu avu'ava'ma hazana kasegemofo naneke*

<sup>15</sup> Hagi ru vahe'mofo kazokazo eri'za vahe'mo'ma, agu'vaziogu'ma kagritegama freno enkenka, ana vahera ete avrenka nafa'ama hu'he'rimofona ome omio. <sup>16</sup> Hagi atreneno tamagrane ina kumate manisuema hanirera mani'nena, havi avu'avara huonteho.

<sup>17</sup> Israeli vahe'mota mono nompina monko avu'ava zana osiho. <sup>18</sup> Hagi a'mo'o vemo'o monko avu'avazanteti'ma eri'nia zagoa Ra Anumzana tamagri Anumzamofo mono nompina erino eno, amigahue huno huvempama hu'nenia zanterea ofa eme omigahie. Na'ankure e'inahu avu'ava zamo'a Ra Anumzana tamagri Anumzamofo avurera kasrino hi'mna vu'ne.

<sup>19</sup> Hagi zagofi ne'zampi, mago'a zama negafu'ma kagripinti'ma nofi'ma huno emeri'neno, ana nofi'ma hu'nea zama eme apasenaku'ma nehanigenka, anantera ante agofetu hunka namio osuo. <sup>20</sup> Ru mopafi vahe'mo'ma kagripinti'ma nofi'ma hu'nenigenka amne hanankeno, ante agofetu huno kamigahie. Hianagi Israeli vahepinti'ma mago negafu'ma nofi'ma hu'nenigetma, ante agofetu hunka eme apaso hunka huonto. E'ina'ma hanageno'a amama unefraza mopafina maka zama hanaza zana Ra Anumzana tamagri Anumzamo'a asomu' huramantegahie.

<sup>21</sup> Hagi Ra Anumzana tamagri Anumzamofonte'ma mago'a zanku'ma huvempama hu'ne'nutma, za'zatera avazu huta ovuta ame hutma anama huvempama hu'ne'naza zana hiho. Na'ankure Ra Anumzana tamagri Anumzamo'a ame hunka anazana huo huno antahigahiankino, ko'ma anazama osnutma kumi hugahaze. <sup>22</sup> Hianagi mago'za hugahue hunka Ra Anumzamofonte'ma huvempama osnunka, kumira osu knare hunka manigahane. <sup>23</sup> Hagi huvempama hu'nenana nanekea kva hu'eneka ana nanekea avaririo. Na'ankure kagra'a kavesite Ra Anumzana tamagri Anumzamofontera huvempa hu'nane.

<sup>24</sup> Hagi tava'onka'are'ma nemanisimofo waini hozafima vanunka, amne grepi raga taginka negamu hugahananagi, magore hunka kuka'afina tagi orio. <sup>25</sup> Hagi tava'onka'are'ma nemanisimofo witi hozafima vanunka, amne witia kazanutira eri akafrigahane. Hianagi magore hunka sekeli kazinura witia okafrigahane.

## 24

### *Aravema atane'zamofo naneke*

<sup>1</sup> Hagi mago ne'mo'ma mago a'ma eri'ne'nigeno, ana a'mo'ma agri'ma azeri musema osinkeno, ana a'mofoma havizama'ama neve'ma keno

erifore hanuno'a, aravema atane avonkreno ana ara azampi nenteno, nom'aafintira huntegahie. <sup>2</sup> Hagi ana a'mo'ma nom'a'a atreno vuno, ru vema omerinkeno, <sup>3</sup> ana vemo'ma avesima ontesuno'a, ete ese ve'amo'ma hu'neaza huno'ma, aravema atane avonkreno azampi nenteno nom'aafinti huntege, agrama frige'ma hinkeno'a, <sup>4</sup> ese ve'amo'a ana ara e'origahie. Na'ankure agra ru vene maseno agra'a azeri pehenage hu'neankino, ese ve'are'ma esiana, Ra Anumzamofo avurera kasrino haviza hu'nesia avu'ava nehuno, kumi avreno Ra Anumzana tamagri Anumzamo'ma tamami'nia mopafina eghie.

<sup>5</sup> Hagi menima zahufama a'ma eri'nesia nera, sondia manige, kamani eri'za kva omiho. Hanki atrenkeno menima eri'nea a'enena musena huno mago kafu kuma'are manino.

<sup>6</sup> Mago vahe'mo'ma tamagripinti'ma nofi'ma nehanigetma, eme nemalinka eri'nana avame'zane hunka witima refuzafu'mape havea e'oriho. Na'akure ne'zama retro'ma hu'za ne'zankura hakegahaze.

<sup>7</sup> Hagi mago'mo'ma Israeli vahe'ma musufaseno kazokazo eri'za vahekna huno kegava huge, zagore'ma avreno ome atrege'ma hania nera, ahenkeno frino. E'ina'ma hanutma amu'notmifintira kefo avu'ava zana eri atregahaze.

<sup>8</sup> Fugo krima erisutma kvahu so'e huneta, Pristi vahe'mo'zama tamasamisaza kea avariraho. Kema zamasami'noa kema tamasamisageta avaririso'e hiho. <sup>9</sup> Hagi Isipiti'ma neageno Ra Anumzana tamagri Anumzamo'ma Miriamuma hunte'nea zankura, tamagera okaniho.

<sup>10</sup> Hagi tava'onka'are'ma nemanisimo'ma mago'a zama nofi'ma hu'nena, kagra kavesitera anamofo nompina vunka anama nofi'ma hu'nea zante eme nenamino eri'nia avame zane hunka mago zana nom'aafintira ome e'orio.

<sup>11</sup> Hagi fegi'a mani'negeno, ana avame'zana agra'a eme camino. <sup>12</sup> Hagi tava'onka'are'ma nemanisimofoma amunte omne'nenama eme negami'na erisua avame'zane huno'ma nakre ku'ama erino eme kamina, ana nakre kura erinka ome ante'negeno hani huno kora otino. <sup>13</sup> Ana nakre ku'a zagea uofre'nena erinka eme amigeno, zasi'ma avesi'zankura kofino nemaseno, Anumzamofona antahigenkeno asomura huganteno. E'ina'ma hanunka Ra Anumzana tamagri Anumzamofo avurera fatgo kavukva hugahane.

<sup>14</sup> Hagi zamunte omne vahe'ma Israeli vahepintiro, emanı vahepinti'ma kema hananke'za zagore'ma eri'zanka'ama emeri negantesagenka, zamaz-eri havizana osuo. <sup>15</sup> Ana zupage zagea uofre'nena eri'zama erisaza mizazamia zamio. Na'ankure zamagra zamunte omne'neanki'za avega ante'za manigahaze. Hagi ame hunka ko'ma mizazmima ozamisanke'za, Ra Anumzamofontega krafa hanagenka, kagra kumi hugahane.

<sup>16</sup> Hagi mofavre'aramimofo kumitera arera afana zamahe ofriho. Hagi ana zanke hutma zamarera zamafa kumitera mofavreramina zamahe ofriho. Hagi iza'o kumi'ma hanimofo ahenkeno, agra'a kumitera frino.

<sup>17</sup> Hagi tamagranema ru mopafi vahe'ma emanı vahe'ene, megusa mofavrenena knare hutma kegava huzmanteho. Hagi kento a'mo'ma mago'a zama tamagripinti'ma nofi'ma hanigetma, anama nofi'ma hu'nere'ma eme neramino erisia avame'zane hutma kukena'a e'oriho. <sup>18</sup> Hianagi Isipima kazokazo eri'za vahe'ma mani'nazageno, Ra Anumzana tamagri Anumzamo'ma ana kazokazo eri'zampinti'ma tamavreno'ma atirami'nea zankura tamagera okaniho. E'ina hu'negu kasegema tamasamuana avariraho.

<sup>19</sup> Hagi hozatamifinti'ma witima nevasesutma evurami'nia witima tamagemakanita esunka, ete vuta ome zo'ogiho. E'imə evurami'nia witia, ru

vahe'ma tamagranema emani vahe'mofone, megusa mofavreramimofone, kento a'nemofo ne'za megahie. E'inama hanageno'a maka zama hanafina, Ra Anumzana tamagri Anumzamo'a asomu huramantegahie. <sup>20</sup> Hagi olive zafa ragama tagisutma, ete mago'enena vutma zafare'ma mesiam'a agura ome ohakeho. Hagi tagisageno zafare'ma mesia raga, ru mopafinti'ma enemania vahe'mofone, megusa mofavreramimofone, kento a'nemofo ne'za megahie. <sup>21</sup> Hagi krepi ragama waini hozaka'afinti'ma tagisunka, magoke zupa tagio. Hagi ete vunka mago'enena ome ontagio. Hagi tagitesankeno e'ima zafare'ma mesia raga, ru mopafinti'ma enemania vahe'mofone, megusa mofavreramimofone, kento a'nemofo ne'za megahie. <sup>22</sup> Hagi ko'ma Isipima kazokazo eri'za vahe'ma tamagrama mani'naza zankura tamagera okaniho. E'na hu'nagu ama ana nanekea amage anteho hu'na neramasmue.

## 25

<sup>1</sup> Hagi tare netremoke'ma mago zante'ma haframa hanukea, ana knazaznia keaga refkohu kva vahete erike ekeno, iza hazenkea higeno, iza hazenkea osu'ne, refko huno negeno, <sup>2</sup> hazenkema hu'nea ne'mo'ma sefu'ma eriga hazenkema hu'ne'na, keagama refkohu kva ne'mo'a ana nekura prihuo hanigeno, pri hu'ne'nigeno hazenke'amofo avamente sefura amigahaze. <sup>3</sup> Hianagi 40'a zupa sefura agatere'za omiho. Hagi rama'a sefu'ma amisankeno vahe'mo'za ana nera kefenkamitesageno agazegu hugahie.

<sup>4</sup> Hagi bulimakao afu'mo'ma witimofo anomaa'ama refuzafu'nepena, agitera nofira anaki onteho. (1 Korinti 9:9, 1 Timoti 5:18).

<sup>5</sup> Tare koganamoke magoke mopafi mani'nenakeno, mago'mo'ma ne'mofavrema onte'neno frisigeno'a, anama frisia ne'mofo a'mo'a vuno ru nagapina vea ome e'origahie. Hagi anama frisia ne'mofo nefu, ana kento ara erinte'neno, neve'ma huntega avu'avara huntegahie. <sup>6</sup> Hagi ana a'mo'ma ese ne'mofavrema ante'niana, anama fri'nea ne'mofo no erinkeno, agimo'a Israeli vahepintira fanane osugahie. <sup>7</sup> Hagi fri'nea ne'mofo nefu'ma ana kento aku'ma avesra hunteno e'origahue huno'ma hinkeno'a, ana kento a'mo'a ranra vahete ra kuma'mofo kafante vuno, amanage huno ome zamasmino, nenave nefu'a a'ma erinante'nige'na mofavrema ante'nugeno nefu agima erino mani'zankura avesra nehie. <sup>8</sup> Hagi anagema hanigeno'a kumapi ranra vahe'mo'za ana nera kehanageno esige'za, mago'ane antahigesageno'ma ana kento a'ma e'origahue huno'ma hanigeno'a, <sup>9</sup> ranra vahe'mo'za negesageno zamavufi ana kento a'mo'a, ana ne'mofo aganona agafintira ome nezafino, avufi avetura ahenenteno, nefu mofavrema erifore hu'zanku'ma i'o huno'ma hia ne'mofo amanara huntoe huno hugahie. <sup>10</sup> E'na hanigeno Israeli vahe'mo'za ana ne'mofo agima ahesazana, agafinti agano kazufetre'nea ne'mofo nagare hu'za hugahaze. <sup>11</sup> Hagi tare netre'mokema ha'ma nehanankeno, mago ne'mofo a'mo'ma neve aza huno ha'nehuno, nevema nehea ne'mofo agonknazama azeri promahina, <sup>12</sup> ana a'mofona kasunkura huontenka azana rukafri atro.

<sup>13</sup> Hagi mago'azama zagoreti'ma atesinaku'ma hanuta, vahera zamazeri savrira osuta, ana zamofo kna'a avamente fatgo huta mizaseho. <sup>14</sup> Hagi zagore'ma atre'nezama refko huno'ma ke tafena, nonka'afina osi tafene rantafenena ontegahane. <sup>15</sup> Hagi ana maka zamofo kna'ama fatgo huta refko hu so'ema nehuta, mago vahe'mofo zama eri savari'ma osanuta, Ra Anumzana tamagri Anumzamo'ma tamisnia mopafina za'zate manigahaze.

**16** Na'ankure zagore'ma atre'zamofoma fatgo huno refko osuno, vahe'ma azeri savri'ma hu'zamo'a, Ra Anumzana tamagri Anumzamofo avurera kasarino hi'mna vu'nea avu'ava hugahaze.

**17** Isipiti'ma atiramita neazageno karankama Ameleki vahe'mo'zama hu'naza avu'avakura tamagera okaniho. **18** Hagi kama neageno tusi tamesra kosrama nehazafina, Ameleki vahe'mo'za Anumzamofonkura korora osu, tamefi'ma zaferina omne amnema hu'za aza vahera, hara huzmante'za zamahe'naze. **19** E'ina hu'negu Ra Anumzana tamagri Anumzamo'ma tamaza hinketa tamisia mopafi vahe'ma zamahehana huta, ana mopama erisantiharesuta Ameleki vahera zamahe hana hinkeno, ama mopafina zamagimo'a fananehino. Hagi amama tamasmua kea tamagera okaniho.

## 26

### *Ese'ma ne'zama ofama hu'zamofo naneke*

**1** Hagi Ra Anumzana tamagri Anumzamo'ma erisanti haregahaze huno'ma hu'nea mopama neramia mopafima, ha'ma hutma omeri santiharetama umanisuta, **2** anama Ra Anumzamo'ma tam'i'nia mopafinti'ma ese'ma nenama hania ne'zana, mago ekaeka kupi eraritma, Rana tamagri Anumzamo'ma e'i kumate monora hunantegahazema huno'ma hu'ne'nia kumate erita vuta, **3** ana knare'ma eri'zama e'nerisia pristi vahe ome nemitma amanage hiho, menima nagra Ra Anumzamofo avugama huama'ma huana, tagehe'mofoma huvempama huzmante'nea kante anteno, Ra Anumzamo'ma ama mopafima navareno emenantea zankura tusi muse hu'noe hugahie. **4** Hagi anante pristi ne'mo'a, ana ekaeka kura tamazampintira erino, Ra Anumzana tamagri Anumzamofonte kresramna vu itamofo avuga antegahie. **5** Hagi anante oti'enka amanage hunka Ra Anumzana tamagri Anumzamofo avuga hugahane, nenageho'a Aramia nekino kanke kanke nere, osi'a naga'a zamavareno Isipi vu'za umani'ne'za, tusi'a vahekrerfa fore nehu'za, hanavenentake vahe fore hu'za mani'naze. **6** Isipi vahe'mo'za knare zamavu'zamavara huorante'nazanki, tazeri haviza nehu'za tutu hazageta kazokzo eri'za erizmant'e none. **7** Ana nehuta taza hinogura Ra Anumzana tagehe'i Anumzantega krafa hunkeno, Ra Anumzamo'a krafagetia nentahino, tata huzama nerami'za tazeri havizama nehaza zana keteno, **8** Ra Anumzamo'a hankavenentake azanteti, azana rusuteno ranra knazanteti'ene ruzahu ruzahu kaguvazane avamezanteti tavreno ne-eno, **9** tumerine amirimo'enema avi'mate'nea mopafina, Agra tavreno eno ana mopa emerami'ne. **10** Menina Ramoka nami'nana mopafintira ese ne'zana ama eri'na oe hunka nehunka, Rana tamagri Anumzamofo avuga ana ne'zana nentenka monora huntegahane. **11** Ana hutetma Rana tamagri Anumzamo'ma knare'zama huramante'nea zankura tamagrane nagatamine, Livae naga'e'ne, ruregati'ma amu'notamifima enemaniza naga'enena musena hugahaze.

**12** Hagi 10ni'a kevufinti mago kevuma refko'ma huno ami ofama hutma ne-esareti'ma, nampa 3 kafure'ma ana ofama erita esuta, kumatamifima Livae naga'e'ne, ruregati'ma enemaniza naga'enene, megusa mofavrерамине, kento a'nenena ana ne'zana zamisage'za nezamu hugahaze. **13** Ana hutetma amanage huta Rana tamagri Anumzamofona asamigahaze, Ra Anumzamoka keka'a naganera okani'na, Kagrama hu'nana kante ante'na ruotge'ma hu'nea ne'zana noniafintira hago eri'na Livae naga'enene, ruregati'ma enemaniza naga'enene, megusa mofavrерамине, kento

a'nenena ne'zana zamivagare'noe hutma hugahaze. <sup>14</sup> Nagra nasuzampima mani'ne'na magore hu'na amama ruotge'ma hu'nea ne'zana onege, pehenama hu'neana eriotre'noe. Ama ana ne'zampintira magore hu'nri fri vahetera ofa osu'noe. Ramoka nagri Anumzamokama hu'nana kemofo amage'a ante'na, kagrama huo hunkama hana kante ante'na mika'zana hu'noe. <sup>15</sup> Hagi ruotge hu'nea kumaka'a monafinkati, kefenkama atrenka amirine tumerimo'enema enevia mopama tagehe'mokizmima huvempa huzmantenka zamigahue hu'nana mopafina neragenka, Israeli vahekamota asomura huranto.

### *Ra Anumzamofo kasegema avariri zamofo naneke*

<sup>16</sup> Hagi menina Rana tamagri Anumzamo'a ama kasegene tra kea avaririhō huno hu'ne. E'ina hu'negu ama kasegene, tra kenena kegava huso'e hu'netma, maka tumotamireti'ene tamagu'aret'iene huta avaririhō. <sup>17</sup> Hagi tamagra menina huama hutma Rana tagri Anumzane nehuta, Agri avu'avara nevaririta maka kasege'ane trake'anena avaririgahune huta hu'naze. <sup>18</sup> Hagi anagema hazageno'a, Ramo'a huvempama hu'nea kante anteno, huama huno tamagra Nagri vahe manita, marerisa fenozani'a mani'nazanki kasegeni'a kegava hiho huno hu'ne. <sup>19</sup> Hagi e'i anama hanageno'a, tamazeri sga huno rantamagi tamamino mika ama mopafi vahe'ma tro'ma huzmante'nea vahepintira tamazeri sga hina, huvempama hu'nea Ra Anumzana tamagri Anumzamofo ruotge vahe manigahaze.

## 27

### *Ebeli agonare kresramna vu'naza itamofo naneke*

<sup>1</sup> Anante Mosese'ene Israeli kva vahe'mo'zamika Israeli vahetmina amanage hu'za zamasami'naze, Menima neramasmua kasegea maka avaririhō. <sup>2</sup> Hagi Jodani tima takaheta kantu kazigama Ra Anumzana tamagri Anumzamo'ma tamamisia mopafima vanaza zupa, ranra haverami omerita retrurente'neta higo mopa kateta erikaroro hunteho. <sup>3</sup> Jodani tima takaheta kantu kazigama amirine tumerimo'ma avite'nea mopama Rana tamagri Anumzamo'ma tamagehe'ima zamigahue huno huvempama hu'nea mopafima vanuta, ana higo hapanu'ma erikaroroma hunte'ne'naza haverera maka ama ana kasegea krenteho. <sup>4</sup> Hagi Jodani tima takaheta kantu kazigama Rana tamagri Anumzamo'ma tamamisia mopafima vanuta, amama tamasamua kante anteta ranra haverami omerita Ebeli agonare retrurente'neta, higo hapa katetma erikaroro hunteho. <sup>5</sup> Hagi e'i ananteria havereti Rana tamagri Anumzamofo kresramna vu ita tro hunteho. Ana kresramna vu itama tro'ma hanazana, aeniretira taga huta ana ita trora osiho. <sup>6</sup> Hagi aenireti'ma tagama osu haveraminteti tro'ma hu'nesaza itareke'za, tevefi kre fananehu ofa Rana tamagri Anumzamo-fontega hunteho. <sup>7</sup> Hagi e'i ana nehuta rimpa fru ofanena anante nehuta, ne'zana neneta, Ra Anumzana tamagri Anumzamofo avuga musena hugahaze. <sup>8</sup> Hagi higoret'i'ma anama eri karoroma hunte'naza haveraminte, maka kasegefima me'nea nanekea krente so'e hu'nenke'za keho.

### *Ebeli agonare ot'i'ne'za kazusi kema hnaza zamofo naneke*

<sup>9</sup> Mosese'ene pristi kva vahe'mo'zanena amanage hu'za Israeli vahera zamasami'naze, Akoheta mani'neta kama antahihō! Menina Rana tamagri Anumzamofo vahe mani'naze. <sup>10</sup> E'ina hu'negu Rana tamagri Anumzamofo kea amage nenteta, menima Agri kasegene tra ke'anema neramasmuana

kegava huta avaririho. <sup>11</sup> Ana zupa Moses'e'a amanage huno Israeli va-hera zamasmi'ne, <sup>12</sup> Jodani tima takaheta kantu kazigama vanuta, Simioni naga'ene, Livae naga'ene, Juda naga'ene, Isaka naga'ene, Josefe naga'ene Benzameni naga'mo'enena Gerisimi agonare oti'ne'za asomu kea huama hugahaze. <sup>13</sup> Hagi Rubeni naga'ene, Gati naga'ene, Asa naga'ene, Zebuluni naga'ene, Dani naga'ene, Naptali naga'mozanena Ebali agonarega oti'ne'za, vahem'a zamazeri havizahu kazusi kea huamara hugahaze. <sup>14</sup> Hagi anante Livae naga'mo'za ranke hu'za Israeli vhahera kenona huzamantegahaze. <sup>15</sup> Hagi mago vahe'mo'ma zafare antreno kaza osu havi anumza tro huge, tevefi aeni kreno mago'azamofo amema'ama tro huno oku'ama ante'nia vahe'mo'a, kazusifi manigahie. Na'ankure e'inahu zankura Ramofona agoteno amuti'agesa nehie. Anagema hanigeno'a, maka tamage hu'za hiho. <sup>16</sup> Hagi iza'o nerera nefu kema ontahi'nia vhahera kazusi huntone hu'za hanageno, maka vahe'mo'za tamage hu'za hiho! <sup>17</sup> Tava'onte'ma nemanisimofo kanagi kama akasino mopa'ma eri havia hanimofona, kazusi huntone hu'za hanageno, tamage hu'za mika vahe'mo'za hugahaze. <sup>18</sup> Hagi avu asuhu vahe'ma havi kantem'a avreno vania vhahera, kazusi huntone hu'za hanageno, maka vahe'mo'za tamage hu'za hugahaze. <sup>19</sup> Hagi ruregati emani vhahero, megusa mofavre, kento a'nemofo zama eri savari hania vhahera, kazusi huzamantone hu'za hanageno, maka vahe'mo'za tamage hu'za hugahaze. <sup>20</sup> Nefu nesaroma anteno masesimofona kazusi huntone, na'ankure agra nefu a'ene maseno nefu agia eri haviza hu'ne hanageno, maka tamage hu'za hugahaze. <sup>21</sup> Afu' kranema monko zama hania vhahera, kazusi huzamantone hu'za hanageno, maka vahe'mo'za tamage hu'za hugahaze! <sup>22</sup> Nesaroma anteno masesia vhahera kazusi huzamantone hu'za hanageno, maka vahe'mo'za tamage hu'za hugahaze! <sup>23</sup> Nenemo a'ma anteno masesia vhahera kazusi huzamantone hu'za hanageno, maka vahe'mo'za tamage hu'za hugahaze! <sup>24</sup> Hagi tava'oma'are'ma nemanisimofo oku'ama frakino ahe frisia vhahera kazusi huzamantone hu'za hanageno, maka vahe'mo'za tamage hu'za hugahaze! <sup>25</sup> Hagi zagoma ami'nigeno vahe'ma ahe frisia vhahera, kazusi huzamantone hu'za hanageno, maka vahe'mo'za tamage hu'za hugahaze! <sup>26</sup> Hagi kasegema ke fenkami netreno, ana kasegema ovaririsia vhahera, kazusi huzamantone hu'za hanageno, maka vahe'mo'za tamage hu'za hugahaze!

## 28

### *Kema antahino avaririsisa vahe'mo'ma erisia asomumofo naneke*

<sup>1</sup> Hagi tamagra Ra Anumzamofo ke'ama nentahita, menima nermasamua kasege'ama kvahu so'e hutama avaririsageno'a, Rana tamagri Anumzamo'a ama mopafi vahepintira rantamagi tami'nigeta mareri vahe manigahaze. <sup>2</sup> Hagi Rana tamagri Anumzamofo kema avaririsageno'a, ana maka zama hanafina asomura huramantegahie. <sup>3</sup> Hagi rankumatamifine, hozatamifinena asomura huramantegahie. <sup>4</sup> Hagi mofavretamine, hozatamine, sipisipi afutamine, bulimakao afu'taminena asomura huramantesigeno, rama'a fore hugahaze. <sup>5</sup> Hagi ne'zama erineriza ku'ene, ne'zama negraza zantaminena asomu huntesigeno, ne'zamo'a rama'a hugahie. <sup>6</sup> Hagi maka'zama hanaza zana, Ra Anumzamo'a asomu huntegahie. <sup>7</sup> Hagi ha'vahetimo'za magoke kampinti e'za hara eme huramantegahaze. Hianagi Ramo'a tamaza hina, hara huzmagateresage'za korora 7ni'a kampi panini hu'za fregahaze. <sup>8</sup> Hagi hozama vasageta nentaza nontamia, Ra Anumzana

tamagri Anumzamo'a asomu huneramanteno, tamamisia mopafina aso-mura huramantegahie.<sup>9</sup> Hagi Rana tamagri Anumzamofo kasegema kegava nehutma, avaririso'ema hanageno'a, Agrama huvempama hu'nea kante anteno, Agra'va vahe tamazeri ruotge hugahie.<sup>10</sup> Ana'ma hanigeno'a anante maka vahe'mo'za Ramo ke hu'nea vhahere hu'za ke'za anta'i'za nehu'za, tamagrira kesga huramantegahaze.<sup>11</sup> Tamagehe'ima zamigahue huno'ma huhampri zamante'nea mopafina Ramo'a maka zantamia eri ampore nentigeno, maka zama hanaza zamo'a knare zanke hugahie. Mofavretamine, bulimakao afuzagatamine, hozataminena eri amporegahie.<sup>12</sup> Hagi Ramo'a monafima fenozama nentea nona anagino eri ruhagar hinkeno, mopatamifina ko'ma neriankrarera kora nerinkeno, maka'zama hanaza zana asomu huramante'nigeta, mago zankura valhepintira memea osugahazanagi, vahe'mo'za tamagripinti memea eme hu'za erigahaze.<sup>13</sup> Hagi tamagrama menima avaririhō hu'nama neramasma kasegema, kegava nehuta avariri so'ema hanageno'a, Ramo'a tamagrira tamaza hina henka omegosazanki, ugagota nehuta mareri vahe manigahaze.<sup>14</sup> Hagi menima neramasma kasegea avariri fatgo hu so'e nehuta, tamaga kaziga rukrahe huge, hoga kaziga ome rukrahe hugera nehuta havi anumza tamimofontera monora huontegahaze.

### *Ke ontahi vahe'mo'zama mizazmima erisaza zamofo naneke*

<sup>15</sup> Hianagi Rana tamagri Anumzamofo kema ontahita, menima neramas-mua kasegene, trakenema ovrarisageno'a, amana kazusi kemo'a tamazeri haviza hugahie.<sup>16</sup> Hagi rankumatamine hozataminena Ra Anumzamo'a kazusi huntenko, haviza hugahie.<sup>17</sup> Hagi ne'zama erineriza ku'ene, ne'zama kreta nenaza zantaminena Ramo'a kazusi huntenko haviza hugahie.<sup>18</sup> Hagi mofavretamine, hozatamine, bulimkaone sipisipi afu'zagatamia Ramo'a kazusi huntenko haviza hugahaze.<sup>19</sup> Hagi inantegama vuta eta nehutma, nazanoma hanazana Ramo'a kazusi huramantegahie.<sup>20</sup> Maka zama hanaza zana Ramo'a kazusi huramantenkeno, antahin-tahitamimo'a savri nehinkeno tamarimpa nehenigeno tamahe fanane hina, ame huta fanane hugahaze. Na'ankure tamagra kefo avu'ava nehutma, Nagrira tamefi hunami'naze.<sup>21</sup> Hagi Ramo'a kri atrenkeno tamazeri haviza hinketa, magore hutma amama vutama omeri santihare'zama nehaza mopafina, omanitfa hugahaze.<sup>22</sup> Ana nehuno Ra Anumzamo'a ruzahu ruzahu kruniti, tamazeri havizantfa nehuno, amuho krunu'ene tamavufga zore krunu'ene, zage atrena amuhonentake huno maka zana tefanane nehina, ne'zantera kria fore nehina, ne'za aninarera kravara azeneri'na, vahera fri vagaregahaze.<sup>23</sup> Hagi kora orinkeno monamo'a hanavetino bronsi havegna hinkeno, mopamo'a aenigna huno tusi hakavetigahie.<sup>24</sup> Hagi Ra Anumzamo'a kora eri rukarehe hinkeno, monafintira kugusopane kasepane eramino, maka vahera tamahe frigahie.<sup>25</sup> Hagi Ra Anumzamo'a tamatre'nigeno ha' vahe' timimo'za tamahegahaze. Hagi magoke kazigati vuta hara ome huzamantegahazanagi, tamahe panani hanageta, panani huta 7ni'a kampi fregahaze. Anama hanageno kokankoka vahe'mo'zama tamagrite'ma havizama fore'ma haniazama kesu'za, zmagogogu hugahaze.<sup>26</sup> Hagi fri'nageno'a tamavufgamo'a namamofone afi'zagagafamofo ne'za sampregahie. Ana namaramine afi'zagagafama aru hari tre vahera magore huno omanigosie.<sup>27</sup> Hagi Isipi mopafima me'nea usge namune, hoga asi namune, hagave namuntmiu Ramo'a tamazeri

haviza hinkeno, ana namuntnimo'a tusi'a hagahaga nehu'za vagaoregahaze. <sup>28</sup> Ra Anumzamo'a antahintahi tamimofona tamazeri savri nehuno, tamavurga tamazeri asu hinketa neginagi nehuta, <sup>29</sup> avu asuhu vahe'mo hanimpi kanku hakea kna huta zage ferupina kankura haketa neginagi nehuta, maka zama hanaza zamo'a knarerā osugahie. Maka zupa keonke zantamia musufa nesena, tamaza huno tamahoke ahe vhahera omanigahie. <sup>30</sup> Hagi e'ina a' erigahane hu'za hugantegahazanagi, ru vemo ana ara anteno masegahie. Nona kintegahananagi, ana nonka'afina ovasesankeno, ru vahe'mo masegahie. Waini hoza antegahananagi, ana hozaka'afintira raga taginka onenankeno, ru vahe'mo tagino negahie. <sup>31</sup> Hagi kavu negesanke'za bulimakao afuka'a ahiegahazanagi, magore hunka ame'a onegahane. Donki afuka'a kavu negesanke'za eme rente'za avazu hu'za vute'za, ete eme onkamigahaze. Ha' vaheka'amo'za kavu negesanke'za, sipisipi afuka'a eme avregahazanagi, mago vahe'mo'ka kaza osugahie. <sup>32</sup> Hagi kavu negesankeno ru kumate vahe'tmimo neka'ane mofaka'anena eme avre'za nevnageno, tumoka'amo'a atanegahianagi, mago'zana osugahane. <sup>33</sup> Kamu'nama ne-hagenigenka ante'ne nana hozaka'a, antahinka kenka osu'nesana kumateti vahe'mo'za ne'za erihana nehu'za, maka zupa kazeri haviza huvava hugahaze. <sup>34</sup> Maka kaziga hazenke zantmimo kagigatenkenka, hazenke zanke negesankeno antahintahi ka'amo'a savri hugahie. <sup>35</sup> Hagi kagiaret'i'ma marerino kasenire'ma uhanati'niana, Ramo'a usge namunu kazeri havizahina, tusanamasama hananana ana namumo'a teoganigahie. <sup>36</sup> Hagi Ra Anumzamo'a tamatrena tamagrane kini ne' timinen kina hurmanteh'za tamagehe'izane tamagranema onke'nesaza moparega tamavre'za vanageta, anantega havere'ene zafare'enema tro hunte anumzantami monora ome huntegahaze. <sup>37</sup> Ana'ma Ra Anumzamo'ma tamatrenigeno tamavre'za vanaza kumate vahe'mo'za nege'za tusi antri nehu'za, tamagizanere'za, kizazokago ke huramantegahaze. <sup>38</sup> Rama'a hozafina avimza hankregahazanagi, kenutamimo'za ana hoza ne'za erihana hanageta, osi'a hamaregahaze. <sup>39</sup> Hagi waini hoza anteta kegava hugahazanagi, havi kafamo'za nehana hinketa, waini tine krepi raganena onegosaze. <sup>40</sup> Hagi olivi zafamo'a mopatamifina rama'a hugahianagi, raga'amo'a nena osu'neno tagiramin-keta olivi masavena erita ofregosaze. <sup>41</sup> Hagi ne' mofara kase zmantegahazanagi, tamagri'enena omanigahaze. Na'ankure ana mofavreramina ha' vahe'mo'za eme zamavare'za kina ome huzmantegahaze. <sup>42</sup> Hagi maka zafa ani'nane, hozataminena kenutamimo'za ne'za eri hana hugahaze. <sup>43</sup> Hagi ruregati vahe'ma tamagranema enemaniza vahe'mo'za, maka zama hanaza zamo'a knare hinke'za, hankaveti'za marenerinageta, tamagrama maka'zama hanaza zamo'a havizanke huno uramigahie. <sup>44</sup> Hagi zamagrip-intike maka zananofira huta erigahaze. Hanki tamagripintira nofira hu'za e'origahaze. Zamagra aseni manisageta, tamagra zamarisona manigahaze.

<sup>45</sup> Hagi Rana tamagri Anumzamo'ma avaririho huno'ma huramante'nea kasege'ane, trake'anema ovaririsageno'a, maka ama ana kazusi zamofo knazamo'a tamavaririno nevuno tamahe frigahie. <sup>46</sup> Hagi ana kazusi zamofo knazamo'a tamagrite'ene henkama tamagripinti fore hunante anante'ma hu'za esaza vahetera mago avame'za me'nena Ramofo rim-pahe'zane hu'za ke'za antahi'za hugahaze. <sup>47</sup> Hagi rama'azama neramia zanku'ma tamagrama tamagu'reti huta Rana tamagri Anumzamofoma musema huontesazana, <sup>48</sup> ha' vahe'timi huzmanteh'na tamavre'za kina ome humantesageta, zamagri eri'za vahe umanigahaze. Anantega tam-

agakura nehuta, tinkura tamavenesina, kukenagura upa nehutma, maka zankura upa hugahaze. Anama nehanageno'a Ramo'a kare namare zafa tamagumpi anakinteno, tamazeri haviza nehina frigahaze. <sup>49</sup> Ra Anumzamo'a ha' vaheera afete moparegati ru zamageru neranaza vahe zamavreno e'nige'za, tumpamo'ma hiaza hu'za eme tamavre'sga hu'za vugahaze. <sup>50</sup> Hagi ana ha' vahe'ma esazana vahe'mofonku zmasunku osu' vahe egahazanki'za, tavava ozafane ne'one mofavreraminena zamasunkura huozmantegahaze. <sup>51</sup> Hagi mika zagagafatimine, hoza timinena eri haviza hanageno, magore huno witine, kasefa wainine, olivi masavene, bulimakao anenta'ene, meme anenta'enena omanitfa hinketa tamagaku hutma frigahaze. <sup>52</sup> Hagi Rana tamagri Anumzamo'ma tamami'nea mopafima tagu'vazigahie hutama nehaza kuma vihutamia ha' vahetamimo'za avazagigagi'ne'za, tapage hugahaze. <sup>53</sup> Hagi ha' vahe'mo'za kumatamimofoma avazagi kagiza ha'ma huramantesageta, ne'za ne'zanku hugeta Rana tamagri Anumzamo'ma tamami'nea ne'ene mofa'enena zama-heta negahaze. <sup>54</sup> Hagi amu'nontamifima mago knare ne'ma vahe'mofo knare'za hunente'nia ne'mo'agi, nefuno, avesinentesia a'amofono, fri vaganerenigeno magoke mani'nesia mofavre'anena ne'zana omitfa hugahie. <sup>55</sup> Hagi ha' vahe'mo'ma avazagi kagi'enigeno ne'zana omnetfa hugahie-ankino, ana ne'mo'ma mofavre'ama aheno nene'nuno'a, magore huno naga'a omitfa hugahie. <sup>56</sup> Hagi fenoma'amo agatere'nigeno agia avapara vano nosuno, mago'zanku upama osu marerisa a'nemo'za nevene, ne'ane mofa'enena ne'zana ozamitfa hugahie. <sup>57</sup> Hagi ha' vahe'mo'ma kuma'ma avazagi kaginigeno, ne'zama omnetfa hanigeno'a, ana a'mo'a kasema ante'nia mofavrene, ana mofavre nom'a'anena frakino ante'neno agrake oku'a negahie.

<sup>58</sup> Hagi tamagrama ama avontafepima krente kasegema ovariritma, Rana tamagri Anumzamofo hihamu masa'ane agi'agu'ma koro'ma huantesazana, <sup>59</sup> Ramo'a tamagrite'ene mofavretamirera vagaore kri atrenkeno, me'neno tamazeri haviza huvava hugahie. <sup>60</sup> Hagi Isipi mopafima fore hidgetama negeta kore'ma hu'naza krimo tamagritera ekamaregahie. <sup>61</sup> Hagi Ramo'a ruzahu ruzahu krimo kasege avontafepima omne'nea kria atreno, tamata hoza neramino tamahe frigahie. <sup>62</sup> Rana tamagri Anumzamofo kea ontahi'nazagu, monafi hanafira agatereta rama'a vahe manigahazanagi, tamahe hana hinketa osi'a vahe manigahaze. <sup>63</sup> Hagi Ra Anumzamo'a tamagri'ma tusi'a musema huramanteno knare'ma huramantegeta, rama'a vahe'ma fore'ma hu'nazaza huno hazenkezama tamino tamahe fananema huzankura muse hugahie. Amama ufreta omeri santiharesaza mopafintira tamazeri vatitregahie. <sup>64</sup> Hagi Ramo'a tamazeri panani hinketa, mago mago huta ru vahe'mokizmi mopafi afete umani emanu hu'neta, anantega havere'ene, zafare anumzantmina tamafahemo'zane tamagrane keta antahita osu'nezasa havi anumzante monora huzmantegahaze. <sup>65</sup> Ana kumategama manisazana mika zupa tamarimpa fru zana omnena manigsa osugahaze. Ra Anumzamo'a maka zupa tamazeri koro nehina, tamavuma ke'zamo'a knarera nosina, manizantmimo'a knare osugahie. <sup>66</sup> Hagi antahintahitamimo'a savri hinketa feru'ene hanimpinenahia antahintahia huvava nehuta, frigahumpi manigahune huta antahigahaze. <sup>67</sup> Hagi nanterama asesigeta amanage hugahaze, hanima huno kenege'ma sesiana knare hugahie huta nehuta, kinagama senigetama mani'neta nanterama sesiana knare hugahie huta hugahaze! Na'ankure mika'zama kesazazamo'a havizantfa hinkeno

tusi tamagogogugu hugahaze. <sup>68</sup> Anante mago'anena onkegosanema hu'noa kumatega ventefi Ra Anumzamo'a huramantesigeta ete Isipi vugahaze. Anama hina kazokazo eri'za vahe manisune huta tamagra'a zagore atregahazanagi, tamagrira mizana osegahaze.

## 29

*Moapu mopafi Anumzamo'a Israeli vahe'ene hu hagerafi huvempage hu'nea naneke*

<sup>1</sup> Hagi Sainai agonare'ma mani'nageno'ma Ra Anumzamo'a huhagerafi huvempa kema Israeli vahe'ma zami'nerera, Moapu mopafima umani'nageno'a, ama'na huhagerafi huvempa kea mago'anenamio huno Mosesena asami'ne.

<sup>2</sup> Hagi Mosese'a Israeli vhahera maka kehu tru huno amanage huno zamasmi'ne, Ramo'ma Isipi mopafima Feronte'ene, eri'za vahe'are'ene, mopa'afinema, <sup>3</sup> maka hankave'ane avame'zane, kaguvazanema erifore'ma hu'nea zana ko' ke'naze. <sup>4</sup> Hianagi manita ama knare'ma ehanatizana, Ramo'a antahintahitamia eri amara osigeta, ana zana keta antahita nosuta, tamavurga eri hari higeta nonkazageno, tamagesa erinkro higeta nontahize! <sup>5</sup> Hagi Ramo'a huno, 40'a kafufi ka'ma kokampina tamavare'na e'noanagi, kukena tamimo'ene tamagia anomo'enena tagatora huno havizana osu'ne. <sup>6</sup> Hagi Nagriku'ma Rana tagri Anumzane huta keni'ma hanagu, bretine wainine aka tinena one'naze. <sup>7</sup> Hagi ese'ma ama mopare'ma neonke'za, Hesboni kini ne' Sihoni'ene Basani kini ne' Ogikea eke hara eme hurante'nazanagi, tagra hara huzamagatere'none. <sup>8</sup> Ana kini netremokizni mopa hanareta Rubeni naga'ene, Gati naga'ene, Manase naga'ma amu'nompinti refko hu'naza naga'enena, ana mopa refako huzami'none.

<sup>9</sup> E'ina hu'negu ama ana huhagerafi huvempa kea kegava hu'neta neverarinkeno, maka zama hanaza zamo'a knarerina hino. <sup>10</sup> Hagi menina Ra Anumzana tamagri Anumzamofo avuga Israeli naga nofite kva vahe'ene, ranra vahe'ene, sondia kva vahe'ene, maka Israeli vene'nene, <sup>11</sup> a' mofavrene, ruregati'ma tamagri'enema enemaniza vahe'ene, tintevema hurami vahe'enena, <sup>12</sup> Ra Anumzana tamagri Anumzamo'ma tamagranema huhagerafi huvempa ke hanigeta avarigarahune huta huvempa hanagu menina eme oti'naze. <sup>13</sup> Hagi tamagehe'i Abrahamuma, Aisakima, Jekopunema huvempama huzamante'nea kante anteno, Agra tamagri'ene eri hagerafi huvempa ke hinketa tamagra menina Agri vahe' mani'nageno, Agra tamagri Anumza manigahie. <sup>14</sup> Hianagi Ramo'na tamagrikukera ama huhagerafi huvempa kea nosuanki, <sup>15</sup> Rana tamagri Anumzamo'na navugama menima oti'naza vahe'ene, henkama fore hu anante ante'ma hanaza vahe'enenu nehue. <sup>16</sup> Hagi Isipima mani'nonteti'ma ana kuma'ma atreta ne-eta ha' vahetimofo mopafima e'nonana, tamagra ko keta antahita hu'naze. <sup>17</sup> Kasrino hi'mnage'ma hu'nea avu'ava'ma nehu'za, zafare'ene havere'ene, silvare'ene, golire'enema kaza osu' anumzama amu'no zamifima trohuntenazana ko ke'naze. <sup>18</sup> Hagi ama huhagerafi huvempa kema tamagri'enema nehuana, mago vemo'o a'mo'o naga'mo'ma, Rana tamagri Anumzamofoma amagena hunemino ana havi anumzantamima mono hunte'niana kefo zafamo agata hageno aka' zafa raga rentea kna amu'nontamifinti hugahie. <sup>19</sup> Hagi izago ama kazusi kema antahimoka kagraka'agura humusena nehunka, nagra navesi'zama avaririsuana mago zana nagritera fore osugosie hunka kagesa ontahio. Kagra rama'a

hazenke zampi maka vahera zamavarenka ufregahane. <sup>20</sup> Ramo'a e'inahu vahe'mofo kefozama'a atreontegosianki, tusi arimpa ahenteneno kanive renentenkeno, ama avontafepima me'nea kazusi kemo'a ana vahe'mofo agofetu me'nhenkeno Ra Anumzamo'a ama mopafintira agi'a eri fanane hugahie. <sup>21</sup> Hagi ana'ma hania vahera Ramo'a Israeli naga'nofipintira azeri arure atreno, kasege avontafepima huhagerafi huvempa kema hu'nea knazana ana vahete atre'nigeno evugahie. <sup>22</sup> Hagi kagripinti fore hania vahero, ruregati'ma e'mani vahepinti forehu anante anante hu'za esaza vahe'mokizmia, Ra Anumzamo'ma mopatamima krinuti'ene hazenke'za nuti'ene eri havizama hania zana nege'za, <sup>23</sup> amanage hu'za krafa hugahaze, Ramo'ma Sodomune, Gomorane, Atmane, Zeboimi kuma'ma arimpa ahezama'areti eri havizama hu'neaza huno maka mopafina salfa havemo'ene hagemo'ene aviteno mopa eri haviza higeno, hoza antegara osigeno trazana magore huno ohagetfa hie hu'za hugahaze. <sup>24</sup> Ana hanige'za ru mopafi vahe'mo'za amanage hugahaze, nahigeno Ramo'a amanara huno ama mopa eri haviza nehuno, na'amo higeno tusi arimpa ahenezamante hu'za antahigahaze. <sup>25</sup> Anante amanage hu'za hugahaze, na'ankure Rana zamagehe'i Anumzamo'ma Isipiti'ma zamavareno ne-eno huhagerafi huvempa kema hu'neana zamagra zamefi humi'zageno, anara hu'ne hu'za hugahaze. <sup>26</sup> Hagi ke'za antahi'za osu'naza havi anumzantami neverir'i'za monora hunte'naze. E'i ana havi anumzantmina monora huonthe huno Ramo'ma hu'nea anumzantami monora ome hunte'naze. <sup>27</sup> E'ina higeno Ra Anumzamofo arimpa he'zamo'a marerigeno, ama avontafepima me'nea knazana atregeno ama mopafina me'ne. <sup>28</sup> Hagi e'ina hazageno Ramo'a tusi arimpa ahezamanteno, ama mopafintira Israeli vahera zamazeri vatiitrege'za menina ru mopafi umani'naze. <sup>29</sup> Hagi Ra Anumzana tagri Anumzamo'a oku'ma me'nea kea ontasami'ne. Hianagi tagrite'ma erifore'ma hiankea tagrane mofavretimozanena avarari vava hugahune.

## 30

### *Eteno zamazeri so'ema hania zamofoma huhampri zamante'nea nancke*

<sup>1</sup> Hagi menina tare kantre tamaveri nehuanki, mago kana Rana tamagri Anumzamo'a tamazeri so'e hugahianki, mago kana Ramo'a tamazeri haviza hugahianki, tamagra'a inankante vugahaze huhamprigahaze. Hagi maka ama ana knazamo'ma Rana tamagri Anumzamo'ma huramante'ngietma umanisaza vahe'mokizmi kumapima tamagrite'ma fore'ma hanigetma, amana tare kantrema tamaveri'ma huankañku tamagesa antahigahaze. <sup>2</sup> Tamagrane tamagripinti'ma fore hanaza vahe'ene rukrahe huta Rana tamagri Anumzamofonte eta, tumotimireti'ene tamagu'areti'ene huta Rana tamagri Anumzamofonkea maka menima tamasamua kante anteta avarir-aho. <sup>3</sup> Ana'ma hanageno'a, Rana tamagri Anumzamo'a ete tamazeri knare nehuno, asunku huneramanteno, tamahe panani'ma higetama ufre efrema hu'naza moparegatira tamavre atru hugahie. <sup>4</sup> Hagi mopa atumparega afete umanigahazanagi, Rana tamagri Anumzamo'a ete tamavre atruhuno tamavreno egahie. <sup>5</sup> Hagi Rana tamagri Anumzamo'a ete tamavreno ko'ma tamafahe'zama erisantima hare'naza mopafi enigetama ana mopa eris-intihareta mani'ne'nageno maka'zama hanaza zampina, tamazeri knare nehina tamafahe'ina zamagatereta rama'a vahe fore huta manigahaze. <sup>6</sup> Ana nehuno Rana tamagri Anumzamo'a tamagri'ene mofavretimimofo

zamagu'a eri rukrahehinketa tamagu'areti'ene tumotamireti'ene huta, Rana tamagri Anumzamofona avesinenteta za'zatera manita vugahaze. <sup>7</sup> Hagi Ra Anumzana tamagri Anumzamo'a ha' vahetimo'zama tazeri havizama ne-haza vhete ama ana maka knazana zamino zamazeri haviza hugahie. <sup>8</sup> Ana hanigeta ete Ramofo kea nentahita, maka menima neramasamu kasege'a avaririgahaze. <sup>9</sup> Ana'ma hanageno'a Rana tamagri Anumzamo'a maka zama hanaza zana erimporenno eri knare hinketa, maka zampina knare hugahaze. Ramo'a mofavreramina rama'a nerammino, bulimakao afutamina zamazeri hakare nehuno, nezantamina erimporenenteno, hozatamia eri knare hinketa rama'a hoza vasagegahaze. Na'ankure Rana tamagri Anumzamo'a tamagrikura tusi muse huneramanteno, tamagehe'ima 'hu'neaza huno tamazeri knare hinketa, maka zampima knare nehutma, <sup>10</sup> ke'ama nentahita, ama avontafepima krente'nea tra ke'ane kasege'anena neveriritma, tamagu'areti'ene tumotmi'areti'enema hutma Rana tamagri Anumzamofonte'ma esageno'a, Agra muse huramanteno avesiramantegahie.

<sup>11</sup> Amama menima neramamu kasegem'o amuhoa osu'nenkita amane antahi ama nehuta, tavaontamire me'neankita kegahaze. <sup>12</sup> Hagi ama ana kasegea monafina omneneankita, iza marerino omerino eme tamisigeta antahigahune huta osugahaze. <sup>13</sup> Hagi ete ama ana kasegem'o hagerimofo kantu kaziga omne'neankita, iza hagerina takaheno omerino eme tam'i'ngeta antahigahune huta osugahaze. <sup>14</sup> I'o, ama ana kasegem'o a tava'ontmire'ene tamagipine, tamagu'afine me'neankita amane avaririgahaze.

<sup>15</sup> Hagi antahihio, menina asimu'ma erino mani'zane, knare nomani'zana tamaveri nehu'na, fri'zane tamazeri havizama hania zanena tamaveri nehuankitma tamagra'a huhamprigahaze. <sup>16</sup> Hagi nagra menima hiho hu'nama nehuana, Ra Anumzana tamagri Anumzamofo avesinenteta kasege'ane, tra ke'ane Agri avu'ava'ene avaririhio hu'na huneramantoe. E'i anama hanutma amama unefraza mopafina knare huta mani'neta vahera kasepazi nehanageno, Rana tamagri Anumzamo'a asomu huramantegahie. <sup>17</sup> Hianagi tamagu'amo'ma rukarahe'ma nehina, kema ontahita atreta ru anumzantamima ome neveririta mono'ma hunteszazana, <sup>18</sup> tamage hu'na menina huama hu'na neramasamuankita frigahaze. Hagi Jodani tima takaheta vuta ome eri'zama nehaza mopafina za'zatera omanigahaze.

<sup>19</sup> Hagi menina monane mopane kehugeke negake'na, asimu'ma erino mani'zane knare nomani'zana nente'na, fri'zane tamazeri havizama hania kanena me'negu tamagrane mofavretiminena asimu erino mani'za e'nerita knare huta maniho. <sup>20</sup> Hagi Rana tamagri Anumzamofona avesinenteta, ke'a neveririta azeri antarako hiho. Na'ankure asimu'ma erino mani'zana Agra neramamino kafu zagetimia eri za'za hina tamagehe'i, Abrahamuma, Aisaki'ma Jekopukizmima Ramo'ma huvempa huno hūhampri zamante'nea mopafina zazate manigahaze.

## 31

### *Josua'ma Israeli vahemokizmi kva mani'nia zamofo naneke*

<sup>1</sup> Mose'sea mago'ene Israeli vahera nanekea zamasmino, <sup>2</sup> Nagra 120'a kafu hu'na ozafaroanki'na mago'enena vugota hu'na tamavre'na vugara osugeno, Ra Anumzamo'a huno, Jodani tina takahenka kantu kaziga ovugosane huno nasami'ne. <sup>3</sup> Hianagi Ra Anumzana tamagri Anumzamo'a Agra'a vugota huramanteno tina takaheno kantu kaziga nevuno, maka ana

mopafima mani'nea vahe'tamina zamahe hana hanigeta, ana mopazmia erigahaze. Hagi Rana tamagri Anumzamo'ma hu'nea kante Josua'a vugota hurmanteno, tamavreno tina takaheno vugahie. <sup>4</sup> Hagi Amori vahe kini ne'tre Sihonine Oginema hu'neaza huno Rana tamagri Anumzamo'a ana mopafi vhahera zamahehna hugahie. <sup>5</sup> Hagi ana mopafi vhahera Ramo'a tamazampi zamavarente'na, hihoma hu'na tamasamua zana ana vhahera huzamantegahaze. <sup>6</sup> Hagi oti hankavetita mani'neta ana vahetminkura korora huta tamagogogura osiho. Na'ankure Rana tamagri Anumzamo'a, tamagrane nevuno vugota hurmanteno vugahie. Hagi Agra amefira huoramige, tamatrege osugahie.

<sup>7</sup> Hagi anante Moses'a Israeli vahe'mokizimi zamavufi Josuana kehuno amanage huno asami'ne, Josuaga korora osunka oti hankavetio. Na'ankure ama vhahera zamavarenka Ramo'ma zamigahue huno'ma zamagehe'ima huhampri zamante'nea mopafi vunka ana mopa omeri zamisanke'za erisantiharegahaze. <sup>8</sup> Hagi korora huge, kahirahikura osuo. Na'ankure Ra Anumzamo'a ogatregosianki, kagri'ene mani'neno vugota huganteno vugahie.

### *Mika vahe zamavufi kasege hampri'nea naneke*

<sup>9</sup> Anante Moses'a ana kasege kreno Ra Anumzamofo huhagerafi huvempa kema me'nea vogisima eneriza Livae pristi vahetamine, Israeli ranra kva vahe'taminena zami'ne. <sup>10</sup> Ana nehuno Moses'a zamasmino, Mika namba 7 kafumofo atumparega vahe'mofo zama eri'nesia zama eteno nemino, seli nompimpa manita e'nazmo antahimita musenkasema hu knarer, <sup>11</sup> Rana tamagri Anumzamofo avugama mono hunantegahazema hania kumapima maka Israeli vahe'tmima etruma hanaza knare ama ana avontafera nentahisageta hampriho. <sup>12</sup> Hagi maka vene'nema, a'ne'ma mofavreramima, ruregati'ma tamagri kumapima emani'naza vahe'taminena kehutru huta ama avontafepima me'nea kasegea hamprinke'za nentahi'za, Rana tamagri Anumzamofona korora hunente'za maka tra kea kva hune'za avariraho. <sup>13</sup> Ana huta nehamprinke'za ontahi'ne'naza mofavretamimo'za nentahi'za Rana tamagri Anumzamofona korora huntegahaze. Hagi Jodani tima takaheta kantu kazigama umani'naza mopafina, ama ana zana huvava hiho.

### *Israeli vahe'mo'zama keontahi'naza zamofonku hunte'nea naneke*

<sup>14</sup> Anante Ra Anumzamo'a Mosesena amanage huno asmi'ne, Kagrama fri'nana knamo'a hago kofta hianki, Josuana kehunka atruhu seli mono nompi vuge'na eri'zana ami'neno. Anagema higekea Moses'e'ene Josuakea atruhu seli mono nontega vu'na'e. <sup>15</sup> Anama vakeno'a Ra Anumzamo'a vimago hampompi eramino atruhu seli mono nompi emanigeno, ana hampomo'a kafante atrureno me'ne. <sup>16</sup> Hagi Ramo'a amanage huno Mosesena asami'ne, menina frinka kagehe'mo'zane manigasa hugahane. E'i anama hanankeno'a ama vahe'mo'za natre'za amama unefraza mopafi, ru anumzantminte monora ome huntegahaze. Hagi Nagrira zamagena hunenami'za zamagranema huhagerafi huvempa kema hu'noana rutagrehahaze. <sup>17</sup> E'i ana'ma hanageno'a, Nagrira tusi narimpa ahenke'na zamatre'na namefi hunezami'na ozamagesuge'za havizantfa hugahaze. Hagi rama'a havi zamo'ene hazenke zamo'ene zamagritera e'nige'za amanage hugahaze, Anumzana amu'nontifina omaninegeno hazenke zamo'a tavatera ne-efi? hu'za hugahaze. <sup>18</sup> Hagi tamage hu'na e'i ana knareru rukrahe hu'na ozamagegahue. Na'ankure zamagra maka havi avu'ava nehu'za

ru anumzantaminte monora ome hunte'naze. <sup>19</sup> E'ina hu'negu amama kasamisua zaganemofo nanekea krenka Israeli vhahera rempi huzamio. Henka ama ana zaganemofo me'neno keaga huzamantegahie. <sup>20</sup> Na'ankure tumerimo'ene amirimo'enema avite'nea mopama zamagehe'imma zaghue hu'nama huhampri zamante'noa mopafina Nagra zamavare'na vugahue. E'ina mopafi zamavare'na vanuge'za maka zampina knare nehu'za, ne'zana ne'zamu hugahazanagi, Nagrira zamefi hunenami'za ru anumzantamti monora ome hunente'za, zamagranema huhagerafi huvempa kema hu'noana ruhantagigahaze. <sup>21</sup> Hagi ana'ma hanageno'a havi zamo'ene, hazenke zamo'enema zamagrite'ma e'nigeno'a, ama zaganemofo avame'za me'nena ana zaganema nehanu'za zamagedesa antahigahaze. Na'ankure fore hunante anante'ma hanaza vahe'mo'za ama ana zagara zamagera okani huvava hugahaze. Na'ankure zamahue hu'nama hu'noa mopafima ome hanaza zamavu'zamava zana Nagra menina ko antahi'na ke'na hu'noe. <sup>22</sup> Ana higeno Mosese'a ana knazupage ana zagara kreno Israeli vhahera rempi huzami'ne.

<sup>23</sup> Hagi anante Ramo'a Nuni nemofo Josuana huhamprinenteno amanage huno eri'zana ami'ne, korera osunka oti hankavetio! Na'ankure Israeli vahem'a zamigahue hu'nama huhampri zamante'noa mopafina, kagra Israeli vhahera zamavarenka ufregahane. Anama nehananke'na Nagra kagne manigahue.

<sup>24</sup> Hagi Mosese'ma ana kasegema avontafepima krente vagareteno'a, <sup>25</sup> huhagerafi huvempa kemofo vogisima zafama huno vu Livae naga amanage huno huzmante'ne, <sup>26</sup> Ama'i kasege avontafera erita Ra Anumzana tamagri Anumzamofo huhagerafi huvempa vogisimofo asoparega antenkeno me'neno, Israeli vahe'mokizmi kefo zamavu'zmava eriama hu'za meno. <sup>27</sup> Na'ankure Nagra tamantahina ke'na hunoankita, keontahi hankave antahintahine vahe mani'naze. Hagi antahih, menina amama ofri'na mani'norera Ra Anumzamofona ha'renentazankita, fri'nugeta menima nehaza zana agatereta ha'rentegahaze.

<sup>28</sup> E'ina hu'negu mika Israeli ranra vahe'ene, vugota eri'za vahe'enena kehuta emetru hanage'na, monane mohanena keha'ne'na tamagri'ma tamavumro'ma antesua nanekea monane mohanemokea antahigahae. <sup>29</sup> Na'ankure Nagra tamantahina ke'na hu'noankita, nagrama fri'nugeta keontahi tamavutamava nehuta, nagrama avaririhou hu'nama huraman-toa kana atretta haviga avaririnageno'a, havizamo tamagritera egahie. Na'ankure Ra Anumzamofo avufina havi avu'ava nehuta, havizamo tro'ma hanaza zamo'a Ra Anumzamofona azeri arimpaa heghahie.

### *Mosese zaganemofo naneke*

<sup>30</sup> Anante Mosese'a ama ana zagara maka Israeli vahe'tmimo'za nentahizageno zamasami vagare'ne.

## 32

<sup>1</sup> Monane mopamokanena, nagrama hanua nanekea tanagesa anteneta antahi'o. <sup>2</sup> Nagrama rempima hurami'nua nanekemo'a, ko'ma riankna nehina, nanekema hanua naneke'nimo'a, ata aheankna nehina, kopaga ko'mo trazante runteankna nehuno, menima nehagea trazante kopaganko riankna hugahie. <sup>3</sup> Na'ankure nagra Ramofo agi ahentesga hugahue. Hagi tamagranena himamu masa'ane Anumzanti mani'ne huta agi'a ahentesga hiloh.

<sup>4</sup> Ra Anumzamo'a ra havegino, Agri eri'zankamo'a knarezantfa hu'ne. Maka'zama nehia zamo'a fatgo higeno, Agra hugahuema nehiaza nehia Anumzankino, mago havizana osuno, fatgo avu'ava zanke hugahie. <sup>5</sup> Hianagi zamagra havige avu'ava nehaza vahe agri avufina mani'naze. Zamagra havige zamavu'zamava nehaza vahe mani'nazanki'za zamagra agri mofavrea omani'naze. Fatgo osu havige avu'ava nehaza vahe mani'naze.

<sup>6</sup> Tamagra antahintahitami omne neginagi vahe mani'nazanki, Ra Anumzamo'ma knare'ma huramante'nerera e'inahu tamavu'tamavateti atesi'za nehazo? Agra tamagrira trora huoramanteno, tamazeri rana osu'nefi? <sup>7</sup> Korapa'ma evu'nea knaraminkura tamagera okaniho. Vahe'ma forehu anante anante'ma huno e'nea kafuraminku tamagesa antahiho. Tamafahe'ine, ranra vahe'tamine zamantahigenke'za tamasamaho. <sup>8</sup> Hagi Marerirfa Anumzamo'a mika kokankoka vahera mopa zami'ne. Agra vahera refko nehuno, ana avamente ankerio vahera refako huno zami'ne. <sup>9</sup> Hianagi Israeli vahera Ramofo vahe mani'naze. Jekopu'a Ramofo vahe mani'ne.

<sup>10</sup> Agra vahe'omani zaho'mo avite'nea ka'ma kokampinti ome keno avre'ne. Agra mani kaginteno, Agra'a avuragama kegavama hiankna huno kegava hunte'ne. <sup>11</sup> Agra tumpamo'ma anenta'ama hareno vano hinogu'ma noma'afinti avretregeno tak'a'unereno ana'ana nehigeno agekona rufranara huno avreankna huno Ra Anumzamo'a zamavareno zamagura vazi'ne.

<sup>12</sup> Ra Anumzamo agrake kegava huzmanteno, zamavareno vu'ne. Ru anumzamo'a kegava huzmanteno zamaza osu'ne. <sup>13</sup> Agra zamaza hige'za agona mopafi vano hu'naze. Ana mopafina hoza ante'za nene'za, havefintira tumerina eri'za nene'za, havege mopafina olivi zafa kri'za masavema'a eri'naze. <sup>14</sup> Agra meme afu'mofo amirinki, bulimakao afu'mofo eri kregefe'nea amirinki, afovage sipisipigi huno zami'ne. Hagi ana agofetura Basani mopafi ve sipisipi afu'taminki, meme afu'taminki, kaneno eri osi higeno knare hu'nea witigi, grepireti tro higeno knare'zantfa hu'nea waini tinki huno zami'ne.

<sup>15</sup> Hianagi Israeli vahe'mota afovage huta maka zampina knare nehuta, tamazeri fore'ma hu'nea Anumzamofona tamefi hunemize. Tamagu'ma vazi'nea Havea huhaviza hunenteta atre'naze. <sup>16</sup> Zamagra havi anumzantminne monora hunte'za Ra Anumzamofona arimpa azeri oti'zageno, kanive renezmanteno rimpa ahezmante'ne. <sup>17</sup> Zamagra tamage anumzana omani'neanangi, havi hankrote kresramana vunente'za, zamagehe'mo'za ke'za antahi'za osu'naza kasefa anumzante monora hunte'naze. <sup>18</sup> Tamagra tamazeri fore'ma hu'nea hanave Havegura tamagesa ontahi'naze. Kasema tamante'nea Anumzankura tamagekaninte'naze.

<sup>19</sup> Ramo'a anama hazazama negeno'a, tusi avesra huzmanteno amefi huzami'ne. Na'ankure Agri'a ne'mofavre'amozane mofane'amozanena havi zamavu'zamava hu'za azeri rimpa ahe'naze. <sup>20</sup> Agra amanage hu'ne, Nagra namefi huzami'na mani'nena atuparega na'a ome kegahazafi zamagegahue. Na'ankure zamagra akrahe akrahu zamavu'zamava nehu'za, kema hazare o'oti vahe mani'naze. <sup>21</sup> Zamagra amnezanku anumzane hu'za monora hunente'za, narimpa azeri oti'zage'na, kanive renezamante'na, kaza osu amnezantamima tro hunte'naza zantaminkura narimpa ahenezamantoe. E'ina hu'negu ru vahe asomura huzmantenuge'za kanive rezmantegahaze. Neginagi vahe huzmant'e'suge'za e'za, zamarimpa ahe avu'avara eme hugahaze. <sup>22</sup> Na'ankure narimpahe zamo'a, tevenefa kna huno maka'zana

mopafintira tefanane hugahie. Ana tevemo'a mopa teno uramino mopa agu'a fri' vahe kuma'enena tefanane hugahie.

<sup>23</sup> Miko hazenkezanu keve zamaheaza hu'na knazana zamagumpina anta'nena zamazeri haviza hugahie. <sup>24</sup> Agatontozane, ruzahu ruzahu kri-raminteti'ene ha' osifavereti'ene, afi' zagaraminuti'ene, zmasaguregati'ma regraro he'za mopafima vanoma nehaza zagaraminuti'ene, zamazeri haviza hugahue. <sup>25</sup> Hagi kumapima mani'naza vahe'tmina ha' vahe'mo'za bainati kazinteti zamahesageno, nomofo agu'afima mani'nesaza nehazavene, mofa'nene ranra vahe'ene ne'one mofavremo'zanena tusi zamagogogu hugahaze. <sup>26</sup> Nagra zamazeri panani hu'na vahe mopafi mago mago hu'na zamattroge'za, mago vahe'mo'e huno antahi ozamizasine. <sup>27</sup> Hianagi ana hanua zanku'ma ha' vahe zamimo'zama hu'za, Ra Anumzamo'a mago zana osigeta zamahone hu'za hu'zanku, anara osu'noe.

<sup>28</sup> Hianagi Israeli vhahera knare antahintahi omne neginagi vahe, zamageda antahi ama' osu vahe mani'naze. <sup>29</sup> Hagi knare antahintahima zamagri'ma me'neresina, henkama zamagri zamavate'ma fore'ma hania knazana ke'za antahi'za hazasine. <sup>30</sup> Hagi nankna huno magoke ne'mo'a, 1tauseni'a Israeli vhahera zamarotgo hanige'za fresageno, tare netremokea inankna huke 10 tauseni'a Israeli vhahera zamarotago hanage'za fregahaze? Ra Anumzamo'a Hanave havezmimo'ma zamatre'nigeno, e'inahu'zana fore hugahie. <sup>31</sup> Hianagi zamagra antahi'za ke'za hu'naze, zamagri havi anumzamo'a, tagri Anumzama hanave Havegna'ma hu'nea Anumzankna osu'ne. <sup>32</sup> Na'ankure zamagri wainimo'a Sodomu vahe'ene, Gomora vahe'mofo hozafinti e'neankino, ana wainimofo raga'amo'a avuatagaza me'neankino, ne'nanana aka kavesigahie. <sup>33</sup> Hagi zamagri waini timo'a ha' osifa'vemofo agregna higeno, ha' osifa'vemo'ma regatatima hunetrea avua tagankna hu'ne.

<sup>34</sup> Ra Anumzamo'a huno, Maka'zama huzmantesua zana mareri fenoma nentofi ante'na renkanirentogeno me'ne. <sup>35</sup> Nonama hu'zana Nagri zane, mizama ami'zana Nagri'za me'neanki'na, kofta knafi nona hu'na zamigahue. <sup>36</sup> Hagi Ra Anumzamo'ma kesiamma naga'amofo hanavemo'ma evurami'nigeno kazokazo eri'za vahero, amne vahe'ma osia manisageno'a, antahintahi'a rukrahe nehuno, asunku hunezamanteno fatgo avu'ava huzmantegahie. <sup>37</sup> Hagi Agra amanage hugahie, fra'maneki'za havi anumzazimia iga mani'ne? <sup>38</sup> Kre sramnana nevaza afu'mofo afovane, ofama haza waini tinema nenaza anumzantmina iga mani'naze? Atrenkeno ana anumzantmimo eme tamaza nehu'za kegava huramanteho!

<sup>39</sup> Menina keho, Nagrake Ra Anumzana mani'noe. Mago anumzana Nagri namefira omani'ne. Nagrake vhahera ahenefri'na, asimura nemue. Hagi zamavufaga eri haviza nehu'na, zamazeri negnamaroankino mago vahe'mo'o, mago anumzamo'e huno nazampintira zamazeri otregahie! <sup>40</sup> Na'ankure Nagra nazana ante anagamu atre'na huvempa huankino, Nagrama manivava hu'na vanufina, <sup>41</sup> Nagrama teve nefae'ene bainati kazini'ama kume'ma kanetesu'na, fatgo hu'na refko nehu'na, ha' vaheni'a nezamahe'na zamavaresrama hunantaza vhahera, Nagra nona hu'na zamazeri haviza hugahue. <sup>42</sup> Keveni'amo'a vahe korana neno neginagi nehina, bainati kazini'amo'a vahe avufga nenena, e'ima ne'neana hapima ahenia vahe korane, kina vahe korane, ugagota sondia kva vahe'tmimofo agenopama nesiazanku hu'ne. <sup>43</sup> Monamoka Agri'ene musena hugeno, maka anumzantmimo'a kepri huno Agrike monora hunteno. Na'ankure

Agri mofavre'aramimo korama tagia nona huno, ha' vahe'a zamahe'ne. Agra nona huno vahe'amofo mopafintira zamavaresrama huntaza vhahera zamahehana nehuno, Israeli vahe'amokizmi kumi'zmi nona huno atrenez-manteno mopazmia eri agru hugahie.

<sup>44</sup> Anante Moses'e'ene Nuni nemofo Josuakea eke, mikä Israeli vhahera ama ana zagamerä eme zamasamizage'za antahi'naze. <sup>45</sup> Hagi Moses'ma, maka ama ana nanekeramima maka Israeli vahe'tmima zamasami vagareteno'a, <sup>46</sup> amanage huno zamasami'ne, ama koro kema neramasamuana kegava huta tamagu'afi erinte'netä mofavretimia zamasaminke'za maka ama ana kasegea avariraho. <sup>47</sup> Na'ankure ama ana nanekea amne nanekea omne'neanki, kagrama kasimu'ma erinka mani'nana naneke. Ama ana naneke amagera nentenka Jodani timofo kantu kazigama umanisunka za'zatera manigahane.

<sup>48</sup> Hagi ana kna zupage Ra Anumzamo'a amanage huno Mosesena asami'ne, <sup>49</sup> Moapu mopamofo zage hanati kaziga vunka, Abarim agonaramimpi uhanatinka, Nebo agonafi marerinka morusapi uhanatitenka, Jodani timofo kantu kaziga Jeriko kuma'ma me'nea kaziga Kenani mopama Israeli vahe'ma zamisua mopa ome kegahane. <sup>50</sup> Ana mopama kegantutenka ketesunka negafu Aroni'ma Hori agonare frino agehe'mo'ene umani'neaza hunka e'i ana agonare frinka kagehe'mo'ene umanigahane. (Vahe hampri Namba 20:22-29) <sup>51</sup> Na'ankure tanagra Sin hagage kokampi, Meriba tinte Kadesi kumatera, Israeli vahe amu'nompina tanamentintia huonanteta ke'n'i'a ontahi'na'e. Na'ankure tanagra Israeli vahe amu'nompina Nagrikura ruotge hu'neta huta nagesga huonante'na'e. (Namba 4 Moses 20: 1-13) <sup>52</sup> E'ina hu'negu kagra kavu'age kegahananki, ana mopafima Israeli vahe'ma zamavare'nama ufresufina uofregosane.

## 33

### *Moses'e'asomu ke hu'nea naneke*

<sup>1</sup> Ama'i Anumzamofo eri'za ne' Moses'e'ma, Israeli vahe asomu ke huz-mantetenö fri'nea naneke. <sup>2</sup> Hagi Moses'e'amanage hu'ne, Ramo'a Sainai agonareti eno Seiri agonaarerä zage hanatiankna huno eme remsa huner-anteno, Parani agonaaretira remsa nehuno kopasi'namo tamaga kaziga azampi me'negeno rumarave nehigeno, 10 tauseni'a ruotge hu'naza an-kerö vahe'aramine e'ne. <sup>3</sup> Agri'a vahe'ma ruotge'ma hu'naza vhahera Ra Anumzamo'a, avesi nezmanteno, aza agusafi zamavarente'nege'za, Agri nanekea nentahi'za, Agri agaka nevaririze. <sup>4</sup> Hagi Ra Anumzamo'ma kasegemä tami'neana, mago mareri fenoza Israeli vahe'mota tami'ne. <sup>5</sup> Hagi ugagota kva vahe'tmimo'zama atruma hazageno, maka Israeli naga'mo'za magopi atruma hazageno'a, Ra Anumzamo'a zamagri kini mani'ne.

<sup>6</sup> Nagra anage hu'na Rubeni nagakura nehue, Rubeni nagara kasefa hu'za manigahazanagi, atrege'za fanenea osiho. <sup>7</sup> Hagi Juda nagakura amanage hu'ne, Ra Anumzamoka Juda agerura antahinka, vahe'afi avarenka efro. Hankave zaminka zamaza huge'za, ha' vahezmia hara huzamanteho.

<sup>8</sup> Hagi Livae nagakura amanage hu'ne, Ra Anumzamoka kentahi eri'za nagaka'a, Livae nagara Tamimi havene Urimi havene kagri kavesi'zama hakeno, erifore'ma hu'zana zami'nane. Masa kumate'ene Meriba tinte'ene rezamahenka ke'nane. <sup>9</sup> Ana'ma hanke'za zamagra keka'a antahi'za amage nente'za, huhagerafi huwempa kasegea kegava hu'naze. Nezmar-erama nezamafama mofavrezmima zamafuh'e'ima zamasarahehe'i kema

antahiza nevaririza avamena agatere'za, Kagri kea avariri'naze. <sup>10</sup> Zamagra tra keka'a Jekopuna rempi humigahaze. Zamagra kasegeka'a Israelina rempi humigahaze. Zamagra mnanentake'za kavuga nente'za, kre fanane hu ofa Kresramana vu itaka'are kregahaze. <sup>11</sup> Ra Anumzamoka Livae nagamofo eri'zana asomu hunezamantenka, zamazanu'ma avako hu'za eri'naza eri'zanena muse hunka antahizamigeno knare hino. Ha' vahe'zmia zamatama kri'are zamazeri haviza nehunka, zamavaresrama huzmanteno antahi havizama huzamante'nia vahera o'oti'are zamahetrege'za maseho.

<sup>12</sup> Hagi Benzameni nagakura huno, Anumzamo'a avesi zamante'neanki'za knare hu'za agrane manigahaze. Agra maka kna hankozmi mani'neno afunte zamavarentegahie.

<sup>13</sup> Hagi Josefe nagakura amanage hu'ne, Josefe naga'mofo mopa, Ra Anumzamo'a marerisa zana monafinkati ata ko'ene mopa agu'afinti tinuti'ene asomura huntegahie. <sup>14</sup> Hagi hozatamifina zagema rentesigeno'a ne'zamo'a knare nehina, ikama ementena ne'zana knare huta hamaregahaze. <sup>15</sup> Hagi korapa me'nea agonaramimpima antesaza hozamo'a knare hugahie. Mevava neonse agonaramimpintira knare huta hiranto ne'za hamaregahaze. <sup>16</sup> Hagi ama mopafina hentofoa zantaminu anteviteno asomura hunezamanteno, zafafima tevema neregeno nagrite'ma efore'ma hu'nea ne'mofo avesi'zamo'a, agrite megahie. Hagi Josefe nagara kini fetorimo zmasenire meankna huno asomu'mo'a me'nena, afuhe'mokizmi amu'nompina kva vahe manigahaze. <sup>17</sup> Hagi Josefena, hanave'amo'a agonesa ve bulimakamofo hanavemo'ma hiaza hugahie. Hagi hanave'amo'a, afi' ve bulimakao afu'mofo pative'agna huno hanavenentake hugahie. Agra ha' vahe'aramina zamavaririsige'za mopa atumparega vnageno, Efraemi naga'mo'za 10 tauseni'a agatere'za manisageno, Manase naga'mo'za 1 tauseni'a agatere'za manigahaze.

<sup>18</sup> Hagi Zebuluni nagaku'ene Isaka naga'enenkura amanage hu'ne, Zebuluni nagara kama ante'naza zamo'a knare huno hageno marenerina muse hiho. Hagi Isaka naga'mota seli nontimifima mani'neta hanaza zamo'a, knare huno nehagena muse hiho. <sup>19</sup> Zanagra vahetmina ke hanake'za agonare esage'za, e'i anante fatgo ofa Kresramana vugaha'e. Na'ankure zanagra hagerimpinti'ene, kasepampintira tusi zago feno eri fore hu'na'e.

<sup>20</sup> Hagi Gati nagakura amanage hu'ne, Gati naga'mofo mopama erira huzmante'nimofona, ra agi amigahaze. Gati'a laionimo'ma mago'a zagagafama aheno avufgama asenima tagana vazinaku'ma pri hu'neno kva huno mani'neankna hu'ne. <sup>21</sup> Agra kva vahe'mo'za eriga mopa, knare'ma hu'nea mopa eri'ne. Hagi kva vahe'timima atruma hu'nafina Ra Anumzamoho fatgo avu'avara nehuno, tra ke'a amage'ante'ne.

<sup>22</sup> Hagi Dani nagakura amanage hu'ne, Dani naga'mo'za kasefa laionigna hu'za Basani kumatetira akasi hu'za hara eme hugahaze.

<sup>23</sup> Hagi Naftali nagakura amanage huno hu'ne, Naftali naga'mo'a Ra Anumzamoho avu'ava zampine asomupine aviteno nemanino, hagerinkaziga mopane, sauti kaziga mohanena éri'ne.

<sup>24</sup> Hagi Asa nagakura amanage hu'ne, Asa naga'mo'za mago'a nagara zamagatere'za tusi'a asomupi nemanisage'za zamafuhe'mo'za zamagrikura tusiza hu'za zamavesi zmantegahaze. Hagi olivi masavemo'a rama'a hanige'za tagi'za zamaga sese hugahaze. <sup>25</sup> Hagi kuma'zmimofo kafama erigino rentrakoma hu'zana, ainireti'ene bronsireti'ene tro hunente'za, mago zankura ontahi knare hu'za manigahaze.

<sup>26</sup> Israeli vahe'mota, tagri Anumzankna anumzana magora omani'ne. Hagi tagri'ma taza huku'ma ne-egeno'a, hampomo'a karisi'agna huno hanavenentake masa'anee avreno ne-e. <sup>27</sup> Manivava Anumzamo'a fraki kumatie. Mevava azampi Agra zamavareno vano nehuno, ha' vahetamia azeri ante'nena, zamahe fri vagareho! <sup>28</sup> Hagi Israelina kva huntesigeno knare huno manigahie. Hagi Jekopuna ha' vahe'amo'za azeri havizana osanageno, wainine witinema avi'mate'nea mopafi mani'enkeno, monafintira ata kora runtegahie. <sup>29</sup> Israeli vhahera muse hihoh, ina vahe Ra Anumzamo'a tamagri'ma tamagu'ma vazi'neaza huno zamagura vazi'nea vhahera mani'naze? Agra tamazama nehia hankone, tamazama higetama ha'ma azerita agatemaneraza bainati kazi mani'ne. Ha' vahe'mo'za tamagafi evasesageta zamagumpi tamaga reneta avoa hagegahaze.

## 34

### *Mosese'ma fri'nea naneke*

<sup>1</sup> Anante Mosese'a, Moapu agupoa atreno Nebo agonamofona Pisge nehaza morusapi uhanati'ne. Ana agona Jeriko kuma'mofona zage hanati kaziga'a me'ne. Ana agonamofo morusapi uhanatigeno, Ramo'a maka Giliati agonareti vuno Dani kumate vuno, <sup>2</sup> maka Naftali mopane, Efraemine Manasekizni mopane, maka Juda mopa meno zage fre kaziga hageri ankena mopare uhanatiteno, <sup>3</sup> Negevi mopane, Jeriko kuma'mofa tava'onte'ma me'nea agupoma, tofe aninagna zafamo'ma tusi'zama hu'nea agupomo'ma vuno Zoama uhanati'nea mopa averi hu'ne. <sup>4</sup> Hagi ana mopama Ra Anumzamo'ma Mosesema averi'ma huteno amanage huno asami'ne, e'ina mopa Abrahamuma, Aisakima, Jekopuma huvempa hu'na huhampri zamante'na, tamagehe'mofona zamigahue hu'na hu'noa mopa, kaveri hugenka kagra kavufinti kananagi, ana mopafina uofregahane.

<sup>5</sup> E'ina hutegeni Ra Anumzamofo eri'za ne' Mosese'a Ra Anumzamo'ma hu'nea kante Moapu mopafi fri'ne. <sup>6</sup> Ra Anumzamo'a Bet-Peori kuma tava'onte Moapu mopafi Mosesena asente'neanagi, anama asentea mati'a mago vahe'mo'a onkegeno meno menina ama knarerera ehanati'ne. <sup>7</sup> Hagi Mosese'a 120'a zage kafu huteno fri'neanagi, hankave'a megeno, avurgamo'a knare hu'negeno fri'ne. <sup>8</sup> Anama Mosese'ma frigeno'a Israeli vahe'mo'za 30'a zage knamofo agu'afi Moapu agupofina zavira nete'za, zamasunkura hu'na.

<sup>9</sup> Hagi Mosese'ma ofri'neno, Nuni nemofo Josua anunte azana anteno nunamu huntogeno, knare antahintahima ami' avamumo'a agripi aviteno mani'ne. Hagi Ra Anumzamo'ma Mosese'ma hunte'nea nanekema Josua'ma Israeli vahe'ma zmasamiana antahinemi'za avariri'naze.

<sup>10</sup> Ana higeno ana knaret'i'ma eno meninena, Israeli vahepin Ra Anumzamo'enema znavufi ogé'agema nehukema nanekema hu'na'a ne' Mosese kna kasnampa nera eforera osu'ne. <sup>11</sup> Na'ankure Ra Anumzamo'a Mosese azante higeno, Isipi mopafina Feronte'ene mika eri'za vahe'are'ene, maka mopa'afinena maka kaguvazane, avame'zanena erifore hu'ne. <sup>12</sup> Israeli vahe'mokizmi zamavufima hankavenentake hihamu'anu, Isipi vahe'ma zamazeri koro'ma hu'nea kna vhahera eforera osugahaze.

## Josua Josua Kre'nea Avontafera

*Ra Anumzamo'ma Josuama azeri hankaveti ke asmi'nea naneke*

<sup>1</sup> Ra Anumzamofo eri'za ne' Mosese'ma frigeno, Nuni nemofo Josuana Mosesema aza huno eri'za e'neria ne' Ra Anumzamo'a anage huno asami'ne. <sup>2</sup> Nagri eri'za ne' Mosese'a hago fri'ne. E'ina hu'negu menina kagra ama Israeli vahera zamavarenka Jodani tina takaheta kantu kaziga zamiku'ma hu'noa mopare uhanatiho. <sup>3</sup> Hagi Nagra Mosese'ma huvempama hunte'noa kante ante'na, ina mopare'ma tamagiamo rentesaza mopa maka tamamigahue. <sup>4</sup> Ana mopamofa ometre emetre hu'amo'a, sauti kaziga ka'ma mopareti vuno, noti kaziga Lebanoni vuteno, Yufretisi rantinte evanigeno, ana maka Hiti vahe mopane, Jodani tinteti vuno zage fr'e kaziga Mediterenieni ra hagerimofo ankenare uhanatigahie. <sup>5</sup> Hagi Josuagama maninka vanana kna'afina, Mosesema hu'noaza hu'nagra kagrane mani'ne'na namefira huogamisugeno, mago vahe'moe'huno hara huno kazeri kageteoregahie.

<sup>6</sup> Hagi kagra korora osunka oti hanavetio, na'ankure Nagrama huvempa hu'na Israeli naga'mokizmi zamafahae'ima zamigahue hu'nama hu'noa mopare zamavarenka vugahane. <sup>7</sup> Hanki korora osunka oti hankavenentinka, eri'za vahemi'amo Mosese'ma kasami'nea kasegeni'a kamefira huminka ufregre efregera osunka, amege ante fatgo huo. E'inama hanankeno'a, maka zama banana zamo'a knare'zanke hugahie. <sup>8</sup> Ama ana kasegema me'nea avontafera kagenera okaninka, feru'ene kenege'enena rempi hvava hunka antahio. E'inama nehunka anampima krente'nea kema amage antesankeno'a, maka'zama banana zamo'a knare'zanke hugahie. <sup>9</sup> Hagi Nagra ko' huhankaveti'na hugante'nogu korora osunka oti hanaveti'nenka, kamanogura hunka kahirahikura osuo. Na'ankure Ra Anumzana kagri Anumzamo'na maka kazigama vanantega kagrane vugahue.

<sup>10</sup> Higeno Josua'a amanage huno Israeli kva vahe'mokizmia zamasami'ne, <sup>11</sup> Seli noma ki'za mani'naza kuma'mofo amu'nompi nevuta, Israeli naga' amanage hutma zamasamaho. Ne'zama nesaza zana retro hiho. Na'ankure tagufa kna evutesigeta Jodani tina takaheta kantu kaziga Ra Anumzana tamagri Anumzamo'ma tamigahue huno'ma hu'nea mopa ome erigahaze. <sup>12</sup> Hagi Josua'a Rubeni naga'ene Gati naga'ene, Manase naga'ma amu'nompinti refkoma hu'naza naga'enena amanage huno zamasmi'ne, <sup>13</sup> Maka nanekema Ra Anumzamofo eri'za ne' Mosese'ma tamasami'nea kegura tamagera okaniho. Ra Anumzana tamagri Anumzamo'a mani fru hiho huno ama mopa tamagrira neramie. <sup>14</sup> Hagi Jodani timofo kama zage hanati kaziga Mosese'ma tamagri'ma tami'nea mopare a' mofavre'tamine, memene sipisipine bulimakao afuzagatamine manigahaze. Hianagi tamagripinti'ma ha'ma nehaza vene'ne'amo'za tina takahet'zma kantu kaziga vu'za, zamafuhe'ina ugota hu'za zamazahu'za hara huo mopa erisageno, tamagri'ma hu'neaza huno Ra Anumzana tamagri Anumzamo mani fru nezamino mopama nezamia moparera umanitesageta, ete etma Jodani timofo kama kaziga Ra Anumzamofo eri'za ne'mo Mosese'ma tami'nea moparera emanigahaze. <sup>15</sup> Josua'ma anagema hutege'za, agri kemofo nona'a amanage hu'naze, nazano hihoma hunka hana zana nehuta, inantego vihoma hunka

hurantesantega vugahune. <sup>17</sup> Hagi tagra ana maka Mosese'ma hiankema antahita amage ante'nonaza huta, kagri kea amage antegahune. Ra Anumzana kagri Anumzamo Mosese'ene mani'neaza huno kagrane manigahie. <sup>18</sup> Hanki iza'o kagri kema ontahino ha'ma regantesia vhahera ahe frigahune. Hagi korera osunka, oti hankavetio.

## 2

### *Josua'ma afureno ke'netre huzmantegeke Jeriko vu'na'a naneke*

<sup>1</sup> Hagi anante Sitimima manine'za Nuni nemofo Josua'a tare afureno ke netre'na oku'a huznanteno, amanage huno zanasami'ne, Kantu kaziga Kenani mopafi vutna Jeriko kumara ome afuretna keso'e hi'o. Higeke vuke mago monko a' agi'a Rehapu'e nehaza a'mofo nompi ana kenagera umase'na'e. <sup>2</sup> Hianagi mago'a vahe'mo'za vu'za Jeriko kumate kini nera amanage hu'za ome asami'naze, kva huo, meni kenage mago'a Israeli naga'mo'za mopati afure'za kenaku e'naze. <sup>3</sup> Hagi Jeriko kini ne'mo'a anankema nentahino'a, amanage huta Rehapuna ome asamiho huno vhahera huzmante'nne. Maka tagri mopama afure'zama kenaku'ma kagritegama e'za nonka'afima emani'naza vhahera, zamavare meg'i' zamatro.

<sup>4</sup> Hianagi Rehapu'a ana netre'na zanavre franekino amanage huno zamasami'ne, Tamage nagritera e'na'anagi zanagra inantegati e'na'e nagra ontahi'noe. <sup>5</sup> Hagi kinagama rankumamofo kahama erigi knama koftama nehigeke vu'na'anagi, iga vu'na'e nagra ozanage'noe. Hagi ame huta zanavaririta vanuta, ome zanazerigahaze. <sup>6</sup> Hianagi Rehapu'a ana ne'trena zanavreno noma'amofo agofetu kukenama tro'ma nehaza traza anakino ante'nefi ome frakizanante'nne. <sup>7</sup> Anagema hige'za ana netrema zanazerinaku zamagare'za Jodani tintega vahe'mo'zama tak'a'ma nehazarega nevazageno'a, rankumamofo kahana erigi'naze.

<sup>8</sup> Hagi ana afure ne'tremoke ko'ma masezanku Rehapu'a nomote marerino, <sup>9</sup> amanage huno ome zanasami'ne, Nagra antahi'noe, ama mopa ko Ra Anumzamo tamagri tam'i'ne. Ana higeta tagra tamagrikura tusi'a koro nehunkeno, maka ama mopafima mani'naza vahe'mo'zanena tamagrikura koro nehu'za tusi'a zamahirahiku nehaze. <sup>10</sup> Na'ankure Isipiti'ma atreta azageno Ra Anumzamo'ma tamagri tamavufima koranke hagerima erineraneno, mopama eri hagagema higetama e'naza zana, tagra ko antahi'none. Hagi Jodani timofo kantu zage hanati kaziga Amori vahe'mokizmi kini netre' zanagi'a Sihonine Oginema zanahe fri'naza zanku'enena ko antahi'none. <sup>11</sup> Tagrama ana kema nentahita, tamagrikura tusi koro hu'none. Na'ankure Ra Anumzana tamagri Anumzamo'a monane mopenema tro'ma hu'nea Anumza mani'ne. <sup>12</sup> E'ina hu'negu menina muse huranantoanki, Ra Anumzamofo avufi hvempa hutna, nagrama so'e navu'nav'a'ma huranantoankna hutna, nagri naga'ma so'ema huzmantesu'ema hanuta'a, mago avame'za nami'o. <sup>13</sup> Hagi nenfa'ma nenerera'ma nasarehe'ima nanunknahe'ine naga zami'nena, zamaza hinke'za, Israeli vahe'mo'za tahe ofriho.

<sup>14</sup> Anante ana ne'tremokea Rehapuna amanage huke asami'na'e, Na'a agafare tagra amafina e'no'e, kagra vahe'ma ozamasamisana, henkama Ra Anumzamo'ma ama mopama tamisia zupa antahigamigahune. Tagra hvempa hu'ankino anama osanukeno'a, Ra Anumzamo'a tazeri haviza hugahie.

<sup>15</sup> Anante Rehapua nomofona zaho eri kampintinofite zanatregeke kuma keginamofo meg'i'a urami'na'e. Na'ankure noma'amo'a kumamofo keginare rehe'negu anara hu'ne. <sup>16</sup> Ana nehuno amanage huno zamasami'ne, Tanganaku'ma nehakaza vahem'o'za tutagiha huznantegahazanki agonarega freta vuta tagufa kna umani'neke'za etesageta, ete e'natega vi'o. <sup>17</sup> Higeke ana netremokea Rehapuna amanage huke asami'na'e, hanki kagrama hanketa hvempa hugante'noa kea tagrama kasamu'a kema amage'ma antesanketa'a, ana hvempa keti'a eri otreghau'e. <sup>18</sup> Hanki menina antahio, ama zasi'ma eri kama atiramu'a kantera, kagra ama koranke nafira anakinte'enka, negafama negrerama kasarehe'ima maka nagaka'anena zamavaretru hunka nonka'afi mani'nenketa tagra Israeli vahenena ama mopafina egahune. <sup>19</sup> Hagi naga'kafinti'ma magomo'ma kagri noma atreno, meg'i'a kumamofo kampima vano nehanige'zama ahe frisageno'a, e'i tagri hazenkeompage agri'a hazenke. Hianagi magomo'ma kagri nompi mani'nenige'za eme ahe frisageno'a, e'i tagri knaza megahie. <sup>20</sup> Hianagi tagrama e'no'a eri'zamofo nanekevahe'ma zamasamisankeno'a, kagrama hanketama hvempama hu'no'a kemofo nona'a tagra hazenke e'origahu'e. <sup>21</sup> Hanki Rehapua ke zanirera amanage hu'ne, Mago narimpa huanki kema ha'a kante anteno anzana fore hino, nehuno huzantan-tegkema nevakeno'a ana koranke nafira noma'amofo zaho'ma eri kahante anakinte'ne.

<sup>22</sup> Hagi ana netremokea atreke agonarega vuve tagufa zagegna fraki'nake'za, zanagenema re'naza vahem'o'za karanka hake vagare'za vu'nazanagi ozanage'za, ete rukrahe hu'za Jeriko e'naze. <sup>23</sup> Ana agonafintira ana netremokea uramike Jodani tina ome takahike vuve ana maka'zama zanagrite'ma fore'ma hu'nea zana, Nuni nemofo Josuana ome asami vagare'na'e. <sup>24</sup> Anage Nehuke Josuana asamike, tamagerafa huno Ra Anumzamo'a ana maka mopa tagri tazampi ante'ne. Na'ankure ana mopafima mani'naza veamo'za tagriku'ma nehu'za, zamahirahi nerege'za tusi' koro nehaze.

### 3

#### *Israeli vahem'o'za Jodani ti takahenaza naneke*

<sup>1</sup> Hagi Sitimima mani'nazaretira Josua'ene maka Israeli vahem'o'za nantemerame ot'i'za Jodani tinte e'za, seli nonkuma eme ante'za mani'naze. <sup>2</sup> Anante tagufa zage kna evutegeno, kva vahem'o'za kuma'ma ante'za mani'nafi vano nehu'za, <sup>3</sup> amanage hu'za zmasami'naze, Tamagrama kesanageno'ma Ra Anumzana tamagri Anumzamofo huhagerafi hvempage vogisima Livae naga'pinti pristi vahem'o'zama erisga hu'zama vanagetma, mani'naza kumara atretma otitma zamavariritma viho. <sup>4</sup> E'ina nehutma kama vanaza kana keso'e hiho. Na'ankure omnaren kasefa kante neaze. Hianagi tamagra huhagerafi hvempage vogisimofo tavaonterea ovutma, 1kilomita naza kankamu amitama, afete echo.

<sup>5</sup> Anante Josua'a Israeli vahera amanage huno zamasami'ne, tamagra'a tamazeri agru hiho. Na'ankure Ra Anumzamo'a tamagri amu'nompi ruzahu kaguvala okina erifore hugahie. <sup>6</sup> Hagi Josua'a pristi vahera amanage huno zamasami'ne, tamagra huhagerafi hvempage vogisia eritma vahemokizmi zamavuga vugoteho, hige'za ke amage ante'za eri'za vahemokizmi zamavuga vugota hu'naze.

<sup>7</sup> Hagi Ra Anumzamo'a Josuana amanage huno asami'ne, Nagra menina agafa hu'na Israeli vahem'o'za zamavuhi kagi'a erisga hanuge'za, zamagrama

ke'za antahi'zama hanazana, Mosese'enema mani'neaza huno Anumzamo'a kagri'enena mani'ne hu'za antahigahaze. <sup>8</sup> Hagi menina huhagerafi hvempage vogisima erisaza pristi vhahera amanage hunka zamasamio, tamagrama Jodani timofo ankenare'ma vanutma, ti amu'nompi vutma ome oti fatgo hiho.

<sup>9</sup> Higeno Josua'a Israeli vhahera amanage huno zamasami'ne, amare erava'o huta Ra Anumzana tagri Anumzamo'ma hiankea eme antahih. <sup>10</sup> Nehuno Josua'a amanage huno Israeli vhahera zamasami'ne, ko'ma mani'naza Kenani vahe'ma, Hiti vahe'ma, Hivi vahe'ma, Peresi vahe'ma, Gilgasi vahe'ma, Amori vahe'ma, Jebusi vahe'ma zamahe panini hanigeta, kasefa huno mani'nea Anumzamo'a amu'nontifi mani'ne hutma keta antahita hugahaze. <sup>11</sup> Keho, maka mopama kegava hu'nea Ra Anumzamofo huhagerafi hvempage vogisimo'ma, vugota huno Jodani tima takahenigeta, <sup>12</sup> menina Israeli vahe'mota mago'mago naga nofipintira mago vahe'huhamprita zmavaretere hinke'za 12fu'a vahe'eho. <sup>13</sup> Hagi Ra Anumzama maka mopama kegava hu'nea Anumzamofo Agri huhagerafi hvempage vogisima erisaza pristi vahe'mo'zama zamagama Jodani timpima ome resageno'a, tima ne'eazamo'a taneno kamanu kaziga magopi ante hihihuno marerigahie.

<sup>14</sup> Anante pristi vahe'mo'za huhagerafi hvempage vogisia eri'za vugota nehzage'za, Israeli vahe'mo'za ana pristi vahe'mokizmi zmavariri'za Jodani tina takahenaku seli nozamia tagana vazi'za e'neri'za maka'za zamia retro hu'naze. <sup>15</sup> Hagi maka kafufina ne'zama hamare knarer Jodani timo'a tusi ti hageterne nehiane. Hagi e'i ana knarekino timo'a amutu'amu mutu'nehifi pristi vahe'mo'za huhagerafi hvempage vogisia eri'za Jodani timofo ankenare ehanati'za zamagia timpi eme razageno, <sup>16</sup> kamaniti'ma e'nea timo'a taneno ogamanu afete Zaretani tavaonte me'nea rankuma Adamua, magopi ome ante hihi huno agonagna huno marerigeno, kami kazigama fri'nea hagerintegama evia timo'a tane vagarege'za hagage' mpare vu'za kantu kaziga Jeriko tava'onte uhanati'naze. <sup>17</sup> Hagi Ra Anumzamofo huhagerafi hvempage vogisima zamafunte'ma kofi'naza pristi vahe'mo'za, timofo amu'nompima hagegema hu'nere ot hanaveti'nage'za, ana maka Israeli vahe'mo'za Jodani timo'ma hagagema hu'nea moparera evu vagare'za kantu kaziga vu'naze.

## 4

### *12fu'a have Jodani timpinti ati'za ome ante'naza naneke*

<sup>1</sup> Hanki maka Israeli vahe'mo'za Jodani tima takaher vagaretazageno, Ra Anumzamo'a Josuana amanage huno asami'ne, <sup>2</sup> Israeli vahepintira 12fu'a vahe' zamagi hinke'za eh. Hagi mago'mago naga nofipintira magoke etere hanagenka, <sup>3</sup> Jodani timofo amu'nompima pristi vahe'mo'zama zamagama re'za ot'i'nareti 12fu'a zamente zamente havea ome erita vuta, seli noma kita meni kenage'ma masesaza kumate omenteho hunka zamasamio. <sup>4</sup> Higeno Josua'a Israeli naga nofipinti mago mago zamagi hutere huno 12fu'a vahe'ma huhampr'i'ne nagara kehige'za e'naze. <sup>5</sup> Hagi Josua'a amanage huno zamasami'ne, Ete Jodani timpi uramita Ra Anumzana tamagri Anumzamofo huhagerafi hvempage vogisima eri'za ot'i'naza pristi vahe'mokizmi zamagiafinti 12fu'a naga'motma naga nofitamire huhampritere hutma mago'mago havea atita tamafunte erita eh. <sup>6</sup> Hanki henkama tamagripinti'ma fore'ma hanaza mofavremo'za ana haferamima

nege'za, ama avame'zana nagafare me'ne? hu'za tamantahigesageta,  
<sup>7</sup> tamagra amanage hutma zamasamaho, Ra Anumzamofo huhagerafi huvempage vogisima eri'za Jodani timpima azageno'ma tanege'zama hagege mopare'ma takahenazagu, Israeli vahe'mo'zama nege'za antahimi vava hanaza avame'za me'ne huta zmasamigahaze. <sup>8</sup> Hanki Ra Anumzamo'ma Josua'ma asami'nea kante ante'za, Jodani timofo amu'nompinti Israeli naga'nofite huhampri'za mago'mago have atitere hu'za ana maka 12fu'a havea eri'za, vu'za kuma'ma ome ante'za masazare anante ome ante'naze. <sup>9</sup> Hanki Josua'a agranena 12fu'a have erino Jodani timofo amu'nompinta Ra Anumzamofo huhagerafi huvempage vogisima pristi vahe'mo'zama eri'ne'zama oti'nazare magopi ante atru higeno meno eno ama knarera ehanati'ne. <sup>10</sup> Hagi Ra Anumzamofo huhagerafi huvempage vogisima eri'naza pristi vahe'mo'za Jodani timofo amu'nompi oti'nazageno, ana maka zama Ra Anumzamo'e'ne Moses'ene'na Josuama asamike, huo huke hunte'na'a zana, ana maka huvagare'naze. Hige'za Israeli naga'mo'za ame'ama hu'za Jodani tina takahenazagu vu'naze. <sup>11</sup> Hanki maka Israeli vahe'mo'za Jodani tima takahenazagu kantu kazigama eme oti vagarazage'za, timpintira Ra Anumzamofo huhagerafi huvempage vogisima pristi naga'mo'za eri'za ome zamagatere'za zamavuga evu oti'naze. <sup>12</sup> Hagi Rubeni naga'ma Gati naga'ma Manase naga'ma amu'nompinti re-fko hu'naza naga'mo'zane ha'ma huga vahe'amozae Israeli naga'mokizmi zamavuga ha'zana tro tra hu'za, Moses'ema zamasami'nea kante ante'za ugote'za vu'naze. <sup>13</sup> Anampina 40 tauseni'a naza ha'ma huga vahera Ra Anumzamofo avurera vu'za, Jeriko tavaonte mago agupo me'nevi vu'naze. <sup>14</sup> Ana knazupa Ra Anumzamo'a Israeli vahe zamavufi Josuana azeri ante'ama hige'za, Mosesenkema antahimi'nazaza hu'za Josuana ke'a antahimi'naze. <sup>15</sup> Anante Ra Anumzamo'a Josuana amanage huno asami'ne, <sup>16</sup> Zamasamige'za huhagerafi huvempage vogisima e'neri'za pristi vahe'mo'za Jodani timpintira atre'za ankenarega emareriro. <sup>17</sup> Higeno Josua'a pristi nagara huzamanteno, Jodani timpintira atreta ankenarega atiramita eho. <sup>18</sup> Anagema hige'za Ra Anumzamofo huhagerafi huvempage vogisima eri'za oti'naza pristi vahe'mo'za, Jodani timofo amu'nompintira atre'za ankenarega e'za, timpinti'ma zamagiamma erisga hu'za mopare'ma razageno'a, Jodani timo'ete hageno ko'ma hu'neaza huno evu'ne. <sup>19</sup> Hagi Israeli vahe'mo'za ese ikamofona 10ni knazupa Jodani tina takamahe'za kantu kazigama vute'za, Jeriko kuma'mofona zage hanati kaziga Gilgalie nehazare ome kumara ante'naze. <sup>20</sup> Hanki 12fu'a havema Jodani timpinti'ma ati'zama eri'za e'naza haveramina, Gilgalie nehazare ana haveramina Josua'a magopi eri ante atru hu'ne. <sup>21</sup> Ana nehuno Israeli vahe'mokizmia amanage huno zamasami'ne, henkama fore'ma hanaza mofavremo'zama zamafahem'ima zamantahige'zma, ama haveramina nagafare mane'ne? hu'zama zamantahigesage'za, <sup>22</sup> amanage hu'za zamasamaho, Israeli vahe'mo'za Jodani timo'ma hihima huno marerigeno mopamo hagegema hu'nege'za takahenazagu e'naza zanku negeta antahimi avame'za me'ne hu'za zmasamigahaze. <sup>23</sup> Na'ankure Ra Anumzana tamagri Anumzamo Koranke Hagerima hu'neaza huno Jodani tina eri hagege higeta, hagege mopare takaheta evagare'none. <sup>24</sup> E'ina hu'negu ama mopafi maka vahe'mo'zama ke'za antahenazana, Ra Anumzamofo azamo'a hanavenentake hu'ne nehanageta, tamagra Ra Anumzana tamagri Anumzamofonke maka zupa korora huntevava hiho.

## 5

*Israeli vene'nemo'za zamagoza anoma'a Gilgali kumate eme taga hu'naza naneke*

<sup>1</sup> Amori Kini vahe'ma Jodani timofo zage fre kazigama nemanimo'zane, Kenani Kini vahe'ma Meditereniani hagerimofo ankenaregama nemanimo'za, Ra Anumzamo'ma Jodani tima eri hagegema hige'za Israeli vahe'mo'zama Jodani tima takama he'naza kema nentahi'zageno, hanave'zamia omanege'za koro hu'za ha'ma hanaza zamagesa osu'naze.

<sup>2</sup> Hagi ana knafina Ra Anumzamo'a amanage huno Josuana asami'ne, Havereti asane kazina trohunka vene'neramine ne'mofavre naga'ma zamagoza anoma tagama osu'nesaza nagara taga huzamanto. <sup>3</sup> Higeno agra'a Josua'a havereti kazina trohuteno, ana vene'nene ne'mofavre nagara Ha'alotie nehaza osi agonare zamagoza anona taga huzmante'ne. <sup>4</sup> Hagi ha'ma huga vene'nema Isipiti'ma etirami'naza vahe'mo'za 40'a kafufima ka'ma kopima ne-eza fri vagare'nazagu Josua'a e'inahu zana huzamante'ne.

<sup>5</sup> Hanki ana maka vene'nema Isipiti'ma atre'zama etirami'naza vahe'mo'za zamagoza anona tagahute'za e'naze. Hianagi karankama ka'ma kopima ne-ezama kasezamante'naza vene'ne'a zamagoza anona taga osu'naze. <sup>6</sup> Israeli vahe'mo'za 40'a kafufi ka'ma kopina e'naze. Ha'ma huga vene'nema Isipiti'ma etirami'naza vahera e'ina knafi fri vagare'naze. Na'ankure Ra Anumzamofo kea amage ontenuag, Agra amanage hu'ne, ana vene'nefintira magomo'e huno zamafahé'ima zamigahue hu'na amirimo'ene tumerim'o'ma avite'nea mopama huvempama hu'zmante'noa moperara ovugahaze. <sup>7</sup> Ka'ma kopima zamagri noma erisagu'ma kasezmant'e'naza ne'mofavre'ramina Josua'a zamagoza anona taga huzamante'ne. Na'ankure karankama ne-eza zamagoza anona taga huozmant'e'nagu anara hu'ne. <sup>8</sup> Ana maka Israeli vene'nemo'za zamagoza anoma taga hute'za, kuma'ma ante'zama mani'nare mani'nageno, namuzmimo'a tegani'ne. <sup>9</sup> Anante Ra Anumzamo'a Josuana amanage huno asami'ne, ko'ma tamagra Isipima mani'neta kazokzo eri'zama eneritma tamagazegu hu'nazane. Hianagi Nagra menina tamagri tamagaze zana eri netroe. Hige'za ana kumakura Gilgalie\* hu'za agia antemi'nageno, ana agimo'a meninena meno e'ne.

<sup>10</sup> Hanki Israeli vahe'mo'za Jeriko agupofi Gilgali kumate mani'ne'za, ese ikana 14ni knamofo kinaga Ra Anumzamo'ma ozamahe zamagatere'nea zanku antahimi'za ra ne'za kre'za nene'za musena hu'naze. <sup>11</sup> Ana ne'zama nete'za, anante knazupa Kenani mopafinti ne'zana agafa hu'za zo'ore bre-tine, kre hagege hu witinena ne'naze. <sup>12</sup> Israeli naga'mozama Kenani mopafinti ne'zama agafama hu'za naza knazupage, mana ne'zamo'ma mon-afinti'ma eneramiazana vagare'ne. E'ina hige'za Israeli vahe'mo'za ana kafufina mana ne'zana e'ori'nazanki, Kenani mopafinti ne'zanke ne'naze.

*Bainati kazi azampi eri'nea ankero ne' Josua'a ke'nea naneke*

<sup>13</sup> Mago zupa Josua'a Jeriko kuma tvaonte eman'i'neno keana, mago ne'mo'a bainati kazina azampi eri'neno, avuga ot'i'negeno negeno urava'o huno, Kagra tagri vahepi, ha' vaheti mani'nane?

<sup>14</sup> Higeno ana ne'mo'a huno, A'o nagra kagri kaziga vahera omani'na, ha' vahe kaziga vahera omaninoanki, nagra Ra Anumzamofo sondia vahete ugota kva ne' e'noe. Higeno Josua'a avugosaregati kepri huno agiafi renarenno amanage hu'ne, Eri'za vahekamo'na na'a hugahufi nasamio.

\* <sup>5:9</sup> Gilgaliema hu'neana Hibru kefina agaze eri atrene hu'ne.

**15** Higeno Ra Anumzamofo sondia vahete ugota kva ne'mo'a Josuana amanage huno asmi'ne, Kagra kaga nona katufe tro. Na'ankure amama ot'i'na mopamo'a ruotage hu'ne. Higeno Josua'a kema hiaza huno agia nona katufetre'ne.

## 6

### *Jeriko rankumamo'ma fragu vazirami'nea zamofo naneke*

**1** Hagi Jeriko kumapi vahe'mo'za Israeli vahe'mokizmigu koro nehu'za kumapima ufre kafantamina erigi vagarazageno, mago'mo'e huno fegira atiramige, marerigera osu'ne. **2** Hagi Ra Anumzamo'a amanage huno Josuana asami'ne, Antahio! Jeriko kuma'ene, kini vahe'ane, hanave sondia vahe'anena ko kagri kazampi ante'noe. **3** Hanki kagrane maka sondia vahe'zaganena, Jeriko kumamofona mago mago zagefina magoke zupa kagitere nehinkeno, vuno 6si zage knare uhanatino. **4** Hagi 7ni'a pristi vahe huzamantege'za 7ni'a ufema ve sipisipimofo pazivete'ma tro'ma hu'naza ufena e'neri'za huhagerafi huvempage vogisimofo avuga viho. Hanki 7ni zage knarerka kagrane sondia vahe'enena Jeriko kumamofona 7ni'a zupa kaneginke'za pristi vahe'mo'za ufena reho. **5** Hagi pristi vahe'mo'zama erivazu hu'zama zazate'ma ufema resagenkama nentahinka, ana maka vhahera zamasamige'za ivimo agazamo nehu'za rankegege hiho. Anama hanageno'a, Jeriko rankumamofo have keginamo'a fragu vaziramina, ana makamotma kefatgo hutma ana kumapina ufreho. **6** Hagi Nuni nemofo Josua'a pristi vhahera kehige'za azageno anage huno zamasami'ne, Ra Anumzamofo huhagerafi huvempage vogisia erisga hutma nevinke'za, 7ni'a pristi vahe'mo'za 7ni'a ufema ve sipisipimofo pazivenuti'ma tro'ma hu'nazana eri'za, huhagerafi huvempage vogisimofo avuga vugoteho. **7** Anante Josua'a Israeli vhahera zamasamino, Vuta Jeriko rankumara ome kagigahaze. Hianagi zamatreke'za sondia vahe'mo'za Ra Anumzamofo huhagerafi huvempage vogisimofo avuga vugoteho. **8** Anante Josua'ma kema zamasamitege'za, 7ni'a pristi naga'mo'za ve sipisipimofo paziveteti'ma 7ni'a ufema tro'ma hu'naza eri'za Ra Anumzamofo avure ufena re'za nevazageno, zamefira Ra Anumzamofo huhagerafi huvempage vogisia eri'za vu'naze. **9** Hanki mago'a sondia vahe'mo'za pristi vahe'mokizmi zamavuga nevzage'za, mago'amo'za huhagerafi huvempage vogisimofo amefiga'a neage'za, ufena re'za e'naze. **10** Hianagi Josua'a anage huno vhahera zamasami'ne, Mago'mo'e huno rankea osuno, mago agerura orutfa hino. Hagi nagrama ranke hihoma hu'nama hanugeta, rankea hugahaze. **11** Anante Josua'a pristi nagara huzamantege'za Ra Anumzamofo huhagerafi huvempage vogisia erisga hu'za, magoke zupa Jeriko rankumara kagite'za, atre'za kuma'ma omente'za mani'nafi ana kenagera emase'naze. **12** Hanki anante knazupa nanterampi Josua'a otige'za, pristi naga'moza'nena Ra Anumzamofo huhagerafi huvempage vogisia erisga hu'za vu'naze. **13** Hagi 7ni'a pristi naga'ma 7ni'a ufema eri'naza naga'mo'za Ra Anumzamofo huhagerafi huvempage vogisimofo avuga ugote'za nevu'za, ufenare'za nevazageno, sondia vahe'mo'za ana huhagerafi huvempage vogisima eri'zana vahe'mokizmi zamefiga'a ne-eza ufenare'za vu'naze. **14** Hanki anante zage knarerka ko'ma hu'nazaza hu'za, magoke zupa Jeriko rankumara kagite'za atre'za vu'za kuma'ma emente'za mani'nafi

emase'naze. Ana avu'ava zanke 6'a zage knafina hu'za vu'naze. <sup>15</sup> Hanki 7ni zagekna zupa nanterampi oti'za ko'ma hu'nazaza hu'za Jeriko kumara kagi'naze. Hianagi ana knarerira 7ni'a zupa Jeriko ran kumara kagi'naze. <sup>16</sup> Hagi 7nire'ma kamanegi'za, pristi vahe'mo'za ufe nerazageno Josua'a vahera amanage huno zamasami'ne, ra tamageru rutma ivimo agazamo hiho. Na'ankure Ra Anumzamo Jeriko rankumara ko tamagri tamazampi ante'ne. <sup>17</sup> Hanki Jeriko kuma'ene anampima me'nea zantamia ana maka Ra Anumzamofontega mago ofa amiankna hutma eri haviza hugahaze. Hianagi afure vahe'ma huzmantoke'zama e'naza naga'ma zamavare frakinegu monko a'Rehapune noma'afima mani'naza naga'anenke zamahe ofriho. <sup>18</sup> Hianagi kva hiho, Jeriko kumapintira magore hutma mago'zana e'oritfa hiho. Mago'zama erisutma Israeli naga'ma nemanuna kumapina hazenke avreta efregahaze. <sup>19</sup> Hianagi silvaretiro, goliretiro, bronsiretiro aenireti'ma tro'mahu zantamima Jeriko kumapinti'ma erisutma, e'i ruotage huno Anumzamofozza me'negu, ana maka eritma Ra Anumzamofozza zagoma nentafi omenteho. <sup>20</sup> Hanki pristi vahe'mo'za ufema ete nerage'za vahe'mo'zama nentahi'za, ana ufenkrafamofo avariri'za ivimo agazamo huza rankege nehazageno, rankumamofo have keginamo'a fragu vaziramige'za, maka vahe'mo'za zamavune ante'za miko kazigati ufre'za Jeriko rankumara ome eri'naze. <sup>21</sup> Mareri'za vea'ene mofavrene zamahehana nehu'za bulimakaone, sipisipine, tonkinena, anazanke hu'za zamahehana hu'naze.

<sup>22</sup> Anante Josua'a ko'ma afure netrema mopama ome ke'ogu'ma huzanante'nea netre'na zanasamino, tanagrama huvempa huntena'a kante antetna, ana monko a'mofo nompi umarerita agri'ene naga'anena ome zamavareta attiramiho huno huznantene. <sup>23</sup> Hanki ana tare afure ne'tremokea umarerike Rehapune nererane nefane, asarehe'ine ana maka naga'a zamavare'za Israeli naga'ma seli noma emegi'za mani'naza kumamofo meg'i eme zamante'naze. <sup>24</sup> Anante ana ran kuma'ene ana maka'zana teve tagintazageno te'ne. Hianagi silvaretiro goliretiro bronsiretiro aenireti'ma tro'ma hu'naza zantamina eri'za Ra Anumzamofozza nompima zagoma nentafi ome ante'naze. <sup>25</sup> Hagi Rehapune ana maka naga'a Josua'a ozmahe zamatrege'za mani'naze. Na'ankure tare afure netrema Josua'ma huznantegekema Jeriko kumate'ma vakeno'ma Rehapu'ma zanavre fra'ma ki'negu anara hu'ne. Hanki Rehapu nagapinti'ma fore'ma hu'naza vahera Israeli nagapine meninena mani'naze.

<sup>26</sup> Anante Josua'a hanavenentake kazusi kea amanage huno vea nagara zamasami'ne, Mago ne'mo'ma ama Jeriko rankumama azeri otisia ne'mofona, Ra Anumzamo'a azeri haviza hugahie. Hanki agrama eri'zama eri agafama hania knazupa, zage ne'mofavre'a frisigeno, kuma keginamofo kafaramima hagentesia zupa amite'namo'a frigahie. (1 King 16:34) <sup>27</sup> Ra Anumzamo'a Josua e'ne mani'negu agri agimo'a anama mani'naza mopafina haruharu huno vuno eno hu'ne.

## 7

*Ai kumate vahe'mo'zama Israeli vahe'ma ha'hu zamagatere'naza naneke*

<sup>1</sup> Hagi kuma'ma eri havizama hanafintira mago'zana e'oritfa hiho huno Ra Anumzamo'a Israeli nagara zmasami'neana, zamagra Agri kea eritre'za amagera onte'naze. Juda naga nofipinti nera Akanina Kami kasentegeno, Kamina Zimri kasentegeno, Zimrina Zera kasentegeno hu'nea ne'mo Ra

Anumzamo'ma Israeli nagara e'oriho huno'ma hunagru'ma huzmante'nea zana e'rinezgeno Ra Anumzamo'a Israeli vahera tusi arimpa ahezmante'nne.

<sup>2</sup> Hagi Jerikoma mani'nazareti Josua'a mago'a vahera huzmantege'za Ai kumate vu'naze. Ana kumara Bet-aven kuma tavaonte, Betel kumamofo zage hanati kaziga me'negeno, amanage huno huzmante'nne, frakita vuta ana kumara ome afureta keho. Hige'za kema hiaza hu'za Ai kumara ome afure'za ke'naze. <sup>3</sup> Hanki ana vahe'mo'za vute'za eza Josuana amanage huna'za eme asmi'naze, rama'a vahera zamatrege'za Ai kumate vahera hara ome huzmantege'za vu'za hara ome huzmantehe. <sup>4</sup> Anante 3 tauseni'a vahe'naza mareriza Ai kumate vahera hara ome huzmante'naze. Hianagi Ai kumate vahe'mo'za Israeli vahera zamahe'za zamagene rage'za fre'za e'naze. <sup>5</sup> Ai vahe'mo'zama Israeli vahe'ma zamagenema re'nazana, Ai rankumamofo kahanteti agafa hute'za, zamagene re'za agonaregati urami'za havema nefragazare urami'naze. Ana zupa 36si'a Israeli vahera zamahe frizageno Israeli naga'mo'za tusi'a koro hu'naze.

<sup>6</sup> Josua'a ana zanku antahintahi hakare nehuno, kukena'a tagato nehuno, Ra Anumzamofo huhagerafi huvempage vogisimofo avuga avugosaregati umseno mani'negeno kinaga se'ne. Hagi mikro Israeli kva vahe'mo'za Josua'ma hiaza nehu'za zamagra zamanunte kugusopa eri'za nefre'za, Josua'ene zmasunku nehu'za mani'nageno vuno kinga se'ne. <sup>7</sup> Hanki anante Josua'a amanage hu'ne, Hanavenentake Ra Anumzamoka kagra Jodani timofo kama kaziga Amori vahe'mo'za tazeri haviza hanazegu tavrenka e'nampi? Tagrama timofo kantu kazigama manisune hutama hu'nontegama manusina, amanahu zana forera osigeta knare huta manusine. <sup>8</sup> Israeli sondia vahe'mo'za ha' vahezmimofo zamagoro rukrahe hu'zma atre'za fre'za azanki, nagra na'ané hu'na Ra Anumzamoka hugahue? <sup>9</sup> Hanki Kenani vahe'mo'zane ama ana mopafima nemaniza vahe'mo'za ama anazamofo kema nentahi'za tagrira tavazagikagi'za tahe fanane hanageno, ama mopafina tagia omanegahie. Hanki kagri rankagima huhavizama osnagura kagra na'a hugahane? <sup>10</sup> Higeno Ra Anumzamo'a Josuana amanage huno asami'ne, Na'a higenka mopafina kavugosaregatira masetenka mani'nane, otio. <sup>11</sup> Hanki kotazana ko huvempa hu'na, Jeriko kumapima me'nea zantamina nagrike zanki maka eri havizama hiho hu'na huhagerafi huvempa kema hu'noana, Israeli naga'mo'za keni'a rutagre'za kumi hu'naze. Zamagra mago'azana musufase'za, zamagra'a fenozampi erinte havia hu'naze. <sup>12</sup> E'ina hu'negu Israeli naga'mo'za oti hanaveti'ne'za ha' vahe'zaminena hara osu'za, rukrahe hu'za ha' vahe'zmi koro fre'naze. Hanki eri haviza hiho hu'nama hunagru'ma huramante'noa zantamina erihavizama osnazana, Nagra tamagranena omanitfa hugahue. <sup>13</sup> Otinka Israeli vahera zamazeri agru nehunka zamasamio, zamagra'a zamazeri agru hiho. Na'ankure okina Ra Anumzamo'na tamagranne eme keaga hugahie. Ra Anumzana Israeli vahe'mokizmi Anumzamo'na amanage nehue, maka eri havizama hiho hu'noa zantamina eri'za e'naze. E'ina hu'negu tamagra ana zantamina eritre hana hutetage ha' vahetamia hara hu zamagateregahaze. <sup>14</sup> Hagi oki nanterana maka'motma eme atru hutetma taisi zokago reta kenkeno, ina nofipinti Ra Anumzamo'a huhamparigahie ana nofipintira nagate nagate etere nehanageno Ra Anumzamo'ma huhampri'nia nagapinti magoke magoke vene'ne etere hiho. <sup>15</sup> E'ina hanageno'a maka'zama eri haviza hihoma hu'noa zantamina erino e'nesimo'a eama hanigeta,

anamofona, agri'ene naga'ane ana maka zama'anena tevefi krerasageho. Na'ankure agra Ra Anumzamo'nema huhagerafi huvempa kema hu'naza kea rufutagino Israeli vhahera tusi'a zamagaze eri'zami'ne.

### *Akani'ma kumi'ma hu'nea zamofo naneke*

<sup>16</sup> Higeno Josua'a nanterampi otino Israeli vhahera kehige'za nofite nofite neazafinti, Juda naga nofi zamazeri'ne. <sup>17</sup> Anante Josua'a Juda naga nofira zamavareno Ra Anumzamofonte e'ne, ana higeno Zera naga zamazeri fore hige'za ana nagapintira vene'ne'age'za neage'za Zabti azeri'ne. <sup>18</sup> Hagi anante Zabti nagapinti vene'neneraminke ageno Josua'a zamazeri otiteno, anampinti Akani avazu hu'ne. Hagi Akanina Karami kasentegeno, Karamina Zapti kasentegeno, Zaptina Zera kasente'ne. Hagi Zera'a e'i Juda naga nofipinti ne' mani'ne. <sup>19</sup> Anante Josua'a Akaninkura amanage hu'ne, Ne'nimoka Ra Anumzana Israeli vahe'mokizmi Anumzana ra agi neminka agi'a ahentesga huo. Hanki kagra na'a hu'nampi nasmio, nagri navufina mago'zana erifrara okio. <sup>20</sup> Anante Akani'a Josuana amanage huno asami'ne, Tamage hu'na nagra Ra Anumzana Israeli vahe'mokizmi Anumzamofo avurera kumi hu'noe. Hagi nagra na'a hunofi kagrira kasmigahue. <sup>21</sup> Jeriko rankuma'ma ha'ma huzamagatere nompintira, kogeno mago knare zantfa hu'nea Babiloniti za'za kukenane, mago'a silva kna'amo'a 4'a kilogi, golia kna'amo'a mago kilo hu'neana kogeno nanunu hige'na, eri'na e'noe. Ana zantamina erina seli noni'afi mopa kafi'na silva antete'na ana agofetu mago'azana ante'na asente'noe.

<sup>22</sup> Higeno Josua'a kato vahe huzmanteg'eza zamagare'za vu'za Akani seli nompima ome kazana, Akani'ma hu'nea kante anteno ana silva frakino fenamete megeno, mago'azana anaga me'nege'za ome ke'naze <sup>23</sup> Hagi zamagra ana maka zana ana seli nompintira eri'za Josuane maka Israeli vahe'mokizmi zamavuga Ra Anumzamofo avure eme herafi'naze. <sup>24</sup> Anante Josua'ene ana maka Israeli vahe'mo'za Zera nemofo Akanina nevre'za, ana silvama, zaza kenama, ana golima, ne'mofavre naga'ama, mofane naga'ama, ana maka bulimakao afu'ama, tonki'ama, sipisipine, seli noma'ane ana maka zama'anena eri'za, Akorie nehaza agupofi avre'za vu'naze. <sup>25</sup> Anante Josua'a Akanina amanage huno asami'ne, Na'a higenka tagrira hazenkefina tavrentane? Ra Anumzamo menina kagri'enena hazenkea kamigahie. Anante maka Israeli vahe'mo'za have kanonteti Akanine ana maka naga'anena zamahe frite'za zamagri'ene ana maka zazminena tevefi kre fanane hu'naze. <sup>26</sup> Ana hute'za rama'a haveraminu Akani agofetura ante hihi hu'naze. Ana haveramina meninena me'ne. Anante Ra Anumzamofoma arimpa ahe'zamo'a amne hu'ne. E'ina hu'negu ana kumamofo agi'a Akori agupoe huno me'nege'za meninena agi'a nehaze.

### *Israeli vahe'mo'za Aia rankumate vahe hahu zamagatere'naza naneke*

<sup>1</sup> Hanki anante Ra Anumzamo'a Josuana amanage huno asami'ne, Korora osuge, atregeno kagu'amo'a kna osino. Maka sondia vhahera zamavarenka marerinka Ai kumara hara ome huzamanto. Na'ankure Nagra Ai kuma'mofa kini ne'ma, vahe'ama, ran kuma'ane, mopa'anena ko kagri kzampi ante'noe. <sup>2</sup> Kagra Jeriko kini ne'ene rankuma'anema hu'nana hunka, Ai rankuma'mofa kini ne'ene ana maka'zana eri haviza huo. Hianagi ana kumapinti'ma maka tamavesisia zantamine bulimakao afutaminena

tamagra'a suza avreta viho. Hanki menina ha'ma hanagu tro nehuta, mago'a sondia vahera huzmantenke'za rankumamofo mefiga'a kafona omenteho.<sup>3</sup> Anagema hige'za Josua'ene maka sondia vahe'mo'za Ai kumate vahera ha' huzmantenaku vu'naze. Hanki koro osu'za hanaveti'za ha'ma nehaza vahe Josua'a 30 tauseni'a huzmantege'za kenageke vu'naze.<sup>4</sup> Hagi nevzageno Josua'a amanage huno huzmante'ne, Ama nanekea tamagesa anteta antahiho, tamagra rankuma'mofa tvaonte amefiga'a kafo ome anteta hahu'are tro huta umaniho.<sup>5</sup> Hanki nagranema mani'naza sondia vahe'enena rankuma'mofona avugati vugahune. Hanki Ai rankumapi vahe'mo'zama ko'ma hu'nazaza hu'za ha'ma hurante'naku atiramiza es-nageta, tagra ese knazupama hu'nonaza huta zamimi huta koro freta egahune.<sup>6</sup> Tagra zami'mi huta freta esunke'za, rankuma'zmia atre'za trotago hu'za afete'ma esu'za tamagra amanage hugahaze, ko'ma hu'nazaza hu'za tagri koro fraze nehanageta, tagra zami'mi huta afete kna egahune.<sup>7</sup> Anama hanunketa tamagra kafoma antetama mani'nafintira atretma vutma, Ai rankumara ome eriho. Ra Anumzana tamagri Anumzamo'a ana rankumara tazampi antegahie.<sup>8</sup> Hagi tamagrama ana rankuma'ma ome eritesuta, teve tagintenkeno teno. Ra Anumzamo'ma nasamige'na tamasami'noa kante antetma anazana hiho.<sup>9</sup> Nehuno Josua'a ana sondia vahera huzmantege'za vu'za zagma ufre kaziga Ai rankuma'ene Beteli rankuma'mofa amu'nozanifi ome kafona ante'naze. Hianagi agra Josua'a ruga'a sondia vahezagane kumama ome ante'za mani'narega ana kenagera mani'ne.<sup>10</sup> Hanki Josua'a nanterampi otino sondia vahe'zaga kehu tru huteno, Israeli ranra vahera zamavareno ugota hige'za sondia vahe'ane Ai kumate vu'naze.<sup>11</sup> Josua'enema vu'naza sondia vahe'mo'za rankumamofona avuga kazigati vurava'o hu'naze. Anante Ai rankumamofona noti kaziga mago agupo amu'nozamifina me'negeno kantu kaziga Ai rankuma me'nege'za, kamakaziga kumara omente'naze.<sup>12</sup> Hagi Josua'a sondia vahera 5 tauseni'a naza ko huzamantege'za vu'za, Ai rankumamofa zage fre kaziga Ai kuma'ene Beteli kumamokizni amu'nompi kafona omente'naze.<sup>13</sup> Hanki ha'ma hanaza kankamuna amanahu hu'za retrora hu'naze. Ai rankumamofa noti kazigama tro'ma hu'za mani'naza sondia vahera rama'agna hu'za mani'naze. Ana hazage'za mago'a sondia vahera zage ufre kaziga kafonte'za mani'naze. Hanki Josua'a ana kenagera agra agupofi uramino umani'ne.

<sup>14</sup> Hanki Ai kumate kini ne'mo'ma agra anama hazazama negeno'a, agrane maka vahe'ane, maka ana kumapi vene'nemo'za Israeli naga Jordani agupofi ha' huzmanteku nanterampi ame hu'za kumara atre'za atrami'za e'naze. Hianagi Ai kumate kini ne'mo'a kuma'amofo amefi'ama mago'a Israeli vahe'mo'zama kafoma omente'zama mani'nazana onke'ne.

<sup>15</sup> Anante Josua'ene maka sondia vahe'amo'za Ai kumate kini nera revatga hu'za ami'mi hu'za hagege kokama me'nerega fre'za vu'naze.<sup>16</sup> Hagi Ai kini ne'mo'ma zamagege'za Israeli naga'mo'zama zami'mi hu'za koroma frazageno'a, maka venenema ana rankumapima mani'naza vahera ke hige'za, Israeli vahera zamarotago hu'za vu'naze. Ana hige'za kumazamia atre'za Josuane Israeli vahetamina zamarotgo hu'za afete vu'naze.

<sup>17</sup> Hanki Ai kumate'ene Beteli kumate vene'nea magore hu'za kumazmia kegava hu'za omani'za, ana maka'mo'za atre'za Israeli vahe zamarotago hu'za vazageno, kuma kahamo'a hagro huno me'n'e.<sup>18</sup> Anante Ra Anumzamo'a amanage huno Josuana asami'ne, Karugru keveka'a

erisga hunka Ai kumatega agona'a hunto, na'ankure Ai kumara kagri kzampi Nagra menina antegahue. Anage higeno Josua'a krugru keve'a erisga huno Ai kumatega agona'a hunte'n. <sup>19</sup> Hanki Josua'a karugru keve'ama erisgama hige'za kafoma ante'naza sondia vahe'mo'za nege'za, kafoma ante'naretira ame hu'za oti'za zamagare'za Ai rankumapina ufre'za, kuma'ma maka erivagananere'za ame hu'za ana kumara teve taginte'naze. <sup>20</sup> Hanki Ai kumate vene'nemo'zama rukrahe hu'zama kazana kuma'zamifintira tevegumo'a vemagu vemagu huno mareri'n. Hanki Israeli vahe'mo'zama zami'mi hu'za koro'ma fre'za nevazaretira rukrahe hu'za, Ai nagara hara hu'zamante'za azageno, koro'ma fre'naza kazamia omnene. <sup>21</sup> Anante Josua'ene mika Israeli vahe'mo'zama zami'mi hu'za Ai vahe'ma nevazareti'ma, kageno Ai rankumapinti'ma teve kumo'ma vemagu vemagu huno monaregama marerige'za nege'za ete rukrahe hu'za zamarotagoma hu'za nevaza Ai vahera zamahe'naze. <sup>22</sup> Hanki Israeli sondia vahe'ma Ai rankumapima mani'naza naga'mo'za atiramiza Ai vahera zamefiti hara eme huzmante'naze. Ana hu'za Israeli vahe'mo'za Ai vahera zamaazeri amu'no hute'za magore hu'za ozamatre'za, ana maka zamahe hana hu'naze. <sup>23</sup> Hianagi magoke Ai kini ne'ke ahe ofri avre'za Josuante vu'naze. <sup>24</sup> Hanki Israeli vahe'mo'za ha' vahezmima, ka'ma kokampi ome zamahe vaganere'za ete rukrahe hu'za vu'za, Ai rankumapima mani'naza vahera bainati kazinteti ome zamahe vagare'naze. <sup>25</sup> Hanki ana zupa 12 tauseni'a Ai kumate vene'nene a'nene zamahe fri'naze. <sup>26</sup> Hianagi Josua'a karugru keve'ama erisga huno agona'ama Ai kumategama hunte'nea azana erinte orami erisga hu'nege'za, maka Ai kumapima mani'naza vahera zamahe vagare'naze. <sup>27</sup> Hanki Ra Anumzamo'ma Josuama asmi'nea kante ante'za, zamagra'a suza bulimakao afutaminke nevre'za, Ai kumapintira mago'a zantaminena eri'naze. <sup>28</sup> Ana hutegeno Josua'a Ai rankumara teve tagintegeno tevemo te osavazigeno ana zantamimo'a hihi huno meno ama knarera e'ne. <sup>29</sup> Anante Josua'a Ai kini nera anankempinofi harari vazino mago zafare anakintegeno frino avufga'amo'a meno vuno kinaga ome se'ne. Hagi zagea tamifretegeno, Josua'a vahe huzmanteg'e'za avufga'a eri'za Ai rankumamofo ufre kafante ome netre'za, ana agofetura have eri'za antehihi hazageno, ana haveramimo'a meno ama knarera ehanati'n. <sup>30</sup> Anante Josua'a Ebali agonafi mago kresramna vu ita Ra Anumzana Israeli vahe Anumzantega tro hu'n. <sup>31</sup> Ra Anumzamofo eri'za ne' Mose'se'ma Israeli vahe'ma zamasami'nea kea amage nenteno, Mose'se kasegefi me'nea kante'ene amage anteno aenireti taga hu'za eri fatgo osu'naza haveraminteti, mago kre fananema hu ofama hu ita trohu'n. Ana itamofo agofetura tevefi kre fananehu ofane, Anumzanema mago zamarimpa hu ofa hu'naze. <sup>32</sup> Anante ko'ma Mose'se'ma kre'nea kasegea Israeli vahe'mokizmi zamavure Josua'a mago'a havemofo agofetu ete krente'n. <sup>33</sup> Ana maka Israeli vahe'ma ranra vahetamima keagama refkoma nehaza vahe'ma, sondia vahete kva vahe'ma, rurega vahe'ma zamagranema nemaniza vahe'mo'za tare kevu vahera refko hu'naze. Ana hute'za mago kevu vahe'mo'za Gerisim agona tava'onte manizageno, mago kevu vahe'mo'za Ebeli agona tvaonte mani'naze. Ana hazageno Ra Anumzamofo huhagerafi huvempage vogisimo'a amu'nozamifi me'ne. Hige'za ana vogisima pristi vahe'mo'zama erisgama hu'za vazazana maka veamo'za ke'naze. Ra Anumzamofo eri'za ne' Mose'se'ma zamasamino, Kenani mopafima umanitetamazeri so'e hanigu Ramofontega hihoma hu'nea zana hu'naze. <sup>34</sup> Anante maka

asomu'ma huzmantesia ke'ne, zamazeri havizama hu kema Moses'e'ma kasege avontafepima krente'neana maka vahe zamavuga Josua'a hamprine.

<sup>35</sup> Josua'a ana maka kasegema Moses'e'ma kre'neana magore huno otreno hampri vagarege'za, maka Israeli vahe'mo'za antahi'naze. Hanki a'ne'ma, mofavre zagama, ruregati vahe'ma zamagranema nemaniza nena ana kea antahi'naze.

## 9

### *Gibioni vahe'mo'za Israeli kva vahe rezamatga hu'naza naneke*

<sup>1</sup> Hanki Jodani timofo kantu zage fre kaziga agonaregama nemaniza kini vahe'ma, agonamofo asoparega nemaniza kini vahe'ma, agupofima nemaniza kini vahe'ma, Mediterenia ra hagerimofo ankinaregati vuno anagamu noti kaziga Lebanoni mopare nemaniza kini vahe'ma, Hiti vahe'ma Amori vahe'ma, Kenani vahe'ma, Peresi vahe'ma, Hivi vahe'ma Jebusi kini vahe'mo'zama antahi'zama Josua'ma Jeriko vahe'ene Ai kumate vahe'ma ha'ma huzamagaterea agenkema nentahi'za, <sup>2</sup> ana maka'mo'za eri mago hu'za Josuane Israeli vhahera ha' huzmante'naku hu'naze. <sup>3</sup> Hianagi Gibioni vahe'mo'za Josuama Jerikone Ai rankuma'enema zamazeri havizama hu'nea zamofo agenkema nentahi'za, <sup>4</sup> mago'a vene'ne nagara huzmantage'za haviza hu'za afete moparegati Israeli vhahete naneke eri'za e' vahekna hu'za e'naze. Ana vahe'mo'za atafareno tagatoma hu'nea meme akrute waini tintafempi rehati rehati hu'za waini tina afineri'za, atafama re'nea kuzamia donki afumofo agumpi nente'za, <sup>5</sup> tagoto hu'nea zamaga ano rehati rehati hu'za nentani'za, atafare'nea kukena nentani'za, hagege huno tontore'nea breti eri'za vu'naze. <sup>6</sup> Anante kuma'ma eme ante'za Gilgalima mani'nazare Josuante e'za, agri'ene Israeli vhahera amanage hu'za eme zmasami'naze, tagra afete moparegati e'nonku tamagrane mago tarimpa huta manisuna zamofo kea huvempa huranteho. <sup>7</sup> Hianagi Israeli vahe'mo'za ana Hivi vahe'mokizmia amanage hu'za zmasami'naze, Na'a agafare tamagranena tarimpa fru huta manisunku, huvempa huraman-tegahune? Na'ankure tamagra afeti vhahera omani'negahaze. <sup>8</sup> Hianagi Hivi vahe'mo'za Josuana asami'za, kagri eri'za vahe mani'none hazageno, Josua'a zamantahigeno, tamagra izagata, igati e'naze? <sup>9</sup> Hige'za Josuana kenona'a hunte'za, kagri eri'za vahe'mota afete mopareti e'none. Na'ankure Ra Anumzana tamagri Anumzamofo hihamu'amofo agi agenkemo'ma marerigeno, ana maka zama Isipi vhahete'ma tro'ma nehuno, <sup>10</sup> tare Amori kini ne'ene Jodani timofo kantu kaziga nemania kini nete'ma tro'ma hu'nea zane, Hesboni kini ne' Sihoninte tro hu'nea zane, Basani kini ne' Ogi'ma Astoroti nemania nete'ma tro'ma hu'nea zamofo agenkea antahi'none. <sup>11</sup> Hagi kva vhahetimozane moperatif'i ma ana maka nemaniza vahe'mo'za hurante'za, mago'a ne'zama erinetama vanaza ne'zana tro hu'neto, nevuta ana vahe'ma ome nezamagenutma amanage huta zamasamiho hu'naze, tagra tamagri eri'za vahe mani'nonanki, trimpa fru huta manisunku tamagra huvempa kea huranteho. <sup>12</sup> Amama erita e'nona bretiramina keho, kantega ne-eta nesunazane huta kumatim' atreta ne-eta ana zupa amuho hu'negeta erita e'none. Hianagi menina keho, hago hagege huno ankra kruhe'ne. <sup>13</sup> Hanki mememofo akruteti tromahu tintafena keho, kasefa me'negeta waini tina afirita e'nonane. Hianagi menina keho, hago ampamu hu'ne. Ana nehigeno kukanane taga anonema antani'nona zamo'nenena za'za kama e'nona zamo

higeno tagatotagatu hu'ne. <sup>14</sup> Anante Israeli vahe'mo'za ana nezantamina eri'za ke'nazanagi, Ra Anumzamofona antahige'za knare antahi'zana e'ori'naze. <sup>15</sup> Hanki Josua'a ana vahera zamazeri fru nehuno, ozamahe zamatresage'za zamagranema mago zamarimpa hu'za manisaza zanku huvempa hunezmanteg'e'za, Israeli kva vahe'mo'zanena hu'za amama huhagerafuna huvempa kea eri otregahune hu'naze. <sup>16</sup> Ana huvempa kema Israeli vahe'mo'za huzamantetageno'a tagufa zagegna evutege'za, henkama antahi'zana afeteti vahera zamagra ome'nazanki, tva'ozamire nemaniza vahe e'naze. <sup>17</sup> Hige'za Israeli vahe'mo'za ot'i'za tagufa zagegnafi kana vu'za ana vahe'mokizmi kumatmintera uhanati'naze. Ana ran kumatmina, Gibionima, Kefirama, Birotima, Kiriati Jearimi kumapinti vahere. <sup>18</sup> Hianagi Israeli vahe'mo'za hara huozamante'naze. Na'ankure Israeli kva vahe'mo'za, Ra Anumzana Israeli vahe'mokizmi Anumzamofo avufi mago zamarimpa hu'za manisaza zamofo kema huvempama hu'naza kegu antahi'za ozamahe'naze. Ana hazage'za maka Israeli vahe'mo'za kva vahe'zamigura mago zamarimpa huozamante'za ke hakare hu'naze. <sup>19</sup> Hianagi mika Israeli kva vahe'mo'za amanage hu'za zamasami'naze, Mago tarimpama huta manigahune huta huvempa kea, Ra Anumzana Israeli vahe'mota Anumzamofo avufi huvempa hu'nonanki menina zamagratera mago'zana osugahune. <sup>20</sup> Hanki tagra amanahu huzmantegahune, ozamahe zamatresunke'za manigahaze. Na'ankure tagrama huvempa huzmante'nona kema eri atresunana Anumzamo'a tazeri haviza hugahie. <sup>21</sup> Hianagi kva vahe'mo'za Israeli vahera mago'ene zamasami'za amanage hu'naze, Zamatrene'za mani'ne'za Israeli vahera tevene tine kato huzami vahe maniho. Hagi kva vahe'mo'zama huvempama huzmante'naza kante ante'za ozamahe zamatrage'za mani'naze. <sup>22</sup> Anante Josua'a Gibioni vahera kehige'za azageno amanage huno zamasami'ne, tamagra na'ante tagrira reravatga hutma, tvaontirema nemaniza naga'mota, afete kotegeati e'none hutma hu'naze? <sup>23</sup> Tamagra havige hu'nagu Anumzamo'a tamazeri haviza hugahie. Ana hanigetma maka zupa nagri Anumzamofo mono nompi kazokzo eri'za vahe mani'neta, tinteve hurami vava hugahaze. <sup>24</sup> Hanki Gibioni vahe'mo'za amanage hu'za Josuana asami'naze, tagrama antahuna Ra Anumzana tamagri Anumzamo eri'za ne'a Mosesena asami'no, ama ana mopaga miko zamigahuanki ana mopafima ufresutma anampima mani'naza vahera maka zamahe vagareho huno hu'nagu, tamagrikura tusi koro nehuta ana havigea hu'none. <sup>25</sup> Ana hu'nonanagi menina kagri kzampi mani'nonku, nazano hurante'naku'ma hanana zana amne huranto. <sup>26</sup> Hanki Josua'a Gibioni vahera zamaza hige'za, Israeli naga'mo'za ozamahe zamatre'naze. <sup>27</sup> Hianagi Josua'a ana Gibioni vahera huzmanteno menintetima agafama hanazana, Israeli vahe'mokizmi tintevema katoma huzmi vahe nemanita, inantego Israeli vahe'ma vanaregama Ra Anumzamo'ma huhamprino amare monora hihoma hanire'ene tintevea huzamigahaze. Hige'za Gibioni vahe'mo'za ana zamavu'zamavara meninena hu'za neaze. (2 Sam 21).

## 10

### *Israeli vahe'mo'za 5fu'a kini vahe zamahe'naza naneke*

<sup>1</sup> Hanki Jerusalemi kini ne' Adonizedekima antahiamma, Josuama Jeriko kumate'ma hu'neaza huno Ai rankuma'ene ana kumate kini ne'ene, ha'ma hu agatereno zamahe hanama nehuno kumazmima eri havizama hu'nea ke'ne, Gibioni vahe'mo'zama Israeli naga'enema mago zamarimpa hu'za

manisaza zamofo ke'ma huvempama hu'naza kema nentahino'a, <sup>2</sup> agrane vahé'amozanena ana zankura tusi'a zamagogogu hu'naze. Na'ankure Gibioni kumamo'a mago'a kumara agatereno agi me'nea rankumokino, Ai rankuma'enena rugaterene. Hagi ana rankumapina hanaventenake sondia veneneraminke mani'naze. <sup>3</sup> E'ina hu'negu Jerusalemi kini ne Adonizedekia 4'a rankumate kini vahetega kea atrezamante'ne. Ana vahera Hebronii kini ne' Hohamuma, Piramu kini ne' Jarmutima, Jafia kini ne' Lakisima, Debiri kini ne' Eklonima huno kea atre'zamante'ne. <sup>4</sup> Ana kini nagakura amanage hu'ne, tamagra etma eme naza hinketa Gibioni nagara hara huzmantaneno. Na'ankure zamagra Josuane Israeli vahé'enena huvempa hu'za hara osu'za, mago zamarimpa hu'za manisnaza naneke huhageraf'i'aze. <sup>5</sup> Hanki 5fu'a Amori kini vahé'ma eme eri atruma hu'nazana, Jerusalemi kini neki, Hebronii kini neki, Jarmutti kini ne'ki, Lakisine Ekloni kini netré'ne hu'za sondia vahé'zamia eri tru hu'za seli nona ome ki'za avazagigagi'za manine'za, Gibioni vahera hara huzmante'aze.

<sup>6</sup> Anante Gibioni vahé'mo'za Israeli vahé'ma Gilgalima kuma eme ante'za mani'nare Josuantega kea atrente'za amanage hu'naze, eri'za vahekamota kamefira huoraminka ame hunka emrerinka tagu'vazinka taza huo. Na'ankure Amori kini vahetamima agonamofo asoparegama nemaniza kini vahé'mo'za eri tru hu'za ha' eme hurante'za nehaze.

<sup>7</sup> Hanki Josua'ma ananke'ma nentahino'a, sondia vahé'ane knare'ma hu'za ha'ma nehaza vahera maka zamavareno Gilgalia atreno Gibioni vahé'mokizmiza zamaza hunaku marerino vu'ne. <sup>8</sup> Hanki Ra Anumzamo'a Josuana amanage huno asami'ne, Kagra korora zamagrikura osuo. Na'ankure zamagrira ko kagri kazampi zamavare ante'nogu, mago ne'mo'e huno kagririra hara hu kagateoregahie. <sup>9</sup> Anante Josua'ene ana maka sondia vahé'mo'za ana kenageke vu'za Amori vahé'ma eritru hu'zama mani'nafe antri hazaza hu'za ame hu'za hara ome huzmante'aze. <sup>10</sup> Ana'ma hazageno'a Ra Anumzamo Israeli naga'mokizmi zamavufi Amori vahera zamazeri neginagi hige'za, rama'a vahé Gibioni kumatera zamaheté'za, mago'a vahera zamarotago hu'za Bet-horonima mareneri'za karanka zamahehe vu'za Azekane, Makeda kumate'ene uhanati'aze.

<sup>11</sup> Hanki Israeli vahé'mokizmi zamagoro'ma hu'za Amori vahé'mo'za Bet-horoni'ti'ma fre'za Azekama uram'i'ea kantega nevazageno, Ra Anumzamo'a tusinasi ko'mopa ko atregeno havegna huno herafiramino, Amori vahera zamahe fri'ne. Hagi Israeli vahé'mo'zama bainati kazinteti'ma zamahe fri'nazama'a ruzamagatereno haveretira zamahe fri'ne.

<sup>12</sup> Hagi Ra Anumzamo'ma Israeli vahé'ma zamaza hige'za, Amori vahé'ma ha'ma hu zamagateraza knazupa Josua'a Israeli vahé'mokizmi zamufi Ra Anumzamofona amanage huno asami'ne, zagemoka uoraminka Gibioni megeno, ikamoka Azalonii agupofi megahanie.

<sup>13</sup> Higeno zagemoa'a anante megeno, ikamo'enenaohanatine. Ana hu'nege'za Israeli naga'mo'za ha' vahezamia hara huzmagatere'aze. Ana zupa zagemoa'a uofreno anuntumpi me'nege'za hara hu'naze. Hagi ana'ma hu'naza zamofo agenkea Jashariema nehaza avontafepi krente'aze. (Jashariema hu'neana fatgo vahé'mokizmi avontafere hu'ne.) <sup>14</sup> Korapa knareti'ma eno meninte'ma ehanati'neana, Ra Anumzamo'a nunamuna antahizamino e'inahukna zana erifore osu'neankna kna efore hu'neankino, henkanena anara osugahie. Na'ankure Ra Anumzamo'a magoke ne'mofe ke

antahimino Israeli vahetega anteno Agra hara hu'ne. <sup>15</sup> Hagi ha'ma huvgarete'za Josua'ene ana maka Israeli sondia vahe'mo'za Gilgalima kuma'ma eme ante'za mani'narega ete vu'naze.

### *Makida kumate vahe'ma ha'ma huzmagatere'naza naneke*

<sup>16</sup> Anama hutazageno'a 5fu'a kini vahe'mo'za koro fre'za vu'za Makida kuma tavaonte mago havegampi ome fraki'naze. <sup>17</sup> Hanki mago'a vahe'mo'za ana 5fu'a kini vahe'ma Makida havegampi fra'maki'nazana kete'za, Josuana eme asamizageno, <sup>18</sup> Josua'a sondia vahera zamasamino, ranra haverami atufetma ana havegana renkanineretma, mago'a sondia vahera huzmantenke'za anante kva hu'za maniho. <sup>19</sup> Ana'ma ne-hutma tamagra manigasa osutma, ha' vahetamia zamefi zamarotgo hutma kuma'zmifina uofre'nesagetama hara ome huzmanteho. Na'ankure Ra Anumzana tamagri Anumzamo ana vahetamina ko tamazampi zamavar-ente'ne. <sup>20</sup> Hanki Josua'ene Israeli ha' vahe'zamia zamarotgo hu'za zamahe hana hu'za kantega vazage'za, osi'a naga'mo'za koro fre'za rankuma za-mimofo vihufi ufre'naze. <sup>21</sup> Ana'ma hute'za ana maka Israeli sondia vahe'mo'za zamavufarera hazenkea e'ori, Makida kuma'ma omente'zama mani'nare Josua'a mani'nege'za ete e'naze. Ana'ma hazage'za magore hu'za Kenani mopare vahe'mo'za Israeli vahetega mago kea huozmante'naze. <sup>22</sup> Anante Josua'a amanage hu'ne, Havegama renkanimare'naza haveram-inna eri atretma ana 5fu'a kini vahera havegampintira zamavareta nagrite echo. <sup>23</sup> Hanki kema hia ke amagenta'za ana kini vahera havegampintira ome zamavaremegi atre'za zamavare'zama e'nazana, Jerusalemi kinigi Hebronii kinigi, Jarmuti kinigi, Lakisi kinigi, Ekloni kini' neki hu'za zamavare'za Josuante e'naze. <sup>24</sup> Ana kini vahera zamavare'za etageno, Josua'a maka Israeli vahera kehu tru huteno, sondia vahete kva vahe'ma agranema ha'ma ome hu'naza vahe'mokizmia amanage huno zamasami'ne, amare etma tamaganutu ama kini vahe'mokizmi zamanankena rentroko hih, hige'za Jo-suankea amage ante'za ana hu'naze. <sup>25</sup> Hanki Josua'a Israeli vahe'mokizmia amanage huno zamasami'ne, Tamagra korora huge, antahintahi hakarea os-iho. Na'ankure Ra Anumzamo'a amama hiaza huno maka ha' vahetamima ha'ma huzmante'nazana anahu zanke hugahie. <sup>26</sup> Anage huteno Josua'a ana kini vahera zamahe friteno, 5fu'a zafare zamufga hantintegeno me'negeno vuno kinaga zagea ufre'ne. <sup>27</sup> Hagi zagema ufregeno'a Josua'a huzman-tege'za ana vahe zamavufaga zafaretira erifenka atre'za, ko'ma fra'makiza mani'naza havegampi ome zamatrete'za ana havegantera ranra havenuti renkani razageno meno eno, ama knarerha ehanatine. <sup>28</sup> Hagi ana zupage Josua'a Makida rankumara hara hu zamagtereno kini ne'zamine ana maka vahera kazinteti zamahe fri vagare'ne. Ana kumapina mago'zane huno otreno ana maka'zana eri haviza nehuno, mago vahera atregeno omani'ne. Hagi Jeriko kini ne'ma hunte'neaza huno, Makida kumate kini nera ana zanke hunte'ne.

<sup>29</sup> Hanki Makida rankumama ha'ma huzamagaterete'za, Josua'ene son-dia naga'mo'za Makida atre'za vu'za Libna kumate vahera hara ome huzmante'naze. <sup>30</sup> Hanki Ra Anumzamo anahukna huno Israeli vahera zamaza hige'za, Libna kini ne'ene ana maka vahe'anena kazinteti zamahe vagare'naze. Ana kumapina Josua'a mago'zane huno otreno, ana maka'zana eri haviza nehuno mago vahere huno atregeno omani'ne. Hagi Jeriko kini ne'ma hunte'neaza huno, Libna kini nera ana zanke hunte'ne. <sup>31</sup> Ana'ma hute'za, Josua'ene Israeli sondia naga'mo'za Libna kumara atre'za vu'za, Lakisi kumara ome avazagigagi'za mani'ne'za hara huzmante'naze.

<sup>32</sup> Hanki Ra Anumzamo Israeli vahe'mokizmia zamaza huno hara higeno, nampa 2 knareria Josua'a Lakisi vhahera hara hu zamagaterege'za, ana makā vhahera Libna kumate vahe'ma hu'nazaza hu'za bainati kazinteti zamahe fri vagare'naze. <sup>33</sup> Anante Gezeri kini ne' Horamua Lakisi vhahetami hara huzmaza hu'naku mrerino egeno, Josua'a ana kini ne'ene naga'anena hara nehuno, mago vhahera huno ozmantre'neanki zamahe fri vagare'naze. <sup>34</sup> Ana'ma huteno'a Josua'a miko Israeli vahe'ene Lakisia atre'za Ekloni vu'za, kafo ome ante'za mani'ne'za avazagi kagiza hara huzmante'naze. <sup>35</sup> Ana zupage Ekloni kumara hara hu zamagatere'za eri vaganere'za, maka zantamina eri haviza nehazageno, Josua'a Lakisi kumapi vahe'ma hu'neaza huno maka vhahera kazinteti zamahe fri vagare'ne. <sup>36</sup> Ana'ma huteno'a Josua'a miko Israeli vahe'ene Ekloni kumara atre'za Hebroniu vu'za hara ome huzmante'naze. <sup>37</sup> Ana kumara omeneri'za ana kumate kini ne'ene maka vhahera kazinknonu zamahe fri vaganere'za, ana kuma tavaonte'ma nemaniza vahe'ene kuma'zminena, Ekloni kumate vahe'ma hu'nazaza hu'za bainati kazinkonteti maka zamahe fri vagare'naze. <sup>38</sup> Ana'ma hute'za Josua'ene miko Israeli vahe'mo'za ete rukrahe hu'za vu'za Debiri kumate vhahera ha'ome huzmante'naze. <sup>39</sup> Ana'ma huteno Josua'a ana kumate kini ne'ene, ana kumapi vahetamina zamahe fri vaganereno, tavaozmire'ma me'nea kumatamina Hebroniu kumate vahe'ene Libna kumate vahe'ene, kini vahetaminte'ma hu'neaza huno Debiri kumate vhahera magore huno ozamatreno bainati kazinteti zamahe fri vagare'ne. <sup>40</sup> Ana higeno Josua'a ana mopafima me'nea rankuma'tamina hara hu zamagaterevaga nereno, agonaregama me'nea kumatamine, kini zamine, Nigevi kazigama me'nea kumatamine, kini zamine, zage fre kaziga me'nea agonaramimofo agiafi me'nea kumatamine kini zamine, Jodani agupofima nemaniza vahe'ene kini zamia, Ra Anumzama Israeli vahe'mokizmi Anumzamo'ma huo huno'ma hunte'nea kante anteno, Josua'a magore huno ozamatreno, ana maka zamahe fri vagare'ne. <sup>41</sup> Hagi Josua'ma ha'ma hu zamagatere vagamare'neana, sauti kaziga Kedes Baneati agafa huno marerino, hageri ankena tavaonte Gaza eteno, noti kaziga ana maka Goseni mopa'a eri vagareno vuno Gibioni rankumate anagamu uhanati'ne. <sup>42</sup> Higeno ana mopafima nemaniza kini vahe'ene mopa'zaminena, Israeli vahe'mokizmi Ra Anumzamo zamaza huno hara huzmantegeno, Josua'a ana knafinke hara huno zamazeri atre vagare'ne. <sup>43</sup> Ana'ma hute'za Josua'ene Israeli sondia vahe'mo'za atre'za Gilgalima kuma'ma eme ante'zama mani'narega ete vu'naze.

## 11

### *Josua'ma noti kaziga kini vahe'ma ha'ma huzamante'nea naneke*

<sup>1</sup> Hanki Josua'ma hahuzmagaterea kema Hazori kini ne' Jabini'ma nentahino'a, Madoni kini ne' Jobabune, Simroni kini ne' Aksafuntegane kea atrezmante'ne. <sup>2</sup> Ana zanke huno vahe'ma kema hu'neana, noti kaziga agona ramimpima nemaniza kini vahetamine, Galili timofo sauti kaziga Araba kinima, zage ufre (westi) kaziga agona ramimpine Nafot-Dorinema nemaniza kini vhahera ke hu'ne. <sup>3</sup> Ana'ma hiaza huno, zage hanati kazi-gane, zage ufre kazigama nemaniza Kenani vahe'ene, Amori vahe'ma, Hiti vahe'ma, Perizi vahe'ma, agona ramimpima nemaniza Jebusi vahe'ene, Hivi vahe'ma Mizpa kaziga Hemoni agona tavaonte'ma nemaniza vhahera kea hu'ne. <sup>4</sup> Hagi ana kuma tamimpi kini vahe'mo'zama anankema nentahizama e'nazana, maka sondia vahe'zmia tusi'a kasepankna hu'za ham-priga osuga'are vhahera nezamavare'za, rama'a hosi afu zamine, ha'ma

hanaza karisi zamine eri'za e'naze. <sup>5</sup> Hanki ana maka kini vahe'mo'za mago zamarimpa hu'za sondia vahezmia Meromu tinte eme zamazeri atru hu'za, Israeli vhahera ha' huzmanteku kuma eme ante'naze. <sup>6</sup> Ana hazageno Ra Anumzamo'a Josuana amanage huno asami'ne, Zamagrikura korora osuo. Na'ankure ama ananknare okina Israeli vhahera zamaza ha'nena ha' vahe'zamia maka zamahe fri vagaregahaze. Ana'ma nehutma hosi afutamimofo agigruna runekafrita, karisi zamia teve hanavazita kregahaze. <sup>7</sup> Anage hutege'za Josua'ene sondia naga'mo'za ha' vahe'zamimo'za antri hazaza hu'za, Meromu tinteti agafa hu'za hara eme hu'zmante'naze. <sup>8</sup> Hagi Ra Anumzamo'a Israeli vhahera zamaza hige'za, ha' vahezamia zamahete'za zamagenere'za vu'nazana, anagamu noti kaziga Saidoni rankuma'ene Misrefot-Maim vute'za, zage hanati kaziga Mispa'e nehaza aguporegane hara huzmanteha'za vu'za ana maka vhahera zamahe fri vagare'naze. <sup>9</sup> Hanki Ra Anumzamo'ma hunte'nea kante Josua'a hosi afutamimofo agigrunaramina taga nehuno, maka karisiramina teve hanavazino krevagare'ne. <sup>10</sup> Ana zupage Josua'a rukrahe huno Hasori rankumara ha' ome huzmanteno zamazeri zamagatenereno, Hasori kini nera bainati kazinteti ahe fri'ne. Ana knafina Hazori rankuma'mo'a anampima me'nea kumatamimofo vugota huzmanteha'za rankuma eri haviza hu'ne. <sup>11</sup> Hanki Israeli vahe'mo'za Hazori kumapima mani'naza vhahera magore hu'za ozmatre'za ana maka bainati kazinfeti, zamahe vagare'naze. Ana nehazageno Josua'a Hazori rankumara teve tagintegeno te'ne. <sup>12</sup> Ana nehuno Josua'a ana maka marerisa kumatamina erivaga nereno, kini vahe zaminena kazinteti zamahe vagarene. Ra Anumzamofo eri'za ne' Mosese'ma asmi'nea kante amage anteno, Josua'a mago zane huno otreno ana maka zantamina eri haviza hu' vagare'nese. <sup>13</sup> Hanki ko'ma ki'naza kumama tapage hutrageno moriri huno'ma marerinere'ma ki'naza kumatmina Israeli vahe'mo'za teve tagi onte'nazanagi, Josua'a agra Hazori rankumara teve tagintegeno te'ne. <sup>14</sup> Ana ranra kuma tamimpinti'ma Israeli vahe'mo'za ha'ma hu'za eri'naza zantamine, bulimakaoramine, sipisipiramine, meme afutamina zamagra'a su'za eri'za vutere hu'naze. Hianagi magore hu'za vhahera ozmatre'za ana maka bainati kazinteti zamahe fri vagare'naze. <sup>15</sup> Hanki ko'ma Ra Anumzamo'ma eri'za ne'a Mosesema asmigeno, ete Mosese'ma asami'nea kante anteno magore huno otreno ana maka'zana Josua'a huvagare'ne. <sup>16</sup> Hanki ne'onse agonafima me'nea mopama, maka Negevi kaziga mopama, Koseni mopama, zage fre kaziga ne'onse agona mopama, Jodani tima enevia agupoma, Siferane Araba mopama, ana maka agona mopane agupo mopama Israelima me'neana, maka Josua'a eri vagare'ne. <sup>17</sup> Ana mopama agafa hu'neana, fenkamu sauti kaziga Idomu tvaonte Haraki agonareti agafa huteno, vuno anagamu noti kaziga Hemoni agonamofo agiafi Lebanon'i aguporega Ba'algati rankumate uhanati'ne. Hagi Josua'a ana kumatamimp'i kini vhahera ko hahu zamagatereteno ana maka zamahe fri vagare'ne. <sup>18</sup> Ana kini vahetamina Josua'a za'zate hara huzmanteno vu'ne. <sup>19</sup> Hanki mago rankumate vahe'mo'e huno Israeli vahe'enena frua huno omuni'ne. Hianagi magoke Gibionima nemaniza Hivi vahe'mo'zage Israeli vahe'enena fru hu'za mani'naze. Hagi ana maka zana ha' huzage eri'naze. <sup>20</sup> Hagi Ra Anumzamo'a agra'a ana vhahera zamagu'a eri hanavetige'za Israeli vhahera hara huzmanteha'za. Na'ankure ana hanige'za kazigazi hu'za Israeli vhahera hara hunezmantesage'za zamahe vagaresaza kazigati anara hu'ne. Hanki Ra Anumzamo'ma Mosesema ko'ma asami'nea kante ante'za Israeli vahe'mo'za mago vahekura zamasunkura huozmante'za, ana maka

vahera zamahe fri vagare'naze. <sup>21</sup> Ana zupa Josua'a vuno ranra zaferinagrerafane Anaki vahe'ma agona ramimpima nemaniza vahera ha' huzmantenno zamahehana hu'ne. Ana vahe'ma nemaniza kumatamina, Hebronima, Debirima, Anabuma, Judama me'nea agona ramimpine Israelima me'nea agona ramimpima nemaniza vahera Josua'a ana maka zamahe vaganereno, rankuma zaminena eri haviza hu'ne. <sup>22</sup> Hanki Israeli mopa'afina zaferinage Anaki vahera omani'naze. Hianagi Gaza kumate'ma, Gati kumate'ma, Asdoti kumate'ma hu'za osi'a Anaki vahera manitere hu'naze. <sup>23</sup> Higeno Ra Anumzamo'ma Mosesema asmi'nea kante anteno, Josua'a ana maka mopa eri vagare'ne. Ana huteno Josua'a ana maka Israeli vahera erisantihare'za manisagu nagatenofite mopa refko huno zamitere hu'ne. E'ina hutegeno ana mopafina magore huno ha'ma hu'zana omanetfa higeno, mopamo'a fru huno me'ne.

## 12

*Israeli vahe'mo'zama ha'ma huzamagatere'naza kini vahe'mokizmi zamagi krente'naza naneke*

<sup>1</sup> Hanki amai'a Israeli vahe'mo'zama ha'ma hu zamagtere'za Jodani timofo kantu zage hanati kaziga mopane, fenkamu Arnoniti marerino anagamu Hermoni agonare marerigeno, zage ufre kaziga Araba mopane ana maka kini vahe'zaminena hara huzamagatere'naze. <sup>2</sup> Hanki Amori vahe kini ne' Sihoni'a Hesboni rankumate mani'neno, kegavama hu'nea mopa, Aroeli mopareti vuno Arnoni agupoma eme atrete uhanatiteno, ana agupomofona amu'nompinti rukitagino Jaboku osi tinte Amoni vahe'mokizmi mopa atumpare uhanati'ne. Ana higeno ana mopamo'a Gileati kaziga me'ne. <sup>3</sup> Hanki agrama mago'a mopama kegavama hu'neana, Jodani timofona zage hanati kaziga agupo mopane, Galili tinkenareti uramino fenkamu sauti kaziga Bet Jesimotine Fri'nea hagerinte uramiteno, sauti kaziga vuvara huno Pisga agonamofo agiafi vu'ne. <sup>4</sup> Ana hige'za Israeli vahe'mo'za Basani vahera hara huzmante'za kini ne' Ogina hara hugatere'naze. Hagi Ogi'a Rifaimi nagapinti nere, kora ana vahera rama'a vahe mani'nazane. Hianagi osia naga Astarotine, Edrei rankumatera mani'naze. <sup>5</sup> Hanki Ogi'ma kegavama hu'nea moparamina, Hermoni agonareti vuno, Saleka mopa're vigeno, ana maka Basani kazigati vuno Gesu vahe'ene Ma'aka vahe mopa're uhanati'ne. Hanki mago'a mopama kegava hu'neana, Giliati mopa amu'nompinti rugitagino vuno Hesboni kini ne'mofa mopa're uhanati'neama'a kegava hu'ne. <sup>6</sup> Hanki Ra Anumzamofo, eri'za ne' Mosese'ene Israeli naga'mo'za kora tare kini netrena Ogine Sihoni kizania hara huzanagatere'naze. Anama hute'za Anumzamofo eri'za ne' Mosese'a ana kini netremokizni mopa, Rubeni naga'ene Gati naga'ene Manase nagara amu'nompinti refko huno zami'ne. <sup>7</sup> Hanki Josua'ene Israeli vahe'mo'zama Jodani timofo zage ufre kaziga me'nea kumatamimi kini vahe'ma ha'ma hu zamagaterete'za eri'naza mopa, Lebanoni agupoa Ba'al-Gatiti agafa huteno vuno Seiri kaziga avugosama hunte'nea Halaki agonare vu'ne. Hagi ana mopa Josua'a refko huno Israeli vahera nagatenofite hu'za erisantihare'za manisaza mopa zami'ne. <sup>8</sup> Hagi agona mopama zage ufre kaziga agonaramimofo agiafima me'nea mopa Alabama agonaramimofo asopa mopama, ka'ma mopama, Negevi mopama, Hiti vahe'ma, Amori vahe'ma Kenani vahe'ma, Perisi vahe'ma, Hivi vahe'ene, Jebusi vahe'mokizmi mopa, Josua'a refko huno Israeli vahera nagatenofite huno zami'ne. <sup>9</sup> Hanki kini vahe'ma ha'ma huzmagatere'naza

Jeriko kini nera magore, Beteli kumamofo tavaonte me'nea kumate Ai kini nera magore,<sup>10</sup> Jerusalemi kini nera magoki, Hebron kini nera magore,<sup>11</sup> Jarmuti kini nera magoki, Lakisi kini nera magore.<sup>12</sup> Hagi Ekloni kini nera magoki, Gesa kini nera magore.<sup>13</sup> Hagi Debiri kini nera magoki, Gedari kini nera magore.<sup>14</sup> Horma kini nera magoki, Aradi kini nera magore.<sup>15</sup> Hagi Libna kini nera magoki, Adulam kini nera magore.<sup>16</sup> Makeda kini nera magoki, Beteli kini nera magore,<sup>17</sup> Tapua kini nera magoki, Hefa kini nera magore.<sup>18</sup> Hagi Afeki kini nera magoki, Lasharoni kini nera magore.<sup>19</sup> Hagi Madoni kini nera magoki, Hazori kini nera magore.<sup>20</sup> Simronmeron kini nera magoki, Akasafi kini nera magore.<sup>21</sup> Hagi Ta'anaki kini nera magoki, Megido kini nera magore.<sup>22</sup> Hagi Kadesi kini nera magoki, Jokneamu kini ne'ma Karmelima nemaniana magore.<sup>23</sup> Hagi Dori kini ne'ma Nafdorima nemaniana magoki, Goimi kini ne' Gilgalima nemania kini nera magore.<sup>24</sup> Hagi Tirza kini nera mago higeno, ana makara 31ni'a kini vahe hara huzamagatere'naze.

## 13

### *Israeli vahe'mo'zama ha'ma hu'za e'ori'naza mopa'amofo naneke*

<sup>1</sup> Hanki Josua'a rama'a kafu huno ozafaregeno, Ra Anumzamo'a amanage huno asmi'ne, Kagra ozafa rankeno rama'a mopama eriga mopa e'ori'naze.<sup>2</sup> Ana'ma e'orinaza mopa'a Filistia kazigane, Gesu vahe mopanena e'ori'naze.<sup>3</sup> Ana mopama agafa hu'neana, Isipi mopamofo zage hanati kaziga Sihoriti agafa huteno, noti kaziga marerino Ekronei mopama ometete uhanati'ne. Hagi Kenani mopa'afima 5fu'a Filistia kini vahe'mokizmi kuma'ma me'neama'a Gazama, Asdotima, Askelonima, Gatima, Ekronine sauti kaziga mago'a Avi vahe mopa me'ne.<sup>4</sup> Hagi fenkamu sauti kaziga maka Kenani vahe mopa, Saidoni kumate vahe'ma Arama nemanireti agafa huno vuno, ogantuma Amori vahe mopamo'ma Afekima uhanati'nea mopa e'ori'naze.<sup>5</sup> Hagi Gebali vahe mopane, ana maka zage hanati kaziga Lebanoni mopane, Ba'al-Gati fenka kaziga Hemoni agonareti vuno Lebo Hamatima vu'nea mopanena e'ori'naze.<sup>6</sup> Hanki Lebanoniti vuno Misrefot Maimima vigeno, agona fima nemaniza vahe'ene ana maka Saidoni kumate vahe'enena, Israeli vahe'mo'za negesage'na Nagrani'a zamahe natitreghahue. Hagi ko'ma hugante'noa kante atenka, ana mopa Israeli vhahera refko hunka zamisanke'za erigahaze.<sup>7</sup> E'ina hu'negu ama ana mopa refko hunka erisantima hare'za manisaza mopa 9ni'a naganofira nezaminka, Manase naga'ma amu'nompinti refko hu'nea, naga'mokizminena ana mopa zamisnanke'za erigahaze.

### *Rubenima Gatima Manasekizmi mopamofo naneke*

<sup>8</sup> Hanki ruga'ama Manase naga'ma refko'ma hutre'nea naga'ene, Rubeni naga'ene Gati naga'mo'za Moses'e'ma zamagri su'zane hu'noma zami'nea mopa Jodani zage hanati kaziga mopa Ra Anumzamofo eri'za ne' Moses'e'ma huzmante'nea kante ante'za eri'naze.<sup>9</sup> Ana mopama agafama hu'neana, Arnoni agupofima tima eneviregati Aroeriti agafa huteno, ana agupomofo amu'nompima me'nea rankuma'ene, ana maka Medebama me'nea agupo mopareti vuno, Diboni rankumate uhanati'ne.<sup>10</sup> Hige'za Amori vahe kini ne' Sihoni'ma kegava hu'nea rankumatamina maka eri vagare'naze. Hagi kora

Sihoni'a Hesboni kumate mani'neno ana maka rankumatamina kegava huzmante'ne. Hanki ana mopamofo agema'amo'a Amoni vahe mopa atuparega ome atre'ne.

<sup>11</sup> Hanki Giliati vahe mopane, Gesuri vahe kazigane, Makati vahe mopane, ana maka Hemoni agonane, ana maka Basani kazigati vuno Saleka rānkumate uhanati'neana, <sup>12</sup> ana maka kumatmia eri mago huno Basani mopae higeno, Ogi'a Astarotine Edreine mani'neno ana maka kumara kegava hu'ne. Hagi Ogi'a Refai kumate ne'kino, agrira maka naganofi'a fritageno agrake mani'ne. Hanki Refai vahera Mosese'a kora ha' huzmagatereno ana mopazamia hanare'nea mopa me'ne. <sup>13</sup> Hianagi Geshuri vahe'ene Ma'aka vahe'enena Israeli vahe'mo'za hara huzmante'za zamazeri otre'nagu, Israeli vahepinina meninena ana vahera mani'naze. <sup>14</sup> Hianagi Livae nagatfana erisantihare'za manisaza mopa Mosese'a ozami'ne. Hagi vahe'mo'zama Ra Anumzana Israeli vahe'mokizmi Anumzamofontegama tevefima kresramna vanaza ofama huntesafinti, Ra Anumzamo'ma Mosesema asmi'nea kante ante'za zamagra suzana erigahaze. <sup>15</sup> Hanki Mosese'a ko'ma Rubeni naga'ma nagatenofite huno mopa refko huno zami'neana amana hu'ne, <sup>16</sup> Hagi mopazmimo'a Aroeria Arnoni tinkrahopinti agafa huteno, eno ana agupomofo amu'nompima me'nea rankuma'ene, ana maka Madebama fatgoma huno agupoma hu'nea mopa zami'ne. <sup>17</sup> Hagi Hesboni mopane ranra kumazamima ana fatgo hu'nea agupo mopa fima me'nea kumatmi zamagi'a, Dibonima Batmot-Ba'alima, Ba'al-Bet-Meonine, <sup>18</sup> Jahazine Kedemane, Mefatine, <sup>19</sup> anagamu kaziga agupofima ne'onse kumatamimpima nemaniza vahera Kiriati vaheki, Sibma vaheki, anagamu agona fima me'nea agupofima nemaniza Zeret-Shahari vaheki, <sup>20</sup> Pisga agona asoparega me'nea kumatre'na Bet-Peorine, Bet-Jesimotinene. <sup>21</sup> Hanki mago'a mopa Rubeni naga'mo'zama eri'nazana, ana agupofima me'nea maka rankumatamine, Amori vahe kini ne' Sihoni'ma Hesboni mani'neno kegava hu'nea kumatamine eri'naze. Hagi Sihoni kini ne'ene Midieni kva vahetami Evima, Rekemu'ma, Zuri'ma, Huri'ma Reba'ma ugagota hu'nea ne'ene, Sihoni'ene eri mago hu'naza nagara Mosese'a hara huzmagatere'ne. <sup>22</sup> Hagi anampina Beori nemofo Balamuna havige kasnampa ne' Israeli vahe'mo'za bainati kazinteti ahe fri'naze. <sup>23</sup> Hanki Rubeni naga'mo'zama erisantima hare'naza mopamofo agema'amo'a, Jodani tinte ometrene. Hagi ana mopa fima me'nea rankumatamine ne'onse kumataminena, Rubeni naga'mo'za nagatenofite refko hu'za erisantihare'naze. <sup>24</sup> Hanki Gati nagara Mosese'a nagatenofite mopa refko huno zamitere hu'ne. <sup>25</sup> Hanki mopazamimofo agema'amo'a Jazeri kumara erigamateno, ana maka Giliati rankumatamine, Amori vahe'mokizmi mopa amu'nompinti refko huno Raba kumamofo zage hanati kaziga Aroeri vigeno, <sup>26</sup> Hesbonitira Ramat Mizpane, Betonimi uhanatiteno, anantetira Mahanaimi vuno Debiri mopa agentega uhanati'ne. <sup>27</sup> Hanki Gati naga'mo'zama mago'a mopa eri'nazana, Jodani tima enevia agupomofona amu'nompinti refko hu'za zage hanati kaziga eri'naze. Ana mopa Hesboni kini ne' Sihoni'ma kegava hu'neankino, ana mopa'ma Galili timofo noti kazigati agafa huteno, Bet-Haramu me'nea rankumatamine, Bet-Nimrane, Sukotine, Zafonia erigu'a atre'ne. <sup>28</sup> Ama ana rankumatamine ne'onse kumatamia Gati naga'mo'za nagatenofite refko hu'za erisantihare'naze.

<sup>29</sup> Hanki Manase naga'ma amu'nompinti'ma refko hu'naza nagara Mosese'a nagatenofite huno mopa zamitere hu'neana, amanahu hu'ne.

<sup>30</sup> Mahanaimi rankumateti agafa huteno, ana maka Basani kaziga mopa ko'ma Basani kini ne' Ogi'ma kegava hu'nea mopane, ana maka Basani kaziga 60'a rankumatmima Jair me'neana Manase naga'mo'za eri'naze.

<sup>31</sup> Ana mopamo'a Giliati kaziga mopa amu'nompinti erigama neteno, Basani kini ne' Ogi'ma nemania kumatmina, Astarotine Edreinena erigamate'ne, ana mopa'a Mosese'a amu'nompinti Manase nemofo Makiri ne'mofavre nagara nagatenofite refko huno zami'ne.

<sup>32</sup> Hanki Jeriko rankuma'ene Jodani timofo kantu zage hanati kaziga, Moapu agupofi Mosese'ma mani'neno refko huno zami'nea kante ante'za ana mopa eri'naze. <sup>33</sup> Hianagi Livae naga nofimofona Mosese'a erisantima haresaza mopa ozami'neanki, Ra Anumzana Israeli vahe'mofo Anumzamo huvempama huzmantenea kante ante'no zamagrama erisantima haresaza zana agra Ra Anumzamo mani'ne.

## 14

### *Jodani timofo zage ufre kaziga mopa refko hu'za eri'naza naneke*

<sup>1</sup> Hanki ama'i Israeli vahe'mo'zama Kenani mopama refko hu'za erisan-tihare'naza zamofo naneke. Hagi pristi ne' Eleazaki, Nuni nemofo Josuaki, mago'mago naga nofite'ma ugota hutere hu'naza vahe'mo'zane ana mopa refko hu'za zamizage'za erisantihare'naze. <sup>2</sup> Ana mopama refko hu'za eri'nazana 9ni'a naga nofiki 10nima hia nagara amu'nompinti refko hu'ne'za, ana mopa satu zokago re'za Ra Anumzamo'ma Mosesema asmi'nea kante ante'za mopa refko hu'naze. <sup>3</sup> Hanki tare naga nofiki mago'ma amu'nompinti refko'ma hutre'nea naga nofimo'za Mosese'ma ko'ma hu'nere ante'za, Jodani timofo zage hanati kaziga mopa erisanti-hare'naze. Hianagi ana mopama ruga'amo'za refkoma hanafintira Livae naga'mo'za erisantiharegahaze huno Mosese'a osu'ne. <sup>4</sup> Hanki Josefe nagara tare naga'nofi efore hu'nazana, e'i Manasene Ifraemikizni nagare. Hagi Livae nagara magore hu'za mopa ozami'naze. Hianagi sipisipima, memema, bulimakao afuzmima, kegavama hu mopane rankuma'ene zamizage'za mani'naze. <sup>5</sup> Ana hige'za Israeli vahe'mo'za Ra Anumzamo'ma Mosesema asmi'nea kea maka amage ante'za, Kenani mopa refko hu'za nagate nofite hu'za eri'naze.

### *Hebronii mopama Kelepi naga'ma zami'naza naneke*

<sup>6</sup> Anante Juda naga'mo'za Josuante Gilgalia ageno, Kenaziti ne' Jefune nemofo Kalepi'a Josuana anage huno asmi'ne, Ra Anumzamo'ma Mosese'ma Anumzamofo Vahe'ma asamigeno, Kades Banea kumate'ma nagriku'ene kagriku'ene hu'nea nanekea kagra ko antahi'nane. <sup>7</sup> Hanki ana knafina nagra 40'a kafu hu'nogeno Kades Banea kumetitira frakita vuta mopa ome kehogura Ra Anumzamofo eri'za ne' Mosese'a hunantege'na vutena e'noana, havigea nagra osu'na nagrama ke'noa zanku nagu'areti hu'na tam-age naneke eme asmi'noe. <sup>8</sup> Hianagi nafuhe'za nagranema vu'namo'za koro ke nehu'za, vahera zamagu'a zamazeri karogro ki'naze. Ana hu'nazanagi nagra maka nagu'areti hu'na Ra Anumzana Anumzanimofona amage ante'noe. <sup>9</sup> Higeno ana zupa Mosese'a huvempa huno anage hu'ne, tam-agereru huno ina mopare'ma kagiama rente'nana mopa kagrane mofavre nagaka'anen erisantihareta manisaza mopa mevava hugahie. Na'ankure kagra nagri Anumzana kagu'areti hunka amage ante'nane.

<sup>10</sup> Hanki Kalepi'a mago'ane huno, Antahiho, maka Israeli vahe'mo'ma ka'ma mopafima mani'za neageno'ma, Ra Anumzamo'ma ama ana zanku'ma Mosesema asmi'nereti'ma e'neana, 45'a kafu evu'ne. Hanki nagrira natrege'na ana knafina ofri'noanki menina kafunimo'a 85'a kafu nehie. <sup>11</sup> Hu'neanagi Mosese'ma hunanteg'e'nama vu'noa zupama me'neankna hankave menina hankaveni'a zahufa me'neanki'na, amne vu'na e'na hu'na hara hugahue.

<sup>12</sup> Hagi ana zupama Ra Anumzamo'ma hu'nea kante antenka menina agonamofo asopa kaziga mopa namighane. Hanki kagra ana zupa mani'enka antahi'nake'za fraki'tama vuta ana mopama ome ke'nona vahe'mo'za ana agonamofo asoparegama me'nea mopagura hu'za, tusinasi Anaki vahe'mo'za ran kuma'zamimofona hankave have kegina hu kagi'za mani'naze hu'za hu'naze. Hianagi Ra Anumzamo'ma nazama huku'ma hanuno'a naza hanige'na, agrama hu'nea kante ante'na ana vahera zamahe natitregahue hu'noe.

<sup>13</sup> Anante Josua'a Jefune nemofo Kalepina Anumzamo aza hinogu asomu ke hunenteno, erisanti'harenogu Hebroni kaziga mopa Kalepinā ami'ne. <sup>14</sup> E'ina hu'negu Hebroni mopamo'a Kenazi ne' Jefune nemofo Kalepine agripinti'ma fore'ma hanaza vahe'mokizmi mopa me'ne. Na'ankure agra maka agu'areti huno Ra Anumzana Israeli vahe'mokizmi Anumzana amage ante'negu anara hu'ne.

<sup>15</sup> Higeno korapara Hebroni kumamofo agi'a Kiriat-Arbae hu'za nehazane, tusinasi Anaki vahepinti ne' Arba'e nehaza ne'mofo agire asamare'naza kumare. Higeno ana maka mopafina hara forera osigeno, mopamo'a fru huno me'ne.

## 15

### *Juda naga'ma mopama refko huzami'nea naneke*

<sup>1</sup> Hanki Juda naga'ma nagate nofite'ma hu'za mopama refko'ma huzami'nazana, fenamu sauti kaziga Idomu vahe mopama ometete uramino, vuvava huno sauti kaziga Sinie nehaza ka'ma kotega vu'ne.

<sup>2</sup> Hanki mopazmimofo agema'amo'a fenamu sauti kazigati'ma agafama hu'neana, fri hagerimofo ankenaregati agafa huteno, <sup>3</sup> anantetira vuno Akrabimie nehaza agonaregama mareneriza kana agatereno, kantu kaziga Sinie nehaza ka'ma kokantega vuteno, Kades Banea mopamofo sauti kazigati marerino vuno, Hezroni rankumara agatereno Ada rankumatega anagamu uhanatiteno, ananteti rukrahe huno Karka rankumate vu'ne.

<sup>4</sup> Hagi anantetira vuno Asmoni kumate uhanatiteno, Isipi mopama emete'nere'ma osi tinkraho me'nea avaririno Mediterenieni ra hagerinte uhanatine. Ana higeno Juda nagamokizmi sauti kaziga mopamo'a anante ometre'ne.

<sup>5</sup> Hagi zage hanati kaziga mopamofo agema'amo'a Fri Hagerimpima Jodani timo'ma enefreregaa vu'ne. Higeno noti kaziga mopamo'a Fri Hagerimpima Jodani timo'ma enefrereti agafa hu'ne. <sup>6</sup> Hanki anantetira ana mopamofo agema'amo'a marerino zage fre kaziga Bet-Hoglen uhanatiteno, vuno anagamu noti kaziga Bet-Araba Bohani Rubeni nemofo havema me'nere uhanati'ne. <sup>7</sup> Hagi mopamofo agema'amo'a Akhori aguporegati marerino vuno Debiri uhanatiteno, rukrahe huno noti kaziga Gilgali agonomo'ma sauti kaziga Adumimi agonamofo asoparega vuteno, anantetira vuvava huno En-Semesima tima nehanatire vuno, En Rogeli ome atre'ne.

<sup>8</sup> Hanki anantetira marerino Ben Hinomu agupoma emetre'nerega Jerusalemi kumamofona sauti kaziga me'nea agonamofo asoparega vu'ne. Anantetira Hinomu agupomofona zage fre kazigati, ana agonamofo morusapi marerino, Refaimi agupomofo noti kazigama ometretrega vu'ne.

<sup>9</sup> Hagi ana agonamofo morusapintira vuno mopamofo agema'amo'a Neftoa tinkeriramma me'nere vuteno, vuno Efroni agona tvaonte me'nea rankumatminte uhanatiteno, anantetira rukrahe huno Ba'ala rankumate vu'ne. Hagi ana kumamofo mago ag'i a Kiriad Jearimi hu'za menina nehaze.

<sup>10</sup> Hanki Ba'alatira zage fre kaziga rukrahe huno Seiri agonare uhanatiteno, Jearimi agonamofo [e'i Kesalon] noti kaziga asoparega vuteno vuvava huno Bet Semesi rugitagino Timna vu'ne. <sup>11</sup> Hagi anantetira ana mopamofo agema'amo'a vuno Ekroni noti kaziga ne'one agonaramintega vuteno, rukrahe huno Sihikeroni vuteno, anantetira Ba'ara agona erigama neteno Jabneli uhanati'ne. Higeno ana mopamofo agema'amo'a Mediterenia ra hagerinte ome atre'ne. <sup>12</sup> Hagi Juda naga'mokizmi zage fre kaziga mopamofo agema'amo'a, Mediterenia ra hagerimofo ankenare me'ne. Hagi Juda naga'mo'za ana mopafi nagatenofite hu'za mani'naze.

### *Josua'ma Kalepima mopama refko humi'nea naneke*

<sup>13</sup> Ko'ma Ra Anumzamo'ma asami'nea kante anteno, Josua'a Jefune nemofo Kalepina Juda nagamokizmi mopafinti mago mopa refko humi'neana Kiriad Arbae, e'i menina Hebronni me'ne. (Arba'a Anaki tusinasi vahe'mokizmi nezamageh'o'e).

<sup>14</sup> Hagi Kalepi'a Hebroniti'ma 3'a Anaki mofavrerami zamahe natitre'neana Sesaiki, Ahimaniki, Talmaima huno zamahe natitre'ne.

<sup>15</sup> Hanki Kalepi'a Debiri rankumapima mani'naza vahera marerino hara ome huzamante'ne. Hanki kora ana kumakura (Kiriad Sefa nehzane).

<sup>16</sup> Hanki Kalepi'a amanage hu'ne, ina ne'mo'o Kiriad sefa vahe'ma ha'ma huzamagateresia nera mofani'a Aksana amisnugeno a'erintegahie.

<sup>17</sup> Higeno Kalepi nefu Kenasi mofavremo Otniel Kiriad Sefa kumara hara huzmagateregeno, Kalepi'a mofa'a Aksana amigeno ara erinte'ne. <sup>18</sup> Hagi Aksama Otnielinte'ma marea knazupa, Aksa'a nefu Kalepina mopagu ome antahigenaku Otnielina tutu hunte'ne. Hagi donki afu'mofo agumpinti'ma Aksa'ma anama takau neregeno'a, Kalepi'a antahigeno, na'a hugante'neuegukave'nesie?

<sup>19</sup> Higeno Aksa'a nefana amanage huno asmi'ne. Asomu hunantenka Kagra Negevi kaziga hagege mopa hago nami'nananki, mago'a kampu'i tinena namighane. Higeno anagamune fenkma kaziganema me'nea kampui tina Kalepi'a ami'ne.

### *Juda naga mopa'afima me'nea rankumatmimofo zamagima krente'naza naneke*

<sup>20</sup> Hanki Juda naga'mo'zama rankuma'ene mohanema nagatenofite'ma hu'za erisantihare'naza kumatamimofo zamagi'a ama'ne, <sup>21</sup> Sauti kaziga Idomu vahe mopa eme atretegama. Juda naga'mokizmi rankumatmima me'neana, Kebzilima, Ederima, Jagurima.

<sup>22</sup> Kinama, Dimonama, Adadama, <sup>23</sup> Kedesima, Hazorima, Itnanima, <sup>24</sup> Zifima, Telemima, Bearotima, <sup>25</sup> Hazor-Hadatama, Keriot-Hezronima, (e'i Hazorie hu'za nehaza kumare), <sup>26</sup> Amamuma, Semama, Moladama, <sup>27</sup> Hazar-Gadama, Hesmonima, Bet-Peleitima, <sup>28</sup> Hazar-Sualima, Besibama Biziota, <sup>29</sup> Ba'alama, Imima, Ezemima, <sup>30</sup> Eltoladima, Kesilima, Homama, <sup>31</sup> Ziklagima, Madmanama, Sansanama, <sup>32</sup> Lebaotima, Silhimima, Ainima,

Rimoni kuma'enene. Hagi ana makara 29ni'a ranra kumatmi me'negeno, ne'onse kumazmia megagitere hu'ne.

<sup>33</sup> Hanki zage fre kazigama ne'onse agonaramimofo asoparegama me'nea kumataminena Juda naga'ma zami'neana, Estaolima, Zorama, Asnama, <sup>34</sup> Zanoama, En-Ganimima, Tapuama, Enamuma, <sup>35</sup> Jarmutima, Adulamuma, Sokoma, Azekama, <sup>36</sup> Sa'araimima, Atithaimima, Gederama, Gederotaimima huno me'ne. Ana makara 14ni'a ranra kumatmi me'negeno, ne'onse kumazmia megagitere hu'ne.

<sup>37</sup> Hagi mago kazigama metru hu'nea ranra kumatmimofo zamagi'a, Zenanima, Hadasama, Migdal-Gatima, <sup>38</sup> Dileanima, Mizpama, Joktelima, <sup>39</sup> Lakhisima, Bozkatima, Eklonima, <sup>40</sup> Kabonima, Lamamura, Kitlisima, <sup>41</sup> Gederotima, Bet-Dagonima, Na'ama, Makeda kuma'enene. Hagi ana makara 16ni'a ranra kumatmi megeno, ne'onse kumazmia megagitere hu'ne.

<sup>42</sup> Hagi mago kazigama metru hu'nea ranra kumatmimofo zamagi'a, Libnama, Etama, Asanima, <sup>43</sup> Iftama, Asnama, Nezibima, <sup>44</sup> Keilama, Akzibima, Maresa kumaki huno megeno, ana makara 9ni'a ranra kumatmi me'negeno, ne'onse kumazmia megagitere hu'ne.

<sup>45</sup> Hanki Ekrone ran kuma e'neri'za ne'onse kumazmima megagi'nea kuma'taminea Juda naga'mo'zama eri'nazana, <sup>46</sup> Ekrone rankuma e'neri'za, Asdoti rankuma'ene e'neriza, vu'za hagerinkenaregama me'nea neonse kumataminena eri'naze. <sup>47</sup> Asdotima me'nea ranra kuma'ene ne'onse kumatamine, Gaza rankuma'ene tvaoma'rema me'nea neonse kumatamima, fenkamu sauti kaziga Isipi mopama eme atretegema me'nea tinkagomute vigeno, Mediteterenia ra hageri ankenare ome atre'ne.

<sup>48</sup> Hagi agonaramimpima me'nea kumatmina, Samirima, Jatirima, Sokoma, <sup>49</sup> Danama, Kiriat-Sana [mago agi'a Debirie]. <sup>50</sup> Hagi Anabuma, Estemoma, Animima, <sup>51</sup> Gosenima, Holonima, Giloma huno megeno ana makara 11ni'a ranra kumatmi me'negeno, ne'onse kumazmia megagitere hu'ne. <sup>52</sup> Hanki mago kaziga metru hu'nea ranra kumatmimofo zamagi'a, Arabuma, Dumama, Esanima, <sup>53</sup> Janimima, Bet-tapuama, Afekama, <sup>54</sup> Humtama, Kiriat-Arbama, (e'i menina Hebronie nehaze), Ziorima huno megeno, ana makara 9ni'a ranra kumatmi me'negeno ne'onse kumazmimo megagitere hu'ne. <sup>55</sup> Hanki mago kaziga metru hu'nea ranra kumatmimofo zamagi'a, Maonima, Kamelima, Zifima, Juttama, <sup>56</sup> Jezrielima, Jokdeamuma, Zanoama, <sup>57</sup> Kainima, Gibeama, Timna kumaki huno megeno, ana makara 10ni'a ranra kumatmi me'negeno, ne'onse kumazmia megagitere hu'ne.

<sup>58</sup> Hanki mago kaziga metru hu'nea ranra kumatmimofo zamagi'a, Halhulima, Bet-Zurima, Gedorima, <sup>59</sup> Ma'aratima, Bet-Anotima, Eltekonima huno megeno, ana makara 6si'a ranra kumatmi megeno, ne'onse kumazmia megagitere hu'ne. <sup>60</sup> Hanki mago kaziga me'nea rankuma-tremokizni zanagi'a, Kiriat-Ba'aline, (mago agi'a Kiriat Jearimie), Raba kuma'ene me'nakeno, ne'onse kumatmimo'a megagitere hu'ne. <sup>61</sup> Hagi ka'ma mopama me'nefima me'nea kumatmimofo zamagi'a, Bet Arabama, Midinima, Sekakama, <sup>62</sup> Nibsaninma Hage rankuma'ma En-Gedi kumaki hu'za me'naze. Hagi ana makara 6si'a ranra kumatmi me'negeno, ne'onse kumazmia megagitere hu'ne. <sup>63</sup> Hianagi Jebusi vahe'ma Jerusalema ko'ma mani'naza vahera, Juda naga'mo'za zamahenati otre'za, zamatrerezage'za zamagrane magopi Jerusalemi kumapi mani'za e'za meninenha mani'naze.

**16***Efraemi naga nofi'ma mopama refko huzami'nea naneke*

<sup>1</sup> Josefe agehemokizmima mopama refkoma huzmi'nazana, zage hanati kaziga Jeriko tavaonte Jodani tinteti agafa huteno, vuno ka'ma mopamofo amu'nompinti rugatagino marerino Beteli kaziga me'nea agonaramintega mareri'ne. <sup>2</sup> Hagi Beteltila Luzi vuteno anantetira vuvava huno Ataroti kaziga Arkatai vahe kumate uhanati'ne. <sup>3</sup> Hagi anantetira zage fre kaziga uramino Jefleti vahe mopama omete'nere uhanatiteno, vuvava huno fenkama kaziga me'nea Bet Horoni aguporega vuno, Gezeri vuteno, anantetira Mediterenia hagerinte ometre'ne. <sup>4</sup> Hagi Josefena agehe'za Manase naga'ene Efraemi naga'mo'za ama ana mopa erisantihare'naze.

<sup>5</sup> Hanki Efraemi naga'mo'zama mopazamima nagatenofite'ma refko'ma hu'za eri'nazana amanahu hu'ne, zage hanati kaziga mopamofo agema'amo'a agafama hu'neana Atarot Ada rankumateti agafa huteno, vuno anagamu kaziga me'nea Betoroni ran kumate uhanati'ne. <sup>6</sup> Hagi anantetira mopamofo agema'amo'a vuvava huno Mediteterenia ra hagerinte uhanati'ne. Hanki noti kaziga Mitmetat kumatetira rukrahe huno zage hanati kaziga Ta'anat Siloa vuteno, ana kumara agatereno zage hanati kaziga Janoa ran kumate uhanati'ne. <sup>7</sup> Hanki isagamo'a anantetira uramino Atarotine, Na'ara ran kumatrente uhanatiteno, vuvava huno Jeriko rankumatire vuteno, vuno Jodani tinte ome vagare'ne.

<sup>8</sup> Hanki Tapua rankumatetira mopamofo agema'amo'a zage fre kaziga Kana tinkazonture vuno agatereno Mediterenia ra hagerinte uhanati'ne. Hanki ama ana mopa Efraemi naga'mo'za nagatenofite refko hu'za erisantihare'naze. <sup>9</sup> Hanki Efraemi naga'mokizmnia mago'a ranra kuma'ene ne'onse kumazamia Manase naga'mo'zama erisantihare'naza mopafi me'ne. <sup>10</sup> Hanki Kenani vahe'ma Gezeri kumate'ma nemaniza vahera zamagra zamahenati otre, zamatrage'za magoka maniza e'za amagnarerera e'naze. Hianagi Efraemi naga'mo'za tutu huzmantage'za zamagri kazokzo eri'zanke eri'naze.

**17***Manase naga nofi'ma mopama refko huzami'naza naneke*

<sup>1</sup> Hanki Josefena zage mofavre'amofo Manase naga nofira mago mopa refko huzami'naze. Hagi Manasena zage mofavre'a Makirikino Gileati vahe'mokizmi nezmafa'e. Na'ankure agra korapara harfa ne'mani'negu Giliatine Basani mopa agri nagara refko huzami'naze.

<sup>2</sup> Hagi amu'nompinti'ma mago'a Manase naga'ma refkoma hu'za mani'naza nagara, nagatenofite hu'za mopama refko huzami'nazana, Abiesama, Helekima, Asrielima, Sekemima, Heferine Semitane huno refko huzami'naze. Hanki ama ana nagara Josefena mofavre Manase nagapinti efora hu'naza vene'negi'za, mago mago naga'nofite'ma ugota hu'naza vahe'mokizmi zamagi'a me'ne. <sup>3</sup> Hagi Serofehati'a Heferi mofavre manigeno, Heferi'a Gileati mofavre manigeno, Gileati'a Makiri mofavre manigeno, Makiri'a Manase mofavre mani'ne. Hianagi Zelofehati'a mago ne'mofavrea onte'neanki, mofanege zmante'neankino zamagi'a amanahu hu'ne, Malaki, Noaki, Hoklaki, Milkaki Tirsaki huno zamante'ne. <sup>4</sup> Hanki ana mofa'nemo'za zamagra pristi ne' Eliesane, Nuni nemofo Josuane, mago'a Israeli kva vahete vu'za amanage hu'naze, Ra Anumzamo Mosesena

asamino, tasarehe'zama mopama erisafintira mago'a tagrikura mopa zamiho huno hunte'ne. E'ina hu'negu Josua'a Ra Anumzamo'ma hu'nea kante anteno mopazamifinti zamasarerehe'mokizmia mago'a mopa zami'ne. <sup>5</sup> Hagi Manase naga'mo'za Jodani timofo zage hanati kaziga Gileati mopane Bashani mohanena eri'ne'za, mago'an 10niasi refkoma huzami'naza mohanena eri'naze. <sup>6</sup> Hagi Manase nagapinti mofa'nemo'za, vene'nemo'zama mopama erizafintira zamagranena anampinti mago'a mopa eri'naze. Hanki Gileati mopa mago'a Manase mofavremokizmi mopa me'ne.

<sup>7</sup> Hanki Manase naga nofi'mofo mopamo'a, Aseriti agafa huteno Sekemu zage hanati kaziga Mikmetati vu'ne. Hagi anantetira mopamofo agema'amo'a henkamu sauti kaziga uramino En-Tapuama nemaniza vhahera zamazerigu'a ate'ne. <sup>8</sup> Tapua mopa Manase naga nofi'mofo mopa megeno, Tapua rankumara Manase naga'mofo mopa agema'arega me'neanagi, Efraemi naga'mofo mopa me'ne.

<sup>9</sup> Hagi anantetira mopamofo agema'amo'a fenkamu sauti kaziga uramino Kana osi tinte uhanati'ne. Ana timofo sauti kazigama me'nea rankuma tamina, Efraemi naga'mofo kumatamine. E'ina rankumatamimo'a Manase naga rankumatamimofo amu'nompi me'ne. Hianagi Manase naga'mofo mopa agema'amo'a Kana osi tinkagomu'mofo noti kaziga evuteno, vuno Mediterenia ra hagerintega uhanati'ne. <sup>10</sup> Hanki Sauti kazigama me'nea mopa Efraemi naga'mokizmi mope. Hagi noti kazigama me'nea mopa Manase naga'mokizmi mopagino zage fre kaziga Mediterenia ra hagerikenare ome atre'ne. Hagi Manase naga'mofo mopa agema'amo'a rugitagigeno, Aseli nagamofo mopa noti kaziga megeno, Isakar naga'mofo mopa zage hanati kaziga me'ne.

<sup>11</sup> Hanki Manase naga'mofo mopa Isaka naga'ene Aseli naga'mokizmi mopafina me'neana, Betsani rankuma'ene ne'eonse kumatamima tavaoma'are'ma me'nea kumatamine, Ibliamu rankuma'ene, ne'onse kumatamima tava'oma'are'ma me'nea kumatamine, Nafat Dori rankuma'ene, Endori rankuma'ene, Tamak rankuma'ene, Megido rankuma'ene ana maka ra kumatamimofo tavao zamire'ma me'nea neonse kumatamia Manase naga'mo'za eri'naze.

<sup>12</sup> Ana hu'neanagi Manase naga'mo'za ana rankumatamimpintira Kenani vhahera zamahenati otre zamatrage'za ana mopafi mani'naze. <sup>13</sup> Hianagi Israeli vahe'mo'zama hankave nentake'ma nehu'za, Kenani vhahera zamahenatitre vagaore'nazanki, mago'a zamatrage'za manine'za Israeli vahe'mokizmi kazokzo eri'za eri zamante'naze.

<sup>14</sup> Henka Josefe naga'mo'za Josuankura amanage hu'naze, Ra Anumzamo tagri nagara asomu hurantegeta rama'a vahe fore huta mani'nonanki, na'a higenka magoke mopagera tam'i'nane?

<sup>15</sup> Hagi Josua'a ke nonazmia amanage hu'ne, Tamagrama tusi'a vahe'ma fore hu'ne'nageno Efraemi agona mopamo'ma osi'ma huramante'nigeta, Perisi vahe'ene, Refaimi vahe mopafi anagamu zafa tanoparega marerita kumara ome eriama huta maniho.

<sup>16</sup> Hige'za Josefe naga'mo'za amanage hu'naze, agona mopamo'a knareru huorantegahie. Hianagi agupofima Kenani vahe'ma nemaniza vahe'ene, Bet Sani ran kumate'ene, ne'onse kuma'ma tava'oma'are'ma me'nea kumatamimpine, Jezrili agupofima nemaniza ha'ma hu'zana aenire karisi ante'naze.

<sup>17</sup> Hianagi Josua'a amanage huno Josefe mofavrerare Manasene, Efraemi naga'mokizmia zamasami'ne, Tamagra tusi'a vahe fore hutma hankaventake hu'nazankita magoke mopafina omanigahaze. <sup>18</sup> Hagi agonarega zafa mopa me'neanagi, tamagra amane ome eriama huta erigahaze. Inante zafa mopamo'a ome atre'neo, anama'a eriama'ma hanazama amo'a tamagri mopa manegahie. Hanki Kenani vahe'mo'za aenire karisi ante'ne'za hanventake hu'nazanagi, tamagra amne zamahe natitregahaze.

## 18

### *Josua'ma mago'a mopama Israeli naga'ma refko huzami'nea naneke*

<sup>1</sup> Hanki Israeli vahe'mo'za mago'a mopama omerite'za Sailo kumate omeritru hu'za, atruma hu'za mono'ma hu seli nona ki'naze. <sup>2</sup> Hianagi Israeli naga'pintira 7ni'a naga nofi'mo'za mopa erisanti ohare'nazageno, <sup>3</sup> Josua'a Israeli vahera amanage huno zamasami'ne, Ra Anumzana tamafah'e'i Anumzamo mopa ko tami'neanki, na'anku avega anteta mani'neta ufretta mopa e'norize? <sup>4</sup> Hanki mago'mago naga nofipintira 3'a vene'ne hu hamprizmantenke'na nagra hu zamantesuge'za vu'za ana mopa inankna mopao ome nege'za, mago mago'mo'ma erisantima haresia avamente avon tafepi krenente'za ete'za nagrite eri'za eho. <sup>5</sup> Hagi tamagra mopa 7ni'afi refko huntenko, Juda naga'mo'za sauti kaziga zamagra'a mopafi manisage'za, Josefe naga'mo'za noti kaziga zamagra'a mopafi mani fatgo hugahaze. <sup>6</sup> Anama hutetma ana 7ni'a mopamofo naneke'a avon tafepi kretetma, nagrite eritma enke'na mago mago nagamo'a ina mopa erigahifi, Ra Anumzana tagri Anumzamofo avure satu zokagoreta iz a mopa erigahifi kegahune. <sup>7</sup> Na'ankure Livae naga'mo'za mopa e'ori'nazanki, Anumzamofo eri'zama erisnafinti erisantiharegahaze. Hagi Gati nagaki, Rubeni naga'ene, Manase nagara amu'nompinti refko hazage'za, Jodani timofo kantu zage hanati kaziga, Ra Anumzamofo eri'za ne' Moses'e'ma zami'nea mopa eri'naze.

<sup>8</sup> Hagi mopamofo agema'ama avontafepi krente vahe'mo'za otizageno, Josua'a amanage huno zamasami'ne, ana maka mopafi vutma vararetma ketetma, inankna mopa me'nefi agi agenkea avompi krentetetma ete nagrite Sailo enke'na, Ra Anumzamofo avure satu zokago reno keteno, anante Israeli vahe'mokizmia nagatenofite huno mopa refko huno zami'ne.

<sup>9</sup> Hige'za zamagra anantetira atre'za vu'za ana mika mopa ome vano hu'za kete'za, ana moparamimofo nanekea avontafepi krente'naze. Ranra kumatmina agateore ana maka 7ni'afima regitagi'naza mopa ke vagarete'za, Josua'ma kuma'ma anteno Sailoma mani'nere ete'za e'naze. <sup>10</sup> Anante Sailo kumate Josua'a Ra Anumzamofo avure satu zokago reno keteno, anante Israeli vahe'mokizmia nagatenofite huno mopa refko huno zami'ne.

### *Benameni naga'mo'zama mopama eri'naza naneke*

<sup>11</sup> Hanki Benzameni naga'mo'zama nagatenofite hu'zama mopama refko hu'za eri'nazana, Juda naga'ene Josefe naga'mokizmi mopamofo amu'nozmifi me'ne a mopa erisantihare'naze. <sup>12</sup> Noti kaziga mopazmimofo agema'amo'a Jodani tinteti agafa huteno vuno, Jeriko noti kaziga me'ne a agonaramimofo asoparega vuno, agatereno zage ufre kaziga me'ne a agonaramimpi ufreno ka'ma mopafi Bet Aveni uhanati'ne. <sup>13</sup> Anantetira mopamofo agema'amo'a rugitagino fenkamu sauti kaziga Luzi (menina Betelie nehaze) ran kumatega ne'onse agonarami me'nerega uramiteno, vuno sauti kaziga Bet Horon rankuma'mofo fenka kaziga tava'oma'are

mago agonamofo agofetu me'nea rankuma Atarot Ada uhanati'ne. <sup>14</sup> Hagi anantetira mopamofo agema'amo'a rukrahe huno ana agonamofo zage ufre kaziga Bethoroni vu'ne. Anantetira mopamofo agema'amo'a sauti kaziga vuno Kiriat Ba'al (mago agi'a Kiriat Jearim) rankumate uhanati'ne, ana kumara Juda nagamokizmi ran kumare. E'i zage ufre kaziga ome atre'nea mopamofo agema'e.

<sup>15</sup> Hagi sauti kaziga mopamofo agema'amo'ma agafama hu'neana, Kiriat Jearimi tavaonte zage ufre kazigati agafa huteno, eno Neptoa kampu'i tinte uhanati'ne. <sup>16</sup> Hagi anantetira mago'ene isagamo'a uramino vuno Re-faimi agupomofo noti kaziga Ben Hinomu aguporegama avugosa hunte'nea agonarega uramiteno, anantetira mopamofo agema'amo'a Jebusi vahe rankuma'mofo sauti kaziga agona tava'onte Hinomu agupofi vuvava huno En-Rogel uhanati'ne.

<sup>17</sup> Hanki anantetira mopamofo agema'amo'a rukrahe huno noti kaziga vuno En-Semesi uhanatiteno, vuvava huno Adumimi agonarega avugosama hunte'nere Geliloti kumate uhanatiteno, anantetira vuvava huno Rubeni nemofo Bohani havere urami'ne. <sup>18</sup> Anantetira mago'ene mopamofo agema'amo'a vuvava huno noti kaziga Bet Araba me'nea agonarega vuteno, vuno Jodani tima enevia agupofi urami'ne. <sup>19</sup> Hagi anantetira mopamofo agema'amo'a vuno Bet-Hogla noti kaziga me'nea agonarega vuteno, ugatereno kame kaziga Fri Hagerimofo noti kaziga ankenare Jodani timo'ma unefrere sauti kaziga uhanati'ne. <sup>20</sup> Hanki zage hanati kaziga omete mopamofo agema'amo'a, Jodani tinte uhanatine. E'i Benjamin naga'ma nagatenofite hu'zama erisantimahare'naza mopa ometre emetrem hu'nea agema'e.

<sup>21</sup> Hanki ama'i Benzamini naga'mo'zama nagate nofite'ma hu'za eri'naza rankumatamimofo zamagi'e, Jerikogi, Bet-Hoglagi, Emek-Kezizigi, <sup>22</sup> Bet-Abarama, Zemaraimima, Betelima, <sup>23</sup> Avimima, Parama, Oframa, <sup>24</sup> Kefar-Amonima, Ofninima Gebane huno me'ne. Higeno ana makara 12fu'a rankumatami megeno, ne'onse kumatamimo megagi zmantetere hu'ne.

<sup>25</sup> Hagi ruga'a Benzameni naga'mo'zama mani'naza rankumatamimofo zamagi'a, Gibionima, Ramama, Birotima, <sup>26</sup> Mispama, Kefirama, Mozama, <sup>27</sup> Rekemima, Irpelima, Taralama, <sup>28</sup> Zelama, Jebusi vahe rankuma (menina Jerusalemie nehaze) Ha-Elefima, Gibeane Kiriati rankuma'enene, ana makara 14ni'a rankumatami megeno, ne'onse kumatamimo megagi zamante'tere hu'ne. E'i Benzameni naga'mo'zama nagate nofite'ma hu'zama erisantimahare'naza mopa me'ne.

## 19

### *Simioni naga'mo'za mopa eri'naza naneke*

<sup>1</sup> Hanki nampa 2 mopare'ma satu zokago'ma re'za kazana, Simioni agi efore hige'za, Simioni naga'mo'za nagate nofite hu'za refko hu'za erisantihare'naze. Ana mopama erisantimahare'naza mopamo'a Juda naga'mokizmi mopamofo amu'nozamifi me'ne. <sup>2</sup> Simioni naga'mozama erisantimahare'naza kumatamimofo zamagi'a ama'ine, Bersebama, mago agi'a (Sebae) Moladama, <sup>3</sup> Hazar-Sualima, Balama, Ezemima, <sup>4</sup> Eltoladima, Bethulima, Homama, <sup>5</sup> Ziklagima, Bet-Makabotima, Hazar-Susama, <sup>6</sup> Bet-Lebaotine, Saruheni kuma me'ne. Hagi ana makara 13ni'a ranra kumatmi megeno, ne'onse kumatamimo megagi zamantetere hu'ne.

<sup>7</sup> Hanki mago'ane 4'a ranra kumatami megeno, ne'onse kuma'ma megagiterema hu'nea kumatamima eri'nazana, Aínima, Rimonima, Eterima, Ásani kuma'ene eri'naze.

<sup>8</sup> Ana nehu'za ranra kuma'ene ne'onse megagi zmante'nea kumatamina miko eri vagarazageno vuno, fenkamu sauti kaziga Ba'alat Bea mago agi'a Nigevi kaziga Rame nehaza kumate uhanatige'za Simioni naga'moza nagatenofite hu'zama erisantimahare'naza mope.

<sup>9</sup> Hanki Juda nagara ra mopa refko huzami'nagu, Simioni naga'mo'za Juda naga'mokizmi mopafinti mago'a eri'naze. Ana hu'negu Simioni naga'mo'za Juda naga'mokizmi mopafi mago'a mopa erisantihare'za mani'naze.

### *Zebuluni naga'mo'zama mopama eri'naza naneke*

<sup>10</sup> Hanki nampa 3 mopare'ma satu zokago'ma re'za kazana, Zebuluni agi efore higeno, Zebuluni naga'mo'za nagatenofite refko hu'za eri'naza mopazamimofo agema'amo'a vuno, Saridi rankumate uhanatine. <sup>11</sup> Hagi zage fre kaziga mopamofo agema'amo'a Marala uhanatiteno, vuno Dabeseti tavaonte vuteno, vuno Jokneam kumamofo zage hanati kaziga ositi me'nere uhanatine. <sup>12</sup> Hanki Sarititura mopamofo agema'amo'a rukrahe huno zage hanati kaziga Kislot-Tabori kaziga uhanatiteno, vuno Daberati uhanatino, Jafia mareri'ne. <sup>13</sup> Anantetira mopamofo agema'amo'a zage hanati kaziga vuvava huno Gat Hefarine, Et Kazini rankuma trente vuteno, anantetira Rimmoni uhanatiteno, rukrahe'ma hiana Nea kaziga avugosa huntenu vu'ne. <sup>14</sup> Hanki noti kaziga mopamofo agema'amo'a rugagino, Hanaton rankumate uhanatiteno, vuvava huno Ifta-El agupoma ome atrete ome atre'ne.

<sup>15</sup> Hanki ana maka Zebuluni naga nofi'moza'ma eri'naza ranra kumatamimofo zamagi'a amanahu me'nere, Katatima, Nahalalima, Simronima, Idalane, Betlehemu kuma'enena eri'naze. Hagi ana makara 12fu'a rankumatamine ne'onse kumatamima megagi zamanteterema hu'nea kumara erivagare'naze. <sup>16</sup> Hanki ama ana ranra kumatamine tavaao zamire'ma me'n'e a neonse kumatamina Zebuluni naga'mo'za nagatenofite refko hu'za zamagra'a mopa erisantihare'naze.

### *Isaka naga'ma mopa eri'naza naneke*

<sup>17</sup> Hanki nampa 4 moparema satu zokagoma re'za kazana, Isaka agi efore hige'za, Isaka naga'mo'za nagatenofite hu'za mopa refko hu'za erisantihare'naze. <sup>18</sup> Hagi Isaka naga'mo'za eri'naza ranra kumatamimofo zamagi'a amanahu me'nere, Jesrilma, Kesulotima, Sunemima, <sup>19</sup> Hafaraimima, Sionima, Anaharatima, <sup>20</sup> Rabitima, Kisionima, Ebezima, <sup>21</sup> Remetima, En-Ganimima, En-hadama, Bet-Pazezima hu'za eri'naze. <sup>22</sup> Hagi Isaka naga'mo'zama eri'naza mopamofo agema'amo'a Tabori agonare vuteno, vuno Sahahazumane Bet-Semes rankuma trente uhanatiteno, vuno Jodani tinte ome atrege'za Isaka naga'mo'zama eri'nazana, 16ni'a ranra kuma'tamine tavaaozamire'ma me'nea neonse kumataminena eri vagare'naze. <sup>23</sup> Ama ana ranra kuma'tamine ne'onse kumatamina Isaka naga'mo'za nagatenofite hu'za zamagra'a suza refko hu'za erisantihare'naze.

### *Asa naga'mo'zama mopa eri'naza naneke*

<sup>24</sup> Hanki nampa 5fu mopare'ma satu zokagore'za kazana, Asa agi efore hige'za, Asa naga'mo'za nagatenofite hu'za mopa refko hu'za erisantihare'naze. <sup>25</sup> Hagi Asa naga'mo'zama eri'naza mopa'afima me'nea ranra

kumatamimofo zamagi'a amanahu hu'ne, Helkatima, Halima, Betenima, Aksafama,<sup>26</sup> Alamelekima, Amadine, Misali ran kuma'ene, zage fre kaziga mopamofo agema'amo'a Kameli agonane Siho Libnat rankuma tavaonte ome antre'ne.

<sup>27</sup> Hanki anantetira mopamofo agema'amo'a ome rukrahe huno zage hanati kaziga Bet-Dagoni rankumate vuteno, Zebuluni naga mopane Ifta-El agupo tavaonte vuteno, vuvava huno noti kaziga Bet-Emekine, Neili rankumate uhanatiteno, agatereno noti kaziga vuvava huno Kabuli rankumate uhanati'ne. <sup>28</sup> Hanki anantetira Ebronima, Rehobuma, Hamonine, Kana kumatamina agatereno ogantu Saidon rankumate uhanati'ne. <sup>29</sup> Hanki anantetira mopamofo agema'amo'a rukrahe huno Rama rankumate vuteno, Tairi rankuma'ma hanaventake have kegina hugagi'naza kumate uhanati'ne. Anantetira mopamofo agema'amo'a rukrahe huno Hosa rankuma me'nerega avugosa hunteno vuno, Akzib kaziga Mediterenia ra hageri me'nere ome atre'ne. <sup>30</sup> Hanki Asa naga'mo'zama mago'a mopama eri'nazana, Umane, Afekine, Rehobu rankuma'ene erizageno, ana makara 22'a ranra kuma me'negeno ne'onse kumatamina megagizmanteterema hu'neana, ana maka eri 'naze. <sup>31</sup> Hanki ana ranra kumatamine ne'onse kumatamina Asa naga'mo'za nagatenofite refko hu'za erisantihare'naze.

### *Naftali naga'mo'za mopa eri'naza naneke*

<sup>32</sup> Hanki nampa 6si mopalare'ma satu zokagoma re'za kazana, Naftali agi'a efore higeno, Naftali naga'mo'za nagatenofite hu'za mopa refko hu'za eri'naze. <sup>33</sup> Hagi mopazamimofo agema'amo'a Herefi rankuma'ene Za'ananimima ko zafama me'nereti agafa huteno, vuno Adami Nekebi rankuma'ene Jabnili kumatrena agatereno vuteno, vuvava huno Lakumi rankumate uhanatiteno, Jodani ti ankenare ome vagare'ne. <sup>34</sup> Hagi ana mopamofo agema'amo'a rukrahe'ma hiana, Aznot-Tabor rankumamofa zage fre kazigati rugitagino Hukok rankumate uhanati'ne. Higeno Zebuluni naga'mofo mopa sauti kaziga megeno, Asa naga'mofo mopa zage fre kaziga megeno, Jodani tina zage hanati kaziga me'ne.

<sup>35</sup> Hanki hankavenentake vihuma havereti'ma hu'naza rankumatamimofo zamagi'a amanahu me'ne, Zidimima, Zerima, Hamatima, Rakatima, Kineretima, <sup>36</sup> Adama, Ramama, Hazorima, <sup>37</sup> Kedesima, Edreima, En-Hazorima, <sup>38</sup> Ironima, Migdal-Elmama, Horemima, Bet-Anatine Bet-Semesine megeno ana makara, Naptali naga'mo'za 19ni'a ranra kumatamine ne'onse kumatamima tavaao zamire'ma megagiterema hu'neana ana maka eri vagare'naze. <sup>39</sup> Hagi ama ana ranra kumatamine ne'onse kumatamina Naftali naga'mo'za nagatenofite hu'za refko hu'za eri'naze.

### *Dani naga'mo'zama mopa eri'naza naneke*

<sup>40</sup> Hanki nampa 7ni mopalare'ma satu zokagoma re'za kazana Dani agi efore higeno, Dani naga'mo'za nagatenofite hu'za mopa refko hu'za eri'naze.

<sup>41</sup> Hanki ranra kumama eri'naza kumatamimofo zamagi'a amanahu me'ne, Zorama, Estaolima, Ir-Semesima, <sup>42</sup> Sa'alabinima, Aijalonima, Itlama, <sup>43</sup> Elonima, Timnama, Ekronima, <sup>44</sup> Eltekema, Gibetonima, Ba'alatima, <sup>45</sup> Jehudima, Bene-Berakima Gat-Rimonima, <sup>46</sup> Mejakonima, Rakonima, Jopa ranku tavaonte'ma me'nea kumatamina ana maká Dani naga'moza eri'naze.

<sup>47</sup> Hianagi Dani nagara henka ha' vahe'zamimo'za mopazamifintira zamahenati atre'naze. Ana hazage'za mareriza Lesemi vahera ha' huzamante'za ana maka vahera bainati kazinteti zamahé vaganere'za Lesemi rankumara Dani naga'moza eri'naze. Hagi Lesemi rankumapima manite'za ana

kuma agi'a rekrahe hu'za nezamageho agire asamre'za Dani'e hu'za agi'a ante'naze. <sup>48</sup> Hanki ama ana ranra kumatamine, neonse kumatamina Dani naga'mo'za nagatenofite hu'za refko hu'za erisantihare'naze.

### *Josua'ma mopa eri'nea naneke*

<sup>49</sup> Hanki Israeli vahe'mo'za mopama refko hu'za nagatenofite hu'za erite'za, anampintira mopa refko hu'za Nuni nemofo Josuana ami'naze.

<sup>50</sup> Ra Anumzamo'ma hu'nea kante ante'za Efraemi naga'mokizmi mopamofo agona asoparega Timnat-Sera me'nea rankuma Josua'a namiho hige'za, amizageno ana kumara eri kasefa huno rankuma kino mani'ne. <sup>51</sup> Hanki pristi ne Eleazaki, Nuni nemofo Josua'ene ana maka naga'nofipinti'ma vugota hutere hu'naza kva vahe'mo'za Silo kumate atruhuza seli nomofo avuga manine'za, Ra Anumzamofo avure satu zokago re'za eri ama hu'za ana maka mopa nagatenofite refko hu'zmi vagarazage'za erisantihare'naze.

## 20

### *Koro fre'za ome fraki'naza 6'a rankumatamimofo naneke*

<sup>1</sup> Ana hutageno Ra Anumzamo'a amanage huno Josuana asami'ne, <sup>2</sup> Israeli vahe'mokizmia zamasamige'za vahe'mo'zama koro fre'za zamagu'ma ome vazi'naza rankumatamina Mosesema asamugenno tamasami'nea kante ante'za mago'a huhamprinteho. <sup>3</sup> Hanki mago'mo'ma, vahe ahfri antahintahi omne'nena hantagama huno vahe'ma ahe frisuno'a, agra koro freno ana aguvazi kumatamimpi vuno umanisige'za, anama ahe fri'nesia vahe'mofo naga'mo'zama ahenaku'ma hanazana ohegahaze. <sup>4</sup> Hagi ana ne'mo'ma koro'ma freno mago kuma'mofo ufre kahante'ma vanuno'a, agra ana kumamofo ufre kahante umani'neno, ana kumate ugota vahe'ene, agrama hu'nea zankura keaga eri fatgo hino. Anama hutesige'za atresageno ufreno ana kumapina zamagrane umanigahie.

<sup>5</sup> Hanki agrama hu'nea hazenkere'ma nona hunaku mago vahe'mo'ma rotogoma huno ana kumate'ma esige'za, ana kumate'ma ugota hu'naza kva vahe'mo'za ana kumatazenkema hu'nea nera avre omigahaze. Na'ankure agri ha' vahera omani'ne. Hianagi ahe frisue huno oheneanki, amne hantaga huno ahe fri'negu, ana kumapi vahe'mo'za ana nera kegava huntaho.

<sup>6</sup> Hanki agra ana kumapinke'za mani'nesige'za, ana kumapima nemanza maka vahe zamavure keaga'a refko hugahaze. Hanki keaga'ama refko'ma hanageno'ma hazenkema omane'nesigeno'a, agra ana kumapinke mani'nesigeno, ana knafima ugagotama hu'nesia pristi nera fritesigeno, mopa agafa'arereta vugahie. <sup>7</sup> Hanki Ra Anumzamo'ma anankema hiana antahite'za, Naftali naga'mokizmi mopamofo agona asoparega, Galili kaziga me'nea kuma Kadesima, Efraemi naga mopamofo agonamofo asoparega me'nea kuma Sekemine, Juda nagamokizmi mopamofo agona asoparega me'nea kuma Kiriat-Arba (mago agi'a menina Hebronie nehaze) ana kumatami hu hampri'naze. <sup>8</sup> Hanki Jeriko kumamofo zage hanatitega, Jodani timofo kantu kaziga, ka'ma mopama me'nerega Rubeni naga'mofo agupo mopa rega me'nea kumara Bezerima, Gileati kaziga Gati naga'mofo mopa me'nea kuma Ramotima, Basani kazigama Golani mopa Manase naga'mofo mopa fima me'nea rankuma huhampri'naze. <sup>9</sup> Hanki Israeli vahepinti mago'mo'o, ru vahe'ma tamagranema emani'nesaza vahepinti, mago'mo'ma, vahe ahfri antahintahima omne'ne'nigeno hantaga huno

mago vahe'ma ahe frisuno'a, anama huhamprinte kumatamimpi koro freno umani'nesigeno, nona huno ahe frisue huno rotago huno'ma esimo'a, ahe ofrigahie. Na'ankure agra maka vahe zamavurera keagafina oraoti'ne.

## 21

### *Livae naga'mo'za ranra kuma eri'naza naneke*

<sup>1</sup> Hanki Livae nagate vugota hu'naza vahe'mo'za, pristi ne' Eleazane, Nuni nemofo Josuane Israeli vhete ugota hu'naza kva vhete, <sup>2</sup> Sailo kuma'ma Kenani mopafi me'nere e'za amanage hu'za zmasami'naze, Ra Anumzamo'a Mosesema asamino tagrikura rankuma'enе masave nentake tra'zama me'nesia mopane zaminke'za tra'zama nenaza afu zaminena maniho hu'ne.

<sup>3</sup> Ana hu'negu Ra Anumzamo'ma hu'nea kante ante'za, Israeli vahe'mo'za zamagrama erisantimahare'naza mopafinti, tra'zamo'ma masavenentake hu'nea mopane, mago'a ranra kumara Livae nagara zami'naze. <sup>4</sup> Hanki ese'ma satu zokago re'za kazana Kohati naga'mo'za erisaza rankuma ke'za erifore hu'naze. Hagi anama hute'za Juda naga'ma, Simioni naga'ma, Benzameni naga'mo'za 13ni'a ranra kuma refko hu'za, Livae naga'ma pristi ne' Aronimpinti'ma efore hu'naza Kohati nagara zami'naze. <sup>5</sup> Hanki Efraemi naga'ma, Dani naga'ma, amu'nompinti'ma refkoma hu'naza Manase naga'mo'za mopama e'ori'naza Kohati nagara 10ni'a ranra kumatami refko huzmi'naze. <sup>6</sup> Hagi Isaka naga'ene, Asa naga'ene, Naftali naga'ene, Basanima nemaniza ruga'a Manase naga'mokizmi mopafinti 13ni'a rankumatami refko hu'za Gesoni nagara zami'naze. <sup>7</sup> Hagi Rubeni naga'ene, Gati naga'ene, Zebuluni naga'mokizmi mopafinti 12fu'a ranra kumatamina refko hu'za Merari nagara, nagate nofite hu'za zami'naze. <sup>8</sup> E'ina hu'negu Ra Anumzamo'ma Mosesema asamine'a kante ante'za, Israeli vahe'mo'za, ana rankumatamine, tra'zama nenaza afutamima ante mohanena Livae nagara satu zokago re'za eri ama hu'za zami'naze.

<sup>9</sup> Hagi Juda naga'ene, Simioni naga'mokizmi mopafima me'nea rankumatamima refko hu'naza kumatamimofo zamagi'a amanahu me'ne. <sup>10</sup> Hagi Livae naga'ma pristi ne' Aronimpinti'ma efore'ma hu'naza Kohati naga'mo'za kotazama satu zokago'ma razana, zamagri zamagimo efore hige'za ana rankuma'tamina eri'naze. <sup>11</sup> Hagi mago ran kuma'ma Israeli vahe'mo'zama Aroni naga'ma zami'nazana, Juda nagamokizmi mopamofo agona asoparega me'nea kuma Kiriat-Arbane (mago agia Hebronie) ana kuma'mofoma trazamo'a masavenke hukagi'nea mopa tra'zama nenaza afuzamima antesagu zami'naze. (Hagi Arba'a Anaki naga'mokizmi nezamageho'e.) <sup>12</sup> Hianagi Israeli naga'mofo rankumamofo tavaonte'ma me'nea ne'onse kumatamine mohanena, Jefune nemofo Kalepi agri mopa ko ami'naze. <sup>13</sup> Hagi Aroni agehe'mo'za pristi eri'zama e'neriza nagara, kore fre'za vu'za zamagu'ma nevaziza Hebron kuma'enе tra'zama nenaza afuzminema kegava hanaza mopane Libna kuma'enе, tra'zama nenaza afuzmima kegava hanaza mopane, <sup>14</sup> Jatiri rankuma'enе tra'zama nenaza afuzminema kegava hanaza mopane, Estemoa rankuma'enе, tra'zama nenaza afuzminema kegava hanaza mopane, <sup>15</sup> Holoni rankuma'enе, tra'zama nenaza afu'zminema kegava hanaza mopane, Debiri rankuma'enе, <sup>16</sup> Ainine, Jutane, Betsemes rankuma'enе zami'naze. Ama ana 9ni'a rankumara, afu'zamimo'zama tra'zamanesaza mohanena Simioni naga'enе Juda naga'mo'za zamagra'a

mopafinti Aroni nagara refko huzmi'naze. <sup>17</sup> Hagi Benzameni naga'mofo mopafintira, Gibionima, Gebama, <sup>18</sup> Anatotine, Almoni rankumaki hu'za ana makara 4'a ranra kumatamine, tava'ozamire'ma me'nea mopa tra'za nenaza afu zamimo'zama tra'zama nesaza mopa Aroni nagara refko huzmi'naze. <sup>19</sup> Hanki Aroni naga'ma pristi eri'zama eneriza naga'mo'za ana makara 13ni'a ranra kumatamine, tavao zamire'ma me'nea mopa afu zamimozama tra'zama nesaza mohanena ana maka eri'naze.

<sup>20</sup> Hanki Livae naga'pintira mago'a Kohati nagara, Efraemi naga mopafinti mago'a ranra kumatmina refko huzmi'naze. <sup>21</sup> Hanki Israeli vahe'mo'za 4'a ranra kuma'ma zami'nazana, Efraemi naga'mokizmi agona asoparegama, koro fre'za ome zamagu'ma nevaziza rankuma Sekemima, Gezama <sup>22</sup> Kibzaimima, Bet Horonine ana maka tavao zamire'ma me'nea mopa afu'zamimozama tra'zama nesaza mohanena ana 4'a ranra kumazminena eri'naze. <sup>23</sup> Hanki ana zanke hu'za Dani naga mopafinti'ma Kohati naga'ma ranra kuma'ma refko huzami'nazana, Eltekema, Gibetonima, <sup>24</sup> Ajaronima, Gat-Rimonine, tavaozamire'ma me'nea mopa afu zamimo'zama tra'zama nesaza mohanena ana maka eri'naze. <sup>25</sup> Hanki Manase nagara tare mopa eri'nazankino, mago mopafi naga'mokizmi mopafintira, Ta'anakine, Gat Rimoni rankumatrene tava'ozanire'ma me'nea mopa afu zamimo'zama tra'zama nesaza mohanena Kohati nagara zami'nazane. <sup>26</sup> Hanki Kohati naga'mo'za ana makara 10ni'a ranra kumatamine, tavao zamire'ma me'nea mohanena afu zamimo'zama tra'zama nesaza mohanena ana maka eri'naze.

<sup>27</sup> Hanki Livae naga'pinti mago nagara Gesomu nagakino, tare rankuma'ma zami'nazana, Manase naga'ma amu'nompinti refkoma hu'naza naga'mokizmi mopafinti refko hu'za, kore fre'za zamagu'ma ome nevaziza rankumara Basani mopafi me'nea Golani rankuma'ene, Be-Estarane tava'ozanire'ma me'nea mopa tra'zama nenaza afu zamimo'zama tra'zama nesaza mohanena ana maka Gesomu naga'mokizmia zami'nazane. <sup>28</sup> Hanki Isaka naga mopafinti'ma Gesomu naga'ma 4'a ranra kuma'ma zami'nazana, Kishionima, Daberatima, <sup>29</sup> Zarmutima, En-Ganimine, ana maka tava'ozamire'ma me'nea mopa, afu zamimo'zama tra'zama nesaza mohanena ana maka zami'nazane. <sup>30</sup> Hanki Asa naga mopafinti'ma Gesomu naga'ma 4'a ranra kuma'ma zami'nazana, Misalima, Abdonima, <sup>31</sup> Helkatima, Rehobune ana maka tava'ozamire'ma me'nea mopa, afu zamimo'zama tra'zama nesaza mohanena, 4'a ranra kuma'ene zami'nazane. <sup>32</sup> Hanki Israeli vahe'mo'za Naftali naga'mofo mopafinti 3'a ranra kuma Gesomu naga'ma refko huzami'nazana, zamagu'ma vazinagu kore freno ome fraki rankuma Galili mopafi me'neana Kades ran kumaki, Hamot-Dori kumaki, Katan rankuma'ene, ana maka tava'ozamire'ma me'nea mopa, afu zamimo'zama tra'zama nesaza mopa zami'nazane. <sup>33</sup> Hanki Gesomu naga'moza ana makara 13ni'a ranra kumatamine, tavaozamire'ma meterrema hu'nea mopa, afu zamimozama tra'zama nesaza mohanena ana maka eri vagare'naze.

<sup>34</sup> Hanki Livae naga'pinti mago nagara Merari nagakiza Israeli vahe'mo'za Jebuluni naga mopafinti ranra kuma'ma zami'nazana, Jokneamuma, Katama, <sup>35</sup> Dimnاما, Nahalal rankuma'ene zami'nazane. Hagi ana maka 4'a ranra kumatamine tava'ozamire'ma me'nea mopa afu zamimo'zama tra'zama nesaza mohanena ana maka Merari naga zami'nazane. <sup>36</sup> Hanki Rubeni naga mopafinti Israeli vahe'mo'za Merari nagama ranra kuma'ma zami'nazana, Bezerima, Jahazima, <sup>37</sup> Kedemotima, Mefa'ati rankuma'ene

zami'naze. Hagi ana makara 4'a ranra kumatamine afu zamimo'zama tra'zama nesaza mopanena ana maka Merari naga zami'naze. <sup>38</sup> Hanki Gati naga mopafinti'ma Israeli vahe'mo'zama Merari naga'ma ranra kuma'ma zami'nazana, kore fre'za zamagu'ma ome nevaziza rankuma Giliati kazigama me'neana Ramotima, Mahanaimima, <sup>39</sup> Hesbonima, Jazeri rankumatre'na zami'naze. Hagi maka ana 4'a ranra kumatamine afu'zamimozama tra'zama nesaza mopanena ana maka Merari naga zami'naze. <sup>40</sup> Hagi Livae naga'mo'za mopama erizage'za mopama e'ori'naza nagara Merari nagakiza zamagra 12fu'a ranra kumatami eri'naze.

<sup>41</sup> Hanki Israeli vahe'mo'zama maka mopama eri'nafintira 48'a ranra kuma'ene afu'zamimo'zama tra'zama nesaza mopanena Livae nagara zami'naze. <sup>42</sup> Hanki ana maka mago mago ranra kumatamimofona tava'ozamirera Livae naga'mo'zama afu'zamima antesaza mopa megagitere hu'ne.

<sup>43</sup> E'ina huno Ra Anumzamo'a zimagehe'ima huvempa huno zamigahue hu'nea mopa ana maka Israeli vahera zamige'za, erisantihare'za ana mopafi mani'naze. <sup>44</sup> Ra Anumzamo'a Israeli vahera zamaza huno ha' vahe'zamia zamazampi zamavarentege'za, Israeli vahe'mo'za hara huzmagaterageno mago'mo'e huno hara huzmagateore'ne. Ana higeno Ra Anumzamo'a zamagehe'ima huvempama huzmante'nea kante anteno, maka kazigatira hara huozmantage'za mani fru hu'za mani'naze. <sup>45</sup> Hanki Ra Anumzamo'ma Israeli vahe'tema knare huvempa kema huzamante'nea ke'mo'a magore huno hantaga osuno, ana maka'zamo'a nena raga'a efore hu'ne.

## 22

### *Rubenima, Gatima, ruga'a Manase naga'mo'za mopazmirega vu'naza naneke*

<sup>1</sup> Anante Rubeni naga'ma Gati naga'ma, amu'nompinti refko hu'naza Manase nagara Josua'a kehige'za eme eri tru hazageno, <sup>2</sup> amanage huno zamasami'ne, Ra Anumzamofo eri'za ne' Mosese'ma hihoma huno'ma huramante'nea zana ana maka hago huvagare'naze. Ana nehutma nagrama hihoma hu'na huankea ana maka amage ante'naze. <sup>3</sup> Hanki korapa knareti eno menima ama knare'ma egetma, tamagra tamafuhe'ina zamatretra ofretma, Ra Anumzana tamagri Anumzamo'ma e'ina hugahaze huno'ma tam'i'nea eri'zana ana maka erivagare'naze. <sup>4</sup> Hanki menina Ra Anumzana tamagri Anumzamo huvempama hu'nea ke'a amage anteno tamafuhe'ina manigsa zami'ne. E'ina hu'negu Ra Anumzamofo eri'za ne' Mosese'ma tam'i'nea mopa zage hanati kaziga Jodani timofo kantu kaziga nonkumatamima mane'nea mopare vugahaze.

<sup>5</sup> Hianagi Ra Anumzamofo eri'za ne' Mosese'ma tam'i'nea kasegene tra kenena kegava huso'e hu'netma amage anteho. Ra Anumzana tamagri Anumzamofo avesinenteta, Agri avu'ava nevaririta, kasege'a amage nenteta, Agrane tragoteta mani'neta, maka tamagu tamenteti hutma Agri eri'zana erinteho.

<sup>6</sup> Anante Josua'a asomu ke huzamanteteno huzmanteg'eza seli nonkuma zamirega vu'naze. <sup>7</sup> Hanki amu'nompinti'ma refkoma haza ruga'a Manase nagara Mosese'a Basani kazigati mago mopa ko zami'ne. Hanki Manase naga'ma amu'nompinti'ma refkoma hu'naza nagara Israeli vahe'mo'za'ma Jodani timofo zage fre kaziga mopama erinafinti Josua'a mopa zami'ne. Anama huteno'a Josua'a asomu ke huzamanteteno huzmanteg'eza seli

nonkuma zamirega nevzageno, <sup>8</sup> amanage huno zamasami'ne, tamagra rama'a feno zantamine bulimakao afu kevutamima, silvama, golima, bronsima, aenine, rama'a knare kukananema, ha'ma hu zamagatereta eri'naza zantamina erita menina seli nonkuma tamirega vuta tamafuhe'zanena ome refko huta eriho.

<sup>9</sup> Ana huteg'e'za, Rubeni naga'ma, Gati naga'ma, ruga'a Manase naga'mo'za Israeli vhahera Kenani kaziga Sailo kumate zamatre'za, Ra Anumzamo'ma Moseese asami'nea kante ante'za eri'naza moparega Gileati vu'naze.

*Jodani timofo zage hanati kaziga mani'naza naga'mo'za kre sramnavu ita tro hu'naza naneke*

<sup>10</sup> Hanki Rubeni naga'ma, Gati naga'ma, ruga'a Manase naga'mo'zama Kenani Mopa atre'za Jodani ti tava'onte Geliloti ete'za, anante tusi'a kresramna vu ita tro hu'naze. <sup>11</sup> Hagi anama hazazana mago'a vahe'mo'za kete'za vu'za Israeli vahe'mokizmia ome zmasami'za, Rubeni naga'ma, Gati naga'ma, ruga'a Manase naga'mo'za vu'za Kenani mopama ome atretega Gelilotia, Jodani timofo tavaonte tagri mopa kaziga, Kresramana vu ita ome tro hu'naze hazage'za, <sup>12</sup> ana zamofo nanekema nentahi'za ana maka Israeli vahe'mo'za oti'za ha'uzmante'naku Sailo kumate eri tru hu'za trotra hu'naze. <sup>13</sup> Hagi Israeli vahe'mo'za pristi ne' Eleazar nemofo Fineasina huntazageno, Rubenima, Gatima, amu'nompinti'ma refko hu'za vu'naza Manase naga'ma Gileatima mani'narega vu'ne. <sup>14</sup> Hanki Finiasi'enena 10ni'a vugagota kva vahetamine huzmantazage'za vu'naze. Ana vhahera tauseni'a Israeli vahepima mago'mago naga'nofi'ma mani'nafintira vugagota hu'naza vahe'age, mago'mago huhamprintetere hazage'za vu'naze.

<sup>15</sup> Hanki Rubeni naga'ma, Gati naga'ma, ruga'a Manase naga'ma hu'za Gileati kumate'ma mani'nare e'za amanage hu'za eme zamasmi'naze, <sup>16</sup> ana maka Ra Anumzamofo kevu naga'mo'za amanage hu'za hu'naze. Na'ahigeta amanahu tamavu tamavara huta Ra Anumzamofona antahi omi'naze. Na'ahigeta Ra Anumzamofona tamefira humita ke'a rutagreta menina ama kresramna vu ita Ra Anumzamofoma ha'marente'zana tamagra tro hu'naze.

<sup>17</sup> Kora Peori kumate'ma, mani'neta kumi hunkeno Ra Anumzamo'a mago kri atregeno vahe'a eme zamazeri haviza hu'neane, hagi meninena ana kumimo'a tatreno ovu'ne. Tamagrama antahi'zana ana hazenke zamo'a knare hu'nefi, ana hu'negeta mago'ene ru hazenkea nehazo? <sup>18</sup> Hagi menina Ra Anumzamofona tamamefira hunemize, menima Ra Anumzamofoma Agri kema ontahita ha'ma rentesageno'a, okina Agra ana maka Israeli vahe'mota rimpa aherantegahie. <sup>19</sup> Hagi mopa tamimo'ma Anumzamofo avure'ma havizama hu'ne hutama hanuta, tamagra eta tagri mopafima Ra Anumzamofo seli mono noma me'nere, Agri mopa fatgofi tagrane emanaho. Hanki tamagra na'a hu'negeta Ra Anumzamofona ke'a antahi nomita tagrira tatreta vuta, Ra Anumzana tagri Anumzamofo Kresramana vu itama ko'ma me'neana atreta, ru kresramna vu ita tro nehaze. <sup>20</sup> Hagi Ra Anumzamo'ma i'o hu'nea zantamima, Zera nemofo Akani'ma Jeriko rankumapinti'ma Ra Anumzamofo ke'ma ru tagreno'ma eri'nea kumi'amofo kna'a agrakera ofri'neanki mago'a nema agri kumimofo kna'ama eri'za fri'naza zana tamagera okaniho.

<sup>21</sup> Anante Rubeni naga'ma, Gati naga'ma, ruga'a amu'nompinti refkoma hu'naza Manase naga'mo'za oti'za Israeli vahepima nagate nofite'ma ugagota hu'naza vhahera amanage hu'za zamasmi'naze, <sup>22</sup> hankavenentake Anumzana Ra Anumzana Agrake mani'ne, magoke hankavenentake hu'nea

Ra Anumzamo Agra antahi'ne, hu'negu Israeli vahe'motanena antahih, tagrama Ra Anumzamofo kema rutagrege, Agri kasegema ovariri nesunketa menina oratreta tahe friho. <sup>23</sup> Hanki tagrama Ra Anumzamofoma tamefi humi kazigati'ma kresramna vu ofama huge, witi ofa huge, mago tarimp hu ofama hu kresramna vu itama tro'ma hu'neskkeno'a, Ra Anumzamo'a Agra'a tagrira tazeri haviza hugahie.

<sup>24</sup> Hianagi tagrama ana itama tro'ma hu'nonana, henkama tamagri tamagehe'za, tagri tageheinku hu'za, tagri Ra Anumzantera monora huontegi, amagera ontegahazema hu'za hu'zanku koro huta tro hu'none. <sup>25</sup> Hanki tagri'ene, tamagri'ene amu'nompina Ra Anumzamo Jodani tinte mopamofo agema'a ante'neankita, tamagra Rubeni naga'ene Gati nagara tagri naga omari'naze nehu'za, Anumzana tamagri Anumza omari'neankita monora huonteho hu'za hu'zanku koro huta ana ita tro hu'none. <sup>26</sup> E'ina agafare amanage hu'none, kresramna vu itama tro'ma hu'nonana tevefima kresramna vu ofa hu ito, mago'a zama kresramna vu ofa hu ita trora osu'none. <sup>27</sup> Hagi tamagri'ene tagri'enena ama anazamo'a mago avame'za mane'neno, tagehezama henkama fore'ma hanaza vahera zamaveri huno, tagranena Ra Anumzana Agriteke monora hunentone hugahaze. Ana hanige'za tamagranena Ra Anumzamofo avurera tevefi kresramna vu ofane, ruzahu ruzahu ofaramine, rimpa fru ofanena mono nom'aafina hunentaze hugahaze. Ru ete henka tamagri tamagehe'za tagri tagehe'inku hu'za tamagra Ra Anumzamofo vahe omari'naze huzanku anara hu'none. <sup>28</sup> E'ina hu'negu tagra amanage huta hu'none, tamagrama amanahu kema tagritero, tagehe'int'e'ma hanageta amanage huta zamasigmahune huta hu'none, Ra Anumzamofo kresramna vu itama tafahezama tro hazageno me'neana keho, mago kresramna vu ofa huge, ruzahu ruzahu ofa hu ita trora osu'nonanki tamagri'ene tagri'ene amu'nompina, ama ana itamo'a mago avame'za me'nne huta hugahune. <sup>29</sup> Tagrama ama ana itama tro'ma hu'nonana, tevefi kre fanane hu ofa huge, witi ofa huge, ruzahu ruzahu ofama hu ita trora osu'none. Tagra e'inama hanuta, Ra Anumzamofona tamefi humita ke'a rutagregahune. Hagi Ra Anumzana tagri Anumzamofo itama seli mono nomofo avugama me'nea kresramna vu itamofo nom eri'nigure huta trora huonte'none.

<sup>30</sup> Hanki pristi ne'Fineasi'ene Israeli vahepima mago mago naga nofite'ma ugagota hutere hu'naza vahe'mo'za, Rubeni naga'ma, Gati naga'ma, Manase naga'mo'zama hazankema nentahi'za, zamagra zamarimpa fru nehu'za muse hu'haze. <sup>31</sup> Hanki anante pristi ne' Eleazra nemofo Finiasi'a, Rubenima, Gatin, Manase nagara amanage huno zamasami'ne, menina tagrama keama'ma hunana Ra Anumzamo'a tagrane mani'ne. Na'ankure tamagra Ra Anumzamofo ke'a tamefira huonte'naze, e'inama hazana maka Israeli vahe'mota Ra Anumzamofo azampintira tagu'vazize.

<sup>32</sup> Ana keagama hute'za pristi ne' Eleaza nemofo Finiasi'ene Israeli nagapi nagate nofite ugagota hu'naza kva vahe'mo'za ete Kenani e'za Rubenine, Gati, naga'enema keagama hu'naza zamofo agenkeia Israeli vahera Gileati kumate mani'nage'za eme zamisami'naze. <sup>33</sup> Hanki anazamofo agenkema Israeli naga'mo'zama nentahi'za muse hu'za Anumzamofo ra agi nem'i'za, Rubenine, Gati naga'ma nemaniza mopama ha' huzamanteta mopazamima eri haviza hugahunema hu'naza ke'a eri atre'naze.

<sup>34</sup> Hanki Rubenine, Gati naga'mo'za ana itamofonkura hu'za Amu'nontifi

Avame'za me'nena Ra Anumzana tagri Anumza mani'ne huta antahi amigahune hu'za agi'a antemi'naze.

## 23

### *Josua'a vagare naneke'a Israeli kva vahe zamasmi'nea naneke*

<sup>1</sup> Hanki Ra Anumzamo'a Israeli vahera mani fru zamige'za ha' vahe'zaminena hara osu rama'a kafu amane mani'naze. Ana knafina Josua'a rama'a kafu maniteno ozafare'ne. <sup>2</sup> Anante Josua'a maka Israeli vahe'ma, ranra vahe'ma, ugagota kva vahe'ma, naneke refko hu kva vahetamine, vahete ugagota hu'naza vahe'tamina ke hige'za azageno amanage huno zamasami'ne, Nagra rama'a kafu manite'na menina ozafaroe. <sup>3</sup> Hanki Ra Anumzana tamagri Anumzamo'ma tamaza huno tamagu vazi'nea zana tamagra'a hago ke'naze. Na'ankure Ra Anumzana tamagri Anumzamo Agra'a tamaza huno ha' vahetamia hara huzmante'ne. <sup>4</sup> Hanki menina ama kea antahi ankereho, ha'ma huzamanteta e'ori'nona mopane, ko'ma hahu zamagatereta eri'nona mopama, Jodani tinteti agafa huteno vuno zage ufre kaziga Mediterenia hagerinte'ma uhanati'nea mopa, ana maka hago refko hu'naga nagate nosite hu'na tamugeta erisantihare'naze. <sup>5</sup> Ra Anumzana tamagri Anumzamo tamavugatira ha' vahe'tamia zamahe'natitresigeta, Ra Anumzamo'ma huvempama huramante'nea kante anteta mopazamia erigahaze.

<sup>6</sup> E'ina hu'negu Moses'e'ma kasege avontafepima krente'nea nanekemofona kva hu'neta hankavetita, avariri fatgo nehuta, rukrahe hu kanti kama osiho. <sup>7</sup> Hanki amama emani'naza mopafi vahe'enena taragoteta omanita, zamagri anumzamofo agi'a amu'nontamifina oheta, ana anumzantamimofo zamagirera huvempa osutma, eri'zana erinozmanteta, tamarenareta monora huozamanthe. <sup>8</sup> Hu'neanagi tamagra ko'ma hutma neazaza hutma, Ra Anumzana tamagri Anumzamofona otretma azeriko'na hiho.

<sup>9</sup> Na'ankure tusi'a hankavenentake ranra kumapi vahe'tamina Ra Anumzamo zamahenatitre'ne. Ana higeno mago vahe'mo'e huno tamagrira tamazeri otrageta manita menina ama knarer ehanati'naze. <sup>10</sup> Hagi magoke magokemoka 1tauseni'a vahera amne zamorotgo hugahane. Na'ankure Ra Anumzana tamagri Anumzamo'ma huvempa hu'nea kea amage anteno hara tamaza huno nehie. <sup>11</sup> Ana hu'negu tamagra kva hunetma Ra Anumzana tagri Anumzamofona tamagu'reti hutma avesinteho. <sup>12</sup> Hianagi tamagrama tagri Anumzama atretma, ama emani'nona mopafi vahe'enema ru tragoteta manige, zamagripinti'ma a'ma erige'ma hanazana, <sup>13</sup> tamagra antahi'naze, Ra Anumzana tamagri Anumzamo'ma tamaza huno hara ana vahera huzmanteno, zamahenati otregahie. Hagi ana hanige'zma tamagrane mani'ne'za mago krifugna nehu'za, sefu kanonu vahe'mofo amagenafi rutraga huno ata amiakna hu'za tamata nerami'za, ave've tra'zamo zamavufi azeriankna nehanigeta, ana maka'mota knazampi mani'neta ama ana knare mopama Ra Anumzana tagri Anumzamo'ma tami'nea mopafina frigahaze.

<sup>14</sup> Hanki nagra kofta huna fri'nugu, tamagra tamagu'reti huta hago antahi'naze, Ra Anumzana tagri Anumzamo'ma tamigahue huno huvempama hu'nea zantamina ana maka tamivagare'ne. Hagi magore huno huvempa hu'nea kemo'a hantaga osutfa hu'ne. <sup>15</sup> Tamage, Ra Anumzamo'ma

huvempama hu'nenu'na, kea amage anteno kema hu'nea zana tro ne-hie. Anahukna huno Ra Anumzamo'ma kore kema huramanteno tamigahue huno'ma hu'nesia knazanteti, knazana tamino tamazeri haviza hanigeta, ama knare mopama tami'nea mopafina omanita fri vagaregahaze. <sup>16</sup> Hanki tamagrama Ra Anumzana tamagri Anumzamo'ma huvempama huramante'nea kasegema agatenereta ke'ama rutagreta vuta havi anumzamofo eri'za vahe manige, tamarenareta mono huntege'ma hanazana, Ra Anumzamofo rimpaher'zamo'a tamagrite ena, ama knare mopama tamigeta mani'naza mopafintira frita omanigahaze.

## 24

### *Huhagerafi huvempa kema Sekemu kumate eri kasefa hu'naza naneke*

<sup>1</sup> Hanki Josua'a ana maka Israeli vhahera nagate nofite huno Sekemu kumate zamavaretru hu'ne. Anante ranra vahe'ma, ugagota kva vahe'ma, keaga refkohu kva vahe'ma, avoma kreno eri antefatgoma hu eri'za vhahera kehige'za vu'za Anumzamofo avure ome atru hu'naze. <sup>2</sup> Anante Josua'a ana maka veara amanage huno zamasami'ne, Ra Anumzana Israeli vahe'mota Anumzamo amanage huno hu'ne, Korapara neramageh'zoa Yufretisi timofo kantu kaziga mani'ne'za havi anumzantaminte monora hunteme azageno eno, neramageh'zo Abrahamune Nahori kizani neznafa Tera knafina ehanati'ne. <sup>3</sup> Hianagi neramafa ne' Abrahamuna Yufretisi timofo kantu kaziga me'nea moparegati avrete'na vugota hunte'na maka Kenani mopafina vano nehu'na, agehe'mokizmia zamazeri rama'a nehu'na, zage mofavrea Aisakina ami'noe. <sup>4</sup> Ana hute'na Aisakina tare ne' mofavrea Jekopune, Isone ami'noe. Hanki Seiria agona mopa Isona ami'noanagi, Jekopu'ene mofavre naga'amo'za Isipi moparega urami'naze. <sup>5</sup> Hanki anantero Mosesene Aroninena huzanantogeke Isipi vake'na, tusia knazanteti Isipi vhahera zamazeri haviza nehu'na, tamagrira anampinti Nagra'a tamavre'na atiramino'e. <sup>6</sup> Hanki Nagra tamafaher'ina Isipiti zamavare'na atirami'na hagerinkenare oge'za, Isipi vahe'mo'za karisine hosi afu agumpi mani'ne'za zamarotgo hu'za korankre hagerinte e'naze. <sup>7</sup> Hianagi Ra Anumzamo'narega zamaza hanugu zavi krafage nehazage'na, zamagri'ene Isipi vahe amu'nozamifina haninku hugeno haninkino refko huzmante'ne. Hageri huntogeno Isipi sondia vhahera maka zamaherefite'ne. Hanki ana'ma Isipi vahete'ma huazana tamagra tamavufinti ke'naze. Hanki tamagra za'zate ka'ma kokampina manita vano hu'naze. <sup>8</sup> Hanki Nagra zamavare'na Jodani timofo kantu zage hanati kaziga, Amori vahe mopare vuge'za, hara huramante'nazanagi Nagra tamazampi zamavarentogeta hara huzmagtere'naze. Hanki negazage'na zamazeri haviza hugeta, mopazamia eri'naze. <sup>9</sup> Hagi henka Moapu kini ne' Zipori nemofo Baraki'ma Israeli vahe'ma ha'ma huzmanteku'ma nehuno'a, Beori nemofo Balamuna Israeli vahe kazusi ke huzmantenogu kea atrente'ne. <sup>10</sup> Hianagi Nagra Ra Anumzamo'na Balamu'ma hiankea antahomi'na, nagra hugeno asomu ke huramante'ne. Hige'na Nagra Balaki azampintira tamagu'vazi'noe. <sup>11</sup> Hanki tamagra Jodani tima takahetama Jerikoma azage'za, Jeriko kumate vahe'mo'za hara hurmante'naze. Ana zanke hu'za Amori vahe'ma, Perisi vahe'ma, Kenani vahe'ma, Hiti vahe'ma, Girsasi vahe'ma, Hivi vahe'ma, Jebusi vahe'mo'zanena hara hurmante'nazanagi, Nagra tamaza hu'na tamazampi zamavarentogeta hara huzmagatere'naze. <sup>12</sup> Hagi Nagra'a tamagritera vugote'na nevu'na ha' vahe'tmia zamatazamina, zamazeri

koro hu'noe. Ana'ma huazamo higeke tare Amori kini netremokea korora fre'na'e. Tamagra'a bainati kazinteti'ene ati keve tamiretira hara huznanta zanavre otre'naze.<sup>13</sup> Hanki tamagra'a eri'zana e'ori'naza mopane, tamagra'a onki'naza ranra kumatamugeta nemanita, tamagra'a tamazampinti onkri'naza waini hozafinti'ene olivi hozafintira tagitma ne'naze.

### *Ra Anumzamofonteke'ma mono'ma huntesaza zamofo nanake*

<sup>14</sup> E'ina hu'negu menina Ra Anumzamofona koro huntetetma tamagu'areti tamage hutma monora hunenteta eri'zana erinteho. Hagi timofo kantu kaziga Isipima tamagehe'zama mani'ne'za mono'ma hunte'naza havi anumzantamintera monora huonteta, Ra Anumzamofonke monora hunteho. <sup>15</sup> Hagi Ra Anumzamofo mono'ma hunenteta eri'zama erinte'zanku'ma tamavesrama hanigeta menina iza monora huntegahazafi huama hiho. Tamafahe'zama Yufretisi timofo kantu kaziga Mesapotomia mopare mono hunte'naza havi anumzante monora huntegahazafi, Amori vahe'ma mopazamifima eman'i'zana vahe'mokizmi havi anumzantaminte monora huntegahazo? Hianagi nagrane a'mofavre ni'anena, Ra Anumzamofo tagra monora hunenteta eri'zana erintegahune. <sup>16</sup> Anante ana maka vea kevumo'za kenona'a amanage hu'naze, tagra tamagerafa huta Ra Anumzana atreta mago'a havi anumzanteria monora huozmantegahune. <sup>17</sup> Na'ankure Agra Ra Anumzana tagri Anumzamo Agra'a, tafahe'inne tagri'enena Isipi vahe kazokzo eri'zama erinezmantompintira tavreno etirami'ne. Ana huteno tavufinti negonkeno, ana maka kaguvazana eri fore nehuno, kama e'nompinha hakare'a kuma vahe mani'nazanagi Anumzamo'a kva hurantegeta amu'nozmifina e'none. <sup>18</sup> Hanki ko'ma ama mopafima mani'naza vahe'ene, Amori vahe'enena negonkeno Ra Anumzamo'a zamahenati atre'ne. E'ina hu'negu tagranena Ra Anumzamofo monora hunenteta eri'zama'a erintegahune. Na'ankure Agrake tagri Anumzana mani'ne.

<sup>19</sup> Hanki Josua'a amanage huno zamasami'ne, Tamagra Ra Anumzamofona monora hunenteta eri'zana eriontegahaze. Na'ankure Agra ruotage hu'neno, kanivere Anumza mani'neankino, tamagri kumi'ene, hazenkema hu'naza kumira apase oramantegahie. <sup>20</sup> Hanki tamagrama Ra Anumzamofo tamefi hunemita, ru vahe'mofo havi anumzantaminte mono'ma huntesnazana, Agra knare huno kegava huramanteno e'neanagi, rukrahe huno rimpa aheneramanteno knazanteti tamagrira tamahe fanane hugahie. <sup>21</sup> Hianagi vea kevumo'za Josuana amanage hu'za asmi'naze, i'o tagra Ra Anumzana Agrike monora huntegahune. <sup>22</sup> Anante Josua'a anage huno vea kevua zamasami'ne, tamagra'a huama nehutma, huvempa hutma Ra Anumzana Agrike monora hunenteta eri'zama'a erintegahune nehazo? Hige'za, izo tagra'a tagipinti huama huta nehune. <sup>23</sup> Hanki Josua'a mago'anee zamasamino, ru vahe'mokizmi havi anumzantamima tamagranema me'neana eri netreta, Rana Israeli vahe'mota Ra Anumzante tamagu'a rukrahe huta amage anteho. <sup>24</sup> Hanki vea kevumo'za Josuana asami'za, Ra Anumzana tagri Anumzamofo monora hunenteta, eri'zama'a erinenteta, Agri kemofo amage'a antegahune. <sup>25</sup> Hanki ana zupa Josua'a Sekemu kumate vea nagara Anumzanema huhagerafi huvempa kea nezamasamino, kasegene tra kenena amage antehogu zamasami'ne. <sup>26</sup> Hanki ana nanekeramina Ra Anumzamofo kasegema me'nea avontafepi Josua'a krente'ne. Ana huteno, anante Josua'a mago ra have erino Ra Anumzamofo seli mono noma me'nea tavaonte oki zafa agafare retrure'ne. <sup>27</sup> Anama

huteno Josua'a maka vea kevumofona amanage huno zamasami'ne, keho, maka zupa ama havema negeta tagrama huvempama hu'nona kegu tagesa antahigahune. Ra Anumzamo'ma tasamia nanekea ama havema negesuta, ama ana havemo mago avame'za me'enketa Anumzamofo nanekea ruotagregahune. <sup>28</sup> Anagema huteno Josua'a ana maka veara huzamanteg'eza erisantimahare'za nemaniza kumatega vu'za e'za hu'naze.

*Josua'ma frige'za asente'naza zamofo naneke*

<sup>29</sup> Hanki anazama huvagareteno zaza kna omani'neno Ra Anumzamofo eri'za ne' Nuni nemofo Josuana, kafu'amo'a 110ni hutegen fri'ne. <sup>30</sup> Hige'za Gasi agonamofo noti kaziga Efraemi naga'mokizmi agona mopamofo asoparega, Timnat Sera rankumate agra'ama erisantimahare'nea mopafi asente'naze.

<sup>31</sup> Hanki Israeli vahe'mo'za Josua'ma kasefa huno mani'nea knafine, agranema ranra vahe'mo'zama Ra Anumzamo'ma mikazama hiazama ke'naza vahe'mokizmi knafina Israeli vahe'mo'za Ra Anumzamofona monora hunte'za eri'zana erinte'naze.

<sup>32</sup> Hanki Israeli vahe'mo'zama Josefe zaferinama Isipiti'ma eri'zama e'nazana Sekemu asente'naze. Anama asente'naza mopa Hamori vahe'mokizmi nezamafa Sekemuna 100'a silva zago nemino Jekopu'a mizase'nea mopafi asente'naze. Hanki Israeli vahe'mo'zama Josefe zaferinama asentete'za, ana mopa Josefe naga'mokizmi su'zane hu'za refko huzmi'naze.

<sup>33</sup> Hanki Aroni nemofo Eleaza'ma frige'za Gibea kumate asente'naze. Ana Gibea rankumara Efraemi naga'mokizmi agona moparega Eleazari nemofo Finiasi ami'naza rankumate asente'naze.

## Jadses-Kva Vahe Kva Vahe Avontaferé

*Jerusalemi kuma ha' hu'za eri'naza naneke*

<sup>1</sup> Hagi Josua'ma fritege'za Israeli vahe'mo'za amanage hu'za Ra Anumzamofona antahige'naze. Menina ina naga nofi'mo'za amu'rontifintira esera vugota hu'za mareriza Kenani vhéra hara ome huzmantegahaze? <sup>2</sup> Hu'za hazageno, Ra Anumzamo'a kenona amanage huno zamasami'ne, Antahiho, Nagra ko' ana mopa Juda naga zami'noanki zamagra mareri'za Kenani vhéra hara ome huzmantegahaze. <sup>3</sup> Anante Juda naga'mo'za nezmafu Simioni nagakura amanage hu'za zmasami'naze, eta eme taza hinketa tagri'ma hurante'nea mopafima mani'naza Kenani vhéra hara ome huta zamahteta, ete tamagrira tamaza hanunketa tamagri mopafima mani'naza vhéra hara huta zamahegahaze. E'inage hazageno Simioni naga'mo'za Juda naga'ene vu'naze. <sup>4</sup> Hagi Juda naga'mo'za mareri'za hara ome hazageno, Ra Anumzamo'a Kenani vhé'e Peresi vhé'enena Juda naga'mofo zamazampi zamavarentege'za 10 tauseni'a vhé Beseki kumapina ome zamahe'naze. <sup>5</sup> Ana Beseki kumapi Adoni-Bezekina ke'za erifore hu'za, agri'ene Kenani vhé'e Perisi vhé'enena hara huzmagatere'naze.

<sup>6</sup> Hianagi Adoni-Beseki'a nefrege'za rotago hu'za ome azeri'za azafa azantrena tarega kazigatira runekafriza, tare agafa agiararena rukafri'naze. <sup>7</sup> Ana'ma hazageno'a Adoni-Beseki'a amanage hu'ne, nagra 70'a kini vhé'mokizmia zamazafa zamazane, zamagiafa zamagine akafruge'za, ne'zama nenoa itamofo fenka kaziga mani'ne'za, ankrahe'a zogi'za ne'naze. E'inama hu'noa avu'ava zante menina Anumzamo'a mizana namie. Anage hutege'za avre'za Jerusalemi vazageno anantega ufr'i'ne. <sup>8</sup> Hagi Juda naga'mo'za Jerusalemi vhéra bainati kazinteti zamahe frivaganere'za, ana kumara teve tagint'e naze. <sup>9</sup> Hagi ana'ma hute'za Juda naga'mo'za urami'za, Kenani vhé'ma agonafine Negevine, agupo mopafinema nemaniza vhéra hara ome huzmante'naze. <sup>10</sup> Ana'ma hute'za Hebronii mopafima nemaniza Kenani vhéku'ma kora Kiriat-Arba hu'zama nehaza vhéra, hara ome huzmante'za Sesai naga'ene Ahimani naga'ene Talmi nagara hara zamagatere'naze.

<sup>11</sup> Hagi anantetira vu'za Debirima nemaniza vahetmina hara ome huzmante'naze. Debiri kumamofo agi'a korapara Kiriat-Sefa hu'za nehazane. <sup>12</sup> Hagi Kalepi'a amanage hu'ne, iza'o Kiriat-Sefa vhé'ma ha'ma huzamanteno ana kumama erisimofona mofa'n'i'a Aksana ami'enkeno ara erigahie. <sup>13</sup> Anagema higeno'a, Kalepi negna Kenazi nemofo Otnielii ana vhéra ha'huzmanteno ana kumara erigeno, Kalepi'a mofa'a Aksana amigeno Otnielii'a ara erinte'ne. <sup>14</sup> Hagi Aksa'ma Otnielinte'ma ne-eno'a amanage huno asami'ne, nenfa Kalepina antahigegeno mopa kamino huno hu'ne. Hagi Aksama donki agumpinti'ma tak'a'uma neregeno'a, Kalepi'a amanage huno antahige'ne, na'anku kave'nesie? <sup>15</sup> Higeno Aksa'a kenona amanage hu'ne, asomu hunantenka Negevi mopa ko nami'nananki, kampu'i tima nehanatia tintaminena musezana namio, higeno Kalepi'a anagamu kaziga me'nea kampu'tine, fenkma kaziga me'nea kampu'i tinena ami'ne.

<sup>16</sup> Hanki Kenazi vhahera Mosese nenemo nagaki'za Juda naga'mo'zama tofegna zafamo hu'nea Jeriko kumara atre'za nevazage'za, zamagrane magoka vu'za Juda vahe'ma hagege kokampi, Arad tava'onte Negevi nemaniza vahe'ene umani'naze. <sup>17</sup> Hagi Juda naga'mo'za zamafuhe'i Simioni naga'ene vu'za, Sefatima nemaniza Kenani vhahera ome zamahe vaganere'za ana rankuma'zmia eri haviza hutre'naze. E'ina hu'negu ana kuma'mofo agi'a Home hu'za agia nehaze.

<sup>18</sup> Hagi Juda naga'mo'zama mago'a kuma'enema ha'ma hu'za eri'nazana, Gaza rankumaki, Askeloni rankumaki, Ekroni rankuma'ene megagi'nea mopazminena zamahe'za hanare'naze. <sup>19</sup> Hagi Ra Anumzamo'a Juda naga'ene mani'nege'za hara hu'za maka agona mopa eri'naze. Hianagi agupofima mani'naza vhahera zamahenati otre'naze. Na'ankure zamagra aenireti tro hu'naza karisi ante'naze. <sup>20</sup> Hagi Mosese'ma hvempama huzmante'nea kante ante'za Juda naga'mo'za Hebronim mopa Kalepi ami'naze. Ana hazageno Kalepi'a 3'a Anaki mofavreramina ana mopa fima nemanizana zamahenati atre'ne. <sup>21</sup> Hianagi Benzameni naga'mo'za Jebusi vahe'ma Jerusalemima mani'naza vhahera zamahenati otre'naze. E'ina hazageno Jebusi vahe'mo'za Benzameni naga'ene Jerusalemia meninena mani'naze. <sup>22</sup> Hagi anahukna huno Ra Anumzamo'a Josefe naga'ene mani'nege'za mareri'za Beteli vhahera hara ome huzmante'naze. <sup>23</sup> Hagi Josefe naga'mo'za afure venenerami huzmantage'za vu'za Beteli kumakura kora Lusie nehaza kumara ome afure'za ke'naze. <sup>24</sup> Anama afure'za kenaku'ma vu'naza vene'nemo'za mago ne' ana kumapintira atiramino nege'za amanage hu'za asami'naze, muse hugantonanki ama kumapima ufre kana taveri huo, ana'ma hananketa kagrirka kazeri havizana osugahune. <sup>25</sup> Anagema hazageno'a, ana kumapima ufre kana zamaveri hutege'za, ana kumapi ufre'za ana maka vhahera bainati kazinteti zamahe vagare'naze. Hianagi kama zamaveri'ma hu'nea ne'ene naga'anena ozamahe, zamatrage'za so'e hu'za mani'naze. <sup>26</sup> Hagi anama ohe'ma atraza ne'mo'a Hiti vahe mopa fivuno, mago rankuma omegino ana kuma'mofo agi'a Lusie huno antem'i'ne. Ana knareti'ma eno menima e'neana ana agige'za nehaze.

### *Israeli vahe'mo'zama ha'ma hu'za e'ori'naza kumatamimofo naneke*

<sup>27</sup> Hagi Betsani kumapine, Tanak kumapine, Dori kumapine Ipleamu kumapine, Megido kumapine maka megagiterema hu'nea kumapi vhahera Manase naga'mo'za zamahenati otre'naze. Na'ankure Kenani vahe'mo'za hanaveti'za hara nehu'za, zamatrage'za mopazmia Manase naga'mo'za e'ori'naze. <sup>28</sup> Israeli vahe'mo'zama ome hankavemaneti'za Kenani vhahetmina zamahenati atrevaga ore'nazanki, kazokazo eri'za vahe zamavrazage'za, kazokazo eri'za vahezmi mani'naze. <sup>29</sup> Hagi Efraemi naga'mo'za Geserima nemaniza Kenani vhahera zamahenati otre'nazanki, zamatrazage'za zamagrane magopi mani'naze. <sup>30</sup> Hagi Kitroni kumapine Nahaloli kumapinemana nemaniza Kenani vhahera Sebuloni naga'mo'za zamahenati otre'nažanki, zamatrage'za magopi zamagrane mani'naze. Hianagi Kenani vahe'tmina kazokzo eri'za vahe zamazeri tro hazage'za kazokzo eri'za vahe mani'naze. <sup>31</sup> Hagi Ako kumapine, Saidoni kumapine, Alapu kumapine, Aksipi kumapine, Helba kumapine, Afeki kumapine, Rehopu kumapinemana nemaniza Kenani vhahera Aseli naga'mo'za zamahenati otre'za zamatrage'za zamagrane magopi mani'naze. <sup>32</sup> Ana hazageno Aseli naga'mo'za Kenani vahe'ene magopi mani'naze. Na'ankure Kenani vhahera hara hu'za zamahenati otre'naze. <sup>33</sup> Hagi Bet-Semesi

kumapine, Bet-anati kumapinema nemaniza Kenani vahera Naftali naga'mo'za zamahenati otre'nazanki, zamatrage'za zamagrane magopi mani'naze. Hagi ana kuma'trepinti vahe'tmina kazokazo eri'za vahe'zmi zamavare'naze. <sup>34</sup> Hagi Amori vahe'mo'za Dani naga'mo'zama agupo mopafima eramizankura hankaveti'za hara huzmante'za zamahenati atrege'za agona kokampi vu'naze. <sup>35</sup> Amori vahe'mo'za hankaveti'za Heresi agonafine, Aijaloni agonafine, Salpim agonafine mani'nazaragi, Josefe naga'mo'za tusi hankaveti'za kazokzo eri'za vahe zamazeri tro hu'naze. <sup>36</sup> Hagi Amori vahe'mofo mopa atupamo'a eramino, Akrabimi agonaregama mareneriza kanteti agafa huteno marerino Sela kumate mareriteno, vuvava huno agona moparega mareri'ne.

## 2

### *Ra Anumzamofo ankeromo Bokimi kumate vu'nea naneke*

<sup>1</sup> Hagi Ra Anumzamofo ankeromo'a Gilgali kumatetira atreno Bokimi kumate marerino vuno Israeli nagara amanage huno ome zamasami'ne. Isipiti'ma tamagehe'ima zamavare'na atinerami'na, mopama zamigahue hu'nama huvempama huzamante'noa kea ruha ontagigahue. <sup>2</sup> Hagi tamagra ama ana mopafi vahe'enena huhagerafi huvempa kea nosuta, Kresramana nevaza ita'zamia tagana'vazitreho hu'na hu'noanagi, ana keni'a ontahi'naze. Nahigeta amanara nehaze? <sup>3</sup> E'ina hu'negu amanage hu'na nehue, Nagra ama ana mopafi vahera zamahenati otre'nuge'za tamagrane mani'ne'za, ave'ave tamazeriankna nehanage'za anumzazmimo'za tamagridera karifu anagintankna hu'za tamentintia reramahe'za kegahaze. <sup>4</sup> Ra Anumzamofo ankeromo'ma ama ana nanekema huvagama neregeno'a, mika Israeli veamo'za zamazantre kofi'za tusi zavite'naze. <sup>5</sup> Hagi ana kuma agi'a Bokimie hu'za agi'a nente'za, Ra Anumzamofontega Kresramana vunte'naze.

### *Josua'ma fri'nea naneke*

<sup>6</sup> Hanki Josua'ma huzamantenge'za vu'za e'zama nehu'za, mago mago Israeli naga'mo'za erigahazema hu'nea mopa, eri santiharetere hu'naze. <sup>7</sup> Hagi Josua'ma manino e'neankna'afine, agranema mani'za ne-ezama mika kaguvazama Ra Anumzamo'ma Israeli vahete'ma erifore'ma hige'zama ke'naza ranra vahetamima mani'naza knafina, Ra Anumzamofonke Israeli vahe'mo'za monora hunte'za vu'naze. <sup>8</sup> Nuni nemofo Josua'a 110ni'a zagekafu huteno frige'za, <sup>9</sup> agrama erisantima hare'nea Efraemi agona kaziga Gasi agonamofo noti kaziga Timnat-Sera kumate ome asente'naze. <sup>10</sup> Hagi Ra Anumzamo'ma Israeli vahete'ma kaguvazama eri fore hige'zama ke'naza vahe'tmina maka fri vagaregeno, ana zantmima onke'naza vahe'tmi efore hu'naze.

### *Israeli vahe'mo'za Bali havi anumzamofo mono hunte'naza naneke*

<sup>11</sup> Hagi Israeli vahe'mo'za Ra Anumzamofo avufi havi zmavuzmava hu'za Bali havi anumzantamimofo monora huzmante'naze. <sup>12</sup> Hagi Isipiti'ma zamagehe'ima zamavareno'ma atiramino e'nea Ra Anumzana, Israeli vahe'mo'za atre'za amefi humi'naze. Anama umani'naza mopafi vahe'tmimofo anumzantminte zamare'nare'za monora hunte'naze. Hagi havi anumzamofo Bali amema'are'ene Astaroti havi anumzamofo amema'are'ene monora huntogeno, Ra Anumzamo'a tusi rimpa ahe'zamante'ne. <sup>13</sup> Na'ankure Ra Anumzamofona atre'za zamafi hunemi'za,

Bali havi anumzante'ene Astaroti havi anumzamofo amema'are'ene monora hunte'naze. <sup>14</sup> Anama hazageno'a Ra Anumzamo'a tusi arimpa ahezmantero, zamazeri havizama hu' vahe huzmanteg'e'za mika'zazmia emeri'naze. E'ina nehuno ha' vahe zamazampi zamavarentege'za ha' vahe'mo'za kegava huzmante'naze. <sup>15</sup> E'ina nehazageno inantego hate'ma vu'za e'zama hazarega Ra Anumzamo'ma huvempama hu'nea kante anteno havi zamavu'zamazama hu'naza zantera ha'rezamantageno nomani'zazimimo'a havizantfa hu'ne. <sup>16</sup> Anante Ra Anumzamo'a ke refkohu kva vahe zamazeri otige'za Israeli vahe'ma zamazeri havizama nehaza vahera zamahe'za Israeli vahera zamagu vazi'naze. <sup>17</sup> Hianagi Israeli vahe'mo'za kema refkohu kva vahe'mokizmi kea ontahi'za, Ra Anumzamofona atre'za savri a'negna hu'za havi anumzantamimofonte monora ome hunte'naze. Ko'ma zamagehe'mo'zama Ra Anumzamofo kasegema avariri'naza kana ame hu'za atre'za, havi kante vu'naze. <sup>18</sup> Hagi Ra Anumzamo'ma keagama refko hu vahe'tmima zamazeri omanetino'a, zamagrane mani'nege'za keaga refko hu kva vahe'mo'za ha' vahe zamazampintira Israeli vahera hara hu'za zamavarete hu'naze. Na'ankure Agri vahe'mo'zama knafima nemanizageno'a, Ra Anumzamo'a asunku huzmante'ne. <sup>19</sup> Hianagi keagama refko hu kva vahe'ma nefrizage'za Israeli vahe'mo'za ete rukrahe hu'za korapa zamavu'zamava zamifi vu'za zamafahe'mo'za hu'naza havi zamavu'zamavara zamagatere'za tusi kefo zamavu'zamava hu'za zamare'na re'za monora hunezamante'za eri'zana eri'zamante'naze. Magore hu'za kefo zamavu'zamavara otre'naze. <sup>20</sup> E'ina hazageno Ra Anumzamo'a tusi arimpa ahenezamanteno anage hu'ne, na'ankure ama vahe'mo'za zamafahe'inema huhagerafi'noa kasegea runetagre'za ke'ni'a ontahizagu, <sup>21</sup> Josuama zamahenati otre'neno'ma fri'nea vahe'tmina, Nagra zamaza osanuge'za, zamahenati otregahaze. <sup>22</sup> Zamagehe'za hu'nazaza hu'za Ra Anumzamo'na navu'navara avaririgahazafi Nagra rezamahe'na zamage'noe. <sup>23</sup> E'igu Israeli vahe mopafima mani'naza vahera Ra Anumzamo'a ame hunora zamahe kasopeno Josua azampina zamavarente vaga'ore'ne.

### 3

*Ra Anumzamofona atre'za savri a'nemo'zama nehzaza hu'za havi anumzante mono hunte'naza naneke*

<sup>1</sup> Hagi ko'ma Kenani mopafima ha'ma hu'naza zama onke'naza Israeli vahetmima rezamaheno kenaku, Ra Anumzamo'a mago'a vahera zamatrege'za Kenani mopafina mani'naze. <sup>2</sup> Hagi Israeli vahe'ma efore hutere hu'za henkama esaza vahetami Ra Anumzamo'a ha'ma hanaza avu'avaza rempi huzaminaku Kenani mopafi vahera zamahenatitre vagaore'ne.

<sup>3</sup> Ama'na kumatmimpi nemaniza vahetami zamatrege'za mani'naze. Faifu'a kumapima nemani'za Filistia vaheki, maka Kenani vaheki, Saidoni vaheki, Hivi vahe'ma Lebanon agonamofoma Bal-Hermoniti'ma vuno Hamat kumate'ma uhanati'nea vahe'mokizmi ozamahe zamatrege'za mani'naze.

<sup>4</sup> Hagi Ra Anumzamo'ma Mosesema ami'nea kasegea avaririgahazafi ovaririgosazafi huno Israeli vahe'ma rezamaheno kesigu Ra Anumzamo'a ana vahera zamatrege'za mani'naze. <sup>5</sup> E'ina hazageno Kenani vahe'ene, Hiti vahe'ene, Amori vahe'ene, Perisi vahe'ene Hivi vahe'ene, Jebusi vahe'mokizmi amu'nompi Israeli vahera mani'naze. <sup>6</sup> Ana'ma nehu'za Israeli vahe'mo'za zamagri mofa'ne ara e'neri'za, ete zamagra mofa'nea

zamatrazage'za zamagri mofavreramintera vea omeneri'za unemrazageno, havi anumzazmirera monora ome hunte'naze.

### *Otniel'i a keaga refkohu kva ne efore hu'nea naneke*

<sup>7</sup> Israeli vahe'mo'za Ra Anumzamofo avufina kefo zamavu'zmava nehu'za, Ra Anumzamofona zamagekani nente'za, Bali havi anumzante'e Asera havi anumzamofo amema'are monora hunte'naze. \* <sup>8</sup> E'ina hazageno Ra Anumzamo'a Israeli vahe'tminkura tusi arimpa ahezamanteno Mesopotem Kini ne' Kusan-risataimi azampi zamavarentegeno ha'eme huzamanteno zamazeri haviza nehuno, zamavareno kina ome huzmanteg'eza 8'a zagegafuji Kusan-risataimi kazokzo eri'za vahe umani'naze. <sup>9</sup> Hianagi Israeli vahe'mo'za Ra Anumzamofontega zamazama hinogura krafa hazageno, Ra Anumzamo'a zamazama hu' nera, Kalepi negana Kenazi ne'mofo, Otnielina azeri ot'i'ne. <sup>10</sup> Ra Anumzamofo Avamumo'a agri'ene emani'negeno, Israeli vahe'mokizmi keaga refko hu kva vahera mani'ne. Hagi Otniel'i'ma Mesopotemia vahe'ene ha' ome nehigeno, Ra Anumzamo'a kini ne' Kusan-risataimina azampi avrentegeno aheno hara azeri agatere'ne. <sup>11</sup> Ana higeno 40'a kafufina ha'huzana omanege'za, fru hu'za Israeli vahe'mo'za mani'nazageno, Kenazi ne'mofo Otniel'i a fri'ne.

<sup>12</sup> Ete mago'ene Israeli vahe'mo'za Ra Anumzamofo avufina kefo avu'avara hazageno, Ra Anumzamo'a Moapu kiri ne' Eklonina hankavea amigeno Israeli vahera hara eme huzmagatereno kegava huzmante'ne. Na'ankure zamagra Ra Anumzamofo avufina kefo zamavu'zmava hu'naze. <sup>13</sup> Hagi Ekloni'a Amoni vahe'ene Ameleki vahe'enena kehige'za azageno Israeli vahera hara ome huzamante'za tofegna zafamoke hu'nea Jeriko rankuma zamahe'za hanare'naze. <sup>14</sup> Hagi ana hazageno Israeli vahe'mo'za 18ni'a kafuzagefi Moapu kini ne' Ekloni kazokzo eri'za vahera mani'naze.

### *Ehuti'a Moapu vahe zamazampinti Israeli vahera zamagu'vazino zavare'nea naneke*

<sup>15</sup> Hianagi Israeli vahe'mo'zama Ra Anumzamofontegama zamaza hinogu'ma krafagema hazageno'a, ha' vahe zamazampinti'ma zamazama hu' nera Benzameni nagapinti Gera nemofo hoga azane ne' Ehuti azeri ot'i'ne. Hagi Israeli vahe'mo'za kafure kafure'ma kini ne'ma takesi zagoma nemizaza huno Moapu kini ne' Ekloni ome ami'nogu ana zantamina Ehutina nemi'za huntazageno erino vu'ne. <sup>16</sup> Ana higeno Ehuti'a tarega kaziga asane bainati kazina zaza'amo'a 50'a sentemita hu'nea tro huno tamaga kaziga amote anakiteno za'za ke'na'a antanino refite'ne. <sup>17</sup> Hagi Ekloni'a ra avufgane ne' mani'neankino, Ehuti'a ana takesi zagone maka zantamina erino Eglonina ome ami'ne. <sup>18</sup> Hagi ana takesi zantamina amiten'o'a, ana zantamina azama hu'za eri'za vu'naza vahera eme huzmanteg'eza vu'naze. <sup>19</sup> Hianagi Ehuti'a Gilgali tavao'rema havi anumzama tro'ma hunte'nazareti ete rukrehe huno Ekloninte eno amanage hu'ne, Ekloniga oku'a nanekek'a erigante'na oe, higeno Ekloni'a eri'za vahe'agura huno, amafintira maka atiramiho, hige'za maka eri'za vahe'amo'za atirami vagare'naze. <sup>20</sup> Hagi Eglonima zasi'ma e'neria noma'afi agrake'ma manigeno'a, Ehuti'a amanage hu'ne, Anumzamofontegati oku nanekek'a eri'na e'noe. Anage higeno tra'aretira ot'i'ne. <sup>21</sup> Hagi Ehuti'a tarega kazigama asane bainati kazima tamaga kaziga

\* <sup>3:7</sup> Bali havi anumzana ve anumzanki, asera anumzanema hu'neana zafareti tro huntenaza a' havi anumzanku hu'ne.

amote'ma anakinte'nea kazina avazu huno, Ekloni rimpia reragufe'ne. <sup>22</sup> Ana bainati kazimofo nena'amo'ene asana'amo'enena Eglonina rimpafi ufresupanegeno afovamo'a herafiramino bainati kazina refite'ne. <sup>23</sup> Ehuti'a ana kazina eriokasi Ekloni avufgafi me'negeno netreno, agu'ati kafana erinegino, marerino nomofo agofetu'ma zasi'ma e'nerizareti takaurenre fre'ne. <sup>24</sup> Ehuti'ma vutegenoa, Ekloni eri'za vahe'mo'za eme kazana anaga kaziga nomofo kafana erigi'negeno, zamagesama antahi'zana agu'afinka rifa nereno mani'ne hu'za hu'naze. <sup>25</sup> Anage hu'za nentahiza kafante avega ante'naze. Hianagi kafana ame huno onagige'za kafante kinofira eri'za ana kafana anagi'za kazana, kvazmimo'a frino mopafi mase'nege'za ke'naze. <sup>26</sup> Hagi kini ne' eri'za vahe'mo'za kafante avega ante'za mani'nazageno, Ehuti'a freno havere taga hu'za trohunte'naza havi anumzamofo amema'a me'nea kumara agatereno Seira vu'ne. <sup>27</sup> Hagi ana'ma huteno'a Israeli vahe'mofo mopafima ufreno Efraemi agonafima nevuno'a, ufe rege'za Israeli vahe'mo'za nentahi'za eme atru hazageno, ha' hunaku zamavareno ugota huno agra urami'ne. <sup>28</sup> Anama uneramino'a amanage huno hu'ne, navaririta viho, na'ankure Ra Anumzamo'a ha' vahetamia Moapu vhahera tamagri tamazampi avrente'neankita zamahegahaze. Anage hige'za Israeli vahe'mo'za Ehutina avariri'za Jodani tima takama nehzare Moapu vahe'enena hara ome hu'za magore hu'za ozamatre zamahehana hu'naze. <sup>29</sup> Ana hapina Moapu hankavenentake ha' vahe'tmina Israeli vahe'mo'za 10tauseni'a vahe zamahehna nehu'za zamatrage'za ofre'naze. <sup>30</sup> E'ina hu'za Israeli vahe'mo'za Moapu vhahera, zamahe vagarazageno 80'a kafufina hahu'zana omanege'za, Israeli vahe'mo'za knare hu'za mani'naze.

### *Kema refkohu ne' Samgari naneke*

<sup>31</sup> Ehuti amefira Anati nemofo Samgari efore huno bulimakao afu rene-haria ronku hu'nea azotareti 600'a Filistia vhahera zamahe hana huno Israeli vhahera zamagu'vazi'ne.

## 4

### *Deborane Barakine naneke*

<sup>1</sup> Hagi Israeli vahe'mo'za Ehuti'ma fritege'za Ra Anumzamofo avurera mago'ane ete kefo avu'ava zana hu'naze. <sup>2</sup> Anama hazageno'a, Ra Anumzamo'a Hazori kuma kegava hu'nea Kenani kini ne' Jabini azampi Israeli vhahera zamavarente'ne. Hagi ana kini ne'mofo sondia vhahete kegavama hu'nea nera Haroset-Hagoimie nehzare kumate nemania nekino agi'a Sisera'e. <sup>3</sup> Hagi Sisera'a 900'a ainire karisirami ante'neankino Israeli vhahera 20'a kafufina arohura zamarenzo zamazeri haviza hige'za, zamaza hinogura Ra Anumzamofontega krafa hu'naze.

<sup>4</sup> Hagi ana knafina kasnampa ara Debora'a Lapidoti nenanekino, Israeli vahe'mo'zama keagare'ma azageno'a keagazmia refko huno antahi'ne. <sup>5</sup> Hagi Debora'a Rama kuma'ene Beteli kuma'ene amu'nompi Efraemi agona mopafi, tofegna zafa agafarene nehzare Debora mani'nege'za, Israeli vahe'mo'za knazazimia eri'za azageno keagazmia refko huno antahi'ne.

<sup>6</sup> Hagi mago zupa Debora'a Kedes-Naftali kumate ne' Abinoamu nemofo Barakintega kea atrentegeno vigeno, anante'ma egono'a amanage huno asami'ne, Israeli vahe'mofo Ra Anumzamo'a kagrikura amanage hu'ne, Vunka Naftali nagapinti'ene Zebuluni nagapintira 10tauseni'a venene zamavarenka Tabori agonare omeri atru hiho huno hu'ne. <sup>7</sup> Ana huge'na kini

ne' Jabini sondia vahete'ma vugotama hu'nea kva ne'ene, aini karisiramine, ha' vahe'taminena zamavare'na Kisoni tinte e'na kazampi eme antegahue.

<sup>8</sup> Anagema higeno'a Baraki'a amanage huno Deborkura hu'ne, Kagrama nagri'enema vanankena vugahue. Hianagi kagra nagri'enema ovnanana, nagra ovugahue. <sup>9</sup> Higeno Debora'a amanage huno hu'ne, Tamage nagra kagrane vugahue. Hu'neanagi amama vanana kamo'a, kagra ra kagia e'origosane. Na'ankure Ra Anumzamo'a Siserana mago a'mofo azampi avrentegahie. Anage nehuno Debora'a Barakina avaririno Kadesi kumatera vu'ne. <sup>10</sup> Hagi Barakia Zebuluni naga'ene Naftali nagara ke hige'za Kedesi vu'naze. Hagi 10tauseni'a sondia vahe'mo'za mareriza vazageno Debora'a zamagrane vu'ne.

<sup>11</sup> Hagi ana knafina kin nagapinti ne' Heberi'a mago seli nona Kadesi kuma tavaonte oki zafa me'nere ki'ne. Korapara Kenasi kumateti, Mosesen nemeh Hobabu nagapinti ne'kino agehemokizmia zamatrevo vu'nea ne'mo ki'ne.

<sup>12</sup> Hagi Abinoamu nemofo Baraki'ma Tabori agonare'ma marerie kema Siserama asamizageno nentahino, <sup>13</sup> Sisera'a 900'a ainire karisi ke hige'za eri'za neazageno, maka sondia vahetamina ke hutru hutege'za, Haroset-Hagoimitira Kisoni tinte vu'naze. <sup>14</sup> Anante Debora'a Barakinkura amanage hu'ne, Otio! Na'ankure menina ama knarer Ra Anumzamo'a vugota huganteno, Siserana kagri kazampi avrente'ne. Anage higeno Baraki'a 10tauseni'a sondia vahera zamavareno, Tabori agonamofo asoparega urami'naze. <sup>15</sup> Hagi Barakima ha'ma eri agafama higeno'a, Ra Anumzamo'a Siserane karisima eri'za vanoma nehaza maka sondia vahe'araminena antahintahi zimia zamazeri savari nehuno, zamazeri koro higeno Sisera'a karisi'afintira mopafi takaireno koro fre'ne. <sup>16</sup> Ana higeno Baraki'a karisifi vanoma nehu'za ha'ma nehaza vahe'tmina zamavaririno Haroset-Hagoimi vuno magore huno ozmatreno, ome zamahe hana hu'ne.

<sup>17</sup> Hianagi Sisera'a mopafi freno vuno Kenasi ne' Heberi nenaro, Jaeli seli nontega vu'ne. Na'ankure Hazori kini ne' Jabinine Kenasi ne' Heberi kizani amu'nompina hafra osu'na'e. <sup>18</sup> Hagi Jaeli'a seli noma'afinti'ma atiramino Siserama eme negeno'a amanage hu'ne, korora osunka seli noni'afi emarerinka emanio. Anage higeno Jaeli seli nompi Sisera'a umarerino umasegeno, franke erino kofinte'ne. <sup>19</sup> Anama nehigeno'a Sisera'a amanage hu'ne, nanankemo'a hagage hianki osi'a tina afinamige'na na'neno, higeno zagagafa akru'reti tro hu'nea tintafempinti mememofo amirina tagi amigeno netegen, ete frankera eri kofintegeno mase'ne. <sup>20</sup> Nemaseno amanage hu'ne, Seli nomofo kafante oti'enka mago'a vahe'mo'ma eno'ma eme kantahigeno, mago'a vahera amafina mani'neoma hanigenka, i'o amafina mago'a vahera omni'ne hunka huo. <sup>21</sup> Hianagi Sisera'a asafe'atagu mase himre'negeno, Jaeli'a hamane seli no avazuhumpi huno negia azota eriteno, akoheno vuno Siserana ana frankepi taponeno asenia runagino aheno mopafi ahenarentegeno fri'ne. <sup>22</sup> Anama nehigeno'a Baraki'a Siserana avaririno ne-egeno'a Jaeli'a viazamo amanage ome hu'ne, ege'na avaririnkama neana nera ome kaveri ha'neno, higeno Baraki'a amage vuno ome keana seli no avazuhumpi huno arenentea azotareti asenia renagino ahentenegeno ome ke'ne.

<sup>23</sup> E'i ana zupage Israeli vahe zamavufi Anumzamo'a Kenani kini ne' Jabinina hara hu agatere'ne. <sup>24</sup> Hagi ana hige'za Israeli vahe'mo'za tusiza hu'za hankaveti'za Kenani kini ne'mofo sondia vahetamina hara huzmante'za zamazeri haviza hu'naze.

## 5

*Deborane Barakine zagame'mofo naneke*

<sup>1</sup> Hagi ana knazupa Debora'ene Abinoamu nemofo Barakikea ha'ma vagaregekeaa amanage huke muse zagamera hu'na'e, <sup>2</sup> Ra Anumzamo ragi erisie! Israeli kva vahe'mo'za vugota hu'za hara hazageno, Israeli vahe'mo'zanena zamagesa ontahi antahi hu'za zamagranena hara hu'naze. <sup>3</sup> Kini vahe'mota nentahinkeno, kini vahe'tmimofo mofavremota antahio, Ra Anumzamofontega zagamera hugahue, Ra Anumzana Israeli vahe Anumzantega zavena ahanenkeno knare ageru rugahie. <sup>4</sup> Ra Anumzamoka Seiri kumara atrenka nevunka, Idomu agupofima nevankeno'a mopamo'a momi'momi nehigeno, monafina hampona negigeno, hampopintira kora tagiramino ru'ne. <sup>5</sup> Ra Anumzamofo avuga agonaramimo'a momi nehigeno, Sainai agonamo'enena momi nehie. Israeli vahe'mota Ra Anumza Kagra mani'nane. <sup>6</sup> Hagi Anati nemofo Samgari knafine, Jaeli knafinena vahe'mo'za koro hu'za ra kampina vano osu, osi' kampinke vano hu'naze. <sup>7</sup> Israeli vahe kumatamimpina knare nomanizana omanege'za maniza neazage'na Debora nagra Israeli vahe'mofona nezamarera kna hu'na efore hu'noe. <sup>8</sup> Hagi Israeli vahe'mo'zama ru anumzama avaririzageno'a, rankuma'mofo kafanteria ha' fore hige'za ha' hu'naze. Hu'neanagi magore huno 40 tauseni'a Israeli sondia vahe'mo'za hankone kevenena zamazampina e'ori'naze. <sup>9</sup> Israeli sondia vahete'ma vugota hu'naza kva vahe'mo'zama zamavesite'ma ha'ma ome nehaza vahetega nagu'amo'a vu'ne. Ra Anumzamo'a ra agi erisie! <sup>10</sup> Hagi efekе donki afu' agumpima vanoma nehaza vahe'ene frufru huno marerirfa tafete'ma nemanina vahe'ene, karankama vanoma nehana vahe'moka ama ana zankura antahio. <sup>11</sup> Hagi timafi kerire mani'ne'za zavenama nehe'za Ra Anumzamo'ene Israeli vahe'mo'zanema fatgo kazigati'ma ha'ma azeri agatere'naza zanku'ma zagame'ma nehzana antahio. Hagi Ra Anumzamofo vahe'mo'za rankuma'mofo kafante urami'naze. <sup>12</sup> Otio, otio, Debora! Otio, otio, zagame huo! Otio, Barakiga, Abinoamu nemofoge, kinama hu'naza vahera zamavarenka vuo. <sup>13</sup> Manizama'amo'za kva vahe'zamine erimago hu'za erami'naze. Ra Anumzamofo vahe'mo'za nagri kaziga ante'za hanaventake ha' vahera hara huzmantenaze. <sup>14</sup> Hagi Efraemi naga'mo'za Ameleki vahe mopafinti neazage'za Benzameni naga'mo'za zamavariri'za hatera erami'naze. Hate'ma vugotama hu kva vahe'tmina, Makiri nagapinti e'naze. Zebuluni nagapintira hate'ma ugotama hu vahe'mofo zantamima erino vu vahe e'naze. <sup>15</sup> Hagi Isaka nagapinti ugagota kva vahe'tmimo'za Debora Barakine zamagefi vu'naze. Baraki amefi zamavunente'za agupofina vu'naze. Hianagi Rubeni naga'mo'za tare antahintahi nehu'za ovu'naze. <sup>16</sup> Nahigeta sipisipi afu naga'mofo amu'nompina kazara osu' mani'naze. Sipisipi afu kva vahe'mo'zama hogema hanazama'a antahinakupi? Tamage Rubeni naga'mo'za razampi antahintahi hakarea nehaze. <sup>17</sup> Gati naga'mo'za Jodani timofo zage hanati kaziga mani'naze. Na'a hige'za Dani naga'mo'za ventenena mani'naze? Asa naga'mo'za kaza osu zamagraku hageri ankenare mani'naze. <sup>18</sup> Zebuluni naga'mo'za frizankura ontahi'za hanavetiza hara hu'naze. Naftali naga'mo'zanena ha'mo'ma tevenefama nefifina zamavufagagura ontahi'za hara hu'naze. <sup>19</sup> Hagi Kenani kini vahe'mo'za Tanaki kumate e'za Megido tinenafi hara hu'nazanagi, magore hu'za silva fenona eri'za ovu'naze. <sup>20</sup> Hagi monafinti ofumo'za hara

hunte'naze. Zamagrama vanoma nehaza kamofo avaririza Siserana hara hunte'naze. <sup>21</sup> Kisoni timo'a ti hageno zamavareno vu'ne, Kisoni tina korapa me'nere me'nea tine. Nagra korora osu hankaveti'na vugahue. <sup>22</sup> Hagi Sisera hosi afutamimo'za vagri vagri hu'za zamagareti mopa rentunkafiza vu'naze. <sup>23</sup> Hagi Ra Anumzamofo ankeromo'a amanage hu'ne, Merosi kumara atrenkeno kazusifi meno. Maka ana kumapima mani'naza vhahera kazusifi manigahaze. Na'ankure zamagra e'za Ra Anumzamofona aza hu'za hara osu'naze. Zamagra e'za Ra Anumzamofona aza hu'za hankave ha' vahetmina hara huozmante'naze. <sup>24</sup> Maka a'nefintira Kin kumate ne' Heberi nenaro Jaeli rama'a asomura erigahie. Seli nompima nemaniza a'neramina zamagatereno, agra ugota asomura erigahie. <sup>25</sup> Sisera'ma tinku'ma antahima negegeno'a Jaeli'a knarezantza huno marerirfa kapufi mememofo amirima eri kragemafente'naza amirina tagimi'ne. <sup>26</sup> Ana a'mo'a hoga azantetira antegantuteno seli noma avazuhumpi huno anakinte azota e'nerino, tamaga kaziga azana antegantuteno hama kano erino, Siserana to'mamuna runagino ana zotanura ahe'ne. <sup>27</sup> Sisera'a kuraramperami'ne, agra traka huno mase'ne, agra kaza osu mase'ne, agra trakama huno masere frinte'ne. <sup>28</sup> Sisera nerera'a nomofo zahoma eri avo kampinti nege. Agra Sisera'ma esigu nomofo zahoma eri avo kampinti negeno amanage hu'ne. Na'ahigeno karisi'amo'a ame hunora nome? Na'ahigeta agri karisimo'ma bagri bagrima huno e'nia zamofo agasasa nontahune? <sup>29</sup> Knare antahintahima nemia a'mo'a kenona hunte'ne. E'ina a'mo'a agra'a kenona hu'ne. <sup>30</sup> Ha'ma hu'za eri'za kumapinti feno refko nehugahaze. Mago'mago sointia vahe'mo'za mago magoro tare tarero hu'za a'neramina nevare'za, knare'ma huno avasesema'amo'ma hu'nea kukena nagri su'an, Sisera su'an megahie. <sup>31</sup> E'igu Ra Anumzamoka ha'ma aregantesamo'za Siserama friaza hu'za frisaze! Hianagi iza'zo kavesigantesamo'za zagema hanatino hanave'anema remasama hiankna hugahaze. E'ina hazageno 40'a kafufina ha'zana omanege'za Israeli vahe'mo'za zamarimpa fru hu'za mani'naze.

## 6

### *Gidioni naneke*

<sup>1</sup> Hagi 40'a kafuma evigeno'a ete Israeli vahe'mo'za Ra Anumzamofo avurera havi zamavu'zamava hu'naze. E'ina hazageno'a Ra Anumzamo'a Midieni vahe zamazampi Israeli vhahera zamavarentegeno, 7ni'a kafufi kegava huzmante'naze. <sup>2</sup> Ana'ma higeno'a Midieni vahe'mo'za hanavenen-take hu'za Israeli vhahera zamazeri havizantfa hazageno, Israeli vahe'mo'za agona agona franeki'za, havegampine, vihuma hunte'nazafine fraki'naze. <sup>3</sup> Hagi Israeli vahe'mo'zama hozama antazageno'a, Midieni vahe'ma, Ameleki vahe'ma, zage hanati kazigati vahe'ma hu'za eme hara huza-mante'naze. <sup>4</sup> Ana mopafi seli nona eme ki'za mani'ne'za maka hozaz-imia agu'za ru'za vu'za Gaza mopare ome atre'naze. Magore hu'za Israeli vahe'mofo zana otre'za maka sipisipi afu'ma, meme afu'ma, bulimakao afu'ma, Donki afutaminena avre vagare'za vu'naze. <sup>5</sup> Hagi ana ha' vahet-mima e'nazana, maka afu'krazmine seli nona eme ki'za mani'ne'za Israeli vahe hoza otre'za ne'za eri hana hu'naze. Kenumo'za hare'za azankna hu'za ohampriga'a vahe'mo'za Israeli vahe mopafina emanine'za maka tra'zana vatri'za nevagarazageno rampa'age hu'ne. <sup>6</sup> E'ina hu'za Israeli vhahera

zamazeri haviza hazage'za, Israeli vahe'mo'za tusi zamagaku nehu'za zamama hinogura Ra Anumzamofontega zavi krafage hu'naze.

<sup>7</sup> Hagi Midieni vahe'mo'zama zamazeri havizama hazageno'a Israeli vahe'mo'za zamazama hanigura Ra Anumzamofontega krafagea hazageno, <sup>8</sup> Ra Anumzamo'a kasanampa ne' huntegeno Israeli vahetega eno amanage eme hu'ne, Ra Anumzana Israeli vahe Anumzamo'a amanage hie, Isipima kazokzo eri'zama e'nerita mani'hazage'na, Nagra ana kazokzo erizaptintira tamavre'na atirami'noe. <sup>9</sup> Isipi vahe'mofo zamazampinti'ene knama tamiza tamazeri havizama nehaza vahe'mokizmi zamazampintira Nagra tamagura vaz'i'na tamavre'na e'na ama mopafima mani'naza ha' vahetimia eme zamahe kasopenetre'na, ama mopa eri tam'i'noe. <sup>10</sup> Hagi amanage hu'na neramasamue, Nagra Ra Anumzana tamagri Anumza mani'noanki, ama mani'naza mopafi Amori vahe anumzantaminkura korora osiho hu'na hu'noanagi, Nagri kea ontahita ke'ni'a rutagre'naze huno hu'ne. <sup>11</sup> Anante Ra Anumzamofo ankeromo'a\* eno, Ofra kumate oki zafa agafare eman'i'ne. Hagi Abiezeri nagapinti ne' Joasi nemofo Gidioni'a Midieni vahe'mo'zama witi'ama erizanku koro huno wainima regatati'ma nehaza kerifi mani'neno, witi hona'a refuzafupe'ne. <sup>12</sup> Ra Anumzamofo ankeromo'a Gidionintehanatino amanage hu'ne. Hankaventake sondia nera, Ra Anumzamo'a kagri'ene mani'ne. <sup>13</sup> Anante Gidioni'a kenona huno, ramoke, Ra Anumzamo'ma tagranema mani'negeno'a nahigeno amanahu zana tagritera efore nehie? Hagi Ra Anumzamo'ma erifore hige'za tagehe'zama tasami'naza kaguva zana iga me'ne? Isipitira Ra Anumzamo'a tavreno e'neanangi, menina Ra Anumzamo'a avresra huranteno Midieni vahe zamazampintira tavrente'ne. <sup>14</sup> Anante Ra Anumzamo'a rukrahe huno amanage huno asami'ne, Midieni vahe zamazampintira hankavema eri'nana hankavenu ome ha' hunka Israeli vahera zamagu'vaziogu Nagra hunegantoe. <sup>15</sup> Hianagi Gidioni'a amanage huno kenona hu'ne, Ra Anumzamoka, inankna hu'na Israeli vahera zamagura vazigahue? Manase naga'nofipina nagri nagara zamigi omane naga'manizageno, nenfa mofavreramimpina nagra amite'na mofavre mani'noe. <sup>16</sup> Higeno Ra Anumzamo'a amanage huno asami'ne, Nagra kagrane mani'nugenka, Midieni vahera magoke vahe'ma aheaza hunka zamahehana hugahane. <sup>17</sup> Anagema higeno'a Gidioni'a amanage huno Ra Anumzamofona kenona hunte'ne, Nagra kagri kavurema knare'ma hu'nugenka tamage hunka nazama hunaku'ma hanunka, mago avame'za naveri huge'na tamage Ra Anumzamoka nehane hu'na ha'neno. <sup>18</sup> Muse hugantoanki natrenka ovunege'na ofani'a eri'na eme kami'neno, higeno Ra Anumzamo'a huno, ama anante mani'nugenka etesanke'na vugahuanki vuo. <sup>19</sup> Anage'ma higeno'a Gidioni'a ame'ama huno nontega vuno, agaho meme afu ome aheno negreno, zisti onte bretine kre'ne. Hagi ana meme afu'ene zisti onte bretinena ekaeka kupi erinerino afu'ma kre'nea tima'a kavofi tagino e'nerino eazamo ra zafamofo agafafi ana ankeromofo avuga eme ante'ne. <sup>20</sup> Hagi anante Ra Anumzamofo ankeromo'a anage huno asmi'ne, Amu ana afu'ene zisti onte bretinena erinka have agofetu ante'eneka afu tima'a ana agofetu tagitro, higeno Gidioni'a ana hu'ne. <sup>21</sup> Anante Ra Anumzamofo ankeromo'a azampima eri'nea azotareti ana afu'ene bretinena avako higeno, ana havefintira teve rukru huno ana maka ne'zana tefanane hu'ne. Ana higeno ana ankeromo'a agranena rufanane hu'ne. <sup>22</sup> Hagi Gidioni'ma Ra

\* **6:11** Akeronkna huno Ra Anumzamo'a Gidiontera efore hu'negu, Gidioni'a Ra Anumzamofo ankerone hu'ne.

Anumzamofo ankerone huno keno antahinoma nehuno'a, amanage huno ran ke hu'ne, Ra Anumzamoka nagra frigahue! Na'ankure Ra Anumzamoka ankero ke'noe. <sup>23</sup> Hianagi Ra Anumzamo'a amanage huno asmi'ne, ofrigosananki korora osunka krimpa frune akohenka manio. <sup>24</sup> Anage higeno Gidioni'a anante kresramna vu ita tro huno agi'a Ra Anumzana Rimpia Fru Nere (Yawe-Shalom) huno ante'ne. Hagi ana kresramna vu ita Abiesa nagamofo mopafi Ofra kumate menina otino me'ne.

<sup>25</sup> Hagi ana kenagera Ra Anumzamo'a Gidionina amanage huno asmi'ne, Negafa bulimakao afu kevufintira mago nevrenka namba 2 bulimakao afu'ma avre'nanana 7ni'a kafu hu'nesia afu avro. Hagi negafa'ma Bali havi anumzante'ma kresramna vunte itama tro'ma hunte'neana tapage hunetrenka, Asera havi anumzamofo amema'ama zafama antre'za ana tava'onte'ma retru re'nazana antaginka kitaginkotago hutro. <sup>26</sup> Hagi Ra Anumzamofo kresramna vu ita haverera tro hutenga, ana Asera havi anumzama retrure'ne'za mono'ma hunentaza zafama antaginkama kitagi'nana zafareti ana kresramna vu itare tevea hanavazinka, namba 2 bulimakao afura ahenga, tevefima kre fananehu ofa hugahane. <sup>27</sup> Anage higeno Gidioni'a 10ni'a eri'za vahe'a nezamavreno Ra Anumzmo'ma asami'aza hu'ne. Hianagi nefä nagaku'ene ana kumapima nemaniza vaheku koro nehuno ferura anzana osu'nearki, kenage ana zana tro hu'ne. <sup>28</sup> Hagi ana'ma hutegen'a ana kumapi ma nanterama oti'zama kazana, Bali havi anumzante'ma kresramnama nevaza ita taganavazi netreno, Asera havi anumzamofo ame'ma'za fare'ma tro hu'za retrurente'nezama mono'ma hunentaza zafaramina maka antagi atrevaga nere'za kasefa kresramna vu ita trohu'za namba 2 bulimakao afura kresramna vu'nazage'za ke'naze. <sup>29</sup> Anazama nege'za ana vahe'mo'za ontahige antahige hu'za, i'za ama zana tro hu'ne? hu'za hu'naze. Hagi henkama rezagane so'e hu'za hake'za erifore'ma hazana, Joasi nemofo Gidioni anara hu'ne, hu'za hu'naze. <sup>30</sup> Anante ana kumapima nemaniza vahe'mo'za amanage hu'za Joasina asami'aze, Negamofona avrenka egeta ahamanenkeno frino. Na'ankure agra Bali anumzante'ma kresramna nevuna ita tagnavazi netreno, Asera anumzante'ma mono'ma hunentona zafa antagi tre'ne. <sup>31</sup> Hianagi Joasi'a ranke huno ana vahetmina amanage huno zamazerikori'ne, Nagafare Bali havi anumzana ahora nekaze? Bali havi anumza aza hu'za nehazo? Bali havi anumzama ahomake'naza vahera nanterama komatinigeta fri vagregahaze. Hagi agra anumzama mani'nenu'n'a, agra'a ahora kegahie. Na'ankure agrite'ma kresramnama nevaza ita tagana vazitre'naze. <sup>32</sup> E'ina hige'za ana knazupa Gidioni agi'a Jerub-bali'e hu'za antemi'naze. Hagi ana agimofo aguagesa'amo'a amana hu'ne, atregeno Bali anumzamo'a agra'a ahora keno, na'ankure agri Kresramana vu ita tagana vazitre'ne.

<sup>33</sup> Hagi Midieni vahe'ma, Ameleki vahe'ma zagehanati kazigati vahe'ma hu'za, Israeli vahe ha'huzamante'naku erimago hute'za Jodani tina takaher'za Jezril agupofi seli nona eme ki'naze. <sup>34</sup> Hianagi Ra Anumzamofo Avamu'mo Gidionintera eman'i'negeno ufena rege'za, Abieseli naga'mo'za hate avaririza vu'naku e'naze. <sup>35</sup> Hagi Manasema, Aserima, Zebulonima, Naftali nagateganena kea atrezamantage'za ana makamo'za ha'ma huga vahetamina agritega emarer'i'naze.

<sup>36</sup> Hagi anante Gidioni'a amanage huno Ra Anumzamofona asami'ne, Kagrama huhamprinante'nana kante'ma tamage hunka nagri'ma naza hanankena ha'ma hu'n Israeli vahe'ma zamaguvinazinaku'ma hanugenka, <sup>37</sup> amana huge'na ka'neno. Meni kenagera witima neharaza kumapina

sipisipi afu azokara antegahue. Hanki tamage hunkama naza hananke'na ha'ma hu'na Israeli vahe'ma zamagu'vazinaku hanugenka, ana sipisipi afu azokatera atregeno atara runentena, mopamo'a hagege hu'nena ka'neno. Nanterama ke'nuama sipisipi afu azokate'ma ata'ma ahenenigeno mopamo'ma hagagema hunenige'na, huhamprinante'nana kante antenka naza hunka Israeli vhahera zamagu vazigahane hu'na antahi'neno. <sup>38</sup> Hagi Gidioni'ma nanterama otino ome keana anaza fore hu'negeno ke'ne. Ana Sipisipi afu azokara omerino tatiana, timo'a mago zuompa avite'ne. <sup>39</sup> Anante Gidioni'a Anumzamofona amanage huno asami'ne, Mago'e'ne kantahige'za huanki krimpa aheonanto. Ete ama ana sipisipi afu azokara ome antegahuanki, mopafinke ata kora runentenko, sipisipi afu azokatera ruontenke'na ka'neno. <sup>40</sup> Anage higeno Ra Anumzamo'a ana kenagera higeno mopafina ata kora runte'ne. Hianagi ana sipisipi afu azokamo'a hagage huno me'ne.

## 7

*Gidioni'ma 300'a vahe'ma zamavare'nea vahe'mofo naneke*

<sup>1</sup> Hagi anante Jerubali'ene (Gidioni mago agi'e) sondia vahe'anena nanterame oti'za Harodi tinnenafi seli nona ome ki'naze. Hagi Midieni sondia vahe'mo'za noti kaziga, Morea agonamofo agafima me'nea agupofi seli nona ome ki'naze. <sup>2</sup> Hagi Ra Anumzamo'a Gidioninkura amanage huno asami'ne, Tamatre'nugeta rama'a sondia vahe'mota Midieni vhahera hara huozaman-tegahaze. Ana maka'motama ha'ma hanazana, Israeli vahe'mo'za tagra hankavere Midieni vhahera zamaheta taguravazune hu'za zamavufa ra hugahaze. <sup>3</sup> E'ina hu'negu menina huama hunka mika vhahera zamasamio, izago koroma hunka kahirahima resimoka, Giliati agona atrenka nontega vuo hunka huzamanto. E'ine higeno 22 tauseni'a vahe'mo'za atre'za nontega vazageno, 10 tauseni'age mani'naze.

<sup>4</sup> Hianagi Ra Anumzamo'a amanage huno Gidionina asami'ne, Zah-ufa rama'a vahe kagri'enena mani'naze. Hagi ana maka zamavarenka timpi uramige'na rezamahe'na nege'na, e'i'a vahe vugahie hu'nama hanua vaheke vugahazanki, e'i'a vhahera ovugahazema hanua vahe'mo'za kagri'enena ovugahaze. <sup>5</sup> Anage higeno Gidioni'a ana maka sondia vhahera zamavareno timpi uramigeno, Ra Anumzamo'a amanage huno Gidionina asami'ne, Kramo'ma nehiaza hu'zama zamazanteti'ma tima ankehi'za zamagfunaret'i'ma nesaza vahe kevua mago kaziga zamavarenteka, zamarena re'za pri'ma hu'za tima enevanifinti'ma nesaza vhahera mago kaziga zamavarento. <sup>6</sup> Hagi ana'ma higeno a 300'age vahe'mo'zage zamazantetira tina ankehi'za kramo'ma nehiaza hu'za zamagfunaretira ne'naze. Hianagi ana maka vahe'mo'za zamarenare'za pri hu'za tima enevifinti ne'naze.

<sup>7</sup> Hagi anante Ra Anumzamo'a amanage huno Gidionina asami'ne, Ama 300'a nagapi kaza hu'na Midieni vhahera avre kazampi anta'nena hara hu zamagateregahane. Hanki mago'a vhahera huzamantege'za nozmirega viho.

<sup>8</sup> Anagema higeno'a Gidioni'a ruga'a sondia vahe'mokizmi nanazantamine ufentaminena e'nerino huzmantegi'za seli nozmirega nevazageno, 300'a vaheke zamavarege'za agri'enena vu'naze. Hagi Midieni vahe'mokizmi seli nonkumara fenkamu agupofi me'nege'za, Gidioni naga'mo'za anagamu emani'naze.

<sup>9</sup> Hagi ana kenagera Ra Anumzamo'a amanage huno Gidionina asami'ne, Otinka Midieni vahe seli nonkumapi uraminka hara ome huzmanto! Na'ankure Nagra ko Midieni vhahera kagri kazampi zamavarente'noe.

**10** Hianagi fenamu anampima urami zanku'ma koro'ma hanunka, eri'za vaheka'a Pura'ene uraminka, **11** na'aneoma hanazankea antahitenka e'ire hankavea erinka hara huzmantegahane. Anagema higeno'a Gidioni'a eri'za vahe'a Purana nevreno uramino ha' vahe'amo'za seli nonku'ma kiza mani'naza kuma atuparega vu'na'e. **12** Hagi Midieni sondia vaheki, Ameleki sondia vaheki, zage hanati kazigati sondia vaheki hu'za tusi kenutamimo agofetu agofetu huno mani'negeno hampriga osiakna hu'za ana vahe'mo'za ana agupofina emani avite'naze. Hagi tusi kemori afutami avre'za e'nazankino ana kemoli afutamimo'za hagerinkenafi kasepankna hu'za ana agupoa mani avite'naze. **13** Hagi Gidioni'ma eramino'ma antahiana, mago ne'mo'a ava'na ke'nea nanekea rone'amoofona amanage huno nesamigeno antahi'ne. Avana kogeno ana ava'nafina mago bali ragareti tro hu'nea bretimo'a zahe'zahe huno eramino seli nona eme rutagana'vazitregeno, ana nomo'a mopafi kriteno mase'nege'na ke'noe. **14** Ana ava'na kema nentahino'a rone'amo'a amanage hu'ne, e'i mago'a vahe enaku higenka ava'na onke'nananki, Israeli ne' Joasi nemofo Gidioni bainati kazinknomo enaku higenka kanankino, Anumzamo'a mika Midieni vahe'motane, tagri'ma eme tazama hanaza vahe'enena Gidioni azampi tavrente'ne. **15** Hagi ana ava'na kene, ana ava'nama eri ama hianke'ma Gidioni'ma nentahino'a, Ra Anumzamofo avuga renarenomo mono hunte'ne. Ana huteno ete Israeli vahe seli nonkumatega vuno amanage huno ome kezatine, otiho! Na'ankure Ra Anumzamo'a ko Midieni sondia vahetamina tagri tazampi hago zamavarente'ne. **16** Hagi Gidioni'a ana 300'a vhahera 3'afi refko huno magoke magoke vhahera ufemare pazine'ene mopa kavofi tavira anteno zamitere hu'ne. **17** Ana huteno amanage huno zamasami'ne, Tamavua nagrite keteta mani'nenke'na, seli nonkumamofo atuparega e'nama na'anoma hanuazana ana zanke'za hiho. **18** Nagri'enema vanaza naga'ene ufema re'nunketa, seli non kuma'ma avazagi'gagi'naza vahe'mota ufena nereta amanage huta ke'zana atiho. Tagra Ra Anumzamofo vahe'ene Gidioni vahe mani'none huta hiho.

### *Midieni vahe'mo'za panani hu'za fre'naza naneke*

**19** Hagi kenage amu'nona Midieni vahe seli nonkumate'ma kvama hu'naza sondia vahe'mo'za vazageno, kasefa vahe'ma eme zamazama hazageno'a, Gidioni'ene 100'a vahe'enena Midieni vahe seli nonku'ma atumparega e'naze. Anante antrihaza'za hu'za magoka ufena nere'za zamazampima eri'naza mopa kavoa rupraro vazi'naze. **20** Ana'ma hazage'za ana maka 3'a kevuma hu'za mani'naza vahe'mo'za, ana zanke hu'naze. Hoga'a zamazampina tavi azeneri'za, tamaga zamazampina ufema resaza pazine eri'ne'za amanage hu'za kezati'naze, Ra Anumzamofone Gidionigizni bainati kazinknone! **21** Anagema hu'za ke'zama neti'za, oti'za manigagine'za nezmagage'za ana seli nonkumapima mase'naza Midieni vahe'mo'za oti'za tusi zamanogu nehu'za, krafage hu'za koro fre'naze. **22** Hagi 300'a Israeli vahe'mo'zama ufema razageno'a Midieni vahe antahintahia Ra Anumzamo'a zamazeri savari hige'za, zamagra zamagra bainati kazinkno ha' hu'naze. Hagi ana ha'ma hazafima hazenkema e'ori'za sondia vahe'mo'za fre'za Bet-Sita kumate Zerera kaziga Abel-mehola mopa atumpare Tabati kuma tavaonte vu'naze.

**23** Hagi Gidioni'a Israeli vahepintira Naftali naga'ma, Aseli naga'ma, Manase naga'ma huno kehige'za e'za emeri mago hute'za, Midieni vhahera zamartago hu'naze. **24** Hagi Gidioni'a Efraemi naga'ma agona mopafima ne-

maniza naga'enenkura amanage huno kea atrezmant'e, eramita Midieni vahe'mo'zama Jodani timo'ma kahesama hu'nere'ma Bet-Bara kumate'ma taka nehzare eme zamavagta huta hara eme huzmanteho. Anagema higeno'a Efraemi naga'mo'za anama hiaza hu'naze.<sup>25</sup> Hagi ana nehu'za tare Midieni kva netrena Orebine Zibi kizania zanazeri'za, Orebina Oreb havere ahenefriza, Zibina Zibi kumate wainima regatati'ma nehzafai ahefri'naze. Ana'ma hute'za Midieni vahera zamarotgo hazage'za nefrage'za ana netremokizni zanasenia eri'za Gidioni'ma mani'nerega Jodani tina takah'e za kantu kaziga vu'naze.

## 8

### *Midieni kini netre Zebane Zalmunakizni naneke*

<sup>1</sup> Anante Efraemi naga'mo'za Gidionina amanage hu'za antahige'naze, Nagafare amanahu kavukavara hurantane? Nahigenka esera hurantaketa Midieni vahe'enena hara ome osu'none? hu'za Gidioni'enena tusi fravazi'naze. <sup>2</sup> Hianagi Gidioni'a amanage huno kenona huzmant'e, Tamagrama hu'naza zama negeta, nagrama hu'noa zama kesazana, nagra naza hu'nofi keho? Efraemi naga'mo'zama krepi ragama otre'zama tagi vagarezamo knareru hu'nefi? Abiesa naga'mo'zama ontagi hozafinti ana maka krepi ragama tagi vagare'zamo knareru hu'neo? <sup>3</sup> Anumzamo'a Midieni sondia kva netrena Orebine Zebanena tamazampi zanavrentegeta zanahe'naze. Nagra Tamagrama hazazana osu'noe. Anagema hige'za frama vazinintazaretira kea tagane'naze.

<sup>4</sup> Hagi Gidioni'ene 300'a vahe'mo'zanena Jodani tina takah'e za zamasafera nehianagi, ha' vahezmia zamarotago hu'naze. <sup>5</sup> Hagi Sukoti kumate'ma neeno'a Gidioni'a amanage huno ana kumate kva vahetmina zamantahige'n. Muse huramantoanki, Nagri'enema aza vahetamina bretia zaminke'za neho. Na'ankure zamagra tusi zamasafeku nehu'za, nagranena neazage'na nagra Midieni kini netre Zebane Zalmunakizni zanaratago hu'na neoe. <sup>6</sup> Hianagi Sukoti kumate kva vahe'mo'za amanage hu'za kenona asmi'naze, Zebane Zalmunanema zanazeritesanketa sondia vaheka'a ne'zana zamigahune. <sup>7</sup> Ana kema hazageno'a Gidioni'a anage hu'ne, Ra Anumzamo'ma Zebane Zalmunanema nazampi'ma znavrentenama zanahesu'na, ka'ma kopima nemanea ave'ave nofinu, sefura eme tami'na tamavufa eri hazro-hazru hugahue. <sup>8</sup> Hagi anantetira Penieli kumate marerino vuno ana hukna kege ana kumapi vahete ome hu'ne. Hianagi Sukoti kumate vahe'mo'zama hu'nazankna ke hu'naze. <sup>9</sup> Hagi anagema hazageno'a Gidioni'a Penieli kumate vahera amanage huno zamasami'ne, nagrama ha'ma ome huzam-agaterete'na esu'na, ama za'za nona eme tapage hutregahue.

<sup>10</sup> Hagi Seba'ene Zalmunakea 15 tauseni'a sondia vahe'ene Karkori kumapi ufre'naze. Hagi eri mago'ma hu'naza sondia vahe'ma zamahe hanama hige'zama mani'nazama'e. Na'ankure 120 tauseni'a kazinteti'ma ha'ma nehaza vahera ko zamahe 'naze. <sup>11</sup> Hagi Gidioni'a marerino Nobane Jokbeha kumatrema me'nea kantega rugagino Midieni sondia vahe'mo'za ha' vahera omegahaze hu'za ontahi'za mani'nazageno, antri hazaza huno hara ome huzmant'e. <sup>12</sup> Hagi anama higeno'a, Midieni kini netre Zeba'ene Zalmunakea freke vakeno, Gidioni'a zanarotago huno ome zanaz-erigeno, ana kini netremofo sondia vahe'mo'za tusi zamagogogu hu'naze.

<sup>13</sup> Hagi Joasi nemofo Gidionima ha'ma huvagareteno'a ana kumara atreno, Heresi agonama me'neregama e'nea kamofo avaririno e'ne.

<sup>14</sup> E'inama huno ne-eno'a mago Sukoti kumate nehaza ne' eme azerino

antahigegeno, Sukoti kumate mani'naza kva vahetmina 77ni'a kva vahe'mofo zamagia Gidionina kremi'ne. <sup>15</sup> Ana'ma higeno'a Gidion'i'a Sukoti kumate eno amanage huno kva vahetmina eme zamasami'ne, Keho, Zebane Zalmunana ama zanazeri'na oe, amare'ma enevu'na sondia vahe'ni'a breti zaminke'za neho hu'nama nehugeta, nazanavanke huta Zebane Zalbunane kazampima zanazerite'nanketa henka sondia vaheka'a bretia zamigahune hu'naze. <sup>16</sup> Hagi Gidioni'ma anagema nehuno'a, ka'ma kopima me'nea ave'ave nofitami erino ana kumate kva vahetamina anagema hu'naza zantero sefu zami'ne. <sup>17</sup> Ana nehuno Peniel kumate mani'ne'zama kuma'ma kegava nehaza za'za nozmia taganavazinetreno ana rankumapi vhahera zamahe fri vagare'ne.

<sup>18</sup> Ana huteno Gidioni'a Zebane Zalbunakiznia zanantahigeno, Tabor kumate'ma zamahe'na'a vahetmina, inankna vahe zamahe'na'e? Huno zanantahigegeke amanage hu'na'e, Kagri kavugosagna vahe zamahe'no'e. Ana maka'mo'za kini ne'mofo nemofo avugosagna hu'naze. <sup>19</sup> Anagema hakeno'a anante Gidioni'a amanage hu'n, E'i nagri nenarera mofavrerami zamahe'na'e. Tamage mani'nea Ra Anumzamofo avufima tanasamisuana, tanagrama ana nafuhe'ima ozamahena'asina menina tanagrira ontanahosine. <sup>20</sup> Anage nehuno zage mofavre'a Jetarinkura huno, otinka zanahegeke fri'o! Hianagi ana nehazamo'a otinora ozanahe'ne. Na'ankure agra osi mofavregino, koro hu'n. <sup>21</sup> Anage higeno Zeba'ene Zalmunakea amanage huke Gidionina asmi'na'e, Vema mani'nesunka kagraka'a otinka tahe frio. Anagema hakeno'a, Gidioni'a otino ana netrena zanahe nefrino, kemolizinimofo zananankente'ma hu'znante'na'a avasase'zana eri'ne.

<sup>22</sup> Anama higeno'a Israeli vahe'mo'za amanage hu'za Gidioninkura hu'naze, Kagrane, negamofo'ene negageho'enena kvati mani'neta kegava huranteho. Na'ankure kagra Midieni vahe zamazampinti tagu'vazi'ne. <sup>23</sup> Hianagi Gidioni'a amanage huno kenona huzmante'ne, Nagra kvatimia mani'nena kegava huoramantegosue. Ana hukna hu'za mofavrenimo'za kvatimia mani'ne'za kegava huoramantegahaze. Hagi Ra Anumzamoke kvatimia mani'neno kegava huramantegahie. <sup>24</sup> Hianagi magoke zanku tamantahigegahue. Ha' vahe'mo'zama zamagesafima renentaza golire rinima zamahefa eri'nazana mago magomota namitere hiho. Na'ankure zamagra Ismaeli nagaki'za zamagesafi golire rini rente vahe mani'nazageno hu'n. <sup>25</sup> Anagema higeno'a, amanage hu'za kenona hunte'naze. Amane tagra kamigahune, hu'za nehu'za nakre ku eri'za tafera nehu'za, korire riniramina ana makamo'za eme atre'naze. <sup>26</sup> Hagi ana golire rinima eritruma hazageno'a kna'amo'a 25'a kilo hu'n. Hagi e'i ana zankera eritru osu'nazanki, pasesuma, agesafi avasesezama, Midieni kini vahe'mo'ma nevasia fitunke za'za kukenama, kemorimofo zmanankempima hunentaza avasase zanena anampinke emeritru hu'naze. <sup>27</sup> Hagi Gidioni'a ana koria erino rankuma'are Ofra viazamo pristi vahe'mo'zama zamimizare'ma nentaniza avasese'za ome tro huntenegeño, monko a'nemo'za hazaza hu'za Israeli vahe'mo'za Ra Anumzamofona zamage'na hunemi'za, ana zante agafa hu'za monora hunte'naze. Gidionine naga'amofontera anazamo'a mago krifugna huno zamazeri'ne.

#### *40'a kafifi hara osu'za mani fru hu'za mani'naza naneke*

<sup>28</sup> Hagi Israeli vahe'mo'za Midieni vhahera zamahe'za zamazeri havizanfta hazageno, mago'anena hara eme huozmante'naze. E'ina hazageno Gidioni'ma kvama mani'nea knafina Israeli vahe'mo'za 40'a kafua hara osu

amne fru hu'za mani'naze. <sup>29</sup> Hagi Joasi nemofo Gidioni'a ete kuma'arega vu'ne. <sup>30</sup> Hagi Gidioni'a rama'a a'nane zmante'negu 70'a ne'mofavrerami zamante'ne. <sup>31</sup> Hagi Sekemu kumate nemania a'amo'a ne'mofavre antegeno, agi'a Abimeleki'e huno ante'ne. <sup>32</sup> Hagi Joasi nemofo Gidioni'a ozafa omereno frigeno, nefo Joasima asente'naza matipi Abiesa naga nofimofo mopafi Ofra kumate asente'naze.

<sup>33</sup> Hagi Gidioni'ma fritege'za, Israeli vahe'mo'za ete mago'ane Ra Anumzamofoana zamefi hunemiza Bal-Beriti havi anumza tro hunente'za, Bali havi anumzante monora hunte'naze. <sup>34</sup> Ana nehu'za Israeli vahe'mo'za Ra Anumzana zamagri Anumzamo'ma ha' vahezimimo'za mika kampinti e'za ha'ma eme hunezmantegeno zamagu'ma vazi'nea Ra Anumzana zamage akaninte'naze. <sup>35</sup> Hanki Gidioni'ma knare'zama huzamante'nea zankura Israeli vahe'mo'za agri naga'mofona humusenkea hu'za susu huozamante'naze.

## 9

### *Sekemu kuma'ma Abimeleki'ma kegava hu'nea naneke*

<sup>1</sup> Hagi mago kna Gidioni nemofo Abimeleki'a anokahe'mofo ome zamage-naku Sekemu vuno, amanage huno anokahemofone nerera naga'enena zamasami'ne. <sup>2</sup> Mika Sekemu kumate kva vahetamima mani'naza vahe'motafi ama nanekeea nehue, Gidionina ana mika 70'a mofavre'aramimo kegava huramante'nie nehazafi, magokemo kegava huramantenigeno knarerera hugahie huta nehaze? Tamagra tamagesa antahiho, nagara tamagri kora mani'noe. <sup>3</sup> E'inage hige'za Abimeleki anokahemo'za agri agi eri'za maka Sekemu kumapima mani'naza vahetega kea atrazageno vuno eno hu'ne. Hagi ana kumapi vahe'mo'zama ana nanekema nentahiza Abimeleki'a tagri kora mani'ne nehu'za agri kaziga mani'naze. <sup>4</sup> Anama nehu'za Bal-Berit havi anumzamofo mono nompintira 70'a silva zago Abimelekina erimi'naze. Hagi ana zagoa Abimeleki'a erino hazenke vahetami mi'za huzmanteno zamavarege'za agri amage ante'za avariri'za vu'naze. <sup>5</sup> Hagi Abimeleki'a nefo kumate Ofra vuno 70'a Jerubali ne' mofavre zagaramina magoke have agofetu ome zamahe'ne. Hianagi amite'na ne'amo Jotamu'a koro freno ome fraki'ne. <sup>6</sup> Hagi anama higeno'a Sekemu kumateti'ene Beth-Milo kumateti kva vahe'mo'za Sekemu kumate vu'za, oki zafa agafare'ma zafa retruma rente'ne'za mono'ma hunentazare omeri atru hute'za, Abimelekina kinia azeri oti'naze.

<sup>7</sup> Hagi Jotamu'ma anazama haza zImagenkema nentahino'a, Gerisimi agonare marerino amanage huno kezana ati'ne. Sekemu kumate kva vahe'mota keni'a antahiho. Anumzamo'ma ketimima antahinie hanuta nagri kea antahiho. <sup>8</sup> Hagi mago zupa zafamo'za kinizmi azeri otinaku amanage hu'naze. Olivi zafamoka kiniti mani'enka kegava huranto hu'za hu'naze! <sup>9</sup> Hianagi olivi zafamo'a anage huno zamasami'ne, Nagra olivi masavema tro'ma hute'na Anumzane vahe'mokizmi nezamuge'za musema nehaza eri'zana atre'na amne oti'nena, vuge ege nehu'na zafamota naza atrezamante vava hanuo? <sup>10</sup> Anagema hige'za zafamo'za amanage hu'za fiki zafagura hu'naze, Kiniti mani'enka kegava huranto! <sup>11</sup> Hianagi fiki zafamo'a anage huno zamasami'ne, Nagra haganentake zafaragama rentoaa eri'zana atre'na amne oti'nena vuge ege nehu'na, zafamota nazana atreramante vava hanuo? <sup>12</sup> Hige'za zafamo'za amanage hu'za waini nofikura hu'naze, Waini nofimoka kiniti mani'enka kegava huranto!

13 Hianagi waininofi'mo'a anage hu'ne, Nagra kasefa waini rgama trohu'na Anumzane vahe'mofonema nezamua eri'za atre'na amne oti'nena vuge ege nehu'na, naza atreramante vava hanuo? 14 Hagi anagema hige'za ave'ave nofikura amanage hu'naze, Ave'ave nofimoka kiniti mani'enka kegava huranto! 15 Anage'ma hu'za antahigazageno'a, ave'ave nofi'mo'a amanage huno kenona hu'ne, Tamagema huta tamagu'reti'ma kinima nazeri otisuta, eta nagri turunampinka emaniho. Hagi ana'ma osanazana ana ave'ave trazampinti tevemo'a eno Lebanon sida zafaramina teno erihana hugahie!

16 Anante Jotamu'a mago'ane amanage huno hu'ne, Abimelekima kinima azeri oti'zana tamagra knare'za huta azeri onetizo? Hagi Jerubali'ene naga'amo'zanena tamagrira knare'za hu'za tamaza hu'nazanagi, tamagra knare'za huntazafi haviza huntaze? 17 Na'ankure nenfa Jerubali'a agra avufgagura ontahi hara huno Midieni vahe zamazampinti tamagu'vazi'ne. 18 Hianagi menina nenfane naga'anena hara rezamanteta 70'a ne' mofavreramima'a magoke have agofetu zamahe vagare'naze. Ana nehuta eri'za a'amofo mofavrea Abimelekina Sekemu kinia azeri oti'naze. Na'ankure agra tamagripinti fore hu'negu anara hu'naze. 19 Hagi menima tamagrama haza ayu'avamo'a Jerubaline naga'are'enema knare'ma huno fatgoma hu'ne'nigeta, Abimeleki'enena musena nehinkeno, agra'enena musena tamagri'enena hino. 20 Hianagi tamagrama knare huno fatgo osu' avu'ava'ma hu'nena zana Abimelekipinti tevemo'a atiramino Sekemu kumate kva vahe'ene Bet-Milo kumate kva vahetmina tehana nehanigeno, Sekemu kumate kva vahe'tamimpinti'ene Bet-Milo kumate kva vahepinti tevemo'a atiramino Abimelekina tegahie. 21 Hagi Jotamu'ma anagema huteno'a, koro freno Beri kumate umani'ne. Na'ankure Abimeleki'ma ahezanku koro freno vu'ne.

### *Sekemu vahe'ene Abimeleki naneke*

22 Ana'ma hutegenoa Abimeleki'a 3'a kafu Israeli vahe kinia mani'ne. 23 Hagi Anumzamo'a havi avamu huntegeno Abimelekine Sekemu kumate kva vahe'mofo amu'nompi emaninege'za, Sekemu kumate kva vahe'mo'za Abimelekina azeri amuho hu'naze. 24 Anumzamo'a knazana atregeno Abimelekinte'ene Sekemu kumate kva vahetaminte'ene e'ne. Na'ankure Sekemu kumate kva vahe'mo'za Abimelekina aza hazageno, Gidionina afuhe'ima 70'a ne'mofavre'zaga zamahenegu anara hu'ne. 25 Hagi Sekemu kumate kva vahe'mo'za mago'a vahera agonafi Abimelekima esigura kankafo ome ante'za mani'ne'za, ami'mi hu'za kante'ma enevaza vahera keonkezazmi zamahe'za hanare'naze. Hianagi anazama haza nanekea Abimelekina eme asami'naze. 26 Hagi mago zupa Ebedi nemofo Gali'a afu'aganahoe'zane Sekemu kumate vu'ne. E'inama higenoa Sekemu kumate kva vahe'mo'za Galina antahimi'za amage ante'naze. 27 Hagi ne'zama vasage knare'ma musema hu knafina Sekemu vahe'mo'za waini raga tagi'za rerati'za tima'za eri'za havi anumzazmimofo mono nompi vu'za, ana tine ne'zanena nene'za Abimelekina huhaviza hunte'naze. 28 Hagi Ebedi nemofo Gali'a amanage hu'ne, Sekemu vahera Hamori tazeri fore hu'ne. Hagi Abimeleki'a agra inanknahu ne' mani'nesigeta tagra Sekemu vahe'mota agri kvafina manigahune? Hagi Abimeleki'a Jeru-Bali nemofo manigeno eri'za vahe'a Zebuli mani'ne. Tagra Sekemu kumamofo nefo, Hamori mofavrerami mani'nonanki, nagafare Abimeleki eri'za vahera manigahune? 29 Hagi nagrama ama Sekemu vahe'ma kegavama huresina Abimelekina ahe kasonene'na amanage hu'na huntegahue, sondia vaheka'a ome avrenka ha'

eme hunanto hu'na huresine. <sup>30</sup> Hianagi ana rankumate kva ne' Zebuli'ma, Ebedi nemofo Gali nanekema nentahino'a, tusi arimpa ahe'ne. <sup>31</sup> Anama higeno'a eri'za vahe oku'a huzmanteg'e za vu'za anage hu'za Abimelekina ome asmi'naze, Ebedi nemofo Gali'a afu'aganahezane eno, Sekemu kumate vahera ha'huzamantenogu zamarimpa eme nere. <sup>32</sup> E'ina hu'negu sondia vaheka'ane kenage eta kankafona eme hu'enkeno, <sup>33</sup> nanterama rumasama huno zagema hanati'nigeta tamagareta ana kumapina vinkeno, ana kumapinti vahe'ma ha'ma huramantenaku'ma esazana anante tamagrama tamagesama antahisaza zana hugahaze. <sup>34</sup> Hagi Abimeleki'a ana kenageke sondia vahe'a 4'afi refko huno Sekemu kumara avazagi-gagi'ne. <sup>35</sup> Hagi nanterama Ebedi nemofo Galima kuma'mofo kahante uoma'netige'za, Abimeleki'ene sondia vahe'amo'zama fraki'nazafintira atre'za e'naze. <sup>36</sup> Hagi Gali'ma ana vahe'tmima nezmageno'a Zebulinkura amanage hu'ne, Agonaregatira vahera eneramizanki ko. Anage'ma higeno'a Zebuli'a amanage huno kenona hu'ne, amne agonaramimofo amema'aramimo vahe knara nehie. <sup>37</sup> Hianagi Gali'a mago'ane amanage huno hu'ne, agonaregatira vahe'tmi eneramizanki ko. Hagi mago'a vahera zamavune vahe'ma mani'ne'za henkama fore'ma hania zanku'ma, havi kasnampa kema nehaza oki zafa agafama me'nea kantegati neaze. <sup>38</sup> Anante Zebuli'a otino Galina amanage huno asami'ne, ina kagipinti kagra ama ana kea hu'nane. Iza'e Abimeleki'a, agra iza mani'nenige'na nagra agri eri'za vahera manigahue? E'inage hunka huhavizama hu'nana vaheki vunka hara ome huzamanto. <sup>39</sup> Hagi anagema higeno'a Gali'a Sekemu kumate vahera nezamavreno, agra vugota huno Abimeleki naga'enena hara ome hu'ne. <sup>40</sup> Hianagi Abimeleki sondia vahe'mo'za Galina arotago nehu'za, vahera ome zamahetre eme zamahetre hu'za rankumamofo kahante ehanati'naze. <sup>41</sup> Ana huteno Abimeleki'a Aruma kumate umanigeno, Zebuli'a Galine afu'aganahe'ina zamahe kasopeno agra Sekemu kumatera umani'ne. <sup>42</sup> Hagi hanima huno ko'matigeno'a, Sekemu kumate vahe'mo'za hozafi vu'naku atirami'za vazageno, Abimelekina mago'a vahe'mo'za ome asami'naze. <sup>43</sup> Abimeleki'ma ana nanekema nentahino'a, 3'afi vahe'a refko huno kankafona ante'ne. Hagi Abimeleki'ma kegeno'ma ana ha' vahetmima kumapinti'ma atirami'za azageno'a, agrane naga'amo'zama framaki'nazafintira ot'i'za zamahe'naze. <sup>44</sup> Hagi 3'a kevu vahepintira Abimeleki'ma mago kevua avreno kuma'mofo kafante ome ankanire'za mani'nazageno, tare kevu vahe'mo'za meg'i'ama mani'naza ha' vahera zamahe vagare'naze. <sup>45</sup> Hagi Abimeleki'a ana kumapi vahera ana zage ferupinke hara huno zamahe hana nehuno, ana kumara tapage huno eri pehe nehuno, hage atinteno vano hu'ne.

<sup>46</sup> Hagi zaza nompima mani'ne'za kuma kegavama nehaza kva vahe'mo'za Abimeleki'ma ha'ma eme huzamantea nanekema nentahi'za, ana nanteranke Bal-Beriti havi anumzamofo mono nomofo vihufi ufre'za mani'naze. <sup>47</sup> Ana'ma hazageno'a mago'a vahe'mo'za Abimelekina eme asami'za, Sekemu kumate'ma za'za nompima manine'za kuma'ma kegavama nehaza kva vahe'mo'za maka magopi eritru hu'za mani'naze hu'za asami'naze. <sup>48</sup> Hagi Abimeleki'a sondia vahe'a zamavareno Zalmoni agonafi mareriteno, sa'ume erino zafa azankuna'aramina antagi atreno afunte e'nerino, zamavarenoma vu'nea vahetmina amanage huno zamasami'ne, Ame'ama huta amama huaza hiho. <sup>49</sup> Anagema higeno'a, ana maka vahe'mo'za ana zafa azankunatmina antagi'za Sekemu vahetmimofo vihurera retrure kagite'za teve tagintazageno ana vihufima mani'naza

vahe'ene zaza nonte'ma kegavama nehaza vahetaminena miko 1tauseni'a venenene a'enena fri'naze.

<sup>50</sup> Hagi anama huteno'a Abimeleki'a Tebezi kumate vuno ana kumapi va-hera hara ome huzamanteno, ana kumara zamaheno hanare'ne. <sup>51</sup> Hianagi ana kumapi kva vahe'mo'za vihufinke ufrebagare'za ufraki'naze. Ana vihua zaza no ki'za mareri'naza nomofo agofetu fre'za umani'naze. <sup>52</sup> Hagi Abimeleki'a ha' hunaku ana zaza nonte eno, ana nomofo kahante teve taginte'za nehigeno, <sup>53</sup> mago a'mo'a witi neharaza havenkno atregeno tamino asenia ru prarovazino ahetre'ne. <sup>54</sup> Anama higeno'a Abimeleki'a amanage huno hanko'ama erinentea nehaza nera asami'nne, a'ne'mo ahe frine hu'za hanagi, ame hunka kazinka'a erinka nahe frio, huno higeno ana nehzamo'a kazi regeno fri'ne. <sup>55</sup> Abimeleki'ma frige'za kazana hige'za, Israeli vahe'mo'za atre'za nozimirega vu'naze. <sup>56</sup> Hagi Abimeleki'ma kefo avu'ava'ma huno 70'a afu'aganahe'ima zamahe frino nefama agima eri haviza hu'nea zanterea, e'ina hukna huno Anumzamo'a nona huno az-eri havizana hu'ne. <sup>57</sup> Ana hukna huno Sekumu kumate vahe'mo'zama kefozama hu'naza zanterea Anumzamo'a nona huzmante'ne. E'inama hu'neana Jerubali nemofo Jotamu'ma zamazeri haviza hu'kasnampa ke'ma huno kazusima huzmante'nea zamo'a zamagrite efore hu'ne.

## 10

### *Filistia vahe'mo'zane Amori vahe'mo'zama Israeli vahe'ma zamazeri hav- iza hu'naza naneke*

<sup>1</sup> Hagi Abimeleki'ma fritegeno'a Pua nemofo Tola'a Dodo negehokino Israeli vahe'mokizmi kva vahe efore huno hara huno zamagu'vazine. Hagi Tola'a Isaka nagapinti fore hu'neankino, Efraemi agona moparega Samiri rankumate mani'ne. <sup>2</sup> Hagi agra 23'a kafufi Israeli vahe'mofo kva mani'neno kezamia antahino refko huzamante'ne. Ana huteno frige'za Samir kumate asente'naze. <sup>3</sup> Hagi Tola'ma fritegeno'a Giliatiti ne' Jairi'a 22'a kafufi Israeli vahe kva mani'neno, ke'zamia antahino refko huzmante'ne. <sup>4</sup> Jairi'a 30'a ne' mofavrerami zmante'neankiza ana mofavreramimo'za 30'a donki agumpi maniza vano nehu'za, Giliati kaziga 30'a kumatami kegava hu'nazankino, ana kumatmimofo agi'a Havot-Jaire hu'za agi'a ante'nazankino, meninena ana zamagige nehaze. <sup>5</sup> Hagi Jairi'ma frige'za Kamoni kumate asente'naze.

<sup>6</sup> Hagi Israeli vahe'mo'za mago'an Ra Anumzamofo avurera kefo zamavuzmava hu'za, Baline Astaroti havi anumzante'ene, Siria vahe havi anumzante'ene, Saidoni vahe havi anumzante'ene, Moapu vahe havi anumzante'ene, Amoni vahe havi anumzante'ene, Filistia vahe havi anumzante monora hunte'naze. Ana nehu'za Ra Anumzamofona zamefi hunemi'za, eri'zana eri onte'naze. <sup>7</sup> Ana'ma hazageno'a Ra Anumzamo'a tusi rimpa ahenezmanteno, Amoni vahe'mokizmi zamazampine, Filistia vahe'mokizmi zamazampi zamavarente'ne. <sup>8</sup> Hagi Giliati kazigama Amori vahe mopafi Jodanima nemaniza Israeli vahera, 18ni'a kafufi tusi'a knaza zami'za zamazeri havizantfa hu'naze. <sup>9</sup> Hagi Amoni vahe'mo'za Jodani tina takah'e'za Juda naga'ma, Benzameni naga'ma Efraemi nagara hara ome huzamantege'za Israeli vahe'mo'za tusi antahintahi nehu'za rama'a knazampi mani'naze. <sup>10</sup> Ana'ma hige'za Israeli vahe'mo'za amanage hu'za Ra Anumzamofontega krafagea hu'naze. Tagra kumi hu'none, na'ankure Anumzamoka tagra tamefi hunegamita, Bali havi anumzamofo eri'zana erinezmanteta monora hunte'none. <sup>11</sup> Hagi anagema hazageno'a Ra

Anumzamo'a amanage huno kenona hu'ne, Isipi vahe'ene, Amori vahe'ene, Amoni vahe'ene Filistia vahe zamazampintira Nagra tamagura ovazi'nofi? <sup>12</sup> Hagi anahukna huna Saidoni vahe'mo'zane Ameleki vahe'mo'zane Maoni vahe mo'zama ha'ma huramante'za tamazeri havizama nehazagetama krafama hazage'na, Nagra tamaza hu'na tamaguravazi'noe. <sup>13</sup> Hianagi tamagra natreta tamefi hunenamita, ru anumzamofo eri'za erinenteta monora hunte'naze. E'ina hu'negu menina tamagura ovazigahue. <sup>14</sup> Hagi tamagra'ama anumzantie hutama huhamprinaza anumzante vuta krafa ome hinkeno, knazantimifintira tamaza huno tamaguravazino. <sup>15</sup> Hianagi Israeli vahe'mo'za amanage hu'za Ra Anumzamofona asami'naze, tagra kumi hu'nonanki nazano hurante'naku'ma hananazana amne hurantegahane. Hianagi muse hugantonanki, ha' vahetimofo zamazampintira menina tagu'vazinka taza huo. <sup>16</sup> Anage nehu'za ru anumzantminte'ma eri'zama erinent'eza mono'ma nehazazana atre'za Ra Anumzamofonte monora hunte'naze. Hagi ana'ma hazageno'a, Ra Anumzamo'a Israeli vahe'mo'zama knama eri'naza zankura tusi asunku hu'ne. <sup>17</sup> Ana'ma hutegen'o'a Amoni vahe'mo'za seli nona Giliati eme kizageno Israeli vahe'mo'za Mispa kumate emeri tru hu'za seli nona ki'naze. <sup>18</sup> Hagi Giliati kumate kva vahe'mo'za zamagra zamagra amanage hu'za hugantugama hu'naze, iz'a ese'ma ha'ma agafama huno Amoni vahe'ma ha'ma huzamantesia ne'mo, Giliati vahe'mofo kva manigahie.

## 11

### *Jepta naneke*

<sup>1</sup> Hagi Jepta'a Giliati kumatera tusi'a hankavenentake ha' ne' mani'ne. Hianagi agra monko a'mofo mofavregino Giliati nemofo'e. <sup>2</sup> Hagi Gilieti nenaro'a rama'a ne' mofavrerami ante'ne. Hagi ana mofavreramimo'za rama nehu'za, Jeptankura amanage hu'naze, ru a'mofo mofavre mani'nanankinka nerafa zana erisanti oharegosane, nehu'za mopazmifintira ahegasopetre'naze. <sup>3</sup> E'inama hazageno'a Jepta'a afu'aganahe'ina nezamatreno, freno Tobu kumate umani'ne. Ana kumate'ma unemanigeno'a hazenkema eri hakarema nehaza vahe'mo'za agrane eme tragote'za vano hu'naze. <sup>4</sup> Hagi mago'a kna evutegeno Amoni vahe'mo'za Israeli vahera agafa hu'za hara huzmant'eaze. <sup>5</sup> Hagi Amoni vahe'mo'zama Israeli vahe'ma ha'ma eme huzamantageno'a Giliati kumate ranra vahe'mo'za Jepta ome avrenaku Tobu kumate vu'za amanage ome hu'naze, <sup>6</sup> kvati emani'negeta Amoni vahera hara huzamantamnen. <sup>7</sup> Hianagi ana ranra vahetmina Jepta'a amanage huno zamasami'ne, Tamagra nagrikura tamavresra higeta nenfa nompintira naheta navazuhu atre'naze. Hagi knazampima nemanita nahigeta nagrikura menina haketa neaze? <sup>8</sup> Anagema hige'za amanage hu'za kenona hunte'naze, Ama'na agafare tagra one. Menina tagri'ene vunka Amoni vahera hara ome huzamantenka Giliati kumate kva manigahane. <sup>9</sup> Hagi Jepta'a amanage huno ana ranra vahera kenona huzmant'e, Menima kumaniregama navreta vanage'na Amoni vahe'ma ha'ma ome huzmant'nugeno, Ra Anumzamo'ma nazama hinke'na, ana vahe'ma zamahe vagamaren'u'na, tamagerfa hu'na nagra kvatimia manigahuo? <sup>10</sup> Hige'za ana ranra vahe'mo'za amanage hu'za kenona hu'naze, ama'na kema rutrage zankura tagri'ene kagri'enena tamage huno amu'notifina Ra Anumzamo mani'neno keno antahino hurantesie. <sup>11</sup> Hagi anante Jepta'a ana ranra vahe'ene

vige'za Giliati vahe'mo'za kva azeri oti'naze. Anama hazageno'a Jepta'a ko'ma hu'nea nanekea Mispa kumate Ra Anumzamofo avuga ete mago'ene zamasami'nne. <sup>12</sup> Hagi anante Jepta'a Amoni kini ne'mofontega amanage huno antahige kea atrentege'za, ke eri'za vu vahe'mo'za amanage hu'za ome asami'naze, Nagafare nagri mopafi vhahera hara eme renezmantane? <sup>13</sup> Hagi Jeptama atregevoma viankerera Amoni kini ne'mo'a amanage hu'ne, Israeli vahe'mo'zama Isipiti'ma ne-eza Arnonitima vuno Jaboki vuteno Jodanima uhanati'nea mopatia eme hanare'naze. E'ina hu'negu fruhuta ete ana mopatia tamaho. <sup>14</sup> Anagema higeno'a Jepta'a Amoni kini netega ete mago'ane kea atregevoma kema erino vu' ne'mo'a ome asamino, <sup>15</sup> Jepta'a amanage hu'ne, Israeli vahe'mo'a Moapu vahe mopane, Amoni vahe mopa kumazafa osene. <sup>16</sup> Hianagi Isipiti'ma mareri'za ne-eza hagage mopafi vu'za korankre hagerinte vute'za, Kadesi kumatera ehanati'naze. <sup>17</sup> Hagi anante Israeli vahe'mo'za Idomu kini netega amanage hu'za kea atrazageno vu'ne. Tatregeta mopaka'afi rugitagitva vamaneno. Hianagi Idomu kini ne'mo'a kea ontahine. Hagi Moapu kini ne'mofona anahukna naneke atrentazageno vu'ne. Hianagi ana kini ne'mo'a kea ontahine. Ana'ma hige'za Israeli vahe'mo'za anante Kadesia eman'i'aze. <sup>18</sup> Hagi anantetira Israeli vahe'mo'za hagage mopafi ufre'za nevu'za Idomu mopane, Moapu mohanena rugagiza Moapu mopamofona zage hanati kaziga, Arnoni timofona kantu kaziga seli nona omeki'za mani'naze. Hianagi Moapu vahe mopafina uofre'naze. Na'ankure Arnoni tinte Moapu mopamofo atupamo'a eme atre'ne. <sup>19</sup> Hagi Amori kini ne' Sihoni'a, Hesboni kumati'neki'za, agritega amanage hu'za Israeli vahe'mo'za kea atrazageno vu'ne. Muse hugantonanki tatregeta mopaka'afina rugitagitva mopatirega vamneno hu'za hu'naze. <sup>20</sup> Hianagi Sihoni'a Israeli vhahera antahinozamino zamatrege'za mopa'afina eovu'naze. Hianagi maka sondia vahe'a zamazeri atru huno Jahas kumate seli nona kino mani'neno, Israeli vhahera hara huzamante'ne. <sup>21</sup> Hianagi Ra Anumzana Israeli vahe Anumzamo'a Sihonine maka vahe'anena Israeli vahe zamazampi zmavrentegeno, ana mopafima mani'naza Amori vhahera hara huzamagatere'za maka mopazamia eri'naze. <sup>22</sup> Ana'ma hute'za Amoni vahe'mokizmi mopama eri'nazana, Arnoni tinteti'ma vuno noti kaziga Jaboku tinte uhanatiteno, ka'ma kokampinti vuno Jodani tinte'ma vu'nea mopa eri'naze. <sup>23</sup> Hagi Ra Anumzana Israeli vahe Anumzamo'a Israeli vahe zamavuga Amori vhahera zamahenati netreno mopazamia hanarenlo Israeli vahe'mokizmi erizami'nne. Hagi kagra ama ana mopa eri'za nehan? <sup>24</sup> Hagi tamagri havi anumza Kemosi'ma tamisia zantamina tamagra eriho. Hagi Ra Anumzana tagri Anumzamo'ma zamahe kasopenetreno erirami'nesia zana erigahune. <sup>25</sup> Hagi kagra Sipori nemofo, Moapu kini ne' Baraki kna hunano? Hagi agra hfra huoranteno, hara huorantene? <sup>26</sup> Hagi Hesboni kuma'ene ana tava'onte'ma megagi'nea ne'one kumatamine, Aroel kuma'ene, ana tava'onte'ma megagi'nea neonse kumatamine, Arnoni tinte'ma meno vu'nea kumatamimpinema Israeli vahe'mo'zama 300'a kafufima mani'nazana, nahigenka kora ana knafina ama ana mopa e'ori'nanane? <sup>27</sup> E'ina hu'negu nagra mago havizana huogante'noe. Hianagi kagra haviza hunka hara eme hunenantane. Kagra tamage nehampi, nagra nehuvi Ra Anumzamoke refko'a hurantegahie. <sup>28</sup> Hianagi Amoni kini ne'mo'a Jepta'ma huzmantege'zama vaza vahe'mokizmi nanekea ontahine.

### *hu'nea zamofo naneke*

<sup>29</sup> Ana'ma higeno'a Ra Anumzamofo Avamu'mo'a Jeptante egeno Jepta'a sondia vahe'a nezmavreno Giliati mopafine Manase mopafine Giliati kaziga Mispa kumate uhanatiteno, Mispatira Amoni kumate vuno Amoni va-hera hara huzmante'naku vu'ne. <sup>30</sup> Hagi Jepta'a Ra Anumzamofona amanage huno huvempa hunte'ne, Amoni vahe'ma kagrama nazampima zamavarente'nanke'na zamahe hnma hute'na, <sup>31</sup> hazenkema e'ori'na narimpa frunema ete kumate'ma vanugeno'ma nonifinti'ma mago zagamo'ma ese'ma atiramino'ma eme tutagihama hunante'nia zaga, e'i Ra Anumzamoka suza megahianki'na, ahe'na kre fanane hu ofa kagritega hugahue. <sup>32</sup> Anagema huteno'a Jepta'a sondia vahe'a nezmavreno tina takaheno Amoni vahe'ene hara ome higeno, Ra Anumzamo'a aza higeno Amoni vhahera hara huzamagatere'ne. <sup>33</sup> Hagi 20'a kuma'ma ha'ma hunte'neana, Aroeri kumateti agafa huno vuno Miniti kumate vuteno, Abel-keramimi kumate'ma mani'zama vu'naza Amori vhahera rama'a nezamaheno kuma'ziminena erihaviza hu'ne. <sup>34</sup> Hagi Jepta'ma kuma'are'ma Mis-pama egeno'a, mofa'amo'a tamborini neheno zagamera huno avoa reno amarara hu'ne. E'ina mofara magoke ante'nea mofakino, rua mago nero mofaro onte'ne. <sup>35</sup> Hagi Jepta'ma mofa'ama negeno'a kukena'a tagato nehuno, tusi krafa huno amanage hu'ne, Mofanimoka tusi'a hazenke erinaminkeno tumonimo'a atané. Na'ankure Ra Anumzamofonte'ma huvempama hu'noa kea eriotregosue. <sup>36</sup> Anagema higeno'a Jepta mofamo'a amanage hu'ne, Nenfaga, Ra Anumzamofoma kagi'ma reakama hunka asami'nana kante antenka nagritera anazana huo. Na'ankure Ra Anumzamo'a kaza higenka ha' vaheka'a Amoni vhahera zamahe vagare'nane. <sup>37</sup> Hianagi ese'zana natrege'na tare ikampina agonarega mofane zagane vano nehu'na, vema e'ori'na frisua zankura nasunkura nehu'na zavira ata'neno. <sup>38</sup> Anagema mofa'amo'ma higeno'a Jepta'a vuo huno huntogeno, mofane zagane agonarega marerino vema e'ori'neno frisia zankura tare ikampi asunkura huno zavira ate'ne. <sup>39</sup> Hagi tare ikama evigeno'a ana mofamo'a nefante egeno nef'a Ra Anumzamofoma huvempa hunte'neaza hu'ne. Ana mofamo'a vea e'ori'neno fri'neankino anazamo'a, Israeli vahepinia mago zamavu'zamava me'neanki'za, <sup>40</sup> kafune kafunena ana knama ege'za Israeli mofa'nemo'za agonarega mareri'za 4'a zagegnafi Giliati ne' Jepta mofakura zavira ometetere nehaze.

## 12

### *Efraemi naga'mokizmi Jepta'a ha' huzmante'nea naneke*

<sup>1</sup> Hagi Efraemi vahe'mo'za sondia vahe'zmia nezmavre'za Jodani tina takahē'za Safoni nevu'za amanage hu'za Jeptantega kea atrageno vu'ne. Jodani tima takahenka Amoni vahe'ma hahuzmante'naku'ma nevunka, nahigenka kea hanketa kagra'enena vuta hara ome osu'none? Hagi e'inama hu'naku menina nonka'ane kagri'enena teve taginteta huvazisunkenka tasagegahane. <sup>2</sup> Anagema hazageno'a Jepta'a amanage huno kenona hu'ne, Amoni vahe'mo'zama tazeri havizama nehazageta hazenkefima mani'neta eme taza hihoma hunketa, tamagra eta Amoni vahe'mokizmi zamazamp-intira eme tagura ovazi'naze. <sup>3</sup> Anagema nehu'nama koama tamagrama etama eme tazama osnazazama hazageta, tagra tavufa eri amanezaseta Amoni vahe'enena hara nehunkeno, Ra Anumzamo'a taza higeta zamahe vagare'none. Hagi nagafare marerita hara eme hurantekeea nehaze?

<sup>4</sup> Anagema hige'za Efraemi naga'mo'za amanage hu'naze, Tamagra Giliati vahera Efraemi nagapinti'ene Manase nagapinti tagrira tretrema fre'naza vahe mani'naze. Anagema hazageno'a, Jepta'a maka vahe'a zamavareno Efraemi nagara hara eme huzmanteno zamahe vagare'nne. <sup>5</sup> Hagi Giliati vahe'mo'za Jodani tima takamahe'zama nevazare kva hu'za mani'n'za, ana tima takah'e'zama vaza vahera zamantahige'za, tamagra Efraemi vahero, hazageno'ma i'oma hia vahera, <sup>6</sup> sihibolet hunka huo higeno'ma, sibolet huno'ma huhavizama hia vahera azeri'za akafr'i'naze. Na'ankure Efraemi vahe zamanankemo'a ruzahu hu'nne. E'ina hu'za 42 tauseni'a Efraemi vahera zamahe'naze. <sup>7</sup> Hagi Jepta'a 6si'a kafufi Israeli vahera kegava huzmanteno mani'neno, keaga refko hu'nne. Hagi Jepta'ma frige'za Giliati mopafi asente'naze.

<sup>8</sup> Hagi Jepta'ma frigeno'a Betlehemuti ne' Ipsan Israeli vahera kegava huzmanteno mani'neno keaga refko huzmante'nne. <sup>9</sup> Hagi agra 30'a ne' mofavre zamanteno, 30'a mofane zamante'nne. Hagi ana maka mofane'a ru naga nofipi masinezmanteno, ne' mofavrearamintera ru naga nofipintike ara hagezamine. Hagi Ipsani'a 7ni'a kafufi Israeli vahera kegava huzmanteno mani'neno, keagazmia refko hu'nne. <sup>10</sup> Hagi Ipsanima frige'za Betlehemu kumate asente'naze. <sup>11</sup> Hagi Ipsani'ma frigeno'a, Zebuluni nagapinti ne' Eloni 10ni'a kafufi Israeli vahera kegava huzmanteno mani'neno keaga refko hu'nne. <sup>12</sup> Hagi Zebuluni ne' Eloni'ma frigeno'a, Aijaloni kumate Zebuluni mopafi asente'naze. <sup>13</sup> Hagi Eloni'ma frigeno'a, Piratoni kumateti ne' Hileli nemofo Abdoni Israeli vahera kegava huzmanteno mani'neno keagazimia refko huzmante'nne. <sup>14</sup> Hagi Abdoni'a 40'a ne'mofavrerami antegeno agehe'za 30'a ne' mofavrerami fore hu'nazankino, 70'a donki afu agumpi vano hu'naze. Hagi Abdoni'a 8'a kafufi Israeli vahera kegava huzmante'neno keagazimia refko hu'nne. <sup>15</sup> Hagi Piratoni kumate ne' Hileli ne'mofo Abdoni'ma frige'za, Efraemi mopafi Piratoni kumate Ameleki vahe agona kokampi asente naze.

## 13

### *Samsonima ksente'nea naneke*

<sup>1</sup> Hagi Israeli vahe'mo'za ete mago'ane Ra Anumzamofo avurera kefo zamavu'znavha hazageno, Ra Anumzamo'a zamavareno Filistia vahe zamazampi zamantegeno, 40'a kafufi Filistia vahe'mo'za Israeli vahera kegava huzamante'n'za zamazeri haviza hu'naze. <sup>2</sup> Hagi ana knafina mago nera Dani nagapinti ne' Zora kumate nemania ne'mofo agi'a Manoa'e. Hagi nenaro'a mofavre onte naravo a' mani'n'e. <sup>3</sup> Hagi Ra Anumzamofo ankeromo'a Manoa nenanonte ehanatino amanage hu'nne, kagra Mofavrea onte naravo a' mani'nananagi, kamu'ene hunka ne' mofavre kasentegahane. <sup>4</sup> E'ina hu'negu waini tine, hankave tine, agruma osu'nesia ne'zanema ne'zankura kva hu'enka onegahane. <sup>5</sup> Hagi antahio, kagra kamu'ene hunka ne' mofavre kasente'gahananki, ana mofavrea azokara taga osutfa huo. Na'ankure ana mofavrea krimpafi mani'negeno, Anumzamo'a otage eri'za vahere huno huhamprintegahiankino, Filistia vahe zamazampintira agra agafa huno Israeli vahera zamagu'vazigahie. <sup>6</sup> Anagema higeno'a ana a'mo'a eno nevena eme asamino amanage hu'nne, Anumzamofo vahe'mo'a nagrite eama hu'nne! Avu'ava'amo'a Anumzamofo ankeronkna huno so'e zantfa hu'nne. Igati e'n'e, antahionkogeno agra agi'a onasami'nne. <sup>7</sup> Hianagi amanage

huno nasami'ne, kamu'ene hunka ne' mofavre kasentegahananki, waini tine, hankave tine, agruma osu'nesia ne'zanena onetfa huo huno nasami'ne. Na'ankure ana mofavrea kasema onte'nenankeno'a Anumzamofo eri'za vhahere huno huhamprinte'nigeno mani'neno ufrigahie huno nasami'ne.

<sup>8</sup> Anagema higeno'a Manoa'a Ra Anumzamofontega amanage huno nunamuna hu'ne, Ra Anumzamoka muse hugantoanki, vaheka'a mago'ene huntegeno kasemantenu'a mofavremofoma hunte'nua avu'ava zana eme rempi huramino. <sup>9</sup> Anage higeno Anumzamo'a Manoa nunamu kea nentahino, ankero'a huntegeno Manoa nenaro'a hozafi mani'nere e'ne. Hianagi ana a'mofo neve Manoa'a anantero nenaro'enena omani'ne. <sup>10</sup> Ana'ma higeno'a, ana a'mo'a agareno nevente vuno amanage ome hu'ne, Oki'ma e'nea ne'mo'a ete e'ne. <sup>11</sup> Higeno ana kema nentahino'a Manoa'a ame huno nenanrona avaririno vuno ana nete uhanatino amanage ome hu'ne, Kagra ama'na a'enema nanekema hu'nana nero? huno antahigegeno, Nagra ana nere. <sup>12</sup> Higeno Manoa'a amanage hu'ne, Kema hu'nana kemo'ma nena rgama fore'ma hina, inankna tra ke ana mofavremo'a amagera nenteno, nanknahu eri'za erigahie? <sup>13</sup> Higeno Ra Anumzamofo ankeromo'a amanage huno Manoa ke'nona hu'ne, Maka kema aka'amofoma asami'noa kea kegava hu'neno avararino. <sup>14</sup> Hagi krepireti'ma tro'ma hanaza tine, waini tine, hankave tine, agruma osu'nesia ne'zanena onetfa hino. <sup>15</sup> Anage higeno, Manoa'a amanage huno Ra Anumzamofo ankerona asami'ne, Muse hugantoanki mani'negeta meme afu anentara ome aheta kregantamnena netenka vuo. <sup>16</sup> Hagi anagema higeno'a Ra Anumzamofo ankeromo'a amanage huno Manoana asami'ne, Nazerinte'nankena manigahuanagi, nezanka'a onegosue. Hianagi retrotra hunka Ra Anumzamofontega kre fananehu ofa hundo. Na'ankure Manoa'a Ra Anumzamofo ankerone huno antahino keno osu'ne. <sup>17</sup> Anante Manoa'a amanage huno Ra anumzamofo ankerona antahige'ne? Ama ana kemo'ma nena raga'a efore'ma hanigetama kagima erisgama hanunkura, kagi'a azage huta ahegahue? <sup>18</sup> Higeno Ra Anumzamofo ankeromo'a amanage huno Manoana asami'ne, Nagafare nagigura nantahinegane? Nagri nagimo'a knarezantfa hu'neankinka, antahi ani hugara osu'nane. <sup>19</sup> Anagema higeno'a Manoa'a meme anenta azenerino, witine erinteno have agofetu Ra Anumzamofontega ofa eme higeno, Ra Anumzamo'ma ruzahukna kaguva zama hiazana ke'na'e. <sup>20</sup> Hagi teve anefamo'ma hagana haganama huno Kresramanama vu itaret'i'ma kumo'ma monafi marerigeno'a, Ra Anumzamofo ankeromo'a ana tevegumpi mareri'ne. Hagi Manoa'ene nenaro'enema ana zama negekea zanavugosaregati mopafi mase'nae.

<sup>21</sup> Hagi Ra Anumzamofo ankeromo'ma ete ru'enena Manoante'ene nenanroterea omegeno, Manoa'a Ra Anumzamofo ankerone huno keno antahino hu'ne. <sup>22</sup> Hagi Manoa'a amanage huno nenanrona asami'ne, Tamage tagra frigahu'e. Na'ankure tagra Anumzamofo ke'no'e. <sup>23</sup> Hianagi nenaro'a amanage hu'ne, Ra Anumzamo'ma tahe frinaku'ma hiresina kre fananehu ofane, witi ofanema hu'a ofa antahi noramino kaguvazana erifore higeta nonkokeno, amama eme tasamia nanekea ontasamisine.

<sup>24</sup> Hagi ana a'mo'a ne' mofavre kasenteno agi'a Samsoni'e huno ante'ne. Hagi ana mofavremo'ma nenama nehigeno'a, Ra Anumzamo'a asomu hunte'ne. <sup>25</sup> Hagi Zora kuma'ene Estaoli kumatremofo amu'nompima me'nea kumate Mahane-dani Samsoni'a mani'negeno, Ra Anumzamofo Avamu'mo'a agafa huno agu'afina eri'zana eri'ne.

## 14

*Samson'i'ma a'ma eri'nea naneke*

<sup>1</sup> Hagi Samsoni'a mago zupa Timna kumate vuno Filistia vahe mofa ome keteno, <sup>2</sup> ete kuma'arega eazamo nererane nefanena amanage huno eme zanasami'ne. Timna kumatera Filistia mofa'nefinti mago mofa kentete'na oanki avrenamike'na a' eri'neno. <sup>3</sup> Hianagi nererake nefakea amanage huke kenona hu'na'e, Tagri nagapine Israeli vahepinena a'nea omani'negenka, agoza anoma taga osu Filistia vahepintira ara eri'za nehano? Hianagi Samsoni'a amanage huno nefana asami'ne, Ome avrenka eme namio. Na'ankure nagri navurera knare agi agonane mofa mani'ne. <sup>4</sup> Hagi e'i ana knafina Filistia vahe'mo'za Israeli vahera kegava huzamante'nageno, Filistia vahe ha' huzmantesiegu Ra Anumzamo mago kankamu eri fore hianagi, nerera'ene nefa'enena antahi amara osu'na'e.

<sup>5</sup> Hagi Samsoni'ene nerera'ene nefa'enema Timna vunaku nevu'za, waini hozama me'nea tava'onte azageno, mago laionimo'a amprinaku krafa huno e'ne. <sup>6</sup> Ana'ma higeno'a Ra Anumzamofo Avamu'mo'a ame huno himamu hanavea Samsonina amigeno, azampina mago zana e'ori'neanagi ame' huno meme afu anenta aheno rutagana vazitreankna huno ana laionia aheno eritagna vazitre'ne. Hianagi ana'ma hiazana nererane, nefanena ozanasami'ne.

<sup>7</sup> Hagi Timna kumate'ma uhanatino'ma ana mofa'enema nanekema ome nehuno keana, ana mofa'mo'a Samsoni avurera hentofaza hu'ne. <sup>8</sup> Hagi mago'a kna evutegeno, ana mofara a' avrenaku Timna kumate ete nevuno, laionima ahentegeno kasrinefina tumemo'a ana laioni avufgafina karegre nehigeno, tumerimo'a avite'negeno ome ke'ne. <sup>9</sup> Hagi ana tumerina varagofino tare azampi erineno nemeneme vu'ne. Hagi etema ne-eno'a mago'a erino nererane nefane eme zanamigeke ne'na'e. Hianagi fri'nea laionimofo avufgafinti varagofina e'noe huno ozanasami'ne.

<sup>10</sup> Hagi nefa'ma vuno'ma Samsoni'ene ana a'enema aravema hana'a kema eri fatgoma nehigeno'a, zamavuzmavapima nehzaza huno Samsoni'a aravema hu kave retrotra hu'ne. <sup>11</sup> Hagi ana a'mofo naga'mo'za kazana hige'za 30'a nehzave huzamantege'za Samsoni'ene eman'i'zaze. <sup>12</sup> Hagi Samsoni'a anage huno ana nehzavea zamasami'ne, 7ni'a knafima kavema trohuta nesuna knafina, mago fronka ke tamasamigahunki rezaganeta kegahaze. Huama'ma hanage'na 30'a efeke zaza kukenane, 30'a knare kukenanena tamigahue. <sup>13</sup> Hianagi ana fronka kema huama osanazana, 30'a efeke kukenane 30'a knare kukenanena tamagra namigahaze. Anage hige'za amanage hu'naze, Tamage hananki ana fronka keka'a hugeta antahimano. <sup>14</sup> Anagema hazageno'a amanage hu'ne, Ne'zama tragafeno nenea zagafintira ne'za fore hu'ne. Hanki hankave zagafintira haganentake'za efore hu'ne. Hianagi 3'a zagegnamofo agu'afina ana fronka kea refko hu'za huamara hugara osu'naze. <sup>15</sup> Hagi namba 4 knarera Samsoni ne-narona amanage hu'za asami'zaze, Negavena azeri masave hugeno fronka ke'a huama huno tasamino. Hagi ana'ma osananketa kagri'ene negafa naga'enena tevefi krefanane hugahune. Hagi tagrira tazeri tamunte omane-nanku tanagra kea haketa e'nono? <sup>16</sup> Hagi anagema hazageno'a, Samsoni ne-naro'a Samsoninte vuno zavi ome neteno amanage hu'ne, Nagrira kavresra hunantenka kavesinonantane. E'ina nehunka vahe'ni'amofona fronka kea eri amara nosunka ana kemofo agafa'a nagrira onasami'nane. Anage higeno

Samsoni'a amanage hu'ne, Nagra nenererane nenfanena amana fronka kemofo agafa'a ozanasami'noanki, nahanige'na kagrira kasamigahue? <sup>17</sup> Hagi anagema higeno'a, Ne'zama kreno neneno musema hu 7ni'a knamofo agu'afina, ana a'mo'a zavira neteno tutu huno antahige vava higeno, Samsoni'a antahi avesra nehuno, 7ni knare ana fronka kemofo agafa'a huama huno nенарона asamigeno, ete vuno ana nehazaveramina ome zamasami'ne. <sup>18</sup> Hagi ana kumapi vene'nemo'za ana nanekema nentahi'za, 7ni knareraga zogemo'a uofre'nege'za Samsoninte ana nanekea eri'za e'za amanage eme hu'naze, Na'amo tumerimofo haga'a agateregeno, na'amo laionimofo hanavea agatere'ne? Anagema hazageno'a, Samsoni'a amanage huno zamasami'ne, Nagri a'bulimakao anentateti'ma hozama e'orizaresina fronka keni'amofo agafa'a keta eriforera osazasine. <sup>19</sup> Hagi anante Ra Anumzamofo Avamumo'a himamu'ane Samsoninte egeno Askeloni kumate vuno 30'a vahe ome nezamaheno, keonke'zazimine, kukenaziminena erino fronka kema huama'ma haza vhahera eme zami'ne. Ana huteno tusi arimpa nehegeno nefo nontega vu'ne. <sup>20</sup> Hagi anama higeno'a, Samsoni nенарона, anama aravema hia zupama avevama hu'za mani'naza nehazavefinti mago ne'mofo avremizageno ara eri'ne.

## 15

### *Samsoni'ma Filisiti vahe zamahe'nea naneke*

<sup>1</sup> Hagi mago'a kna evutegeno, witima vasage knama ne-egeno'a, Samsoni'a mago meme anenta azenerino nenaro kenaku vu'ne. Hagi kumate'ma unehanatino'a, ana a'mofo nefana amanage huno ome asami'ne, A'nimo'ene umasenaku nehue. Hianagi ana a'mofo nefo'a atregeno nенарона ome anteno omase'ne. <sup>2</sup> Hagi ana a'mofo nefo'a amanage hu'ne, Nagrama nagesama antahuana aka'agura kavesra hunte'nane nehu'na ne'zama krenka musema hampima kavegama hu'nea ne' huntogeno, a' eri'ne. Hianagi ko, negna'a nuna'amofona agatereno knare agi agonane mofa mani'neankinka amne ara erintegahane. <sup>3</sup> Anagema higeno'a Samsoni'a amanage hu'ne, Menina nazanoma hu'na Filistia vahe'ma zamazeri havizama hanua knazana nagripina omnegosie. <sup>4</sup> Anage nehuno viazamo 300'a afi krarami ome azerino tare eri tragoteno zanarisonare tevema tagintesia zana anakintetere hu'ne. <sup>5</sup> Hagi ana'ma huteno'a, ana teve ko'naraminte teve taginenteno afi kraramina zamatrege'za nevu'za amnema me'nea witi hozane, ko'ma akafrinte witine, olivi zafa hozanena teve taginte'za vu'naze. <sup>6</sup> Ana'ma hige'za Filistia vahe'mo'za amanage hu'naze, Iza e'inara hu'ne? hu'za hazage'za, Timna kumateti ne'mofo nenemo Samsoni anara hu'ne. Na'ankure Samsoni'ma aravema hunaku'ma hianknare'ma avevama hu'nea ne' ana ara avremigeno'e. Hu'za hazage'za Filistia vahe'mo'za vu'za ana a'ene ana a'mofo nefanena ome zanazeri'za tevefi krerasage'naze. <sup>7</sup> Ana'ma hazageno'a Samsoni'a amanage hu'ne, Tamagrama e'inama hazana tamage hu'na, e'ina'ma hazarera famahetenage mani frua hugahue. <sup>8</sup> Anage nehuno Samsoni'a ana vhahera tusi rimpa henezmanteno tusi'a vahe zamaheno erivazi'ne. Ana huteno vuno Etamu havegampi umani'ne.

<sup>9</sup> Ana'ma hige'za Filistia vahe'mo'za Juda mopafi seli nona eme ki'za mani'ne'za, Lehi kumate vhahera hara huzamante'naze. <sup>10</sup> Hagi ha'ma eme hunezamantage'za Juda vahe'mo'za amanage hu'naze, Nagafare tamagra emereritma hara eme hunerantaze? Anagema hazage'za Filistia

vahe'mo'za amanage hu'za kenona hu'naze, tagri'ma ha'ma hurante'neaza huta Samsonina aheta anakinaku e'none. <sup>11</sup> Anagema hazage'za Samsonina ome avrenaku 3 tauseni'a Juda vahe'mo'za Etamu havegante vu'za amanage ome hu'naze, Filistia vahe'mo'zama kegavama hurante'nazana kagra ontahi'nano? Nahigenka kagra e'inahura tagrira hurantane? Anage hazageno Samson'i aamanage huno kenona huzamante'ne, Na'ano zamagrama nagri'ma hunantazaza huzamante'noe. <sup>12</sup> Anagema hige'za amanage hu'za asami'naze, Tagra kazerita anakita Filistia vahe ome zaminaku erami'none, hazageno Samson'i aamanage huno kenona hu'ne, Tamagra kahe ofrigahune huta huvempa huta nasamiteta anara hiho. <sup>13</sup> Anagema hige'za amanage hu'za kenona hu'naze, Kahe ofrigosunanki amne kagare'ene kazante'ene nofi anakita Filistia vahe ome zamigahune, hu'za nehu'za tare kasefa nofitrenu anakintete'za havegampintira avre'za atirami'naze. <sup>14</sup> Hagi Samson'i ma Lehi kumate'ma ehanatige'za, Filistia vahe'mo'za kezanheti'za Samsonintega zamagare'za e'naze. Hianagi Ra Anumzamofo Avamumo'a himamu'ane Samsoninte egeno, azante'ma anaki'naza nofi'mo'a tevefima kre'nazageno'ma hiaza huno mramra huno evurami'ne. <sup>15</sup> Ana higeno kasefa kasefa hu'nea donki afu'mofo age-mazampa zaferina'a erino ana zaferinaretira 1tauseni'a vahe zamahe fri'ne. <sup>16</sup> Ana huteno Samson'i aamanage hu'ne, Donki afu'mofo agemzampa zaferinaretira vahera ahena kevure kevure erivazue. Donki afu'mofo agemzampa zaferinaretira 1tauseni'a vahe zamahoe!

<sup>17</sup> Anagema huvanereno'a, donki afu'mofo agemzampa zaferina matevu atre'ne. Ana hige'za ana kumakura Rama-lehie hu'za agi'a ante'naze.

<sup>18</sup> Ana'ma hutegen'o Samsonina tusiza huno tinkura avesigeno amanage huno Ra Anumzamofontega krafa hu'ne, Kagra eri'za vahekamonafi efrenka hara azeri agaterane. Hanki nagra tinku nefrisuge'za agozano taga osu vahe'mo'za nagrira nahefrisazo? <sup>19</sup> Anagema higeno'a Anumzamo'a mopa eri aka higeno, Lehi kumapina tina hanatigeno Samson'i a tina neno hanavea eri'ne. Ana kumakura Eh-hakore huno agia antegeno Lehi kumatera ana tina meninena me'ne. <sup>20</sup> Hagi Filistia vahe'mo'zama Israeli vahe mopama eri'za kegavama hu'naza knafina, Samson'i a 20'a kafufi Israeli vahe'mokizmi keagama refkoma hu kva vahera mani'ne.

## 16

### *Samsonine Dilailakizni naneke*

<sup>1</sup> Mago zupa Samson'i a Filistia vahe kumate Gaza vuno mago savri a' mani'negeno ome keno ana a'ene umase'ne. <sup>2</sup> Hagi Gaza kumate vahe'mo'zama Samson'i ma ana a'enema emase'ne naneke'ma nentahi'za, ana kumara avazagi kagi'za ana kumamofo kafanteria kafona ante'za kenagera mani'naze. Ana kenagera ranke'nankea osu akohe'za mani'ne'za amanage hu'naze, Kafonteta mani'nesunkeno ko'matanigeno esnigeta ahe-gahune. <sup>3</sup> Hianagi Samson'i akenage amu'nompi otino vuno rankuma'mofo vihu kafane, kafama azeri'nea zafanena maka akasi zuzu huno afunte eri konefino Hebron'i tava'onte me'nea agonafi mareri'ne.

<sup>4</sup> Hagi anama huteno'a mago'a kna evutegeno Soreki agupofi nemania a' agi'a Dilailae nehaza a'kenunu huno avesinte'ne. <sup>5</sup> Ana'ma higeno'a Filistia kumate kva vahe'mo'za ana a'te e'za amanage eme hu'naze, Samsonina inampi hanave'a me'nefi masavenke hunka revatga hugeno negasamino, inankna huta azerita anakigahumpi kasamina azerita anakimmeno. Hagi

e'inama hananketa magoke magokemota 1tausen 100'a silva zago kamitere hugahune. <sup>6</sup> Hagi Dilaila'a amanage huno Samsonina antahige'ne. Muse hugantoanki nasamio, inampi hanaveka'a me'ne? Inankna hanageno hanaveka'a omanesige'za kazeri'za anakigahazafi nasamio? <sup>7</sup> Anagema higeno'a Samsoni'a amanage huno kenona hu'ne, Atima negraza kasefa nofi'ma 7ni'a eri'za nagare nazante'ma anakinageno'a hankaveni'a omnesige'na, amne vahekna hugahue. <sup>8</sup> Anagema higeno'a Filistia kumate kva vahe'mo'za atima negrazanofira kasefa 7ni'a eri'za Dilailana eme amizageno, Samsonina agare azanteru rugagi rugagi huno anakinte'ne. <sup>9</sup> Ana huntenu ana a'mo'a mago'a vahera zamavareno ana nomofo agu'a hunaрагинте'нека frakizamanteteno, amanage huno Samsoninkura hu'ne, Samsoniga Filistia vahera ama aze! Hianagi Samsoni'a ana nofira tevefima krenegeno'ma temramrama hiazza huno rukampru hutre'ne. Ana higeno hankave'ama me'neama'a ke'za eriforera osu'naze.

<sup>10</sup> Hagi anante Dilaila'a amanage huno Samsonina asami'ne, Ko kagra kizazokogo ke hunantenka havige hu'nane. Hagi muse hugantoanki, inankna hu'za anaki kantegahazafi nasamio? <sup>11</sup> Anagema higeno'a Samsoni'a amanage huno kenona hu'ne, Mago'a kasefa nofinu'ma anaki antrokoma hunante'nageno'a hankaveni'a omnesige'na amne vahekna hugahue. <sup>12</sup> Anage higeno mago'a vahe'mo'za nompi frakiza mani'nazageno, Dilaila'a kasefa nofitami erino agare azanteru anakinteteno amanage hu'ne, va'i Samsoniga, Filistia vahe'mo'za kahenaku aze, higeno'a, Samsoni'a kukena hati nofi'ma erikano hiankna huno ana nofira rukano hutre'ne. <sup>13</sup> Anante Dilaila'a anage huno Samsonina asmi'ne, Kagra renevataq hanke'na nagazegu hue, hagi menina tamage hunka nasamio, higeno Samsoni'a huno, Kagra 7ni'a za'za nazokama erinka strini nofi'ma nezagi'za masinifi rusi nehunka nilima erinka ahentrakoma hanankeno, hanaveni'a omnena, amne vahekna hu'na manigahue. <sup>14</sup> Anagema higeno'a, Samsoni'ma mase'neama'agu azokara erino 7ni'a aragafa hanenteno, azoka'ma anaki nnilinu eri hankavenetino amanage hu'ne, va'i Samsoniga Filistia vahe'mo'za kahenaku aze, higeno'a Samsoni'a mase'nefintira otino ana nofi'ene nnilinena azokapintira eri avazu hutre'ne.

<sup>15</sup> Ana'ma higeno'a Dilaila'a amanage hu'ne, Kagu'amo'ma nagri'enema omne'negeñka nahigenka kavesinegantoe hunka nehane? Kagra 3'a zupa kizazokago kea hunantenka hankaveka'a inampi me'ne nagrira onasami'ne. <sup>16</sup> Hagi Dilaila'ma maka knama anagema huva huvama higeno'a, Samsoni'a anankema antahizankura tusi avesra nehuno, <sup>17</sup> anante hufra'ma nekiñazana maka hufore huno Dilailana amanage huno asami'ne, Kasema nantetegati'ma e'neana nazokara taga osu'noe. Na'ankure Anumzamofo eri'za vahe manigahane huno nenreru rimpafima mani'nogeno ko huhamprinante'ne. Hagi nazoka'ma tagama hanugeno'a hankaveni'a omanesige'na amne vahekna hugahue. <sup>18</sup> Hagi Dilaila'ma kegeno'ma Samsoni'ma agu'areti'ma huama'ma huno maka oku'ama me'neazama asamigeno'a, amanage huno Filistia kva vahe'tamintega kea atregeno vu'ne. Ete mago'ane echo. Na'ankure agra hago agu'areti huno maka oku'zama'a huama huno nasami'ne. Anagema higeza Filistia kva vahe'tmimo'za zagone zamazampina eri'ne'za ete emareri'naze. <sup>19</sup> Hagi Dilaila'a amote Samsonina azeri avukoko higeno mase'negeno, mago ne'ku higeno eazamo 7ni'a ragafa'a eme taga huno vazagetetre'ne. E'inama hutegeno'a, Dilaila'a Samsonina ata hoza nemigeno hankave'a omane'ne. <sup>20</sup> Hagi Dilaila'a amanage hu'ne, va'i Samsoniga Filistia vahe'mo'za

kahe'naku aze, huno'ma higeno'a, Samsoni'a mase'nefintira otino, ko'ma nehuaza hu'na ruvakanegahue huno hu'ne. Hianagi Ra Anumzamo'ma agri'ma atre'no vu'nea zana ontahi'ne. <sup>21</sup> Hagi ana'ma hige'za Filistia vâhe'mo'za azeri'za tarega avurga reragati atrete'za avre'za Gaza kumate vu'za bronsire seninofi'nu agare azanteranakintazageno kina nompi witi refuzafu nepeno mani'ne. <sup>22</sup> Hianagi ana azoka'ma vazagatetre'naza azokamo'a ete agafa huno hage'ne.

<sup>23</sup> Hagi Filistia kva vahe'mo'za emeritru hu'za Dagonie nehaza havi anumzazimirera ofa nehu'za musena hu'za amanage hu'naze, Tagri anumzantimo'a ha' vahetia Samsonina tazampi avrente hu'za hu'naze. <sup>24</sup> Hagi Filistia vahe'mo'za Samsonima nege'za anumzazimimofo agi erisga nehu'za amanage hu'naze, Vahe'tima zamahe hana'ma nehuno mopatima eri havizama hu'nea nera Samsonina anumzantimo avreramigeno menina tagri hanavefi mani'ne. <sup>25</sup> Hagi aka tima nenazageno antahintahi zamimo'ma savari'ma hige'za amanage hu'naze, Samsonina avre atiraminkeno mago'aza huno tazeri musena hino, hu'za hazageno Samsonina kina nompintira avre atiramî'za noma azeri'nea zafaramimofo amu'nompi ome antageno otî'neno mago'azana huno zamazeri musena hu'ne.

<sup>26</sup> Hagi ana'ma hazageno'a azante'ma azeri'nea nehaza ne'kura Samsoni'a amanage hu'ne, Navrenka noma azeri'nea zafare vuge'na nazana avako hu'na namagena renti ha'neno. <sup>27</sup> Higeno ana nompina Filistia kva vahe'mo'zane veamo'za avite'nageno, nomofo agofetura 3 tauseni'a vea'naza mani'ne'za negazageno, Samsoni'a zamazeri musena hu'ne.

<sup>28</sup> Hagi Samsoni'a amanage huno Ra Anumzamofontega nunamuna hu'ne, Ra Anumzamoka mago'ene antahinaminka hanavea namio, muse hugantoanki hankavea namige'na Filistia vahera zamahe'na navurgama rera-gati'nazarera nagonagea haneno. <sup>29</sup> Hagi Samsoni'a anagema nehuno'a noma vazisga hu'nea zafararemofo amu'nompi otino azana kantigama ana zafararente rentinti nehuno, <sup>30</sup> Samsoni'a amanage hu'ne, Filistia vahe'ene frisue, huno nehuno ana zafararena hanavetino retufegeno ana noma'pasaru huno maka kva vahe'ene, ana nompima mani'naza vahera zamahe vagare'ne. Ana higeno nefrino'ma zamahe'nea vahe'mofo nampamo'a, amanema mani'neno'ma zamahe'nea vahe'mofo nampana agatere'ne. <sup>31</sup> Hagi ana'ma hutege'za, afuhezane naga'amo'za vu'za avufga'a omeri'za mareri'za Zorane Estaoli kumatremofo amu'nompi nefa Manoa matipi eme asente'naze. Hagi Samsoni'a 20'a kafufi kva mani'neno Israeli vahera kegazimia refko huzmante'ne.

## 17

### *Kaza osu havi anumzamofo Maika'a mono hunte'nea naneke*

<sup>1</sup> Hagi mago nera Efraemi agona kokampi nemania ne' agi'a Maika'e. <sup>2</sup> Mago kna nererankura amanage hu'ne, nagra nentahugenka 1tausen 100'a silva zagoma musufama erizagenka kazusi ke huzamante'nane. E'ina zagoa nagra musufa eri'noe. Higeno nerera'a kenona huno, hufore'ma hantera Ra Anumzamo'a asomu hugantesie, <sup>3</sup> higeno'a ana 1tausen 100'a silva zagoa erino nerera ome amigeno nerera'a amanage hu'ne, Menina nagra ama'na zagoa nenamofonku hu'na Ra Anumzamofo amuanki'na kaza osu havi anumzamofo amem'a tro'ma nehaza vahe zaminuge'za tro hute'za

eme kamigahaze. <sup>4</sup> Anage nehuno nerera'a 200'a silva zagoa erino zafare'ma antre'zama silvama rukamre'za keonke'zama tro'ma nehaza vahe ome zamizage'za, eri'za vahe amem'a tro nehu'za, magora silvaretike tro hu'za eme amizageno erino Maika nompi ome ante'n'e. <sup>5</sup> Hagi Maika'a osi mono noma'a me'neankino, pristi vahe kukena tro huno efotie nehaza amimizare rente'za trohuntenu mofavreramima'afinti mago'mofo pristi manisie huno huhamprinte'n'e. <sup>6</sup> E'ina knafina Israeli vahepina mago kinia omani'neankino mago mago vahe'mo'a agra'a avesite kegeno avure'ma fatgoma hiazana hutere hu'n'e. <sup>7</sup> Hagi mago knazupa Juda nagapinti mago Livae nehaza ne'mo'a Betlehem kumate Juda mopafi nemaniane. <sup>8</sup> Hagi Juda mopafinti Betlehemu kumara atreno kuma'ma manisia kumaku hakeno vu'n'e. Hagi anama nevuno'a Efraemi agona kokampi vuno Maika nonte uhanati'n'e. <sup>9</sup> Anama uhanatigeno'a Maika'a amanage huno hu'n'e, kagra igati ane? Huno antahigegeno amanage huno ana ne'mo'a hu'n'e. Nagra Livae ne' Juda mopafi Betlehemu kumate nemanua ne'mo'na mani'nua kumaku hake'na neoe. <sup>10</sup> Higeno Maika'a amanage hu'n'e, Nenfa kna hunka nagri'ene mani'enka, pristi eri'za vaheni'a manio. Hagi mago mago kafufina 10ni'a Silva zagone kukenane ne'zanena kamigahue, higeno ana ne'mo'a ufre'n'e. <sup>11</sup> Hagi Livae nehazamo'a muse nehuno Maika nemofoza higeno, <sup>12</sup> Maika'a ana Livae nehazavea pristi mani'nie huno azeri ruotage higeno, Maika nompi pristi eri'za ne' mani'n'e. <sup>13</sup> Ana nehuno Maika'a anage hu'n'e, nagra menima nagesama antahuana, Livae ne' pristia azeri otuankino Ra Anumzamo'a asomu hunantegahie hu'n'e.

## 18

### *Dani naga'mo'za mopagu hake'naza naneke*

<sup>1</sup> Hagi ana knafina Israeli vahe'mokizmi kinia omani'nege'za Dani naga'mo'za manisaza mopagu hake'za vano hu'naze. Na'ankure Israeli vahe'mo'zama mopama erizafina zahufa zamagra mopa e'ori'naze. <sup>2</sup> E'ina hu'negu Dani naga'mo'za 5fu'a hankavematiza ha'ma nehaza vahetamina huzmantazage'za Zora kumate'ene Estaoli kumateti'enena manisaza mopagu afure'za kenaku vu'naze. Hagi Efraemi agona kokampima nevu'za, Maika nompi umase'naze. <sup>3</sup> Hagi zamagrama Maika nonte'ma erava'oma nehu'za, Livae nehaza ne'mofo ageru nentahi'za vugantite'za amanage hu'za antahige'naze. Iza kavreno amafina e'ne? Na'a ama kumapina emenerine? Nankna eri'zanka'a amafina me'n'e? <sup>4</sup> Anage hazageno amanage huno ana ne'mo'a zamasami'n'e, Maika'a amanage huno huanante'n'e, mizasegantegahuanki pristi vaheni'a manio huno hige'na, pristi ne'a mani'nogeno mizasenenante. <sup>5</sup> Hagi anante amanage hu'za hu'naze, Amama nevuna kamo'a knare hurantegahifi Ramofona antahigenka ko. <sup>6</sup> Anagema hazageno'a pristi ne'mo'a amanage huno zamasami'n'e, Ramo'a vugota huramantegahianki tamarimpa frune viho. <sup>7</sup> Anagema hige'za ana 5fu'a vene'nemo'za ana kumara netre'za Laisi kumate vu'naze. Ana kumate'ma vu'za ome kazana, ana kumapi vahe'mo'za Saidoni vahe kna hu'za magozankura zamagesa ontahi zamarimpa frune mago zankura koro osu' mani'naze. Hagi ana vahe'mo'za mago zankura upara osu feno vahe mani'naze. Na'ankure mopazmimo'a knare'za hu'n'e. Hagi Saidoni vahera afete're mani'nazageno mago vahe'mo'e huno zamagri tavaontera omani'naze. <sup>8</sup> Hagi ana 5fu'a vahe'mo'zama nagazmirega Zora kumate'ene Estaoli kumate'enema azageno'a, zamafuhemo'za amanage

hu'naze. Na'a ome ketma erifore hu'nazafi huama hiho? <sup>9</sup> Hu'za zamatahigazageno, ana vahe'mo'za anage hu'naze, otinketa vuta ome zamaheta mopazmia hanaramneno! Na'ankure mopama ke'nonana knare'zantfa hu'nea mopa me'ne. Na'anku aveganentaze? Ana mopama omerizankura korora huta rege'regera osiho. <sup>10</sup> Hagi ana kumate'ma vu'nanana ana mopafi vahe'mo'za mago'zankura zamagesa ontahi zamarimpa fru hu'za mani'naze. Na'ankure ana mopa ra huno mikazamo'a avite'nea mopa Anumzamo'a ko tami'ne. <sup>11</sup> Hagi anagema hazageno'a Dani nagara 600'a venenemo'za Zora kumateti'ene Estaoli kumatetira ha'zana retro hu'za hatera vu'naze. <sup>12</sup> Hagi Kiriat-jearimie nehaza kumate zage fre kaziga Juda mopafi seli nona ome ki'za mani'naze. Hagi e'ina kumakura menina Mahane-Danie hu'za agia nehaze. <sup>13</sup> Hagi anantetira atre'za Efraemi agona kokampi e'za, Maika nonte ehanati'naze.

<sup>14</sup> Hagi 5fu'a vene'nema Laisi mopama afure'za ke'naza vene'nemo'za ruga'a naga'mokizmia amanage hu'za zamasami'naze. Pristi vahe'mo'zama zamimizare'ma nehaza kukena efotigi, nompima nentaza havi anumzantaminki, antre'zama tro'ma hu'naza amema'agi, aenima kre'za tro'ma hu'naza amema'ama ama nontamimpima me'neana ontahi'nazo. E'ina hu'negu menina na'a hugahazafi zamagesa antahiho? <sup>15</sup> Anage nehu'za ana 5fu'a vene'nemo'za kana atre'za, Maika nompima ana Livaie ne'ma nemanifinka ufre'za musenkeea ana nera ome hunte'za, hufrufra kea hunte'naze. <sup>16</sup> Hagi Dani nagapinti ana 600'a sondia vahe'mo'za maka ha'zazmia eri'za ana kumamofo kafante oti'za mani'ne'za, <sup>17</sup> ana pristi ne'ene nanekea nehazageno, ana 5fu'a venenemo'za Maika naga'mo'zama mono'ma nehazafinka vu'za pristi vahe'mo'zama zamimizare'ma nehaza kukena efotigi, nompima nentaza havi anumzantaminki, antre'zama tro'ma hu'naza amema'agi, aenima kre'za tro'ma hu'naza amema'anena omeri'za atirami'naze. Ana nehazage'za pristi ne'ene 600'a sondia vahe'mo'za ha'zana eri'ne'za kuma kafante otine'za ke'naze. <sup>18</sup> Hagi ana venenemo'zama Maika nompima umreri'zama pristi vahe'mo'zama zamimizare'ma nehaza kukena efotigi, nompima nentaza havi anumzantaminki, antre'zama tro'ma hu'naza amema'agi, aenima kre'za tro'ma hu'naza amema'anena eri'za atiramizageno'a, ana pristi ne'mo'a amanage hu'ne, na'a nehaze? Huno zamatahigege'za, <sup>19</sup> amanage hu'naze. Taganenka kea osu tavaririnka enka tagri nerafaiza nehunka, pristi vaheti emanio. Magoke naga'mofo pristima mani zamo knarera hu'nefi, maka Israeli vahepima mago naga nofimofo pristima mani'zamo knarera hu'noe? Hu'za hu'naze. <sup>20</sup> Anagema hazageno'a pristi ne'mo'a muse nehuno ana pristi kukenane, havi anumzane, antre'za trohunte amema'anena erino ana vahe'tamine vu'ne. <sup>21</sup> Hagi ana vahe'mo'za anantetira antre'za mofavrezmine afuzagazmine zamazerigota hu'za fenozazminena eri'za vu'naze. <sup>22</sup> Hagi Maika noma agatere'za afete'ma vutazageno'a, Maika no tavaonte'ma noma ki'naza vahe'mo'za emeritru hu'za Dani nagara zamavariri'naze. <sup>23</sup> Hagi ana vahe'mo'za rankege hu'za vazageno Dani naga'mo'za rukrahe hu'za amanage hu'za Maikankura hu'naze, Nagafare vahera zamavaretru huntenka, rankegera hunka neane? Hu'za antahigazageno, <sup>24</sup> Maika'a amange huno kenona hu'ne, anumzantamima tro'ma hunte'noa anumzantamini'a maka eri vaganereta pristi ne'nianena avreta neaze. Hagi mago zani'a otreta eri hana huta neazanki, nahigeta e'inahura nehaze? <sup>25</sup> Hige'za Dani naga'mo'za amanage hu'naze, Kva hunenka e'inagea huo! Amama neompina ame arimpama ahe vahera neankino, zamarimpama ahenige'za nagaka'ane

kagri'enena tamahe frigahaze. <sup>26</sup> Anage nehu'za Dani naga'mo'za vu'naze. Hagi Maika'ma keama Dani naga'mo'za rama'a vahem'a vazageno ha'ma huzamantega'ma nosuno'a ete rukrahe huno nom'a'rege vu'ne. <sup>27</sup> Hagi Maikama tro'ma hunte'nea kaza osu anumzatamine, Dani naga'mo'za e'neriza pristi ne'anena nevre'za eza mago zanku'ma zamagesa ontahi fruma hu'za mani'naza vahe kumapi Laisi e'naze. Hagi eza ana kumapi vahera eme zamahehna nehu'za, kumazimia teve taginte'naze. <sup>28</sup> Hagi Laisi kumate vahera mago'mo'e huno eme zamaza osu'ne. Na'ankure Saidoni vahera afete manizageno, Laisi vahe'mo'za mago vahe'enena tragote'za omani'naze. Ana zana Beth-Rehob kuma tava'onte me'nea agupofi fore hu'ne. <sup>29</sup> Hagi Dani naga'mo'za ana agupofi ete kumara trohuza agima anteminazana Dani kumare hu'za Israeli nemofo nezmageho agire asamre'naze. Hagi ana kumakura kora Laisie hu'za agia nehzane. <sup>30</sup> Hagi Dani naga'mo'za ana kaza osu havi anumzana azeri retrurente'za, Gesomu nemofo Mosese negeho Jonatani azeri otizageno pristi ne'zimia mani'ne. Hagi Dani nagapina Jonatanimpinti'ma fore'ma haza vahe'mo'za pristia maniza neazageno, ha' vahe'mo'za eme zamahe'za zamavar'eza kina ome huzamante'naze. <sup>31</sup> Hagi Anumzamofo seli mono nomo'ma Sailoma me'nea knafina, Dani naga'mo'za Maika'ma tro hunte'nea kaza osu havi anumzante monora hunte'naze.

## 19

### *Mago Livae ne'ene nenarokizni naneke*

<sup>1</sup> Hagi Israeli vahe'mofo kinima omani'nea knafina mago Livae nagap-inti nera Efraemi agona kokampi mani'ne. Hagi ana ne'mo'a mago kna Juda mopafi vuno, Betlehemu kumateti nampa 2ara a'tampi ome avreno e'ne. <sup>2</sup> Hianagi ana a'mo'a mago'a vene'nene savari huteno, nevena atreno kuma'rega 4'a ika umani'ne. <sup>3</sup> Ana'ma higeno'a neve'a nenaro arimpa omeri fru huno avreno enaku eri'za ne'an, tare donki afu'ane nevreno vu'ne. Hagi ana kumate'ma uhanatigeno'a, ana ne'mofo nenaro'a avreno nefo nonte vigeno, nefo'a tusi muse nehuno avrente'ne. <sup>4</sup> Hagi ana ne'mofo nenemo'a osi'a manigenka vuo higeno, ana ne'mo'a nenemo nompina ne'zane tinena neneno 3'a kenage manino maseno hu'ne. <sup>5</sup> Hagi namba 4 knarera nanterame otino nom'a'rega vunaku keonke'zana retro hu'ne. Hianagi nenemo'a huno, Bretia netenka vugahane. <sup>6</sup> Anagema nenemo'a higeno'a ana netremokea ete manike ne'zane tinena ne'na'e. Ana ne'zama nenakeno'a nenemo'a otiazamo amanage hu'ne, Muse hugantoanki mago kenage'ene maseneta ne'zana neneta musena huteta vi'o. <sup>7</sup> Hianagi Livae ne'mo'a vunaku keonke'zama'a enerino otigeno, nenemo'a tutu huno, Mago kenagera masetenka vuo, higeno mase'ne. <sup>8</sup> Hagi maseno namba 5fu knarera nanterame otino vunaku retrotra higeno, nenemo'a otiazamo amanage hu'ne, ne'zana krenka neneka mani'negeno kinagasena vuo, huno higeke ete mago knane mani'neke ne'zana kreke ne'na'e. <sup>9</sup> Hagi ana'ma hute'za agrama, nenaro'ma eri'za ne'ama hu'za vunaku tro hu'za ot'i'zageno, ana a'mofo nefo'a amanage hu'ne, Keho, hago kinagaseanki, meni kenage'enena maseta musena huteta, okina nanterame otita vugahaze.

<sup>10</sup> Hianagi ana ne'mo'a ru'enema masezankura avesra nehuno, donki afutrema'mofo agumpi mani'noma vu'zana retro hunenteno, nenaro-nena nevreno Jebusi kumakura menina e'i Jerusalemie nehzankino ana kantega vu'ne. <sup>11</sup> Hagi Jebusi kumate'ma azageno'a kinagasegeno, eri'za

ne'amo'a amanage hu'ne. Jebusi vahe ran kumapi umasenune. <sup>12</sup> Anagema higeno'a kva'amo'a amanage hu'ne, Ru vahe kumapina Israeli vahe'ma omani'nesia kumapina uomasegosunanki, nevuta Gibea uhanatigahune. <sup>13</sup> Anage nehuno ana nehaza nera amanage huno asami'ne. Enketa ko nevuta Gibea kumatero Rama kumatero umasamneno. <sup>14</sup> E'i anage nehu'za vuvava hu'za Benzameni naga'mofo mopafi Gibea kuma tava'onte uhanati'zageno zagemo'a uramige'za, <sup>15</sup> ana kumapi masenaku kuma amu'nompi umani'nazanagi, mago vahe'mo'a zamavare nompina ontege'za mani'nazageno, <sup>16</sup> mago ranafamo hoza'aregatira kinaga e'ne. Ana nera Efraemi agona kokampinti ne' Benzameni naga'ene Gibea kumate zoka emani'nea nere. <sup>17</sup> Hagi ana ranafa ne'mo'ma ne-eno'ma eme kesaga huno keama ana naga'ma kuma amu'hompima mani'nazageno'a anage huno zamantahige'ne, Igati e'neta iga vunaku emani'naze? <sup>18</sup> Higeno ana ne'mo'ma amanage huno hu'ne, Efraemi agona kokampi kumanirega vunaku Juda kaziga Betlehemu kumateti eta emani'nonanagi, vahe'mo'za nozamifina tavreontazageta mani'none. <sup>19</sup> Hagi donkitimofo ne'zane, nagrama nesua wainine bretine, a'niomofo ne'zane eri'za vahe'nimofo ne'zanena eri'nonankita mago zankura upara osu'none. <sup>20</sup> Anage'ma hazageno'a ana ranafa ne'mo'ma amanage hu'ne, knarekita nagri nontega vanage'na maka'mota kegava huramantegahue. Hianagi amafina omasegahaze. <sup>21</sup> Anage nehuno zamavareno nomafifi vuno donkizmimofo ne'zana nezamige'za zamagra zamaga ome sese hute'za ne'zane tinena ne'naze. <sup>22</sup> Hagi ne'zama nene'za musema nehazageno'a, ana kumapi'ma hazenkema ne-haza vene'nemo'za anama mani'naza nona eme avazagigagiza kafanteria vagare vagare hu'za nemasagiza, ana ranafagura amanage hu'naze, E'ima nonka'afima avrente'nana nera avreramigeta monko zana huntamneno. <sup>23</sup> Hagi ana ranafamo'a atiramiazamo amanage huno zamasami'ne, Nafuheta, amanahu kefo avu'ava zana osiho. Na'ankure ama ne'mo'ma ko noni-afi emani'ne. <sup>24</sup> Hagi keho, vene omase mofani'ane ana ne'mofo a'enena ama mani'na'aniki zanavreta vuta nazano huzanante'naku'ma hanaza zana ome huznanteho. Hianagi ama ne'mofona kefo avu'avara huonteho. <sup>25</sup> Hianagi ana vene'neramimo'za ke'a ontahizageno, Livae ne'mo'ma nenarona kaha anagino retufezamige'za ana vene'nemo'za ana ara monkozana hunte'za azeri haviza hu'za vano nehazageno kotige'za atrazageno e'ne. <sup>26</sup> Hagi ana a'mo'ma eazamo neve'ma mase'nea nomofo kahante eme traka huno mase'negeno rumasa hu'ne. <sup>27</sup> Hagi neve'ma vunaku'ma nanterama otino'ma kafama anagiana nenaro'a, kaha tra zafare azeriteno mase'negeno negeno anage hu'ne, <sup>28</sup> otigeta havamnenno. Hianagi ana a'mo'ma kea osigeno donki afu'amofo agumpi avufga'a erinteno nomafarega vu'ne. <sup>29</sup> Hagi ana ne'mo'ma nomafarema uhanatino'a, kazi erino ana ara 12fu'afi taga huteno, 12fu'a Israeli naga'nofi'ma mani'nazarega mago mago huno ana a'mofo avufga atregeno vuno eno hu'ne. <sup>30</sup> Hagi ana zama kaza vahe'mo'za amanage hu'naze, Isipiti'ma e'nona knareti'ma eno ama knare'ma ehanatiana Israeli vahe'mota amanahu kefo hazenkezana onke'nonaza fore hianki, ama ana zankura na'ane huta tamagesa antahize?

<sup>1</sup> Hagi anante noti kaziga Daniti vuno Berseba uhanatigeno sauti kazi-gati'ene, Jodani timofo kantu kaziga Giliatit'iene maka Israeli vhahera emeri tru hu'naze. Hagi ana maka Israeli vhahera Ra Anumzamofo avuga Mispa kumateke ome atru hu'naze. <sup>2</sup> Hagi Israeli naga'mofonte'ma ugagota hu'naza maka kva vahetmimo'za Anumzamofo vahem'o'zama atruma hazafi umani'naze. Hagi anampina kazinteti'ma ha'ma hu sondia vahet'mina 400 tausenia vahemani'naze. <sup>3</sup> Hagi Israeli naga'mo'za Mispa kumate'ma atruma haza nanekemo'a ko Benzameni nagatera vu'ne. Hagi Israeli vahetmimo'za amanage hu'naze. Inankna huno ama ana kefo avu'ava zana fore hu'nefli hugeta antahimneno. <sup>4</sup> Hazageno nenaroma ahe fri'naza Liva'e ne'mo'a amanage huno kenona hu'ne, Benzameni nagamofo kumate Gibea masenaku a'ni'ane nagranena emani'no'e. <sup>5</sup> Hianagi ana kenagera Gibea kumate vahem'o'za eme tavazagigagi'za nahe'za nehu'za, a'ni'a avre'za monko'zana hunentazageno fri'ne. <sup>6</sup> E'ina hazage'na ana a'mofo avufga'a taga hu'na 12fu'a Israeli naga nofima mani'nazarega, atrogeno vuno eno hu'ne. Na'ankure Israeli mopamofo agu'afina kasrino havizantfa huno zamagazegu huga monko avu'avaza hu'naze. <sup>7</sup> Hagi menina maka Israeli vahemotma na'a hugahumpi nanekea hiho. <sup>8</sup> Hagi anagema hige'za, maka Israeli vahem'o'za magoke zamagi ante'za amanage hu'naze, Mago'mo'e huno seli noma'rega ovuge, noma'rega ovuge hugahie. <sup>9</sup> Hianagi amanahu'za Gibea vhahera huzamantegahune. Satu zokagoreta kesunkeno, zamagimo'ma efore'ma hania vahem'o'za hatera vu'za hara ome hugahaze. <sup>10</sup> Hagi 100'a Israeli vahepintira 10ni'a vahake nezamavareta, 1tauseni'a vahepintira 100'a vahem'o'za nezamavareta, 10 tauseni'a vahepintira 1tauseni'a vahetfami zamayaresunke'za Gibea kumate vahem'o'zama Israeli vahem'o'za amu'nompima kasrino havizantfama hu'nea monko avu'avazama hu'nazare'ma ha'ma ome huzmante'za zamavu'za zamagesazama hanaza sondia vahemokizmi ne'zana eri'za vugahaze. <sup>11</sup> E'ina hige'za maka Israeli emerimago hu'za Gibea kumate vhahera hara ome huzmante'naze. <sup>12</sup> Ana nehu'za Israeli vahem'o'za Benzameni nagatega amanage hu'za kea atrazageno vu'ne. Nankna kefo avu'avaza amu'nontamifina fore hu'ne? <sup>13</sup> E'ina hazenke vahetmina Gibea kumapintira avre taminketa zamahe frisunkeno, Israeli mopamo'a agru hino. Hianagi zamafuhe'zama Israeli vahem'o'za hazankea Benjamen naga'mo'za ontahi'naze. <sup>14</sup> Ana nehu'za maka Benzameni mopafima me'nea ranra kumatamimpinti vahem'o'za Israeli vhahera hara huzamantenaku Gibea kumate emeritru hu'naze. <sup>15</sup> Hagi Benzameni naga'mofo kumatamimpintira kazinteti'ma ha'ma hu vhahera 26 tauseni'a vahem'o'za eritru hazageno, Gibea kumatetira anampina 700'a han-kave sondia vahetami eritru hu'naze. <sup>16</sup> Hagi e'i ana 700'a ha' vahetmina hoga kazigati hara hu vahetminkino, kumi atifima havema ante'zama osi'zama ahesazana hantaga osugahaze. <sup>17</sup> Hagi kazinteti'ma ha'ma hu vhahera 400 tauseni'a Israeli vhahera eritru hu'za, Benzameni nagara hara huzmante'naku hu'naze. <sup>18</sup> Hagi Israeli vahem'o'za henka hara ome hugahunanki hu'za nehu'za, esera Beteli kumate vu'za Anumzamofona amanage hu'za ome antahige'naze. Ina naga nofimo'za vugota hurantesageta Benzameni nagara hara ome huzmantegahune? Hu'za hazageno, Ra Anumzamo'a amanage huno zamasami'ne, Juda naga'mo'za vugota hu'za vugahaze. <sup>19</sup> Hagi anagema hutege'za Israeli vahem'o'za nantera otiza Gibea kuma tava'onte vu'za seli nonkumazmia ome ki'za mani'naze. <sup>20</sup> Hagi anante Israeli vahem'o'za Benzameni nagara ha' ome huzmante'naku

Gibea kumate ome erimpi hu'za ot'i'naze. <sup>21</sup> Hagi anama hazageno'a Benzameni naga'mo'za Gibea kumapintira atiramiza Israeli vahe'enena hara eme nehu'za, ana zupa 22 tauseni'a Israeli sondia vhahera zamahe fri'naze. <sup>22</sup> Hianagi Israeli vahe'mo'za ana zankura zamagesa ontahi ko'ma hate'ma vunaku'ma emeritru hu'naza kumapi ete hate vunaka atruhu'za mani'ne'za nanekeea hu'za ozeri hankaveti azeri hankaveti hu'naze. <sup>23</sup> Ana hute'za Israeli vahe'mo'za Beteli kumate mareri'za, Ra Anumzamofontega zavi krafa ome nehazageno vuno kinagase'ne. Hagi zavima nete'za amanage hu'za Ra Anumzamofona antahige'naze. Tafuhe'mofona Benzameni nagara hara ome huzamante'naze. <sup>25</sup> Hagi Benzameni naga'mo'za ete mago'ane Gibea kumapintira atirami'za 18 tauseni'a Israeli vahetamina kazinteti'ma ha'ma nehaza vhahera zamahe fri'naze. <sup>26</sup> Hagi anama hige'za maka Israeli vahe'mo'za arimpa fru ofane kresramnama vu ofanena e'neriza, Beteli kumate mareri'za ofa ome nehu'za, ne'zana a'o hu'za mani'ne'za tusi zavi Ra Anumzamofontega netazageno vuno kinagase'ne. <sup>27</sup> Hagi Israeli vahe'mo'za Ra Anumzamofo antahintahi'a erinaku Beteli vu'naze. Na'ankure e'ina knafina Ra Anumzamofo huhagerafi huvempage vogisimo'a Beteli kumate me'nege'za anara hu'naze. <sup>28</sup> Aroni negeho Eleaza nemofo Finiasi ana knafina pristia mani'ne. Hagi Israeli vahe'mo'za amanage hu'za Ra Anumzamofona antahige'naze. Tafuhe'mofona Benzameni nagara hara ome huzmantenumpi atrenune? Hu'za hazageno Ra Anumzamo'a amanage huno hu'ne, Okina zamavarena tamazampi antegahuanki vuta hara ome huzamanteho. <sup>29</sup> Anagema hige'za Israeli vahe'mo'za Gibea Kumate vu'za kafona ome antegagi'naze. <sup>30</sup> Hagi ana'ma hute'za namba 3 knarerko'ma nehazaza hu'za hahunaku Gibea kumate vu'naze. <sup>31</sup> Hagi anante Benzameni naga'mo'za kumazmifintira atirami'za Israeli nagara hara eme huzamantage'za Israeli naga'mo'za zamimi hu'za kumazmimofona afete vu'naze. Hagi Israeli vhahera 30'a vahe Betelima vu kantegane Gibeama vu kanteganena zamahe fri'naze. <sup>32</sup> Hagi Benzameni naga'mo'za amanage hu'naze, kote'ma hu'nonaza huta Israeli vhahera zamahone. Hianagi Israeli vahe'mo'za amange hu'naze, Atreta nefreta zami'mi huta karanka vanunke'za, kumazmia atre'za afete egahaze. <sup>33</sup> Hagi anagema hute'za, maka Israeli vahe'mo'za Ba'al-tamar kumate unehanati'za ete rukrahe hu'za ha'huzamanteku ha'zana ome retro hu'za manizageno, mago'a Israeli vahe'ma Ma'ar-Geba kumate'ma kafoma ante'za mani'nazaretira hahunaku kafona hage'za atirami'naze. <sup>34</sup> Hagi 10tauseni'a Israeli sondia vahe'ma knare'ma hu'za ha'ma nehaza vahe'mo'za, Gibea kumatera hara eme hu'naze. Hagi ha'mo'a tusiza huno hankavetino vu'neanagi, Israeli vahe'mo'zama zamahe hana'ma huzankura Benzameni naga'mo'za ontahi'naze. <sup>35</sup> Ana'ma hazageno'a Ra Anumzamo'a Israeli vhahera zamaza hige'za' Benzameni nagara 25tausen 100'a kazinteti'ma ha'ma hu'ama antahini'ma hu'naza vhahera zamahe'naze.

<sup>36</sup> Hagi ana'ma hazage'za Benzameni naga'mo'za kazana Israeli vahe'mo'za hara huzmagatere'naze. Na'ankure kafoma ante'naza nagaku Israeli vahe'mo'za zamagesa nentahih'i'za Benzameni nagara zami'mi hu'za Gibea kumara atre'za afete e'naze. <sup>37</sup> Hagi ana'ma hazageno'a, kafoma ante'za mani'naza Israeli sondia vahe'mo'za zamagare'za Gibea kumapi ufre'za, ana kumapima mani'naza vhahera kazinteti zamahehana nehu'za,

<sup>38</sup> ana kumara teve tagintazageno teve kumo'a vemagu vemagu huno marerige'za, mago'a Israeli sondia vahe'mo'za nege'za hara agaterone hu'za hu'naze. <sup>39</sup> Hagi Israeli vahe'mo'zama ana tevegu'ma nege'za ete rukrahe hu'za Benzameni nagara zamarotgo hu'naze. Hagi ana zupa Benzameni naga'mo'za 30'a Israeli vahe nezmahe'za amanage hu'naze. Ko'ma hu'nonaza huta Israeli vahera hara hago huzamagaterone. <sup>40</sup> Hianagi Benzameni naga'mo'zama rukrahe hu'zama kazana teve kumo'a kumazmifintira vemagu vemagu huno hampompi marerige'za ke'naze. <sup>41</sup> Ana'ma hige'za Israeli vahe'mo'za rukrahe hu'za Benzameni nagara hara huzamantage'za, Benzameni naga'mo'za tusi koro hu'naze. Na'ankure zamagrama antahi'za ke'zama hazana ra hazenkefi ufrone hu'naze. <sup>42</sup> Hagi anantetira rukrahe hu'za ka'ma kokampi Israeli vahe'mokizmi korora fre'naze. Hianagi kumazmima omeri havizama hute'za aza vahe'mo'za zamavatga hu'naze. <sup>43</sup> Hagi Benzameni nagara Noha kumateti agafa hute'za zamaratgo hu'za manigasa osu Gibea kuma'mofona kantu zage hanati kaziga vu'naze. <sup>44</sup> Hagi ana knarera Benzameni nagara hankavetiza ha'ma huga sondia vahetamina, 18tauseni'a vahe zamahe'naze. <sup>45</sup> Hagi maniza naga'mo'za hagage kokampi Rimon havema me'nerega fre'za nevazageno 2tauseni'a vahera karanka ome zamahe'naze. Hagi mago'a vahera zamarotgo hu'za Gidomu kumate 2tauseni'a vahe ome ome zamahe'naze. <sup>46</sup> Hagi ana maka vahe'ma ha'ma huga vahe'ma zamahe'neana 25tauseni'a vahe Benzameni nagara zamahe'naze. <sup>47</sup> Hianagi 600'a vahe'mo'za rukrahe hu'za fre'za hagege kokampi vu'za Rimon havefi 4'a ika umani'naze. <sup>48</sup> Hagi Israeli vahe'mo'za Benzameni nagamofo kumatamimpintira maka vahe'ene bulimakao afu'zaminena zamahe vaganere'za ana kumatmina teve taginte vagare'naze.

## 21

### *Benjameni naga'ma a'nanema avrezami'naza zamofo naneke*

<sup>1</sup> Hagi Israeli vahe'mo'za Mizpa kumate omeri atru hu'za amanage hu'za huvempa hu'naze, Magore huno magotimo'a mofa'a atresigeno Benzameni nagatera uomaregosie. <sup>2</sup> Hagi ana'ma hute'za Israeli vahe'mo'za Beteli kumate Ra Anumzamofo avuga vu'za tusi zavi krafa nehzageno vuno kinaga omeseg'eza, <sup>3</sup> zamagra amanage hu'naze, Ra Anumzana Israeli vahe Anumzamoka nahigeno Israeli vahepintira mago naga'mo'za fananea hu'za nehaze? <sup>4</sup> Hagi mase'za anante knarera nanterame oti'za kresramna vu ita trohu'za, anante kresramnama vu ofa nehu'za, zamarimpa fru ofanena hu'naze. <sup>5</sup> Hagi anante amanage hu'naze, Israeli vahepintira ina naga'mo Ra Anumzamofo avugama atruma nehumpina atrua osu'naze? Na'ankure zamagra kora huvempa hu'za amanage hu'naze, Iza'o Ra Anumzamofonte'ma Mispama omesimofona ahe friho. <sup>6</sup> Hagi Israeli vahe'mo'za nezamafunkura Benzameni nagara zamasunku hunezamante'za amanage hu'naze, menina Israeli vahepintira mago nagamo'a fanane hie. <sup>7</sup> Hagi tagra Ra Anumzamofonte huvempa huta mofa'netia ozamigosune huta hunonanki, inankna huta a'ne zamigura hakegahune? <sup>8</sup> Hagi amanage hu'naze, Israeli vahepintira ina naga'mo'za Ra Anumzamofo avuga Mispa kumatera ome'naze? Hagi keho Jabes-Gileatitira mago vahera Ra Anumzamofo avuga ome'ne. <sup>9</sup> Na'ankure Israeli vahe'mo'zama vahe'ma hamprizafina Jabes-Giliati vahera ana zupa omani'naze. <sup>10</sup> Hagi e'ina hu'nazagu koro osu'za

hanaveti'za ha'ma nehaza vahera, Israeli vahe'mo'za 12tauseni'a hunezamante'za amanage hu'naze, vuta Jabes-Giliati kumate vahera maka a' mofavre'zamine zamahe hana hiho.<sup>11</sup> Hagi tamagra amanahu hugahaze, maka vene'hene, vene'nemema mase'nesia a'nenena zamahehna hiho.<sup>12</sup> Hagi Jabes-Gileati vahepintira 400'a venema omase mofa'neramina hake'za zamavare'za seli noma ki'za mani'naza kumate Kenani mopafi Sailo e'naze.<sup>13</sup> Hagi ana'ma hazage'za maka Israeli vahe'mo'za Benzameni naga'ma Rimoni havekampima fraki'zama mani'naza nagatega kea atre'za amanage hu'naze, Menina tamagri'enena hara osuta fru huta manigahune hu'za hu'naze.<sup>14</sup> Hagi anagema hazage'za Benzameni naga'mo'za kuma'zmirega ete vazage'za Jabes-Giliatiti'ma zmvare'naza a'nea zami'naze. Hianagi ana maka vene'nemo'za ana a'nea erizamentera osu'nazanki mago'amo'a amne mani'ne.<sup>15</sup> Hagi Benzameni nagakura Israeli vahe'mo'za zamasunku hu'naze. Na'ankure Israeli vahepina Ra Anumzamo'a zamatrege'za fanane hazageno kankamu fore hu'ne.<sup>16</sup> Hagi anante Israeli kva vahe'mo'za amanage hu'naze, Benzameni nagapintira ko a'nezmia zamahe hana hu'nonanki, a'ma e'ori'naza vene'neramina igati a'neramina haketa avrezamigahune?<sup>17</sup> Hagi amanage hu'naze, Zamahe hanama hunke'zama osi'ama maniza Benjamen naga'mo'za mofavre ante'nageno Israeli vahepintira zamagia fanane osanie.<sup>18</sup> Hianagi mofa'netia zaminunke'za ara e'origosaze. Na'ankure ko Israeli vahe'mo'za hvempa hu'za Benzameni nagara mofatia ozamigosune hu'naze. Hagi izo'oma mofa'ama amisimofona Anumzamo'a kazusi huntegahie hu'za nehu'za,<sup>19</sup> amanage hu'naze, Keho maka kafumofona Sailo kumatera Ra Anumzamofoma musema hunteno ne'zama kreno nekna etere nehie. Hagi ana kumara Beteli kuma'mofo noti kaziga megeno, Betelitima marerino Sekemuma vu'nea kamofona zage hanati kaziga megeno, Lebona kuma'mofona sauti kaziga me'ne.<sup>20</sup> Hagi anage hu'za Benzameni naga'ma a'ma e'ori'naza nagakura huzmante'naze, Vuta waini hozafi kafona ome anteta,<sup>21</sup> mani'neta negenkeno Sailo kumateti'ma avoma renaku'ma atirami'za e'naza mofa'neramina fraki'nesafintira ame huta atiramita zamavazu huta freta kumatzmirega eta ara emeri zamanteho.<sup>22</sup> Hagi anama hanageno'ma zamafah'e'zane zamaserah'e'zanema tagrite'ma e'za fragema hanageta, amanage huta zamasamigahune. Muse huramantonanki tamasunku hunezamanteta zamatrenke'za ara zamavareho. Na'ankure Jabes-Giliati vahe'ma zamahetra a'nema avre zamunana erizamentera hvuvaga ore'naze. Hianagi ana mofa'nea tamagra'a ozami'nazankita hvuvempama hu'naza zantera knazana e'origahaze.<sup>23</sup> Anage hazage'za Benjamen naga'mo'za anama zamasamizaza hu'za avoma renakuma Sailo kumapinti'ma atirami'za aza mofa'nea zamavare'za fre'za erisantima hare'naza mopazmirega vu'za ara omeri zamante'za havizama hu'nea kumazmia omeri so'e hutere hu'za ki'za mani'naze.<sup>24</sup> Hagi ana knazupa Israeli vahe'mo'za ana kumara atre'za erisantima hare'naza mopazmirega, naga nofi zamirega vu'za e'za hu'naze.<sup>25</sup> Hagi ana knafina Israeli vahe'mokizmia kinia omani'neanki'za, mago'mago'mo'a kegeno'ma avure'ma knare'ma hiazana hutere hu'ne.

## Rut Ruti Avontafere

### *Mago nagapi zamaga'zane, fri'zane fore hu'nea nanake*

<sup>1</sup> Korapa'ma keaga refakohu vahe'mo'za (jasi) mopa kva hu'naza knafi, tusi'a zamagate'za Juda mopare fore higeno, mago nera Betlehemu, Juda mopareti ne'mo, osi'agna Moapu umaniku nenarone, tare ne'anе zamafahreno vu'ne. <sup>2</sup> Ana ne'mofa agi'a, Elimeleki'e, nenaro agi'a Naomi'e, hagi tare ne'amokizni znagi'a, Maloni'ene, Kilionike. Efrata naga nofipintira Betlehemu Juda mopafinti Moab mopare e'za eman'i'naze. <sup>3</sup> Ana mopare mani'nageno, Naomi neve, Elimeleki'a frigeno, Naomi'a tare ne'mofavre'ane zamagraku mani'naze. <sup>4</sup> Higeno tare ne'amokea Moapu mopareti mofatre ara eri'na'e. Mago'mofa agi'a, Opa'e, hanki mago'mofa agi'a Ruti'e. Ana nehu'za 10'i' Zagegafu naza anantega mani'naze. <sup>5</sup> Anante mani'nageno Naomina, tare mofavre'a Maloni'ene, Kilionikea anazanke hu'ne fri'na'e. Ana hzageno, Naomina, tare mofavre'ane, neve'ene, fri'zageno, zavi neteno agraku mani'n!

<sup>6</sup> Moapuma mani'neno antahiamma Ramo'a asomu huntogeno, agri'a vahepina ne'zamo'a avitema higeno'a, Naomi'a mopa'are vunaku retro ne'higeno, nenoferokea, agrane vunaku tro hu'na'e.

### *Naomi'ene, Rutike Betlehem vu'na'a nanake*

<sup>7</sup> Nenofero a'trene, agrane (Naomi) nemaniza mopa atre'za vu'za Judama nevaza kante uhanati'naze. <sup>8</sup> Anante Naomi'a tarega nenoferokiznigu anage hu'ne, Taregamotna'a kama antahi'o, antatani'amofo nontega vi'o. Fri'naza nagate'ene, nagrite'enema tanagrama ha'a avu'ava zanteria, Anumzamo'a tanagririra ana huno knare avu'ava huranantesie. <sup>9</sup> Kasefa ve eritna nonkuma huta manisapina Anumzamo'a knare'za huno kegava huranantegahie huno neznamino, zanagi antako nehige'za krafa hu'za zavi ate'naze. <sup>10</sup> Hianagi zanagra anage hu'na'e. O'e, tagra kagri vahetega kagrane vugahu'e, huke asmi'na'e. <sup>11</sup> Hu'neanagi, Naomi'a kenonazni'a anage hu'ne, Kuma tani'arega etetna vi'o, mofa'nimotna'a, Judama nagranema vana'a zamofona knare kegafa omane'ne. Nagra knare osu'noanki'na, mofavrea kasentesnugeno, ana mofavremo'a nernave zana osugahie. <sup>12</sup> Kuma taniarega etetna vi'o, mofa'nimotna'a! Nagra ko tavava te'noanki'na ete'na aravea osugahue. Hagi nagrama meni kenage'ma ve eri'na mofavre zaga kasezamantegahue huasina, <sup>13</sup> tanagra knare zanavega ante'nesanke'ne, arave huga kantera ra hate'sino? Tanagra knare vea e'oritna ana kna'afina amnea mani'tesino? O'e, mofa'trenimotna'e, nagranena ovu tfaza hugaha'e. Na'ankure tanagrama eri'a knazana agtere'na nagra eri'noe, Ramo'a nagrira nazeri haviza hu'ne. <sup>14</sup> Tusi krafa hu'za mago'ene zavira ate'naze. Anante Opa'a nenoferona azerino antako nehuno ete vu'ne. Hianagi ana huo huno huma nenteana, Ruti'a tusi'za huno Naomina agzafeno anuki hampo'na hu'ne. <sup>15</sup> Naomi'a anage hu'ne, Ko, neganunkna'a, vahe'ane, anumzama'a nehirega eteno nevie. Neganunkna amage antenka kumaka'arega vuo, huno asmi'ne.

<sup>16</sup> Hianagi Ruti'a ke'arera amanage hu'ne, Natrenka vuo hunka kagra tutura huonanto. Na'ankure, kagrama inantega vusanana, anantega

nagra vugahue. Inante manisanana, nagra anante umanigahu'e. Kagri vahe'mo'za, nagri vahe manigahaze. Kagri Anumzamo'a, nagri Anumza segahie. <sup>17</sup> Inante'ma kagrama fri sneranta, anante nagra frisnuge'za ase nantegahaze. Anumzamo'a nagrira tusi'a kna nami-gahie, nagrama nehua kema amage'ma osnugen'o'a, magoke'zana fri'zamoke tazeri pasegahie.

<sup>18</sup> Naomi'ma kegeno Ruti'ma hampo'natino agrane vugahue'ma higeno'a, tutu'ma huno'ma huma nenteretira anante atre'ne. <sup>19</sup> Higeke ana tarega'moke vuvava hu'ne Betlehem uhanatina'e. Betlehem ufrake'za, ana kumapi miko vahe'mo'za uma hnatin'a zankura tusi muse hu'naze. Ana nehu'za kumate a'ne zagamo'za anage hu'naze, Ama ara Naomio?

<sup>20</sup> Hianagi, Naomi'a ke nonazmi huno, Naomi'e (knaremo'e) hutma nagia ohetma, Mara'e (aka he'ne) huta nagia aheho, na'ankure Miko'zante Kva Hu'nea Hanave Anumzamo (Sovren) knare'zana huonante'ne. <sup>21</sup> Amareti'ma atre'na vu'noana maka'zampina avite'na vu'noe, hianagi Ramo'a nazampi omane kno eteno navareno e'ne. Na'a higetma Naomi'e huta nagia nehaze, negazo Ramo'ma nagri'ma ha'ma renenanteno, Miko'zante Kva Hu'nea Hanave Anumzamo (Sovren) nagri'ma nasuzane, natazama nemamiana?

<sup>22</sup> E'ina higeno, Naomi'a nenofero Moabuti a' Ruti'e. Moabuti'ma Betle-hemima ehanati na'ana, bali hoza agafa hu'za traga nehaza knafi e'na'e.

## 2

### *Boasi hozafi Ruti'a, eri'za eri'neana naneke*

<sup>1</sup> Hagi ana knafina Naomina neveragapinti nera mani'neankino agi'a Boasi'e. Agra Elimeleki naga nofipinti afufeno ne' mani'nege'za, rama'a vahe'mo'za ke'za antahi'za hu'naze.

<sup>2</sup> Mago zupa Ruti'a Moaputi a'mo, Naomi asmino, Natrege'na hozafi vu'na atresaza bali raga knarerema hunantesage'na tragama hanaza naga zamage nevu'na zogi'neno. Higeno Naomi'a mofa'nimoka, tagri tavutvakinka amne vugahane huno hunte'ne. (Diut 24: 19) <sup>3</sup> Higeno Ruti'a vuno bali raga traga nehaza vahe zamage nevuno evuramiam'a zogi atru huno vu'ne. E'i ana eri'zama eri'neana Elimeleki nagapinti ne' Boasi hozafi eri'zana eri'neankino agra Boasi hoze huno ontahi'ne.

<sup>4</sup> Anama nehia knafi Boasi'a Betlehem kumateti eno, hoza traga nehaza vahe'agu kezatino Ra Anumzamo'a tamagrane manigahie, hige'za zamagra nona'a, Ra Anumzamo'a asomu hugantesie, hu'za hu'naze. <sup>5</sup> Boasi'a, hoza traga nehaza vahe'mokizmi kva ne' antahigeno, Amu zahufa ara aza naga nofipinti a' eman'i'ne? <sup>6</sup> Hagi bali traga nehaza vahe'te kva ne'mo anage hu'ne, Agra Moabuti zahufa are, Moabu kumateti Naomi'ene magoka ena'e. <sup>7</sup> Ruti'a eme nantahigeno, Knare bali tragahu vahe'mokizmi zamage nevu'na, bali raga ko'nama ananekisafinti evu ramisiama'a zogi atru hutere hugaho? Huno hige'na, knarere hunte'noe. E'neregati nantera agafa huno hamponatino tusi eri'za manigsa osu enerino, tona nompina osi'a kna manigsa hu'ne.

<sup>8</sup> Higeno Boasi'a anage Rutinku hu'ne, Mofanimoka antahi anker, mago hozafina atrenka vunka bali raga ome zogi atru osutfa huo. Kagra ama'na hozafinti'ra, atrenka ru hozafina ovugahane. Eri'za a'ne nagan'i'ane tragotenka eri'zana erigahane. <sup>9</sup> Ke ankerenka vene'nemo'za e'ina hozafi eri'zana eri'zanki nehunka, eri'za a'ne naga zamage huo. Vene'nemo'za kvako osiho hu'na nagra zamasmigahue. Kagri'ma tinku

kavesisnigenka, vunka vene'nemo'za ome afi'za eme ante'naza kavofinti afinka no. <sup>10</sup>Ruti'a agiafi rena reno avugosa mopafi hunteno, agrikura anage hu'ne, Nahigenka nagrira knare'zana hunantenka, nagrikura kagesa antahi nenamine, nagrama ru mopareti a'ma mani'noana? <sup>11</sup>Higeno, Boasi'a nona'a Rutinku anage hu'ne, Maka'zama negave'ma fri'nereti'ma negnoferoma huntenko e'nana'zane, negafane, anta'kane, mopaka'anema atretenka kora antahinka, kenka osu'nana vahe'enena emani'nana kagenke ka'a ko nagrira nasmige'na antahi'noe. <sup>12</sup>Anama hu'nana nona'a, Ramo mizana kamisie. Knare kvukva zanteria Israeli Ra Anumzamo nona huno ante avitegantesie, kagrama kva hunante'snie, hunkama hu'nana Anumzamo asomu hugantesie. <sup>13</sup>Anante Ruti'a anage hu'ne, Kagra knare'za nagrira hunenantane ramoka, na'ankure nagra mago kagri eri'za ara omani'noanagi, kagra nazeri so'e nehunka, knare keaga hunami'nane.

<sup>14</sup>Henka ne'za nenaza knare, Boasi'a Rutinku anage hu'ne, Amare enka breti eme nenenka, hagi breti ka'a vinega timpi refru hunka no! Higeno bali tragahu vahe'mokizmi zamasoparega umani'negeno tevefi kre hagege hu'naza bali raga refko humigeno Ruti'a neteno amu higeno mago'a eriri'ne.

<sup>15</sup>Anante Ruti'a otino bali raga eri atru hunaku nevigeno, Boasi'a eri'za vahe'a zamasmino, Atrenkeno ama a'mo'a bali raga ko'na'ma anakinte'naza amu'nompi vano nehuno zoneginigeta ahe onatiho. <sup>16</sup>Anahu kna hutma agri tfana, ko'na anakintepintira raga'a rmina avazuhu atre'nenkeno agra zogirino, hagi i'o hutma huonteho.

<sup>17</sup>Ana higeno Ruti'a hozafinti bali raga zogi atru nehigeno vuno kinaga se'ne. Anante agrama zogi atru huno hareno eriri'nea bali rgamofo kna'amo'a 10ni'o, 13ni'a kilo naza fore hu'ne.

### *Ruti'a, Naomi hirega vu'nea naneke*

<sup>18</sup>Hagi Ruti'a zogirino, erino rankumate vigeno, nenofero'a nama'a zogirino e'neo ke'ne. Agra mago'a kre hagegehu balima feru nenenego amu'ma higeno eriri'nea bali raga ne'zana Naomina hefimi'ne. <sup>19</sup>Naomi'a, nenoferona amanage huno antahige'ne, Inante menina bali raga eritru hu'nane? Iza hozafi eri'zana eri'nane? Aza'o kagriku'ma agesa antahino kza hu'nesimofona asomu huntiegahie. Higeno Ruti'a nenoferona aza'ene eri'zana eri'neo, nesmino anage hu'ne, Nagrama menima eri'zama erinte'noa ne'mofo agi'a, Boasi'e huno asmi'ne. <sup>20</sup>Naomi'a nenoferonku anage hu'ne, Ra Anumzamo'a agrira asomu huntiegahie. Na'ankure Ramo fri'naza nagakura age okanino, mani'nona nagara so'e hunerante. Anante Naomi'a, Rutina asmi'ne, Ama'na nera tagri tvate kora mani'neankino, agra tagri kegava hurantegahie. <sup>21</sup>Ruti, Moapu a'mo ke nona'a anage hu'ne, Mago'anee nagriku anage hu'ne, Kagra eri'za vaheni'a mokizmi zamate manitere nehnanke'za nagri hozafinti ne'zana tragahu vagaregahaze huno nasm'i'ne. <sup>22</sup>Naomi'a, anante nenofero Rutina anage huno asmi'ne, Mofa'nimoka agri eri'za mofa'nene tragotenza eri'zante vnanana knare hugantegahie. Na'ankure ru vahe hozafi'ma eri'za omerisanana, hazenkezamo kvufare egahie.

<sup>23</sup>Ana higeno Ruti'a, Boasi eri'za mofane zagane tragoteno bali raga zogino eritru nehigeno, bali hozama tragahu eri'zamo'a vagaregeno, witi hozama tragahu eri'zamo'enena anante vagare'ne. Ana eri'zama vagaregeno'a Ruti'a nenofero'ene mani'ne.

## 3

*Naomi'a Ruti avumro ante'nea naneke*

<sup>1</sup> Hagi mago zupa Naomi'a nenofero Rutinkura amanage huno asmi'ne, Mofa'nimoke, venema tragotenka noma mani'sana vahera nagra hakre'na kegantesugeno kagrira kegava huganteno kagu vazisigenka knare hunka manigahane. <sup>2</sup> Menina Boasi eri'za mofa'ne zagane tragotenka eri'za eri'nana nera, tagri tvate knampatvie. Ko! Meni keragera, bali raga hare kuma tro hunte'nere bali raga akru hategahie. <sup>3</sup> Hagi kagra ti fretenka, mna nevia msave kvufarerera nefrenka, knare kukenaka'a kvate eri hutenga, bali rgama hare kumate uraminka vuo. Hianagi, ana ne'mofo avurega osunka ufraki'negeno ne'zane, tinena nevaga reno. <sup>4</sup> Hagi agra retro huno vaseku'ma hanigenka, vsesia kumara ke ankerenka, inante masesifi kavua ketenka, agiarega omeri vakarenka umase'negeno, mago'azama husana zana kasamigahie. <sup>5</sup> Ruti'a, ke nona huno Naomina asmi'ne, Hakare kema nasmina zana, nagra amne hugahue.

<sup>6</sup> Higeno Ruti'a, bali raga hare kumate vuno nenofero'ma maka asmino, e'ina huo huno asmi'nea kante ana hu'ne. <sup>7</sup> Boasi'a ne'zama'a nehna huteno muse nehuno, bali rgama eri kevu vazinte'pinka mago asoparega umse'ne. Anante Ruti'a tkaureno ako heno, Boasi agarega frankera omeri zakeno umase'ne. <sup>8</sup> Mase'nereti kerage amu'nompi mase rukrahe huku nehuno, anante keana mago a'mo agri agiarega mase'negeno keteno antri hu'ne. <sup>9</sup> Boasi'a anage hu'ne, Kagra azage? Huno antahigegeno, ke nona'a anage hu'ne, Nagra Ruti'ne, kagri eri'za aki, a' navrento, na'ankure tagri naganofi'mokizmi zamesi'zana, kagra Elimelekina mago korankinka, kagrade taza hugahane. <sup>10</sup> Boasi'a anage hu'ne, Mofa'nimoka Anumzamo'a asomu hugantegahie. Kagra vagare museza hu'naverina zamo'a, pusante musezana agatere, kasefa verero, fenoma'a me'nea netero, fenoma'a omne netera, a' erigantenogura zamaririnka vono osu'hane. (Diut Kas 25:5-10) <sup>11</sup> Menina mofa'nimoka korera osuo, maka zanku'ma nantahigesanke'na, nagra amne hugantegahue. Na'ankure hakare ra kumapi vahe'nimo'za hago knare kavukva ene a' mani'nane hu'za kage'za antahiza hu'haze. <sup>12</sup> Menina tamage, nagra kvate vaheka'a mani'noe. Hianagi, nagrira naggereno magora tamazahu nera mani'ne. <sup>13</sup> Hagi meni kenagera ama anante masenegeno, masa hinkena nanterampi a' erigantegahue haniana knare hugahianki, atregeno agra ana hino. Hianagi anama osugahue'ma haniana, nagra tamage hu'na hvempa nehue, Ra Anumzama mani'negu nagra ara erigantegahue. Amare mase'negeno ko atino.

<sup>14</sup> Higeno Ruti'a agafi mase'nereti, masa osu'negeno ko'atu hanimpi vahe'mo onke'are vu'ne. Boasi'a otino amanahu ke asami'ne, mago a'mo bali raga hare kumapi eno emasenereti vie, kea ontahitfa hiho. <sup>15</sup> Nago'ane agra anage hu'ne, amega kavufare'ma ruvanare'nana kena eritarenka azeri hampona huo, higeno azerigeno, 6si'a zupa balia herfi anteno anakino afunte kofi ante'ne. Ana huteno Boasi'a ra kumapi ufre'ne. <sup>16</sup> Ruti'a nenoferontega uhanatigeno, Naomi'a antahige'ne, Mikazamo'a inankna hugante'ne, mofa'nimoka? Higeno Ruti'a, maka'zama Boasi'ma hunte'nea zana asmi'ne. <sup>17</sup> Ruti'a anage hu'ne, Ana bali rgamofona, 27ni'a kilo naza kna'amo'a hu'nea, herfinteno nenamino anage hu'ne, Neganoferontega vusunka, kza avapara ovugahane hu'ne. <sup>18</sup> Hagi anante Naomi'a anage hu'ne, Akohenka mofa'nimoka avega ante'nenga ko, naza fore hugahifi.

Na'ankure ana ne'mo'a mani fru osu'neno ana kna'zana mensi eri ante fru hugahie.

## 4

### *Boasi'a ana knaza erifru hu'nea naneke*

<sup>1</sup> Boasi'a marerino ana kumate kasante umani'ne. Anante Boasi'a keana, Rutima asmino kva huntegahie hu'nea ne' egeno, anage hu'ne, Nenfuga amare enka emanio, higeno anante eman'i'ne. <sup>2</sup> Ana hutegeno Boasi'a 10ni'a ranra kuma kva vahe, zamare atru huno anage hu'ne, amare emanilo hige'za zamagra eman'i'zane. <sup>3</sup> Anante Boasi amanage huno ana nera asami'ne, Naomi'a Moabu mopareti e'neno, tagri vahe'mofo Elimeleki mopa mizante atrenaku nehige'na negasmue. <sup>4</sup> Hige'na nagra tamage kazigati kasami fatgo hunaku nagesa nentahue. Amama mani'naza vahe'ene, ranra kva vahe'nimokizmi zamufi, kagrama miza sena aza hugahue hanunka, amne ana huo. Hagi ana osugahue hanunka, nasmige'na antahi'neno. Na'ankure kagra kagota hanke'na, nagra kagri kamage hu'noe. Ana ne'mo'a kenona huno, Nagra mizasena aza hugahue huno hu'ne. <sup>5</sup> Higeno Boasi'a anage hu'ne, Ana mopa Naomi azampinti miza sesana zupa, Moabuti a'ma fri'nemofo kento a' Rutina nafa'aza hunenka, fri'nea ne'mofo naga zam-agima erifore hananke'za, ana naga'mo'za ana mopa erigahaze. <sup>6</sup> Avate korama kvama huntega ne'mo'a anage hu'ne, Nagra mizase'na azahuga osu'noe. Na'ankure e'ina hanu'na nenfa'ma namige'na erisanti hare'noa zana eri haviza hugahue. E'ina hu'negu nagrama huga'zana kagra huo. Na'ankure nagra mizase'na azahuga osu'noe.

<sup>7</sup> Hagi amanahu avu'avara, korapa knafi'na Israeli vahepi me'neane. Mago vahemo'ma mago'zama mizasekuro, azahukura, mago agia ano zafino mago'mofo nemia zane. Higeno amanahu antahi'zamo'a mani'zamofo kankamu erifore huno Israeli vahera aza nehia zane.

<sup>8</sup> Ana higeno, Rutima kegava huntega ne'mo'a, Boasinku anage hu'ne, Kagraka'a suza miza'so, nehuno aga nona zafi'ne. <sup>9</sup> Anante Boasi'a ranra vahaku'ene, mika vaheku anage hu'ne, Tamagra negesage'na tamagri tamufi menina Naomi azampintira, Elimelekima, Killion'i'ma, Maloni zantamima me'neana, nagra miza segahue. <sup>10</sup> Nagra ana zanke hu'na, Moaputi a' Rutina azeri nafa'a nehue, Maloni kento a'mo nagri a' mani'neno, fri'nea ne'mofo agi fanane hu'zanku zamagia erifore hanige'za ana mopare ene, vahe'afine, kuma'afinena fanane osugahie. Mika vahe'mota menina amazana tamufinti negaze,

<sup>11</sup> huno higeno ana kumamofo kasante mani'naza vahe'ene, kumate ranra vahe'ene mika'moza hu'za, Tagra negone, Ra Anumzamo azeri so'e hanigeno nonka'afima esnia a'mo'a, Resoli'ene, Liakema, Israeli vahe kse hakare huna'a kna hugahie. Hanigenka kagra Efrati naganofipi ra kagi erinka Betlehemia feno ne' manigahane. <sup>12</sup> Mago'ene nagakamo'za, Peresi naga kna huza, Judanteti Tamari'ma kasente'nea ne'mofo nagapinti, Ra Anumzamo ama a'pinti mofavre zaga kamigahie.

### *Naomina negeho fore hu'nea naneke*

<sup>13</sup> Higeno Boasi'a, Ruti a' avregeno nenaro'za higeno, anteno mase'ne. Ramo azeri knare huntegeno agra amu'ene huno ne'mofavre ksente'ne.

<sup>14</sup> Anante a'nemo'za Naominku anage hu'naze, Ra Anumzamofo agi'a erisga hanune, na'ankure meni ama knafina kzahu vahera omani'ne huno onka-tre'ne. Ama mofavremo Israeli vahe motafina ragi erigahie. <sup>15</sup> Agra nomani

zanka'a kzeri muse nehuno tavava'ma resankeno'a knare huno kegava hugantegahie, na'ankure neganofero'a, seveni'a ne'mofavre zaga zamatagtere'no, agra avesi kantega'chie! <sup>16</sup> Anante Naomi'a ana mofavre avreno, agra'a asumpi anukino kegava hu'ne. <sup>17</sup> Magopi nemaniza a'nemo'za, anage hu'naze, Mago ne'mofavre Naomi'na fore humie! Obeti'e hu'za agi'a antemi'naze. Obeti'a raseno Jesi ksentegeno, Jesi'a, Deviti nefaza hu'ne!

*Deviti'a, Obeti naga'nofipinti fore hu'nea naneke*

<sup>18</sup> Ama'ne e'i Peresi naga'nofimokizmi zamagi'e, Peresi'a, Hesroni ksente'ne, <sup>19</sup> Hesroni'a, Rami ksentegeno, Rami'a, Aminadabu ksente'ne. <sup>20</sup> Aminadabu'a, Nasoni ksentegeno, Nasoni'a, Salmoni ksente'ne. <sup>21</sup> Salmoni'a, Boasi ksentegeno Boasi'a, Obeti ksente'ne. <sup>22</sup> Obeti'a, Jesi ksentegeno, Jesi'a, Deviti ksente'ne.

## 1 Samuel Nampa 1 Samueli Avontafere

### Elkanane tare a'tre'amofo naneke

<sup>1</sup> Hagi mago nera Elkana'e nehia ne' mani'ne. Hagi ana nera Rama kumateti Efraemi naga'pinti neokino, nefä agi'a Jerohamu'e. Hagi negeho agi'a Elihu'e, agigomofo agi'a Tuhu'e. <sup>2</sup> Hagi Elkana'a tare a' zanante'neankino magomofo agi'a Hanaki, magomo'a Penina'e. Hagi Penina'a mofavrea ante'neanki, Hana'a mofavre onte'ne. <sup>3</sup> Hagi mago mago kafurera Elkana'a a' mofavre a zamavareno atruhu seli mono noma Sailo me'nerega vuno, Hanavenentake Ra Anumzamofontera monora ome nehuno kresramana vutere hu'ne. Hagi ana knafina Ra Anumzamofo pristi nera Eli mani'neankino, tare mofavre'amokizini zanagi'a Hofanie'ene Finiasike. Hagi zanagra neznafana aza huke ana knafina pristi eri'zana eri'na'e. <sup>4</sup> Hagi Elkana'ma ofama erino'ma egezama kresramnama vazanknarera Peninane maka ne'mofa'anena ana ofafintira ame'a refako huno zamitete hu'ne. <sup>5</sup> Hianagi Hanana Ra Anumzamo'a rimpä erigigeno mofavrea onte'neanagi, Elkana'a avesinteno ante agofetu huno ofama nehfintira rama'a zantami amitete hu'ne. <sup>6</sup> Hagi Ra Anumzamo'ma Hanama rimpama erigigeno mofavrema onte'nea zankura Penina'a kiza zokago ke hunteno, maka knafina azeri haviza hutere higeno, rimpamo'a ata negrigeno asunku zampi Hana'a manitere hu'ne. <sup>7</sup> Hagi kafune kafunema Ra Anumzamofo seli mono nontegama vuterema nehzageno'a, Penina'a Hanana ana kege huntetere nehuno, arimpä eri haviza nehigeno Hana'a zaviraneteno ne'zana onetere hu'ne. <sup>8</sup> Ana'ma higeno'a neve' Elkana'a amanage hu'ne, Nahigenka ne'zana a'o nehankeno krimpa haviza nehigenka zavira netane? Kagra 10ni'a Mofavre antegahananagi antahintahikafina nagrikura kavesinanategahane.

<sup>9</sup> Hagi mago zupa Sailo kumate mani'ne'za ne'zane tinema nevagaretazageno, Hana'a otino nunamu hunaku mono nontega vu'ne. Hagi ana knarerera pristi ne' Eli'a Ra Anumzamofo seli mono nonpima ufre kahante pristi vahe'ma nemaniza trate mani'ne. <sup>10</sup> Hagi Hana'a rama'a asunku nehuno zavira neteno agu'reti huno Ra Anumzamofontega nunamuna nehuno, <sup>11</sup> Ra Anumzamofontega amanage huno huvempagea hu'ne, Ra Anumzana hanavenentake hu'namoka eri'za akamo'na natazana negenka, kasunku hunantenka ne' mofavrea nam'i'nanke'na, ete ana mofavrea Ra Anumzamoka kagri kaminenkeno, mika zupa kagrane manigahie. Hagi ana mofavrema Ra Anumzamokare'ma azeri ruotge hu avame'zama mesiana, azokara oharetfa hugahie. <sup>12</sup> Hagi Hanama antahintahifima nunamuma huno Ra Anumzamofoma antahinegegeno'a Eli'a ana a'mofo agipi keteno mani'ne. <sup>13</sup> Hana'a antahintahifi nunamuna nehigeno, agi'mo'a kaza hi-anagi nunamuna hia agerura Eli'a ontahi'ne. Ana'ma hia zankura Eli'a agesama antahiana Hana'a akati ne'neno negi ne'negahie huno hu'ne. <sup>14</sup> Anage nehuno Eli'a amanage hu'ne, Aka ti nenenka neginenananki aka tima nenanazana atro. <sup>15</sup> Hianagi Hana'a kenona'a amanage hu'ne, ra ne'moka nagra anara osu'noanki, nagu'afina knaza me'nege'na ana knazani'a eri'na Ra Anumzamofontega eme huama nehue. <sup>16</sup> Hagi nagrikura havi are hunka kagesa antahionamio, nagra nasuzampine, nata zampi mani'ne'na nunamuna nehue. <sup>17</sup> Higeno Eli'a kenona amanage hu'ne, Israeli vahe

Anumzamo'a antahigana zana amane kamigahianki, krimpa fru nehunka vuo. <sup>18</sup> Higeno Hana'a huno, ra ne'moka eri'za akamo'na antahinamio, huno Elina nesamino vuno ne'zana ome neneno, mago'ene asuzampina omani'ne.

### *Hana'a ne' mofavre kasente'nea naneke*

<sup>19</sup> Hagi anante nanterana maka naga'mo'za ot'i'za Ra Anumzamofo avuga monora hute'za, ete kumazamirega Rama vu'naze. Hagi Elkana'a nenaro Hanana anteno masegeno, Ra Anumzamo'a Hana'ma nunamuma hu'nea zanku antahimi'ne. <sup>20</sup> Ana higeno Hana'a amu'ene huno ne' mofavre kasenteno, Ra Anumzamofo antahigogeno namie nehuno, Samueli'e huno agi'a antemi'ne.

<sup>21</sup> Hagi anante kafurera Elkana'a a' mofavre'ane kafugu kafugu'ma Ra Anumzamofontega kre sramana nevazaza hu'za kresramana nevu'za, huvempa kema hu'nea kema eri knare hanagu Sailo kumate vu'naze.

<sup>22</sup> Hianagi Hana'a zamagranena marerino ovu nemanino amanage huno nevena asami'ne, Mofavremo'ma amima atresanige'na avre'na vanugeno Ra Anumzamofo nompi umani vava hugahie. <sup>23</sup> Higeno Elkana'a kenona'a hunteno kagrama antahisankeno knare'ma haniaza hunka maninenka mofavre amina neminka azeri ra huo. Hagi mani'negeno Ra Anumzamofonte'ma huvempage hu'nana zana kazeri knare hanie. Higeno Hana'a ovu mani'neno mofavrea kegava huso'e nehigeno, ra huno amina atre'ne.

<sup>24</sup> Hagi ana mofavremo'ma rama huno amima netregeno'a osi mofavre mani'neanagi nerera'a nevreno, 3'a kafu hu'nea bulimakaonki, 10ni'a kilo hu'nea flauaki, mago tafempi waini tina e'nerino, ana mofavrenena avreno Ra Anumzamofo nontega Sailo kumate marerino vu'ne. <sup>25</sup> Hagi ana bulimakaoma ahegis'za, ana mofavrea avre'za Elinete vu'naze. <sup>26</sup> Hana'a amanage huno Elina asami'ne, ranimoke, ko'ma tava'onire'ma amare'ma mani'nankena'ma, Ra Anumzamofoma antahige'noa a' oe.

<sup>27</sup> Ama mofavrea nunamu hu'na Ra Anumzamofo antahigogeno nunamuni'ama antahinamino nami'nea mofavre. <sup>28</sup> Ana hu'negu menina ama mofavrea Ra Anumzamofo ami vagaroankino mani'noma vania knafina Ra Anumzamofo vhahere huno manino vugahie. Na'ankure ana mofavremo'a Ra Anumzamofo nompi mika kna mani'neno, Ra Anumzamofo eri'zana erigahie. Higeno agra anampi Ra Anumzamofo agi erisga hu'ne.

## 2

### *Hana'ma Ra Anumzamofoma susu hunteno nunamuma hu'nea zamofo naneke*

<sup>1</sup> Hagi Hana'a amanage huno nunamuna hu'ne, Ra Anumzamoka nagu'areti hu'na rama'a muse hugante'na kagi ahentesga hue. Kagra'a hanavea naminka nazeri sga hu'nane. Na'ankure naza hunka knazanifintira navrananki'na, ha' vaheni'amofona agizaregahue. Na'ankure nagu'mavazinka navrana zankura muse hugantoe. <sup>2</sup> Hagi Ra Anumzamoka mago'mo'e huno kagri kna huno ruotagera osigeno, mago havemofo hanavemo'a tagri Anumzamoka hankavegnara osu'ne. <sup>3</sup> Hagi avufga rahu kea mago'ane osuno, kagra'ama kazerisga hu kea kagipintira atioramino. Na'ankure Ra Anumzamo'a mika'zama hanana zana ko ke'neankino, kavukava'ma hanana kante anteno, refko hugantegahie. <sup>4</sup> Hagi hanavenentake vahen mani'nonema nehaza vahen mokizmi atia eri futagi netreno, hanavezmi omne vahera zamazeri hanavetige'zma hanave vahen nemanize. <sup>5</sup> Hagi ne'zama nezamu'ma nehaza vahen mokizmia, zamaga netenigeno,

ne'zanku'ma zamaga'ma netenia vahe'mo'za nezamu hugahaze. Hagi naravo a'mo'a 7ni'a mofavre antegahie. Hianagi rama'a mofavrema ante'nea a'mo'a ontegahie.<sup>6</sup> Hagi Ra Anumzamo vhahera ahenefrino, vhahera asimura amigeno nemanigeno, Agra vhahera huntogeno fri vahe kumatega nevigeno, vhahera anampintira azeri onetie.<sup>7</sup> Hagi Ra Anumzamo vhahera azeri amunte nomaneno, feno vhahera azeri retro nehie. Agrake vhahera azeri anteneramino, vhahera azeri antesga nehie.<sup>8</sup> Hagi amunte omane vahe'e'ne mika zanku'ma upa'ma nehaza vahe'enena kugusopafintira zamavaresga huno ra zamagi zāmige'zma marerisa vahe'enena nēmanize. Na'ankure Ra Anumzamo'a ama mopamofo trara tro huteno, mopamofona anante megahane huno higeno me'ne.<sup>9</sup> Hagi fatgoma hu'zma Agri'ma amage'ma ante'za kama vanoma nehaza vahe'mokizmia kegava hunezamanteanagi, kefo zamavu'zmava'ma nehaza vhahera zamatrege'za hanimpi fanene hugahaze. Na'ankure mago vahe'mo'a agra'a hanaverera knarerera huno omanigahie.<sup>10</sup> Hagi Ra Anumzamofoma ha'ma rentesnaza vhahera, Ra Anumzamo'a zamazeri haviza hugahie. Hagi monage huno monafintira nezamaheno, Ra Anumzamo'a miko mopafi vahe'mokizmia kegaga huzamantegahie. Hagi Agra kini ne'a hanavea nemino, masavema frentenoma huhamprima ante'nea nera hihamu hanavea amino azeri antesga hugahie.

<sup>11</sup> Anante Elkana'ene Hanakea ete kumazanirega Rama vu'na'e. Hianagi Samueli'a pristi ne' Eli aza huno Ra Anumzamofo eri'zana eri'ne.

### *Eli mofavremo'za kumi hu'naza naneke*

<sup>12</sup> Hagi Eli mofavre'amokea kefo zanavu'zanava nehuke, Ra Anumzamofona Ra mani'ne huke antahi omi'na'e. <sup>13</sup> Hagi ana pristi ne'tremokea vahe'mo'zama ofama eri'za e'za eme kresramana nevazafintira, eri'za vahe huntakeno 3'a ave me'nea fokureti kavofima krazageno'ma nerea afupintira ome revazu huno eme zanamitere hu'ne. <sup>14</sup> Hagi ana eri'za ne'mo'a afu'ma kre'naza kavofima ana fokureti'ma reno avazuma hia afura, erino Eli mofavrerarena eme zanami'ne. Israeli vahe'mo'zama mika zupa Sailo kumate'ma ofama eme nehazageno'a, e'inahukna zanavu'zanava hutere hu'na'e. <sup>15</sup> Hagi mago'a zupa pristi vahe'mo'za afova'a onkre'nazageno ana eri'za ne'mo'a emenerige'za, pristi vahe'mo'za amanage hu'naze, kretesunkenka erigahane hu'zama nehazageno'a, kavofima kraza afura one-gaha'anki zanagra'a tevefi kreke negaha'e. <sup>16</sup> Hagi anama ofama hunaku'ma nehia pristi ne'mo'a amanage hu'ne, natrege'na afu afova'a kretanena, henka kavesiniam'a erinka vuo, higeno'a pristi ne'mofo eri'za ne'mo'a amanage hu'ne, kagrama namizanku'ma menima kave'ma osiniana, nagra'a erigahue. <sup>17</sup> Hagi Ra Anumzamofo avufina ana netremokea tusi'a kumi hu'na'e. Na'ankure zanagra Ra Anumzamofonte'ma eri'za aza ofa kefenkami atreke tusi'a kefo zantfa hu'na'e.

### *Samueli'ma Sailo kumate'ma mani'nea naneke*

<sup>18</sup> Hianagi Samueli'a pristi vahe'mo'zama nehaza efeke zaza kukena hu'neno, eri'zana Ra Anumzamofo avuga eri'ne. <sup>19</sup> Hagi kafugu kafugu'ma nehazaza huke ofama huku'ma nererake nefake'ma ne-ekea, Samuelina nerera'a osi za'za kukena'a tro huno erinte'neno etere hu'ne.

<sup>20</sup> Hagi anama huteke kuma zaniregama vu'zama nehakeno'a, Eli'a nunamuna huno Elkanane nenaronena asomu kea huznanteno amanage hu'ne, Ra Anumzamo'a ama mofavrema ami vagamarena'a zanteria, nona huno mofavreramina tanamigahie, higeke ete kumazanirega vu'na'e.

**21** Hagi Ra Anumzamo'a Hanana azeri so'e huntegeno amu'ene huno 3'a ne'mofavregi tare mofaki huno kasezmante'ne. Hianagi Samueli'a Ra Anumzamofo avuga Sailo manineno nena hu'ne.

*Eli'a tare mofavre'amokizni zanavumro ante'nea naneke*

**22** Hagi Eli'a ananknafina ozafa re'neanagi tare ne'mofavre'amokea maka Israeli vahe'ma huzamanta'a zanavu'zanava zamofo agenkea antahine. Hagi ana netremokea seli mono nomofo kafante'ma eri'zama eneri'za a'nene monko'za hu'na'e. **23** Hu'negu Eli'a ana mofavre'amokiznigura amanage hu'ne, na'ahigeta e'inahu kefo tanavu'tanava'ma neha'a zamofo tanagenkea miko vahe'mo'za eme nenasamize? **24** Hagi mofavrenimota'a e'inahu tanavu'tanavara osi'o. Na'ankure Ra Anumzamofo vahe'mo'zama huganti kamama nehaza kema nasamiza kemo'a havizantfa nehie. **25** Hagi mago vahe'mo'ma mago vahe'ma kefo avu'ava'ma huntesiana Anumzamo amu'nompina mani'heno eri ante fatgo hugahie. Hagi Ra Anumzamo-fonte'ma kefo zama haniana, i'za erinte fatgo hugahie? Hianagi Eli mofavr-eraremokea nezanafama zanasamia nanekea ontahi'na'e. Na'ankure ko' Ra Anumzamo'a zanahe fri'naku antahi'ne.

**26** Hagi Samueli'a mofavrema mani'neno'a Ra Anumzamofo avure'ene vahe'mofo avure'enena so'e avu'avaza hige'za avesinentazageno Ra Anumzamo'enena avesinte'ne.

**27** Hagi mago knazupa Anumzamofo eri'za vahe'mo'a Elinte eno aman-age huno eme asami'ne, Ra Anumzamo'a amanage hu'ne, Isipima Fero agoragama kagehe'zama mani'nage'na zamagrithera Nagra'a nazeri ante amara osu'nofi? **28** Hagi neramageho Aronina maka Israeli naga nofip-intira Nagra'a huhampri antogeno pristi vahe zaza kukena hu'neno, Nagri navuga pristi eri'zana kresramna vu itarera marerino e'nerino, man-anentake'zana kremla vu'ne. Hagi mika Israeli vahe'mo'zama ofama tevefima haza ne'zana, miko kagri kagehe'i pristi naga zami'noe. **29** Hagi nahigeta Nagrite'ma Israeli valte'mo'zama kresramnama hihoma hu'na huzmantehoa kante ante'za noniafima ofama eme haza ofa antahi on-amike, renkrerera nereke eri havizana hu'na'e. Hagi nhigenka tare mofavreka'a ra zanagia nezanaminka, Nagria ra nagia onami'ne? Na'ankure knare afu'ma Nagrite'ma ofama eme hazana, tamagragukera antahita neneta afovagera hu'naze. **30** E'inahu zama hanku Israeli vahe Ra Anumzamo'a anage huno hu'ne, Kagri naga'ene kagehe'i naga'mo'za pristi eri'zana erivava hugahaze hu'na hu'noanagi, anara osugahaze. Na'ankure Nagri'ma ra nagima namisamokizmia, ra zamagi zamigahue. Hagi Nagri nagima eri haviza hanamokizmia, zamazeri henkami atregahue. **31** Hagi antahih, mago kna ne-eankina hanavetamia erinetrena, tamaha'e'i hanavea eritra'nena tamagri naga'pina magore huno ranra vahera omanigahie. **32** Hagi tamagra negetma kanive neresege'na Israeli vahera asomura huzamantegahue. Hianagi tamagri naga'pina, magore huno ozafareno ranra vahera mani'nenageta ke vava osugahaze. **33** Hagi ana hutesuge'zama ofri'zama magoke magoke'ma manisaza vahe'mo'za zamasuzampi nemani-isage'za, mofavrema kasezamantesaza mofavremo'za, ozafa ore'ne'za ame hu'za frigahaze. **34** Hagi tare mofavreka'a Hopni'ene Finiasikea magoke zupage frisakenka, ana maka ke'nimo'a tamage hu'ne hunka antahiga-hane. **35** Hianagi nagri kema antahinamisia pristi ne' azeri oti'nena, Nagri nagu'afine antahizampima me'nea kemofo amage anteno eri'zana ener-ino, miko zupa Nagrama huhamprinte'nua kini vahe'mofo avuga eri'zana

erivava huno vugahie. <sup>36</sup> Hianagi kagri naga'pinti'ma ofri'ma mani'namo'za miko zupa ana pristi ne'te e'za zamare'na emere'za, ne'zama nesunazana omaneanki hurantegeta pristi eri'zana enerita, breti ankrahe'a erita nam-neno hugahaze.

### 3

#### *Ra Anumzamo'ma Samuelima ke hu'nea zamofo naneke*

<sup>1</sup> Hagi Samueli'a mofavre mani'neno Elina aza huno Ra Anumzamofo avuga pristi eri'zana eri'ne. Hagi ana knafina rama'a kafufi Ra Anumzamo'a Israeli vhahera keaga huozami'ne. Hagi magoke magoke knazupa, ava'nagna zana zamaveri hutere hu'ne. <sup>2</sup> Hagi Elina avumo'a agafa huno asu higeno keso'e osuno, mago kinaga Ra Anumzamofo nompi tafe'are mase'ne. <sup>3</sup> Hagi Ra Anumzamofo nompima lamu tavi'ma rekruma hunte'naza tavi'mo'a asura osu'negeno, Samueli'a Hanavenentake Ra Anumzamofo huhagerafi huvempage ante vogisima me'nea seli mono nompi mase'ne. <sup>4</sup> Anante Ra Anumzamo'a Samuelina agihegen, Samuelia kenona huno, Ama mani'noe. <sup>5</sup> Nehuno anampinti Samueli'a otino Elinte vuno, na'anku hanke'na oe, higeno Eli'a huno, Kagrira kea osu'noanki ete vunka umaso. <sup>6</sup> Hagi ete mago'ane Ra Anumzamo'a Samuelina agi higeno, Samueli'a otino Elinte vuno, Ama mani'noanki na'anku hankena oe, higeno Eli'a huno, Nagra kea osu'noanki mofavrenimoka vunka umaso. <sup>7</sup> Hagi Samueli'a Ra Anumzamofona keno antahinora osu'ne. Na'ankure Ra Anumzamo'a kora agritera eama huno keaga higeno keno antahino osu'negu, anara hu'ne. <sup>8</sup> Hagi nampa 3 zugama Ra Anumzamo'a kema higeno'a, Samueli'a otino Elinte vuno, Kagrama kema hanana ama mani'noe huno ome asami'geno anante Eli'a antahi ama nehuno, Ra Anumzamo ama ana risera kea hunei-mie huno antahi'ne. <sup>9</sup> Hagi Eli'a anage huno Samuelina asami'ne, Ete vunka umasenegeno mago'enema kagima hanigenka, kenona huntenga Ra Anumzamoka eri'za vahekamo'na nentahuanki nasamio hunka huo, huno nesamino ete huntogeno Samueli'a vuno tafe'are umase'ne. <sup>10</sup> Hagi Ra Anumzamo'a tavaonte eme otino ko'ma hu'neaza huno, Samueliwe, Samueliwe higeno Samueli'a huno, Ra Anumzamoka eri'za vahekamo'na nentahuanki nasamio. <sup>11</sup> Higeno Ra Anumzamo'a Samuelina asamino, Antahio Nagra menina Israeli vahepina, antari hanazaza eri fore hugahuinkino iza'o ana zamofo agenkema antahisimo'a antri nehuno na'a fore nehie huno vugahie. <sup>12</sup> Hagi Eli naga'ma zamazeri haviza hugahuema hu'na koro ke'ma huzmante'noa kemofona amage ante'na agafareti eri agafa hute'na zamazeri haviza hume vu'na, ome vagaretenga zamazeri haviza hu vagaregahue. <sup>13</sup> Hagi Eli naga'ma zamazeri haviza hugahuema hu'na kore kema huzmante'noa kemo'a mevava huno vugahie. Na'ankure agri mofavre'mokea kefo zanavu'znavama nehake'na, zanazeri haviza hugahuema huankea, agra antahino keno hu'neanagi, haviza neha'e huno znazeri fatgohu kea ozanasami'ne. <sup>14</sup> E'ina hu'negu Nagra huvempage huankino Eli naga'mo'zama kresramna hanaza ofaretiro, witi ofaretira nona hu'za kumi'zmia apaosegahaze.

<sup>15</sup> Hagi anagema hutegeni'o Samueli'a vuno umase'negeno vuno ko'atune. Hagi nanterana Ra Anumzamofo mono nomofo kafana ko'ma nehiaza huno anagi'neanagi Ra Anumzamo'ma ava'nagna zampima asami'nea nanekema Elima asami'zankura Samueli'a koro hu'ne. <sup>16</sup> Hianagi Eli'a kezatino, Nenamofo Samueliwe, higeno Samueli'a kenona huno, Ama mani'noe. <sup>17</sup> Higeno Eli'a Samuelina antahigeno, Na'ane huno

Ra Anumzamo'a kasaminefi ana nanekea magore hunka eri fra'okinka nasamio? Hagi kagrama ana mika nanekema eri frakisankeno'a Ra Anumzamo'a kagrira mago'ene knazana erinte agofetu huno kazeri haviza hugahie. <sup>18</sup> Anage higeno Samuel'i'a Ra Anumzamo'ma asami'nea nanekea maka asami vagaregeno, Eli'a ana kenona huno, Atregeno Agra'a Ra Anumzamoke agri'ma avesi'nia zana hino.

<sup>19</sup> Anama hutegen Ra Anumzamo'a Samuel'i'ene mani'negeno nena huno rana nehigeno, maka nanekema Samuel'i'ma hu'nea nanekemo'a amnezanknara osu'ne. <sup>20</sup> Hagi noti kaziga Dani kumateti agafa huteno, vuno sauti kaziga Bersiva kumate'ma mani'za uhanati'naza maka Israeli vahe'mo'za Samuelinkura Ra Anumzamofo kasnampa ne' efore hie hu'za hu'naze. <sup>21</sup> Hagi Ra Anumzamo'a Sailo kumatera seli mono nompi mago'ene Samuelintera efore huno kea eme asamitere hu'ne.

## 4

### *Filistia vahe'mo'za ha' hu'za huhagerafi huvempage vogisi eri'naza naneke*

<sup>1</sup> Hagi Samuelima miko ke'ma Israeli vahe'ma zmasamige'za antahite'za hatera vu'naze. Hagi ana knafina Israeli vahe'mo'za Filistia vahe ha' huzmante'naku Ebenesa kumate seli no ome ki'za mani'nage'za, Filistia vahe'mo'za Afeki kumate seli nona eme ki'za mani'naze. <sup>2</sup> Hagi Filistia vahe'mo'za rama'a sondia vahe zamazeri retrotra hute'za, avazuhumpi hu'za nevu'za, Israeli vhahera tusi'a ha' ome huzamante'za 4 tauseni'a sondia vahe ana zupa zamahe fri'naze. <sup>3</sup> Hagi Israeli sondia vahe'mo'zama ha'tetima azage'za kva vahe'mo'za hu'za, na'a higeno Ra Anumzamo'a tatregeno Filistia vahe'mo'za hara hutagateraze? Hagi tagra Ra Anumzamofo huhagerafi huvempage vogisia Sailo kumatetira omerineta hatera nevanunkeno, ha' vahetimo'za tahe'zankura ana zamo tagu'vazigahie.

<sup>4</sup> Anagema hute'za sondia vahe huzmantage'za Sailo kumatetira Ra Anumzamofo huhagerafi huvempage vogisima tarega kazigama Serobimi ankerontrema mani'nakeno Anumzamo'ma amu'nompima nemania vogisia ome eri'naze. Hagi Elina tare mofavrearare Hofani'ene Finiasikea ana huhagerafi huvempage bogisine e'na'e.

<sup>5</sup> Hagi seli nonkuma'ma ome ante'za mani'nfima ana huhagerafi huvempage vogisima eri'za ehanatizage'za, Israeli vahe'mo'za kezanke hu'za rankema hu'naza agasasamo'a mopa azeri tote hu'ne. <sup>6</sup> Hagi ana agasankema Filistia vahe'mo'zama nentahi'za, Hibru vahe seli nonkumapina naza fore nehie, hu'za hu'nazanagi henkama antahi'zana Ra Anumzamofo huhagerafi huvempage vogisi Hibru vahe'mo'za eri'za e'nazanke antahi'naze. <sup>7</sup> Hagi Filistia vahe'mo'za tusi koro nehu'za amanage hu'naze, Israeli vahe'mokizmi mago anumzazamimo seli nonkuma zamifina e'ne, hu'za nehu'za e'inahukna zana kora nonkonaza forehie. <sup>8</sup> Tagra tusi'a hazenkefi manigahu'ne, izi taza huno hankavenentake anumzazmimofo azampintira tavretregahie? E'i ruzahu ruzahu knazanteti ka'ma kopima Isipi vahe'ma zamazeri haviza hu'nea anumzane. <sup>9</sup> Hagi Filistia vahe'mota ru Hibru vahe'mo'zama tagri kazokzo eri'zama eri'nazankna huta, tagra zamagri kazokzo eri'za erisunki, vene'ne mani'nonanki oti hanaveti'neta hara huzmantesune. <sup>10</sup> Hagi ana zupa Filistia vahe'mo'za hanavetiza hara hu'za Israeli vhahera zamarotago hu'za rama'a vahe 30 tauseni'a zamahe fri'zageno manizama'amo'za atre'za fre'za seli nonkuma zamirega vu'naze. <sup>11</sup> Hagi ana zupage huhagerafi

huvempage vogisia Filistia vahe'mo'za zamahe'za nehanre'za, Elina tare ne' mofavre'ararena Hopnike Finiasinena zanahe fri'naze.

### *Eli'ma fri'nea zamofo naneke*

<sup>12</sup> Hagi ana zupage Benzameni nagapinti mago ne'mo ha'ma nehazafinti atreno agareno Sailo kumate vuno kukena'a ome tagoto tagatu nehuno, kugusopa kateno anumpi netreno, asunkura hu'ne. <sup>13</sup> Hagi Eli'a nemania tra'a erino eme anteno kante mani'neno negeno, Ra Anumzamofo huhagerafi huvempage vogisigura tusi agesa nentahino asunku nehigeno, ana ne'mo'a kumapina ufreano ana nanekea zamasamige'za ana rankumapi vahe'mo'za tusi zavi krafa hu'naze. <sup>14</sup> Hagi ana kumapinti'ma zavi krafagema haz-anke'ma Eli'ma nentahino, nazafore nehie? Huno nehigeno ana ne'mo'a ame huno eno ana nanekea eme asami'ne. <sup>15</sup> Hagi ana knarera Eli'a 98'a kafu higeno, avumo'a asu hu'negeno keso'e osu'ne. <sup>16</sup> Hagi ana ne'mo'a Elina asamino, Nagra ha'pintira meni ama e'noe, higeno Eli'a huno, mofavrenimoka inankna ha'mo'a nehifi nasamio? <sup>17</sup> Higeno ana kema erino e'nea ne'mo'a Elina asamino, Israeli vahe'mo'za kore atre'za frageno, Filistia sondia vahe'mo'za tusia vahe zamahazageno, anampina tare ne' mofavreka'ararena Hopnike Finiasikea frikeno, hago huhagerafi huvempage vogisia Filistia vahe'mo'za eri'naze. <sup>18</sup> Hagi Anumzamofo huhagerafi huvempage vogisima eri'naze ke'ma Eli'a nentahino'a amagenaregati traka huno umasegeno, rankumamofo kafante aheno ananke rehantagigeno fri'ne. Na'ankure agra ranafaregeno avufamo'a kna hu'ne. Hagi Eli'a 40'a kafufi Israeli vahe kva mani'ne.

<sup>19</sup> Hagi Finiasi nenaro'a amu'ene hu'neno mofavre ante'za nehia knafi anazana fore higeno, ana a'mo'ma antahiamma Ra Anumzamofo huhagerafi huvempage vogisi'a ha' vahe'mo'za erizageno, nenofero ne'ma frigeno, neve'ma fria kema nentahino'a ame huno ata negrigeno renarenmo mofavrea kasente'ne. <sup>20</sup> Hagi mofavrema kasenenteno fri'zama nehigeno'a, mofavrema azahuno antenemia a'mo'a asamino, ne' mofavre kasentanaki korora osuo, huno asamianagi, ana kenona'a osu'ne. <sup>21</sup> Ana higeno ana mofavremofo agi'a Ikabotie huno antemineankino, ana agimofo agafa'a Israeli vahe'mota Anumzamofo hanavemo'a hago tatre'ne hu'ne. Na'ankure Anumzamofo huhagerafi huvempage vogisia erizageno, nenanofero nera hago fri'geno neve'enena fri'negeno'e. <sup>22</sup> Hagi ana amo'a huno, Anumzamofo hanavemo'a hago Israeli vhahera tatre'ne. Na'ankure Anumzamofo huhagerafi huvempage vogisia hago ha' vahe'mo'za eri'naze.

## 5

### *Filistia vahepima huhagerafi huvempage vogisima umane'nea zamofo naneke*

<sup>1</sup> Hagi Filistia vahe'mo'za Anumzamofo huhagerafi huvempage vogisia ha'ma hu'za Ebeneza kumatetima erite'za, eri'za vu'za Asdoti kumate uhanati'naze. <sup>2</sup> Anama hute'za Filistia vahe'mo'za Anumzamofo huhagerafi huvempage vogisia eri'za havi anumzazimimofo Dagoni mono nompi mareri'za, ana havi anumzazamimofo asoparega tava'oma'are ome ante'naze. <sup>3</sup> Hagi Asdoti kumate vahe'mo'za nanterama oti'za eme kazana Dagoni havi anumzamo'a mopafi traka huno avugati Ra Anumzamofo huhagerafi huvempage vogisimofo avuga mase'nege'za eme ke'za antri nehu'za, ete eri'za noma'are ome retrurente'naze. <sup>4</sup> Hianagi ete'za anante

nanterama ot'i'za eme kazana ete mago'ane Dagoni havi anumzamo'a traka huno Ra Anumzamofo huhagerafi huvempage vogisimofo avuga avugosare-gati mase'nege'za ke'naze. Hagi ana Dagoni havi anumzamofo aseni'ané azantremokea ruhantagike kahantrate me'nazageno avufga'amoke me'ne. 5 E'ina agafare meninena Dagoni havi anumzamofo pristi vahe'mo'zane amane vahe'mo'zama ana Dagoni havi anumzamofo mono no kafante'ma unefre'za, ana kaha tratera zamaga ore'za takaueraze.

6 Hagi Asdotima mani'naza vahe'ene, tva'ozamire'ma me'nea kumatamimpi vahe'enena Ra Anumzamo'a azana rusuteno usgenkna namunteti zamazeri haviza hu'ne. 7 Hagi anazama fore'ma hiazama Asdoti vene'nemo'za nege'za amanage hu'naze, Israeli vahe Anumzamofo huhagerafi huvempage vogisia tagranena omanenianki, erita ome atresune. Na'ankure Agra azana rusuteno hara huneranteno, Dagoni havi anumzantinena hara hunente. 8 Hagi Filistia mopafima mika 5fu'a kuma'ma kvama hu'naza vahezaga ke hutru hu'za amanage hu'naze, ama Israeli vahe Anumzamofo huhagerafi huvempage vogisia na'a hugahune? Hazageno ana ranra kva vahetamimo'za kenona hu'za, Israeli vahe Anumzamofo huhagerafi huvempage vogisia Gati kumate erita viho, hazage'za Israeli vahe Anumzamofo huhagerafi huvempage vogisia eri'za Gati kumate vu'naze. 9 Hianagi ana huhagerafi huvempage vogisima eri'za Gati kumate'ma vazageno'a, ana kumapi vahera ositeti'ma vuno ra vahete'ma vu'neana Ra Anumzamo'a azana rusuteno usagenkna ranra namunteti zamazeri haviza nehige'za tusi zamagogogu hu'naze. 10 Ana hige'za ana huhagerafi huvempage vogisia huzmantazage'za eri'za rankumate Ekroni vu'naze. Hianagi Ekroni vahe'mo'za rankege hu'za amanage hu'naze, Israeli vahe Ra Anumzamo'a vahetia zamahe friku higeta ama huhagerafi huvempage vogisia erita neaze. 11 Hagi miko Filistia ranra kva vahetamina ete ke hutru hu'za amanage hu'za zamasami'naze, amafintira Israeli vahe Anumzamofo huhagerafi huvempage vogisia huzmantenke'za eri'za kuma'arega ometreho. Ana'ma osanazana tagri vahe'mo'za rama'a frigahaze. Na'ankure Ra Anumzamo'a azana rusuteno hara hunezmanege'za, ana kumapi vahe'mo'za fri'zankura tusi koro hu'naze. 12 Hagi zamahema ofri'nea vahera usagenkna namunteti zamazeri haviza hige'za zamaza huzankura krafage hazageno anagamu monarega mareri'ne.

## 6

*Filistia vahe'mo'za huhagerafi huvempage vogisima ete atrazageno Israeli vahetega vu'nea naneke*

1 Hagi 7ni'a ikampi Filistia vahe'mokizmi mopafina Ra Anumzamofo huhagerafi huvempage vogisimo'a me'ne. 2 Filistia vahe'mo'za pristi vahe'ene avune vahe'zamia kehazage'za age'za amanage hu'za zamatihige'za. Inankna huta Ra Anumzamofo huhagerafi huvempage vogisia atre'nunkeno kuma arega vugahie? 3 Hazageza ana pristi vahe'ene avune vahe'mo'za zamasami'za, Israeli vahe'mokizmi Anumzamofo huhagerafi huvempage vogisia amnea atresage'za eri'za ovugahazanki, kumi ofama huzantamine eri'neta erita viho. Hagi anama hanageno ana knazamo'ma vagaresigeta, ama knazana Anumzamo neramie huta antahigahaze. 4 Hagi ana kenona zamire zamatihige'za, inankna zantimi kumi ofa eri'neta vugahune? hu'za hazage'za, golireti 5fu'a usagenkna namu tro nehuta,

5fu'a kfa golireti tro huta erita viho. Na'ankure anahu knazamo'a tamagri'ene 5fu'a kini vahetaminte'enena efore hu'ne. <sup>5</sup> Hagi mopatami tamazeri haviza hu'negu 5fu'a usgenkna namuna golireti tro nehuta, ne'zama neno erivagarea kafaramina 5fu'a golireti tro huta Israeli vahe'mofo Anumzamofoma ami'nageno'ma ra agima erisuno'a, azama rusuteno tamagri'ene anumzatamine mopatamia azeri havizama nehiazana osugahie. <sup>6</sup> Hagi nahigeta Isipi vahe'mo'zane Ferozama hu'nazaza huta tamagu'a azeri hankavenetize. Zamagra Israeli vahe'ma zamazerizana Anumzamo'a antahintahi zami'a zamazeri savri huno knazana zamige'za zamatrazage'za vu'naze. E'ina hu'negu tamagra e'izanku nentahita amefira huomihio. <sup>7</sup> Hagi menina kasefa karisi retro nehuta, anenta'ma antekema anima nemisia tare bulimakao afutrema kora zanagumpina agare namara zafa erinteno reonte'nesia suzantere zanavreta zanarenfe tragotenteta anenta'a ramina zanavreta kegina agu'afi ome zamatreho. <sup>8</sup> Hagi ana karisifi Ra Anumzamofo huhagerafi huvempage vogisia eri nenteta kumi'ma apasente ofe hutama golireti'ma kfane usagenkna namuma tro hu'naza zantamina mago vogisifi anteta erinenteta, ana bulimakaontrena zamatrenkene ana karisia avazuhuke vi'o. <sup>9</sup> Hagi kva hu'neta negenkeno ana bulimakaomokema Bet-Semesi mopa kazigama vanigeta, e'i Ra Anumzamo ama knazana neramie huta antahigahune. Hagi ana'ma osina, agraragisa fore nehie huta antahigahune.

<sup>10</sup> Hagi ana vahe'mo'zama ana kema nentahi'za tare a' bulimakaontrena zanavre'za karisire renente'za, anentazani'a zamavare'za bulimakao kegina agu'afi ome atre'naze. <sup>11</sup> Hagi Ra Anumzamofo huhagerafi huvempage vogisine anama golireti'ma tro hu'naza kafane usagenkna namunema ante'naza vogisia karisifi erinte'naze. <sup>12</sup> Hagi ana bulimakaomokea kana atre'ne vugantigama osu Bet-Semesima me'nea kazigama vu'nea kante vufatgo hu'ne nevu'ne krafa hume vu'na'e. Hagi anama huke nevakeno'a Filistia kva vahe'mo'za zanavarir'i'za Bet-Semesi mopa atupare ome zanatre'naze.

<sup>13</sup> Hagi ana knazupa Bet-Semesi vahe'mo'za hoza agupofi witi hoza nehamare'za kesga hu'za huhagerafi huvempage vogisima nege'za, tusi'a muse hu'naze. <sup>14</sup> Hagi ana bulimakaomokea Josua hozafi Bet-Semesi ehanatiike ra have me'nea asoparega eman'i'na'e. Hagi ana karisia taganavazi'za Ra Anumzante kresramana vunte teve eri'za, ana tare bulimakaontrena znahe'za Ra Anumzamofonte kresramana vu'naze. <sup>15</sup> Hagi pristi vahe'mo'za Ra Anumzamofo huhagerafi huvempage vogisine, golireti'ma tro'ma hu'naza kfane usagenkna namunema ante'naza vogisia eri'za ra have agofetu ante'naze. Ana hute'za ana zupa Bet-Semesi vahe'mo'za Ra Anumzamofontega kre fanane hu ofa nehu'za mago'a ofanena kresramna vu'naze. <sup>16</sup> Hagi 5fu'a Filistia kva vahe'mo'za anzama hazazana kete'za ete ana zupage kuma'zamirega Ekroni vu'naze.

<sup>17</sup> Hagi Filistia vahe'mo'za mago mago kumazamire Gazagi, Asdotigi, Askelonigi, Gatigi Ekrongi hu'za zamente zamente golireti usgenkna namuna tro hu'za Ra Anumzamofontega kumizmima apasezmante ofa ante'naze. <sup>18</sup> Hagi 5fu'a golireti'ma kfa tro'ma hu'za ante'nazana 5fu'a kva vahe'mo'zama kegava hu'naza rankumatamima Ra Anumzamofo huhagerafi huvempage vogisima antazageno'ma me'nea kumataminte huhampri'za tro hunte'naze. Hagi ra havemra Josua hozafima me'nea havemo anzama fore'ma hu'nea zamofo avame'zana me'neankino meninena me'ne.

<sup>19</sup> Hianagi Ra Anumzamo'a 70'a Bet-Semesi vhahera zamahe'ne. Na'ankure Ra Anumzamofo huhagerafi huvempage vogisimofo agu'afinka ke'naza zante anara hige'za 50 tauseni'a vahe'mo'za rama'a vahe'ma fri'naza zanku tusi zamasunku hu'za zavira ate'naze. <sup>20</sup> Hagi Bet-Semesi vahe'mo'za amanage hu'naze, iza ruotgema hu'nea Ra Anumzamofo avurera otigahie nehu'za, iga ama huhagerafi huvempage vogisia atre'nunkeno vugahie. <sup>21</sup> Anage nehu'za ke erino vu vhahera huzmantage'za vu'za Kiriat Jearimi vhahera amanage hu'za ome zmasami'naze. Hago Filistia vahe'mo'za Ra Anumzamofo huhagerafi huvempage vogisia eri'za eme atrazanki emerita kumatamirega viho, hu'za kea atre zamante'naze.

## 7

<sup>1</sup> E'ina hige'za Kiriat Jearimi vene'nemo'za ana huhagerafi huvempage vogisia eme eri'za kuma'zamirega vu'za, Aminadapu noma agonare me'nere ome ante'naze. Ana nehu'za ana ne'mofo nemofo Elisana pristi azeri otizagene pristia manino kegava hu'ne. <sup>2</sup> Hagi 20'a kafunaza za'zate huhagerafi huvempage vogisimo'a Kiriat Jearimia me'negeno, Israeli vahe'mo'za Ra Anumzamo'a tatre'ne hu'za krafagea hu'naze.

### *Samueli Israeli vahe kegava huzmante'nea zamofo naneke*

<sup>3</sup> Hagi Samueli'a miko Israeli vahekura amanage hu'ne, Tamagrama Ra Anumzamofonte'ma tamagu'areti huta tamagu'ama rukrahe'ma ne-huta, miko ru anumzantamine Astaroti havi anumzamofo amema'ama amu'nontamifima me'neara eri netreta Agriteke'ma mono'ma hunesageno'a, Agra Filistia vahe zamazampintira tamaza huno tamavregahie. <sup>4</sup> Hige'za Israeli vahe'mo'za Bali havi anumzane Astaroti havi anumzana amu'nozamifintira erinrete'za Ra Anumzanke monora hunte'naze.

<sup>5</sup> Hagi Samueli'a Israeli vhahera amanage huno zamasami'ne, Mika'mota Mispa omeri atru hinke'na tamagri tamagi eri'na Ra Anumzamofontega nunamuna ha'neno. <sup>6</sup> Hagi Mispana emetru hute'za, tinkerifinti tina ome afi'za Ra Anumzamofo avuga eme tagi'naze. Hagi ana knazupa ne'zana a'o nehu'za, nunamuna hu'za kumi'ma hu'naza zanku huama hu'za zamasunku nehu'za amanage hu'naze, tagra Ra Anumzamofontera kumi hu'none. Hagi Samueli'a Mispa mani'neno Israeli vhahera keaga refko huzmante kva vhahera mani'ne.

<sup>7</sup> Hagi Israeli vahe'mo'za Mispana emeri atru nehaze kema Filistia kva vahe'mo'zama nentahi'za, Israeli vahe ha' huzamantenaku sondia vhahera zamavare'za e'naze. Hagi ana nanekema Israeli vahe'mo'zama nentahi'za, tusi koro nehu'za zamagogogu hu'naze. <sup>8</sup> Hagi Israeli vahe'mo'za Samuelina asami'za, ontaganenka Ra Anumzana tagri Anumzamofontega mago'ene hanavetinka nunamuna nehugen, Filistia vahe zamazampintira tagu'vazino. <sup>9</sup> Anage hazageno Samueli'a mago ami'nenea anenta sipisipi aheno Ra Anumzamofonte maka kresramana nevuno, Israeli vahe'mokizmi zamagi erino hanavetino nunamuna higeno, Ra Anumzamo'a antahimi'ne. <sup>10</sup> Hagi ana'ma huno kresramana nevige'za, Filistia vahe'mo'za Israeli vhahera ha' huzamante'naku e'naze. Hianagi ana zupa Ra Anumzamo'a monagemo hiaza huno kea nehige'za Filistia vahe'mo'za savri nehu'za na'a fore nehie hu'za neginagi nehazageno, Israeli vahe'mo'za hara huzamagatere'naze. <sup>11</sup> Hagi Israeli vahe'mo'za Filistia vhahera zamorotago hu'za Mispa atre'za Bet-kar kumapi nevu'za Filistia sondia vahetamina zamazi'za zamahe fri'naze.

<sup>12</sup> Hagi Samueli'a Mispa kuma'ene Seni kuma'mofo amu'nozanifi have erino asenenteno amanage hu'ne, Amarera Ra Anumzamo taza hu'nerere, nehuno Ebenize huno agi'a antemi'ne. <sup>13</sup> Hagi Filistia vahe'mo'za mago'an Israeli vhahera hara eme huozamante'naze. Hagi Samueli'ma kvama mani'nea knafina, Ra Anumzamo'a azana rusuteno Israeli vahera zamaza huno Filistia vahera hara huzamante'ne. <sup>14</sup> Hagi Israeli vahe kumatamina, Ekroniti vuno Gatima ome atre'nea kumatamima Filistia vahe'mo'zama ko'ma zamahe'za hanare'za eri'nazana, ete Israeli vahe'mo'za eri'naze. Ana hazageno Israeli vahe'mo'za Amori vahe'enena hara osu fru hu'za mani'naze. <sup>15</sup> Hagi Samueli'ma mani'nea knafina Israeli vahetera kva mani'neno, keaga refko nehuno kegava huzmanteno ne-eno efri'ne. <sup>16</sup> Hagi kafure kafurera Samueli'a Betelima, Gilkalima, Mispa kumatamimpi kagino vano nehuno, vahe'mokizmi kea antahino refako huzmantetere hu'ne. <sup>17</sup> Hagi ete kuma'aregama Ramama nevuno'a, anazanke huno vahe'mofo keaga refako hu'ne. Hagi Rama kumate Ra Anumzamofo kresamana vu ita tro hunte'ne.

## 8

### *Israeli vahe'mo'za kinigu antahige'naza naneke*

<sup>1</sup> Hagi Samueli'ma ozafama nereno'a keaga refakoma hu kva vahera nemofokizni huhampri zanante'ne. <sup>2</sup> Hagi ese ne' mofavre'mofo agi'a, Joel'e. Hanki henka ne'mofo agi'a, Abija'e. Zanagra Berseba kumate keaga refako hu kva vahetre mani'na'e. <sup>3</sup> Hianagi ana netremokea nez-nafa'ma hu'neaza huke kva eri'zana e'ori'na'e. Zanagra tamage huke eri'zana e'orina'anki, havi kazigati oku'a zagoreti'ma masavema zanamiza hazankaziga anteke keaga refko huke zamaza hu'na'e. <sup>4</sup> Ana'ma hake'za miko Israeli ranra vahe'mo'za eri hantage'za Samuelinte Rama kumate vu'za, <sup>5</sup> amanage ome hu'naze, Kagra hago ozafare'nane, tare neg-amofokea kagrama nehanaza huke eri'zana e'ori'anki, mago'a kumapi vahe'mo'zama nehzaza hunka kini huhamprintegeno tagririra kegava huranteno. <sup>6</sup> Hianagi kini vahe azeri otigeno kegava hurantenoma hu'za hazankegura Samueli'a musena osuno, Ra Anumzamofontega nunamuna higeno, <sup>7</sup> Ra Anumzamo'a Samuelina asamino, na'anema hu'za vahe'mo'za hanaza kante antenka amane anazana huo. Na'ankure zamagra kagri zame-fira hunogamizanki, Nagri zamefira hunenami'za, Nagrikura kinitia omanisie hu'za nehaze. <sup>8</sup> Hagi Isipitima zamavare atiramina e'noregati anazana hu'za ne-eza Nagrira zamefi hunenami'za ru anumza avariri'za monora hunente'za eri'zama'a erinte'za e'nazanki'za, anahukna kagri'enena hune-gantaze. <sup>9</sup> Hagi kagra ke zamia amage antenka kini ne' azeri otigeno, kegava huzmanteno. Hianagi kini ne'mo'ma kegavama huzmanteneno'ma maka avu'avazama huzmantesia zamofo nanekea zamasamio. <sup>10</sup> Higeno Samueli'a kini vaheku'ma eme antahigaza vahera, Ra Anumzam'o'ma asamia nanekea miko zamasami vagare'ne <sup>11</sup> Hagi Samueli'a zamasamino, Amanahu'za kinima manino kegava huramantesia ne'mo'a hugahie. Agra miko mofavretamia avreno hosi afu'ama eri'zama ha'ma ome hanaza vahe nezamanteno, karisima eri'za nevu'za ha'ma hu vahe zamavarentesige'za mago'amo'za agri karisimofo avuga ugote'za vugahaze. <sup>12</sup> Hagi mago'a zamavareno 1tauseni'a sondia vahete kva nezamanteno, mago'a zamavareno 50'a sondia vahe kva vahe nezamanteno, mago'a zamavareno hozama erino ante vahe nezamanteno, mago'a zamavareno hozama hamare vahe nezamanteno, mago'a vahera zamavareno ha'zane kevema trohu vahe

nezmanteno, mago'a zamavareno karisimofo mikazama tro hu vahe zamattegahie.<sup>13</sup> Hagi mofa'netamia mago'a zamavareno mananentake zama retro'ma hanagu nezamateno, mago'a zamavareno ne'zama kre vahe nezamateno, mago'a zamavareno bretima kre vahe zamantegahie.<sup>14</sup> Hagi knare hu'nenia witi hozama, knarema hunenia waini hozama, knare'ma hunenia olivi hozanena erino agra'a eri'za vahe zamigahie.<sup>15</sup> Hagi 10ni'a kevuma witine wainima ante'enafintira mago kevu erino eri'zama'a kegava nehaza vahe'ane eri'za vahe'a zamigahie.<sup>16</sup> Anahunkna huno ve kazokzo eri'za vahe'ene a' kazokzo eri'za vahe'ene, hanave nehazavene, knare'ma hu'nenia donkiramine bulimakaotamia zamavareno agra'a eri'za kante zamantegahie.<sup>17</sup> Hagi agra 10ni'a bulimakao afu kevu ante'nesafintira mago kevua agra nevreno, tamagria kazokzo eri'za vahe tamavrentegahie.<sup>18</sup> Hagi ana'ma hanigeta Ra Anumzamofona krafage hunteta tamagrama huhampri'naza kini ne'mofo azampintira tazahunka tavro huta nunamuna hugahazanagi, Ra Anumzamo'a tamaza osugahie.<sup>19</sup> Anagema Samueli'ma hige'za, ana ke'a ontahi'za zamagra hu'za, tagrira kini ne'mo kegava hurante'niegu tave'sie.<sup>20</sup> E'ina hanigeta ruga'a kumate vahe'mo'zama nehazaza huta kinimofo kvafi mani'nunkeno agra'a vugota huranteno, hatera tavreno vugahie.

<sup>21</sup> Hagi ana miko kema hazana Samueli'a antahiteno ana miko kea Ra Anumzamofo ome asami'ne. <sup>22</sup> Hagi Ra Anumzamo'a amanage huno Samuelina asami'ne, zamagri ke antahinka mago kini zamio. Anage higeno Samueli'a miko vahera huzmantenge'za kuma'zamirega vu'za e'za hu'naze.

## 9

### *Kini mani'nogu Samueli'a Solina masave frenteno huhamprinte'nea naneke*

<sup>1</sup> Hagi magora rama'a feno ante'nea nera Benzameni naga nofipinti ne'mofo agi'a Kisi'e. Hagi Kisina Abielu kasentegeno, Abielina Zerori kasentegeno, Zerorina Bekorati kasentegeno, Bekoratina Afia kasente'ne. Ana hu'neankino Kisi'a rama'aza anteno agi me'nea ne' mani'ne.<sup>2</sup> Hagi Kisi'a ne'mofavre ante'neankino, hentofa nehazavegino agra za'za huno maka Israeli vahera zamagatere vagare'neankino, agi'a Sol'i'e. Israeli vahe'mokizmi amu'nompina magore huno agrikna nera omani'ne.<sup>3</sup> Hagi mago knafina Kisi donki afutamimo'za fanene hu'nazageno nemofo Solina asamino, mago eri'za vahe nevrenka vunka ana donki afuzagagu ome hako.

<sup>4</sup> Higeno Soli'ene eri'za ne'ane hakeke Efraemi agona kokampina nevune, Salisa uhanati'na'anagi magore huke hakeke eriforera osu'na'e. Anantetira hakeke Salimi vuna'anagi hakeke eri fore osuke netreke, Benzameni naga'mokizmi kumatamimpi vu'na'anagi onketfa hu'na'e.<sup>5</sup> Hagi anantetira hakeke Sufu kaziga uhanatiteke, Soli'a eri'za ne'a asamino, Ru nenfa'a donki afuku'ma agesa antahintahima nehiama'a agatereno tagrikura agesa antahinigi egeta ete kumatega va'maneno.<sup>6</sup> Hianagi eri'za ne'mo'a amanage hu'ne, Ko, antu kumatera magora Ra Anumzamofo eri'za nera mani'neankino vahe'mo'za kesaga hunentaza nere. Hagi mika zanku'ma fore hugahiemu nehiazamo'a fore nehia neki, egeta antu ana nete va'manenkeno, amaretira inante vugahu'e agra tasamigahie.<sup>7</sup> Hagi Soli'a eri'za ne'amofona amanage huno kenona hunte'ne, Tagra knare Ra Anumzamofo eri'za netera vugahuanagi, naza muse zana eri'neta omene-mita hugahue. Hagi hago ne'zama eri'no'a zana nevagare'noe. Hagi tavatera

musezama amisu'azana omane'ne. <sup>8</sup> Anage higeno ete eri'za ne'amo'a Solina kenona hunteno, Ko, ama kunifina osi'a silva zagoa eri'noankita Ra Anumzamofo vahe'mofona aminukeno inante tagra vugahu'e agra tasamigahie. <sup>9</sup> (Hagi ana knafina Israeli vahe'mo'za Anumzamofontegati'ma keagama erinakura, enketa avune vahe ome kamaneno nehaze. Hagi korapara avune vhahere hu'za nehazanagi, menina Anumzamofo kasnampa vhahere hu'za nehaze). <sup>10</sup> Hagi Soli'a eri'za ne'agura anage hu'ne, Knare ke hananki vanu'e. Anage higeke Anumzamofo vahe'ma nemanirega vu'na'e.

<sup>11</sup> Hagi agonarega umarerike rankumatega nevakeno ana kumapinti tifinaku atineramiza mofa'nezaga ome zamantahigeke anage hu'na'e, avune nera mani'neo? <sup>12</sup> Hakeno ana mofa'nemo'za kenona hu'za, izo meni avune nera tagri kumapina e'neno kresramana vu ofa nehu'za ruotage ne'za nenaku nehaza vahe zamavareno agonarega vu'za nehiangi, ame huta ko vi'o. <sup>13</sup> Hagi ne'zama nenaku agonarega mareorinesigeta kumapima ufresuta'a ome tutagiha huntegaha'e. Hagi zamagima hu'nea vahe'mo'za ne'zana one avega ante'zma mani'nenageno uhanatino asomu kea ome hutena negahaze. Hagi hantaka huta vanuta'a ome kegaha'e. <sup>14</sup> Hagi zanagra kumapi ufrike nevuke, Samueli'a agonarega mono'ma nehaza kumatega vunaku ne-egeke ome ke'na'e.

<sup>15</sup> Hagi Soli'ma ome'negeno ko oki Ra Anumzamo'a Samuelina asamino, <sup>16</sup> okina ama ana knare Benzameni mopafinti mago nera huntanenkeno kagrite egahie. Hagi kagra masave frentenka azeri ruotage hugeno Israeli vaheni'arera kva mani'neno Filistia vahe'mo'zama zamazeri havizama nehaza zamazampintira zamagu vazigahie. Na'ankure zavi krafagezmia Nagra nentahi'na vaheni'a antahinezamue. <sup>17</sup> Hagi Samueli'ma Solima negegeno'a Ra Anumzamo'a Samuelina asamino, E'i'na neku kasami'noankino agra vahe'nirera kegava hugahie.

<sup>18</sup> Higeno Soli'ma kuma kahante Samuelima tutagiha hunenteno'a antahigeno, Inantega avune ne'mofo nona me'ne huno Samuelina antahige'ne? <sup>19</sup> Higeno Samueli'a kenona hunteno, Nagra ama'na avune nera mani'noanki, ete vugeta agonarega marerimaneno. Hagi menina nagrane ne'zana nenenga oki nantera katranena vugahane. Hagi kagra'ma kagesa antahi'nana zantamina kasamivaregahue. <sup>20</sup> Hagi donkima fananema higeno 3'a knama evu'nea zankura kagesa ontahio, ko hake'za erifore hu'naze. Hagi menina Israeli vahe'mo'za kagri'ene negafa nagaku'ene amuhara nehaze. <sup>21</sup> Hagi Soli'a kenona amanage hu'ne, Israeli naga nofipina Benzameni nagara osi naga manizageno, ana agau'afina nagri naga'mo'za osi'a naga mani'none. Hagi nahigenka e'inahu kea nehane? <sup>22</sup> Hagi Samueli'a, Soline eri'za ne'anena nezanavreno vuno vahe'ma kehige'za emani'naza nompi ufreno, ese trate ome zanante'ne. Hagi anampinka 30'a vahe naza mani'naze. <sup>23</sup> Hagi Samueli'a ne'zama negrea nera asamino, rure antese huo hu'nama kasami'noa afu ame'a erinka eme namio. <sup>24</sup> Higeno ne'zama negrea ne'mo'a afu aga'a erino Soli avuga eme ante'ne. Hagi Samueli'a Solina amanage huno asami'ne, Vahetamima kema nehu'na, kagri suzane hu'na antegante'noanki, amama zamagima huge'za aza vahe'ene ne'zana no. Higeno Soli'a ana zupa Samueli'ene ne'zana ne'ne. <sup>25</sup> Hagi anantetira kumate'ma eramizageno'a Samueli'a nomofo agofetu Soli'enena keaga huteno, noma mase'niazana retro huntogeno mase'ne. <sup>26</sup> Hagi kotu avame Samueli'a otino Solina kehuno, Otige'na kazeri retrotra hanena kumakarega vuo. Higeno Soli'a otino Samueli'ene magoka kantega vu'na'e.

<sup>27</sup> Hagi kumapinti'ma utiraminaku'ma nehu'za Samueli'a Solina amanage huno asami'ne, ko huntogeno eri'za nekamo'a tatreno vugoteno nevina, kagra amare osi'agna nagrane mani'nege'na Ra Anumzamo nasami'nea kea huama hu'na kasami'neno.

## 10

### *Samueli'a Solina kini mani'nogu maseve frente'nea naneke*

<sup>1</sup> Anante Samueli'a masave tafena erino masavena Soli anumpi tag-inteteno, antako hunenteno anage hu'ne, Amanahu'zama huana, Israeli vahe'a kegava hanane huno Ra Anumzamo'a kini kazeri otie. <sup>2</sup> Hagi menina natrenka vunka Reselima asente'naza mopamofo agente'ma Zelza Benzameni naga'mofo moparega uhanati'nunka, tare netre ome zanagenakeno, zanagra kasamike hakenkama vu'nana donki afura hago hake'za eri fore hu'naze huke kasamigaha'e. Hagi negafa'a donki afutaminkura agesa on-tahino, kagriku tusi agesa nentahino, nankna hu'na mofavreni'a kegahue huno nehuno mani'ne. <sup>3</sup> Hagi anantetira vunka Taboria ra oki zafa agafare uhanatigahane. Hagi ananteria 3'a vene'nemo'za Anumzamofo mono ome hunte'naku Beteli nevanagenka ome zanagegahane. Magomo'a 3'a agaho meme afu'zaga avrena, magomo'a 3'a breti erina, mago'mo'a waini tintafe eri'ne'za mareri'za nevanagenka ome zamagegahane. <sup>4</sup> Hagi ana venenemo'za negagesu'za kazeri frufra hunegante'za tare bretia kamigahazanki, ana tare bretia erio. <sup>5</sup> Hagi anantetira Filistia sondia vahe'mo'zama Ra Anumzamofo agonare Gibeama kuma eme ante'za mani'nare vugahane. Hagi ana kumapima ufrenunka mago'a kasnampa vahezaga agonaregati ne-eza zamagra zamazampina laire nehaza zavenane hapue nehaza zavenane, nase'nasepane, konkene, eri'ne'za ahe'za ne-eza kasanampa kea hu'za ne-esaza vahe ome tutagiha huzmantegahane. <sup>6</sup> Hagi anante Ra Anumzamofo Avamu'mo kagripi hanavenentake huno efresigenka, kagra-nena kasanampa ke nehunka, ruzaher hunka ruzahu vahe efore hugahane. <sup>7</sup> Hagi kagrite'ma ana avame'zama efore'ma hanigenka ketesunka, inankna hu'na vhahera zamazama hanugen knare hugahie hunka kagesama antahi'nana zana, amane hugahane. Na'ankure Ra Anumzamo'a kagrane mani'neno kza hugahie. <sup>8</sup> Hagi anantetira Gilgali vugotenka uraminka ne-vuge'na, Nagra anantega eme kagranena kre fanane hu ofane, rimpfa ofa-nena kresramana vugahue. Hagi 7ni'a zagegna navegantenka mani'nege'na kagritega e'na nazanoma hanana zana eme kasamigahue. <sup>9</sup> Hagi Soli'ma rukrahe huno Samuelima atreno nevigeno'a, Anumzamo'a Soli agu'a azeri ruzaher hu'ne. Ana higeno ana zupage ana maka avame'zamofo kema asami'nea kemo'a rgare'ne. <sup>10</sup> Hagi Soli'ene eri'za ne'anema Gibiama ehanatikeno'a, mago'a kasnampa vahe'mo'za tutagiha huznante'za kasnampa ke nehazageno, Solina Anumzamofo Avamu'mo agrite hanavetino egeno, ana vahe'ene eri mago huno kasnampa kea hu'ne. <sup>11</sup> Hagi Solima ko'ma ke'za antahi'za hu'naza vahe'mo'za kageno kasnampa vahe'ene erimago huno kasnampa kema nehige'za nege'za, zamagra zamagra amanage hu'naze, Kisi nemofontera na'a fore nehie? Agranena kasnampa vahe fore nehie. <sup>12</sup> Hu'za hazageno mago ana kumate ne'mo mani'nereti otino amanage hu'ne, Mago'a vahe'mo'za amne kasnampa vhahera fore hugahie. Iza agri nef'a mani'ne. Hagi e'i ana agafare anagea nehaze, Soli'a agranena kasnampa vahe mani'nef? hu'za nehaze. <sup>13</sup> Hagi Soli'ma kasnampa kema huvagareteno'a, mono'ma ome nehaza agonarega marerino vu'ne.

<sup>14</sup> Hagi anante Soli nenogo'a Soline eri'za ne'anena zanantahigeno, iga vuteta nea'e? Higeno Soli'a kenona huno, tagra donki afuku ome hako'ana onketa atreta Samueli ome kenaku vu'noane. <sup>15</sup> Huke hakeno Soli nenogo'a huno, muse huranantoanki na'ane huno tanasami'nefi nasami'o. <sup>16</sup> Higeno Soli'a nenogona kenona hunteno, donki afu'tamina fanane hu'neana hago ke'za erifore hu'naze huno agra tasami'ne. Hianagi kini manigahanema huno asami'nea nanekea osami'ne.

### *Vahe zamufi Solima kini azeri oti'nea naneke*

<sup>17</sup> Hagi henka Samueli'a Israeli vhahera ke hige'za Ra Anumzamofo avuga Mispa kumate e'naze. <sup>18</sup> Hagi anante agra Israeli vhahera zamasamino, Ra Anumzana Israeli vahe Anumzamo'a anage huno huama hie, Isipi vahe zamazampintira tamavre atiramina mareri'na ne-ena, mika knama tamamiza kuma'tamimofo hanavefintira tamavre'na atirami'noe. <sup>19</sup> Hianagi tamagra menina hazenke zampinti'ene knazampinti'ma tamagu'vazi'nea Anumzana atreta tamage'na humi'naze. Hagi tamagra huta kini vahe huhamprintegeno kva huranteno hu'naze. Hagi menina Ra Anumzamofo avuga nagate nofite omeritru emeri tru hiho. <sup>20</sup> Hagi Samueli'a Israeli naganofira miko kehige'za erava'o hutazageno, Ra Anumzamofo avesi kenaku taisi zokago reno kegeno Ra Anumzamo'a Benzameni naga zamazeri fore hu'ne. <sup>21</sup> Hagi anama hute'za ete Benzameni nagate ana taisi zokago re'za kazageno, Matri naga huhampri zamante'ne. Hutegenan anampinti Kisi nemofo Soli huhamprinte'ne. Hianagi Soli'a anampina omani'nege'za ke'za erifore osu'naze. <sup>22</sup> Ana hige'za Ra Anumzamofona zamagra antahige'za, iga Soli'a mani'ne, hazageno Ra Anumzamo'a huno, fenozantamima ante'nafi kankamumpi frakino mani'ne. <sup>23</sup> Hige'za ananke'ma nentahi'za zamagare'za vu'za Solina anampinkati ome avre'za ageno, ana vahe'enema eme oti'neana agra za'za hu'negeno miko vahe'mo'za agru afunteke eme atre'naze. <sup>24</sup> Hagi anante Samueli'a maka vhahera zamasamino, Ra Anumzamo'ma huhamprintea nera hago kazo? Hianagi miko vahe'mota atupa hu'nazanki ana ne'mo'a za'za huno tamagatere'ne, hige'za miko vahe'mo'za ranke hu'za, za'zate kinia manino vugahie. <sup>25</sup> Hagi Samueli'a kini ne'mo'ma eri'zama erisia ke'a miko vhahera nezamasamino, ana naneke avontafepi krenteno Ra Anumzamofo avuga ante'ne. Anama huteno'a miko vhahera kuma'zmirega huzmanteg'eza vu'za e'za hu'naze. <sup>26</sup> Hagi Soli'enena kuma'arega Gibea nevige'za, Anumzamo'ma zamarimpama zamazeri otia hanavenentake sondia vahe'mo'za agrane vu'naze. <sup>27</sup> Hianagi mago'a hazenke vahe'mo'za hu'za, inankna huno ama ne'mo'a tagu'vazigahie. Hagi ana vahe'mo'za huhamviza hunente'za musezana eri'za eme omi'naze. Hianagi Soli'a ana vahekura mago kea osu'ne.

## 11

### *Soli'a Amoni vahe ha' huzmagatere'nea naneke*

<sup>1</sup> Hagi mago'agna evutegen, Amoni kini ne' Nahasi'a sondia vahe'a zamavarege'za, Israeli vahepi me'nea kuma Jabel-Kiriati ome avazagi kagizageno, ana kumapima mani'naza Jabeli-Kiriati vahe'mo'za Nahasina asami'za, kagrané huhagerafi huvevpage hanunkenka kegava hurante'nanketa kagri eri'za vahe manigahune. <sup>2</sup> Hagi Nahasi'a kenonazmirera anage hu'ne, tamagranema huhagerafi kema hanuana, nagra maka vahe'mota tamaga kaziga tamavurga tagati atregahue. Ana hanugenno Israeli vahe'mo'za zamagazegu hugahaze. <sup>3</sup> Hagi Jabeli kumate

ranra vahe'mo'za ananke nona'a Nahasina amanage hu'za asami'naze, 7ni'a zagegazi tavega ante'eneketa, Israeli vahe'mo'zama eme taza hu'za tagumavazi'nagura kato vhahera huzmantamnena kea eri'za vu'za Israeli vhahera ome zamasamiho. Hagi zamagrama eme taza osanazana, nazano tamagrama hurantenaku'ma hazazana tamagrite maka'mota esunketa hurantegahaze. <sup>4</sup> Hagi Nahasi'ma ana kere'ma hu izo'ma hige'za, Jabesi vahe'mo'za mago'a vahe huzamantage'za Soli kumatega Gibea kea eri'za vu'naze. Hagi ana ke'ma ome nezamasamige'za, miko vahe'mo'za nentahi'za ranke hu'za zavira ate'naze. <sup>5</sup> Hagi anama hu'za zavi krafama nehazageno'a, Soli'a hozaregati eri'zama e'neria bulimakaoma'ane ne-eno eme nezamageno anage hu'ne, naza fore hu'negeta miko vahe'mota zavira netaze, huno zamantahigege'za? Jabesi vahe'mo'za hu'naza kea agrira asami'naze. <sup>6</sup> Hagi Soli'ma anankema nentahigeno'a Ra Anumzamofo Avamu'mo'a agritera hanavetino egeno, Solina tusi arimpa ahe'ne. <sup>7</sup> Hagi Soli'a tare bulimakao'a aheno tagarago huno eri nezamino, ama ame'a erita nevuta, mika Israeli vhahera amanage huta nanekea ome zamasamiho. Iza'o Soline Samuelinema amage'ma ontesimofona, ama bulimakaonte'ma fore'ma hianknaza fore humigahie. Hige'za ana nanekema nentahizageno'a Ra Anumzamo'a zamazeri zamagogofege'za miko vahe'mo'za eri mago hu'za eme atru hu'naze. <sup>8</sup> Hagi ana vahe'mo'za Bezeke kumate'ma azageno Soli'ma zamazeri ante fatgoma huno'ma hampri'neana, Israeli sondia vhahera 300 tauseni'a sondia vahe manizageno, Juda sondia vhahera 30 tauseni'a sondia vahe mani'naze. <sup>9</sup> Hagi anama hute'za kema eri'za e'naza vhahera amanage hu'za huzmante'naze, oki'na zagemma hanatino mareri'enigeno tamaza hu'zana fore hugahie huta Jabel vhahera ome zamasamiho. Hagi ana nanekema eme zamasamizage'za Jabesi vahe'mo'za tusi muse hu'naze. <sup>10</sup> Anante Jabeli vahe'mo'za Nahasina asami'za, okina tagra atiramisunketa nazano hurantenaku'ma hanaza zana hurantegahaze. <sup>11</sup> Hagi kora otu'negeno nanterame Soli'a sondia vhahera 3'a kevu refako hige'za, Amori vahe kumapi ufre'za ha' huzmante'za bainati kazinkonteti zamahe'za rukafri makafri nehazageno vuno feruse'ne. Ana hazage'za osi'ama maniza Amori vahe'mo'za panani hu'za ufre efre hu'naze. <sup>12</sup> Hagi ana hute'za Samuelina antahige'za, ina vahe'mo'za hu'za Soli'a kva huorantegahie hu'za hu'naze? Zamavreta amare enketa zamahe frimmeno. <sup>13</sup> Hianagi Soli'a kenona huno, magore huta Israeli vhahera zamahe ofrigahune. Na'ankure menina Ra Anumzamo'a Israeli vhahera zamahokeno zamavare'ne. <sup>14</sup> Hagi Samueli'a huno, enketa Gilgali vuta ete mago'ane hu'ama huta Soli'a kini mani'ne huta eri hanavetita vhahera zamasamisune. <sup>15</sup> Hige'za miko vahe'mo'za Gilgali vu'za Ra Anumzamofo avuga Soli'a kini mani'ne hu'za mago'ene azeri hanaveti kea hu'naze. Hagi anantega arimpa fru ofa nehu'za, Soli'ene mika Israeli vahe'mo'za tusi musenkase hu'naze.

## 12

### *Samueli'a vagare ke'a Israeli vahe zamasami'nea naneke*

<sup>1</sup> Hagi Samueli'a miko Israeli vhahera amanage huno zamasami'ne, Miko kema nasamiza ketami antahirami'na kegavama huramantesia kinia azeri otue. <sup>2</sup> Hagi keho, vugotama huramante'nia kinia hago azeri otue. Hagi nagra hago ozafarogeno, tu'nazoka tagigeno mofavre'nimo'za ama tamagrane mani'naze. Hagi mofavrema mani'noreti kva huramante'na neogeno menina ama knare ehanatie. <sup>3</sup> Hagi menina ama Ra Anumzamofo

avure'ene kini ne'mofo avurera ama otuanki, mago'a zama tamagri tamavufima hu'nesua zana huama hunanteho. Nagra mago vahe bulimakao o donki afu kumzafa ase'nofi? Hifi iza havizana hunte'na knazana ami'noe? Hagi keagama refko hu'nofina iza zago eri'nena, agri kaziga mani'na keaga refako hu so'ea osu'noe. Nasaminke'na anazama hu'ne'nua zanteria nona hu'na mizasa'neno. <sup>4</sup> Anage hige'za Israeli vahe'mo'za kenona hu'za, Kagra tazeri havizana osunka, reravatga osunka, masavema hu kazigati'ma kamiza zantamina mago vahe'mofo zamaintira e'ori'nane. <sup>5</sup> Hagi anante Samuel'i amanage huno zamasami'ne, Mago havizana tagri tavufina osu'nane hutama hazza ketamia, Ra Anumzamo'ene menima azeri otua kini ne'mo'a nentahigeta anagea nehaze, hige'za zamagra kenona'a hu'za, Izo agra keno antahino hu'ne hu'za hazageno, <sup>6</sup> Samuel'i mago'anee Israeli vahera zamasamino, Ra Anumzamo'a Mosesene Aronikizni huhampri zantan-teteno, Isipitira tamagehe'ina zamavareno fegi atiramino e'ne. <sup>7</sup> Hagi otita mani'enke'na knare huno fatgoma hu'nea zama Ra Anumzamo'ma tamagri'ene tamagehe'inema huramante'nea zamofo nanekea zamasami'neno. <sup>8</sup> Hagi Jekopu'ma Isipi vutegen'o, tamagehe'za Ra Anumzamofonku taza-huo hu'za krafage huntazageno, Mosesene Aronikiznia huznantege'ne vugota huzamante'za amama menima mani'naza mopafina zamavare'za e'naze. <sup>9</sup> Hianagi zamagra Ra Anumzana zamagri Anumzamofona zam-age kanintazageno, Hazori sondia vahete vugagota sondia ne' Siserane, Filistia vahetamine, Moapu kini ne' zamazampi Ra Anumzamo'a zamavar-entege'za, ha' huzmagatere'za kegava huzmante'naze. <sup>10</sup> Anama hige'za ete Ra Anumzamofontega zavi krafa hu'za ana zankura zamasunku nehu'za anage hu'naze, tagra kumi huta Ra Anumzana atreta tamefi hunemita, Ba'ali havi anumzane, Astaroti havi anumzamofo amema'are monora hunteta eri'zana erinte'none. Hagi menina tagu'vazinka ha' vahetimofo zamazampintira tavaregeta kagritera monora huneganteta erizanka'a erig-antamaneno. <sup>11</sup> Anage hazageno Ra Anumzamo'a Gidionima, Bedama, Jep-tama, nagri Samuelinagi huno hurantegeta, ha' vahe tamimofo zamazamp-intira tamagu'vazita tamaza hunketa, so'e huta mani'naze. <sup>12</sup> Hianagi kazageno Amori vahe kini ne' Nahasi'ma ha' eme huramante'za nehigeta, Ra Anumzamo kinitamia ko mani'neanagi nagrira nasamita, kinigu tavesie huta nantahig'e'naze. <sup>13</sup> E'ina hu'negu kini neku'ma hu'nazana ama'ne. Tam-agrama nantahi ke'nazana, Ra Anumzamo'a ama'na ne' kinia neramiankino kegava huramantegahianki keho. <sup>14</sup> Hagi tamagrane kinitaminema Ra Anumzamofonku'ma koro hunenteta, mono hunenteta eri'zama'a erinteta agoraga'a nemanita, agri kasegema amage'ma ante'nazana Anumzamo'a tamaza hanigeta tamagra knare huta manigahaze. <sup>15</sup> Hagi tamagrama Ra Anumzamofo tra kema ontahisazana, Ra Anumzamo'a tamagehe'ima ha'ma rezmante'neaza huno tamagri'enena hara reramantegahie. <sup>16</sup> Hagi menina oti'neta Ra Anumzamo'ma tamagri tamavufima razama erifore hu'zama nehia zana keho. <sup>17</sup> Hagi menina witima vasage knafi manunkeno, ko'ma ru kna zahufa ome'ne. Hianagi Ra Anumzana antahiga'enkeno kopasina e'herina, kora atre'nigeno eramigahie. E'inama hanigeta antahiam'a ma hanazana Ra Anumzamofo avufina haviza huta kinia azeri otune huta antahigahaze. <sup>18</sup> Hagi Samuel'i nunamu huno Ra Anumzamofona antahigegeno, ana zupa Ra Anumzamo'a atregeno monagea ne-higeno, kora ru'ne. E'ina hige'za Ra Anumzamofone Samuelikiznigura miko vahe'mo'za tusi koro hu'haze. <sup>19</sup> Hagi miko vahe'mo'za Samuelina

antahige'za, tagrikura Ra Anumzana kagri Anumzamofontega nunamu hunka antahigegeno tahe ofrino. Na'ankure ko'ma hu'nona kumitimofo agofetura kinigu'ma antahigona zamo'a, mago'ane rama'a kumi hu'none. <sup>20</sup> Hagi Samuel'i'a huno, Tamagra korora osiho, miko kumira hunazanagi, Ra Anumzana atreta tamagena huomihio. Hianagi maka tamagu'areti huta monora hunenteta eri'zama'a erinteho. <sup>21</sup> Hagi tamagra mago'a havi anumzantera rukrahera huta amagera ontegahaze. Zamagra amnezanki'za tamaza huge tamagura vazige osugahie. <sup>22</sup> Hagi Ra Anumzamo'a vahe'a amagena huoramigahie. Na'ankure Agra'a ra agigu agesa nentahino, Agri'a vahe tamazeri retro hugahie. <sup>23</sup> Hagi nagra mago'ane Ra Anumzamofontega tamagriku hu'na nunamuma huvava nehua zana otregosue. Ru atresu'na Ra Anumzamofontera kumi hugahue. Ana nehu'na fatgo huno knare'ma hu'nea avu'ava'mofo nanekea rempi huramigahie <sup>24</sup> Hianagi Ra Anumzamo'ma ra zankrefama huramante'nea zanku tamagesa nentahita, koro hunteta tamage huta tamagu'areti monora hunenteta eri'zama'a erinteho. <sup>25</sup> Hagi tamagrama kumi'ma huta vanazana, ti hageno miko'za erino viaza huno miko tamagri'ene kini ne' taminena harafi huno vanigeta, vahe kokampi kazokazo vahe umanigahaze.

## 13

### *Israeli vahe'mo'za Filistia vahe ha'huzmante'naza naneke*

<sup>1</sup> Soli'a 30'a kafu hu'neno Israeli vahe kinia mani'ne. Hagi Israeli vahe'mokizmi kinima mani'neana 42'a kafufi kinia mani'ne. <sup>2</sup> Hagi Soli'a 3 tauseni'a Israeli vene'nea sondia vahe mani'nazegu huhampri zmante'ne. Anampintira 2 tauseni'a vene'nea zamavarege'za Mikmasi kumate agrane mani'nazageno, 1 tauseni'a vene'nea huzamantege'za Jonatani'ene Gibea kumate'ene Beteli agona kumate Benzameni naga'mokizmi mopafi umani'naze. <sup>3</sup> Hagi anama hute'za Jonatani'ene sondia vahe'amo'za Filistia vahera Geba kumapi ha' ome huzamante'za hara huzamagatere'naze. Hagi ana nanekea mago'a Filistia vahe'mo'za antahi'naze. Hagi Israeli vahe'mo'za ke'a eme antahisazegu, Soli'a eri'za vahe'a huzamantege'za maka Israeli vahe kumapi ufenare'za vu'naze. <sup>4</sup> Hagi Soli'ma ha'ma Filistia vahe'ma huzmante nanekema miko Israeli vahe'mo'za nentahi'za, Israeli sondia vahe'mo'za eri hantage'za Solina Giliati ome age'naze. <sup>5</sup> Ana'ma hazage'za Filistia vahe'mo'za Israeli vahe'ma ha' huzmantenakura, 30 tauseni'a karisi e'neri'za, hosifima nevu'za ha'ma nehaza vahera 6 tauseni'agi, sondia vahera rama hu'za hagerinkenafi kahepanka hige'za haprigara osuga'a vahe Mikmasi mareri'za zage hanati kaziga Bet Aven seli nona emeki'za mani'naze. <sup>6</sup> Hagi Israeli vahe'mo'za anazama nege'za antahi'zana, rama'a Filistia vaheki'za hara huragateregahaze'ma nehu'za, mago'amo'za havegampi ufrakizageno, mago'amo'za trampi ufrakizageno, mago'amo'za ranra havegampi frakizageno, mago'amo'za tinkerifi fraki'naze. <sup>7</sup> Hagi mago'amo'za Jodani tim-ofo kantu kaziga takaher'za Gatine Giliati mopafi vu'naze. Hianagi Soli'a Gilgali kumate mani'nege'za agranema mani'naza sondia vahe'mo'za tusi koro nehu'za zamahirahiku hu'naze. <sup>8</sup> Hagi ana kumatera 7ni'a zagegna Samuelima navega antenka manio hu'negu Soli'a avega anteno 7ni'a zagegna mani'ne. Hianagi Samuel'i'a ana Kumatera omege'za Soli sondia vahe'mo'za atre'za vu'za e'za hu'naze. <sup>9</sup> Ana hazageno Soli'a huno, Kre fananehu ofane rimpa fru ofane erita echo, hige'za eri'za ageno, anante agra'a kre fanane hu ofa hu'ne. <sup>10</sup> Hagi Soli'a ana ofama huvaneregeno,

Samueli'a egeno Soli'a azeri frufra huno avrenaku vu'ne. <sup>11</sup> Hianagi Samueli'a antahigeno, Na'a amazana nehane, huno Solina antahige'ne. Higeno Soli'a kenona huno, Nagra koge'za sondia vahe'mo'za atre'za vu'za e'za nehzageno, kagra kema hu'nana knarer eaohanatinke'za, Filistia ha'vahe'mo'zama Mikmasima eri atruma hazage'na, <sup>12</sup> meni Filistia vahe'mo'za Gilgalia erami'za hara eme hunantegahaze hu'na nagra nagesa antahi'noe. E'ina hu'negu nagra'a Ra Anumzamofona antahi onke'nena ofa hanue hu'na ofa hu'noe. <sup>13</sup> Higeno Samueli'a huno, Kagra neginagi vahekna hunka Ra Anumzana kagri Anumzamofo kasege'a ovaririne. Kagrama kasege'a avaririnka vantesina, Israeli vahe'mokizmi kinia kagrane naga'kamo'zane manivava huta vazasine. <sup>14</sup> Hianagi kagri nagapima kini eri'zama me'neana amare menina eme vagaregahie. Na'ankure kagra Ra Anumzamofo kasegea rutagre'nane. Hagi Ra Anumzamo'a ko mago nera Agri avesizama nevariria nera ko huhampri ante'neankino, ana ne'mo Ra Anumzamofo vhetera kinia manigahie. <sup>15</sup> Hagi Samueli'a ana huteno Gilgalia atreno vigeno, Soli'a agranema mani'naza sondia vahe'ma hampriana 600'a vahake mani'naze. <sup>16</sup> Hagi Soliki nemofo ne' Jonataniki, anama agranema mani'naza sondia vahe'mo'zanena Benzameni naga'mofo mopafi Geba kumate mani'nazageno, Filistia vahe'mo'za Mikmasi kumate seli nonku'ma eme ante'za mani'naze.

### *Israeli vahe'mo'za ha'zazmi onte'naza zamofo naneke*

<sup>17</sup> Hagi Filistia vahe'mo'za kuma'ma ankanire'za ha'ma hu vahera 3'afi refako hute'za, seli nonkuma'ma ante'za mani'nafintira atirami'za vu'naze. Hagi mago sondia kevumo'za Ofra kumara Suali mopa kaziga zamavugosa hunte'za vazageno, <sup>18</sup> mago kevumo'za Beta Horonima vu'nea kantega vazageno, mago kevumo'za ana mopa atuparegama vu'nea kantega vu'za Zeboimi agupofima hagage kokantega urami'nea avaparega urami'naze. <sup>19</sup> Hagi ana knafina Israeli vahepina aenireti'ma ha'zantamima trohu vahera omani'naze. Filistia vahe'mo'za ha'zama aeniretima tro'ma hu'zana rempi huozamaho hu'za hunagru Israeli vahera huzmante'naze. <sup>20</sup> Hu'negu Israeli vahe'mo'za hozama e'neri'za zantamina, witi hoza tinkama nesaiza aenima, kazintamima, sa'umema, witi tagahu agena fagigi kazima, pikiruma kume'ma kanenakura, eri'za Filistia vahete vutere hu'naze. <sup>21</sup> Hagi Israeli vahe'mo'zama ana zantamima kume'ma kanenakuma vazageno'a, Filistia vahe'mo'za 6gis kine hu'za miza agi ahezamante'naze. <sup>22</sup> Hagi ha'ma hunaku'ma hazankna zupa Israeli sondia vahe'mo'za bainati kazine karugru kevenena e'ori'nazanki Soli'ene Jonatanike zanagrake ha'zana e'ri'na'e. <sup>23</sup> Hagi Filistia vahe'mo'za Mikmasima uhanati'nea kama amago'nama hu'nere seli nonkumara ome ante'za mani'naze.

## 14

### *Jonatani'ma Filistia vahe ha'ma huzmante'nea naneke*

<sup>1</sup> Hagi mago zupa Jonatani'a hanko'are'ma erinentea nehaza ne' nevreno anage hu'ne, Egeta Filistia sondia vahe'ma eman'i'za kumapi va'maneno, huno higene vu'na'e. Hianagi Jonatani'a vania zamofona nefana osami'ne. <sup>2</sup> Hagi ana zupa Soli'a sondia vahe'ane Migroni kuma'mofo fegi'a Gibe'a tava'onte pomegreneti zafa agafafi seli nonkuma ome ante'za mani'naze. Anampina 600'a sondia vahe naza mani'naze. <sup>3</sup> Hagi anampina mago nera pristi kukena hu'nea ne' mani'ne. Ana ne' agi'a Ahiza mani'neankino, nef'a'a

Ahitupu'e. Hagi Ahitupu nefu'a Ikabotie. Hagi Ahiza'a Ahitubu kasentegeno, Ahitubuna Finiasi kasentegeno, Finiasina Eli kasente'ne. Higeno Eli'a za'za kukena hu'neno Ra Anumzamofo pristi eri'za e'nerino Sailo kumate mani'nea nere. Hagi mago vahe'mo'e huno Jonatanima kumama atreno hate'ma viazana keno antahinora osu'ne. <sup>4</sup> Hagi Filistia vahe'ma krerami'za vu'za e'zama nehaza mehinteti Jonatan'i'a kreramino Filistia vahe kumapi vunaku agesa antahi'ne. Hagi kantigamama me'na'a mehin-tremofo zanagi'a, Bozezine Senene. <sup>5</sup> Hagi mago mehina noti kaziga Mikmasi marerigeno, magora Sauti kaziga Geba avuga mareri'ne. <sup>6</sup> Hagi Jonatan'i'a hanko'ama erinteno nevia nehaza nera asamino, Egeta oku zamavufaga taga osu vahe mopafi va'maneno. Ra Anumzamo agra'a hara taza huno hugahie. Hagi Ra Anumzamo'a rama'a vahekuro, osi'a vahekura agesa nontahianki, amne hara hugateregahie. <sup>7</sup> Hagi hanko'ama e'neria nehaza ne'mo'a Janataninkura anage hu'ne, Nagra nazanoma hana zana, amane kamage ante'na hugahue. <sup>8</sup> Higeno Jonatan'i'a huno, Egeta rugreramita amate va'manena Filistia vahe'mo'za tageho. <sup>9</sup> Hagi zamagrama tagriku'ma hu'za anante mani'neketa va'mnenoma hanageta'a, zam-agritega marerita ovugahuanki, ama anante otita manigahu'e. <sup>10</sup> Hianagi zamagrama hu'za emareriomma hanageta'a tagra marerigahu'e. Na'ankure Ra Anumzamo'a e'i ana vahera tagri tazampi zamavarentegahue huno mago avame'za taveri hugahie. <sup>11</sup> Anage nehuke ana taregamoke Filistia vahe'mo'zama kumapinti'ma zanage'are amate ome ot'i'na'e. Anama hake'za Filistia vahe'mo'za neznage'za amanage hu'naze, Hibru vahe'ma kerifima fraki'naza vahe'mo'za atirami'za azanki, keho. <sup>12</sup> Hagi Filistia vahe'mo'za Jonatanine hanko'are'ma e'neria ne'enema nezanage'za kezanke hu'za, emareriketa mago'azana rempi huranamisune. Anage'ma hazageno'a Jonatan'i'a hanko'are'ma e'neria nehaza nera asamino, namefi navaririnka marerio. Na'ankure Ra Anumzamo'a Israeli vahe zamazampi anamu vahera zamavarentegahie.

<sup>13</sup> Hagi ana mehimpi Jonatan'i'a azanteti azerino aganuti omere emere huno marenerigeno, hanko'are'ma e'neria nehaza ne'mo'a agumpi avaririno marerigeke, hara ome huke ana vahera zamahe'na'e. <sup>14</sup> Hagi Jonatan'ene hanko'are'ma e'neria nehaza ne'enena, ese hapina 20'a vahera 30'a mita naza hu'nea mopafi ome zamahe'na'e. <sup>15</sup> Hagi anama higeno'a Filistia sondia vahe'mokizmi kumapima mani'nazane, fegu'ma mani'nazane, kumate kumate'ma nevu'za ha'ma nehaza sondia vahe'e'ne, miko Filistia vahe'mokizmi mopafina imi erige'za, tusia zamagogogu hu'naze. E'ina korozana Ra Anumzamo eri fore hu'ne. <sup>16</sup> Hagi Benzameni mopa kazigama Soli naga'ma vahe'ma esagu kegava hu'za mani'naza naga'mo'za, kazana Filistia vahe kevu krefamo'za miko kaziga panani hu'za nefrage'za zamage'naze. <sup>17</sup> Ana zama fore higeno'a Soli'a sondia vahe huzmanteno, tamagra sondia vahera hamprita zamazeri antefatgo nehutma, iza amafina omaninefi keho. Hagi ana'ma hu'za hampriza kazana Jonatan'ene hanko'ama e'neria ne-enena omani'nake'za ke'naze. <sup>18</sup> Hagi Soli'a Ahizana amanage huno asami'ne, Ra Anumzamofo huhagerafi huvempage vogisia erinka eno. (Na'ankure ana knarera Israeli vahe'e'ne ana huhagerafi huvempage vogisia me'negeno hu'ne.) <sup>19</sup> Hagi pristi ne'enema kegagama anante'ma nehakeno'a, Filistia vahe kumapima panini hu'zama ufre efreme nehu'za rankege'ma nehaza zamo'a omerura hu'ne. Hianagi Soli'a pristi ne' Ahizana asamino, knareki atregeta hate vanune. <sup>20</sup> Anama hige'za Soli'ene miko sondia vahe'ane eri atru hute'za

hatera vu'naze. Hagi Filistia vahe'mo'za neginagi hu'za zamagra zamagra bainati kazinkonteti ome zamahe fri eme zamahe fri nehazage'za ke'naze. <sup>21</sup> Hagi ko'ma Filistia vahe'enema umani'naza Hibru sondia vahe'mo'za Jonatanine Solikizanirega ante'za Filistia vhahera zamahe'naze. <sup>22</sup> Hagi mago'a Israeli vahe'ma Efraemi agona kokampima fraki'za mani'naza vahe'mo'za Filistia vahe'ma atre'za fraze kema nentahi'za, atirami'za zamagranena zamarotgo hu'za hara hu'naze. <sup>23</sup> Hagi Ra Anumzamo'a ana zupa Israeli vhahera zamaza hige'za, Bet-Avenia hara hugatere'za vu'naze. <sup>24</sup> Hagi ana zupa Israeli vahe'mo'za ne'zana onazageno hanavezami omane amne hu'ne. Na'ankure Soli'a hanavenantake ke huno, ha' vahe'n'i'a nona hu'na zamahe'za huankita menina ne'zana oneta mani'ne'nunkeno kinaga omasegahie. Hagi iza'o ne'zama nesimo'a, sifna huntoankino Anumzamo'a azeri haviza hugahie. <sup>25</sup> Hagi miko sondia vahe'mo'za zafafi ufre'za kazana tumerima'amo'a aviteno mopafina me'nege'za ke'naze. Hianagi mago'mo'e huno ana tumerina afino one'ne. <sup>26</sup> Hagi tume rimo'a aviteno varehirami'neanagi Soli'ma hanave sifna kema hu'nea kegu kore nehu'za magore hu'za eri'za one'naz. <sup>27</sup> Hagi hanave kema nef'a'ma hu'nea kea Jonatani'a ontahi'neankino, azompa'areti tumemofo rima'a reno neneno ame huno ete hanavea erino ruvunase'ne. <sup>28</sup> Ana'ma higeno'a mago sondia ne'mo Jonatanina asamino, Negafa'a hanavege huno menina ne'zana oneho hu'ne. Hagi nesimo'a sifnafi manino haviza hugahie hu'negu ne'zana ama vahe'mo'za one mani'nageno hanavezamia omnegeno zamu evu evu nehie. <sup>29</sup> Hagi Jonatani'a huno, Nenfa'ma hu'nea kemo'a mikomota tazeri haviza hu'ne. Hagi keho, osi'a tumerima'ama noana hanave erina runavunase'noe. <sup>30</sup> Hagi ne'zana neho hige'za ha'ma hazafinti'ma eri'za ne'zama ne'nazaresina, rama'a Filistia vahe zamahontesine.

<sup>31</sup> Hagi Israeli vahe'mo'za ana zupa ha'ma hu'nazana Filistia vhahera Mikmasiti zamahe'za Aijalon uhanatizageno, tusi zamavaresa higeno zaferina omane amne hu'ne. <sup>32</sup> Hagi ana kinaga zamagare'za vu'za hapinti'ma eri'za e'naza sipisipima agonknaza hari'naza ve bulimakao afu'ma anenta bulimakao afu'enena ome ahe'za kre onte'ante hu'za korana me'nege'za ne'naze. <sup>33</sup> Hagi anama hazage'za mago'a vahe'mo'za Solina eme asami'za, kora me'nea ame'a nene'za Ra Anumzamofo avufina kumi nehazanki ko, hu'za hazageno Soli'a huno, mikomota tra kea rutagrazanki menintafa vuta have rezahe huta amare ementeho. <sup>34</sup> Hagi vuta ome zamasaminke'za sipisipi afu'zamine bulimakao afu'zamia ru kora me'nesige'za nene'za kumi hanagi, amare eme aheho. Ana hazageno ana kenagera ana maka sondia vahe'mo'za bulimakao afu'zmia avare'za eme ahegi'naze. <sup>35</sup> Anante Soli'a Ra Anumzamofonte'ma kresramana vunte ita tro hu'ne. E'i ana ita kora tro huno oke'neaza ese kna'a tro hu'ne.

<sup>36</sup> Hagi Soli'a sondia vhahera amanage huno zamasami'ne, Enketa hanimpi vuta Filistia vhahera hara ome hu'nezmantamanenko masa huno feruseno. Hagi magore huta ozamtregahunanki zamahe vagaregahune, hige'za sondia vahe'mo'za amanage hu'naze, Nazano huzmante'naku'ma hanana zana amane hugahane. Hianagi pristi ne'mo'a kenona huno, amare Anumzamofona antahigeta kesune. <sup>37</sup> Higeno Soli'a Ra Anumzamofona antahigeno, knare natre'nanke'na Filistia vhahera hara ome huzmantenenkena zamagrira Israeli vahe zamazampina zamavarentegahano? Hianagi ana zupa Ra Anumzamo'a kenona huonte'ne. <sup>38</sup> Ana higeno Soli'a sondia kva vahetamina kehu tru huno, Iza kumira hu'negeno Ra Anumzamo'a kea osifi,

refako huta kesune. <sup>39</sup> Hagi Israeli vahe'ma zamavare'nea Ra Anumzamofo Agifi hvempage huankino, iza'o ana kumi'ma hu'nesimo'a frigahie. Hagi nenamofo Jonatanima ana kumi'ma hu'nenu'no'a frigahie. Hianagi mago'mo'e huno ana hazenkegura kea osu'ne. <sup>40</sup> Hagi Soli'a mika Israeli vahera amanage huno zamasami'ne, Nagrane ne' mofavreni'anena amare otigahuanki, tamagra auture uotihu, huno zamasamige'za zamagra hu'za, kagri'ma kavesi'niazza huo. <sup>41</sup> Anage hutazageno Soli'a amanage huno Ra Anumzamofontega nunamuna hu'ne, Israeli vahe'mokizmi Anumzamoka ama ana kumi'ma nagrane ne' mofavreni'anema hu'ne'nunkenga, pristi vahe'ma keno erifore hu zagoma reno kenigenka, Urimi erintegeno keno. Hagi Israeli vahe'mo'zama kumi'ma hu'ne'nagenka, Tamimi erinteg'e'za keho. Anante ana zokagoma re'za kazana, Soline nemofo Jonatani suzamo e'ama higeno, Israeli vahe'mokizmi su'zamo'a e'amara osu'ne. <sup>42</sup> Ana'ma higeno'a Soli'a huno, Nagri'ene nenamofo Jonataninte taisi zokagora reta keho, hige'za ana zokago'ma reza kazana, Jonatani su'amo e'ama hu'ne. <sup>43</sup> Ana higeno Soli'a nemofo Jonatanina antahigeno, nankna kumi hu'nampi nasamio, higeno Jonatani'a huno, Nagra azompanireti tumerina re'na ne'noe. Hagi nagrikura frigahie hananki, nahe frige'na fri'neno! <sup>44</sup> Higeno Soli'a anage hu'ne, Ozo Jonataniga frigahane. Hagi kahe ofrisugen'a Anumzamo'a nahe frigahie. <sup>45</sup> Hianagi sondia vahe'mo'za Solinkura hu'za, Ra ha'ma huno Israeli vahe'ma tavre'nea ne' Jonatani ahefrigahue ne-hano? Ra Anumzamofo agifina Jonatanina avufarera avako huge, ahe ofrigera osugahane. Na'ankure Ra Anumzamo'ene tragoteno mani'neno hanavetino hara hu'neankinka, ohegosane. Anage nehu'za Jonatanina agu'vaziza avrazageno, Soli'a ahe ofri'ne <sup>46</sup> Hagi ana zama hutegen'a Soli'a Filistia vahe'ma zamarotagma nehiretira zamatreno marerige'za, Filistia vahe'mo'za, ete kuma zamirega vu'naze. <sup>47</sup> Hagi Soli'ma eama huno Israeli vahe kinima maniteno'a, maka kazigama Israeli vahe'mokizmi ha' vahe'ma mani'naza vahera hara huzamante ne. Moapu vahe'ma, Amoni vahe'ma, Edomu vahe'ma, Zoba kini vahe'ma, Filistia vahera miko hara huzamanteno zamazeri haviza hu'ne. <sup>48</sup> Hagi hanavetino Amaleki vahera hara hunezamanteno, zamagri zamazampinti'ene ha'ma huzmante'za zamazeri havizama nehaza vahe'mokizmi zamazampintira Israeli vahera zamavare'ne. <sup>49</sup> Hagi Soli ne' mofavreramina, Jonataniki, Isviki Malkisue. Hagi tare mofa zanante'neankino zage mofa'amofo agi'a Merabuki, henkamofo agi'a Mikeli'e. <sup>50</sup> Hagi Soli nenaro agi'a Ahinoamukino, Ahimasi mofare. Hagi Soli sondia vahetema ugota hu'nea nemofo agi'a, Abnakino Neri nemofo'e. Hagi Neri'a, Solina nenogo'e. <sup>51</sup> Hagi Kisi'a Soli nefu manigeno, Neri'a Abna nefu mani'neankinke, zanagra kogna mani'na'e. Hagi nezanafa'a Abielu mani'ne. <sup>52</sup> Hagi Soli'ma kinima manino e'nea knafina, Filistia vahe'enena rama'a zupa hara nehuno, koro'ma osu'za hanaveti'zama ha'ma haza Israeli vahera zamavareno agra'a sondia vahe zamanteg'e'za mani'naze.

## 15

### *Soli'ma Ra Anumzamofo kema rutagre'nea naneke*

<sup>1</sup> Hagi mago zupa Samuel'i'a amanage huno Solina asami'ne, Ra Anumzamo'a nagri hunantege'na Israeli vahe kinima mani'nankura masavena eme fregante'na huhampri kante'noe. Hagi menina Ra Anumzamo'ma kasami'nia nanekea antahise huo. <sup>2</sup> Hagi amanage huno hanavenentake Ra Anumzamo'a hie, Israeli vahe'ma Isipinti'ma

neage'za zamazeri haviza hu'naza zantera, Nagra Ameleki vahera zamazeri haviza menina hugahue. <sup>3</sup> Hagi menina vuta Ameleki vahera ha' ome huzmanteta mika zazimia eri haviza nehuta, zamahe fanane hu vagareho. Hagi vene'nema, a'nema, mofavrema, meni kasente'nenia mofavrema bulimakaoma, sipisipima, kemolima, donkinena mika'a zamahe friho.

<sup>4</sup> Higeno Soli'a Israeli sondia vahera Telaimi kumate zamazeri atru huno zamazeri antefatgo huno keana, 200 tauseni'a Israeli vahe manizageno, Juda vahera 10 tauseni'a sondia vahe mani'naze. <sup>5</sup> Hagi Soli'a sondia vahe'anee Ameleki vahe ha' huzmantenaku kafo ome ante'za timo'ka ko hagage hu'nea karahopi ome fraki'za mani'naze. <sup>6</sup> Anante Soli'a Kenaiti vahekura huno, Ameleki vahera zamatreta viho. Hagi ana'ma osnazana ana vahe'ene tamahe hana hugahue. Na'ankure Israeli vahe'mo'zama Isipima atre'za karankama neageta tamagra knare tamavutamaya huzmanteta zamaza hu'naze. Anage hige'za Kenaiti vahe'mo'za Ameleki vahera zamatre'za vu'naze. <sup>7</sup> Ana hutazageno Soli'ene sondia vahe'amo'zanena Ameleki vahera hara Havira kumate huzmante'za vu'za Isipi mopamofo zage hanati kaziga Suri kumate uhanati'naze. <sup>8</sup> Hagi kini ne'zamia Agakina ahe ofri amne aze'neri'za, maka vahera bainati kazinkonteti zamahe fri'naze. <sup>9</sup> Hagi Soli'ene sondia vahe'amozanena Agakina nohe'za, knare'ma hu'nea sipisipi afutamine, knare'ma hu'nea bulimakao afutamine, agaho sipisipine, agaho bulimakaone marerirfa fenozanena eri havizana osu'naze. Hianagi haviza huno knare'ma osu'nea zantamina miko zamahe frivaga nere'za eri haviza huvagare'naze.

<sup>10</sup> Anante Ra Anumzamo'a Samuelina amanage huno asami'ne, <sup>11</sup> Solina otroanki kinima azeri oti'noa zankura, narimpamo'a haviza hie. Na'ankure agra amagena hunenamino, osuoma hu'na hunte'noaza nehie. Anagema huno asamigeno'a, Ra Anumzamofontega Samueli'a krafage huno nunamuna huno nevigeno kotu'ne.

<sup>12</sup> Hagi Samueli'a nanterame otino Soli ome kenaku nevigeno, mago'a vahe'mo'za asami'za, Soli'a ha'ma hugatere'nea zante'ma nege'za antahimi haverami Karmel kumate ome retru renteteno, anantetira atreno Gilgali vu'ne. <sup>13</sup> Higeno Samueli'ma Solinte'ma ehanatigeno'a Soli'a huno, Ra Anumzamo'a asomu hugante'nie. Hagi Ra Anumzamo'ma ome hugahane huno'ma hunante'nea kante ante'na maka zana huvagare'noe. <sup>14</sup> Hianagi Samueli'a huno, Na'a hige'na sipisipi ageru'ene bulimakao agerura nentahue? <sup>15</sup> Anage higeno Soli'a kenona huno, Sondia vahe'mo'za Ra Anumzana kagi Anumzamofontega kresramna vunte'za Ameleki vahe'mokizmi knare'ma hu'nea Sipisipine bulimakaonena avre'za e'nazanki, mika zana zamahe vaganereta eri haviza hu'none. <sup>16</sup> Hagi Samueli'a huno, Taganenka mani'nege'na Ra Anumzamo'ma oki kenage'ma nasami'nea kea kasamineno, huno Solina azeri korigeno Soli'a huno, na'ane hu'nefi nasamio, huno Soli'a hu'ne. <sup>17</sup> Higeno Samueli'a asamino, Kagrakora kagi omene vahe mani'noe hunka kagesa antahi'nananagi, Ra Anumzamo Agra'a Israeli vahe kinia kazeri oti'ne. <sup>18</sup> Ana nehuno Ra Anumzamo'a amanage huno eri'zankea hugante'ne, kumi zamavu'zamava nehaza Ameleki vahera ha' ome huzmantenka mika zamahe fri vagaro huno hu'ne. <sup>19</sup> Hagi nahigeta Ra Anumzamofo ke'a amagera onteta, knare'nare'zana ha'ma hazafintira ame'amara huta omenerita Ra Anumzamofo avufina havi avu'avara hu'naze? <sup>20</sup> Higeno Soli'a amanage huno Samuelina asami'ne, Hianagi nagra Ra Anumzamofo ke amage ante'na Ra Anumzamo'ma ome hugahanema hunanteazana ome hu'noe. Nagra maka'zana ome zamahe

vaganere'na Kini ne' Agakina avre'na e'noe. <sup>21</sup> Hianagi knare'nare'ma hu'nea sipisipi afutamine, meme afutamine, bulimakao afutamina Gilgali Ra Anumzana kagri Anumzamoftega kresramna vunte'zane hu'za sondia vahe'mo'za avre'za e'naze. <sup>22</sup> Hianagi Samueli'a kenona huno, Ra Anumzamo'a ofama hu'zane kresramna vezanku musena hugahifi, ke'ama amage'ma ante'zanku musena hugahie? Ra Anumzamofa kema antahino amage ante'zamo'a, ofama hu'zana agateregeno, sipisipi afovama erino eme kresramna vu'zana, Anumzamofa kema antahi'zamo agatere'ne. <sup>23</sup> Hagi kema rutagre avu'avazamo'a zogomarenko ke avu'avazamofo kumi kna higeno, kema ontahi'zamo'a, havi anumzante mono hunentea kumikna hu'ne. Kagra Ra Anumzamofa ke rutrage'nanku, Ra Anumzamo'a kini tratetira kagria kazeri atre. <sup>24</sup> Higeno Soli'a huno, Ra Anumzamo'ma kasamigenka nasami'nana kea nagra rutagre'na kumi hu'noe. Na'ankure sondia vaheku koro hu'na ana hu'noe. <sup>25</sup> Hagi nagra nasunku huanki kumi'ni'a atrenenantenka, nagrane ege'na Ra Anumzamofona monora ome huntaneno. <sup>26</sup> Hianagi Samueli'a kenona huno, Nagra kagranena ovugahue. Na'ankure kagra Ra Anumzamofa ke rutagrankeno Israeli vahe kinia mago'ene omanisane huno kazeri atre'ne. <sup>27</sup> Hagi Samueli'ma rukrahe huno Solima atreno vu'za higeno, Soli'a Samuelina za'za kena'amofo atupa'are azerinegeno viana tagato hu'ne. <sup>28</sup> Hagi ana'ma higeno'a Samueli'a Solina asamino, Ra Anumzamo'a menina kinima mani'nenka Israeli vahe'ma kegavama hu'nana trara erimarenko kagrima kagetere'nea ne' ami'ne. <sup>29</sup> Hagi Israeli vahe'mofo Hanavenentake Anumzamo'a, kema hia kemo-fona ruotagreno, antahi'zama'a ruzah osu Anumzankino, Agra vahera omani'neankino antahintahi'a zahera osugosie! <sup>30</sup> Hagi Soli'a mago'ene inene huno Samuelinkura anage hu'ne, Kumi hu'noanagi antahinaminka nagrane egeta, vahe'nimokizmine kva vahe zamavugane, Israeli vahe zamavuga Ra Anumzana kagri Anumzamofona monora ome huntaneno. <sup>31</sup> Anage higeno Samueli'a avaririno vigeno Soli'a Ra Anumzamofona monora ome hunte'ne. <sup>32</sup> Hagi Samueli'a huno, Ameleki kini ne' Agakina avreta echo, huno Samueli'a hige'za avre'za e'naze. Hagi Agakima avre'za ne'ageno'a, hago hara vagareankino nahe ofrigahaze huno agesa antahi'ne. <sup>33</sup> Hagi Samueli'a Agakina asamino, Kagra rama'a vahe zamahanke'za mofavrezamia omani aneramina rama'a mani'nazankino, kagri'enena negrerana mofavre'a omanigahie. Anage huno nehuno Ra Anumzamofa avuga Samueli'a Agakina aheno Gilgali kumate rukafri makafri hutre'ne. <sup>34</sup> Ana huteno Samueli'a atreno Rama vigeno, Soli'a kuma arega Gibea vu'ne. <sup>35</sup> Hagi mago'ane Solina onke mani'neno Samueli'a fri'ne. Hagi Samueli'a Solinkura rama'a asunku hu'ne. Hagi nahigena Israeli vahe'mofo kinia Solina azeri oti'noe huno nehuno, Ra Anumzamo'a asunku hu'ne.

## 16

### *Samueli'a Deviti kini azeri oti'nea naneke*

<sup>1</sup> Hagi Ra Anumzamo'a Samuelina amanage huno asami'ne, Nama'agna Solinkura kasunkura nehane? Israeli vahe kinima mani'neana hago Nagra azeri atre'noe. Hagi pazivepi olivi masavena taginka e'nerinka, Betlehemu Jesi nagatega vuo. Na'ankure Nagra agri mofavre nagapinti mago'mofo kinia manigahie hu'na huhamprinte'noe. <sup>2</sup> Anage higeno Samueli'a huno, Soli'a nahe frigahianki nagra inankna hu'na vugahue? Higeno Ra Anumzamo'a huno, Anenta onte'ne'nia a' bulimakao mago

avrenenka vunka, Ra Anumzamofontega kresramana vuku neoe hunka ome huo. <sup>3</sup> Hagi ome kre sramanama vananter Jesina hugeno ena, Nagri eri'zama erisia mofavre'a kaveri ha'nena masavena taginka frentenka huhamprinto. <sup>4</sup> Hagi Ra Anumzamo'ma asamia kante anteno Samuel'i'a Betlehemu nevige'za, ana kumate kva vahe'mo'za tutagiha'ma hunente'za antri nehu'za amanage hu'naze, Kagra tarimpa fru naneke erinka neano? <sup>5</sup> Anage hu'za antahigazageno Samuel'i'a huno, izo nagra Ra Anumzamofontega kresramana vuntenaku neoe. Hagi tamagra'a tamazeri agru nehuta, nagrane enketa kresramana vamaneno, nehuno Samuel'i'a Jesine mofavrezaga'a zamazeri agru nehuno zamagi hige'za kresramna vutera e'naze. <sup>6</sup> Hagi anama hute'za Jesi'ene mofavre naga'ama azageno'a, kotamofo Eliabuma negeno'a Ra Anumzamo'a tamage huno amamofo huhamprime huno Samuel'i'a antahi'ne. <sup>7</sup> Hianagi Ra Anumzamo'a Samuelina amanage huno asami'ne, Amega avufgare'ene za'za'ma huno hentofazama hu'nenia zanter, kenka huhampri onto. Na'ankure nagra agrira huhampri onte'noe. Hagi Nagra vahe'ma huhamprima nezmantoana, vahe'mo'zama nehaza za hu'na amega zmavufgarera nege'na hunohampruanki, zamagu'are nege'na hunehamprue. <sup>8</sup> Anage higeno Jesi'a anante'mofo Aminadapu huntogeno Samueli avuga e'ne. Hianagi Samuel'i'a huno, Amamofonena Ra Anumzamo'a huhampri onte'ne. <sup>9</sup> Anage higeno Jesi'a mago mofavre'a Sama huntogeno Samueli avuga e'neanagi Samuel'i'a huno, amamofonena Ra Anumzamo'a huhampri onte'ne. <sup>10</sup> Higeno Jesi'a 7ni'a mofavre zaga'a kea hige'za Samueli avuga e'nazanagi Samuel'i'a Jesina asamino, Ra Anumzamo'a ama anampintira mago'mofona huhampri onte'ne.

<sup>11</sup> Hagi anante Samuel'i'a Jesina anage huno antahige'ne, Ama'age mofavreka'a mani'nafi mago'a omanni'nazo? Huno antahigegeno Jesi'a huno, magora amitenamofavrea mani'neanagi sipisipi afu kva huno mani'ne huno asamigeno Samuel'i'a huno, Ne'zana one' otiteta mani'nununanki mago'a vahe huzamantege'za vu'za ome avre'za echo. <sup>12</sup> Higeno vahera huzamantege'za vu'za ome avre'za azageno, ke'neana hentofa vahekino avurgamo rumsa huno anefa hu'ne. Anante Ra Anumzamo'a huno, e'ina neki masavena taginka frenentenka huhamprinto. <sup>13</sup> Ana higeno Samuel'i'a afuhe'mofo zamavufi ana pazine erino masavena tagino frenenteno huhamprinte'ne. Hagi ana knaretim'a e'neana Ra Anumzamofo Avamu'mo'a hanave'ane Devitintera emanineno agrane maka kna manino e'ne. Hagi anama Samuel'i'a huteno'a ete Rama kuma'arega vu'ne.

### *Deviti'a Soli'ene mani'nea naneke*

<sup>14</sup> Hagi anama hutegenoa Ra Anumzamofo Avamu'mo'a Solina atreno vigeno, Ra Anumzamo'a havi avamu huntogeno Soli agu'afina efreno antahintahi'a azeri haviza nehigeno koro hu'ne. <sup>15</sup> Hagi Solina eri'za vahe'amo'za asami'za, Antahio, Ra Anumzamo'a havi avamu huntogeno kazeri haviza nehie. <sup>16</sup> Hagi rantimoka eri'za vahe'kama amama kavugama oti'nonana hurantegeta hapue nehaza zavenama ahe vaheku ome haketa avreta amneno. Hagi inanknarero Ra Anumzamo'ma havi avamu'ma huntesigeno ena ana vahe'mo'za zavena nehehanagenka knarera hugahane. <sup>17</sup> Higeno Soli'a eri'za vahe'a huzmanteno, Vuta hapu zavenama knare'ma hu'za nehesaza vahe ome haketa avreta echo. <sup>18</sup> Higeno mago eri'za ne'mo'a kenona huno, Mago Betlehemu ne' Jesi nagapinti risera ke'noana knare huno hapue nehaza zavena nehegena ke'noe. Hagi agrahentofa agi agonane nekino, koro osu harafa ne' mani'ne. Na'ankure Ra

Anumzamo'a mani'ne. <sup>19</sup> Anante Soli'a kato vahera huzmanteno, Jesina ome asaminkeno ne' mofavre'a Devitina huntenkeno sipisipi kvama huno mani'neregatira atreno nagritega eno. <sup>20</sup> Higeno Jesi'a donki afu agumpi bretine, waini tintafenena erinenteno, mago agaho sipisipinena avrenen-teno huzmantege'za Devitinena avre'za Solintega vu'naze. <sup>21</sup> Hagi Deviti'a Soli eri'za agafa huno emergeno, Soli'a tusiza huno avesinentegeno, agra Solina hanko'ama eri eri'za vahe mani'ne. <sup>22</sup> Hagi Soli'a Jesina ke atrenteno, Muse hugantoanki atregeno Deviti'a nagri eri'za vahe manino. Na'ankure agra knare huno eri'zana erige'na muse huntue. <sup>23</sup> Hagi Ra Anumzamo'ma havi avamu'ma huntegeno Solinte'ma egeno'a, Deviti'a hapu zavena'a erino eme nehegeno, Soli'a nentahino ete knare antahi'zana e'nerigeno, havi avamu'mo'a atreno nefre.

## 17

### *Devitine Goliatikizni naneke*

<sup>1</sup> Hagi Filistia vahe'mo'za hahunaku Soko kumate Judia mopafi son-dia vahezmia zamazeri atru hu'naze. Hagi Sokone Aseka kumatremofo amu'nozanifi me'nea kumate Efes-Damimi seli nonkumara ome ante'za mani'naze. <sup>2</sup> Hagi Soli'ene Israeli sondia vahe'mo'za Ela agupofi seli nonku-mara ome ki'za mani'ne'za, Filistia vahera hara huzmante'haku manimpi hu'za vu'naze. <sup>3</sup> Hagi mago agonarera Filistia vahe'mo'za eme otizageno, mago kaziga agonarega Israeli vahe'mo'za eme ot'i'zageno amu'no zamifina agupo me'ne. <sup>4</sup> Hagi ha'pina agimo marerisa nera Gati nagapinti ne' Goliat'i'a Filistia vahe seli nonkumapinti atiramino e'ne. Ana nera zaza amo'a 2mitagi 75 sentimita hu'ne. <sup>5</sup> Hagi agra bronsireti tro hu'naza fetori asenirera nentanino, nozame ahehem'o'ma hu'neaza hu'za ha' kukena bronsireti tro hu'nazana kna'amo'a 57ni'a kilogremi hu'nea kukena antanine. <sup>6</sup> Hagi amoteti urami'nea aga nona bronsire tro hu'naza nentanino, bronsireti tro hu'naza krugru keve afumpina eri'ne. <sup>7</sup> Hagi ana keve'amofo asana'amo'a kukenama tro'ma nehaza masinimofo zafa'agna higeno, atohe'nea keve agona'amofo kna'amo'a 7 kilogremi hu'ne. Hagi hanko'ama erino vu ne'mo avuga vu'ne. <sup>8</sup> Hagi Goliat'i'a eme otino anage huno Israeli vahera kezati zami'ne, Tamagra na'ante hara hunakura manimpia huta mani'naze? Tamagra Soli eri'za vahe manizage'na, nagra Filistia sondia ne' mani'noe. Hagi tamagra mago ne' huntenkeno eramino hara nagranena eme hino. <sup>9</sup> Hagi ana ne'mo'ma ha'ma eme hunanteno nahe frisigeta, tagra tamagri kazokzo eri'za vahe umanigahune. Hagi nagrama ana ne'ma ahe frisugeta, tamagra tagri kazokzo eri'za vahe manigahaze. <sup>10</sup> Anante Goliat'i'a huno, Menina Israeli vahe'mota hara huramante'na ke'za huanki, mago ne' huntenkeno ena, hara ha'mneno! <sup>11</sup> Hagi Soli'ene mikä Israeli vahe'mo'za anankema nentah'i'za, zamagogogu nehu'za tusi kore hu'naze. <sup>12</sup> Hagi Deviti'a Jesi nemofo Efrata nagapinti Betlehemu kumate ne'kino, Judia mopafinti nere. Hagi Jesi'a 8'a mofavre zamante'neankino, agra Soli'ma kini mani'nea knafina ozafare'ne. <sup>13</sup> Hagi Jesina kota 3'a mofavrezaga Eliabuki Abinadapuki Samaki hu'za Filistia vahe'ene ha' hunaku Soli sondia vahe'ene umani'naze. <sup>14</sup> Hagi ana 3'a kota mofavreramimo'za Soli avariri'za hate vu'naze. Hagi Jesi mofavre nagapina Deviti'a henka amitenenae' mani'ne. <sup>15</sup> Hagi Deviti'a Soli eri'zama e'neriretira nefantega Betlehemu vutere nehuno, nefaa sipisipia ome kegava hu'ne. <sup>16</sup> Hagi Goliat'i'a 40'a zagegnafi nanterane kinaganena eme otino Israeli vahe'mo'za mago ne'ma hunte'nageno e'nigeno ha'ma

hanakura ke'zankea hutere hu'ne. <sup>17</sup> Hagi mago kna Jesi'a anage huno Devitina asami'ne, Ama 10ni'a kilogremi witi ragama kre hagage hunte'ene, 10ni'a breti kona erinka nempukamo'za sondia vahe'enema seli nonkuma ome ante'za mani'nazarega ame hunka vunka ome zamio. <sup>18</sup> Hagi eri karagefe amirinena 10ni'a erinenka, sondia vahete kva nemofona ome neminka, nempukamo'za inankna hu'za mani'nafi ome zamagetenga eme nasamio. <sup>19</sup> Hagi zamagra Soli'ene mika Israeli sondia vahe'enena Ela agupofi Filistia vahe ha'huzmante'naku umani'naze. <sup>20</sup> Hagi nanterana Deviti'a otino kegavama hanaza vahe zamazampi sipisipi kevu'a netreno, Jesi'ma asamia kante anteno maka'zana e'nerino vu'ne. Hagi ana seli nonkuma'ma ante'za mani'nare uhanatiana, miko sondia vahe'mo'za ha' ome hunaku rankege hu'za vu'naze. <sup>21</sup> Hagi Israeli sondia vahe'enena Filistia sondia vahe'mo'zanena ha'hunaku rugaraga umanimpi emanimpi hu'naze. <sup>22</sup> Hagi Deviti'a fenoma kegava nehia neta nanazama'a ome netreno, ana ha'ma hu'za nehazarega vuno nempu'amokizmi ome hu frufra huzmantenu vu'ne. <sup>23</sup> Hagi Deviti'a anama nempu a'mozanema keagama ome nehigeno, Gati nagapinti ha'pima agima me'nea Filistia ne' Goliat'i a eno ko'ma kema nehiaza huno Israeli sondia vahekura kea eme nehigeno, Deviti'a antahine. <sup>24</sup> Hagi mika Israeli sondia vahe'mo'zama ana ne'ma nege'za, zamagogogu nehu'za atre'za fre'za e'naze. <sup>25</sup> Hagi Israeli sondia vahe'mo'za zamagra zamagra hu'za, E'in'e'ma, Israeli vahe'ma zamazeri zamarimpa ahensaku'ma eterema nehia ne'ma ahisia ne'mofona kini ne'mo'a rama'a fenozana nemino, mofa'anena aminkeno, a' erintena naga'amo'za takisi zagoa mi'zana osugahaze. <sup>26</sup> Hagi Deviti'a anante oti'naza sondia vahera zamantahigeno, Antu Filistia ne'ma aheno Israeli vahe'ma zamazeri zamagaze nehiazama eritresia nera na'a kini ne'mo'a huntegahie? Hagi oku avufga taga osu Filistia vahe'mo'a mani'nea Anumzamofo sondia vahera huhavizana huontegahie. <sup>27</sup> Hige'za kenona hunte'za, E'im a kasamiza kante anteno, ana ne'ma ahe frisia vahera kini ne'mo'a huntegahie. <sup>28</sup> Hagi ana vahe'enema Deviti'ma kegaga nehigeno nempu'amo Eliabu'ma nentahin'o'a, tusi arimpa Devitina ahententeno anage hu'ne, Na'ante amafina e'nane? Iza sipisipi nagara kegava higenka trampina zamatrekena e'nane? Nagra antahi'noe, kefo antahi'zankamo higenka kagra kavufgara ra hunka ha'mofo uruha hunaku amafina e'nane. <sup>29</sup> Higeno Deviti'a kenona hunteno, Nagra amne zamantahinegoanki, na'a hu'noe? <sup>30</sup> Anage nehuno ete rukrahe huno mago'amokizmi ome zamantahigege'za, ko'ma hu'naza kante ante'za ana nanekege asami'naze.

### *Deviti'a Goliatima ahe fri'nea naneke*

<sup>31</sup> Hagi Deviti'ma hu'nea nanekea mago'a vahe'mo'za nentahi'za Solina ome asamizageno, Soli'a vahe huzmanteno ome avreta echo hige'za, vu'za ome avre'za azageno, <sup>32</sup> Deviti'a Solina asamino, Mago vahe'mo'a antu ana Filistia nekura körera osino, nagra eri'za ne'kamo'na hara ome huntegahue. <sup>33</sup> Higeno Soli'a kenona hunteno, Kagra mofavre mani'nanankinka antu ana nera hara ome huontegahane. Agra nehazavema mani'neregati hara huno manino e'nea ne' mani'ne. <sup>34</sup> Anage higeno Deviti'a kenona huno, Nenfa sipisipima kvama hu'na eri'za vahekamo'na mani'nogenoma, sipisipi kevufinti'ma laionimo'o Beamo'ma mago'ma eme avreno nevige'na, <sup>35</sup> rotago hu'na agipinti ome ahena avre'na e'noe. Hagi rukrehe'ma huno nampri'zama hige'na agemazampa azokate vamagi'na azer'nen ahe fri'noe. <sup>36</sup> Hagi kinimoka nagra laionine beanema ahenoankna hu'na,

agoza ano taga osu Filistia nera ahegahue. Na'ankure agra mani'nea Anumzamofo sondia vahe huhavizana hunte'ne. <sup>37</sup> Mago'ane Deviti'a huno, beane laionimofo azampinti'ma nazama hu'nea Ra Anumzamo naza huno antu Filistia ne'mofo azampintira nagu'vazigahie. Anage higeno Soli'a huno, Ra Anumzamo'a kagrane manigahianki vuo. <sup>38</sup> Nehuno Soli'a agra'a kukena hunenteno, bronsireti tro hu'naza fetori'a Devitina antaninenteno, ha' kukena hunte'ne. <sup>39</sup> Hagi Deviti'a ana kukena huno onke'neankino, za'za kukenare bainati kazina renenteno, vuno eno huno ke'ne. Hianagi knarera huontegeno Solina asamino, nagra ama'na kukena hu'na onke'noa zanki'na, antanina hara ome osugahue, nehuno Deviti'a ana zantamina zafitre'ne. <sup>40</sup> Anantetira azompa'a enerino, osi kraho timpinti 5fu'a pehe hu'nea havermi ome zogino ku'afi erinerino, azampina kao akrutetima tro'ma hu'ne'za havema erinte'za mate'ma vu'za nehaza ati'a e'nerino, ana Filistia ne'ma mani'nerega vu'ne. <sup>41</sup> Hagi Goliatina hanko'ama e'heria ne' egota higeno, agra amefi'a Devitintega e'ne. <sup>42</sup> Hagi ana ne'mo'ma Devitima keana, avufgamo'a knare huno masamasa huno hentofaza hu'nea nehaza ne' negeno, hara huga osu'ne huno Devitina kefenkami atre'ne. <sup>43</sup> Hagi ana Filistia ne'mo'a Devitina asamino, Nagra kra mani'nogenka azomparetira hara hunante'naku ne'ano? Nehuno agra'a anumzamofo agifi Devitima azeri haviza hanigu kazusi ke hunenteno, <sup>44</sup> amanage hu'ne, Kagra are ege'na kagrirra kahena kavufga harezama vanoma nehaza namazagane, mopafima vanoma nehaza afi zagane zami'nena negahaze. <sup>45</sup> Higeno Deviti'a kenona'a huno, Kagra nagri'ma nahenakura bainati kazine, karugru kevene hankone erinenka ne'an. Hianagi nagra kagri'ma ha'ma hugante'naku'ma neona, Israeli sondia vahetamimofo Hanavenentake Ra Anumzama huhaviza hunentana Anumzamofo agifi hara hugante'naku neoe. <sup>46</sup> Hagi menina Ra Anumzamo'a kagrirra nazampi kavrentenkena, kahena knankena akafrigahue. Hagi Filistia sondia vahera menina zamahe'na zamavufaga hare'za vanoma nehaza namaramine, mopafi vanoma nehaza afi zagagafa zami'nena negahaze. E'ina hanuge'za mika kokankoka vahe'mo'za antahi'za ke'zama hanazana, Israeli vahe'mota Anumzana tamage Anumza mani'ne hu'za hugahaze. <sup>47</sup> Hagi ana hanuge'za amama mani'naza vahe'mo'za Ra Anumzamo'a bainati kazinteti'ene keveretira tagura ovazigahie hu'za hugahaze. Na'ankure Ra Anumzamofo hakino, Agra'a hara huramanteno tamagrira tagri tazampi tamavrentegahie. <sup>48</sup> Hagi Goliatima Deviti'ma ahenaku'ma erava'o ne-higeno, Deviti'a agareno tava'oma'are nevuno, <sup>49</sup> ku'afinti mago havefino kao akruteti'ma tro'ma hu'ne'za havema erinte'za mate'ma vu'za nehaza ati'afi erinteno, eri kagigagi huteno matevuno ana Filistia nera aseni rurako huno ahegeno, ana havemo'a asenifi hanagatino ufregeno, avugosaregati mopafi traka huno umasene. <sup>50</sup> Hagi Deviti'a kao akruteti'ma tro'ma hu'ne'za havema erinte'za mate'ma vu'za nehaza atifinti Filistia nera ahefrino hara hugatere'ne. Hagi Deviti'a magore huno azampina bainati kazina e'ori'ne. <sup>51</sup> Hagi Deviti'a agareno agofetu ome oti'neno, Goliatina bainati kazima'a ku'afinti ome avazu huno ahenefrino, agenopa akafritre'ne. Hagi Filistia vahe'mo'zama kageno hanavenentake ha' ne'ma frige'za zamagra rukrahe hu'za kore fre'naze. <sup>52</sup> Hagi ana'ma hige'za Israeline Juda sondia vahe'mo'za rankezaneti'za Filistia vahera zamarotago hu'za ome zamatetre eme zamahetre hu'za Ekroni kuma kafante uhanati'naze. Hagi ana Filistia vahe'mokizmi zamavufgamo'a Saraimine Gatine Ekroni agupo

kantega meno vu'ne. <sup>53</sup> Hagi Israeli vahe'mo'za zamarotago hu'za Filistia sondia vahera ome zamatrete'za, ete e'za ana Filistia vahe'mo'zama seli nonkuma'zmia atre'za fre'naza kumapima me'nea zantamina eme eri vagare'naze. <sup>54</sup> Hagi Deviti'a Goliat agenopa erino Jerusalemi vu'ne. Hianagi ana ne'mofa ha' zana erino seli noma'afi ome ante'ne. <sup>55</sup> Hagi Devitima Goliat'i'ma ha' hunte'naku'ma nevigeno, Soli'ma negeno'a sondia vahete kva ne' Abnana antahigeno, Ami iza mofavre? huno antahigegeno, Abna'a kenona huntenu, kini ne'moka tamage hu'na ami ana risera ke'na antahi'na osu'noe. <sup>56</sup> Higeno Soli'a huno, Iza mofavre mani'nefi vahe ome zamantahigenka go. <sup>57</sup> Hagi Deviti'ma Goliat'i'ma ome aheteno ana ne'mofa agenopama azampi e'rineno ne-egeno'a, Abna'a ame huno Devitina avreno Solini vu'ne. <sup>58</sup> Hagi Soli'a Devitina antahigeno, Kagra iza mofavre mani'nane? Higeno Deviti'a kenona huno, Betlehemu kumateti kagri eri'za ne'mofa Jesi mofavre mani'noe.

## 18

### *Devitine Jonatanine naneke*

<sup>1</sup> Hagi Deviti'ma Soli'enema ke'ma huvagaretogeno'a, henka Jonatani'a Devitina avesinenteno, agra'agu'ma avesinenteaza huno tusiza huno avesinte'ne. <sup>2</sup> Hagi ana knareti'ma vu'neana Soli'a Devitina atregeno nefi nontega ovu'neanki, azerigeno agrane mani'ne. <sup>3</sup> Hagi Jonatani'a hanavenentake huvempage Devitina hunte'ne. Na'ankure agra'aguma avesinenteaza huno tusiza huno Devitina avesinte'negu anara hu'ne. <sup>4</sup> Hagi Jonatani'a za'za kukenama amegama antani'neana, Deviti hatenemino, ana agofetura ha' kukena'ane, bainati kazima'ane ati'ane amu nofi'anena ami'ne.

<sup>5</sup> Hagi nazankuro Soli'ma Devitinku'ma hugahane huno hiazana Deviti'a knare huno anazana higeno, Soli'a azeri antesga huno sondia vahete kva ante'ne. Hagi ana zankura maka vahe'mo'zane Soli eri'za vahe'mo'zanena muse hu'naze. <sup>6</sup> Hagi Deviti'ma Filistia ne'ma ahetege'za ha'ma huzmagaterete'za ete kumategama azageno'a, maka Israeli kumapinti a'mofa'mo'za nasenasepane, hapu zavenane eri'za ahe'za muse hu'za avo nehage'za Solina amarara hu'naze. <sup>7</sup> Hagi ana a'mofa'mo'za zavena nehe'za anage hu'za zagamera hu'naze, Soli'a 1tauseni'a ha' vahе zamahegeno, Deviti'a 10 tauseni'a ha' vahе zamahe'ne. <sup>8</sup> Hagi ana zagamema Soli'a nentahino'a, tusi arimpa ahegeno amanage hu'ne, Zamagra zagamema hazana Devitinkura rama'a 10tauseni'a aheneanki, nagrikura 1tauseni'a ahene hu'za nehaze. Hagi agra maka zantamina erineno, nagri no erino kini mani'naku hige'za e'inahu zagamera hu'naze. <sup>9</sup> Hagi ana knareti'ma vu'neana Deviti'ma kini tra'ama erizanku Soli'a kaniverenteno vu'ne.

### *Soli'a Devitina kaniverenenteno ha'rente'nea naneke*

<sup>10</sup> Hagi anante knazupa Anumzamo'a havi avamu huntogeno Solintera hanavetino eno eme azeri haviza higeno, noma'afi mani'neno neginagi nehuno azampina karugru keve e'rinenego, Deviti'a nehiaza huno zavena azampi azeri'neno ahe'ne. <sup>11</sup> Hagi Soli'a karugru kevereti Devitina nozafare renarente'ne huno nentahino, karugru keve matevuno reana hantaga higeno, Deviti'a atreno fre'ne. Hagi e'inahu'zana tare zupa hu'ne. <sup>12</sup> Hagi Soli'a Devitinkura koro hu'ne. Na'ankure Ra Anumzamo'a Solina atreno Deviti'ene mani'ne. <sup>13</sup> Hagi Soli'a Devitina tavaoma'aretira azeri netreno 1tauseni'a sondia vahе kva manio huno huntogeno, sondia vahе

zamavareno hate vu'ne. <sup>14</sup> Hagi hakarezama Deviti'ma hu'nea zamo'a knare ke'za hu'ne. Na'ankure Ra Anumzamo'a agrane mani'negeno'e. <sup>15</sup> Hagi Soli'ma keno antahino'ma hiama Deviti'ma hiazamo'ma knare zanke higeno'a, Soli'a mago'an'e tusi koro hu'ne. <sup>16</sup> Hianagi miko Israeli vahe'ene Juda vahe'mo'za Devitina zamavesinte'naze. Na'ankure agra knare huno sondia vhahera hatera zamavareno vuno eno hu'ne.

<sup>17</sup> Hagi mago zupa Soli'a anage huno Devitinkura hu'ne, Kota mofa'ni'a Merapuna kaminugenka a' erintegahane. Hianagi kotazana kagrama hanavetinka Ra Anumzamofo ha'ma hanunka, ana ara erigahane. Na'ankure Soli'a antahi'zama'afina Devitina nagra'a nazarana ahe ofrisuanki, Filistia vahe'mo'za hara hunte'za ahe frisaze huno antahi'ne. <sup>18</sup> Hagi Deviti'a kenona huntenu, Nagra knarera osugeno, Israeli vahepin a naga'nimokizmia zamagia omane vahe mani'nazanki'na, kini ne'moka mofara ara erigara osu'noe. <sup>19</sup> Hagi Soli'a Merapuna Deviti ara erintegahie huno hu'neanagi, anama zanazeri aravema hunaku'ma hia zupa, Soli'a mofa'a Merapuna omi netreno, Mehola kumate ne' Adrieli avremigeno ara eri'ne.

### *Soli mofa Devitima a' eri'nea naneke*

<sup>20</sup> Hagi ana knafina Mikeli'a Solina mago mofa'agino, Devitima avesin-tea kea Solina eme asamizageno'a muse nehuno, <sup>21</sup> Anage hu'ne, nagra ana mofania Devitina aminugenno ara erino, nenanemo'zana hanige'na, huntenugeno vuno Filistia vahe'ene hara ome nehanige'za ahiegahaze. Nehuno Soli'a Devitina asamino, Menina mago'en'e nagri mofara erinka nenanemo'zana hugahane. <sup>22</sup> Hagi Soli'a eri'za vahe'a huzamanteno anage hu'ne, vuta Devitina agrake'ma mani'nenigeta ome asamita, Soli'a agrane mika eri'za vahe'anena muse hugantazanki, kagra mofa'a a' erintenka nenemo'za huo huta ome asamiho. <sup>23</sup> Higeno ana nenekea Devitina ome asamizageno, Deviti'a anage huno kenona huzamante'ne, Tamagra tamagesa antahi'zana kini ne'mofo nenemozama hu'zana osi'za me'ne hutma nehazo? Nagra nagi omne namunte omane ne' mani'noe. <sup>24</sup> Hagi Soli eri'za vahe'mo'zama Deviti'ma hu'nea nanekema eri'za ome nesamizageno'a, <sup>25</sup> Soli'a mago'an'e eri'za vahe'a huzamanteno, amanage huta Devitina ome asamiho, Mofanima mizama hunaku'ma haniana 100'a Filistia venenemokizmi zamagoza anoma'a zamaheno taga huno egahie huno hu'ne huta ome asamiho. Hianagi Solima agesama antahiana ha' ome nehanigeno ahesaze huno antahi'ne. <sup>26</sup> Hagi Soli eri'za vahe'mo'zama ana nanekema Devitima eme asamizageno'a Deviti'a muse ana naneker- era hu'neanagi, anama knama ante'nea kna eohanati'negeno, <sup>27</sup> Deviti'ene sondia vahe'amo'za vu'za 200'a Filistia vene'ne ome zamahe'za, zamagoza anona taga huno erino kini ne' eme ami'ne. Ana higeno kini ne'mo'a mofa'a Mikelinam amigeno Deviti'a ara erino kini ne'mofo nenemo'za hu'ne. <sup>28</sup> Hagi Soli'ma antahino kenoma hiama Ra Anumzamo'ma Deviti'ene manigeno, mofa'amo Mikeli'ma Devitima avesintegeno'a, <sup>29</sup> Soli'a mago'an'e tusi koro Devitinkura nehuno, hara renteno vu'ne. <sup>30</sup> Hagi Filistia sondia vahe'mofo kva vahe'mo'za sondia vhahera rama'a zupa zamavare'za e'za Israeli vhahera hara eme huzamante'naze. Hianagi ana'ma hu'za Soli sondia vahe'ma ha'ma eme hunezamantageno'a, Deviti'a knare huno hara huzamagatenerge'za maka vahe'mo'za antahi'za ke'za nehu'za, Devitina ra agi ami'naze.

## 19

### *Deviti ahe'naku Soli'a maraguzati'nea nanenke*

<sup>1</sup> Anante Soli'a nemofo Jonatanine mika eri'za vahe'aramina Devitina ome ahe friho huno huzmante'neanagi, Soli nemofo Jonatani'a Devitina tusiza huno avesinte'ne. <sup>2</sup> Ana hu'neankino Jonatani'a Devitina eme asamino, Nenfa Soli'a kahe fri'naku nehianki, oki nanterana kegava hu'enka meg'i'a ufrakinka manio. <sup>3</sup> Hagi anama fraki'nenante nenfa'enena ome otita mani'neta kagriku'ma antahige'na kesugenoma, na'ane huno kagrikura nasamigahie ananke eme kasamigahue. <sup>4</sup> Hagi anante nanterana Jonatani'a nefi Solina ome asamino, kinimoka eri'za vaheka'a Devitima ahenka kumima hanankeno'a knarerera osugahie. Na'ankure agra mago havizana kagrira huoganteno kumira osu'ne. Hagi agra rama'a knare avu'avara huno kaza hu'ne. <sup>5</sup> Hagi agra'a avufgagu agesa nontahino Goliatina hara ome hunteno ahe frigeno Ra Anumzamo'a Filistia vahe'mofa zamazampintira Israeli vahera zamagu'vazine. Hagi nagafare hazenke'a omane ne' Devitina ahenka kumira hu'za nehane?

<sup>6</sup> Hagi Soli'a nemofo Jonataninkea antahimino anage huno hanave huveppagea hu'ne, Kasefa huno mani'nea Ra Anumzamofo agifi huveppage huoanki'na, Devitina ahe ofrigahue. <sup>7</sup> Anage hutegeno Jonatani'a Devitina ke higeno egeno, nefi'enema hu'na'a maka nanekea asamiteno, avreno Solinte vigeno ko'ma nehiaza huno eri'zama'a omerinenteno mani'ne.

<sup>8</sup> Hagi henka Filistia vahe'mo'za ha' eme huzmantageno, Deviti'a ana vahera hanavenentake huno ha' ome huzmanteno rama'a vahe zamahe frige'za, mago'a Filistia vahe'mo'za atre'za fre'naze. <sup>9</sup> Hagi mago zupa Soli'a karugru keve'a azampi azerineno noma'afi mani'negeno, Devitia zavena neheno mani'nere Ra Anumzamo'a azeri haviza hu havi avamura mago'ene huntegeno Solina agu'afi efregeno, <sup>10</sup> Soli'a karugru kevereti Devitina no zafare renarentenaku matevuno re'neanagi, mani'ganegeno kevemo'a nozafafi anirigeno, ana kenageke Deviti'a atiramino fre'ne.

<sup>11</sup> Hagi Soli'a mago'a vene'ne huzamanteno, Deviti nonte ome kvagrita mani'neta nanterama senigeta aheho huno huzamante'ne. Hianagi Devitina nenaro Mikeli'a asamino, Meni kenage atrenka amafintira fro, ofresanana oki nanterana eme kahefrigahaze. <sup>12</sup> Anage nehuno Mikeli'a nomofo zaho eri kampinti avretregeno Deviti'a uramino fre'ne. <sup>13</sup> Hagi Mikeli'a antre'za vahe amema'a tro hunte'nazaza erino Deviti'ma nemasea tafete nenteno meme azoka erino asenia antesga nehuno, tavrave erino refitente'ne. <sup>14</sup> Hagi Devitima azeriho huno'ma Solima huzamanteg'e'za aza vahe'mokizmia Mikeli'a zamasamino, Deviti'a kri erino mase'ne. <sup>15</sup> Hige'za ana kea ome asamizageno, Soli'a ana vahera ete huzmanteno, Tafe'arema mase'nena ana tafe'aga avreta emarerinke'na ahe fri'neno. <sup>16</sup> Hagi anama huzmantage'za vu'naza vene'nemo'zama nompima efre'za tafete'ma eme kazana, vahe amema'a antre'za tro hu'naza vahe meme azokateti asenia antesga hu'nege'za ke'naze. <sup>17</sup> Anama higeno'a Soli'a Mikelina asamino, nahigenka nagrira renavatga hunka ha' vahe'n'i'a avretrrankeno fre'ne? Higeno Mikeli'a kenona huno, nagri'ma naza hunka navre otre'nanke'na kaha frigahue huno hia zanku avre atrogeno fre'ne.

<sup>18</sup> Hagi Deviti'a freno Rama kumate Samuelinte uhanatino, maka zama Soli'ma hunteazamofo nanekea ome asami'ne. Anantetira Samueli'ene Devitikea atre'ne Naioti kumate umani'n'a'e. <sup>19</sup> Hagi mago'a vahe'mo'za Solina eme asami'za, Deviti'a Rama kaziga Naoti kumate mani'ne. <sup>20</sup> Hagi

Soli'a Deviti ome azerihogu mago'a kato vahe huzmanteg'e'za vu'naze. Hianagi ana vahe'mo'zama ome kazana kasnampa vahe kevumo'za Samueli'ene oti'ne'za kasnampa ke nehazage'za ome nentahizageno, Ra Anumzamofo Avamumo'a zamagrriteria hanavetino ege'za zamagranena ana hu'za kasnampa ke hu'naze. <sup>21</sup> Hagi anagema eme asamizageno'a, Soli'a mago'ane rama'a vahe huzamante'neanagi ana vahe'mo'zanena kasnampa kege'za ome hu'naze. Hagi nampa 3 zupa ana zanke huno mago'ane kato vahera huzmanteg'e'za vazanagi, ana zanke hu'za kasnampa ke ome hu'naze. <sup>22</sup> Hagi anama huvagareteno'a Soli'a agra'a Rama mopafima rantinkerima me'nerega Seku vuno anage ome hu'ne, inantega Samuelike Devitikea mani'na'e? Anage hige'za zamagra asamiza, Rama kaziga Naioti kumate mani'na'e hu'za asami'naze. <sup>23</sup> Anage hazageno Soli'a Rama kaziga Naioti kumate vu'ne. Hagi karankama nevigeno Ra Anumzamofo Avamumo'a hanavetino Solintera egeno, agranena kasnampa ke hume nevuno Naioti kumatera uhanati'ne. <sup>24</sup> Hagi Soli'a za'za kukena'a hatenetro Samuelsi avuga kasnampa kea nehuno, avufga avapako mase'negeno vuno kotuno hanina ome hu'ne. E'ina hu'nea agafare Solinkura kasnampa kema hazafina, agranena kasnampa vahe mani'neo hu'za nehaze.

## 20

### *Jonatani'a Deviti aza hu'nea naneke*

<sup>1</sup> Hagi Devitia Rama kaziga Naioti kumatetira freno Jonataninte eno, amanage huno Jonatanina eme antahige'ne. Nagra na'a hu'noe, nahavizana nehu'na, nankumi negafana hunte'nogeno, nagrira nahe frinakura nehake? <sup>2</sup> Hagi Jonatani'a kenona hunteno, Nenfa'a osizano ra zana magore huno nagrriteria eri frara nokiankino, kahe ofrigahie. Hagi na'a hanigeno nenfa'a kagri'ma kahe nanekea eri frara kigahie? A'o anara osugahie!

<sup>3</sup> Hianagi Deviti'a hanave huvempage huno, Kagrama nagri'ma kavesinenantana zana negafa'a keno antahino hu'neno, agra nenamofo Jonatanina ama ana kema asaminugen'o arimpamo'a knarerera osugahie huno antahi'ne. Hianagi tamage huno kasefa huno mani'nea Ra Anumzamofo avufine kagri kavufinena huvempage huankino, nagrira ame huno nahe frigahie. <sup>4</sup> Higeno Jonatani'a Devitina asamino, Nazano hunanto hunka hanana zana, amane hugantegahue. <sup>5</sup> Hagi Deviti'a Jonatanina asamino, Antahio, okina kasefa ika eme antegeno ne'zama nenaza knagi, nagra kini ne' ene ne'zana nosinagi natrege'na trampi ufraki'na mani'nanenko 3'a zagegnamo'a nagatereno evino. <sup>6</sup> Hagi negafa'ma onagesuno'ma kantahigena kagra amanage hunka asamio, Devitina naga'amo'zma Betlehemu kumate atru hu'za kafugu kafugu'ma nehazaza hu'za kresramama vanarega anantega vugahue huno eme tutu huno nantahige'na huntogeno vu'ne hunka asamio. <sup>7</sup> Hagi anagema hanankeno'ma knarerera'ma hanigenka, eri'za vahekamona knare hu'na manigahue hunka antahio. Hianagi ananke'ma asami'nankeno arimpama ahe'na, eri'za vahekamo'na nahe frigahie hunka antahio. <sup>8</sup> Hagi kagra eri'za vahekamo'na knare kavukva hunante'hane. Na'ankure kagra Ra Anumzamofo avufi eri'za vaheka'amo'na so'ema huta manisu'a huvempagea hunante'nane. Hagi kagra navrenka negafanteria ovunka, nagrama mago havizama hu'enugenka, kagraka'a nahe frio. <sup>9</sup> Higeno Jonatani'a huno, i'o anara osugahue. Nenfa'ma kahekema hanige'na ame'

hu'na kasamigahue. <sup>10</sup> Anante Deviti'a Jonatanina asamino, Ana nanekema negafama asami'nankeno arimpama ahenantenia nanekea iza erino ome nasamigahie? <sup>11</sup> Anagema higeno'a Jonatania Devitinkura huno, Egeta hoza agupofi magoka va'mneno, huno Jonatani'a higeke, magoka vu'na'e. <sup>12</sup> Anante Jonatani'a anage huno Devitina asami'ne, Ra Anumzana Israeli vahem Anumzamofo avufi hvempage huankino, tare knama evanige'na, nenfa'ma kahekema hania nanekea antahigahoanki'na, arimpma fruma hugante'nia kea eme kasamigahue. <sup>13</sup> Hianagi nenfa'ma kahenaku'ma hanige'na, eme okasami'nugenka frenka kagu'ma ovazisankeno'a, Ra Anumzamo'a nagrira nona hunanteno nahe frigahie. Hagi Ra Anumzamo'a nenfa'enema nemaniaza huno kagri'enena manigahie. <sup>14</sup> Hagi kagrima Ra Anumzamo'ma knarema hugantenigenka maninka vanunka, nagrira knare hunantenka nahe ofriho. <sup>15</sup> Hagi Devitiga ha' vahekamofoma ama mopafinti'ma Ra Anumzamo'ma zamahe vagamaresigenka, nagri nagara knare kavukva huzmantenka vuo. <sup>16</sup> Anante Jonatani'a Devitinkura amanage hu'ne, kagrane amama hvempa kema hu'a nanekea kagrane nagakanena tamagera okaniho. Hagi nagri'ma navesiana ha' vaheka'a Ra Anumzamo'a Agra'a hara huzmanties. <sup>17</sup> Hagi Jonatani'a mago'ane tragoteke manisa'a hvempage Devitina hunte'ne. Na'ankure Jonatani'a agra'agu'ma ave'nesiaza huno Devitina tusiza huno avesi ante'negu anara hu'ne. <sup>18</sup> Anante Jonatani'a Devitina asamino, Okina kasefa ikante'ma musenkase hu'za ne'za nenaza knagino, ana musenkasema hanafina kagri tramo'a amane megahie. <sup>19</sup> Hagi nampa 3 knazupa kinaga, ko'ma frakinkama mani'nana have kevuma me'nerega ame hunka umanio. <sup>20</sup> Hagi nagra 3'a kevea mafe'ante'na ana haveregah ahetregahue. <sup>21</sup> Hagi mago eri'za rise'ma hunte'na kamakaziga keveme'neanki ome hakenka erinka eno hu'na huntesogenka, amne egahane. Na'ankure tamage huno Ra Anumzana mani'negu mago kazeri haviza hu'zana kagritera forera osugahie. <sup>22</sup> Hianagi ana riseku'ma hu'na kevea kame kaziga me'neanki ome erio hanugenka, e'i ame hunka atrenka vuogu hugahue. Na'ankure Ra Anumzamo omenka vuo huno hugantegahie. <sup>23</sup> Hagi kagrane nagranema hvempa kema hu'noa zamofona Ra Anumzamo'a agrake keno antahino hu'negu kagra ana kemofona amage'anto. <sup>24</sup> Hagi Deviti'a anantega frakino mani'negeno, kini ne'mo'a kasefa ikante'ma musenkase hu'za ne'zama nenaza knarera ne'zama nenaza tratera emani'ne. <sup>25</sup> Hagi kini ne'mo'a ne'za nenaku ko'ma nehiaza huno nomofo asarega amagena renteno rutragoteno emanigeno, mago kaziga Jonatani mani'geno, mago kaziga Abna mani'neanagi Devitima nemania trara amne me'ne. <sup>26</sup> Hagi Soli'a ana zupa nanekea osu'ne. Na'ankure agrama agesama antahiana Deviti'a mago'aza huno agra'a azeri pehana hu'neno ome'ne huno antahine. <sup>27</sup> Hianagi nampa 2 kna zupanena Deviti'ma nemania tramo'a amne me'ne. Ana higeno Soli'a nemofo Jonatanina asamino, Devitima nemania tramo'a amne me'neana na'agafare Jesi nemofo Deviti'a okine meninena ne'za ne'rtratera ome'ne? <sup>28</sup> Higeno Jonatani'a kenona huno, Deviti'a Betlehemu vunaku tutu huno nantahigeno, <sup>29</sup> natrege'na va'neno, na'ankure naga'nimo'za rankumapi kresramana nevazageno, nafuhe'za ke hazanki'na ame hu'na vugahue. Hagi navesi nante'nunka hunanteg'e'na nafuhe'na ome zamage'nue hige'na, huntogeno vu'ne. E'i ana agafare ame tratera omani'ne.

*Soli'ma arimpama Jonatanima ahente'nea naneke*

<sup>30</sup> Hagi Soli'a Jonatanina tusi arimpa ahenenteno anage hu'ne, Kagra keontahi savri a'mofo mofavre mani'nananki, Devitima kagri noma erino kinima manino kazeri kagaze nehuno, negrerama agazema eri amisia zankura ontahinka Devitina aza hu'nano? <sup>31</sup> Na'ankure Jesi nemofo'ma ofri'noma mani'enigenka, tamagerafa hunka kinia omanigahane. Hagi mago'a vahe huzmantege'za vu'za ome avre'za esnage'na ahe fri'neno. <sup>32</sup> Hianagi Jonatani'a huno, Naza agra havizana hu'ne? Nagafare agra frigahie? <sup>33</sup> Anagema higeno'a Soli'a Jonatanina ahe frinaku karugru kevereti re'neanagi, mani'ganegeno hantga hu'ne. E'inama higeno'a tamage nenfa'a Devitina ahe frigahie huno Jonatani'a antahi'ne. <sup>34</sup> Hagi Jonatani'a nefana tusi arimpa ahenenteno ese ikamofona nampa 2 knarera, ne'zana oneno otino atreno vu'ne. Na'ankure nefaf'a Deviti agima eri havizama hiazanku anara hu'ne. <sup>35</sup> Hagi anante nanterana Jonatani'a mago eri'za rise nevreno Deviti'ene keaga ome hunaku kema hunte'nate hoza agupofi vu'ne. <sup>36</sup> Hagi ana eri'za risera asmino, Kagarirenka vunka kevema ahetrenua kevea ome hakenka erio, higeno ana rise'mo'a agareno nevigeno Jonatani'a kevea ana risera ahe agatereno ogamanu'a avuga ahe'ne. <sup>37</sup> Hagi ana eri'za rise'mo'ma kevema ome akasinaku anante'ma vigeno'a, Jonatani'a ke'zatimino, Kevemo'a ogamu'a me'neanki, <sup>38</sup> omaninka ame hunka vuo! Hagi Jonatani eri'za rise'mo'a ana kevea ome erino ete rukrahe huno kva'amofontega e'ne. <sup>39</sup> Hagi e'i ana mikozama hiazamofo agafa'a ana eri'za risemo'a antahi amara osu'neanki, Jonatanike Devitike zanagrake antahi'na'e. <sup>40</sup> Hagi Jonatani'a ati'anе keve'anena ana eri'za risemofo nemino, erinka kumatega vuo. <sup>41</sup> Higeno ana eri'za rise'ma vutegen'o'a, Deviti'a have kevumofo amefima fraki'nefintira atramino eno Jonatanina agafi eme arena reno, 3'a zupa kepri hu'ne. Hagi zanagra onuki, anuki huke zanagi ohene ahene nehun'e, taregamokea zavi ate'na'e. Hianagi Deviti'a tusiza huno zavira ate'ne. <sup>42</sup> Hagi Jonatani'a amanage huno Devitina asmi'ne, Karimpa frune vuo. Na'ankure Ra Anumzamofo avure huvempage hu'noankita ronema huno'azana, Ra Anumzamo amu'nontifina mani'neno maka knafima kagripinti'ma fore'ma hania vahe'ene nagripinti'ma fore'ma hania vahera keno antahino hanie. Hutegen Deviti'a nevigeno, Jonatani'a ete kumatega vu'ne.

## 21

### *Deviti'a Solina atreno koro fre'nea nanenke*

<sup>1</sup> Hagi Nopu kumate pristi ne' Ahimelekintega Deviti'a vu'ne. Hagi Ahimeleki'a Deviti'ma negeno'a antri nehuno, Nahigenka kavega vahera ovarenka kagrakera neane. <sup>2</sup> Higeno Deviti'a ana pristi nera kenona huntenu, Kirii ne'mo'a mago'a eri'zanke hunanteno anage hu'ne, Amama hugantoa zamofo kea mago'mo'a ontahino huno hu'ne. Hagi sondia vaheni'a huzamante'noanki'za emanihoma huzamante'nore eman'inenage'na vugahue. <sup>3</sup> Hagi mago'a ne'zama ante'nenunka 5fu'a breti kona namige, mago'a ne'zama me'neniana amne namigahane. <sup>4</sup> Hianagi Pristi ne'mo'a Devitina kenona huntenu, Nagra mago'a amane bretia onte'noanki, ruotage'ma hu'nea bretige me'neanki sondia vahekamo'zama ama kenage'ma a'nенема omase'nesnagenka amane ome zami'nanke'za negahaze. <sup>5</sup> Higeno Deviti'a kenona'a amanage huno asami'ne, Kagesa ontahio, maka zupa hate'ma nevuta sondia vahe'nimo'za a'nаненена nomasazanki'za agru hu'haze. Ana hu'heankita menina e'nonana ruotge

eri'zante enonankita, agru hu'none. <sup>6</sup> Hagi ne'zana omanegeno ana pristi ne'mo'a seli mono nompima Ra Anumzamofo avugama amuhoma hu'nea bretima erinenteno, zasi'ma hia ruotge bretima eri ante'neana Devitina eri ami'ne (Matiu 12:3-4, Maki 2:25-26, Luku 6:3).

<sup>7</sup> Hagi ana zupa ana seli mono nompina Idomu ne' Doekie nehaza ne' Soli bulimakao afute kegavama nehaza vahe'mokizmi ugota kva ne'mo ofa hu'naku umani'neno negegeno, ana zana pristi ne'mo'a hu'ne.

<sup>8</sup> Hagi Deviti'a amanage huno Ahimelekinkura hu'ne, Bainati kazin-knone kevenena ontenampi? Kini nemo'a ame hunka vuo hige'na bainati kazinknone kevenena e'ori e'noe. <sup>9</sup> Hagi pristi ne'mo'a asamino, Magore huno omaneneanki Filistia ne' Goliatima Ela agupofima ahe'nana nemofo bainati kazinke me'ne. Tavravefi antegafite'na pristi vahe'mo'zama zamamizare'ma nentaniza kukenamofo amefi antigeno me'ne. Hagi kagrama erinaku'ma hanunka erio huno higeno, Deviti'a kenona huno, Mago'a bainati kazimo'a amanahura osu'neanki amne erinamio.

### *Deviti'a Gati kumate mani'nea naneke*

<sup>10</sup> Hagi ana knazupa Deviti'a Solinku kore huno freno Gati kini ne' Akisinte vu'ne. <sup>11</sup> Hianagi Akisi eri'za vahe'mo'za Deviti'ma nege'za, Ama nera kini ne' Devitimpi, avoma re'za zagamema nehu'za, Soli'a 1 tauseni'a vahe zamahegeno, Deviti'a 10 tauseni'a vahe zamahe'ne hu'zama hu'naza nere hu'za hu'naze. <sup>12</sup> Hagi ana nanekema Deviti'ma nentahino'a Gati kini ne' Akisi'ma ahe zankura tusi'a koro hu'ne. <sup>13</sup> Ana hu'negu Devitia ana kini ne'enе eri'za vahe'amokizmi zamavufina haviza huno negi vahe sampreno ufre kafanteria azanu avona negreno, agipintira agrena ampritregeno agi azokatega zuzu huno afra afra hu'ne. <sup>14</sup> Hagi kini ne' Akisi'ma negeno'a amanage huno eri'za vahe'a zamasami'ne, Na'a higeta tamagra neginagi vhahera avreta nagritega e'naze? <sup>15</sup> Hagi rama'a amanahu negi vhahera mani'nazanki'na, na'a hanige'na noni'afina atre'nugenno manigahie? Ne-huno Akisi'a atregeno Deviti'a vu'ne.

## 22

### *Deviti'a havegampi mani'nea naneke*

<sup>1</sup> Hagi Deviti'a Gati kumatetira freno Adulamu have kantega vuno umani'ne. Hagi ananke'ma nef'a'ene afuhe'zama nentahi'za anantega vu'naze. <sup>2</sup> Hagi vahe'mo'zama knama nezamiza vahe'mo'zane, zamarimpa knazampima mani'naza vahe'mo'zane, nof'i'ma hu'naza vahe'mo'za maka Devitinte e'za eme eri atruma hu'nazana 400'a vahe eme atru hazageno Deviti'a kegava huzmante'ne. <sup>3</sup> Hagi anantetira Deviti'a Moapu kaziga Mizpa kumate vuno, ana kumate kini nera ome antahigeno, muse hugantoanki knare nenhane nerareranena kegava huzanante'nesankeno mani'nenake'na, nagriteria Ra Anumzamo'a na'a hunantegahifi ka'neno, <sup>4</sup> higeno ana kini ne'mo'a izo hu'ne. Hagi Deviti'a nererane nefanena zanavreno Moapu kini ne'mofo kvafi eme neznanteno, agra have kampi ufrakino umani'ne. <sup>5</sup> Hianagi mago zupa kasnampa ne' Gati'a Devitina asamino, Kagra ama have kana atrenka Juda kaziga vuo. Higeno Deviti'a anampintira atreno Hereti zafafi vu'ne. <sup>6</sup> Hagi mago zupa Soli'a Gibeagonare tamaris zafamofo tonapinka keve'a erineno mani'nege'za, eri'za vahe'amo'za manigagi ante'naze. Anante mago'a vahe'mo'za Deviti'ma ke'za eri fore'ma hu'nazankea Solina eme asami'naze. <sup>7</sup> Hagi Soli'a ana kema nentahino'a ana vahezaga zamasamino, Benzameni naga'mota antahiho,

Jesi nemofo'a witi hoza tamigahifi, waini hoza tamamigahio? Hifi agra amne 1tauseni'a sondia vahete kva, 100'a sondia vahete kva vahe manigahaze huno nagrama nehuaza huno huvempagea huramantegahio? <sup>8</sup> Hianagi ha'ma renantea ne' Deviti'enema nenamofo Jonatanima huvempagema hia nanekeea nahigeta tamagranena onasami'naze. Tamage magomoke hunka nagrikura tamagesa antahinamita tamauskura huonanteta, Deviti'ma ka-fonteno'ma vano nehia nanekeea onasami mani'nageno, eno ama knarera ehanat. <sup>9</sup> Hagi Edomu nagapinti ne' Doeki'a ana vahepinti otino ranke huno, Nagra Nobi kumate mani'nena negogeno, Deviti'a pristi ne' Ahitupu nemofo Ahimeleki'ene nanekeea nehige'na ke'noe. <sup>10</sup> Hagi Ahimelekia Deviti agi erino Ra Anumzamofona nazanoma hania zankura antahinegeno, Filistia ne' Goliat bainati kazine ne'zanena erimi'ne. <sup>11</sup> Anage higeno kini ne'mo'a Ahitubu nemofo Ahimelekine maka agri naga'ma Nobu kumate'ma seli mono nompima pristi eri'zama eneri'za naga'anena, zamavareta eho huno huzmante'ne. Hige'za miko'mokizmia kini nete zamavare'za e'naze. <sup>12</sup> Anante Soli'a huno, Ahitubu nemofoga antahio. Ahimeleki'a huno, ramoka nentahue. <sup>13</sup> Higeno Soli'a asamino, Na'a higeta kagrane Jesi ne'mofo'enena nahenakura nanekeea retro nehutna, na'a agafare Jesi nemofona ruotgema hu'nea bretia eri neminka, bainati kazina eri neminka, Deviti'ma azama hanigura Ra Anumzamofona antahige'nane? E'ina hunka azahankeno kafona anteno vano nehigeno, eno ama knarera ehanat. <sup>14</sup> Hianagi Ahimeleki'a kini ne'mofo kenona huno, Iza kagri eri'za vahepintira mago'mo'a knarera huno negagaru Deviti'ma nehiaza huno fatgo eri'za vahe ka'a mani'neno, kagrira kamage ante'ne? Agra kavate'ma kegava hunegantaza sondia vahe'mokizmi kva mani'nege'za, maka vahe'ma nonkafima nemaniza vahe'mo'za antahimiza ra agi nemiza ne' mani'ne. <sup>15</sup> Hagi ese knani'a amanara hu'na Devitima azama hanigura Ra Anumzamofona antahigenofi? I'o. Hagi kini ne'moka, nagri'ene naga'nimofona ama ana kegagafina tavrentenka kna oramio. Tagra mago nanekeea retro huta kagrira kazeri haviza hu nanekeea osuta, ama anazana keta antahita osu'none. <sup>16</sup> Hianagi kini ne'mo'a huno, Ahimelekiga kagrane mika nagaka'anena frigahaze.

<sup>17</sup> Anante kini ne'mo'a avate'ma kegava hunentaza sondia vaheku huno, Ra Anumzamofo pristi eri'za vahera zamahe friho, na'ankure zamagra Deviti kaziga mani'ne'za, Devitima freno vu'nea zamofona antahi'za ke'za hu'nazanagi, eme onasami'naze. Hianagi kini nemofo eri'za vahe'mo'za Ra Anumzamofo pristi vahera ozmahe'naze. <sup>18</sup> Hagi ana hazageno kini ne'mo'a pristi vahera zamahe frio huno Idomu ne' Doekina huntogeno, Doeki'a ana miko pristi vahera za'za kukenama hu'naza pristi vahera 85fu'a zamahe fri'ne. <sup>19</sup> Hagi pristi vahe kumapima Nopuma mani'naza vahera, vene-neo, a'neo, mofavreo, bulimakao afuro donki afuro sipisipi afura bainati kazinknonteti maka zamahe fri vagare'ne. <sup>20</sup> Hianagi Ahimeleki nemofo Ahitubu negeho Abiata'a anampintira freno Deviti'ene umani'ne. <sup>21</sup> Hagi Soli'ma Ra Anumzamofo pristi vahe'ma zamahe fri'nea nanekeea Abiata'a Devitina eme asami'ne. <sup>22</sup> Hagi Deviti'a ana nera asamino, Idomu ne' Doekima anampima mani'nege'na nege'na, tamage Solina ome asamigahie hu'na nagra ko antahi'noe. Hagi negafa naga'ma mika frizana, nagri knaza eri'za fri'naze. <sup>23</sup> Hagi korora osunka nagrane manio. Kagri'ma kahe'zama nehia nemo'a nagri'ene nahe'naku nehie. Hagi nagrane emaninankinka, knare hunka manigahane.

## 23

### *Deviti'a Keila vahe zamaza hu'nea naneke*

<sup>1</sup> Hagi Devitina eme asami'za, Keila kumate vhahera Filistia vahe'mo'za ha' eme huzmante'za witima neharazafima eri atru hu'naza witzamia eri vagare'naze. <sup>2</sup> Hagi Deviti'a Ra Anumzamofona antahigeno, Knare vu'na Filistia vhahera hara ome huzmantegahuo, higeno Ra Anumzamo'a Devitina asami'no, Amne vunka hara ome huzmantenka Keila vhahera zamagu vazigahane. <sup>3</sup> Hianagi Deviti'enema mani'naza vahe'mo'za amanage hu'naze, Antahio, tagra Judama manineta Filistia vahekura korora nehnankita, tagra Keila kumatera vuta rama'a Filistia vhahera hara ome huozmanegosune. <sup>4</sup> Hagi Deviti'a mago'ene Ra Anumzamofona antahigegeno, Ra Anumzamo'a asamino, Otinka Keila kumate uraminka Filistia vhahera hara ome huzamanto. Na'ankure Nagra Filistia vhahera kazampi zamavarentesugenka hara ome huzmagateregahane. <sup>5</sup> Higeno Deviti'ene sondia vahe'anena Keila urami'za Filistia vhahera ome nezamahe'za mika afuzamia nevre'za Keila vhahera zamagu'vazi'za zamavare'naze. <sup>6</sup> Hagi pristi ne' Ahimeleki nemofo Abiata'a freno Devitintegama Keila kumategama nevuno'a, pristi vahe'mo'zama antanine'za Anumzamofo avesi'zama hake'za eri fore'ma nehaza kukena ifoti erineno, Ra Anumzamo'ma nanekeema asami'nigu vu'ne.

<sup>7</sup> Hagi Deviti'ma Keila kumate mani'nea nanekeema mago'a vahe'mo'za Solima eme asamizageno'a Soli'a huno, Ra Anumzamo'a nazampi avrente. Na'ankure Deviti'a agra'a avreno kinafi ufreankna huno hanave keginamo kagi'nea ra kumapina ufre'ne. <sup>8</sup> Anage higeno Soli'a maka Sondia vahezaga'a zamazeri atru huno nezamavareno, Devitine sondia vahe'ane avazagigagino zamahenaku Keila kumate urami'ne. <sup>9</sup> Hagi Deviti'ma antahiamma Soli'ma ha'ma eme hunte'naku'ma kema retro'ma nehigeno'a, agra pristi ne' Abiatana asamino, 12fu'a havema me'nenege'za pristi vahe'mo'zama nentaniza kukena ifotia omerinka amare eno. <sup>10</sup> Hagi Deviti'a anage huno nunamuna hu'ne, Ra Anumzana Israeli vahe Anumzamoka kagri eri'za vahe'mo'na antahuanana nagrama eman'i'noa zanku huno Soli'a Keila kumara eme erihaviza hu'naku ke retro nehia naneke nentahue. <sup>11</sup> Hagi Keila kumate vahe'mo'za nagrira navre'za Soli ome amigahazafi? Hagi tamage huno Soli'a eri'za nekamo'na antahua kante anteno egahifi? Ra Anumzana Israeli vahe Anumzamoka muse hugantoanki eri'za nekamo'na nasamio. Higeno anante Ra Anumzamo'a huno, agra eramigahie. <sup>12</sup> Hagi mago'ane Deviti'a Ra Anumzamofona antahigeno, Keila vahe'mo'za nagri'ene eri'za vahe'nianena tavre'za Soli azampina ome antegahazafi? Higeno Ra Anumzamo'a huno, Ozo e'inara hugahaze. <sup>13</sup> Hagi Deviti'enema mika 600'a sondia vahe'anena Keilitira atre'za kumate manitere hu'za vu'naze. Hagi Soli'ma antahiamma Deviti'a Keilitira atreno ko fre'ne ke'ma nentahino'a anantega ovu'ne.

### *Deviti'a have agonarega umani'nea naneke*

<sup>14</sup> Hagi Deviti'a Sifi kaziga me'nea ka'ma kopi ome frakino mani'ne. E'i ana kaziga umaninegeno Soli'a Devitina ahe'naku hakeno mika kna vano hu'neanagi, Ra Anumzamo'a atregeno Soli'a Devitina aze'ori'ne. <sup>15</sup> Hagi mago zupa Soli'a Horasi kaziga Sifi hagege kokampi frakino mani'nerega Soli'a ahe'naku nevia nanekeea Deviti'a antahi'ne. <sup>16</sup> Hagi Soli nemofo Jonatani'a Horesi kaziga vuno Devitina ome negeno Ra Anumzamofonte'ma hanavetino amentintima hu nanekeea ome asamino azeri hanavenetino anage hu'ne, <sup>17</sup> Kagra nenfankura korora osuo, na'ankure kagrira hakeno

eriforera osugahie. Hagi kagra Israeli vahe kini mani'nanke'na, nagra ehenka hugantegahue. Hagi ama anazana nenfa'a ko keno antahino hu'ne. <sup>18</sup> Hagi ana huvempa kema Ra Anumzamofo avufima hutekea Deviti'a Horesi mani'geno, Jonatani'a noma'arega ete vu'ne. <sup>19</sup> Hagi mago'a Sifi kumate vahe'mo'za Solina ome asami'za, Hakila agonafi Horesi kumamofo sauti kaziga Jesimoni Deviti'a frakino mani'ne hu'za hu'naze. <sup>20</sup> Hagi Kini ne'moka kagrama hana kante antenka eramigeta kazampina tagra'a avrentegahune. <sup>21</sup> Hagi Soli'a amanage huno zamasmi'ne, Ra Anumzamo asomu huramantesie, na'ankure tamagra tamasunku hunantaze. <sup>22</sup> Hagi vuta mago'ene ome haketa e'ire mani'ne huta keho. Na'ankure nagra antahi'noe, agra ruzahu ne'kino reravatga hugahie. <sup>23</sup> Hagi mika frakino nemania kuma'a haketa erifore huso'e huteta, ame huta keaga atrenantenke'na eramineno. Hagi Juda kaziga inama'are manigahie nagra ome hake'na azerigahue. <sup>24</sup> Anage huzmanteg'e'za zamagra Solina vugota hunte'za Sifi kumatega vu'naze. Hagi ana'ma nehazage'za Deviti naga'mo'za anampintira atre'za Jesimoni kumara sauti kaziga me'nege'za Maoni hagege kokampi Araba agupofi vu'naze. <sup>25</sup> Hagi Soli'ene sondia vahe'amo'za agafa hu'za Devitinku hake'naze. Hagi anama agriku'ma hakaza nanekea mago'a vahe'mo'za Devitina eme asmizageno, agra mago'ene vuno havege hu'nea kokampi Maoni ufrakino mani'ne. Hagi ana'ma hiazamofo nanekema Soli'ma nentahino'a otreno, avaririno anantega vu'ne. <sup>26</sup> Hagi Soli'a mago agonomofona mago kazigama hakeno eneviana, Deviti'ene naga'amo'za ana agonomofona mago kaziga vu'naze. Hianagi Soli'a erava'o huno Devitina azeri'za hu'ne. <sup>27</sup> Hagi ana'ma hu'zama nevazageno'a kema eri'za vu vahe'mo'za Solina eme asami'za, Filistia vahe'mo'za ha eme hurante'za ku'ma eme ankanirazanki ame hunka eno hu'za hu'naze. <sup>28</sup> Hagi Soli'ma Devitima avaririno nevia zana ome netreno, Filistia vahe ha' ome huzmante'naku vu'ne. E'ina agafare ana mopagura Sela Hamalekotie hu'naze. (Sela Hamalekotie hu'nazana Hibru kefina, atreno fre'nea have hu'ne). <sup>29</sup> Anama huno Soli'a neviana, Deviti'ene naga'amo'za atre'za Engedi have kampi umani'naze.

## 24

### *Deviti'a Solina ahe ofri atre'nea naneke*

<sup>1</sup> Hagi Soli'ma Filistia vahe'ma ome zamarotago hige'za vazageno'a, henka mago'a vahe'mo'za eme asami'za, Deviti'a Engedi hagege kokampi frakino havegampi mani'ne hu'za hu'naze. <sup>2</sup> Hagi Soli'a anankema nentahino'a, mika Israeli vahepintira 3 tauseni'a sondia vahe nezamavareno, Devitinku hake'naku Engedi hagege kokampina Afi Meme Afu'mofo Have nehzarega vu'naze. <sup>3</sup> Hagi Soli naga'mo'za mago havegana me'negeno sipisipi kegava nehaza keganagante uhanati'naze. Hagi Solina rifagu avesigeno, arifa ome renaku ana have kampi ufre'ne. Hagi ana have kampina Deviti'ene agranema vanoma nehaza vahe'mo'za ogamanu'a mani'nageno Soli'a ufre'ne. <sup>4</sup> Ana hige'za Deviti'enema vu'naza vahe'mo'za nege'za anage hu'za Devitina asami'naze, Ama Ra Anumzamo'ma ha'vaheka'a mago kankamu retro huno kazampi avrentegahuema hu'nea kna fore nehie. Hazageno anante Deviti'a rerakaurenio viazamo, Soli'a keno antahino osiazza, zaza kukena'amofona atupa'a ome taga hu'ne. <sup>5</sup> Hagi anama huno Soli'uke-nama Deviti'a taga huteno'a, tusiza huno agesa nentahino asunku hu'ne. <sup>6</sup> Hagi Deviti'a agranema vu'naza vahera zamasamino, Ra Anumzamo'a

hunagru huno anara osuo hu'neazanagi, Ra Anumzamo huhamprinte'nea ne' ranimofo kukena tagahue. <sup>7</sup> Anage nehuno Deviti'a agranema vu'naza vhahera zamazeri korige'za, Solina hara hunte kea osu'naze. Hagi Soli'a otino ana havegana atreno atiramino nevigeno,

<sup>8</sup> Deviti'a otino ana have kampinti atiramino Solina kezatimino, ranimoka kini nere, higeno Soli'a rukrahe huno kegeno Deviti'a avugosaregati mopafi umaseno agi'a erisga hu'ne. <sup>9</sup> Hagi Deviti'a keza atimino, Na'a higenka kagra Deviti'a hazenke kamiku neheke hu'za kasamiza vahe kea nentahine? <sup>10</sup> Hagi havegampi kagrira menintfaza Ra Anumzamo'a nagri nazampina kavrenteanki ko. Mago'a nagrane mani'namo'za kagrikura ahefrio hu'za hazanagi, nasunku hugantena, ranimofona ohegosue hu'noe. Na'ankure Ra Anumzamo huhamprinte'nea neki'na avakora osugahue hu'na hu'noe. <sup>11</sup> Hagi nafanimoka antahio, zaza kukenakamofo atupa'a taga hu'na nazampi e'nerina kahe ofri'noanki ama ko. E'inama hu'noa zamo'a nagra hararegante'na kahenakura nosue. Nagra mago kumira hu'na kagrira havizana huogante'noanagi, kagra nahenakura kafona antenka navaririnka vano nehane. <sup>12</sup> Hagi Ra Anumzamo agrake taregamota'a refako huranteno, iza havizana nehie taregamota tagegahie. Hianagi nagra nazana erisga hu'na mago'zana kagri kavufarera osugahue. <sup>13</sup> Hagi koknafi knare antahi'zamofo nanekefina huno, kefo avu'vaza hu valhepintira kefo avu'avazamo efore hugahie huno hu'ne. Hianagi nagra nazana erisga hu'na mago'zana kagri kavufarera osugahue. <sup>14</sup> Hagi nagra iza'na mani'nogenka, Israeli vahe kinimoka hara hunante'naku nehane? Na'ante knaka'a atrenka fri'nea kragna nehu'na, harukna hu'nomonagura nehakrane? <sup>15</sup> Atregeno Ra Anumzamo Agrake taregamota'a haviza hane, knare'za hane huno refko hurantegahie. Agrake ke'n'i'a antahinenamino, tamage hunka fatgo hunane huno kagri kazampintira nagu'vazi'nie. <sup>16</sup> Hagi Deviti'ma ana nanekema huvarettegeno'a Soli'a huno, ne'nimoka Devitiga kageru nentahufi? Anage nehuno Soli'a krafage huno zavi ate'ne. <sup>17</sup> Ana huno zavitetenno Soli'a Devitinkura huno, Kagra nagaterenka fatgo kavukava hu'nananagi, nagra havi navu'nava hu'na kahe frinaku hu'noe. <sup>18</sup> Hagi knare zama hunenantana zamofona menintfa eri ama hane. Ra Anumzamo'a nahe friogu kagri kazampima navrentegenka knare kavukava hunka nahe ofri'nane. <sup>19</sup> Hagi mago vahe'mo'ma ha' vahe'ama keno'a amane atregeno novianki ahenefrie. Hagi kagrama nagri'ma menima hunantana kavukavatera Ra Anumzamo asomura knare huno hugantesie. <sup>20</sup> Hagi nagrama tamage hu'na antahuana kagra kini mani'nankeno, Israeli vahe'mo'za kagri kazampi manigahaze. <sup>21</sup> Hagi Ra Anumzamofo agifi huvempage hunka, henkama kini mani'nunka nagri nagara zamahe fanene nosu'na, kagripinti'ma fore hu anante anante'ma hanaza vhahera zamahe fanane osugahue hunka nasamio. <sup>22</sup> Higeno Deviti'a Solina huvempage huntetegeno, Soli'a kuma'arega vu'ne. Hianagi Deviti'ene agranema vu'naza vahe'mo'za fra'maki'za mani'naza havegantega ete vu'naze.

## 25

### *Samueli'ma fri'nea zamofo naneke*

<sup>1</sup> Hagi Samueli'a frige'za Israeli vahe'mo'za eme atru hu'za zavi krafa nehu'za Rama kumate norava'oma'are asente'naze. Anante Deviti'a Paran Maoni hagege ka'ma kokantega urami'ne. Hagi Soli'a antahiamma Deviti'ma Paran Maoni umani'ne hazageno'a anantega avaririno urami'ne.

### *Nebali'ma Devitima azeri rimp ahe'nea zamofo naneke*

<sup>2</sup> Hagi Maoni kaziga Kameli kumatera tusi'a feno ante'nea nera magora mani'neankino, ana ne'mo'a 3 tauseni'a sipisipi afu anteno, 1tauseni'a meme afu ante'ne. Hagi mago zupa sipisipi afu'amofo azoka neharen mani'ne. <sup>3</sup> Hagi ana ne'mofo agi'a Nebali'e. Hagi nenaro agi'a Abigelikino, agra hentofa a'kino knare antahi'zane a' mani'ne. Hianagi Nebali'a Kalepi nagapinti ne'kino, havi avu'ava ene' ne' mani'ne. <sup>4</sup> Hagi Deviti'ma hagege kokampima mani'neno antahiamma, Nebali'ma sipisipi afu'amofo azoka nehare kema nentahino'a, <sup>5</sup> 10ni'a nehzave huzamanteno anage hu'ne, Kameli kumate vuta, nagri nagifi knare kne huta Nebalina ome humuse hunenteta, <sup>6</sup> anage huta asamiho, Kagra knare hunka za'za kna nemaninka, kagrane nagakane maka zanka'anena tamarimpa frune maniho, <sup>7</sup> Hagi menina antahuana sipisipi azoka neharana kna me'ne hu'za nasami'naze. Hagi sipisipi afukama kegavama nehaza vahe'mo'zama Kemoli kumate'ma tagranema emani'naza knafina, zamazeri havizana nosuta, mago'a zazmia kumazafa ose'none. <sup>8</sup> Hagi anankea eri'za vaheka'a zamasamisanke'za, tamage hu'za kasamigahaze. Hagi antahiraminka so'e kavukva huranto. Na'ankure menina ne'za kreno neneno muse hukna me'ne. Hagi muse hugantonanki, ne'zama ante'nesaza zana Deviti'a mofavreka'agna higeta tagra eri'za vaheka'a mani'nonanki aza hunka ne'zana menina tamio huta asmiho. <sup>9</sup> Hagi ana nehzavemo'za Nebalinte'ma unehanati'za Deviti'ma zamasami'nea nanekea agri agi eri'za ome asamite'za, kenonama huzaminigu avega ante'za mani'naze. <sup>10</sup> Hianagi Nebali'a ana kemofo nona'a amanage hu'ne, Jesi ne'mofo Deviti'ema nehzana izanku nehaze. Nagra ke'na antahi'na osu'noe? Meni ama knafina hakare'a eri'za vahe'mo'za kva'zimia atre'za nefraza knagino, agra mago kazokzo eri'za vahe mani'negahie. <sup>11</sup> Na'ante antahi'na ke'na osu'nesoa vhahera, bretiniane, tini'ane, afu'niane sipisipi azoka'ma haresaza vahe'ma zaminaku'ma hanua ne'zana tamigahue? Tamagra igati e'naze nagra kena antahina osu'noanki'na ontamigahue. <sup>12</sup> Hagi Devitima huzmanteg'e'za e'naza nehzavemo'za ete rekrake hu'za vu'za ana miko kema Nebali'ma hiankea Devitina ome asami'naze. <sup>13</sup> Hagi Deviti'a sondia vahe'a anage huno zamasami'ne, Bainati kazinknontamia tamavate eriho hige'za eri'zageno, agranena ana huno bainati kazinknoma'a e'nerino, 400'a sondia vhahera zamavareno nevuno, 200'a sondia vhahera huzmanteg'e'za fenozamire kegava hu'naze.

<sup>14</sup> Hianagi mago kato ne'mo Nebali nenaro Abigelina ome asamino anage hu'ne, Deviti'a ka'ma kokampi mani'neno, kvatimofona kea atrenteana ana kea huhaviza nehuno, ke'a antahi omi'ne. <sup>15</sup> Hagi ana vahe'mo'za anantegama umanuna kna'afina knare zamavuzmava hurante'za, tazeri havizana osu'za, mago zantia kumazafa ose'za kegava hurante'zane. <sup>16</sup> Hagi anantegama umanuna knafina hanine zagenena ana vahe'mo'za vi-hugna hu'za manigagine'za kegava hunerantageta sipisipia kegava hu'none. <sup>17</sup> Hagi ama anankea nentahinka, nazano huzmantenaku'ma hanana zana huzamanto. Na'ankure kvatimofone noma'afima nemaniza vhahera Deviti'a eme zamazeri haviza hu'naku kea retro nehie. Nebalia knare nera omani'neankino, mago vahe'mofo kea ontahigahie. <sup>18</sup> Hagi Abigeli'a ana nanekema nentahino'a, ame huno 200'a bretigi, meme akrute tro hu'naza tafentrempo wainia tagino e'nerino, 5fu'a krente'naza sipisipi afuki, 20 kilo kre hagege hunte witigi, 100'a waini araga antehagege hu'za regripe ante'nazanki, 200'a fiki araga regripe ante'nazana donki afutamimofo

agumpi erinte'ne. <sup>19</sup> Hagi Abigeli'a eri'za vahe'a anage huno zamasmi'ne, Ko vugota hinke'na tamage tamavaririna va'neno. Hianagi ana'ma hi-azana nevena Nebalina osami'ne. <sup>20</sup> Hagi ana a'mo'a donki afu'afi manino ana agonamofo krahopi nevigeno, Deviti'ene sondia vahe'anena anantega eramigeno, ana a'mo'a ome tutagiha huzmante'ne. <sup>21</sup> Hagi Deviti'a anage hu'ne, Maka'zama ama ana ne'mo'ma ka'ma kopima ante'neana tamage hu'na kegava hugeno mago'zana kumazufa osege, fanenea osuge hu'ne. Hagi knare navu'nava'ma hunte'norera nona huno haviza hunante'ne. <sup>22</sup> E'ina hu'negu ana ne'mofo nagara kenageke zamahe fri hana hugahue. Hagi ana'ma osu'na atrenugeno anampinti mago vahe'mo'ma amnema mani'nesigeno nanterama uhanatina, Anumzamo'a nahe frigahie. <sup>23</sup> Hagi Abigeli'ma Devitima negeno'a ame huno donki afu'afinti eramia zamo, Devitina agafi kepri hu'ne. <sup>24</sup> Hagi ana a'mo'a agafi kepri huneno Devitina asamino, Mago vahera knazana ozaminka, ranimoka nagripi ana miko knazana anto. Hagi muse hugantoanki nagra eri'za vahekamo'nama hanua kea antahio. <sup>25</sup> Devitiga ranimoka Nebali'a kefo avu'ava'ene ne'mani'neanki ke'a antahiminka mago'zana huonto. Agra'a agimo'ma hu'heaza huno negi vahe mani'ne. Hianagi nehazavema huzmantanke'za vu'nazana zamage'na antahina osu'noe. <sup>26</sup> E'ina hu'negu menina ranimoka tamage huno Ra Anumzamo'a mani'neankino, kataregenka kagra kazanutira vahera zamahe frinka kumira osane. Ana hu'negu kagri'ma ha'ma regantesaza vahera zamatrege'za Nebali'ma hiazza hu'za neginagi hiho. <sup>27</sup> Hagi menima eri'za vahekamo'na eri'na e'noa ne'zana erinka, vaheka'a zamige'za neho. <sup>28</sup> Hagi nagrama hua navu'navamo'ma kazeri havizama hani-genka, kumi'ni'a atrenanto. Na'ankure Ra Anumzamo'a kinima mani trara kagri nagapi antesigeta kinia manivava huta vugahaze. Na'ankure kagra Ra Anumzamofo ha'nehunka, maninkama ampina, mago havizana osu'nane. <sup>29</sup> Hagi ha'vahekamo'zama kahe friku'ma nehageno'a, Ra Anumzana kagri Anumzamo'a knare huno kva hunegante. Hianagi Anumzamo'a ha'va-heka'a kumi atifi have erinteno ahetreankna huno zamahenati atresige'za ame hu'za fanane hugahaze. <sup>30</sup> Hagi Ra Anumzamo'a kagrima ranimoka hu-vempagema hugante'neazama hvumaretesuno'a, Israeli vahete kva kazeri otisanigenka kva manisanunka, <sup>31</sup> ama anazamo'a kazeri haviza hugah-anki, ranimoka kagra kazampintira nona hunka vahera zamahenka kagra kagia eri havizana osuo. Hanki Ra Anumzamo'ma ana mika'ma hvempage hugante'nea zama hugantesigenka, nagrira kagesa antahinamio.

<sup>32</sup> Hagi Deviti'a amanage huno Abigelia asmi'ne, Ra Anumzana Israeli vaher Anumzamo'a ra agi erisie! Menina Agra'a hugantegenka nagira nagekura e'nane. <sup>33</sup> Hagi kagri'enena muse hugantoe, kagri so'e antahi'zamo naza huno knare antahi'zana namige'na, nona hu'na kezmi omane vahera ozamahegahue. <sup>34</sup> Hagi menina nagritega ameria hunka omantesina, Ra Anumzana Israeli vaher Anumzamofonte ko hvempage hu'noanki'na, oki nanterana Nebali'ene veneneraminena magore hu'na ozamatrosine.

<sup>35</sup> Anante Deviti'a, Abigeli'ma erino vu'nea ne'zana e'nerino amanage hu'ne, Keagama nasami'nana hago antahoanki, kagrama nasamina kante ante'na anazana hugahuanki, krimpa fru e'nerinka nontega vuo. <sup>36</sup> Higeno Abigeli'a anama huteno nontegama vuno ome keana, Nebali'a kini vahe'mo'za nehazaza huno tusi'a ne'za kreno neneno musenkase nehigeno ome ke'ne. Abigeli'a ana zamofo nanekea magore huno osami'ne. Na'ankure ana keragera Nebali'a tusi'a negi ti neno musenkase ne-

higeno nanterase'ne. <sup>37</sup> Hagi nanterama segeno Nebali antahintahimo'ma ama'ma higeno, ana nanekeea Abigeli'a asami'ne. Hagi anankema Nebali'ma nentahino'a tusi agesa nentahigeno, agazamo'a hapu higeno kaza osu havegna huno mase'hne. <sup>38</sup> Hagi 10ni'a zagegna naza evutegeno, anante Ra Anumzamo'a Nebalina ahogeno fri'ne.

### *Deviti'a Abigelima a'ma eri'nea zamofo naneke*

<sup>39</sup> Hagi Nebali'ma fri'nea nanekema Deviti'a nentahino amanage hu'ne, Nagra Ra Anumzamofo agi'a hentesga hanue, Nebali'ma nagri'ma nazeri haviza hu'nemofo nona hunte. Hagi eri'za vahe'amo'ma vahe'ma ahe frizanku Ra Anumzamo'a Agra'a ahe frie. Anage nehuno Deviti'a Abigelina ke atrenteno, a'erigantegahue hu'ne. <sup>40</sup> Hagi Deviti eri'za vahe'mo'za Kameli kumate urami'za Abigelina ome asami'za, Deviti'a ome avreta enkena a'erintaneno huno hurantegeta e'none.

<sup>41</sup> Abigel'i a mopafi kepri nehuno amanage hu'ne, Nagra Deviti' eri'za vahe mani'ne'na eri'za vahe'amofo zamagia sese hu'zankura nave'nesie. <sup>42</sup> Anage nehuno Abigel'i a ame huno agra donki'amofo agumpi marerige'za 5fu'a eri'za a'ne'amo'za avega hazageno, Deviti eri'za vahe'ene vazageno, Deviti'a a'avrente'ne. <sup>43</sup> Hagi Deviti'a Jezriri kumateti a' Ahinoamu ara erinte'nere, Abigel'i ma egeno'a ana taregamokea Deviti atre mani'na'e. <sup>44</sup> Hianagi anama hiaknafina Soli'a mofa'a Mikelina Deviti nenaro mani'neanagi, Gilim kumate ne' Lais nemofo Paltiel hanare ami'ne.

## 26

### *Deviti'a mago'ane Solina oheno atre'nea naneke*

<sup>1</sup> Hagi mago zupa Soli'a Gibea kumate mani'nege'za, Sifi kumate vahe'mo'za eme asami'za, Deviti'a Hakila agonafi Jesmonima avugosama hunte'nea kaziga frakino mani'ne. <sup>2</sup> Hazageno Soli'a 3 tauseni'a hanave Israeli sondia vahe zamavareno, Sifi ka'ma kokampi Devitinku hakenaku vu'ne. <sup>3</sup> Hagi Soli'a Jesmoni tava'onte Hakila agonafi seli nonku'ma ome kino mani'ne. Hianagi Deviti'a ka'ma kopi mani'neno, Soli'ma agriku'ma hakeno eazamofo kea nentahino, <sup>4</sup> mago'a afure vahe huzamanteg'e'za, Soli'ma eman'inenigura ome ke'naze. <sup>5</sup> Hagi anantetira Deviti'a otino Soli'ma seli nonkuma eme anteno mani'nerega vu'ne. Hagi Soli'ene sondia vahete kva ne'a Neri nemofo Abnakea Sondia vahe'mo'za masegagizageno amu'nompi masenakeno, Deviti'a ana kenagera rerakauren ome zanage'ne.

<sup>6</sup> Hagi Deviti'a Hiti ne' Ahimelekine, Zeruia nemofo Joapu nefu Abisaik-izni zanantahigeno, Iza navega hanige'na Soli'ma seli noma eme kino'ma mani'nerega uramigahue. Anage higeno Abisai'a huno, Nagra kagrane uramigahue.

<sup>7</sup> Higeno Deviti'ene Abisaikea ana kenagera Soli'ma seli nonku'ma anteno mani'nef ufre'na'e. Anampima ufrene ome ka'ana, Soli'a kuma amu'nompi karugru keve'a asenirega retru renenteno, masenegeno, Abna'ene mago'a sondia vahe'mo'zanena Solina mase kagi ante'nage'za ome ke'nae. <sup>8</sup> Hagi Abisai'a Devitina asamino, Menina Anumzamo'a ha' vaheka'a kazampi avrenteanki, natrege'na krugru kevereti magoke zupa reharuharu hu'na mopare rekamarenta'neno. <sup>9</sup> Hianagi Deviti'a Abisaina asamino, Ohenga atro. Na'ankure Ra Anumzamofonte'ma masavema frenteno huham-printe'nea vahe'ma ahesuta'a, hazenkefi manigahue. <sup>10</sup> Deviti'a mago'ane huno, Ra Anumzamo Agra'a ahe frise. Hagi ozafama resuno frige, hapi uraminig'e'za ahe frige hugahaze. <sup>11</sup> Hianagi Ra Anumzamofonte'ma

masavema frenteno huhamprinte'nea nera ahefrio huno hu izora hu-nante'ne. Hagi menina Soli keve'ane tintafema'ane aseniregama me'neana erigeta amafintira atiramita va'maneno. <sup>12</sup> Hagi Soli asenirega me'neana kevene, tintafema'anena Deviti'a erigeke vu'n'a'e. Hagi anama ha'azana mago vahe'mo'e huno keno antahino osu'ne. Na'ankure Ra Anumzamo'a ana miko vhahera zamazeri zamavutoko hige'za, mase himre'nazageke anara hu'n'a'e.

<sup>13</sup> Hagi Deviti'a vuno mago agona kantu kaziga me'nea agonare afete ome ot'i'ne. <sup>14</sup> Ananteti Deviti'a Abnane sondia vahe'anena kezana atizamino, Abnaga antufina mani'nano, higeno Abna'a huno, Kagra izaga kini nemofonkura kezankea nehane. <sup>15</sup> Higeno Deviti'a huno, Abnaga kagri'ma kagatere'nea harafa vhahera Israeli agu'afina iza mani'ne? Na'a higenka kini nera kegava huontankeno, ahenaku'ma nehia vahe'mo'a ahe'zana hu'ne? <sup>16</sup> Kagra knare kavukavara osane. Na'ankure kagrane sondia vahekanena Ra Anumzamofonte'ma masavema frenteno huhamprinte'nea vahe'ma kegava huontazankita tamagra frigahaze. Hagi kini ne'mofo aseniregama me'nea keve'ane tintafema'iga me'nefi keho? <sup>17</sup> Higeno Soli'ma Deviti'ageru'ma nentahino'a kezatino, nemafogea Devitiga ne-hano. Higeno Deviti'a kenona huno, ranimoka, kini nera nagri nageru nentahine. <sup>18</sup> Deviti'a Solina asamino, Na'ante ranimoka eri'za vahekamo'na naratogo nehane? Na'a nagra hugante'noe? Nagra na'a havizana hu'noe? <sup>19</sup> Hagi kininimoka eri'za vahekamo'na hanua nanekea antahinamio, kagrima Ra Anumzamo'ma kazeri ot'i'nigenkama ha'ma renenante'nankeno'a, ofama hananana antahigamigahie. Hianagi vahe'mo'ma kazeri otisi-genkama ama anazama nehanakeno'a, Ra Anumzamo'a kazusi huzmantegahie. Na'ankure Ra Anumzamo'ma erisintima haregahane hu'nea mopafintira naratogo nehu'za, ru anumzante mono ome hunto hu'za hu'naze. <sup>20</sup> Hagi atregeno koranimo'a, Ra Anumzamofo tava'ontetira atreno ru mopafina tagi oramino. Hagi Israeli vahe kinimoka, kagra na'ante hinimagu hakeankna hunka nagrikura nehakenka, agonafi namagu hakeanknara nehane?

<sup>21</sup> Anante Soli'a huno, Nagra kumi huanki nenamofo Divitiga mago'ane kagriria kazeri havizana osugahuanki ete eno. Na'ankure ko nahantesinagi, nagrira antahinaminka onahenka natre'nane. Nagra tamage hu'na negi-nagi'za hu'na havi avu'ava zantfa hu'noe. <sup>22</sup> Hagi Deviti'a huno, kini ne'moka kevea ama me'neanki, mago nehaza ne' huntogeno eme erino. <sup>23</sup> Hagi fatgo zamavu'zmava nehu'za, kazingazi hu'za ke'ama amage'ma nentaza vhahera, Ra Anumzamo'a ana zamavu'zamavatera mi'zana nezamie. Hagi menina Ra Anumzamo'a kagriria nazampi kavrenteanagi, kahe ofri'noe. Na'ankure Ra Anumzamo masave freganteno kazeri ot'i'ne. <sup>24</sup> Hagi menina kagri'ma antahigami'na onkahorera, Ra Anumzamo'a antahinamino onaheno, miko hazenke zampintira naza hugahie. <sup>25</sup> Anante Soli'a Devitinku huno, Mofavrenimoka, Ra Anumzamo'a asomu hugante'nigenka ranraza nehunka, hara agateregahane. Anage huteke Deviti'a neviana, Soli'a kuma'arega ete vu'ne.

## 27

### *Deviti'a freno Filistia vu'nea naneke*

<sup>1</sup> Hagi anante Deviti'a amanage huno agesa antahi'ne, Mago'a knafi Soli'a nahegahianki'na Filistia vahe kumate'ma fre'na vanuana, nagra knare hu'na umanigahue huno antahine. E'ina hanena Solina avesra

hinkeno, nagrikura mago'ane ohakrena knare hu'na umanigahue. <sup>2</sup> Huno nentahino Deviti'a agranema vanoma nehaza 600'a sondia vahe'ene, Gati kini ne' Maoka nemofo Akisi'ene umani'naku rugitagi'za vu'naze. <sup>3</sup> Hagi Deviti'a agranema vano nehaza vene'nene a'mofavre'zaminena zamavareno Gati mopare Akisi'ene umani'naze. Hagi Deviti'a tare atrema'anee vu'neankino, mago'mofo agi'a Ahinomukino, agra Jezreri kumateti a' mani'ne. Hagi mago'mofo agi'a Abigel'i'e. Ana ara Kameri kumateti Nebali kento a'ma eri'nea a'e'ne zanavreno vu'ne. <sup>4</sup> Hagi Deviti'ma Gati moparega vu'nea nanekema Solima eme asamizageno nentahino'a, Devitina ahenakura mago'anena rotagoa osu'ne. <sup>5</sup> Hagi mago zupa Deviti'a amanage huno Akisina asmi'ne, Kagrama nagri'ma kavesi nante'nunka, mago osi kumaka'a namige'na anampi naga'ninen umani'neno. Eri'za vahekamo'na kini ne'moka rankumapina omanigahue. <sup>6</sup> Huno higeno, ana knazupa Akisi'a Zigmak kuma ami'ne. (E'inagafare Zigmak kumamo'a Juda vahe kinimofo kuma meno menina ama knarera ehanati'ne.) <sup>7</sup> Hagi Deviti'a Filistia mopafina mago kafugi 4'a ika mani'ne. <sup>8</sup> Ana huteno Deviti'ene sondia vahe'amo'za vu'za, Gesuri vahe'ma Kirzeti vahe'ma Ameleki vahe'enena hara ome hu'naze. Ana vahera za'za kna e'i ana mopa-fina mani'naza vaheki'za, ana mopazmimofo agema'amo'a Suriti vuno Isipi tv'aonte ome atre'ne. <sup>9</sup> Hagi Deviti'ma ha'ma ome hunezmanteno'a, maka venenene a'nenena zamahehna nehuno, sipisipi afuma, bulimakao afu'ma, donki afu'ma, kemori afuma kukenanena e'nerino ete kini ne' Akisima mani'nerega e'ne. <sup>10</sup> Hagi Akisi'a antahigeno, Kagra menina iga hara ome nehane? Higeno'a Deviti'a amanage huno kenona'a hu'ne, Juda vahe'ene Negevi mopamofo mago asoparega hara ome huge, mago kaziga asoparega Jerami vahe'ene hara ome huge, mago kaziga asoparega Kenaiti vahe'ene hara ome huge nehue. <sup>11</sup> Hagi Deviti'a ha'ma ome nehuno'a, magore huno vene'nene a'nenena ozmatreno zamahe fri vagare'ne. Agrama agesama antahiana, mago vahe'ma atresugen'o'a, Deviti'a vahera ahe fri vagare'ne huno Gati kumate vahera ome asamigahaze huno agesa antahine. Hagi Deviti'a Filistiaman'i'nea knafina, e'inahu'za huwava huno vu'ne. <sup>12</sup> Hagi Akisi'ma agesama antahiana Deviti'a tamage nehie nehuno, amanage huno antahi'ne, Agra'a naga Israeli vahe hara ome hunezamante huno agesa antahi'ne. Hagi meninteti'ma vaniana nagri eri'za vahe manino vugahie huno antahi'ne.

## 28

### *Soli'a fri vahe'mofo hankro'agu antahige'nea nanenke*

<sup>1</sup> Hagi ana knafina Filistia vahe'mo'za Israeli vahe ha' ome huza-mante'naku sondia vahe zamia zamavare atru hu'naze. Hagi Akisi'a Devitina asamino, Kagrane sondia vahekanena nagrane magoka vuta hara ome hugahane. <sup>2</sup> Hagi Deviti'a kenona huno, E'ina'ma hanunka henka eri'za vahekamo'na eri'zana kenka antahinka hugahane. Anage higeno Akisi'a huno, Nagrani'a navufare kva vahe kavrane'na maka kna nagri kegava hunantegahane. <sup>3</sup> Hagi Samueli'a frige'za miko Israeli vahe'mo'za zavi krafa hute'za, Rama agri kumate ome asente'naze. Hagi ana knafina Soli'a fri vahe hankro'enema nanekema nehaza vahe'ene zamavune vahe'enena zamahenatitrege'za anampina omni'naze. <sup>4</sup> Hagi Filistia vahe'mo'za eza Sunemu seli nonkumara eme ki'za manizage'za, Soli'ene mika sondia vahe'amo'za Gilboa seli nonkumara eme ki'za mani'naze. <sup>5</sup> Hagi Soli'ma Filistia sondia vahe'ma nezmageno'a tusi koro nehuno ahirahiku hu'ne.

**6** Ana nehuno Soli'a Ra Anumzamofo antahige'neanagi Ra Anumzamo'a magore huno ava'nafino, urimi zokago'ma rezagafino, kasnampa vahepina hvuzino osamitfa hu'ne. **7** Higeno Soli'a eri'za vahe'aramina huzaman-teno, Vuta fri vahe'enema keaga nehania a' ome avreta enke'na, nagra antahige'na ka'neno. Hige'za zamagra kenona anage hu'naze, Magora e'inahu'zama nehia ara Endor kumate mani'ne. **8** Hagi Soli'a agri'ma keama'ma osania kazigati kini kukena'a hunetreno, amane kukena eri nentanino, tare netrene kenage vu'naze. Hagi Soli'a ana ara antahigeno, Avamura antahigesankeno kenonani'a huno nagrama antahigesua vahera avrenamigahio? **9** Hianagi ana a'mo'a Solina asamino, Kini ne' Soli'ma fri vahe hankro'enema nanekema nehaza vahe'ene zamavune vahe'enena zamahenatitre'neana kagra ko antahi'nane. Hagi kagra havige hunka nahe frinogu renavataga nehane. **10** Higeno anage huno Soli'a asami'ne, Ra Anumzamofo agifi huvempage huankino ama anazama hanantera mago'mo'a onkahegahie. **11** Higeno ana a'mo'a antahigeno, Izanku kea hanugeno otino esiegu nehane, higeno Soli'a kenona huno Samuelle. **12** Anage higeno ana a'mo'a Samuelima negeno'a ranke huno, Kagra Soliga mani'nananki nahigenka kagra renavataga nehane? **13** Anage higeno kini ne'mo'a huno, Korera osunka na'a negane? Huno antahigegeno ana a'mo'a huno, nagra negogeno mago hankro mopafintira atineramige'na negoe. **14** Higeno Soli'a antahigeno, Agra inankna nere? Higeno ana a'mo'a huno, Mago ranafa za'za kukena hu'nea ne' negoe. Anagema higeno'a Soli'a keno antahino'ma hiana Samueli'e nehuno, mopafi renarenra agi Samuelina ami'ne. **15** Hagi Samueli'a Solina anage huno asami'ne, Na'a higenka matipintira nazeri otinkena neoe? Higeno Soli'a kenona huno, Filistia vahe'mo'za ha' hunante'za nehzageno, Anumzamo'a amagena hunamino, ava'nafine kasnampa vahepina hvuzino kenona huonamige'na, kagrira ke hanena nagrama ome hanua zana nasamisane hu'na nagra e'noe. **16** Higeno Samueli'a kenona huno, Hago Ra Anumzamo'a amagena hugamino kagri ha' vahe mani'neanki, na'a higenka nagrira nantahinegane? **17** Hagi nagri'ma nasamige'na kasnampa kema hu'noa kante anteno, Ra Anumzamo'a kagri kazampintira kini trara hanarenra tava'onkare'ma nemanimofo Deviti ami'ne. **18** Na'ankure kagra Ra Anumzamo'ma Ameleki vahe'ma tusi rimp ahezmanteno, zamahe frio huno'ma hiana kagra ke'amofona rutagrenka anara osankeno, amanahu'zana menina hugante. **19** Hagi kagri'ene Israeli vahe'enena Ra Anumzmo'a oki'na Filistia vahe zamazampi tamavrente-gahie. E'ina hanigeno oki'na kagrane kamoh'e'zanena nagrane emanighaze. Hagi tamage huno Ra Anumzamo'a Israeli Sondia vahetamina Filistia vahe zamazampi zamavarentegahie. **20** Hagi Samueli'ma asamia kea Soli'a nentahino tusi kore nehuno, avugosaregati mopafi masegeno hanave'a omane amane hu'ne. Na'ankure agra feru'ene kenage enena ne'zana one'ne. **21** Hagi ana a'mo'ma ome keana, Soli'ma tusi'a kore huno amanogu'ma nehigeno'a amanage huno asami'ne, Nagra kagri eri'za akamo'na kagrama hana eri'za nagra navufagura nagesa ontahi'na, hago ana eri'zana eri'noe. **22** Hagi menina muse hugantoanki eri'za akamo'na ke antahinaminka natrege'na, osi'a bretika'a reraro hanena nenka hanavea eritenka kana vuo. **23** Hianagi Soli'a onegahue huno hu'ne. Hianagi eri'za vahetamima'amo'ene ana a'mo'enena tutu huntazageno, kezmia antahino mopafima mase'nefintira otino tafete mani'ne. **24** Hagi ana a'mo'a afovage bulimakao anenta ome aheno kreno noma'afi eme nenteno, ame huno zisti

onte bretia krente'ne. <sup>25</sup> Hagi ana a'mo'a ana ne'zana erino Soline eri'za vahe'anena eme zamige'za nete'za, oti'za ana kenageke ete vu'naze.

## 29

### *Akisi'a Deviti huntegeno ete vu'nea naneke*

<sup>1</sup> Hagi Filistia sondia vahera Afeke kumate emeri atru hazage'za, Israeli vahe'mo'za Jesrili kuma tva'onte kampui ti me'nere seli nonkumara ante'za mani'naze. <sup>2</sup> Hagi Filistia rankva vahe'mo'za sondia vahera 100'afine, tauseni'afine refko hu'za kevure kevure nevazageno Deviti'ene sondia vahe'amo'zanena Akisi'enena zamagefi vu'naze. <sup>3</sup> Hagi Filistia sondia kva vahe'mo'za Devitine eri'za vahe'anema nezamage'za amanage hu'naze, Hibru vahetamimo'za na'a amafina emenerize? Hazageno Akisi'a ana kva vahe'mokizmi kenona huno, Ama nera Israeli kini ne' Solina vugota eri'za ne'a Deviti'e. Hagi ama ana ne'mo'ma Solima atreno nagri'enema rama'a kafu emanige'na, anama emania knareti'ma eno menima amare'ma ehanatineana, mago hazankea agripina kena eriforera osu'noe. <sup>4</sup> Hianagi Filistia sondia kva vahe'mo'za Akisina tusi zamarimpa ahenente'za amanage hu'naze, huntegeno kuma'ma ami'nantega umanino. Hagi atregeno agra tagranena hatera ovino, ha'ma ome nehanunkeno'a rukrahe huno hahurantegahie. Na'ankure e'i mago knare kankamu fore hugahiankino, ha' huranteno sondia vahetia tahesigeno, Solima antahisuno'a ete avregahie. <sup>5</sup> Hagi Israeli a'nemo'za zagame hu'za avo nere'za, Soli'a 1 tauseni'a vahe zamahe'neanki, Devitia agatereno 10 tauseni'a vahe zamahe'ne hu'zama hu'naza ne' Devitipi hu'za hu'naze? <sup>6</sup> Anage hazageno Akisi'a Devitina agi higeno egeno, amanage huno asmi'ne, Kasefa huno mani'nea Ra Anumzamofo agifi huvempage huankino, eman'i'nantegati'ma e'nama menina ama knare'ma eana, kagra fatgo ne' mani'nanke'na nagesa antahuana kagra nagrane ha' ome hugahane hu'na huanangi, mago'a Filistia sondia vahete kva vahe'mo'za ana kegura musena osu'naze. <sup>7</sup> E'ina hu'negu ana sondia kva vahera zamarimpa kna eri ozaminka, akohenka krimpa fru hunka ete kumatega vuo. <sup>8</sup> Higeno Devitia ana kenona Akisina asamino, nagra na'a hu'noe? Eri'za vahekamonafina na'a hazenke kenza eri fore hu'nanku kini ne' ranimoka, ha' vahekana hara ome osugahue huno Devitina antahige'ne. <sup>9</sup> Hianagi Akisi'a ke nona'a amanage huno Devitina asmi'ne, Nagra'ma kagoana, kagra mago Anumzamofo ankeronkna hunka mani'nenka, mago hazenke ka'a omene nere. Ana hu'nananagi sondia vahete kva vahe'mo'za amanage hu'naze, Kagrikura tagranena hatera ovugahie hu'naze. <sup>10</sup> Hu'negu kagra mika kagranema e'naza vahe'enena okina anama rumasama nehanigeta, mopama tami'noa moparega amafintira atreta ete vugahaze. <sup>11</sup> Anage higeno Deviti'a sondia vahe'ane nanterame oti'za Filistia moparega nevazage'za, Filistia vahe'mo'za hate Jezrili vu'naze.

## 30

<sup>1</sup> Hagi 3'a zage kna evutege'za Deviti'ene sondia vahe'amo'zanena Ziklag kumate uhanati'za ome kazana, Ameleki vahe'mo'za ha' eme hu'za, Ziklagi kuma'ene Negevi kuma'enana teve taginte'za kre'naze. <sup>2</sup> Hagi Ameleki sondia vahe'mo'za ana kumate a'mofavrene maka vahe'enena zamahe ofri amne zamavare'za vu'naze. <sup>3</sup> Hagi Deviti'ene sondia vahe'anema Ziklagi kumate'ma ehanati'za kazana, kumazmia teve taginente'za a'mofavrene mofa'nene ne' mofavrezamia mika zamavare'za vu'nage'za eme ke'naze.

<sup>4</sup> Ana'ma hazazanku Deviti'ene sondia vahe'anena tusiza hu'za zavira netageno hankave'zimia omanege'za mago'anena zavira ote'naze. <sup>5</sup> Hagi anampina ana vahe'mo'za Devitina tare a'trema'a, Jezrili kumateti a' Ahinoamune, Kameli kumateti Nebali kento a'ma eri'nea a' Abigelinena zanavre'za vu'naze. <sup>6</sup> Hagi Deviti'a ranknazampi mani'ne. Na'ankure agranema vanoma nehaza vene'nemo'za a'mofavre zamigura tusiza hu'za zamasunkura nehu'za Devitina havenkno ahegahune hu'naze. Hianagi Deviti'a Ra Anumzana Anumzama'amofontega nunamu higeno, Anumzamo'a hanave ami'ne. <sup>7</sup> Anante Deviti'a pristi ne' Ahimeleki nemofo Abiata asamino, muse hugantoanki 12fua havema me'nea kukenama pristi vahe'mo'za zamimizare'ma nentaza kukena erinka eno, higeno Abiata'a ana kukena erino e'ne. <sup>8</sup> Anante Deviti'a Ra Anumzamofona amanage huno antahige'ne, Knare ana vahera zamarotgo hu'na ome zamazerigahufi? Higeno Ra Anumzamo'a asamino, Kagra amane ome zamazerinka ana maka vahe'ene a'mofavrenena zamagu vazigahananki zamarotgo hunka vuo huno asami'ne. <sup>9</sup> Hagi Deviti'a 600'a sondia vahe'a zamavareno Besori tinkrahopi uravao hu'naze. <sup>10</sup> Hanki ana tinkrahopina 200'a sondia vahe'mo'za zamavaresragu hu'za umanizage'za, Deviti'enena 400'a sondia vahe'mo'zaana vahera zamarotago hu'za vu'naze. <sup>11</sup> Hagi sondia vahe'amo'za, mago Isipi ne' ome nege'za, av're'za Devitinte e'naze. Hagi ana nera zamagra bretine tinena amizageno ne'ne. <sup>12</sup> Hagi mago'a fiki raga'a regripe'za eri'nazane, waini raga eri'nazana ana nera ami'naze. Na'ankure agra ne'zane tinena 3'a zagene hanine oneneanki'za ami'zageno neno hanavea eri'ne. <sup>13</sup> Hagi Deviti'a ana nera antahigeno, Kagra igati ne' mani'nane? Higeno ana ne'mo'a kenona huno, nagra Isipi neki'na, Ameleki vahe'mokizmi eri'za ne' mani'noe. Hagi kvanimo'a kri erugenome natreno vige'na 3'a kna mani'noe. <sup>14</sup> Tagra Negevi kaziga vuta Kereti vahe'ene Juda vahe'ene Kalepi vahe ha' ome huzamanteteta, Ziklag kumara teve ome taginteta negreta e'none. <sup>15</sup> Hagi Deviti'a ana nera antahigeno, Kagra knare navrenka ana Ameleki vahetera vugahano? Higeno ana ne'mo'a huno, Kavre'na vugahuanagi, kagra Ra Anumzamofo agifi hvempage hunka nagrira nahe ofrige, kvani'amofo azampi navrenka ome ogantegahue hunka hvempage hutege'na, kavre'na va'heno. <sup>16</sup> Hagi ana Isipi ne'mo'a, Devitina avreno Ameleki vahe'ma mani'narega vigeno ome keana, Ameleki vahe'mo'za umani emani hu'neza ne'za kre'za nene'za musenkase nehu'za mani'naze. Na'ankure Filistia vahe mopafinti'ene Juda vahe mopafinti'ma rama'a zama eri'za e'naza zanku musenkase nehazageno zamage'ne. <sup>17</sup> Hagi Deviti'a sondia vahe'ane ana kumate umani'nageno rehanima hiama'a hara erigafa hu'za nehzageno, vuno kotuno anante knamofona kinaga omese'ne. Hagi ana ha'pina maka Ameleki vahera zamahe fri'ne. Hianagi 400'a vahe'moke'za kemori afutamimofo zamagumpi mani'za koro atre'za fre'naze. <sup>18</sup> Hagi Deviti'a tare atrema'a neznavreno Ameleki vahe'mo'za eri'za e'naza zana maka ete eri vagare'ne. <sup>19</sup> Hagi mago zamo'a fanane osu'neanki, osi'zama razama mofa'nema nemofavreramina nezamavareno, maka zazmima eri'za e'nazana eri vagareno Deviti'a vu'ne. <sup>20</sup> Hagi maka bulimakaone, sipisipi afutaminema Ameleki vahe'mo'zama avre'za vu'naza zana maka Deviti'a erino ne-ege'za ha'ma ome hu'za eri'za bulimakaone sipisipi afutaminema avregota hu'za ne-eza amanage hu'naze, Deviti'ma ha'ma huno eri'nea zantamine. <sup>21</sup> Higeno Besori tintem'a 200'a vahe'ma hankavezimi omanege'za emeni'nare uhanatige'za, ana vahe'mo'za Devitine agri'enema aza vahera nezamage'za hu frufra ke

huzamantageno, Deviti'enena muse nehuno hu frufra huzmante'ne. <sup>22</sup> Hagi Deviti'enema hate'ma vu'naza vahepintira mago'a hazenke vahe'mo'za, anage hu'naze, Zamagra tagri'enena ovu'nazankita ha'pinti'ma eri'nona zantamina refko huta ozamigahunanki, a'mofavre'zimige zaminunke'za zamavare'za vugahaze. <sup>23</sup> Hu'neanagi Deviti'a amanage hu'ne, Nafuheta Ra Anumzamo tami'nea zantamina anara osugahune. Agrake taza nehigeta kumatima eri haviza hu'naza vahera zamaheta ete mikazana erita e'nonku, tagragukera ontahigahune. <sup>24</sup> Hagi iza tamagri kegura tamage huno hugnarera hugahie? Hagi fenotire'ma kegava hu'za hate'ma ovu'naza vahe'ene hate'ma vu'naza vahe'enena, maka zana ana avamenteke refko huta erigahune. <sup>25</sup> Hagi Devitima e'ina'ma hu'nea zamo'a mago kasegegna huno Israeli vahepina me'negeno eno, meni ama knarerera ehanati'ne. <sup>26</sup> Hagi Deviti'ma Ziklag kumate'ma unehanatino'a hapinti'ma eri'nea zantamina rone'amokizmi Juda ranra vahe'mokizmi refko huntenezmanteno, ana vahera anage huno zamasami'ne, Ama muse zana Ra Anumzamofo ha' vahe'mokizmi zantami erita e'nonaza, mago'a refko huta eme neramune. <sup>27</sup> Hagi ana'ma eri'nea zantamima musezane huno refko'ma huzami'nea kumatamimofo zamagi'a amana hu'ne, Betelima nemaniza vahe'ma, Negevi ka'ma kokampi nemaniza vahe'ma Ramuti kumate'ma nemaniza vahe'ma, Jatiri kumate'ma nemaniza vahe'ma, <sup>28</sup> Aroeri kumate'ma nemaniza vahe'ma, Sifmoti kumate'ma nemaniza vahe'ma Estemoa rankumate'ma nemaniza vahe'ma, <sup>29</sup> Rakali kumate'ma nemaniza vahe'ma Jerameri rankumapi nemaniza vahe'ma, Kin rankumapi nemaniza vahe'ma, <sup>30</sup> Homa kumate'ma nemaniza vahe'ma, Bor-asani kumate'ma nemaniza vahe'ma, Ataki kumate'ma nemaniza vahe'ma, <sup>31</sup> Hebronii rankumate'ma nemaniza vahetega ana zantamina refako hutregeno vu'ne. Ana nehuno koma sondia vahe'anema vano hu'nea kaziga maka ana fenozana refko huno zami'ne.

## 31

### *Soline ne'mofavre'amokizmi zamahe fri'naza naneke*

<sup>1</sup> Hagi Filistia vahe'mo'za eza Israeli vahera hara eme huzmante'za zamarotago hazage'za fre'za vu'naze. Hagi rama'a vahera bainati kazinknonteti zamahage'za Gilboa agonafi fri'naze. <sup>2</sup> Hagi Soli'ene mofavrezaga'amo'za fre'nazanagi, Filistia vahe'mo'za hanaveti'za zamarotago hu'za, mika Soli mofavrezaga'a Jonatanima Abinadabuma Malkisuanena zamahe'naze. <sup>3</sup> Hagi Solina tusi'a ha' hugagintazageno ha'mo'a hanavetigeno, mago'a vahe'mo'za kevea ahazageno ra hazenke eri'ne. <sup>4</sup> Ana'ma higeno'a hankoare'ma eneria nera asamino, Ru oku zamavufaga taga osu Filistia vahe'mo'za esu'za kiza zokago ke eme hunante'za nata nenami'za nahe frisagi, bainati kazinka'a erinka nare frio. Hianagi hazama'are erinentea ne'mo'a tusi koro nehuno, ahe ofrine. Ana higeno Soli'a bainati kazima'a erino ana kazinte agra'a taruheno fri'ne. <sup>5</sup> Hagi Solina hankoare'ma azerinentea ne'mo'ma keama Soli'ma frigeno'a, agranena kazima'a erino agra'a kazinte taruheno Soli'ene fri'na'e. <sup>6</sup> Ana higeno Solima, 3'a mofavre'ama, ha'zama'are'ma azerinentea ne'ma, miko Israeli sondia vahe'ma Soli'enema vu'naza vahe'mo'za ana zupage fri vagare'naze. <sup>7</sup> Hagi Israeli vahe'ma agupofima nemani'za vahe'mo'zane, Jodanima mani'za vu'naza vahe'mo'zama kazama, Israeli sondia vahe'mo'za frazageno, Soli'ene maka mofavre'aramine, hanko'are'ma azerinentea ne'ma, agranema vu'naza vahetamima fri vagarazage'za,

kumazamia atre'za frazageno, Filistia vahe'mo'za ana kuma'zmia eme eri'za mani'naze.

<sup>8</sup> Hagi ha'ma haza knamofo anante knazupa Filistia vahe'mo'za Israeli vahe ha'zane kukenazami zoginaku ha'ma hu'nazafi e'za eme kazana, Soli'ene 3'a mofavre'aramina Gilboa agonafi fri'nage'za eme ke'naze.

<sup>9</sup> Hagi zamagra Solina agenopa nekafri'za ha' kukena'a hate'za eri'naze. Hagi anama nehu'za zamagra ke erino vu vahe huntageno mikä Filistia kokampine, havi anumzamofo mono hunentafi Soli'ma fri'nea zamofo musenkea ome hu'ama hu'za zmasami'naze. <sup>10</sup> Hagi Solina ha'zama'a Astaroti havi a' anumzamofo mono nompi ome nente'za, avufga'a eri'za Bet-seni rankuma keginare ome hanti'naze.

<sup>11</sup> Hagi Jabel-giliati kumate'ma nemaniza vahe'mo'zama, Filistia vahe'mo'zama Soline mofavre'amokizmima huzmantaza zamofo ke'ma nentahi'za, <sup>12</sup> maka hanave vahe'amo'za kenage Bet-seni kumate vu'za, Soline mofavre'arami zamavufaga ome eri'za, Jabeli kumate eme krerasage'naze. <sup>13</sup> Ana'ma hute'za zaferinazami eri'za tamaris zafa agafafi asenente'za, 7ni'a zagegnafi ne'zana a'o hu'za zamasunkura hu'naze.

## 2 Samuel Nampa 2 Samueli Avontafere

*Soli'ma fri'nea zamofo ke Deviti eme asami'naza naneke*

<sup>1</sup>Hagi Soli'ma fritegeno'a, Ameleki vahera Deviti'a hara huzmagatereteno, tare zagegna Ziklaki kumatera emani'ne. <sup>2</sup>Hagi nampa 3 knazupa mago nehaza ne'mo kukena'a tagato nehuno, asenifina kugusopa kateno freteno, Soli sondia vahe'mokizmi seli nonkumapinti atreno freno e'ne. Hagi ana ne'mo'ma Devitinte'ma enehanatino'a, Deviti agafi avugosaregati emase'ne. <sup>3</sup>Hagi ana nera Deviti'a anage huno antahige'ne, Kagra igati e'nane? Higeno ana ne'mo kenona huno, Nagra Israeli vahe seli nonkumapinti fre'na e'noe. <sup>4</sup>Higeno Deviti'a antahigeno, Muse hugantonki na'a fore hu'nefi nasamio, higeno ana ne'mo'a kenona huno, rama'a vahera hapintira atre'za fri'zageno, rama vahetamine, Soline, nemofo Jonataninena zamahe fri'naze. <sup>5</sup>Hagi Deviti'a ana nehaza nera antahigeno, Soli'ene nemofo Jonatanikema fri'na'e nanekea inankna hunka antahi'nane? <sup>6</sup>Ana nehaza ne'mo'a kenona huno, Nagra Gilboa agonare mani'nena kogeno, Soli'a karugaru keve'are rentinti huno ot'i'ne. Hagi ha' vahe'mofo karisimo'za eme azeri'za ne-hazage'na ke'noe. <sup>7</sup>Hagi agra rukrahe huno nenageno, kezanke hige'na voe hu'na hugeno, <sup>8</sup>agra anage hu'ne, Kagra izage huno hige'na, nagra kenona'a hu'na, Ameleki ne' mani'noe hu'na asami'noe. <sup>9</sup>Anage hugeno, agra anage hu'ne, Muse hugantonki amare enka eme nahefrio. Na'ankure nagra ofri amane mani'noanagi tusi nata negrige'na maraguzanetuanki eme nahe frige'na, fri'neno huno hu'ne. <sup>10</sup>Hige'na nagra agrite uravao hu'na ahe fri'noe. Na'ankure nagra kena antahi'nama huana agra ra hazenke eri'neankino manigara osu'nege'na, ahe nefri'na, kini fetori'a e'neri'na, azampinti asama'a katufe'na ama eri'na ranimokarega neue. <sup>11</sup>Hagi ana ke'ma Deviti'ene mika sondia vahe'amo'zama nentahi'za zamasunku nehu'za, kukenazamia tagato hu'naze. <sup>12</sup>Hagi Soline Jonatanine, Ra Anumzamofo sondia vahetamine, rama'a vahetamine Israeli vahetamima fri'naza zanku zamasunku nehu'za, zamagra zavi krafa nehu'za ne'zana one mani'nageno vuno kinagase'ne. Na'ankure rama'a vahetamina bainati kazinkonteti'ma zamahe fri'naza zanku anara hu'naze. <sup>13</sup>Hagi kema erino e'nea nehaza nera Deviti'a antahigeno, Kagra iga rise mani'nane, higeno ana risemo'a huno Nagra Ameleki vahe'ma kagri mopafima emani'naza vahe'mokizmi mofavre mani'noe huno hu'ne. <sup>14</sup>Hagi ana risera Deviti'a antahigeno, nahigenka masavema frenteno Ra Anumzamofonte'ma huhampri ante'nea nera korera osunka ahe fri'nane? <sup>15</sup>Huteno Deviti'a mago sondia ne' ke higeno egeno, ana nera bainati kazinknoteti ome akafrio, huno higeno ana nehaza nera ome ahe fri'ne. <sup>16</sup>Ana higeno Deviti'a ana Ameleki ne'mofo avufga negeno anage hu'ne, kagra'a hu'nana hazenke zamofo nona'a frine. Kagraka'a huama hunka nagra Ra Anumzamo'ma huhamprinte'nea kini ne' ahe fri'noe hunka hu'nane.

*Soli'ne Jonatankiznigu Deviti'a asunku zagame hu'nea naneke*

<sup>17</sup>Hagi Deviti'a Soline Jonatanikiznigura asunku nehuno zavi asunteno, <sup>18</sup>Judia vahekura ana zagamera rempi huzaminke'za hiho huno hu'ne. Hagi ama ana zagamera atimofo zagamere hu'za nehzankino,

Jasari avontafepi krente'naze. Amanage huno ana zagara Deviti'a hu'ne, <sup>19</sup> Israeli vahe'mota tamagimo'ma mareri'nea vahetamimotma agonaramimpi frizageno, himamunentake sondi'a vahetamimo'zanena fri'naze. <sup>20</sup> Ana zamofo agenkea Gati kumapina ome huama nosuta, Askeloni kumapinena ome hu amara osiho. Ru Filistia vahe'mokizmi mofa'nemo'za muse hugahaze. Hagi oku zamavufaga taga osu Filistia vahe'mokizmi mofa'nemo'za antahisu'za muse nehu'za tagizaregahaze. <sup>21</sup> Gilboa agonarera atara ohesigeno, kora ruontena, hozafima ofama hu witi raga reontesie. Na'ankure hanave ne'mofo hankoa azeri pehana higeno, Solina mago'ane hankoarerma masavema freontegosie. <sup>22</sup> Jonatani atia vahe ahe vagare ati me'neankino hatetira amane omegosie. Hagi Soli bainati kazimo'a, amane nomaneanki hanave sondia vahe nezamahegeno, ha' vahe'zamimofo koramo'a ana kazintera avite'ne. <sup>23</sup> Soli'ene Jonatanikea kasefa'ma huke mani'natera, vahe'mo'za zamavesi neznante'za knare huznante'naze. Zanagra kasefa'ma hu'ne maninatera tagrote'ne mani'nene, fri'ana magoka frie. Zanagra tumpa namamo'ma ame huno eankna nehuke, laionimofo hanavegna hanavezanimo'a hu'ne. <sup>24</sup> Hagi Israeli mofanemota Solinkura tamasunku nehuta, zavira ateho. Agra marerirfa korankre kukena huneramanteno, golire pasesu kukenatamirera rekamrente'ne. <sup>25</sup> Hagi ana hapina hanavenentake sondia vahera frizageno, Jonatani'enena fri'negeno, avufgamo'a agonafi me'ne. <sup>26</sup> Hagi nenafu Jonataniga kagrikura tusiza hu'na zavi krafa nehu'na, kagrira tusiza hu'na navesigantoe. Kagrama nagri'ma kavesinante'nanana vene'nemo'ma a'nema avesinentea avamena agaterenka, kavesinante'nane. <sup>27</sup> Hanavenentake sondia vahera ha'pi zamahe vagarazageno, ha'zazmimo'a haviza hu'ne.

## 2

### *Juda kini mani'nogu Devitima masave tagino frente'nea naneke*

<sup>1</sup> Hagi ana knazama fore'ma hutegeno, Deviti'a Ra Anumzamofona antahigeno, Nagra knare Juda vahe'mokizmi mago rankumapina vugahufi? Higeno Ra Anumzamo'a asamino, Umarerio higeno Deviti'a mago'ane antahigeno, Ina kumate nagra vugahue? Higeno Ra Anumzamo'a kenona'a huno, Hebron'i vugahane. <sup>2</sup> Higeno Deviti'a tare a'trema'a Jezrieli kumati a' Ahinoamune, Karmeli kumate ne' Nebali kento a'ma eri'nea Abigeline nezanavreno vu'ne. <sup>3</sup> Hagi Deviti'a agranema mani'naza vene'nene, a'mofavre'zaminena zamavarege'za magoka mareri'za Hebron'i kumate megagi'nea kumatamimpi umani'naze. <sup>4</sup> Hagi anantega umani'nazage'za, Juda vahe'mo'za e'za Devitina masavema eme tagi'za frenente'za Juda vahe kinia azeri ot'i'naze.

Hagi mago'a vahe'mo'za Devitina eme asamiza, Jabesh-Giliat vahe'mo'za Soli avufga eri'za ome asente'naze. <sup>5</sup> Hazageno Deviti'a Jabes-Giliati vahetega kema erino vu vahera anage huno huzmantne, Ra Anumzamo'a knare tamavutamava huta rankvatamimofo Soli avufgama erisentazarera, asomu huramante'nie. <sup>6</sup> Hagi menina Ra Anumzamo'a vagaore avesizanteti avesineramantena, knare tamavu'tamava'ma hazarerha nagranena tamagira knare navu'nava huramantegahue. <sup>7</sup> E'ina hu'negu menina tamagra ot'i hanavenetita, koro osu hanavetita maniho. Na'ankure rantimo Soli'a hago frigeno, Juda vahe'mo'za kini maninka kegava huranto hu'za masave frenante'za kinia nazeri ot'i'naze.

### *Is-bosetina Israeli kini azeri otizageno ha'fore hu'nea naneke*

<sup>8</sup> Hu'neanagi ana'ma nehigeno'a, Soli sondia vhahete kva ne' Neri nemofo Abna'a Soli nemofo Is-bosetina avreno Mahanaimi kumate vu'ne. <sup>9</sup> Hagi ana kumatega agra huama huno, Giliati vhahete'ene, Asuri vhahete'ene, Jezrili vhahete'ene, Efraemi vhahete'ene, Benzameni vhahete'ene Asuri mopafima nemaniza vhahete'ene mikä Israeli vahe kini manisie huno Is-bosetina azeri oti'ne. <sup>10</sup> Hagi Soli nemofo Is-boseti'a 40'a kafu hu'neno, Israeli vahe kinia mani'ne. Hagi agra Mahanaimi mani'neno tare kafufi kini eri'zana eri'ne. Hianagi Juda vhahete'za Deviti amage ante'naze. <sup>11</sup> Hagi Deviti'a Hebroni kumara rankuma'a tro huno mani'neno, 7ni'a kafugi 6'a ikampi Hebroni kumatera Juda vahe kinia mani'ne. <sup>12</sup> Hagi Neri nemofo Abna'a Soli nemofo Is-boseti eri'za vhahetami nezamavareno, Mahanaimi kumara atreno Gibeoni kumate vu'ne. <sup>13</sup> Hagi anama nehiana Zeruia nemofo Joapu'a Deviti sondia vhahera nezamavareno Gibeoni tinkerire ome tutagiha huzmante'naze. Hagi ana vhahete'za ana tirumofo kantugama umani emani hu'naze. <sup>14</sup> Anante Abna'a Joapuna asamino, Nehazaveramina hanunke'za zamazankno ha'hanaze huno higeno Joapu'a ana kerera, knarere huno hu'ne. <sup>15</sup> Higeno 12fu'a vhahera Benzameni nagapinti vhahete Soli nemofo Is-boseti kaziga huhampri printageno, Deviti sondia vhahepintira 12fu'a vhahete huhampri zamante'naze. <sup>16</sup> Hagi ana'ma hutage'za ana vhahete'za zamaz-eri zamente hute'za, ha'hu'za bainati kazinteti zamasoparega orefri are fri hu'za tarega kaziga vhahete'za ufrinte efrinte maka'mo'za hu'naze. Ana hu'nagu e'i ana Gibioni kumakura, bainati kumare hu'za nehaze. <sup>17</sup> Hagi ana zupa ha'mo'ra higeno, Deviti sondia vhahete'ene, Abna'sondia vhahete enena ra ha nehazageno, Deviti naga'mo'za ana hara huzamagatere'naze. <sup>18</sup> Hagi ana hapina 3'a Jeruia mofavrezaga, Joapuki, Abisaiki, Asaheliki hu'za Deviti sondia vhahera mani'naze. Hagi Asaheli'a dia afukna hu'neankino, agamaren vaniana ame huno vugahie. <sup>19</sup> Ana hu'negu Asaheli'a keganti kegama osu Abnana rotago huno nevigeno, <sup>20</sup> Abna'a freno nevifinti rukrehe huno, Kagra Asaheligo? Higeno agra kenona huno, Izo nagre. <sup>21</sup> Higeno Abna'a anage huno asami'ne, Rukrahe hunka mago'a sondia vhahete zamahenka ha'zazmia erio, hu'neanagi Asaheli'a ananke'a ontahi rotago huno vu'ne. <sup>22</sup> Ana higeno Abna'a Asahelina asamino, Narotoga osunka natrenka vuo. Hagi anama osanankena kagri'ma kahezankura navesra hie. Hagi kagri'ma kahesu'na nankna hu'na negafu Joapu avurera vugahue? <sup>23</sup> Hu'neanagi Asaheli'a ana ke'a ontahino, rotago huno vigeno Abna'a krugru keve'reti regeno amagenafinti uhanatigeno, anante frino traka hu'nege'za maka sondia vhahete'za anante'ma ne-eza eme oti'naze. <sup>24</sup> Hianagi anama hige'nea Joapuke Abisaikia zagema ufre'zama nehigekeea Abnana rotago huke, Gia tavaonite Amae nehaza agonare zage hanati kaziga Gibeoni ka'ma kokantega vu'nea kante e'na'e. <sup>25</sup> Anante Benzameni nagapinti vhahete'za omeri atru hu'za eri mago hute'za, Abna amagenare hu'za mago agonare ha' hunaku oti'naze. <sup>26</sup> Hagi Abna'a Joapuna ke'zanke humino, tagra amanara huta hara huvava huta vugahupi? Henka ra knazampima ufresuna zankura kenka antahinkara nosampi? Hagi nankna zupa sondia vhahete'za zamasamisanke'za zamafuhe'ima zamarotagoma nehaza zana atregahaze? <sup>27</sup> Higeno Joapu'a kenona huno, Tamage mani'nea Anumzamofo avufi kasamuanki, kagra e'inahu kea osantesina nagri vhahete'za tamarotago huvava hu'za nevazageno masa hisine. <sup>28</sup> Hagi anante Joapu'a ufe rege'za zamarotagoma nehaza vhahete'za umani'za, mago'ane hara osu'naze. <sup>29</sup> Hagi ana kenageke Abna'a sondia vhahete'ane Araba vu'za Jodani agupofi vute'za,

ti rakahe'za Bitroni vute'za, Mahanaim uhanati'naze. <sup>30</sup> Hagi Joapu'ma Ab-nama rotagoma nehiretira atreno, vuno sondia vahetamina ome zamazeri atru huno keana, Asaheli'ene 19ni'a Deviti sondia vahera omani'nazageno ke'ne. <sup>31</sup> Hianagi Deviti sondia vahe'mo'za, Abna sondia vahe'ma Benza-meni naga'ma e'nazana 360'a vahe zamahe'naze. <sup>32</sup> Hagi Abna'ene sondia vahe'amo'za Asaheli avufga eri'za nefama asente'naza havegampi Betle-hemu ome asente'naze. Ana hute'za Joapu'ene agranema vu'naza sondia vahe'mo'za ana kenageke eva eva hu'za, Hebronii ehanatizageno kora eme atumasa hu'ne.

## 3

### *Deviti mofavre zagamofo naneke*

<sup>1</sup> Hagi anantetira Deviti naga'ene Soli naga'mo'zanena za'zate hara hu'za vu'naze. Deviti naga'mo'za mago'ane hanaveti'za vazageno, Soli naga'mofo hanavemo'a ome osi osi huno vu'ne. <sup>2</sup> Hagi Deviti'a Hebronima mani'neno'a, ne' mofavrezaga zamante'ne. Hagi zage mofavremofo agi'a Amnonikino, Jezrili kumateti a'mo Ahinoamu kasente'ne. <sup>3</sup> Hagi nampa 2 mofavrea Kililabukino, Karmeli kumateti ne' Nebali kento a'ma Abigelima eri'nea a'mo kasente'ne. Hagi nampa 3 mofavre'a Absalomukino, Gesuri kumate kini ne'mofo mofa'mo Maka kasente'ne. <sup>4</sup> Hagi nampa 4 mofavre'a Adonijakino Hagiti kasentene. Hagi nampa 5fu mofavrea Sefatiakino, Abitarikasente'ne. <sup>5</sup> Hagi nampa 6is mofavrea Itreamukino, Eglia kasente'ne. E'i ana mo-favrezaga Deviti'a Hebronii mani'neno kasezamante'ne.

### *Abna'a Deviti kaziga vu'nea naneke*

<sup>6</sup> Hagi ha'ma Deviti naga'ene Soli naga'enema nehaza knafina, Abna'a hanave sondia ne' Soli sondia vahepina mani'ne. <sup>7</sup> Hagi Soli'ma mago a'ma eri'neana, Aia mofa Rizpa eri'ne. Hagi Is-boseti'a Abnankura huno, nahi-genka nenafa ara antenka mase'nane? <sup>8</sup> Hagi Is-boseti'ma hiankegura Ab-nana tusi arimpa ahogeno amanage hu'ne, Juda vahe'mokizmi zukake kra nagra mani'nogenka nagrira balia rugantugma nehano? Hagi maka'zama negafa Soline, naga'ane, roneanema navesinezmant'e na kagri'ma kavre'na Deviti azampima ome onte'noa zante miza naminaku nehunka, ama ara azeri savri hu'nane hunka nehano? <sup>9</sup> Hagi Ra Anumzamo'ma Devitima huvempa hunte'nesia zama nagrama osanugen'o'a, Anumzamo'a nagrira nazeri haviza hugahie. <sup>10</sup> Hagi nagra Abna'na Soli kini trara Deviti eri amisugen, Israeli vahe'ene Juda vahe'ene Dani vahera noti kazigati vuno sauti kaziga Berseba uhanatisigeno agrake kegava hugahie. <sup>11</sup> Hagi Is-boseti'mago kea osu'ne. Na'ankure Abnankura tusi'a koro hu'ne. <sup>12</sup> Anante Abna'a ke erino vu vahete kea Devitina atrenteno anage hu'ne, Ama mopa kagri mopa me'nanki, nagri'ene kea eme huhagerafinka huvempa huge'na, nagra miko Israeli vahera zamazeri rukrahe hanena kagrite echo. <sup>13</sup> Higeno Deviti'a ana kerera anage hu'ne, Knarekita huvempa huta huhagerafigahue. Hianagi Soli mofa Mikelima kagra avrenka eme namisunka, nagri navufina kegahane. <sup>14</sup> Huteno Deviti'a ke erino vu vahete Is-bosetina kea atrenteno anage hu'ne, A'ni'a Mikelina avrenka eme namio. Na'ankure nagra 100'a Filistia vahe zamahe'na ko oku zamavufa anonteti mizase'noa a' mani'ne. <sup>15</sup> Hagi Is-boseti'a ana nanekema nentahino'a mago'a vahe huzamanteg'e'za, Laisi nemofo Paltia nenaro Mikelina ome avre'za e'naze. <sup>16</sup> Hianagi ana ara avre'za neageno, neve'a zavinetenno avaririno Bahurimi kumate egeno, Abna'a huntogenous, ete rukrahe huno kuma'arega vu'ne. <sup>17</sup> Hagi Abna'a

Israeli ranra vahera zamavare atru huno anage huno zamasami'ne, Kotera Devitinku kinitia manigahie huta tamagra hu'naze. <sup>18</sup> Hagi menina ana ketamire otita anaza hiho. Na'ankure Ra Anumzamo'a Deviti huvempa hunteno, Filistia vahe zamazampinti'ene ha' vahe'tamimofo zamazampintira, Israeli vahera eri'za ne'n'i'a Deviti zamagu'vazigahie hu'nese. <sup>19</sup> Hagi anante Abna'a viazamo Benzameni nagara ome ana kea nezamasamino, ete ana kea erino Devitinte Hebronii vuno, hago maka Israeli vahe'ene Benzameni naga'mo'za mago zamarimpa hu'naze huno ome asami'ne. <sup>20</sup> Hagi Abna'a 20'a vahe'ene Deviti'ma mani'nerega Hebronii kumate egeno, Deviti'a rama'a ne'za krezmante'ne. <sup>21</sup> Hagi ne'za nete'za Abna'a Devitina anage huno asami'ne, Natrege'na vu'na miko Israeli vahera rani kinimokare ome zamazeri atru hanuge'za, zamagra huvempa hu'za kagrica kini kazeri otisagenka, kagri'ma kavesiniza hunka kegava huzamantegahane. Higeno Deviti'a Abnana atregeno rimpia frune vu'ne.

### *Joapu'a Abna ahe fri'nea naneke*

<sup>22</sup> Hagi Abna'ma Hebronii kuma'ma anama atreno'ma nevigeno'a, Deviti sondia vahe'ene Joapu'enena ha'ma nehazaregatira hapinti'ma eri'naza zantamina rama'aza eri'za e'naze. Hianagi Abna'a Deviti'enena Hebronii kumatera omanni'ne. Na'ankure Deviti'a ko Abnana huntogeno rimpia frune vu'ne. <sup>23</sup> Hagi Joapu'ene sondia vahe'enema ehanatizage'za mago'a vahe'mo'za Joapuna asami'za, Neri nemofo Abna'a kini nete egeno, kini nemo'a magozana huonteno atregeno rimpia frune vu'ne. <sup>24</sup> Higeno Joapu'a ame huno kini nete vuno amanage ome hu'ne, Na'a hu'nane? Abna'ma kagrite'ma egenka, nahigenka amnea atrankeno agra vu'ne? <sup>25</sup> Hagi kagra antahi'nane, Neri nemofo Abna'a regavatga huno maka zama nehanaza ke'naku e'ne. <sup>26</sup> Anante Joapu'a Abnana ke atrentege'za Sira tinkerire nevige'za ome ke'za avre'za e'naze. Hagi e'i ana zama hiazana Deviti'a antahino keno osu'ne. <sup>27</sup> Hagi Abnama ehanatigeno'a, Joapu'a avreno rankuma kafante agri'akema kema asaminaku'ma hiaza huno avreno viazamo, negana Asahelima ahe fri'nea zanteku huno bainati kazi ome erino rimpia retragufegeno fri'ne. <sup>28</sup> Hagi henkama ana ke'ma Deviti'ma nentahino anage hu'ne, Nagrama kegava hu'noa vahe'mo'zane nagranena Ra Anumzamofo avufina keta antahita osu'nonankita, Neri nemofo Abna'ma fri'nea zamofo kora kumi'mofo knazamo'a tagritera omenetfa hugahie. <sup>29</sup> Hagi Abnama ahe fri'nea zamofo knazamo'a Joapu'ene mika nefu naga'amo'zane erigahaze. Hagi Joapu'ene agripinti'ma fore'ma hanaza vahe'mofona namu zamarege, fugo kri erige, azompare vano huge, bainati kazinu zamahe frige, nezanku zamagatege hanige'za frigahaze. <sup>30</sup> E'ina hu'negu Joapu'ene nefu Abisaikea Abnana ahe'na'e. Na'ankure agra nezanafu Asahelima Gibioni kumate'ma hapima ahe'nea zanku huke ahe'na'e.

### *Deviti'a Abnanku asunku huno zavite'nea naneke*

<sup>31</sup> Hagi anante Joapune maka agranema mani'naza vahera Deviti'a zamasamino, Kukenatamia tagato nehuta, tamasunku kukena huta tamasunku huta Abnankura zavira atevo. Hagi kini ne' Deviti'a vahe'ma eri'zama nevaza vahe zamefi e'ne. <sup>32</sup> Hagi Abnana Hebronii ome asentageno, keri'arera kini ne'mo'a tusi zavi ome ateg'e'za, mika'mo'za Abnankura zavi ate'naze. <sup>33</sup> Hagi kini ne'mo'a amanage huno asunku zagamera Abnanteria hu'ne,

Abna'a negi vahera omani'neanagi, na'a higeno neginagi vaheknara huno frie? <sup>34</sup> Kazantera nofira kionte'za seni nofiteti kagarera kionte'naze.

Hagi kagrira kefo vahe'mo'za kahe frize. Hige'za miko vahe'mo'za Ab-nankura tusi zavi ate'naze. <sup>35</sup> Anante hanina osuneg'e'za miko vahe'mo'za e'za Devitinkura ne'zana no hu'za hu'naze. Hianagi Deviti'a hvempage huno, Zagemo'ma uoram'i'enke'na ne'zama nenugeno'a, Anumzamo'a nahe frigahie. <sup>36</sup> Hagi miko vahe'mo'za anazama kini ne'mo'ma hiazama nege'za muse nehu'za, ko'ma hu'nea zanku'enene muse hu'naze. <sup>37</sup> Anama hige'za miko vahe'mo'za antahi ama nehu'za, Abna'ma fri'nea zamofona kini ne'mo'a eri'za vahe'aramina zamasamino, menina Israeli vahepima rankva vahe'ma fri'neana tamagra antahita keta osu'nazo? <sup>38</sup> Hagi Ra Anumzamo'a kini manio huno huhampri nante'neanagi, nagrira hanaveni'a omane'ne. Hagi ama Zeruia nemofo Joapu'ene Abisai'enena hanave nentake netre mani'na'ankina, nagra zanazeri rava hegara osu'noe. Hagi havi avu'ava hu'nemofona Ra Anumzamo azeri havizana hanie.

## 4

### *Is-bosetima ahe fri'naza nanek*

<sup>1</sup> Hagi Abna'ma Hebronii kumate'ma fri'nea namekema Soli nemofo Is-boseti'ma nentahigeno'a, hanave'a omnegeno agra tusi koro nehige'za, Israeli vahe'mo'za zamagogogu hu'naze. <sup>2</sup> Hagi Soli nemofo Is-boseti sondia vahepima ugota huneke rohu'ma vahe'ma re'zama vanoma ne-haza sondia vahete kva hu'na'a netre zanagi'a Bana'ene Rekapuke. Hagi zanagra Beroti kumate Benzameni nagapinti netrenike Rimoni mofavre mani'na'e. <sup>3</sup> Na'anckure Beroti mopa agafa vahe'mo'za fre'za vu'za Gitaimu kumate kraka vahe umani'nazageno, eno ama knarerha ehanati'ne. <sup>4</sup> Hagi Soli nemofo Jonatani'a mago mofavre ante'neana, ana mofavremofo agamo'a haviza hu'ne. Hagi ana mofavremo'a 5fu'a kafu nehige'za Soline Jonataninem zanahaza zanagenkea ehanatigeno, mofavremo kegava ne-hia a'mo'a ana mofavrea avreno fre'ne. Hianagi ana mofavremo avreno nefreno ome ahentegeno, ana risemofo tarega aga hantagi'ne. Hagi ana rise'mofo agi'a Mefiboseti'e. <sup>5</sup> Hagi mago zupa ferura Is-boseti'a nomafa'i maseno mani'negeno, Beroti kumateti Rimoni mofavremo ke Banake Rekapukea ome ke'naku vu'na'e. <sup>6</sup> Hagi zanagra witima erinaku'ma hiaza huke nomofona agu'afinka ufre'ne Is-bosetina kazinteti amupi ome rakeno fri'ne. Hagi vahe'mo'a ozanageama'a zanagra ananke akafrice agenopa e'nerike, ana kenagera atiramike frene vu'na'e. <sup>7</sup> Hagi zanagrama nompima ufrinema ka'ana agra tafe'are mase'negene ome negeke, kazina amupi reke ahe nefrike agenopa akafrice erike, ana kenageke Jodani agupofi freke vu'na'e. <sup>8</sup> Hagi ana agenopa erike Hebronii kumate Devitinte uhanati'ne ange hu'na'e, Ha'ma regante'nea ne' Soli nemofo Is-boseti agenopa amanagi ko. Hagi menina Ra Anumzamo'a kagrima ha'ma hugante'naza vahera rankva nimoka kaza huno nona huzamante. <sup>9</sup> Hianagi Beroti kumateti ne' Rimoni ne'mofavrerenarena Rekapune Banakiznia Deviti'a ange huno kenona huzanante'ne, Maka hazenkema nagrite'ma ne-egeno'a mani'nea Ra Anumzamoke naguranevazie. <sup>10</sup> Hagi kora mago ne'mo'a Solima fri'nea nanekea erino eme nenasamino, agesama antahiana knare naneke nasamigahie huno antahi muse hu'neanagi, nagra ana nera Ziklaki kumate ahe fri'noe. Ana nanekema eme nasamia zamofonte mizama'a ami'noe. <sup>11</sup> Hagi

mago hazenke'ama omne fatgo ne'ma noma'afima masenegeno ome ahe fria hazenke vahera, na'a huntegahue? Ana nona'a nagra tanahe frinugeta ama mopafina omanigaha'e. <sup>12</sup> Huno nehuno Deviti'a agranema nemaniza sondia vene'ne huzamanteg'e'za, ana netrena zanahe nefri'za zanagia zanazana nekafri'za zanavufga'a eri'za Hebronja mago tiru me'nea ankenare ome hantinte'naze. Hianagi Is-boseti aseni'a eri'za Abnama asente'naza havegampi Hebroni ome asente'naze.

## 5

### *Deviti mikä Israeli vahe'mokizmi kinima mani'nea naneke*

<sup>1</sup> Hagi miko Israeli naga nofi'mo'za Hebroni kumate Devitinte e'za ange hu'naze, Tagra mago kora mani'nonanki ko. <sup>2</sup> Hagi kote'ma Soli'ma tagri kinima mani'negenka kagra sondia vahete kva mani'enka, hatera zamavarenka vunka enka nehankeno, Ra Anumzamo'a amanage hu'ne, Kagra sipisipima kegava hiaza hunka Israeli vahete kva mani'enka, Israeli vahe'ni'a kegava huzmantegahane hu'ne. <sup>3</sup> Hagi mika Israeli ranra kva vahe'mo'za Devitima kenaku Hebronima ageno'a, Deviti'a Ra Anumzamofo avure zamagranema knare'ma hu'za manisazanke huvempa hige'za, masave frente'za Israeli kini ne' azeri oti'naze. <sup>4</sup> Hagi Deviti'a 30'a kafu hu'neno kinia efore hu'neankino, 40'a kafufi kinia manino kegava hu'ne. <sup>5</sup> Hagi Hebronima mani'neno'a, 7ni'a kafugi 6'a ikampi Juda vahe kinia mani'ne. Hagi Jerusalemima emani'neno'a 33'a kafufi maka Israeli vahete'ene Juda vahetera kinia manino kegava huzmanteh'e.

### *Deviti'a ha'huno Jerusalemi kuma eri'nea naneke*

<sup>6</sup> Hagi henka kini ne' Deviti'a Jebusi vahe ha' huzamantenaku sondia vahe zamavarege'za Jerusalemi vu'naze. Hagi anante'ma uhanatizage'za Jebusi vahe'mo'za Devitina kiza zokago ke hunte'za anage hu'naze, Zamagama haviza hu vahe'mo'zane zamavu asuhu vahe'mo'za kama vanana kana renkani regante'sagenka kagra amafina omegahane. Hagi zamagrama antahi'zana Devitinkura kumatia tahenoohaneregahie hu'za hu'naze. <sup>7</sup> Hianagi ana kezamimo'a amne zankna higeno, Deviti'a Saioni rankumara ha' huno eri'nege'za menina ana rankumakura Deviti rankumare hu'za ne-haze. <sup>8</sup> Hagi anama ha'ma hu'naza zupa Deviti'a sondia vahe'a zmasamino, zamagia haviza huno, zamavu asuhu Jebusi vahekura nagu'reti hu'na nagote'zamantoe. Hagi ana rankumapima tima avre'za vu'naza kampinti rankumapina ufretu, ana zamavu havizahu vahe'ene, zamaga havizahu vahera zamaheta kumazamia eri haviza hugahune. Hagi zamaga haviza huno, zamavu suhu vahere huno'ma Deviti'ma hu'nea kegu, menina zamaga havizahu, zamavu asuhu vahe'mo'za kini ne'mofo nompina uofregahaze hu'za nehaze.

<sup>9</sup> Hagi Deviti'a ana rankuma'ma ome erino Saionima unemanino'a, ana kumakura Deviti rankumare huno agi'a antemi'ne. Hagi ana kumamofo zage hanati kazigama urami eramima hu'nea kumara mopa kateno anteviteno kumara erira hu'ne. <sup>10</sup> Hagi Deviti'a mago hihamu'ane ne' efore huno mani'ne. Na'ankure monafi ohampiriga'a sondia vahetamimofo Anumzana Ra Anumzamo agrane mani'nego'e.

<sup>11</sup> Hagi Tairi kini ne' Hiramu'a kema eri'zama vu vahete Devitina kea atrenenteno, Noma negiza vahe'ene, sida zafane, havereti'ma eri'zama e'neri'za vahe'ene Devitina noma'a kinteho hige'za eme kinte'naze. <sup>12</sup> Hagi anazama fore hiaza Deviti'a negeno, tamage huno Israeli vahe'mokizmi kini manio huno Ra Anumzamo'a huhampri nante'ne huno antahi'ne.

<sup>13</sup> Hagi Deviti'ma Hebronima atreno Jerusalemima ne-eno'a, mago'a a'nea e'nerino, henka a'nea rama'a ome erino rama'a ne'mofara kasezmanente'ne. <sup>14</sup> Hagi Deviti'ma Jerusalemima mani'neno kasezamante'nea ne' mofavre zagaramimofo zamagi'a, Samuaki, Sobabiki, Neteniki, Solomoniki, <sup>15</sup> Ibihariki, Elisuaki Nefekiki, Jafiaki, <sup>16</sup> Elisamaki, Eliadaki, Elifeleti'e. <sup>17</sup> Hagi Filistia vahe'mo'zama antahizama Deviti'na Israeli vahe'mo'za masave frent'e'za kini azeri oti'naze hazankema nentahi'za, maka Filistia vahe'mo'za Devitina ha'hunte'naku mareri'za ome hake'naze. Hianagi Deviti'ma anankema nentahino'a, atreno uramino frama ki'zama nemanziza havegantega vu'ne. <sup>18</sup> Hagi ana Filistia vahe'mo'za Refaimi agupofi emanimpi hu'naze. <sup>19</sup> Hagi Deviti'a Ra Anumzamofo antahigeno, Nagra amane mareri'na Filistia vahera hara ome huzamantegahufi? Kagra ana vahera nazampina zamavarentegahano? Higeno Ra Anumzamo'a huno, Izo Nagra Filistia vahera kagri kazampi zamavarentegahuanki amne marerio. <sup>20</sup> Higeno Deviti'a marerino Ba'al-Perazimi kumate Filistia vahera hara eme huzamanteno, hara huzamagatere'ne. Ana'ma huteno Deviti'a anage hu'ne, Tima hageno mika'zama eri haraf'i'ma huno eviankna huno Ra Anumzamo'a ha' vahe'n'i'a zamahe panani hu'ne. Ana hu'negu ana kumamofo ag'i'a Ba'al Perazimie hu'za nehaze. <sup>21</sup> Hagi Filistia vahe'mo'zama nefre'za havi anumzantamina atre'za frage'za, Deviti'ene sondi'a naga'amo'za ana zantamina ome eri'za vu'naze. <sup>22</sup> Hagi mago'agna evutegeno, Filistia vahe'mo'za Refaimi agupofi e'za hahunaku emanimpi hu'naze. <sup>23</sup> Hagi mago'anee Deviti'a Ra Anumzamofona antahigeno, Na'a huzamantegahue, higeno Ra Anumzamo'a asamino, zamavugatira hara huozmantenka, zamefiti zamavazagi kagitenka balsama zafa avo'nomofo avuga hara huzamanto. <sup>24</sup> Hagi kagrama balsama zafa amumpafintima antahisankeno rama'a vahe agazamofo agasasa knama hanigenka, nentahisunka kagra ame hunka ha' ome huzamanto. Na'ankure Ra Anumzamo'na nagra'a vugota hu'na Filistia vahera zamahegahue. <sup>25</sup> Hagi Ra Anumzamo'ma anama huo huno'ma hunteaza huno Deviti'a Filistia vahera Gibionitira zamaheteno vuvava huno Gezeri kumate uhanati'ne.

## 6

### *Deviti'a Ra Anumzamofo huhagerafi huvempage vogisia Jerusalemi erino e'nea naneke*

<sup>1</sup> Hagi Deviti'a ete Israeli agu'afintira 30 tauseni'a hanavenentake sondia vahe'aramina zamavare atru hu'ne. <sup>2</sup> Hagi ana vahetamine Deviti'a Ra Anumzamofo huhagerafi huvempage vogisia Juda kaziga Ba'alati kumateti ome eri'za enaku vu'naze. Hagi ana vogisirera hanavenentake Ra Anumzamofo agi me'nea vogisigino, ana huvempage vogisimofo agofetura tare ankerontremofo zanamema'a tro hu'za antagene kantigama me'nakeno, amu'nompina Anumzamo nemanie. <sup>3</sup> Hagi ana huvempage vogisia Abinadapu nompi agonafi me'nege'za omeri'za kasefa karisifi erintageke, Abinadapu mofavrea Uza'ene Ahio'ene ana karisia kegava hake'za eri'za e'naze. <sup>4</sup> Hagi Ahio vugota huno nevige'za, ana huhagerafi huvempage vogisia eri'za e'naze. <sup>5</sup> Hagi anama hu'za eri'za nevazage'za Deviti'ene maka Israeli vahe'mo'za hu'za musenkase nehu'za, zavenane, konkene, tamborima, zozopama hu'za nehe'za musena hu'naze. <sup>6</sup> Hagi Nakoni'ma witi honama neharere ehanatizageno, Anumzamofo huhagerafi huvempa vogisima erino ne-ea bulimakaomo'a tnafa eme higeno, Uza'a ana vogisima

evurami'za higeno azana antegantuteno azeri'ne. <sup>7</sup> Hagi anazama higeno'a Ra Anumzamofona tusi'a arimpa ahogeno, Uzana ahetregeno huhagerafi huvempage vogisimofo tava'onte fri'ne. Na'ankure avako osiho huno'ma hu'nea vogisi avako higeno, anara hu'ne. <sup>8</sup> Hagi Ra Anumzamo'ma Uzama ahe frigeno Deviti'ma negeno'a, tusi'a rimpia ahogeno ana kumakura Perez-Uza'e huno agi'a antege'za, meninena ana agige'za nehaze. <sup>9</sup> Hagi ana zupa Deviti'a Ra Anumzamofonkura tusi koro nehuno anage hune, inankna hu'na Ra Anumzamofo huhagerafi huvempage vogisia eri'na nagra ome antigahue. <sup>10</sup> Nehuno Deviti'a ana huhagerafi huvempage vogisima erino Deviti ran kumate Jerusalemi vezankura avesra nehuno, Gati' kumate ne' Obed-edomu nonte erino ome ante'ne. <sup>11</sup> Hagi anante Ra Anumzamofo Huhagerafi huvempage vogisia eri'za ome antazageno, Obed-edomu nompina 3'a ika me'ne. Hagi anama higeno'a, Obed-edomune maka naga'amofona Ra Anumzamo'a rama'a asomu huzmante'ne.

*Huhagerafi huvempa vogisi Obed-edomu nonteti emeri'za Jerusale vu'naza nanake*

<sup>12</sup> Hagi kini ne' Devitina anage hu'za eme asami'naze, Obed-edomune maka naga'ane maka zazminena Ra Anumzamo'a asomu huzamante'ne. Na'ankure Ra Anumzamofo huhagerafi huvempage vogisia agri'ene me'negu anara hu'ne. Higeno Deviti'a vuno Obed-edomu nompintira Anumzamofo huhagerafi huvempage vogisia ome erige'za tusi'a musenkase nehzageno, Jerusalemi rankumapina erino ufre'ne. <sup>13</sup> Hagi ana huhagerafi huvempage vogisima eri'naza vahe'mo'zama 6si'a zupama zamagama renakere'za vazageno'a Deviti'a mago ve bulimakaonki mago anenta bulimakaonki huno aheno kresramana vu'ne. <sup>14</sup> Hagi Deviti'a pristi vahe efeke za'za kukena hu'neno Ra Anumzamofo avuga avoreno musenkase hu'ne. <sup>15</sup> Hagi Deviti'ene mika Israeli vahe'mo'za tusi musenkase hu'za kezanke nehu'za ufena nere'za, Ra Anumzamofo huhagerafi huvempage vogisia eri'za marer'i'ne. <sup>16</sup> Hagi Ra Anumzamofo huhagerafi huvempage vogisima eri'za Deviti rankumapima efrageno'a, nomofo zaho eri kampinti Soli mofa'mo Mikeli'a ke'ne. Hagi kegeno Ra Anumzamofo avure'ma Deviti'ma haru huno marerino tamino huno nehuno, avona reno musenkasema huno ne-egeno negeno'a, Devitina antahi haviza hunte'ne. <sup>17</sup> Hagi Ra Anumzamofo huhagerafi huvempage vogisia eri'za Deviti'ma kinte'nea seli nompi ome ante'ne. Hagi anante Deviti'a kre fanane hu ofane, arimpa fru ofanena Ra Anumzamofo avurera hu'ne. <sup>18</sup> Hagi Deviti'a kre fanene hu ofane arimpa fru ofanema huvagareteno'a, miko Israeli vahera Hanavenentake Ra Anumzamofo agifi asomu kea huzmante'ne. <sup>19</sup> Hagi agra mika Israeli vahera vene'nene a'nema musezana, bretine zagagafa ame'ane, waini ragama regripe'nazana mago mago vahera zamatere hu'ne. Ana hutege'za ana mika vahe'mo'za nozmirega vu'za e'za hu'ne. <sup>20</sup> Hagi Deviti'a anama hvareteno naga'amofo asomu kema ome huzmantenaku'ma noma'are nevigeno'a, Soli mofa Mikelia etiramino Devitinkura anage hu'ne, Israeli vahe kini ne'mo'a amne vahe'mo'ma hiaza huno, eri'za vahe'amofo kazokzo eri'za mofa'nemofo zamavufina takaire takaire huno avufa avapa avo hageno evu'ne. <sup>21</sup> Higeno Deviti'a Mikelina kenona hunteno, Kagri negafane, nagaka'ane azeri atreno kini mani'enka, mika Israeli vahe'nire kegava huzmanto huno huhampri nante'nea Ra Anumzamofo avuga musenkase hu'na ra agi'a erintesaga nehue. <sup>22</sup> Hagi nagra mago'ane amane vahekna hu'na kagri kavufina

navufa erinteramigahue. Hianagi amama kema hana kazokazo eri'za mofa'nemo'za nagrira nagesga hu'za ra nagia namigahaze.<sup>23</sup> Hagi Soli mofa Mikeli'a anagema hiazamofo nona'a, mofavre onte naravo a' mani'neno fri'ne.

## 7

### *Deviti'a ra mono no kinaku antahintahi'a retro hu'nea naneke*

<sup>1</sup> Hagi kini ne' Deviti'ma kini noma'afima manitegeno'a, Ra Anumzamo'a manifru amigeno mikha' vahe'amo'za hara eme huontazageno fru huno mani'ne. <sup>2</sup> Hagi kini ne'mo'a kasnampa ne' Netenina asamino, Ko, sida zafareti knare no kintenafi nagra nemanugen, Ra Anumzamofo huhagerafi hvempage vogisimo'a seli nompima me'nea zamo'a fatgoa osie. <sup>3</sup> Higeno Neteni'a kenona huno, Nazano antahizanka'afima esanigenka hunakurema hanana zana, miko ana zana amane hugahane. Na'ankure Ra Anumzamo'a kagrane mani'ne. <sup>4</sup> Hianagi ana kenagera Ra Anumzamo'a Netenina anage huno asami'ne, <sup>5</sup> Vunka eri'za vahe'ni'a Devitina ome asaminka, amanage huno Ra Anumzamo'a hie hunka asamio, Nagrama maninua nona kagra onkigahane. <sup>6</sup> Nagra Israeli vahe'ma Isipiti'ma zamavarena atiraminoregati'ma eno menima ehanatiana, nompina omani'noe. Hianagi seli nompi nagra manite manite hu'na zamagranena e'noe. <sup>7</sup> Hagi Israeli vahe'enema maka kumate'ma manite manite'ma hu'na ne-ena, mago kva vahe'ma huhamprizamantoa vahera sida zafareti noni'a kiho hu'na zamatihai onke'noe.

### *Ra Anumzamo'a Deviti hvempage hunte'nea naneke*

<sup>8</sup> E'na hu'negu eri'za vahe'ni'a Devitina amanage huno Hanavene-take Ra Anumzamo'a hie hunka ome asamio, Kagra sipisipi kegava hunka mani'nanke'na, Israeli vaheni'a kegava hugahane hu'na huhampri-gante'noe. <sup>9</sup> Hagi inantego vunka enkama hu'nanana kagrane vano nehu'na ha' vaheka'a zamahogenka ke'nane. Hagi menina kagika'a eriraha'nena ama mopafima zamagimo'ma mareri'nea vahe kna hugahane! <sup>10</sup> Hagi Na-gra vaheni'a Israeli vahera mago kuma zaminena anampi mani'nenageno, mago vahe'mo'a eme zamazeri havizana osugahie. Hagi kote'ma hu'naza kna hu'za havi vahe'mo'za mago'anena eme zamazeri havizana osuga-haze. <sup>11</sup> Hagi kema refko hu kva vahe'ma huhampri zamantoge'zama Israeli vahe'ni'a kegava'ma hu'naza knafina, ha' vahe'mo'za tamazeri haviza hu'naze. Hianagi Ra Anumzamo'na Nagrani'a huama hu'na mani fru kamin-ugenka mani'nesankeno, kagehemo'za kini vahera manigahaze huno hu'ne. <sup>12</sup> Hagi fri knakama esigenka frinka kagehezanema umanisankena, kagri mofavreramimpinti magomofo kini azeri oti'nugeno, agra hanavenentake kini mani'nesigeno, mago'zamo'a azeri otregahie. <sup>13</sup> Hagi e'i ana ne'mo Nagri nagima erisgama hanaza nona kisige'na Nagra, kini eri'zama'a eri hanavetinenka kini tramo'a agri nagapi mevava huno vugahie. <sup>14</sup> Hagi Nagra agri nef'a na mani'nena, agra mofavreni'a manigahie. Hagi agrama kumi'ma hanige'na, Nagra nef'a ma mofavre'ama sefu'ma amino azeri antefatgomia hiazza hu'na azeri antefatgo hugahue. <sup>15</sup> Hagi negankena Solinteti'ma navesi'zama kote'ma eritre'noa knara osugahuanki, nagra navesinte vava hugahue. <sup>16</sup> Hagi naga'kamo'za vagaoresage'na, Nagra tamaza ha'nena tamagri naga'pinti kinia mani'za nevanageno, kini tramo'a tamagri nagapi mevava huno vugahie. <sup>17</sup> Hagi Ra Anumzamo'ma miko nanekema avanagna zampima Netenima asmia nanekea, vuno Devitina ome asami'ne.

### *Deviti'a nunamu hu'nea naneke*

<sup>18</sup> Anante Deviti'a Ra Anumzamofo avuga nunamuna ome huno, Hanaventakate Ra Anumzamoka nagra iza'na mani'noe, naga'nimo'za inankna vahe mani'nazagenka Kagra navrenka amarera ehanatine? <sup>19</sup> Hagi Hanaventakate Ra Anumzamoka mago'a zama hunante'nana zanteke onatrananki, Kagri eri'za vahe'mo'na nagapinti'ma kinima mani'za vugahazema hanana nagra amne vahetfa mani'noe. Hagi Ra Anumzamoka kagra mago'a vahe'enena anara nehana zampi? <sup>20</sup> Hagi na'ane hu'na mago'anena eri'za vahekamo'na hugahie? Na'ankure kagra Ra Anumzamoka eri'za vahekamo'na ko, nagenka antahinka hu'nane. <sup>21</sup> Na'ankure kagrama huvempama hu'nana kegu'ene, kagra'a kavesite ama ana miko zana nehunka eri'za vahekamo'na eri naveri hane. <sup>22</sup> Hagi Kagra hanaventakate hunka marerisa Ra Anumza mani'nane. Hagi mago'mo'a kagriknara osu'ne. Hagi magora Kagrikna anumzana omanigeta keta antahita osu'none. <sup>23</sup> Hagi ama mopafina ina vahe'mo'za Kagri vahe Israeli vahe knara hu'naze? Hagi ama mopafina ina vahe'mokizmi kazokazo eri'zampintira zamagu'vazinka Kagra vhahere hunka zamante'nane? Kagra Isipiti'ma vaheka'ama zamagu'vazinanana Kagraka'a kagia eri ra hu'nane. Hagi Kagra tusi'a kaguvaza hunka vahe'ene havi anumzantaminena zamahe natitre'nane. <sup>24</sup> Hagi Israeli vhahera maka knane knanena zamavarenka Kagraka'a vahe zamantanke'za manizagenka, hanaventakate Ra Anumzamoka zamagri Anumza mani'nane. <sup>25</sup> Ana hu'negu menina Ra Anumzamoka, eri'za vaheka'a mani'nogu Kagrama huvempsa hunka nagriku'ene naga'nimofoma huzmanteku'ma hanazana hugeno, keka'amo'a mevava huvempsa ke megahie. <sup>26</sup> Ana hanigeno Kagri kagimo'a rura huno vuvava hugahie. Ana nehina hu'za Hanaventakate Ra Anumzana Israeli vahe Anumzane hugahaze. Hagi eri'za vahekamofo nagapinti kinia manivava hu'za vugahaze. <sup>27</sup> Hagi Hanaventakate Ra Anumzana, Israeli vahe'mota Anumzamoka, korora osu ama nunamuna Kagritega nehue. Na'ankure Kagra maka'zana nagrite eri ante ama hunka anage hu'nane, knane knanena kini vhahera kagri nagapinti zamazeri otigahue hu'nane. <sup>28</sup> Hagi menina Anumzamoka, Kagra Ra Anumza mani'nane. Hagi keka'amo'a tamage ke me'ne. Kagra knare huvempsa ke eri'za vaheka'amo'na hunantane. <sup>29</sup> E'ina hu'negu kagra muse hunka eri'za vahekamo'na naga'mokizmia asomu huzmantesanke'za, Kagri kavurera manivava hu'za vugahaze. Na'ankure Anumzamoka, Kagra Ra Anumza mani'nananki, eri'za vahekamo'na huvempsa hunantanankinka, naga'nimofona asomu huzmante vava hugahane.

## 8

### *Deviti'ma ha'ma hu'nea zamofo naneke*

<sup>1</sup> Ana'ma hutegeno mago zupa Deviti'a Filistia vahe'mokizmi hara huzamagatereno kegava hunezamanteno, ugotama hu'nea Meteke-ama rankuma'zminena erino kegava huzmante'ne. <sup>2</sup> Hagi Deviti'a Moapu vahe'enena ha'huzamanteno ha'ma huzamagatereno, ana vhahera mopafi maseho hige'za masempi hu'za vazageno, nofiteti avazuhuno mesarimi huno ke'ne. Hagi 3a kevu vahepintira tare kevu vhahera zamahe vaganereno, mago kevu vhahera ozamaheno zamatrege'za agri agoraga mani'naze. Hagi Moapu vahe'ma ozmahe zamatreva vahe'mo'za agri agorga mani'za takesi zagoa Devitina ami'naze. <sup>3</sup> Hagi Zoba kini ne'Rehobu nemofo Hadadezeri'ma sondia vahe'anema Yufretis tintega vuno mopa'a ome hahuno eri'naku nevigeno, Deviti'a hara hunteno hara hugatere'ne. <sup>4</sup> Hagi

Deviti'a 1tausen 700'a hosifima vanoma nehaza sondia vahetaminki, 20 tauseni'a mopafima vanoma nehu'za ha'ma nehaza sondia vahe zama-heno nezmareno, maka hosi afutamina zamagigruna taga nehuno 100'a karisima avazu huno vuga hosi afutaminke zamatre'ne. <sup>5</sup> Hagi ana knafina Damaskasi kumateti Aramu sondia vahe'mo'za vu'za, Joba kini ne' Hadadezeri ome aza hu'za hara nehazageno, Deviti'a ana ne'mofo sondia vahera 22 tauseni'a vahe zamahe'ne. <sup>6</sup> Hagi Deviti'a sondia vahe'aramimofo kumatamina Aramu vahe'mofo mopafi Damasakasi kumapi retro huno zamanteg'e za mani'neza kegava hu'nazage'za, Aramu vahe'mo'za Deviti agorga mani'ne'za takesi zagoa ami'naze. Ana nehazageno Ra Anumzamo'a Deviti'ma vuno eno'ma huno'ma ha'ma hirega, hanave amigeno hara huzmagatere'ne. <sup>7</sup> Hagi Hadadezeri sondia vahe'mo'za golireti'ma tro'ma hu'naza hankoramina Devitia erino Jerusalemi vu'ne. <sup>8</sup> Hagi Hadadezeri'ma kegava hu'nea tare rankumara Beta kuma'ene Berotai kumapintira Deviti'a rama'a bronsi eri'ne. <sup>9</sup> Hagi Hamati kumate kini ne' Toi'ma antahiamma Deviti'a Hadadezeri sondia vahe hara huzmagatere'ne hazanke nentahino'a, <sup>10</sup> Toi'a nemofo Joramuna huntegeno Deviti ome musenke hunte'naku vu'ne. Hagi Toi'ene Hadadezeri'enena zanagra za'zate hara hu'na'a netre'ne. Hagi Joram'u musezana silvane, goline bronsinena erineno Devitina aminaku vu'ne. <sup>11</sup> Hagi kini ne' Deviti'a miko ha' vahe'amokizmi ha' huzmanteno eri'nea zantamimpinti ko'ma hu'neaza huno, ana musezantamina Ra Anumzamofo zane huno erinte otage huno Ra Anumzamofo ami'ne. <sup>12</sup> Hagi ana zantamima Ra Anumzamofoma eri otage huno ami'neana, Idomu vahe zanki, Moapu vahe zanki, Amoni vahe zanki, Filistia vahe zanki Ameleki vahe zanki huno eri'ne. Hagi Rehopu nemofo Soba kini ne' Hadadezeri zantaminema eri'nea zanena Ra Anumzamofo eri otage huno ami'ne. <sup>13</sup> Hagi Deviti'a Hage nehaza agupofima 18tauseni'a Idomu sondia vahe'ma ome zamaheteno ege'za, ra agi amizageno agimo'a mareri'ne. <sup>14</sup> Hagi Deviti sondia vahe'mo'za manisaza kumatamina Idomu mopafi tro huno zamanteg'e za umani emanı hu'ne'za kegava hazage'za, Idomu vahe'mo'za Deviti agoraga mani'naze. Hagi inantego Devitima vunoma ha'ma ome hirega, Ra Anumzamo'a aza huno hanave amigeno hara agatere'ne.

### *Deviti eri'za vahe'mokizmi naneke*

<sup>15</sup> Ana huteno Deviti'a fatgo avu'ava huno Israeli vahera knare'za huno kegava huzamante'ne. <sup>16</sup> Hagi Seruai nemofo Joapu'a Sondia vaher kva mani'geno, Ahiluti nemofo Jehosafati'a maka'zama nehaza-zamofo avonkreno eri fatgo hu eri'za vahe mani'ne. <sup>17</sup> Hagi Ahitubu nemofo Zadoki'ene, Ahimeleki nemofo Abiatakea pristi netre manikeno, kini ne'mo'ma hiazantamima avonkreno eri fatgo hu eri'za nera Sera'a a mani'ne. <sup>18</sup> Hagi Jehoiada nemofo Benaia'a kini ne'mofo avate kva nera mani'ne. Hagi Deviti ne'mofavremo'za pristi eri'za vahete kegava huzmante'naze.

### 9

### *Devitine Mefiboseti naneke*

<sup>1</sup> Hagi Deviti'a mago'a vahe zamatahigeno, Soli nagapintira mago'a vahera mani'nafi? Mani'nenigeta keta antahita hu'nenua, nasaminke'na Jonatani'ma knare avu'ava'zama hunante'nere nona huntegahue. <sup>2</sup> Hagi Siba'a korapara Soli eri'za ne' mani'neankino, kini ne' Deviti'a kehigeno

egeno Sibana antahigeno, Kagra Sibago? Higeno agra huno, Izo ramoka nagre kagri eri'za vahere. <sup>3</sup> Hagi kini ne'mo'a antahigeno, Mago'a Soli nagapinti vahera mani'nafi? Mago'ma mani'enigenka nasamige'na, knare avu'ava'zana hunte'na Anumzamofo avesi averi ha'neno. Anage higeno Siba'a kenona huno, Izo magora Jonatani nemofo'a mani'neanagi tare agiamo'a haviza hu'negeno kana vano nosie. <sup>4</sup> Higeno kini ne'mo'a antahigeno, Ana risera iga mani'ne? huno kini ne'mo'a antahigeno Siba'a huno, Ammieli nemofo Makiri nompi Lodeba kumate mani'ne. <sup>5</sup> Anage higeno kini ne' Deviti'a huzamantege'za vu'za ana risera Lodeba kumati Ammieli nemofo Makiri nompintira ome avre'za e'naze. <sup>6</sup> Hagi Mefiboseti'a Jonatani nemofo Soli negehokino, kini ne' Devitinte'ma ehanatino'a avugosaregati mopafi emasegeno, Deviti'a huno, Mefibosetigo? Huno higeno, izo eri'za vahekamo'na nagre. <sup>7</sup> Higeno Deviti'a asamino, Korera osuo. Na'ankure negafa Jonatani'enema huvempa hu'nogu kagrira knare navu'nava hunegante'na, negageho Soli mopa ete kamigahue. Ana hanugenka kagra maka zupa nagrane ne'zama nenoa tratetira ne'zana negahane. <sup>8</sup> Hagi Mefiboseti'a mago'ane avugosaregati umaseno nahigenka kini ne'moka eri'za vahekamo'na fri'nea kraganama hu'noa vahera e'inahu knare kavukavara hunantane huno hu'ne. <sup>9</sup> Hagi Deviti'a Soli eri'za ne' Sibana kehigeno egeno amanage huno asami'ne, Mika Soline naga'amofo mopane maka zazamia ete kvakamofo Soli negeho Mefiboseti ami vagaroe. <sup>10</sup> Hagi kagrane mofavre raminka'ane eri'za vahekane ana mopafina hoza anteta erita eme amigahaze. Hianagi kvakamofo negeho Mefiboseti'a nagrane maka zupa ne'zane tratera mani'neno ne'zana negahie. Hagi Sibana 15ni'a ne' mofavre'a manigeno, 20'a eri'za vahe'a mani'ne. <sup>11</sup> Hagi Siba'a kenona'a huno, Rana kini nimoka mikazama huo hunka hunantana zana hugahue. Hagi ana knaretima agafa hiana Mefiboseti'a kini ne'mofo mofavregna huno ne'zane trate ne'zana ne'ne. <sup>12</sup> Hagi Mefiboseti'a ne' mofavre mago ante'ne, agi'a Mika'e. Hagi maka Siba naga'mo'za Mefiboseti eri'za vahe mani'naze. <sup>13</sup> Hagi Mefiboseti'a Jerusalemi kini ne'ene mani'neno, nezama nenea tratetira maka zupa ne'zana ne'ne. Na'ankure tarega agiamo'a haviza hu'ne.

## 10

### *Deviti'a Amoni vahe ha' huzamagatere'nea nanek*

<sup>1</sup> Hagi mago'a knama evutegen'o Amoni kini ne' Nahasi'a fritegeno, nemofo Hanuni agri nona erino kinia mani'ne. <sup>2</sup> Hagi Hanuni nefi Nahasi'ma frigeno'a Deviti'a agesama antahiana, knare avu'ava hunante'nere, nagra knare navu'nava huntegahue huno nentahino, Deviti'a asunku ke atrentege'za Hanunina ome asami'naku Deviti eri'za vahe'amo'za vu'naze. Hianagi Deviti eri'za vahe'mo'zama Amoni mopafima unefrageno', <sup>3</sup> Amoni kumate kva vahe'mo'za ra zamimofo Hanunina asami'za, Kagrama kagesama antahinana Devitia negafanku antahinemino asunku ke atregantege'za tamage hu'za eri'za e'nafi? I'o zamagra rankumatifi efre'za afure'za nege'za, ke eri'za vanage'za, ha' eme huragatere'za mopati erinaku e'naze. <sup>4</sup> Hagi anagema hazageno'a Deviti eri'za vahetamina Hanuni'a zamazeriteno, zamagi zamazokara hare atupa hunezamanteno, kenazamia zamariga avamenteti aheragato huteno, huzmanteg'e'za ete vu'naze. <sup>5</sup> Hagi ana kema Deviti'ma nentahino'a, eri'za vahe'a huzmanteno anage hu'ne, Tusi'a zamagaze hugahianki ome zamasaminke'za Jeriko mani'nenkeno

zamagi zamazokara hagetenke'za eho. <sup>6</sup> Hagi Deviti'ma arimpama ahea kema Amoni vahe'mo'zama nentahi'za, mopafi vanoma hu'za ha'ma ne-haza Aramia sondia vahera Bet-rehobu kumateti'ene Zoba Kumatetira 20 tauseni'a zagoreti mizase'za nezamavare'za, 1tauseni'a sondia vahe Ma'aka kini ne'mofo sondia vahepintira nezamavare'za, 12 tauseni'a sondia vahe Tob mopafintira zamavare'naze. <sup>7</sup> Hagi Deviti'a anankema nentahino'a Joapune, mika hanavenentake sondia vahe'a huzamantege'za ha' ome huzamantenaku vu'naze. <sup>8</sup> Hagi Amoni sondia vahe'mo'za ha' hunaku ranku'ma zamimofo kahante emeri atru nehazageno, Aramu sondia vahe'ma Zoba kumate'ene, Rehobu kumate vahe'mo'zane, Tob kumate ne, Ma'aka kin-imofo sondia vahe'mo'za ha' hunaku kuma'mofe fegi'a agupofi eman-impi hu'naze. <sup>9</sup> Hagi Joapuma ome keama ha' vahe'mo'zama tarefima avugane amefi'enema manimpima hunazageno negeno'a, Israeli sondia vahe'mokizmi agu'afinti hanave sondia vahetamina ha'ma hanagu zamazeri retro nehuno, Aramu vahe'moki'zmima ha'ma huzmante'nagu agra'a ugota huzmanteno zamavareno vu'ne. <sup>10</sup> Hagi maka sondia vahera Joapu'a nefu Abisai azampi antegeno, kegava huzamantege'za Amoni vahe ha' huzamantenaku vu'naze. <sup>11</sup> Hagi Joapu'a nefuna asamino, Aramu vahe'mo'zama hanaveti'za ha'ma hurantesageta, tamagra eta eme taza hugahaze. Hianagi tamagri'ma Amoni vahe'mo'zama hanaveti'za ha'ma huramantesageta, tagra vuta ome tamaza hugahaze. <sup>12</sup> Hagi korora osu hanavetinketa vahetigu'ene Ra Anumzantimofo rankumaku'ene hara hamneno. Hagi Ra Anumzamofo agri'a avesizamo efore hanie. <sup>13</sup> Hagi anagema huteno'a Joapu'a sondia vahe'ane vu'za Aramu vahe'ma ha'ma ome huzmantage'za ana vahe'mo'za atre'za fre'za vu'naze. <sup>14</sup> Hagi Amoni vahe'mo'zama kageno, Aramu vahe'mo'zama atre'za frazageno'a, zamagranena Abisaianku koro fre'za rankuma'mofe agu'afinka ufre'naze. Hagi ha'ma vagaregeno'a, Joapu'a ete Jerusalemi vu'ne. <sup>15</sup> Hagi ana hutege'za Aramu vahe'mo'za kazama, Israeli vahe'mo'zama ha'ma huzmagaterazage'za maka sondia vahera zamazeri atru hu'naze. <sup>16</sup> Hagi kini ne' Hadadezeri'a mago'a vahe huzmantege'za vu'za, Aramu vahe'ma Yufretisi timofo kantu kazigama nemanza vahera ome ke hige'za e'naze. Hagi ana sondia vahe'mo'za Helamu emeri atru hazageno, Hadadezeri sondia vahete ugota kva ne' Sobaki'a ana sondia vahetera ugagota huzmante'naze. <sup>17</sup> Hagi ana'ma hazanke'ma Deviti'ma nentahino'a Israeli sondia vahera zamavarege'za Jodani tina takah'e'za kantu kaziga Helamu vu'naze. Hagi Aramu vahe'mo'za ha' hunaku ome retro hu'za manimpi hute'za, Devitine Israeli vahera hara huzmante'naze. <sup>18</sup> Hianagi Israeli vahe'mo'za hara huzmagatere'za, ana zupa Deviti'ene sondia vahe'amo'za, karisifima vano nehu'za ha'ma nehaza sondia vahera 700'a nezamahe'za, mopafima vanoma nehu'za ha'ma nehaza sondia vahera 40 tauseni'a nezamahe'za, ugagota sondia nera Sobakina ahe'naze. <sup>19</sup> Hagi Hadadezerima eme azama hu'za ha'ma hu'naza kini vahe'mo'zama kazageno, Israeli sondia vahe'mo'zama ha'ma huzmageterage'za, ana kini vahe'mo'za hara erifru hu'za Israeli vahe'mokizmi zamagorga mani'naze. Ana hazageno Aramu vahe'mo'za Amoni vahe'ma zamaza hu'za ha'ma huzankura koro hu'naze.

## 11

### *Batseba'ma ti nefregeno Deviti'a ke'nea naneke*

<sup>1</sup> Hagi mago mago kafumofo agu'afina zasi koma atu knamo'ma vaganerege'za kini vahe'mo'za ha' vahe'zami'a ha' ome hunezamantaza

kanagino, Deviti'a Joapune mika Israeli sondia vahetaminena hate viho huno huzmantenge'za, zamagra vu'za Amoni vhahera ome zamahe'za zamaz-eri haviza nehu'za, Raba kuma ome avazagi kagi'naze. Hianagi Deviti'a ana hatera ovuno, Jerusalemi mani'ne. <sup>2</sup> Hagi mago kinaga Deviti'a tafe'are mase'nereti otino nom'a'amofo agofetu vano nehuno keana, mago hentofa a'mo'a ti nefregeno ke'ne. <sup>3</sup> Hagi Deviti'a keteno mago vahe huntenu amanage hu'ne, Fenamu ara izapi ome ketenka eme nasamio, higeno ome keteno ete eme asamino, Eliamu mofa Batsiba Hiti ne' Uria nenaro'e. <sup>4</sup> Anante Deviti'a eri'za vahe huzamantenge'za vu'za ana ara ome avre'za ageno, anteno mase'ne. (Hagi e'inama hu'neana namunka mani'nereti vagar-entegeni ti ome freno agra'a azeri agru nehigeno ke'ne.) Hagi Deviti'enema maseteno'a ete nom'a'rega vu'ne. <sup>5</sup> Hagi ana a'mo'ma keama amu'enema nehuno'a, Devitina kea atrenteno anage hu'ne, Namu'ene hue huno hu'ne.

<sup>6</sup> Higeno Deviti'a Joapuna ke atrenteno, Hiti ne' Uriana huntogeno eno, higeno Joapu'a Uriana huntogeno Devitintega vu'ne. <sup>7</sup> Hagi Uria'ma Devitinte'ma ehanatigeno'a Deviti'a asamino, Joapuzane sondia vahera inankna hu'za mani'ne'za hara nehaze nehuno, <sup>8</sup> anante Deviti'a Uriana huntenu, Vunka umani fru huo, huno huntogeno nevigeno'a, mago'a musezana antentege'za eri'za ome ami'naze. <sup>9</sup> Hianagi Uria'a nom'a'rega ovu'neanki kini ne'mofo eri'za vahe'ene kini ne' ku'ma kahampi umaseno mani'ne. <sup>10</sup> Mago'a vahe'mo'za Devitina eme asami'za, Uri'a nom'a'rega uoram'i'ne, hu'za hazageno Deviti'a kehigeno Uria'a egeno anage huno asami'ne, za'za kna umani'nanteti e'nananki na'a higenka nonka'rega ovu'nane? <sup>11</sup> Anage higeno Uria'a Devitina kenona huntenu, Ra Anumzamofo huhagerafi hu'vempage vogisigi, Israeli sondia vaheki, Juda vahe'mo'za seli nompi manizageno, rankva vahe'ni'a Joapu'ene sondia vahete kva vahetamina ha' kampima seli nomaki'za mani'nena fina nagrama noniaregama vu'na ne'za ome nenena, a'ninema mase so'e huzamo'a knarera osu'ne. Hagi tamager-afa hu'na e'ina huzana osutfa hugahue. <sup>12</sup> Anage higeno Deviti'a Uriana asamino, Meni kenagera are mase'negena, okina huganta'nena ete hate vuo. Higeno Uria'a Jerusalemi ana kenagera maseno magokna mani'ne. <sup>13</sup> Hagi Deviti'a ke higeno nom'a'afi Uria'a eno Deviti'ene ne'zana nenenego, akatina rama'a ami'geno neno neginagi hu'ne. Hu'neanagi ana kinaga Uria'a nom'a'rega vunora a'anena uomase'neanki, Deviti eri'za vahe'ene ko'ma mase'nere umase'ne.

<sup>14</sup> Hagi nanterana Deviti'a mago avona Joapuntega krenenteno, Uriana huntogeno erino vu'ne. <sup>15</sup> Hagi ana avompina amanage huno krente'ne, Uriana ha'ma hanavemati'za nehanafi avuga avrenentenka sondia vahera kehuge'za atre'za esageno, anampi Uriana ahesageno frino. <sup>16</sup> Higeno Joapu'a hara nehuno negegeno ha'mo'ma ra higeno, hanave ha' vahe'mo'zama ha'ma nehaza kaziga Uriana avrentegeno hara hu'ne. <sup>17</sup> Hagi rankuma agu'afinti vahe'ma e'za hara eme huzmante'za mago'a Deviti sondia vahera zamahage'za frizageno, anampina Hiti ne' Urianena ahegeno fri'ne. <sup>18</sup> Ana higeno Joapu'a ana miko'zama ha'pima fore'ma hiazana kema erino vu vahe huzmantenge'za Devitina ome asami'naze. <sup>19</sup> Hagi Joapu'a kema erino vu vahera huntenu, Ama miko'zama fore'ma hia zamofo nankeea kini nera asami vagaro. <sup>20</sup> Hagi agra arimpama ahesigeno'a, amanage hugahie, nahigeta rankuma keginamofo tavaontera vu'naze? Zamagrama kuma keginamofo agofetuti'ma kevema tamahesaza zana tamagra ontahi'nazo? <sup>21</sup> Hagi ko'ma Abimelekinte'ma fore'ma hu'ne zana tamagekaninefi? Hagi Abimeleki'a Gidioni nemofokino, Tebesi kuma'mofo tava'onte oti'negeno,

mago a'mo ku'ma keginamofo agofetu ot'i'neni witima refuzafu nepaza ra havenu erino ahegeno fri'ne. E'ina hu'negu nahigeta tamagra ana kegina tava'ontera vu'naze? Huno kini ne'mo'ma kantahigesigenka, anampina Uri'a'ene fri'ne hunka asamio. <sup>22</sup> Higeno ana kema erino vu vahe'mo'a vu'ne. Hagi ana miko kema Joapu'ma huntea kea Devitina eme asami vagare'ne. <sup>23</sup> Hagi ana eri'za nemo'a Devitina asamino, Ko agupofi hara hanavetiza eme hurante'nazanagi tagra inene huta rankuma'mofo kafante hara huta vu'none. <sup>24</sup> Hagi mago'a Amoni sondia vahe'mo'za kuma keginamofo agofetu manine'za kevereti tahazage'za kini ne'moka mago'a eri'za vaheka'a fri'naze. Hagi anampina Hiti ne' eri'za neka'a Uri'a fri'ne. <sup>25</sup> Hagi Deviti'a kema erino vu'nea nera asamino, Joapuna asamigeno ama ana zankura agesa ontahino, na'ankure mago ne'mo'a hapima fri'nia zana antahino keno osu'negu, ome asamigeno hanavetino hara nehuno, ana kumara erino. Amama kasamua kereti azeri hankanavetio.

<sup>26</sup> Hagi Uri'a nenaro'ma antahiamma nevema hapima ahe'naze higeno'a, asunku huno zavi ate'ne. <sup>27</sup> Hagi asunku'ma huvaregeno'a, Deviti'a huza-mantege'za ana ara avre'za ageno a' avrentegeno mani'neno ne' mofavre kasente'ne. Hianagi Deviti'ma hu'nea zankura Ra Anumzamo'a musena osu'ne.

## 12

### *Neteni'a Deviti kumi'agu ome huama hu'nea naneke*

<sup>1</sup> Hagi Ra Anumzamo'a Netenina huntegeno Devitintega vu'ne. Hagi Neteni'ma Devitinte'ma eno'a amanage eme huno asami'ne, Mago rankumapina tare netre mani'na'anee, mago nera fenone ne' manigeno, magomo'a amunte omane ne' mani'ne. <sup>2</sup> Hagi feno ne'mo'a rama'a sipisipi kevune rama'a bulimakao kevune ante'ne. <sup>3</sup> Hianagi amunte omane ne'mo'a magoke osi a' sipisipi anenta ate'ne. Hagi agra ana osi sipisipi anentara kegava hu'negeno, mafavre zaga'anee magoka nena hu'naze. Hagi ana sipisipimo'a ana ne'mofo zuompafinti ne'zana neneno, kapu'afinti tina ne'neno afumpi masetere hu'ne. Hagi ana sipisipi anentamo'a mofa'agna hu'negeno avure anteneno kegava nehiiane. <sup>4</sup> Hagi mago zupa feno ne'mofona mago nantu vahe noma'rega egeno, feno ne'mo'a afu kevu'afintira sipisipi ome ohe netreno, amunte omane ne'mo'ma magoke a' sipisipi anenta'ma ante'nea ome aheno ana nantu vahera krente'ne. <sup>5</sup> Hagi ana nanekema Deviti'a nentahino'a tusi'a arimpa ahegeno amanage hu'ne, Kasefa huno mani'nea Ra Anumzamofo avufinki, tamage huno anazama hu'nea ne'mo'a frigahie. <sup>6</sup> Na'ankure agra amunte omane ne'mofo zama kumazafa neseno, asunkura huonte anara hu'negu, anama eri'nea zantera 4'a zupa ante agofetu huno amigahie.

<sup>7</sup> Hagi Neteni'a Devitina asamino, E'i ana feno nera kagra mani'nane. Hagi Ra Anumzana Israeli vahe Anumzamo'a amanage hie, Nagra masavena fre-gante'na huhampri kantogenka Israeli vahe kinia mani'nanke'na, Sol'i'ma kahe'za nehige'na Nagra'a agri azampintira kaguravazi'noe. <sup>8</sup> Hagi Na-gra'a kvakamofo Soli naga'ene avrenegamina, a'ne'aramina avrenegamina, Israeli vahe'e'ne, Juda vahete kva Nagra huhampri kante'noe. Hagi e'ina zamo'ma knare'ma huoganteresina, Nagra rama'a zantamina mago'ana amne kamusine. <sup>9</sup> Hagi nahigenka Ra Anumzamo'na kea kefenkami na-trenka, Nagri navufina havi kavukvara hane? Hagi Hiti ne' Uriana Amoni vahe'mokizmi bainati kazinteti kagra ahe nefrinka, a'a kumazafa avre'nane.

**10** Hagi antahio, kagra nagefenkami atrenka Hiti ne' Uria a' avrenanku, ama knareti'ma manita vanazana kagri nagara bainati kazinteti hara huzmante vava hu'za vugahaze. **11** Hagi amanage huno Ra Anumzamo'a hie, kagrama hana kavukavate kagri'a naga'mo'za ot'i'za hafra hugantegahaze. Hagi a'neka'aramina tava'onkare nemaninimofo avreminugeno, negesanke'za zage ferupi amate zmanteno masegahie. **12** Hagi kagra oku'a ana kavukvara hu'nananagi, Nagra zage ferupi amate mika Israeli vahe zamufi ana zana erinte ama hugahue. **13** Anage higeno Deviti'a huno, Nagra Ra Anumzamofo avufina kumi hu'noe, higeno anante Neteni'a asamino, Ra Anumzamo'a kumika'a atreganteankinka, ana kumikura kagra ofrigahane. **14** Hianagi e'ina kavukava'mo'a Ra Anumzamofo ha' vhahera zamaza hige'za Ra Anumzamofona azanavanke hu'za huhaviza huntegahazankino, ana mofavrekamo'a frigahie. **15** Hagi Netenima noma'arega vigeno, Uria kento a' Batsiba'ma Devitinteti'ma ante'nea mofavrerer Ra Anumzamo'a rankri atregeno kri eri'ne. **16** Hagi ana mofavregura Deviti'a ne'zana a'o huno mopafi maseno Ra Anumzamofontega nunamuna nehigeno kora atune. **17** Hagi anama nehige'za, ranra eri'za vahe'amo'za otino ne'zama zamagranema nenogu azeri ot'i'nazanagi, agra otino ne'zama zamagranema ne'zankura avesra hu'ne. **18** Hagi 7ni knazupa ana mofavrea frige'za eri'za vahe'mo'za Devitima asamizankura koro nehu'za anage hu'naze, Ana mofavrema ofri mani'negeta, tagra kema hunana ontahi'neankino menima fri'nea kema asaminunana, agrazante hazenke erigahianki, tagra na'a hugahune? **19** Hianagi eri'za vahe'mo'zama zamagrage zamagrageda hu'za sumi'sumima hazazama negeno'a, hago mofavreni'a fri'ne huno Deviti'a antahi'ne. Hagi Deviti'a eri'za vahe'a zamantahigeno, Mofavrea fri'neo? huno hige'za zamagra kenona hu'za, Izo hago fri'ne hu'za hu'naze. **20** Hagi Deviti'a mopafintira otino ti freteno, azokara erise nehuno, masave freteno kukena'a eri nentanino Ra Anumzamofo seli nontega vuno Ra Anumzamofo monora ome hunte'ne. Ana huteno noma'arega vuno ne'zanku hige'za eri'za eme amizageno ne'ne. **21** Hagi eri'za vahe'amo'za Devitina antahige'za, Kagra nankna kavukva hunka mofavrema ofri mani'negenka, ne'zana atrenka zavira ate'nane? Hianagi menima mofavrema frigenka, ete otinka ne'za ne'nane. **22** Anage hazageno Deviti'a kenona huno, Ne'zana a'o hu'na nasunku'ma hu'noana, na'ankure Ra Anumzamo asunku hunante'nigeno mofavrea ofrisiegue ne'zana atre'na nunamuna nehu'na zavira ate'noe. **23** Hianagi agra fri'negu na'ante ne'zana a'o hu'na nunamuna hugahue? Nagra asimura aminugeno oraotigahie. Hagi nagra agritera vugahuanagi, agra nagritera omegahie.

**24** Anante Deviti'a nenaro Batsibana azeri avava seno, azeri fru nehuno, Deviti'a agrane masegeno, amu'ene huno ne'mofavre kasentegeno, Deviti'a ana mofavre agi'a Solomoni'e huno antemi'ne. (Solomoni'ema hu'neana rimpia frue hu'ne.) Hagi Ra Anumzamo'a ana mofavrea avesinte'ne. **25** Hagi Ra Anumzamo'a ana mofavrea avesintegu kasnampa ne' Neteni huntogeno Devitinte vuno mofavremofo agi'a Jedidia Ra Anumzamo avesinte'ne hu'ne hunka antemio huno asami'ne. **26** Hagi anama nehigeno'a, Joapu'a Amoni vahe'mokizmi ugagota hu'nea kuma Raba rankuma ha' huzamanteno mago kuma eri'ne. **27** Hagi Joapu'a kema erino vu vahe huzamanteno, hago Raba rankumara ha'huzamateno tima nenaza tina zamaheno hanarene huta Devitina ome asamiho. **28** Ru menina nagra ha' hu'na Raba kuma erisuge'za ana kumamofa agia nagri nagire asamaresagi, mago'a sondia

vahera zamavarenka Raba rankumara ome zamahenka erio huta asamiho. <sup>29</sup> Higeno Deviti'a maka sondia vahera nezamavareno Raba kumatega vuno, ha ome huno ana rankumara eri'ne. <sup>30</sup> Hagi Raba kini ne'mofo kini fetorira kna'amo'a 35 kilogremi hu'neankino, ana fetoritera zago'amo'a mareri'nea have me'nea fetori omeri'za Devitina asenifi antaninte'naze. Hagi Deviti'a ha'ma huno eri'nea zantamina rama'a eri'ne. <sup>31</sup> Ana nehuno Raba kumate vahera zamavarege'za kazokzo eri'za vahe mani'ne'za, so eri'zanki, saumenteti eri erizanki, piki tunteti eri'zanki, briksima kreno trohu eri'za zamige'za eri'naze. Maka Amoni rankumatamimpi vahera ana erizanke'za zami'ne. Ana huteno Deviti'a maka sondia vahe'a zamavarege'za ete Jerusalemi vu'naze.

## 13

### *Amnonine Tamakizni naneke*

<sup>1</sup> Hagi ana knafina Deviti nemofo Apsalomuna nesaro Tamari'a hentofa mofa mani'ne. Hagi Deviti nemofo Amnoni'a ana mofakura tusiza huno kenunu hunte'ne. <sup>2</sup> Hianagi Tamari'a vene omase mofa mani'negeno, Amnoni'a ana mofate'ma erava'o huno mago'azama hunte kankura hakeno eri forera osu'ne. Ana higeno ana zamo'a kri ami'ne. <sup>3</sup> Hagi magora Amnoni nefu'a mani'neana agi'a Jonadabukino, agra knare antahi'zane ne' mani'ne. Hagi ana nera Deviti nefu Simea nemofo'e. <sup>4</sup> Hagi mago zupa Jonadabu'a Ammonina asamino, Kagra kini ne'mofo nemofoaga maka nanterana kri kavukava nehanana, na'a hu'nefi nasamio? Higeno Amnoni'a asamino, Nagri nenufu Apsalomu nesaro Tamarinku nave'nesige'na anara nehue. <sup>5</sup> Hagi Jonadabu'a Ammonina asamino, Kagra vunka tafete kri vahe kna hunka umase'negeno negafa'ma kageku'ma esigenka amanage hunka asamio, nagri nensaro Tamari asamigeno ne'zana erino eme namino. Hagi negenugeno emani'neno ne'zana retro hunaminke'na, azama'afintira naneno hunka hugahane. <sup>6</sup> Anage hutegeno Amnoni'a kri vahekna huno umase'negeno nefu Deviti'ma kenaku efregeno Amnoni'a asamino, Muse hugantoanki nensarona Tamarina asamigeno ne'zana negane'na eme krenke'na azama'afintira na'neno. <sup>7</sup> Higeno Deviti'a Tamarina eme hunteno, Vunka negasaro Amnoni'a kri erino mase'neanki, ne'zana noma'afi ome kremio. <sup>8</sup> Higeno Tamari'a nesaro nonte'ma vuno ome keana Amnoni'a tafe'are kri erino mase'ne. Hagi Tamari'a mago'a flaua erino heruno negregeno, Amnoni'a mase'nefintira ke'ne. <sup>9</sup> Hagi ana ne'zama kreno erino zuompafima eme nemiana navresrahie huno nehuno, miko vahera huzmanteno, Amafintira atreta viho. Huno hige'za miko vahe'mo'za atirami'za vu'naze. <sup>10</sup> Anante Amnoni'a Tamarina asamino, Ana ne'zana nemasofinka efrenka kazampinti eme namige'na na'neno, higeno Tamari'a anama retro hu'nea ne'zana erino nemasefinka vu'ne. <sup>11</sup> Hagi ana ne'zama erino eme nemigeno'a, Amnonia azeri anunekino, Nensaroga nagrane mase'nanegu nehue. <sup>12</sup> Hianagi Tamari'a huno, nensaroga nazeri havizana osuo. E'inahu zana Israeli vahe agu'afina osuo. Kagra haviza huno neginagi hu'nea avu'ava zana osuo. <sup>13</sup> Hagi kagra e'ina hu'zama hanankeno'a nagaze hanige'na, vahe zamavufina vano osugahue. Hagi Israeli agu'afina kagra neginagi vahera zamagaterenka, kefo vahe manigahane. E'ina hu'negu muse hugantoanki kini ne' asamigeno, hugnarere hugante'na nagrira ara erigahane. <sup>14</sup> Higeno Amnoni'a ana ke'a ontahi hanavetino Tamari'na, avazu huno havi avu'ava hunte'ne. <sup>15</sup> Anama

hutegeni Amnonina ame huno Tamarima avesinte'nea zamo'a fanane higeno, Tamarina tusiza huno avesra hunenteno, otinka amafintira vuo, huno Tamarina hunte'ne. <sup>16</sup> Higeno Tamari'a kenona huno, Nagri'ma amafinti'ma vuoma hunkama humanantana zamo'a, ko'ma hu'nante'nana hazenke zana agaterenka tusi'a hazenke hugahane. Hianagi Amnoni'a ke'a ontahi'ne. <sup>17</sup> Hagi avate eri'za vahe asamino, Ama ara amafintira avreta atineramita kafana erigiho. <sup>18</sup> Higeno ana eri'za vahe'amo'a fegu'a avre netreno, kahana erigi'ne. Hagi kini vahe'mofo mofa'nemo'zama za'za kuke-nama antani'nage'za vahe'mo'za nezmage'za venema omase mofa'nem huz'za nehaza za'za kukena Tamari'a antaninen, Amnoni nontega vu'neankino, <sup>19</sup> Tamari'a ana za'za kukena'a tagoto tagatu nehuno tanefa kateno nefreno, asenirera azana refiteno zavira neteno vu'ne. <sup>20</sup> Hagi Absalomu'a nesaro Tamarima negeno antahigeno, Negasaro Amnoni'a nankna huno amanahu havi avu'ava zana hugante. Hianagi agra negasaroki anazana mago vahera osaminka atrenka manio. Hagi Tamari'a Apsalomu nompi mani'neanagi, asunku zampi mani'ne. <sup>21</sup> Hagi ana mika zamofo nanekema kini ne' Deviti'ma nentahino'a, tusi'a arimpa ahe'ne. <sup>22</sup> Hagi Absalomu'a Amnonina magokea huomi'ne. Na'ankure nesarona azeri haviza hu'negu tusiza huno antahi haviza hunenteno anara hu'ne.

### *Absalomu'a Amnoni ahefri'nea nanekema*

<sup>23</sup> Hagi Tare kafu evutege'za Absalomu eri'za vahe'mo'za sipisipi azoka harenaku Balhasori kumara Efraemi kuma tava'onte me'nere vu'naze. Hagi Absalomu'a kini ne'mofo mofavre zaga kehige'za utru hu'naze. <sup>24</sup> Hagi Absalomu'a kini ne' Devitinte vuno anage hu'ne, Sipisipi afu'mofo azokama hare eri'za vahe'nimo'za sipisipi azoka nehare'za menina ne'zana kre'za nene'za musenkase nehzanki, knare kini ne'moka eri'za vahekanena anante esanketa musenkasea hugahuno? <sup>25</sup> Hianagi kini nemo'a ke'nona huno, Mofavrenimoka tagra ovugahune. Na'ankure tagrama vanunkena kagra ne'zama krerante zankura rankna erigahane. Hagi anagema higeno'a, Absalomu'a inene hu'neanagi, kini ne'mo'a maka'mota ovugahune nehuno, Absalomuna asomu ke hunte'ne. <sup>26</sup> Anante Absalomu'a kini nera antahigeno, Muse hugantoanki kagrama ovanunka, nenfu Amnonina huntegeno nigrane vino? Higeno kini ne'mo kenona huno, Na'ante Amnonina huntanenkeno kagranena vugahie? huno hu'neanagi, <sup>27</sup> Absalomu'ma inene huno kema hiazanku kini ne'mo'a huzmantenge'za, Amnoni'ene mika kini ne'mofo mofavremo'za agrane vu'naze. <sup>28</sup> Hianagi Absalomu'a eri'za vahe'a zamasamino, Amnoni'ma waini tima neno neginagima hanigeta ahe friho. Hagi Amnonima ahe fri zankura korora osiho. Nagra ahe friho hu'na hura-mantoanki, ahe friho. <sup>29</sup> Higeno Absalomu eri'za vahe'mo'za Absalomu'ma hu'nea kante ante'za, Amnonina ahe fri'naze. Hagi kini ne'mofona maka mofavre'amo'za anazama nege'za, miulie nehaza donkizami'a eri'za panani hu'za fre'naze. <sup>30</sup> Hagi ana mofavre'mo'za zahufa kantega neage'za, mago'a vahe'mo'za kini nera eme asamiza, Absalomu'a kini ne'moka mofavre zaga maka zamahe vagare'ne. <sup>31</sup> Hagi anankema nentahino'a, kini ne'mo'a otino kukena'a tagoto tagatu nehuno mopafi maseno krafa hu'ne. Hagi mika eri'za vahe'mo'zanena kukenazamia tagoto nehu'za krafa hu'naze. <sup>32</sup> Hianagi Deviti nefu Simea nemofo Jonadabu'a Devitina eme asamino, ranimoka antahintahi hakarea osuo, ana miko mofavre zaga ozamahe'neanki Amnoninke ahe'ne. Hagi ama anazama fore hu'neana Amnonima nesaroma Tamarima havi avu'ava'ma hunte'nea zante Absalomu'a anara

hu'ne. <sup>33</sup> E'ina hu'negu kini ne' ranimoka, ana kegura antahintahi hakarea osuo. Amnoni agrake fri'ne. <sup>34</sup> Hagi anama nehuno'a Absalom'u'a atreno fre'ne. Hagi avuma anteno kuma kegava nehia sondia vahe'mo'ma keana Horonaimia zage fre kaziga agonafinti rama'a vahe e'naze. <sup>35</sup> Ana hazageno Jonadabu'a kini nera asamino, Ko nagrama huankante kini ne'moka mofavre zagamo'za neaze. <sup>36</sup> Hagi kema huvaganeregeno'a kini ne'mofo mofavre'zagamo'za anante ehanati'za tusi zavi atage'za, kini ne'ene mikä eri'za vahe'mo'za zavi ate vagare'naze. <sup>37</sup> Hagi Deviti'a nemofo Amnoninkura rama'a knafi zavira ate'ne. Hagi Absalom'u'a freno negeho Talmaintega vu'ne. Hagi Talmaia Amihudi nemofokino Gesuri kumatera umani'ne. <sup>38</sup> Hagi Absalom'u'a freno 3'a kafu Gesuri kumatera umani'ne. <sup>39</sup> Ana'ma higeno'a Deviti'a Amnoninku'ma asunku hu'nea zana atreno ete Absalomku asunkura hu'ne.

## 14

### *Tekoa kumateti knare antahi'zane a'mofo naneke*

<sup>1</sup> Hagi Zeruia nemofo Joapu'ma antahiamma kini ne'mo'ma Absalomuma kenigu tusizama higeno'a, <sup>2</sup> Joapua mago'a vahe huzamantege'za Tekoa kumate vu'za, mago knare antahi'zane a' ome avre'za e'naze. Hagi Joapu'a ana ara asamino, Zamasunku hu'zama nentanizankna kukena haviza hunka, masavena ofrenka, ko'ma vahe frinegeno asunku huno za'zakna mani'nea a'mo'ma nehiaza huo. <sup>3</sup> Ana hutesunka kini nete vunka ama hanua kea ome asamio, anage nehuno Joapu'a kini ne'ma asaminia nanekea ana ara asami'ne. <sup>4</sup> Higeno Tekoati a'mo'a kini netema uhanatino'a, ome kepri humino avugati mopafi umase'neno amanage hu'ne, Muse hugantoanki kini ne'moka naza huo! <sup>5</sup> Higeno kini ne'mo'a antahigeno, nankna hazenke me'negenka nehane? Higeno ana a'mo kenona huno, Nagrira neneve'a frige'na kento a' mani'noe. <sup>6</sup> Hagi eri'za a'kamo'na tare ne' mofavre zanante noankine hoza agupofi ha' ome ne-hakeno, vahe'mo'a zanazeri amnea osigeke, mago'mo'a mago'mofona ahe fri'ne. <sup>7</sup> Hagi anama higeno'a maka tagri naga'mo'za ot'i'za nefuma ahe fria zante, ana risera ahe frisunkeno, nefazana erisanti oharegahie hu'za hu'naze. Hagi zamagra magoke mofavreni'a ahe fri'za nehazankino, nenave agine, naga'amofo zamagima erino maniga vahera ama mopa-fina omanigahie. <sup>8</sup> Hagi kini nemo'a ana ara asamino, Nagra ama ana kegaga eri ante fatgo hugahuanki, kumakarega vuo. <sup>9</sup> Hianagi Tekoati amo'a kini nera asamino, Kini ne' ranimoka, atregeno ana knazamo'a nagrite'ene nenfa nagate'ene meno. Hagi kagrane naga ka'anena knazana e'origahaze. <sup>10</sup> Hagi kini ne'mo'a huno, Iza'o ana nanekema hugantenimo-fona avrenka nagrite egeno, mago'enena ke hakarea huoganteno. <sup>11</sup> Hagi ana a'mo'a kenona huno, Muse hugantoanki, kini ne'moka Ra Anumzana kagri Anumzankamofo agifi huvempa hunka hugeno, vahe'mo'za mofavre'nia ahe ofriho. Hagi kini ne'mo'a kenona huno, Tamage hu'na kasefa'ma huno'ma mani'nea Ra Anumzamofo agifi huankino mago'mo'a ana mofavrea mago'azana huontegahie. <sup>12</sup> Anante ana a'mo'a huno, Natrege'na mago'ane kini nemoka kantahiga'neno, higeno kini ne'mo'a huno, Amne huo. <sup>13</sup> Higeno ana a'mo'a kini ne' Devitina eri ante ama huno asami'ne, Nahigenka Anumzamofo vahetera e'inahu antahintahia retro hu'nane? Hagi menima nagri'ma nasami'na nanekea, kagraka'a havizama hu'nana zana eri ama hunka keaga hugantane. Na'ankure negamofoma kuma'ma

atre'nama fregenka omesiema hu'nana mofavrea, ete avrankeno ome'ne. <sup>14</sup> Na'ankure mopafima tima tagiramige'za ete ana tima e'orizankna huta frigahune. Hu'neanagi vahe'mota havizama hunkeno'a, Anumzamo'a tahe nofrianki, mago'a kanku hakeno atre'zama frazage'za omesnazema hu'naza vahera, ete agrarega zamavare tava'o nehie. <sup>15</sup> Hagi kini ne' ranimoka, naza hugahane hu'na kagrite e'noe. Na'ankure vahe'mo'za nazeri kore hazage'na, kini ne'mo'a naza hugahie hu'na nagra hu'noe. <sup>16</sup> Hagi kini ne'moka, eri'za a'kamo'na kea antahinaminka Anumzamo'ma tamigeta erisantima hare'nona mopafintira nagri'ene nenamofonema tahe fanema hu'za nehaza vahe zamazampintira tagu'vazigahane. <sup>17</sup> Hu'negu kini ne' ranimoka kemo'a narimpa fru namigahie. Na'ankure kini ne'moka kagra Anumzamofo ankerio kna hu'enka, havizane knare'zanena refako ne-hane. Hagi Ra Anumzana, kagri Anumzamo'a kagri'ene manisnie. <sup>18</sup> Higeno kini ne'mo huno, nagra mago zanku kantahige'za huanki kagra mago'zana erifra okinka nasamio, higeno ana a'mo'a huno, kini ne' ranimoka amane nantahigo. <sup>19</sup> Hagi kini ne'mo huno, Kagrira Joapu hugantegenka nagritera enampi? Higeno ana a'mo kenona huno, Kini nera ranimoka, nankna hu'na eri frakigahue? Hagi kagrama kasefa'ma hunka mani'nenanken'a, mago'mo'e huno mago'azana kagritera eri fraraokigahie. Tamage, eri'za nekamo Joapu ome asamio huno hunantea ke eme kasami'noe. <sup>20</sup> Hagi agra amne anara osu'neanki, Absalomu'ma hu'nea hazenki eri fru hunaku hu'ne. Hianagi kini nemoka, Anumzamofo ankerio vahekna hunka, knare'nare antahintahine vahe mani'enka, maka'zama mopafi'ma fore'ma hiazana antahinka kenka nehane. <sup>21</sup> Higeno kini ne'mo'a Joapuna asamino, Knareki kema hanazana hugahuanki vunka Absalomuna ome avrenka eno. <sup>22</sup> Hagi Joapu'a avugosaregati mopafi umaseno, ra agi nemino anage hu'ne. Kini ne' ranimoka, menina eri'za ne'kamo'nra kema antahinaminka knare kavukvama hunantana zana menina antahiamma hue. Na'ankure ke'ni'a antahinka hu izo hunantane. <sup>23</sup> Anante Joapu'a Gesur vuno Absalomuna ome avreno Jerusalemi e'ne. <sup>24</sup> Hianagi kini ne'mo'a anage huno hanave kea hu'ne, Absalomu'a noma'arega umanigahianki, nagri navurera omegahie. Anage higeno Absalomu'a agra'a noma'afi umani'neno, kini nera eme onke'ne. <sup>25</sup> Hianagi Absalomuna Israeli vahe'mo'za husga hunte'naze. Agra asenireti'ma vuno agiare'ma urami'neana, afuhe afahera omanegeno, hentofa avufgane ne' mani'ne. Hagi magora agrikna vahera Israeli vahepina omani'naze. <sup>26</sup> Agra maka kfurera magoke zupa azokara haretere hu'ne. Na'ankure ana azokamo'a kna hu'negen'e. Hagi ana azokama erinte'za kna'ama refkoma hu'za kazana, 2 kilogremi hu'ne. <sup>27</sup> Hagi Absalomu'a tagufa ne' mofavre nenteno, magoke hentofa mofa anteno agi'a Tamari'e huno ante'ne. <sup>28</sup> Hagi Absalomu'a tare kafu Jerusalemi kumatera mani'ne. Hianagi agra vuno kini nemofo avufina ome onke'ne. <sup>29</sup> Hagi Absalomu'a agri agi erino kini ne' ome keriegua Joapuna ke atrente'ne. Hianagi Joapu'a omegeno, mago'ane eri'za vahera huzmanteg'e za vu'nazanagi Joapu'a avesra huno ome'ne. <sup>30</sup> Hagi Absalomu'a eri'za vahe'a huzamanteno, Joapu bali hozamo'a nagri hoza tava'onte me'neanki, teve ome taginteho huno huzmante'ne. <sup>31</sup> Anante Joapu'a Absalomu nontega eno, Nahigenka eri'za vaheka'a huzamantane'za hozani'a teve ome taginteho huno. <sup>32</sup> Higeno Absalomu'a kenona huno, Nagra ke atregante'na, are ege'na hugantanena kini ne' ome ko hu'na huana kagra ome'nane. Hagi kagra na'ante knare'ma hu'na mani'noana kea hanke'na Gesuritira e'noe huno nagrikura hie hunka

ome antahigo. Hagi anantega manuresina knare hiresine. Hagi menina natrege'na kini ne ome ka'nenko hazenkema hunenugeno'a nahe frino. <sup>33</sup> Higeno Joapu'a kini nete vuno ana nanekea ome asamigeno, kini ne'mo'a Absalomuna ke higeno eno avugosaregati mopafi umasegeno, kini ne'mo Absalomuna antako hunte'ne.

## 15

### *Absalomu'a kini maninaku hu'nea naneke*

<sup>1</sup> Hagi mago'a kna evutegeno Absalomu'a mago karisine hosi afu'ene nevreno, vugotama hunte'za kegavama hu'za vu vhahera 50'a mizasezman-teno huzamantego'za vugota hu'naze. <sup>2</sup> Hagi mika zupa nanterame otino rankumapi ufre'nea kante umani'neno, kini ne'mo'ma knaza zamima eri fatgo huzmantenigu'ma vaza vhahera, Absalomu'a zamantahigeno, Tamagra ina kumapinti vhahere huno zamantahigege'za, tagra Israeli nagapinti vhahere hazageno'a, <sup>3</sup> ana kema antahiteno'a Absalomu'a amanage hu'ne, Keho knazantamia amne eri fatgo hugahianagi, kini ne'mo'a kema refko'ma hu' eri'zana mago vhahera omi'neankino, ketamia refko osugahie. <sup>4</sup> Hagi Absalomu'a huno, Nagrama ke refko hu kva vahe manusuge'za, vahe'mo'za knaza zamia eri'za nagrite esage'na fatgo hu'na kezamia refko hugahue. <sup>5</sup> Hagi mago'a vahe'ma enevu'za eme kepri'ma humiza nehazageno'a, Absalomu'a zamazante zamavazu hugantiteno zamantako huzmante'ne. <sup>6</sup> Hagi Absalomu'a e'inahu avu'ava'ma hia zamo mika Israeli vahe zamagu'a avazuhu agrarega zmante'ne.

<sup>7</sup> Hagi 4'a kafu evutegeno Absalomu'a kini nera asamino, natrege'na Hebroni vu'na huvempama hu'nore Ra Anumzamofontega ome ofa huntaneno. <sup>8</sup> Na'ankure Aramia kaziga Geshuri'ma mani'ne'na huvempa hu'na Ra Anumzamo'ma natrenige'na ete Jerusalemi kumate'ma vanu'na, Hebroni kumate monora ome huntegahue hu'na hu'noe. <sup>9</sup> Hagi kini ne'mo'a kenona huno, Kagra krimpa frune vunka, huvempama hu'nana kemofona omeri knare huo, higeno Absalomu'a Hebroni vu'ne. <sup>10</sup> Hianagi anantega umani'neno, Absalomu'a kema erino vuno eno hu vhahera huzamanteno anage hu'ne, Maka Israeli vahetamima mani'nazarega vuta amanage ome hiho, ufema resageta mikomota kezanke huta, Absalomu'a kinia Hebroni kumate efore hu'ne huta hiho. <sup>11</sup> Hagi agra 200'a vahe Israelitira nezamavarenou vu'neanagi, na'ante zamavarenou vu'ne zamagra ke'za antahiza osu'naze. <sup>12</sup> Hagi Absalomu'a ofama nehuno'a mago'a vahe huzamantego'za Gilo kumateti ne' Ahitofelina ome avre'za e'naze. Hagi Ahitofeli'a Devitima knare antahizama nemiza vahepinti mago zami'mo'e. Hagi Absalomu kazigama vaza vahe'mo'za rama'a hu'naze.

### *Deviti'a Jerusalemi kuma atreno fre'nea naneke*

<sup>13</sup> Hagi kema eri'za vu vahe'mo'za e'za kini ne' Devitina eme asami'za, Rama'a vahe'mo'za Absalomuna avariri'za kini azeri oti'za nehaze. <sup>14</sup> Hazageno Deviti'a agranema Jerusalemi mani'naza eri'za vhahera zamazeri atru huno anage huno zamasmi'ne, Ru Absalomu'a mika tamagri'ene nagri'ene tahe vagaresigi ame huta Jerusalemi kumara atreta fresune. Hagi anama osanunkeno'a ame hu'za Absalomu naga'mo'za eza eme nerahe'za, ama kumapi vahe'enena zamahe vagaregahaze. <sup>15</sup> Hagi kini nemofo eri'za vahe'mo'za hu'za, kini ne'mokama hana kea erizafa hugahune. <sup>16</sup> Hige'za kini ne'ene eri'za vahe'amo'za atre'za vu'naze. Hagi

kini ne'mo'a 10ni'a henka ane'a zaga'a huzamantege'za kuma'a kegava hu'za mani'naze.

<sup>17</sup> Hagi kini ne'ene mikä Jerusalemi kuma'ma atre'za atirami'za nehu'za, ana kumamofo refarega mago no me'nere umani'naze. <sup>18</sup> Hagi anante kini ne'mo'a ome oti'nege'za, naga'amo'za vugota hazageno, mikä Kereti vahe'ma, Paleti kumateti vahe'ma, Getiti'ma Devit'i'enema e'naza 600'a vahe'mo'zanena agatere'za vu'naze. <sup>19</sup> Hagi kini ne'mo Geti vahe'mokizmi kva ne' Itaina asamino, nahigeta tamagra tagranena neaze? Rurega vahe tagrane emani'nazanki, ete vuta kasefa kini ne' Absalom'u'ene umaniho. <sup>20</sup> Hagi tamagra kofa'a knafi tagranena emani'nazanki, tagrane vu'za ne-hazo? Hagi sondia vaheka'a nezamavarenka ete viho. Na'ankure tagra iga vugahune ontahi'none. Hagi Ra Anumzamo'a knare huno asunku hunera-manteno fatgo avu'ava huramanteno kegava huramantesie. <sup>21</sup> Hianagi Itai'a kenona huno, Kini ne' ranimoka kasefa huno mani'nea Ra Anumzamofo agifi tamage hu'na huanki, kagrama kasefa hunka mani'nenga inantegama vananana kagrane nevanunkeno, kagri'ma kahe frisuza tagri'enena tahe frigahaze. <sup>22</sup> Hagi Deviti'a Itailanku huno, Knareki eviho, hige'za sondia vahe'ane mikä a'mofavre zamine vu'naze. <sup>23</sup> Hagi Deviti'e'ne naga'anema nevage'za, maka Jerusalemi vahe'mo'za tusi zavi atezmante'naze. Hagi kini ne'mo'a Kitroni krahopi nevige'za, maka vahe'mo'za hagege ka'ma kokampima vu'nea kantega vu'naze.

<sup>24</sup> Hagi Zadoku'ene agranema mani'naza Livae naga'mo'za Anumzamofo huhagerafi hvempage vogisia eri'za eme antageno, Abiata'a ofa nehige'za, mikä vahe'mo'za rankumara atre'za vu vagare'naze. <sup>25</sup> Hagi Deviti'a Jadokina asamino, Ra Anumzamofo huhagerafi hvempage vogisia ete erinka rankuma agu'a ufro. Hagi Ra Anumzamo'ma arimpa fruma hu-nantesuno'a, Agra natrenige'na ete e'na huhagerafi hvempage vogisia eme nege'na, seli mono nonena eme kegahue. <sup>26</sup> Hagi Ra Anumzamo'ma musema huonantesuno'a, Agri'ma avesi'niazza hunantesie. <sup>27</sup> Hagi Deviti'a pristi ne' Zadokina asamino, Amanahu antahintahi reraro hue, kagra kasnampa ne' mani'nanku kagrane ne' mofavreka'a Ahimane, Abiata nemofo Jonataninena zamavarenka tamarimpa frune rankuma agu'afi ete ufreho. <sup>28</sup> Hagi nagra hagege kopi vu'na tima taka nehare ome tamavega ante'na mani'negahuanki, Jerusalemima fore'ma hania zamofo nanekea atrenantenke'za, anantega eme nasamaho. <sup>29</sup> Higeno Zadoki'e'ne Abiatakea Ra Anumzamofo huhagerafi hvempage vogisie erike, ete Jerusalemi rankumapi ufre'ne umani'na'e.

<sup>30</sup> Hianagi Deviti'a tusi zavi neteno Olivi agonare mareri'ne. Hagi agra zamasunku'ma nehu'za nehzaza huno, asenirera refinetenno agia nona ovazi aga avapa vu'ne. Hagi agranema vu'naza vahe'mo'za ana zanke hu'za zamasenirera refi'nete'za zavi ateme agona mareri'naze.

<sup>31</sup> Hagi mago'a vahe'mo'za Devitina eme asami'za, Ahitofeli'a Absola-muntega ante, hu'za hazageno Deviti'a Ra Anumzamofonte nunamu huno, Ra Anumzamoka Ahitofelina azeri havia hugeno, neginagi antahintahi Absalomuna amino.

<sup>32</sup> Hagi vu'zama agonafima mono'ma nehzare uhanati'zageno'a, Devitina nefu Akaiati ne' Husai'a zamasunku avu'ava'ma nehzaza huno kukena'a tagato nehu'na, kugusopa kateno anumpi nefreno, anante eme tutagiha hunte'ne. <sup>33</sup> Hagi anante Deviti'a asamino, Kagrama nagranema vananana kna namigahane. <sup>34</sup> Hianagi ete rankumapi vunka Absalomuna

ome asmio, kini ne'moka negafa eri'za vahe korapara mani'noanki'na menina kagri eri'za vahe manigahue hunka ome nehunka, antahintahia amigeno Ahitofeli antahintahia eri atregahie.<sup>35</sup> Hagi pristi netre Zadoki'ene Abiatakeea kagrane Jerusalemi manigaha'e. Hagi kini ne' nompima nanekema retro'ma hanaza nanekea, maka zanagri zanasamio.<sup>36</sup> Hagi zanagra mofavre'zani'a Jonatanine, Ahimasakizni huznantenageke kagrama mika kema zanasami'nana kea eme nasamigaha'e.<sup>37</sup> Hagi Deviti nefu Husai'a Deviti'ma hianke antahino, ete kumapi unefregeno Absolamuenena Jerusalemi kumapina ufre'ne.

## 16

### *Siba'a havige hu'nea naneke*

<sup>1</sup> Hagi Deviti'a ananteti onasi'a vugamanu ategeno, Mefiboseti eri'za ne' Siba'a Devitina tutagihu hunte'naku eme avega antenegeno ome ke'ne. Hagi agra tare donkifi 200'a breti konagi, fiki raga 100'a konagi, ante hagage hu'nea waini raga'a 100'a konagi huno erineno meme afumofo akru'are tro hu'naza tintafempi waini tina erino eman'i'ne.<sup>2</sup> Hagi kini ne Deviti'a Sibana antahigeno, amazana na'a hu'zane? Higeno Siba'a kenona huno, ama donki afutrena naga kamo'za zanagumpi mani'za vugahaze. Hagi bretine zafa raganena venenemo'za negahaze. Hagi ama waini tina hagage kopima nevanganego tamavresrama hanigeta negahaze.<sup>3</sup> Hagi kini ne'mo ete antahigeno, inantega kva vahekamofo negeho Mefiboseti'a mani'ne? Higeno Siba'a huno, Agra agesama antahiana menina negeho kini trara namigahaze huno Jerusalemi mani'ne.<sup>4</sup> Hagi kini ne'mo'a Sibana asamino, E'i menina maka Mefiboseti zantamina ete'na kagri kamue. Higeno Siba'a kenona huno, kini ne' ranimoka kagri'ma kavesisia zana amne hugahue.<sup>5</sup> Hagi anama hute'za kini ne'mo'a Bahurimi kumate'ma vigeno, mago ne'mo tutagihu hunte'ne. Ana nera Soli nagapinti ne' Gera nemofo Simeikino ne-eno Devitina kesuno e'ne.<sup>6</sup> Hagi Sime'i'a have knonu matevuno Devitina neheno, mika Deviti'enema vu'naza vahera nezamaheno, Devitima kegavama hunte'za kanti kamama vu'naza avate hanave sondia vahe'enena zamahe'ne.<sup>7</sup> Hagi Sime'i'a Devitima kema nesuno'a amanage hu'ne, Kagra vahe ahe fri vava hunka vahe kora eri taginka haviza hu'nana vahe mani'nananki, amafintira maniganenka vuo.<sup>8</sup> Hagi kagra Soli naga'ma zamahe frinka, Soli kini trama eri'nana zante menina Ra Anumzamo'a kagrira nona hunegante. Hagi menina negamofo Absalomu kini eri'zana hanare amigenka, frenka ne'ane. Na'ankure kagra vahe zamahe frinka vahe kora eritagi ne' mani'nanku, e'inahu hazenkea eri'ne.<sup>9</sup> Anante Zeruia nemofo Abisai'a kini ne' asamino, nahigeno ami fri'nea kramo'a kini ne'moka e'inahu kea kasuno ne-e! Natrege'na ome ahena agenopa akafr'i'neno.<sup>10</sup> Hianagi kini ne'mo huno, Ra Anumzamo'ma huntenigeno huhavizama hunenante'na Zeruia nemofo foga antahio, tagra magozana hugara osu'none.<sup>11</sup> Anante Deviti'a Abisaine mika eri'za vahe'anena zamasamino, Nagra'ama kasente'noa mofavremo Absalomu'ma nahe'za nehanigeno'a, Benzameni naga'mo'za amane nahegahaze. Hagi Ra Anumzamo asamigeno nehianki, mago'zana osu atrenenko huhavizana hunantenio.<sup>12</sup> Hagi nagriku'ma haviza hunane huno'ma huhavizama hunanterera, Ra Anumzamo'a nenageno, Agra'a nona huno asomura hunante'nie.<sup>13</sup> Hagi Deviti'ene naga'amo'za nevazageno Sime'i'a anagami kaziga nevuno, Devitina kea nesuno kugusopa kateno avufina netreno have kanona atreno aheno vu'ne.<sup>14</sup> Hagi kini ne'ene agranema vu'naza

vahe'mo'za zamavaresra hige'za Jodani tinte unehanati'za anante umanigasa hu'naze.

<sup>15</sup> Hagi ana'ma nehzageno'a, Absalomu'ene maka eri'za vahe'anema Jerusalema ehanati'zageno'a Ahitofeli'a agrane e'ne. <sup>16</sup> Hagi Deviti rone'a Akati kumateti ne' Husai'a Absalomuna eme tutagiha hunteno anage hu'ne, Kini nera kagra zazate kinia manigahane! <sup>17</sup> Hianagi Absalomu'a Husaina antahigeno, Deviti nefuga mani'nananki, kagra nahigenka agranena ovu mani'nane? E'i knare kavukvara negafuna huontane. <sup>18</sup> Higeno Husai'a kenona huno, Ra Anumzamo'ene maka Israeli vahe'mo'za huhamprintesaza kini nemofo agoraga nagra manigahue. <sup>19</sup> Hagi nagra negafa antahintahima ami eri'za vahe mani'noankna hu'na kagri eri'za vahe manigahue.

<sup>20</sup> Hagi Absalomu'a Ahitofelina asamino, Na'a hugahumpi antahi'zana namio. <sup>21</sup> Higeno Ahitofeli'a Absalomuna hunteno, negafana henka a'nezaga'ane umaso. Na'ankure agra nonku'ma kegava hanazegu zamatreno vu'ne. E'inama hananke'za Israeli vahe'mo'za antahisu'za, tamage hunka negafana ha'renentane nehu'za, kagranema mani'naza vahe'mo'za hanaveti'za kagritega antegahaze. <sup>22</sup> Higeno nomofo agofetu seli no Absalomuna kintageno, nefama zamatreno vu'nea a'nenea mika Israeli vahe zamavuga zamanteno mase'ne. (2 Samuel 12:11-12.)

<sup>23</sup> Hagi ana knafina Ahitofeli'a Ra Anumzamofontegati'ma antahintahima erinoma hiankna ke nehigeno Absalomu'a kote'ma Deviti'ma hu'neankna huno amagera ante'ne.

## 17

### *Husai'a Absalomu revatga hu'nea nanake*

<sup>1</sup> Hagi henka Ahitofeli'a Absalomuna asamino, natrege'na 12tauseni'a sondia vahe zamavare'na meni kenagera vu'na Devitinku ome hakena hara huntaneno. <sup>2</sup> Hagi agra menina kasaro kasara huno ana'ana huno nevanige'na ome azerigahue. Hagi nagra antri hanazaza hu'na va'nena, mika vahe'mo'za atre'za fresage'na kini ne'ke ahegahue. <sup>3</sup> Hagi menina nagra maka vahera zamavarena kagrite egahue. Hagi zamagra zahufa a'mo neve atreno frenereti ete eankna hu'na, ana miko vahera ozamahe zamavare'na kagrite egahue. Hagi Devitinke ahesankeno frinigenka kagra krimpa fru hunka manigahane. <sup>4</sup> Hige'za Absalomu'ene mika Israeli kva vahe'mo'zama ana nanekema antahi'zana knare hu'ne. <sup>5</sup> Hagi Absalomu'a huno, Akai nagapinti ne' Husaina kehinkeno agranena antahi'zama'a eme huama hina antahimaneno. <sup>6</sup> Hagi Husai'a Absalomunte egeno Absalomu'a asamino, Ahitofeli'a ama naneke tasami'neanki agrama tasamia naneke amagera antegahumpi? Hagi i'oma hanunka antahintahi ka'a kagra hu ama huo. <sup>7</sup> Hagi Husai'a kenona huno, Menima Ahitofeli'ma tamia antahi'zamo'a knarera osie. <sup>8</sup> Hagi kagra antahi'nane, negafa'ene sondia vahe'amo'za hanavenentake vahe mani'nazageno zamarimpama ahe'zamo'a Beamofo anenta'ama vahe'mo'za nevrazageno arimpa aheankna vahe mani'naze. Hagi negafa'a harafa vahekino, kenagera sondia vahe'anena omasegahie. <sup>9</sup> Hagi agra ko mago'a kumatego, have kampino frakino mani'ne. Hagi agrama kagri sondia vahe'ma ese'zana ha'ma huzmantesniana rama'a vahe zamahe frigahiankino, vahe'mo'zama anankema antahisnu'za Absalomu nevaririza sondia vahera zamahe fri vagaraze hu'za hugahaze. <sup>10</sup> Hagi mago'a laionigana hu'za koro osu sondia vahe'kamo'za anankema antahisnu'za koro hugahaze. Na'ankure mika

Israeli vahe'mo'za antahi'naze, negafa'a tusi hihamu ne' mani'nege'za, agranema mani'naza sondia vahe'mo'za hanavenentake vahne mani'naze. <sup>11</sup> E'ina hu'negu noti kaziga Dani kumateti vuno sauti kaziga Bersebama uhanati'nea vahe'ma mani'naza Israeli sondia vahera, kagra mika zamavarenka Devitima ha'ma huntenakura eritru hugeno hagerinkenafi kasepakna hanigenka, zamavarenka hara ome huntu. <sup>12</sup> Hagi inantego Devitima ome keta erifore'ma hanuta, ata komo eramino mikaza refiteaza huta, Devitine mika sondia vahe'anena zamahe fri vaga regahune. <sup>13</sup> Hagi agrama mago kumapima ufrenketa ana kumofo vihu keginare nofi renteta avazu huta agupofi ome atregahune. Ana nehanunkeno ana kuma'mo fanane huvagaregahie. <sup>14</sup> Anante Absalomu'ene mika Israeli vahe'mo'za hu'za, Arkiti ne' Husaia tamia antahizamo'a knare huno Ahitofelima tamia antahi'zana agatere. Na'ankure ana hanigeno Ra Anumzamo'a Absalomuna azeri haviza hunaku ana antahi'zana zamige'za Ahitofeli antahi'zana eri atre'naze.

<sup>15</sup> Hagi ana huteno Husai'a Zadokune pristi ne' Abiatakizania amanage huno zamasami'ne, Ahitofeli'a Absalomune Israeli kva vahe'tamina antahintahi zamige'na nagra amanahu antahi'za zami'noe. <sup>16</sup> Hagi menina ame hutna Devitina ke atrentekeno, tima takah'za kantu kazigama nevera uomaseno, ru agri'ene agranema maka vu'naza vahetamina eme zama-hesagi ame hu'za freza hagege kokampi viho.

<sup>17</sup> Hagi Jonatan'iene Ahimasikea Jerusalemi vahe'mo'za zanage'zanku frakike Enrogeli mani'nakeno eri'za mofamo kea erino Devitima ome asaminogura ome zanasami'ne. <sup>18</sup> Hianagi mago nehaza ne'mo ana netrena zanageteno Absalomuna ome asami'ne. Ana higeno ana netremokea ame huke freke Bahurimi kumate mago ne'mofo kumapi me'nea ti kerigampi uramine ome fraki'na'e. <sup>19</sup> Hagi ana ne'mofo nenaro'a tavrave rutareno anama mani'na'a kerirera refi'neteno ana agofetu witi kanara huno zanazeri frakizanante'ne. <sup>20</sup> Hagi Absalomu eri'za vahe'mo'za ana a'ma kuma'afi mani'nege'za eme antahige'za, Ahimasi'ene Jonatanikea iga mani'na'e? Hazageno ana a'mo'a kenona huno, zanagra tina takahene hago vu'na'e. Hagi Absalomu eri'za vahe'mo'za ome hakazana ozamage'za ete atre'za Jerusalemi vu'naze.

<sup>21</sup> Hagi ana vahe'ma vutageke anama framaki'napinkati atramine Deviti ome asaminaku vu'na'e. Hagi Devitina ome asamine, kagra menina amafintira atrenka tina takahenka ko vu. Na'ankure kagri'ma eme kazerisania kea Ahitofeli'a Absalomuna retro huno asami'ne. <sup>22</sup> Hagi Deviti'ene agranema vu'naza vahe'mo'za maka ana kenageke Jodani tina takah'za kantu kaziga vu'naze. Hagi ko'ma atiana mago vahera timofo kama kaziga omani'naze.

<sup>23</sup> Hagi Ahitofeli'ma keno antahino'ma hiama Absalomu'ma ke'ama ontahigeno'a, donkiafi marerino kuma arega vuno, mika'zama omerintese nehuno, agra kana aheno frige'za naga'ama asenentaza matipi ome asente'naze.

<sup>24</sup> Hagi Deviti'a Mahanaimi vigeno, Absalomu'a mika Israeli sondia vahera zamavarenko Jodani tina eme takah'ne. <sup>25</sup> Hagi Absalomu'a Joapu noma erino sondia vahe'ma kvama hania nera Amasa huhamprinte'ne. Hagi Amasa'a Jeta nemofokino Israeli nagapinti ne'mo Nahasi mofa Abigeli ara eri'ne. Hagi Abigelina nuna'amo Seru Joapu'naka sente'ne. <sup>26</sup> Hagi Giliati mopafi Israeli sondia vahe'ene Absalomu'enena seli nonku'ma eme ki'za mani'naze.

<sup>27</sup> Hagi Deviti'ma Mahanaimima ehanatigeno'a, Nahasi nemofo Sobi'a Amoni kaziga Rabati kumateti ne'ki, Amiel nemofo Makiri Lodeba kumateti ne'ki, Giliati ne' Barsilaiki hu'za musenkea hufuru hu'za avre'naze. <sup>28</sup> Hagi zamagra tafe'ma masiza mase zanki, ne'zama kreno atino huzanki, kave'ma ati'za nesaza zuomparamima, mago'a witigi baligi flaua'ene kre hagege hunte witi aragane, rentori koheki, koheki, <sup>29</sup> tume rima'agi, batagi, sippisipigi memegi sipisipimofo amiri eri kragefinteki hu'za Devitine naga'ané ne'zana eri'za e'naze. Na'ankure zamagra hu'za maka'mota za'za ka ka'ma kokampina azageno tamavesra nehigeno, tamagara netegeno, tinkura tamavenisigeno hu'ne hu'za hu'naze.

## 18

### *Absalomu ahe fri'nea zamofo naneke*

<sup>1</sup> Hagi Deviti'a agranema vu'naza sondia vahete'ma ugagota hu'za kegavama hanaza sondia vahe'ma huhampri zamante'neana 1tauseni'a sondia vahete kva vahe huhampri nezamanteno, mago'a 100'a sondia vahete kva huhampri zamante'ne. <sup>2</sup> Hagi 3'a kevuma sondia vahe'ma refako hu'nefintira, mago kevua Joapu kegava higeno, mago kevua Joapu nefu Abisai kva higeno mago keyu'a Gatiti ne' Itaia kegava hu'ne. Ana hazageno kini ne'mo'a sondia vahetamina zamasamino, nagrane hatera vugahue. <sup>3</sup> Hianagi sondia vahe'mo'za anage hu'naze, Kagra tagranena hatera ovugahane, tagrama hapinti'ma atreta frege, amu'nompinti'ma refko hu'za mago'a vahetima zamahesu'za, ana zankura zamagra ontahigahaze. Hagi kagrama vananke'za kahesu'za 10 tauseni'a vahe'ma zamahe'za musema nehazankna hugahaze. Hagi kagra atrenka kumate mani'enka vaheku'ma upa hanuno, neone zanku upa'ma hanunkenza taza hananana knare hugahie. <sup>4</sup> Hagi kini ne'mo'a amanage hu'ne, Tamagrama antahisageno'ma knarema haniazana nagra hugahue. Hagi kini ne'mo rankumamofo kahante uotino mani'ne'za sondia vahe'mo'za 1tauseni'a sondia vahete kvao, 100'a sondia vahe'ma refko'ma hunteterema hu'naza kevu nevazageno, 1tauseni'a sondia vahe'ma refko'ma hunteterema hu'naza kevumo'za vu'naze. <sup>5</sup> Hagi kini ne'mo'a amanage huno Joapunki, Abisainki, Ittainena zamasami'ne, Nagri'ma antahinamisuta Absalomuna agazone hunteho. Hagi ana nanekema 3'a kva vahe'ma zamasamiana mika sondia vahe'mo'za nentahizageno zamasami'ne.

<sup>6</sup> Anante Deviti sondia vahe'mo'za vu'za Efraemi zafafi Israeli sondia vahe'ene hara ome hu'naze. <sup>7</sup> Hagi Deviti naga'mo'za Israeli vahera hara huzamagaterage'za, ana zupa 20 tauseni'a vahe zamahe fri'naze. <sup>8</sup> Hagi ana zupa ha'mo'a ra huno maka kaziga vuno eno higeno, ana zafafima savri hu'za hazenkema eri'za fri'naza vahe'mofo nampamo'a kazinteti'ma zamahe'naza vahe'mokizmi nampana agatere'ne.

<sup>9</sup> Hagi ana ha'ma nehazageno'a, Absalom'u'a Deviti sondia vahe mani'narega e'ne. Hagi eme zamageno miuli nehaza donkifi frenaku freno viana oki zafa azankuna'afi azokamo'a rusi huno azeri sga higeno miuli donkimo'a atreno fre'ne. <sup>10</sup> Hagi mago sondia ne'mo'a ana zana negeno vuno Joapuna ome asamino, Absalomuna azoka'mo'a oki zafafi rusi huno azeri sga higeno mani'ne. <sup>11</sup> Ana'ma hutegen'o'a Joapua ana nera asamino, nahigenka agrira ahe ofri'nane, kagrama ahe frintesina nagra silvane harafa ma nentaniza amunofira kamuresine. <sup>12</sup> Hianagi ana sondia ne'mo kenona huno, 1tauseni'a silva nenaminka ome ahe frio hunka

hugahananagi, nagra anara osugahue. Hagi tagra nentahukeno kini ne'mo'a kagri'ene tare kva netrena Abisaine Ittainena tamasamino Absalomuna ahe ofriho hu'ne. <sup>13</sup> Hagi nagra ana nera ahoresina, kini ne'mo'a keno eri fore hisine. Na'ankure maka'zama fore hiazana agra ko nentahie. Hagi agra keagare'ma nazeri otino nazeri havizama hanifintira, kagra naza osugahane. <sup>14</sup> Hagi Joapu'a ana nekura amanage hu'ne, Kea osunka tagano, nehuno oki zamofo azanku'nate Absalomu'a hantiteno ofri mani'negeno 3'a karugru keve erino vuno, Absalomuna tumo ruragino regeno fri'ne. <sup>15</sup> Hagi Joapu hankore'ma e'neri'za 10ni'a vahe'mo'za Absalomuna ome regagi'za ahe'naze. <sup>16</sup> Hagi ana huteno Joapu'a uferege'za agri sondia vahe'mo'za Israeli sondia vahe'ma zamarotagoma nehzaregatira atre'za e'naze.

<sup>17</sup> Hagi Absalomuna avufga'a eri'za mago keri kampi nevaziza, ana agofetura have eri'za rentrako huntazageno hihi huno mareri'ne. Hagi ana'ma hige'za mika Israeli sondia vahe'mo'za kumazamirega vu'za e'za hu'naze.

<sup>18</sup> Hagi Absalomu'a kasefa huno'ma mani'neno'a, mago havea eri retru renenteno nagra mofavre onte'noankino, ama havemo'a nagri nagi erino avame'za megahie, huno hu'neankino menina ana havea me'nege'za nege'za Absalomu have hu'za nehaze.

#### *Deviti'a Absalomunku asunku huno zavi ate'nea naneke*

<sup>19</sup> Anante Zadoki nemofo Ahimasi'a Joapuna asamino, natrege'na narena vu'na amama fore'ma hia zamofo musenkea kea Devitina ome asamina, Ra Anumzamo'a ha' vahekamofo azampintira kaguvazie hu'na ome asamineno. <sup>20</sup> Hagi Joapu'a kenona huno, Kagra menina ama musenkea erinka kini netega ovugahane. Hagi henka musenkea erinka vugahane. Na'ankure menina agri'a mofavre fri'ne. <sup>21</sup> Hagi Sudaniti (Itiopia) ne'mofo Joapu'a hunteno anage hu'ne, Kagra knazamofo nanekea Devitina ome asamio, ana ne'mo'a Joapu avuga renarenopri kepri huteno agareno vu'ne. <sup>22</sup> Hianagi Zadoki nemofo Ahimasi'a hanavetino Joapuna asamino, Nazano navufgar'e ma fore'ma hania zankura kagesa ontahi natrege'na nagranena kini nete vaneno. Higeno Joapu'a huno, Mago mizana e'origahananki, na'agafare vunaku nehane? <sup>23</sup> Hianagi Ahimasi'a huno, Nazano nagrite'ma fore'ma hania zankura ontahuanagi nagrira natrege'na va'neno. Higeno Joapu'a knareki vuo huno hunte'ne. Hagi Ahimasi'a Jodani agupofinti Mahanaimiti rugitagino Sudani (Itiopia) nera ovu'negeno uhanati'ne.

<sup>24</sup> Hagi Deviti'a ran kuma'mofona tare kahantremofo amu'nompi mani'negeno, anaga mani'neno avunteno kuma kegava nehia ne'mo marerino kuma kegina agofetuti ome keana, mago ne'mo'a agra'ake agareno ne-egeno ke'ne. <sup>25</sup> Hagi anaga mani'neo avunteno kuma'ma kegava nehia ne'mo'a kezatino, mago ne'mo agareno ne-e'ne negoe, huno kini nera asmigeno, Kini ne'mo'a kenona huno, agra'akema ne-esiana e'i knare musenke erino ne-e. Hagi anama agarenoma nea ne'mo'a erava'o hu'ne. <sup>26</sup> Higeno avunteno kuma'ma kegava nehia ne'mo'a kezatino, Anama agareno ne-ea nemofo amefira mago vahe agareno ne-e, huno kafante'ma kegava nehia netega kezatimino. Hagi anagama mani'neno avunteno kuma'ma kegavama nehia ne'mo'a kafante'ma kegava nehia nera kezatimino, Kotama e'nea ne'mofo amefira mago ne' ne-e, higeno kini ne'mo'a huno, agranena knare musenke erino ne-e. <sup>27</sup> Hagi anaga mani'neno avunteno kuma'ma kegava nehia ne'mo'a huno, Ese'ma ne-ea ne'ma koana Ahimasikna hu'ne. Hagi kini ne'mo'a kenona huno, agra knare nekino knare musenke erino ne-e. <sup>28</sup> Hagi Ahimasi'a kini ne'mofona anage

huno kezatimi'ne, Mikazamo'a knare hu'ne, nehuno eme kepri huno Ra Anumzana kagri Anumzamofo ragi amisune. Na'ankure kini ne'mokama ha'ma renegantea nera hago ahe'naze. <sup>29</sup> Hagi kini ne'mo'a kenona huno, Absalomu'a knare mani'negenka nehampi? Higeno Ahimasi'a kenona huno, Joapu'ma nagri'ene eri'za neka'anema hunerantegeno'a vahe'mo'za atru hu'ne'za ranke ranke hu'nazanagi, na'a fore hu'ne nagra ke'na antahi'na osu'noe. <sup>30</sup> Higeno kini ne'mo'a huno, antire evu mani'nenga avega anto, higeno Ahimasia anante oti'no mani'ne.

<sup>31</sup> Hagi Sudaniti (Itiopia) ne'mo ehanatino anage hu'ne, kini ne' ranimoka knare musenke eri'na neoe. Hagi menina Ra Anumzamo'a kahe'zama nehie vahe zamazampintira kazeri atre. <sup>32</sup> Hagi ana kema kini ne'mo'ma nentahino'a, ne'ni'a Absalomu'a knare huno mani'nefi? Higeno Sudaniti (Itiopia) ne'mo'a kenona huno, Kini ne'moka kagri ha' vhete'ene ha'ma renegantaza vhetera, Absalomunte'ma fore'ma hianknaza fore hugahie. <sup>33</sup> Hagi kini ne'mo'a tusi asunku nehuno kuma kafamofo agofetu me'nea nonte marerino hunaragintepinka zavi ome ate'ne. Hagi agra zavi'neteno anage hu'ne, Absalomuga mofavre'nimoke, mofavre'nimoke, Absalomuge, kagri noma eri'na nagrama frisuana knare hugahie, Absalomuga mofavre'nimoke, mofavre'nimoke huno zavira ate'ne.\*

## 19

### *Deviti'ma ete kini mani'nea naneke*

<sup>1</sup> Hagi kini ne'mo'ma Absalomunku'ma asunku huno zavi'ma ateankea mago'a vahe'mo'za Joapuna eme asmi'naze. <sup>2</sup> Hagi kini ne'mo'a, nemofonku zavi ate'ne hazanke'ma nentahiza, mika sondia vahe'mo'zama ha'ma huzamagateraza musezamo'a rukrahe hige'za, mikomo'za zavi ate'naze. <sup>3</sup> Hagi ana hige'za ha'ma huzmageterazage'za musema osu'zama zamagazegu'ma hu'za azaza hu'za mika sondia vahe'mo'za akohe'za rankumapina efre'naze. <sup>4</sup> Hagi kini nemo'a asenire azana refiteno nemofo Absalomunkura rankrafage huno, nenamofo Absalomu, nenamofo Absalomuo huno zavira ate'ne.

<sup>5</sup> Hagi Joapu'a kini nemofo nonte vuno kini nera ome asamino, Menina mofavre zagakane mofane zagakane a'nekane, henka a'nekanema zamagu'ma vazuna zankura ontahinka amanahu'za hunka tagazea eriramine. <sup>6</sup> Hagi kagri'ma kahe'za haza vahe zamavesi nezamanteka, kagri'ma kavesi kantaza vahera zamavaresa huzmantane. Hagi e'ina'ma hana kavukvamo'a sondia vahete kva vahekane, sondia vahekanena zamage amne hane. Na'ankure Absalomuma ofri manigeta tagra maka'mota frutesina, kagra muse hasine. <sup>7</sup> Hagi menina otinka megia vunka sondia vaheka'a kasunku kea ome huzamanto. Hagi e'i anama osananana, Ra Anumzamofo avufi huvempa huankino, mago vahe'mo'e huno meni kenagera kagranena omanigahaze. Hagi kasefa kareti'ma maninka enantegati'ma erinka e'nana knazana, meni knazamo'a agatereno havizantfa hugahie. <sup>8</sup> Anage higeno kini nemo'a vuno kuma kahante'ma nemania trate umani'negeno, kini ne'mo'ma kuma kahante manine kema mika vahe'mo'za rentahi'za, eza eme ke'naze. Hianagi anama hige'za Absalomu avaririza vu'naza sondia vahe'mo'za atre'za seli nonkuma zamirega vu'naze.

### *Deviti'a ete Jerusalemi e'nea naneke*

\* <sup>18:33</sup> Hibru avontafepina ves 33mo'a sapta 19nimofo ves 1ni'a me'neanangi tagra rama'a avontafemo'ma hu'nea kante avaririta 19nifina onte'none.

<sup>9</sup> Hagi miko Israeli naganofi'mo'za amanage hu'za ke hakarea hu'naze, kini ne'mo'a ha' vahe timofo zamazampintira tagunevazino, Filistia vahe zamazampintira taza hu'neanagi menima Absalomunku koro huno kini ne'mo'a kumara atreno fre'ne. <sup>10</sup> Hianagi tagra Absalomu kinia azeri otunagagi, hapi ahazageno fri'ne. Hagi nahigeta kini ne' Devitina ke hazageno kini trara eme erino omani'ne? <sup>11</sup> Hagi kini ne'mo'a anage huno pristi netre Zadokine Abitanena kea atrezanante'ne, nahigeta kini nera kea hazageno nom'a arera e'ne huta Juda vahera zamasamio. <sup>12</sup> Hagi tamagra nagri naga manita nagri kora mani'nazanki nahigeta kea huta onavreta natrageno, aru vahe'mo'za navre'naze? <sup>13</sup> Hagi Amasana ome asami'o, agra nagri kora manine, nagra huhamprigate'nugenka Joapu nona erinka sondia va-hetera kegava hugahane, nagrama havigema hanugeno'a Ra Anumzamo'a nahegahie. <sup>14</sup> Hagi Juda nagara Deviti'ma hiankemo zamagu'a zamazeri rukrehe hige'za, Devitina kea atrente'za, kagrane maka sondia vahekane ete Jerusalemi echo.

<sup>15</sup> Hagi Deviti'a Jerusalemi enaku Jodani tinte ne-ege'za Juda vahe'mo'za Gilgali kumate ome tutagiba hu'za azahu'za avre'za Jodani tina eme takahē'za enaku vu'naze. <sup>16</sup> Hagi Gera nemofo Sime'i'a Benzameni nagapinti nekino Devitima eme negen'o'a, mago'a Juda naga'ene kini ne' Devitintega ame hu'za urami'naze. <sup>17</sup> Hagi Sime'i enena rama'a Benzameni nagapinti ne urami'naze. Hagi anampina Siba'a Soli eri'za ne-ene 15ni'a ne' mofavre zaga'anee, 20'a eri'za vahe'anee vu'naze. Hagi kini nemofo avuga ame hu'za Jodani tina takahē'za vu'naze. <sup>18</sup> Hagi tina takahē'za vute ete hu'za Deviti nagara zamaza hugantu atre'naze. Hagi kini ne'mo'ma tima takaheno kantu kazigama vu'zama nehigeno'a, Gera nemofo Sime'i'a agafi eme kepri hu'ne.

<sup>19</sup> Hagi Sime'i'a Devitina amanage huno asmi'ne, Jerusalemi kuma'ma atrenka nevanke'na hu'noa zankura nagra nasunku huanki ramoka, ana hazenkeni'a atrenanto. <sup>20</sup> Hagi antahio, nagra kefo navu'nava hu'na kumi hu'noe. E'ina hu'negu mika Josefe nagapintira nagra egota hu'na eme hufrufra hugantoe. <sup>21</sup> Hagi Zerua nemofo Abisai'a amanage huno hu'ne, Nahigenka Anumzamo'ma huhamprinte'nea ra nera huhavizana hu'nane? Hagi Simeiga frigahane. Na'ankure Ra Anumzamo'ma huhampri'nea kini nera huhaviza hunte'nane. <sup>22</sup> Higeno Deviti'a Abisaikiznina Joapukiznia amanage huno kenona hu'ne, ama tanagri' zana omne'ne. Hagi na'a higeta nagrira kehara hunenanta'e? Ama'na kna vahe ahefri kna omaneneanki, muse hukna me'ne. Na'ankure nagra menina Israeli vahe kini mani'noanki, mago vahera zamahe ofrigahaze. <sup>23</sup> Hagi Deviti'a rukarehe huno Simeina anage huno asami'ne, onkahegahue.

### *Mefiboseti'a Deviti eme ke'ne a naneke*

<sup>24</sup> Hagi Soli negeho Mefiboseti'a, Deviti kenaku urami'ne. Hagi Deviti'ma Jerusalemima atreno viregatira Mefiboseti'a agia sese osuno, kukena'a sese osuno, agi'zokara ohareno atregeno me'ne. <sup>25</sup> Hagi Mefiboseti'ma kini ne'ma eme tutagiba huntogeno'a, kini ne'mo agenoka huno, Kagra nahigenka nagranena ovu'nane? <sup>26</sup> Higeno agra kenona huno, ranimoka kagra antahi'nane, nagria nagiamo'a haviza hu'ne. Hagi Jerusalema atrenka vana zupa donkinia'a azeri retro hunantenke'na va'heno hu'na eri'za vaheni'gu huana, anara osu'za renavatga hu'naze. <sup>27</sup> Hagi Siba'a natreno vuno ka-gira havige ome kasamino, nagrira nazeri haviza hu'ne. Hianagi nagra antahi'noe, kagra Ra Anumzamofo ankero vahe kna hunananki, nazano kagri'ma kavesi'nea zana amne hunanto. <sup>28</sup> Hagi kagra nenfa nagara maka

tahē frintesine. Hianagi kagra nagrane ne'zana eme no hunka hanke'na, kagrane ne'zana ne'noe. Hagi ranimoka na'ante mago'a zankura kagrica kantahige'na erigahue. <sup>29</sup> Hagi Deviti'a ana kemofo nona'a huno, Hago rama'a keaga hañanki tagano. Soli mopa kagrane Siba'ene amu'nompinti refko huta erigahue'. <sup>30</sup> Hagi Mefiboseti'a ana kemofo nona'a amanage hu'ne, Agrake Siba'a ana maka'zana erino. Hagi kagrama mago hazenkema e'orinka knare'ma hunka kumate'ma anazankura nagra muse hue.

<sup>31</sup> Hagi Bazilai'a Gileati kazigati ne'kino Rogerimi kumateti Devitina kenaku eramino Jodani tinte eme tutagiba hunteno, kegava hunteno vu'ne. <sup>32</sup> Hianagi Bazilai'a 80'a kafu huno ozafare'ne. Hagi agra feno nekino Deviti'ma Mahanamima umanigeno'a, kva hunteno upa'ma hia zana aza hu'ne. Na'ankure agra tusi'a feno ne' mani'negu anara hu'ne. <sup>33</sup> Anama higeno'a Deviti'a amanage huno Bazilaina asmi'ne, Tina takahenka nagrane Jerusalemi vananke'na, ome kegava hugantegahue. <sup>34</sup> Hagi Bazilai'a kenona huno, ramoka, nagra na'ante Jerusalemia vugahue? Nagra ozafa re'noanki'na za'za kna ama mopafina omanigahue. <sup>35</sup> Hagi nagra 80'a zagekafu hugeno, navufgamo'a so'e osu'ne. Hagi kave'ma nene'na e'iza nenoe hu'na haga'a nontahue. Hagi zagamema hu vahe'mo'zama zagamema nehazage'na, nagra antahi so'e nosue. Hagi kini ne'moka nagra eri'za vahekamo'na na'ante kna kamigahue. <sup>36</sup> Kini ne'moka kagrane Jodani tina takahe'na vugahuanagi, za'za kana ovugahuanki, kagra mago knare kavukva zana huonanto. <sup>37</sup> Hagi natrege'na ete nagra kuma'nirega vu'na ufri'nena, nenrera nenfa matipi ome asenanteho. Hagi ama'ne eri'za neka'a Kimhamu'a, atregeno kagrane tina takaheno vinkenka nazano nagri'ma hunante'naku'ma hanana zana, agri ome hunto. <sup>38</sup> Hagi Deviti'a kenona huno, Nagra Kimhamu'na avrenugenno Jodani tina takaheno nevanige'na, kagri'ma kavesinia zana amne huntegahue. <sup>39</sup> Hagi mika vahe'mo'za Jodani tina takahe'za kantu kaziga vazageno'a Deviti'a Basilaina antako hunenteno asomu ke huntetegeno, ete kuma'arega vu'ne. <sup>40</sup> Hagi Deviti'a Kimhamu'na avreno ete ti takaheno Gilgali nevige'za, mago'a Israeli vahe'ene sondia vahe'mo'za avega hu'za vu'naze.

<sup>41</sup> Hagi Israeli vahe'mo'za Devitinte e'za amanage hu'naze, nahige'za Juda tafuhe'za katrazagenka, kagra'ene nagaka'anena Jodani tina takaheta neaze? <sup>42</sup> Hige'za Juda vahe'mo'za Israeli vahe'mokizmi ke nona'a hu'za, tamagria nahigeno tamasia nevazie? Tagra rankini nemofona, agri naga mani'none. Hianagi tagririra kini nemo'a mago zana amnea tamigeta nononkeno mago'zana amnea ontami'ne. <sup>43</sup> Anante Israeli vahe'mo'za Juda vahe'mokizmi kenona hu'za, Tagra rama'a tamagririra tamagatereta 10ni'a naganofi mani'nonankita, tagra rama'aza Devitimpintira erigahune. Hagi na'a hu'negeta e'inahu knara hunerantaze? Hagi tagra ese'zana ama kini nera ome avreta e'none. Hianagi Juda naga'mo'za mago'ane hanaveti'za Israeli nagara kehara rezamante'naze.

## 20

### *Siba'ma Deviti ha' rente'nea naneke*

<sup>1</sup> Hagi Benzameni nagapintira mago nera Sibakino, kefo avu'ava'ene ne' mani'ne. Ana nera Bikri nemofokino miko Israeli vahe'mo'za antahisazegu ufe nereno amanage hu'ne, Israeli veamota, Deviti'a tagri nagapinti nera omani'neanki, atreta nontamirega vuta eta hiho. Ama Jesi nemofo'a magore huno erisantima haresuna zana ontamigahie. <sup>2</sup> Hige'za Israeli vahe'mo'za

Devitina atre'za Siba'ene vu'naze. Hianagi Juda vahe'mo'za Jodani tintetira Devitina avariri'za Jerusalemi vu'naze.

<sup>3</sup> Hagi Deviti'a Jerusalemima uhanatino nomama ome enerino nemanino'a, 10ni'a henka a'nema'ama kuma kegava hiho hige'za Jerusalemima mani'naza a'neramina zamavareno mago nompi zamanteg'za mani'nageno ne'zane mago'azana nezamino mago'a vahe huzmanteg'za kegava huzmante'naze. Hianagi ana a'nea ome zamanteno omasege'za, ana a'nemo'za kento ane manizaza hu'za mani'n'e'za ufri'naze.

<sup>4</sup> Hagi Deviti'a amanage huno Amasana asmi'ne, 3'a knamofo agu'afi kagranne Juda vene'nea ke hunka amare eme atru hihi! <sup>5</sup> Higeno Amasa'a vuno mika Juda vene'nea ome kehu atru hu'neanagi, ana eri'zama ome eriana kini ne'mo'ma hu'nea kna agatereno za'zate ana eri'zana eri'ne. <sup>6</sup> Hagi Deviti'a amanage huno Abisaiana asmi'ne, Absalom'u'ma hurante'nea hara agatereno Bekri nemofo Siba'a menina ra ha' hurantegahie. E'ina hu'negu ru tatreno mago'a hanavenentake vihu me'n'e'nia rankumapi ufre'nigi, hankave sondia vaheni'a zamavarenka arotogag hunka vuuo.

### *Joapu Amasia ahe'nea naneke*

<sup>7</sup> Hagi Abisaia'ene Joapukea mika sondia vahe'zniane, kini ne'ma kegavama hunentaza hanavenentake sondia vahe'ene Kireti vahe'ene Peliti vahe'enena nezamavareke, Jerusalemi kumara atre'za Bikri nemofo Sibanku ome hakeku vu'naze.

<sup>8</sup> Hagi ra have me'nere Gibioni kumate vazageno, anante Amasa'a ome tutagiha' huzamante'ne. Hagi Amasama azeri frufra hunaku Joapuma nevigeno'a, ha' kukena atanineno zaza bainati kazina amu nofipi rusi hu'nea bainati kazimo'a evurami'ne. <sup>9</sup> Hagi Joapu'a Amasana musenke huntenu, nena fuga kagra knare hu'nano? Nehuno Joapu'a ome agazafeno antako hunte'naku'ma hiaza huno tamaga azanura agi' azokate azeri'ne. <sup>10</sup> Hagi Joapu'ma osi kazima azampima eri'neana Amasa'a onkeno, kegava osigeno Joapu'a ana osi kazinu rimpma reraragufegeno rimpamo'a mopafi herafirami'ne. Hagi Joapu'a ru'enena akasino ore'neanki, magoke zupa Amasana kazina regeno fri'ne. Joapu'ene negna Abisaika Bikri nemofo Sibana rotago huke vu'nae. <sup>11</sup> Hagi Joapu kazigati mago sondia ne'mo otino, Amasa'ma frino me'nere ot'i'neno kezatino, Joapune Devitintegama ante'naku'ma hanamoka Joapu avaririo. <sup>12</sup> Hagi Amasa'a ka amu'nompi mase'neno, agra'a kora timpi maseno hapa nerege'za, sondia vahe'mo'za, anante eme ot'i'ne'za uruha nehazageno, kezamatia ne'mo'a Amasana kampinti avazu huno hozafi ome netreno, nakare ku erino refitente'ne. <sup>13</sup> Hagi Amasa avuvgama kampinti'ma eri atrege'za, maka vahe'mo'za Joapuna avariri'za Bikri nemofo Sibana ahenaku vu'naze.

<sup>14</sup> Hagi Siba'a mika Israeli naga nofi'mofo mopafi vugatereno, Abel-Betmaka vu'ne. Hagi Beriti nagara agri nagaki'za agrane hagerafi'za kuma agu'a ufre'naze. <sup>15</sup> Hagi Joapu sondia vahe'mo'za Abeli kumara avazagi kagite'za, kumamofo have kegina tavaontera mopa kate'za ante marerite'za, anante mani'n'e'za ana have kegina nefragazageno,

<sup>16</sup> ana kumapinti mago knare antahintahine a'mo kezanke huno, Tamagesa anteta antahihio, nagra Joapu'ene keaga hugahuanki kehinkeno erava'o hino. <sup>17</sup> Higeno ana kema nentahino, Joapu'ma erava'o higeno, ana amo antahigeno, Kagra Joapugo higeno Joapu'a kenona huno, Izo nagre. Higeno ana a'mo'a asamino, eri'za a'kamo'na hanua nanekea antahio, higeno Joapu'a huno, Izo nentahue.

<sup>18</sup> Hagi ana a'mo huno, Korapara amanage hu'za nehzane, mago'a hazanke'zama eri antefatgoma hunakura, Abeli kumate kva vahete vunka keaga eri antefatgo hugahane hunege'za ana hu'za keaga erinte fatgo nehzane. <sup>19</sup> Hagi tagra Israeli vah'e'mota ha' osu fru vahe mani'nonanki, nahigeta Israeli mopafima agima me'nea rankumara eri haviza hu'za nehaze. Na'a higeta Ra Anumzamofo zana eri haviza hu'za nehaze? <sup>20</sup> Higeno Joapu'a kenona huno, I'o, nagra ama kumara eri haviza hu'za nosue. <sup>21</sup> Hagi Efraemi agona mopafinti ne' Bekri nemofo Siba'a kini ne' Devitina ha'retenteno freno kumatamifi emani'ne. Hagi e'ina neke avrenamige'na atre'na va'neno. Hagi ana a'mo Joapuna kenona hunteno, Menintfa ana ne'mofo agenopa akafrita kuma keginamofo fegi'a mate vanunketa kegahaze. <sup>22</sup> Anante ana a'mo a knare antahizama'a mika vahe ome zamasamige'za, ana vahe'mo'za Bekri nemofo Sibana ahe'za agenopa'a akafr'i'za Joapu ome mate vumi'naze. Ana higeno Joapua ufereno sondia vahe'a zamazeri atru huteno huzmanteg'e'za nozmirega nevazageno, Joapu'a kini netega Jerusalemi vu'ne.

<sup>23</sup> Hagi Joapu'a ete mika Israeli sondia vahe'mokizmia vugote kvazimi manigeno, Jehoiata nemofo Benaia'a, Kereti vahe'ene Peleti vahe'ma Devitinte'ma kva hunentaza hanavenentake sondia vahe'tamimofo kva ne' mani'ne. <sup>24</sup> Hagi Atoram'u kazokzo eri'zama e'neri'za vahete kva mani'ne. Hagi Ahiruti nemofo Jehosafati'a kamani avontafe kegava hu'ne. <sup>25</sup> Hagi Siba'a avoma kreno eri fatgo hu eri'za kegava hu'ne. Hagi Abiatake Zadokukea pristi netre mani'na'e. <sup>26</sup> Hagi Jaira nagapinti ne Ira'a, Devitina agri'a pristi ne' mani'ne.

## 21

### *Deviti'ma kini mani'nea knafi agatontoza fore hu'nea naneke*

<sup>1</sup> Hagi Deviti'ma kini mani'nea knafina, Israeli mopafina 3'a kafumofo agu'afi agatonto kna fore hu'ne. Higeno Deviti'a Ra Anumzamofona nunama huno antahigegeno, Ra Anumzamo'a Deviti nunamuma'arera kenona hunteno, e'inahu zama fore nehiana Soli'ene naga'amo'zama Gibioni vahe'ma zamahe fri'naza zante nona huno ama ana knazana efore nehie. <sup>2</sup> Higeno Gibioni vhahera Deviti'a kehige'za agrite azageno kea zamasami'ne. Hagi ana Gibioni vhahera zamagra Israeli vhahera omani'nazanki Amori vahe'mokizmi zamagehe'za mani'naze. Hagi Israeli vahe'mo'za kora hvempa hu'za Amori vhahera ozmahegosune hu'za hu'nazanagi, Soli'a agra zamahe vagare'ne. Na'ankure agra Israeli vahe'ene Juda vahe mopama mika kegava hania kazigati anara hu'ne. (Josua 9:3-27) <sup>3</sup> Hagi Deviti'a Gibioni vahe'mokizmia zamantahigeno, Soli'ma hu'nea zanteru nagra inankna hu'na Soli kumimofo nona hu'na apasentanenkeno Ra Anumzamo'a asomura hurantegahie? <sup>4</sup> Higeno Gibioni vahe'mo'za amanage hu'naze, Soline agri nagapintira silvane golinena e'orige mago vhahera Israeli nagapintira ahe frigera tagra osugahune. Anage hazageno Deviti'a ete zamantahigeno, Hagi nagra na'a mago'a zana huramantegahue? <sup>5</sup> Hige'za zamagra kinimofo kenona hu'za, Soli ana zana huranteno ama mopafintira tahe fanene hanigeta Israeli vahe mopafina omanisunegu ana antahintahia retro hu'ne. <sup>6</sup> Ana hu'negu Soli nagapima mofavre'o, negeho'ma mani'ne'niana 7ni'a avreramigeta, Soli kumate Gibioni Ra Anumzamofo avuga ome zamaheta hantimaneno. Hazageno kini ne'mo'a zamasamino, Nagra avre tamigahue. <sup>7</sup> Hagi Deviti'a Jonatani'ene hvempa hu'negu nentahino, Jonatani ne'mofo Mefi-boseti'na avre franekino

Amori vahera avre ozami'ne. <sup>8</sup> Hianagi Aia mofa Rispama Solinte'ma mani'neno, tarema zanante'nea mofavrerare Armonine ru Mefibosetina avre'zami'ne. Ana nehuno Meholia kumateti ne' Barzilai nemofo Adrielinte'ma Soli mofamo'ma Merabu'ma mani'neno kasezmante'nea 5fua ne' mofavreramine zamavaren, <sup>9</sup> ana 7ni'a vahera Gibioni vahera avreza-mige'za, Ra Anumzamofo avuga zamanankempi nofi hararivazi'za agonafi zamahe fri'zage'za, bali ne'zama hamare knama erigafa haza knare fri'naze.

### *Soli agehe'i asezamante'naza naneke*

<sup>10</sup> Hagi tare mofavreraremofo nezanarerera Rispa'a asunku kukena erino vuno ana tva'onte me'nea have agofetu ome rutareno tafe hu'ne. Hagi bali ne'zama hamare knareti vuno ko knafima ufre'neana hanine zagenena agra ana vahe'mokizmi zmauvufare kegava hu'neno, atrege'za namazagane afi zagagafamo'za zamavufaga eme one'naze.

<sup>11</sup> Hagi Solina henka nenaro Aia mofa Rispama hiazamofo kema Devitima nentahino'a, <sup>12</sup> agra Jabase kumate Giliati kaziga vuno, kora Filistia vahe'mo'za Soline nemofo Jonatanigzani Gilboa agonafi znahete'za, zanavufga eri'za maka vahe'mo'zama atruma nehzafii Jabel-Giliati ome hanti znante'naze. Henka Jabeli vahe'mo'za oku'a vu'za zanavufama ome eri'za asente'nafinti zaferina zani'a omerinaku vu'ne. <sup>13</sup> Hagi Deviti'a eri'za vahe'a huzmanteg'e za vu'za, Soline nemofo Jonatanigzini zaferinane, Gibioni vahe'mo'za zamahe'naza 7ni'a vahe zaferina omeri'naze. <sup>14</sup> Ana hute'za Benzameni naga mopare vu'za Soli naga'ma asezmant'e naza mopa agentega Zela kumate nefia Kisima asente'nefi ome asezmant'e naze. Hagi ana maka kema kini ne'mo'ma zamasamia zama huvarageno'a, Ra Anumzamo'a numamuzamia antahizamino, ana mopafima zamaga tontozama me'neana eri atre'ne.

### *Israeli vahe'mo'za Filistia tusinasi vahe'ene ha' hu'naza naneke*

<sup>15</sup> Hagi ete mago'ane Israeli vahe'mo'za Filistia vahe'enena hara hu'naze. Hagi hara hu'za nevazageno, Deviti'a asafeku huno zaferina omne amne hu'ne. <sup>16</sup> Hagi mago Filistia ha' nera agi'a Isbibenobu'e. Agra tusinasi Refaimi vahe'mokizmi nezamagehokino, agra Deviti ahenaku hu'ne. Hanki ana ne'mofo keve agona'a bronsireti tro higeno, kna'amo'a 3kilo naza hu'nea eri'neno, kasefa bainati kazine eri'ne. <sup>17</sup> Hianagi Abisaia'a Devitina eme aza huno ha' huno ana Filistia ha' nera ahe'ne. Ana huteg'e za sondia vahe'mo'za Devitina hanave huvempa ke hunte'za, kagra hatera tagranena vano osugahane. Hagi kagra Israeli vahe'motarera lampe tavi kna hunka mani'nananki, atre'nankeno ana tavimo'a asura osugahie. <sup>18</sup> Hagi ete henka mago Filistia vahe'enena Gobi kumate hara ome hu'naze. Hagi ana hapina Sibekai'a, Husa mopareti ne'mo, Refaimi tusinasi nagapinti nera Sapuna ahe'ne. <sup>19</sup> Hagi ete mago'ane Gobi kumate Filistia vahe'enema ha'ma ome hazana, Elihanani'a Zaeli nemofo Betlehemu kumateti ne'mo Gati nagapinti Goliat nefuna ahe fri'ne. Hagi ana nemofo kevemo'a kukena hati masini-mofo zafa'agna hu'ne. <sup>20</sup> Hagi ete'za mago hara Gati kumate ome hu'naze. Hagi anampina Goliat kna ne' krefa mani'neana 6'a agigogi, azankogi huno hunte'neankino miko 24'a agigo azankone me'ne. Hagi agranena Refaimi tusinasi vahe'mokizmi nezmageh'o'e. <sup>21</sup> Ana ne'mo'a Israeli vahera kiza zokago ke hunezamantegeno, Deviti nefu Simei nemofo Jonatani ana nera ahe fri'ne. <sup>22</sup> Hagi e'i ana 4'a vahera Gati kumateti Refaimi tusinasi nagapinti vaheki'za Deviti'ene, sondia vahe'amo'za zamahe fri'naze.

## 22

*Deviti'a Ra Anumzamofo agi ahentesagahu zagame hu'nea naneke*

<sup>1</sup> Hagi Ra Anumzamo'ma maka ha' vahe'a zamazampinti'ene Soli azampinti'enema aguma'vazigeno'a, Deviti'a ama zagame huno Ra Anumzamofona agi'a hentesaga hu'ne. <sup>2</sup> Amanage huno zagamera hu'ne, Ra Anumzana nagri hanave havene, nagri vihune, nagri naza huno naguvazi nere. <sup>3</sup> Ra Anumzanimo'a nazeri frakino nagu'vazi haveni'a mani'neno, hankoni'a mani'ne. Agrake hanave kuma'ni'a mani'neno, fraki kumania mani'ne. Agrake nagria nahokeheno nagu'vazi nere. Nagri nahokenka naguvazi ne'moka hazenke zampintira nagura vazi'nane. <sup>4</sup> Ra Anumzama ra agima eriga Ra Anumzamofontega nazama hinogura kezanke hugeno, ha vahe'mokizmi zamazampintira naza hu'ne. <sup>5</sup> Fri'zamo'a tusi'a hagerimo kranto kranto nehuno eme rugaginantea kna nehigeno, knazamo'a ti hageno ne-eno nazeri anakriaza nehie. <sup>6</sup> Hagi frizamo'a nofikna huno nazeri anakiaza nehuno, krifumo nazeria kna hu'ne. <sup>7</sup> Narimpa knazampi mani'ne'na Ra Anumzamofona naza hinogu krafage huntogeno, Agra noma'afi mani'neno krafa ke'ni'a antahino naza hu'ne. <sup>8</sup> Hagi mopamo'a imi erino tore higeno, monamofo tra'mo'a tore huno kaneki'voki hu'ne. Na'ankure Ra Anumzamofona rimpama ahe'ne. <sup>9</sup> Agona kampintira toki higeno, agipintira tevemo hagna hagna huno maka'za tefanene nehigeno, rimpama ahezamo'a tankanuzare'ma tevema teankna hu'ne. <sup>10</sup> Hagi mona eri anagino eramigeno, haninentake hampomo agamofo fenka kaziga me'ne. <sup>11</sup> Haren vano nehia hanavenentake Serabim ankeromofo agofetu manino eankna nehuno, zahomofo agekonare manino ne-e. <sup>12</sup> Hanimo'a nonka'agna higeno, koma avrenoma ne-ea tapari hampomo'a kazeri anovazi'ne. <sup>13</sup> Hagi mani'nampintira masanentake higeno, tevemo ruragareno vuno eno nehie. <sup>14</sup> Ra Anumzamo'a monafinka mani'neno kemä hiazamo'a monagemo hiza nehigeno, Marerisa Ra Anumzamo'a ke'a huama nehie. <sup>15</sup> Kopsina kevereti ha' vaheka'a zamahe panani nehunka, kopsinareti rumarave hunka ha' vaheka'a zamahanke'za panini hu'za fre'naze. <sup>16</sup> Hagi Ra Anumzamo'a ha' vahera arimpa ahezamanteno zamazeri korigeno, agonagampinti asimumo'a hagerina aheranegeno mopamofo agafa'ama azeri'nea zamo'a ama hu'ne. <sup>17</sup> Hagi agra monafinkati azana antehenkateno ti amu'nompinti navre'ne. <sup>18</sup> Hagi zamavesra hunante'za hanavema ati'za ha'ma hunenantaza vahepintira naza hugara osugen, nagu'vazino navre'ne. <sup>19</sup> Hanaveni'a omanegena knazampima ufroa knafina, ha' vahe'nimo'za hara eme hunantageno, Ra Anumzmo'a nagu'vazino navre'ne. <sup>20</sup> Agra naza higena knare hu'na mani'noe. Agra avesinante'negu huno nagura vazino navre'ne. <sup>21</sup> Nagra fatgo navu'nav'a'ma huazante Ra Anumzamo'a avesinante'ne. Nagrira hazenkeni'a omnenege huno Ra Anumzamo'a mizana nami'ne. <sup>22</sup> Na'ankure nagra Ra Anumzamofika nevariri'na, kefo avu'avara hu'na Ra Anumzamofona namage'na huomi'noe. <sup>23</sup> Na'ankure kasege'a nasenifi ante'ne'na, ana kasege'ane tra ke'anena rutagre'na namagena huomi'noe. <sup>24</sup> Ra Anumzamofa avurera nagra mago hazenkea osu'na, kumi'ma huzankura kegava nehu'na kumira osu'noe. <sup>25</sup> E'ina hu'na fatgo hu'na nagra manua zante Ra Anumzamo'a mizana nenamino, agri avure'ma mani fatago hu'na manua zante knare avu'avara hunante'ne. <sup>26</sup> Kagri kema amage antaza vahera knare avu'avara hunante'ne. <sup>27</sup> Kagri kema amage antaza vahera knare hunezmantenka, mani fatgoma Kagrite'ma haza vahera,

knare kavukva hunezamantane. <sup>27</sup> Fatgo zamavu'zamava'ma haza vahera, fatgo kavukava hunezamantane. Hianagi kefo zamu'zamavama nehaza vahera, zamazeri henkami netrane. <sup>28</sup> Kagra zamufga anteramiza maniza vahera zamagu nevazinka, zamufga ra nehaza vahe'mokizmia, zamazeri anteneramine. <sup>29</sup> Ra Anumzamoka Kagra nagri tavi masani'e. Kagra remsa hunantenka, hanizana nagritetira eri netrane. <sup>30</sup> Kagri hanavefi ha' vaheni'a hara huzmageteregahue. Kagri hanavefi rankumofo kegina haguteregahue. <sup>31</sup> Ra Anumzamoka Kagri kavukava zamo'a fatgo higeno, mika kagrama hvuempa hu'nana kemo'a tamage naneke me'ne. Hagi iza'zo kagripima efraki'za vahera hankozami nemanine. <sup>32</sup> Na'ankure magora kagrikna Anumzana omani'neanki Kagrake Ra Anumzana mani'nane. Kagrake hankave havea mani'nane. <sup>33</sup> Anumzamoka Kagra fraki havegan'i'a mani'nanankinka, makazampina naza hanke'na fatgo kantera nevue. <sup>34</sup> Kagra nagri nagia azeri dia afumofo agiagana nehunka, nazahankena mareri saga huno roro hunte'nea agonarega vano nehue. <sup>35</sup> Kagra ha'ma hanugura nazamofo rempi hunaminke'na, bronsireti'ma tro hu'naza atia amne avazuhu kararapena nehoe. <sup>36</sup> Kagra nagu'vazi hankoni'a mani'enka, Kagra vahenimofo zamavufina nazeri ra vahera nante'nane. <sup>37</sup> Kagrake kama vu'noa kana eri ra hankeno, nagiamo'a tanafara osu'ne. <sup>38</sup> Nagra ha' vaheni'a kazigazi hu'na zamarotago hu'na hara huzamante'na zamahe vagare'noe. <sup>39</sup> Nagra kazinteti zamahe nefrina, naganu zamare hapa atuge'za oraoti'naze. <sup>40</sup> Kagra naza hunka hanave nenaminka, ha' vahe'ni'a nazampi zamavarentanke'na ha' huzamante'na hara huzamagatere'noe. <sup>41</sup> Kagra ha' vahe'nimokizmia zamazeri rukrahe hanke'za atre'za nefrage'na, ha'marenantaza vahera zamazeri havizana hu'noe. <sup>42</sup> Zamagra zamazahu vaheku kea nehazanagi mago'mo'e huno eme zamaza osu'ne. Hagi zamagra Ra Anumzamofonku tazahuo hu'zma antahige'nazaragi, Agranena zamaza osu'ne. <sup>43</sup> Nagra zamarehapatuge'za zamagra kugupa se haze. Nagra zamazeri'na zamarentrako huge'za, hapa kna hu'naze. <sup>44</sup> Vahe'nimozama haframa hunantaza vahepintira, naza hu'nane. Kagra kva ne' nazeri ontinke'za, vahe'mo'za nagri kvafi manizageno, ke'na antahi'na osu'noa vahe'mo'zanena nagri kvafi mani'naze. <sup>45</sup> Rurega vahe'mo'za nagri nagenkema nentahi'za, koro hu'za nagri agoraga mani'naze. <sup>46</sup> Rurega vahe'mokizmia hanavezami'a omaneno zamahirahi nerege'za, frama'ki'za mani'naza kumazamia atre'za e'naeze. <sup>47</sup> Ra Anumzamo'a kasefa huno manine. Nagra agi'a erisga hugahue. Agra naguvazi hankave haveni'e. Agri agi ahentesga hanune. <sup>48</sup> Agra nahokeno havizama hunantaza ha' vaheni'a zamahe'ne. Hagi ruga'a kumara nagri kvafi ante'ne. <sup>49</sup> Kagra ha' vahe'mokizmi zamazampintira nagu'vazinka navre'nane. Hanavenentake ha' vaheni'amofo zamazampintira Kagra naza hunka nagu'vazi'nane. <sup>50</sup> E'ina hu'negu ruga'a vahe'mokizmi amu'nompina muse hu'na Ra Anumzamoka Kagri kagia hentesga hugahue. <sup>51</sup> Agra'ki kini manio huno huhamprinantege'na tusi'a hatamina agatere'na kinia mani'noe. Maka knafina Agra avesinante'neankino, henkama nagripinti fore'ma hanaza vahera zamavesinte vava hugahie.

<sup>1</sup> Hagi Deviti'na huvagare naneke'a ama'ne, Nagra Jesi nemofo Devitina Ra Anumzamo'a knare hunanteno ra nagima nami'nemo'ne. Jekopu Anumzamo masave frenanteno huhampri nantenemone. Nagra rama'a knare'nare zagametamina krente'noge'zä Israeli vahe'mo'za zagamema ne-haza ne' Devitine. <sup>2</sup> Hagi Ra Anumzamofo Avamumo nagripi huvazino keaga nehigeno, Ra Anumzamofo kemo nagitera me'ne. <sup>3</sup> Hagi Israeli vahe'mota Ra Anumzamo'a frakirante havegino, amanage huno nasami'ne, mago vahe'mo'ma fatgoma huno'ma vahe'ma kegava huzmantesiana, Anumzamofonku koro hunenteno, vahera kegava huzmantegahiankino, <sup>4</sup> ana avu'avazamo'a nanterama zage hanatino marerino remsa hiankna ne-huno, nanterama monare'ma hampoma omnegeno, ko'ma ruteno rusegeno zagemo'ma remsama higeno, agata tra'zamo'ma mopafinti tretre huno hageankna nehie. <sup>5</sup> Tamage huno Ra Anumzamo'a nagri nagamokizmia zamazeri hanavetigahie. Na'ankure nagrira mevava hania hanave huvempa ke Agra hunanteneankino, agra ana huvempa kea ruotagreno, makazana er-inte fatgo nehuno, kegava hu'nenigeno makazamo'a knare hugahie. <sup>6</sup> Hagi kefo zama nehaza vahe'mo'za ave'ave trazankna hu'nazage'za vahe'mo'za zanefi atrazankna hugahaze. Na'ankure ave'ave trazana mago vahe'mo'a azantetira azeriga osu'ne. <sup>7</sup> Hianagi ana ave'ave trazama avako'ma hanimo'a, aeniretiro azotareti rezanefino eri atru huteno, tevefina kre fanane hugahie.

### *Devitina hanave sondia vahe'amokizmi zamagima krente'naza naneke*

<sup>8</sup> Hagi ama'i Devitina harafa sondia vahe'amokizmi zamagi'e, Joseb Base-beti'a Takemoni nagapinti neokino 3'a sondia vahe'mokizmi kvazmi mani'ne. Hagi mago hapina agra 800'a ha' vahe'a kevenura zamahe fri'ne. <sup>9</sup> Ana 3'a sondia vahe'mokizmi zamefira anante kvama mani'neana, Eliesakino, agra Ahohi nagapinti ne' Dodo nemofo neokino, mago kna Filistia vahe'ene Israeli vahe'enena hara hu'za nehazageno, Israeli vahe'mo'za koro atre'za nefrageno, agra ana zupa Deviti'ene oti'neno hara hu'ne. <sup>10</sup> Hagi Filisti'a vahera hara hunezmantegeno azamo'a karakino bainati kazinte azeri antarako hu'ne. Hagi ana zupa Ra Anumzamo'a ra hanave amigeno hara Filistia vahera huzamagatere'ne. Hagi koroma fre'naza Israeli sondia vahe'mo'za ete e'za, zamahege'za fri'naza Filistia sondia vahe'mokizmi fenozana eme zogi'naze. <sup>11</sup> Hagi mago sondia kva nera Harariti ne' Age nemofo Samakino, mago zupa Filistia vahe'mo'za sondia vahezmi Lehie nehazafi zamazeri atru hu'naze. Hagi anama zamazeri atru hu'nafina tusi'a lentoli kohe hoza me'ne. Hagi anama hazage'za Israeli vahe'mo'za atre'za Filistia vahe'mokizmi koro fre'naze. <sup>12</sup> Hianagi Sama'a ana hozamofo amu'nompi oti'neno hara huno Filistia vahera zamahe'ne. Hagi ana zupa Ra Anumzamo zamaza higeno, tusi'a hara agetere'ne. <sup>13</sup> Hagi ne'zama vasage knafina 30'a hanavenentake sondia vahepinti 3'a kva vahe'mo'za Devitima mani'nerega Adulamu havegama me'nerega vu'naze. Hagi Filistia sondia vahe'mo'za Refaimi agupofi seli nona ki'za mani'naze. <sup>14</sup> Hagi Betlehemu kumara Filistia ha vahe'mo'za eriza mani'nazageno, Deviti'a frakino havegampi mani'ne. <sup>15</sup> Hagi Deviti'a anampinka frakino mani'negeno tinkura tussiza huno avesigeno amanage huno hu'ne, Betlehemu kuma'mofo khantetii mago'a vahemo tina afino eme namige'na nosina knare hisine! <sup>16</sup> Hige'za 3'a hanave sondia vahe'mo'za oku'a kafona ante'za nevu'za Filistia vahera ha'huzamante'za vu'za, Betlehemu ku'ma kegina tva'onteti tina ome afi'za e'naze. Ana tima afi'za eri'za Devitinte'ma ageno'a, agra ana tina oneno,

erino Ra Anumzamofontega ofa huno mopafi tagitre'ne. <sup>17</sup> Ana nehuno amanage hu'ne, Ra Anumzamoka ama timo'a, frizankura ontahiza tima ome afi'za e'naza vahe'mokizmi korankna hu'neankina onegahue. Anage nehuno Deviti'a ana tina onene. Hagi e'ina hu'za vahe'mo'zama osugazana, 3'a sondia vahe'mo'za hu'naze.

<sup>18</sup> Hagi Zerua'e nehaza a'mo'a Joapune Abisaine kasezanante'neankino, Joapu nefu Abisai ana 30'a sondia vahe'mokizmi kva'zimia mani'ne. Mago ha'pina agra 300'a ha' vahe keve'anura zamahe fri'ne. Hagi agri agi agenkemo'a ana 3'a vahe'mokizmi zamarinena magokna hu'ne. <sup>19</sup> Hagi ana 30'a vahepina agra ugota huzmanteno rankva mani'ne. Hianagi ana 3'a vahepina agrira ohampri'naze. <sup>20</sup> Hagi Jehoiada nemofo Benaia'a agra Kabziri kumateti kore osu rama'a zupa hanavetino ha' nehia nere. Hagi agra Moapu sondia vahepi vugota hu'na'a netre nezanaheno, hampo ko' atuno krari'nea knafi kerifi uramino raioni ahe'ne. <sup>21</sup> Hagi agra mago zupa Isipi ha' nera marerisa ne' ahe fri'ne. Hagi ana Isipi nera vimago knonu aheno keve'a hanareno, ana kevenu ahe fri'ne. <sup>22</sup> Hagi ama'nazana Johoda nemofo Benaia hu'nea zamo agimo'a 3'a sondia vahe'mokizmi zamagimo'ma hu'neaza huno magozahukna hu'ne. <sup>23</sup> Hagi 30'a sondia vahep-intira agri agimo'a marerine. Hianagi agrira 3'a nagapina avre onte'naze. Hagi Deviti'a agra'a avufgare kegava hania ne' avrente'ne. <sup>24</sup> Hagi ama'i 30'a vahe'mokizmi zamagima krente'nazana ama'ne, Joapu nefu Asaheliki, Betlehemu kumateti Dodo nemofo, Elhaniki, <sup>25</sup> Harodi kumateti netrena Samake Elikake, <sup>26</sup> hagi Heresi'a Palti kumateti ne'ki, Ikesi nemofo Ira'a Tekoa kumateti neki, <sup>27</sup> Abiezeri'a Anatoti kumateti neki, Mebunaia Husatati kumateti nere. <sup>28</sup> Hagi Zalmoni'a Ahohaiti kumateti neki, Mahalai'a Netofa kumateti nere. <sup>29</sup> Helebi'a Ba'ana nemofokino Netofa kumateti neki, Itaia'a Ribai nemofokino, Benzameni nagapinti nere. <sup>30</sup> Hagi Benaia'a Piratoni kumateti neki, Hidai'a Gasi agona krahopinti nere. <sup>31</sup> Abialboni'a Arapu kumateti neki, Azmaveti'a Bahurimi kumateti nere. <sup>32</sup> Hagi Eliaba'a Salboni kumateti neki, Jaseni mofavrezagagi, Jonataniki, <sup>33</sup> Harari kumateti ne' Sara nemofo Ahiamuki, <sup>34</sup> Makati kumateti Ahasbai nemofo Eliferetiki, Giloni kumateti ne' Ahitoferi nemofo Eliamuki, <sup>35</sup> Kameri kumateti ne' Hezroki, Arba kumateti ne' Paraie. <sup>36</sup> Zoba kumateti ne' Natani nemofo'e Igaliki, Gati kumateti ne' Baniki, <sup>37</sup> Amoni kumateti ne' Zelekiki, Beroti kumateti ne' Neharaikino agra Zerua nemofo Joapu hanko'a reheneria neki, <sup>38</sup> Itri kumateti netrena Irake Garepikegi, <sup>39</sup> Hiti kumateti ne' Uriaki hu'za maka 37ni'a sondia vahe mani'naze.

## 24

### *Deviti'a Israeli vahe'ene Juda vahe'enema hampri'nea naneke*

<sup>1</sup> Hagi mago'ane Ra Anumzamo'a Israeli vhahera arimpa ahenezaman-teno, Devitina antahintahi amino Israeli vahe'ene Judia vhahera nama'a mani'nafi ome hamprio hu'ne. <sup>2</sup> Higeno kini ne'mo'a sondia vahete kva ne Joapuna hunteno, kagra ana mika Israeli naga'mokizmi nompi vunka noti kaziga Dani kumateti eri agafa hutenga, saoti kaziga Berseba kumate vunka vhahera hamprige'na nama'a vhahera mani'nazafi ke'na antahi'na ha'neno. <sup>3</sup> Hianagi Joapu'a kenona huno, Kini ne'moka nagri'ma navesiana Ra Anumzankamo'a vhahera zamazeri rama'a hanige'za 100'a zupa rama'a hu'za amama mani'nazaza hu'za fore hanaze. Hagi anazama fore'ma haniazana kagra kasefa hunka mani'nenankeno fore huzanku nave'nesie.

Hagi na'a agafare amanahu zana kagra hu'za nehane? <sup>4</sup> Hianagi kini ne'mo'a ana ke'a refako huno onke ome hampriho hige'za Joapu'ene sondia vahe'mo'za vahe ome hamprinaku vu'naze. <sup>5</sup> Hagi zamagra Jodanitina takahē'za Aroeri kuma'mofo sauti kaziga agupofi seli no ome ki'za mani'ne'za Gati vu'za rugitagi'za Jazeri vu'naze. <sup>6</sup> Hagi zamagra Giliati vute'za anantetira Hiti vahe mopafi Kadesi vu'za Dani ehanatite'za, Danitira rugagi'za Saidoni vu'naze. <sup>7</sup> Anantetira rukrahe hu'za vihuma me'nea kumate Hirvine Kenani kumate ete'za, henka sauti kaziga Judane Bersibanena vu'naze. <sup>8</sup> Hagi 9ni'a ikanki, 20'a zage knafi maka kaziga vano huza vhahera hamprite'za ete Jerusalemi vu'naze. <sup>9</sup> Hagi Joapu'a anama ome hampri'nea vahe'mokizmi kea Devitina asamino, Kazinteti'ma ha'ma huga vhahera 800 tauseni'a Israeli vahepin manizageno, 500 tauseni'a vahe Juda nagapina mani'naze. <sup>10</sup> Hagi Deviti'a vahe'ma hamprite'noa arimpagna hu'ne. Ana huteno Ra Anumzamofona antahigeno, Nagra vahe'ma hampruana tusi'a kumi hu'noe. Hagi eri'za vahekamo'na nagra neginagi navu'nava hu'noanki kumini'a eri atrenanto. <sup>11</sup> Hagi Deviti'a masenefinti anante nanterana otigeno, Ra Anumzamo'a Deviti kasnampa ne Gatinte eno, anage huno kea atrenteno, <sup>12</sup> Ra Anumzamo'a amanage hie hunka Devitina ome asamio, Kazeri havizama hanua kea 3'a kankamumpi kasamiga huanki, anampinti mago'mofo huhamprike'na kazeri havizana ha'neno. <sup>13</sup> Anage huno asamigeno Gati'a Devitina ome asamino, 7'a kafufi agatonto kna fore haniegū kavesifi? 3'a ikampi ha' vahe'mo'za ha'huramanteno kna tamisifi, 3'a zageknafi kria atrenugenotamazeri haviza haniegū kavenesie? Hagi e'i anampinti mago knazamofo huhamprigena, anama hanamofo Ra Anumzamofona ome asamigahue. <sup>14</sup> Hagi Deviti'a Gatina asamino, nagra tusi'a narimpagna huanki, Ra Anumzana asunku Anumza mani'neanki atregeno nazano hunaku'ma hanuno'a, agra'a tazeri havizana hino. Hagi ha' vahe'mokizmi zamazampina tavarente'na tazeri havizana osiho. <sup>15</sup> Hagi Ra Anumzamo'a ana nanterana tusi'a hazenke atregeno 3'a zage knafi noti kaziga Daniti agafa huteno, vuno sauti kaziga Berseba vigeno ana maka mopafina 70 tauseni'a vahe zamahe fri vagare'ne. <sup>16</sup> Hagi vahe'ma zamahe fri ankeromo'ma Jerusalemi kuma'ma erihaviza hunaku retro nehigeno, Ra Anumzamo'a asunku nehuno, antahi'zama'a eri rukrahe huno, ana ankeroa asamino, kazana atro huno hu'ne. Ana zupa ko ankeromo'a Jerusalemi tavaonte Jebusi ne' Araunama witi akruma neharere mani'negeno anage hu'ne. <sup>17</sup> Hagi Devitima ankeromo'ma vahe'ma nezamahegeno negeno'a, anage huno Ra Anumzamofona asami'ne, Nagra'a kumira hu'na havi navunavara hu'noe. Hianagi ama'na vahe'mo'za sipisipigna huza kezmia omne'neanki nankna hazenke hu'nazagenka zamahe'za nehane? Muse hugantoanki nagri'ene nagani'ane tazeri haviza huo. <sup>18</sup> Ana higeno Gati'a ana kna zupa Devitinte eno anage huno asami'ne, marerinka Jebusi ne'ma Arauna'ma witi akru'ma neharere Ra Anumzamofo kresramnavu ita ome retro huo. <sup>19</sup> Anage higeno, Ra Anumzamo'ma Gati'ma asamia kante anteno anaza ome retro hunaku, Deviti'a marerino vu'ne. <sup>20</sup> Hagi Arauna'ma kegeno kini ne'mo'ene vahe'amozama agrama mani'neregama azageno'a, Arauna'a uramino kini ne'mofo avuga avugosaregati mopafi upri huno ra agi ami'ne. <sup>21</sup> Ana huteno Arauna'a anage hu'ne, na'a higenka rana kini nemoka eri'za vaheka'monarega neane? Higeno Deviti'a kenona huno, witi akaru'ma neharana mopa mizasena Ra Anumzamofontega Kresramanavu ita tro hanugeno, amama zamazeri haviza Nehia hazenkea omnegahie.

<sup>22</sup> Anante anage huno Arauna'a Devitina asami'ne, ranimoka amne ama ana mopa erinka kagrama antahinankeno knare'ma haniazana hugahane. Hagi kresramna vu zana kaona megeno, rezahema huza witima refuzafunepaza zafane, kaomofo anankempima nentaza karenamare zafanena erinka tevea kregahane. <sup>23</sup> Hagi kini ne'moka ama mika zantamina nagra negamue, nehuno Arauna'a mago'ane anage huno kini nekura hu'ne, Ra Anumzana, kagri Anumzamo'a kagrama hanana ofarera muse nehuno antahigamisie. <sup>24</sup> Hianagi kini ne'mo'a anage huno Araunana asami'ne, Nagra mizasena kagripintira erigahue. Hagi miza ose'nenua mopafina Ra Anumzana nagri Anumzamofona kre fanene hu ofa amnea huontegahue. Anage nehuno Deviti'a witima neharea mopane bulimakaonena 50'a silva zagoreti mizase'ne. <sup>25</sup> Ana huteno Deviti'a anante kresramna vu ita tro huteno, kre fanene hu ofane, rimpia fru ofanena hu'ne. Ana higeno Ra Anumzamo'a nunamuzmia nentahino, ana mopafintira knazana eri amne hu'ne.

## 1Kin Nampa 1 Kinie

### *Deviti'ma ozafarefinka hu'nea avu'avazamofo naneke*

<sup>1</sup> Kini ne' Deviti'ma ozafa regeno avufamo'a tusi zasi higeno, rama'a franke eri'za eme kofinte'nazanagi, ana franketamimo'a azeri amuhoa osu'ne. <sup>2</sup> Ana'ma higeno'a eri'za vahe'amo'za amanage hu'za asami'naze, Vene omase'nesia mofa avreta esunkeno kegava huneganteno, kasumpina mase'neno kazeri amuho hanie. <sup>3</sup> Anage nehu'za Israeli mopamofona mika kaziga knare mofa'nema kesagu hake'za vano hu'naze. Hagi Abisagi'e nehaza mofa Sunemi kumate ome before hute'za, avre'za kini nete e'naze. <sup>4</sup> Hagi ana mofara hentofa mofakino, kini nera kegava hunte'neanagi, kini ne'mo'a ana mofara monko'zana huonte'ne.

### *Adoniza'a kini mani'naku hu'nea naneke*

<sup>5</sup> Hagi ana knafina Deviti nemofo Adoniza'a Hagiti'e nehia a'mo kasente'nea mofavremo kini mani'nakure huno agra'a erintesga nehuno, karisiramine hosi afu agumpima vanoma nehaza vahe'ene, 50'a vahe'enena ugotama hunte'za kvama huntesagu zamazeri retro hu'ne. <sup>6</sup> Hagi Kini ne' Deviti'a magore huno Adoniza'ma havizama nehigeno'a azeri fatgohou kea huno, Nagafare ama zana nehane huno antahi onke'ne. Hagi Adoniza agi'agonamo'a fana ohesa nekino, Absalomu kasenteteno, ana amefi'a kasente'nea ne' mani'ne. <sup>7</sup> Hagi Adoniza'a azama hanakeno'ma kinima mani'sigura, Zerua nemofo Joapune, pristi ne' Abiatanena oku'a nanekea retro hute'za Adonizana nevaririke aza hu'na'e. <sup>8</sup> Hianagi pristi ne' Zadoki'ma, Jehoiada nemofo Benai'ma, profeti ne' Neteni'ma, Simeima, Reima, Deviti avuvgare kva nehaza sondia vahe'mo'zanena Adonizana aza osu'ne. <sup>9</sup> Hagi En-Rogeli nehaza tinkenare Zoheletie nehaza havere Adoniza'a sipisipi afu'tamine, ve bulimakao afutamine, afovage bulimakao afu anentataminena aheno kre sramana nevuno, afu'aganahe'ine, Deviti mofavreramine, maka Juda kumate kva vahetamine, kini ne'mofo eri'zama e'neriza vahetaminena kehige'za omeritrur hu'naze. <sup>10</sup> Hianagi kasnampa ne' Neteni'ma Benaimama, kini ne'mofo avuvgare kva vahe'ma, nefu Solomoninena kea hige'za anama Kresramanama virera ome'naze.

<sup>11</sup> Hagi Adoniza'a ana'ma nehigeno'a, Neteni'a Solomoni nerera Batsebante vuno amanage huno ome antahige'ne? Hagiti nemofo Adoniza'a kinima mani'neana, rantimo Deviti'a antahigeno, kagranena antahinano? <sup>12</sup> E'ina hu'negu menina nagrama kasaminua ke'ma antahinka amagema antesunka, kagra kagu nevazinka negamofo ne' Solomoninena agu'vazigahane. <sup>13</sup> Hagi Kini ne' Devitinte ame hunka vunka amanage hunka ome asamio, ranimoka kini nera kagra ko huvempa hunka amanage hu'nane, negamofo Solomoni nagrama frisugeno'a kinia manineno kini trairerira manigahie hunka hu'nane. Hagi nahigeno menina Adoniza'a kinia fore nehie? <sup>14</sup> Hagi anagema hunka kini ne'ma nesaminanke'na, nagra kamefi efre'na, ana nanekeka'a eri hankaveti kea hugahue. <sup>15</sup> Hagi anagema higeno'a Batseba'a kini ne'mo'ma nemasefinka umarerri'ne. (Hagi kini ne'mo'a ozafaregeno Sunemu kumateti a'mo Abisaki kegava hunte'ne.) <sup>16</sup> Hagi Batseba'a umarerino kini ne'mofo avuga avugosaregati

umase'ne. Anama higeno'a kini ne'mo'a amanage huno antahigene, Na'anku kavenesie? <sup>17</sup> Anagema higeno'a Batseba'a amanage huno kenona hu'ne, ranimoka kagra Ra Anumzana Anumzanka'amofo avufi ko huvempa hunka amanage hu'nane, Negamofo Solomoni kinia mani'neno, kini tra'nirera manigahie hunka hu'nane. <sup>18</sup> Hianagi antahio, menina Adoniza'a ko' kinia fore huno mani'negenka, ranimoka kagra ontahinane. <sup>19</sup> Hagi agra ko rama'a bulimakao afutamine, afovage bulimakao anentatamine, sipisipi afutaminena aheno kre sramana nevuno, maka kini ne'moka mofavreramine, pristi ne' Abiatane, sondia vahe'mofo ugagota kva ne' Joapunena zamagia hige'za anampina ne'zana ome nene'za musena nehaze. Hianagi eri'za neka'a Solomonina agia osu'ne. <sup>20</sup> Hagi menina kini ne' ranimoka antahio, iza kinia azeri otisankeno kagri nona erigahie hu'za nehu'za, maka Israeli vahe'mo'za kagri kavufi kete'za mani'naze. <sup>21</sup> Hagi menima kagrama ana'ma osu'enka frisankeno'a nenamofo Solomonine nagri'enena kumazafa vahekna hu'za tahe frigahaze. <sup>22</sup> Hagi Batseba'ma ana nanekema zahufama nesamigeno'a kasnampa ne' Neteni'a kini ne'ma nemasefinka efre'ne. <sup>23</sup> Hagi Neteni'ma efregeno'a eri'za ne'mo'a kini nera asamino, Kasnampa ne' Neteni'a kagenaku ama'na ne-e huno asamigeno, Neteni'a eazamo kini ne'mofo avuga avugosaregati enemaseno, <sup>24</sup> amanage hu'ne, Rania kini ne'moka, kagra hunka kini trairera Adoniza kinia manigahie hunka hu'nano? <sup>25</sup> Na'ankure Adoniza menina uramino ve bulimakao afutamine, afovage bulimakao anentatamine, sipisipi afutaminena rama'a aheno kresramana nevuno, kini ne'moka mofavreramine pristi ne' Abiatane, sondia vahe'mofo ugagota kva ne' Joapunena kehige'za avuga umanine'za ne'zane tinena nene'za zazakna kini manino vugahie hu'za nehaze. <sup>26</sup> Hianagi nagri'ene, pristi ne' Zadokine, Jehoiada nemofo Benaiane, eri'za neka'a Solomoninenen tagia osu'ne. <sup>27</sup> Hagi kini ne' ranimoka kagra hankeno ama'na zana fore hu'neo? Hagi nahigenka eri'za vaheka'amota kagri noma erino kini traka'are'ma kinima manisia vahera ontasami'nane. <sup>28</sup> Anagema higeno'a kini ne, Deviti'a amanage hu'ne, Batsebana kehinkeno eno, higeno ke hazageno eazamo kini ne'mofo avuga eme otigeno, <sup>29</sup> kini ne'mo'a huno, Kasefa huno mani'nea Ra Anumzamo'ma mika hazenke zampinti'ma nagu'ma vazi'nea Anumzamofo agifi huvempa huankino, Solomoni kinia manigahie. <sup>30</sup> Hagi ko'ma Ra Anumzana Israeli vahe Anumzamofo agifima huvempama hu'noa kante anteno, menina negamofo Solomoni nagri nona erino kini trairera kinia manigahie. <sup>31</sup> Hagi Deviti'ma anagema higeno'a, Batseba'a avugosaregati kini ne'mofo avuga nemaseno amanage hu'ne, Kini ne' ranimo Deviti'a manivava hanie. <sup>32</sup> Hagi Deviti'a eri'za vahe'a amanage huno zamasami'ne, Vuta pristi ne' Zadokine, kasnampa ne' Netenine, Jehodaia nemofo Benaiyanena kehinke'za echo, hige'za ome ke hazage'za avuga e'za eme ot'i'zane. <sup>33</sup> Anama eoti'zageno'a amanage huno zamasami'ne, Eri'za ne'n'i'a Solomonina nagri miulie donki afu' agumpi ome avrenteta avreta Gihoni tintega uramiho. <sup>34</sup> Hagi e'i anantega pristi ne' Zadoki'ene, kasnampa ne' Netenikea masavena Solomoni anumpina tagintekte, Israeli vahe kinia azeri ot'i'o. Hagi e'ina'ma hute'nigeta ufena nereta amanage hiho. Kini ne' Solomoni'a zaza kna kinia manivava hugahie huta hiho. <sup>35</sup> Hagi tamagra avaririta amefi ne-enkeno eno nagri kini tratera emanino. Na'ankure nagra agri huhampri'noankino kini mani'neno Israeli

vahe'ene Juda vhahera kegava hugahie hu'na hu'noe. <sup>36</sup> Hagi anagema higeno'a Benai'a amanage huno kenona kini nera hunte'ne, Tamage! Ra Anumzana rani kini ne'mofa Anumzamo'a ke'ma hiazana hugahie. <sup>37</sup> Hagi ranimoka kini ne' Devitiganema Ra Anumzamo'ma mani'neaza huno Solomon'i'enena mani'neno aza nehinkeno, kagrira kagatereno agi'amo'a agatererfa kini ne' manigahie. <sup>38</sup> Hagi anagema hutegen'o'a pristi ne' Zadokiki, kasnampa ne' Neteniki, Jehodaia nemofo Benaiaki, kini ne' kva netre Kereti'ene Peretiki hu'za Solomonina Kini ne' Deviti miuli donki afu agumpi avrente'za Gihoni tinte vu'naze. <sup>39</sup> Hagi anante pristi ne' Zadoki'a seli mono nompinti pazivepima ante'naza olivi masave erino Solomoni anumpi taginteno kini azeri otige'za, maka vahetmimo'za ufe nere'za anage hu'naze, kini ne' Solomoni'a zazate kinia mani vava hugahie! <sup>40</sup> Hagi maka vahe'mo'za konke nere'za mopamo'a tore huga kante ante'za tusi avoge hu'za zahamera nehu'za, musena hu'za Solomonina avaririza mareri'naze.

<sup>41</sup> Hagi Adonizama kema hige'za ne'zama nene'za musema hunaku'ma enaza, vahe'mo'za ne'zama ne'za musema huvagama nere'za Solomoni naga'mo'zama musema nehu'zama hazama'a antahi'naze. Hagi Joapu'ma ufenkrafama nentahino'a, amanage hu'ne, na'a nehu'za Jerusalemi rankumapintira rankea nehu'za ke hakarea nehaze? huno zamantahige'ne. <sup>42</sup> Hagi Joapu'a zahufa anankea huvaga ore'negeno, Abiata nemofo pristi ne' Jonatani'a uhanati'ne. Hagi anama uhanatigeno'a Adoniza'a amanage hu'ne, Kagra so'e ne' mani'nenga knare musenka erinka neananki emarerio.

<sup>43</sup> Hianagi Jonatani'a amanage huno Adoniza kenona hu'ne, I'o, rantimo kini ne' Deviti'a Solomoni kinia azeri oti'ne! <sup>44</sup> Hagi pristi ne' Zadoki'ma, kasnampa ne' Neteni'ma, Jehoiada nemofo Benai'a ma kini nete kva netrene Kereti vahe'ene Pereti vhahera Deviti'a huzmantenge'za miuli donki afu'amofo agumpi Solomonina avrente'aze. <sup>45</sup> Hagi pristi ne' Zadoki'ene, kasnampa ne' Netenikea Gihoni tinte Solomonina masavema asenifi taginteko kinia azeri oti'nake'za vahetmimo'za musena hu'za avoa nehage'za Jerusalemi rankumapina azageno, rankumapima mani'naza vahe'mo'zanena musena nehu'za avoa nehagaza agasasanke kagra nentahine. <sup>46</sup> Ana nehazageno menina Solomoni'a kini trate mani'ne. <sup>47</sup> Hagi ana'ma higeno'a kini ne' Deviti eri'za vahe'mo'za avuga vu'za humusena hunte'za amanage hu'naze, Anumzanka'amo'a Solomonina azahanigeno agi'amo'ene hankave'amo'enena kagrira agatereno marerisie. Anage hazageno kini ne' Deviti'a tafe'are mani'neno kepri huno Anumzamofona ra agi ami'ne.

<sup>48</sup> Anagema hazageno'a kini ne'mo'enena amanage hu'ne, Ra Anumzana Israeli vahe Anumzamo'a ragi erigahie. Na'ankure menina Agra mago vahe azeri otigeno kini tranirera manige'na nagra navufinti koe huno hu'ne. <sup>49</sup> Hagi Adonizama zamagi hige'za emani'neza ne'zama nenaza vahe'mo'za Jonatani'ma hiankema nentahi'za, zamagogofege'za panani hu'za fre'naze. <sup>50</sup> Hagi Adoniza'a Solomoninkura tusi kore nehuno, freno ruotge'ma hu'nea seli mono no kumapi vuno kre sramnamavu itamofo pazivete ome azeriteno mani'ne. <sup>51</sup> Hagi Solomonina ome asamiza amanage hu'naze, Adoniza'a kagrikura tusi koro hu'ne. Na'ankure agra kre sramnavu itamofo pazivete anukineno amanage nehie, Atrenkeno kini ne' Solomoni'a huvempa huno ese'zana nagrikura eri'za vahe'amo'na bainati kazintetira ahe ofrigahue huno hino. <sup>52</sup> Hagi Solomoni'a amanage hu'ne, agrama knare ne'ma mani'enigeno'a, magore huno avufgarera hazenkezana ometfa hugahie. Hianagi agrama hazenke ne'ma maninesuno'a frigahie. <sup>53</sup> Anage nehuno Solomoni'a vahe huzamantenge'za Adonizana kre sramnamavu

itama anukino mani'neretira ome avrefenka atre'za azageno, avugosaregati emasegeno, Solomoni'a amanage hu'ne, nonka'arega vuo.

## 2

### *Deviti'a Solomoni avumro ante'nea naneke*

<sup>1</sup> Hagi Devitima fri kna'amo'ma egoftama nehigeno'a, amanage huno nemofo Solomonina asami'ne, <sup>2</sup> Kofta hu'na nagra frigahue. Hagi ve mofavremo'ma nehiaza hunka oti hanavetinenka, <sup>3</sup> Ra Anumzana kagri Anumzamo'ma huoma hania zana nehunka, maka avu'ava'a avaririo. Hagi Mosese avontafepima krente'nea tra ke'ane, kasege'anema kegava hunka avaririsankeno'a, maka zama banana zamo'ene, kama vanana kamo'a knare hugahie. <sup>4</sup> Hagi ana'ma hananken'o Ra Anumzamo'ma huhamprinante'nea kemo'a nena raga regahie. Agra amanage huno hu'ne, Ne' mofavreka'amo'zama vahe'ma maniga kante nemaniza, maka zupa kazigazi hu'za miko tumozimireti'ene, zamagu zamenteti'ma hu'za navaririsazana Israeli vahete'ma kinima mani vahekura ohakegosazanki, kagri mofavre nagapinti mago zimimo kinia otitere hugahie huno nasami'ne.

<sup>5</sup> Hagi Zeruia nemofo Joapu'ma hunante'nea avu'avazamofo kea antahi'nane. Agra tare Israeli sondia kva netrena, Neri nemofo Abnane, Jeta nemofo Amasakigiznia zanahe fri'ne. Hagi anama zanahe'neana hapina ozanahe'neanki, fru hu'ne amne mani'na'a knafi zanaheno korazan'i'a eri tagi'nea koramo'a amu'nofifone agia anomofonte me'ne. <sup>6</sup> Hagi kagra knare antahintahika'a avaririnka e'ina zantera nona hunto. Hagi atregeno amanea mani'neno ozafa reno rimpfa frunena ofrino. <sup>7</sup> Hagi Giliati ne' Basilai ne'mofavreramina zamatrege'za kagranema nezama ne-naza traka'areti'ma nenaza naga'ene neho. Na'ankure negafu Absalomkuma koro'ma fre'na nevugen'o'a, zamagra knare zamavu'zamava na-grira hunante'naze. <sup>8</sup> Hagi Bahurimi kumateti Benzameni nagapinti ne' Gera nemofo Simeinkura kagera okanio. Agra Mahanaimi kumate'ma ne-vugen'o'a kazusi ke hunanteno nazeri haviza hu'ne. Hianagi Jodani tinte'ma eme nege'na Ra Anumzamofo avufi huvempa hunte'na amanage hu'noe, Kahe ofrigosue hu'na hu'noe. <sup>9</sup> Hianagi atregeno e'ina kemo'a hazenke'a erifrara okino. Hagi kagra knare antahintahika'a avaririnka e'ina zantera nona hunto. Hanki atregeno amanea mani'neno ozafa reno ofri'nianki, ahenga korama'a eri tagigeno frino.

### *Deviti'mafri'nea zamofo naneke*

<sup>10</sup> Hagi anante Deviti'a frige'za agri rankumapi Jerusalemi asente'naze. <sup>11</sup> Hagi Deviti'a 40'a kafufi kinia mani'neno, Israeli vahera kegava hu'ne. Hagi ana 40'a kafuma mani'nefina 7ni'a kafua Hebron maniteno, 33'a kafua Jerusalemi umani'ne. <sup>12</sup> Hagi anama higeno'a Solomoni'a nefu nona erino Deviti kini tratera kinia mani'ne. Hagi Solomoni'a hankave kini ne' fore huno hanavenentake higeno magozamo'a azeri atregara osu'ne. <sup>13</sup> Mago zupa Hagiti ne'mofo Adoniza'a Solomoni nerera Batseba kenaku e'ne. Hagi anama egeno'a, Batseba'a amanage huno antahige'ne. Kagra knare kazigati ampi? huno higeno, Adoniza'a amanage huno kenona hu'ne, Knare naneke kasaminaku oe nehuno, <sup>14</sup> amanage hu'ne, Nagra mago'a ke kasaminaku e'noe, higeno Batseba'a amanage hu'ne, Huge'na antahi'neno huno hu'ne. <sup>15</sup> Higeno Adoniza'a amanage hu'ne, Kagra antahi'nane, esera mika Israeli vahe mo'za nagrikru kini manigahie hu'za hu'naze. Hianagi ana kini tramo'a ete nenafu azampi vigeno, nenagna kinia manie. Na'ankure

ko Ra Anumzamo agri huhamprinte'ne. <sup>16</sup> Hanki nagra menina magoke zanku kantahigegahue. Muse hugantoanki ama ana keni'a antahinamio, higeno Batseba'a amanage huno hu'ne, Hugena antahineno huno hu'ne. <sup>17</sup> Anagema higeno'a Adoniza'a amanage huno asami'ne, Muse hugantoanki kini ne' Solomonina antahigegeno, Sunamiti a' Abisakina naminkena a' eri'neno. Na'ankure kagrama hananankea antahigahie. <sup>18</sup> Higeno Batseba'a amanage huno asami'ne, Knareki'na kagri kea eri'na kini nera ome antahigegahue. <sup>19</sup> Anage nehuno Batseba'a Adoniza agi erino Solomonina ome antahigenaku vu'ne. Hagi kini ne' Solomoni'ma Batsebama negeno'a, otino arena reno kepri nehuno, eri'za vahe'a kehige'za mago trara eri'za azantmaga kaziga eme antazageno, nerera'a ana trate mani'ne. <sup>20</sup> Hagi Batseba'a ana trate'ma maniteno'a amanage hu'ne, Nagra mago osi zanku kantahigegahue, hanki ana keni'a eri otreンka antahinamio. Anante kini ne'mo'a amanage hu'ne. Antanimoka amne nantahigo, na'ankure kagra antahi'nane, nagra keka'areru i'o hu'na osugahue. <sup>21</sup> Hanki Batseba'a amanage hu'ne, Atregeno negafu Adoniza'a Sunemiti ara a' avrenteno. <sup>22</sup> Anagema higeno'a kini ne' Solomoni'a amanage hu'ne, Nagafare Sunemiti ara Abisakina Adonizana amio hunka eme nantahinegane? E'ina'ma hunaku'ma hanunka fatgo hunka nantahigege'na atranenkeno nagri no erino kinia manino. Na'ankure agra nempuni'a manigeno agri kaziga pristi ne' Abiata'ene, Seruia nemofo Joapukea mani'na'e. <sup>23</sup> Anage nehuno Solomoni'a Ra Anumzamofo avufi amanage huno huvempagea hu'ne. Adoniza'ma amanahu ke'ma hire'ma ahe ofrisugen'o'a Anumzamo'a nagrira nahe frigahie! <sup>24</sup> E'ina hu'negu menina Ra Anumzamo'ma naza huno hankave naminege'na nenfa Deviti kini trate'ma nagri naga'ma huhampri'nea kante'ma ante'na kini tratera mani'ne'na mani vava Anumzamofo agifi huankino, Adoniza'a meninke frigahie. <sup>25</sup> Anage nehuno kini ne' Solomoni'a Jehoiada nemofo Benaia huntogeno vuno, Adonizana ome ahegeno fri'ne.

<sup>26</sup> Hagi kini ne'mo'a pristi ne' Abiatana amanage huno asami'ne, kagra ete mopakarega Anatoti vuo. Hianagi menina kagrira kahe ofrigahue. Na'ankure kagra nenfa Deviti'ene mani'enka Ra Anumzana hankavenentake Anumzamofo huhagerafi huvempage vogisi e'nerinka, nenfa'ma hazenke knafima mani'negenka aza hunka nenfa knazana eri'nane. <sup>27</sup> E'inage nehuno kini ne'mo'a Ra Anumzamo'ma Sailo kumate Eli naga'ma kasnampa ke huzamante'nea kante anteno Abiatana pristi eri'zama'afintira ahenati'ne.

### *Joapu'ma ahe fri'naza zamofo naneke*

<sup>28</sup> Hagi Joapu'a Absalomu'ma kinima mani'naku'ma nehigeno'a agri'enena tragoteno mani'neno aza osu'ne. Hianagi Adoniza'ma kinima mani'zama nehigeno'a, Adoniza'ene ome tragoteno mani'neno aza hu'ne. E'ina hu'neankino Adonizama ahaza nanekema nentahino'a, freno vuno ruotge seli mono nompi Ra Anumzamofo kre sramnavu itare'ma me'nea pazivetaminte ome azeriteno mani'ne. <sup>29</sup> Hagi kini ne' Solomonina ome asami'za amanage hu'naze, Joapu'a freno vuno Ra Anumzamofo seli mono no kumapi kre sramnavu itare'ma me'nea pazivete ome azerintrako huteno mani'ne. Hagi ana nanekema nentahino'a Solomoni'a Jehoiada nemofo Benaia hunteno, Joapuna ome ahegeno frino! <sup>30</sup> Anagema higeno'a Benaia'a Ra Anumzamofo seli nompi eazamo amanage huno Joapuna eme asami'ne, Kini ne'mo'a fegi atiramio huno hianki fegia atiramio. Hianagi Joapu'a amanage huno hu'ne, I'o nagra ama anante frigahue. Hagi

agrama hia nanekea erino vuno Joapu'a anage hie huno kini nera ome asami'ne. <sup>31</sup> Kini ne'mo'a amanage huno kenona hu'ne, Knareki agri ke avaririnka anante ome ahegeno frina asentegeno Joapu'ma hazenke'a omene vahe'ma zamahe'nea kanazamo'a tagritera omaneno. <sup>32</sup> Hagi hazenkezani omne netrema zanahe'nea zanter, Ra Anumzamo agrake Joapuna nona huntegahie. Na'ankure agra hazenkezni omne netre Israeli vahe sondia kva ne' Neri nemofo Abnane, Juda vahe sondia vahetaminte kva ne Jetari nemofo Amasanena nenfa'a keno antahino osu'negeno zanahe'ne. <sup>33</sup> E'ina hu'negu ana netremofo knazamo'a Joapunte'ene agripinti'ma forehu anante anante hu'zama vanaza vahepi mevava huno vugahie. Hianagi Devitinte'ene agripinti'ma forehu anante anante'ma hu'za vanaza vahe'en, naga'are'en, kini tra'are mani'za esaza vahetera maka zupa Ra Anumzamofo arimpa fruzamo mevava huno vanie. <sup>34</sup> Hagi anante Jehoiada nemofo Benaia'a vuno ruotge seli mono nompi Joapuna ome ahe frigeno, avufa'a eri'za hagege kokampi noma'afinka ome asente'naze. <sup>35</sup> Hagi ana nehuno kini ne'mo'a Joapu nontera Benaiana azeri otigeno sondia vahetera ugota kva manigeno, pristi ne' Abiata nontera, Zadoki azeri otigeno pristia mani'ne.

### *Simei ahe fri'naza naneke*

<sup>36</sup> Hagi anante kini ne'mo'a Simeintega amanage huno kea atrente'ne, kagra Jerusalemi nona ome kinka manio. Hianagi ana kumapintira atrenka rurega vunka enka osutfa huo. <sup>37</sup> Hanki ana kuma'ma atrenka Kidroni kraho'ma agaterenka nevanunka, nagra frigahue hunka kagesa antahio. Hagi anama hunka kagrama frisankeno'a, fri'nana knazamo'a kagrite megahie. <sup>38</sup> Hanki Simei'a amanage huno kini ne'mofo kerera hu'ne, kini nera nanekema refko'ma hunka ketenka hunantana kemo'a fatgo hi-anki'na rana kini nimokama hanankemofona, eri'za nekamo'na avaririgahue. Anage nehuno Simei'a zaza kna Jerusalemia mani'ne. <sup>39</sup> Hianagi 3'a kafuma enevigeno'a, Simei eri'za netremokea atrene freke Gati kini ne' Maka nemofo Akisi'ene Gati kumate umani'na'e. Hagi Simeina mago'a vahe'mo'za asami'za, Eri'za neka'araremokea freke Gati kumate umani'na'e huza asamizageno, <sup>40</sup> Simei'a tonki afu'a retro huteno agumpi marerino eri'za netrema'agu hakeno Gati kumate Akisinte vu'ne. Hagi ana eri'za netre'na ome zanageno, Gati kumatetira ete zanavreno e'ne. <sup>41</sup> Hagi Simei'ma Jerusalemima atreno Gatima vuteno eankema Solomoni'ma nentahino'a, <sup>42</sup> kini ne'mo'a amanage huno kea atrente'ne, Nagra Ra Anumzamofo avufi huvempa hu'na Jerusalemi kuma'ma atrenka ru kumate'ma vanunka frigahane hu'na hu'noe. Hagi anagema hugenka, kagra amanage hu'nane, kini nera nanekema refko'ma hunka ketenka hunantana kemo'a fatgo hi-anki'na ana kemofo avaririgahue hu'nane. <sup>43</sup> Hagi nahigenka Ra Anumzamofo avufima huvempama hunka avaririgahue hu'nana kea rutragenane? <sup>44</sup> Hagi kini ne'mo'a Simeinkura mago'an amanage hu'ne, kefo kavukava'ma nenfa Devitima hunte'nana zana kagra'a antahi'nane. E'ina hu'negu Ra Anumzamo'a ana knazamofo nona'a kagira kazeri haviza hugahie. <sup>45</sup> Hianagi Ra Anumzamo'a nagrira asomu hunante'nigeno, Ra Anumzamofo avurera Deviti kini tramo'a agripintima fore hunante anante'ma hu'za vanaza vahepi mevava huno vugahie. <sup>46</sup> Ana huteno Jehoiada nemofo Benaia huntogeno, Simeina ome ahe fri'ne.

Ana huteno Solomoni'a hankavenentake kini fore huno vahera kegava hu'ne.

## 3

*Solomoni'a knare antahi'zanku nunamu huno Anumzamofo antahige'nea zamofo naneke*

<sup>1</sup> Hagi Solomoni'a Isipi kini ne' Fero mofa'a ara erigeke, hara osuke mago zanarimpa huke manisaku kea huhagerafi'na'e. Hagi ana ara agra avreno Deviti rankumapi Jerusalemi ome ante'neno, nom'a'ane, Ra Anumzamofo none, Jerusalemi kumamofo vihunena trohu vagare'ne. <sup>2</sup> Hagi ana knafina Israeli agonaramintega mareri'za ofa ome Ra Anumzamofontega kresramna vu'naze. Na'ankure e'ina knafina Ra Anumzamofo agirera mono nona onki'nazage'za anara hu'naze. <sup>3</sup> Hagi Solomoni'a Ra Anumzamofona Deviti'ma hu'neaza huno avesinenteno trakea avaririneanagi, agonarega vuno Anumzamofontega ofa'a ome kresramna vu'ne.

<sup>4</sup> Hagi kini ne'mo'a Gibioni kumate ofa ome Kresramana vuku vu'ne. Na'ankure Gibioni agonaramimpina mareri agatereno agi me'nea kre sramnavu ita me'negeno vu'ne. Hagi e'i ana kre sramnavu itarera Solomoni'a 1tauseni'a bulimakaone sipisipi afuzaga tevefina kre fananehu ofa hu'ne. <sup>5</sup> Hagi Gibioni kumate Ra Anumzamo'a Solomonina ava'nafe before huno amanage huno asami'ne, Kavesinia zanku nantahigege'na kami'neno. <sup>6</sup> Higeno Solomoni'a amanage huno asami'ne, Kagri eri'za vaheka'a nenfa Devitina mevava kavesi'zanteti avesinte'nane. Na'ankure agra fatgo avu'ava nehuno tamage huno tumo'areti huno kavariri'ne. Hagi kagra vagaore kavesizanteti ne' mofavrea aminkeno menina agri nona erino kini tra'arerera mani'ne. <sup>7</sup> Hagi nagra osi mofavregi'na vahe'ma kegavama hu'zana ontahi'noanagi, menina Ra Anumzana nagri Anumzamoka eri'za neka'a kinia nazeri otinke'na nenfa Deviti nona eri'noe. <sup>8</sup> Hagi nagri vahere hunkama huhamprinana vahe amu'nompi menina nagra eri'za vahekamo'na mani'noe. Hagi e'i ana vahera rama'a vahekrerfa mani'nage'za, hamprigara osu'ne. <sup>9</sup> E'ina hu'negu muse hugantoanki vahe'ma kegavama hu knare antahi'za namige'na vahera kegava hu'ne'na havi zane knare zanena refko hu'na kegava ha'neno. Na'ankure nagra knarera osu'noanki'na ama vahekrerfa kegava osugahue.

<sup>10</sup> Hagi Solomoni'ma knare antahi'zanku'ma antahigegeno'a Ra Anumzamo'a tusi muse nehuno, <sup>11</sup> amanage huno asami'ne, Kagra kafuni'a erizaza huo hunka osuge, fenozankura nantahionkege, naza huge'na ha' vaheni'a zamaha'neno hunka osananki, knare antahi'za namineg'e'na havi zane knare zanena refko ha'neno hunka hananki'na, <sup>12</sup> menina Nagra kema hana kante ante'na knare antahi'zana kamigahue. Hagi havi zane knare'zane refkohu knare antahi'zana ko'ma mani'za e'naza vahe'mo'za e'orinazankna antahi'za kamisugeno, ete henka kagrikna antahintahine vahera forera osutfa hugahie. <sup>13</sup> Hagi nantahima onke'nana zana fenone, ra agima ami'zanena antegofetu hu'na kaminena, maninkama vanampina mago kini ne'mo'a kagateoregahie. <sup>14</sup> Hagi negafa'ma hu'neaza hunka Nagri navu'nava'ma nevaririnka, trake'n'i'ane kasege'n'i'anema kegavama hunka avaririsankena, kafuzageka'a eri za'za ha'nena zazate manigahane. <sup>15</sup> Higeno anante Solomoni'a mase'nefintira antri huno otino keana amne ava'na ke'ne. Hagi anantetira atreno Jerusalemi kumate vuno Ra Anumzamofo huhagerafi huvempage bogisimofo avuga kre fananehu ofane, rimpia fru ofanena ome nehuno, eri'za vahe'anena ra ne'za kreno ne'ne.

*Solomonia knare antahizama'areti savri atremokizni ke refko hu'nea naneke*

<sup>16</sup> Hagi mago zupa savri atremokea Solomoni avuga eoti'na'e. <sup>17</sup> Hagi mago a'mo'a otiazamo amanage hu'ne, ranimoka, ama a'ene nagranena mago nompi nemanu'ankita, ama a'mo'a magoka nompi mani'nege'na mofavrea kasente'noe. <sup>18</sup> Hagi 3'a zagegna evutegeno ama a'mo'a, mofavrea kasente'ne. Hagi ana nompina tagrake mani'noanki, mago vahera omanitfa hu'ne. <sup>19</sup> Hianagi agra kenage mase'neno, mase rukrahe hirega mofavre'a rehapatigeno fri'ne. <sup>20</sup> Ana'ma nehuno'a mase himamrenoama'a agra kenage otiazamo nagri mofavrea eme avreno asumpinka agra aminte ome nenteno, fri'nea mofavre'a avreno nagri nasumpinka aminte eme ante'ne. <sup>21</sup> Ana'ma hutege'na nanterama otina mofavreni'ama amima ami'za nehu'na koana, agra ko fri'ne. Hianagi ana mofavrema nanterama masama hige'na oti'na amima aminaku'ma koana, nagrama kasente'noa mofavrea omani'ne. <sup>22</sup> Hianagi mago a'mo'a ke'amofona anintaka huno amanage huno hu'ne, I'o mani'nea mofavrea nagri mofavregi, fri'nea mofavrea kagri mofavre. Anagema higeno'a, ese'ma nanekema hu'nea a'mo'a amanage hu'ne, I'o fri'nea mofavrea kagriki, mani'nea mofavrea nagri mofavre. Anage huke kini ne'mofo avuga fravazi'na'e.

<sup>23</sup> Hagi kini ne'mo'a amanage hu'ne, Tanagra huta nagri mofavremo kasefa huno mani'neanki, kagri mofavremo fri'ne, higeno, ete mago'mo'a huno, I'o kagri mofavremo fri'neanki, nagri mofavremo kasefa huno manine huta ha'e. <sup>24</sup> Ha knareki bainati kazi erinka eme namio, huno kini ne'mo'a eri'za ne'agura higeno, bainati kazina erino avuga egeno, <sup>25</sup> amanage hu'ne, Kasefa huno mani'nea mofavrea amu'hompinti rutanerare hunka mago kaziga magomofo aminka, magokaziga magomofo amio. <sup>26</sup> Anagema higeno'a ana mofavremofo nerera fatgo'amo'a tusiza huno avesi nenteankino amanage hu'ne, I'o ranimoka muse hugantoanki ohenka, agri amio huno hu'ne. Hianagi mago a'ma havigema nehia a'mo'a amanage hu'ne, Tamage hananki agri mofavrea omanige nagri mofavrea omanige hananki, rutnerare huramio huno hu'ne. <sup>27</sup> Hagi anante kini ne'mo'a amanage huno kenona hu'ne, Ese a'mo'ma ahe ofrita antu a' amiho huno'ma hia a'mo ana mofavremofona nerera fatgo mani'neanki ahe ofrita agri amiho. <sup>28</sup> Hagi kini ne'mo'ma knare'ma huno kema refko'ma hianke'ma maka Israeli vahe'mo'zama nentahi'za, kini nera koro hunte'naze. Na'ankure Anumzamofo knare antahizama me'negeno knare'ma huno nanekema refkoma hu'neazana zamagra ke'za antahiza hu'naze.

## 4

*Solomoni vugota eri'za vahetamimofo naneke*

<sup>1</sup> Hagi kini ne' Solomoni'a mika Israeli mopa kegava hu'ne. <sup>2</sup> Hagi vugota kva vahetamimofo zamagi'a amane, Zadoki nemofo Azaria pristi nera mani'ne. <sup>3</sup> Hagi Sisa nemofokea Erihorefike, Ahizakea mika zante'ma avoma kreke eri fatgohu eri'za netre'na mani'na'e. Hagi Ahiluti nemofo Jehosafat'i maka'zama kini ne'mo'ma hiazama avompima krenentea ne' mani'ne. <sup>4</sup> Hagi Jehoiada nemofo Benai'a sondia vahete vugagota huno kegava higeno, Zadoki'ene Abiatakea pristi eri'za netre mani'na'e. <sup>5</sup> Hagi Neteni nemofo Azaria'a kiapu vahete vugota huno kegava higeno, Netenina mago nemofo agi'a Zabudikino, agra pristi ne' mani'neno kini ne'mofona

knare antahintahia ami'ne. <sup>6</sup> Hagi kini ne'mofo nompima me'nea zantamima kegavama hu nera Ahisari manigeno, Abda nemofo Adoniram'a kazokazo eri'za vahetaminte kegava hu' nera mani'ne. <sup>7</sup> Hagi Solomoni'a 12fu'a kumapintira mago'mago kva vahe zamazeri otige'za maka Israeli vahera kegava hu'neza kini ne'mofone, naga'anena ne'zana eri'za eme zamitere hu'naze. Hagi ana 12fu'a vahepintira mago ikante ikantera mago'mo ne'zana erino kini ne'ene naga'anena eme zamitere hu'naze. <sup>8</sup> Hagi ana 12fu'a kva vahetmimofo zamagi'a ama'ne, Efraemi agona kukampi me'nea kumatera Ben-huri kegava higeno, <sup>9</sup> Makazi kuma'ma, Salbimi kuma'ma, Betsemesi kuma'ma, Elonbet-hanan kuma'enena Ben-dekeri kegava hu'ne. <sup>10</sup> Hagi Aruboti kuma'ene Soko kuma'enena Ben-heseti kegava nehuno, Sokoti kuma'ene maka Heferi mopanena agra kegava hu'ne. <sup>11</sup> Hagi Ben-abinadapu'a maka Nafat-dori mopa kegava nehuno, Solomoni mofa Tafati ara eri'ne. <sup>12</sup> Hagi Ahiludi nemofo Bana'a, Tanaki kuma'ene Megido kuma'ene kegava nehuno, Betsin mopane Zaretani kuma tavaonte'ma Jesrili kumamofo fenka kaziga me'nea mopa maka kegava nehuno, Betsani mopama Abel-mehola kumateti agafa huteno vuno Jokmeamuma vu'nea mopanena maka kegava hu'ne. <sup>13</sup> Hagi Ben-geberi'e nehaza ne'mo Ramot-gilead kuma'ene Gilietima me'nea kumara kegava higeno, Manase nagapinti ne' Jairi Manase nagara kegava hu'neno, Argobi kaziga Basani mopafina 60'a kuma'ma ranra vihummo megagigeno Bronsireti kafama hagente'nea kumatmina kegava hu'ne. <sup>14</sup> Hagi Ido nemofo Ahinadapu Mahanaimi kumara kegava hu'ne. <sup>15</sup> Hagi Ahimas'i'e nehaza ne'mo Naftali nagamofo kumara kegava hu'neno, (Solomoni mofa Basematina ara eri'ne.) <sup>16</sup> Husi nemofo Bana'a Asa nagamofo mopane, Bealoti kuma'enena kegava hu'ne. <sup>17</sup> Hagi Parua nemofo Jehosafati'a Isaka nagamofo mopa kegava hu'ne. <sup>18</sup> Hagi Ela nemofo Sime'i'a, Benzameni naga'mofo mopa kegava hu'ne. <sup>19</sup> Hagi Uri nemofo Gebari'a Giliati mopa kegava hu'neno, Amori vahe kini ne' Silioni mopane, Basani vahe kini ne' Ogi mopanena kegava hu'ne. Hagi ana mopa magoke kva ne'mo kegava hu'ne.

### *Fenozampine knare antahizampima Solomoni'ma knare huno ra hu'nea nanake*

<sup>20</sup> Hagi Juda vahe'ene, Israeli vahe'mo'zanena ra hu'za hageri ankenafi kasepankna hu'naze. Hagi ana vahe'mo'zane'zane tinena nene'za musena nehu'za mani so'e hu'naze. <sup>21</sup> Hagi Solomoni'ma kegavama hu'nea mopa, Yufretis tinteti vuno Filistia mopare vuteno, Isipi mopa atupare ome atre'ne. Hagi anampima nemaniza vahe'mo'za agri agorgia maka knafina mani'ne'za, takesi zagoa nemi'za, eri'zama'a erinte'naze. <sup>22</sup> Solomoni'ene agri nompima nemaniza vahe'mo'zama mago knamofo agu'afima nesaza ne'zama eri'za e'nazana, 30'a donki afumo'ma eriga avamente knare'ma huno kane witine, 60'a donki afumo'ma eriga avamente kane so'ema hu'nea witia eri'za e'naze. <sup>23</sup> Hanki witire'ma negriza bulimakao afutamina 10ni'agi, trazante'ma negriza bulimaka afutamina 20'agi, 100'a sipisipi afutamine ruzahu ruzahu dia afutamine, afovage kokoreramine avre'za e'naze. <sup>24</sup> Na'ankure Solomoni'a Yufretisi timofona zage fre kaziga Tifsa kumateti agafa huteno vuno, Gazama uhanati'nea mopane, ana mopamofo atumpama ome atre eme atrema hu'nerega ha'zana omanege'za fru hu'za mani'naze. <sup>25</sup> Hanki Solomoni'ma kinima manino vu'nea knafina,

maka Juda vahe'mo'zane Israeli vahe'mo'zanena ha'ma hu avu'ava zana omnege'za knare hu'za mani'naze. Hagi Dani mopareti'ma vuno, sauti kaziga Beseba kumate'ma uhanati'neana, wainine fiki zafaramina mago mago nagamofona metere hige'za ana zafamofo tonapi manitere hu'naze. <sup>26</sup> Solomoni'a karisima renteno avazuma huno vanoma nehia hosi afutamimofo nona 40ti tauiseni'a no kintegeno, hosi agumpima vano hu vhahera 12tauseni'a vahezaga mani'naze. <sup>27</sup> Hagi 12fu'a vugota kva vahe'ma zamazeri otia vahe'mo'za Kini ne' Solomoniine, maka agri nompinti'ma ne'zama nenaza vahetmimofo ne'zana mago mago ikantera eri'za etere hazage'za magore hu'za ne'zankura atupara osu'naze. <sup>28</sup> Hagi Kini ne'mofo hosi afutamine karisima rentenoma vanoma nehia hosi afutamimofo ne'zana baline, trazanena ana knareke eri'za eme zami'naze. <sup>29</sup> Hagi Anumzamo'a Solomonina rama'a knare antahi'zane, antahiamma'hu antahi'zanena amigeno, ana antahi'zamo'a hageri ankenafi kahepankna hu'ne. <sup>30</sup> Hagi tamage huno Solomoni knare antahi'zamo'a, maka knare antahi'zane vahe'ma zage hanati kazigane, Isipinema mani'naza vahe'mokizmi antahintahi'zana zamagatere'ne. <sup>31</sup> Na'ankure agri knare antahintahizamo'a maka vahe'mofo knare antahintahi'zana zamagatenereno, Ezra nagapinti ne' Maholi mofavreramina Etani'ma, Hemeni'ma, Kalkolima, Dadanima, Maholi amohe'mokizmi knare antahintahizanena zamagatere'ne. <sup>32</sup> Hagi Solomoni'a 3tauseni'a knare antahizamofonkea kreno, 1tausen 5fu'a zagamera kre'ne. <sup>33</sup> Hagi nanekema hu'neana ra zafa sida zafareti agafa huteno, vuno osi hisopu trazama have keginafintima nehagea trazante uhanati'ne. Hagi zagagafagu'ene namaraminku'ene zamasaguregati'ma regarorohe'za vanoma nehaza zagaramine, nozamegu'ene nankeea hu'ne. <sup>34</sup> Hagi maka kokantegati vahe'mo'zane, maka ama mopafi kini vahe'mo'nena Solomoni knare antahintahima antahinakura agrite e'naze.

## 5

### *Solomoni'ma ra mono no kinaku retro hu'nea zamofo naneke*

<sup>1</sup> Hagi Tairi vahe'mofo kini ne' Hiramu'a kora Deviti'ene tragoteno mani'nea neokino, Deviti nemofo Solomoniina kini azeri ot'i'za kema nentahino'a, vugota eri'za vahe'arami huzamantege'za humuse hunte'naku e'naze. <sup>2</sup> Hagi Solomoni'a amanage huno Hiramuntega kea atrentegeno vu'ne, <sup>3</sup> Kagra antahi'nane, nenfa Deviti'a Ra Anumzamofo agima erisgahu nona onki'ne. Na'ankure agra amama manigagi'naza ha' vahe'aramimo'za maka zupa hara eme hunteva hunteva nehzageno, Ra Anumzamo'a aza higeno hara huzmagatere'ne. <sup>4</sup> Hianagi menina Ra Anumzana nagri Anumzamo'a maka kaziga ha'ma hu'zana eritregeno, hara eme huontazageno, mago knazana forera osigena so'e hu'na mani'noe. <sup>5</sup> E'ina hu'negu Ra Anumzana nagri Anumzamo'ma nenfa Devitima asamino, kagri trate'ma kinima azeri otisua mofavremo, Nagri nagima erisga hu nona kigahie huno'ma hu'nea kante ante'na Ra Anumzamofo agima erisgahu mono nona kinaku nehue. <sup>6</sup> E'ina hu'negu huge'za Lebanonitira sida zafa antagi'za eme namiho. Eri'za vahe'nimozane, kagri eri'za vahe'mo'zane ana eri'zana ener'iage'na nama'a zago agima ahesanana, kagri eri'za vahera zagoa tesizamantegahue. Hagi kagra ko antahinka kenka hu'nane, mago'a tagri vahe'mo'za Saidoni vahe'motama zafama nentagi'za zana hu'za zafa ontagigahaze. <sup>7</sup> Hagi Solomoni'ma atrenteal ke'ma Hiramu'ma nentahino'a,

tusi muse nehuno amanage hu'ne, Ra Anumzamo'a Devitina knare antahi'zane mofavre amigeno hanavenentake Israeli vahe'mofo kinia manie!

<sup>8</sup> Anage nehuno Hiram'u'a amanage huno Solomonintega kea atregeno e'ne, Nagritegama kema atrankeno'ma eana hago antahuanki'na, maka sida zafane saipresi zafanena antagi'na atresugenno egahie. <sup>9</sup> Hagi nagri eri'za vahe'mo'za Lebanonitira ana zafaramina antagi'za eri'za hagerintera erami'nage'na magokepi eritru hu'na anaki'nugeno hagerimpi eri'za e'za kema hunante e'zanofira eme ahekampru hanagenka ana zafaramina erigahane. Hagi ana zafamofo mizama'a nagrira ne'zanku navesiankinka, nonifima nemaniza naganimofo ne'zana namigahane. <sup>10</sup> Anage Hiram'u'a nehuno, sida zafane saipresi zafanena Solomoni'ma hia kante anteno, maka antagino erino eme amigeno, <sup>11</sup> ana nona'a Solomoni'a kna'amo'a 20 tauseni'a donki afumo'ma eriga avamente knare'ma huno kane witia nemino, 20 tauseni'a donki afumo'ma eriga avamente olivi masavenena Hiramu nagara ami'ne. Hagi e'ina avamente maka kafune kafunena Solomoni'a Hiramu nagara ne'zana zamitere hu'ne.

<sup>12</sup> Hagi Ra Anumzamo'a kema huvempama hu'nea kante anteno Solomonina knare antahi'zana ami'ne. Hagi Solomoni'ene Hiramukea zanarimpa fru hu'nema manina'a nanekea huhagerafiteke, fru huke mani'na'e.

<sup>13</sup> Hagi Solomoni'a ana eri'zama erisaza vahera, Israeli mopafintira 30 tauseni'a vahe zamazeri oti'ne. <sup>14</sup> Hagi ana erizanterea 10 tauseni'a vahe mago ikanterea huzamantetere hu'ne. Hagi mago ikampi Lebanonia ana eri'zana omerite'za, tare ikana kumazamire emanitere hu'naze. Hagi ana eri'zanta Adoniramu kegava hu'nege'za ana eri'zana eri'nze.

<sup>15</sup> Hagi Solomoni'a havema eri'za esaza vahera 70 tauseni'a nezamavareno, agonafinti'ma havema tagahu vahera 80 tauseni'a nezamavareno, <sup>16</sup> ana erizante'ma kegavahu kva vahetmina 3tausen 300'a vahe zamavare'ne.

<sup>17</sup> Hagi Solomoni'a huzamantege'za zago'amo'ma mareri havema me'neregati vu'za ranra have ome tagahu'za azageno, ana mono nomofo trara agafa huno ante'ne. <sup>18</sup> Hagi Gebali rankumateti vahe'mo'za Solomoni eri'za vahe'ene Hiramu eri'za vahe'enena zamaza hu'za ana noma ki'zana havea taga nehu'za zafa antagi'nze.

## 6

### *Solomoni'ma agafa huno ra mono no ki'nea naneke*

<sup>1</sup> Hagi Israeli vahe'mo'za Isipima atre'za e'nazareti'ma mani'za e'nazana 4hanret 80'a kafu manitageno, Solomoni'ma kinima efore'ma huno 4'a kafuma kinima nemanino'a, namba 2 ikana Zivie nehaza ikante agafa huno Ra Anumzamofo mono nona ki'ne. <sup>2</sup> Hagi Ra Anumzamofo noma kini ne' Solomoni'ma ki'neana zaza'amo'a 27 mita higeno, atupa'amo'a 9 mita higeno, atrure'amo'a 13 mita hu'ne. <sup>3</sup> Hagi mago noma ana nomofo avugama hunaraginte'neana zaza'amo'a 9 mita huno ra nomofo atupa kaziganena magozanke higeno, atupa'amo'a 4'agi hafu'a mita hu'ne. <sup>4</sup> Hagi Solomoni'a ana nomofo zaho'ma eri kama hagente'neana agu'a ra higeno, megira osi hu'nea zahoka hagente'ne. <sup>5</sup> Hanki ana nomofo asoparega mago nona kikamrenteno hunaragino kagine. Ana nehuno ana asoparega agu'afina neone no hunaragintetere hu'ne. <sup>6</sup> Hagi ana ne'one nona 3'a agofetu agofetu huno ki'ne. Hagi mopa avate nomofo zaza'amo'a 2mitagi 20sentimita higeno, nampa 2 agofetu nomofo zaza'amo'a 70sentimita higeno,

nampa 3 agofetu nomofona zaza'amo'a 3 mitagi 10ni sentimita hu'ne. Hagi ana osi nontmina mono nomofo asoparega tra ante'neno aru hamprino ki'neankino mono nomofo asoparega kana hageno ana osi nomofo trara onte'ne. <sup>7</sup> Hagi ana mono nomofo agu'afina noma neg'i'za hama ageru'ma, sasume ageru'ma, aini agerura ontahi'naze. Na'ankure havema anama fragenazarega frage'za eriso'e hute'za eri'za e'naze. <sup>8</sup> Hagi anaga kaziga non-trempima marerinakura, ana nomofona sauti kaziga kafana me'neankino, ana kafante vuteno marerigahie. <sup>9</sup> Hagi Solomoni'a ana nona kivagareteno, nomofo agu'afina anagami kaziga (silinia) sida zafareti aheno evu'ne. <sup>10</sup> Hagi ana mono nomofo 3'a asoparegama neone noma kimahampri'neana, atrure'amo'a 2 mitagi 20sentimita hu'neankino, sida zafareti ke'ki'ne. <sup>11</sup> Hagi anante Ra Anumzamo'a amanage huno Solomonina asami'ne, <sup>12</sup> noma negina nomofo keaga hu'za hue, Kagrama maka nanekenine, tra ke'ni'ane, maka kasegeni'anema avaririsanke'na, negafa Devitima huhamprinte'noa zana kagrite hugahue. <sup>13</sup> Hagi Israeli vahe amu'nompi mani'nena magore hu'na vaheni'a namefira huzami'na ozamatregahue.

<sup>14</sup> Hagi Solomoni'a ana mono nona kivagareteno, <sup>15</sup> ana nomofo agu'afina anagami kazigane, rugaraga asopareganena sida zafanuke'za ahe fanka-nine. Hagi fenkami kaziga manizana saipresi zafanu ahe'ne. <sup>16</sup> Hagi ana mono nomofo turenkazigama ruotge'ma huno ruotgema hu'nea asama hunaragi'neana, zaza'amo'a 9mita hu'ne. Hagi floa'ene, rugaraga asopane, silininena sida zafareti ahe anknire'naze. <sup>17</sup> Ruotge'ma hu'nea nomofo avugama me'nea kuma' nomofo zaza'amo'a 18 mita hu'ne. <sup>18</sup> Hagi ana noma havenu'ma ki'nea zana maka sida zafanu aheno erinovaziteno, ana zafamofona hanagatino, zafa amosrerami krenteno evu'ne. <sup>19</sup> Hagi ana nomofoma agu'afina atumparega Ra Anumzamofo huhagerafi huvempage vogisima ante'zana hunaraginte'ne. <sup>20</sup> Hagi anama hunaraginte nomofo zaza'amo'ene atupa'amo'ene atrure'amo'enena 9 mitage'za hu'neankino, maka golinuke'za eri anovazi'ne. Hagi sida zafare'ma tro'ma hu'naza Kresramana vu itanena golinutike'za erinovazi'ne. <sup>21</sup> Hagi ruotge'ma hu'nea nomofo agu'afinka golinuti sida zafa aheneazana erinonevazino hunaraginenteno, ruotge hunefima mareri kahantera golireti tro hu'naza seni nofiteti anakinte'ne. <sup>22</sup> Hagi ana nomofo agu'afinka miko golinutike eri anovazinenteno ruotge'ma hu'nefima mnanentakezama kre mnama vu itanena golinutike eri anovazi'ne. <sup>23</sup> Hagi ruotage huno ruotge'ma hu'nefinka olive zafareti serabimie nehaza ankerontre'na tare trohuno, retrurente'ne. Hagi ana ankerontremofo zazaznimo'a 5mita hu'ne. <sup>24</sup> Hagi mago ankeromo'ma ageko'nama rufana'rama hiana, 2mitagi 25sentimitare uhanatigeno, mago ankeromo'ma ageko'na rufanara'ma hu'neana 4mitagi hafu'are uhanatine. Hagi mago ankeromofo agekona atumpareti'ma vuno mago'mofo agekona atumpare'ma vaniana, 4mitagi hafu hugahie. <sup>25</sup> Hagi ana ankerontrena za'zaznimo'ene zanavufagamo'enena magozahu hu'ne. <sup>26</sup> Hanki ana tarega ankerontremofo za'za zanimo'a 5mita hutere hu'ne. <sup>27</sup> Hagi ana ankerontrema agu'a nompima retruma regeno'a, zanageko'namo'a rufanara huno magomofo ageko'namo'a kanti kaziga zafa avako higeno, magomofo agekonamo'a kama kaziga zafa atupa'a avako hu'ne. Hagi mago kaziga zanageko'namo'a amu'nompi eme ruhampri'na'e. <sup>28</sup> Hagi ana ankerontrena golireti'za eri anovazi'ne. <sup>29</sup> Hagi serafimi ankeromofo amema'ane, tofe anina'agna zafamofoa amema'ane zafa amosre'amofo amema'a ruotge'ma

hunefinkane ruotge'ma huno ruotgetfama hunefinka nomofo agu'afina ahe'zama evu'naza zafarera antreno tro hunte'ne. <sup>30</sup> Hagi ana nomofo ruotge'ma hu'nefine, meg'i'ane mopafinena golireti eri'novazi'ne. <sup>31</sup> Hagi ruotge'ma hu'nea nomofo agu'afima, hunaraginte'negeno ruotgema huno ruotge'ma hu'nefinkama ufre kafana olivi zafareti tare hagenenteno, ana kafanteria 5fu'a kafa zafa ahekamre ahekamre huno ahente'ne. <sup>32</sup> Hagi serafimi ankeromofo amema'ane tofe anina'agna zafamofo amema'ane zafa amosreamofo amema'ana kafararente antreno tro huteno, ana makazana golireti eri anovazinte'ne. <sup>33</sup> Hagi ana ra mono nomfo kafa zafama retrure'neana, 4'a kafa zafa ahekamre ahekamre huno olivi zafareti ahente'ne. <sup>34</sup> Hagi saipresi zafareti tare kafana hagente'neakino, ana kafama anagi'nigeno'ma repsi'ma hu kafa tare hagente'ne. <sup>35</sup> Hagi serafimi ankeromofo amema'ane tofe anina'agna zafamofo amema'ane zafa amosreamofo amema'ana kafararente antreno tro huteno, golireti eri anovazino erimasave hunte'ne. <sup>36</sup> Hagi ana mono nomofo kuma keginama hu'neana, 3'a have antreno marenerino sida zafa trara rugeka nehuno, 3'a have nenteno, sida zafa trara nenteno kino mareri'ne. <sup>37</sup> Hagi 4'a kafuma Solomoni'ma kinima nemanigeno, Zivie nehaza ikante Ra Anumzamofo mono nona eri agafa hu'za ki'naze. <sup>38</sup> Hagi 11ni'a kafuma Solomoni'ma kinima nemanigeno'a, Bulie nehaza ikante ana mono nona ki vagare'naze. Hagi ana mono noma ki'nazana, 7ni'a kafufi ki'naze.

## 7

### *Agra'a no Solomoni ki'nea naneke*

<sup>1</sup> Hagi Solomoni'ma noma'ama ki'neana 13ni'a kafufi kivagare'ne. <sup>2</sup> Hagi Solomoni'a ra nonkrerfa ki'teno, ana nomofo agi'a Lebanoni afuza zafe huno agi'a antemi'ne. Hagi ana nomofo zaza'amo'a 45 mita higeno, atupa'amo'a 23 mita higeno, anagamima mreri'amo'a 14 mita hu'ne. Hagi ana nomofo azeri'nea zafama reharare'neana, 4'a kankamumpi tusinasi sida zafa reharereno vuteno anama reharere'nea zafa agofetura sida zafareti vazisga hu'ne. <sup>3</sup> Hagi ana maka 15ni'a zafareti runkre hu'naze. Hagi agofetu'ma rugeka'ma hu'neana 45fu'a sida zafanu rugekara hu'ne. <sup>4</sup> Hagi ana nomofo kanti kama asoparega 3'afi zaho eri kana (windua) hagentetere huno kanti kama asoparega vigeno avugosa ohumi ahumi hu'ne. <sup>5</sup> Hagi kanti kaziga kafane, kama kaziga kafamo'ene zahoma eri kamo'enena (windua) 4'a agema'a huntogeno, ana makamo'a avugosa ohumi ahumi hu'ne. <sup>6</sup> Hagi Solomoni'a mago ra nonkrerfa kino, ranra retrure zafamofo none huno agi'a ante'ne. Hagi ama ana zafamofo zaza'amo'a, 23 mita higeno, atupa'amo'a 14 mita hu'ne. Hagi ana nomofo ko'nona ana hukna huno tusinasi zafareti ki'ne. <sup>7</sup> Hagi mago nona kini tra'ma mesia no ki'ne. Hagi ana nompi mani'neno keaga refkoma hania nonkino, keaga refko hu none huno agi'a ante'ne. Hagi ana nomofo agu'afina fenkamiti anagamima mareri'neana, sida zafareti ahe fankani'ne. <sup>8</sup> Hagi Solomoni'ma manisia nona keaga refkohu nonkumamofo amefi'a rure kegina huno anahu no kinte'ne. Hagi anahu kna huno Isipi kini ne' Fero mofa'ma eri'nea a'mofo nona kinte'ne. <sup>9</sup> Hagi ana maka noma ki'neana, zago'amo'a mareri havereti ranra zante havea frageno eri avozaze huteno ki'ne. Hagi fenkami noma erigafama hu'neretima anagami ome atre'neane, megia nomofone kegina-nena ana havenu ki'ne. <sup>10</sup> Hagi nomofo trama anteno agafama huno ki'nea

haveramima tagama hu'neana, zaza'amo'a 5mita higeno mago'a havemo'a 4mitagi hafu hu'ne. <sup>11</sup> Hagi ana agofetura zago'amo mareri'nea haveramine, sida zafaramine, avamente avamente taga huno ante'ne. <sup>12</sup> Hagi ana maka nontamimofo zaho nom a ki'neana, Ra Anumzamofo mono nomofo keginama hu'neaza huno 3'a have anteno marenerino, sida zafa rugeka nehuno, 3'a have anteno marenerino, sida zafa rugeka huno kino mareri'ne.

### *Huramu'ma mono nompi zantamima tro'ma hu'nea naneke*

<sup>13</sup> Hagi kini ne' Solomoni'ma anama huteno'a, Huramu'e nehaza ne' Tairi kumateti kehigeno e'ne. <sup>14</sup> Hagi ana ne'mofo nerera'a Naftali nagapinti kento are. Hagi nef'a Tairi kumateti nekino, bronsireti'ma keonke'zama tro'ma hu'arera knarezanfta hu'ne. Hagi Hiramu'a bronsi havereti'ma keonke'zama tro'ma hu'arera agatereno knarezanfta hu'neankino, Kini ne' Solomoni eri'zama bronsireti'ma tro'ma hu' eri'zana maka agrake eri'ne. <sup>15</sup> Hagi Huramu'a bronsiretike tare ra vimago zafagna huno tro hu'ne. Hagi ana vimago bronsi zafararemofo zazaznimo'a 8 mita higeno, rama huno kagi'neana 5mitagi 30 sentemita hutere hu'ne. <sup>16</sup> Hagi ana bronsi zafararemofo agofetu'ma kankri'ama tro hunteterema hu'neana, zaza'amo'a 2 mitagi 20sentemita hu'ne. <sup>17</sup> Hagi ana bronsi zafararente'ma kankri'ma tro'ma huntetera, avonkre nankre huno, 7ni'a seni nofi tro huntetere hu'ne. <sup>18</sup> Hagi ana tare zafare'ma avonkre nankre'ma hunte'nefina, tarefi pomigreneti zafaragamofo amema'a krenteno evutere hu'ne. <sup>19</sup> Hagi ana bronsire zafararemofo kankri'amokea liliema nehaza trazamofo amosre'agna huna'ankino 2mita hutere hu'ne. <sup>20</sup> Hagi ana bronsi zafararemofo kankrite'ma avonkre nankre'ma hu'nefina, tare kankamu tro huntenten 200'a pomigreneti zafa ragamofo amema'a tro hunte'ne. <sup>21</sup> Hagi ana'ma huteno'a Huramu'a ana zafararempintira magora erino ra mono nomofo kafante sauti kaziga asenteno retruneren, magora noti kaziga asente'ne. Hagi sauti kazigama asente'nea zafagura, Jakimi'e huno agi'a nenteno, noti kazigama asentea zafagura Boasi'e huno agi'a ante'ne. <sup>22</sup> Hagi ana zafararemofo anaga zanasenirera liliema nehaza trazamofo amosre'amofo amema'a tro hu'za ante'naze. Hagi ana'ma higeno'a anante zafama tro'ma huno asente eri'zamo'a vagare'ne. <sup>23</sup> Hagi Huramu'ma ana'ma huteno'a tima afinte zana bronsireti mago tenki tro huno tirure huno agia antem'i'ne. Hagi ana tenkimo'a tupo hu'neankino, 2 mitagi 20sentemita hanagatino agu'a ufregeno, 4mitagi 40ti mita megia kagigeno, rama hu'amo'a 13mita huneno hafu'a sentemita hu'ne. <sup>24</sup> Hagi ana tenkimofona avaza avamentera, 45 sente mitamofo agu'afina hagonefaramimofo amema'a 10ni'a tarefi trohunteno avasese'a huntetere huno kagi'ne. <sup>25</sup> Hagi Huramu'a bronsire ve bulimakao afutami 12fu'a tro huteno ana 12fu'a bulimakao afu agumpi tima afinte'zana tenkia ante'ne. Hagi ana bronsire bulimakao afutmima tro'ma hunte'neana zamarigamo'a magopi ruhampri'nazageno, 3'amo'za noti kaziga zamavugosa huntazageno, 3'amo'za zage ufre kaziga zamavugosa huntazageno, 3'amo'za sauti kaziga zamavugosa huntazageno, 3'amo'za zage hanati kaziga zamavugosa hunte'naze. Hagi ana tenkimo'a ana ve bulimakao afutamimofo zamagumpi megeno, ana tenkimofo fenka kaziga mani'naze. <sup>26</sup> Hagi ana tenkimofo tapa'amo'a 10 sentimita higeno, agi'amo'a kapugna nehuno liliema nehaza trazamofo amosre'agna huno rutare'ne. Hagi ana tenkimofo agu'afima tima afinte'niana 40tauseni'a lita afintegahie. <sup>27</sup> Hagi Huramu'a tenkifima tima afino retrurenteno retufeno

vu'zana, bronsireti 10ni'a wili tro hu'ne. Hagi ana zamofo zaza'amo'a 2mita higeno, atupa'amo'a 2 mita higeno, atrumare'amo'a 2 mita hu'ne.

<sup>28</sup> Hagi anama tro'ma hazza zamofona rugeka rugeka hu'za ahentetere hu'naze. <sup>29</sup> Hagi ana tenkima retufeno vu'zama tro'ma hu'naza zantera Laionine bulimakao afu'ene Serabimie nehaza ankeromofo amema'ane tro huntetere hu'ne. Hagi anama tro'ma hunte'nea zagaramimofo fenkamu kazigane, anagama kaziganena zafa amosre'arami trohu korave huntetere hu'ne. <sup>30</sup> Hagi ana tenkima retufeno vu'zamofo wili'anee wilima azeri akarehehu zotaramina, 4'a bronsireti tro hunte'ne. Hagi ana zotaram-intera tupoza metere hu'ne. <sup>31</sup> Hagi ana zamofo agi'arera neone tenkima retrumare avamente bronsireti erikorave huntetere higeno, zaza'amo'a 45sentimita higeno atupa'amo'a 65 sentimita hu'ne. Hagi anama tro'ma huntea zantera zafa amosrareami trohu korave huntetere hu'ne. Hagi 4'a bronsire zafamofo eri koravema hunte bronsia azeri'ne. <sup>32</sup> Hagi 4'a wilima bronsire zafama retrumare'nere trohuntetere hu'ne. Hagi wilima azeri'nea bronsimofo zaza'amo'a 67 sentimita hu'ne. <sup>33</sup> Hagi ana tintenkima erino vu'zamofo wiliramia karisi wiliramigna huno tro hu'ne. Hagi ana wiliramima azeri zotaramina bronsire tro hu'ne. <sup>34</sup> Hagi tenkima hagazama ami zana 4'a bronzi zafa 4'a agentera krekamarentegeno, anante mekna hu'ne. <sup>35</sup> Hagi agitera bronsinu eri korave huno krekamarentegeno, zaza'amo'a 20sentimita hu'ne. Hagi 4'a bronzi zafama 4'a agente'ma kreka-marente'nerera 4'a bronzi krekamarenteno, ana 4'a bronsire zafa azeri hanavetine. <sup>36</sup> Hagi ana maka brosiramintera serabimie nehaza akeromofo amema'ama laioni amema'ama tofe aninagna zafamofo amema'ama tro hunenteno, zafa amosrea tro huno avasese'a huntetere hu'ne. <sup>37</sup> Hagi ana ti tenkima retufeno vu'zana anahukna huno 10ni'a tro hu'ne. Hagi ana makazamofo zaza'amo'e, atupa'amo'ene atrure'amo'enena magozanke hu'ne. <sup>38</sup> Hagi tima afi tenkia 10ni'a tro hu'ne. Hagi ana tenkiramimofo atupa kaziga'amo'a 1 mitagi 80 senti mita higeno, magoke magoke tenkimo'a 800 lita tina azeriga hu'ne. <sup>39</sup> Hagi ana tenkiramina ra mono nomofona sauti kaziga 5fu'a anteno, noti kaziga 5fu'a ante'ne. Hagi ra mono nomofona sauti kazigane, zage hanati kazigamofo amu'nompina ran tenkima tirurema huno agima antemi'nea tenkia ante'ne. <sup>40</sup> Hagi anama huteno'a Huramu'a tima fre zuompane, sipetine, mago'a zuomparaminen tro hu'ne. Huramu'a kini ne' Solomoni'ma Ra Anumzamofo nompima me zantaminku'ma trohuo huno'ma hia zantamina, maka trohu vagare'ne. <sup>41</sup> Hagi bronsire tare vimago zaferare tro huno ana vimago zaferaremofo asenirera zuompagnaza tro huno resi hunenteno, tare seni nofi tro huno hagerafi hagerafi huno avasese'a hunteno kagine. <sup>42</sup> Hagi ana seni nofitera 400'a pomigreneti zafa raga tro huntogeno, ana bronsire vimago zaferaremofo aseniretira erami erami hu'ne. <sup>43</sup> Hagi tima afinteno erino vuno eno'ma hu'zana 10ni'a tro huno ana zamofo agu'a 10ni'a ne'onse ti tenkirami retruretere hu'ne. <sup>44</sup> Hagi tima afinte zana mago ainire tro huno, agi'a tirure huno nenteno, ana tenkimofo fenka kaziga 12fu'a bronsire ve bulimakao afutami tro huno antegeno, ana afutamimofo zamagofetu tirurema nehaza tenkia me'ne. <sup>45</sup> Hagi Huramu'a kavone savorine, zuomparaminen tro huno bronsireti eri masave hunteten, Ra Anumzamofo mono nompina ante'ne. <sup>46</sup> Hagi Jodani agupofi higo hapa me'nere Sukoti kuma'ene Zaretani kuma amu'nompi kini ne'mo'a ana zantamina tro huo higeno, Huramu'a

tro hu'ne. <sup>47</sup> Hagi Solomoni'a ana zantmimofo kna'a sigerirera erinteno refko hunora onke'ne. Na'ankure rama'a zantminkino bronsimofo kna'a refko huno onke'ne. <sup>48</sup> Hagi Solomoni'a Ra Anumzamofo nompima me itaramima tro'ma hu'neana, kre sramnavu ita golireti tro nehuno, bretimofo ita, golireti tro hunte'ne. <sup>49</sup> Hagi hunaragintegeno ruotge'ma hu'nea asamofo avuga, goliretike'za 10ni'a tavi azota tro hutegen, 5fu'a tavi azota sauti kaziga retrurenteno, 5fu'a tavi azota noti kaziga retrurente'ne. Hagi zafa amosre'agi, tavi azotagi, osama hampage tu'za azotanena knare goliretike'za tro nehuno, <sup>50</sup> kapuraminki, tavi'ma resu'ma hu tu'za azotagi, zuomparaminki, mnanentake'za kre mnavu zuompagi, ruotge'ma huno ruotgetfama hu'nefinkama ufre kafantremofo insigi, ra mono nomofo kafante'ma hagente insinena maka goliretike'za tro hu'ne. <sup>51</sup> Hagi kini ne' Solomoni'a Ra Anumzamofo ra mono nona ki vagareteno, nefa Deviti'ma Ra Anumzamofo suzanema huno ami'nea zantamina silvama, golima, mono nompima eri'zama eri neonse zantamina maka erino, Ra Anumzamofo mono nompima feno ante'zanema huno hunaragintepi eme ante'ne.

## 8

### *Seli nompinti huhagerafi huvempage vogisi erino ra mono nompi e'nea naneke*

<sup>1</sup> Hagi Solomoni'a maka Israeli ranra vahe'tamine, mago mago naga'nofimofo kva vahe'tamine, nagazamire'ma ugagotama hu'naza vahetamina mikha kehige'za agri avuga Jerusalemi kumate etru hu'naze. Hagi ke'ma hige'zama eme atru'ma hu'nazana, huhagerafi huvempage vogisi Deviti rankuma Saioni agonare'ma me'nereti omeri'za ra mono nompi eme antehogu kehu tru hu'ne. <sup>2</sup> Hagi maka Israeli vene'nemo'za kini ne' Solomoni avuga ka'ma kokampima fugagi'nomu ki'za mani'zama e'naza zanku'ma antahimi'za ne'zama kre'za nene'za musemahu knare Etanimie nehaza 7ni ikante, eme atru hu'naze. <sup>3</sup> Hagi ana maka Israeli ranra vahe'ma emeri atruma hutazageno'a, pristi vahe'mo'za huhagerafi huvempage vogisia erisga hu'naze. <sup>4</sup> Hagi ana pristi vahe'mo'zane, Livae vahe'mo'za huhagerafi huvempage vogisine, atruhu seli none, ana seli nompima ruotge'ma hu'nea zantaminena maka eri'za mareri'naze. <sup>5</sup> Hagi Solomoni'ene maka Israeli vahetmima emeri atruma hu'naza vahe'mo'zanena sipisipi afutamine, bulimakao afutamina ohamprig'a a ahe'za huhagerafi huvempage vogisimofo avuga kresramna vu'naze. <sup>6</sup> Ana nehzageno pristi vahe'mo'za huhagerafi huvempage vogisia eri'za, ra mono nomofo hunaragintazageno ruotge'ma huno ruotgetfama hu'nefinka serabimi ankerontrema tro huntazageno zanageko'namoke'ma kantu kamati rufanara huntenapi henka kaziga ome ante'naze. <sup>7</sup> Ana'ma hazageno'a, ana ankerontremofo zanageko'namo'a kantu kamati rufanara huke ana huhagerafi huvempage vogisine, zafama hu'za eri'zama vu'naza zafararena refitente'na'e. <sup>8</sup> Hagi ana zafararemokea za'za huke agaterena'ankino ruotge'ma hu'nea mono nompintira amne ana zafararemofo atumpa kegahazanagi, mono nomofo legitira onke'naze. Hagi ana zotararena meninenan anante me'na'e. (Ko'ma avontafema kre'nea knagu menine hu'ne). <sup>9</sup> Hagi ana huhagerafi huvempage vogisimofo agu'afina mago zana omane'neanki, Isipiti'ma atirami'za neazageno'ma, Ra Anumzamo'ma Israeli vahe'enema huhagerafi huvempage nehuno, Sainai (Horepi) agonare'ma Mosesema have tafetrente'ma kreteno ami'nea kasege

me'ne. <sup>10</sup> Hagi ana huhagerafi huvempage vogisima eri'za ufraza pristi vahe'mo'zama hunaragintageno ruotge'ma hu'nea mono nompinti'ma ete atiramizageno'a, hampomo Ra Anumzamofo mono nompina avite'ne. <sup>11</sup> Hagi pristi vahetmimo'za mono nompina eri'zazmia e'ori'naze. Na'ankure hampomo'ene Ra Anumzamofo hihamu masa'amo'enena Ra Anumzamofo mono nompina avite'ne.

### *Solomoni'a asomu ke Israeli vahetami huzmante'nea naneke*

<sup>12</sup> Anante Solomoni'a amange hu'ne, Ra Anumzamo'a huno, Agra hanintiri hampompi manigahue hu'ne. <sup>13</sup> Hagi nagra menina Ra Anumzamokama mani vavama hanana zana marerisa ra mono nonka'a kintoe.

<sup>14</sup> Anage nehuno kini ne'mo'a rukrahe huno, maka ot'i'zama mani'naza Israeli vahera asomu kea huzmante'ne. <sup>15</sup> Hagi agra amanage hu'ne, Ra Anumzana Israeli vahe'mofo Anumzamo'ma nenfa Devitima huhamprinte'nea zamo'ma efore'ma hiazankura Agra'a ra agi erisie. <sup>16</sup> Ra Anumzamo'a amanage hu'ne, Israeli vahe'ma Isipiti'ma zamavare'na e'noreti'ma eno menima ehanatiana, Nagra mago kumara maka Israeli naga nofipintira non'i'ama kisageno nag'i'ni'ama erisgama hanaza kumara huhampri onte'noe. Hianagi Nagra Israeli vahe'namofo kini manigahie hu'na Deviti huhamprinte'noe. <sup>17</sup> Hagi nenfa Deviti agu'afi Ra Anumzana Israeli vahe Anumzamofo agi'ma erisgahu mono noma ki' antahintahia me'neane. <sup>18</sup> Hianagi Ra Anumzamo'a nenfa Devitinkura amanage huno asami'ne, Nagri nagima erisgahu noma ki' antahintahia kagua'afina nentahine. E'i knare antahintahi kagu'afina antahi'nane. <sup>19</sup> Hianagi ana nona tamage hunka kagra onkigosane. Hagi negamofo, kagrama kasente'nana mofavremo nagima erisga nehu'za, mono'ma hunantesaza nona kigahie huno hu'ne. <sup>20</sup> Hagi menina Ra Anumzamo'a huvempama hu'nea nanekea eri knare hie. Na'ankure nagra nenfa Deviti tra eri'na Ra Anumzamo'ma huvempama hu'nea kante ante'na, Israeli vahe kinia mani'nena Ra Anumzana Israeli vahe Anumzamofo agi'ma erisgahu nona kue. <sup>21</sup> Hagi ana nompina Ra Anumzamo'ma tafahe'mokizmima Isipiti'ma zamavare atiramino zamavareno ne-eno'ma huhagerafi huvempa kema huzmante'nea vogisima ante nona kintoe.

### *Solomonima ra mono nomofo asomu nunamuma hu'nea naneke*

<sup>22</sup> Hagi Solomoni'a anage nehuno, Israeli vahe zamavufi kre sramnavu itamofo avuga monafinka azana rusute anagamu neteno, <sup>23</sup> amanage huno nunamuna hu'ne, Ra Anumzana Israeli vahe'mota Anumzamoka kagri kna Anumzana monafine, ama mopafinena omani'ne. Kagra huhagerafi huvempage amage nentenka, tamagema huno agu'areti'ma huno kavariria vahera vagaore kavesizanan kavesi nezamantane. <sup>24</sup> Kagra eri'za vaheka'a nenfa Devitima huhamprinte'nana keka'a avariri'nane. Kagra kagipinti'ma huvempa hunte'nana zana, kagra'a kazanuti menina anama huhampri'nana zana hane. <sup>25</sup> Hagi menina Ra Anumzana Israeli vahe'mota Anumzamoka amanage hunka eri'za vaheka'amofo nenfa Devitina huvempagea hunte'nane, kagripinti'ma forehu anante anante hu'zama vanaza vahe'mo'zama zamavu'zamavama kegava hu so'e nehu'za, kagrama hu'nanaza hu'za fatgoma hu'za navaririsageno'a, mago'zimimo Israeli vahe'mokizmi kinia manitere hugahie hunka hu'nane. <sup>26</sup> Hagi menina Israeli vahe Anumzamoka eri'za vaheka'a nenfa Devitima huvempama hunte'nana keka'a avaririnka ana zana huo.

27 Hianagi tamage hunka eraminka ama mopafina emanigahampi? Ko, anami monamo'ene onagamuma me'nea monamo'a rankrerafa hu'neangi mani avitegahane. Hagi inankna huno amama kintoa nomo'a kagrira knareru hugantegahie? 28 Ana hu'neanagi Ra Anumzana nagri Anumzamoka nunamu keni'a antahio. Eri'za vaheka'amo'na menima kavugama mani'nena nehua krafa keni'ane, nunamu keni'anena antahinamio. 29 Hagi kenage'ene feru'enena kavua antenka mani'enena, Nagri nagi me'nena mono hunanteho hunkama hu'nana nontegama tavugosama hunteteneta nunamuma hanunkenka antahiramio. 30 Hagi eri'za vahe'kamo'nane, Israeli vahekamozanema ama ana nontegama tavugosama hunteta nunamuma hanunana antahio. Hagi nemanina mona kumaka'afinti nentahinka kumitia eri atreranto. 31 Hagi mago'mo'ma tavaoma'are'ma nemanisimofoma azeri havizama huteno, ama ana nompima kresramna vu itamofo avugama eno, nagra mago havizana osu'noe huno'ma huvempama hina, 32 monafinkati nentahinka eri'za vaheka'aramimofo kea fatgo hunka refko hunka, havizama hu'nenimofona mizama'a neminka, hazenkema osu'nesimofona knare hunto. 33 Hagi kagri vahe Israeli vahe'mo'za kagri kavure'ma kumi'ma hu'nenageno ha' vahe'zmimo'za ha'ma huzmagateresage'za ete kagrite'ma ama ana nompima e'za kagima eme nehe'za nunumuma hanagenka, 34 monafinkatira nunamuzmia nentahinka vaheka'a Israeli vahe kumira atre'zmantenka ete zamavarenka zamagehe'ima zami'nana mopafi eno. 35 Hagi kagri vahe Israeli vahe'mo'zama kumi'ma hu'nenageno, ko'ma orina kumi zamavu'zmavama atre'za rukrehe hu'za ete kagrite'ma e'za zamavugosama ama nontegama hunte'nezama zamazeri havizama hanana zanku'ma kagima nehe'za nunamuma hanagenka, 36 monafinkatira nunanuzmia nentahinka eri'za vaheka'aramina Israeli vhahera kumizmia eri atre'nezmantenka, knare kana zamaveri nehunka, erisantima hare'za manisaza mopa ka'ama zami'nampina kora atregeno runteno. 37 Hagi agatonto knama mopazmifima fore huge, krima fore huge, hozafima ruzahu ruzahu kri fore huge, neone kafaramimo'za hozama eri havizama huge, ha' vahe'zmimo kuma kafazamire ankanirege'ma hanage'za, 38 mago Israeli vhahemo'o, rama'a Israeli ma ana hazenke zanku'ma zamavugosama ama nontegama hunente'za nunamuma hanagenka, 39 mona kuma ka'afintira nunamuzmia antahizaminka kumizmia eri atre zamantegahane. Hagi mago mago'mo'ma agr'ama hu'nenia avu'ava zante'ma nunamuma hanigenka nunamu ke'a antahimitere hugahane. Na'ankure Kagrake'za vahe'mofo tumora kenka antahinka hu'nanankinka, mago mago'mo'ma hu'nenia avu'avate antenka mizana amigahane. 40 Hagi ana'ma hananke'za zamagehemofoma zami'nana mopafima maka knama mani'zama vanaza knafina, kagrikuke korora hunegante'za, kagri agorga manigahaze. 41 Hagi henka Israeli vaherompage meg'i'a vahe'mo'za kagri kagi kagenkea antahigahaze. Ana nehu'za Kagri kagigura afeteti kumazmia atre'za egahaze. 42 Na'ankure hihamu hanavekareti'ma kzama rusutenka ranra avu'avazama erifore'ma hu'nana kagi kagenkea antahigahaze. Hagi ana kagi kagenkema nentahiza e'za zamavugosama ama nontegama hunte'za nunamuma hanagenka, 43 mona kuma ka'afintira nunamuzmia nentahinka, nazankuro rurega vahe'mo'zama kantahima kesaza zana huzmanto. E'ina'ma hananke'za, maka ama mopafi vahe'mo'za, Israeli vahe'mo'zama nehzaza hu'za kage'za antahii'za nehu'za, korora hunegante'za kagorga'a manigahaze. Ana nehu'za ama kagri noma kintoa

nonkura, mono hugante'za kagi erisga hu no kinte'ne hu'za ke'za antahi'za hugahaze. <sup>44</sup> Hagi vaheka'ama huzamantesanke'za ha' vahe'zaminema ha'ma ome hunaku'ma nevu'za, mono'ma hunantate nagima erisga hihoma hunkama hanke'nama ki'noa noma me'nea rankumategama zamavugosa hunte'za nunamuma hanagenka, <sup>45</sup> monafinkatira nunamuzmia nentahinka zamaza hananke'za, ha' vahe'zmia hara huzmagateregahaze. <sup>46</sup> Hagi maka vahera kumi vahe mani'nonanki, henkama kumi'ma hanagenka krimpa ahezmanterka ha' vahe'zmia huzmante'nanke'za eme zamahe'za kina huzmante'za zamavare'za mopazmirega afetero tava'ontero vugahaze. <sup>47</sup> Hianagi ana moparega umani'ne'za zamagu'a rukrahe hu'za kagrite ne-eza, nunamu hu'za tagra kefo avu'ava huta, kumi hu'none hu'za nehu'za, <sup>48</sup> ha' vahe'zmimofo mopafima manine'za maka antahintahi zamireti'ene, tumozmireti'ene, zamagu'areti'enema hu'za kumi zamigu'ma zamasunku'ma nehu'za, tagehe'ima zami'nana moparegane, huhampri zmante'nana rankumategane, mono hunegante'za kagi erisga hihoma hu'nama kintoa nonteganema zamavugosa hunte'ne'za nunamuma hanagenka, <sup>49</sup> monafinkatira nunamuzmia nentahinka, knazazmia eri oza nehunka zamaza huo. <sup>50</sup> Hagi ana nehunka vaheka'amo'zama inankna kumi'ma kagrite'ma hu'enazana kumizamia atre'nezmantenka, ha' vahe'zamimofo antahintahia eri rukrahe huge'za, zamasunku huzmanteho. <sup>51</sup> Na'ankure zamagra kagrika'a vahe mani'nazankinka Isipitira aenima krefizoma nehiankna tevefinti zamavarenka atiraminka e'nane. <sup>52</sup> Hagi eri'za vahe'kamona krafa kere'ene Israeli vahe'ka'amofo krafa kere'enena, kavu antenka mani'enka kagesa antetenka manio. Hagi kagritegama inanknarero nunamuma hanagenka antahizamio. <sup>53</sup> Na'ankure kagra ama mopafi vahe'pintira nagri vahe fatgo manisaze hunka, Mosesema huama'ma hunka asami'nana kante antenka zamazerinte ruotge hunka tagehe'mofoma Isipitira zamavare atiraminka e'nane. Kagra Ra Anumzana hihamu hankavekane Anumza mani'nane. <sup>54</sup> Hagi Solomoni'ma Ra Anumzamofontegama ana maka nunamuma huvagareteno'a, Ra Anumzamofontegama kre sramnavu itamofo avugama rena reno azantre'ma rusute anagamuma atre'neretira oti'ne. <sup>55</sup> Hagi anante otino maka Israeli vahera ranke huno asomu kea huzmante'no amanage hu'ne, <sup>56</sup> Ra Anumzamo'a huhampri tante'nea kante'ma Israeli vahe'motama manigasama tamia zankura ragi amisune. Eri'za ne'a Mosesema huhamprin'e'nea ke'amo'a magore huno amnezanknara osie. <sup>57</sup> Hagi Ra Anumzana tagri Anumzamo'a amefira huramige, tatregera osanianki, tafahe'mo'enema mani'neaza huno tagri'enena manisie. <sup>58</sup> Hagi agra kante tazeri ante fatgo hanigeta kasegene, trakene ke'anema tagehe'mofoma zami'nea kea avaririgahune. <sup>59</sup> Hagi menima Ra Anumzamofo avugama krafama hua nunamu ke'ni'amo'a Ra Anumzana tagri Anumzamofo tava'onte me'enkeno, hanine, zagenena eri'za vahekamo'nane Israeli vahe'kamofona maka zupa fatgo avu'avara hurantesane. <sup>60</sup> Hagi ana'ma hanigeno'a maka ama mopafi vahe'mo'za ke'za antahi'zama hanazana, mago Anumzana ama mopafina omani'neanki Ra Anumzamo'a agrake Anumzana mani'nie hu'za ke'za antahiza hugahaze. <sup>61</sup> Hagi tamagra Ra Anumzana tamagri Anumzamofona tamage huta tamagu'areti nevaririta trake'ane, kasege'anena menima hazaza huta avariraho.

<sup>62</sup> Hagi anante kini ne' Solomoni'ene maka Israeli vahe'mo'zanena Ra Anumzamofontega ofa kresramna vunte'naze. <sup>63</sup> Hagi Solomoni'a 22tauseni'a bulimakao afuki, 120tauseni'a sipisipi afutminki huno aheno Ra Anumzamofontega rimpia fru ofa kresramna vunte'ne. E'ina bulimakaone sipisipi afutminteti kini ne'mo'ene maka Israeli vahe'mo'zanena Ra Anumzamofo nona kafana renagiza, Anumzamofontega hunagrura hunte'naza ami vagarenaze. <sup>64</sup> Hagi ana kna zupage Solomoni'a Ra Anumzamofo mono nomofo avugama me'nea kumara Ra Anumzamofontega hunagru huntenu ami vagare'ne. Na'ankure e'ina kumapi me'nea bronsire kre sramnavu itamo'a osi hu'neankino tevefima kre fananehu ofane, witi ofane, afova'aretima arimpia fru ofa hugara osu'ne.

<sup>65</sup> Hagi Solomoni'ene Israeli vahe'mo'za ne'zana kre'za nene'za musena Ra Anumzana tagri Anumzamofo avuga hu'naze. Hagi noti kaziga Lebo-hamatiti evuno sauti kaziga Isipi tinte'ma evigeno, tusi vahekrerfamo'za atru hu'za 7ni'a knafi kre sramnavu itamofona musena hunte'za ne'zana kre'za nene'za, 7ni'a knafina ko'ma fugagi noma ki'za mani'za e'naza zankura ne'zana kre'za nene'za antahimi'naze. Hagi ana makara 14ni'a knafi ne'zana kre'za nene'za musenkase hu'naze. <sup>66</sup> Hagi musema hu knamo'ma vagaregeno'a Solomoni'a ana vahe'tmina huzmanteg'e'za agrira asomuke hunente'za nozmirega tusi muse nehu'za vu'za e'za hu'naze. Na'ankure Ra Anumzamo'a eri za ne'a Devitine, maka Israeli vahe'enena eri knare huzmante'ne.

## 9

### *Anumzamofo huvempa ke'ne, koro kemofo naneke*

<sup>1</sup> Hagi Ra Anumzamofo mono none, agra'a nonema Solomoni'ma ki vaganereno, maka zama hugahuema hu'nea zamo'ma vagamaretegeno'a, <sup>2</sup> Gibioni kumate'ma mani'negeno Ra Anumzamo'ma agrite'ma efore hu'neaza huno efore hu'ne. <sup>3</sup> Hagi Ra Anumzamo'a anage huno asami'ne, Mono nonku'ma nunamuma hanana Nagra antahi'noankino Nagri'ma mono'ma hunantesaza no me'nena maka knafina veamo'za Nagrira monora eme hunenantesage'na, maka knafina ama ana nonte navua kete'na mani'nena nagesa antahigahue. <sup>4</sup> Hagi kagra negafa Deviti'ma hu'neaza hunka fatgo kavukva hunka kagu'a anteraminka, maka kema kasamua kea nevaririnka kasegeni'ane, trake'ni'ane amage'ma antesanke'na, <sup>5</sup> maka zupa kagri nagapintike Israeli vahe kinia azeri fore hutere hugahue. Na'ankure negafa Devitina amanage hu'na huvempa hunte'noe. Kagi nagapintike Israeli vahe'mofo kinia manino vugahie hu'na hunte'noe.

<sup>6</sup> Hianagi kagrane kagripinti'ma forehu anante anante'ma hu'zama vanaza vahe'mo'za amama avaririo hu'nama nehua kasegene, tra kenema ovaririza atre'za ru anumzamofo ome nevariri'za mono'ma hunteszazana, <sup>7</sup> Israeli vhahera amama zami'noa mopafintira zamazeri vati atregahue. Ana nehu'na mono hunanteho hu'na'ma eri ruotge'ma hua mono nona atre'na namefi humigahue. Hagi Israeli vhahera kiza zokago hu'zanknaza zamazeri tro ha'nena, kokankoka vahe'mo'za kizazokago ke huzmante'za zamagiza regahaze. <sup>8</sup> Hagi ama avasase'ane mono nomo'a havizantfa hinkeno, kante'ma evanaza vahe'mo'za nege'za antri nehu'za, zamagena neru'za amanage hugahaze, nahigeno Ra Anumzamo'a ama mopane, ama mono nonena amanara hie hu'za hugahaze. <sup>9</sup> Hagi amanage hu'za kenona hugahaze, na'ankure Isipiti'ma zamagehe'mofoma zamavareno'ma e'nea

Ra Anumzana zamagra atre'za, ru anumzantami nevaririza monora ome hunte'naze. E'ina hu'nazagu Ra Anumzamo'a amanahu hazenkea zami'ne hu'za hugahaze. <sup>10</sup> Hagi Solomoni'a 20'a kafufi mono none agra'a nonena kivagare'ne. Hagi ana nontrema ki vagamare'neana, <sup>11</sup> Tairi kini ne' Hiramu'a maka sida zafane saipresi zafane, golinena Solomoni'ma kema hiam'a amigeno ki'ne. Hagi ana'ma hirera kini ne' Solomoni'a 20'a rankumatmi Hiramuna Galili mopafina ami'ne. <sup>12</sup> Hianagi Hiramu'ma Tairi kumateti'ma eno Solomoni'ma ami'nea kumatmima eme negeno'a, musena osu'ne. <sup>13</sup> Ana nehuno amanage huno antahige'ne? Nenfuga nanknahu kumatmi namine? huno nehuno ana kuma'ma me'nea mopagura Kabulie (eri'zama'a omne'ne) huno agia antegeno, ana knareti'ma eno menima ehanati'neana ana mopagura Kabulie hu'za agi'a nehaze. <sup>14</sup> Hagi kna'amo'a 4'a tani agatere'nea goli Hiramu'a Solomonina atrentege'za eri'za e'naze. <sup>15</sup> Hagi ama'i Solomoni'ma eri'za vahe'ma zamavarege'za Ra Anumzamofo none, agri none negi'za Jerusalemi kuma'ma tam'i'nea kaziga mopa kate'za ante avite'nente'za, Jerusalemi kuma'mofone Hazori kumamofone, Megido kuma'mofone Gezeri kuma keginama hu'naza zamofo nanke. <sup>16</sup> Na'ankure Isipi kini ne' Fero'a Gaza kumate vahe ha' eme huzmanteno kina hunezmanteno, Kenani vahera rama'a nezamaheno, kumazmia teve taginte'ne. Hagi mofa'amo'ma Solomoninte nemaregeno'a, e'i ana kumara muse'za mofa'amofo ami'ne. <sup>17</sup> Ana higeno Solomoni'a Gezeri kumara eriso'e hu'ne. Hagi ana nehuno fenka kaziga Bet-horoni kuma'ene, <sup>18</sup> Ba'alati kuma'ene tro nehuno, Juda ka'ma kokampina Tamari kumara tro hu'ne. <sup>19</sup> Hagi Solomoni'a maka karisiramima antesia kuma'ane, hosi afutmima antesia kuma'ane, mago'a zantmi antesia kumatmina Jerusalemine, Lebanonine maka agrama kegavama hu'nea mopafi tro hu'ne. <sup>20</sup> Hagi Israeli mopafina mago'a Amori vahe'ene Hiti vahe'ene Perizi vahe'ene Hivi vahe'ene Jebusi vahe'enena mani'naze. <sup>21</sup> Hagi e'ina vahetamina Israeli vahe'mo'zama zamahe hanama osu'naza vahe'tmimofo zamagehemo'ze. Hagi Solomoni'a e'ina vahetmina zamavarege'za, agri kazokazo eri'za vahe manine'za eri'zana erime e'za menina ehanati'naze. <sup>22</sup> Hianagi Solomoni'a magore huno Israeli vahera zamavarege'za kazokazo eri'zana e'ori'naze. Hagi sondia vahetmima, kva vahe'tmima, sondia vahete vugota kva vahetmima, karisma eri'za ha'ma nehaza vahete kva vahetmima, hosi afutmima eri'za ha'ma hu vahe'tmina Israeli vahera zamazeri oti'ne. <sup>23</sup> Hagi 5 hantret 50'a vugota kva vahe'tmi Solomoni'a huzmanteg'e'za eri'za vahetera vugota hu'za kva huzmant'e'za, eri'zankea ana vahetamina huzmant'e'ne. <sup>24</sup> Hianagi Fero mofa'ma Solomoni nenaro'a Deviti rankumara atreno, Solomoni'ma kintea nompi umani'ne. Hagi Solomoni'a Jerusalemi kuma'ma tam'i'nea kaziga eri'za vahe'agu hige'za, mopa kafi'za atre'za eri agupo tro hu'naze. <sup>25</sup> Hagi Ra Anumzamofo kresramna vu itama tro'ma huntetera mago kfumofo agu'afina Solomoni'a 3'a zupa kre fananehu ofane, arimpa fru ofanena nehuno, anahukna huno mnanentake'zana Ra Anumzamofontega kremna vu'ne. Ana nehuno mono nona ki vagare'ne. <sup>26</sup> Hagi ana huteno kini ne' Solomoni'a Edomu mopafina Eloti kuma tava'onete, Koranke hageri ankena, Ezion-gebe kumatera rama'a venterami tro hunte'ne. <sup>27</sup> Hagi kini ne' Hiramu'a ventema erino vanoma hu'ama antahini'ma hu'naza eri'za vahe'a huzmanteg'e'za Solomoni eri'za vahe'tamine ventefi erizana ome eri'naze. <sup>28</sup> Hagi ana vahe'mo'za vente eri'za Ofiri moparega hagerimpi vu'za kna'amo'a 16ni'a tani hu'nea goli omeri'za Solomonina eme ami'naze.

## 10

### *Siba kumate kuini a'mo Solomoni kenaku e'nea naneke*

<sup>1</sup> Hagi Siba mopama kegava hu'nea kuini a'mo'ma Anumzamo'ma Solomonima azama higeno'ma knare'ma hiazamofo agenkema nentahino'a, amuhoma hu'nea agenoka kea antahigeno reheno ke'naku, Jerusalemi kumate e'ne. (Luk 11:31) <sup>2</sup> Hagi ana kuini a'mo'ma eri'za vahé'arami hige'za aza hazageno mnanentake zantamine, rama'a goline, zago'amo marerirfa haveraminena, kemoli afu agumpi erinte'za Jerusalem kumate e'naze. Hagi ana kuini a'mo'ma Solomoninte ehanatino maka antahintahi'afima me'nea nanekea eme asami'ne. <sup>3</sup> Hagi ana a'mo'ma agenoka'ma hirera Solomoni'a mago zana agateoreno ana maka eriama huno kenona hunte'ne. Hagi ana a'mofoma kenonama hunte'neana, mago zamo'e huno Solomonina amuhoa huonte'ne. <sup>4</sup> Hagi Siba kuini a'mo'ma Solomoni knare antahintahi zama keno antahi'no'ma nehuno, noma ki'nea noma negeno, <sup>5</sup> ne'zama nenaza trate'ma me'nea ne'zama negeno, eri'za vahé'ama eri'za kante'ma zamanteg'e'za marerirfa kukenama hu'naza zana negeno, kinimofo waini tima tro hu eri'za vahé'ama negeno, tevefima kre fananehu ofama Ra Anumzamofo nompima nehiazama negeno'a, ke'a omne'ne. <sup>6</sup> Hagi anante ana a'mo'ma kini nekura amanage hu'ne, Kagri kagenkene knare antahizanka'amofo agenkenema kuma'niregama mani'nena antahi'noana tamage! <sup>7</sup> Hianagi kuma'niregama mani'nena kagri kagenkema nentahin'a, havige hu'na hu'noane. Hagi menina nagra navufinti nege'na nagra nagesafinti antahue. Hagi antahintahi kamo'ene, knare'ma hunka hagenkama marerina zamofo kagenkema antahi'noa zana agatere'ne. <sup>8</sup> Hagi kagri vahé'mo'zane, eri'za vahé'kamozanema, maka knama kavugama mani'ne'za knare antahizanka'ama nentahiza muse hugahaze. <sup>9</sup> Hagi Ra Anumzana kagri Anumzamo'ma musema huganteno Israeli vahé' kini trate'ma kavrente'nea Anumzamo'a, ragi erigahie. Na'ankure Agra Israeli vahera zmavesinte vava nehuno, fatgo hunka refko nehunka fatgo kavukava hunka Israeli vahera kegava huzmanto hunka kinia kazeri oti'ne.

<sup>10</sup> Anage nehuno ana a'mo'ma Solomonina kna'amo'a 4tani hu'nea goline, mnanetake zantmanine, zago'amo marerirfa haveraminena rama'a ami'ne. Hagi Siba kuini a'mo'ma erino'ma e'nea avamentera, mnanentake zantamina Solomonina mago'mo'e huno erino eme omi'ne. <sup>11</sup> Hagi Hiramu venteramimo'a Ofiri kumatetira goline, rama'a alamuk zafaramine, zago'amo mareri haveraminena erino e'ne. <sup>12</sup> Hagi kini ne'mo'a ana zafaraminuti Ra Anumzamofo mono none, agra nonena negino, hapue nehaza zavenama mago'a zavenane tro hu'ne. Hagi venteramimo'ma erino'ma e'neankna zafa mago'mo'e huno erinora ome'ne. <sup>13</sup> Hagi ana'ma higeno'a kini ne' Solomoni'a musezantamima amia agofetura Siba kuini a'mo'ma nazankuro antahigea zana amne ami'ne. Hagi ana'ma higeno'a Siba kuini a'mo'ma eri'za vahé'ane ete mopa zimirega vu'naze. <sup>14</sup> Hagi Solomoni'a mago'mago kafufina kna'amo'a 23tani hu'nea goli eritere hu'ne. <sup>15</sup> Hagi zagore'ma fenoma netraza vaheteti'ene, Arabia kini vahetaminteti'ene, Israeli mopama refko hu'za kvama huterema hu'naza vahetaminteti takesi zagomo'a anampina eoffre'ne. <sup>16</sup> Hagi Solomoni'a goli ruguta huno 200'a ranra hanko tro hu'ne. Hagi kna'amo'a 7 kilo naza hu'nea golireti mago'mago hankoa trohutere hu'ne. <sup>17</sup> Hagi ne'one hankoramina hamanteti golia ruguta huno 300'a tro hu'ne. Hagi kna'amo'a 2kilo hu'nea golireti mago'mago hankoa trohutere

hu'ne. Ana huteno Lebanoni afuza zafema huno kinte'nea nompi ana zantamina ante'ne. <sup>18</sup> Ana nehuno kini ne'mo'a kini tra'a razankrerfa trohuteno, elefantimofo zaza aveteti (ivory) ana trara avasesea hunteten, knare zantfa hu'nea golireti erino vazinte'ne. <sup>19</sup> Hagi ana kini trate'ma agama reno mareri trara 6si'a ahenteno mrenerino, ana tra'mofo amefiga'a golireti amagenama ante'zana eri fagigi nenteno, bulimakao anenta afu'mofo agenopoa tro hunenteno, azama ante harage'ma hu zafa ana trat- era ahenenento, tare laioni amema'a tro huno ana tra'mofona kantigama retrurente'ne. <sup>20</sup> Ana nehuno 6'a tra'ma ahenoma marerinerera, kantigama mago'mago Laionimofo amema'a tro huno antetere huno mareri'geno ana makara 12fu'a laioni amema'a me'ne. Hagi e'inahu kini trara mago kini ne'mo'e huno ama mopafina trora osu'ne. <sup>21</sup> Hagi maka Solomoni'ma tima nenea kapuramine Lebanoni afuza zafe huno'ma nom'a'agu'ma agima antemi'nea nompima me'nea zuomparamina goliretike tro hu'ne. Hagi Silvaretira trora osu'naze. Na'ankure Solomoni knafina silvamofo kna'amo'a evurami'ne. <sup>22</sup> Hagi kini ne'mo'a rama'a vente ante'negeno, Hiramu venteramine hagerimpina vano hu'ne. Hagi 3'a kafufina magoke knazupa ana venteramimo'a elefanti afumofo zaza ave'ma (ivory) golima silvama, monkima ranra namaraminena avre'za etere hu'naze. <sup>23</sup> Ana higeno ama mopafi kini vahe'mokizmia, kini ne' Solomoni'a feno zampine knare antahintahifina zamagatere'ne. <sup>24</sup> Hagi maka kokankoka vahe'mo'za Solomontte e'za Anumzamo'ma amia knare antahintahia eme antahi'naze. <sup>25</sup> Hagi kafune kafunena mago'mago vahe'mo'zama Solomonima agenaku'ma aza vahe'mo'za silvane, goline, kukanane, ha' zantamine, mere nehaza mnanentake pauranena eme nemiza, hosi afutamine, miulie nehaza donki afutaminena avre'za musezana eme ami'naze. <sup>26</sup> Hagi Solomoni'a ha'ma hu'zantamina 1tausen 4 hanret'i karisirami eri tru nehuno, 12 tauseni'a hosi afutami eritru hu'ne. Hagi karisima ante kumatmima tro'ma huntenefine, Jerusalemi kumapinena, ana zantamina zamante'ne. <sup>27</sup> Hagi kini ne'mo'a rama'a silva eritru higeno havemo'ma hiaza huno Jerusalemi kumapina amne zankna nehigeno, rama'a sida zafa eritru higeno, sikamo zafamo'ma Juda neone agonafima hiaza huno amne zankna hu'ne. <sup>28</sup> Hagi Solomoni'a hosi afutamina Isipiti'ene Kue kumateti'ene mizase'ne. Hagi Kue kumateti'ma hosi afu'tamima mizanesaza zago avamenteti, Solomoni eri'za vahe'mo'za hosi afutamina Kue kumatetira mizana hu'naze. <sup>29</sup> Hagi ana knafina Isipitira mago'mago karisiramina 600'a silva zagoreti (6.8 kilo) mi'za nese'za, mago'mago hosi afu'tmina 150'a silva zagoreti (1.7 kilo) mizasetere hu'naze. Hagi Hiti'kini vahetaminte'ene, Siria kini vahe'mokizmire'ene ana zantamina zagrera atre'naze.

## 11

### *Solomoni'a Anumzamofo amefi humi'nea naneke*

<sup>1</sup> Hagi Solomoni'a Fero mofa'ma eri'nefina, rama'a meg'i a'nema avesizamanteno eri'neana Moapu a'nene, Amoni a'nene Edomu a'nene, Saidoni a'nene, Hiti a'enena eri'ne. <sup>2</sup> Hagi Ra Anumzamo'a amanage huno Israeli vahera kora zamasami'ne, E'i ana mopafintira aneramina e'oriho. Na'ankure tamagu'a tamazeri arukraha hanageta zamagri anumzaavaririgahaze huno hu'ne. Hianagi Solomoni'a anankea ontahi ana a'neramina tusiza huno avesizmantene'. <sup>3</sup> Hagi kini vahe'mokizmi mofanea Solomoni'a 700'a ese a'nea nezmantero, 300'a henka a'nea

eri'zmante'ne. Hagi tamage hu'za ana a'nemo'za Ra Anumzamofonte'ma mani'neazana agu'a azeri rukrahera hu'naze. <sup>4</sup> Hagi Solomoni'ma ozafama nerege'za ana a'neramimo'za agu'a azeri rukrahe hazageno, nefa Deviti'ma agu'areti huno Ra Anumzamofoma avesinteno avariri'nea zana osu'ne. <sup>5</sup> Na'ankure Solomoni'a Saidoni vahe'mofo a' anumza Astoretine, Amori vahe anumza agoteno hi'mnage hu'nea anumza Molekine, zanavaririno monora huzanante'ne. <sup>6</sup> E'ina nehuno Solomoni'a Ra Anumzamofo avurera kefo avu'ava nehuno, nefa Deviti'ma agu'areti huno Ra Anumzamofoma avariri'nea zana osu'ne. <sup>7</sup> Ana nehuno Solomoni'a Jerusalem kuma'mofona zage hanati kaziga agonare, Moapu vahe hi'mnage anumza Kemosine, Amori vahe hi'mnage anumza Molekinema mono hunte kumara tro hu'ne. <sup>8</sup> Ana nehuno Solomoni'a mago'mago meg'i a a'ne'aramimo'ma havi anumzama'are'ma ofa nehuno, Kresramanama nevuno, mnanentake zama kre mnama vanaza kumara tro huzmantetere hu'ne. <sup>9</sup> Hagi tare zupama Solomoninte'ma efore'ma humino ru anumzantera mono huontoma huno asami'nea Ra Anumzamofona atreno amefi humigeno, Anumzamo'a tusi arimpa Solomonina ahente'ne. Na'ankure Ra Anumzana Israeli vahe Anumzamofona amefi humigeno'e. <sup>10</sup> Hagi havi anumzantamimofoma ovaririnka, monora huonto huno'ma Ra Anumzamo'a avumarora ante'ne. Hianagi Solomoni'a Ra Anumzamo'ma osuoma huno asmi'nea kea rutarage'ne. <sup>11</sup> E'ina higeno Ra Anumzamo'a amanage huno Solomonina asmi'ne, kagra kasege'nine trake'ninema kegava huo huana, ontahinka rutraganku kumama kegavama hu'nampintira kazeri atre'na eri'za vaheka'a atrenugenno kegava hugahie. <sup>12</sup> Hianagi negafa Deviti'ma hu'nea avu'ava zanku nentahi'na kagrama mani'nenana knafina kagrira anara osugahuanki, kagrama fritesanke'na negamofo anara hu'na kini tratetira avretre'na eri'za vah'e'a kini tratera avrentegahue. <sup>13</sup> Hianagi Deviti'ma hu'nea avu'ava zanku'ene Jerusalem kuma'ma huhampri'noa zanku'enena nentahi'na, negamofona kini tratetira azeri atre vagaoregahuanki, magoke naganofi ami'nenkeno kegava huzmantegahie.

### *Anumzamo'a Solomoni ha'rente vahe azeri oti'nea naneke*

<sup>14</sup> Anage nehuno Ra Anumzamo'a Idomu kini ne'mofo nagapinti Hadati'e nehaza ne' azeri otigeno, Solomonina ha'rente'ne. <sup>15</sup> Na'ankure kora Deviti'ma Edomu vahe'ma ha'ma ome hunezmantea knafina, Sondia vahete vugota kva ne' Joapu'a marerino Israeli sondia vahe'ma hapinti'ma zamahe'naza vahetmina ome asenezmanteno, maka Idomu vefamora zamahe hana hu'ne. <sup>16</sup> Hagi Joapu'ene Israeli sondia vahe'mo'za 6si'a ika Edomu kumatera mani'ne'za maka vefamora zamahe hana hu'naze. <sup>17</sup> Hianagi ana'ma higeno'a Hadati'a nefo eri'za vahe'tamine freno Isipi vu'ne. Hagi ana knafina Hadati'a osi mofavre mani'negeno anara hu'ne. <sup>18</sup> Hagi Midieni mopafintira atre'za Parani e'za Paranitira mago'a vahe eme zamavare'za Isipi kini ne' Feronte ehanatizageno none ne'zana nezamino, mopa zamige'za mani'naze. <sup>19</sup> Hagi Fero'a Hadatina tusiza huno avesinenteno, nenaro kuini a' Tapenesi negna amigeno ara eri'ne. <sup>20</sup> Hagi Tapenesi negna'a Hadatintetira mago ne' mofavre anteno Genubati'e huno agia antemi'ne. Higeno ana mofavre Tapenesi avreno kegava higeno, Fero nompi Fero mofavreramine mani'ne. <sup>21</sup> Hagi Deviti'ene sondia vahete kva ne' Joapu'enema fri'na'ema hiankema Hadati'ma nentahino'a, amanage huno Ferona antahige'ne, natrege'na mopanirega vaneno. <sup>22</sup> Hianagi Fero'a huno, Na'anku atupara amafina hunenka mopakarega vunakura nehanne.

Higeno Hadati'a huno, ana hu'neanagi natrege'na va'neno. <sup>23</sup> Hagi ana hukna huno Anumzamo'a Eliada nemofo Rezonina azeri otigeno, Solomonina ha'rente'ne. Hagi Rezon'i'a Zoba kumate kini ne' Hadadezeri eri'za nekino kva'amofona atreno freno vuno, <sup>24</sup> kini ne'ma ha'ma huntentaza vahe'mofa kva umani'ne. Hagi Deviti'ma Hadadezerine Zoba kumate sondia vahe'anema aheno'ma eri hana'ma higeno'a, Rezon'i'a kvama huzmante'nea vahe'tmina nez mavremo, fre'no vige'za Damaskasi kumate kinia ome azeri ot'i'naz. <sup>25</sup> Hagi Solomoni'ma kinima mani'nea knafina Israeli vahe'mofona Rezon'i'a hankvenentake ha' vahe'zmi mani'neno, Hadadi'ma hu'neaza huno tusi hazenke hunezamino Israeli vhahetminkura agra tusiza huno agotezmanteno, Siria vahera kegava hu'ne.

### *Jeroboamu'a Solomoni ha'rente'nea naneke*

<sup>26</sup> Ana hukna huno mago ne'ma Solomonina ha'ma rente'nea nera, Nebati nemofo Jeroboamu'e. Agra Efraemi nagapinti ne' Zereda kumate nemania nekino, Zerua'e huno nehia kento a'mofo mofavre. <sup>27</sup> Hagi ama'na agafare Jeroboamu'a Solomonina hararente'ne. Jerusalemi rankuma'mo'ma urami eramima hu'nea zama Solomoni'ma mopa katenteno eri agupo ne-huno, nefä Deviti'ma hu'nea vihu keginama eri fatgoma hu'nea zanku anara hu'ne. <sup>28</sup> Hagi Jeroboamu'a maka eri'zana antahi ani hu'nea ne-hazavegino, Solomoni'ma keama maka eri'zama eriga'ma higeno'a, kva azeri otigeno Josefe nagatera agra kegava hu'nege'za eri'zana eri'naz. <sup>29</sup> Hagi ana knafina Jeroboamu'a Jerusalemi kumara atreno nevigeno, Silo kumateti kasnampa ne' Ahiza'a karanka eme keno eri fore higeke vahe omanipi vu'na'e. Ahiza'a kasefa nakreku antanineno vu'ne. <sup>30</sup> Hagi Ahiza'a Jeroboamuma eme keno eri fore'ma nehuno'a, kasefa nakreku'ma antani'neana eme azerino amu'nompinti eri vararo higeno 12fu'a efore nehigeno, <sup>31</sup> amanage huno asami'ne, Nakre kuka'ama 10ni'ama eri tagato'ma hetroana kagra erio. Na'ankure Ra Anumzana Israeli vahe Anumzamo'a amanage hie, ko, nagra Solomoni'ma kegavama hu'nea mopa hanare'na 10ni'afima naganofira kami'nugenka kegava hugahane. <sup>32</sup> Hianagi eri'za vahe'nemifo Devintinku'ene Jerusalemi kumaku'ma, maka Israeli naga'nofipinti'ma huhampri'noa kumaku'ene nentahina Solomonina atre'nugeno magoke naga'mofo kinia manigahie. <sup>33</sup> Na'ankure zama-gra zamefi hunami'za, Saidoni vahe'mofa a' havi anumza Astoretinte'ene, Moapu vahe havi anumza Kemosinte'ene, Amori vahe havi anumza Morek-inte monora hunente'za, nagrira namagera nonte'za, nagri navurera knare zamavu'zmavara nosu'za, Solomoni nefä Deviti'ma hu'neaza hu'za kasegeni'ane trakeni'a ovariri'naz. <sup>34</sup> Hianagi Solomoni'ma ana maka mopama kegavama hu'nea mopa ru vahera hanare omigosuanki, atresugeno kini mani'neno ufrigahie. Na'ankure eri'za ne'n'i'a Devitinku nagri eri'za vahe mani'ne hu'na hugeno kasegeni'ane tra keni'ama aviriri'nea zanku hu'na anara hugahue. <sup>35</sup> Hianagi Solomoni nemofo azampintira kegavama hu'nea 10ni'a naganofira hanare'na kagri kaminugenka kegava huzmantegahane. <sup>36</sup> Hianagi nemofo magoke naga nofi amisugeno kegava nehina, eri'za ne'n'i'a Deviti nagapintike nagima erisga hugahazema hu'noa kumapina, Jerusalemia tavi kna hu'za mani'za vugahaze. <sup>37</sup> Hagi kagrirra Israeli vahe kini trate kavrenta'nena, maka kagri'ma kavesinia mopa kegava hugahane. <sup>38</sup> Hagi eri'za ne'n'i'a Deviti'ma hu'neaza huo hu'na kasamisua kema kagrama antahinka nagri navu'navama nevaririnka, fatgo avu'ava'ma nehunka tra ke'n'i'ane kasegeni'anema avaririsank'e'na, maka

zupa kagri'ene mani'nena Devitima hu'noaza hu'na kagri nagapintike Israeli vahe kinia azeri onetina, Israeli mopa kagri kamigahue. <sup>39</sup> Ana nehu'na Solomoni'ma hu'nea kumitera Devitipinti'ma fore'ma hanaza va-hera hazenkezanu zamazeri haviza hugahuanagi, zamazeri haviza hu vava hu'na ovugahue. <sup>40</sup> E'inama higeno'a Solomoni'a Jeroboamuna ahenaku hu'neanagi, Jeroboamu'a freno Isipi kini ne' Sisaki'ene umaninegeno, Solomoni'a fri'ne. <sup>41</sup> Hagi Solomoni'ma kinima mani'nea knafima fore'ma hu'nea zantamine, Solomoni'ma knare antahintahi'reti'ma hu'nea zantamina Solomoni agi agenkema krenentaza avontafepi krente'naze. <sup>42</sup> Hagi Solomoni'a Jerusalemi kumate kinia mani'neno 40'a kafufi Israeli vahera kegava hu'ne. <sup>43</sup> Hagi Solomoni'ma frigeno'a, Deviti rankumapi Jerusalemi afahemofoma asente'nazafi asentazageno, nemofo Rehoboamu'a agri nona erino kinia mani'ne.

## 12

### *Rehoboamu'a neginagi avu'ava hu'nea naneke*

<sup>1</sup> Hagi Rehoboamu'a Sekemi kumate vu'ne, na'ankure maka Israeli vahe'mo'za agrira kini azeri oti'naku ana kumate omeri tru hu'nazageno'e. <sup>2</sup> Hagi Nebati nemofo Jeroboamu'ma ana nanekema nentahino'a, Solomoninku'ma koro'ma huno Isipima umani'neregatira atreno e'ne. <sup>3</sup> Hagi Israeli kva vahe'mo'za Jeroboamuna ke hazageno ege'za, maka Israeli vahe'tamine vu'za Rehoboamuna amanage hu'za ome asami'naze, <sup>4</sup> negafa'a ra erizanke'za tamigeta amuho huta eri'zana erita e'none. Hagi menina kagra ana knatia eri oza hugeta fru huta eri'zanka'a erigantamnen. <sup>5</sup> Anagema hazageno'a, Rehoboamu'a amanage huno kenona hu'ne, vuta eta huta 3'a kna umaniteti ete eho, hige'za vu'za e'za hu'naze.

<sup>6</sup> Hagi vu'za ezama hazageno'a, Rehoboamu'a nefu Solomoni tavaonte'ma mani'nezama antahintahima nemiza ranra vahetami zamavare atru huno amanage huno zamantahige'ne, na'ane hu'na ama vahetmina kenona huzmantegahufi antahintahia namiho. <sup>7</sup> Hige'za amanage hu'za kenona hunte'naze, Kagrama menima ama vahe'tmimofo eri'za vahe'ma mani'naku'ma hanunka knare kema hunezaminka zamagrama kantahige'naza zama hananke'za kagri eri'za vahe mani vava hu'za vugahaze. <sup>8</sup> Hianagi Rehoboamu'a ana ranra vahetamimofo kea ontahi erinetreno, magokama fore'ma hu'naza vahetmima agri eri'zama e'neriza vahe'mokizmi antahintahi eri'naku, <sup>9</sup> amanage huno zamantahige'ne, Tamagra antahintahitnia hinke'na antahineno. Na'ane hu'na ama vahetmimo'zama hu'za negafa'ma knanentake eri'zama tamigetama e'neruna eri'zana eri oza huranto hu'zama haza vahe'tmina kenona huzmantegahufi antahintahia namiho, huno zamantahigege'za, <sup>10</sup> agri'enema magoka zomare'naza vahe'mo'za amanage hu'za kenona hu'naze, Amanage hunka ana vahe'tmina zamasamio, katre nazamo'a nenfa amora agatere'ne. <sup>11</sup> Hagi nenfa'a tamage huno knanentake eri'za tami'neanagi, anante antegofetu hu'na mago'anee knanentake eri'zana tamigahue. Hagi nenfa'a sefu knonu kema ontahizageno'a tamazeri fatgo hu'neanagi, nagra segintave sefu tamigahue, hunka zamasamio hu'za antahintahia ami'naze.

<sup>12</sup> Hagi kini ne'mo'ma hu'nea kante ante'za 3'a knama evutege'za, Jeroboamu'ene maka Israeli vahetaminena Rehoboamunte e'naze. <sup>13</sup> Hianagi kini ne'mo'a ranra vahe'mo'zama amiza antahintahia eri netreno, ana vahetamina knanentake ke hunezamanteno, <sup>14</sup> kasefa vahe'mo'zama amiza

antahintahi avaririno amanage hu'ne. Nenfa'a kna eriza tamami'neanagi, nagra anante antegofetu hu'na mago'ane knanentake eri'za tamigahue. Hagi nenfa'a sefu knonu kema ontahizageno'a tamazeri fatgo hu'neanagi, nagra segintave sefu tamigahue. <sup>15</sup> Ana nehuno kini ne'mo'a ana vahe'mokizmi nanekea ontahi'ne. Hagi ana'ma hu'neana Ra Anumzamo'ma Silo kumateti ne' Nebati nemofo Ahi'zama asamigeno Jeroboamuma eme asami'nea kemo'a nena rgare'ne.

<sup>16</sup> Hagi Israeli vahe'mo'zama kazama kini ne'mo'ma ke'zimima ontahige'za, amanage hu'za kenona hunte'naze. Deviti nagapintira, tagra na'a eri'none? Tagra Jesi nemofo zana erisantia ohare'none. Hagi Israeli vahemota nontamirega vuta eta hiho. Hagi Deviti nagamota tamagra'a kegava hiho, hu'za nehu'za nozimirega vu'za e'za hu'naze. <sup>17</sup> Hianagi mago'a Israeli vahe'ma Juda kumatamimpima nemaniza vahete Rehoboamu'a kegava huzmante'ne. <sup>18</sup> Anante Kini ne' Rehoboamu'a eri'za vahete kva ne'a Adoramuna huntegeno vige'za Israeli vahe'mo'za havenknonu ahe fri'naze. Ana'ma hazageno'a Rehoboamu'a ame'ama huno karisi'a erifatgo nehuno, Jerusalemi freno vu'ne. <sup>19</sup> Ana higeno ana knaret'i'ma eno menima ehanati'neana, Israeli vahe'mo'za Deviti nagapinti'ma fore'ma hu'naza vahe'mo'zama kegavama huzmante'zankura zamavaresra nehu'za ha'rezmanter'ne. <sup>20</sup> Hagi Israeli vahe'mo'zama Jeroboamu'ma Isipiti'ma e'nea kema nentah'i'za, ke hazageno atru'ma hu'za mani'nazafi ege'za, maka Israeli vahete kini azeri oti'naze. Ana hazageno Deviti naga'mo'za Juda nagake'za kegava hu'naze.

<sup>21</sup> Hagi Solomoni ne'mofo Rehoboamu'a Jerusalemi kumate'ma enehanatino'a, Israeli vahe'ma ha'ma huzmanteno mopama ete erino kegavama huzmante'nakura 180 tauseni'a sondia vahe Juda nagapinti'ene Benzamini nagapintira zamazeri atru hu'ne. <sup>22</sup> Hianagi Anumzamo'a amanage huno kasnampa ne' Semaiana asami'ne, <sup>23</sup> Juda kini ne' Solomoni nemofo Rehoboamune, maka Juda naga'ene, Benzameni naga'ene mago'a vahetaminena amanage hunka zamasamio, <sup>24</sup> Ra Anumzamo'a amanage hie, tamagra nagatami'a hara huozmantetma atreta kumitmirega viho. Na'ankure anazama fore'ma nehiana Nagra hugeno fore nehie! Hige'za Ra Anumzamo'ma hiankante ante'za kumazmirega vu'naze.

### *Jeroboamu'ma golireti tare bulimakao anenta tro hunte'nea naneke*

<sup>25</sup> Ana higeno Jeroboamu'a Efraemi agona kokampi vuno Sekemu ku'mamofo kegina ome azeri hankavetino tro nehuno, ana kumapi mani'ne. Hagi anantetira vuno Penueli kuma kegina azeri hanavetino ki'ne. <sup>26</sup> Hagi ana'ma nehuno'a, Jeroboamu'a amanage huno agu'afina antahintahia antahi'ne, Nagrama kvahu so'ema osnugeno'a amama kegavama hu'noa vahe'mo'za ete Deviti nagatega vugahaze. <sup>27</sup> Hagi ama vahetamimo'za Jerusalemima Ra Anumzamofo mono nontegama ofama ome kresramnama vunaku'ma nevanageno'a, antahintahi zamimo'a rukrahe hinke'za ra zamimofo Juda kini ne, Rehoboamuntega ome ante'za nagrira nahe fri'za agri agiafi umanigahaze huno agu'afina antahi'ne. <sup>28</sup> Hagi ana antahintahima nentahino'a antahintahima ami vahe'mofo antahintahia erino tare golire bulimakao afu anentatre tro hunenteno, amanage huno vahetmina zamasmi'ne, Hago rama'agna Jerusalemia marerize. Hagi Israeli vahe'ma Isipiti'ma tamavre atiramino'ma e'nea anumzana ama'nagi keho nehuno, <sup>29</sup> ana golire bulimakao afu anentatrema tro'ma hu'neana magora Beteli kumate nenteno, magora Dani kumate ante'ne. <sup>30</sup> Ana'ma hiana tusi kumi erifore

hu'ne, na'ankure Israeli vahe'tmimo'za afeteragi, Dani kumatera vu'za ana kaza osu havi anumzana monora ome hunte'naze. <sup>31</sup> Hagi Jeroboamu'a ag-onaramimpina havi anumzamofo mono hunte nontmina kinenteno, Livae nagapintira zamazeri oranotino, ru nagapinti pristi vahe'tmina zamazeri ot'i'ne.

<sup>32</sup> Hagi ka'ma kokampima seli noma ki'za mani'zama e'naza zanku'ma antahimi'za ne'zama kre'za nene'za mono'ma nehazazamofo avaharo huno Jeroboamu'a 8ti ikamofo 15ni knazupa Beteli kumatera monora ne-huno, ne'zana kreno ne'ne. Ana nehuno bulimakao afutamina aheno golire bulimakao anentama troma hunte'nerera Kresramana vunenteno, havi anumzantmimofo mono kuma'ma tro'ma hunteterema hu'nere'ma kegavamahu vhahera, pristi vahetami zamazeri ot'i'ne. <sup>33</sup> Hagi Jeroboamu'ma agra agesafinti'ma eri fore'ma hu'neana 8ti ikamofona 15 knazupa Beteli kumate'ma tro'ma hunte'nea kresramna vu itarera mareri'ne. Hagi ne'zama kreno neneno musema huno mono'ma hu kna erifore nehuno, ana itare marerino ofa hu'ne.

## 13

### *Anumzamofo eri'za ne'Juda kumate'ma nemania ne'mofo naneke*

<sup>1</sup> Hagi Anumzamofo eri'za ne'mo'a Ra Anumzamofo ke antahino Juda kumara atreno Beteli kumate vuno Jeroboamu'a Kresramana vu itare mnanentake'za krenaku ot'i'negeno uhanati'ne. <sup>2</sup> Anama unehanatigeno'a Ra Anumzamo'a agipi hvazino amanage huno kezati'ne, kresramna vu itamoke, kresramna vu itamoke! Amanage huno Ra Anumzamo'a hie, Deviti nagapintira mago ne'mofavre fore hanige'za Josaia'e hu'za agia ahegahaze. Hagi ana mofavremo'a kagri agofetura agona agonama havi anumzamofonte'ma mono'ma hunentaza pristi vahe'tmina aheno kresramna vanigeno, kagofetura vahe zaferinaramimo'a tevea regahie. <sup>3</sup> Anage nehuno ana knareke Anumzamofo eri'za ne'mo'a ke'ama eri tamagema hunkura, avame'zana amanage huno hu'ne, ama avame'zamo hugasamino ama kea Ra Anumzamo hu'ne hugahie, ko, kresramna vu itamo'a tagana vaziraminigeno, tanefamo'a herafiramigahie. <sup>4</sup> Hagi Kini ne'Jeroboamu'ma Anumzamofo eri'za ne'mo'ma Betelima me'nea kresramna vu itagu'ma, kasnampa kema higeno, ana nanekema hiankema nentahino, kresramnavu itare'ma Jeroboamu'ma mani'nereti azana rusuteno amanage hu'ne, amu nera azeriho, higeno ana zamo'a ru fatgo higeno, ete renamagi zankura tusi amuho hu'ne. <sup>5</sup> Ana'ma nehigeno'a Ra Anumzamo'ma ke'ama eri tamagema hu avame'zama Anumzamofo eri'za ne'mofo agipi hvazino hu'nea kante anteno kresramna vu itamo'enena fragu vaziramigeno tanefa'mo'a herafirami'ne. <sup>6</sup> Hagi kini ne'mo'a amanage huno Anumzamofo eri'za ne'mofonkura hu'ne, muse hugantoanki, Rana kagri Anumzamofo nunamuna hunka antahigegeno nazana eriso'e hino, higeno Anumzamofo eri'za ne'mo'a Anumzamofo antahigegeno, ete ana azana eriso'e higeno ko'ma me'neankna hu'ne. <sup>7</sup> Anante kini ne'mo'a amanage huno Anumzamofo eri'za nera asami'ne, enka noni'afi ne'zana eme nenege'na musezana kami'neno. <sup>8</sup> Hianagi Anumzamofo eri'za ne'mo'a amanage huno kini nera asami'ne, Maka nonka'afima me'neazana amu'nompinti refko hunka kamigahue hugahananagi, nonka'arega kagranena ovugahue. Hagi ama kumapina ne'zana nege, tina negera osugahue. <sup>9</sup> Na'ankure Ra Anumzamo'a amanage huno hunagru hunante'ne, Ana kumapima vanunka magore hunka tina nege, bretia nege, nehunka ete vu'hana karanka rukrahe

hunka omo huno hunante'ne. <sup>10</sup> Anage nehuno Beteli kumara atreno ru kante avaririno kuma'arega vu'ne. <sup>11</sup> Hagi ana'ma higeno'a, Beteli ku-matera mago ranafa kasnampa ne' nemania ne'mofo mofavre'aramimo'za, maka zama ana knare'ma Beteli kumapima Anumzamofo eri'za ne'mo'ma eri fore'ma nehuno, kini ne'ma asamia kea eme asami'naze. <sup>12</sup> Hagi ana nanekema nentahino'a nezamafa'a amanage huno zamantahigene, ina kantega vu'ne? Hige'za mofavre naga'amo'za Anumzamofo eri'za ne'mo'ma Juda kumate'ma eteno'ma nevige'homa ke'naza kana averi hu'naze. <sup>13</sup> Ana'ma hazageno'a amanage huno mofavre naga'agura hu'ne. Ame hutma donki afu'nimofonofira renteta azeri retro hiho, huno hige'za mofavre naga'amo'za donki afura azeri retro hazageno, ana donki afu agumpi marerino vu'ne. <sup>14</sup> Hagi ana kasnampa ne'mo'a Anumzamofo eri'za nera avaririno vuno mago oki zafa agafare umaninegeno, ome negeno amanage huno antahige'ne. Kagra Juda kumateti'ma Anumzamofo eri'za ne'ma e'nana nero? Huno antahigegeno, Izo nagra ana nere huno hu'ne. <sup>15</sup> Anagema higeno'a, amanage huno ranafa kasnampa ne'mo'a hu'ne, Noni'arega nagrane enka tine bretinena eme no. <sup>16</sup> Higeno Anumzamofo eri'za ne'mo'a amanage huno kenona hu'ne, I'o kagri'enena ete vu'na ama kumapina bretia nege, tina negera osugahue. <sup>17</sup> Na'ankure Ra Anumzamo'a amanage huno hunagrū hunantene. Ana kumapina bretia nege tina negera nosunka, ete katima esanana, kamati'ma vu'nana kantera omenka ru kantega eno huno hunante'ne. <sup>18</sup> Anagema higeno'a ranafa kasnampa ne'mo'a amanage huno asami'ne, Kagrama hanaza hu'na nagra'enena kasnampa ne' mani'noankino, Ra Anumzamo'a ankeroma'a huntegeno amanage huno eme nasami'ne, Ete avrenka nonka'arega egeno ne'zane tinena eme neno huno nasmi'ne. Hianagi havige huno revatga hu'ne. <sup>19</sup> Hagi ranafa kasnampa nemo'a revatgama higeno'a, Anumzamofo eri'za ne'mo'a, ana ranafa kasnampa ne'ene ne'zane tinena noma'afi ome ne'ne. <sup>20</sup> Hagi ne'zama nenaza trate'ma umani'nakeno revatgama huno avreno'ma e'nea ranafa kasnampa nera Ra Anumzamo'a asamigeno, <sup>21</sup> Juda kumateti'ma e'nea kasnampa nera ranke huno amanage huno asmi'ne, Ra Anumzamo'a amanage hie, Na'ankure kagra Ra Anumzamofonkea rutagrenka trake'a avaririo huno'ma hiana ovaririnka, <sup>22</sup> Ra Anumzamo'ma ne'zane tinema ono huno'ma hu'nea kumapina ne'zane tinena ete enka eme ne'nane. E'ina hu'negu fri kerfaka'a kagehe'ima asezamante'naza matipina aseogantegahaze. <sup>23</sup> Hagi Anumzamofo kasnampa ne'mo'ma bretine tinema netegeno'a, ana ranafa kasnampa ne'mo'a agra'a donki afu'anofi renteno retro hunte'ne. <sup>24</sup> Ana higeno Anumzamofo eri'za ne'mo'a ana donki agumpi nevigeno, laionimo'a karanka eme keno ahe fri'ne. Ana ne'ma ahe frigeno'a, avufgamo'a kampi me'negeno, ana laionimo'a anante otino donki afu'ene mani'ne. <sup>25</sup> Hagi karankama enevaza vahe'mo'zama kazana, ana nera laionimo ahetreteno anante otino mani'nege'za kete'za Beteli kumate vu'za mikazama fore'ma hu'nea zamofono nekeea ome zamasami'naze. <sup>26</sup> Hagi ome revatgama huno avreno'ma e'nea ranafa kasnampa ne'mo'ma ana nanekema nentahino'a amanage huno hu'ne, Anumzamofo eri'za ne'ma Ra Anumzamofo ke'ma rutag're'nea nera, Ra Anumzamo'a kema hu'nea kante anteno laioni huntogeno ome ahe'ne. <sup>27</sup> Nehuno anante mofavre naga'agura donki afuranofira renteta azeri retro hiho, hige'za donki afuranofira rente'za azeri retro hu'naze. <sup>28</sup> Ana hazageno, ana donki afu agumpi nevuno ome keana ana ne'mofo avufga kampi me'negeno donkine lionimokea ana

ne'mofo avufgama me'nere otinakeno ome ke'ne. Hagi Laionimo'a ana ne'mofo avufga nege, donki afura aheno negera osu'ne. <sup>29</sup> E'ina hu'negeno ana ranafa kasnampa ne'mo'a, Anumzamofo eri'za ne'mofo avufga donki afu agumpi ome erinenteno, asunku huno zavira neteno asente'naku kuma'rega erino vu'ne. <sup>30</sup> Hagi ana ranafa kasnampa ne'mo'a, nafu nagnanimoke huno krafa huno zavira neteno, agra'a matipi eme asente'ne. <sup>31</sup> Hagi Anumzamofo eri'za ne'ma asenteteno'a amanage huno mofavre naga'a zamasami'ne, henkama nagrama frisugeta, Anumzamofo eri'za ne'ma asente'noa matipi, nagri zaferina agri zaferinama eritruma hanare eritru huntaho. <sup>32</sup> Na'ankure Ra Anumzamo'ma asamigeno'ma Beteli kumate'ma me'nea kresramna vu itagu'ma eri haviza hugahue huno nehuno, Sameria kumapima agona agonama havi anumzante'ma mono'ma hunte kumatmima me'nea kumatmina eri haviza hugahiema hu'nea ke'mo'a nena avufga'a efore hugahie. <sup>33</sup> Hianagi ana zama fore'ma hutegen'o'a, Jeroboamu'a kefo avu'ava zama'afintira agu'a rukrahera osu'neanki, havi anumzamofo mono noma agona agonama kinte'naza mono nompina pristi vahetmina, amne vahepinti zamazeri oti vava nehuno, iza'omá pristima mani'nuema hia vhahera pristi vahe azeri otitere hu'ne. <sup>34</sup> Hagi e'ina zamo'a ra kumi Jeroboamu nagapina fore higeno, maka Jeroboamu nagara ama mopafintira Ra Anumzamo'a zamahe hana hu vagare'ne.

## 14

### *Jeroboamu'ma hazenke'ma erisia zanku Ahiza'a kasnampa ke hu'nea naneke*

<sup>1</sup> Hagi ana knafina Jeroboamu nemofo Abiza'a kri eri'ne. <sup>2</sup> Ana'ma higeno'a Jeroboamu'a nenanrona amanage huno asami'ne, Kukena hunka ru a'negna hutenka, vahe'mo'a nagri are huno keno antahinora osina Sailo kumate vunka nagri'ma kini manigahane hige'nama kinima mani'noa kasnampa ne' Ahizante vuo. <sup>3</sup> Hagi musezama erinte'enekama vananana 10ni'a bretine, mago'a kekine, tumerima'a me'nea tafenena erinka vunka ama mofavremofontera naza fore hugahifi, ome kenka antahigegeno kasamino. <sup>4</sup> Anagema higeno'a Jeroboamu nenanro'a kema hiazza huno ru a'negna huteno, Sailo kumate Ahiza nonte vu'ne. Hagi Ahizana avumo'a haviza hu'ne, na'ankure agra ko ranafa re'ne. <sup>5</sup> Hagi Ra Anumzamo'a Ahizana amanage huno asami'ne, Jeroboamu nenanro'a ru a'negna huno mofavre'amo'ma krims eri'nea zanku kantahi kenaku neanki, kva huo. Hagi esanigenka Nagrama kasamuanke asamio. <sup>6</sup> Hagi ana a'mo'ma kahante'ma ne-egeno agagema nentahino'a, Ahiza'a ranke huno amanage hu'ne, Jeroboamu nenanroga emarerio. Hagi na'a higenka ru a'negnara hunka neane? Kagrite'ma havizama fore'ma hania nanekeka'a eri'noe. <sup>7</sup> Hagi vunka negave Jeroboamuna ome asamio, Ra Anumzana Israeli vahe Anumzamo'a amanage hie, na'ankure vahe amu'nompintira kavre'na, Israeli vaheni'are kva manio hu'na hugante'noe. <sup>8</sup> Hagi kini eri'zana Deviti nagamofo zamazampintira refko hu'na eri kami'noe. Hianagi eri'za ne'n'i'a, Deviti'ma hu'neaza hunka kasegeni'a nevaririnka, kagu'areti hunka nagrira namagera nentenka, fatgo kavukava'ma huoma hua avu'avara osu'nane. <sup>9</sup> Hianagi kote'ma mani'naza maka vhahera zamagaterenka kefo avu'avara nehunka, ru anumzantamine golire Bulimakao anenta'ma tro'ma hanazamo Nagrira nazeri narimpah'e'ne. Ana hunka kamefi hunami'nane. <sup>10</sup> Einahu hanku kagri nagapina hazenke'za atrena maka kagripinti'ma

fore'ma hu'naza vene'nema, kazokzo vahе'ma amne vahе'enena zamahe hana hugahue. Hagi arifama kre fananema hiaza hu'na, Jeroboamu nagamokizmia kre fanane hanugen, maka fanane hugahaze. <sup>11</sup> Hagi Jeroboamu naga'ma rankuma agu'afima fri'nazana, kramo'za zamavufaga traga hugahaze. Hagi rankumamofo meg'iama frisazana, namaramimo'za zamavufaga traga hugahaze. Na'ankure Ra Anumzamo ama anankea hu'ne. <sup>12</sup> Anage nehuno Ahiza'a amanage huno mago'ane Jeroboamu nenarona asami'ne, Kagrama rankumofo agu'afima kagiama renka ufresankeno'a, ana mofavrekamo'a frigahie. <sup>13</sup> Ana'ma hanigeno'a, maka Israeli vahе'mo'za zamasunkura hu'za zavira nete'za asentegahaze. Na'ankure Jeroboamu nagapintira agrike mopafina asentegahaze. Na'ankure Jeroboamu nagapina e'ina mofavremoke Ra Anumzana Israeli vahе Anumzamofo avurera knarerera hu'neankino atrenige'za azeri so'e hu'za asentegahaze. <sup>14</sup> Hagi Ra Anumzamo'a mago kini ne' azeri otinkeno, Jeroboamu naga zamahe hana hugahie. Hagi e'i ana zana ama knare meni fore hugahie. <sup>15</sup> Ana nehuno Ra Anumzamo'a timo varoza eri toretore hi-ankna huno Israeli vahera zamahegahie. Hagi Ra Anumzamo'a knare mopama zamagehemofoma huhampri zmante'nea mopafintira, zamazeri vati're'nige'za Yufretesi tinkena kaziga mago'mago hu'za manigahaze. Na'ankure Asera a' anumzamofo amema'ama zafare'ma antre'za zamagra retruma re'haza zamo azeri arimpa ahenigeno, Ra Anumzamo'a anara hugahie. <sup>16</sup> Jeroboamu'a kumi nehuno, Israeli vahе'ma zamazeri kumipi zamante'negu huno Ra Anumzamo'a Israeli vahera amefi huzamigahie. <sup>17</sup> Hagi anagema higeno'a, Jeroboamu nenaro'a ete Tirza kumate vuno, non kahama'arema ne-egeno'a ana mofavre'mo'a fri'ne. <sup>18</sup> Ana'ma higeno'a maka Israeli vahе'mo'za Ra Anumzamo'ma kasnampa ne'Ahizama asamigeno'ma hu'nea kante ante'za zamasunkura hu'za zavira nete'za asente'naze. <sup>19</sup> Hagi Jeroboamu'ma kinima mani'negeno'ma fore'ma hu'nea zantamine, Jeroboamu'ma kinima manineno'ma ha'ma nehuno, Israeli vahе'ma kegavama hu'nea agenkea Israeli kini vahetmimofo agenkema krenentaza avontafepi krente'naze. <sup>20</sup> Hagi Jeroboamu'a 22'a kafu zage kinia maniteno frige'za afahе'mofoma asente'naza matipi asentazageno, nemofo Nadapu agri nona erino kinia mani'ne.

### *Rehoboamu'ma Juda vahе kampi zamavareno vu'nea naneke*

<sup>21</sup> Hagi Juda vahе kinia Solomoni nemofo Rehoboamu mani'ne. Hagi Rehoboamu'a 41ni'a kafu nehuno, Juda vahе kinia mani'neankino, Ra Anumzamo'ma Israeli naga nofipinti huhampri agima erisga hugahazema hu'nea rankumapina Jerusalemia 17ni'a kafu kinia mani'ne. Hagi Rehoboamu nerera'a Amori akino agi'a Na'ama'e. <sup>22</sup> Hagi Rehoboamu'ma kinima mani'nea knafina, Juda vahе'mo'za Ra Anumzamofo avurera zamafahe'mozama hu'naza kefo avu'avara zamagatere'za kefo zamavu'zmava nehu'za, kumi hu'za Ra Anumzamofona azeri arimpa hazageno kaniye rezmante'ne. <sup>23</sup> Na'ankure havi anumzantaminte'ma mono'ma hu kumatmina agona agona tro hunente'za Asera a' havi anumzamofo amema'a zafarer tro hu'za maka agonafine, maka ranra zafa riga retrurentene'za monora hunte'naze. <sup>24</sup> Hagi ana mono kumatmimpima monko avu'ava'ma hu veneneramimo'za ana mopafina avite'naze. Hagi ana mopafima mani'nageno Ra Anumzamo'ma zamahenati atre'nea vahе'mofo kasri zamavu'zmava Juda vahе'mo'za zamavariri'za

hu'naze. <sup>25</sup> Hagi Rehoboamu'ma 5fu'a kafuma kinima manigeno'a, Isipi kini ne' Sisaki'a Jerusalemi kumate vahera hara eme huzmante'ne. <sup>26</sup> Ana nehuno Ra Anumzamofo mono nompinti'ene, kini ne'mofo nompintira maka zago'amo'ma marererifa zantamina eri'ne. Hagi anampintira maka zana eri vaganereno, Solomoni'ma goliretimma tro'ma hunte'nea hankoramina nena eri vagare'ne. <sup>27</sup> Hagi ana'ma hutazageno'a kini ne' Rehoboamu'a golire hankoramima eri'za vu'nazarera henka bronsire hankorami tro huno nom'a mofo kafante'ma kegavama hu'za nemaniza sondia vahe'tmina zami'ne. <sup>28</sup> Hagi kini ne'mo'ma Ra Anumzamofo mono nontegama nevigeno'a, ana hanko eri'ne'za avre'za vute'za, ete kvama hu'zama nemaniza nontera etere hu'naze. <sup>29</sup> Hagi Rehoboamuma kinima mani'nego'ma fore'ma hu'nea zantamine, Rehoboamu'ma kinima mani'neno'ma ha'ma nehuno, Juda vahe'ma kegavama hu'nea agenkea Juda kini vahetmimofo agenke'ma krente'naza avontafepi krente'naze. <sup>30</sup> Hagi Rehoboamu'ene Jeroboamukea hara hu vava huke vu'na'e. <sup>31</sup> Hagi Rehoboamu'ma frige'za, agehe'mofoma asezmantane'naza matipi Deviti ran kumapi asente'naze. Hagi nerera'a Amoni akino agi'a Na'ama'e. Hagi ana'ma higeno'a, nemofo Abija agri nona erino kinia mani'ne.

## 15

### *Abizamu'ma kini manino Juda mopama kegava hu'nea naneke*

<sup>1</sup> Hagi Jeroboamu'ma 18ni'a kafuma Israeli vahe kinima nemanigeno'a, Nebati nemofo Abizamu'a Juda vahe kini efore huno kegava huzmante'ne. <sup>2</sup> Hagi 3'a kafufi Jerusalemi kumatera kinia mani'neno kegava hu'ne. Hagi nerera'a Abisalomu mofakino, agi'a Maka'e. <sup>3</sup> Hagi agra nef'a'ma hu'neankna kumitami nehuno, negeho Deviti'ma hu'neaza huno agu'aretira huno Ra Anumzama'amofona ovariri'ne. <sup>4</sup> Hianagi Deviti'ma hu'nea knare avu'avaku huno Ra Anumzana agri Anumzamo'a nentahino, negehonava rentegeno agri nona erino kinia Jerusalem kumapina manigeno, Deviti nagamofo tavimo'a asura osu'ne. <sup>5</sup> Na'ankure Deviti'a Ra Anumzamofo avurera fatgo avu'ava nehuno, Ra Anumzamo'ma huo huno'ma hia zantamina maka kna hu vava huno e'ne. Hagi magoke zama havizama hu'neana, Hiti ne' Uraia a'enema hu'nea hazenkege me'ne. <sup>6</sup> Hagi Abizama kinima mania knafina Jeroboamu'enena hara hu vava hu'na'e. <sup>7</sup> Hagi Abizama kinima mani'nego'ma fore'ma hu'nea zantmimofo agenkea, Juda kini vahetmimofo agenkema krente'naza avontafepi maka krente'naze. Hagi Abizamu'ma kinima mania knafina Jeroboamu'enena hara hu vava hu'na'e.

### *Abizamu no erino Asa'a Juda kini mani'nea naneke*

<sup>8</sup> Hagi Abizamu'a frige'za agehemofoma asente'naza matipi Deviti rankumapi asente'naze. Ana hutazageno ne'mofo Asa agri nona erino kinia mani'ne. <sup>9</sup> Hagi Jeroboamu'ma 20'a kafuma Israeli vahe kinima nemanigeno'a, Asa'a Juda vahe kini efore huno kegava huzmante'ne. <sup>10</sup> Hagi Asa'a 41ni'a kafu Jerusalemi kumapina kinia mani'ne. Hagi nerera'a Abisalomu mofakino agi'a Maka'e. <sup>11</sup> Hagi negeho Deviti'ma hu'neaza huno Asa'a Ra Anumzamofo avurera fatgo avu'ava hu'ne. <sup>12</sup> Havi anumzamofo mono kumapima monko avu'ava zama nehaza vahera ana mopafintira zamahe fanane nehuno, kaza osu havi anumzantamima nef'a'ma tro'ma hunte'nea zantamina eritre vagare'ne. <sup>13</sup> Hagi negeho a'Makama kuinima mani'nea tratetira azeri atre'ne. Na'ankure agra kasrino

hi'mnage hu'nea avu'ava huno Asera a' havi anumzamofo amema'a tro hunte'ne. Hagi Asa'a ana a' havi anumzamofo amema'a antagino apapu huno Kidroni agupofi teve hanavazino kre'ne. <sup>14</sup> Hianagi agona agonama havi anumzamofo mono kumatmina eri havizana osu'ne. Hagi Asa'a maka knafina Ra Anumzamofo avesinenteno agorga mani'ne. <sup>15</sup> Hagi Ra Anumzamofoma nef'a'ma ami'nea zantamine, agranema ami'nea zantamine, goline, silvane, mago'a zantaminena erino Ra Anumzamofo mono nompi vu'ne. <sup>16</sup> Hagi Asa'eene Israeli vahe kini ne' Ba'asakea kinima manike vu'na'a knafina, maka zupa hara hu vava huke vu'na'e. <sup>17</sup> Hagi Israeli vahe kini ne' Ba'asa'a Juda vhahera ha' huzmanteno Rama kumara omerino, ana kumara hankave vihu higeno, vhahetmimo'za ana kumapintira Juda mopafina atriramiza vu'za eza osu'naze. <sup>18</sup> Hagi Asa'a maka goline, silvanema Ra Anumzamofo nompima me'neane kini ne'mofa nompima me'neanena erino eri'za vhahetami'amofo zamazampi nenteno, huzmanteg'eza Siria kini ne' Hezioni negeho Tabrimoni nemofo Damaskasi nemania nete Ben-hadadinte eri'za nevazageno, Ben-hadadintega amanage huno kea atrentege'za eri'za vahe'aramimo'za vu'naze. <sup>19</sup> Hagi nerfakema hu'na'aza huta kea eri hagerafita rone huta manisu'egu ama musezana goline silvanena atregantoe. Hagi vunka Israeli kini ne' Ba'asa'enema huhagerafi'na'a kea omeritrenka ha'huntegeno kumani'a atreno vino. <sup>20</sup> Hagi Ben-hadati'a kini ne' Asa'ma hianke antahino sondia kva vhahetami huzmanteg'eza vu'za Israeli vahe kumatmina, Izoni kumaki, Dani kumaki, Abel-bet-ma'aka kumaki, Kenoreti kumaki, maka Naptali mopa hara ome huzmant'eza zamahe'za hanare'naze. <sup>21</sup> Hagi Israeli kini ne' Ba'asa'ma ana nanekema nentahino'a, Rama kuma keginama nehiretira atre'no Tirza kumate umani'ne. <sup>22</sup> Hagi ana'ma higeno'a kini ne' Asa'a maka Juda vhahetmina ke higeno mago'mo'e huno omani ana makamo'za e'za Ba'asa'ma Rama kuma'ma negiretira atreno'ma via havene zafanena emeri'za vazageno, ana zantaminu Benzameni mopafima me'nea kuma Geba kuma'ene Mizpa kuma'enena ki'naze.

### *Jehosafati'ma Asa no erino kini mani'nea naneke*

<sup>23</sup> Hagi Asa'ma kinima mani'negeno fore'ma hu'nea zantamine, hihamu'ama eriamama hu'neane, maka zama nehuno kumatmina tro'ma hu'nea kumatamimofo aginena Juda kini vhahetmimofo agenkema krenentaza avontafepi krente'naze. Hianagi Asa'a ranafa regeno, aga agusafina kri fore hu'ne. <sup>24</sup> Hagi Asa'ma frigeno'a agehe'mofoma asente'nea matipi, Deviti rankumapi asente'naze. Hagi ana'ma higeno'a, nemofo Jehosafati agri nona erino kinia mani'ne.

### *Nadapu'ma Israeli vahe kini manitegeno anante Ba'asa Israeli kini mani'nea naneke*

<sup>25</sup> Hagi kini ne' Asa'ma tare kafuma Juda vahe kinima nemanigeno'a, Jeroboamu nemofo Nadapu Israeli vahe kinia efore hu'ne. Hagi Nadapu'a tare kafufi kinia mani'neno, Israeli vhahera kegava hu'ne. <sup>26</sup> Hianagi agra nef'a Jeroboamu'ma kefo avu'ava'ma nehuno Israeli vahe'ma zamavare kumipima zamante'nea avu'ava avaririno Ra Anumzamofo avurera kefo avu'ava hu'ne. <sup>27</sup> Hagi ana'ma nehigeno'a Isaka nagapinti ne' Ahiza nemofo Ba'asa'a Nadapuna ahe fri'naku mago'a kankamunku hakene. Hagi Nadapu'a Israeli sondia vahe'ene Filistia vahe mopafi Gibeton kuma vahe ha' huzmantenaku kumazimi ome avazagigaginafi, Ba'asa'a Nadapuna ome ahe fri'ne. <sup>28</sup> Hagi

kini ne' Asa'ma 3'a kafuma Juda vahe kinima nemanigeno'a, Ba'asa'a Nadapuna ahe nefrino Israeli vahe kinia agra mani'ne. <sup>29</sup> Hagi agrama kinima nemanino'a, maka Jeroboamu nagapinti'ma fore'ma hu'naza va-hera zamahe hana higeno, Ra Anumzamo'ma Sailo kumate kasnampa ne' Ahizama Jeroboamunte'ma fore'ma hania zamofo kema asami'nea kante anteno magore huno kini ne'mofa nagara ozmatre zamahe vagare'ne. <sup>30</sup> Hagi Jeroboamu'ma kumi'ma nehuno, Israeli vahe'ma kumipima zamavarentegeno'ma Ra Anumzamofoma azeri arimpama ahe'nea zante, ana zana fore hu'ne. <sup>31</sup> Hagi Nadapu'ma kinima mani'neno'ma hu'nea zantmimofo agenkea, Israeli kini vahetmimofo agenkema krente'nea avontafepi krente'ne.

### *Israeli vahe'mo'za Juda vahe'ene ha' hu'naza naneke*

<sup>32</sup> Hagi Juda kini ne' Asa'ene Israeli kini ne' Ba'asakea kinima mani'na'a knafina hara hu vava huke vu'nae. <sup>33</sup> Hagi Asa'ma 3'a kafuma Juda vahe kinima nemanigeno'a, Ahiza nemofo Ba'asa'a Israeli vahe kinia efore hu'ne. Hagi Ba'asa'ma Tirza kumate'ma Israeli vahe kinima mani'neana 24'a kafu mani'ne. <sup>34</sup> Hianagi agra Ra Anumzamofo avurera kefo avu'ava nehuno, Jeroboamu'ma Israeli vahe'ma zamazeri kumipima zamante'neaza huno agri avu'ava avariri'ne.

## 16

### *Ba'asa'ma hazenkema erisia zamofo kasnampa ke hunte'nea naneke*

<sup>1</sup> Hagi Ra Anumzamo'a kini ne' Ba'asante'ma fore'ma hania zamofo naneke, kasnampa ne' Hanani nemofo Jehuna anage huno asami'ne, <sup>2</sup> Nagra kugusopafinti kavre'na Israeli vahe'ni'a kegava huo hu'noanagi, kagra Jeroboamu'ma hu'nea avu'ava avaririnka Israeli vhahera zamazeri kumipi nezman trenka, Nagrira nazeri narimpa hane. <sup>3</sup> E'ina hanku Nagra Nebati nemofo Jeroboamu nagate'ma huzmant'e noaza hu'na Ba'asagane maka nagaka'anena zamahe hana hugahue. <sup>4</sup> Hagi Ba'asampiti'ma fore'ma hanaza vhahera rankuma agu'afima fri'nageno'a, kramo'za negahaze. Hagi megi'ama fri'nazana vhahera namaramimo'za negahaze. <sup>5</sup> Hagi Ba'asa'ma kinima mani'neno'ma hu'nea zantamine, hanave zantamima tro'ma hu'nea zamofo agenkea Israeli kini vahetmimofo agenkema krenentaza avontafepi krente'ne.

### *Israeli kini vahe'mofo naneke*

<sup>6</sup> Hagi Ba'asa'ma frigeno'a Tirza kumate asentazageno, nemofo Ela agri nona erino kinia mani'ne. <sup>7</sup> Hagi Ra Anumzamo'ma Ba'asane naga'anema hazenke zamisia zamofo naneke kasnampa ne' Hanani nemofo Jehunte hunte'ne. Na'ankure maka havi avu'ava'ma nehuno, maka'zama tro'ma hu'neazamo Ra Anumzamofona azeri arimpaa hegeno, Jeroboamu naga'ma zamahe fananema hu'neaza huno Ba'asa nagara zamahe fri vagare'ne. <sup>8</sup> Hagi kini ne' Asa'ma 26si'a kafuma Juda vahe kinima nemanigeno'a, Ba'asa nemofo Ela'a Israeli vahe kinia efore hu'ne. Hagi Ela'a tare kafu Tirza kumatera kinia mani'neno, Israeli vhahera kegava hu'ne. <sup>9</sup> Hianagi karisi eri'za vano nehaza sondia vhahera amu'nompinti refko huno kva nehia ne' Zimri'a Ela ahenuku kankamunku hake'ne. Hagi mago zupa Ela'a Tirza kumate mani'neno, noma'ama kegava nehia ne' Arza nompi aka ti neneno neginagi nehigeno, <sup>10</sup> Zimri'a eno eme ahe fri'ne. Hagi kini ne' Asa'a 27ni'a kafu Juda vahe kinia nemanigeno, Zimri'a Elana ahe nefrino, agri nona erino Israeli

vahe kinia mani'ne. <sup>11</sup> Hagi Zimri'ma anama kinima nemanino'a, maka Ba'asa nagapinti'ma fore'ma hu'nea vhahera zamahe hana nehuno magore huno ne' mofavrea ozamatreno zamahe hana hu'ne. <sup>12</sup> Hagi Ra Anumzamo'a Ba'asa kama hazenkema ami kema kasnampa ne' Jehuma asami'nea kante anteno, maka Ba'asa nagapinti'ma fore'ma hu'nazahahetmina zamahe hana hu'ne. <sup>13</sup> Na'ankure Ba'asa'ene nemofo Ela'enena kumi nehuke, Israeli vahe'enena zamazeri kumpima nezmanatreke, kaza osu havi anumzana tro hunte'neke, mono'ma huntazamo'a Ra Anumzamofona azeri arimpama ahe'na'e. <sup>14</sup> Hagi Ela'ma kinima mani'negeno'ma fore'ma hu'nea zantamine, maka zama agrama hu'nea zamofo agenkea Israeli kini vahetmimofo agenkema krente'naza avontafepi krente'naze. <sup>15</sup> Hagi kini ne' Asa'ma 27ni'a kafuma Juda vahe kinima nemanigeno, Zimri'a Israeli vahe kinia 7ni'a zagegnafi Tirza kumatera mani'ne. Hagi Israeli sondia vahe'mo'za Filistia vahe kumara Gibetonia avazagigagi'naze. <sup>16</sup> Hagi ana kuma'ma avazagigagi'naza sondia vahe'mo'za Zimri'ma Elama ahea nanekema nentahiza, sondia vahete kva ne' Omrina ana zupage Israeli vahe kinia azeri oti'naze. <sup>17</sup> Hagi ana'ma hutazageno'a, Omri'a Israeli sondia vhahera Gibetoni kumateti zamavareno marerino Israeli vahe rankumapi Tirzama mani'naza vhahera hara ome huzmante'ne. <sup>18</sup> Hagi Zimri'ma keama ha'ma eme hu'za ana kuma'ma emerizageno'a, kini ne'mofo nompi ufreto ha'ma hanigeno fraki'naza nomina hunaraginte'nef umaniteno, ana nona teve tagintegeno nereno agri'enena terasge'ne. <sup>19</sup> Na'ankure Jeroboamu'ma kumi'ma nehuno, Israeli vahe'ma zamazeri kumpima zmante'neaza huno, agra Ra Anumzamofa avururer kefo avu'ava nehuno, Israeli vhahera zamazeri kumpi zamatre'ne. <sup>20</sup> Hagi Zimri'ma kinima mani'neno'ma hu'nea zantmimofo agenkene, Elama ahenea agenkea Israeli kini vahetmimofo agenkema krenentea avontafepi krente'naze. <sup>21</sup> Hagi ana'ma hazageno'a, Israeli vahe'mo'za tarefi atane'za magokaziga Ginati nemofo Tibni kinia azeri otizageno, mago kagiza Omri avariri'naze. <sup>22</sup> Hianagi Omrima avaririza hanaveti'za Ginati nemofo Tibnima avariri'naza vhahera hara huzmagatere'za, Tibnina ahe nefriza Omrina kinia azeri oti'naze. <sup>23</sup> Hagi kini ne' Asa'ma 31ni'a kafu Juda vahe kinima nemanigeno'a, Omri'a Israeli vahe kinia 12fu'a kafufi mani'ne. Hianagi 6si'a kafufi Tirza kumatera Israeli vahe kinia mani'ne. <sup>24</sup> Hagi Sameria agona mopamofo nefu Semantira, Omri'a 70 kilo hu'nea silva zagoreti ana mopa mizaseno rankuma tro huteno, ana mopa agafa ne' agire asamaren, Samarie huno ana kumamofo agi'a ante'ne. <sup>25</sup> Hagi ko'ma maniza e'naza kini vahetmina Omri'a zamagatereno, rama'a kefo avu'ava Ra Anumzamofa avurera hu'ne. <sup>26</sup> Na'ankure Nebati nemofo Jeroboamu'ma Israeli vahe'ma zamazeri kumpima nezamanteno Ra Anumzana Israeli vahe Anumzamofoma azeri arimpama ahe'nea avu'ava avaririno, Omri'a kaza osu havi anumzantmina tro hunte'nenonomo'ma huntea zamo Ra Anumzamofona azeri rimpahe'ne. <sup>27</sup> Hagi Omri'ma kinima mani'nea knafima fore'ma hu'nea zantamina Israeli kini vahe'mokizmi zamagi zamagenkema krenentaza avontafepi krente'naze. <sup>28</sup> Hagi Omri'a frigeno Sameria asentazageno, nemofo Ahapu agri nona erino kinia mani'ne. <sup>29</sup> Hagi Kini ne' Asa'ma 38'a kafuma Juda vahe kinima nemanigeno'a, Omri nemofo Ahapu Israeli vahe kinia efore huno mani'ne. Hagi Omri nemofo Ahapu'a 22'a kafu Sameria kumatera kinia mani'neno Israeli vhahera kegava hu'ne. <sup>30</sup> Hagi ko'ma maniza e'naza kini

vahetmina zamagatereno, Omri nemofo Ahapu'a rama'a kefo avu'ava Ra Anumzamofo avurera hu'ne.<sup>31</sup> Hagi Ahapu'a knare navu'nava nehue huno antahi amne nehuno, Nebati nemofo Jeroboamu'ma hu'nea kefo avu'avara agatereno, Saidoni kini ne' Etba'ali mofa' Jesebelina ara omenerino, Bali havi anumzamofonte monora hunte'ne.<sup>32</sup> Hagi Ahapu'a Sameria kumat- era Bali havi anumzamofo mono no kino, agu'afina kresramna vu ita tro hunte'ne.<sup>33</sup> Hagi anantera Asera a' havi anumzamofo amema'ama me' zafarami retru rentetere hu'ne. Hagi e'ina'ma hia zamo'a, ko'ma maniza e'naza kini vahetmimo'zama hu'naza kefo avu'avara agatereno, rama'a kefo avu'ava huno Ra Anumzana Israeli vahe Anumzamofona azeri arimpa ahe'ne.<sup>34</sup> Hagi Ahapu'ma kinima mani'nea knafi, Beteli kumateti ne' Hieli'a Jeriko kumara ete eri agafa huno ki'ne. Hagi Ra Anumzamo'ma Nuni nemofo Josuama asami'nea kante anteno, ana kuma'ma eri agafa huno negigeno'a, ese mofavre'a Abiram'u'a fri'ne. Hagi ana kumama kivagaren, ana kumamofo rankafama hagenentegeno'a, henka mofavre'a Segupu'a fri'ne. (Josua 6:26)

## 17

### *Elaijama ko'ma orania zamofonku hu'nea naneke*

<sup>1</sup> Hagi Giliati mopafi, Tisbe kumate nemania kasnampa ne' Elaija'a amanage huno kini ne' Ahapuna asami'ne, Ra Anumzana Israeli vahe Anumzama kasefa huno mani'nea Anumzamofo avufi Agri eri'za ne'mo'na huankino, mago'a kafumofo agu'afina magore huno atara ahege, kora rugera osugahianki, nagrama hanugenoke atara ahege, kora rugera hugahie.  
<sup>2</sup> Anagema hutegeno'a, Ra Anumzamo'a amanage huno Elaijana asami'ne.  
<sup>3</sup> Amaretira atrenka rukrahe hunka Jodani timofona zage hanati kaziga vunka, Keriti tinkagomupi ome frakinka umanio.<sup>4</sup> Hagi ana tinteti tina nenege'na, Nagra kotkoti namazaga huzmanta'enkeno ne'zana eri'za eme kamigahaze.<sup>5</sup> Anagema higeno'a, Ra Anumzamo'ma asamia kante anteno Elaija'a Jodani timofona zage hanati kaziga Keriti tinkagomupi umani'ne.  
<sup>6</sup> Hagi anampinkama mani'negeno, maka nanterane kinaganena kotkoti namazagamo'za bretine ame'anena eri'za eme nemizageno, ana tinteti tina ne'ne.<sup>7</sup> Hianagi osia khama nemanigeno'a, ana timo'a tane'ne. Na'ankure ana mopafina kora oru'negeno'e.

### *Zarefati kumate kento a'mofo naneke*

<sup>8</sup> Ana'ma higeno'a, Ra Anumzamo'a amanage huno Elaijana asami'ne,  
<sup>9</sup> Otinka Saidoni mopafi vunka Zarefati kumapi umanio. Nagra ko kento a'mofo hunte'noankino, ne'zana negamino kegava hugantegahie.  
<sup>10</sup> Hagi anagema higeno'a, otino Zarefati kumatega vuno, ana kumamofo kafante'ma unehanatino keana, ana kento a'mo'a tevesesa zonegino mani'negeno omege'ne. Hagi ana a'ma negeno'a, amanage huno ke'zana tino asami'ne, Muse hugantoanki tina tafempina afinka eme namige'na naneno, huno higeno,<sup>11</sup> ana a'mo'ma ana tima ome afinaku'ma neviana ete mago'anе amanage huno ranke huno asmi'ne, Osi'a kazampina bretinen a eri'enka eno.<sup>12</sup> Hianagi amanage huno ana a'mo'a hu'ne, Tamage Ra Anumzana mani'nea Anumzanka'amofo avufinki, bretima kreno eme kami flauara omne'neanki, mago naza huga'a osi'a kavofina megeno, tafempina osi'a ro'afinka masavena me'ne. Hagi ne'zana omne'neankita nigrane neni'anena anama'a kreta neteta mani'neta fri'huegu tevesesa eme

zonegue. <sup>13</sup> Anagema higeno'a, Elaija'a amanage huno ana a'mofonkura hu'ne, Korora osunka vunka kema hanaza ome huo. Hianagi ese'zana osi'a nagrira bretia krenka eme namitenka, henka kagra su'anegamofo su'anena ome kro. <sup>14</sup> Na'ankure Ra Anumzana Israeli vahe'mofo Anumzamo'a amanage hu'ne. Kavofina flauamo'a vagaoreno me'nena tafempinena masavemo'a vagaore me'enkeno vuno Ra Anumzamo'ma ama mopafima ko'ma atresigeno arania knare uhanatigahie. <sup>15</sup> Hagi anankema nentahino'a vuno Elaija'ma hiaza ome hu'ne. Ana higeno ana kento a'mo'ene Elaija'ene, ana a'mofo naga'mozanena nezankura atupara osu rama'a knafi ne'zana ne'za vu'naze. <sup>16</sup> Hagi Ra Anumzamo'ma Elaija'ma asamigenoma hu'nea kante ante'no ana kavofima me'nea flauamo'ene tafempima me'nea masavemo'enena vagaore'ne.

<sup>17</sup> Hagi mago'a kna evutegeno, ana a'mofo mofavremo'a kri erigeno ana kri'amo'a ome ra higeno fri'ne. <sup>18</sup> Hagi ana'ma higeno'a, ana a'mo'a amanage huno Elaijana asami'ne, Anumzamofo eri'za ne'moka naza amazana hunantane? Nagrama kumi'ma hu'noa zante hunagesa nehunka nenamofo ahe fri'naku kagra e'nano? <sup>19</sup> Hianagi Elaija'a amanage huno ana akura hu'ne. Negamofona namio, huno nehuno ana a'mofo azampintira ana mofavrea avreno nomofo anaga kaziga nemasefinka marerino nemasea sipay ome ante'ne. <sup>20</sup> Hagi ana nehuno ranke huno amanage huno Ra Anumzamofontega nunamuna hu'ne, Ra Anumzana nagri Anumzamoke, nahigenka knare'ma huno noma'afima navrentege'nama manua kento ara amanahu hazenkea avrenka ankeno mofavre'amo'a frie? <sup>21</sup> Anage nehuno 3'a zupa ana mofavremofo agofetu maseno amanage huno Anumzamofontega nunamuna hu'ne. Ra Anumzana nagri Anumzamoka ama mofavremofo asimura ete aminka azeri otio. <sup>22</sup> Hagi Ra Anumzamo'a Elaijama hia nunamuna nentahino, ana mofavrea asimura amino azeri oti'ne. <sup>23</sup> Hagi frinefinti'ma otigeno'a Elaija'a nomofo anaga kazigama nevasefintira ana mofavrea avreno eramino nerera eme nemino amanage hu'ne, negamofo'a ofri amne mani'neanki ko. <sup>24</sup> Higeno ana zama negeno'a ana a'mo'a amanage huno Elaijankura hu'ne. Tamage nagra menina kena antahi'nama huana, kagra Anumzamofo eri'za vahe mani'nankeno, Ra Anumzamo'ma kagri kagipima huvazino'ma nehia nanekemo'a tamage naneke.

## 18

### *Obadia'a Elaija eme tutagiha hunte'nea naneke*

<sup>1</sup> Hagi ko'ma oruno zagma reno e'nea knamofo namba 3 kafurera, Ra Anumzamo'a amanage huno Elaijana asami'ne, vunka kini ne' Ahapuna kavugosa ome averi nehunka, ama mopafina Ra Anumzamo'a kora atrenigeno hago rugahie hunka ome asamio. <sup>2</sup> Ananke'ma nentahino'a, Ahapu avure vunaku Elaija'a vu'ne. Ana knafina Sameria kaziga tusi agaton-tonkna fore hu'ne. <sup>3</sup> Hagi Ahapu'a noma'amofo kva ne' Obediana kehigeno'e'ne. Obedia'a Ra Anumzamofona koro hunteno, agorga'a nemania nere. <sup>4</sup> Hagi Jesebeli'ma Ra Anumzamofo kasnampa vahetmima zamahe vagamaneregeno'a, 100'a kasnampa vahera zamavareno 50'a mago havegampi nezmanteno, 50'a mago havegampi frakizmanteno, tine ne'zanena zamitere hu'ne. <sup>5</sup> Hagi Ahapu'a amanage huno Obadiana asami'ne, Maka tin-krahopine aguporampinena knare trazama me'enigura haketa, ama hosi

afutamine, donki afutamimo'zama fri'zankura zamaza hanunke'za manisageta zamahe ofrisune. <sup>6</sup> Anage nehuke mago kaziga moparega Ahapu'a agraku vigeno, mago kaziga moparega Obadia'a agraku vu'ne. <sup>7</sup> Hagi Obadia'a agraku nevuno, Elaijana ome tutagiba hu'ne. Hagi Obedia'ama Elaijama keno antahinoma nehuno'a, avugosaregati mopafi umaseno amanage hu'ne, ranimoka, kagra tamage Elajago? <sup>8</sup> Higeno Elaija'a amanage hune, Izo nagragi, vunka kvaka'amofona Elaija'a hago e'ne hunka ome asamio. <sup>9</sup> Anante Obedia'a amanage hu'ne, Eri'za vahekamo'na nagra na'a kumi hugenka, Ahapu'ma nahe frinogura hunenantane? <sup>10</sup> Na'ankure Ra Anumzana kasefa huno mani'nea Anumzanka'amofo avufi tamage hu'na huvempa huankino, kini ne'mo'a maka ama mopafima me'nea kumatmimpina kagrikura hake vagare'ne. Ana nehuno mago mago kumate'ma hakeno'ma nevuno'a, ana kumate kini vahtemima zamantahigege'za, i'o omani'nema hazageno'a, kini ne' Ahapu'a huvempa huta tamage hiho higeno, tamage huta onke'nona hu'za hu'naze. <sup>11</sup> Higenka menina nagrikura amanage nehane, Elaija'a ne-e hunka ranka'amofona ome asamio hunka nehane. <sup>12</sup> Hianagi kat're'nama amaretima nevanugen'o'a, Ra Anumzamofo Avamu'mo'a onkenurega kavresga huno vugahie. Ana'ma hanigeno'ma Ahapuma ome asamisugenno eno eme kesiama omani'nesankeno'a, nagra ositeti'ma manina e'noana, Ra Anumzamofonku korora hunte'na agoraga'a mani'na e'noanagi, nahe frigahie. <sup>13</sup> Hagi Jesebeli'ma Ra Anumzamofo kasnampa vahe'tmima zamahe hana'ma nehigenama hu'noa zana, ranimoka onkasami'nazo? Nagra 100'a kasnampa vahetami refko hu'na 50'a mago havegampi fraki zamante'na, mago 50'a mago havegampina fraki zamante'nena ne'zane tinena zamami'noe. <sup>14</sup> Hagi menina kagra hunka Elaija'a hago e'ne hunka ome asamio nehanankina, nagrama ome asami'nugenno eme hakesiama omani'nenankeno'a nahe frigahie. <sup>15</sup> Hagi anagema higeno'a, Elaija'a amanage huno asami'ne, Amage'ma nentoa Ra Anumzana kasefa huno mani'nea Hihamu'ane Anumzamofo avufi tamage hu'na huvempa huanki'na, menina Ahapuna ome kegahue. <sup>16</sup> Higeno Obadia'a Ahapu ome kenaku vuno ome keno eri fore huteno, ana nankeea asamigeno Ahapu'a Elaija ome kenaku vu'ne. <sup>17</sup> Hagi Ahapu'ma Elaijama ome negeno'a amanage hu'ne, Israeli mopafima hazenkema eri fore nehana nera kagro. <sup>18</sup> Anagema higeno'a, Elaija'a amanage huno ke nona hu'ne, Nagra Israeli vahera hazenkea eri ozmi'noe. Hianagi kagrane nagakamo'zane Israeli vahtetera hazenkea eri'za e'naze. Na'ankure kagra Ra Anumzamofo kasegea atrenka kamefi huneminka, Bali havi anumzantami monora ome hunentenka avariri'nane. <sup>19</sup> Hagi menina huge'za maka Israeli vahera Karmeli agonare'ma mani'nenure omeri tru nehuta, 450'a Bali havi anumzamofo kasnampa vahe'ene, 400'a Asera havi anumzamofo kasnampa vahetamima Jesebeli'ma neza agampu'ma nehia vahetaminena zamavarenetma eviho. <sup>20</sup> Hagi anagema higeno'a, Ahapu'a ke atrege'za maka Israeli vahe'ene, ana kasnampa vahe'mo'zanena Karmeli agonare omeri atru hu'naze. <sup>21</sup> Ana hutageno Elaija'a maka vahe zamavuga otino amanage huno hu'ne, Nama'a zupa tare antahintahirera otineta kantu vuge kama egira nehaze? Ra Anumzamo'ma tamage Anumzama mani'nena, Agri avariraho. Hianagi Bali havi anumzamo'ma tamage Anumzama mani'nena agri avariraho. Anagema hige'za ana vahe'mo'za kea osu'naze. <sup>22</sup> Anage huteno Elaija'a ana vahetminkura amanage huno zamasami'ne, Ra Anumzamofo kasnampa nera nagrake mani'noe. Hianagi Bali havi anumzamofo kasnampa vahetmina 450'a vahe mani'nazagu, <sup>23</sup> menina

tare bulimakao afu avreta echo. Hagi ana tare bulimakao afutrempintira Bali havi anumzamofo kasnampa vahe'mota tamavesinia su'a aheta taganavazita kre sramnavu itare'ma tevema hanavazi ante'nazarera nenteta tevea tagi onteho. Hagi nagra mago bulimakao afu ahe'na taganavazina kre sramnavu itare'ma tevema hanavazi antenurera nente'na tevea tagi ontegosue. <sup>24</sup> Hagi ana'ma huteta tamagra anumzantmimofo agi aheta nunamuna hanage'na, nagra Ra Anumzamofo agihe'na nunamuna hugahue. Hagi ina Anumzamo'ma nunamuma antahino tevema tagintesigeno ama ana ofama tesigeta e'i tamage Anumza mani'ne huta hugahune. Anagema higeno'a, maka vahetmimo'za tamage hane hu'za hu'naze. <sup>25</sup> Hagi ana'ma hazageno'a, Elaija'a amanage huno Bali havi anumzamofo kasanampa vahetminkura hu'ne. Ese'zana tamagra mago bulimakao afu aheta taganavazita kresramna vu itarera anteta anumzantmimofo agia aheta nunamuna hiho. Na'ankure tamagra rama'a mani'naze. Hianagi tevema hanavazi ante'nazarera tevea tagi onteho. <sup>26</sup> Hagi anagema hige'za mago bulimakao afu ahe'za taganavaziza kresramna vu itare antete'za, nantarama agafama hu'nazana nunamuna hu'za Bali havi anumzamofo agia nehe'za, kezati'za Bali anumzamoka ketia antahiramio hu'za nehu'za, krafa nehazageno zagemo'a anuntupi evuno feru omese'ne. Hianagi ana nunamu zimirera kenona huozmantegeno, mago zana forera osu'ne. Hagi ana'ma higeno'a, anama tro'ma hu'naza kre sramma vu itamofo tavaonte haruhu'za mareriza tami'za nehu'za avore'za kagi'naze. <sup>27</sup> Hagi zagemo'ma marerino feru'masegeno'a, Elaija'a agafa huno kiza zokago kea amanage huno huzmante'ne. Ranke huta kezatiho. Na'ankure agra anumza mani'ne. Agra feru avana negeno manige, kerirega vuge, kanteno vano huge, avu masege hu'negahianki azeri otiho. <sup>28</sup> Anagema hige'za ranke hu'za kezaneti'za mono zmimofo avu'avamo'ma hu'neaza hu'za kazinteti'ene agona zanteti'enena zamavufaga taga hazageno koramo'a herafirami'ne. <sup>29</sup> Hagi ana nehu'za ranke hu'za avore'za kanegi'zageno, zagemo'a evutragiseno kinaga ofama nehaza knarera evu'ne. Hianagi ana anumzazmimo'a magore huno ke'zazmia antahizamino kenona huozami'ne. <sup>30</sup> Hagi ana'ma higeno'a Elaija'a amanage huno ana maka vahekura hu'ne, Amare erava'o hiho, higeno erava'o hazageno, Ra Anumzamofo Kresramana vu itama eri havizama hutre'nazana eriso'e huno tro hu'ne. <sup>31</sup> Hagi Ra Anumzamo'ma Jekopuma asamino, kagri kagia Isralige hu'za hugahazema huno'ma hu'nere, 12fu'a naga'nofimofo huhamprino 12fu'a have erino, <sup>32</sup> Ra Anumzamofo agifi ana kre sramnavu ita tro huteno, ana itamofona 14ni'a lita tima marevaziga avamente tinkana aseno kagi'ne. <sup>33</sup> Ana nehuno ana Kresramanavu itamofo agofetura teve hanavaziteno, bulimakao afura aheno taganavazino ana teve agofetu nenteno amanage hu'ne, ama ana ofama hu bulimakao afute'ene tevere'enena 4'a ranra tintafe afita tagi kasriho, huno hige'za, <sup>34</sup> ana hu'za 4'a ranra tintafe afiza bulimakao ofane tevenena tagi pasuki'naze. Ana'ma hazageno'a, mago'ane ana hiho huno higeza, ete mago'ane ana hazageno, namba 3 zupa ana hiho huno hige'za ete mago'ane tina afi'za bulimakao ofane tevenena tagi pasuki'naze. <sup>35</sup> Hagi ana'ma hazageno'a timo'a ana Kresramana vu itafintira hatihati huno tinka ma asente'nefina marevite'ne. <sup>36</sup> Hagi kinagama ofama Kresramanama vu knama egeno'a, kre sramnavu itare Elaija'a erava'o huno amanage huno nunamuna hu'ne, Ra Anumzana, Abrahamune, Aisakine, Israeli Anumzamoka, Israeli mopafina Nagrake Anumzana mani'noe hunka ne-

hunka, eri'za vahekamo'nagura Nagra huntogeno maka ama zantamina nehie hunka eriamma huo. <sup>37</sup> Ra Anumzamoka nunamuni'a antahinamio! Nunamuni'a antahinamige'za ama vahetmimo'za Ra Anumzamoka kagrake Anumzana mani'enka, tagu'a eri rukre hunka kagrarega turrentane hu'za ke'za antahiza hugahaze. <sup>38</sup> Anagema nehigeno'a monafinkati hantaka huno Ra Anumzamofo tevemo'a hagna hagna huno eramino, ana bulimakaoma tagnavazino'ma ante'nea afu'ene tevema hanavazi'nea tevene, kresramnavu itama tro hu'nea haveramine, kugusopane, tinkampima marevazi'nea tinena ana maka tevemo'a teno eri hana hu'ne. <sup>39</sup> Hagi maka vahe'mo'za ana zama nege'za zamavugosaregati mopafi mase'za amanage hu'naze, Ra Anumzamo'a Agrake tamage Anumzana mani'ne! Ra Anumzamo'a Agrake tamage Anumzana mani'ne! hu'za hu'naze. <sup>40</sup> Hagi ana'ma higeno'a Elaija'a amanage hu'ne, Bali havi anumzamofo kasnampa vahetami fresagi, ana maka zamazeriho, hige'za ana maka zamazerizageno Elaija'a ana Bali havi anumzamofo kasnampa vahetmina zamavareno vuno Kisoni timpi ome zamahe fri vagre'ne. <sup>41</sup> Ana huteno Elaija'a amanage huno Ahapuna asami'ne, Marerinka ne'zane tinena ome no. Na'ankure rankokrerfa ne-ege'na agasasankea nentahue. <sup>42</sup> Anagema higeno'a, ne'zane tine ome nenaku Ahapu'a mareri'ne. Hagi Elaija'a Karmeli agona morusapi marerino arena omereno tare arenararempo asenia ante pri huteno mani'ne. <sup>43</sup> Hagi Elaija'a eri'za ne'agura amanage hu'ne, Marerinka hagerima me'nerega omego. Higeno eri'za ne'amo'a marerino ome keteno, ete Elaijante eno amanage eme hu'ne. Mago zana onkoe, huno higeno, Elaija'a 7ni'a zupa vute ete hunka ome ko huno hunte'ne. <sup>44</sup> Hagi namba 7ni zupa vuno ome keteno eno amanage eme hu'ne, Vahe'mofo azagusagna huno osi hampomo hageri me'nerega efore hige'na koe. Anagema higeno'a, Elaija'a amanage huno hunte'ne, Marerinka Ahapuna amanage hunka ome asamio, Ko ruhiza hanigenka ovnanki karisika'a retro hunka uramio hunka ome asamio. <sup>45</sup> Hagi osi'a kna manigeno monafina hampomo'a ome rehan-intiri higeno, zahomo'a hampona atufeno ne-egeno, tusi ko aru'ne. Hagi Ahapu'a karisi agumpi ame'ama huno marerino, Jezreli kumate vu'naku vu'ne. <sup>46</sup> Ana higeno Ra Anumzamo'a Elaijante azana anteno hanavea amigeno, zaza kena'a repasi hunaga atreno amunofipi ahenevazino, tusi agarenko Ahapuna ome azeri agatenereno Jezreli kumate vu'ne.

## 19

### *Jesebelinku koro huno Elaija'a Sainai agonarega vu'nea naneke*

<sup>1</sup> Hagi Ahapu'ma nonte'ma unehanatino'a, maka Elaija'ma hia zantamina Jesebelina nesamino, Bali kasnampa vahetmima kazinteti'ma maka zamahehna'ma hia kenena asami'ne. <sup>2</sup> Anagema Jezebeli'a nentahino'a, amanage huno Elaijantega kea atregeno vu'ne. Ama knaretima agafa huno vuno oki'ma ama ana knare'ma vanige'na, kasnampa vahetmima zamahana hanankna hu'na nagrama kahe ofrisugen'o'a, anumzantmimo'za nagrira nahe frigahaze. <sup>3</sup> Higeno anankema Elaija'a nentahino'a, koro nehuno otino freno Juda mopafi Berseba vuno, anante eri'za ne'a ome netreno, <sup>4</sup> agrake ka'ma kokampi mago zage knamofo agu'afi vuno, brumue nehaza zafa agafafi umani'neno amanage huno nunamuna hu'ne, Ra Anumzamoka nagehezagna vahera nagra omani'noanki, ha'anki nasimura erige'na fri'neno. <sup>5</sup> Anage huno nehuno ana zafa agafafi mase'negeno ankeromo'a eazamo eme azeri o'netino amanage hu'ne, otinka ne'zana no,

huno hu'ne. <sup>6</sup> Anage higeno Elaija'a otino asenirega keana amuho hu'nea have agofetu kre'naza kekine, tintafena me'negeno erino neteno mase'ne. <sup>7</sup> Ana'ma higeno'a ete mago'ane ana ankeromo'a eazamo eme azeri otino amanage hu'ne, Afete kana vugahananki otinka ne'zana no, huno hu'ne. <sup>8</sup> Anage higeno otino ana kekine tinena erino netegeno, ana ne'zamo azeri hankavetinegeno 40'a zugene haninemofo agu'afi kana vuno, Anumzamofo agonare Horepia uhanati'ne.

<sup>9</sup> Ana huteno mago have kampi umaseno mani'negeno Ra Anumzamo'a amanage hu'ne, Elaijaga amafina na'a eme nehane? huno antahige'geno, <sup>10</sup> Elaija'a amanage huno kenona hu'ne, Ra Anumzana hihamu'ane Anumzamoka, nagra hanaveti'na kamage ante'noe. Hianagi Israeli vahe'mo'za huhagerafi huvempa keka'a ruhanentagi'za, Kresramana vu itaka'a tagana vazitrenaze. Ana nehu'za maka kasnampa vaheka'a kazinteti zamahe vagarage'na nagrake mani'noge'za nahe fri'naku nehakaze. <sup>11</sup> Anagema higeno'a Ra Anumzamo'a amanage huno asami'ne, Atiraminka agonare navuga ome otio, higeno Elaija'a ome otigeno Ra Anumzamo'a agatereno enevigeno, hankave zaho'mo'a ana have agona erifrage mafrege hu'neanagi, ana zahopina Ra Anumzamo'a omani'ne! Hagi ana hutegeno tusi imi eri'neanagi, ana imimpina Ra Anumzamo'a omani'ne. <sup>12</sup> Hagi imima eritegeno'a, teve anefa'mo hagnahagna huno evu'neanagi, ana teve nefapina Ra Anumzamo'a omani'ne. Hagi teve anefa'ma evutegeno'a akoheno osi agerupinti sumi huno hiankna ageru ru'ne. <sup>13</sup> Hagi Elaijama ana ageru'ma nentahino'a, nakre ku'anu avugosa refineteno, atiramino ana havegamofo kafante oti'ne. Hagi anama uotigeno'a mago ageru'mo'a amanage huno hu'ne. Elaijaga amafina na'a eme nehane? <sup>14</sup> Higeno Elaija'a amanage huno kenona hu'ne, Nagra hanaveti'na Ra Anumzana Monafi sondia vahetamimofo Anumzamoka kamage ante'noe. Hianagi Israeli vahe'mo'za huhagerafi huvempa keka'a ruhanentagiza, Kresramana vu itaka'a tagana vazitrenaze. Ana nehu'za maka kasnampa vaheka'a kazinteti zamahe vagarazage'na nagrake mani'noge'za nahe fri'naku nehakaze. <sup>15</sup> Anagema higeno'a amanage huno Ra Anumzamo'a asami'ne, E'nana kantega ete rukrahe hunka Damaskasi ka'ma kokama me'nea kantega vunka, anante'ma uhanati'nunka, Hazaelinan anumpi masavena ome tagintenka Siria vahe kini azeri otio. <sup>16</sup> Hagi Nimsi nemofo Jehuna masavena anumpi ome tagintenka Israeli vahe kinia azeri onetinka, Abel-meholati kumateti ne' Safati nemofo Elisana anumpi masavena ome tagintenka kasnampa nera kagri noma erino eri'zama erisia nera azeri otigahane. <sup>17</sup> Hagi Hazaelinku'ma koro hu'za fresaza vahera Jehu zamahe frigahie. Hagi Jehunkuma koro hu'za freza esaza vahera Elisa zamahe frigahie. <sup>18</sup> Hianagi 7tauseni'a Israeli vahetmima Bali havi anumzante'ma zamare'na re'za mono huntege, antako huntege'ma osu'naza vahetmina ofri amne mani'naze.

### *Elaija'a Elisa ke hu'nea naneke*

<sup>19</sup> Higeno ananke'ma nentahino'a, Elaija'a viazamo Safati nemofo Elisa'a bulimakao afutamina 12fu'a kevu tro huteno, agra 12fuma hiankevufi mani'neno hozafina hoza e'nerigeno ome keno eri fore hu'ne. Hagi ana ne'ma Elaija'a ome negeno'a, viazamo nakreku'a Elisa afumpi ome netreno vu'ne. <sup>20</sup> Hagi ana'ma higeno'a, Elisa'a ana bulimakao afutmima'a netreno, Elaijana avaririno nevuno amanage ome huno asami'ne, Natrege'na ete vu'na nenerane nenfanena ome hufru huzmantete'na ete e'na eme

kavaririneno huno higeno, Elaija'a amanage huno kenona hu'ne, Nagra i'o huogantegahuanki knareki vunka anara ome huo. <sup>21</sup> Anagema higeno'a Elisa'a ete vuno ana bulimakao afutmima'a ome aheno zamafumpima kare namarema nehaza zafarami ante'neana apapu huno ana bulimakao afutamina kreno ana kumapi vahetami ome zami, eme zami hige'za ne-nazageno, agra netreno vuno Elaija eri'za vahe umani'ne.

## 20

### *Ben-hadati'a Sameria vahe huzmantene'nea naneke*

<sup>1</sup> Hagi ana knafina Aramu vahe kini ne' Ben-hadati'a maka sondia vahe'a zamavare atru nehuno, 32'a kini vahetamine erihagerafino hosi afutamine, karisiraminena eri anteraro hu'ne. Hagi ana'ma hutege'za ana maka'moza vu'za Sameria kumate vahera hara ome huzmante'naze. <sup>2</sup> Hagi ana'ma nehuno'a Ben-hadati'a amanage huno Israeli kini ne' Ahapuntega kea atregeno ana rankumapina ufre'ne. Amanage huno kini ne' Ben-hadati'a hie, <sup>3</sup> Silvane golinema ante'nanana nagri su'a megeno, hentofa a'neka'ane mofavrerminka'anena nagri su'a mani'naze. <sup>4</sup> Hagi anagema higeno'a, Israeli kini ne'mo'a amanage huno kenona hu'ne, kema hana kante ranimoka kagri suza manugenno, maka zama ante'noana kagri su'a me'ne. <sup>5</sup> Hagi Ben-hadati'ma kema erino vuno eno'ma hu vahe'mo'a, ete mago'ane eno amanage eme hu'ne, Ben-hadati'a amanage huno hie, Nagra ko amanage hu'na huntogeno vu'ne, silvane golinema antenanana nagri su'a megeno, maka a'neraminka'ane mofavrerminka'anena nagri su'a mani'naze. <sup>6</sup> Hianagi oki'na ama ana knarera, eri'za vahe'ni'aramina huzmantenuge'za vu'za nonka'afinti'ene eri'za vaheka'amofo nontmimp-inti'enena maka knare'nare zantamina ome erigahaze. <sup>7</sup> Anagema higeno'a, Israeli kini ne'mo'a maka Israeli ranra vahetmina kehutru huno amanage huno zamasami'ne, ama ne'mo'ma hazenkema eri fore'ma nehiana keho! Kema hirera Nagra i'o osu'na, ko hu izo huntena silvane goline a'neramini'ane, mofavre naga'nianena amigahue, hu'na hu'noe. <sup>8</sup> Hagi anagema hige'za maka ranra vahetamine, maka vahe'mo'za amanage hu'za antahintahia ami'naze, kezmia ontahio. <sup>9</sup> Hagi anagema hazageno'a, Ahapu'a amanage huno Ben-hadati'ma hianke'ma erino vuno eno'ma hu vahera zamasami'ne, ranimo kini ne'mo'ma, ese'ma nantahigea zantamina kamigahue hu'na hu'noe. Hianagi henkama nantahigeno huoma hi-azana osugahue. Hige'za ana vahe'mo'za Ahapu'ma zamasamia kea Ben-hadatina ome asami'naze. <sup>10</sup> Anagema hazageno'a, Ben-hadati'a amanage huno kea atregeno ete vu'ne. Nagrama Sameria kuma'ma eri haviza hanugenoma kugusopanema fananema osanigeno'a, anumzantmimo'za nahe frigahaze. <sup>11</sup> Hagi anagema higeno'a, Israeli kini ne' Ahapu'a amanage huno kea atregeno vu'ne, zahufama ha'kukenama eri renehankrea ne'mo'a, ko'ma ha'ma hugatere'nenia vahe'mo'ma, ha kukenama nehate'noma hiankna kea huno puuhaha agerura orugahie. <sup>12</sup> Hagi Ben-hadati'a mago'a kini vahetamine seli nompi aka ti neneno mani'nere Ahapu'ma hiankea eri'za uhanati'naze. Hagi Ben-hadati'ma anankema nentahino'a, sondia vahe'araminkura amanage hu'ne, Ha' hugahunanki retro hihon, hige'za ana Sameria kumapi vahe ha'huzmante'naku retrotra hu'naze.

### *Ahapu'ma Ben-hateti naga'ma ha' huzamagatere'nea naneke*

<sup>13</sup> Hagi ana'ma nehazageno'a kasnampa ne'mo'a Israeli kini ne' Ahapunte erava'o huno amanage eme hu'ne, Ra Anumzamo'a amanage huno hie,

ha' vahekamo'za tusi'a vahe'ma mani'nazana kagra ke'nano? Menina Nagra ana maka ha' vaheka'aramina kazampi zamavarentenugenka nezamahenka Nagrikura Ra Anumza mani'ne hunka kenka antahinka hugahane. <sup>14</sup> Anagema higeno'a, Ahapu'a kasnampa nera amanage huno antahige'ne, inankna huno anara hugahie, higeno ana kasnampa ne'mo'a amanage huno kenona hu'ne. Magoke magoke provinsifi sondia vahete'ma kvama hu'naza kasefa sondia vahe'mo'za anara hugahaze. Higeno, iza ana hara agafa hugahie, huno higeno, kagra agafa hugahane huno hu'ne. <sup>15</sup> Hagi anankema Ahapu'ma nentahino'a maka ana provinsiramma kvama hu'naza vahetmimofo kasefa sondia vahetmina kehutru higeno, 232'a vahetami atru hu'naze. Hagi ana amefira 7tauseni'a Israeli vahetmina kehuno eritru hu'ne. <sup>16</sup> Hagi ferutregema segeno Ben-hadati'a 32'a kini vahetaminena seli nompi mani'ne'za aka tina nene'za agafa hu'za neginagi hu'za mani'naze. <sup>17</sup> Hagi ana'ma nehu'za mani'nageno'a, provinsifima kvama hu'naza vahetmimofo sondia vahetamimo'za hahunaku esera Sameria rankumapintira atirami'za erimpi hu'za e'naze. Hagi anama neageno'a, Ben-hadati'ma huzmanteg'e'za kankavama hu'naza, vahe'mo'za sondia vahetamina Sameria ra kumapintira atirami'za neaze hu'za Ben-hadati'na ome asami'naze. <sup>18</sup> Hagi anagema hazageno'a, Ben-hadati'a amanage hu'ne, ha hunaku ege, amnema ege'ma nehanazana zamahe ofri amne zamazeriho. <sup>19</sup> Hagi provinsima kvama hu'nea vahetmimofo sondia vahetmimo'za egota hazageno, ana zamefira Israeli sondia vahetami e'naze. <sup>20</sup> Hagi ha'ma agafama higeno'a mago mago Israeli sondia vahe'mo'a mago mago ha' vahezmimo'ma ha'ma eme huzmantaza vahetmina zamahe vagare'naze. Ana'ma hazageno'a, Siria sondia vahe'mo'za atre'za frazageno, Israeli sondia vahe'mo'za zamavariri'naze. Hianagi Siria kini ne' Ben-hadati'ene karisima eri'za ha'ma nehaza vahe'mo'zanena hosi agumpi mareri'za fre'naze. <sup>21</sup> Hianagi Israeli sondia vahetmimo'za vu'za hosi afutamine karisiramine, Siria sondia vahetaminena tusi'a vahe zamahe fri'naze. <sup>22</sup> Hagi ana'ma hutazageno'a kasnampa ne'mo'a kini ne' Ahapunte erava'o huno amanage hu'ne, menima ha'ma hanana antahintahia retro nehunka manio. Na'ankure Siria kini ne'mo'a anaga'a kafufima tra'zamo'ma ete hage knare eno hara eme hugantegahie. <sup>23</sup> Hagi anagema hutuge'za Siria kini ne'mofo eri'za vahe'mo'za amanage hu'naze, Israeli vahe anumzantmimo'za agonafi anumzantami mani'nazankiza hankavezmimo'a tagri hankavea azeri agatere'za hara tagateraze. Hianagi agupofima ha'ma hanunana zamagateregahune. <sup>24</sup> Hagi amana huo, esera 32'a kini vahetmina zamazeri atrenka, zamagri nontera sondia vahetmimofo kva vahetami zamavarento. <sup>25</sup> Ana nehunka zamahe hana'ma hu'nazankna sondia vahetami nezamavarenka, hapima zamahe'nazankna hosi afutamine, karisiramine tamigeta agupofi hara ome huzmantamneno. Hazageno Ben-hadati'a ana antahintahima amiza antahintahirera, knarera huno anaza hu'ne.

### *Mago'ané Siria vahe'ene ha' hu'naza naneke*

<sup>26</sup> Hagi ete mago kafufima trazama hage knarerera, Ben-hadati'a Siria sondia vahetmina zamavareno Afeki kumate Israeli vahe ha' huzmante'naku vu'ne. <sup>27</sup> Hagi ana'ma hazageno'a, Israeli sondia vahetami ke hutru hu'za keonke zazmia retro hute'za Siria sondia vahe'mokizmi ha' huzmante'naku vu'naze. Israeli vahe'mo'za osi'a sipisipi afu kevumoza eri atruma ne-hazaza hu'za tarefi seli no ome ki'za mani'naze. Hianagi Siria sondia vahe'mo'za ana agupofina mani vite'naze. <sup>28</sup> Hagi ana'ma hazageno'a, Anumzamofo eri'za ne'mo'a Israeli kini ne' tava'onte eno amanage eme

hu'ne, amanage huno Ra Anumzamo'a hie, Siria sondia vahe'mo'za amanage haze, Ra Anumzamo'a agupofi anumza omani'neanki, agonafi anumza mani'ne hu'za hazankina, ama tusi'a sondia vhahera zamahe hana hanugenka, Nagrikura Ra Anumzane hunka kenka antahinka hugahane huno hu'ne.<sup>29</sup> Hagi 7ni'a knamofo agu'afina Siria sondia vahe'mo'za kantu kaziga seli nona ki'za manizageno, Israeli sondia vahe'mo'za kama kaziga seli nona kiza mani'naze. Hagi namba 7nima hiakna zupa hara agafa higeno, Israeli sondia vahe'mo'za mopafima nevu'za ha'ma nehaza Siria sondia vhahera 100 tauseni'a zamahe fri'naze.<sup>30</sup> Hagi mago'a sondia vahe'mo'za fre'za Afeki rankumapi ufrazageno, ana kumate'ma vihuma hu'za mareri'naza havemo fraguvaziramino 27 tauseni'a sondia vhahera zamahe vagare'ne. Hagi Ben-hadati'enena freno viazamo ana kumapina mago nomofona, vahe frakizane huno agu'afinka hunaragintenevi ome fraki'ne.<sup>31</sup> Hagi Ben-hadatina ugota eri'za vahetmimo'za amanage hu'za asami'naze, Israeli kini vahetmina vahaku zamasunku hu kini vahe mani'naze hu'za hazageta antahinone. E'ina hu'negu tagra zmasunkuma hu'zama nentaniza atafa kukena tafafafina ruganegita tanuntera nofi ruganegita Israeli kini netera vanune. Hagi e'ina'ma hanunkeno'a ontahet tatrengita manigahune.<sup>32</sup> Anage nehu'za zamasunku'ma nehu'zama nentaniza atafa kukena zmafafafina rugagi'za nentaniza, zamanuntera nofi ruganegi'za Israeli kini nete vu'za amanage ome hu'naze, Ben-hadati'a eri'za neka'amo'a amanage hie, muse hugantoanki onahenka natregena mani'neno huno hie. Anagema hazageno'a Israeli kini ne'mo'a amanage hu'nene, Agra nenfuki ofri amne mani'negeta eme nehazo? huno zamantahige'ne.<sup>33</sup> Hagi anankema nentahiza e'i knare ke hie hu'za nehu'za amanage hu'naze, Izo Ben-hadati'a negafu'e, hu'za hazageno amanage huno Israeli kini ne'mo'a hu'ne. Hagi vuta ome avreta echo, huno huzmante'ne. Hagi Ben-hadati'ma atiramino egeno'a, (Ahalu'a) higeno karisifi mareri'ne.<sup>34</sup> Hagi ana karisifi mareriteno'a amanage huno Israeli kini nera asami'ne, Nenfa'ma kagri negafama aheno hanare'nea kumatmina ete maka kaminugenka, nenfa'ma Sameria kumate'ma hu'neaza hunka fenoma mizaseno ete fenoma zagore'ma atre kumara Damaskasi kumate ana zana tro hugahane. Anagema higeno'a, Ahalu'a amanage huno asami'ne, E'ima kema hana antahintahire menina katresugenka vugahane. Anage nehuno erihagerafike manisa'a huvempagea huteno, atreno vu'ne.<sup>35</sup> Hagi ana'ma hutakeno'a, kasnampa vahe kevufinti Ra Anumzamo'a mago kasnampa ne' asamigeno otino mago kasnampa nekura naho huno hu'neanagi, ana ne'mo'a ohe'ne.<sup>36</sup> Ana'ma higeno'a ana kasnampa ne'mo'a kema ontahia kasnampa nekura amanage hu'ne, na'anckure kagra Ra Anumzamofo kea ontahi'nankino, menima amareti'ma atrenkama nevnankeno'a laionimo kahe frigahie. Anagema higeno, ana ne'mo'a nevigeno laionimo ahe fri'ne.<sup>37</sup> Hagi ana'ma hutegeno'a, ete ana kasnampa ne'mo'a mago ne' ome keno amanage hu'ne, Naho, huno higeno ana nera ahe kuzafa hu'ne.<sup>38</sup> Hagi ana'ma higeno'a ana kasnampa ne'mo'a vahe'mo'ma kezankura tavravenu avugosafina anakino antene hananeno kante kini ne avega ome anteno mani'ne.<sup>39</sup> Hagi kini ne'ma eneviana ana kasnampa ne'mo'a amanage huno asami'ne, Eri'za vahekamo'na tusi'a hapi mani'nogeno mago sondia ne'mo'a mago ha' ne' azerino avreno eme nenamino amanage hu'ne, Ama nera kegava huso'e huo. Hagi kegava huso'e osnankeno'ma katreno'ma fresige'na eme kahe frige, hanugenka kna'amo'a 30 tauseni'a kilo hu'nesnia silva zago mizasegahane,<sup>40</sup> Hagi anagema higena ke'onke zamofoma urimete erime-

tema nehuama'a, ana ne'mo'a natreno fre'ne. Anagema higeno'a, Israeli vahe' kini ne'mo'a amanage hu'ne. E'ina hu'negu anzamofo mizama'a kagrama kema hana kante antenka erigahane.<sup>41</sup> Anagema nehigeno'a, ana kasnampa ne'mo'a ame'ama huno ana tavaravea avugosafintira eritregeno, Israeli vahe kini ne'mo'a kasnampa vahetmimpinti mago zamimo'e huno keni hu'ne.<sup>42</sup> Hagi kini ne'mo'ma ana kasnampa ne'ma keni'ma higeno'a amanage huno asami'ne, Ra Anumzamo'a amanage huno hie. Ahe frio hu'nama hua nera amne atrankeno vu'ne. E'ina hu'negu agri no erinka kagra frisankeno, vahekamo'za agri vahe'mokizmi no eri'za haviza hugahaze.<sup>43</sup> Hagi Israeli vahe' kini ne'mo'ma anankema nentahino'a, avugosamo'a evuramigeno tusi rimpagna nehuno nom'a'rega Sameria vu'ne.

## 21

### *Ahapu'ma Naboti waini hoza kenunu hu'nea naneke*

<sup>1</sup> Mago'a kna evutegeno Jezrieli kumate ne' Naboti'a Jezrieli kumatera, Sameria kini ne' Ahapu nomofo tavaonte waini hoza'a me'negeno kegava hu'ne.<sup>2</sup> Hagi mago zupa kini ne' Ahapu'a amanage huno Nabotina antahige'ne, Waini hozakamo'a kuman'i'a tava'onte me'negu, namige'na nani'za hoza nentena, ana nona'a ete mago hoza knarema hu'neania kamige, mizanku'ma hananke'na mizasege haneno.<sup>3</sup> Hianagi Naboti'a amanage hu'ne, Ra Anumzamo'a negafampinti'ma erisantima hare'nenana zana, vahera omio huno hu'neanki'na onkamigahue.<sup>4</sup> Higeno'a Ahapuna avugosamo'a evuneramigeno tusi rimpaga neheno nom'a'rega vu'ne. Na'ankure Naboti'a huno, nenfampinti'ma erisantima hare'noa zana onkamigosue, huno hu'neazanku anara hu'ne. Anama higeno'a Ahapu'a kavera oneno avugosa rukrehe huno tafe'are mase'ne.

<sup>5</sup> Hianagi nenaro Jesebeli'a eazamo amanage huno eme antahige'ne, na'anku kavugosamo'a evuneramigenka kavera nonane?<sup>6</sup> Higeno amanage huno kenona hu'ne, Na'ankure Jezrieli kumateti ne' Naboti'na amanage hu'na antahige'noe, waini hozaka'a namige'na hoza nentena, ana nona'a ete mago hoza kamige, mizanku'ma hananke'na mizasege haneno hu'na huana, i'o onkamigosue huno hu'ne.<sup>7</sup> Higeno nenaro, Jesebeli'a amanage huno asami'ne, kagra Israeli kinia mani'eneka Israeli vahera kegava huzmantenananki, otinka ne'zana nenenka atregeno karimpamo'a kna osino. Jezrieli kumateti ne' Naboti waini hoza omeri kamigahue.<sup>8</sup> Anage nehuno Naboti'ma nemania kumate ranra vahetamintegane kva vahe'teganena mago avo kreno Ahapu azanko avo rukamare nenteno atregeno vu'ne.

<sup>9</sup> Hagi ana avompina amanage huno krente'ne. Ne'zana atreta nunamu hu kne huta maka vahetamina kehu atru hinke'za atruma hanageta, Nabotina agesga huta ese trate hinkeno, vahetmimofo zamavuga manino.<sup>10</sup> Ana nehuta mago kaziga kefo netre huznantenkeno, umanineke Nabotinkura, Anumzamofone kini ne'enena huhaviza hu'ne huke hunte'o. Hagi anagema hanageta, Nabotina avre atiramita have knonu ahe friho.

<sup>11</sup> Hagi anankema nentahi'za ana kumapi ranra vahe'ene, kva vahe'mo'za Jesebeli'ma avoma krezamino'ma hiho huno'ma hiazza hu'naze.<sup>12</sup> Hagi ne'za atreno nunamu hu kna erintazageno, vahe'ma atruma haza vahetmimofo zamavuga Nabotina ese trate avrente'naze.

<sup>13</sup> Hagi tare kefo netremokea Naboti'ma mania tra'mofo kantikaziga emanike amanage huka Nabotina havigea hunte'nae. Naboti'a Anumzamofone, kini ne'enena huhaviza huzanante'nae. Hagi anagema hakeno'a,

Nabotina rankumapintira avre'atirami'za havenknonu ahe fri'naze. <sup>14</sup> Hagi ana'ma nehu'za ana kumapi kva vahe'mo'za Jesebelintega amanage hu'za kea atre'naze, Nabotina hago havenknonu ahe frunkeno fri'ne, hu'za kea atrente'naze. <sup>15</sup> Hagi Jesebeli'ma ana kema nentahino'a, amanage huno Ahapuna asami'ne, Jezrieliit ne' Naboti'ma zagore'ma kami zanku'ma i'o huno'ma hu'nea ne'mofo waini hoza otinka omerio. Na'ankure agra omani'neanki, hago fri'ne. <sup>16</sup> Hagi Naboti'ma frie nanekema Ahapu'ma nentahino'a, ana waini hoza omeri nafa'a hunaku urami'ne.

<sup>17</sup> Hianagi Ra Anumzamo'a amanage huno Tisbe kumateti kasnampa ne' Elaijana asami'ne, <sup>18</sup> Otinka vunka Israeli kini ne' Ahapu'a Samerriama nemania ne'mo, Naboti waini hoza erinaku ana hozafi umani'neanki uraminka ome negenka, <sup>19</sup> amanage hunka ome asamio, Ra Anumzamo'a amanage huno hie, kagrama Nabotima ahenga hoza'ama enerinka korama'a eriraginanku, kramo'zama Naboti korama hu'zama naza kumate, anahukna hu'za kramo'za kagri korana hu'za negahaze hunka ome asamio. <sup>20</sup> Higeno vigeno Ahapu'a amanage huno Elaijankura hu'ne, Ha' vahenimoka nagrira eme nagenka erifore hane. Anage higeno Elaija'a amanage huno kenona hu'ne, Izo kagriku hake'na e'noe. Na'ankure kagra Ra Anumzamofo avurera kefo kavukava hu'nane. <sup>21</sup> E'ina hu'negu Ra Anumzamo'a amanage huno hie, Kagrrira rama'a hazenke kamigahue. Hagi Ahapuga kagripinti'ma fore'ma hanaza vahera amne vahe'ene, kazokzo vahe'enena maka zamahe vagaregahue. <sup>22</sup> Hagi Nebati nemofo Jeroboamu naga'ene, Ahiza nemofo Ba-asu naga'enema hu'noaza hu'na kagri nagara zamahe hana hugahue. Na'ankure kagra tusiza hunka nazeri narimpa nehenka, Israeli vahera zamazeri kumipina zamante'nane. <sup>23</sup> Hagi Jesebelinkura amanage huno Ra Anumzamo'a hu'ne, Jesebeli avufga kramo'za Jesrieli kuma keginamofo agu'afi negahaze. <sup>24</sup> Hagi Ahapu nagapinti'ma rankuma agu'afima frisaza vahera kramo'za nesageno, meg'i'ama frisnaza vahera namamo'za negahaze.

<sup>25</sup> Hagi Ahapu nenaro Jesebeli'ma havi antahintahi amino azeri savari'ma Ahapu'ma higeno, Ra Anumzamofo avure'ma havi avu'ava'ma hu'neankna avu'avara mago vahe'mo'e huno kora osu'neaza hu'ne. <sup>26</sup> Hagi ko'ma Israeli vahe'ma ome'nazageno ana mopafima Amori vahe'ma mani'nezama haviza huno kasrino agote avu'ava'ma nehazageno, Ra Anumzamo'ma zamahe natitre'neankna huno kaza osu havi anumzantaminte Ahapu'a monora ome hunte'ne.

<sup>27</sup> Hianagi Ahapu'ma ana nanekema nentahino'a, kukena'a tagato huno zamasunku'ma nehu'za atafa kukanama nehaza kukena eri nehuno, kavera a'o huno mani'ne. Hagi kenage'enena ana kukena antanino mase'neno, tusi asunku hu'ne. <sup>28</sup> Hagi ana'ma nehigeno'a, Ra Anumzamo'a amanage huno Tisbe kumateti ne' Elaijana asami'ne, <sup>29</sup> Nagri navugama Ahapu'ma agu'ama erinteramino asunku'ma hiazana hago kano. Na'ankure agra agu'ama erinteramino navuga asunku hianki'na agri knafina ana hazenke zana eriforera osugahuanki, mofavre'amofo knafi ana hazenke zana eri fore hugahue.

## 22

### Ahapu'ma namba 3 ha'ma Siria vahe'ma huzmante'nea naneke

<sup>1</sup> Hagi 3'a kafumofo agu'afina Siria vahe'ene Israeli vahe'enena hara osu mani'naze. <sup>2</sup> Hianagi namba 3 kafurera Juda kini ne Jehosafet'i'a

Israeli kini ne' kenaku e'ne. <sup>3</sup> Hagi Israeli kini ne'mo'a ugota eri'za vahe'araminkura amanage huno zamasami'ne, Ramot-gileati kumara tagri kuma'ma me'negeta Siria vahe kini nemofo azampinti'ma e'ori'nonana tamagra ontahi'nazo? <sup>4</sup> Hagi Ahapu'a rukraha huno Jehosafetina antahige'ne, kagra naza hanankena hara hu'na Ramot-gileati kumara erigahufi? Anagema higeno'a, Jehosafet'i'a Israeli kini nekura amanage hu'ne, sondia vahe'niaramine hosi afuni'amozanan tro hu'za mani'nazanki na'a huogu nehane? <sup>5</sup> Hianagi Juda kini ne' Jehosafat'i'a huno, ese'zana Ra Anumzamo'a na'ane hugahifi antahigeta keteta'e huno hu'ne. <sup>6</sup> Hagi anagema higeno'a, Israeli vahe kini ne'mo'a 400'a kasnampa vahetami kehige'za etru hazageno amanage huno zamantahige'ne, Ramot-Gileati vahera marerina hara ome huzmantenufi ome huozmante'nue, huno zamantahigege'za amanage hu'naze, amne marerinka hara ome huzmanto. Na'ankure Ra Anumzamo'a kazampi zamavarentena hara huzmagateregahane. <sup>7</sup> Hianagi Jehosafet'i'a amanage hu'ne, mago kasnampa vahera mani'nefi, asi'age mani'naze huno zamantahige'ne. <sup>8</sup> Anagema higeno'a, Israeli vahe kini ne'mo'a amanage huno hu'ne, Ra Anumzamofo antahintahima erisunana mago kasnampa nera Imla nemofo Mikai'a mani'ne. Hianagi nagra nagote'nteo nere. Na'ankure agra knare kasanampa kea nosianki, havi kasnampa kege nagrit-era hutere nehie. Anagema higeno'a, Jehosafet'i'a amanage huno hu'ne, kini ne'moka e'inagea osunka na'ane agra hugahifi antahisu'e. <sup>9</sup> Anagema higeno'a, Israeli vahe kini ne'mo'a eri'za vahe'a kehigeno egeno amanage huno hunte'ne, Imla nemofo Mikaiiana ame hunka ome avrenka eno.

<sup>10</sup> Higeno Israeli vahe kini ne' Ahapu'ene Juda vahe kini ne' Jehosafetikea kini kukanazini huteke Sameria kuma kafamofo tava'onte witi neharaza kumapi kini trate mani'na'e. Hagi maka kasnampa vahetmimo'za zanavuga mani'ne'za kasnampa kea hu'naze. <sup>11</sup> Hagi mago'zmimo Kenana nemofo Zedekaia'a ainire pazine tro huno eri'neno amanage hu'ne, Ra Anumzamo'a huno ama'na pazivenu Siria vahera nezamarenka, zamaretufenka nevunka zamahe hana hugahane huno hie. <sup>12</sup> Anagema higeno'a, ana maka kasnampa vahe'mo'za mago zamarimpa nehu'za amanage hu'naze, marerinka Ramot-giliati vahera hara ome huzmagatero. Na'ankure Ra Anumzamo'a ana maka vahera kini ne'moka kazampi zamavarentegahie.

<sup>13</sup> Hagi Mikaiama avrenaku'ma vu'nea ne'mo'ma ome avrenoma ne-eno'a amanage huno kasnampa ne' Mikaiana asami'ne, antahio, kini ne'mo'ma zamavare atruma hu'nea kasnampa vahe'mo'za knare kege kini nera asami'naze. Hagi kagrama vanunka, ana hunka knare kege kini nera ome asamio. <sup>14</sup> Hianagi Mikai'a amanage huno kenona hu'ne, Nagra kasefa huno mani'nea Ra Anumzamo'ma nasami'nia kege'za hugahue, huno hu'ne. <sup>15</sup> Hagi Mikai'a ma kini ne' Ahapu avugama ehanatigeno'a, Ahapu'a amanage huno antahige'ne, Mikaiaga Ramot-giliati vahera marerina hara ome huzmantenufi hara ome huozmantenue? Higeno Mikai'a amanage huno kenona hu'ne, vunka hara ome huzmanto. Na'ankure Ra Anumzamo'a ana maka vahera kazampi zamavarentegahie. <sup>16</sup> Hianagi kini ne'mo'a amanage huno kenona hu'ne, nama'a zupa Ra Anumzamofo kema hvempa hunka tamagea nasamiogura kantahia negoe? <sup>17</sup> Anagema higeno'a, Mikai'a amanage huno hu'ne, Israeli vahe'mo'za kvazmimo'ma omani sиписимо'зма nehzaza hu'za agonaramimpina panani hu'za vu'za eza nehzazeg'na ke'noe. Ana'ma hazageno'a, Ra Anumzamo'a amanage huno hu'ne, kvazmimo'ma omani'neanki huzmanteg'eza nozmirega zamarimpa frune vu'za e'za hiho huno hu'ne. <sup>18</sup> Anagema higeno'a Israeli vahe kini

ne'mo'a amanage huno Jehosafatina asami'ne, Nagra ko'ma kasami'na, nagritera knare kasnampa kea osugosianki, havi kasnampa kege hugahie hu'na kasami'noe. <sup>19</sup> Hagi Mikaia'a amanage huno hu'ne, E'ina hu'negu Ra Anumzamo'ma hiankea kama antahilo. Hagi kogeno Ra Anumzamo'a kini tra'are monafi mani'negeno monafi Sondia vahe'amo'za tamaga kazigane, hoga kaziganena mani kagi'nazageno, <sup>20</sup> amanage hune, Iza Aha-puna ami'mira hanigeno'a, Ramot-giliatia vanige'za ahegahaze? Hagi anagema higeno mago'mo'a ru antahintahi nenteana, mago'mo'a ru antahintahi nenteana hu'naze. <sup>21</sup> Hagi ana'ma nehazafintira mago avamu'mo Ra Anumzamofo avuga eazamo, nagra ami'mira hugahue. <sup>22</sup> Anagema higeno'a, Ra Anumzamo'a amanage huno asami'ne, Inankna hunka anara hugahane, huno antahigegeno agra ana avamu'mo'a amanage huno hu'ne, nagra ana maka kasnampa vahe zamagipi hvuzina havige hugahue. Anagema higeno'a, tamage hunka revatga hanankeno keka'a antahigahianki, vunka ana ome huo. <sup>23</sup> E'ina hu'negu ko, Ra Anumzamo'a menina kazeri haviza hunaku havige avamutmi ama kasnampa vahe'mofo zamagipina antenege'za, hazenke kampi kavrentaze. <sup>24</sup> Hagi anagema higeno'a Kenana nemofo Zedekaia'a eazamo Mikaiana ameregenti eme rupro huno neheno amanage hune, inankna huno nagripintira Ra Anumzamofo avamu'mo'a natreno kema ome hugaminakura vie? <sup>25</sup> Anagema higeno'a, Mikaia amanage huno asami'ne, nompima hunaragima ante'nfima ome framakisana zupa e'ire antahi ama hugahane. <sup>26</sup> Hagi anagema higeno'a, Israeli vahe kini ne' Ahapu'a amanage huno hu'ne, Mikaiana azerita rankumamofo gavana ne' Amoninte'ene, kini ne'mofo mofavre Joasinte avreta yuta, <sup>27</sup> kini ne'mo'a amanage hie huta ome asamaho, ama nera avreta kina hunte'neta tine bretinena osi'a amitere nehinke'na hatetira a'neno, huno hie huta ome zanasamaho. <sup>28</sup> Hianagi Mikaia'a amanage huno kenona hu'ne, Kagrama knare'ma hunka hatetima esunka, nagrikura Ra Anumzamofo kea erino eme osune hunka hugahane. Anage nehuno manigagi'naza vahera amanage huno zamasami'ne, Amama huanken'i'a antahinteta maniho.

### *Kini ne' Ahapu'ma fri'nea zamofo naneke*

<sup>29</sup> Hagi ana'ma hutegeno'a, Israeli vahe kini ne' Ahapu'ene, Juda vahe kini ne' Jehosafetikea hahunaku Ramot-giliati kumate mareri'na'e. <sup>30</sup> Hagi Israeli vahe kini ne'mo'a amanage huno Jehosafatinkura hu'ne, Hate'ma vanu'ana, nagra ru kukena hu'na ru vahe kna hu'na vugahuanki, kagra kini kukenaka'a hunka vuo. Anage nehuno Israeli vahe kini ne'mo'a amne kukena nehuno, ru vahe kna huno hatera vu'ne. <sup>31</sup> Hagi Siria kini ne'mo'a, karisima erino'ma ha'ma nehia sondia vahetmima kegavama nehaza vahera 32'a kva vahe amanage huno huzmante'ne, ha'ma hanazana sondia vahero zamagima me'nesia kva vahetminkura tamagesa ontahita, Israeli kini neke'za hara huntaho. <sup>32</sup> Hagi anagema higeno'a karisima eri'za ha'ma nehaza sondia vahetaminte'ma vugagotama hu'naza sondia vahe'mo'za Jehosafetima nege'za amanage hu'naze, Israeli vahe kini nera antu'ne hu'za nehu'za rukrahe hu'za avariri'naze. Hianagi Jehosafeti'a ranke huno kezana atigeno, <sup>33</sup> karisima eri'za ha'ma nehaza sondia vahete'ma vugotama hu'naza Sondia vahetmimo'za kazana Israeli kini nerompage ru ne' rotago hu'za nevazaretira atre'za rukrahe hu'za e'naze. <sup>34</sup> Hianagi mago ne'mo'a fatufatu huno Israeli Sondia vahera kevea zamaheno virega, Israeli kini nera ha' kukena'amo'a emete'nea kampi mago kevea ahe'ne. Ana'ma higeno'a, karisima erino avreno'ma nevia nekura amanage hu'ne, Tavata kevea hago nahazanki hapintira navrenka rukrahe hunka atiraminika

vuo. <sup>35</sup> Higeno ana kini nera karisifi retru rentene'za Siria vahetaminena hara nehazageno kinaga ome segeno fri'ne. Hagi ana kini ne'mofo koramo'a ana karisifina avite'ne. <sup>36</sup> Hagi zagema ufre'zama higeno'a mago'a vahe'mo'za kezati'za amanage hu'naze, hagi hara atreta maka vahe'mota kumatamirega vuta etma hoho, hu'za hu'naze.

<sup>37</sup> Ana higeno kini nera frige'za Sameria eri'za e'za eme asente'naze. <sup>38</sup> Ana nehu'za Sameria me'nea tirute kini ne'mofo korana karisifintira sese nehazageno Ra Anumzamo'ma hu'neankante anteno kramo'za korama'a hune hane nehazageno savri a'neramimo'za ana tirupina tina fre'naze.

<sup>39</sup> Hagi Ahapu'ma kinima mani'nea knafima fore'ma hu'nea zantamine, agrama kinima mani'neno'ma hu'nea zantamine, elefanti afu'mofo zaza aveteti (ivory) konaririma hunte'nea nomofo agenkene, rankumatmima tro'ma hu'nea agenkenena Israeli kini vahetmimofo agenkema krente'naza avontafepi krente'naze. <sup>40</sup> Hagi Ahapu'a frigeno nemofo Ahazia nefo nona erino kinia mani'ne.

<sup>41</sup> Hagi kini ne' Ahapu'ma 4'a kafuma kinima manigeno'a, Asa nemofo Jehosafati'a Juda vahe kinia efore huno mani'ne. <sup>42</sup> Hagi Jehosafati'a 35'a kafu hu'neno, kinia efore huno mani'neno, 25'a kafufi Jerusalemi kumatera kinia mani'ne. Hagi nerera'a Silhi'e nehaza ne'mofo mofakino agi'a Azuba'e. <sup>43</sup> Hagi Jehosafati'a, nafa'amo'ma Asa'ma hu'nea avu'ava avaririno knare kini mani'ne. Ra Anumzamofo avurera knare avu'ava hu'ne. Hianagi kinima mani'neno'a havi anumzante'ma mono hunentaza kumara eri havizana osu'ne. Ana hu'negu vahetmimo'za havi anumzantera kresramna vunente'za mninanentake zana kre mnanevu'za monora hunte'naze. <sup>44</sup> Hagi Jehosafati'a Israeli vahe' kini ne'enena hara osuno eri mago arimpa huno fru huno mani'ne. <sup>45</sup> Hagi Jehosafeti'ma kinima mani'negeno'ma fore'ma hu'nea zantamine, hanavenentake zama nehuno, ha'ma hu'nea agenkenena Israeli kini vahetmimofo agenkema krenentaza avontafepi krente'naze. <sup>46</sup> Hagi havi anumzama mono'ma hunentaza kumapima monko'zama nehaza vene'nene, a'enenena Jehosafati nefo, Asa'ma zamahe hana'ma hige'za mago mago'ma vahe'ma mani'nazana, Jehosafati'a zamahe hana hu'ne. <sup>47</sup> Hagi e'i ana knafina Idomu vahe kinia omani'neankino, kini ne'mofo amefiga'ama hu'nea ne' Jehosafati'a huntogeno Idomu vahera kegava huzmant'e. <sup>48</sup> Hagi Jehosafati'a hagerimpima vuno Ofiri kumatetima golima omerino'ma esia venteramina tro hu'neanagi, ana kumatera ovu'naze. Na'ankure ana venteramimo'za Ezion-geber kumate haviza hu'za me'naze. <sup>49</sup> Hagi ana'ma higeno'a, Ahapu nemofo Ahazia'a amanage huno Jehosafatinkura hu'ne, atrege'za eri'za vahe'nimo'za venteka'afina viho huno hu'ne. Hianagi Jehosafati'a ke'a ontahi'ne. <sup>50</sup> Hagi Jehosafeti'a frige'za agehe'mofoma asezmant'e naza matipi negeho Deviti kumapi asente'naze. Hagi nemofo Jehoramu agri nona erino kinia mani'ne.

<sup>51</sup> Hagi Jehosafati'ma 17ni'a kafuma Juda vahe kini nemani'negeno'a, Ahapu nemofo Ahazia'a kinia efore huno Sameria kumate mani'neno tare kafufi Israeli vahe kinia manino kegava hu'ne. <sup>52</sup> Hianagi Ahazia'a Ra Anumzamofo avufina nerera nefo avu'ava avaririno kefo avu'ava nehuno, Nebati nemofo Jeroboamu hu'nea avu'ava avaririno Israeli vahera zamazeri kumpina zamatre'ne. <sup>53</sup> Hagi nefo'ma hu'neaza huno Ahazia'a Bali havi anumzamofo avaririno monora hunenteno, Ra Anumzana Israeli vahe Anumzamofona azeri arimpa ahe'ne.

## 2 Kin Nampa 2 Kinie

*Ahazia'a havi avu'ava higeno Anumzamo azeri haviza hu'nea naneke*

<sup>1</sup> Hanki Israeli vahe'mokizmi kini ne' Ahapu'ma fritegeno, Moapu vahe'mo'za zamagra'a zamagiare ot'i'naku, Israeli vahera ha'huzamante'za hu'naze.

<sup>2</sup> Hagi Ahasia'a Sameria kumate mani'neno mago zupa zare noma'amofo meg'i'a husga hunte'neno zaho'ma enerire enevuno, ananteti evuramino ra hazenke eri'ne. Anama huteno'a kato vahe'a zamasmino amanage hu'ne, Ekroni vahe'mofo anumza Balsebabunte vutma hazenkema erua hazenkefintira kanamregahufi ome antahigetma keho. <sup>3</sup> Hianagi Ra Anumzamofo ankeromo Tisbe kumateti kasnampa ne' Elaijana amanage huno asmi'ne, Otinka Sameria kini ne'mo'ma huzmanteg'e'za neaza kato vahe'ma ome nezamagenunka amanage huo, Israeli kumatera Anumzana omani'negeta Ekroni vahe havi anumzana Balsebabuntagatira antahintahia ome erikura nevazo hunka zamantahigo? <sup>4</sup> E'inahu avu'avazama Ahaziamma hiazanku Ra Anumzamo'a huno tamagerfa huno hazenkema erino mase'nea tafetetira oraotino frigahie! Higeno Elaija'a vuno kini ne'mofo kato vahera, anankea ome zamasami'ne.

<sup>5</sup> Elaijama hiankema antahite'za ana kato vahe'mo'za ete'za kini nete vazageno, kini ne'mo amanage huno zamantahige'ne, na'ahigetma ame hutma aze? <sup>6</sup> Anage hige'za agri kemofo nona'a amanage hu'za asmi'naze, Mago ne'mo kampi eme tutagiba huranteno amanage huno tasami'ne, huramantegeta e'naza kini nera amanage huta ete ome asamiho, Ra Anumzamo'a amanage huno hu'ne, Israelia Anumzana omani'negenka Ekroni vahe havi anumzana Balzebabunteti antahintahia erikura huzmantanke'zma e'nazo? E'inahu kavukvama hu'nanana, hazenkema erinka tafete'ma mase'nampintira onkanamrenka tamage hunka frigahane huno hu'ne. <sup>7</sup> Anankema kini ne'mo'ma nentahino'a amanage huno zamantahige'ne, inanknahu ne'mo eme tutagihara huramanteno anankea tamasami'ne? <sup>8</sup> Hige'za kini ne' Ahazia ke'mofo nona'a amanage hu'za asami'naze, Ana ne'mofo avufarera azokamoke higeno, agra zagagafamofo azokateti tro hu'naza \*kukena antani'neno, zagagafamofo akruteti tro hu'naza amu'nofi afafafina hu'ne. Anankema kini ne'mo'ma nentahino'a, e'i Tisbe kumateti ne' Elaija'e. <sup>9</sup> Anante kini ne'mo'a 50'a sondia vahete ugote'nea ne' mago avrenteno 50'a sondia vahe'ene huzmanteg'e'za Elaija avrenaku vu'naze. Hagi Elaija'ma mani'nea osi agonare vute'za, sondia vahete ugote'nea ne'mo'a ana agonafi marerino Elaijanku amanage hu'ne, Anumzamofo eri'za ne'moke, kini ne'mo'a kagrikura eraminka eme nago hu'ne. <sup>10</sup> Higeno Elaija'a ana sondia vahete kva nera amanage huno asmi'ne, Nagrama Anumzamofo eri'za ne'ma mani'nesugen'o'a, monafintira tevemo'a eramino kagri'ene 50'a sondia vaheka'a terasgesie. Higeno monafintira tevemo'a eramino ana sondia vahete kva ne'ene, 50'a sondia vah'e'enena te fanane hu'ne.

<sup>11</sup> Anama higeno'a ete mago'ene kini ne' Ahazia'a sondia vahete ugagota hu'nea nera mago avrenteno 50'a sondia vahe'ene huzmanteg'e'za Elaijana

---

\* <sup>1:8</sup> Mago'a avontafepina azokake nere nehazageno, mago'amo'za zagagafamofo azokateti tro hu'naza kukena antanine hu'za hu'naze.

ete ome avre'za enaku vu'naze. Hagi anante uhanatite'za sondia vahete kva ne'mo'a amanage huno hu'ne, Anumzamofo eri'za ne'moka, kini ne'mo'a ame hunka eraminka eme nago huno hu'ne! <sup>12</sup> Hianagi Elaija'a kezmimofo nona'a amanage huno zamasami'ne, Nagrama Anumzamofo eri'za ne'ma tamage hu'na mani'nesugeno'a, monafinti tevemo'a eramino, kagri'ene 50'a sondia vaheka'a te vagaresie. Higeno monafinti Anumzamofo tevemo eramino ana sondia vahete kva ne'ene 50'a sondia naga'anena te fanane hu'ne.

<sup>13</sup> Hanki anante nampa 3rera kini ne'mo'a ru'ene sondia vahete ugagote'nea ne' mago avrenenteno, 50'a sondia vahe'ene huzamantge'za Elaijana ete ome avre'za enaku vu'naze. Hanki ana sondia vahete kva ne'mo'a Elaija'ma agonafima mani'nere vuno agiafi rena omereno amanage huno asmi'ne, Anumzamofo eri'za ne'moka muse hugantoanki, nagri'ene sondia vahe'ni'anena, antahiraminka kasunku huranto. <sup>14</sup> Hanki kote'ma monafinti tevemo'ma eramino, ugagota sondia netrene, sondia vahe zani'anema te fanenema hu'neana nagra antahi'noe. Hanki menina antahinaminka kasunku hunanto. <sup>15</sup> Higeno anante Ra Anumzamofo ankeromo Elaijana amanage huno asmi'ne, Korora osunka agrane amne uramio. Higeno Elaija'a otino ana sondia vahete kva ne'ene uramino, kini nete vu'ne. <sup>16</sup> Hanki Elaija'a kini nera amanage huno asmi'ne, Ra Anumzamo'a amanage hu'ne, Israelia Anumzama mani'neana Agripintima antahi'zana eri'zankura na'ante kato vaheka'a huzmantanke'za Ekroni vahe anumzana Balsebabunategatira antahintahia ome erikura vu'naze. E'inahu kavukvama hu'nana zantera tamagerfa hunka hazenkema erinkama tafete'ma mase'nampintira onkanamrenka frigahane.

<sup>17</sup> Hagi henka Ra Anumzamo'ma Elaijama asami'nea kante anteno, Ahazia'a fri'ne. Hagi Ahazia'a ne' mofavrea onte'negu huno agri negna Joram agri nona erino kinia mani'ne. Ana knafina Jehosafati nemofo Jehoramu'ma Juda naga'mokizmi kini fore huno nampa 2 kafu mania knafi ana zana fore hu'ne.

<sup>18</sup> Hanki Ahazia'ma kinima mani'nea knafima fore'ma nehigeno, agranema tro'ma hu'nea zantamimofo agigenkea, Israeli kini vahe'mokizmi zamagenkema krenentaza avontafepi krente'naze.

## 2

### *Ra Anumzamo Elaijama avreno monafinka vu'nea naneke*

<sup>1</sup> Hanki Ra Anumzamo'ma Elaijama hanavenentake kagigagi zahopima avreno'ma monafinkama vania knamo'a egofta hu'ne. Ana hu'negu Elaija'ene Elisakea Gilgali kumara atreke vu'na'e. <sup>2</sup> Anama huke nevakeno Elaija'a amanage huno Elisana asmi'ne, Muse hugantoanki, Ra Anumzamo nagrikura Beteli vuo hige'na vu'za huanki amare kagra manio. Hianagi Elisa'a ke nona'a amanage hu'ne, Kasefa huno mani'nea Ra Anumzamofo avufine, kagri kavufine huvempa huanki'na, kagrane Betelia vugahue. Anage higeke Betelia magoka vu'na'e. <sup>3</sup> Hanki Betelia mago'a kasnampa vahe mani'nazanki'za, ana kasnampa vahe'mo'za tutagiba huznante'za Elisana amanage hu'za asmi'naze, Ra Anumzamo'ma kva neka'ama menima avaresiana antahi'nampi? Hu'za hazageno ananke nonazmia amanage huno zamasami'ne, Hago antahi'noanki ana zankura keaga osiho. <sup>4</sup> Hanki zangra Betelima mani'nekea Elaija'a amanage huno Elisana asmi'ne, Nagrikura Ra Anumzamo'a Jeriko vuo huno nasamianki', Elisaga muse hugantoanki kagra

amare manio. Hianagi Elisa'a amanage hu'ne, kasefa huno mani'nea Ra Anumzamofo avufine, kagri kavufine huvempa huanki'na, kagrane Jerikoa vugahue. Anage higeke magoka Jeriko kumate vu'na'e. <sup>5</sup> Hanki Jerikoa mago'a kasnampa vahera mani'nazanki'za, ana kasnampa vahe'mo'za Elisante e'za amanage hu'za asmi'naze, Ra Anumzamo'ma kva neka'ama menima avresiana antahi'nampi, hu'za hazageno ana kenonazmia amanage huno zamasami'ne, Hago antahi'noanki ana zankura mago'ene keaga osiho. <sup>6</sup> Hanki zanagra Jerikoma mani'nekea Elaija'a amanage huno Elisana asmi'ne, Nagrikura Ra Anumzamo'a Jodani tintega vuo huno nasamigu, muse hugantoanki kagra amare manio. Hianagi Elisa'a amanage hu'ne, Kasefa huno mani'nea Ra Anumzamofo avufine, kagri kavufine huvempa huanki'na kagrane Jodani tintega vugahue. Anage higeke magoka Jodania vu'na'e. <sup>7</sup> Hanki Elaijake Elisakea Jodani timofo ankenare uoti'nake'za, 50'a kasnampa vahe'ma zanamage vu'naza vahe'mo'za afete oti'ne'za zange'naze. <sup>8</sup> Anante Elaija'a amega antani'nea za'za nagreku'a zafino eri vamagiten, ana nakre ku'areti Jodani tina amasagigeno, timo'a rupapa huno tare kaziga vuno eno higeno, mopamo'a hagage higeke, kantu kaziga takaheke vu'na'e.

<sup>9</sup> Hanki tima takaheke kantu kazigama vutekea, Elaija'a amanage huno Elisana asami'ne, Ra Anumzamo'ma navresnige'nama katre'na vanua knamo'a hago kofta hianki, na'a kagriria hugantesufi nasamio, higeno Elisa'a kenona'a amanage hu'ne, Muse hugantoanki kagripima me'nea avamura nami'enka, mago'ene ante agofetu hunka namio. <sup>10</sup> Higeno ana kemofo nona'a Elaija'a amanage huno Elisana asmi'ne, Kagra tusi'a amuho hu'nea zanku nantahigane, hu'neanagi kagrama nenagesankeno Ra Anumzamo'ma navresigenka ana hanave'a amne erighane. Hianagi onagesanana e'origahane. <sup>11</sup> Hanki magoka keaga huke nevakeno, anante ame huno monafinti tevenefake hosi afutamimo'za tevenefake karisi avazu hu'za amu'nozanifi erami'za zanazeri kantugama hazageno, hankave nentake kagigagi zahomo Elaijana eme avregeno monafinka marerino vu'ne. <sup>12</sup> Anazama Elisa'a negeno'a kezatino amanage hu'ne, Nafanimoke, nafanimoke, kagra Israeli vahe'mokizmia hosi agumpi manine'za ha'ma nehaza vahekna hunenka karisiraminkna hu'nane. Hagi Elaija'a hago vigeno Elisa'a mago'ene onke'ne. Anante Elisa'a amegama antani'nea nakre ku'a tarefi eri tagato tagatu hu'ne.

<sup>13</sup> Hagi Elaijama zaza nakre ku'amo'ma mopafima erami'neana, Elisa'a e'nerino vuno Jodani tinkenare ete ome oti'ne. <sup>14</sup> Anante Elaija nakre kuma mopafima evuramiana Elisa'a erino tina nemasagino amanage hu'ne, inantega Ra Anumzana, Elaija Anumzana mani'ne, higeno timo'a rupapa huno rugaraga vuno eno higeno, kantu kaziga vu'ne. <sup>15</sup> Hanki Jerikoma 50'a kasnampa vahe'ma mani'naza naga'mo'za anazama nege'za amanage hu'naze, Elaijampima me'nea avamumo'a Elisante me'ne, nehu'za vu'za ome nege'za, agiafi zamarena re'za ra agi amiza hu'naze. <sup>16</sup> Anante zamagra amanage hu'za Elisana asami'naze, tagra Kagri eri'za vahe'mota 50'a hankave vahe mani'nonku tatregeta vuta kva neka'agura ome haketa kamnenno. Na'ankure Ra Anumzamofo avamu'mo avreno agonarego, agupofi ome atrege hunegahie. Hazageno ana kezamirera Elisa'a zamasamino, i'o huzamantenke'za oviho. <sup>17</sup> Hianagi zamagra tusi'za hu'za kazigazi hazageno, i'oma huzankura agaze higeno anage hu'ne, hanki huzamantenke'za viho. Anage hige'za 50'a vahe huzmantage'za vu'za tagufa zage knafi ome hake'naze. Hianagi zamagra onketfa hu'naze. <sup>18</sup> Hanki Elisa'ma Jeriko

mani'nere zamagra ete azageno, amanage huno zamasami'ne, nagra na'ane hu'na tamasamuane, oviho hu'nama huana nahigeta nagri kea ontahi'naze?

### *Elisa'ma Jeriko mago ti eriso'e hu'nea naneke*

<sup>19</sup> Hanki mago zupa Jeriko rankumapi vahe'mo'za Elisana amanage hu'za asmi'naze, kva vahe'timoka ko, ama kuma'ma me'neana knare zantfa huno me'ne. Hianagi timo'a havizantfa hu'negeno, avimzama mopafima hankronana nena rente so'ea nosie. <sup>20</sup> Anante Elisa'a amanage huno zamasami'ne, vuta mago kasefa zuompafi hagea anteteta erita amare echo. Hige'za kema hiaza hu'za eri'za e'naze. <sup>21</sup> Anante Elisa'a vuno timo'ma kampu'ima nehanatifi ana hagea ome netreno amanage hu'ne, Ra Anumzamo'a amanage huno hie, Nagra ama tina eri so'e huankino mago'ene vhahera zamahe ofrigahie. Hagi hankrisaza ne'zamo'a havizana osuno, knare huno nena rentegahie. <sup>22</sup> Higeno ana timo'a Elisa'ma hiankante anteno, knare huno meno eno, menina ama knarera ehanati'ne.

### *Mofavre naga'mo'za Elisama azanavanke hunte'naza naneke*

<sup>23</sup> Hagi Jerikotira Elisa'a atreno Beteli marerino vu'naku vu'ne. Karankama nevige'za mago'a mofavre naga'mo'za ran kumapinti atirami'za ranke hu'za azanvankea amanage hunte'naze, Kazamonke ne'moka maniganenka vuo, kazamonke ne'moka maniganenka vuo. <sup>24</sup> Anage hazageno Elisa'a rukrahe huno ana mofavre naga'ma nezamageno'a Ra Anumzamofo agifi (sifna kea) zamazeri havizahu kea huzamantegeno, Ame huke tare a' beamoke tva'onte me'nea zafa tanopafinti atiramike eke ana 42'a mofavreramina zamaheke tapagetapagu hu'na'e. <sup>25</sup> Anantetira Elisa'a atreno Karmeli agonarega vuteno, ete anantetira rukrahe huno Sameria vu'ne.

## 3

### *Moapu vahe'mo'za Israeli vahe'mokizmi kea ontahi'naza naneke*

<sup>1</sup> Hagi Jehosafati'ma Juda naga'mokizmi kinima mani'negeno vuno 18nima hia kafufina, Ahapu nemofo Joram'u'a Israeli vahe kinia fore huno Sameria kumatera mani'neno 12fu'a kafufi Israeli vhahera kegava hu'ne. <sup>2</sup> Ra Anumzamofo avurera Joram'u'a havi avu'avaza hu'ne. Hianagi nefake nererake'ma tusi'a havi zanava zanava'ma hu'na'a avamenteera osu'ne. Nefake nererakema Bali havi anumzamofo amema'ama havere'ma tro'ma hunte'na'ana eri haviza hutre'ne. <sup>3</sup> Agra e'ina hu'neanagi Nebati nemofo Jerooboamu'ma Israeli vahe'ma huzamaveri nehuno, zamavareno vu'nea kumi avu'ava hu'ne. Jeramu'a ana havi avu'ava zana atreno amefira huomi'ne.

<sup>4</sup> Hagi Israeli vahe'mo'za hakare'a kafuma evu'nea knafina Moapu vhahera kva huzmante'naze. Hagi Moapu kini ne' Mesa'a 100 tauseni'a anenta ve sipisipi afutami Israeli kini nera nemino, azoka'ama hareno eri'zana 100 tauseni'a sipisipi afutamimofo azokatami Israeli kini nera maka kafurera amitere hu'ne. <sup>5</sup> Hianagi Israeli kini ne' Ahapu'ma fritegeno'a, Moapu kini ne'mo'a Israeli kini ne'mofonkea ontahino takisia zagoa omi'ne. <sup>6</sup> Higeno kini ne' Joram'u'a Sameria kumara atreno maka Israeli sondia vhahera zamazeri retro hu'ne. <sup>7</sup> Anante Joram'u'a Juda kini ne' Jehosafatina amanage huno nanekea atrente'ne, Moapu kini ne'mo'a keni'a ontahigu, kagra knare eme naza hananketa hara marerita ome huntegahufi! Higeno amne kagranena vugahue. Hagi na'anema hnanana kagri kamage ante-gahue. Nagri sondia vahe'ene hosi afutaminu'enena kagria kaza hugahue.

<sup>8</sup> Hianagi ina kazigati vuta hara ome huntegahu'e, higeno Joramua' ke nona'a huno, Idomu hagege ka'ma kokampima vu'nea karanka vugahune. <sup>9</sup> Hige'za Israeli kini neki, Juda kini neki, Idomu kini ne'ma hu'za sondia vahe'zamia zamavare'za vu'naze. Hagi anankama vu'naza kamo'a zaza hu'nege'za 7ni'a zagefi vazageno, ti zamimo'a vagarege'za sondia vahe'ene afutamimo'za tima nezanku tusiza hu'naze. <sup>10</sup> Anama hazageno Israeli kini ne' Joramua' amanage hu'ne, Ra Anumzamo'a tagrira 3'a kini vahe'mota, Moapu kini ne' azampi tavrentenaku tazeri atru nehifigure huno hu'ne. <sup>11</sup> Hianagi Jehosafati'a Joramuna amanage huno antahige'ne, Amafina magora Ra Anumzamofo kasnampa nera mani'nefii omapi'ne, kesnunkeno Ra Anumzamofona antahigenigeno na'a hiho huno asminigeno eme tasamigahifi antahisanune. Anage higeno Israeli kini ne'mofo eri'za ne'mo'a, ana kemofo nona'a amanage hu'ne, Korapara kasnampa ne' Elaijama azama huno katoma hunemia nera Safati nemofo Elisa'a mani'ne. <sup>12</sup> Hagi Jehosafati'a ana kema nentahino'a amanage hu'ne, Ra Anumzamo'ma hanianke tasamigahie hige'za, Juda kini ne' Jehosafatiki, Israeli kini ne' Jehoramuki, Idomu kini ne'ma hu'za Elisana ome kenaku urami'naze. <sup>13</sup> Anante Elisa'a Israeli kini nera amanage huno asmi'ne, Na'a kagrira hugantenaku hugenka amarera neane? Negafane negreragizni kasnampa vahetega vuo. Hianagi Israeli kini ne' Jehoramua' amanage hu'ne, Tagrama e'nonana, Ra Anumzamo'a ama ana maka 3'a kini nagara tavre atru huteno Moapu kini ne'mofo azampi tavrentenaku higeta kagrite neone. <sup>14</sup> Anante Elisa'a Israeli kini ne' Jehoramuna amanage huno asmi'ne, Nagrama eri'zama erinentoaa hankvenentake Ra Anumzama ohampirga'sondia vahetamimofo Anumzamofo avufi tamage huanki'na, Juda kini ne' Jehosafati'ma kagranema omesina kagri kavufina onketfa husine. <sup>15</sup> Hanki menina vuta knare'ma huno zavenama nehesia ne' ome avreta echo. Hige'za ana ne' ome avre'za azageno zavena nehegeno, Ra Anumzamofo hanavemo Elisante e'ne. <sup>16</sup> Anante Elisa'a amanage hu'ne, Ra Anumzamo'a amanage hie, ko'ma tima evuteno hagegema hu'nea tinkagomupina rama'a keri kafintetere hiho hie. <sup>17</sup> Na'ankure Ra Anumzamo'a amanage huno hie, Kora neranigeno zaho'enena e'nerinigeta tamagra onkegahaze. Hianagi ama tinkagomupina timo'a avitegahie. Ana hanigetma tamagrane, bulimakao afu zagatamine, mago'a zagagafa tami'nena timo'a avite'nenigetma negahaze. <sup>18</sup> Hanki ama anazana Ra Anumzamo'a amne tro hugara hu'neankino, amne tro hugahie. Ana nehuno Moapu kini ne'ene sondia vahe'anena tamagri tamazampi zanavrentena hara hu zamagateregahaze. <sup>19</sup> Ana nehutma hankave nentake vihureti'ma hu kaginte'naza rankumatamine, agima marerisa kumatmina hahu zamagateretma e'nerita, knarenare zafaramina antagi netretma, tinkeriramina renagreta, knare'ma huno hozama antega moparamina havereti ante avitegahaze. <sup>20</sup> Anage hutegeno haninkino komatigeno'a nantera ofama huknare ame huno Idomu kazigati timo'a hageno eno, ana mopafina eme marevite'ne. <sup>21</sup> Hanki zamagra maka Moapu vahe'mo'zama antahizama, 3'a kini vahe'mo'zama ha'ma eme huzmanteku'ma aze ke'ma nentahi'za, ranra vaheteti vuno kasefa vahetema vigeno ha'ma huga vahe'a maka zamagi hutru hu'za hahunaku Moapune, Idomu mopama eme atre agentega eme trotra hu'naze. <sup>22</sup> Ana kna evutegeno anante nanterana Moapu vahe'mo'za mase'nareti'ma ot'i'zama kazana, zagemo'ma tinte'ma zagemarentea zamo'a koranentike huno korankna hige'za, ogantu mani'ne'za ke'naze. <sup>23</sup> Anama nehu'za amanage hu'za hu'naze, keho koranki, ana 3'a kini naga'mo'za zamagra

zamagra ha' hu'za ohefri ahefri hu'negahazanki, otinketa vuta maka zzamia ome zogisune hu'naze. <sup>24</sup> Hianagi Moapu vahe'mo'za Israeli sondia vahe'mo'zama kuma'ma eme ante'za mani'nfima azage'za, Israeli vahe'mo'za oti'za Moapu vhahera ha' huzamante'za zamarotgo hazage'za, mopa zamirega fre'za nevazage'za Israeli sondia vahe'mo'za Moapu vhahera rama'a zamahe fri'naze. <sup>25</sup> Hanki Israeli naga'mo'za Moapu vahe ranra kumatmina eri haviza nehu'za, knare'nare zafaramina antagi netre'za, tinkeri ramina renkaninere'za, knare'ma hu'nege'za hozama nentaza agupo moparamina havereti antevite'naze. Hianagi Moapu vahe rankuma'ma magoke atre'nazana Kir-heresi kumake atre'naze. Ana hazage'zanofi atifi have rusi hu'za ahe sondia vahe'mo'za ana kumara mani kagintete'za, havereti ahazageno ana kumapina ufre ufre hu'ne. <sup>26</sup> Hanki Moapu kini ne'mo'ma keana ha'ra hugatereza hazageno, agra 700'a sondia naga'ma bainati kazima eri'za ha'ma nehaza naga zamavarege'za, rankumapintira atirami'za koro fre'za Idomu kini ne' mani'nerega vuku hu'nazanagi, anara osu'naze. <sup>27</sup> Higeno agri kuma'ma erino kinima maniga zage mofavrea Moapu kini ne'mo'a aheno rankumamofo have kegina agofetu, tevefi kre fanane huno ofa Moapu vahe havi anumzantega hunte'ne. Anazama Israeli sondia vahe'mo'zama nege'za tusi zamagogogu nehu'za, hara atre'za mopa zamirega vu'naze.

## 4

### *Elisa'a mago kento a' azahu'nea naneke*

<sup>1</sup> Hanki mago zupa Ra Anumzamofo kasnampa vahepinti mago kasnampa ne' fri'nea ne'mofo kento a'mo Elisana amanage huno eme asmi'ne, Muse hugantoanki nenave'ma ko'ma fri'neana kagra ko antahi'nane. Hagi ofri'ma mani'neno'a kamage nenteno, Ra Anumzamofona monora hunte'ne. Hianagi mago ne'mofontegati zagoanofi hu'neankino, ana ne'mo'a eno eme tare ne'mofavre ni'ararena zanavreno vanigeke kazokazo eri'za omerinte-gaha'e. <sup>2</sup> Anage higeno ana ara Elisa'a amanage huno asmi'ne, Inankna hu'na nagra kaza hugahue? Nonka'afina na'a ante'nane, higeno ana a'mo'a ke nona'a huno, Muse hugantoanki mago'a zana onte'noe. Hianagi osi'a olivi masave antogeno taferopina me'ne. <sup>3</sup> Higeno Elisa'a ana ara asmino, Vunka tvaonka'arema nemaniza vhahera zamantahigenka kavoramina osi'a e'orinka rama'a erio. <sup>4</sup> Hanki anama hute'nunka, kagrane tare mofavre ka'anena nompi ufretra kafana erigita nemanita, ana maka kavofi masavena taginte vagarecho. Anama nehanankenoma mago kavomo'ma aviteterema haniana, rure erintetere huo. <sup>5</sup> Ana kema Elisa'ma hiana ana a'mo'a antahiteno, vuno vahe kavoramina zamantahigeno eritru huteno, tare ne'ararene noma'afi ufreto kahana erigiteno, tare ne'ararene ke higeke kavoa eri amitere hakeno masavena tagintetere huno evu'ne. <sup>6</sup> Hanki ana a'mo'ma ana maka kavoramimpima masavema tagintegeno avite vagaretegeno, mago mofavre'agu huno, Mago'a kavoma me'nesiana eri namio, huno higeno mofavre'amo'a kenona'a huno, Magore huno kavoa omne'neanki hago vagare. Higeno masavemo'ma ne-eretira anante vagare'ne. <sup>7</sup> Anante ana a'mo'a Ra Anumzamofo kasnampa ne' Elisana anazama fore'ma hiazana ome asamigeno, Elisa'a ana ara asmino, Vunka ana masaveramina ome zagore atrenka zagoma erisunka, negave'ma nofi'ma hu'neana zagoa apanesenka, mago'a mesia zagoa kagrane mofavre ka'ararene ne'zana mizaseta neneta maniho huno hu'ne.

*Elisa'a mago feno a'mofo ne'mofavre fri'nefinti azeri oti'nea naneke*

<sup>8</sup> Hanki mago zupa Elisa'a Sunemi rankumate vigeno, ana kumapina mago feno ara mani'neankino, ana a'mo'a kehigeno nomafinti ne'zana ome ne'ne. Ana hu'neankino Elisa'ma Sunemi kumate'ma mago'a zupama eterema nehuno'a, ana a'mofo nompintike ne'zana eme ne'ne. <sup>9</sup> Hanki mago'a kna evutegeno, ana a'mo'a nevena amanage huno asmi'ne, Ama ne'ma eno'ma tagranema ne'zama eme neterema nehia nera, nagrama antahi'noana Ra Anumzamofo ruotge kasnampa ne' mani'ne. <sup>10</sup> E'ina hu'negu tagra nonti'amofo agofetu Elisa'ma masesia nona mago hunaraginteteta, anampinka mase sipane, ne'zama anteno nesia tra'ene, manisia tra'ene tro huntefeta, lamu tavi'ene anampinka antente'nesukeno, tagri'ma tageku'ma eterema hania zupa, anama hunaragintepinka umrerino umasegahie.

<sup>11</sup> Hanki mago zupa Elisa'a Sunemi kumate eno, anama hunaragintepinka evumarerino umaseno mani'ne. <sup>12</sup> Ana huteno Elisa'a kato ne'a Gehasina amanage huno hunte'ne, Ama noma retro'ma hunte'nea ara ome kehugenno eno, higeno Gehasi'a vuno ana ara ome kehigeno e'ne. <sup>13</sup> Anama higeno'a Elisa'a amanage huno Gehasina asmi'ne, Vunka ana ara na'kagrira mago so'ezana hugantegahu'e hunka ome antahigo. Hagi kagrama hu izo hanankeno'a, amne Elisa'a vuno kini netero, sondia vaheete ugota hu'nea nera ome zamageno kavesisia zanku'ma hnanana, ome zamasaminege'za amne trohugahaze hunka asmio. Higeno Gehasi'a ana ara anankea ome asmigeno, ana amo'a kenona huno, Nagra vahe'ni'ane knare hu'na mani'noanki'na mago'zankura atupara osu'noe. <sup>14</sup> Higeno ana ke'ma Gehasi'ma eno Elisama eme asmigeno'a Elisa'a huno, Knare avu'avazama ana a'mo'ma hurante'nerera na'a huntegahu'e? Higeno Gehasi'a amanage hu'ne, Ne' mofavrea onte'negeno neve'a ko ranafa re'ne. <sup>15</sup> Anage higeno Elisa'a ana ara ome kehugenno eno higeno, Gehasi'a ome kehigeno eno kahante eme oti'ne. <sup>16</sup> Ana hutegeno Elisa'a ana ara amanage huno asmi'ne, Anaga'a kafufina meni amana knare, ne' mofavreka'a kazampi avaregahane. Higeno ana a'mo'a ke nona huno, kvanimoka Ra Anumzamofo eri'za vahe mani'hanki havigea osuo. <sup>17</sup> Hianagi ana a'mo'a henka mofavre amu'ene huno, Elisa'ma hu'nea kante anteno anaga'a kafufina, ana kna fatgore ne' mofavre kasente'ne.

<sup>18</sup> Hanki henka ana mofavremo'a ra huteno mago zupa, nef'a hozafi eri'za vahe'anema witi nevasgazafi vu'ne. <sup>19</sup> Hanki anampi mani'neno nefana asmino, Nase'nimo'a tusi natagrie, natagrie, huno higeno, nef'a mago eri'za vahe huntefeta, avrenka nerera'ma mani'nerega vuo. <sup>20</sup> Higeno eri'za ne'mo'a ana mofavrea avresga huno nerera ome ami'geno, nerera asumpi maseno mani'negeno vuno ferusegeno fri'ne. <sup>21</sup> Ana higeno ana a'mo'a anama fria mofavre'a erino marerino, Anumzamofo eri'za vahe Elisa'ma nemasea sipayre ome antemaseteno, kafa erinegino atreno atirami'ne. <sup>22</sup> Anante ana a'mo'a nevena kezatimino anage hu'ne, Muse hugantoanki mago eri'za ne'ene mago donki afura namige'na Ra Anumzamofo kasnampa ne' ame hu'na ome kete'na a'neno. <sup>23</sup> Anage higeno ana a'mofo neve'a huno, Menina kasefa ikana omnege, mani fruhu kna Sabatia omne'neanki, na'a higenka menina vu'za nehane? Hianagi ana a'mo'a huno, E'ina hu'neanagi knare hu'neanki'na amne vugahue. <sup>24</sup> Anante ana a'mo'a donki afura azerinte fatgo nehuno, eri'za ne'agura huno, avazu hunka ame'ma hunka vuo. Hanki donkimo'ma akoheno vinogura nagrake'za kasamigahue. <sup>25</sup> Hanki anage hutegeke, ana a'ene eri'za ne'anena, Ra Anumzamofo kasnampa ne' Elisa ome keku Karmeli agonare vu'na'e.

Hanki zanagra afete nevakeno Elisa'a nezanageno kato ne'a Gehasina asamino, antu Sunemiti a' ne-eanki ko. <sup>26</sup> Hanki kagra kagarenka vunka ana a'ra ome negenka, kagrane, negave'ene, mofavreka'anena knare huta mani'nazo? hunka antahigo. Higeno Gehasi'a anankema ome asmigeno'a, ana a'mo'a kenona'a huno, mago kea omne'neanki knare huta mani'none. <sup>27</sup> Hanki ana a'mo'ma Ra Anumzamofo eri'za ne'ma agonafima mani'nere uhanatino, Elisana agiafi rena nereno, agiare azeri antroko hu'ne, anama hiaza Gehasi'ma negeno'a, ana ara retufe ogantu atreku hu'neanagi, Elisa'a Gehasina asmino, Agra tusi'a knazampi mani'negahianki atrenenka ko. Hagi agrama knafima mani'neazana Ra Anumzamo'a knafi mani'ne huno onasami'ne. <sup>28</sup> Anante ana a'mo'a anage hu'ne, Kva vahe'ni'a Ra Anumzamofo eri'za vahe'moka, nagra ne'mofavregura kantahi onkenoanki, kagrama hana kante anteno Anumzamo mofavrea nami'ne. Hianagi nagrama hu'noana renavataga osuo hu'na hu'noe. <sup>29</sup> Ana ke'ma Elisa'ma nentahino'a, Gehasina anage huno asmi'ne, Zaza kenaka'a kamu nofipi eri pasihunka ahenevazinka kazampina azompani'a enerinka kagarenka Sunemi rankumate vuo. Hanki kantegama vahe'ma nezmagesunka keaga huozaminka, keagama hunegami sagenkanena kenona osunka, vuvava hunka ana a'mofo nompi umarerinka ana mofavremofo avugosafi azompania omento. <sup>30</sup> Hianagi ana mofavremofo nerera'a amanage hu'ne, Kasefa huno mani'nea Ra Anumzamofo avufine kagri kavufine tamage hu'na ne-huankina, nagra kat're'na ovugahue, higeno Elisa'a otino ana a'ene Sunemi ete vu'ne. <sup>31</sup> Hanki Gehasia vugota huno Elisa azompa ana mofavremofo avugosafi ome ante'ne. Hianagi tamage huno mago'zana forera osu'ne. Ana higeno Gehasia ete vuno Elisa'ma kantegama ne-egeno ome asmino, Kema nasm'i'nazana ome huanagi ana mofavremo'a oraoti'ne. <sup>32</sup> Higeno Elisa'a nonte uhanatiteno umarerino keana, agrama nemasea sipare, anama fri'nea risera mase'negeno ke'ne. <sup>33</sup> Hagi hunaragintepinka umarerino kahana erigiteno, Ra Anumzamofontega nunamuna hu'ne. <sup>34</sup> Anante ana rise'ma mase'nea sipare marerino ana rise'mofo agofetu unemaseno, agira agite nenteno, avurga avure nenteno, azana azante ante'ne. Ana higeno ana rise'mofo avufgamo'a osi'a amuho hukna hu'ne. <sup>35</sup> Amuho higeno otino osi'a ana nompi vano huteno ete mago'ene ana huno avufgare mase'ne. Mase'negeno seveni'a zupa kasera ruteno avurga ruhari hu'ne. <sup>36</sup> Ana'ma nehiana Elisa'a Gehasina kehigeno egeno anage huno asmi'ne, vunka nereraana ome kehugeneno eno, higeno kema hiaza huno Gehasi'a ana ara ome kehigeno emarerigeno, Elisa'a huno, ne'mofavreka'a ete avro. <sup>37</sup> Higeno ana a'mo'a anampinka emarerino Elisana agafi avugosaregati emeseno kepri huno humuse hunenteno, ana mofavre'a avreno megi'a atiramino vu'ne.

### *Afi hagonefa kre'za nete'za fri'za hazageno Elisa'a zamaza hu'nea naneke*

<sup>38</sup> Mago'a kna evutegeno Elisa'a eteno Gilgali vu'neana ana mopafina ne'zana fanane higeno tusi'a zamaga tonto hu'ne. Hanki anampima mago'a nemaniza kasnampa vahe'mo'za agrane mago zupa eme eritru hu'za mani'naze. Ana hazageno Elisa'a kato ne'a amanage huno asmi'ne, Rankavo erinka ana kasnampa vahera ne'zana krezamanto. <sup>39</sup> Higeno kasnampa vahepinti mago'mo vuno kamo'za ome huno eme kreku nevuno ome keana, afi hagonefa rente'negeno ome keteno, e'i afi hagonefa me'ne huno ontahineno, mago'a tagiazamo zaza kena'afi erinteno e'ne. Eteno anante eme akrakru hiazamo ana kamo'ene kavofina kre'ne. <sup>40</sup> Hanki ana ne'zama tafepi atintete'za, ana kasnampa vahe'mo'za agafa hu'za nene'za

krafa hu'za, Ra Anumzamofo vahe Elisaga ama ne'zamo'a tusi akaheankino vahe tahe frigahie nehu'za one'za atre'naze. <sup>41</sup> Hanki anama hazageno Elisa'a zamasamino, witireti trohu flaua erita eho, hige'za eri'za azageno ana kamo'ma kre'naza kavofi ana flauara netreno kato ne'agu huno, refko hunka tafepi zamige'za neho. Higeno kema hiaza huno eri'za ne'amo'a maka kasnampa vahera atino zamige'za ne'nazanagi, ana ne'zamo'a zamazeri havizana osu'ne.

### *Elisa'ma 100'a vahe breti zamige'za ne'naza naneke*

<sup>42</sup> Mago zupa Ba'al-Salisa rankumateti e'nea ne'mo'a, ese hamre'naza bali ragareti tro hu'naza bretiramina 20'a enerino, mago'a kasefa bali raganena ku'afi erarineno Ra Anumzamofo eri'za ne' Elisante egeno, Elisa'a kato ne'a asmino, Ama ne'zana ama vahera zamige'za neho. <sup>43</sup> Anage higeno kato ne'amo'a Elisana antahigeno, Inankna hu'na ama 100'a vahera, asama ne'zana zamisuge'za negahaze. Higeno Elisa'a ana kemofo nona huno, Zaminke'za neho. Na'ankure Ra Anumzamo'a huno, nenesageno mago'a amne megahie hianki zaminke'za neho. <sup>44</sup> Anante Elisana kato ne'amo'a ana ne'zana zamige'za nenageno, Ra Anumzamo'ma hu'nea kante anteno mago'a amne me'ne.

## 5

### *Elisa'ma Nemani fugonkri azeri so'ema hu'nea naneke*

<sup>1</sup> Hanki Nemani'a agra Siria sondia vahete kva ne' mani'ne. Ana hu'neno agri kva ne'amofo avurera knare ne' mani'negeno kva ne'amo'a muse hunentea ne' mani'ne. Na'ankure Ra Anumzamo'a agrira aza hige'za Siria vah'e'mo'za ha' vahe'zmia hara huzmagatere'nagu anara hu'ne. Nemani'a hanave sondia netfa mani'neanagi, agrira fugo namumo azeri haviza hu'ne.

<sup>2</sup> Hanki mago kna Siria sondia vahe'mo'za Israeli vahera rohu ome renezmante'za, anampinti mago osi mofara avre'za vu'naze. Ana hazageno ana mofa'mo'a Nemani a'mofo eri'za mofa umani'ne. <sup>3</sup> Henka ana mofa'mo'a Nemani nenanrona amanage huno asmi'ne, Sameriamana mani'nea kasnampa ne'ma negave'ma vuno ome kesiana, amne fugo kri'a azeri so'e hugahie. <sup>4</sup> Anankema Nemani'ma nentahino'a, kva ne'are vuno, ana Israeli mofa'mo'ma hiankea ome asmi'ne. <sup>5</sup> Higeno kini ne'mo'a ame huno Nemanina asmino, Israeli kini netega nagra mago avo krenta'nena erinka vunka ome amigahane, nehuno kema hiaza higeno ana avona enerino kna'amo'a 340 kilo hu'nea silva zagone enerino, kna'amo'a 60 kilo hu'nea goli enerino, knare'nare kukena 10n'i a e'nerino vu'ne.

<sup>6</sup> Hanki ana Israeli kini netegama krente'nea avona amanahu avo krente'ne. Nagra eri'za vaheni'a Nemanina ama avona kre'na huntogeno kagritega vianki, fugo kri'a azeri so'e hunto. <sup>7</sup> Hanki anante Israeli kini ne'mo'ma ana avoma hampriteno'a, zaza kukena'a tagato nehuno amanage hu'ne, Nagra Anumza mani'ne'a vahera ahe nefri'na, vahera fripintira azeri oti'naku hugeno hio. Ama ne'mo'a fugo krima eri'nea nera azeri so'e huogura huntogeno ome'neanki, nagrama antahuana ha'eme hurante'naku mago'a kankamunku hakeno anara hu'ne. <sup>8</sup> Hianagi Ra Anumzamofo kasnampa ne' Elisa'ma antahiamma Israeli kini ne'mo'ma za'za kukena'ama tagato'ma hiankema nentahino'a, kato ne'a huntogeno vuno amanage hu'ne, Na'anre hunka za'za kukenaka'a tagatora hu'nane? Hagi ana nera atregeno nagrite ena Israelia mago kasnampa nera mani'ne hu'na averira

hanena keno antahino hugahie.<sup>9</sup> Higeno Nemanina hosi afutamine, karisiramima'ane vuno, Elisa nomofo kafante umani'naze<sup>10</sup> Anante Elisa'a mago kato vahe huntenu, Nemanina amanage hunka ome asamio, kagra vunka 7ni'a zupa Jodani timpi tina ome fregeno, kavufamo'a so'e hina agru hugahane huno hie hunka ome asamio.<sup>11</sup> Hianagi Nemanina tusi arimpahegeno nevuno amanage hu'ne, Nagrama antahuana atiramino eme otine'no, Ra Anumzana agri Anumzamofo agi neheno, azana rusuteno veraveraverave nehuno fugonkrini'a nazeri so'e hugahie hu'na huanagi anara osie.<sup>12</sup> Hanki Damaskasia tare tintrena Abana tine Farpari timokea ana maka Israelima me'nea tintamina zamagaterena'e. Ana hu'neanki'na anampi tina fre'na so'ea hugare, nehuno tusi arimpa nehegeno rukrahe huno atreno vu'ne.<sup>13</sup> Hianagi Nemanina eri'za vahe'amo'za eza amanage hu'za asmi'naze, kva ne'moka kasnampa ne'mo'ma mago'ma amuhoma hu'nea zama tro huo huno'ma hiresina, amne ana zana tro hasine. Hu'negu agrama hiaza hunka vunka tina ome fregeno fugo namumo'a atregantena agru huo.<sup>14</sup> Higeno Nemanina ana vaheke antahiteno vuno, Jodani timpi 7ni'a zupa tina ome fre'ne. Ra Anumzamofo kasnampa ne' Elisa'ma hu'nea kante anteno tina fregeno fugo kri'amo'a atrentegeno, avufgamo'a osi mofavremofo avufgamo'ma hiaza huno agrunentake hu'ne.

<sup>15</sup> Ana hutege'za Nemanina'ene eri'za vahe'amo'za ete Ra Anumzamofo kasnampa nete e'naze. Anama hute'za Nemanina' Elisa avuga ome otino amanage hu'ne, Menima nagrama antahuana maka ama mopafina mago anumzana omani'neanki, Israeli vahe'motma tamagri Anumzamo agrake maka vahe Ra Anumzana mani'ne. E'na hu'negu muse hugantoanki kvanimoka ama kamua musezana erio.<sup>16</sup> Anagema higeno'a, Elisa'a kenona'a amanage hu'ne, Ra Anumzama kasefa huno mani'nege'nama Agri eri'zama enerua Anumzamofo agifi tamage hu'na huankina, mago musezana e'origahue. Anage higeno Nemanina tutu huno erio hu'neanagi, Elisa'a e'oritfa hu'ne.

<sup>17</sup> Anagema higeno'a, anante Nemanina' Elisana asmino, Kagra musezama e'oriku'ma hanunka, kvanimoka natrege'na mago'a Israelitira mopa kate'na tare miuli donki afu tre'mokema eriga avamente eri'na kumanirega va'neno. Hanki kvanimoka meninteti'ma vanige'na mago'a anumzantera Kresramana vuontegi, ofanena huontegahue. Hianagi Ra Anumzamo-fonteke kresramna vunente'na, ofanena huntegahue.<sup>18</sup> Hianagi eri'za vahe'kamo'na Ra Anumzamo'a magoke zantfante kumi'ni'a atrentegahie. Kva ne'nimo'ma Rimoni havi anumzamofo mono nompima nevuno'a, nazante azerineno mono'ma hunte'naku'ma kepri'ma hige'na, nagrane prira nehue. E'na hu'negu eri'za vaheka'mo'na Ra Anumzamo'a kuminia' atrenantesie.<sup>19</sup> Anage higeno Elisa'a asmino, antahintahi hakarea osunka krimpa frune vuo. Hianagi Nemanina' zazatera ovu'negeno,

### *Gehasi'ma havige hu'nea zamofo nona' knaza eri'nea nanike*

<sup>20</sup> Ra Anumzamofo eri'za ne' Elisa kato ne'mo Gehasi'a amanage huno agesa antahi'ne, Kvani'mo'a Nemanina amne atregeno vu'ne. Na'ahigeno Nemanina' musezama amiku'ma hiazana e'ori'ne. Kasefa huno mani'nea Ra Anumzamofo avufi tamage huanki'na, nagra Nemanina amage taragi'na vu'na ana zantamia mago'a ome erigahue.<sup>21</sup> Anage nehuno Gehasi'a agareno Nemanina avaririno vu'ne. Hanki Gehasi'ma avaririno eazama Nemanina' negeno'a, Gehasina agenaku karisi'afinti takasureno Gehasina anage huno antahige'ne, Mago'a hazenke me'negenka neano?<sup>22</sup> Higeno

Gehasi'a kenona huno, Mago'a kea omne'neanki, kva ne'nimo'a amanage huo huno hunante'ne. Efraemi naga agona mopafima mani'naza kasnampa vahepinti menina tare netrena e'na'e. Ana hu'naku kagra mago silva zagona kukena tare zanamiogu hunantege'na e'noe. <sup>23</sup> Higeno Nemani'a kenona'a huno, I'o silva zagoa mago kura e'origahananki, tare ku erigahane huno nehuno, Gehasina tutu huno erio higeno, Gehasi'a antahi fru huno eri'ne. Ana nehuno Nemani'a kna'amo'a 68 kilo hu'nea silva zago refko huno tare kupi eraritere nehuno, kukena tare erinteno eri zanamigeke tare eri'za vahe'amokea Gehasina azahuke erike vu'na'e. <sup>24</sup> Hanki agonare'ma ete'za, Gehasia ana zantamina tare eri'za netremokizni zanzampintira erino noma'afi erinenteno, ana netrena huznantegeke ete vu'na'e. <sup>25</sup> Ana huteno Gehasia ufreto Elisa avure uotigeno, Elisa'a huno, Iga vu'nanane, huno antahigegeno Gehasi'a kenona huno, Kva vahe'nimoka mago'arega vu'na e'na osu'noe. <sup>26</sup> Hianagi Elisa'a amanage huno asmi'ne, Mago vahemo'ma kagrane keaga huku'ma karisiafinti'ma erami'neana, nagra avamupina kagrane mani'nena kagenoana ontahi'nampi? Menina zago erige, kukena erige, olivi hoza erige, waini hoza erige, sipisipi afutami erige, bulimakao afu tami erige, eri'za veneneramine, eri'za a'neneramina zamavare kna omane'ne. <sup>27</sup> E'ina hu'negu Nemani fugo krimo'a takiguren kagrite'ene kagripinti'ma fore'ma hanaza vahete'ene maka kna mevava huno vugahie. Anage hutegeno Elisa avugati'ma Gehasi'a atreno nevigeno, fugo krimo'a azeri haviza higeno maka avufamo'a efenantake huno hamponkna hu'ne.

## 6

### *Sa'ume timpi rugatitre'naza ete Elisama eri'nea zamofo naneke*

<sup>1</sup> Mago zupa kasnampa naga'moza Elisanku amanage hu'naze, Tagrama eta kagranema eme atru huta nemanuna nomo'a osi hu'negeta titipa ne-hune. <sup>2</sup> Hagi kagra amne tatresanketa Jodani tintega vuta tamente tamente zafa ome antagitere huta, eme atruma huta manisuna nona kasefa ki-gahumpi? Hazageno Elisa'a kenona huno, Knareki kema hazaza huta viho. <sup>3</sup> Anante mago kasnampa ne'mo'a Elisana amanage huno antahige'ne, Muse hugantoanki tagranena amne egahampi? Higeno Elisa'a huno, Izo amane tamagranena vugahue. <sup>4</sup> Anagema huteno'a Elisa'a zamagrane vige'za, Jodani tinte'ma vute'za, agafa hu'za zafaramina antagi'naze. <sup>5</sup> Hianagi kasnampa vahe'pinti mago'zamimo'a zafa nentagigeno sa'ume'amo'a katiramino Jodani timpi fre'ne. Ana higeno kezatino, Oho, kva vahe'nimoka, vahesau'me zamantahige'na eri'na e'noa saumemo katiramino timpi fre'ne. <sup>6</sup> Hanki anante Ra Anumzamofo eri'za ne' Elisa'a amanage hu'ne, Inante saumemo'a ufre'ne, higeno ufre'neama'a asami ankeretegeno, Elisa'a osi zafa azanku'na rukafrino anama ufrenerre atregeno ana sasumemo'a timofo avozare mareri'ne. <sup>7</sup> Anama higeno'a Elisa'a huno, Hanki erio, huno higeno ana kasnampa ne'mo'a azana ante henkamuteno ana sa'umena eri'ne.

### *Elisa'a nunamu higeno Siria sondia vahe zamavumo asuhu'nea naneke*

<sup>8</sup> Hanki knane knanena Siria kini ne'mo'ma Israeli vahe'ma ha'ma eme huzamanteku'ma nehuno'a, e'ire e'ire seli nonkumara ome anteta mani'neta Israeli vhahera hara huzmantegahune huno sondia vahete kva vahe'age zamavaretru huno kea anaki'ne. <sup>9</sup> Hianagi Ra Anumzamofo eri'za ne' Elisa'a Israeli kini netega anage huno kea atrente'ne, Siria vahe'mo'za hahuranteku seli nonkuma eme antazanki kva hu'enka e'irega ovuo huno

asamitere hu'ne. <sup>10</sup> Anagema higeno'a, Israeli kini ne'mo'a sondia vahe'a huzmanteg'e za vu'za Elisa'ma zamasamirera ome kva hutere hu'naze. Rama'a zupa ana hutere hu'naze.

<sup>11</sup> Anama nehazageno'a, Siria kini ne'mofona tusi rimpah'e'ne. Ana higeno Siria kini ne'mo'a, sondia vahete ugagota kva vahera kehige'za azageno amanage huno zamantahige'ne, ina ne'mo Israeli kini netega anteno, tagrama huna kea ome nesamifi nasamiho? <sup>12</sup> Higeno mago eri'za vahe'amo'a asmino, a'o tagra ome nosamunanki Israelima mani'nea kas-nampa ne' Elisa agra Israeli kini nera nesaminkino, nemsampinkama oku'ama hana nanekenena nentahino agra nesamie. <sup>13</sup> Anagema higeno'a, kini ne'mo'a eri'za vahe'a zamasamino, inantega Elisa'a mani'nefi ome haketa ketenke'na sondia vahe huzmanta'nena vu'za ome avre'za amare eho. Hige'za vu'za ome hake'za kefore hute'za e'za anage hu'naze, Agra Dotani kumate mani'ne. <sup>14</sup> Higeno kini ne'mo'a tusi sondia vahe krerafane, hosi afutamine, karisiramine zamatrege'za kenage Dotani vu'za ana rankumara kafo ome ante'za avazagi kagi'naze.

<sup>15</sup> Hanki Anumzamofo eri'za ne' Elisa kato ne'mo'a nanterana atiramino keana, Siria sondia vahe'mo'za karisine, hosi afu'zmine emani'ne'za ana kumara avazigagint'e nageno zamage'ne. Ana huteno otino anage hu'ne, Oho kva vahe'nimoka, Siria vahe'mo'za tavazagi kagi'nazanki, tagra na'a hugahune? <sup>16</sup> Higeno Elisa'a amanage huno asami'ne, Kagra korora osuo. Na'ankure tagri kazigama mani'namo'za zamagrira zamagatere'za rama'a mani'naze. <sup>17</sup> Anante Elisa'a nunamuna amanage huno hu'ne, Ra Anumzamoka muse hugantoanki avua erihari hugeno keno, higeno Ra Anumzamo'a avua erihari higeno keana, mani'nampi me'nea agonaramimpina tusi'a hosi afutamimo'ene, tevenefake karisiramimo Elisana megagint'e negeno ke'ne. <sup>18</sup> Hagi anante Siria sondia vahe'mo'za agrama mani'neregama erami tava'oma nehazageno'a, Elisa'a amanage huno Ra Anumzamofontega nunamuna hu'ne, Ra Anumzamoka ama sondia vahe'mokizmia zamavua erisu huo, huno higeno Elisa'ma hia kante, Ra Anumzamo'a sondia vahe'mokizmi zamavua erisu hu'ne. <sup>19</sup> Higeno Elisa'a amanage huno ana sondia vahe'mokizmia zamasami'ne, Kana hazagreta ru kumate e'naze. Hu'negu namage navaririta enke'na anama kenaku'ma aza ne'mofonte tamavre'na va'neno. Anage hige'za Elisana amage vazageno zamavareno Sameria rankumate vu'ne.

<sup>20</sup> Hagi anama Sameria rankumapima ufratzageno'a, Elisa'a amanage hu'ne, Ra Anumzamoka ama sondia vahe'mokizmi zamavua erihari huge'za ete keho. Higeno Ra Anumzamo'a zamavua ete erihari hige'za kazana zamagra Sameria kumamofo amu'nompi mani'naze. <sup>21</sup> Anama hazazama Israeli kini ne'mo'ma negeno'a, Elisana amanage huno asami'ne, Nenfaga hu i'zo huge'na ama vahera zamahe fri'neno? <sup>22</sup> Higeno Elisa'a kenona'a amanage hu'ne, kagra ozamahegahane. Na'ankure kazinuti'ene atireti'ma ha'ma hunka zamavrana vahera, zamahe nofrine. E'ina hu'negu ne'zane tine nezaminka zamatrege'za kinizmima mani'neregaa ete viho. <sup>23</sup> Higeno Israeli kini ne'mo'a tusi'a ne'za ana sondia vahera krezmantage'za, ana ne'zane tinena nevagama retazageno, huzmanteg'e za ete kini zamimo'ma Siriama mani'nerege vu'naze. Ana hige'za Siria sondia vahe'mo'za mago'enena e'za Israeli vahera rohura eme ozami'naze.

### *Sameria kumapi tusi'a zamagatonto kna fore hu'nea naneke*

<sup>24</sup> Hanki henka, mago'a kafua evutegen, Siria kini ne' Ben-Hadati'a maka sondia vahe'a zamazeri tru hutege'za, vu'za Sameria kumara ha'

huzamantenaku ome kafonte'za avazagigagi'naze. <sup>25</sup> Hagi za'za kna Siria vahem'o'za Sameria kumara kafo ante'za avazagigagi zamantazage'za, vu'za e'za hu'za ne'zama eri'za nekana omanegeno, Sameria kumapina tusi'a zamagatontoza fore hu'ne. Higeno mago vahem'o'ma tonki afu'mofo aseni'ama mizama hu'naku'ma hu'neana, kna'amo'a 0.9kilo hu'nea silva zagoreti miza nehu'za, namamofo rifa'a kna'amo'ma 63gremi hu'neana, kna'amo'a 57gremi hu'nea silva zagoreti mizase avamente vu'ne. <sup>26</sup> Ana'ma higeno mago zupa Israeli kini ne'mo'a have keginamofo agofetu enevigeno mago a'mo'a kezatino, kini'nimoka muse hugantoanki, naza huo. <sup>27</sup> Anage higeno kini ne'mo'a amanage huno asmi'ne, Ra Anumzamo'ma kazama nosanige'na, nagra nankna hu'na kaza hugahue? Kagrama antahinana witima neharaza kumapinti witia eri kamige, wainima regatatima ne-haza kumapintira wainia eri'na kaza hugahuo? A'o anara osugahue. <sup>28</sup> Anante ana kini ne'mo'a ana ara antahigeno, Nagra na'a hugante'negu nehanie? Higeno ana a'mo'a kini nera asmino, Ama a'mo'a nagriku huno, ne'mofavreka'a menina ahegeta neteta, okina nagra ne'mofavreni'a ah-esugeta negahu'e hu'ne. <sup>29</sup> Hige'na nagra mofavre'ni'a ahogeta kavofi kreta neteta, anante knazupa agri nonte vu'na, kagra mofavre'ka'a ahegeta na'mneno hu'na huana, agra mofavre'a azeri fraki'ne. <sup>30</sup> Higeno ana a'mofo kema kini ne'mo'ma nentahino'a, avatera asunku kukena hu'neno, amegama antani'nea kini zaza kukena'a tagato tugutu nehuno, ana have keginamofo agofetu nevige'za, ke'naze. <sup>31</sup> Anante kini ne'mo'a amanage hu'ne, Amama e'neruna knazamofo agafa'a Elisa mani'ne. E'ina hu'negu nagra menina Sarafati kumateti ne' Elisana ananke akafrigahue. Ana'ma osanugen'o'a, Anumzamo'a ama ana knare okina nagrira nazeri havizantfa hugahie. <sup>32</sup> Hagi kini ne'mo'ma anagema huteno'a, mago eri'za vahem'o'za mani'nerega vu'ne. Hanki ana zupa Elisa'a noma'afi Israeli ranra kva vahem'o'za mago'a zanku keaga nehu'za mani'nazageno, kini ne'mo'ma huntogeno ugota huno vu'nea eri'za nera uohanati'negeno, Elisa'a ana ranra kva valtetamina amanage huno zamasami'ne, Vahe'ma zamahe fri kini ne'mofo mofavremo'a, nagri nananke akafrinogu mago vahem'o'za huntogeno ne-e. Hianagi ana ne'ma esanigeta, kafa erigita rentrako hinkeno, nompina emareorino. Anama hanageno'a, kini ne'mo'a agra'a ana nera avaririno egahie. <sup>33</sup> Hagi Elisa'a ana keaga huvaga orenegeno, kini ne'mofo kema erino vuno e'nomu hu eri'za ne'mo'a agrite eramino e'ne. Hagi anante kini ne'mo'enena eno amanage hu'ne, Ra Anumzamo'a ama knazana atregeno tagritera efore nehie. Ana ne-higu mago knare'zana Ra Anumzamo'a tagrirra taza osugahiankina agrira mago'enena avegante'na omanigahue.

### *Elisa'a ne'zama erisaza zanku huvempa hu'nea naneke*

<sup>1</sup> Hianagi Elisa'a amanage huno hu'ne, Ra Anumzamo'a amanage huno hi-anki antahio, knare witireti trohu flauara, kna'amo'a 3'a kiloma hu'nesiane, balia kna'amo'a 6si'a kiloma hu'nesiana Sameria rankumamofo kafanteria, ama ana knare okina kna'amo'a 11ni'a gremi hu'nesia silva zagore atresage'za mizasegahaze. <sup>2</sup> Hagi anagema higeno'a, kini ne'mofo avate'ma kva nehia eri'za ne'mo'a, Elisa ke nona'a amanage hu'ne, Nagrama antahuana Ra Anumzamo'ma mona kahama erinagi hagaro hanigeno, ko'ma riaza huno nezamo'a tamisnianagi magoke zupagera ame huno ana ne'zamo'a aviraotegahie. Hianagi Elisa'a ana nera asmino, kagra kavufinti

ana ne'zana kegahananagi, tamage hunka ana nezampintira magore hunka onetfa hugahane.

*Siria vahe'mo'za kafo'ma ante'nafinti atre'za koro fre'naza naneke*

<sup>3</sup> Hanki ana knafina, Sameria rankumamofoma ufre kafanteria fugo kri eri'naza vhahera 4'a nemani'zanki'za, zamagra'a amanage hu'za hu'naze, Nahanigeta tagra amarera mani'neta frigahune? <sup>4</sup> Hagi Sameria kumapina ufrete ne'zankura hakosinagi, zamaga tonto higeno ne'zana kumamofo agu'afina omne'neankita ufresuta ufrigahune. Hagi ama anante'ma manisunana ana zanke huta frigahune. E'na hu'negu otinketa Siria vahe'mo'zama seli nonkuma'ma eme ante'za mani'nafi vanunke'zama taha frisazana knare hugahie. Hagi ontah'e'zama tatresazana knare hugahie. <sup>5</sup> Anage hute'za kinaga rehanima hiama'a oti'za, Siria vahe'ma seli nonkuma'ma eme ante'za mani'nafi vu'naze. Hanki ana kuma'ma ome atretegama unehanati'zama kazana, ana kumapina magore hu'za vhahera omani'nage'za ke'naze. <sup>6</sup> Na'ankure ana maka Siria vahe'mo'zama koro'ma fre'nazana, ana kinaga Siria vhahera Ra Anumzamo'a zamagesa eri hagro hige'zama antahi'zana, tusi'a sondia vahe krefamo hosi afu agumpine, karisifine mani'ne'za ha' eme huzmanteku eri'za neaza agasasagna agasasa nentahi'za, amanage hu'za hu'naze, Keho Israeli kini ne'mo'a, Hiti kinine, Isipi kinine zago misa sezmantageke erimago hu'za ha' huranteku neaze hu'naze. <sup>7</sup> Hagi ana Siria vahe'mo'za anagema nehu'za, ame hu'za ana kinagage, seli nozamima, hosi afu'zamima, tonki afu'zamine, ana maka zazmia fragu vazit're'za zamavapa atre'za korora fre'naze. <sup>8</sup> Hanki zamagra ana 4'a fugo namuma zamarinea vahe'mo'zama Siria vahe kumapima ehanatite'za, mago seli nompi ufre'za kazana, ne'zane tine me'nege'za ome eri'za nene'za, silvane, goline tavaraveraminena eri'za ome fraki'naze. Ete mago'ene e'za mago seli nompi umarer'i'za mago'a zantamina eme eri'za ome fraki'naze.

<sup>9</sup> Anama hute'za anante zamagra'a amanage hu'naze, Amanahu'ma huna na knare tavu'tavara osune. Hanki menina musema hanuna kna efore hu'negu, tagraguke'ma nentahita atre'nesunkeno'ma meno ko'mataniana, tagra knazana erigahunanki, otinketa vuta kinimofo nagara ama ana zamofonkea ome zamasamimneno. <sup>10</sup> Anagema hute'za vu'za Sameria rankuma kafante'ma kvama nehaza vhahera kezanke hu'za zamasmi'za, Siria vahe'mo'zama seli noma eme ki'za mani'naza kumapima uhanatitama konana, tamage huta mago vhahera onketa, mago vahe'mofo ageru'enena ontah'i'none. Hagi hosi afu'ene, tonki afu'ma rente'naza zanke megeno, seli nontamimpina maka zamo'a anante me'ne <sup>11</sup> Hagi rankumamofa kafante'ma kvama nehaza vahe'mo'za anankema nentahi'za, agu'afima mani'naza vhahera kezati'za zamasamizage'za, kini ne'mofo nontega vu'za naga'amofona anazamofo agenkea ome asami'naze. <sup>12</sup> Hagi ana kenageke kini ne'mo'a ana nanakea nentahino, oti'no eri'za vahe'a amanage huno zamasami'ne, Siria vahe'mo'za e'inhau'ma hazana antahihi, zamagrama ke'za antahi'zama hazana tagra tagazanku frunanki'za, zamagra amanahu zamagesa antahigahaze, trampi vuta ome frakinesunke'za zamagra rankuma'zamima atre'zama fegi'ma esageta, ome zamazenerita, rankumazaminena erigahune hu'za fraki'naze. <sup>13</sup> Hagi ana kema hia kemofo nona'a, kini ne'mofo eri'za vahepinti mago eri'za ne'amo'a anage huno asmi'ne, 5fu'a hosi afutaminke mani'nazanki zamatrege'za eri'za vu'za Siria vahetera naza fore hu'nefi ome keho. Hanki Siria vahe'mo'zama

ana vahe'ma zamahe frisazana, e'i knare hugahie. Na'ankure tagrama ama rankumapima mani'nona vahe'motanena, anazanke huta frigahune. <sup>14</sup> Hanki tare karisi'ma me'nne hosi afutrena avrenezamino, kini ne'mo'a Siria vahetera naza fore hu'nefi vuta ome keho huno huzmant'e.

<sup>15</sup> Anage hige'za Siria vhahera zamavariri'za vuvava hu'za Jodani tingegama nevu'za kazana, koro'ma fre'za nevu'za, karankama kukenafi, ha'zampi mago'azama atrete atretema hu'za vu'naza zana ome nege'za, ete vu'za kini nera ome asmi'naze. <sup>16</sup> Hagi Sameria vahe'mo'zama ana kema nentahi'za, Siria vahe'mo'zama kuma'ma eme ante'za mani'naza kumapi ame hu'za vu'za, ana kumapima atre'za vu'naza zantamina maka ome eri'naze. Hagi anampintira tusi'a bali raisine, rama'a flaua'ene erite'za, Ra Anumzamo'ma hu'nea kante ante'za, kna'amo'a 3'a kilo hu'nea flauate'ene, kna'amo'a 6si'a kiloma hu'nea balia, kna'amo'a 11ni'a gremi hu'nea silva zagoreke atre'naze.

<sup>17</sup> Hagi kini ne'mo'a avate kva nera huntegeno vuno, rankumamofo kafante'ma kvama nehaza sondia vahe' ome kegava huzmant'e. Hagi ana ne'mo'a kahamofo tava'onte ot'i'nege'za, erintagu hu'zama fegi'ma vaza vahe'mo'za reraraka hutre'za rerari hazageno fri'ne. E'inama hu'neana Anumzamofo eri'za ne' Elisa'ma kini ne'ma asami'nea kasnampa kemo'a nena'a before hu'ne. <sup>18</sup> Hagi Ra Anumzamofo eri'za ne' Elisa'ma kini ne'ma asmino, amana knare oki'na, Sameria rankuma'mofo kafanteria, knare witireti trohu flauara, kna'amo'a 3'a kiloma hu'nesiane, bali raisia kna'amo'a 6si'a kiloma hu'nesiana 11ni'a gremi hu'nea silva zagoreke atrehazema hu'nea ke'mo'a, nena'a before hu'ne. <sup>19</sup> Hagi kora anama rerari'ma hazageno'ma fria eri'za ne'mo'a, Elisana kenona'a amanage hu'neane, Nagrama antahuana Ra Anumzamo'ma mona kahama erinagi hagro hanigeno, ko'ma riaza huno ne'zamo'a herafiramigahianagi magoke zupagera ame huno ana ne'zamo'a avira otegahie hu'ne. Hianagi Elisa'a ana nera asmino, kagra kavufinti ana ne'zana kegahane. Hianagi tamage hunka ana ne'zampintira magore hunka onetfa hugahane huno, <sup>20</sup> Elisa'ma asmi'nea kemo'a nena'a before higeno, ana nera ran kuma'mofo kahampi zamagareti rehapat'i'za rerari hazageno fri'ne.

## 8

### *Sunemi kumateti kento a'mo mopa'a eteno ome eri'nea nanek'e*

<sup>1</sup> Hanki fri'negeno Elisa'ma azeri ot'i'nea rise'mofo nererana, Elisa'a mago zupa vuno nanekea amanage huno ome asami'ne, Otinka nagaka'a zamavarenka ina moparega atupa knafi umaniku'ma hanana moparega umanio. Na'ankure Ra Anumzamo'a huno, amama mani'nona mopafina 7ni'a kafufi ne'zana omanenesigeno zamaga tontozanku hugahaze huno hu'ne. <sup>2</sup> Higeno ana a'mo'a otino Ra Anumzamofo eri'za ne' Elisa'ma hianke antahino, naga'a zamavareno Filistia vahe'mokizmi moparega vu'za, anantega 7ni'a kafu umani'naze. <sup>3</sup> Anante ana 7ni'a kafua evuvgaretegeno, ana a'mo'a Filistia mopa atreno, Israeli mopare eteno, mopa'ane noma'ane ete erinaku kini ne'mofonte vuno keaga ome hu'ne. <sup>4</sup> Hagi ana knareria kini ne'mo'a Anumzamofo eri'za ne' Elisama azama nehia ne' Gehasina asmino, Elisa'ma maka ranra eri'zama eri'nea zamofo agenkea nasmio. <sup>5</sup> Higeno Elisa'ma mago rise'ma fri'nefinti azeri ot'i'nea zamofo agenkea Gehasi'a kini nera nesamigeno, anante ana mofavremofo nerera'a, mopa'ane noma'anenku kini ne' antahigeno erisigu e'ne. Anante ana ara

egeno Gehasi'a kini nera asmino, kema hua a'ene, fri'nefinti'ma azeri oti'nea mofavre'anena amu nea'anki ko. <sup>6</sup> Hanki anante kini ne'mo'a Elisa'ma tro'ma hu'nea zanku ana ara antahigegeno, ana a'mo'a maka nanekea asmi vagare'ne. Ana hutegeno anante kini ne'mo'a mago eri'za vahe'a asmino, inazano agri'zama mene'niazane, mopa'ama atreno vu'nenia knareti'ma eno meninte'ma esnigeno'ma, ana mopafinti zama zagore'ma atreno eri'nesia zagine, ana maka mohanena ome eri amio.

### *Hazaeli'e nehaza ne'mo Ben-Hadati ahe fri'nea naneke*

<sup>7</sup> Hanki mago zupa Elisa'a Siria vahe'mokizmi rankumate Damaskasi vu'ne. Ana zupa Siria kini nera Ben-Hadati'a kri eri'nege'za, ana kini nera eme asami'za, Anumzamofo eri'za ne' Elisa'a ama emarerie. <sup>8</sup> Higeno kini ne'mo'a mago eri'za ne'a Hazaelinha asmino, Mago musezana eri'eneka vunka Anumzamofo eri'za nera ome asamigeno nagra krifintira kanamregahufi, Ra Anumzamofona ome antahigeno keno. <sup>9</sup> Anage higeno Hazaeli'a ome amisia muse zantamima eri'neana, 40'a kemolimofo agumpi Damaskasiti maka knare'nare feno zantamina erinteno erino Elisante vu'he. Anante uhanatiteno Elisana anage huno asmi'ne, Kagri eri'za ne' Ben-Hatati'a huanteno, kri'afintira kanamregahufi ome antahigenka ko hige'na e'noe. <sup>10</sup> Higeno Elisa'a kenona'a amanage huno asmi'ne, Vunka ome asmio, kri'afintira knamaregahie. Hianagi Ra Anumzamo'ma naveri hu'neana tamage huno frigahie. <sup>11</sup> Anante Elisa'ma ana nanekema asmiteno'a, Hazaeli avufi keteno mani'negeno anama hiazanku Hazaeli'a agazegu higeno, anante Elisa'a zavi ate'ne. <sup>12</sup> Ana zavi'ma ateazanku, Hazaeli'a antahigeno, Kva vahenimoka na'a agafare zavira netane, huno higeno Elisa'a kenona'a huno, Zavi'ma toana na'ankure henka'a kagra Israeli vahera tusi hazenke nezaminka, kuma kegina'zamia anafenafu hunka teve negrenka, nehazaveramina kazinteti zamahe nefrinka, ne'onse mofavreramina zamazernika mopafi ruhapatinka nezamahenka, zamu'enema hu'enaza a'nea kazinteti zamarimpa retragufegahane. <sup>13</sup> Hagi ana kema Hazaeli'ma nentahino'a kenona'a huno, Nagra kragna hu'na nagi omne vahe mani'noanki, inankna hu'na e'inahu zantamina hunaku hugenka nehane. Higeno anante Elisa'a asmino, Kagrikura henka'a Siria vahe kini fore hugahane huno Ra Anumzamo'ma naveri hu'ne. <sup>14</sup> Anagema hutegeno'a, anantetira Hazaeli'a atreno kini ne' Ben-Hadati'ma mani'nerega vigeno, kini ne'mo'a antahigeno, Na'ane huno Elisa'a kasami'ne. Higeno Hazaeli'a asmino, Elisa'a kagrikura huno, tamage hunka knamregahane hu'ne. <sup>15</sup> Hianagi ana knamofo anante knazupa, Hazaeli'a kini ne ahefrinaku, mago franketa erino timpi rerinke huteno, erino vuno kini ne'mofo avugosafi ome rufiteno rentrako higeno fri'ne. Ana higeno Hazaeli'a agri kuma erino kini fore huno mani'ne.

### *Juda vahe kini ne' Jehoram'u naneke*

<sup>16</sup> Hanki Ahapu nemofo, Joram'u 5fu'a kafuma Israeli vahe kinima nemanigeno'a, Jehosafati nemofo Jehoram'u'ne nefo no erino, agafa huno Juda vahe'mokizmi kinia mani'ne. <sup>17</sup> Hanki Joram'u 32'a kafu hu'neno kinia efore huno, 8'a kafufi Jerusalemi kumatera kinia mani'ne. <sup>18</sup> Ana huteno Joram'u, Ra Anumzamofo avure'ma kumi'ma hu'neana, Ahapu mofa ara eriteno, Ahapu naga'mo'zama nehaza havi zamavu'zmava'ene, Israeli kini vahe'mo'zama nehaza havi zamavu'zmavara zamage anteno hu'ne. <sup>19</sup> Hianagi Ra Anumzamo'a eri'za vahe'a Devitina antahinemino, Juda vahera zamazeri havizana osu'ne. Na'ankure Agrama huvempa huno,

Deviti naga'pintike maka zupa kinia mani anante nante hu'za nevanageno, Deviti nagamofo lamu tavimo'a asu osugahiema huno hu'nea kegu agesa nentahino anara osu'ne. <sup>20</sup> Hanki Jehoram'u'ma Juda vahe kinima mani'neno kegavama huzmante'nea knafina, Idomu vahe'mo'za Juda vahe kinimofo kea ontahi'za zamagra'a kini azeri oti'zageno kegava huzmante'ne. <sup>21</sup> Hanki anama hazageno'a, Jehoram'u'ma karisifima mani'ne'za ha'ma nehata sondia vahe zamavareno, Zairi kumate Idomu vahe ha' huzmanteku vu'ne. Anantega vutazage'za Idomu vahe'mo'za e'za kafona eme regagi zamante'naze. Anama hazage'za, kenage Jehoram'u'ma karisire ugota hu'naza sondia vahe'mo'za hara hanaveti'za hu'naze. Hianagi Idomu vahe'mo'za hara huzmagaterage'za atre'za koro fre'za nozamirega e'naze. <sup>22</sup> Ana hazage'za Juda vahera, Idomu vahe'mo'za hara hu zamagatere'ne'za zamagra'a kegava hu'za mani'ne'za meninena mani'za neaze. Hanki ana knafina Libna ran kumate'ma nemaniza vahe'mo'za anahukna hu'za Juda vahe'mokizmi kea ontahi'za ha'rezmante'za zamagra'a zamagiare oti'naze. <sup>23</sup> Hanki ruga'a zantamima Jehoram'u'ma kinima mani'neno tro'ma hu'nea zamofo agenke, Juda kini vahe'mokizmi zamagi zamagenkema krenentaza avontafepi krente'naze. <sup>24</sup> Hagi Jehoram'u'ma frige'za, Deviti rankumapi agehemozama frizage'zama asezmantane'nafi ome asente'naze. Ana hutegeno nemofo Ahazia'a agri no erino kinia mani'ne.

### *Ahazia'ma Juda vahe kinima fore hu'nea naneke*

<sup>25</sup> Hanki Ahapu nemofo, Joram'u'ma 12fu'a kafuma Israeli vahe'mokizmi kinima nemanigeno'a, Jehoram'u'ma Ahazia'a agafa huno Juda vahe'mokizmi kinia mani'ne. <sup>26</sup> Hagi Ahazia'a 22'a kafu nehuno, kinia efore huno, magoke kafufi Jerusalemi kumatera kinia mani'ne. Ahazia nerera agi'a Atalia'kino agra Ahapu mofa mani'neankino, Israeli vahe'mokizmi korapa kini ne' Omri negeho mani'ne. <sup>27</sup> Hanki Ahazia'a Ahapu naga'mo'zama nehaza zamavu'zmava huno, Ra Anumzamofo avurera havi avu'avaza hu'ne. Na'ankure agra Ahapu naga'pinti ara eri'negu zamage anteno anara hu'ne. <sup>28</sup> Hanki mago zupa Ahazia'e, Ahapu nemofo Israeli kini ne Joramukea, Giliati kaziga Ramoti kumate vu'ke, Siria kini ne' Hazaelina ha' ome hunte'na'e. Ana hu'n'a'anagi Siria sondia vahe'mo'za Joramuna keve aheguzafa ante'naze. <sup>29</sup> Hanki Ramoti kumate'ma ha'ma nehigeno Siria vahe'mo'zama kevema ahe'naza zampinti knamrenigu kini ne' Ahapu nemofo Joram'u'ma atreno vuno Jezrili kumate umani'negeno, Juda vahe kini ne' Jehoram'u'ma nemofo Ahazia'a ome kenaku anantega uram'i'ne.

## 9

### *Jehu'ma Israeli vahe'mokizmi kini mani'nea zamofo naneke*

<sup>1</sup> Hagi mago zupa Elisa'a, kasnampa vahepinti mago kasefa ne' kehigeno egeno amanage huno asami'ne, Kenaka'a eritupa hunka nemasinka, ama masave tafena erinka Ramot-Giliati rankumate vuo. <sup>2</sup> Hanki kagra Ramot-Giliati vute'nunka, Nimsi negeho, Jehosafati nemofo Jehuna, ome hakenka erifore huo. Anama hute'hunka, naga'anema mani'nesifintira agri'ake avrenka noma hunaragintepinka vuo. <sup>3</sup> Hanki anante ama ana maseve tafena erinka asenifi neraginka amanage huo, Ra Anumzamo'a amanage huno hu'ne, Menina Israeli kini manio huno huhampri negante. Anama hutenga kafana eri anaginetrenka atiraminka ame hunka kagarenka fro!

<sup>4</sup> Hanki ana kasefa kasnampa ne'mo'a, otino Ramot Giliati rankumate vu'ne. <sup>5</sup> Hagi anante'ma uhanatino'ma keana, sondia vahete ugagota hu'naza kva mani'neza keaga nehazageno ome nezmageno anage hu'ne, Ugagotama hu'nana nera kagritega mago naneke eri'na neoe. Higeno'a Jehu'a otino anage hune, izanku nehane, higeno ugagotama hu'nana sondia ne'moka kagriku nehue. <sup>6</sup> Higeno Jehu'a anante otino nompinka umrerino umanitegeno, anante ana kasefa kasnampa ne'mo'a Jehu asenifi masavema taginenteno amanage hu'ne, Ra Anumzana Israeli vahe Anumzamo amanage huno hu'ne, Nagri vahe Israeli naga'mokizmi kini maniogu menina huhampri negantoe hie. <sup>7</sup> Hanki kva neka'a Ahapu nagara maka zamahe vagaro. E'inama hananana, Jesebeli'ma ko'ma Nagri kasnampa vahe'ene eri'za vahe'ma zamahe fri'nea kora kumitera, Nagra nona huzmantegahue. <sup>8</sup> Hagi Ahapu nagapina, maka kazokzo vene'nene amne vene'neramine mofavreraminena Nagra maka zamahe fanene ha'nena Israeli vahepina zamagia omanegahie. <sup>9</sup> Hanki Nebati nemofo Jeroboamu naga'ene, Ahija nemofo Basa naga'ma ko'ma zamahe fananema hu'noaza hu'na, Ahapu naga nofira zamahe fananene hugahue. <sup>10</sup> Hanki Jesebeli'a Jezrili kaziga mopafi fri'enige'za kramo'za avufga'a negahazanki, mago'mo'e huno avufga'a erino aseontegahie huno Ra Anumzamo'a hie. Anagema huteno'a, ana kasnampa ne'mo'a kafana eri anaginetreno atiramino agareno fre'ne. <sup>11</sup> Anante Jehu'a atiramino mago'a eri'za vahe'ma mani'nare vige'za antahige'za, Mago'aza fore hu'nefi? E'i neginagi ne'mo'a na'anе huno eme kasami'ne. Anage hazageno Jehu'a huno, E'inahu vahera havige havage hantage vahekita ko tamagra keta antahita hu'naze. <sup>12</sup> Hige'za zamagra hu'za, Reravatga osunka tamage hunka tasamio hu'naze. Anagema hazageno'a Ra Anumzamo'a nagrikura Israeli vahe'mokizmi kini ne' manio huno huhampri nante'ne huno Jehu'a hu'ne. <sup>13</sup> Hanki anama hiankema ana eri'za vahe'mo'ma nentahi'za, ame hu'za zaza kukanazamia hate'za, nonteti'ma agiama renoma atiramisirera tafe hu'za erami'naze. Anama hute'za ufe eri'za nere'za anage hu'naze, menina Jehu'a kini fore hie.

### *Jehu'ma Israeli kini ne' Joramuma ahe fri'nea naneke*

<sup>14</sup> Anama hutazageno Nimsi negeho Jehosafati nemofo Jehu'a Joramuma ahefrisia naneke retro hu'ne. Hagi ana knafina Joram'u'ene maka Israeli sondia vahe'mo'za Siria kini ne' Hazaeli'a Ramot-Giliati kumate ha'eme hu'nezmanteg'e'za kegava hu'za mani'naze. <sup>15</sup> Hianagi kini ne' Joram'u'ete Jesrili vuno, Siria kini ne' Hazaeli naga'anе ha'ma nehigeno kevema ahe'naza namumo'ma teganingu umani'ne. Hagi anama nehigeno'a Jehu'a Ramot-Giliati kumate mani'neno eri'za vahe'a amanage huno zamasami'ne, Nagriku'ma kini manino kegava hurantesie hutama antahisuta, mago'mo'e huno ama kumapintira atreno Jesrilia vuno Joramuna ama anazamofo agenkea ome osamino. <sup>16</sup> Anagema huteno'a, Jehu'a karisi'afi marerino Jesrili vu'ne. Na'ankure Joramuna kevema ahe'naza namumo'a tegani onte'negeno maseno mani'negeno, Juda kini ne' Ahazia'a vuno ome negegeke mani'nakeno anantega vu'ne. <sup>17</sup> Hanki kuma'ma kegava nehia ne'mo'a, Jesrili kuma have keginamofo agofetu mani'neno, Jehu naga neazageno nezmageno rankumapima mani'haza vahera anage huno kezatizamine, Ha' vahe neazage'na nezamagoe. Higeno ana kema Joram'u'ma nentahino'a, mago vahe hunteno, ame hunka mago hosi afu erinka vunka, ana vahe'ma ome zamagenunka amne neazafi ha' eritma neaze? hunka ome zamantahigo. <sup>18</sup> Anage hutegeno, mago sondia ne'mo

hosí afú agumpí maní'nenó ame huno vuno ome nezamageno, Jehuna amanage huno asmi'ne, kini ne'mo'a huno ha' erinka neampí krimpa frune neane huno hu'ne. Anagema nehiana Jehu'a asmino, Rimpa fruma huno maní'zana kagriza omne'neanki tamefi eramage antenka eno, higeno kuma'ma kegava hu'nea ne'mo'a keama kinimo'ma huntogeno'ma via ne'mo'a ko uhanati'neanagi, eteno omegeno anankea kini nera asmino, Hago kema erinoma via ne'mo'a uhanatianagi ete nome. <sup>19</sup> Higeno anante kini ne'mo'a ru'ene mago sondia ne' huntogeno hosi afu agumpí manino vuno, Jehu nagara ome nezamageno anage hu'ne, Kini ne'mo'a huno tamagra ha' eritma neazafi tamarimpa frune neaze hu'ne. Anagema nehiana Jehu'a asmino, Rimpa fruma huno maní'zana kagriza omne'neanki tamefi eramage antenka eno. <sup>20</sup> Hagi anante kuma'ma kvama hu'nea ne'mo'a kini nera asamino, Henkama huntana ne'mo'a ana vahetera uhanati'neanagi, ete rukrahera huno nome. Hagi egote'noma ne-ege'na koa ne'mo'a Nimsi nemofo Jehu'ma nehiaza huno tusi avunenteno karisia erino ne-e. <sup>21</sup> Higeno anante kini ne' Joram'u'a huno, Hosi afu'ene karisinena retro hunanteho, hige'za retro huntazageno, ana karisifi marerigeno ana zanke huno kini ne' Ahazia'a agranena mago karisifi marerige'ne, Jehu kenaku vu'na'e. Hanki zanagra vuke Jesriliti ne' Naboti mopa tava'onte Jehuna ome ke'na'e. <sup>22</sup> Hanki anante Joram'u'a Jehuna negeno, amanage huno antahige'ne, Karimpa frune neampí kea huo. Anagema higeno'a Jehu'a ke nona'a huno, negregra Jesebeli'ma hige'zama havi anumzante mono'ma hunte'naza avu'avazamo'ene, avu'atagazama hihoma hige'zama hu'naza avu'ava'mo'a ome rama nehiana, nankna hu'na narimpa frunesa esue hu'ne. <sup>23</sup> Anante Joram'u'ma ana kema nentahino'a, karisi'a azeri rukrahe huno nevuno, Ahaziankura ranke huno, Ama ne'mo'a nagri nami'mi huno nahenaku ne-eanki kagranena fro. <sup>24</sup> Anagema nehiana Jehu'a otino keve'a eri krino Joramuna ruga raga azo'na amunompi amagenafi ahegeno, ana kevemo'a tumo'a azerigeno, karisi'afi evuramino fri'ne. <sup>25</sup> Hanki anante Jehu'a tva'oma're nemania eri'za ne'a Bitkarina asmino, Joramuna erisga hunka Jesriliti ne' Naboti mopama me'nefi ome asagafetro hu'ne. Na'ankure kagranema karisiti'afima maní'neta nefá Ahapu enema neonkeno, Ra Anumzamo'ma Ahapunte'ma fore'ma haniazankuma kasnampa ke'ma hunte'nea nanekegu kagesa antahio. <sup>26</sup> Hagi Ra Anumzamo'ma Ahapunku huno, kagra hanke'za Nabotine mofavre'amokizmi korana okina eri tagi atre'naze. E'ina hu'negu, anazamofo nona'a Naboti mopa fatgofi nona hugahue. Hu'negu Ra Anumzamo'ma hu'nea kante antenka Joram'u' avufga erisga hunka Naboti mopafi omeri atro.

<sup>27</sup> Hanki Juda kini ne' Ahazia'a, Joram'u'ma friaza negeno, Bet Hagani rankumategama vu'nea karanka koro freno vu'ne. Anama nehigeno'a Jehu'a amage rotago huno nevuno, sondia vahe'agu huno, agri'enena kevea aheho, hige'za sondia vahe'mo'za rotago hu'za Guri agonarega Ibleami kuma tva'ontega karisi'afi maní'neno koro freno nevige'za, kevea ome ahe'naze. Ana hazageno Ahazia'a koro freno vuno, Megido rankumate yuteno anantega fri'ne. <sup>28</sup> Ana hige'za Ahazia avufga, eri'za vahe'amo'za karisifi erinte'za Jerusalemi vu'za agehe'ima asenezmantazafi, Deviti rankumapi ome asente'naze. <sup>29</sup> Hanki Ahapu nemofo Joram'u'ma, 11ni'a kafuma kinima nemanigeno, Ahazia'a Juda vahe kinia efore hu'ne.

<sup>30</sup> Hagi anante Jehu'a Jesrili kumate e'ne. Higeno Jehu'ma ne-e kema Jesebeli'a nentahino, avurera konaririza freno erikaruvi hunenteno, azokat-

era avasase nehuno, mani'nea nomofo zaho eri kanteti kefenkamuteno ke'ne. <sup>31</sup> Kehenkamuteno keana Jehu'a rankuma'mofo kafante efregeno, Jesebeli'a amanage hu'ne, Zimri,\* kva vahe'ka'a ahe fri ne' mani'nananki, karimpa frune neano? <sup>32</sup> Higeno Jehu'a nentahino, kesga huno ana nomofo zaho'ma eri kante negeno amanage hu'ne, Iza nagri kaziga mani'ne huno kezati'ne. Anagema hige'za zmagonknazama hari'naza vahe'ma ana nompima eri'zama eneri'za vahe'mo'za e'za ke fenkate'za Jehuna ke'naze. <sup>33</sup> Anama hazageno'a Jehu'a zamasamino, ana ara azeri atrenkeno eramino, hige'za azerite'za atrageno erami'ne. Ana higeno Jehu'a hosi afutamine karisine erino ana ara rehapatati atregeno, hosi afutamire'ene kuma'mofo have keginarega koramo'a tusiza hu'ne. <sup>34</sup> Anama huteno Jehu'a kini ne'mofo nompi umarerino ne'zane tinena neteno, vahetamina huzmanteno, amama Anumzamo'ma azeri havizama higeno fria ara erita ome asenteho. Na'ankure agra kini ne'mofo mofa mani'negu anara hugahaze. <sup>35</sup> Hianagi ana vahe'mo'zama vu'za ome kazana, mago'a avufga onke'nazanki, aseni zaferinane tare agiane azane me'nege'za ke'naze. <sup>36</sup> Hagi ana ome kete'za e'za Jehuna eme asamizageno, Jehu'a amanage hu'ne, Ra Anumzamo'a eri'za vahe'a Tisbeti ne' Elaija agipi huvezino amanage hu'ne, Jesebeli'a Jesrili kumapi fri'nigeno, kramo'za eri hantage'za avufga'a negahaze hu'ne. <sup>37</sup> Anama nehazageno anitraga tragoma hutresaza zamavufaga'amo'a, rifamo'ma hiaza huno Jesrili mopafina me'enige'za kegahazanagi e'i Jesebeli avufage hu'za ke'amara osugahaze huno Ra Anumzamo'ma hu'nea kemo nena raga efore hu'ne.

## 10

### *Ahapu naga nofi'ma, maka zamahe vagama re'naza naneke*

<sup>1</sup> Hanki Ahapu ne'mofavreramine, mago'a agri agehe'za 70'a venene Sameria rankumapina mani'naze. Ana hu'nageno Jehu'a, Sameria rankumate ranra vahe'ene, kva vahete'ene, Ahapu ne'mofavre nagate'ma kegavama hunezmante'za vahetega amanage huno avona kretre'ne. <sup>2</sup> Menina tamagra hanave have kegina agu'afi mani'netma, hosi afutamine karisine, ha'zantaminena antazageno, kva ne'tami Ahapu ne'mofavre naga'mo'zanena tamagra mani'naze. E'ina hu'negu tamagrama ama nagri avoma hamprita antahisutma, <sup>3</sup> kva ne'tmimofo Ahapu ne'mofavre naga'pinti'ma mago knare huno kinima maniga'ma hu'nesia ne' azeri otinkeno kinitamia manino. Ana hu'nesigeta nefu agima fanane hu'zankura, aza huta hara nehinkeno kinia manino vino. <sup>4</sup> Hianagi ugagota vahe'ene, ranra kva vahemo'zanena ana avoma hampri'za nege'za tusi zamagogogu nehu'za, amanage hu'za hu'naze, Jehu'a ko tare kini netre'na hara hu zanagatere'ne. E'ina hu'negu tagra amuhara osu'nonankita, hara huontegahune. <sup>5</sup> Hanki kini ne'mofo nonte'ma kvama hu'nea neki, rankumate'ma kvama hu'nea neki, mago'a ugota kva vaheki, Ahapu mofavre nagate'ma kvama hu'naza vahe'mo'zanena amanage hu'za Jehuna kea atrente'naze. Tagra kagri eri'za vahe mani'nonankita kagrama hana nanekege'za antahigahune. Tagra mago kini nera azeri oraotigahune. E'ina hu'negu nazanoma huku'ma hananazana amne hugahane. <sup>6</sup> Anagema hazageno'a, mago'ene anante avona Jehu'a amanage huno kretre'ne. Hanki tamagrama nagri kazigama mani'neta

\* 9:31 Zimriema hu'nea agimofo agafa'a 1 Kin 16: 8-20 kegahane.

nagri kema antahinaku'ma hanuta, okina ama ananknare Ahapu mofavre nagamokizmi zamasenia akafrita erita Jesrili kumate eho, huno kea atrezmant'e. Hanki Ahapu ne'mofavre'ramine, mago'a agri agehe'mozanena 70'a venene mani'hage'za, Sameria rankumapi ranra kva vahe'mo'za rempi hunezmi'za kegava huzmantage'za mani'naze.

<sup>7</sup> Hanki ana kva vahe'mo'za Jehu'ma kretre'nea avoma erite'za, Ahapu ne'mofavreramina 70'a zamahe fri'naze. Anama hute'za zamanankena kitagiza ekaeka kutamimpi eririte'za atrazage'za Jehu'ma Jesrili kumate mani'nerega eri'za vu'naze. <sup>8</sup> Hanki kema erino e'nea ne'mo'a Jehuna eme asamino, hago Ahapu ne'mofavre'ramimofo zamasenia eri'za neaze huno asmi'ne. Anagema higeno'a, Jehu'a asamino, erita vutma kuma kafante tarefi kevu ome antenkeno me'nenigeno vuno nanteraseno hu'ne.

<sup>9</sup> Hanki ko'matigeno'a Jehu'a atiramino ome oti'neno, ana maka vahera amanage huno zamasami'ne, nagra kva ne'ni'a Joramuna azeri atresue hu'na antahintahi hu'ne'na ahe fri'noankino, tamagripina keaga omne'ne. Hu'neanagi ama vahetamina izá zamahe fri'ne? <sup>10</sup> Anage nehuno Jehu'a zamasamino, Menina antahiho ana maka kema Ra Anumzamo'ma eri'za vahé'a Elaija agipima huvazino'ma Ahapu nagaku'ma huama'ma hu'nea kemo'a, ana maka nena raga fore hie. <sup>11</sup> Nehuno Jehu'a Ahapu naga'nofima mago'a Jesrilima mani'naza naga'ene, Ahapu eri'za vahe'ene, knare rone'aramine, agri pristi eri'za vahe'anena, magore huno zamatrege'za ofre'nazanki, ana maka zamahe fri vagare'ne.

<sup>12</sup> Hanki Jehu'a sondia naga'ane Jesrilitira atreno otino Sameria vunaku karanka nevuno, mago kumara sipisipi kva vahe'mo'za atru nehaza kuma agi'a, Bet-Eketi vu'ne. <sup>13</sup> Anante nevuno Jehu'a Juda kini ne' Ahazia naga ome nezamageno anage hu'ne, tamagra iza nagare, huno zaman-tahige'ne. Hanki zamagra kenona'a hu'za, tagra Ahazia nagamota Jesrili vuta kini ne' Joramune, agri nerera kuini a Jesebeli naga ome zamagenaku neone. <sup>14</sup> Anagema Jehu'a nentahino'a naga'amofo zamasamino, zamazer-iho hige'za zamazerite'za zamavare'za vu'za Bet-Eketi tinkeri tva'onte ana maka 42'a vahera magore hu'za ozmatre'za zamahe vagare'naze.

<sup>15</sup> Hagi ananteti'ma atre'za nevu'za, Rekabu nemofo Jehonadabu'a Jehu keku ne-ea ne' ome negeno, Jehu'a hu frufra kea amanage huno hunt'e. Nagra kagrica mago narimpa hugante'noanki, kagra mago krimpa nagrica hunenantano? Higeno Jehonadabu'a huno, Izo nagra mago narimpa hunge-gantoe. Anage higeno e'inama hu'nesiana kza ante'nagamato higeno, azana ante anagamutegeno Jehu'a azante avazuhu anagama karisi'afi atre'ne. <sup>16</sup> Anante Jehu'a amanage huno asami'ne, Nagrane ne-enka Ra Anumzamofoma hanavematinam amage'manentoa avu'avara ko, huno higeke, magoka karisifi vu'na'e. <sup>17</sup> Hagi Sameriamma ete'za, anampima Ahapu naga'ma mago'a mani'naza vahera Jehu'a eme zamahe vagare'ne. E'inama hu'neana Ra Anumzamo eri'za ne'a Elaija agipima huvazino huama hu'nea kemo nena raga'a fore hu'ne.

### *Havi anumza Balinte mono hunentaza vahe, Jehu'a zamahe fri'nea naneke*

<sup>18</sup> Anante Jehu'a ana maka vahe zamavare atru huteno amanage huno zamasami'ne, Ahapu'a avamente havi anumza Balintera monora hunt'e. Hianagi nagra rugatere'na havi anumza Balintera monora huntiegahue. <sup>19</sup> E'ina hu'negu menina havi anumza Balimofo kasnampa vaheki, pristi eri'za vahe'agi, ana maka Balinte'ma mono'ma hunentaza vahe'enena kehinke'za evagareho. Na'ankure nagra Balintega tusi'a ofa kresramna vunte'za nehue. Hanki omesimofona ahe frigahue. E'inagema hu'neana

Jehu'a havige huno Bali havi anumzante mono'ma hunentaza vahe zamahe friku anagea hu'ne. <sup>20</sup> Anante Jehu'a zamasamino, Hanki Bali havi anumzamofo agifi mago kna erinteta monora huntesune, huno hige'za mago kna erintete'za ana knagura maka vahe zamasami vagare'naze. <sup>21</sup> Hagi Jehu'a maka Israeli mopafima havi anumza Balima mono hunentaza vhahera ke hige'za, mono no zmifina eme mani avite'naze. <sup>22</sup> Hagi anante antanine'za Balima mono'ma hunentaza kukenama nentaza bogisire'ma kvama nehia nera Jehu'a asamino, Bogisifintira kukena erinka Balinte'ma mono'ma hunentaza vhahera zamio, higeno ana ne'mo'a kema hiaza huno ana kukenaramina eri fegi atre'ne. <sup>23</sup> Anante Jehu'ene Rekabu nemofo Jehonadabukea ana havi anumza Balimofo mono nompi ufreteke, Jehu'a amanage huno Bali havi anumzante mono'ma hunentaza vhahera zamasami'ne. Tamagrake'za amafina manigahaze. Hanki amu'nontamifima Ra Anumzamofoma mono'ma hunentesaza vahe'ma mani'nesagura haketa ke so'e hiho. <sup>24</sup> Anagema hutekeea Jehu'ene Jehonadabukea umrerike havi anumza Balimofoma kresramnama vunentaza itare tevefima kre fanenehu ofane, mago'a ofanena Balintega ofa hunte'na'e. Hanki korapara ana vahe'ma nompima emareorinageno, meg'i'a kva hiho huno, 80'a sondia vahe Jehu'a huzamanage'za kva nehzageno, amanage huno zamasami'ne, Balinte'ma mono'ma hunentaza vhahera ana maka zamahe fri vagareho. Hagi iza'o mago vahe'ma atresigeno'ma koro fre'nia nera, anama fre'nia ne'mofo nona'a huno agra frigahie. <sup>25</sup> Anante Jehu'ma tevefima kre fanenehu ofama huteno'a, sondia vahe'anen a kva vahe'anena huzamanteno, nompi ufrete magore huta ozamatreta ana maka zamahe vagareho. Anagema hige'za ufre'za ana maka vhahera kazinteti zamahe vagarete'za, zamav-ufaga'a eri'za kumamofo fegi'a ome atre'naze. Anama hute'za ete e'za Balima mono hunentaza nomofo agu'afi ufre'naze. <sup>26</sup> Hanki ana mono nompi ufre'za, zafare'ma antre'za antene'za mono'ma hunentaza zafa ome eri'za, meg'i'a teve eme hanavazi'za kre'naze. <sup>27</sup> Ana nehu'za Bali havi anumzamofo amema'ama tro'ma hunte'naza zane, mono'ma hunentaza nonena tapage tapagu huza eri havizantfa hazageno, rifa kerigna huno me'neno eno meninte'enena ehanati'ne. <sup>28</sup> Hanki Jehu'ma e'inama hiazamo higeno, Israeli mopafintira Bali havi anumzante'ma mono'ma hunentaza zamo'a vagare'ne. <sup>29</sup> Hianagi Nebati nemofo Jeroboamu'ma Beteline Dani kumatrente'ma, golireti bulimakao anentatrena havi anumzama tro huntege'za Israeli vahe'mo'za mono hunte'za kumi hu'nazaza huno, Jehu'a anazanke huno havi anumzana monora hunteno vu'ne. <sup>30</sup> Ana hutegeno Ra Anumzamo'a Jehuna asmino, Nagri navesiza'ma amage antenka Ahapu naganof'i'ma zamazeri haviza hu'nanku, kagri nagapintira zamatzesuge'za 4'a zugama fore hu anante ante'ma hu'za vanaza vahepina Israeli vahe kinia maniza vugahaze. <sup>31</sup> Hianagi Jehu'a agu'aretira huno, Ra Anumzana Israeli vahe'mokizmi Anumzamofo kasegea amagera onte'ne. Ana nehuno ko'ma Jeroboamu'ma Israeli vahe'ma zamavazu hige'za havi anumzante mono hunte'za kumi'ma hu'nazaza huno, Jehu'a ana avu'avaza hu'ne.

<sup>32</sup> Hanki Jehu'ma kinima mani'nea knafina, Ra Anumzamo'a Siria kini ne' Hazaeli atregeno Israeli vahe'mokizmi mopa mago'a eri'ne. Siria kini ne' Hazaeli'a Israeli vhahera ha'huzmagatereno, ana mopazamia eri'ne. <sup>33</sup> Anama eri'neama'a, Jodani timofo zage hanati kaziga, Gati mopama, Rubeni mopama, Manase mopanena eri'ne. E'ina mopa Anoni ti kazontu me'nea tva'onte, Aroeri kumateti agafa huteno vuno, sauti kaziga Giliatine

Basani kaziga vu'nea mopa eri'ne. <sup>34</sup> Hanki ruga'a zantamima Jehu'ma kini mani'neno tro'ma hu'nea zamofo agenkea, Israeli vahe kini vahe'mokizmi zamagi zamagenkema krenentaza avontafepi krente'naze. <sup>35</sup> Anante Jehu'a frige'za, agehem'o'zama frizagezama asezmant'e'zama matipi Sameria asente'naze. Ana hazageno ne' mofavre'amo, Jehoahazi agri kumara erino kinia mani'ne. <sup>36</sup> Hanki Jehu'a 28'a kafufi kinia fore huno Sameria mani'neno, Israeli vahera kegava huzmante'ne.

## 11

### *Atalia'ma Judama kuini manino kegava hu'nea naneke*

<sup>1</sup> Hanki kuini a' Atalia'ma kegeno nemofo kini ne' Ahaziamma frigeno'a, sondia vahe huzamantege'za Juda vahe'mokizmi nagapima, kinima fore huga vahe'ma mani'nazana maka zamahe vagare'ne. <sup>2</sup> Hianagi kini vahe mofavrezagama nezamahazageno'a kini ne' Joram mofa, Ahazia nesaro Jehoseba'a, Joasina avre frakino, agrama nemasefinka kegava higeno mani'ne. Hagi mase tafetamima nentafinka kvama huntlesia a'ene zanatregeke anampinka mani'nakeno Atalia'a ahe ofri'ne. <sup>3</sup> Hanki Jehoseba'a Ra Anumzamofo mono nompinka Joasina 6si'a kafufi kva huntegeke frakike mani'nakeno, Atalia'a Juda vahe'mokizmia ana knafina kegava huzmante'ne. <sup>4</sup> Hianagi Atalia'ma kvama manino egeno 7nima hia kafufina, pristi ne' Jehoida'a, 100'a sondia vahe'ma kuini a'mofo kva nehaza sondia vahete kva vahe'ene, kinimofo nontema kvama nehaza vahera Ra Anumzamofo mono nonte echo huno kea atrezmante'ne. Hanki anante Ra Anumzamofo mono nompi etazageno, Jehoida'a mago huvempa kea zagrane huhagerafiteno, anage huno zmasamine, Inazano tamasami'nua zana tamage huta anaza hugahazo, hige'za huvempa hu'za izo hu'naze. Anage hutazageno Ahazia ne'mofavrea Joasina avreno eme zamaveri hu'ne. <sup>5</sup> Hagi anante Jehoida'a amanage huno zamasami'ne, Nagri'ma navenesiana amanahu hugahune. Sabatima mani fruhu kna zupa 3'afi sondia vahera refko huteta, mago kevumo'a kinimofo nonte kva hina, <sup>6</sup> mago kevumo'a Surie nehaza kafante manina, mago kevumota kinimofo no kafante kvama nehaza vahe'mofo zamefi kva hu'neta, kinimofo nontera kva hugahaze. <sup>7</sup> Anama nehanage'za tare kevumo'za mani fruma hu (Sabat) knazupama manigasa hanamo'za Ra Anumzamofo mono nompina kini ne' Joasina eme kva huntegahaze. <sup>8</sup> Hanki inantego kini ne' Joasi'ma vanoma hanigeta, kazina tamazampi erineta kvahu so'e nehinkeno, iza'o tva'oma'arema esimofona ahe friho. <sup>9</sup> Anante pristi ne' Jehoida'ma zamasamiaza hu'za 100'a sondia vahete kva hu'naza vahe'mo'za manigasama hu kna (Sabati) zu-pama manigasama hanaza sondia vahe'ene, zamagri noma eri'za eri'zama erisaza sondia vahe'ene zamavare'za Jehoida'ma Ra Anumzamofo nompima mani'nere e'nze. <sup>10</sup> Anante pristi ne'mo'a kini ne' Deviti hankoramine keveramima Ra Anumzamofo mono nompima me'neana erino 100'a sondia vahete'ma kvama huterema hu'naza vahera zami'ne. <sup>11</sup> Ana hutege'za ana maka sondia vahe'mo'za ha'zana zamazampi eri vaganere'za kini ne' nomofo tamaga kazigati vuno hoga kaziga evigeno kresramna vu itane, ana mono nonena kegava hu'naze. <sup>12</sup> Hanki sondia naga'mozama tro'ma hu'za otitageno'a, anante pristi ne' Jehoida'a ana kini nemofo mofavre Joasina avreno, atiramino kini fetori asenirera antente'ne. Ana nehuno azampina kasege krente'naza avontafe amigeno eri'neno ne-ege'za huama huza, kini

ne'mo'a zaza kna kinia manigahie. Ananteria anumpi olivi masavena tagiza frenentage'za vahe'mo'za zamaza nehe'za ranke hu'za, Joasi'a zazate kinia manigahie! <sup>13</sup> Hanki sondia vahe'ene, vahe kevumo'za'ma haza zamagasasa kema, kuini a' Ataliama nentahino'a, Ra Anumzamofo ra mono nompima vahe'ma atruma hu'za mani'nazarega vu'ne. <sup>14</sup> Anante'ma vuteno keana, kasefa kini nera zamagra zamavuzmavapima nehazaza huno, ra mono nomofo avuga noma vazisgama hu'nea zafamofo tva'onte oti'nege'za, ana tvaoma'arerar ufera neraza vahe'ene, sondia kva vahe'ene oti'za mani'nage'za maka vahe'mo'za ufe nere'za musenkase nehazageno zamage'ne. Anama nezmageno'a anante Atalia'a kukena'a tagatotagatu nehuno anage huno kezatine, tamagra havi vahe'mota komoru huta nagri nazeri atre'za nehaze. <sup>15</sup> Higeno pristi ne' Johoiada'a 100'a sondia vahetema kvama hutere'ma hu'naza kva vahetmina zamasamino, Ataliana azeriteta avreta sondia vahe amu'nompi vuta mono nomofo meg'i viho. Anama nehutma agri'ma amage'ma nentaza vahera kazinteti zamaheho. Anage nehuno pristi ne' Jehoiada'a zamasamino, ana a'ra Ra Anumzamofo mono nompina ahe ofrita meg'i avreta viho hu'ne. <sup>16</sup> Hanki anagema hutege'za ana a'ra avazu hu'za kini ne'mofo nonte'ma hosi afutamimoza'ma nevaza kafante vu'za ome ahe fri'naze.

*Pristi ne' Jehoida zamaza hige'za veamo'za Ra Anumzamofo amage ante'naza naneke*

<sup>17</sup> Anante Pristi ne' Jehoiada'a kini ne' Joasine, vea kevu naga'ene Ra Anumzamofonte'e, mago huvempa kasege hugagerafino, Ra Anumzamofo vaheke manisune huno hu'ne. Ana zanke huno zamasamige'za vea kevune kini ne'enena mago huvempa kasegea hugagerafi'naze. <sup>18</sup> Anama hute'za ana maka vahe'mo'za oti'za vu'za Bali havi anumzamofo mono nona ome tapage hunetre'za, Kresramanama vu itaramine, Bali havi anumzamofo amema'ama tro'ma hunte'nazana rutako hutre'naze. Ana nehu'za Bali havi anumzamofo pristi ne' Matanina Kresramana vu itaramimofo avuga ahe fri'naze. Anante pristi ne' Jehoiada'a mago'a sondia vahera huzamanteg'e'za Ra Anumzamofo mono nona ome kva hu'naze. <sup>19</sup> Anama huteno 100'a sondia vahete'ma kegava huterema hu'naza kva vahe'ene, kini nete'ma kvama hanaza sondia vahe'ene, kinimofo nonte'ma kvama hanaza sondia vahera Jehoiada'a huzmanteg'e'za, Ra Anumzamofo mono nompintira kini nera avre'za kinimofo nontega nevazageno, ana maka zamagefi zamavaririza vazageno, sondia vahe kafanema nehaza kafanteti ufreno Joasi'a kini tratera umani'ne. <sup>20</sup> Anama hutege'za ana maka vahe'mo'za muse hu'naze. Hagi Ataliana kazinteti kinimofo no tva'onte ahe frizageno, Jerusalemi rankumapina mago'a agasasana omnegeno zamarimpa fru hu'za mani'naze. <sup>21</sup> Hanki Joasina kafu'amo'a 7nima nehigeno, kinia azeri oti'naze.

## 12

*Joasi'ma Ra Anumzamofo mono noma eri fatgo hu'nea zamofo naneke*

<sup>1</sup> Hanki Jehu'ma 7ni'a kafuma Israeli vahe kinima nemanigeno'a Joasi'a Juda vahe kinia efore huno, Jerusalemi kumatera 40'a kafufi kinia mani'ne. Joasi nerera'a Besiba kumateti akino agi'a Zibia'e. <sup>2</sup> Hagi Joasi'ma kinima efore huno mania knafina maka zupa Ra Anumzamofo avurera fatgo avu'avazanke tro hu'ne. Na'ankure pristi ne' Jehoiada'a antahintahi amino

azeri fatgo higeno, anara hu'ne. <sup>3</sup> Hianagi mono'ma hunentaza agona kumatmina Joasi'a eri havizana osu'ne. Ana hige'za vahetmimoza ana kumatminta vu'za Ra Anumzamofontera ofa ome nehu'za, mnanentake zanena kremlina vu'naze. <sup>4</sup> Hanki mago zupa Joasi'a pristi vahera amanage huno zamasami'ne, monote'ma ne-eza eri'za esaza ofane, huvempama hu'nenare'ma aminaku'ma eri'za esaza ofane, zamavesite'ma ami ofama veamo'zama eri'za ra mono nompima e'naza zagoa eritru hiho. <sup>5</sup> Hagi kenkeno'ma Ra Anumzamofo mono nomo'ma havizama haniana, zagoma kegavama hu'naza vaheteti pristi vahe'mo'za mago'a zagoa eri'za ana mono nona eri fatgo hiho. <sup>6</sup> Hianagi pristi vahe'mo'za Ra Anumzamofo mono noma havizama hiana eri fatgo osu'za mani'nageno eno Joasi'ma kinima manino egeno 23ma hia kafure ehanati'ne. <sup>7</sup> E'ina hu'negu pristi ne' Jehoiadane, mago'a pristi vahera kini ne' Joasi'a kehige'za azageno amanage huno zamasami'ne, Nahigeta Ra Anumzamofo mono noma havizama hu'neana eriso'ea osu'naze? Hagi ana zagoa erinteteta omanita, noma negi'za vahe'mokizmi eri'zaminke'za ra mono nona eri fatgo hiho. <sup>8</sup> Hige'za pristi naga'mo'za, Joasi'ma hiankere ana hugahune hu'za mago zamarimpa hute'za, mono nomo'ma havizama hanigeta eri so'ema hanuna zagoa mago'enе vahepintira zo-ogigahune. Ana nehuta mono noma havizama haniana tagra'a eri fatgoa osugahune hu'naze. <sup>9</sup> Hanki anante pristi ne' Jehoiada'a mago vogisi erino avaza'arera mago ka hagentefeno, ana vogisia kre sramnavu itamofo tva'onte, tamaga kaziga vahe'ma unefrare ante'ne. Hanki Ra Anumzamofo nompima vahe'mo'zama zagoma ome netrageno'a, kahama ufrete'ma kvama hu'nea pristi ne'mo anama ome atraza zagoa erino vogisifina atre'ne. <sup>10</sup> Hanki kazageno'ma ana vogisifima zagomo'ma avimatege'za, vugota pristi ne'ene kinimofo eri'za vahe'mo'za e'za ana zagoa Ra Anumzamofo mono nompintira eme hampari'za kupina eriri'naze. <sup>11</sup> Anama hute'za ra mono noma havizama hunenige'za eriso'ema hanaza vahe'mokizmi kva nemofo azampi, ana zagoa antegahaze. Hagi Ra Anumzamofo noma eri fatgoma hanaza kamunta vahe'ene noma kisaza vahe'ene, <sup>12</sup> havereti'ma noma negi'za vahe'ene, noma negi'za vahe'ene, asopa noma kiza vahe'enena ana zagoreti mizana sezamante'naze. Hanki mago'a zagoretira, zafa mizanese'za havea mizanese'za, mago'a zanena mizase'za Ra Anumzamofo mono noma havizama hu'neana maka eri fatgo hu'naze. <sup>13</sup> Hanki anama eri'za e'naza zagoretira, Ra Anumzamofo mono noma eri fatgohu eri'zanteke atre'naze. Ana nehu'za silvareti trohu zuom-paramine, tavi'ma erisuhi zotaramine, tima runi runimahu zuomparamine, uferamine, mago'a goliretiro silvareti'ma tro'ma hu'naza zantamina Ra Anumzamofo mono nompima eri'zama eri zantaminena ana zagofintira mizana ose'naze. <sup>14</sup> Hianagi anama Ra Anumzamofo mono nompima eri'za aza zagoa, mono noma eri fatgo haza vahe miza huzmante'naze. <sup>15</sup> Hanki zamagra eri'zama kvama hu'ne'za, eri'za vahe'ma zagoma mizama seneztataza vahe'mo'za fatgo zamavu'zmava hu'za zagoa erihava osu'naze. E'ina hazage'za ugagota kva vahe'mo'za ana zagogura zamantahia onke'naze. <sup>16</sup> Hianagi hazenke'ma eri fatgohu ofane, kumi ofama hunaku'ma eri'za aza zagoa, Ra Anumzamofo mono nompi zagoma nentafina ome onte'nazanki, eri'za pristi vahe ome zami'naze. <sup>17</sup> Hanki ana knafina Siria kini ne' Hazaeli'a, Gati rankumara hara huzamagatereno eri'ne. Anama huteno'a rukrahe huno Jerusalemi kuma ha' huntoku ke'ne. <sup>18</sup> Hagi anama huteno'a Jerusalema ehanatigeno'a, korapa Jehosafati'ma, Jehoram'u'ma, Ahazia'ma

hu'za Ra Anumzamofoma ami'naza maka zantamine, Joasi'ma ante'nea zantamine, ra mono nompine, kinimofo nompima ante'naza golia ana maka Joasi'a eritru huno Siria kini ne' Hazaeline muse'za ami'ne. Ana musezama Hazaelia enerino'a, Jerusalemi kumara hara huonteno atreno vu'ne. <sup>19</sup> Hanki Joasi'ma kinima mani'nea knafima tro'ma hu'nea zamofo, agigenkene, mago'a zama hu'neazamofo agenkea, Juda kini vahe'mokizmi zamagenkema krenentaza avontafepi krente'naze. <sup>20</sup> Hanki mago zupa Joasina agri eri'za vahe'mo'za ahenaku ot'i'za kea retro hute'za, Sailo kumategama urami'nea kantega Bet-Milo kumate ome ahe fri'naze. <sup>21</sup> Hanki Joasi eri'za netrena Simiati ne'mofo Jozabadi'ene, Soma ne'mofo Jehozabatikea Joasina ahe frikeno frige'za, Deviti rankumapi agehe'ima asez-mante'nazafi ome asente'naze. Ana hazageno Joasi nemofo Amasia nefra nona erino kinia mani'ne.

## 13

### *Israeli kini ne' Jehoahazi naneke*

<sup>1</sup> Hanki Ahasia nemofo Joasi'ma 23'a kafuma, Juda vahe kinima ne-manigeno'a, Jehu nemofo Jehoahasi'a Israeli vahe'mokizmi kinia efore huno Sameria mani'neno, 17ni'a kafufi kegava huzmante'ne. <sup>2</sup> Hagi Jehoahasi'a Ra Anumzamofa avuvi havi avu'avaza nehuno, Nebati nemofo Jeroboamu Israeli vaheku hiho huno hige'za hu'naza kumira amefira huomino avaririno anahukna kumi hu'ne. <sup>3</sup> Ana higeno Ra Anumzamo'a tusi arimpa Israeli vhahera ahe'zamanteno, Siria kini ne' Hazaeline, nemofo Ben-Hadatikizin zanazampi Israeli vhahera zamavarentege'za kegava huzamante'ne. <sup>4</sup> Hagi anante Siria kini ne'mo'ma Israeli vahe'ma zamazeri havi'zama hiazanku Jehoahasi'a Ra Anumzamofontega nunamu higeno, Ra Anumzamo'a nunamu'a antahimi'ne. Na'ankure Siria kini nemo'ma zamazeri havizama hiazana Ra Anumzamo'a ko ke'ne <sup>5</sup> Higeno Israeli vahe'ma zamaho'ma keno zamazama hania nera mago, Ra Anumzamo'a hu hamparintegeno Siria vahe zamazampintira Israeli vhahera zamagu vazi'ne. Ana hige'za Israeli vahe'mo'za ko'ma nehazaza hu'za seli nompi so'e hu'za mani'ne. <sup>6</sup> Hianagi ko'ma Jeroboamu naga'mozama nehazage'zama, zamavaririzama hu'naza kumira Israeli vahe'mo'za otre'naze. Ana zamavu'zmava zana hvavava nehu'za, havi a' anumza Asera amema'ama zaferetti'ma troma hu'za Sameria kumate'ma ante'nezama mono'ma hunentaza zana eri otre'naze. <sup>7</sup> Hagi ana knafina Siria vahe'mo'za Israeli sondia vhahera zamahe vagarageno, Jehoahasi'ma ante'neana, karisiramina 10ni'a anteno, hosi agumpima mani'ne'za ha'ma hu sondia vhahera 50'a naza mani'zageno, mopafima vanoma hu'za ha'ma hu sondia vhahera 10 tauseni'a naza mani'ne. <sup>8</sup> Hanki Jehoahasi'ma kinima mani'nea knafima hankave eri'zama enerino, ruga'a zantamima tro'ma hu'nea zamofo agenkea, Israeli vahe'mokizmi kinimofo zamagi zamagenkema krente avontafere nehaza avontafepi krente'naze. <sup>9</sup> Hanki anante Jehoahasi'a frige'za afu afah'e'ima asenezmantafi Sameria asente'naze. Ana hutazageno nemofo ne' Jehoasi'a nefa nona erino kinia mani'ne.

<sup>10</sup> Hanki Joasi'ma 37ni'a kafuma Juda vahe'mokizmi kinima nemanigeno'a, Jehoahasi nemofo Joasi'a Israeli vahe kinia efore huno Sameria mani'neno 16ni'a kafufi kva huzamante'ne. <sup>11</sup> Hagi Joasi'a Ra Anumzamofa avurera havi avu'avaza nehuno, Nebati nemofo Jeroboamu Israeli vahe zamavazu hige'za hu'nazankna kumi, agranena hu'ne. <sup>12</sup> Hanki maka zama Joasi'ma kinima mani'nea knafima tro'ma hu'nea zamofo

agenkene, Juda kini ne' Amasiamha ha'ma hunte'nea zamofo agenkenena, Israeli vahe kini vahe'mokizmi zamagi zamagenke'ma krenentaza avontafepi krente'naze. <sup>13</sup> Hanki afaher'zama friza nevazaza huno Joasi'a frige'za Israeli kini vahe'ma Sameriamma asenezmantafi asente'naze. Ana hutazageno nemofo ne' Jeroboamu'a nefna nona erino kinia mani'ne.

### *Kasnampa ne' Elisa'ma fri'nea zamofo naneke*

<sup>14</sup> Hanki Jehoasi'ma kinima mani'nea knafina, kasnampa ne' Elisa'a rankri erino fri'za hu'ne. Higeno kini ne' Jehoasi'a uramino vuno Elisana avuga zavi ome neteno amanage hu'ne, nafanimoke, nafanimoke, kagra ha'mahu karisigna nehunka, hosi afu agumpima mani'neza ha'ma nehaza vahekna hu'enka, Israeli vhahera hanavetinka zamaza nehana nere. <sup>15</sup> Higeno Elisa'a Jehoasina asmino, Atine keve zagane erio. Anagema higeno'a Jehoasina asmino, kevea atifi erintenka erigrio, huno higeno ana hutegeno, Elisa'a Israeli kini ne'mofa azante azana agofetu ante'nne. <sup>16</sup> Ana huteno asamino, Zagema hanati kazigama me'nea zaho kahana erinagio, huno higeno eri nag'i'ne. Anama hutegeno'a, Elisa'a asamino, Kevea aho, huno higeno Jehoasi'a keve ahogeno, Elisa'a huno, Ama kevea Ra Anumzamofo kevegino Siria vahe'ma ha'ma huzmagateresia keve. E'ina hu'negu kagra Siria vahe'ma Afeki rankumate'ma ha'ma huzmantesanana, ana maka vhahera zamahe vagaregahane. <sup>18</sup> Anante Elisa'a kini nera asamino, Keveramina erio, huno higeno eritegeno keveramintetira mopa amasagio huno higeno Jehoasi'a keveramintetira 3'a zupage mopa amasagiteno atre'ne. <sup>19</sup> Anama hutegeno Ra Anumzamofo kasnampa ne' Elisa'ma negeno'a kini nera arimpa ahenenteno amanage huno asmi'ne, Na'a higenka 5fu'a o 6si'a zupa naza mopa omasagine. E'inama hantesina Siria vhahera ana maka zamahe hana hasine. Hianagi menina Siria vhahera 3'a zupage'za hara huzamagteregahane. <sup>20</sup> Hagi henka Elisa'a frige'za asente'naze. Anante ana maka kafufina Moapu vahe'mo'za tra'zamo'ma agatama nehagea knafina e'za Israeli vahe'mokizmi eme rohu rezmante'za zamazeri haviza hutere hu'naze. <sup>21</sup> Mago zupa mago'a Israeli naga'mo'za fri'nea ne' asenteku hu'naze. Hianagi kazama Moapu vahe'ma azage'za nezamage'za, anama fri'nea nera eri'za Elisa'ma frige'za asente'naza havegampi matevu netre'za koro fre'naze. Anama hazageno'a, Elisa zaferinamo anama fri'nea ne'mofa avufga avako higeno, fri'nefintira ot'i'ne.

<sup>22</sup> Hanki Jehoahasi'ma Israeli kinima mani'nea knafina, Siria kini ne' Hazaeli'a Israeli vhahera maka zupa eme zamazeri haviza huvava hu'ne. <sup>23</sup> Hianagi Ra Anumzamo'a Israeli vhahera asunku huzmanteno, zamazeri so'e huzmantene'. Na'ankure zamagehe'i Abrahamuma, Aisakima, Jekop-unema huhagerafi huvempa kema huzmantene'nea zanku agesa nentahino, amefira huozamino zamatrege'za havizantfa osu'za mani'za menina e'naze. <sup>24</sup> Hagi henka Siria kini nera Hazaeli'a frigeno, nemofo ne' Ben-Hadati nefna nona erino Siria vahe kinia mani'ne. <sup>25</sup> Anante Israeli kini ne' Jehoasi'a Siria kini ne' Ben-Hadatina hara hugatereno, ko'ma Siria kini ne' Hazaeli'ma, nefna ne' Jehoasima ha'ma hugatereno'ma Israeli vahe ranra kumatamima eri'neana eteno eri vagare'ne. Hagi Jehoahasi'a Ben-Hadatina 3'a zupa hara hunteno azeri agatere'ne.

## 14

### *Juda vahe kini ne' Amasia naneke*

<sup>1</sup> Hanki Jehohasi nemofo Jehoasi'ma tare kafuma Israeli vahe kinima nemanigeno'a, Juda vahe kini ne' Joasi nemofo Amasi'a Juda vahe kinia efore huno mani'ne. <sup>2</sup> Amasia'a 25fua kafu nehuno kinia efore huno, Jerusalemia mani'neno 29ni'a kafufi kini eri'zana eri'ne. Hagi nerera agi'a Jehoadinikino Jerusalemiti a' mani'ne. <sup>3</sup> Hanki Amasia'a Ra Anumzamofo avurera fatgo avu'avaza hu'ne. Hianagi negeho Devitima hu'nea knara osu'neanki, maka zama tro'ma hu'neana nefu Joasi'ma hu'nea avu'avaza amage anteno hu'ne. <sup>4</sup> Ana nehuno havi anumzama mono'ma hunentaza agona kumatamina eri havizana osu'nege'za, anantega vu'vava hu'za ofa ome Kresramana nevu'za, mnanentake zana tevefi krempa vu'naze. <sup>5</sup> Hanki henka Amasia'ma kinima mani hankavema netino'a, nefama ahe fri'naza vahera, zamahe fri'ne. <sup>6</sup> Hianagi anama zamahe fri'za vahe'mokizmi mofavre nagaara zamahe ofri'naze. Na'ankure Ra Anumzamo'ma Moses'e'ma asamigeno kasege avontafepima krente'neana, nefu'ma hu'nesia kumitera mofavre'a ahe ofrisigeno, mofavre'amo'ma hu'nesia kumitera nefana ahe ofrigahie. Hianagi magoke magokemo'ma agra'ama hu'nesia kumite zamahe fritere hugahaze hu'ne. <sup>7</sup> Hanki mago zupa Amasia'ene sondia naga'amo'za, hage nehaza agupofi Idomu sondia vahera 10tauseni'a hara huzmagatenere'za, Selae nehaza rankumara eri'naze. Ana hute'za ana rankuma'ma kasefa agima ami'nazana Joktelie hazage'za, meninena ana agi nehaze. <sup>8</sup> Mago'a kna evutegeno Amasia'mago'a vahe huzmanteg'e'za ke eri'za Jehu negeho Jehoashi nemofo Israeli kini ne' Jehoasintega vu'naze. Ana vahe'mo'za Joasinte vu'za amanage hu'za ome asmi'naze, Kini ne' Amasia'a tamagri Israeli nagamotma ha' eme huramantegahue huno hu'ne. <sup>9</sup> Hianagi Israeli kini ne' Jehoasi'a amanage huno Juda kini ne' Amasia kerera kenona huno kea atrente'ne, Mago Lebanoniti ave've trazamo amanage huno kea atrentegeno mago Lebanon me'nea sida zafarega vu'ne. Kagra mofaka'a atregeno nagri ne'mofavremo a' avreno hu'ne. Hanki ave've trazamo'ma anagema hutegeno'a, Lebanoniti mago afi zagamo eno, ana ave've trazana agiaretu rentrako higeno haviza hu'ne. <sup>10</sup> Anagema huteno'a Amasia kerera mago'ene amanage huno kea atrente'ne, Kagrama Idomu vahe'ma ha'ma huzmagatere'nana zanku musenkase hunka rankagia enerine. E'ina hu'negu nonka'afi mani'enka ana musenkasea huo, kagrama ha'ma eme hurantesunka, kagra haviza nehananke'za, Juda vahe'mo'zanena haviza hugahaze. <sup>11</sup> Hianagi Amasia'a anankea ontahi'ne. Ana higeno Israeli kini ne' Jehoasi'a sondia naga'anee vuno, Juda vahe'mokizmi mopafi me'nea rankuma Betsemesi kumate Amasiane sondia naga'anena hara ome huzmanteg'e'za. <sup>12</sup> Hanki ana hapina Israeli naga'mo'za Juda nagara hara huzmagatere'naze. Anama hazage'za maka Juda sondia vahe'mo'za atre'za koro fre'za seli nonkuma zamirega ete'za vu'naze. <sup>13</sup> Hanki Israeli kini ne' Jehoasi'a Juda kini ne' Ahasia negeho Joasi nemofo Amasiana Betsemesi rankumate azerino kina hunte'ne. Anama huteno'a Jehoasi'a sondia naga'ane Betsemesitira atre'za Jerusalemi rankumate uhanatite'za, Jerusalemi rankumamofo have kegina, Efraemi rankafanteti agafa huteno vuno ome renagentetema me'nea kahante vu'neana, 184'a mitanaza ana kegina ru faragu farage vazi'za eri haviza hutre'naze. <sup>14</sup> Ana'ma huteno Jehoasi'a Ra Anumzamofo mono nompi umarerino ana maka goline silvane, anampima me'nea zantamina, ana maka enerino, kinimofo nompima zagoma nentafima marerisa fenozama me'nea zantaminena eri vagare'ne. Ana nehuno mago'a vahera zamahe ofri zamavareno Sameria vu'ne.

**15** Hanki Israeli kini ne' Jehoasi'ma kinima mani'nea knafima hankave eri'zama enerino, ruga'a zantamima tro'ma hu'nea zamofo agenkene, Juda kini ne' Amasiamma ha'ma hugatere'nea zamofo agenkenena Israeli kini vahe'mokizmi zamagi zamagenkema krenentaza avontafepi krente'naze. **16** Hanki Jehoasi'a frige'za Israeli kini vahe'ma asenezmantafi Sameria asente'naze. Ana hutazageno Jeroboamu'a nef a nona erino kinia mani'ne.

**17** Hagi Israeli kini ne' Joasi ne'mofo Jehoasi'ma fritegeno'a, Juda kini ne' Jehoasi nemofo Amasia'a 15ni'a kafu maniteno henka fri'ne. **18** Hagi Amasiamma mago'a zama tro'ma hu'nea zamofo agi agenkea, Juda kini vahe'mokizmi zamagi zamagenkema krenentaza avontafepi krente'naze. **19** Hagi Amasia'ma Jerusalema mani'nege'za mago'a vahe'mo'za ahe frinaku kea retro hu'naze. Ana nanekema Amasia'ma nentahino'a, atreno koro freno Lakisi rankumate ome ahe fri'naze. **20** Anama hute'za Amasia avuufga hosi afu agumpi erinte'za eri'za e'za, Jerusalemi Deviti rankumapi afahe'ima asenezmantazafi asente'naze. **21** Anante maka Juda vahe'mo'za oti'za Amasia nemofo Azariana nef a nona erino kini mani'nogu azeri oti'naze. Hagi 16ni'a kafu nehige'za Azariana kinia azeri fore hu'naze. **22** Hagi Amasia'ma fritegeno'a henka, Azaria'a kinima nemanino'a, ete Elati rankumara eriteno, ana kuma'ma havizama hu'neama'a eriso'e hu'ne.

### *Nampa 2 Jeroboamu Israeli vahe'mokizmi kini fore hu'nea naneke*

**23** Hagi Joasi nemofo Amasia'ma Juda vahe kinima manino egeno 15nima hia kafufi, Jehoasi nemofo Jeroboamu'a Israeli vahe'mokizmi kinia fore huteno, 41ni'a kafufi Sameria kinia manino kegava hu'ne. **24** Hagi agra Ra Anumzamofo avurera havi avu'avaza huno, Nebati nemofo nampa 1ni Jeroboamu'ma kumi nehuno Israeli vahe zamatufefe'za hu'naza kumira, amefi huomino, ana kumira agranena zamavaririno hu'ne. **25** Hagi Israeli vahe mopama ha' vahe zamazampima me'nea mopama nampa 2 Jeroboamu'ma ete eri'nea mopamofo agema'amo'a noti kaziga Lebo-Hamatiti agafa huteno, uramino fenkamu sauti kaziga fri hagerintega vu'ne. Hagi ana mopama eri'neana Ra Anumzana Israeli vahe'mokizmi Anumzamo'ma, Kathefa kumateti kasnampa ne' Amitai nemofo Jona agipima huvazino hu'ne a nanekemo nena'a efore hu'ne. **26** Hagi Israeli vahe'mo'zama tusi zamatazampima mani'naza zana Ra Anumzamo'a keno antahino hu'ne. Hagi kazokzo eri'za vahero, amne vahero ana knazampike manizageno mago'mo'e huno zamazama huga vahera omanigeno, Ra Anumzamo'a Jeroboamu aza higeno anara hu'ne. **27** Hanki Ra Anumzamo'a Israeli nagara ama mopa agofetutira zamahe vagaregahue hunora osu'neankino, Joasi nemofo Jeroboamumpi sotu huno, Israeli nagara zamagu'vazi'ne. **28** Hagi Jeroboamu'ma kinima fore huno mani'nea knafima fore hu'nea zane, mago'a zama tro'ma hu'nea zamofo agenkene, Damaskasine Hamati rankumatrema ha'ma huno ete eri'nea zamofo agenkea Israeli kini vahe'mokizmi zamagi zamagenkema krenentaza avontafepi krente'naze. **29** Hagi nampa 2 Jeroboamu'a frige'za afahe'ima asenezmantazafi asentazageno, nemofo Zekaraia'a nef a nona erino Israeli vahe kinia mani'ne.

<sup>1</sup> Hagi nampa 2 Jeroboamu'ma Israeli vahe kinima manino vigeno 27nima hia kafufina, Amasia nemofo Azaria'a Juda vahe kinia agafa huno mani'neno kegava hu'ne. <sup>2</sup> Azaria'a 16ni'a kafu nehuno, kinia fore huno Jerusalemi kumatera 52'a kafufi kinia mani'ne. Nerera agi'a Jekoliakino Jerusalemiti a' mani'ne. <sup>3</sup> Azari'a nef'a'ma Amasiama hu'neaza huno Ra Anumzamofo avurera fatgo avu'avaza hu'ne. <sup>4</sup> Hianagi havi anumzante'ma mono'ma nehaza kumatmina Azaria'a eri havizana osu'ne. Ana hu'nege'za veamo'za ana kumatmintera vu'za ofa ome Kresramana nevu'za, mnanentake zantamina tevefi kremina vu'naze. <sup>5</sup> Anama hazageno'a Ra Anumzamo'a Azariana fugo krireti azeri haviza higeno, ana krifi mani'neno fri'za hu'ne. Anama higeno'a kini vahe'ma nemani'za nompintira atreno vuno mago nomipi umani'ne. Ana hutegeno Azaria nemofo Jotamu'a nefä nona erino, kinimofo none ana mopafima mani'naza vahe'enena maka kegava hu'ne. <sup>6</sup> Hagi Azariama kinima mani'nea knafima fore hu'nea zantamine, ana maka zama tro'ma hu'nea zantamimofo agenkea, Juda vahe'mokizmi kinimofo agigenkema krenentaza avontafepi krente'naze. <sup>7</sup> Hagi Azaria'a frige'za, Deviti rankumapima afahe'ima asezmantenazafi asente'naze. Ana hutazageno nemofo Jotamu'a nefä nona erino Juda vahe kinia mani'ne.

### *Israeli kini ne' Zekaraia nanke*

<sup>8</sup> Hanki Juda vahe kini ne' Azaria'ma kinima fore huno 38'a kafuma nemanigeno'a, Joram u nemofo Zekaraia'a Israeli vahe'mokizmi kinia fore huteno Sameria kumate mani'neno 6si'a ikampi Israeli vhahera kegava huzmante'ne. <sup>9</sup> Hagi afahe'zama hu'nazaza huno Zekaraia'a Ra Anumzamofo avurera havi avu'ava hu'ne. Ko'ma Nebati nemofo Jeroboamu'ma kumi'ma nehuno, Israeli vahe'ma zamatu'fege'za hu'naza kumira, amefira huomino ana kumira agranena zamavaririno hu'ne. <sup>10</sup> Anante Jabsi nemofo Salumu'a mago'a vahe zamavare atru hige'za Zekaraiaama ahesaza nanke retro hu'naze. Ana huteno henka Salumu'a vahe zamavu'fi Zekaraiaana ahe friteno, agra'a kinia mani'ne. <sup>11</sup> Hagi Zekaraia'ma kinima mani'neno ruga'azama tro'ma hu'nea zantamimofo agenkea, Israeli kini vahe'mokizmi zamagi zamagenkema krenentaza avontafepi krente'naze. <sup>12</sup> E'inama hu'neana Ra Anumzamo'ma Jehuma asmino, kagripinti forehu anante anante'ma hu'zama vanaza, vahe'mo'za 4'a zupa kinia manigahaze huno'ma asmi'nea kemo'a nena raga'a efore hu'ne.

<sup>13</sup> Hagi Uzia'ma 39ni'a kafuma Juda vahe kinima nemanigeno'a, Jabsi nemofo Salumu'a Israeli vahe kinia fore huno mago ikampi Sameria kumatera kinia mani'ne. <sup>14</sup> Hagi ana knafina Gati nemofo Menahemu'a Tirza rankumateti Sameria kumate marerino Salumuna ome ahenefrino, agri kumara erino kinia mani'ne. <sup>15</sup> Salumu'ma kinima mani'nea knafima fore'ma hu'nea zantamine, kini ne' Zekaraiaama mago'a vahe'ene kema anakiten'o'ma ahe' nefrino, agri noma erino kinima mani'nea zamofo agenkenena, Israeli kini vahe'mokizmi zamagi agenkema krenentaza avontafepi krente'naze. <sup>16</sup> Hagi Menahemu'a Tirza rankumateti agafa huteno vuno Tipsa rankumate vhahera hara ome hunezmanteno, ana kumamofo tavaoma'arema megagi'nea ne'onse kumapi vhahera zamahe vaganereno, zamuenema hu'naza a'nenea zamazerino kazinu zamarimpa reraragufe'ne. E'inama hu'neana i'oma hazageno kumazmifima uofre'nea zante anara hu'ne.

<sup>17</sup> Hagi Azaria'ma Juda vahe kinima 39ni'a kafuma nemanigeno'a, Gati nemofo Menahemu'a Israeli vahe kinia fore huteno Sameria kumate mani'neno 10ni'a kafufi Israeli vhahera kegava hu'ne. <sup>18</sup> Menahemu'a ana maka knama kinima mani'nea knafina Ra Anumzamofo avurera havi avu'ava hu'ne. Nebati nemofo Jeroboamu'ma ko'ma kumi nehuno, Israeli vahe zamatufege'za hu'naza kumira, amefi huomino ana kumira agrane avaririno hu'ne. <sup>19</sup> Hagi Menahemu'ma kinima mani'nea knafina, Asiria kini ne' Tiglat Pilesa'a Israeli vhahera eme ha' huzmant'e. E'inama higeno'a Israeli kini ne' Menahemu'a, hara osanu'anki natrenige'na Israeli kinia mani'nue hiankazigati, 34 tauseni'a kilo hu'nea silva zago erino Asiria kini ne' Tiglat Pilesana ami'ne. <sup>20</sup> Anante ana zagoma Asiria kini ne'ma aminakura, Menahemu'a Israeli vahepinti takisi zagoa zogi'ne. Maka feno vahepinti kna'amo'a 570'a gremi hu'nea silva zago eritere huteno, Tiglat Pilesana ana zagoa ami'ne. Ana hutegen Tiglat Pilesa'a Israeli mopafina omani atreno vu'ne. <sup>21</sup> Hagi Menahemu'ma kinima mani'nea knafima fore'ma hu'nea zamofo agenkene, maka zama agrama tro'ma hu'nea zamofo agenke, Israeli kini vahe'mokizmi zamagi zamagenkema krenentaza avontafepi krente'naze. <sup>22</sup> Anante Menahemu'a frige'za afahe'ima asemazmantenafi asente'naze. Hagi anante nemofo Pekahia'a nefra nona erino Israeli vahe kinia mani'ne.

### *Israeli kini ne' Pekahia naneke*

<sup>23</sup> Hagi Azaria'ma Juda vahe kinima 50'a kafuma nemanigeno'a, Menahemu nemofo Pekahia'a Israeli kinia fore huteno Sameria kumate mani'neno tare kafufi Israeli vhahera kegava hu'ne. <sup>24</sup> Hagi Pekahia'a Ra Anumzamofo avurera havi avu'avaza hu'ne. Nebati nemofo Jeroboamu'ma kumi'ma ko'ma nehuno, Israeli vahe zamatufege'za hu'naza kumira, amefi huomino ana kumira zamavaririno agra hu'ne. <sup>25</sup> Anante Pekahia sondia vhahete ugota hu'nea kva ne' Remalia nemofo Peka'a otino Giliati kazigati 50'a vahe zamavarege'za Pekahiamma ahefrisaza kea retro hu'naze. Hagi Pekahia'a kini nompi mago hunaragintageno hanavetinefi mani'nege'za anafe hu'za anampinka mareri'za nehe'za, Agrobune Arienena magoka zamahe'naze. Anama hutazageno Pekahia no erino, Peka'a Israeli vahe kinia mani'ne. <sup>26</sup> Hagi Pekahia'ma kinima mani'nea knafima fore hu'nea zamatamine, ana maka zama tro'ma hu'nea zantamimofo agenke, Israeli kini vahe'mokizmi zamagi zamagenkema krenentaza avontafepi krente'naze.

### *Israeli kini ne' Peka naneke*

<sup>27</sup> Hagi Azaria'ma Juda vahe kinima manino egeno 52ma hia kafufi, Remalia nemofo Peka'a Israeli kinia fore huteno, Sameria kumate mani'neno 20'a kafufi Israeli vhahera kegava hu'ne. <sup>28</sup> Hagi Peka'a Ra Anumzamofo avurera havi avu'ava hu'ne. Ko'ma Nebati nemofo Jeroboamu'ma kumi nehuno Israeli vahe zamatufege'za hu'naza kumira amefi huomino, ana kumira agra zamavaririno hu'ne. <sup>29</sup> Hagi Peka'ma Israeli vahe kinima mani'nea knafi, Asiriati kini ne' Tiglat Pilesa'a ha' eme huzmanteno Ijoni kuma'ma, Abel-Betmaka kuma'ma, Janoa kuma'ma, Kadesi kuma'en, Hazori kuma'enena e'nerino Giliati kazigane Galili kaziganena enerino, ana maka Neftali naga'mofa mohanenena erivagare'ne. Ana nehuno ana kumatmimpi vahetmina zamavareno Asiria mopare ome kina huzmant'e. <sup>30</sup> Hagi Juda kini ne' Usia nemofo Jotamu'ma 20'a kafuma kinima nemanigeno'a, Ela nemofo Hosea'a mago'a vahe zamavare atru huno Remalia

nemofo Pekama ahesaza nanekea retro hu'naze. Ana huteno henka Hosea'a Pekana ahenefrino agri nona erino kinia mani'ne. <sup>31</sup> Hagi Peka'ma kinima mani'nea knafima fore'ma hu'nea zamofo agenke, maka zama agrama tro'ma hu'nea zamofo agenke, Israeli kini vahe'mokizmi zamagi zamenkema krenentaza avontafepi krente'naze.

### *Juda kini ne' Jotamu naneke*

<sup>32</sup> Hanki Remalia nemofo Peka'ma Israeli vahe kinima tare kafuma nemanigeno'a, Usia nemofo Jotamu'a agafa huno Juda vahe kinia fore huno mani'ne. <sup>33</sup> Jotamuna kafu'amo'a 25fu nehigeno kinia fore huteno, Jerusalemi kumate mani'neno Juda vahera 16ni'a kafufi kegava hu'zmante'ne. Hagi nerera agi'a Jerusakino Zadoku mofare. <sup>34</sup> Hagi Jotamu'a Ra Anumzamofo avurera nefu Usia'ma hu'neaza huno maka fatgo avu'avaza hu'ne. <sup>35</sup> Hanki Jotamu'a hige'za Ra Anumzamofo ra mono no kumapima ufre kahama, anagamu kazigama me'nea kahana tro hu'naze. Hianagi havi anumzante'ma mono'ma nehaza kumatamina eri havizana osu'nege'za, anantega vahe'mo'za vuvava hu'za ofa ome kresramna nevu'za mnantake pauranena tevefi kremla vu'naze. <sup>36</sup> Hagi Jotamu'ma kinima mani'nea knafima fore hu'nea zamtamine, ana maka zama tro'ma hu'nea zantamimofo agenke, Juda vahe'mokizmi kinimofo zamagi zmagenkema krenentaza avontafepi krente'naze. <sup>37</sup> Hagi Jotamu'ma Juda vahe kinima mani'nea knafina, Siria kini ne' Rezinine, Israeli kini ne' Ramalia nemofo Pekanena Ra Anumzamo'a zanatregike Juda vahera hara eme huzmante'na'e. <sup>38</sup> Hanki Jotamu'a frige'za afah'eima asenezmantazafi, nefu Deviti rankumapi asente'naze. Ana hutazageno nemofo Ahasi'a nefu nona erino kinia mani'ne.

## 16

### *Juda vahe kini ne' Ahasi naneke*

<sup>1</sup> Hanki Remalia nemofo Peka'ma 17ni'a kafuma Israeli vahe kinima nemani'geno'a, Jotamu nemofo Ahasi'a Juda vahe kinia agafa huno mani'ne. <sup>2</sup> Ahasi'a 20'a kafu nehuno kinia fore huteno, Jerusalemi rankumapi mani'neno Juda vahera 16ni'a kafufi kegava hu'ne. Hagi Ra Anumzana agri Anumzamofo avufina havi avu'avaza nehuno, negeho Deviti'ma hu'nea avu'ava zana osu'ne. <sup>3</sup> Agra Israeli kinimoza'ma hu'naza havi avu'avaza zamavaririno nehuno, ko'ma ana mopafima mani'naza vahe'ma, Israeli negazageno Ra Anumzamo'ma zamahe natitre'nea vahe'mokizmi kasrino havizantfa hu'nea zamavu'zmavaza nehuno, ne'mofonena aheno tevefi kresramna vu'ne. <sup>4</sup> Ana nehuno agra mono'ma nehaza kumatmimpine, agonaregane ranra zafaramimofo agafine vuno, Kresramana vu ofa nehuno mnantake paurana tevefi kre mna vu'ne. <sup>5</sup> Hagi Ahasi'ma Juda kinima mani'negeke, Siria kini ne' Rezini'ene Israeli kini ne' Remalia nemofo Peka'enena Ahasina ha' eme hunenteke Jerusalemi kumara eme avazagi kagi'na'anagi azeri agateore'na'e. <sup>6</sup> Hagi ana knafina Siria kini ne' Resini'a Juda vahera Elati rankumapintira hahuzamagatereno ete ana kumara agrarega erinenteno, zamavare atrege'za vu'naze. Anama hige'za Idomu vahe'mo'za ana kumapina ufre'za umani'ne'za meni'nena mani'aze. <sup>7</sup> Hagi Ahasi'a amanage huno Asiria kini ne' Tiglat-Pilesantega nanekea atrente'ne. Nagra kagri eri'za vahe mani'nena kagri kagorga manigahuanki, Siria kini ne'ene, Israeli kinimoke'ma eke ha'ma hunenanta'ana eme hara hunka naza huo. <sup>8</sup> Ahasi'ma anagema huteno'a, Ra Anumzamofo ra mono nompine,

kinimofo nompima zagoma nentafima me'nea silvane goliraminena erino, Asiria kinirega museza atrente'ne. <sup>9</sup> Anama higeno'a Asiria kini ne' Tiglat-Pilesa'a Ahasi'ma hiankea antahinemino, sondia vahe'a zamavarege'za e'za Aramu vahe rankuma Damaskasi ha'eme hu'za ana kumara eri zama-grarega atre'naze. Anama huteno anante Asiria kini ne' Tiglat-Pilesa'a Siria kini ne' Resinina ahe nefrino, ana maka Damaskasima nemaniza vahera zamavareno Kiri rankumate ome kina huzmante'ne. <sup>10</sup> Anama hutegeno henka kini ne' Ahasi'a Damaskasi vuno Asiria kini ne' Tiglat-Pilesa ome kenaku vu'ne. Hagi Ahasi'ma Damaskasima mani'neno'a kresramna vu ita mago me'nea keteno, ana itamofo amema'a krenenteno, inankna huno anahukna itama tro'ma hania zamofo naneke'a ana maka krenteteno, atregeno pristi ne' Uria'ma Jerusalema mani'nerega vu'ne. <sup>11</sup> E'ina higeno pristi ne' Uria'a avompima kretregeno e'nea kante anteno Damaskasima me'nea kresramnavu itagna ita tro hu'ne. Hagi Ahasi'a Damaskasia atreno Jerusalemia viana ana ita pristi ne' Uria'a ko tro huvgarente'nego ome ke'ne. <sup>12</sup> Hagi kini ne' Ahasi'a Damaskasiti eno, ana ita eme negeno erava'o huno, ana itare ofa hunaku mareri'ne. <sup>13</sup> Hagi Ahasi'a ana itarera tevefi kre fanane hu ofane, witi ofane, tima tagi tre ofanena nehuno, kora rutritri huno rimpfa fru ofa kresramana vu itamofo agofetu hu'ne. <sup>14</sup> Ahasi'ma ofama huteno'a, ko'ma bronsiretimu tro'ma hu'naza kresramna vu ita, Ra Anumzamofo mono none, kasefa'ma tro'ma hu'nea itamofo amu'nozanifima me'neana erino kasefa'ma tro'ma hu'nea itamofo noti kaziga erinte'ne. <sup>15</sup> Hagi kini ne' Ahasi'a amanage huno pristi ne' Uriana asmi'ne, kasefa'ma trohu kresramna vu itarera, nanterana tevefi kre fanane hu ofa nehunka, kinaga witi ofa nehunka, kinimofo kre fanane hu ofa nehunka, witi ofa'anena nehunka, maka vahe'mokizmi tevefi kre fanane hu ofazamine witi ofazamine tima tagitre ofazaminena nehunka, ana maka tevefima kre fananehu ofama hanaza ofamofone rug'a ofama hanaza ofamofo korana erinka itamofo agofetu runi'ni huo. Hianagi bronsireti'ma trohu ita, nagri su'za me'nenige'na ana itare nagra ofa nehu'na, nanknazama nagripima hania zamofona Ra Anumzamofona antahigegahue. <sup>16</sup> Hagi kini ne' Ahasi'ma asamia nanekea pristi ne' Uria'a amage anteno ana maka'zana tro hu'ne. <sup>17</sup> Hagi kini ne' Ahasi'a Ra Anumzamofo mono nompintira bronsireti'ma tro huntene'za erigantugmama nehaza tra'mofo asoparegati timafinte kavoaa ome enerino, ana itare'ma me'nea osi zuomparamina eri'ne. Ana nehuno timafinte rankavoma, bronsireti'ma trohu bulimakaomo'ma vazisgama hunte'neana ana bulimakaona eritreno havereti tra'a trohuno ana timafinte rankavoa ana agofetu retrure'ne. <sup>18</sup> Ana nehuno Ahasi'a Sabati zugama retaneraza seli nona ra mono no tvaontetira erinetreno, kinimofo nonteti'ma ra mono nomofo kumapima nevaza kahana renkanire'ne. E'ina maka'zama hu'neana, Asiria kini ne' Tiglat-Pilesa antahintahi avaririno anara hu'ne. <sup>19</sup> Hagi Ahasi'ma kinima mani'nea knafima fore hu'nea zamtamime, ana maka zama tro'ma hu'nea zantamimofo agenkea, Juda vahe kinimofo agigenkema krenentaza avontafepi krente'naze. <sup>20</sup> Hanki Ahasi'ma frige'za afahae'ima asenezman-tazafi, Deviti rankumapi asente'naze. Anama hutazageno nemofo Hezekia nefa nona erino kinia mani'ne.

<sup>1</sup> Hagi Ahasi'ma Juda vahe kinima 12fu'a kafuma nemanigeno'a, Ela nemofo Hosea'a Israeli vahe kinia fore huno Sameria kumate mani'neno, 9ni'a kafufi Israeli vhahera kegava hu'ne. <sup>2</sup>Hosea'a Ra Anumzamofo avurera havi avu'avaza hu'ne. Hianagi ko'ma Israeli vahe'mo'za kinima mani'za e'naza kini vahe'mo'zama hu'naza havi zamavu zamavara zamagatereno osu'ne.

<sup>3</sup> Hagi Hoseama Israeli kinima mani'nea knafina, Asiria kini ne' Salmanese'a Israeli vhahera eme hahu zamagaterene. Ana higeno Hosea'a Asiria kini nete huvempa huno, agri agorga mani'neno maka kafufina takisi zagoa amino vu'ne. <sup>4</sup> Hianagi Hosea'a ko'ma kafugu kafugu'ma nehiaza huno, Asiria kini nera takisi zagoa omi'nne. Ana nehuno eme aza hinogu Hosea'a Isipi kini ne' Sontega kea atrentege'za mago'a vahe'mo'za eri'za vu'naze. Hagi ananke'ma kini ne' Salmaneserima nentahino'a, ome azerino kina hunte'ne. <sup>5</sup> Hagi ana'ma huteno'a Asiria kini ne' Salmaneseli'a, sondia vahezaga'a zamavareno vuno Israeli vhahera ha'huzmanteno ana maka mopa erivareteno, eno 3'a kafufi Sameria kumara hara eme huzmante'ne. <sup>6</sup> Hagi Hosea'ma Israeli vahe kinima 9ni'a kafuma nemanigeno'a, Asiria kini ne'mo'a Sameria kumara hara eme huzmagatereno enerino, Israeli vhahera zamavareno Asiria vuno, mago'a vhahera zamatrege'za Hala kumate nemanizageno, mago'a Habori ti tva'onte Gosani kaziga nemanizageno, mago'a Midia vahe'ma nemaniza ranra kumatmimpi zamatrege'za mani'naze.

### *Israeli vahe'mo'za kumi haza nona'a kina ome hu'naza naneke*

<sup>7</sup> Hagi ana maka knazama Israeli vhahete'ma fore hu'neana, zamagra Ra Anumzana zamagri Anumzamo'ma, Isipi kini ne' Fero hankavefinti'ma zamavareno'ma Isipi mopafinti'ma atirami'nea Anumzamofo avurera kumi nehu'za, havi anumzantamimofo koro hunezmante'za mono huzmantazagu, anazana fore hu'ne. <sup>8</sup> Ana nehu'za Ra Anumzamo'ma negazageno'ma anama mani'naza mopafinti vahe'ma zamahenati tre'nea vahe'mokizmi havi zamavu zamavara neverari'za, Israeli kini vahe'mo'za eri agafama hu'naza havi zamavu zamava'enena zamavariri'naze. <sup>9</sup> Ana nehu'za Israeli vahe'mo'za oku'a mago'a zamavu zamava hazazamo Ra Anumzana zamagri Anumzamofo avurera knareru osu'ne. Zamagra osi kumateti vuno ranra kumate'ma vigeno havi anumzante'ma mono'ma hunte kumatmina tro hunte vagare'naze. <sup>10</sup> Ana maka ranra agona ramimpine, maka ranra zafa agafafina Asera havi anumzante'ma mono'ma hunte havene, Asera amema'ama me'nea zafaramina asente vagare'naze. <sup>11</sup> Anama havi anumzante'ma mono'ma hunte kuma'ma tro'ma huntaza kumatmintera, anama umani'naza mopafi vahe'ma negazageno Ra Anumzamo'ma zamahenati atre'nea vahe'mo'zama hu'nazaza hu'za mna nentakezana kre mna vu'naze. Ana havi zamavu zamava'ma hazazamo Ra Anumzamofona azeri arimpa ahe'naze. <sup>12</sup> Hagi ko'ma Ra Anumzamo'ma huno, kaza osu havi anumzantera monora huonteho huno'ma zamasami'niana, ke'a rutagre'za ana zantaminte monora hunte'naze. <sup>13</sup> Ra Anumzamo'a kasnampa vahe'ene mago'a kva vahe'enena huzmanteg'eza, Israeli vahe'ene Juda vhahera koro kea amanage hu'za zamasami'naze, havi tamavu tamava'ma nehaza zana atretma, Nagri kasegene, tra kenena amage anteho. E'i ana kasegea tamagehe'inku amage anteho hu'na zami'noa kasege, eri'za vahe'nia kasnampa vahe zamagipi huvazi'na zamasami'noe huno hu'ne.

<sup>14</sup> Hianagi Israeli vahe'mo'za Ra Anumzamofo kea ontahi'za zamasenimo'a hanavetige'za, zamafah'e'zama Ra Anumzana zamagri Anumzama

antahiomiza mono'ma huonte'nazaza hu'za monora huonte'naze. <sup>15</sup> Hagi Israeli vahe'mo'za Ra Anumzamofo tra kema, zamafahe'inema huhagerafi huvempa kema hu'nea ke'ne, mago'a koro ke'ma huzmante'nea kegura zamefi humi'naze. Hagi havi anumzana amnezante monora ome hunente'za, zamagranena amne'za se'naze. Hagi kora Ra Anumzamo'a Israeli vahera zamasamino, ru kumate vahe'mo'zama hanaza zamavu'zama zana zamavaririta osiho huno zamasami'ne. Hianagi Ra Anumzamofo kea rutagre'za ana havi zamavu'zmavazana hu'naze. <sup>16</sup> Ana nehu'za Israeli vahe'mo'za Ra Anumzana Anumzazamimofo kasegea ana maka runetagrre'za, ainireti kre'za tare bulimakao anentatre tro nehu'za, Asera havi anumzamofo amema'a antre'za tro hunente'za, monafi hanafitamine Bali havi anumzante'ene monora huzamante'naze. <sup>17</sup> Ana nehu'za zamagra ne'mofa'zamia zamahe'za tevefi Kresramana nevu'za, zamene vahete'ene, fri vahe hankro'enema keaga nehaza vahetega, zamaza hanazegu nevu'za, Israeli vahe'mo'za Ra Anumzamofo avurera monko a'nemo'zama nehazaza hu'za zamagra'a zugore ome atre'za havi zamavu'zmavaza hazazamo Anumzamofona azeri arimpa ahe'ne.

<sup>18</sup> E'ina hu'negu Ra Anumzamo'a Israeli vahera tusi rimpia hezamanteno, amefi hunezamino, mopazamifintira zamaretrege'za afete vu'naze. Ana higeno magore huno Israeli vahera mopa zamifina omanizage'za, Juda naga'mo'za zamagrake mopafina mani'naze. <sup>19</sup> Hianagi Juda naga'mo'za zamagranena ana zanke hu'za, Ra Anumzana Anumzazamimofo kasegea amagera onte'naze. Zamagra Israeli vahe'mo'zama hu'naza havi zamavu zamavaza zamage'ante'za hu'naze. <sup>20</sup> E'ina hu'negu Ra Anumzamo'a ana maka Israeli vahera agri avugatira zamefi hunezamino, zamatrege'za ha'vahe'mo'za eme zamazeri haviza hu'naze.

<sup>21</sup> Hagi korapara Israeli vahe'ene Juda vahe'enena kini ne' Deviti kegava huzmanteg'eza mani'nazane. Hianagi henka Anumzamo Deviti nagapintira Israeli vahera refko hutrege'za zamagra'a zamagiare oti'naze. Anama nehu'za Israeli vahe'mo'za Nebati nemofo Jeroboamuna kini'zamia azeri oti'naze. Hianagi Jeroboamu'a Israeli vahera zamavazu hige'za, Ra Anumzana zamefi humi'za rama'a kumi hu'naze. <sup>22</sup> Hagi Israeli vahe'mo'za Jeroboamu'ma hu'nea kumira zamefira huomi'za, kazigazi hu'za ana maka kumira hu'naze. <sup>23</sup> Hagi Israeli vahe'mo'za ana zamavu zamavara hu'za neazageno, Ra Anumzamo'ma eri'za vahe'a kasnampa vahe zamagipi huvazino koro kema huzamante'nea nanekemo'a nena raga'a before hu'ne. Ana hutege'za Asiria vahe'mo'za Israeli vahera eme ha'huzamante'za zamavare'za Asiria moparega kina ome huzmantazage'za anantega umani'ne'za meni'nena \* mani'naze.

### *Ru vahe'mo'za meg'i'ati e'za Israeli vahe mopa eme eri'za mani'naza nanike*

<sup>24</sup> Hagi anante Siria kini ne'mo'a Babiloni rankumate'ene Katama kumate'ene Avama kumate'ene Hamati kumate'ene Sefarvaimi kumate'ma hu'za nemaniza vahera zamavareno, Sameriana me'nea kumatamimpina Israeli vahe'ma nomaniza nompi eme zamatrege'za ana kumatmippi mani'naze. Ana nehu'za Sameria rankuma'enena eri'za mani'naze. <sup>25</sup> Hagi ana Israeli vahe kumapima emaniza vahe'mo'za Ra Anumzamofona korrora hunte'za monora huonte'naze. E'ina hazagu Ra Anumzamo'a laioni huzamanteg'eza e'za ana vahera mago'a eme zamahe fri'naze. <sup>26</sup> Hagi

\* **17:23** Meninema hu'neana ama knareku osu'neanki avontafe'ma kre'naza knagu hu'ne.

ana higeno mago'a vahe'mo'za vu'za Asiria kini nera amanage hu'za ome asami'naze, Kagrama zamavarenka Sameria kumatimpima ome zamante'nana, vahe'mo'za ana mopafima nemania Anumzamofo kasegea ontahi'naze. E'ina hu'negu ana mopafi Anumzamo'a laioni huzamantge'za eza ana vhahera eme zamahe fri'naze.

<sup>27</sup> Hagi anante Asiria kini nemo'a amanage huno vhahera huzamante'ne, Israelit'i ma zamavaretama eme kinama huzamante'nona pristi nagapinti vutma mago ome avreta Sameria ome antenkeno mani'neno, ana mopafi Anumzamofo kasegea vhahera rempi huzamino. <sup>28</sup> Hagi anante Israeliti pristi naga'ma eme kinama huno Asiriam mani'nazafinti mago avare'za vu'za Sameria ome atrazageno Beteli kumate umani'neno, ana vhahera Ra Anumzamofoma koro hunte'za mono'ma hunte'naza avu'ava zana rempi huzami'ne.

<sup>29</sup> Hianagi ru vhahera ru vahe'ma Israeli vhahera ranra kumatamimpima emaniza vahe'mo'za zamagra'a anumza tro hutere hu'za nemaniza kumate kumatera antetere hu'naze. Ana nehu'za havi anumzazamimofo amema'a tro hu'za, Israeli vahe'mo'zama havi anumzamofonte mono'ma hunte kuma'ma tro'ma hunte'naza kumatamintera antevare'naze. <sup>30</sup> Hagi Babiloni vahe'mo'za Sukot-Benotie nehaza havi anumzamofo amema'a tro hazage'za, Kuta vahe'mo'za Nergalie nehaza havi anumzamofo amema'a tro hazage'za, Hamati vahe'mo'za Asimaea nehaza havi anumzamofo amema'a tro hazage'za, <sup>31</sup> Avate vahe'mo'za Nibfazie nehaza havi anumzane, Tar-takie nehaza havi anumzantremokizni zanamema'a tro hazage'za, Sefar-vaimi vahe'mo'za Adramelekie nehaza anumzane, Anamelekie nehaza havi anumzantrente ne'mofavrezamia zamahe'za ofa kresramna vu'naze. <sup>32</sup> Hagi zamagra ana nehu'za, Ra Anumzamofona Agri'enena monora hunte'naze. Hianagi zamagra'a vahepinti pristi vhahera huhampri zamantage'za ofama hu kumatera mani'n'eza, ofama eri'za aza zantamina kresramna vu zamante'naze. <sup>33</sup> Hagi zamagra Ra Anumzamofona koro hunte'naze. Hianagi zamagra mopa zamiregama mani'nezama ko'ma nehaza zamavu'zamavaza amage ante'za anumzazamire monora huntetere hu'naze.

<sup>34</sup> Hagi meninena ana vahe'mo'za ko'ma nehaza zamavu zamavara otre'za huvava hu'za neaze. Ana nehu'za Ra Anumzamofona monora hunonte'za, kasegene, tra kea amagera nonte'za, Jekopunku'ma mago agi'a Israeli'e huno'ma antemi'nea ne'mofo naga'ma zami'nea kasegene tra kenena amagera onte'naze. <sup>35</sup> Hagi Ra Anumzamo'ma Israeli naga'enema huhagerafi huvempa kema hu'neana amanage huno huzamante'ne, tamagra mago anumzantera monora huntege, kepri huta tamarenarege, eri'zana erintegi, ofa kresramna vugera osutfa hiho. <sup>36</sup> Hianagi Ra Anumzamona tusi'a hankavenireti nazana rusutena, Isipitira tamavre'na etirami'noa Anumza mani'noanki, Nagriteke kepri hutma tamarenareta monora hunenanteta, ofa kresramna vunanteho. <sup>37</sup> Hagi maka tra ke'ne kase keni'anema amage anteho huno'ma krerami'nea kemofona kva hu'neta, maka zupa avariri fatgo hiho. Ana nehutma mago'a havi anumzamofonkura korora huta monora huozmanteho. <sup>38</sup> Hagi tamagranema huhagerafi huvempa kema hu'noankegura tamagesa nentahitma, mago'a havi anumzamofonkura korora hunteta monora ome huonteho. <sup>39</sup> Hianagi Ra Anumzana tamagri Anumzamonage monora hunenantekena maka ha' vahe'zamazampintira tamagu vaz'i'neno.

<sup>40</sup> Ra Anumzamo'a anage hianagi anankea ontahi'za, ko'ma hu'za e'naza

zamavu zamavara kazigazi hu'za huvava hu'naze. <sup>41</sup> Hagi ana vahe'mo'za Ra Anumzamofona koro hunte'za monora hunte'nazanagi, zamagra havi anumza zamire'enena monora hunte'naze. Ana hazage'za mofavre zammimo'zane zamagehe'izanena zamafah'e'mokizmi zamavu zamava zamavariri'za ana zanke meninena nehaze.

## 18

### *Juda vahe kini ne' Hezekai'a naneke*

<sup>1</sup> Hagi Ela ne'mofo Hosea'ma Israeli vahe kinima 3'a kafuma nemanigeno'a, Ahasi nemofo Hezekai'a agafa huno Juda vahe kinia fore huno mani'ne. <sup>2</sup> Hagi Hezekaiana kafu'amo'a 25fu nehigeno kinia fore huteno, 29ni'a kafufi Jerusalemia kinia mani'neno kegava hu'ne. Nerera agi'a Abijakino Zekariaa mofa mani'ne. <sup>3</sup> Hagi Negeho ne' Deviti'ma hu'neaza huno Hezekai'a Ra Anumzamofa avurera maka fatgo avu'avaza hu'ne. <sup>4</sup> Hagi havi anumzante'ma mono'ma hunentaza kumatmina Hezekai'a eri haviza hunetreno havema asente'nezama mono'ma nehaza havea ru tamana hunetreno, Asera havi anumzamofa amema'ama zafare'ma antre'za tro'ma hunte'nazana rukafri atre'ne. Ana nehuno Mosesem'a bronsireti osifavema tro'ma huntenege'za, Nehustani'ema nehaza osifavere'ma mnenantake zantamina kre mna nevu'za mono'ma hunentaza zana erino ru tamanahu osi osi hutre'ne.

<sup>5</sup> Hezekai'a Israeli vahe Ra Anumzantera hanavetino amentintia hu'ne. Hagi ko'ma Juda vahe kinima mani'za e'naza kini vahepintira magore hu'za agrikna kinia forera osu'naze. <sup>6</sup> Agra Ra Anumzamofona maka kna azeri antrako nehuno, amefira huomi'ne. Ana nehuno Ra Anumzamo'ma Mosesema ami'nea kasegea amage ante'ne. <sup>7</sup> Anama higeno'a Ra Anumzamo'a Hezekai'ene mani'negeno, maka'zama agrama hiazamo'a knare'zanke hu'ne. Hagi Asiria kinimofo kema antahino agri agoragama mani'neno eri'zama'ama erinte'zankura aveosi'ne. <sup>8</sup> Hagi ne'onse kumapine hankave keginama hu'naza ranra kumapima nemaniza Filistia vahera ogantu Gaza rankumateti agafa huteno, ana kuma tva'onte'ma me'nea ne'onse kumapima nemaniza vahera, Hezekai'a ana maka hara huzmagatere'ne.

<sup>9</sup> Hagi Hezekai'ama kinima manino egeno 4ma hia kafurera, Ela nemofo Hosea'ma Israeli kinima mani'neana kafu'amo'a 7ni hu'ne. Ana kafufina Asiria kini ne' Salmaneseli'sa sondia vahezaga'anen eno ha'huzmante'naku Sameria kumara eme avazagi kagi'ne. <sup>10</sup> Hagi Asiria vahe'mo'za Sameria rankumara avazagikagiza hara hume nevazageno 3'a kafu evutege'za, ana kumara hara huzmagatere'za eri'ne. Higeno ama ana kafumo'a Hezekaima kinima manino e'nea kafua 6si higeno, Hosea'ma kinima manino'ma e'nea kafua 9ni hu'ne. <sup>11</sup> Anama huteno Asiria kini ne'mo'a Israeli vahera zamavareno Asiria vuno, mago'a ome zamatrege'za Hala kumate nemanizageno, mago'a Habori ti tvaonte Gosani kaziga nemanizageno, mago'a Midia vahe'ma nemaniza ranra kumatmimpi zamatrege'za mani'naze.

<sup>12</sup> Na'ankure ana maka knazama Israeli vahete'ma fore hu'neana, zamagra Ra Anumzana Anumza zamimofo nanekea amage nonte'za, Ra Anumzamo'ma zamagranema erihagerafi huvempa kema hu'neana ruta'gre'za, Ra Anumzamofa eri'za ne' Mosesem'a zami'nea kasegenena zamefi huminagu, anara hu'naze.

<sup>13</sup> Hagi Hezekaia'ma Juda vahe kinima mani'negeno 14nima hia kafufina, Asiria kini ne' Senakeripi'a Juda vahera eme hahuzmanteno ana maka ranra kuma'ma hankave keginama hu'naza kumatmina erivagare'ne.

<sup>14</sup> Hagi Asiria kini ne' Senakeripi'ma Lakisi kumate'ma mani'negeno'a, Juda kini ne' Hezekai'a amanage huno kea atrentegeno vu'ne, Nagra hazenke hu'noe. E'ina hu'negu kagra natrenka rukrahe hunka vuo. Anama hnanke'na nagra nazano mizasenantoma hunka banana zana amne kamigahue. Higeno Asiria kini ne'mo'a Hezekaiankura asamino, silva zagoa Kna'amo'a 11tausen kilo hu'nesia nenaminka, golia kna'amo'a 1tausen kilonaza hu'enya namigahane huno hunte'ne. <sup>15</sup> Hagi anagema higeno'a, Ra Anumzamofo mono nompima silva zagoma me'neama'a, kini ne'mofo nompima zagoma nentafima silva zagoma me'neama'a ana maka Hezekaia'a erivagareno ami'ne. <sup>16</sup> Hagi Ra Anumzamofo mono nomofo kafaraminte'ene kafa zafare'ma, Hezekaia'ma anomia vazinte'nea golinena ana zupa, agra'a maka kanopevareno Asiria kini nera ami'ne.

*Asiria kini ne'mo Jerusalemi kumapi nemariza vahe koroke huzmante'nea  
naneke*

<sup>17</sup> Hagi Asiria kini ne'ma Lakisi kumate'ma mani'neno, sondia vahete'ma ugagota hu'naza 3'a kva vahera huzmantege'za, tusi sondia vahe'zagane Hezekai'ma Jerusalemi mani'nerega vu'naze. Hagi ana vahe'mo'za Jerusalemi uhanatite'za, anaga kazigama me'nea tirutegati'ma kerima ase'za tima avre'za Jerusalemi kumapima urami'nazare vu'za ana tvaonte umani'naze. Ana tima avre'naza kerimo'a tavtravere'ma penima fre'za tro'ma nehaza kumategama vu'nea kamofo tvaonte me'ne. <sup>18</sup> Hagi ana kini ne' Hezekaianku ke hazageno, agri nonte'ma kegavama nehia ne' Hilikia nemofo Eliakiminki, avontafe'ma kreno eri fatgoma nehia ne' Sebnanki, kini ne'mo'ma ana maka'zama hiazama avompima krenentea ne', Asapu nemofo Joanki huno huzmantege'za vu'naze.

<sup>19</sup> Hagi ana 3'a Hezekaia eri'za vahe'ma uhanatizageno'a, Siria sondia vahete ugota kva ne' Rabsake'a amanage huno zamasami'ne, Asiria kumate hanavenentake kini ne'mo'a amanage huno hie, Kagra ina hankeva'agu nentahinka nagri nagorga mani'nakura nosane hanki Hezekaiana ome asamiko. <sup>20</sup> Kagrama nehanana ha'ma hu antahintahine sondia vahe'enena knare hu'noe hunka nehananagi, kekamo'a nena'a forera osugahie. Ina vahe'mo kzahuku higenka, kagra nagri nagorga nomani'ne.

<sup>21</sup> Hagi menina kagra Isipi vahe'mo'za naza hanage'na hara hugahue hunka kavua nentane. Hianagi Isipi kumamo'a ketamo rufutagiankna hu'ne. E'ina hu'neankinka ana ketama erinkama azompama renka'ma vnanana kzampi kregahie. Hagi Isipi kini ne'mofo avu'ava'amo'a e'ina ketakna hu'neankino, agrama tamazama haniana e'ina hugahie. <sup>22</sup> Hianagi kagrama hunka, Israeli vahe'mota Ra Anumzana tagri Anumzamofonte tamentinti nehunankino, taza hugahie hunka hugahananagi, tamaza osugahie. Na'ankure Hezekaiaaga kagra mono'ma hunentaza kumatamine Kresramanama nevaza itaramina ana maka eri haviza huvaganerenka, Juda vahe'ene Jerusalemi vahekura zamasaminka, Jerusalemige eta magoke kresramna vu itama me'nereke monora eme huntaho hunka hu'nane.

<sup>23</sup> Hagi Hezekaiaagura Asiria kini nemo'a amanage huno hu'ne, Kagrama hu izo hunka mago krimpama hnanke'na, kagri sondia vahe'ma knare huno rama'ama mani'nesazana amne 2tauseni'a hosi afura kamisnuge'za agumpina mani'za vugahazanagi nagrama antahuana e'inahu avamentera sondia vaheka'a omani'naze. <sup>24</sup> Hagi kagrama Isipi vahe'mokizmi karisine,

hosí afú agumpíma maní'za ha'ma nehaza sondia vaheku'ma antahinezam-inana, inanka hunka tagripintira mago agi omaneno, amne sondia vahera hara hugateregahane? <sup>25</sup> Hagi mago'anena nagra navesite e'na hara eme hugante'na mopaka'a eri haviza hunakura ome'noe. Ra Anumzamo hunan-teno vunka ha' ome huzmantenka mopazamia eri haviza huo huno hige'na e'noe.

<sup>26</sup> Hagi Hilkiá nemofo Eliakimí'ma, Sebna'ma, Joasi'ma hu'za anankema nentahi'za, Asiria sondia vahete'ma ugota hu'nea sondia ne' Rabsakena amanage hu'za asmi'naze, tagra kagri eri'za vahe mani'nonanki Asiria vahe'mokizmi zamagerupinti tasamio. Na'ankure tagra ana tamagerura antahinone. Hagi Hibru tagerupintira ontasamio, kagrama anama hnanke'za kuma keginamofo agofetu'ma mani'naza vahe'mo'za hanana nanekea antahigahaze hu'za hu'naze. <sup>27</sup> Hianagi ana sondia vahete kva ne'mo'a amanage huno zamasami'ne, Kvani'amo'ma hunantege'na e'noana tamagri 3'a nagate'ene kini tamimofontegagera ama nanekea atreramanterge'na eri'na ome'noanki, anama kegina agofetu'ma mani'naza vahemo'zanena amne ananke'a antahigahaze. Na'ankure ha'ma erita eme kumatmima avazagi kagisunke'za, kegina agofetu'ma mani'naza ne'za nesazazanku huge'za rifa'zami nene'za abire'za nenesageta, tamagranena ana zanke hugahaze. <sup>28</sup> Hagi anante ana sondia vahete kva ne'mo'a otino Hibru vahe'mokizmi zamagerupinti kezatino amanage huno zamasami'ne, tamagra amarega tamagesa ante'neta hankave kini ne' Asiria kini ne'mofonkea antahihio! <sup>29</sup> Hagi Asiria kini ne'mo'a amanage huno hu'ne, Tamagra atrenkeno Hezekai'a reramatga osino, agra muhara osu'neankino nagi nazampintira tamagura ovazigahie. <sup>30</sup> Hagi Hezekai'a'ma huno Ra Anumzamo'a taza hanigeta knare huta manisunke'za Asiria vahe'mo'za Jerusalemi rankumara hara huragatere'za e'origahazanki Ra Anumzamo-fontega tamentinti hihoma huno tutu huramantesia kegura antahiomaho. <sup>31</sup> Hagi tamagra Hezekai'a nanekea antahimita ha'mahu tamagesa ontahihio. Asiria kini ne'mo'a huno tamagrama natresage'nama kumatmima erisu'na, nagra amne tamatresugetma, waini hozatmifintira wainia tagita nenetma, fiki zafa ragatamia tagitma nenetma, tinkeri tamifintira tina afitma negahaze. <sup>32</sup> Hagi ana hutma kofta kna'afi mani'nesnage'na, nagra eme tamavre'na vu'na tamagri mopagna mopama, witi ragane waini timo'ene, bretine waini hozamo'ene, olivi zafamo'ene tumerimo'ma tusizama hu'nea mopa ome tamihanugeta ofrita umanigahaze. E'ina hu'negu Hezekaiama huno, Ra Anumzamo tagu'vazigahie huno havigema nehia kagura ontahihio. <sup>33</sup> Hagi mago kaziga mopare anumzamo'a vahe'a zamagu vazige'za Asiria kinia hara hu'za agaterenazafi? A'o mago kuma'mo'e huno anara osu'ne. <sup>34</sup> Hagi Hamati rankuma'ma, Arpati rankuma'ma, Sefarvaimi rankuma'ma, Hena rankum'ma, Iva rankuma'enema, tagrama vuta ha'ma huzmante'nonana anumza zamimo'za iga mani'ne'za zamaza osu'naze. Hagi Sameria kuma'ma ha'ma huzmante'nonana anumzazmimo'a zamagura ovazi'ne. <sup>35</sup> Hagi mago'a kuma'ma ha'ma huzmante'nonana anumza zamimo'a mago kumare huno zamaza hige'za hara huragateore'naze. E'ina hu'negu inankna huno Ra Anumzamo'a tamazahina tagrirra hara huragatereta Jerusalemi kumara agura vazigahaze? <sup>36</sup> Hagi ana Asiria sondia vahete kva ne'mo'ma keagama hu'neana tamagra akohe'za mani'ne'za keaga'arerá magore hu'za kenona'a osu'naze. Na'ankure kini ne' Hezekai'a zamasamino, Keaga'arerá mago kea nona osiho huno huzmante'nege'za anara hu'naze. <sup>37</sup> Anante kini ne'mofo nonte kva nehia ne' Hilkiá nemofo Eliakimiki, avontafe'ma kreno eri fatgoma nehia ne' Sebnaki, Asapu nemofo

Joa'ma kini ne'mo'ma ana maka'zama hiazama avompima krenentea neki, hu'za kukenazamia tagoto tagutu hute'za kini ne' Hezekaianterea e'za Asiria sondia vahete kva ne'mo'ma hia nanekea eme asmi'naze.

## 19

### *Hezekai'ma kasnampa ne'Aisiaama knazama'amofo ke asami'nea naneke*

<sup>1</sup> Hagi Hezeikaia'ma ana nanekema nentahino'a ame huno kukena'a tagato tagatu huno asunku kukena nehuno, Ra Anumzamofo mono nompi umarereri'ne. <sup>2</sup> Hagi kini ne'mofo nonte kva nehia ne' Eliakiminki, avontafe'ma kreno eri fatgoma nehia ne' Sebnanki, mago'a ugagota hu'naza pristi vaheki huno Hezekai'a huzmanteg'e'za zamasunku kukena hute'za kasnampa ne' Amosi nemofo Aisaia mani'nerega vu'naze. <sup>3</sup> Hagi Aisaia'ma mani'nere vute'za Hezeikaia'ma hu'nea nanekea amanage hu'za ome asami'naze, Asiria vahe'mo'za tazeri haviza hu naneke hazageno tagrira tusi tagaze higeta tusi'a knafi mani'none. Ana hunkeno mago a'mo mofavre ante kna'amo erava'o hu'neanagi, hankave'a omnegeno mofavrea ame huno'ma onteaza huno, tagrira hankavetia omne'ne. <sup>4</sup> Hagi Asiria kini ne'mofo sondia vahete kva ne'ma huntogeno eno Ra Anumzana kasefa huno mani'nea Anumzamofoma huhavizama hunteankea, hago antahinegahianki nunamuna hunka Ra Anumzana kagri Anumzamofona mago'azana huntegahifi antahigo. Ana nehunka tagrama ofri'ma mani'nona naga'amotagura Ra Anumzamofontega nunamuna hunka antahigo. <sup>5</sup> Hagi kini ne' Hezeikaia eri'za vahe'mo'zama Aisaiante'ma azageno'a, <sup>6</sup> Aisaia'a amanage huno zamasami'ne, Ra Anumzamo'a amanage hianki vuta kini ne' Hesekaiiana ome asmiho, Asiria kini ne'mofo eri'za vahe'mo'zama Nagri'ma huhavizama hunantaza kea kagra nentahinka korora osuo. <sup>7</sup> Hagi antahio! Nagra mago avamu Asiria kini nera antente'na antahintahi'a azeri savri ha'nena, kantegati mago'a naneke nentahino, mopa'arega ete rukrahe huno vanige'za bainati kazinteti ahe frigahaze.

<sup>8</sup> Hagi anante Asiria sondia vahete kva ne' Rabsakima antahiam, Asiria kini ne' Senakeripima Lakisi kuma'ma atreno vuno Libna kumate vahe'ma ha'ma ome hunezmantea nanekema nentahino'a, agra Jerusalemi rankumara atreno vuno Asiria kini nera anantega ome ke'ne. <sup>9</sup> Hagi Asiria kini ne' Senakeripi'ma ha'ma nehuno antahiana, Kusiti ne' Isipi kini ne'ma Tirhaka'ma hahuganteku ne'e hu'za eme asami'naze. E'ina higeno Asiria kini ne'mo'a Hezekaiantega amanage huno kea atrente'ne. <sup>10</sup> Amanage hutma Juda kini ne' Hezeikaiana ome asmiho, kagrama kamentintima nehana Anumzamo'ma kasamino, kza hanugenno Asiria kini ne'mo'a hara huganteno Jerusalemi kumara e'origahie huno'ma regavatgama hiankegura ontahio. <sup>11</sup> Hagi tagra Asiria kinimotama ha'ma huzmantona kuma'ma zamazeri havizantfama nehunana kagra ko antahi'nane. Kagrama antahisanana nagri kumara anara osugahie hunka nentahino? <sup>12</sup> Hagi kora para nagri nafah'e'za, Gosani rankuma'ma, Harani rankuma'ma, Rezefi rankumapima nemani'za vahe'ene, Ideni vahe'ma Tel-Asa rankumate'ma nemani'za vahe'enema ha'ma huzmantehazana anumza zamimo'a zamaza osu'ne. <sup>13</sup> Hagi Hamati rankumate kinima, Arpa kumate kinima, Sefarvaimi kumate kinima, Hena kumate kinima, Iva rankumate kininena menina iga mani'naze? Ana maka hago zamahe vagaronke'za fri'naze.

<sup>14</sup> Hagi anante Asiria kini ne' Senakeripi'ma huzmanteg'e'za e'naza vahe'mokizmi zamazampinti, Hezeikaia'a ana avona erino hampriten, ana avona erino Ra Anumzamofo mono nompi marerino, Ra Anumzamofo

avure ana avona eritareno ante'ne. <sup>15</sup> Ana huteno Hezekaia'a amanage huno Ra Anumzamofontega nunamuna hu'ne, Ra Anumzana Israeli vahe'mota Anumzamoka, Kagri tra'mo'a zamagekona retare'naza ankerontami amu'nompi me'ne. Kagrake ama mopafi maka vahe'mokizmi Ra Anumzana mani'nane. Kagrake monane mohanena tro hu'nane. <sup>16</sup> Hagi Ra Anumzamoka kagesa antenka nunamuni'a nentahinka, Ra Anumzamoka kavua antenka negenka, Asiria kini ne' Senakeripi'ma kasefa hunka mani'nana Ra Anumzamoka kagima huhavizama hiana antahi'nane. <sup>17</sup> Hagi tamage, Ra Anumzamoka Asiria kini vahe'mo'za rama'a vahe'ma zamahe nefri'zama, kuma'zamima eri havizama hu'nazana tagra antahi'none. <sup>18</sup> Hagi ana nehu'za, anama zamazeri havizama haza vahe'mokizmi anumzazamia tevefi hanavazi'za kre'naze. Na'ankure zamagra kaza osu havi anumza zafareti'ene, havereti tro huntene'za mono hunentaza zantami Asiria vahe'mo'za anara hu'naze. <sup>19</sup> Hianagi kagra menina tagri Ra Anumza mani'nanku hunka Asiria kini ne'mofo azampintira tagu'vazinka taza hananke'za, ama mopafima maka kaziga mani'naza ke'za antahi'za hanazana, Ra Anumzana kagrake tamage Anumza mani'nane hu'za hugahaze.

*Senakeripi'ma havizama hania zanku, Kasnampa ne Aisaia'ma hupo hu'nea naneke*

<sup>20</sup> Hagi anante Amosi nemofo Aisaia'a amanage huno Hezekaina kea atrente'ne, Ra Anumzana Israeli vahe'mota Anumzamo'a amanage huno hie, kagrama Asiria kini ne' Senakeripinku'ma hana nunamuna hago nagra antahi'noe. <sup>21</sup> Hagi Ra Anumzamo'a Asiria kini ne' Senakeripinkura amanage huno huhaviza hunte'ne.

Jerusalem kumamo'a mago vene omase'nea mofakna hu'neankino, koroma nefresankeno'a kamage nevuno kagiza nereno, zokago ke hune-ganteno, agena rugahie. <sup>22</sup> Hagi kagra Senakeripigama huhavizama ne-hunka, zokago kema nehunka, kagima erisgama nehunka, kavufgama atare'nanana, izante anara hu'noe hunka kagesa antahi'nane? E'ina'ma hu'nanana Nagra Ra Anumzana Israeli vahe'mokizmi ruotage hu'noa Anumzamo'nare anara hu'nane. <sup>23</sup> Hagi kagra kato vaheka'amokizmi zamagite nanekeaa antanke'za Ra Anumzamo'na nagia huhaviza hu'naze. Ana higenka kagra amanage hunka kagia erisga hu'nane. Nagra karisir-amin'i'a eri'na Lebanonia tusi'a zafa ta'nopa me'nef ufre'na, vahne vano nosazama'afinti, zaza'ma hu'nea sida zafaramine, knarenare'ma hu'nea saipresi zafaramina antagi'na e'noe hu'nane. <sup>24</sup> Anage nehunka amanage hu'nane, Nagra Isipi mopafina nagiareti ana maka tintamina reho'mu nehu'na, ru vahe'mokizmi mopafina nagrani'a tinkeria kafi'na tina ne'noe hunka hu'nane. <sup>25</sup> Hagi Senakeripiga kagra ontahi'nane, korapa ana zana forera osu'nege'na, Nagra ru knafi huvame hunte'noa zamofo menina eriama nehu'na hankavea negamugenka, kagra hankave nentake have keginama hugagi'naza ranra kumatmina, hara huzmagaterankeno, have kegina zamimo'a fragu vaziramino mopafina hihi huno mareri'ne. <sup>26</sup> Hagi ana kumatmimpi vahe'mokizmi hankavea omnege'za, antahintahi hakare nehazageno tusi zamagaze hu'ne. Anama hazazamo'a mopafi tra'zamo kasefa kasefa huno marenerigeno, trazamo nomoteti hageno marenerigeno zagemo'ma rentegeno hagegema hiaza hu'naze.

<sup>27</sup> Hianagi kagra menina inante mani'nano, inantegati ano, inantega vano nehunka, menima krimpama ahenantanana ko antahi'na ke'na hu'noe.

**28** Hagi kagrama kavufga erisga nehunka, krimpa ahenantana zamo'a Nagrite ege'na antahi'noe. E'ina hu'negu menina Nagra hosimofo agipima renentaza ani atupa eri'na kagipi antete'na, kazeri rukrahe ha'nena e'nana kantega ete vugahane.

**29** Hagi Aisaia'ma Sinakeripinku'ma asamia kemo'ma tamage huno efore hanigenoma kesigura, Hezekiana amanahu avame ke asmi'nne, meni kafufina hozafima agraragisama hagesia ne'za hamareta netenma, anante kafufina anampinti'ma rutri hanifinti'ma hageno mrerino raga rentesia ne'za hamareta negahaze. Hianagi nampa 3 kafufina tamagra'a ne'zana krita netenma, tamagra'a waini hoza antetma raga'a tagitma negahaze. **30** Ana nehanageno Juda nagapima ha' vahe'mo'zama ozmahage'za osi'ama mani'naza naga'mo'za ete zamagra hozafi avimzamo rafu'na atregeno mopafi uneramigeno, hageno raga renteankna hugahaze. **31** Hagi Ra Anumzana hankavenentake Anumzamo Jerusalemi kumapine, Zaioni agnafima osi'a naga'ma mani'naza nagara, ofri mani'ne'za hagegahaze. Ana nehanageno Ra Anumzamo'a hankave agu'agesa antahi'neankino, anazana huzmantegahie.

**32** E'ina hu'negu Ra Anumzamo'a Asiria kini nekura amanage hu'ne, agra Jerusalemi kumapina enofreno, kevea magore huno ahetresigeno omegahie. Hanko'a erino erava'ona nosuno, kuma keginamofo tvaontera marerino ha'ma hu'zana mopa eritru huno trora osugahie. **33** Hagi Nagra Ra Anumzamo'na huama huankino, Jerusalemi rankumapina eofretfa nehuno, agrama e'nea kantega ete rukrahe huno vugahie. **34** Hagi Nagrama e'inama hanuana Nagri'ma ra nagima namisagu anara nehu'na, eri'za vaheni'a Devitima hvempama hunte'noa kegu ene anara hugahue.

**35** Hagi ana kenagera Ra Anumzamofo ankeromo Asiria sondia vahe'ma seli noma eme ki'za mani'nafi vuno, sondia vahe'zaga 185 tauseni'a zamahe fri'ne. Anama hutege'za nanterama oti'zama kazana ana kumapina maka fri'naza vahe zamavufagamoke'za avite'nege'za ke'naze. **36** Anama higeno'a Asiria kini ne' Senakeripi'a seli nonkuma'ma eme ante'zama mani'naza kumara atreno Ninive rankumate vuno umani'ne. **37** Hagi mago zupa Senakeripi'a Nisroku havi anumzama'amofo mono nompi mono hunentejeno, tare ne'mofavre'a Adramelekike Sareseriuke eke bainati kazinteti eme ahe friteke, freke Ararati moparega umanikeno, nemofo Esarhadoni'a nefä nona erino kinia mani'ne.

## 20

### *Hezekai'a ma kri eritenofri'za hu'nea zamofo nanek*

**1** Hagi ana knafina Hezekai'a kri erino fri'za hu'ne. Ana higeno kasnampa ne' Amosi nemofo Aisaia'a vuno ome negeno amanage huno asami'ne, Ra Anumzamo'a kagrikura amanage hu'ne, kagra krika'afintira onkanamrenka frisanku, mika zanka'a erinfatgo huo. **2** Hagi Hezekai'ma anankema nentahino'a avugosa rukrahe huno noma hunaragi asantega hunenteno, Ra Anumzamofontega nunamuna amanage huno hu'ne, **3** Ra Anumzamoka muse hugantoanki, maka zupama Kagri kema ruotagre'nama, maka nagu'areti'ma hu'na Kagri kavure'ma knare avu'ava'ma hu'noa zankura Kagra kagesa antahinamio. Anage nehuno Hezekai'a krafage huno tusi zavite'ne.

**4** Hagi Aisaia'a kinimofo nona atreno meg'i'a atirami'neanagi, kumara atreno ovu'negeno Ra Anumzamo'a ete nanékea amanage huno asmi'ne,

<sup>5</sup> ete rukrahe hunka vahenimofo kva ne' Hezekai'ante vunka, Ra Anumzana negageho Deviti Anumzamo'a amanage hie hunka ome asamio, kagrama hana nunamunka'a hago antahi'na, zavi'ma atana kavunura hago ke'noe. E'ina hu'neanki'na Nagra kazeri kanamresugenka, tagufa zage kna manitenka, marerinka Ra Anumzamo'a mono nompi monora ome hunantegahane. <sup>6</sup> Hagi Nagra knaka'a erinte za'za ha'nena 15ni'a kafu manigahane. Ana nehu'na Asiria kini nera atra'nena kagrira hara hugagetereno Jerusalemi kumara e'origahie. Hagi Jerusalemi rankuma'ma kegavama hanuana, Nagri'ma ra nagima namisagu anara nehu'na, eri'za vaheni'a Devitima hvumpama hunte'noa kegu'ene anara hugahue.

<sup>7</sup> Hagi anagema hutegen'o'a, Aisaia'a amanage huno kini ne'mofo eri'za vhahera zamasami'ne, tamagra vutma hagagema hu'nesia fiki zafa raga ome erita echo, hige'za ome eri'za ete'za Hezekai'a usge namuntera regripe'za rekamantazageno namu'amo'a tegani'ne.

<sup>8</sup> Anante Hezekai'a amanage huno Aisaiana antahige'ne, Ra Anumzamo'a nagriku'ma huno kazeri kanamresugenka tagufa zage kna manitenka, marerinka mono nom'a afima mono'ma ome hunantegahane ma hu'neana ina avame'za nagritera eriforera hanige'na nege'na, Ra Anumzamo'a tamage hu'ne hu'na hugahue?

<sup>9</sup> Higeno Aisaia'a kenona'a amanage huno asami'ne, Ra Anumzamo'ma hu'nea naneke'ama eri hankavema atinakura, ama avame'za kaveri hugahie. Nonte'ma mareneri'za latare'ma zagemo'ma rentesigeno amema'amo'ma 10ni'a zupa renakereno ana latarera avugatira vanigu kave'nesifi, 10ni'a zupa renakereno amefitira e'niegu kavenesie?

<sup>10</sup> Higeno Hezekai'a amanage hu'ne, Amne amuhoa osu'neankino zagma'oma rentesigeno'a latamofo amema'amo'a 10ni'a zupa renekereno avugatira vugahie. E'ina hu'neanagi atregeno ana latamofo amema'amo'a ame huno 10ni'a zupa amefira eno. <sup>11</sup> Hagi anante kasnampa ne' Aisaia'a Ra Anumzamofontega hanavetino nunamuna higeno, Ahasi'ma korapa tro'ma hu'nea latarera Ra Anumzamo'a higeno zagea rentegeno amema'amo'a ame huno 10ni'a zupa amefi urami'ne.

### Babiloni vahe'mo'za Hezekai'a eme ke'naza naneke

<sup>12</sup> Hagi ana knafina Baladani nemofo Merodak-Baladani Babiloni kini nemo'a, Hezekai'a krima eri'nea ke'ma nentahino'a, mago musezane avone krenezamino eriza vahe'a huzmanteg'e'za Hezekai'a eme kenaku e'haze. <sup>13</sup> Hagi ana vahe'mo'za Hezekai'a'ma eme ketageno'a, zamavareno vuno fenoma nentea nompi vuno, silvama golima, mnanentake zantamine, knare zantfama hu'nea masaventamima, ha'ma hu'zantaminena zamaveri hu'ne. Hagi kini nompima me'nea zantamine, ana maka mopa'afima me'nea zantamina magore huno erifra okino ana maka zamaveri hvugare'ne.

<sup>14</sup> Hagi anante kasnampa ne' Aisaia'a Hezekaiante eno amanage huno antahige'ne, Amama e'naza vhahera igati e'ne'za, zamagra na'ane hu'za eme nehaze? Anage higeno Hezekai'a asamino, Zamagra Babilonia afete moparegati e'haze hu'ne.

<sup>15</sup> Hagi Aisaia'a antahigeno, Zamagra naza kagri nompima me'nea zana ke'naze? Anage higeno Hezekai'a huno, Zagoma nentoa nompima ana maka zantamima me'hea zantamina magore hu'na erifrara oki'na, ana maka zamaveri hvugare'noe.

<sup>16</sup> Higeno anante Aisaia'a amanage huno Hezekaiiana asami'ne, Ra Anumzamofonkea kagesa antenka antahio. <sup>17</sup> Mago kna ne'eankino ana knama esigeno'a, kagri nompima ana maka fenoma me'nea fenone,

kafahe'zama korapa eritruma hu'naza fenozanena, magore hu'za otre'za ana maka eme erivagare'za Babiloni moparega vugahaze huno Ra Anumzamo'a hie. <sup>18</sup> Ana nehina kagrama kasezamante'nana ne'mofavre nagara mago'a eme zamavare'za vu'za, zamagonknaza ome harisage'za, Babiloni kini ne'mofo nompi eri'za vahe umanigahaze.

<sup>19</sup> Hagi anagema higeno'a Hezekia'a amanage huno Aisaiana asami'ne, Kagrama Ra Anumzamofo nanekema hanana knare hu'ne. Hezekia'a ma'e'inahu kema hiana, nagrama kinima manisua knafina hara osuta, mani fru huta manigahune huno nentahino anankea hu'ne.

<sup>20</sup> Hagi Hezekia'a kinima mani'nea knafima fore'ma hu'nea zantamine, agrama mago'azama hu'nea zamofo agenkene, tiru'ma henkaniteno mopama kafino agu'afima tima avreno Jerusalemi rankumapima e'nea zamofo agenkenena, ana maka Juda vahe kini vahe'mokizmi zamagenkema krenentaza avontafepi krente'naze. <sup>21</sup> Hagi henka Hezekai'ama fri'ge'za afahemokizmima asenezmantenazafi asente'naze. Ana higeno nemofo Manase agri nona erino kinia mani'ne.

## 21

### *Juda vahe kini ne' Manase naneke*

<sup>1</sup> Hagi Manase'a 12fu'a kafu nehuno, agafa huno kinia mani'ne. Ana huteno Jerusalemi rankumate mani'neno 55'a kafufi Juda vhahera kegava hu'ne. Nerera agi'a Hefziba'e. <sup>2</sup> Hagi Manase'a Ra Anumzamofo avurera havi avu'avaza tro hu'ne. Ko'ma ana mopafima mani'naza vahe'ma Ra Anumzamo'ma Israeli vahe zamavufima zamahe natitre'nea vahe'mokizmi kasrino zamagote zamavara zamage anteno hu'ne. <sup>3</sup> Hagi havi anumzante'ma mono'ma hunentaza kumatmima nefi' Hezekai'ama eri havizama huneana, ete eri kasefa huno tro huvagare'ne. Hagi Israeli kini ne' Ahapu hu'neaza huno, havi anumza Balinte'ma kresramnama vu itaramina tro nehuno, havi anumza Asera amema'a zafare antreno trohu'ne. Ana nehuno monafi me'nea hanafitaminte rena reno monora huzmante'ne. <sup>4</sup> Hianagi Ra Anumzamo'ma huno, Jerusalemi kumapina Nagri nagimoke me'nesige'za Nagia erisga hugahaze huno hu'neanagi, Manase'a Ra Anumzamofo mono nompina havi anumzante'ma mono'ma huntasaza itaramina tro hunte'ne. <sup>5</sup> Ana nehuno Manase'a Ra Anumzamofo mono nompima, tarefima atruma nehaza kumapina, monafi hanafitaminte mono'ma huntasaza itaramina tro hunte'ne. <sup>6</sup> Hagi Manase'a ne'mofavre'a aheno tevefi havi anumzamofontega kresramma nevuno, antahintahima erikura, fri vahe hankro'enema nanekema nehaza vhahete nevuno, henkama fore'ma haniazanku havi zamema nentaza vhahete nevuno, ha' avu'atgaza nehaza vhahete'ma viazamo'a, Ra Anumzamofo avurera havizantfa higeno, Ra Anumzamo'a tusi arimpa ahente'ne.

<sup>7</sup> Hagi Ra Anumzamo'ma Devitine ne'mofo Solomonikiznima zanasamino, ana maka Israeli naga nofipima me'nea kumatamimpintira, ama mono none Jerusale kuma'enena hühampintoankino, Nagri nagimo me'nesige'za maka zupa monora hunantegahazema hu'nea mono nompina, Manase'a Asera havi anumzamofo amema'ama antreno'ma tro'ma hunte'neana erino ome ante'ne. <sup>8</sup> Hagi Ra Anumzamo'a huno, Tamagramma tamagu'areti huta nagri kema nentahita, eri'za vaheni'a Mose'se'ma tami'nea kasegema amage'ma antesazana, Nagra tamafahe'ima huvempama hu'na zami'nogeta menima mani'naza mopafintira tamazeri otregahue. <sup>9</sup> Hianagi Juda

vahe'mo'za kea ontahi'naze. Ana hazageno Manase'a zamavareno havi kante vige'za, ko'ma ana mopafima mani'naza vahe'ma, negazageno Ra Anumzamo'ma zamahenati atre'nea vahe'mo'zama hu'naza havi zamavu zamavara zamagtere'za tusi kumi hu'naze.

<sup>10</sup> Ana hazageno Ra Anumzamo'a eri'za vahe'a kasnampa vahe zamagipi huvazino amanage huno zamasami'ne, <sup>11</sup> Juda vahe kini ne' Manase'a, ko'ma ana mopafima mani'naza Amori vahe'mo'zama hu'naza havi zamavu zamavara zamagatereno kasrino zamagote avu'avaza nehuno, Juda vhahera zamatu fege'za, agrama tro'ma hunte'nea havi anumzante monora hunte'za kumira hu'naze. <sup>12</sup> E'ina hu'negu Ra Anumzana Israeli vahe'mokizmi Anumzamo'a amanage hu'ne, Nagra Jerusalemi vahe'ene Juda vhahera mago knaza zami'na zamazeri haviza ha'nena, ana ke'ma ru vahe'mo'zama antahisuzu koro nehu'za antahintahi hakare hugahaze. <sup>13</sup> Hagi Nagra Sameria kumate'ene, Ahapu nagate'enema hu'noaza hu'na, Jerusalemi kumara eri haviza hanugen, mago vahe'mo'ma zuompama sese huteno eri rukrahe hu'negeno hagegema hiaza hugahie. <sup>14</sup> Hagi anampima osi'a naga'ma nagri nagaremu hu'za manisaza naga'enena namefi hunezami'na, ha' vahe zamazampi zamatre'nuge'za, ha' vahe'zamimo'za ha' humzante'za zamaz-eri haviza nehu'za, maka zazamia erigahaze. <sup>15</sup> Na'ankure zamafahe'za Isipiti'ma etiramiza aza knaret'i'ma hu'naza havi zamavu zamava zamo'a meme eno ama knarereta egeta, tamagranena ana havi avu'avazanke nagri navufi hazageno, Nagrira tusi narimpa ahe'ne.

<sup>16</sup> Hagi Manase'ma havi avu'avaza nehuno, Juda vahe'ma zamatu fege'za Ra Anumzamofo avure'ma, agrama hia kumi'ma haza agofetura, ru'ene ke'zamima omne vahe'ma Jerusalemi kumapina nemaniza vhahera, mago kazigati agafa huteno vuno mago kazigama vigeno'a, zamaheno korana eri tagitre'ne.

<sup>17</sup> Hagi Manase'ma kinima mani'nea knafima fore'ma hu'nea zantamine, ana maka zama agrama tro'ma hu'nea zantamine, kumi'ma hu'nea zamofo agenkenena, Juda vahe kinimofo agenkema krenentaza avontafepi krente'naze. <sup>18</sup> Hagi anante Manase'a frige'za kinimofo nonkumapi, Uza hoze nehaza hozafi asente'naze. Ana hazageno nemofo ne' Amoni nefo nona erino kinia mani'ne.

### *Juda vahe kini ne' Amoni nanike*

<sup>19</sup> Hagi Amoni'a 22'a kafu nehuno agafa huno kinia fore huteno, Jerusalemi ran kumate mani'neno tare kafufi Juda vhahera kegava hu'ne. Nerera'a Haruzi mofa Mesulemetikino, Jotba ran kumateti a' mani'ne.

<sup>20</sup> Hagi Amoni'enena Ra Anumzamofo avurera, nefo Manase'ma hu'neaza huno, havi avu'avaza hu'ne. <sup>21</sup> Amoni'a nefo'ma hu'nea zana ana maka nehuno, nefo'ma mono'ma hunte'nea havi anumzantamine rena reno monora humzante'ne. <sup>22</sup> Agra Ra Anumzana afa'e'mokizmi Anumzana amefi hunemino, Ra Anumzamofo avesi'zana amagera onte'ne.

<sup>23</sup> Anante mago zupa Amonina eri'za vahe'amo'za, atru hu'za ahe frisaza kanku hake'za erifore hute'za, kini nompi mani'nege'za ome ahe fri'naze.

<sup>24</sup> Hianagi atru hu'za kema retro'ma hute'za ana kini ne'ma ahe fri'naza vhahera, Juda vahe'mo'za ana maka zamahe fri'naze. Ana hute'za Amoni nefofo Josaiana kini azeri ot'i'naze.

<sup>25</sup> Hagi Amoni'ma kinima mani'nea knafima fore'ma hu'nea zantamine, mago'a zama tro'ma hu'nea zantamimofo agenke, Juda vahe kinimofo zamagenkema krenentaza avontafepi krente'naze. <sup>26</sup> Hagi Amonima

asente'nazana, Uza hoze hu'za nehaza hozafi agri'a matipi asente'naze. Ana hutazageno nemofo Josaia nefo nona erino Juda vahe kinia mani'ne.

## 22

### *Juda vahe kini ne' Josaia naneke*

<sup>1</sup>Hanki Josaia'a 8'a kafu nehuno, Juda vahe kini efore huteno, 31ni'a kafufi Jerusalemi rankumatera kinia mani'ne. Nerera'a Adaia mofa, Jedidakino Bozkatı rankumateti a' mani'ne. <sup>2</sup>Hagi Josaia'a Ra Anumzamofo avurera fatgo avu'avaza nehuno, negeho Deviti'ma Ra Anumzamofo nanekema amage'ma ante'neaza huno, avua keganti kegma osuno, Ra Anumzamofo nanekea ana maka amage ante'ne.

<sup>3</sup>Hagi Josaia'ma Juda vahe kinima 18ni'a kafuma nemanino'a, avontafe negrea ne' Azaria nemofo, Mesulamu negeho Safanina, Ra Anumzamofo mono nontega vinogu anage huno hunte'ne, <sup>4</sup>Kagra vunka ugagota pristi ne' Hilkiana ome asamigeno, Ra Anumzamofo mono no kafante'ma kvama nehaza vahe'mo'zama mono no kahantet'i ma zondegiza zagoa hamprino. <sup>5</sup>Hagi Hilkiana asamigeno ana zagoa erino, Ra Anumzamofo mono nonte'ma eri'zama eneriza vhahete kva vahe zamino. Anama hani'ge'za ana vahe'mo'za eri'za vhahera miza senezmantesage'za Ra Anumzamofo mono noma havizama hu'nenia zana eri fatgo hugahaze. <sup>6</sup>Hagi kamunta vahe'ene kva vahe'zamine, havereti'ma noma eri fatgoma hu'za negiza vahe'ene, havema taga hu'za noma eri fatgohu eri'zama erisaza vhahera, ana zagonu mi'zana huzmantegahaze. Ana nehu'za Ra Anumzamofo mono noma eri fatgo hu'za kisaza zafane, ko'ma taga huno eri pehe hunte haveramina ana zagoretike mizasegahaze. <sup>7</sup>Hagi ana zagoma zamisaza kva vhahera, inankna hutma zagoa netraze hutma zamantahi onkeho. Na'ankure zamagra fatgo hu'za eri'za eri vahe mani'ne.

### *Hilkia'ma Anumzamofo kasege avontafe keno eri fore hu'nea naneke*

<sup>8</sup>Hagi anankema asamitegeno'a, ugagota pristi ne' Hilkia'a amanage huno avontafe'ma negrea ne' Safanina asami'ne, Nagra Ra Anumzamofo mono nompinti kasegema me'nea avontafera kena eri'noe, huno nehuno ana avontafera Safanina amigeno hampri'ne. <sup>9</sup>Anama huteno'a avontafe'ma negrea ne' Safanina vuno kini ne' Josaiana amanage huno ome asami'ne, Eri'za vahekamo'za ana zagoa eri vgrare'za Ra Anumzamofo mono noma eri fatgo hu erizante'ma kegava hu'naza kva vahe zamazampi ante'naze. <sup>10</sup>Anage nehuno avontafe'ma negrea ne' Safanina mago'anekina nera amanage huno asami'ne, Pristi ne' Hilkia'a mago avontafe namige'na eri'na e'noe, nehuno ana avontafera kini ne'mofa avuga hampri'ne. <sup>11</sup>Hagi kini ne' Josaia'ma kasege avontafepinti nanekema nentahino'a, zaza kukena'a tagato tagutu hu'ne. <sup>12</sup>Hagi anante Pristi ne' Hilkiam, Safan nemofo Ahikamuma, Makaia nemofo Akborima, avontafe'ma negrea ne' Safanine, kini ne'mofa eri'za ne' Asaianena kehige'za azageno hankave nanekema amanage huno huzmantehne. <sup>13</sup>Ra Anumzamo'a nagri'ene ana maka Juda vahe'motagura tusi arimpa aherante'negahie. Na'ankure tagrira tagehe'za ama kasege avontafepima tagrik'u'ma huno krente'nea nanekema amagera onte'naze. E'ina hu'negu tamagra vutma Ra Anumzamofontega nunamu hinkeno, maka kasegemo hu'nea kante amage anteta na'a hugahumpi tasamino.

<sup>14</sup>Hagi pristi ne' Hilkia'ma, Ahikamu'ma, Akbori'ma, Safan'ene Asaia'ma hu'za, kinimofo kukenama nentaza nonte kva nehia ne' Harhasi negeho

Tikva nemofo Salumu nenaro kasnampa a' Hulda'ma mani'nerega, kenaku Jerusalemi kumamofona mago kaziga vu'naze. <sup>15</sup> Anante Hulda'a amanage huno zamasami'ne, Ra Anumzana Israeli vahe'mota Anumzamo'a amanage huno hie. Tamagri'ma huramantegetama nagrite'ma e'naza nera amanage hutma ome asamiho, <sup>16</sup> Ra Anumzamo'a huno, Nagra ama avontafepima kre'naza nanekema Juda kini ne'mo'ma hampri'nea nanekea, ana maka amage ante'na, amama mani'naza kuma'ene, vahe'enena tusi'a knazanteti zamazeri havizantfa hugahue. <sup>17</sup> Na'ankure zamagra Juda vahe'mo'za Nagira zamefi hunami'za, havi anumzante monora hunente'za, zamagrama zamazanteti tro hu'naza zantaminte mnanentake'za kre mna vunte'naze. Anama hazazamo nazeri narimpa hazankino, ana narimpa ahezamo'a vagaoregahie. <sup>18</sup> Hagi Ra Anumzamofo antahintahigu'ma huramantegetama e'naza Juda kini nera, avontafepinti nanekema hamparizageno'ma antahi'nea zamofo kaziga, Israeli vahe Ra Anumzamo'a amanage hie hutma ome asamiho. <sup>19</sup> Nagra amama mani'naza kuma'ene vahe'enena, knazanteti zamazeri haviza nehu'na, kazusi huntegahuema hu'noa nanekema nentahinka, Ra Anumzamo'na navure'ma kavufga anteneraminka, zaza kukanakama tagoto tagutu nehunka zavi'ma ate'nana kavunura tamagerfa hu'na hago ke'noe huno Ra Anumzamo'a hu'ne. <sup>20</sup> E'ina hu'negu kagrira katrenugenka kafahe'zama nehazaza hunka frigahane. Anama hananke'za karimpa frune asegentesnagenka, ana knazama Juda vahe'ma zamisua knazana kagra onkegahane. Hagi ana kasnampa a'mo'ma anankema hutege'za, anankea eri'za kini nete vu'naze.

## 23

### *Huhagerafi hvempa ke Josaia eri kasefa hu'nea naneke*

<sup>1</sup> Hagi anante kini ne' Josaia'a Jerusalemiti'ene Juda kumat'i'ene ana maka ranra vahetmina kehige'za eme atru hu'naze. <sup>2</sup> Ana hutazageno, ana maka Juda vahe'ma, Jerusalemi kumateti vahe'ma, ana maka pristi vahe'ene kasnampa vahe'tamine, ana maka agima me'nea vaheteti vuno agima omne vahete vige'za, Josaia'ene Ra Anumzamofo mono nompi marerite'za, huhagerafi hvempage me'nea avontafe'ma Ra Anumzamofo mono nompinti'ma ke'za erifore'ma hu'naza avontafepinti nanekea Josaia'a nehamprige'za antahi'nez. <sup>3</sup> Anante kini ne'mo'a noma vazisgama hu zafa tavaonte ot'i'neno, hugagerafi hvempagea Ra Anumzamofo avuga huno, tagra kasegene trake'anena maka tagu'reti hu'a amagera antegahune hige'za, ana maka vahe'mo'za hu'za, izo tagra ana hugahune hu'za hvumpa hu'naze.

<sup>4</sup> Anante kini ne' Josaia'a ugagota pristi ne' Hilkiane, agri agoragama mani'naza pristi vahe'ene, mono no kafante'ma kvama nehaza vahera huzmantegi'za, Ra Anumzamofo mono nompintira, Bali havi anumzane, Asera havi anumzane, monafi hanafitaminte'enema mono'ma hunentaza zantamina, ana maka eritre vagare'naze. Ana hutazageno kini ne'mo'a huzmantegi'za anama eritraza zantamina eri'za rankumamofo meg'i a Kidroni agupofi teve ome hanavazi'za kre'naze. Anama hute'za ana zantamimofo osa'a eri'za Beteli rankumate vu'naze <sup>5</sup> Hagi kotama mani'za enaza Juda kini vahe'mo'zama huhampri zmantage'za mani'ne'za, Jerusalemine Juda kumapine, tvaozanire'ma me'nea kumatamimpima havi anumzante mono'ma hunte kuma'ma tro'ma hunte'naza kumapinema, havi anumzante kresramna nevu'za, Bali havi anumzante'ene, ikanterene zagere'ene maka monafi hanafitaminte'enema mnanentake'zama kremnama nevaza pristi

vahera, Josaia'a zamazeri atre vagare'ne. <sup>6</sup> Ana nehuno Asera havi anumzamofo amema'ama zafare'ma antre'za tro hute'za, Ra Anumzamofo mono nompima ante'nazana, Josaia'a eritrege'za eri'za Jerusalemi kumamofo meg'i Kidroni agupofi ome tevefi krete'za, osa'a eri'za knazageno osi osi hutege'za zamagima omne vahe'ma asenezmantaza matipi vu'za ome rupopo hutre'naze. <sup>7</sup> Ana nehuno Ra Anumzamofo mono nompima hunaragintene'za vene'nemo'za monko'zama nehaza nona Josaia'a tapagehu atre'ne. Ana nona Asera havi anumzamofo tvaravema tro'ma nehaza a'nenema nemaniza tvaonte me'ne. <sup>8</sup> Hagi ana maka Judama me'nea ranra kumapintira, pristi vahera Josai'a kehige'za Jerusalemi azageno, ana kumapima havi anumzante'ma kresramnama nevaza kumatmina eri haviza nehuno, noti kaziga Geba ran kumateti agafa huteno vuno Sauti kaziga Beseba ran kumate uramigeno, ana kumatmimpima havi anumzante'ma Kresramanama nevaza kumatmina vahe zamavufo eri pagehena hu'ne. Ana nehuno Jerusalemi rankumamofo gavana ne' Josua kafa tva'onte'ma hoga kaziga me'nege'za havi anumzante'ma Kresramanama nevaza itaramineni eri haviza hutre'ne. <sup>9</sup> Hagi kini ne'mo'ma kehige'zama e'naza pristi vahe'mo'za zo'ore bretima mago'a pristi vahe'mo'zama nazafintira amne ne'naze. Hianagi zamagra Ra Anumzamofonte Kresramana vunte itama Jerusalema me'nea itarera kresramna ovu'naze.

<sup>10</sup> Hagi havi anumzante'ma mono'ma hunentaza kuma'ma, Hinomu agupo tvaonte Tofetima me'neana, vahe zamavufo Josaia'a eri haviza higeno pēhenage hu'ne. Ana higeno mago'mo'e huno ana kumatera Moleki havi anumzantega ne' mofavre'a kresramna vuntemaga osu'ne. <sup>11</sup> Hagi kotama mani'za e'naza Juda kini vahe'mo'za mago'a hosi afu'ma havi anumza zage anumzamofontegama ami'naza hosirami amema'ma, Ra Anumzamofo mono no kafa tvaonte atruma nehaza kumapi ante'nazana Josaia'a eri atre'ne. Ana hosi afutamima ante'nazana, kini nemofo mago eri'za ne' Natanmeleki no tvaonte ante'naze. Hagi ana karisiramima zage anumzamofoma ami'naza karisia Josaia'a erino tevefi hanavazino kre'ne. <sup>12</sup> Hagi ko'ma maniza e'naza Juda kini vahe'mo'zama, mago kresramna vu itama trohu'za Ahasi nomofo agofetu'ma ante'nazana, Josaia'a eri netreno, Ra Anumzamofo mono nompima tare kuma'ma me'nege'za atruma nehazafima, Manase'ma kresramna vu itararema tro'ma hunte'neana eritreno ru tamana tamanu huteno, erino Kidroni agupofi ome atre'ne. <sup>13</sup> Anama huteno'a Jerusalemi kumamofo zage hanati kaziga, Olivi agonomofo sauti kazigama, agoteno havizama hu'nea Saidoni vahe anumza Astoretine, Moapu vahe havi anumza Kemosine, Amoni vahe havi anumzama Molekinte enema kresramna vu itaramina, kini ne' Solomoni'ma tro'ma hunte'neana Josaia'a eri haviza hu'ne. <sup>14</sup> Hagi have retru re'neza Asera havi anumzante mono'ma hunentaza havea erino rutamna tamanu hunetreno, zafare antre'za Asera havi anumzamofo amema'ama trohu'za retruma re'nazana akasinetre, ana zafama akasima atraza kerifina, Josaia'a vahe zaferinareti antevite'ne.

<sup>15</sup> Hagi ko'ma Nebati nemofo Jeroboamu'ma, Beteli ran kumate'ma havi anumzante'ma mono'ma hunte kuma'ene Kresramanama vu itama tro'ma hunte'neno, mono'ma hunenteno Israeli vahe zamatufenge'za kumi hu'naza kumatmina ana zanke huno, Josaia'a eri haviza hu'ne. Ana nehuno havi anumzante'ma mono'ma hunentaza kumate'ma tro'ma hunte'naza zantamina erino tevefi kregeno tetegeni, osa'a erino kane osi osi hu'ne. Ana nehuno Asera havi anumzamofo amema'ama antre'zama tro hunte'nazana erino

tevefi anazanke huno kre'ne. <sup>16</sup> Hagi Josaia'a anante oti'neno osi agonamofo asoparega keana, vahe'ma asenezmantaza havega me'negeno negeno, vahe huzmantege'za vu'za vahe zaferinaramina anampinti ome eri'za azageno, Jeroboamu'ma tro'ma hunte'nea itare ana zaferinaramina kreno ana ita, vahe zamavurera eri haviza hu'ne. Hagi e'i anazama Josaia'ma tro'ma hu'nea zamo'a, Ra Anumzamofo eri'za ne'mo'ma korapa kasnampa ke hunte'nea zamo nena raga'are'ne.

<sup>17</sup> Hagi anazama Josaia'ma huteno'a mago mati me'negeno negeno amanage hu'ne, Ama matira iza matire? Anagema hige'za Beteli rankumate vahe'mo'za asamiza, Juda kumateti mago kasnampa ne' eno, menima ama itare'ma tro'ma hana zamofonku, kasnampa kema hunte'nea ne'mofo mati me'ne. <sup>18</sup> Hagi anante Josaia'a amanage huno zamasami'ne, Mago vahe'mo'e huno zaferina'a avako osina atrenkeno meno. Anagema hige'za ana kasnampa ne'mofo zaferinane, mago'a Sameria kumateti kasnampa vahe zaferinanena atrazageno me'ne. <sup>19</sup> Hagi Israeli kini vahe'mo'zama Sameriamma me'nea ranra kumatmimpima, havi anumzante'ma mono'ma hunentazageno, Ra Anumzamo'ma rimpama ahezamante'nea kumatmina, Beteli rankumate'ma hiaza huno Josaia'a eri haviza hu'ne. <sup>20</sup> Hagi havi anumzante'ma mono'ma hunentaza kumapima eri'zama eneri'za pristi vahera, Josaia'a ana maka zamaheno kresramna vu itazamire nenteno, fri vahe zaferina zamagofetu anteno teve hanavazino kre'ne. Anama huteno'a Josaia'a ete Jerusale kumate vu'ne.

### *Israeli vahe ozmahe zamagatere'nea knagu antahimino neza nenaza kne, Eks-Ati 12*

<sup>21</sup> Hagi anante kini ne' Josaia'a amanage huno maka vahera zamasami'ne, Ama hugagerafi hvuempage avontafepima hu'nea kante anteta Ra Anumzamo'ma Israeli vahe'ma ozmahe zamagatere'nea knagura antahimita ne'zana kreta neneta musena hunteho. <sup>22</sup> Hagi kema refko'ma hu kva vahe'mo'zama kegavama huzmante'nareti'ma eno Jerusalemine, Juda kini vahe'mo'zama kvama huzmante'nare'ma egeno'a, Ra Anumzamo'ma Israeli vahe'ma ozmaheno zamagtere'nea zankura antahimi'za magore hu'za ne'zana kre'za nene'za musena huonte'naze. <sup>23</sup> Hianagi Josaia'ma 18ni'a kafuma kinima maninege'za, ana maka vahe'mo'za Jerusalemi kumate e'za, Israeli vahe'ma Ra Anumzamo'ma ozamahe zamagtere'nea zankura antahimi'za ne'zana kre'za nene'za, Ra Anumzamofo musena hunte'naze.

<sup>24</sup> Hagi fri vahe hankro'enema keaga nehaza vahe'ene, havi avamu'mofo eri'zama e'neriza vahe'ene, nozamifima havi anumzama tro hunte'nea mono hunentaza zantamine, havi anumzamofo amema'aramine, maka agotega zantamima Jerusalemi kumate'ene Juda kumapinema me'neana, Josaia'a ana zanke huno ana maka eritre vagare'ne. E'inama hu'neana pristi ne' Hillkia'ma Ra Anumzamofo mono nompinti'ma keno eri'nea avontafepima me'nea kasege avaririno anara hu'ne. <sup>25</sup> Hagi Josaia'ma frige'za ko'ma mani'za e'naza kini vahe'ene henkama fore'ma hu'naza kini vahe'mo'za Josaia'ma maka agu'reti'ene, agu'amententi'ene, han-kave'reti'enema huno Ra Anumzamo'ma Mosesema ami'nea kasegefima me'nea nanekema amage'ma ante fatgoma hu'neazana huno, mago kin-im'o'a anara osu'naze.

<sup>26</sup> Hianagi ko'ma Manase'ma havi avu'avazama nehuno Ra Anumzamo-foma azeri arimpama ahogeno'ma Juda vahe'ma tusi arimpama aheza-mante'nea arimpa ahe'zamo'a vaga'ore'ne. <sup>27</sup> Hagi Ra Anumzamo'a aman-age hu'ne, Nagra ko'ma Israeli vahe'ma hu'noaza hu'na, Juda vhahera mopa zamifintira zamazeri atresuge'za afete mopare vugahaze. Ana nehu'na Jerusalemi kuma'ma Nagri su'anu hu'nama huhampari'noa kumara namefi hunemi'na, Nagri nagi me'nesigetama monora hunantegahazema hu'noa mono nonena, nagra namefi humigahue.

<sup>28</sup> Hagi mago'a zama Josaia'ma kini mani'nea knafima efore'ma hu'nea zantamine, agrama tro'ma hu'nea zantamimofo agenke, Juda kini vahe'mokizmi zamagi zamagenkema krenentaza avontafepi krente'naze.

<sup>29</sup> Hagi Josaia'ma kinima mani'nea knafina, Isipi kini ne' Fero Niko'a sondia vahe zaga'a zamavareno, Yufretisi tintega Asiria kini ne' ome aza hunaku vu'ne. Anama nehigeno'a, kini ne' Josaia'a avatga huno ha'hunteku sondia vahe'a zamavareno nevigeno, Isipi kini ne' Fero Niko'a Megido ku-mate eme tutagiha huntenu Josaiana ahe fri'ne. <sup>30</sup> Ana hutazage'za Josaiana eri'za vahe'amo'za Megidotira avufga'a karisifi erinte'za vu'za Jerusalemi kumapi, agri'a matipi ome asente'naze. Hagi ana kumapi, Josaia nemofo Jehoahasina, avre'za masave frentete'za huhampaintazageno nefu nona erino kinia mani'ne.

### *Jehoahasi'a Joasi no erino Juda vahe kini mani'nea naneke*

<sup>31</sup> Hagi Jehoahasia 23'a kafu nehuno kini efore huno, Jerusalemi ku-matera 3'a ikampi kinia mani'ne. Nerera'a Libna ran kumateti, Jeremaia mofakino agi'a Hamutali'e. <sup>32</sup> Hagi agehe'zama hu'nazaza huno Jehoahasi'a Ra Anumzamofo avurera havi avu'avaza hu'ne. <sup>33</sup> Hagi Isipi kini ne' Fero Niko'a, Jehoahasina azeriteno Hamati mopafina Ribla kumate kina hunte'ne. Ana higeno Jehoahasi'a Jerusalemi kumatera mago'ene kinia omani'ne. Ana higeno Isipi kini ne Fero Niko'a Juda vahekura huno, sil-vama kna'amo'ma 3,400 kiloma hu'nesiane, golima kna'amo'ma 34 kiloma hu'nesia namigahaze hu'ne. <sup>34</sup> Hagi Isipi kini ne' Fero Niko'a, Josaiana mago ne' mofavre'a, Eliakimina nefu no erino Juda vahe kinia maninogu azeri o'netino, agi'a Jehoiakimi'e huno ru agi antemi'ne. Hianagi Jehoahasina avreno Isipi mopare umani'negeno anantega fri'ne. <sup>35</sup> Hagi Isipi kini ne' Fero Niko'ma huhampari'nea silvane, golinema Jehoiakimi'ma aminakura, vahepinti hige'za mani'naza avamente takisi zagoa eme amitere hazageno, erino Isipi kini netega atregeno vu'ne.

### *Juda kini ne' Jehoiakimi naneke*

<sup>36</sup> Hagi Jehoakimina kafu'amo'a 25fu nehigeno agafa huno kinia mani'ne. Ana huteno Jerusalemi mani'neno 11ni'a kafufi Juda vhahera kegava hu'ne. Nerera'a Ruma ran kumateti, Pedaia mofakino agi'a Sebida'e. <sup>37</sup> Hagi agehezama hu'nazaza huno Jehoiakimi'a Ra Anumzamofo avurera havi avu'avaza hu'ne.

## 24

<sup>1</sup> Hagi Jehoiakimi'ma Juda vahe kinima mani'nea knafina, Babiloni kini ne' Nebukatnesa'a Juda vhahera ha' eme huzmagatere'ne. Ana huteno Jehoiakimina atregeno agri agorga mani'ne. Hianagi 3'a kafuma evutegeno'a Jehoiakimina antahintahi'amo'a rukrahe higeno Nebukatnesana ha' renteno agri agorga omani'ne. <sup>2</sup> Hagi anama higeno'a Babiloni vahe'ma, Aramia vahe'ma, Moapu vahe'ma, Amoni vahe'mokizmia

Ra Anumzamo'a huzmantege'za e'za, Juda vhahera eme zamazeri haviza hu'naze. E'ina'ma hu'nazana Ra Anumzamo'a eri'za vahe'a kasnampa vahem zamagipi huvazige'za kore ke'ma huama hu'naza kemofo nena'a efore hu'n'e. <sup>3</sup> Tamagerfa huno Ra Anumzamo huzmantege'za e'za Juda vhahera zamazeri havizana hu'naze. Na'ankure Manase'ma hu'nea kumi ku'ene ana maka havizama hu'nea zanku Ra Anumzamo'a avugatira zamazeri atre'naku anara hu'n'e. <sup>4</sup> Hagi hazenkezmi omane vahe'ma Manase'ma zamaheno korazamima eri tagitregeno Jerusalemi kumapima avi'mate'nea zanku Ra Anumzamo'a nentahino, Manasena kumi'a atreonte'ne.

<sup>5</sup> Hagi Jehoiakimi'ma kinima mani'nea knafima fore'ma hu'nea zantamine, agrama tro'ma hu'nea zantamimofo agenkea, Juda vahe kinimofo zamagenkema krenentaza avontafepi krente'naze. <sup>6</sup> Hagi Jehoiakimi'a frigeno afahemofoma asezmantena'za matipi asentetageno, nemofo ne' Jehoiakini'a nefna nona erino kinia mani'ne.

<sup>7</sup> Hagi ana knafina Isipi kini ne'mo'ma kegavama hu'nea kumatmina, ana mika Babiloni kini ne'mo kegava higeno, Isipi kini ne'mo'ma eno Juda vahe'ma ha'ma hunezmanteazana osu'ne. Ana higeno Babiloni kini ne'mo'ma kegava hu'nea mopamofo agema'amo'a, Isipi tinteti agafa huteno vuno, Yufretisi rantinte uhanati'ne.

<sup>8</sup> Hagi Jehoiakin'i'a 18ni'a kafu nehuno kinia efore huno Jerusalemi kumatera 3'a ikampi Juda vahe kini manino kegava hu'n'e. Nerera'a Jerusalemi kumateti Elnatani mofakino, agi'a Nehusta'e. <sup>9</sup> Hagi Jehoiakin'i'a nefna'ma hu'neaza huno Ra Anumzamofo avurera maka havi avu'avaza hu'n'e.

<sup>10</sup> Hagi Jehoiakin'i'ma kini mani'nea knafina, Babiloni kini ne' Nebukatnesa'ene sondia kva vahe'ene, sondia naga'amo'za mareri'za Jerusalemi kumara ha'huzmantenaku ome avazagi kagi'naze. <sup>11</sup> Hagi Babiloni sondia vahe'mo'zama, Jerusalemi kuma'ma avazagigagiza mani'nageno'a Babiloni kini ne' Nebukatnesa'za zamagenaku Jerusalemi rankumate e'ne.

<sup>12</sup> Hagi kini ne' Jehoiakin'i'ma kegeno Nebukatnesa'ma egeno'a, nererama eri'za vahe'ama, sondia vahete kva vahe'ene, kinimofo nompima eri'zama eneri'za vahe'mo'zanena kumara atre'za ana maka atirami'za vu'za Nebukatnesa'ene hara osanune hu'za hu'naze. Anama hazageno'a Nebukatnesa'za Jehoiakinina kina huntetu azeri'ne. Hagi anazama fore'ma hu'neana, Jehoiakinima Juda vahe kinima 8'a kafuma nemanigeno anara hu'n'e. <sup>13</sup> Hagi Ra Anumzamo'ma huama hu'nea kante anteno, Ra Anumzamofo mono nompine, kini ne'mofo nompima knare'nare zama me'nea zantamina Nebukatnesa'a e'nerino, Solomoni'ma golireti tro'ma hu'nea zantamima antagino ruprorovazi netreno, Ra Anumzamofo mono nompima me'nea ana maka golia erivagare'ne. (Jeremaia 20:5) <sup>14</sup> Ana nehuno Jerusalemi mani'naza vahe'ene, kinimofo eri'za vhahera ana maka nezamavaren, hankavenentake sondia vhahera 10tauseni'a nezmavreno, zamazanteti ruzahu ruzahu zama tro'ma nehaza vahe'ene, ainireti'ma keonke'zama tro'mahu antahi'zama eri'naza vhahera ana maka Nebukatnesa'za zamavaren, Babiloni vuno kina ome huzmante'ne. Hagi zamunte omnege'zama havizama hu'naza vahe'age, zamatrege'za Juda mopafina mani'naze.

<sup>15</sup> Hagi Jerusalemitira Jehoiakinima nererama, a'naneramima'ane, eri'za vahe'ane, Juda kumate ranra kva vahezaganena Nebukatnesa'za zamavaren, Babiloni ome kina huzmante'ne. <sup>16</sup> Hagi hankavetino ha'ma huga sondia vhahera Babiloni kini ne'mo'a 7tauseni'a nezamavaren, zamazanteti ruzahu ruzahu zama tro'ma nehaza vahe'ene, ainireti'ma

keonke'zama tro'mahu antahi'zama eri'naza vahera ana maka 1tauseni'a vahe zamavare'ne.

<sup>17</sup> Hagi Jehoiakinina onasi nefu Mataniana, Jehoiakini no erinka Juda vahe kini manio huno Nebukatnesa'a huhamprinenteno, Mataniana kasefa agi'a Zedekaia'e huno antemi'ne.

### *Babiloni vahe'mo'zama Jerusalemi kuma'ma eme ha'ma hu'za eri'naza naneke*

<sup>18</sup> Hagi 21ni'a kafu nehuno Zedekaia'a agafa huno kinia mani'ne. Ana huteno Jerusalemi mani'neno 11ni'a kafufi Juda vahera kegava hu'ne. Nerera'a Libna kumateti Jeremaia mofakino, agi'a Hamutali'e. <sup>19</sup> Hagi Jehoiakinina'sa a nefu'ma hu'neaza huno Ra Anumzamofo avurera maka havi avu'ava zana hu'ne. <sup>20</sup> Hagi Jerusalemi vahe'mo'zane, Juda vahe'mo'zama haza havi zamavu zamavaku, Ra Anumzamo'a rimp'a ahezamanteno, zamefi hunezamino mopazamifintira zamavare atrege'za, afete moparega vu'naze. Hagi Zedekaia'a Babiloni kinimofona ha'arenteno agri agorga omani'ne.

## 25

### *Jerusalemi rankuma'ma havizama hu'nea zamofo naneke*

<sup>1</sup> Hagi Zedekai'ma kinima manino egeno 9nima hia kafufina, 10ni ikamofona 10ni zupa, Babiloni kini ne' Nebukatnesa'a ana maka sondia vahe'a zamavareno Jerusalemi kumara eme hahuzmanteku e'ne. Anama hute'za Jerusalemi ran kuma'mofo meg'i'a kuma eme ante'za mani'ne'za, kuma keginamofo tva'ontera oti'ne'za ha'ma hanaza zana mopa kate'za ante hihi hu'za mareri'naze. <sup>2</sup> Hagi Babiloni vahe'mo'za Jerusalemi rankumara avazagi kaginte'za mani nazageno, mago kafugi 6si'a ika evigeno, Zedekai'ma kinima manino egeno 11nima hia kafurera ehanati'ne. <sup>3</sup> Higeno ana kafufina 4 ikamofona 9ni zupa, Jerusalemi rankumapima mani'naza vahera ne'za zamimo'a vagaregeno, tusi zamagaku nehazageno ne'zama nesazazana omne'ne. <sup>4</sup> Ana hige'za Babiloni sondia vahe'mo'za Jerusalemi kuma kegina tapage hu'za ufre'naze. Hagi Babiloni sondia vahe'mo'za Jerusalemi kumara avazagi kagi'nazanagi, Zedekaia'ene ana maka sondia vahe'mo'za kenage atrami'za, kini ne'mofo hozama me'nerega tare kazigati keginamokema eme rehe'n'a amu'nompima me'nea kahanteti atrami'za Araba kaziga vu'naze. <sup>5</sup> Hianagi Babiloni sondia vahe'mo'za kini nera rotago hu'za vu'za Jeriko agupofi ome azerizageno, sondia vahe'mo'za atre'za panani hu'za fre'naze. <sup>6</sup> Anama hute'za Babiloni sondia vahe'mo'za Zedekaiana avre'za Babiloni kini ne'ma Ribla kumate'ma mani'nere azageno, keagafi avrente'za knama amisia keaga erinte fatgo hu'naze. <sup>7</sup> Hagi Zedekai'a negege'za ne'mofavre naga'a zamahe fri vagare'naze. Ana nehu'za Zedekaiana tarega avurga repro hunetre'za, bronsireti seninu azanteria anakinte'za avre'za Babiloni rānkumate vu'naze.

<sup>8</sup> Hagi Nebukatnesa'ma kinima manino egeno 19nima eme hia kafufina, 5fu ikamofona 7ni zupa, kini nete'ma kvama nehaza sondia vahe'mokizmi kva nera Nebusaradanikino mago zupa Jerusalemi rankumate e'ne. <sup>9</sup> Hagi Ra Anumzamofo mono nonki, kini ne'mofo nonki, ana maka Jerusalema me'nea nontamine, agima me'nea nontaminena Nebusaradani'a teve tagintegeno te'ne. <sup>10</sup> Hagi Nebusaradani'ma Babiloni sondia vahe'ma kegava huno zamavareno'ma vu'nea vahera huzmanteg'e'za Jerusalemi rankuma'mofo have kegina, maka ru tamana tamanu hutre'naze. <sup>11</sup> Hagi

Jerusalemi vahe'ma zamavare'za Babilonima nevu'zama mago'ama zamat're'naza vhahera, Babiloni sondia vahete kva ne' Nebusaradani'a kina ome huzmanteku zamavareno Babiloni vu'ne. Ana nehuno mago'a Juda vahe'ma ha' knafima kora atre'za vu'za Babiloni sondia vahe'ma ha' kuma'ma emente'za mani'nafima umani'naza vahe'enena zamavareno Babiloni kina ome huzmanteku vu'ne. <sup>12</sup> Hianagi mago'a zamunte'ma omne'nea vhahera, Nebusaradani'a zamatrege'za Juda mopafina mani'neza hoza nente'za waini hozanena kegava hu'naze.

<sup>13</sup> Hagi Babiloni sondia vahe'mo'za Ra Anumzamofo mono nompi umareriz'a, noma vazisgama hu (fumza) anumza zafama Bronsireti'ma tro'ma hu'naza zafa e'neri'za, tusi'a zuompama bronsireti'ma tro hu'za tima afinte'ne'za tirurema nehaza zuompane, aga'araminena tagana vazi'za eri'za Babiloni vu'naze. <sup>14</sup> Hagi Babiloni vahe'mo'za ana zanke hu'za, bronsireti'ma tro'ma hu'naza kavoma, savorima tavi'ma erisuhi azotama, zuomparamine, ana maka zama brosireti'ma tro'ma hu'naza zantamima Ra Anumzamofo mono nompima me'neana eri vagare'naze. <sup>15</sup> Hagi golireti'ene silvareti'ma tro'ma hu'naza zuompama tankanuzama hampagenente'za zuompane, korama tagint'e'za ru tri'ri'ma nehaza zuompanenäa Babiloni sondia vahete kva ne' Nebusaradani'a erino vu'ne.

<sup>16</sup> Hagi noma vazisgama hu (fumza) anumza zafararente'ma anoma vazi'naza bronsine, ra zuompama tima afintene'za tirurema nehaza zuompane, aga'araminema bronsireti'ma tro'ma hu'nazana, kna'amofona refko hu'za kegara osu'naze. <sup>17</sup> Hagi ana tarega zafamokea magozahu hakeno za'za zaniamo'a 8'a mita hutere higeno, ana zafararente'ma anagami asenire'ma fetori'ma tro'ma hu'za ante'nazana 1mitagi 30'a sentamita hu'ne. Hagi tare zafamofo fetorite'ma avonkre avankre'ma hunte'nafina, tarefi pomigreneti zafa ragamofo amema'a krente'za evutere hu'naze. <sup>18</sup> Hagi Babiloni kini ne'mofo sondia vahete kva ne' Nebusaradani'a, ugagota pristi ne' Seraiane, agri amefima hu'nea pristi ne' Zefanaiane Ra Anumzamofo mono nomofo kahante'ma kvama nehaza 3'a vahe'ene, kina ome huzmanteku zamazeri'ne. <sup>19</sup> Hagi Jerusalemi kumapima maniza sondia vahete'ma kvama nehia neki, kini ne'ma antahintahima nemiza vhahera 5fu'a Jerusalemi mani'nazageno Nebusaradani'a zamazeri'ne. Ana nehuno sondia vahe'ma zamagima kreno erinte fatgo nehia ne'enena azeri'ne. Ana nehuno 60'a vhahera mago'a Jerusalemi kumapintira zamazeri'ne. <sup>20</sup> Ana'ma huteno'a Nebusaradani'a ana vhahera zamavareno Babiloni kini ne'ma Ribla kumate'ma mani'nere vu'ne. <sup>21</sup> Hagi ana huntegeno Babiloni kini nemo'a ana vhahera Ribla kumate Hamati mopafi zamahege'za fri'naze. Anama hute'za Juda vhahera zamavare'za afete moparega vu'za kina ome huzmante'ne.

### *Babiloni kini ne'mo Gedaliama Juda vahe kva azeri oti'nea zamofo naneke*

<sup>22</sup> Hagi Babiloni kini ne' Nebukatnesa'a mago'ama zamatre'za Judama aza vahe'ma kegavama huzmantesia nera, Safani negeho Ahikamu nemofo Gedalia gavana huhamprinte'ne. <sup>23</sup> Hagi Juda sondia vahe'ene, kva vahe'zamimo'zama fre'za umani'nazaregati'ma antahi'zama, Babiloni kini ne'mo'a Gedaliama Juda gavana ne' azeri oti'ne haza nanekema nentahi'za, Gedalia'ma Mizpama mani'nere e'naze. Anama e'naza nagamokizmi zamagi'a, Netania nemofo Ismaeliki, Karea nemofo Johananiki, Netofa kumateti ne'Tanhumeti nemofo Seraiaki, Makati kumateti ne'Zesaniaki hu'za e'naze. <sup>24</sup> Hagi Gedalia'ma ana vahe'ma nezamageno'a amanage huno huvempa

huno zamasami'ne, tamagra Babiloni kva vahekura korora osiho. Ana ne-hutama ama mopafina amne mani'neta nazano Nebukatnesa'ma haniazana amage anteta tro nehuta, knare hutma manigahaze.

<sup>25</sup> Hianagi 7ni ikampina Elishama negeho Netania nemofo Ismaeli'a kini-mofo naga'pinti nekino, 10ni'a vahe'ene eno Gedaliana ahe nefrino, mago'a Juda vahe'ene, mago'a Babiloni vahe'ma Mizpa kumate'ma mani'naza va-hera zamahe fri'ne. <sup>26</sup> Hagi anama hutegeno'a Juda vahera ranteti vuno osite vigeno, sondia vahete kva vahe'enema Mizpa kumate'ma mani'nazaretira atre'za Babiloni vahe koro hu'za Isipi moperega vu'naze.

### *Jehoiakinima kinafinti katufente'na zamofo naneke*

<sup>27</sup> Hagi Juda kini ne' Jehoiakini'a 37ni'a kafufi Babilonia kina hu'ne. Hagi anama 37nima hia kafufina Evil-Merodaki'e nehaza ne'mo Babilonia kasefa kinia efore hu'ne. Hagi ana kafufina 12fu ikamofo 27ni zupa Evil-Merodaki'a Jehoiakinina asunku hunteno kinafintira katufente'ne. <sup>28</sup> Hagi Evil-Merodaki'a Jehoiakinina azeri so'e huno knare avu'avaza hu'nenteno mago'a kina vahe'ma Babilonima kina hu'za mani'naza vahe'ma kini ne'mo'ma zamazeri so'e nosia avamente Jehoiakinina azeri so'e hu'ne.

<sup>29</sup> Ana higeno Jehoiakini'a kina vahe kuke'na mago'ene ontani'ne. Anama mani'nea kna'afina kinimofo nompinti ne'zana neneno manino vu'ne.

<sup>30</sup> Hagi Babiloni kini ne'mo'a, Jehoiakinina nazano avesi'nia zama erisigura mika zupa zagoa amitere huno nevigeno, manime vuno ome fri'ne.

# 1 Kronikol-Zamagi Zamagenke

## Nampa 1 Kronikol-Zamagi Zamagenke

*Adamumpinti'ma fore'ma hu anante anante'ma hu'naza vahe'mokizmi naneke*

<sup>1</sup> Adamu'a Seti nef'a'e. Hagi Seti'a Enosi nef'a'e, <sup>2</sup> Enosi'a Kenani nef'a'e. Hagi Kenani'a Mahalaleli nef'a'e. Mahalaleli'a Jareti nef'a'e. <sup>3</sup> Hagi Jareti'a Inoku nef'a'e, Inoku'a Metusela nef'a'e. Metusela'a Lemeki kasentegeno Lemeki'a, <sup>4</sup> Noana kasentegeno, Noa'a 3'a mofavre zamante'neankino zamagi'a, Semiki, Hamuki, Jefetie.

*Jefetimpinti'ma fore'ma hu'naza vahe'mokizmi zamagimofo naneke*

<sup>5</sup> Hagi Jefeti ne' mofavreramimofo zamagi'a, Gomaki, Magokiki, Mataiki, Javaniki, Tuvariki, Misekiki, Tirasi'e. <sup>6</sup> Hagi Goma'a, Askenasi vahe'mokizime, Rifati vahe'mokizime, Togarma vahe'mokizimi zamagigomo'e. <sup>7</sup> Hagi Javani'a Elisa vahe'mokizime, Tasis vahe'mokizime, Kitimi vahe'mokizime, Rodanimi vahe'mokizimi zamagigomo'e.

*Hamumpinti'ma fore'ma hu'naza vahe'mokizmi zamagimofo naneke*

<sup>8</sup> Hagi Hamu ne' mofavreramimofo zamagi'a, Kusiki, Misraimiki, Putiki, Kenani'e. <sup>9</sup> Kusi ne' mofavreramimofo zamagi'a, Sebaki, Havilaki, Sabtaki, Ramaki Sebteka'e. Hagi Rama'a Sebane, Dedanine kasezanante'ne. <sup>10</sup> Hagi Kusi'a hankavenentake ha' ne'ma ama mopafima efore'ma hu'nea ne' Nimroti kasente'ne. <sup>11</sup> Hagi Misraimi'a Ludi vahe'mokizmine, Anami vahe'mokizmine, Lehabi vahe'mokizmine, Naptu vahe'mokizime, <sup>12</sup> Patrusi vahe'mokizime, Kaslu vahe'mokizime zamagigomo'e. Hagi Filistia vahe'ma e'nazana Kaslu vahepinti fore hu'naze. <sup>13</sup> Hagi Kenanina ese ne' mofavre'a Saidoni'e. Hagi Kenani'a Saidoni vahe'ene Hiti vahe'ene, <sup>14</sup> Jebusi vahe'ene, Amori vahe'ene, Girgasi vahe'ene, <sup>15</sup> Hivi vahe'ene, Arka vahe'ene, Sini vahe'ene, <sup>16</sup> Arvati vahe'ene, Zemari vahe'ene, Hamati vahe'mokizmi zamagigo'mo'e.

*Semimpinti'ma fore'ma hu'naza vahe'mokizmi zamagimofo naneke*

<sup>17</sup> Hagi Semi ne' mofavreramimofo zamagi'a, Elamuki, Asaki, Arfaksatiki, Lutiki, Aramu'e. Hagi Aramumpinti'ma fore'ma hu'naza vhahera, Uziki, Huliki, Geteriki, Miseki'e. <sup>18</sup> Hagi Arfaksati'a Sela kasentegeno, Sela'a Eber kasente'ne. <sup>19</sup> Hagi Eberi'a tare ne' mofavre zanante'ne, ese ne'amofo agi'a Peleki'e hu'ne, na'ankure agri knafi ama mopafi vahe'mo'za fako hu'za zamagerute zamagerute umani emania hu'naze. Hagi mago ne' mofavre'amofo agi'a Joktani'e. <sup>20</sup> Hagi Joktani'ma kasezamante'nea ne' mofavreramina Almodatima, Selefima, Hazamavetima, Jerama, <sup>21</sup> Hadoramura, Uzalima, Diklama, <sup>22</sup> Ebala Abimaelima, Sebama, <sup>23</sup> Ofirima, Havilama, Jobabuma huno kasezamnte'ne.

<sup>24</sup> Hagi Semipinti'ma fore'ma hu'naza vhahera amana hu'ne, Semi'a Arpaksatiki nef'a'e, Arpaksati'a, Sela nef'a'e. <sup>25</sup> Hagi Sela'a Eber nef'a'e, Eberi'a Peleki nef'a'e, Peleki'a Reu nef'a'e. <sup>26</sup> Hagi Reu'a Seruku nef'a'e, Seruku'a Nahori nef'a'e. Nahori'a Tera kasentegeno, <sup>27</sup> Tera'a Abram kasente'ne. Hagi Abramuna henka kasefa agi'a Abrahamu'e huno antemi'ne.

*Abrahamumpinti'ma fore'ma hu'naza vahe'mokizmi zamagimofo naneke*

<sup>28</sup> Hagi Abrahamu nemofokea Aisakike Ismaelike.

<sup>29</sup> Hagi Ismaelipinti'ma fore'ma hu'nea vhahera, ese mofavrea Nebai-oti'e. Hagi ana maka ne' mofavrereramimofo agi'a Nebaioti'ma, Ketari'ma, Adberi'ma, Mibsama'ma, <sup>30</sup> Misima'ma, Duma'ma, Masa'ma, Hadati'ma, Tema'ma, <sup>31</sup> Jeturi'ma Nafisi'ma, Kedema'e. Hagi ama ana makara Ismaeli mofavrererami man'i'naze.

<sup>32</sup> Hagi Abrahamuna henka nenaro Katura'ma kasezmante'nea ne' mofavrereramimofo zamagi'a, Zimrani'ma, Joksani'ma, Medani'ma, Midieni'ma, Isbaki'ma, Sua'e. Hagi Joksani nemofokea Sevake, Dedanike. <sup>33</sup> Hagi Midieni ne' mofavrereramina Efama, Eferima, Hanoki'ma, Abidama, Eldama huno kasezamante'ne. Hagi ama ana makara Abrahamu nenaro Keturama kasezmante'nefinti fore hu'naze.

*Aisakimpinti'ma fore'ma hu'naza vahe'mokizmi zamagimofo naneke*

<sup>34</sup> Hagi Abrahamu'a Aisaki kasentegeno, Aisaki'a Isokizni Israelikizni kasezanante'ne.

*Isompinti'ma fore'ma hu'naza vahe'mokizmi zamagimofo naneke*

<sup>35</sup> Hagi Iso ne' mofarveramimofo zamagi'a ama'ne, Elifasi'ma, Reueli'ma, Jeusi'ma, Jalami'ma, Kora'e. <sup>36</sup> Hagi Elifasi ne' mofavrereramimofo zamagi'a ama'ne, Temani'ma, Omari'ma, Zefo'ma, Gatami'ma, Kenasi'ma, Timna'ma, Amaleki'e. <sup>37</sup> Hagi Reueli ne' mofavrereramimofo zamagi'a ama'ne, Nahati'ma, Zera'ma, Sama'ma, Misa'e.

*Idomu vahe'ma fore'ma hu'naza zamofo naneke*

<sup>38</sup> Hagi Seiri ne' mofavrereramimofo zamagi'a ama'ne, Lotani'ma, Sobali'ma, Zibioni'ma, Ana'ma, Disoni'ma, Eseli'ma, Disani'e. <sup>39</sup> Hagi Lotani nemofokea Horike, Homamike. Hagi Lotani nesaro agi'a Timna'e. <sup>40</sup> Hagi Sobali ne' mofavrereramimofo zamagi'a ama'ne, Alvani'ma, Manahati'ma, Ebali'ma, Sefo'ma, Onami'e. Hagi Zibeoni nemofokea Aia'ene Anake.

<sup>41</sup> Hagi Ana nemofo'a Disoni'e. Hagi Disoni ne' mofaveramimofo zamagi'a ama'ne, Hemdani'ma, Esbani'ma, Itrani'ma, Kerani'e. <sup>42</sup> Hagi Ezeri ne' mofavrereramimofo zamagi'a ama'ne, Bilhani'ma, Zavani'ma, Akani'e. Hagi Disani nemofokea Usike, Aranike.

*Idomu ugota vahe'mokizmi naneke*

<sup>43</sup> Hagi Israeli vahe kinima efore'ma huno Israeli vahe'ma kegavama osu'nerera, ama'na kini vahe'mo'za Idomu mopafina kinia mani'naze, Beori nemofo Bela'e. Hagi rankuma'amofo agi'a Dinhabae. <sup>44</sup> Hagi Bela'ma frigeno'a, Zera nemofo Bozra kumateti ne' Jobapu agri nona erino kinia mani'ne. <sup>45</sup> Hagi Jobapu'ma frigeno'a, Teman mopafinti ne' Husamu agri nona erino kinia mani'ne. <sup>46</sup> Hagi Husamu'ma frigeno'a, Bedati nemofo Hadati agri nona erino kinia mani'ne. Hagi rankuma'amofo agi'a Avitie. Hagi agra Moapu mopafina Midieni vhahera zamahe vagare'ne. <sup>47</sup> Hagi Hadati'ma frigeno'a, Masreka kumateti ne' Samla agri nona erino kinia mani'ne. <sup>48</sup> Hagi Samla'ma frigeno'a, Yufretisi tinkenare, Rehoboti kumate ne' Sauli agri nona erino kinia mani'ne. <sup>49</sup> Hagi Sauli'ma frigeno'a Akbori nemofo Bal-hanani agri nona erino kinia mani'ne. <sup>50</sup> Hagi Bal-hanani'ma frigeno'a, Hadati agri nona erino kinia mani'ne. Rankuma'amofo agi'a Paie. Hagi Matreti mofa Mezahapu negeho, Mehetaberri ara eri'ne.

<sup>51</sup> Hagi Hadati'a fritegeno, Idomu kumate'ma vugotama hu'naza kva vahe'mofo zamagi'a ama'ne, Timna'ma, Alva'ma Jateti'ma, <sup>52</sup> Oholibama'ma, Ela'ma, Pinoni'ma, <sup>53</sup> Kenazi'ma, Temani'ma, Mibzari'ma, <sup>54</sup> Magdieli'ma Iramu'e. Hagi ama ana vahetamina makara Idomu kumate ugagota kva vahetami mani'naze.

## 2

### *Jekopuna (Israeli) 12fu'a ne' mofavre'amokizmi naneke*

<sup>1</sup> Hagi Israeli ne' mofavreramimofo zamagi'a ama'ne, Rubeni'ma, Simeoni'ma, Livae'ma, Juda'ma, Isaka'ma, Sebulunu'ma, <sup>2</sup> Dani'ma, Josefe'ma, Benzameniki, Naftaraki, Gatiki magora Asa'e.

<sup>3</sup> Hagi Juda'a Keneeni kumateti a' Betsua ara erino, 3'a ne' mofavrerami zmante'neankino zamagi'a, Eri'ma, Onani'ma, Sela'e. Hagi Judana agonesa ne'a Eri'a Ra Anumzamofo avufina kefo avu'ava higeno, Ra Anumzamo'a ahe fri'ne. <sup>4</sup> Hagi Juda'a nenoferona Temana a' erinte'negeno, Peresine Zerakiziana kasezanante'ne. Ana higeno ana maka ne' mofavreramina, Juda'a 5fu'a zamante'ne.

<sup>5</sup> Hagi Peresi'a, Hesronine Hamulikizni kasezanante'ne. <sup>6</sup> Hagi Sera ne' mofavreramimofo zamagi'a amane, Zimri'ma, Etani'ma, Hemani'ma, Kalkoli'ma, Darda'e. Hagi ana makara 5fu'a mofavrezaga Sela'a kasezamante'ne. <sup>7</sup> Hagi Karmi'a Israeli vahe'mo'zama Ra Anumzamofozane hu'zama eri ruotge'ma hu'naza zama eritenoma, Israeli vahe'ma hazenke'ma eri zami'nea nere. <sup>8</sup> Hagi Etani'a magoke mofavre Azaria kasente'ne.

### *Devitimpinti'ma fore'ma hu'naza vahe'mokizmi zamagimofo naneke*

<sup>9</sup> Hagi Hesroni ne' mofavreramimofo zamagi'a ama'ne, Jerameli'ma, Ramu'ma, Kalepi'e. <sup>10</sup> Hagi Ramu'a Aminadapu nef'a'e. Aminadapu'a Juda nagapima ugotama hu'nea ne' Nasoni nef'a'e. <sup>11</sup> Hagi Nasoni'a Salmoni nef'a'e. Salmoni'a Boasi nef'a'e. <sup>12</sup> Boasi'a Obeti nef'a'e, Obeti'a Jesi nef'a'e. <sup>13</sup> Hagi Jesi'ma ese ne'ma ante'neana Eliapu'e, namba 2 mofavrea Abinadapu'e, namba 3 mofavrea Simea'e, <sup>14</sup> namba 4 mofavrea Netaneli'e, namba 5 mofavrea Radai'e. <sup>15</sup> Hagi namba 6 mofavrea Ozemu'e, namba 7 mofavrea Deviti'e. <sup>16</sup> Hagi Jesi'a tare mofatre zanante'neankino, zanagi'a Zeruiake Abigelike. Hagi Zerulia ne' mofavreramimofo zamagi'a ama'ne, Abisai'ma, Joapu'ma, Asaheli'e. <sup>17</sup> Hagi Abigeli'a Ismaeli nagapinti ne' Jeterinte mani'neno, Amasana kasente'ne.

<sup>18</sup> Hagi Hesroni nemofo Kalepi'a, tare a' zanante'neankino zanagi'a Azubai'ene Jeriotike. Hagi Jerioti ne' mofavreramimofo zamagi'a amane, Jeseli'ma, Sobapi'ma, Aradoni'e. <sup>19</sup> Hagi Azuba'ma frigeno'a, Kalepi'a Efrati'e nehia a' erigeno, Huri kasente'ne. <sup>20</sup> Hagi Huri'a Uri nef'a'e. Uri'a Bezaleli nef'a'e.

<sup>21</sup> Hagi Hesroni'ma 60'a kafuma huteno'a, Makiri mofa Gilieti nesaro ara erigeno, Segupuna kasente'ne. <sup>22</sup> Hagi Segupu'a 23'a rankuma'ma Gilieti mopafima kegavama hu'nea ne' Jairi nef'a'e. <sup>23</sup> Hianagi Gesuri'ene Aramukea Jairina ha'eme hunteke, Jairi'ma kegavama hu'nea kuma'ene Kenati kuma'ene, 60'a kuma'ma megagi'neana eri'na'e. Hagi ana maka vahera Gilieti nef'a Makiri negehoza mani'naze.

<sup>24</sup> Hagi Abiza'a amu'ene hu'negeno neve Hesroni'a Kalepi Efrata kumate'ma fritegeno, Abiza'a Asurina kasentegeno, Asuri'a Tekoa rankumara azeri otino kine.

*Hesronipinti'ma fore'ma hu'naza mofavreramimofo zamagi krente'naza naneke*

<sup>25</sup> Hagi Hesroni agonesa mofavre Jeramel'i'ma kasezmante'nea neana, esetegati'ma agafama huno vu'nea nagamofo zamagi'a ama'ne, Ramu'ma, Buna'ma, Oreni'ma, Ozemi'ma, Ahiza'e. <sup>26</sup> Hagi Jeramel'i'a tare a' ante'neankino, Atara'e nehia a'mo, Onamuna kasente'ne. <sup>27</sup> Hagi Jeramelina ese ne'amofo agi'a Ramukino, Ma'azima, Jamin'i'ma, Ekerima huno kasezmante'ne. <sup>28</sup> Hagi Onamu nemofokea Samaike, Jadake. Hagi Samaia nemofokea, Nadapu'ene, Abisurike. <sup>29</sup> Hagi Abisuri nenaro agi'a Abihailikino, Abanikizni Molidikizni kasezanante'ne. <sup>30</sup> Hagi Nadapu nemofokea, Seletike, Apaimikegino, Seleti'a mofavrea onte'neno fri'ne. <sup>31</sup> Hagi Apaimi nemofo'a Isi'e. Isi nemofo'a Sesani'e, hagi Sesani nemofo'a Alai'e.

<sup>32</sup> Hagi Samai nefu, Jada nemofokea Jeterike, Jonatanike. Hagi Jeteri'a mofavrea onte'neno fri'ne. <sup>33</sup> Hagi Jonatani nemofokea Peletike, Zazake. Hagi zamagra Jeramel'i agehe'za mani'naze.

<sup>34</sup> Hagi Sesani'a ne mofavreramina ozmant'e neanki, mofanege zamante'ne. Hianagi Isipi eri'za ne' ante'neankino agi'a Jarha'e. <sup>35</sup> Ana hu'negu Sesani'a mofa'a amigeno, Isipi kumateti kazokzo ne'amo'a ara erino ne'mofavre Atai kasente'ne. <sup>36</sup> Hagi Atai'a Neteni nefae, Neteni'a Zabati nafa'e. <sup>37</sup> Hagi Zabati'a Epafali nefae, Epafali'a Obeti nefae. <sup>38</sup> Hagi Obeti'a Jehu nefae. Jehu'a Azaria nefae <sup>39</sup> Hagi Azaria'a Helezi nefae, Helezi'a Eleasa nefae. <sup>40</sup> Hagi Eleasa'a Sismai nefae, Sismai'a Salum nefae. <sup>41</sup> Hagi Salumu'a Jekamia nefae, Jekamaia'a Elisama nefae.

<sup>42</sup> Hagi Jeramel'i nefu Kalepi'a ese mofavrea Maresa kasentegeno, Maresa'a Zifi kasentegeno, Zifi'a Hebroni kasente'ne. <sup>43</sup> Hagi Hebroni ne' mofavremokizimi zamagi'a, Kora'ma, Tapua'ma, Rekemu'ma, Sema'e. <sup>44</sup> Hagi Sema'a Rahamu nefae, Rahamu'a Jorkeamu nefae. Hagi Rekemu'a Samai nefae. <sup>45</sup> Hagi Samai'a Maoni nefae, Maoni'a Bet-zuri nefae.

<sup>46</sup> Hagi Kalepina henka a'amofo agi'a Efakino, Haranima, Mozama, Gazezima huno kasezmante'ne. Hagi Harani'a Gazezi nefae. <sup>47</sup> Hagi Jadai ne' mofavreramimofo zamagi'a ama'ne, Regemi'ma, Jotami'ma, Gesani'ma, Peleti'ma, Efa'ma, Safu'e.

<sup>48</sup> Hagi Kalepina nampa 3 akanomofo agi'a Makakino Seberine Tirhanakizni kasezanante'ne. <sup>49</sup> Hagi ana nehuno Madmana nefae Safunena kasente'ne. Hagi mago ne'amofo agia Seva'e. Seva'a Makbenakizni Gibakizni neznafa'e. Hagi Kalepi'a magoke mofa ante'neankino agi'a Aksa'e.

<sup>50</sup> Hagi ama'i Kalepi agehemofa zamagi'e, Huri'a Efratana ese mofavre'amo'e. Hagi Huri'a Sobali nefae. Sobali'a Kiriat-Jearimi kuma eri fore hu'ne. <sup>51</sup> Hagi Salma'a Betlehemu kumara agra eri fore hu'nea nere. Hagi Harepi'a Betgaderi kumara agra erifore hu'neankino, Betgaderi kumamofo nefae. <sup>52</sup> Sobali'a Kiriat-Jearimi kuma'ma erifore hu'nea nere. Hagi Menuhoti nagara mago'a amu'nompinti'ma refko'ma hu'naza vahe'mokizmigu'ma Haroe nagarema nehaza vahe'mokizmi nezmageho'e. <sup>53</sup> Hagi Kiriat-Jearimi kumapinti'ma fore'ma hu'naza vahera, Itri vaheki,

Puti vaheki, Sumati vaheki, Misra vahe mani'naze. Hagi ana vahepinti Zorati vahe'ene Estaoli vahe'enena fore hu'za mani'naze.

<sup>54</sup> Hagi Salma agehe'mo'za ama'ne, Betlehemu vaheki, Netofa vaheki, Atrot-bet-Joapu vaheki, mago'a Manahati nagama amunompintima re-fkoma hu'naza vaheki, Zori vaheki hu'za mani'naze. <sup>55</sup> Hagi mago'a vahera avonkre eri'za e'neriza Jabesi kumate mani'naze. Hagi ana vahetmimofo zamagi'a amane, Tira vaheki, Simea vaheki, Suka vaheki hu'za mani'naze. Hagi e'i ana maka vahera, Keni vaheki'za, Hamati negehoze. Hagi Hamati'a Bet-Rekapu nagamofo nezmageho'e.

### 3

#### *Deviti nagapinti'ma fore'ma hu'naza vahe'mokizmi naneke*

<sup>1</sup> Hagi Deviti'ma Hebroni kumate'ma mani'neno'ma kasezamante'nea ne' mofavreramimofo zamagi'a ama'ne, Ese mofavrea Amoni'e. Amoni nerera'a Jezril kumateti akino, agi'a Ahinoamu'e. Hagi namba 2 ne' mofavre'a Danieli'e. Hagi Danieli nerera'a, Kameli kumateti akino agi'a Abigeli'e. <sup>2</sup> Hagi namba 3 ne' mofavre'a Absalomukino, nerera agi'a Maka'e Gesuri kumateti kini ne'mofo mofare. Hagi namba 4 mofavre'amofo agi'a Adoniza'e. Hagi nerera agi'a Hagiti'e. <sup>3</sup> Hagi namba 5fu mofavremofo agi'a Sefati'e. Hagi Sefati nerera agi'a Abitali'e. Hagi namba 6 mofavremofo agi'a Itreami'e. Hagi Itreami nerera agi'a Egl'a'e. <sup>4</sup> Hagi Deviti'ma Hebroni kumate'ma 7ni'a kafugi 6si'a ikama kinima mani'nea knafi kasezmante'nea 6si'a mofavreramine. Anama huteno'a Deviti'a mago'ane 33'a kafu Jerusalemi kumatera kinia mani'ne. <sup>5</sup> Hagi Deviti'ma Jerusalemi kumate'ma mani'neno kasezmante'nea mofavreramina amane, Simea'ma, Sobabu'ma, Neteni'ma, Solomoni'e. Hagi nezmarera'a Amieli mofakino, agi'a Batseba'e. <sup>6</sup> Hagi Deviti'a 9ni'a mofavrerami henka kase zmante'neankino zamagi'a amane, Ibari'ma, Elisama'ma, Elifeleti'ma, <sup>7</sup> Noga'ma Nefeki'ma, Jafia'ma, <sup>8</sup> magora ru Elisama'ma, Eliada'ma, Elifeleti'e. Ana makara 9ni'a mofavreramine. <sup>9</sup> Hagi e'i ana makara Deviti mofavreramine. Hagi nezamasaro agi'a Tamari'e. Devitina henka a'nearamimo'za ante'naza mofavreramina ama anampina ohampri'naze.

#### *Solomoni nagapinti'ma Juda vahe kinima fore'ma hu'naza naneke*

<sup>10</sup> Hagi Solomoni'a Rehoboamu nefae, Rehoboamu'a Abiza nefae, Abiza'a Asa nefae, Asa'a Jehosofati nefae, <sup>11</sup> hagi Jehosofati'a Joram nefae, Joram'u Ahazia nefae, Ahazia'a Joasi nefae, <sup>12</sup> hagi Joasi'a Amasia nefae, Amasia'a Azaria nefae, Azaria'a Jotamu nefae. <sup>13</sup> Hagi Jotamu'a Ahasi nefae, Ahasi'a Hesekaia nefae, Hesekaia'a Manase nefae, <sup>14</sup> hagi Manase'a Amoni kasentegeno, Amoni'a Josaia kasente'ne. <sup>15</sup> Hagi Josaia'a esera Johanan kasenteno, anantera Jehoiakimi kasenteno, namba 3 mofavrea Zedekaia kasenteno, namba 4 mofavrea Salumu kasente'ne. <sup>16</sup> Hagi Jehoiakimi'a Jekoniane Zedekaiakizni kasezanante'ne.

#### *Kini ne'mofo naga'ma Babilonima kinama hu'naza vahe'mofo naneke*

<sup>17</sup> Hagi ha' vahe'mo'zama avre'za Babilonima kinama ome hunte'naza kini ne' Jehoiakini mofavreramimofo zamagi'a ama'ne, Sealtiel'i'ma, <sup>18</sup> Malkiramu'ma, Pedaia'ma, Senazari'ma, Jekamaia'ma, Hosama'ma, Nedabia'e.

#### *Kinama hu'za Babilonima manafinti'ma atre'za e'naza vahe'mofo naneke*

<sup>19</sup> Hagi Pedai'a Zerubabeline Simeikizni zanante'ne. Hagi Zerubabeli'a Mesulamune Hananiakizni zanante'ne. Hagi neznasaro agi'a Selomit'e. <sup>20</sup> Hagi Pedai'a anahukna huno 5fu'a mofavrerami zamante'neankino zamagi'a ama'ne, Hasuba'ma, Oheli'ma, Berekia'ma, Hasadaia'ma, Jusapheseti'e. <sup>21</sup> Hagi Hananaia'a Pelataiane, Jesaiakizni kase zanante'ne. Hagi Jesaia'a Refaia' nefae', Refaia'a Arnani' nefae', Arnani'a Obadaia nefae', hagi Obadaia'a Sekanaia nefae'. <sup>22</sup> Hagi Sekanaimpintira 6si'a vahe forera hu'naze. Hagi Sekanai'a Semaia kasentetegeno, Semaia'a Hatusi'ma, Igali'ma, Baraia'ma, Nearia'ma, Safatima huno kasezmante'ne. <sup>23</sup> Hagi Nearia'a 3'a ne' mofavrerami zmante'neankino, zamagi'a ama'ne, Eliona'ma, Hizkaia'ma, Azrikamu'e. <sup>24</sup> Hagi Elionai'a 7ni'a ne' mofavrerami zmante'neankino, zamagi'a ama'ne, Hodavia'ma, Eliasibi'ma, Pelaia'ma, Akupu'ma, Johanani'ma, Delaia'ma Anani'e.

## 4

### *Mago'a Juda nagapinti'ma fore'ma hu'naza vahe'mokizmi naneke*

<sup>1</sup> Hagi mago'a Juda naga'mofo zamagi'a ama'ne, Peresi'ma, Hesroni'ma, Karmi'ma, Huri'ma, Sobali'e. <sup>2</sup> Hagi Sobali'a Reaia' nefae'. Reaia'a Jahati nafa'e, Jahati'a Ahumaine Lahatikizni neznafa'e. Hagi ama ana nagara Zora kumate'ma nemaniza vahepinti fore hu'naze.

<sup>3</sup> Hagi Etamu ne'mofavremofo zamagi'a ama'ne, Jezrili'ma, Isma'ma, Id-basa'e. Hagi nezmasaro agi'a Hazelelponi'e. <sup>4</sup> Hagi magora Penuelikino Gedori nefae'. Magora Ezerikino Husa kuma eri fore hu'ne. Hagi magora Hurikino Betlehemu Kuma azeri oti'nea nere. Hagi Huri'a Efratana ese mofavre'e.

<sup>5</sup> Asuhuri'a Tekoa kuma'ma eri fore'ma hu'nea nekino, tare a' zanante'neana zanagi'a Hela'ene Narake. <sup>6</sup> Hagi Nara'a Ahuzamima, Heferima, Temenima, Hahastarima huno kasezmante'ne. <sup>7</sup> Hagi Hela'a Zeretima, Izarima, Etnanima huno kasezmante'ne.

<sup>8</sup> Hagi Kozi'a Anupune, Zobebakizni kase zanante'neankino, agripinti Harumu nemofo Aharheli nagara efore hu'naze. <sup>9</sup> Hagi Jabesi'a afuhe'ina zmagatere'hea nekino vahe'mo'za kesga hu'za ragi nemiza nere. Hagi nerera'a, tusi'a nata negrig'e'na kasente'noe huno nehuno, Jabesi'e huno agi'a antemi'ne. <sup>10</sup> Hagi mago zupa Jabesi'a Israeli vahe'mofo Anumzantega amanage huno nunamuna hu'ne, Anumzamoka, asomu hunenantenka, mopanimofo agema'ama ome atre, eme atrema hu'neama'a eri ra ne-hunka, muse hugantoanki tava'onire mani'enka hazenke zama navate'ma ezankura kegava hunantegeno, natama namizamo'a navatera omeno. Einage huno nunamuna higeno, Anumzamo'a nunamu ke'a antahimino, nunamuma hiazana ami'ne.

<sup>11</sup> Hagi Suha nefu Kelupu'a Mehiri' nefae', Mehiri'a Estoni nefae', <sup>12</sup> hagi Estonia'a Bet-rafane, Paseane, Tehinama huno kasezmante'ne. Hagi Tehina'a Irnahasi nefae'. Hagi ama ana veneneramina Reka kumate venene mani'naze.

<sup>13</sup> Hagi Kenazi'a, Otnielikizni, Seraiakizni neznafa'e. Hagi Otniel'i'a Hatatikiznine Meonotaikizni neznafa'e. <sup>14</sup> Hagi Meonotai'a Ofra nefae'. Hagi Seraia'a Joapu nefae', Joapu'a Ge-harasim kasente'ne. Hagi Ge-harasimi'ema hu'neana, na'ankure maka'zama zamazantetima tro'ma nehaza vahera agripinti efore hu'naze.

<sup>15</sup> Hagi Jefune nemofo Kalepi ne' mofavre'ramimofo zamagi'a ama'ne, Iruma, Ela'ma, Na'amue'e. Hagi Ela'a Kenazi nefae'e. <sup>16</sup> Jehaleleli ne' mofavreramina ama'ne, Zifi'ma, Zifa'ma, Tiria'ma, Asareli'e.

<sup>17</sup> Hagi Ezra ne' mofavremokizimi zamagi'a, Jeteri'ma, Meredi'ma, Eferima, Jaroni'e. Hagi Meredi'a Fero mofa Bitia ara eri'ne. Hagi ana a'mo'a Miriamuma, Samaima, Isbama huno kasezmante'e. Hagi Isba'a Estemoa kuma azeri otine. <sup>18</sup> Hagi Mereti'a Juda kumateti a' erineno Jereti kasentegeno, Jeretia Gedori kuma azeri otine'a nere. Hagi Heberi'a Soko kuma azeri otine'a nere. Jekutieli'a Zanoa kuma azeri otine'a nere.

<sup>19</sup> Hodia nenaro'a Nahamu nesaro'e. Hagi e'i ana veatremokea tare mofavre zanantena'ankino mago nemofo'a Keila kumara azeri otigeno, agripinti Garmi vahera efore hazageno, mago nemofo'a Estemoa kuma azeri otigeno, Ma'aka vahera agripinti efore hu'naze.

<sup>20</sup> Hagi Simeoni ne' mofavremokizmi zamagi'a, Amnonima, Rina'ma, Ben-hananim, Tiloni'e. Hagi Isi'a Soheti naga'ene Ben-soheti nagamofo nezamageh'o'e.

<sup>21</sup> Hagi Juda nemofo Sela ne' mofavreramimofo zamagi'a, Erikino Leka kuma azeri otigeno, Maresa kumama azeri otine'a nera Lada mani'ne. Hagi Lada naga'mo'za Bet-Asbea kumate mani'ne'za efeke huno knare'ma hu'nea tavravema tro'ma nehaza naga mani'naze. <sup>22</sup> Hagi mago mofavrea Jokimikino, Koseva vahe'ene Joasi vahe'ene Sarafu vahe'enena agripinti efore hu'za mani'neza, Moapu mopane Jasuvi-Rehemu mopanena kegava hu'naze. (Ama ana zamagi zamagenkema krente'nazana korapa knafi krente'naze.) <sup>23</sup> Hagi ama ana vahetmina Netamu kumate'ene Gedera kumate'ene mani'ne'za, mopa kavo tro nehu'za, kini ne' eri'za eneriza nemaniza vahetami mani'naze.

### *Simeonimpinti'ma fore'ma hu'naza vahe'mofo naneke*

<sup>24</sup> Hagi Simioni ne' mofavreramimofo zamagi'a, Nemueli'ma, Jamini'ma, Jaribi'ma, Zera'ma, Sauli'e. <sup>25</sup> Hagi Sauli'a Salumu nefae'e, Salumu'a Mibsamu nefae'e, Mibsamu'a Misma nefae'e. <sup>26</sup> Hagi Misma agehemokizmi zamagi'a ama'ne, Misma'a Hamueli nefae'e, Hamueli'a Zakuri nefae'e, Zakuri'a Simei nefae'e. <sup>27</sup> Hagi Simei'a 16ni'a ne' mofavreraminki 6si'a mofanegi huno zamante'ne. Hianagi afuhemo'za mofavrea rama'a onte'nazageno, mago'a Juda naga'mozama hazaza hu'za Simeoni naga'mo'za rama'a vahera forera osu'naze.

<sup>28</sup> Hagi Simioni naga'mo'za Berseba kumapima, Molada kumapima, Hazar-Sual Kumapima, <sup>29</sup> Bilha kumapima, Ezemi kumapima, Toladi kumapima, <sup>30</sup> Betueli kumapima, Homa kumapima, Ziklagi kumapima, <sup>31</sup> Bet-Makaboti kumapima, Hazar-Susim kumapima, Bet-Biri kumapima, Saraim kumapima hu'za mani'naze. Hagi Simeon naga'mo'za ama ana kumatminte mani'nazageno Deviti'a kinia efore hu'ne. <sup>32</sup> Hagi mago'a zamagehemo'za 5fu'a neonese kumapi mani'naze. Ana kumatmimofo zamagi'a, Etamu kuma'ma, Aini kuma'ma, Rimoni kuma'ma, Tokeni kuma'ma, Asani kumapima hu'za mani'naze. <sup>33</sup> Hagi neone kumatmima ana rankumatmimofoma megagitere huno Balatima ome atre'nea kumatmimpine mani'naze. E'ina maka Simioni nagamofo kumataminkino, mikha zamagehemo'za zamagiramine zamagri zamagiraminena, avontafeipi krente'naze.

<sup>34</sup> Hagi mago'a Simeonimpinti'ma fore'ma hu'naza vahetmimofo zamagi'a, Meshobapu'ma, Jamleki'ma, Amasia nemofo Josa'e. <sup>35</sup> Joeli'ma, Josibia nemofo Jehu'ma, Jehu nemofo Seraia'ma, Seraia nemofo Aserima,

<sup>36</sup> Elioenai'ma, Jakoba'ma, Jesohaiama, Asaia'ma, Adiel'i'ma, Jesimieli'ma, Benaia'ma, <sup>37</sup> Sifi nemofo Siza'ma, Aloni nemofo Jedaia'ma, Jedaia nemofo Simri'ma, Simri nemofo Semaia'e. <sup>38</sup> E'i ama ana vahetamina Simioni naganofite'ma ugota huterema hu'naza vahe'mofo zamagi krente'naze. Hagi ana naga'nofimo'za rama'a vahe fore hu'naze. <sup>39</sup> Hagi sipisipi afutamine bulimakao afuzagamofo trazankura agupomofo zage hanati kaziga Gedori mopafi hake'za vu'naze. <sup>40</sup> E'ina mopama ome kazana trazamo'a knare hu'ne. Hagi ana mopamo'a kahesa huno ra higeno, ana kumapi vahe'mo'za hafra osu fru hu'za knare hu'za mani'naze. Na'ankure ana agupofina Hamu nagake kora mani'nazane. <sup>41</sup> Hianagi Juda ne' Hezekai'a'ma kinima mani'nea knafi Simioni naga'mo'za vu'za, Hamu naga'en'e Meuni naga'enena ome ha'huzmante'za nonkumazmia taganavaziza maka zazmia eri haviza nehu'za zamahe vagare'naze. Na'ankure ana mopafina trazamo'a avitegeno sipisipi afu'ene, bulimakao afutaminema kegavama hu'areraka knare hu'ne.

<sup>42</sup> Hagi Simioni nagapinti'ma 500'a vahe'ma zamavare'za Seiri agona kokantegama Idomu kaziga vu'naza kva vhahera Isi mofavreramink'i'za Pelatiama, Neariamama, Refaiama, Uzieli'e. <sup>43</sup> Hagi korapama Amaleki vhahera Israeli vahe'mo'zama zamahe vagarazageno osi'a naga'ma koro frezama ana kazigama umani'naza vhahera Simioni naga'mo'za ome zamahe vagare'za ana mopafi mani'za e'za ama knarera menina ehanati'naze.\*

## 5

### *Rubenimpinti'ma fore'ma hu'naza vahe'mokizmi naneke*

<sup>1</sup> Hagi Israelina ese mofavre'a Rubeni'e. Hianagi Rubeni'a nefana mago a'amofo anteno maseno nefaa agia eri haviza hu'ne. E'ina hu'negu ese mofavremofo asomura agra e'ori'neanki, negna Josefe mofavreramimo'za eri'naze. E'i ana agafare Israeli mofavreramofo zamagima krente avontafepina esera Rubeni agia omneneanki, Josefe agi me'ne. <sup>2</sup> Hagi Juda naga'mo'za hankavenentake vahe fore hazageno, Israeli vahe kva zamagripinti fore hu'nazanagi, ese mofavremofo asomura Josefe nagapi me'ne.

<sup>3</sup> Hagi Israelina ese mofavre'a, Rubenikino agri mofavreramimofo zamagi'a, Hanoki'ma, Palu'ma, Hesroni'ma, Karmi'e.

<sup>4</sup> Hagi Joelimpinti'ma fore'ma hu'nazana, Joeli'a Semaia'a nefaa'e, Semaia'a Gogi nefaa'e, Gogi'a Simei nefaa'e, <sup>5</sup> hagi Simei'a Maika nefaa'e, Maika'a Reaia nefaa'e, Reaia'a Ba'ali nefaa'e, <sup>6</sup> hagi Ba'ali'a Bera nefaa'e. Hagi Asiria kini ne'Tiklat-pilesama zamaheno kinama ome huzmantea knafi Bera'a Rubeni nagatera vugota huzmanteno kva mani'ne.

<sup>7</sup> Hagi Bera nagamofo zamagia Rubeni nagamofo zamagima krente'naza avontafepi krente'naze. Hagi Jeiei'a ugota higeno Zekaraia ehenka higeke kva mani'na'e. <sup>8</sup> Hagi Asasi nemofo'a Bela'e, Bela nemofo'a Sema'e, Sema nemofo'a Joeli'e. Hagi Rubeni naga'ma mani'naza mopa Aroeri kumateti evuno, Nebo kumate uhanatiteno, Bal-Meoni kumate ometre'ne. <sup>9</sup> Hagi mago'amo'za zage hanati kaziga Yufretisi timofo kama kaziga ka'ma kokampi mani'naze. Na'ankure Sipisipi afu'zamimozane Bulimakao afuzmimozanena Gileati mopafina anentara kasepazi hu'za mani avite'nazageno'e.

\* <sup>4:43</sup> Ama knareremra hu'neana, ama meni tagri knafinkura osu'neanki korapa knafinku hu'naze.

<sup>10</sup> Hagi Soli'ma kinima mani'nea knafina, Rubeni naga'mo'za Hagar kumate vhahera ha' huzamagetere'za Giliati mopamofona zage hanati kaziga ana vahe'mokizmi kumapi mani'naze.

### *Gati naga'mofo nanek*

<sup>11</sup> Hagi Gati naga'mo'za mago kaziga asoparega Basani kumateti agafa hute'za mani'za vu'za Saleka kumate ome atre'naze. <sup>12</sup> Hagi Basani mopa-fina Joeli vugota huno kva mani'nege, Safamu anante kva manigeno, Safamu amefira Janai manigeno, Janai amefira Safati kva mani'n'e. <sup>13</sup> Hagi Gati nagapina 7ni'a naga nofi mani'nazankino ana naga nofimofo kva vhett-mimofo zamagi'a, Maikoli'ma, Mesulamu'ma, Seba'ma, Jorai'ma, Jakani'ma, Zia'ma, Eberi'ma hu'za maka'a seveni'a mani'naze.

<sup>14</sup> Hagi ama nagara Abbihaili agehemo'ze. Abbihailia Huri nemofo'e, Huri'a, Jaroa nemofo'e, Jaroa'a Gileati nemofo'e, Gileati'a Maikoli nemofo'e, Maikoli'a Jesusai nemofo'e, Jesusai'a Jado nemofo'e. Hagi Jado'a Buzi nemofo'e. <sup>15</sup> Hagi Ahi'a ana nagamofo ugagota kva mani'n'e. Hagi Ahi'a Abdieli nemofo'e, Abdielina Guni kasente'ne.

<sup>16</sup> Hagi Gati naga'mo'za Giliati mopa-fine Basani kumate'ene mago'a neone kumatmimpine, knare'ma huno tretre'ma hu'nea Saroni mopamofo agentega mani'za vu'naze. <sup>17</sup> Hagi Juda kini ne' Jotamu knafine, Israeli vahe kini ne' Jeroboamu knafi ana maka nagamofo zamagia avontafepina maka krente'naze.

<sup>18</sup> Hagi 44 tausen 760'a hankavematinha'ma huga vhahera Rubeni nagapine, Gati nagapine, Manase nagama amu'nompinti'ma refkoma hu'za mago kaziga mani'naza nagapine mani'naze. Hagi e'i ana vahe'amo'a hankoma erineno kazintetima ha'ma hu'are'ene, kevema ahe'arera knare zantfa hu'naza vahe mani'naze. <sup>19</sup> Hagi ana vahe'mo'za, Hagari vahe'ma, Jeturi vahe'ma, Nafisi vahe'ma Nodapu vahe'mokizmi hara huzmante'naze.

<sup>20</sup> Hagi ha'ma nehu'za Anumzamofontega nunamuna hu'za krafa hazageno, Anumzamo'a nunamu kezvia antahizmino zamaza hige'za, Hagar vahe'ene zamagenaregama eme ante'za ha'ma huzmantaza vahe'enena zamahe vagare'naze. Na'ankure zamagra Anumzamofonte zamentinti hu'nazagu Anumzamo'a zamaza hu'n'e. <sup>21</sup> Hagi Israeli vahe'mo'za Hagar vahe'ma zamahe'zama eri'naza zantamina 50 tauseni'a kemoli afutminki, 250 tauseni'a Sipisipi afutminki, 2 tauseni'a tonki afutminki, 100 tauseni'a vhahetamine kina huzmante'za zamavare'za e'naze. <sup>22</sup> Hagi ana hapina rama'a Hagar vhahera zamahe'naze. Na'ankure Anumzamo Agra'a hara huzmante'naze. Hagi ana hute'za Rubeni naga'ma Gati naga'ma mago'a Manase naga'mo'za ana mopafi mani'nazageno Asiria vahe'mo'za eme zamahe'za kina huzmante'za zamavare'za vu'naze.

<sup>23</sup> Hagi mago'a amu'nompinti'ma refkoma hu'naza Manase naga'mo'za rama'a vahe fore hu'za Basani kumate-tira maninime vu'za Bal-hermoni kumate uhanati'za, Bal-hermoni kumate-tira Senir kumate uhanatite'za, maniza Hermoni agonare uhanati'za rama'a vahe mani'naze. <sup>24</sup> Hagi ana naga nofipima harafa vahe'ma mani'nazageno zamagima me'nege'za nagazmire'ma ugagotama hu'naza vhahetmimofo zamagia, Eferi'ma, Isi'ma, Elieli'ma, Azrieli'ma, Jeremaia'ma, Hodavia'ma, Jadieli'e.

<sup>25</sup> Hianagi ana naga'mo'za monko a'nemo'za ve'a atreno ru vene savri hiaza hu'za zamagehemofo Anumzantera mani fatgo hu'za mani'n'e'za zamentintia nosu'za ovariri'naze. Hagi ana mopafi vahe'ma Anumzamo'ma zamahe fananema hu'nea vhahetmimofo havi anumzantami nevaririza

monora huzmante'naze. <sup>26</sup> E'ina hazageno Anumzamo'a Asiria kini ne' Pulina (mago agi'a Tiglat-pileser) arimpa azeri otigeno Rubeni naga'e Gati naga'ene amu'nompinti refkoma hu'naza mago'a Manase nagara eme zamaheno kina huzmanteno zamavareno vuteno Hala kumate'ma, Habori kumate'ma, Hara kumate'ma, Gosani tinte ome zamantenge'za mani'za e'za \*meninena mani'naze.

## 6

### *Livae nagapintima fore'ma hu'naza vahe'mokizmi naneke*

<sup>1</sup> Livae ne' mofavrermimofo zamagi'a, Gersonima, Kohati'ma, Merari'e. <sup>2</sup> Hagi Kohati ne' mofavrermimofo zamagi'a, Amramu'ma, Izari'ma, Hebroni'ma, Uzieli'e. <sup>3</sup> Hagi Amramu mofavrermimofo zamagi'a, Aroni'ma, Moses'i'ma, Miriamu'e. Hagi Aroni ne' mofavrermimofo zamagi'a, Nadapu'ma, Abihu'ma Eleaza'ma, Itamari'e.

<sup>4</sup> Hagi Eleaza'a Finiasi nefae, Finiasi'a Abisua nefae, <sup>5</sup> hagi Abisua'a Buki nefae, Buki'a Uzi nefae. <sup>6</sup> Hagi Uzi'a Zerahia nefae, Zerahia'a Meraioti nefae, <sup>7</sup> hagi Meraioti'a Amaria nefae, Amaria'a Ahitupu nefae, <sup>8</sup> Ahitupu'a Zadoki nefae, Zadoki'a Ahima'azi nefae, <sup>9</sup> Ahima'azi'a Azaria nefae, Azaria'a Johanani nefae, <sup>10</sup> Johanani'a Azaria nefae mani'ne. Ana hu'neakino Solomoni'ma Jerusalemima ra mono noma ki'nea knafina Azaria ugagota pristi nera mani'ne. <sup>11</sup> Hagi Azaria'a Amaria nefae, Amaria'a Ahitupu nefae, <sup>12</sup> hagi Ahitupu'a Zadoki nefae, Zadoki'a Salumu nefae, <sup>13</sup> Salumu'a Hilkia nefae, Hilkia'a Azaria nefae, <sup>14</sup> Azaria'a Seraia nefae, Seraia'a Jehozadaki nefae. <sup>15</sup> Hagi Ra Anumzamo'ma Juda vahe'ene Jerusalemi vahe'enema Nebukaneza azampima zamavarentegeno'ma kinama huzmanteno zamavarenoma vu'nef, Jehozadakina avreno Babiloni vu'ne.

<sup>16</sup> Hagi Livae ne' mofavrermimofo zamagi'a, Gesoni'ma, Kohatima, Merari'e. <sup>17</sup> Hagi Gesoni ne' mofavrermimofo zanagi'a, Libnike, Simeike. <sup>18</sup> Hagi Kohati ne' mofavrermimofo zamagi'a, Amramu'ma, Izari'ma, Hebroni'ma, Uzieli'e. <sup>19</sup> Hagi Merari ne' mofavrermimofo zanagi'a, Malike, Musike. Hagi ama ana makara Livae nagapinti'ma fore hu'naza naga nofite'ma ugotama huterema hu'naza vahe'mokizmi zamagi'e.

<sup>20</sup> Hagi Gesonimpinti'ma fore'ma hu'nea vhahera, Gesoni'a Libni nefae, Ribni'a Jahati nefae, Jahati'a Zima nefae, <sup>21</sup> hagi Zima'a Joa nefae, Joa'a Ido nefae, Ido'a Zera nefae, Zera'a Jeaterai nefae. <sup>22</sup> Hagi Kohatipinti'ma fore'ma hu'nea vhahera, Kohati'a Aminadapu nefae, Aminadapu'a Kora nefae, Kora'a Asiri nefae, <sup>23</sup> hagi Asiri'a Elkana nefae, Elkana'a Ebiasapu nefae, Ebiasapu'a ru Asiri nefae, <sup>24</sup> hagi Asiri'a Tahati nefae, Tahati'a Uriel nefae, Urieli'a Uzia nefae, hagi Uzia'a Sauli nefae.

<sup>25</sup> Hagi Elkana ne' mofavrermimofo zanagi'a, Amasaike, Ahimotike. <sup>26</sup> Hagi Elkanampinti'ma fore'ma hu'naza vahe zamagi'a, Elkana'a Zofai nefae, Zofai'a Nahati nefae, <sup>27</sup> hagi Nahati'a Eliapu nefae, Eliapu'a Jerohamu nefae, Jerohamu'a Elkana nefae.

<sup>28</sup> Hagi Samueli ne' mofavrermimofo zanagi'a, ese mofavrea Joel'i'e, hagi anante'mo'a Abija'e.

<sup>29</sup> Hagi Merarimpinti'ma fore'ma hu'naza vahe'mofo zamagi'a, Merari'a Mali nefae, Mali'a Libni nefae, Libni'a Simea nefae, Simea'a Uza nefae, <sup>30</sup> Uza'a Simea nefae, Simea'a Hagia nefae, Hagia'a Aisaia nefae.

\* <sup>5:26</sup> Meninena huno'ma hu'neana, avontafema kre'nea knagu hu'naze.

*Mono nompima zavenama nehe'za zagame'ma nehaza vahe'mokizimi zamigofo naneke*

<sup>31</sup> Hagi Deviti'ma huhagerafi huvempage vogisima Ra Anumzamofo seli mono nompima erinoma omenteteno'a, zavenama aheno zagame'ma hu vahetmina, ama'na vahetami zamazeri oti'ne. <sup>32</sup> Hagi ana vahe'amo'za seli nompima zavenama aheno zagamema hu zanteria kegava hu'ne'za ana eri'zana e'nerizageno vuno Solomoni'ma Ra Anumzamofo ra mono nona Jerusalemi kumate kige'za, rempima hu'naza kante ante'za mono nompina maka zana hu'naze.

<sup>33</sup> Hagi ana vahezagane mofavrezmimofo zamagi'a ama'ne, mago'ma zavenama aheno zagamema nehia nera Hemani'e. Agra Kohati nagapinti nere. Hagi Hemani'a Joeli nemofo'e, Joeli'a Samueli nemofo'e, <sup>34</sup> hagi Samueli'a Elkana nemofo'e, Elkana'a Jerohamu nemofo'e, Jerohamu'a Elieli nemofo'e, Elieli'a Toa nemofo'e, <sup>35</sup> hagi Toa'a Zufu nemofo'e, Zufu'a Elkana nemofo'e, Elkana'a Mahati nemofo'e, Mahati'a Amasai nemofo'e. <sup>36</sup> Hagi Amasai'a Elkana nemofo'e, Elkana'a Joeli nemofo'e, Joeli'a Azaria nemofo'e, Azaria'a Zefania nemofo'e, <sup>37</sup> hagi Zefania'a Tahati nemofo'e, Tahati'a Asiri nemofo'e, Asiri'a Ebiasapu nemofo'e, Ebiasapu'a Kora nemofo'e. <sup>38</sup> Hagi Kora'a Izari nemofo'e, Izari'a Livae nemofo'e hagi Livae'a Israeli nemofo'e.

<sup>39</sup> Hagi Hemanima azama hania ne'ma Deviti'ma azeri oti'neana, Gesoni nagapinti ne' Asapu azeri oti'ne. Hagi Asapu'a Bereki'a nemofo'e, Bereki'a Simea nemofo'e. <sup>40</sup> Hagi Simea'a Maikoli nemofo'e, Maikoli'a Basea nemofo'e, Basea'a Malkia nemofo'e. <sup>41</sup> Hagi Malkia'a Etni nemofo'e, Etni'a Zera nemofo'e, Zera'a Adaia nemofo'e. <sup>42</sup> Hagi Adaia'a Etani nemofo'e, Etani'a Zima nemofo'e, Zima'a Simei nemofo'e, <sup>43</sup> hagi Simei'a Jahati, nemofo'e, Jahati'a Gesoni nemofo'e, Gesoni'a Livae nemofo'e.

<sup>44</sup> Hagi Hemanima azama hania ne'ma mago'ma azeri oti'neana Merari nagapinti ne' Etani'e. Etani'a Kisi nemofo'e, Kisi'a Abdi nemofo'e, Abdi'a Maluku nemofo'e. <sup>45</sup> Hagi Maluku' Hasabia nemofo'e, Hasabi'a Amasia nemofo'e, Amasia'a Hilkia nemofo'e. <sup>46</sup> Hagi Hilkia'a Amzi nemofo'e, Amzi'a Bani nemofo'e, Bani'a Semeri nemofo'e. <sup>47</sup> Hagi Semeri'a Mali nemofo'e, Mali'a Musi nemofo'e, Musi'a Merari nemofo'e. Hagi Merari'a Livae nemofo'e. <sup>48</sup> Hagi mago'a Livae vahetamimo'za Anumzamofo nompi eri'za maka eri'naze.

<sup>49</sup> Hianagi Aroni'ene mofavrezaga'amo'zanena kre sramnamavu itare'ma ofama hu eri'zanki Ruotgema huno Ruotgema Hu'nefinkama mnenantake'za insensima kre mnamatavu eri'zanki hu'za eri'naze. Hagi Anumzamofo eri'za ne' Mosese'ma hihoma huno huzmante'nea kante ante'za Israeli vahe'mofo kumizmiguma nona huno apasezmante eri'zana eri'naze.

<sup>50</sup> Hagi Aronimpinti'ma fore'ma hu'naza vahera, Aroni'a Eleaza nef'a'e, Eleaza'a Finiasi nef'a'e, Finiasi'a Abisua nef'a'e. <sup>51</sup> Hagi Abisua'a Buki nef'a'e, Buki'a Uzi nef'a'e, Uzi'a Zerahia nef'a'e. <sup>52</sup> Hagi Zerahia'a Meraioti nef'a'e, Meraioti'a Amaria nef'a'e, Amaria'a Ahitubu nef'a'e. <sup>53</sup> Hagi Ahitubu'a Zadoku nef'a'e, Zadoku'a Ahimasi nef'a'e.

<sup>54</sup> Hagi Israeli vahe'mo'zama, ese satu zokagoma re'za nege'za, mopama refkoma hu'za Aronimpinti'ma fore'ma hu'naza Kohati naga nofi'ma zami'zage'za eri'nazana amanahu hu'ne. <sup>55</sup> Juda naga'mofo mopafi Hebron kuma'ene, tra'zamo'ma knare'ma hu'nea mopama ana kumamofoma megagi'nea mopane zami'naze. <sup>56</sup> Hianagi hoza mopane Hebron kuma

tavaonte'ma me'nea neonse kumataminena Jefune nemofo Kalepi ami'naze.  
 57 Hagi Aroni nagara ama'na mopane, sipisipi afu'ene bulimaka afu'enema kegavama hu mopa zamatere hu'ne. Hebroni kuma'ma, Libna kuma'ma, Jatiri kuma'ma, Estemoa kuma'ma, <sup>58</sup> Holoni kuma'ma, Debiri kuma'ma, <sup>59</sup> Asan kuma'ma, Beth-semesi kumama Juda kumare. <sup>60</sup> Hagi Benzameni nagamofo mopafima, mopama refko hu'zama Aroni naga'ma zami'nazana, Gibioni kuma'ene, afu'ma kegavama hu mopane, Gebane afu'ma kegava hu mopane, Alemeti kuma'ene sipisipine bulimakao afuma kegavama hu mopane, Anatoti kuma'ene afu'ma kegavama hu mopane zami'naze. Hagi ana nagara 13ni'a kuma ana maka Israeli mopafina zami'naze.

<sup>61</sup> Hagi mago'a Kohati naga'ma mani'naza naga'ma kumama zami'nazana, Manase naga'ma amu'nompintima refkoma hu'naza nagamofo mopafinti satu zokago re'za nege'za 10ni'a kuma refko huzami'naze.

<sup>62</sup> Hagi Basani mopa agu'afima me'nea kumatamimpintira Gesoni nagama, nagate nofite hu'za zami'nazana, Isaka naga mopafine, Aseli naga mopafine, Naftali naga mopafine, Manase naga mopafintira 13ni'a kuma zami'naze.

<sup>63</sup> Hagi Merari naganofima 12fu'a kuma'ma refkoma hu'za zami'nazana, Rubeni naga mopafine, Gati naga mopafine, Zebuluni naga mopafine zami'naze.

<sup>64</sup> E'ina hu hu'za Israeli vahe'mo'za Livae nagara kuma'ene, sipisipizmine bulimakao afu'zmima antesaza mopa zamatere hu'naze. <sup>65</sup> Hagi Juda naga mopafima, Simioni naga mopafima, Benzameni naga mopafinema, me'nea kumatamima zamagima krente'naza kumatamina satu zokago re'za nege'za, zamatere hu'naze.

<sup>66</sup> Hagi mago'a kumatamima Kohati naga'mo'zama eri'nazana, Efraemi naga mopafi me'nea kumatami eri'naze. <sup>67</sup> Hagi Israeli vahe'mo'za zamu'vazi kumarema hu'za tro'ma hu'naza kumatmima Efraemi agona kokampi me'neana Sekemu kuma'ene Sipisipine bulimakao afuzmima antesaza mopane, Gezeri kuma'ene zagagafa zamima antesaza mopane, <sup>68</sup> Jokmeamu kuma'ene sipisipine bulimakao afu'zamima antesaza mopane, Bet-horoni kuma'ene sipisipine bulimakao zamima antesaza mopane, <sup>69</sup> Ajalonii kuma'ene sipisipine bulimakao zamima antesaza mopane, Gatrimoni kuma'ene sipisipine bulimakao zamima antesaza mopa zami'naze. <sup>70</sup> Hagi mago'a Kohati naga'mo'zama kuma'ene sipisipine bulimakao zamima antesaza mopanema eri'nazana, amu'nompintima refkoma hu'naza Manase nagamokizmi mopafinti Aneri kuma'ene sipisipine bulimakao zmima antesaza mopanena zami'naze.

<sup>71</sup> Hagi amu'nompinti'ma refko'ma hu'naza Manase nagamofo mopafinti'ma Gesomu naga nofi'ma kuma'ene mopanema refko hu'zami'nazana Gorani kuma'ene sipisipine bulimakao zamima antesaza mopa refko hunezamiza, Astaroti kuma'ene sipisipine bulimakao zamima antesaza mopanena refko huzami'naze. <sup>72</sup> Hagi Isaka nagamokizmi mopafina mago'a kuma'ene sipisipine bulimakao zamima antesaza mopa me'ne. Hagi ana kumatmimofo zamagi'a, Kedesi kuma'ene sipisipine bulimakao zamima antesaza mopane, Daberati kuma'ene sipisipine bulimakaoma antesaza mopane, <sup>73</sup> Ramoti kuma'ene Anemi kuma'ene sipisipine bulimakao zamima antesaza mopanena eri'naze. <sup>74</sup> Hagi mago'a kuma'ene sipisipine bulimakao zamima antesaza mopanema zami'nazana,

Aseli naga'ma mani'naza mopafi zami'naze. Hagi ana kumatmimofo zamagi'a, Masali kuma'ene sipisipine bulimakao zmima antesaza mopane, Abdoni kuma'ene sipisipine bulimakao'zmima antesaza mopane,<sup>75</sup> Hukoki kuma'ene sipisipine bulimakao'zmima antesaza mopane, Rehobu kuma'ene sipisipine bulimakao'zmima antesaza mopane zami'naze.<sup>76</sup> Hagi mago'a kumama zami'nazana, Galili kaziga Naftali naga mopafi zami'nazankino, Kedesi kuma'ene sipisipine bulimakao zmima antesaza mopane, Hamoni kuma'ene, sipisipine bulimakao zamima antesaza mopane, Kiriataimi kuma'ene sipisipine bulimakao zmima antesaza mopa zami'naze.

<sup>77</sup> Hagi mago'a Merari naga'ma maniza naga'ma kuma'ene sipisipine bulimakao zmima antesaza mopa zami'nazana, Zebuluni nagamofo mopafi zami'naze. Hagi ana kumatremofo zanagi'a, Rimono kuma'ene sipisipine bulimakao zmima antesaza mopane, Tabori kuma'ene sipisipine bulimakao zamima antesaza mopanena zami'naze.<sup>78</sup> Hagi Rubeni nagamofo mopa Jordani timofo zage hanati kaziga Jeriko kuma'mofa kama kaziga me'ne. Hagi ana naga'mofa mopafima kuma'ene sipisipine bulimakao zamima antesaza mopama zami'naza kumatamimofo zamagia, ka'ma kopima me'nea Bezeri kuma'ene sipisipine bulimakao zmima antesaza mopane Jaza kuma'ene sipisipine bulimakaozmima antesaza mopane,<sup>79</sup> Kedemoti kuma'ene sipisipine bulimakao zmima antesaza mopane, Mefati kuma'ene sipisipine bulimakao zmima antesaza mopane zami'naze.<sup>80</sup> Hagi Gati nagamofo mopafintira Giliati kaziga Ramoti kuma'ene sipisipine bulimakao zmima antesaza mopane, Mahanaimu kuma'ene sipisipine bulimakao zmima antesaza mopane,<sup>81</sup> Hesboni kuma'ene sipisipine bulimakao zmima antesaza mopane, Jazeri kuma'ene sipisipine bulimakao zmima antesaza mopane, zami'naze.

## 7

### *Isakampinti'ma fore'ma hu'naza vahe'mokizmi naneke*

<sup>1</sup> Hagi Isakana 4'a ne' mofavreramimofo zamagi'a, Tola'ma, Pua'ma, Jaspupu'ma, Simroni'e. <sup>2</sup> Hagi Tola ne' mofavreramimofo zamagi'a, Uzi'ma, Refaia'ma, Jeriel'i'ma, Jamai'ma, Ipsamu'ma, Samueli'e. Hagi ama ana vahetamina Tola nagapina mago mago naga nofimofo ugagota kva vahetami ana knafina mani'naze. Hagi ana nagapinti'ma hankavenentake sondia vahetmimofo zamagima Deviti'ma kini mani'nea knafima kre'za eri fatgoma hu'nazana, 22tausen 600'a vahetami zamagi avontafeppina krente'naze. <sup>3</sup> Hagi Uzia nemofo'a Izrahia'e. Hagi Izrahia ne' mofavreramimofo zamagi'a, Maikoli'ma, Obadaia'ma, Joeli'ma, Isia'e. Hagi ana maka 5fu'amo'za nagazmirera ugagota kva vahe manitere hu'naze. <sup>4</sup> Hagi ana nagapintira, ha'ma huga vahetamina 36 tauseni'a sondia vahetami fore hu'naze. Na'ankure ana naga'mo'za hakare'a a'neramine ne' mofavreramine zamante'naze. <sup>5</sup> Hagi Isaka nagapintima zamagima kre'za eri fatgoma hu'nazana 87 tauseni'a sondia vahetmimofo zamagi kre'za eri fatgo hu'naze.

### *Benzameninpinti'ma fore'ma hu'naza vahe'mokizmi naneke*

<sup>6</sup> Benzameni'a 3'a ne' mofavrerami zamante'neankino zamagi'a, Bela'ma, Bekeri'ma, Jediaeli'e. <sup>7</sup> Hagi Bela'a 5fu'a ne' mofavrerami zamante'neankino, zamagi'a, Ezbonima, Uzi'ma, Uzieli'ma, Jerimoti'ma, Iri'e. Hagi mago'magomo'a naga'amofonte ugagota kva vahe manitere hu'naze. Hagi ana nagapinti'ma sondia vahetmimofo zamagima kreza eri

fatgoma hu'nazana 22tausen 34'a sondia vahetmimofo zamagi kre'za eri fatgo hu'naze.

<sup>8</sup> Hagi Beker i ne' mofavrereramimofo zamagi'a, Zemira'ma, Joasi'ma, Eliez-er'i'ma, Elioenai'ma, Omri'ma, Jeremoti'ma, Abiza'ma, Anatotima, Alemeti'e. E'i ana maka Beker i ne' mofavrereramine. <sup>9</sup> Hagi e'i ana nagamofo zamagima kasente kasentema huno e'neregatima kreno eri fatgoma hu'neana 20 tausen 200'a hankave sondia vahetmimofo zamagi'a kre'za eri fatgo hu'naze. <sup>10</sup> Hagi Jediali nemofo'a Bilhani'e. Hagi Bilhani ne' mofavrereramimofo zamagi'a, Jeusi'ma, Benzameni'ma, Ehuti'ma, Kenana'ma, Zetani'ma, Tasisi'ma, Ahisahari'e. <sup>11</sup> Hagi mago'magomo'a naga'amofonte ugagota kva vahe manitere hu'naze. Hagi ana nagapintima ha'ma huga sondia vahetamimofo zamagima kreza eri fatgoma hu'nazana 17 tauseni 200'a sondia vahe zamagi kreza eri fatgo hu'naze. <sup>12</sup> Hagi Iri nemofokea Supimike, Hupimike. Hagi Husimi'a Aheri nemofo'e.

### *Naftalimpinti'ma fore'ma hu'naza vahe'mokizmi naneke*

<sup>13</sup> Naftali ne' mofavrereramimofo zamagi'a, Jazieli'ma, Guni'ma, Jezeri'ma, Salumu'e. Hagi ama ana nagara, Jekopu'ma eri'za a' a'ma eri'nea a'mofo Bilha agehe'mo'ze.

### *Manasempinti'ma fore'ma hu'naza vahe'mokizmi naneke*

<sup>14</sup> Manase ne' mofavrererarena, Asrielike, Makirike. Hagi ana mofavrererarena, henka a'ma Manase'ma Aramu a'ma eri'nea a'mo kasezanante'n. Hagi Makiri'a Giliati kasente'n. <sup>15</sup> Hagi Makiri'a Hupimina mago a' avren-emin, Supimina mago a' avremi'n. Hagi nesaro agi'a Maka'e. Hagi Makirimpinti Selofehati'a fore hune. Hagi Selofehati'a nera onte'neankino, mofanege ante'n. (Num 27:1-11.)

<sup>16</sup> Hagi Makiri nenaro'a Ma'akokino tare ne' mofavrererare zanante'n. Hagi ana mofavrererarena zanagi'a, Peresi'ene Seresike. Hagi Seresi'a tare ne' mofavrererare zanante'neankino zanagi'a, Ulamuke Rakemike. <sup>17</sup> Hagi Ulamu nemofo'a Bedani'e. Hagi ama ana nagara Giliati nagare. Hagi Giliati'a Makiri nemofo'e, hagi Makiri'a Manase nemofo'e.

<sup>18</sup> Hagi Hamoleketi'a Giliati nesarokino Isotima, Abiezerima, Malama huno kasezamante'n. <sup>19</sup> Hagi Semida ne' mofavrereramimofo zamagi'a, Ahiani'ma, Sekemu'ma, Likhi'ma, Aniamu'e.

### *Efraemimpinti'ma fore'ma hu'naza vahe'mokizmi naneke*

<sup>20</sup> Efraemimpinti'ma fore'ma hu'naza vahera, Efraemi nemofo'a Sutela'e, Sutela nemofo'a Bereti'e, Bereti nemofo'a, Tahati'e, Tahati nemofo'a Eliata'e, Eliata nemofo'a mago Tahati'e <sup>21</sup> Hagi Tahati nemofo'a Zabati'e, Zabati nemofo'a Sutela'e, Sutela nemofo'a Ezeri'e. Hagi Ezerike Elatikea Gati kumateti bulimakao afu musufa omenesake'za, Gati vahe'mo'za zanahe fri'naze. <sup>22</sup> Hagi ana'ma hu'za ana netrema nezanahazageno'a nezanafa Efraemi'a tusi asunku huno zavinetege'za afuhe'za e'za eme azeri avavase'naze. <sup>23</sup> Hagi ana'ma hutegen'o'a, Efraemi'a nenaro'ene masegeno, amu'ene huno mago nemofavre kasenteno agi'a Beria'e huno antemi'n. Na'ankure ra hazenkefi naga'amo'a ufre'negeno'e.

<sup>24</sup> Hagi Efraemi'a mago mofa ante'neankino agia Sera'e. Hagi Sera'a anagamu Bet-horoni kuma'ene, fenkamu Bet-horoni kuma'ene, Uzen-Sera kuma'ene erifore hu'n.

<sup>25</sup> Efraemi'a Refa nef'a'e, Refa'a Resefu nef'a'e, Resefu'a Tela nef'a'e, Tela'a Tahani nef'a'e. <sup>26</sup> Hagi Tahani'a Ladani nef'a'e, Ladani'a Amihudi nef'a'e, Amihudi'a Elisama nef'a'e.

<sup>27</sup> Hagi Elisama'a Nuni nef'a'e, hagi Nuni'a Josua nef'a'e. <sup>28</sup> Hagi Efraemi naga'ma mani'naza mopane kuma'enena amana hu'ne, sauti kaziga Beteli kuma'ene megagi'nea kumatamine megeno, zage haniti kaziga Naran kuma' megeno, zage fre kaziga Gezeri kumatmi megeno, noti kaziga Sekemu kumatamine Aia kumatamine me'ne.

<sup>29</sup> Hagi Manase naga'mofo kumatmina Bet-sani kuma'ene ana tavaonte'ma me'nea kumatamine, Tanaki kuma'ene ana tavaonte'ma me'nea kumatamine, Megido kuma'ene ana tavaonte'ma me'nea kumatamine, Dori kuma'ene ana tavaonte'ma me'nea kumatmi me'ne. Hagi e'ina kumatmimpi Israeli nemofo Josefe mofavreramina mani'naze.

### *Asampinti'ma fore'ma hu'naza vahe'mokizmi naneke*

<sup>30</sup> Hagi Asa ne' mofavreramimofo zamagi'a, Imna'ma, Isva'ma, Isvi'ma, Beria'e. Hagi nezmasaro agi'a Sera'e.

<sup>31</sup> Hagi Beria ne' mofavreramimofo zamagi'a, Heberi'ma, Malkiel'i'e. Hagi Malkiel'i'a Birizaiti kasente'ne. <sup>32</sup> Hagi Heberi ne' mofavreramimofo zamagi'a, Jafleti'ma, Someri'ma, Hotamu'e. Hagi nezamasaro agi'a Sua'e.

<sup>33</sup> Hagi Jafleti ne' mofavremofo zamagi'a, Pasaki'ma, Bimhal'i'ma, Asvati'e.

<sup>34</sup> Hagi Someri ne' mofavreramimofo zamagia, Ahi'ma, Roga'ma, Jehuba'ma, Aramu'e. <sup>35</sup> Hagi Someri nefu, Helemu ne' mofavreramimofo zamagia, Sofa'ma, Imna'ma, Selesi'ma, Amali'e. <sup>36</sup> Hagi Zofa mofavreramimofo zamagi'a, Sua'ma, Haneferi'ma, Suali'ma, Beri'ma, Imra'ma, <sup>37</sup> Bezeri'ma, Hod'i'ma, Sama'ma, Silsa'ma, Itrani'ma, Bera'e. <sup>38</sup> Hagi Jeteri ne' mofavreramimofo zamagia, Jefune'ma, Pisp'a'ma, Ara'e.

<sup>39</sup> Hagi Ula ne' mofavreramimofo zamagi'a, Ara'ma, Hanieli'ma, Riza'e.

<sup>40</sup> Hagi ama ana maka vahera Asampinti fore hu'nazankino, nagazmimo-fonte ugagota kva vahe manitere hu'naze. Hagi e'i ana nagamofo zamagina kasente kasentema huno e'neregatima kre'za eri fatgoma hu'nazana, <sup>26</sup> tauseni'a hankave sondia vahetamimofo zamagi kre'za eri fatgo hu'naze.

## 8

### *Benzamenimpinti'ma fore'ma hu'naza vahe'mokizmi naneke*

<sup>1</sup> Hagi Benzameni'a ese mofavrea Bela kasenteno, ananteria Asbeli kasenteno, namba 3 mofavrea Ahara kasenteno, <sup>2</sup> namba 4 mofavrea Noha kasenteno, namba 5 mofavrea Rafa kasente'ne. <sup>3</sup> Hagi Bela ne' mofavre-mofo zamagi'a, Adari'ma, Gera'ma, Abihuti'ma, <sup>4</sup> Abisua'ma, Namani'ma, Ahoa'ma, <sup>5</sup> Gera'ma, Sefufani'ma, Hurami'e.

<sup>6</sup> Hagi Ehuti ne' mofavreramina zamagra mago mago naga kegava hutere hu'naza vahetminkino, Geba kumate mani'nazageno ha' vahe mo'za eme huzamante'za zamavare'za Manahati kumate kina ome huzmante'naza vahe mani'naze. <sup>7</sup> Hagi ana mofavreramimofo zamagi'a Namani'ma, Ahiza'ma, Gera'e. Hagi Gera'a Heglamu nef'a'e, hagi Heglamu'a Uzakizni Ahihudikizni kasezanante'ne.

<sup>8</sup> Hagi Saharaimi'a tare a'ararema Husimine Baranema huznanteteno Moapu mopafima mani'neno'a, mago a' erino rama'a ne' mofavrerami zamante'ne. <sup>9</sup> Hagi e'i ana ne'mofavreramina henka a'a Hodesinteti kase zmante'nea ne' mofavreramina, Jobabu'ma, Zibia'ma, Mesa'ma,

Malkamu'ma, <sup>10</sup> Jeusi'ma, Sakia'ma, Mirma'e. Hagi e'ina maka ne' mofavrereramimo'za nagazmimofo ugagota kva vahe manitere hu'naze. <sup>11</sup> Hagi Saharaimi nenaro Husimi'a ne' mofavrererarena Abitubukizni Elpa'alikizani kasezanante'nne. <sup>12</sup> Hagi Elpali ne' mofavrereramimofo zamagi'a, Eberi'ma, Misamu'ma, Semeti'e. Hagi Semeti'a Ono kuma'ene Lodi kuma'ene, tava'onte'ma me'nea kumatamina eri fore hu'naze.

<sup>13</sup> Hagi Beria'ene Semakea Aijalon kumate'ma nemaniza nagamofo kva netrenkike, Gati kumate'ma nemaniza nagara zanagra zamahe natitre'na'e. <sup>14</sup> Hagi Beria ne' mofavrereramina, Ahio'ma, Saka'ma, Jeremoti'ma, <sup>15</sup> Zebadaia'ma, Aradi'ma, Ederi'ma, <sup>16</sup> Maikeli'ma, Ispa'ma, Joha'e. <sup>17</sup> Hagi Elpali'a ne' mofavrereramina, Zebadaia'ma, Mesulamu'ma, Hizki'ma, Heberi'ma, <sup>18</sup> Ismerai'ma, Izlia'ma, Jobabu'e. <sup>19</sup> Hagi Simei ne' mofavrereramina, Jakimi'ma, Zikri'ma, Zabdi'ma, <sup>20</sup> Elienai'ma, Zilatai'ma, Elieli'ma, <sup>21</sup> Adaia'ma, Beraia'ma, Simrati'e. <sup>22</sup> Hagi Sasaki ne' mofavrereramina, Ispani'ma, Eberi'ma, Elieli'ma, <sup>23</sup> Abdoni'ma, Zikri'ma, Hanani'ma, <sup>24</sup> Hananaia'ma, Elamu'ma Antotiza'ma, <sup>25</sup> Ifdeia'ma, Penueli'e. <sup>26</sup> Hagi Jerohamu ne' mofavrereramina, Samserai'ma Seharaia'ma, Atalia'ma, <sup>27</sup> Jaresaia'ma, Elaija'ma, Zikri'e. <sup>28</sup> Hagi e'ina vahetmina naga zmimofonte ugagota kva vahetaminkiza zamagima krente avontafepi zamagia krente'naze. Hagi ana maka'mo'za Jerusalemi kumate mani'naze.

<sup>29</sup> Hagi Gibioni nefä Jeieli'a Gibioni kumate nemania nekino, nenaro agi'a Maka'e. <sup>30</sup> Hagi Gibionina ese ne' mofavre'a Abdoni'e'. Hagi ana amefi'ma kasezmante'neana, Zurima, Kisima, Balima Nadapuma, <sup>31</sup> Gedorima Ahioma, Zekerima, <sup>32</sup> Mikloti'e. Hagi Mikloti'a Simei nefä'e. Ana naga'mofona zamafuhe'za Jerusalemi kumamofona kantu kaziga manize'za, zamagra kama kaziga mani'naze.

### *Kini ne' Soli nagapinti'ma fore'ma hu'naza vahetmimofo naneke*

<sup>33</sup> Hagi Neri'a, Kisi nefä'e, Kisi'a Soli nefä'e. Hagi Soli ne' mofavrereramina, Jonatani'ma, Malki-sua'ma, Abinadapu'ma, Esbali'e. <sup>34</sup> Hagi Jonatani'a Merib-bal nefä'e, hagi Marib-balina mago agia Mefibosetikino Maika nefä'e. <sup>35</sup> Hagi Maika ne' mofavrereramina, Pitoni'ma, Meleki'ma, Tarea'ma, Ahasi'e. <sup>36</sup> Hagi Ahasi'a Jehoada nefä'e, hagi Jehoada'a Alemetima, Azmavetima, Zimrikizmi nezmafa'e. Hagi Zimri'a Moza nefä'e. <sup>37</sup> Hagi Moza'a Binea nefä'e, Binea'a Rafali nefä'e, Rafali'a Eleasa nefä'e, hagi Eleasa'a Azeli nefä'e. <sup>38</sup> Azeli'a 6si'a ne' mofavrererami zamante'neankino zamagi'a, Azrikamu'ma, Bokeru'ma, Ismaeli'ma, Searia'ma, Obaidia'ma, Hanani'e. Ama ana makara Azeli mofavrererami mani'naze. <sup>39</sup> Hagi Azeli nefu Eseki ne' mofavrereramina, ese mofavrea Ulamu'e, ananteria Jeusi'e, hagi namba 3 mofavrea Elifeleti'e. <sup>40</sup> Hagi Ulamu mofavrereramina hankavenentake sondia vahetaminki'za ati'ma ahe'erara knare hu'naze. Hagi ana naga'mo'za rama'a mofavrererami kasezmantage'za nezamageho zanena mani'nazankino, namba zamimo'a 150'a mani'naze. Hagi ana nagara maka Benzamenimpinti'ma fore'ma hu'naza naga mani'naze.

### *Jerusalemi vahetmimofo naneke*

<sup>1</sup> Hagi e'ina hu'za nagate nofite maka zamagi'a kre'za eri fatgo hazageno, Israeli kini vahetmimofo avontafepina kre'za eri fatgo hunte'naze. Hagi Juda vahetmina zamavare'za Babiloni kina ome huzmantenaze. Na'ankure

Ra Anumzamofona ovariri zamage'na humi'nazagu anara hu'naze. <sup>2</sup> Hagi kinama ome hu'nazaregati'ma ese'ma e'za mopa'zamima emeri'naza va-hera, Pristi vahetmima, Livae vahetmima, mono nompi eri'za vahetamine mago'a Israeli vahe'mo'zanena e'za mopazmia emeri'naze. <sup>3</sup> Hagi mago'a vahera Juda nagapinti'ma Benzameni nagapinti'ma, Efraemi nagapinti'ma, Manase nagapintiki hu'za e'za Jerusalemi kumatera eman'i'naze.

<sup>4</sup> Hagi anampima mago'a naga'ma e'nazana, Utai naga e'naze. Hagi Utai'a Amihudi nemofo'e, Amihudi'a Omri nemofo'e, Omri'a Imri nemofo'e, Imri'a Bani nemofo'e, hagi Imri'a Perezi nagapinti fore hu'ne. Hagi Perezi'a Juda nemofo'e. <sup>5</sup> Hagi mago'a vahe'ma anampima e'nazana, Sela nagapinti Asaia'ene ne' mofavreramima'ane e'naze. <sup>6</sup> Hagi Zera ne'mofavre nagapinti'ma mago'a vahetmina e'nazana, e'i ana nagara Jueli'ene naga'an e'nazankino ana maka vahera 690'a vahe e'naze.

<sup>7</sup> Hagi Benzameni nagapinti vahe'ma e'nazana, Mesulamu nemofo Salu e'ne. Hagi Mesulamu'a Hodavia nemofo'e, Hadavia'a Hasenua nemofo'e, <sup>8</sup> hagi Hasenua'a Ibneia nemofo'e, Ibneia'a Jerohamu nemofo'e, Jerohamu'a Ela nemofo'e, Ela'a e'i Uzi nemofo'e, Uzi'a Mikri nemofo'e, Mikri'a Mesulamu nemofo'e, Mesulamu'a Sefataia nemofo'e, Sefataia'a Reueli nemofo'e, hagi Reueli'a Ibaiza nemofo'e. <sup>9</sup> Hagi ama ana vahetmina maka naga nofizmimofonte ugagota kva vahetminkino, kasezmante kasezmantema huno e'neregati zamagia kre'za eri fatgo hu'za avontafepina krente'naze. Hagi ana maka Benzameni nagapinti fore hu'naza vaheki'za, 956'a vahe'mo'za mopazmia emeri'za mani'naze.

### *Pristi vahemokizmi nanake*

<sup>10</sup> Hagi pristi vahetmina, Jedaia'ma, Jehoiaribi'ma, Jakini'e. <sup>11</sup> Hagi Hilkaia nemofo'a Azaraia'e. Hagi Hilkaia'a Mesulamu nemofo'e, Mesulamu'a Sadoku nemofo'e, Sadoku'a Meraioti nemofo'e, Meraioti'a Anumzamofa mono nonte'ma ugagota huno'ma kvama hu'nea ne' Ahitubu nemofo'e. <sup>12</sup> Hagi mago pristi ne'ma anampima e'neana Adaia'e. Hagi Adaia'a Jerohamu nemofo'e, Jerohamu'a Pasuri nemofo'e, hagi Pasuri'a Malkija nemofo'e. Hagi mago pristi nera Masai'e. Hagi Masai'a Adiel nemofo'e, Adiel'i'a Jazera nemofo'e, Jazera'a Mesulamu nemofo'e, Mesulamu'a Mesilemiti nemofo'e, hagi Mesilemiti'a Imeri nemofo'e.

<sup>13</sup> Hagi ana maka vahe'ma e'nazana 1tausen 760'a pristi vahetami ete mopa zimirera e'naze. Hagi e'i ana vahetmina naga'zmimofonte ugagota kva vahetami mani'ne'za, Anumzamofa nomo nompi hankaveti'za eri'za e'neriza vahetami e'naze.

### *Livaempinti'ma fore'ma hu'naza vahe'mokizmi nanake*

<sup>14</sup> Hagi Livae naga'ma e'nazana, Hasubu nemofo Semaia'e. Hagi Hasubu'a Azrikamu nemofo'e, Azrikamu'a Hasabaia nemofo'e, Hasabaia'a Merari nagapinti fore hu'ne. <sup>15</sup> Hagi mago'a Livae vahe'mofo zamagi'a, Bakbakari'ma, Heresi'ma, Galali'ma, Mika nemofo Matanaia'e. Hagi Mika'a Zikri nemofo'e, Zikri'a Asapu ne'mofo'e. <sup>16</sup> Hagi mago Livae ne'ma e'neana, Semaia nemofo Obadaia'e. Hagi Semaia'a Galali nemofo'e Galali'a Jedutuni nemofo'e. Hagi mago ne'ma e'neana, Asa nemofo Berekaia'e. Hagi Asa'a, Elkana nemofo'e. Hagi ama ana vahe'mo'za Netofa vahetamimofo kumatamimpi nemaniza vahe mani'naze.

### *Livae vahemokizmi nanake*

<sup>17</sup> Hagi kinama hu'naregati'ma mono no kafantema kvama hanaza Livae vahe'ma Juda mopare'ma e'naza vahe zamagia ama'ne, Salumu'ma, Akubu'ma, Talmoni'ma, Ahimani'e. Hagi ana naga'mo'za zamagrakera ome'nazanki mago'a naga'zamine e'naze. Hagi anampina Salumu ugota kvazimia mani'ne. <sup>18</sup> Hagi korapara Jerusalemi kumamofona zage hanati kaziga kini vahe kafane nehaza kuma kafante kegava hu'nazane. Hagi ka'ma kopima e'naza knafina, Livae nagamofo kuma kafante kegava hu'za maniza e'naza nagare. <sup>19</sup> Hagi Salumu'a Kore nemofo'e, hagi Korena Abias-apu kasente'ne. Hagi Abiasapu'a seli mono no kafante'ma kegavama nehaza naga, Kora nagapinti' nere. Hagi Kora naga'mo'za zamafahe'mozama ka'ma kokampima Ra Anumzamofo seli mono nonkafama kegavama hu'nazaza hu'za kegava hu'naze. <sup>20</sup> Hagi kora Eleaza nemofo Finiasi' ugota huno kegava huzmantegeno, Ra Anumzamo'a agrane mani'neane.

<sup>21</sup> Hagi ananteria Meselemaia nemofo Zekaraia atruhu seli mono nontera kva hu'neane.

<sup>22</sup> Hagi ana eri'zama eri'naza vahetmina ana maka 212fu'a vahetaminkino, kasezmante kasezamantema hu'za eneregati eri fatgo huno kuma'ma maniterema hu'nazare zamagia krentetere hu'naze. Hagi Deviti'ene kas-nampa ne' Samuelike ama ana eri'zana zamike'za eri'naze. <sup>23</sup> Hagi ama ana vahe'tmina Ra Anumzamofo no kafante kegava hu eri'zama eneriza vhahere. Hagi zamagrane kasema zamantaza vahemo'zanena ana eri'zana seli mono nompinha erime ne-eza ra mono nompinena eme eri'naze.

<sup>24</sup> E'i ana vahe'mo'za mono'ma nehaza kumamofo zage hanati kazigagi, zage fre kazigagi noti kazigagi, sauti kazigagi hu'za 4'a kaziga kuma kafante kegava hu vahetamine. <sup>25</sup> Hagi ana vahetmimofona nagazmimoza kumara atre'za 7ni'a zagegnafina ana eri'zana eme zamaza hute'za vutere hu'naze. <sup>26</sup> E'ina hu'neanagi, Livae nagapintira 4'a veneneramimo'za vugota hu'za Ra Anumzamofo mono noma hunaragine nontamine, fenoma ante nontaminedena kegava hu'naze. <sup>27</sup> Hagi kenagera Anumzamofo nonte kegava hu'za mani'ne'za nanterana kafana anagitere hu'naze.

<sup>28</sup> Hagi mago'a Livae naga'mo'za kavo zuomparami kegavama hu eri'za eri'naze. Ana kavo zuomparamima mono nompintima eri'za atiramige, eri'za marerigema hazage'za hampriza erifatgo huntetere hu'naze. <sup>29</sup> Hagi mago'a Livae naga'mo'za mono nompi itarami kegava nehu'za, witine, wainine, olivi masavene, mnanentake'za frenkisensine, mago'a mnanentake zantmima eri'za aza zantamina kegava hu'naze. <sup>30</sup> Hianagi ana zantmima eri haviamma higeno knare mnama vu zantmima tro hu eri'zana, pristi vahe'mo'zage eri'naze. <sup>31</sup> Hagi Livae nemofo Kora nagapinti ne' Sulamuna ese ne' mofavre'a Matitiakino ofama hu bretima kre eri'zana agra eri'ne. <sup>32</sup> Hagi Livae vahepinti mago'a Kohati naga'mo'za maka Sabatima mono nehaza knare'ma Anumzamofo avure'ma ante bretima kre eri'zana eri'naze.

<sup>33</sup> Hagi Livae naga'ma ugagotama hu'za kegavama hu'naza vahemo'zanena naga'zmimo'zanena mono nompima zavenama aheno zgame'ma hu eri'zantera vugota hu'naze. Hagi ana naga'mo'za mago'a eri'zana e'ori'nazanki, ana eri'zanke eri'naze. Na'ankure maka kna ana mono nompi nemase'za kinagane, nanteranena ana eri'zanke eri'naze.

<sup>34</sup> Hagi ama ana vahetmina Livae nagapina mago mago nagate ugagota hu'za kegava hu'naza vahetamine. Hagi ana vahe'mofo zamagi'a avontafepina krentenaze. Hagi ana vahe'mo'za zamagra Jerusalemi mani'naize.

<sup>35</sup> Hagi Gibioni kuma'ma eri fore'ma hu'nea nera Jeielikino nenaro Ma'aka'ene Gibioni kumate mani'na'e. <sup>36</sup> Hagi kota mofavre'amofo agi'a Abdoni'e. Hagi Jeielina mago'a ne'mofavre'amokizmi zamagi'a, Zuri'ma, Kisi'ma, Ba'al'i'ma, Neri'ma, Nadapu'ma, <sup>37</sup> Kedor'i'ma, Ahio'ma, Zekaraia'ma, Mikloti'e. <sup>38</sup> Hagi Mikloti'a Simeamu nef'a'e. Hagi ama ana naga'mo'za mago'a nagazmima mani'naza tava'onte Jerusalemi kumate mani'naze.

<sup>39</sup> Hagi Neri'a Kisi nef'a'e, Kisi'a, Soli nef'a'e, hagi Soli ne'mofavre'mokizimi zamagi'a, Jonatani'ma, Malki-sua'ma, Abinadapu'ma, Esba'alie. <sup>40</sup> Hagi Jonatani'a Merib-ba'ali nef'a'e, hagi Merib-ba'alina mago agia Mefibosetikino Maika nef'a'e. <sup>41</sup> Hagi Maika ne' mofavremokizmi zamagi'a, Pitoni'ma, Meleki'ma, Taharea'ma, Ahasi'e. <sup>42</sup> Hagi Ahasi'a Jara nef'a'e. Hagi Jara ne' mofavremokizmi zamagi'a, Alemeti'ma, Azmaveti'ma, Zimri'e. Hagi Zimri'a Moza nef'a'e. <sup>43</sup> Hagi Moza'a Binea nef'a'e, hagi Binea'a Refaia nef'a'e, Refaia'a Eleasa nef'a'e, hagi Eleasa'a Azeli nef'a'e. <sup>44</sup> Hagi Azeli'a 6si'a ne' mofavre zamante'neankino zamagi'a, Azrikamu'ma, Bokeru'ma, Ismaeli'ma, Searaia'ma, Obadaia'ma, Hanani'e.

## 10

### *Kini ne' Soli'ma fri'nea zamofo naneke*

<sup>1</sup> Hagi Filistia vahe'mo'za Israeli vahera ha' eme huzamantage'za fre'za vazage'za rama'a vahera Gilboa agonafi ome zamahe fri'naze. <sup>2</sup> Hagi Filistia vahe'mo'za Solina 3'a ne' mofavre'aramina, Jonatanima, Abinadapuma, Malki-suanena zamarotgo hu'za ome zamahe fri'naze. <sup>3</sup> Hagi ha'mo'a ome hankavetino nevinfinti Solina ome azeri kagige'za Soli'na kevea ahe'naze.

<sup>4</sup> E'ina higeno Soli'a atagu huno maraguzanetino hanko'are'ma azeneria nera asamino, zamago'za noma taga osu Filistia vahe'mo'za eme nazanava hu'za nata hoza namisagi, bainati kazinka'a erinka nahe frio. Hianagi hanko'are'ma azeneria ne'mo'a tusi kore nehuno anara osu'n'e. E'ina higeno Soli'a agra'a bainati kazinte taru aheno fri'n'e. <sup>5</sup> Hagi hanko'are'ma azeneria ne'mo'ma keama Soli'ma frigeno'a, agra'enena bainati kazima'are taru aheno agra zante ahe fri'n'e.

<sup>6</sup> E'ina higeno, Soli'ene maka 3'a ne'mofavre naga'enena fri vagarazageno, maka agri naga'mo'za fri vagare'naze. <sup>7</sup> Hagi maka Israeli vahe'ma Jezrili agupofima mani'naza vahe'mo'zama kazageno, Soli'ene maka ne'mofavre naga'anema fri vagarazageno, maka sondia vahe'zmimo'zama koroma hu'za frazage'za Filistia vahe'mo'za ana kumazmia emeri'za manite'za,

<sup>8</sup> anante kna zupa Filistia Israeli vahe'ma zamahazage'zama fri'naze vahe'mokizimi kukena hate'za eri'za enevu'za, Gilboa agonafi Soline ne'mofavre'aramimofo zamavufaga ome before hu'naze. <sup>9</sup> Hagi Solina kukena'ane hanko'ane, e'neriza aseni'anena rukafri'za erite'za, maka Filistia moparega Soli'ma fri'nea kea atrazageno vuno eno nehige'za, anazamofo agenkea eri'za kaza osu havi anumzazmirega vu'naze. <sup>10</sup> Hagi Filistia vahe'mo'za Soli ha' kukena'a havi anumzazmimofo mono nompi ome nente'za, Soli agenopa eri'za havi anumzazmi Dagoni mono nompi ome hantinte'naze.

<sup>11</sup> Hianagi Filistia vahe'mo'zama maka zama Solima huntazazana Jabes-giliati kumate'ma nemani'za vahe'mo'za nentahi'za, <sup>12</sup> hankavenentake ha' vahe'mo'za vu'za Soli avufane, ne' mofavreramima'amofo avufganena

ome eri'za Jabels kumate oki zafa agafafi ome asezamantete'za, 7ni'a knafi ne'zana a'o hu'za zamasunkura hu'naze.

<sup>13</sup> Hagi Soli'ma fri'neana, na'ankure agra Ra Anumzamofona tamage huno agu'aretira huno ovaririno, kasege'amofona amagera onte'no, fri vahe hankro'enema keagama nehia ara mago'a zankura ome agenoka huno antahintahia e'nerino, <sup>14</sup> agra Ra Anumzamofo knare antahintahigura antahionke'ne. E'ina hu'nea zante Ra Anumzamo'a ahenefrino, Jesi nemofo Deviti kinia azeri ot'i'ne.

## 11

### *Deviti'ma Israeli vahe kini mani'nea naneke*

<sup>1</sup> Hagi anante mika Israeli vahe'mo'za Deviti'ma mani'nere Hebronim kumate omeri tru hu'za amanage hu'za asami'naze, ko tagra kagri kora mani'none. <sup>2</sup> Hagi koma Soli'ma kinima mani'nea knafina kagra Israeli sondia vahera vugota huzmantenka hatera zamavarenka vunka enka hu'nane. Hagi Ra Anumzana kagri Anumzamo'a amanage huno kasami'ne, kagra Nagri vahe'mofona sipisipi afute'ma kegavama hiankna hunka ugagota huzmantenka kva huzmantegahane hu'nene. <sup>3</sup> E'ina hu'negu maka Israeli ranara vahe'mo'zanena Deviti'ma Hebronim kumate mani'neregaa azage'za, Ra Anumzamofo avufi huhagerafi huvempa kea hute'za, Ra Anumzamo'ma Samuelima asami'nea kante ante'za Devitina kinia azeri ot'i'ne.

<sup>4</sup> Hagi ana hute'za Deviti'ene maka Israeli vahe'mo'za Jebusi vahe'ma nemaniza kumate Jerusalemia kora Jebusie hu'za nehaza kumate vu'naze.

<sup>5</sup> Hianagi Jebusi kumate'ma nemaniza vahe'mo'za Devitinkura amanage hu'naze, kagra amarerai omegosane. Hianagi Deviti'a ana vahetamina ha' huzmanten Saioni kuma'ma hankave vihu keginama hu'naza kumara eri'ne. Hagi meni ana kumakura Deviti rankumare hu'za nehaze.

<sup>6</sup> Hagi ha'ma hu'zama Devitima nehuno'a amanage hu'ne, iza'o Jebusi vahe'ma ese'ma ha'ma huzmantesia ne'mo sondia vahe'niarera ugagota huno kva huzmantegahie, higeno Zeruaia nemofo Joapu anara higeno, Sondia vahe'amofo ugagota kva azeri ot'i'ne.

<sup>7</sup> Hagi ana vihu kumara Deviti'a agra kuma erisegen, e'i ana agafare Deviti rankumare hu'za nehaze. <sup>8</sup> Hagi Deviti'a ana kumamofona urami'nea kazigati kumara agafa huno eri so'e huno ki'no evu'ne. Ana higeno mago'a ana kumara Joapu eri ante fatgo huno evu'ne.

<sup>9</sup> Hagi Deviti'a maka zampina hageno marenerino ome hankavetino vu'ne. Na'ankure Hanavenentake Ra Anumzana Monafinka Ohampriga Sondia Vahete kva nemo'a agrane mani'negeno anara hu'ne.

### *Devitina hankavenentake sondia vahe'amokizmi zamagi'amofo naneke*

<sup>10</sup> Hagi ama'i ugagota hu'za hankavenentake sondia vahetamima Deviti'ma aza hu'za Israeli vahete kvama azeri ot'i'za vahetamine. Hagi Ra Anumzamo'ma Israeli vahete kini manigahie hu'nea kante ante'za ama ana hankavenentake sondia vahetmimo'zane maka Israeli vahe'mo'zanena mago zamarimpa hu'za Devitina kinia azeri ot'i'ne.

<sup>11</sup> Hagi Devitina hankavenentake sondia vahetmimofo zamagi'a amane, ese nera Hakmoni nagapinti nekino agi'a Jasobeamu'e. Agra Hankmoni nagapina ugagota sondia ne' mani'neankino, mago hapina 300'a vahe kevenutira zamahe fri'ne.

<sup>12</sup> Hagi ana 3'a hanavenentake sondia vahepintira anante'ma eme hu'nea nera Ahoa nagapinti Dodo nemofo Eleaza'e. <sup>13</sup> Hagi Eleaza'a mago zupa

Deviti'ene Pas-damimi kumate mani'nakeno Filistia vahe'mo'za bali hozafi Israeli vhahera hara eme huzmanteg'e za atre'za kore fre'naze. <sup>14</sup> Hianagi Eleaza'ene Deviti'enena ana hoza amunompi oti'neke Filistia vhahera hara hunezamantakeno Ra Anumzamo'a zanaza higeke Filistia vhahera razampi hara huzamagatere'na'e.

<sup>15</sup> Hagi Filistia sondia vahe'mo'zama Refaimi agupofima seli noma ki'zama mani'nazageno'a, 30'a ugagota sondia vahepintira 3'amo'za Deviti'ma Adulamu havegampima mani'nerega vu'naze. <sup>16</sup> Hagi e'i ana knafina Deviti'a ana havegampi mani'negeno, mago'a Filistia sondia vahe'mo'za Betlehem'i kumate mani'na'ze. <sup>17</sup> Hagi anama higeno'a Deviti'a tinku avesigeno Betlehemima me'nea tinkura agesa nentahino amanage hu'ne, Betlehem'i kumamofo kafante'ma me'nea tinkerifintima tima afino eme namige'na noasina knare hisine.

<sup>18</sup> Hagi anagema higeno'a, ana 3'a hankave sondia vahe'mo'za vu'za Filistia vahe vihua ome tapage hu'za ufre'za Betlehem'i kumamofo kafante'ma me'nea tinkeriretira tina afi'za Devitina eme ami'naze. Hianagi Deviti'a ana tina oneno Ra Anumzamofontega ofa huno tagitre'ne. <sup>19</sup> Ana tima taginetreno'a Deviti amanage hu'ne, Anumzamofo agire tamage nehue, ama'i tina onegahue. Hagi ama ana timo'a mago'a tinknara osu'neanki agatereno, ama ana vahe'mofo korankna hu'neanki'na onegahue. Na'ankure ama ana tima ome afi'naza vahe'mo'za fri'zankura ontahi zamavufaga eri amne hu'za tina ome afi'za e'naze. E'inage nehuno ana tina Deviti'a one'ne. Hagi e'i ana 3'a hanavenentake sondia vahe'mo'za ana zana hu'naze.

<sup>20</sup> Hagi Joapu nefu Abisai'a 30'a sondia vahete kva nekino, 3'a vahe'mo'zama eri'zankna ra agima eri'nea nera, 300'a ha' vahetami kevea zamahe friteno, ana ra agia eri'ne. <sup>21</sup> Hagi Abisai'a ana 3'a vahe'mokizimia zamagetereno ra avo erino, kvazimi mani'ne. E'ina hu'neanagi, agra ana 3'a ranra vahepina mago'zamia omani'ne. Hagi agra 30'a vahe'mokizmi kva mani'ne.

<sup>22</sup> Hagi Kapzeli kumateti mago nera Johoiada nemofo Benaya'a hankavenentake sondia ne' mani'neankino, agra harafa vahe'mo'zama nehaza zana ranra zantmi nehuno, tare Moapu harafa netrena neznaheno, ko'mopa ko'ma rianknafina kerifintira laionia ahe'ne. <sup>23</sup> Hagi magora Isipiti tusizankna nekrefa zaza'amo'a 2mitagi hafu hu'nea ne' ahe fri'ne. Hagi ana Isipi ne'mofo karugru keve'amo'a tavrave trohu masinimofo aini'agna hu'neanagi, Benaya'a ana karugru keve'ha hanaren, agri karugru kevereti ana Isipi nekrefa arefri'ne. <sup>24</sup> Hagi Benaya'a e'inama hiazante 3'a hanavenentake sondia vahe'mo'zama eri'nazankna agia eri'ne. <sup>25</sup> Hagi agra 30'a sondia vahe'tmina zamagatereno ra agi eri'neanagi, 3'a vahepina mago'zamia omani'ne. Hagi Deviti'a avate kvama hunentaza sondia vahet-mimofo kva ne' Beniana azeri oti'ne.

<sup>26</sup> Hagi Devitina hankavenentake sondia vahetmimofo zamagi'a, Joapu nefu Asaheli'ma, Dodo nemofo Betlehem'u kumateti ne' Elhanani'ma, <sup>27</sup> Harori nagapinti ne' Samoti'ma, Peloni nagapinti ne' Helesi'ma, <sup>28</sup> Tekoa kumateti ne' Ikesi nemofo Ira'ma, Anatoti kumateti ne' Aviezeri'ma, <sup>29</sup> Husa nagapinti ne' Sibekai'ma, Ahoa nagapinti ne' Zalmoni'ma, <sup>30</sup> Netofa nagapinti ne' Maharai'ma, Netofa nagapinti ne' Bana ne'mofo Heledi'ma, <sup>31</sup> Gibeia kumateti, Benzameni nagapinti ne' Ribai nemofo Itai'ma, Piratoni nagapinti ne' Benaya'ma, <sup>32</sup> Gasa tinkrahopinti ne' Hurai'ma, Araba nagapinti ne' Abiel'i'ma, <sup>33</sup> Baharumu nagapinti ne' Azmaveti'ma, Salboni nagapinti ne' Eliaba'ma, <sup>34</sup> Gizoni nagapinti ne' Hasemi'ma, Harari nagapinti ne' Sage

nemofo Jonatani'ma, <sup>35</sup> Harari nagapinti ne' Sakari nemofo Ahiamu'ma, Uri nemofo Elifari'ma <sup>36</sup> Mekera nagapinti ne' Heferi'ma, Peloni nagapinti ne' Ahizama, <sup>37</sup> Kameri nagapinti ne' Hezro'ma, Ezbai nemofo Narai'ma, <sup>38</sup> Neteni nefu Joeli'ma, Hagri nemofo Mibhari'ma, <sup>39</sup> Amoni nagapinti ne' Zeleki'ma, Joapu hankoma e'neria ne' Beroti nagapinti ne' Zerua nemofo Naharai'ma, <sup>40</sup> Jatiri nagapinti ne' Ira'ma, Jatiri nagapinti ne' Garepi'ma, <sup>41</sup> Hiti nagapinti ne' Uri'a'ma, Alai nemofo Zabati'ma, <sup>42</sup> Rubeni naga kva ne'ma 30'a sondia vahenema vanoma nehia ne' Siza nemofo Adina'ma, <sup>43</sup> Maka nemofo Hanani'ma, Mitan nagapinti ne' Josafati'ma, <sup>44</sup> Astaroti nagapinti ne' Usia'ma, Aroeli kumateti Hotamu ne' mofavrare Sama'ene Jeiliikegi, <sup>45</sup> Tizi nagapinti netre Simri nemofoke Jediael'iene nefu ne' Joha'ma, <sup>46</sup> Mahava nagapinti ne' Elieli'ma, Elnamu nemofoke Jeriba'iene Josavia'ene, Moapu nagapinti ne' Itma'ma, <sup>47</sup> Erieli'ma, Obeti'ma, Mezoba nagapinti ne' Jasiel'i.e.

## 12

### *Devitintegama eme ante'naza sondia vahe'mofo naneke*

<sup>1</sup> Hagi Deviti'ma Ziklagima frakino Kisi nemofo Soli koroma mani'negeno'a ama'na sondia vahe'mo'za agritegama eme antenakura e'naze. Hagi ana sondia vahetmina hankavenentake sondia vahetmima agri'enema tragote'za ha'ma nehaza vahetami mani'naze.

<sup>2</sup> Hagi ana sondia vahera atifima keve'ma erinteno ahe'are'ene, kumi atifima havema erinteno ahe'are'enena knare zantfa hu'nazankino, amne hoga kazi zamazanteti'ene tamaga kaziga zamazanteti'enena atireti'ene, kumi atireti'enenha hara hugahaze. Hagi e'ina ana sondia vahetmina Soli nagaki'za, Benzameni nagapinti vahetamine. <sup>3</sup> Hagi ana vahetema ugota kva netrena Gibea kumateti ne' Sema nemofoke Ahiezeri'ene Joasike. Hagi mago'a sondia vahe'mokizmi zamagi'a amane, Azmaveti nemofoke Jezieli'e Peretikegi, Anatoti kumati netre Beraka'ene Jehuke. <sup>4</sup> Hagi Ismai'a Gibioni nagapinti harafa ne'mo'ma 30'a sondia vahe'ma kegava hu'neana, Jeremaiaki, Jahazieliki, Johananiiki, Gedera nagapinti ne' Jozabadiki, <sup>5</sup> Eluzaiki, Jerimotiki, Bealiaki, Semariaki, Herufu nagapinti ne' Sefatiaki, <sup>6</sup> Elkanaki, Isaiaki, Azareliki, Joezeriki, Kora nagapinti ne' Jasobeamuki, <sup>7</sup> Gedoriti ne' Jerohamu nemofoke Joelakike, Zebadaiake.

<sup>8</sup> Hagi Gati nagapintira hankave sondia vahetmima ha'ma hu'zama antahi ani hu'neza hankoma eri'neza kevema ahe'are'ma vugota hu'nazankino ha'ma nehzageno'a, zamugosamo'a laionia avugosagna nehige'za, zamagamare'amo'a agonafi nemaniza dia afukna hu'za zamaga neraza vaheki'za Solina atre'za ka'ma kopima hankavenentake vihu'afima Deviti'ma mani'nerega vu'za agrane umani'naze. <sup>9</sup> Hagi ana vahe'mokizmi zamagi'a ama'ne, vugota kvazmia Ezeri'e, hagi namba 2'a Obadia mani'geno, namba 3a Eliapu manigeno, <sup>10</sup> hagi namba 4a Mismana manigeno, namba 5fu'a Jeremaiia mani'ne. <sup>11</sup> Hagi namba 6 nera Atai manigeno, namba 7nia Elieli manigeno, <sup>12</sup> hagi namba 8'a Johanani manigeno, namba 9nia Elzabati mani'ne. <sup>13</sup> Hagi namba 10nia mago Jeremaiia mani'geno, namba 11nia Makbanai mani'ne.

<sup>14</sup> Hagi e'i ana vahetmina Gati nagapinti'ma Deviti Sondia vahetaminte'ma ugötama hu'naza Sondia vahe mani'naze. Hagi anampinti'ma hanave'amo'ma erami'nea sondia kva vahe'mo'za 100'a sondia vahetamina amne zamahe frigahaze. Hagi hanavezmimo'ma zamagatere'nea

vahe'mo'za amne 1tauseni'a sondia vahera hara huzmante'za zamahe friga-haze. <sup>15</sup> Hagi e'i ana vene'neramina ese ikante'ma Jodani timo'ma tima hageno enevuno mikazama ante hananeno'ma enevigeno takamahe'nea vahetamine. Hagi ana vene'neramimo'za Jodani tina takahē'za kantu kaziga agupofima mani'naza vahetmina ome zamahe'nati'za zage hanati kazigane zage fre kaziga ome zamatre eme zamatre hu'naza vahe mani'naze.

<sup>16</sup> Hagi mago'a Juda naga'ene Benzameni nagapinti vene'neramimo'za hankavenentake vihufima Deviti'ma frakino mani'nerega vu'naze. <sup>17</sup> Hagi ana vahetmima nevazageno'a Deviti'a ana vihu'afintira atramino ome nezmageno amanage hu'ne, tamagrama nagri rone mani'neta naza hukanu'ma ne-esuta, nagra tamagri'ene mago narimpa hugahue. Hianagi mago hazenke'ma osu'nenure'ma tamagrama komoru huta ha' vahe zamazampima navrente'naku'ma ne-esageno'a, tagehemofo Anumzamo'a negeno knazana tamagrira tamigahie.

<sup>18</sup> Anagema higeno'a Anumzamofo Avamu'mo'a ana 30'a veneneramimofo kva ne' Amasainte egeno amanage hu'ne, Devitiga kagri vahe mani'none. Jesi nemo fogga, tagra kagri kaziga mani'none. Hagi arimpa fru zamo'ene maka zampima knare'ma hu'zamo'a kagrane nemanesigeno, kazama hanaza vahe'mo'za hara huzmagatenere'za zamagranena knare hu'za manigahaze. Na'ankure Anumzanka'amo'a kaza huno vugahie. Hagi anagema higeno'a, Deviti'a mago rimpa nehuno sondia vahe'mofo kva zamazeri ot'ne.

<sup>19</sup> Hagi Soli'ma Devitine Filistia vahe'enema ha'ma huzmante'naku'ma ne-egeno'a Manase nagapinti'ma Israeli sondia vahepima mani'naza nagapinti mago'amo'za atre'za Deviti kaziga e'naze. Hianagi Filistia kva vahe'mo'za Devitina huntazageno nemanirega ete Ziklaki kumatega vu'ne. Na'ankure zamagesama antahi'zana Deviti'ma Solima ome kenuno'a, ete agri kaziga ome anteno tagrira tahegahie hu'za zamagesa antahi'naze. <sup>20</sup> Hagi Deviti'ma ete Ziklaki kumategama nevigeno'a, Manase nagapinti sondia vahe'tmina ama'na vahe'mo'za avaririza vu'naze, Adna'ma, Josabadi'ma, Jediael'i'ma, Maikeli'ma, mago Josabadi'ma, Elihu'ma, Ziletai'e. Hagi ana Manase nagapintira 1tauseni'a sondia vahete kegava hutere hu'naze. <sup>21</sup> Hagi e'ina sondia vahe'mo'za Devitina aza hu'za ha' vahetmimo'zama ha'ma eme hu'za keonke'zama eri havizama nehaza vahera hara huzmante'naze. Na'ankure zamagra hankavenentake sondia vaheki'za, mago'a sondia vahete vugota huzmante'naze.

<sup>22</sup> Hagi mika knafina Devitima aza hunakura rama'a vahetami agritega etere nehazageno, Anumzamofo sondia vahetminkna huno rama'a vahekr-erfa efore hu'naze.

### *Mago'a Israeli vahe'mo'za Deviti'ma Hebronomima mani'nerega vu'naza naneke*

<sup>23</sup> Hagi Deviti'ma Hebron kumate'ma mani'negeno'a, ama'na Solinkura zamavaresra hunente'za Ra Anumzamo'ma hu'nea kante ante'za Deviti kinia mani'nie hu'za agritega ome ante'naze. <sup>24</sup> Juda nagapintira 6tausen 800'a sondia vahe'mo'za hanko'zimine karugru keve'ziminena eri'ne'za vazageno, <sup>25</sup> Simeon nagapintira 7tausen 100'a sondia vahe vazageno, <sup>26</sup> Livae nagapintima vu'nazana 4tausen 600'a sondia vahe vu'nazankino, <sup>27</sup> ama'na hu'ne, Jehoiada'a Aroni nagamofonte kva nekino agranena 3tausen 700'a sondia vahetami zamavareno vu'ne. <sup>28</sup> Hagi magora hanavenentake nehazave ne' Zadokukino naga'afintira 22'a ugagota hankave sondia vahe zamavareno evufre'ne. <sup>29</sup> Hagi Benzameni nagapintira

3tauseni'a sondia vahetami e'naze. Hagi anampina Soli afu agnazama agri kazigama mani fatgo hu'za mani'naza sondia vahe'mo'zane e'naze. <sup>30</sup> Hagi Efraemi nagapintira, zamagesga nehaza hankaventake sondia vahetmina 20tausen 800'a e'naze. <sup>31</sup> Hagi amu'nompinti refko hu'nea Manase nagapintira, 18 tauseni'a vahe huhamprizage'za e'za Devitina kinia eme azeri oti'naze. <sup>32</sup> Hagi Isaka nagapintira 200'a ugagota kva vahe'zagane nagazminena e'naze. Hagi ana kva vahe'mo'za, e'ina hu'za fore hugahie hu'zama knamofoma antahini'ma nehu'za, Israeli vahe'tmima antahintahima nezmiza ranra vahetami'ne. <sup>33</sup> Hagi Zebuluni nagapintira 50tauseni'a sondia vahe'mo'za ha'ma nehaza 'zantami eri'za retro hu'za magoke antahintahire Devitima aza hunakura e'naze. <sup>34</sup> Hagi Naftali nagapintira Sondia vahete'ma kegavama hu vahera 1tauseni'a kva vahe azageno, 37tauseni'a sondia vahetmimo'za hankone karugru kevezmi'ne e'naze. <sup>35</sup> Hagi Dani nagapintira 28 tausen 600'a sondia vahetami e'naze. <sup>36</sup> Hagi Aseli nagapintira ha'ma hu'zama rempi hu'za antahi'naza sondia vahetmina, 40 tauseni'a sondia vahe'mo'za hazazmia retro hu'za Devitina eme aza hu'naze. <sup>37</sup> Hagi Jodani timofo kantu zage hanati kazigama mani'naza Rubeni nagapinti'ma, Gati nagapinti'ma, amu'nompinti'ma refko hu'nea Manase nagapintira ruzahu ruzahu ha'zazmia eri'ne'za ana makara 120tauseni'a sondia vahetami e'naze. <sup>38</sup> Hagi ama ana maka sondia vahe'mo'zama ha'zazminema eri'za e'nazana magoke antahi'zante e'naze. E'i ana antahi'zana Devitima kini azeri oti'nageno maka Israeli vahe'ma kegavama hania antahizante Hebronii kumatera e'naze. Anahukna hu'za maka vahe'mo'za Israeli kinia Deviti manisie hu'za antahi'naze. <sup>39</sup> Hagi ana sondia vahe'mo'za Deviti'ene 3'agna Hebronii eman'i'naze. Ana hazageno nagazmimo'za ne'zana retro huzmantage'za ne'naze. <sup>40</sup> Hagi ana zanke hu'za afete'are'ma nemaniza Isaka naga'ma, Zebuluni nagama, Naptali naga'mo'za donki agumpima, kemoli agumpima, hosi agumpima bulimakao agumpima witima, fikima, ante hagagehu krepima, wainima hu'za erinte'za eri'za ne-eza bulimakao afu'ene sipisipi afu'ene avre'za e'naze. Na'ankure maka Israeli mopafina vahe'mo'za tusi muse hu'naze.

## 13

### *Anumzamofo huhagerafi huvempage vogisima ete Deviti'ma eri'nea naneke*

<sup>1</sup> Hagi Deviti'a 1tauseni'a sondia vahetema kegavama hu'naza kva vahe'ene 100'a sondia vahetema kegavama hu'naza kva vahe'ene, maka ugagota kva vahetmina zamavare atru huno keaga huno antahintahizmia eri'ne. <sup>2</sup> Ana'ma nehuno'a amanage huno Israeli vahera zamasami'ne, Tamagramma hugnarerema nehanageno, Ra Anumzamofo avesi'ma me'nena maka Israeli vahetegane, kumazmifine, trazama nenaza afutamima kegavama nehaza mopafima nemaniza pristi vaheteganena kea atresunke'za maka vahe'mo'za e'za eme atru hugahaze. <sup>3</sup> Hagi enketa Ra Anumzamofo huhagerafi huvempage vogisi ete omerita esune. Na'ankure Soli'ma kinima mani'neno kegavama hu'nea knafina, ana zankura tagra tagesa ontahi mani'none.

<sup>4</sup> Hagi anagema hige'za, atruma hu'naza maka vahe'mo'za mago zamarimpa hu'za kema hanazana hugahune hu'za hu'naze. Na'ankure antahintahima retro'ma hazazamo'a maka vahe'mofo zamavurera fatgo hu'ne.

<sup>5</sup> E'ina higeno Deviti'a Anumzamofo huhagerafi hvempage vogisima Kiriat-Jearimi kumate'i'ma omerinaku'ma Israeli vahe'ma zmavre atru'ma hu'neana Isipia sauti kaziga Sihori tinteti agafa huno manino vuno noti kaziga Lebo-hamati kumate'ma uhanati'nea Israeli vhahera maka zamavare atru hu'ne. <sup>6</sup> Ana huteno Deviti'ene maka Israeli vahe'enena Anumzamofo huhagerafi hvempage vogisi omerinaku Juda nagamofo moparega Kiriat-Jearimi vu'naze. Hagi ana vogisimofo agofetura tare ankerontre trohuntenego, ana ankerontremofo amu'nompi Ra Anumzamomofo kini trara mani'nege'za agia nehaza vogisie.

<sup>7</sup> Hagi Abinadapu nompintira kasefa karisifi Anumzamofo huhagerafi hvempage vogisi erinte'za eri'za e'naze. Hagi ana karisia Uzake Ahioka kegava huke e'na'e. <sup>8</sup> Hagi eri'zama nevazageno'a Devit'ene Israeli vahe'mo'zanena Anumzamofo avuga maka hankavezmireti hu'za, hapue nehaza zavenane, lairiema nehaza zavenane konkena nere'za zozopanetiza, nasenasepa nehe'za ufena re'za zagamera hu'za musena hu'naze.

<sup>9</sup> Hagi ana hume eza Kidonima witi honama refuzafu'ma nepea kumapima azageno'a, Uza'a azana ante kantuteno Anumzamofo huhagerafi hvempage vogisia azeri'ne. Na'ankure ana huhagerafi hvempage vogisima eri'nea bulimakao afu'mo'a tanafa huno maseza higeno anara hu'ne. <sup>10</sup> Hagi ana'ma higeno'a Ra Anumzamo'a Uzana tusi arimpa ahnenenteno, ahe fri'ne. Na'ankure Uza'a huhagerafi hvempage vogisi avako hu'negeno'e. Ana higeno Uza'a Anumzamofo avuga fri'ne.

<sup>11</sup> Ana'ma higeno'a Ra Anumzamo'ma Uzama ahe fria zankura Deviti'a tusi arimpa ahnenenteno, ana kumakura Perez-uzae huno agia antemigeno meno eno, ama knarerera ehanati'ne.

<sup>12</sup> Hagi ana knarerera Deviti'a Anumzamofonkura koro nehuno amanage hu'ne, inankna hu'na Anumzamofo huhagerafi hvempage vogisia eri'na noniarega vugahue? <sup>13</sup> E'nage nehuno Deviti'a ana huhagerafi hvempage vogisia erino noma'arega ovu'neanki, Gati kumate ne' Obed-Edomu nompi eri'kantiteno ante'ne.

<sup>14</sup> Hagi Anumzamofo huhagerafi hvempage vogisimo'a, Obed-Edomu nompina 3'a ika me'ne. Hagi ana'ma higeno'a, Ra Anumzamo'a Obed-Edomune naga'anee maka zantmima'a asomu hunte'ne.

## 14

### *Deviti naga'mofone noma'amofo naneke*

<sup>1</sup> Hagi anante Tairi kumate kini ne' Hiramu'a kato vahe huzmanteg'e'za sida zafa e'neriza, have eri'zama eri vahe'ene, noma negiza vahe'enena nezmvareno Deviti hirega kini noma'o ome kinaku vu'naze. <sup>2</sup> Hagi ana'ma higeno'a Deviti'ma antahino keno'ma hiana Ra Anumzamo'a Israeli vahe' kini nazeri otino, Israeli vahe'agu huno maka mopama kegavama hanua mopa asomu hunante huno antah'i'ne.

<sup>3</sup> Hagi Deviti'a Jerusalemi kumate mani'neno mago'ane a'nanea erino rama'a ne'mofara zamante'ne. <sup>4</sup> Hagi Jerusalemi kumate'ma mani'enonoma kasente'nea mofavreramimofo zamagi'a ama'ne, Samuama, Sobabuma, Netenima, Solomonima, <sup>5</sup> Iparima, Elisuama, Elpeletima, <sup>6</sup> Nogama, Ne-fekima, Jaflama, <sup>7</sup> Elisamama, Beliadama, Elifeletima huno zamante'ne.

### *Deviti'a Filistia vahe ha' huzamagatere'nea naneke*

<sup>8</sup> Hagi Filistia vahe'mo'zama antah'i'zama, Devitima Israeli vahe kinima azeri otizageno'a, maka Filistia vahe'mo'za erimago hu'za

Devitina hahunte'naku hake'za mareri'naze. Hianagi ana kema Devitima asamizageno nentahino, ha' huzmante'naku vu'ne. <sup>9</sup> Hagi Filistia vahe'mo'za Refaimi agupofi e'za ana kumate vahetmina eme zamarotgo hu'za rohu nezamare'za mika zazmia eri'naze.

<sup>10</sup> Hagi Deviti'a Anumzamofo antahigeno, Filistia vhahera vu'na hara ome huzmantenugenka, nzampina zamavarentegahano? Huno higeno amanage huno Ra Anumzamo'a kenona hu'ne, Marerige'na Filistia vhahera kazampi zamavarentaneno.

<sup>11</sup> Anage higeno Deviti'a sondia vahe'anena marerino Filistia vhahera hara ome huzamagatereno amanage hu'ne, Ti hageankna huno ha' vahe'nia Anumzamo'a hara huzmante'ne. E'ina hu'negu ana kuma'mofo agi'a Ba'al Perazimie huno agi'a antemi'ne. <sup>12</sup> Hagi Filistia vahe'mo'za koroma nefre'za atre'za fraza havi anumzazimia, teve hanavazita kreho huno Deviti'a hige'za, teve hanavaziza kre'naze. <sup>13</sup> Hagi Filistia vahe'mo'za osi'a kna umanite'za ete e'za Refaim agupofi vhahera zamaratgo hu'za rohura eme zamare'naze. <sup>14</sup> Hagi Deviti'a mago'ane Anumzamofona antahigegeno, Anumzamo'a asamino, marerinka ome ozmahegosananki, rugaginka balsamu zafaramima me'neregati enka eme hara huzmantenka zamahegahane. <sup>15</sup> Hagi kagrama antahisankeno'ma zafaramimofo amuzafima sondia vahetamimo'ma agatre azatrema huno esia agasasama antahisunka, Filistia vhahera vunka hara ome huzamanto. Na'ankure Anumzamo'a vugota huganteno nevuno, Filistia sondia vhahera zamahegahie.

<sup>16</sup> Hagi Anumzamo'ma asami'nea kante anteno Deviti'a nevuno Filistia vhahera Gibionitira agafa huno zamarotgo huno hara huzmanteno vuno, Gezeri kumate ome atre'ne.

<sup>17</sup> Hagi ana'ma higeno'a Deviti agenkemo'a maka kokantega vuno eno higeno, Ra Anumzamo'a maka mopafi vhahera zamazeri zamagogofege'za Devitinkura tusi koro hu'naze.

## 15

### *Huhagerafi huvempage vogisima Jerusalemi kumate eri'za e'naza naneke*

<sup>1</sup> Hagi Deviti'a rankuma'afina Jerusalemi noma'aramina kivatu huteno, Anumzamofo huhagerafi huvempage vogisimofo kumara retrotra huno seli noma'a kinte'ne. <sup>2</sup> Ana huteno Deviti'a amanage huno hu'ne, Mago'a naga'mo'za huhagerafi huvempage vogisia eri'za omegosazanki, Livae nagamozage eri'za egahaze. Na'ankure Ra Anumzamo'a huhagerafi huvempage vogisima eri'za vano nehu'za, eri'zama'ama eri vhahera zamagri huhampri zamante'neankiza zamagrake ana eri'zana eri vava hugahaze.

<sup>3</sup> Hagi Ra Anumzamofo huhagerafi huvempage vogisima ante kuma'ma retro'ma huntenebi ana vogisia erino emareriku Deviti'a mika Israeli vhahera Jerusalemi kumate ke hutru hu'ne. <sup>4</sup> Hagi ana nehuno Deviti'a Aroni naga'ene Livae naga'enena zamavare atru higeno nampa zamimo'a amanahu hu'ne. <sup>5</sup> Kohati nagapina 120'a vahe manizageno, kvazmia Urieli mani'ne. <sup>6</sup> Hagi Merari nagapina Asaia kvazmia manigeno 220'a vahe e'naze. <sup>7</sup> Hagi Gesomu nagapintira Joel kvazmia manigeno 130'a vahe e'naze. <sup>8</sup> Elizafani nagapintira Semaia kvazmia manigeno, 200'a vahe e'naze. <sup>9</sup> Hagi Hebronii nagapintira Elieri kvazmia manigeno, 80'a vahe e'naze. <sup>10</sup> Hagi Uzieli nagapintira Aminadabu kvazmia manigeno, 112'a vahe e'naze.

<sup>11</sup> Hagi Deviti'a tare pristi netrena Zadokine Abiatarinena ke nehuno Livae nagapinti kva vahetmina Urielima, Asaiama, Joelima, Semaiama, Elielima, Abinadapuma huno ke hutru huteno, <sup>12</sup> amanage huno zamasami'ne, Tamagra Livae nagapinti kva vahetami mani'naze. Hagi tamagra'a tamazeri agru nehuta, ruga'a Livae naga'enena zamazeri agru huteta, Ra Anumzana Israeli vahe Anumzamofo huhagerafi hvempage vogisia omerita kuma'ma retrotra'ma huntofina eme antegahaze. <sup>13</sup> Na'ankure ese'ma vuta huhagerafi hvempage vogisima omenerunketa Livae naga'mota tamagra ana vogisia vuta ome e'ori'naze. E'inama hu'naza zanku Ra Anumzana tagri Anumzamo'a tusi arimpa aherante'ne. Na'ankure Anumzamofona inankna huta ama ana vogisia erigahune huta antahi onketa, e'ina huta erigahazema hu'neankea avaririta ana huhagerafi hvempage vogisia e'orinone.

<sup>14</sup> Anage higeno Livae naga'ene pristi vahe'mo'za Ra Anumzana Israeli vahe Anumzamofo huhagerafi hvempage vogisi omerinaku zamazeri agru hu'naze. <sup>15</sup> Ana hute'za Livae naga'mo'za huhagerafi hvempage vogisia Ra Anumzamo'ma Mosesema asamigeno zamasami'nea kante ante'za, vimago zafare eri'zafa hu'za zamafunte kofi'za e'naze.

<sup>16</sup> Hagi, hapue nehaza zavenama, lailiema nehaza zavenama, nase-nasepama, zavenane nehesage'za zagame'ma hu'za musenkasema hanaza vahera Deviti'a Livae nagamofo kva vahe huzmantenge'za nagazamifinti zamazeri ot'i'naze. <sup>17</sup> Hagi Joelii nemofo Hemani azeri oneti'za, mago'a afuhe'ima zamazeri ot'i'nazana, Berekia nemofo Asapuma, Merari nagapinti Kusaia nemofo Etamura, <sup>18</sup> mago'a zamazama hanaza vahe'ma zamazeri ot'i'nazana, Zekaraiama, Jazielima, Semiramotima, Jehielima, Unima, Eliapuma, Benaiama, Maseama, Matitiamma, Elifelehuma, Mikneiamma huno huhampri nezmanteno, kuma kahante kva netrena Obed Idomune, Jeielikizni zanazeri ot'i'naze. <sup>19</sup> Hagi zagamema nehu'za bronsiretim tro'ma hu'naza nase'nasepama ahesaza vahera, Hemanima, Asapuma, Etanima huno zamazeri ot'i'ne. <sup>20</sup> Hagi Lairie nehaza zavenama ahesaza vahera, Zekaraiama, Azielima, Semiramotima, Jehielima, Unima, Eliapuma, Maseama, Benaiama huno zamazeri ot'i'ne. <sup>21</sup> Hagi hapanue nehaza zavenama ahe vahera Matitiamma, Elifelehuma, Mikneia'ma, Obed-Idomuma, Jeielima, Azazaiama hu'za ugotama hu'zama vanaza vahera zamazeri ot'i'naze. <sup>22</sup> Hagi Livae nagapinti ne' Kenenai'a zagamema hu vahete ugota hu'neankino, agra zagamema hu'zana rempi huzamigahie. Na'ankure agra zagamema hu'zana antahini hu'nea ne' mani'ne. <sup>23</sup> Hagi Ra Anumzamofo huhagerafi hvempage vogisima ante nomofo kafante'ma kegavama hu netrena, Belekiane Elkanakizni zanazeri ot'i'naze. <sup>24</sup> Hagi Ra Anumzamofo huhagerafi hvempage vogisimofo avugama ufema re'za vanaza pristi vahe'ma zamazeri ot'i'nazana, Sefaniamma, Joshafatima, Natanielima, Amasaima, Zekaraiama, Benaima, Eliezerima hu'za zamazeri ot'i'naze. Hagi Obed Idomune, Jehiakiznia huhagerafi hvempage vogisima ante kumamofo kahante kegava hu netre zanazeri ot'i'naze. <sup>25</sup> Hagi Deviti'ene maka Israeli kva vahe'mo'zane, 1000ni'a sondia vahete kva vahe'mo'za Ra Anumzamofo huhagerafi hvempage vogisima musenkase hu'za Obed Idomu nompinti omeriza marerinaku vu'naze. <sup>26</sup> Hagi Anumzamo'ma Livae nagama zamaza hige'za Ra Anumzamofo huhagerafi hvempage vogisima zamafunte'ma eri'za e'naza zanku hu'za 7ni'a ve bulimakaone, 7ni'a ve sipisipine, ahe'za kresramna vu'naze. <sup>27</sup> Hagi Deviti'a efeke za'za kukena nentanigeno, ana zanke hu'za huhagerafi hvempage vogisima eri'za neaza

pristi vahe'mo'zane, zagamema nehaza vahe'ene, zagame'ma nehaza va-hetema ugotama hu'nea ne' Kerenai'enena anahukna kukena hu'naze. Hagi Deviti'a efeke za'za kukenama hu'nea agofetura pristi vahe'mo'zama zamimizare'ma nentaniza kukena efotienda nehaza kukena antani'ne.<sup>28</sup> Ana hute'za Israeli vahe'mo'za nase'nasepana nehe'za, hapuema nehaza zavenane, Laireima nehaza zavenanena nehe'za musena hu'za Ramofo huhager-afi hvempage vogisia eri'za vu'naze.<sup>29</sup> Hianagi Ra Anumzamofo huhager-afi hvempage vogisima Deviti rankumapima enefregeno'a, Soli mofa Deviti nenaro Mikali'a nom'aafi mani'neno zaho eri kampinti kefenkateno ke'ama, kini ne' Devitima musema nehuno haru huno takaire takaire'ma huno avoma hagenoma nevigeno'a, agu'afina antahi haviza hunte'ne.

## 16

### *Huhagerafi hvempage vogisima antesaza seli nomofo naneke*

<sup>1</sup> Hagi Anumzamofo huhagerafi hvempage vogisia eri'za e'za Deviti'ma seli no kinte'nefinka eme nente'za, tevefima kre fananehu ofane, arimpa fru ofanena Anumzamofontega kre'naze. <sup>2</sup> Hagi Deviti'ma tevefima kre fananehu ofane arimpa fru ofanema Kresramanama vuteno'a, Ra Anumzamofo agifi Israeli vahetmina asomu kea huzmante'ne. <sup>3</sup> Ana nehuno maka Israeli vahetmina mago mago vene a'enena, bretine afu ame'anena nezamino kre hagegema hu'nea bretinena refko huno zami'ne. <sup>4</sup> Ana nehuno mago'a Livae vahetmina Ra Anumzamofo huhagerafi hvempage vogisire'ma mono eri'zama eri kva vahetami zamazeri o'netino, Ra Anumzana Israeli vahe Anumzamofoma susu hunenteno agima eris-gama hu' vahetamina zamazeri oti'ne. <sup>5</sup> Hagi ana vahetmimofo ugo-tama huzmante'nea kvazmia Asapu'e. Hagi Asapu amefira Zekaraia'e, hagi Zekaraia amefira Jeieli'ma, Semiramoti'ma, Jehiel'i'ma, Matitia'ma, Eli-apu'ma, Benai'a'ma, Obed-Idomu'ma Jeieli'e. E'i ana vahetmimofo eri'zana Hapuema nehaza zavenane, Laierima nehaza zavenane, nase'nasepama ahe vahe mani'naze. Hagi Asapu'a ra ageruma neria nase'nasepama ne-hea ne' mani'ne. <sup>6</sup> Hagi Anumzamofo huhagerafi hvempage vogisimofo avugama maka zupama ufema nera'a pristi netrena Benaiake Jahzielike mani'na'e. <sup>7</sup> Hagi anankna zupa Deviti'a Asapune mago'a Livae afuhe'inena Ra Anumzamofoma susuma hunenteno agima erisgama hu zagamera ama'na zagame huntege'za esera agafa hu'za hu'naze.

<sup>8</sup> Ra Anumzamofo susu hunenteta, agi'a aheta knare avu'ava'amofona huama hanunkeno, kokankoka vahe'mo'za antahisaze! <sup>9</sup> Zgame huta agi'a erisga nehuta, maka ruzahu ruzahu knare avu'ava'ma hu'nea zamofo nanekea huama hanune. <sup>10</sup> Zgame huta ruotge'ma hu'nea agia husga nehanunkeno, zamagu'areti'ma hu'za Ra Anumzamofonku'ma nehakaza vahe'mo'za muse hugahaze. <sup>11</sup> Ra Anumzamofone hihamuagu'ene ne-haketa, Agri avufima kesaza zanku maka zupa hakeho. <sup>12</sup> Hagi avamezan-tamine kaguva zantaminema erifore nehuno, fatgo avu'ava'ma huno re-floma nehia zankura maka zupa tamagesa antahihiho. <sup>13</sup> Agri eri'za ne' Israeli agehemota Jekopu ne' mofavreramina, Agra'a humhamprinte'nea vahetami mani'naze! <sup>14</sup> Agra Ra Anumzana tagri Anumzane. Agra maka ama mopafi vahe'ene maka zana refko nehie. <sup>15</sup> Hagi huhagerafi hvempa ke'agura tamagera okanita maka zupa tamagesa antahi vava

hiho. Tauseni'a zupa kasente kaseentema hanigeno fore'ma hunante huanante'ma huno esia vahetminku'ene Agra ana nanekea hu'ne. <sup>16</sup> Agra Abrahamu'ene huhagerafi hvempage nehuno, Aisaki'ne hvempagea hunteno, <sup>17</sup> Israeli vahepina mevava hania kasegea Agra Jekopunte eri kasefa ne-huno, <sup>18</sup> amanage huno asami'ne, erisantima hareshanazana Kenani mopa kamigahue huno hu'ne. <sup>19</sup> Kenani mopafima osi'a vahe'ma mani'neta emani vahekna huta mani'neta, <sup>20</sup> ru kumate ru kumate'ma manita vano nehuta, ru vahepi ru vahepi huta manita vano hu'naze. <sup>21</sup> Hianagi agra zamatrege mago vahe'mo'a zamazeri havizana osu'ne. Hagi zamazeri havizama huzankura kini vahetmina hankave naneke zmasamino, <sup>22</sup> amanage hu'ne, zamazeri ruotge'ma hu'noa nagamofo zamavufagarera zamavakora osiho. Nagri kasnampa vahera hazenkea ozamiho hu'na hu'noe. <sup>23</sup> Maka mopafi vahe'mota Ra Anumzamofontega zagamera huta tamagu'ma vazi'nea zankura knane knanena agi'a erisga hugahaze. <sup>24</sup> Maka mopafi vahetera, hihamu hankave'ane avu'ava'agura huama ne-huta, ruzahu ruzahu knare avu'ava'ma hu'nea zankura maka vahera zamasmaho! <sup>25</sup> Na'ankure Ra Anumzana marerisa neki, Agrike'za ragia amigahaze. Hagi maka havi anumzantamima mani'nazafina Agrake'zage marerisa Anumzana mani'neankita, Agrike korora hunenteta agoraga'a manigahune. <sup>26</sup> Na'ankure maka kumate anumzantamima vahe'mo'za mono'ma hunentaza anumzantamina vahe'mo'za zamazanteti antre'za tro hu'naza anumzantami mani'naze. Hianagi Ra Anumzamo monaramina tro hu'ne. <sup>27</sup> Hagi Agrira marerisa hentofo konariri masa'amo'a arugag-integeno, hanave'amo'ene masazamo'enena kuma'afina avite'ne. <sup>28</sup> Hagi maka naga nofimota Ra Anumzamofona huama nehinke'za keama hiho. Ra Anumzamofo hihamu masa'agu huama nehinke'za keama hiho. <sup>29</sup> Ra Anumzamofona keama huta ragia nemita, ofa tamia erita Agri avuga echo. Ra Anumzamofona ruotge hihamu masa'afi monora hunenteta, <sup>30</sup> maka mopafi vahe'mota Agri avuga tamahirahikura hiho. Ama mopamo'a hanavetino me'neankino, momira osugahie. <sup>31</sup> Monamo'a musena ne-hinkeno, mopamo'enena musena nehu'za amanage hu'za kokankoka vahera zamasmaho. Ra Anumzamo'a Agra'a kinia mani'ne hiho! <sup>32</sup> Hagi hagerimo'a kranto kranto nehi'na, anampima nemaniza maka zagaramimo'za agi'a erisga nehinkeno, hozamo'ené anampima me'nea kavemo'za agi'a erisga hiho. <sup>33</sup> Hagi zafafi zafaramimo'za Ra Anumzamofona muse hunte'za agia erisga hiho. Na'ankure Ra Anumzamo'a maka ama mopafi zana keagare avrenteno refko hunaku egahie. <sup>34</sup> Ra Anumzamofo musena huntesune, na'ankure Agra knare ne' mani'neankino, maka zupa avesirante vava nehie. <sup>35</sup> Hagi kezatita mago'ene amanage hanune, tagu'ma nevazina Anumzamoka tagririra tagu'vazio. Vahe kokampintira tavre tru hunka taza-hugeta susu huneganteta, musena huta ruotge kagika'a erisga huta rankagia kamimneno. <sup>36</sup> Manivava Ra Anumzana Israeli vahe Anumzamofona ragi amisunkeno, ra agia eri vava huno vanie. Anagema hutege'za maka vahe'mo'za tamage hu'za nehu'za, Ra Anumzamofo agi erisga hu'naze.

<sup>37</sup> Ana huteno kasegemo'ma hu'nea kante'ma ante'za Ra Anumzamofo huhagerafi hvempage vogisimofo avuga magoke magoke knare'ma eri'zama erisagu Deviti'a Asapune mago'a Livae naga'enena zamazeri ante fatgo hu'ne. <sup>38</sup> Hagi ana vahepina Jedutuni nemofo Obed-Idomune, 68'a naga'anе Hosanena seli mono no kafante'ma kegavama hu vahetami zamazeri oti'ne.

<sup>39</sup> Hagi ugota pristi ne' Zadokine afu'aganahe'ina Gibioni kumate Ra

Anumzamofo mono'ma hunentazare seli mono nonte'ma kegavama hu vahera zamazeri oti'ne. <sup>40</sup> Hagi ana naga'mo'za Ra Anumzamofo kasegemo'ma hu'nea kante ante'za kinagane nanterananena Kresramanama vu itarera Ra Anumzamofontega Kresramana vutere hugahaze. <sup>41</sup> Hagi ana nagapina Hemanine, Jedutune mago'a zamagima kreno zamazeri oti'nea nagara Ra Anumzamo'ma maka zupama avesizmante vavama nehia zanku'ma humuse hunente'za zagame'ma hu'za agi'ma erisga hu vahetami zamazeri oti'ne. <sup>42</sup> Hagi Heman'i'ene Jedutunikea ufene, nasenasepane, zavenaramine mago'a zavenama ahe'za Anumzamofoma agima erisgama nehaza zavema kegava hu'na'e. Hagi Jedutuni amohe'ina kuma kafante'ma kegavahu vahetami zamazeri oti'ne. <sup>43</sup> Hagi ana maka zama vagaregeno'a, maka vahe'mo'za nozmirega vu'za e'za hazageno, Deviti'a agra'a naga'amofo asomu ke ome huzmante'naku noma'arega vu'ne.

## 17

### *Anumzamo Deviti'ene huhagerafi huvempage hu'nea naneke*

<sup>1</sup> Hagi Deviti'ma kasefa noma ki'nea nompima agafa huno nemanino'a amanage huno kasnampa ne' Netenina asami'ne, Ko, nagra sida zafanu knare no kinte'na mani'noanagi, Ra Anumzamofo huhagerafi huvempage vogisimo'a seli nompi me'ne. <sup>2</sup> Anage higeno Neteni'a Devitina amanage huno kenona asamine, Na'anoma hunaku'ma kagu'affima antahisana zana amne huo. Na'ankure Anumzamo'a kagri'ene mani'ne. <sup>3</sup> Hianagi ana kenagera Anumzamo'a amanage huno Netenina asamine, <sup>4</sup> Vunka eri'za vaheni'a Devitina omesamio, Nagrama manisua nona Devitiga kagra onkigahane. <sup>5</sup> Israeli vahe'ma Isipiti'ma zamavare atirami'na enoreti'ma eno amare'ma ehanati'neana, magore hu'na nompina Nagra omani'noe. Hianagi Nagra seli nompi manite manite hu'na e'noe. <sup>6</sup> Hagi mago mago kumate'ma Israeli vahe'enema manitere hu'nama e'noana, magore hu'na keagama refko hu kva vahe'ma vaheniare'ma kegava hihohu'nama huhamprizmante'noa kva vahera noni'a sida zafareti kinanteho hu'na huozmante'noe. <sup>7</sup> E'ina hu'negu menina eri'za vaheni'a Devitina amanage hunka ome asamio, Hankavenentake Ra Anumzamo'a amanage hie, sipisipi afu kva hunka trazama ne'za vanoma nehazarega zamavaririnka vano' nehanke'na, Israeli vaheni'are ugota hunka kegava huzmantese hu'na kavre'noe. <sup>8</sup> Ana hute'na maka kazigama vanoma banana, Nagra kagrane mani'nena ha' vaheka'a zamahe hana hu'noe. Hagi menina kagri kagia erira hanenkenka ama mopafima zamagima eri'naza vahe kna hugahane. <sup>9</sup> Hagi Israeli vahe'nia kumara nezami'na zamagrira zafama kriankna hu'na kri'nena zamazeri hanavetisuge'za, zamagra'a kumapi mani'nesageno, mago'a havi vahe'mo'za ko'ma hu'nazaza hu'za eme zamazeri havizana osugahaze. <sup>10</sup> Hagi ke refkohu kva vahe'ma zamazeri oti'noa knafima ko'ma hu'nazaza hu'za, mago'a kumate vahe'mo'za keonkezantamia emeri havizana nehu'za hazenkea ozamigahaze. Hagi maka ha' vaheka'a zamahehna nehu'na, kagri nagara zamazeri hankavetina zamazeri ra ha'nena, kagri nagapinti kva vahera mani'za vugahaze. <sup>11</sup> Hagi kagrama frinka kagehe'zama mani'nazaregama vanankena, kagri mofavreramimpinti magomofo kinia azeri oti'enkeno hankave kinia manino vugahie. <sup>12</sup> Ana hanugenana ne'mo noni'a kigahie. Hagi agripinti'ma fore'ma hania vaheke nagra kinia azeri otinena kinia mani vava huno vugahie. <sup>13</sup> Hagi Nagra nefaza hanugenana, agra mofavreniaza hanige'na koma mani'nea kini

neteti'i'ma navesizaniama eri atre'noa zana hu'na ana kini netetira eri otregosuanki avesinte vava hugahue.<sup>14</sup> Hianagi agri azeri otisnugeno, Nagri vahete'ene kuman'i'arera kinia manino kegava hu vava huno vugahie.<sup>15</sup> Anage hutegen Neteni'a vuno Ra Anumzamo'ma ava'nafima asmi'nea kante anteno Devitina ana maka nanekea ome asmi'ne.

### *Deviti'a Ra Anumzamofo susu huntenu nunamu hu'nea naneke*

<sup>16</sup> Hagi kini ne' Devitima ana kema antahiteno'a, seli nompi Ra Anumzamofo avuga ufreno umariteno amanage huno nunamuna hu'ne, Ra Anumzamoka, nagra i'zana manugen, Nagani'amo'za nanknahu naga mani'nazagenka nagrira navrenka amarera ehanatine.<sup>17</sup> Hagi Anumzamoka rama'aza hunante'nananagi, e'i ana zamo'a amneza segenka nagra mareri vahe'ma mani'nogeno'ma hiaza hunka nagripinti'ma fore'ma hania vahetema huzmantesana zanku'ma huamama hanazankura muse hugantoe.<sup>18</sup> Hagi eri'za vaheka'amo'nama nagesgama hunka antahinamina zankura mago kea osugosue. Na'ankure kagra ko eri'za vaheka'amo'na nagenka antahinka hu'nane.<sup>19</sup> Na'ankure Ra Anumzamoka eri'za vaheka'amonagu hunka kagra kavesite razankrerfa tro hunante'naku eme nasami'ne.<sup>20</sup> Ra Anumzamoka kagrikna vahera omanni'ne. Hagi kagrikna Anumza mani'ne hu'za hazageta ontahi'none.<sup>21</sup> Hagi ama mopafima mani'naza vahepintira, ina vahe'mo'za kagri vahe Israeli vahekarna hu'naze? Hagi Anumzamoka kagri vahe'ma maninogura ina vahe'mo'za kazokzo eri'zana eneri'za Isipia mani'nazagenka vahe'mo'zama rankagima kaminagu hunka zamagura vazinka zamavare'nane? Hagi kagra tusi'a hanavenentake kaguvaaza hunka Israeli vahe'ma nezmahazagenka ha' vahezamia zamahenati atre'nane?<sup>22</sup> Hagi Kagra Israeli vahera nagri vahe mani' vava hanaze hunka nehunka, Ra Anumzamoka zamagri Anumza mani'nane.<sup>23</sup> Hagi menina Ra Anumzamoka atregeno eri'za vahekamonagu'ene naga'nimofonku'ma hu'nana kemo'a, huvempama hu'nana kemofo kante anteno, anazamo'a efore huno mevava huno meno nevinkeno,<sup>24</sup> kagimo'a eama nehina, maka ama mopafi vahe'mo'za rankagi negami'za amanage hugahaze, Hankavenentake'Ra Anumzana, Israeli vaher Anumza mani'ne hu'za hugahaze. Hagi eri'za vahekamo'na Deviti'na naga'mo'za kinia mani vava hu'za kagri kavuga vugahaze.<sup>25</sup> Na'ankure Kagra Anumzanimoka, eri'za nekamo'na naveri hunka nagripinti'ma fore'ma huza vnaza vahe'mo'za kinia mani'za vugahaze hunka hu'nane. E'ina hu'negu eri'za nekamo'na korora osu kagritega hanavetina nunamuna nehue.<sup>26</sup> Hagi Ra Anumzamoka kagrake Anumzana mani'enka ama'inahu knare'zana hunante'naku huvempa kea hunante'nane.<sup>27</sup> Hagi menina kagri kavurera knare higenka eri'za vahekamo'na naga'mofonku hunka kagri kavuga kinia mani vava hanaze hunka asomu kea huzmantane. Na'ankure kagra Ra Anumzankinka asomu ke'ma hana asomu kemo'a mevava huno vugahie.

## 18

### *Deviti'ma ha'vahe'aramima ha'ma huzmagatere'nea naneke*

<sup>1</sup> Hagi henka Deviti'a Filistia vahera hara huzmagatenereno, Gati rankumazmazma enerino, neone kumazminena Filistia vaher zamazampintira eri vagare'ne.<sup>2</sup> Hagi anahukna huno Deviti'a Moapu vahetaminena hara huzmagateregeno, Moapu vahe'mo'za Deviti eri'za vaher fore hu'za takisi zagoa eri'za etere hu'za eme ami'naze.<sup>3</sup> Hagi Zoba-Hamati kumate kini ne' Hadadezeri'ma Zufretesi tima me'neregama mani'naza vahe'ma kegavama

hu'nea kumara Deviti'a hara ome hugatereno eri'ne. <sup>4</sup> Hagi Deviti'a 1tauseni'a karisigi, 7tauseni'a karisifima vano nehu'za ha'ma nehaza sondia vahetaminki, 20tauseni'a mopafima vano nehu'za ha'ma nehaza sondia vahetminki huno zamavaririno zamazeri'ne. Ana nehuno maka hosi afutamina zamagigrū'na taga nehuno, 100'a karisima avazuhuga avamente hosi afutamina atre'ne. <sup>5</sup> Hagi Siria vahe'ma Damaskasi kumate'ma nemaniza vahe'mo'za kazana hige'za Zoba kini ne' Hadadezeri eme aza hu'za ha'ma hunaku'ma azana, Deviti'a 22tauseni'a vahe zamahe fri'ne. <sup>6</sup> Hagi Deviti'a ana huteno mago'a sondia vahe'a zamatrege'za Damaskasi kumapina umani'nazageno, Syria vahe'mo'za Deviti eri'za vahe mani'ne'za takisi zagoa eri'za eme amitere hu'naze. Hagi Devitina Ra Anumzamo'a hankave amigeno, maka kazigama ha'ma ome hiana ha' vahe'a hara ome hu zamagatere'ne. <sup>7</sup> Ana nehuno Hadadezeri sondia vahe'mo'zama golireti'ma tro'ma hu'naza hankoma eri'nazana, Deviti'a erino Jerusalemi kumate vu'ne. <sup>8</sup> Hagi Tibhatine, Kuni kumatrena Hadadezeri kumatrenkino ana kumatremprintira Deviti'a rama'a bronsi eri'ne. Hu'neankino Solomoni'a ana bronsireti hagerinema huno'ma hu'nea ti tenkia tro nehuno, mono nomofoma vazisgama hu zafane, mono nompima eri'zama eri'naza zantamina trohu'ne. <sup>9</sup> Hagi Deviti'ma Zoba kumate kini ne' Hadadezeri Sondia vahe'tmima zamahehna hiankema Hamati kumate kini ne' Tou'ma nentahino'a, <sup>10</sup> Deviti'ma ha'ma huno ha' vahe'ama zmahehna'ma hiazante'ma humuse huntengenu nemofo Hadoramuna huntengen e'ne. Hagi Hadadezerike Toukea zanagra ha' netrenkike hara hutere neha'a netre mani'na'e. Hagi Hadoramu'a Devitintega goline, silvane mago'a bronsine atrentege'za eri'za musezana vu'naze. <sup>11</sup> Hagi Deviti'a ana zantamina Idomuti'ma, Moaputi'ma, Amoni vahepinti'ma, Filistia vahepinti'ma, Ameleki vahepinti'ma silvane golinema eri'nea zantamina Ra Anumzamofo su'ane huno eri ruotge hu'ne. <sup>12</sup> Hagi Zeruia nemofo Abisai'a Hage nehaza agupofi Idomu vahera hara ome huzmanteno, 18tauseni'a sondia vahe zamahe fri'ne. <sup>13</sup> Ana hutengen Deviti'a mago'a sondia vahe'a huzmantege'za Edomu kumate umanizage'za, Edomu vahe'mo'za Deviti eri'za vahe mani'ne'za takisi zagoa eri'za eme ami'naze. Hagi Devitina Ra Anumzamo'a hankave amigeno maka kazigama ha'ma ome hiana, ha' vahe'a hara hu zamagatere'ne. <sup>14</sup> Hagi Deviti'a ana huteno maka Israeli vahe kini mani'neno ana maka vahe'a magozanke huno fatgo avu'avaza huno kegava huzmante'ne. <sup>15</sup> Hagi Zeruia nemofo Joapu'a, Sondia vahetmimofo ugagota kva manigeno Ahiludi nemofo Jehosafati'a maka'zama avontafepima kreno eri fatgo hu eri'za ne' mani'ne. <sup>16</sup> Hagi Ahitubu nemofo Zadoku'ene, Abiatari nemofo Abimelekike pristi netreman i na'e. Hagi avoma kreno eri fatgoma hu' vahera Savsa'e. <sup>17</sup> Hagi Deviti avufgare kva vahetmimofo kva nera Jehoiada ne'mofo Benai'a'e. Ana higeno Deviti amohe'mo'za Deviti tavaontera mani'ne'za ranra eri'zana eri'naze.

## 19

### *Deviti'ma Amoni vahe'ma ha'ma huzamagatere'nea naneke*

<sup>1</sup> Hagi mago'a kna evutegen, Amoni vahe kini ne' Nahasi'a frigeno nemofo Hanuni agri nona erino kinia mani'ne. <sup>2</sup> Hagi Deviti'a amanage hu'ne, nagra Hanunina knare avu'avaza huntensue, na'ankure nafa'amo Nahasi'a nagrira knare avu'ava kora hunante'ne. Anage nehuno Hanunina nef'a'ma fri'nea zante Hanuni zamasunku ke ome huntehogu kato vahera Deviti'a huzmante'ne. Hagi ana'ma hige'za Deviti eri'za

vahe'amo'za nef'a'ma frigeno'ma mani'nea zante Hanuni kenaku Amoni  
 vahe mopafi e'naze. <sup>3</sup> Hianagi Amoni kumate kva vahe'mo'za amanage  
 hu'za Hanunina asmi'naze, Kagrama antahinana ama'i vahe'tmima  
 Deviti'ma huzmanteg'e'zma azana, negafa'ma fri'nea zante zamasunku ke  
 hugantenaku aze hunka kagesa antahino? I'o, ha' eme hurante'naku  
 mopatia afure'za kenaku e'naze. <sup>4</sup> Hazageno Hanuni'a Deviti'ma huzmanteg'e'zama  
 e'naza vahetmina zamazerino zamagi zamazokara harenenezman-  
 teno, zamariga avamenteti kenazmia ahe vatro hutere huteno huzmanteg'e'za  
 ete vu'naze. <sup>5</sup> Hagi ana nanekema Devitima eme asamizageno'a,  
 eri'za vahe'arami huzmanteg'e'za e'za amanage hu'za ana vahetmina eme  
 zamasami'naze, kini ne'mo'a amanage hie, Jeriko kumate mani'enkeno  
 tamagitamazoka'mo'a hagetena echo huno hu'ne. Na'ankure zamagrira  
 tusi'a zamagazema hu avu'ava'ma huzmantegeno zamagazema hiazanku  
 anagea hu'ne. <sup>6</sup> Hagi Amoni vahe'mo'zane, Hanuni'enema ke'za antahi'za  
 hazama zamagrama haza avu'avamo'ma Devitima azeri arimpama ne-  
 hegено'a, karisifima mani'neza zamaza hu'za Devitima ha'ma hunte'naza  
 vahetamine karisiraminema mizasenazana Messopotamia kumateti'ene,  
 Aram-ma'aka kumateti'ene, Zoba kumatetira, kna'amo'a 30 tausen hu'nea  
 silva zagoreti ome mizase'naze. <sup>7</sup> Hagi ana zago'a ome zami'za 32tauseni'a  
 karisiraminki, Ma'aka kumate kini ne'ene maka sondia vahe'araminen  
 zamavare'za e'za, Medeba kumate seli nona eme ki'za mani'naze. Hagi  
 anama nehazage'za Amoni sondia vahe'mo'za zamagra rankumapinti Is-  
 raeli vahe'ha' huzmantenaku atiramiza e'naze. <sup>8</sup> Hagi Deviti'ma ana'ma  
 haza nanekema nentahino'a, Joapune maka hankave sondia vahetmina  
 huzmanteg'e'za ha' ome huzmantenaku vu'naze. <sup>9</sup> Hagi Amoni kumate  
 sondia vahe'mo'za rankumapintira etirami'za rankumamofo kafante eman-  
 impi hu'za ha hunaku otizageno, mago'a kini vahe'mo'zama zamazama  
 hunaku'ma e'naza kini vahe'mo'zane, sondia vahe'mo'zanena hahunaku  
 zamagranena hofa agupofi eme retro hu'za ot'i'naze. <sup>10</sup> Hagi Joapu'ma  
 keama ha' vahe'amozama amigane avuganema maninpi hu'za otizageno,  
 knare'ma hu'za ha'ma nehaza hankave sondia vahetmina huzmanteg'e'za  
 Aramu sondia vahe'ene hara ome hunaku manimpi hu'za ot'i'naze. <sup>11</sup> Hagi  
 mago'ama maniza sondia vahetmina negna Abisai azampi antegeno, Abi-  
 sai'a zamavareno Amoni vahe'mokizmī hara huzmantenaku manimpi  
 hu'naze. <sup>12</sup> Ana nehuno Joapu'a negna Abisaina amanage huno asmi'nne,  
 Siria ha'vahe'mo'zama tusiza hu'za hankavema tiza ha'ma hunante'snageta  
 eta eme naza hiho. Hagi Amoni vahe'mo'zama kagri'ma hankavetiza  
 ha'ma hugantesnagena, nagra e'na eme kaza hugahue. <sup>13</sup> Hagi korora  
 osunka hankavetigeta, vahetiagu'ene Anumzanti'amofo rankumaku'ene  
 ha' vaheti'aramina hara huzmantamnena, Ra Anumzamo'ma kesigenoma  
 knare'ma haniazana amne agra hugahie. <sup>14</sup> Hagi Joapu'ene sondia  
 vahe'amozama Siria sondia vahetmima ha'ma ome huzmantage'za, ana  
 Siria vahe'mo'za atre'za fre'naze. <sup>15</sup> Hagi Amoni sondia vahe'mo'zama  
 kazama Siria sondia vahe'mo'zama koro'ma frage'za, zamagranena atre'za  
 Abisainku koro hu'za fre'za rankumamofo agu'afi ufre'naze. Anama haz-  
 ageno'a Joapu'a atreno Jerusalemi kumate vu'ne. <sup>16</sup> Hagi Siria sondia  
 vahe'mo'zama kazama, Israeli sondia vahe'mo'zama ha'ma huzmagater-  
 age'za, Yufretisi timofo kantu kazigama mani'naza sondia vahetmintega  
 eme zamazama hanagura kato vahe huzmantazage'za kea eri'za vu'naze.  
 Hagi e'i ana sondia vahetmimofo ugota kva vahezmia Sofakikino, agra  
 Hadadezeri sondia vahetamintera ugota kva ne' mani'ne. <sup>17</sup> Hagi anankema  
 Deviti'ma nentahino'a, mika Israeli sondia vahetmina zamazeri retru

nehuno zamavareno Jodani tina takaheno kantu kaziga ha' ome huzmante'naku vu'naze. Hagi Deviti'ma kantu kazigama vigeno'a, Siria sondia vahe'mo'za hahunte'naze. <sup>18</sup> Hagi Siria sondia vahe'mo'za Israeli sondia vahetminkura koro frazageno, Deviti sondia vahe'mo'zama karisifima vano nehu'za ha'ma nehaza vhahera 7tauseni'a vahe nezamahe'za, mopafima vano nehu'za ha'ma nehaza vhahera 40tauseni'a nezmahe'za, ana sondia vahetmimofo kva ne' Sofakinena ana hapi ahe'naze. <sup>19</sup> Hagi Hadadezeri eri'za vahe'mo'zama kazama Israeli sondia vahe'mo'zama ha'ma huzmagaterazage'za, Devitinte e'za zamarimpa fruma hu'za manisaza naneke eme nehu'za agri agorga'a mani'zageno, Siria vahe'mo'za ru'enena Amoni vahetega eme ante'za zamaza osu'naze.

## 20

### *Deviti sondia vahe'mo'zama tusinasi Filistia vahe'ma zamahe fri'naza naneke*

<sup>1</sup> Hagi aisimo'ma vagaregeno trazamo'ma agatama nehagea knarera kini vahe'mo'za ha' ome nehaza knagino, ana knama egeno'a Joapu'a Israeli sondia vahetmina zamavareno Amoni vahe' mopafi hara ome hu'naze. Hagi ana hapina Amoni vhahera hara huzmagatere'za Raba rankumazmia zamahe'za hanare'naze. Hianagi Deviti'a ana hatera ovu Jerusalemi kumate mani'ne. <sup>2</sup> Hagi Deviti'ma Raba kumate'ma ne-eno, Amoni vahe kini ne'mofo kini fetorira emerino agra asenire antani'ne. Hagi ana fetorira 34 kilo hu'nea golinu tro huno agu'afina zago'amo marerirfa haverami ante'ne. Hagi ana rankumapintira eri havizama haza zantamina rama'a zagone fenonena Deviti'a eri'ne. <sup>3</sup> Ana nehuno Raba kumate vahetmina kazokzo eri'za vahe zamavarege'za so nuti'ma piki tunteti'ma, saumereti'ma eri'zama eri vahe zamavarentege'za eri'zana eri'naze. Hagi maka Amoni vahetmimofo rankumapi vahetmina ana zanke huzmanteteno, Deviti'ene maka sondia vahe'anena ete Jerusalemi kumate vu'naze.

<sup>4</sup> Hagi ana'ma hutegenoa, Israeli sondia vahe'mo'za Gezerikumate Filistia vahetamina hara ome huzmante'naze. Hagi ana ha'ma hazafi Husa nagapinti ne' Sibekai'a Refaimi nagapinti Sipa'ema nehaza nera ahe fri'ne. Hagi Sipai'a tusinasi vahetmimofo zamagehe'mokino agri'ma ahete'za Filistia vahetmina hara huzmagatere'naze. <sup>5</sup> Hagi ru zupa ete mago'ane Israeli sondia vahe'mo'za Filistia vhahera hara ome huzmantazageno, Jairi nemofo Elhana'a Gati kumateti ne' Goliat nefu Lamina ahegeno fri'ne. Hagi ana nekrerfamofo karugru zotamo'a tavaravema troma nehaza masinimofo zafa'agna hu'ne. <sup>6</sup> Hagi mago'ane Israeli sondia vahe'mo'za Gati kumatera hara ome nehu'za, 6si'a azankogi, 6si'a agigo huntogeno ana maka 24'a agigo azanko hunte'nea nekrerfa ke'za erifore hu'naze. Hagi ana nera Rafa vahepinti tusinasi vahetmimofo zamagehe'mo'e. <sup>7</sup> Hagi ana ne'mo'ane Israeli vhahera huprihuno ki'za zokagoke huzmantegeno Deviti nefu Simea nemofo Jonatani ana nekrerfa ahegeno fri'ne. <sup>8</sup> Hagi ei' ana maka vahetmina tusinasi vahetmimpinti fore hu'za e'naza vahetminkino, Deviti'ene sondia vahe'aramimozane zamahe vagare'naze.

## 21

### *Deviti'a Israeli vahe'ma hampri'nea zamofo naneke*

<sup>1</sup> Hagi Israeli vahe zamazeri haviza hunaku Sata'a antahintahi huteno, Israeli vahe hampri antahintahia Devitina ami'ne. <sup>2</sup> Ana higeno Deviti'a

Joapune sondia vahetema ugote'naza kva vahetaminena amanage huno zamasmi'ne, maka Israeli vahetmina sauti kaziga Besebat'i'ma evuno noti kaziga Dani mopare'ma mani'naza vahetmina hamprita nampazmia erita eme naminke'na nama'a vahe mani'nazafi kaneno. <sup>3</sup> Hianagi Joapu'a amanage huno ana kenona hu'ne, Ra Anumzamo'a vahe'a mago'an 100'a zupa zamazeri rama'a hanigeno, rama'a vahe fore hu'za manigahazanki, rania kini ne'moka nagafare ama zana hu'za nehaze? Zamagra kagri eri'za vahe mani'nazanki, nahigenka Israeli vahera zamavarenka kumipina zamante'za nehane? <sup>4</sup> Hianagi Deviti'a ana kea ontahi tutu huno huntogeno, maka Israeli mopafi Joapu'a vano nehuno vahera hamprino nampana eriteno, ete Jerusalemi kumatera e'no, <sup>5</sup> ana vahe nampana Devitina eme ami'ne. Hagi maka Israeli agu'afima bainati kazinknoma erino ha'ma huga vahetmima hampri'neana 1milien 100tauseni'a vahetminki, Juda mopamofo agu'afina bainati kazinknoma erino ha'ma huga vahetmima hampri'neana, 470tauseni'a vahetami hampri'ne. <sup>6</sup> Hianagi ana vahe'ma hamprifina Livae naga'ene Benzameni nagara ohamprine. Na'ankure kini ne' Devitima hia kegura Joapu'a musena osuno anara hu'ne. <sup>7</sup> Hianagi Anumzamo'a vahe'ma hampri'naza zankura musena osuno, Israeli vahetmina knazana zamino zamazeri haviza hu'ne. <sup>8</sup> Ana higeno Deviti'a amanage huno Anumzamofona asmi'ne, nagrama vahe'ma hamprua zamo'a kagri kavurera rankumi hu'noe. Hianagi menina muse hugantoanki eri'za nekamo'na kumira eritrenanto. Na'ankure nagra negi nagi navu'nava hu'noe. <sup>9</sup> Anagema higeno'a, Ra Anumzamo'a amanage huno Deviti kasnampa ne' Gatina asmi'ne, <sup>10</sup> vunka Ra Anumzamo'a amanage hie hunka Devitina ome asamio, 3'a zantmi kaveri hugahuanki, anampinti mago huhamprio. <sup>11</sup> Hagi anagema hutegeno'a Gati'a Devitinte eno amanage eme hu'ne, Ra Anumzamo'a amanage hie, kagri'ma kavesinia sua mago huhamprio, <sup>12</sup> 3'a kafufima agatontoma hu'za huhamprigahampi, 3'a ikampima ha' vahe'mo'za kazinteti'ma ha'ma eme hutam-agatere zampi, 3'a knafima Ra Anumzamo'ma ankerovahe'ama huzmantesige'za Israeli mopafima vahe'ma knazama eme zam'i'niaza huhamprigahampi kagesa antahitenka, anampinti kavesi'nia su'a mago huhamprige'na Ra Anumzamofona ome asami'neno. <sup>13</sup> Anagema higeno Deviti'a amanage huno Gatina asmi'ne, kema nasamina kegura nagra tusigna huanki, atregeno Ra Anumzamo'a agra'a azanuti nazano hunanteku'ma hania zana hunanteno. Na'ankure Agri asunku zamo'a ra hu'neanki, natrenigeno ama mopafi vahe'mo'a nazeri havizana osino. <sup>14</sup> E'inge higeno Ra Anumzamo'a Israeli vahepina, kefo kri atregeno 70tauseni'a Israeli vene'ne zamahe fri'ne. <sup>15</sup> Hagi ana nehuno Anumzamo'a Jerusalemi kumara eri haviza hinogu, ankerovahe'ama huzmantesige'za Israeli mopafima vahe'ma knazama eme zam'i'niaza huhamprigahampi kagesa antahitenka, anampinti kavesi'nia su'a mago huhamprige'na Ra Anumzamofona ome asami'neno. <sup>16</sup> Hagi Deviti'a avuma kesga huno keana Ra Anumzamofa ankeromo'a monane mopanemofo kankamumpi otineno, bainati kazima'a azampi erineno Jerusalemi kumatega azana rusute'negeno ke'ne. E'i ana'ma higeno'a Deviti'ene maka ranra vahe'tmimo'zanena zamasunku kukenazmi hu'ne'za zamavugosaregati mopafi mase'naze. <sup>17</sup> Hagi Deviti'a Anumzamofona amanage huno asami'ne, Nagra huge'za vahera hampri'zage'na, nagra kagri kavurera tusi'a kefo navu'nava hu'na ku-

mira hu'noe. Hianagi sipisipi afu'mo'ma hiaza huno ama vahe'mokizmia hazenkezmia omane'n'e. Zamagra nahazenke hu'naze? Ra Anumzamoka karimpahezana atregeno nagrite'ene naganire'ene eno. Hianagi ama va-heka'a mago hazenkea osu'nazanki zamahe ofrio. <sup>18</sup> Anagema higeno'a Ra Anumzamofo ankeromo'a Gatina amanage huno asmi'n'e, kagra vunka Devitina amanage hunka ome asamio, Jebusi ne' Onani'ma witi honama neharea kumapi marerinka Ra Anumzamofo kresramna vu ita ome tro huo hunka ome asamio. <sup>19</sup> Higeno Deviti'a Ra Anumzamo'ma Gati'ma asamigeno'ma Ra Anumzamofo agifima eme asmia kea amage anteno, ana zana ome tro hunaku mareri'n'e. <sup>20</sup> Hagi Onani'a witi hona'a refuzafupeno neharereti ana ankerona rukrahe huno ke'n'e. Hagi 4'a ne' mofavre'ramima'amo'zama agri'enema mani'n'e'za witima nehararetira ana ankeroma nege'za koro fre'za ome fraki'naze. <sup>21</sup> Hagi Onani'ma mani'n're Deviti'a egeno, Onani'a negeno witima nehareretira atreno vuno avugosaregati mopafi umaseno ragi ami'n'e. <sup>22</sup> Hagi anante Deviti'a amanage huno Onanina asmi'n'e, witi honama neharana kumaka'a namige'n'a, knare mizanteti miza hu'na Ra Anumzamofontegama kresramnavu ita tro hanenkeno, krireti'ma vahe'ma zamazeri havizama nehia knazana eri atreno. <sup>23</sup> Higeno Onani'a Devitina amanage huno asmi'n'e, kini nera ranimoka, amne erinka nazano hunaku'ma banana zana huo. Hagi Kresramama vanana zana nagra bulimakao afura negami'n'a, witi honama refuzafu'nepoa zafaramina kamisugenka tevea hanavazinka Kresramana vughahane. Hagi witi ofama banana witiramina nagrake'za maka kamisugenka ofa hugahane. <sup>24</sup> Hianagi Deviti'a amanage huno Onanina asmi'n'e, i'o, nagra knare mizanteti mika zanka'a mizasegahue. Hagi nagrama amuho hunama eri fore'ma osu'nesua zana kagripintira erige, amnea anazana eri'na Ra Anumzamofontega tevefima kre fananene hu ofa osugahue. <sup>25</sup> Anage nehuno Deviti'a kna'amo'a 7kilo hu'nea goli Onanina amino witi honama neharea kuma'a mizase'n'e. <sup>26</sup> Hagi ana kumapi Deviti'a Ra Anumzamofo kre sramnavu itare'ma me'neana eme tefanane hu'n'e. <sup>27</sup> Ana hutegeno Ra Anumzamo'a ankeromofona asamigeno, bainati kazima'a anomaa'afi ete vazinte'n'e. <sup>28</sup> Hagi Deviti'ma keama Jebusi ne' Onani'ma witima neharea kumapima Ra Anumzamo'ma nunamuma'ama antahino nonama huntogeno'a, anante ofaramina kresramna vu'n'e. <sup>29</sup> E'ina knafina Ra Anumzamofo seli mono nomina Mosese'ma hagege kokampima ki'nea mono none, Kresramana vu itanena mono'ma nehaza kumate Gibioni me'n'e. <sup>30</sup> Ana hu'negu Deviti'a Gibionia vuno Anumzamofona avesizana ome antahigeno onke'n'e. Na'ankure Ra Anumzamofo ankeromofo bainati kazinku koro huno ovu'n'e.

## 22

### *Deviti'a ra mono nomi kisaza zantami retro tra hu'nea zamofo naneke*

<sup>1</sup> Hagi anante Deviti'a amanage hu'n'e, Ra Anumzamofo ra mono nona amare me'nigeno Israeli vahe'mo'zama Kresramanama vanaza ita ama ananteke megahie.

<sup>2</sup> Hagi Deviti'a meg'i'ati ru vahetmima Israeli mopafima emaniza vahera ke hige'za azageno, mono nomi kisaza havema tagahu eri'zana zami'n'e.

<sup>3</sup> Hagi Deviti'a kahante'ma ahe nirine insinema tro'ma hu aeniramina

rama'a eritru nehuno, bronisinena rama'a eri atru higeno, kna'a erinte'za kegara osu'naze. <sup>4</sup> Hagi Tairi vahe'mo'zane Saidoni vahe'mo'zanena rama'a sida zafaramina antagi'za eri'za Devitina eme ami'naze. <sup>5</sup> Hagi Deviti'a amanage hu'ne, nenamofo Solomoni'a kasefa vahe mani'neankino nomi ki'zana ontahi'ne. Hanki Ra Anumzamofo nomi Solomoni'ma kisiana marerifa no kisigeno, agenke'amo'a maka kokantega haruharu haniaza retrotra menina nehue. Anage nehuno Deviti'a nomi kizantmina ofri'neno tusi zantmi retrotra hunteteno fri'ne. <sup>6</sup> Ana huteno Deviti'a nemofo Solomonina kehigeno egeno Ra Anumzana Israeli vahe Anumzamofo nomi kisia nanekea amanage huno asmi'ne, <sup>7</sup> Ne'nimoka Ra Anumzana Anumzanimofoma mono'ma huntesaza nona kisue hu'na nagra nagu'afina nagesa antahuanagi, <sup>8</sup> Ra Anumzamo'a amanage huno nasmi'ne, Devitiga kagra rama'a ha' nehunka, rama'a vahe ana hapina zamahenka korazmia eri tagi'nane. E'ina hu'negu mono'ma hunantesaza mono nona onkigosane. Na'ankure kagra rama'a vahe zamahenka korana nagri navurera eri tagi'nane. <sup>9</sup> Hianagi kagra mago ne'mofavre käsentenanke'na, Nagra aza hanena ha' vahe'amo'za hara eme huontegosaze. Na'ankure ana mofavremofo agi'a Solomonikino, \*agrama kegavama hania knafina Israeli vahera hara osu knare hu'za zamarimpa fru hu'za manigahaze. <sup>10</sup> Hagi nagri'ma mono'ma hunantesaza nona agra kigahie. Ana nehuno agra nagri mofavre manisige'na, nagra agri nefaza hu'nena Israeli vaherpina kini azeri otinenkeno, agri nagapintekе kinia maniza Israeli vahera kegava huzmante vava hu'za vugahaze huno hu'ne. <sup>11</sup> Hagi menina ne'nimoka Ra Anumzamo'a kagrane mani'neno maka zama banana zampina kazeri knare nehina, Ra Anumzanka'amofo ra mono nona kema hu'nea kante antenka kigahane. <sup>12</sup> Ra Anumzamo'a knare antahi'zane, antahi ama'ma hu antahi'zana kaminkenka, Israeli vahe'ma kegavama nehanunka Ra Anumzana Anumzanka'amofo kasegea amage antegahane. <sup>13</sup> Hagi Ra Anumzamo'ma Israeli vahe'mo'zama amage anteho huno Mosesema ami'nea tra ke'ne kasegenema kegava nehunka, amage'ma antesunka maka zama banana zamo'a knare'zanke hugahie. Hagi kahirahikura osunka oti hankavetinka mani'enka, korora osuo. <sup>14</sup> Hagi nagra tusi amuho huna eri'zana eri'na Ra Anumzamofo ra mono nomi ki'zantamina, 3tausen 750'a tani hu'nea goligi, 34tausen 500'a tani hu'nea silvagi, kna'amo'a mareri'nea aenine, bronsinena eritru hu'noe. Hagi zafane havenena ana nomi ki'zana ko eritru hu'noanki, mago'ene eri atru hugahane. <sup>15</sup> Hagi kagrira rama'a eri'za vahe mani'nazanki'za havema tagahu eri'za vahe'ma, brikima tro hu eri'za vahe'ma, nomi negiza vahe'ma, zamazantetima eri avasesema huno eri'zama eri antahi'zane vahetamina rama'a manizageno, <sup>16</sup> golireti'ene silvareti'ene bronsireti'ene aenireti'enema eri'zama eri vahera rama'a mani'naze. Hagi otinka eri'zana agafa hunka erio. Na'ankure Ra Anumzamo'a kagrane manigahie. <sup>17</sup> Hagi Solomonima azama hanagura Deviti'a maka Israeli vahete kva vahetmin'a amanage huno zamasam'i'ne, <sup>18</sup> Ra Anumzana tamagri Anumzamo'a, tagranena mani'neankino ha'ma hu'zana eri atregeta mani fru hu'naze. Na'ankure Agra ama mopafi vahetmin'a tamazampi zamavarentegeta Ra Anumzamofo avuga hara agatereta mopazmia eri'naze. <sup>19</sup> Hagi menina Ra Anumzana tamagri Anumzamofona tumotamireti'ene tamagu'aret'i'ene huta hakeho. Ra Anumzana tamagri Anumzamofo mono nona kita Ra Anumzamofo huhagerafi huvempage

\* 22:9 Hibru kefina Solomoni'ema hu'neana rimpa frue huno hu'ne.

vogisine, eri ruotage'ma hu'naza zuomparaminena erita Ra Anumzamofo agima erisgahu mono noma kinte'nafe eme anteho.

## 23

### *Livae nagamofo eri'za Deviti'a huhampri'nea naneke*

<sup>1</sup> Hagi Deviti'ma ozafama nereno'a, nemofo Solomoninku Israeli vahe'mokizimi kini manigahie huno huhamprinte'ne. <sup>2</sup> Hanki maka Israeli vahe kva vahetamina zamavare atru nehuno, Pristi vahetamine, Livae vahetaminena Deviti'a zamavare atru hu'ne. <sup>3</sup> Ana hutege'za 30'a kafuma agatere'nea Livae vene'nema hampri'nazana 38tauseni'a vahetami hampri'naze. <sup>4</sup> Hagi Deviti'a amanage hu'ne, ama 24tauseni'a vahe'mo'za Ra Anumzamofo mono nompi eri'zana erigahaze. Hagi ama 6tauseni'a vahe'mo'za mono nonte'ma ugagotama hanaza eri'zane, vahe keagama refkohu eri'za erigahaze. <sup>5</sup> Hagi 4tauseni'a vahe'mo'za kuma kafante kvahu eri'za eri'nageno, mago 4tauseni'a vahe'mo'za Devitina'ma tro'ma hunte'noa zavena nehe'za zagame'ma hu'za Ra Anumzamofoma agima erisgahu vahe manigahaze. <sup>6</sup> Ana huteno Deviti'a Livae nagapina 3'a nofima mani'nazare vahera refko hu'ne. E'i ana 3'anofira Livaena 3'a mofavre naga'afinti fore hu'nazankino, zamagi'a Gesoni'ma, Kohati'ma, Merari'e.

<sup>7</sup> Hagi Gesoni'a Ladanine Simeikizni kasezanante'ne. <sup>8</sup> Hagi Ladani'a 3'a ne' mofavrerami zamante'neankino zamagi'a, ese mofavre'a Jehieli manigeno, ananteria Zetami mani'geno henkamo'a Joeli mani'ne. <sup>9</sup> Hagi Semei'a 3'a ne' mofavrerami kasente'neankino zamagi'a, Selomoti'ma, Hazieli'ma, Harani'e. Hagi Ladani nagapina ama ana 3'a vahe'mo'za kva mani'naze. <sup>10</sup> Hagi Simei'a mago'a ne' mofavrerami zmante'neankino, ana ne'mofavreramimofo zamagi'a, Jahati'ma Ziza'ma Jeusi'ma, Beria'e. Hagi ana makara 4'a ne' mofavrerami Simei'a kasezmante'ne. <sup>11</sup> Hagi Jahati'a ana nagamofo kva manigeno, Zizati agri amage'a nampa 2 kva mani'ne. Hagi Jesusike Beriakea rama'a ne' mofavrea ontena'ankino zanagri nagara zanazeri mago hu'za hampri'naze.

<sup>12</sup> Hagi Kohati ne' mofavreramina, Amramu'ma, Izari'ma, Hebron'i'ma, Uzielikino, ana makara 4'a mofavrerami kasezmante'ne. <sup>13</sup> Hagi Amramu'a Aronine Mosesekizni kasezanante'ne. Hagi Aronimpinti'ma fore'ma hu'naza vahera nagru huno ruotge'ma hu'nea zantminte kegava hugahaze huno Ra Anumzamo huhamprizmante'ne. Ana hu'neankino zamagra Ra Anumzamofo eri'zana eri'za ofa kresramma vunente'za, Agri agifina asomukea Israeli vahera huzmante vava hugahaze. <sup>14</sup> Hianagi Anumzamofo eri'za ne' Mosese ne'mofavre'mo'za Livae naga nofire hu'za mani'naze.

<sup>15</sup> Hagi Mosese'a Gesomune Eliezarikizni kasezanante'ne. <sup>16</sup> Hagi Gesomu ne' mofavreramimpina ese mofavre'a Subaelikino, agra vugota huno naga'a kegava huzmante'ne. <sup>17</sup> Hagi Eliezari'a magoke ne' mofavre nenteno mago'a onte'neankino, agi'a Rehabia'e. Hianagi Rehabia'a rama'a mofavre zamantegeno, hamprigara osu'ne. <sup>18</sup> Hagi Izari'a ese ne' mofavrea Selomiti kasente'geno agra ugota huno naga'afina kegava huzmante'ne. <sup>19</sup> Hagi Hebron'i'esaera Jeria kasenteno, Jeria amefira Amaria kasenteno, Amaria amefira Jahazieli kasenteno, Jahazieli amefira Jekamiamu kasente'ne. <sup>20</sup> Hagi Uzieli'esaera Maika kasenteno, Maika amefira Isia kasente'ne.

<sup>21</sup> Hagi Merari'a Maline Musikizni kasezanante'ne. Hagi Mali'a Eleazarine Kisikizni kasezanante'ne. <sup>22</sup> Hagi Eleazari'a ne'mofavrea onte mofaneg'e

anteneno frige'za, ana mofanemo'za, nefu Kisi mofavrerminte mare'naze.  
<sup>23</sup> Hagi Musi'a 3'a ne'mofavrermati zmante'neankino zamagi'a, Mali'ma, Ederi'ma, Jeremoti'e.

<sup>24</sup> Hagi ama ana vahera Livae nagapinti'ma fore'ma hu'naza vaheki'za, magoke magoke naga nofizmire ugota hutere hu'nazageno zamagi kreno eri fatgo hu'nege'za 20'a kafuma agatere'naza vahe'mo'za Ra Anumzamofo mono nompina eri'zana enerize. <sup>25</sup> Hagi Deviti'a amanage hu'nene, Ra Anumzama Israeli vahe Anumzamo'a vahe'a manigasa nezmino, Agra Jerusalemi kumapina mani vava hugahie. <sup>26</sup> Hagi menina Livae naga'mo'za, Seli mono none ana nompima eri'zama e'neriza zantaminena eri'za vu'za e'za osugahaze. <sup>27</sup> Hagi Deviti'ma e'ina hihonu'ma huvagare kema zamasami'nea kante ante'za, 20'a kafuma agatere'nea vahetami mono nompima eri'zama eri vahera zamagia krente'naze. <sup>28</sup> Hanki Livae vahet'mimofo eri'zana, Aroni naga'mokizmi zamaza hu'za Ra Anumzamofo nompima eri'zama erisaza eri'za me'ne. Hagi mago'a eri'zana mono nonkuma'ma kegava nehu'za, mono nompima eri'zama e'neriza zantamima zamazeri agruhu eri'zane, Anumzamofo nompima eri eri'zane, mago'a eri'zanena eri'naze. <sup>29</sup> Hagi ruotgema hu'nea bretima itare'ma eme antaza bretine, witi ofama eme haza ofane, zo'ore breti ofane, olivi masavenema erihavia huno kre'nea kekine, anazantamina sigerirema erinteno kna'ama refko huno ke eri'zane kegava hu'naze. <sup>30</sup> Hagi mika nanterane kinaganena Ra Anumzamofo avuga otine'za zagamera hu'za susu hunente'za, agia erisga hu'naze. <sup>31</sup> Hagi Sabati knare'ene kasefa ika ementegeno musema hu knare'ene mono'ma hu knare'ma zamaza hu'za Kresramana vanaza vahera, e'i'a vahe manine'za eri'zana erigahazema hu'nenia kante ante'za anama'a namba mani'neza, Ra Anumzamofo avuga ana eri'zantamina maka zupa erigahaze. <sup>32</sup> Hagi zamafuhe'za pristi naga'mo'za kegava huzmante'nage'za, Livae naga'mo'za maka eri'zana seli nompima ruotage'ma hu'nefina Ra Anumzamofo avuga eri'zana eri'naze.

## 24

### *Pristi vahe'mokizmi eri'zamofo naneke*

<sup>1</sup> Hagi Aroni mofavrermrina, pristi eri'zama erihogura amana huno refko hu'ne. Hagi Aroni'a Nadapuma, Abihuma, Eleazarima Itamarima huno kasezmante'ne. <sup>2</sup> Hianagi Nadapu'ene Abihukena ne' mofavrea onte'neke, neznafa Aroni'a ofrinegeka ko zanagra frikeno, Eleazari'ene Itamarike pristi eri'zana zanagrake eri'na'e. <sup>3</sup> Hagi Eleazar nagapinti ne' Zadoki'ene Itamari nagapinti ne' Abimelelike Devitina aza hakeno, Aroni nagara refko huno eri'zana zami'ne. <sup>4</sup> Hagi Eleazar naga'mo'za refko hu'za 16ni'a kevufi omeri atru emeri atru hu'ne'za anampina rama'a kva vahe manizageno, Itamari naga'mo'za 8'a kevufi omeri atru emeri atru hu'za mani'nazafina osi'a kva vahe mani'naze. <sup>5</sup> Hagi satu zokago re'za magoke avamente eri'zana refko hu'za zami'naze. Na'ankure zamagra Eleazeri naga'ene Itamari naga'enekino Anumzamo'a mono nompi ruotge eri'za erigahaze huno huzmante'ne. <sup>6</sup> Hagi avonkre eri'zama eneria Livae ne' Netaneli nemofo Semaia kini ne'mofo avonkre eri'za vahera mani'negeno, pristi ne' Zadoku'ma Abiatar nemofo Ahimeleki Livae naga'ma pristi eri'zama eneriza naga'mofo zamavuga Eliezarine Itamali nagamokizmi zamagia maka kreno erifatgo hu'ne. <sup>7</sup> Hagi ese'ma reza kaza satu zokagomo'a Jehoiaribi nagate takairegeno anante'ma reza kaza satu zokagomo'a Jedaia nagate

takaure'ne. <sup>8</sup> Hagi namba 3 satu zokagomo'a Harimi nagate takauregeno, namba 4 satu zokagomo'a Seorimi nagate takaure'ne. <sup>9</sup> Hagi namba 5 satu zokago'ma re'za kazana Malkia nagate takauregeno, namba 6 satu zokago'ma re'za kazana Mizamini nagate takaure'ne. <sup>10</sup> Hagi namba 7ni satu zokagoma re'za kazana Hakosi nagate takauregeno, namba 8ti satu zokagoma re'za kazana Abiza nagate takaure'ne. <sup>11</sup> Hagi namba 9ni satu zokagoma re'za kazana Jesua nagate takauregeno, namba 10ni satu zokagoma re'za kazana Sekania nagate takaure'ne. <sup>12</sup> Hagi namba 11ni satu zokagoma reza kazana Eliasipi nagate takauregeno, namba 12fu satu zokagoma re'za kazana, Jakimu nagate takaure'ne. <sup>13</sup> Hagi namba 13ni satu zokagoma re'za kazana, Hupa nagate takauregeno, namba 14ni satu zokagoma re'za kazana Jesebeapu nagate takaure'ne. <sup>14</sup> Hagi namba 15ni satu zokagoma re'za kazana Bilga nagate takauregeno, namba 16ni satu zokagoma re'za kazana Imeri nagate takaure'ne. <sup>15</sup> Hagi namba 17ni satu zokagoma re'za kazana Heziri nagate takauregeno, namba 18ni satu zokagoma re'za kazana Hapisesi nagate takaure'ne. <sup>16</sup> Hagi namba 19ni satu zokagoma re'za kazana Petahaia nagate takauregeno, namba 20ti satu zokagoma re'za kazana Jehezkeli nagate takaure'ne. <sup>17</sup> Hagi namba 21ni satu zokagoma re'za kazana Jakini nagate takauregeno, namba 22 satu zokagoma re'za kazana Gamuli nagate takaure'ne. <sup>18</sup> Hagi namba 23 satu zokagoma re'za kazana Delia nagate takauregeno, namba 24 satu zokagoma re'za kazana Ma'azia nagate takaure'ne. <sup>19</sup> Hagi Ra Anumzamofo nompima eri'zama erinaku'ma hanazana amama refkoma huzmantere avariri'za eri'zana emeriterema hanazana, Israeli vahe Ra Anumzamo'ma nezamageho Aronima asami'nea kante ante'za Ra Anumzamofo mono nompina eri'zana erigahaze.

### *Livae nagamofo naneke*

<sup>20</sup> Hagi mago'a Livae nagapima naganofizamirema ugota hu'naza vahe'mokizmi zamagia ama'ne, Amrami nagapina Subaeli kva manigeno, Subaeli nagapina Jedeia kva mani'ne. <sup>21</sup> Hagi Rehabia nagapina Isia kva mani'ne. <sup>22</sup> Hagi Isia nagapina Selomoti kva manigeno, Johati'a Selomoti nagapi kva mani'ne. <sup>23</sup> Hagi Hebron ne' mofavreramimpina ese mofavrea Jeriaki, namba 2 mofavrea Amariaki, namba 3 mofavrea Jahasieliki, namba 4 mofavrea Jekameamu'e. <sup>24</sup> Hagi Uzieli nagapina Maika ugota huno kva manigeno, Maika nagapina Samiri ugota huno kva mani'ne. <sup>25</sup> Hagi Maika negna Isia'a mago'a mofavreramina zamante'neankino, Isiana ese mofavre'a Zekaraia mani'neno, agri nagapina kva mani'ne. <sup>26</sup> Hagi Merari mofavrerarena Malike, Musikegine zanagra Merari nagapina kva mani'na'e. Hagi Jazia mofavreramimpina ese mofavrea Benokino, agra Jazia nagapina kva mani'ne. <sup>27</sup> Hagi Merari nemofo Jazia'ma kasezmante'nea vahera, Benoma, Sohamuma, Zakurima, Ibrima huno kasezmante'ne. <sup>28</sup> Hagi Mahali'a Eleazari kasentegeno, Eleazari'a ne' mofavrea kaseozmante'ne. <sup>29</sup> Hagi Kisi nemofo'a Jeramelikino, Kisi nagapina agra kvazmia mani'ne. <sup>30</sup> Hagi Musi ne'mofavre'mokizimi zamagi'a Mali'ma, Ederi'ma Jerimoti'e. E'i ana maka kva vahetmina mago mago Livae naga nofite huhampritere hu'za azage'za zamagia krente'naze. <sup>31</sup> Hagi kini ne' Devitine, Zadokine, Ahimelekine, mago mago nagamofo kva vahetamine, pristi vahetamine, Livae vahetamimofo zamavuga, Aroni naga'ma hu'nazaza hu'za agi me'neo agi omane vahero anankantekte ante'za satu zokago re'za nege'za, mago mago eri'zana zamitere hu'naze.

## 25

### *Zavena aheza zagamema hu vahetami zamazeri fatgo hu'nea naneke*

<sup>1</sup> Deviti'ene sondia vahete'ma vugotama hu'naza kva vahe'mo'za hapuema nehaza zavenane, lariema nehaza zavenane, nase'nasepa nehe'za kasnampa kema hanaza vahetmima zamazeri oti'nazana, Asapuma, Hemanima Jedutuni mofavreramimpinti zamazeri oti'naze. Hagi ana vahetmina ama vahetami zamazeri oti'naze, <sup>2</sup> Asapu mofavre nagapintira Zakurima, Josefema, Netaniama, Asarela'e. Hagi Asapu vugota huno mofavreramima'a ana erizantera kegava huzmantegeno, agri'ma kini ne'mo'ma antahintahima ami'nere anteno kasnampa kema huama hu eri'zana eri'ne. <sup>3</sup> Hagi Jedutuni mofavreramimpintira 6si'a mofavrerami zamazeri oti'neankino zamagi'a Gedaria'ma, Zeri'ma, Jesaia'ma, Sime'i'ma, Hasabia'ma, Matitia'e. Hagi ana maka mofavreramina nezmafa Jedutuni kegava huzmante'nege'za, hapuema nehaza zavena ahe'za kasnampa kea nehu'za, Ra Anumzamofona susu hunte'za agia erisga hu'naze. <sup>4</sup> Hagi Heman'i mofavre nagapintira, Buklama, Mataniama, Uzielima, Sebuelima, Jerimotima, Hananiama, Hananima, Eliatama, Gidaltima, Romamti-Ezerima, Josbekasama, Malotima, Hotirima, Mahazioti'e. <sup>5</sup> Hagi ama ana maka mofavreramina kini nemofo avate kasnampa ne' Heman'i mofavreramine. Hagi Anumzamo'a Hemanina ragi amigahue huno huvempa hunte'nere ama ana mofavreramina ami'neankino, Heman'i a 14ni'a ne' mofavrerami nezmanteno, 3'a mofanerami zamante'ne. <sup>6</sup> Hagi ana makamo'za nezmafa kavafinke mani'ne'za Ra Anumzamofo mono nompina zavena neheza nase'nasepana nehe'za ruzahu ruzahu zavena ahe'za monora hu'naze. Hagi Asapuma, Jedutunima, Hemanima huno kini ne' Deviti'a kegava huzmantenege'za mani'ne'za eri'zana eri'ne. <sup>7</sup> Hagi ana maka zavenama ahe vahetamine, mago'a zamafuhe'inema zavenama ahe'zama rempi huzamige'zama antahini' hu'ne'za zavenama ahe'za Ra Anumzamofoma agima erisgama nehaza vahetmina, 288'a vahe mani'naze. <sup>8</sup> Hagi ra vaheteti vuno kasefa vahete uhanatino, rempima humi vaheteti vuno avo noma nehaza vahete'ma vu'neana satu zokago re'za nege'za eri'zama erisaza eri'zana refko hu'za zami'naze. <sup>9</sup> Hagi ese'ma satu zokagoma re'za Asapu nagapima kazana, Josefe nagate takaire'ne. Hagi namba 2 satu zokagoma re'za kazana Gedaliante'ene, mofavre naga'are'ene agri nagate'ene takaire'ne. Hagi ana makara 12fu'a naga mani'naze. <sup>10</sup> Hagi namba 3 satu zokagoma re'za kazana Sakurinte'ene, mofavre naga'are'ene agri nagate'ene takaire'ne. Hagi ana maka 12fu'a naga mani'naze. <sup>11</sup> Hagi namba 4 satu zokagoma re'za kazana Izrinte'ene, mofavre naga'are'ene agri nagate'ene takaire'ne. Hagi ana maka 12fu'a naga mani'naze. <sup>12</sup> Hagi namba 5fu satu zokagoma re'za kazana Netaniante'ene, mofavre naga'are'ene agri nagate'ene takaire'ne. Hagi ana maka 12fu'a naga mani'naze. <sup>13</sup> Hagi namba 6si satu zokagoma re'za kazana Bukiante'ene, mofavre naga'are'ene agri nagate'ene takaire'ne. Hagi ana maka 12fu'a naga mani'naze. <sup>14</sup> Hagi namba 7ni satu zokagoma re'za kazana Jesarelante'ene, mofavre naga'are'ene agri nagate'ene takaire'ne. Hagi ana maka 12fu'a naga mani'naze. <sup>15</sup> Hagi namba 8ti satu zokagoma re'za kazana Jesaiante'ene, mofavre naga'are'ene agri nagate'ene takaire'ne. Hagi ana maka 12fu'a naga mani'naze. <sup>16</sup> Hagi namba 9ni satu zokagoma reza kazana Mataninte'ene, mofavre naga'are'ene agri nagate'ene takaire'ne. Hagi ana maka 12fu'a naga mani'naze. <sup>17</sup> Hagi namba 10ni satu zokagoma re'za kazana Simeinte'ene, mofavre naga'are'ene agri nagate'ene

takaure'ne. Hagi ana maka 12fu'a naga mani'naze. <sup>18</sup> Hagi namba 11ni satu zokagoma reza kazana Azarelinte'ene, mofavre naga'are'ene agri nagate'ene takaure'ne. Hagi ana maka 12fu'a naga mani'naze. <sup>19</sup> Hagi namba 12fu satu zokagoma re'za kazana Hasabiant'e'ene, mofavre naga'are'ene agri nagate'ene takaure'ne. Hagi ana maka 12fu'a naga mani'naze. <sup>20</sup> Hagi namba 13ni satu zokagoma reza kazana Subaelinte'ene, mofavre naga'are'ene agri nagate'ene takaure'ne. Hagi ana maka 12fu'a naga mani'naze. <sup>21</sup> Hagi namba 14ni satu zokagoma reza kazana Matitiant'e'ene, mofavre naga'are'ene agri nagate'ene takaure'ne. Hagi ana maka 12fu'a naga mani'naze. <sup>22</sup> Hagi namba 15ni satu zokagoma reza kazana Jeremotinte'ene, mofavre naga'are'ene agri nagate'ene takaure'ne. Hagi ana maka 12fu'a naga mani'naze. <sup>23</sup> Hagi namba 16ni satu zokagoma reza kazana Hananiante'ene, mofavre naga'are'ene agri nagate'ene takaure'ne. Hagi ana maka 12fu'a naga mani'naze. <sup>24</sup> Hagi namba 17ni satu zokagoma reza kazana Josbekasante'ene, mofavre naga'are'ene agri nagate'ene takaure'ne. Hagi ana maka 12fu'a naga mani'naze. <sup>25</sup> Hagi namba 18ni satu zokagoma reza kazana Hananinte'ene, mofavre naga'are'ene agri nagate'ene takaure'ne. Hagi ana maka 12fu'a naga mani'naze. <sup>26</sup> Hagi namba 19ni satu zokagoma reza kazana Malotinte'ene, mofavre naga'are'ene agri nagate'ene takaure'ne. Hagi ana maka 12fu'a naga mani'naze. <sup>27</sup> Hagi namba 20ti satu zokagoma reza kazana Eliatante'ene, mofavre naga'are'ene agri nagate'ene takaure'ne. Hagi ana maka 12fu'a naga mani'naze. <sup>28</sup> Hagi namba 21ni satu zokagoma reza kazana Hotirinte'ene, mofavre naga'are'ene agri nagate'ene takaure'ne. Hagi ana maka 12fu'a naga mani'naze. <sup>29</sup> Hagi namba 22 satu zokagoma re'za kazana Gidaltinte'ene, mofavre naga'are'ene agri nagate'ene takaure'ne. Hagi ana maka 12fu'a naga mani'naze. <sup>30</sup> Hagi namba 23 satu zokagoma reza kazana Mahaziotinte'ene, mofavre naga'are'ene agri nagate'ene takaure'ne. Hagi ana maka 12fu'a naga mani'naze. <sup>31</sup> Hagi namba 24 satu zokagoma rezama kazana Romamti-Ezerinte'ene, mofavre naga'are'ene agri nagate'ene takaure'ne. Hagi ana maka 12fu'a naga mani'naze.

## 26

### *Mono kumamofo kafante kva vahetmimofo eri'za refko huno zami'nea nanake*

<sup>1</sup> Hagi mono kumamofo kafantaminte kvama hanaza vahetamima refkoma huterema hu'naza vahetmimofo zamagia ama'ne, Kora nagapintira Asapu mofavreramimpinti Kore nemofo Meselemia'e. <sup>2</sup> Hagi Meselemia ne'mofavrerami zamagi'a, ese mofavrea Zekaraia'e, anantera Jediaeli'e, namba 3 mofavrea Zebadaia'e, namba 4 mofavrea Jatniel'i'e. <sup>3</sup> Hagi namba 5fu mofavrea Elamu'e, namba 6si mofavrea Jehohanani'e, namba 7ni mofavrea Eliehoenai'e. <sup>4</sup> Hagi Obed-Edomu mofavreramimofo zamagia ama'ne, ese mofavremofo agi'a Semaia'e, anantera Jehozabadi'e, namba 3 mofavrea Joa'e, namba 4 mofavrea Sakari'e, namba 5fu mofavrea Netaneli'e. <sup>5</sup> Hagi namba 6si mofavrea Amiel'i'e, namba 7ni mofavrea Isakari'e, namba 8ti mofavrea Peuletai'e. (Na'ankure Anumzamo'a Obed-Edomuna knare huno asomura hunte'ne.) <sup>6</sup> Hagi Obed-Edomuna ese mofavre'a Semaiakino, agra mago'a mofavrerami zamante'neanki'za naga'zamire kva manitere hu'naze. Na'ankure zamagra hanavententake hu'za makazana

huga vahe mani'nage'za, vahe'mo'za zamagesga hu'naze. <sup>7</sup> Hagi Semaia mofavreramimofo zamagi'a ama'ne, Otni'ma, Refaeli'ma, Obedi'ma, Elzabadi'e. Hagi Elihuke Semakiakea Semaia nefukeginne zanagranena hanavementake netre mani'nake'za antahi nezanamize. <sup>8</sup> Hagi Obed-Edomu mofavreramine, mofavre naga'zmine zamafuhe'zanena hanavementake hu'za maka'zana huga vahe mani'nage'za, antahinezamiza vahera 62'a vahe mani'naze. <sup>9</sup> Hagi Meseleimi mofavreramina mago'a manizage'za nagazamia mani'nazankino, miko eri'zama antahi ani hu'naza vahera ana makara 18n'i a vahe mani'naze. <sup>10</sup> Hagi Merari nagapintine' Hosa ne'mofavreramina amane, ugota huno kvazmima mani'neana Simri'e. Hagi Simri'a ese mofavrea omani'neanagi nef'a, naga'amofo kva azeri ot'i'ne. <sup>11</sup> Hagi anante mofavrea Hilkia'e, namba 3 mofavrea Tebalia'e, namba 4 mofavrea Zekaraia'e. Hagi maka Hosa ne' mofavreramine, naga'anema mono no kuma kafante'ma kva hugahazema hu'zama huhampri zmante'nazana 13n'i a vahe mani'naze. <sup>12</sup> Hagi ama ana kva vahetmima mono kumamofo kafante kva hugahaze huno'ma zamazeri ot'i'nea vahetmimofo eri'zamo'a, Ra Anumzamofo mono nompima Livae zamafuhe'zama eneriza kna eri'za erigahaze. <sup>13</sup> Hagi nagatenofite hu'za satu zokago re'za nege'za mago mago kuma kafante kvama hu vahera, ra vahetetima vuno kasefa vahete'ma vige'za zamazeri ot'i'aze. <sup>14</sup> Hagi zage hanati kaziga kafantema kegava hanaza vahe'ma huhamprinaku'ma satu zokago re'za kazana Selemaia agi efore hige'za agri huhampri'aze. Hagi knare antahi'zama nezamia ne'mofo Sekariante'ma satu zokago re'za kazana, noti kaziga kafamofo agimo eama hige'za, ana kafante kva azeri ot'i'aze. <sup>15</sup> Hagi sauti kaziga kafante'ma kegava hu vahe'ma huhamprinaku satu zokago reza kazana Obed-Edom agi efore hige'za agri huhamprinte'aze. Hagi fenoma ante nonte kva hu vahera Obed-Edomu ne'mofavre zaga huhampri zamante'aze. <sup>16</sup> Hagi Supimine Hosakiznia zage fre kaziga kuma kafane, ra mono nontegama mareri kante'ma me'nea kafante kva vahe huhampriznante'aze. <sup>17</sup> Hagi mika kna zage hanati kaziga kuma kafanterea 6si'a huzmanteg'e za kegava hutere hu'naze. Hagi noti kazigane, sauti kazigane kuma kafanterea kegavama hanaza vahera 4'a huzmantetere hige'za kegava hu'naze. Hagi fenoma ante nontaminte'ma, kegava hania vahera tare huzmantetere hige'za kegava hu'naze. <sup>18</sup> Hagi zage fre kaziga mono kuma'ma kegavama hu vahera 6si'a huzmanteg'e za 4'amo'za kante kva hazageno, tare'mokea ana kuma kegava hu'na'e. <sup>19</sup> Hagi e'i ana vahetamina Korane Merarikizni nagapintintikino kuma kegina kegava hanazana vahetami zamazeri ot'i'aze.

### *Mono nomofo fenonte'ma kegava hu vahe'mofo naneke*

<sup>20</sup> Hagi mago'a Livae naga'mo'za Anumzamofo mono nompima me'nea feno zantaminte'ene vahe'mo'zama musezama Anumzamofoma eme ami'za zantaminte kegava hu'naze. <sup>21</sup> Hagi Gersoni naga'nofipina, Ladani mofavre nagapinti Jehieli kva mani'ne. <sup>22</sup> Hagi Jehieli ne'mofavre nagapintira, Zethamuke, Joelike Ra Anumzamofo nompima fenoma nentaza nontera kegava hu'na'e. <sup>23</sup> Hagi Amramu nagaki, Izari nagaki, Hebronu nagaki, Uzieli naga'mozanena ana eri'zana eri'aze. <sup>24</sup> Hagi Mosese negeho Gesomu nemofo Sebueli ana fenoma nentaza nontera kva mani'neno kegava hu'ne. <sup>25</sup> Hagi Gesomu nefu Eliazari'a Rehabia' nef'a, Rehabia'a Jesaia nef'a, Jesaia'a Joramufa'ne hagi Joram'u Zikri kasentegeno Zikri'a Selomiti kasente'ne. <sup>26</sup> Hagi Seromiti'ene naga'amo'zanena, kini ne' Deviti'ene, mago mago

nagamofo kva vahe'mo'zane, sondia vahetmimofo kva vahe'mo'zanema Ra Anumzamofoma ami'naza zantmima ante'naza nontaminte kegava hu'naze. <sup>27</sup> Hagi zamagra ha' vahezmima ha'ma hu zamagatere'za knare fenozmima eri'nazana Ra Anumzamofoma noma eriso'ema hu'za kisaza zantami eme ami'naze. <sup>28</sup> Hagi ana zanke hu'za kasnampa ne' Samuel'i'ma, Kisi nemofo Soli'ma, Neri nemofo Abna'ma, Zeruia nemofo Joapu'ma hu'za Ra Anumzamofoma maka zantmima ami'naza zantminte Salomit'i'ene afuhe'zanena kegava hu'naze. <sup>29</sup> Hagi Izari nagapintira Kenaniane ne' mofavre naga'anena huhampri zamantazage'za mono nomofo megia eri'zantminte'ene Israeli vahe nanekema antahiza refkoma hu eri'zanena zami'naze. <sup>30</sup> Hagi Hebroni nagapintira Hasabiane, naga'anena eri'zama hanaveti'za eriga vahetmina 1tausen 700'a zamazeri otino eri'zana zamige'za, Ra Anumzamofone kini ne'mofo eri'zana Jodani timofo zage fre kaziga omeri'naze. <sup>31</sup> Hagi zamagina kre'za eri fatgo hu'za avontafepima krenazana, Jeria'a Hebroni nagamofo kva mani'ne. Hagi Devitima kinima mani'no'ma e'nea kafumo'ma 40'a kafuma nehigeno'a, vahe zamagina kre'nea avontafepima ke'za erifore'ma hazana, marerirfa antahi'zane vahera, Hebroni vahetami Jazeri kumate Giliati mopafi mani'naze. <sup>32</sup> Hagi Jeria nagapima knare'ma huno eri'zama eriga vahetamima mani'nazana, 2tausen 700'a vahetami mani'naze. Hagi kini ne' Deviti'a ana vahetmina Rubeni nagate'ma, Gati nagate'ma Manase nagama amu'nompinti'ma refkoma hu'naza nagate kva vahetami zamazeri otige'za Anumzamofo eri'zane, kini nemofo eri'zama eri'zantera kegava huzmante'naze.

## 27

### *Sondia vahete kva vahetamimofo zamagi eri fatgo hu'nea naneke*

<sup>1</sup> Hagi ama'i vahe zamagia, Israeli vahetamimofo nagate, nagate'ma kegava hutere hu'naza vahetamine, 1tauseni'sondia vahete'ene, 100'a sondia vahetaminte'ma kegava hu'naza vahetamine, kini ne'mofo eri'zama erinentaza vahetamine. Hagi ana vahetmina 24tauseni'a vahe refko huntetere hu'neankino mago kevumo'a mago ikampi eri'zana eritere hu'naze. <sup>2</sup> Hagi ese ikante'ma ese keyufima mani'naza vahe'ma eri'zama erisaza vahetmimofo kva nera Zabdieli nemofo Jasobiamu'e. Hagi ana kevufina 24tauseni'a vahe mani'naze. <sup>3</sup> Hagi Jasobiamu'a Perezi nagapinti fore hu'neankino, maka sondia kva vahe'taminte kegava hu'ne. Hagi agra maka ese ikampina eri'zana erigahie. <sup>4</sup> Hagi namba 2 ikante'ma eri'zama erisaza vahe'ma refkoma huntea kevurera, Ahohiti nagapinti ne' Dodai kegava higeno Mikloti anante kva nera mani'ne. Hagi ana kevufina 24tauseni'a vahe mani'naze. <sup>5</sup> Hagi namba 3 ikante'ma refko'ma hunte'nea vahe kevure'ma kegavama hu'nea kva nera, ugagota pristi ne' Jehoiada nemofo Benaia mani'ne. Hagi ana kevufina 24tauseni'a vahe mani'naze. <sup>6</sup> Hagi Devitina 30'a hankavennentake sondia vahepinna Benaia'a mago'zimimokino, agra ugota huno kegava huzmante'ne. Hagi Agri'ma refko'ma humiza kevurera nemofo Amizabadi nampa 2 kva nera mani'neno kegava huzmante'ne. <sup>7</sup> Hagi namba 4 ikante'ma nampa 4 kevuma refkoma hunte'nea kevure'ma kegavama hu'nea kva nera Joapu nagna'amo Asaheli kegava hu'ne. Hagi agri noma henka erino kegavama hu'neana, nemofo Zebadiah ana vahera kegava higeno, ana kevufina 24tauseni'a vahe mani'naze. <sup>8</sup> Hagi namba 5fu ikantema, nampa 5fu kevuma refkoma hunte'nea kevure'ma kegavama hu'nea kva nera Izrahi nagapinti ne' Samhuti'e. Hagi ana kevufina 24tauseni'a

vahe mani'naze. <sup>9</sup> Hagi namba 6si ikante'ma nampa 6si kevuma refkoma hunte'nea kevure'ma kegavama hu'nea kva nera Tekoa kumateti ne' Ikesi nemofo Ira'e. Hagi ana kevufina 24tauseni'a vahe mani'naze. <sup>10</sup> Hagi namba 7ni ikante'ma nampa 7ni kevuma refkoma hunte'nea kevure'ma kegavama hu'nea kva nera Peloni kumateti, Efraemi nagapinti ne' Helezi'e. Hagi ana kevufina 24 tauseni'a vahe mani'naze. <sup>11</sup> Hagi namba 8ti ikante'ma nampa 8ti kevuma refkoma hunte'nea kevure'ma kegavama hu'nea kva nera Husa kumateti, Zera nagapinti ne' Sibekai'e. Hagi ana kevufina 24tauseni'a vahe mani'naze. <sup>12</sup> Hagi namba 9ni ikante'ma nampa 9ni kevuma refko'ma hunte'nea kevure'ma kegavama hu'nea kva nera Anatoti kumateti, Benzameni nagapinti ne' Abiezeri'e. Hagi ana kevufina 24tauseni'a vahe' mani'naze. <sup>13</sup> Hagi namba 10ni ikante'ma nampa 10ni kevuma refko'ma hunte'nea kevure'ma kegavama hu'nea kva nera Netofa kumateti, Zera nagapinti ne' Mahara'i'e. Hagi ana kevufina 24tauseni'a vahe' mani'naze. <sup>14</sup> Hagi namba 11ni ikante'ma 11ni kevuma refko'ma hunte'nea kevure'ma kegavama hu'nea kva nera Piratoni kumateti, Efraemi nagapinti ne' Benai'a'e. Hagi ana kevufina 24tauseni'a vahe mani'naze. <sup>15</sup> Hagi namba 12 ikante'ma 12fu kevuma refko'ma hunte'nea kevure'ma kegavama hu'nea kva nera Netofa kumateti, Otniel nagapinti ne' Heldai'e. Hagi ana kevufina 24tauseni'a vahe mani'naze.

### *Mago mago naganofite'ma ugotama hu'naza kva vahe'mofo naneke*

<sup>16</sup> Hagi Israeli vahetamimofoma mago'mago nagate'ma ugotama hu'za kegavama hu'naza vahetamina ama'ne, Zikri nemofo Eliezeri'a Rubeni nagate kva manigeno, Simioni nagatera Ma'aka nemofo Sefataia kva mani'ne. <sup>17</sup> Kemueli nemofo Hasabia Livae naga'mofontera kva manino kegava huzmantegeno, Aroni naga'mofontera Sadoki kva manino kegava huzmante'ne. <sup>18</sup> Hagi Deviti negana Elihu Juda nagamofo kva manigeno, Maekoli nemofo Omri Isaka naga kva mani'ne. <sup>19</sup> Hagi Obadaia nemofo Ismaia Zebuluni nagate kva mani'geno, Azerieli nemofo Jeremoti Naftali nagate kva manino kegava huzmante'ne. <sup>20</sup> Hagi Azazaia nemofo Hosea Efraemi nagate kva manigeno, Manase nagama amunompinti'ma refkoma hu'nea nagara Pedaia nemofo Joel kva zemmane mani'ne. <sup>21</sup> Hagi Zekaraia nemofo Ido Manase naga'ma amu'nompintima refko hu'za Giliatima nemaniza nagara kegava huzmante'ne. Hagi Ja'asieli nemofo Abna Benzameni nagamofo kva mani'ne. <sup>22</sup> Hagi Jerohamu nemofo Azareli Dani naga kva mani'ne. Hagi ama'i Israeli vahe'mokizmima ugota huzmante'naza vahetami mani'naze. <sup>23</sup> Hagi kafu'amo'ma 20reti'ma erami'nea vahera Deviti'a ohampri'ne. Na'ankure Ra Anumzamo'a huvempa huno Israeli vahera azeri rama'a hanugeno monafi ofugna hugahie, huno hu'ne. <sup>24</sup> Hagi Zeruia nemofo Joapu'a agafa huno vahera hampri'neanagi, ana eri'zana eri vagaore'ne. Hagi é'i ana zankura Anumzamo'a Israeli vahera tusi arimpa ahezmante'ne. E'ina higeno anama hamodia nambana kini ne' Deviti'ma eri'zama eri'nea agenkema krente'nea avontafepina kre onte'naze.

### *Kini ne'mofo zantaminte'ma kegava hunaza kva vahe'mofo naneke*

<sup>25</sup> Hagi Adieli nemofo Azmaveti'a kini ne'mofo feno nontera kegava hu'ne. Hagi Uzia nemofo Jonatani'a Israeli agu'afima afete'ma me'nea feno nontaminte'ene, rankumatmimpi me'nea feno nontaminte'ene, neone kumatmimpima me'nea feno nontaminte'ene, zaza nontaminte'ene kegava hu'ne.

26 Kalubi nemofo Ezri hoza eri'zama eri vahetera kegava huzmante'ne. 27 Hagi waini hozaramintera Rama kumateti ne' Simei kegava hu'ne. Hagi nomofo agu'afima keri asentene'za wainima vasagenentaza nontera, Se-famu kumateti ne' Zabdi kegava hu'ne. 28 Hagi agupofima me'nea olivi zafaraminte'ene, sikamo zafaramintera Gederi kumateti ne' Ba'al-Hanani kegava hu'ne. Hagi Joasi olivi masavema ante nontera kegava hu'ne. 29 Hagi Saroni kumateti ne' Sitrai Saroni agupofi bulimakao afutamintera kegava hu'ne. Hagi mago'a agupofima mani'nea bulimakao afutamintera Adlai nemofo Safati kegava hu'ne. 30 Hagi Ismaeli nagapinti ne' Obili maka kemoli afutamintera kegava hu'ne. Hagi Meronoti kumateti ne' Jedeia donki afutamintera kegava hu'ne. 31 Hagi Hagri nagapinti ne' Jazizi maka sipisipi afutamintera kegava hu'ne. E'i ama ana maka vahera Kini ne' Deviti fenonte'ma kegavama hutere hu'naza vahetami mani'naze.

32 Hagi Devitina anenta nafa'amo Jonatani'a maka avoma kre'zana antahi ani' hu'neankino, agra knare antahi'zama Devitima ami' nera mani'ne. Hagi kini ne'mofo ne' mofavreramima rempi huzami nera Hakmoni nemofo Jehieli mani'ne. 33 Hagi Ahitofeli'a kini ne'mofoma knare antahintahima nemia ne' mani'ne. Hagi Aka nagapinti ne' Husai'a kini ne'mofo avate rone'a mani'ne. 34 Hagi Ahitofeli'ma frigeno'a, Benaya nemofo Jehoiata'ene Abiatake agri nona eri'na'e. Hagi Joapu maka sondia vahetamina kegava hu'ne.

## 28

### *Devitima ra mono noma kisaza naneke zmasami'nea naneke*

1 Deviti'a maka Israeli kva vahetmima, mago mago naganofite kvama hu vahetmima, kevure kevure'ma refkoma hunte sondia vahete kva vahetmima, 1tauseni'a sondia vahete'ene 100'a sondia vahetema kegavama hu'naza kva vahetmima, keonke fenoraminte'ma kegavama hu'naza vahetmima, afutmima'arema kegavama hu vahetmima, kini nemofo noma kegavama hu'nea vahetmima, hankavementake sondia vahetmima maka zama trohu antahintahima eri'nea vahetmima, maka Jerusalemi kumate zamavare atru hu'ne. 2 Ana hetuno Deviti'a otino amanage huno zamasmi'ne, nafuhetane vahe'nimotanena kama antahiho, nagrama han-kave antahintahima antahi'noana Ra Anumzamofo huhagerafi huvempage vogisire'ma Anumzamo'a aga tra'ma antenia no kinakure hu'na retro-trara hu'noe. 3 Hianagi Anumzamo'a amanage huno nasmi'ne, Devitiga kagra nagrima mono'ma hunante'za nagima erisgahu nona onkigahane. Na'ankure kagra harafa nekinka, rama'a vahe zamahenka korana eri taginane huno nasmi'ne. 4 Hagi Juda naga'mo Israeli vahepin vu-gota hugahie huno Ra Anumzamo'a huhampri'ne. Hagi Juda nagapina nenfa naga'mo vugota hugahie huno huhampri'ne. Hagi nenfa nagapintira nagriku Israeli vahe kinia manigahane huno nehuno, nagripinti'ma fore'ma hania mofavreramimo Israeli vahe kinia mani vava huno vugahie huno huhamprinante'ne. 5 Hagi Ra Anumzamo'a rama'a mofavrerami nami'neanagi, ana maka mofavrefintira Solomoni kinia mani'neno Israeli vahera kegava hugahie huno hu'ne. 6 Hagi Ra Anumzamo'a amanage huno nasmi'ne, negamofo Solomoni'a Nagri nona negino, mono kuma'nianena tro hugahie. Na'ankure agra nenamofiza hanige'na, Nagra nefaza hugahue huno hu'ne. 7 Hagi menima nehiazo huno Nagri kasegene tra kenema hankavetinoma avaririsiana, agri nagapintike mika knafina kinia forehu

vava huno vugahie huno hu'ne. <sup>8</sup> E'ina hu'negu menina maka Israeli vahera, Ra Anumzamofo kevumota tamavufi Anumzamo'a nentahige'na amanage hu'na neramasmue, Ra Anumzana tamagri Anumzamofo kasegema kegava nehuta, avariri so'ema hanuta ama hentofo mopa erisantihareta mani'neta frinaku'ma hanuta mofavretamimofo zamsage'za, mofavret-mimo'za erisantihare'za mani'za nevu'za, henkama frisu'za ana zanke hu'za vugahaze. <sup>9</sup> Hagi mofavrenimoka, Solomoniga, negafa Anumzana kenka antahinka nehunka, maka kagu'reti'ene antahintahi ka'reti'ene hunka eri'zama'a erinto. Na'ankure Agra maka vahe'mofo antahi'zana refko huno negeno, agu'afima antahia antahintahia antahino keno nehie. Kagrama kagu'retimma hunka hakenka kesunka, Agrira kenka eri fore hugahane. Hianagi kagrama kamefima humisankeno'a, Agra kamefi hugamigahie. <sup>10</sup> Hagi menina antahi anker, na'ankure Ra Anumzamo'a kagriku mono nona kigahane huno huhampri negante. Hagi hankanavetinka ana eri'zana erio. <sup>11</sup> Hagi ana nanekema huteno'a, anante Deviti'a ana noma kisia amema'ama tafete'ma krente'nea amema'a Solomonina ami'ne. Hagi ana tafetera, mono nomofo megia nonki, mono nonki, fenoma ante nonki, anaga kaziga nonki, agua nonki, asunku tra'ma me'nia nonki, <sup>12</sup> meg'i'a Ra Anumzamofo mono kumamofo amema'ama krente'nea avontafera ami'ne. Hagi Ra Anumzamofo zagoma ante none, eri ruotgema hu'za Anumzamo-foma eme amisaza zantmima ante nomofo amema'ama antahintahifima egeno retro'ma hunte'neana anante ami'ne. <sup>13</sup> Hagi Deviti'a pristi vahe'ene Livae vahe'enema refkoma hanige'za eri'zama Ra Anumzamofo nompima eri'naza zama krente'nea avontafe'ene, Ra Anumzamofo nompima eri'zama erisaza zantmima krente'nea avontafe'enena ami'ne. <sup>14</sup> Hagi mago mago ruotge zantmima tro'ma hania silvane, golimofo kna'era fatgo huno negeno krente'neana, <sup>15</sup> golire tavi azotane, lamuma tro'ma hania golimofo kna'ane, mago mago azankuna'ama tro'ma hania golimofo kna'ane eri fatgo nehuno, mago'mago azankunate'ma ante'nia lamu tavima tro'ma hanaza silvamofo kna'anena eri fatgo hu'ne. <sup>16</sup> Hagi zo-ore bretima ante itama tro'ma hanaza golimofo kna'ane, silvaretima tro'ma hanaza itaramimofo kna'ane, <sup>17</sup> goliretimma trompa hanaza foku'ma, tintafetamima, zuompama tro'ma hanaza kna'ane, silvaretima tro'ma hanaza zuompamofo kna'anena erifatgo hu'ne. <sup>18</sup> Hagi mnanentake zama krewnama vu golire itama tro'ma hanaza amema'ane kna'ane, asunku tratema tro'ma huntienigeno zan-gekonamo'ma rutareno Anumzamofo karisignama hania ankerontremofo amema'ane, ana ankeroma tro'ma hania golimofo kna'anena krenteteno ami'ne. <sup>19</sup> Hagi anante Deviti'a amanage hu'ne, ama ana maka zantmimofo amema'a, Ra Anumzamo'ma nasmia kante antenna avontafepina krente'noe. <sup>20</sup> Hagi Deviti'a nemofo Solomonina amanage huno asmi'ne, korora hunka kahirahikura osunka hankvetinka ama ana eri'zana erio. Korora huge kahirahikura osuo, Ra Anumzana, nagri Anumzamo'a kagrane manigahie. Agra noma vagama orenenifina amefira hugamige katregera osugahianki, kagrane mani'nenigena noma'ki vagaregahane. <sup>21</sup> Hagi antahio, pristi vahetamine Livae vahetmimo'za kazahu'za Anumzamofo nona kigahaze. Hagi maka ruzahu ruzahu eri'zama eri antahizama eri'naza vahetmimo'za kaza hu'za ana eri'zana eneringenka, maka eri'za vaheka'ane, zamagra zamavesite'ma eri'zama eri vahem'o'za kagria keka'a antahi'za eri'zana erigahaze. Hagi maka ugagota kva vahem'o'zane, maka vahem'o'zanena ke'ma hanana kea antahi'za ana eri'zana erigahaze.

## 29

### *Mono noma kisaza ofama eme ami'naza zamofo naneke*

<sup>1</sup> Ana huteno Deviti'a mika vahe kevua amanage huno zamasami'ne, Nenamofo Solomoni Anumzamo'ma huhampri ante'nea ne'mo'a osi mo-favregino eri'zama eri'zana ontahi'negeno eri'zamo'a rankrerfa hu'ne. Na'ankure ama ana nompina vahe'mo'a omanigahianki, Ra Anumzamo manisia no kigahie. <sup>2</sup> E'ina hu'negu nagrama hugazana hu'na Anumzani-mofo noma kizantmina golima, silvama, bronsima, ainima, zafama oniksi haveramima, mago'a ruzahu ruzahu zago'amoma mareri haveramine, al-abastanena eri atru hu'noe. <sup>3</sup> Hagi nagrama Anumzanimofo noma ki antahizama eri fore'ma hutena, ana noma kizama eri atruma hu'noa agofe-tura, nagra'a goline, silvanena mago'an Anumzamofo ruotge mono noma ki'zana antoe. <sup>4</sup> Hagi golima aminuana kna'amo'a 100tausen kilo hu'nea knare goligi, ana nomofoma masavema freno eri avugosama hu'zana 240tausen kilo hu'nea knare silva amigahue. <sup>5</sup> Hagi keonke zama trohu antahi'zama eri'naza vahe'mo'za ama ana goliretira golire zantamina tro nehu'za ama ana silvareti silvare zantamina tro hugahaze. Hagi tam-agripintira iza Anumzamofo noma ki zantamine, agra'ama ofama ami-nakura agesa nentahie? <sup>6</sup> Anage higeno mago mago nagamofo kva vahetmima, mago'mago nofimofo kva vahetmima, 100'a sondia vahetam-inte kva vahetamima, 1tauseni'a sondia vahete kva vahetamima, kini ne'mofo fenonte'ma kegavama hu'naza vahetamimozanena, zamagra'a za-mavesite ana mono noma kizantamina emeri atru hu'naze. <sup>7</sup> Hagi ana maka Anumzamofo noma ki zantmima eme ami'naza zamofo kna'amo'a 170tausen kilo hu'nea goligi, 340tausen hu'nea silvagi, 620tausen hu'nea bronsigi, 3million 400tausen hu'nea ainigi hu'za emeri atru hu'naze. <sup>8</sup> Hagi zago'am'o'ma marerirfa havema antenemo'a erino eme amigeno, Anumzamofo zugoma nentaza nompi eme ante'ne. Hagi ana nontera Gesoni nagapinti ne' Jehieli kegava hu'ne. <sup>9</sup> Ana nehu'za vahetamimo'za tusi muse hu'naze. Na'ankure zamagra zamavesite zamagu'areti hu'za Ra Anumzamofona ofa eme ami'naze. Kini ne' Deviti'enena tusi'a muse hu'ne.

### *Deviti'a Ra Anumzamofo agi erisga hu nunamu hu'nea naneke*

<sup>10</sup> E'inama hutazageno Deviti'a mika vahetmimofo zamavuga Ra Anumzamofona agia erisga nehuno amanage hu'ne, Ra Anumzana nerfa Israeli Anumzane, maka knane knanena vahetmimo'za kagi erisga huvava hugahaze. <sup>11</sup> Kagrina hankavekamo'ene hihamuka'amo'ene masazankamo'a agatere'neankinka, maka hara hugatenerane. Na'ankure monane mopanena, kagri zanke'za me'ne. Kagra maka zana kegava hunanankinka, mika zana mani agaterenka onaga'a mani'nane. <sup>12</sup> Hagi feno vahera kagra'a azeri retro nehunka, vahe'moma ra agima ami'zana kagraka'a vahera nemine. Kagrake'za mika'a zantera kegava hu'nane. Kagri kazampinke vahe'ma hihamune, hankavenema ami'zana mika me'ne. <sup>13</sup> Menina Anumzantimoka susu huneganteta, hihamu masa'ane kagia erisga nehune. <sup>14</sup> Hianagi nagrane vea'ninena tagra izagata tagra'a tavesitera ofa eme negamune? Na'ankure maka zama ante'nona zantamina kagritegatike ne-egeta kagri kazampinti maka zana eriteta, ete negamune. <sup>15</sup> Tagra Kagri kavurera tagehezama hu'nazaza huta ruregati emani vahe'ene kankekanke vahe'ene mani'none. Ama mopafi manizantimo'a vahe amema'agna huno amuhazana omane'ne. <sup>16</sup> Ra Anumzana tagri Anumzamoka, ama tusi'a zantmima ruotge kagima erisga

hu noma kinaku'ma emeri atruma huna zantamina, maka Kagritegati e'neankino, ana maka zana Kagrike zanke me'ne. <sup>17</sup> Anumzantimoka, kagra mika vahe'mota tamarimpa rezaganenka negenka, knare hu'za fatgo avu'avazama nehaza vahera muse hunezmantane. Nagra fatgo hu'na nagu'reti navesigante'na ama maka zantamina eme negamina, menina negogeno vaheka'amo'za eme atru hu'za musezampinti zamagra'a zamavesite mika ofazamia eme negamize. <sup>18</sup> Ra Anumzana, tafahe'i Abrahamuma, Aisakima, Israeli Anumzamoka vaheka'a zamaza hunka kagrarega zamagu'a zamazeri rukrahe huntege'za maka knafina kavesinegante'za keka amage anteho. Ana nehuge'za Kagririra kavesi negante'za kagrite rukrahe hu'za eho. <sup>19</sup> Nenamofo Solomonina knare antahintahi amigeno, kasegeka'anekavukvaka'an, tra keka'anena maka amage nenteno, nonka'a kino. Na'ankure noma ki'nia zantamina ko retro hunte'noe. <sup>20</sup> Hagi anante Deviti'a maka atruma hu'naza vea kevua amanage huno zamasmi'ne, Hagi Ra Anumzana tagri Anumzamofa agia erisga hiho. Higeno ana maka vahe'mo'za Ra Anumzana zamafah'e'i Anumzamofa agia erisga nehu'za, kepri hu'za kini ne'mofo avuga zamavugosaregati mopafi mase'naze. <sup>21</sup> Ana hute'za mase'za anante knarerera 1tauseni'a bulimakao afutminki, 1tauseni'a ve sipisipigi 1tauseni'a anenta ve sipisipi afutminki hu'za Ra Anumzamofontega ofa eme hu'za kresramna yunte'naze. Ana nehu'za waini ofane mago'ofanena maka Israeli vahe'mo'za eme hu'naze. <sup>22</sup> Hagi ana zupa Ra Anumzamofa avuga ra ne'za kre'za nene'za, tina nene'za musena hu'naze. Ana nehu'za anante Deviti nemofo Solomonina ete mago'ene kinia azeri oti'za Ra Anumzamofa avuga masavena frenente'za Zadokina pristi azeri oti'naze. <sup>23</sup> Hagi Solomoni'a nafa'amofo Deviti no erino kinia mani'neno Ra Anumzamofa vahera kegava hu'ne. Hagi maka zama hia zampina knare huno hageno marerigeno, maka Israeli vahe'mo'za ke'a antahimiza amage ante'naze. <sup>24</sup> Hagi maka kva vahetamima, hankave sondia vahetamima, kini ne' Deviti ne' mofavreramimo'zanena Solomoni agoraga'a manigahune hu'za huvempa hu'naze. <sup>25</sup> Ana higeno Ra Anumzamo'a Solomonina maka Israeli vaher zamavurera azerisga huno ragi amigeno, magora e'ina hu kini nera korapara Israeli mopafina fore osu'neankina kini fore huno kinia mani'nene.

<sup>26</sup> Hagi ana'ma higeno Jesi nemofo Deviti'a maka Israeli vahe'mofo kinia mani'nene. <sup>27</sup> Hagi 40'a kafufi Deviti'a Israeli vahe kinia mani'nene. Hebron kumatera 7ni'a kafu kinia maniteno, Jerusalemia 33'a kafu kinia umani'nene.

### *Deviti'mafri'nea zamofo nanek*

<sup>28</sup> Ana huteno ozafama ome nereno'a, veamokizmi zamavurera feno'amo agatere'nea ne' manino, ra agi erino mani'neno frigeno, nemofo Solomoni agri nona erino kinia mani'nene. <sup>29</sup> Hagi Kini ne' Deviti'ma tro'ma hu'nea zamofo agenke'a, eseteti agafa huno vuno uvagarete'ma vu'nea agenkea kasnampa ne' Samueli avontafepine, kasnampa ne' Neteni avontafepine, kasnampa ne' Gati avontafepi krente'naze. <sup>30</sup> Hagi e'i ana avontafepina Deviti'ma kinima mani'nea agenkene, hihamu'amofo agenke, agrama kinima mani'nea knafima Isareli vahete'ene agrama kegavama hu'nea mopafima maka'zama fore'ma hu'nea zamofo agenkea krente'naze.

## 2 Kronikol-Zamagi Zamagenke

### Nampa 2 Kronikol-Zamagi Zamagenke

*Solomoni'a knare antahizanku Anumzamofo antahige'nea naneke*

<sup>1</sup> Hagi Deviti nemofo, Solomoni'a maka mopa agrake erino vhahera kegava higeno, agri kvafinke maka vhahera mani'naze. Na'ankure Ra Anumzana agri Anumzamo'a hihamu hankavea amino, azerisga higeno agimo'a marerirfa kini ne' mani'ne. <sup>2</sup> Hagi maka Israeli vahepintira, 1tauseni'a sondia vhahetema kvama hu'nea sondia vhahetmima, 100'a sondia vhahete'ma kegavama hu'nea vhahetmima, kema refkoma hu kva vhahetmima, Israeli vhahetmimofo kva vhahetmima, mago mago nagate'ma vugotama hu'nea kva vhahetmima huno Solomoni'a ke hutru huteno nanekea zamasami'ne. <sup>3</sup> Hagi ana huteno Solomoni'ene maka vahe kevumo'zanena mono'ma nehaza agona kumate Gibioni vu'naze. Na'ankure Ra Anumzamofo eri'za ne' Mosese'ma ka'ma kopima Anumzanema atruhu seli noma tro'ma hu'nea seli mono nomo'a anantega me'nege'za vu'naze. <sup>4</sup> Hianagi Deviti'a Anumzamofo huhagerafi hvempage vogisima Kiriat-Jearimi kumate'ma me'neana ko erino eno kuma'ma tro'ma hunte'nef Jerusalemi eme ante'ne. Na'ankure Jerusalemi kumate ana huhagerafi hvempage vogisima ante seli nona kinte'nef eme ante'ne. <sup>5</sup> Hianagi Uri nemofo, Huri negeho Bezaleli'ma kre sramana vu itama bronsiretim tro'ma hu'nea itamo'a Gibioni kumate seli mono nomofo avuga me'nege'za, Solomoni'ene maka vahe'mo'za Ra Anumzamofo vahe'mo'za monora ome hunte'naze. <sup>6</sup> Hagi Solomoni'a ana bronsire kre sramnavu itare marerino Ra Anumzamofo avuga atruhu seli noma me'nere, 1tauseni'a tra'zama nenaza afura aheno tevefi kre fananehu ofa hu'ne. <sup>7</sup> Hagi ana kenagera Anumzamo'a Solomoninte ava'nafi efore huno amanage huno asami'ne, nazanku kavenesifi nasamige'na kami'neno, <sup>8</sup> higeno Solomoni'a amanage huno Anumzamofo asami'ne, nenfa Devitina tusiza hunka Kagra kavesintenka knare'za hunentenka, nagrira kinia nazeri otinke'na, agri nona eri'na kinia manue. <sup>9</sup> Ra Anumzana Anumzanimoka, ko'ma nenfa Devitima huhamprinte'nana kemo'a menina nena'a efore hie. Na'ankure ama mopafi kugusopagna huno ohompriga'a vhahete kinia mani'nenga kegava huo hunka kinia nazeri otine. <sup>10</sup> Hagi knare antahintahine, ama' antahi'zanena namige'na, kagri vaheklerfa kegavahuu so'e ha'neno. Na'ankure nagra hanaverera kagri vaheklerfa kegava hugara osu'noe. <sup>11</sup> Anage Solomoni'a higeno, Anumzamo'a amanage huno kenona'a hunte'ne, na'ankure kagri vaheka'a kegava hu antahintahine me'negenka, feno vahe'ma maninka ra kagima eri'zanku'ene, ha' vaheka'a zamazeri haviza huo hunka nantahinogenka, kafuni'a eri'zaza huge'na mani'neno hunka nantahi onke'nane. Hianagi nagri vahe kegava hu so'e hanue hunka knare antahizanku'ene ama' antahi'zanku'ene nantahige'nane. <sup>12</sup> E'ina hu'negu menina knare antahintahine'zane, ama' antahi'zanena amne kamigahue. Hagi ana agofetura ama mopafima ko'ma efore'ma hu'naza kini vahe'mo'zama onte'nazankna zagofenone, ragima eri'zanena kamigahuanki, henkama fore'ma hanaza kini vahe'mo'zanena, anara hu'za kagrikna kinia eforera osugahaze. <sup>13</sup> Hagi anante Solomoni'a Gibeoni kumate'ma me'nea agonarema Ra Anumzanema atruma nehaza

seli nomofo avugatira atreno, Jerusalemi kumate vuno kinia umani'neno, Israeli vhahera kegava hu'ne.

### *Solomon'i'ma fenoma ante'nea zamofo naneke*

<sup>14</sup> Hagi Solomoni'ma karisiramine hosi afu agumpima vanoma hu vahetmima zamavare atruma hu'neana, 1tausen 400'a karisiraminki, vahem'o'zama mani'ne'za ha'ma nehaza hosiramina 12tauseni'a hosiramine, ana hosirami erinoma vanoma nehia vahetamine, hosinema nente'za manisaza kumama tro'ma hunte'naza ran kumatmimpine, agrama nemania ran kumapi Jerusalemia ante'naze. <sup>15</sup> Hagi kini ne' Solomoni'a rama'a goline silvane Jerusalemi kumapina eritru higeno, havegna huno amne zankna hu'ne. Ana nehuno sida zafaramina rama'a Jerusalemi kumapina eri tru higeno, agupofi sikamo zafagna huno amne zankna hu'ne. <sup>16</sup> Solomoni'a eri'za vahe'a huzmanteg'e'za vu'za Kue mopafinti'ene Isipi mopafinti'ene hu'za hosi afutamina ome mizase'naze. <sup>17</sup> Hagi Solomoni eri'za vahe'mo'za 600'a silva zagoreti Isipitira karisiramina mizanese'za, 150'a silva zagoreti hosi afutamina mizase'naze. Ana hute'za hosi afutamine karisiraminena Hiti kini vahete'ene, Siria kini vahete'ene zagore atrege'za mizase'naze.

## 2

### *Solomonima mono none noma'anema Jerusalemi kumate'ma ki'nia zamofo naneke*

<sup>1</sup> Hagi Solomoni'a Ra Anumzamofo agima erisgahu mono none, kinima mani'neno manisia noma'a kinaku antahintahi retro hu'ne. <sup>2</sup> Hagi knarentake zantamima eri'za esage'za noma kisaza vahetmina Solomoni'a, 70tauseni'a huhampri nezmanteno, agonafinti'ma havema frage vahetmina 80tauseni'a huhampri nezmanteno, ana eri'za vahetmima kegavama hu vahetmina 3tausen 600'a vahetami huhampri zamante'ne. <sup>3</sup> Hagi Tairi kumate kini ne' Hiramuntega amanage huno Solomoni'a kea atregeno vu'ne. Nenfa Deviti'ma noma kinogu'ma sida zafa'ma aza hu'nanaza hunka naza huo. <sup>4</sup> Hagi ko, Ra Anumzana Anumzani'amofo agima erisga hu nonki'na Agrite eri ruotge hanugen, Agri avuga mnanentake'za frenkinsensia kremna nevu'za, maka kna zisti onte bretia eri'za ana nompi eme nente'za, kinaga nanterana tevefi kre fananehu ofa eme nehu'za, Sabati knare'ene, kasefa ikante'ene, mago'a knama Ra Anumzana tagri Anumzamo'ma hunte'nea knare'enena ne'zana eme kre'za nene'za musena hugahaze. E'ina hu avu'avazamo'a mago kasegegna huno me'nenige'za Israeli vahe'mo'za miko kna hvavava hu'za vugahaze. <sup>5</sup> Hagi ama ana mono noma kisuana nona konaririmo'a agateren marerirfa no kigahue. Na'ankure tagri Anumzamo'a maka'a anumzatmina zmagatere'nea Anumza mani'ne. <sup>6</sup> Hagi iza Anumzamofo nonkrerfa kintegara hu'ne? Monaramimo'a rankrerfa hu'neanagi anampina Anumzamofona avrentegara osu'ne. Hagi nagra iza'na Agri mono nona kigahue? Hagi mono noma kisuana, ofama Agritegama Kresramanama vanua no kigahue. <sup>7</sup> Ana hu'negu golileti'ma, silvareti'ma, bronsiretim, ainireti'ma, fitunke'ene koranke'ene hokonke tavravere'enema eri'zama eri antahi'zama antahini'ma hu'naza vahe'ene, azanteti'ma antreno maka'zama tro'ma hu antahintahima eri'naza vahe'enena huzmanteg'e'za e'za, Juda kumate'ene Jerusalemi kumate'ma keonke'zama tro hu'zama antahi ani'ma hu'nenia vahe Deviti'ma zamazeri retro'ma hunte'nea vahe'ene zamagra eri'zana emergahaze. <sup>8</sup> Hagi sida zafane, saipresi zafane, agalumu zafanena

Lebanonitira atrege'za eri'za echo. Na'ankure nagra antahi'noanki'za kagri eri'za vahe'mo'za Lebanoniti'ma zafama antagi'a antahi ani' hu'nazanki'za, nagri eri'za vahe'mo'za kagri eri'za vahetmina zamaza hanage'za,<sup>9</sup> ana zafaramina rama'a antagi'za eme namigahaze. Na'ankure ana noma kisuana konaririmo'a agaterene'nia no, ra nonkrerfa kigahue.<sup>10</sup> Hagi kagri eri'za vaheka'ane, zafama antagi vahetaminema nagrama mizama huzmantesuana, kna'amo'a 2tausen tani hu'enenia witine, 2tausen tani hu'enenia baseline, 400tauseni'a lita hu'enenia wainine, 400tauseni'a lita hu'enenia olivi masavene zamigahue.<sup>11</sup> Hagi Tairi kumate kini ne'Hiram'u'a amanage huno Solomonintega avona kre atre'ne. Na'ankure Ra Anumzamo'a vahe'agura zamavesinenteno zamagri kinia kagrira kazeri oti'ne.<sup>12</sup> Hagi mago'anе Hiram'u'a amanage hu'ne, Ra Anumzana Israeli vahe'mofo Anumzama monane mopanema tro'ma hu'nea Anumzamofo agi'a erisga hanune. Agra kini ne' Devitina knare antahi'zane mofavrea ami'ne. Ana ne' mofavrea knare antahi'zane, ama' antahi'zanena ami'neankino Ra Anumzamofo mono none, agrama kinima mani'nia nonena kigahie.<sup>13</sup> Hagi maka eri'zama eri' antahi'zama antahini'ma hu'nea ne' Huram-Abi nagra huntesugen vugahie.<sup>14</sup> Hagi ana ne'mofo nerera'a Dani nagapinti Israeli are, hagi nef'a Tairi kumateti ne' Hiram-Abikino golireti'ma, silvareti'ma, bronsireti'ma, ainireti'ma, havereti'ene zafareti'ene fitunke'ene koranke'ene hokonke tavravereti'ma eri'zama eri'zante'ma antahi ani' nehuno, havema taga huno vahe amema'ama tro'ma hu'ama antahi' ani hu'neankino, kagri eri'za vahe'ene, Deviti'ma zamazeri retroma huzmante'nea eri'za vahe'enena eri'zana erigahie.<sup>15</sup> E'ina hu'negu witine, baline, olivi masavene waininena ranimoka kema hana kante antenka eri'za vaheka'amotarega atreranto.<sup>16</sup> Hagi kagra inankna zafagu'ma hananana Lebanonitira antagita, ventefi erinteta avazu huta erita Jopa kumate e'nunketa, ananteti emerita Jerusalemia marerigahaze.<sup>17</sup> Hagi nef'a Deviti'ma vahe'ma hampri'neaza huno Solomoni'a ruregati'ma Israeli mopafima eman'i'aza vahe'ma maka hampri'neana, ana vahe'mofo nampamo'a 153tausen 600ti hu'ne.<sup>18</sup> Hanki havene zafaraminema eri'za esaza vahetamina 70tauseni'a huhampri nezmanteno, agonafinti'ma havema tagahu'za eri fatgoma hu vahetmina 80tauseni'a huhampri nezmanteno, ana maka eri'za vahetmima kegavama hu kva vahetmina 3tausen 600'a zamazeri oti'ne.

### 3

#### *Jerusalemima mono noma ki'naza zamofo naneke*

<sup>1</sup> Ana huteno Solomoni'a agafa huno Moraia agonare Jerusalemi kumapi Ra Anumzamofo mono nona ki'ne. E'i ana agonarera korapara Jebusi ne' Onani'ma witi honama neharea kumate'ma, Ra Anumzamo'ma Devitinte'ma efore'ma hu'minere ana nona ki'ne.<sup>2</sup> Solomoni'ma 4'a kafuma kinima nemanino'a, ana kafumofo namba 2 ikamofona nampa 2 knazupa agafa huno ana mono nona ki'ne.<sup>3</sup> Ana nomofo tra'ama (foundation) ki'neana zaza'amo'a 27mita higeno, atupa'amo'a 9mita hu'ne.<sup>4</sup> Hagi ana nomofona avuga kazigama zasi'ma eri noma ki kamare'naza nomofo zaza'amo'ene, atupa'amo'enena 9mita higeno, anagamuma mareri'amo'a 54mita hu'ne. Hagi ana nomofo anagami kazigane agu'afi asopareganena knare'zantfa hu'nea goli eri'za ana nomofona eri anovazi'za eri masave hu'naze.<sup>5</sup> Hagi ana nomofo agu'afine maka asoparega saipresi zafa retrureno aheno evuteno, golireti eri anovazino eri masave nehuno, tofe

zafamofo amema'ane, seni nofi'mofo amema'ane ana zafarera kreno eri avasesea hunte'ne. <sup>6</sup> Hagi ana nomofo avasase'ama tro'ma hu'neana, zago'amo'a marerirfa haveraminteti'ene Parvaim kumateti'ma mizase'nea haveraminteti avasese zana tro huno konariri'a ana nomofo agu'afina hunte'ne. <sup>7</sup> Hagi anagamima ana noma prohu zafane, kafa zafaramine, agu'afima maka asoparegama ahekamre'zama evu'naza zafaramintera maka golireti eri anovazino enevuno, asoparegama ahekamre'nea zafaramintera serabimie nehaza ankerontamimofo amema'a tro huntetere huno evu'ne. <sup>8</sup> Hagi ana nomofo agu'afima hunaragintegeno ruotage'ma huno ruotagetfama hu'nea nomofo zaza'amo'ene atupa'amo'enena 9mita higeno, kna'amo'a 23 tani hu'nea golireti agu'afina eri anovazinteno eri masavea hu'ne. <sup>9</sup> Hagi kna'amo'a 570'a gremi hu'nea golireti, nilima ahegeno ufre'nea kana eri masave huno eri hananeno evu'ne. Ana nehuno ana nomofo asoparegama ki kamre'naza nomofo anaga kazigama hunaraginte'nafina, golireti eri masave huno evu'ne. <sup>10</sup> Hagi hunaragintegeno ruotagema huno ruotagetfama hu'nefinka Solomoni'a tare ankeromofo amema'a zafareti antreno tro huteno, golireti eri anovazino eri masave huteno anampinka ante'ne. <sup>11</sup> Hagi ana ankeromoke'a asamofo amunompi otineke zanageko'na rufananara hakeno'a mago'mago zanagekonamofo za'za zani'amo'a 2.25mita hutere hu'ne. Hagi ana asamofo zaza'amo'a 9mita hu'nea asagino ana ankeromokea zanageko'na rutarakeno kantu atupare-tira kama atuparera e'ne. <sup>12</sup> Anahukna huno mago ankeromofo mago kaziga ageko'namo'a 2.25mita huno nomofo areharare zafa avako higeno, mago kaziga agekonamo'a ese ankeromofo agekonare avako hu'ne. <sup>13</sup> Hagi ana ankerontremokea oti fatgo huneke zanavugosa agu'afi kafantega hunteneke zanagekona rufananara hakeno kantu kaziga asoparegati eno, kama kaziga asoparegama e'nea, zanageko'namofo zaza'amo'a 9mita hu'ne. <sup>14</sup> Hagi hunaragintegeno ruotage huno ruotagetfama hu'nefinkama ufre kafante'ma tafinte travaverse'ma avasesema hunte'nazana, kunke'ene fitunke'ene koranke'ene efefe nofiteti rehati'za, ana ankeromofo amema'aramina tro hunte'za evu'naze.

<sup>15</sup> Ana nomofo avuga tare zafarare retrurente'ne. Hagi ana zafararemofo zaza'amo'a 2.5 mita higeno, kankri'ama tro huno'ma ana zafararemofo aseni'are'ma resima hu'neana zaza'amo'a 2.5 mita hu'ne. <sup>16</sup> Hagi seni nofiteti avasesezana tro huteno evuteno, ana seni nofipina pomigreneti zafa raga 100'a tro huno ana seni nofipina rusi huteno, ana zafararentera anagamu asenifina rusi hunte'ne. <sup>17</sup> Hagi ana zafararena mono nompima ufre kafante kini ne'mo'a sauti kaziga mago retrunereno, Jakini'e huno agi'a nenteno, magora noti kaziga retrurenno Boasi'e huno agi'a ante'ne.

## 4

### *Ana mono nompima ante'saza zamofo naneke*

<sup>1</sup> Hagi Solomoni'a bronsireti Kresramana vu itama tro'ma hu'neana, zaza'amo'a 9 mita higeno, atupa'amo'enena 9mita higeno, anagamuma mareri'amo'a 4.5mita hu'ne. <sup>2</sup> Ana nehuno bronsireti ra zuompakrerfa tro huteno, ana zuompamofona agi'a hagerine huno antemi'ne. Hagi ana zuompamofo rugagi'amo'a 13.5mita higeno, urami'amo'a 2.5mita higeno, kahesama hu'neama'amo'a 4.5 mita hu'ne. <sup>3</sup> Hagi ana zuompamofo avaza

avamentera, 45 sentemita huterema hu'nea kankamuntera tarefi bulimakaomofo amema'agnaza 10ni'a tro huntetere huno kagi'ne. Hagi ana avasesezama tro'ma hu'neana, zuompama tro'ma hunte'nea bronsireti tro hunte'ne. <sup>4</sup> Hagi ana zuompamo'a 12fu'a bronsireti'ma tro'ma hu'naza bulimakao afutamimofo zamagumpi me'negeno, 3'a bulimakao afutamimo'za noti kaziga zamavugosa huntazageno, 3'amoza zage ufre kaziga zmavugosa huntazageno, 3'amoza sauti kaziga zamavugosa huntazageno, 3'amoza zage hanati kaziga zamavugosa hunte'naze. <sup>5</sup> Hagi ana zuompamofo tapamari'amo'a 8 sentimita higeno, agi'amo'a kapugna huno kagigeno, rutareno rugahesa hu'nema'amo'a flauamo amosre ahen-teno rutareankna hu'ne. Hagi ana zuompafima tima afinte'niana 60ti tausen lita afintega hu'ne. <sup>6</sup> Hagi 10ni'a ne'one zuomparamina tro huteno, 5fu'a sauti kaziga keginarega nenteno, 5fu'a noti kaziga keginarega ante'nege'za, e'ina zuomparamimpina tevefima kre fananehu ofama nehaza zantmi sese nehaze. Hianagi ra zuompafina pristi vahe'mo'za tina nefraze. <sup>7</sup> Hagi kema hu'nea kante anteno, 10ni'a lamu tavi zotarami tro huteno, mono nomofo agu'afina tamaga kaziga 5fu'a anteno, hoga kaziga mago 5fu'a ante'ne. <sup>8</sup> Hagi ana zanke huno ne'zama ante itaramina 10ni'a tro huteno, 5fu'a sauti kaziga nenteno, mago 5fu'a noti kaziga nenteno, 100'a neone zuomparamina golireti tro huteno mono nompina ante'ne. <sup>9</sup> Ana nehuno mono nomofo kumara tare tro hu'ne. Hagi agu'afima pristi vahe'ma mani'saza kumara osi tro nehuno, meg'i rankumama tro hu'nefima ufretera kafa hagenteteno bronsireti erinovazinteno eri pehe hunte'ne. <sup>10</sup> Hagi bronsireti'ma tro'ma huteno hagerine hu'noma agima ante'nea zuompa erino mono nomofo sauti kazigane zage hanati kaziganema renagente'nea amu'nompi ome ante'ne. <sup>11</sup> Hagi Huram-Abi'a anazanke huno kavoma, savoruma, zuompanena trohunte'ne. Hagi Solomoni'ma Anumzamofo mono nomofo eri'zama Huramu-Abi'ma ami'nea eri'zana ana maka eri vagare'ne. <sup>12</sup> Tare zafararema retruma rente'nea zafararentera, zuompagna kankri trohuno ana zafararemona zanuntupina antani nezzanteno, ana kankritera avonkre avankre huno avasesena hunte'ne. <sup>13</sup> Hagi ana avonkre avankre'ma hunte'nerera seninofira tarefi evu'neankino 400'a pomigreneti zafa raga trohuno ana tare seninofi'ma evu'nefina tafintetere huno evu'ne. <sup>14</sup> Hagi agra anazanke huno tra'tamina tro nehuno, zuomparaminen tro huteno, ana agofetu antetere hu'ne. <sup>15</sup> Hagi bronsiretimi 12fu'a bulimakaoma tro'ma hunte'nea afutamimofo agofetura ra zuompa Hagerinema huno agima ante'nea zuompa ante'ne. <sup>16</sup> Hagi Ra Anumzamofo mono nompima antezantamima Solomoni'ma higeno'ma Huramu'ma tro'ma hu'neana, kavoma, savoruma fokunena tro nehuno, maka zantaminena bronsireti'za tro hu'ne. <sup>17</sup> Hagi kini ne'mo'a Huram-Abi'ma huntege'za ana zantmima tro'ma hu'nazana, higo mopafi anama tro'ma hunaku'ma haza zamofa amema'a tro hunte'ne'za bronsia kre mara'mara hu'za, anampi tagitre'za tro hu'naze. Hagi ana zantmima tro'ma hu'naza kumara Jodani agupofi Sukoti kuma'ene, Zareda kuma'mofo amu'nompi ana zantamina tro hu'naze. <sup>18</sup> Hagi Solomoni'a ama ana zantamina rama'a tro hu'neankino, bronsimofo kna'a hamprigara osu'ne. <sup>19</sup> Hagi Solomoni'a Anumzamofo mono nompima ante zantamina maka tro hu'ne. E'i ana zantamina golire kre sramnavu itagi, Anumzamofo avugama nentaza bretimofo itaraminki, <sup>20</sup> e'ina hunka tro hugahanema hu'zama hu'naza kante anteno ruotagema huno ruotagetafama hu'nefinkama tavi'ma rekruma hunte

azotane, ana tavi azotare'ma rekruma hunte lamuramina goliretike tro hunte'ne. <sup>21</sup> Hagi ana tavi zotamofo amosre'araminki, lamugi, tu'zama hu zotanema tro'ma hu'neana, goliretike tro nehuno, <sup>22</sup> tavima rusu'ma hu azotaraminki, korama ru tritri'ma hu zuompagi, mnanentake'za insensima kre zuompagi, zuomparaminki, mono nomofo kafane, ruotage'ma hu'nefinkama vu kafanena goliretike tro hu'ne.

## 5

### *Huhagerafi huvempage vogisima eri'za mono nompi eme ante'naza naneke*

<sup>1</sup> Hagi Solomoni'ma Ra Anumzamofo mono noma kihanama huntogeno'a, ko'ma nefo Deviti'ma Ra Anumzamofoma musezama amigeno ruotage'ma hu'nea zantamina, silvagi, goligi, mago'a eri'zama e'neri'za zantaminena erino Anumzamofo nompima fenoma nentazafi eme ante'ne.

<sup>2</sup> Ana huteno Solomoni'a mika Israeli ranra vahetamine, maka naga nofimofo kva vahetaminena, Ra Anumzamofo huhagerafi huvempage vogisima, Jerusalemi kumaku'ma Deviti kuma Saionema nehaza kumapinti'ma eri'za mareri'za mono nompima eme antesazegu zamavare atru hu'ne. <sup>3</sup> Hagi hagege kokampima fugagi noma ki'za mani'za e'naza zanku'ma antahimi'za kafugu kafuguma 7ni ikante, ne'zama kre'za nene'za musema nehaza knarera maka Israeli vene'neramimo'za kini ne'mofo avuga eme atru hu'naze. <sup>4</sup> Hagi ana maka Israeli ranra vahetmima etruma hutazageno, Livae vahe'mo'za ana huhagerafi huvempage vogisia erisga nehazage'za, <sup>5</sup> mago'a Livae vahe'mo'zane pristi vahe'mo'za Seli nomofo agu'afima ruotge'ma hu zantmima me'nea zantamine, ana seli nonena maka eri'za mareri'naze. <sup>6</sup> Hagi ana huhagerafi huvempage vogisima Livae vahe'mo'zama eri'za nevazageno'a, Solomoni'ene mika Israeli vahe'mo'za huhagerafi huvempage vogisimofo avuga vugote'za sipisipi afutamine, bulimakao afutaminena ohampriga'a ahe'za kresramna vu'naze. <sup>7</sup> Ana hutazageno pristi vahe'mo'za Ra Anumzamofo huhagerafi huvempage vogisia eri'za vu'za, Ra Anumzamofo mono nompi hunaragintegeno ruotge'ma huno ruotagetfama hu'nefinkama tare ankeromoke'ma zanageko'nama rutare'nampinka ome ante'naze. <sup>8</sup> Hagi ana tare ankerontremokea zanageko'na rufanara huke ana huhagerafi huvempage vogisima antesaza kankamuma'a rufinetekete, huhagerafi huvempage vogisine erisgama huno vu azotararena rufite'na'e. <sup>9</sup> Hagi ana vogisima erisgahu zota'araremokea za'za hu'na'ankino, meg'i'a nompintira amne atumpa'ararena kegahaze. Hianagi ana nomofo meg'i'atira onkegahaze. Hagi ana zotararemokea meninena anante me'na'e. <sup>10</sup> Hagi ana vogisimofo agu'afina mago'azana omne'neanki, ko'ma Isipiti'ma zamavareno ne-eno'ma Sainai agonafima Ra Anumzamo'ma Israeli vahe'enema huhagerafi'nea huvempagema tare have tafete'ma Mosesema kremigeno'ma ante'nea have tafetre me'ne.

<sup>11</sup> Ana hute'za maka pristi vahe'mo'za mono nompima ruotage huno ruotagetfama hu'nefintira atre'za atirami'naze. Hagi e'i anampima mani'naza pristi vahe'mo'za ru kevufinti ru kevufinti e'nazanagi, ana maka vahera ko' zamazeri agru hu'naza vahe'mo'za e'naze. <sup>12</sup> Hagi Livae nagapima zagamema nehaza vahe'ene, Asapu'ene Hemeni'ene Jedutuni'ene mofavre naga'zmine, naga'zamimo'zanena efeke kukena hu'ne'za nasenasepane ha-pue nehaza zavenane, Lairie nehaza zavena nehe'za kresrama vu itamofo

zage hanati kaziga oti'naze. Ana nehazage'za 120'a pristi vahe'mo'zanena ufena re'naze. <sup>13</sup> Ana hu'za ufema neraza vahe'mo'zane zagamema nehaza vahe'mo'za magoka runknana hu'za zagamera nehu'za, Ra Anumzamofona agi'a erisga hu'naze. Anama nehazage'za mago'a ufema neraza vahe'mo'zane, nase'nasepama nehaza vahe'mo'zane, magoka ruknana hu'za zagamera nehu'za Ra Anumzamofona agi'a erisga hu'za, tamage huno Agra knare hu'ne. Na'ankure Agra vagaore avesizanteti avesi nerante. Anagema hu'za zagame'ma hazageno'a, hampomo'a Ra Anumzamofono mono nona eme ruvite'ne. <sup>14</sup> Hagi pristi vahe'mo'za ana nompina eri'zana e'ori'naze. Na'ankure ana nompina hampomo'ene Ra Anumzamofono himamu masa'amo'ene Anumzamofono mono nona ru vite'ne.

## 6

### *Solomoni'a Israeli vahe'mokizmi nunamu huzmante'nea naneke*

<sup>1</sup> Anante Solomoni'a amanage huno nunamuna hu'ne, Ra Anumzamoka hanintiri hu'nea hampompi nemanue hunka hu'nane. <sup>2</sup> Hianagi nagra menina konariri'anе hentofa mono no kigantoankinka, kagra anampi emani vava hugahane. <sup>3</sup> Anage nehuno kini ne' Solomoni'a rukrahe huno, anante'ma oti'naza Israeli vea kevua asomu kea huzmante'ne. <sup>4</sup> Ana nehuno amanage hu'ne, Ra Anumzana Israeli vahe Anumzamo'a ra agi erisie. Na'ankure Agra agipinti'ma nenfa Devitima huhamprinte'nea zantamina eri nenanraga nereno, anage hu'ne, <sup>5</sup> Nagrama Israeli vahe'ma Isipiti'ma zamavare'na attramua kna zupa, Israeli naga nosimofo kumapintira mago kuma huhampri'na e'ina kumapi mono noni'a kinantegahaze hu'na osu'noe. Ana nehu'na nagri vahera kegava hugahane hu'na mago kinia huhampri onte'noe. <sup>6</sup> Hianagi menina Nagri nagima me'nesige'za mono'ma hunantesaza mono nona Jerusalemi kumate kigahaze hu'na huhampri'ntoe. Ana nehu'na Israeli vahe'n'i'ama kegavama hania nera Deviti huhamprinte'noe huno hu'ne. <sup>7</sup> Hanki nenfa Deviti'a Ra Anumzana Israeli vahe Anumzamofono Agima erisgahu noma kinakura tusiza huno avesi avesi hu'ne. <sup>8</sup> Hianagi Ra Anumzamo'a amanage huno nenfa Devitina asmi'ne, Kagra fatgo kagukasareti Nagri nagima erisgama hu nona kinakura kavesi kavesi hu'hane. <sup>9</sup> Hianagi kagra ana mono nona onkigosankanki, kagrama kasente'nana mofavrefinti mago mofavremo, Nagri nagima erisgahu mono nona kigahie, huno hu'ne. <sup>10</sup> Hagi menina Ra Anumzamo'ma huvempama hunte'nea kea eri ragarege'na, Ra Anumzamo'ma huhamprinte'nea kante ante'na nenfa Deviti kini trara nagra eri'na Israeli vahe kini mani'nena, Ra Anumzana Israeli vahe Anumzamofono agima erisgahu mono nona kintoe. <sup>11</sup> Ana nehu'na Ra Anumzamo'ma have tafete'ma kreno Israeli vahe'enema huhagerafi huvempa kema hu'nea haverarema ante'naza vogisia ana mono nompinka ante'noe.

<sup>12</sup> Anage nehuno Solomoni'a Ra Anumzamofontega Kresramanama nevaza itamofo avuga, maka Israeli vahe'mo'za negazageno, oti'neno azana erisga hunagamu atre'ne. <sup>13</sup> Hagi Solomoni'a vahe'ma oti trara bronsire tro hu'neankino, atupa kazigamo'a 2mitagi 20sentimita higeno, zaza kazigamo'a anahu huno 2mitagi 20sentimita higeno, anagamima mareri'amo'a 1mitagi 30sentimita hu'ne. Hagi maka Israeli vahe zamavuga Solomoni'a vahe'ma o'neti'za trate eme otiteno, tarega azantre'na monarega rusu'neteno arena nereno, <sup>14</sup> amanage hu'ne, Ra Anumzana Israeli vahe Anumzamoka magore huno kagri kna Anumzana monafine ama

mopafinena omanitfa hu'ne. Maka zamagu'retimu hu'za kamage'ma nentaza eri'za vaheka'a, huvempama hu'nana kasegea runotagrenka, vagaore kavesi zanteti kavesi nezmantane. <sup>15</sup> Hagi eri'za vaheka'a nenfa Devitima kagra kagipinti'ma huvempama hunte'nana kea ruotagre'nane. Kagra'a kagipinti nenfama huvempama hunte'nana kea menina eri nena ragarane. <sup>16</sup> Hagi Ra Anumzana Israeli vahe Anumzamoka, eri'za vaheka'a nenfa Devitina huvempama huntenga amanage hu'nane, kagrama kasezmantesana mofavremo'zama, kagrama hu'nanaza hu'za nagri kasegema amage antesage'na, zamatre'nugeno mago'mo Israeli vahe kinia manitere huno yugahie hunka hu'nane. <sup>17</sup> E'ina hu'negu menina Ra Anumzana Israeli vahe Anumzamoka, atregeno eri'za vaheka'a Devitima huvempama hunte'nana kemo'a tamage huno nena raga'a efore hanie. <sup>18</sup> Hianagi tamagerfa hunka Anumzamoka ama mopafina vahe'enena emanigahano? Monaramimo'a rankrerfa hu'neanagi, anampina Anumzamoka mani avitegahane. Hagi ama mono noma ki'noa nomo'a ositta hu'neanki, Ra Anumzamoka ama mono noma kua mono nomo'a, kagrira osi hugantegaiankinka emanigara osu'name. <sup>19</sup> Hianagi Ra Anumzana nagri Anumzamoka, eri'za vahekamo'na nazama huogu'ma nunamuma hu'nua kantahigesugenka, nunamuni'a antahinaminka kasunku hunanto. <sup>20</sup> Hagi zugene haninema nagima erisgama hugahazema hunka hu'nana mono nontera kavua antenka mani'enka, eri'za vahekamo'nama nunamuma ama kumapima eme hanuana, monafintira antahinaminka nona'a hunanto. <sup>21</sup> Hagi Israeli vahe'ene eri'za vahekamo'nanema ama ana nontegama tavugosama hunte'netu nazankuro nunamuma huta kantahigesunkenka, nemanina kumaka'a monafinkatira nunamuntia nentahinka kumitia atreranto. <sup>22</sup> Hagi mago vahe'mo'ma havigema huno tava'oma'arema nemanisimofoma mago'a hazenke hunantene huno huntenigeno, anamo'ma eno nagra mago'a hazenkea tamagerfa hu'na osu'noe huno'ma, kresramna vu itamofo avuga eme hanigenka, <sup>23</sup> monafintira nentahinka fatgo hunka ke'zani'a refko hugahane. Hagi ana kema antahitesankeno'ma havigema hu'enigenka, kagraka'a ana zanteru kna nezaminka, tamagema hu'enigenka ana zanteru mi'zana amigahane. <sup>24</sup> Hagi Israeli vaheka'amota kumi'ma hanunkeno, ha'vahe'timo'za ha'ma emehu tagaterenageta, ete rukrahe huta kagritega nunamuma ama mono nonka'afima hanunkenko, <sup>25</sup> monafintira Israeli vaheka'mota nunamuntia antahiraminka kumitia atrenerantenka, tagri'ene tafahe'inema tami'nana moperera ete tavarenka eno. <sup>26</sup> Hagi tagrama kumi'ma hanuna zanku'ma hunka, mona kafama eriginakeno ko'ma orina, ete rukrahe huta ama ana noma me'neregama tavugosama rukrahe hunteetama kagima neheta kumi avu'ava zantima netreta nunamuma hanunkenko, <sup>27</sup> monafintira nunamuntia antahinka eri'za vahe'kamota Israeli vahe'mota kumitia eri atrerantegahane. Ana nehunka fatgo kavukvara taveri hananketa nevanunkenko, rempi huneraminka, erisantihareho hunkama vaheka'amotama taminana mopafina kora atrenakeno runtegahie. <sup>28</sup> Hagi ama ana mopafima agatontoza fore hanio, hozafei nezante kri fore hanio, kenutmimo mika hoza neno erihna hanio, ha' vahetimo'za kuma kafantire'ma eme runkninere'za avazagi kaginazo, kri fore huno tazeri haviza hanio, inankna knaza fore hanigeno, <sup>29</sup> mago ne'mo'o, maka Israeli vaheka'amotama knazantifine tasunku zampinema mani'neta, ama ana mono noma me'neregama tazama rusuteta tazama hananegu'ma nunamuma huta krafagema hanunkenko, <sup>30</sup> mona

kumaka'afintira nentahinka kumitia atrenerantenka, mago mago'mo'ma hu'nenia avu'avate antenka nona huzmantetere huo. Na'ankure Kagra mika vahe'mofo agu'agesa kenka antahinka hu'nane. <sup>31</sup> E'ina hananketa, tafahe'ima zami'nana mopafima tagrama maka knama manita vanumpina, Kagrikura koro nehuta keka'a amage'anteta vugahune. <sup>32</sup> Hagi megi'ati ru vahe'mo'zama e'za kagrama, kazama rusutenga hanaventenake ranra avu'avazama hu'nana zante'ene kagri kagigu'ene nentahi'za e'za ama ana mono nontegama zamavugosama hunte'ne'za nunamuma hanagenka, <sup>33</sup> mona kumaka'afintira ana vahe'mokizmi nunamuzmia nentahinka zamaza huo. E'ina'ma hananke'za, maka ama mopafi vahe'mo'za, Israeli vahe'mo'zama nehazaza hu'za kagrikura koro hunegante'za ama mono noma ki'noa nonkura, kagri rankagi kami'none hu'za ke'za antahi'za hugahaze. <sup>34</sup> Hagi mago kazigama kagra vahekamofoma huzmantesanke'za ha' vahezmima, ha'ma ome huzmante'naku'ma nevu'za, ama rankuma'ma kagrama huhampri'nana kumategane, kagri kagima erisgama hu mono noma ama kintoa nontegama zamavugosama hunte'ne'za nunamuma hanagenka, <sup>35</sup> nunamuzmia monafinkati nentahinka, kasunku huzmantenka zamaza huo. <sup>36</sup> Hagi maka vahera kumike vahe mani'nonankino, vaheka'amozama kagri kavure'ma kumi'ma hanagenkama krimpa ahenezmanenka, ha'vahe zamazampima zamavare ante'nanke'za zamavare'za afete moparego, tva'onte moparegama vu'za, <sup>37</sup> anantegama kinama ome hu'za mani'ne'za zamagu'a rukrahema nehu'za kasunku huzmantogu'ma nunamuma hu'za, kana hazagreta havi avu'ava nehuta, kumi hu'none nehu'za, <sup>38</sup> anama kinama ome hu'za mani'enaza moparegati'ma zamagu'areti'ene tumozmireti'ene hu'za zamagu'ama rukrahe hu'za kagritegama ne-eza, zamafah'eima zami'nana moparegane, kagima erisgahu mono noma kinte'noregane, kagrama huhampri'nana rankumateganema zamavugosama hunte'ne'za nunamuma hanagenka, <sup>39</sup> mona kumaka'afintira nunamuzmia antahizaminka, zamaza nehunka, vaheka'amo'zama kagri ke'ma rutagre'za kumi'ma hu'naza kumizmia atrezmanto. <sup>40</sup> Hagi menina Anumzanimoka, kavune kagesanena ama kumapi antenka mani'enka, nunamuma hanunkenka nunamuntia antahiramio. <sup>41</sup> Menina Anumzana Ra Anumzamoka otinka mani fruhu kumaka'afi huhagerafi huvempage vogisine umanigahane. Hagi ana vogisia hanaveka'amofa avame'za me'ne. Ra Anumzamoka kasunku pristi vahera huzmantenka maka zupa zamaza nehuge'za zamagu'areti'ma hu'za kagri'ma kamage'ma nentaza vahe'mo'za knare kavukva zankura muse hugahaze. <sup>42</sup> Hanki Ra Anumzana kagra Anumza mani'nananki, kagrama huhampri nante'nana kini ne'mo'na kamefira huonamio. Ko'ma eri'za vaheka'a Devitima mevava kavesi zanteti'ma kavesinentenka huvempama hunte'nana kegura kagera okanio.

## 7

*Ra Anumzamo'ma mono nompima eman'i'nea zamofo naneke*

- <sup>1</sup> Hagi Solomoni'ma nunamuma huvagaregeno'a, monafinti tevemo'a eramino kre fananehu ofane, kre sramanama vu zantaminena tefanane higeno, Ra Anumzamofo hihamu masa'amo'a ana mono nona ruvitente'ne.
- <sup>2</sup> Hagi ana'ma hige'za pristi vahetmimo'za ana nompina umreori'naze, na'ankure Ra Anumzamofo hihamu masa'amo'a ana mono nona ruvitente'ne.
- <sup>3</sup> Hagi maka Israeli vahe'mo'za tevene, Ra Anumzamofo hihamu masa'anema ana mono nonte'ma nege'za, zamavugosaregati mopafi

mase'za Ra Anumzamofona monora hunente'za, susu hunte'za amanage hu'naze, Ra Anumzamo'a Agra knare hu'ne. Na'ankure marerirfa avesi'zamo'a vagaore mevava huno vugahie. <sup>4</sup> Ana hute'za, kini ne'ene maka vahe'mo'zanena Ra Anumzamofo avuga ofaramina kresramna vu'naze. <sup>5</sup> Hagi kini ne' Solomoni'a ofama kresramnana vu'neana 22 tauseni'a bulimakao afutminki, 120 tauseni'a sipisipi afutminki huno kresramna vu'ne. E'ina hu'za kini ne'ene, maka Israeli vahe'mo'zanena Anumzamofo mono nona eri ante ruotagera hu'naze. <sup>6</sup> Hagi pristi vahe'mo'za otigahazema hu'nea kankamunte otizageno, Livae naga'mo'zanena ana zanke hu'za kanti kaziga otine'za, Deviti'ma Ra Anumzamofo vagaore avesi zanku'ma agima ahentesga nehu'za, ahesnaze hu'noma tro'ma hunte'nea zavenaramina eri'neza oti'naze. Hagi kanti kaziga pristi naga'mo'za ufenerage'za mika Israeli vahe'mo'za oti'naze. <sup>7</sup> Hagi Ra Anumzamofo mono nomofo avugama me'nea mono kumamofo amu'noma'a, Ra Anumzamofo suzane huno Solomoni'a hunte ruotage hu'ne. Hagi e'i anante kre fananehu ofane, rimpia fru ofamofo afova'anena kresramna vu'ne. Na'ankure kresramna vu itama bronsire'ma tro'ma hu'nea itamo'a, osi hu'neankino tevefi kre fanane hu ofane, witi ofane afova'anena ana itarera avitegeno kregara osu'ne. <sup>8</sup> Hagi ana knafina Solomoni'ene maka Israeli vahetmimo'zane 7ni'a zagegnafi ne'zana kre'za nene'za musena hu'naze. Hagi ana knare'ma atruma hu'haza vahera, noti kaziga Lebo-Hamati kumateti agafa huteno vuno, sauti kaziga Isipi tinte'ma mani'zama vu'naza vahete uhanati'nea kazigati vahem'o'za eme atru hu'naze. <sup>9</sup> Hagi 8ti kna zupa emeritru hu'za mono hu'naze. Na'ankure kresramnana vu ita 7ni'a knafi Anumzamofontega erinte ruotge nehu'za, 7ni'a knafi ne'zana kre'za nene'za musena hu'naze. <sup>10</sup> Hagi seveni ikamofona 23knazupa, Solomoni'a ana maka vahetmina huzamanteg'eza kumazmirega muse nehu'za vu'za eza hu'naze. Na'ankure Ra Anumzamo'a, Devitine, Solomonine, Israeli vahe'ama knare'zama huzmante'nea zanku anara hu'naze.

<sup>11</sup> Hagi Solomoni'a Ra Anumzamofo ra mono None, agra'a nonena ki vagare'ne. Hagi anama hu'neana Solomoni'a mika zama Ra Anumzamofo Ra Mono none, agra'a nonema kigahuema huno antahintahima retro'ma hu'nea eri'zana, ana maka eri vagare'ne. <sup>12</sup> Ana hutegeno Ra Anumzamo'a Solomoninte kenagera efore huno amanage huno asmi'ne, Nagra nunamunka'a antahi'na ama nona nagri none nehu'na nagritegama kresramna vanaza none hu'na huhampripto. <sup>13</sup> Hagi Nagrama mona kahama erigi'na ko'ma azerige, kenutmi huntanenkeno maka trazantami neno eri hana huge, kri atresugen vahe'nima zamazeri haviza hanige'za, <sup>14</sup> Nagri vaheremu hu'noa vahe'mo'zama zamagu'a erinterami'za, nunamuma nehu'za, nagri navugosagu'ma nehake'za, kefo avu'ava'zama nehaza zama atresage'na, monafintira nunamu'zmia nentahi'na kumizmia atre'nezmanten, mopazmia eri knare hugahue. <sup>15</sup> Hagi menina ama mono nompima hanaza nunamunku navua nente'na nagesa antete'na manigahue. <sup>16</sup> Na'ankure menina ama mono nona Nagra huhampri'na erinte ruotge huankino, nagri nagimo ama mono nompina mevava huno nevanigeno, navumo'ene nagu'amo'enena mika kna ama anampi mevava hugahie. <sup>17</sup> Hagi kagra ko'ma negafa Deviti'ma hu'neaza hunkama Nagri navure'ma mani fatgo nehunka, maka zantmima huoma hu'nama kasamua zantmima nehunka, maka tra ke'niane, kasegeni'anema avariri fatgoma hananke'na, <sup>18</sup> negafa Devitima hvempama hu'na huhamprinte'na, kagri nagapintike kinia mani'neno Israeli

vahera kegavama hugahie hu'na hu'noa kante ante'na, kagri nagapintike maka knafina kinia azeri oti vava hugahue. <sup>19</sup> Hianagi kagrama rukrahe hunka kamefi hunenaminka, trake'ni'anane, kasegeni'anema ovaririnka, ru anumzantmimofo eri'za ome'nerinka, ana anumzantamima mono'ma huntesanana, <sup>20</sup> Nagrama tami'noa mopani'afintira tamazeri vatinetre'na, ama ra mono nomu Nagri nagi ahentesga hugahazema hu'nama erinte ruotage'ma hu'noa mono nona namefi humigahue. Ana hanugen mago avame'za meankna hu'enige'za maka kaziga ama mopafima mani'naza vahe'mo'za nege'za, ama ana mono nonkura kizazokago ke huntegahaze. <sup>21</sup> Hagi menina ama Mono nomo'a marerirfa konariri'ane no me'nege'za negazanagi, henkama havizama hanige'za karankama evanaza vahe'mo'za eme negesu'za, antri hu'za amanage hugahaze, nahigeno Ra Anumzamo'a ama mopane ama mono nonte'enena amazana hie hu'za hugahaze. <sup>22</sup> Anagema hanage'za mago'amoza amanage hugahaze, na'ankure zamagra Ra Anumzana zamafahe'i Anumzamo'ma Isipiti'ma zamavarenoma atiramino'ma e'nea Anumzana atre'za zamefi hunemi'za, havi anumzantmimofo eri'za omeneri'za, monora hunte'nazagu Ra Anumzmo'a knazana zaminu zamazeri havizana hu'ne huza hugahaze.

## 8

### *Solomoni'ma noma ki vagare'nea zamofo naneke*

<sup>1</sup> Hagi Solomoni'a mono none agra'a nonema ki'neana 20'a kafumofo agu'afi kivagare'ne. <sup>2</sup> Hiramu'ma ami'nea ranra kumatamina Solomoni'a eri so'e huno kiteno, anampi Israeli vahera zamavarentege'za mani'naze. <sup>3</sup> Hagi Solomoni'a Hamat-Zoba kumara ome ha huzmanteno eri'ne. <sup>4</sup> Hagi ka'ma kokampina, Tadmori kuma tro hunenteno, maka zantmima ante rankumatamina Hamati kaziga tro huntetere hu'ne. <sup>5</sup> Hagi anagamu kaziga Bet-Horoni kuma'ene, fenkma kaziga Bet-Horoni kumatremofo kuma kegina eri hanavetino tro nehuno, kumamofo kafaraminte'ma agu'atima erigino rentrokoma hu azotanena aenireti tro hu'ne. <sup>6</sup> Anazanke huno Ba'alati kumara kinenteno, maka fenoma ante kumatminki, karisiramine hosi agumpima vano hu vahetmima mani'naza kumataminena ki'ne. Hagi Solomoni'a maka'zama Jerusalemi kumapine, Lebanoni kumapine, ana maka agrama kegava hu'nea mopafima kigahuema huno antahintahima retro'ma hu'nea zana ana maka trohu vagare'ne. <sup>7</sup> Hagi Israeli vaherompge meg'i'va hetmima ha'ma nehu'za ozmahe'ma zamatre'naza vahera, Hiti vahe'ma, Amori vahe'ma, Perisi vahe'ma, Hivi vahe'ma Jebusi vahera, <sup>8</sup> Israeli vahe'mo'za zamahe vagaore'nazanki, mago'a zamatrage'za mani'naze. Hagi e'i ana vahera Solomoni'a kazokazo eri'za vahe retro hu zamantege'za, agri kazokazo vahe mani'za e'za ama knarrera ehanati'naze. <sup>9</sup> Hianagi Solomoni'a Israel vahera kazokazo eri'za vahere huno ozmvare'neanki, sondia vahetamine, sondia vahetema ugotama hanaza vahetamine, karisima erino vanohu vahetamine, hosi afu agumpima manino vanoma hu vahetami zamazeri oti'ne. <sup>10</sup> Hagi 250'a ugagota kva vahetami zamazeri otige'za, vahetamintera kegava hu'haze. <sup>11</sup> Hagi ana nehuno Solomoni'a Fero mofa'ma a'ma eri'nea ara, Deviti rankumapintira avreno menima kinte'nea nom'a'afi vu'ne. Na'ankure agra amanage hu'ne, Nagri a'mo'a Deviti nompina omanigosie. Na'ankure Ra Anumzamofo huhagerafi huvempage vogisima me'nea kuma'mo'a ruotge hu'ne. <sup>12</sup> Anage nehuno Solomoni'a, Ra Anumzamofo kresramna vu itama mono nomofo avuga'ama tro'ma hunte'nere kre fananehu ofa Ra

Anumzamofontega hu'ne. <sup>13</sup> Hagi Sabatima manigsa hu knare'ma ne-haza ofane, mago'mago ikamofo ese knare'ma musema nehaza ofane, zore bretima nenaza knare'ma nehaza ofane, kave'ma vasage knamofo musema hu knare'ma nehaza ofane, fugagi noma ki'zama mani'nezama Anumzamofoma antahimi knare'ma nehaza ofanena, Kresramanama vu kasegema Mosese kasegefima krente'nea kante amage anteno kresramna vu'ne. <sup>14</sup> Hagi nefo Deviti'ma hunte'nea eri'zamofo kasege'a amage anteno, Solomoni'a pristi vahetmina mago'mago eri'zama e'neri'za kankamunte refko hunezmanteno, Livae vahetmina mago'mago knare'ma zavenama nehe'za zagame'ma hu zante'ene, pristi vahetmina zamazama hu'zante refko hunezmanteno, kuma kafante'ma kegavama hu vahetmina refko huno mago'mago kafanteria zamantetere hu'ne. Na'ankure Ra Anumzamofo vahet Deviti'ma e'ina huo huno hunte'nere anara hu'ne. <sup>15</sup> Ana higeno pristi vahet'ene Livae vahet'mo'zanena Deviti'ma hu'nea kante ante'za, maka zana nehu'za fenozama nentaza nonena anahukna hu'za kegava hu'naze. <sup>16</sup> Solomoni'ma Ra Anumzamofo Mono Noma eri agafa huno ki'nereti vuno vagarete vigeno, maka eri'zama eri'nea eri'zamo'a vagare'ne. E'ina huno Ra Anumzamofo Mono Nona kivagare'ne. <sup>17</sup> Ana huteno Solomoni'a hagerinkena Idomu vahet mopafi, Ezion-Geberi kumate'ene, Eloti kumate-gane vu'ne. <sup>18</sup> Hagi Hiramu'a hagerimpima vanoma hu'ama antahi ani'ma hu'naza eri'za vahet'ane, Solomoni eri'za vahetaminena huzmanteg'e za agri venteramimpi vu'za Ofiri kumateti 17ni'a tani hu'nea goli omeri'za kini ne' Solomoninte e'naze.

## 9

### *Siba kumateti Kuini a'mo Solomoni eme ke'nea naneke*

<sup>1</sup> Hagi Siba kumateti kuini a'mo'ma Solomoni agi agenkemo'ma vuno'eno'ma hiankema nentahino'a, amuhoma hu'nea agenoka kea Solomonina eme antahigeno reheno kenaku Jerusalemi kumate e'ne. Hagi anama e'neana mnanentake zantamine tusi'a goliramine, zago'amo'a marerirfa haveramine, erino rama'a kemoli afutamimofo agumpi e'ne. Hagi Solomoninte'ma ana zantmima erino eteno'a ne-eno'a antahintahi afima me'nea nanekea maka Solomonina eme antahige'ne. <sup>2</sup> Hagi maka agenoka kema antahima ke'nea kem'o'a magore huno Solomonina amuhoa huonte'ne. <sup>3</sup> Hagi Siba kumate kuini a'mo'ma Solomoni knare antahintahi'ama negeno, kini vahet kuma'ma ki'nea zama negeno, <sup>4</sup> ne'zama nenea zama negeno, eri'za vahet'amine, kukanazminema negeno, kinimofo waini tima afinemiza eri'za vahet'amine kukanazminema negeno, mono nompima Ra Anumzamofontega marerino kresramna nevia zantaminema negemo'a, ra asimu nenteno kea osu'ne. <sup>5</sup> Ana nehuno ana kuini a'mo'a amanage huno kini nera asmi'ne, Keka'agu'ene, knare antahizanka'agu'ma nanekema hazage'nama kumanirega mani'nena antahi'noana tamage hu'naze. <sup>6</sup> Hianagi ana nanekema nentahi'na havige nehe'za hu'na nagesa antahi'noanagi, menina nagra navufinti eme koana tamage huno knare antahintahi kamo'a, kumanire'ma mani'enama antahi'noa kea agateretfa hu'nege'na nagra navufinti koe. <sup>7</sup> Hagi maka vahetkamo'za muse nehzageno, eri'za vahetka'aramimo'zama maka knama kavugama mani'nezama knare antahintahi zanka'ama nentahisnaza vahet'mo'za, tusi muse hugahaze. <sup>8</sup> Kagri'ma kavesineganteno Israeli vahet kinima kazeri oti'nea Ra Anumzana kagri Anumzamo'a, ra agi erisie. Na'ankure kagri Anumzamo'a, Israeli vahera ozmatretfa hugahue huno

avesi zmante'neankino, ozmatretfa hugahie. Kagra fatgo hunka keagazmia nentahinka, fatgo hunka keagazmia refko huzmantogu, kinizmi manio huno kazeri oti'ne.<sup>9</sup> Anage nehuno Seba kumate kuini a'mo'a Solomonima ami'neana, kna'amo'a 4'a tani agatere'nea goline, rama'a mnanentake zane, zago'amo'a mareri'nea mnanentake paurana, rama'a nemino, zago'amo marerirfa haveraminena ami'ne.<sup>10</sup> Hagi Hiramu eri'za vahetamine Solomoni eri'za vahetmimo'za Ofiri kumateti golima eri'zama e'nazana vahe'mo'za algamu zafane, zago'amo marerirfa haveramine eri'za e'naze.<sup>11</sup> Hagi kini ne' Solomoni'a algamu zafareti Ra Anumzamofo mono nonte'ene agra nonte'enena lata ahenenteno, ana zafaretike mago'a zavenaramina tro nehuno, hapue nehaza zavenaraminena tro hu'ne. Hagi e'inahu hentofa zana kora Juda vahe mopafina fore hige'za onke'nazaza eri fore hu'ne.<sup>12</sup> Hagi kini ne' Solomoni'a Seba kumati kuini a'mo'ma mago'a zanku avesigenoma antahigea zana, ana maka amigeno, agrama erino'ma e'nea fenona agatereno tusi feno eri'za vahe'ane kuma'arega ete vu'ne.

### *Solomoni'ma tusi fenoma ante'nea zamofo naneke*

<sup>13</sup> Hagi mago mago kafufima Solomonima golima eme amizageno eritrura huterema hu'neana, kna'amo'a 25tani hu'nea goli eri atru hutere hu'ne. <sup>14</sup> Hagi feno vahetegati'ma takisi zagoma eri'nea zagoa, anampina erinte'za ohampri'naze. Ana zanke hu'za Arebia kini vahe'mo'zane, Israeli mopafima kegava hu'naza gavana vahe'mo'zanena goline silvanena eri'za Solomonina eme ami'ne. <sup>15</sup> Hagi Solomoni'a ranra hankoa golireti 200'a tro hu'neankino, mago mago hankoma tro'ma hu'neana kna'amo'a, 7 kilo hu'nea golireti ruguta huno trohutere hu'ne. <sup>16</sup> Hagi anazanke huno goliretike neone hankoa 300'a hamanteti ruguta huno tro hu'neankino, mago'mago hankoma tro'ma hu'neana, kna'amo'a 3.5kilo naza hu'nea golireti tro hu'ne. Hagi ana hankoramima tro'ma huteno'a, kinimofo nompima Lebanoni afu'za zafe huno agi'a nehea nompi ante'ne. <sup>17</sup> Ana nehuno kini ne' Solomoni'a kini tra'a elefentimofo zaza aveteti avasesea hunteten, golinutike rekamreno eri anovazinte'ne. <sup>18</sup> Hagi kini tra'ma me'neregama marerinaku'ma agiama reno mareri lata, 6si'a tro hunenten, kini trate'ma mani'neno agiama antesgama hu trara golinutike tro hunte'ne. Hagi ana kini tra'mofo kantigama azama ante harage'ma hu'zana tro hunenten, ana tava'ontera tare laioni amema'a tro huno kantigma retrurente'ne. <sup>19</sup> Hagi kini tra'ma me'neregama marerinaku'ma agiama reno mareri lata 6si'ama tro'ma hunte'nerera, kantigama mago mago laioni tro huntetere higeno, ana makara 12fu'a laioni oti'naze. Hagi mago kinimo'e huno e'na hukna kini trara trora osu'neaza huno tro hunte'ne. <sup>20</sup> Hagi Solomoni'ma tima nenea kapuramina goliretike tro hu'ne. Hagi mago nomina kino Lebanoni afuza zafe huno'ma agiama antemi'nea nompima me'nea zuompo, keonke zantamina maka goliretike tro hu'ne. Hagi mago zana silvaretira trora osu'ne, na'ankure Solomoni knafina silvamofona ke amneza se'naze. <sup>21</sup> Na'ankure Solomoni venteramimpina Hiramu eri'za vahe'mo'za, Tasisi kumate vu'za 3'a kafuma evuterema nehige'za golima, silvama elefentimofo zaza ave'ma, monkitmima, ranra namaramine avre'za etere hu'naze. <sup>22</sup> Ana higeno Solomoni'a feno zampine knare antahintahi zampinena, maka ama mopafi kini vahetmina zamagatere'ne. <sup>23</sup> Hagi maka ama mopafi kini vahe'mo'za Solomoninte e'za Anumzamo'ma knare antahintahima ami'nea antahintahia eme antahi'naze. <sup>24</sup> Maka kafune kafunema Solomoni'ma aza vahe'mo'za musezama eriza e'nazana silvane,

goline kukenane, mnanentake zantamine, hosi afutamine, miulie nehaza donki afutaminena avre'ne'za eme ketere hu'naze. <sup>25</sup> Hagi Solomoni'a karisima renteno vanoma hu hosi afutamimofo nona 4tauseni'a kinteno, 12tauseni'a hosi afutamina ante'ne. Hagi ana hosiramima ante'neana zamagri kuma'ma tro'ma hunte'nea kumatmimpine Jerusalemima agrama nemania kumate'ene zamanteg'e za mani'naze. <sup>26</sup> Hagi Yufretisi tinteti agafa huteno vuno Filistia mopafi vuno, Isipi mopa atupare'ma manino uhanati'nea kini vahetmina Solomoni kegava huzmante'ne. <sup>27</sup> Hagi Solomoni'a rama'a silva eritru higeno, Jerusalemi kumapina havegna huno amne zankna nehigeno, rama'a sida zafa eritru higeno agupofima sikamo zafamo hageno amnezankna hiaza hu'ne. <sup>28</sup> Hagi Solomoni hosiramima mizama se'nazana, Isipiti'ene mago'a kumategati'ene mizase'naze.

### *Solomoni'ma fri'nea zamofo naneke*

<sup>29</sup> Hagi Solomoni'ma kinima mani'nea knafima mago'azama tro'ma hu'nea zamofo agenkea eseteti'ma agafa huno atumpare'ma vu'neana, kasnampa ne' Neteni agenkema krenentaza avontafepine, Silo kumateti kasnampa ne' Ahija agenkene, kasnampa ne' Ido'ma Nebati nemofo Jeroboamu avontafema krentenafi krente'naze. <sup>30</sup> Hagi Solomoni'a 40'a kafufi kinia Jerusalemia mani'neno, Israeli vahera kegava huzmante'ne. <sup>31</sup> Hagi anante Solomoni'a frige'za, nefä Deviti kumapi Jerusalemi asente'naze. Hagi anama hutazageno'a nemofo Rehoboamu agri nona erino kinia mani'ne.

## 10

### *Rehoboamu'ma kefo kinima mani'nea naneke*

<sup>1</sup> Hagi maka Israeli vahe'mo'za Rehoboamuna kini azeri oti'nageno kini mani'niegu Sekemu kumate omeri atru hu'nazarega, Rahoboamu'a anantega vu'ne. <sup>2</sup> Hagi Nebati nemofo Jeroboamu'ma Solomoninku koro freno Isipima umani'neregatira Rehoboamuma kinima azeri oti'za nehaza agenkema nentahino'a, Isipitira atreno ete e'ne. <sup>3</sup> Hagi vahe huzmanteg'e za Jeroboamuna ome avre'za azage'za, agrane Israeli vahe'mo'za Rehoboamunte ehanati'za amanage eme hu'naze, <sup>4</sup> korapara negafa'a karenamare zafama bulimakao anankempima nentazankna huno ra eri'za tamigeta tusi amuho huta eri'zana eri'none. E'ina hu'negu menina negafa'ma tami'nea kna eri'zana ontaminka, eri'zama erioza'ma hunka tami'nanketama erisuta kagri kagorga mani'neta eri'zanka'a erigantegahune. <sup>5</sup> Anage hazageno Rehoboamu'a amanage huno kenona hu'ne, vuta 3'a zagegna umaniteta ete echo, hige'za ana vahetmimo'za vu'za e'za hu'naze. <sup>6</sup> Ana'ma hazageno'a, Rehoboamu'a ko'ma nefä Solomoni'enema mani'nezama antahintahima ami'naza ranra vahetami zamantahigeno amanage hu'ne, na'anee hu'na ama vahetmina kenona huzmantegahufi antahintahia namiho? <sup>7</sup> Anage hige'za amanage hu'za asmi'naze, kagrama knare'zama hunezmantenkama, zamazeri muse hunka knare nanekema zamasamisanke'za, zamagra kagri eri'za vahe manivava hu'za vugahaze. <sup>8</sup> Hianagi Rehoboamu'a ranra vahetmimo'zama ami'naza antahintahia eri netreno, kasefa vahetmima agranema magoka nenama hu'naza vahe'ma agri eri'zama e'neriza vahetami zamantahigeno, <sup>9</sup> amanage hu'ne, negafa'ma karenamare zafama bulimakao anankempima nentazankna huno knanentake eri'zama tami'neana eri ozahuranto hu'zama ama vahe'mo'zama nantahige'nazana, na'anee hu'na kenona huzmantegahufi antahintahia namiho? <sup>10</sup> Hagi anante kasefa vahetmima agranema magokama nenama hu'naza

vahe'mo'za amanage hu'za asami'naze, negafa'ma knanentake eri'zama tami'nea eri'zana eri'o'za hunka osi'a eri'za tamio, hu'zama haza vahetamina, katre nazamo'a nenfa afafa agatere'ne hunka zamasamio. <sup>11</sup> Hagi nenfa'aamuho eri'za tami'neanki'na anante antegofetu hu'na mago'ene rama'a knaza tamigahue. Nenfa'a kanonu sefura tami'neanki'na, nagrama sefu'ma tami'nua zamo'a segintavemo tamampriankna hugahie hunka zamasamio. <sup>12</sup> Hagi ana'ma hutazageno'a kini ne'mo'a huno, 3'a knama umaniteta ehoma hu'nea knare Jeroboamu'ene maka vahe'mo'za kini ne'Rehoboamuntega ete e'naze. <sup>13</sup> Hagi kini ne'mo'a ranra vahetmimofo kea eri netreno, hanavegefinti kenona huzmante'ne. <sup>14</sup> Hagi kini ne'Rehoboamu'a ana kasefa vahetmima agri'enema magokama rama hu'naza vahetmimo'zama asamiza kante anteno amanage hu'ne, nenfa'a kna eri'za tami'ne. Hianagi nagra mago'ane ante agofetu hu'na eri'zana tamigahue. Nenfa'a sefu kanonteti tamaheno tamazeri fatgo hu'neanagi, nagrama tami'nua sefu'mo'a segintavemo tamampriankna hugahie. <sup>15</sup> E'inage nehuno vahetmimo'zama hazankea kini ne'mo'a ontahi'ne. Na'ankure Anumzamo'a Silo kumate kasnampa ne' Ahijama asamigeno, Nebati nemofo Jeroboamuma asami'nea kemo nena rgare'ne. <sup>16</sup> Hagi Israeli vahe'mo'za kazama kini ne'mo'ma kezmangi ontahige'za kini nera amanage hu'za kenona hunte'naze, Deviti nagapintira tagra mago'zana e'origahune! Jesi nagapintira tagra mago'zana e'origahune. E'ina hu'negu Deviti nagamota tamagra'a ome kegava hiho, nehu'za Israeli vahe'mo'za atre'za nozmirega vu'za e'za hu'naze. <sup>17</sup> Hianagi mago'a Israeli vahe'ma Juda rankumatamimpima mani'naza vahete, Rehoboamu'a kini mani'neno kegava huzmante'ne. <sup>18</sup> Hagi kini ne'Rehoboamu'a kazokzo eri'za vahete'ma kegava nehia ne'Hadoramuna eri'za vahe ome kegava huo huno huntogeno zamefi vu'ne. Hianagi Israeli vahe'mo'za havenknonu ahe frizagene fri'ne. Hagi anama hazageno'a kini ne'Rehoboamu'a ame huno karisi'afi takaureno freno Jerusalemi vu'ne. <sup>19</sup> E'ina hu'negu Israeli vahe'mo'za, Deviti nagamokizmi kvafina omani'za hara rezmanteme e'za ama knarera ehanati'naze.

## 11

### *Rehoboamu'ma Juda ranra kumatamimofo kegina eri hanaveti'neananeke*

<sup>1</sup> Hagi Rehoboamu'ma Jerusalemi kumate'ma ne-eno'a, Israeli vahe'ma ha'ma huzmanteno ana maka Israeli mopama erino kinima mani'nakura, ha'ma hu antahi'zama eri'naza vahera 180tauseni'a vahetami Juda nagapinte'ene Benzameni nagapintira ke hutru huno, Israeli vahera agrarega zamavarenteno kegava huzmantenaku hu'ne. <sup>2</sup> Hianagi Ra Anumzamo'a kasnampa ne'Semaiana anage huno asami'ne, <sup>3</sup> Kagra vunka, Juda kini ne' Solomoni nemofo Rehoboamune, maka Israeli vahetmima Judama nemaniza vahetamine, Benzameni naga'enena, <sup>4</sup> Ra Anumzamo'a amanage hie hunka ome zamasamio, tamagra marerita tamafuhe'zanena hara ome osugahazanki, makamota nontamirega vuta eta hiho. Na'ankure Nagra e'ina zana fore hugahie hu'na hu'noazamo fore nehie. Anage hige'za Ra Anumzamofonke antahi'za Jeroboamuna hara ome huonte atre'za vu'za e'za hu'naze.

<sup>5</sup> Hagi Rehoboamu'a Jerusalemi kumate mani'neno ha'ma hanigeno fraki rankumatamima Juda mopafi me'neana ete eri hanavetino kintetere hu'ne.

<sup>6</sup> Hagi ana rankumatamina Betlehemu kumaki, Etam kumaki, Tekoa kumaki, <sup>7</sup> Bet-zuri kumaki, Soko kumaki, Adulamu kumaki, <sup>8</sup> Gati kumaki,

Maresa kumaki, Zifi kumaki, <sup>9</sup> Adoraimi kumaki, Lakisi kumaki, Azeka kumaki, <sup>10</sup> Zora kumaki, Aijalonii kumaki Hebronii kuma'enene. Hagi ana mikia rankumatamina Judane, Benzameni mopafi me'ne. <sup>11</sup> Hagi han-kavenentake vihuma hunte kumatamimpina sondia vahete kva vahetami zamavarenenteno, ne'zane olivi masaventamine, waini tinena anampina ante'ne. <sup>12</sup> Hagi anzanzake huno ana ranra kumatamimpina hankoramime, karugru keveramine, refko huno antetere nehuno, ana kuma keginaramina eri hanavetino tro hu'ne. E'na huno Juda naga'ene Benzameni naga'enena kegava hu'ne.

<sup>13</sup> Hagi Israeli mopafima maka noti kazigama me'nea kumatamimpi nemani'za maka pristi vahe'mo'zane, Livae vahe'mo'za Rehoboamu kazigage ante'naze.

### *Jeroboamu'ma noti kaziga Israeli mopa kegava hu'nea naneke*

<sup>14</sup> Hagi Livae vahe'mo'zane kumazamine, sipisipi afu'ene bulimakao afu'enema kegavama nehaza kuma'enena atre'za, Juda kumate'ene Jerusalemi kumate e'naze. Na'ankure Jeroboamu'ene ne' mofavre'amoza Ra Anumzamofo pristi vahera omanigahaze hu'za huzmante'nazagu arara hu'naze. <sup>15</sup> Hagi agra'a pristi vahetami zamazeri otige'za mono'ma nehaza agona kumatamimpina meme afu'mofone bulimakao anentamofo amema'a tro hunte'nege'za monora hunte'naze. <sup>16</sup> Hagi maka Israeli vahe'mo'za naga nofipinti'ma Ra Anumzana Israeli vahe Anumzamofona hanaveti'za mono'ma huntenuku'ma nehaza vahe'mo'zane, pristi vahetamine Livae nagara zamavariri'za Ra Anumzana zamafahe'i Anumzante kresramna vunaku Jerusalemi vu'naze. <sup>17</sup> Hagi 3'a kafufina Juda vahe'ene umani'neza Solomoni nemofo Rehoboamuna aza hu'za Juda kumara eri hanaveti'naze. Na'ankure ana 3'a kafufina zamagra Deviti'ene, Solomonikema kinima manineke knare zanavu'zanava hu'na'a zanavu'zanava avariri'za, Rehoboamuna aza hu'naze.

### *Rehoboamu nagamofo naneke*

<sup>18</sup> Hagi Rehoboamu'a, Deviti nemofo Jerimoti mofa Mahalati ara eri'ne. Hagi Mahalati nerera agi'a Abihailikino agra Jesi nemofo Eliapu mofa mani'ne. <sup>19</sup> Hagi Mahalati'a Rehoboamunte mani'neno, Jesusima, Semariama Zahamuma huno kasezmante'ne. <sup>20</sup> Henka ara Jehoboamu'a Absalomu mofa Ma'aka ara eri'ne. Hagi Rehoboamuntet'i'ma Ma'akama kasezmante'nea mofavreramina Abijama, Ataima, Zizama, Selomitima huno kasezmante'ne. <sup>21</sup> Hagi Rehoboamu'a maka ane'aramimpinti'ene henka a'nema erinefintira zamagatereno Absalomu mofa Ma'akana rama'azampi avesinte'ne. Hagi ana maka 18ni'a ese a'negi henka a'nea 60'a zamante'ne. Hagi ana a'nemo'za ne' mofavreramina 28'a kasezmante'za 60'a mofane kasezmante'ne. <sup>22</sup> E'na hu'negu Rehoboamu'a Ma'aka nemofo Abija kva azeri otigeno, zamafuhe'ina kegava huzmante'ne. E'na hu'neno henka kini azeri otisigu anara hu'ne. <sup>23</sup> Rehoboamu'a knare antahintahi erino mago'a ne' mofavre naga'a eri'zana refko huno nezamino, mago'a ne'mofavre naga'a huzmantege'za Juda naga mopafine, Benzameni naga mopafi'ma me'nea ranra kumatamima eri hankavematia kumatamina kegava hutere hu'naze. Ana nehuno rama'a feno nezmino, rama'a a'ne hagezami'ne.

<sup>1</sup> Rehoboamu'ma kinima manino maka zama kegavama huno hanave kinima efore'ma nehige'za, agrane maka Israeli vahe'mo'za Ra Anumzamofo kasegea zamagena humiza ovariri'naze. <sup>2</sup> Hagi 5fu'a kafuma, Rehoboamu'ma kinima nemanigeno'a, Isipi kini ne' Sisaki'a eno Jerusalemi kumapi vahera hara eme huzmante'e. Na'ankure zamagra Ra Anumzamofona tamage hu'za ovariri'nazagu anara hu'ne. <sup>3</sup> Sisaki'a 1tausen 200'a karisiraminki, hosi agumpima mani'ne'za ha'ma hu vahetmina 60 tauseni'agi, Isipiti'ma, Libiati'ma, Sukimuti'ma Itiopiat'i'ma hu'za tusi vahekrerfa mopafima vanoma nehu'za ha'ma nehaza vahera hampriga osuga'a zamavareno e'ne. <sup>4</sup> Anama huteno Juda mopafi me'nea hankave rankumatamina zamaheno hanare vagareno eno Jerusalemi kumate ehanati'ne. <sup>5</sup> Hagi Sisaki'ma ha'ma eme huzmantea zanku hu'za Rehoboamu'ene ne'mofavre'amo'za koro hu'za Jerusalemi mani'nazageno, kasnampa ne' Semaia'a eno amanage hu'ne, Ra Anumzamo'a amanage hie, tamagra Nagrira tamefi hunamizagu, Nagranena namefi hunerami'na Sisaki azampi tamavrente'noe. <sup>6</sup> Anagema hige'za Israeli vahe'mokizmi kva vahe'mo'zane kini ne'mo'enena zamagu'a eri ante'nerami'za anage hu'naze, Ra Anumzamo'a fatgo avu'avaza huranteno amanahu zana hurante. <sup>7</sup> Hagi Ra Anumzamo'ma keama zamagu'ama anteramizageno'a, amanage huno Semaina asami'ne, Zamagu'a anteramizanki'na zamahe fanane osugosuanki, ame hu'na zamaguvazigahue. Narimpa ahe'na Sisakina huntenujeno Jerusalemi vahera hara huozmantegahie. <sup>8</sup> Hianagi Nagra zamatrenuge'za Sisaki kazokzo eri'za vahe mani'ne'za, Nagrama hunezmantoa navu'navamo knarera hu'nefi, ru kini vahe'mo'zama huzmante'naza zamavu'zmavamo knarera hugahifi, zamagra'a refko hu'za kegahaze. <sup>9</sup> E'nage higeno Isipi kini ne' Sisaki'a marerino Jerusalemi vahera hara eme huzmentario, Ra Anumzamofo feno nompinti'ene kini ne'mofo nompintira marerirfa fenozana maka eri hana huno vu'ne. Hagi Solomoni'ma golire hankoramima tro'ma hunte'neana, maka eri hana hu'za Isipi vu'naze. <sup>10</sup> Hagi Isipi vahe'mo'zama eri'za vu'naza hankoramintera, ete Rehoboamu'a bronsire hanko tro huno, kini ne'mofo kafante'ma kvama hu sondia kva vahetmina zami'ne. <sup>11</sup> Hagi inanknarero kini ne'mo'ma Ra Anumzamofo nontegama nevige'za, ana kva vahe'mo'za e'za eme kva hunte'za vute'za, ete atiramino'ma noma'aregama nevige'za ana hankoramina eri'za nompinka eme antetere hu'naze. <sup>12</sup> Na'ankure Rehoboamu'a agu'a anteramino mani'negu, Ra Anumzamo'a rimpama neheazana atreno maka zama'a eri havizana huvaga ore'ne. Ana'ma higeno'a Juda mopafina knare'za fore hu'ne.

<sup>13</sup> Hagi Rehoboamu'a Jerusalemi kumate kinia mani'me vuno hankave kini omese'ne. Hagi Rehoboamu'a 41'a kafu nehuno kinia mani'neankino, Ra Anumzamo'ma Israeli mopafima me'nea kumatamimpinti Jerusalemi kuma huhamprino nagima ahentesgama hanaze huno'ma hu'nea kumapina 17ni'a kafufi kinia mani'ne. Hagi Rehoboamu nerera agi'a Na'amokino Amoni kumateti a'mo kasente'ne. <sup>14</sup> Hianagi Rehoboamu'a kefo avu'ava hu'ne. Na'ankure agra Ra Anumzamofontera maka agu'aretira huno amagera onte'negu anara hu'ne. <sup>15</sup> Hagi Rehoboamu'ma hu'nea zantmimofo agenkea eseteti'ma agafa huno atumpare'ma uhanati'neana, kasnampa netremokizni Semaiane Idokizni znagenkema krente'nea avontafepi krente'naze. Hagi Rehoboamu'ene Jeroboamu'enena hara huvava huke vu'na'e. <sup>16</sup> Hagi Rehoboamu'a frige'za, Deviti rankumapi

Jerusalemi asentazageno, nemofo Abija agri nona erino kinia mani'ne.

## 13

### *Abija'ma nefä no erino Juda vahe kinima mani'nea zamofo naneke*

<sup>1</sup> Jeroboamu'ma 18ni'a kafuma Israeli vahe kinima nemanigeno'a, Abija'a Juda vahe kinia agafa huno mani'ne. <sup>2</sup> Hagi Abija'a 3'a kafu Jerusalemia kinia mani'ne. Nerera'a Gibea kumateti Urieli mofakino agi'a Mikiae'a. Hagi Jeroboamu'ene Abijakea ana knafina tusi ha' hu'na'e. <sup>3</sup> Hagi Abija'a 400 tauseni'a hankavenentake sondia vahe'aramina zamavareno Jeroboamuna hara hunte'naku vigeno, Jeroboamu'a 800 tauseni'a hankavenentake sondia vahe zamavareno Juda vhahera hara hu'zmantenaku e'ne. <sup>4</sup> Hagi Abija'a Efraemi agona kokampi Zemaraimi agonare oti'neno amanage huno kezanati'ne, Jeroboamugane, maka Israeli vahe'mota kama antahiho! <sup>5</sup> Ra Anumzana Israeli vahe Anumzamo'ma hanavenentake huvempage huno, Israeli vahe kini trara Devitine agripinti'ma fore hunante anante'ma hanaza vahe'mokizmi kini tra mevava hugahie huno'ma hu'neana ontahi'nazo? <sup>6</sup> Hianagi korapara Nebati nemofo Jeroboamu, Deviti eri'za nemo otino Deviti nemofo kva ne'a Solomonina hararente'nne. <sup>7</sup> Ana'ma nehige'za mago'a kumazafa vahe'mo'za Solomoni nemofo Rehoboamu'na hararente'naze. Hagi ana knafina Rehoboamu'a osi mofavre mani'neankino, ana kezmirera mago zana osu'ne. <sup>8</sup> Hagi kagri'ma ohampriiga'ha hanave sondia vaheka'a manizageno, havi anumzama golire bulimakao anentama Jeroboamu'ma tro hugami'nea anumzama ante'nana zanku nentahinka, Ra Anumzamo'ma Deviti naga'ma huvempa huno ami'nea kini tra eri atregahue hunka nehano? <sup>9</sup> Hagi kagra Aroni naga'ene, Livae nagapinti Ra Anumzamofo pristi vhahera zmahanatinka, ru mopafi vahe'mo'zama nehazaza hunka, kagra'a pristi vahetami zamazeri oti'nane. Hagi iza'oma mago agaho bulimakaogi, 7ni'a ve sipisipima avrenoma agra'ama azeri ruotge'ma hunaku'ma a'nea vhahera, zamavarenka havi anumzamofo pristi vahe zmantake'za manitere hu'naze. <sup>10</sup> Hianagi tagra, Ra Anumzana Anumzantimofona tamagena huomi'none. Aroni mofavremo'za pristi eri'zana erizageno, Livae naga'mo'za Ra Anumzamofo eri'zana zamaza hu'za e'nerize. <sup>11</sup> Hagi zamagra mika kna nanterane, kinaganena tare zupa Ra Anumzamofontega ofane mnanentake insensinena kre mna vunttere nehu'za, Anumzamofo avugama ante bretia goli itare nente'za, golire tro hunte'nea tavi azotare mika kinaga tavira rekru huntetere nehaze. Tagra Ra Anumzamofo amage anteta nevarurunketa, tamagra tamefi agrira humili'ne. <sup>12</sup> Hagi menina antahiho, Anumzamo'a tagri kaziga mani'neankino, pristi vahe'mo'za ha'ma huramante ufe renaku retro hu'za mani'ne. Israeli vahe'mota Ra Anumzana tamafahe'i Anumzamofona ha' reonthe. Na'ankure hara hu ageteoregahaze. <sup>13</sup> Hagi Jeroboamu'a sondia vahetmina huzmanteg'e'za zamefiti hara eme huzmante'naku kafona ome ante'naze. Hagi mago'a sondia vahe'mo'za Juda sondia vahe zamavuga manizage'za, mago'amo'za zamefi kafona eme ante'naze. <sup>14</sup> Hagi Juda vahe'mo'zama kazana ha' vahe'mo'za zamavugati'ene zamefikati'ene e'naze. Ana'ma hige'za Ra Anumzamofontega zamazama hanigura krafage hazageno, pristi vahe'mo'za ufere'naze. <sup>15</sup> Ana'ma hute'za Juda sondia vahe'mo'za ha'mahu kezati'naze. Hagi Juda vahe'mo'za hahu kezati'za krafagema nehazageno', Jeroboamune maka Israeli vhahera Anumzamo'a hara huzmanteno, Abijane Juda vahe zamavuga hara huzmagatere'ne.

**16** Ana'ma higeno'a, Israeli vahe'mo'za koro frazageno, Anumzamo'a Israeli vahera Juda vahe zamazampi zamavarente'nne. **17** Hagi Abija'ene Juda vahe'mo'za hanavenentake Israeli sondia vahera tusi vahekrerfa zamahe'nazankino, ana zupa 500 tauseni'a sondia vahe zamahe fri'naze. **18** E'ina hu'za Juda vahe'mo'za Israeli vahera hara huzmagatere'naze. Na'ankure Juda vahe'mo'za zamagra Ra Anumzana zamafahe'i Anumzante zamentintia hu'nazagu anara hu'naze. **19** Ana higeno Abija'ene sondia vahe'amo'za Jeroboamune sondia vahe'a zamahe'za zamarotgo hazage'za nefrage'za mago'a ranra kuma'zmia zamahe'za hanare'nne. E'i ana kumatmina, Beteli rankumaki, Jesana rankumaki, Efroni rankumaki, maka neone kumatmima ana rankumataminte'ma megagi'nea kumatmina zamahe'za hanare'naze. **20** Hagi Abija'ma hanaventino kinima mani'neno'ma kegava hu'nea knafina, Jeroboamu'a mago'enena hihamua erino kinia omanigeno, Ra Anumzamo'a henka ahe fri'ne. **21** Hianagi Abija'a tusiza huno hankaventake kini efore nehuno, 14ni'a a'ne anteneno, 22'a ne' mofavreraminki, 16ni'a mofanegi huno zamante'nne. **22** Hagi maka'zama Abijama hu'nea zamofo agenkea kasnampa ne' Ido avontafepi krente'naze.

## 14

### *Asa'ma Abija no erino Juda vahe kini mani'nea naneke*

**1** Hagi kini ne' Abija'ma frige'za Deviti rankumapi afahe'mokizmima asente'nafe Jerusalemi asente'naze. Hagi nemofo Asa, nefo nona erino kinia manigeno, ana knafina ha'zana omnegeno, 10ni'a kafufina fru hu'za mani'naze. **2** Hagi Asa'a fatgo avu'ava Ra Anumzana Anumzama'amofo avurera hu'ne. **3** Na'ankure Asa'a havi anumzama mono'ma hunentaza kre sramnavu itane, mono'ma hunentaza kuma'ma agonaregama me'neana taganavazitreno mono'ma hunentaza havene, havi anumza asera amema'ama antrent'e'nezama mono'ma hunentaza zafaraminena antagi atre'ne. **4** Ana nehuno Asa'a maka Juda vahera amanage huno zamasami'ne, Ra Anumzana tamafahe'i Anumzamofo monora hunenteta Agri kasegene, tra ke'ane amagera anteho huno hu'ne. **5** Hagi maka Juda rankumampintira agonaregama havi anumzante'ma mono'ma hunentaza kumatamine, mnanentake'zama kre mna nevaza itanena tagna vazinetreno, Juda vahera kegava huzmanteg'e za hara osu fru hu'za mani'naze. **6** Hagi ana knafina ha'zana omnegeno, Asa'a Juda mopafima me'nea ranra kumatamimofo kuma kegina eri hankavetino ki'ne. E'ina kafu'afina ha'ma hu'zana omnene. Na'ankure Anumzamo'a mani fru ami'negu anara hu'ne. **7** Hagi Asa'a amanage huno Juda vahe'mokizmia zamasami'ne, Ranra kumatmi kita vihurami tro huganegita, kvama hu'za mani'naza nontamine, kuma kafane hagente-sune. Na'ankure Ra Anumzana Anumzantimofo amage antonkeno, maka kaziga mopa tamigeta hara huta eri'none. Anage nehige'za ranra kumatmina negizageno maka zama hazazamo'a knareke'za hu'ne. **8** Hagi Asa sondia vahera Juda nagapina ranra hankoramne karugru keveraminema eri sondia vahetmina 300tauseni'a manizageno, Benzameni nagapina osi hankoramne atine kevene eri sondia vahetamina 280tauseni'a vahe mani'naze.

**9** Hagi Itiopia ne' Zera'a 1 milioni'a sondia vahe nezmavreno, 300'a karisine erino hara eme huzmant'e naku Juda mopafina, Maresa kumate ehanati'ne. **10** Anama higeno'a Asa'a ha'ome hunte'naku sondia vahe'ane vuno, Maresa kuma tava'onte Zefati agupofi ome avazuhumpi hu'za ot'i'naze. **11** Anama nehazageno'a Asa'a Ra Anumzana, agra'a Anumzamofontega anage huno

nunamuna hu'ne, Ra Anumzamoka, sondia vaheni'ane nagranena hankavetia omne vahe manunkeno, Zerana rama'a sondia vahetami mani'naze. Hianagi Kagra hankavezmima omne sondia vahe zamaza nehanke'za, hanave sondia vahera hara hu'za zamagateneraza Anumza mani'nane. Kogra kagire tamentinti hunankino, mago vahe'mo'e huno hara Ra Anumzamoka hu'kagateoregahie. <sup>12</sup> Anagema hutegen, Ra Anumzamo'a Asane Juda vahetmimofo zmavuga, Itiopia sondia vahera hara hu'za zamagaterege'za, Itiopia sondia vahem'o'za atre'za koro fre'naze. <sup>13</sup> Hagi Asa'ene sondia vahem'o'za zama-genere'za zamaheme vu'za Gerari kumate Itiopia vahera ome zamahage'za rama'a vahe fri'naze. Na'ankure Ra Anumzamofone sondia vahem'o'zo avuga panani hu'za fre'naze. Ana nehu'za Itiopia vahe keonke'zana tusi'a zantmi eri'za e'naze. <sup>14</sup> Hagi Gerari tva'onte'ma megagi'nea kumatmina ha' humzante'za kumazmia eri haviza hu'naze. Na'ankure tusi'za huno Ra Anumzamo'a zamazeri koro hu'ne. Ana nehu'za ana kumatmimpintira fenona eri'naze. Na'ankure ana kumatmimpina tusi'a feno me'nege'za anara hu'naze. <sup>15</sup> Hagi sipisipi afutamine meme afutaminte'ma kegavama nehaza vahetmimofo seli nona zamahe'za tagana nevazi'za sipisipi afutamine, meme afutamine, kemoli afutaminena zamavare'za Jerusalemi e'naze.

## 15

### *Asa'ma mono'ma hu avu'avaza eri kasefa hu'nea naneke*

<sup>1</sup> Anumzamofo Avamumo'a Obeti nemofo Azariante emanigeno, <sup>2</sup> Asante vuno amanage huno ome asmi'nne, Asagane maka Judane Benzameni nagamotanena antahiho, Ra Anumzamo'a, Agri'enema mani'nazageno'a tamagrene mani'nne. Tamagramma Agriku'ma hakenutma Agrira haketa eri fore hugahaze. Hianagi tamagramma tamagenama humisageno'a, Agrarena ana zanke huno amagena huramigahie. <sup>3</sup> Hagi za'za kna Israeli vahem'o'za tamage Anumzanena omanizageno, pristi vahe'mo'za zamagri'enena manine'za rempia huozmizageno, kasegemo'a zamagri'enena omne'nne. <sup>4</sup> Hianagi knazampima unefre'za Ra Anumzana Israeli vahe Anumzamofonku rukrahe hu'za eme nehake'za, Agrira ke'za eri fore hu'naze. <sup>5</sup> Hagi ana knafina Israeli mopamofo agu'afina hazenke zamo'a avitegeno, kama vanoma hu'zamo'a amuho hige'za kana vanoa osu'naze. <sup>6</sup> Hagi mago kumamo'a otino mago kumara ha'rentegeno, ranra kumpapi vahem'o'za ha orente arente hu'za umani emani hu'naze. Na'ankure tusi hazenke maka kaziga Anumzamo'a taregono hazenkemo kagi'ne. <sup>7</sup> Hianagi tamagra korora osuta hankavetitma eri'zana eriho. Na'ankure eri'zama erinesaza kante mizana erigahaze. <sup>8</sup> Hagi kasnampa ne' Odeti nemofo Azaria'ma hiankema Asa'ma nentahino'a, hankave e'nerino Judama, Benzamenima, Efraemi agona kokampima me'nea rankumapima ante'naza kaza osu havi anumzatmina maka eri netreno, Ra Anumzamofo kresramna vu ita Ra Anumzamofo mono nomofo avugama me'neana, eri so'e hu'ne. <sup>9</sup> Asa'a mika Juda vahe'ene Benzameni naga'enena zamavare atru nehuno, Efraemi naga'ma Manase naga'ma Simeoni naga'ma Juda mopafi nemaniza vahem'enena kehu atru hu'ne. Na'ankure Ra Anumzana Asa Anumzamo'a agri'ene mani'nege'za kazana hige'za, rama'a Israeli vahe'mo'za Asa'ene emani'naze. <sup>10</sup> Asa'ma kinima manino egeno 15nima hia kafumofo 3 ikanteria, ana vahe'mo'za Jerusalemi kumate emeri atru hu'naze. <sup>11</sup> Hagi ha'ma hazafinti'ma zamavare'zama e'naza afutmimpintira 700'a bulimakao

afutamine, 7tauseni'a sipisipi afutamine ahe'za Ra Anumzamofontega Kresramana vu'naze. <sup>12</sup> Ana nehu'za Ra Anumzana zamafahe'i Anumzamofona zamagu'zmenteti amage antegahune hu'za huhagerafi huvempagea hu'naze. <sup>13</sup> Hagi mago mofavrem'o, ra vahe'mo'o, vemo'o, a'mo'ma Ra Anumzamofoma ovararisiana ahe frigahune hu'za kea anaki'naze. <sup>14</sup> Ana maka vahe'mo'za ranke hu'za kezaneti'za, ufena nere'za Ra Anumzamofona avaririgahune hu'za huvempa kea hu'za eri hankaveti'naze. <sup>15</sup> Hagi Juda vahe'mo'za tusi muse hu'naze. Na'ankure zamagra hu'za tagu'aretira huta amage antegahune hu'za huvempa nehu'za Anumzamofona antahigazageno, Ra Anumzamo'a kezmia antahi'nne. E'ina hazageno Ra Anumzamo'a mika kaziga ha'zana eri atrege'za, fru hu'za mani'naze. <sup>16</sup> Ma'aka'ma kuinima mani'neana kuini tra'aretira negeho Asa'a azeri netreno, havi anumza Asera amema'ama antreno tro'ma hunte'nea zafaramina antagino kitaginkotago huno Kidroni agupofi teve hanavazino kre fanane hu'ne. Na'ankure Ma'aka'a kasrino hi'mnage avu'ava huno, zafa antreno Asera havi anumzamofo amema' tro hunte'negu anara hu'ne. <sup>17</sup> Hagi Asa'a maka havi anumzama mono'ma hunentaza kumatmina Israeli mopafintira eri havizana osune. Hianagi Asa'ma kinima mani'nea knafina tamage huno maka agu'areti huno Ra Anumzamofona amagera nenteno mago havizana osu'ne. <sup>18</sup> Hagi nef'aene agranema Anumzamofo suzanema huke eri atru hu'na'a silvane goline mago'a zantaminena, erino Anumzamofo mono nompi ome ante'ne. <sup>19</sup> Hagi Asa'ma 35'a kafufima kinima mani'neno'ma kvama hu'nea knafina, ha'zana omane'ne.

## 16

### *Asa'ma Israeli kini ne' Basama ha'ma hunte'nea naneke*

<sup>1</sup> Asa'ma 36si'a kafuma Juda vahe kinima nemanigeno'a, Israeli vahe kini ne' Basa'a Juda vahera hara eme huzmanteno, Rama kumate sondia vahe'amofo kumara eme kintege'za sondia vahe'mo'za mani'ne'za kegava hazageno, Juda kini ne' Asa mopafina mago vahe'mo'e huno ufrege, atiramigera osu'ne. <sup>2</sup> Ana'ma higeno'a Asa'a Ra Anumzamofo nompinti'ene agra nompintira goline mago'a silvanena erino Siria kini ne' Ben-Hadati'ma Damaskasima nemanirega atregeno nevigeno, amanage huno hu'ne. <sup>3</sup> Amanahu nagesa nentahue, ko'ma nerfakema hu'na'aza huta mago trimpia huta maninu'ke he huvempa huta huhagerafinu'egu silvane golinena kagritega atregantogeno vie. Hagi vunka Israeli kini ne' Basa'enema huhagerafina'a nanekea ome vakonetregeno natreno vino. <sup>4</sup> Hagi Ben-Hadati'a Asa'ma hiankea nentahino, sondia vahe kva vahetami huzmantegi'za Israeli rankumatmimpi vahetmina hara huzmante'za Ijoni rankuma'ma, Dani rankuma'ma, Abel-Maimi rankuma'enena e'nerino, ne'zama eritruma nehaza rankumatmima Naftali mopafima me'neana maka zamahe'za hanare'naze. <sup>5</sup> Hagi ana nanekema Ba'asa'ma nentahino'a, Rama kuma'ma negia eri'zana atregeno anante me'ne. <sup>6</sup> Ana higeno kini ne' Asa'a maka Juda vahetaminku ke hige'za, Rama kuma'ma eri hanavetino kinaku'ma haveramine zafaraminema eri atruma hu'nea zantamina, eri'za vazageno ana havereti'ene zafareti Geba kuma'ene Mizpa kuma'enena eri hanavetino ki'ne.

<sup>7</sup> Hagi ana kna zupa kasnampa ne' Hanani'a Juda kini ne' Asante eno amanage huno eme asmi'ne, Ra Anumzana kagri Anumzamofontera

kamentintia osananki, atrenka Siria kini ne'mofonte kamentintia han-keno, Siria kini ne'mofo sondia vahe'mo'za katre'za fraze. <sup>8</sup> Hagi Itiopia vahe'ene Libia vhemo'zanena rama'a sondia vahe nezmantra'za rama'a karisine hosifima mani'ne'zama ha'ma hu vhadera rama'a zamante'naze. Hianagi kagra Ra Anumzamofonte kamentinti hu'nanku, Ra Anumzamo zamavare kazampina zamante'genka hara huzmagatere'nane. <sup>9</sup> Na'ankure Ra Anumzamo'a ama mopafina maka kaziga avua anteno omege emege ne-huno, i'zano agu'amo'a knare huno Agrite'ma rutragote'nesia vahe zamaza nehuno zamazeri hanavetinaku tro huno mani'ne. Hagi kagra neginagi'za hananki'za, ha' vahe'mo'za hara eme huramante vava hu'za vugahaze. <sup>10</sup> Anage higeno Asa'a ana kasnampa nekura tusi rimpaa henenenteno, azerino kina nompi ante'ne. Na'ankure ana ke'arerar tusi arimpa ahente'ne. Ana nehuno tusiza huno mago'a Juda vahetmina Asa'a zamazeri haviza hu'ne.

<sup>11</sup> Hagi Asa'ma kinima mani'neno'ma hu'nea zantmimofo agenkea, agafama hu'nereti'ma vuno atumpare'ma uhanati'neana maka Juda kini vahe'ene Israeli kini vahetmimofo zamagenkema krenentaza avontafeipi krente'naze. <sup>12</sup> Hagi Asa'ma 39ni'a kafuma kinima nemanino'a, agafi kria efore higeno ana kri'amo'a ome ra hu'ne. Hagi ana krimo'ma ome rama nehigeno'a, Ra Anumzamofona antahigeno azahu zana e'orineanki, dota vahetegatike zmantahigeno azamu hu zana eri'ne. <sup>13</sup> Ana nehuno Asa'a 41ni'a kafu kinia maniteno frige'za afahe'ima asezmante'nazafi asente'naze. <sup>14</sup> Hagi anama asemante'nazana agra'a hanagatinte'nea havegampi Deviti rankumapi Jerusalemi asente'naze. Hagi havegampina mnanentake'za atre'za eri mana nevu'za megi'a tusi teve hugre'za mani'neza zamasunkura hu'naze.

## 17

### *Jehosafati'ma Asa no erino Juda kini mani'nea naneke*

<sup>1</sup> Hagi Asa nona nemofo Jehosafati erino Juda vahe kinia mani'neno, Israeli vahe'mo'za ha'ma eme huzmantte zankura kuma'a eri hankaveti'ne. <sup>2</sup> Hagi sondia vahe'aramina huzmantge'za Juda mopafima me'nea ranra kumatmina ome kva hu'za neman'izageno, mago'a sondia vhadera huzmantte'za ko'ma nefu Asa'ma Efraemu mopafi me'nea kumatmima ha'ma huno hanare'nea kumatamina ome kegava hu'naze. <sup>3</sup> Hagi Ra Anumzamo'a Jehosafeti'ene mani'ne. Na'ankure agra kinima nemanino'a, negeho Deviti'ma agafa huno kinima nemanino knare avu'ava'ma hu'neaza huno, Bali havi anumzantera monora huonte'ne. <sup>4</sup> Hianagi Jehosafati'a Israeli vahe avu'avara amagera onteno, negeho Anumzamofa amage'nenteno kasege'a kegava huno amage'ante'ne. <sup>5</sup> E'ina hu'negu Ra Anumzamo'a kinima mani'zana agri azampi anteno azeri hankavetigeno, mika Juda vahe'mo'za musezana eri'za eme ami'naze. Ana'ma hazageno'a Jehosafati'a tusi feno antegeno, agimo'a mareri'ne. <sup>6</sup> Hagi agra hankvetino Ra Anumzamofona amage'nenteno mika Juda mopafintira havi anumzamofonte mono'ma hunentaza agona kumatmina erihaviza nehuno, Asera havi anumzamofa amema'ama antre'za tro huntene'zama mono'ma ne-haza zafaramina antagi atre'ne. <sup>7</sup> Hagi Jehosafati'ma 3'a kafuma kinima nemanino'a, eri'za vahe'aramina Ben-hailimima, Obadiama, Zekaraiama, Netanelima, Makaiama huno huzmantge'za, Juda rankumatamimpi Ra Anumzamofa kasege ome rempi huzami'za vano hu'naze. <sup>8</sup> Hagi ana kva vahetamima zmazamahu Livae vahetmina, Semaia'ma, Netanaia'ma,

Zebadaia'ma, Asaheli'ma, Semiramoti'ma Jehonatani'ma, Adonija'ma, Tobia'ma, Tob-Adonija'e. Hagi pristi netre'na Elisa'ene Jehoramuke anampina vu'na'e.<sup>9</sup> Hagi ana vahetmimo'za Ra Anumzamofo kasege avontafe eri'neza maka Juda mopafima me'nea ranra kumatamimpi vano nehu'za, vahera rempi huzmi'naze.<sup>10</sup> Hagi Juda mopamofo tavaonte'ma manigagi'naza vahetmimo'za Ra Anumzamofonkura tusi koro nehu'za, Jehosafatina hara eme huonte'naze.<sup>11</sup> Hagi mago'a Filistia vahe'mo'za musezana silva zagonena takisi eri'za eme nemizageno, Arabia vahe'mo'zanena 7tausen 700'a ve sipisipi afutminki, 7tausen 700'a ve meme afutminki hu'za avre'za eme ami'naze.<sup>12</sup> Hagi Jehosafati'a hankavenentake kini fore nehuno, maka Juda mopafima me'nea ranra kumatamimpina vihu kegina nehuno, kave'ma ante kumataminena kinenteno,<sup>13</sup> nezantmina ana kumatmimpina ante avitente'ne. Hagi koro osu'za hankavematiza ha'ma nehaza sondia vahetmina, Jerusalemi kumapi zamavare atru hige'za mani'naze.<sup>14</sup> Hagi ana sondia vahetmima nagate nofite'ma hu'zama zamagima kre'za eri fatgoma hu'nazana vahete kva vahe'mo'za 1tauseni'a sondia vahe kegava hazageno, Juda nagapima 300 tauseni'a sondia vahe'ma kegavama hu'naza sondia kva vahete, Adna'a kva higeno,<sup>15</sup> ananteria Jehohanani'a 280 tauseni'a sondia vahete kva higeno,<sup>16</sup> ananteria Zikri nemofo Amasia'a agra'a avesite Ra Anumzamofo eri'za erinakure huno 200 tauseni'a hanavenentake sondia vahete kva hu'ne.<sup>17</sup> Hagi Benzameni nagapintira, Eliada'a atine kevene hankonema erino ha'ma hu sondia vahetmina 200 tauseni'a vahete kva higeno,<sup>18</sup> ananteria Jehosabeti'a 180 tauseni'a sondia vahetmima hate'ma vunaku'ma tro'ma hu'naza vahetami kva hu'ne.<sup>19</sup> Hagi ama ana maka vahera kini ne'mofa eri'za vahetamine. Hagi mago'a vahetmina maka Juda mopafima me'nea ranra vihu kumatmimpina manitere hu'naze.

## 18

### *Jehosafati'a Ahapu'ma azama huno ha'ma hania zamofo naneke*

<sup>1</sup> Hagi Jehosafati'a tusi feno ne' nemanige'za ra agi nemizageno, agra Ahapu mofa nemofonte ara erinemino, Ahapu'enema tragoteno mani'nia kea huhagerafi'ne. <sup>2</sup> Hagi mago'a kafu evutegeno, Jehosafati'a Ahapu ome kenaku Sameria kumate vigeno Ahapu'a rama'a sipisipi afutamine bulimakao afutamine aheno Jehosafatine, agri'enema vaza vahetmina ne'zana krezamente'ne. Ana nehuno Ahapu'a Ramot-Gileati vahe'ma agranema eme tragomate'nageno ha' ome huzmantesigu Jehosafetina masavenke asami'ne. <sup>3</sup> Israeli kini ne' Ahapu'a Juda kini ne' Jehosafatina antahigeno, Nagri'enema vananketa Ramot-Gileati kumate vahera hara ome huzmantegahu'o? higeno kenona huno, Nagrane sondia vahe'nimozanena kagri vahe mani'nonankita, tagra amne kagrirra ome kaza huta hara hugahune hu'ne. <sup>4</sup> Hianagi Jehosafeti'a huno, Kotazana amama ha'ma hunaku'ma nehu'azana Ra Anumzamo'a na'anee hugahifi antahigeta keteta'e huno Israeli vahe kini ne' Ahapuna asami'ne. <sup>5</sup> Anage higeno Israeli vahe kini ne' Ahapu'a 400'a kasnampa vahetami zamavare atru huteno amanage huno zamasami'ne, Ramot-Gileati vahera hara ome huzmantenumpi, ome huozmante'hune? Anage'ma hige'za zamagra hu'za, Anumzamo'a kini ne'moka kazampi zmavrentegahianki, marerinka ome hara huzmanto hu'za hu'naze. <sup>6</sup> Hianagi Jehosafati'a mago'ene huno, Ra Anumzamofo kasnampa vahera ama'age mani'nazafi, mago'a mani'nazagu zmantahigegahune huno hu'ne. <sup>7</sup> Anage higeno'a, Israeli vahe kini ne' Ahapu'a

huno, Mago kasnampa nera Imla nemofo Mikaiia mani'neankita antahigenunkano, Anumzamofo avesira antahigeno kegahie. Hianagi Imala nemofo Mikaiiana tusi navaresra hunentoa kasnampa ne' mani'ne. Na'ankure agra kasnampa kema hiana, nagri'ma nazeri havizahu kege nehie. Higeno Jehosafeti'a huno, Kini ne'moka, e'inahu kea osunka atregeno agra na'anehugahifi antahimneno. <sup>8</sup> Anage higeno Israeli vahe kini ne' Ahapu'a eri'za vahe'a huntenu, Ame hunka Imla ne'mofa Mikaiiana ome avrenka eno. <sup>9</sup> Hanki Israeli kini ne' Ahapu'ene Juda kini ne' Jehosafatikea kini vahe zaza kukena huke tra'znire Sameria kuma kafante witi akru neharazare mani'nake'za, zamavuga ana kasnampa vahetmimo'za kasnampa kea hu'naze. <sup>10</sup> Hagi Kenana nemofo Zedekai'a ainireti pazivetamina tro huteno amanage hu'ne, Ra Anumzamo'a amanage hie, Siria vhahera ama'na pazivetaminteti zamahenka zamaretufenka nevunka, ome zamahe fri vagaregahane hie. <sup>11</sup> Anage hige'za mika kasnampa vahe'mo'za magozahu kasnampa kege nehu'za amanage hu'naze, marerinka Ramot-Giliati vhahera hara ome huzmagatero. Na'ankure Ra Anumzamo'a kini ne'moka kazampi zamavarentegahie. <sup>12</sup> Hagi Mikaiama asminaku'ma via eri'za ne'mo'a, Mikaiiana asmino, ko, mika kasnampa vahe'mo'za Ahapuna knare kasnampa kegege'za eme asmi'naze. Hanki menina antahio, mago'a kasnampa vahe'mo'zama hu'nazankna hunka kini ne'moka hara agateregahane hunka ome asmio. <sup>13</sup> Hianagi Mikai'a amanage hu'ne, Nagra kasefa huno mani'nea Ra Anumzamo'ma nasami'nea kege'za hugahue. <sup>14</sup> Hagi Mikai'a ma kini ne' Ahapunte'ma ehanatigeno'a Ahapu'a antahigeno, Mikaiaga Ramot-Gileati kumate vhahera hara ome huzmantegahufi hara ome huozmantegahue huno Ahapu'a antahigegeno, Mikai'a huno, Vunka hara ome huzmanto. Na'ankure Ra Anumzamo'a ana maka vhahera kazampi zamavarentegahie. <sup>15</sup> Hianagi kini ne' Ahapu'a Mikaiiana asmino, Nama'a zupa Ra Anumzamofo agifina tamage hunka hvempa hunka nasamio nehugenka, kagra havige kasnampa kea nehane? <sup>16</sup> Huno higeno Mikai'a a anage hu'ne, Israeli vahe'mo'za kvazmimo omani sipisipimozaa nehaza hu'za agonaramimpina panini hu'za vu'za eza nehazage'na ke'noe. Ana nehazageno Ra Anumzamo'a huno, Kvazmia omani'neanki, zamatrege'za nozmirega zamarimpa frune vu'za e'za hiho hu'ne. <sup>17</sup> Anagema higeno'a Israeli kini ne'mo'a, Jehosafatina asmino, ko'ma kasmi'na ama ne'mo'a knare kasanampa kea osugahianki, nagri'ma nazeri havizahu kasnampa kege hugahie hu'na kasami'noe. <sup>18</sup> Hagi anagema nehakeno'a Mikai'a huno, Ra Anumzamofonkea antahio, Ra Anumzamo'a kini tra'are monafina mani'negeno, maka monafinka ankero vahe'mo'za Anumzamofona tamaga kazigane, hoga kaziganena mani'nazage'na ke'noe. <sup>19</sup> Ra Anumzamo'a amanage hu'ne, Iza Israeli kini ne' Ahapuna ome revatga hanigeno Ramot-Gileatia marerinige'za ahegahaze? Anage higeno magoke magokemo'a agra'a antahintahi'a huama hutere hu'ne. <sup>20</sup> Anage hazageno, mago avamu'mo'a Ra Anumzamofo avuga eotino amanage hu'ne, Nagra ome revatga hugahue higeno, Ra Anumzamo'a huno inankna hunka ome revatga hugahane? huno antahigegeno, <sup>21</sup> agra amanage hu'ne, nagra vu'na maka kasnampa vahetmimofo zamagipina havige naneke ome antegahue. Anagema higeno'a Ra Anumzamo'a huno, revatgama hanana kegura tamage hane huno hugahianki, vunka kema hanazana ome huo huno hunte'ne. <sup>22</sup> E'ina hu'negu menina antahio, Ra Anumzamo'a havigema hu vahe'ma revatga hu avamu maka kasnampa vaheka'aramimofo zamagipina ante'ne. Na'ankure Ra Anumzamo'a kagrikura hazenke erigahane

huno hunte'ne. <sup>23</sup> Anage'ma higeno'a, Kenana ne'mofo Zedekaia'a eno Mikaina ameragente eme rupro hunemino amanage hu'ne, Inankna huno Ra Anumzamofo Avamu'mo'a nagrira natreno kagritega vuno nanekea ome kasami'ne? <sup>24</sup> Higeno Mikai'a kenona huno, Antahio, henkama ha' vahe'mo'zama ha'ma eme hurante'nagenka nomofo agu'afi hunarag-intepinka ome frakinka umani'enka, tamage hu'ne hunka antahigahane. <sup>25</sup> Anagema higeno'a, Israeli vahe kini ne' Ahapu'a huno, Mikaina avreta rankumama kegavama hu'nea gavana ne' Amoninte'ene nenamofo Joa-sainte vuta, <sup>26</sup> kini ne'mo'a amanage hie huta ome hiho, Ama nera kinafi avrenteneta mago zana omitta bretine tinke'za aminkeno neneno mani'nena, hara ome hute'na ete a'neno huno hie huta ome asamihio. <sup>27</sup> Anante Mikai'a amanage hu'ne, Hapinti'ma onkahesagenkama kagrama knare hunka esanke'na Ra Anumzamo'a nagripina huvazino kasnampa kea osu'ne hu'na hugahue. Hagi ama nanekea maka vahe'mota antahio!

<sup>28</sup> Higeno Israeli vahe kini ne' Ahapu'ene Juda vahe kini ne' Jehosafatikea sondia vahe'zania zamavareke Ramot-Gileati mareri'na'e. <sup>29</sup> Hagi Israeli vahe kini ne' Ahapu'a amanage huno Jehosafatinkura hu'ne, Nagra amne vahe kna hu'na ha' kukena hu'na hapi ufreregahue. Hanki kagra kini vahe kukena hunka vuvo, huno nesmino agra amne kukena huno hapina ufre'ne. <sup>30</sup> Hagi Siria vahe kini ne'mo'a, karisifi maniza ha'ma nehaza sondia vahete kva vahetminkura huno, Ruga'a vahe'enena hara osuta, Israeli kini ne'ke'za hara hunteho. <sup>31</sup> Anage'ma hige'za nevu'za Jehosafatima ome nege'za Israeli vahe kini nere hu'za nehu'za rukrahe hu'za avariri'naze. Hianagi Jehosafati'a kezatino, Ra Anumzamoka naza huo higeno, Anumzamo'a aza huno zamazeri rukrahe hige'za atre'za rurega vu'naze. <sup>32</sup> Hagi karisifima mani'za e'naza sondia vahe'mo'zama kazama Israeli kini nerompage ru ne'ma nege'za, avarari'zama nevazaretira ome atre'za rukrahe hu'za e'naze. <sup>33</sup> Hianagi mago sondia ne'mo'a fatufatu huno kevea ahetreno nevuno, mago kevema ahetreana nozame ahehe kna ha kukenamofo kankmumpinti aheraponeno Israeli vahe kini nera amimizafi ahe'ne. Ana higeno kini ne'mo'a karisima erino'ma nevia nekura huno, hago ra hazenke eruanki hapintira ete rukrahe hunka navrenka vuvo. <sup>34</sup> Ana knazupa hara hu'za nevazageno, Israeli kini nera karisifi amagena rentinti huntazageno Siria vahe'ma mani'nazarega avugosa hunte'neno mani'negeno vuno kinaga omesegeno fri'ne.

## 19

### *Kasnampa ne' Jehuma Jehosafati azeri fatgo hu'nea naneke*

<sup>1</sup> Hagi ana'ma higeno Juda kini ne' Jehosafati'a, hazenkea e'ori knare huno ete noma'arega Jerusalemia e'ne. <sup>2</sup> Hianagi kasnampa ne' Hanani nemofo Jehu'a, anante ome keno kini ne' Jehosafatina amanage huno asmi'ne, Kagra kefo avu'ava'ma nehuno, Ra Anumzamofoma avresrama hunentaza kefo vahe zamaza nehunka kavesizmant'e nane. Ana hanku Ra Anumzamo'a tusi rimpa ahegante'ne. <sup>3</sup> Hianagi kagripina mago'a knare zana me'ne. Na'ankure kagra mika Asera havi anumzamofo amema'ama antre'za tro'ma hunte'nazana antagitrena mika kagu'areti hunka Anumzamofona amage ante'nane.

<sup>4</sup> Hagi Jehosafati'a Jerusalemi kumate mani'neno, Beseba kumateti agafa huteno vuno Efraemi agona moparegama uhanati'nea kumatmimpina vano nehuno, Ra Anumzana zamafahe'i Anumzamofoma avararihogura

veamokizmia zamazeri hankavetino vano hu'ne. <sup>5</sup> Hagi maka Juda mopafima hanave vihuma hugagiterema hazageno me'nea ranra kumapina, nanekema refkoma hu kva vahetmina zamazeri otitere nehuno, <sup>6</sup> amanage huno zamasmitere hu'ne, Kva hu'neta vahetmimofo keaga refko hoho. Na'ankure tamagra vahe'mofo eri'zana e'norizanki, Ra Anumzamofo eri'za e'nerizankino, Agra tamagrane mani'nena keaga refko huta vahera zamaza hugahaze. <sup>7</sup> Hagi menina atrenkeno Ra Anumzamofo foma koroma hunenteno fatgo huno'ma refkoma hu avu'avamo tamagranena meno. Na'ankure Ra Anumzana tagri Anumzamo'a magomofontega anteno, magomofo azeri havizahu Anumza nera omani'ne. Hagi Agra vahe'mo'zama zamaza hinogu'ma masavema hu'za amisaza zana e'ori Anumza mani'ne. <sup>8</sup> Ana nehuno Jerusalemia Jehosafati'a mago'a Livae vahe'ene, pristi vahetamine, Israeli vahepima mago mago nagate'ma ugotama hu'ne'za keagama refkoma hanaza kva vahemazazeri otige'za, ranra keagama Jerusalemi kumapima fore'ma hige'za keaga refko nehu'za, Ra Anumzamofo eri'zana eri'naze. <sup>9</sup> Hagi agra amanage huno kea zamasmi'ne, Ra Anumzamofonku koro hunteta agorga'a mani'neta, tamagu'areti huta eri'zana eriho. <sup>10</sup> Hagi tamagri vahe'ma rankumapima nemaniza naga'mo'zama, vahe ahefri ke'ma eri'za ege, mago'a kasegeo, trake'ma hantagi'nenaza keagama eme hanageta, zamavumro zmantenke'za Ra Anumzamofo avurera kumira osiho. Hagi ana'ma osnazana Anumzamofo rimpahezamo'a tamagrite'ene tamafuhe'inte'ene egahie. Hagi kema antahitama ana'ma hanazana, nagatmimofo knazana tamagra e'origahaze. <sup>11</sup> Hagi antahiho, ugagota pristi ne' Amaria'a maka zama Ra Anumzamofonte'ma hanaza zantero kegava hugahie. Hagi Ismaeli nemofo Zebadaia'a Juda vahe'mokizmi rankva mani'neno maka keagama kini netegama erita esazana refko hugahie. Hagi Livae naga'mo'za eri'za vaheka'arami mani'neza kagri eri'zana erigahaze. Hagi hankavetita eri'zana e'nerinkeno, Ra Anumzamo'a fatgoma hu'za eri'zama erisaza naga'ene manigahie.

## 20

### *Anumzamo Jehosafatinaaza huno ha'ma hu'nea zamofo naneke*

<sup>1</sup> Hagi ana'ma hutegen'o'a, Moapu vahe'ma, Amoni vahe'ma, mago'a Meuni vahe'ma hu'za Jehosafatina hara eme hunte'za hu'naze. <sup>2</sup> Hagi mago'a vahe'mo'za Jehosafatina amanage hu'za eme asami'naze, Tusi'a vahekrfamo'za ha' hugante'naku hagerimofo kantu kaziga Edomuti e'za Hazazon-tamari emani'naze hu'za eme asmi'naze. (Hazazon-tamaria mago agi'a Engedi'e). <sup>3</sup> Ananke'ma Jehosafati'a nentahino'a, tusi koro nehuno Ra Anumzamofo avesi'zankura nunamuna huno antahinegeno, mika Juda vahera ke hige'za ne'zana a'o hu'za Ra Anumzamofontega nunamu hu'naze. <sup>4</sup> Hagi mika Juda vahetmimo'za emeri atru hu'za Ra Anumzamo'ma zamaza hanigura antahige'naze. Mika Juda rankumapintira Ra Anumzamofontega nunamu hu'za antahige'naku eme atru hu'naze. <sup>5</sup> Hagi mika Juda vahe'ene Jerusalemi vahetmimofo zamavugane Ra Anumzamofo mono nomofo avuga kasefa kuma'ma tro'ma hunte'nazafi Jehosafati'a ot'i'nen, <sup>6</sup> amanage huno nunamuna hu'ne, Ra Anumzana Kagra tafafe'i Anumzamoka kagra monafi Anumzana mani'nane. Kagrake'za maka ama mopafi kumatmina kegava hu'nane. Kagri kazampinke maka hihamu

hankavea me'neankino, mago vahe'mo'e huno hara hugageteoregahie. <sup>7</sup> Kagra Anumzantimoka, Israeli vaheka'a zamavufo ama mopafima ko'ma mani'naza vahera zmahenatitrenka, kanampaka'a Abrahamu agehemofo ama mopa zamagri mopa mevava hugahie hunka zami'nane. <sup>8</sup> Hagi zamagra ama ana mopafi mani'ne'za mono'ma hugantesaza mono nona kintete'za amanage hu'naze, <sup>9</sup> ha' eme hurante'nazo, hazenke'za fore hanio, ruzahu ruzahu kri fore hanio, agatonto kna fore haniana ama Kagri kagina erisgahu mono nomofo avuga otita Kagritega krafagema hanunkenza, krafagetia antahiraminka knazanpintira tagu'vazigahane hu'none. <sup>10</sup> Hagi tagehemofo Israeli vaheku'ma hanke'za Isipitima ne-eza Moapu vahe'ma, Amoni vahe'ma' Seiri agonafima nemaniza vahera ha'ma huozmante'za zamagatere'za e'naza vahe'mo'za menina ha' hurantenaku neaze. <sup>11</sup> Hagi e'i anahu avu'ava'ma huzmante'nonte, miza neramiza erisantihareho hunkama tam'i'nana mopafintira eme tahanatitre'za ama mopa eri'naku neazafi ko? <sup>12</sup> Hagi Anumzantimoka nahanienga kagra refko hunka keaga ana zantera hunezmanterka hazenkea ozamigahane? Na'ankure tagra ama tusi vahekrfama neazana knarera osu'nonankita, hara huozmante'gahune. Hagi antahintahi timo'a savari higeta, tazama hanankura kagri kavufinke keteta mani'none. <sup>13</sup> Anage'ma nehigeno'a, mika Juda venenemo'za ne'one mofavrezmine, a'nezamine, mofavre'zmine Ra Anumzamofo avuga oti'za mani'nazageno, <sup>14</sup> ana vahe amu'nompi Zekaraia nemofo Jahzielinte Ra Anumzamofo Avamumo'a e'ne. Hagi Zekaraia'a Benia nemofo'e, Benia'a Jeieli nemofo'e, Jeieli'a Matania nemofo Livae nekino, Asapu ne' mofavreramimpinti ne' mani'ne. <sup>15</sup> Hagi Jahaziel'i amanage hu'ne, Mika Juda vahe'ma, Jerusalemi kumapima nemaniza vahe'motane kini ne' Jehosafetiganena antahihio, Ra Anumzamo'a amanage hie, ha'ma huramante'naku'ma, tusi'a sondia vahekrfamo'zama aza vahekura tamahirahikura huta korora osiho, na'ankure ama hara tamagri hara omne'neanki, Anumzamofo ha' me'ne. <sup>16</sup> Oki'na uramita hara ome huzmanteho. Zamagra Zizi krahopinti marerigahazankita Jerueli hagege kokamofo zage hanati kaziga ome zamagegahaze. <sup>17</sup> Tamagra ama ana hapina hara osugahazanki, oti hankavetita retrohuta manineta Ra Anumzamo'ma tamagritegama anteno tamagu'ma vaziniana keho. Juda vahe'ene Jerusalemi vahe'mota korora nehufa tamahirahikura osiho. Ra Anumzamo'a tamagrane manigahianki, okina hara ome huzmanteho. <sup>18</sup> Anage'ma higeno'a, Jehosafati'a mopafi renaregeno, Juda vahe'mo'zane, Jerusalemima nemaniza vahe'mo'zanena Ra Anumzamofo avuga zamarena re'za kepri hu'za Ra Anumzamofona monora hunte'naze. <sup>19</sup> Ana hazageno Kohati nagapinti Livae vahe'mo'zane, Kora naga'mo'zanena oti'za Ra Anumzana Israeli vahe'mofo Anumzana ranke hu'za zagamera hu'za agi'a ahentesga hu'naze.

### *Ha'vahe'mo'za zamagra ohefri ahefri hu'naza naneke*

<sup>20</sup> Hagi nanterame oti'za hagege kokampi Tekoa vu'naze. Hagi anama nevazageno'a, Jehosafati'a otino amanage hu'ne, Juda vahe'ene Jerusalemima nemaniza vahe'enena kama antahihio, Ra Anumzana tamagri Anumzamofonte tamentintia hinkeno tamagu vazino tamaza nehina, Agri kasnampa vahetmimofo kere tamentinti nehuta, knarera huta manigahaze. <sup>21</sup> Hagi zamavare atru huno ana nanekema zmasamiteno'a, ruotge'ma hu'nea kukena hu'neza vugote'za nevu'za zagamera hu'za Ra Anumzamofoma agima ahentesgama hanaza vahetami zamazeri

oti'ne. Hagi anama hutege'za amanage hu'za ana zagamera hu'naze, Ra Anumzamofona susu huntone, na'ankure avesirante'nea zamo'a mevava huno vugahie. <sup>22</sup> Anagema hutege'za agafa hu'za zagamera ranke hu'za nehazageno Amoni vahe'ma, Moapu vahe'ma, Seiri agonafima nemaniza vahetaminen Ra Anumzamo'a agafa huno zamazeri savri hige'za, hara zamagra zamagra hu'za ohefri ahefri hu'naze. <sup>23</sup> Amoni vahe'ene Moapu vahe'mo'zanena rukrahe hu'za, Seiri agonafi vahera hara huzmante'za zamaha'naze. Hagi Seiri agonafi vahe'ma zamahe vagamarete'za, ete Moapu vahe'mo'zane Amoni vahe'mo'za oti'za zamagra zamagra ohefri ahefri hu'naze. <sup>24</sup> Hagi hagege kokamofoma uruha'ma nehaza agonare Juda vahe'mo'za emarerite'za, kegamanute'za hagege kokantegama kazana mago'mo'e huno atre'nora ofre'neanki ana maka vahetmimo'za fri'za uvase evase hu'nazage'za ke'naze. <sup>25</sup> Hagi kini ne' Jehosafati'ene vahe'amo'zanema ana vahetmimofo fenoma erinaku'ma e'za eme kazana, ana fri vahetmimofo fenoma, ne'zama, kukenama, zago'amo mareri zantaminena, tusi feno me'nege'za eri vagaregara osu'naze. Ana fenoma eri'nazana tusi'a fenonkino, 3'a zage knafi fenona hantage'naze. <sup>26</sup> Hagi namba 4kna zupa Beraka agupofi emeri tru hu'za muse nehu'za, Ra Anumzamofo agi'a ahentesga hu'naze. E'ina hu'negu ana agupomofo agia Berake (Berakaemra hu'nena asomure hu'ne) hu'za hazageno meno eno menina ama knarera ehanati'ne. <sup>27</sup> Ana hutazageno Jehosafati'a vugota huzmantege'za maka Juda vahetamine, Jerusalemima nemaniza vahe'mo'zanena Ra Anumzamo'ma ha' vahe'zmima ha'ma huzmagaterea zanku zagame nehu'za tusi muse hume Jerusalemi vu'naze. <sup>28</sup> Hagi Jerusalemi kumapima enefre'za, hapu zavenama, laerie nehaza zavenama nehe'za, ufenena nere'za Ra Anumzamofo nompina musenkase hu'za ufre'naze. <sup>29</sup> Hagi Ra Anumzamo'ma Israeli vahe'ma zamaza huno ha' vahezmima zamaheankema ruga'kumatmimpi vahe'mo'zama nentahi'za, Anumzamofonkura tusi koro hu'naze. <sup>30</sup> E'ina higeno Jehosafeti'ma kinima mani'noma vu'nea knafina, agri Anumzamo'a ha'zana eri atrege'za maka kazigatira hara eme huozmantage'za fru hu'za mani'naze.

<sup>31</sup> Hagi Jehosafati'a 35'a kafu hu'neno Juda vahe kinia efore huno mani'neankino, 25'a kafufi Jerusalemi kumatera kinia mani'ne. Hagi nerera agia Azubakino, agra Silhi mofa mani'ne. <sup>32</sup> Hagi Jehosafati'a ko'ma nefu Asa'ma fatgo avu'ava'ma hu'neaza huno, Ra Anumzamofo avurera fatgo avu'ava hu'ne. <sup>33</sup> Hianagi havi anumzante'ma mono hunentaza kumatmina eri haviza osu'neanki'za, vahe'mo'za zmafahemofo Anumzantera zamagu'aretira hu'za amagera onte'naze. <sup>34</sup> Hagi Jehosafati'ma agafa huno kinima mani'neretima vuno vagamaretema vu'nea knafima tro'ma hu'nea zantmimofo agenkea, Hanani nemofo Jehu avontafepi krentegeno, Israeli kini vahetmimofo agenkema krentenazafi me'ne. <sup>35</sup> Hagi henka Juda kini ne' Jehosafati'a havi avu'avazama nehia Israeli kini ne' Ahasia'ene eri hagerafino mani'ne. <sup>36</sup> Hagi ana kini netremokea vente trohuke Tasisi vunaku mago zanarimpa huteke, ana venteramina Ezion-Geba kumate trohu'na'e. <sup>37</sup> Ana'ma nehakeno'a higeno'a Maresa kumateti ne' Dodavalu nemofo Eliezeri'a anage huno Jehosafatina kasnampa kea hunte'ne, Na'ankure kagra Ahasia'ene kea hagerafinankino, tro'ma hana venteramina Ra Anumzamo'a eri haviza hugahie. Higeno ana venteramimo'za haviza hazage'za, Tasisia ovu'naze.

# 21

## *Jehoram'u'ma Jehosafati noma erino Juda vahe kini mani'nea naneke*

<sup>1</sup> Hagi Jehosafati'a frige'za Deviti rankumapi agehemokizmima asez-mante'naza matipi ome asente'naze. Higeno nemofo ne' Jehoram'u agri nona erino kinia mani'ne. <sup>2</sup> Jehoram'u' Jehosafati mofavregino, 6si'a afu aganahe'mokizmi zamagi'a, Azaria'ma, Jekiel'i'ma, Zekaraia'ma, Azari-ahu'ma, Maikoli'ma, Sefataia'e. Ama ana maka Juda vahe kini ne' Jehosafati ne' mofavrerami mani'naz. <sup>3</sup> Hagi nezmafa Jehosafati'a silvama, golima, zago'amo'ma marerisa zantamine, Juda mopafima hanave vihu keginama hugagi'naza rankumataminena refko huno mofavre'zaga'a zami vagare'ne. Hianagi Jehoramuna kini tra'a amigeno kinia mani'ne. Na'ankure agra ese ne' mofavre'a mani'ne. <sup>4</sup> Hagi Jehoram'u'ma kini trate'ma umani hankavenetino'a, maka aganahe'ine, mago'a Israeli kva vahetaminena bainati kazinteti zamahe fri vagare'ne. <sup>5</sup> Hagi Jehoram'u'a, 32'a kafu hu'neno kinia efore hu'neankino, 8'a kafufi Jerusalemi kumatera kinia mani'ne. <sup>6</sup> Hagi Jehoram'u'a Israeli kini vahe'mo'zama hu'naza zamavu'zmava nezmavaririno Ahapu naga'mo'zama hu'nazankna kumi Ra Anumzamofo avurera hu'ne. Na'ankure agra Ahapu mofa ara eri'neno, Ra Anumzamofo avurera kumi hu'ne. <sup>7</sup> Hianagi Ra Anumzamo'a Deviti nagara zamahe ofri'ne. Na'ankure Agra Deviti'ene huhagera fi huvempage huno kagripinti'ma fore hu anante anante'ma hu'zama vanaza vahe'mo'za tavikna hu'za kinia mani vava hugahaze huno hu'ne. <sup>8</sup> Hagi Jehoram'u'ma kinima mani'nege'za Idomu vahe'mo'za Juda vhahera hahunezmante'za atre'za vu'za zamagrazmi kini ome azeri oti'naze. <sup>9</sup> Ana'ma hazageno'a, Jehoram'u'sondia vhahete kva vahetamine, karisifima vanoma nehu'za ha'ma hu sondia vahetaminena zamavareno Idomu vu'ne. Anama hige'za kenagera Idomu vahe'mo'zama agri'ene karisifima maniza ha'ma nehaza sondia vahe zmahenaku'ma eme avazagi kaginafinti hahu'za kenageke zamatre'za fre'naze. <sup>10</sup> E'ina higeno ananteti agafa hu'za Idomu vahe'mo'za Juda vhahera hara renezmante'za, zamagra hankavere oti'naze. E'ina knafinke Libna Jehoramuna hara rente'za agri kvafintira atre'za vu'naze. Na'ankure Jehoram'u'a Ra Anumzana zamagehe'i Anumzamofona atreno amefi humili'negu anara hu'ne. <sup>11</sup> Ana nehuno Jehoram'u'a Juda mopafima me'nea agonaramimpi havi anumzama mono'ma hunte nontamina kinen-teno, Jerusalemi kumate'ma nemaniza vahetmina hige'za havi anumzante monora hunentazageno, agranena Juda vhahera zamavare hazagreg'e'za Ra Anumzamofona atre'za zamafi humili'naze. <sup>12</sup> Hagi kasnampa ne' Elaija'a mago avona Jehoramuna amanage huno kremi'ne, Ra Anumzana negafa Deviti Anumzamo'a amanage hie, negafa Jehosafetima Juda vahe kini ne' Asa'ma hu'neaza hunka kagra Ra Anumzamofona amagera ontananki, <sup>13</sup> Israeli kini vahe'mo'zama hu'nazaza hunka Juda vahe'ene Jerusalemi kumapima nemaniza vahe'mokizmia antahintahi zaminke'za, Ahapu nagamofo avu'avaza avaririza monko a'nemo'zama rehazaza hu'za havi anumzantera monora hunentaze. Ana nehunka kagri'ma kagatere'za soe'ma hu'naza kaganahenina zamahe fri vagare'ne. <sup>14</sup> E'ina hu'nanku ko, vaheka'ane, mofavre'raminka'ane, a'neka'ane, maka feno zanka'anena Ra Anumzamo'a eri haviza hugahie. <sup>15</sup> Ana'ma hanigenka kagra kefo kri erigahanankino, krimpamo'a kata negrinigeno uravemo'a akoheno kasonenepa krimpamo'a fragu vaziramina katagu nehunka frigahane. <sup>16</sup> Hagi Filistia vahe'ene, Itiopia vahe tva'onte'ma nemaniza Arapu vahe'enena Ra

Anumzamo'a zamarimpa zamazeri otige'za, Jehoramuna ha' rente'naze. <sup>17</sup> Ana nehu'za Juda vahera ha' eme huzmante'za maka kini ne'mofo nom-pima me'nea fenoramina e'neri'za, ne' mofavre'ramima'ane, a'ne'anena zamavare hana nehu'za, amiten a ne'a (Jehoa'asi) Ahazianke atre'naze. <sup>18</sup> Ana'ma huteno'a, Ra Anumzamo'a Jehoramuna rimpafi krima ami'neana tusagino azeri onkanamre kri ami'ne. <sup>19</sup> Hagi Jehoram'u a tare kafu anankrifina manigeno, uravemo'a tagatiramigeno tusi atagu nehuno fri'ne. Hagi afah'e'zama nefrizage'za antahizamiza tevema hunegrazaza hu'za, agrama frige'za naga'amo'za teveva huonkre'naze. <sup>20</sup> Jehoram'u a 32'a kafu huteno, kini efore huno Jerusalemi kumatera 8'a kafu kinia maniteno fri'neanagi, vahe'mo'za zavira nete'za zamasunkura huonte'naze. Hagi anama hige'za kini vahe'ma Deviti kumapima asemanezmantazafi aseote'nazanki, rurega asente'naze.

## 22

### *Ahasia'ma Jehoram'u no erino Juda vahe kini mani'nea naneke*

<sup>1</sup> Hanki Jerusalemi kumate'ma nemani'za vahe'mo'za Jehoramuna amite'na mofavre'a Ahasiana kinia azeri otizageno, nefu Jehoram'u nona erino kinia mani'ne. Na'ankure Arabia vahe'mo'za ha'ma eme huzmante'za maka Ahasi afuhe'ina zamahe vagare'naze. E'ina higeno Jehoram'u nemofo Ahasi'a Juda vahe kini manino kegava huzmante'ne.

<sup>2</sup> Hagi Ahasia'a 22tu'a kafu hu'neno kinia efore hu'neankino, magoke kafu Jerusalemi kumatera kinia mani'ne. Hagi nerera agi'a Ataliakino negeho'a Israeli kini ne' Omri'e. <sup>3</sup> Hagi Ahapu nagamo'ma hu'naza avu'ava Ahasia'a avariri'ne. Na'ankure nerera'a antahintahi amigeno kefo avu'ava hu'ne. <sup>4</sup> Ahasia'a Ahapu naga'mo'zama hu'nazaza huno Ra Anumzamofo avufina kefo avu'ava hu'ne. Na'ankure Ahasia'a nefu'ma fritegeno'a Ahapu nagapinti vahetmimo'za antahintahia ami'zageno havi avu'avara hu'ne.

<sup>5</sup> Ahasia'a ana vahe'mokizmi ke antahino Israeli kini ne' Ahapu nemofo Jehoram'u avaririno Siria vahe kini ne' Hazaeli ha' ome hunte'naku Ramot-Gileati kumate vigeno, ana hapi Siria vahe'mo'za Joramuna ahe kuzafa antazageno, <sup>6</sup> ete rukrahe huno eno namuma'ama teganinogura Jezrili kumate eman'i'ne. Hagi Juda kini ne' Jehoram'u nemofo Ahasia'a Ahapu nemofo Joram'u kenaku Jezrili kumate uramu'ne. Na'ankure Joramuna hapinti ahe kuzafa antazageno umase'negeno'e. <sup>7</sup> Hianagi Anumzamo'a Ahasiana azeri haviza hunaku higeno, Joramuna ome kenakura vu'ne. Na'ankure anante'ma nevuno'a Jehoram'u ene vuno Ra Anumzamo'ma Ahapu nagama zamahe hana hinogu'ma Nimsi nemofo Jehu'ma masavema frente'nea ne' ome ke'naku vu'na'e. <sup>8</sup> Hagi Jehu'ma Ahapu naga'ma zamazeri havizama nehireti'ma Juda kva vahetamine, Ahasia afuhe'ima ome tutagiha'ma hunezmanteno'a, ana maka zamahe fri'ne. <sup>9</sup> Ana nehuno Ahasianku nehakege'za, mago'a vahe'mo'za Sameria kumateti Ahasia'a frakinege'za ome ke'za avre'za Jehuna eme amizageno, ahe fri'ne. Ana hige'za Ahasiana kerifi asente'naze. Na'ankure negeho Jehosafati'a agu'areti huno Ra Anumzamofona amagera ante'ne. Ana hazageno Ahasia nagapina hanavetino mani'neno Ahasia noma erino kinima maniga vahera omni'ne.

<sup>10</sup> Hagi Atalia'ama antahiamma nemofo Ahasia'ma fria nanekema nentahino'a, maka Juda nagapinti'ma kinima maniga vahetamina zamahe hana hu'ne. <sup>11</sup> Hagi Ahasia nemofo Joasina ahenaku neageno, kini

ne'mofa mofa Jehosabeti'a ana mofavrea oku'a avreno nemasefinka ome frakino ante'negeno mago a'mo kegava hu'n'e. Hagi Jehosabeti'a kini ne' Jehoram mofakino pristi ne' Jehoaida nenaro'e. Hagi Jehosabeti'a Ahasiana nesarokino Atalia'ma Joasima ahe fri'zanku avreno ome frakinte'negeno Atali'a ana mofavrea ahe ofrine. <sup>12</sup>Hagi Atalia'ma Juda mopama kegavama hu'negeno'a, 6si'a kafufi Ra Anumzamofo mono nompi Joasina avre frakine'za kegava hazageno mani'n'e.

## 23

### *Jehoiada'a Juda vahe kini Joasina azeri oti'nea naneke*

<sup>1</sup> Hianagi pristi ne' Jehoiada'a korora osu 100'a sondia vahete'ma kegavama nehaza sondia kva vahetamine kea huhagerafi'n'e. Ana kva vahetmimofo zamagi'a, Jerohamu nemofo Azaria'ma, Jehohanani nemofo Ismaeli'ma, Obeti nemofo Azaria'ma, Adaia nemofo Maseia'ma, Zikri nemofo Elisafati'e. <sup>2</sup> Ana hute'za Livae vahetamine, mago mago Israeli naga nofimofo kva vahetmina maka Juda mopafima me'nea rankumatmimpi vano hu'za zamavare'za Jerusalemi kumate zamavare atru hu'naze. <sup>3</sup> Hagi maka atruma hu'naza vahe'mo'za Anumzamofo nompi vu'za kasefa kini ne'ene huhagerafi hvempa kea hu'naze. Hagi Jehoiada'a amanage hu'n'e, kini ne'mofa Deviti mofavremo kinia manigahie huno Ra Anumzamo'a hu'n'e. <sup>4</sup> Hagi tamagra amana hugahaze, 3'a kevu pristi vahe'ene Livae vahepintira, mago kevuma Sabatire'ma eri'zama eneriza kevumo'za mono nomofo kafanteria kegava hugahaze. <sup>5</sup> Hagi mago kevumo'za kini ne'mofa nonkumate kegava hanageno, mago kevumo'za mono nonkuma kafante kegava hugahaze. Hagi maka vahe'mo'za Ra Anumzamofo mono no kumapi manigahaze. <sup>6</sup> Hagi atrenkeno mago vahe'mo'za Ra Anumzamofo mono nompina marerino atiraminora osutfa hino. Pristi vahetamine ana nompima eri'zama eri'naza Livae vahe'mo'zage mareri'za atiramiza hugahaze. Na'ankure zamagra agru hu'naze. Hianagi maka vahetmina Ra Anumzamo'ma eri'zama zami'nere manitere hugahaze. <sup>7</sup> Hagi mago mago Livae vahemota tamazampina ha'zantmia erineta kini ne' Joasina manigaginteneta kegava huntegahaze. Hagi iza'oma mono nompima efresia vahera ahefriho. Ana nehuta inantegoma kini ne'mo'ma vanirega avaririta vano hih. <sup>8</sup> Anage hige'za Livae vahe'ene maka Juda vahe'mo'zanena pristi ne' Jehoiada'ma zamasamia kante ante'za Sabati knazupa eri'zama e'neri'za vahetamine ete zamazama hunuk'ma aza vahetaminena, maka zamavarente'n'e. Na'ankure pristi ne' Johoiadama eri'zama refkoma huno koma zami'nea vahera huozmante zamatrege'za mani'naze. <sup>9</sup> Ana nehuno pristi ne' Jehoiada'a kini ne' Deviti'ma Anumzamofo mono nompima ante'nea karugru keveramine, ranra hankoramine, neone hankoraminena 100'a sondia vahete kva vahetamina erizmi'n'e. <sup>10</sup> Ana huteno kini ne'mo'a kva vahera zamazeri otige'za maka ha'ma huzantamina zamazampina erieri hu'neza kre sramnavu itareti vuno, ana mono nomofo sauti kaziga evuteno, noti kazigama evige'za oti'za manigaginte'naze. <sup>11</sup> Ana hute'za kini ne'mofa nemofona avre'za atineramiza kini fetorira asenirera antanidente'za kasegema me'nea avontafera ami'naze. Ana nehu'za kini nere hu'za huama nehzageno, pristi ne' Johoiada'a olivi masavena anumpi taginte'no kinia azeri oneti'za anage hu'naze, Kini ne'moka zazate kinia maninka vugahane. <sup>12</sup> Hagi vahe'mo'zama zamagamare'za musema hu'za

kini ne' Joasima amrarama hu'za nevaza zamagasasama Atalia'ma nentahino'a, Ra Anumzamofo mono nompi ana vahetmima mani'nazafi ufre'ne. <sup>13</sup> Hagi ana nompima marerino keana, ra zafama retrurente kafanteria kini vahe'ma oneti'zare kini ne' Joasi'a ot'i'negeno ome ke'ne. Hagi sondia vahete kva vahetamine, ufema neraza vahetaminena kini ne'mofo asoparega kantigma otizageno maka vahe'mo'za ufena nere'za, zavena nehe'za musena hu'za zagamera nehazageno ome nezamageno, kukena'a tagato nehuno krafa huno amanage hu'ne, tamagra nahenaku komoru hutma renavatga hu'naze. <sup>14</sup> Anagema higeno'a, anante Jehoiada'a 100'a sondia vahete kva vahetmima zamazeri ot'i'nea vahera ke hige'za azageno amanage huno huzmante'ne, Mono no tava'ontetira avretma sondia vahetmimofo amunompi nevinkeno agri'ma avariri'zama vanaza vahetmina maka zamahe friho. Na'ankure pristi ne'mo'a huno Ra Anumzamofo mono nompina ahe ofriho hu'ne. <sup>15</sup> Anage higeno Ataliana ome azerite'za kini ne'mofo kuma kafanku Hosi afu kafane nehaza kafante avre'za ome ahe fri'naze. <sup>16</sup> Ana huteno Jehoiada'a agrane, maka vahetami'mozane, kini ne' Joasi'enema Ra Anumzamofo vahe'ma manisaza kea huvempa huno huhagerafi'ne. <sup>17</sup> Ana'ma hutege'za maka vahe'mo'za vu'za Bali havi anumzamofo mono nona ome taganavazi netre'za, kre sramnavu itaramimofo, amema'araminena tapage tapagu hunetre'za, ana kre sramnavu itaramimofo avuga, Bali havi anumzamofo pristi ne' Matanina ahe fri'naze.

<sup>18</sup> Ana huteno Deviti'ma ko'ma mono nompri eri'zama refkoma hu'neaza huno Jehoiada'a pristi vahetamine, Livae vahetaminena mono nompri eri'zana refko huno zami'ne. Hagi ana vahe'mo'za Mosese kasegem'o'ma hu'nea kante ante'za Ra Anumzamofontega kresramna nevu'za Deviti'ma e'ina hihoma hu'nea kante ante'za zagamera nehu'za musena hu'naze.

<sup>19</sup> Hagi zamagra'ama zamazeri agru osu vahe'ma Ra Anumzamofo mono nompima marerizanku'ma kafante'ma mani'ne'za kegava hu vahera Jehoiada'a zamazeri ot'i'ne. <sup>20</sup> Ana nehuno Jehoiada'a sondia vahete kva vahe'ma, gavana vahe'ma, vahete'ma kvama hu'naza vahetmima, maka vahetmima huno kehige'za kini nera avre'za Ra Anumzamofo mono nonnegatira urami'naze. Hagi anaga kaziga kafanteti umarer'i'za kini nera noma'afina ome antazageno kini trate umani'ne. <sup>21</sup> Ana nehu'za ana maka vahe'mo'za tusi muse nehu'za, zagamera hu'naze. Hagi Jerusalemi kumapina mago zamo'a agasasa oru'ne, na'ankure Ataliana bainati kazinteti ahazageno fri'ne.

## 24

### *Joasi'ma mono no eri so'e hu'nea naneke*

<sup>1</sup> Hagi Joasi'a 7ni'a kafu hu'neno Juda vahe kini efore hu'neankino, 40'a kafufi Jerusalemi kumatara kinia mani'ne. Hagi nerera agi'a Sibiakino agra Beseba kumateti a' mani'ne. <sup>2</sup> Hagi pristi ne' Jehoiada'ma mani'nea knafina, Joasi'a Ra Anumzamofo avurera fatgo avu'avake hu'ne. <sup>3</sup> Hagi Jehoiada'a tare atre Joasina avre amigeno, ne'mofara kasezmante'ne. <sup>4</sup> Hagi ana'ma hutegen'o, Joasi'a Ra Anumzamofo mono no eri so'e huno kinaku agesa antahi'ne. <sup>5</sup> Ana nehuno pristi vahetamine Livae vahetaminena kehu atru huno amanage huno zamasami'ne, Maka Juda mopafima me'nea rankumatmimpi vuta Israeli vahepintira kafune kafunema Ra Anumzamofo mono noma eriso'e huta ki'nuna silva zagoa zogita egahaze. Hagi anagema huteno'a, ame huta viho huno huzmante'ne. Hianagi Livae

vahe'mo'za kema hiazana hu'za ame hu'za ovu'naze. <sup>6</sup> E'inama hazageno'a kini ne'mo'a ugota pristi ne' Jehoiadana amanage huno antahige'ne, Nahigenka Livae vahetmina ame hunka huozmantanke'za Juda mopafinti'ene Jerusalemi kumapintira Ra Anumzamofo eri'za vahe Mosese'ma hu'nea kantera ante'za takesi zagone, kasegema ante nomofo zagoa zogiza nomaze? <sup>7</sup> Na'ankure kefo avu'ava'ene a' Atalia mofavre'ramimo'za Anumzamofo mono nona tapage hu'za ufre'za, Ra Anumzamofo zanema hu'za eri ruotge'ma hunte'naza zantamina eri'za, Bali havi anumzamofonte mono hunte zantami ome ante'naze. <sup>8</sup> Anage nehuno kini ne' Joasi'a ke hige'za mago vogisitro hu'za Ra Anumzamofo mono kuma kafante ante'naze. <sup>9</sup> Hagi Israeli vahetmima hagege kokampima mani'nazageno Anumzamofo eri'za ne' Mosese'ma hige'zama takisima zogi'za eme ami'nazaza hu'za, Judane Jerusalema nemaniza vahetega takisi zagoa erita echo huno kea atregeno vuno eno hu'ne. <sup>10</sup> Higeno maka kva vahe'mo'zane, maka vahe'mo'zanena muse nehu'za ana vogisifina zagoa eri'za eme nentazageno avite'ne. <sup>11</sup> Hagi Livae vahe'mo'zama ana zago vogisima eri'za kini ne'mofo eri'za vahete'ene, zago'are'ma kegavama nehaza vahetema azage'za, ana vahe'mo'za ana zagoama ante vogisima kazama silva zagomo'ma avi'mateneg'eza ana zagoa ruherafi nente'za, ete eri'za ana kuma kafante ome antetere hu'naze. Maka kna ana hvavava nehu'za tusi silva zago zogi'naze. <sup>12</sup> Hagi kini ne' Joasi'enе Jehoiadakea ana zagoa erike Ra Anumzamofo mono noma eri so'ema hu'vahe zamazampi ante'na'e. Ana nehuke noma ki vahetamine, zamazanteti'ma keonkezama tro hu vahe'ene, ainine bronsinema kreno ke'onkezama trohu vahetaminena zagoa mizasezmantazage'za Ra Anumzamofo mono nona eri so'e hu'za ki'naze. <sup>13</sup> Hagi ana eri'za vahe'mo'za hanaveti'za eri'zana e'nerizageno, eri'zamo'a ome vagarege'za ko'ma hu'nazaza hu'za Anumzamofo mono nona eri hanavetiza eri so'e hu'za ki'naze. <sup>14</sup> Hagi ana eri'zama eri vagamarete'za amnema me'nea zago'a eri atru hu'za eri'za kini ne'ene, Jehoiadakizni eme znamizageke, ana zagoa erike Ra Anumzamofo nompima antesaza golire zantamina silvare zantamine tro hu'na'e. Hagi Jehoiadama pristima mani'nea kna'afina, Ra Anumzamofo mono nompina vahe'mo'za ofa eri'za eme kresramma vu vava hu'naze. <sup>15</sup> Hianagi Jehoiada'a 130'a kafu huteno ozafarenlo fri'ge'za, <sup>16</sup> kini vahetmima asenez-mantazafi Deviti rankumapi asente'naze. Na'ankure agra Israeli vahete'ene, Anumzamofonte'ene mono nompine agra nagate'enena knare avu'avaza hu'ne.

### *Joasi'ma Ra Anumzamofoma atreno amagen humi'nea naneke*

<sup>17</sup> Hagi Jehoiada'ma fritege'za Juda kumatamimpinti kva vahe'mo'za kini ne' Joasinte eza eme kepri hu'za ra agi nem'i'za antahintahia eme amizageno, ana antahintahi zamia amage ante'ne. <sup>18</sup> Ana'ma hige'za kini ne'mo'ene vahetamimo'za Ra Anumzana zamagehe'i Anumzamofo mono nona atre'za, zafare'ma antre'za Asera havi anumzamofo amema'ama tro'ma hunte'naza zante'ene, kaza osu havi anumzantminte monora hunte'naze. E'na hazageno Juda vahe'ene Jerusalemi vahera Anumzamo'a tusi arimpa ahezmante'ne. <sup>19</sup> Ra Anumzamo'a antahintahi zamima zamazeri rukrahe hanige'za Agritega ehogu'ma, kasnampa vahetmina huzmanteg'eza kefo avu'ava zana atretma Anumzamofonte echo hu'za ome zmasamizanagi, ana kezmiya ontahi'naze. <sup>20</sup> Ana hazageno Ra Anumzamofo Avamu'mo'a pristi ne' Jehoiada nemofo Zekaraiante hanavetino egeno, ana vahetmimofo zamavuga otino amanage huno zamasmi'ne, Anumzamo'a amanage hie,

Nahigeta Ra Anumzamofo kasegea amagera nontazageno, maka zama hazazamo'a knarerwa nosie? Na'ankure tamagra Ra Anumzamofona tamagena humizageno, Agranena ana zanke huno amagena tamagrira hurami'ne. <sup>21</sup> Hianagi ahe frinaku kea retro hutazageno, kini ne'mo'a ahe friho hige'za Zekaraiana Ra Anumzamofo mono nonkumapi have knonu ahe fri'naze. <sup>22</sup> Hagi Joasi'a Jehoiada'ma knare'zama hunte'nea zankura agesa ontahi, nemofo Zekaraiana ke'a omne vahera ahe fri'ne. Hagi havenknonu'ma Zekaraiana ahazagenoma nefrino'a amanage hu'ne, Amama haza zana Ra Anumzamo'a negeno, Agra'a nona humzantesie.

### *Joasima ha'eme hunte'za ahe fri'naza naneke*

<sup>23</sup> Hagi ana kafumo'ma vagamaneregeno kasefa kafuma agafama ne-higeno'a, Siria sondia vahe'mo'za Juda vahe'ene Jerusalemi kumapima nemaniza vahe'enena ha'eme huzmante'za, maka ranra kva vahetmina zamahe hana nehu'za, maka fenozmia eri'za Damaskasi kini netega atrazageno vu'ne. <sup>24</sup> Juda vahera rama'a sondia vahe manizageno, Siria sondia vahera osi'a vahe' e'nazanagi, Ra Anumzamo'a Siria sondia vahe zamazampi Juda sondia vahera zamavarentege'za hara huzmagatere'naze. Na'ankure Juda vahe'mo'za Ra Anumzana zamafahe'i Anumzamofo zama-gena humi'naze. E'i ana agafare Joasina hazenkea ami'naze. <sup>25</sup> Hagi ha'ma huvagamanere'za, Joasina ahe kuzafa nente'za atre'za vu'naze. Ana'ma hazage'za pristi ne' Jehoiada nemofo Zekaraiama ahe fri'nea zante eri'za vahe'aramimo'za ke hugantugma hu'za tafe'are'ma masenere ahe frite'za, Deviti rankumapi ome asente'nazanagi, kini vahe'ma asezmente matipina aeonte'nazanki, rufi ome asente'naze.

<sup>26</sup> Hagi kema hugantugama huke Joasima ahe fri'na'a ne'trena, Amoni a'mo Simeati kasente'nea ne' Zabadi'ene, Moapu a'mo Simireti'ma kasente'nea ne' Jehozabatike ahe fri'na'e. <sup>27</sup> Hagi kini vahetmimofo zamagenkema krente'naza avontafepi, Joasi mofavrerami zamagenkene, kasnampa vahe'mo'zama agrikuma kasnampa kema hu'naza naneke a krente'naze. Hagi anama hutegenoa nemofo Amasia Joasi nona erino kinia mani'ne.

## 25

### *Amasia'ma Juda vahe kini mani'nea naneke*

<sup>1</sup> Amasia'a 25'a kafu hu'neno Juda vahe kinia efore huteno, 29ni'a kafufi Jerusalemi kumatera kinia mani'ne. Hagi nerera'a Jerusalemi kumateti akino, agi'a Jehoadini'e. <sup>2</sup> Hagi Amasia'a Ra Anumzamofo avurera knare avu'ava hu'neanagi, tamage huno agu'aretira amagera onte'ne. <sup>3</sup> Hagi Amasia'ma kini trate'ma umani hankavenetino'a, ko'ma ne'fama kinima maninege'za ahe fri'naza eri'za vahetamina, zamahe fri vagare'ne. <sup>4</sup> Hianagi Ra Anumzamo'ma Mosesema asamigeno kasege avontafepima krente'nea kante anteno, ana eri'za vahe'mokizmi mofavreramina ozamahe zamat're'ne. Hagi ana kasege avontafepina amanage hu'ne, mofavre'amo'ma hania hazenkerera nefana ahe ofrige, nef'a'ma hu'nenia hazenkerera nemo-fona ahe ofriho. Hianagi iza'o kumima hanimo'a, agra'a kumimofo knazana erino fritere hugahie hu'ne.

<sup>5</sup> Amasia'a Juda naga'enena Benzameni naga'enena kehige'za, kafu'zimimo'ma 20'a kafuma agatere'nea vahetmina, nagate nofite hu'za 300tauseni'a vahetami eri atru hu'naze. Hagi ana 300tauseni'a vahetmina kasefa vahetminki'za, hanko eri'za ha'ma huga vahetami

zamavare atru hutegeno, ana vahe kevurera 100'a vhahete kva vahe azeri onetino, 1 tauseni'a vahetema kegavahu kva vahe zamazeri otitere hu'ne. <sup>6</sup> Ana nehuno Amasia'a 100tauseni'a hanavenentake Israeli sondia vahetmina, kna'amo'a 3tauseni'a kilo hu'nea silva zagonuti azama hu'za ha'ma hanagura mizasege'za e'naze. <sup>7</sup> Hianagi Anumzamofo kasnampa ne'mo'a eno amanage huno Amasiana eme asami'ne, Kini ne'moka ama Israeli sondia vahe'ma e'naza vahera atrege'za hatera kavaririza oviho. Na'ankure Ra Anumzamo'a Israeli vahe'enena nomanino, nomanino, maka Efraemi vahe'enena omani'ne. <sup>8</sup> Kagra korora osu hankavetinka hara ome hugahananagi, Anumzamo'a katrehanigeno ha' vahekamo'za hara hugateregahaze. Na'ankure Anumzamo'a agrake vahera zamaza hige'za hara hu agatenerazageno, Agrake'za vahera zmatrege'za hapina evuneramize. <sup>9</sup> Higeno Amasia'a amanage huno Anumzamofo kasnampa nera asmi'ne, ana hu'neanagi 3tauseni'a kiloma hu'nea silva zagoma Israeli sondia vahe'ma mizama sezmante'noana inankna hugahie? Higeno Anumzamofo kasnampa ne'mo'a kenona hunteno amanage hu'ne, E'ima atre'nana zagoa Ra Anumzamo'a ru agatereno rama'a zago kamigahie. <sup>10</sup> Anage higeno Amasia'a Efraemiti'ma e'naza sondia vahetmina huzmanteg'eza nozmirega vu'naze. Ana higeno, Efraemi sondia vahe'mo'za Juda vahetaminkura tusi zamarimpa ahenezmante'za nozmirega vu'naze. <sup>11</sup> Hianagi Amasia'a korora osuno, sondia vahe'a zamavareno Hage Agupoe nehaza agupofi vuno 10tauseni'a Seiri sondia vahetmina ome zamahe fri'ne. <sup>12</sup> Ana nehu'za Juda sondia vahetmimo'za 10tauseni'a ha' vahetmina zamavuaga zamazerite'za e'za have zavateti eme zamarutefu atrazageno havere zamaheno ru tagnatagnu vazige'za fri'naze. <sup>13</sup> Ana'ma nehazageno'a, Amasia'ma huzmanteg'eza ha'ma osu nontega vaza sondia vahe'mo'za, Juda mopafima me'nea rankumatamina Sameria kumateti eri agafa huteno vuno Bet-Horoni kumate'ma uhanati'nea kumatamimp'i vahetamina, ha' eme huzmanteg'eza 3tauseni'a vahe zamahe nefri'za, tusi'a fenozmi eri'za vu'naze. <sup>14</sup> Hagi Amasiama Idomu vahe'ma ha'ma ome huzmanteno zamahe fri vagamareteno ne-eno'a, Seiri vahe anumzana erino eazamo agra'a anumza eri'neseno, kepri huno monora hunenteno, ofa kremna vunte'ne. <sup>15</sup> Ana'ma higeno'a, Ra Anumzamo'a Amasiana tusi arimpa ahenenteno, kasnampa ne'a huntegeno amanage huno ome asami'ne, nagafare vahe'ama kagri kazampinti'ma zamagu'ma ovazia havi anumzana nevaririnka, monora hunentane? <sup>16</sup> Hianagi kasnampa ne'mo'a ana nanekea huvaga ore'negeno, kini ne'mo'a amanage hu'ne, kagrica kini vahe'ma antahintahizmi ne' kazeri ot'i'hazo? Kahesugenka frigahananki kasnampa kea osunka taganenka vu. Higeno kasnampa ne'mo'a tagneana higeno anage hu'ne, Anumzamo'a kahe frinaku nehige'na nagra antahi'nena nehue. Na'ankure knare antahintahima kamuana ontahinka kagra amazana nehane.

<sup>17</sup> Ana hutegeno, Amasia'a antahintahima nemiza Juda kva vahetmina kehu tru huno keaga retro huteno, keagama erino vuno eno'ma hu vahera huntogeno Israeli kini ne' Jehoahasi nemofo Jehu negeho Joasintega vu'neana, hapi ogé agea hanu'e huno kea atrente'ne. <sup>18</sup> Anankema nentahino'a Israeli kini ne' Joasi'a amanage huno fronka kea Juda kini nera asami'ne, Lebanoni zafafinti ave'ave trazamo'a Lebanoni zafafi sida zafagura huno, nenamofona mofaka'a amigeno a' erinteno hu'ne. Hianagi Lebanoni zafafinti afi'zagamo eno ana ave'ave trazana eme repr'i'geno haviza hu'ne. <sup>19</sup> Hagi Amasiaga hunka Idomu vahe hara huzmagateroe hunka

kavufga ra hane. Hianagi kagra omenka, nonka'are manio. Hagi kagrama hazenkema eri fore'ma hanunka, kagrane Juda vahe'enena frigahaze.

<sup>20</sup> Hianagi Anumzamo'a zamavareno ha' vahe'mokizmi zamazampi ome ante'naku Amasiana antahintahi'a erigigeno anankea ontahi'nne. Na'ankure zamagra Idomu vahe anumzama monora hunente'za amage'ante'nazagu anara hu'ne. <sup>21</sup> E'ina higeno Israeli kini ne' Jehoasi'a marerino Juda vahe mopafi Bet-Semesi kumate, Juda kini ne' Amasia'ene ome tutagihu hu'na'e. <sup>22</sup> Hagi Israeli vahe'mo'za Juda vahera hara huzmagaterazage'za, koro fre'za kumazmirega vu'za e'za hu'naze. <sup>23</sup> Hagi Israeli kini ne' Jehoasi'a, Juda kini ne' Joasi nemofo Ahazia negeho Amasiana Betsemesi kumateti azeriteno, avreno Jerusalemi kumate vu'ne. Ana huteno Jehoasi'a Jerusalemi kuma vihua Efraemi kafanteti eri agafa huno, tapage huno vuno Konae nehaza kafante ome atre'neankino, 180'a mita tapage hu'ne. <sup>24</sup> Hagi Jehoasi'a maka goline silvane maka zantamima Anumzamofo mono nom-pima Obed-edomu'ma kegavama hu'neana e'nerino, kini ne'mofo nom-pintira maka fenone zagonena e'nerino, vahe'enena kina huzmanteno zamavareno Sameria vu'ne. <sup>25</sup> Hagi Israeli kini ne' Jehoahasi nemofo Joasi'ma fritegeno'a, Juda kini ne' Joasi nemofo Amasia'a 15ni'a kafu mani'ne. <sup>26</sup> Hagi mikazama Amasia'ma kinima mani'neno hu'nea zantamina, esetetima vuno atumpare'ma vu'neana mika Juda vahe kinine Israeli vahe kini vahetmi-mofo zmagenkema krenentea avontafepi krente'ne. <sup>27</sup> Hagi Amasia'ma Ra Anumzamofoma amagena humigeno, mago'a vahe'mo'za Jerusalemi kumapi oku'a kea retro hute'za ahe'za hazage'za, freno Lakisi kumate vige'za, anantega avaririza ome azeri'za ahe fri'naze. <sup>28</sup> Hagi avufga'a hosí afutamimofo agumpi erinte'za eri'za vu'za, Deviti rankumapi Jerusalemima agehe'mokizmima asente'naza matipi Juda vahe mopafi eme asente'naze.

## 26

### *Usia'ma Amasia noma erino Juda vahe kini mani'nea naneke*

<sup>1</sup> Hagi maka Juda vahe'mo'za Usia'a 16ni'a kafu hu'nege'za kinia azeri otizageno, nafa'amofo Amasia no erino kinia mani'ne. <sup>2</sup> Hagi nefá Amasia'ma agehe'mo'zama hu'nazaza huno'ma fritegeno'a, Usia'a Eloti kumara eri so'e higeno Juda vahe kuma me'ne. <sup>3</sup> Hagi Usia'a 16ni'a kafu hu'neno kinia efore hu'neankino 52'a kafu Jerusalemi kumatera kinia mani'ne. Hagi nerera'a Jerusalemi kumateti akino, agi'a Jekolia'e. <sup>4</sup> Hagi agra nefá Amasia'ma hu'neaza huno Ra Anumzamofo avurureratago avu'ava hu'ne. <sup>5</sup> Hagi Zekaria'a'ma mani'nea knafina Usia'a Anumzamofona knare huno amagera ante'ne. Na'ankure Zekaria'a Anumzamofoma koro'ma hunteno, agoraga'ama mani avu'avara rempi humi'ne. Hagi kini ne'mo'ma Ra Anumzamofoma kazigazi huno'ma amage'ma nentegeno'a, Ra Anumzamo aza higeno maka zama hiazamo'a knare'zanke hu'ne. <sup>6</sup> Hagi Usia'a vuno Filistia vahe'ene hara ome nehuno Gati kumate have keginama, Jabne kumate have keginama, Astodi kumate have keginanena taganavazino zamahe'ne. Ana huteno agra ran kumatami Astodi kumapina negino, Filistia vahe kumapinena ana zanke hu'ne. <sup>7</sup> Hagi Anumzamo'a aza higeno Filistia vahe'ene, Arapu vahe'ma, Gur-Ba'ali kumapima nemaniza vahera hara hunezmanteno, Meuni vahe'enena hara huzmante'ne. <sup>8</sup> Hagi Amoni vahe'mo'za takisi zagoa eri'za Usiana eme nemizageno, agenke'amo'a Isipi mopa atumparega vuno eno hu'ne. Na'ankure agra tusi hihamu'ané kini efore huno mani'ne. <sup>9</sup> Hagi Usia'a Jerusalemi kumapina Kona kafane nehaza

kafante'ene Agupo Kafane nehaza kafante'enema mani'neza vaheku'ma kegavama hu za'za nontamina kinte'ne. <sup>10</sup> Hagi Usia'a ka'ma kokampima manine'za kuma'ma kegavama hu nontmina negino, tinkeriramina kafintetere hu'ne. Na'ankure agra Sefela kokampine, agupofinena tusi'a bulimakao afu kevu ante'negu anara hu'ne. Ana nehuno tusi eri'za vahetami zamavarege'za hozafine, waini hozafinena eri'zana eri'naze. Na'ankure agra hozama ante'zanku avesi aesi nehia ne' mani'ne. <sup>11</sup> Hagi Usia'a himamutino ha'ma huga sondia vahe'tmina, refko huno kevure kevure zmanteg'eza hate vunaku retro hu'za mani'naze. Hagi sondia vahe'ma refko huno kevure kevure'ma zmante'neana, kini ne'mo'ma huntegeno'ma sondia vahete'ma kegavama hu'nea ne' Hanania'a huznantergeke Jeieli'ene Maseiake vugota huke ana eri'zana eri'na'e. <sup>12</sup> Hagi koro osu hankaventake sondia vahetmima mago mago naga nofipima ugotama huterema hu'naza vahe'ma mani'nazana 2tausen 600'a vahe mani'naze. <sup>13</sup> Hagi ana sondia vahe'mo'zama kegavama hu'nazana 307tausen 500'a sondia vahe hankavematinha'ma huno, kini ne'mofoma azama huga sondia vahetamina mani'naze. <sup>14</sup> Hagi ana sondia vahe'mo'zama ha'ma ome hanaza ha' zantamina, Usia'a mika sondia vahe'amofo hankoma, kevema, ainire kankri'ma, amimizare'ma antani hankoma, atima, kumi atifima anteno ahe havenena mika retro huzmantene. <sup>15</sup> Hagi Jerusalemi kumapina Usia'a higeno antahi'zama eri'naza zaza nonte'ma mani'neza kevene ranra haveraminema erirusi hu'za ahetre masinirami tro hu'naze. Ana hazageno, kini ne'mofoma agimo'a mareri'ne. Na'ankure Ra Anumzamo'a knare huno aza higeno tusi'a hihamu'ane kini ne' efore hu'ne.

### *Usia'ma kumi'ma higeno knazama ami'nea naneke*

<sup>16</sup> Hianagi Usia'ma tusi'a hanavenentake kinima efore'ma nehuno'a, agra avufga ra huno agra zante azeri haviza hu'ne. Na'ankure agra Ra Anumzana agra'a Anumzamofona ovaririno, osuga avu'ava huno Ra Anumzamofo mono nompi mnanentake zama kremna vu itarera ome kre mna vunaku ufre'ne. <sup>17</sup> Hianagi Anumzamofono pristi ne' Asaria'a, 80'a koro osu hankave pristi vahetami zamavarege'za amefira avaririza ana mono nompina ufre'naze. <sup>18</sup> Hagi ana pristi vahe'mo'za Usia avuga vu'za amanage ome hu'naze, Usiaga mnanentake zama Ra Anumzamofontegama kre mnama vu eri'zana kagri eri'zana omne'ne. Hagi pristi vahetmima Aronimpinti'ma fore'ma hu'naza vahe'mo'zage ama eri'zana erigahaze huno zameri ruotuge hu'ne. Hagi kumi hananki mono nompintira atrenka atiramio. Na'ankure Ra Anumzamo'a, ama ana zama hana zankura antahi onkamigahie. <sup>19</sup> Anagema hazageno'a, Usia'a kre mna vu zana azampi eri'neno kre mna vu'za nehireti tusi arimpagu hu'ne. Hagi Usia'ma ana pristi vahetaminku tusi rimpama nehegeno, Ra Anumzamofono nompi kre mnauv itama me'nere ana pristi vahetnimofo zamavuga ame huno fugo namuna kokovipi fore hu'ne. <sup>20</sup> Hagi ugagota pristi ne' Asaria'ene, mago'a pristi vahe'mo'zama kazama fugo namuma kokovitema fore'ma hige'za, ame hu'za avre'za mono nompintira atirami'naze. Ana'ma hazageno'a, agranena ame huno atirami'ne. Na'ankure Ra Anumzamo'a ana krireti hazenke amino azeri haviza hunaku, atregeno avufgarera efore hu'ne. <sup>21</sup> E'ina higeno Usia'a ana fugonkrine mani'neno ufri'ne. Hagi ana krifima mani'neno'a, agraku ru nompi mani'ne. Na'ankure Ra Anumzamofono nompintira ahe megat're'naze. Hagi nemofo Jotamu avrentageno kini ne'mofoma kuma'ene maka vahetaminena kegava hu'ne. <sup>22</sup> Hagi Usia'ma kinima

mani'neno hu'nea zantamina, Kasnampa ne' Amosi nemofo Aisaia ana mika nanekea avontafepina krente'ne. <sup>23</sup> Hagi Usia'ma frige'za, agra fugo kri eri'ne hu'za nehu'za, agehemokizmima asenezamantazafi matipima kini vahetmima asenezmantazafi asente'naze. Anama hutazageno'a, nemofo Jotamu agri nona erino kinia mani'ne.

## 27

### *Jotamu'ma Juda vahe kini mani'nea naneke*

<sup>1</sup> Hagi Jotamu'a 25'a kafu hu'neno Juda vahe kinia efore huno mani'neno, 16ni'a kafufi Jerusalemi kumatera kinia mani'ne. Hagi nerera'a Zadoki mofakino agi'a Jerusa'e. <sup>2</sup> Hagi Jotamu'a, ko'ma nefu Usia'ma hu'neaza huno Ra Anumzamofo avurera fatgo avu'ava hu'neanagi, Ra Anumzamofo mono nompina uofre'ne. Hianagi vea kevumo'za kumi avu'avara hu vava hu'za vu'naze. <sup>3</sup> Hagi mono nomofo kuma kafanku'ma Anagamu Kaziga Kafane hu'zama nehaza kafana Jotamu'a eri so'e nehuno, Ofeli agona kazigama me'nea kuma vihua rama'a eri'za ete erino eri so'e hu'ne. <sup>4</sup> Hagi Juda agona kokampina rama'a rankumatmi negino, zafama me'nea Juda agonaramimpina mani'ne'za ha' vaheku'ma kesaza zaza nontamine, bihuraminena tro-huntetere hu'ne. <sup>5</sup> Hagi Jotamu'a kinima mani'nea knafina Amoni vahera ha' ome huzmanteno hara huzmagatere'ne. Hagi e'ina'ma higeno'a, Amoni vahe'mo'za 3'a kafufi Jotamuna takisima ami'nazana, kna'amo'a 4 tani (3,400 kilo) hu'nea silva zagogi, 480 tani hu'nea witigi, 480 tani (1,820 kilo lita) hu'nea baligi hu'za mago mago kafurera eri'za eme amitere hu'naze. <sup>6</sup> E'ina hazageno, Jotamu'a hankvenentake kini efore hu'ne. Na'ankure agra maka zama hifina Ra Anumzana Anumzama'amofona amagera antefatgo hu'ne. <sup>7</sup> Hagi Jotamu'ma kinima mani'neno hu'nea zantmimofo agenkene, ha'ma hu'nea zamofo agenke'anena Israeli kini vahetamine Juda kini vahe'tmimofo zImagenkema krenentaza avontafepi krente'naze. <sup>8</sup> Hagi Jotamu'a 25'a kafu hu'neno, kinia efore huno 16ni'a kafu Jerusalemi kumatera kinia mani'ne. <sup>9</sup> Ana huteno Jotamu'ma frige'za, Deviti rankumapi ome asentazageno, nemofo Ahasi agri nona erino kinia mani'ne.

## 28

### *Ahasi'ma nefu noma erino Juda vahe kini efore hu'nea naneke*

<sup>1</sup> Hagi Ahasi'a 20'a kafu hu'neno, Juda vahe kinia efore huno Jerusalemi kumatera 16ni'a kafufi kinia mani'ne. Hagi agra negeho Deviti'ma fatgo avu'ava'ma hu'neaza huno Ra Anumzamofo avurera fatgo avu'avara osu'ne. <sup>2</sup> Hianagi agra ko'ma Israeli kini vahe'mo'zama hu'naza zamavu'zamava nezmavaririno, Bali havi anumzante'ma mono'ma hunte'naza zana ainireti kremramra huno amema'a tro hunte'ne. <sup>3</sup> Hagi ana mopafima mani'naza vahe'ma Ra Anumzamo'ma zamahekaspetroo Israeli vahe'ma mopazmima erizmi'nea vahetmimofo kefo hi'mnage avu'ava huno Ahasi'a Hinomu agupofi ofa nehuno, ne' mofavre naga'anena zamaheno tevefi Kresramana vu'ne. <sup>4</sup> Hagi Ahasi'a havi anumzama mono'ma hunentaza agona kumatmimpine, zafa agafafine, havi anumzamofontera ofa nehuno, mnantenake zana kremna vu'ne.

<sup>5</sup> E'ina higeno Ra Anumza agri Anumzamo'a Siria kini ne'mofo azampi Ahasina avrentegeno hara hu agatereno, rama'a vahekrerfa kina huzmanteno zamavareno Damaskasi kumate ome nezmantegeno, ana zanke

huno Ra Anumzamo'a Israeli kini ne'mofo azampi Ahasina avrentegeno hara hunteno, rama'a sondia vahe'a hazenkea zami'ne. <sup>6</sup> Hagi Israeli kini ne' Remalia nemofo Peka'a magoke knafina, 120tauseni'a koro osu hankavenentake Juda sondia vahetmina zamahe fri'ne. Na'ankure zama-gra Ra Anumzana zamagehe'i Anumzamofona zamefi humi'nazagu anara hu'ne. <sup>7</sup> Hagi kini ne'mofona mofavre'a Maseiama, kini ne'mofo kuma'ma kegavama hu'nea sondia ne' Azrika'ma, kini ne'mofoma eme amefi'ma hu'neno'ma vahe'ma kegavama nehia ne' Elkananena, maka magoke kna zupage Efraemi kumateti harafa sondia ne' Zikri'a zamahe vagare'ne. <sup>8</sup> Hagi Israeli sondia vahe'mo'za Juda vhahera zamafuhe'i a'nene, ne' mo-favreramine, mofa'nezminena 200tauseni'a zamavare'za, ha'pinti'ma eri'za zantamina tusi zantamine eri'za Sameria rankumate vu'naze.

<sup>9</sup> Hianagi Ra Anumzamofo kasnampa ne' Odeti'a ana Israeli sondia vahetmima hateti'ma Sameria kumate'ma neaza vahetmina amanage huno ome zamasami'ne, Keho, Ra Anumzana tamagehe'i Anumzamo'a Juda vahekura tusi arimpa ahenezmanteno, zamavare tamazampina antegeta zamaheeta hara huzmagateraze. Hianagi tamasunkura osu kefo'za huta zamahazageno ana zamo'a Anumzamofo avure vigeno keno antahino hu'ne. <sup>10</sup> Ana huteta menina Juda kumate'ma nemaniza vene'nene a'nanene Jerusalemi kumate vene'nene a'nanena kazokzo vahe zamazeri tro hukanu tamagesa nentahize. Hianagi tamagra'enena Ra Anumzana tamagri Anumzamofo avurera kumi hu'naze. <sup>11</sup> Hagi menia ke'n'i'a antahita kinama huzmanteta zamavaretama aza tamafu tamagnana ete huzmantenke'za viho. Na'ankure menina Ra Anumzamo'a e'inahu tamavutamavama haza zankura tusi arimpa aheramante'ne. <sup>12</sup> Anankema nehigeno'a, Efraemi kva vahetmima, Jehonani nemofo Asaria'ma, Mesilemoti nemofo Berekaia'ma, Salumu nemofo Jehizkaia'ma, Hadlai nemofo Amasa'ma hu'za kasnampa ne'mofo kerera mago zamarimpa hute'za oti'za,

<sup>13</sup> ana sondia vahetminkura amanage hu'naze, tamagra kinama huzmanteta zmavreta aza vahetmina zamavareta amarera omegahaze. Na'ankure Ra Anumzamofo avurera kumitimo'a ko marerino ra hu'neanki, mago'ene erinte agofetu huta kumira nehazageno, Israeli vahe'mota Ra Anumzamo'a tusi arimpa ahenerante. <sup>14</sup> Anage hazage'za ana sondia vahe'mo'za kinama huzmant'eza zamavare'za aza vahetmina, ana kva vahetmimofo zamavugane, vahe'mokizmi zamavuga eme nezmatre'za, hapinti'ma eri'za aza zantaminena maka eme ante'naze. <sup>15</sup> Hagi sondia vahe'mo'za ha'pinti'ma eri'za e'naza kukanaramine, zamaga nonena ana kva vahetmimo'za e'za emeri'za zamavufaga zamavapama zamavare'za e'naza kina vahetmina zamizage'za kukena nehazageno, nezane tinena zamizage'za nenazage'za zamavufagama tga hunerera masavenna frezmante'naze. Ana hute'za kama vuga'ma osaza vahetmina, donki agumpi zamavarenente'za amne vahe'enena zamavare'za zamafuh'e'zama mani'narega tofenke kumapi Jeriko kumate ome zamatrete'za, ete Sameria kumate e'naze.

### *Ahasia'a Asiria vahe'ene eri mago hu'nea naneke*

<sup>16</sup> Hagi ana knafina kini ne' Ahasi'a Asiria kini netega eme aza hinogu kea atre'ne. <sup>17</sup> Hagi Edomu vahe'mo'za ete mago'ane Juda vhahera hara eme huzmant'eza hara huzmagatere'za kina huzmant'eza zamavare'za vu'naze. <sup>18</sup> Hagi Filistia vahe'mo'za Juda agonaramimofo agafine, Negevi kazigama me'nea kumatmina aroho eme zamare'za, Bet-semesi kumapi vahetamine, Ajalonni kumapi vahetamine, Gederoti kumapi vahetamine,

Soko kumapima nemaniza vahe'ene tavaonte'ma megagi'nea kumatmimpi vahetamine, Timna kuma'ma, tavaonte'ma megagi'nea kumatmimpi vahetamine, Gimzo kuma'ma, tavaonte'ma megagi'nea kumapi vahetamine maka ha eme huzmantza' zamahe'za hanare'za, ana kumatmimpi mani'naze.<sup>19</sup> Kini ne' Ahasi'ma hia avu'avaku huno Ra Anumzamo'a Juda vahera zamazeri anterami'ne. Na'ankure agra hige'za Juda vahe'mo'za kefo kumi avu'avara nehu'za, Ra Anumzamofona zamagu'aretira huza amagera onte'za zamefi humi'naze.<sup>20</sup> E'ina hu'negu Asiria kini ne' Tiglat-Pilesa'a eme aza hugaragi hara eme hunte'ne.<sup>21</sup> Ahasi'a agra nompinti'ene, eri'za vahe'aramimofo nompinti'ene, Ra Anumzamofo mono nompintira zago'amo'ma marerinea zantamina erino Asiria kini nera takisia eme ami'neanagi, ana zama hia zamo'aza osu'ne.

<sup>22</sup> Hagi Ahasi'ma ana hazenke knafima mani'neno'a, Anumzamofona antahinomino mago'anem kefo avu'avara nehuno, Ra Anumzamofonera mani fatgo osu'ne.<sup>23</sup> Hagi Ahasi'a huno, Damaskasi kini vahetmima zamazama hige'za ha'ma hunagatere'naza havi anumzantaminte ofa kresramana vanuge'za nagrira naiza hugahaze, nehuno ana havi anumzante ofa kresramana vu'ne. Hianagi agra zante hazenke avreno egeno, mika Israeli vahe'mo'zanena hazenkef ufre'naze.<sup>24</sup> Hagi Ahasi'a Anumzamofo mono nompinti kavo zuomparamina erino emeri atru huteno, takoraku huntrenro Ra Anumzamofo mono no kafana ahe ankaninereno, Jerusalemi kumapina maka kaziga havi anumzante'ma Kresramanama vu ita tro hu'ne.<sup>25</sup> Hagi Juda mopafima me'nea ranra kumatamimpina havi anumzantaminte'ma ofama hanaza kumatami'ma troma huntetere'ma hiazamo higeno, Ra Anumzana agehe'i Anumzamo'a tusi arimpa ahente'ne.<sup>26</sup> Hagi Ahasi'ma kinima agafa huno mani'nereti'ma vuno ome vagare'nea knafima maka zama hu'nea zamofo agenkea, mika Juda kini vahe'ene, Israeli kini vahetmimofo zamagenkema krenentaza avontafepi krente'naze.<sup>27</sup> Hagi Ahasi'a frige'za Jerusalemi rankumapi asente'naze. Na'ankure avufga'a eri'za kini vahe'tmimofo matipina ome ase onte'naze. Hagi anama hutegen'o'a, nemofo Hezekai'a agri nona erino kinia mani'ne.

## 29

### *Hezekai'ama Juda vahe kini mani'nea naneke*

<sup>1</sup> Hagi Hezekaiia 25'a kafu hu'neno Juda vahe kini efore huno 29ni'a kafufi Jerusalemi kumatera kinia mani'ne. Hagi nerera'a Zekaraia mofakino agi'a Abija'e.<sup>2</sup> Hagi agra Ra Anumzamofo avurera negeho Deviti'ma hu'neaza huno fatgo avu'ava hu'ne.

### *Hezeki'ama mono no azeri agru hu'nea naneke*

<sup>3</sup> Hagi Hezekaima kinima agafa huno nemanino'a ese kafumofo ese ikanteria Ra Anumzamofo mono nonkafantamima ahenkanima re'nazana anagino eri hagro nehuno eri so'e hu'ne.<sup>4</sup> Hagi pristi vahe'ene Liva'e vahe'enena mono kumamofona zage hanati kaziga kehige'za eme atru hazageno,<sup>5</sup> amanage huno zamasmi'ne, Nagrama hanua kea Liva'e nagamota kama antahiito, menina tamagra'a tamazeri agru nehuta, Ra Anumzana tamagehe'i Anumzamofo mono nona azeri agru nehuta, ana mono nompima agru osu zantmima me'neana eri atreho.<sup>6</sup> Hagi tagehe'za Ra Anumzana tagri Anumzamofona netreza, amagera onte kefo avu'ava hu'naze. Zamagra Ra Anumzamofone, Agrama nemania mono noman'anena

zamagena humi'naze. <sup>7</sup> Hagi ra mono nonkafana eriginente'za, zotare'ma tavima nereana husu hunente'za, mnanentake zane kre fananehu ofanena Israeli vahe Anumzamofo mono nompina kresramana ovu'naze. <sup>8</sup> E'ina hazageno Juda vahe'ene Jerusalemi kumate vahe'enena Ra Anumzamo'a tusi arimpa ahenezmanteno, zamazeri haviza hige'za vahe'mo'za nege'za kizazokago kema huzamante'naza zana tamagra tamavufintira ke'naze. <sup>9</sup> E'ina agafare tafahe'ina bainati kazintetira zamahe nefri'za, ne mofavrette, mofanetine, a'netinena kina huzmante'za zamavare'za vu'naze. <sup>10</sup> Hagi nagra menina nagu'reti hu'na Ra Anumzana Israeli vahe Anumzane eri hagerafi huvempage huankino tusi rimpama ahenerantea zamo'a rurava hegahie. <sup>11</sup> E'ina hu'negu namoheta erizantmia otreho, na'ankure Ra Anumzamo'a agri avugama eri'zama enerita ofama hanaza eri'za vhahera ko tamagri huhampri tamante'ne. <sup>12</sup> Anagema hige'za ot'i'za ana eri'zama eri'naza Livae vhahera, Kohati nagapinti Amasai nemofo Mahati'ma, Azaraia nemofo Joeli'e. Hagi Merari nagapintira, Abdi nemofo Kisi'ma, Jehaleleli nemofo Azaraia'e. Hagi Gesoni nagapintira, Zima nemofo Joa'ma, Joa nemofo Edeni'e. <sup>13</sup> Hagi Elisafani ne' mofavrerarena Simri'ene Jeuelike. Hagi Asapu ne' mofavrerarena Zekaria'e Matanaiake. <sup>14</sup> Hagi Hemani nagapintira, Jahiel'i'ene Simeike. Hagi Jedutuni nagapintira Semaia'ene Uzielike. <sup>15</sup> Hagi ana Livae vahe'mo'za zamafuhe'ina zamagna kehu atru hu'za zamazeri agru hute'za, kini ne'mo'ma Ra Anumzamofo kasegema avaririno zamasmia kante ante'za mono nona eri agru hu'naze. <sup>16</sup> Hagi ana pristi vahe'mo'za Ra Anumzamofo mono nOMPI mareri'za maka pehenama hu'nea zantamina kaza zantamina eri fegi'a mono kumapi atre'naze. Ana hutazage'za anantetira Livae vahe'mo'za eri'za Kidroni Agupofi vu'naze. <sup>17</sup> Hagi ana vahetmimo'za ese ikamofona ese knazupa eri'zana agafa hu'za eri'za nevazageno 8ti knazupa Ra Anumzamofo mono nompima ufre kafanteria ehanati'naze. Hagi mago 8'a knafi mono noma eri agruhu eri'zana eri'za vu'za ese ikamofona 16ni knazupa ana eri'zana eri vagare'naze. <sup>18</sup> Ana hute'za vu'za Kini ne' Hezekaiana amanage hu'za ome asmi'naze, Hago tagra ana maka Ra Anumzamofo mono nona eri agruhu vagareteta, kresra mnama vu itane maka anante'ma eri'zama e'neriza zantamine, ruotge bretima ante itane, anante'ma eri'zama eri zantaminena maka eri agru hvagare'none. <sup>19</sup> Hagi kini ne' Ahasi'ma Ra Anumzamofoma amefi'ma hunemino mono noma'ama eri'negino, maka eri'za zantmima ana nompinti'ma eritrerema hu'nea zantamina eritru huta eri ante fatgo nehuta eri agru huteta Ra Anumzamofonte'ma kre sramnavu itamofo avuga antonkeno me'ne.

### *Hezekai'a mono nompima mono'ma hu avu'avaza ete eri agafa hu'nea naneke*

<sup>20</sup> Anagema hazageno'a, Hezekai'a anante knazupa nanterame otino rankumapi eri'za vahe'aramina kehige'za atru hazageno, Ra Anumzamofo mono nontega zamavareno mareri'ne. <sup>21</sup> Ana'ma higeno'a ana vahe'mo'za 7ni'a bulimakaonki, 7ni'a ve sipisipi afutminki, 7ni'a ve sipisipi afu anentatminki, 7ni'a meme afutminki hu'za, kini ne'mo'ma kegavama hu'nea mopare'ene, mono nonte'ene, Juda vahe'tenema kumi ofama hu'zana avre'za vu'naze. Ana hazageno kini ne' Hezekai'a Aronimpinti'ma fore'ma hu'naza pristi vahekura huno, Ra Anumzamofo kresramana vu itare afutamina aheta kresramana viho hu'ne. <sup>22</sup> Hige'za pristi vahe'mo'za ana bulimakao afutamina ahe'za korama'a tagi'za kresramana vu itare rutritri

hunte'naze. Ana nehu'za ve sipisipi afutamina ahe'za korama'a tagi'za kresramana vu itare rutritri hunte'naze. Hagi anantero sipisipi afu anentatmina ahe'za korama'a tagi'za kresramana vu itare rutritri hunte'naze.

<sup>23</sup> Ana hute'za kumite'ma ofama hu meme afutamina kini ne'mofo avugane maka vahetmimofo zmagugane zamavare'za azage'za, kini ne'ene maka vahem'o'zarena zamazana ana meme afutami agofetu ante'naze. <sup>24</sup> Ana hutazageno, ana pristi vahem'o'za ana meme afutamina aheza korama'a tagiza maka Israeli vahem'ofo kumi nona huza Kresramana vu itare rutritri hu'naze. Na'ankure kini ne'mo'a huno, Maka Israeli vahete kre fanane hu ofane, kumite ofanena hiho huno huzmantene'. <sup>25</sup> Ana nehuno kini ne' Hezekai'a Livae nagara zamazeri otitere hige'za Ra Anumzamofo mono nompi nase'nasepane, hapu zavenane, lairiema nehaza zavenane eri'za otihoma hire otitere hu'naze. Na'ankure e'i ana'ma hu'nazana Devitine, Anumzamofo kasnampa ne' Gatine, kasnampa ne' Neteninena Ra Anumzamo'ma zamasamige'za hu'naza kante anteno zamazeri otitere hu'naze. <sup>26</sup> Hagi ko'ma Deviti'ma ruzahu ruzahu zavenaramima tro'ma hunte'neana Livae vahem'o'za eri'neza retrotra hu'za otitere hu'naze. Hagi pristi vahem'o'zarena ufena eri'za otitere hu'naze. <sup>27</sup> Ana hutazageno Hezekai'a Kresramana vu itare Kresramana viho hige'za, tevefima kre fananehu ofama nehazageno'a, Ra Anumzamofo agima erisgama hu zagamera agafa nehazageno, ufena nerazageno, Israeli vahem'o'za kini ne' Deviti'ma tro'ma hu'nea zavenaramima eri'naza vahetmimo'zarena ana zavenaramina nehe'za zagamera hu'naze. <sup>28</sup> Ana'ma nehazageno'a maka vahem'o'za Ra Anumzamofona monora hunentazageno, zagame'ma nehaza vahem'o'za zagamera nehazageno, ufema neraza vahem'o'za ufena re'naze. Hagi e'ina hu'za zagamera nehu'za monora nehazageno kre fanane hu' ofama kre'naza ofamo'a tefanane hu'naze. <sup>29</sup> Hagi ana ofamo'ma tefananema hutege'za, kini ne' Hezekai'a'ene mika anampima mani'naza zamare'na re'za Ra Anumzamofona monora hunte'naze. <sup>30</sup> Hagi kini ne' Hezekai'a'ene vugota eri'za vahem'o'zarena Livae vahem'o'zarena zamasmiza, Devitine kasnampa ne' Asapukizni nehuta, Ra Anumzamofo agia erisga hiho hu'za zamasmiznaze. Anage hazage'za musezampinti nehu'za kepri hu'za Ra Anumzamofona monora hunte'naze. <sup>31</sup> Ana hutazageno, Hezekai'a'anante huama huno, Menina Ra Anumzamofonte tamagra'a tamazeri ruotge hazanki, Kresramanama vu ofane, Ra Anumzamofoma susu hunte ofenena erita Ra Anumzamofo nompi echo. Anage hige'za ana vahetmimo'za kre fanane hu' ofama susu'ma hunte ofanena eriza neazageno, izano agu'amo'ma musema himo'a agra avesite musema huno'ma hu ofa erino etere hu'naze. <sup>32</sup> Anama hazage'za Ra Anumzamofontegama tevefima kre fanane hu' ofa hu'zama vahem'o'zama eri'za e'nazana, 70'a ve bulimakao afutminki, 100'a ve sipisipiafutminki, 200'a sipisipi anentataminki, hu'za avre'za e'naze. <sup>33</sup> Hagi ana nehu'za erinte ruotge'ma hu'naza ofama eri'zama e'nazana, 600'a bulimakao afutminki, 3tauseni'a sipisipi afutami avre'za e'naze. <sup>34</sup> Hianagi ana mika afutmima aheno kararuvazi pristi vahera rama'a omani'naze. E'ina hu'negu zamafuhe'za Livae naga'mo'za zamaza hu'za ana eri'zana enerizage'za rama'a pristi vahem'o'za zamagra'a zamazeri agru hute'za eri'za zamirera e'za eme zamaza hu'za ana eri'zana eri vagare'naze. Na'ankure Livae vahem'o'za ana eri'zama eri'nazana zamagu'areti hu'za pristi vahera zamagatere'za zamagra'a zamazeri agrua hu'naze. <sup>35</sup> Hagi rama'a kre fanane hu ofama hazafina, arimpa fruhu ofama haza bulimakao afumofo afova'ane, waini ti ofanena hu'naze. E'ina

hazageno Ra Anumzamofo mono nompima mono'ma hu'zana agafa hu'ne.  
<sup>36</sup> Hagi Anumzamo'ma zamaza hige'za ame hu'za maka zama huvagama raza zankura Hezekai'aene mika vahe'mo'zanena tusi muse hu'naze.

## 30

*Ozmahe zamagatere'nea knare antahimi knamofo musenkasema Hezekai'a hu'nea naneke*

<sup>1</sup> Ra Anumzamofo nonte Jerusalemi e'za, Ra Anumzana Israeli vahe' Anumzamo'ma Ozmahe Zamagatere'nea zanku'eme antahimiza musenkase hihogu, maka Israeli vahetegane, Juda vahetegama kema erino vuno enoma hu vahera Hezekai'a huzmanteg'eza nevazageno, ana zanke huno Efraemi nagategane Manase nagateganena avona kretregeno vu'ne. <sup>2</sup> Hagi kini ne'ene, eri'za vahe'aramine, maka Jerusalemi kumapima nemiza vahe'mo'zanena, namba 2 ikante eme atru hu'za ne'zana kre'za nene'za Anumzamo'ma Ozmahe Zamagatere'nea zanku'ma antahiminaku antahintahia retroma haza zamo'a knare hu'ne. <sup>3</sup> Ana kna fatgorera ne'zana kre'za nene'za musena osu'naze. Na'ankure ana knarera rama'a pristi vahe'mo'za zamazeri agrua osazageno, Jerusalemi kumapina vahera eme atrua osu'naze. <sup>4</sup> Hagi Ozmahe Zamagatere'nea zanku'ma antahimiza ne'zama kre'za nene'za antahimi antahintahima retro'ma hazazamo'a, kini ne'mofo avure'ene maka vahetmimofo zamavurera fatgo hu'ne. <sup>5</sup> Ana hige'za mika Israeli mopafima sauti kaziga Bessebat'i'ma marerino noti kaziga Dani moparegama mani'naza vahetmintega kea atre'za, maka vahera Jerusalemi kumapi eme atru huta Ra Anumzana Israeli vahe Anumzamo'ma Ozmahe Zamagatere'nea zanku'ma antahimiza kre'za ne-naza ne'za kreta neneta antahimiho hu'za hu'naze. Na'ankure kasegefima krente'nea kante ante'za ana maka vahe'mo'za ana kna kegava hu'za ovariri'nazanki, osi'a vahe'mo'za kegava hu'za avariri'naze. <sup>6</sup> E'ina hu'negu kini ne'mo'a maka Israeli vahetegane, Juda vaheteganena amanage huno avona kreteno zamige'za avoma erino vuno eno'ma hu vahe'mo'za eri'za vu'naze. Maka Israeli vahe'mota ete rukrahe huta Ra Anumzana Abramune, Aisakine, Israeli vahe Anumzamofonte enkeno, osi'a nagama Siria kini ne'mo'ma tamavararigetama fre'naza nagara Ra Anumzamo'a rukrahe huno eno tamagrane emanigahie. <sup>7</sup> Hagi kote'ma tamagehe'zane tamafuhe'zanema Ra Anumzana tamagehe'i Anumzamofoma zamefi'ma humiza azeri arimpama hazageno, zamahe frigetama ke'nazazana osiho. <sup>8</sup> Tamagehe'zama hu'naza zana huta Anumzamofo kegura tamagu'a azeri hankave otita, Ra Anumzamofo agoraga nemanita, eri ruotge'ma hu'nea mono noma'afi eta Ra Anumzana tamagri Anumzamofo monora eme huntenkeno arimpama aheneramantea zamo'a ome amne hino. <sup>9</sup> Na'ankure Ra Anumzana tamagri Anumzamo'a rimpa fru huno asunku Anumzankino tamagrama ete rukrahe'ma huta Agritegama esageno'a avresra huramanteno amagena huoramigahie. <sup>10</sup> Higeno ana avona, avoma erino vuno eno hu vahe'mo'za eri'za kumate kumate Efraemi mopafine, Manase mopafine, Zebuluni mopafi vahetmina zamiza vu'nazanagi, ana kegura hunte'za kiza zokago ke hu'naze. <sup>11</sup> Hianagi Asa nagapinti'ene Manase nagapinti'ene Zebuluni nagapinti'enena osi'a naga'mo'za anankema nentahi'za zmavufga anteramiza, Jerusalemi kumatera e'naze. <sup>12</sup> Ana'ma nehazageno'a, Anumzamo'a Juda naga'mofonte azana anteno zamagua eri mago hige'za Ra Anumzamo'ma kini ne'ene eri'za vahe'araminem a zamasamig'eza ome zamasmiza zana amage ante'za ana zana hu'naze.

*Ra Anumzamo'ma Ozmahe Zamagatere'nea kna ete agafa hu'za kegava hu'naza naneke*

<sup>13</sup> Hagi namba 2 ikantera tusi'a vahe'mo'za Zo-ore Breti kre'za nene'za musenkase hu'naku Jerusalemi kumatera eme atru hu'naze. <sup>14</sup> Hagi mika havi anumzante'ma Kresramana vu itaramine, mika mnantentake'za kre mnama vu itaramima Jerusalemi kumapima me'neana eri'za vu'za Kidroni agupofi ome atre'naze. <sup>15</sup> Hagi namba 2 ikamofo 14ni zupa Ozmahe Zamagatere'nea zanku'ma antahimi'za, sipisipi anentatamina ahe'naze. Ana'ma hazage'za pristi vahe'mo'za zamagazegu nehu'za zamagra'a zamazeri ruotge hute'za, kresramanama vu ofa eri'za Ra Anumzamofo nompi vu'naze. <sup>16</sup> Hagi Anumzamofo eri'za vahe Mosese kasegefima me'nea kante ante'za, pristi vahetamine Livae vahe'mo'za eri'za kankamuzmire otitere hu'ne'za, Livae vahe'mo'za korana eri'za pristi vahe'ma eme zamizage'za eri'za kre sramnavu itarera ru tritri hu'naze. <sup>17</sup> Na'ankure ana vahe ke-vufina zamazeri agruma osu vahetmina rama'a mani'naze. E'ina hu'negu Livae vahe'mo'za Ozmahe Zmagatere'nea zanku'ma antahimiza nehaza sipisipi anentatamina mago mago vahe'mofo amente amente ahe'za zamazeri agru hu'naze. Na'ankure ana maka vahe'mo'za agrua osu'nazankiza Ra Anumzamofontera sipisipi afu anentamina ohe'naze. <sup>18</sup> Hagi Efraemi nagapinti'enе, Manase nagapinti'enе Isaka nagapinti'enе Zebuluni nagapinti'enema e'naza vahera, kini ne' Hezekai'a nunamuna huzmantetege'za, kasegea amagera ante'za zamagra'a zamazeri agru osu'nazanagi, Ozamahe Zmagatere'nea zanku'ma antahimi'za nenaza ne'zana amne ne'naze. Na'ankure Hezekai'a amanage huno nunamuna hu'ne, Knare Ra Anumzamoka magoke magoke vahe'mofo kumira apasezmanto. <sup>19</sup> Hagi mono nomofo kasegema amage antezamo azeri agru osugahianagi, iz'a'o, Anumzamofonte'ma agu'ama anteno Ra Anumzana agehe'i Anumzamofoma amagema antesia vahera kumi'a apasento. <sup>20</sup> Anage higeno Ra Anumzamo'a Hezekai'a nunamuna antahimino vahetmina zamazeri knare nehuno, kumizmia atrezmantne. <sup>21</sup> Hagi Israeli vahetmina Jerusalemi kumate'ma atruma hu'naza vahe'mo'za 7ni'a knafi Zo-ore Bretima nenaza knaguma antahimi ne'zana kre'za nene'za, musena nehazageno Livae vahe'ene, pristi vahe'mo'za maka kna zavenaramina nehe'za zagamera hu'za Ra Anumzamofona maka hanavezmireti hu'za agi'a erisga hu'naze. <sup>22</sup> Hezekai'a knare antahintahima ante'za Ra Anumzamofo eri'zama eri'za Livae vahetmina zamazeri hankavetike zamasami'nе. Anagema hutege'za Israeli vahe'mo'za 7ni'a knama huhampri'naza knafi ne'zana kre'za nene'za zamarimpa fru ofa nehu'za, Ra Anumzana zamagehe'i Anumzamofona susu hunte'naze.

<sup>23</sup> Ana hute'za maka vahe'mo'za mago zamarimpa hu'za mago'ene 7ni'a zagegna erinte'za, Ozmahe Zmagatere'nea zankura ne'zana kre'za nene'za antahimi'naze. E'ina hige'za 7ni'a zagegnafi ne'zana kre'za nene'za musenkase hu'naze. <sup>24</sup> Hagi kini ne' Hezekai'a Juda vahetmina, ofama hu'zana 1tauseni'a bulimakao afutminki, 7tauseni'a sipisipi afutminki huno zamigeno, kini ne'mofo eri'zama e'neriza kva vahe'mo'za 1tauseni'a bulimakao afutminki, 10 tauseni'a sipisipi afutminki hu'za zami'naze. Hagi ram'a pristi vahe'mo'za zamagra'a zamazeri agrua Anumzamofo avurera hu'naze. <sup>25</sup> Hagi maka Juda vahe'mo'zane, maka vahetmima Israeli mopafinti'ma e'naza vahe'mo'zane, pristi vahe'mo'zane, Livae vahe'mo'zane, maka ruregati'ma Juda mopafima enemaniza vahe'mo'zanena musenkase hu'naze. <sup>26</sup> E'ina higeno Jerusalemi kumapina

vahe'mo'za tusi muse hu'naze. Na'ankure Israeli kini ne' Deviti nemofo Solomoni knareti'ma eno ana knare'ma ehanati'neana, e'inahu'zana Jerusalemi kumapina fore osu'nea knaza fore hu'ne. <sup>27</sup> Hagi anante pristi vahe'mo'zane Livae vahe'mo'zanena oti'za ana vahetmina asomu ke huzmantageno, Anumzamo'a nunamu zamia antahi'ne. Na'ankure nunamu zamimo'a monafinka Ra Anumzamo'ma nemania ruotge kumapi mareri'ne.

## 31

### *Hezekai'a mono'ma hu avu'avaza eri kasefa hu'nea naneke*

<sup>1</sup> Hagi ana maka musenkase'zamo'ma vagamaregeno'a, Israeli vahe'ma anampima mani'naza vahe'mo'za atirami'za Juda rankumatamimpi vu'za havi anumzante'ma mono'ma hunentaza zafaramine, Asera havi anumzamofo amema'ama zafare'ma antre'za tro hunte'neza mono'ma hunentaza zafaraminena maka Juda mopafine, Benzameni mopafine, Efraemi mopafine, Manase mopafima, havi anumzama mono'ma hunentaza itane, agonafima havi anumzantema mono'ma hunentaza kumatmima me'neana ana maka taganavazi atre'naze. Ana hute'za maka Israeli vahe'mo'za ete nozmima me'nea rankuna zamirega vu'naze.

<sup>2</sup> Hagi pristi vahe'mo'zane Livae vahe'mo'zama Ra Anumzamofo mono nonkumapima ufre kafaraminte'ma eri'zama eri'nagura, Hesekai'a re-fko huno Kresramanama vu eri'zane, arimpa fru ofama hu eri'zane, kafante'ma manine'za susu hu'za zagame'ma hu eri'zana kevure zamitere hu'ne. <sup>3</sup> Hagi kinagane nanterane, maka mani fru hu Sabati knare'enе, kasefa ikante'enе, Ra Anumzamofo kasegefima huno ne'zama kreta neneta muse hugahazema hu'nea knare'enema Kresramanama vu zana kini ne' Hesekai'a agra'a afu keginafintira zami'ne. <sup>4</sup> Hagi kini ne'mo'a Jerusalemi kumapima nemaniza vahetminkura huno, pristi vahe'ene Livae vahe'enena, ana ne'zana zamigahazema hu'nea kante anteta ne'zana eme zaminke'za nene'za, Ra Anumzamofo kasegefima hu'neaza hu'za zamagu'areti hu'za eri'zana eriho. <sup>5</sup> Hagi Hesekaia'ma hia nanekema Israeli vahe'mo'zama nentahi'za ese ne'zama hozafima nenama hu'nea ne'zana tusi ne'za eri'za e'naze. <sup>6</sup> Hagi Israeli vahetamine Juda vahetamimo'zama Juda rankumatamimpima nemaniza vahe'mo'za bulimakao afuzmine, sиписи afuzmine hampriza nevazageno, 10nima hia bulimakao afutamine sipisipi afutaminena avre'za e'naze. Ana nehu'za Ra Anumzana zamagri Anumzamofonte'ma eri ruotgema hu'nea zantamina hampriza nevazageno 10nima hia zantamina eri'za eme kevure kevure antazageno agonagna huno hihi huno mareri'ne. <sup>7</sup> Hagi namba 3 ikante agafa hu'za ana ne'zana eri atru hu'za nevazageno, 7ni ikante ome vagare'naze. <sup>8</sup> Ana'ma ne-hazageno Hesekai'ene vugota kva vahe'mo'zanema eme kazama ana neza keviramimo'ma agonagna'ma huno mareri'nege'za, Ra Anumzamofona agia erisga nehu'za, asomu kea Israeli vahetmina huzmante'naze. <sup>9</sup> Ana huteno Hesekai'a pristi vahetamine Livae vahetaminena ana ne'za keviraminkura zamagenoka huno, Igati ama ne'za keviramina eri atru hu'naze? <sup>10</sup> Higeno Zadoku nagapinti ugagota pristi ne' Azaraia'a kenona huzmanteno ne'zama eri'za e'naza knareti'ma eno amare'ma ehanati'neana, nezantimo'a hakare higeta nezonkeno rama'a ne'zamo'a amne aviteno me'ne. Na'ankure Ra Anumzamo'a tusi'a zampi Agra'a vahetmina asomura huzmante huno hu'ne. <sup>11</sup> Hagi Hesekai'a kave'ma ante nontamina, Ra Anumzamofo nompi retro hiho hige'za, zamagra retro hunte'naze.

**12** Ana hige'za vahe'mo'za kentahiza ne'zana hamprizageno 10nima hia ne'za kevuramine, eri ruotgema hu'naza ofaraminenena eri'za ana nompipi eme ante'naze. Hagi ana maka zantmintera Livae nagapinti ne' Konani vugota huno kva mani'neno kegava higeno, nefu Semei agri amefi'a kva mani'ne. **13** Hagi kini ne' Hesekai'ene Anumzamofo mono nonte kva ne' Azariake'ma huzmante'naza kante ante'za Konanine nefu, Simeinena zanaza hu'zama ana nompima eri'zama eri'naza vahetmina, Jehiel'i'ma, Azazia'ma, Nahati'ma, Asaheli'ma, Jerimoti'ma, Jozabati'ma, Elieli'ma, Is-makia'ma, Mahati'ma, Benaia'e. **14** Hagi Livae ne' Imna nemofo Kore'a, zage hanati kaziga kuma kafante kva hu'neno vahe'mo'zama zamagra'a zama vesite'ma Anumzamofonte'ma eri'za aza ofane, Ra Anumzamofoma eme ami'za zantamine, eri ruotge hu'neza eri'za aza ofanena kegava hu'neno refko huno pristi vahe'ene Livae vahera zami'ne. **15** Hagi Edeni'ma, Miniamini'ma, Jesua'ma, Semaia'ma, Amaraia'ma, Sekeniaki hu'za Korena aza hu'za ana ofaramima eri'zama azana pristi vahe'ma nemaniza ran kumatamimpima nemaniza zamafuhe'ina, ra vahetetima vuno mofavrere'ma vu'neana, ana ne'zantamina refko hu'za zamente zmiente zamitere hu'naze. **16** Ra Anumzamofo nompima eri'zama zamige'za eri'zama eneri'za vahera ana zantamina refko hu'za maka 3'a kafuma hu'nea ne' mofavreram-intetima mareri anagamuma atre'nea venenema zamagima avontafepima krente'nea vahetmina ana ne'zana refko hu'za zamitere hu'naze. **17** Hagi pristi vahetmimofo zamagima kre'nazana, nagate nagate negre'za 20'a kafuma agatere'naza Livae vahetmimofo zamagia eri'zama zamiterema hu'nere zamagi'a krentetere hu'ne. **18** Hagi ana kva vahe'mo'za ne'one mofavrezmine, a'nezmine, ne' mofavrezmine, mofa'nezminena zamagima krenentaza avontafepina maka zamagia krente'naze. Na'ankure zamagra'a hankavetiza Anumzamofo avurera zamazeri agru hu'naze. **19** Hagi pristi vahetmima Aroni agehemo'zama ranra kumatamimofo hozafu hu mopama megagi'nea mopafima nemaniza vahe'mo'za, mago'a vahetami huhampri zamante'nege'za ne'zazmia eri'za ome zami'naz. Hagi ana ne'zana pristi nagapine, Livae nagapinena maka venenema zamagima avontafepima me'nea naga'mo'zage eri'naz. **20** E'inahu huno maka Juda mopafina Hezekai'a agu'areti huno Ra Anumzana Anumzama'amofo avurera knare huno fatgo avu'ava hu'ne. **21** Hagi Hesekai'a agu'areti huno Anumzamofo mono nomofo eri'zana enerino, kasegea kegava nehuno, Anumzamofona avaririne. E'ina higeno maka zama hia zamo'a knare'zanke hu'ne.

## 32

### *Asiria kini ne' Senakeripi'ma Juda vahe ha' huzmante'nea naneke*

**1** Hagi Hesekia'ma agu'areti'ma huno Ra Anumzamofo kema antahino maka eri'zama eri vagama neregeno'a, Asiria kini ne' Senakeripi'a Juda vahera hara eme huzmanteno, hanavenentake vihu kegina me'nea kumatamina zamaheno hanareno kegava huzmanteku hu'ne. **2** Hagi Hesekai'ma keama Senakeripi'ma Jerusalemi rankuma'ma ankanireno ha'ma huzmantenaku'ma egeno'a, **3** megiasi'ma Jerusalemi rankumapima enefrea tima rurega humitre antahintahi retro higeno, koroma osu hanave sondia vahe'amozane, ugota eri'za vahe'amo'za aza hu'za megiamma me'nea tine, tinkeria renkanire'naze. **4** Ana'ma nehzageno'a, tusi'a vahe'mo'za eme atru hu'za osi tintamine, ranra tintaminena maka anama'afima me'neana rurega ome humitre eme humi atre nehu'za amanage hu'naze,

Asiria kini vahe'mo'za rama'a tina me'nenige'za eme nesagi renkaniresune.

<sup>5</sup> Ana nehuno Hesekai'a Jerusalemi rankuma keginamo'ma havizama hu'neama'a eri so'e nehuno, kuma'ma kegavama hu zaza nona ana agofetu negino, ana have keginamofo amefira mago have kegina nehuno, Deviti kumapima mopamo'ma uraminerega tukeheni mopa kateno ante aviteno evu'ne. Ana nehuno ha'ma hu'zantamine, hankoraminena rama'a tro hu'ne. <sup>6</sup> Hagi sondia vahete kva vhahera Jerusalemi rankumamofo kafante atruma nehzaf Hesekai'a zamazeri atru huno zamazeri hankaveti naneke amanage huno zamasami'ne, <sup>7</sup> korora osuta hankavetita otiho. Asiria kini ne'ene rama'a sondia vahe'araminkura korora huta tamahirahikura osiho. Na'ankure tagri kazigama mani'nea ne'mofo hankavemo'a, agri kazigama mani'naza vahe'mofo hankavea razampi agatere'ne. <sup>8</sup> Asiria kini ne'mofo kazigama mani'naza sondia vhahera amne vahetfanke mani'naze. Hianagi Ra Anumzana tagri Anumzamo tagri kaziga mani'neankino, taza huno ha' vahetia hara huzmantegahie. Hagi Juda kini ne' Hesekai'ma hiankema sondia vahe'mo'zama nentahi'za hankave eri'naze. <sup>9</sup> Hagi mago'a kna evutegeno, Asiria kini ne' Senakeripi'a sondia vahe'ane vuno Lakisi kumate vahe'ene hara ome nehuno, Juda kini ne' Hesekaiantegane maka Juda vahetmima Jerusalemi kumapima nemaniza vahetmintega amanage huno kea atrezmante'ne, <sup>10</sup> Nagra Asiria kini ne' Senakeripi'na amanage hu'na tamantahigoe, tamagra nazante tamenarentinti hu'neta, Jerusalemi kumama avazagi kaginoana, ontahegahie huta mani'nazo?

<sup>11</sup> Tamagri kini ne' Hesekaia'a huno, Ra Anumzana tagri Anumzamo'a Asiria kini ne' azampintira tamaguvazigahie huno neramasmie. Hianagi reramavatga nehiankita, nezanku'ene tinku'enena frigahaze. <sup>12</sup> Hagi Hesekai'a agonafima mono'ma nehaza kumatamina eri haviza nehuno, kresramanama nevaza itaramina taganavazi netreno, Juda vahe'motane Jerusalemi vahe'mota magoke Kresramana vu itareke ofa eme Kresramana nevuta, monora hiho hu'ne. <sup>13</sup> Hagi mago'a kumate vahetaminte'ma ko'ma nagehe'mo'zama hu'naza zane, nagrama menima nehua zana tamagra ontahi'nazo? Hagi ana vahetmina anumzazmimo'za zamaza hu'za nagri hanavefintira zamagura vazi'nazafi? <sup>14</sup> Hagi magore huno ana havi anumzamo'za nagri nazampintira zamagura ovazi'naze. Hagi inankna huno nagri nazampintira, tamagri Anumzamo'a tamagura vazigahie?

<sup>15</sup> E'ina hu'negu atrenkeno Hesekaia'a amanara huno reramavatga osino. Hagi agri kerera tamentintia osiho, na'ankure magore huno mago kumate vhahera anumzazmimo'a nagri nazampinti'ene, nafahe'mokizmi zamazampintira zamagura ovazi'ne. E'ina hu'neankino tamagri Anumzamo'a nagri nazampintira tamagura ovazigahie. <sup>16</sup> Anagema nehige'za, Senakeripi eri'za vahe'mo'za Ra Anumzamofone eri'za ne'a Hesekainena ke ha'rezanante'naze. <sup>17</sup> Ana nehuno Senakeripi'a mago'a avonkreno Ra Anumzana Israeli vahe Anumzamofona kiza zokago kea amanage huno hu havizana huno hufenkamitre'ne, Mago'a kumate vahe anumzamo'za zamazama osu'nazaza huno, Hesekaia Anumzamo'a nagri nazampintira tamagura ovazigahie. <sup>18</sup> Anagema huteno'a, Jerusalemi rankumamofo have kegina agofetuma mani'naza vahe'tmima Senakeripi eri'za vahe'mo'za zamazeri koro hu'za, ana rankuma'ma zamahe'za hanarenakura, Hibru vahe kefinti ranke hu'za kezati'zami'naze. <sup>19</sup> Ana vahe'mo'za mago'a kumate vahe'mo'zama zamazanteti'ma tro'ma hu'naza havi anumzantaminku'ma hu'nazankna ke Jerusalemi kumate nemaniza vahe'mo'zama mono'ma huntentaza Anumzamofonkura hu'naze.

<sup>20</sup> Hagi anankema nentahikea, kini ne' Hezekai'a ene kasnampa ne' Emosi

nemofo Aisaia'enena zanazama hanigura Ra Anumzamofontega nunamuna hu'na'e. <sup>21</sup> Ana'ma hakeno'a, Ra Anumzamo'a mago ankero huntegeno, maka sondia vahetamine, sondia vahete ugagota kva vahetmina Asiria kini nemofo seli nonkumapintira zamahe hana hu'ne. Ana higeno Sinakeripi'a agazegu nehuno atreno mopa'arega vuno havi anumzama'amo nompima unefregeno'a, mago'a ne' mofavre naga'amo'za bainati kazinteti eme ahe fri'naze. <sup>22</sup> Ana higeno Asiria kini ne' Senakerepi azampinti'ene, mago'a ha' vahetmimofo zamazampintira Hesekaiane, Jerusalemi kumapima nemaniza vahetmina Ra Anumzamo'a zamagu nevazino, maka'zama hazazampina kegava huzmantenge'za fru hu'za mani'naze. <sup>23</sup> Ana higeno rama'a vahem'o'za Ra Anumzamofontega musezana eri'za Jerusalemi kumatera ne-eza, zago'amo marerisa muse zana Juda kini ne' Hesekaiana eri'za eme ami'naze. Ana'ma hutege'za mika kumate vahem'o'za Hesekaiana ra agi amiza husga hunte'naze.

### *Hesekaia kri erino fri'za huteno kanamre'nea naneke*

<sup>24</sup> Hagi ana knafina Hesekaia'a kri erino fri'za hu'ne. Hagi ana'ma nehuno'a, Hesekaia'a Ra Anumzamofontega nunamu higeno, kri'amo'ma vagamarenogura Ra Anumzamo'a mago avame'za eri averi hu'ne. <sup>25</sup> Hianagi Hesekai'a avufga ra nehuno, Ra Anumzamo'ma knare'ma hunteno azama hia zankura, musena huonte'ne. E'ina higeno Ra Anumzamo'a agri'ene Juda vahetminku'ene, Jerusalemi kumate'ma nemaniza vahetminkura tusi arimpaa ahezmante'ne. <sup>26</sup> Ana hu'neanagi Hesekaia'ene Jerusalemi kumate'ma nemaniza vahem'o'zanena zamagu'a anteramiza manizageno, Hesekaia'ma kinima mani'nea kna'afina Ra Anumzamo'a arimpaa ahe ozmante'ne.

<sup>27</sup> Hesekaia'a tusi zagofeno ne' mani'nege'za vahem'o'za husga hunte'naze. Hagi Hesekaia'a silvama, golima zago'amo'ma marerisa haveramima, mnanentake zama, hankoramima, mago'a zago'amo marerisa zantaminema antesia nona ki'ne. <sup>28</sup> Hagi hozafi ne'zantamina, witima, wainima, olivi masavema, antenia nona negino, bulimakao afutamine, sipisipi afutaminema ante'nia keginane nontaminena tro huntetere hu'ne. <sup>29</sup> Ana nehuno rankumatmi tro huno sipisipi afutamine, bulimakao afutaminena zamante'ne. Na'ankure Ra Anumzamo'a Hesekaina tusi afu kevune, zagofenone amigeno tusi zagofeno ne' mani'negu anara hu'ne. <sup>30</sup> Hagi Hesekai'a Kihoni tina mopa agu'a avreno Deviti rankumamofona zage fre kaziga e'ne. Hagi Hesekai'a maka zama hia zamo'a knare zanke hu'ne. <sup>31</sup> Hagi Babiloni kumate kva vahem'o'zama antahizama Anumzamo'ma Juda kumate'ma kaguvazama hiankema nentahiza, mago'a vahem'o'zama antahizama kaguvazanku Hesekaia eme antahige'za kenaku e'naze. Hagi Anumzamo'a Hesekaiana agu'a reheno kenaku agrira atreneno ke'ne.

<sup>32</sup> Hesekaia'ma kinima mani'neno hu'nea zantmimofo agenkea kasnampa ne' Amosi nemofo Aisaia'ma, Judane Israeli kini vahetmimofo zamagenkema krente'nea avontafepi krente'ne. <sup>33</sup> Hagi Hesekai'ma frige'za, Deviti naga'mofo matipi agonafi asente'naze. Hagi anama asente'nazana maka Juda vahetamine, Jerusalemi kumapima nemaniza vahem'o'za marerisa vahem'o'za asenezamantaza'za hu'za asente'naze. Ana hazageno, Manase nefä nona erino kinia mani'ne.

## 33

### *Manase'ma nefo no erino Juda vahe kinia mani'nea naneke*

<sup>1</sup> Hagi Manase'a 12fu'a kafu nehuno Juda vahe kinia efore huno, 55'a kafu Jerusalemi kumatera kinia mani'ne. <sup>2</sup> Hagi Manase'a Ra Anumzamofo avufina ko'ma ana mopafima mani'naza vahe'mo'zama agoteno himnagema hu'nea avu'ava'ma nehazageno zamahe natitre'neankna kefo kumi hu'ne. <sup>3</sup> Hagi nefo Hesekaia'ma havi anumzamofo mono kumatmima taganama vazit're'neana ete eri so'e huno negino, Bali havi anumzante'ma kre sramnavu ita tro nehuno, Asera havi anumzamofo amema'ama antre'za tro'ma hunte'naza zafaramina retrurentetere hu'ne. Ana nehuno maka monafima me'nea zantmintera rena reno monora huzmant'e. <sup>4</sup> Hagi Ra Anumzamo'ma huno, Jerusalemi kumapi Nagri nagi me'nena, monora hunante vava hugahazema huno hu'nea mono nompina, Manase'a havi anumzamofo kre sramnavu ita tro hunte'ne. <sup>5</sup> Hagi Ra Anumzamofo mono nonkumapima, meg'i'ane agu'afinema me'nea kumatrempina, monafima me'nea zantmimofonte'ma kresramanama vu itarami tro hunte'ne. <sup>6</sup> Ana nehuno Ben-Hinomue nehaza agupofi ne' mofaveramima'a aheno kresramana nevuno, fri vahe hankro'ene nanekea huno antahintahia e'nerino, avu'ataga avu'ava zana nehuno, tusazane safezanena nehuno, amene vahetegatira antahintahia eri'ne. E'ina nehuno Ra Anumzamofo avurera tusi kumi'ma hiazamo higeno, Ra Anumzamo'a tusi rimpia ahente'ne. <sup>7</sup> Ana nehuno azanteti'ma antreno tro'ma hu'nea havi anumzamofo amema'a erino, Anumzamofo ra mono nompi ome ante'ne. E'ina mono nona Anumzamo'ma Devitine, nemofo Solomonininen anage huno znasami'ne, Israeli naga nofipintira Jerusalemi kuma huhampruankino, Nagri nagimo'a ama anampi me'nenke'za, monora hunante vava hugahaze. <sup>8</sup> Ana nehuno, Nagrama huanke'ma zamagrama nevaririza Mosesema ami'noa kasegene, tra kenema kegava nehu'zama, amage'ma antesnage'na, zamafahe'ima huhampri zmante'noa mopafima mani'nafintira zamahenati otretfa hugahue. <sup>9</sup> Hianagi Manase'a Juda vahetamine Jerusalemi kumapima nemaniza vahetaminena zmavreno havigampi frege'za, Ra Anumzamo'ma ama mopafinti'ma zamahenati tre'nea vahe'mo'zama hu'naza kefo avu'avara agatere'za hu'naze. <sup>10</sup> Ana hazageno Ra Anumzamo'a Manasene, Agri vahe'enena nanekea zmasami'neanagi, zamagra ke'amofona antahiza amagera onte'naze. <sup>11</sup> E'ina hu'negu Ra Anumzamo'a Asiria sondia vahete kva vahe'mokizmi zamazampi Manasena avrentege'za azeriza, bronsire seni nofinu kina rentete'za, agonagampi hukunu vazirusi hu'za avre'za Babilonia vu'naze. <sup>12</sup> Hagi Manase'ma tusi atagu'ma nehuno'a, Anumzama'amofo avuga razampi agu'a anteramino, aza hinogura afah'e'i Anumzamofona antahige'ne. <sup>13</sup> Hagi Manase'ma asunku'ma huno Anumzamofoma nunamuma huno antahigegen'o'a, Anumzamo'a asunku hunenteno aza huno avreno, agrama kegavama hu'nea mopafi Jerusalemi e'ne. E'ina higeno Manase'a Anumzamofonkura Ra Anumza mani'ne huno keno antahino hu'ne. <sup>14</sup> Hagi anama huteno'a Manase'a Jerusalemi kumamofona zage hanati kaziga, Gihoni agupoma me'nea kaziga have keginamofona amefi'a, mago zaza have kegina huno nozame kuma kafane nehazare uhanatiteno, Oferie nehaza agonarega ana kegina huno mareri'ne. Hagi sondia vahete kva vahetmina tusinasi vihuma me'nea rankumatmima Juda mopafima me'nea rankumatmimpi zamantetere

hu'ne. <sup>15</sup> Ana nehuno Manase'a havi anumzantmimofo amema'aramima zafarema antreno tro'ma hunteterema hu'neana, Ra Anumzamofo mono nompintira erinetreno, ana havi anumzantminte'ma kresramanama vu itaramina taganavazino Jerusalemi ran kumamofona fegi'a ome atre'ne. <sup>16</sup> Ana huteno Ra Anumzamofo kresramana vu ita ete tro huno, ana agofetu arimpia fru ofane, susu hunteno ami ofanena Ra Anumzana Israeli vahe'mofo Anumzamofontega kre'sramna vu'ne. <sup>17</sup> Ana'ma hige'za vahe'mo'za agona agona mono'ma nehazafina kresramana vu'nazaragi, Ra Anumzana Israeli vahe'mofo Anumzamofonteke kresramna vu'naze. <sup>18</sup> Hagi mago'a zantmima Manase'ma kinima mani'neno hu'nea zantamine, Ra Anumzamofonte'ma nunumuma hu'nea nunamune, kasnampa vahetmimozama Ra Anumzana Israeli vahe Anumzamofo agifima asami'naza nanekenena, Israeli kini vahe'mofo zamagenkema krenentaza avontafepi krente'naze. <sup>19</sup> Hagi Manase'ma havi anumzantmimofo mono kuma'ma tro nehuno, Asera havi anumzamofo amema'ama zafare'ma antreno tro nehuno, Anumzamofonte'ma mani fatgoma osu'nea zamofo agenkene, agra'ama anteramino Ra Anumzamo'ma aza hinogu'ma nunamuma higeno Ra Anumzamo'ma aza hu'nea zanena kasnampa vahe'mofo agenkema krente'naza avontafepi krente'naze. <sup>20</sup> Hagi Manase'ma frige'za, agri nonkuma'afi asentageno, nemofo Amoni agri nona erino kinia mani'ne.

### *Amoni'ma Juda vahe kinima mani'nea zamofo naneke*

<sup>21</sup> Hagi Amoni'a 22'a kafu nehuno, kinia efore huno tare kafu Jerusalemi rankumatera kinia mani'ne. <sup>22</sup> Hagi Amoni'a Ra Anumzamofo avufina nefu Manase hu'neaza huno kefo avu'ava nehuno, ne'fama antreno tro'ma hunte'nea maka havi anumzantamimofo amema'araminte kresramana nevuno, monora hunenteno, eri'zana erinte'ne. <sup>23</sup> Hianagi Amoni'a, nefu Manase'ma hu'neaza hunora Ra Anumzamofontera agu'a anteramino asunkura osu'neanki, mago'ane rama'a kumi huno vu'ne. <sup>24</sup> Hagi Amoni'ma ana'ma huno'ma vige'za kege'za, agri eri'za kva vahe'amo'za, ahe frinaku oku'a antahintahia retro hute'za, agri nompi ahe fri'naze. <sup>25</sup> Hianagi Juda vahe'mo'za hugantigama hu'za, kini ne' Amonima ahe fri'naza vahetamina zamahe nefri'za, nemofo Josaia kinia azeri otizageno, agri nona erino kinia mani'ne.

## 34

### *Josaia'ma Amoni no erino Juda vahe kinima mani'nea naneke*

<sup>1</sup> Hagi Josaia'a 8'a kafu hu'neno Juda vahe kinia efore huteno, 31'a kafu Jerusalemi kumatera kinia mani'ne. <sup>2</sup> Hagi Josaia'a Ra Anumzamofo avurera fatgo avu'ava huno ufrege efregera osuno, negeho Deviti'ma hu'nea avu'ava avariri'ne.

<sup>3</sup> Hagi Josaia'a 8'a kafuma kinima nemanino, 15ni'a kafu hu'neno agafa huno negeho Deviti'ma hu'neaza huno Anumzamofona monora hunte'ne. Hagi namba 12fu kafurera Juda mopafine, Jerusalemi kumapinena vano nehuno, maka havi anumzama mono'ma hunentaza kumatmina tapage hunetreno, Asera havi anumzamofo amema'ama zafare'ma antre'zama tro'ma hu'naza zantamina antagi netreno, zafare'ma antre'za kaza osu havi anumzamofo amema'aramima tro'ma hunte'aza zantamina rutmanatmanu hunetreno, kre mramrama hu'za havi anumzamofo amema'ama tro'ma hunte'aza zantaminena rutmana tamanu hutre'ne. Hagi Josaia'a e'inahu huno Juda mopane, Jerusalemi kuma'enena azeri agru hu'ne.

<sup>4</sup> Ana nehuno Josaia'a hige'za Bali havi anumzamofonte'ma kresramana vu itaramina negege'za tagnavazi netre'za, mnanentake'za insensima kre mnama nevaza itaraminena tagna vazitre'naze. Ana nehuno Asera havi anumzamofo amema'ama me'nea zafaramine, kaza osu havi anumzamofo amema'ama antre'za tro'ma huntenaza zantamine, kre mramrama hu'za havi anumzamofo amema'ama troma hunte'naza ame'ma'aramina rutmana hu'za rufuzafupete'za, ana anumzantminte'ma mono'ma hunentaza vahe'mokizmi matipi atre'za vano hu'naze. <sup>5</sup> Ana nehuno Josaia havi anumzantmimofo pristi vahe'mokizmi zaferinaramina Kresramana vu itazmire kreno Juda mopane, Jerusalemi kuma'enena eri agru hu'ne. <sup>6</sup> Hagi anazanke huno Manase nagamokizmi rankumapine, Efraemi nagamokizmi rankumapine, Simioni nagamokizmi rankumapine, Nafatari nagamokizmi rankumapine, tava'ozmire'ma me'nea kuma'ma havizama hu'nea kumatamimpinena vuno, <sup>7</sup> havi anumzamofonte'ma kresramana vu itaramine, Asera havi anumzamofo amema'ama me'nea zafaramina maka antagino kitagi kotago hunetreno, havi anumzamofo amema'aramima tro hunte'nazana rutamina huno ru fuzafulpenetreno, mnanentake'za insensima kre mnama nevaza itaraminena Israeli mopafintira maka tagna vazitreno, ete Jerusalemi kumate vu'ne.

### *Josaia'ma Ra Anumzamofo mono noma ete eri so'ema huno ki'nea zamofo naneke*

<sup>8</sup> Josaia'ma 18ni'a kafuma kinima nemanino'a, havi anumzama mono'ma hunentaza zantamina eri haviza huno Juda mopane, ran mono nonena eri agru huteno, Azalia nemofo Safanima, rankumamofo kva ne' Ma'aseiama, avonkre eri'za e'neria ne' Joahazi nemofo Joanki huno Ra Anumzana Anumzama'amofo no eriso'e hihohuno huzmante'ne. <sup>9</sup> Hige'za e'za Manase nagama, Efraemi nagama, mago'a Israeli naga'ma, maka Juda mopafinti vahetmima, Benzameni naga'ma, Jerusalemi kumapima nemaniza vahe'mo'zanema Anumzamofo mono nompima ne-eza, zagoa eri'za Livae vahetami eme zami'zage'za, eri'za ugagota pristi ne' Hilkaiana ome ami'naze. <sup>10</sup> Hagi ana zagoa erino mono noma eri so'e ne-haza vahe'mokizimi kva vahe zamige'za, ana zagoa eri'za mono noma eriso'ema nehaza vahe'mokizmi miza sezmantenaze. <sup>11</sup> Hagi ana zagoma zami'nazana, zamagra ana zagoa eri'za noma negi'za vahe'ene ke'onkezama tagama hunte haverami miza nese'za, zafarami mizase'za Juda kini vahe'mo'zama eri so'ema osu'za atrazageno'ma havizama hu'nea nomofo zafaramina eri fatgo hu'naze. <sup>12</sup> Hagi ana vahe'mo'za eri'zana hankaveti'za eri'naze. Ana eri'za vahetmima kegavama huzmante'na vahetmima, Merari nagapinti Livae netre Jahati'ene, Obadaiakegi, Kohati nagapinti netre Zekaraiake Mesulamuke. Hagi ana maka Livae nagaki'za zavenama ahe'za zagame'ma hu zana antahi ankere'naza vaheki'za, <sup>13</sup> eri'za vahetmima kegava nehu'za, erizante'ma vugote'zama kegavama hu'naza vahera e'ina hihohi, amana hihohu'za antahintahi zami'naze. Hagi mago'a Livae vahe'mo'za avonkre eri'za e'nerizageno, mago'amo'za Kasegema kreno eri fatgoma hu eri'za enerizageno, mago'amo'za kafante'ma kegava hu eri'za eri'naze. <sup>14</sup> Hagi Ra Anumzamofo nompima ana zagoma eri'za e'naza zagoma eri'za atineramizageno'a, pristi ne' Hilkaia'a Ra Anumzamo'ma Mosesema ami'nea Kasege Avontafera keno eri'ne. <sup>15</sup> Hagi Hilkaia'ma ana kasege avontafema hakreno enerino'a, kasegema kreno eri fatgo nehia ne' Safanina amanage huno asmi'ne, Kasege avontafera Ra Anumzamofo mono nompinti kena erue, nehuno ana avontafera Safani ami'ne. <sup>16</sup> Ana

higeno Safani'a ana avontafera erino kini ne' Josaia ome nemino, eri'zamofo agenkea anage huno asmi'ne, Eri'za vaheka'ama maka eri'zama zami'nana eri'zana knare hu'za e'nerize. <sup>17</sup> Hagi Ra Anumzamofo mono nompima me'nea zagoa eri'za, eri'zante'ma vugote'za kegavama hu'naza vahetami zami'naze. <sup>18</sup> Hagi mago'ané Safani'a kini nera asmino, Ama avontafera pristi ne' Hilkaia nami'ne, huno nesmino ana avontafera kini nemofo avuga hampri'ne. <sup>19</sup> Hagi kini ne' Josaia'ma kasegefima me'nea nanekeramima nentahino'a, zaza kukena'tagato hu'ne. <sup>20</sup> Ana nehuno kini ne'mo'a Hilkaaima, Safani nemofo Ahikamura, Maika nemofo Abdonica, avon kre eri'za ne' Safanima, kini ne'mofo eri'za ne' Asaianena amanage huno zamasami'ne, <sup>21</sup> Hagi nagrane maka Israeli vahe'ene, Juda vahe'motanena ama avontafepima me'nea nanekerera na'a hugahumpi, vuta Ra Anumzamofona ome antahigeta keho. Na'ankure tagehe'mo'za ama avontafepima me'nea kasegea ovaririnazageno, Ra Anumzamo'a tagrira tusi arimpa aherante'ne. <sup>22</sup> E'inage higeno Hilkaia'ene kini ne'mo'ma huzmantea vahe'mo'zanena, kasnampa a' Hulda kenaku Jerusalemi kumapina, noti kaziga mago kuma me'nea kumapi vu'naze. Hagi ana a'mofo neve'a, Salumukino Tokhati nemofo Hasra negeho'e. Hagi agra kukena nonte kva ne'mani'ne. Hagi ana kini ne'mo'ma hiankea ana vahe'mo'za kasnampa ara ome asami'naze.

<sup>23</sup> Hagi ana kasnampa a'mo'a amanage huno zamasami'ne, Ra Anumzana Israeli vahe Anumzamo'a huno, huramantegeta'e'naza nera amanage huta ome asamiho, <sup>24</sup> Ama kumate'ene ama ana kumapi vahete'enena, Juda kini ne'mofo avugama nehampri'za avontafepima me'nea hazenkezane, maka kazusisanena atrenugeno egahie. <sup>25</sup> Na'ankure zamagra Nagrira zamefi hunami'za, ru anumzantminke Kresramana nevu'za, monora hunente'za, havi zamavu'zmava'ma hazazamo'a, tusiza huno Nagrira nazeri narimpa ahe'ne. E'ina hu'negu ama kumapi vahetmima narimpama ahezmante'noa zana, mago zamo'a eri amne hugara osu'ne. <sup>26</sup> Hianagi Juda kini ne'mo'ma Ra Anumzamofoma ome agenoka huta antahiho huno'ma huramantegetama e'naza nera, Ra Anumzana Israeli vahe Anumzamo'a ko'ma hamprizagenka antahi'nana kerera amanage hie huta ome asamiho, <sup>27</sup> Na'ankure nagra ama kumate'ene, ama kumapi vahetema hunaku'ma hua nanekema nentahinka, kagu'a anteraminka Anumzamo'na navuga nemaninka, kuke-naka'a tagato hunka kasunkura nehunka, zavira atanke'na antahue huno Ra Anumzamo'a hie huta ome asamiho. <sup>28</sup> Hagi menina ama kumate'ene ana kumapi vahe'ma zamazeri havizama hanuazana onkenenka knare hunka mani'enka frigahane. Anage hige'za ana vahe'mo'za atre'za vu'za, Hulda'ma hiankea kini ne' Josaiana ome asmi'naze.

<sup>29</sup> Higeno kini ne' Josaia'a mika Juda kumapi ranra vahetamine, Jerusalemi kumapi ranra vahetamina kehu atru hu'ne. <sup>30</sup> Ana huteno vuno maka Juda vahetamine, Jerusalemi vahetamine, pristi vahetamine, Livae vahetaminena Ra Anumzamofo mono nompi zamavare atru higeno, ositeti'ma vuno ra vahetema vu'neana maka atru hu'naze. Ana hutazageno, Ra Anumzamofo mono nompinti'ma ke'za eri'naza avontafepima me'nea nanekea ranke huno maka hampri vagare'ne. <sup>31</sup> Ana huteno kini ne' Josaia'a kini vahe'mo'zama oneti'zare otino, Ra Anumzamofo kasege'ane, avu'ava'ane, tra ke'anema ama avontafepima krente'neana, maka nagu namenteti hu'na avaririgahue huno huvempa hu'ne. <sup>32</sup> Ana nehuno miko Jerusalemi kumapima nemaniza vahe'ene, Benzameni naga'enena hige'za agri'ene ot'i'naze. Ana hazageno Jerusalemi kumapi vahe'mo'za

Anumzamofo huhagerafi huvempa kemo'ma hu'nea kante ante'za, zamafahe'mofo Anumzantera huvempa hu'naze.<sup>33</sup> Hagi mikä Israeli mopa agu'afima kaza osu havi anumzantmimofo amema'aramina Josaia'a ru takoraku hunetreno, maka vahetmina hige'za Ra Anumzana zamagehe'mokizmi Anumzante monora hunte'naze. Hagi Josaia'ama kegavama hu'nea knafina Israeli vahe'mo'za Ra Anumzana atre'za ru anumzantmina monora huonte'naze.

## 35

*Ozamahe zamagatere'nea knagu antahinemiza kna ete eri kasefa hu'zana naneke*

<sup>1</sup> Hagi Josaia'a ke hige'za Ra Anumzamo'ma Isipima ozamahe zamagatere'nea knaguma antahimiza ne'zama nenaza knare Jerusalemi kumate etru hu'naze. Hagi ese ikamofo 14ni zupa ozamahe'ma zamagatere'nea zanku'ma antahimiza sipisipiramina aheli'naze.<sup>2</sup> Ana nehuno ana zupage Josaia'a Pristi vahetmina huzmanteg'e'za, eri'zazmia enerizageno zamazeri hanaveti nanekea zamsmige'za, Ra Anumzamofo mono nompina eri'zana eri'naze.<sup>3</sup> Hagi Livae nagama zamazeri ante ruotage'ma hige'za mani'ne'za Israeli vahetmima kasegema rempima hunezmiza Livae nagara, ke hutru huno amanage huno zamasmi'ne, menina Anumzamofo huhagerafi huvempage vogisia Deviti nemofo Israeli vahe kini ne' Solomonima kinte'nea mono nompi anteho. Mago'enena huhagerafi huvempage vogisia zafa huta vuta eta osugahaze. Tamafuntera erita vano osiho. Ra Anumzana tamagri Anumza Israeli vahe'mota monora hunenteta eri'zama'a erinteho.<sup>4</sup> Israeli vahe kini ne' Devitine, nemofo Solomoni avontafepinema, krente'nea kante anteta nagatenofite trora hiho.<sup>5</sup> Hagi mago mago nagamota, nagatenofite huta ruotgema hu'nea kumapina Livae naga'ene otita maniho.<sup>6</sup> Hagi Ozamahe'ma zamagatere'nea kanagu'ma antahimiza nehaza sipisipi anentatami, aheta tamagra'a tamazeri agru nehuta, retrotra nehinkeno ruga'a tamafuhe'za Ra Anumzamo'ma Mosesema asami'nea kante ante'za anara hiho.<sup>7</sup> Hagi ozamahe'ma zamagatere'nea zanku'ma antahimi ofama hanaza zana, sipisipine meme anentatamina Josaia'a agraa keginafintira 30tausenia nezmino, 3tauseni'a ve bulimakao afutamina maka eme atruma hu'naza vahe'mokizmia zami'ne.<sup>8</sup> Ana hige'za kini ne'mofo eri'za vahe'amo'za zamagranena mago'a sipisipine bulimakao afutamina zamavesite avre'za Israeli vahetamine, pristi vahetamine, Livae naga'enenememe zami'ne. Hagi Anumzamofo mono nonte kya vahera Hilkaia'ma, Zekaraia'ma, Jehiel'i'ma hu'za zamagranena ozamahe'ma zamagatere'nea zanku'ma antahimiza ofama hanaza zana, 2tausen 600'a sipisipine meme afutaminki, 300'a bulimakaogi hu'za pristi vahe'mokizmia zami'ne.<sup>9</sup> Hagi Livae kva vahera Konanaia'ma, neganakea Semaia'ene Netanelikegi, Hasabaia'ma, Jeieli'ma, Jozabadi'ma hu'za zamagranena, ozamahema zamagatere'nea knaguma antahimi ofama huzana, sipisipine meme afutamina 5tauseni'agi, 500'a bulimakao afutminki hu'za Livae naga'ra zami'ne.

<sup>10</sup> Hagi ana zantmima retro'ma hute'za, pristi vahe'mo'za zamagra'a eri'za kankamunte oti'zageno, Livae naga'mo'za kini ne'mo'ma kevure kevure'ma refkoma huzmanteg'e'za kante ante'za oti'naze.<sup>11</sup> Hagi ozmahe'ma zamagatere'nea zanku'ma antahimiza ofama hu'za sipisipiramina ahe'za korama'a tagi'za pristi vahetami zamizage'za, pristi vahe'mo'za eri'za

Kresramana vu itarera rutritri nehazageno, Livae naga'mo'za ana sиписи афутамимоfo аkrura kararuvazi'naze. <sup>12</sup> Hagi Mosesе avontafepima hu'nea kante'ma ante'za mago mago naga'mo'zama Ra Anumzamofonte tevefima kre fananehu ofama hanaza sиписи афутамине, bulimakao afutaminena anampinti Livae naga'mo'za eritru hunte'naze. <sup>13</sup> Hagi tra kemoma hu'nea kante ante'za Ozmahe'ma zmagatere'nea zanku'ma antahimi sиписиа ahe'za tevefi negre'za, zamazeri ruotgema hu ofanena kavoramimpine ranra kavofinenia ti taginte'za kre'za ame hu'za ati'za zamizage'za maka vahe'mo'za ne'naze. <sup>14</sup> Hagi anama hute'za Livae naga'mo'za zamagra'a sиписи афутамине, pristi vahe'mokizmi sиписи афутамине retrotra hu'naze. Na'ankure pristi vahera, Aroni amohe'za kre fananemahu ofane, afova'anena Kresramana nevazageno vuno hani ome hu'ne. E'ina hu'negu hu'za Livae naga'mo'za zamagra'a sиписи афутамине, pristi vahe'mokizmi sиписи афутамине retrotra hu'naze. <sup>15</sup> Hagi zavename ahe'za zagame'ma hu vahetmina Asapumpinti'ma fore'ma hu'naza vaheki'za, Devitima Asapuma Hemanima kini ne'mofo kasnampa ne' Jedutuni'ma hu'za huzmant'e'naza kante ante'za eri'za kankamuzmire otitere hu'naze. Hagi kuma kafante kva vahe'mo'za, kuma kafana atre'za ovu'za kafante kva hute'za mani'naze. Na'ankure mago'a Livae naga'mo'za makazazmia retrotra huzmant'e'naze. <sup>16</sup> E'ina hige'za Israeli vahe'mo'za Ra Anumzamo'ma ozmahe'ma zamagatere'nea zankura antahinemiza ne'zana kre'za nene'za musena nehu'za, kini ne' Josaia'ma hu'nea kante ante'za Ra Anumzamofo Kresramanavu itarera, kre fanane hu ofa hu'naze. <sup>17</sup> Hagi Israeli vahe'tamima atru'ma hu'naza vahe'mo'za ozmahe'ma zamagatere'nea zankura antahinem'i'za zisti onte bretia 7ni'a knafi nene'za musena hu'naze. <sup>18</sup> Hagi kasnampa ne' Samuelsi knareti'ma e'neana mago kini ne'mo'a e'inahukna zana Israeli vahepinia eri fore osu'nea kna hu'za, ozamahe'ma zamagatere'nea knaguma antahimi'za ne'zama kre'za nene'za musenkasea osu'nazankna hu'za pristi vahetmima, Josaia'ma Livae vahetmima, maka Judane Israeli vahetmima, Jerusalemima nemaniza vahe'mo'zanena ne'zana kre'za nene'za tusi musenkase hu'naze. <sup>19</sup> Hagi Josaia'a 18ni'a kafuma kinima nemanige'za, ozmaheno zamagatere'nea zanku'ma antahimi knareru ne'zana kre'za nene'za ama ana musenkasea hu'naze.

### *Josaiana hapi ahazageno fri'nea naneke*

<sup>20</sup> Hagi Josaia'ma mono nompi zama eri fatgoma hutegen'o, Isipi kini ne' Niko'a hara erino Yufretisi Tinte Kakemisi kumate egeno, Josaia'a ha' ome huzmantenaku vu'ne. <sup>21</sup> Hianagi Niko'a amanage huno Josaiantega kea atregeno vu'ne, Juda kini ne'moka, na'ante kagra hara hunante'za nehane? Nagra kagrira hara hugantenakura nomoanki, nagrama ha'ma hunezman-toa vahe'ene hara hunaku neoe. Anumzamo'a ame hunka vuo huno hunantegeni neoanki, ru nagranema mani'nea Anumzamo kahe frisigi hara reonanto. <sup>22</sup> Hianagi Anumzamo'ma Niko'ma asmigeno'ma hiankea Josaia'a antahi amne nehuno, ru kukena huno agr'a aazeri frakino ru vahekna nehuno, Megido agupofi ha'ome hunaku vu'ne. <sup>23</sup> Hagi ha'eme nehige'za, keve ahazageno Josaia'a eri'za vahe'araminkura huno, hago hazenke eruanki navreta viho. <sup>24</sup> Anage hige'za eri'za vahe'amo'za Josai'ana karisi'afintira avre'za ru karisi'afi ante'za avre'za Jerusalemi vazageno ufri'ne. Anama frige'za, maka Juda vahetamine, Jerusalemi kumate vahe'mo'zanena afahе'mofo matipi eri'za ome asenente'za, tusi zamasunku hu'za zavira ate'naze. <sup>25</sup> Ana'ma

higeno'a, kasnampa ne'Jeremaia'a, Josaia agire vare zagame asunte'nege'za, zagamema hu vahe'mo'za ana zagamera hu'za meninena zavira netaze. Hagi ana zagamera zavi zagamema krententaza avontafepina krentazageno me'nege'za zagamera hu'za zavira netaze.

<sup>26</sup> Hagi Josaia'ma agafama huno kinima mani'neretima vuno vagaretema vu'nea knafima hu'nea zantamimofo agenkene, Ra Anumzamofo kasegema avariri'nea avu'avamofo agenkenena, <sup>27</sup> Israeli kini vahetamine Juda kini vahetmimofo zamagenke'ma krente'naza avontafepi krente'naze.

## 36

### *Josaia'ma kinima mani'nereti'ma vuno kinafima vu'nare'ma ome atre'naza kini vahe'mokizmi naneke*

<sup>1</sup> Hagi Josaia'ma nefrige'za Juda vahe'mo'za nefa nontera nemofo Jehoahasi kasefa kinia Jerusalemi kumatera azeri oti'naze. <sup>2</sup> Hagi Jehoahasi'a 23'a kafu hu'neno, kini efore huno 3 ikamofo agu'afi Jerusalemi kumatera kinia mani'ne. <sup>3</sup> Hagi Isipi kini ne' Niko'a Jehoahasina kini tratetira azeri netreno, Juda vahekura kna'amo'a 4tausen kilo hunesia silvane, 34 kilo hunesia golinena takisia miza hugahaze hu'ne. <sup>4</sup> Ana nehuno Isipi kini ne' Niko'a Jehoahasi negna Eliakimina Juda vahe kini azeri onetino, Jehoiakimi'e huno kasefa agia antemi'ne. Hianagi Niko'a Jehoahasina kina hunteno avreno Isipi vu'ne.

### *Jehoiakimi'ma Juda vahe kini mani'nea naneke*

<sup>5</sup> Hagi Jehoiakimi'a 25'a kafu hu'neno, Juda vahe kini efore huno 11ni'a kafu Jerusalemi kumatera kinia mani'ne. Hagi agra Ra Anumzana agri Ra Anumzamofo avufina, havi avu'ava hu'ne. <sup>6</sup> Ana higeno Babiloni kini ne' Nebukatnesa'a Jehoiakimina ha' eme hunteno azeriteno, bronsireti tro hu'nea seni nofinu kina renteno avreno Babiloni vu'ne. <sup>7</sup> Hagi Nebukatnesa'a mono nompintira mago'a marerisa zantamina erino, agra nompi ome ante'ne. <sup>8</sup> Hagi Jehoiakimi'ma kinima mani'neno hu'nea avu'avazamofo agenkene, kasrino himanage'ma hu'nea avu'ava'ma hu'nea zamofo agenkea, Israeli kini vahe'ene Juda kini vahe'mokizmi avontafepi krente'naze. Higeno nemofo Jehoiasini agri nona erino kinia mani'ne.

<sup>9</sup> Hagi Jehoiasini'a 8'a kafu hu'neno Juda vahe kini efore huteno, 3'a ikanki 10ni'a kna Jerusalemi kumatera kinia mani'ne. Hagi Jehoiasini'a Ra Anumzamofo avurera havi avu'ava hu'ne. <sup>10</sup> Hagi kafu'mofoma trazamo'ma agatama nehagea knafina, Babiloni kini ne' Nebukatnesa'a mago'a vahe huzmanteg'e za'e za Jehoiasina eme azerite'za kina hunte'za, avre'za Babiloni nevu'za, Ra Anumzamofo mono nompintira mik'a marerisa zanena emeri'za vu'naze. Ana nehu'za agri nagapinti ne' Zedekaiana kini azeri oti'zageno, Jehoasini nona erino kinia mani'neno, Juda vahe'ene Jerusalemi kumate vahera kegava huzmante'ne.

<sup>11</sup> Zedekai'a 21ni'a kafu huneno Juda vahe kinia efore huteno, 11ni'a kafu Jerusalemi kumatera kinia mani'ne. <sup>12</sup> Hagi Zedekai'a Ra Anumzana Anumzama'amofo avufina kefo avu'ava huno, kasnampa ne' Jeremaia'ma Ra Anumzamoma asami'nea nanekema eme asamiana agu'a anteramino mani'neno, ke'a ontahi'ne. <sup>13</sup> Ana nehuno Babiloni kini ne' Nebukatnesana Anumzamofo agifima huvempama hunteno kagri kagorga manigahuema hu'nea nera ha' arente'ne. Hagi agra agu'a eri hankave netino, Ra Anumzana Israeli vahe Anumzamofonte'ma ezankura avresra hu'ne. <sup>14</sup> Hagi maka pristi vahe'mofo ugota kva vahe'mo'zane, Juda

vahe'mo'zanena Ra Anumzamofona novaririza zamagena humiza kasarino havizama hu'nea avu'ava nehu'za, Ra Anumzamo'ma noma'ama eri ruotge'ma hu'nea nona, eri pehana hu'naze. <sup>15</sup> Hianagi Ra Anumzana zamagehe'i Anumzamo'a, ana avu'ava'ma atresazegura kema erino vu vahe'aramintera huzmantege'za, kea eri'za vu vava hu'naze. Na'ankure Agra vahe'agu'ene, Agrama nemania noma'agu'enena tusiza huno asunkura hu'ne. <sup>16</sup> Hianagi ana vahe'mo'za Anumzamo'ma huzmantege'za e'naza kasnampa vahe'mo'zama hazankea ontahi'za, hu haviza hunezmante'za, kiza zokago ke hunezmante'za zamagiza re'naze. Ana hazageno Ra Anumzamo'a tusi rimpa ahezmanterego, ana arimpa ahe'zana mago zamo'a eri amne hugara osu'ne.

<sup>17</sup> Ana hageno Ra Anumzamo'a Babiloni kini ne' Nebukatnesa huntogeno Jerusalemi kumate vhahera ha' eme huzmanteno, kasefa nehazaveramina mono nompintira kazinteti nezmaheno, kasefa vahe'ene, vene omase mofanema, a'nenema, tavava ozafanena zamasunkura huozmante zamahe vagare'ne. Hagi Ra Anumzamo'a, Babiloni kini ne' Nebukatnesa azampi miko zamavare ante'ne. <sup>18</sup> Hagi kini ne' Nebukatnesa'a mono nompinti ranra zuomparamine, neonse zuomparamine, Ra Anumzamofo feno nompinti fenone, kini nemofo nompinti fenone, ugagota eri'za vahe'aramimofo nompinti fenonena maka eri hana huno Babiloni vu'ne. <sup>19</sup> Hagi Anumzamofo mono nona teve taginente'za, Jerusalemi Nkumamofo have kegina tapage hunetre'za, maka kini ne'mofo nonkuma'enena teve taginte'za negre'za, maka marerisa fenoma'anena eri haviza hu'naze. <sup>20</sup> Hagi hapintima ozamaheno zamatreahahera, zamavareno vige'za kini ne'mofo eri'za vahetamine, amohe'mofo eri'za vahetami umani'nazageno, vuno Pesia kamanimo'ma efore huno Babiloni kamanima agatere'nea knare uhanatine. <sup>21</sup> Ana higeno Israeli vahe'mo'za sevenima hia kafufina, mopatamia atrenkeno manisga hinoma huno'ma Ra Anumzamo'ma hu'neana atrazageno Sabatia erino manigasa osu'ne. E'ina hu'negu maka kinama hu'za maniza kafu'afina, mopamo'a manigasa hu'negeno, Ra Anumzamo'a kasnampa ne' Jeremaiama asami'nea kante 70'a kafua evu'ne.

<sup>22</sup> Hagi Sairusi'ma Pesia kinima efore'ma huno mania knafina, ese kafurera Ra Anumzamo'ma kasnampa ne' Jeremaiama asami'nea kante anteno, Ra Anumzamo'a azeri otigeno, mago avona kre atregeno agrama kegavama hu'nea mopa'afina vuno eno hu'ne. <sup>23</sup> Hagi Pesia kini ne' Sairusi'a amanage huno ana avona kre atre'ne, Monama kegava hu'nea Ra Anumzamo'a mika mopa kegava huo huno nehuno, noma'a Juda mopafi Jerusalemi ome kigahane huno hunante'ne. Hagi Ra Anumzamofo vahetmima ru vahepima mani'naza vhahera, Ra Anumzana zamagri Anumzamo'a zamagrañe mani'neno kegava huzmantenesnige'za ete Jerusalemi kumatera mareriga-haze.

## Esra Esra Avontafere

*Pesia kini ne' Sairusi'ma Israeli vahe zamatrege'za mopa zamire ete vu'naza naneke*

<sup>1</sup> Hagi Sairusi'ma ese agafa huno Pesia mopare kinima mania kafufina, Ra Anumzamo'a kasnampa ne' Jeremaia agipi huvazino kasnampa kema Israeli vaheku hu'nea nanekemo'a avufga'a efore hanigu, Pesia kini ne' Sairusina Ra Anumzamo'a antahintahi'a azeri otigeno, ana makama kegava hu'nea mopafi vahetera huama huno nezamasamino, avompinena krenenteno anage hu'ne, <sup>2</sup> Pesia kini ne' Sairusi'a amanage huno hie, Ra Anumzana monane mohanema tro huteno kegavama hu'nea Anumzamo maka mopa kva huo huno nami'neno, nagrira huhamprinanteno Juda mopafina Jerusalemi kumate nagri mono nona kinanto huno hunante'ne. <sup>3</sup> Hagi Israeli vahe'ma amu'nontamifima tamagranema mani'nesazana, Anumzazmimo'a Israeli vahe'ene manigahianki zamatreke'za Juda mopafi Jerusalemi kumate mareri'za, Israeli vahe Anumzama Jerusalema mani'nea Ra Anumzamofona mono noma'a ome eri kasefa hu'za kinteho. <sup>4</sup> Hagi ina kumapino Israeli vahe'ma mani'nesia kumapi vahe'mota, tamagra'a silvama golima, mago'a knare'nare zantamine nezamita, bulimakaone memene sipisipi afutaminena avre nezamita, Jerusalema Ra Anumzamofo mono nompima zamavesite ofama huntesaza zantaminena zaminke'za eri'ne'za viho.

<sup>5</sup> Hagi anante Judane Benzamenine Livae nagate'enema ugotama hu'naza vahe'ene pristi naga'ene, izano Ra Anumzamo'ma rimpama azeriotia vahe'mo'zanena Jerusalemi mareri'za Ra Anumzamofo mono no ete ome azeri oti'za kinaku trotra hu'naze. <sup>6</sup> Hagi anante tvaozamire'ma nemaniza vahe'mo'za Israeli vahe'mokizmia, silvareti'ene golireti'ma tro'ma hu'naza zantamine, mago'a ne'zane, bulimakaone, memema, sipisipi afutamine, mago'a marerifa knare'nare zantaminena nezami'za, ana agofetura mago'a musezana Ra Anumzamofo mono nompima kresramnama vanaza zantamina zamizage'za eri'ne'za vu'naze. <sup>7</sup> Hagi kota kini ne' Nebukatnesa'ma Israeli vahe'ma hahuzamagatereno Jerusalemi ra mono nompi zantamima erino eno agrama mono'ma hunentea havi anumzantamimofo mono nompi eme ante'nea zantamina kini ne' Sairusi'a erimegi atre'ne. <sup>8</sup> Hagi Pesia kini ne' Sairusi'a agri zagore'ma ugagota huno kvama hu'nea ne' Mitredatina hamprio higeno ana zantamina hampriteno, Juda vahete'ma ugota huzmanteno zamavareno esia ne' Sesbazarina ana zantamina ami'ne.

<sup>9</sup> Hagi anazantamina amanahu huno eri'ne. Golireti'ma tro'ma hu'naza zuompa 30'agi silvareti'ma tro'ma hu'naza zuompa 1 tauseni'agi, mago'a zantamima silvareti'ma tro'ma hu'nazana 29ni'agi, <sup>10</sup> mago'a zuomparamima golireti'ma tro'ma hu'naza zuomparamina 30'agi, mago'a zuomparamima silvareti'ma tro'ma hu'naza zuomparamina 410ni'agi, ruga'a zantamima Ra Anumzamofo mono nompi ante zantamina 1tauseni'agi hu'za zami'naze.

<sup>11</sup> Hagi golireti'ene silvareti'enema tro'ma hu'naza zantamine, ruga'a zantamima Ra Anumzamofo mono nompi ante zantaminema eri atruma

hazageno'a ana makara 5tausen 400'a zantami efore hu'ne. Higeno Israeli vahe'ma Babilonima kina hu'za mani'naregati'ma atre'za Jerusalema mareri'za nevazageno'a, Sesbazari'a anzantamina erige'za vu'naze.

## 2

*Babilonima kina hu'za mani'naregati e'naza naga'mokizmi zamagi krente'naza naneke*

<sup>1</sup> Hagi Babiloni kini ne' Nebukatnesa'ma Juda vahe'ma zamavareno Babilonima kinama huzmante'nea vahe'mo'zama Babiloni mopama atre'za Jerusalemi vute'za, mago mago vahe'mo'a Juda mopafima kuma'ama metrema hu'nere vuno eno hu'ne.

<sup>2</sup> Hagi anampina kegava huzmante'za magokama e'nazana kva vahe'mokizmi zamagi'a, Jerubabeliki, Jeshuaki, Nehemaiaki, Seraiaiki, Rilaiaki, Modekaiki, Bilshaniki, Mispariki, Bigvaiki, Rehum'iene Ba'anaki hu'za e'naze. Hagi Israeli venenema e'nazana ama hampri'za krente'naze.

<sup>3</sup> Hagi Parosimpinti'ma fore hu'naza venenea 2tausen 172'a e'naze. <sup>4</sup> Sefatiampinti'ma fore'ma hu'naza venenea 372'a e'naze.

<sup>5</sup> Aramumpinti'ma fore hu'naza venenea 775'a e'naze.

<sup>6</sup> Hagi Jeshuane Joapu naga'ma Pahat-Moapumpinti'ma fore hu'naza venenea 2tausen 812'a e'naze. <sup>7</sup> Elamumpinti'ma fore'ma hu'naza venenea 1tausen 254'a e'naze. <sup>8</sup> Hagi Zatumpinti'ma fore'ma hu'naza venenea 945'a e'naze. <sup>9</sup> Zakaimpinti'ma fore'ma hu'naza venenea 760'a e'naze.

<sup>10</sup> Banipinti'ma fore'ma hu'naza vene'nea 642'a e'naze. <sup>11</sup> Hagi Bebamimpinti'ma fore'ma hu'naza venenea 623'a e'naze. <sup>12</sup> Hagi Azagatimpinti'ma fore'ma hu'naza venenea 1tausen 222'a e'naze. <sup>13</sup> Hagi Adonikamumpinti'ma fore'ma hu'naza venenea 666si'a e'naze. <sup>14</sup> Hagi Bigvaimpinti'ma fore'ma hu'naza venenea 2tausen 56si'a e'naze. <sup>15</sup> Adinimpinti'ma fore'ma hu'naza venenea 454'a e'naze. <sup>16</sup> Atana mago agi'a Hezekaiakino, agripinti'ma fore hu'naza venenea 98'a e'naze. <sup>17</sup> Bezaimpinti'ma fore hu'naza venenea 323'a e'naze. <sup>18</sup> Jorapinti'ma fore hu'naza venenea 112fu'a e'naze. <sup>19</sup> Hashumimpinti'ma fore hu'naza venenea 223'a e'naze. <sup>20</sup> Gibarimpinti'ma fore hu'naza venenea 95'a e'naze.

<sup>21</sup> Hagi Judama me'nea kumatamimpima, kumate kumate'ma vanaza vahe'ma hampri'za krente'nazana, Betlehemu kumate vhahera 123'a venene e'naze. <sup>22</sup> Netofa rankumate vhahera 56si'a venene e'naze. <sup>23</sup> Anatoti rankumatetira 128'a venene azageno, <sup>24</sup> Azmaveti rankumatetira 42'a venene e'naze. <sup>25</sup> Hagi Kiriat-arimi rankumatet'iene Kefira rankumatet'iene Beroti rankumatet'iene 743'a e'naze. <sup>26</sup> Hagi Rama rankumatet'iene Geba rankumatetira 621ni'a vene'ne e'naze. <sup>27</sup> Hagi Mikmasi ran kumatetira 122'a venene e'naze. <sup>28</sup> Hagi Beteli rankumatet'iene Ai rankumatetira 223'a venene e'naze. <sup>29</sup> Nebo rankumatetira 52'a vene'ne e'naze. <sup>30</sup> Hagi Magbisi ran kumatetira 156si'a venene e'naze. <sup>31</sup> Hagi Elamu rankumatetira 1tausen 254'a vene'ne e'naze. <sup>32</sup> Hagi Harimi ran kumatetira 320'a venene e'naze.

<sup>33</sup> Hagi Lodi kumatet'iene Haditi kumatet'iene, Ono rankumatetira 725'a venene e'naze. <sup>34</sup> Hagi Jeriko rankumatetira 345'a venene e'naze. <sup>35</sup> Hagi Sena rankumatetira 3tausen 630'a venene e'naze.

*Pristi vahe'ene Livae vahe'ma ete enaza vahe'mokizmi zamagie*

<sup>36</sup> Hagi pristi eri'zama eneri'za vahe'ma eterema hu'nazana, Jeshua naga'nofipima Jedaia ne' mofavre naga'ma pristi eri'zama eneriza nagara

973'a venene azageno,<sup>37</sup> Imeri nagapima pristi eri'zama eneri'za venene nagara 1tausen 52'a azageno,<sup>38</sup> Pashuri nagapima pristi eri'zama eneriza venenea 1tausen 247ni'a azageno,<sup>39</sup> Harimi nagapima pristi eri'zama eneriza venenea 1tausen 17ni'a venene e'naze.

<sup>40</sup> Hagi Livae nagara, Hodavia naga'nofipinti, Jeshuane Katmielikizni ne' mofavre nagara 74'a e'naze.<sup>41</sup> Hagi Asapu nagapintima zagame'ma nehaza venenea 128'a venene e'naze.<sup>42</sup> Hagi Salumuma Aterima, Talmonima, Akubuma, Hatitama, Sobai naga'pintira ra mono nonkafante'ma kvama hanaza vene'nea 139ni'a e'naze.

<sup>43</sup> Hagi ra mono nompima eri'zama erisaza vahe'ma e'nazana, ama'i naga'nofipinti e'naze. Zihama, Hasufama, Tabaotima,<sup>44</sup> Kerosima, Sia-hama, Padonima,<sup>45</sup> Lebanama, Hagabama, Akubuma,<sup>46</sup> Hagabuma, Salmaima, Hananima,<sup>47</sup> Gidelima, Gaharima, Reaiana,<sup>48</sup> Rezinima, Nekodama, Gazamuma,<sup>49</sup> Uzama, Paseama, Besaima,<sup>50</sup> Asnama, Meunimima, Nefusimima,<sup>51</sup> Bakbukima, Hakufama, Harhurima,<sup>52</sup> Bazlutima, Mehidama, Hashamama,<sup>53</sup> Barkosima, Siserama, Temama,<sup>54</sup> Neziane, Hatifa naga'nofipinti'ene hu'za e'naze.<sup>55</sup> Hagi kini ne' Solomoni eri'zama eri'naza vahepinti'ma e'naza vahe'mokizmi naga nofi'mofo zamagi'a amanahu me'nne, Sotaima, Hasofereti'ma, Perudama,<sup>56</sup> Ja'alama, Darkonima, Gidelima,<sup>57</sup> Sefatiama, Hatilima Pokeret-Hazebaimine, Ami nagapinti'ene hu'za e'naze.

<sup>58</sup> Hagi ra mono nompima eri'zama eri'naza vahe'ene, Solomoni eri'zama eri'naza vahepinti'ma fore hu'naza vahe'ma e'nazana ana makara 392'a venene e'naze.

<sup>59</sup> Hagi mago'a vahe'ma Tel Mela ran kumateti'ene Tel Harsa rankumate'i'ene Kerubine, Adanine, Imeri rankumateki hu'za e'naze. Hianagi Israeli vahepina ina naga nofipinti e'nazafi zamagra erinte'amara osu'naze.<sup>60</sup> Hagi ana vahera, Delaiama, Tobiamma, Nekodakizmi ne' mofavre nagaki'za 652'a venene e'naze.

<sup>61</sup> Hagi pristi eri'zama e'neriza nagapintima Jerusalemima age'zama refako hu'za zamage'nazana Habaiama, Hakozima, Barzilai nagaki'za zamagia omneneg'e'za, pristi vahera fore hugara osu'naze. Hagi Barzilai naga nofi'mokizmi nezamageh'o'a, Gileadi ran kumateti Barzilai mofa ara eri'neanki'za, e'inahu hu'za naga nofi'zamimofo zamagia nehaze.

<sup>62</sup> Hianagi ana 3'a vahe'mokizmi nagara Israeli vahepina ina naga'nofipinti e'nafi zamagia onke'naze. Ana hu'negu agru osu'naze hu'za zamatrorage'za, pristi eri'zana e'ori'naze.<sup>63</sup> Hagi Juda vahe'mokizmi gavana ne'mo'a ana vahekura i'o huzamantge'za Ra Anumzamofonte'ma ofama eri'za e'naza ne'zampintira one mani'nazageno pristi vahe'mo'za Urimie nehaza havene Tamimie nehaza havereti Ra Anumzamofo avesi'zama kenakura satu zokago re'za ketesage'za, ana ne'zana negahaze.

<sup>64</sup> Hagi ana maka Israeli vahe'ma mopa zamire'ma ete'za e'nazana 42tausen 360'a vahe e'naze.<sup>65</sup> Hagi ana agofetura eri'za vevara ana makara 7tausen 337ni'a azage'za, zagame'ma nehaza vahera venenene a'enenenana makara 200'a e'naze.<sup>66</sup> Hagi hosi afuzmia 736si'agi miulie\* nehaza donki afura 245fu'agi,<sup>67</sup> 435fu'a kameli fu'taminki, tonki afura 6 tausen 720'a afutaminki hu'za zamavare'za e'naze.

<sup>68</sup> Hanki Israeli vahe'mo'zama Ra Anumzamofo mono noma ko'ma Jerusalema me'nere'ma etage'za, mago'a naganofite'ma ugota hu'naza

\* **2:66** Miulima hu'neana, ve donki afumo a' hosi afu azerigeno kasentena donkigu hu'ne.

vahe'mo'za Ra Anumzamofo mono noma ko'ma oti'nea nomarure'ma ete mono noma azerioti'zama kisaza zantamina, zamavesite ofa ami'naze.<sup>69</sup> Hagi rama'ama ante'nemo'a rama'a nemigeno, osi'ama ante'nemo'a osi'a amitere higeno ana maka golimofo kna'amo'a 500'a kilo higeno, silvamofo kna'amo'a ana makara 2tausen 800'a kilo hu'nea nemi'za pristi vahe kukena 100'a ami'naze.

<sup>70</sup> Hagi pristi vahe'ma Livae naga'ma zagame'ma hu vahe'ma ra mono nonkafante'ene, ra mono nompima eri'zama eneriza vahe'mo'zane mago'a vahe'mo'zanena ran kumazamire vu'za umani emanu hu'naze. Anama hazage'za ruga'a Israeli mopafima ranra kumatamima me'nea kumazmirega vu'za umani emanu hu'naze.

### 3

#### *Kresramna vu itane kresramnavu avu'ava zana ete eri agafa hu'naza naneke*

<sup>1</sup> Hanki Israeli vahe'mo'za ko nonkuma zamire umani emanu hutage'za henka, 7ni ikana agafa hu'ne. Anante maka vahe'mo'za erimago zamavugosa hu'za Jerusalemi kumate atru hu'naze. <sup>2</sup> Ana hutazageno Jozadaki nemofo Jeshua'ene afuhe'zane agranema pristi eri'zama eneriza naga'ene, Sealtieli nemofo Jerubabeli'ene naga'amozane agafa hu'za Israeli vahe'mokizmi Ra Anumzamofonte'ma tevefi kre fnanehu ofama hunte-saza ita ete tro hu'naze. Ana itama tro'ma hu'nazana Ra Anumzamofo eri'za ne' Mosese kasege avontafepi krente'naza kante ante'za tro hu'naze.

<sup>3</sup> Hanki zamagra anama mani'naza mopafi vahekura koro hu'nazanagi, ana zankura ontahi'za ko'ma kresramna vu itama me'nea nonte ete ita tro hute'za, anante maka nanterane kinaganena Ra Anumzamofontega tevefi kre fanane hu ofa hu'naze. <sup>4</sup> Ana hute'za Fugagi Nompima mani'za e'naza zanku'ma antahimiza musenkasema nehaza knarerera, avontafepima hu'nea kante amage ante'za, mago mago knarerera tevefi kre fanane hu ofa kre srama vutere hu'naze. <sup>5</sup> Hanki anama hute'za maka zugama tevefi kre fananema nehaza ofaramina nehu'za, kasefa ikama eme antegen'o'ma nehia ofa nehu'za, Ra Anumzamofoma mono'ma hunenteno musema hu knama huhamparinte'naza knaramintera kresramna nevu'za musenkasea hu'naze. Ana nehazage'za mago'a vahe'mo'za, zamagra'a zamavesite'ma Ra Anumzamofoma ami ofanena eri'za azage'za ofa hu'naze. <sup>6</sup> Hanki 7ni ikamofona ese knazupa agafa hu'za, Ra Anumzamofontega tevefi kre fanane hu ofa hunte'naze. Hianagi Ra Anumzamofo mono noma agafa hu'za azeri retrure trara zahufa azeri oraoti'naze.

#### *Ra mono noma ete azeri oti'za kinaza zamofo naneke*

<sup>7</sup> Hanki anante Pesia kini ne' Sairusi'a amne sida zafa Lebanonitira ome erigahaze huno Israeli vahekura hu knare huzmante'nne. E'ina hu'negu Israeli vahe'mo'za ne'zane waini tine olivi masavenena Saidoni vahe'ene Tairi vahe'enena miza sezmantazage'za Lebanonitira hagerimpi sida zafa eri'za Jopa ehanati'naze. Ana nehu'za Israeli vahe'mo'zama havema tagahu vahe'ene noma kisaza vhahera zagoa miza sezmant'e'naze.

<sup>8</sup> Hanki Israeli vahe'mo'zama Babiloniti'ma atre'za Jerusalema e'naza knareti'ma egeno 2ma hia kafumofo nampa 2 ikantera agafa hu'za Ra Anumzamofo mono nona ki'naze. Seatieli nemofo Zerubabeliki Jozadaki nemofo Jeshua'ene zamafuhe'za pristi vahe'mo'zane Livae naga'ene, ana maka vahe'ma kinafinti'ma atre'za Jerusalema e'naza vahe'mo'zane eri'zana eri agafa hu'naze. Hanki Ra Anumzamofo mono

nonte eri'zama kvama hu'nesage'za erisaza Livae vhahera, kafu zamimo'ma 20ti reti'ma menagate'nea vaheke zamazeri oti'naze.<sup>9</sup> Hanki ana mono no eri'zama kvama hu'naza Livae vhahera, Jeshua'ene ne' mofavre naga'ane afu'aganah'e'zane, Kadmieli'ene ne' mofavre naga'ane Juda ne' mofavre naga'ene, Ra Anumzamofo mono nomofonte eri'zana kva hu'nage'za eri'naze. Ana nehazage'za Henadadi ne' mofavre naga'ene zamafuhe'za Livae naga'mo'zane zamaza hu'za ana eri'zana kegava hu'naze.

<sup>10</sup> Hanki nomagi vahe'mo'zama Ra Anumzamofo mono noma azeri oti tra'ma ki vagamaretazage'za, pristi naga'moza pristi kukena eri nentani'za, ufen aenerizage'za, Asapu ne' mofavre Livae naga'mo'za nase'nasepa eri'zage'za, Israeli kini ne' Deviti'ma krente'nea kante amage ante'za Ra Anumzamofo agi ahentesga hunaku oti'naze.<sup>11</sup> Anante muse zagame hu'za Ra Anumzamofona agi'a ahentesga nehu'za, Ra Anumzamo'a knare hu'neankino Israeli vahe'motarera Agri avesizamo'a mevava huno nevie hu'za hu'naze. Anagema nehazage'za maka vahe'mo'za zamagerura erinte mago hu'za, ranke hu'za Ra Anumzamofona agia ahentesga nehu'za, susu hunte'naze. Na'ankure Ra Anumzamofo mono noma azeri oti tra'ma erinte fatgoma hu'naza zanku anara hu'naze.<sup>12</sup> Hianagi hakare'a ozafama re'naza pristi vahe'ene Livae vahe'ene naga nofite'ma ugogotama hu'naza vahe'ma, ko'ma me'nege'zama Ra Anumzamofo mono noma ke'naza vahe'mo'za zamagedesa antahi'naze. Ana nehu'za mono nomofo tra'ama ki vagama nerazage'za tusi zavi krafa nehazage'za, rama'a vahe'mo'za tusi muse hu'naze.<sup>13</sup> Hanki tusia zavi krafagemo'ene musenkasema haza agasasankemo'enena havia higeno krafamo'a mago avamenteke vige'za, e'i zavi krafa nehazanki, e'i musenkase nehazanki hu'za antahi amara osu'naze.

## 4

### *Ha' vahe'mo'za Israeli vahe ha' huzmante'za hu'naza naneke*

<sup>1</sup> Hanki Judane Benzameni naga'mokizmi ha' vahe'mo'zama antahizama, kinafinti'ma atre'za e'naza vahe'mo'za Ra Anumzana Israeli vahe'mokizmi Anumzamofo mono noma ete eme negize nanekema nentahi'za,<sup>2</sup> zamagra Zerubabelinte'ene Israeli naga nofite'ma ugagotama hu'naza vhahete vu'za amanage hu'naze, Asiria kini ne' Esarhadoni'ma tavreno ama mopafima eme tangetegatama mani'nonteti'ma eno meninte'ma eana, tamagrama ne-hazaza huta tamagri Anumzantera monora hunenteta, Kresramana vunentonanki, tattrenketa tamaza huta mono nona kimaneno.

<sup>3</sup> Hianagi Zerubabeli'ene Jeshua'ene Israeli naga nofite'ma ugota hu'naza kva vahe'mo'zanena amanage hu'za zamasami'naze, tagri Ra Anumzamofo mono nona taza huta onkigahaze. Pesia kini ne' Sairusi'ma hurante'nea kante amage anteta, Ra Anumzana Israeli vahe'mota Anumzamofo mono nona tagrake'za kigahune.

<sup>4</sup> Hagi anagema hazage'za ana mopafima ko'ma mani'naza vahe'mo'za, Juda vhahera zamarimpa eri haviza hu'naneke nehu'za, mono no onkisazegu zamazeri koro hu'naneke agafa hu'za hu'naze.

<sup>5</sup> Ana nehu'za Pesia kini ne' Sairusi'ma kinima manino egeno, Dariusi'ma agri noma erino kinima efore'ma hia knare'ma ege'za, Juda vhahera antahintahi zami'za erizazmia eri savri hanazegu, Pesia kamani eri'za vhahera masave hu kazigati zago zamiza zamavare'naze.

### *Ra Anumzamofo mono noma negi'za knama eri'naza naneke*

**6** Hagi Ahasuerusi'ma agafa huno kinima mania knafina, ha' vahe'zamimo'za Judama nemaniza vahe'ene Jerusalema nemaniza vahekura mago havige avonkre'za kini ne' Ahasuerusina ami'naze.

**7** Hanki henka Pesia kini ne' Artserksisi'ma kinima mania knafina, Bislamu'ma Mitredati'ma Tabeli'ene, zamagranema magokama eri'zama eneriza naga'enenki hu'za, kini ne' Artserksisina mago avonkremi'naze. Ana avoma kre'nazana Aramu zamagerupi kre'nage'za, hamprima amiza vahe'mo'za, Pesia vahe'mokizmi zamagerupi rekrahe humi'naze.

**8** Hagi ana mopama ugagota huno kegavama hu'nea gavana ne' Rehumu'ene avoma kre eri'zama eneria ne' Simsaikea Jerusalema nemaniza vahe'ma kaegama huzmante avona amanage huke kre atrakeno Pesia kini ne' Artserksisintega vu'ne.

**9** Nagra gavana kva ne' Rehumu'nane, avoma kre eri'zama eneria ne' Simsai'ene, kema refkohu vahe'ene mago'a kagri eri'za vahe'ma tagranema eri'zama eneriza vahe'ene, Ereki vahe'ma Babiloni mopafima nemaniza vahe'ene, Elamu vahe'ma Susa ran kumate'ma nemaniza vahe'ene, **10** ko'ma hanavenentake kini ne' Asurbanipali'ma mago'a vahe'ma zamavareno Sameria ran kumapima eme zamanteg'e'zama nemaniza vahe'ene, Yufretisi timofo kantu kazigama nemaniza vahe'mo'zane, ama avona kre atronkeno kagritega nevie. **11** Hanki anama kremi'naza avona amanage hu'za kremi'naze, Kini ne' Artserksisiga kagri eri'zama eneruna vahe'ma Yufretisi timofo kantu kazigama nemanuna vahe'mota musenkea atrenegantone.

**12** Kinimoka amana nanekea antahio, Juda vahe'ma kagri kumatmimpima mani'nareti'ma atre'za aza vahe'mo'za ko'ma Jerusalemi kumapima mani'ne'za kema nontahi'za, havi zmatu'avazama hu'naza vahe'mo'za e'za Jerusalemi ran kumapina nona eme ki'naze. Noma azeri ot'i'za tra'ama kivagama nere'za, ku'ma kegina hago huvagare'za nehaze.

**13** E'ina hu'negu kinimoka amagea antahio, ama ana vahe'mo'za Jerusalemi ran kuma'ma keginama huvagaresu'za takisi zagoa onkamigahaze. Ana hanageno'a zagoma nentana nompina zagoa omnena zagogura atupa hugahane. **14** Kagrama maka zampima tazama nehana zanku tagesa nentahita, vahe'mo'zama kagri'ma kagefenkamima atre'zankura tavenosigeta ana kazigati kinimoka amana nanekea negasamune.

**15** Kafahe'za ko'ma tro hu'naza zama krente'naza avontafepima kesanana, Jerusalema nemaniza vahe'mo'za kea ontahi vahe mani'neza, kini vahera ha renezmantazage'za, e'i ana zamavuzmava zanku kumazmia eme eri havizantfa hageno vahera omanitfa hu'naza kuma me'ne. **16** E'ina hu'negu kinimoka ama'na nanekea negasamune, zamagrama Jerusalemi ran kuma'ma eriso'ema nehu'za, kuma keginama huvagama resnagenka, Yufretisi ran timofo kantu kazigama me'nea kumatmina mago'ene kegava osugahane.

### *Kini ne'mo'a ana avonte nona huno kre zami'nea naneke*

**17** Hanki kinimo'ma ana avoma keteno'a, amanage huno nona'a avona kre atre'ne. Kavana ne' Rehumugane avontafe'ma kre eri'zama eneria ne' Simsaike Sameriamana mani'ne'za eri'zama zamazama nehaza vahe'ene, Yufretisi rantimofo kantu kazigama nemaniza vahera musenke atreraman-toe.

**18** Hanki tamagrama kre atre'naza avona nagri navure hamprite'za rekrahe hazage'na antahi'noe. **19** Anama hute'na eri'za vahe huge'za, korapa'ma fore'ma hu'nea zama krente'naza avontafepima hake'zama ke'nazana, ko'ma maniza enazaregatira kini vahe'mofo kema ontahino

zamagorgama omani zamavu'zmava zamo'a meno e'nea vahe mani'naze. Hankino meninena tamagerfa huno havi vaheke ana kumapina avite'naze. <sup>20</sup> Hanki korapara hankave kini vahe'mo'za Jerusalemi kumara kegava nehu'za, Yufretisi ran timofo kantu kazigama me'nea kumatmina maka kva huzmante'nage'za, ruzante ruzante takisi\* zagoa zami'naze. <sup>21</sup> E'na hu'negu ana vahera hanavetita zamasaminke'za Jerusalemi rankuma'ma eri oti'zama negi'za zana atre'za amne mani'nesage'na, nagrake hu izo huge, i'o hu'na anazanteria hugahue. <sup>22</sup> Hanki tamarga ame huta vutma ome ke hinke'za ana eri'zana e'ori atreho. Na'ankure tamagrama anama osnage'zama, zamagrama ome knare'ma hanageta tagra kegava huzmante-gara osugahune.

<sup>23</sup> Hanki kini ne' Artserksisi'ma krema atre'nea avona eri'za vu'za, gavana ne' Rehumune, avontafe kre eri'zama eneria ne' Simsainte'ene, magoka eri'zama eneriza vahete'ene ana avona ome hamprizami'naze. Anama hazage'za ha'zana eri'ne'za ame hu'za Jerusalemi vu'za Juda vahemota nona onkita atreho hu'za hanaveti'za ome huzmante'naze.

<sup>24</sup> Anante Juda vahe'mo'za Ra Anumzamofo mono noma Jerusalema ne-giza eri'zana e'ori'za atrageno me'nō eno, Pesia kini ne' Dariusi'ma kinima manino egeno nampa 2ma hia kafure ehanati'ne.

## 5

### *Mono noma kige'za atre'naza eri'zama erigafa hu'za ki'naza naneke*

<sup>1</sup> Hagi ana knafina kasnampa netre Hagai'ene Ido nemofo Zekaraiakea Israeli vahe Anumzamofo agifi kasnampa kea Jerusalemi vahete'ene Juda vahetera huama huke zamasami'na'e. <sup>2</sup> Hagi ana ke'ma hutake'za, Sealtieli nemofo Zerubabeli'ene Jozadaki nemofo Jeshuakea otike Jerusalemi ku-mate'ma Anumzamofo mono noma eme atre'naza eri'zana ete eri agafa huke enerike'za, Anumzamofo kasnampa vahe'mo'zanena zanaza hake'za ana eri'zana eri'naze.

<sup>3</sup> Hanki anama nehazage'za, Yufretisi rantimofo kantu kazigama me'nea kuma'ma kegavama hu'nea gavana ne' Tetanai'ene, eri'za ne'a Setar Bozenai'ene zanagranema eriza'ma eneriza vahe'mo'zanena Israeli vahete Jerusalemi vu'za amanage hu'naze, iza huramantgeftma ama mono nona eri ante fatgo hutama negize? <sup>4</sup> Anage nehu'za mago'ene amanage hu'za zamantahige'naze, Iza'za ama mono noma ki eri'zana enerizafi zamagi'a tasamiko? <sup>5</sup> Hianagi zamagri Anumzamo'a avunteno Juda ranra vahera kegava huzmante'naze. Ana hige'za Pesiati'ma e'nea kva ne'ene eri'za vahe'amo'za, Juda nagara eri'za zamia asevazi ozmantage'za eri'za nevu'za, Tatenai'ma avoma kremisigenoma kini ne' Dariusi'ma, ana avonte'ma kenonama hanigu avega ante'naze.

<sup>6</sup> Hanki Yufretisi ran timofo kantu kazigama me'nea kumama kegavama hu'nea gavana ne' Tatenai'ene eri'za ne'a Setar Bozenai'ene zanagranema eri'zama magokama eneriza, kini ne' Dariusina amanage hu'za avona kre'za atrente'naze. <sup>7</sup> Ana avoma kremi'naza avomo'a amanahu hu'ne. Kini ne' Dariusiga musenke atregantonanki krimpa fru'ne manigahane.

<sup>8</sup> Kini ne'mokama menima kasamisunana, tagra Juda mopare vuta ome konana, Ra Anumzamofo mono nona negizageta ke'hone. Ana mono nona tusinasi have taga hu'za negi'za, noma vazisgama hania zana zafareti

\* **4:20** Ruzahu ruzahu takesiema hu'nonana, kini nemofoma ami takesigi, kante takesigi, fenoma erino kantrifima efre takesigu hu'none.

kitagi'za asoparega nona azeri oti'naze. Mika vahe'mo'za kva hu'ne'za ana eri'zana hankaveti'za enerizageno, eri'zamo'a ame huno nevie.

<sup>9</sup> Anante amanage huta ranra vahera zamantahige'none. Iza hu'izoa huramantegetma ama mono nona ete erinte fatgo huta negize? <sup>10</sup> Ana nehuta avompima zamagima kreta kagri'ma kasamisnunkura, vugotama hu'nage'zama eri'zama eneriza vahe zamagigu zamantahige'none. <sup>11</sup> Anagema nehunke'za amanage hu'za tasami'naze, Anumzana monane mopenema tro'ma huno'ma kegavama hu'nea Anumzamofo eri'za vahe tagra mani'nonankita, korapara Israeli vahe'mota hankavenentake kini ne'mo, ama mono nona ki'nea no, ha' vahetimo'za eme eri haviza hu'naza no, ete azeri otita negune, <sup>12</sup> na'ankure Monafima mani'nea Anumzamo-fona tagehe'za rimpahé avu'avaza hazageno, Kaldiatu ne' Babiloni kini ne' Nebukatnesana atregeno eno Anumzamofo mono nona eme eri haviza ne-huno, ana maka vahera zamavareno Babiloni vuno kina ome huzmante'ne.

<sup>13</sup> Hianagi Babiloni kini ne' Sairusi'ma agafa huno kinima maria kafufina, kini ne' Sairusi'a mago huvempage huno, Ra Anumzamofo mono nona ete kiho huno hu'ne. <sup>14</sup> Anage nehuno ko'ma Nebukatnesa'ma Jerusalemi kumateti'ma Anumzamofo mono nompinti golireti'ene silvareti'ma tro'ma hu'naza zantamima me'neana erino Babiloni vuno, havi anumza'amofo mono nompima ome ante'nea zantamina, kini ne' Sairusi'a erino, Sesbasari'e nehaza ne' Juda mopare gavana mani'nogu kini ne' Sairusi'a agrama huhamparinte'nea ne' ana zantamina nemino, <sup>15</sup> amanage huno asami'ne, vunka Jerusalemi ra mono nompi amana zantamina ome nennenka, Anumzamofo mono noma ko'ma me'nere ete anante azeri otinka kio huno hunte'ne. <sup>16</sup> Ana hu'negu Sesbasari'a Jerusalemi eno ama Anumzamofo mono noma ki tra'a ki'ne. Hianagi ana knareti'ma eno ama knare'ma egeta, ana nona ki vava hu'nonanagi, ki vagaore'none huza tasami'naze.

<sup>17</sup> Juda vahe'mo'za e'inahu ke hazagu, Babiloni vahe'mo'zama fenozama nentaza nompima me'nenigura, kini ne'moka eri'za vaheka'a huzmante'sanke'za, ko'ma tro'ma hu'naza zantamimofo agenkema krente'naza avontafera hake'za, kini ne' Sairusi'ma Ra Anumzamofo mono noma Jerusalema ete kihoma huno huzmante'nesia kegura, Juda vahe'mo'za tamage hazafi hake'za eri fore hiho. Anama hutesanagenka, ana zankura na'ane huta huzmantegahumpi, kini ne'moka tasamio.

## 6

*Kini ne' Sairusi'ma ko'ma huvempama hu'nea ke'ma krente'naza kema hake'za eri fore hu'naza naneke*

<sup>1</sup> Hanki anante kini ne' Dariusi'ma ana avoma keteno'a, eri'za vahe'a huzmanteno, Babiloni vuta marerisa fenozama nentaza nompi, Sairusi'ma hu'nea ke'ma krente'nesaza avontafuku ome hakeho hige'za vu'naze. <sup>2</sup> Hagi ana avontafera Babiloni kumatera onke'naze. Hianagi Midia kaziga Ekbatana ran kumate mago avontafepi ana nanekea me'nege'za ome hake'za eri fore hute'za kazana, ana avontafepina amanahu naneke me'ne.

<sup>3</sup> Kini ne' Sairusi'ma eri agafa huno kinima maria kafufina, Ra Anumzamofo mono nona ete Jerusalemi kigahaze huno kini ne' Sairusi'a huvempa kea hu'ne. Ana nehu'za ana mono nompina, tevefi kre fananehu ofane, mago'a ofanena hugahaze. Hagi kotazana noma retrure tratamina, have tagahu'za asentegahaze. Ana mono nomofona soparega mareri'amo'a

27ni'a mita hina, asoparega zaza'amo'a 27ni'a mita hugahie. <sup>4</sup> Hagi asopa noma azeri otisaza zana, tusinasi havea taga hu'za 3'afi erinte agofetu agofetu hu'za erinte fatgo hu'za mareneri'za, ana agofetura zafa erintetere hu'za mareri'naze. Ana mono nonte maka'zama mizaneseta eri'za vahe'ma mizama sezmantesazana, kini ne'mofo nompima zagoma nentafinti eritma mizana sezmantegahaze. <sup>5</sup> Ana nehu'za Anumzamofo nompima eri'zama eri zantamima silvareti'ene golireti'enema tro'ma hu'naza zantamima Jerusalemima Anumzamofo mono nompinti'ma Nebukatnesa'ma erino Babilonima vu'nea zantamina ete eri'za Jerusalemi vu'za, Anumzamofo mono nompi ko'ma me'nere ome antegahaze.

<sup>6</sup> E'ina hu'negu Yufretisi rantimofo kantu zage fre kazigama kegavama hu'nana gavana ne' Tatenaigane, Setar Bozenaigane, eri'zama tanaza hu'za eneriza vahe'mo'zane mago'zana huo zmanfeta zamatreke'za, Ra Anumzamofo mono nona kih. <sup>7</sup> Hagi Juda vahe'mo'zama Anumzamofo mono noma negisnagetma mago'zana hutma eri'zana asevazi ozmantetma, zamatreke'za Juda mopare gavana ne'ene, Juda kva vahe'mo'zanena zamagra'a Anumzamofo mono noma ko'ma me'nea marurera ete erioti'za kih.

<sup>8</sup> E'ina hu'negu mago'ene huvempa hu'na tamasamuana, Juda kva vahera zamazahinke'za ana eri'zana enerisageta, Yufretisi rantimofo zage fre kazigama me'nea kumatamimpinti'ma, takisi zagoma zogita kinimofo nompima erintesaza takisi zagoreti, Ra Anumzamofo mono noma kisaza zanteria mizase'za neginkeno eri'zamo'a vino. <sup>9</sup> Hanki monafinkama mani'nea Ra Anumzamofoma, Jerusalemima mani'naza pristi vahe'mo'zama tevefi kre fanane hu' ofama hunte'zanku'ma hanagetma, ve agaho bulimakaono rama sipisipi afuro, ve anenta sipisipi afura avre nezamitma, witifi, hagegupi, wainigupi, tine masave nazanku'ma hanagetma, kema hanaza avamente maka zupa zamiho. <sup>10</sup> Ana nehinke'za, monafinkama mani'nea Ra Anumzamofona avesisia ofa nehu'za, Ra Anumzamofontega nunamuna hanageno, nagri'ene ne' mofavre nagani'a kegava huranteno.

<sup>11</sup> Hanki mago'enema hankave nanekema hanuana, mago vahe'mo'ma ama nanekema amage ontessiana, ana vahe'mofo noma'areti mago zafa avazu hu'za antregonia hute'za, avuvgafi resageno frigahie. Ana nehu'za ana ne'mofo nona eri taganavaziza magopi erintesageno moriri huno marerigahie. <sup>12</sup> Hanki Anumzamo Agra'a Jerusalemi kumakura huhamprino Nagri nagimoke me'nesige'za eza monora hunantegahazema huno'ma hu'nea kumakino, mago kinimo'o mago vahe'mo'ma nagri ke'ma eri atrege, azana erisga huno Jerusalemima me'nea mono nona eri havizana osugahie. Nagra Dairusi'na ama huvempa kea nehuanki ama anankea avariri fatgo hiho.

### *Ra Anumzamofo mono no kivagarete'za nunamu hu'za renagi'naza naneke*

<sup>13</sup> Hanki Yufretisi rantimofo kantu kazigama me'nea kuma'ma kvama hu'nea ne' Tetanai'ene eri'za ne'a Setar Bozenai'ene zanagramema magokama eri'zama eneriza vahe'mo'zanena, kini ne' Dariusi'ma huvempama huno kre'nea avoma hampari'za kete'za, avariri fatgo hu'naze.

<sup>14</sup> Hanki Juda kva vahe'mo'za Ra Anumzamofo mono no eri'zana knare hu'za eri'za vu'naze. Ana nehazageke tare kasnampa netre'na Hagai'ene Ido ne'mofo Zekaraiakea knare naneke zanasamike zamazeri hankave netike'za, eri'zana hankaveti'za eri'naze. Ana hume nevu'za Israeli vahe'mokizmi Ra Anumzamo'ma hu'nea kante amagenente'za, Pesia kini vahezagaa Sairusi'ma, Dariusi'ma, Artaseksiski hu'zama hu'nazankea amage

ante'za ana mono nona kivaga re'naze. <sup>15</sup> Hanki Dariusi'ma kinima manino egeno 6sima hia kafumofona, Adarie \*nehaza ikamofona 3zupa, ana mono nona kivaga re'naze.

<sup>16</sup> Ana hute'za maka Israeli vahe'ma, pristi vahe'ma, Livae naga'ene mago'a kinafinti'ma e'naza Israeli vahe'mo'zanena musenkase nehu'za, Anumzamofo mono nona nunamu hu'za erinte ruotge hu'naze. <sup>17</sup> Hanki Ra Anumzamofo mono noma musenkase nehu'za nunamuma hu'za renagi'za erinte ruotge'ma haza zupa, 100'a ve bulimakaogi, 200'a rama sipisipi afu'ene, 400'a ve sipisipi anentatami avre'za ana maka Ra Anumzamofona ofa hunte'naze. Ana nehu'za Israeli naganofite mago meme huhamprintetere hu'za, 12fu'a ve meme afu avre'za mago mago naga nofi'mofo kumi'ma eri atre ofa hu'naze. <sup>18</sup> Hanki ana nehu'za pristi naga'ene Livae nagara huhampri zmante'naza knare'ma, Ra Anumzamofo mono nompi Jerusalema eri'zama eriterema hanagu Moses'e'ma krente'nea avontafepima me'nea kante amage ante'za huhampri zamante'naze. (Livistikas-Pristi Eri'zane 8:1-36, Exo-Utirami 29:1-37).

### *Ra Anumzamo ozmahe zamagtere'nea knagu antahimi'za musenkase hu'naza naneke*

<sup>19</sup> Hanki Babilonima kina hu'za mani'naza vahe'ma enaza vahe'mo'za, Ra Anumzamo'ma zamavareno atirami'nea (pasova) knagu antahimi'za, ana maka vahe'mo'za ese ikamofona 14ni zupa, ne'zana nene'za musenkasea hu'naze. (Ekso-Utiramne 12:1-28) <sup>20</sup> Hagi pristi vahe'mo'zane Livae naga'mo'za, Ra Anumzamofo avure'ma agruma hu' avu'avaza tro hu'za zamazeri agru hu'naze. Anama hute'za Livae naga'mo'za, Ra Anumzamo'ma ozmahe'ma zamagtere'nea knare'ma, ahe sipisipi afura ahe'za, zamagrare'ene pristi nagate'ene, ana maka vahe'ma Babiloni kinafinti'ma e'naza vahete'enena ofa hu'naze. <sup>21</sup> Hanki ana maka Israeli vahe'ma kinafinti'ma e'naza vahe'mo'za, anama ofama haza afura nevagare'naze. Ana nehazage'za meg'i'vahe'ma ana mopafima mani'naza vahe'mo'za, agru osu tavu tva'ma nehuna zana netreta, Ra Anumzana Israeli vahe'mokizmi Anumzama amage'ma antesunema haza vahe'mo'zanena, ofama haza afu'mofo ame'a ne'naze. <sup>22</sup> Hanki Israeli vahe'mo'za 7ni'a zagemofo agu'afina zo-ore bretima nenaza knagura tusi'a musenkase hu'naze. Na'ankure Ra Anumzamo'ma Siria kini ne'mofo antahintahima eri rukrahe higeno, zamaza hige'za Israeli vahe'mo'za Ra Anumzana zamagri Anumzamofo mono noma ete ki'naza zanku tusi musenkase hu'naze.

## 7

### *Ezra'ma Babilonima atreno Jerusalema e'nea naneke*

<sup>1</sup> Hanki ama ana zantamima fore hutegenen henka mago'a kna evutegenen, Artserksisi'ma Pesia kinima mani'nea knafina, Ezra'a Babilonia atreno Jerusalemia mareri'ne. Ezra nef'a Seraia'e. Seraia nef'a Azaria'e, Azaria nef'a Hilkia'e. <sup>2</sup> Hanki Hilkia nef'a Salumu'e, Salumu nef'a Zadoku'e, Zadoku nef'a Ahitubu'e. <sup>3</sup> Hagi Ahitubu nef'a Amaria'e, Amaria nef'a Azaria'e, Azaria nef'a Meraioti'e, <sup>4</sup> Meraioti nef'a Zeraia'e, Zerai'a nef'a Uzi'e, Uzi nef'a Buki'e, <sup>5</sup> Buki nef'a Abisua'e, Abisua nef'a Finiasi'e, Finiasi nef'a Eleazar'i'e, Eleazar'i nef'a ugagota pristi ne'Aroni mani'ne. <sup>6</sup> Hagi Ra Anumzana Israeli vahe'mokizmi Ra Anumzamo'ma Moses'e'ma amigeno

\* <sup>6:15</sup> Adariema hu'nea ikana, 3 ikanku hu'ne.

Israeli vahe'ma zami'nea kasegea Ezra'a antahi ankere'neno, rempi hunezamia nekino, Babilonia atreno Jerusalemi mareri'ne. Na'ankure Ra Anumzamo'a agrane mani'negeno'e.

<sup>7</sup> Hanki kini ne' Artaserksisi'ma kinima manino egeno 7nima hia kafufina, Ezra'ene mago'a Israeli vahe'ene, pristi vahe'ene Livae naga'ene, zagame'ma nehaza vahe'ene, ra mono no kafante'ma kvahu vahe'ene, ra mono nompi eri'za vahe'mo'zanena Ezra'ene Babilonia atre'za Jerusalemi mareri'naze. <sup>8</sup> Hanki Artaserksisi'ma kinima mani'no egeno 7nima hia kafumofona 5fuma hia ikantera Ezra'a Jerusalemia ehanati'ne. <sup>9</sup> Ezra'ma Babiloni kuma'ma atre'neana, ese ikamofona ese zupa atreno, Jerusalemi kumatera 5fu ikamofona ese zupa ehanati'ne. Na'ankure Ra Anumzamo'a agrane mani'neno knare hunte'negu huno anara hu'ne. <sup>10</sup> Ezra'a maka knafina agu'areti huno Ra Anumzamofona kasegea rempi huno nentahino, ana kasegea agu'areti huno amage ante'ne. Ana nehuno Israeli vahera ana kasegene tra kenena rempi huzami'ne.

### *Kini ne' Artaserksisi'ma Ezra'ma avoma kremi'nea naneke*

<sup>11</sup> Hagi Israeli vahe Ra Anumzamofo kasegene tra kenena, Ezra'a pristi ne' mani'neno, Israeli vahera rempi hunezamia ne' mani'neankino, kini ne' Artaseksisima huvempama huno mago avoma kreno Ezrama ami'nea avomo'a amanage hu'ne.

<sup>12</sup> Nagra hakare'a kuma'ma kvama hu'noa kini ne' Artaserksisi'na ama avona kre'na, pristi ne' Ezraga Anumzamofo kasegema antahini hu'enka, monafima mani'nea Ra Anumzamofo kasegema rempima hu'nezamina ne'moka kre negami'na, musenke atregantoe.

<sup>13</sup> Nagra menina huvempa naneke huankino, nagrama kvama hu'noa Israeli vahepi, pristi vahepi, Livae naga'ma mani'nezama kagranema Jerusalemi yunaku'ma hanamo'za, amne Yugahaze huzmantoe. <sup>14</sup> Hanki nagra kini ne'mo'nane antahintahima nenamiza 7ni'a vahe'mo'zane, kagrira hu izo hugantonankinka amne vunka Jerusalemi kumate'ene Juda mopare'ma mani'naza vahe'mo'zanena Ra Anumzanka'amofo kasege avontafe'ma kzampima eri'nana kasegea, amagera nentazafi ome kegahane. <sup>15</sup> Hanki nagra kini ne'mo'nane antahintahima nenamiza vahe'mo'zanena tavesite musezana silvane golinena Israeli vahe'motma Ra Anumzamofona amunanki, erinka vunka Jerusalemima Agrama nemania mono nompi ome anto. <sup>16</sup> Hanki Babiloni kumatmimpinti'ma zogi'nana silvane golinena ana zanke hunka erinka vuo. Ana nehunka Babiloni mopafima mani'naza Israeli vahe'ene, pristi vahe'mo'zama, Ra Anumzazmimofo mono nomina Jerusalemima me'nefima, ofama huogu'ma zamavesite kami'naza ofanena eri'enkena vuo.

<sup>17</sup> Hagi ana zagoa kvahu so'e hu'enka, Jerusalema kagri Ra Anumzamofo mono nompima me'nea kresramna vu itare'ma kresramnama vanana zantamina, ve bulimakaonki, sipisipi afuki, ve anenta sipisipi afuki hunka miza nesenka, ofama hu'zanena witigi waini tinki hunka ana zagoretira mizaso.

<sup>18</sup> Hanki ana zantamima miza setenankeno'ma mago'ama mesia silvane golinena Ra Anumzamofo avesi avaririta knare'ma hania zana, kagrane kafuhe'zanena tamagri Ra Anumzamofona hunteho. <sup>19</sup> Hanki Ra Anumzamofo mono nompima eri'zama erisia zantamima kami'naza zana, erinka Anumzamofo mono nompi Jerusalemi omento. <sup>20</sup> Hanki anama

nehunkama, Anumzankamofo mono nompima ante'zanku'ma mago'a hanunka, kinimo'na zagoma nentaza nompinti, zagoa erinka atupa'ma hanana zana miza hugahane.

<sup>21</sup> Hanki nagra kiri ne' Artaserksisi'na menina huvempa hu'na huanki Yufretisi rantimofo kantu kazigama me'nea kumatmimpima mani'netma zagoma kegavama nehaza vhahera amanage hu'na neramasamue, pristi ne' Ezra'a monafinka mani'nea Ra Anumzamofo kasege'a rempi hunezamia ne' mani'neanki, Anumzamofo mono noma kinaku'ma mago'a zanku'ma tamantahigesigeta, ame hutma ana zana amiho. <sup>22</sup> Hianagi ana zantamima amisnazana ama avamena agateretma omiho. Silva 3400'a kiloa agateretma omiho. Hagi witia 13 tausen 500'a kiloa (500 kura) agateretma omiho, ana nehutma waini tina 2000ni'a lita agateretma omiho, olivi masavena 2000ni'a lita agateretma omiho. Hagi hagegura nama'agu avesigahie anama'a amigahaze. <sup>23</sup> Hanki monafinkama mani'nea Anumzamo'ma mono noma'ama ki'zanku'ma huramante'nia zana kegava hunetma avariri fatgo hiho. E'ina'ma osnageno'a Anumzamo'a nagri kini ne'monane, ne' mofavre naga'nima henkama kinima fore'ma hanaza naga'enena arimpa aherantegahie.

<sup>24</sup> Hagi mago'enema tamasamisuana antahihi, Pristi vaheteti'ene Livae nagateti'ene zagame'ma hu' vaheteti'ene, mono nonkafante'ma kvama nehaza vaheteti'ene, mono nompima eri'zama eneriza vaheteti'ene, mago'a Anumzamofo mono nompima eri'zama eneriza vaheteti'enena ruzahu ruzahu takisi zagoa e'oriho.

<sup>25</sup> Hanki Ezra'ga antahio, Anumzankamo'a tusi'a knare antahi'zana kami'nea antahizanteti, Yufretisi rantimofo kantu kazigama me'nea kumatmimpima keagama refko hu kva vhahera zamazeri otinke'za mani'ne'za, ana vhahera kva huzmanteho. Hagi mago'a vahe'ma Anumzamofo kasegema antahi so'ema osu'nesaza vahe'ma mani'nesazana kagra rempi huzamio.

<sup>26</sup> Hanki mago vahe'mo'ma kagri Anumzamofo kasegema amage ontege, kini ne' Artaserksisi'ha nagri kasegenema amage'ma ontlesia vhahera tamagerfa hu'za ahe frisageno frige, ahenatisageno ru moparega vuge, fenozama'a erige, kina huntege hugahaze.

### *Ezra'ma Ra Anumzamofo agi ahentesga hu'nea naneke*

<sup>27</sup> Hanki nagra Ezra'na Ra Anumzana tagehe'mokizmi Ra Anumzamo-fona muse hunte'na agi'a ahentesga nehue. Na'ankure Ra Anumzamo'a kini ne'mofona antahintahi'a azeri otigeno Jerusalemia Ra Anumzamofo mono nona eri avasase nehie. <sup>28</sup> Hanki Ra Anumzamo'a asunku huanteno, kini ne'ene agri'ma antahintahima nemiza vahe'ene, hankave eri'za vahe'amokizmia antahintahidi zamige'za nagrira nazeri so'e nehaze. E'ina hu'negu Ra Anumzana tagri Anumzamo'a nagrane mani'neno han-kavea nenamianki'na, Israeli vahepima ugotama hu'naza vahe'a amne zamavare'nugeta Jerusalemia marerigahune.

## 8

### *Babiloniti'ma atre'zama Ezra e'nema vu'naza vahe'mokizmi naneke*

<sup>1</sup> Hanki Artaserksisi'ma kinima mani'nea knafima, mago mago naga nofite'ma ugotama hu'naza vahe'ma, Babiloniti'ma atre'za Jerusalema nagranema vu'naza vahe'mokizmi zamagia amananahu hu'ne, <sup>2</sup> Finiasi nagapintira Gesomuki, Itamari nagapintira Danieliki, Deviti nagapintira Hatusiki, <sup>3</sup> Parosi nagapintira Sekenaia'ene 150'a vahe agranema

vu'naza vahe'mokizmi zamagi me'ne. Ana nehu'za zamagehe'i zamagima krente'naza avontafe'ene eri'ne'za vu'naze. <sup>4</sup> Hanki Pahatmoapu nagapintira, Serahia mofavre Elioenai'ene 200'a vahe agranena vu'naze. <sup>5</sup> Hanki Zatu nagapintira Jahazieli nemofo Sekania'ene, 300'a venene agranena vu'naze. <sup>6</sup> Hanki Adini nagapintira Jonatani nemofo Ebeti'ene, 50'a venene agranena vu'naze. <sup>7</sup> Hanki Elamu nagapintira Atalia nemofo Jesaia'ene, 70'a venene agranena vu'naze. <sup>8</sup> Hanki Sefatia naga'pintira Maikeli nemofo Zebadaia'ene, 80'a venene agranena vu'naze. <sup>9</sup> Hanki Joapu naga'pintira Jehieli nemofo Obadiah'ene, 218ni'a venene agranena vu'naze. <sup>10</sup> Hanki Bani nagapintira Josifia nemofo Selomiti'ene, 160'a venene agranena vu'naze. <sup>11</sup> Hanki Bebai naga'pintira Bebai nemofo Zekaraia'ene, 28'a venene agranena vu'naze. <sup>12</sup> Hanki Azagadi naga'pintira Hakatani nemofo Johanani'ene, 110ni'a venene agranena vu'naze. <sup>13</sup> Hanki Adonikamu naga'pintima henkama fore'ma hu'naza nehazavea, Elifeleti'ma, Jeuelima, Semaiaki hu'za 60'a venenene vu'naze. <sup>14</sup> Hanki Bigvai naga'pintira Uta'i'ene Zakurike 70'a venene vu'naze.

### *Ezra'ma Jerusalemi kumate'ma uhanati'nea naneke*

<sup>15</sup> Hanki Ahava kumapima enevia rantiomofo ankenare 3'a zage knafi kumara ementeta manineta nagra Ezra'na ana maka vahera zamavare tru nehu'na vahe'ene pristi vahe'ene rezaganena koana, anampina Livae nagapintira magore hu'na onke'noe. <sup>16</sup> E'ina hu'negu 9ni'a kva vahe'ma ke'ma huge'za e'naza vahe'mokizmi zamagi'a amanahu hu'ne, Eliezeriki Arieliki, Simaiaki, Elnataniki, Jaripiki mago ru Elnataniki, Nataniki Zekaraiaki, Mesulamu'ene, knare antahi'zama erina'a netrena zanagi'a Joiaripi'ene Elnataninenka ke huge'za e'naze. <sup>17</sup> Ana hute'na Livae vahete ugagota kva ne' Idontega nagra huzmantoge'za Kasefia kumate vu'za, agri'ene naga'ane ra mono nompima eri'zama e'neriza vahe'ene ome zamasamisage'za, Jerusalemima Ra Anumzamofo mono nompima eri'zama erisaza vahera huzmantesige'za esaze hu'na huzmante'noe. <sup>18</sup> Ra Anumzamo'a so'e avu'ava huranteno, maka eri'zama eri antahintahima eri'nea ne' Serebia atrageno e'ne. Hanki Serebia'a Mali negehokino Livae ne' Israeli nagapinti ne' mani'neankino, agranema e'nazana, ne' mofavre naga'ane afu aganahe'za ana makara 18ni'a venene e'naze. <sup>19</sup> Ana zanke hu'za Merari nagapintira Hasabiane Jeshaiane huznante'naze. Ana hazageke mofavre naga'zanine, naga'zani fatgone e'nazana 20'a venene zanagranena e'naze. <sup>20</sup> Hagi mono nompima eri'zama e'neriza vahera, 220'a vahe huzmanteg'e'za e'naze. Ana vahera korapa'ma zamagehe'imma kini ne' Deviti'ene ugota eri'za vahe'amo'za Livae naga'ma Ra Anumzamofo mono nompi eri'za zamaza hihoma hu'zama, huhamprima zamante'naza nagapinti vahe mani'nazankino, zamagi'a mago avontafepi me'ne.

### *Ne'za a'o hutma nunamu hiho huno Ezra'a zamasami'nea naneke*

<sup>21</sup> Hanki Ahava tinkenare mani'neta amanage hu'na vea kevua zamasami'noe, Ne'zana a'o huta Ra Anumzamofo avurera tavufga anteramita, antahigesunkeno, tagri'ene mofavre nagatine, feno zantinena taza huno kegava hurante'nesigeta Jerusalemia vugahune. <sup>22</sup> Hanki nagrama kini ne'ma antahigesugenno hosi agumpima mani'za nevaza sondia vahe'ene mopafima vu sondia vahe'ma huzmantesige'za kvama hurante'za vu'zankura nagaphe hu'ne. Na'ankure kini ne'enema mani'nena amanage hu'na asami'noe, Iza'o tagri Ra Anumzamofoma amage'ma antesia vahera,

ha'ma hurante'naku'ma hanaza vahera Agra'a kegava hurantegahie hu'na asami'noe. Hianagi Agri'ma amefima humisia vahera, Agra arimpa ahenezmanteno ha'rezmanteregahie hu'na hu'noe. <sup>23</sup> Ana hu'negu ne'zana a'o huta Ra Anumzantimo'ma kegavama huranteno'ma vanigu hanavetita nunamuna hanune nehuta, nunamuna huta antahigonkeno, Ra Anumzamo'a nunamuntia antahino kegava hurante'ne.

<sup>24</sup> Anantera pristi ne' Serebia nagapinti'ene pristi ne' Hasabia nagapintira 12fu'a ugagota pristi vahe huhampri nezmanter'na, pristi eri'zama eri'naza venenea 10n'i'a huhampri zmante'noe. <sup>25</sup> Hanki kini ne'mo'ene antahintahima nemiza vahe'ene ugota eri'za vahe'ane Israeli vahe'mo'zama tagri Ra Anumzamofo mono nompi zantamine hu'zama ofama tami'naza zantamina, nagra Ezra'na eri'na 12fu'a ugagota pristi vahe'ma huhampri zamante'noa vahe kegava hiho hu'na refko hu'na silvane golinena zami'noe. <sup>26</sup> Ana'ma hu'na zami'noa zantamimofo kna'amo'a amanahu hu'ne, silvamifo kna'amo'a 22 tani higeno, golimofo kna'amo'a 3tausen 400'a kilogremi higeno, silvareti'ma tro'ma hu'nea zantamina 100'a zuompagino, mago mago zuompamofo kna'amo'a 34 kilogremi hutere hu'ne. <sup>27</sup> Hanki golireti'ma tro'ma hu'naza zuompa 20'agino, mago mago zuompamo'a 8'a kilogi 400gremi hutere hu'ne. Hanki bronsireti'ma tro'ma hu'naza zuompa taregino, miza zaniamo'a tare golire zuompama mizama nesaza avamente vu'ne.

<sup>28</sup> Hagi anante ana pristi nagakura amanage hu'na zamasami'noe, Tamagrane ama zantaminena Ra Anumzamofo avurera ruotage hu'naze. Hagi silvane golinena, Ra Anumzana tamagri tamafahe'i Ra Anumzamofo vahe'mo'za amavesite ami'naza ofe. <sup>29</sup> Hanki ama ana zantamina kegava hu'neta erita vuta Jerusalemia, Israeli naga'nofite'ma ugota hu'naza vahe'ene ugagota pristi vahe'ene Livae naga'mokizmi zamavuga Ra Anumzamofo mono nompima hunaragintene'za fenozama nentazafi, ome anteta kna'a refko huta keho. <sup>30</sup> Hanki anante pristi vahe'mo'zane Livae naga'mo'za ana maka silvane goline mono nompima ante zuomparaminenena eri'za kna'amofona refko hu'za kete'za, Ra Anumzamofo mono nompi Jerusalemi omente'naku eri'za vu'naze.

<sup>31</sup> Hanki ese ikamofona 12fu zupa Ahava tin ankenare'ma mani'nontetira atreta Jerusalemia vu'none. Ra Anumzamo'a tagrane mani'neno, knare huno kva huranteno vigeno, ha' vahe'mo'zane kumazufa vahe'mo'za karankama nevunke'za mago'zana osu'naze. <sup>32</sup> Hagi Jerusalemia uhanatiteta 3'a zage knafi mani frua hu'none.

<sup>33</sup> Hanki mani fruma huteta 4ma hia zage zupa Ra Anumzamofo mono nompi vuta, silvane goline mago'a zantamina eritama vu'nona zantamina, sigerile ome hantita kna'a refko huta negeta, pristi ne' Meremoti Uria nemo-foki pristi ne' Eleazar Finiasi nemofo, tare Livae netre Jeshua nemofo Josabati'ene Binui nemofo Noadia'ma hu'za mani'nageta ome zami'none. <sup>34</sup> Hagi ana maka zantamimofo kna'amofona hampri'za erinte fatgo nehu'za sigerire erinte'za kna'a erite'za, ana maka zantamimofo kna'amofona mago avontafepi krente'naze.

<sup>35</sup> Hagi anante kinafinti'ma Babilonima atre'zama e'naza naga'mo'za Israeli Ra Anumzamofontega tevefi kre fanane hu ofa hu'naze. Ana maka Israeli vaheteku hu'za 12fu'a ve bulimakao aheza kresramana nevu'za, ve sipisipi afura 96si'a aheza kresramna nevu'za ve anenta sipisipi afura 77ni'a ahe'za kresramna vu'naze. Ana nehu'za kumi zamima eritre ofa 12fu'a meme afutami aheza kresramna vu'naze. Hagi ama ana maka afutamina

tevefi kre fanane hu ofa Ra Anumzamofontega hu'naze. <sup>36</sup> Hanki kini ne'mo'ma kre'nea avona eri'na, Yufretisi rantimofo kantu kazigama me'nea kumatamima kvama hu'nea Gavana ne'ene kva vahete'ene, eri'za vahetera atronkeno vuno eno hu'ne. Hagi ana avoma kete'za, tagira tazeri so'e nehu'za, Ra Anumzamofo mono nompi eri'zanena taza hu'naze.

## 9

### *Israeli vahe'mo'zama meg'i'a vahe'ene arave nehaza zanku Ezra'a keaga hu'nea naneke*

<sup>1</sup> Hanki anama hutonke'za henka mago'a kva vahe'mo'za nagrite e'za amanage hu'naze, Israeli vahe'mo'zane pristi vahe'mo'zane Livae naga'mo'zanena, ko'ma ama mopafima mani'naza vahe'mo'zama hu'naza kasrino haviza hu'nea havi zamavu zamavarara zamavariri'za nehaze. Ana havi zamavu zamava'ma nehaza vhahera Kenani vahe'ma, Hiti vahe'ma, Perizi vahe'ma, Jebusi vahe'ma, Amoni vahe'ma, Moapu vahe'ma, Isipi vahe'ma, Amori vaheki hu'za mani'naze. <sup>2</sup> Na'ankure mago'a Israeli vahe'mo'za ana meg'i'a vahepintira a'nanee energie'za, mofavre zamimo'za anazanke hu'za ara eri'naze. Ana nehu'za Ra Anumzamo'ma nagri vahe fatgo mani'nazema hu'neankea eri havia hu'naze. Ana kumira ugota kva vahe'mo'zane, eri'za vahe'mo'za ugota hu'za nehazage'za, vea kevumo'za zamage ante'za ana kumira hu'naze.

<sup>3</sup> Hanki nagra Ezra'na anankema nentahi'na kukenanine, amega nakre ku'ninena tagato nehu'na, naseni nazoka'ene nagi nazoka'enena vararete'na, antahintahinimo'a haviza hige'na, akohe'na mani'noe.

<sup>4</sup> Anante mago'a vahe'ma, Israeli vahe Ra Anumzamofo nanekegu'ma koroma hunentaza vahe'mo'za eme nagagi'naze. Zamagra Ra Anumzamo'ma kumi'ma nehaza vahe'ma zamazeri havizama nehia zankura koro nehu'za, Babilonima kinafinti'ma e'naza vahe'mo'zama nehaza havi zamavu zamava nege'za, e'za nagrama akohe'nama mani'nore eme atru hu'za mani'nageno kinaga ofama hukna elhanati'ne.

### *Veamokizmi kumiku huno Ezra'a kumima huamama huno asunku hu'nea naneke*

<sup>5</sup> Hanki kinaga ofama hu knama ege'na, kukenanine nakre ku'ninema tagato'ma hute'na mani'noretira oti'na nare'na nere'na, Anumzana Ranimofontega nzantre'na erisga nehu'na, <sup>6</sup> amanage hu'na nunamuna hu'noe, Ra Anumzanimoka nagrama kagri kavure'ma e'zankura tusi nagaze hie. Na'ankure tagra tusi kumi hunkeno, kumitimo'a tagatereno monafi mareri'ne. <sup>7</sup> Korapa tagehonteti eno meni tagritema egeta tusi'a kumi hu'none. E'ina hu'negu Kagra ha' vahetia zamatranke'za e'za tagri'ene kini vahetine pristi vahetinenha ha' eme hurante'za tagatere'naze. Ana nehu'za mago'a vhahera eme zamahe nefri'za mago'a vhahera eme tavre'za kina ome hurante'naze. Ana nehu'za feno zantia eneri'za tatarazageta tagazegu nehuta mani'none.

<sup>8</sup> Hianagi Ra Anumzamoka menina ete kasunku hurantenka, osi'a naga tatranketa kinafintira atreta knare kumaka'afi Jerusalemia e'none. Ana nehunka Kagra hankave ka'areti kinafintira taza hanketa, kora kazokazo eri'za vahe mani'nonanagi, menina fru huta knare huta mani'none. <sup>9</sup> Tagra kazokzo eri'za vahe mani'nonanagi Rana tagri Anumzamoka kamefira huarami'nane. Kagra kavesi nerantenka, kasefa asimia tamiaza hunka, Pesia kini vhahera hanke'za tazeri so'e nehu'za, tatarazageta mono noma ko'ma

havizama hu'neana ete eme kiteta, Jerusalene Juda mopafina menina so'e hunka kva hurantanketa mani'none.

<sup>10</sup> Hianagi menina tagri Ra Anumzamoka mikazama tro'ma hurantenanta na'anee huta kasamigahune? Kagra ana maka knare zantami tro hurante'nane. Hianagi Kagri kasegea tamefi humita amagera onte'none. <sup>11</sup> Hagi eri'za vaheka'a kasnampa vahe'mokizmi zamagipi huvazinka ana nanekea amanage hu'nane, Amama unefreta erisantima hare'naza mopamo'a nagri navurera agru osu'nue. Na'ankure ana mopafima mani'naza vahe'mo'za havi zamava hu'za ana maka mopa eri himna vu'naza mopafi unefraze. <sup>12</sup> E'ina hu'negu mofo'nanetamia zamatreke'za ana vahetera nomanisageta, ana vahepintira ne' mofavretamirera ara avre ozamaho. Ana vahe'enena mago tamarimpa hutma nomanita, mago'a zama tro'ma hunaku'ma hnageta zamaza osiho. Hagi ama ana nanekema amagema antenuta ana mopafina knare hutma mani'neta, hankavenentake vahemaniyahaze. Ana hu'neseg'za henka ana mopa tamagehe'za erisanti hare'za mani vava hu'za vugahaze.

<sup>13</sup> Hagi kagri kea amagera onteta tusi'a kumi huta hazenke hunonanagi, Ra Anumzamoka kagra ana kumitimofo nona'a tusi'a knaza tamisinagi, osi knaza neraminka, tatranketa menina ofri osia nagara mani'none. <sup>14</sup> Tagra na'anee huta Ra Anumzamoka kasegea ete rutagreta meg'i a vahe'ma haviza huno agoterfa avu'avazama nehaza vahetera mofavre nagatia zamatre'sanunke'za vea erige, ara erige hugahaze? Tagra antahi'none anama hanunkena'a, Kagra karimpa ahenerantenka ana maka tahe fanane hananketa magore huta omanigahune. <sup>15</sup> Ra Anumzana Israeli vahe Anumzamoka, kagrake fatgo kavukvazana nehane. E'ina hu'negu ko'ma tazeri havizama nehunka menina osi'a nagara tatranketa mani'none. Tagra kumike vahe mani'nonankita, Kagri tava'ontera manigara osu'none.

## 10

### *Israeli vahe'mo'za kumizmi huama nehu'za zamasunku hu'naza naneke*

<sup>1</sup> Hanki Ezra'a Ra Anumzamofo mono nomofo avuga, avugosaregati umaseno nunamu nehuno zavira neteno Israeli vahe'mokizmi kumi'ma huama'ma nehige'za, Israeli vene'nema a'nanema ne' mofavre naga'ma hu'za tusi'a vahekerfamo'za Ezra'ma mani'nere e'za, zamagranena tusi zavi emete'naze. <sup>2</sup> Anante Elamu nagapinti Jehieli nemofo Sekania'a Ezrante eno amanage huno hu'ne, Tagra Anumzantimofo kea rutagreta meg'i a vahepintira a'nea eri'none. Hianagi mago kankamuna me'nankita ana hazenke zama atresanunkeno'a, Ra Anumzamo'a tazeri havizana osugahie. <sup>3</sup> Hanki menina Ra Anumzantimofo avure mago huvempa ke huta, meg'i a'nenetine mofavre naga'zaminena huzmantenunke'za mopa zamirega vugahaze. Hanki Ezragane Anumzamofo ke'ma amage'ma nentaza vahe mo'zanema tasamisnaza kante anteta anara hugahune. E'inahu'ma hanunana Anumzamofo kasegefima hu'nea kante amage anteta anara hugahune. <sup>4</sup> E'ina hu'negu Ezraga kagri eri'zanki otinka ama ana knazana eri fatgo huo. Tagra keka'a antahigamita nazanoma hanana zana tro hugahunanki, korora osunka oti hanavetinenka ana eri'za erio.

<sup>5</sup> Anagema higeno Ezra'a otino ugota pristi vahe'ene Livae naga'ene ana maka Israeli vahe'mokizmia zamasamino, Huvempa kema hutma Sekania'ma hia kea amage antegahune hutma huvempa hihohige'za ana hu'naze. <sup>6</sup> Hanki Ezra'ma Ra Anumzamofo mono nomofo avugama mani'neretira atreno vuno, Eliasipi nemofo Jehohanani'ma nemasefinka

vu'ne. Anampinka ne'zane tinena a'o huno mani'neno, Israeli vahe'ma kinafintima e'naza vahe'mo'zama hu'naza kumikura tusi zavi neteno asuzampi mani'ne.

<sup>7</sup> Hanki anante Juda kva vahe'mo'zane eri'za vahe'mo'zanema Babiloni kinafinti'ma atre'za e'za Jerusalemi kumapine Juda kumapima emani'naza vhahera, Jerusalemi kumate maka eme tru hiho, hu'za kea atre'zmante'naze.

<sup>8</sup> Hanki iza'o 3'a zagemofo agu'afima omesia vahe'mofona, ranra vahe'mo'zane kva vahe'mo'zama hanaza kante ante'za, fenozama'a eri hana nehu'za, kinama hute'za e'naza Israeli naga'pintira ahenatitregahaze.

<sup>9</sup> Hanki 3'a zagemofo agu'afi ana maka Juda naga'ene Benjamini naga'moza Jerusalemi kumate eme tru hu'naze. Ana'ma eme atru hu'nazana 9ni ikamofona 20ti zupa maka Anumzamofo mono nomofo avuga eme atru hu'za mani'nazageno, ana zupa tusi'a ko nerigeno, atru'ma hu'nafima efore'ma hanige'za antahisaza kegu'enena tusi zamahirahite'ne.

<sup>10</sup> Hanki anante pristi ne' Ezra'a otino amanage huno zamasami'ne, Tamagra Ra Anumzamofo tra kea tamefi humita, meg'i'a a'nanea erita Israeli vahe'mota kna eriramize. <sup>11</sup> Hanki menina Ra Anumzana tamagehe'i Anumzamofonte kumitamia huama nehutma, Agri avesi'za amage anteho. Amama emani'naza mopafi vahe tvaontera omanitma afete nemanitma, meg'i'a a'nanema eri'nazana zamatreho.

<sup>12</sup> Anante ana maka vahe'mo'za ranke hu'za, Kagra tamage hanankita kagrama hana nanakea amage antegahune. <sup>13</sup> Hianagi tusi'a koneriankita ama vahe krerfamota magoke knafino tare knafina otita manineta ama ana kea eri fatgo hugara osu'none. Na'ankure rama'a vahe'mota meg'i'a a'nanea erita tusi'a kumi hu'none. <sup>14</sup> E'ina hu'negu kva vahetimo'za Jerusalemi mani'neza ama ana knazana taza hu'za erigahaze. Hanki kumat-ifima iza'o meg'i'a a'nanema eri'nesia vahe'ma mani'nesimo'a, huhampri'ma ante'nesaza knarer, kuma'afinti kva vahe'ene keagama refko'ma nehaza vahe'ene zamavare'neno ana zupa eno ana knazana emeri fatgo hugahie. E'inama hanunkeno'a Anumzamo'a arimpa aheorantegahie. <sup>15</sup> Anage'ma hazage'za maka ana kerera mago zamarimpa hu'naze. Hianagi Asaheli nemofo Jonatani'ene Tikva nemofo Jazeiakea ana nanekerera mago zanarimpa osu'na'e. Ana nehake'za Livae nagapinti netre Mesulamu'en Sabetaikea zanagritega eme anteke zanaza hu'na'e.

<sup>16</sup> Hanki kva vahe'ma huhampriage'za mani'neza ana knazana erigahaze hu'zama haza kerera, Babiloni kinafinti'ma ana maka e'naza vahe'mo'za mago zamarimpa hu'naze. Anante pristi ne' Ezra'a, Israeli naga nofite'ma ugagota hutere hanaza vhahera huhampri nezmanteno, avontafepi zamagi'a krente'ne. Hagi 10ni ikamofona ese knazupa agafa hu'za meg'i'a a'nanema eri'naza vhahera ke hazage'za e'za ana knazana eri fatgo hu'naze. <sup>17</sup> Hanki meg'i'a a'nanema eri'naza ve'nenemokizmi knazana 3'a ikampi eri'za vu'za, ese ikamofona ese zupa ome vagare'naze.

### *Meg'i'a a'nanema eri'naza ve'nenemokizmi zamagima krente'naza naneke*

<sup>18</sup> Hanki pristi nagapinti'ma meg'i'a a'nanema eri'naza ve'nenemokizmi zamagi'a amanahu hu'ne, Jozadaki nemofo Jesuane afu'agna he'zama mani'naza nagapintira, Maseianki Elieserinki Jaribinki Gedalianki hu'za hake'za zamazeri fore hu'naze. <sup>19</sup> Anama hazage'za hago haviza hu'none hu'za nehu'za huvempa hu'za meg'i'a a'nanema eri'naza a'nanea nezmatre'za, mago ve sipisipi afu azeri'za kumi ofa hu'naze. <sup>20</sup> Hanki Imeri nagapintira Hananiki Sebadaia'e. <sup>21</sup> Hagi Harimi nagapintira Ma'aseiaki Ilaijaki

Simaiaki Jehieliki Usia'e. <sup>22</sup> Hagi Pasuri nagapintira Elioenaiki Maseiaki Ismaeliki Netaneliki Jozabadiki Elasa'e. <sup>23</sup> Livae nagapintira Jozabadiki Simeiki Kelaiaki (mago agi'a Kelita'e) Petahiaki Judaki Eliezeri'e. <sup>24</sup> Hanki zagate'ma hu nagapintira Eliasibi'a agrakere. Ra Anumzamofo mono no kafante'ma kvama nehaza nagapintira Salumuki Telemiki Uri'e. <sup>25</sup> Hanki mago'a Israeli vahepinti'ma meg'i'a a'nanema eri'naza ve'nemokizmi zami'i amanahu hū'ne. Parosi nagapintira Ramiaki Iziaki Malkijaki Mjaminiki Eleasariki magora ru Makiaki Benai'a'e. <sup>26</sup> Hagi Elamu nagapintira Mataniaki Zekaraiaki Jehieliki Abdiki Jeremotiki Elaija'e. <sup>27</sup> Zatuni nagapintira Elioenaiki Eliasibiki Mataniaki Jeremotiki Zabadiki Aziza'e. <sup>28</sup> Bebai nagapintira Jehohananiki Hananiaki Zabaiki Atlai'e. <sup>29</sup> Hagi Bani nagapintira Mesulamuki Malukiki Adaiai Jashubuki Sialiki Jeremoti'e. <sup>30</sup> Hagi Pahat-Moapu nagapintira Adnaki Kelaliki Benaiaki Maseiaki Mataniaki Bezaleliki Binuiki Manase'e. <sup>31</sup> Hagi Harimi nagapintira Eliezeriki Isijaki Malkiaki Simaiaki Simioniki, <sup>32</sup> Benjaminiki Malukiki Simaria'e. <sup>33</sup> Hasumu nagapintira Matenaiki Matataki Zabadiki Elifeletiki Jeremaiaki Manaseki Sime'i'e. <sup>34</sup> Hagi Bani nagapintira Madaiki Amramuki Ueliki, <sup>35</sup> Benaiaki Bedeiai Keluhiki, <sup>36</sup> Vaniaki Meremotiki Eliasibiki, <sup>37</sup> Mataniaki Matenaiki Ja'asuki, <sup>38</sup> Baniki Binuiki Simeiki, <sup>39</sup> Silemiaki Neteniki Adaiai, <sup>40</sup> Maknadebaiki Sa-saiki Saraiki, <sup>41</sup> Azareliki Silemiaki Simariaki, <sup>42</sup> Salumuki Amariaki Josefe'e. <sup>43</sup> Hagi Nebo nagapintira Jeieliki Matitiaki Zabadiki Zebinaki Jadaiki Joeliki Benai'a'e. <sup>44</sup> Ama ana maka ve'nememo'za meg'i'a a'nane eri'naze. Hanki ana a'nefintira mago'amo'za mofavrea zamante'naze.

## Nehemaia Nehemaia Kre'nea Avontafere

### *Nehemaia nunamu hu'nea naneke*

<sup>1</sup> Hanki Hakalia nemofo Nehemaia'a amanage huno naneke'a krente'ne, Pesia kini ne' Artserksisi'ma kinima manino egeno 20tima hia kafufina, Kislevie nehaza ikampina nagra Nehemaia'na hankavenentake vihu m'nea ran kumapi Susa mani'noe. <sup>2</sup> Hanki ana zupa mago nena fu ne' Hanani'a mago'a venene'zagane Judatira nagritega azage'na, amanage hu'na zamantahige'noe, Jiu vahe'ma Babiloni kinafinti'ma atre'za vu'naza nagara knare huza mani'zageno, Jerusalemi kuma'mo'enena knare huno m'neo hu'na zamantahigoge'za, <sup>3</sup> zamagra amanage hu'za nasami'naze, Babiloni kinafinti'ma atre'zama vu'naza naga'mo'za tusi'a knafi nemanize. Ana nehazage'za tva'ozamire'ma nemaniza vahe'mo'zanena huhaviza huzmantazage'za zmagazegu hu'naze. Jerusalemi rankumamofo have kegina ahe fragu vzinetre'za, kuma kegina kafaramina teve tagintazageno te fanane hu'ne.

<sup>4</sup> Hagi anankema rentahi'na, mopare mani'na tusi zavi nete'na mago'a zage knafi ne'zana a'o hu'na mani'nena, monafi Anumzamofo avurera zavira netena nunamuna amanage hu'na hu'noe.

<sup>5</sup> Ra Anumzana monafi Anumzamoka hankavenentake hu'nenka marerigaterenana Anumza mani'nane. Ana hu'nenka iz'a'o kagri'ma kavesi neganteno kagri kasegemä amage'ma nentea vahera, vagaore kavesizanu navesi zamantegahue hunka huhagerafi huvempa keka'a amage antenka zamavesi nezamantana Anumza mani'nane. <sup>6</sup> Muse hugantoanki kavua antenka nenagenka, eri'za vahekamo'nama kagri kavure'ma Israeli vahekagu'ma, feru'ene kenage'enema nunamuma nehuana kagesa antenka antahinamio. Ana nehu'na Israeli vahe'motama kagri kavure'ma hu'nona kumiku'ene, nagra kumiku'ene, nena fa naga'mozama hu'naza kumikura kagri kavure huama nehue. <sup>7</sup> Kagri kavurera kefo tavutva nehuta, havizantfa hu'none. Ana nehuta amage'ma anteho hunkama eri'za vaheka'a Mosesema ami'nana kasegene tra kekanena amagera onte'none. <sup>8</sup> Hianagi muse hugantoanki eri'za vaheka'a Mosesema amanahu ke'ma hunte'nana kegu kagesa antahio. Tamagra Israeli vahe'motama Nagrite'ma mani fatgoma osutma tamefi'ma hunamisage'na, tamagrira tamazeri panani hanugetma kokankoka vahe moparega vuta eta huta umani emanu hugahaze. <sup>9</sup> Hianagi tamagrama Nagrite'ma eta kasegeni'ama amage'ma antesage'na, mopama omete emete hutegama kinama ome hu'nesaregatira tamavre'na Nagri nagima hentesga hugahazema hunama huhampri ante'noa kumate tamavre'na egahue hunka'ma hu'nana kegura kagesa antahio. <sup>10</sup> Hanki tagra Israeli vahera Kagri vahe mani'neta Kagri eri'za vahe mani'none. Kagra tusi'a hankaveka'areti'ene, hankavenentake kzanteti taguvazinka kinafinti tavre'nana vahe mani'none. <sup>11</sup> Ra Anumzamoka muse hugantoanki eri'za vahekamo'nama nunamuma huana kagesa antenka antahi nenaminka, mago'a eri'za vaheka'ama Kagri kagima ahentesgama nehaza eri'za vahe'kamozanema nehaza nunamune nentahinka, muse hugantoankinka menina eri'za vahekamo'na, waini tima tro'ma hu'nama nemua kini ne'mofona arimpa azeri otisankeno asunkura hunanteno, inazanku'ma hanua zana amne tro hanigeno knare'zantfa hino.

## 2

*Nehemaia'ma Jerusalemi ome kenaku vu'nea naneke*

<sup>1</sup> Hanki Artserksisi'ma kinima manino egeno 20tima hia kafumofona Nisani ikampina, ko'ma nehuaza hu'na kini ne'mofo waini tina tagi'na eme ami'noe. Hianagi mago'a zupama nehuazana hu'na ana zupa musena osugeno navugosamo'a evurami'ne. <sup>2</sup> Ana'ma higeno'a kini ne'mo'a nantahigeno, Kagra kria e'ori'nananagi na'a higeno kavugosamo'a evuneramigenka musena nosane? Mago'a zamo higeno krimpamo'a musena nosifi? Anagema hige'na nagra tusi koro nehu'na, <sup>3</sup> kini ne'mofo ke'arera amanage hu'na kenona'a hu'noe, kini ne'moka knare hunka za'zate kinia maninka vugahane. Nagrama musema nosuana na'ankure, nagehe'mokizmima asezamante'naza rankuma'mo'a tusi'a zampi havizantfa huno me'negeno, ana kuma'mofo kafana tevemo tefanane hu'negu anara nehue. <sup>4</sup> Anagema hugeno'a kini nemo'a amanage huno nasami'ne, Na'a kagrira hugantesuegu kave'nesie, hige'na anante ame hu'na monafi Anumzamofontega nunamuna hu'noe. <sup>5</sup> Nehu'na amanage hu'na kini ne'mofona antahige'noe, kagrama antahi musema hunantesnanke'na Juda mopare mopa agafa'nire vu'na ome kete'na, maka'zana ome eri so'e hanue. <sup>6</sup> Hanki kini ne'mofo nenaro kuini a'mo'a kini nemofo tava'onte mani'negeno kini ne'mo'a nantahigeno, nama'a kna umanitenka etema esanana ina zupa egahane? Anage nehuno amne vugahane huno hu izo hige'na, etema esanua kna fatgogura asami'noe. <sup>7</sup> Hagi anante mago'ene kini nera amanage hu'na antahige'noe, Kini ne'mokama antahi so'ema hunantesnunka, Yufretisi rantimofo kantu kazigama me'nea kumatmimpima kva hu'naza vahetega knare mago'a avona kre namisanke'na, nevu'nama ana kumapi gavana vahetamina ana avona ome zamisanuge'za, nege'za mago'zana osu natresage'na Juda moparera vu'na uhanatigahue. <sup>8</sup> Hanki kini ne'mofo zafa tanopare'ma kvama hu'nea ne' Asapuna, zafama naminig'nama ra mono no tvaonte'ma, sondia vahe'ma mani'nezama kvama hanaza nomofo kafama tro'ma hu zaфaramine kuma keginare'ma eri'zama erisanuna zafane nagrama masesanua noma kisanuna zaфaramima namisigura, mago avon krento hu'na antahige'noe. Hanki Ra Anumzamo'a nagrane mani'negu nazanoma kini ne'mofonku'ma antahigoa zana amne tro huanante'ne. <sup>9</sup> Hanki sondia vahete ugota hu'naza vahe'ene hosi afu'mofo agumpima mani'nezama ha'ma nehaza sondia vahera kini ne'mo'a mago'a huzmanteg'e'za nagrane vu'naze. Ana higeta Yufretisi rantimofo kantu kazigama me'nea kumatmima kvama hu'naza vahera vu'na kini ne'mo'ma krenami'nea avona ome zami'noe. <sup>10</sup> Hianagi Bet-Horoni kumateti kamani eri'zama eneria ne' Senbalati'ene, Amoni kumateti kamani eri'za eneria ne' Tobia'enema nagrama oank'e'ma nentahikea zanarinpamo'a haviza hu'ne. Na'ankure zanagrama antahi'ana Israeli vahe zamaza hunaku neaze ne-huke anara hu'na'e.

*Nehemaia'ma Jerusalema vuteno kuma keginama varareno ke'nea naneke*

<sup>11</sup> Hanki Jerusalema uhanati'na 3'a zagegna umanite'na, <sup>12</sup> kenagera otina osi'a venene zamavrogeta vu'none. Hianagi Jerusalemi kuma'mofonte'ma nazano tro hugahane huno'ma Anumzamo'ma nagu'afima ante'nea zana mago vahera osami'noe. Hanki nagrake tonki afu'mofo agumpina mani'na vu'noanki, mago'a vene'nea mopafi vu'naze. <sup>13</sup> Hanki ana kenagera kuma keginamofona, Agupo Kafanema nehaza kafanteti atirami'na, Ra Osifave tinkerima nehzarega vute'na, Mikazama Harafi hu'zama ome

netraza kafanema nehaza kafama me'nerega vu'noe. Hanki tonki afu'mofo agumpima mani'na nevu'na, Jerusalemi kuma'mofo have keginama ahefragu vazi'naza zantamine, kuma kafaramine tevemo'ma te havizama hu'nea zana keso'e hu'na vu'noe. <sup>14</sup> Anantetira Kampu'i Tine nehaza kafante'e, Kini Nemofo tirure nehaza tirute uhanati'noe. Hianagi ufre kafampina have keginama fragu'ma vazirami'nea havemo'a hihi huno mareri'negeno tonkimo'a ufregara osu'ne. <sup>15</sup> Anama hige'na Kidroni agupofu enevu'na ran kuma kegina ke'na evute'na, masa osu nege'na ete rukrahe hu'na Agupo Kafanema nehaza kafanteti emarer'i na ran kumapina ufre'noe. <sup>16</sup> Hanki ana kenage'ma vanoma nehu'nama hu'noa zamofo nanekeua, Jerusalemima mani'naza kva vahe'mo'za ontahi'naze. Na'ankure magore hu'na Jiu vahepi, pristi nagapi eri'za vahepi mago'a eri'zama zamazama hu'za erisaza vahe'enena ozamasami'noe. <sup>17</sup> Hianagi anante amanage hu'na zamasami'noe, Tagrama knazampima mani'nonana tamagra ko keta antahita hu'naze. Jerusalemi kuma'mo'ma havizantfa higeno, kumamofo rankafana tevemo teno eri haviza hu'ne. E'ina hu'negu enketa Jerusalemi kuma'mofo kegina ete eriso'e huta hamaneno. Hagi e'inama hanunke'za mago'enena tazeri tagazea osugahaze. <sup>18</sup> Anage nehu'na Ra Anumzamo'ma azama anteno nazama hu'nea zamofo kea nezamasami'na, kini ne'mo'ma hu'nea nanekenena zamasami'noe. Anankema huge'za zamagra amanage hu'naze, Knarekita hago eri'zana agafa huta erisune, nehu'za, ana kere eri'zana agafa hu'za eri'naze.

<sup>19</sup> Hianagi Horoni kumateti ne' Sanbalati'ma, Amoniti ne' Tobiaki, Araputi ne' Gesemi'ma hu'za amana eri'zama eriku'ma huna nanekema nen-tahi'za, tusi tagiza nere'za zokago kea amanage hu'za hurante'naze, tamagra ama na'a hu'za nehaze? Tamagra kuma kegina ete azeri o'netitma, kini ne'mofona ha' hunte'za nehazo? <sup>20</sup> Hagi anante nagra amanage hu'na zamasami'noe, tagra monafi Anumzamofo eri'za vahe mani'nonankita ama ana eri'zana enerisanunkeno, taza huno tazeri so'ea hugahie. Hianagi ama Jerusalemi kumapina tamagrira tamagia omane'ne. Ana higeno tamagehe'zanena kora ama kumapinena zamagia omane'nea vahe mani'naze.

### 3

#### *Jerusalemi rankuma'mofo keginama agafa hu'za azeri oti'naza naneke*

<sup>1</sup> Hagi anante ugota pristi ne' Eliasibi'ene mago'a afu aganahe'zama pristi eri'zama eneriza naga'mo'za oti'za vu'za Sipisipi Afu Kafane hu'za nehaza kafana ome tro hu'naze. Ana kafana trohu vagare'za hagema antete'za, nunamu hu'za Anumzamofo azampi nente'za, ananteti'ma kuma keginama hu'nazana vuvava hu'za, sondia vahe'mo'zama manisgama hu'nezama kvama nehaza nontre'ma zanagi'a, 100tine Hananeli'ema nehaza nontre'ma me'nere uhanati'naze. E'ina kankamumpima me'nea kegina huvagarete'za, ana za'za nontrene keginanena nunamu hu'za Anumzamofo azampi ante'naze. <sup>2</sup> Hagi anama ome atrazaretira Jeriko kumate vene'nemo'za kuma kegina hu'za vazage'za, anante zamefiga'a Imri nemofo Sakuri'ene mago'a naga'moza kegina eri'zana eri'za vu'naze.

<sup>3</sup> Hanki Hasena ne'mofavre naga'mo'zama Nozame nehaza kafama hagente'nazana, kafama hagente zafa nom'a're erinte fatgo hu'za kafama hagenente'za, kafama erigino retrakoma hu'aeni zafanena tro hunte'naze.

<sup>4</sup> Hagi ome atrazaretira Uria nemofo Meremoti'a Hakozi negehokino anantetira agra kegina huno vu'ne. Hagi agrama erino ome atreretira, Berekia

nemofo Mesulamu'a agra Mesezabeli negehokino anantetira kuma kegina huno vu'ne. Hagi agrama ome atreretira Bana nemofo Zadoku ananteti kegina huno vu'ne. <sup>5</sup> Hagi anantetira Tekoa kumate vene'nemo'za kuma kegina hu'za vu'naze. Hianagi Tekoa kumate kva vahe'mo'za kuma kegina eri'zante'ma kvama hu'naza vahera mago zamarimpa huozamante'za ana eri'zana zamaza hu'za e'ori'naze. <sup>6</sup> Hanki Pesea nemofo Joida'ene Besodeia nemofo Mesulamukea, Korapa Kuma Kafane nehaza kafana kantigma eri ante fatgo huke aheneunteke kafanrena ana trate hagenenteke, kafama erigino rentrakoma hu' aenine zafanena tro hunte'na'e. <sup>7</sup> Hagi Gibioniti ne' Melatiaki, Meronotiti ne' Jadoniki, mago'a Gibioni venene zagane Mizpati venenemo'za anantetira kuma kegina hu'naze. E'i ana vahetamina Yufretisi timofo zage fre kazigama me'nea kumatamima kegavama hu'nea gavana ne'mofo nagaki'za agri nonena eri fatgo hu'naze. <sup>8</sup> Hagi golire zantamima trohu eri'zama antahi'nea ne' Harhaia nemofo Uzieli'a ananteti kuma kegina agafa huteno erino vuno ome atregeno, anantetira mna nentake masavema tro'ma nehia ne' Hanania'a kuma kegina huno vu'ne. Ana keginama huke vuna'ana, Fatgo huno za'zate'ma vu'ne hu'zama nehaza keginare uhanati'na'e. <sup>9</sup> Hagi ananteti'ma kuma keginama eri ante fatgoma huno vu'neana, Jerusalemi kuma'ma amu'nompinti refko hazageno mago kazigama kvama hu'nea ne' Huri nemofo Refaia eri so'e huno ome atre'ne. <sup>10</sup> Hagi anama ome atreretira Harumafu nemofo Jedaiakino noma'amofo tvaontekino agra erino vuno ometregeno, anantetira Hasabneia nemofo Hatusi eri antemino ana kuma kegina huno vuno ome atre'ne. <sup>11</sup> Hagi Harimi nemofo Malkija'ene Pahat-Moapu nemofo Hasubikea anantetira kuma kegina zanagra erike vu'na'e. Ana nehuke sondia vahe'ma manisga hu'za mani'ne'za kegavama nehaza noma agi'a Witima Kre nonema nehaza nonena ki'na'e. <sup>12</sup> Hagi Jerusalemi kuma'mofona amu'nompinti refko hazageno, mago kazigama kvama hu'nea ne' Halohesi nemofo Salumu'a, mofa'ne naga'amo'za aza hazageno anantetira kuma kegina huno vu'ne. <sup>13</sup> Hagi Hanunu'ene Zanoa rankumate'ma nemaniza vahe'mo'za Agupo Kafanema nehaza kafana tro hu'naze. Ana kafamofo zafa erinte fatgo nehu'za, kafanena tro hunente'za, kafama erigino rentrakoma hu' aenine zafanena tro hunte'naze. Zamagra ana nehu'za anantetira kuma kegina hu'za Mikazama Harafi hu'zama ome netraza kafanema nehaza kafante uhanati'naze. Ana hazageno ana keginama eri fatgoma hu'za vu'naza keginamofo zaza'amo'a, 440ti mita naza hu'ne. <sup>14</sup> Hagi Bet-Hakerem kazigama kvama hu'nea ne' Rekabu nemofo Malkija'a, mikazama harafima hu'zama ome netraza kafama erinte fatgo nehuno kafaraminenahagenento, kafama erigino rentrakoma hu' aenine tro hunte'ne. <sup>15</sup> Hagi Mizpa kazigama kvama hu'nea ne' Kol-Hoze nemofo Saluni'a, Kampui Tine nehaza kafana eri so'e hu'ne. Ana kafamofona anaga kaziga nona kinenteno, kafanena tro nehuno, kafama erigino rentrakoma hu' aenine zafanena tro hunte'ne. Ana nehuno kini ne'mofo hozaregama Sela tiru'ma me'nerega kuma keginanena erino vuteno, vuvava huno Deviti ran kumategati'ma latama tro hunte'nezama marenerezarega uhanati'ne. <sup>16</sup> Hagi Bet-Zuri kazigama kvama hu'nea ne' Azbuku nemofo Nehemaia'a anantetira kuma kegina huno marerino kini ne' Devitima asente'naza mati tvaonte uhanatiteno, vuvava huno vuno Harfa Sondia vahe'mokizmi None nehzare vuteno, vahe'mo'zama tro'ma hunte'naza tiru'ma me'nere uhanati'ne.

<sup>17</sup> Hagi ananteti'ma kuma kegina eri'zama eri'za vu'naza Livae na-

gara, Bani nemofo Rehumu erino vuno ometregeno, anantetira Keila kaziga kuma'ma kvama hu'nea ne' Hasabia'a agri kumakino agra'a eriso'e huno vu'ne. <sup>18</sup> Hagi Hasabia'ma erino ome atreretira, Keila kuma'mofo mago kazigama kvama hu'nea ne' Henadati nemofo Bavai'ene mago'a agri naga'mo'zane kuma kegina eri so'e hu'za vu'naze. <sup>19</sup> Hagi Bavai'ma erino ome atreretira, Jesua nemofo Ezeri Mizpa kuma'ma kvama hu'nea ne'mo anantetira kuma kegina huno maremanerizarega vuno, ha'zama nentaza nonte uhanatiteno renagentete ome atre'ne. <sup>20</sup> Hagi anantetira agri amagenarera Zabai nemofo Baruku'a, keginama renagentageno roroma hu'nereti agafa huteno, kazikazi huno kuma kegina huno ugota pristi ne' Eliasibi nomofo kafante uhanati'ne. <sup>21</sup> Hagi Baruku'ma ome atreretira Uria nemofo Meremoti'a Hakozi negehokino, Eliasibi nomofo kafa avamenteti kuma kegina eri agafa huteno vuno ana nomo'ma ome atre'nere, ana kegina eri so'e huno ome atre'ne.

### *Pristi naga'mo'zama kuma keginama hu'naza naneke*

<sup>22</sup> Hagi Meremoti'ma keginama huno ome atrege'za, anantetira Jerusalemi kumamofo tvaonte'ma megagi'nea kumatmimpi pristi vahe'mo'za e'za kuma kegina hu'za vu'naze. <sup>23</sup> Hagi pristi vahe'ma eri'zama eri'za vahe'mo'za eme atrazaretira Benzamini'ene Hasubuke no zanimofo avuga kuma kegina huke vu'na'e. Zanagrama erike ome atratetira, Ma'aseia nemofo Anania negeho Azaria, agra'a nomofo tva'ontera kuma kegina hu'ne. <sup>24</sup> Hagi Azaria nontetira Henadati nemofo Binui kuma kegina huteno vuno Kegina Renagentetere nehazare uhanati'ne. <sup>25</sup> Hagi anantetima eri agafama huno keginama eri so'ema hu'neana, Uzaia nemofo Palali renagentetetira agafa huno eri fatgo huno vuno sondia vahe nomofo tavaonte'ma kini nemofo nonteti'ma za'za noma mareri agatere'nea nonte vu'ne. Agrama erino ome atreretira, Parosi nemofo Pedaia kegina huno vu'ne. <sup>26</sup> Hagi anantetira mono nompi eri'za vahe'ma Ofeli agonafima nemaniza vahe'mo'za agafa hu'za kegina hu'za zage hanati kaziga Tima Afi Kafanema nehaza kafantega za'za noma me'nerega uhanati'naze. <sup>27</sup> Hagi ana za'za nontetira Tekoa kumateti vahe'mo'za kuma kegina hute'za vu'za Ofeli kuma kazigama hu'naza keginare uhanati'naze. <sup>28</sup> Hagi Hosi Kafanema nehaza kafama me'nereti mareri'nea kazigama vu'neana, mago mago pristi naga'mo'za noma kiterema hu'nazare eri so'e hutere hu'za vu'naze. <sup>29</sup> Hagi anama ome atreretira Imeri nemofo Zadoku'a noma'amofo tvaonte'ma meno'ma vu'nea kegina eri so'e huno vu'ne. Hagi Zadoku'ma ome atreretira Zage Hanati Kaziga Kafanema nehaza kafante'ma kegavama nehia ne' Sikania nemofo Simaia anantetira kegina eri so'e huno vu'ne. <sup>30</sup> Hagi Simaia'ma erino ome atreretira, Silemia nemofo Hananaia'ene Zalafuna nampa 6gis mofavre Hanuni'ene anantetira kegina huke vu'na'e. Hagi zanagrama ome atratetira Berekia nemofo Mesulamu'a agrama nemania no tvaontera kegina hu'ne. <sup>31</sup> Hagi Mesulamu'ma erino ome atreretira, golire zantamima tro'ma nehia ne' Malkija anantetira kegina huno vuno, mono nompima eri'zama eneriza vahe none, feno vahe'mokizmi noma me'nere eteno rukitagino Atruhi Kafanema nehaza kafante eteno, anantetira uvava huno renagentetema anaga kazigama za'za noma kinte'nazare uhanati'ne. <sup>32</sup> Hagi keginama renagentete'ma anaga agofetu'ma noma kinte'nareti'ma vuno Sipisipi Kafanema nehaza

kafante'ma vige'za keginama hu'nazana, golire zantamima tro'ma nehaza  
vahē'ene fenozama zagore'ma netraza vahē'mo'za kegina hu'naze.

## 4

### *Keginama eri so'ema hu'za negizage'za kiza zokago ke huzmante'naza naneke*

<sup>1</sup> Hanki tagrama Jerusalemi rankuma'mofo kegina ete azeri otuna zamofo  
nanekema Sameria kazigama kvama hu'hea ne' Senbalati'ma nentahino'a,  
tusi arimpa aheneranteno, Jiu vahe'mota ki'za zokago ke hurante'ne.

<sup>2</sup> Agra eri'za vahe zamavufine, Sameria sondia vahe'mokizmi zamavu-  
fina amanage hu'ne, Zamagra hanavezmima omne Jiu vahe'mo'za na'a  
nehaze? Zamagrama antahi'zana kuma kegina eri so'e hugahune hu'za  
nehazafi? Zamagra ana maka ofa Kresramana vunaku nehzafi? Zama-  
gra magoke zage ferupina, kegina huvagare'za nehzafi? Tevemo'ma te  
fragu vazirami'nea haveramina inankna hu'za eri'za kuma kegina eri so'e  
hunakura nehzaze? <sup>3</sup> Anankema nehigeno'a, Amoni vahepinti ne' Tobia'a  
Senbalati tava'onte otineno amanage hu'ne, Zamagra na'a tro nehzafi  
keho, afi kramo'ma ana keginare'ma takau resiana have keginazamia re-  
nafe hutregahie! <sup>4</sup> Hanki anankema hazama nentahi'na, amanage hu'na  
nunamuna hu'noe, Anumzantimoka nunamuntia antahiramio. Na'ankure  
ama vahe'mo'za tagrikura ki'za zokago ke hunerantaze. E'ina hu'negu  
atregeno ana nanekemo'a zamagri'a zamavufare fore hino. Ana hanige'za  
ha' vahe'zamimo'za ha' eme huzamante'za zamavareza ru moparega kina  
ome huzamanteho. <sup>5</sup> Havi avu'ava'ma hu'za kumi'ma hu'naza zana keam-  
nea nosunka kumi'zamia eri atreozmanto. Na'ankure keginama nehzaza  
vahe'mokizmi zamavufina, zamagra kiza zokago ke hunerante'za Kagrira  
kazeri krimpa nehzaze.

<sup>6</sup> Hanki ana nunamuma hutogeta, maka'mota tagu'areti huta hanavetita  
eri'zana erita, kankamuna rehiza huvaga ronkeno kuma keginamo'a  
marerino amu'nompi vu'ne. Na'ankure mika vahe'mota mago tarimpa huta  
eri'za eri antahintahi huteta ana eri'zana eri'none. <sup>7</sup> Hianagi Senbalati'ma  
Tobia'ma Arapu vahe'mo'zane Amoni vahemozane, Asdoti vahe'ma an-  
tahizama Jerusalemi kuma keginama kazigazi huta erita nevuna nanekene,  
kuma keginamofo ne'onse kankamuma rehiza'ma nehuna nanekema nen-  
tahi'za, tusi zamarimpa aherante'naze. <sup>8</sup> Ana nehu'za zamagra Jerusalemi  
kumate naga ha' eme hunerante'za, eri'zama e'neruna eri'za eri haviza  
hunaku kea retro hu'naze. <sup>9</sup> Ana hu'neanagi tagra Anumzantimofontega  
nunamuna nehuta, kegavama hu vahera huzamantonke'za feru'ene ke-  
nage'enena ha'ma eme hurante zankura kegava hu'naze. <sup>10</sup> Hianagi Jiu  
vahe'mo'za amanage hu'za nehzaze, eri'za vahe'mokizmi hankavemo'a hago  
vagare'za hie. Ana higeno fragu vaziramino'ma hihima hu'nea haveramina  
rama'a me'neankita eri'zana eri vaga oregahune.

<sup>11</sup> Ha' vahetimo'za amanage hu'naze, Jiu vahe'mo'za tagrira ke'za an-  
tahi'za osu'nesageta, ame huta vuta ha' ome huzamanteta zamahe vaga  
resanunkeno, ana eri'zamo'a amne zankna hugahie. <sup>12</sup> Hanki ana  
vahe'mokizmi tva'onte'ma nemaniza Jiu vahe'mo'za 10ni'a zupa naza  
agatere'za eme tasami'za, maka asoparegati hara eme huranteke nehzaze.  
<sup>13</sup> Anagema hazage'na mago'a vahera huzamantoge'za vu'za, keginamo'ma  
uram'nea kaziga ome kegava nehzage'na, mago'a vahera huzmantoge'za  
kankamuma maneterema hu'nere bainati kazitamine, karugru kevene,  
ati kevene eri'ne'za nagate nagate otitere hu'naze. <sup>14</sup> Ana'ma hutogez'a

veamo'zama koro'ma hazazama nezamage'na, kva vahe'ene eri'za vahe'ene ana maka vahetamina amanage hu'na zamasami'noe, tamagra ha' vahekura korora osiho. Ra Anumzana hankaventake huno marerisa Anumza mani'neanki tamagera okanita, tamafuhe'inku'ene ne' mofavre tamigu'ene mofo'nane tamigu'ene a'nane tamigu'ene nonkuma tamigu'ene tamagesa nentahita korora osu hankavetita hara hiho. <sup>15</sup> Hanki ha' vahetimo'zama ha'ma eme hurante kema anakiza nanekema tagrama antahuna nanekea zamagra antahi'naze. Hianagi ha'ma eme hurante nanekema anaki'nazana Ra Anumzamo zamazeri havia higeno hara eme huorantazageta, mago'magomota kegina hu eri'zantirera vu'none.

<sup>16</sup> Hagi ana knareti agafa huta, amu'nompinti vahera refko hunke'za mago'amo'za kegina eri'zana eri'naze. Hige'za mago'amo'za atine kevene zamimizare'ma nentaniza ha' kukenane, hankone zamazampina eri'ne'za oti'za kegava hu'naze. Hagi ana nehazage'za, erizante'ma ugota hu'za kegavama nehaza vahe'mo'zane ana maka Juda vahe'ma keginama nehaza vahe'mokizmi zamefi otitere hu'naze. <sup>17</sup> Hagi keginama haza vahe'mo'za mago kaziga zamazanteti eri'za eneri'za, mago kaziga zamazampina ha'za eri'naze. <sup>18</sup> Ana nehu'za eri'zama eri'za vahe'mo'za bainati kazina atrazageno zamasoparega urami'nege'za eri'zana eri'naze. Hianagi paziveteti'ma ufema neraza vahe'mo'za nagrane mani'naze. <sup>19</sup> Anama hutazage'na kva vahe'tamine ugotama huzmantie'naza kva vahetamine mago'a vahetaminena amanage hu'na zamasami'noe, Kegina hu za'za huta vahera afete umani emanı huneta eri'zana enerune. <sup>20</sup> E'ina hu'negu ina knare'ma ufenkrafama antahisutma, ame hutma nagra mani'nore eme eri tru hiho. Anumzantimo'a tagritega anteno ha' vahetia hara huzamantegahie. <sup>21</sup> Hagi anagema hotogeta mika zupa nanteranteti'ma vuno kinagama monafima hanafi'mo'ma ehanatia knare'ma vigeta, kegina eri'zama erita vu'nonana vahera amu'nompinti refko hu'neta mago'amo'za karugru kevea zamazampi eri'ne'za kva nehazageta, mago'amota kuma kegina eri'zana eri'none.

<sup>22</sup> Hanki ana zupa mago'ene amanage hu'na vahera zamasami'noe, Eri'zama eri vagama resutma mago mago vahe'moka eri'za vahekane Jerusalemi kumara atreta meg'i' ovuta, agu'afi mani'neta kenagera kegava huneranteta, msama hanigeta kuma kegina eri'zana erigahaze. <sup>23</sup> Hagi ana knafina nagrane nafuhe'zane nagri eri'za vahe'mo'zane nagri'ma kvama hunenantaza vahe'mo'zanena kukenatia hate otre'none. Makamota ha'zana tazampi me'negeta otreta, tinteganema vunana tazampinke me'negeta vu'no'ne.

## 5

### *Nehemaia'ma Juda vahe knazamima zamazama hu'nea naneke*

<sup>1</sup> Hanki anante mago'a Jiu venenemo'zane a'nene zamimo'zanena Jiu naga'zamigura tusiza hu'za ke hara rezmante'naze. <sup>2</sup> Anama keha'maraza naga'moza amanage hu'naze, Tagra tusi mofavrezaga zamante'none. E'ina hu'negu tagrama witima erita nesuta ofri manigahaze. <sup>3</sup> Hanki mago'amo'za amanage hu'naze, tagatontoma hia knafina tagra mago'a ana vahepinti zagoa nofi huta enerita, mago tarimpa huta kea anakita ana nof'i'ma apa'ma osesunana, waini hozati'ma witi hozati'ma nontinena erigahaze huta kea anaki'none. <sup>4</sup> Hagi mago'a vahe'mo'zanena amanage hu'naze, Tagra waini hozatine, mopatimofo takisima kini ne'mofoma aminakura vahepinti zagoa nofi huta ami'none. <sup>5</sup> Hagi tagranena zamagrama hazaza huta Juda vahe

mani'none. Tagri mofavre naga'mo'za zamagri ne'mofavre naga'mo'zama nehzaza hu'za knare hu'naze. Hianagi mofavre nagatia zamatresa-nunke'za kazokazo eri'za ome erigahaze. Hagi mago'a mofa'netimo'za hago vu'za kazokazo eri'zana ome enerize. Hianagi tagrira hankavetia omane'ne, na'ankure mopatine waini hozatinena hago rumo'za eri'naze.

<sup>6</sup> Hanki ana vahe'mo'zama haza nanekene krafa ke'zamima nentahugen'o a nagrira tusi narimpa ahe'ne. <sup>7</sup> Ana hige'na ana nanekea antahinhinifi atrogeno me'nege'na refko hute'na, kva vahe'tamine erizante'ma ugotama hu'naza vahetaminena amanage hu'na zamasami'noe, tamagra magoke vahe mani'nazanki na'agafare nofi'ma hu'naza zagarera amema'a ante marerita enerize. Anage hute'na ana vahera zamuvufintanke huku, ana maka vahe kuhuge'za eme eri tru hu'naze. <sup>8</sup> Hagi anante amanage hu'na zamasami'noe, Ko'ma meg'i'a vahe'mo'zama mago'a nagatima zagoreti'ma mizase'za ome kinama huzmante'nazana maka ete mizama huta zamavare meg'i atreku maraguzana netune. Hianagi zamagra zamafuhe'ina meg'i'a vahete zagarera netrazanki'za ete ana vahera tagrite zagore atregahaze. Anankema huge'za kva nagara ke'zamia omanege'za akohe'za mani'naze. <sup>9</sup> Anama hazage'na mago'ene amanage hu'na zamasami'noe, Tamagra e'inahu tamavutamava'ma nehaza zamo'a knarera osu'neanki, tagri Anumzamofonku korora hunenteta, Agri agorga nemanita fatgo avu'avazama'a amage anteho. E'ina tamavu'tamavama hanage'za meg'i'a tamefi'a nanekea osugahaze. <sup>10</sup> Hagi nagrane nafuhe'zane eri'za naga'ninena ana zanke huta zagone witinena nofi'ma hu'za erinaku'ma hazageta nezamune. Hianagi nofi'ma hu'nazare'ma apasehogu'ma rama'a zago agima ahezmante'zana atresune. <sup>11</sup> Hanki waini hoza zamifi, olivi hoza zamifi, no zamifi hozama ante mopa'zaminema eri'nesazana meninke'za ete ame huta zamiho. Ana zanke hutma zagozi, witifi, wainifi olivi masavenema zamagripinti'ma nofi'ma hu'nesazana amema'a zamagripintira ante marerita e'oritma atreho. <sup>12</sup> Anante kva vahe'mo'za kenona hu'za, Kema hana kea amage anteta ana maka zama eri'nona zantamina ete zamigahune. Ana nehuta zamagripintira mago zana kea huta e'origahune. Anagema hazage'na kva naga'ene ugota kva vahera zamasami'na, kema haza nanekerera pristi vahe zamavufina mago huvempa ke hutma ana osugahune hutma hilo huge'za ana osugahune hu'za huvempa hu'naze.

<sup>13</sup> Anagema nehu'na nakre kuni'mofo kasagura eriherahe nehu'na, amanage hu'na hu'noe, Amama huvempama hazankema, amage'ma ontesimofona Anumzamo'a anamofo nom'a fintira ama avame'zama huaza huno, ana maka vahe'mo'za fenozama'a eri herahe hutregahie. Ana hanigeno anamofona mago'a zama'a omanegahie hu'na huge'za, ana maka tamage hu'za nehu'za Ra Anumzamofona agi'a ahentesga nehu'za, huvempama hu'naza ke amage ante'naze. <sup>14</sup> Hagi Pesia kini ne' Artserksisi'ma kinima manino egeno 20ma hia kafufi, nagrira huhampari nantage'na Juda mope'rema kva mani'noreti'ma eno, Artserksisi'ma kini manino egeno 32ma hia kafumofo amu'nompina nagra 12fu'a kafufi gavana eri'zana eri'noanagi, gavana ne'mo'ma ne'zama miza huno negahie hu'nea zagofintira mago zago'e hu'na e'oritfa hu'noe. <sup>15</sup> Hianagi Juda mope'rema ko'ma gavana mani'za e'naza, vahe'mokizmia tusi'a kna nezam'i'za, ne'zane waini tinema eriza agofetura, 40'a silva zagone eri'naze. Hagi ana kva vahe'ma zamaza hu'za eri'zama eri'za vahe'mo'zanena, vahera tusi'a knaza zami'naze. Hianagi nagra Anumzamofonku koro hunente'na e'inama hazazana osu'noe.

<sup>16</sup> Nagra Jerusalemi kuma keginama hu' eri'zanke nagu'areti hu'na e'neri'na

mopa miza ose'noe. Hagi nagranema eme atru hu'za eri'zama eri'za vahe'mo'zanena, ana zanke hu'za mopa miza ose'naze. <sup>17</sup> Hianagi nagri nompintira Jiu vahe'ene ugota kva vahetamina 150'a vahe'mo'za ne'zana eme nenageno, anampina tvaontire'ma me'nea mopafima nemaniza vahepintira mago'amo'za nagri nompinti tagrane ne'zana eme ne'naze. <sup>18</sup> Hanki mago mago zupama nagri nompima ne'zama kre terema hu'nazana vahe'mo'za mago bulimakaogi, 6si'a knare'ma hu'nea sipisipi afutaminki, mago'a kokore raminki hu'za ana vahera ne'zana krezamantetere hu'naze. Hagi 10ni'a zage kna'ma evuterema nehige'za, eri'za waini tina eri'za eme zamizage'za, ana netere hu'naze. Ana ne'zantamimpina, magore hu'na gavana ne'mofa ne'zanema hu'za huhampari'naza ne'zampinti'enena er-inteta erita echo hu'na huozamante'noe. <sup>19</sup> Na'ankure eri'zama zami'noa eri'zamo'a ranknaza zaminogu anara hu'noe. <sup>19</sup> Anama hute'na nunamu hu'na, Anumzanimoka ama vahe'mokizmima zamaza hu'na maka knare eri'zama eri'noazamofona kageraakanionantenka asomura hunanto hu'na hu'noe.

## 6

### *Kuma keginama nehazage'za ha'rezmante'naku keaga retro hu'naza naneke*

<sup>1</sup> Anante Sanbalati'ma, Tobia'ma, Araputi ne' Gesemu'ene mago'a ha'vahetimo'za, nagrama mago kankamuma otre'nama kuma keginama hvagaroa nanekea antahi'naze. Hianagi kuma keginamofo kafaramintera kahana hageonte'noe. <sup>2</sup> Sanbalatike Gesemukea amanage huke kea atrenantena'e, Kagra enketa Keferimie nehaza kumama Ono agupofima me'nere atru hanune huke hu'na'e. Hianagi zanagra nagri nazeri haviza hunaku havige hu'na'e. <sup>3</sup> Anagema hake'na ana kezani'amofo nona'a amanage hu'na kea atrezamantoge'za, mago'a vahe'mo'za eri'za vu'naze. Nagra ra eri'za eri agafa hunte'nena e'neruanki'na ana eri'zana atre'na uoramigahue. Na'agafare eri'zana atresanugeno me'nesige'na tanagritega uramigahue? <sup>4</sup> Hianagi zanagra ana netremokea anahukna nanekea 4'a zupa atrenantakeno e'ne. Hige'na anama atrenantakeno'ma eterema hia knarer, ko'ma ese zupama kezanire'ma ke nonama hu'noa nanekege'za atrezanante'noe. <sup>5</sup> Anama hugeno'a 5 furera, ko'ma atrenanta'a nanekegna kea Sanbalati'a avontafete kreteno, fukina reokamarenno amne amigeno eri'za vahe'amo erino e'ne. <sup>6</sup> Ana avompina amanage huno krente'ne, Nagra Sanbalati'nama zaho kema antahuana tvaontire'ma mani'naza kumapi vahe'mo'za nehazageno, Gesemu'enema hiana, kagrane Jiu vahe'mota kuma kegina nehuta, kini ne'mofa agorga omaniku nehaze. Ana nehanagenka kagra Nehemaiaaga kini zamia maniku nehane. <sup>7</sup> Ana nehunka kasnampa vahe huhampri zamantanke'za Jerusalemi kumapi huama hu'za, Juda moparera mago kini mani'ne hu'za nehaze. Ana hu'neankino ana kemo'a Pesia kini nete vugahie. E'ina hu'negu kagra egeta, ana zamofo nanekea erinte fatgo ha'maneno. <sup>8</sup> Hagi Sanbalati kerera nona'a amanage hu'na avona kre'noe. Amama hana nanekemo'a magore huno tamagea omne'neanki, kagra'a antahintahifinti eri fore nehane. <sup>9</sup> Na'ankure ha' vahetimo'za amanage hu'za antahi'naze, nanekefinti zamazeri koro hanunke'za, zamesra hu'za eri'zana eri vagaoresaze hu'za anara hu'naze. Hianagi Anumzamoka nazana eri hankavetige'na eri'zana eri'neno huno hu'na nunamuna hu'noe. <sup>10</sup> Anante mago zupa Mehetabeli negeho ne' Delaia nemofa Simai'a noma'a kafana erigino mani'nere nantu antente'na vugeno, amanage huno hu'ne, Anumzamofo

mono nompima ruotage'ma hu'nefinka ome franekita, mono no kafana erigisanu'e. Na'ankure meni kenagera ha' vahekamo'za eme kahe friku keaga hu'naze. <sup>11</sup> Hianagi nagra amanage hu'na kenona hu'noe, Nagra amanahu vahe'mo'na korora fregahufi? Inankna hu'na kva vahe'mo'na korora freña vu'na mono nompina ome frakina nagura vazigahue? I'o, nagra anara ovutfa hugahue. <sup>12</sup> Nagrama antahi ama'ma huana ama ana nanekea Anumzamo asamigeno onasami'ne. Hianagi Tobiake Sanbalatike zago nemike hakeno, havi kasnampa ke nagritera hu'ne. <sup>13</sup> Hanki nagri'ma nazeri koro'ma hanake'na koroma fre'na mono nompima ome frakisua zamo'ma hanige'na kumi'ma hanugeke, havi nagi nenamike huhaviza hunantesnanku, zanagra zago nemike huntakeno koro kea hunante'ne. <sup>14</sup> Hige'na zanazeri haviza hinogu Anumzamofontega nuna-muma hu'na nagri Anumzamoka ko, Tobiake Sanbalatikema nagri'ma hunante'na'a zanavu zanavara negenka, kasnampa a' Naodia'ene mago'a kasnampa vahe'mo'zanema nazeri kore'ma hunaku'ma nehaza zana hago zamage'nane.

### *Kuma keginama eri vagama re'nea zamofo naneke*

<sup>15</sup> Hanki Elul ikamofona 25 zupa Jerusalemi kuma keginama nehuna eri'zana erivaga re'none. Ana eri'zama eri'nonana 52'a zagegnamofo agu'afi eri'none. <sup>16</sup> Ana hunke'za tva'ontire'ma me'nea mopafima mani'naza ha' vahetimozama ana nanekema nentahi'za tusi koro hazageno, amuha zazamia omane'ne. Na'ankure zamagrama antahi'zana tagri Anumzamo taza higeta kuma kegina huvaga re'none. <sup>17</sup> Hagi ana knafina Juda ranra vahe'mo'za Tobiana rama'a zupa avona kre'za atrente'naze. Ana hazageno Tobia'a agranena anazanke huno avona atrezamanteg'e'za avona omi ami hu'naze. <sup>18</sup> Ana hige'za Juda vahepintira hakare'a vahe'mo'za Tobiana kza hugahune hu'za kea hu hagerafite'za aza hu'naze. Na'ankure Tobia'a Ara negeho Sikania mofa ara erigeno, Tobia nemofo Jehohanan'i Berekia nemofo Mesulamu mofa eri'negu hu'za anara hu'naze. <sup>19</sup> Ana hige'za ana ranra vahetamimo'za Tobia'ma hia knare avu'ava zama'agura eme nenasami'za, nagrama hua nanekenena ome asami'naze. Ana hazageno Tobia'a nazeri koro hunaku nagritega avona kre atrevava hu'ne.

## 7

### *Ese'ma Babilonima kinafinti'ma e'naza vahe'mokizmi zamagi eri fatgoma hu'naza naneke*

<sup>1</sup> Hanki kuma kegina eri'zamo'ma eme vagarege'na, ananteria kuma kafaramina hagente vaganere'na, kafante'ma kvama hanaza vahe'ene zagate'ma hu vahe'ene Livae naga'enena huhampari zamante'noe. <sup>2</sup> Ana nehu'na nenfu ne' Hananine, kini ne'mofo nonte'ma kvama nehia ne' Hanania kiznia huhampari zanantogeke Jerusalemi kumara kegava hu'na'e. Na'ankure Hanania'a sondia vahe'mokizmi hanave vihuma kegava hu'ne a ne'kino agu'areti huno maka'zana fatgo huno nehia ne' mani'neno, mago'a vahera zamagatereno Anumzamofona koro hunenteno agorga nemania ne' mani'ne. <sup>3</sup> Hanki anante ana netrena amanage hu'na zanasami'noe, Jerusalemi kuma kafantamina onagita atrenkeno me'nenigeno vuno zagemo'ma hanavema ometitesigeta anagaho. Hagi kafante'ma kegavama nehaza vahe'mo'za atre'za nozamirega ovu'neza kafana erigi'za agu'ati ren-trako hute'za viho. Hagi Jerusalema nemaniza vahera huhampri zamantes-nanke'za kegavama hanazana vahera huzmantenke'za mago'amo'za kuma

keginarera otitere nehanageta mago'amokizmia huzmantenke'za nozamimofo tva'ontera kegava hutere hiho.

<sup>4</sup> Hanki Jerusalemi rankuma'mo'a rankrefa higeno rama'a kankamuna me'ne. Hianagi anampima mani'nazana osi'a vahe mani'nazageno, anampina nontamina onki'naze. <sup>5</sup> Ana hu'negu nagri Anumzamo antahintahi namige'na, ugota kva vahe'ene amne vahe'enena nagate nofite hu'na zamagia krena erinte fatgo huku ke huge'za eme atru hu'naze. Hanki anama hute'na, Babiloni kinafinti'ma atre'za ese'ma e'naza vahe'mokizmi zamagima krente'naza avontafe kena erifore hu'noe. Amanahu hu'za ana avontafepina zamagia krente'naze. <sup>6</sup> Hanki ama mago mago kuma'ma Judama me'nea kumatmimpinti vahe'ma, Babiloni kini ne' Nebukatnesa'ma zamavareno kinama ome huzmante'nea vahe'mo'zama ete Jerusalemi kumate'ene, Juda moparema ete'za, kuma zamire uvu evu hu'naze. <sup>7</sup> Hanki ana vahe'ma kegava huzmante'za zamavare'za e'naza kva vahe'mokizmi zamagia, Zerubabeliki, Jesuaki, Nehemaiaiki, Azariaki, Ra'amiaki, Nahamaniki, Modekaiaiki, Bilsaniki, Misperetiki, Bigvaiki, Nehumuki, Ba'anaki hu'za e'naze. Hagi kvama krizmante'za zamavare'za e'naza Israeli vahe'mokizmi zamagi'a ama'ne, <sup>8</sup> Parosi nagapintira 2 tauseni 172'a venene e'naze. <sup>9</sup> Sefatia nagapintira 372'a venene e'naze. <sup>10</sup> Ara nagapintira 652'a venene e'naze. <sup>11</sup> Pahatmoapu vahepintira Jesua naga'ene Joapu nagapintima e'nazana 2 tausen 818ni'a venene e'naze. <sup>12</sup> Elamu nagapintira 1 tausen, 254'a vene'ne e'naze. <sup>13</sup> Hagi Zatu nagapintira 845fu'a vene'ne e'naze. <sup>14</sup> Zakai nagapintira 760'a venene e'naze. <sup>15</sup> Binui nagapintira 648'a vene'ne e'naze. <sup>16</sup> Bebai nagapintira 628'a venene e'naze. <sup>17</sup> Azagadi nagapintira 2 tausen, 322'a vene'ne e'naze. <sup>18</sup> Adonikamu nagapintira 667ni'a venene e'naze. <sup>19</sup> Bikvai nagapintira 2 tausen, 67ni'a vene'ne e'naze. <sup>20</sup> Adini nagapintira 655'a vene'ne e'naze. <sup>21</sup> Hagi Hezekaiampinti fore'ma hu'nea ne'Ateria nagapintira 98'a venene e'naze. <sup>22</sup> Hasumu nagapintira 328'a venene e'naze. <sup>23</sup> Bezai nagapintira 324'a venene e'naze. <sup>24</sup> Harifi nagapintira 112'a vene'ne e'naze. <sup>25</sup> Gibeoni nagapintira 95'a vene'ne e'naze.

<sup>26</sup> Hanki Betlehemu kuma'ene Netofa kumate vahe'ma kinafintima e'nazana 188'a vene'ne e'naze. <sup>27</sup> Hanki Anatoti kumate vahera 128'a vene'ne e'naze. <sup>28</sup> Bet-Azmaveti kumate vahera 42'a vene'ne e'naze. <sup>29</sup> Kiriat-Jearimi kuma'ma Kefira kuma'ma Biroti kumate vahera 743'a venene e'naze. <sup>30</sup> Rama kuma'ene Geba kumate vahera 621ni'a vene'ne e'naze. <sup>31</sup> Hanki Mikmasi kumate vahera 122'a venene e'naze. <sup>32</sup> Hanki Beteli kuma'ene Ai kumate vahera 123'a vene'ne e'naze. <sup>33</sup> Mago Nebo kumate vahera 52'a vene'ne e'naze. <sup>34</sup> Mago Elamu kumate vahera 1 tausen 254'a vene'ne e'naze. <sup>35</sup> Harimi kumate vahera 320'a vene'ne e'naze. <sup>36</sup> Hanki Jeriko kumate vahera 345'a vene'ne e'naze. <sup>37</sup> Hanki Lotine Haditine Ono kumate vahera 721ni'a venene e'naze. <sup>38</sup> Sena'a kumate vahera 3 tausen 930'a vene'ne e'naze.

<sup>39</sup> Hanki pristi eri'zama eneriza vahe'ma kinafintima e'nazana, Jesua naga'nofipinti Jedaia nagara 973'a vene'ne e'naze. <sup>40</sup> Hagi Imeri nagapintira 1 tausen 52'a venene e'naze. <sup>41</sup> Pasuri nagapintira 1 tausen 247ni'a vene'ne e'naze. <sup>42</sup> Harimi nagapintira 1 tausen 17ni'a vene'ne e'naze.

<sup>43</sup> Hanki Livae vahe'ma kinafintima e'naza vahera, Hodaviampintima fore'ma hu'neana Jesua naga'ene Kadmieli nagaki'za 74'a vene'ne e'naze.

<sup>44</sup> Hanki Asapu nagapinti'ma zagamema nehaza vahe'ma kinafinti'ma e'nazana 148'a vene'ne e'naze. <sup>45</sup> Hanki ra mono no kafante'ma kvama

nehaza vahe'ma e'nazana, Salumu'ma Ateri'ma Talmoni'ma Akubi'ma Hatita'ma Sobai nagapintiki hu'za ana makara 138'a vene'ne e'naze. <sup>46</sup> Hanki ra mono nompima eri'zama eneriza vahe'ma e'nazana, amama zamagima me'nea vahe'mokizmi nagapinti e'naze. Ziha'ma, Hasufa'ma, Tabaoti'ma, <sup>47</sup> Kerosi'ma, Sia'ma, Padoni'ma, <sup>48</sup> Lebana'ma, Hagaba'ma, Salmai'ma, <sup>49</sup> Hanani'ma, Gideli'ma, Gahari'ma, <sup>50</sup> Reaia'ma, Rezini'ma, Nekoda'ma, <sup>51</sup> Gazamu'ma, Uza'ma, Pesea'ma, <sup>52</sup> Besai'ma, Meaunimi'ma, Nefusimi'ma, <sup>53</sup> Bakbuku'ma Hakufa'ma Harhuri'ma, <sup>54</sup> Bazluti'ma, Mehida'ma, Harsa'ma, <sup>55</sup> Barkosi'ma, Sisera'ma, Tema'ma, <sup>56</sup> Nezia naga'ene Hatifa nagapintiki hu'za mika e'naze. <sup>57</sup> Hagi Solomoni eri'za vahe'mokizmi naga nofipinti'ma e'nazana, amama zamagima me'nea vahe'mokizmi nagapinti etere hu'naze. Sotai'ma Sofereti'ma Perida'ma, <sup>58</sup> Ja'ala'ma, Darkoni'ma, Gideli'ma, <sup>59</sup> Sifatia'ma, Hatili'ma, Pokeret-Hazebaimi e'ne Amoni nagaki hu'za e'naze. <sup>60</sup> Hagi ra mono nompi eri'za vahe'ene, Solomoni eri'za vahe'mokizmi nagapinti vahe'ma kinafinti'ma e'nazana ana maka 392'a venene e'naze. <sup>61</sup> Hagi mago'a vahe'ma e'nazana ama kumatamimpinti e'naze. Tel-Melagi Tel-Hasarigi Kerubigi Adonine Imeri kumate venenegi hu'za e'naze. Hianagi zamagra Israeli vahepina ina naga nofipinti e'nafi hake'za eriforera osu'naze. <sup>62</sup> Hanki ana vahera Delaiane Tobiane Nekoda nagapintiki hu'za e'nazankino, ana makara 642'a venene e'naze. <sup>63</sup> Hanki mago'a pristi vahe'ma e'nazana, Hobai'a'ma Hakozi'ma Bazilai nagapintiki hu'za e'naze. Bazilai'a Giliatiti ne' Bazilai mofa a' erige'za, a'amofo naga'moza zamagra'a nagapi nehaza zamagi Bazilai'e hu'za antemi'naze. <sup>64</sup> Ana hige'za ana 3'a nagara ina naga nofipinti e'nafi hu'za zamagigura hake'nazanagi, zamagima krenentaza avontafepina hakazanagi ke'za eri forera osu'naze. E'na hu'negu agru osu'naze nehu'za, zamatrage'za pristi eri'zana e'ori'naze. <sup>65</sup> Ana higeno Juda mopare'ma ugotama hu'nea gavana ne'mo'a zamasamino, Anumzamofontegama ofama huntesaza ne'zampintira onetma amne mani'enkeno, Urimine Tamimiema nehaza havema eri'nesia pristi ne'mo, pristi eri'zana erigahazafi Anumzamofo avesira keno eri fore hugahie. <sup>66</sup> Hagi Israeli vahe'ma e'nazana ana makara 42 tausen 360'a vahe e'naze. <sup>67</sup> Ana hazage'za ve kazokzo eri'za vahe'ene a' kazokzo eri'za vahera ana makara 7 tausen 337ni'a vahe azageno, anampina zagamema nehaza vene'nene a'enenena 245'a vahe e'naze. <sup>68</sup> Hanki hosi afutamina 736agi, miulie nehaza tonki afutamina 245 fu'agi, <sup>69</sup> kemoli afutamina 435fu'agi, donki afutamina 6 tausen 720'a afu taminki hu'za zamavare'za e'naze.

<sup>70</sup> Hanki ra mono noma ki zantamima, mago'mago naga nofite'ma ugota hu'naza vahe'mo'zama eri truma hu'nazana amanahu hu'n. Juda mopare'ma ugotama hu'nea gavana ne'mo'a, 1 tausenia golire zagogi, 50'a golire zuompagi, pristi vahe kukena 530'agi huno eme atre'naze. <sup>71</sup> Hagi mago mago naga nofite'ma ugotama hutere'ma hu'naza vahe'mo'za 20 tauseni'a golire zagogi, silva 1 tausen 325fu'a kilogi hu'nea eme atre'naze. <sup>72</sup> Hagi mago'a vahe'mo'za golire zagoa 20 tauseni'agi, Silva 1 tausen 330'a kilone, pristi vahe'mo'zama antanisaza kukena 67ni'agi hu'za eme atre'naze. <sup>73</sup> Hanki pristi vahe'ma, Livae naga'ma, mono no kafante'ma kvama nehaza vahe'ma, zagame'ma nehaza vahe'ma, mono nompima eri'zama eneri'za vahe'ene, mago'a amne vahe'ene ana maka Israeli vahe'mo'za ne'onse kumazmire umani emanı huyagare'naze. Ana hu'za Israeli vahe'mo'za ko'ma mani'naza nonku'ma zamire umani emanı huvaga retazageno, 7ni ikana emente'n.

## 8

*Ezra'ma Anumzamofo kasegema hamprige'za antahi'naza naneke*

<sup>1</sup> Hanki Tima Afi Kafanema nehaza kafamofo avugama me'nea kankampumi ana maka Israeli vahe'mo'za eri mago zamavugosa hu'za eme atru hu'naze. Anama hute'za avoma kre eri'zama e'neria ne' Ezrrana asami'za, Ra Anumzamo'ma Israeli vahe'ma zamasamio huno, Mosesema huntegeno krente'nea avontafera erinka eno hu'za hu'naze. <sup>2</sup> Anage hazageno 7ni ikamofo ese knazupa, pristi ne' Ezra'a ana kasege avontafera erino, venenene a'nene kema antahini'ma huga mofavreramima mani'naza zamavuga e'ne. <sup>3</sup> Anante Ezra'a ana avontafera erino nanterampi tima nefiza kafamofo avugama me'nea kumapi, ana maka Israeli vahe zamavuga oti'neno, ana kasege avontafepinti nehamparige'za vene'nene a'nanene, kema antahi ani'ma huga mofavreramimo'za nentahizage'za, ana maka vahe'mo'zanena zamagesa ante so'e hu'neza nentahizageno vuno feruse'ne. <sup>4</sup> Hanki Ezra'a manisga hu'neno keagama hu tra'ma tro hunte'naza trate mani'nege'za azantmaga kaziga, Matitia'ma, Sema'ma, Anaia'ma, Uria'ma, Hilkia'ene Ma'aseiaki hu'za oti'naze. Ana hazageno hoga kaziga'a Pedaia'ma Misaeli'ma Malkija'ma Hasumi'ma Hasbadana'ma Zekaraia'ene Mesulamuki hu'za oti'naze. <sup>5</sup> Hagi anante Ezra'a kasegema hamprinaku manisga hu trate mani'nege'za ana maka vahe'mo'za negageno, ana avontafe'ma erivakama rege'za, ana maka vahe'mo'za oti vagare'naze. <sup>6</sup> Ana hazageno Ezra'a Ra Anumzana tusi'a Anumzamofona agi'a ahentesga hu'ne. Ana hige'za ve'a kevumo'za zamazana erisga huvagare'za, Tamage, Tamage nehu'za, zamarena re'za mopafi zamavugosaregati kepri hu'za Ra Anumzamofona monora hunte'naze. <sup>7</sup> Anante anama hutazage'za, Livae nagara Jesua'ma Bani'ma Serebia'ma Jamini'ma Akubu'ma Sabetai'a'ma Hodia'ma Ma'aseia'ma Kelita'ma Azaria'ma Josabati'ma Hanani'ene Pelaia'ma hu'za, oti'naza vhahera kasegea eriama hu'za zamasami'naze. <sup>8</sup> Zamagra Anumzamofo kasege avontafepinti hamparite'za, agu'gesa'a eriama hu'za vahe'mo'zama antahi ani'ma hu'are zamasamizage'za antahi ama' hu'naze.

<sup>9</sup> Hagi anante Juda mopare gavana ne' Nehemaiaki, Pristi eri'zama enerino avontafe'ma negrea ne' Ezra'ene Livae naga'ma vahe'ma rempima hunezamiza naga'mo'zanena amanage hu'za maka vhahera zamasami'naze, Menina amagnamo'a tamagri Anumzamofo avurera ruotge hu'neanki tamasunkura huge, zavirategera osiho. Na'ankure zamagrama ana kasegema nentahi'za maka vahe'mo'za zavi krafage nehazage'za anankea hu'naze. <sup>10</sup> Anante Nehemai'a anage huno zamasami'ne, Vutma knare'nare ne'zane haganentake tinena ome neneta, musenkase nehuta ne'zama trotra'ma huonte'nesaza vhahera mago'a zamigahaze. Amagnamo'a tagri Ra Anumzamofo avurera ruotage hu'neanki, tamasunkura osutma muse hiho. Na'ankure Ra Anumzamo'ma neramia musezamo'a tamagri hankave me'ne. <sup>11</sup> Hanki Livae naga'mo'za vahe'ma zamazeri fru hu kea amanage hu'naze, Akoheta maniho, na'ankure amagnamo'a ruotge hu'nea kna me'ne. E'ina hu'negu tamasunkura osiho. <sup>12</sup> Hanki maka veamo'za no zamirega vu'za e'za hu'za, ne'zane tinena ome nene'za, ne'zankuma atupa'ma hu'naza vhahera ne'zana nezami'za tusi musenkase hu'naze. Na'ankure kasegema hampari zamiza kemofo agafa'a antahi ama hu'nazagu anara hu'naze.

*Fugagi nompima mani'za e'naza zamofo antahimi'za musema nehaza kna eri kasefa hu'naza naneke*

<sup>13</sup> Hanki 7ni ikamofona nampa2 knazupa, ana maka naganofite'ma ugagotama huterema hu'naza vahe'ene pristi vahe'mo'zane Livae naga'moza, kasegefima me'nea naneke rempi huzami'niegu avontafe'ma negrea ne' Ezrante e'za emeritru hu'naze. <sup>14</sup> Ana hute'za Ra Anumzamo'ma Mosesema ami'nea Kasege avontafepina amanahu ke me'nege'za ke'za erifore hu'naze. Israeli vahe'mota 7ni ikampima musenkasema hu knarerera fugagi nompi mani'neta ne'zana kreta neneta musena hugahaze huno hu'nea naneke me'nege'za ke'naze. <sup>15</sup> Ana hu'negu ne'onse kumatmimpine Jerusalemi kumapinema mani'naza vahetega amanage huta kea atre zamanteho, avontafepina amanage huno krente'ne, agonarega zafa tanopafi mareritma ani'namoke'ma hu'nenia olivi azankuna'ene, afi olivi zafa azankuna'ene tofe ani'nane Maitilesi zafa (myrtle) azankuna'ene mago'a ani'nage'ma hu'nea zafa azankuna'enena erita eta fugagi nona eme kineta kasegemo'ma hu'nea kante anteta ne'zana kreta neneta, musena hugahaze huno krentene. <sup>16</sup> Ana hu'negu veamo'za vu'za zafa azankuna'a ome eri'za e'za nozamimofo agofetu'ene kumapinena fugagi nona eme negi'za, Anumzamofo mono no kumapine, Tima afi Kafanema nehaza kafamofo avugane, Efraemi kafanema nehaza kafamofo avuga fugagi nontamina ki'naze. <sup>17</sup> Hanki ana maka vahe'ma Babiloni kinafinti'ma atre'za e'naza fugagi no ki'za mani'naze. Hagi Nuni nemofo Josua knaret'i'ma eno ana knare'ma ege'za, e'inahu zana hu'za musenkasea osu'nazanki'za, tusi musenkase hu'naze. <sup>18</sup> Ana nehu'za mago mago zupa Anumzamofo nanekea mago'an Ezra'a hamprige'za antahi'naze. Nentahi'za seveni zagekna zupa mani'ne'za muse hu'naze. Hagi ana'ma hute'za Anumzamo'ma kema hu'nea za hu'za eme atru huvagarete'za vu'za e'za hu'naze.

## 9

### *Kefozazmi huama hu'naza naneke*

<sup>1</sup> Ana ikamo'ma 24ma hiankna zupa Israeli veamo'za ne'zana a'o nehu'za, hapa frete'za eri tru hu'naze. <sup>2</sup> Hagi ana Israeli vahe'mo'zama meg'i'a vahe'enema rutrago'ma ate'nazana, ana vahera zamatre'za e'naze. Ana nehu'za ot'i za kumi'zamigura zamasunku nehu'za, korapa zamagehe'zama hu'naza havi zamavu zamava zanku'enena zamasunku hu'naze. <sup>3</sup> Hagi 3'a auamofo agu'afi ot'i'ne'za Ra Anumzana zamagri Anumzamofo kasege avontafepinti'ma hampri zamiza nanekea antahi'naze. Ana hute'za ete 3'a auamofo agu'afina kumi'zami huama nehu'za, Ra Anumzamofona monora hunte'naze. <sup>4</sup> Hanki Livae naga'mo'zama manisga hu'nezama nenekema nehaza tratera, Jesua'ma Bani'ma Katmieli'ma Sebania'ma Buni'ene Keanani'ma hu'za ana tratera mani'ne'za ranke hu'za Ra Anumzana zamagra'a Anumzamofontega nunamuna hu'naze. <sup>5</sup> Anante Livae nagara Jesua'ma Kadmieli'ma Bani'ma, Hasabneia'ma, Serebia'ma, Hodia'ma, Sebania'ene Petahiaki hu'za amanage hu'za vea kevua zamasami'naze, otita Ra Anumzana tamagri Anumzama mani vava Anumzamofo agi'a hentesga hiho. Hagi Ra Anumzamoka so'e Kagika'a ahentesga hune, tagrama keagafinti'ma huta e'inahu Anumza mani'namene huta hu'zamo'a amuho hie.

<sup>6</sup> Kagrake Ra Anumzana mani'nane, Kagra monaramina tro nehunka, anazanke hunka onaga'ama me'nea monaramina tro nehunka, hanafi taminen tro hu'nane. Ama mopa tro nehunka, mopa agofetu'ma me'nea zantaminena tro hu'nane. Hage rintamina tro nehunka, hageri agu'afima

me'nea zantaminena tro nehunka, maka zamofona zamasimura nezamine. Ana hu'nanke'za hampriga osu ankerontamima monafinkama mani'naza ankeromo'za zamare'nare'za Kagia ahentesga nehaze.

<sup>7</sup> Kagrake Ra Anumzana mani'enka, Babiloni mopafi me'nea kuma Kaldia kaziga Uri mopareti Abramuna huhamprinka avre tiraminka ne-enka, Abrahamu'e hunka agia antemi'nana Anumza mani'nane. (Gen-Agaf 11:31, 17:5) <sup>8</sup> Na'ankure agra maka agu'areti fatgo huno kavesigantegenka Kagra agrira hu hagerafi huvempage huntenga, kagripinti'ma henkama forehu nante anante'ma hu'za esaza vahera, Kenani vahe'ma, Hiti vahe'ma, Amori vahe'ma, Perizi vahe'ma, Jebusi vahe'ene Gurgasi vahe'mokizmi mopa zamigahue hunka hunte'nane. Kagra fatgo Anumza mani'nanku, huvempama hu'nana keka'a eri otre'nane.

<sup>9</sup> Tagri tagehe'zama Isipima mani'nazage'za Isipi vahe'mo'zama tusi'a knazama zami'nazana zamage'nane. Zamagra koranke hagerinte'ma emani'ne'za zamazama hananegu'ma Kagritegama zavi krafama hazagenka, Kagra antahi zami'nane. <sup>10</sup> Kagra ruzahu ruzahu kaguva zane avamezane hunka Feronte'ene eri'za vahe'are'ene ana maka Isipima mani'naza vahe'enena zamazeri haviza hu'nane. Na'ankure zamagrama Israeli vahe'ma zamazeri havizantfama hazazanku anara hu'nane. Ana nehunka Kagia erinte ama hu'hankeno, vahe'mo'za meninena Kagia ahentesga nehaze. <sup>11</sup> Zamagra negazagenken hagerina refko hugantigama han-keno, amu'nompina ka fore hige'za hagege mopare vu'naze. Hianagi zamarotgoma hu'za aza vahera havema hiazza hunka timo'ma hankave-manetifi zamazeri atranke'za urami'naze.

<sup>12</sup> Ferura hampompi mani'enka vugota huzmantenka vu'nane. Hagi kenagera tevenefake hampompi mani'enka, remsa huzmantenka kana zamaveri hanke'za vu'naze. <sup>13</sup> Hagi Sainai agonarera eraminka monafintira kea hunezaminka, fatgo huno knare'ma hu'nea tra ke'ne, kasegenena Kagra zami'nane. <sup>14</sup> Kagra ruotage'ma hu'nea Sabati knaka'a zamagritera emeri ante ama' nehunka, amage anteho hunka tra kene kasegeka'a, eri'za vaheka'a Mosesena ami'nane. (Eks-Uti 20:8) <sup>15</sup> Ne'zama ne'zanku'ma zama'ga'ma netegenka monafinkati bretia nezaminka, tinku'ma zamavene-sigenka, tina hankeno havefinti ege'za ne'naze. Hagi huvempama huzmantenka zamigahue hunkama hu'nana mopafi ufre'za erisanti hare'za mani'naze. Hanki tina omne'nege'za tinku zamave'nesigenka knare hunka havefinti tina erifore huzmi'nanke'za ne'naze.

<sup>16</sup> Hianagi tagehe'mo'za zamavufaga ra nehazageno zamagu'amo'a hanavetige'za, kagri kasegea amagera onte'naze. <sup>17</sup> Zamagra keka'a zamagesa ante'za nontahi'za, zamagri amunompima kaguva zantamima eri fore'ma hu'nana zankura zamagane kani'naze. Ana nehu'za zamefi hugami'za kea nontahi'za, ete kazokzo eri'zampi Isipi vanune hu'za mago kva ne' azeri ot'i'naze. Hianagi Kagra kumi atrente Anumza mani'enka, kasunku hunezmantenka krimpa fru Anumza mani'nanankinka, kasunku hunezmantenka so'e kavukva nehunka, ame hunka krimpa ohenka mevava kavesizanu vahera kavesinentana Anumza mani'nane. E'ina hu'negu zamefira Kagra huozami'nane.

<sup>18</sup> Hagi Sainai agonafima mani'ne'za goli eri'za bulimakoa tro hu'za anange hu'naze, ama anumzana tagri anumzane hu'za nehu'za, Isipitima tavre'noma e'nea anumzane hu'za hu'naze. Ana nehu'za Anumzamoka kagi'a eri haviza hu'naze. <sup>19</sup> Hianagi tusi'a kasunku huzmantenka hagege kokampina kamefira huzminka zamatrakte'za ofri'naze. Feru'ma kama

zamaveri huno nevia hampomo'a zamatreno ovigeno, kenage'ma remsa huno kama zamaveri'ma huno nevia teve nefake hampomo'a asura osu'n'e. <sup>20</sup> Kagra knare Avamuka'a huntankeno antahintahia zami'n'e. Kagra mana ne'zana zaminke'za nevava nehazagenka, tinku'ma hagegema hazagenka tina zaminke'za ne'naze. (Eks-Uti 16, 17:1-7) <sup>21</sup> Hanki 40'a kafumofo agu'afina hagege kokampina kegava huzmante'nanke'za mago zankura atupara osu'naze. Kukena zamimo'a tagato tagutura osigeno, zamagamo'a zoreno prora osu'n'e. (Diu-Kas 8:4) <sup>22</sup> Kagra zamaza hanke'za kini vahera hara hu zamagtere'za afete'ma mani'naza vahe mopazamia eri'naze. E'ina hu'negu Hesboni kini ne' Sihoni mopane Basani kini ne' Ogi mohanena eri nafa'a hu'naze. <sup>23</sup> Ana nehunka zamagrira tusi mofavre naga zaminke'za, monafi hanafikna hazage'za hamprigara osu'naze. Ana nehunka zamafahe'ima huhampri zmante'nana mopafi zamavarenka ufre'nane.

<sup>24</sup> Hagi zamagehemo'za ufre'za Kenani mopa ome eri nafa'a hu'naze. Kagra zamaza hanke'za Kenani mopafima nemaniza vahera zamavaretre'naze. Kini vahe'zamine, ana mopafima nemaniza vahe'ene Kenani vahe'enena zamazampi zamavare antanke'za, nazanoma huzaman-teku'ma hazazana amne huzamante'naze. <sup>25</sup> Hagi hankavenentake keginama hu'naza ranra kumatamine, knare zantfama hu'nea mohanena hahu'za eneri'za, knare'nare zantamimo'ma avite'nea nontamine, ko'ma kafinte'naza tinkerinena eri nafa'a nehu'za, waini hozane, olivi zafa hozane, mago'a zafa raga hozanena rama'a eri nafa'a hu'naze. Zamagra tusi ne'za nene'za afovage nehu'za, tusi'a asomu'ma zamina zankura musenkase hu'naze.

<sup>26</sup> Hianagi zamagra keka'a nontahi'za ha' renegante'za, kasegeka'a zamefi humi'naze. Kagritegama ete rukrahe hu'za ehogu'ma hankave keagama zamasami'za kasnampa vaheka'a zamahe fri'naze. Ana nehu'za Kagri kagia tusiza hu'za huhaviza hu'naze. <sup>27</sup> E'ina hu'nazagu ha' vahe'zami zamazampi zamavare antanke'za zamazeri haviza hu'naze. Hagi zamagrama zamatama e'neri'za, Kagritega krafage hazagenka monafinkati antahinezaminka, tusi kasuntagi zamantenka zamagu'ma vazi vahera huzmantanke'za e'za ha' vahe zamazampintira eme zamagu vazi'naze.

<sup>28</sup> Hianagi zamagrama mani fruma nehu'za, Kagri kavurera havi'zama hu'nea avu'ava zana ete hu'naze. Anama hazagenka zamatrane'za ha' vahezamimo'za kegava huzmantage'za ete Kagritegama krafagema hazagenka, Kagri monafinkati krafa ke'zamia nentahinka kasunku huzmantenka, maka zupa zamavaretere hu'nane. <sup>29</sup> Hagi zamagrama rukrahe hu'za kasegeka'a amage antehogura hankave ke huzmante'nane. Hianagi zamav-ufaga ra nehu'za zamarimpamo'a hankavetige'za, keka'a ontahi'naze. Ana nehu'za vahe'mo'zama amage'ma ante'za so'e huzama maniga tra keka'a zamefi hunemi'za kumi hu'naze. Zamarimpamo'a hankavenetige'za zamefi hunegami'za, haviza hu'za keka'a amagera onte'naze. <sup>30</sup> Hanki rama'a kafufina akohenka fru hunezmantakeno Avamuka'amo'a kasnampa vahe zamagipi huvazino zamasami'neanagi, ana nanekerera tagehe'za zamagesa ante'za ontahi'naze. E'ina hu'negu ha' vahe'mokizmi zamazampi zamavare ante'nane. <sup>31</sup> Hianagi tusi'a kasunku hunezmantenka zamahe fananea nosunku, kamefira huozami'nane. Na'ankure Kagra fru hunka kasunku Anumza mani'nane.

<sup>32</sup> Hanki e'ina hu'negu tagri Anumzana tusi hihamukane hentofaza hunka hankavenentake Anumza mani'nenka, maka zupa kagrama hu-vempama hu'nana kegu kagesa nentahinka, kavesirante vava nehana

Anumza mani'nane. E'ina hu'negu muse hugantonanki, ko'ma Asiria kini vahe'mo'zama tazeri havizama hu'nareti'ma eno meninte'ma egeta, kini nagatine kva vahetine pristi vahetine kasnampa vahe'ene tafahe'ine, ana maka vahek'amota tusi'a knazamo eme tazeri havizantfa hu'ne.<sup>33</sup> Hianagi e'i ana maka knazama tagrite'ma e'nea knafina Kagra fatgo kavukvaza hurante'nane. Hagi tagrama kumi'ma nehunkenka'a, huvempama hu'nana keka'a amage ante fatgo hunka taza hu'nane.<sup>34</sup> Hagi kini vahetimo'zane kva vahetimo'zane pristi nagatimo'zane, tafahe'mozanena Kagri kasege amagera onte'naze. Kagrama hihoma hunka huzamante'nana nanekene, koro kema huzamante'nana nanekea zamagesa ante'za ontahi'naze.<sup>35</sup> Ana hu'nazanagi asomu huzamantenka kini vahera zaminke'za kegava huzamante'naze. Ana nehunka knare huno masavenkema hu'nea ra mopakr-erfa zami'nane. Hianagi ana zankura zamagesa nentahi'za, Kagrira monora hunegante'za kefo zamavu zamavama nehaza zana netre'za ete rukrahera hu'za Kagritera ome'naze.<sup>36</sup> Hianagi menina knare huno masavenentake mopa tafahe'ina zaminke'za mani'ne'za zafa rgaramine knare'nare ne'zana ne'nazanagi, ama ana mopafina tagra kazokzo eri'za vahe menina mani'none.<sup>37</sup> Na'ankure tagra kumi hu'nona nona'a, ru vahe kinima huzamantanke'zama ezama eme kegavama hurante'naza kini vahe'mo'za, mopatifinti'ma knare'nare ne'zama hamarona ne'zana zamagrake'za eri'naze. Hagi tagri'ene afu nagatinena kegava hurante'neza, nazano tagritema hunaku'ma haza zana, amne hu'naze. Ana hazageta tusi'a knazampi mani'none.<sup>38</sup> Hanki ama ana zantamima refko'ma huta kevagamareteta, mago tarimpa huta Ra Anumzamofo kasege amage antegahune huta mago kea anakiteta avompi krente'none. Ana hunke'za kva vahetimo'zane Livae nagatimo'zane pristi nagatimo'za ana avomofo agofetura zamagi krentetere hu'za ana avona eri hankaveti'naze.

## 10

### *Israeli vahe'mo'za mago zamarimpa hu'za ke hu anaki'naza naneke*

<sup>1</sup>Hanki ana avomofo agofetu'ma zamazanko avoma ante'naza vahe zama-gia ama'ne. Kavana ne' Hakalia nemofo Nehemaiaiki, Zedekaiaki,<sup>2</sup> Seraiaiki, Azariaki, Jeremaiaki,<sup>3</sup> Pasuriki, Amariaki, Malkijaki,<sup>4</sup> Hatusiki, Sibaniaki, Malukiki,<sup>5</sup> Harimiki Meremotiki Obadiaki,<sup>6</sup> Danieliki Ginetoniki Barukiki,<sup>7</sup> Mesulamuki Abijaki Mijaminiki,<sup>8</sup> Ma'aziaki Bilgai'ene Simaia'eneki hu'za pristi eri'zama eneriza naga'mo'za zamagia krente'naze.<sup>9</sup> Hanki ana avomofo agofetu'ma zamazanko avoma ante'naza Livae nagamok-izmi zamagia ama'ne, Azania nemofo Jesuaki, Henadati nagapinti ne' Binuiki, Katmieli'ene,<sup>10</sup> afuagnahe'za Sebaniaki, Hodaki, Kelitaki, Pelaiaki, Hananiki,<sup>11</sup> Mikaki, Rehopuki, Hasabiaki,<sup>12</sup> Zakuriki Serebiaki Sebaniaki,<sup>13</sup> Hodaki, Bani'ene Beninu'enene.<sup>14</sup> Hanki ugota kva vahe'ma ana avomofo agofetu'ma zamazanko avoma ante'naza vahe'mokizmi zamagia ama'ne, Parosiki Pahat-Moapuki, Elamuki, Zattuki, Baniki,<sup>15</sup> Bunniaki, Azagatiki, Bebaiki,<sup>16</sup> Adonijaki, Bigvaiki, Adiniki,<sup>17</sup> Ateriki, Hezekaiaki, Azzuriki,<sup>18</sup> Hodaki Hasumiki, Bezaiki,<sup>19</sup> Harifiki, Anatotiki, Nebaiki,<sup>20</sup> Makpiasiki, Mesulamuki, Heziriki,<sup>21</sup> Mesezabeliki, Zadokuki, Joduaki,<sup>22</sup> Pelatiaki, Hananiki, Anaiaki,<sup>23</sup> Hoseaki, Hananiaki, Hasubuki,<sup>24</sup> Halohesiki, Pil-haki, Sobekiki,<sup>25</sup> Rehumuki, Hasabnaki, Ma'aseiaki,<sup>26</sup> Ahiaki, Hananiki, Ananiki,<sup>27</sup> Malukiki, Harimi'ene Ba'ana enene.<sup>28</sup> Hanki mago'a vahe'ma anampima mani'naza vahera pristi vahe'ene Livae vahe'ma mono no

kafante kva vahe'ene zagame'ma nehaza vahe'ene, mono nompi eri'za vahe'ene, Ra Anumzamofo kasegema amage'na nente'za zamagra'ama zamazeri ruotge'ma hu'zama nemaniza vahe'ene a'nezamine mofavre naga'zamine kema zamagesama ante'zama antahi so'e huga naga'mozane,<sup>29</sup> ana maka vahe'mo'za e'za zamafu zamaganah'e'zane kva vahe'zamine eme eri atru hu'za mago hankave naneke huhagerafi'za, Ra Anumzama tagri Anumzamo'ma eri'za vahe'a Mosesema ami'nea kasegene, trake'anena maka zupa amage antegahune hu'za kea anaki'naze. Anage nehu'za zamagra amanage hu'naze, Huvempama huna ke'ma amage'ma ontisanukeno'a Anumzamo'a tazeri haviza hugahie.<sup>30</sup> Tagra huvempa hunankita mofa'netia zamatre sunke'za meg'i' veneneramina vea enorisageta, ne' mofavretirera meg'i' vahepintira mofa'ne zamia ara avare ozamigahune.<sup>31</sup> Hagi meg'i' vahe'ma tva'ontire'ma nemaniza vahe'mo'zama Sabati manifru hu knarero, mago'a knama huhampri antegeno ruotgema hu'nea knare'ma zagore'ma atreku mago'a zazmima eri'za ege, witi nazama eri'zama esnageta tagra mizana osegahune huta huvempa hu'none. Anage nehu'za hampritama nevanunkeno 7nima hutere hania kafurera, mopatifina eri'zana e'ori atresanunkeno mopamo'a manigsa nehanigeta, Jiu vahe'motama nofi'ma ohu ahuma hu'nesuna nofi'enena maka otrente atrente hugahune.<sup>32</sup> Hanki huvempa hunankita mago mago kafufina magoke zupa, Ra Anumzana tagri Anumzamofo mono nompima eri'zama erisnaza zama mizase zana, osi'a silva zagoa refko huta eme atretere hugahune.<sup>33</sup> Hanki ana zagoretira, Ra Anumzamofo avure'ma mono nompima me'nea trate'ma ante bretia miza nese'za, maka zupama witi ofama hu' witine, maka zupama tevefima kre fanane hu ofama hu sиписипи kao afutamine, Sabati zupama kresaza ofaramine, kasefa ikama ementegen'o'ma musema hu knare'ma ofama hu zantamine, mago'a ranra knare'ma ofama huzantaminena miza segahaze. Ana zanke huta Israeli vahe'mota kumi'mofa nona, ofama hanageno kumitima atrerantesia zantaminena ana zagoretira miza nesetma, tagri Anumzamofo mono nompima ana maka eri'zama erisaza zantaminena mizasegahaze.<sup>34</sup> Hanki tagra pristi naga'motane, Livae naga'motane, maka vahe'motanena taisi zokago reta kesanunkeno, ina naga'mo mago kafufina Ra Anumzantimofo mono nompima kresramnama vu itare'ma tevema hugare tevea haretere hugahifi, kasegefima krente'naza kante anteta huhampari zamantetere hugahune.<sup>35</sup> Tagra anazanke huta kea anakunankita mago mago kafufina hozatifinti'ma ese ne'zama hamaresuna ne'zane, maka zafa rga-timo'ma ese uza'ma resanigeta tagisunana erita Ra Anumzamofo mono nompi egahune.<sup>36</sup> Hanki ana zanke huta kasegefi hu'nea kante anteta ese zage ne' mofavrette, esema kasentesia ve bulimakao anenta'ene sиписипи anenta'ene meme afu anenta'ene avreta Ra Anumzana tagri Anumzamofo mono nompima eri'zama ener'za pristi vahe'ma mani'nazare vugahune.<sup>37</sup> Ana nehuta Ra Anumzana tagri Anumzamofo mono nompima fenozama nentaza nompima antesnaza zantamima pristi vahete'ma eritama vanuna zantamina, ese'ma rentrama ahesuna witifinti, witi ofama hu'zana osi'a enerita, zafa ragafinti'ene wainifinti'ene olivi masavenena erita vugahune. Ana nehuta hozatifinti'ma hamparsanunkeno 10nima hutere hania kevua erita ne'onse kumate'ma mani'neta eri'zama eneruna kumapima huhampri zamantage'za ana zantamima zonegi'za Livae naga'mokizmi erita ome zamigahune.<sup>38</sup> Hanki Aroni nagapinti'ma pristi eri'zama e'nerisnaza

naga'mo'za mago'a Livae naga'ene mani'ne'za nege'nage'za, 10ni'a ke-vufinti'ma mago kevuma Livae naga'ma eme zamitere hanaza kevu ne'zana erigahaze. Ana hute'za ete kevuma ante'za hamparisnageno 10nima hutere hania kevua ete eri'za Ra Anumzana tagri Anumzamofo mono nompi vu'za fenozama nentazafi ome antegahaze.<sup>39</sup> Hagi ana ofama hu'zana witiramine kasefa wainine olivi masaveramina erita tagra maka Israeli vahe'motane, Livae naga'enena, Ra Anumzamofo mono nompima eri'zama e'neri'za zuomparamima nentazage'za, ana tava'onte'ma pristi vahe'ene mono nomofo kafante'ma kvama nehaza vahe'ene, zagamema nehaza vahe'ma nemasafinka erita ome antegahune. Ana nehuta Anumzantimofo mono nona tagerakanita tamefira huomigosune huta hu'none.

## 11

### *Jerusalemi kuma'ma refko hu'za vahe'ma mani'naza zamofo naneke*

<sup>1</sup> Hagi ana vahe'mokizmi kva vahe'mo'za Jerusalemi rankumapi mani'naze. Hianagi Juda nagapinti'ene Benzameni nagapinti vahe'mo'za, iza ruotge'ma hu'nea kumapi Jerusalemia ufregahifi taisi zokago re'za kazageno 10nima eme hutere himofona huzmantage'za Jerusalemi ran kumapi umani'naze. Hagi ruga'a 9ni'a vahe'mo'za ne'onse kumazamifi ete'za umani emani hu'naze. <sup>2</sup> Anante iza'zo zamarimpamo'ma otige'zama Jerusalemi rankumapima umaniza vahera, Israeli vahe'mo'za asomu ke huzmante'naze. <sup>3</sup> Hanki provinsirema kvama huterema hu'naza Jerusalemi rankumapi emani'naze. Hagi Pristi naga'ene Livae naga'ene, mono nompima eri'zama erisaza vahe'ene Solomoni eri'za vahe'mokizmi naga nofipinti vahe'ma Juda mopafima me'nea ne'onse kumatamimpima nemaniza vahe'mo'zanena kumazamifi mani'ne'za mopazamine rankumazmia zamagra'a kegava hutere hu'naze.

<sup>4</sup> Hianagi mago'a Juda nagapinti'ene Benzameni nagapintira Jerusalemi ran kumapi mani'naze. Hagi Juda nagapinti vahe zamagi'a ama'ne, Uzzia nemofo Ataia'e. Hanki Uzziana Zekaraia kasentegeno, Zekaraiana Amaria kasentegeno, Amariana Sefatia kasentegeno, Sefatiana Mahalaleli kasentegeno, Mahalalelina Perezi kasentegeno, Perezina Juda kasente'ne. Hagi Ataia'a Perezi nagapinti efore hu'ne. <sup>5</sup> Hagi Juda nagapinti mago nera Ma'aseiakino, Ma'aseiana Baruku kasentegeno, Barukuna Kol-Hose kasentegeno, Kol-Hosena Hazaia kasentegeno, Hazaiana Adaia kasentegeno, Adaiana Joiaribi kasentegeno Joiaribina Zekaraia kasentegeno, Zekaraiana Sela kasentegeno, Sela'a Juda nagapinti efore hu'ne. <sup>6</sup> Hagi Perezipinti'ma efore'ma hu'naza vahe'ma Jerusalemi rankumapima mani'nazana hanave vene'nea makara 468'a mani'naze.

<sup>7</sup> Hanki Benzameni nagapinti'ma Jerusalemi rankumapima mani'naza vahe zamagia ama'ne, Benzameni nagapintira mago nera Salukino, Saluna Mesulamu kasentegeno, Mesulamuna Joedi kasentegeno, Joedina Pedaia kasentegeno, Pedaiana Kolaia kasentegeno, Kolaiana Ma'aseia kasentegeno, Ma'aseiana Itieli kasentegeno, Itielina Jesaia kasente'ne. <sup>8</sup> Ana hu'neankino Salu afu'aganaha'e'zama vu'hazana, Gabaike Salaike vu'na'e. Higeno Benzamenimpinti'ma efore'ma hu'naza vahe'ma Jerusalemi rankumapima mani'nazana, ana makara 928'a venene mani'naze. <sup>9</sup> Higeno Zukri nemofo Joel ugota kva vahe'zamia manigeno, Hasenua nemofo Juda'a nampa 2 kva mani'ne. <sup>10</sup> Hanki pristi vahepinti'ma Jerusalemi rankumapima

mani'naza vahe zamagia ama'ne, Joaripi nemofo Jedaia'a Jakini nege-hokino agra kva mani'ne. <sup>11</sup> Hagi mago nera Seraiakino Seraiana Hilkia kasentegeno, Hilkiana Mesulamu kasentegeno, Mesulamuna Zadoku kasentegeno, Zadokuna Meraioti kasentegeno, Meraiotina Anumzamofo mono nonte'ma kegavama hu'nea ne' Ahitubu kasente'ne. <sup>12</sup> Higeno ana na-gapinti'ma mono nompima eri'zama eri'naza vhahera ana makara 822'a venene. Hagi mago nera Adaiaikino, Adaiana Jerohamu kasentegeno, Jerohamuna Pelalia kasentegeno, Pelaliana Amzi kasentegeno, Amzina Žekaraia kasentegeno, Žekaraiana Pasuri kasentegeno, Pasurina Malkija kasente'ne. <sup>13</sup> Higeno Adaia naga nofipinti'ma naga zamire'ma ugotama hutere hu'naza kva vhahera, ana makara 242'a vahe mani'naze. Hagi mago nera Amasaikino, Amasaina Azareli kasentegeno, Azarelina Azai kasentegeno, Azaina Mesilemoti kasentegeno, Mesilemotina Imeri kasente'ne. <sup>14</sup> Higeno Amasai naga nofipinti'ma hankaveti'za ha'ma huga vene'nea 128'a vahe vu'naze. Ana hazageno Hagedolimi nemofo Zabdieli ugota huno kva vahvezamia mani'ne. <sup>15</sup> Hanki Livae nagapinti'ma Jerusalemi rankumapima mani'naza vahe zamagia ama'ne, mago nera Semaikino, Semaiana Hasabu kasentegeno, Hasubuna Azrikamu kasentegeno, Azrikamuna Hasabia kasentegeno, Hasabiana Buni kasente'ne. <sup>16</sup> Hagi Livae nagapima ugota hu'neke kvama hu'nakezama Ra Anumzamofo mono nomofo meg'iama eri'zama eneriza kva netrena, Sabetaike Jozabatike. <sup>17</sup> Hagi anantera Mata-niakino Mataniana Mika kasentegeno, Míkana Zabdi kasentegeno, Zabdina Asapu kasente'ne. Ana hu'neankino Matania'a, Ra Anumzamofo mono nompima zagame'ma nehaza vahetema ugota huzmante'nege'za Anumzamo-foma susu hunte mono'ma nehaza zupama nunamuma hutege'za mono'ma nehaza ne' manine. Higeno agr'i'ma azama nehia ne' Bakbuki'a agranena Jerusalemi kumapi mani'ne. Hagi anantero mago nera Abdakino Abdana Samua kasentegeno, Samuana Galali kasentegeno, Galalina Jedutuni kasente'ne. <sup>18</sup> Ana hige'za Jerusalema ruotage'ma hu'nea kumapima Livae naga'ma umani'nazana ana makara 284'a vahe umani'naze. <sup>19</sup> Hagi kuma kegina kafante'ma kvama hu vhahera Akubu'ene Talmoni'ene zanafu zanagnahe'zane kva hu'naze. Ana hu'neankino ana makara 172'a vahe mani'naze.

<sup>20</sup> Hagi mago'a Israeli vahe'ene, pristi vahe'ene, Livae vahe'mo'za Juda mopafima ne'onse kumatamima me'nefi umani emanı nehu'za, erisantima hare'naza mopa zamire umanitere hu'naze. <sup>21</sup> Hianagi mono nompima eri'zama e'neri'za vhahera, Jerusalemi kumapina mago kaziga Ofeli nehaza osi agonan mani'naze. Ana hazaägeke Žiha'ene Gispake kvazamia mani'nae'. <sup>22</sup> Hanki Bani nemofo Uzzi'a, Livae vahe'ma Jerusalema mani'naza vahe'mokizmi ugota kva mani'ne. Higeno Bani nemofo Uzzina Hasabia kasentegeno, Hasabiana Matania kesentegeno, Mataniana Mika kasentene. Ana hu'neankino Asapu naga'ma Ra Anumzamofo mono nompima zagame'ma nehaza naga nofipinti ne' Uzzi'a mani'ne. <sup>23</sup> Hanki zagame'ma hu vhahera kini ne'mo'ma maka zupa e'ina huta zagamera hiho huno huzmante'nea kante mago mago zupa zagamera hutere hu'naze. <sup>24</sup> Hagi Juda nemofo Zera nagapinti ne' Mesezabeli nemofo Petahia'a, kini ne'mofo tva'ontera mani'neno vahe'mokizmi zamagira erino kini nera keaga nesamia ne' mani'ne. <sup>25</sup> Hagi mago'a Juda vahe'ma Kiriat Arba rankuma'ene tva'oma'are'ma megagi'nea ne'onse kumatamine, Diboni rankuma'ene tva'oma'are'ma megagi'nea ne'onse kumatamine, Jekabzeli rankuma'ene, tva'oma'are'ma megagi'nea ne'onse kuma

tamimpinena mani vagare'naze. <sup>26</sup> Ana hazage'za mago'a naga'mo'za Jesua rankumapine, Molada rankumapine, Betpeleti rankumapinena mani'naze. <sup>27</sup> Hazar-suali rankumapine, Beseba rankumapine tva'oma'arema me'nea ne'onse kumatamimpinena manizage'za, <sup>28</sup> mago'a naga'mo'za Ziklagi rankumapine, Mekona rankumapine tva'oma'arema megagi'nea ne'onse kumatamimpinena manizage'za, <sup>29</sup> mago'amo'za Enrimoni rankuma'ene Zora rankuma'ene Jarmuti rankumapi manizage'za, <sup>30</sup> mago'amo'za Zanoa rankuma'ene Adulamu rankuma'ene tvaoma'arema megagi'nea ne'onse kumatamine, Lakisi rankuma'ene tva'oma'arema megagi'nea ne'onse kumatamimpina mani vagare'naze. Hagi ana hute'za Berseba rankumateti agafa hu'za manite'za vuvava hu'za Hinomu agupore uhanati'naze. <sup>31</sup> Hagi Benzameni naga'mozama mani'naza kumatamina, Geba rankuma'ma, Mikmasi rankuma'ma, Aija rankuma'ma, Beteli rankuma'ene tva'ozamire'ma me'nea kumatamimpina ana makamo'za mani vagare'naze. <sup>32</sup> Ana nehazage'za mago'amo'za, Anatoti rankuma'ene Nobu rankuma'ene, Anania rankuma'ene, <sup>33</sup> Hazori rankumapima Rama rankumapima Gitaimi rankumapima, <sup>34</sup> Haditi rankumapima, Zeboimi rankumapima, Nebalati rankumapima, <sup>35</sup> Lodi rankumapima Ono rankumapinki hu'za nemani'za, tuzampazama zamazantet'i'ma tro'ma nehazema nehaza agupofinena mani'naze. <sup>36</sup> Hanki mago'a Livae naga'ma Juda naga'mokizmi mopafima nemaniza nagara huzamantazage'za vu'za Benzameni naga'ene umani'naze.

## 12

### *Zerubabeli'enema ete Jerusalemima e'naza vahe'mokizmi zamagima krente'naza naneke*

<sup>1</sup> Hanki Sealtieli nemofo Zerubabeli'ene Jesua'enema Babiloniti e'naza pristi vahe'ene Livae vahera Seraia'ma, Jeremaia'ma, Ezra'ma, <sup>2</sup> Amaria'ma, Maluku'ma, Hatusi'ma, <sup>3</sup> Sekania'ma, Rehumu'ma, Meremoti'ma, <sup>4</sup> Ido'ma, Gineton'i'ma, Abija'ma, <sup>5</sup> Mijamini'ma, Ma'adia'ma, Bilga'ma, <sup>6</sup> Semaia'ma, Joiaribi'ma, Jedaia'ma, <sup>7</sup> Salu'ma, Amoki'ma, Hilkia'ene Jedaia'enena, zamagra pristi nagate'ene nagazmire kva vahe e'naze. Hagi ana maka vahe'ma Babiloniti'ma e'nazana vahe'mo'za Jesua'ma pristi nagamokizmi ugota kvama mani'nea knafi e'naze. <sup>8</sup> Hanki Livae nagara, Jesua'ma Binui'ma Katmieli'ma Serebia'ene Juda'ene Mataniakizmia zamafuhe'za zamaza hazage'za, muse zagamera hu'za Anumzamofona susu hunentaze. <sup>9</sup> Hagi anama nehazage'za Bakbuki'ene Uni'ene zamafuhe'zanena, zamavugosa ohumi ahumi hu'za ot'i'ne'za mono'ma hu knarerza zamaza hu'za muse zagamera hugahaze. <sup>10</sup> Hanki ugota pristi ne' Jesua'a Joiakimi kasentegeno, Joiakimi'a Eliasibi kasentegeno, Eliasibi'a Joiada kasentegeno, <sup>11</sup> Joiada'a Jonatani kasentegeno, Jonatani'a Jadua kasente'ne. <sup>12</sup> Hanki Joiakimi'ma ugota pristima mani'nea knafina, amama zamagima me'nea pristi vahe'mo'za naga'zamirera ugagota huzmantetere hu'naze. Seraia nagatera Meraia ugota higeno, Jeremaia nagatera Hanania ugota higeno, <sup>13</sup> Ezra nagatera Mesulamu ugota higeno, Amaria nagatera Jehohanani ugota higeno, <sup>14</sup> Maluki nagatera Jonatani ugota higeno, Sebania nagatera Josefe ugota higeno, <sup>15</sup> Harimi nagatera Atna ugota higeno, Meraioti nagatera Helkai ugota higeno, <sup>16</sup> Ido nagatera Zekaria ugota higeno, Gineton'i'ma nagatera Mesulamu ugota higeno, <sup>17</sup> Abija nagatera Zikri ugota higeno, Miniamini nagate'ene, Moadia nagatera Piltai ugota kvazamia manigeno,

<sup>18</sup> Bilga nagatera Samua ugota higeno, Simaia nagatera Jehonatani ugota higeno, <sup>19</sup> Joaribi nagatera Matenai ugota higeno, Jedaia nagatera Uzzi ugota higeno, <sup>20</sup> Salai nagatera Kalai ugota higeno, Amoku nagatera Eberi ugota higeno, <sup>21</sup> Hilkia nagatera Hasabia ugota higeno, Jedaia nagatera Netaneli ugota hu'ne.

<sup>22</sup> Hagi Eliasibi'ma, Joiada'ma, Johanani'ma, Jadiakima, hu'za pristi eri'zama eri'naza knafi Livae nagate'ma ugota huterema hu'naza kva vahe'mokizmi zamagine, pristi eri'zama eri'naza naga'mokizmi zamagia mago avontafepi krentem'e. Hagi anazanke hu'za Dariusi'ma Persia kinima mani'nea knafina ete mago'anee ana vahe'mokizmi zamagia kre'za erinte fatgo hu'naze. <sup>23</sup> Hagi Livae nagate'ma ugotama hu'naza kva vahe'mokizmi zamagia, zamagi zamagenkema krentem'a avontafepi krentem'e neazageno eno, Eliasibi nagapinti pristi ne' Johanani'ma fria knare emetre'ne. <sup>24</sup> Hagi Anumzamofo eri'za ne' Deviti'ma hiho huno'ma hu'nea kante ante'za, Hasabiaki Serebiaki, Katmieli nemofo Jesua'ene nagazmimo'zanena, tarefi refko hu'za zamavugosa ohumi ahumi hune'za muse zagamera hu'za Anumzamofona susu hunte'naze. <sup>25</sup> Hanki Matanaki, Bakbukiaki, Obadiaki, Mesulamuki, Talmoni'ene Akubuki hu'za kuma kafantera fenozama nentaza nontaminte kegava hu'naze. <sup>26</sup> Hagi Jesua nemofo Jozadaki negeho, Joiakimi'ma ugota pristima manigeno, Juda moperera Nehemaia'ma gavana manigeno, kasegema rempima hunezamia ne' Ezra'ma hu'za mani'naza knafi ana Livae naga'mo'za ana eri'zana eri'naze.

### *Jerusalemi rankumamofo keginama nunamu hu'za Anumzamofo azampi ante'naza naneke*

<sup>27</sup> Hagi Jerusalemi kuma keginama nunamu hu'za Anumzamofoma amiza zupa, musenkase nehu'za nasenasepane laeriema nehaza zavenaramine, hapuema nehaza zavenaramine nehe'za, muse zagame hihogu maka Juda mopafima mani'naza Livae nagara ke hazage'za Jerusalemi e'naze.

<sup>28</sup> Ana zanke hu'za Jerusalemi kuma tvaonte'ma megagi'nea kumatamimpinti'ma zagame'ma hu Livae vahe'ma e'nazana, Netofa vahe'mokizmi kuma'ma, <sup>29</sup> Bet-Gilgali kuma'ene, Geba kuma'ene Azmaveti kumatamimpinti e'naze. Na'ankure zagamema hu vahe'mo'za zamagra Jerusalemi kuma tva'onte nonkumara ante'za mani'nagu anara hu'naze. <sup>30</sup> Hagi pristi vahe'mo'zane Livae naga'mo'zama zamagra'a zamazeri agruma hute'za vahe'zagane kuma kafaramine, kuma keginanena zamazeri agru hu'naze.

<sup>31</sup> Hagi nagra Nehemaia'na kva nagara, kuma keginamofo agofetu zamazeri atru hute'na, Ra Anumzamofontegama muse zagamema hu'za agima hentesgama hanaza vahera tarefi refko hu'noe. Hagi ana hutogeno mago kevumo'a nazantmaga kaziga kegina agofetu vu'za Kumapinti zama harafima hu'zama ome atre kafanema nehaza kafante vu'naze. <sup>32</sup> Hagi Hosaina'ene amu'nompinti Juda kva vahera refko hu'ne'za, ana vahe zamefira vu'naze. <sup>33</sup> Hagi ana zamage'ma pristi naga'ma vu'nazana, Azaria'ma, Ezra'ma, Mesulamu'ma, <sup>34</sup> Juda'ma, Benzamini'ma, Semaia'ma, Jeremiahiaki hu'za nevu'za, <sup>35</sup> ana maka'mo'za ufe re'za vu'naze. Ana zamefira mago'a pristi vahe'mo'zane, Jonatani nemofo Zekaraia'ene, Simei negehoza, Matanaki, Mikaiaki, Zakuriki, Asapu nagapinti ne' Jekaraia'ene,

<sup>36</sup> mago'a agri nagapinti vahe'ene vu'nazankino, ana vahe'mokizmi zamagi'a, Semaia'ma, Azareli'ma, Milalai'ma, Gilalai'ma, Ma'aima, Netaneli'ma, Juda'ene Hananiki hu'za vu'naze. Ana nehu'za Anumzamofo eri'za ne'

Deviti'ma ahe'nea zavenaraminteti nehe'za, kasegema rempi hunezamia ne' Ezra ugota hige'za amefi vu'naze. <sup>37</sup> Hagi anante Tinkapu'i kafane nehaza rankafante uhanatite'za, latama hunte'nare mareri'za, Deviti rankumapi marerite'za, kini ne'mofo nona agatere'za vu'naze. Ana hute'za Jerusalemi kumamofo kuma keginarega ete vu'za, zage hanati kaziga Tima Afi kafanema nehaza rankafante uhanati'naze. <sup>38</sup> Hagi zagame'ma hu vahe'ma refko'ma hutre'naza nampa 2 kevu vahe'mo'za, rukrahe hu'za kuma keginamofo agofetu nevazage'na, nagra zamefi vu'noe. Ana nehuge'za mago'a nena azageta avenima me'nea zaza nona agatereta vuta Tusizankna Keginema nehzare uhanati'none. <sup>39</sup> Anantetira Efraemi Rankafanema nehzare vuteta, anantetira Jesana kafane huge korapa kafanema nehzaza rankafante vuteta, anantetira Nozame kafante vuteta, anantetira Hananeli za'za nonte vuteta, anantetira 100'a sondia vahe'ma nemaniza za'za nonte eteta, evava huta Sipisipi Kafanema nehzaza kafante eteta, evava huta kegavama hu kafanema nehzaza kafante ehanati'none. <sup>40</sup> Hagi zamagra ana tare kevu vahe'ma, muse hu'za zagamema nehzaza vahe'mo'za, Anumzamofo mono nompi umani'naze. Hige'za kva vahetamimo'za tarefi refko hune'za mago kevumo'za nagrane mani'naze. <sup>41</sup> Hagi anampima mago'ama mani'naza pristi vahera, Eliakimiki, Ma'aseiaki Miniaminiki, Mikaiaki, Elioenaiki Zekaraia'ene Hananiaha hu'za anampina ufena re'naze. <sup>42</sup> Hanki Ma'aseia'ma, Simaia'ma, Eleazari'ma, Uzzi'ma, Jehohanani'ma, Malkija'ma, Elamu'ene Ezeriki hu'za anante ot'inazageno, Jezrahia'a ugota huzmanteg'eza zagamera hu'naze. <sup>43</sup> Ana hu'neankino ana zupa tusi'a Kresramana vu ofa nehu'za, tusi musenkase hu'naze. Na'ankure Anumzamo ra muse'za zamige'za anara hu'naze. A'nene mofavre zagamo'za zamagranena tusi muse hu'naze. Ana nehzage'za Jerusalemi kumapima musenkasema hazazamofo agasasana, afete'ma mani'naza vahe'mo'zanena antahi'naze.

<sup>44</sup> Hanki ofama hanaza zantamine hoza'zamifinti ese ne'zama hamaresaza ne'zane 10nima hania kevuma eri'za Anumzamofoma eme ami'naza zantaminema antesaza nonte'ma kegava hanaza vene'nea ana kna zupa huhampri zamante'naze. Hagi venenemo'za kuma tvaonte'ma me'nesia mopafima antesaza hozafintira kasegemo'ma pristi vahe'ene Livae naga'ma zamihoma huno'ma hu'ne'nia avamente, pristi vahe'ene Livae nagamokizmi su'za ana nompina erita ome antegahaze. Hige'za ana maka Juda naga'mo'za pristi vahe'ene Livae nagakura muse hunezmante'za, eri'za zamigu'enena tusi muse hu'naze. <sup>45</sup> Hanki pristi vahe'mo'zane, Livae naga'mo'za Anumzazamimofo eri'zana eneri'za, vahe'ma zamazeri agruhu eri'zanena enerizage'za, zagame'ma hu vahe'mo'zane mono no kafante'ma kvama hu vahe'mo'za zamagranena ana zanke hu'za, Deviti'ene ne'mofo ne' Solomonike'ma hu'na'a kante ante'za eri'za zamia eri'naze. <sup>46</sup> Hanki korapara Devitike Asapukema mani'na'a knafina, Anumzamofontegama muse zagame'ma huno agima hentesgama hu vahe'ma kegavama hu vahera kora mani'nazane. <sup>47</sup> Hagi Zerubabeli'ene Nehemaiakema mani'na'a knafina, mago mago zupa Israeli vahe'mo'za zamazankakuti ne'zana eri'za zagamema hu vahe'ene mono nonkafante'ma kvama hu vahera eme zamitere hu'naze. Ana hazage'za ana ne'zantamina Livae naga'moza refko hu'neza, Aroni naga'ma pristi eri'zama eneriza vahera zami'naze.

<sup>1</sup> Hanki ana zupa Mosese kasege avontafepinti ranke hu'za nehamparizage'za mik'a vahe'mo'za antahi'naze. Hagi ana avontafepina amanage huno krente'nege'za hampri'naze, Amoni vahe'mo'zane Moapu vahe'mo'za Anumzamofo vahe'ma atruma hanafina magore hu'za eofregahaze hu'ne. <sup>2</sup> Na'ankure zamagra Israeli nagara ne'zane tinena nozami'za, kazusi ke huzmantenogu Balamuna zago ami'naze. Hianagi tagri Anumzamo'a ana kazusi kea eri rukrahe huno asomu hurante'ne. <sup>3</sup> Hagi Israeli vahe'ma Mosese kasegema hamprizage'zama nentahi'za, feg'i'ati'ma zamagraneema emani'naza vahera agafa hu'za huzmante'naze. <sup>4</sup> Hagi pristi ne' Eliasibi'a Tobiana naga'agino, kora Anumzamofo mono nompima fenozama nentaza nonte kva hino hu'za huhamparinte'naza nere. <sup>5</sup> Ana hu'neankino Eliasibi'a Tobiana huntogeno, Anumzamofo mono nompima ra zantema hunaragintene'za, witi ofama hu zantamine, mnanentake insensine mono nompima eri'zama eneriza zantaminema nente'za, kasegemo'ma huno Livae naga'ma zamihoma hu'nea zantamina, hozafi zama 10ni'a kevuma eritruma hu'nafintima mago kevuma zamiza zantamine, kasefa wainine, masavenema eri'za azage'za nente'za Livae nagamokizmine, zagamema hu vahe'ene, mono no kafante'ma kvama nehaza vahe'ene, pristi naga'mokizmi musezama ko'ma eme anteterema nehaza nona amigeno mani'ne. <sup>6</sup> Hagi ana zama fore'ma hia knafina nagra Nehemaia'na Jerusalemi kumapina omani'noanki, Plesia kini ne' Artaserksisi'ma kinima manino egeno 32ma hiankafure Artaserksisina ome kenaku Babiloni vu'noe. Hagi mago knama evutege'na, Kini ne'mo'ma natre'nige'na ete Jerusalemima esugu antahige'noe. <sup>7</sup> Anama hute'na Jerusalemi oge'za nasamiza Eliasibi'a havi avu'avaza huno, Anumzamofo ra mono nompima hunaraginte'naza nona Tobia'na amigeno mani'ne hu'naze. <sup>8</sup> Hagi ana kema nentahugen'o'a, tusi narimpahege'na, Tobia fenozana ana nompintira maka eri fegi atre'noe. <sup>9</sup> Hagi anante vahe huzamantoge'za hunaraginte'naza nona Anumzamofo avure harafi hu'za eri agru hutazage'na, mono nompi zuomparamine ofama hu witine, mnanentake zantamina insensinena ete eri'na anampinka ome ante'noe.

<sup>10</sup> Hagi anahukna hu'na ke'na eri fore'ma huana, hozama vasagazafintira, Livae naga'mozama eri'ga ne'zana, eriza eme ozami'naze. E'na hu'negu ana maka Livae naga'ene zagame'ma hu vahe'mo'za mono nompi eri'zazamia atre'za mop'a zamirega ete vu'naze. <sup>11</sup> Hagi anante kva vahera amanage hu'na zamasami'noe. Na'ahigeta Ra Anumzamofo mono nona tamefira humi'naze. Anagema hute'na Livae vahetamine zavenama aheno zagamema hu vahera ke hutru hu'na, eri'za kankamu zamire zamazeri otitere hu'noe. <sup>12</sup> Anante ana maka Juda witi zamifinti'ene, waini zamifinti'ene, masave zamifinti'ma, hamprizageno vuno 10nima hia kevua eri'za mono nompima fenozama nentafi eme ante'naze. <sup>13</sup> Hagi anante pristi ne' Selemianki avontafete'ma ugagota'ma hu'nea ne' Zadokunki Livae nagapinti ne' Pedaiama hu'na huhampari zamantoge'za, ana fenozama ante nona kegava hu'naze. Hagi zamazama huno kegavama hania nera, Matania negeho ne' Zakuri nemofo Hanani huhampri ante'noe. Na'ankure zamagra knare'za hu'za eri'zana eri'naza vaheki'za, kegava hu'neza zamafuhe'ina fatgo hu'za refko huzamisaze hu'na antahinezami'na huhampari zamante'noe. <sup>14</sup> E'na hu'negu Anumzanimoka ama ana eri'zama eri'noa zankura kagesa antahinamio. Ana nehunka Anumzanimoka mono nonte'ene, mono nompima eri'zama erisaza zama nagu'areti'ma hu'na er-

inte fatgoma hu'noa navu'navazana Anumzanimoka kagerakani onanto. <sup>15</sup> Hanki e'ina knafima zamagoana Juda vahe'mo'za Sabati mani fruhu knarera, waini zafa raga regatati hu'za tima'a eri'naze. Ana nehu'za donki afu'mofa agumpina witi kutamine wainine, grepine, fiki zafa raganena erinente'za mago'a nezantaminena, mani fru kna Sabati zupa Jerusalemi vu'za zagore ome atre'naze. Ana hu'negu ana Sabati knarera ne'zana zagonera otreho hu'na asevazi zamante'noe. <sup>16</sup> Hanki Tairi vahe'ma Jerusalema nemaniza, nozameramine mago'a zantaminena, eri'za mani fruhu kna Sabati zupa Juda vahete zagore ome atre'naze. <sup>17</sup> Anama hazageno'a tusi narimpa hege'na, Juda vahe'mokizmi kva vhahera amanage hu'na zamasami'noe, ama havi tamavu tamava'ma hazazamo'a Sabati mani fruhu kna erihaviza nehaze hu'na hu'noe. <sup>18</sup> Tamagrira tafahe'za amanahu zamavu zamava hazazamo higeno, tagri Anumzamo'a tagrite'ene ama rankuma'enena knazana tami'ne. Hanki menima Sabati mani fruhu knama eri pehanama hazazamo higeno Israeli vahe'mota Anumzamo'a tusi'a rimpia ahenerante.

<sup>19</sup> Hanki kinaga nesegeno Sabatima eofre'negeno, Jerusalemi kuma kafantamina ana maka eriginenkeno Sabatia evute'na erinagiho hu'na huzamante'noe. Hanki ana nehu'na, mago'a zama eri'za Sabati zupama efre zankura kafante'ma kegavama nehaza eri'za vaheni'a mago'a huzamantoge'za kuma kafaramintera kva hu'naze. <sup>20</sup> Hagi zagore'ma nanazama eme netraza vahe'mo'za tareo mago kenage nazá Jerusalemi rankumamofo kafanterera megi'a emase'naze. <sup>21</sup> Hianagi ana vahe'ma nezamage'na amanage hu'na hankave kea hu'noe, na'ahigetma kuma keginamofo megi'a emase'naze. Hagi amanahu zama henka'anema hanazana, tamazeri'na kina huramantegahue. Hagi anankema hu'noret'i'ma agafama hiana ana vahe'mo'za mago'ene e'za Sabati zupa nanazana zagonera eme otre'naze. <sup>22</sup> Anante Sabati knagu'ma ruotage hu'ne hu'zama antahinagura, Livae nagara huzamante'na tamagra'a tamazeri agru huteta vuta kuma kegina kafanterera kva hihohu'na huzamante'noe.

Hagi Anumzanimoka ama ana avu'ava zama tro'ma hu'noa zankura kagesa antahinamio, ana nehunka vagaoe kavesi zanteti, zamavesi zamante vava hugahue hunkama hu'nana keka'a amage antenka kasunku hunanto.

### *Israeli vahe'ma megi'ati a'nene ma eri'naza zamofo naneke*

<sup>23</sup> Hagi ana knafima koana, mago'a Juda vene'ne naga'mo'za Astoti kumatetiki, Amoni kumatetiki, Moapu kumatetiki hu'za a'nea eri'naze. <sup>24</sup> Hagi mago'a mofavre nagazamimo'za, Astoti vahe zamagerura antahi'neza zamagerura ru'naze. Ana nehazage'za mago'amo'za ruga'a vahe zamageru ru'naze. Hianagi Juda vahe zamagerura oru'naze. <sup>25</sup> Hagi ana vhahera zamazeri koneri'na kazusi ke huzamante'noe. Mago'a nagara sefu nezami'na zamazokara eri varare'noe. Hagi Anumzamofo agifi huvempa kea amanage hihohu'na huzmante'noe. Tamagra ne' mofavretamirera megi'ati a'nenea zamavare ozamigahaze. Ana zanke huta mofa'netamia zamatresage'za megi'a vene'nea e'origahaze. <sup>26</sup> Hige'na amanage hu'na zamasami'noe, Solomoni'a Israeli kini ne' mani'neanagi agranena a'neneramima erino amanahu kumi'ma hu'neana ontahi'nazo? Ama mopafima me'nea kumatmimpina magore huno Solomonikna kini nera omani'ne. Agri Anumzamo'a avesinteno kinia azeri otigeno, ana maka Israeli mopa kegava hu'ne. Hianagi megi'ati'ma eri'nea a'nemo'za avre'za kumipina vu'naze. <sup>27</sup> Hagi ana havi tamavu tamava zama tagrama amage'ma anteta, megi'ati a'nene ma

erisunana, tagra Ra Anumzamofonkea rutagreta, tusi'a kumi hugahune. Hagi tamagrama antahi'zana tagrikura ana hanaze hutma nentahizafi? <sup>28</sup> Hagi pristi ne' Eliasibi nemofo Jehoiada ne'mofavre nagapinti mago'mo, Heroni kumateti ne' Sanbalati mofa ara erineanki'na, ana nera ahe'na rotago hugeno fre'ne. <sup>29</sup> Ana hu'negu Anumzanimoka pristi vahe'mo'zama hu'naza havi zamava zamava zankura kaganera okanino. Na'ankure zamagra pristi vahe'ene Livae naga'enema huhagerafi'nana kasegea runetagre'za zamagra'a zamazeri haviza hu'naze. <sup>30</sup> E'ina hu'negu meg'i'a zantamimo'ma zamazeri pehanama hu'neana zamazeri agru hu'noe. Ana hute'na Li-vae naga'ene pristi nagara eri'za zamire huhampari zamantetere hu'noe. <sup>31</sup> Nagra anazanke hu'na, mago mago zupama tevema hare'zama kresram-nama vu itare'ma esnaza vahe'ene, ese ne'zama hozafinti'ma hamare'za eri'za esaza vahe'ene, ese zafa rgama tagisaza zama Ra Mono nompima eriza esaza vahe'enena huhampari zamante'noe. Ana maka zama hu'noa zanku antahi nenaminka Anumzanimoka nazeri so'e hunanto.

## Esta Esta Avontafere

*Megi'a a'nanema eri'naza vene'nemokizmi zamagi krente'naza naneke*

<sup>1</sup> Hagi Serksisima (Ahasurusi'ma) kinima mani'neana India mopareti eri agafa huteno, vuno Itiopia (Cush) mopare ome atre'nea kumat-mima 127ni'a provinsirami kegavama hu'nea knafina, amanahu'za fore hu'ne. <sup>2</sup> Hagi ana knafina kini ne' Serksisi'a kini tra'are ran kumapi Susa mani'ne. <sup>3</sup> Hagi 3'a kafuma kinima nemanino'a, ranra kva va-hetamine eri'za vahe'aramimofona tusi ne'za krezmante'ne. Hagi Pe-siane Media sondia vhete kva vheta-mine, ranra eri'za vheta-mine, ga-vana vahe'mo'zanena anampinke mani'naze. <sup>4</sup> Na'ankure 6si'a ikamofo agu'afi agrama kegavama hu'nea mopafi zago-fenona eriama nehuno, hi-hamu konariria erinte ama huno zamaveri hu'ne. <sup>5</sup> Hagi ana knaramima evutegeno'a, kini ne'mo'a Susa rankumapima atru hu'nea vheta-mimofo ne'zana tusi ne'za kreno retro huzmante'ne. Na'ankure ana maka vahe'ma atruma hu'nazana, osi eri'za vheta-ti vuno ra eri'za vhete vu'ne. Hagi ana ne'zana kini ne'mo'a agra kumapima me'nea knagune hozafi retro hige'za 7ni'a knamofo agu'afi nene'za musena hu'naze. <sup>6</sup> Hagi ana knagune hozafima konaririma hunte'neana, efeke'ene fitunke tavraverami renteno evu'ne. Hagi ana tavraveramina efeke'ene fitunkenofitminu silvare rinifi alabasta have posirera ru marave'marave nehia haverami renteno evu'ne. Hagi mopafima ruzahu ruzahu havema rekamrente'za evu'naza agofetura golireti'ene silvareti'ma tro'ma hu'naza tratami ante'naze. <sup>7</sup> Hagi golireti'ma tro'ma hu'naza kapufi waini tina tagiza ru avamente avamente vahera nemizageno, kini ne'mo'a wainiramina rama'a ana vahera zami'ne. <sup>8</sup> Hagi za-magima hige'za e'naza vahe'mo'za zamagra zamavesite waini tina ne'naze. Na'ankure waini tima tagino veva'ma hu vheta-mina kini ne'mo'a zamasmimo, mago magomofoma avesi'nia avamente waini tina tagita zamiho huno huzmante'ne. <sup>9</sup> Hagi kini ne' Serksisima venenezagama zamazeri musema nehigeno'a, anahukna huno kini ne' kumapina kuini a' Vasti'a agranena zamazeri muse huno tusi'a ne'za a'neramimofona krezmante'ne.

<sup>10</sup> Hagi namba 7ni kna zupama waini timo'ma kini ne' Serksisi antahin-tahima azeri negima nenegeno'a, Mehumanima, Bazitama, Habonama, Bigtama, Abagtama, Zetarima, Kakasima huno zamagonknazama har'i'nea 7ni'a eri'za vahe'aramima ana ne'zama nenaku'ma etruma hu'naza vheta-mina huzmanteno, <sup>11</sup> kuini a' Vastina ome avre'za esageno kuini fetori anta-nineno kini ne'mofo avuga enogu huzmante'ne. Hagi kuin' Vasti'a hentofa agi agonane a mani'neankino, kini ne'mo'a eri'za vheta-mima'a zamaveri hunaku kuini a' Vastina kea hu'ne. <sup>12</sup> Hianagi ana nanekema kini ne'mofo eri'za vahe'mo'zama ome asamizankea kuini a' Vasti'a ontahi'ne. Hagi ana'ma higeno'a, kini ne'mofona tusi rimpa ahegeno arimpama ahezamo'a agu'afina tevere'ne. <sup>13</sup> Ana higeno kini ne'mo'a, kuini a' Vasti'ma hunt'nea zanku nentahino antahintahih eri'naku knare antahintahine vheta-mi zmantahige'ne. Na'ankure kini vahe' zamavu'zmavara knare antahintahine vahe'ma antahigeno antahintahima eri zamavu'zmava me'negu anara hu'ne. <sup>14</sup> Hagi knare antahi'zane vheta-mima kini ne'mofo tava'oma'are'ma

nemaniza vahetmina Kasenaki, Setaki, Adamataki, Tasisiki, Meresiki, Mase-naki, Memukani'e. Hagi ama ana 7ni'a vahetmina Pesiane Media kamanimofo ranra kva vahetminkino, maka zupa kini ne' eme ketere nehaza vahe mani'naze.<sup>15</sup> Hagi kini ne' Serksisi'a anage huno ana vahera zamasami'ne, eri'za vahe'niaramima huzmante'na Kuini a' Vastima kehinkeno enoma huge'za ome asamizageno'a, kuini a' Vasti'a ke'n'i'a ontahianki, na'a huntegahufi kasegefina keta nasamaho.<sup>16</sup> Higeno kini ne'mofo avugane ranra kva vahetmimofo zamavuga Memukani'a kenona huno, kuini a' Vasti'a kini ne'tekera ama ana avu'avara huonteanki, maka ranra kva vahetamine, maka vahetmima kini ne'mo'ma kegavama hu'nea mopafima mani'naza vahete'ene ama ana avu'avara huzmante.<sup>17</sup> Na'ankure ama ana kema vuno eno'ma hina maka a'nemo'zama antahinu'za, kuini a' Vasti'a kini ne' Serksisi'a ke hiana ke'a antahino ome'ne hu'za nehu'za, zmavenanehe'mofona zamage fenkami netre'za kezmia ontahigahaze.<sup>18</sup> Hagi menima Pesiane Media ranra kva vahetmimofo a'nemo'zama kuini a' Vastima kini ne'ma huntea avu'avazamofo agenkema antahisu'za, ana zanke hu'za kini ne'mofo ranra kva vahetmina zamage fenkami netre'za, kezmia ontahisage'za tusi zamarimpagu hugahaze.<sup>19</sup> E'ina hu'negu ama ana kere'ma kini ne'mokama muse hanunka mago kasege krenka, kuini a' Vasti'a nagri navuga omegahie, hunka negrenka mago knare aku kenka erigeno kuini Vasti nona erino kuinia manino.<sup>20</sup> Hagi e'inama hunka kasegema tro hanankeno ana nanekemo'ma maka kagrama kegavama hu'na'a mopa atupare'ma vuno eno'ma hinkeno, maka agima omne' a'nereti vuno agima me' nea a'neraminte'ma vaniana a'nemo'za, zmavenanehe'i kea nentahiza zamage sga hugahaze.

<sup>21</sup> Hagi kini ne'ene ranra eri'za vahetmimo'za Memukani'ma hia antahintahirera mago zamarimpa hu'za muse hu'naze. Ana hazageno Memukani'ma antahintahima amia kante anteno kini ne'mo'a ana zana hu'ne.<sup>22</sup> Hagi kini ne'mo'a avona kreno maka agrama kegavama hu'nea kumatmintega atregeno vuno eno hu'ne. Hagi mago mago kumategama avoma kre atre'neana zamagrama negraza avompinti kre atre'ne. Hagi ana avompina amanage huno krente'ne, mago mago naga'mofona vemo vugota kva manigahie huno kretre'ne.

## 2

### *Estana kuini azeri oti'naza naneke*

<sup>1</sup> Hagi ana zama huvgaregeno'a kini ne' Serksisina arimpa ahe'zamo'ma uramigeno'a, Vasti'ma hu'nea zanku agesa nentahino, Vasti'a kuinia omanigahie huno'ma huvempama hu'nea zanku agesa antahi'ne.<sup>2</sup> Hagi kini ne'mofo tava'oma'are'ma mani'ne'za knare antahintahima nemiza vene'nemo'za anage hu'naze, huge'za venema ovase'ne'nia hentofa agi agonane mofa'nerami hake'za avre'za echo hu'za hu'naze.<sup>3</sup> Hagi kini ne'moka mago mago kumatera ranra kva vahetami zamazeri otitere huge'za venema omasenenia knarenare mofaneramina zamavare'za rankumate Susa enkeno, kini ne'moka eri'za ne' Hegai kegava huzmante'neno zamavufagama eri so'ema hanaza zana nezaminige'za zamavufaga eri so'e nehu'za knare'nare mofa'nea zoregahaze.<sup>4</sup> Ana nehu'za mani'nagenkena anampinti'ma kini ne'moka kenankeno kavesi'nia mofa avrenankeno Vasti nona erino kuinia manigahie.<sup>5</sup> Hagi ananknafina mago Jiu nera Simei nemofo Kisi negeho Benzameni nagapinti ne' agi'a Modekaiakino Susa

rankumapina kini ne'mofa ra nompi nemania nere. <sup>6</sup> Hagi korapara Babiloni kini ne' Nebukatnesama Jerusalemi kumapinti'ma vahe'tmima kina ma huzmanteno zamavare'noma vu'nefi, Modekaiane Juda vahe kini ne' Jehoiakininenza zanavre'za vu'naze. <sup>7</sup> Hagi Modekaia'a mago mofara nesaro kegava hu'neankino, ana mofamofo agi'a Hadasha'e, mago agi'a Esta'e. Na'ankure Estana nerera nef'a ko fri'ne. Hagi ana mofara avufgamo'enae agi'agonamo'a hentofaza hu'ne. Hagi nerera afa'ma nefrigeno'a, Modekai'a avreno agra mofa'agna huno kegava hu'ne.

<sup>8</sup> Hagi kini ne' Serksisima kema atreno, knare'nare mofa'nema haketa zamavareta Susa rankumate ehoma higeno'a, rama'a mofa'nerami zamavare'za neazafi Estanena anampi avre'za Susa kumate Hegai azampi eme ante'naze. <sup>9</sup> Hagi Hegai'ma Esta'ma negeno'a, tusiza huno musena huntenu avesinte'ne. Ana'ma nehuno'a, ame huno Estana avufgama eri so'ema hu zantamine ne'zanena nemino, kini ne'mofa kumapinti 7ni'a eri'za mofanerami huzmanteg'e'za kini ne'mofona marerirfa nompi Estana avre'za ome kegava hunte'naze. <sup>10</sup> Hagi Esta'a kuma'ane vahe'amofo agia ahe forera osu'ne, na'ankure Modekaia'a anara osuo huno hunte'nego anara hu'ne. <sup>11</sup> Hagi Modekaia'a maka zupa Esta'ma mani'nea nomofo avuga vano nehuno, Estana na'anoma hentesnagura keno vano hutere hu'ne. <sup>12</sup> Hagi ana maka mofa'nema kini ne'mofa avugama vanagura 12fu'a ikampi zamavufaga kegava hu'za erifatgo hute'za vugahaze. Hagi 6'a ikampina mere nehaza masave freno nevnigeno 6si'a ikama vagamare'nigeno'a, mago 6si'a ikampina mnanentake zama eri haviamma hu'nea masave freno nevnigeno ana 6si'a ikamo'a ome vagaregahie. <sup>13</sup> Hagi kini ne'mofa avugama vunaku'ma hanigeno'a, kukeno avasesezano inankna zanku'ma avesi'nia zana anama mase'nenia nompintira amisageno eri'neno kini ne'mofa avuga vugahie. <sup>14</sup> Hagi kinagama sesigeno'a, kini ne'mofa nompi kini ne'ene umani'nenigeno komatanigeno'a, ete mago nompi vanigeno agonknaza hari'naza ne' Sasgasi'e nehia ne'mo kegava huzmantegahie. <sup>15</sup> Hagi Abihaili mofa Esta'a Modekaina nenogokino agrama kini ne'ma ome ke knama egeno'a, mago kukanaguro avasase zankura zamantahi onke'neanki kva'amo Hegai'ma huhamprinte'nea zantami eri hankre'ne. Hagi Esta'ma ke'naza vahe'amo'za muse hunente'za mago zamarimpa hunte'naze. <sup>16</sup> Hagi Serksisima 7ni'a kafuma kinima nemanige'za ana kafumofona, 10ni ikana Tebetie nehaza ikante Estana avre'za noma'are eme ami'naze. <sup>17</sup> Ana higeno kini ne'mo'a mago'a mofa'neramima avesizmante'neama'a agatereno Estana tusiza huno avesinte'ne. Hagi Esta'a vene omase mofa'nea mika zamagatereno kini ne'mofa avesira eri knare higeno, kini ne'mo'a tusi muse hunenteno kuini fetorira antaninteno, Vasti nontera Estana kuinia azeri ot'i'ne. <sup>18</sup> Ana huteno kini ne'mo'a Estana ne'za krenenteno azeri musena nehuno, ranra kva vahe'ane eri'za vahe'anena kehige'za ana ne'zantera e'naze. Ana nehuno kini ne'mo'ma kegavama hu'nea kumatamimpi vahekura ananknarera manigasa hoho nehuno maka vhahera musezana zami'ne. <sup>19</sup> Hagi vene omase mofa'nemo'za mago'enema emeri atruma nehzageno'a, Modekai'a kini ne'mofo kuma kafante mani'ne. <sup>20</sup> Hagi Modekai'a asami'nea kante anteno Esta'a agra igati mofa mani'ne mago vhahera erinte amara huno osami'ne. <sup>21</sup> Hagi Modekai'ma kini ne'mofo kuma kafante'ma nemania knafina, kini ne'mofo eri'za netrena Bithanake Teresikea tusi zanarimpa kini ne' Serksisina aheneunteke ahe frinaku oku'a nanekea retro hu'nae. <sup>22</sup> Hianagi Modekai'a

ana oku nanekezni'a antahiteno, vuno kuini a' Estana ome asamigeno Esta'a Modekai'ma hia nanekea erino kini nera ome asami'ne.<sup>23</sup> Hagi ana nanekema hake'za erifore'ma hazageno'ma tamagema me'nege'za nege'za, ana netrena zanazeri'za vahe'ma zamahé'zama nehanti'za zafare hantiza-geke fri'na'e. Hagi ama ana agenkea kini vahe'mofo agenkema krenentaza avontafepi krente'naze.

### 3

#### *Jiu vahe zmahenaku oku'a naneke retro hu'naza naneke*

<sup>1</sup> Hagi ana knama evutegeno'a, kini ne' Serksisi'a Agagi nagapinti ne' Hamedata nemofo Hemanina eri'zama'afintira azeri anaga atregeno maka agranema eri'zama e'neriza eri'za vahetmina zmagatereno rankva manino kegava huzmantene. <sup>2</sup> Hagi maka ranra kva vahe'ma kini ne'mofo kuma kafante'ma mani'naza vahe'mo'za zamare'na re'za ra agia Hemanina ami'naze. Na'ankure kini ne'mo'a, e'ina hiho huno huzmant'e'negu anara hu'naze. Hianagi Modekai'a ana nera antahiminora arena reno ra agia omi'ne. <sup>3</sup> Anante kini ne'mofo eri'za vahe'ma kini ne' kuma kafante'ma nemani'za vahe'mo'za Modekaina antahige'za, nahigenka kini ne'mo'ma hiankea rutagre'nane? <sup>4</sup> Hagi maka knane knanena Modekaina nanekea asami'nazanagi, kezmiia ontahige'za ana zanteria Hemani'a na'a huntegahifi ke'nune nehu'za Hemanina ome asmi'naze. Na'ankure Modekaia'a huno nagra Jiu vahe mani'noanki'na Hemanintera narena oregosue huno hu'ne. <sup>5</sup> Hagi Hemani'ma keama Modekaia'ma arenama reno ragima omigeno'a, tusi arimpa Modekaina ahente'ne. <sup>6</sup> Hianagi Modekai'ma agriake'ma ahe frizankura avresra Hemani'a hu'ne. Na'ankure Modekai'a Jiu ne' mani'noema huno'ma higenoma keno antahinoma nehuno'a, Jiu vahetmima Serksisima kegavama hu'nea maka mopafima mani'naza vhadera maka zamahe fanene hu vagarenaku agesa antahi'ne.

<sup>7</sup> Hagi kini ne' Serksisi'ma 12fu'a kafuma kinima nemanigeno'a, ese ikana Nisanie nehaza ikantera Hemanima Jiu vahe'ma zamaheniä kna erintenaku hige'za agri avuga satu zokago re'za ke'naze. Hagi satu zokagoma re'za kazana 12fu ikana Adarie nehaza ikamofonte efore hu'ne. <sup>8</sup> Hagi anante Hemani'a kini ne' Serksisinte vuno amanage huno ome asmi'ne, Kégavama hu'nana mopafina mago'a vhadera ruzahu vahetami mani'naze. Zamagri zamatu'zmavamo'a ama mopafi vahe'mokizmi zamavuzmava knara osu'ne. Hagi kasegezmimo'a ruzahu hu'neankino, kagri kasegea novaririze. E'ina hu'negu zamatesanke'za amafina omanifa hanaze. <sup>9</sup> Hagi kini ne'moka ama ana kere'ma musema hanunka, ana vahetmima zamahe friho hunka huvempa hunka avona krenanke'na kna'amo'a 375 tani hu'enaria silva zago, feno zanka'arema kegavama hu'naza vhadera zamisuge'za fenoma nentana nompina ome antegahaze. <sup>10</sup> Hagi ana kema kini ne'mo'ma nentahino'a, avonkreno hu izoma huno renekamrea rini azampinti zafino Agati nagapinte ne' Hamedata nemofo Jiu vahe ha' ne' Hemanina nemino,<sup>11</sup> amanage hu'ne, Zagoma naminaku'ma banana kagraka'a enerinka, na'anoma hukanu'ma banana zana amne ana vahetmina huzmanto. <sup>12</sup> E'inage higeno ese ikantera 13ni kna zupa Hemani'a kehige'za kini nete'ma avonkre eri'zama e'neri'za vahe'mo'za eme atru hu'naze. Hagi maka kema zamasamia kea mago mago kumate vahe'mofo agerupinti'ene avompinti avona krete'za kini nemofo rinireti avame'za ana avontera rekamrentete'za ranra kva vahetegane (Satraps), gavana vahetamintegane atrazageno mago mago

provinsifima mani'nazarega vuno eno hu'ne. <sup>13</sup> Hagi avoma atrazageno maka kumategama vuno eno'ma hu'nea avomo'a anage hu'ne, 12fu ikamofona 13ni knazupa magoke knafinke Jiu vhahera mofavrereti vuno tavava ozafare'ma uhanati'neana zamahe hana hinkeno, kini ne'mo'ma kegavama hu'nea mopafina miko omanitahina, maka zazmi eriho huno kretre'ne. <sup>14</sup> Hagi maka kumate vahe'mo'za ana avona eri'za kasege me'nenige'za amage antegahaze hu'za nehu'za, ana knama esigu tro hu'za manigahaze. <sup>15</sup> Hagi kini ne'mo'a hankave ke huzmanteg'e'za ana avontafera maka kumatega ame hu'za eri'za vu'za eza hu'naze. Hagi vihuma hugagi'naza rankumapima Susama neman'i'zaza vhahera ama ana nanekeaa eriama hazzage'za maka vahe'mo'za antahihaze. Hagi anama huteke kini ne'ene kea waini tina nenekeaa mani'nakeno'a Susa kumapi vhahera antahihahi za-mimo'a savri hige'za tusi koro nehu'za antahihahi hakare hu'naze.

## 4

### *Esta'ma azama hanigu Modekaia'a antahige'nea naneke*

<sup>1</sup> Hagi ana maka zama haza nenekeaa Modekai'ma nentahino'a, kukena'a tagato tagatu nehuno, tanefa kateno nefreno rankuma amu'nompi nevuno ranke huno tusi zavi krafa huno vu'ne. <sup>2</sup> Hianagi kini ne'mofo kuma agu'afina uofre'neanki, ana kuma kafante umani'ne. Na'ankure zamasunku kukenama hu'ne'naza vahe'mo'za kini ne'mofo kumapina uofregahaze. <sup>3</sup> Hagi kini ne'mo'ma hiankemo'ma maka kumate'ma vuno eno'ma hige'za Jiu vahe'mo'zama nentahihaze, ne'zana a'o hu'za neman'i'za tusi zavi krafa hu'naze. Rama'a vahe'mo'za zamasunku kukena antanite'za tanefa kate'za nefre'za mani'naze. <sup>4</sup> Hagi ana nenekeaa Esta eri'za mofa'nene, eri'za vene'ne'amo'zama eme nesmizageno'a, Esta'a tusi antahihahi huno ome ru emeru nehuno, kukena antentegeno vu'neanagi Modekai'a ana kukena ontani'ne. <sup>5</sup> Anante Esta'a, kini ne'mo'ma huntogeno'ma eme kegavama hunte'nea eri'za ne' Hatakina hunteno, Modekai'a zavi'ma netea zamofo agafa'a ome antahigenka ko hu'ne. <sup>6</sup> Higeno Hataki'a Modekaima rankuma amu'nompima kini ne'mofo kuma kafante'ma mani'nere vu'ne. <sup>7</sup> Anama huno vigeno'a Modekai'a maka zama agrite'ma fore'ma hu'nea zamofo nenekeaa nesmino, Jiu vahe'ma zamahesire'ma Hamani'ma mizama sesigeno kini ne'mofo feno nompima ome antesaza zagomofo kea asami'ne. <sup>8</sup> Ana nehuno Susa rankumapima mani'naza Jiu vahe'ma zamahe hana'ma hanaza avoma kre'naza avontafe'enena Hatakina nemino anage hu'ne, erinka ama avontafera vunka omeri ani hunka Estana asmigeno, Esta'a vahe'amota tagri tagira erino kini netera vuno tazama hanigura nenekeaa ome huranteno. <sup>9</sup> Hagi Hataki'a Estante vuno Modekai'ma hiankeaa ome asmi'ne. <sup>10</sup> Higeno Esta'a Hatakina asmino, Amanage hunka Modekaina ome asmio. <sup>11</sup> Kini ne'mofo eri'za vahe'mo'o, kini ne'mo'ma kegavama hu'nea kumateti vemo'o a'mo'ma, kini ne'mo'ma kema osunenifima kenaku'ma agri nompima esaza vahe'mofona magoke kasegege'za me'ne. E'i ana vhahera ahe frigahaze. Hagi anama umrenerinigeno kini ne'mo'ma gorire azota'ama rusute amisia vahe ahe ofrigahie. Hagi kini ne'mo'ma nagrikura eme nago huno osige'na hago 30'a kna mani'noe. <sup>12</sup> Hagi ana nenekeaa Modekaina ome asamizageno, <sup>13</sup> Modekai'a amanage huno kenonaa hu'ne. Kagra kini ne'mofo nompi mani'noankino mago zana navatera forera osugahie hunka kagesa on-tahio. Maka Jiu vahe'motane kagri'enena tahe frigahaze. <sup>14</sup> Hagi kagrama

kema osuma mani'nankeno'a, Jiu vahe'ma zamazama hu'zamo'a ruregati egahie. Hianagi kagri'ene nagakanena otrekano tamino tahe vagaregahaze. Hagi kagra amanahu knafima tazama hananku kuinia mani'nane. <sup>15</sup> Anagema nentahino'a, Esta'a amanage huno Modekaina kenona hunte'ne, <sup>16</sup> Vunka Susa rankumapima mani'naza Jiu vahetmina ome zamavare atru hunka kini ne'ma ome kesuazankura 3'a knafina ne'zane tinena a'o huta mani'neta kenage'ene feru'enena nunamuna hiho. Nagri'enema nemaniza mofa'neramine nagranena anazanke huta ne'zana a'o hu'neta nunamuna hugahune. Ana hute'na kasegemo'a i'o hu'neanagi, vanugeno'ma nahe frisiana ha nahe frisianki, kini netera vugahue. <sup>17</sup> Anage higeno Modekai'a vuno maka Estama huntea kante anteno ana ome hu'ne.

## 5

### *Esta'a kini ne' ne'za retro hu'nea naneke*

<sup>1</sup> Ana higeno namba 3 knarera Esta'a kuini kukena'a eri nentanino, kini ne'mofo kumapi ufreno kini ne'mofo noma me'nea avuga tava'onte uoti'ne. Hagi kini ne'mo'a kafantega avugosa hunteno kini tra'are mani'ne. <sup>2</sup> Hagi kini ne'mo'ma keama Esta'ma kafante'ma uotigeno negeno'a, muse hunenteno golire azotama azampima eri'neana rusute amigeno, Esta'a umrerino ana azota agonare avako hu'ne. <sup>3</sup> Higeno kini ne'mo'a antahigeno, Kuini a' Estaga na'anku kave'nesie? Na'anku nantahige'za nehane? Kegavama hu'noa mopama amu'nompinti'ma refko hunamio hunkama hananke'na amne anara hugahue.

<sup>4</sup> Hagi Esta'a kenona huno, Kini ne'moka musema hanunka, kagrane Hemani'enena kagri ne'zama retro'ma hunte'nore menina evi'o. <sup>5</sup> Hagi kini ne'mo'a huno, Ame huta Hemanina avreta enketa Esta'ma hirega va'mneno. Hige'za Hemanima avre'za azageno kini ne'ene Hemanikea Esta'ma retro'ma hu'nea ne'za ome nenaku vu'na'e. <sup>6</sup> Hagi ne'zama nete'za waini tima nenazageno'a, kini ne'mo'a Estankura huno, Nazankuroma nantahigesanke'na ana zana amne kamigahuanki nantahigo. Hagi kegavama hu'noa mopama amu'nompinti'ma refko hunamio hunkama hanankena, amne anara hugahue. <sup>7</sup> Higeno Esta'a kenona huno, Nagra ama zanku kantahigegahue, <sup>8</sup> kini ne'mokama kavesinantenka musema hunka kantahima ke'nuazama hunaku'ma hanunka, muse hugantaonki retro'ma hanua nezantera okina Hemanina avreta eke'na kini ne'mokama hana kerera kenona hugantaneno.

### *Hemani'a Modekai ahe frinaku hu'nea naneke*

<sup>9</sup> Hagi ana kna zupa Hamani'a tusi muse nehuno, agu'amo'a knare nehigeno vu'ne. Hianagi Modekaiama kini ne'mofo kuma kafante'ma mani'negeno ome negeno'a, tusi arimpa ahente'ne. Na'ankure Hamani'ma nevigeno'a, Modekai'a rankva vahe'ma ne-egeno'ma nehiaza huno antri huge otinora ra agi omi'ne. <sup>10</sup> Hianagi Hamani'a arimpa he'zana eria amara osu agu'afi netreno, noma'arega vuno arone'aramine nenaro Zeresinena ome kehutru huno, <sup>11</sup> fenoma ante'nea zanku'ene ne' mofavreramima ante'nea zanku'ene, kini ne'mo'ma ra agima amino eri'zampima avre onagamuma netreno, mago'a eri'za vahetmima zamagaterea zanku'ene ra agima eria zankura ome zamasami'ne. <sup>12</sup> Hagi Hemani'a huno, E'ikerompage mago'a eri'za vhahera nezmatreno kuini a' Esta'a nagri'ene kini ne'ene kehigeta kini ne'mofo ne'zama retro'ma hu'nea nezantera vu'no'e. Ana nehuno oki'nena nagrike'za kea hu'neanki'na kini ne'ene vuta ne'zana ome

negahu'e. <sup>13</sup> Hianagi Jiu ne'ma Modekai'ma kini ne'mofo kuma kafante'ma mani'negenama negogeno'a, ana knare'zama hunante'nea zantmimo'a amnezankna nehie. <sup>14</sup> Higeno Hemani rone'amo'zane nenaro Zeresi'ene amanage hu'za asmi'naze, Za'za'amo'a 22mita hu'nesia za'za zafa huge'za eri'za eme retru renesagenka, oki nanterana kini neku hugeno Modekaiana aheno hantino. Ana hanigenka muse nehunka, kini ne'enena vunka ne'zana ome negahane. Higeno Hemani'ma antahiana ana antahi'zamo'a knare higeno, za'za zafa retro hunte'ne.

## 6

### *Kini ne'mo Modekaiana ragi ami'nea naneke*

<sup>1</sup> Hagi ana kenagera kini ne'mo'a avura masegara osuno ko'ma fore'ma hu'nea zantmimofo agenkema krente'naza avontafe omerita navuga eme hamprinke'na antahi'neno huno hu'ne. <sup>2</sup> Anagema hige'za vu'za ana avontafera omeriza, zanagonknaza hari'nea netrema kini nemofo kuma kafante'ma eri'zama e'neria netrena, Biktana'ene Teresikema ko'ma kini ne' Serksisima ahenaku oku'a naneke retro nehakeno, Modekai'ma keteno, ana nanekema huama'ma hu'nea naneke hampri ami'naze. <sup>3</sup> Ana nanekema nentahino'a kini ne'mo'a amanage hu'ne, E'ina'ma hu'nerera Modekaina na'a hunte'none? Higeno ana avontafema hampri ami'za vahe'mo'za amanage hu'naze, Mago zana huonte'none. <sup>4</sup> Higeno kini ne'mo'a huno, Iza kumapina menina mani'ne? huno nehigeno'a, Hemani'a zafama tro'ma hunte'nere'ma Modekaima aheno hanti'nia naneke kini ne'ome asaminaku, kini ne' kumapina ana umarer'i'ne. <sup>5</sup> Higeno kini ne'mofo eri'za ne'mo'a kini nera asamino, Hemani'a kumapi eme ot'i'ne higeno, kini ne'mo'a huno, Kehugenno efreno huno hu'ne. <sup>6</sup> Higeno Hemani'a emarerigeno kini ne'mo'a amanage huno hu'ne, Nagra mago nera mani'neanki'na ragi ami'na husga huntegahue? Higeno Hemani'a agra'agura amanahu antahintahi antahi'ne, mago'vahe'ma kini ne'mo'ma ana'ma huntega vahera omani'neanki, nagrake'za mani'noe huno antahi'ne. <sup>7</sup> Ana antahintahi nentahino Hemani'a amanage huno hu'ne, Kini ne'mokama ragima aminka azeri sgama hana nera, <sup>8</sup> ke huge'za kini ne'moka kukena eri'za eme nemiza, kini ne'mokama vanoma nehana hosi afuma kagri kavasese zantetima asenire'ma avasesema hunte'naza hosi afu avre'za eme amiho. <sup>9</sup> Ana nehanigenka mago ugagota eri'za neka'agu hugeno, kini ne'moka za'za kenaka'a erino ana nera kukena hunenteno, hosi afuka'amofo agofetu avreno kumapina vano nehuno ana eri'za ne'mo'a ranke huno, ama nera kini ne'mo'a ragi amino knare avu'ava hunte huno hino! <sup>10</sup> Anage higeno, Knare ke hananki kema hanankante antenka ame hunka vunka ana kukena omenerinka hosi afura nevrenka enka kuma kafante'ma kvama huno nemania Jiu ne' Modekaina ana maka zana hunto. Hagi mago zane hunka kagera okanio! <sup>11</sup> Higeno Hamani'a kini kukena omerino Modekaiana eme hunenteno, kini ne'mofo hosi afu agumpi avrenteno kuma amu'hompina ana hosi afura avazu huno vano nehuno, ranke huno amanage hu'ne, ama nera kini ne'mo'a ragi amino knare hunte'ne huno vano hu'ne. <sup>12</sup> Ana'ma hutegen'o'a, Modekaia'a kini ne'mofo kuma kafante ete eman'i'ne. Hianagi Hamani'a asenire arefiterino rimpagna nehuno nom'a'rega vu'ne. <sup>13</sup> Hagi Hamani'a maka zama agrite'ma fore'ma hia zamofo nanekea rone'aramine nenaro Zeresinena ome zamasami'ne. Higeno nenaro'ene knare antahi'zama nemiza vahe'mo'za amanage hu'za asami'naze, azeri havizama nehana ne' Modekaia'a Jiu nekino agri'ma ahe kema retro'ma nehana zamo'a eri'zana

e'origosie. Hagi kagri kazeri haviza hugahie. <sup>14</sup> Ana nanekea zahufa nesmizageno, kini ne'mofo eri'za ne'ma agonknazamo hari'nea ne'mo'a ame huno vuno Hemanina ome avreno Esta'ma ne'zama retro'ma hu'nerega vu'ne.

## 7

*Hemanima ahe'za hanti'naza naneke*

<sup>1</sup> Ana higeno kini ne'ene Hemanikea kuini a' Esta'ma retro'ma hu'nea ne'za ome nenaku vu'na'e. <sup>2</sup> Hagi namba 2 zupama krentea ne'zane waini timema neneno'a, kini ne'mo'a ete mago'ane Estana amanage huno antahige'ne, Kuini a' Estaga nazanku kave'nesifi nasmio? Na'ankuro nantahima kesana zana amne kamigahue. Kegavama hu'noa mopagu'ma nantahigesanke'na amne amu'nompintira refko hugamigahue. <sup>3</sup> Higeno anante Kuini a' Esta'a kenona'a huno, kini ne'moka musema hunantenka kavesi nantenunka, kantahigoanki nagri'ene vahe'ni'anena tahe ofrio. <sup>4</sup> Na'ankure nagri'ene vahe'ni'anena ko tahe'za akafri kafro nehu'za tazeri havizama nehu'za tahe vagamaresageta frisuna vahe zamazampi zagore tatre'naze. Hagi kazokzo eri'za vahe'ma tavarenaku'ma hiresina, nagra amanahu kea hu'na kna onkamusine. Hianagi nagri'ene naga'ni'anena mika'a tahe vagareke hu'naze. <sup>5</sup> Higeno kini ne' Serksisi'a kuini a' Estankura amanage hu'ne, Iza e'inahu kea hu'ne? Iga ana nera mani'nea ne'mo e'inahu zana huke hu'ne? <sup>6</sup> Higeno Esta'a kenona'a huno, E'i ana kefo avu'ava'ma nehuno ha'ma renerantea nera Hemanikino ama mani'ne. Anage higeno Hemani'a kuini a'mofo avugane, kini ne'mofo avuga tusi agogogu nehuno ahirahiku hu'ne. <sup>7</sup> Anage higeno kini ne'mo'a, tusi arimpa ahogeno otino atiramino knagune hozafi vu'ne. E'inama higeno'a, Hemani'a mani'neno kuini a'mo'ma asunku'ma huntesigu amesumesu hu'ne. Na'ankure agrama antahiana, kini ne'mo'ma eme ahe frizanku anara hu'ne. <sup>8</sup> Hagi kini ne'mo'ma knagune hozafinti'ma eno'ma eme keana Hemani'a kuini a'mofo tava'onte agafi mase'za nehigeno eme ke'ne. Hagi anante kini ne'mo'a huno, Ama ne'mo'a navufi kuini a' anteno vase'za nehifi? Anagema nehigeno'a, kini ne'mo'ma vahe'ma ahe frinaku'ma nehigeno'ma nehiaza hu'za eri'za vahe'amo'za ame hu'za Hemani agenopa tavravenu refite'haze. <sup>9</sup> Ana higeno anante kini ne'mofo eri'za ne'ma agonknazama hari'naza ne'Habona'a amanage hu'ne, 22mita hu'nea za'za zafa kuma'afina retrurentre'neno, kini ne'mokama kahenaku'ma nehazageno hufore'ma huno kagu'ma vazi'nea ne' Modekaima aheno hanti'niazza retro hunte'ne, huno higeno kini ne'mo'a huno, Hemanina azerita ana zafare ome aheta hantiho. <sup>10</sup> Hige'za Modekaima aheno hantinaku'ma Hemani'ma retro'ma hunte'nea zafare ahe'za hanti'haze. Ana hazageno kini ne'mofo arimpa ahe'zamo'a evurami'ne.

## 8

*Kini ne'mo'ma Modekaima ra agi nemino eri'zama'ama erintesgama hu'nea naneke*

<sup>1</sup> Hagi ana knazupage kini ne' Serksisi'a Jiu vahe'ma ha'ma rezmantea ne'mofo mopa'ama, noma'ama maka zama'anena kuini a' Esta eri nemino, Modekaina avate eri'za vahe avre'ne. Na'ankure kuini a' Esta'a kini nera asamino Modekaia nensaro mani'ne huno hu'ne. <sup>2</sup> Ana ne-huno kini ne'mo'a amiteno ete eri'nea rinia Modekai ami'ne. Higeno Esta'a Modekaina nonku'ma kva vahe azeri ot'i'ne. <sup>3</sup> Ana huteno Esta'a

mago'ane kini nete vuno, zavi ome neteno agafi umaseno kini nera agesu huno, Agagi ne' Heman'i'ma Jiu vahe'ma zamahe hana'ma hukanu'ma retro'ma hu'nea nanekeea eri atro huno hu'ne. <sup>4</sup> Hagi anante kini ne'mo'a golire azota arusute amigeno Esta'a kini ne'mofo avuga oti'no, <sup>5</sup> amanage huno hu'ne, Kini ne'mokama musema nehunka, kavesi nantenka, kagesama antahisankeno kagri kavure'ma fatgoma hanigenka, Agati ne' Heman'i'ma huno, Jiu vahe'ma maka kumapinti'ma zamahe hanama huke hu'nea naneke eri atregeno kagrama kegava hu'nana mopafina ana zana forera osino. <sup>6</sup> Na'ankure nagrama nege'nugeno'ma vahenimo'ma e'inahu hazenkema erisage'na inankna hu'na frua hu'na manigahue. Hagi naga'ni'ama zamahesage'na haviza hugahue. <sup>7</sup> Higeno kuini a' Estane Jiu ne' Modekainena amanage huno kini ne' Serksisi'a znamsmi'ne, Heman'i nonkumara ko Esta amugen, Hemanina zafare ahe'za hanti'naze. Na'ankure agra Jiu vahetmina zamahe fanane huke hu'negu anara hu'noe.

### *Kini ne'mo Jiu vaheku huno ha'ma huramantesia vahera zamaheho hu'nea naneke*

<sup>8</sup> Hagi menina ama'na avona kini ne'mo'na nagire kreta avame'zana rinini'a rekamareta Jiu vahetega atrenkeno maka kaziga vuno eno hino. Na'ankure ko'ma kini ne'mo'na nagire'ma avoma kreno, nagri avame'zama rinima rekamrente avontafera eri otregahaze. <sup>9</sup> Higeno 3 ikanku'ma Sivanie nehaza ikamofo 23 zupa kini ne'mofo avoma kre eri'za neku higeno, Modekaima hia kante anteno, Jiu vahetegama, ugota kva vahetegama, ranra kva vahetegama gavana vahetegama, mareri eri'za vaheteganena kreno atregeno maka 127ni'a provinsia Indiatu vuno (Kus) Itiopia ome atre'nea kumatamintega vuno eno hu'ne. Hagi mago mago provinsifi vahetmintega zamagr'i'a zamagerupinti kretere nehuno, Jiu vahetega zamagr'i zamagerupinti kretre'ne. <sup>10</sup> Hagi ana avona kini ne' Serksisi agifi kreno, avame'zana agri rinireti rekamarente'ne. Ana huteno ana avontafe tamina avoma erino vuno eno'ma hu vahetami huzmanteg'e'za kini ne'mofo erizante'ma agamaren vuno eno'ma nehia hosi afutamimpi ana avona ame hu'za eri'za vu'za eza hu'naze. <sup>11</sup> Hagi ana avontafepina kini ne'mo'a Jiu vahera hu izo huzmanteno, magokepi ome atru hutma manitere hu'neta ha'ma vahe'mo'zama huramantesageta tamagra amne hara huzmanteta fenontamine a'netamine mofavre'taminena tamagura nevazita, ha' vahetamimofo fenozana erigahaze huno krentene. <sup>12</sup> Hagi ana'ma hanaza zamofo knama kini ne' Serksisima erinte'neana Adarie nehaza ikana 12fu ikankino, 13 knazupa ana zama hanazankna erinte'ne. <sup>13</sup> Hagi ana nanekema kre'neana maka provinsifina kasegegna hu'za huama hanageno, ana knama esige'za Jiu vahe'mo'za trotra hu'za mani'ne'za ha' vahe'zamimo'za ha'ma eme huzmantesnage'za, nona hu'za hara huzmantegahaze. <sup>14</sup> Hagi kini ne'mo'a avoma erino vuno eno'ma hu vahetami huzmanteg'e'za kini ne'mofo erizante'ma agamaren vuno eno'ma nehia hosi afutamimpi, ana avona ame huza eri'za vu'za e'za hu'naze. Hagi anahu nankege Susa rankumapinena huama hu'naze. <sup>15</sup> Hagi Modekai'a kini vahe'mo'zama nentaniza za'za kukena hokonke'ene efekе kukena nentanino, golire fetori asenirera nentanino, fitunke nakre ku'a amega antanino kini ne'mofo avugatira atreno vige'za Susa rankumapina ana avoma kre'nea zanteru musenkasena hu'naze. <sup>16</sup> Hagi Jiu vahe'mokizmia, zamagu'afina muse zamo'a avitegeno, maka kaziga ra zamigi zami'naze. <sup>17</sup> Hagi

maka kazigane maka rankumapinena Jiu vahe'mo'za kini ne'mo'ma hi-ankema nentahi'za mago mani fruhu kna erinte'za ne'za kre'za nene'za, tusi musenkase nehzageno rama'a vahe'mo'za Jiu vahekese'naze. Na'ankure zamagra Jiu vahekura tusi koro hu'naze.

## 9

### *Jiu vahe'mo'za ha' vahezmi zamahe fri'naza naneke*

<sup>1</sup> Hagi 12fu ikana Adarie nehaza ikamofo 13ni kna zupa kini ne'mo'ma huno Jiu vhahera zamahe vagaregahaze hu'neana, ete rukrahe hu'za Jiu vahe'mo'za ha' vahe'zmia zamahe'naze. <sup>2</sup> Hagi Jiu vahe'mo'za maka kumat-mimpina ha'ma huzmante'nia vahe'ma nona hu'za ha'ma huzmante'nagu eritru hu'za mani'naze. Hianagi mago'mo'e huno hara huozmante'naze. Na'ankure maka vahe'mo'za Jiu vahekura tusi koro hu'naze. <sup>3</sup> Higeno mago mago provinsifima zamagima me'nea vahe'mo'zane, ranra kva vahe'mo'zane, gavana vahe'mo'zane, kini ne'mofo agi'ma eri'za ru kumate'ma nemaniza kva vahe'mo'zanena Jiu vahetega ante'naze. Na'ankure zamagra tusiza hu'za Modekainkura korora hu'naze. <sup>4</sup> Na'ankure Mod-ekaina kini ne'mo'a ragi amino avregeno kini ne'mofo kumapi umanigeno, agi agenkemo'a maka kaziga haruharu higeno, maka kna tusi himamu'ane ne' efore hu'ne. <sup>5</sup> Hagi Jiu vahe'mo'za ha'marezmantea vhahera bainati kazinteti maka zamahe hana nehu'za, ha'marezmantea vhahera na'anoma huzmante'naku'ma haza zana amne huzmante'naze. <sup>6</sup> Hagi hanave vi-huma hugagi'naza Susa rankumapina 500'a vahe Jiu vahe'mo'za zamahe fri'naze. <sup>7</sup> Ana nehu'za Parsandatama, Dalfonima, Aspatama, <sup>8</sup> Poratama, Adaliamma, Aridatama, <sup>9</sup> Parmastama, Arisaima, Aridaima, Vaizatama hu'za, <sup>10</sup> Jiu vahe'ma ha'marenentea ne' Hamedata nemofo Hemanina 10ni'a ne' mofavreramina zamahe fri hana hu'naze. Hianagi Jiu vahe'mo'za anama zamahezana vahe'mofo fenona e'ori'naze. <sup>11</sup> Hagi ana kna zupama hankave vihuma hugagi'naza Susa rankumapima vahe'ma zamahezana agenkeia kini ne'ma ome asamizageno'a, <sup>12</sup> kini ne'mo'a anage huno kuini a' Estana asami'ne, Hanave vihuma hugagi'naza Susa rankumapina 500'a vahe'ene 10ni'a Hemanai ne'mofavreraminena Jiu vahe'mo'za zamahezana. Hagi e'ina'ma ama kumapima hazana mago'a kumapina hago rama'a vahe zamahe fri'negahaze. Hianagi menina na'anku mago'enena kavenesifi nantahigege'na kami'neno? Nazankuroma nantahima kesana zana amne kamigahuanki nasamio. <sup>13</sup> Higeno Esta'a kenona huno, Kini ne'mokama antahi'nanama knare'ma hina musema hanunka, menima hankezama hazaza hunka, okina Susa kumate'ma mani'naza Jiu vahetmina huizo huzmantege'za vhahera nezamahe'za, Hemanina 10ni'a ne'mofavreramina zafare zamavufaga'a eri'za hantiho. <sup>14</sup> Anage higeno kini ne'mo'a ana hihonu, kasege retro hige'za Hemanina 10ni'a ne'mofavreramina zafare zamavufaga'a eri'za hanti'naze. <sup>15</sup> Ana nehu'za Adarie nehaza ikamofona 14ni zupa Jiu vahe'mo'za mago'ene 300'a vahe Susa rankumapina zamahe'nazanagi, kote'ma zamahe'naza vahetmimofo fenoma e'ori'nazaza hu'za e'ori'naze. <sup>16</sup> Hagi ana'ma nehzageno'a kini ne'mo'ma ruga'ama kegavama hu'nea provinsifima nemani'za Jiu vahe'mo'za emeri atru hu'za zamagranena hahu'za zamagra'a zamagu'vazi'naze. E'inama hazafina ha'marezmantea vahetmina 75tauseni'a vahe zamahe fri'naze. Hianagi zamagranena anama zamahe friza vahe'mokizmi fenozana e'ori'naze. <sup>17</sup> Hagi

Adarie nehaza ikamofona 13ni zupa, e'i ana zana hu'za vahera zama-hete'za, 14ni knazupa manigsa hu'za mani'ne'za tusi ne'za kre'za nene'za musenkasea hu'naze. <sup>18</sup> Hianagi Susama nemaniza Jiu vahe'mo'za 13nine 14ni kna zupaga ha' vahezminena hara hute'za, 15ni kna zupa tusi ne'za kre'za nene'za musena hu'naze. <sup>19</sup> E'ina agafare osi kumatmimpima nemaniza Jiu vahe'mo'za Adariema nehaza ikamofona 14ni knazupa manigasa hu'za ne'zana kre'za nene'za musenkasea hu'za musezana omi ami nehaze.

### *Purimie nehaza hompa gnama eri agafa hu'naza naneke*

<sup>20</sup> Higeno Modekai'a ama ana zamofo agenkea avontafepi kreno kini ne' Serksisi'ma mika kegavama hu'nea provinsifima nemaniza Jiu vahet-mintega atregeno vuno eno hu'ne. <sup>21</sup> Hagi ana avona kreno Adari ikamofona 14nine 15ni kna zupaga maka kafufina ne'zama kreta neneta musenkasema hu kna erinteho. <sup>22</sup> Hagi e'i ana knarerera ne'za kreta neneta musenkase nehuta, musezana omi ami nehuta, zamunte omne vahetaminena ana huz-manteho. E'ina huta knazampinti'ene ha' vahetimofo zamazampinti'ene tasunku zampinti'ma atreta atiramita e'nona zankura antahimigahune. <sup>23</sup> Ana hige'za Jiu vahe'mo'za hu'za, Amama eri agafama hu'nazana hu vava huta vugahune nehu'za, Modekaia'ma hiankegura mago zamarimpa hu'naze <sup>24</sup> Na'ankure korapara Agati ne' Hamedata nemofo Hemani'a Jiu vahe zamahe hana hunaku antahintahia retro hu'neane. Ana antahintahima retro'ma nehu'nou'a, purie nehaza satu zokago reno ke'negu anara hu'naze. <sup>25</sup> Hianagi kini ne'mofo avugama Esta'ma ne-egeno'a, Jiu vahet-mima zamahenaku'ma Hemanima kefo antahi'zama retro'ma hu'neana, eri arukrahe hu'za agri ahe fri'naze. Ana nehu'za 10ni'a ne'mofavre'a zamahe'za zafare hanti'naze. <sup>26</sup> E'ina agafare ne'zama kre'za nene'za musema nehaza knagura Purimie hu'za satu zokago agire asamre'naze. <sup>27</sup> E'ina avu'ava zana Jiu vahe'mo'za kasege eri retro hazageno zama-gripinti'ma fore'ma hanaza vahete'ene ru vahe'mo'zama Jiu vahe'enema mani'naku'ma hanaza vahete'enena kasegegna huno me'nena avaririgahaze. Hagi Jiu vahe'mo'za huama hu'za, maka kafua mani okanegosunanki ama ana tare knarerera ne'zana kreta neneta musena hugahune hu'za hu'naze. <sup>28</sup> E'ina hu'negu mago mago nagapinti'ma forehu anante anante'ma hu'za vanaza vahe'mo'za maka kumatmimpina ama ana tare knarareke ne'zana kre'za nene'za musenkase hutere hu'za vugahaze. Hagi maka kafufina ama ana Purimi knama fore'ma hanige'za, mika Jiu vahe'mo'za zamageraokani manigasa antahitere hugahaze.

<sup>29</sup> Ana higeno Abihaili mofa kuini a' Esta'ene Modekaike henka mago avona kreke Purimi knama kegava hu nanekea eri hankaveti'na'e. <sup>30</sup> Ana huteke ha'zama omnesige'za zamarimpa fruma hu'zama mani'naza nanekema kre'na'a avontafera 127ni'a provinsima kini ne' Serksisi'ma kegavama hu'nea kumatmimpima Jiu vahe'ma nemanizarega atrakeno vuno eno hu'ne. <sup>31</sup> Hagi Jiu ne' Modekai'ene kuini a' Esta'enema hu'na'a kante ante'za ana avoma kre atrakeno vuno eno'ma hia avomo'a Purimi knama ne-esige'zama kegavama hana zamofo ke eri hankaveti'ne. Hige'za Jiu vahe'mo'za ne'zama a'oma hu'za zavi krafama hu'naza zanku nentahi'za zamagrugu'ene zamagripinti'ma fore'ma hanaza vahe'enenu hu'za ana knamo'a meno vugahie hu'za eri hankaveti'naze. <sup>32</sup> Hagi Purimi knama kegava hu kasegema kuini a' Esta'ma eri hanavetigeno kasegema fore'ma hu'nea agenkea ranra zantamima fore'ma nehige'za krenentaza avontafepi krentazageno me'ne.

**10***Modekai'ma ra agima ami'naza zamofo naneke*

<sup>1</sup> Higeno kini ne' Serksisi'a agrama kegavama hu'nea mopafine, hageri ankenaregama meno vu'nea mopafima nemaniza vahetminku'enena hige'za, takisi zagoa eri'za e'naze. <sup>2</sup> Hagi kini ne'mo'ma ranana zantmima erifore nehuno, mago'a zama hu'nea zantmimofo agenkene Modekaia'ma marerirfa vahe'ma efore'ma hu'nea zamofo agenkea Mediane Pesia kini vahetmimofo agenkema krenentaza avontafepi krente'naze. <sup>3</sup> Hagi Jiu ne' Modekaia'a kini ne'mofa amagenare eme hu'ne. Hagi Jiu vahe zamavurera mareri vahe manige'za ra agi ami'naze. Na'ankure agra maka eri'zama eri'neana, agra'a vahe Jiu vaheku'ene henkama fore'ma hunante anante'ma hanaza vahe'mokizmi knare nomanizanku agesa nentahino, kini netera keaga hu'ne.

## Jop Jopu avontafere

### *Jopu avu'ava zamofone fenoma ante'nea zamofo naneke*

<sup>1</sup> Korapara mago nera Jopu'e nehaza nekino Usi mopafi mani'ne. Agra hazenke'a omne ne' maka zampina mani fatgo huno nemanino, Anumzamofonku korora nehuno kefo avu'ava'zana amefi hunemia ne' mani'ne. <sup>2</sup> Jopu'a 7ni'a ne' mofavreraminki 3'a mofa'neraminki huno zamante'ne. <sup>3</sup> Hagi fenoma ante'neana 7tauseni'a sipisipi afutaminki, 3tauseni'a kemoli afutaminki, hozama eri bulimakao afutamina 500'agi, 500'a a' donki afutaminki huno nenteno, rama'a eri'za vahetamima'a mani'neankino, maka vahem'a zage hanati kazigama mani'naza vahera Jopu'a zamagatereno tusi'a feno ne' mani'ne. <sup>4</sup> Hagi Jopu ne' mofavreramimo'za zamasarahehe'ina kehazage'za e'za, magomofo nompi atru hu'za tusi'a ne'zana kre'za nene'za musenkasea hutere hu'naze. <sup>5</sup> Hagi ana'ma hu'za ne'zama kre'za nene'za musenkasea huvagama retazageno'a, mofavre'amo'za ne'zama kre'za nene'za musenkasea hazafina kumima nehu'za Anumzamofoma huhaviza hunte'nesagura, nanterana Jopu'a ana maka mofavreramima'a kehutru huno zmente zmente sipisipi afura aheno tevefi kre fananehu ofa huno zamazeri agru Anumzamofa avurera hutere hu'ne.

### *Jopu'ma knazampima ufre'nea naneke*

<sup>6</sup> Hagi mago zupa Anumzamofo ankeru vahe'mo'za Ra Anumzamofo avuga atru hunaku neazageno, Sata'a anampina egeno, <sup>7</sup> Ra Anumzamo'a antahigeno, Kagra igati ane? Higeno Sata'a amanage huno kenona hu'ne, Nagra mopafi vano vano nehuregati oe. <sup>8</sup> Anage higeno Ra Anumzamofa amanage huno antahige'ne, Eri'za vahe'ni'a Jopu'a maka zampina mani fatgo huno nemanino, Anumzamo'nagu korera nehuno, kefo avu'ava zana amefi hunemia ne' mani'neanki kagra ke'nano? <sup>9</sup> Huno antahigegeno Sata'a amanage huno Ra Anumzamofona kenona hunte'ne, Kagra tamage hananagi, Jopu'a agafa'a me'nere agra Anumzamokagura korora hungeante. <sup>10</sup> Kagra vihugna hu'enka mika kaziga agri'ene a' mofavre'ane mika'zama'anena kegava hunte'nane. Hagi agrama mani'nea mopafina mika zama hiazana asomu hunentankeno afufeno zama'amo'a ome ra huno mika zampina avite'ne. <sup>11</sup> Hianagi kzama rusutenka mika zama'ama ahe fananema hanankeno'a, kavu negesankeno huhaviza hugantegahie. <sup>12</sup> Higeno Ra Anumzamo'a huno, Nagra hu izo hugantoanki, vunka Jopu'ma ante'nea zantmintera amne avako hunka eri haviza hugahane. Hianagi Jopu avufgarera avakora osutfa huo. Anage higeno Ra Anumzamofa avugatira Sata'a atreno vu'ne.

### *Sata'ma reheno Jopuma ke'nea zamofo naneke*

<sup>13</sup> Hagi mago zupa Jopu ne'mofamo'za nempu'zimimofo nompi ne'zana kre'za nene'za waini tina nene'za musenkase nehu'za mani'nazageno, <sup>14</sup> eri'za ne'mo'a Jopunte eno amanage eme hu'ne, Hozama eri bulimakao afutmimo'za hoza enerizageno, donki afutamimo'za trazana ana hoza tavaonte nene'za mani'nazageno, <sup>15</sup> Sabea kumateti vahe'mo'za e'za ha' eme hurante'za, ana maka eri'za vahetmina bainati kazinteti zamahe hana nehu'za, bulimakao afutamine donki afutaminena maka zamavare hana

hu'za vazage'na, nagrake'za mani'nena ana naneke kasminaku fre'na oe. <sup>16</sup> Anage huno ana nanekema asmi vagaore'negeno ete mago eri'za ne'mo'a, agareno eno amanage eme hu'ne, Anumzamofo tevemo monafinti eramino mika sipisipi afutaminka'ane mika sipisipi afu kva vahetaminena teno eri hana hige'na anampintira nagrake mani'nena ana naneke kasminaku fre'na oe. <sup>17</sup> Anage huno ana nanekea asmi vagaore'negeno, ete nampa 3 eri'za ne'mo'a agareno eno amanage eme hu'ne, 3'a kevu hu'za e'naza Kaldia vahe'mo'za eri'za vaheka'a mika bainati kazinteti eme zamahe hana nehu'za, mika kemori afuka'aramina musufase'za vazage'na, anampintira nagrake frena ana naneke kasminaku oe. <sup>18</sup> Anage huno ana nanekea asmi vagaore'negeno, ete mago eri'za ne'mo'a agareno eno amanage eme hu'ne, Ne'mofaka'amo'za nempu'zmimofo nompi ne'zana kre'za neneza waini tina nene'za musenkase nehu'za mani'nazageno, <sup>19</sup> ame huno ka'ma kokampinti tusi'a zaho erino eno, anama mani'naza nomofona mika kaziga asoparega eme amino ahe pasru hutregeno, ana nomo'a pasru huno ana maka ne'mofaka'a zamahe fri vagarege'na, ana knazampintira nagrake atiramina fre'na kasaminaku oe.

<sup>20</sup> Higeno Jopu'ma ana nanekema nentahino'a, tusi asunku nehuno otino zaza kukena'a tagato nehuno, aseni azokara hareno eri rampage nehuno, mopafi maseno Anumzamofona mono hunenteno, <sup>21</sup> amanage hu'ne, Nenarera arimpafintira kukena osu navufa navapake e'noanki'na, fri'na vanuana navufa navapa vugahue. Agra Ra Anumzamo namiteno, ete Agra'a e'nerie. E'ina hu'neanki'na, Ra Anumzamofo ra agi amue. <sup>22</sup> Hagi ama ana mika knazampima Jopu'ma unefreno'a, Ra Anumzamofona kna amino huhaviza hunteno kumira osu'ne.

## 2

### *Jopu avufare'ma krima fore hu'nea naneke*

<sup>1</sup> Hagi mago zupa Anumzamofo ankeromo'za ete Ra Anumzamofo avugama eme atru hunaku'ma neazageno'a, Sata'a anampi e'ne. <sup>2</sup> Ra Anumzamo'a amanage huno antahige'ne, Kagra igati ane? Higeno Sata'a amanage huno kenona hu'ne, Nagra mopafi vano vano nehureti oe. <sup>3</sup> Ra Anumzamo'a ete mago'ane Satana antahigeno, Eri'za vaheni'a Jopuna kennampi onke'nane? Mopafina agrikna vahera omani'neankino maka zampina mani fatgo huno nemanino, hazenke'a omanegeno Anumzamo'nagu korera nehuno, kefo avu'ava zana nosia ne' mani'ne. Agra mago hazenkea osu'nea zante, rehe'na kesue hanke'na hugantogenka maka zama'a omeri haviza hu'nananagi, agra ko'ma mani'nea kante mani fatgo huno mani'ne. <sup>4</sup> Hianagi Sata'a ana kemofo nona'a amanage huno Ra Anumzamofonkura hu'ne, Avufgare'ma hazenkema fore'ma hinkeno'a, mika zama'a atreno agra'a avufga agura vazigahie. <sup>5</sup> Hianagi Jopu avufgare'ma krima neminka zaferina'ama eri havizama hanankeno'a negesnankeno huhaviza hugantegahie. <sup>6</sup> Anage higeno Ra Anumzamo'a huno, Knareki amne kavesinia zana Jopu avufgarera hugahananagi, asimu'a e'orio. <sup>7</sup> Higeno Sata'a Ra Anumzamofo avugatira atreno vuno Jopuna mika avufafina usage namu omeri fore humigeno, aga agusaret'i'ma vuno asenire'ma uhanati'neana usage namumo'a avite'ne. <sup>8</sup> Ana higeno Jopu'a tanefapi mani'neno, tako hu'nea mopa kavo atupa'a erino namuma'afina zuke nehateno mani'ne. <sup>9</sup> Ana'ma nehigeno'a nenaro'a huno, Amanahu zama nehigenka kagra naga-fare fatgo kavukvara hunka neane? Ama atrenka Anumzamofona huhaviza

huntegeno kahe frina frio. <sup>10</sup> Hianagi Jopu'a kenona huno, Kagra negi nagi a'nemo'ma nehiankna ke nehan! Anumzamo'ma knare'zantamima tamisnigeta e'nerisuta'a, na'a hanigeta havi zanena e'origahu'e. Anage nehuno ana maka zama avufgare'ma fore'ma hia kna'afina, Jopu'a mago kumira keaga'afina osu'n'e.

### *Jopu rone'amo'za eme ke'naza naneke*

<sup>11</sup> Hagi Jopu avufgare'ma hazenkema fore'ma hiankema nentahi'za 3'a arone'amo'za kea hu'za antahi'za hute'za, nozmia atre'za zamasunku'ma hunente'za azeri hanaveti kema asaminagura e'naze. Ana vahe'mokizmi zamagi'a, Temani vahepinti ne' Elifasi'ma, Suhi vahepinti ne' Biltati'ma, Na'ama vahepinti ne' Zofari'e. <sup>12</sup> Hagi afeteti'ma Jopuma eme nege'za ru vahe mani'n'e hu'za kesavri hu'naze. Ana nehu'za erava'oma hu'za nege'za tusi krafa hu'za zavira nete'za tanefara hatregonefi'za tusi zamasunku hunte'naze. <sup>13</sup> Ana hute'za 7ni'a knafi Jopuna enena mopafina mani'naze. Hagi ana knafina mago'mo'e huno Jopuna kea huomi'n'e. Na'ankure Jopu'a tusi'a atazampi mani'neankino kea humigara osu'nege'za anara hu'naze.

## 3

### *Jopu'ma knazampima manino kragima ru'nea naneke*

<sup>1</sup> Ana'ma hutegeno'a Jopu'a agira reaka huno nerera'ma kasente'nea knamofona hu haviza huntenu, <sup>2</sup> amanage huno hu'n'e, <sup>3</sup> nenarera'ma kasenante'nea knamo'a omanegeno, ese'ma nenarera arimpafima fore'ma nehugenno ne' fore hugahie hu'nea kenagemo'a omaneasina knare hisine. <sup>4</sup> Hagi atregeno e'i ana knamo'a hani fore nehigeno, zagem'o'a remsa hunon-tegeno Anumzamo'enema ana knama kegavama osiresina knare hisine. <sup>5</sup> Hagi e'i ana knama kumazu hanimo'ma kintrako nehigeno, hampoma kino refitentegeno hanintirima huno ana knama azeri koroma hiasina knare hisine. <sup>6</sup> Hagi e'i ana kenage'ma fore'ma hu'noa kenage'ma fore osigeno, mago kafumofo knaramima nehamprizafina ohampripe, ikamofo knama hamprizafina ohampizaresina knare hisine. <sup>7</sup> Hagi e'i ana kenagera kasefa mofavrea forera osigeno, vahe'mo'za musena osazasina knare hisine. <sup>8</sup> Hagi kazusima huzante'ma ugotama hu'naza vahe'mo'zama kazusima hazageno, hagerimpima tusizaga krokotairima azeri oneti'za ana knama kazusima huntazaresina knare hisine. <sup>9</sup> Hagi ko'matu hanafimo'a remsa huontegeno, masagura amuhara hugahianagi, amnezampi amuhara nehuno nanterama segeno'ma ko'manetia zana onkeresina knare hisine. <sup>10</sup> Hagi ana knarerera nenrerana arimpa erigigeno, kaseonantege'na ama hazenkeramina onkoasina knare hisine.

<sup>11</sup> Hagi nagra nerera agu'afima fri'nogeno kasenantege, kasemanantea kna zupama fruresina knare hisine. <sup>12</sup> Nahigeno nenrera'a amotera navrenteg'e'na mani'nogeno ami'na nami'n'e? <sup>13</sup> Hagi nenrera'ma kase-manantea knazupama frusina, menina mago knazana onke fri'na knare hu'na mani fru husine. <sup>14</sup> Kini vahetamine, mago mago mopare'ma kegavama hu'naza vahetamima frizageno'ma knare nonkumazmimo'ma menima havizama huno me'nea vahetaminema frina umanigasa huresina knare hiresine. <sup>15</sup> Ana nehu'na goline silvanema nozmifima ante-vite'naza ugagota kva vahetmimo'zama fri'naza vahe'enema menina manigasa huresina knare hisine. <sup>16</sup> Hagi nahigeno nenrera'a fri mofavrea kasenantege'na masa onke'na ofri'noe? <sup>17</sup> Na'ankure kefo avu'ava'ma ne-haza vahe'mo'zane nomani zampima amuhoma nehu'za maraguzamat'i za

e'naza vahe'mo'zanena fri vahe kumapina mani fru nehaze. <sup>18</sup> Hagi kazokzo eri'zama e'neriza vahe'mo'zama fri'za fri vahe kumapima vazana, kegava huzmante vahera omanizage'za knare hu'za ana kumapina mani fru ne-haze. <sup>19</sup> Feno vahe'ene zamunte omne vahe'enena anampi manizageno, kazo kazo eri'za vahetmina kvazmia omani'ne.

<sup>20</sup> Nagafare knazampima mani'naza vahe'ene hazenkefima nemaniza vahera tavira nezaminka nomanizazmimo'ma amuhoma nehia vahera zamatrake'za zamasimura eri'za nemanize? <sup>21</sup> Fri'zanku'ma avega antaza vahe'mo'za nofrize. Hagi knare zama mopa agu'afima me'nege'za keri kafi'za hakazaza hu'za fri'zankura nehakraze. <sup>22</sup> Hagi ana vahe'ma frizage'za asezmantage'za tusi muse nehaze. <sup>23</sup> Nagafare nomani zamo'ma amuhoma huntea vahera remsa hunteno Anumzamo'a asimura amigeno mani'negeno, hazenkezanura azeri kanegie? <sup>24</sup> Ra nasimu'ma nente'na kragi'ma neruna zavi'ma atoazamo'a tinkna huno navunumo'a herafiramige'na ne'zana one'noe. <sup>25</sup> Koro'ma hunentoa zamo navatera ne-egeno, nagogogu'ma nehua zamo nagritera fore huno nazeri haviza nehie. <sup>26</sup> Nagra mani fru hu'na manirava nohe'na manigasa nosuanki, hazenkefi manivava nehue.

## 4

### *Elifasi'ma agra'a antahi'zama eri ama huno Jopuma asami'nea naneke*

<sup>1</sup> Hagi anante Temani mopafinti ne' Elifasi'a amanage huno kenona hu'ne, <sup>2</sup> Mago vahe'mo'ma kagri'enema nanekema hu'zama nehanigenka akohenka mani'nenga ontahigahano? Hagi nagra nagitera aze'ori'na hunaku'ma hanua nanekea amne kasmigahue. <sup>3</sup> Rama'a vahe antahintahia nezminka, hankavezmi omne vahera zamazeri hankaveti'nan. <sup>4</sup> Tanafa'ma hu'za mase'zama nehaza vahetmina, nanekeka'amo'a zamazeri hankavenetino, zaferina omne amnema hia vahera hankavea nezamie. <sup>5</sup> Hianagi menima knazampi nemaninkeno'a krimpamo'a haviza nehie. Hazenke zamo'ma kavate'ma egenka kagogogu nehane. <sup>6</sup> Anumzamofonku'ma koro hunentenka fatgo hunka nemaninazanku kamentintia nehunka, Anumzamo naza hugahie nehano? <sup>7</sup> Kagesa antahigo, hazenke'a omne vahe'mo'a amnea frigahifi? Hagi fatgo avu'ava'ma nehia vahera inantega ahe fri'negenka ke'nane? <sup>8</sup> Hagi nagrama ke'na antahi'nama hu'noana, hozama eri'za avimzama hankre'za hamarazankna hu'za kefo avu'avazama nehaza vahe'mo'za hazenke'za nehamaraze. <sup>9</sup> Anumzamofo rimp ahezamo'a, zaho'mo'ma maka'zama eri haviza hiaza huno, Agra asimu'ma antea zantetira zamahe fanane nehie. <sup>10</sup> Zamagra ha' laionimo'ma ha' hunaku nehiaza hu'za krafa nehu'za, rekazigazi hugahazanagi, hanave laionimofona aheno avera rutafrigahie. <sup>11</sup> Hagi ana ha' laionimo'za ahe'zama nenaza zaga omanisige'za zamagaku nehu'za mofavrezmia atresage'za panini hu'za hazagre'za vu'za e'za hugahaze.

<sup>12</sup> Hagi tamage nanekea oku'a sumi sumi hu'za eme nasmizage'na antahi'noe. <sup>13</sup> Vahe'mo'za mase himrenageno, kenage ava'nafe ana nanekea eme nasmizage'na anhintahi hakare nehugen, <sup>14</sup> tusi nagogo nefegeno, zaferinani'a omne amne nehige'na, tusi nahirahiku hu'noe. <sup>15</sup> Mago zaho erino navufi evigeno, navufga nazokamo'a harahara huno oti vaga'rene. <sup>16</sup> Hagi ana zaho'ma erino'ma evigenama koana, mago zamofo amema'a fore huno oti'neanagi, avufga'a onke'noe. Anama nehigeno

agasasama omanene fintira mago agerumo'a anage hu'ne. <sup>17</sup> Anumzamofo avurera mago vahe'mo'a fatgo osu'ne. Tro'ma hurante'nea Anumzamofo avurera magora agru vhahera omanifta hu'ne. <sup>18</sup> Anumzamo'a eri'za vahe'anena antahi nozmino ankero vahe'amofo havi zamavu'zmava zana refko huno nezamage. <sup>19</sup> Hagi vhahera Anumzamo'a mopareti eri kripeno tro hunteneankino (moth) afovage brebrema rehapatiaza hugahie. <sup>20</sup> Hagi trazamo'za nantera fore hute'za, kinaga sege'za frizankna hu'za ana fri fanane hazage'za antahi nozamize. <sup>21</sup> Seli nozmimofonofira katufe atrazageno pasru hiakna hu'za knare antahintahi omne vahe nefrize.

## 5

### *Elifasi'a mago'ene Jopuna keaga asmi'nea naneke*

<sup>1</sup> Jopuga menina mago'a vahe'mo'za kazama hanagura krafagea hunka ko? Ina ankeromo eme kaza hugahie? <sup>2</sup> Amne zampima arimpama ahe'zamo neginagi vhahera ahene frigeno, arumofo zanku'ma kenunuma ne-huno amefikema hu'zamo antahintahima omne vhahera azeri haviza nehie. <sup>3</sup> Neginagi vahe'mo'za osi'a knafi feno vhahera manizage'na nagra ketogeno, hazenkemo'a ame huno zamazeri haviza nehie. <sup>4</sup> Mago'a vahe'mo'za mo-favrezimia zamaza hu'za keagafina zamagura ovazizage'za, kuma kafan-tera zamazeri haviza nehaze. <sup>5</sup> Zamagaku'ma hu'za friza vahe'mo'za ana vahe'mofo hozafintira ne'zana vasage'za nene'za ave'ave trazampinti'enena ne'zana vasage'za nenaze. Ana nehazage'za, tinku'ma zamavesige'za ne-hazaza hu'za feno zanku'ma nehakaza vahe'mo'za fenozama'a e'nerize. <sup>6</sup> Knazamo'a mopafintira hanatino marenorigeno, hazenkezamo'a mopafin-tira aru hanana huno nohage. <sup>7</sup> Tevemo'ma teragareno mareriankna huno, vahe'ma fore'ma hianknaretira agafa huno hazenkezamo'a forera nehie.

<sup>8</sup> Hianagi Jopuga kagrama hanaza hu'na nagra knazama eruasina, knazani'a Anumzamofo antahigogeno naza hisine. <sup>9</sup> Agra tusi'a ruzahukna kaguva zantami erifore nehuno, ohampriga'a kaguvezantmina erifore ne-hiankita, tagra keta antahita osugahune. <sup>10</sup> Agra higeno mopafina kora runentegeno, hozafinena tina nemie. <sup>11</sup> Agra amunte omane vhahera za-maza hige'za, mani'zazmifina knarerahazageno, zavi'ma netaza vhahera zamahokeno zamagu nevazie. <sup>12</sup> Hagi vahe'ma zamazeri havizama hu kazigati'ma knare antahi'za retro nehune nehu'za, havi antahi'zama retro'ma nehaza vahe'mofo antahi'zazmia eri ama higeno, ana antahi'za zamimo'a amane zankna nehie. <sup>13</sup> Hagi vahe'ma zamazeri havizahu kazi-gatima knare antahi'za retro nehune nehu'za, havi antahizama retroma nehaza vahe'mofo antahizazmia eriama higeno, ana antahi'za zmimo'a amnezankna nehie. <sup>14</sup> Hagi ana vahe'mo'za ferura hanimpima vanoma hazankna hu'za vano nehu'za, kinagama omeseg'eza kenage'ma inkonkima erino'ma viaza hu'za vano nehaze. <sup>15</sup> Hianagi ana vahe'mo'zama zamunte omne vahetmima huhavizama hunezmantazageno'a, zamaza nehuno hanave vahe'mo'zama zamazeri havizama nehazageno'a zamaza nehie. <sup>16</sup> Hagi zamunte'ma omne vahe'mo'za Anumzamo'ma zamazama hanigu amuhara nehazageno, kefo zamavu'zmava'ma nehaza vahe'mokizmi zam-agira Anumzamo'a ru hamunkige'za kea tagane'za nemanize.

<sup>17</sup> Anumzamo'ma azeri fatgoma hania vahe'mo'a muse hugahie. E'ina hu'negu kefo avu'ava'ma nehankeno Himamu'ane Anumzamo'ma kaz-eri fatgoma nehanigenka kavresra hunka kamefira huomio. <sup>18</sup> Hagi

Anumzamo'a atrenigeno namumo'a kavufgarera fore huno kazeri haviza hugahianagi, ete kazofeno kazeri so'e hugahie. <sup>19</sup> Hagi 6'a zupama hazenkefima ufresankeno'a, Agra kaza hu'neno, 7ni hazenke zama esigeno'a kagu'vazinigeno ana hazenke zamo'a kazeri haviza osugahie. <sup>20</sup> Agra agatonto knama esigeno'a, kazahina nezankuranofrisankeno, ha'ma hu knafina katesigeno bainati kazintetira kahe ofrigahaze. <sup>21</sup> Hagi vahe'mo'zama kefinti'ma kazeri havizama hu'zankura, Anumzamo'a kazeri frakigahianki, hazenke zamo'ma keonke'zama eri havizama huno ne-enigenka korora osuo. <sup>22</sup> Ana hanigenka hazenke zamo'ma keonke'zama eri havizama hania zank'ene agatonto zankura ki'za neranakeno, afi zagagafamo'za kazeri korora osugahaze. <sup>23</sup> Hagi havege mopamo'a knare hinkenka hoza nentesankeno, afi zagagafamo'za hara reogantegahaze. <sup>24</sup> Hagi hazenke zana omnedenkeno nonkumaka'amo'a knare huno mesigeno, sipisipi afuzagaka'ama hamprinka kesanana mago'mo'e huno fananea osugahie. <sup>25</sup> Hagi henkama kenka antahinkama hananana mofavreraminka'amo'za rama'a ome hanageno kagehemmo'za rama'a ome hu'za ama mopafi tra'zankna hugahaze. <sup>26</sup> Hagi witimo'ma kna fatgo'are'ma nenama hige'zama vasagazaza hunka, kagra ozafa omeretenka renteraminka frigahane. <sup>27</sup> Hagi keho, tagra ama ana zana rempi huta keta antahita hu'nonankino, tamage ama ana zana fore hugahianki antahi ani'huo.

## 6

### *Jopu'a Elifasi kere kenona hu'nea naneke*

<sup>1</sup> Elifasi'ma anagema hutegeno Jopu'a amanage huno kenona hunte'ne. <sup>2</sup> Hagi nasuzampima mani'noa zamofo kna'ane hazenke zani'amofo kna'anema sigerire'ma erinte'za kazasina, <sup>3</sup> maka hagerinkenafikaseparamimofo kna'a agateresine. E'inama hu'nea zankura nagra nagesa antahi so'e osu ame'ama hu'na rama'a kea hu'noe. <sup>4</sup> Na'ankure Hihamu'ane Anumzamo'a keve nahetrege'na masenogeno ana keveraminte'ma fre'nea avuutga zamo'a nazeri haviza nehie. Ana nehigeno nazeri koro'ma hu'zantamima Anumzamo'ma huntegeno e'nea zamo'a navuga emanimpi huneno nazeri korora nehie. <sup>5</sup> Hagi afi donki afu'mo'zane bulimakao afu'mo'za trazama me'nege'zama nene'za krafa nosaze. <sup>6</sup> Hagi hagemointegeno'ma hagama osu ne'zana vahe'mo'za amnea negahazafi? Nama amu'amofo efeke'amo'a haga hugahifi? <sup>7</sup> Nagra e'inahu' ne'zama avako'ma hu'zankura navresra nehie. E'inahu ne'zama nenogeno'a, amuti nagesa nehige'na ana nezama ne'zankura tusi nagonete. <sup>8</sup> E'igu Anumzamo'a nunamuni'a nentahino, nagesama nentahua zana hunantesiegu nave'nesie. <sup>9</sup> Anumzamo'a nare hapati'nige'na fruresina knare nehigeno, Anumzamo'a azana rusuteno nahege'na fruresina knare hisine. <sup>10</sup> Knazampi mani'ne'na natagura nehuangagi, nazeri knare hugahie. Na'ankure knazampima mani'ne'na Ruotge'ma Hu'nemofona kea hu'avizana huonte'noe. <sup>11</sup> Hankave'n'i'a omne'neanki'na hanaveti'na mani'ne'na ama ananknazana eri'na ovugosue. Akohena mani'ne'na ama ana knafima ufre hankaveni'a omnetfa hie. <sup>12</sup> Hanavenimo'a havegna huno hanavenentake higeno, navufgamo'a bronsimo'ma hiaza hu'nefi? <sup>13</sup> Hagi nagra'a naza hugara nosugenno, ama ana knazama agatere kankmuna omnetfa hie.

<sup>14</sup> Hagi Hihamu'ane Anumzamofoma korora hunontesnia vahe'mo'agi, rone'amo'ma knafima mani'nenigeno'a knare avu'ava huntegahie. <sup>15</sup> Hagi

nena fugatma tamagra, hagegema hu'nea tinkagomupi ko'ma rigeno tusi tima hageno eteno, ko'ma rusegeno'ma ame huno'ma taneankna vahe mani'naze. <sup>16</sup> Hagi zagemo'ma aisima teze'ze higenoma, tima hageno'ma evi ankna vahe mani'naze. <sup>17</sup> Hianagi ana timo'a ra zogema regeno'a ner-anegeno, tusi amuhoma higeno'a, tima eneviretira taneno hagege nehie. <sup>18</sup> Hagi fenozama zogorema netraza vahe'mo'za (Karivani) hagege ka'ma kokampima enevu'za tinku'ma zamavesige'zama umani fru hu'zama tima nenaku'ma hazana, timo'a tanenege'za tinkura huge'za fri'naze. <sup>19</sup> Hagi Tema kumateti fenozama zogore'ma netraza vahe'mo'zama enevu'za ana krahopima tinku'ma kazana tina omnene. Hagi Siba kumateti vahe'mo'zanena enevu'za ana tina negahune hu'za amuhara hu'nazanagi onke'naze. <sup>20</sup> Hagi zamagra ana tina enevifi hu'zama ome kazana ana timo'a tanegeno, ana tima negahunema hu'za amuha'ma hu'za e'naza zamo'a amnezankna hu'ne. <sup>21</sup> Hagi menina tamagoana timoma taneaza huta naza hugara osaze. Na'ankure nagri'ma eme nagazana, tusi knaza eri'na mani'nogeta, tusi tamagogogu nehaze.

<sup>22</sup> Nagra mago'mokagura hu'na nagri nagi erinka muse'za amio hu'na huge, magomokagura hu'na fenonka'afintira mago'azana erinka knazamp-intira atesinka navro hu'na hu'nofi? <sup>23</sup> Hagi ha' vahe'nimofo zamazampintira nagu'vazio hu'na huge, kefo vahetmimofo zamazampintira nagu'vazio hu'na mago'mokagura osu'noe. <sup>24</sup> Hagi akoheno'ma mani'zana rempi hunaminke'na kea osu' akahe'na mani'neno. Hagi havizama hu'ne'nua zana naveri hiho. <sup>25</sup> Tamage nanekema hu'zamo'a tusi katagrigahie. Hi-anagi keha'ma rezamo'a, nanknare'za erifore hugahie? <sup>26</sup> Tamagrama tamagesa antahi'zana, tagrama huna ke antahino amage antegahie huta nehuta, knazampima mani'ne'na nazama huzanku'ma nehakoa vahe'mo'na nanekea eri amne hazageno zahoknara nehio? <sup>27</sup> Ana nehutma satu zokago reta negeta, megusa mofavreramine, ronetaminena zogore zamatregahaze. <sup>28</sup> Hianagi menina muse nehuta kama nageho, tamagri tamavufina nagra havige nehufi? <sup>29</sup> Tamagra havige huta kumi hune huta nazeri haviza hu kea osiho. Na'ankure nagra mago hazenkea osu'noe. <sup>30</sup> Tamagrama tamagesama antahi'zana, nagra havige nehufi? Nagra fatgo zane knare zanena ke'na antahi'na osugahufi?

## 7

*Jopu'ma mani so'ema huno omani'nea zamofo naneke*

<sup>1</sup> Vahe'mofo nomani'zamo'a ama mopafina amuho nehie. Hagi nomani zantimo'a, vahe'mo'ma amuhoma huno zago eri'zama eriankna huno tusi amuho nehie. <sup>2</sup> Nagafare nomani'zantimo'a kazokzo eri'za vahe'mo'za zagefi eri'za e'neri'za tonaku hakrazankna nehigeno, eri'za vahe'mo'za mizazmi e'ori'ne'za miza zimigu avega ante'za manizanknara nehie. <sup>3</sup> E'ina hu'negu Anumzamo'a natrege'na rama'a ikampina knare osu nomani'zana mani'na ne-e'na maka kenagera narimpagna nehu'na nasu zampinena mani'na neeo. <sup>4</sup> Hagi kenage'ma mase'ne'na, inankna huno ame huno masa hugahie ha hu'na mase rukrahe rukrahe hu'noe. Hianagi ana hanimo'a, ame hunora masa huno kora otu'ne. <sup>5</sup> Hagi navufafina kanimo'a nehigeno namu rifamo'a hantohanto hu'negeno hagege huno hanahananunu hu'ne. Ana nehigeno namumo'a navufafina pro nehigeno avo'mo'a ana namuntamimpintira tusi'za hu'ne. <sup>6</sup> Hagi knama mani'na oanknamo'a ame

huno evuevu nehuno, kukenama nehatia nekazamo'ma ame huno'ma kuke-nafima marerino atiramino'ma nehiaza huno enevige'na, knamaregahue hu'na ontahi'noe.

<sup>7</sup> Anumzamoka kagera okanio, nasimu'ma eri'na mani'zamo'a asimu'ma anteankna higeno knare muse zana mago'ane onkegahue. <sup>8</sup> Menima nenagaza vahe'mo'za zazakna onagegosaze. Nagrikura hakegahazanagi, nagra omani ko' vugahue. <sup>9</sup> Hampoma kiteno'ma kiragama hiankna hu'za fri'za fri vahe kumapima vanaza vahe'mo'za ome fanane hugahaze. <sup>10</sup> Hagi mago'anena noma'arega ome'nige'za, vahe'mo'za onkegahaze. <sup>11</sup> E'ina hu'negu nagra nagira hamunki'na omanigosuanki, nagu'afima me'nea nata zana huama nehu'na, narimpa haviza hu'zana huama hugahue. <sup>12</sup> Nagra hageri mani'nena, hagerimpi'tusi zaga mani'nogenka kegava hunantetenka mani'nano? <sup>13</sup> Hianagi nagrama antahuana tafe'niare'ma masenua zamo'a nazeri knare nehanigeno, navu'ma mase'zamo narimpa knama hu'na ke hakarema nehuazana eritregahie hu'na nagesa antahi'noe. <sup>14</sup> Hianagi ava'nanifina nazeri nagogonefenka, avanagna zampina nazeri koro hane. <sup>15</sup> E'ina higu nata e'ori snuanki nanankena nazeri porari hanage'na fri'neno. <sup>16</sup> Nasimu'ma eri'na mani'zankura tusiza huno navresra hianki, natrege'na zazatera mani'na ova'neno.

<sup>17</sup> Vahera nankna zaga mani'nonkenka, hakare zupa vahe'motagura kagesa are'arerara nehane? <sup>18</sup> Nagafare Kagra mika nanterane, mika knama enevigenka ame hunka rerahenka ketere nehane? <sup>19</sup> Kagra amnerega kavua keamne hunka negenka, osi'a kna natresanke'na nagrena nakrigahufi? <sup>20</sup> Maka vahete'ma kavuma antenka negana ne'moka, kagri kavure'ma nagra kumi'ma hu'nene'nuana, na'a kumi hu'nogenka ke'nane? Nagafare kagra kavua nagritera antetenka mani'nane? <sup>21</sup> Nahigenka Kagra kumi'n'i'a atre nonantenka, kefo avu'ava zani'a eri notrane? Na'ankure nagra kofa hu'na fri'na kugusopafina mase'nugenka nagrikura hakegahananagi, nagra ko vanugenka onagegosane.

## 8

### *Sua kumateti ne' Bildati'ma Jopu kenona hu'nea naneke*

<sup>1</sup> Hagi anante Sua kumateti ne' Bildati'a amanage huno Jopuna kenona hunte'ne, <sup>2</sup> Hago zazate ama nanekea hane. Kagipinti'ma atiramia nanekemo'a, tusi'a zahokna hie. <sup>3</sup> Anumzamo'a fatgo huno refkomu hu avu'ava zana eri arukrahera huno havi avu'ava zana hugahifi? Hihamu'ane Anumzamo'a fatgoma hu'nenia zana, eri arukrahera hugahifi? <sup>4</sup> Hagi mofavre nagatamimo'zama Anumzamoho avure'ma kumi'ma hazageno'a, ana kumi'zmimofo nona'a ana hazenkefi zamavarenente. <sup>5</sup> Hianagi kagrama Anumzamofontegama nunamuma hunka Hihamu'ane Anumzamo'ma asunku'ma hugantesigu'ma antahinegenka, <sup>6</sup> kavukva zampina fatgo hunka nemaninka, fatgo zanke'ma hanankeno'a, Anumzamo'a tamage huno tra'aretira otino ete kazeri so'e hanigenka, ko'ma mani'nana kante manigahane. <sup>7</sup> E'ina hanigenka ko'ma ante'nanazana agaterenka rama'a zantami antegahane.

<sup>8</sup> Hagi korapa knafima mani'zama e'naza vahetami zmantahigenka negenka, tagehe'zama mani'zama e'naza nomani'zana negenka rempi hunka antahio. <sup>9</sup> Na'ankure tagra meni vahe mani'nonkeno, knatimo'a atupa hu'neankita, mago zana antahita keta osu'none. Ana hu'neankino zagma'ma rentegeno amema'amo'ma fore huteno ame huno'ma fanenema

hiankna huta frigahune. <sup>10</sup> Hianagi ko'ma mani'za e'naza vahe'mo'za rempi hugamigahaze. Zamagra korapa vahetmimofo knare antahintahi eri'nazanki'za ana antahintahia rempi hugamigahaze. <sup>11</sup> Varozamo'a (Papyrus) hapa'ma hu'nesia mopafina knare huno hagegahie. Hagi hapapi uha trazamo'a tima omnennenifina knare huno hagegahio? <sup>12</sup> Hagi hapapi varozamo'a zahufama amosrema nehenigeno ana mopafima me'nenia timo'ma hagegema hinkeno'a, ame huno hagege hugahianagi mago'a trazamo'za ame hu'za hagegea osugahaze. <sup>13</sup> Anumzamofoma zamage'nama hunemiza vahe'mokizmire'ma, amuha'ma nehaza zamo'a amane zankna hugahie. <sup>14</sup> Hagi hankave'a omne zante'ma, amuha'ma nehaza vahe'mo'za pamponkemofo nofiteti eri anafru hu'za eramiza haviza hugahaze. <sup>15</sup> Nontimo tagu'vazigahie hu'za zamagra azeri akona hugahazanagi, ana zamo'a za'zatera menora ovugahie. <sup>16</sup> Hagi Anumzamofoma amagema nontaza vahe'mo'za zugema ohanatinegeno, timo'ma avite'nea mopafi me'nea tra'zamo'ma hozafima agatama reno vuno eno'ma hiaza zamagra nehaze. <sup>17</sup> Hagi ana trazamofo arafu'namo'a hageno havere ome azeri antrako nehie. <sup>18</sup> Hianagi ana tra'zama eri vatisresageno'a, ana mopamo'a avresra hunenteno nagra kagrira onkage'noane huno hugahie. <sup>19</sup> Hagi havi avu'ava'ma nehaza vahe'mo'za osi'a knafi musena hute'za frisageno, ru vahe'mo'za ana mopafina fore hu'za zamagri nona eri'za manigahaze. <sup>20</sup> Ana nehuno tamage huno Anumzamo'a hazenk'ama omane vahera amefira huomigosie. Hianagi tamagerfa huno kefo avu'ava'ma nehia vahera aza huno azeri hankavea otigahie. <sup>21</sup> Hagi Anumzamofoma kazeri knare hina kagipintira kiza zokago kege nehunka, musenkege hunka manigahane. <sup>22</sup> Ha' vahekamo'zama kavresrama hunegantaza vahera zamazeri zamagaze nehuno, kefo vahera zamazeri haviza hugahie.

## 9

### *Jopu'a Bildati kere nona hu'nea naneke*

<sup>1</sup> Hagi Jopu'a amanage huno kenona hu'nene, <sup>2</sup> Kagrama banana tamage hane. Hianagi inankna huno Anumzamofoma avureria mago vahe'mo'za fatgo vahera manigahie? <sup>3</sup> Hagi mago vahe'mo'za Anumzamofoma tauseni'a zupa keagarera avrenteno keaga huntegahianagi, magore huno keagafina agateoretfa hugahie. <sup>4</sup> Na'anckure Anumzamofona knare antahi'zamo'a avite'nenkino tusi'a hihamu'ane Anumza mani'ne. Hagi Anumzamofoma ha'ma rentaza vahe'mo'za zamagra'a zamavate hazenkea eri'za ketere hu'naze. <sup>5</sup> Agra arimpama ahogeno'a, kea osu'neno antri hazaza huno agonaramina zamatufe zamatuge'za haviza nehaza Anumza mani'ne. <sup>6</sup> Agra mopa eri kaza huno atufetregeno noma'a atreno arufi nevigeno, mopamofo tra'a eri kaza nehia Anumza mani'ne. <sup>7</sup> Hagi Agrama zagegu'ma huno, hanatinka mareorio huno'ma hanigeno'a, zugemo'a hanatino mareorisnigeno, ofunku'ma remsa osuo huno'ma hinkeno'a, ofumo'a remsa osugosie. <sup>8</sup> Agrake haroma hiaza huno mona eri rutarenenteno, hagerimo'ma krantonkrantomia hifina agofetura agatre azatre huno vano nehie. <sup>9</sup> Agrake ofuntamina tro huno kankamunte kankamunte zamantuge'za kevure kevure mani'nazankino zamagi'a Beama, Orioma, Pleiadesima, sauti kaziga monafima metruma nehaza hanafitaminena tro hunte'ne. <sup>10</sup> Agra ruzahu ruzahu zantmi tro huntogeno knare zantfa hu'neankino, ana zantamina

hamprigara osu'ne. <sup>11</sup> E'ina hu'neanagi Agrama erava'oma nehige'na nagra nonkogeno, enagatereno'ma eviama'a kena antahi'na nosue. <sup>12</sup> Hagi Agrama nazanoma erinaku'ma haniazama e'nerisigeno'a, mago vahe'mo'a azeorige, na'a nehane hunora antahi onkegahie.

<sup>13</sup> Hagi Anumzamo'a rimpia ahe'zana azeorigosiankino Rehapue nehaza osifaveramina hagerimpintira amne zamazerino aganutira zamarehapti-gahie. <sup>14</sup> E'ina hu'negu nagra iza'na Anumzanena keaga huge, mago'a zamofo nanekea hu'na eri fatgo hugahue? <sup>15</sup> Hagi nagrira hazenkeni'a omne'nesianagi nagra iza'na Anumzamofona ke hakarea huntegahue? Hagi magoke'zana Agrama asunku'ma hunantesigu antahigegahue. <sup>16</sup> Hagi nagrama keagare'ma avre'na e'na keagama eme huntesuana, nagrama antahuana, tamage huno Agra ke'ni'a antahi onamigahie hu'na nagesa nentahue. <sup>17</sup> Na'ankure Agra ununko'nun hara renenanteno agafa'a omne zante nazeri havizantfa huno nataza nemamie. <sup>18</sup> Agra natrege'na nasimura e'noruanki, hazenke namino nasimu kana renkrirege'na natagura nehu'na nasimu ante'zanku nehue.

<sup>19</sup> Hagi nagrama Anumzamofo hanavema rehe'na kenaku'ma hanuana, nagri hanavea agatereno hanavenentake hu'ne. Hagi keagama erifatgoma hunaku'ma hanuana, keagafina agateregara osu'noe. <sup>20</sup> Nagra hazenke osu'noanagi, nagra hu'nesua kere anteno hazenke hu'nane huno hunantegahie. Nagra mago havizana osu'noanagi nagrama hu'nesua kemo, kefo avu'ava'ene vahere huno hunantegahie. <sup>21</sup> Nagrira mago hazenkeni'a omne'neanagi, nagragura nagesa nontahue. Nagra nasimu'ma eri'na mani'zankura navresra nehue. <sup>22</sup> Hazenke osu' vahero, hazenke vahero, Anumzamofo avurera magozahu vaher mani'none. Agra hazenke osu' vah'e'ne hazenke vah'e'nenza zamaha fanane nehue. <sup>23</sup> Hagi antrima hazaza huno'ma hazenke zamo'ma hazenke'ama, omne vah'e'ma ahe frigeno'a Anumzamo'a ana knazankura ki'za nere. <sup>24</sup> Mago vah'e'mo'ompge Anumzamo keagama refkoma nehaza vahera zamavua eri sukigeno, kefo avu'ava'ma hu vah'e'mofo azampi mopamo'a nevie. Hagi Anumzamo'ma ana'ma osanigeno'a, iza anara hugahie?

<sup>25</sup> Zamagama neraza vah'e'mo'zama zamagama nerazama'a zamagatereno knanimo'a tusiza huno aganere. Ana hu'neanki'na knare'zana fore hanige'na onkegahue. <sup>26</sup> Knanimo'a ventemo hagerimpi agasasa oruno agareankna nehuno, tumpamo ne'zaga'a aheno nenaku eri kafagino hareno takigurenkna huno knamo'a tusi aganere. <sup>27</sup> Hagi nagrama knama nehuazama nage'nekani'na, nasunku'ma nehua zana atre'na muse navugosa nehue. <sup>28</sup> Hianagi nagra maka nata zankura tusi koro nehue. Na'ankure kagra kefo zani'a nagenka erifore hugahane. <sup>29</sup> Ko'ma nageno antahino'ma hige'na kumi vah'e'mani'noanki, nagafare nagra amne zampina fatgo vah'e'mani'zantera maraguzatigahue. <sup>30</sup> Hagi sopenutira tina fre'na nazeri agru nehu'na, hankave marasinireti'ma tro'ma hu'naza soperetira nazana sese hugahuanagi, <sup>31</sup> Anumzamo'a hapake kerifi nasaga hutrena, hapake hu'na hi'mnage ha'enkeno, kukananimo'enena tusiza huno agote nantegahie. <sup>32</sup> Anumzamo'a mopafi vah'e knara osu'neanki'na, nagra Agri'enena fravazige, avre'na keaga huntegera osugahue. <sup>33</sup> Hagi amu'nonte vahera magora mani'neresina keagati'a eri fatgo huno tazeri mago hiresine. <sup>34</sup> Agra amu'nonte ne'mo'a Anumzamofona asmigeno kanoma nemamia zana atrege'na ru'enena agrama knazama namino nazeri koro nehia knazankura korora osu'na

manusine. <sup>35</sup> Ana hige'na korora osu knazani'amofo keaga Anumzamofona asamusinagi nagra hankaverera e'inara osugahue.

## 10

### *Jopu'a asimu'ma erino mani'zanku agote'nea naneke*

<sup>1</sup> Nasimu'ma eri'na mani'zankura tusiza huno nagoteno navresra ne-hige'na Anumzanimofontega narimpa haviza hu'zana huama hu'na asami-gahue. <sup>2</sup> Nagra Anumzamofona asmi'na, Kagra nazeri haviza hu keaga huo-nanto. Hagi keagama hunanteku'ma nehana ke agafa'a eri ama huo hu'na hugahue. <sup>3</sup> Hanki nazeri havizama neham pintira nankna knare'za eriga-hane? Kagraka'a kazanuti tro hunante'nana vahe mani'noanki, nagafare kavresra hunenantenka, kefo avu'ava'ma nehaza vahe'mo'zama antahin-tahima retro'ma hazza antahintahirera musena nehane? <sup>4</sup> Hagi kagrama kavuma kanana, vahe'mo'zama zamavuma negazaza hunka nonkane. Hagi vahe'mo'zama keonke'zama kazaza hunka, kagra nonkane. <sup>5</sup> Huge mopafi vahe'motama atupa knama nemanunaza hunka atupa kna neman-impi? Vahe'mota kofa'a kafuma nemanunaza huno, Kagri kafumo'a kofa hu'nefi? <sup>6</sup> E'inama osu'nena nahigenka Kagra kefo navu'navanigu'ene kumi'niagu'enena hanavetinka nehakane? <sup>7</sup> Kagra hazenkea osu'nogenka kenka antahinka hu'nananagi, mago'mo'e huno Kagri kazampintira nagura ovazigosie.

<sup>8</sup> Kagra kazampinti eri kripenga tro hunantetenka menina nazeri hav-izantfa nehane. <sup>9</sup> Hagi Kagra kagerakaninka antahio, nagrira hapa eri kripenga tro hunante'nane. Hanki Kagra ete ame hunka nazeri kugu-sopase'za nehano? <sup>10</sup> Kagra nagrira bulimakaomofo amirima reratiteno, eri kragefeno sisima tro'ma hiankna hunka nennrera arimpafina tro hunante'nane. <sup>11</sup> Hagi kukena ataninanteaza hunka nagu'a navufga amega navufgareti eri ano nevazinka, name'ane zaferinani'anena nagrunanuti hatinka eri rehampri rehampri hunante'nane. <sup>12</sup> Hagi Kagra nasimu'ma nenaminka mani'zana nenaminka, vagaore kavesi'zana naveri hu'nane. Hagi kagra kegava hunantanke'na ofri'na mani'noe.

<sup>13</sup> Hianagi Kagrama nazeri havizama nehana zana, kagu'afi eri fraki'nane. Kagra nazeri haviza hunaku, e'inahura hu'nane. <sup>14</sup> Kagra nenaganke'nama nagrama kumi'ma huasina Kagra kumi'ni'a atre onantasine. <sup>15</sup> Nagra kumi'ma huresina havizantfa hisine. Hagi nagri'ma hazenkenima omaneresina, nasenia erisga osu nagazegu nehu'na haviza huresine. <sup>16</sup> Hagi nagrama navufga rama hanugenka, laionimo'ma afi'zagama aheno nenaku'ma nevaririankna hunka tusi'a hihamuka'anu hara hunantegahane. <sup>17</sup> Hagi maka zupa havizama nehua zana eri ama hunante vava nehunka, Kagra tusi krimpa ahenenantenka sondia vahetmina huzmantanke'za e'za hara eme hunenante'za tusi nata nami'za nazeri haviza nehaze. <sup>18</sup> Hagi natrankena nennrera agu'afi fruge'za vahe'mo'za onagazanki, nagafare natrankeno nennrera'a kasenante'ne. <sup>19</sup> Nagrira nena rera'ma kaseonantege, narera'ma kasemanenantege'na fruge'za ome asenanta zaresina knare hisine. <sup>20</sup> Hagi knanimo'a atupa hianki natrege'na osi'a knafina musena hu'na mani'nena, <sup>21</sup> hanintiri huno knare osu kuma'ma, vahe'mo'zama vute'za ete nomaza moparega fri'na va'neno. <sup>22</sup> E'i ana mopamo'a kenage hanimo'ma hiaza huno tusi hanintiri huno knarera osu maka zamo'a savri higeno, ana hanimpina tavira re'neanagi ana tavimo'a hanintiri hu'ne.

## 11

### *Sofari'ma Jopu kenona hunte'nea naneke*

<sup>1</sup> Hagi anante Na'ama kumati ne' Sofari'a amanage huno Jopuna kenona hunte'ne, <sup>2</sup> Rama'a nanekema hana nanekemofona kenona hugante'za hue. Mago vahe'mo'ma rama'a nanekema hania nanekemo'a agrira hazenke'a omne vahere huno aza osugahie. <sup>3</sup> Hagi agafa'a omne nanekema hana nanekegura mago vahe'mo'a kea osugahie hunka nehano? Hagi Anumzamofoma huhavizama hunte'nankeno'a mago vahe'mo'a kazeri kagazea osugosie. <sup>4</sup> Kagra hunka, nagrama namentintima nehua zamo'a agru hu'neanki'na, Anumzamofo avurerera agru hu'noe hunka nehane. <sup>5</sup> Hianagi Anumzamo'ma nanekema kasamiresina, antahintahi'afima me'nea nanekea kasamisine. <sup>6</sup> Agrake'za knare antahi'zane ani antahi'zanena kasamigahie. Na'ankure tamage antahi'zamofona rama'a antahi'zama'a me'ne. E'ina hu'negu ana maka kumi'ma hu'nana avamentera Anumzamo'a knazana nogamianki, osi'a negamie. Na'ankure mago'a kumika'a atreneganteno anara hu'ne.

<sup>7</sup> Hagi kagra Anumzamofona oku'a antahi'zama'a antahi ama' hugahano? Kagra Hihamu'an Anumzamofo antahintahi'zana, antahi ani' hugahampi? <sup>8</sup> Anumzamofo antahi'zamo'a mona agatereno amenametega marerigeno, fri vahe kumara agatereno (Sheol) amefenkame tami'nearinkika kagra ana maka antahintahizama'a kenka antahinka osugahane. <sup>9</sup> Hagi Anumzamofo antahintahi zama'amo'a mopamo'ma ome atre eme atre'ma hu'neama'a agatereno rankrefa nehuno, hagerimo'ma ome atre eme atre'ma hu'neama'a agatereno rankrerfa hu'ne. <sup>10</sup> Hagi Anumzamo'ma eme kavreno kinama hugantege keagafima kavrenteno keagama hugantena iza Anumzamofona i'o huno huntegahie. <sup>11</sup> Na'ankure Agra havigema nehaza vahera zamageno antahino nehuno, kumi'zminena antahino keno hu'neankino tamage nanekema erinakura vahera zamantahinoge. <sup>12</sup> Hianagi afi donki afumo'a vahe anentara kaseontegahie. Ana hukna huno knare antahi'zama omne vahe'mo'a antahi amahu' antahi'zana e'origahie.

<sup>13</sup> Hagi kagu'ama retrotra'ma nehunka kazama erintesga hunka Anumzamofontegama nunamuna nehunka, <sup>14</sup> kazampima kumi'ma me'nesiana atregamu atrenka netrenka, vahe'ma havigema huno azeri haviza hu' avu'ava'zana atro. <sup>15</sup> E'inama hanankeno'a kavugosafintira masa nehinkeno, mago hazenkeka'a omnesigenka mago zankura korora osu hankavetinka manigahane. <sup>16</sup> Hagi hazenke zanka'amo'a tima hageno evu kagatereankna hanigenka, ana hazenkeka'agura kageknigahane. <sup>17</sup> E'ina hanigeno nomizankamo'a rumasa huno zage ferukna nehina, nomanizanka'afima hanima hu'nea zamo'a, nantera zagemma hanatino rumsama hiankna hugahie. <sup>18</sup> Ana'ma hanigenka mago zankura korora osugosane, na'ankure knare'zankura amuha nehunka, korora osunka fru hunka manigahane. <sup>19</sup> Hagi kavu'ma masesanana korora osu nemasesankeno, vahe'mo'za kagesga nehu'za zamazama hanankura kagritega egahaze. <sup>20</sup> Hianagi havi zamavu'zamava'ma nehaza vahe'mofo zamavumo'aasu nehinkeno, kama frekazmia omnena frizankuke avega antegahaze.

## 12

### *Jopu'ma Sofarima azeri fatgo hu nanekema hu'nea naneke*

<sup>1</sup> Anage higeno Jopu'a amanage huno Sofarina kenona hunte'ne, <sup>2</sup> Tamagrama antahi'zana tamagrake maka zana antahita keta hu'nazankino frisageno'a, knare antahi'zamo'a fanane hugahie huta nehaze. <sup>3</sup> Hianagi nagra'enena kagrama hanaza hu'na ama' antahi'zane vahe mani'noe. Iza kagri negi vahera mani'neno, kagrama hanana nanekea nontahie? <sup>4</sup> Nagra fatgo vahe mani'nena Anumzamofontega nunamuna nehugenonunamuni'a antahinenamia vahe mani'noanagi ronenimota hunanteta nagiza neraze. <sup>5</sup> Hagi knare'ma hu'zama nemaniza, knazampima mani'naza vahera huhaviza huzmante'za, kiza nere'za tanafa'ma haza vahera zamaretufenetraze. <sup>6</sup> Hianagi kumzafa vahe'ene Anumzamofoma amage'ma nontaza vahe'mo'za fru hu'za nemani'za, zamagra'a hanavegu antahizageno anumzazmi asenezmanteanagi Anumzamofo Hihamu hanavefi nemanize.

<sup>7</sup> Hianagi afi zagagafa zmantahigege'za rempi hunegaminagenka, anami kankamumpima hare'za vanoma nehaza namaramina zmantahigege'za kasamaho. <sup>8</sup> Huge mopamofo antahigegeno rempi hunegamina, atregeno hagerimpi nozamemo'za kasamaho. <sup>9</sup> Na'ankure nagritegama maka hazenkezama neiana, Anumzamo atregeno neie hu'za ana zagaramimo'za ke'za antahi'za hu'naze. <sup>10</sup> Na'ankure mika zagagafamofo asimura Anumzamofo azampi megeno, mika vahe'mofo asimu'mo'enena Agri azampinke me'ne. <sup>11</sup> Hagi ne'zama neneno'ma haga'ama antahiaza huta tagra'a tagesafinti kea nentahita, kea refko huta nentahune. <sup>12</sup> Ranra vahepi knare antahi'zana megeno, antahi ama'ma hu' antahi'zana ozafanafafi me'ne. <sup>13</sup> Hianagi knare antahi'zane hihamunena Anumzamofompi me'negeno Agripinke knare antahi'zane, antahi ama'mahu antahi'zanena me'ne. <sup>14</sup> Anumzamo'ma eri haviza hu'nesia zana mago vahe'mo'a eri so'e hugara osu'ne. Hagi Agrama kinama huntlesia vahera mago'mo'a kinafintira katufetregara osu'ne. <sup>15</sup> Anumzamo'ma ko'ma neriazama azerinigeno'a, mopamo'a hagage koka megahie. Hagi Agrama tima azerinenireti'ma atresanigeno'a ti hageno mopa refitegahie. <sup>16</sup> Hagi hihamune knare antahi'zanena Agripi me'neankino, vahe'ma revatgama nehia vahe'ene, anama rezmavatgama nehaza vahe'mo'zanena Agri hanavefi mani'naze. <sup>17</sup> Hagi knare antahi'zama vahe'ma nezmiza vahera knare antahi'zazmia erihana nehuno, keagama refkoma nehaza vahera, zamazeri neginagi vahe kna nehie. <sup>18</sup> Hagi Agra kini vahe'mokizmia kini kukena'zmia hateno zamafafafi rugagi zmantege'za, kazokzo eri'za vahe kna nehaze. <sup>19</sup> Hagi Agra pristi vahera kukenazmia hatege'za amne vahekna nehazageno, za'za knama kvama mani'za e'naza kva vahe'tmina knare antahizazmia eri netrege'za amne vahekna nehaze. <sup>20</sup> Hagi vahe'mo'zama antahinezmizage'za knare antahi'zama nezmiza vahe'mokizmi zamagira Agra ru hamunenkino, ranra vahe'mokizmi knare antahi'zana erinetre. <sup>21</sup> Hagi Agra ugagota kva vahetmina zamazeri zamagaze nehuno, hankave vahe'mokizmi ha'zana zamazampintira eri hanarenetre. <sup>22</sup> Hagi Agra hanimpima framaki'nea zana eri ama nehuno, hanintirima hu'nea zana remsa higeno rumsa huvaganere. <sup>23</sup> Hagi Agra vahetamina zamazeri ra hige'za kumara ante'za rama'a vahe fore hutazageno, ete zamahe fanane nehie. Hagi Agra vahera zamazeri ra hige'za, rama'a fore hutazageno, ete zamazeri osira nehie. <sup>24</sup> Hanki Agra kini vahe'mokizmi antahintahia zamazeri savri hige'za, kana omne ka'ma kokampina neginagi hu'za hazagre'za vano nehaze. <sup>25</sup> Hagi ana'ma hige'za hanimpim eri'eri hu'za

vano nehaze. Ana nehu'za aka tima nenea vahe'mo'zama nehzazaza hu'za traka truku hu'za vano nehaze.

## 13

### *Jopuna rune'amo'zama hunte'naza kegu havige nehaze hu'nea naneke*

<sup>1</sup> Hagi tamagra antahiho, ama ana maka nanekema tamagrama hazana nagra navufinti'ene nagesafinti antahi'na ke'na hute'na, antahi ama hu'noe. <sup>2</sup> Hagi nagra'enena tamagrama hu'nazaza hu'na ama' antahi'zane vahe mani'noankita nagrira nagateore'naze. <sup>3</sup> Hianagi nagra Hihamu'an Anumzane nanekea hu'za nehue. Knafima mani'nama nevua zanku Anumzamo'ene keharare'za nehue. <sup>4</sup> Tamagra ana maka'mota havige tusa vahe'mota, havi naneke nenasamite. Tamagra knare osu tusa vahe mani'naze. <sup>5</sup> Hagi tamagrama tamagi'ma hamunkita manisnuta knare antahi'zana erigahaze. <sup>6</sup> Hagi knama e'nerua zanku'ma ke ha'mareramante'nuana tamagesa anteta antahiho. <sup>7</sup> Hagi tamagra havigereti Anumzamofona aza hanune huta keagafina nehazo? Tamagra Anumzamofo kaziga anteta azahunaku kehara nehazo? <sup>8</sup> Tamagra Anumzamofo kaziga anteta nanekea keagafina aza huta nehuta, Anumzamofo kaziga anteta aza hu'za nehazo? <sup>9</sup> Hagi amana'ma nehzazama tamageno erifore'ma hanuno'a, Agra knare avu'ava huramantegahifi? Hagi tamagra vahe'ma revatgama nehzazaza huta Anumzamofona revatga hugahazo? <sup>10</sup> Tamagrama oku'ama havige huta Anumzamofoma azama hunaku'ma hanazana, hazenkefi manigahaze. <sup>11</sup> Agra hihamu masa'anuti tamazeri koro hinketa, tusi tamagogogu hugahaze. <sup>12</sup> Hagi knare antahi'zama eri naneketmimo'a, amnezankna huno tanefakna hugahie. Hagi tamagra'a kema eri hanavetiku'ma nehaza kemo'a mopa kavomo'ma tako'ma nehiankna nehie.

### *Jopu'a kumi'ma hu'enigu Anumzamofo antahige'nea naneke*

<sup>13</sup> Hanki tamagra kea osutma natrenke'na mani'neno. Hagi natrenke'na nagrani'a kea nehu'na anankemofo nona'a nagra'a eri'neno. <sup>14</sup> Hagi frisu, manisuana nagri'za me'neanki'na, na'aneoma hunaku'ma hanua nanekea amne hugahue. <sup>15</sup> Anumzamo'a nahe frighianagi, mago'arega amuha'zani'a omne'neanki Agripinke me'ne. Nagra knazani'a eri'na Agri'ene kehara hugahue. <sup>16</sup> Hianagi ama ana'ma hanua zamo'a nagu'vazigahie. Na'ankure Anumzamofo avuga kumi vahe'mo'za e'za keaga eme osugahaze. <sup>17</sup> Hagi nanekema hanuana antahi so'e hiho. Tamagesa ante so'e huneta nanekema hanuana antahiho. <sup>18</sup> Hagi nagrama keagafima hanua keaga hago retrotra hu'noanki'na, nagrani'a hazenkeni'a omne'ne hu'na nazeri ama hugahue. <sup>19</sup> Hagi ama ana nanekema nehanugen'o'iza haviza hu'nane hunora hugahie? Hagi ana nanekema hanugetama havige hanema huta hanage'na, nagra ke osu' mani'ne'na frighahue.

<sup>20</sup> Hagi Anumzamoka tare zanku kantahigoanki, tare'za hunantege'na nagra kagri kavurera frara oki'neno. <sup>21</sup> Nagritetira kazana erisga hunka nazeri haviza nosunka, knazana naminka nazeri korora osuo. <sup>22</sup> Hagi Kagra keaga nasmige'na kenona hunka huganta'neno. Huge natrege'na keaga kasmi'nena kenona hunka nasamio. <sup>23</sup> Nagra nama'a hazenke hu'na kumira hu'nofi nasmige'na antahi'neno? Nagra nankna kazigati krimpa eri haviza hu'na kumira hu'nofi naveri huo? <sup>24</sup> Nahigenka kamagena hunenaminka, ha' vahe'ka'ama hunentana kavukvara hunenantane? <sup>25</sup> Hagi

Kagra zaho'mo'ma eri tasinoma via zafa ani'na azeri koro nehunka, hagage trazama zaho'mo'ma eri hareno'ma viana nevaririno? <sup>26</sup> Hagi Kagrama hana nanekemo'a natage'za nenamigenka, nehzavema mani'nenama hu'noa kumira eri nagumpina nentane. <sup>27</sup> Kagra tarega nagiararena zafafi erintenka kina hunenantenka, kama vanoma nehuankana rezaganenka negenka maka nagaka negane. <sup>28</sup> Hagi vahe'mota tavufgamo'a kasri zankna huge, atafa kukena hakanomo neankna nehie.

## 14

### *Jopu'a vahe'mo'ma nefria zanku hu'nea naneke*

<sup>1</sup> Hagi a'nemo'zama vahe'ma kasezmantege'za osi'a kna nemani'za rama'a knazampina unefraze. <sup>2</sup> Trazamo amosre ahenteteno, ame huno friankna vahe'mota nehune. Huge zagemo hanatino remsa higeno amema'amo ame huno fore huteno, ame huno fanane hiankna nehune. <sup>3</sup> Hagi Kagra e'inahu vhete kavua antenka ketenka mani'nano? Kagra e'inahu vahe zamavarenka keaga huzmantenka refkoa hunezmantano? <sup>4</sup> Hagi agruma osu vhahera, iza azeri agru hugara hu'ne? I'o mago'mo'a anara osutfa hugahie. <sup>5</sup> Hagi manita vanuna kna Kagra antahinka kenka hu'nane. Tagra nama'a ika manita vugahune, Kagra antahinka kenka hu'nanankinka, ko e'inahu kna'afi manigahaze hunka hunte'nanankino, mago vahe'mo'a agra'ama manino'ma vania kna'a azeri za'zara huno omanigahie. <sup>6</sup> E'ina hu'negu amnerega kavua antenka negenka, natrege'na mani'ne'na zago eri'za eneri'za vahe'mo'zama nehzaza hu'na manisua kna'afina eri'zana e'neri'na musenkasea ha'neno.

<sup>7</sup> Na'ankure zafama antagima atrazage'za, ete hagegahune hu'za amuhara nehzanki'za kasefa agata hage'za azankunatmina omere emere hugahaze. <sup>8</sup> Hagi ana zafamofo arafu'namo'a ome ra huno osaparesingeno, agafa'amo'a hagege huno mopafina kasrigahie. <sup>9</sup> Hianagi mopafina tima me'nenigeno'a ana zafamo'a ete agata hageno, kasefa zafagna huno hageno marerigahie. <sup>10</sup> Hianagi vahe'ma frigeno'a hankaveamo'a vaganeregeno, atumparega ra asimu'ma anteteno nefrie. <sup>11</sup> Hagi hagerimpima zagma rentegeno'ma amuho huno amu'ma mareriankna nehuno, ra zagma regeno'ma tiramo'ma tanеankna huno, <sup>12</sup> vahe'mo'a frino manigasa hu'nenigeno monamo'a vagaregahie. <sup>13</sup> Hanki matipima fraki nantenka kagekani nantenankeno karimpa ahe'zamo'ma evunagateresiana knare hisine. Hianagi ete nagri'ma antahi namisana kna, mago kna huhamprinanto.

<sup>14</sup> Hagi fri'ne'nia vahe'mo'a ete otinora manigahifi? Hagi e'inahu zama me'enige'na, maraguzamat'i'na vanua knafina frizampinti'ma nazeri oti'nia zankura amuhara hu'na vugahue. <sup>15</sup> Hagi Kagra nagriku'ma kema hananke'na kenona hunegantenugenka, Kagraka'a kazanuti'ma tro'ma hunte'nana vahe'mo'nagura tusiza hunka antahintahia hugahane. <sup>16</sup> Na'ankure menina nagama rerakaure'nama kama vanoma nehuazana negananki, kumi'ma huazamofona ohamprio. <sup>17</sup> Hagi e'ina nehunka kefo navu'nava zana kupi eririnka anaki nentenka kumi'n'a refitesane. <sup>18</sup> Hianagi agonamo ankariseno eramianka nehigeno, mehimpinti havemo atamana huramiankna nehigeno, <sup>19</sup> tima hageno havea erino eviankna nehanigeno, tima hageno mopa erino viankna hunka vahe'mo'ma maniso'ema hunaku'ma amuha'ma nehiazana eri haviza nehane. <sup>20</sup> Kagra hankavetinka maka knafina zamazeri zamagatere vava nehanke'za fanane nehazagenka, zamavufaga eri ruzahu hutenka huzmantanke'za friza nevaze. <sup>21</sup> Hagi

ana vahe'mokizmi mofavreramimo'za zamagi me'nea vahe mani'nazanagi, zamagra e'i ana zana antahi'za ke'za osu'naze. Hagi zamazeri fenkamima atresniana antahi'za ke'za osugahaze. <sup>22</sup> Zamagrira zamavufagafintira zama negrige'za zamatagura nehu'za zamagra zamavufagura zavira netaze.

## 15

### *Elifasi'a agra'a antahi'za huama hu'nea naneke*

<sup>1</sup> Hagi anante Tema kumateti ne' Elifasi'a amanage huno Jopuna kenona hunte'ne, <sup>2</sup> Knare antahi'zane vahe'mo'a e'inara huno agafa'a omne kea ohantagege, zage hanati kazigati amuhonentake zaho'mo eno eme vazi zoreankna huno agi'arina osiresine. <sup>3</sup> Hagi knare antahi'zane vahe'mo'a nena'a omne kea huno ke hara regahifi? <sup>4</sup> Hianagi kagra Anumzamofoa korora huntenga, agesga hunka Agri agorga nomanine. <sup>5</sup> Hagi kumika'amo hugasmigenka nanekea nehane. Kagra knare nanekema hunka vahe'ma azeri savri'ma hu'areru knare hu'nane. <sup>6</sup> Nagra huhaviza hunogantoanki, kagri kagi'mo huhaviza hunegante. Kagri kagefu'namo maka havizanka'a huama hunegante. <sup>7</sup> Kagra kagesama antahi'nana, vahera fore osu'nege'na nagra esera fore hu'noe hunka nehampi? Hifi kagrama kagesama antahi'nana, agonaramina fore osu'nege'na nagra fore hutogeno, henka fore hu'ne hunka nehano? <sup>8</sup> Anumzamo'ma Agra'a keagama retroma hifina kagra mani'nampi? Hagi kagrade'za knare antahi'zana erinampi? <sup>9</sup> Hagi tagrama antahita ketama osu'nona zana, na'a tagaterenka nentahinka, tagrama antahini'ma osu'nona zana, na'a tagaterenka kagra antahira hu'nane? <sup>10</sup> Hagi tagri kazigama mani'naza ranra vahe'ma, efeke zamazoka'ma reana vahe'mo'za kagri negafana agatere'za za'zakna mani'naze. <sup>11</sup> Hagi knafima mani'nankeno Anumzamo'ma kazeri so'ema hiazamo'a, osi huno knareru huogantefi? Hagi akoheno'ma fru kema hugamia kemo'a, knareru huoganteo? <sup>12</sup> Na'amo higeno antahintahi kamo'a afe'arera nevigeno, kavumo'a ke so'ea nosie? <sup>13</sup> E'ina'ma nehigenka Anumzamofoa krimpa ahnenentenga, keonke keretira azeri havizana nehane? <sup>14</sup> Hagi ama mopafina magore huno agru vahera omani'neankino, ama mopafina fatgo vahera omanitfa hu'ne. <sup>15</sup> Hagi ko, Anumzamo'ma ankeru vahetmina antahi nozmic. Hagi monafi vahe'mo'enena Anumzamofo avurera agrua osu'naze. <sup>16</sup> Hagi mopafi vahe'mota agru osuta kumike vahe mani'nonankita, kefo avu'ava'ma hu'zankura tinku'ma ave'nesigeno'ma hiaza huno tusi taga'nete.

<sup>17</sup> Hagi Jopuga nagra kaveri hugahuanki, kama antahio. Nagrama ke'na anthi'nama hu'noa zamofona huama hu'na kasamigahue. <sup>18</sup> Knare antahi'zane vahe'mo'zama zamafahemofompinti'ma eri'naza antahintahia eri fraoki, eri ama' hazage'na nagra antahi'noe. <sup>19</sup> Hagi e'inahu antahi'zama eri'naza vahera zamagra mopa agafa vahe mani'naze. Hagi zamagra emani vahera omani'naze. <sup>20</sup> Hagi kefo avu'ava zama nehia vahe'mo'a, mika zupa atazampi manino nevie. <sup>21</sup> Ana nehuno azeri agogofe'zamofo agasasankea antahi vava nehuno, musema huno mani knafinenha ha' vahekura korora hu vava nehie. <sup>22</sup> Hagi agrama amentintima hiana, fegi'ma atirami'na hanizampima vanuana, bainati kazinteti nahe frigahaze huno korora nehie. <sup>23</sup> Hagi agra bretigura hakeno vano nehuno, igati bretia erigahueha huno agesa nentahie. Hanizamo'ma retrotra'ma huno'ma tava'oma'are'ma me'neana, ko antahino keno hu'ne. <sup>24</sup> Atazamo'ene hazenke zamo'ene azeri koro higeno, hate vunaku trotra nehia kini ne'mo nehiaza huno antahintahia

hakare nehie. <sup>25</sup> Na'ankure azana anakino mopa nemasagino, Hanaventake Anumzamofona huhaviza hunte'ne. <sup>26</sup> Hagi agra hanko azampina eri'neno Anumzamofona hara huntenaku agareno vu'ne. <sup>27</sup> Hanki afovamo'a avugosa eri anonevazigeno afafafina afovamo'a avite'neanagi, <sup>28</sup> agra haviza hu'nea kumapi nemanino, vahe omani zute noma pasru hu'zama hu'nea nompi manigahie. <sup>29</sup> Hanki fenozamine zago zmimo'enena zazatera omne fanane huge, keonke zama eri nafa'ama hu'zantmimo'a ruza-hera huno mopa atumparera vuno enora osugahie. <sup>30</sup> Hanki agra hanizampintira atreno ofregahie. Hagi zagemofo amuhomo ne'zana te hagege ne-hanigeno, Anumzamo'ma asimu'ma antesia zaho'mo, ahe fanane hugahie. <sup>31</sup> Hanki negi vahe'mo'zama nehzaza hu'za nena'a omne fenozantera za-mentintia osiho. Na'ankure e'inahu vahe'mo'a agra agu'agesa'ama omne zampintira mago mizana e'origahie. <sup>32</sup> Hanki e'inahu vahera kasefa vahe mani'neza ame hu'za frisageno, zagasefage ani'nane zafamo'ma hariri hiaza hu'za fanene hugahaze. <sup>33</sup> Hanki agra nena osu'negeno tagi'za tro hu'naza waini tinkna nehuno, olivi zafa amosaremo raga'a fore osu'negeno ame huno tagiramiankna hugahie. <sup>34</sup> Hanki Anumzamofo kema antahino am-age'ma onte vahe'mo'a mofavrea kase nontesigeno, havigema huno knare osu kankmunteti'ma zagoma erino feno vahe'ma mani'nesia vahe'mofo seli nomo'a teveregahie. <sup>35</sup> Na'ankure ana vahe'mo'a hazenke zamofo amu'ene huno kefo avu'ava'za kasenente. E'ina huno arimpafintira havigema huno vahe'ma revatgama hu'za erifore nehie.

## 16

### *Jopu'a rone'aramimofo nanekere ke nona hu'nea naneke*

<sup>1</sup> Hagi Jopu'a anante Elifasine ruga'amokizmia amanager huno kezmirera kenona hu'ne, <sup>2</sup> Rama'a zupa ama ana nanekea antahi'na oanagi, magore huno ama ana nanekema hazazamo'a naza osutfa nehigeta tamasunkura hunonantaze. <sup>3</sup> Hanki nazeri amuhoma hu nanekema nehzaza taganeta omanigahazo? Na'a nehigeta kea huvava huta nevaze? <sup>4</sup> Hanki nagrama huaza huta tamagrama knafima manizasina, tamagrama nehzaza hu'na kefintira tamazeri haviza nehu'na nageno rusine. <sup>5</sup> Hianagi nagrama huazama huta tamagra knafima manizasina, nagra tamazeri hanavetikea huneramugetma fru hutma manizasine.

<sup>6</sup> Hianagi nagra'ama naguvazi kazigati kema huampi, kema osu'ma man-uampi, ana avamentike knazanimo'a vagaore meno nevie. <sup>7</sup> Tamagerfa huno Anumzamo'a mika hanaven'i a erinetreno, naga'ni'a mika zamahe vaganere. <sup>8</sup> Ana nehuno nazeri havizantfa higeno, navufgamo'a zafe-rina'nire akamare'ne. E'ina'ma hia zama vahe'mo'zama nege'za kumi hu'nea zamofo nona'a knazana e'nerie hu'za hu'naze. <sup>9</sup> Anumzamo'a tusi arimpa ahenenanteno nagrira nazeri haviza hu'ne. Agra tusi rimpagu nehuno avera aninkreki nehuno, avua anteno nenageno nage raponeno nenage. <sup>10</sup> Hanki vahe'mo'za zamagira renagate nenamiza, nameragente rupro hunenamiza, huhaviza hunante'za eri mago hu'za ha'rarenante'haze. <sup>11</sup> Anumzamo'a kumi vahetmimofo zamazampi navrente'ne. Hanki Agra nazeriteno kefo avu'ava'ma nehaza vahe'mokizmi matevu zami'ne.

<sup>12</sup> Hanki korapara hakare'a zamo'a knare huno me'nege'na knare hu'na mani'noanagi, Anumzamo'a nanankente navazu huno nazeri taganavazi'ne. E'ina nehuno nazeri haviza hunaku hankogna huno nazeri

oti'ne. <sup>13</sup> Ana hige'za kevema nahe vahe'mo'za manigaginante'naze. E'ina hu'nazageno Anumzamo'a asunkura huonanteno kevea nenahegeno, navinompafi timo'a mopafina herafi neramie. <sup>14</sup> Hanki Anumzamo'a mago zupa natrege'na amnea omani'noanki, sondia vahe'mo'zama ha' vahe'ma nezmahazaza huno maka zupa naheva naheva huno tusi kano nenamie. <sup>15</sup> Hagi nagra nasunku nehu'na kopra beki kukena hati'na nentanina, navufga rama nehua zana atrogeno kugusopafi evurami'ne. <sup>16</sup> Hagi zavi'ma netogeno'a, navugosamo'a korankifa nehegeno, navumo'a finigu ahe'ne. <sup>17</sup> Hianagi nagra mago hazenkea osu'noanki, fatgo hu'na nunamuna nehue. <sup>18</sup> Hagi mopamoka korani'a refira otenegeno, nagrama knama enerua zankura koranimo'a krafagea huno vino. <sup>19</sup> Hagi meninenko, nagri'ma huama'ma huno tamage nehi'e huno'ma huama'ma hunantesia vhahera monafinka mani'ne. Nagri'ma nahokeno nanekema hu' vhahera manisga huno anagamu mani'ne. <sup>20</sup> Hagi aronenimo'za huhaviza hunenantazage'na Anumzanimofontega nunamuna hu'na zavira atevava nehue. <sup>21</sup> Hagi nagri'ma navenesiana Anumzane nagri amu'nompina mago vahe mani'neno nagri nagira erino Anumzanena nanekea haniegua nehue. <sup>22</sup> Na'ankure nagrama fri'nama fri vahe kumategama nevuna, ete omesua kafua osi'a me'ne.

## 17

### *Jopu'a Anumzamofonte mago'ene knazama'a huama hu'nea naneke*

<sup>1</sup> Hagi hanavenimo'a evuramigeno, knani'amo'a eme upa nehigeno, vahe'ma asente matimo'a navega anteno me'ne. <sup>2</sup> Hagi nagri'ma huhaviza hunenantaza vahe'mo'za nazeri kagi'za mani'ne'za, hunte'za ki'za zokago kea hunenantazage'na mani'ne'na nezmagoe. <sup>3</sup> Hagi nagrira hazenkeni'a omneneanki, Anumzamoka naza huo. Na'ankure mago vahe'mo'a otino naza hugara osu'ne. <sup>4</sup> Kagra antahintahizmia eriginke'za ama ana zana antahi amara nosaze. E'ina hu'negu zamatrege'za kefintira nazeri havizana hu'za nagateoreho. <sup>5</sup> Zamagra'a knare zanku nentahi'za, aronezmia zamazeri haviza nehaze. E'ina hu'negu mofavrezimia zamatrege'za, zamagaku nehu'za friho. <sup>6</sup> Hagi vahe amu'nompina Anumzamo'a nagrira nazeri kizazokago zankna higeno, vahe'mo'za navugosafina zamavetura ahenante'za vano nehaze. <sup>7</sup> Hanki zavi'ma atoa zamo higeno navumo'a zorege'na, nagra oza'ozza hu'na vahe amema'agna nehue. <sup>8</sup> Hagi fatgo zamavu'zmava'ma nehaza vahe'mo'za ama anazama nege'za, antri hu'za zamagogogu nehazage'za, hazenke'zmima omne vahe'mo'za Anumzamofoma amage'ma nontaza vhahera ha' renezmantaze. <sup>9</sup> Ana nehu'za fatgo zamavu'zmava'ma nehaza vahe'mo'za rukrahera osu, fatgo zamavu'zmavama nehaza vahe'mo'za zamavu'zmavara hu'za nevazageno, zamazampima pehena okamare maka zupa fatgo avu'ava'ma hu'zampina hage'za mareneri'za ome hankaveti'za nevaze. <sup>10</sup> Hianagi mika'mota atreta rukrahe huta echo, tamagri amu'nompina knare antahi'zane vhahera hakre'na eri forera osu'noe. <sup>11</sup> Nagrira knani'a vagaregeno amuha zani'a omene. Ana higeno nagesama antahi'na hugahuemu hu'na retromu hu'noa zamo' amare eme vagare. <sup>12</sup> Hagi ama vahe'mo'za ferukura eri rukrahe hu'za kenagere nehu'za, kenagekura ferure hu'za nehu'za, hanintirima hiazankura masa hu'ne hu'za nehaze. <sup>13</sup> Nagra fri vahe kumapima tafe'ma hu'na hanintirima hu'nefima masoresina knare hisine. Hanki hanimpima tafen'i'ama rutare'na masina masogeno'a, knare hisine. <sup>14</sup> Hagi fri vahe

matiku'ma hu'na kagra nenfage nehu'na, hagirafagu'ma hu'na, kagra nenerage hu'na huge, nensarogema huasina knare hisine. <sup>15</sup> Hagi amuha zani'a iga me'né? Iza amuha zani'a hakeno eri fore hugahie. <sup>16</sup> Hagi amuha zanim'o'a fri vahe kuma kafante uramigahifi? Tagranena kugusopafi uramigahuno?

## 18

### *Bildati'ma havige antahintahi Jopuma ami'nea naneke*

<sup>1</sup> Hagi anante Suha kumate ne' Bildati'a amanage hu'ne, <sup>2</sup> Jopuga zatake nanekea hunka vane. Kagrama tagriku'ma kenonama hurantesiema hanunka kagesa antahinka nanekea huo. <sup>3</sup> Hanki kagrama antahinana, tagra bulimakao afu mani'nompi? Hagi kagrama antahinana tagra kagri kavurera antahi'za omane vahe mani'none. <sup>4</sup> Hagi kagrira tusi krimpa ahenigenka kazokara vararegahananagi, e'i ana krimpa ahe'zamo'a, mopa eri rukrahera osugahie. Huge ana krimpa ahe'zamo'a, have agona erinkria osegahie. <sup>5</sup> Tamage huno kefo avu'ava'ma nehaze vahetmimofo tavi'mo'a asu hanigeno, akrukruma huno nerea tevemo'a ru'enena akrukru hunora ontigosie. <sup>6</sup> Hanki seli noma'afima neresia tavi'mo'a ome hanintiri nehanigeno, ana nompima hantinte'neni'a tavimo'a asu hugahie. <sup>7</sup> Hanki kefo avu'ava'ma Nehia vahe'mo'ma ko'ma hanave'a me'negeno'ma afete'ma agiama renakenerea zana osugahianki, tava'onte renakeregahie. Hanki ru vahe'ma zamazeri haviza hu' antahintahima retro'ma Nehia antahintahimo, agrira azeri haviza hugahie. <sup>8</sup> Kefo avu'ava'ma Nehia vhahera kukomo azenerigeno, agri'a agiamo avreno vigeno kerifina uneramie. <sup>9</sup> Hagi krifuma anaginte'naza zamo'a, agiamerumparera azeri'neno azeri antrako hugahie. <sup>10</sup> Hanki ana krifuma anaginte'neana zagaruruma hu'neama'a mopafi eri franeokino azeri'niam'a, kama vanoma nehifi kri-fua hunte'né. <sup>11</sup> Kefo avu'ava'ma Nehia vhahera korozamo azeri kagintegeno, hazenke zamo'a avaririno nevie. <sup>12</sup> Hagi menina zamagate'zamo higeno hanavezmi nomnegeno, hazenke zamo'a zamazeri havizá hunaku, tanafa'ma hanagu zamavega ante'ne. <sup>13</sup> Hagi krimo'a zamavufaga zamazeri haviza nehigeno, zamagia zamazamo'a kasrino nevie. <sup>14</sup> Kefo avu'ava zama nehaza vhahera nonkuma zamafintira ame huno zamazeri atresige'za, fri'za fri vahe'ma kegava hu'nea kini ne'mofo kvafi umanigahaze. <sup>15</sup> Hagi ana vahe'mofo nonkumara, Salfae nehaza tevenefa'ane haveramimo tefanane hugahie. <sup>16</sup> Hagi ana vahe'mo'za zafa rafu'namo'ma hagegema hiankna hu'za hagege nehanageno, zafa azanku'namo amagino hagege hiankna hu'za, amagi'za osapa regahaze. <sup>17</sup> Hanki ana vahetmina ru'enena zamagesa antahi ozmisage'za fri'za fanane hanageno, ama mopafintira zamagimo'a fanane hugahie. <sup>18</sup> Hagi masafintira zamahe kasopenige'za hanimpi umanigahaze. Hagi ama mopafintira zmahenati atrenige'za ru'enena ama mopafina omanigahaze. <sup>19</sup> Hagi ana mofavrea kaseozmantesage'za, zamagehe'ina kaseozmantegahaze. Huge zamagrama ko'ma nemaniza kumapina mago vhahera omanifta hugahie. <sup>20</sup> Hagi ana vahetaminte'ma fore'ma hiazankura zage fre kazigama nemaniza vahe'mo'za antri hu'za zamagogogu nehazageno, zage hanati kazigama nemaniza vahe'mo'za zamagranena antri nehu'za tusi'a zamagogogu nehaze. <sup>21</sup> Ana nehu'za amanage hugahaze, kefo avu'ava'ma Nehia vahe'mofo nonkuma'mo amanahura hie nehu'za, zamagra Anumzamofona zamefi'ma hunemiza vahetmimofo nonkumokino havizana hie, hu'za hugahaze.

## 19

### *Jopu'a Bildati kere ke nona hu'nea naneke*

<sup>1</sup> Hagi anante Jopu'a amanage huno Bildatina kenona hunte'ne, <sup>2</sup> Kagra zazate nata naminka ane. Kema hana kemo'a zazate nazeri havizantfa hie. <sup>3</sup> Hago kagra 10ni'a zupa kefintira nazeri haviza nehunka, kefinti'ma nazeri havizama hanazankura kagazegura osane. <sup>4</sup> Hagi nagrama tamagema hu'na kumi'ma hu'nesuana, kagri zana omne'neankinka e'inahu kea eme huonantegahane. <sup>5</sup> Kagrama kagesama antahinana, nagra knare hu'noe hunka kavufga rana nehunka, nagrama knafima ufroa zankura kumi hu'nea nona'a knazana e'nerie hunka nagrikura nehane. <sup>6</sup> Hianagi Anumzamo Agra'a nazeri haviza nehuno, kukompina navrenente. <sup>7</sup> Hanki naza hiho hu'na kezama atuana, mago vahe'mo'a ana kezanken'i a antahi onami'n'e. Naza hihogu'ma nanekea huanagi, mago vahe'mo'a antahinamino nagri kaziga anteno nazahu kea osu'ne. <sup>8</sup> Hagi kama vunaku'ma huankana Anumzamo maninkanirege'na kama vu'zankura huge'na, awoke'na mani'noe. Ana nehuno kana rehanintiri huno rehiza hige'na novue. <sup>9</sup> Hanki vahe'mo'zama ra nagima nemamizageno nasenire'ma kini fetori'ma anteanknama hu'neana, hagitenetreno nagaze erinami'n'e. <sup>10</sup> Hagi Agra maka kaziga hazenkea namin nevige'na ome haviza hugeno, arafu'n'a aga'ma zafa eri tasagima hiaza huno amuha zani'a eri atrene. <sup>11</sup> Ana nehuno ha' vahe'amofoma hiaza huno nagri'ma arimpa ahenante'nea zamo'a teve rukru hu'ne. <sup>12</sup> Hagi sondia vahe'amo'za eritru hu'za hahunante'naku kana nevarize. Ana nehu'za ana maka sondia vahe'amo'za seli noni'a avazagi kanegize.

<sup>13</sup> Anumzamo'a naga'n'i a zamavare afete'are nezmanteno, ronen'iaramina zamazeri ha' vahe'n'i a sege'za hara renenantaze. <sup>14</sup> Hagi naga'nimo'za nenatrazageno, navate aronenimo'za zamage'akaninanitaze. <sup>15</sup> Hagi nagri nompima nemaniza vahe'mo'zane, eri'za a'nemo'zanena kasefa vahe'ma zamagazanka hu'za nenagaze. Nagra zamagri zamavurera ruregati vahekna hue. <sup>16</sup> Hanki eri'za vahe'nigu'ma kema nehugen'o'a, ke'n'i a antahinonamie. E'na hige'na eri'za vahe'nimo'ma ke'nima antahinogura mago'ane kea hu agesa nehuanagi, eme onage'ne. <sup>17</sup> Nagi'ma aka hu'na kema nehugen evia himnagura a'nimofona amuti agesa higeno, tusi avresra hunenantegeno, nafuhe'za tusi zamavesra hunantaze. <sup>18</sup> Ne'one mofavreramimo'zanena tusi zamavaresra hunante'za huhaviza hunenantaze. Ana nehu'za kema huzmi'zama nehuge'za zamefi hunenamize. <sup>19</sup> Hanki navate aronenimo'za zamagote'za zamavesra hunenantazageno, nagrama navesi nezmantoa vahe'mo'za zamefi hunenamize. <sup>20</sup> Na'ankure navufgamo'a zaferinanire akamareg'e'na, fri' avamente e'noanagi ofri'noe. <sup>21</sup> Hanki aronenimota tamasunku hunanteho. Na'ankure Anumzamo'a Agra'a azanu knazana namin, nazeri haviza nehie. <sup>22</sup> Hagi tamagra nagafare Anumzamo'ma hiazana huta, nazeri havizana nehaze? Nahigeta nazeri haviza huvava huta nevaze? <sup>23</sup> Hagi nagrama nagesama antahuana, naneken'i a avontafepi krentege, mago'a zante'ma hanagati'za krentege, <sup>24</sup> havere'ma eri vakiki'za krentege'ma hazageno meno viresina knare hisine. <sup>25</sup> Hianagi nagra antahi'noe, nagu'vazino ete Navre Nera mani'neankino, magokna nagri kaziga eme anteno keagani'a naza huno eri fatgo hugahie. <sup>26</sup> Hanki fri'nugeno navufgamo'a kasrigahianagi, ama ana navufgare mani'n'e'na Anumzani'a kegahue. <sup>27</sup> Nagra navufinti Anumzanimofona kegahue.

Nagra navufinti'ma kesua zankura tusiza huno nave'nesie. <sup>28</sup> Hanki nagafare nazeri havizahu kea hunka, agra hu'nea kefo avu'ava'mo higeno hazenkefina nemanie hunka nehane. <sup>29</sup> Hianagi ana nanekemo'ma hazenkema avreno'ma kagrite'ma esia zankura korora nosane. Na'ankure bainati kazinteti kagrica hazenkea kaminigenka kagrama kenka antahinka banana, fatgo huno refko nehie hunka antahigahane.

## 20

### *Sofari'ma Jopu kere kenona hu'nea naneke*

<sup>1</sup> Hagi anante Na'ama kumateti ne' Sofari'a amanage huno Jopuna kenona hunte'ne, <sup>2</sup> Nanekema hana nanekemo'a, antahintahinifina knareria osutfa hige'na keka'arera ke nona'a hu'zahue. <sup>3</sup> Kagrama nazeri havizahu nanekema hana nanekemo'a, tusiza huno nagaze eri namige'na, nagu'reti hu'na keka'arera kenona hugante'za hue. <sup>4</sup> Hanki ese agafare'ma vahe'ma zamazeri fore hige'za ama mopafima mani'za e'za, amare'ma ehanati'naza vahete'ma fore hu'nea zana kagra ontahi'nano, <sup>5</sup> kefo zamavu'zmava'ma nehaza vahe'mo'za zazatera musena nosage'za, Anumzamofo avu'ava'ma nosaza vahe'mo'za musena nehzaganagi, zazatera menora novie. <sup>6</sup> Zamavufga rama hu'zazmimo'ene hihamu zmimo'a amename monarega marenerigeno, zamasenimo'a hampo avako hu'ne. <sup>7</sup> Hianagi rifama retrageno'ma fananema hiaza hu'za fanane hugahaze. Hanki zamage'za antahi'zama hu'naza vahe'mo'za anage hugahaze, zamagra iga mani'naze? hu'za hugahaze. <sup>8</sup> Zamagra ava'nafi vahekna hu'za hare'za fanane hugahaze. Hagi vahe'mo'za avanagnaza ke'naza zamo fanane hiankna hu'za ana vahe'mo'za fanane hugahaze. <sup>9</sup> Hanki ko'ma zamage'naza vahe'mo'za ru'enena nozmagesageno, naga'zmimozanena ozmagegahaze. <sup>10</sup> Hanki ana vahe'mofo mofavrezmimo'za, zamunte omne vahe'ma zamazama hanagura memea hugahaze. Na'ankure zmafahe'zama zamunte omne vahe'mokizmi fenoma musufama eri'naza zantamina, zamagra'a zamazampinti ete zami'za vano hugahaze. <sup>11</sup> Hihamu'a me'nenigeno kasefa vahe manigahianagi, ana hihamu hankave'ane frino kugusopafi masegahie.

<sup>12</sup> Zamagra kefo avu'ava'ma nehaza zamo'a tusi haga zamavesige'za tima'a aru'za nene'za, zamagefunaretira hune hane nehaze. <sup>13</sup> Ana kefo avu'ava zana notrazanki zamagipi haninkofite'za nemanize. <sup>14</sup> Hianagi ana ne'zamo'a aka ome hanigeno, zamarimpafina ha osifavemofo avu'ataga zankna ome hugahie. <sup>15</sup> E'ina hinke'za fenoma asagahu nakri'naza zana Anumzamo'a atre'nigeno zamarimpafina omnegasianki, amu'ma atitreaza huno eri atregahie. <sup>16</sup> Hanki ana vahe'mo'za osifa'vemofo avuatga zama'a anivazu hu'za nenesageno, ha' osifavemo zamaprisige'za frigahaze. <sup>17</sup> Ana hanige'za ru'enena olivi masavena nege, bulimakamofo amirine, tume rima'anena nene'za musena osugahaze. <sup>18</sup> Hanki eri'zama maraguzati'za eri'za erifore'ma hu'naza zantamina zamunte omne vahe zaminageno maraguzati'za eri'zama eri'naza zamo'a amnezankna hugahie. <sup>19</sup> Na'ankure zamagra zamunte omne vahetmina, rezmatga hu'za zamagra onki'naza none fenozmine eri'naze. <sup>20</sup> Zamagragukema antahi vahe'mo'za maka'zana ante'nazanagi, ru'enema maka'zama erisaza zankuke nehaze. Hanki rama'a zantmima antesaza zanku antahintahi hugahazanagi, ana zantamina ontegahaze. <sup>21</sup> Hagi ne'zama neneno'a magore huno negenora notreankino, fenozamimo'a zazatera omneno haviza hugahie. <sup>22</sup> Hanki

rama'a fenoza antegahazanagi, hazenkefi ufre'za knazampina maniza vugahaze. <sup>23</sup> Hanki e'inahukna vhahera Anumzamo'a arimpafina hazenkeza eri avitenenteno tusi arimpa ahenteno hazenkea amigahie. <sup>24</sup> Hanki ainireti'ma tro'ma hu'nesaza ha'zanku koro hu'za fregahazanagi, bronsire kevenuti zamahegahaze. <sup>25</sup> Hanki ana kevenu'ma ahe taponesigeno amagenafinti'ma ruraponenkeno'a, keve agonare'ma koramo'ma hanigeno kesuno'a tusi agogogu hugahie. <sup>26</sup> Hanki maka zago fenozmia hanimpi fanene hanigeno, mago'ama mesia fenozmine seli nozmi'nena tusi'a tevemo hagana hagana huno te fanene hugahie. <sup>27</sup> Monamo'a kefozazmia eriamma nehinkeno, mopamo'a maka zama hu'naza zana huama huzmantegahie. <sup>28</sup> Hanki ana vahe'mokizmi none fenozazminera tihageno erino nevanigeno, Anumzamofo arimpae zamo'a tihageankna huno zamavareno vugahie. <sup>29</sup> Anumzamo'a kefo avu'ava'ma nehaza vhahera e'ina huno zamahe fanane hugahie. Hagi kefo avu'ava'ma nehaza vahetmimofo mizama Anumzamo'ma havi miza erigahazema huno'ma huhampri zmante'nea mizana e'ina hu'za erigahaze.

## 21

### *Jopu'a Sofa ke nona hu'nea naneke*

<sup>1</sup> Hagi anante Jopu'a kenona amanage hu'ne, <sup>2</sup> Kagesa ante so'e hu'enka nagrama hanuankea antahio. Hagi kagesama antenka antahi'nana zamo nagrira naza hugahie. <sup>3</sup> Akohenka mani'enka nagrama hanua nanekeaa antahitenka, henka kagra kiza zokago kea hunantegahane. <sup>4</sup> Nagra Anumzamofontega narimpa haviza hu'zana eri ama nehuanki, vahetega narimpa haviza hu'zana eri ama nosue. E'i ana agafare narimpa fru hu'na nomane. <sup>5</sup> Hanki nagrira nenageta antri huta tamazana tamagipi anteta anikaafriho. <sup>6</sup> Hagi kema huankemofo nagesa nentahi'na tusi koro nehugen, nahirahi nere. <sup>7</sup> Nagafare kefo avu'ava'ma nehaza vahe'mo'za maka zampina knarera nehu'za, mani'za vu'za ozafa omere'za himamu'ane vhahera maniza feno vhahera nemanize? <sup>8</sup> Zamagra ana mani'ne'za negazageno mofavrezmimo'za ra hu'za nomani'zana trohu'za nemanize. Ana nehu'za mofavrea kasentazageno kase anante ananteria hu'za nevaze. <sup>9</sup> Hagi ana vahe'mo'za nonkumazmifima mani'zana mago'zankura korora osu nemanzageno, Anumzamo'enena knazana nozmige'za, knare hu'za nemanize. <sup>10</sup> Hanki ve bulimakao afutzmimo'a mofavrea eri fore huvava nehigeno, a' bulimakao afutzmimo'za anentara kase kuntrara nosaze. <sup>11</sup> Hanki mofavrezmimo'za sipisipi afumo'za kevure kevure vanoma nehazaza hu'za magopi kiza zokagora hu'za nemanizageno, neonse mofavreramimo'za musenkaseahu'za avoa hage'za vano nehaze. <sup>12</sup> Zamagra tambarini nehe'za hapue nehaza zavenane nehe'za zagamera nehaze. Ana nehu'za konkena nere'za, musenkasena hu'naze. <sup>13</sup> Nomani'zazmifina knare hu'za manime nevu'za zamarimpa frune fri'za nevaze.

<sup>14</sup> Hagi havi avu'ava'ma nehaza vahe'mo'za Anumzamofonkura amanage hu'za nehaze, Kagri kavukva'ma huzankura, tavesra nehianki taternka vuo hu'za nehaze. <sup>15</sup> Marerirfa Anumza nera Agra iza mani'enigeta ke'a antahigahune. Hanki Agritegama nunumuma hanunana, Agra na'a knare zana hurantegahie? <sup>16</sup> Hagi zamagrama antahi'zana tagra'a han-kavere maka zana nehune hu'za zamagesa nentahize. Hianagi e'inahu antahintahima havi vahe'mo'zama namiza antahi'zana amagera onte'na, afete manigahue. <sup>17</sup> Hagi kefo avu'ava'ma nehaza vhahera Anumzamo'a

ame hunora zamahe ofri zamatrege'za mani'ne'za ozafare'za nefrize. Hagi zamagra mago hazenke e'ori amne nemanize. Hanki Anumzamo'a ana kefo vahe'mokizmigura arimpa ahezmantero knazana nozamie. <sup>18</sup> Hagi zamagrira zaho'mo'ma hagage tra'zama erianknara huge, hanave za-homo witi hona eri hareno vianknara nosio? <sup>19</sup> Hagi tamagra huta, Anumzamo kumima nehaza vahe'mokizmi mofavreramina knazana za-migahie huta nehaze. Hianagi nagrama nehuana kumi'ma hu'n'nia vahe knazana Anumzamo zami'nige'za fatgoma huno refkoma hania zana antahi ani hanaze hu'na nentahue. <sup>20</sup> Ana vahetamina zamatrenke'za Hihamu'anee Anumzamo'ma zamazeri havizama hania zana zamagra za-mavufinti nege'za, arimpama ahezmanteria zana zamagra zamavate keho. <sup>21</sup> Na'ankure zamagrama fri'zama vanu'za, naga'zmire'ma fore'ma hania zankura zamagesa ontahigahaze.

<sup>22</sup> Hianagi mago vahe'mo'a Anumzamofona rempi humigara osu'ne. Na'ankure Agra marerirfa vahe'enena refko hunezmante. <sup>23</sup> Hanki mago'a vahe'mo'za miko zama nehaza zamo'a knare nehige'za muse hu'za mani'neza nefrize. <sup>24</sup> Hagi mago'a vahe'mofona zamavufagamo'a knare hige'za hankave vahe mani'ne'za nefrize. <sup>25</sup> Hagi mago'a vhahera zamunte omanege'za nomani'za zmimo'a amuho hige'za knare osu nomani'zampi mani'ne'za nefrize. <sup>26</sup> Hianagi knare nomani'zampima mani'neno fria vahe'e, amunte omne nomani'zante'ma mani'neno fria vahe'enena mago zahu huno mopafi asezmantegeno hagirafamo zamavufaga nene. <sup>27</sup> Hanki kagrama nentahina antahintahia nagra antahi'noe. Nagri'ma nazeri haviza hunaku'ma oku'ama retro'ma nehana antahintahia nagra antahi'noe. <sup>28</sup> Na'ankure kagra hunka, inantega kefo avu'ava'ma nehaza vahe'ma nemaniza seli nona me'ne? hunka nehane. <sup>29</sup> Hianagi karankama vanoma nehaza vahe zamantahigege'za tamage nanekea kasamihoo. <sup>30</sup> Kefo zamavu'zmava'ma nehaza veamo'za hazenke zama ne-ege'za hazenke e'norizanki amne nemanize. <sup>31</sup> Hagi mago vahe'mo'a amatera huhaviza huzmanteno havi avu'ava'zama nehaza zantera nona hunozmante. <sup>32</sup> Hagi ana vahe'ma frizage'zama eri'za ome asezmantage'za sondia vahe'mo'za matimati zimirera kegava hute'za nemanize. <sup>33</sup> Hagi ana vahe'ma asentenaku'ma eri'za nevazageno'a, tusi'a vahekrfam'o'za zamavariri'za matitega nevaze. Rama'a vahe'mo'za antahinemi'za negazageno vogisi'amo'a kerifina uneramigeno, mopa ragana atrazageno uneramie. <sup>34</sup> Hanki inankna huno kagesama ontahi kema nehana kemo'a naza huno nazeri knareru hugahie? Mika nanekema hana kemo'a amnezankna hie!

## 22

### *Jopuma hu'nea kere Elifasi'a nona huno agra'a antahintahi asami'nea nanake*

<sup>1</sup> Hanki anante Temani kumateti ne' Elifasi'a amanage huno Jopuna kenona hunte'ne. <sup>2</sup> Magore huno ama mopafi vahe'mo'a Anumzamofona aza osugahie. Ana nehanigeno, knare antahi'zane vahe'mo'a agra'a aza hugahianagi, Anumzamofona aza osugahie. <sup>3</sup> Kagrama fatgo kavukva'ma hanana zamo'a Hankavenentake Anumzamofo avurera amne zankna ne-hanigeno, knare kavukva'ma hnana zamo'a, Anumzamofona aza osugahie. <sup>4</sup> Hagi kagrama Anumzamofo agorga nemaninka, mono'ma hunen-tanana amanahu knazana atregeno kazeri havizana nehuno keaga hugan-

teresino? <sup>5</sup> I'o kagra rama'a kumi hunka nevankeno kumikamo'a hihi huno mareri'nea agafare Anumzamo'a keaga hunegante. <sup>6</sup> Hagi roneka'amo'za kagripinti'ma zagoma nofi hunaku'ma hazagenka, zagoni'ma eme nemita ete erisaze nehunka kukena'zamia erintanke'za zamavufaga zamavapako vu'naze. <sup>7</sup> Ana nehunka tinku'ma nehaza vahera tina nozaminka, zamagaku'ma nehaza vahera ne'zana ozami'nane. <sup>8</sup> Kagrama kagesa antahi'nana, hankave vahe'mo'zage'za mopra eri nafa'a nehazage'za, mopama eriga vahe'mo'zage energize hunka kagesa nentahine. <sup>9</sup> Kento a'nanemo'zama zamazama hananegu'ma kagrite'ma ne-azana zamatranke'za amne nevazagenka, megusa mofavre nagazmama zamazeri haviza nehane. <sup>10</sup> E'ina hu'negu menina hazenke zamo'a kukomo hiaza huno, maka asoparega kazeri kagigenka mani'nankeno antri hanaza huno koro'zamo'a kagrite ne-e. <sup>11</sup> E'ina agafare hanizamo'a kavua rehani higenka nonkankeno, ti hageno refiteaza huno knazamo'a, kagrira rufitenegeante.

<sup>12</sup> Hianagi menina Jopuga antahio, Anumzana rankrerfa hu'nea Anumzankino amunagamuma me'nea hanafitamina zamagatereno amenagame monafi nemanie. <sup>13</sup> Hianagi kagra amanage hunka nehane, nagrama nehua navu'nava zana inankna huno Anumzamo'a keno antahino nehie? Agra haninenteake hampompi mani'neankino inankna huno tage amara huno nerageno, refkora huno tagegahie? <sup>14</sup> Tapa hampomo Anumzamofo avurera anteso higeno norage. Ana nehigeno agra monamofona agatereno onaga'a vano nehuno norage. <sup>15</sup> Hanki Jopuga antahio, ko'ma kumi vahe'mo'zama hu'naza zamavu'zmava nehunka zamage ante'za nehampi? <sup>16</sup> Nozamima azeri ot'i'zama ki'naza tra'ma timo hageno erino viankna huno ana kumi'ma nehaza vahera tavava ozafa ore'ne'za kasefa vahe mani'neza frigahaze. <sup>17</sup> Anage nehu'za Hankavenenteake Anumzamo'a na'a hurantegahie. Tatarenka vuo hu'za nehaze. <sup>18</sup> Anage nehazanagi e'i ana Anumzamoke nozamifina knare'hare fenozana eri antevi tezmante'ne. E'ina hu'negu kefo zamavu'zamava'ma nehaza vahe'mo'zama nentahi'za antahintahia nagra ovaririgahue. <sup>19</sup> Kefo avu'ava zama nehaza vahe'ma Anumzamo'ma zamazeri havizama hige'zama, fatgo avu'ava'zama nehaza vahe'mo'za nezamage'za muse nehaze. Ana nehanage'za ke'zami omne vahe'mo'zama nezamage'za zamagiza regahaze. <sup>20</sup> Ana nehu'za, anage hugahaze, ha' vahetimofona tamagerfa hu'za zamazeri haviza nehazageno, tevemo fenozamia tefanane hie hu'za hugahaze.

<sup>21</sup> Hagi Jopuga menina Anumzamofonte kagraka'a anteraminka nemalinka, kasunku hunka Agrane kea eri fatgo nehunka krimpa fru hunka manio. E'inama hanankeno'a, nomani zanka'afina maka zamo'a knare hugahie. <sup>22</sup> Amama kavumar'o'ma antekema kasamuana antahiso'e nehunka, kagu'afi erintegeno meno. <sup>23</sup> Hanki kagrama ete rukrahe hunka Hankavenenteake Anumzamofonte'ma esnankeno'a, maka knazanka'a eri netreno ete nomani'zanka'a eri so'e hugantegahie. E'ina hu'negu menina nomanizankafima kefo kavukva zama me'neniana eri atro. <sup>24</sup> Ana nehunka goligu'ma kavesikavesi'ma nehana zana netrenka, knare zantfama hu'nea golima Ofiri mopafinti'ma eri'nana golia atregeno havemoke'ma hu'nea tinkagomupi vino. <sup>25</sup> Ana nehunka atregeno Hankavenenteake Anumzamo goli ka'agnara huno nemanino, knare zantfama hu'nea silvagnara huno manino. <sup>26</sup> Anama hanigenka kagra Hankavenenteake Anumzamofona tusi muse hunentenka, kesga hunka Anumzamofona an-

tahimigahane. <sup>27</sup> Kagra Anumzamofontega nunamuna hanankeno, nuna-munka'a antahi kamigahie. Ana nehanigenka kagrama huvempama hu'nana keka'a amage antegahane. <sup>28</sup> Kagrama nazano hunaku'ma kagesama nentahinka anaazama tro'ma hnana zamo'a knare zanke nehanigeno, kama vanana kampina tavi'mo remsa huganteno vugahie. <sup>29</sup> Hanki mago'a vahe'mo'zama knafima mani'nesnagenka kagrama hunka, zamaza huo hunkama hanankeno'a, Anumzamo'a zamagu'vazigahie. <sup>30</sup> Kumi'ma ne-haza vahe'enena Anumzamo'a zamagu vazigahie. Na'ankure kagrama Anumzamofo avure'ma agruma hunka mani'nana zanku huno zamagura vazigahie.

## 23

### *Jopu'ma Elifasi kere'ma kenona hu'nea naneke*

<sup>1</sup> Hanki Jopu'a amanage huno kenona hu'ne. <sup>2</sup> Nagrira menina mani'zanimo'a amuho nehige'na keha regahuanki'na, rentarako hune'na karagira orugahue. <sup>3</sup> Anumzamo'ma mani'nea kuma'ma nagrama ke'noresina, Agrama mani'nea kumapi menina vusine. <sup>4</sup> Anama hute'na kegagani'a Agri avure eri'na vute'na, nazama huno keagani'ma refko huno antahinogura kehara ome husine. <sup>5</sup> Anama hute'na keaganire'ma nonama huno keagama nasamisnia nanekea antahi ama' huresine. <sup>6</sup> Anumzamo'a Agra tusi'a hankave'areti hara renanteno, nazeri havizana hugahifi? I'o anara osu nagri nanekerera agesa ante'neno antahi so'e hisine. <sup>7</sup> Hagi nagrama fatgo vahe'ma mani'nenugeno refko huno nenageno, Agrama hazenkea omane'ne hanige'na mani vava hu'na vusine. <sup>8</sup> Zage hanati kaziga hake'na vuanagi onke'noe. Zage fre kaziga hake'na vuanagi Anumzamofona onke'noe. <sup>9</sup> Noti kaziga hake'na vu'noanagi, Anumzamo'a fraki'nege'na onke'noe. Sauti kaziga hake'na vu'noanagi navumo'a onketfa hu'ne. <sup>10</sup> Hianagi nagrama kama vanoma huana, nageno antahino hu'ne. Ana hu'neankino renaheno'ma kesanige'na, tevefima golima krazageno avusesema hiaza hugahue. <sup>11</sup> Na'ankure maka zupa nagra Anumzamofo kante nagia rente'na vano nehu'na, Agri avu'ava'za amage nente'na, ru kantera vugantigma nosue. <sup>12</sup> Anumzamofo kasegea namefira huomi'na amage ante'noe. Ana nehu'na ne'zama hiaza hu'na naneke'a erintogeno nagu'afi me'ne. <sup>13</sup> Hianagi Agrake Anumzana mani'neankino nazano hunaku'ma haniazana amne hanigeno, mago vahe'mo'a retro'ma hania antahintahi'a eri otregahie. <sup>14</sup> Ana hu'neankino nazano nagrite'ma tro hugahue huno antahintahima hu'nesniazana amne hugahie. Na'ankure nagri'ma hunantesiazana rama'a zantami retro hunte'neankino, Agrake keno antahino hu'ne. <sup>15</sup> Ana hu'neanki'na menina Agri avurera tusi nahirahi nerege'na, Agri hankavegu'ma nagesama nentahi'na tusi koro nehue. <sup>16</sup> Anumzamo'a maka hankaven'i'a eri netreno, Hankavenentake Anumzamo'a Agra nazeri koro nagesa hu'ne. <sup>17</sup> Hanizamo eme nazeri kagine'na hanizampi havizantfa hu'na mani'noanagi, kea tagane'na omanigahue.

## 24

### *Jopu'ma Anumzamofo antahige'nea naneke*

<sup>1</sup> Nahigeno Hanavenentake Anumzamo'a keagama refko hukna huhampri onte'nesniane? Ana hu'nege'za Agri'ma amage'manentaza vahe'mo'za ana knama kesagura amniefina avega ante'za mani'nazageno

amne zanknara nehie? <sup>2</sup> Kefo avu'ava'zama nehaza vahe'mo'za havige hu'za vahe mopa hanarenakura, kanagi kana eri kasi ogantu'a nente'za, sipisipi afutamina musufase'za zamagra afu kevufi eri havia nehaze. <sup>3</sup> Megusa mofavreramina rezmatga hu'za donki afuzamia nevre'za, nofi'ma hu'nazana vahe'mo'za eme neramita erisaze nehu'za, kento a'nemokizmi bulimakao afura avre'za nevaze. <sup>4</sup> Ana nehu'za zamunte omane vhahera kama nevazafintira amanefi zamaretufe netraze. Ana hazage'za zamunte omne ana vahe'mokizmi zamagoro hu'za ome fra'nekize. <sup>5</sup> Ka'ma kokampi afi donki afu'mo hiazza hu'za, zamunte omane vahe'mo'za makazupa ne'zankura hakevava nehu'za, mofavre'zamimofoma zamisaza ne'zanku'enena nehakaze. <sup>6</sup> Vahe hozafinti ne'zana ome nehamre'za, havi avu'ava'ma nehaza vahe'mokizmi waini hozafinti waini raga neragi'za, mago'ama atre'nazama'a ome tagi vagare'naze. <sup>7</sup> Hagi zamavufagarera kukena omnege'za zasiku nehu'za kenagera mase'za vano nehu'za, mago'zana erigonofize. <sup>8</sup> Agonaregati'ma runo eanko'mo eme zamahe nefarige'za, noma manisaza zanku huge'za havegampi mani'za vano nehaze. <sup>9</sup> Kento a'nemokizmi zamasumpinti megusa mofavre nagara, eme zamavaresga hu'za nevu'za, nofi'ma hu'nazana ome paneseta ete ome zamavareta echo nehaze. <sup>10</sup> Hagi zamunte omne kukena zamavatera omnenege'za zamavapako vano nehu'za, vu'za hozafintira vahe ne'zana ome hamare'za eri nezamizanagi, zamagra'a zamagaku nehaze. <sup>11</sup> Zamagra olivimofo raga'an, wainimofo raga'a regatiti hu'za tima'a e'nerizanagi, magore hu'za tima'a ne'za onkazageno zmanankemo'a tusiza huno hagage nehie. <sup>12</sup> Frinaku'ma karagi'ma neraza vahe'mokizmi zamageru'mo ran kumapintira ome ra hu'ne. Ana nehazage'za zamahe kuzafa'ma ante'naza vahe'mo'za zamazama hanaza vaheku zavira netaze. Hianagi Anumzamo'a zavi'ma netazazana antahizamino rukrahera huno nozamage.

<sup>13</sup> Kefo zamavu zamava'ma nehaza vahe'mo'za masazamofona ha'renente'za, masazamofo kante'ma vu'zankura zamavesra nehige'za afete nemanize. <sup>14</sup> Nanterama zahufama masama osu'negeno'a, vahe'ma zamahe fri vahe'mo'za oti'za vu'za zamunte omne vahe'ene keonke zanku'ma atupa'ma nehaza vhahera ome zamahe nefri'za, musufa vahekna hu'za kenagera vano nehu'za ke'onke'zana musufa nesaze. <sup>15</sup> Vere a'nanema zamazeri savari'ma nehaza vahe'mo'za avega ante'nazageno, zagemo'a tami nefarege'za amanage nehaze. Tavugosarera refite'nesunke'za vahe'mo'za oragegahaze nehu'za, tavaravereti zamavugosarera ana'nekize. <sup>16</sup> Kumazafa vahe'mo'za kenage vano nehu'za, vahe'mokizmi nona anafe hu'za kumazafa nesaze. Ana nehu'za ferura zamavu nemase'za, masama hiama'a ke'za antahi'za nosaze. <sup>17</sup> Kenage'ma hanima kintrakoma hiana e'i zamagridera nantera nese. Ana nehige'za kenage'ma amanovazi'zama fore'ma huno vahe'ma zamazeri koro'ma nehia zana ke'za antahi'za hu'nazanki'za korora nosaze.

<sup>18</sup> Hianagi timofo agremo'ma ame huno vagareaza hu'za fanane nehaze. Maka zama zamagrama ante'naza zamo'a kazusifi mesnige'za, zamagra'a ante'naza waini hozafinagi novaze. <sup>19</sup> Zagemo'ma aisima te ze'zema higeno kekokako'ma hu'nea mopafima ufreankna hu'za kumi'ma nehaza vhahera fri vahe kuma'mo zamazeri nakrinige'za frigahaze. <sup>20</sup> Ana hina kasema zamante'naza vhahera anta'zmimo'za antahi ozamigahaze. Ana nehanageno zamavufagamo'a haganentake hanige'za kanintamimo'za nesage'za, vahe'mo'za mago'enena antahi ozamigahaze. Kumi'ma nehaza vahe'mo'za zahoko tuno zafa eri hantagiankna hu'za tam'i'za masega-

haze. <sup>21</sup> Kumi'ma nehaza vahe'mo'za mofavrema kase onte'naza narnavo a'nea rezmatga hu'za keonke'zazmia eneri'za, kento a'nenenema zamazama hu'zankura zamavesra nehaze. <sup>22</sup> Hianagi zago vahe'ma mani'za vahe'mo'za ra zamagima e'neri'za vahera Anumzamo'a Agra'a han-kave'reti zamazeri netre. Ana vahe'mo'za maka zampina knare hu'za vugahazanagi, henka'a ome haviza hugahaze. <sup>23</sup> Anumzamo'a zamatreningo mago zamo'a hazenkea ozamisnige'za, knare hu'za manigahaze. Hianagi Anumzamo'a maka'zama hazazampina avua anteno nezamage. <sup>24</sup> Hagi zamagra atupa knafi ra zamagia eri'za mani so'e hute'za, ruga'a vahe'ma fri'za nevazaza hu'za frigahaze. Ana hugahazankino witi ragamo'ma afu re'nege'zama kazinteti rukafari zankna hu'za frigahaze. <sup>25</sup> Nagrama havigema nehanugen'o, iza nagrikura huno havige nehane hunora nazeri kori'sigeno, nagri nanekemo'a amne zanknara hugahie?

## 25

### *Bildati'ma nampa 3mofonte'ma Jopu kenona hunte'nea naneke*

<sup>1</sup> Hagi anante Suha mopareti ne' Bildati'a amanage huno Jopuna kenona hunte'ne, <sup>2</sup> Anumzamo'a hankavenentake hu'neanki'za maka vahe'mo'za Agrikuke korora hugahaze. Ana hu'neankino maka zama monafima me'nea zantamina Agrake kegava hu'nege'za Agri avesi amage ante'za, mani fru hu'za nemanize. <sup>3</sup> Iza amuhara hu'nesnia vahe'mo monafima mani'naza sondia vahe'a hamparigara hu'ne? Hagi ama mopafintira ina vahe'moka hunka nagritera Agri masamo'a remsa hunonante hunka hugahane? <sup>4</sup> Inankna huno mopafi vahe'mo'za Anumzamofo avurera fatgoa huno nemanino, agrua huno manigahie? <sup>5</sup> Ikamo'ene hanafimo'za remsa hufa hu'nazanagi, Anumzamofo avurera ana masamo'a rumsa osu'ne. <sup>6</sup> Tagra mopafi vahe'mota kaninkna huta hagirafagna hu'none.

## 26

### *Bildati kere'ma Jopu'ma kenona hunte'nea naneke*

<sup>1</sup> Hagi anante Bildati'ma hia nanekerera Jopu'a amanage huno kenona hunte'ne, <sup>2</sup> Inankna hunka hankavezamima omne'nea vahera zamaza ne-hunka, zamagra'ama zamaza osuga vahera zamagura vazi'nane. <sup>3</sup> Kagra inankna hunka knare antahi'zama omne'nea vahe'mofona antahintahia neminka, oku'ma me'nea knare antahi'zanka'a erinte ama hane? <sup>4</sup> Ama ana knare antahintahи zanka'a igati eri'nane? Ana hu'nankeno iza avamu'mo kagri kagipina huvazino amá'na nanekea huamara nehie?

### *Anumzamofo so'e zama'ama Jopu'ma erinte ama hu'nea naneke*

<sup>5</sup> Fri'naza vahe'mokizmi hankro'ma hagerimofo agu'afima nemaniza naga'mo'za Anumzamofonkura tusi koro nehazageno zamahirahi nere. <sup>6</sup> Fri vahe kumapima nemaniza vahe'mo'za Anumzamofo avurera frara oki amate mani'naze. Vahe'ma zamazeri havizama nehia kumapima me'nea zantamina Anumzamo'ma kenaku'ma hiana, mago zamo'a avurera anteso osu amate me'negeno nege. <sup>7</sup> Hanki noti kaziga me'nea mona anami kankamumpi tro huntogeno me'negeno, Anumzamo'a anami kankamumpi tro huntogeno mago'zamo'a azeoriaza me'ne. <sup>8</sup> Hanintirima huno antarakoma hu'nea hampompi Anumzamo'a ko tina eri ano vazintegeno me'ne. Hianagi knagura huno ana timo'a rufuragu vazinora evunoramie. <sup>9</sup> Ana nehuno hamponteti kini tra'a erirefitegeta nonkone. <sup>10</sup> Hagerimofo agofetura Anumzamo'a mago avame'zanteti isagana ante'ne. Ana hu'neankino ana

isagamo hanine masanena refko hunezanante. <sup>11</sup> Anumzamo'ma monamofoma azeri konerigeno'a, monama tro huno regarinte'nea tra'mo'a torevare nehie. <sup>12</sup> Anumzamo'a hankave'areti higeno avunemanentea hagerimo'a, ome rurava nehe. Agra knare antahi'zanteti, hagerimofo agu'affima Rehapu'e nehzageno'ma nemania afi'zaga rehapanetie. <sup>13</sup> Anumzamo'ma asimu'ma antegeno'a, anamima me'nea monamo'a rumsa hutfaza nehie. Ana nehuno hagerimpima mani'neno vanoma nehia osifavea Agra azanuti ahe fri'ne. <sup>14</sup> Ama ana maka zama fore'ma hiana, Anumzamo'a hankave'areti tro'ma hu'nea zamofona, amne agema'a fore higeta kone. Hagi Agra menina sumi ke huno kea nehigeta nentahunanki, monagefinti'ma rankema huno'ma keagama hanigeta, inankna huta tagra antahi amara hugahune?

## 27

### *Jopu'a fatgo navu'nava hu'noe huno hu'nea naneke*

<sup>1</sup> Jopu'a mago'ene keaga'a amanage huno hu'ne, <sup>2</sup> tamagerfa huanki kasefa'ma huno mani'nea Hankavenentake Anumzamo'a, kankamuna on-amino knare avu'avara hunonanten, natrege'na tusi natazampi manue. <sup>3</sup> Menima kasefa'ma hu'na mani'ne'nama nasimu'ma nentoana, Anumzamo nasimura namige'na mani'noe. <sup>4</sup> Nagra havige nanekea nosu'na, havigea hu'na vhahera revatga osugahue. <sup>5</sup> Hagi tamagrama nehaza nanekegura, tamage nehaze hu'na osugahue. Ana nehu'na kefo avu'ava zana osu'na, mani fatgo hu'na mani'nena frigahue. <sup>6</sup> Nagra fatgo navu'nava'ma nehua zana kegava hu'ne'na, ana avamenteke mani'na vugahue. Nagrama kasefa'ma hu'na mani'na vanuanknafina, kumi hu'noe hu'na antahintahi hakarea osugahue. <sup>7</sup> Nagri'ma ha'ma renenantaza vhahera, kefo avu'ava'zama nehaza vahe'ma Anumzamo'ma zamazeri havizama nehiaza huno zamazeri haviza nehuno, nagri'ma zamefi hunenamiza vhahera, kumi'ma nehaza vahe'ma zamazeri havizama nehiaza huno zamazeri haviza hugahie. <sup>8</sup> Hagi Anumzamofoma amage'ma nontaza vhahera, amuha zazamia omanegahie. Ana hanigeno Anumzamo'a ana vhahera zamahe fananehu vagaregahie. <sup>9</sup> Ana vahe'mofo avate'ma knazamo'ma esanigeno zavi'ma atesniana, Anumzamo'a antahi omigahifi? <sup>10</sup> E'i ana Hankavenentake Anumzamofona musena hunonte'za, Anumzamofontega nunamuna osugahaze. <sup>11</sup> Nagra menima rempima huramisuana, mago'zana eri frara okighauhanki, Anumzamofo hankave'a erinte ama hu'na tamasamigahue. <sup>12</sup> Ana hankave'a tamagra'a ko ke'naze. Hianagi na'a higeta amunte omane nanekea hantageta eri hakarea nehaze?

<sup>13</sup> Kefo avu'ava'zama nehu'za, vahe'ma zamazeri havizama nehaza vhahera, Hankavenentake Anumzamo'a miza zamia huhampri zamante'neanki'za erigahaze. <sup>14</sup> Ana rama'a mofavrea antegahazanagi, ana mofavre naga'zmia hapi zamahege, zamagaku hu'za frige hugahaze. <sup>15</sup> Hagi mago'ama ofri'ma manisaza vhahera, ruzahu ruzahu krimo zamahe frisnige'za, kento a'nane nagazmimo'za ana vahekura zamasunkura hu'za zavira otegahaze. <sup>16</sup> Kefo zamavu'zamava'ma nehaza vahe'mo'za rama'a zago eri atru nehu'za, kukenanena rama'a eri tru hanageno hihi huno marerigahianagi, <sup>17</sup> fatgo zamavu'zmava'ma nehaza vahe'mo'za ana kukena eri nehankresnag'e'za, ke'zami omne vahe'mo'za ana vahe'mokizmi zagoa refko hu'za erigahaze. <sup>18</sup> Kefo zamavu'zmava'ma nehaza vahe'mo'zama noma kisazana, pamponkemofo nomo'ma

hiaza huno hankave'a omane no negi'za, mani'ne'za hozama kvama hanazana tona no kizankna hu'za nona kigahaze. <sup>19</sup> Kumi'ma nehaza vahe'mo'zama nozamifima masazana zago vahekna hu'za nemasaze. Hianagi mase'nafinti'ma oti'zama kazana, maka fenozamimo'a igafi freno omnetfa nehie. <sup>20</sup> Timo'ma hageno eaza huno, hazenke zamo'a eno eme zamavareno fregahie. <sup>21</sup> Zage fre kazigati zaho'mo eme zamazeri komenkame huno zamavaresga huno fresnige'za, ko'ma mani'naza nonkumatera omanigahaze. <sup>22</sup> Ana zahomo'a ana vahekura asunkura huozmanteno zamazeri haviza hanige'za, ana zahomofo hankavegu koro nehu'za zamagare'za fregahaze. <sup>23</sup> Hianagi maka vahe'mo'zama ana zama fore haniaza nege'za, zamaza rupro nehu'za tusi zamagiza regahaze.

## 28

### *Jopu'a ama mopafi feno zanku keaga hu'nea naneke*

<sup>1</sup> Vahe'mo'za mopafinti silva kafi'za e'neri'za, golia tevefi kre'za eri-gru hu'za e'nerize. <sup>2</sup> Ainia mopafinti kafi'za eneri'za, have krefrage'za kopa e'nerize. <sup>3</sup> Mopa agu'ama golima me'nea havegu'ma nehakaza vahe'mo'za ofenkame hanintirma hu'neama'afi tavi tagizageno remasa hu'nege'za, tavi masare ana haveramina hake'za e'nerize. <sup>4</sup> Ana vahe'mo'za mopa agu'afina vahe'ma ovu'are keria kafi'za ufrete'za, ana kerifina nofite urami'za ihmareaza hu'za vute ete nehu'za eri'zana e'nerize. <sup>5</sup> Hagi mopamofo agofetura vahe'mo'za hoza eri'za nentaze. Hianagi mopamofo agu'afina goligu'ma nehakraza, tusi teve hanavazi'za haveramina kre nefragazageno tevemo'a tusi amuho huno mopa temara'mra nehie. <sup>6</sup> Anampinti'ma e'nerizana zago'amo'ma marerisa havema safaema nehaza have e'neri'za, golima me'nea mohanena kafi'za e'nerize. <sup>7</sup> Goligu'ma nehakraza vahe'mo'zama ana kerifima unefraza kana oku'a me'nege'za, namamo'zane tumpamo'zanena zamavua onke'naze. <sup>8</sup> Ana nehazage'za zamavufaga rama nehaza afi zaga kfamo'za anankerifina zamagia rente'za vano nosazage'za, laioni mo'zanena anankerifina zamagaka renontaze. <sup>9</sup> Goli eri'zama e'neriza vahe'mo'za kazinkazima hu'nea haveramina ru frage mafrage hunetre'za, agona kafi'za eri ankrinesaze. <sup>10</sup> Ana vahe'mo'za haveramimpina kafi'za ufre'za, zago'amo'ma marerisa haveramina ke'za e'nerize. <sup>11</sup> Anama nehu'za ana vahe'mo'za mopa kafi'za tima agafama huno'ma ne-eama'a renkaninere'za marerisa zantamima oku'ama fraki'nea zana erinte ama'nehaze.

### *Knare antahi'zama hakeno eri'zanku hu'nea naneke*

<sup>12</sup> Hianagi vahe'mo'za knare antahi'zana igati ome e'neri'za, ama' antahi'zana igati ome e'nerize? <sup>13</sup> Mago vahe'mo'e huno knare antahi'zane, ama' antahi'zama eri kumara keno antahinora osu'ne. Na'ankure ama mopafima nemaniza vahe amu'nompina knare antahi'zane, ama' antahi'zana onketfa hugahane. <sup>14</sup> Ra hagerimo'a huno, nagranena omani'ne nehanigeno, amefenkame mopa agu'afima me'nea tirumo'enena huno nagranena omani'ne huno hugahie <sup>15</sup> Knare antahi'zane, ama' antahi'zamofo mizama'amo'a rugatere'neankita, golireti'ene silvaretira miza osugahune. <sup>16</sup> Ofiri mopafinti'ma eri'naza golimofo mizama'anee, zago'amo'ma marerisa haverarena, Oniksine Safaema nehaza havemofo mizama'a agatere'ne. <sup>17</sup> Knare antahi'zamo'a golimofo mizane kritoraisie nehaza havemofo mizama'a agatere'ne. Ana hu'neankino goliretike'ma

tro'ma hu'nesnia zanteti'enena, knare antahi'zana miza osegahie. <sup>18</sup> Hagi hagerimpima kororiema nehaza zama me'nea zanteti'ene, zago'amo'ma marerisa havema Jaspema nehaza haveretira miza osegahane. E'ina hu'neankino knare antahi'zamo'a perieme nehaza zamofo mizanena agatere'ne. <sup>19</sup> Hagi zago'amo'ma marerisa havema topasiema nehaza havema Itiopia mopareti'ma eri'naza havemofona, knare antahi'zamo'a agatere'ne. E'ina hu'neankino knare antahi'zamo'a hentofaza huno agruma hu'nea golia agatere'ne. <sup>20</sup> E'ina hu'neankita, knare antahi'zamo'a igati ne-e? Hagi ama' antahi'zana inantega me'nesnigeta kegahune? <sup>21</sup> Mika zagamofo avurera knare antahi'zamo'a frakino me'neankino, knare avurgama hunte'negenoma anamifima hareno vanoma nehania namamo'enena onkegahie. <sup>22</sup> Fri vahe kumamo'ene vahe'ma zamazeri havizama hu kumamokea huke, knare antahi'zama hakeno ke kumara me'ne hazageta zaho kea antahino'e. <sup>23</sup> Knare antahi'zama eri kana Anumzamo Agrake keno antahino hu'ne. Ana hu'neankinka igati knare antahi'zana erighane. Anumzamo agrake antahi'ne. <sup>24</sup> Na'ankure maka zama ama mopamofo agofetu'ma me'nea zantamina Anumzamo'a keharu huno negeno, monamofo fenka kazigama me'nea zantamina nege. <sup>25</sup> Anumzamo'a zaho'mofona zaho'ma erisnia hankave'a avamente refko huno nemino, hampompima me'neno ko'ma arania zana tina, avamente refko huno Anumzamo'a ante'ne. <sup>26</sup> Ko'ene kopsi'nanena e'ikante megaha'e huno Anumzamo'a kasege retro hunte'negene ana kante amage nenta'e. <sup>27</sup> Hagi ana'ma huteno'a Anumzamo'a knare antahi'zama rezagane so'e huno keno erinte fatgo nehuno, knare huno me'ne huno nehie. <sup>28</sup> Ana nehuno Anumzamo'a amanage huno vahe'motagura hu'ne, Ra Anumzamofoma koro'ma huntezana, knare antahi'zana megeno, havi avu'ava zamofoma amefi'ma humisnanana, ama' antahi'zana erigahane hu'ne.

## 29

### *Jopu'ma ko'ma knare nomani'zama mani'nea zanku hu'nea naneke*

<sup>1</sup> Jopu'a mago'ene keaga'a amanage huno hu'ne, <sup>2</sup> Ko'ma evia kafuramimpine ikampinema Anumzamo'ma knare huno kegavama hunantege'nama mani'na e'noaza hu'na, manisuegu antahintahia nehue. <sup>3</sup> Anumzamo agra nasenirera tavira remsa hunentege'na, mago zankura nagesa ontahi knare hu'na vu'noe. <sup>4</sup> Hagi ko'ma maka zamo'ma knare'ma higenama mani'noa knafina, nagrite'ene naga'ni'arera Anumzamo'a taragoteno knare aronen'i'a mani'nege'na ke'noe. <sup>5</sup> Hankavenentake Anumzamo'ma nagranema taragotenoma mani'nea knafina, mofavre naganimo'za nagri tava'onte mani'naze. <sup>6</sup> Ana nehazage'na bulimakao afu zaga'nifintira ami rina rama'a nerati'na, olivi hozanifintira rama'a olivi raga tagite'na, masavena reratina rama'a erugenitvito tima eviaza hu'ne. <sup>7</sup> Hagi korapara nagra ugota kva vahe mani'ne'na, rankumamofo kafante'ma keagama refkohu knazupa, zamagima me'nea vahe'mo'zama trate'ma unemanizage'na nagranena tra'nire umani'noe. <sup>8</sup> Kasefa vahe'ma nagrama neoge'zama nenage'za, mani kantugma nehu'za kankamuna nami'naze. Ana nehazage'za ozafanafa naga'mo'za, antahinenim'i'za oti'ne'za nenagazage'na vu'noe. <sup>9</sup> Kva vahe'mo'zama keagama nehazaretira nagrama neoge'zama nenage'za, kea osu mani'ne'za zamazanteti zamagitera rehamunki'naze. <sup>10</sup> Ran kumate'ma ugagota hu'za

kegavama hu'naza kva vhahera, zamagefunamo'a marerino zmavagunafare akamrege'za kea osu zamagira hamunki'za mani'naze.

<sup>11</sup> Hagi nagrama keagama nehuge'zama antahi'za vahe'mo'za hu muse hunenantage'za, keagama nehuge'za nagaza vahe'mo'zanena knare keaga hunami'naze. <sup>12</sup> Na'ankure zamunte omane vahe'ene megusa mofavre naga'mo'zama, taza huo hu'za kema hazage'na, nagra zamaza hu'noe. <sup>13</sup> Amuha zazamima omanea vhahera zamaza nehuge'za, nagrira husga hunante'naze. Ana nehu'na kento a'nanea zamaza nehuge'za tusi muse hu'naze. <sup>14</sup> Maka zama hu'noana fatgo kazigatike hu'noe. Ana ne-hugeno fatgo navu'nava zamo'a za'za kukenama antaninogeno'ma hiaza huno rufitenante'ne. Hagi fatgoma huno refkohu avu'ava'zamo'a, pristi vahe'mo'zama nentani'za kankrikna huno nasenirera me'ne. <sup>15</sup> Zamavuma asuhu'nea vhahera kana zamaveri nehu'na, zamagiama haviza hu'nea vhahera zamaza huge'za kana vu'naze. <sup>16</sup> Zamunte omane vahe'mokizmia nafa zamigna nehu'na, ke'na antahi'nama osu'noa vahe'ma keagafima otizage'na, zamaza hu'na keaga eri ante fatgo hu'noe. <sup>17</sup> Anumzamofoma amage onte vahe'mo'zama vahe'ma zamazeri havizama hazage'na, ana vhahera zamagemazampa ru tavegr'i'na, zamagipintira eri vari'noe. <sup>18</sup> Nagrama antahuana, tamagerfa hu'na ama mopafina zazate musenkasea hu'na mani'na vute'na ome ozafa re'na frigahue hu'na nagesa antahi'noe. <sup>19</sup> Hagi zafamofo rafu'namo ofenkame uramino mopa agu'afinti ti anivazu higeno ani'namo tretre hiaza nehigeno atako'mo aninare runteankna hige'na nagra korapara mani'noane. <sup>20</sup> Nagri'ma ko'ma knare nagima nami'zama zamo'a nagripina amne kasefa huno me'ne. Ana nehige'na maka zupa kasefa hankavea erivava hu'na nevve. <sup>21</sup> Nagrama antahintahima vahe'mokizmima nezamuge'za, maka vahe'mo'za akohe'za mani'neza, nagi nanekea antahi'zaze. <sup>22</sup> Hagi nagrama keagama huvagama retogeno'a, mago'mo'e huno nagi kerera antemino keaga osu'ne. Na'ankure nagrama hua nanekea antahiso'e hu'nagu anara hu'naze. <sup>23</sup> Vahe'mo'za komaranigu'ma avegama ante'nazageno koma rige'zama musema nehazankna hu'za, nagi nanekema antahi'zankura tusiza huno zamavesi'ne. Ana hige'za za'za knama ko'ma oru'nereti'ma ko'ma rigeno'ma maka zamofo ani'namo'ma muse nehuno ani'na eri mareankna hu'za nagi nanekea muse hu'za eri'naze. <sup>24</sup> Hagi vahe'mo'zama antahintahihakarema nehu'za mani'nazage'na, kiza renezami'na knare navugosa huzami'noe. E'inama hua kazigati zamarimpa zamazeri hankaveti'noe. <sup>25</sup> Nagra kva vahezmi mani'ne'na, e'ina hiho, amana hiho hu'na vhahera zamazeri ante fatgo nehu'na, mago kini ne'mo sondia vahe'amofo amu'hompi nemaniaza nehu'na, zavi'ma ataza vhahera zamazeri tagane vahekna hu'noe.

## 30

### *Jopu'a azeri agazema hu'naza zanku hu'nea naneke*

<sup>1</sup> Hianagi menina kasefa vahe'mo'za kiza zokago ke hunenante'za huhaviza hunante'naze. Ana kasefa vahe'mokizmi zamafahe'za nagi sipisipima kegavama nehaza kraramina zamagra kegava hugara osu'naze. <sup>2</sup> Hagi nagrama zamagoana hankave'zamia omane'neanki'za nagrira e'za eme naza hugara osu'naze. Na'ankure hankavezmimo'a hago zamagripintira vagare'ne. <sup>3</sup> Ana vahe'mokizmia zamunte omanege'za, zamagaku nehu'za atre'za vu'za vahe omani ka'ma kokampi umani'ne'za, kenagera ne'zankura hake'za vano hu'naze. <sup>4</sup> Ana nehu'za trazampintira aka tra'zana hu'za

nene'za, brumu zafamofo rafu'na'anena eri tasagi hu'za ne'naze. <sup>5</sup> Ana vahera kumapintira zamahe kasopenetre'za, kumzufa vaheku'ma nehazaza hu'za kezatizmante'naze. <sup>6</sup> Ana'ma hazage'za vu'za, tinkagomupine muri kampine, have kampine umani'naze. <sup>7</sup> Anantegama umani'ne'za trazampi vano nehu'za, donki afu'mo'zama nehazaza hu'za ana trazampina eri tru hu'za mani'ne'za krafage hu'naze. <sup>8</sup> Hagi ana vahera zamagia omaneno neginagi vase mani'nazanki'za zamahe kasopazage'za fre'naze. <sup>9</sup> Hagi ana vase'mokizmi mofavre naga'mo'za, nagirevare zagamera nehu'za, huhaviza hunante'naze. Ana nehu'za nagrikura kiza zokago ke hunante'za, nazeri nagaze hu'naze. <sup>10</sup> Nagra zamagri zamavurera mago havi zaga manuge'za zamefi hunenami'za, nagriterererava'no nosu'za, navufi zamavetu ahene'za. <sup>11</sup> Ati karima reragareaza huno Anumzamo'a knaza namino nazeri ante ravahege'za, nazano hunante'naku'ma haza zana amne hu'naze. <sup>12</sup> Hazenke zama nehaza kasefa vase'mo'za nazantmaga kazigatira oti'za, narotago hazage'na fre'na vano nehuge'za, kama vanufina krifu eme anaginte'naze. <sup>13</sup> Nagri'ma nazeri haviza nehu'za keonke'zama eri kazigati maka zana nehu'za, kama nevufina eme rehiza nehu'za, zamagrama antahi'zana agri'ma azahu vahera omani'ne hu'za nehaze. <sup>14</sup> Nagri'ma ha'ma hunantenaku'ma e'nazana vase'mo'za, maka kazigati ankariserami'za e'za eme nazeri haviza hu'naze. <sup>15</sup> Ana hige'na menina tusi koro nehugen, zaho'mo hampo erino viaza huno knare nagima e'neruazane fenozaninenra erino vu'ne. <sup>16</sup> Hagi nagra menina hago fri'za nehugen, natazamo'a maka zupa nazeri haviza nehie. <sup>17</sup> Kenagera zaferinanimo'a tusi nata negrigeno, ana natazamo'a naterenora novie. <sup>18</sup> Anumzamo'a hankavenentake azantetira kukenagna huno rufitenante'n. Ana hu'neno azantetira za'za kukenama antaninoa kenamofo nananke kama'are azerino nanankena nazeri pro hu'za nehie. <sup>19</sup> Ana huteno hapapi matevuno natrege'na, kugusopagna nehu'na tanefakna hu'noe. <sup>20</sup> Ana hige'na naza hananegu Anumzamoka kagritega krafagea hu'noanagi, keni'arera nona osu'nane. Ana nehunka kagri kavure oti'noanagi, nagrira kamefi hunami'nane. <sup>21</sup> Kagra karimpa ahenenantenka, hankavenentake kazanteti nazeri haviza nehane. <sup>22</sup> Kagra kagigagi zaho atrankeno eno eme nazeri sga huno nefregenka, kagra ununko atrankeno eno eme nazeri haviza hu'ne. <sup>23</sup> Ana'ma nehanke'na nagrama antahuana, kagra nahe fritenka hunantesnanke'na maka vase'mo'zama fri'za nevaza kumatega vugahue hu'na nagesa antah'i'noe. <sup>24</sup> Hagi mago vase'mo'ma knafima mani'neno'ma azahu zanku'ma krafama nehanigeno'a, tamagerfa huno mago'mo azana anteno aza hugahie. <sup>25</sup> Nagrama ko'ma knare hu'na mani'ne'na, knazampima mani'za vahekura zavira atenezmante'n, zamunte omane vahekura nagu'afina tusiza hu'na keke huzmante'noe. <sup>26</sup> Hianagi nagritererera knare'za fore hanie hu'nama amuha'ma hu'noa zana forera osigeno, kefo zamo nagritererera ne-egeno, tavi masagu'ma avegama ante'noana omegeno hanizamo e'ne. <sup>27</sup> Nagu'amo'a hazenkefi manino ne-eno mani frua osu'nne. Ana higeno maka zupa natazamo nazeri havizantfa hu'ne. <sup>28</sup> Nagrira knazamo rentrako higena hanizampi vano nehu'na, tavira onke'noe. Ana nehu'na kuma amu'nompima vase'ma vano nehazafi mani'ne'na, iza naza hugahieha nehu'na zavira ate'noe. <sup>29</sup> Ana nehu'na zavi'matoa nagerumo'a, ahi kramo'ene za'za agempunane namagu'ma os-tritiema nehaza namamo'enema krafama neha'aza hu'ne. <sup>30</sup> Navufgamo'a

ru ko'nagifa nehegeno, zaferinanifintira tusi amuho nehuno teve rukaru hu'ne. <sup>31</sup> Nagra hapue nehaza zavena nehe'na, nasunku zagamera nehu'na, konkena nere'na zavi zagamera hu'noe.

## 31

### *Jopu'a fatgoma huno mani'nea zanku huama hu'nea naneke*

<sup>1</sup> Hanki nagrama navuma kezani'afima mago huvempa kema hu'noana, mago mofa'ma negesuna havi antahintahia e'orisnue hu'na huvempa hu'noe. <sup>2</sup> E'inahu havi avu'ava'zama hanugeno'a, manisgama hu'nea Hankavenentake Anumzamo'a ana havi avu'ava zanirera havi mizana namigahie. <sup>3</sup> Havigama hu'za refkoma hu so'ema nosaza vahera Anumzamo'a knaza nezamino, kumi'ma haza vahetera hazenkeza atregeno ne-e. <sup>4</sup> Ana nehuno maka zama hua zampina Anumzamo'a avua anteno nenageno, nagama rerakaure'na vuana nenage. <sup>5</sup> Nagra mago vahera havigea hu'na revataga nosu'na, havige zanteria nagia re'na ovu'noe. <sup>6</sup> Atrenkeno Anumzamo'a navu'navazania erinteno, fatgoma huno refko'ma nehia sigerire negeno refko huno nageno. Na'ankure nagrama fatgo navu'nava zama nehuana Agrake keno antahino hu'ne. <sup>7</sup> Hagi Anumzamofo kama atre'na hazama negre'na, navumo kea zante'ma havi antahintahima hu'na kumi'ma hu'nesnua kumiro, mago'a kumi'enema hu'nesnua, <sup>8</sup> atrenkeno nagrama hankre'nesnua ne'zana, ru vahe'mo'za vasage'za neho. Hagi nagrama hankre'nesnua avimzana eri tasagi hutreho. <sup>9</sup> Hagi mago a'ma nege'na havi antahintahima eri'nesnua, tvaonire'ma nemanisnia ne'mofo a'ma nege'na kenunuma hu'nesnua, <sup>10</sup> atrenkeno nagri a'mo'a ru vemofo a' nemanina, ru venenemo'za a'n'i'a ante'za maseho. <sup>11</sup> Hagi nagra mago vemofo a'enema hazenkema hu'nesnua, nagra'a tusi nagaze eri nami'noanki'na, ana kumi'ma hu'nesnua zanteria mizama'a nagra'a erigahue. <sup>12</sup> E'i ana kumi'mo'a, mago tevegna hu'neankino, tevava huno nevuno, teve kumapi vugahie. Ana hu'neankino ana maka'zama ante'noa zana, tevemo te fanene hugahie. <sup>13</sup> Hagi ko'ma nagri eri'za venenemozane a'nemo'zanema, knazamima eri'za neazage'nama, knazazamima e'orinesnua, <sup>14</sup> inankna hunka eri'za vaheka'a kegava hu'nane huno Anumzamo'ma nagenokama hanige'na, na'ane hu'na kenona huntegahue? <sup>15</sup> Na'ankure Anumzamo'a Agrake nagri'ene eri'za vahe'n'i'anena, antatimofo arimpafina tro hurante'ne. <sup>16</sup> Hagi zamunte omane vahe'mo'zama mago'a zanku'ma kema nehazage'na, i'ora osu'na amne nezami'na, kento a'nememo'zama zamazama hanuegu'ma nagrite'ma zamavuma nentazage'na amne zamaza nehu'na, <sup>17</sup> nagragukera ontahi'noanki megusa mofavreramina, ne'zana refko hu'na zami'noe. <sup>18</sup> Nagra osi'ma mani'noregati'ma eno meninte'ma e'neana, megusa mofavre nagara nafa zamigna hu'na kegava hunezmante'na, kento a'nane nagara zamaza hu'na e'noe. <sup>19</sup> Hagi nonkumazmima omne vahe'ma kukenagu'ma atupa'ma nehazage'na, kukena nezami'na, mago'a zanku'ma atupa'ma nehaza vahera kukenane nakreku'enena zami'noe. <sup>20</sup> Ana nehu'na zamazeri amuhoma hanigu sipisipi azokateti'ma trohu'naza nakre kura zamuge'za antani'za amuhogu'ma nehu'za musema nehu'za, nagrira husga hunante'naze. <sup>21</sup> Hagi keaga refkohu ne'mo'a, nagri kaziga antegahie nehu'na, nagra keagafina ot'i'na megusa mofavre naga'ma keagama huzmantesnua, <sup>22</sup> nazamo'a naz'o'nafinti rutasagi

huramigahie. <sup>23</sup> Na'ankure nagrama koro'ma nehuana, Anumzamo'a knazana atreni'geno eme nazeri haviza hugahie hu'na nentahue. Hagi Anumzamo'ma hankaveareti'ma nazeri havizama nehaniana, nagrira amuhazani'a omane'ne. <sup>24</sup> Hagi nagra zagofina amuha zani'a nonte'na, golimo'a naza hugahie hu'na namentintia nosue. <sup>25</sup> Nagra'a nazapinti'ma erifore hu'na ante'noa zago fenokura navufga erisga nosu'na, <sup>26</sup> monare'ma me'neno nerea zagere'ene ikamo'ma knare zantfama huno remsama nehige'na monora huonte'na, <sup>27</sup> e'i ana zanteria mago narimpa hu'na monora hunonte'na, nzantetira zanahe'na antakora osu'noe. <sup>28</sup> Hanki nagrama anama hu'nesanuana kumi hu'noankino, kema refko'ma hunantesnia nemo'a knaza namigahie. Na'ankure onagamu monafinkama nemania Anumzamofontera havige hu'na eri fraki'nogu anara hugahie. <sup>29</sup> Hagi ha' vahe'nimo'zama knazampima mani'nazage'na nezamage'na, nagra musena nehu'na zamagizana ore'noe. <sup>30</sup> Ana nehu'na magore hu'na zamazeri haviza hu nanekea hu'na kumira nosu'na, havizama hunante'nazarera nona osu'noe. <sup>31</sup> Hagi nagri nompima nemaniza eri'za vahe'nimo'za hu'za, maka eri'za vahe'a ne'zana nezamino magore huno zamatrege'za amnea novaza ne'mani'ne hu'za nagrikura nehaze. <sup>32</sup> Nagra ozamageno'a vahe'ma nonire'ma azage'na magore hu'na zamatrege'za megira omase'nazanki, kahana anagi hagaro nehu'na, zamavare nompi antoge'za maka zupa mase'naze. <sup>33</sup> Mago'a vahe'mo'zama nehzaza hu'na kumi'ni'a nagu'afina eri frakinaku hu'noanagi, anara osu'noe. <sup>34</sup> Hagi rama'a vahe'mo'zama nenage'za, kiza zokago kema hunenantesage'za, naga'nimo'zama eme nasami'zankura korera hu'na nompina omani'noe. <sup>35</sup> Hagi nagra nagesama antahuana, nagrama nehuankema mago vahe'mo'ma agesama anteno antahiresina knare hisine. Nagra nazanko avona ama antoanki atre'nenko Hankavenentake Anumzamo negeno kenona hunanteno. Hagi mago vahe'mo'ma nagri'ma keagama hunantenaku'ma hanuno'a avompi krenteno. <sup>36</sup> Anama hanige'na muse nehu'na ana avona naz'o'hare erigofi'na vano nehu'na, kini fetori'ma hiaza hu'na nasenire antanigahue. <sup>37</sup> Ana nehu'na kini vahe'mofo mofavremo'ma hiaza hu'na, Anumzamofo avuga uoti'na nagra'ama maka navu'nava zama hu'nesanuana ome eri ama hu'na asamigahue. <sup>38</sup> Hagi mopa'nimo'ma haviza hu'nane huno'ma keagama hunantenigeno, hoza tinkamo'a tusi zavi'netenigeno, <sup>39</sup> mago vahe'mofo hozafinti ne'za musufa sege, ana hozamofo nefo ahe frige'ma hu'nesanuana, <sup>40</sup> anama eri nafa'ama hu'nesanua mopafina witimo'a ohesianki ave've trazamoke hageno marenerisanigeno, amne tra'zamo balimofo nona erino hageno marerigahie. Ama ana nanekema huvagareteno'a, Jopua kea osu'ne.

## 32

### *Jopu'ma hiankere Elihu'a rimp a neheno kenona hunte'nea naneke*

<sup>1</sup> Jopuna 3'a rone'amo'za agri kere'ma ru'enema kenona hunte'zankura zamavaresra hu'naze. Na'ankure Jopu'ma agra'agu'ma huama huno, hazenkeni'a omane'neanki fatgo hu'na mani'noe huno'ma hu'nea zanku anara hu'naze. <sup>2</sup> Hianagi mago nehzaye nera, Barakeli nemofovino agi'a Elihu'e. Ana hu'neankino agra Rami nagapinti nekino, Jopuna tusi arimpa ahente'ne. Na'ankure agrama agesama antahiana Anumzamo'a agri kumiku huno knazana nemianagi, nagafare Jopu'a huamara huno tamage hago kumi hu'nogeno Anumzamo'a knazana nenamie hunora nosie nehuno, Jopuna arimpa ahente'ne. <sup>3</sup> Ana nehuno Jopuna 3'a rone'a

raminku'ene tusi arimpa ahezamante'ne. Na'ankure Jopu nanekere'ma kenona hunte so'ema nosu'za, Jopu'a hazenke hu'negeno Anumzamo'a knazana nemie hu'zama, hazenke'amofo agafama ke'za eri fore'ma osaza zanku anara hu'ne. <sup>4</sup> Elihu'a agra nehzavate mani'negu huno kea osu mani'nege'za, Jopuna 3'a rone'amo'za zamagra ranra vaheki'za, Jopu'enena keaga vugote'za hu'naze. <sup>5</sup> Hianagi ana ranra naga'mo'zama Jopu nanekere'ma mago'enema kenona huontaza zankura, tusi arimpa ahe'ne. <sup>6</sup> Ana higeno Buzi kumateti ne' Barakeli nemofo Elihu'a amanage hu'ne, Nagra kasefa vahe manugeta tamagra ranra vahe mani'nazagu nagazegu nehu'na koro hu'na ke'nima huama huzankura ete azeri'noe. <sup>7</sup> Nagrama antahuana rama'a kafuma hu'naza vahe'mota knare antahi'zana huama hugahaze hu'noane. Na'ankure knare antahi'zamo'a e'inahu vahepinti ne-e. <sup>8</sup> Hianagi Anumzamo'a avamu'a huhu hvuzagino vahepina avamu'a mani'neankino, ana avamumo hige'za ama' antahi'zane vhahera mani'naze. <sup>9</sup> Mago'a zupa ranra vahe'mo'za knare antahi'zana e'norizage'za, mago'a zupa kafuzmimo'ma rama'a hu'nea vahe'mo'za fatgo huno'ma refakohu avu'ava'zana antahi amara osu'naze. <sup>10</sup> E'ina hu'negu nagranena antahintahini'a Jopuga menina kasami'za huanki antahio. <sup>11</sup> Tamagrama keagama nehuta knare'nare antahintahima erinteta kema hugantugama hazankea, akohe'na mani'ne'na antahi'noe. <sup>12</sup> Nagra nagesama ante so'ema hune'na keagatamima antahufina, magomo'e huno Jopunkura havige hie hunora huama huonte'ne. Ana nehutma Jopu'ma hia nanekerera kenona huonte'nze. <sup>13</sup> Hagi tamagra amanage huta osih, Jopuna agri knare antahi'zamo'a tagri antahi'zana agatereankino, agri kerera vahe'mo'a kenona huontesnianki, Anumzamoke kenona hunties. <sup>14</sup> Jopu'a nagranena keaga osu'neanki tamagranenke keaga hu'ne. Hagi nagranema keagama hiresina, tamagrama kenonama huntazankna hu'na kenona huontosine. <sup>15</sup> Hagi tamagrira keagatamia omanegetma antahintahai hakare nehuta, Jopu'ma hia nanekerera kenona huonte'nze. <sup>16</sup> Hianagi tamagrama kenona osu, acoheta zazate'ma manizaza hu'na nagranena akohe'na manigahufi? I'o. <sup>17</sup> Nagranena antahintahini'a huama hu'na Jopuga kasamigahue. <sup>18</sup> Na'ankure rama'a naneke nagu'afina avite'neanki'na nagu'amo'ma huama huo huno'ma nazeri otisanige'na huama hugahue. <sup>19</sup> Hagi nagri nagu'afina mememofo avufgareti'ma tro'ma hu'naza tintafepima kasefa waini tima ante'nazageno'ma me'neno ruhavahavu huno rupro hunaku'ma hiazza nagu'amo'a hu'ne. <sup>20</sup> Hanki nagra menima kasaminaku'ma hanua nanekema kasamisnugeno'a narimpamo'a fru hugahie. Hagi menina nagu'afima avi'mate'nea nanekea hugaho hugahue. <sup>21</sup> Nagra mago vahe'mofo kazigagera antene'na agrikera azana nosu'na, mago vhahera havigea hu'na husga huontegahue. <sup>22</sup> Hagi nagrama havigema nagiteti'ma hu'na vahe'ma husga hunte'zante'ma knare'ma hu'noresi'na, nagri'ma tro'ma hunante'nea Anumzamo'a nagrira nazeri fanane hiresine.

### 33

#### *Jopu'ma hu'nea nanekere Elihu'a mago'ene hunte'nea naneke*

<sup>1</sup> Hianagi menina Jopuga kagesa antenka mani'eneka nagrama maka nanekema hanuana antahio. <sup>2</sup> Nagra menina ete nagira reaka hu'na nanekea agafa hu'za hue. <sup>3</sup> Nagrama hanua nanekea fatgo nagu'areti

hugahuanki'na, tamage naneke hugahue. <sup>4</sup> Anumzamofo Avamu'mo nagiira tro hunantegeno, Hankavenentake Anumzamo nasimura namige'na kasefara hu'na mani'noe. <sup>5</sup> Kagra Jopugama knare'ma hu'nesunka, nagrama keagama nehanugenka, kagra kazigatira antahintahia hutenga, nagri kerera kenona hunanto. <sup>6</sup> Kama antahio, kagrane nagranena Anumzamofo suza mani'no'ankino, nagri'enena higo mopa erino tro hunante'ne. <sup>7</sup> E'ina hu'negu nagrikura korora osuo. Na'ankure nagrama hanua nanekemo'a tusi knazana kamino kazeri korora osugahie. <sup>8</sup> Nagra nentahugenka maka nanekema hu'nampina hankavetinka kehara re'nane. <sup>9</sup> Kagra Jopuga hunka, nagra agru hugeno kumi'ni'ane hazenke'ni'anena omnegenia ke'ni'a omne vahe mani'noe hunka hu'nane. <sup>10</sup> Hianagi Anumzamo'a ha' vahe'arema nehiaza hunenanteno, kefo zamav'uava'zama nehaza vahe'ma zamazeri havizama nehiaza huno nazeri haviza nehie hunka hu'nane. <sup>11</sup> Hagi vahe'ma kinama hunezmantaza zafafi nagia erinteno Anumzamo'a kina hunante'neno, kama vanoma hufina avua anteno nenage hu'nane. <sup>12</sup> Hianagi Jopuga havige hu'nananki'na kaveri hugahue. Na'ankure maka ama mopafi vahera Anumzamo'a zamagatere'ne. <sup>13</sup> Ana hu'neanki kagra nagafare Anumzanena kehara renka, na'a higeno vahe'ma zamaza hinogu'ma kema nehazageno'a, kenona'a Anumzamo'a hunozmante hunka nehane. <sup>14</sup> Hianagi Anumzamo'a ruzahu ruzahu kampinti vahera keaga huneramianagi, Agri kea tagra keta antahita nosune. <sup>15</sup> Kenage'ma nompi masenonkeno, ava'nfine ava'nagna zampine Anumzamo'a nanekea eme neratasamie. <sup>16</sup> Hagi mago'a kenagera zmagesafi sumi huno koro kema zmasamiazamo, zamazeri korora nehie. <sup>17</sup> Anumzamo'ma e'inahu'ma nehiana, kefo avu'ava'zane avufgama erisgahu zane atreta tamagu'a rukrahe hiho huno anara nehie. <sup>18</sup> Hagi zamagra friza fri vahe kumatega ovanaze huno Anumzamo'a kegava hunezmante. <sup>19</sup> Hagi mago'a zupa zamagrama hu'naza kumite Anumzamo'a knazana zamige'za kri tafetera mase'nazageno, zaferina zamifintira zamatia kri vava nehie. <sup>20</sup> Ana hu'neankino ne'zana one agesa higeno, knare'nare ne'zama kre'za e'naza ne'zanena none. <sup>21</sup> Hanki ana vahe'mofo zamavufagamo'a zaferinare akamaregeno, zaferina zamimo'a amate fore nehie. <sup>22</sup> Ana vahe'mokizmi fri'zamo'a tavaonte megeno, vahe'ma ahefri ankeromo'a zamavega anteno mani'ne. <sup>23</sup> Hianagi 1tauseni'a ankerovo vahepinti mago ankeromo agri'ma azama hanigu amu'nonte otino mani'neno agri avu'avazama huama huno, agra fatgo hu'ne huno'ma hiresina knare hisine. <sup>24</sup> Hanki ana ankeromo'ma ana vahek'u'ma asunku'ma hunenanteno'a amanage hiresine. Fri vahe kumapintira agu vazio. Na'ankure ana vahe'ma mizama seno ete zamavare kana ko ke'na erifore hu'noe. <sup>25</sup> Hagi ana ne'mofo avufgamo'a knare zantfa huno osi mofavre'mofo avufgamo'ma hiaza nehanigeno, ko'ma kasefa vahe'ma mani'negeno'ma avufgamo'ma knare'ma huno me'neaza hugahie. <sup>26</sup> Ana nehanigeno ana ne'mo'ma Anumzamofonte'ma nunamu hanigeno'a, Anumzamo'a muse huno nevre'nigeno agra Anumzamofo avufi negeno musena hugahie. <sup>27</sup> Ana'ma hanigeno'a ana nemo'a rone'amokizmia huama'ma huno zamasamisiana, nagra tamage kemofona eri rukrahe hu'na havige nehu'na kumi hu'noe. Hianagi Anumzamo'a nahe frigaragi kumini'a atrenanteno nahe ofri'ne. <sup>28</sup> Ana nehuno fri vahe kumapinti Anumzamo'a ete nagu'vazino navre'ne. Ana hu'negu hu'na menina ofri kasefa hu'na mani'nena masa negoe. <sup>29</sup> Tamagerfa huno maka zupa e'inahu avu'ava'zana

Anumzamo'a vahe'mokizmia huzmanteneno, anahu avu'avara huno nevie. <sup>30</sup> Fri vahe kumapinti ete zamagu vazino zamavare'negu hu'za, ofri kasefa hu'za mani'ne'za asimu erino mani'zamofo masarera mani'za nevaze. <sup>31</sup> E'ina hu'negu mago'ene keaga kasamigahuanki Jopuga akohenka mani'eneka kagesa antenka antahi so'e huo. <sup>32</sup> Hianagi kagrama mago'a nanekema hunaku'ma hanunka, amne hananke'na antahigahue. Na'ankure nagri'ma nave'nesiana, vahe'mo'za kagri'ma ke'za antahi'zama hanazana ke'a omne'nea ne' mani'ne hu'za hanazegu nave'nesie. <sup>33</sup> Hianagi kagripima mago'a nanekema omane'nesiana, kagra akohenka mani'eneka, nagrama knare antahi'zama rempi hugamisuana antahio.

## 34

### *Jopu'ma hu'nea nanekere Elihu'a mago'ene kenona hunteno vu'nea naneke*

<sup>1</sup> Hagi Elihu'a mago'ene amanage hu'ne, <sup>2</sup> Knare antahi'zama eri'nana ne'moka nagrama hanua nanekere kagesa antenka nentahinka, ama' antahi'zama eri'nana ne'moka nagrama hanua nanekea akohenka mani'eneka antahio. <sup>3</sup> Hagi ne'zama tagite erinteta haga'ama neta konaza huno, maka nanekema tagesamo'ma antahia nanekea, tagesamo'a rezagane so'e huno nentahie. <sup>4</sup> E'ina hu'negu inagemo fatgo huno knare hu'nefi tagra'a rezaganata negeta, rempi huta antahisune. <sup>5</sup> Hagi Jopu'ma kema hifina anage hu'ne, nagrira ke'ni'a omane'neanagi, Anumzamo'a kema hu kankamuni'a eri atrege'na mago zana osu'noe huno hu'ne. <sup>6</sup> Nagrira mago hazenke'ni'a omanegeno keni'a omane'ne. Hianagi vahe'mo'za nagrikura havige ne' mani'ne hu'za nehaze. Nagrira kumini'a omane'neanagi natama namino nevia natazamo'a vagaoresnia avamente nevie. <sup>7</sup> Hagi magora Jopukna nera iza mani'ne. Agra kizazokago ke huno vahe'ma zamaveri hu kege nehia ne' mani'ne. <sup>8</sup> Ana nehuno Jopu'a kumi'ma nehaza vahe'ene eri mago huno nemanino, kefo avu'ava'ma nehaza vahe'ene kna ahefrino nemanie. <sup>9</sup> Na'ankure Jopu'a huno, Anumzamofoma musema huntensampintira mago zana e'origahane huno hu'ne. <sup>10</sup> E'ina hu'negu ama' antahi'zama eri'naza vahe'mota nagri naneke antahio. Maka vahe'mo'zama antahi'nazana Anumzamo'a havi avu'avara nosia ne' mani'ne hu'za antahi'naze. Ana hu'neankino Hankavenentake Anumzamo'a mago hazenke osugahie. <sup>11</sup> Vahe'mo'zama hu'naza avu'avate anteno rezaganano negeno, mizana zamitere nehia Anumza mani'ne. <sup>12</sup> Tamagerfa huno Hankavenentake Anumzamo'a mago hazenke zana osugahie. Ana hu'neankino Hanavenentake Anumzamo'a fatgo huno refkoa hugahie. <sup>13</sup> Iza ama mopa tro huteno, kegava huo huno Anumzamofonkura hunte'ne? <sup>14</sup> Hagi Anumzamo'ma Agra'a avamu'ene, asimu'anema ete eriresina, <sup>15</sup> maka asimu'ma enerino kasefa'ma huno nemania zagamo'a fri vaganeregeno, maka vahe'mo'za fri'za ete mopasazaresine. <sup>16</sup> E'ina hu'negu Jopuga ama' antahi'zane vahe mani'noema hunka hanunka, nagrama nehua nanekere kagesa ante'eneka antahio. <sup>17</sup> Kagrama antahinana fatgo avu'ava zanku'ma avesrama hiresina, Anumzamo'a ama mopa kegava hunora viresimpi? E'ina hu'negu Hankave nentake huno fatgoma hu'nea Anumzamo'ma refko'ma hania zantera, mago hazenke hu'ne hunka huamara huntegahampi? <sup>18</sup> Anumzamo'a kini vahekura huno, mago zana huga vahera omani'naze nehuno, zamagima me'nea vahekura huno havi avu'avaza nehaza vahe mani'naze huno nehie. <sup>19</sup> Anumzamo maka vahera Agra'a tro huzmante'neankino, agi me'nea vahe'ene zago vahekukera nehuno, zamagi omne vahe'ene zamunte omne vahera zamage

amne zanknara nosianki, Agri avurera mago avamenteke mani'naze. <sup>20</sup> Vahe'mo'za osi'a knafi ame hu'za nefrize. Kenage amu'nompi friza nevazageno, hankave vahera Anumzamo'a zamahe nefrie. <sup>21</sup> Na'ankure maka vahe'mo'zama haza zana Anumzamo'a negeno, maka avu'ava zama hazana nege. <sup>22</sup> Hanimia nehia zamo'a Anumzamofo avua resoa osanigeno, maka kumira amate kegahie. <sup>23</sup> E'ina hu'negu tagra kna huhampri'neta ana knarera esanunkeno, Anumzamo'a refkoa huorantegahie. <sup>24</sup> Anumzamo'a mago hankave vahe'ma azeri havizama hunakura, vahera antahigeten anara nosie. Ana'ma nehuno'a ana vahe nontera ruvahe azeri o'netie. <sup>25</sup> Ana vahe'mo'za nehaza zamavu zmavara keno antahino hu'ne. Ana hu'neankino kenageke'za ana vahera zamahe fanane nehie. <sup>26</sup> Hagi havi vahe'mo'zama zamavu'zmava zama hu'naza zamofo nona'a, amate zamazeri haviza nehige'za vahe'mo'za nezamagaze. <sup>27</sup> Anama nehiana na'ankure Anumzamo'ma hihoma huno hiazana nosu'za, Agri kasegema amage'ma nontaza zanku anara nehie. <sup>28</sup> Ana zamunte omne vahera zamazeri havizama hazage'zama Anumzamofontega zavi'ma nete'zama, zavi krafama nehzageno'a Anumzamo'a antahi'ne. <sup>29</sup> Hianagi ana zante'ma Anumzamo'ma nona huno havi avu'ava'ma nehaza vahe'ma zamazeri havizama nosanigeno'a, iza huno Anumzamo'a havi avu'ava nehie? hunora hugahie. Hagi avugosama eri fra'ma nekisanigeno'a, mago vahe'mo'a keno eri forera osugahie. Hianagi Agrake mago'mago vahete'ene ama mopafima me'nea kumatamina kegava hu'ne. <sup>30</sup> Hagi Anumzamokane kefo avu'ava'ma nehaza vahe'mo'zama kva vahe'ma mani'ne'za vahe'ma zamavare'za havi kampima atresnagae'za, kumi'ma hu'zanku huno anara nehie. <sup>31</sup> Hagi izaga antahi'nankeno Jopu'a Anumzamofonkura huno, nagrama hu'noa kumi'mofo nona hunka nazeri haviza nehananki, mago'enena kumira osugahue hunora hu'ne? <sup>32</sup> Nagrama hu'nesnuu kumira eri ama hunka nasamio. Hagi nagrama havi navu'navama hu'nesnuana henka'anena anazana osugahue. <sup>33</sup> Anumzamo'ma Jopugama hugantea zankura kave'nosie. Ana hu'negu kagri'ma kave'nesiaza Anumzamo'a hunantesie hunka kagesa ontahio. Hianagi nagri zana omane'neanki, kagripi antahintahia me'nne. Ana hu'negu menina knare antahi'zanka'a huuma hugeta antahi'maneno. <sup>34</sup> Hagi ama' antahi'zama eri'naza vahe'mo'zane, knare antahi'zama eri'naza vahe'mo'zama nagrama hua nanekema nentahi'za amanage hu'za nagrikura hazaresine. <sup>35</sup> Jopu'a agafa'a omane'nea naneke nehantageno, antahintahia osu neginagi naneke nehie hu'za hazaresine. <sup>36</sup> Jopugama kefo nanekema hu'nana zantero, Anumzamo'a tusi'a knaza kamigahie. <sup>37</sup> Jopu'a kumi'ma hu'nea agofetu'ma, mago'ene kumi'ma hu'neana, azante rupro huno Anumzamofona kiza zokago ke hunenteno, tagri'enena keha'nereno, Anumzamofonkura huno fatgo hunora refkoa hunonante huno keharente'ne.

## 35

### *Elihu'a mago'ene Jopuna azeri kori'nea naneke*

<sup>1</sup> Anante Elihu'a mago'ene amanage huno hu'ne, <sup>2</sup> Jopuga Anumzamofo avurera fatgo hu'noema hunkama nehanana, kagrama antahinana tamage naneke nehue hunka nehampi? <sup>3</sup> Hagi kagra Jopuga Anumzamofonku hunka, nagrama kumi'ma osu mani'ne'nama fatgo navu'nav'a'ma hanuana, anampintira na'a knare'zana erigahue? hunka nehane. <sup>4</sup> Hanki menina Jopuga kenona hunegante'na ana maka 3'a roneka'a raminena, kenona

huzamantegahue. <sup>5</sup> Jopuga menina kesga hunka onagamu monare'ma me'nea hamporamina ko. <sup>6</sup> Hanki kagrama kumi'ma hanana zamo'a inankna huno Anumzamofona azeri havizana hugahie? Kagra kumira mago'ene huvava hunka vugahananagi, e'i ana zamo'enena azeri havizana osugahie. <sup>7</sup> Kagrama mani fatgoma hunka manina zamo'a, magore huno Anumzamofonaaza nehifi? Na'a mago knare'za Anumzamo'a ka-gripintira erigahie? <sup>8</sup> Hanki kagrama hana hazenke zamo'a, vaheke'za zamazeri havizana nehuno, knare kavukva'zama hana zamo'a vaheke'za zamazeri so'ea nehie. <sup>9</sup> Hankave'zami me'nea vahe'mo'zama vahe'ma zamazeri havizama nehazage'za, mago'a vahe'mo'zama eme zamazama hanagura zavi krafage nehaze. <sup>10</sup> Hianagi mago'mo'a amanage hunora nosie, nagri'ma nazeri fore'ma hu'neno, hani zampima mani'nogeno'ma muse zagame'ma namige'nama nehua Anumzana iga manie? <sup>11</sup> Anage nehuno afi zaga kafane, nama ramimofo antahi'zama rugatereno knare antahi'zama tami'nea Anumzana iga mani'ne hu'za nosaze? <sup>12</sup> Ana'ma nehige'za Anumzamo taza hanie nehu'za zavi krafagea nehaze. Hianagi Anumzamo'a ke'zamia antahino nona hunozmante. Na'ankure zamagra zamavufaga erisga nehu'za, kumi nehaza vahe mani'naze. <sup>13</sup> Hianagi zamunte omene vahe'mo'zama zavi krafagema nehaza zankura Hankavenentake Anumzamo'a antahi nozamie hu'zama nehazana havige nehaze. <sup>14</sup> Hanki kagra Jopuga ko'ma hunka, Anumzamofona onkegahue nehunka, Agrake'za eno nagrama hu'nesua kefo zanteri mizana eme namigahie hunka avega antenka mani'nananagi, Anumzamo'a ana keka'a antahio gami'ne. <sup>15</sup> Hagi kumi'ma nehaza vahera Anumzamo'a arimpa ahezamanteno zamazeri haviza nosie hunka nehunka, kefo zamavu zamava'ma nehaza zankura agesa nontahie hunka hu'nane. <sup>16</sup> Hianagi Jopugama hana nanekea amunte omene naneke nehunka, kagesa ontahi negi vahe'mo'zama nehazankna naneke hunka eri hakare nehane.

## 36

### *Elihu'a mago'ene keaga'a huno vu'nea naneke*

<sup>1</sup> Hagi Elihu'a mago'ene amanage huno hu'ne. <sup>2</sup> Jopuga akohenka mani'enka antahi'nege'na antahintahia kami'neno. Na'ankure nagra mago'ene keaga hu'na Anumzamofona nanekea eri hankaveti'za nehue. <sup>3</sup> Nagrama rempi hu'na antahi'zama antahi'noa antahi'zanteti menima kasamisuana, nagri'ma tro'ma hu'nea Anumzamo'a fatgo avu'ava'za ne-hia ne' mani'ne hu'na kasamigahue. <sup>4</sup> Nagrama negasamuana havigea nogasamuanki, tamage naneke negasamue. Na'ankure nagra hentofa antahi'zane neki'na, menina kagrane mani'noe. <sup>5</sup> Anumzana hankavenentake Anumza mani'ne. Hianagi mago vahera kefenkamia note. Agra hihamufine, ama' antahi'zampina hankavenentake hu'ne. <sup>6</sup> Havi avu'ava'zama nehaza vahera Anumzamo'a zamatrege'za kasefara hu'za nomanize. Hianagi knafima mani'naza vahera fatgo huno refko hunezmane. <sup>7</sup> Ke'zamima omne vahetera avua anteteno nemanie. Hianagi zamatrege'za kini vahe'ene kini trate nemanizageno, maka zupa zamazeri antesga huvava nehie. <sup>8</sup> Hianagi vahe'ma kina huzmantesage'za mani'enageno tusi'a knazamo'ma zamazeri anakinige'zama mani'nesaza vahera, <sup>9</sup> na'a agafare anara hu'nefi Anumzamo'a eri zamaveri nehie. Ana nehuno zamavufaga erisga nehu'za kumi'ma hu'naza kumira eri zamaveri nehie. <sup>10</sup> Antahi'zazmia eri hagaro hige'za kefo avu'ava'ma

hu'naza zana keama nehazageno, hanavenentake naneke hige'za kumi zamavu'zmava zana atre'za rukrahera nehaze. <sup>11</sup> Hanki zamagrama Anumzamofo nanekema nentahi'za, amage'ma antesnageno'a, nama'a kfuma kasefa'ma hu'za manisaza kna'afina Anumzamo'a asomu huzmantesigeno no mani'zazmimo'a knare hanige'za, muse hu'za manigahaze. <sup>12</sup> Hianagi zamagrama Agri kema ontahisnazana, ha' vahem'o'za e'za bainati kazinteti eme zamahe frisnag'e'za, e'i anazana na'a agafare fore nehie keamara osu'za neginagi vahem'frigahaze. <sup>13</sup> Anumzamofoma zamefi'ma hunemiza vahem'o'za, Anumzamo'ma zamuvro'ma antea zankura zamarimpa ahenentaze. Ana nehu'za Anumzamo'ma zamazama hanigura zavi krafa hu'za antahi'nogaze. <sup>14</sup> Ana monko avu'avaza hume nevu'za, ozafa orene'za kasefa vahem'nefrize. <sup>15</sup> Hianagi Anumzamo'ma zamatrege'za knazampima unefraczana, na'ankure ana knazamo'ma hanige'za zmatafima mani'ne'za Agrite rukrahe hu'za esnageno zamagu vazino zmaveragesnigu anara nehie. <sup>16</sup> Jopuga amama mani'nana knazampintira Anumzamo'a kavre atretno, knaza omare kumate kavrenteno knare'nare ne'za tratera retro hugante'ne. <sup>17</sup> Hianagi kagra kefo avu'ava'za nehana ne' mani'nanankino Anumzamo'a refko huno negeno, fatgo huno kazeri havizana nehie. <sup>18</sup> Hianagi mago vahem'o'ma feno zanteti'ma regvatagama hu'zankura kva huo. Ana nehunka zamatrege'za zagoreti masavea hu'za kumpipina kavre onteho. <sup>19</sup> Kagrama antesnana fenozamo'ene, maka han-kaveka'amo'a ama knazampintira kaza osutfa hugahie. <sup>20</sup> Ana hu'negu ame huno haninkisie hunka haninkura avega onto. Na'ankure knazamo'a kenagera ame huno eno, kumazamifintira vahera eme zamazeri haviza nehie. <sup>21</sup> Kagra kegava hu'enka havi kavukva zampintira atrenka rukrahe huo. Na'ankure havi kavukva zampintira atrenka rukrahe hunka esane huno Anumzamo'a knazana kagritera atregeno ne-e. <sup>22</sup> Antahihi! Anumzana hankavenentake hu'neankino, ina ne'mo Agrama rempima hunezamiankna nera mani'ne? <sup>23</sup> Mago vahem'o'a Anumzamofonkura, e'ina huo hunora osamige, Kagra mago zana eri haviza hu'nane hunora huontegahie. <sup>24</sup> Hagi Agrama hankave eri'zama eri'nea zanku Agrira agi'a husga nehu'za, zagamera hu'za humuse huntegahaze. Ana hu'negu kagranena zagame hunka humuse hunto. <sup>25</sup> Maka vahem'o'za Agrama tro hu'nea zana, ko ke'naze. Hianagi Anumzamo'ma so'e antahi'zanteti'ma eri'zama eri'nea zana afeteti ke'nazanki'za, keso'ea osu'naze. <sup>26</sup> Tamage, Anumzamo'a tagri antahi'zana agatereno rankrerfa hu'ne. Ana hu'neankita Agrira kafu'amo'a nama'a hu'nefi keta eri forera hugara osu'none. <sup>27</sup> Agra higeno mopafinti timo'a amu huno marerino, hampo ome seteno tina fore huno kora nerie. <sup>28</sup> Ana ko'mo'ma hampompinti'ma eramiana knare huno maka vahete runente. <sup>29</sup> Anami monafima hampoma eritama rente'nea zana, iza keno antahinora nehanigeno, Anumzamo'ma nemanifinti'ma monagema nehia zana, inankna huta keta antahitara hugahune? <sup>30</sup> Anumzamo'a higeno Agrama mani'nea tavaontera kopsi'namo'a marave huno azeri kanegigeno, masa'amo'ma amefenkame'ma hagerimofo ro'are'ma uneramia zana ko. <sup>31</sup> E'inahu hankave'reti Anumzamo'a maka vahera kegava hunezmanteno, ne'zana rama'a zamige'za atupara nosaze. <sup>32</sup> Agra kevema hiaza huno kopasi'na azampi eri'neno, inantego ahetersuema huno hirega ahenetere. <sup>33</sup> Hagi Anumzamo'ma higeno monagema hiazamo'a, ununko atugahie huno hunerasamigeno, bulimakao afutamimo'za zamagranena anazanke hu'za nentahize.

## 37

*Elihu'a mago'ene ununko'ma tania zanku hu'nea naneke*

<sup>1</sup> Ama anazama fore'ma nehigeno'a nagu'amo'a antari nehigeno, tumo'nimo'a fakrofakro nehie. <sup>2</sup> Anumzamo'ma kema nehigeno agerumo'ma monagemo'ma nehiazama huno atineramiana tamagesa ante'netma antahi so'e hiho. <sup>3</sup> Ana monagemofo agasasa anami monafina atregeno vuno eno huvaga neregeno, kopasi'namofo masa'a atregeno mopamo'ma umetre eme atrema hu'nerega vuno eno nehie. <sup>4</sup> Hagi kopasi'nama erigetama ketonkeno anantero, Anumzamofona hankavenentake agerumo'a monagemo'ma hiaza higeta nentahune. Anumzamo'ma kema nehigeno'a, kopasi'namo'ma nehiaza huno masa'amo'a rumarave huno vuno eno nehie. <sup>5</sup> Anumzamofo agerumo'a monagemo'ma nehiaza hu'neankino, so'e zantfa huno knare hu'ne. Agra tusi'a hankave'areti, tagri antahi'zana agaterero ranra eri'zana e'neriankita, anazana tagra keta antahita osugahune. <sup>6</sup> Agra higeno ko'mopa komo'a moparera runentegeno, rankora huntegeno tusiza huno mopafina nerie <sup>7</sup> Ana'ma nehige'za maka vahe'mo'za eri'zana e'ori atre'za amne mani'ne'za, Agri hankave'a negaze. <sup>8</sup> Hagi ana knafina afi zagagafamo'za koro fre'za vu'za, fra'makiza nemaniza havegampino, kerigampi ome fra'nekize. <sup>9</sup> Hagi kagigagi zahomo'a agrama nemaniregati ne-egeno, ra zahomo'a zasi avareno ne-e. <sup>10</sup> Anumzamo'ma asimu'ma nentegeno'a tusi zasi nehigeno, tintamimo'a fonupareno kragenefe. <sup>11</sup> Anumzamo'a hampompina tina eri atru huno erivineteno, kopasi'na atregeno ana hampompina ruganani huno vuno eno nehie. <sup>12</sup> Anumzamo'a vuo huno'ma hunterega vuno hampomo'a ome eri tru hutere huno neme. E'ina hihoma huno huzmanteaza hu'za maka kaziga ama mopamofo agofetura vano nehaze. <sup>13</sup> Mago'a zupa Anumzamo'a vagaore avesizama'a zamaveri huge knazama zamige, hunaku kora atregeno nerie. <sup>14</sup> Jopuga kagesa ante'nenka ama nanekea antahio, Anumzamo'ma ruzahu ruzahu zantamima eri fore'ma nehia zantamina negenka antahintahia erio. <sup>15</sup> Anumzamo'a hakare zana kegava hu'neankino, kopsi'nama huntegeno hampompinti'ma ruganani huno'ma vuno eno'ma nehia zana kagra kenka antahinka nosampi? <sup>16</sup> Maka zama tro'ma hu'zana Anumzamo'a antahi ani' hu'neankino, hampoma ante agofetu agofetu huno antegeno anami kankamumpima me'nea zana kagra kenka antahinka nosampi? <sup>17</sup> Hagi sauti kazigati'ma zaho'ma ne-ea zahomo'a omegeno, anante maka zamo'a kazara osuno oti fatgo higeno'a, kamu'namo'a kukenaka'a pasunekie. <sup>18</sup> Anumzamo'a higeno bronsireti'ma tro'ma hu'naza kapoteti'ma masamo'ma rumarave nehiaza huno, amuho zamo'a hamponteti ome antegeno eneramie. Ana hu'neanki, kagra e'ina hu'zana hugara hu'nampi? <sup>19</sup> E'ina hu'negu tagra na'anee huta Anumzamofonkura hugahumpi rempi huramio. Tagripina mago antahi'zana omane'neankita, mago knare nanekea huta tagra'a tagura ovazigahune. <sup>20</sup> Nagrama mago nanekema hunaku'ma nehanugeno'a, mago'a Anumzamofona asami'nageno agesa ante'neno keagani'a antahi so'ea hugahifi? I'o anara osuno nagrira nazeri haviza hugahie. <sup>21</sup> Monafima me'nea hampoma zahomo'ma eri papama hutrenigeno, zagemo'ma tusiza huno amuhoma hanigeta, zagefina tavua onketfa hugahune. <sup>22</sup> E'ina avamente noti kazigati'ma tusi'a tavi'ma ne-ea tavimofo masa'amo'a goligna nehie. E'i Anumzankino avasase zama'amo azeri kaginte'negeno, hankavenentake masa zama'afi

ne-e. <sup>23</sup> Hankavenentake Anumzamofona tusi'a hihamu'a me'neankita, Agri avatera erava'oa osugahune. Hianagi Agra fatgo huno refko nehia Anumza mani'neankino, tazeri havizana nosie. <sup>24</sup> Anama hiazamo hige'za vahe'mo'za Agrira koro hunentaze. Hagi ama' antahi'zane vahe mani'nonema hu'zama nehaza vahera antahi nozamie.

## 38

### *Anumzamo'a agafa huno Jopuma keaga asami'nea naneke*

<sup>1</sup> Hagi tusi'a kagigagi zaho erino efi Anumzamo'a mani'neno, Jopuna amanage huno kenona hunte'ne, <sup>2</sup> Jopuga kagrira knare antahi'zana omane'ne. Ana hu'neankinka Nagrama eri'zama erinaku'ma retro'ma hua zankura neginagi nanekea nehane. <sup>3</sup> Nagra menina kagenoka hu'za huaniki, vene'ne antahi'za erinka oti hankavetio. Ana nehunka Nagri kere'ma kenonama hananku trotra huo. <sup>4</sup> Kagra iga mani'nankena ama mopamofona tra'a eri agafa hu'na trora hu'noe? Kagra e'i anazama antahi ama'ma hu'nesunka nasamio. <sup>5</sup> Ama mopamofo za'za'anet atupa'anem amu'noma'anemanofi'ma (measurement) avazu huno kenofira iza tro hunte'ne? E'i ana zana kagra ko kenka antahinka hu'nampi? <sup>6</sup> Ama mopamo'ma agofetu'ma me'nea trara na'amo azeri hanavenetigeno, ome renage eme renage huntete'ma me'nea haveramina, ome regari eme regari hunte'ne? <sup>7</sup> Hagi kotu ofumo'za anazama nege'za magoka zamagira ante'za zagamera nehazage'za, ankeru ramimo'zanena ranke hu'za kezati'za musenkasea hu'naze. <sup>8</sup> Hagerimo'ma ruvarehiramino mopafima ezankura ama anante megahane huno iza huntogeno me'ne? <sup>9</sup> Hagerimofona hamponteti Nagra kukenama hiazza hu'na eri ano vazinent'e, hagerina kumazu haninu eri anakinte'noe. <sup>10</sup> Ana nehu'na hagerimoka agaterenka ovunka, amare megahane nehu'na, hagerimo'ma ome atre eme atrema hu'nea ankina ankina, kafa erigi'na rentarako hunte'noe. <sup>11</sup> Ana nehu'na amanage hu'na asami'noe. Kavufgama eris-gama nehana hagerimoka amare marenka eme netrenka, mago'enena agatarenka ovuo hu'na asami'noe. <sup>12</sup> Hagi Jopuga mago zupa masa huo hunka hankeno nanterana rumsa nehigenka, kotu masagura hunka remasa hunka marerio hunka hankeno anara hu'nefi? <sup>13</sup> Hagi kagra mago zupa huntankeno nanterama remasama hia masazamo'a, ama mopama ometre eme trema hu'nerega vuno eno huvaga nereno, havi avu'ava zama nehaza vahera zamazeri ama hige'za tavimofo korora hu'za fre'nazafi? <sup>14</sup> Zagema marerino rumasama higeno'a, kokamo'a ruzahne huno ama tfaza higeno, avonkrenankre tvaravemo'ma nehiazza huno avasese'amo'a so'e zantfa nehie. <sup>15</sup> Hagi zagema marerino remsama hige'za, kefo zamavu'zmava zama nehaza vahe'mo'zama hanimpima vano nehu'za, vahe'ma zamazeri havizama nehaza vahe'mo'za zamazana ruhantgi trege'za anara nosaze. <sup>16</sup> Kagra Jopuga hagerimpina uraminka hagerimo'ma agafa huno ne-ea kampuira ome negenka, hagerimo'ma amefenkame'ma urami'neama'a ome keme vunka kevaga re'nampi? <sup>17</sup> Fri vahe'mokizmi kuma kafaramima me'neama'a ko negenka, hanintirima hu'nea hanizamofo kafaramima ko ke'nampi? <sup>18</sup> Ama mopamo'ma ra huno vuno eno'ma hu'neana kagra kenka antahinka hu'nampi? Kagrama ana maka zantamima ko'ma antahi vagare'nesunka nasamio. <sup>19</sup> Masamo'ma mani'neno'ma ne-ea kumara kagra kenampi? Hanimo'ma nemania kumara iga me'ne? <sup>20</sup> Kagra kana ke'nana

zanaveri hanankeke masamo'ene, hanimokea zanagrama neman'i'a nonkumatega vuve eke hugahapi? <sup>21</sup> Kagra ko antahi'nane, na'ankure maka zana forera osu'negenka kagra ko fore hugota hu'nanankino, kafukamo'a rama'a hu'negahie! <sup>22</sup> Aisimo'ma aviteno me'neno eneramia nona ome negenka, ko'mopa ko'mo'ma aviteno me'neno eneramia nona ke'nano? <sup>23</sup> E'i ana zantamima retro huntogeno'ma me'neana, hazenke knama esanige'nama ha'ma hanuaza retro huntogeno me'ne. <sup>24</sup> Kopsinamo'ma ruganini huno vuno eno'ma nehia kana iga me'ne? Zage hanati kazigati zaho'ma erino vuno enoma nehia nonkuma'a iga me'ne? <sup>25</sup> Monafinti'ma avune ko'mo'ma herafi ramino'ma eneramia tinkana iza tro hunte'ne? Monamo'ma monagema huteno agasasama runo'ma vuno eno'ma hania kana iza varinte'ne? <sup>26</sup> Vahe'ma omani hagege ka'ma kokampina, iza kora atregeno runente? <sup>27</sup> Ana mopafina kora, zafane trazanena omanenegeno mago zana omanetfa hu'neane. Hianagi iza kora atregeno eno mopa eme rufru higeno, trazamo'a ete hageno marenerie? <sup>28</sup> Ko'mofona nafa'a mani'nefi? Iza ata komofona nafa'a mani'neno atregeno eneramie? <sup>29</sup> Aisimofona iza anta'a mani'ne? Hagi iza monafintira aisi atakora kase atregeno eneramie? <sup>30</sup> Zasi ko'matia knafina, tintamimo'a hankavetino havegna nehigeno, hagerimofo agofetu'ma aisima neramino'a azeri karagene. <sup>31</sup> Hagi Pleiadesie nehaza hanafitamima, monare'ma me'nea zana Jopuga seni nofitetira magopi anaki nezmantenka, Orioniema nehaza hnafitamima anaki zmante'nea nofira ahekanora hugahampi? <sup>32</sup> Ana nehunka kagra ana hanafitamina hananke'za, mago kafufina kna'zamire efore hutere nehanagenka, Beane mofavre naga'anema hu'za nehaza hanafitamina kagra kegava huzmantegahampi? <sup>33</sup> Monafima ruzahu ruzahu zantamima me'naza zamo'za amage'ma nentaza kasegea kagra antahi'nampi? Ana'ma hu'nesnunka kagra hananke'za ama mopafi maka zantamimo'zanena ana kasegea amage antegahazafi? <sup>34</sup> Kagra monafima me'nea hampona kezati misankeno, kora atrenigeno eramino kora kahegahifi? <sup>35</sup> Kopasi'nagu'ma hunka mago kaziga vuo hunka'ma huntesrankeno'ma nevuno'a, e'ina huoma hunka hunantana zana hugahue hunora hugahifi? <sup>36</sup> Iza knare antahi'zana, vahe agu'afina nenteno, ama' antahi'zana vahe'mofo antahi'zampina ante'ne? <sup>37</sup> Iza knare antahi'zampina avite'nesnimo maka hampontamina hamprigara hu'ne? Ana nehuno monafima me'negeno anampinti'ma ko'ma neria mopa kavoa eriragisigeno ko'mo'a herafiramigahie? <sup>38</sup> Anama higeno'a kugusopamo'a ome runtrako huno eme hanavetigeno, hihi huno magopi marenerie. <sup>39</sup> Zamagama netegenka Laioni anenta'a ramine, laioniraminenza zagagafa ahezminke'za nenazafi? <sup>40</sup> Ana laioniramimo'za havegampine, kafoma ante'za nemaniza trazampinti etirami'za zamagra'a anara nosazafi? <sup>41</sup> Kotkotiemma nehaza namaramimo'za ne'zanku'ma hake'za vano vanoma nehazageno, anenta'arimo'za ne'zama nesaza zanku'ma Anumzamo'naregama krafama nehazageno'a, iza ne'zana nezamie?

## 39

### *Anumzamo'ma mago'ene Jopuma asamino vu'nea naneke*

<sup>1</sup> Hagi agonafima nemaniza afi meme afutamimo'za anenta'ma nentaza kna fatgoa kagra antahi'nampi? Kagra nezmaganke'za afi dia afu'mo'za anentara nentazafi? <sup>2</sup> Memene dia afumofa anentamo'zama nezmarera

arimpafima nemaniza ikama'a antahi'nano? Nezamarera'ma kase zamantesnia kna kagra kenka antahinka hu'nampi? <sup>3</sup> Memene dia afumo'zama anenta'ma antenakura, zamaga renamagi'za mopare manine'za anentara antazageno zamatazamo'a amne nehie. <sup>4</sup> Ana hutazage'za ana anentatamimo'za ta'nopafi mani'ne'za nena hute'za, nezamarerana atre'zama nevu'za ete rukrahera hu'za nomaze. <sup>5</sup> Afi donki afu'ma rente'nazanofira iza katufegeno fru huno vano nehie? <sup>6</sup> Hagege huno tra'zama omane'nea ka'ma koka zamuge'za nemanizage'na, hagemoke'ma hu'nea mopa Nagra zamuge'za nonkuma zamia ante'za nemanize. <sup>7</sup> Ana donki afutamimo'za ran kumapima nemaniza vahe'mofo zamagasasankegura zamavaresra nehu'za, vahe'mo'zama zamazeri agazonema hunaku'ma kema nehazage'za, kezmia nontahize. <sup>8</sup> Ana donki afutamimo'za agonaramimpina vano nehu'za, tra'zama nesnagura hake'za vano nehaze. <sup>9</sup> Afi bulimakaomo'fruhuno mani'neno kagri eri'zana erigahifi? Ana nehuno hanima hanigeno'a bulimakao afu nompina emasegahifi? <sup>10</sup> Afi bulimakao afu'mofona karenamare zafarenofira rentetenka, hanankeno kamagera nevuno, hozafina mopa rekorino vugahifi? <sup>11</sup> Kagra ana bulimakao afu'mofo han-kavegura antahineminka, atresnankeno amuhoma hu'nesia eri'zanka'a eri kantegahifi? <sup>12</sup> Kagra ana afi bulimakao afumofo hankavegu nentahinka atresnankeno, hozakafintira witia erino witi honama neharafina vugahifi? <sup>13</sup> Mananinkna za'za anankene namama Ostritsie nehaza namamo'a, muse nehuno agekona rutafra tafra nehie. Hianagi azokamo'a za'za aginkunane afi patomofo azoka knara osu'ne. <sup>14</sup> Ostriti namamo'za mopamofo agofetu amura antete'za zamatre'za vazageno mopamofo amuhomo zamazeri amuho hige'za nemanize. <sup>15</sup> Hagi vahe'mo'o, mago afi zagamo'o agiareti amu'ama rempoke zankura Ostritsimo'a agesa nontahie. <sup>16</sup> Zamagri'ma zamatama krige'zama kase zamante'naza zankura ontahi'za, ru namamo'ma kase zamante'nea anenta'ma hiaza hu'za kegavahu so'e nosaze. <sup>17</sup> Na'ankure Anumzamo'a knare antahi'zana nomino, antahi ama'ma hu'zana agripintira eri atre'negu huno anara nehie. <sup>18</sup> Hianagi ana Ostritsi namamo'ma otino agama nereana, tusi avune anteno agama nerea hosi afu'ene agumpima mani'nea vahera agatereno nevie. <sup>19</sup> Kagra Jopuga hosi afu'mofona hankavea neminka, anankempima me'nea azokara kagra hankeno fore huno me'nefi? <sup>20</sup> Kagra hosi afu'mofona hankavea aminkeno ranra kenumo'zama nehzaza huno takauñerefi? Hosi afu'mo'zama zamageru'ma nerazazamo'a vahera zamazeri koro nehie. <sup>21</sup> Ana hosi afu'mo'za zamagra'a hankavegu nentah'i'za, haru hu'za mareri'za tam'i'za nehu'za zamagareti mopa rentrako nehu'za, hatera zamagare'za nevaze. <sup>22</sup> Hosi afumo'za korora hu'za antahintahi hakarea osu, bainati kazinteti'ma ha'ma nehzage'za hapintira atre'za korora nofraze. <sup>23</sup> Ana hosi afumo'za haima nevazageno kevegumo'a vagare vagare nehigeno, karugaru keveret'i'ene keveretira zagedemofo masamo'a rumarave nehie. <sup>24</sup> Ha'ma agafa hunaku nehigeno, paziveteti'ma ufema regeno'a, hosi afumo'a haru huno marerino tamino nehuno manirava oheno, aga zanteti hankavetino mopa nemasagie. Ana nehuno agareno ha'pina unefre. <sup>25</sup> Paziveteti'ma ufema neraza krafagema hosimo'ma nentahino'a, oho huno nehuno ha'ma afete ne-egeno'a, ha'mofo mna nentahie. Ana nehuno hate'ma ugotama hu'naza sondia vahe'mokizmi zamagerura nentahino, sondia vahe'mo'zama ivigema hu'za aza zamagasasankea nentahie. <sup>26</sup> Jopuga kagri antahi'za amage anteno, tumpamo'a ageko'na rutarerino sauti kaziga enevifi? <sup>27</sup> Hagi kagra

hankeno tumpamo'a haresga huno marerino vahe'mo'ma mareoriga'afina nona negifi? <sup>28</sup> Ana tumpamo'a have ra'nafi manino vano nehuno, kenagera anampinka nemase. Hagi nozamimo'a hankave kuma'zami me'neanki'za knare hu'za nemanize. <sup>29</sup> Ana kumate'ma manine'za, ahe'zama nenaza zaga afete mani'nazanagi, amne nezamagaze. <sup>30</sup> Hagi tumpamo'ma mago zagama aheteno'a, ana zaga erino eno anenta'amofona eme amigeno, korama'a anivazu huno nene. Frino kasri'nesia zagamofo auvugama me'nesirega, tumpamo'za ome atru nehanagenka zamagegahane.

## 40

### *Anumzamo'ma Jopuma kenona hunte'nea zamofo naneke*

<sup>1</sup> Anante Ra Anumzamo'a amanage huno Jopuna asami'ne, <sup>2</sup> Kagra hanavenentake Anumzamofona keha' rentenka nevunka, Agrira azeri fatgo hunaku nehampi? Ana hugahue hunka hanananagi, Nagrama kagenokama hanugenka, Nagri kerera, kenona hugahampi? <sup>3</sup> Anante Jopu'a amanage huno kenona Ra Anumzamofona hunte'ne, <sup>4</sup> Nagra amne zaga mani'noanki, inankna hu'na kagri kerera kenona hugahue? Nagra nzanteti nagira ruhamunki'na manigahue. <sup>5</sup> Nagra ko rama'a nanekea hu'noanki'na, mago'enena keaga osugahue.

<sup>6</sup> Hagi kagigagi zahomo'ene komo'ene huno efi Ra Anumzamo'a mani'neno, Jopuna amanage huno asami'ne, <sup>7</sup> Kagra vene'ne antahintahi erinka oti hankavetio. Na'ankure mago'a kagenoka hugahuanki, eri ama hunka kagra kenona hunanto. <sup>8</sup> Kagra hanavetinka keaga hunka, nagri navu'navamo'a knare hu'ne hunka nehane. Hianagi nagrira huhaviza nehunka, Jopuga kagra'agura mani fatgo hu'na mani'noe hunka nehane. <sup>9</sup> Kagri hankavemo'a Anumzamo'na hankavegna hu'ne? Nagrama kageru'ma nerankeno'a, Anumzamo'nama nageru'ma nerugenno monagema hianganara huno, kagri kagerumo'a monagea nehifi? <sup>10</sup> Hagi kagra knare'ma hu'nesanunka, kukena hiaza hunka hihamu hanaveka'afi mani'nege'za, vahe'mo'za negage'za rankagi negami'za husga huganteho. <sup>11</sup> Kagra krimpa ahe'zana atregeno eama nehaningenka, zamavufaga rama nehaza vahera zamazeri fenkami atro. <sup>12</sup> Zamavufaga rama nehaza vahera krimpa ahenezamantenka, uruha zamagege'za zamavufaga anteramiza maniho. <sup>13</sup> Ana nehunka ana vahera kugusopafi asene zamantenka, fri vahe kumapi kina huzmanto. <sup>14</sup> Jopuga anama hananke'na knare'za hane hu'na kagri kagia husga hugahue. Na'ankure kagrika'a hankavemo kaguvasigahie.

<sup>15</sup> Hagi kagri'ma tro hu'noa zama hu'na hanavenentake tusizaga hipopotamosiema nehaza afi zaga tro huntogeno mani'neno bulimakao afu'mo'ma trazama nenea zama huno trazama neneana ko. <sup>16</sup> Ana zagamofo amagenafima me'neno hihamuma nemia ame'a negenka, amurugufima me'neno hankavema nemia ame'a ko. <sup>17</sup> Ana zagamofo risonamo'a sida zafamo'ma hiaza huno hanavenentake hu'ne. Hagi agia zampima me'nea ame'amo'a magopi eri tru hutere hu'neankino tusi hankaveti'ne. <sup>18</sup> Ana hipopotamosimofo zaferinamo'a bronsireti'ma tro'ma hu'naza paipugna higeno, agia zampi zaferinamo'a aini zafagna hu'ne. <sup>19</sup> Anumzamo'na mago'a zaga kfama tro'ma huzmante'nofintira hipopotamosimo'a maka ruzamagatere'ne. Ana hu'neankino tro'ma hunte'nesimoke, ahesnigeno frigahie. <sup>20</sup> Hagi agona ramimpima afi zaga kfamo'zama zokago'ma nerazafi, hipopotamosimo'ma nenea trazamo'a hageno marenerie. <sup>21</sup> Nerga

asinagna traza lotusine, uha'enema tirupima nehaga'a trazamofo agafafi frakino nemase. <sup>22</sup> Tinkenare'ma hageno mareneria trazanku'ma lotusiema nehaza trazampi freno mase'negeno, tonam'o reso huntegeno nemanie. <sup>23</sup> Hagi tusi avunema anteno hageno ea tinkura korora nosuno, Jodani timo'enema hageno ankena regama varehiramino ea zanku'enena korora nosie. <sup>24</sup> Hagi avunteno mani'neno kvama hu'nesnia vahe'mo'a aze'origahie. Ana nehuno agonagampina nofitetira renteno avazu huno ovugahie.

## 41

### *Anumzamo'ma mago'ene Jopuma keaga asamino vu'nea naneke*

<sup>1</sup> Hagi agaza hunte tusizankna osifavema Leviataniema nehaza osifavekverfa, hagerimpima nemaniana Jopuga hukuretira avazu nehunka, nofitetira agefu'narera anakigahampi? <sup>2</sup> Agonagampinanofira rentetenka, avazu hunka nevunka, ameragempina reraponentenka nofira rentegahampi? <sup>3</sup> Ana'ma hanankeno'a kasunku hunantenka natro hunora fru kea hugahifi? <sup>4</sup> Ana nehuno nagra mago narimpa huanki'na kagri eri'za vahe manine'na, kazokazo eri'za erigante vava hu'na vugahue hunora hugahifi? <sup>5</sup> Namama avrenka kegavama nehana zana hunka kegava nehunka, nofitera rentetenka ne'one mofaneka'a zaminanke'za zokagora rentegahazafi? <sup>6</sup> Hagi zago vahe'mo'za ana zagama mizasenakura, mizama'agura keha rete'za, ana zaga ahe'za akafari osi osi hu'za eri'za maketifina zagorera ome atregahazafi? <sup>7</sup> Hagi ana zaga, nozamema nehaza keveretira asenifine avuvgafinena ahegresogreso hugahampi? <sup>8</sup> Hagi ana zagamofo avuvgare'ma kazama antenka kesanunka, henka'anena anara osugahue hunka hugahane. Na'ankure ana'ma hanugenoma henka'ama ha'ma hunantesniana, havizantfa hugahie hunka kagesa antahigahane. <sup>9</sup> Hagi antahio, kagrama hunka ana zagama azerisanue hunka'ma kagesama nentahisanunka anara osuo. Na'ankure ana zagama azerisanuema huno hania vahera ana zagma'a refaki hutregahie. <sup>10</sup> Mago vahe'mo'a ana leviatani'ema nehaza zaga azeri oraotigahie. Ana'ma haniana iza oti hankaveti'neno hara hunantegahie? <sup>11</sup> Iza mago zana nami'nesanigu hu'na, ete nona hu'na amigahue? Na'ankure ama mopafima maka zama me'nea zantamina, Nagri zanke me'ne. <sup>12</sup> Hagi leviataniema nehaza zagama hage rimpima nemania zagamofo hankavene, avuvgane agia azankrefagura eri ama hu'na kasamigahue. <sup>13</sup> Ana zagamofo avufagare'ma me'nea irira iza eri kanope netreno, agofetu agofetu'ma huno'ma hankave avuvgama me'neana iza reraponegahie? <sup>14</sup> Ana zagamofona ave krerfa hunte'neanki'za, vahe'mo'za koro nehaze. E'ina hu'neankino, iza ana zaga aheno agemzampa atavegrigahie? <sup>15</sup> Ana zagamofo amagenafina iri'amo'a, magopi rukamaretere huno evuevu hu'neankino hankavetino hankogna hu'ne. <sup>16</sup> Ana zagamofo iri'amo'a, magopi akamarenlo hantohanto hu'neankino, zahomo'ma ufrega kana omane'ne. <sup>17</sup> Mago mago irimo'a agu'afinka, mago irite rukamaretere huno azeri hankaveti'ne. Ana hu'neankino eri kanopeno eri rure'rurera hugara osu'ne. <sup>18</sup> Hagi ana zagamo'ma kasi'ma haniana, agonagampintira teve ruganani huno vuno eno nehigeno, avuvgafintira nantera zagemarero zagemo'ma remsama hiaza nehie. <sup>19</sup> Ana zagamofo agipintira teve ruganani huno vuno eno nehigeno, agipintira tevemo'a hagna hagna huno atineramie. <sup>20</sup> Ana nehigeno kavofima tima tagino, tevere

kre'negeno krakra hiaza huno, agonagampintira amu'mo'a rugasu huno enevie. <sup>21</sup> Hagi agipinti'ma evia zahomo'a tanknu'zafima tevema nerea tevea hukru higeno rukaru nehigeno, teve nefamo'a agipintira hagna hagna huno nere. <sup>22</sup> Ana zagamofo anankempina tusi'a hankave me'neankino, inantego vanoma hiana, tusiza huno vahera zamazeri koro nehie. <sup>23</sup> Ana zagamofo avufgamo'ma marerino tamino'ma hu'nea ma'amo'a, magopi ruhampri ruhampri huno antrako huno hankaveti'neankino, eri paheси rure rure'ma hu'amo'a amuho hu'ne. <sup>24</sup> Ana zagamofo tumo'amo'a havegna huno hanavetineankino, witima refuzafunepaza havegna hu'ne. <sup>25</sup> Ana zagamo'ma o'manetige'za hankave vahe'mo'za koro nehu'za, na'a hugahune hu'za kanku nehakaze. <sup>26</sup> Ana hu'neankino bainati kazintetiro, keveretiro, karugru keveretiro, osi have kazintetira mago vahe'mo'a ana zaga ahegara osu'ne. <sup>27</sup> Hagi ainireti'ma tro'ma hu'naza ha' zantamima ana zagamo'ma keana, trazankna huno keamne zankna nehuno, bronsireti'ma tro'ma hu'naza ha' zantamima keana, kasari'nea zafagna hu'ne. <sup>28</sup> Vahe'mo'za kevea ahe tresnageno mani'nesnirega vugahianagi, korora ofregahie. Gumi atifina havea erinte'za ahegahazanagi ana havemo'a hagege trazamo'ma avufgare'ma avako'ma hiankna hugahie. <sup>29</sup> Kumpa kanoma kesaniana, trazankna huno ke amnezaneseno, karugru kevema matrevuno atresigeno esania zamofa agasasama nentahino'a kiza regahie. <sup>30</sup> Ana zagamofo asagufima me'nea irimo'a, mopa kavomo'ma rupararo vazigeno asane'neankna hu'ne. Ana hu'neankino, mopa fima regararo heno'ma nevigeno'a, mopa vazikekurino nevie. <sup>31</sup> Hagi hagerimpima nevigeno'a, kavofima tima afino tevefi kre'negeno timo'ma krakra hiaza huno, hagerimo'a krakra huteno masavemo'ma ze'ze'ma nehiaza nehie. <sup>32</sup> Ana zagamo'ma hagerimpima nevigeno'ma, amefi'ma timo'ma agrege'ma huno nevia zamo'a rumsa huno efeke hu'neankino, mago kavrinteaza nehie. Ana nehigeno ana zamo'a tavava ozafamofo efeke azoka kna huno efeke nehie. <sup>33</sup> Ama mopa fima mago agrikna zaga omani'neankino, mago zagagura korora nosie. <sup>34</sup> Maka zagama mani'naza zagafina, agra zamagatereno avufga ra nehie. Ana hu'neankino maka afi zagama mani'nazana zamagatereno kini mani'ne.

## 42

### *Jopu'ma kugusopafi mase'neno asunku'ma hu'nea naneke*

<sup>1</sup> Hagi anante Jopu'a amanage huno Ra Anumzamofona kenona hunte'ne, <sup>2</sup> Nagrama antahi'noana nazano hunaku'ma hanana zana amne nehanankeno, mago vahe'mo'a e'ina hu'zana osuo huno osugahie. <sup>3</sup> Kagra nantahigenka, iza antahintahi'a omane vahe'mo Nagri knare antahi'zankura nagenoka hu'ne hunkama hu'nanana? E'i ana vahera nagragi'na, ke'na antahi'na osugeno nagri antahi'zampinena omaneanagi, knare zantfama hu'nea zanku amne keaga hu'noe. <sup>4</sup> Anumzamoka hunka, Jopuga kagesa naminege'na keaga nehu'na, mago'a kagenoka hugahuanki kenirera nona hunanto hunka hu'nane. <sup>5</sup> Kora vahe'mo'za kagri kagenkea nehzage'na antahi'noe. Hianagi menina nagra'a navufinti kagoe. <sup>6</sup> Maka nanekema hu'noana ete erue. Ana nehu'na menina nasunku'ma huazana ama tane-fapine kugusopafi mani'ne'na erinte ama hue.

*Jopuna roneamokizmigu Anumzamo'a mago rimpia huozmante'nea naneke*

<sup>7</sup> Hagi Jopu'enema keagama Ra Anumzamo'ma huvagamareteno'a, amanage huno Temani kumateti ne' Elifasinkura hu'ne, Kagri'ene tare ronekagu'enena tusi narimpa aheramante'noe. Na'ankure Nagri eri'za ne' Jopu'ma nagriku'ma tamagema huno huamama hiaza huta, Nagri navu'nava zankura tamagra tamage huta huamara osu'naze. <sup>8</sup>E'ina hu'negu tamagra 7ni'a ve bulimakao afu'ene 7ni'a ve sipisipi afu'ene avreta Nagri eri'za ne' Jopunte vuta, tamagra'agu huta tevefi kre fanane hu' ofa ome hiho. Ana nehinkeno, Nagri eri'za ne' Jopu'ma tamagriku huno, nunamuna hanige'na, tamagra neginagi kema huta Nagri navu'nava zanku'ma tamage huta huama'ma osu'naza zanteria, Jopu nunamuna antahi'na knazana ontamigahue. <sup>9</sup>Anagema hutege'za Temani kumateti ne' Elifasiki, Suha kumateti ne' Bildatiki, Nama kumateti ne' Zofariki hu'za Ra Anumzamo'ma hihoma huno huzmantea zana amage ante'za tro hu'naze. Ana hazageno Jopu'ma hia nunamuna Ra Anumzamo'a antahimi'ne.

#### *Anumzamo'a Jopuna mikazama'a ete ami'nea naneke*

<sup>10</sup> Hagi rone'araminku'ma huno Jopu'ma nunamuma hutegeno'a, Ra Anumzamo'a knare nomani'za ete Jopuna ami'ne. Ko'ma Jopu'ma ante'nea fenozama havizama hu'nerera, tamagerfa huno Ra Anumzamo'a ana mika fenozana ete ami'neno, ana agofetura mago'ene ante agofetu huno amigeno rama'a fenoza ante'ne. <sup>11</sup>Anama hutege'za afu aganahe'zane asarehe'zane korapa rone'amo'zanena e'za noma'afina ne'zana eme ne'naze. Ana nehu'za Ra Anumzamo'ma knazama atregeno agrite'ma e'nea zankura, Jopuna eme zamasunku hunente'za, azeri hankaveti nanekea hu'naze. Ana nehu'za mago mago vahe'mo'a muse zana, zagone golireti'ma tro'ma hu'naza rini eritere hu'za eme ami'naze. <sup>12</sup>Ana higeno henka no-man'i'zama Jopu'ma manino vu'nea nomani zama'afina Ra Anumzamo'a asomu huntogeno ko'ma mani'nea nomanizana rugatere'ne. Higeno Jopu'a menina 14tauseni'a sipisipi afutami anteno, kemoli afutamina 6tauseni'a anteno, hozama e'neria bulimaka'ama zanazeri tragoteno rezmante'nea bulimakao afutamina 2tauseni'a anteno, a' tonki afutamina 1tauseni'a ante'ne. <sup>13</sup>Ana nehuno Ra Anumzamo'a ru'ene Jopuma ami'neana, 7ni'a ne' mofavre nemino, 3'a mofa'ne ami'ne. <sup>14</sup>Hagi ese mofa'mofona Jemima'e huno agia antenemino, anante mofa'mofona Kesia'e huno agia antenemino, nampa 3 mofakura Keren-Hapuku'e huno agia antemi'ne. <sup>15</sup>Hagi anama mani'naza mopa'afina, Jopu mofa'nemo'zama hiranto hu'za knare zantfama hu'nazankna mofa'nea omani'naze. Ana hu'neankino Jopu'ma fenone mopanema refko huno ne' mofavre naga'ama nezamino'a, ana mofane nagara ana zanke huno refko huno zami'ne. <sup>16</sup>Ana'ma huteno'a Jopu'a 140'a kafu mani'neno, agehone agigone azankonena ke'ne. <sup>17</sup>Ana'ma huteno'a Jopu'a knare'za huno za'zate maniteno, ozafa reno fri'ne.

## Sam-Zagame

### Namba 1ni Zagame Avontafere

#### 1

*Knare avu'ava'ma nehaza vahe'ene havi avu'ava'ma nehaza vahe'mofo zagamere*

<sup>1</sup> Kefo avu'ava'ma nehaza vahe'mokizmi kea amage'ontege, kumi'ma nehaza vahe'mokizmi zamage ontege, mani'ne'za Anumzamofoma kiza zokago kema hunentaza vahe'enema nomaniza vahe'mo'za asomu eri'za muse hugahaze. <sup>2</sup> Ra Anumzamofo kasegema avesi avesi hunenteno, masane haninema agesa are'are'ma ana kasegegu'ma nehia vahe'mo'a, <sup>3</sup> tinkenare me'nea zafamo'ma kna fatgo'are raga'a knare huno renentegeno, ani'na'amo'a harari osu tretre huno meankna huno, maka zama hania zamo'a knare zanke hugahie. <sup>4</sup> Hagi kefo zamavu'zamava'ma nehaza vahe'mo'za anara osugahazanki, zaho'mo witi hona'a eri hareno viankna hugahaze. <sup>5</sup> E'ina hu'negu kefo avu'ava'ma nehaza vahe'mota Anumzamo'ma keagama refkohu trate'ma mani'neno keagama refko huramantesigeta anankeaga agatenoresageno, kumi'ma nehaza vahe'mo'zanena fatgo zamavu'zamava'ma nehaza vahe kevufina omanigahaze. <sup>6</sup> Na'ankure fatgo avu'ava'ma nehaza vahe'mokizmia Ra Anumzamo'a kegava huzmantegahanki, kefo avu'ava'ma nehaza vahe'mo'za haviza hu'za fanane hugahaze.

#### 2

*Ra Anumzamo'ma huhamprinte'nea kini ne'mofo naneke*

<sup>1</sup> Na'a agafare ama mopafima me'nea kumatamimpi vahe'mo'za hara hunakura oku'a nanekea retro nehazage'za, vahe'mo'za nena'a fore osia nanekea oku'a retro hu'za vano nehaze? <sup>2</sup> Hagi Ra Anumzamo'ma masavema freno huhamprinte'nea kini ne'mofone, Anumzamofonena hara huznantenakura ama mopafi kini vahetamimo'za retrotra nehazageno, kva vahe'mo'zanena ome eritrua nehaze. <sup>3</sup> Ana hute'za anage nehaze, tagri'manofi'ma rerantena'a zana rukampru nehuta, kegavama huneranta'a zana zanatretra fru huta manisune hu'za nehaze.

<sup>4</sup> Monafima kini tra'are'ma mani'nea kini ne'mo'a zamagiza neregano, Ra Anumzamo'a kiza zokago ke hunezmante. <sup>5</sup> Ana nehuno arimpahe zampinti kea hunezmino, rimpaaakahe ke huno zamazeri koro nehuno amanage hugahie, <sup>6</sup> Nagra'ni'a Saioni ruotge agonanire kini ne'ni'a azeri ot'i'noe. <sup>7</sup> Ra Anumzamo'ma trakema anaki namiankea zmasamigahue, Ra Anumzamo'a amanage huno nasmie, Kagra nenamofoga maninke'na, menina nagra kavre'na negafa'za hue. (Hibru 1:5-5) <sup>8</sup> Nantahigege'na ama mopafi kumatmina kami'nena erisanti haresskeno, maka mopamo'a kagri'za segahie. <sup>9</sup> Kazampina aini azompaka'a erinenka vahera kegava hunezmantenka, mopa kavo rufuzafupeankna hunka, ana vahetmina ana azompareti rufuzafupegahane. (Rev-Hufo hu'nea naneke 2:27) <sup>10</sup> E'ina hu'negu menina kini vahetmimota knare antahi'za e'nerinkeno, ama mopafi kva vahe'mota tamavumro kea antahiho. <sup>11</sup> Ra Anumzamofona koro hunteta agoraga'a mani'neta eri'zana erinenteta, tamahirahi nere'na koro hunteta agoraga'a

mani'neta musena hiho. <sup>12</sup> Aru arimpa ahesigeno'a tamahe fanane hanigi, nemofona agihene, agona hene hiho. Na'ankure teve anefakna huno arimpama he'zamo'a, ame huno ruhagna hugahie. Agripima frakisu'za vahem'o'za muse hugahaze.

### 3

#### *Deviti'ma nemofo Absalomunku koro'ma freno umani'neno hu'nea naneke*

<sup>1</sup> Ra Anumzamoka ha' vahenimo'za ome ra hu'za hara hunantazanki ko! Rama'a vahe'mo'za oti'za hara renantaze! <sup>2</sup> Rama'a nagrikura hu'za, Anumzamo'a agura ovazigahie hu'za nehaze. <sup>3</sup> Hianagi kagra Ra Anumzamoka maka kaziga hankoni'gna hunka manigaginantenka, ra nagia nenaminka naza hanke'na hara zamagate'nero. <sup>4</sup> Hagi Ra Anumzamo'ma nzama hinogu'ma krafage hu'na ke'zatugeno'a, ruotge agona'retira antahinami'ne. <sup>5</sup> Navura mase so'e hute'na onetue, na'ankure Ra Anumzamo'a kegava hunenante. <sup>6</sup> Hanki rama'a 10tauseni'a ha' vahe'mo'zama maka kazigati'ma eme navazagi kagisazana, nagra korora zamagrikura osugahue. <sup>7</sup> Ra Anumzamoka, otio! Nagri Anumzamoka nagu'vazio! Ha' vahe'ni'aramina zamerage rupro hunka nezmahenka, kefo avu'ava'ma nehia vhahera zamave rutafrinka zamaho. <sup>8</sup> Vahe'ma agu'vazi zana Ra Anumzamofompi me'nne. Hagi kagri asomu'mo'a, kagri vahepi megahie.

### 4

#### *Zavenama nehaza vahe zagame Deviti asunte'nea zagamere*

<sup>1</sup> Anumzanimoka kema hanugenka fatgo navu'navani'a refko hunka negenka antahinamio! Knafima mani'nogenka kagra naza hu'nane. Kasunku hunantenka nunamu'ni'a antahinamio. <sup>2</sup> Hagi ama vahe'mota nama'a zupa ra nagima nenamiza zana eri rukrahe huta, agafa'a omne'zantera nazeri nagazea nehaze? Nama'a zupa nena raga ore nanekea avesinenteta havi nanekea nevararize? <sup>3</sup> Hianagi antahio, Ra Anumzamo'a agri'ma nevaririza vhahera zamazeri ruotge huno agrarega zamavarenenteno, nagrama nunamuma hanugeno'a antahi namigahie. <sup>4</sup> Krimpama nehena kumira osuo, tafeka'are masenenka kea osu mani'enkena kagu'afi antahintahia huo. <sup>5</sup> Ofa fatgo hunka Kresramana nevunka, Ra Anumzamofonte kamentinti huo. <sup>6</sup> Rama'a hu'za, iza knare'zana taveri hugahie? hu'za nehaze. Hanki Ra Anumzamoka atregeno kavugosafinti masamo'a remsa huranteno. <sup>7</sup> Kagra tusi'a muse'za nagu'afina ante avitenantankeno witine kasefa wainima vasagazageno rama'a hige'zama musema nehzama'a agatere'ne. <sup>8</sup> Narimpa fru hu'na korora osu'nua masegahue. Na'ankure Ra Anumzamoka naza hanke'na hazenkea e'ori knare hu'na nemanue.

### 5

#### *Konkempinti'ma hu zugame Deviti'ma kre'nea zugamere*

<sup>1</sup> Ra Anumzamoka, nunamu keni'a antahinaminka, knazampima mani'ne'nama kragima neruana, nenagenka antahinamio. <sup>2</sup> Kagra nagri kini ne' mani'enkena, nagri Anumza mani'nananki, zavi krafage'nia kagesa antenka antahio. Na'ankure nagra kagritega nunamuna nehue. <sup>3</sup> Ra Anumzamoka nanterama segenka nagerura nentahine, maka nanterana Kresramanama vu'zana retro huntete'na kenonama hunantesanku tusiza hu'na nagesa nente'na kavegantete'na nemanue. <sup>4</sup> Na'ankure kagra kefo avu'avazanku muse osu Anumza mani'nanankino, kefo avu'avazamo'a

kagri tavaontera erava'o osugahie. <sup>5</sup> Hagi zamavufaga rama nehaza vahe'mo'za kagri kavuga o'otigahaze. Hagi kefo avu'a'ma nehaza vahera kavresa hunka zamagote nezmantane. <sup>6</sup> Kagra havigema nehaza vahera nezmahane. Ha'ma huno vahe'ma ahefri zanku'ma tusi aga'manetea vahe'enе, knare agerupinti'ma masavenkema huno vahe'ma revatgama nehia vahe'enena, Ra Anumzamoka kavresa hunka zamagote'nezmantane. <sup>7</sup> Hianagi vagaore kasunku'zamo'a rankrerfa hu'neanki'na amne nonka'afina marerige, ruotge mono nonka'ama me'nerega navugosa hunte'na korora hunegante'na keprihu'na monora hugantegahue. <sup>8</sup> Ra Anumzamoka fatgo kavukavazampi navrenka vuo, na'ankure ha' vahe'niaramimoza nazeri haviza hu'za nehzanki, navrenkama nevana kana eri fatgo huo. <sup>9</sup> Na'ankure nagri ha' vahe'mokizmi zamapipina tamage nanekea omnegeno, zamagu'afina vahe'ma azeri haviza hu'zamo avite'ne. Hagi zamananke nofimo'za, vahe'ma asenezmantaza mati kerigna higeno, vahe'ma masavema huno havi kampima avreno vu nanekemo'a, zamagefu'nafina avite'ne. <sup>10</sup> Anumzamoka keaga huzmantenka hazenke zamio, zamatrege'za zamagri kefo antahintahizamo, hazenkefina zamavareno ufreno. Hazenke zamavu'zmavamo'a marerige'za ha'regantazanki, zamahe natitrege'za kagri tava'ontera omaniho. <sup>11</sup> Hianagi kagripima eme fra'manekiza vahera zamatrege'za muse hiho. Anama nehu'za zagamema hu'za musena nehanagenka, kegava huzmanto. Kagriku'ma kavesinegantaza vahera kazana rusutenga turunara huzmanteg'e'za kagri turunapi mani'ne'za musenkasea hiho. <sup>12</sup> Na'ankure tamage hunka Ra Anumzamoka fatgo avu'ava'ma nehia vahera kagra asomu hunezmanenka, knare kavukavazanu hankonuma hiazza hunka maka kaziga anteso hunezmanenka kegava hunezmanetane.

## 6

### *8'a nofi me'nea zavena nehe'za hu zagame Deviti'ma hunte'nea zagamere*

<sup>1</sup> Ra Anumzamoka kasima vazizampintira kea onasuge, karimpa ahezampintira nazeri fatgoa osuo. <sup>2</sup> Ra Anumzamoka hankaveni'a omneanki kasunku hunantenka naza nehunka, zaferinanimo'a omne amanehanki naza huo. <sup>3</sup> Ra Anumzamoka, nagu' namemo'a tusi kna navenesianki, inankna zupa naza hugahane? <sup>4</sup> Ra Anumzamoka rukrahe hunka naza nehunka, vagaore kavesizanka'agu nentahinka nagu'vazio. <sup>5</sup> Fri'za vahe'mo'za fri'nazafintira antahi'nogamizanki, iza zagameru huno fri vahe kumapintira kagri kagia husga hugahie? <sup>6</sup> Kragri'ma ruvavama huazamo nanankena segeno, maka kenagera navunumo'a tafen'i'afina tiru nemaregeno, zavi'ma atoazamo'a pilonimo'a pasupanegie. <sup>7</sup> Zavi'ma atoazamo navumo'a zoregeno, ha' vahe'nimo'zama hazazamo hige'na zavi'ma atoazamo navumofona hankave'a omane. <sup>8</sup> Ra Anumzamo'a zavi krafage'ni'a antahanki, kefo avu'ava'ma nehaza vahe'mota rukrahe huta natreta viho. <sup>9</sup> Asunku hunantenogu'ma krafama huana Ra Anumzamo'a nentahino, nunamuma huana nentahie. <sup>10</sup> Ana maka ha' vahe'nimo'za tusi zamagaze nehanige'za antahintahi hakare nehu'za, havi zamagi e'neri'za, ame huno zamagaze nehina rukrahe hu'za vugahaze.

## 7

### *Benjameni nagapinti ne' Kusi zagame, Deviti kre'nea naneke*

<sup>1</sup> Ra Anumzana nagri Anumzamoka, kagripi fra nekuanki, nahenaku'ma navrizarizama ne-esagenka nagu'vazinka naza huo. <sup>2</sup> Ana'ma osnankeno'a laionimo'ma nehiaza hu'za nahe'za tagna taganu vazisageno mago vahem'o'e huno eme naza huno nagura ovazigahie. <sup>3</sup> Ra Anumzana nagri Anumzamoka, nagrama vahem'a zamazeri haviza huge, nzampima hazenke'zama mege, <sup>4</sup> hazenke'zama mege, omne vahem'a kefo avu'ava huntege, agafa'a omne zante ha' vahem'i'amofo feno rohumare'na erige'ma hu'nenuuan geno'a, <sup>5</sup> zamatrege'za ha' vahem'i'amofo feno rohumare'na erige'ma hu'nenuuan geno'a, <sup>6</sup> Ra Anumzamoka krimpa hezmantenka otinka, ha' vahem'i'aramina kasi vazizana eri zamaveri huo. Otinka zamarimpama ahenenantaza ha' vaheni'a fatgo kavukva hunka refko huzmantenka knazana zamio. <sup>7</sup> Atrege'za maka vahera emeri atru hu'za manigagisagenka, kagra manisga hunka mani'enka kegava huzmanto. <sup>8</sup> Ra Anumzana maka vahem'a refko nehia Anumzamo nagrira refko huno keana, nagra fatgo hu'noe. Fatgo navu'nava'ene knare navu'nava hugeno, hazenke zani'a omane'neanki, marerisa Anumzamoka nagrira refko hunanto. <sup>9</sup> Fatgo Anumzamoka kagra vahem'ofo antahintahine, tumo'enena negana Anumza mani'nananki, atregeno kefo zamavu'zmavama nehaza vahem'okizmi kefo zamavu'zmavam'a vaganerena, fatgo avu'ava'ma nehaza vahera zamaza huge'za hankaveti'za maniho. <sup>10</sup> Marerifa Anumzana agra hankoni'agino, agra tumo'amo'ma fatgoma hu'nea vahera zamagu'nevazie. <sup>11</sup> Anumzamo'a fatgo huno keaga refko nehia Anumzankino, maka kna arimpa ahenezmante. <sup>12</sup> Hanki mago vahem'o'ma agu'ama rukrahe osigeno'a, Anumzamo'a kazima'a kume neganeno, ati'a refagigino karina negreno retrotrara nehie. <sup>13</sup> Vahem'a ahe fri ha' zama'a retro hunenteno, teve nefaa'ane kevea'aramina retro hunente.

<sup>14</sup> Kefo zamavu'zmava'zama nehaza vahem'o'za kefo avu'ava zamo zamagu'afina avitege'za, a'nemo'za zamu'ene hazaza hu'za hazenke avu'ava zana zamu'ene hu'za krunagema hu'za kasenentaze. <sup>15</sup> Hagi iza'o vahem'moma taminogu'ma kerima kafintenimo'a, agra'a ana kerima kafintenia kerifi tamigahie. <sup>16</sup> Vahem'a hazenkema hunte'nia hazenkemo'a rukrahe huno agri asenire ne-enigeno, vahem'a azeri haviza hunaku retro'ma hania havizamo'a ete rukrahe huno agri kokovite egahie. <sup>17</sup> Fatgo avu'ava zama'agura Ra Anumzamofona susu hunente'na, muse zagame hu'na Ra Anumzana Marerifa Anumzamofona agia erisga hugahue.

## 8

### *Zavena neheno hu zagame Deviti kre'nea naneke*

<sup>1</sup> Ra Anumzana, tagri Anumzamoka maka ama mopafina Kagri kagimo'a mareri agatere'ne! Himamu masaka'amo'a, monaramina agatereno onagamu'a me'ne. <sup>2</sup> Ne'one mofavreramine, amima nenaza mofavreramine rempi huzminke'za hankaveka'agura huama nehanageno, ha' vahem'kamo'za mago kea nosazageno, ha'ma renerantaza vahem'mofonena kezemia omane'ne. <sup>3</sup> Tro'ma hunte'nana monaramimpima kesga huna koama, ikane ofuramima tro hunka noma'are'ma ante'terema hu'nana kazanko avoma nege'na, <sup>4</sup> amanahua nagesa nentahue, nankna hu zaga vahera mani'nonkenka tusi antahintahi hunerantenka, vahera amnezaga mani'nonanagi kegava hunerantane? <sup>5</sup> Hianagi monafima mani'naza

ankeroramina zamazeri antesga hunka tro hunezmantenka, mopafi vahera osi'a ante fenkma atrenka tro hunezmantenka masazanu'ene ragima amizanu'ene fotorira antaninte'nane. <sup>6</sup> Maka zama tro'ma hu'nana zantmimofo kegava hinogu kva azeri otinentenka, maka zana agri kvafi atrankeno agra kegava hu'nne. <sup>7</sup> Maka sipisipi afu kevuramine, bulimakao afu kevuramine, afi zaga kafane, <sup>8</sup> monaramimpima hareza vanoma nehaza namaramine, hagerimpi nozameramine, hagerimpima vanoma nehaza zagaraminena maka agri kavafinke atrenka kegava huo hunka ami'nane. <sup>9</sup> Ra Anumzana tagri Ra Anumzamoka, maka ama mopafina kagimo'a mareri agatere'ne!

## 9

### *Deviti'a Ra Anumzamofo agi erisaga hu zagame kre'nea zagamere*

<sup>1</sup> Ra Anumzamofona mika nagu'areti hu'na susu hunente'na agi'a erisga nehu'na, hentofa zama tro'ma hu'nea zamofo agenkea eri ama hugahue. <sup>2</sup> Marerirfa Anumzamoka, muse nehu'na zagame hu'na kagia erisga hugahue. <sup>3</sup> Hagi ha' vahe'nimo'zama rukrahe'ma hanu'za, kagri kavuga traka hu'za frigahaze. <sup>4</sup> Na'ankure kagra kema refko hu trate mani'enka fatgo hunka keaga refko nehunka, nagrira fatgo hunka refko hunenantane. <sup>5</sup> Krimpama ahenezmantenka ama mopafi vahera kea nezmasunka, kefo avu'ava'ma nehaza vahera zamahe frinkeno zamagimo'a fanene nehie. <sup>6</sup> Ha' vahera zamazeri haviza hunka nevunka, rankumazmia tra'zama tasgi hutreankna hunka vativrankeno vahe'mo'za mago'enena zamagesa antahi nozmize. <sup>7</sup> Hianagi Ra Anumzama kini tra'are'ma manivava huno nevia Anumzamo'a, fatgo huno keagama refko hanigura retro nehie. <sup>8</sup> Fatgo avu'ava huno ama mopafi vahera refko hunezmenten, fatgo huno vahetmina kegava huzmantegahie. <sup>9</sup> Hagi Ra Anumzamo'a zamazeri havizama nehaza zamunte omne vahe'mokizmi fraki havegazmi mani'neanki'za hazenke knafina anampinka ome frakiza manigahaze. <sup>10</sup> Kagri kagima antahi'naza vahe'mo'za kagrite zamentinti nehazanki, kagrama zamaza huogu'ma kantahima negaza vahera, Ra Anumzamoka kamefira hunozamine. <sup>11</sup> Ra Anumzamo'a Saioni kumatera (Jerusalem) kini tra'are manisga huno mani'neanki, zagame hunka agi'a erisga nehunka, maka zama hu'nea zamofo agenkea maka ama mopafi vahetmina zamasamio. <sup>12</sup> Na'ankure vahe'ma zamahe frizare'ma, nona huno nezamahea Anumzamo'a knafima maniza vahera antahi nezmiankino, hazenke'ma zamiza vahe'mo'zama krafagema hanazana, ana krafage zamia antahi amnea osugahie. <sup>13</sup> Ra Anumzamoka kasunku hunanto, zamavaresrama hunenan-taza vahe'mo'za nazeri haviza nehazagenka, kasunku hunantenka, fri kahanteti'ma navresgama hu'nana Anumza mani'nane. <sup>14</sup> Saioni (Jerusalem) mofa'hemofo kuma kafanterza zagameru hu'na nagu'ma vaz'i'nana zankura musena hugahue. <sup>15</sup> Ama mopafi vahe'mo'za zamagrama kafinte'naza kerifi neramisageno, zamagrama eri aka'ma hunte'naza kukompi ufregahaze. <sup>16</sup> Ra Anumzamo'a fatgoma huno keagama refkoma huno, agra'a avu'avara eriama nehigeno, kefo avu'ava'ma nehaza vahe'mo'za zamagrama haza kefo zamav'u'zmavazamo rukrahe huno zamazeri havizana nehie. <sup>17</sup> Hagi ama mopafima kefo avu'ava'ma nehaza vahe'mo'za, ete rukrahe hu'za fri vahem kumapi vanageno, Anumzamofoma zamagema akaninen-taza vahe'mo'zanena ana zanke hugahaze. <sup>18</sup> Hianagi keonke zanku'ma

upa'ma nehaza vhahera, Ra Anumzamo'a agera akaniozmante'na, zamunte omne vahe'mo'zama amuhama nehaza zamo'a, fananea osugahie. <sup>19</sup> Ra Anumzamoka otio! Atregeno vahe'mo'a hara azerino agate'orena, atregeno ama mopafi vahe'mo'za keagare kavuga eotiho. <sup>20</sup> Ra Anumzamoka zamazeri koro huo! Zamatrege'za ama mopafi vahe'mo'za amne vahetafa mani'none hu'za antahihio.

## 10

### *Tazama hanigu hanuna nunamu zagamere*

<sup>1</sup> Ra Anumzamoka nahigenka afetera otinka mani'nane? Knazampima mani'nogenka nahigenka frakinka mani'nane? <sup>2</sup> Kefo avu'ava'ma nehaza vahe'mo'za zamavufagara hu'za zamunte omne vhahera zamazeri haviza hunaku nezavaririzanki zamatrege'za zamagrama hanaza hazanke zamo zamazeri haviza hino. <sup>3</sup> Na'ankure kefo zamavu'zmava'ma nehaza vahe'mo'za, zamavufagamofo avesizankura zamavufagara nehu'za, zamagri'ama zamazama hania zankuke nentahi'za, Ra Anumzamofona huhaviza hunente'za zamefira hunemize. <sup>4</sup> Kefo avu'ava'ma nehia vahe'mo'a avuvgara nehuno, Anumzamofonkura nohakeno, Anumzana omanine huno antahintahi'afina agesa nentahie. <sup>5</sup> Hianagi ana vahe'mo'ma maka zama hia zamo'a, knare nehigeno kagrama azeri havizama hanana zamo'ma avegama ante'neazana nonkeno, ha'vahe'zmia kiza zokago ke hunezmante. <sup>6</sup> Hagi agu'afina amanage huno agesa nentahie, mago zamo'a nazeri kazara osugahie nehuno, maka zupa muse hvavava hu'na nevanugenno hazenke zana navatera omegahie nehie. <sup>7</sup> Hagi agipina kazusi kene, vahe'ma revatgama hu kene, vahe'ma azeri havizama hu kemo avitegeno, agefu'nafina hazenkema hu kene, kefo avu'avazama hu kemo avite'ne. <sup>8</sup> Hagi kuma tava'onte kafona anteno mani'neno hazenke'a omane vhahera ahe nefrino, oku'a frakino mani'neno azanavama antega vahe'ma azeri havizama hania zanku nehake. <sup>9</sup> Laionimo'ma trampima kfafoma anteno mani'neno zagagafama ame huno azeriaza huno, frakino mani'neno zamagra'ama zamazama hugama osaza vhahera kukozmifi zamazerite'za zamavazu hu'za nevaze. <sup>10</sup> Hankavezmima omane vahe'ma evazageno'a, hanavezmima me'nea vahe'mo'za zamaha'za rehapatinetraze. Na'ankure kefo avu'ava'ma nehaza vhahera hanavezmimo'a ra hu'nege'za anara nehaze. <sup>11</sup> Ana kefo avu'ava'ma nehia vahe'mo'a, agu'afina amanage huno agesa nentahie, nagrama hua navunavara Anumzamo'a agenekanino, avua nonkeankino, onagegahie huno nehie. <sup>12</sup> Ra Anumzamoka otio! Anumzamoka vahe'mo'zama zamazeri havizama nehazage'za, knazampima nemaniza vhahera kagerakani ozmantenka, kazana erisga hunka zamaza huo. <sup>13</sup> Na'a higeno kefo avu'ava'ma nehia vahe'mo'a Anumzamoka amagena hunegamino, havi avu'ava'ma hua zanteria nona osugahie huno agesa nentahie? <sup>14</sup> Hianagi Ra Anumzamoka hazenkema e'neri'za knazampima maniza vhahera kenka antahinka nehanankinka, hazenkema zamiza vhahera kagra'a kazanuti nona huzmantegahane. Zamagra'ama zamazama hugama osu'naza vahe'mo'za kagrite zamentintia nehaze. Kagra megusa mofavrerami zamazahu Anumza mani'nane. <sup>15</sup> Kefo avu'ava'ma nehuno vahe'ma azeri havizama nehia vahe'mofo azana ruhanentaginko, kefo avu'ava nehaza zanteria zamarotgo hunka zamahehna huo. <sup>16</sup> Hagi Ra Anumzamofo mopafintira fanane hugahazanagi, Ra Anumzana mani vava kini mani'ne. <sup>17</sup> Ra Anumzamoka anteramiza nemaniza vahe'mokizmi zamavesizana

negenka, zamagu'a zamazeri hanavenetinka krafa kezmia kagesa antenka nentahinka,<sup>18</sup> megusa mofavreramine vahe'mo'zama zamazeri havizama nehaza vahetega antenka zamahora nekane. E'ina'ma hanke'za ama mopafi vahe'mo'za koro nehu'za, mago'anena vahera zamazeri korora osugahaze.

## 11

### *Deviti'ma zagamate vugota hu'nea ne' kre'mi'nea zagamere*

<sup>1</sup> Nagra Ra Anumzamofompinka frakina nemanuanki, nahigenka ngrikura namamo'za zamagu'vazinaku hare'za agonarega frazankna hunka korora nefrane hunka nehane. <sup>2</sup> Na'ankure kefo avu'ava'ma nehaza vahe'mo'zama fraki'za mani'ne'za, fatgo vahera zamahenaku atizamifi keve erinte'za eri negrize. <sup>3</sup> Hagi kasegema amage anteno fatgo avu'ava'ma hu'zama omanesigeno'a, fatgo vahe'mo'za na'a hugahaze. <sup>4</sup> Hagi Ra Anumzamo'a Agra'a ruotuge mono nompi monafina kini tra'are mani'neno, avuaomege emege nehuno, Agra'a avurgareti vahera rezagneno nezam-age. <sup>5</sup> Hagi Ra Anumzamo'a fatgo vahera refko huno nezam-age. Hianagi havi zamavu'zmavama nehu'za, vahe'ma hazenkema nezamiza vahera tusi avesra hunezmante. <sup>6</sup> Hagi ana nehuno kefo avu'ava'ma nehaza vahe'ma hazenkema zamisiana monafinti amuho teve tankanuza herafi atrenigeno ko'arianka huno eramino zamahegahiankino, e'i miza zamia erigahaze. <sup>7</sup> Hagi Ra Anumzamo'a fatgo avu'ava nehia Anumza mani'neankino, fatgo avu'ava zanku ave'nesie. Hanki fatgo avu'ava'ma nehaza vahe'mo'zage, Agri avufina kegahaze.

## 12

### *Hazenke'ma fore'ma hanige'za hanaza zagame Deviti kre'nea zagamere*

<sup>1</sup> Ra Anumzamoka nazahuo, na'ankure fatgo vahera omanitfa higeno, kema antahino amage antega vahera ama mopafina omani'naze. <sup>2</sup> Hagi mika vahe'mo'za havige vaheke nemani'za, tare zamagu'reti masavenkea nehu'za vahera rezamavataga nehaze. <sup>3</sup> Ra Anumzamo Agrake havigema nehaza vahe'mofo zamagira ruhamunegino, zamavufaga rama nehaza zamaganefu'na ruhamunenkie. <sup>4</sup> Zamagra ana vahe'mo'za hu'za, tagra tavufga rankema hanuna zamo vahera zmagateregahunanki, iza tagrira kva vahetia manigahie hu'za nehaze. <sup>5</sup> Na'ankure kefo vahe'mo'za zamunte omane vahera zamazeri haviza nehu'za, kna nezamizanki'na, Nagra kegava huzmante'nuge'za havi vahe'mo'za zamazeri havizana osugahaze huno Ra Anumzamo'a hu'ne. <sup>6</sup> Ra Anumzamofo nanekemo'a, agru hu'neankino sil-vama 7ni'a zupa tevefi kreno eri agru hianknahuno agrunntake hu'ne. <sup>7</sup> Ra Anumzamoka, havi zamavu'zamava'ma nehaza vahe'mo'zama zamazeri havizama hu'zankura zamagu'vazinka maka knafina kegava huzamante vava huo. <sup>8</sup> Hagi kefo avu'avazamo'ma vahepima ome rama nehige'za kefozama nehaza vahe'mo'za zamavufaga ra huza vano nehaze.

## 13

### *Hazenke knafima zamazama hanigu hanaza nunamu zagame Deviti hu'nea zagamere*

<sup>1</sup> Ra Anumzamoka nama'a knafi kagera kaninantragahane? Ana maka kna kaganera kaninantragahampi? Nama'a knafi kamefira hunaminka onagegosane? Ra Anumzamoka za'za knafi kagera kaninantrane. Za'za kna

kamefira hunaminka onagane. <sup>2</sup> Nagra za'zate nasuzampina nemanugenogu nagu'namemo'a knazampina manino nevie. Nahigenka natranke'za ha' vahe'nimo'za nazeri havizama hazza zankura zamavufaga rana nehaze? <sup>3</sup> Rukrahe hunka nenagenka Ra Anumzana nagri Anumzamoka kenona hunganato. Ru mase'nurega frinugi, navurga eri hari hunka hanavea namige'na, ofri kasefa hu'na mani'neno. <sup>4</sup> Hagi ha' vahe'nimo'za amanage hugahaze, tagra hara hugateronkeno'e hu'za musena hugahaze. <sup>5</sup> Hianagi nagra vagaore kavesi zanka'agu namentintia nehu'na, nagra nagu'ma nevazina zanku musena nehue. <sup>6</sup> Nagra Ra Anumzamofonku zagamera hugahue. Na'ankure Agra knare'zana rama'a hunante'ne.

## 14

*Neginagi avu'ava huno havi avu'ava'ma nehia zamofo zagame Deviti kre'nea zagamere*

<sup>1</sup> Hagi neginagi vahe'mo'za zamagrama zamagu'afima antahi'zana Anumzana omanine nehaze. Hagi zamagra havizantfa hu'nazanki'za kasrino haviza hu'nea zamavu zamava nehu'za, havi vaheke manizageno magore huno knare vahera omani'ne. <sup>2</sup> Hagi Ra Anumzamo'a monafinka mani'neno, kema antahi ama'ma hu vahe'mo'zama Anumzamofonku'ma antahimiza amagema nentaza vahe'ma mani'nenagura kefenkatreno ama mopafina nege. <sup>3</sup> Hianagi mika vahe'mo'za rukrahe hu'za zamagena hunemiza, kefo vaheke mani'naze. Hagi magomo'e huno knare avu'vazana osu'neanki, mika vahe'mo'za kefo vaheke mani'naze. <sup>4</sup> Hagi kefo zamavu zamava'ma nehaza, bretima nenazaza hu'za nagri vahera zamazeri havizama nehu'za, Ra Anumzamofona nunamuna hu'za antahi nonkazafi? <sup>5</sup> Hianagi ana vahe'mo'za tusi'a koro hugahaze, na'ankure Anumzamo'a fatgo vahe'ene manigahie. <sup>6</sup> Hagi zamunte'ma omane vahe'mo'zama antahintahima retro'ma nehaza zana, havi zamavu'zamava'ma nehaza vahe'mo'za huhaviza nehzananagi, Ra Anumzamo zamunte omane vahe'mokizmi frakino zamagu'vazi kumazamia mani'ne. <sup>7</sup> Hagi nagrama antahuana, agu'vazi zana Saioni agonaregati egahiankino, Israeli vahera zamagu'vazigahie. Hagi Ra Anumzamo'ma naga'amofo maka'zama eri knarema hanigeno'a, Jekopu naga'mo'za musenkase nehanageno, Israeli vahe'mo'za tusi muse hugahaze.

## 15

*Saionima nemaniza vahe'mofonku huno Deviti asunte'nea zagamere*

<sup>1</sup> Ra Anumzamoka, iza kagri mono nompina manigara hu'ne? Iza ruotgema hu'nea agona ka'arerara manigara hu'ne? <sup>2</sup> Iza'o hazenkema nosuno fatgo avu'ava'ma nehuno, agu'aretima huno tamage kema nehuno, <sup>3</sup> vahe'mofo azeri haviza hu kea nosuno, vahe'mofo huhaviza hunenteno, tavaoma'are'ma nemanimofoma havigema hunonteno, <sup>4</sup> kefo avu'ava'ma nehia vahe'ma amagena hunemino, Ra Anumzamofoma amagema nentaza vahe antahine'zamino, knazampina unefreno'a, huvempama hu'nea zanku agesa nentahino runotagreno, <sup>5</sup> zagoma ami'nerema, rama'a zagoma ante agofetu'ma huno eme zamizanku'ma nontahino, zamagr'i'ma zamaza huno hazenke'a omane vahe'ma zamazeri haviza hinogu'ma masavema hu'za zagoma amiza zagoma e'noria vahe'mo'a, oti hankanavetino manigahie.

**16***Deviti asunte'nea zagamere*

<sup>1</sup> Ra Anumzamoka nagu'vazio, na'ankure kagripinka mani'nena nagra nagura nevazue. <sup>2</sup> Hagi Ra Anumzamofonkura nagra hu'na, mika knare zama e'neruana kagritegati ne-e. <sup>3</sup> Hagi Anumzamofo vahe'ma amafima mani'naza vahera knare vahe mani'nazage'na, zamagranema mani'zankura nagra musena nehue. <sup>4</sup> Hagi havi anumzama nevaririza vahe'mo'za, rama'a zamasu zampi manigahaze. Hagi nagra ana havi anumzante'ma tima tagitre ofama huogu'ma, korama eri'za eme namisazana erina ofa huontegi, ana havi anumzantamimofo zamagirera huamara osugahue. <sup>5</sup> Hagi Ra Anumzamoka nagrama erisanti hare'nua zane, tintafeni'a Kagrake mani'nenga, henkama manisua zani'a eri knare hugahane. <sup>6</sup> Hagi mopa'ma nami'nana mopamo'a, knare hu'nege'na musena nehu'na, hentofa zantamina erisanti neharoe. <sup>7</sup> Nagra nazeri fatgoma nehia Ra Anumzamofona agi'a erintesaga hugahue. Na'ankure hanimpinena ana nanekemo'a nagu'afi me'neno rempi hunenamie. <sup>8</sup> Nagra antahi'noe, Ra Anumzamo'a mika knafina nagrane nemanino hanavea nemiamkina, mago zankura korora hu'na antria osugahue. <sup>9</sup> E'ina hu'negu nagu'areti hu'na muse nehuokino, musezamo nagripina avinetegi'na knare hu'na nemanue. <sup>10</sup> Na'ankure kagra natrenanke'na fri'na fri vahe kumapina uomanige, atrenankeno ruotagema hu'nea vahekamo'a frino onkasarigahie. <sup>11</sup> Hagi kagra nomani'zamofo kana naveri nehankeno, kagri tava'ontera musezamo'a avineteankina tamaga kaziga kzantega mani'nena musena huavava hugahue.

**17***Deviti nunamumofo naneke*

<sup>1</sup> Ra Anumzamoka mani fatgo hu'na mani'nuegu kantahinegoanki nuna-muni'a antahinamio. Hagi nzama huogu'ma krafagema nehu'na, nagra regavatga nosuanki nunamuni'a antahinamio. <sup>2</sup> Hagi kagra mani'nantegatira nazahunka refko hunantenka, nazeri knare huo. Na'ankure kagrake knare'ma hu'naza vahera zamagenka refakoa nehane. <sup>3</sup> Hagi kagra hanimpina antahizani'a refako hunka negenka, nagu'amofona renahenka negane. Hianagi mago kumira nagripina kenka erifore nosane. Hagi kegaganifina mago kefo kea omanesie hu'na nehue. <sup>4</sup> Hagi kagri kasegema amagema nentoa zamo nazahige'na, haframa nehaza vahe'mokizmia namage'na hunezamue. <sup>5</sup> Mika zupa kagri kanteke nevugen, nagamo'a kririno havifina vuno enora nosie. <sup>6</sup> Ra Anumzamoka kagritega kezana netuanki antahinamio. Ra Anumzamoka kagesa antenka nunamu keni'a antahinamio. <sup>7</sup> Hagi vagaore kavesi zanka'a hentofaza hunka eri ama huo. Ha' vahezamigu'ma koroma nehaza vahera, Kagra hanave kazanu zamagu nevazina ne' mani'nane. <sup>8</sup> Hagi Kagra kavurgama kegavama nehanankna hunka kegava hunantenka, kagekonanu refitenanto. <sup>9</sup> Kefo avu'ava'ma nehaza vahe'mo'za nazeri haviza huza nehazagenka nagu'nevazinka, ha' vahe'nimo'za nahenaku'ma navazagi kaginagenka nagu'nevazine. <sup>10</sup> Hagi zamagra mago vahekura zamasunkura hunozamante'za, zamavufaga ra hu nanekege nehaze. <sup>11</sup> Hagi kama nevuge'za zamagra navaririza nevu'za, mopafi nahetrenaku navazagi kagine'za, zamavu ante'za mani'naze. <sup>12</sup> Zamagra laionimo zagagafa aheno tapage hunaku eme krino maniaza nehu'za, agaho laionimo zagagafa

ahenaku frakino maniaza hu'naze. <sup>13</sup> Hagi Ra Anumzamoka otinka ha' vahe'nia ha' huzamantenka zamahe mopafi zamatro. Kagra'a bainati kazin-knonteti kefo vahepintira hara hunka nagu'vazio. <sup>14</sup> Hagi Ra Anumzamoka ama mopafi zama erisantima harenaku'ma tusizama nehaza vahe zamazampintira hanave kazanuti nagu'vazio. Ana nehunka miko knaza zami-mofo avamente antenka mizana zamio. Ana nehunka zamagripintima fore hu anante nante hanaza vahera knazana zaminka vugahane. <sup>15</sup> Na'ankure nagra fatgo hu'na knare hu'noankina, henkama otinu'na kagri kavufina negage'na musena hugahue.

## 18

### *Ra Anumzamo Soli azampinti agu'vazi'nea zanku Deviti'a muse zagame hu'nea zagamere*

<sup>1</sup> Ra Anumzamoka nagra navesigantoe, nagri hanavea Kagrake mani'nane. <sup>2</sup> Ra Anumzamo'a ra haveni'ane, vihuni'a mani'neno nagura nevaziankina, agripinka frakugenno hankoni'a mani'neno nagura nevazie. Ra Anumzamo'a nagri hankone hankavenine nazahu have mani'neno, fraki kumani'a mani'ne. <sup>3</sup> Nagra Ra Anumzamofonku nunamu hu'na antahigogeno, ha' vahe'nimofo azampintira naza hu'neanki'na, Ra Anumzamofona ra agi nemina agi'a hentesga hugahue. <sup>4</sup> Nofi'mo nazeri kagiankna huno fri'zamo'a nazeri kanegigeno, ti hageno refiteankna huno hazenkezamo'a refiteneante'ne. <sup>5</sup> Hagi fri'zamo'a nofikna huno anaki nenantegeno, fri'zamo'a krifumo zagagafa azeriakna huno naze'nerie. <sup>6</sup> Hagi nagra narimpa natazane knazanifi mani'nena Ra Anumzamofona krafage humentogeno, Agra ra mono nomafinti ana krafageni'a agesa anteno antahi'ne. <sup>7</sup> Hagi mopamo'a imi e'nerigeno, toretore nehigeno, agonamofo tramo'a kazakaza hu'ne. Na'ankure Ra Anumzamofona arimpa ahenegeno anara hu'ne. <sup>8</sup> Hagi agonagampintira toki nehigeno, apipintira maka'zama tefanene hu tevemo hagana hagana nehigeno, teve tankanu'zamo ankanuferami ankanuferami hu'ne. <sup>9</sup> Hagi Agra mona kafana erinagino ne-egeno, agagusamofo fenka kaziga haninentake hampo me'ne. <sup>10</sup> Hagi serafimie nehaza ankeromofo agofetu hareno ne-eno, zaho'mofo agekonare mani'neno hareno evu'ne. <sup>11</sup> Hagi haninu agra'a azeri ano nevazino, koma neria hamponteti Agra'a azeri ano vazinte'ne. <sup>12</sup> Hagi masazama'amo'a ana hampona rupapa huno nevigeno, komopa komo'a nehigeno, tevemo'a teragareno vuno eno huno erami'ne. <sup>13</sup> Hagi marerifa Ra Anumzamo monafinkati kema nehigeno'a, agerumo'a tusi'a monage hiaza hu'ne. Hagi kema nehigeno'a, tevemo'a ankanuferamino vuno eno nehigeno, komopa komo'a hu'ne. <sup>14</sup> Hagi Agra keve'aramina ahetrore ha' vahe'a zamahe panani nehuno, tusi'a masa'areti kopasinamo ru marave marave hiaza huno zamahe savri hu'ne. <sup>15</sup> Hagi Ra Anumzamoka kasimu'ma nentankeno'a, hagerimo'a apapa huno vuno eno higeno mopa fore nehigeno, tusi'a keri fore higeno, mopama azeri'nea tra'mo'a amate me'ne. <sup>16</sup> Hagi Ra Anumzamo'a monafinka mani'neno azana antefenka atreno, hagerimo nazeri nakri'za nehigeno naza huno navre'ne. <sup>17</sup> Hagi hanavenentake ha' vahe'mo'zama nahe'zama nehazageno'a, Agra naza nehuno zamavaresrama hunantaza vahepinti'enena naza hu'ne. Na'ankure ha' vahe'nimo'za hanavenentake hu'za nagri nagatere'nazagu anara hu'ne. <sup>18</sup> Ha' vahenimo'za hanaveni'ama omnea knafi hara eme hunante'nazanagi,

Ra Anumzamo'a naza hu'ne. <sup>19</sup> Hago Agra navareno nagu'vazinia kumapi ome nantene. Na'ankure Agra nagria muse hunante'negu anara hu'ne. <sup>20</sup> Hagi Ra Anumzamo'ma knare'ma hunante'neana, nagrama fatgo navunava'ma hu'noa zante nona huno mizani'a nami'ne. Nazamo'a agru higena mago hazenke'ma osu'noa zante, nona huno mizana nami'ne. <sup>21</sup> Na'ankure nagra Ra Anumzamofona kasege'a amage nentena, nagra havi navu'navara hu'na Anumzamofona otre'nogu huno anara hu'ne. <sup>22</sup> Nagra kasegea mika amage nentena, magore hu'na tra ke'a ruotagre'noe. <sup>23</sup> Nagra kumira nosuna, Ra Anumzamofo avufina kumi'ma huzankura kegava hu'na mani'noe. <sup>24</sup> Ana hu'negu Ra Anumzamo'a knare navu'nava'ma hunore nona huno mizana nami'ne. Na'ankure Agrama keana nagri nzampina hazenke'zana omneno agru hu'negu huno, anara hu'ne. <sup>25</sup> Hagi manifatgoma huza maniza vahera, fatgo kavukva hunezmantenka, hazenkezmima omne vahera knare kavukva hunezmantane. <sup>26</sup> Hagi agruma hu'nea zamavu zamava'ma nehaza vahera, agru hu'nea kavukava hunezmantenka, fatgoma osu zamavuzamava nehaza vahera, fatgo kavukva hunka, ana avu'avazanteria nona hunezmantane. <sup>27</sup> Hagi zamavufagama anteramiza maniza vahera zamazeri antesaga nehunka, zamavufagama antemareriza vahera zamazeri fenkami netrane. <sup>28</sup> Hagi Ra Anumzamoka Kagra tavira rekru hunenantenka, hanizana nagripintira eri netrane. <sup>29</sup> Hagi Anumzanimoka Kagra nzahankena hanave ha' vaheni'a nezamahe'na, Kagra nzahankena ranra kuma kegina takaire'na nevue. <sup>30</sup> Anumzamofo avu'avamo'a knare hu'ne. Ra Anumzamoka ke'mo'a tamage ke me'ne. Hagi Agra hankogna hu'nege'za vahe'mo'za agripinka ome franekeze. <sup>31</sup> E'ina hunanku ina Anumzamo kagri knara huno Ra Anumzana mani'ne? Magore huno ra anumzana ormani'neanki, tagri Anumzamoka Kagrake hanavenentake havetia mani'enka, kva hunerantane. <sup>32</sup> Hagi magoke Anumzamo agrake hanavea nenamino, fatgo kantera knare huno navareno nevie. <sup>33</sup> Hagi Agra nagiamofona azeri hanavetige'na dia afumo'zama nehzaza hu'na agona morusapina vano nehu'na, tarakara nosue. <sup>34</sup> Hagi Ra Anumzamo'a ha'ma hu'zana rempi hunenamino, hanave namige'na bronsireti tro hu'naza hanavenentake atia erigrinkenke nehue. <sup>35</sup> Hagi Ra Anumzamoka Kagra nagu'vazi hanko nemalinka, tamaga kazanu nazerisga hankena, hara hu'na vahe'mokizmi zamavurera nagine vahera mani'noe. <sup>36</sup> Hagi nagamo'ma krarizankura Kagra ranka varinantanke'na traka osu nevue. <sup>37</sup> Hagi nagra ha' vaheni'a zamarotago hu'na ome zamazeneri'na, zamarotago huge'na otre'noanki, zamarotago huvava hu'na miko zazmia eri haviza nehu'na zamahe vagare'noe. <sup>38</sup> Hagi nagra zamahe'na rehapatuge'za, nagafi ufrinte efrinte hu'za oratigara osu'naze. <sup>39</sup> Hagi ha' vaheni'anema ha'ma hanua hanavea Kagra nemalinka, ha' vaheni'a zamatrante'za nagafi eme kepri hunante'naze. <sup>40</sup> Hagi Kagra ha' vaheni'a zamazeri koro hanke'za, zamefira rukrahe hu'za onke fre'za vazage'na, zamavesrama hunenantaza vahera mika zamahe vagare'noe. <sup>41</sup> Hagi zamazama hanaza vaheku kezati'nazanagi, magomo'e huno zamaza osige'za, Ra Anumzamofonku taza huo hu'za hazanagi, zamaza osu'ne. <sup>42</sup> Hagi nagra ha' huzmantene'na zamahe kasopoge'za, zahomo kugusopa eri hareno vuno eno hiakna hu'za miko kokantega umani emanu hu'naze. Hagi ha' vaheni'a ha' huzmantena zamahena rehapatuge'za, kampi hapa kna hu'naze. <sup>43</sup> Hagi Kagra ha'ma renenantazagenka, nagu'vazinka nzamahankena ha' vaheni'a hara huzamagatere'noe. Hagi

Kagra kva vahera huhampri'nantake'na kumatamina kegava hu'noge'za, zamage'na antahina osu'noa vahe'mo'zanena nagri ngoraga manine'za erizani'a eri'naze. <sup>44</sup> Hagi nagri nagenkema miko kaziga vahe'mo'zama nentahiza, zamanogu nehu'za nagri nagafi anterami'za mani'naze. <sup>45</sup> Hagi ha' vahe'nimokizmia miko hanavezamia vagarege'za zamahirahiku nehu'za, fra'ma nekiza vihu'zamia atre'za nagrite e'naze. <sup>46</sup> Hagi kasefa huno mani'nea Ra Anumzana nagri fraki havenia mani'neanki'na, agi'a ahentesga nehu'na, nagu'ma vazi'nea Anumzamofo agi'a ahentesga hugahue. <sup>47</sup> Hagi ama ana Anumzamo, nagri'ma nazeri haviza hu'naza vahera nona huno zamazeri haviza nehuno, ru kazigati vahera zamavarenamige'za nagri nagafina mani'naze. <sup>48</sup> Ha' vahe'ni'mo'zama nahenaku nehazageno'a naguvazi'ne. Hagi hazenke vahe'mo'zama nazeri havizama hu'za nehazagenka Kagra nagu'vazi'nane. <sup>49</sup> E'ina hu'nanku, maka kumapi vahepintira nagra muse zagamera hu'na Ra Anumzamoka kagia erisga hugahue. <sup>50</sup> Hagi Kagra kinima nazeri oti'nana ne'kamo'na hanavea nenaminkena hara azeri agatenerogenka, Kagra masavema frenka huhampri nante'nana ne'mo'na kavesinenantenka Deviti'nane nagripinti'ma fore'ma hania vahera kavesi rante vava hugahue.

## 19

### *Anumzamofo hanavema erinte ama hu zagame Deviti'ma asunte'nea zagamere*

<sup>1</sup> Hagi monamo'a Anumzamofo hankave'a erinte ama nehigeno, monafima me'nea zantamimo'a Agri erizankama'a erinte ama hu'ne. <sup>2</sup> Hagi magoke magoke knamo'a Anumzamofoku hu'ama nehigeno, maka kenagemo'a Agri antahi'zama'a erinte ama nehaze. <sup>3</sup> Hagi masane haninemokea kegaga neha'anagi, zanagerura ontahigahaze. <sup>4</sup> Naneke zanimo'a mopane mopane vuno eno hu'ne. Hagi zagemofo nonkumara Anumzamo'a monafi retro hunte'ne. <sup>5</sup> Hagi anampinkatira zagemo'a aravema hunaku hu'nea ne'mo atiramino eaza huno ne-eno, agare zokago nerea ne'mo agarenaku muse nehia kna nehie. <sup>6</sup> Hagi zagemo'a mopamofona mago kazigati hanatino mago kaziga unefreankino, mago zamo'a agri amuhofintira frakigara osu'ne. <sup>7</sup> Hagi Ra Anumzamofo kasegemo'a fatgo hu'neno kasefa tasimu neramie. Hagi Ra Anumzamofo kemo'a, knare antahi'za me'neankino antahizama'a omne vahera azeri ante fatgo huno knare antahi'za nezamie. <sup>8</sup> Hagi Ra Anumzamofo kasegemo'a knare zantfa hu'neankino, tagu'afina musezanente. Hagi Ra Anumzamofo kasegemo'a, agru hu'neankino vahe'mofo avua eri hari nehuno, ama' antahiza nemie. <sup>9</sup> Hagi Ra Anumzamofonku'ma kore'ma huntezamo'a agru hu'neankino mevava hugahie. Hagi Ra Anumzamofo kemo'a tamage ke me'neankino, makazana fatgo huno refako nehie. <sup>10</sup> Hagi ana ke'amo'a, rama'a golima krei'za eri agruma hu'naza golimofo mizama'a agaterene. Hagi ana ke'amofo haga'amo'a tume rima'amofo haga'a agatere'ne. <sup>11</sup> Hagi ana kekamo'a eri'za vahekamo'na havi avu'ava'ma huzanku koro kea nenasmino, ana nanekeka'ama amage'ma antaza vahera knare museza nezmie. <sup>12</sup> Hagi inankna hu'na nagripima me'nea kefozana kena antahina hugahue? Ra Anumzamoka kagrake oku'ama frakino nagripima me'nea kumini'a atrenantenka nazeri agru huo. <sup>13</sup> Hagi havizama hugahuanki hu'na antahine'nama hu kumipina natrege'na uofra'neno, hagi atregeno kumi'mo'a

nazeri nagatereno navareno ovuno. Hagi natrege'na kumimpintira fru hu'na mani'neno. <sup>14</sup> Hagi Ra Anumzamoka atregeno kenimo'ene nagu'afima antahintahima nehua zamo'a kagri kavufina knare huno me'nena musena hunanto. Kagra Ra Anumzamoka fraki have mani'enka, nagu'veazi ne' mani'nane.

## 20

### *Deviti asunte'nea zagamere*

<sup>1</sup> Hagi hazenkefima ufresankeno'a, Ra Anumzamo'a kagu vazigahie. Jekopu Anumzamo'a kegava hugante'nie. <sup>2</sup> Hagi Agra mono nom'aafi mani'neno kza nehuno, Jerusalemi kumateti kza hu'zana atrenigeno egahie. <sup>3</sup> Hagi mika ne'za ofama hananana, antahi'negamino tevefima kre fanene hu ofama hananana, antahi muse hanie. <sup>4</sup> Hagi Agra kagri'ma kvesinia zana negamino, nazano tro'ma hunaku keagama retro hanana zana amane hugantenigeno knare zanke hugahie. <sup>5</sup> Hagi Kagrama ha'ma agatere'nanketa tagra musenkase huta kaninereta, Anumzantimofo agire krauvefana erisaga hugahune. Ra Anumzamo agrake mika nunamuma hanazana antahiramisie. <sup>6</sup> Hagi menina nagra antahi'noe, Ra Anumzamo'a monafinka ruotge kuma'afi mani'neno, Agra'ama huhampri'nante'nea kini ne'mo'na nunamuni'a antahinenamino kenona hunanteno, tamaga azanteti hanave'a eri ante ama huno naza huno navregahie. <sup>7</sup> Hagi mago'a vahe'mo'za hosi afuzmine karisi zmimofo hanavegu antahinezamize. Hi-anagi tagra Ra Anumzana tagri Anumzamofonte tamentintia nehune. <sup>8</sup> Hagi mago'a vahe' mo'za evuramiza haviza hugahazanagi, tagra oti'neta han-kavenentake huta manigahune. <sup>9</sup> Ra Anumzamoka aza hunka kini nera agu'nevazinka, taza huoguma krafagema nehanunkenka, krafa ketia antahiramio.

## 21

### *Ra Anumzamo'ma azama hu'nea zanku Deviti'a muse hunenteno hu'nea zagamere*

<sup>1</sup> Ra Anumzamoka, kagrama kini ne'mofoma hankavema nemina zanku, agra tusi muse nehuno, azama hankeno ha' vahe'ama ha'ma huzmagatere'nea zankura tusiza huno kagrikura musenkasea hunegante. <sup>2</sup> Agri'ma agu'afima avesiazana amne neminka, nazankuro kantahigea zana, i'ora osunka amne nemine. <sup>3</sup> Kagra tamagerfa hunka kini nera asomu hunentenka, knare zantfa hu'nea golireti tro hu'naza kini fetori anuntera antani nentane. <sup>4</sup> Kini nemo'ma kantahigeno za'zate kasefa hu'na manisanuema higenka, Kagra hu izo hunka asimura neminka, kna'a eri zaza hankeno mani vava nehie. <sup>5</sup> Kagra kini nera aza hankeno, ha' vahe'a hara huzmagaterege'za agrira ragia ami'naze. Kagraka'a ra agima eri'zane hanavenena ami'nane. <sup>6</sup> Tamagerfa hunka mevava asomura hunentenka, tavaonkare avrentankeno muse huno Kagrane nemanie. <sup>7</sup> E'ina hu'negu kini ne'mo'a, Ra Anumzamofonku antahi amuhara nehuno, Marerisa Anumzamofona vagaore avesizanku nentahino, antria nosuno oti hankavetigahie. <sup>8</sup> Ra Anumzamoka hankavenentakema hu'nea tamaga kaziga kzanteti ha' vaheka'a hara hunezmantenka, kagri'ma zamavesrama hunegantaza ha' vaheka'a zamazeri haviza hugahane. <sup>9</sup> Kagrama efore'ma hanana knazupa, kagri ha' vahera Kagri tevenefake tevemo teno eri fanane hugahie. Ra Anumzamoka tusi krimpa ahenezmantenka tevefi

zamahe fanene hugahane. Ana nehanigeno Anumzamofo tevemo'a ana vhahera teno eri fanane hugahie. <sup>10</sup> Ana vahepintima fore hu anante anante'ma hu'za ama mopafima mani'naza vhahera, ama mopafintira zamahe vagaresnanke'za, ama mopafina omanigahaze. <sup>11</sup> Kagrirra ana vahe'mo'za kazeri haviza hunaku kea anaki'naze. Hianagi ana kezamimo'a, amne zankna hugahie. <sup>12</sup> Na'ankure Kagra keveka'a atifima erintenka zamahenaku'ma eri karisnanke'za, koro atre'za fregahaze. <sup>13</sup> Ra Anumzamoka kagri hankavegu kagia ahentesga nehune. Ana nehuta kagri hihamugu zagamera hutu kagia ahentesga nehune.

## 22

### *Knazampima mani'neta hanuna zagame Deviti asunte'nea zagamere*

<sup>1</sup> Anumzanimoke Anumzanimoke, na'a higenka kamefira hunenamine? Nazama huoguma kragima nerugenka, nahigenka naza osu afetera nemanine? (Matiu 27:46, Maki 15:34) <sup>2</sup> Anumzanimoka kagritega manigasa osuna mika knafina zagene haninena kagritega zavi krafagea nehuanagi, kagra antahi nonamine. <sup>3</sup> Ana hu'neanagi kagra ruotage hu'nana Anumzankinka kini trakare mani'nanke'za Israeli vahe'mo'za kagia erihentesga neheze. <sup>4</sup> Korapara tagri tagehe'za Kagrite zamentintima hazagenka, zamagu'vazinka ete zamavare'nane. <sup>5</sup> Kagritega zavi krafa hazagenka nentahinka, zamagu'vazi'nane. Ana nehanke'za kagrite zamentintia nehu'za zamagazegura osu'naze. <sup>6</sup> Hianagi nagra vaheklnara osu'na hagirfagna vahe mani'noanki'za, maka kea nenasu'za zamefi hunenamide. <sup>7</sup> Maka vahe'mo'zama nenage'za, ki'za zokago ke hunenante'za, zamagefu'na hakana hunenami'za zamagena neru'za, <sup>8</sup> zamagra amanage hu'za nehaze, Ra Anumzamofonte amuhara nehuno amentintia nehanki, atrenkeno Ra Anumzamo aguravazino, Agra aza hino hu'za nehaze. (Matiu 27:39, 43. Maki 15:29. Luku 23:35) <sup>9</sup> Ana hu'neanagi kagrake'za naza hanke'na antanimofo arimpafintira so'e hu'na atirami'noe. Ana nehunka osi'ma manine'na antanimofo amima nenoa knafina naza hankena namentintia kagritera hu'noe. <sup>10</sup> Antanimo'ma kasenante'nea knaret'i'ma eno menima ama knare'ma egenka, kagra kegava hunenanteka, kagra nagri Anumza mani'nane. <sup>11</sup> Nagrirra natrenka afetera omanio, na'ankure knazamo'a tavaonte me'neankino, mago vahe'mo'e huno naza hugara osu'ne. <sup>12</sup> Rama'a ha' vahe'mo'za ve bulimakao afu'mo'za nehazaza hu'za manikagi nante'naze. Ana vahe'mokizmi hankavemo'a Basani kazigama nemaniza ve bulimakao afutamimofo hankavezmimo'ma nehiaza huza mani kaginante'naze. <sup>13</sup> Nagri ha' vahe'mo'za laionimo agira aka huno mago'a zagagafa aheno nenaku krafa nehuno rotago nehiaza hu'za, nahenaku narotago nehaze. <sup>14</sup> Tima eri tagi atregeno'ma hiaza huno hankavenimo'a omanegeno, zaferinanimo'a avazu hu'ne. Ana higeno tumoni'amo'a kragefe masavemo nehiaza huno nagu'afina ze'ze huno pakepake hu'ne. <sup>15</sup> Zagere ante hagege hu'nea mopa kavomo tako hiankna huno hankavenimo'a omnegeno, nagefunamo'a navagu'nafare marerino antrako hu'ne. Ana higenka Anumzamoka kagra frio hunka natrakte'na kugusopafina mase'noe. <sup>16</sup> Kramo hiaza hu'za ha' vahe'nimo'za mani kanegizageno kefo vahe'mo'za navazagi kagi'naze. Nazampine, nagiafinena rerapone'naze. <sup>17</sup> Ana hazagena ana maka zaferinan'i a hampri'na ke'noe. Hagi ha' vahe'nimo'za uruha nenage'za zamagu muse nehu'za orevumi

arevumi hu'naze. <sup>18</sup> Ana nehu'za ana vahe'mo'za nagri kukena refko hu'za eri zamente hu'za eneri'za, nagri kukena erinaku satu zokago re'naze. (Matiu 27:35. Maki 15:24. Luku 23:34. Jon 19:24.) <sup>19</sup> Hianagi kagra Ra Anumzamoka nagrira natrenka afetera omanio. Na'ankure kagra nagri hanave mani'nananki ame hunka enka eme naza huo. <sup>20</sup> Nagu'vazinka naza huge'za vahe'mo'za kazintetira nahe ofriho. Kagra naza huge'za, knare'ma hu'na mani'nofintira kragna vahe'mo'za nahe ofriho. <sup>21</sup> Laionimo'ma naheno nezama nefifintira naza nehunka, afi bulimakao afumo'ma pazivema nare'zama nefintira naza hunka nagu'vazio.

<sup>22</sup> Nafu nagnahe'mokizmia Kagri kagia huama hu'na nezamasami'na, atruma hu'za mono'ma hanaza vahe amu'nompi ot'i'na kagia ahentesga hugahue. (Hibrus 2:12) <sup>23</sup> Hagi izagato Ra Anumzamofonku'ma koro'ma nehanamota, Agri agia ahentesga hiho. Ana maka Jekopu agehe'mota Agri agi'a ahentesga huta monora huntaho. Israeli agehe'mota Ra Anumzamofonku koro hunenteta, Agri agorgia maniho. <sup>24</sup> Iza'zo zamatafima mani'ne'za zamagra'ama zamazama huga'ma nosaza vahera, Ra Anumzamo'a amefira hunozamie. Ana nehuno zamagritera ke amnea huno frara nokianki, iza'o aza hinogu'ma nunamuma huno zavi krafama huno antahigea vahera, nunamu'a antahimino aza nehie. <sup>25</sup> Hanki Ra Anumzamoka kagri vahe'mo'zama mono'ma hunaku'ma eme atru'ma hanafina, Kagra muse zanka'a nagu'afina ante avite'nanke'na kagri kagia ahentesga hugahue. Kagriku'ma koroma nehaza vahe zamavufi, ko'ma huvempama hu'na hugahuema hu'na hu'noa zantamina ana maka hvugaregahue. <sup>26</sup> Zamunte'ma omane vahe'mo'za ne'zana nezamu hugahaze. Ra Anumzamofonku'ma nehakesaza vahe'mo'za, Agri agia ahentesga hugahaze. Anama hanaza vahera Anumzamo'a vagaore museza antezmanteke'za, musena hu'za vugahaze. <sup>27</sup> Ama mopafima maka kazigama mani'naza vahe'mo'za Ra Anumzamoka kagrira antahi negami'za rukrahe hu'za kagritega egahaze. Ana nehanage'za ama mopafima mani'naza maka vahe'mo'za nagate nofite hu'za Kagri kagiafi zamarena eme re'za monora hugantegahaze. <sup>28</sup> Na'ankure Ra Anumzamo'a Agra'a kinia manino, maka ama mopafi vahera kegava hu'ne. <sup>29</sup> Maka feno vahe'mo'za, ne'zana nene'za Ra Anumzamofona monora huntegahaze. Ana nehanage'za ana zanke hu'za frisaza vahe'ma mani'naza vahe'mo'za e'za, Ra Anumzamofo avuga zamarena eme re'za monora huntegahaze. <sup>30</sup> Henkama fore'ma hu'za mani'zama vanaza vahe'mo'za Ra Anumzamoka kagri eri'zana eri'za nevanage'za, mofavretimo'za kaguvazama eri fore'ma hu'nana zamofo agenkea antahigahaze. <sup>31</sup> Hagi ana fatgo avu'avazama hu'nea zana nezmarera rimpafima mani'naza mofavre nagamokizmia nezamasamisnage'za, maka'zama eri fore'ma hu'nea zamofo agenkea antahigahaze.

## 23

### *Knare sipisipi kva ne'mofo zagamere*

<sup>1</sup> Ra Anumzamo'a kva vaheni'a mani'neanki'na, mago zankura atupara osugahue. <sup>2</sup> Ana hu'neankino afovage huno tretre'ma hu'nea trazampi nanteg'e'na mani fru nehue. Ana nehuno kaza osu tintega navareno vige'na, tina ne'noe. <sup>3</sup> Agra hanaveni'a ete eri kasefa nehuno, Agra'a agigu nentahino navareno fatgo avu'avazamofo kantera nevie. <sup>4</sup> Ana nehu'na knazamo'ma rehanima hige'na, hanimpi neviankna hugahuanagi, anankna zamo'ma eme nazeri havizama hu'zankura korora osugahue. Na'ankure

Ra Anumzamoka sipisipi kva vahe'mo'zama e'nerizankna azompaka'ane, sipisipima runeharizankna knonka'a eri'enkena nagrane mani'nanke'na ana zama negogeno'a, narimpamo'a fru nehie. <sup>5</sup> Ha' vahe'nimofo zamavuga, ra ne'zana retro hunenantane. Ana nehunka nasenifina masave taginka fre nenantenka, huhampri nantankeno, kapufinti'ma avite'noma herafirami-aza huno musezamo'a nagu'afintira aviteno varehineramie. <sup>6</sup> Tamagerfa huno Ra Anumzamofo knare avu'ava zamo'ene agri avesi'zamo'a ofri'nama kasefa hu'na ama mopafima manisua kna'afina, namage navararino vano hugahie. Ana nehanige'na Ra Anumzamofo mono nompi maka zupa mani-vava hugahue.

## 24

### *Marerisa kinimofo zagame Deviti asunte'nea zagamere*

<sup>1</sup> Ama mopa Ra Anumzamofo suza megeno, ama mopafima maka'zama me'nea zantamimo'a agri zanke megeno, maka vahe'mo'zanena agri vaheke mani'naze. <sup>2</sup> Na'ankure agra ama mopamofo tra'ama amefenkame tami'nea hagerimofo agofetu tro hunenteno, timofo agofetu mopa tro hunte'ne. <sup>3</sup> Ina vahe'mo Ra Anumzamofo agonafina marerigahie? Ina vahe'mo Ra Anumzamofo ruotage mono nompina ome otigahie? <sup>4</sup> Hagi agu'amo'ene azamo'enema agru nehanigeno, havi anumzante'ma mono'ma hunntenno havigema nosania vahemo anampina vugahie. <sup>5</sup> E'inahu vahe'mo Ra Anumzamofontegatira asomura erigahie. Anumzamo'a agu'vazino nevreno, fatgo vahe mani'ne huno huntegahie. <sup>6</sup> E'inahu vahe'mo Anumzamofonkura nehakeno monora hunenteno, Jekopu Anumzamofo tvaontera urava'o nehie.

<sup>7</sup> Kuma kahantamimota anagita ru hagro nehinkeno, korapa'ma me'naza kahamota anagita ru hagaro nehinkeno, hankave'ane kini ne'mo'a efreno. <sup>8</sup> Hagi ana hankave kinia iz'a'e? E'i agra Ra Anumzana hihamu'ane hankanave Anumzankino, Agra hankavetino hara hugateregatira Anumza mani'ne. <sup>9</sup> Kuma kahamota anagita ruhagro hiho, ana nehanageta korapa kahamota, anagita ru hagaro hiho. Ana nehinkeno hankave'ane kini ne'mo'a efreno. <sup>10</sup> Hagi ana hankave kinia iz'a'e? Ra Anumzana hankaventake Anumzamo agrake ugagota kinia mani'ne.

## 25

### *Ra Anumzamo'ma kegava hurantesia zanku Deviti asunte'nea zagamere*

<sup>1</sup> Ra Anumzamoka kagrite nagu namena eri'na e'na ama nunamuna nehue. <sup>2</sup> Kagra nagri Anumza mani'nanke'na, kagrite namentintia nehue. Kagra natrege'na nagazegura osaneno. Hanki ha' vaheni'a zamatrege'za, hara hu nagate'nere'za musrena osiho. <sup>3</sup> Kagrite'ma amuha nehu'za zamentintima nehaza vahera zmatresnanke'za, zamagazegura osugahaze. Hianagi kagri'ma ha'ma renegantaza vahe'mo'za, osuga zamavu zamava'ma hu'naza zanku zamagesa nentahi'za zamagazegura hugahaze. <sup>4</sup> Ra Anumzamoka knare kavukva zana naveri nehunka, Kagri'ma kavaririnua kana rempi hunamio. <sup>5</sup> Tamage nanekeka'afi kegava hunka navrenka nevunka, anankema amage'ma antesnua zana rempi hunamio. Na'ankure kagra nagri Anumza mani'enkena, nagu'vazinka ete nenavrane. Ana nehunku maka knafina Kagrama nazama hananku, amuhara nehue. <sup>6</sup> Ra Anumzamoka kasunku zanku'ene vagaore kavesi zankura kageraokanio. Na'ankure ana kavukva zana korapa knareti hume enka, meninena ana

kavukvara nehane. <sup>7</sup> Ra Anumzamoka, ko'ma mofavrema mani'nenama hu'noa kumi'enе kefo avu'ava zani'a, vagaore kavesizanku kagesa nentahinka kumini'a atrenanto. Na'ankure Ra Anumzana Kagra kasunku Anumza mani'nane. <sup>8</sup> Ra Anumzamo'a knare hu'neno fatgo hu'neankino, kumi'ma nehaza vhahera rempi huzamige'za, agri avesi'zana amage nentaze. <sup>9</sup> Zamavufgama anteramiza maniza vhahera, fatgo avu'ava huno kegava huzmanteno zamavareno nevuno, Agra'a avu'ava zana rempi hunezamie. <sup>10</sup> Ra Anumzamofo kasegene trakenema amage'ma nentaza vhahera, agra vagaore avesi zanteti zamavesi nezamanteno, hugahue huno'ma huzmante'nea ke'are oti'neno anaza nehia Anumza mani'ne. <sup>11</sup> Ra Anumzamoka, nagri kumira rama'a me'neanagi kagri kagimofo knare zanku kagesa nentahinka, muse hugantoanki kumini'a eri atrenanto. <sup>12</sup> Iza'o Ra Anumzamofonku'ma koro'ma hunte'nesnia vhahera, Agra'a huhampri'nesia kante vu huno huntenigeno vugahie. <sup>13</sup> Ana vahe'mo'za knare nomani'zampi nemansnage'za, zamagrama kase zamantesnaza vahe'mo'za ama mopa erisanti hare'za so'e hu'za manigahaze. <sup>14</sup> Ra Anumzamo'a agrik'u'ma koro nehu'za, agri agoragama nemaniza vhahera, zamatrege'za agri rone'a nemanizageno, oku'a me'nea kasege'a eri ama huno nezamasamie. <sup>15</sup> Maka zupa nazama hanigu Ra Anumzamofonteke navua nentoe. Na'ankure nagri'ma nazeri traika'ma hunaku'ma hania kukompintira nazeri atregahie. <sup>16</sup> Ra Anumzamoka rukrahe hunka nenagenka, kasunkura hunanto. Na'ankure nasuzampi mani'noe. <sup>17</sup> Nagri nagu'affima me'nea knazamo'a ome ra huno nevie. Ana knafima manine'na antahintahi hakarema nehua zampintira, katufenka navre atro. <sup>18</sup> Knazamo nazeri havizama nehige'na, narimpa knafima mani'noa zana nenagenka, maka kumini'a eri atrenanto. <sup>19</sup> Nagri ha' vhahera rama'a efore nehu'za, nagri'ma ha'ma renenante'za zamavesrama hunantaza zana kagra ko. <sup>20</sup> Kagra nagu'nevazinka kegava hunka navrenka vu. Natrege'za nazeri nagaze osiho. Na'ankure Kagripi e'na eme franekue. <sup>21</sup> Fatgo avu'avazamo'ene, mani fatgoma huno mani avu'azamo kegava hunantegahie. Na'ankure nagra nazama hanankura kagriku amuhara nehue. <sup>22</sup> Anumzamoka maka Israeli vahe'ma mani'naza kna zampintira kasunku huzmantenka ete zamagu'vazinka zamavro.

## 26

### *Ke'a omane vahe'mo'ma hania nunamumofo zagamere*

<sup>1</sup> Ra Anumzamoka nagrira nenagenka fatgo vahe mani'nane hunka huo. Na'ankure nomaniza'nifina fatgo navu'nav'a'za hu'na e'noe. Ana nehu'na rukrahe osu hankaveti'na kagrite namentintia hu'noe. <sup>2</sup> Ra Anumzamoka nagrira renahenka nenagenka, nagu'ane antahintahi zani'a rezaganenka ko. <sup>3</sup> Na'ankure vagaore kavesi zamo'a navuga me'nege'na nege'na, maka zupa tamage nagu'areti hu'na kamagera ante vava nehue. <sup>4</sup> Nagra havigema nehaza vahe'enena vano nosu'na, tavre vahe'mofo amu'nompina nomanue. <sup>5</sup> Havi zamavu zamava'ma nehaza vhahera vahe'mo'zama atruma haza atrugura navesra hunezmante'na, havi zamavu zamava'ma nehaza vhahera manizafina omanigahue. <sup>6</sup> Ra Anumzamoka nagri'ma hazenkeni'a omane'ne hu'na kaveri'ma hanuana timpi nazana sese nehu'na, Kresramanama vu itakarera neoe. <sup>7</sup> Ana nehu'na ranke hu'na muse zagamera hu'na Kagri kagia ahentesga nehu'na, mika knare'nare kagu'vazama hu'nana zankura, huama hu'na vhahera zamasamigahue. <sup>8</sup> Ra Anumzamoka kagrama mani'nankeno, kagri masa zamo'ma me'nea mono nonka'agura navesi navesi nehie. <sup>9</sup> Hagi

kumi'ma nehaza vahe'ma zamazeri havizama hanampina, nagrira nazeri haviza osuo. Ana nehunka vahe'ma zamahe'zama korama eri tagi netraza vahe'ma zamahe frisnampina, nahe ofrio. <sup>10</sup> Ana vahe zamazampina kefo avu'avazamo avinetegeno, tamaga kaziga zamazampina zagore'ma masave hu'za mago'aza eri'zamo avite'ne. <sup>11</sup> Hianagi nagrani'a fatgo navu'nava zanke nehugu, kasunku hunantenka ete navro. <sup>12</sup> Nagra agupo hu'nea mopare oti'noanki'na, kagri vahe kerfamo'zama atruma hanafina, kagri kagia ahentesga hugahue.

## 27

### *Ra Anumzamofoma humuse hunte nunamu zagame Deviti asunte'nea zugamere*

<sup>1</sup> Ra Anumzamo'a nagri tavi mani'neno, nagu'vazi ne' mani'neankina, nagra na'anku korora hugahue? Ra Anumzamo'a nagrira hankave vi-huni'a mani'neanki'na, na'anku nagra nahirahikura hugahue? <sup>2</sup> Hanki havi avu'ava zama nehaza vahe'mo'zama nazeri haviza hunaku erava'o ne-hanageno, ha' vahe'nimo'za nahenaku egahazanagi, ana vahe'mo'za traka hu'za masegahaze. <sup>3</sup> Rama'a sondia vahe kerafamo'za nahenaku kafo eme ante'za navazagi kagigahazanagi, nagra korora osugahue. Ha' vahenimo'za hara agafa hu'za eme hunantegahazanagi, Ra Anumzamofonku amuhara hugahue. <sup>4</sup> Ra Anumzamofona mago zanku antahigesue, Knare nagrira na-tresanigena kasefa'ma hu'nama manisnua kna'afina, Agri nompina mani-vava nehu'na, knare avu'ava'a nege'na, musena hunente'na Agri mono nompi mani'nena kama naverima hanigura kegahue. <sup>5</sup> Hanki hazenke zama esania knafina, Agra'a navre franekino, Agra'a seli mono nompi navre fraki-gahie. Ana nehuno navresga huno onagamu'a have agofetu nantesige'na knare hu'na manigahue. <sup>6</sup> Anama hanige'na nagri'ma nazeri kagi'naza ha' vaheni'a naza hanige'na hara huzmagetenerena, ranke hu'na musenkase nehu'na, Ra Anumzamofo mono nompina ofa kresramna vugahue. Ana nehu'na zavena ahe'na zugamera Ra Anumzamofontega hugahue. <sup>7</sup> Ra Anumzamoko naza huogu'ma kagritegama nunamuma nehanugenka, ka-sunku hunantenka nunamuni'a antahinamio. <sup>8</sup> Nagu'amo'a agritega nunamu hunka agriku hako huno hige'na, nagra Ra Anumzamokarega nunamuna nehue. <sup>9</sup> Ra Anumzamoka kamefira hunaminka kavugosa rukrahera nehunka, eri'za vahekamo'na krimpa aheonanto. Na'ankure kagra ko'ma nagu'vazinka e'nana Anumza mani'nananki, kamefira hu-naminka onatrenka, nagu'vazinka nazahuo. <sup>10</sup> Nenfa'ene nenrer'a'enena zanamefira hunamigaha'anagi, Ra Anumzamo'a navareno kegava hunan-tegahie. <sup>11</sup> Ra Anumzamoka Kagra'a kavukvara rempi hunamio. Ha' vaheni'amo'za kafonte'za mani'nazanki, kegava hunantenka navrenka knare huno fatgo hu'nea kantera vuو. <sup>12</sup> Nagrira natrege'na ha' vahe'nimo'fo zamazampina va'nenkeno zamagri'ma zamavesi'niaza hu'za nazeri havizana osiho. Na'ankure ana vahe'mo'za nagrira havige hunante'za e'za nazeri koro nehaze. <sup>13</sup> Tamagerfa hu'na namentintima huana, henka'a Ra Anumzamofo knare'zana, nagrama mani'nama vanua knafina kegahue. <sup>14</sup> Ra Anumzamofonku avega antenka mani'enka, oti hankavetinenka atregeno kagu'amo'a hankave enerisnigenka, Ra Anumzamo'ma kazama hanigu akohenka mani'enka aveganto.

## 28

### *Ra Anumzamo'ma taza hanigu hanuna nunamune*

<sup>1</sup> Ra Anumzamoka nagri fraki hankave haveni'a mani'nanku, kagritega kezantuanki, kezankeni'a antahinamio. Na'ankure nagri kezankere'ma nonama osnanke'na, nagra vahe'mo'zama fri'za nevaza kumatega fri'na vugahue. <sup>2</sup> Nagra Ruotage'ma hu'nea mono nonka'ama me'nea kaziga nazana erisga hu'na naza huogu nunamuna nehuanki, kezankeni'a antahinamio. <sup>3</sup> Kefo zamavuzmavama nehu'za, havizama nehu'za tava'o zamire'ma nemani'za vahe'enema zamagiteti haganentake naneke nehazanagi, zamarimpafina havi avu'avamo'ma aviteneg'e'zama havigema ne-haza vahe'enena nazeri fenkamua otro. <sup>4</sup> Havi zamavu' zmava'ma nehu'za, kumimofo eri'zama eri'naza vhahera, havi zamavu zmava'ma nehu'za kumi'ma hu'naza avamente antenka, mizana zamitere hunka zamazeri havizana huo. <sup>5</sup> Ana Ra Anumzamofo eri'zanku'ene, Ra Anumzamo'ma azampinti'ma tro'ma hu'nea zantaminkura antahi amne nehaze. Ana hu'nazankino zamazeri havizantfa hutresnige'za, mago'enena oti'za so'ea hu'za omanigahaze. <sup>6</sup> Ra Anumzamofona agi'a ahentesga hugahue. Na'ankure kasunku hunantu hu'nama kezatugen'o, kezanke'n'i'a antahinami'ne. <sup>7</sup> Ra Anumzamo'a hankveni'ane, hankoni'ane mani'ne. Ana hu'negeno nagu'amo'a agripi me'nege'na namentintia nehugen, agra naza nehie. Ana nehigeno nagu'amo'a tusi muse nehianki'na, muse zagame nehu'na susu huntegahue. <sup>8</sup> Ra Anumzamo'a vea kevu'amofo hankavea agra'a nezminno, masavema freno huhamprinte'nea kini ne'mo'ma fra'ma nekino, agu'ma vazisnia kumara agrake mani'ne. <sup>9</sup> Ra Anumzamoka nagri vhahera nehunka, fenozama hiaza hunka'ma erisinte'ma hare'nana vhahera asomu hunezmantenka, zamaza huo. Ana nehunka sipisipi kva vahe'mo'ma nehiaza hunka, maka knafina kazampi zamavarenteka kegava huzmante vava hunka vuu.

## 29

### *Hazenke'ma esania knafima Ra Anumzamofo ageru'ma antahi'zamofo zagamere*

<sup>1</sup> Monafima nemaniza maka ankeromota Ra Anumzamofo agia ahentesga hunenteta, agri agigu'ene hankave'agu'enena husga hunenteta muse hunteho. <sup>2</sup> Ra Anumzamofoma so'e zantfama hu'nea agia ahentesga ne-huta, ruotage'ma huno hankave nentake'ma hu'nea Anumzana monora hunteho. <sup>3</sup> Ra Anumzamofo agerumo'a hagerimofo agofetu'ma vuno eno nehigeno, hankavenentake Ra Anumzamofo ageru'mo'a hagerimofo agofetura monagema hiaza huno runagraseno vuno eno nehie. <sup>4</sup> Ra Anumzamofo agerumo'a hankavenentake higeno, konariri'amo'a avite'ne. <sup>5</sup> Hagi Ra Anumzamofo agerumo'a, sida zafaramina runagaza penetreno, Ra Anumzamo'a Lebanoni kokampima me'nea Sida zafaramina, ru futagi atre'ne. <sup>6</sup> Ana nehuno Lebanoni agonamofona higeno bulimakao anenta'mo'ma hiaza huno, takaire takaire nehigeno, Hemoni agonamofona higeno, afi agaho bulimakao afumo'ma hiaza huno takauñere. <sup>7</sup> Ra Anumzamofo agerumo'a kopsi'namo'ma hiaza huno rumarave marave ne-higeno tevenefa rukru nehie. <sup>8</sup> Ra Anumzamofo agerumo'a hagege koka eri kanage nehigeno, Ra Anumzamofo agerumo'a, Kadesima me'nea ka'ma koka eri tore nehie. <sup>9</sup> Ra Anumzamo'ma ageru'ma nerigeno'a, dia afu'mo'za

anopa anenta nentageno, zafa ani'namo'za harari hu'za mopafinke eneramize. Ana nehazage'za agri mono nompima mani'naza vahe'mo'za hu'za, Anumzamo'a hankavenentake hu'ne hu'za agia ahentesga nehaze. <sup>10</sup> Ra Anumzamo'a kini tra'are mani'neno, ranra hagerintamina kegava hu'ne. Ana hu'neankino agrake kinia mani'neno kegava hu vava hugahie. <sup>11</sup> Ra Anumzamo'a agra vahe'a hankavea nezamino, rimpia fruzanteti asomura huzmantesie.

## 30

### *Ra Anumzamofoma humusema hunteno'ma hu'nunamu zagamere*

<sup>1</sup> Ra Anumzamoka kagra natranke'na fri vahe kumapina mani'noge'za nagri ha' vahe'mo'za ra zamagia e'neri'za nagefenkami otrazanki, kagra anampintira navre atirami'nanku, kagri kagia ahentesga hu'na rankagia kamigahue. <sup>2</sup> Ra Anumzana nagri Anumzamoka, kagrama naza huogu'ma nunamuma hugenka, kagra nazeri kanamr40 'nane. <sup>3</sup> Ra Anumzamoka nagra fri'na matipi uramiza hu'noanagi, anampinti navre atirami'nane. Ana nehunka nazeri kasefa hanke'na, fri'na fri vahe kumapina uoram'i'na kasefa hu'na mani'noe. <sup>4</sup> Anumzamofa amage'ma nentza vahe'mota zagame huta Ra Anumzamofona husga hunenteta, ruotage'ma hu'nea zanku agia aheta humuse huntaho. <sup>5</sup> Na'ankure Ra Anumzamofa arimpa ahe'zamo'a zazatera meno ovugahie. Hianagi agri knare avu'avazamo'a, kasefa'ma huta manisuna kna'afina mevava huno vugahie. Hanima e'nigeta kenagera zavira ategahunanagi, nanterama ko'manetigeta musenkase hugahune. <sup>6</sup> Hagi nagra maka'zama ante'na knare'ma hu'nama mani'noa kna'afima nagesama antahi'noana, mago'zamo'a nagritera eno nazeri kazara osugahie hu'na antahi'noe. <sup>7</sup> Ra Anumzamoka kagra knare kavukva hunantenka nazeri hankavetinke'na agonamo'ma oti hankavetiaza hu'na oti hankaveti'noe. Hianagi kagrama kavugosama rukrahe hunka kamefi'ma hunaminke'na, nagra koro hu'noe. <sup>8</sup> E'ina hu'negu Ra Anumzamoka naza huogu kagritega krafage nehu'na, kasunku'ma hunante'naku nunamuna nehue. <sup>9</sup> Hagi nagrama fri'na fri vahe kumapima uramina kasrinuana, iza zagamera huno Ra Anumzamoka'ma, knare kavukva'ma nehana zankura kagia ahentesga nehuno, musena hugantegahie? <sup>10</sup> Ra Anumzamoka nagrama nehuankea antahi'eneminka, kasunkuma hunantenka naza huoguma nunamuma nehuana antahinaminka naza huo. <sup>11</sup> Zavi'ma netoa zampintira nazeri muse hanke'na musena hu'na avo nehagoe. Ana nehunka nasunku kukenama hu'noa zana hate netrenka, kukanama hiaza hunka musezana eri hankre nantanke'na musenkase nehue. <sup>12</sup> E'ina hu'negu nagra fruhu'na omani-gahuanki, nagu'reti hu'na Ra Anumzana nagri Anumzamoka kagritega zagamera hu'na, maka zupa susu hugante vava hugahue.

## 31

### *Agu'vazinogu Deviti hu'nea nunamu zagamere*

<sup>1</sup> Ra Anumzamoka kagripi franekuanki natrege'za magore hu'za nazeri nagazea osiho. Hanki fatgo kavukva zampinti nagu'vazio. <sup>2</sup> Kagesa antenka nunamuni'a nentahinka, ame hunka nagu'vazio. Kagra fraki haveni'ane, hankave vihuni'agna hunka mani'nananki'na, anampi fraki'na nagura vazigahue. <sup>3</sup> Ra Anumzamoka Kagra fraki haveni'ane, hankave vihuni'anena mani'nane. Kagri kagimo'ma knare haniazanku nentahinka nazeri fatgo hunka kegava hunanto. <sup>4</sup> Ha' vahe'nimo'zama nahenaku'ma

krifuma anagi ante'nazafintira navare atiraminka nagu'vazio. Na'ankure kagra nagri fraki kumani'a mani'nane. <sup>5</sup> Kagri kazampi avamuni'a antoanki, Ra Anumzamoka nagu'vazio, na'ankure Kagra tamagege hu' Anumza mani'nane. <sup>6</sup> Kaza osu havi anumzante'ma mono'ma hunentaza vhahera, tusi navresra hunezmantoe. Hianagi nagra Ra Anumzamokare namentintia nehu'na antahinegamue. <sup>7</sup> Nagra Ra Anumzamoka vagaore kavesizanka'agura musena hugahue. Na'ankure kagra knazani'a negenka natama eri'na vuazana antahinka kenka hu'nane. <sup>8</sup> Hagi kagra ha' vahe'ni'amokizmi zamazampina nevre onte'nananki, nagu'vazinke'na ra mopafi knare hu'na mani'noe. <sup>9</sup> Hagi Ra Anumzamoka kasunku hunanto. Na'ankure nagra knazampima mani'ne'na zavi'ma atoa zamo'a navumo'a pro nehigeno, navufgamo'enena ome haviza hie. <sup>10</sup> Maka kna nasuzampi nemani'na, knazampima mani'na vuazamo, higeno kafuni'amo'a atupa ne-hie. Kumi avu'avazampi mani'na vuazamo higeno hankaveni'a omnegeno, zaferinani'a omne amne nehie. <sup>11</sup> Ha' vahe'nimo'za zamavaresra hunenantazageno, tava'onte'ma nemaniza vahe'mo'za nagefenkami netrazageno, ronenimo'zama kumapima nenage'za koro nefraze. <sup>12</sup> Fri'nea vahe'ma zamagekaniaza hu'za zamagekani nentazage'na nagra tako hu'nea mopa kavogna hu'noe. <sup>13</sup> Rama'a vahe'mo'za huhaviza hunentaza naneke nentahi'na tusi koro hu'noe. Hagi zamagra nahe frinaku oku'a atru hu'za kea anaki'naze. <sup>14</sup> Hianagi Ra Anumzamoka kagrite namentintia nehu'na nagri Anumza kagra mani'nane hu'na nehue. <sup>15</sup> Nasimu'mo'a Kagri kazampi me'neanki, ha' vahe'niamo'zama nahenaku'ma nenanaririza vahe'mokizmi zamazampintira nagu'vazio. <sup>16</sup> Atregeno kavugosafinti masazamo'a eri'za vaheka'arera remasa nehina, huvempama hunka huhagerafinana keka'agu nentahinka kasunku hunantenka nzahuo. <sup>17</sup> Hanki Ra Anumzamoka kagripi nagra franekue. Hagi natrege'za ha' vahetmimo'za nazeri nagazea osiho. Fatgo kavu'kvaka'afinti nagu'vazio. Hagi kefo zamavu'zmava'ma nehaza vhahera zamazeri zamagaze nehunka, zamagira ruhamunkige'za friza matipi maseho. <sup>18</sup> Havigema nehaza zamagefu'na erirava ne-henka, fatgo zmvavuzmava'ma nehaza vahe'ma huhaviza nehu'za zamav-ufaga ra kema nehaza zamagira eriravaho. <sup>19</sup> Ra Anumzamoka knare kavukvamo'a rankrerfa hu'neankinka, kagri'ma koro'ma hugante'za kagor-ag'a'ama nemaniza vhahera rama'a zmasimu ante vite'nezmantane. Hagi kagripima eme frakinaku'ma aza vhahera knare kavukva zana antevite nezmanterka asomura hunezmantake'za maka vahe'mo'za nezamagaze. <sup>20</sup> Ha' vahe'mo'zama zamahe'zama nehazagenka Ra Anumzamoka zamazeri franekinka, zamagipinti'ma huhavizama nehazagenka zamazeri fra'nekine. <sup>21</sup> Ra Anumzamofona ra agi erisga hanue. Na'ankure ha' vahe'nimo'zama mani'noa rankumama avazagi kagizageno'a, Agra vagaore avesizama'areti nagu'vazi'ne. <sup>22</sup> Hagi antrima nehu'na amanage hu'noe, Ra Anumzana atre'na nagra ogama afete e'noe hu'na hu'noe. Hianagi naza huogu'ma krafagema huana antahinka naza hu'nane. <sup>23</sup> Anumzamofo vahe'mota Ra Anumzamofona tamavesinteho. Na'ankure Ra Anumzamo'a Agri'ma avariri fatgoma nehaza vhahera hazenkema erizankura kegava hunezmante'anagi, zamavufaga rama nehaza vhahera zamazeri havizantfa nehie. <sup>24</sup> Ra Anumzamofonte'ma amuha'ma nehaza vahe'mota korora osu hankavetita maniho.

*Ra Anumzamofo vagaore avesi zanku Deviti asunte'nea zagamere*

<sup>1</sup> Kema ontahi avu'ava zama'ama Anumzamo'ma atrenenteno, kumi'ama apasente'nia vahe'mo'a tusi muse hugahie. <sup>2</sup> Hagi Ra Anumzamo'ma mago vahe'mofo kefo avu'ava'ama eritrenigeno, vahe'ma revatga hu avu'avazamo'ma agripima omnennenia vahe'mo'a muse hugahie. <sup>3</sup> Hagi kumini'ama huama'ma osugeno'a, nagri navufgamo'enе zaferinamo'enena tusi nata negrige'na karagi ruvava nehue. <sup>4</sup> Na'ankure zugene haninena knazana nagrite ante'nankeno, tusi kna nave'nesie. Hagi zagemo'ma tima te hagege hiazza huno, hankavenimo'a hagege nehie. <sup>5</sup> Ana'ma hutege'na kumini'a refiote maka kagritega huama hu'noe. Ana nehu'na nagra anage hu'noe, Ra Anumzamofonte nagra keontahi navu'navazani'a huama hugenka, kumini'a apase nantankeno mika kumi'ni'a vaga'rene. <sup>6</sup> E'ina hu'negu atrege'za Kagri kamage'ma nentaza vahe'mo'za knama me'nesire kagritega nunamuna hiho. Ana hanageno knazamo'ma tima hageazama huno esia zamo'a zamazeri onakrino. <sup>7</sup> Kagra fraki kuman'i mani'nanankinka, hazenke knafina nagu'nevazinke'na, ana zankura zagame nehu'na tusi musenkase nehue. <sup>8</sup> Hagi Ra Anumzamo'a huno, Nagra kegava hugante'nena rempi hugamisugenka knare kantera vugahane. Nagra navunte'na negage'na antahintahia kamigahue. <sup>9</sup> Hagi antahintahizmi omne hosi afuro, miuri afu'ma aini atupa'ama zamagipi ante'neza nofi rente'za zamavazu hazage'za zamavariri'za vazanknara osiho. <sup>10</sup> Kefo avu'ava'ma nehaza vahera, rama'a knazamo zamazeri haviza nehanige'za zamasuzampi manigahaze. Hianagi Ra Anumzamofona vagaore avesizamo'a Agrite'ma zamentintima nehaza vahete megahie. <sup>11</sup> Fatgo avu'ava'ma nehaza vahe'mota Ra Anumzamofonku muse nehinkeno, tamagu'amo'ma fatgoma hu'nenia vahe'mota ranke huta zagamera huta agi'a erisga hiho.

## 33

*Muse zagame Deviti asunte'nea zagamere*

<sup>1</sup> Fatgo avu'ava'ma nehaza vahe'mota zagamera huta Ra Anumzamofona musena hunteho. Na'ankure fatgo avu'ava'ma nehia vahe'mo'ma Ra Anumzamofo agima erisgama haniana knare hugahie. <sup>2</sup> Hapu zavena neheta zagamera huta Ra Anumzamofona agia erisga nehuta, 10ni'a strini nofi'ma me'nea zavenagu'ma laeriema nehaza zavena neheta zagamera huta musena hiho. <sup>3</sup> Kasefa zagame huta agia erisga hiho. Knarezantfa huta zavena neheta ranke huta agi'a erisga huta musena hiho. <sup>4</sup> Na'ankure Ra Anumzamofonkea tamage naneke me'neankino, nazano hugahuema hu'nea zantamina Agra ana maka nehie. <sup>5</sup> Ra Anumzamo'a fatgo avu'avazane, mago zanke'ma huno maka zama refkohu avu'ava zanku'ene avenesigeno, ama mopafina Agri vagaore avesizamo avite'ne. <sup>6</sup> Ra Anumzamo'a ke higeno mona fore nehigeno, Agra ke higeno monafima me'nea hanafitamine zugene ikanena fore hu'ne. <sup>7</sup> Agra, Ra Anumzamo hagerina repapa higeno magokepina umareno moriri huno marerigeno, tinkerifima tima afinteankna huno hagerina magokepi renatint'e. <sup>8</sup> Maka ama mopafima mani'naza vahe'mo'za Ra Anumzamofonku korora hunte'za agoraga'a maniho. Maka ama mopafi vahe'mo'za Agrira kesga hu'za monora hunte'za agoraga maniho. <sup>9</sup> Na'ankure Agra ke nehigeno ama mopa fore hu'ne. Agra huno, efore huo huno higeno ama mopamo'a efore hu'no me'ne.

<sup>10</sup> Ama mopafi vahe'mo'zama e'ina hugahune hu'zama antahintahima retro'ma haza antahintahia Ra Anumzamo'a zamahe savri nehuno, mika zama hugahune hu'zama kema anakiza zana eri haviza nehie. <sup>11</sup> Hianagi Ra Anumzamo'ma mago'zama hunaku'ma antahintahima retro'ma hu'enienia zamo'a mevava huno vugahie. Hugahue huno'ma hu'enienia zana Agra tamage huno fore'ma hu anante anante'ma hanigeno manino vania vahete'enena meno vugahie. <sup>12</sup> Ra Anumzanku'ma tagri Anumzane hu'zama hanaza vahe'mo'za muse nehinkeno, Nagri fenozane huno'ma eri santimahare'nea vahe'mo'za muse hiho. <sup>13</sup> Monafinkatira Ra Anumzamo'a kefenka atreno ama mopafima mani'naza vahera maka nezamagie <sup>14</sup> Agrama nemania kumapintira kefenka ateno mika ama mopafima nemaniza vahera nezamagie. <sup>15</sup> Agra vahe'mofo tumora trohunte'neankino, maka zama hu'na zana antahino keno nehie. <sup>16</sup> Hankavenentake sondia vahetmimo'za kini nera agura ovazi'nageno, harafa sondia ne'mo'a agra'a hanave'aretira kini nera agura ovazigahie <sup>17</sup> Hosi afu'mo'za naza hange'na hara agateregahue hunka amuhara osuo. Na'ankure hosi afu'mofo hankavemo'a kaza huno kagura ovazigahie. <sup>18</sup> Hianagi Ra Anumzamo'a Agriku'ma koro'ma hu'za agoraga'ama neman'i'za, vagaore avesizama'mofonte'ma amuha'ma nehaza vahete avua anteno nege. <sup>19</sup> Agra frizampintira zamagu'nevazino agatonto knafina zamatrege'za ne'zankuranofrize. <sup>20</sup> Ra Anumzamofonku tagra avega anteta manineta amuhara nehunankino, Agrake'za hankotia mani'neankino, taza hugahie. <sup>21</sup> Agriku tagu'amo'a musena nehie, na'ankure tagra, Agri ruotge agifi tamentintia nehune. <sup>22</sup> Ra Anumzamoka kagripi amuha zantia me'neanki, vagaore kavesi'zanteti maka knafina kegava hunka refiteranto.

## 34

### *Ha'vahe azampinti'ma agu'vazinia zamofo nunamune*

<sup>1</sup> Maka kna nagra Ra Anumzamofona husga hunente'na, Agri agi'a hentesga huvava hugahue. <sup>2</sup> Nagra Ra Anumzamofonku musena nehu'na navufga rana hugahuanki'za, vahe'mo'zama zamazeri havizama nehaza vahe'mo'za nentahi'za muse hugahaze. <sup>3</sup> Enketa Ra Anumzamofo avu'avazama'a huama nehuta, agi'a husga huntammeno. <sup>4</sup> Ra Anumzamofontega nunamuna hugeno, nunamuni'a antahinamino koro'ma nehua zana eri amne hu'ne. <sup>5</sup> Ra Anumzamofontegama zamavuma antete'za nemaniza vahe'mokizmi zamavugosafintira rumasa nehanige'za, muse nehanageno zamavugosafina zamagaze zamo'a refi'otegahie. <sup>6</sup> Amunte omne ne'ma amama mani'nea ne'mo'a nunamu higeno, Ra Anumzamo'a antahimino ana maka knazama'afintira agu'vazi'ne. <sup>7</sup> Ra Anumzamofo ankeroma'amo'a Agri'ma koro'ma hunte'za agoraga'ama nemaniza vahera manigagino kegava hunezmanteno hazenke zampintira zamagu'nevazie. <sup>8</sup> Agra knare avu'ava nehia ne' mani'neanki Ra Anumzamofona rehenka ko, Agripinkama frakino manisia vahe'mo'a muse hugahie. <sup>9</sup> Anumzamofo amage'ma nentaza vahe'mota Ra Anumzamofona koro hunteta agoraga'ama maniho. Na'ankure Agri'ma koro'ma hunte'za agoraga'ama nemaniza vahe'mo'za mago'zama zankura atupara nosaze. <sup>10</sup> Hankavenentake laionimo'a mago'zama kna agakura hugahie. Hianagi Ra Anumzamofonte'ma amentintima himo'a, knare zantaminkura upara nosie. <sup>11</sup> Mofavrenimota nagrite eta eme antahihio. Ra Anumzamofoma

koroma huntenu agoraga'ama mani'zana rempi huramigahue. <sup>12</sup> Izaga ofrinka zaza kna ama mopafina knare hunka manizankura kave'nesie? <sup>13</sup> E'ina hunaku'ma hanunka, kefo nanekene havi nanekema hu'zankura, kagira kegava huo. <sup>14</sup> Kefo kavukava'ma nehanazana atrenka knare kavukva huo. Arimpa fruma huno mani zankuke nehakenka, ana kavukavake huo. <sup>15</sup> Ra Anumzamo'a fatgo zamavu'zamavama nehaza vhete avua anteno kegava hunezmante. Agritegama krafagema hanageno'ma zamaza hanigu agesa anteteno nemanie. <sup>16</sup> Hianagi Ra Anumzamo'a kefo zamavu'zmava'ma nehaza vhera amefi hunezmino, ama mopafintira zamahe fanane hanige'za vahe'mo'za zamagesa ru'enena antahi ozamigahaze. <sup>17</sup> Fatgo zamavu'zmava'ma nehaza vahe'mo'zama Ra Anumzamofontegama krafagema nehzageno'a, Agra antahi nezmino maka hazenkefintira zamagu'nevazie. <sup>18</sup> Ranknazampima mani'naza vhera Ra Anumzamo'a tva'ozmire nemanino, vahe'mo'zama knazama zami'za zamagu'ama zamazeri havizama nehaza vhera, zamagu'nevazie. <sup>19</sup> Fatgo zamavu'zmava'ma nehaza vahe'mo'za rama'a hazenkef ufretere hugahazanagi, Ra Anumzamo'a ana hazenkefintira zamaza huno zmagu'vazitere hugahie. <sup>20</sup> Na'ankure Ra Anumzamo'a fatgo avu'ava'ma nehia vahe'mofo zaferina kegava huntegahiankino mago zaferina'amo'a hara ontagigahie. <sup>21</sup> Kefo avu'ava'ma nehia vhera agrama nehania kefo avu'ava zamo'a ahenebrisigeno, fatgo avu'ava zanku'ma avresrama nehania vhera, ana avu'ava'zantera nona huno knazana amigahie. <sup>22</sup> Hianagi Ra Anumzamo'a eri'za vahe'a agu'vazigahie. Hanki Ra Anumzamofompima frakisia vahe'mo'a hazenkefina uofregahie.

## 35

### *Ra Anumzamo'a hankave Anumzane huno Deviti asunte'nea zagamere*

<sup>1</sup> Ra Anumzamoka nagri'ma mago zamarimpama hunontaza vhera mago krimpa hunozmantenka, ha'ma renantaza vhera ha'rezmano. <sup>2</sup> Ha' kukenaka'a nehunka, hankoka'a erinka enka eme naza huo. <sup>3</sup> Navaririzama neaza vhera keveka'ane, karugru keveka'ane erisga hunka nezmahegena, kagu'vazigahue hunkama nehana nanekeka'agura antahineno. <sup>4</sup> Nahenaku'ma nenavaririza vahe'mokizmia zamatrege'za zamagazegu hoho. Nazeri haviza hunaku'ma antahintahima nehaza vhera zamazeri haviza huge'za zamagazegu hoho. <sup>5</sup> Ra Anumzamoka witi hona'ama hiazza hunka huharafu huzmatrege'za zahomo'ma hiazza hu'za Kagri anker ovahe'mo'za zamaretufe zamatreno. <sup>6</sup> Kama vanaza kana eri hanintiri nehunka, eri krarin tege'za Ra Anumzamoka ankeromo'a zamarotago huno vino. <sup>7</sup> Nagra zamagrira zamazeri havizana osu'noanagi, zamagra karifu anaginte nante'naze. Nagra mago zana osu'noanagi zamagra nagri nazerinaku keri kafinte'naze. <sup>8</sup> E'ina hu'negu atregeno zamazeri havizama huzamo'a antri hanazaza huno zamavatera ne-ena, nagri'ma nazerisie hu'zama anaginte'naza krifumo'a zamazerino. Nagri kerima kafinte'nazafi, zamagra'a tamaho. <sup>9</sup> E'ina'ma hanage'na Ra Anumzamokagura tusi musenkase nehu'na, kagi'a erisaga hugahue, na'ankure Kagra naguranevazine. <sup>10</sup> Ra Anumzamoka ana maka nagu'areti hu'na kagia erisga hugahue. Ra Anumzamoka magore huno Kagrikna anumzana omani'ne. Hagi zamagra'ama zamaza huga osu vahe'mofo zantamine, zmunte omne vahe'mofo zantaminema musufama neseza zamazeri havizama nehzana iza zamaza hugahie.

<sup>11</sup> Kezmifinti'ma vahe'ma zamazeri havizama hu vahe'mo'za, havige hu'za keaga hunenantaze. Nagra osu'noa hazenkegura kagra hazenke hu'nane hu'za havigea hunenantaze. <sup>12</sup> Knare navu'nav'a'ma huzmanta zantera, havi zamavuzmava zanu nona hunentaze. E'ina'ma haza zamo higeno, nagu'amo'a tusi kna nehie. <sup>13</sup> Hianagi krima erizage'na nasunku hunezmante'na, atafa kukena hu'na manine'na kavera a'o hu'na ana nagamofona zamazama hananegura nunamuna hunezmantoanagi, ana nunamuni'arera nona nosane. <sup>14</sup> Nagra nagaku'ma hiaza hu'na zavira atenezmante'na, nenreranku'ma hiaza hu'na nasunkura hu'na zavira atenezmantoe. <sup>15</sup> Hianagi nagrama tanafa'ma hu'na mase'zama huge'za, muse nehu'za eme naregagi'naze. Hagi antahina ke'na osu'noa vahe'mo'za hara eme renenante'za huhaviza hunante vava nehaze. <sup>16</sup> Kefo avu'ava'ma nehaza vahe'mo'za nehzaza hu'za zamagra kiza zokagoke hunenante'za zamavera aninkreki hu'naze. <sup>17</sup> Ra Anumzamoka hago zazate mago zana huonante natranke'za amanara hu'za neaze. Hanki hankavematiza ha'ma hunentazana naguvazio. Laionimo'ma hiaza hu'za nahe'zama nehzaza vahepintira nagu'vazio. <sup>18</sup> Ana'ma hananke'na rama'a mono kevuma atruma hanafina kagia ahentesga nehu'na, susu hunegante'na tusi'a vahekrorfama atruma hanafina nagra zagamera hu'na kagia erisga hugahue. <sup>19</sup> Hagi atregeno ha' vahe'nimo'za nagri'ma nazeri havizama nehzaza zankura musena osiho. Ana nehunka zamatrege'za zamavaresrama hunenante'za amnezampima knama nemamiza vahe'mo'za rezavumira nehu'za nag'i'zana oreho. <sup>20</sup> Zamagra zamarimpa fruma hu'za vahe'enema manisaza zankura keaga nosazanki, knare hu'zama zamagra'a erizante'ma vanoma nehzaza vahe'ma zamahesaza keaga retro nehzaze. <sup>21</sup> Zamagra zamagira reaka hu'za amanage hu'za havigea hunentaze, kagrik'u'ma tavuma anteta haketa vanoma nehunazana, meni tagri tavumo'a kageno eri fore hie. <sup>22</sup> Ra Anumzamoka kagra ama ana zana kenka antahinka hu'nananki, kea osura omanio. Ra Anumzanimoka Kagra natrenka afetera akohenka uomanio. <sup>23</sup> Ra Anumzanimoka otio! Otinka nahorakenka hara huo. Kagra Ra Anumzana nagri Anumza mani'nananki nagri kaziga antenka naguravazio. <sup>24</sup> Ra Anumzana nagri Anumzamoka nagra mago hazenkea osu'noanki, huama hunka zamasmio, na'ankure kagra fatgo hunka refko nehana ne' mani'name. Hagi zamatrege'za hazenkefima unefrenuge'za ha' vahe'nimo'za nag'i'zana oreho. <sup>25</sup> Zamatrege'za zamagu'afina hu'za agrikuma nehuna nera hago azeri haviza hu'ne hu'za osiho. <sup>26</sup> Hazenkefima mani'noge'zama musema nehu'za nagizama neraza vahera zamazeri haviza huge'za zamagazegu hiho. Zamavufga rama nehzaza vahera zamazeri haviza huge'za, zamagazegu nehu'za zamagi omne vahe maniho. <sup>27</sup> Hianagi nagri'ma nahomanekaza vahera museza ante vitezmanteg'e'za muse nehuza amanage hiho, Ra Anumzana agra marerisa Anumza mani'neankino eri'za vahe'amofona muse hunenteno asomura hunteno arimpa frua nemie hu'za hiho. <sup>28</sup> Ana'ma hananke'na fatgo kavukvazana huama nehu'na, maka kna zagamera hu'na kagi'a ahentesga hugahue.

## 36

### *Deviti'a Anumzamofo vagaore avesizanku asunte'nea zagamere*

<sup>1</sup> Kefo avu'ava'ma nehia vahe'mofona kumimo'a sumisumi huno agu'afina nanekeea nesmigeno, agra Anumzamofonkura korora nosie. <sup>2</sup> Na'ankure agra avufga ra nehuno, agesama antahiana kefo navu'nav'a zama nehua

zamo'a, amne zane huno nentahie. <sup>3</sup> Maka kema hiana fatgo osu, krunagege nehuno, antahintahima huno knare avu'ava'ma huzankura avresra nehie. <sup>4</sup> Hagi agra kenagera avura ovase mani'neno kumima hania antahintahi hugentahige nehie. Ana nehuno knare osu avu'ava zanke nehuno kefo avu'ava zampinti'ma atreno rukrahe'ma huno ezankura agesa nontahie. <sup>5</sup> Ra Anumzamoka vagaore kavesizamo'a monamo'ma hiaza huno rankrerfa higeno, hugahuema nehana zama amagema antenka hu' kavukva zamo'a hampona azeri agatereno onaga'a me'ne. <sup>6</sup> Fatgo kavukava zamo'a zaza huno ra agonagna higeno, fatgoma hunka refkoma hu' kavukva zamo'a ra hagerimo'ma amafenkame urami'ankna hu'ne. Ra Anumzamoka kagra zagagafane vahe'enena magozahu hunka kegava nehane. <sup>7</sup> Anumzamoka vagaore kavesizamo'a knare zanfta hu'ne. Maka vahe'mo'za kagri kagekon-amofo turunapinka franekize. <sup>8</sup> Zamagra Kagri nompinti ne'zana nezamu nehazagenka, Kagri musezamo'a tinkna hu'neanki'za nene'za muse nehaze. <sup>9</sup> Na'ankure kagra asimu'ma erino mani tigampui mani'nenka, tagri tavi mani'nanketa negone. <sup>10</sup> Ra Anumzamoka, kagri'ma kage'za antahizama nehu'za kavesinegantaza vahera vagaore kavesi zanteti zamavesi nezman-tenka, fatgo zamavu'zmava'ma nehaza vahera fatgo hunka refko huzmanto. <sup>11</sup> Atregeno zamavufaga rama nehaza vahe'mo'za nagofetura zamagare'za vano nosnageno, kefo avu'ava'ma nehaza vahe'mo'za natufe kantutete natufe kamatetera osiho. <sup>12</sup> Kefo avu'ava'ma nehaza vahe'mo'za traka nehazanki ko. Matevuno mopafi zamatrege'za vasene'za oti'zankura ana'ana nehazankiza ru'enena o'itigahaze.

## 37

### *Anumzamo'a Agra vahe'a amefira huomigahie huno asunte'nea zagamere*

<sup>1</sup> Kefo avu'ava'ma nehaza vahekura antahintahi hakarea osuo. Hagi kefo avu'ava'ma nehia vahera keganunua osuo. <sup>2</sup> Na'ankure zamagra trazankna hu'za ame hu'za hagage huge, trazamofo amosre'agna hu'za ame hu'za frigahaze. <sup>3</sup> Hagi Ra Anumzamofonte tamentinti nehuta knare tamavutmava hiho. Ama mopafina knare huta nemanita fatgo avu'ava'zama hu'zanku hankavetita eri'zana eriho. <sup>4</sup> Ra Anumzamofonku musena huntegeno kagu'amo'ma ave'manesia zana kamino. <sup>5</sup> Maka zama hunaku'ma hanana zana Ra Anumzamofa azampi nentenka Agrite'ma kamentintima hanankeno'a, Agra amne anazana hugahie. <sup>6</sup> Agra fatgo kavu'kva zanka'a erinte ama hanigeno, nantera zagemo hanatino remsa hiankna nehanigeno, fatgoma hunka refkoma nehana kavukvara zamo'a ferusegeno zage renteankna hugahie. <sup>7</sup> Ra Anumzamofo avuga akohenka mani'negeno, nazano hunaku'ma haniazana, Agra'a hino. Hanki kefo zamavu'zmava'ma nehaza vahe'mo'zama rama'a fenoma ante'za knare'ma hanaza zankura kagesa nontahinka, kefo avu'ava'ma nehaza vahe'mo'zama kefo avu'ava'ma hanaza zankura antahintahi hakarea osuo. <sup>8</sup> Krimpagura osunka atregeno krimpama ahe'zamo'a evuneramina, ana zankura antahintahi hakarea osuo. Na'ankure e'i ana zamo'a kavreno hazenkefi ufregahie. <sup>9</sup> Hanki kefo zamavu'zmava'ma nehaza vahe'mo'za fanane hugahazanagi, Ra Anumzamofonku'ma amuhama hunemiza vahe'mo'za mopa erisanti haregahaze. <sup>10</sup> Hanki kefo zamavu'zmava'ma nehaza vahe'mo'za ame hu'za fanane hanagenka, anama mani'narega ome hakega-hananagi, ozmagegosane. <sup>11</sup> Hianagi zamavufagama anterami'za nemanza vahe'mo'za ana mopa erisanti hare'za musena hu'za nemani'za, maka

zampina knare hu'za manigahaze. <sup>12</sup> Hagi kefo zamavu'zmava'ma nehaza vahe'mo'za Anumzamofoma amage'ma nentaza vahe' zmahenaku kea oku'a ananeki'za, zamarimpa ahenezmante'za, zamavera aninkreki nehaze. <sup>13</sup> Hianagi Ra Anumzamo'a ana vahekura zamagiza nere. Na'ankure zamagri'ma keagama huzmantesia knamo'a ne-eankino, Agra antahino keno hu'ne. <sup>14</sup> Hanki zamunte omane vahe'ene, vahe'ma havigema hu'za zamazeri havizama nehaza vahe'ene, fatgo avu'ava'ma nehaza vahe'mokizmia, kefo avu'ava'ma nehaza vahe'mo'za zamahe frinaku kazinknozma hefiza zamazampi eneri'za, kevea atifi erinte'za atia eri krikrraranepaze. <sup>15</sup> Hianagi zamagri'a bainati kazinknomo tumozmi reragino zamaregahie. Ana nehanigeno ati zmimo'a hantagigahie. <sup>16</sup> Fatgo avu'ava'ma nehuno osi'a feno ante'zamo'a, kefo avu'ava zanteti'ma feno vahe'ma mani nomani'zana agatere'ne. <sup>17</sup> Na'ankure kefo avu'ava'ma ne-hia vahe'mofo hihamua eri amne nehie. Hianagi Ra Anumzamo'a Agri amage'ma nentaza vhahera kegava hunezmante. <sup>18</sup> Hagi hazenkezmima omne vhahera Ra Anumzamo'a kegava hunezmantenige'za, mevavama hania zantamina erisanti hategahaze. <sup>19</sup> Hanki havi knama esige'za ana vahe'mo'za zamagra zamagakura nosu'za, agatonto knafina rama'a ne'za ante'ne'za negahaze. <sup>20</sup> Hianagi kefo avu'ava'ma nehaza vahe'mo'za frigahaze. Hanki Ra Anumzamofo ha' vahe'mo'za traza amosre'agna hu'nazanki'za, kumo ome amne hiankna hu'za fanane hugahaze. <sup>21</sup> Hagi kefo avu'ava'ma nehaza vahe'mo'za zagoa kehu'za erite'za, ete ome nozamize. Hianagi fatgo avu'ava'ma nehaza vahe'mo'za muse hu'za keonke zana vhahera nezamize. <sup>22</sup> Hagi Ra Anumzamo'ma asomu'ma hunezmantesia vahe'mo'za mopa erisanti hategahazanagi, Ra Anumzamo'ma kazusima huzmantesia vahe'mo'za frigahaze. <sup>23</sup> Fatgo zamavu'zmava'ma nehaza vahe'mo'zama vanoma nehazageno'a, Ra Anumzamo'a kegava hunezmanteno nomani'zasmigura musena nehie. <sup>24</sup> Zamagra tanafa hugahazanagi, trakara hu'za zamasenia reofragegahaze. Na'ankure Ra Anumzamo'a zmazante zamazerigahie. <sup>25</sup> Hanki mofavrereti'ma manime e'na menima ozafama emeroana, Ra Anumzamo'a fatgo avu'ava'ma nehie vhahera amefira huomige, zamatregeano ana vahe'mofo mofavreramimo'za ne'zankura upara nehu'za memea hu'za vano osu'naze. <sup>26</sup> Hanki fatgo zamavu'zmava'ma nehaza vahe'mo'za muse nehu'za keonke'zana vhahera nezamizageno, mofavrezmia asomura hunezmante. <sup>27</sup> Hanki kefo avu'ava zampinti'ma atrenka rukrahe hunka fatgo avu'ava zama hanunka, manivava hugahane. <sup>28</sup> Na'ankure Ra Anumzamo'a fatgoma huno refkoma hu'zanku ave'nesankino, fatgo avu'ava'ma nehia vhahera amefira huomigahie. Agra knare huno kegava huzmantenige'za knare hu'za manivava hugahaze. Hianagi kefo avu'ava'ma nehia vahe'mofo mofavreramina zamahefri hana hugahie. <sup>29</sup> Fatgo avu'ava'ma nehaza vahe'mo'za mopa erisanti hare'za marivava hugahaze. <sup>30</sup> Fatgo avu'ava'ma nehaza vahe'mokizmia, zmagipintira knare antahi'zana atineramigeno, knare avu'avazane kefо avu'avazanema keama'ma hu'zana rempi hunezmie. <sup>31</sup> Hagi Anumzamofona kasegemo zamagu'afina avite'neankino, hazaonkre Anumzamofona amage ante fatgo hugahaze. <sup>32</sup> Hagi kefo avu'ava'ma nehaza vahe'mo'za kafo ante'za mani'neza, fatgo avu'ava'ma nehaza vahe zamahe frinaku kankamunku nehakaze. <sup>33</sup> Hianagi Ra Anumzamo'a zamatrenige'za ana kefo avu'ava'ma nehaza vahe'mo'za hunaku'ma nehazazana osuge, fatgo avu'ava'ma nehaza vahe'mo'zama keagare'ma oti'nageno'a, za-

mazahinke'za keagafina zamazeri zamagate'oregahaze. <sup>34</sup> Ra Anumzamofonte kamentintia nehunka, Agri avu'avaza'ma' nevararigeno, rankagi negamino mopa kamigahie. Hagi negesankeno kefo avu'ava'ma nehaza vahe'mo'za haviza hugahaze. <sup>35</sup> Hagi vahe'ma ha'ma renezmantaza vahe'mo'za, knare mopafima zafamo'ma afovage huno hageno mareriankna hu'za knare nomani'za nemanizage'na negoe. <sup>36</sup> Hianagi mago'a knama evuteg'e'na, ana kefo avu'ava'enе vahetmima nemanizare'ma ome koana, nomanizanki ko fanane nehaze. Ana'ma hazage'na ana vahetminku'ma hake'na vanoma huana nozamagoe. <sup>37</sup> Hagi tamage kege nehu'za, fatgo avu'vazama nehu'za, zamarimpa fruma hu'za nemaniza vahe'mokizmi naga'mo'za henka knare hugahaze. <sup>38</sup> Hianagi kefo zamavu'zmava'ma nehaza vhahera zamahe fanane hanige'za, vhahera zamagripintira fore hu'za ovugahaze. <sup>39</sup> Hianagi Ra Anumzamo'a Agri'ma amage'ma nentaza vhahera zamagu'nevazino hazenke knafina kegava hunezmante. <sup>40</sup> Ra Anumzamo'a fatgo avu'ava'zama nehaza vhahera zamaa nehuno, kefo avu'ava'ma nehaza vahe'mokizmi zamazampintira zamagu'vazige'za so'e hu'za nemanize. Na'ankure zamagra Agripinka fra'maki'za nemanizagu anara nehie.

## 38

### *Ra Anumzamoka kamefira huonamio huno hunte'nea zagamere*

<sup>1</sup> Ra Anumzamoka krimpa ahenantenka kea onasuge, karimpa ahenantenka knazana naminka nazeri fatgo hugera osuo! <sup>2</sup> Keve ka'anura na-hankeno nagu'a unefrengena, kazanura rentrako hunka narehapanetin. <sup>3</sup> Krimpama ahenantana zamo higena kria enerugeno, kuminimo higeno zaferinanimo'a natanegrie. <sup>4</sup> Na'ankure kumini'mo'a ome ra huno nazeri agateregeno, kna'amo'a narerari nehie. <sup>5</sup> Nagri'a neginagi navu'navazamo higeno hi'mnage namumo'a navufgarega tusiza huno hantohanto nehie. <sup>6</sup> Hagi tusi nata negrige'na pripri hu'na vano nehu'na, maka kna natagura nehu'na zavi krafa nehue. <sup>7</sup> Hagi namagenamo'a teve ha' nehuno, natane-grige'na kri'e'nerue. <sup>8</sup> Ana nehuno hankaveni'a omnege'na tusiza hu'na havizantfa hue. Nagu'afinti'ma natamagria zamo hige'na kragira neruna krafa nehue. <sup>9</sup> Ra Anumzamoka, nagri'ma navesi'a zana maka Kagra ko' kenka antahinka hu'nane. Kragi'ma nerua zana Kagra nentahine. <sup>10</sup> Tumo'nimo'a fakro fakro nehigeno, hankaveni'a nomanegeno, navuragamo'a asu nehie. <sup>11</sup> Hagi zamavesima nezmantoa vahe'mo'zane, aronenimo'zanena, kri ruvazirante zankure hu'za koro nehu'za afete nemanize. Nagri'a koramo'zanena anagege nehu'za afete nemanize. <sup>12</sup> Hagi ha' vahe'nimo'za nahenaku krifua anagintere nehzageno, nagri'ma nazeri haviza hunaku'ma nehaza vahe'mo'za, maka zupa nagri'ma nazeri havizama hanaza keagage retro nehaze. <sup>13</sup> Nagra agesa ankanire vahe'mo'ma nehiaza hu'na kea nontahi'na, kema nosia vahe'mo'ma agi'ma hamunkino maniaza hu'noe. <sup>14</sup> Nagra zamagesa ankanire vahe'mo'zama nehzaza hu'na kea nontahi'na kenona huozamante'noe. <sup>15</sup> Ra Anumzamoka kavega ante'na mani'noanki, Kagra kenona hunanto. Kagra Ra Anumzana nagri Anumza mani'nane. <sup>16</sup> Nagra amanage hu'na nunamuna hu'na kasmi'noe, zamatrege'za ha' vahe'nimo'za traka'ma hanua zankura nagizana nere'za musena osiho hu'na kasami'noe. <sup>17</sup> Na'ankure nata zamo'a mevava huno nevige'na, traka hu'za nehue. <sup>18</sup> Hianagi nagra kefo avu'ava'zama hu'noa zana huama

hu'na negasami'na, tusi nasunku nehue. <sup>19</sup> Hagi hankavemati'za ha'ma renenantaza ha' vahe'nimo'za agafa'a omne zante zamago ate'nenantaze. <sup>20</sup> Knare avu'ava'ma huzmantorera kefo avu'ava zanu nona hunante'haze. Na'ankure nagra knare avu'ava nehuge'za ha'renantaze <sup>21</sup> Ra Anumzana nagri Ra Anumzamoka onatrege, natrenka afetera vugera osuo. <sup>22</sup> Ra Anumzana nagu'vazi Anumzamoka ame hunka eme nazahuo.

## 39

### *Devitima knama manino'ma vania knagu hunte'nea zagamere*

<sup>1</sup> Nagra amanage hu'noe, kema hanufina kegava hu'ne'na, kema hu'zampintira kumira osugosue. Hagi Anumzamofoma amage'ma nontaza vahe'enema mani'nenuna, nagra nagira reaka hu'na kea osugosue. <sup>2</sup> Hianagi nagra akohena nemanina knare zanku'ma nagima hamunki'na kema osu'na nemnugeno'a, narimpa kanazamo'a ome ra nehie. <sup>3</sup> Ana zanku'ma antahintahima nehugen'o'a, narimpa he'zamo'a teve arukru nehigeno, kema hu'zanimo'a amare amare nehie. <sup>4</sup> Ra Anumzamoka nama'a kna ama mopafina mani'na vugahufi hunagesa huo. Mani'nama vanuankna hamprinka ketenka nasmio. Na'ankure knanimo'a tusiza huno aganere. <sup>5</sup> Hagi kasefa hu'nama manisuankna eri atupa hankeno, Kagri kavurera amnezankna hie. Hagi vahe'motama tasimu'ma erita mani'zamo'a, magoke asimu'ma anteankna nehie. <sup>6</sup> Hagi tagra zagemo'ma rentegeno vahe'mofo ame'ma'ama fore'ma hiaza hu'nonankita, amuhoma huta eritruma hu'na zamo'a amnezankna nehie. Fenoma eritruma nehuna zana, ina vahe'mo erisantiharegahie ontahineta eritru nehune. <sup>7</sup> Hianagi menina nagra izanku amuhara hugahue? Nagra Kagriteke namentintia nehu'na amuhara nehue. <sup>8</sup> Hanki kumini'afintira nagu'nevazinka, atregeno neginagi vahe'mo'za kizazokago kea huonanteho. <sup>9</sup> Hagi nagira hamunki'na kea osu manigahue. Na'ankure Kagra knazana nenamine. <sup>10</sup> Hianagi muse hugantoanki knazama nenamina zana hanki eritro. Hazenkema namina zamo'a tusiza huno nazeri haviza hianki natro. <sup>11</sup> Hagi kumi'ma huna zante'ma knazama tamina zamo'a, zago'amo marerirfa zama antenonkeno hakanomo'ma tragama hiankna huno, tazeri haviza nehie. Maka vahe'mota tagra asimu'ma antegeno'ma vahe'mofo agipinti'ma amu'ma atiriaminkna hu'nonankita, ame huta fanane hugahune. <sup>12</sup> Ra Anumzamoka nunamuni'a antahio! Naza huogu'ma zavi'ma netoana krafageni'a antahinamio! Zavi'ma netogeno'ma navunumo'ma nehiazana keamnea osuo. Na'ankure nagra nantu vahekna hu'na ama mopafina e'noankina nagehem'o'zama hu'nazaza hu'na ko fri'na vugahue. <sup>13</sup> Hanki karimpama ahenenantana zana natrege'na, osi'a knafina musena hu'na mani'nena fri'na va'neno.

## 40

### *Anumzamo'ma azahanigu Deviti kre'nea zagamere*

<sup>1</sup> Hagi Ra Anumzamo'ma nzama hanigura akohe'na avega ante'na mani'nogeno, Agra rukrahe hunamino zavi krafageni'a antahi'ne. <sup>2</sup> Ana nehuno hapake kerifima antahintahi hakarema nehu'na mani'nogeno, navazu husga huno havere nantege'na, oti hankaveti'na oti'noe. <sup>3</sup> Ana huteno Anumzantimofo agima erisgama hu' zagamera kasefa zagame nam'i'ne. E'ina hu'neana vahe'mo'zama nege'za Ra Anumzamofoma koro'ma hunte'za Agrite'ma zamentintima hanagu anara hu'ne. <sup>4</sup> Hanki

zamavufaga rama nehaza vahete'ene havi anumzante'ma zamentintima nehaza vahete'ma amema renti osuno, Ra Anumzamofonte'ma amentintima hanimo'a, agra muse hugahie. <sup>5</sup> Ra Anumzana nagri Anumzamoka vahemota osugaza rama'hentoza zantamina hurante'nane. Tagri'ma hurante'nana zantmimofo antahintahima retro'ma huntanana antahintahia, rama'agino avompina krentegara osu'ne. Hanki mago vahemota kagri knara osu'ne. Kagrama hentoza zantmima hu'nana zantmima ham-pri'nama kesuana ana makara hampri vagaoregosue. <sup>6</sup> Hagi kresram-nama nevuno ofama hu zankura musena nosane. Hanki menina naz-eri ani hanke'na antahi ani' hue. Kagra tevefima kre fananehu ofane kumi ofagura nantahinonkane. <sup>7</sup> Hagi anante nagra amanage hu'noe, ko, Nagra ama oe. Anumzamofo avontafepina nagriku hu'za avona krente'naze. <sup>8</sup> Anumzanimoka kagri kavesi'ma avaririzanku muse nehue. Hagi kasegeka'amo'a tumonifi me'ne. <sup>9</sup> Nagra fatgo kavukava zanka'a eri fraraoki'na, ana maka vaheka'a zamasami'noe. Ra Anumzamoka Kagra kenka antahinka hu'nane, nagra vahekura korora hu'na nagira hamunki'na omani'noanki vahem'a zmagu'ma vazi'nana zana huama hu'na vahem'e ke-vua zamasmi'noe. <sup>10</sup> Hagi fatgo kavukava'ma nehana zanka'a nagu'afina atrogenora frakino omne'ne. Hanki kema hu'nana kere'ma amage'ma antenka vahem'a zamagu'ma nevazina hihamuka'amofo agenkea eriamu hu'na zamasmi'noe. Hagi tusi'a vahekrekra mani'nazafi eriamu hu'na vagaore kavesi zamofone, kema hu'nana kere'ma otinenka ana zama hu kavukavara eriamu hu'na zamasmi'noe. <sup>11</sup> Hanki Ra Anumzamoka, ka-sunkuma hunenantana zana azeorinka, vagaore kavesizane ke'ma hunana kere'ma amage'ma antenka ana zama hu kavukava zamo'a kegava hu-nantegahie. <sup>12</sup> Na'ankure ohampriga'a hazenkemo kaginante'ne. Hagi kuminimo'a agonagna huno marerineno kama vanuankana rehiza hu-nantenenge'na, ke'zanku nehue. Ana nehu'na kuminimofo nampamo'a nasenifima me'nea zamo'a nazokamofo nampana azeri agateregeno han-kaveni'a omne amne hie. <sup>13</sup> Hanki Ra Anumzamoka muse hugantoanki nagu'vazio! Ra Anumzamoka ame hunka enka nazahuo! <sup>14</sup> Hanki na-grim'a nahe frinaku'ma nehaza vahem'o'za zamagazegu nehanageno antahintahizmimo'a savari hugahie. Hanki hazenkefima mani'noge'zama musema nehaza vahem'o'za zamagazegu hugahaze. <sup>15</sup> Hanki hunte'za na-giza nere'za, ehe ehe! hu'zama nehaza vahem'o'za zamagazegu hugahaze. <sup>16</sup> Hianagi maka vahem'o'za Kagri'ma negavaririza vahem'o'za Kagri'enena muse hu'za manigahaze. Kagrama zamagu'mavazi'nana zanku'ma za-mave'nesia vahem'o'za, Ra Anumzamo'a marerisa Anumza mani'ne hu'za hiho. <sup>17</sup> Hanki nagra namunte omne kne mani'noankino, Ra Anumzamo'a nagrikura agesa antahinami vava nehie. Ra Anumzanimoka Kagra nazahu ne'maninka nagu'vazi ne' mani'nananki, ame hunka eme nazahuo.

## 41

### *Deviti kre'nea zagamere*

<sup>1</sup> Hagi zamunte omne vahem'a knare zamavu'zmava'ma hunezmantaza vahera hazenke zama esigeno'a, Ra Anumzamo'a zamagu'vazigahie. <sup>2</sup> Ra Anumzamo'a zamagu nevazino zamaza hanige'za ofri'za knare hu'za mani-gahaze. Ana nehuno zamaza hanige'za maka zama hanaza zamo'a knare ne-hinkeno, ha' vahem'o'zama zamahenaku'ma hanageno'a zamagu'vazigahie. <sup>3</sup> Hagi krima erizageno'a, Ra Anumzamo'a kegava hunezmanteno krizmia

zamazeri negnamare. <sup>4</sup> Ra Anumzamokarega nunamuna nehuanki ka-sunku hunantenka nazeri kanamaro. Na'ankure osuo hunkama hu'nana kumi hu'noe. <sup>5</sup> Hianagi ha' vahe'nimo'za huhaviza hunante'za amanage nehaze, nazupa frinigeta tagera akanigahune? <sup>6</sup> Zamagra ronen-im'o'zama nantu'ma ante'nantazankna hu'za nantu ante nante'nazanagi, havigema hu'za nagenkema hanagu nanekea emerite'za vu'za nagenkea ome hugantikma nehaze. <sup>7</sup> Zamago'ma ante'nenantaza vahe'mo'za nazeri haviza hu kea sumi sumi hu'za nanekea ananeki'za, <sup>8</sup> agra havi kri erino tafe'arera mase'neankino onkanamregosie hu'za nehaze. <sup>9</sup> Knare aronenima mani'negena antahima nemina, magopinti'ma ne'zama neno'a vahe'mo'a amefi hunenamie. <sup>10</sup> Hianagi Ra Anumzamoka kasunku hunantenka krini'a nazeri knamrege'na ana vahera nona huzmantaneno. <sup>11</sup> Nazama hananke'na ha' vahe'ni'ama ha'ma huzmagateresu'na, Kagra muse hunenantane hu'na hugahue. <sup>12</sup> Ra Anumzamoka nagrira hazenken'i'a omne vahe mani'nogu hunka, maka zupa kavuga nantanke'na mani' vava nehue. <sup>13</sup> Ra Anumzana Israeli vahe Anumzana mani'neno manivava Anumzanki, huta agi'a ahentesga hanune. Tamage, tamage.

## 42

### *Namba 2 zagame avontafere*

#### *Anumzamo zamaza hanigu Kora naga'mo'za hunte'naza zagamere*

<sup>1</sup> Dia afumo'ma tinku'ma ave'nesigeno tinku'ma hakeno vanoma nehiaza hu'na Anumzamokagura nagu'amo'a tusiza huno ave'nesie. <sup>2</sup> Tinku'ma ave'nesigenoma hiaza huno nagu'amo'a kasefa'ma huno mani'nea Anumzamofonkura nave'nesige'na nazupa agri avurera vugahue hu'na nagesa nentahue. <sup>3</sup> Hanine zagenena zavi'ma netogeno navunuma hiazamo'a nezaniagna nehigeno, ha' vahenimo'za hu'za kagri Anumzana iga mani'ne? hu'za hu'naze. <sup>4</sup> Hagi mono'ma hunegantona knare'ma, ko'ma vahe kevuma zamavare'na mono nonka'afima, nevuge'zama zagamema hu'za musenkasema nehaza zanku'ma nagesa nentahugen, tumonimo'a netanie. <sup>5</sup> Hagi nagafare nagu'amo'a kna nehie? Nagafare tumo'nimo'a netanege'na nasunkura nehue? Nagra Anumzamokare namentintia nehuanki'na, Agrama nagu'mavazi'nea zanku agia ahentesga hugahue. <sup>6</sup> Hagi menina nagu'amo'a kna nehianagi, Jodani mopafima ogantuma me'nea Hemoni agonare'ene Misa agonare mani'nena Anumzanimokagura nagesa antahimigahue. <sup>7</sup> Hagi hagerimo'ma knafu knafu'ma huno agasasama neriankna huno, knazamo'a eme narefinete. <sup>8</sup> Hianagi mago mago kna Ra Anumzamo'a vagaore avesizama'areti avesinentge'na, mago mago kenegera zagamera hu'na agia erisga nehu'na, nasimu'ma namige'nama mani'noa Anumzamofontega nunamuna nehue. <sup>9</sup> Hagi nagra Anumzanimofontega krafagea hu'na, Anumzanimoka hankave havegani'a mani'nananki, nahigenka kagerakaninenantane? Na'a hige'za ha' vahenimo'za nazeri haviza nehazage'na nasuzampina vano nehue? <sup>10</sup> Hagi maka kna ha' vahenimo'zama kefinti'ma nazeri haviza nehu'za, iga Anumzanka'a mani'ne hu'zama haza zamo'a zaferinani'a ruhantagi'za rufuzafunepaze. <sup>11</sup> Nahigeno nagu'amo'a kna huno evuneramie? Hagi nahige'na nasuzampina mani'na nevue? Nagra Anumzamo'ma nazama hanigu amuhara hugahue! Nagu'mavazi ne', Anumzanimofona mago'ene zagamera hu'na agia erisga hugahie.

**43***Anumzamofo masane tamage naneke'agu hunte'nea zagamere*

<sup>1</sup> Anumzanimoka nagrikura fatgo avu'ava'ané ne' mani'ne hunka vahepina huama huo. Kagri'ma nogavariri'za vahe'mo'zama keagama hunenantenagenka nagri kazika antenka nazahu keaga hunka naza huo. Fatgo huzama refkoma nosaza vahe'mo'zama havigema hunentazana nagu'vazio. <sup>2</sup> Na'ankure Anumzanimoka Kagra fraki vihuni'a mani'nane. Nahigenka natufetranke'za, ha' vahe'mo'za knazana nenamizage'na nasuzampina vanovano nehue? <sup>3</sup> Hagi Anumzamoka masazanka'ane tamage nanekeka'a atregeno kana naveri huno navareno ruotge agonaka'a, Saionima nemanttega vino. <sup>4</sup> E'ina'ma hnanke'na kre sramanavu itaka'are vu'na nazeri musema nehana Anumzanimoka hapu zavena ome ahe'na zagamera hu'na kagia erisga hugahue. <sup>5</sup> Nahigeno nagu'amo'a kna huno evuneramie? Hagi nahige'na nasuzampina mani'na nevue? Nagra Anumzamo'ma nazama hanigu amuhara hugahue! Nagu'mavazi'nea Anumzanimofona mago'ene zagamera hu'na agia erisga hugahue.

**44***Anumzamo'ma aza hanigu asunte'nea zagamere*

<sup>1</sup> Anumzamoka korapa'ma nazano tagehe'mokizmima huzmante'nana zana ko tasamizageta tagra tagesafinti antahi'none. <sup>2</sup> Kagra hihamu ka'anu ama mopafima nemaniza vahetmina zamahe kasope netrenka, ana maka mopafina tagehemokizmia avimazavi hankreankna hanke'za mani'naze. Kagra ha' vahetia zamahe hana hanke'za ama mopa tagehe'moza eri'za knare hu'za mani'naze. <sup>3</sup> Hagi tagehemo'za bainati kazintetira ha' vahera harahu zamagatere'za ama mopa e'ori'naze. Huge zamagra'a han-kaverera hara hu zamagateore'naze. Hanki Kagri hankavenentake tamaga kazamo'ene kavugosafinti masamo zamaza hu'ne. Na'ankure Kagra kavesizmante'nane. <sup>4</sup> Kagra nagri kini mani'eneka, nagri Anumzana mani'nane. Kagra hanke'za Israeli vahe'mo'za ha' vahe'zmia hara huzmagatere'naze. <sup>5</sup> Kagri hankavefi ha' vahetia hara huta zamafuteta ometre emetre ne-huta, Kagri kagireti ha'ma hurantenaku'ma hanaza vahera zamagofetura tagia reta zmare hapakopatigahune. <sup>6</sup> Hagi atini'agura antahinom'i'na, kazinknoni'amo'a nagu'vazigahie hu'na amuhara hunomue. <sup>7</sup> Na'ankure Kagrake'za taza hanketa, ha' vahetia hara huzmagaterenone. E'ina hunka zamavaresrama hunerantaza vahera zamazeri zamagaze hu'nane. <sup>8</sup> Hagi maka kna nanterantetima vuno kinagama omeseana Anumzamokagu ak-agia nereta, zagamera huta kagia erisga nehune. <sup>9</sup> Hagi menina kamefi huraminka tatrankeno ha' vahe'mo'za tazeri tagaze nehaze. Ko'ma ha'ma hunaku'ma nevunkenkama nehanaza hunka tagri'enena hatera vunka ome taza nosane. <sup>10</sup> Hagi tatranketa ha' vahetimofo koro nefronke'za, ha' vahetimo'za rohu eme tre'za keonke'zantia e'nerize. <sup>11</sup> Hagi tatrankeno ha' vahe'mo'za sipisipi afu'ma ahe'za nenaku'ma hiankna hu'za nerahe'za tahe panani hazageta vahe mopafina hazagreta umani emanu hu'none. <sup>12</sup> Hagi marerifa vaheka'a osi'a zagore atrenka mago zagoa retrora osu'nane. <sup>13</sup> Kagra tatrake'za tava'ontire'ma nemaniza vahe'mo'za kiza zokago kea hurante'naze. Hagi tagri mopa atupa ometre emetremu hu'neregama manigagi'naza vahe'mo'za kizazokago'ke hunerante'za tazeri haviza nehaze. <sup>14</sup> Tagrira kizazokago ke hunteza tazeri retro hanke'za, zamagena neru'za

kizazokago hurante'za tazeri fenkami netraze. <sup>15</sup> Maka kna hugeforenenen-tazage'na, tusi nagazegu nehu'na vano nehue. <sup>16</sup> Hagi maka kema antahunana kizazokago kema hurantaza kege nentahita, ha' vahetimo'zama nonama hu'za ha'ma hurante'zama nehaza zanke negone. <sup>17</sup> Kagirira tamefira hugamita huhagerafi huvempa keka'a ha'ontaginonanagi, ama ana zantamimo'a tagritera fore nehie. <sup>18</sup> Tagra Kagirira tamefira hunegamita kana atreta havi kampina ovu'none. <sup>19</sup> Hianagi tahenka tazeri haviza hutranketa afi kramofo kumapi nemanune. Ana nehunka frizamofo hanizanu refitenerantane. <sup>20</sup> Hagi tagrama Anumzantimofo agima aheta mono'ma huontege, tazama rusuteta ru vahe' anumzamofontegama nunamuma hunesunkeno'a, <sup>21</sup> tamage huno anzana Anumzamo'a keno antahino hu'ne, na'ankure Anumzamo'a Agra tagu'affima oku'ma me'nea zana keno antahino hu'ne. <sup>22</sup> Hianagi Kagri vahe'ma mani'nona kazigati maka kna tagirira tahe nefrise. Sipisipi afu'ma ahenaku'ma reharino'ma viaza hu'za rehari'za tavre'za nevaze <sup>23</sup> Hagi Ra Anumzamoka otinka taza huo! Nahigenka kavura nevasane? Kagera kanirante vava osunka otinka taza huo. <sup>24</sup> Nahigenka ke'amnea nehane? Tatama tami'za tazeri havizama nehazageta knafima mani'nonana nahigenka Anumzamoka ontage vahe knara nehane? <sup>25</sup> Tagu'amo'a tamino mopafi runtrako higeno, tavugamo'a avugosaregati mopafi runtrako huno mase. <sup>26</sup> Anumzantimoka otinka taza huo! Vagaore kavesizanku hunka nona hunka mizasenka tavro.

## 45

### *Anumzamofo kini tramo'a mevava hugahie huno hunte'nea zagamere*

<sup>1</sup> Hentofa naneke antahintahifina nentahugen, nagu'a nazeri otie. Ana hentofa nanekea kini neku hu'na kregahue. Na'ankure nagefunamo'a avoma kre'are'ma knarezantfama hu'naza vahe'mokizmi avo azotagna hu'ne. <sup>2</sup> Kagra hentofa ne' mani'nane. Kagipinti fru huno knare nanekege atineramie. E'ina agafare Anumzamo'a asomura hugante vava nehie. <sup>3</sup> Hankavenentake ha' nera bainati kazinka'a erinka kasoparega atregeno uramino! Kagirira hihamu masaka'amo kagatere'nea ne' mani'nane. <sup>4</sup> Masanentake hihamuka'ane vunka tamage nanekegu'ma, agu'ama anteramino mani'zanku'ma, fatgoma huno refkoma hu avu'avakura hara ome huo. Ana nehunka atregeno, tamaga kzamo'a ruzahukna kaguvaazana eri fore hinke'za keho. <sup>5</sup> Keveka'aramimo'a agona hu'neankino ha' vaheka'aramimofo tumotmina ahe neragie. Ana nehanke'za maka kokankoka vahe'mo'za kagafinke evuneramize. <sup>6</sup> Anumzamoka kini traka'amo'a mevava hugahie. Fatgoma huno keagama refkoma nehana azompaka'anu vahera kegava nehane. <sup>7</sup> Kagra fatgoma huno keagama refkoma hu zanku kave'nesinka kefo avu'avazankura kavesra nehane. E'ina hu'negu Anumzana Kagri Anumzamo'a masavena kasenifina tagino kazeri ruotgera nehuno, musezamofo masavena mago'a vahera rugatereno kagritera rama'a taginte'ne. <sup>8</sup> Hagi merema nehaza mnazamofo mnama, aloveramofo mnama, kasiema nehaza zamofo mnamo'a kini vahe'mo'za za'za kukenaka'e eri mnamentake hugahie. Hagi elefantu aveteti'ma kinte'naza kini vahe kumapina strini nofite'ma rente'za nehaza zavena nehe'za kazeri muse nehaze. <sup>9</sup> Kini ne'mofa mofa'nemoza agima me'nea anene mani'naze. Hagi kuini a'mo'a Ofiri kumateti eri'naza golireti trohu'naza zantaminu avasasea hu'neno kazantamaga kaziga ot'i'ne. <sup>10</sup> Kini netema maniku'ma

nehana mofamoka kama kagesa antenenka antahio. Keonke zagaka'ama kumaka'aregama zamatrewna e'nanana kagekanio. <sup>11</sup> Na'ankure negave'a, kini ne'mo'a hentofa kagikagonagura tusiza huno avesinegante. Agra ranka'a mani'negu ke'a antahiminka amage anto. <sup>12</sup> Hagi Tairi kumateti musezantmina eri'za eme negami'nageno, feno vahe'mo'za kagrama zamazama hananku anara hugahaze. <sup>13</sup> Kini ne'mofo kasefa a'mo'a goliretima avama renenia za'za kukenama huno esigeno'a, avasase'amo a tampre tampre hugahie. <sup>14</sup> Ana avasase'ane kukena hunenige'za ana ara avre'za kini netera nevnageno avevama hu' mofaneramimo'za amage avarariza vugahaze. <sup>15</sup> Maka vahe'mo'za tusi musenkase nehu'za kini ne'mofo kumapina ufregahaze. <sup>16</sup> Kagri ne' mofavremo'za zmafahe'mozama hu'nazaza hu'za kini vahe manigahaze. Ana hanagenka ugagota kva vahe zamazeri otisanke'za, maka ama mopafina kva vahe manigahaze. <sup>17</sup> Nagra rankagi kamisuge'za forehu anante anante'ma hu'za esaza vahe'mo'za, kagrira antahinegamiza rankagia kamivava hu'za vugahaze.

## 46

*Anumzamo'a fraki kumati mani'ne hu'za Kora mofavre naga'mo'za hunte'naza zagamere*

<sup>1</sup> Anumzamo'a fraki vihutine hankavetine mani'neankino, hazenke knafima tazama hanigura maka kna retro huno nemanie. <sup>2</sup> E'na hu'neankita imima e'nerisigeno, agonamo'a ankariseno hageri amu'nompina vugahianagi, tagra korora osugahune. <sup>3</sup> Hagerimo'a kranto kranto huno agrenkera nehanigeno, agonamo'a imina erino eri tore vare hugahianagi, tagra korora osugosune. <sup>4</sup> Mago rantimo'a Anumzamofo rankumapi ufre efre huno Marerirfa Anumzamo'ma nemanifima me'nea zantamina tina zamino zamazeri muse nehie. <sup>5</sup> Anumzamo'a e'i ana rankumapi nemanikino, vahe'mo'za eri havizana osugahaze. Nanterama komatanigeno'a Anumzamo'a ana kumara kegava huno aza hugahie. <sup>6</sup> Ama mopafima me'nea kumataimpintira vahe'ma azeri agore hu agasasaneranigeno, kini vahe'mo'zama kegavama hu'naza kumatmimo'zanena fuzafrupe'za amane zankna hugahaze. Hanki Anumzamo'ma ageru'ma aranigeno a, tevemo'ma plastikima temramra'ma hiazza huno ama mopamo'a maramra hu'ne. <sup>7</sup> Monafi sondia vahe'mokizmi Ra Anumzamo'a, tagrane magopi mani'ne. Jekopu Anumzamo'a tagrama frakita mani vihuti mani'ne. <sup>8</sup> Eta Ra Anumzamo'ma ruzahu avu'avazama hiazana eme keho. Agra ra hazenke'za avreno, eno ama mopa eri haviza hie. <sup>9</sup> Agra ama mopafina maka kaziga ha'ma nehaza zana eri netreno, atine, kevenena eri hantagi netreno, hankoramina teve hanavazino kre'ne. <sup>10</sup> Tamagra tamagasasana eri taganeta akoheta mani'neta, Nagrikura Anumza mani'ne huta antahio. Kokankoka vahe'mo'za nagesga hu'za ra nagi nenamisageno, ama mopafi vahe'mo'zanena nagesga hu'za ra nagi namigahaze. <sup>11</sup> Monafi sondia vahe'mokizmi Ra Anumzamo'a, tagrane mani'ne. Jekopu Anumzamo'a frakita mani vihuti mani'ne.

## 47

*Anumzamo'a maka vahe'mofo kini ne' mani'ne huno hunte'nea zagamere*

<sup>1</sup> Mika kokankoka vahe'mota tamazana nehetma, ranke huta muse zagamera nehutma hentofa Anumzamofona agi'a erisga hiho. <sup>2</sup> Na'ankure Marerirfa Ra Anumzamo'a knare zantfa hu'nea Anumza mani'neankita,

kore hunenteta agorga'a manigahune. Agra maka ama mopafina marerirfa kini ne' mani'neno, ama mopa kegava hu'ne! <sup>3</sup> Agra kokankoka vahetmina hara huzmagatenereno ha' vahetia zamaheno eri tagafi atregeta, zamagofetu tagia reta oti'none. <sup>4</sup> Anumzamo'a erisantima haresuna zana, huhampirante'nea mopa tami'ne. Jekopu mofavreramima Anumzamo'ma avesima nezmantea naga'mo'zama erisantima nehare'za ra zamagima erisaza zantamina zami'ne. <sup>5</sup> Kezati'za muse zagamera nehazageno, Anumzamo'a mareri'ne. Hagi ufena nerazageno, Ra Anumzamo'a anagamua mareri'ne. <sup>6</sup> Zgame huta Anumzamofo agi'a erisga hiho. Zgame hiho. <sup>7</sup> Na'ankure Anumzamo'a Agra maka ama mopafi vahe Kini mani'ne. Zgame avontafepima krente'naza zgame huta agi'a erisga hiho. <sup>8</sup> Anumzamo'a manisga huno ruotge'ma hu'nea tra'are mani'neno, kokankoka vahera kegava hunezmante. <sup>9</sup> Kokankoka vahe'mokizmi kva vahe'mo'za Abrahamu Anumzamofo naga'ene emeritru hu'naze. Na'ankure maka ama mopafi kini vahe'ma mani'nazana Anumzamofo vahe mani'naze. Ana hu'neanki'za Ra Anumzamofona agi'a ahentesga hugahaze.

## 48

### *Anumzamofo kuma Saioni ran kumaku asunte'nea zagamere*

<sup>1</sup> Ra Anumzana marerisa ne' mani'neankita Anumzantimofo rankumapina, Agri ruotge agonarera zagamera huta agi'a ahentesga hugahune. <sup>2</sup> Hagi Anumzamofo agonamo'a, hentofaza huno mesga hu'nege'za, maka kokankoka vahe'mo'za kenakura tusi muse nehaze. Noti kaziga Saioni agonamo'a ruotge hu'neankino hentofaza hu'nea kini ne'mofo rankuma me'ne. <sup>3</sup> Anumzamo'a ana kumapi mani'neno, Agra'a ana kumapinti eama huno kegava nehie. <sup>4</sup> Hagi ama mopafi kini vahe'mo'za sondia vahezmia erimago hu'za ana rankumara hara hunte'naku urava'o nehaze. <sup>5</sup> Hianagi e'zama eme nege'za antri nehu'za, tusi zamagogogu nehu'za, atre'za koro fre'naze. <sup>6</sup> Zamagrira tusi zamahirahi nerege'za, a'nemo'za mofavre kasenteku zamatagu nehazankna hu'naze. <sup>7</sup> Hagi kagra zage hanati kazigati hanavenentake zaho'mo Tasisi kumate hanave venterami eri tagana taganu vazitreankna hunka kagra zamahe vagare'nane. <sup>8</sup> Ke'age nehazageta ana rankumamofo konarari'agura antahi'nonanagi, Monafi sondia vahe'mofo Ra Anumzamofo rankumara menina tagra tavufinti kone. E'i ana kumara tagri Anumzamofo rankumokino Agra'a kegava hu lava hugahie. <sup>9</sup> Anumzamoka mono nonka'afina mani'neta, vagaore kavesizantetima kavesinerantana zankura tagesa antahinegamune. <sup>10</sup> Anumzamoka kagi'amo'ma hu'neaza hu'za zgame'ma hu'za kagima erisgama hanaza zamo'a mopa atumparega vuno eno hugahie. Hanavenentake tamaga kazampina fatgo avu'avazamo avite'ne. <sup>11</sup> Saioni agonafi nemaniza veamo'za muse nehanage'za, Juda mopafima me'nea kumatamimpima ne-maniza vahe'mo'za muse hiho. Na'ankure Kagra fatgo kavukvama hunka vahe'ma refkoma nehana kavukava zanku anara hugahaze. <sup>12</sup> Saioni rankumara kaginka negenka, mani'neza kuma'ma kegavama nehaza za'za non-tamima kinte'nazana hamprinko ko. <sup>13</sup> Kuma vihuma kino mareri'nea zana negenka, fraki hankave viihu keginama hu'nea kumara ketenka, henkama efore hu'za esnaza vahera nanekea zamas mio. <sup>14</sup> Na'ankure Anumzamo'a

e'inahu hu'ne. Agra manivava Anumzanti mani'neankino, Agra kegava hurante'nенигета manime vuta ufrigahune.

## 49

### *Hazenke knafima koro osnuna zagame asunte'nea zagamere*

<sup>1</sup> Nanekema hanuana maka vahe'motma nentahinkeno, ama mopafima mani'naza maka vahe'mo'zanena zamagesa ante'za antahihi! <sup>2</sup> Marerifa vahe'ma, tami vahe'ma, feno vahe'ma, tamunte omne vahe'motanena antahihi! <sup>3</sup> Na'ankure knare antahi'zamofo naneke huama nehugenno, nagu'afina antahi ama' hu antahizamo avite'ne. <sup>4</sup> Nagra knare antahi'zamofo nanekegu nagesa ante'na nentahi'na, hapu zavena nehe'na, fraki nanekea zagamepi erinte ama hu'na hugahue. <sup>5</sup> Hazenke zama ne-enigeno, ha' vahe'mo'zama eme navazagi kagisazana, nahanige'na nagra korora hugahue? <sup>6</sup> Zamagra fenoma ante'naza zante zamentintia nehu'za, tusi zago fenoma ante'naza zanku zamavufa ra hu'za akagi neraze. <sup>7</sup> Tagra antahi'none, mago vahe'mo'a frizampintira agra'a aguravazige, Anumzamofona atesinteno nefuna ovaregosie. <sup>8</sup> Mago mizantetira vahe'mo'a atesino, agra'a agu'vazigara osu'ne. Na'ankure mago mizantetira mizaseno, <sup>9</sup> frino onkasarino, manivava huno ovugosie. <sup>10</sup> Negonke'za knare antahi'zane vahe'mo'za nefrizageno, ana hukna hu'za neginagi vahe'ene antahintahi omne vahe'mo'zanena nefrizage'za, ru vahe'mo'za ana vahe'mokizmi fenozana erisanti neharaze. <sup>11</sup> Ana vahe'mo'za rama'a mopa eri'za zamagia ana mopazmirera asamregahazanagi, matimati'mo'a manivava nonkumazmi senige'za fri'za matipi umanigahaze. <sup>12</sup> Hagi fenoma antene'za ra zamagima e'neriza vahe'mofo zamagimo'a zazatera meno ovugahanki, zagagafama fri fananema nehiaza hu'za fri'nageno, zamagimo'a fanane hugahie. <sup>13</sup> Hagi knare vahe mani'none hu'za neginagi vahe'mo'zama nehaza vahete'ene, ana vahe'mokizmi kere'ma zamentintima nehaza vahete ama anazana fore hugahie. <sup>14</sup> Sipisipi afute kva vahe'mo, sipisipi afutami zamavareno viaza huno fri'zamo'a zamavareno fri vahe kumapina vugahie. Hagi nanteramasena Anumzamofo vahe'mo'za kegava huzmantegahaze. Kumazmimofona afete'are matipi zamavufagamo'a kasrigahie. <sup>15</sup> Hianagi nagrira nagu'nevazino, fri'zamofo hihamufintira Anumzamo'a eri varino navaregahie. <sup>16</sup> Hagi vahe'mo'zama rama'a fenoma ante'za hage'za mareneri'nageno, nonkumazmifima knare zantmimo'ma avimatesia zankura korora osiho. <sup>17</sup> Na'ankure zamagrama frisageno'a, maka fenozamimo'a amanezankna hugahankino, anazana eri'ne'za fri kantega ovugahaze. <sup>18</sup> Kasefama huno mani'nea knafina maka zampina knare hu'noe huno agra'a husga nehanigeno, vahe'mo'zanena humuse huntegahaze. <sup>19</sup> Hianagi ko'ma zamagehe'zama hu'nazaza hu'za fri'za nevu'za mago'enena zagemo'ma remsa hania masa onkegahaze. <sup>20</sup> Hagi fenozmig'u'ma akagima neraza vahe'mo'za zamagra maka zana antahi anira nosazanki'za, afukra friaza huza frigahaze.

## 50

### *Anumzamo Agra'a ke refko hu' nera mani'ne huno Asafu asunte'nea zagamere*

<sup>1</sup> Ra Anumzana Hankavenentake Anumzamo'a zage fre kazigati evuno zage hanati kazigama evu'nea vahekrerfa ke huno eritru nehie. <sup>2</sup> Saioni

kumara konarari'amo agatererfa kuma me'neankino, Anumzamofo masazamo'a remsa huno ana kumapinti enevie.<sup>3</sup> Hagi Anumzantimo'ma esiana agasasane eghiankino, maka zama tefanene hu tevemo avuga neresigeno, tusi ununko netanifi Agra egahie.<sup>4</sup> Agra monane mopane ke hanigeno emanineke negesakeno, Agra'a vahera keaga huzmanteno refkoa huzmantegahie.<sup>5</sup> Nagri'ma zamagu'aretimu hu'za namage'ma nente'za, huhagerafi huvempa kema hune'za nagrite'ma kresramnana vunenantaza vahera ke huge'za echo.<sup>6</sup> Hagi fatgoma huno refkoma hu avu'ava zama'agura monomo'a huama hino. Na'ankure Anumzamo'a Agra'a keaga refko hugahie.<sup>7</sup> Nagrama kema hanuana vahe'nimota kama antahiho. Ama'na zantminte Israeli vahe'mota huama huramantegahue. Nagra Anumzankina, tamagri Anumza mani'noe!<sup>8</sup> Tamagrama kresramnana nevaza zantero, tevefima krefanane hu ofama nagri navugama erita evavama nehaza zantero keaga huoramantegahue.<sup>9</sup> Hianagi bulimakao afu keginaka'afinti ve bulimakao afukuro, meme afu keginaka'afinti ve meme afukura avrenka eno hu'na osugahue.<sup>10</sup> Na'ankure zafa avo'nompima maka zagagafama mani'nazana nagrike zaga manizageno, tauseni'a agonaramimpima mani'naza bulimakao afutamina nagrike suza mani'naze.<sup>11</sup> Maka namaramima agona fima mani'nazana nagra kena antahina nehugen, maka zagagafama hofa avo'nompima vanoma nehaza zagaramina nagrike suza mani'naze.<sup>12</sup> Hanki Nagri'ma naga'ma tenige'na mago zankura tamagrira tamantahi onkegahue. Na'ankure maka zama ama mopa fima me'neana, nagrike zantaminke me'naze.<sup>13</sup> Nagra ve bulimakao afutamimofo ame'ane, ve meme afu'tmimofo koranena nenofi?<sup>14</sup> Marerirfa Anumzamofonte'ma huvempama hu'nana naneke avaririnka, musenkase huno susu'ma hunte ofa Anumzamofona hunto.<sup>15</sup> Ana nehunka hazenkefima ufresunka nagritega nunamuna huge'na kaguvazinugenka, nagrira ra nagia namigahane.<sup>16</sup> Hianagi Anumzamo'a kefo zamavu'zmava'ma nehaza vahetminkura huno, tamagra kasegeni'a huamara hugara osu'nazanki nagafare kasege'nii'a huamara nehuta, huhagerafi huvempa kea tamagitetikera nehaze?<sup>17</sup> Na'ankure tamazeri fatgoma nehugeta tamavesra hunenanteta, anankeni'a tamamefi humita amagera nontaze.<sup>18</sup> Musufa vahe'ma nezamageta, zamazeri rone nehuta, ru vahe'mofo aro, vema azeri savri huno anteno nemasea vahetamine tragedeta nemanize.<sup>19</sup> Tamagipina, kefo avu'avazama hu nanekemo avitegeno, havigema hu nanekege tamagefu'nafintira atineramie.<sup>20</sup> Tamagra zogitru huta mani'neta tamafuhe'i zamagenke nehuta, neramarera nemofo neramafuna havige hunezmantaze.<sup>21</sup> E'ina'ma nehazage'na nege'na kema nosugeta, tamagrama antahi'zana, Anumzamo'a tagrikna hu'ne huta nehaze. Hianagi menina maka'zama hu'narera keaga huramantegahue.<sup>22</sup> Hagi Anumzamofonku'ma tamage'ma nekaniza vahe'mota kama antahiho, zamagu'a rukrahe huta tama suntuhiho. Hanki ana'ma osnazana, tamahe'na rutagana taganu vazitransenavahe'mo'za tamaza osugahaze.<sup>23</sup> Hianagi muse nehuno susu hu ofama hunenantea vahe'mo'a, Anumzamo'na ra nagi nenamianki'na, agu'mavazisua kana averi hugahue.

<sup>1</sup> Anumzamoka kasunku hunanto. Vagaore kavesizanteti rama'a kasunku hunantenka kumini'a eritre vagaro. <sup>2</sup> Kefo avu'avazani'a sese hunantenka nazeri avusese nehunka, kumini'a sese hunka nazeri agru huo. <sup>3</sup> Na'ankure nagra kumini'a ke'na antahi'na hu'nogeno, maka zupa antahintahifina eri'zana e'nerie. <sup>4</sup> Nagra kagri kea hantagi'na ha' renegante'na, kagri kavurera kumi hu'noe. E'ina hu'noankinka tamage hunantenka fatgo kazi-gati refko hunka keaga hunenantane. <sup>5</sup> Nagra kumi vahe mani'nogeno, nenrera'a kasenante'ne. Na'ankure nenrera arimpafina kumi vahe fore hu'noe. <sup>6</sup> Hianagi tamage nanekemo'a nagu'afi avitesie hunka Kagra kagesa nentahine. E'ina hu'negu knare antahi'zana nagu'afina rempi hunamio. <sup>7</sup> Kumini'a hisopureti nazeri agru huge'na agru ha'neno. Sese hunka nazeri agru huge'na, efeke hamponkna ha'neno. <sup>8</sup> Hanki ete musenkassema huno mani avu'ava zana namigeno, nazeri fru hina ruhantaginana zaferinanimo'za musenkasesa hihio. <sup>9</sup> Kumini'arera ketenka omaninka, kefo avu'avazani'a eri atre vagarenane. <sup>10</sup> Anumzamoka agru tumo nagu'afina tro hunenantenka, Kagrite'ma mani fatgoma hu'za nagu'afina antenanto. <sup>11</sup> Kavugatira nahenati notrenka, Ruotge Avamuka'a nagu'afintira eri otro. <sup>12</sup> Nagu'ma vazinkenama musema hunoakna musezana ete nemalinka, keka'ama antahino kavariri navesi zana namio. <sup>13</sup> E'ina'ma hananke'na kefo avu'ava'ma nehaza vahe'mokizmia kagri kavukavara rempi huzminuge'za, kumi vahe'mo'za ete kagrite rukrahe hu'za egahaze. <sup>14</sup> Vahe'ma ahe'na korama eri tagi'noa kumira Anumzamoka apase nenantenka nagu'vazio. Ana'ma hananke'na fatgo kavukvama hunka nagu'ma vazi'nana zankura, musenkasesa hu'na zagamera hugahue. <sup>15</sup> Ra Anumzamoka nagira eri o'za huge'na, zagamera hu'na kagia ahentesga ha'neno. <sup>16</sup> Na'ankure nagra ofa erina eme kamigahuanagi, kre fanene hu ofagura musena nosane. Kagrite'ma kre fananehu ofama kresramnama vezankura kave'nosie. <sup>17</sup> Hagi kagri'ma kavenesia kresramna vu ofa, e'i avufgama anteramino mani'zane. Avufgama anteramino nemanino agua'retima huno asunku'ma huno agu'ama rukrahema nehia vahera Anumzamoka kamefira hunomine. <sup>18</sup> Kagra kavesintenka Saioni rankumara azeri knare nehunka, Jerusalemi kumamofo kegina huo. <sup>19</sup> Ana hutenga mani fatgo hu'za mani'neza fatgo avu'ava'ma hu'za kresramna vanaza ofagi, tevefima kre fananehu ofagi, maka zagagafama tevefi krefanene hu ofagi, bulimakao afu'ma kresramna vu itaka'arema kresramna vu ofagura musena hugahane.

## 52

### *Doekima hu'nea havi avu'ava zanteku huno Deviti asunte'nea zagamere*

<sup>1</sup> Hankavenentake sondia ne'moka, nagafare kefo avu'ava zama nehana zankura kavufga rana nehane? Hagi Anumzamo'ma fatgo avu'ava'ma huno, maka knafima nevia zankura kagesa nontahino? <sup>2</sup> Maka kna vahe'ma azeri haviza hu antahintahige retro nehunka, havigema huno vahe'ma azeri haviza hu kemo'a asane'nea resagna huno kagipintira atineramie. <sup>3</sup> Kagra knare avu'ava zama kavesi nentana avamena agaterenka, havi avu'ava'zana kavesi nentenka, tamage kema kavesi nentanama'a agaterenka havigea kavesinentane. <sup>4</sup> Knare osu keka'aretima vahe'ma azeri havizama hu'zanku kavenesia nekinka, kagra havige ne' mani'nane! <sup>5</sup> Hianagi Anumzamo'a kahe fanane hanigenka, ru'enena omanigosane. Traza vatitreankna huno nonkuma ka'afintira Anumzamo'a kavazu hutrena ru'enena mopafina

omanigahane. <sup>6</sup> Fatgo avu'ava'ma nehaza vahe'mo'za nege'za, zama-gogogu hugahaze. Anazama kagrite'ma fore'ma hanige'za negenu'za, kagiza nere'za amanage hugahaze, <sup>7</sup> Anumzamo naza hugahie huno antahi omino, agra'a hankavegu'ma nehia hankavenentake sondia nete'ma fore'ma ne-hia zana keho. Agra'a feno zante amentinti nehuno, ru vahe'mokizmia hanavetino kefo avu'ava'zana huzmante vava huno nevie. <sup>8</sup> Hianagi na-gra Anumzamofo nompina olivi zafamo tretre huno amu mareankna ne-huanki'na, maka kna Anumzamofo vagaore avesizante namentintia huvava hugahue. <sup>9</sup> Knare kavukva'ma hunantana zankura Anumzamoka kagia erisga huvava nehu'na, Kagri kagire amuhara hugahue. Na'ankure Kagri kagimo'a, knare zantfa hu'ne. Kavariri fatgoma nehaza vahe'mokizmi zamavufi kagri kagia nagra husga hugahue.

## 53

### *Maka vhahera kumi vaheke'za mani'none huno Deviti asunte'nea zagamere*

<sup>1</sup> Neginagi vahe'mo'zage zamagu'afina anagea nehaze, Anumzana omani'ne hu'za zamagesa nentahize. E'inahu vhahera ko haviza hu'nazanki'za zamavuzmava zmimo'a kefoza hu'neankino, magomo'e huno knare avu'ava zana nosie. <sup>2</sup> Anumzamo'a monafinka mani'neno, iza ama' antahi'zane vhahera ama mopafina mani'neno, agrira amagera nentefi huno, kefenkma atreno maka vhahera nerage. <sup>3</sup> Hianagi magore huno fatgo vhahera omani'neanki maka vahe'mota Anumzamofona tamagena humita havizantfa hu'none. Maka vahe'ma mani'nonana kefo avu'avake hunkeno mago'mo'e huno fatgo vhahera omani'ne. <sup>4</sup> Ana kefo zamavu'zmavama nehaza vahe'mo'za magore hu'za rempia hu'za nontahize. Hanki bretima neankna hu'za nagri vhahera zamahe'za nene'za Anumzamofontegama nunamuma hu'zankura zamagesa nontahize. <sup>5</sup> Hianagi tusi koro nehu'za zamagogofena, ha'ma regantesaza vahe'mokizmi zaferina herafi atregahie. E'ina hanigenka kagra zamazeri zamagaze hugahane. Na'ankure Anumzamo'a amagena huzmino zamatregahie. <sup>6</sup> Hanki Israeli vahe'ma zamagu'ma vazisia ne'mo'a Saioni agonaregati'ma esiana knare hugahie. Hanki Anumzamo'ma Agra vahe'ama eme zamavareno ete zamazeri so'ema hanigeno'a, Jekopu naga'mo'za ranke hu'za zagamera hu'za musena nehanageno, Israeli vahe'mo'zanena musenkase hugahaze.

## 54

### *Ra Anumzamo kegava hunantegahie huno asunte'nea zagamere*

<sup>1</sup> Anumzamoka kagika'reti nagu'vazio. Hankanaveka'anu nagu'a refko hunka nago. <sup>2</sup> Anumzanimoka nunamu keni'a nentahinka, nanekema kasami'nuana kagesa antenka antahio. <sup>3</sup> Na'ankure ru vahe'ma eman vahe'mo'za hara renantazageno, vahe'ma zamazeri havizama nehaza vahe'mo'za nahefri'za nehaze. Zamagra Anumzamofonkura antahi amaneza nesaze. <sup>4</sup> Hianagi Anumzamo nazahu nera mani'ne. Agra naza hige'na kasefa hu'na mani'noe. <sup>5</sup> Ha' vahe'nimo'zama nagri'ma nazeri haviza hu'antahintahima retro'ma haza antahintahia, eri arukrahe hugeno, zamagri zamazeri haviza hino. Anumzamoka kagrama huvempama hunana kante antenka, ana vahetmina zamahe fri vagarege'za mago'enena ama mopafina omaniho. <sup>6</sup> Ra Anumzamoka nagra navesite kagritera ofa kresramna nevu'na, susu hugante'na kagia ahentesga hugahue. Na'ankure

e'inama hanuana knare hu'ne! <sup>7</sup> Na'ankure kagra maka hazenkenifintira nagu nevazinka, nazahanke'na ha' vahe'ni'aramina hara huzmagatere'noe.

## 55

### *Rone kamo kavreno kanazana ome kamigahie huno hunte'nea zاغامەر*

<sup>1</sup> Anumzamoka naza huogu'ma nunamuma nehuana antahi amnea osunka, kagesa antenka nunamuni'a antahinamio. <sup>2</sup> Muse hugantoanki, nunamuni'a antahinaminka kenona hunanto. Na'ankure hazenke zamo'a nazeri haviza hige'na kragira nerue. <sup>3</sup> Ha' vahe'nimo'za kezati'za rankege hunenantage'za, kefo avu'ava'ma nehaza vahe'mo'za knazana nami'za nazeri haviza nehu'za, tusi zamarimpa ahenenantaze. <sup>4</sup> E'ina'ma hazageno'a tumonimo'a faki faki nehige'na, fri'zankura tusi koro nehue. <sup>5</sup> Tusi nagogo nefegeno koro zamo'ene nahirahimo'enena nahenefrie. <sup>6</sup> Maho namamofoma hiaza hunora nagekona huntenege'na, hare'na knare'ma hu'nea kumatega mani fruma hu'na umanuresina knare hisine. <sup>7</sup> Nagra hare'na afete'are ka'ma kokampi umanuresine. <sup>8</sup> Ununkomo'ene zasi komo'ma hifintira, nagra ame hu'na fre'na afete ome fraki'na umanuresine. <sup>9</sup> Ra Anumzamoka ha' vahe'nimozama retromta nehaza antahintahia eri savri hunka eri haviza huo. Na'ankure vahe'ma azeri haviza hu avu'avazane, mani fru osu avu'avaza rankumapina negoe. <sup>10</sup> Hanine zagenena ku'ma keginare vano nehu'za kegava nehazanagi, tamage huno ha'zamo'ene kefo avu'ava zamo'a kuma agu'afina avite'ne. <sup>11</sup> Maka zama eri haviza hu'zamo ama ana kuma amu'nompina megeno, vahe'ma knama amino azeri haviza nehuno, revatgama hu avu'avazamo'a ana kumara atreno novie. <sup>12</sup> Ha' vahe'nimozama huhaviza hunantazasina, nagra ana zankura nagesa ontahuresine. Hagi ha' vahe'nimo'zama ha'ma eme hunantazaresina nagra frakuresine. <sup>13</sup> Hianagi mago avamente'ma manino'a ne'moka anara nehane. Kagra nagri'enema tagrotenga vanoma nehankena, kagena antahina hu'noa navate ronenimoka anara nehane. <sup>14</sup> Korapara kagranena knare huta magopi nemanita, tusi'a vahe'ma Anumzamofo mono nontegama nevazafima magokama nevu'ane. <sup>15</sup> Ha' vahe'ni'aramina atregeno antri hanazaza huno fri'zamo'a zmavatera ne-enkeno, matimo'a zamavu aga zmasgahu nakarino. Na'ankure kefo zamavu'zmava zamo'a zamagu'afina nonkino me'ne. <sup>16</sup> Hianagi Anumzamofonku kea hanugeno, Ra Anumzamo'a nagu'vazigahie. <sup>17</sup> Knazani'afima mani'nena nanterane, feru'ene kenage'enena krafagea nehugen, Ra Anumzamo'a antahi nenamie. <sup>18</sup> Ra ha'pintira nahokeno ete nagu'vazine. Na'ankure rama'a ha' vahe maninazafinti naza huno navare'ne. <sup>19</sup> Anumzana Agra kini mani vava huno ne-ea kini ne'mo krafage'ni'a antahino zamazeri haviza hugahie. Na'ankure nagri ha' vahe'mo'za zamavu'zmavara rukrahera osuge, Anumzamofona korora huntegera nosaze. <sup>20</sup> Ronenimo'a ha'renanteno huhagerafi hvempagema hu'neana ruhanentagie. <sup>21</sup> Naneke'amo'a batagna huno frufru hu'neanagi, agu'afina ha'ma hu'za me'ne. Naneke'amo'a olivi masavenkna huno frufru hu'neanagi, agu'afina asane bainati kazi me'ne. <sup>22</sup> Knazanka'a Ra Anumzamofo azampi antegeno, Agra knazanka'a e'herino kazeri hanavetino. Agra fatgo zamavu'zmava'ma nehaza vahera zamatrenige'za regarari'za trakara osughahaze. <sup>23</sup> Hianagi Anumzamoka kefo zamavu'zmava'ma nehaza vahera zamavarenka hazenke zamofo kerifi

zamatregahane. Hagi vahe'ma zamahe nefri'za vahe'mo'zane krunagema nehaza vahe'mo'zanena kasefa vahe mani'ne'za ko frigahaze. Hianagi nagra Kagriku antahi negamina namentintia nehue.

## 56

*Filistia vahe'mo'za Gati kumate Deviti azerinaku nehazageno asunte'nea zagamere*

<sup>1</sup> Anumzamoka kasunku hunanto, na'ankure vahe'mo'za nahe'za nartago nehaze. Maka kna ha' vahenimo'za nazeri havizantfa nehaze. <sup>2</sup> Ha' vahe'nimo'za nahenaku knane knanena nenavararizageno, zamavufaga ra hanaza kazigati rama'a vahe'mo'za hara eme hunenantaze. <sup>3</sup> Hianagi koro'ma hanua knafina, Kagrite namentintia hugahue. <sup>4</sup> Anumzamo'ma huvempama hu'nea kere namentintia nehu'nua, agia ahentesga nehue. Nagra Anumzamofonte namentintia nehuankina, na'a hanigena amne vahetfankura korora hugahue? <sup>5</sup> Nagrama hua nanekea zamagra eri rukrahe nehu'za, nazeri haviza hunaku maka kna mani'ne'za oku'a kea retro nehaze. <sup>6</sup> Nagri'ma nazeri'za nahenakura, oku'a kea retro hu'za kafona ante'za vano nehu'za, kama vano nehuge'za zamavunte'za nenagaze. <sup>7</sup> Kefo zamavu'zmavama nehaza vahera ana zamavu'zmava zanteria Anumzamoka zamahe kasopetro. Hanki krimpa ahezmanterka zamazeri fenkami atro. <sup>8</sup> Kagra nasunku'ma huazana kavuntenka nenagane. Zavi'ma atogeno'ma navunu'ma hia navunura tafempi afinte'nane. Magoke magoke zana avompi krente'nane. <sup>9</sup> Hagi nazama huogu'ma Kagritegama kezamat'i'nen, ha' vahe'nimo'za koro fregahaze. E'ina'ma hanage'na Anumzamoka nagri kaziga mani'enka hara huzmantane hu'na ke'na antahi'na hugahue. <sup>10</sup> Anumzamo'ma Agrama huvempama hu'nantenegu nentahina agi'a ahentesga hugahue. Tamage Ra Anumzamokama huhampri nante'nana zanku kagia erisga hugahue. <sup>11</sup> Nagra Anumzamokare namentintia nehuanki, na'a hanige'na amne vahetfankura korora hugahue. Agra vahetfa mani'neanki na'a hunantegahie? <sup>12</sup> Nagra huvempama hu'noa kere amage ante'na, nazama nehana zanteria susu hu'na ofa hugantegahue. <sup>13</sup> Na'ankure Kagra fri zampintira nagu'nevazinka, tanafa'ma hu'za nehugenka naza hu'nane. E'ina hu'nananki'na menina amne Anumzamoka kavuga vano nehu'na, vahe'moma asimu'ma erino nemania tavitera vano hugahue.

## 57

*Solinku'ma kore'ma huno Deviti'a freno nevuno asunte'nea zagamere*

<sup>1</sup> Kasunku hunanto Anumzamoka, kasunku hunanto! Na'ankure nagra kagripinka franekue. Kagri kagekonamofo turunapinka, fraki'na mani'nenueno hazenke zamo'a nagateregahie. <sup>2</sup> Marerirfa Anumzamofonta nagra kezatigahue. Maka zama hugantegahuema nehia zama hunenantea Anumzamofonta kezanatigahue. <sup>3</sup> Agra monafinkati nazama hu'zana atresigeno eme nagura vazigahie. Nagofetu'ma zamagama re'za vonoma nehaza vahetmina, Agra zamazeri zamagaze hugahie. Anumzamo'ma monafinkati vagaore avesizane, hugahuema hu'neaza huno navesinte vava hugahie. <sup>4</sup> Nagra vahe'ma amprizama nenaza laioniramimofo amu'nozmifi mani'noe. Zamave'mo'ma keve kna higeno zamagefu'namo'ma bainati kazinkno kna'ma hu'nea vahetmimofo amu'nompi mani'noe. <sup>5</sup> Anumzamoka monaramina agaterenka onagamu mani'nananki'za husga hugantegahaze. Hagi masazankamo'a maka

ama mopafina remsa hanie. <sup>6</sup> Ha' vahe'nimo'za nahenaku krifu anagi ante'nazageno nagu'amo'a kna nehie. Hanki kama vu'na e'nama nehuifina, keri kafinte'nazanagi, ana kerifina zamagra'a tamigahaze. <sup>7</sup> Anumzamoka nagu'areti hu'na nagra kagritra namentinti nehue. Nagra nagu'areti namentinti nehuanki'na zagamera hu'na kagia ahentesga hugahue. <sup>8</sup> Nagu'amoka otio. Hapu zavenane laeri zavenanena oti'o. Nagra zagame hu'na ko'matu'zana azeri otigahue. <sup>9</sup> Nagra maka kokankoka vahe'mokizmi zamavufina, susu hu'na kagia ahentesga hugahue. Maka vahe'mokizmi zamavufina zagamera hu'na Anumzamoka kagia ahentesga hugahue. <sup>10</sup> Anumzamoka vagaore kavesizamo'a, monagna huno amunagamu marenerigeno, hugahuema hu'nana kema amage antenka hu kavukava zamo'a amunagamu marerino hampona avako nehie. <sup>11</sup> Anumzamoka monaramina mani agaterenka onagamu mani'nanankino, vahe'mo'za husga hunegante'nageno masazanka'amo'a maka ama mopafina remsa hugahie.

## 58

### *Anumzamo'a ama mopafi vahera refko hugahie huno asunte'nea zagamere*

<sup>1</sup> Tamagra kva vahe'mota fatgo naneke keagafina nehzafi? Tamagra fatgo huta vahe'mokizmi naneke refko nehazo? <sup>2</sup>I'o, tamagu'afina kefozama hu antahintahi retro nehuta, ama mopafi vahera zamazeri haviza nehaze. <sup>3</sup>Kefo avu'ava'ma nehzaza vahe'mo'za anama kasezmantetegati kana atre'za hazagre'naze. Zamagra nezamarera ku'afi mani'neza havigege hu'naze. <sup>4</sup>Nanekema hazazamo'a ha' osifavemofo avu'ataga zankna nehige'za, nanekema nehzazazamo'a kobra osifavemo'ma hiaza hu'za kea nontahize. <sup>5</sup>Hagi zavenama aheno osifavema azeri oti vahe'mo'a, eri ruzahu ruzahu huno'ma zavenama ahesiana, ana osifavemo'a ontahigosie. <sup>6</sup>Anumzamoka zamagipima me'nea zamavera rutafri atro. Ra Anumzamoka ama ana laioniramimofo zamagemazampa rutavegri atro. <sup>7</sup>Zamatrege'za hagege mopafima tima tagiramino ome fananema hiaza hu'za fanene hiho. Zamatrejeno zamazampima eri'haza kevemofo agonazmimo'a atupaseho. <sup>8</sup>Zamatrege'za koravemo'za hagage hazaza huge, osi mofavremo ana kasentegeno zage onkeneno friankna hiho. <sup>9</sup>Kavoramimo'ma tevere'ma me'neno amuhoma nehia kna'a agetereno, Anumzamo'a ame huno kasefa vahero, ozafa tavavararo, kefo avu'ava'ma nehzaza vahera ruharafi hutrehagie. <sup>10</sup>Anumzamofoma amage'ma nentaza vahe'ma, kefo avu'ava'ma nehzaza vahe'mo'za zamazeri havizama nehzaza zante'ma Anumzamo'za nonama huno zamahenige'za, kenu'za muse hugahaze. Anumzamofoma amage'ma nentaza vahe'mo'za kefo zamavu'zamava'ma nehzaza vahe'mofo korampi zamagia sese hugahaze. <sup>11</sup>Ana hanige'za maka vahe'mo'za amanage hugahaze, tamage huno fatgo avu'ava'ma nehzaza vahe'mokizmia mizazmia me'neankino, fatgo huno'ma ama mopafima vahe'ma refkoma nehia Anumzana mani'ne hu'za hugahaze.

## 59

### *Ha' vaheni'amofo zamazampinti Anumzamoka nagu'vazio huno Deviti asunte'nea zagamere*

<sup>1</sup> Anumzamoka ha' vahe'nimofo zamazampintira nagu'vazio. Ha' vahe'nimo'zama ha' hunantenaku'ma neazana nahokenka navre

frakio. <sup>2</sup> Kefo avu'ava'ma nehaza vahe'mokizmi zamazampintira nazeri vario. Vahe korama eri taginaku'ma, tusi'zama hu'za vanoma nehaza vahe'mokizmi zamazampintira nagu'vazio. <sup>3</sup> Hagi ko, zamagra nagri nahenaku kafona nentaze. Ra Anumzamoka nagra havizana hunozmante'na kumira osu'noanagi, hankavenentake ha' vahe'mo'za nahenaku antahintahia retro nehaze. <sup>4</sup> Nagra mago havizana osu'noanagi, ha' hunante'naku zamaga re'za ome retrotra nehaze. Otio! Otinka nagri'ma hunante'zama nehaza zana negenka naza huo. <sup>5</sup> Ra Anumzana Monafi sondia vahe'mokizmi Anumzamoka, Kagra Israeli vahe Anumza mani'nananki, otinka kokankoka vahe'mo'zama ha'ma hunante'zama nehaza vahera knazana zaminika zamazeri haviza huo. Kefo avu'ava'ma nehaza vahe'tmina, kasunkura huozamanto. <sup>6</sup> Ana maka kinaga e'za rankumamofona meg'i aeme kagigagi nehu'za, kramo'ma nehiaza hu'za hauhau hu'za vano nehaze. <sup>7</sup> Knare osu nanekema zamagipinti'ma atineramiana ko. Zamagipinti'ma rukahama huneramia nanekemo'a, bainati kazi atiramiankna nehige'za amanage nehaze, Iza naneketia antahigahie hu'za nehaze. <sup>8</sup> Hianagi Ra Anumzamoka Kagra ana vahetmina zamagiza nerenga, kokankoka vahetamina kiza zokago ke hunezmantane. <sup>9</sup> Kagra nagri hankave mani'nananki'na, Kagri kavega mani'nugenkena, nagura vazigahane. Na'ankure Kagra Anumzamoka, nagrama frakisua hankave vihuni'a mani'nane. <sup>10</sup> Nagri Anumzamo'a vagaore avesizama'areti avesima nenantea ne'mo naza hugahie. Anumzamo'a naza hanige'na, ha' vaheni'a zamage fenkaminete'na zamagiza regahue. <sup>11</sup> Ra Anumzamoka zamahe ofrio. Na'ankure nagri vahe'mo'za ame'ama hu'za rempima huzmina zana zamagenekanize. Hanki hihamukanu zamahe arava hege'za zamarena reho. Ra Anumzamoka kagra tagri hanko mani'ne. <sup>12</sup> Hagi ana vahe'mo'za kumi'mo avite kege nehaze. Na'ankure ana vahe'mokizmi zamagipina kefo kemo avite'ne. Zamatrengeno zamagri zamavufaga ra hu'zamo, zamazeri haviza hino. Na'ankure zamagra kazusi ke nehu'za, krunage nehaze. <sup>13</sup> Ra Anumzamoka karimpa ahe zamantenka zamahe fanane huo! Zamahe fanane huge'za magore hu'za omanaho. E'ina huge'za maka ama mopafi vahe'mo'za Anumzamo'a Jekopu naga Israeli vahera kegava huzmantene hu'za ke'za antahi'za hiho. <sup>14</sup> Ana maka kinaga ete e'za rankumamofona meg'i aeme kagigagi nehu'za, kramo'ma nehiaza hu'za, hauhau hu'za vano nehaze. <sup>15</sup> Zamagra ne'zankura maka kaziga hake'za vano nehu'za, ne'zama nezamu'ma nosu'za hauhau hu'za vano nehaze. <sup>16</sup> Hianagi nagra hihamukagura zagamera hugahue. Maka nanterana vagaore kavesizankura zagamera hu'na kagia ahentesga hugahue. Na'ankure Kagra knazampima mani'nogenkena, nagrira fraki kuma'ene naguvazi kuma'ene mani'nane. <sup>17</sup> Anumzamoka kagra hankavenia mani'nananki'na, Kagritega zagamera hu'na kagia ahentesga hugahue. Kagra fraki kumania mani'nanankinka, vagaore kavesizanka'aretimi kavesima nenantana Anumza mani'nane.

## 60

### *Anumzamo ha'vahetia agianu rehapatigahie huno hunte'nea zagamere*

<sup>1</sup> Anumzamoka, Kagra ko taternka tazeri haviza hu'nane. Kagra krimpa aherantenka e'nananki, menina ete tazeri knare huo! <sup>2</sup> Kagra mopa eri tore hankeno, kekora reno vuno eno hu'neanki, ana kekokana renagro. Na'ankure mopamo'a zahufa kazara nehie. <sup>3</sup> Kagra vaheka'amofona

rama'a knaza zaminka zamazeri amuho nehunka, hankave waini tamin-keta neteta neginagia hu'none. <sup>4</sup> Hianagi Kagri'ma koro'ma hugante'za, mono'ma hunegantaza vhahera kevemo'ma zamavate'ma zamazeri zankura, mago avameza zami'hane. <sup>5</sup> Kagrama kavesima nezmantana vhahera zamagu'vazio. Tamaga kazanu taguranevazinka, nunamuntia antahiraminka kenona huranto. <sup>6</sup> Ruotge hu'nea konarari'afi mani'neno, ama huvempa kea hu'ne. Nagra muse hu'na Sekemu kumara eri fako nehu'na, Sukoti agupomofo zaza'ane upa'anena mesarimi hu'na kegahue. <sup>7</sup> Giliati'ene Manase'enena nagri suza mani'na'e. Hanki Efraemi'a Nagri fetori manigeno, Juda'a kini azompani'a mani'ne. <sup>8</sup> Hianagi Moapu mopa tima nefroa zuompani'a me'nigeno, Edomu mopare nagia anona zafitregahue. Filistia vhahera hara huzamagatere'na musena hugahue. <sup>9</sup> Hagi izaa navareno hankavenen-take vihuma me'nea rankumapina vugahie? Iza navareno Edomu moperara vugahie? <sup>10</sup> Anumzamoka Kagra tarenka kamefira huneramino? Kagra ru'enena tagri sondia vahetaminena hatera ovugosano? <sup>11</sup> Taza hunka ha' vahetia hara huzmanto, na'ankure vahetfamo'za taza hugara osu'naze. <sup>12</sup> Anumzamofa hanavereti ha' vahetia hara huzmagateregahune. Agra ha' vahetia zamahetreteno, zamagofetu agia reno zamare hapatigahie.

## 61

### *Havere navrenka vuo huno hunte'nea zagamere*

<sup>1</sup> Anumzamoka krafage'ni'a antahio! Nunamu ke'ni'a kagesa antenka antahio! <sup>2</sup> Nagu'amo'ma knama nehige'na, mopa atumparegati naza huogura Kagritega kezana netue. Hanki navrenka hanavenentake have're marerige'na nagu'vazi'neno. <sup>3</sup> Na'ankure Kagra fraki kuma'n'i'a mani'enka, vihuni'a mani'nanankino ha' vahe'nimo'za eme onahegahaze. <sup>4</sup> Natrege'na mono nonka'afi manivava hu'na va'neno. Natrege'na Kagri kagekonafinka fraki'na mani'neno. <sup>5</sup> Na'ankure huvempama hu'noana, Anumzamoka antahi'nane. Kagri kagigu'ma koro'ma hu'za mono'ma hugantesaza vahe'mo'za erisanti haregahaze hunkama ante'nana zana nagi nami'nane. <sup>6</sup> Kini ne'mofona mago'ene kafuzage'a erinte za'za huo. Vahe'ma forehu anante anante'ma huno'ma vania knafina, agra zazate ama mopa fina manigahie. <sup>7</sup> Agra Anumzamofa avuga kini manivava huno vugahie. Hagi vagaore kavesi zamo'ene hugahuema hu'nana zama hu kavukva zamo'a, kegava huntiesie. <sup>8</sup> Ana'ma hananke'na knane knanena kagia ahentesga huvava hugahue hu'nama huvempama hu'noa kante antena, zagameru hu'na kagia ahentesga hugahue.

## 62

### *Nagra kagrikuke kavegante'noe huno hunte'nea zagamere*

<sup>1</sup> Anumzamo'ma nazama hanigu akohe'na avegante'na mani'noe. Na'ankure Agrake nagura nevazie. <sup>2</sup> Agrake'za fraki haveni'a mani'neno, nagura nevazie. Agra fraki kuman'i'a mani'neankina, antria hu'na korora osugahue. <sup>3</sup> Hago zazate ana maka vahe'mota magoke nera hara renteta aze. Ana maka'moza nahenaku nenavararize. Zamagrama nagazana nagra fraguvazirami have keginagna huge, kuraramperami keginagna hu'noe. <sup>4</sup> Nagrama ra nagima eri'na mani'noa zana, nazeri fenkami atrenaku, keaga retro nehaze. Havigema hu'za nagri'ma nazeri havizama hu'nakura tusi muse nehaze. Navurera husga hunenantazanagi,

zamagu'afina antahi haviza hunenantaze. <sup>5</sup> Anumzamoka Kagrikuke nagra akohe'na kavega ante'na mani'noe. Nagra Kagripi amuha zani'a ante'noe. <sup>6</sup> Agrake'zage framaki hanave havenia mani'neankino, kegava hunenanteno nagu'nevazie. Agra fraki kumani'a mani'neankina, antria hu'na korora osugahue. <sup>7</sup> Anumzamoke nagura nevazino, ra nagia nemamie. Anumzamoke havegani'ane, fraki kumani'anena mani'ne. <sup>8</sup> Vahe'nimota Agriteke maka kna tamentintia hiho. Maka tamagu'a Agriteke anteho, na'ankure Agra fraki kumati mani'ne. <sup>9</sup> Agima me'nea vahetetima vuno agima omâne vahetem vu'neana, mago asimu'ma hutreankna hu'nazankiza, zamagra amne'za Agri avufina mani'naze. Hanki zamagra'a knama sigelire'ma erinte'zama kesazana, knazmimo'a zahomofo kna'a agateore'ne. <sup>10</sup> Vahe'ma knama amino azeri havizama hu'zamo naza hugahie hunka kamentintina huge, musufamase avu'avazamo naza hugahie hunka amuhara huge, fenozanka'amo'ma ome rama huno nevanigenka, ana zamo'a naza hugahie hunka amuhara osuo. <sup>11</sup> Anumzamo'ma magoke kema nehige'na, tare zanku nagesa nentahue. Hihamu hankaveane Anumza mani'nane. <sup>12</sup> Vagaore kavesizana, Ra Anumzamoka Kagri suzane. Tamage hunka maka vahera refko humzantenka nazanoma hu'nenerera nona hunka mizana zamigahane.

## 63

### *Tinku'ma hiaza huno Anumzamokagura nave'nesie huno asunte'nea zagamere*

<sup>1</sup> Anumzamoka Kagra nagri Anumza mani'nanke'na, Kagrikura tusiza hu'na nehakroe. Nagu'amo'a tinku'ma hiaza huno, Kagrikura navenesigeno, tima omne hagage kokampina navufgamo'a Kagrikura tusiza nehie. <sup>2</sup> Hagi Anumzamoka mono nonka'afina negage'na hihamukane, masaka'anena ke'noe. <sup>3</sup> Na'ankure vagaore kavesi zamo'a asimu'ma erino mani'zana agatere'neanki'na, kagi'a erisga huvava hugahue. <sup>4</sup> Nasimu'ma erina mani'na vanua knafina, kagi'a ahentesga nehu'na, nazana erisga hu'nena Kagritega nunamuna hugahue. <sup>5</sup> Knare ne'zama naminke'na nemamura nehuankina, muse zagame hu'na husga hugantegahue. <sup>6</sup> Hanki tafenire'ma masenena, kagrikura nagesa nentahi'na, ana kenagera numuna nehu'na, nagesa antahigami'noe. <sup>7</sup> Na'ankure Kagra nazahu ne' mani'nananki'na, nagra Kagri kagekonamofo turunapinka mani'nena muse zagamera hugahue. <sup>8</sup> Anumzamoka nagu'amo'a Kagrite tragoteno me'negenka, tamaga kazanu nazeri antrako nehane. <sup>9</sup> Hianagi nagri'ma nahenaku'ma nehaza vahe'mo'za haviza hugahaze. Zamagra friza fri vahe'mofo kumapi amefenkame mopa agu'a uramigahaze. <sup>10</sup> Bainati kazinknonu zamahe vagaresigeno, afi kramo'za zamavufaga'a traga hu'za negahaze. <sup>11</sup> Hianagi kini ne'mo'na Anumzamokagu musena hugahue. Anumzamofonte'ma zamentintima nehaza vahe'mo'za, Anumzamofona agia erisga nehanageno, havigema nehaza vahe'mo'za kea osugahaze.

## 64

### *Anumzamo aza hanigu vahe'mo nunamu hu'nea zagamere*

<sup>1</sup> Anumzamoka narimpa havizama hu'zama huama'ma hanuana antahi nenaminka, ha' vahe'mo'za nazeri koro ke nehu'za, nahe'za nehanaku kegava hunanto. <sup>2</sup> Kefo avu'ava'ma nehaza vahe'mo'za nahenaku nanekea

oku'a retro nehazanki, nazeri franekinka, ranke rankema nehaza kefo vahe'mokizmi zamavureti nazeri frakio. <sup>3</sup> Zamagra ana vahe'mo'za bainati kazin kume'ma kaneaza hu'za, zamagefu'na kumera negane'za, nanekema hazana, kefo nanekezmimo'a kevema ahetrazaza nehaze. <sup>4</sup> Ana vahe'mo'za kafoma ante'nazafinti kezmima omane vahera kevea nezmahe'za, antri hazaza hu'za korora osu tusiza hu'za hara hunezmantaze. <sup>5</sup> Zamagra kefo avu'avazama hunakura kea huganti hugama hu'za zamazeri han-kaveneti'za, vahe krifuma anagintesagura oku'a keaga retro nehaze. Ana nehu'za mago vahe'mo'za onketfa hugahie hu'za nehaze. <sup>6</sup> Hazenkema hu' kema retroma nehu'za amanage nehaze, knare antahintahirafa retro hune hu'za nehaze. Vahe'mofo agu'afine antahintahifina vahe'ma revatga huzamoke avite'neankinka keamara osutfa hugahane. <sup>7</sup> Hianagi Anumzamo'a Agra kevea zamahe'nige'za, ame hu'za hazenkea erigahaze. <sup>8</sup> Zamagri zamagefu'namo zamazeri haviza hanige'za, zamagesaza vahe'mo'za zamagena neru'za, kiza zokago kea huzmantegahaze. <sup>9</sup> Ana hanige'za maka vahe'mo'za koro nehu'za, Anumzamo'ma kaguvazama hia zankura huama nehu'za, maka avu'avazama eri fore'ma hia zamofonkura antahintahia huvava hugahaze. <sup>10</sup> Anumzamofoma amage'ma nentaza vahe'mo'za Ra Anumzamofonkura muse nehu'za, Agri turunapinka manigahaze. Ana nehanage'za fatgo zamavuzmava'ma nehaza vahe'mo'za, muse nehu'za agi'a ahentesga hugahaze.

## 65

### *Anumzamoka tagu'vazi ne'mani'nane huno asunte'nea zagamere*

<sup>1</sup> Anumzamoka Saioni kumapi rankagia kamigahaze. Na'ano hugantegahune hutama ko'ma huvempama hu'nenuna zana tagra hugahune <sup>2</sup> Na'ankure Kagra nunamuntia nentahine. Maka vahera Kagriteke egahune. <sup>3</sup> Tagrama kumitigu'ma antahintahi hakarema nehunkenka, Kagra ana kumitia apaserante'nane. <sup>4</sup> Kagrama huhamprintankeno, ruotge kuma tava'onte'ma nemanimo'a rama'a asomu erigahie. Kagri mono nompinka rama'a knare zane musezamo'enena avite'ne. <sup>5</sup> Anumzamoka knarezantfa huno mareri agatere'nea fatgo kavukva hunka nunamuntia antahinka nona hunerantane. Anumzamoka Kagra tagu'vazi ne'mani'nane. Ama mopafi vahe'mo'za Kagrite zamentintia nehazageno, hagerimpima afetema nemaniza vahe'mo'zanena kagrite zamentintia nehaze. <sup>6</sup> Kagra hihamukareti agonaramina trohunentenka, hanaveka'a eri ama hu'nane. <sup>7</sup> Hagerimo'ma krantokrantoma nehigenka, Kagra azeri arava nehenka, kokankoka mopafi vahe'mo'zama rankerankema nehazagenka, zamazeri neraganane. <sup>8</sup> Mopa atumparegama nemaniza vahe'mo'za ruzahu ruzahu kaguva zantamima erifore'ma hana zankura, ama zana, naza fore nehie hu'za nehu'za, tusi zamagogogu nehaze. Zage hanati kazigati vuno zage fre kazigama umani emanima nehaza vahe'mo'za Kagrama hana kavukvamo zamagu'a zamazeri otige'za tusi muse nehaze. <sup>9</sup> Kagra mopa kegava hunenka tina aminkeno mopamo'a knare huno masavena nehie. Anumzamoka maka kaziga tina tro hunte'nanankino, knare huno witia tina amigeno, rama'a raga renente. Na'ankure Kagraka'a e'inahu huno fore hugahie hunka retro hunte'nana kante anteno efore nehie. <sup>10</sup> Hozama rekorinte mopafina Kagra kora atrankeno runteno mopa ru fru nehuno, mopa ragana runezmane. Ana nehunka ata kora atrankeno hozafina runtegeno ne'zamo'a knarerera huno

nehageno rama'a ne'zana renente. <sup>11</sup> Kagra mago kafufina asomu hurantankeno, ne'zamo'a tusi'za huno amponere. Ana nehigeno kama vanoma hupinena nezamo'a aviteno herafineramie. <sup>12</sup> Hanki ka'ma kokampina trazamo'a hageno tretre nehigeno, agonaramimpina trazamo'a tretre huno refitegeno musena nehaze. <sup>13</sup> Hanki krahopina sipisipi afutamine, meme afutamimo'za avitazageno, agupofina witi hozamo'a fankanino kankmunu omnetfa hu'ne. Ana maka trazama nenaza afu'mozane hozamozanena ranke hu'za zagamera hu'za musena nehaze.

## 66

### *Anumzamofo susu hunte'za agi'a ahentesga hu'naza zagamere*

<sup>1</sup> Maka ama mopafima nemaniza vahe'mota, ranke huta zagamera huta Anumzamofona agi'a ahentesga hiho! <sup>2</sup> Anumzana Agri agimofo hihamu hanave'agura zagamera huta agi'a ahentesga hiho. Zgame huta Agri hihamu masazama'agura erinte ama hiho! <sup>3</sup> Anumzamofonkura, kavukva zamo'a knare zantfa huno mareri agatere'ne hiho. Ha' vahekamo'za Kagri hihamu hankavegura koro hu'za zamavufaga eri anaki'za Kagritega neaze. <sup>4</sup> Maka ama mopafima me'nea zantamimo'za monora hunegante'za, zagamera hu'za kagia ahentsga hugahaze. Zagamera hu'za rankagia ahentesga hugahaze. <sup>5</sup> Eta tagri Anumzamo'ma hu'nea zana eme keho. Agra knarezantfa huno mareri agatere'nea avu'avaza, maka vahe'mofontera eri fore hu'ne. <sup>6</sup> Hagerina eripapa hugantigama huno kana erifore hige'za, Agri vahe'mo'za hagege mopafi rugitagi'za kantukaziga vu'naze. Hanki Agriku musena hanune. <sup>7</sup> Agra kinia mani'neno tusi'a hihamu'areti kegava huvava hugahie. Agra kokankoka vahera maka kna avua anteno nezmageanki, ke ontahi vahe'mo'za hara reonteho. <sup>8</sup> Maka ama mopafi vahe'mota Anumzamofona husga huntaho. Ranke huta agia ahentesga nehinke'za vahe'mo'za antahaho. <sup>9</sup> Tagrama fri'zankura kegava huneranteno, tatregeta regaririta trakara nosune. <sup>10</sup> Anumzantimoka rerahenka knazana neraminka, silvama tevefi kreno eri agru hiaza hunka tazeri agru hane. <sup>11</sup> Kagra kuko atrenka tazeritenka, tagumpina tusi'a knaza eri kofirantane. <sup>12</sup> Ana ne-hunka tatrankeno tasenia refrage mafrage hu'za karisia eri'za vano hu'naze. Tevefine timpinena ufre'nonanagi, ete Kagra tavrenka anketa maka'zama ampore'nea mopafi one. <sup>13</sup> Nagra tevefi kre fanane hu ofa mono nonka'afi eme hugantegahue. Nagrama huvempama hu'noa zantero ofa hugahue. <sup>14</sup> Nagra ra hazenkefi mani'nena, huvempa hu'noe. <sup>15</sup> E'ina agafare tevefima kre fanene hu ofa Kagritega hugahue. Nagra so'ema hu'nenia agonknaza ohari ve sipisipi afu kresramna vanugenno knare mna nevina, Nagra ve bulimakao afu'ene meme afu'enena Kagritega kresrama vanugenno, knare mna marerigahie. <sup>16</sup> Anumzamofoma koro'ma hunentaza vahe'mota, eta eme nentahinke'na Anumzamo'ma hunante'nea zana tamasm'i'nen. <sup>17</sup> Nazama hinogura Agritega krafa nehu'na, nanekema hufina agi'a erisga huvava nehue. <sup>18</sup> Nagrama kumini'ama huama'ma osuresina, Ra Anumzamo'a nunamunkeni'a ontahisine. <sup>19</sup> Hianagi Anumzamo'a nunamuni'a nentahie. Nunamunkeni'a agesa anteno nentahie. <sup>20</sup> Anumzamo'a ra agi'erisie. Agra nunamuni'a antahi amnea nosuno vaga ore avesizama'a nagritetira eri notre.

**67***Anumzamofonku'ma muse huno hu zagamere*

<sup>1</sup> Anumzamoka kasunku hurantenka asomura hunerantenka, kavugosarukrahe huramigeno kavugosafinti masamo'a remsa huranteno taza hino. <sup>2</sup> E'ina hanankeno Kagri kavukva zana ama mopafi vahe'mo'za ke'za antahi'za nehanageno, tagu'ma vazi'nana hihamu hankaveka'a kokankoka vahe'mo'za ke'za antahi'za hugahaze. <sup>3</sup> Anumzamoka, vahe'mo'za kagia ahentesga hugahaze. Tamage maka kokankoka vahe'mo'za zagamera hu'za kagia ahentesga hugahaze. <sup>4</sup> Ana maka vahe'ma ama mopafima nemaniza vahe'mo'za musena nehu'za, zagamera hu'za kagia ahentsga hugahaze. Na'ankure Kagra mago avamenteke fatgo hunka vahera refko henezman-tenka, kokankoka vahera antahintahia zaminka zamazeri fatgo nehane. <sup>5</sup> Maka vahe'mo'za zagamera hu'za Ra Anumzamoka kagia erisga hugahaze. Ana maka vahe'mo'za kagia erisga hugahaze. <sup>6</sup> Ana hanageno ama mopa-fina ne'zamo'a amporegahie. Anumzana tagri Anumzamo'a rama'a zampi asomura hunerante. <sup>7</sup> Anumzamo'a asomu hurantesie! E'ina'ma hanigeno'a ana maka vahe'ma ama mopafima mani'naza vahe'mo'za Anumzamofona korora huntesaze.

**68***Anumzamo'a ha' vahe'aramina zamahe panani hugahie huno asunte'nea zagamere*

<sup>1</sup> Anumzamo'a otino ha' vahe'aramina zamahe panani hanie! Agri'ma avesrama hunentaza atre'za koro fregahaze. <sup>2</sup> Zamahe panani huge'za zahomo tevegu eri amne huno vuno eno nehiaza hu'za freho. Fukimo tevemofo tava'onte me'neno temramra hiaza hu'za, kefo avu'ava'ma ne-haza vahe'mo'za Anumzamofo avuga haviza hu'za fanene hugahaze! <sup>3</sup> Hianagi fatgo zamavu'zamava'ma nehu'za Anumzamofo amage'ma nen-taza vahe'mo'za muse hoho. Anumzamofo vahe'mo'za agri avuga musena nehanageno, musezamo'a zamagripina avitegahie. <sup>4</sup> Anumzamofona zagamera huta agi'a ahentesga hoho. Hampo agofetu'ma manino vanoma nehia nera husga hunteho. Agi'a Ra Anumzanki, Agri avuga musena hoho. <sup>5</sup> Agra megusa mofavre'ramimofo nezmafa mani'ne. Agra ruotge hu'nea kuma'afi mani'neno, kento a'neramina zmahonekea Anumza mani'ne. <sup>6</sup> Hagi agraku'ma nemania vahera Anumzamo'a naga'afi avrentegeno muse huno nemanigeno, kinama hu'zama mani'naza vahera kinafintira za-mavare fegi atrege'za musena hu'za knare nomani'zana nemanize. Hianagi Agri'ma ha'ma renentaza vahera, hagege hu'nea mopafi zamantege'za ne-manize. <sup>7</sup> Anumzamoka vaheka'ama Isipiti'ma zamavare atineraminka ka-gia kazana ometre eme atre hunka masi hunka hagege kokampima vugota hunka nevankeno, <sup>8</sup> mopamo'a momi'momi huno tore'vare hu'ne. Anama hu'neana Anumzamoka kavuga, Sainai agonamofo Anumzane, Israeli vahe Anumzamoka kavuga anara hu'ne. <sup>9</sup> Kagri vahe'mo'zama erisantiha-re-saze hunkama hagege mopama zami'nana mopafina, rama'a ko atrankeno, kora aru kasri kasri huno maka zana azeri kasefa hu'ne. <sup>10</sup> Ana mopafi na Kagri vahera mani'nazagenka, ne'zana eri amporenampinti zamunte omne vahera ne'zana Anumzamoka zami'nane. <sup>11</sup> Ra Anumzamo'ma vahe'mokizmima nanekema zamasamigeno, rama'a a'neramimo'za ana nanekeea eri'za vu'za ome huama hu'naze. <sup>12</sup> Hagi Kini vahe'mo'zane sondia

vahe'mo'zanena maka zana atre'za fre'naze. Zamagra makazana atre'za frazage'za Israeli a'neramimo'za fenozmia refko hu'za eri'naze. <sup>13</sup> Hagi zamagra sиписи афу кевүфима nemasageno, maho namamofo agekonare silvanu rekamarenteankna nehuno, azokate golinu rekamrenteankna huno refitegahie. <sup>14</sup> Hankavenentake Anumzamo'ma ana mopafima nemaniza kini vahe'ma zamahe panani'ma hu'neana, Zalmoni agonafi ko'mopa ko tamiankna huno zamahe panani hu'ne. <sup>15</sup> Basani agonaramina tusinasi agonarami me'naze. Basania rama'a agonaramina amunagamu mareri'nea agonarami me'naze. <sup>16</sup> Rama'a agona morusama me'nea agonamoka, nagafare Saioni agonare'ma Anumzamo'ma manigahue hu'noma hu'nea agonagura, kegasanea nehane? Tamagerfa huno Ra Anumzamo'a ana agonare manivava huno vugahie. <sup>17</sup> Ohampriga'a karisiramimo'za Ra Anumzamofona azeri kaginte'nazageno, Saioni agonaretira eno ruotgema hu'nea mono nomafinka emareri'ne. <sup>18</sup> Hanki mareri agatere'nea agonafima marenerinka kina vahetmina zamavarenka marerinke'za, ke ontahi vahe'mo'zane ha'ma renegantaza vahe'mo'zanena musezana negamize. Menina Ra Anumzamo'a tagrane ama agonafina manigahie hu'za nehaze. <sup>19</sup> Ra Anumzana tagu'vazi Anumzamofona husga hunteho! Na'ankure maka knafina knazantia Agra e'nerie. <sup>20</sup> Tagri Anumzana Agra tagu'ma nevazia Anumza mani'ne. Mareri agateri'nea Ra Anumzamo frizampintira tagura nevazie. <sup>21</sup> Hianagi Anumzamo'a ha' vahe'aramina zamaseni rurako huno nezmaheno, ke ontahi kefo zamavu'zmava zanku'ma zmavesinente'za ana zamavu'zmavama nevaririza vahera Anumzamo'a zamaseni zaferina rufuzafupegahie. <sup>22</sup> Ra Anumzamo'a huno, ha' vahera Basanitira zamavare'na egahue. Amefenkame hageri agu'atira zamavare'na marerigahue. <sup>23</sup> Ana hanugeta nagri vahe'mota zamagri korampi tamagia sese nehanageno, kraramimo'zanena ana korana negahaze. <sup>24</sup> Anumzamoka Kagri nagara rama'amo'za erimpi hu'za neazage'za vahe'mo'za nezamagaze. Nagri Anumzana kini'nimoka naga'mo'za mono nompi erimpi hu'za unefraze. <sup>25</sup> Zgame'ma hu' vahe'mo'za vugota hazageno, zamefira ruzahu ruzahu zavename ahe vahetami vazageno, amu'nompina mofa'nemo'za nevu'za nase'nasepana nehaze. <sup>26</sup> Maka Israeli vahe'ma atruma hanafina zagame huta Anumzamofona agi'a hentesga hiho. Israeli vahe'ma zamasimu'ma nezvia Ra Anumzana Zgame huta agi'a husga hunteho. <sup>27</sup> Osi nagara Benzameni naga'mo'za egote'za azageno, rama'a kva vahetmina Juda nagapinti azageno, maka Zebuluni nagapinti'ene Naftali nagapinti maka kva vahetmina e'naze. <sup>28</sup> Anumzamoka hihamuka'a eriama huo. Anumzamoka korapa'ma hu'nanaza hunka hankaveka'a eriama huo. <sup>29</sup> Ama mopafi kini vahe'mo'za musezana eri'za mono nonka'afi Jerusalemi egahaze. <sup>30</sup> Kokankokama ha' vahetamima mani'naza vahetamina zamaeri korio. Varoza trazampima afi zagama mani'naza zagaramina zamaeri korio. Bulimakao afutmima hankavezmi omne bulimakao anenta taminema mani'nazana zamazeri korio. Zamazeri arava hege'za silvane golinena eri'za takisia eme kamaho. Hanki ha'ma hu'zanku'ma musema nehaza vahetmina, zamahe panani huge'za freho. <sup>31</sup> Isipi vahe'mo'za zago'amo'ma marerirfa haveramina eri'za musezana eme negamisageno, Itiopia vahe'mo'za eme kepri hu'za monora hugantegahaze. <sup>32</sup> Ama mopafima kini vahe'mo'zama kegavama hu'naza kumatamimpima nemaniza vahe'mota, Ra Anumzamofona zagamera huta agia ahentesga hiho. <sup>33</sup> Korapa'ma me'nea hampomofo agofetu'ma manino'ma harenoma enevia

nera zagameru huta agia erisga hiho. Kema nehigeno'a, agerumo'a monagemo'ma hiaza nehie.<sup>34</sup> Anumzamofo hihamu hankavemofo agi agenke, huama hunka vahera zamasamio. Agri konarari masa'amo'a Israeli vahera remsa hunezmantegeno, anami monafina hankave'amo'a avite'ne.<sup>35</sup> Anumzamofa mono nomafina knare'zanfta huno mareri agatereno mani'ne. Israeli vahera Anumzamofa Agra'a vahera hihamu hankavea nezmi-ankino, Agrake'za ragia erisie!

## 69

### *Anumzamoka nagu'vazio huno asunte'nea zagarere*

<sup>1</sup> Anumzamoka nagu'vazio! Na'ankure timo'a ti hageno nazeri nakrinaku nanankente ne-e. <sup>2</sup> Hapapi hampakanena amefenkame supa'nena uneramue. Hankave moparera nagia noroe. Timu'nompi nevugeno timo'a nazeri nakari'za nehie. <sup>3</sup> Anumzamoka nazama huogu'ma kavegama ante'nena krafagema nehua zamo'a hanaveni'a omanegeno, navurgamo'a nata negrigeno, nanankemo'a tusiza huno hagege nehie <sup>4</sup> Mago haviza osu'nore'ma zamavaresrama hunenantaza vahe'mo'za nanumpima me'nea nazokara agatere'za rama'a vaher mani'naze. Anumzamoka hankavenentake ha'vahe'mo'za havige hu'za nahe fri'za nehaze. Havige hu'za e'ori'noa zankura musufa se'nananki tamio hu'za nehaze. <sup>5</sup> Anumzamoka Kagra neginagi navu'navu zani'a kenka antahinka hu'nanankino, maka kumini amo'a Kagri kavurera frara okigahie. <sup>6</sup> Ra Anumzamoka kagrite'ma zamentintima nehaza vahera, nagrama hanua navu'navazamo'a zamazeri zamagazea osino. Monafi sondia vahe'mofo Ra Anumzamoka nagrama hanua navu'navu zanteria zamazeri fenkamia ozmatro. Kagra Israeli vahera Anumza mani'nane. <sup>7</sup> Na'ankure nagra Kagri kamagema antoa zanku kiza zokago kea hunenantazage'na nagazegura nehue. Ana nehugen nazeri havizama nehaza zamo'a tusiza huno nazeri nagaze nehie. <sup>8</sup> Nafuhemo'zama nenage'za keno antahino'ma osu'nea vahe'ma agatereankna nehaze. Hagi nenrera mofavremo'za rurega vahe'ma huntazankna zamavu'zamava hunenantaze. <sup>9</sup> Mono nonka'agu'ma navesintoa zamo'a nagu'afina tevema reankna nehigeno, Kagri'ma kazeri havizama hu kema nehaza vahe'mo'za nagri'enena nazeri haviza hu naneke nehaze. <sup>10</sup> Hanki zavi'ma nete'na kave'ma a'o'mahu'na nunanuma nehuge'za vahe'mo'za, nazeri haviza hu ke nehaze. <sup>11</sup> Nasunku'ma nehu'na nasunku kukenama huazankura, zamagra hunte'za kiza zokago ke hazage'na nagra zamagri zamavurera kiza zokago zankna hue. <sup>12</sup> Hanki rankuma kafante'ma nemaniza kva vahe'mo'za nagenke nehazageno, akatima nene'za neginagima nehaza vahe'mo'za nazeri haviza hu zagame asunenantaze. <sup>13</sup> Hianagi menina kna fatgo'are nunamuna nehuanki Anumzamoka vagaore kavesi zanteti kavesinantenka nona hunantenka tamage hunka nagu'vazio. <sup>14</sup> Anumzamoka hapapintira navresga hunka nagu'vazio. Hanki natrege'na hapapina hampakanena uofra'heno. Zamavresrama hunenantaza vahe'mokizmi zamazampintira nagu nevazinka, tirupintira navazuhuti atro. <sup>15</sup> Anumzamoka natregeno tima hageno esiantimo'a eme narefi otege, tirumo'a nazeri onakrige, fri vahe kerimo'a nasgahu onakrino. <sup>16</sup> Ra Anumzamoka nunamuni'a antahinaminka nona hunanto, na'ankure vagaore kavesizamo'a knarezantfa hu'ne. <sup>17</sup> Anumzamoka eri'za vahekamo'na kamefira huonaminka, ame hunka nunamu keni'a antahinka nona hunanto. Na'ankure ra hazenkefi mani'noe! <sup>18</sup> Anumzamoka erava'o hunka nahokenka

nagu'vazio. Ha' vahe'ni'amofo zamazampintira ete nagu'vazinka navro. <sup>19</sup> Ha' vahe'nimo'zama nazeri nagaze nehu'za, hu haviza hunenante'za, nagima eri havizama nehaza zana Kagra ko kenka antahinka hu'nane. <sup>20</sup> Kema nenasuza nazeri havizama haza zamo'a, tumoni'a netanege'na kria enerue. Hagi zamasunku hunantegahazafi hu'nama hua vahe'mo'za zamasunkura hunonantaze. <sup>21</sup> Hagi ne'zama namigazana netre'za, vahe'ma ahe nefriaza avu'atgaza nezampina ante'za nenami'za, tinku'ma navenesige'za tima namigazana atre'za, aka waini nami'naze. <sup>22</sup> Atregeno rama'a ne'zama retro hunte'za nenaza zamo'a, kukonkna huno zamazeri haviza nehina, maka zampima knare'ma hu'za nemaniza nomanizamo'a krifugna huno zamazeri haviza hino. <sup>23</sup> Atregeno zamavumo'a asu nehinke'za, zamavua onkeho. Ana nehunka zamatrengeno zamavufagafina hanavezmia omne amne nehina, hanavezmia atreme vu'za ome haviza hiho. <sup>24</sup> Kagra karimpa ahe'zamantenka zamazeri haviza nehunka, tusi'a kasivazi nezmantenka zamahe hana huo. <sup>25</sup> Nonkumazmimo'a haviza nehinkeno, nevasaza seli nozmimo'a vhahera omaninigeno zutesie. <sup>26</sup> Na'ankure Kagrama knama zaminka zamazeri havizama hana vhahera zamahe'za zamasu'za nehu'za, zamazeri havizama nehanke'za zamatagu'ma nehaza vahe'mokizmia ki'za zokago ke hunezmantazageno mago'anee zamatagura nehaze. <sup>27</sup> Kumi'zmia erinte agofetu agofetu nehunka, ana kumizmia apasezmantenka zamagura ovazio. <sup>28</sup> Asimu eri avontafepima zamagima me'neana renehaganenka, fatgo avu'ava'ma nehaza vahe'mokizmi zamagima krentesampina zamagia kreonto. <sup>29</sup> Anumzamoka knazampi mani'nena natagu nehuanki, vahe'ma zamagu'ma nevazina hihamuka'anu nagu'vazio. <sup>30</sup> E'inama hananke'na zagame hu'na kagia ahentesga nehu'na, susu hugante'na husga hugantegahue. <sup>31</sup> Na'ankure e'i ana'ma hanua zamo'a bulimakao afu'ma aheno kresramna vuge, maka pazine'ene agigo azankonema me'enigeno kresramna vanigeno Ra Anumzamo'ma musema hu'zana agatere'ne. <sup>32</sup> Zamavufama anterami'za nemaniza vahe'mo'za Anumzamo'ma eri'zama erisia zana nege'za, musena hugahaze. Anumzamofonku'ma nehake'za nunamuma hunentaza vahe'mo'za hankavea erigahaze. <sup>33</sup> Na'ankure Ra Anumzamo'a maka zanku'ma upama nehaza vahe'mokizmi krafagea nentahino, Agri naga'ma zamavare'za kinama ome huzmante'naza vhahera ozmatregahie. <sup>34</sup> Maka monamotane, ama mopamokanena Ra Anumzamofona agia ahentesga nehinkeno, hagerine maka ana hageri agu'afima nemaniza zagamotanena zagamera huta agia ahentesga hiho. <sup>35</sup> Na'ankure Anumzamo'a Jerusalemi kumara agu'nevazino, Juda rankumatamina eri fatgo huno kigahie. Ana hanige'za Agri vahe'mo'za anampi mani'ne'za zamagra mopazmia erisanti hategahaze. <sup>36</sup> Eri'za vahe'amofo nezmagehoza erisanti hare'za nemanisage'za, agri'ma amagema nentaza vahe'mo'za anampina manigahaze.

## 70

### *Anumzamoka ame'hunka nazahuo huno asunte'nea zagamere*

<sup>1</sup> Muse hugantoanki Anumzamoka nagu'vazio! Ra Anumzamoka ame hunka enka eme nazahuo. <sup>2</sup> Nahenaku'ma nehaza vhahera zamazeri fenkami netrenka, zamazeri zamagaze huo. Hagi hazenkefima mani'noge'zama musema nehaza vhahera zamazeri rukrahe huge'za zamagazegu nehu'za viho. <sup>3</sup> Oho! Meni keta eri fore hu'ne hu'zama nagriku'ma nehaza vhahetmina, zamazeri zamagaze huge'za zamagazegu

hiho. <sup>4</sup> Hianagi Kagriku'ma nehakaza vahe'mokizmia, tusi'a muse'za ante avite'zmantesane. Zamagu'ma vazi'nana zanku'ma zamave'nesia vahe'mo'za Anumzana marerirfa Anumza mani'ne hu'za ranke hu'za kagia ahentesga huvava hanaze! <sup>5</sup> Hianagi nagra namunte omne maka zankura upa nehua ne' mani'noe. Hanki Anumzamoka muse hugantoanki, ame hunka eme naza huo. Kagrake'za naza hunka naguvazi' nera mani'nananki, Ra Anumzamoka ame hunka eme nazahuo.

## 71

### *Anumzamoka hankaveni'ma evuneraminigenka onatro huno asunte'nea zagamere*

<sup>1</sup> Ra Anumzamoka kegava hunantogu Kagritega neoanki, natrege'za ha' vahenimo'za nazeri nagazea osiho. <sup>2</sup> Nahokenka nagu'vazio, na'ankure Kagra fatgo avu'ava zanke nehana Anumza mani'nane. Kagesa antenka krafageni'a nentahinka nagu'vazio. <sup>3</sup> Hanavenentake havegani'a mani'nege'na anampinka fre'na maka kna ome frakineno. Kagra huzmantegē'za nagura vazihō. Na'ankure Kagra nagu'vazi havegani'ane vi-huni'ane mani'nane. <sup>4</sup> Kefo zamavu'zmava'ma nehaza vahe'mokizmi zamazampinti'ene, vahe'ma zamazeri havizama nehaza vahe'mokizmi zamazampintira nagu'vazio. <sup>5</sup> Na'ankure Ra Anumzamoka kagrake'za nagri amuha zani'a mani'nane. Mofavrema mani'nena agafa hu'na kagritera namentintia hu'noe. <sup>6</sup> Kasema nanteneregati kagrake'za naza hankena mani'na e'noe. Kagra nerarera arimpafintira navre atirami'nane. E'ina agafare zagamera hu'na Kagri kagia ahentesga huvava hugahue. <sup>7</sup> Maka zama nagri mani'zampima fore'ma nehia zana, rama'a vahe'mo'za ke'za antahi'za nehu'za rempi nehaze. Na'ankure kagra hanaveni'a mani'enka, kegava hunenantane. <sup>8</sup> E'ina agafare tagane'na omani zagamera hu'na kagi'a ahentesga huvava hugahue. Ana nehu'na maka kna kagri hihamu masakagura huama hugahue. <sup>9</sup> Hanki ozafama renugenka Anumzamoka onatro. Hankaveni'ama omanenigenka kamefira huonamio. <sup>10</sup> Na'ankure ha' vahe'nimo'za nazeri haviza hu naneke nehu'za, nahe frinaku oku'a nanekea retro nehaze. <sup>11</sup> Zamagra amanage nehaze, Anumzamo'a amefi humianki, avaririta ome azerisune. Na'ankure mago vahe'mo'a ahora okegosie hu'za nehaze. <sup>12</sup> Anumzamoka nagrira natrenka afetera omanio. Anumzani'amoka ame hunka enka eme naza huo. <sup>13</sup> Havigema hunante'za nazeri havizama nehaza vahe'mokizmia, zamazeri zamagaze nehunka zamazeri haviza huo. Hanki hazenkema naminaku'ma nehaza vhahera zamazeri fenkami netrenka, zamazeri zamagaze huo. <sup>14</sup> Hianagi nagra kagrite amuhara huvava nehu'na, zagamera hu'na mago'ene kagia ahentesga huvava hugahue. <sup>15</sup> Fatgo kavukava zanka'agura nagra huama nehu'na, vahe'ma agu'ma nevazina zankura maka zupa huama hugahue. Na'ankure kagra tagu'ma vazi'nanana ra zankrefa tro hu'nanankina, nagra ke'na antahina hugara osu'noe. <sup>16</sup> Ra Anumzamoka hanavenentake eri'zama eri'nana zankura nagra husga hugantegahue. Kagra maka'zama kegava hu'nana Anumzana mani'nanankina, fatgo kavukava'ene Anumza kagrake mani'nane hu'na mika vhahera zamasigmahue. <sup>17</sup> Anumzamoka mofavrema mani'noretima agafa huno amare'ma eana, Kagra rempi hunaminka neanke'na hentofazama hu'nea kavukva zanka'agura huama hu'na vhahera zamasami vava nehue. <sup>18</sup> Ozafama resugeno efe nazoka'ma tagisiana, Anumzamoka onatrenka naza huge'na mani'nena, hihamu hankaveka'ane,

ranra kaguvezama erifore'ma hu'nana zantminkura, menima fore'ma ne-haza vhahera zamasmi'neno. <sup>19</sup> Anumzamoka fatgo kavukva zankamo'a mona agatereno ame'anagema mareri'ne. Kagra ruzahu ruzahu kaguva ranke erifore hu'name. Anumzamoka kagri kna vhahera ama mopafina omuni'ne. <sup>20</sup> Kagra antahinenka natranke'na hazenkefine knazampinena unefroe. Hianagi kagra nazeri knare nehunka, amefenkame mopa agu'ama mani'nofintira ete navre atiramigahane. <sup>21</sup> Navresga hunka ra nagi ne-naminka, mago'ane nazeri knare hunanto. <sup>22</sup> Hapu zavenna ahena kagia ahentesga hugahue. Na'ankure kagra huvempama hu'nana keka'are amage ante Anumzani'a mani'nane. Israeli vahete'ma Ruotge'ma hu'nana Anumzamoka, nagra laeri zavenna nehe'na zagamera hu'na kagia ahentesga hugahue. <sup>23</sup> Nagra ranke hu'na muse zagamera nehu'na, Kagia ahentesga hugahue. Na'ankure kagra nagu'vazinka ete navre'nane. <sup>24</sup> Hagi fatgo kavukva zanka'agura maka kna huama hu'na vhahera zamasami vava hugahie. Na'ankure nazeri havizama hunaku'ma nehaza vhahera zamazeri fenkami netrenka zamazeri zamagaze hu'nane.

## 72

### *Solomoni asunte'nea zagamere*

<sup>1</sup> Anumzamoka fatgoma huno refkoma hu' avu'ava zana kini nera neminka, fatgo kavukva zanka'a kini ne'mofo nemofona amio. <sup>2</sup> Fatgo avu'ava huno vaheka'a refko hunezmanteno, zamunte omne vhahera fatgo avu'ava hunezmanteno kegava huzmanties. <sup>3</sup> Ranra agonaramimo'za knare huno manifru hu nomani'za avre'za vahetera ne-enageno, neone agonaramimo'za fatgo avu'ava zamofona nena raga'a rentegahaze. <sup>4</sup> Zamunte omene vhahera zamahonekeno, maka zanku'ma upa'ma nehaza vahe'mokizimi mofavreramina zamagu nevazino, vahe'ma ha'ma renezmantaza vhahera zamazeri haviza hugahie. <sup>5</sup> Zagema reno nevanigeno ikamo'ma remsa nehanire, fore'ma hu anante anante'ma hu'za vanaza vahe'mo'za korora hunegante'za monora hugante vava hu'za vanaze. <sup>6</sup> Hagi kini ne'mo'ma vahe'ma kegavama hania avu'ava zamo'a, menima apri'nea aepate'ma ko'ma runteankna nehuno, mopafima atako'ma runteankna hugahie. <sup>7</sup> Kini ne'mo'ma kegavama hania kna'afina, Anumzamofoma amage'manentaza vahe'mo'za mani'za zmifina knare hu'za hagegahaze. Ikamo'ma remsama nehanifima maka'zama hanaza zamo'a, knare zanke huno tretre hanie. <sup>8</sup> Hagi mago hagerinteti'ma vuno mago hagerintema vanigeno, Yufretisi tinteti'ma vuno, mopa atumparegama vuno e'nama haniana, ana kini ne'mo miko vhahera kegava hanie. <sup>9</sup> Hanki hagage kokampima nemaniza vahe'mo'za agrite zmarena emere'za kepri nehanageno, ha' vahe'aramimo'za zamavugosaregati avuga masene'za kugusopa negahaze. <sup>10</sup> Hanki Tasisi kumate kini vahe'mo'zane, hageri amu'nompima nemaniza vahe'mo'zanena takisi zagoa eri'za kini nera eme amigahaze. Ana nehanageno Seba kumate kini ne, Seba'enena ana hu'za musezana eri'za kini nera eme amigahaze. <sup>11</sup> Maka kini vahe'mo'za agrite kepri hunentesageno, maka kokankoka vahe'mo'za agri eri'za erintegahaze. <sup>12</sup> Na'ankure zamunte omne vahe'mo'zama krafagema nehanageno'a, agra antahizmino zamagu vazigahie. Vahe'mo'za zamazeri havizama nehazage'zama, vahe'mo'zama zamazama nosaza vhahera, agra zamaza hugahie. <sup>13</sup> Zamunte omne vahek'u'ene maka zanku'ma upama nehaza vahekura agra asunku hunezmanteno zamagu' vazi'nige'za

ofrigahaze. <sup>14</sup> Vahe'mo'zama knama zami'za zamazeri haviza nehu'za, ha'ma rezmantaza vhahera zamahokeno zamagu vazigahie. Na'ankure agri avurera vhahera raza mani'naze. <sup>15</sup> Kini ne'moka zazate manigahane! Seba kumateti golia eri'za kagri eme kamisaze. Maka zupa kagrikura nunamuna hunegante'za, asomu kea hugantesaze. <sup>16</sup> Ama mopafina witimo'a rama'a nehanigeno, agonafinena witimo'a hageno, marerino umase emase hanie. Lebanonzi zafaramimo'ma nehiaza huno zafa ragamo'a knare huno renentenigeno, ran kumapima nemaniza vahe'mofo nomani'zamo'a tra'zama hageno tretre hiankna huno, knare'za huno afovage huno tretre hugahie. <sup>17</sup> Hanki kini ne'mofo agimo'a mevava huno nevina, zagemo'ma me'neno'ma remasma huno vania kna'afina kini ne'mofo agia erisga hugahaze. Anumzamo'ma agri'ma asomu'ma hunte'neankna huno maka ama mopafi vhahera asomura hunezmantesige'za nege'za ana nera husga huntesaze. <sup>18</sup> Ra Anumzana Israeli vahe Anumzamofona agi'a ahentesga hanune. Agrake'za knare huno mareri agatere avu'ava zana erifore nehie. <sup>19</sup> Ra Anumzamofona hihamu masa'anemagi'a ahentesga huvava hanune! Hankavenentake masa'amo'a maka ama mopafina remsa hanie! Tamage! Anazana fore hanie. <sup>20</sup> Jesi nemofo Deviti nunamumo'a amare eme vagare'ne.

## 73

### Namba 3 zagame avontafere

*Anumzamo'a nagri hankaveni'a mani'neno Nagri Anumza mani'ne huno  
Asapu asunte'nea zagamere*

<sup>1</sup> Tamagerfa huno Anumzamo'a Israeli vahe'mokizmia knare hunezmanteno, zamagu'amo'ma agruma hu'nea vahe'mokizmia knarera hunezamante. <sup>2</sup> Hianagi nagiamo'a krarige'na traka hu'na masekate'noe. Nagiama renakeroana regaririna masekatoe. <sup>3</sup> Na'ankure zamavufaga rama nehaza vhahera kanive renezmante'na, kefo avu'ava'ma nehaza vahe'mokizmi nomanizamo'ma knare zanke'ma hia zama nege'na, kenanunu hu'noe. <sup>4</sup> Na'ankure ana vahe'mokizmia zamavufagafina zamatazana omanege'za, kria e'ori hanaveti'za nemanize. <sup>5</sup> Mago'a vahe'mo'zama nehazaza hu'za hazenkefina uofrege, ruga'a vahe'mo'zama nehazaza hu'za knazampina unofraze. <sup>6</sup> E'ina hu'negu zamavufaga rama hu' zamo'a, zmanankempima nentaniza pasesugna nehigeno, vahe'ma hazenkema zamizamo'a kukena antanizankna hu'ne. <sup>7</sup> Ana vahe'mokizmi zamagu'amo'a hanavenetino tapari'nege'za kefo avu'ava zana huvava hu'za nevaze. <sup>8</sup> Zamagra kiza zokago kene kefo kege nehu'za, zamavufaga ra nehu'za vahe'ma zamazeri haviza hu kankuke nehakaze. <sup>9</sup> Zamagrama nanekema nehu'za monafima mani'naza vhahera huhaviza hunezmante'za, zamagra mopa eri nafa'a hu nanekege nehaze. <sup>10</sup> Ana hazage'za zamagogogu nehazageno, antahintahi zmimo'a savri nehie. Ana nehu'za ana vahe'mokizmi nanekeea tima nazaza hu'za nenaze. <sup>11</sup> Ana vahe'mo'za amanage nehaze, inankna huno Anumzamo'a keno antahinora hugahie? hu'za nehaze. Marerirfa Anumzamo'a amafima fore'ma nehia zana, keno antahinora osugahie hu'za nehaze. <sup>12</sup> Kefo avu'ava'ma nehaza vhahera zamageho, knare no'mani'za mani'nazageno fenozmimo'a ome ra huno nevie. <sup>13</sup> Nagra nagu'a kegava hugeno agru huno me'negena, kumira osu'noanki, e'i ana zama hu'noa zamo'a amnezankna hugahifi? <sup>14</sup> Maka knafina hazenkefi nagra

mani'na nevue, maka nanterana nazeri haviza hankena natagura hu'na nevue. <sup>15</sup> Nagra ama anazamofo nanekema vahetmima zamasamuresina, ha' vale zamazampi vaheka' a zamavarente'naku nagra komoru huresine. <sup>16</sup> Hianagi inankna hu'za kefo avu'ava'ma nehaza vahe'mo'za, nomaniza zamifina knarer nehaze. Nagra antahi amara osu'na, tusi knazampi nemanue. <sup>17</sup> Ana'ma hute'na Anumzamoka mono nompima ufre'na, kefo avu'ava'ma nehaza vahe'mofonte'ma henkama efore'ma hania zana ke'na antahi'na hue. <sup>18</sup> Tamagerfa hunka Anumzamoka krari'nenia kampi zamavarente'za rekrari'za zavapi urami'za hazenke eriho. <sup>19</sup> Zamagra ame hu'za hazenkea eri'za haviza nehanageno, korozamo zamahe frigahie. <sup>20</sup> Vahe'mo'ma ava'nama keteno nanterama otigeno, ana ava'namo'ma fanenema hiankna hunka Anumzamoka zamazeri fanenema hugahane! <sup>21</sup> Ana zama ke'na antahi'nama nehugen'o, musezanimo'a omanegeno narimpa aka nehegeno, tumo'nimo'a natagri'ne. <sup>22</sup> Nagra ana zana anira osu'noanki, neginagi hu'na antahintahi'a omne afi zaga kafagna kagri kavurera hu'noe. <sup>23</sup> Hianagi nagra katre'na ovu maka knafina kagrane mani'nogenka, tamaga kaziga nazante nazeri'nane. <sup>24</sup> Ana nehunka knare antahintahi naminka, nazeri fatgo nehanankinka, henka navrenka masanentake kumapina vugahane. <sup>25</sup> Monafina nagri vahera omani'neanki, kagrake'za mani'nane. Hagi mopafina mago zankura navesi ontegahuanki, kagrike'za navesi kantegahue. <sup>26</sup> Nagu'amo'ene navufgamo'enena zaferina omne amne huno navresra nehianagi Anumzamoke'za nagu'amofona nazeri hankavenetiankino, nagri Anumza Agra mani vava nehie. <sup>27</sup> Kagri'ma katre'za afetema nemaniza vahe'mo'za fanane hugahaze. Na'ankure kamefi'ma hugamiza vahera zamazeri haviza nehane. <sup>28</sup> Hianagi nagrama Anumzamofo tvaonte'ma nemanua zamo'a knare nehie. Ra Anumzamo'a nagri Anumza mani'neno, nagu vazi kuma mani'neankina, knare'ma huno mareri agatere avu'ava zama'agura huama hugahue.

## 74

### *Mono noma eri haviza hu'naza zanku hunte'naza zagamere*

<sup>1</sup> Anumzamoka nahigenka kamefira huraminka mani vava hunka nevane? Nahigenka trazampi zmantanek'zama vanoma nehaza sipisipi afutaminkura, Kagra krimpa ahenezmantane? <sup>2</sup> Korapama Nagri vahe manigahaze hunkama huhampri'nana vahe mani'nonanki, kagera okaninka kagesa antahiramio. Tagu'ma nevazinka mareri fenozan'i'agna huta manigahaze hu'nana vahe tagra mani'none. Kagra Saioni agonarema nemanina agonagura (Jerusalemi) kagesa antahio. <sup>3</sup> Eri havizama hazageno havizama huteno zazate'ma me'noma nea rankumapi, nevunka ko. Ha' vahetimo'za Kagri mono nona eri haviza hu'naze. <sup>4</sup> Kagri ha' vahe'mo'za ana mono nompi mani'ne'za kezana neti'za, ha'ma hugatere'naza avame'zana, krauvefana (flek) asenentaze. <sup>5</sup> Saumenuma zafama antagitre'naku'ma nehzaza hu'za nona antagi tapage nehaze. <sup>6</sup> Hagi mono no zafare'ma antreno'ma keonke'zamofo amema'ama trohunteno avasasema hunte'nea zana, sasume tunuti'ene hamanteti antagi hantagutagi atre'ne. <sup>7</sup> Ana ha' vahe'mo'za zamagra teve tagintazageno mono nonka'a teno ko mopafi tepasaru huramigeno, Kagri kagima me'nea nona eri ankrare kre'naze. <sup>8</sup> Zamagra amanage hu'za antahintiahia antahi'haze, ana maka zana eri haviza hutregahune hu'za hute'za, ana

mopafima Anumzamofoma mono'ma hunentaza nonkumatamina teve tagintazageno te'ne. <sup>9</sup> Anumzamoka tamagrane mani'noe hunka mago avamezana eri fore hanketa onkone. Hagi ana maka kasnampa vahe'mo'za omanizageno, ama knazamo'ma vagamaresia zama tasam'i'na za vahera omani'naze. <sup>10</sup> Anumzamoka nama'agna atresankeno ha' vahetimo'za hu havizana hugantegahaze? Hagi zamatre'sanke'za maka zupa kagia eri haviza huvava hanazo? <sup>11</sup> Nahigenka hankavenentake tamaga kazana rusutenga taza nosane? Hanavavenentake kazana renamaginka omaninka rusutenga zamahe frio. <sup>12</sup> Hianagi Anumzamoka korapama evu'nea knafine meninena nagri kini ne' mani'enka, ama mopafina tagura vaz'i'none. <sup>13</sup> Kagra hankaveka'areti hagerina eri atanankeno tare kaziga otikenka, hagerimpima nemania afizagamofo aseniramina rupraro vaz'i'none. <sup>14</sup> Laviataniema hu'za nehaza afi zagama hagerimpi nemania zagamofo aseniramina rupraro vazitenka, hagage kokampima nemaniza zagagafa zaminke'za ne'naze. <sup>15</sup> Kagrake'za kampu'i tine, neone tinena erinkazo hankeno, timo'a krohupeno enevigenka, ontaneno evuvavama nehia tirantamina eri neranane. <sup>16</sup> Masane, haninena anantarega kagri suza me'nae. Kagrake'za zagine ikanena, tro hunte'none. <sup>17</sup> Kagrake'za mopamofona isagana antetere nehunka, amuho knane zasi'ma hu kna trohu ante'none. <sup>18</sup> Ra Anumzamoka ha' vahe'mo'zama hu havizama hunegantazana kagesa nentahinka, neginagi vahe'mo'zama kagi'ama hu haviza nehaza zana ko. <sup>19</sup> Hagi atrege no mahonamaka'a afi zagamo'za zamahe'za oneho. Vahe'mo'zama knama nezamiza vaheka'a kagerakani zamante vava osuo. <sup>20</sup> Huhagerafi hvempa kema hu'nana zana kagera okanio. Na'ankure ama mopafima hanintirima hu'nefina, vahe'ma ohefri ahefirma hu'zamo'a avite. <sup>21</sup> Vahe'mo'zama zamazeri havizama nehaza vhahera zamatrege'za, zamagazegura nehu'za rukrahe hu'za oviho. Hanki atrege'za zamunte omme vahe'mo'zane, maka zanku'ma atupa'ma nehaza vahe'mo'za kagi'a ahentesga hiho. <sup>22</sup> Anumzamoka otinka tagri kaziga antenka tahoko. Neginagi vahe'mo'za maka knafina, hago zazate hu haviza hugante'za nevaze. <sup>23</sup> Ha' vahekamo'zama nehazankea antahi amnea osuo. Hagi ranke hu'zama hu haviza hunegantaza zamo'a anagamu mareri vava nehie.

## 75

### *Anumzamofo agi'ama ahentesgama hu zagamere*

<sup>1</sup> Anumzamoka susu huganteta kagia ahentesga hune. Na'ankure tagri tava'onte kagra mani'nane. Knare'za huno mareri agatere'nea kavukva zanka'agura vahe'mo'za huge antahige nehaze. <sup>2</sup> Anumzamo'a huno, vahe'ma refko hu knama erinte'noa kna fatgore, vhahera mago avamenteke ante'na refko huzmantegahue. <sup>3</sup> Hagi mopama momi'ma higeno, vahe'mofo mani'zamo'a herave korave nehigena, Nagra mopama azeri'nea trara azeri akona nehue. <sup>4</sup> Zamavufga rama nehaza vahekura tamavufga rana osiho nehu'na, kefo avu'ava'ma nehaza vahekura hu'na, hara agateregahune huta tamimiza runafege nehuta, hankavetamia erita mareorihohu'na zamasamigahue. <sup>5</sup> Hara hu agateregahune huta hankavetamia erita marenerita, tamanankena antesga huta tamavufga rankea osiho. <sup>6</sup> Vahe'mofoma azeri antesgama hu'zana, zage hanati kzigatiro, zage fre kzigatiro, hagage kokampintira omegahie. <sup>7</sup> Anumzamoke vhahera refko huno, nezmageno

avre anagamu netreno, avre henkama netreno hugahie. <sup>8</sup> Na'ankure mnanentake zantamine waini tinema eri havia hu'nea hankave tina agrema'age nehigeno, Ra Anumzamo'a azampi azeri'ne. Agra maka ama mopafima kefo avu'ava'ma nehaza vahete tagitresigeno, ana vahe'mo'za nene'za ro'afima me'nia ankare're'anena nehana hugahaze. <sup>9</sup> Hianagi nagra maka kna Anumzamo'ma tro'ma hu'nea zankura huama hu vava nehu'na, zagameru hu'na Jekopu Anumzamofona agi'a ahentesga hugahue. <sup>10</sup> Na'ankure Anumzamo'a huno, kefo avu'ava'ma nehaza vahe'mokizmi hankavea eri atregahuanagi, fatgo avu'ava'ma nehaza vahe'mokizmia mago'ane hankavea zamigahue.

## 76

### *Mago vahe'mo'a kagri kavuga otigara osu'ne huno Asapu asunte'nea zagarere*

<sup>1</sup> Juda vahe'mo'za Anumzamofona ke'za antahi'za hu'neza kesga hunen-tazageno, Israeli mopafina agimo'a haruharu hu'ne. <sup>2</sup> Jerusalemia Agrama nemania kuma megeno, Saioni agonare noma'a me'ne. <sup>3</sup> E'i anampina ha' vahe'mokizmi kevemofo agonare'ma tevema nerea kevema, hankoma, bainati kazinknone mago'a hazantamine ruhantagi atre'ne. <sup>4</sup> Kagri hihamu hankavene masazanka'amo'a, zagagafama ahe'za nenaza agonaramina agatere'ne. <sup>5</sup> Hankave ha' vahetmina zamarohu zamarenka zamahe fri'nanankiza mago'mo'a otino hara huorantegahie. <sup>6</sup> Jekopu Anumzamoka hate'ma ne-enka ivimo agazamo'ma hunka ankeno'a, hosi afu'mo'ene hosi agumpima vanoma nehu'za ha'ma nehaza vahe'mo'zanena, kazara osu'za mopafi mase'naze. <sup>7</sup> Na'ankure kagoro huga vaheki'za Kagrikura vahe'mo'za korora hugahaze. Hagi krimpa ahezamo'ma tevema neresifina, iza knareru hu'nenia vahe'mo kavuga otigahie? <sup>8</sup> Ha' vaheka'ama knazama zamisana kea monafinkati huama nehankeno, mopafima nemanziza vahe'mo'za zmahirahiku nehu'za, kea osu kavuga akehe'za nemanize. <sup>9</sup> Hagi Anumzamo'a otino vahe'mo'zama zamazeri havizama nehaza vahera refko huzmantegahie. <sup>10</sup> Vahe'mo'za zamarimpama nehaza zamo'a, rankagi negamize. Na'ankure mago'ama mesia rimpah'e'za erinka kanankempi kavasese hugahane. <sup>11</sup> Ra Anumzana tamagri Anumzamofontega huvempa nehuta, anama huvempama hanaza kea eri ragareho. Knare'zantfama huno mareri agatere'nea ne'tega miko vahe'mota musezana erita agrite echo! <sup>12</sup> Na'ankure ugagota kva vahe'mo'zama antene'za, akagima neraza zantamina, Agra ahe hantagi netrege'za, ama mopafi kini vahe'mo'za koro hunentaze.

## 77

### *Hazenke knafina Ra Anumzamofonku hakregahue huno asunte'nea zagarere*

<sup>1</sup> Anumzamofontega ranke hu'na nagra krafagea hugahue. Nazama hinogura ranke hu'na krafa hanugen Anumzamo'a antahi namigahie. <sup>2</sup> Hazenkefima unefre'na, Ra Anumzamofonku hake'noe. Kinagareti'ma agafama huno vuno ko'ma ome tu'neana monafinka nazana rusutete'na nunamuna hu'noanagi, narimpamo'a kna hu'ne. <sup>3</sup> Anumzamokagu'ma nagesama nentahi'na, natagura karagi neru'na, kagriku'ma nentahi'na nunamuna nehugen, zaferinani'a omne amne hu'ne. <sup>4</sup> Kagra navua eri hari hanke'na maka kinaga navura omase mani'nena, tusi antahintahi

hakare nehu'na kea osu'noe. <sup>5</sup> Ko'ma evu'nea knafima knare'ma hu'na mani'noa zanku nagesa nentahi'na, ko'ma evu'nea kafuramimpima fore'ma hu'nea zantaminkura nagesa nentahue. <sup>6</sup> Nagrama kenage'ma nehua zagamenigura nagesa nentahi'na, nagu'afina antahintahia hu'noe. Anante antahintahinimo'ma ama'ma higena, ko'ma hu'noa zagamekura nagesa nentahi'na, anage hu'noe, <sup>7</sup> Anumzamo'a ha natreno amefi hu'namifi? Ete mago'anena avesinanteno nazeri so'ea huonantegahifi? <sup>8</sup> Vagaore avesizamo'a ha fanene hu vagarefi? Huvempama hu'nea kemo'a hago vagarefi? <sup>9</sup> Anumzamo'a asunku'ma hurante zankura agekanifi? Hifi tusi'a arimpa aheneranteno asunku zama'a azenerifi? <sup>10</sup> Anante anage hu'na antahi'noe, Marerirfa Anumzamo hara renante hu'na hu'noe. <sup>11</sup> Hianagi Anumzamo'ma hu'nea avu'ava zankura nagera okanigahue. Tamage, nagra korapa'ma ruzahu ruzahu kaguvazama hu'nana zankura nagera okanigahue. <sup>12</sup> Maka zama tro'ma hu'nana zankura nagesa antahigami vava nehu'na, ranra avu'avazama hu'nana zantmimofonku nagu'afina antahi vava hugahue. <sup>13</sup> Anumzamoka kavukva zankamo'a ruotagetfa hu'ne. Tagri hankavenentake Anumzankna Anumzana magore huno omanitfa hu'ne. <sup>14</sup> Kagra ruzahu ruzahu kagu'vaza eri fore hu'nana Anumza mani'nane. Kagra vahe'mokizmi amu'nompi hankaveka'a erifore hu Anumza mani'nane. <sup>15</sup> Kagra hankavenentake kazanuti vaheka'a Jekopu mofavreramine, Josefe mofavreraminena zamagu'vazi'nane. <sup>16</sup> Anumzamoka timo'ma negageno'a, koro nehigeno, hagerimo'ma negageno'a koro huno ahirahiku hu'ne. <sup>17</sup> Hampompintira ko'mo'a herafi neramigeno, monagemo'a kragugu nehigeno, kopsinamo'a rutrage huno kevema ahene trazankna huno enevie. <sup>18</sup> Kagra hankeno monagemo'a ununkomofo agasasa nerigeno, kopsinamo'a maka kokantega trage huno rumsa huno vuno eno nehigeno, ama mopamoa' kaza nehuno tusi agogogu nehie. <sup>19</sup> Kama vanoma nehana kamo'a hageri amu'nompi vu'ne. Kagra tusi'a hankave timpi nevankeno, vahe'mo'za kagiaka nonkaze. <sup>20</sup> Sipisipi afutami avreno viankna hunka, vaheka'a ana kampina zamavarenka vananke'za, Aroni'ene Moseskeea sиписи афу ква вахекна хуке замавареке ву'на'e.

## 78

### *Henkama fore'ma hanaza vahera zamasmihou asunte'nea zagamere*

<sup>1</sup> Rempima huramisua zana vahe'nimota antahiho, nanekema tamas-misuuna tamagesa ante'neta antahiho. <sup>2</sup> Na'ankure nagra mago fronka ke tamasamigahue. Rempima huramiga zantamima korapama oku'ama me'nea zantmi rempi huramigahue. <sup>3</sup> Kanihe'ma ko'ma antahi'nona kanihe tamasamigahue, ko'ma tagehe'mozama hurasmi anante anante'ma hu'za e'naza kanihe tamasamigahue. <sup>4</sup> Hagi ama ana tamage nanekea, mofavretirera frara okigosunanki, Ra Anumzamo'ma hihamu hankave'anuti'ma ruzahu ruzahu kaguva zantmima erifore'ma hu'nea zantamina, menima fore'ma nehaza vahetmina zamasmigahune. <sup>5</sup> Na'ankure Agra Jekopuna trake'a nemino, kasege'a Israeli vahera zami'ne. Ana nehuno tagehe'mofonkura, mofavre nagatamia ama ana nanekea rempi huzamiho huno zamasm'i'ne. <sup>6</sup> Ana hinkeno henkama fore hu anante anante'ma hu'za vanaza vahe'mo'za, ama ana nanekea antahine'za, mofavrezmia rempi hu'za zamasami vava hu'za viho. <sup>7</sup> E'ina hanage'za fore hu anante anante'ma hu'za vanaza vahe'mo'za Anumzamofonkura amuhara nehu'za, kasegea amage nente'za, ruzahu ruzahu kaguva zama hu'nea zankura

zamagera okanigahaze. <sup>8</sup> E'ina nehu'za zamagehem'o'zama zamagu'ama eri hanavemati'naza zana nosu'za, hara renonte'za, kea antahi'za avarari fatgo nosu'za, zamagu'a Anumzamofona omi'nazanknara osugahaze. <sup>9</sup> Hagi Efraemi sondia vahe'mo'za ati kevea zamazampi eri'nazanagi, ha'ma hazafina zamage'na humi'za hara osu koro fre'naze. <sup>10</sup> Zamagrama huhagerafi huvempa kema Anumzanema hu'nazankea runet agre'za, kasege'ama avarari zankura zamavaresra hu'naze. <sup>11</sup> Anumzamo'ma maka ruzahu ruzahu zama zamaveri'ma hu'nea zankura zamagenekani'za, kagu'vazama hu'nea zankura zamagesa ontahi'naze. <sup>12</sup> Hagi Zoani kaziga Isipi mopa-fina zamafahem'ofo zamavufina, Agra ruzahukna kaguvaza erifore hu'ne. <sup>13</sup> Na'ankure Agra hagerina amu'nompinti eri ataneno, kana eri fore huno zamavreno kantu kaziga vigeno, timo'a emare hihi huno mareri'ne. <sup>14</sup> Hagi masafi'na hamponteti kana zamaveri huno zamavareno nevuno, maka hanimpina teve anefanu remsa huzmanteno zamavareno vu'ne. <sup>15</sup> Ka'ma kopina Agra havea rutaneno tina zamigeno, timo'a krohupeno ege'za ne'naze. <sup>16</sup> Hagi Agra neone tintamina erifore higeno, havefintira hanatino tirantima eviaza huno enevie. <sup>17</sup> Hianagi ana hagege ka'ma kopina amnea omani'za kumira hu'za ne-eza, marerirfa Anumzamofona hara rente'za e'naze. <sup>18</sup> Zamagra zamagu'areti hu'za Anumzamofona rehe'za nege'za, zamavesi zmavesima nehia nezankura Anumzamofona antahige'naze. <sup>19</sup> Ana nehu'za Anumzamofona huhaviza hunente'za amanage hu'naze, Anumzamo'a Agra amne hagege kokampintira ne'zana eri fore huramigahio? hu'za hu'naze. <sup>20</sup> Tamage Agra havea rutanegeno timo'a krohupeno evuno aviteno megahianagi, Agra bretine ame'anena vahe'a zamigahifi?

<sup>21</sup> Hagi Ra Anumzamo'ma ana nanekema nentahigeno'a, arimpama ahe'zamo'a teveregeno Jekopu nagara teve krenerasegeno, mago'a Israeli vahe'mokizmia tevereti krerasage'ne. <sup>22</sup> Na'ankure zamagra Anumzamofontera zamentintia nosu'za, kegava hurantegahie hu'za antahi omi'naze. <sup>23</sup> Hianagi Agra monamofonkura kafana anagio, higeno monamo'a kafana anagino erihagro hu'ne. <sup>24</sup> Mana ne'zanema nehaza ne'zana ko'ma rianka huno monafinkati herafi tregeno, monafintira witia zmige'za ne'naze. <sup>25</sup> Ankeromofo ne'za zamige'za vahe'mo'za nenazageno, nezmu'ma huga avamente Anumzamo'a rema'a ne'za zamige'za ne'naze. <sup>26</sup> Zage hanati kaziga zahora huntegeno monafina zahora erino enevigeno, Agra' hihamu'areti sauti kaziga zahora azeri fatgo higeno Agra antahia kantera nevie. <sup>27</sup> Agra monafinti ame'a atregeno eramino mopa-fina kugusopamo hihi huno mareriankna nehigeno, namama zmi'neana namaramimo'a rama'a hu'za hagerinkena kasepagna hu'naze. <sup>28</sup> Ana namaramina Anumzamo'a higeno seli noma ki'za mani'naza amu'nompine, seli noma ki'zama nemanizafinena erami erami hu'naze. <sup>29</sup> Zamagrama zmanankenku'ma haza zaga Agra zamige'za nezamu hu'naze. <sup>30</sup> Hianagi ana ne'zana nevaga orenazageno, ana ne'zamo'a zahufa zamagipi me'nege'no, <sup>31</sup> Anumzamo'a ana vahetamina tusi arimpa ahe'zmanteno hankavenentake vahezmia zamahehna hu'ne. Hagi hankavenentake Israeli nehazaveramina zamahehna hu'ne. <sup>32</sup> E'inara hu'neanagi, ana vahe'mo'za ana zankura zamagesa ontahi'za kumira hu'za vu'naze. Anumzamo'ma knare eri'zama eri'nea zankura antahimi'za Agrite'ma zamentintima hu'zankura zamavaresra hu'naze. <sup>33</sup> E'ina hazageno ame' huno zamazeri haviza hige'za amne zankna nehazageno, zamazeri koro

hige'za koro hu'naze. <sup>34</sup> Hagi Anumzamo'ma agafa huno zamahema nefrige'za nege'za, maka zana netre'za ete rukrahe hu'za Anumzamofontera hanaveti'za zamentintia hu'naze. Ana nehu'za zamagu'a rukrahe hu'za Anumzamofona zamagu'areti hu'za avariri'naze. <sup>35</sup> Anumzamo'a tagri fraki haveganti mani'ne hu'za zamagesa nentahi'za, Mareri Agatere Anumzana tahokeno tavre'nea nere hu'za antahi'naze. <sup>36</sup> Hianagi ana maka zama hu'nazana zamagiteti hu'nazanki tamage hu'za zamagu'a omi'naze. Zamagra amne zamagiteti havige hu'naze. <sup>37</sup> Zmagu'amo'a tamagea huno Anumzamofontera hankvetino omnene. Ana hige'za Anumzanema huhageraf'i'aza huvempakea kegava osu'za ru hantagi'naze. <sup>38</sup> Hianagi Anumzamo'a asunku Anumzankino kumizmia atrenezmanteno, zamahe fri vagaore'ne. Rama'a knafi rimpah'e'zana azenerino, zamahe vaga ore'ne. <sup>39</sup> Ana nehuno vahekura amne vahetfa mani'naze huno agesa antahi'ne. Vahe'mo'za zahomo'ma evu huhu huno vuteno omeankna huza vagaregahaze. <sup>40</sup> Hagi hagage kokampima mani'neza rama'a zupa Ra Anumzamofona hararenentazageno arimpa knanena mani'ne. <sup>41</sup> Hagi mago'ane Ra Anumzamofona reh'e'za nege'za Israeli vahe ruotge Anumzamofona rimpagna erimi vava hu'za vu'naze. <sup>42</sup> Zamagra ha' vahe'zmimofo zamazampinti'ma zamagu'ma vazi'nea hihamu'agura zamage kaninte'naze. <sup>43</sup> Isipi mopafima ruzahu ruzahu kaguvazama erifore nehuno, Zoani kazigama knare huno mareri agatere'nea ruzahu ruzahu kaguvazama eri fore'ma hu'nea zankura zamagesa nontahizageno, <sup>44</sup> Agra tirazmia eri rukrahe higeno korasege'za ana tintetira tina one'naze. <sup>45</sup> Agra tusi'a kosintami huzmanteg'e'za kregre hu'za nezamampri'zageno, hogatmi huntege'za rama'a hazenkea zami'naze. <sup>46</sup> Agra neonse kenu'ene ranra kenu'ene huzmanteg'e'za, hozazmia ne'za erihna hu'naze. <sup>47</sup> Agra ranra komopa ko atregeno waini zafa zamia ahe haviza nehigeno, neonse komopa ko atregeno, sikamo zafazmia ahe haviza hu'ne. <sup>48</sup> Hagi Agra bulimakao afuzmia ranra komopa ko atregeno zamahe nefrigeno, kopsina atregeno trazama nenaza afuzagama kegavama hu'nazana zamaheno eri vagare'ne. <sup>49</sup> Agra tusi'a arimpa ahe'nezmanteno, vahe'ma zamazeri haviza hu ankeru vahetamina mago'a huzmanteg'e'za, zamazeri haviza nehu'za zamahe fri'nagura e'naze. <sup>50</sup> Agra arimpa ahezamofo kana retro huno magore huno Isipi vahetmina zamagura ovazi'neanki, knazana zaminio zamazeri haviza hu'ne. <sup>51</sup> Isipi vahetmimofo nompintira ese ne' mofavreramina Agra zamahe fri'ne. Hamu nagamokizmi zamagonesa mofavreramina agra zamahe fri'ne. <sup>52</sup> Hianagi Anumzamo'a Agra'a vahetmina sipisipi afutmima vugoteno avreno'ma viankna huno hagege kokampina kegve huzmantie so'e huno zamavareno vu'ne. <sup>53</sup> Agra'a kegava huzamanteno zamavareno vige'za zamagra korora osu'naze. Hianagi ha' vahe'zmimo'za hagerimpina ti nakri'naze. <sup>54</sup> Agra ruotge'ma hu'nea mopa atupare zamavareno e'ne. Agra tamaga azantetima ha'ma huno'ma eri'nea agona kokampi zamavareno e'ne. <sup>55</sup> Hagi Agra zamavugama ana mopafima mani'naza vahera zamahe kasopenetreno, ana mopa erisantihareho huno zami'ne. Ana hige'za avamente avamente hu'za refko hu'za Israeli naga nofimo'za seli nonkuma ki'za mani'naze. <sup>56</sup> Hianagi zamagra Anumzamofona reh'e'za nege'za, Marerirfa Anumzana ha' renente'za, kasege'a ovarari'naze. <sup>57</sup> Zamagra Anumzamofona zmagenta hunemi'za, zamaghehemo'zama hu'nazaza hu'za Anumzamofona avarari

fatgo osazageno, ati amagenamo'ma kazakiankna huno zmavu'zamava zmimo'a kazaki'naze. <sup>58</sup> Zamagra havi anumzantamimofoma mono'ma hunente'za, kumama tro husgama hunte'naza zamo Anumzamofona azeri arimpa nehe'za, havi anumzama antre'za tro'ma huntaza zanku Anumzamo'a azeri kanivea rezmante'ne. <sup>59</sup> Hanki Anumzamo'ma ana nanekema nentahino'a tusi arimpa ahegeno, Israeli vhahera amefi huzamino zamatre vagare'ne. <sup>60</sup> Ana nehuno Silo kumate'ma seli mono noma'afima nemaniretira atreno vu'ne. Vahe amu'nompima seli noma'afima nemaniretira atreno vu'ne. <sup>61</sup> Agra huhagerafi huvempage vogisia ha' vahe zamazampi antege'za eri'za kumazmirega vu'naze. Agri hihamu hankvema huvame huno me'nea zana ha' vahemoza eri'za ome antene'za ana zamofona ke amne zankna hu'naze. <sup>62</sup> Agra vahe'aramina ha' vahe zamazampi zamavarentege'za ha' vahe'mo'za zamahe'za kazinteti traga hu'naze. Na'ankure Agra'ama erisanti'harege'za Agri ruotge vahe'ma mani'naza vahekura tusi arimpa ahezmante'ne. <sup>63</sup> Kasefa nehazaveramina tevemofo neza nesazageno, kasefa mofaneramimo'zama vema erisaza vene'nea omanige'za, masinezmant'e zama nehaza zagamera osu'naze. <sup>64</sup> Hagi pristi vhahera bainati kazinteti zamahe vagarazage'za, ana pristi vahe'mokizmi kento aneramimo'za zamasunkura hu'za zavira ote'naze. <sup>65</sup> Vahe'mo'zama mase'nazafinti'ma otizaza huno Ra Anumzamo'a oti'ne. Hanave sondia ne'mo'ma hanave waini tima neteno, neginagima huno mase'nereti'ma otiankna huno oti'ne. <sup>66</sup> Ha' vahe'aramina Agra zamahe panani hige'za ete freza nevazageno, zamagazema huvavama hu'are zamazeri haviza hu'ne. <sup>67</sup> Hianagi Josefe nagara avesra huzmanteno nezmatreno, Efraemi naga nofi'enema mani'zankura avresra hu'ne. <sup>68</sup> Hianagi Juda naga huhamprino zamagrane umani'ne. Na'ankure Agra Saioni agonagu avesi'ne. <sup>69</sup> E'i anante ruotgema hu'nea mono noma'a Agra kisga huno kintegeno, anagamu marerino monarega mareri'ne. Ana nehuno ana nomofo tra'ama ante'neana mopamo'ma hanavetiankna huno hanaveti'neankino mevava hugahie. <sup>70</sup> Agra eri'za vahe'a Deviti huhamprinteno, sipisipi afu keginafinti ke higeno e'ne. <sup>71</sup> Anumzamo'a Devitima avre'neana a sipisipine amima nenea anenta'aramima kegavama nehia eri'zampinti avreno Jekopu aghemofo, Ra Anumzamo'a Agra'a feno zama'agna huno huhampri'nea Israeli vahe'a kegava hu eri'zana ami'ne. <sup>72</sup> Hagi Deviti'a maka agu'areti'ene maka zama tro'ma hu'are'ma antahi ani'ma hu'nea ne'kino, Israeli vhahera kegava hu'ne.

## 79

### *Asapu asunte'nea zagamere*

- <sup>1</sup> Anumzamoka meg'i'a vahe'mo'za hara eme huragatere'za erisanti'ma hare'nana mopaka'a e'neri'za, ruotgema hu'nea mono nonka'a eri haviza nehu'za, Jerusalemi kumara tagna vazitrazageno hihi huno mareri'ne.
- <sup>2</sup> Eri'za vaheka'aramine Kagrima negavaririza vaheka'aramina zama-hete'za zamavufaga'a atrazageno namamo'zane zagagafamo'za ne'naze.
- <sup>3</sup> Jerusalemi kumapina zamahe'za korana tagitrazageno tihageno eviankna nehigeno, asezmant'e nia vhahera magore huno omani'ne. <sup>4</sup> Mika tagri tava'onte'ma nemaniza vahe'mo'za huhamprino hunerantazageno, mani kagirante'naza kumapinti vahe'mo'za ki'za zokago ke hurante'naze. <sup>5</sup> Ra Anumzamoka nama'a kna krimpa aherantenka vugahane? Kagrima karimpa aherante vava hunka vugahampi? Maka kna kanive renerantankenano ana

zamo'a tevenefakna hu vava huno vugahifi? <sup>6</sup> Mono'ma hugante'zanku'ma zamavaresrama hunegantaza vaheku karimpa ahenezmanterka, kini ne'mo'ma kegavama hu'nea kumatamimp'i vahe'mo'zama kaghanta'ma novaziza vahetami karimpa ahezmanto. <sup>7</sup> Na'ankure Kagri vahe Israeli vahera zamahe'za eri vagarazageno, mopazmimo'a vahe omani hagege kokankna hie. <sup>8</sup> Ko'ma tagehemeo'zama hu'naza kumitera antahintahi ka'afina ana zankura antahinka ovuo. Kasunku hurantenka ame hunka enka eme taza huo. Na'ankure tagra tusi'a hazenkefi manune. <sup>9</sup> Anumzana tagu'vazi ne'mani'nananki taza huo. Kagra'a kagimofo knare zanku nentahinka taza huo. Kagri kagima husgama hugantesaza zanku netahinka, kumitia apase nerantenka tagu'vazio. <sup>10</sup> Na'a hanige'za ru vahe'mo'za hu'za, iga zamagri Anumzana mani'ne? hu'za hugahaze. Tagona kema hunka ana vahtimma ha'ma huzmant'e sana zana, tagra kamneno. Na'ankure zamagra eri'za vaheka'aramimofo korana zamahe'za eri tagi atre'naze. <sup>11</sup> Kinama hu'naza vaheka'amo'zama zamatagu'ma nehu'za, kragi'ma neraza zana antahio. Frigahaze hu'zama hazage'zama mani'naza vahera, marerirfa hihamuka'anu zamagu'vazio. <sup>12</sup> Anumzamoka tava'ontire'ma nemaniza vahe'mo'zama Kagri'ma huhavizama hugantazarera, 7ni'a zupa ana zanteria nona huzmanto. <sup>13</sup> Ana'ma hananketa Kagri vahe'mota tretre'ma hu'nea trazampima tantenanketa sipisipigna huta mani'nomota musena nehuta, susu hugante vava nehanunkeno, henkama forehu anante anante hu'zama esaza vahe'mo'za ana zanke hugahaze.

## 80

### *Anumzamoka ete tazeri knare huo huno hu'nea zagamere*

<sup>1</sup> Sipisipi afu kevuma kegavama nehzaza hunkama Israeli vahe'ma kegavama nehana kva ne'moka, kagesa antenka antahio. Sipisipi afu'ma kegavama huno viazama hunka Josefe agehe'mofoma, avrenka nevamoka antahio. Kagra serafimiema nehzaza ankerontremofo amu'nompima manisga hunkama nemanina Anumzamoka masazanka'a remsa hunerantenka eme taza huo. <sup>2</sup> Efraemi naga'ma, Benzameni naga'ma, Manase nagate'enena Hankaveka'a eri ama' hunka tagu'vazio. <sup>3</sup> Etenka tazeri knare nehunka, kavugosafinti masanu remsa hunerantenka taguravazio. <sup>4</sup> Ra Anumzana Monafi sondia vahetmimofo Anumzamoka, zataze kagri vahe'mota nunamuma huta neonkenka karimpa aheneranture. <sup>5</sup> Tasunkuzana bretima hiaza hunka neraminka, tima hiaza hunka tavunura rama'a taminketa ne'none. <sup>6</sup> Tava'ontire'ma nemaniza vahetmina zamatranke'za, tagri mopareku hu'za hara hunerante'za, ki'za zokago kea hunerantaze. <sup>7</sup> Monafinka sondia vahe'mofa Anumzamoka ete tazeri knare nehunka, atregeno kavugosafinti masa zamo'a remsa hunerantesigenka taguravazio. <sup>8</sup> Kagra Isipitira waini avina rukafrinka erinka, ama mopa fima megi'a vahetmima mani'nazana eme zamahenati netrenka, tagrira ama ana mopa fima avimzama seaza hunka eme hankre'nane. <sup>9</sup> Kagra ama mopa emeri ama' hurantanketa, tagra ama ana mopa fima arafu'na reta mani avite'none. <sup>10</sup> Ana waini zafamofo turuna'mo agonaramina turuna hunentegeno, azankuna'amo'za hankave sida zafa refite'ne. <sup>11</sup> Hagi azankunamo'a hageno zage fre kaziga Mediterenia hagerintega vigeno, agatamo'a hageno zage hanati kaziga Yufretisi tinte uhanati'ne. <sup>12</sup> Hianagi nahigenka hoza kegina ahe fragu vazitranske'za karankama vanoma nehzaza vahe'mo'za ufre'za krepi raga musufa neragize? <sup>13</sup> Zafa tanopafinti zamagonknazama ohari afi

afu'mo'za ana wainia zamaganuti repripro nehzageno, afi zagagafamo'za ana zafa raga nenaze. <sup>14</sup> Monafinka sondia vahe'mofo Anumzamoka muse hugantonanki etenka eno. Waini hozaka'afima nehia zana Monafinkatira kefenkma atrenka negenka, ama ana waini zafaka'a kegava huo. <sup>15</sup> Ana wainia Kagraka'a kazampinti kri'nane. Ana ne'mofavrea Kagraka'a az-eri nena hu'nane. <sup>16</sup> Ana waini hozaka'a teve negre'za, rukafri kafro hutre'naze. Karimpa ahenga kavugosa hunezmanterka zamahe fanene huo. <sup>17</sup> Hanki kazana rusutenga kaza tamaga kazigama mani'nea ne'hankavea neminka, Nagri vahe manigahaze hunkama tazeri nenama hu'nana vahe mani'nonanki tazeri hankavetio. <sup>18</sup> E'ina hugeta tamefira huonkamim-neno. Ete tazeri kasefa hugeta, Kagritega nunamuna nehuta, kagia ahentesga hamneno! <sup>19</sup> Monafinka sondia vahe'mofo Anumzamoka ete tazeri knare nehunka, atregeno kavugosafinti masazamo'a remsa huranteno taguravazino.

## 81

### *Vahe'nimo'za ke'ni'a antahiho huno hu'nea zagamere*

<sup>1</sup> Anumzamo'a Agra tagri hankaveti mani'neanki zagame huta agi'a erisga hanune. Jekopu Anumzamofontega muse zagamera huta agi'a erisga hihoh? <sup>2</sup> Zgamera nehuta nasenasepana neheta, knare ageru'ma neria hapu zavenane laeri zavenanena aheho. <sup>3</sup> Kasefa ikama eme antesigeta sipisipi afu'mofo paziveteti ufena nereta, ikamo'ma zarama vagehinigeta, ra ne'za kreno nekna egahianki, ne'zana kreta neneta musenkase hihoh. <sup>4</sup> Ama'i Israeli vahe'mofo trake, Jekopu Anumzamo'ma Israeli vahe'motama tami'nea kasegene trake. <sup>5</sup> Anumzamo'ma Isipi vahe'ma ha'ma renenteno'a, Josefe naga'mozama avaririsaza trake huno retro hunte'ne. Nagra ontahino'noa agerupinti agerura runo anage hu'ne, <sup>6</sup> Nagra zamafunte'ma me'nea knazana eri atroe. Kna zama e'neriza ekaeka kutamia tamazampintira eri atre'noe. <sup>7</sup> Knaifima mani'neta krafa nehzagena, tamagu'vezi'noe. Nagra hanintiri hampompinti monagema hiaza hu'na kenonatamia huramante'noe. Meriba tinte tamamentintia reramahe'na tamage'noe. <sup>8</sup> Tamavumro tamantena tamazeri fatgo hunaku huanki, vahe'nimota antahiho! Israeli vahe'mota tamavumro'ma nentenugeta kea osu mani'neta amne tamagesa antahiho. <sup>9</sup> Ru vahe'mokizmi anumzantera monora huontege, havi anumzantera tamarena reta monora huontebo. <sup>10</sup> Nagra Ra Anumzana tamagri Anumzamo'na Isipi mopafintira tamagura vazi'na tamavre'na emarerino'noa Anumza mani'noe. Tamagira eri aka hunenke'na knare zantaminura tamagipina ante vita'neno. <sup>11</sup> Hianagi nagri vahe'mo'za keni'a nontahi'za, namagera onte'naze. <sup>12</sup> Zamagu'amo'ma hanavetige'na zamattroge'za zamagra zamavesi avariri'za vu'naze. <sup>13</sup> Tamagra nagri vahe'mota keni'a nentahinkeno, Israeli vahe'mota nagri kante'ma navaririta vanageno'a knare hugahie. <sup>14</sup> Nagra ame hu'na tamagri ha' vahera zamahe rava hugahue. Ha'ma renezmantaza vahera nazana rusute'ha hara huzmagateregahue. <sup>15</sup> Ra Anumzamofoma zamavaresrama hunentaza vahe'mo'za agri avurera antri nehu'za tatapa hugahaze. Ana knazana eri vava hu'za vugahaze. <sup>16</sup> Hianagi knare zantfama hu'nea witi tami'nena negahaze. Ana nehu'na havefinti afi tumeri taminena neramu hugahaze.

## 82

*Hankavezmima omne vahe'ene maka zanku'ma upa'ma nehaza vahe'ma zamagu'vazisia zagamere*

<sup>1</sup> Anumzamo Agra mona kumapina vugota huno mani'neno, anumza mani'nonema huza nehaza kva vahetamima omeritruma hu'za keagama nehzageno'a, nanekea refko nehuno antahintahi'a huama nehie. <sup>2</sup> Tamagra nama'a zupa havizama nehaza vahe'mokizmia zamavesi nezmaneta, kefo avu'ava'ma nehaza vahera knare avu'avara hunezmantaze? <sup>3</sup> Hankavezmima omne vahe'ene megusa mofavre nagara zamaza nehuta, zamunte omne vahe'ene zamazeri havizama nehaza vahe'enena zamahokeho. <sup>4</sup> Zamunte omne vahe'ene maka zanku'ma upa'ma nehaza vahe'enena zamagu'nevazita kefo avu'ava'ma nehaza vahe'mokizmi zamazampintira zamahoketa zamavareho. <sup>5</sup> Hagi vahe'ma zamazeri havizama nehaza vahe'mota, mago zana antahita keta osuta hanimpi vano nehzageno, ama mopamofo tra'amo'a tore'vare nehie. <sup>6</sup> Nagra amanage hu'noe, tamagra anumza mani'naze, ana makamota tamagra Marerirfa Anumzamofo mofavre mani'naze hu'na hu'noe. <sup>7</sup> Hianagi vahe'mo'zama nehzaza huta frigahaze. Mago'a kva vahe'mo'zama nehzaza huta frigahaze. <sup>8</sup> Anumzamoka otinka ama mopafi vahera keaga huzmanto. Na'ankure ana maka vahe'ma mani'nazana kagri vaheke'za mani'naze.

## 83

*Anumzamoka kea osura omanio huno hu'nea zagamere*

<sup>1</sup> Anumzamoka kea osura omanige, agesa ankanire vahe knara hunka omanige, akohenka omanio. <sup>2</sup> Ha' vahekamo'zama ranke rankema nehzaza zana nontahino? Zamavesrama hunegantaza vahe'mo'zama zamavufaga rankema nehzana nonkano? <sup>3</sup> Vaheka'a zamahenaku amne vahenkama hu'za vano nehu'za, marerirfa fenozan'i'e hunkama hu'nana vaheka'a zamahenaku oku'a nanekea retro nehzaze. <sup>4</sup> Zamagra amanage nehzaze, enketa Israeli vahera mopazmifintira zamahehna hamneno hu'za nehzaze. Zamahehna hanunkeno, ama mopafina Israeli vaher zamagia omnени'za mago'anee antahi ozamisaze. <sup>5</sup> Zamagra mago zamarimpa hu'za ana nanekea retro nehu'za, kagri'ma ha'ma regante'naza nanekea huhagenerafi'za huvempa nehzaze. <sup>6</sup> Hagi ana nanekema nehzaza vahetamina Idomu vahetmima, Ismaeli vahetmima, Moapu vahetmima, Hagri vahetmima, <sup>7</sup> Gebali vahetmima, Amoni vahetmima, Ameleki vahetmima, Filistia vahetamine, Tairi rankumapi vahe'mo'zane anara hu'naze. <sup>8</sup> Asiria vahe'mo'zanena anampina efre'za Loti agehe'mokizmia hankave zami'naze. <sup>9</sup> Midieni vahe'ma huzmante'nanaza nehunka, Kisoni tirampima Siserane Jabininema huznantenana zana huzmanto. <sup>10</sup> Ana vahetmina Endori mopafi zamahehna hankeno zamavufagamo'ma anampima kasri'neankna hino. <sup>11</sup> Zamatrege'za hankavenentake vahemzimo'za Orebike Zebikema hu'na'aza hu'za nefrinkeno, ugagota kva vahemzimo'za Zebake Zalmunakema hu'na'aza hu'za friho. <sup>12</sup> Na'ankure zamagra hu'za, Anumzamo'ma traza ne' afu'tmima kegavama nehia mopa aheta hanaregahune hu'za hu'naze. <sup>13</sup> Anumzamoka zamahe panani huge'za kagikagi zahomo kugusopa eri harafi huno freankna nehu'za, zaho'mo witi hona eri hareno viankna hiho. <sup>14</sup> Zamatrege'za zafafi afe taginteankna hu'za nerenko, agonafi afe'ma tagintegeno ruhagna hagna

huno teankna hoho. <sup>15</sup> Ununko huntogeno nezmavrarino keonke'zana eri tasagihu agumpi agumpi huno zamazeri korora hino. <sup>16</sup> Zamazeri zamagaze huge'za tusi zmagazegu nehu'za, Ra Anumzamoka kagifi eme anterami'za mani'neza kamage anteho. <sup>17</sup> Zamazeri zamagaze nehunka, zamarimpa zamazerigna huvava huge'za zamagazegu nehu'za friho. <sup>18</sup> E'ina huge'za Ra Anumza mani'nane hu'za kage'za antahi'za nehanageno, maka mopafi vahe'mo'za kagrake'za Marerirfa Anumzana mani'nane hu'za ke'za antahi'za hugahaze.

## 84

### *Ra Anumzamofo nonkumapi umanisuegu nagesa antahi vava nehue hu'nea zagamere*

<sup>1</sup> Monafinka Sondia vahe'mokizmi Ra Anumzamoka nemanina kumakamo'a hentofaza hu'ne. <sup>2</sup> Ra Anumzamofo mono nompima mani'zankura nagu'reti hu'na navesinavesi nehue. Nagra nagu'reti'e, maka navufgareti'enena muse nehu'na ranke hu'na kasefa huno mani'nea Anumzamofona zagamera hu'na agi'a ahentesga hugahue. <sup>3</sup> Kisve namamo'zane suvi namamo'zanena kresramna vu ita tava'onte nozmia kine'za amura ante'za mofavre'zmia azeri'nena nehaze. Monafi sondia vahe'mofo Ra Anumzamoka nagri kini mani'nenka, Anumzani'a mani'nane. <sup>4</sup> Ra Anumzamoka kagri nompima nemaniza vahe'mo'za muse nehu'za, zagamera hu'za kagia ahentesga huvava hugahaze. <sup>5</sup> Ra Anumzamokaregati'ma hankavema e'neriza vahe'mo'za muse nehanageno, Saioni agonare'ma vu'za mono'ma ome hugante'naku'ma zamagesa are'are'ma nehaza vahe'mo'za muse hugahaze. <sup>6</sup> Hagi balsam zafamo'ma hu'nea Baka agupofima rugitagi'zama vanu'za, ana agupofinti'ma tima hanatiaza hu'za maka zana eri kasefa hugahaze. E'ina hanigeno ko'ma arania zamo'a, kerifina timo'a avitegahie. <sup>7</sup> Anama nevu'za ome hankavetime vu'za hanavenentake vahetami Ra Anumzamofo avuga Jerusalemi kumatera uhanatigahaze. <sup>8</sup> Ra Anumzana Hankavenentake Anumza Jekopu Anumzamoka nunamuni'a antahinamio. <sup>9</sup> Anumzana tagri hanko mani'nananki, masavema taginka frenentenka huhamprinte'nana kini ne'mofona kavuntenka negenka kegava hundo. <sup>10</sup> Magoke knama Kagri mono nompima mani'zamo'a, tauseni'a knama megi'ama mani'zana agatere'ne. Kefo avu'ava'ma nehaza vahe'mofo, nompima knare nomani'zama mani'zana atre'na, Anumzamoka nomofo kafante'ma mani'suana knare hugahie. <sup>11</sup> Na'ankure Ra Anumzamo tagrira kegava huneranteno masati mani'ne. Agra'a asunku hunezmanteno razmagia nezamie. Fatgo zamavu zamavama nehaza vahe'mokizmia knare zantamina azeori nezamie. <sup>12</sup> Monafi hankavenentake sondia vahe'mokizmi Ra Anumzamoka, kagrite'ma zamentintima nehaza vahe'mo'za muse hugahaze.

## 85

### *Anumzamoka tazeri kasefa huo hu'nea zagamere*

<sup>1</sup> Ra Anumzamoka mopaka'a azeri knare hu'nane. Kagra etenka Jekopu nagamofo fenozana erinte avitente'nane. <sup>2</sup> Kagra vaheka'amofo kefo avu'ava zana atre'nezmantenko, maka kumizmia refite zmante'nane. <sup>3</sup> Krimpa akama nehegenka azenerinka, krimpa ahezamo'ma tevenefra'ma nhigenka krimpa aheozmante'nananki azeri'nane. <sup>4</sup> Anumzana tagu'vazi

ne'moka krimpa aherantenka kea orasunka, ete tazeri knare huo. <sup>5</sup> Kagra krimpa aherante vava hunka vugahampi? Kagra vahetmima forehu anante nante'ma hu'za vanaza vhahera krimpa ahezmanategahampi? <sup>6</sup> Kagra ete tazeri kasefara hananketa, vaheka'amota kagrikura musena huta ovanuno? <sup>7</sup> Ra Anumzamoka vagaore kavesizana, taveri nehunka tagu'vazio. <sup>8</sup> Ra Anumzana Agra Anumzamo'ma haniankea nagra antahi soe hugahue. Na'ankure Agri kema antahiza amagema nentaza vhahera rimpia fru nezamie. Hagi ana atre'za neginagi zamavu'zmavara ete osiho. <sup>9</sup> Hagi Anumzamofoma koro'ma hunente'za agri agoragama nemaniza vhahera tamage huno zamagu vazigahie. Ana hanigeno tagri mopafina Agri masazamo'a avitegahie. <sup>10</sup> Vagaore avesizamo'ene tamage namekemo'enena eme tutagiba nehakeno, fatgo avu'avazane, arimpia fruzamo'enena eri mago hu'na'e. <sup>11</sup> Hugahuema hu'nea kema amage'ma anteno ana zama hu' avu'avazamo'a mopafinti hageno atiramigeno, fatgo avu'avazamo'a monafinkati ke fenkma atreno nege. <sup>12</sup> Ra Anumzamo'a knare'ma hu'nea zana tamisigeno ama mopafina nezamo'a amporesigeta vasagegahune. <sup>13</sup> Fatgo avu'avazamo'a vugota huno nevuno kama vania kana retro huno vugahie.

## 86

### *Anumzamoka vagaore kavesizamo'a rankrerfa hu'ne huno Deviti asunte'nea zagamere*

<sup>1</sup> Ra Anumzamoka kagesa antenka nunamu keni'a antahinka nona hunanto. Na'ankure nagrira kna nami'za nazeri haviza nehzage'na, maka zankura atupa nehu'na, naza hugara osu'noe. <sup>2</sup> Anumzamoka kegava nagrira hunanto. Na'ankure kagri kavariri fatgo nagra nehue. Kagrite'ma namentintima nehua Anumzanimoka eri'za vahekamo'na nagu'vazio. <sup>3</sup> Ra Anumzamoka kasunku hunanto, na'ankure maka kna kagritega nunamuna hvava nehue. <sup>4</sup> Ra Anumzamoka eri'za vahekamo'na nagu'afina muse'za antenanto, na'ankure kagritega nunamuna nehu'na monora hungegantoe. <sup>5</sup> Ra Anumzamoka kagra knare'zantfa hu'nanankinka kumizmia atrezmante'naku retro hu'nane. Zamazama hananegu'ma kagri'ma kantahigaza miko vahe'mokizmia vagaore kavesizanu ante avite'nezmantane. <sup>6</sup> Ra Anumzamoka kagesa antenka nunamu ke'n'a antahinamio. Kasuraginantenka nazama huogu'ma krafama nehua krafageni'a antahinamio. <sup>7</sup> Hazenke knafima ufrresuna kagritega nunamuna hanugenka, nunamu keni'a antahinamigahane. <sup>8</sup> Ra Anumzamoka kagrikna anumzana magore huno omani'ne. Kagrama nehana kna kagu'vazana mago'a anumzantmimo'za osugahaze. <sup>9</sup> Mika kokankoka vahe'ma tro'ma huzmante'nana vahe'mo'za Ra Anumzamoka kavuga e'za monora eme hungegante'za ruotge'ma hu'nea kagia ahentesga hugahaze. <sup>10</sup> Na'ankure kagra knarezantfa huno mareri agatere'nea kavu'kvaza erifore nehane. Kagrake'za Anumzana mani'nane. <sup>11</sup> Ra Anumzamoka kavukva zanka'a rempi hunamige'na, tamage nanekeka'a amage antena va'neno. Nagu'a nazeri agru huge'na, kagri kagigura koro hunte'na agorga mani'neno. <sup>12</sup> Ra Anumzana nagri Anumzamoka nagu'areti hu'na susu hunegante'na, zagamera hu'ha kagia ahentesga hugahue. Kagi'a ahentesga hvava hu'ha vugahue. <sup>13</sup> Na'ankure Kagrama navesi'nantenka knare'ma hunenan-tana zamo'a rankrerfa hu'ne. Kagra fri vahe kumapinti nagu'vazi'nane. <sup>14</sup> Hazenke vahe'mo'za ha'renentaze. Vahe'ma zamahe'za zamazeri havizama nehaza vahe'mo'za nahe fri'za nehu'za, Kagririra kagefenkami atre'za

kage amneza nehaze. <sup>15</sup> Hianagi Ra Anumzana kagra keke nehunka ka-sunku hu Anumza mani'nanankino, vagaore kavesizanu knare hunerantenka, ame hunka krimpa ahenorantenka, kema hu'nana kema avaririnka ana zama hu kavukva zamo'a kagripina avite'ne. <sup>16</sup> Ra Anumzamoka kavugosa hunaminka, kasunku hunanto. Eri'za vaheka'amofona han-kavea neminka, eri'zama erinegantea a'mofo nemofona agu'vazio. <sup>17</sup> Ra Anumzamoka nagri'ma navesi nenantana zamofo avame'zana naveri huo. E'ina hugeno zamavaresrama hunentaza vahe'mo'za nege'za zamagaze-gura hugahaze. Na'ankure Ra Anumzamoka knarerera hunenantenka naza nehane.

## 87

### *Ra Anumzamoka vagaore kavesizamo'a rankrerva hu'ne hu'nea zagamere*

<sup>1</sup> Ruotge agonarera Ra Anumzamo'ma tro'ma hu'nea rankumara me'ne. <sup>2</sup> Agra mago'a rankuma'ma Israeli mopafima me'nea rankumatmima avesima nenteama'a agatereno Jerusalemi rankumara avesinente. <sup>3</sup> Anumzamofo rankuma'mokagura vahe'mo'za hentofo kege hunegantaze. <sup>4</sup> Nagri'ma ke'za antahi'zama hu'naza vahe'ma antahima nezamisuna, Isipi vahe'ma Babiloni vahe'enena zamagia ahentesgahue. Filistiane Tairi kuma'ene Itiopia kuma'enena ana zanke hu'na zamagia ahentesgahue. Ana maka'mo'za Jerusalemi kumapi vahe ase'za manigahaze! <sup>5</sup> Ana hugahianagi Jerusalemi kumapima nemaniza vahekura amanage hugahie, maka Jerusalemi kumapima fore'ma huta nemaniza vahe'mota, muse huta knare nomani'zante nemanisageno, Marerirfa Anumzamo'a ana rankumara Agra' eri hanavetisigeno meno vugahie. <sup>6</sup> Ra Anumzamo'ma vahe zamagima kreno evanuno'a Agra amanage hugahie, zamagra Jerusalemi kumapi kasezmanteg'e'za, zamagra ana kumapi vahe mani'naze huno hugahie. <sup>7</sup> Zgame nehaza vahe'mo'zane konkema neraza vahe'mo'zanena amanage hu'za zagamera hugahaze, Tagrama musema nehuna zamo'a, Jerusalemi kumapinti ne-e, hu'za hugahaze.

## 88

### *Feru'ene kenage'enena Kagri kavuga krafagea nehue hu'nea zagamere*

<sup>1</sup> Ra Anumzana naza nehunka nagu'ma nevazina Anumzanimoka, masare'ene haninenaga Kagri kavuga nunamuna nehue. <sup>2</sup> Nunamuma nehua nunamu keni'a nentahinka, naza huogu'ma krafagema nehuana antahinaminka naza huo. <sup>3</sup> Na'ankure nomanizanifina hazenke zamo'a avineteno, navareno fri vahe kuma tava'onte nevie. <sup>4</sup> Fri'zage'zama matipima ome asenezmantaza vahekna hu'noe. Nagra hanaveni'a omane vahe kna hu'noe. <sup>5</sup> Zamagra fri vahe amu'nompi natrazage'na, fri' vahe'ma matipima asen-tegeno'ma maseankna hu'na mase'noe. Ana hugenka Kagra kazana antenka kegava huonante natranke'na haviza hu'noe. <sup>6</sup> Kagra amefenkame tami'nea kerimofona aro'are, hanintirima hu'nefi natre'nane. <sup>7</sup> Krimpama ahezamo'a narentrako huno urami'ne. Hagerimo'ma hiaza hunka rug-nafu knafu hunka naherava he'nane. <sup>8</sup> Roneni'aramina nagritetira re-natitranke'za vu'za e'za nehu'za zamago atenante'haze. Nagra frekan'i'a omanege'na krifu ahente'na manue. <sup>9</sup> Knazama eri'na zavi'ma atoazamo'a, navunumo'a navua resuhie. Mago mago knafina Ra Anumzamokama nazama hanankura kantahinegoe. Kasunku'ma hunantenka nazama hanankura kagritega nazana erisga nehue. <sup>10</sup> Kagra kagu'vazana hunka

fri'nea vahera aza nehampi? Fri'naza vahe'mo'za fri'nazafintira ot'i'za zagamera hu'za kagia ahentesga hugahazafi? <sup>11</sup> Frizage'zama matipima asezmante'naza vahe'mo'za vagaore kavesizanka'agu huamara hugahazafi? Huge keka'ama avaririnka hugahuema hu'nana zama nehana kavukva zankura keonke zamo'ma havizama hu'nefina huama hugahazafi? <sup>12</sup> Kaguvazama zama hu'nana zantamina hanimpina ke'za antahi'za hugahazafi? Hifi frizage'za vahe'mo'zama zamage'ma akanizmantaza vahe'mo'za fatgo kavukva zankura keaga huge antahigamige hugahazafi? <sup>13</sup> Hianagi Ra Anumzamoka naza huogu kagritega krafagea nehue. Maka nantereran kagritega nunamuna nehue. <sup>14</sup> Ra Anumzamoka nahigenka nenatrenka, kavugosa rukrahera hunka kamefira hunenamine? <sup>15</sup> Osi'ma mani'noregati'ma knazama eri'na e'noa zamo'a, kri eri'na fri'za hue. Kagra nazeri koro'ma hu'zanke hanke'na, rama'a knazampi mani'na oe. <sup>16</sup> Krimpa ahe'zamo'a ti hageankna huno narefi netegeno, nazeri namanoma vazina zamo'a nazeri haviza nehie. <sup>17</sup> Nanteranteti'ma agafama huteno tima hageno refite'nanteankna huno korozamo'a narefite'ne. <sup>18</sup> Ronenine navesimanentoa vahetaminena nagripintira zamavare hana hu'nane. Ana han-keno hanimo'a, nagri arone ase'ne.

## 89

### *Ra Anumzamofo vagaore avesizama'agu Etani hu'nea zagamere*

<sup>1</sup> Ra Anumzamofo vagaore avesizama'agura nagra zagamera huvava hugahue. Hugahuema hu'nana kema avaririnkama hu kavukvazana huama nehanuge'za, forehu anante anante'ma hanaza vahe'mo'za antahigahaze. <sup>2</sup> Na'ankure nagra amanage hu'na huama hugahue, Ra Anumzamoka vagaore kavesizamo'a mevava huno vugahie. Hugahuema hunana kema avaririnkama hu kavukvazamo'a monamo'ma nehiaza huno mevava hugahie. <sup>3</sup> Ra Anumzamoka hunka, Nagrama huhamprinte'noa eri'za ne' Deviti'ene huhagerafi huvempagea nehu'na, agri'ene huvemps kea hu'noe. <sup>4</sup> Devitiga kagripinti'ma fore'ma hu anante anante'ma hu'za vanaza vahepintinke, kini vahera zamazeri fore huvava hu'na vugahue hunka hu'nane. <sup>5</sup> Ra Anumzamoka monamo'za knare huno mareri agatere kavukva zanka'a husga hunegantesage'za, hugahuema hu'nana ke'ma avaririnkama hu kavukvazana, atruma hu'za mani'saza ankero vahe'mo'za husga hugahaze. <sup>6</sup> Iza monafima nemanizafintira Ra Anumzanknara hu'ne? Monafima mani'nea hanavenentake ankeromo'a Kagri knara osu'ne. <sup>7</sup> Marerirfa ankero vahe'mo'za, Anumzamofonkura kesga hu'za koro hunentaze. Anumzamo'a Agri'ma tra'are'ma manigagint'e'zama ankeri vahetmina, zamagatereno mareri agatere'nea Anumza mani'ne. <sup>8</sup> Ra Anumzana Monafinka Sondia vahe'mofo Anumza mani'nane! Kagrikna hankave Anumzana omani'ne. Ra Anumzamoka kagra hankavenentake Anumza mani'enka, hugahuema hu'nana kema avaririnkama hu kavukvazamo'a kazeri kagi'ne. <sup>9</sup> Kagra knafu knafu'ma nehia hagerina kegava hu'nane. Hagerimo'ma knafu knafu'ma higenka, Kagra zam Maherava ne-hane. <sup>10</sup> Rehapu'e hu'zama nehaza tusi'a osifave krerfama hagerimpima nemania osifavea, Kagra asenia rupraro vazinka ahe'nane. Hankavenentake kazaruti ha' vaheka'a zamahe panani hu'nane. <sup>11</sup> Ra Anumzamoka mona kagri su'a megeno, mopa kagri su'a me'ne. Hagi maka ama mopafima me'nea zantamina maka kagrike zantmi me'neankinka, kagrade tro huzmant'e'ne. <sup>12</sup> Kagrake'za noti kazigama me'nea zantamina tro

nehunka, sauti kazigama me'nea zantamina tro hu'nane. Tabori agonane Hemoni agonianemokea musena nehuke, zagamera huke kagia ahentesga neha'e. <sup>13</sup> Anumzamoka kazamofona hihamu hanave'amo'a agatere'ne. Kazamo'a tusiza huno hanavenentake hu'ne. Tamaga kaziga kazamo'a mareri agatereno hankavenentake hu'ne. <sup>14</sup> Fatgo avu'avazane, maka zama fatgoma huno'ma refkohu avu'avazamokea kinima mani'nana traka'amofo tra me'na'e. Vagaore kavesizamo'ene tamage nanekekamo'enena kavuga neva'e. <sup>15</sup> Ra Anumzamofoma mono'ma hunente'za muse zagame'ma nehaza vahe'mo'za muse hugahaze. Na'ankure zamagra Ra Anumzamofona Agri masa zampi vano nehaze. <sup>16</sup> Kagri kagirera nanteranteti agafa hu'za musena nehazageno, vuno kinaga omese'ne. Fatgo kavukva zanka'amo'a zamagrira zamazeri muse nehie. <sup>17</sup> Kagra masanentake hihamu hankavezmi mani'nane. Na'ankure kagra muse hurantenka hankavea neraminketa, tagra hankavenentakera nehune. <sup>18</sup> Ra Anumzantimoka Kagra tagri hanko mani'nane. Israeli vahe'mofo Ruotge'ma hu'nea Ne'mo'a Agra kinia tami'ne. (2 Samuel 7:8-16) <sup>19</sup> Korapara Kagri'ma kazigazima hu'za negavariri'za tagehemofona, ava'nafi nanekeea amanage hunka zamasami'name, Nagra hankavenentake sondia azeri oti'noe. Nagra amne vahepinti vahetmimofo kini manigahane hu'na huhamprinte'noe. <sup>20</sup> Nagra eri'za vahe'ni'a Deviti hakena erifore hu'noe. Nagra ruotge masave anumpina taginte'na, azeri ruotge hunte'noe. <sup>21</sup> Nagra nazanu hagaza nemi'na, hihamu'ane nazanu azeri hankavetigahue. <sup>22</sup> Ha' vahe'mo'za revatga osuge, kefo avu'ava'ma nehaza vahe'mo'za azeri fenkamia otregahaze. <sup>23</sup> Agri avuga ha' vahe'aramina zamahe'na rehapatinetre'na, zamawaresrama hunentaza vhahera zamahehna hugahue. <sup>24</sup> Nagra avesinte vava nehu'na, agrane mani'nenugeno nagri nagifinti hankavea erino ome hankavetigahie. <sup>25</sup> Hihamu amisugeno Mediterenia hagerinteti vuno, zage hanati kaziga Yufretis tirantema uhanati'nea mopa kegava hugahie. <sup>26</sup> Ana hanugenyo Nagrikura amanage hugahie, Kagra Nenfaga mani'enka, nagri Anumza mani'nanankinka, nagri naguvazi Have mani'nane huno hugahie. <sup>27</sup> Nagra azeri nagonesa mofavre sa'nena, maka ama mopa-fina hankavenentake kini ne' fore huno manigahie. <sup>28</sup> Nagra vagaore navesizanu, navesinte vava hu'na nevuna, huhagerafi hvempa ke'ni'a eri tamage hugahue. <sup>29</sup> Agripinti'ma fore hu anante anante'ma hu'za vanaza vhahera kegava huzmante'nanena, kini tra'amo'a monagna huno mevava huno vugahie. <sup>30</sup> Hianagi agripinti fore hu anante anantema hanaza vahe'mo'zama nagri kene kasegenema novaririza, kasegeni'a novarisaza, <sup>31</sup> tra keni'a ruhanetag'i'za, kasegenima ovaririnazana, <sup>32</sup> Nagra ana kumizmirera sefu nezmi'na, ke'nima rutrage'narera knazana zami-gahue. <sup>33</sup> Hianagi Nagra navesinte vava nehu'na, agri'enema hvempama hu'noa keni'a ruha'ontagigahue. <sup>34</sup> Huge huhagerafi'noa keni'a ruha'ontagigae, magore hu'na kema hu'noa kea ete'na eri otregahue. <sup>35</sup> Nagra ruotge hu'nea hvempage Devitina hunte'noankina, havigea osugahue. <sup>36</sup> Deviti nagapintike kini vhahera manivava hu'za vanageno, kini tra'amo'a zagemo'ma nehiaza huno mevava huno vugahie. <sup>37</sup> Ikamo'ma monafima me'nemoma, huama'ma huno neviaza huno, tra'amo'a mevava huno vugahie. <sup>38</sup> Hianagi menina kavresra hunentenka kamefi humine. Masavema anumpima tagintenka kinima azeri oti'nana nera krimpa ahentane. <sup>39</sup> Eri'za vaheka'anema huhagerafi'nana hvempa kea kamefi huneminka, kini fectori'a kugusopafi zafitre'nane. <sup>40</sup> Agu'ma nevazia kuma have keginaram-

ina, maka ahe fragu vazinetrenka, fraki kuma'a eri haviza hutre'nane. <sup>41</sup> Maka vahe'ma ana kante'ma enevaza vahe'mo'za arohure'za keonke zama'a eri hana nehzageno, tavaoma'arema nemaniza kini ne'mofona kizazokago ke hunte'haze. <sup>42</sup> Ha' vahe'aramina hankave zaminke'za hara hugate'nere'za, musenkase nehaze. <sup>43</sup> Ha'ma nehia bainati kazinknoma'a eri amnezankna nehunka, ha'ma nehigenka kamefi huminka aza osu'nane. <sup>44</sup> Kagra marerirfa konariri'a eri netrenka, kini tra'a mopafi eri akaha hutre'nane. <sup>45</sup> Kagra ame hunka zahufaf iazeri ozafa nerenga, azeri agaze hu'nane. <sup>46</sup> Ra Anumzamoka nama'agna fraki vava hunka vugahane? Krimpa ahe'zamo'a nama'gna teveareno vugahie? <sup>47</sup> Kagesa antahio, nagra zazatera mani'na ovugahue. Vahe'ma tro'ma hurante'nanana, amne'za mani'none. <sup>48</sup> Mago'mo'e huno mani vava huno ovugahianki, maka frisuna vahake mani'none. Mago'mo'e huno fri'zana agatereno fregara osu'nene. <sup>49</sup> Ra Anumzamoka iga vagaore kavesizana me'negenka anara nehane? Kagra huempama Deviti'ma hunentenka, kavesinte vava hugahue hu'nane. <sup>50</sup> Ra Anumzamoka eri'za vaheka'amo'na huhavizama hunenantazana antahio. Rama'a vahe'mo'zama huhavizama hunenantaza kea nagu'afi erinte'na vano nehue. <sup>51</sup> Ra Anumzamoka ha' vahekamo'za kizazokago ke hunenantaze. Anumpima masavema tagintenka kinima azeri ot'i'nana nera, vuno eno'ma hirega hunte'za ki'za zokago ke hunentaze. <sup>52</sup> Ra Anumzana ragi amivava hugahune. Tamage, tamage.

## 90

### *Namba 4 zagame avontafere*

#### *Anumzamofo vahe'mo Mosese hu'nea nunamune*

<sup>1</sup> Ra Anumzamoka fore hu anante anante huno'ma e'nea vahepina, kagra kumati'gna hunka maninka e'nane. <sup>2</sup> Agonaramina forera osu'negeno, ama mopane kokanema tro'ma osu'nenka, ko maninka e'nana Anumzankinka eseteti'ma agafama huno atupare'ma uhanati'neana Kagrake'za Anumzana mani'nane. <sup>3</sup> Vahera zamazeri rukrahe hanke'za ete kugusopafi nevazagenka amanage nehane, tamagra fri vahe mani'nazanki, ete frita kugusopa seho hunka nehane. <sup>4</sup> Na'ankure 1 tauseni'a kafumo'a, kagri kavurera amneza me'neankino, mago knamo'a sondia vahe'mo'ma kenage'ma kvama krino mani'negeno ame huno eviankna hu'ne. <sup>5</sup> Avanama ke'nea zamo'ma vahe antahintahifinti'ma ame huno fanane hiankna hunka vahera ahe nefrine. Vahe'mo'za nanterama trazama hageno mareriankna nehaze. <sup>6</sup> Nanterana tra'zamo'a amosrea aheten, kinagama segeno'a hagege nehie. <sup>7</sup> Ra Anumzamoka krimpama aherantanketa hagege nehuta, kasima vazinerantanketa, tagra tusi tagogogu nehune. <sup>8</sup> Ra Anumzamoka kumitia kavuga eri fanara huntankeno, oku'a nehu'na kumitimo'enena kagri masare amate me'negenka negane. <sup>9</sup> Tagra maka kna kagri krimpa hezampi manita nevuta, tasimu'ma anteankna huta ame huta fanane nehune. <sup>10</sup> Kafuma manita vanuna kafua, 70'a kafu tami'nane. Hanki tavufgamo'ma knare'ma huno me'nigeta, amne 80'a kafuzagea manigahune. Hianagi knare kafuma manita vanumpinga, tatazamo'ene hazenke zamo'enena aviteno nevanigeno, kafu zagetimo'a ame huno evanigeta fanane hugahune. <sup>11</sup> Krimpa ahe'zamofo hihamu'a, iza mago vahe'mo'a antahino keno hu'ne? Na'ankure krimpa ahe'zamo'a, rankrerfa hu'neanki'za kagoro hugantega vahe korora hunegantaze. <sup>12</sup> E'ina hu'negu manitama

vanuna kna'a rempi huramigeta knare antahi'zana enerita manita vam-neno. <sup>13</sup> Ra Anumzamoka ete tagritega eno. Hago zazate krimpa ahez-mantenka avega antenka ananki, eri'za vaheka'aramina kasunku huz-manto. <sup>14</sup> Maka nanterana vagaore kavesizanteti tazeri knare hugeta, maka knama manita vanunana, musena nehuta zagamera huta musena huvava hamneno. <sup>15</sup> Tazeri havizama hunka e'nana avamente, ete tazeri muse huo. Hazenkefima manitama e'nona kafumofo avamente tazeri muse huo. <sup>16</sup> Ra Anumzamoka eri'za vahekamota ranra zama tro'ma hu'nana zana taveri hananketa negesunkenka, anahu kna hunka hihamu masaka'a mofavre nagatimofona eriama hananke'za kegahaze. <sup>17</sup> Ra Anumzana tagri Anumzamoka kavesizamo'a tagri'ene me'neno, maka zama hanunana eri knare nehinketa, maka zampina knare hanune.

## 91

### *Anumzamofonte'ma zamentintima nehaza vahe'mofo zagamere*

<sup>1</sup> Hagi iza'o marerisa Anumzamofo hankavefima ome frakino manisia vhahera, Hankavenentake Anumzamo refitetenigeno ana tonapinka manigahie. <sup>2</sup> Hagi nagra Ra Anumzamofonkura amanage hu'na huama hugahue. Ra Anumzamo'a nagrama frakisaua kuma'ene, nagu'vazisania kuma mani'neno, nagri Anumza mani'neanki'na agrite namentintia hugahue. <sup>3</sup> Na'ankure Anumzamo'a kva hugante'neankino, katre'nigeno vahe'mo'zama krifuma anaginte'naza krifumo'a kaze'orisigeno, vahe'ma ahe nefria krimo'a kazeri havizana osugahie. <sup>4</sup> Ageko'nafi kavre frakinkenka mani'nesnankeno, agekona'anu refitegantegahie. Anumzamofona vagaore huvempa ke'amo'a, hankone hankave vihugna hu'neankino kegava hugahie. <sup>5</sup> Kenage'ma kamano vazi'zama fore'ma hania zankura korora osuo. Ana nehunka masare'ma kevemo'ma ame huno eno kazeri havizama huzanku'enena korora osuo. <sup>6</sup> Ana zanke hunka kenage'ma rankrima esania zanku'enena korora nosunka, hazenke zamo'ma eno masare'ma eme kazeri haviza hunaku'ma hania zanku'enena korora osuo. <sup>7</sup> Hagi kagri tva'ontera 1tauseni'a vahe nefrisanigeno, kazantamaga kaziga 10 tauseni'a vahe frigahaze. Hianagi ana zamo'a kagritera erava'o osugahie. <sup>8</sup> Kagra kavufinti negesnankeno, havi zamavu zamava'ma hu'naza vhahera Anumzamo'a zamazeri haviza hugahie. <sup>9</sup> Hagi kagra Ra Anumzamofoma fraki kumaka'a eri nesenka, Marerisa Anumzamofoma, kagu'vazi kumaka'ama eri sesanana, <sup>10</sup> magore huno havi zamo'a kazeri havizana nosanigeno, mago krimo'a kagrama manisana nonku'ma ka'arerar erava'o osugahie. <sup>11</sup> Na'ankure inantego vunka enkama hananana, Ra Anumzamo'a ankeru vahe'a huzmante'na e'za, maka kama vanoma hanampina eme kegava hugantegahaze. <sup>12</sup> Ana nehu'za zamazanu kavresga hanageno, havemo'a kagiafina oregahie. <sup>13</sup> Laionine osifa'venena zanazeri fenkami netrenka, hankave laionine ha' osifa'venena (cobra) kagiaifi zanazerintenka zanare hapatigahane. <sup>14</sup> Ra Anumzamo'a huno agrama avesi nenantegu hu'na, agrira agu'nevazi'na, Nagri nagima keno antahino'ma hu'negu hu'na, kegava huntegahue. <sup>15</sup> Hagi nagritegama nunamunke'ma hanige'na, agrri nunamua antahimigahue. Ana nehu'na knafima mani'nesige'na, agrane magoka manine'na, aza nehu'na ra agi amigahue. <sup>16</sup> Ana nehu'na mizama'ama amisanuana, kna'a erinte za'za hanugenno muse huno nemanisige'na, Nagra vahe'ma agu'ma nevazua hanaveni'a eri averi hugahue.

## 92

### *Manifruhu kna Sabati knare'ma hanaza zagamere*

<sup>1</sup> Ra Anumzamoka susu huno humusema hugante zamo'a knare'zantfa hu'neanki'na, Marerisa Anumzamoka zagame hu'na kagi'a ahentesga hugahue. <sup>2</sup> Anumzamoka maka yupama tagri'ma kavesirantenka knare'ma hunerantana zankura nanterana huama nehu'na, maka yupama kage'ma kaninorantana zankura kinaga huama nehu'na, <sup>3</sup> Laeriema nehaza zavenareti'ene, hapureti'ene zavena nehe'na, zagamera hu'na kagia ahentesga hugahue. <sup>4</sup> Ra Anumzamoka Kagrama eri'nana eri'zanu nazeri muse hankena, Kagrama kazanu'ma tro hunka eri fore'ma hu'nana zankura zagamera hu'na musena nehue. <sup>5</sup> Ra Anumzamoka kagra ra eri'za eri'nanankino, Kagri antahi'zamo'a rankrerfa huno amefenkame tam'i'ne. <sup>6</sup> Antahintahima oma'ne vahe'mo'a ana zana keamara nosigeno, neginagima nehia vahe'mo'a ana zana antahiamara nosie. <sup>7</sup> Havi avu'ava zama nehaza vahe'mo'za, trazamo rehakarufeno mareriazza hu'za nehagesage'za, kefo avu'ava zama nehaza vahe'mo'za amosrema ahenteaza hu'za makazana antegahazanagi, kagra zamahe fanene hugahane. <sup>8</sup> Na'ankure Ra Anumzamoka kagi'a ahentesga hu vava hu'za vugahaze. <sup>9</sup> Ra Anumzamoka kagri ha' vahe'mo'za tamagerfa hu'za fanane nehanage'za, havi zamavu zamava'ma nehaza vahe'mo'za miko panani hu'za ufre efre hugahaze. <sup>10</sup> Hianagi afi bulimakaomofo pazivemo'ma hankavematiaza hunka, nagrira nazeri hankave ti'nane. Ana nehunka kasefa masavereti taginka nanuntera frenantanke'na musena hu'noe. <sup>11</sup> Nagra navufinti nezmagoge'za ha'vahenimo'za evu neramizageno, kefo avu'ava'ma nehaza vahe'mo'zama, ha'ma renenantaza vahe'ma, ha'ma huzmagaterazageno zavi krafama haza zana antahi'noe. <sup>12</sup> Hianagi fatgo avu'ava'ma nehaza vahe'mo'za, tofe zafamo knare zantfa huno hageno mareriankna nehu'za, sida zafamo Lebanoni mopafi hageno tretre huno mareriankna hugahaze. <sup>13</sup> Zamagra Ra Anumzamofo nompi hankre'naza zafagna nehu'za, tagri Anumzamofo kumapina zamagra knare'zantfa hu'za tretre hu'za hagegahaze. <sup>14</sup> Fatgo vahe'mo'za tavava ozafa regahazanagi raga renente'za, zafa asi'namo tretre huno kasefa kasefa nehiaza hu'za manigahaze. <sup>15</sup> Ana vahe'mo'za huama hu'za, Ra Anumzamo'a fatgo avu'ava'za nehia nekino, Agra hankave havetia mani'neankino Agripina havi avu'ava zana omne'ne hu'za hugahaze.

## 93

### *Anumzamo'a kini mani'ne hu'nea zagamere*

<sup>1</sup> Ra Anumzamo'a Agrake kinia mani'neno masanentake zaza kukena hu'ne. Hanave'areti kukena hu'neno hahunaku retro huno mani'ne. Ama mopa tro huntogeno hankavetino me'neankino, mago vahemo'e huno eri kazara osutfa hugahie. <sup>2</sup> Ra Anumzamoka kagra maka zana forera osu'negenka korapa mani'nanankinka, kinia mani vava hunka neane. <sup>3</sup> Ra Anumzamoka hagerimo'a tusiza huno kranto kranto nehigeno, monagemo'ma hiaza huno timo'a ra agasasa nerie. Ana nehigeno hagerimo'a hanavetino kranto krantora nehie. <sup>4</sup> Ra Anumzamofo hanavemo'a hagerimo'ma eme runagrama neseno'ma, agasasama neriam'a agetereno tusi hankavenentake higeno, rama'a tintamimofo agasasankenena agatere'ne.

**5** Anumzamoka'ma ante'nana kasegea mago vahe'mo'a eri otregahie. Tamagerfa huno Ra Anumzamoka Kagri mono nonkamo'a ruotge huno mevava hugahie.

## 94

*Anumzamo'ma havi vahe'ma azeri haviza nehuno knare vahe'ma azeri so'ema hania zagamere*

**1** Ra Anumzamoka kagri'ma ha'ma renegantaza vahera, kagra nona hunka zamazeri haviza nehana Anumza mani'nane. Ana hu'nananki krimpa ahe'zana eriama huge'za keho. **2** Ama mopafima mani'ne'za zamavufaga rama nehaza vahera, otinka keaga huzmantenka refko hunezmantenka mizana zamio. **3** Ra Anumzamoka nama'agna kefo zamavu zamava'ma nehaza vahe'mokizmia zamatre'nanke'za musena huza maniza egahaze? Nama'a knazami me'ne? **4** Nama'a zupa kefo zamavu zamava'ma nehaza vahe'mo'za havigea nehu'za, kefo avu'ava'ma nehaza nama'a zupa zamavufaga erisga hu nankeea nehaze? **5** Ra Anumzamoka ana vahe'mo'za kagri vahera zamare hapa'neti'za, Nagri vaherema hunka erisantima hare'nana vahera zamazeri haviza nehaze. **6** Ana vahe'mo'za kento a'nene megusa mofavre nagara zamahe nefri'za, ru mopareti'ma tagri mopafima emani'naza vahe'enena zamahe nefrize. **7** Ana vahe'mo'za hu'za Ra Anumzamo'a avua norage hu'za nehu'za, Jekopu naga'mo'za tagrama hu'na zantera Ra Anumzamo'a avua anteno norage hu'za nehaze. **8** Tamagra neginagi nehuta keontahi vahe mani'nazanki kama antahihi, ina zupa ama' antahi'zana erigahaze? **9** Vahe'motama tagesama tro hunt'nea Anumzamofona agesa ankani re'nefi? Vahe'mota tavuragama tro hunt'nea Anumzamofona, avua asuhu'nefi? **10** Ama mopafi vahe'ma knama zamino zamazeri fatgoma nehia Anumzamo'a, zamavumrora anteno zamazeri fatgoa osugahifi? Ama mopafi vahe'ma rempi hunezamia Anumzamo'a antahi'zankura atupa hu'nefi? **11** Ra Anumzamo'a vahe'mokizmi antahi'zama keno antahino'ma hiana, ana antahintahizmimo'a amnezankna huno zahoma huhu hutreankna hu'ne. **12** Ra Anumzamokama azeri fatgoma nehunka kasege ka'afinti'ma rempima hunemina vahe'mo'a asomu erigahie. **13** Ana vahemo'ma knafima unefregenk, kegava hunentenka arimpa fru neminka, kefo avu'ava'ma nehia vahe'mofo keria Anumzamoka kagra kafintenenka azerigahane. **14** Na'ankure Ra Anumzamo'a vahe'a amefira hunozamino, nagri nagare huno huhampari zamante'nea vahe'agino ozamatregahie. **15** Keagama refko'ma hanazana, fatgo avu'ava zante nege'za refko hugahaze. Ana nehanage'za fatgo avu'ava'ma nehaza vahe'mo'zama nege'za amage antegahaze. **16** Hagi kefo avu'ava'ma nehaza vahe'mo'zama nazeri havizama nehanageno'a, iza nagritega anteno nagura nevazzino, havi avu'ava'ma nehaza vahe'mo'zama nazeri haviza hu'zama nehanageno'a naza hugahie? **17** Hagi Ra Anumzamo'ma naza osiresina, nagra ko fri'na keonke zamofo agasasankema omne fri vahe kumapi umanusine. **18** Nagrama hu'na regarari'na umasoema hugenka, Ra Anumzamoka vagaore kavesi zanteti knare hunantenka nazerisga hu'nane. **19** Narimpagna zamo'ma nazeri havizama hunaku'ma nehigenka, Kagra nazeri fru hunka nazeri hankavetinke'na, muse hu'noe. **20** Fatgo avu'ava zama nosu'za, havi kasegema nente'za, vahe'ma zamaza hazage'zama kumi'ma nehaza kva vahe'mo'za Kagranena taragote'za nomanize. **21** Ana vahe'mo'za magopi atru hu'za kea anakite'za, fatgo avu'ava zama nehaza vahera zamahe

frikea hu'za kna nezami'za, ke'zami omane vahera zamahe frinaku ne-haze. <sup>22</sup> Hianagi Ra Anumzamo'a nagri vihuni'agino kegava hunantegahie. Anumzanimo'a nagrama frakinu havega mani'ne. <sup>23</sup> Kefo avu'ava'ma nehaza vahe'mo'zama hu'naza kumira erino zamagri zamagumpi nenteno, ana kumi zamigu huno zamazeri havizana hugahie. Ra Anumzana tagri Anumzamo ana vahera zamazeri havizana hugahie.

## 95

### *Anumzamofo agima erisgama hanaza zagamere*

<sup>1</sup> Enketa Ra Anumzamofona muse zagame huta agi'a ahentsga nehuta, tagu'ma nevazia Havegi Ra Anumzamofona ranke huta agi'a ahentesga hanune. <sup>2</sup> Enketa Agri avuga vuta susu hunenteta, muse zagame huta agi'a ahentesga hamnenno. <sup>3</sup> Na'ankure Ra Anumzamo'a marerisa Anumza mani'neno, maka havi anumzantamina zamagatereno, ugota Kini mani'ne. <sup>4</sup> Ama mopafima kerima huno ame fenkame'ma urami'neregati'ma vuno, ame'nagame marerigatere'nea agonaregama vu'neana, ana maka Anumzamofo azampi me'ne. <sup>5</sup> Hagerina Anumzamo tro hu'negu huno, Agri suza me'ne. Ana zanke huno ho'mu mopa azanuti tro hu'ne. <sup>6</sup> Enketa kepri huta mono hunenteta, Ra Anumo'ma tagri'ma tro'ma hurante'nea ne' avuga tarena reta monora huntesune. <sup>7</sup> Na'ankure Agra tagri Anumza mani'neankino, sipisipi afu'tamima kegavama nehiaza huno kegava hurantegeta, Agri azampi mani'none. Ana hu'neanki, meninena tamagesa ante'neta Agri agerura antahihi. <sup>8</sup> Ra Anumzamo huno, Israeli vahe'mo'zama hagege kokampima ne-eza, Meriba kumaku'ma Masa kumarema nehaza kumatema, zamagu'a kafama erigi'naza zana huta tamagu'a kafana eri onkiho. <sup>9</sup> Hagi tamagehe'moza hagege kokampima manine'za, maka zama eri fore'ma hua zana ko ke'nazaragi, Nagri hanave kenaku renahe'za ke'naze. <sup>10</sup> Hagi 40'a kafumofo agu'afina nagote nezmanente amanage hu'nua hu'noe, ama vahe'mo'za kana atre'za hazanegre'za, nagrama hihoma hu'na huzmantoa nanekea amagera nontaze. <sup>11</sup> Ana'ma hu'nazagu hu'na tusi narimpa ahenezmante'na, amanage hu'na huvempa hu'noe. Nagrama huama hu'na, tamisugetama ome mani fru hugahazema hu'noa mopafina uofretfa hugahaze (Hibru 4:3).

## 96

### *Anumzamo'ma so'e avu'ava'ma hunezmantea zagamere*

<sup>1</sup> Tamagra Ra Anumzamofona kasefa zagame hunteho. Maka ama mopafima mani'naza vahe'mota Ra Anumzamofona zagame hunteho. <sup>2</sup> Ra Anumzamofona zagame hunenteta, agi'a ahentesga hiho. Ana ne-huta vahe'ma zamagu vazino etema nezamavarea zankura, maka knafina huama huta vahera zamasamaho. <sup>3</sup> Agri hihamu masazama'agura kokankoka vahera huama huta nezamasamita, hanavenentake eri'zama eri'nea zankura, huama huta maka vahera zamasamaho. <sup>4</sup> Ra Anumzamo'a maka zana agatereno tusi'a Anumza mani'neankino, Agrake ra agi'a erigahie. Maka havi anumzana zamagatere'neankita, Agrikuke'za korora huntegahune. <sup>5</sup> Na'ankure maka ama mopafima mani'naza vahe'mokizmi havi anumzantamina, amne zamazanteti tro hu'naza zantami me'naze. Hianagi anamifima me'nea monaramina, Ra Anumzamo agra'a tro hunte'ne. <sup>6</sup> Ra Anumzamo'a noma'afina ragi erino kinia mani'negeno, agri hihamune masa'amo'ene konariri'amo'enena noma'afina avite'ne. <sup>7</sup> Ama mopafima

kokankokama mani'naza vahe'mota, Ra Anumzamofona husga hunenteta, agri hihamu masa zama'agueneña husga huntaho. <sup>8</sup> Ra Anumzamo'a agrake ra agia erigara hu'neanki agi'a erisga nehuta, ofatamia erineta, agri mono nompina ufreho. <sup>9</sup> Ra Anumzamofona ruotage huno masa nentake'ma hu'nea avasase zama'afi mani'neta monora huntaho. Maka ama mopafima mani'naza vahe'mota, agri avure mani'neta, kore hunenteta, tamahirahiku hiho. <sup>10</sup> Ama mopafima kokankokama mani'naza vahe'mokizmia zamasamita, Ra Anumzamo'a kini mani'né huta hiho! Ama mopa tro huntogeno hankavetino me'neankino, mago zamo'a eri kazara osugahie. Agra ana nehuno maka ama mopafima mani'naza vahera, mago avamenteke refko huzmantegahie. <sup>11</sup> Monane mopamokanena muse nehinkeno, hagerimokane tigu'ama me'nea zantami motanena, ranke huta Ra Anumzamofona husga huntaho. <sup>12</sup> Hozamokane hoza fima ne-hagaza ne'zamota, avo nehageta musenkase hiho. Ana nehanageta zafa ta'nopafima me'nea zafamota ranke huta muse zagamera hiho. <sup>13</sup> Na'ankure Ra Anumzamo'ma esaniana, ama mopafima mani'naza vahe eme refko huzmanteku egahianki, agri avuga ana zana hugahaze. Ama mopafi vahe'ma eme refko huzmantesiana, fatgo avu'ava zanteti'ene, ke tamage'areti'ene huno eme refko huzmantegahie.

## 97

### *Anumzamo ugota kini mani'nea hu'nea zagamere*

<sup>1</sup> Ra Anumzamo'a kini mani'neno maka zana kegava hu'ne huta, maka ama mopafima mani'naza vahe'mota muse nehinke'za, hagerimofa amu'nompima me'nea mopafima nemaniza vahe'mo'zanena musena hiho. <sup>2</sup> Hanintiri hu'nea hampomo'ene tapari'nea hampomo'ene azeri kagintegeno mani'ne. Fatgo avu'ava zanteti'ene mago avamenteke'ma refko'ma hu avu'ava zama'areti, kini tra'amofo trara anteno mani'ne. <sup>3</sup> Tevenefa'mo agri avuga hagana hagana nehigeno, maka asoparegati'ma ha' vahe'amozama eme regaginte'naza vahera teve zamaren tefanene nehie. <sup>4</sup> Agri kopasi'namo'a trege huno ama mopa remsa nehigeno, ama mopamo'ma ana zama negeno'a tusi ahirahi nere. <sup>5</sup> Anumzana ama mopama kegava hu'nea ne'mofo avuga, agonaramimo'za masavemo'ma ze'ze huno pakepake nehiaza hu'za pakepake hu'naze. <sup>6</sup> Anamima me'nea mona ramimo'za fatgo avu'ava zama'agu huama nehanageno, maka ama mopafima kokankokama mani'naza vahe'mo'za agri hihamu masazama'a negaze. <sup>7</sup> Hagi zmazantetima antre'za tro'ma hu'naza havi anumzamofa amema'are'ma mono'ma hunente'za, zamavufaga rama nehaza vahe'mo'za zamagazegu hugahaze. Ana nehanageno maka havi anumzantamimo'za, Anumzamofo avuga zamarena re'za mono huntegahaze. <sup>8</sup> Saioni kumamo'ene, Juda mopafima me'nea kumatamimo'za, anankema nentahi'za, tusi musenkase nehaze. Na'ankure Ra Anumzamokama keagama refko'ma hana zanku, anara hu'naze. <sup>9</sup> Na'ankure Ra Anumzana Kagra Marerirfa Anumza mani'enka maka ama mopa kegava hu'nane. Ana hu'enka kagrake'za rankagia erinka, maka havi anumzantamina zamagterenka onagamu mani'nane. <sup>10</sup> Ra Anumzamofoma avesima nentaza vahe'mota, kumimofona tamefi humiho. Tamagu'areti'ma huta amage'ma nentaza vahe'mota, Ra Anumzamo'a kegava huramantegahie. Ana nehuno kefo avu'ava zama nehaza vahe zamazampintira tamagu vazigahie. <sup>11</sup> Fatgo

avu'ava zama nehaza vhahera Anumzamo'a remsa hunezmanteno, zamagu'amo'ma fatgo hu'nea vhahera musezana ante nezmanteg'e'za muse ne-haze. <sup>12</sup> Anumzamofoma amage'ma nentaza vahe'mota, agrama hu'nea avu'ava zankura muse hunenteta, ruotage'ma hu'nea agigura susu huntaho.

## 98

### *Anumzamo maka vahe kini mani'nea hu'nea zagamere*

<sup>1</sup> Ra Anumzamo'ma knare'nare zama erifore'ma hu'nea zanku huta, Agritega kasefa zagame huntesune. Agra tamaga kaziga hankavenen-take azanteti'ene, ruotage'ma hu'nea azanteti'ene huno hara hugatere'ne. <sup>2</sup> Ra Anumzamo'a Agrama vahe'ma zamagu'ma vazizama'a eriama ne-huno, maka kokankoka vhahera fatgo avu'ava zama'a eri zamaveri hu'ne. <sup>3</sup> Agrama Israeli vahe'ma huvempa huzmanteno, maka zupa nagra navesi tamante vava nehu'na, namefira huozamigahue huno'ma huvempama hu'nea naneketu agesa antahi'ne. Ama mopama ometre emetre'ma hu'neregama nemaniza maka vahe'mota, Anumzamo'ma tagu'ma vazi'nea zana ko ke'haze. <sup>4</sup> Maka ama mopafima nemaniza vahe'mota ranke huta Ra Anumzamofo agia ahentesga hiho. Mago zankura rekura osuta, ranke huta muse zagamera eri otita nehuta musenkasea hiho. <sup>5</sup> Hapu zavena nehenkeno knare ageru neranigeta, zagamera nehuta Ra Anumzamofona agi'a ahentesga hiho. <sup>6</sup> Ufenteti'ene sipisipimofo paziveteti ufennereta, Ra Anumzana kini ne'mofo avuga ranke huta zagamera nehuta musenkasea hiho. <sup>7</sup> Hagerimokane, hagerimpima nemaniza zagaramimota tamagerura erintesga huta rantamageru riho. Anazanke huta ama mopamokane, agofetu'ma nemaniza zantamimota tamagranena anazanke hiho. <sup>8</sup> Ranra tintamimoza zamazana nehesageta, agonaramimota tamagerura eri mago huta musenkasea zagamera hiho. <sup>9</sup> Na'ankure Ra Anumzamo'ma ne-eana ama mopafima nemaniza vahe refko huzmanteku ne-eankino, maka ama mopafima kokankokama nemaniza vhahera fatgo avu'ava huno, mago ava-menteke refko huzmantegahie.

## 99

### *Anumzamo ugagota kini mani'ne hu'nea zagamere*

<sup>1</sup> Ra Anumzamo'a kini manino maka zana kegava hu'neanki, maka kokanko'ma nemaniza vahe'mota korora hunenteta tamahirahiku hiho. Agra serabime nehaza ankerontremofo amu'nompri kini tra'a anteno on-agamu mani'negen, ama mopamo'a imi enerje. <sup>2</sup> Saioni kumapina Ra Anumzamo'a tusi konariri'ane mani'neno, maka kokankokama mani'naza vahetera Agra manisga huno mani'neno kegava hunezmante. <sup>3</sup> Maka ama mopafima mani'naza, vahe'mo'za ra huno so'e zantfama hu'nea kagia husga hunegante'za, kagrikura ruotage hu'ne hu'za hiho. <sup>4</sup> Hankavenentake'ma hu'nana kini ne'moka, fatgo avu'ava zanku kave'nesie. Kagraka'a fatgoma huno refko hu avu'ava zana eri agafa hu'nane. Ana nehunka Israeli vhahera magoke avamente antenka fatgo avu'ava hunka refko hunezmantane. <sup>5</sup> Ra Anumzana tagri Anumzamofona agi'a ahentesga nehuta, agri agafi ome kepri huta monora huntesnune. Na'ankure agra ruotage hu'ne. <sup>6</sup> Hagi pristi eri'zama eneriza vahe amu'nompina, Mosesi'ene Aronikea pristi eri'zana eri'na'e. Agritegama nunamuna nehaza vahe amu'nompina, Samueli'a agrane nunamuna higeno, Ra Anumzamo'a nunamuzamia antahi neza-mino nona huzmante'ne. <sup>7</sup> Ra Anumzamo'a vimago hampompi mani'neno,

Israeli vahera keaga zamasami'ne. Ana hige'za amage anteho huno'ma zamasamia tra kene, kasegenena amage ante'naze.<sup>8</sup> Ra Anumzana tagri Anumzamoka nunamu zamia antahi zami'nane. Ana'ma hanke'za kagri'ma ke'za antahi'zama hazana, kumi atre zamante Anumza mani'nane hu'naze. Hianagi zamagrama kumi'ma hazagenka nona hunka zamazeri haviza nehana Anumza mani'nane.<sup>9</sup> Ra Anumzana tagri Anumzamofona agi'a ahentesga nehuta, ruotage'ma hu'nea agona'afina monora huntesnune. Na'ankure Ra Anumzana tagri Anumzamo'a ruotage hu'ne.

## 100

### *Anumzamofoma agima ahentesgama hu zagamere*

<sup>1</sup> Maka ama mopafima mani'naza vahe'mota musenkase huta zagamera nehuta Ra Anumzamofona agi'a ahentesga hiho. <sup>2</sup> Ra Anumzamofona muse huta eri'zama'a erinteho. Agri avugama nevanuta, muse zagame huta viho. <sup>3</sup> Ra Anumzamo'a Anumza mani'ne huta keta antahita hiho. Agra'a tro hurantegeta agri vahe mani'none. Ana huta agri vahe mani'nonankino, sipisipi kva vahe'mo sipisipi kegava hunteankna huno kegava hurantegeta mani'none. <sup>4</sup> Agri kumapima ufre kahante'ma nevuta muse hume nevuta, unefreta agi'a ahentesga hiho. Ana nehuta susu huta muse hunenteta, ra agi'a ahentesga hiho. <sup>5</sup> Na'ankure Ra Anumzamo'a knare hu'negu agri vagaore avesizamo'a mevava huno vugahie. Hagi hugahuema huno hu'nea ke'are oti'neno, fore hu anante anante'ma hu'za knane knanema mani'za aza vahera zamaza nehia Anumza mani'ne.

## 101

### *Kini ne'Deviti'ma huvempa hu'nea zagamere*

<sup>1</sup> Ra Anumzamoka vagaore mevava kavesi zanka'agu'ene, fatgo kavukva zankura zagamera hugahue. Ra Anumzamoka zagame nehu'na kagri kagia ahentesga hugahue. <sup>2</sup> Nagra kegava hu'na mani'nena, fatgo avu'ava zanke hu'na vugahue. Ra Anumzamoka ina zupa enka, nagrira eme naza hugahane? Nagra nonifima manine'na, inankna zama hanuana fatgo avu'ava zanke hugahue. <sup>3</sup> Nagra vahe'ma agazema nemia havi avu'ava zantera navua ante'na onkegahue. Havi avu'ava zama nehaza vahe'mokizmi avu'ava zankura nago'nete. Ana hu'neanki'na ana vahe'enena rutragote'na omanigahue. <sup>4</sup> Akrahe krehe avu'ava zama nehaza vahera zamatre'nuge'za nagri tva'ontera omegahaze. Ana nehu'na kefo avu'ava zana namefi humigahue. <sup>5</sup> Tava'ozamire'ma nemaniza vahe'ma oku'ma zamazeri havizama nehaza vahera, ozmatre'na zamazeri haviza hugahue. Vahe'ma zamage fenkami netre'za zamavufaga ataneraza vahera ha'rezamantegahue. <sup>6</sup> Zamagu'areti'ma tamagema hu'za Anumzamofoma avariri fatgoma nehaza vahera, nagra kegava huzmantegahue. Iza'o hazenke'ama omne'nenia vahe'mo Nagri eri'zana erigahie. <sup>7</sup> Havigema hu'za vahe'ma rezmatgama nehaza vahera zamatre'nuge'za, nagri nompina mani'neza eri'zani'a e'origahaze. Havigema nehaza vahera zamatre'nuge'za, nagri noni'afina mago kankamuna zaminuge'za navuga omanigahaze. <sup>8</sup> Ama mopafintira kefo avu'ava zama nehaza vahera, maka nantera nagra zamahe fanene huvava hugahue. Anumzamofo rankumapima havi avu'ava zama nehaza vahera zamahe fanene hugahue.

## 102

*Vahe'mo'ma knazampima unefreno nehia nunamu zagamere*

<sup>1</sup> Ra Anumzamoka nunamuni'a nentahinka, naza huogu'ma zavi krafama nehuana antahinamio. <sup>2</sup> Kna zampima mani'nesugenka, kavugosa rukrahe hunka kamefira huonaminka, kagesa antahinamio. Ana nehunka naza huogu'ma kezankema nehanugenka, ame hunka naza huo. <sup>3</sup> Kum'o'ma mareriteno ame huno fanane hiaza hu'na osi'a knafi mani'nena fanane hu'za nehugen, zaferinanifintira teve rukru nehigeno, tevemo'ma tankanu'zama teganinkani nehiakna zaferinanimo'a nehie. <sup>4</sup> Zagemo'ma trazama temagigeno'ma hiaza huno nagu'amo'a evuramitfaza nehige'na, ne'zana onesanua nagesa nehie. <sup>5</sup> Karagi'ma ruazamo higeno, navufgamo'a zaferinare vuno ome kamare'ne. <sup>6</sup> Hagege huno vahe omani ka'ma kokampi komutomo'ma hiaza hu'na nagrake nemani'na, atrazageno haviza hige'za vhahera nomaniza kumatamimpi, komutomo'ma manino vano hiaza nehue. <sup>7</sup> Kenagera navura mase'noanagi, antahintahimo'a eri'zana erivava hige'na, navura omase'noe. Ana hige'na nomofo agofetu'ma namamo agraku akoheno maniaza hu'na nemanue. <sup>8</sup> Nagri ha' vahe'mo'za maka zupa kiza zokago ke hunantevava nehaze. Ana nehu'za vahe'ma kema nezamasu'za zamazeri havizama hunakura, nagri nagi ahenente'za hu havizana hunezmantaze. <sup>9</sup> Ne'zama neaza hu'na ta'nefara nene'na, tima nofina navunumo'a eramige'na, navunu'ene tina ne'noe. <sup>10</sup> Na'ankure kagra tusi krimpa ahenantenka, nagrira nazeri sga hutenga matevu natre'nane. <sup>11</sup> Nagra za'za kna omanigahuankino knanimo'a ame huno kinaga fre zagemofo amema'amo'ma hiaza huno vaga neresnige'na, trazamo osapareaza hu'na hagege nehue. <sup>12</sup> Hianagi Ra Anumzamoka kagra kinia maninka za'zate kegava hunka vugahane. Ana hu'nesnanke'za henkama mani'za vanaza vahe'mo'zanena ana zankura zamagera okanigahaze. <sup>13</sup> Kagra otinka Saioni rankumakura kasunku huntegahane. Na'ankure kagrama kasunku'ma huntenka azu hugahue hunkama huhampri'nana kna fatgo eankinka, kavesinentenka azu hugahane. <sup>14</sup> Saioni kumpapi havemo'a haviza hu'neanagi, eri'za vahekamo'za tusiza hu'za avesinte'naze. Ana nehu'za menima kumamo'ma haviza higeno kugusopa moke'ma hu'nea zankura, tusiza hu'za zamasunku hunentaze. <sup>15</sup> Maka kokankoka mopafima mani'naza vahe'mo'za Ra Anumzamofa agigura zamahirahiku nehu'za, avuga zamarena regahaze. Ana nehanage'za maka ama mopafi kini vahe'mo'za Anumzamoka hihamu masaka'agura koro hugahaze. <sup>16</sup> Na'ankure Ra Anumzamo'a Jerusalemi kuma'ma ete eri so'ema huno negino, Agra'a hihamu masa'afima eama'ma hania zanku anara hugahaze. <sup>17</sup> Ana nehuno zamunte omane zamavufaga zamavapa nemaniza nagamokizmi nunamuna antahi nezamino, nazankuro nunamuma hu'za antahima kesaza nunamu kezmia antahi amnea osugahie. <sup>18</sup> Ama ana zankura avontafe pi krente'ne sanunke'za henkama fore hu anante anante'ma hanaza vahe'mo'za hampari'za antahigahaze. Ana nehanage'za henkama fore'ma hanaza vahe'mo'za Ra Anumzamofa agi'a ahentesga hugahaze. <sup>19</sup> Ra Anumzamo'a onagamu ruotgema hu'nea noma'afi mani'neno, kefenkateno ama mopafina nege. <sup>20</sup> Hagi kinafima mani'naza vahe'mo'zama karagi'ma nerazazana nentahino, zamafe frigahune hu'za hu'naza kina vhahera katufe zamatre'naku anara nehie. <sup>21</sup> Ana'ma hanige'za Saioni agonafina Ra Anumzamofa agi'a huama nehanage'za, Jerusalemi kumapina agri agia ahentesga hugahaze. <sup>22</sup> Maka ama mopafima

kokankokama nemaniza vahe'mo'za, magopi eme eritru nehanage'za, maka ama mopafima kinimo'ma kvama huterema hu'nea mopareti e'za Jerusalemi kumapina Ra Anumzamofo mono eri'zana emerintegahaze. <sup>23</sup> Ozafa ore kasefa vahe mani'nogeno, Ra Anumzamo'a nagri hankavea eri netreno, knani'a eri atupa hu'ne. <sup>24</sup> Ana higena Anumzamofonkura amanage hu'na hu'noe. Anumzanimoka kasefa vahe mani'noanki, knani'a eri atupara hunka ama mopafintira nazeri otro. Kagra ofri manivava hunka neana Anumza mani'nane. <sup>25</sup> Korapara Kagra ama mopamo'ma regrino'ma me'nia trara tro hunentenka, monare'ma me'neā zantamina Kagra kazanteti tro huzmante'nane. <sup>26</sup> Ana zantamimo'za vagaresazanagi, Kagra manivava hunka vugahane. Atafa kukenamo'ma hiaza huke ome haviza hugaha'e. Kasefa kukena eri nehankreno atafa kukenama hate atregeno'ma viaza hunka zanazeri atresankeke vagaregaha'e. <sup>27</sup> Hianagi Kagra mago avamenteke maninka nevnankeno, kafu kamo'enena vagaore vuvava huno vugahie. <sup>28</sup> Kagri eri'za vahe'mokzimi mofavre nagara, Kagra kegava hu so'e huzmante'snanke'za knare hu'za manigahaze. Ana'ma hananke'zama manine'za kase zamantesnaza mofavre nagapinti'ma efore'ma hu'za vnaza vahe'mo'za, kagrane magoka knare hu'za manigahaze.

## 103

### *Anumzamo'ma tavesima rante'nea zanku'ma Deviti'ma asunte'nea zagamere*

<sup>1</sup> Maka nagu'reti hu'na Ra Anumzamofona agi'a ahentesga nehu'na, nagu'reti hu'na ruotage'ma hu'nea agi'a ahentesga hugahue. <sup>2</sup> Maka nagu'reti hu'na Ra Anumzamofona agi'a ahentesga nehu'na, knare avu'ava zama huno maka zampima nazama nehia zankura naganera okanigahue. <sup>3</sup> Anumzamo'a maka kumini'a eri netreno, maka krini'a eri netreno, <sup>4</sup> nagu'vazino navrege'na ofri'na mani'noe. Ana nehuno vagaore avesi zane asunku zanena, fetori'ma hiaza huno nanuntera ante'ne. <sup>5</sup> Anumzamo'a knare'nare zantamina namige'na eri knare nehue. Ana nehu'na nazeri kasefa higena, tumpamo'ma hanave'ama eri kasefa'ma nehiaza hu'na hanavea erina manigahue. <sup>6</sup> Ra Anumzamo'a fatgo avu'avaza huzmanteno, vahe'mo'zama knamazami'za zamazeri havizama nehaza vahera, maka mago avamenteke refko hunezmante. <sup>7</sup> Korapara Ra Anumzamo'ma nazano tro hunaku'ma hiazana eri ama huno Mosesena asami'ne. Ana nehuno hankave eri'zama eneria zana zamaveri hige'za Israeli vahe'mo'za ke'naze. <sup>8</sup> Ra Anumzamofona asunku zamo'a aviteno mareri'ne. Ana hu'neankino, avesi rante vava nehuno, ame huno arimpa ohe Ra Anumza mani'ne. <sup>9</sup> Agra kea tasuvava nosuno, arimpa aherante vava huno ovu Anumza mani'ne. <sup>10</sup> Tagrama kumi'ma hu'nona avamente knazana tamigaragi anara nosuno, tagri kefozamofo avamente ranknaza tamigaragi anara nosie. <sup>11</sup> Anumzamofoma koro hunte'za agoragama nemaniza vahe'ma avesima nezamantea avesizamo'a, monamo'ma mopama agatereno ame'nagame'ma meaza huno Ra Anumzamofo avesi zamo'a ame'nagame mareri'ne. <sup>12</sup> Zage hanati kazigatima zage fre kazigama evu'neana afete me'neankino, anahukna huno tagri kumira afete eri netre. <sup>13</sup> Nef'a'ma mofavre naga'ama asunku'ma hunezmanteaza huno, Ra Anumzamo'a Agri'ma koro'ma hunente'za agoragama nemaniza vahera asunkura hunezmante. <sup>14</sup> Na'ankure Agrama mopama erino tagri'ma tro'ma hurante'neana, Agra ko tageno antahino hu'neankino,

tagrikura kugusopa mani'naze huno nentahie. <sup>15</sup> Tagra vahe'ma ama mopafima mani'nonana trazankna hu'nonankita za'zatera omanigahune. Ana hu'neankita tra'zamofo amosremo'ma osi'a knafi rutarenteaza ne-hune. <sup>16</sup> Anama hutegen zaho'mo ana amosrema eri hare'noma vigeno, zamage'ma nekanizaza nehune. <sup>17</sup> Hianagi Ra Anumzamofonku koro'ma nehu'za Agri agoragama nemaniza vahera, knane knanena Anumzamofona vagaore avesi zamo'a zamagrane mevava nehie. Ana nehanigeno zam-agripinti'ma fore'ma hanaza vahe'mokizmi mofavre nagate'enena fatgo avu'ava huzmanteno nevie. <sup>18</sup> Anumzamofo kasegene tra ke'nema kegava huso'ema hu'nezama amage'ma nentaza vahera, e'inahu avu'ava'za hunezmante. <sup>19</sup> Ra Anumzamo'a Agrama kinima manisania trara monafi retro hunte'ne. Ana hu'neankino anante mani'neno, makazana kegava nehie. <sup>20</sup> Hankavenentake hu'naza ankeromota Ra Anumzamofo agi'a ahentesga hiho. Hankavenentake'ma hu'neta, nazano hihoma huno higeta Agri amage'ma nentamota, nazano hihoma huno hania zamofo ke'a amage anteho. <sup>21</sup> Monafima ohampiriga'a ankeroramima mani'netama agri avesi'zama amage'manentaza ankeromota, Ra Anumzamofona agi'a ahentesga hiho. <sup>22</sup> Maka zama tro'ma hunte'neno Agrama kegavama hu'nea mopafima nemaniza zantamimota, Ra Anumzamofona agi'a ahentesga hiho. Ana nehinke'na nagranena maka nagu'areti hu'na Ra Anumzamofona agi'a ahentesga hugahue.

## 104

### *Ra Anumzamo'ma maka'zama tro'ma hu'nea zamofo zagamere*

<sup>1</sup> Nagra nagu'areti hu'na Ra Anumzamofona agi'a ahentesga hugahue. Ra Anumzana Anumzanimoka kagra rankrerfa hu'nane. Za'za kukenamo'ma hiaza huno masa zankamo'ene konaririkamo'enena kazerino vazinte'ne. <sup>2</sup> Za'za kukenama hiaza hunka masa zanka'a eri hankre'nane. Ana nehunka monafima me'nea zantaminena, seli nomi eri atama nereaza hunka, mona eri atarente'nane. <sup>3</sup> Monafima me'nea hampompima tima marenavezimofo anaga kaziga, nonka'ama vazisga hania zafaramina retrure'nane. Hagi karisifima hiaza hunka hampompina maninka vano nehunka, zahopi maninka harenka vano nehane. <sup>4</sup> Kagra zaho'mofonku hankeno nanekeka'a erino vano nehie. Ana nehigeno hagna hagna'ma huno nerea tevemo, Kagri eri'za vahera mani'ne. <sup>5</sup> Kagra ama mopa tro hutenga tra'are antankeno me'neankino kazara osugahie. <sup>6</sup> Tavravereti'ma hiaza hunka hagerinu mopa refi'netenka, agonaramina tinu refitankeno azeri nakari fenkateno onaga me'ne. <sup>7</sup> Hianagi kagrama hage rimofonku'ma hankave kema hankeno'a, koro huno nevie. Kagrama monagemo'ma hi-ankna hunka kageru'ma nerankeno'a, tintamimo'a ame'ama huno nevie. <sup>8</sup> Agonaramimo'za marerisga nehzageno, agupo mopamo'za uramiza e'ire mano hunka hunte'nampi me'naze. <sup>9</sup> Ana nehunka hagerimofona, isa kana antetenankeno ana isa kana agatereno vuno mago'anena mopa refi'otegahie. <sup>10</sup> Kampu'i tina tro huntankeno, tinkagomupina nevigeno, ne'onse tintamina huntankeno agonaramimofo amu'nompinenina nevuno, <sup>11</sup> maka afizaga gafamofona tina nezamige'za nenazageno, afi donki afu'tamimo'za tinku'ma nezmagege'za ana tina nazageno fru zame'nesie. <sup>12</sup> Hare'zama vanoma nehaza namamo'za ana timofo ankenaregama nona ki'za manine'za, ana timofo ankenaregama me'nea zafaramimofo azankunate manine'za zagamera nehaze. <sup>13</sup> Kagra mona kumakafi onagamu

mani'nenka, kora atrankeno eramino agona ramimpina runente. Ana nehunka kagraka'a kazanko avona antenka, maka zana tro hunka ama mopafina antankeno aviteno me'n'e. <sup>14</sup> Bulimakao afu'mo'zama nesaza trazana kagra hankeno hageneg'e'za vahe'mo'za ahe'za hoza nentaze. Ana hutazagenka kagra hankeno, mopafintira ne'zamo'a hageno marerino ne-narga rentege'za vahe'mo'za e'nerize. <sup>15</sup> Anazanke hunka kagra hankeno wainimo'a hageno marerige'za, eri'za waini tina tro hu'za nene'za antahi musena nehazagenka, olivi masavena zaminke'za eri'za zamugosafina frageno rumsa nehigenka, ne'zama nene'za hankavema eri'za manisaza zana bretia nezamine. <sup>16</sup> Ra Anumzamofo zafamo'za tina nezamu nehazageno, Ra Anumzamo'ma Lebanoni mopafima sida zafaramima hankre'nea sida zafamo'za tina nezamu nehaze. <sup>17</sup> Ana sida zafa ramimpina nama ramimo'za nona eme ki'za nemanize. Ana nehazage'za afi patomo'zanena (stork) saipresi zafa ramimpi nozamia eme negize. <sup>18</sup> Za'za agona ramimpima nemaniza afi meme afutamimo'za vano vano hu'za nemanize. Ana nehazage'za var'e'mo'za havemofo keko kampi fraki'za zamagu nevazize. <sup>19</sup> Kagra ika tro hunka ante'nankeno me'neno, ruzahu ruzahu knagura hunerasamie. Ana nehigeno inankna fatgore zagemo'a ufregahie zagemo'a agra'a keno antahino hu'ne. <sup>20</sup> Kagra hanina atrankeno hania eme negie. Ana hanke'za zafa tano'pafima nemaniza zagagafamo'za rerakaure'za vano nehaze. <sup>21</sup> Kenagera kasefa laioni ramimo'za zagagafama ahe'za tragama hu'za nesagura rankrafage hu'za vano nehazagenka, Anumzamoka ne'zana zaminke'za nenaze. <sup>22</sup> Hagi zagema ufrefe'za ana laionimo'za ete vu'za nemaniza have kampi ome nemasaze. <sup>23</sup> Ana'ma nehazage'za vahe'mo'za vu'za e'za hu'za eri'za zamia ome e'nerizageno vuno kinaga nese. <sup>24</sup> Ra Anumzamoka, kagra agigu agigu zantami tro hu'nane. Kagra knare antahi'za ka'areti ana maka zantamina tro hu'nane. Ana hankeno Kagrama tro hu'nana zagagafamo'za ama mopafina mani avite'naze. <sup>25</sup> Hagerimo'a rankrerfa huno uvu evu hu'negeta negone. Ana hu'neankino ana hagerimofo agu'afina agigu agigu zaga, osira rana huno ohampriga'a mani avite'naze. <sup>26</sup> Ana hagerimofo agofetura venteramimo'za vano nehazage'za, Laviataniema hu'za nehaza afi zagama, tro'ma hu'nana zagamo ana hagerimpina tina freno vano nehuno zokagora nereno nemanie. <sup>27</sup> Ana maka tro'ma huzmante'nana zagagafamo'za, kna fatgore'ma ne'zama zamisnanku kagriteke kete'za nemanize. <sup>28</sup> Kagra ne'zana zaminke'za nenaze. Kagra kazana eri atarenka ne'zana zaminke'za nazageno zamura nehie. <sup>29</sup> Hianagi Kagrama rukrahe'ma hunka kamefi'ma huzaminke'za, zamagra antri hu'za antahintahi hakare nehaze. Hagi Kagrama zamasimu'ma erinke'za, zamagra fri'za ete mopanesaze. <sup>30</sup> Kagra kasimura huhu huvazi zamantanke'za, zamasimura eri'za kasefa hu'za mani'naze. Ana nehunka maka ama mopamofo agofetu'ma me'nea zantamina, ete eri kasefa hankeno me'n'e. <sup>31</sup> Ana hu'neankino Ra Anumzamofo hihamu masazamo'a mevava huno nevanigeno, maka zama tro'ma hu'nea zankura Ra Anumzamo'a muse hugahie. <sup>32</sup> Ra Anumzamo'ma kefenkateno ama mopafima uruha'ma nehigeno'a, ama mopamo'a kazakaza nehigeno, Ra Anumzamo'ma agona ramima avako'ma nehigeno'a tevegu nehie. <sup>33</sup> Nagrama ofri'ma mani'nesua kna'afina, Ra Anumzamofontega zagameru hugahue. Ana nehu'na zagame hu'na Anumzamofo agi'a ahentesga hunteme nevu'na ome frigahue. <sup>34</sup> Nagrama Ra Anumzamofonku'ma antahintahima nehua zama Agrama keno antahino'ma hanuno'a muse hanie. Na'ankure na-

gra Ra Anumzamofonte mani'nena musenkasea nehue. <sup>35</sup> Hagi kumi'ma nehaza vahe'mo'za ama mopamofo agofetutira fanene nehanageno, kefo avu'ava'ma nehaza vahe'mo'za fanane hu'za omanisaze. Maka nagu'reti hu'na Ra Anumzamofona husga hunente'na, Ra Anumzamofo agi'a ahentesga hugahue.

## 105

### *Anumzamo'ma ruzahu ruzahu eri'zama eri'nea zamofo zagamere*

<sup>1</sup> Ra Anumzamofona agi'a aheta susu hunenteta, ranra eri'zama eri'nea zankura maka ama mopafima mani'naza vahera huama huta zamasamisune. <sup>2</sup> Anumzamofontega muse zagame huta susu huntesnune. Ana nehuta knare huno hentofo eri'zama eri'nea zankura vahera zamasamisune. <sup>3</sup> Anumzamofo agimo'ma ruotage'ma hu'nea zankura husga huntesnune. Hagi Ra Anumzamofoma mono'ma hunentaza vahe'mota muse hiho. <sup>4</sup> Ra Anumzamofonku'ene agri hankave'agu'enena nehaketa, avugosafima kesunkura hake vava hanune. <sup>5</sup> Agrama ruzahu ruzahu eri'zama eri'nea zanku'ene kaguvaza eri fore nehuno, keaga refko hugahue huno'ma hu'nea zankura taganera okanisune. <sup>6</sup> Hagi Agri eri'za vahe Abrahamu mofavre naga'mota, agrama huhampri ramantegeta Jekopumpinti'ma fore'ma hu'naza vahe mani'naze. <sup>7</sup> Ra Anumzamo'a agrake tagri Anumzana mani'ne. Ana hu'neankino, maka ama mopafi vahera refko hunezmante. <sup>8</sup> Anumzamo'ma huhagerafi hvempagema hu'nea kegura maka zupa ageraokani antahi vava hugahie. Ana hu'neankino tauseni'a zupama fore hu anante anante'ma hu'za vanaza vahete'enena ana hvempa kemo'a mevava huno vugahie. <sup>9</sup> Hagi ana huhagerafi hvempagea Abrahamu'ene hu'neankino, ana hvempagea Aisakinte eri hankaveti'ne. <sup>10</sup> Anumzamo'a henka ana hvempama hu'neanke'a Jekopunte eriama nehuno, Israeli vahetera ana hvempa kemo'a mevava hugahie huno zamasami'ne. <sup>11</sup> Tamagrama eriterema hanare Kenani mopa tamisanugeta erisanti haresnageno, ana mopamo'a tamagri mopa mevava hugahie huno Anumzamo'a hu'ne. <sup>12</sup> Ama ana nanekema Anumzamo'ma hu'neana, Kenani vahe amu'nompina Israeli vahera kraka vahekna hu'za osi'a naga mani'nazagano anankea hu'ne. <sup>13</sup> Israeli vahe'mo'za vahe mopafine, ru kinimo'zama kegavama hu'naza mopafi mani'za vano vano hu'naze. <sup>14</sup> Hianagi Anumzamo'a zamatrege mago'a vahe'mo'za zamazeri havizana osu'naze. Israeli vahetega Anumzamo'a anteno zamazeri haviza hunaku'ma nehaza kini vahera ha' kea huzamine. <sup>15</sup> Anumzamo'a huno nagrama huhampri'noa vahera zamavakora osiho huno nehuno, nagri kasnampa vahera zamazeri havizana osiho huno hu'ne. <sup>16</sup> Anage nehuno Kenani mopafina Anumzamo'a agatontoza atregeno ne-egeno, maka ne'zana eri fanane hvugare'ne. <sup>17</sup> Ana'ma nehuno'a mago ne' huntogeno ugoteno Isipi mopafima vu'neana Josefekino, kazo kazo eri'za erisanie hu'za zagoreti mizase'za avre'za vu'naze. <sup>18</sup> Ana hute'za seni nofiteti agafina anakizageno atagura nehige'za, ainireti rini tro hute'za anankempina rusi hu'naze. <sup>19</sup> Ana huno manino nevigeno ava'nama ke'nea zamo'ma efore'ma hania knamo'a ehanati'ne. Ana higeno Ra Anumzamo'a Josefena reheno ke'ne. <sup>20</sup> Hagi kini ne' Fero'a hige'za kinafintira Josefena katufente'naze. Vahete'ma kegavama hu'nea kini ne'mo hige'za kinafintira katu fentageno vu'ne.

21 Ana hutazageno kini ne'mo'a Josefena huhampri antegeno rankva manino, maka noma'afima me'nea zantera kegava nehuno, maka fenoma ante'nea zante'enena kegava hu'ne. 22 Ana hu'neankino agra amne kini ne'mofa eri'za vhahera kina nompina zamavarenenteno, kini ne'mofoma antahintahima nemiza vhahera rempi huzamigahie. 23 Hagi henka Israeli naga'mo'za Isipi mopafina efre'naze. Ana hutazageno Jekopu'a Hamu vhahera mopafra kraka vahe seno emani'ne. 24 Anante Ra Anumzamo'a Agra'a Israeli vhahera zamaza hige'za, rama'a mofavre kasezamante'naze. Ana hume nevu'za rama'a vahe ome forehu hakare hu'za ha' vahe'zamimo hankavea zamagatere'naze. 25 Anante Anumzamo'a Isipi vahe antahi'zana eri rukrahe hige'za, Agri'a nagara Israeli vhahera ha' rezamante'naze. Ana nehu'za Ra Anumzamofo Agri'a eri'zama eneriza Israeli vahe'ma zamazeri haviza hanaza kanku hake'naze 26 Hianagi Ra Anumzamo'a eri'za vahe'a Mosesene, Aronine huhampari zanantegeke vu'na'e. 27 Ana higeke Hamu nagama Isipi mopafima nemaniza vahetera vuke, Ra Anumzamo'ma hu'nea kaguvazane, avamezanena ome eri fore hu'na'e. 28 Ra Anumzamo'a higeno Isipi mopafina hanizamo eme refite'ne. Na'ankure Anumzamofo nanekea ontahi'za Israeli vhahera zamatrazage'za ovu'naza zante anara hu'ne. 29 Anumzamo'a maka tintamina eri rukrahe higeno, kora segeno ana timpima mani'naza nozameramimo'za fri vagare'naze. 30 Anantero hoga'mo'za Isipi mopafina avitete'za, kini ne'mo'ma nemasefinena mani vite'naze. 31 Ra Anumzamo'a kosine umpe umpe'ene huzmantege'za eri erintagu hu'za maka Isipi mopafina emani avite'naze. 32 Ko'mopa ko huntogeno ko'ma riaza huno eneramigeno, kopsi'na atregeno ru trage huteno tevenefu huno maka Isipi mopafina vuno eno huvagare'ne. 33 Isipi vahe'mokizmi waini hozane, fiki zafaraminena eri haviza nehuno, Isipi mopafima me'nea zafaramina rukrara karurupetre'ne. 34 Ana nehuno tusinasi kenutami huzmantege'za rama'a hu'za ohampriga'a e'naze. 35 Ana kenu'mo'za trazantamina vatri'za neza maka eri hana nehu'za, hozafi me'nea ne'zantamina ne'za maka eri vagare'naze. 36 Ana nehuno Anumzamo'a Isipi mopafina ese'ma kasezmante'nea agonesa anentatamina miko zama vaganereno, maka vahe'mo'za zage mofavregu'ma musema nehu'za hankavetie hu'zama nehaza ne' mofavre nagara zamahe vagare'ne. 37 Ra Anumzamo'ma vahe'a Israeli naga'ma zamavarege'za Isipiti'ma etirami'za e'naku'ma nehu'za, rama'a silvane golinena eri'ne'za e'naze. Magomo'e huno Israeli naga nofipintira tanafara osu'ne. 38 Israeli vahe'mo'zama Isipi mopama atre'za azage'za, Isipi vahe'mo'za tusi muse hu'ne. Na'ankure ko'ma Israeli vahe kor'o'ma hu'naza zanku anara hu'ne. 39 Anumzamo'a mago hampo antegeno Israeli vhahera anteso hunezmantegeno, hanimpina tevenefanu remsahu zamante'ne. 40 Israeli vahe'mo'zama ne'zanku'ma antahigazageno'a, hifa namazaga atregeno ege'za ahe'za nenazageno, monafinti mana ne'zana atregeno ege'za eri'za nazageno zamura hu'ne. 41 Agra havea rutanegeno timo'a rumpasasa huno krohupeno eno, hagege kokampina ranti evu'ne. 42 E'inama hu'neana Anumzamo'a eri'za vahe'a Abrahamuma ruotge huvempa kema hunte'nea kegu agesa nentahino anara hu'ne 43 Hagi Anumzamo'ma nagri nagare'ma huno huhampari zamante'nea Israeli vahe'ma, Isipiti'ma zamavareneno ne'e'za, ranke hu'za kezati'za musenkasea nehu'za e'naze. 44 Ana nehuno ru vahe'mokizmi mopa eri zami'ne. Ana hige'za ru vahe'mo'za maraguzati'za hankre'naza ne'za Israeli vahe'mo'za eri nafa'a hune'za vasage'za ne'naze.

**45** Ama ana maka zama fore'ma hu'neana, Israeli vahe'mo'za nege'za, Anumzamofo kasegene tra kenena amage antesagu huno anara hu'ne. Ra Anumzamofona agi'a ahentesga hanune.

## 106

### *Anumzamo'ma vahe'ama knare avu'ava'ma hunezmantea zagamere*

**1** Ra Anumzamofo agi'a ahentesga nehuta susu huntessune. Na'ankure agra knare hu'ne. Agrama avesi nerantea zamo'a vagaore mevava huno nevie. **2** Ra Anumzamo'ma hankavenentake eri'zama eri'nea zankura, iza hamprino kegara hugahie? Ana hu'neankino mago vahe'mo'a agri agi'a husga huntegahianagi, Agrama antahi'nea avamentera osugahie. **3** Iza'o maka zupama fatgo avu'ava zama nehuno, fatgo huno refkohu avu'ava zama nehia vahe'mo'a muse hugahie. **4** Ra Anumzamoka vaheka'ama zamazeri knare'ma nehanunka, kagesa antahi nenaminka, erava'o hunka naza hunka nagu'vazio. **5** Kagrama huhampri zamante'nana vahe kamo'zama so'e mani'zampima musema hu'za nemanisage'na, zamagrane musema hu'zanku nave'nesige'na kagri vahe'ene musena hanue hu'na nagesa nentahue. Kagrama erisantima hare'nana vaheka'ane natrege'na magoka mani'ne'na, Kagri kagi'a ahentesga ha'heno. **6** Tagri tagehe'mo'zama hu'nazaza huta tagra kumi hu'none. Ana nehuta kumi hu hakare huta eri hakare hu'none. **7** Tagehemo'zama Isipima mani'neza kagrama eri fore'ma hu'nana kaguva zankura musena osu'naze. Kagrama kavesi zamantenenkama so'e kavukva'ma huzmante'nana zankura zamaganekani'naze. Ana nehu'za Koranke hagerinte'ma ne-eza ha' regante'naze. **8** Ana hu'neanagi Anumzamo'a Agri agimofo knare zankure huno zamaguravazi'ne. Ana nehuno Agra tusi hankave'a erinte ama hanige'za kesazegu anara hu'ne. **9** Anumzamo'a hankave ke Koranke Hagerimofona huntogeno, hageri amu'nompina ka fore huno, hagage kokampima hu'neaza huno mopa fore higeno hagege hu'ne. Ana hutegeno hagege kokampima me'nea mopare'ma viaza huno, hagerimofo amu'nompina Israeli vhahera zamavareno kantu kaziga vu'ne. **10** E'ina huno Anumzamo'a ha'ma rezmantenaza vahe'mofo zamazaptintira zamagu'nevazino, ha' vahe'zmimokizmi hankavefintira zamagu'vazino ete zamavare'ne. **11** Hianagi zamagri ha' vhahera, hagerimo ete eme ruhamprino refitege'za fri vagarageno, anampintira magore huno kuzafara omani fri vagare'naze. **12** Ana'ma hige'za Anumzamofo vahe'mo'za agrama huvempama hu'nea kegura zamentinti nehu'za, zagame hu'za agri agi ahentesga hu'naze. **13** Hianagi Ra Anumzamo'ma erifore'ma hu'nea zankura, ame hu'za zamagekani'naze. Ana hige'za Anumzamofo antahintahigura avega onte'za nazano hunaku'ma haza zana, amne tro hu'naze. **14** Hagege kokampima e'nazana ne'zama ne'zankura tusiza huno zamavesi zamavesi hu'ne. Ana nehige'za vahe omani ka'ma kokampina Anumzamofona rehе'za ke'naze. **15** E'ina hazageno Anumzamofoma antahigaza zana amne zami'ne. Hianagi havizantfa hu'nea kri atregeno eme zamazeri haviza hu'ne. **16** Seli nonkuma'ma eme ante'za mani'nafintira, mago'a oti'za Ra Anumzamo'ma huhampri zananteno zanazeri ruotagema hu'nea pristi eri'za netre Mosese'ene Aronikema e'neri'a eri'zankura kanive reznante'naze. **17** Ana'ma hazageno'a mopamo'a ruaka huno Datanina asgahu nenakrino, anampina Abiramune mago'a naga'enena zamazeri nakrifenka atreno refite'ne. **18** Ana naga'mokizmi kema antahi'za amage'ma

nente'za vahem'o'za havi avu'ava'ma hu'naza vhahera, tevemo eramino eme te fanane hu'ne. <sup>19</sup> Horepi agonafima ete'za golireti kre maramra hu'za, bulimakao anenta'mofo amema'a tro huntete'za, ana zamofo avuga kepri hu'za monora hunte'naze. <sup>20</sup> Hihamu masa'anee Anumzana amne zama hiaza hu'za, tra'zama nenea zaga ve bulimakaomofo amema'are atre'naze. <sup>21</sup> Isipi mopafima zamagu vazinaku'ma hankave kaguvazama erifore'ma nehuno, zamavareno etiramino'ma e'nea Anumzana, zamage kaniinte'naze. <sup>22</sup> Anumzamo'ma e'inahu hankave eri'zama Hamu mopafi erifore nehuno, ruzahu kaguvazama koranke hagerinte'ma erifore hige'zama ke'naza zankura zamagesa ontahi'naze. <sup>23</sup> E'ina'ma hu'nazagu huno Anumzamo'a zamazeri haviza hugahue huno huama hu'ne. Hianagi Agrama huhamprinte'nea ne' Mosese'a Anumzamofone veamokizmi amu'nompi oti'neno antahigeno, krimpa ahe'zana atregeno uramino huno meme higeno, Anumzamo'a zamazeri havizana osu'ne. <sup>24</sup> Hagi zamagra knare mopafima ufre zankura zamavesra hu'ne. Na'ankure Anumzamofo kegura zamagra zamentintia osu'nazagu anara hu'naze. <sup>25</sup> Zamagra seli nozamifi mani'neza sumisumi hu'za kehakare nehu'za, Ra Anumzamofo nanekea amage onte'naze. <sup>26</sup> Ana'ma hazagu huno Anumzamo'a aza erisga nehuno vahem'o'za omani ka'ma kokampi zamatre'nuge'za frigahaze huno huvempa kea hu'ne. <sup>27</sup> Ana nehu'na zamagripinti'ma efore'ma hanaza vhahera, zamazeri panani hanuge'za ru vahem'o'za ru vahem'o'za ru vahem'o'za anantega frigahaze hu'ne. <sup>28</sup> Hagi henka Israeli vahem'o'za Peori kumatera Bali havi anumzana mono hunente'za, fri vahete'ma ofama nehaza ne'zanena ne'naze. <sup>29</sup> E'inahu havi avu'ava zama haza zamo Ra Anumzamofona azeri rimpia hazageno rankri atregeno eno, eme zamazeri haviza hu'ne. <sup>30</sup> Hianagi Finiasi'a otino kumi'ma hu'naza vhahera zamahe hana higeno, ana krimo'a vagare'ne. <sup>31</sup> Ana hu'neankino ananteti'ma agafa hu'za mani'za vanaza vahem'o'za, henkama forehu anante nante'ma hu'za vanaza vahem'o'za, Finiasi'a fatgo avu'ava'za hu'ne hu'za maka zupa antahimi'za vugahaze. <sup>32</sup> Israeli vahem'o'za Meriba mopafima me'nea tintaminte'ma mani'neza Ra Anumzamofona azeri rimpia ahazageno, ana'ma hazazamofo knazana Mosese agofetu erintegeno eri'ne. <sup>33</sup> E'ina hu'za Mosesena azeri rimpia ahazageno, osuga naneke Mosese'a hu'ne. <sup>34</sup> Anama emani'naza mopafima mani'naza vhahera, Ra Anumzamo'a zamahe hana hiho huno Israeli vhahera huzmante'neanagi, ana nanekea amagera ante'za zamahe hanara osu'naze. <sup>35</sup> Hianagi Israeli vahem'o'za ana mopafima nemaniza vahem'ene ruhava hu'za nemani'za, ana vahem'o'za kefo avu'ava zana amage ante'za hu'naze. <sup>36</sup> Ana nehu'za havi anumzamofo monora hunte'naze. Ana'ma haza zamo'a krifugna huno zamazeri haviza hu'ne. <sup>37</sup> Ana nehu'za ne'mofa zamia zamahem'o'za havi anumzante kresramna vu'naze. <sup>38</sup> Hazenkezmi omane'nea ne'mofa zamia zamahem'o'za, korazmia eri neragi'za, Kenani vahem'o'za havi anumzantaminte zamahe'za Kresramanama vu'naza korazmimo mopa eri hi'nimna vu'ne. <sup>39</sup> E'inahu kefo avu'ava'ma hazazamo higeza Anumzamofo avurera agrua nosu'za, havi anumzama avesima antaza zamo'a Ra Anumzamofo avurera, vere a'mo'ma neve'enema mani fatgo osuno, atreno mago venema monko avu'ava zama hiaza hu'naze. <sup>40</sup> E'ina hu'negu Ra Anumzamo'a vahem'o'za tusi arimpa ahenezmanteno, nagri vahere huno'ma erisanti'ma hare'nea vhahera agotezmanteno avesra huzmante'ne. <sup>41</sup> Ana huteno ru mopafi vahem'o'za zamavesrama hunezmantaza vahem'o'za zamazampi

zamavarentege'za, ana vahe'mo'za kegava huzmante'naze. <sup>42</sup> Ana nehu'za ha' vahe'zamimo'za knazana zamiza zamazeri haviza nehazage'za, zamagri hankavefi mani'naze. <sup>43</sup> Rama'a zupa Anumzamo'a zamagu vazi'neanagi, kema antahi avu'ava zana zamagripina omane'negu huno, zamagri kumimo zamazeri haviza hu'ne. <sup>44</sup> Hianagi knafima mani'neza zamazama hanigu Ra Anumzamofontega zavi krafa hu'za nunamuma hazageno'a, nunamuzamia antahino asunku huzmante'n. <sup>45</sup> Anumzamo'a zamagrikure huno huvempama huzmante'nea nankegu agesa antahi'ne. Na'ankure vaga ore mevava avesi zama'agu agesa nentahino, antahintahi'a rukrahe hu'ne. <sup>46</sup> Israeli vahe'ma zamavare'za ome kina huzmante'naza vhahera, Anumzamo'a zamarimpa eri rukrahe hige'za Israeli vhahera zamasunku huzmante'naze. <sup>47</sup> Taguvazio, Ra Anumzana tagri Anumzamoka ru vahe moparegama umani emanima hu'nontegati tavre atru huo. Ana'ma hananketa ruotage'ma hu'nea kagia neheta hu muse huneganteta, musenkase huta kagi'a ahentesga hugahune. <sup>48</sup> Ra Anumzana Israeli vahe Anumzamofona agi'a ahentesga hanune. Maka zupa knane knanena agra manino nevia Anumza mani'ne. Maka vahe'mota tamage huta nehuta, Ra Anumzamofona agi'a ahentesga hanune.

## 107

### *Nampa 5 zagame avontafe*

#### *Anumzamofo knare avu'avazanku muse hu zagamere*

<sup>1</sup> Ra Anumzamofona susu huntensnune. Na'ankure agra knare avu'ava hu'neranteankino, avesimaranteno knare'ma hunerantea avu'avazamo'a mevava huno vugahie. <sup>2</sup> Ra Anumzamo'ma ha' vahe zamazampinti'ma tamagu'vazino tamavre'nenia vahe'mota, ranke huta Ra Anumzamo ha' vahe'mofa zamazampinti tagu'vazino tavre'ne huta huama huta vhahera zamasamiho. <sup>3</sup> Na'ankure zage hanati kazigane, zage fre kazigane, noti kazigane, sauti kaziganema ru vahe moparegama umani emanima huta kinama huta mani'nazaregatira, agra ete zamavare atru hu'ne. <sup>4</sup> Mago'amo'za vahe omani ka'ma kokampi vano vano nehu'za, manisnaza rankumaku hake'nazanagi onke'naze. <sup>5</sup> Ne'zankura zamaganetege'za tinku'enena hagage nehu'za fri'za hu'naze. <sup>6</sup> Ana kna zampima manine'za, Ra Anumzamofontega zavi krafa hazageno, ana kna zampintira zamagu'vazino ete zamavare'ne. <sup>7</sup> Agra knare huno zamavare fatgo huno umanisaza rankumate zamavareno vu'ne. <sup>8</sup> Zamatreke'za Ra Anumzamofona vagaore mevava avesi zama'agura susu hunente'za, knare avu'ava'ma huzmante'nea zanku'enena humuse hunteho. <sup>9</sup> Tinku'ma avesiaza huno maka zanku'ma ave'nesia vhahera eri knare hunente. Ne'zanku'ma hiazza huno maka zanku'ma aga'ma netea vhahera, knare zantaminu agu'afina antevinete. <sup>10</sup> Mago'a nagara tusi haninkino antrako hu'nefi, seni nofiteti kina huzmantage'za zamatagu nehu'za mani'naze. <sup>11</sup> Na'ankure Ra Anumzamofo nanekea ha'arente'za zamefi hunemiza Marerisa Anumzamo'ma hihoma huno huzmantea nanekea amagera onte'nazagu anara hu'naze. <sup>12</sup> E'ina agafare Anumzamo'a zamazeri anteramisige'za akohe'za manisazegu, zamatrege'za tusi maraguzati'za knanentake eri'zana eri'naze. Ana nehu'za traka hu'nazanagi, mago vahe'mo'e hunora zamaza osu'ne. <sup>13</sup> Ana knaza zamifima zamagrama mani'ne'za, Ra Anumzamofontega zavi krafa hazageno, ana knazampintira zamaza huno zamagu'vazi'ne. <sup>14</sup> Tusi

hani zampinti'ene fri'zamofo turunapima mani'nazafintira Anumzamo'a zamavare atineramino, seni nofimo'ma kinama rezmante'nea zana katufezmante'ne. <sup>15</sup> Ana'ma hanige'za zamatrengle'za Ra Anumzamofona vagaore mevava avesi zama'agura susu hunente'za, knare huno hentofa avu'ava'ma huzmante'nea zanku'enena susu huntaho. <sup>16</sup> Bronsireti'ma tro hu'naza kahana rurapage huno rufuzafupenetreno, kafama erigi'za rentrako nehaza ainia rufutagi atre'ne. <sup>17</sup> Zamagrama agri ke'ama ontahi avu'ava'ma hazazamo'a, negi vahe'mofo avu'ava'za tro nehu'za, kumi'ma haza nona'a knafina ufre'za zamatazana eri'naze. <sup>18</sup> Ne'zama ne'zankura zamavesra nehu'za, fri'zamofo kahanterera erava'o nehaze. <sup>19</sup> Ana knazamo'ma zamazeri haviza hige'zama manine'za, Ra Anumzamofontega zavi krafa hazageno, ana hazenkefintira zamagu'vazino zamavare atirami'ne. <sup>20</sup> Anumzamo'a naneke'a huntogeno eno zamazeri neganamreno, frinaku'ma nehazafintira eme zamagu'vazi'ne. <sup>21</sup> Ana hu'negu zamagra Ra Anumzamofona vagaore mevava avesi zama'agu'ene, knare avu'ava'ma huzmante'nea zanku'enena susu huntegahaze. <sup>22</sup> Ana nehu'za muse ofa Anumzamofontega Kresramana nevu'za, knare avu'ava'ma hu'nea zankura zagame hu'za musenkase nehu'za huama hoho. <sup>23</sup> Mago'amo'za ventefi mani'za hagerimofo agofetu vu'za e'za hu'za ru moparega fenozana eri'za zagore ometre emetre nehaze. <sup>24</sup> Ana vahe'mo'za zamagranena Ra Anumzamo'ma hankave eri'zama eri'nea zana ke'za antahi'za nehu'za, knare zantfama hu'nea zantamima hagerimofo agu'afima tro'ma hunte'nea zanena ke'naze. <sup>25</sup> Anumzamo'a hankave zaho huntogeno eno hagerina eme vazi'zoregeno, hagerimo'a kranto kranto nehie. <sup>26</sup> Ana nehuno anama mani'naza ventea erisga huno ame'nagame monafi mareriteno, atregeno hagerimpina amefenkame uneramie. Ana'ma higeno'a ventefima vanoma nehaza vahe'mo'za koro hu'za tusi zamagogogu nehaze. <sup>27</sup> Ana nehu'za ventefima vanoma nehaza vahe'mo'za aka tima ne'nea vahe'mo'ma neginagi nehuno, traka huno umse emase hiaza nehu'za, ventema agu'vazi antahi'zazmimo'a vagare'ne. <sup>28</sup> Ana knazamo'ma zamazeri havizama nehige'za, Ra Anumzamofontega kezati'zageno, ana knaza ramimpintira zamagu'vazino zamavare'ne. <sup>29</sup> Anumzamo'a hagerimofona akohenka manio huno magoke zupa higeno, hagerimo'ma kranto kranto'ma nehia agasasamo'a urami avazage'ne. <sup>30</sup> Hagerimo'ma ome avamazagegeno'a ventefima vano nehaza vahe'mo'zama nege'za tusi muse nehazageno, vunaku'ma haza kumate'ma me'nea tinkenarega zamavare so'e huno zamagu'ma vazisaza kumatega vu'ne <sup>31</sup> E'ina hu'negu Ra Anumzamofona vagaore avesi zama'agura susu hunente'za, knare avu'ava'ma huzmante'nea zanku'enena susu huntegahaze. <sup>32</sup> Anumzamofo vahe'ma atruma hanafina Agri agi'a ahentesga nehu'za, kva vahe'ma atruma hanafina husga huntegahaze. <sup>33</sup> Tirama ne-ea tintamina Anumzamo'a eriranegeno hagege mopa fore nehigeno, tima nehanatia kampuitamina eri ranegeno mopamo'a hagege hu'ne. <sup>34</sup> Ana nehuno masave nentake'ma hu'nea mopafina, higeno hagemo'a aviteno mopa eri haviza hu'ne. Na'ankure ana mopafima nemaniza vahe'mo'zama havi avu'avazama hu'naza zanku huno anara hu'ne. <sup>35</sup> Hianagi hagege kokampina Anumzamo'a higeno tirura mare'nevazigeno, ka'ma kokampina higeno tintamimo'a rama'a eforera huno ne-e. <sup>36</sup> Ana'ma huteno'a ne'zanku'ma zamaga'ma netea vahera zamavareno ana mopafina vige'za umanine'za, nona ki'za

ranra kumatmina erifore hu'za mani'naze. <sup>37</sup> Ana mopafina hoza ome eri'za nente'za, waini hozanena antazageno raga rentege'za rama'a tagi'naze. <sup>38</sup> Anumzamo'a vahe'a asomu huzmanteg'e'za rama'a mofavre kasezamante'za eri hakare nehazageno, bulimakao afu'mo'zanena rama'a forehu hakare hu'za vu'naze. <sup>39</sup> Hagi zamagra rama'a vahe'ma mani'nazaretira ome osi osi hume vu'za osi'a vahe mani'nazagu ha' vahe zamimo'za hara eme huzmagatere'za zamazeri zamagaze nehu'za, zamata nezami'za tusi knaza zamizage'za zamasunku zampi mani'naze. <sup>40</sup> Ra Anumzamofo vahe'ma ha'ma eme huzmantaza vahe'mokizmi kva vahetera, Anumzamo'a arimpa ahe'zana erikaha hutrege'za, ka'ma kokampina kanku hazagre'za vano vano nehaze. <sup>41</sup> Hianagi zamunte omane vahe'mo'zama knafima mani'nazageno'a, Anumzamo'a zamaza huno zamavare netreno, sipisipi afu'mo'zama nehazaza huno zamazeri hakare hige'za, rama'a mofavre zamante'za eri hakare nehaze. <sup>42</sup> Fatgo avu'ava'zama nehaza vahe'mo'za ana zama nege'za muse nehanage'za, kefo avu'avazama nehaza vahe'mo'za kea osu zamagira hamunki'za mani'naze. <sup>43</sup> Hagi iz'a knare antahi'zama me'nesia vahe'mo'za ama ana zankura agesa anteno nentahino, Ra Anumzamofo vagaore mevava avesi zama'a keno antahino hugahie.

## 108

### *Amentintifima oti hankavetino mani'zanku Deviti asunte'nea zagamere*

<sup>1</sup> Anumzamoka nagu'reti hu'na kagritera namentintia nehue. Ana nehuanki'na maka nagu'reti hu'na zagamera nehu'na, kagri kagia ahentesga hugahue. <sup>2</sup> Nanterama zahufa masama osu'nesige'na oti'na laeliema nehaza zavenane, hapu'ema nehaza zavenanena nehe'na masama hu'zana azeri otisugenno masa hugahie. <sup>3</sup> Maka ama mopafima mani'naza vahe'mokizmi zamavufi, Ra Anumzamoka susu hugantegahue. Ana nehu'na kokankokama nemaniza vahe'mokizmi zamavufi kagi'a ahentesga hu'na zagamera hugahue. <sup>4</sup> Na'ankure vagaore mevava kavesi zamo'a mona agatereno ame'nagame mareri'ne. Ana nehigeno so'e kavukva'ma hurante vavama hunka neana zamo'a onagamu hampompi mareri'ne. <sup>5</sup> Anumzamoka kagri kagia ahentesga hanunkeno monafi marenerisigeno, kagri hihamu masazankamo'a maka ama mopafina vuno eno hanige'za vahe'mo'za antahiza ke'za hanaze. <sup>6</sup> Hanki menina kagrama kavesinerantana vaheka'a tagu'vazinka ete tavaro. Nunamuni'a antahi nenaminka kagra hankave ka'reti nagu'vazio. <sup>7</sup> Anumzamo'a ruotage'ma hu'nea mono noma'afi mani'neno amanage huno huvempa hu'ne. Nagra hara ko hugatere'noanki'na, muse hu'na Sekemu mopane Sukoti agupo mopa refko hugahue. <sup>8</sup> Giliati mopane Manase mopamokea nagri mopa menakeno, Efraemi mopamo'a bronsi fetori nanunte nentuanckna huno megeno, Juda mopamo'a kini vahe'mo'ma azampima e'neria azotani'agna hu'ne. <sup>9</sup> Hagi Moapu mopamo'a tifre zuompa ni'agna hu'neankino, henka nagri eri'za vahe nemanisige'na, Idomu mopa'i nagia nona zafi atregahue. Ana nehu'na Filistia vahera hara huzmagatenere'na, kezati'na musena hugahue. <sup>10</sup> Iza navareno hankave vihu keginama hugagi'naza rankumapina ufregahue? Iza navareno Idomu mopafina vugahie? <sup>11</sup> Anumzamoka kagra ko kamefi hurami'nampi? Anumzamoka tagri sondia vahera zamaza osugahampi? <sup>12</sup> Anumzamoka taza hugeta ha' vahetia hara huzmagateramneno. Na'ankure vahe'mo'ma tazama hu'zamo'a, amne

zankna hugahie. <sup>13</sup> Anumzamo'a taza hanigeta hara huzmageteregahune. Na'ankure ha' vahetia agiareti zamare hapatigahie.

## 109

### *Knazampima mani'nea vahe'mofo zagamere*

<sup>1</sup> Anumzana kagri kagima ahentesgama nehua Anumza mani'nananki, kagasasana eri taganenka omanio. <sup>2</sup> Na'ankure kefo avu'ava'zama nehu'za krunagema nehaza vahe'mo'za, zamagira reaka hu'za nazeri haviza hu nanekea nehu'za, havige hunante'za vano nehaze. <sup>3</sup> Maka kazigatira huhaviza hunenantaza kemo nazeri kanegigeno, mago agafa'a omane'nea zante zamagra nenahaze. <sup>4</sup> Nagra navesi nezmante'na, nunamu huzmante noanagi, zamagra rukrahe hu'za osu'noa zanku havi naneke hunante'naze. <sup>5</sup> Knare avu'ava zama huzmantoa zantera, nona hu'za havi avu'ava hunante'naze. Ana nehu'za nagra navesi zmantoanagi, nagrira navesi onante'za zamavesra hunante'naze.

<sup>6</sup> Kefo avu'ava'ma nehia vahe huntogeno ha'ma renenantea vahera keaga hunteno, Agri ha' vahe huntogeno keaga hunteno. <sup>7</sup> Hagi keaga'ama refko hania ne'mo'ma naneke'ama nentahino'a, hago hazenke hu'ne huno hugahie. Ana nehuno ana ne'mo'ma nunamuma huno e'neana, ana nunamumo'a kumizase'ne. <sup>8</sup> Atregeno ana ne'mo'a ame huno nefrisigeno, mago vahe'mo agri nona eri'noe. <sup>9</sup> Agri mofavre naga'mo'za megusa nemanisageno, nenaro'a kento a' manisanie. <sup>10</sup> Ana ne'mofo mofavre naga'mo'za vano vano nehu'za, vahe zante meme hu'za vano nehu'za, havizama hu'nea nozamia atre'za afete hake'za vano hiho. <sup>11</sup> Hagi ana ne'mo'ma mago vahe'mofo zamanofi'ma hu'neno omi'nesia zantera, anazamofo nafa'amo'a eme ana ne'mofo fenozana eri vagaregahie. Ana nehanige'za ru kumate vahe'mo'za e'za, amuhoma huno eri atruma hu'nea feno zama'a maka eri'za vugahaze. <sup>12</sup> Mago vahe'mo'a ana ne'mofonkura asunkura hunteno knare avu'avara huonteno. Ana nehina ana ne'mofo megusa mofavre nagara zamasunkura huozmantegahaze! <sup>13</sup> Ana nehanigeno agripinti'ma fore'ma hanaza mofavre nagara ana maka fri vagaresage'za, henkama fore'ma hanaza vahe'mo'za ana vahera antahi ozamigahaze. <sup>14</sup> Ana ne'mofo agehememo'zama hu'naza kumira Ra Anumzamo'a aganera okanisie. Ana nehuno ana ne'mofo nerera'ma hu'nesia kumira avontafepintira eri otresie. <sup>15</sup> Ra Anumzamo'a maka zupa ana vahe'mokizmi kumikura agesa antahi vava nehanige'za, ana ne'mofona vahe'mo'za mago'e'ne zamagesa antahi omigahaze. <sup>16</sup> Na'ankure ana ne'mo'a vahe'ma so'e avu'ava'ma huzmante zankura avesra nehuno, zamunte omane vahe'ene ke'onke zanku atupama nehaza vahera zamazeri haviza nehie. Ana nehuno zamarimpa zamatafima mani'naza vahera zamahe fri'ne. <sup>17</sup> Ana ne'mo'a sifana kema vahe'ma huzmanteno zamazeri haviza hu zankura muse nehie. Ana hu'neanki menina agri sifna kemo sifna hunteno azeri haviza hanie. Ana ne'mo'a vahera zamazeri so'ea nosia neki, ana nera azeri so'ea osanie. <sup>18</sup> Agrama vahe'ma sifna kema huzmantea zamo'a, avate'ma za'za kukenama eri antaniaza nehuno, tima negeno avufgafi ufreaza nehigeno, masavemo'ma zaferinafima ufreaza hu'ne. <sup>19</sup> Hagi vahe'ma sifnamma huzmante'nea zamo'a ete rukrahe huno agrite eno, kukenama antaniaza huno avufgare nemesigeno, maka zupama amunofi'ma regeno afafafima meaza hino. <sup>20</sup> E'inahu knazana Ra Anumzamo'a atresigeno eno, nagri'ma nazeri haviza hu kema nehaza vahera eme zamazeri haviza hanie. <sup>21</sup> Hianagi Ra Anumzana

nagri Anumzamoka, kagraka'a kagigu nentahinka, enka eme naza huo. Na'ankure kavesi zankamo'a knare zantfa hu'neanki, nagu'vazinka ete navro. <sup>22</sup> Nagrira namunte omanege'nna, maka zankura atupa hu'na mani'nogeno, tumo'nimo'a fakifaki nehuno nata negrie. <sup>23</sup> Kinaga fre zagemo rentegeno namemo ome atupa hizaza hu'na, ome vagare'za nehu'na, ra kenu'mo atafari ramiaza nehue. <sup>24</sup> Nagra ne'zama a'o hu'na manua zamo higeno narenafina hanave'a nomanege, navufgamo'a tari'vazino zaferinare ome akamare'ne. <sup>25</sup> Vahem'o'zama nagri'ma nenage'za tusi kizazokago ke hunenante'za, zamaseria rugenka hu'naze. <sup>26</sup> Ra Anumzana nagri Anumza mani'nananki naza hunka, vagaore mevava kavesi zanteti nagu'vazio. <sup>27</sup> Ama ana zama nehana zankura, Ra Anumzamo Agra'a azanuti agura nevazie hu'za ke'za antahi'za hihi. <sup>28</sup> Zamagra nagrira kazusi hunantegahaze. Hianagi kagra asomu hunantegahane. Nagrira nazeri haviza hugahaze. Hianagi zamagrira zamazeri haviza hananke'za zamagazegu hugahaze. Hianagi kagri eri'za vahe'mo'a musenkase hugahie. <sup>29</sup> Nagri'ma havigema hunante'naza vahe'mo'za zmagazezamo'a refitez-mantegahie. Ana nehanageno za'za kukanomo'ma rufiteaza huno zamagazemo'a refitezmantegahie. <sup>30</sup> Ra Anumzamofona tusiza hu'na susu hunente'na, vahe'ma atruma hanaza amu'nompima mani'nena, agri agi'a ahentesga hugahue. <sup>31</sup> Na'ankure Agra maka zanku'ma atupa'ma nehaza vahe kaziga mani'neno, vahe'mo'zama zamazeri havizama nehu'za zamahe frinaku'ma nehazageno'a Agra zamaza nehie.

## 110

### *Anumzamo'ma huvempama hu'nea kini nemofo zagamere*

<sup>1</sup> Ra Anumzamo'a Ranimofonkura amanage huno asami'ne, nazant-maga kaziga mani'nege'na, ha' vaheka'a zamazeri atresanuge'za kagiafinka mase'nagenka zamogofetu kagia renka otigahane!

*(Matiu 22:44, Aposolo 2:34, 1 Korinti 15:25, Hibru 1:1-13)*

<sup>2</sup> Ra Anumzamo'a kazeri antesga hanigenka Jerusalemi rankumate kva mani'enka, mago'a kuma'enena kegava nehunka, ha vaheka'anena kegava huzmantegahane. <sup>3</sup> Hagi kagrama hate'ma vunaku'ma hananke'za, kagri vahe'mo'za amne zamagra'a oti'za kagrane vanageta ha' vahe'enena hara ome hugahaze. Ruotage'ma hu'nea agonafima kenage ata komo'ma, trazante runtegeno kasefa hankavema ete eriaza hunka, maka zupa han-kaveka'amo'a kasefa hugahie. (Hibru 5:6, 6:20, 7:17-21.)

<sup>4</sup> Ra Anumzamo'a huvempa hu'neankino naneke'a amage antegahie. Melkizedeki'ma hu'neaza hunka Kagra pristi vahe fore hugahane. E'ina hu'neankinka pristia manivava hunka vugahane. <sup>5</sup> Ra Anumzamo'a kazantamaga kaziga mani'neankino, arimpahе zamo'ma efore hania knazupa, kini vahera rama'a zamaheno rehapatitregahie. <sup>6</sup> Ama mopafima mani'naza vahera, zamagrama hu'naza zamavu'zmava zanteria Anumzamo'a keaga hunezmaneno, zamatresnige'za hapinti rama'a vahera zamahe'za eri kevu hanageno hihi huno marerigahie. Ana nehuno maka ama mopafima mani'naza kini vahetamina zamaheno rutragatrago hutregahie. <sup>7</sup> Hianagi agra karanka nevuno, kantegama me'nea osi tina neneno hankavea erigahiankino hara hu agatereno asenia antesga hugahie.

## 111

### *Ra Anumzamofoma agi'ama ahentesgama hu zagamere*

<sup>1</sup> Ra Anumzamofona agi'a ahentesga hanune. Fatgo avu'ava'ma ne-haza naga'ma atruma hanafina, maka nagu'reti hu'na Ra Anumzamofona susu huntegahue. <sup>2</sup> Ra Anumzamo'ma eri'zama eri'nea eri'zamo'a, so'e zantfa hu'ne. Ana hu'neanki'za agrama eri'nea eri'zanku'ma musema nehaza vahe'mo'za, ana zamofo agenkea atrazageno zamagu'afi me'nege'za nentahize. <sup>3</sup> Maka zama Anumzamo'ma nehia zamo'a agri hankave hi-hamu masa zama'anena erinte ama nehie. Ana hu'neankino Anumzamofa fatgo avu'ava zamo'a, vagaore mevava huno nevie. <sup>4</sup> Anumzamo'a ruzahu hentofa eri'zama eri'nea zankura, tamaganera okanisie huno tagri antahi'zana eri o'netie. Ra Anumzana tagri Anumzamo'a asunku nehuno arimpa fru Anumza mani'ne. <sup>5</sup> Anumzamofonku'ma koro'ma hunte'za agorga'ama nemaniza vahera, agra ne'zana zamige'za nenaze. Agrama hvempama hu'nea kasege'agura agera okani agesa antahi vava hugahie. <sup>6</sup> Anumzamo'ma hankave'ama eri ama hige'za agri vahe'mo'zama ke'nazana, ru vahe mopa hanareno, eri zamige'za erisantihare'za menina mani'naze. <sup>7</sup> Agrama hugahue huno'ma hu'nea zana maka tro nehuno, fatgo huno refko nehia Anumza mani'neankino, maka kasege'amo'a tamage ke me'neankita antahita amage antegahune. <sup>8</sup> Ana kasegemoa mevava hugahie huno eri hankaveti'neankita, maka zupa fatgo tavutva nehuta amage ante vava hugahune. <sup>9</sup> Agra vahe'a mizaseno ete nezamavareno, mevava hania huhagerafi hvempage huzmante'ne. Ana hu'neankino agri agimo'a, ruotage huno hentofaza hu'ne. <sup>10</sup> Ra Anumzamofoma koro'ma hunte'zana, knare antahi'zamofo agafa'a me'ne. Iza'zo agri avesi'zama amage'ma antesnaza vahe'mo'za antahintahi zampina ani hugahaze. Ana hu'negu maka zupa Anumzamo'a ra agia eri vava hanie.

## 112

### *Knare veamo'za muse hugahaze hu'nea naneke*

<sup>1</sup> Ra Anumzamofo agi'a ahentesga hoho! Iza'o Ra Anumzamofonku'ma koro hunenteno, muse huno'ma agri kasegema amage'ma nentesnia vahe'mo'za knare asomu erigahie. <sup>2</sup> Ana nehanageno mofavre naga'amo'za ranra vaheke efore hu'za maka kaziga ama mopafina knare hu'za manigahaze. Hagi ana fatgo avu'ava zama nehania vahepinti'ma, henka forehu anante nante'ma hu'za maka kazigama vanaza vahe'mo'za asomu'enene manigahaze. <sup>3</sup> Ana vahe'mokizmi nompina zagone feno zamo'enena megahie. Ana nehanigeno fatgo zamavu zamavamo'a maka zupa mevava huno vugahie. <sup>4</sup> Hani zana fore hugahianagi, Anumzamofo amagema nente'za vaheku'ma zamasunku'ma nehu'za, knare zmavuzmava hunezmante'za fatgo zamavu'zamava zama nehaza vahe'mokizmia tavi'mo remsa huzmantegahie. <sup>5</sup> Vahe'mo'za zagoma nofi hunaku'ma nehanageno, iza'o muse huno zagoma nemino, maka zama hanifima fatgo kazigatike'ma hania vahe'mo'a, maka zama hania zamo'a knare hugahie. <sup>6</sup> Fatgo avu'ava zama nehania vahera kefo avu'ava zamo'a azeri otregahie. Fatgo avu'ava zama nehaza vahera, vahe'mo'za zamagerakani ozamante'za, zamagesa antahizami vava hugahaze. <sup>7</sup> Ana vahe'mo'za knazama fore hania zamofo agenkema nentahisu'za korora osugahaze. Na'ankure zamagra Ra Anumzamo'a taza hugahie hu'za amuhara nehu'za, zamentintia nehaze. <sup>8</sup> Ana vahe'mo'za zamagu'a zamazeri hanaveneti'za, korora osu mani'ne'za nezmagese'za

ha' vahezmia zamazeri haviza hugahaze. <sup>9</sup> Ana vahe'mo'za zamunte omane vhahera refko hu'za mago'a zana amne zamigahaze. Ana nehanageno fatgo zamavu'zmavama nehaza zamo'a mevava huno nevanige'za vahe'mo'za, husga hunezmante'za ra zamagi zamigahaze. <sup>10</sup> Hagi kefo zamavu'zmavama zama nehaza vahe'mo'za ana zama nege'za, zamarimpagu nehu'za zamavera aninkreki hugahaze. Ana nehu'za kefo avu'ava zama nehaza vahe'mo'zama knare'nare zama erinaku'ma antahintahima hu'nesaza zana e'orisageno, mago'a zama erinaku'ma amuhama nehaza zamo'a amne zankna hugahie.

## 113

### *Knare vahe'mo'za muse hugahaze hu'nea naneke*

<sup>1</sup> Ra Anumzamofo agi'a ahentesga hanune! Ra Anumzamofo eri'za vahe'mota Anumzamofo agi'a ahentesga hiho. Ra Anumzamofo agi'a ahentesga hiho. <sup>2</sup> Menine henkanena Ra Anumzamofo agigura muse hunte vava huta vanune. <sup>3</sup> Zage hanatitegati vuno zage fretegama vanigeta, maka vahe'mota, Ra Anumzamofo agi'a husga huntesune. <sup>4</sup> Ra Anumzamo'a onagamu mani'neno, maka ama mopafi vhahera kegava hu'negen, Agri konarari masa zamo'a mona agatereno amenagame mareri'ne. <sup>5</sup> Ina vahe'mo Ra Anumzana tagri Anumzamo'ma tra'are'ma manisgama hu'nea Anumzankna vhahera mani'ne? <sup>6</sup> Ana Anumzamo'a onagame mani'neno kefenkateno monane mohanena nege. <sup>7</sup> Zamunte omne vahe'ma kugusopafima mase'nazana Anumzamo'a zamavazu huno zamazeri o'netino, maka zanku'ma atupa'ma nehaza vahe'ma ta'nefapima mani'nazana zamavaresga nehie. <sup>8</sup> Ana huteno kva vahe'mofo trate zamantege'za, agri vahe'ma kegavama nehaza ugota kva vahe'mo'zama nemaniza tva'ontera nemanize. <sup>9</sup> Mofavre onte naravo ara mofavre amigeno rama'a mofavre nenteno, tusi muse nehie. Ra Anumzamo'a ra agia erisie.

## 114

### *Anumzamo'ma koranke hagerinte'ma zamazama hige'za hu'naza zagamere*

<sup>1</sup> Hagi Israeli vahe'mo'zama Isipiti'ma atre'zama e'nazana, Jekopu naga'mo'za ru zamageru'ma neraza vahe'mokizmi moparegama umani'nazaregatira atre'za e'naze <sup>2</sup> Ana'ma hazageno'a Juda mopamo'a Anumzamofo mono nonkna higen, Israeli mopa Agra'a kegava hu'ne. <sup>3</sup> Koranke hagerinte'ma azageno'a, ana hagerimo'a nezmageno koro fre'ne. Ana nehigeno Jodani timo'a ete rukrahe huno ne-erega vu'ne. <sup>4</sup> Ranra agonaramimo'za, ve sipisipimo'zama nehazaza hu'za takaire takaire nehazageno, ne'onse agonaramimo'za anenta sipisipimo'zama nehazaza huza takaire takaire hu'naze. <sup>5</sup> Nazamo higenka Koranke hagerimoka, korora nefrane? Nazamo higenka Jodani timoka, ete rukrahe hunka neantega nevane? <sup>6</sup> Nazamo higeta ranra agonaramimota, ve sipisipimo'za nehazaza huta takaire takairera nehaze? Nazamo higeta ne'onse agonaramimota, anenta sipisipi afumo'zama nehazaza huta takaire takairera nehaze? <sup>7</sup> Ama mopamoka Ra Anumzamofo avuga kahirahiku nehunka, Jekopu Anumzamofo avuga kahirahiku huo. <sup>8</sup> Ana Anumzamo'a havefina higeno tirura marennevazigeno, havemoke'ma hu'nea agonafintira higeno tina hanatino ne-ea ne' mani'ne.

## 115

### *Anumzana Agrake tamage Anumzana mani'ne hu'nea naneke*

<sup>1</sup> Ra Anumzamoka tagra rantagia e'origahunanki, kagrake rankagia erigahane. Na'ankure kagra maka zupama vagaore kavesi zanku'ene, hugahuema hu'nana zama amage'ma antenkama nehana zanku huta, kagi'a husga hunegantone. <sup>2</sup> Nagafare ama mopafima mani'naza vahe'mo'za tagrikura hu'za, Anumza zamimo'a iga mani'ne hu'za nehaze? <sup>3</sup> Tagri Anumzamo'a monafinka mani'neankino nazano hunaku'ma hiazana agra'ava esite amne nehie. <sup>4</sup> Hianagi mago'a vahe'mokizmi havi anumzana, silvareti'ene golireti vahe'mo'za avako hu'za zamazanteti tro hu'naze. <sup>5</sup> Ana havi anumzantamina zamagira me'neanagi, keaga nosu'za, zamavurga me'neanagi, onkegahaze. <sup>6</sup> Hagi zamagesa me'neanagi keaga nontahi'za, zamagona me'neanagi mna ontahigahaze. <sup>7</sup> Zamazana me'neanagi mago zana avakora hu'za nonke'za, zamagia me'neanagi kana ante'za vanoa nosu'za, zamanankena me'neanagi, zamagerura orugahaze. <sup>8</sup> Hagi ana havi anumzantamima tro'ma nehaza vahe'mo'za ana havi anumzantamo'zama havizama nehzaza hu'za zamagra haviza nehanage'za, ana havi anumzante'ma zamentintima nehzaza vahe'mo'za zamagranena haviza hugahaze. <sup>9</sup> Hagi tamagra Israeli vahe'mota Ra Anumzamofonte tamentintia hiho. Na'ankure agra hankogna huno mani'neankino, agrake'za tamahorakeno tamagura nevazino kegava huneramante. <sup>10</sup> Aroni nagapinti'ma pristi eri'zama e'neriza nagamota, Ra Anumzamofonte tamentintia hiho. Na'ankure agra hankogna hu'neankino agrake'za tamahorakeno tamagura nevazino, kegava huneramante. <sup>11</sup> Hagi Ra Anumzamofonku koro'ma hunteta agoraga'ama nemaniza vahe'mota, Ra Anumzamofonte tamentintia hiho. Na'ankure Agra tamazahu ne'mani'neno tamagri hanko mani'neankino, Agrake'za tamahora keno tamagura nevazino kegava huneramante. <sup>12</sup> Ra Anumzamo'a ageraokani agesa antahi neramiankino, asomura hurantegahie. Israeli vhahera asomura hunezmanteno, Aroni naga'ma pristi eri'zama e'neriza naga'enena asomura huzmantegahie. <sup>13</sup> Zamagi me'nea vahero zamagi omene vahe'mo'zanema, Ra Anumzamofonkuma koro'ma nehzaza vahera Anumzamo'a asomu huzmantegahie. <sup>14</sup> Ra Anumzamo'a asomu huramantena tamagra mofavrea kasente hakare nehanageno, tamagri mofavre naga'enena asomura huzmantesnige'za mofavrea kasente hakare hanaze. <sup>15</sup> Ra Anumzana monane mohanema tro'ma hu'nea Anumzamo tamagrira asomura huramantesie. <sup>16</sup> Monafina Ra Anumzamo nemanino, ama mopa vahemotagu manio huno tami'ne. <sup>17</sup> Ko'ma fri'naza vahe'mo'za zagameru hu'za Ra Anumzamofo agi'a ahentesga osugahaze. Na'ankure zamagra fri'za keaga osu kumapi, matipi umani'naze <sup>18</sup> Hianagi tagra Ra Anumzamofona menine henka'anena agri agi'a ahentesga huvava huta vanune. Ra Anumzamofo agi'a ahentesga hanune!

## 116

### *Anumzamofonku susu hunte zagamere*

<sup>1</sup> Nagra Ra Anumzamofona navesinentoe. Na'ankure Agra nagerura nen-tahino asunku'ma hunanteno nazama hinogu'ma krafa kema huana antahinenamie. <sup>2</sup> Na'ankure Agrama agesa anteno antahi nenamia zankura, nagrama kasefa'ma hu'na manisanua kna'afina agriteke nunamuna hugahue. <sup>3</sup> Fri'zamo'a nofimo'ma nazeri anakiaza nehigeno, fri vahe kumaku'ma

koro huazamo'a, nazeri fenkami netre. Ana zamo hige'na knazampi nemani'na nasu zampi nemanue. <sup>4</sup> Ana'ma nehige'na Ra Anumzamofo agi ahe'na, Ra Anumzamoka nagu'vazio hu'na nunamuna nehue. <sup>5</sup> Ra Anumzamoa'a asunku huneranteno, fatgo avu'ava nehia ne'mani'neankino, tagri Anumzamofona arimpa fruzamo'a avite'ne. <sup>6</sup> Zamagra'ama zamaza osuga vahera, Ra Anumzamoa'a kegava hunezmante. Korapara ra hazenkezampi mani'nogeno naguravazi'ne. <sup>7</sup> Menina narimpa fru hu'na mani'noe. Na'ankure Ra Anumzamoa'a knare hunante'ne. <sup>8</sup> Nagrira fri'zampinti nagu'vazino nenavreno, navunura eri haminenanteno, naza hige'na trakara hu'na nomasoe. <sup>9</sup> Ana nehigu nagra kasefa'ma hu'na ama mopafima manisanua kna'afina, Ra Anumzamofo avure kana vano hugahue. <sup>10</sup> Nagra Ra Anumzamokare namentinti nehugu amanage hugahue. Ranknazamo nazeri haviza nehie. <sup>11</sup> Nagra antahintahi hakarema nehua knafina amanage hu'na Kagritega kezana netue. Maka amama mani'naza vahera havige nehaza vahe mani'naze. <sup>12</sup> Ra Anumzamoa'ma maka knare avu'ava zama hunante'nea zanteria, nagra na'a nona hu'na amigahue? <sup>13</sup> Waini ofama erino Ra Anumzamofonte emerisga hiaza hu'na nagu'vazino navre'nea zankura musenkase nehu'na, agi'a ahentesga hugahue. <sup>14</sup> Hagi Anumzamofono vahe'ma maka eme etruma hanafina, nazano hugahue hu'nama Ra Anumzamofono avure'ma huvempama hu'noa zantamina hugahue. <sup>15</sup> Ra Anumzamofoma amage'manentaza vahe'ma frizana, Anumzamofono avurera so'e zantfa nehie. <sup>16</sup> Ra Anumzamoka nagra kagri eri'za vahe mani'noanki'na, eri'za vahekamo'na kagri nompima eri'za e'neria a'mofo mofavre mani'noe. Ana hu'neankinka nofimo'ma kinama renante'neana katufenka nazeri fru hu'nane. <sup>17</sup> Ana hu'neanki'na kagritega humuse ofani'a hunegante'na, Ra Anumzamoka kagire nunamuna hugahue. <sup>18</sup> Hagi nazano hugahue hu'nama Ra Anumzamofono avure'ma huvempama hu'noa zantamina, maka Anumzamofono vahe'ma eme etruma hanafina ana zana hugahue. <sup>19</sup> Jerusalemi kuma'mofo agu'afima, Ra Anumzamofono mono noma me'nea kumapi, Ra Anumzamofono agi'a husga huntuesue.

## 117

### *Ra Anumzamofono agi'a ahentesga hanune hu'nea zagamere*

<sup>1</sup> Maka ama mopafima kokankokama nemaniza vahe'mota, Ra Anumzamofono agi'a husga hunteho. Maka mopafi vahe'mota Anumzamofona agi'a ahentesga hiho. <sup>2</sup> Na'ankure Ra Anumzamoa'a tusiza huno vagaore avesi zanteti avesi neranteno, Agra hugahuema hu'nea ke'a avaririno kegava hurantevava nehie. Ra Anumzamofona agi'a ahentesga hanune.

## 118

### *Anumzamo azahu'neazankukvanemomusenehuno hunte'neazagamere*

<sup>1</sup> Ra Anumzamofona susu huntunesune, na'ankure Agra knare avu'avaza huneranteno vagaore avesi zama'areti avesirante vava nehie. <sup>2</sup> Maka Israeli vahe'mota huta, Anumzamofona vagaore avesi zama'amo'a mevava huno nevie huta hiho. <sup>3</sup> Aroni naga'ma pristi eri'zama e'neriza nagamota hanazana, Anumzamofona vagaore avesi zama'amo'a mevava huno nevie huta hiho. <sup>4</sup> Ra Anumzamofonku'ma koro'ma hunente'zaagoragama nemaniza vahe'mota Anumzamofona vagaore avesi

zama'amo'a mevava huno nevie hu'za hiho. <sup>5</sup> Nagra ra knazampima manine'na Ra Anumzamofonte nunamuma hugeno'a, Ra Anumzamo'a nunamuni'a antahinamino knazanifintira naza hige'na fru hu'na nemanue. <sup>6</sup> Ra Anumzamo'a nagri kaziga mani'neanki'na, nazano vahe'mo'ma hunante'naku'ma hania zankura, korora osugahue. <sup>7</sup> Tamage, Ra Anumzamo'a nagri kaziga mani'neankino, nagrira naza hugahie. Ana nehuno ha'ma renenantaza vhahera zamazeri haviza nehanige'na, muse nehu'na zamage fenkami atregahue. <sup>8</sup> Ra Anumzamofompima fra'makino mani'zamo'a, vahete'ma amuha'ma hu'zana agatere'ne. <sup>9</sup> Ra Anumzamofompima fra'makino mani'zamo'a, ugagota kva vahete'ma amuha'ma hu'zana agatere'ne. <sup>10</sup> Maka kokankoka vahe'mo'zama eme navazagi kagi'za hara hunante'naze. Hianagi Ra Anumzamofo agifi ana vhahera hara huzmagatere'noe. <sup>11</sup> Nagri'ma ha'ma hunante'nakura tamagerfa hu'za maka asoparegati eme navazagi kagi'naze. Hianagi Ra Anumzamofo hankavefi hara huzmagatere'noe. <sup>12</sup> Ha' vahe'mo'za tumemo'ma nehiaza hu'za eme nazeri kagi'naze. Hianagi tevemo'ma osi trazampima ruhagana huno teteno fanane hiankna hu'naze. Ana nehazage'na Ra Anumzamofo agifi hara huzmagatere'noe. <sup>13</sup> Ha' vahenimo'za hankaveti'za hara hunante'za e'za eme nazeri haviza hunaku hu'naze. Hianagi Ra Anumzamo'a naza hu'ne. <sup>14</sup> Ra Anumzamo'a nagri hankavene, nagri zagame'ene mani'ne. Ana hu'neankino agrake naguranevazie. <sup>15</sup> Fatgo avu'ava zama nehaza vahe'mo'za seli nozamifi manine'za musenkase nehu'za, muse zagame'ma hu'nazana, Ra Anumzamofo tamaga azamo'a, hankavenentake'za eri fore hu'ne hu'za hu'naze. <sup>16</sup> Ra Anumzamo'a tamaga kaziga azana eri sga huno mani'neno hara hugaterene. Ra Anumzamofona tamaga kaziga azamo'a hankavenentake eri'za eri fore hu'ne. <sup>17</sup> Nagra ofri'na kasefa hu'na manine'na, Ra Anumzamo'ma tro'ma hu'nea zankura huama hu'na vhahera zamasamigahue. <sup>18</sup> Ra Anumzamo'a nagrira nazeri fatgo hunaku knaza namino nazeri havizantfa hu'ne. Hianagi natrege'na ofri'noe. <sup>19</sup> Fatgo avu'avazamofo kafana eri anaginanntege'na, ufre'na Ra Anumzamofona humuse huntaneno. <sup>20</sup> Ama Ra Anumzamofo kafane. Ana hu'neanki'za fatgo vahe'mo'za ama ana kafanteti ufregahaze. <sup>21</sup> Anumzamoka nagri nunamuma antahi nenaminka, nagu'mavazinke'nama knare hu'nama mani'noa zankura susu hu'na humuse hugantoe. <sup>22</sup> Noma negiza eri'zama'a omane'nea have hu'zama eri atre'naza havemo'a, nomofo renagentete asetenageno noma azeri hankaveti have fore hu'ne. (Matiu 21:42, Maki 12:10-11) <sup>23</sup> Ama ana eri'zana Ra Anumzamo eri fore higeta negonankino, hentofaza hu'negeta negone. <sup>24</sup> Ama zagegna Ra Anumzamo tro hu'ne. Ana hu'neankita ama ana knafina musenkase huta trimpa frune manisanune. <sup>25</sup> Ra Anumzamoka keke huta muse hugantonanki, tagu'vazinka neravrenka, tazeri so'e hananketa maka zampina knare huta manisanune. <sup>26</sup> Iza'o Anumzamofo agifima esania vhahera, Ra Anumzamo'a asomu huntegahie. Ana vahe'mofona Ra Anumzamofo nompi agia husga huntesune. (Matiu 21:9. 23:39. Maki 11: 9-10. Luku 13: 35.19: 38. Joni 12: 13) <sup>27</sup> Ra Anumzana tagri Anumza mani'neankino, agra'a masa'areti remsa hurante'ne. Ofama huntesaza zana erita vuta, kresramna vu itamofo pazivete nofiteti ome anakinteho. <sup>28</sup> Anumzamoka nagri Anumza mani'nanku, susu hu'na humuse hugantegahue. Kagra nagri Anumza mani'nananki'na, kagri kagi'a husga hugahue. <sup>29</sup> Ra Anumzamofona susu

huta humuse huntesanune. Na'ankure agra knare zantfa hu'neankino, vagaore mevava avesi zama'amo'a mevava huno vugahie.

## 119

### *Anumzamofo kasegemo'a knare zantfa hu'ne hu'nea naneke*

#### *\*Alef*

<sup>1</sup> Iza'zo nomani'za zamifima fatgo avu'ava zama nehu'za, Ra Anumzamofo kasegema amage'manentaza vahe'mo'za muse hugahaze. <sup>2</sup> Iza'zo Anumzamofo kasegema amage'ma nente'za vahe'mo'za, maka zamagu'reti'ma hu'za agriku'ma nehakaza vahe'mo'za muse hugahaze. <sup>3</sup> Ana vahe'mo'za havi avu'ava zankura zamavesra nehu'za, Anumzamofoma ave'nesia avu'ava zanke hu'za amageranentaze. <sup>4</sup> Anumzamoka kagra kasegeka'a neraminka tagrikura hunka, ana kasegea amage ante fatgo hiho hunka hu'nane. <sup>5</sup> Nagri'ma nave'nesiana maka zupa kagri trake amage nentesugen, nomani'zanifina ome hankavetisieu nave'nesie. <sup>6</sup> Ana'ma hanige'na nagazegura osugahue. Na'ankure kagri kasegefi navua ketena vugahankina, nagra nagazegura osugahue. <sup>7</sup> Hagi fatgoma hu'nea kasegeka'ama rempima hu'na antahisuna, fatgo nagu'reti hu'na kagrira humuse hugantegahue. <sup>8</sup> Kagri tra keka'a amage antenaku nehue. Muse hugantoanki natrenka kamefira huonamio.

#### *Beth*

<sup>9</sup> Inankna huno nehezavemo'a nomani'za ma'afina agrua huno manigahie? Agrama mani agruma huno mani'naku'ma hanuno'a, kagri ke'ma amage'ma antesanuno, anara hugahie. <sup>10</sup> Kagri'ma kagenakura nagu'reti tusiza hu'na nehakoanki, natrege'na kagri kasegea atre'na kana hazagre'na ofraneno. <sup>11</sup> Kagri nanekea nagu'afi erintogeno me'neanki'na, kagri kavurera kumira osugahue. <sup>12</sup> Ra Anumzamoka kagri kagia ahentesga nehuanki, tra keka'a rempi hunamio. <sup>13</sup> Kagrama tasami'nana kasegeka'a, nagipintira huama hu'na vahera zamasamigahue. <sup>14</sup> Kagri kasegegu'ma musema nehua zamo'a, afu fenonku'ma musema nehua zana rugatere'ne. <sup>15</sup> Amage'ma antehoma hunka tami'nana tra kegura nagesa are'are nehu'na, kagri kavukva zante navua ante'na negoe. <sup>16</sup> Kagri tra kegura tusi muse nehuanki'na, kagri nanekegura naganera okanigahue.

#### *Gimel*

<sup>17</sup> Nagra kagri eri'za vahe mani'noanki nazeri so'e huge'na, kasefa hu'na manine'na nanekeka'a amagera anta'neno. <sup>18</sup> Navurga eri hari huge'na, kagri kasegefima hentofazama me'nea zana keama ha'neno. <sup>19</sup> Nagra ama mopafina karaga vahe emani'noanki, nagri navurera kasegeka'a eri frara okio. <sup>20</sup> Kagri kasegema amage'ma ante'zankura maka knafina nagu'amo'a tusiza huno avesi'avesi nehie. <sup>21</sup> Kema ontahi veganokno'ma nehu'za kasegeka'ama atre'za hazama negraza vahera, kagra zamazeri konerinka zamatrenanke'za huviza hugahaze. <sup>22</sup> Zamatrege'za kiza zokago kea hunenante'za huhaviza huonanteho. Na'ankure kagri kasegea, nagra amagera nentoe. <sup>23</sup> Vugota kva vahe'mo'zanena magopi manine'za nazeri haviza hunaku keaga ana'nekize. Hianagi eri'za vähekamo'na kagri kasegegu nagesa antahintahi nehue. <sup>24</sup> Kagri kasegegura tusiza hu'na musena nehugen, ana kasegemo'a knare antahi'za nenamie.

\* 119: Hibru kefi alfa betia amareti agafa huno vu'ne.

*Daleth*

<sup>25</sup> Nagra kugusopafi urami'na mase'noanki, kagra naneke ka'areti nazeri kasefa huo. <sup>26</sup> Nagrama nazano hunaku'ma nagesa antahi'noa zana kagrira kasamugenka, ke'nirera nona hunante'nane. Ana hu'nananki menina tra keka'a rempi hunamio. <sup>27</sup> Nagrira naza huge'na kasegeka'amofo agafa'a antahi ama ha'neno. Ana'ma hananke'na so'e zantfama hu'nea eri'zama eri'nana zankura nagesa antahintahi hugahue. <sup>28</sup> Nagu'amo'a kna nehigena, nasunku zampi mani'nena zavira netoanki, kagrama nanekefima hu'nana kante amage antenka nazeri hankavetio. <sup>29</sup> Nagrama havigema nehua zampintira nazeri afete atro. Ana nehunka kasunku hunantenka, kasegeka'a rempi hunamio. <sup>30</sup> Kagrira ogatre'na tamage hu'na kamage antegahue hu'na ko huhampri'noe. Ana nehu'na maka zupa kasegeka'a, nagu'areti hu'na amage antegahue hu'na nagesa antahi'noe. <sup>31</sup> Kagri kasegea azeri antrako hu'noanki, Ra Anumzamoka natregeno mago zamo'a nazeri nagazea osino.

<sup>32</sup> Kagri kasegeka'a, amage ante'na vugahue. Na'ankure nagri antahi'zana, kagra eri ra hu'nanku anara hugahue. <sup>33</sup> Ra Anumzamoka kasegeka'a rempi hunamige'na, amage ante'na nevu'na ome vagaretega va'neno.

*He*

<sup>34</sup> Ama' antahi'zana namige'na kasegeka'a nentahi'na amage anta'neno. Ana kasegeka'a maka nagu'areti hu'na amage antegahue. <sup>35</sup> Kagra naveri huge'na kagri kasegemo'ma vuoma huno hu'nea kante vaneno. Na'ankure nagra ana kasegegu musena nehue. <sup>36</sup> Nagri nagu'a eri rukrahe huge'na kagri kasegema amage ante'zanku navesi navesi nehu'na, havi kazigati zago eri'na feno vhahera omani'neno. <sup>37</sup> Agafa'a omane zantaminte'ma navuma negoazana eri netrenka, kagrama naneke ka'afima hu'nana kante amage antenka nazeri kasefa huo. <sup>38</sup> Kagrama huvempama hu'nana zana eri'za vahekamo'nare erinteamo nehananke'za, vahe'mo'za kagriku korora hugantegahaze. <sup>39</sup> Vahe'mo'zama nazeri nagazema hu nanekema nehazafintira, Kagra naza huo. Na'ankure kagri kasegemo'a knare hu'ne. <sup>40</sup> Kagri kasegema amage'ma ante zankura navesi navesi nehuanki, kagra fatgo kavukva hunka nazeri kasefa huo.

*Vav*

<sup>41</sup> Ra Anumzamoka atregeno vagaore mevava kavesi zamo'a nagriteria nesigenka, kagrama huvempama hu'nana kante antenka, nagu'vazinka ete navro. <sup>42</sup> Ana'ma hananke'na nazeri havizama hu kema nehaza vahe'mofo ke'zamirera kenona huzmantegahue. Na'ankure kagri nanekema namentintia nehue. <sup>43</sup> Kagra tamage keka'a nagipintira eri otro. Na'ankure nagra kagri kasegegu amuhara nehue. <sup>44</sup> Kagri kasegea nagra maka knafina amage antevava hugahue. <sup>45</sup> Mago zamo'a kina reonantesige'na fru hu'na vano hugahue. Na'ankure nagra maka nagu'areti hu'na, kagri kasegea amage nentoe. <sup>46</sup> Kini vahe'mokizmi zamavuga ot'na kagri kasegea huama hu'na nezamasami'na, nagazegura osugahue. <sup>47</sup> Kagri kasegegura muse nehuankina, ana kasegea navesinentoe. <sup>48</sup> Nagra kagri kasegegura maka zupa nagesa antahintafia nehue.

*Zayin*

<sup>49</sup> Kagri eri'za vahekamo'nama huvempama hunante'nana kegura kagesa antahio. Na'ankure anazamo hige'na, kagriteria amuhara nehue. <sup>50</sup> Kagrama huvempama hunante'nana nanekemo nazeri hankavenetigeno,

knazampima ufroana ana nanekemo nazeri kasefara nehie. <sup>51</sup> Zamavufga rama nehaza vahe'mo'za, nagira ki'za zokago ke hunenantaze. Hianagi nagra Kagri kasegea namefira hunomue. <sup>52</sup> Ra Anumzamoka korapa'ma tami'nana kasegeka'a naganera nokanue. Ana nehugenno ana nanekemo nazeri hankavenetie. <sup>53</sup> Kefo avu'ava'ma nehaza vahe'mo'zama Kagri kasegema amage'ma nontageno'a, tusi narimpa nehe. <sup>54</sup> Ru vahe moparega kraka'ma umanine'na, Kagri kasegea erirukrahe hu'na asunte'noe. <sup>55</sup> Ra Anumzamoka kenage'enena kagri kagigura naganera nokanue. Ana nehuanki'na kagri kasegea amage antegahue. <sup>56</sup> Nagra nomani zanifina maka zupa kagri kasegea amagenentoe.

### *Heth*

<sup>57</sup> Ra Anumzamoka nagri suza mani'nane hu'na kagrira huhampari'noe. Ana nehu'na huvempa hu'noanki'na amage'ma anteho hunka'ma tami'nana nanekeka'a, amage antegahue. <sup>58</sup> Kagra asomu hunanto hu'na maka nagu'reti hu'na kantahinegoe. Kagrama huvempa hu'nana kante amage antenka, kasunku hunanto. <sup>59</sup> Nagrama nehua navu'navu zankura nagesa antahintahi nehu'na, rukrahe hu'na Kagri kasege amage antegahue. <sup>60</sup> Nagra mago zankura avega ontegahuanki'na, amehu'na Kagri kasegea amage antegahue. <sup>61</sup> Kefo avu'ava zama nehaza vahe'mo'za nazeri anaki'za nehaze. Hianagi Kagri kasegegura nagera nokanue. <sup>62</sup> Kenagera oti'na fatgoma hu'nea kasegeka'agura humuse hunegantoe. <sup>63</sup> Kagri'ma kamagema nente'za vahe'mo'za, Kagri kasegema amage'ma nentaza vahe'ene tragote'na nemanue. <sup>64</sup> Ra Anumzamoka vagaore mevava kavesi'zamo ama mopafina avite'neanki, kasegeka'a rempi hunamio.

### *Teth*

<sup>65</sup> Ra Anumzamoka kagrama huvempama hu'nana kante amage antenka, eri'za vahekamo'na knare'zana rama'a tro hunante'nane. <sup>66</sup> Kagri kasegegura namentinti nehuanki, knare'ma huno refkohu avu'ava zane, ama' antahi'zana namio. <sup>67</sup> Nagra kamagera onte'na kana atre'na havi kante vugenka, kagra knaza naminka nazeri fatgo hu'nane. Hianagi menina kagri nanekeka'a amagenentoe. <sup>68</sup> Kagra knare hu'nenka knare avu'ava zanke nehananki, kasegeka'a rempi hunamio. <sup>69</sup> Zamavufga rama nehaza osu'noa zanku havige hunante'za vano nehaze. Hianagi nagra nagu'reti hu'na, Kagri kasegea amagenentoe. <sup>70</sup> Ana vahe'mokizmi zamagu'amo'a afovamo'ma hiaza huno kakani'ne. Hianagi kagri kasegegura tusiza hu'na muse nehue. <sup>71</sup> Knazama naminka nazeri havizama hu'nanana nagra knare zanku anara hu'nane. Na'ankure e'i ana zamo'a Kagri kasege amage ante'za rempi hunami'ne. <sup>72</sup> Kagrama tami'nana kasegemo'a, rama'a tauseni'a goline silvanena rugatereno nagritera razankrerfa me'ne.

### *Yodh*

<sup>73</sup> Kagraka'a kazampinti tro hunantenka nazeri fore hu'nane. Ana hu'nanku kagri kasegema rempima hu'na antahisanugu ama' antahi'zana namio. <sup>74</sup> Kagriku'ma koro'ma nehaza vahe'mo'za nagri'ma nenage'za muse hugahaze. Na'ankure Kagri nanekegu amuhara nehugu anara hugahaze. <sup>75</sup> Ra Anumzamoka kagra fatgo hunka refkoah nehane. Nagri nazeri fatgo hunaku naneke ka'are Kagra oti'enka, knazana nami'nane. <sup>76</sup> Eri'za vahe kamo'nama huvempama hunante'nana kante amage antenka, atregeno vagaore mevava kavesi zamo nazeri hankavetino. <sup>77</sup> Kagra kasunku hunantenka nazeri kasefa huge'na mani'neno. Na'ankure Kagri kasegegura tusiza

hu'na muse nehue. <sup>78</sup> Zamavufga rama nehaza vahe'mo'zama havigema hu'za nazeri havizama hu'naza vahera zamazeri zamagaze huo. Hianagi nagra Kagri kasegegu nagesa antahintahi hugahue. <sup>79</sup> Kagri kasegema antfahi'neza, kagrik'u'ma koro'ma nehu'za kagoraga'ama nemaniza vahera atrege'za nagrite erava'o hiho. <sup>80</sup> Naza hugena kagri kasege amage nente'na, havi nagia e'orisane. Ana nehu'na nagazegura osanue.

### *Kaph*

<sup>81</sup> Kagrama nagu'vazinka navresnanku navesinavesi nehige'na kavega ante'na za'zate'ma manua zamo higeno, zaferinani'a omane amane nehie. Hianagi Kagri nanekegu amuhara nehue. <sup>82</sup> Kagrama huvempama hu'nana kemo'ma nena'ama efore hanigu navuma antete'na manua zamo'a, navunata negrie. Ana hige'na nagra hu'na, nazupa nazeri knare hugahane hu'na nehue? <sup>83</sup> Mememofo akrutetima troma hu'naza tintafema teverema ante hagege hazageno, ome haviza hiankna huno navufgamo'a havizantfa hu'ne. Hianagi Kagri tra kea nagra nagera okani'noe. <sup>84</sup> Nama'a zupa Kagrikura kavega antegahue? Nagri'ma knama nenaniza vahera, ina zupa nona hunka knazana zamigahane? <sup>85</sup> Zamavufga rama nehaza vahe'mo'za kagri kasegea amagera nonte'za, nagrama tnfaf'a ma hu'na mase'nugura kama vano nehfina keri kafinentaze. <sup>86</sup> Maka kasegekamo'a tamage nanekege me'ne. Agafa'a omane'nea zante vahe'mo'za havige hu'za hazenke naminaku nehzanki naza huo. <sup>87</sup> Ana vahe'mo'za ama mopafintira kofahu'za nahe fri'za hu'naze. Hianagi Kagri tra kea namefira huomi'noe. <sup>88</sup> Kagra vagaore mevava kavesi zanteti nagrira nazeri antese hunka kegava hunenantane. Ana hu'negu kagri tra kea amage ante vava hugahue.

### *Lamedh*

<sup>89</sup> Ra Anumzamoka Kagri nanekemo'a vagaore mevava naneke me'neankino, monafinka hankavetino me'ne. <sup>90</sup> Kagra nazano hugahue hunkama hu'nana zama nehana kavu'ava zamo'a mevava nehuno, forehu anante nante'ma hu'za vanaza vahetera vugahie. Mopa tro hunka antankeno hankavetino me'ne. <sup>91</sup> Kagri kasegemo'a hankavetino meme eno ama knarerera ehanati'ne. Ana hu'neankino maka ama mopafima me'nea zantamimo'za Kagri eri'zanke e'nerize. <sup>92</sup> Hanki Kagri kasegegu'ma tusi musema osuresina, nagrama natazama erua knafi ko frusine. <sup>93</sup> Nagra tamagerfa hu'na kagri kasegea nagera okanigahue. Na'ankure ana nanekemo higenka, nasimura naminke'na kasefa hu'na mani'noe. <sup>94</sup> Nagra kagri vahe mani'noanki nagu'vazio. Na'ankure maka zupa Kagri kasege amagera nentoe. <sup>95</sup> Kefo avu'ava zama nehaza vahe'mo'za kafo ante'za mani'neza nazeri haviza hunaku nehaze. Hianagi Kagri kasegegura nagesa antahintahi hugahue. <sup>96</sup> Nagrama ke'na antahi'na huana, mago zamo'a knare huno hankavetino mezana omane'ne. Hianagi Kagri kasegea mago zamo'a azeri ontisigeno, mevava huno vugahie.

### *Mem*

<sup>97</sup> Nagra Kagri kasegegura tusiza hu'na navesi nente'na, maka knafina nagesa antahintahi nehue. <sup>98</sup> Kagri kasegemo knare antahi'zana namige'na, ha' vaheni'a knare antahizampina zamagate'nero. Na'ankure maka zupa Kagri kasegemo nagrane me'neno, nazeri fatgoa nehie. <sup>99</sup> Nagra maka zupa Kagri kasegegu nagesa antahintahi nehu'na, rempima hunenamiza vahera zamagatere'na knare antahi'zana eri'noe. <sup>100</sup> Ranra vahe'mokizmia zamagatere'na knare antahi'zana eri'noe. Na'ankure maka zupa Kagri tra

ke amagera nentogu anara hu'noe. <sup>101</sup> Maka kefo avu'ava zama hu'zantera nagia renakere'na novue. Na'ankure kagri naneke amage antenaku anara nehue. <sup>102</sup> Nagra Kagri tra kea atre'na namefira huomi'noe. Na'ankure Kagra knare'za hunka, rempi hunami'nanku anara hu'noe. <sup>103</sup> Kagri nanekemo nagite'ma erinte'nama koana, tusi haganentake hu'neankino, tumerimo'ma hagama nehiama'a rugatereno tusi haga hu'ne! <sup>104</sup> Kagri kasegemo ama' antahi'zana nemamie. E'ina hu'negu maka havi avu'ava zankura nagotenentoe.

### *Nun*

<sup>105</sup> Kagri nanekemo'a lamu tavikna huno nagiafina remasa hunenanteno, tavikna huno kama nevufina remsa hunenante. <sup>106</sup> Nagra huvempa hu'na fatgoma hu'nea trake amage antegahue. Anage nehu'na hu hankavetuaniki'na amage antegahue. <sup>107</sup> Ra Anumzamoka nagra tusi'a kna zampi manuanki, Kagrama huvempama hu'nana kante amage antenka, nazeri kasefa huge'na ofri mani'neno. <sup>108</sup> Ra Anumzamoka ofagna hu'na Kagri'ma rama'a zupama susu'ma hu'na husgama hunegantoana antahi nenaminka, kasegeka'aramina rempi hunamio. <sup>109</sup> Maka zupa ha' vahenimo'za nahe fri'za nehaze. Hianagi Kagri kasegea naganera okanigahue. <sup>110</sup> Kefo avu'ava zama nehaza vahe'mo'za nagri'ma nazeri haviza hunakura, kampina krifu anagi antazankna nehaze. Hianagi Kagri kasegea atre'na hazanogroe. <sup>111</sup> Kagri kasegea mevava feno zankna hu'na erisanti hare'noe. Na'ankure ana nanekemo, nagu'a nazeri muse nehie. <sup>112</sup> Nagra kagri kasege maka zupa amage antegahue hu'na nagesa antahi'noanki'na, amage anteme nevu'na ufrigahue.

### *Samekh*

<sup>113</sup> Kagri kasegema amage antegahune nehu'za tare antahintahima nehaza vahera nagote'nezmantoe. Hianagi Kagri kasegea navesinentoe. <sup>114</sup> Nagrama fra'ma kisanua kuma'ene hankonine Kagra mani'nane. Kagri nanekegu amuhara nehue. <sup>115</sup> Tamagra kefo avu'ava zama nehaza vahe'mota, nagrira natareta viho. Na'ankure nagra Anumzanimofa kasege amage ante'naku nehue. <sup>116</sup> Ra Anumzamoka kagrama huvempama hu'nana kante amage antenka, nazeri hankavetige'na ofri kasefa hu'na mani'neno. Ana nehunka atregeno amuha'ma nehua zamo'a, amne zanknara osino. <sup>117</sup> Nazeri sga huge'na knare hu'na nemani'na, maka zupa kasegeka'agura antahintahi huvava ha'neno. <sup>118</sup> Kagri kasegema amage'ma nontaza vahera kamefi hunezamine. Zamagra ana vahe'mo'zama nehaza havigemo'a amne zankna hugahie. <sup>119</sup> Kefo avu'ava zama nehaza vahera kagra amne zama hiaza hunka ama mopafintira reganope netrane. Ana hu'negu nagra Kagri kasegea navesinentoe. <sup>120</sup> Nagra kagriku koro nehugen, navufgamo'a nahirahi nere. Kagri keagama refko'ma nehana zanku, nentahi'na korora nehue.

### *Ayin*

<sup>121</sup> Nagra knare huno fatgo hu'nea avu'avaza hu'noanki, natrege'za vahe'ma knama zamiza zamazeri havizama nehaza vahe'mo'za nazeri havizana osiho. <sup>122</sup> Muse hugantoanki kagri eri'za vahekamo'na kegava hunenantenka, natrege'za zmavufga rama nehaza knazana onamiho. <sup>123</sup> Kagrama huvempama hu'nana kante amage nentenka, fatgo kavukva hunka havi avu'ava zama nehaza vahe'mokizmi zamazampinti'ma naza hunka nagu'vazisanegu'ma navuma antete'nama manua zamo'a navumo'a

natagrie. <sup>124</sup> Vagaore mevava kavesi zanteti eri'za vahekamo'na kavesigante'noe hunka naveri nehunka, tra keka'a rempi hunamio. <sup>125</sup> Nagra Kagri eri'za vahemani'noanki ama' antahi'zana namige'na, Kagri kasegea antahi amara ha'neno. <sup>126</sup> Ra Anumzamoka menina Kagri kna efore hu'negu, Kagri kasegema runetagraza vahera zamazeri haviza huo. <sup>127</sup> Tamagerfa hu'na Kagri kasegema navesimanentoa zamo'a, agruma hu'nea golia rugatere'ne. <sup>128</sup> E'ina agafare maka Kagri kasegemo'a tamage naneke me'ne hu'na nentahi'na, havi kante'ma vu'zankura nagonet.

### *Pe*

<sup>129</sup> Kagri kasegemo'a knare zantfa hu'negu, nagra amage nentoe. <sup>130</sup> Kagri nanekema eri vakare'za rempima huneramiza zamo'a, tavi remsa hinankna huno remsa huneranté. Ana hu'neankino antahizama' omane vahem'o'enena nanekeka'a antahi ani' hugahie. <sup>131</sup> Nagi'ma aka hu'nena nagefunama hagna hagna'ma nehuana, na'ankure nagu'reti tusiza hu'na Kagri kasegema navesinentogu anara nehue. <sup>132</sup> Kagri kagima avesinentaza vahem'a hunezmantanaza hunka, rukrahe hunka kasunkura hunanto. <sup>133</sup> Kagra huvempama hu'nana kante antenka, kama vanoma hanufina kegava hunanto. Ana'ma hanankeno'kefo avu'ava zamo'a nazeri nagate oregahie. <sup>134</sup> Vahe'mo'zama knama namiza nazeri havizama nehaza zampintira, Kagra ete navu'vazinka nenenavrege'na, Kagri kasegea amage anta'neno. <sup>135</sup> Kagra kavugosafinti masaka'anu eri'za vahekamo'na remsa hunenantenka, kasegeka'a rempi hunamio. <sup>136</sup> Vahemo'zama Kagri kasegema amage'ma nontageno'a, navunumo'a, navufintira tinkna huno herafi neramie.

### *Tsadhe*

<sup>137</sup> Ra Anumzamoka Kagra fatgo kavukva'ene ne' mani'nankeno, Kagri kasegekamo'enena fatgo hu'ne. <sup>138</sup> Kagrama tam'i'nana kasegemo'a fatgo hu'neankino, vahem'o'za zamentintia hugahaze. <sup>139</sup> Nagri'ma ha'ma renenantaza vahem'o'za Kagri nanekea antahi nomizageno, narimpa ahe'zamo'a tusi'za huno teve rukru nehie. <sup>140</sup> Kagrama huvempama hu'nana nanekeka'ama avamepima erinte'na koana knarezantfa hu'nege'na, Kagri eri'za vahekamo'na tusiza hu'na navesinentoe. <sup>141</sup> Nagra amne nagi' omane vahemani'noge'za, vahem'o'za huhaviza hunenantaze. Hianagi Kagri kasegea naganera nokanue. <sup>142</sup> Fatgo kavukva zamo'a mevava huno vugahie. Ana hu'neankino Kagri kasegemo'a, fatgo naneke me'ne. <sup>143</sup> Knazamo'a nazeri navesra hianagi, kagri kasegemo'nazeri muse nehie. <sup>144</sup> Kagra kasegemo'a maka zupa tamagerfa huno fatgo hu'ne. Kagra naza huge'na ana nanekea antahi ama nehu'na, kasefa hu'na mani'neno.

### *Qoph*

<sup>145</sup> Ra Anumzamoka nagra nagu'reti hu'na Kagritega zavi krafa hu'na nunamuna nehuanki, nunamuni'a antahinamio. Ana'ma hananke'na kagri tra kea amage antegahue. <sup>146</sup> Kagritega zavi krafa nehuanki, nagu'vazinka naza huge'na, Kagri kasegea amage anta'neno. <sup>147</sup> Kagrama naza hananegura zahufama masama osu'nege'na ot'i'na Kagritega zavi krafa nehu'na, Kagri nanekeke amuhara nehue. <sup>148</sup> Kenage'ma navu'ma omase hari hute'nama nemanuana, na'ankure Kagri nanekegu nagesa antahintahi nehu'na anara nehue. <sup>149</sup> Ra Anumzamoka vagaore mevava kavesi zanteti'ma kavesi nenantana Anumza mani'nananki, zavi krafama nehuana antahi nenaminka, Kagrama hu'nana kante amage antenka nazeri kasefa

huge'na nasimura eri'na mani'neno. <sup>150</sup> Kema ontahi vahe'mo'za nazeri haviza hunaku nagritega erava'o nehaze. Ana vahe'mo'za Kagri kasege-mofo tava'ontera omani'nazanki afete mani'naze. <sup>151</sup> Ana hu'neanagi Ra Anumzamoka nagri tvaonte mani'nankeno, ana maka Kagri kasegemo'a tamage nanekege me'ne. <sup>152</sup> Nagra korapa'ma Kagri kasegema rempi hu'nama antahi'noana, Kagra kasegeka'agura vagaore mevava hugahie hunka eri fore hankeno me'ne.

### *Resh*

<sup>153</sup> Nagrama natazama e'nerua zana negenka, ana knazampintira nazeri atro. Na'ankure nagra Kagri kasegea naganera nokanue. <sup>154</sup> Nagri kaziga antenka keagafina naza hunka keaga nehunka, Kagrama huvempama hu'nana kante antenka nazeri kasefa nehunka, nasimura namige'na mani'neno. <sup>155</sup> Kefo avu'ava zama nehaza vahe'mo'za zamagu'ma vazizamofona afete nemanizankinka zamagura ovazigahane. Na'ankure ana vahe'mo'za kagri kasegea amagera nontazagu, anara hugahane. <sup>156</sup> Ra Anumzamoka Kagri kasunku zamo'a rankrerfa hu'neanki, kagri kasegemo'ma hu'nea kante antenka nazeri kasefa nehunka, nasimura namige'na mani'neno. <sup>157</sup> Nagri'ma nazeri havizama nehaza vahe'ene knazama nenamiza vahetmina rama'a mani'naze. Hianagi Kagri kasegea atre'na namefira hunomue. <sup>158</sup> Havigema hu'za vahe'ma rezmavatga hazage'zama hazenkema eneriza vahe'ma nezamage'na, amutisanua nagesa nehie. Na'ankure ana vahe'mo'za Kagri nanekea antahi amneza nehaze. <sup>159</sup> Nagrama kagri kasegema navesimanentoa zana nenagenka, Ra Anumzamoka vagaore mevava kavesi zanteti kavesinantenka nasimura namige'na kasefa hu'na mani'neno. <sup>160</sup> Kagri nanekemo'a tamage naneke me'ne. Ana hu'neankino maka fatgo tra kekamo'a vagaore mevava huno vugahie.

### *Shin*

<sup>161</sup> Mago ke agafa'a omane zante ugagota kva vahe'mo'za nazeri haviza nehaze. Hianagi nagu'reti hu'na kagri nanekegura korora nehu'na nagesa antahintahi nehue. <sup>162</sup> Mago vahe'mo'ma tusi fenozama eri nafa'a nehuno musema hiaza hu'na, Kagrama huvempama hu'nana nanekegura tusi muse nehue. <sup>163</sup> Havigema hu avu'ava zankura, nagrira nagonete. Hianagi Kagri kasegea navesi nentoe. <sup>164</sup> Fatgoma hu'nea kasegegura, mago zage knafina 7ni'a zupa Kagrirra humuse hunegantoe. <sup>165</sup> Kagri kasegema amage'ma nentaza vahe'mo'za ra zamarimpa frune nemanizankino, mago zamo'a zamazeri tanafara osugahie. <sup>166</sup> Ra Anumzamoka nagu'vazinka etema navres-nanku amuhara nehu'na kavega ante'na manine'na, Kagri kasegea amagenentoe. <sup>167</sup> Kagri kasegema nagrama amage'netoana, na'ankure nagra tusiza hu'na navesinentogu hu'na amageranentoe. <sup>168</sup> Maka kasegeka'anee tra keka'anena nagra amagenentoe. Na'ankure nagra maka'zama nehuana, Kagra ko nagenka antahinka hu'nane.

### *Tav*

<sup>169</sup> Ra Anumzamoka nagri zavi krafamo'ma Kagrite'ma ne-eana antahi nenaminka, Kagrama huvempama hu'nana kante amage antenka ama' antahi'zana namio. <sup>170</sup> Nagrama nunamuma nehuana antahi nenaminka, kagrama huvempama hu'nana kante antenka nagu nevazinka ete navro. <sup>171</sup> Kagra kasegeka'ama rempima hunenamina zanku hu'na, Kagri kagia husga hunegantoe. <sup>172</sup> Kagri kasegegura nagra zagame hugahue. Na'ankure Kagri kasegemo'a, milko fatgo nanekege me'ne. <sup>173</sup> Kagra kazana rusutenka

nazahuo. Na'ankure nagra Kagri kasegema amage antegahue hu'nama huhampri'noanki naza huo. <sup>174</sup> Ra Anumzamoka Kagrama nagu'nevazinka nazama hananku kavega ante'na mani'noe. Ana nehu'na Kagri kasegegura tusiza hu'na musena nehue. <sup>175</sup> Kagra natrege'na ofrina kasefa hu'na manine'na, Kagri kagia ahentesga haneno. Ana nehanugeno Kagri kasegemo naza huno vugahie. <sup>176</sup> Sipisipi afumo'ma hiaza hu'na kana atre'na haz-agre'noe. Ana hu'noanki Kagri eri'za vahekamo'na eme hakrenka navro. Na'ankure Kagri kasegegura naganera nokanue.

## 120

### *Agonaregama mareneri'za nehaza zagamere*

<sup>1</sup> Nagrite'ma knazama fore'ma higena, Ra Anumzamofonte e'na zavi krafra hu'na antahigogeno, nunamuni'a antahi nami'ne. <sup>2</sup> Nagra amanage hu'na nunamuna hu'noe. Ra Anumzamoka zamagi'arima nehu'za vahe'ma rezamatgama nehaza vahe tvaontera omanisuanki naza hunka navre atro. <sup>3</sup> Havigema nehuta vahe'ma revatagama nehaza vahe'mota, Ra Anumzamo'a naza tamagrira tro huramantegahie? Inankna knaza tamagrira tamigahie? <sup>4</sup> Harafa sondia vahe'mokizmia roro hu'nea keve zamireti, tamahe haruharu nehuno, brumu zafamofo teve tankanu'za nereria erino regasrimprigahie. <sup>5</sup> Nagra Meseki mopafima kragna'ma eman'i'nena nomani'zana mani so'ea osu'noe. Anazanke hu'na afete Kedari mopafima mani'noana, seli nontamimpi nemani'na mani so'ea osu'noe. <sup>6</sup> Zamarimpa fruma huno manizanku'ma zamavesrama nehaza vahe'enena zazate mani'noe. <sup>7</sup> Nagra ha' osu fru huno mani zankuke nehua neki'na, arimpa fruma huno mani zanku'ma keagama nehuge'za, ha' eri otikege nehaze.

## 121

### *Anumzamo kva vaheti mani'ne hu'nea zagamere*

<sup>1</sup> Nagra navua kesga hu'na agonaramintega koanagi, inantegati nazamahu vahera egahie? <sup>2</sup> Monane mopanema tro'ma hu'nea Ra Anumzantegati naza hu'zana ne-e. <sup>3</sup> Agra kat're'nigenka regrarinika omasesgosane. Na'ankure kagri'ma kegavama hunegantemo'a avura nomasea ne' mani'ne. <sup>4</sup> Antahio, tamagerfa huno Israeli vahe'ma kegavama hunezmantemo'a, avu'tokora nosuno avura nomasea ne' mani'ne. <sup>5</sup> Ra Anumzamo'a tamagrira kegava huramante'ne. Ra Anumzamo'a tona zafagna huno kagri tvaonte mani'neno, kegava hunegante. <sup>6</sup> Zage feru'pima nevnankeno'a zagemo'a tenogasagesigeno, kenage'ma nevnankeno'a, ikamo'a hazenkea ogamigahie. <sup>7</sup> Ra Anumzamo'a kagrrira kegava hugante'sigenka, so'e hunka nemaninka hazenkea e'origahane. <sup>8</sup> Meninteti'ma agafa huteno henkama maninoma vaniana, inantego vunka enka'ma hananana Ra Anumzamo'a avua anteno kegava hugante vava huno vugahie.

## 122

### *Ra Anumzamofo ra mono nontega marenerino hu' zagame, Deviti asunte'nea zagamere*

<sup>1</sup> Vahe'mo'za nagrikura hu'za, enketa Ra Anumzamofo mono nontegama vanune hu'za nehzage'na, tusiza hu'na musena nehue. <sup>2</sup> Hagi menina Jerusalemia rankafaraminteti ufretta kumapina ot'i'none. <sup>3</sup> Jerusalemi

rankumapima me'nea nontamina magopi magopi hu'za eri hankaveti'za ki'nazageno, kuma'mo'a hankavetino knare huno me'ne. <sup>4</sup> Ra Anumzamofo vahé Israeli vahe'mo'za trakemo'ma hihoma huno hu'nea kante ante'za, nagate nofite hu'za anantega mareri'za Ra Anumzamofona susu hunente'za, agi ome ahentesga nehaze. <sup>5</sup> Hagi mani'neza keagama refko'ma nehaza tratami ananteria me'ne. Ana tratamintera Deviti naga'mo'za kinima mani'za esaza kini tratami me'ne. <sup>6</sup> Rimpa fruma huno manizankura Jerusalemi rankumakura nunamu hunteho. Jerusalemi kuma'ma avesi nentaza vahe'mo'za makazampina knare hu'za hage'za marerigahaze! <sup>7</sup> Jerusalemi kuma'moka kuma keginamofo agu'afina arimpa fru huno mani avu'ava zamo megahie. Ana nehanigeno kini vahe'mofo non-tamimpina hazenkea omanesige'za knare hu'za manigahaze. <sup>8</sup> Nagrira nafu nagna'zane, rone'nimo'zanema Jerusalemi kumapima mani'naza na-gaku nagesa nentahi'na, Jerusalemi kumapina hara omena arimpa fru'za mesanie hu'na nehue. <sup>9</sup> Ra Anumzana tagri Anumzamofo mono noma me'nea zanku nagesa nentahi'na, Jerusalemi kuma'mokagura nunamuna nehanugenka maka zampina knare hunka hagenka marerigahane.

## 123

*Ra Anumzamofo ra mono nontega marenerino hu'zagamere*

<sup>1</sup> Ra Anumzamoka monafinka kini trakare manisga hu'nanke'na, nagra navua kesga hu'na negagoe. <sup>2</sup> Eri'za vahe'mo'za kva vahe zamimofonte zamavu kete'za nemanizageno, eri'za a'mo'a kvama hunte'nea a'mofonte azama hanigu'ma avuma keteno maniaza huta, Ra Anumzana tagri Anumzamo'ma asumantagi ranteno tazama hanigu, agrite tavua keteta nemanune. <sup>3</sup> Ra Anumzamoka kasunku hunerantenka mago'ene kasuragiranto. Na'ankure tagira tusiza hu'za vahe'mo'za tazeri haviza nehaze. <sup>4</sup> Zamavufga rama nehaza vahe'mo'za za'zate tagrira kiza zokago ke hunerantage'za, keontahi vahe'mo'za tagrira tazeri haviza nehaze.

## 124

*Ra Anumzamofo ra mono nontega marenerino hu'zagamere, Deviti asunte'nea zagamere*

<sup>1</sup> Maka Israeli vahe'mota amanage huta hiho. Ra Anumzamo'ma tagri kazigama omani'neresina, inankna hugahie? <sup>2</sup> Ra Anumzamo'ma tagranema omani'nesige'zama ha' vahetimo'zama ha'ma eme hurantes-nazana inankna hugahie? <sup>3</sup> Ha' vahetimo'zama tusi zamarimpama aherante'naresina, ko e'za magozagama asgahu nakriankna hu'za tagrira eme tavuaga tasgahu nakrizasine. <sup>4</sup> Tagrira timo hageno eme tavreno nevigeno, timo tazeri nakariresine. <sup>5</sup> Tusi avunema anteno hageno nea timo, tagrira eme tavreno vu'neresine. <sup>6</sup> Ra Anumzamofona humuse huntesanune. Na'ankure agra tatuge'za afi zagamo'zama zagagafama ahe'za tragama nehzaza hu'za, ha' vahe'mo'za eme tahe'za traga osu'naze. <sup>7</sup> Krifuma anagintegeno azeri'nea namamo'a rugraru'vazino freaza huta, tazeri'nea nofimo'a rukano higeta atreta fre'none. <sup>8</sup> Ra Anumzama monane mopane tro'ma hu'nea Anumzamo tagrira taza nehie.

## 125

*Ra Anumzamofo ra mono nontega marenerino hu'zagamere*

<sup>1</sup> Ra Anumzamofonte'ma zamentintima nehaza vahe'mo'za zamagra Saioni Agonama mago zamo'ma azeri tore'ma osigeno, oti hankavematin mevava huno viaza hu'za oti hanavetine'za mani'za vugahaze. <sup>2</sup> Agonaramimo'ma Jerusalemi kuma'ma azeri kaginteaza huno, Ra Anumzamo'a vahe'a meninteti'ma agafa huteno vuvavama haniana manigagi zamanteno kegava huzmantegahie. <sup>3</sup> Kefo avu'ava zama nehaza vahe'mo'za kva vhahera efore hu'za Ra Anumzamofoma amage'ma nentaza vahe'mofo mopa kegava osugahaze. Hanki zamagrama e'ina'ma hanage'za, Anumzamofoma amage'ma nentaza vahe'mo'za, zamagranena zamage ante'za kefo avu'avaza hugahaze. <sup>4</sup> Zamagu'amo'ma fatgo hu'nege'za, knare zamavu zamava'ma nehaza vahe'mokizmia, Ra Anumzamoka zamazeri knare huo. <sup>5</sup> Hianagi Ra Anumzamoka, kefo avu'ava zama nehaza vhahera zamazeri netrenka, anazanke hunka havi avu'ava zama nehaza vhahera zamazeri atro. Israeli vahe'mo'za zamarimpa frune manisaze.

## 126

### *Ra Anumzamofo ra mono nontega marenerino hu' zagamere*

<sup>1</sup> Israeli vahe'ma kinama ome hu'naza vahe'ma Ra Anumzamo'ma ete zamavarenoma Jerusalemi kumate'ma egeta, tagra ava'na negompi huta hu'none. <sup>2</sup> Ana zupa tagra tusi kizazokago nehuta, zagame huta muse hu'none. Ana'ma nehunke'za ana zupa kokankoka vahe'mo'za amanage hu'naze. Ra Anumzamo'a ruzahu'za huno Israeli vhahera zamaza hie hu'za hu'naze. <sup>3</sup> Tamage, Ra Anumzamo'a ruzahu'za huno tagrira taza higeta tusi muse hu'none. <sup>4</sup> Negevi hagage kokampima tima enevuno mikazama eri kasefa'ma nehiaza hunka, knare'zanu Ra Anumzamoka ante vitenerantenka tazeri kasefa huo. <sup>5</sup> Zavi'manete'za avimzama nehankre-saza vahe'mo'za ranke hu'za muse zagame nehu'za ne'zana hamaregahaze. <sup>6</sup> Avimzama hankre'naku'ma eri'za kantegama nevu'za, zavitemema nevanamo'za, hozafinti'ma ne'zama hamre'za nontegama eri'za ne-esuza ranke hu'za muse zagamera nehu'za eri'za egahaze.

## 127

### *Ra Anumzamofo ra mono nontega marenerino hu' zagame, Solomoni asunte'nea zagamere*

<sup>1</sup> Hagi Ra Anumzamo'ma mago noma onkisiana, ana noma kisia kamunta nemofo eri'zamo'a amne zankna hugahie. Hagi Ra Anumzamo'ma mago rankuma'ma kegavama osaniana, kuma kvama nehaza vahe'mokizmi eri'zamo'a, amne zankna hugahie. <sup>2</sup> Kagrama ne'zama nesana zanku'ma kamu'nasisima nehunka, nanterame otinka eri'zama e'nerinkeno vuno hanima huno kenage'ma nesegekena nontegama neanana, amne zampi hankaveka'a neutrane. Na'ankure Ra Anumzamo'a agrama avesi nezmantea vhahera mani frua zamige'za zamura nemsaze. <sup>3</sup> Ra Anumzamo'ma mofavreramima neramiana museza neramie. Ana hu'neankino Anumzamo'a asomu hunerante. <sup>4</sup> Kasefa ne'mofo mofavreramimo'za harafa vahe'mo'ma azampima keveramima eriaza nehie. <sup>5</sup> Keve kupima keveramima eri viteankna huno, rama'a ne' mofavreramima eri fore'ma hu'nesia ne'mo'a muse hugahie. Na'ankure agra agazegura osuno ha' vahe'anena kuma kafanteria keaga hugahie.

## 128

*Ra Anumzamofo ra mono nontega marenerino hu' zagamere*

<sup>1</sup> Ra Anumzamofoma koro'ma hunente'za agri avu'ava'ma amage'ma nentaza vahe'mo'za muse hugahaze. <sup>2</sup> Kagrama kamu'nasisima hunka eri'zama eri'nesana eri'zamofo raga'a, kagraka'a taginka negahane. Ana'ma hanunka asomu'enе knare hunka manigahane. <sup>3</sup> Nonka'afina kagri a'mo'a wainimo knare huno rama'a ragama renteankna hugahie. Kagri mofavre naga'mo'zama ne'zama nenaku'ma trate'ma manikagi snazana, mensi ne-hagea olivi zafagna hu'za manigagi kantegahaze. <sup>4</sup> Tamagerfa huno e'inahu zama fore'ma haniana, Ra Anumzamofoma koro'ma hunentaza vahete fore hugahie. <sup>5</sup> Ra Anumzamo'a Saioni kumate mani'neno, asomu hugantegahie. Kagrama kasefa'ma hunka manisnana kna'afina, Jerusalemi kumamo'a maka zampina so'e zantfa huno nehagesigenka kegahane. <sup>6</sup> Kagra muse hunka mani'enka mofavre naga kamo'zama kasezamante'naza mofavre nagara zamagegahane. Israeli vahe'mo'za ha'zana omanesige'za fru hu'za manisaze.

## 129

*Ra Anumzamofo ra mono nontega marenerino hu' zagamere*

<sup>1</sup> Nagrama mofavrema mani'noreti agafama huteno'ma e'neana, ha' vahe'nimo'za hara eme hunante'za nazeri haviza hutere hu'naze. Ama ana nanekea maka Israeli vahe'mota namage anteta hiho. <sup>2</sup> Nagrama mofavrema mani'noreti agafama huteno'ma e'neana, ha' vahenimo'za hara eme hunante'za nazeri haviza hutere hu'naze. Hianagi nagrira hara hunagateore'naze. <sup>3</sup> Ha' vahe'mo'zama sefu'ma nami'naza zamo'a nagumpina, hozama antenaku'ma hozafu vahe'mo'za zazate'ma tinkama asazaza huno tinka evu evu hu'ne. <sup>4</sup> Hianagi Ra Anumzamo'a fatgo hu'neankino, kefo avu'ava'ma nehaza vahe'mo'zama kinama renante'nazanofira ahekano hutrege'na fru hu'na mani'noe. <sup>5</sup> Jerusalemi kuma'ma zamago'ma tenentaza vhahera, zamarotago hanage'za rukraha hu'za nefre'za za zamagazegu hanaze. <sup>6</sup> Ana vahe'mo'za nomofo agofetu'ma nehagea trazamo'ma mareri za'za osu'neno hagege hiaza hu'za, zamagra zazatera omanine'za hagege hugahaze. <sup>7</sup> Ana trazana witima vasage vahe'mo'za azampina eri aviotege, kona anakigera osugosie. <sup>8</sup> Hagi zamagri tvaonte'ma vahe'ma enevu'za amanahu asomu nanekea huozmantegahaze. Ra Anumzamo'a asomu huramante'nie. Tagranena Ra Anumzamofo agifi asomu ke huramantone hu'za osugahaze.

## 130

*Ra Anumzamofo ra mono nontega marenerino hu' zagamere*

<sup>1</sup> Ra knazamo refite'nanteregena manine'na, Ra Anumzamokarega naza huogu kezanetue. <sup>2</sup> Ra Anumzamoka nagerura antahio. Kasunku hunantogu'ma kezamanetuan kagesa antenka antahio. <sup>3</sup> Ra Anumzamoka Kagra tagri kumi'ma avontafepima krentantesina, keagama hurantesana zupa Kagrira keagafina, iza kagateregahie? <sup>4</sup> Hianagi kagra tagri kumi'ma atrerante'nana zanku huta kagriku korora hugahune. <sup>5</sup> Ra Anumzamofonku avega ante'noe. Nagu'amo'a Agriku avega ante'neankina, agri nanekere amuhara nehue. <sup>6</sup> Kenage'ma kuma kvama nehaza vahe'mo'zama, ame huno nanterama rumsama hanigu avegama nentazama'a, agatereno

nagu'amo'a tusiza huno Ra Anumzamofonkura avega nente. Tamage rumsama hanigu avegama nentazama'a agatereno nagu'amo'a tusiza huno Ra Anumzamofonkura avega nente. <sup>7</sup> Israeli vahe'mota Ra Anumzamofonku amuhara hiho. Na'ankure agripina vagaore mevava avesi zamo'ene, vahe'ma agu'vazino ete avre avu'ava zamo'a avite'ne. <sup>8</sup> Israeli vahe'mo'zama maka kumi'ma hu'naza zampintira, Ra Anumzamo'a Agrake'za kumizamia eri netreno ete zamavaregahie.

## 131

*Ra Anumzamofo ra mono nontega marenerino hu' zagame Deviti asunte'nea zagamere*

<sup>1</sup> Ra Anumzamoka navufga atahara nosuna, nagra namimiza runafagera nosue. Nagra ranra zanku'ene, nagrama osuga zankura nagesa antahintahia nosue. <sup>2</sup> Osi mofavremo'ma zavima ote'noma nerera azampima akoheno maseaza hu'na, akohe'na narimpa frune nemanue. Ana zanke huno nagu'amo'enena fru huno nemane. <sup>3</sup> Tamagra Israeli vahe'mota meninteti'ma agafama huno vaniana Ra Anumzamofonte amuhara huwava huta viho.

## 132

*Ra Anumzamofo ra mono nontega marenerino hu' zagamere*

<sup>1</sup> Ra Anumzamoka Devitinku'ene, agrama maka knazampima manino e'neazankura kaganera okanio. <sup>2</sup> Israeli vahe'mofo Hankavenentake Anumzamoka Deviti'ma huvempagema kagrite'ma hu'neana, <sup>3</sup> amanage huno hu'ne, nagra nonirega vu'na, siparera uomasegahue huno hu'ne. <sup>4</sup> Nagra atre'nugeno navumo'a toko nosanige'na, navua kesuraki'na omase manine'na, <sup>5</sup> Ra Anumzana Israeli vahe'mokizmi hankavenentake Anumzamo'ma manisania nona kite'na, mani frua hugahue hu'ne. <sup>6</sup> Tagra Efrata (Betlehem) kumate'ma manineta huhagerafi huvepage vogisimofo agenkea antahiteta, vuta Ja'ari mopafi me'negeta ome ke'none. <sup>7</sup> Anante tagra huta, enketa Anumzamo'ma nemania nontega vuta, Agrama nemania kini tra'mofo agiaifi monora huntesanune huta hu'none. <sup>8</sup> Ra Anumzamoka otinka Kagri hankavema huhamprino me'nea huhagerafi huvepage vogisimo'ma, Kagrama mani fruma hanana nompima nevanigenka, Kagrane enka ana nompinka umarerio. <sup>9</sup> Kagri pristi vahe'mo'za za'za kukenama hiaza huza fatgo avu'ava zana eri nehankre'za, Kagri'ma hankavetiza kamage'ma nentaza vahe'mo'za, ranke hu'za zagamera nehu'za musenkasea hugahaze. <sup>10</sup> Kagri eri'za ne' Devitinku kagesa nentahinka, Kagraka'ama masavema frentenka huhampari'nana kini nera kamefira huomio. <sup>11</sup> Ra Anumzamo'a Devitina hankave huvepage hunte'neankino, ana huvepagea eri otregahie. Ana huvempa kema hu'neana, kagrama kasezmante'nana mofavre nagapinti mago'mofo huhampri antesnugeno kagri nona erino kinia manigahie, huno hu'ne. <sup>12</sup> Hagi kagri ne'mofavre naga'mo'zama, nagrama huhagerafi'noa huveampa kene, kasegenema amage'ma antesageno'a, zamagripinti'ma fore hu anante anante'ma hu'za vanaza mofavre naga'mo'za kinia mani vava hu'za vugahaze. <sup>13</sup> Na'ankure Ra Anumzamo'a Saion kuma hunehamprino, Nagri kuma mesie huno hu'ne. <sup>14</sup> Ra Anumzamo'a huno, ana kumara nagrama mani fru hanua kuma mevava hugahie. Na'ankure ana kumakura tusiza huno navenesianki'na, anampi nagra manigahue. <sup>15</sup> Ana kumapi

vahe'mo'zama nazankuro atupa'ma hanaza zana, amne zamazeri knare nehu'n'a, ana kumapima zamunte omane vahe'ma mani'naza vahera ne'zana zami'nuge'za nezamu hugahaze. <sup>16</sup> Hagi Jerusalemima nemaniza pristi vahera za'za kukenama hiaza huna vahe'ma zmaguvazi zana eri hankre zamantegahue. Ana nehanuge'za hankaveti'za namage'ma nentaza vahe'mo'za, ranke hu'za zagameru nehu'za musenkasea hugahaze. <sup>17</sup> Hanki Nagra Devitina hankave'a amigahue. Nagrama masavema taginte'na huhamprinte'noa ne'mo nagri vahe'mofo tavira manigahie. <sup>18</sup> Nagra agri ha' vahera zamagaze zanu refite zmantegahue. Hianagi agra hihamu masa'ane kini ne' efore hugahie.

## 133

*Ra Anumzamofo ra mono nontega marenerino hu' zagame Deviti asunte'nea zagarere*

<sup>1</sup> Hagi kogano'mo'zama mago zamarimpa hu'za magopima mani avu'ava zamo'a knare zantfa hu'ne. <sup>2</sup> Mago arimpama huno mani avu'ava zamo'a, Aroni asenire masave tagino frentegeno agemazampa azokatega uramino za'za kukena'amofo ananke kante uramiankna nehie. <sup>3</sup> Mago arimpama huno mani avu'ava zamo'a, Hemoni agonaregati ata ko'mo, eno Saionima me'nea agonaraminte eme runteaza hu'ne. E'ina kumate Ra Anumzamo'a asomura hunezmante'nige'za, mani vava hugahaze.

## 134

*Ra Anumzamofo ra mono nontega marenerino hu' zagarere*

<sup>1</sup> Maka Ra Anumzamofo eri'za vahe'ma, Ra Anumzamofo mono nompima kenage eri'zama e'neriza vahemota Ra Anumzamofona agi'a ahentesga hiho. <sup>2</sup> Ana nehuta nunamuma hanafina, tamazana erisga huta ruotage'ma hu'nea mono noma me'nerega hunenteta Ra Anumzamofona agi'a ahentesga hiho. <sup>3</sup> Monane mohanema tro'ma hu'nea Ra Anumzamo'a Saioni agonare mani'neno asomu huramantegahie.

## 135

*Ra Anumzamofo eri'zanku'ma hu musema huntasaza zagarere*

<sup>1</sup> Ra Anumzamofo eri'za vahe'motma Ra Anumzamofona agi'a ahentesga hiho. Ra Anumzamofona husga hunteho. Ra Anumzamofona agi'a ahentesga hiho. <sup>2</sup> Ra Anumzamofo mono nompima omanetiza vahe'ene, tagri Anumzamofo mono nonkumapima oneti'za vahe'mota anara hiho. <sup>3</sup> Ra Anumzamofona agi'a ahentesga hiho. Na'ankure Ra Anumzamo'a Agra knare hu'ne. Ra Anumzamofona zagarere huta agi'a ahentesga hiho. Na'ankure Agri agimo'a so'e zantfa hu'ne. <sup>4</sup> Na'ankure Ra Anumzamo'a Jekopunkura nagri'a suzane huno huhamprinento, Israeli vahekura huno nagri marerisa feno zankna hu'za manigahaze huno huhampri zamante'ne. <sup>5</sup> Nagrama ke'na antahi'nama huana, Ra Anumzamo'a rankrerafa hu'ne. Ana hu'neankino maka havi anumzantamina zamagatere vaga'rene. <sup>6</sup> Ra Anumzamo'a monafino, ama mopafino, hagerimofo agofetru, hagerimofo agu'afinema nazano tro hunaku'ma hiazana amne nehie. <sup>7</sup> Agra higeno mopama ome atretegatira hampomo'a eri tru huno marenerigeno, ko'ene kopasi'nanena atregeno ne-e. Ana nehuno fenoma nentea noma'afinti zahora atregeno ne-e. <sup>8</sup> Isipi vahe'mokizmi agonesa

mofavreramine, afukra zamifintira agonesa anenta'araminena maka ome zamahetre eme zmahetre hu'ne. <sup>9</sup> Isipi vahe'mota tamagri amu'nompi, Feronte'ene, Fero eri'za vahetera kaguva zane, avamezanena eri fore huno zamazeri haviza hu'ne. <sup>10</sup> Kokankokama mani'naza vahera ome zmahetre eme zmahetre nehuno, hankavenentake kini vahera zamahe fri'ne. <sup>11</sup> Ana kini vahera, Amori vahe kini ne' Sihonima, Basani vahe kini ne' Ogima, maka Kenani mopafima mani'naza kini vahe'taminena zamahe hana hu'ne. <sup>12</sup> Ana huteno ana vahe'mokizmi mopa Agra vahe Israeli nagara eri zamige'za erisanti hare'naze. <sup>13</sup> Ra Anumzamoka kagri kagimo'a maka kna mevava huno nevie. Maka vahe'ma forehu anante nante'ma hu'za vanaza vahe'mo'za Ra Anumzamoka Kagri kavukva zankura antahigami'za vugahaze. <sup>14</sup> Na'ankure Ra Anumzamo'a vahe'a refko huno nezamageno, eri'za vahe'a asunku huzmantegahie. <sup>15</sup> Kaza osu havi anumzantamina, silvareti'ene golireti vahe'mo'za avako hu'za zamazanteti tro hunte'naze. <sup>16</sup> Ana havi anumzaramina zamagira me'neanagi, keaga nosu'za, zamavua me'neanagi zamavua nonke'za, <sup>17</sup> zamagesa me'neanagi keaga nontahiza, zamagona me'neanagi zamasimura nontaze. <sup>18</sup> Hagi ana kaza osu havi anumzantamina tro'ma hu'naza vahe'ene, ana zantaminte'ma zamentintima nehaza vahe'mo'zanena, ana kaza osu havi anumzankna hugahaze. <sup>19</sup> Israeli vahe'mota Ra Anumzamofo agi'a ahentesga nehinke'za, Aroni naga'nofi'ma pristi eri'zama e'neriza naga'mo'za Ra Anumzamofo agi'a ahentesga hiho. <sup>20</sup> Livae naga nofi'mota Ra Anumzamofo agi'a ahentesga nehinke'za, iza'zo Ra Anumzamofonku'ma koro hunente'za vahe'mo'za Agri agoragama nemanisaza vahe'mo'za Ra Anumzamofo agi'a ahentesga hiho. <sup>21</sup> Saioni agonare'ma mani'naza vahe'mota Ra Anumzamofona agi'a ahentesga hiho. Na'ankure Agra ama ana Jerusalemi kumapi nemanie. Ra Anumzamofo agi'a ahentesga hiho.

## 136

### *Ra Anumzamofoma susu hunte zagamere*

<sup>1</sup> Ra Anumzamofona susu huntunesun, na'ankure Agra knare hu'ne. Anumzamofona vagaore avesizama'amo'a mevava huno vugahie. <sup>2</sup> Anumzana susu huta humuse huntunesun. Na'ankure Anumzamofona vagaore avesizama'amo'a mevava huno vugahie. <sup>3</sup> Ra Anumzamofona susu hunteta husga huntunesun, Agra maka ama mopafi ranra vahetmimofo Ra Anumza mani'ne. Na'ankure Anumzamofona vagaore avesizama'amo'a mevava huno vugahie. <sup>4</sup> Agrake'za hankavenentake kaguvezana eri fore nehigu, Agrike'za susu hunenteta humuse huntesanune. Na'ankure vagaore avesizama'amo'a mevava huno vugahie. <sup>5</sup> Monafima me'nea zantamima Agra'a antahintahireti'ma tro'ma hunte'nea Anumzamofona susu huta humuse huntesanune. Na'ankure vagaore avesizama'amo'a mevava huno vugahie. <sup>6</sup> Ama mopama tro huteno, timofo agofetu'ma antegen'o'ma me'nea Anumzamofona susu huta humuse huntesanune. Na'ankure vagaore avesizama'amo'a mevava huno vugahie. <sup>7</sup> Monafima me'neno remsa nehia tavitamima tro'ma hunte'nea Anumzamofona susu hunteta humuse huntesanune. Na'ankure vagaore avesizama'amo'a mevava huno vugahie. <sup>8</sup> Zagema tro'ma hunte'neana, masama kegavama hu'neno remsa haniegutro hunte'ne. Na'ankure vagaore avesizama'amo'a mevava huno vugahie. <sup>9</sup> Ikane hanafi'taminema tro'ma hunte'neana, kenage kegava hune'za, remsa hanazegu tro hunte'ne. Na'ankure Agrama oratreno avesirante

vavama nehia zamo'a, vagaore mevava huno vugahie. <sup>10</sup> Isipi vahe'mokizmi agonesa mofavreraramima zamahe hana'ma hu'nea Anumzamofona susu hunteta humuse huntesanune. Na'ankure Agrama oratreno avesirante vavama nehia zamo'a, vagaore mevava huno vugahie. <sup>11</sup> Israeli vhara Isipi mopafintira Agra zamavareno atiramige'za e'naze. Na'ankure Agrama oratreno avesirante vavama nehia zamo'a, vagaore mevava huno vugahie. <sup>12</sup> Agra Hankavenentake azanteti rusuteno zamavareno e'ne. Na'ankure Agrama oratreno avesirante vavama nehia zamo'a, vagaore mevava huno vugahie. <sup>13</sup> Koranke hagerima eri rupapama hugantigama hu'nea Anumzamofona susu huta humuse huntesanune. Na'ankure Agrama oratreno avesirante vavama nehia zamo'a, vagaore mevava huno vugahie. <sup>14</sup> Ana'ma huteno'a ana hagerimofo amu'nompi Israeli vhara zamavareno vu'ne. Na'ankure Agrama oratreno avesirante vavama nehia zamo'a, vagaore mevava huno vugahie. <sup>15</sup> Hianagi Ferone sondia vahe'a koranke hagerimpi zamaherege'za tinakri'za fri'naze. Na'ankure Agrama oratreno, avesirante vavama nehia zamo'a vagaore mevava huno vugahie. <sup>16</sup> Agra vahe'ama zamavareno, vahe omani ka'ma kokampima e'nea Anumzamofona susu huta humuse huntesanune. Na'ankure Agrama oratreno avesirante vavama nehia zamo'a, vagaore mevava huno vugahie. <sup>17</sup> Hankave kini vahetmima zamahe hana'ma hu'nea Anumzamofona susu huta humuse huntesanune. Na'ankure Agrama oratreno avesirante vavama nehia zamo'a, vagaore mevava huno vugahie. <sup>18</sup> Zamagimo'ma mareri'nea kini vahetamina zamahe fri vagare'ne. Na'ankure Agrama oratreno avesirante vavama nehia zamo'a, vagaore mevava huno vugahie. <sup>19</sup> Amori vahe kini ne' Sihonina ahe fri'ne. Na'ankure Agrama oratreno avesirante vavama nehia zamo'a, vagaore mevava huno vugahie. <sup>20</sup> Basani vahe kini ne' Oginena ahe fri'ne. Na'ankure Agrama oratreno avesirante vavama nehia zamo'a, vagaore mevava huno vugahie. <sup>21</sup> Ana'ma huteno'a Anumzamo'a ana kini vahe'mokizmi mopa, erisantiharesaze huno Agra vahe'a erizami'ne. Na'ankure Agrama oratreno avesirante vavama nehia zamo'a, vagaore mevava huno vugahie. <sup>22</sup> Agri eri'za vahe Israeli vahe'mo'za ama ana mopa erisanti hategahaze huno zami'ne. Na'ankure Agrama oratreno avesirante vavama nehia zamo'a, vagaore mevava huno vugahie. <sup>23</sup> Tagri hankavemo'ma evuramigetama manuna knafina Agra aganera kaninoramie. Na'ankure Agrama oratreno avesirante vavama nehia zamo'a, vagaore mevava huno vugahie. <sup>24</sup> Agra tagri ha' vahe'mokizmi zamazampinti tagu'vazino ete neravare. Na'ankure Anumzamo'ma oratreno avesirante vavama nehia zamo'a, vagaore mevava huno vugahie. <sup>25</sup> Anumzamo'a maka vahe'ene zagagafanena ne'zana nezamie. Na'ankure Agrama oratreno avesirante vavama nehia zamo'a, vagaore mevava huno vugahie. <sup>26</sup> Monafinkama nemania Anumzamofona susu huta humuse huntesanune. Na'ankure Agrama oratreno avesirante vavama nehia zamo'a, vagaore mevava huno vugahie.

## 137

*Israeli vahe'mo'za ru mopafi mani'neza mopazmigu nentahi'za zavite'naza zagamere*

<sup>1</sup> Babilonima me'nea tintamimofo ankenarega mani'neta, Jerusalemi kumakura tagesa nentahita zavira te'none. <sup>2</sup> Zavenama neheta zagame'ma

nehuna hapuramina, wilo zafaramimpi runtani'none. <sup>3</sup> Na'ankure kinama hurante'naza vahe'mo'za tagrikura, zagame nehinketa antahisune hu'za kazikazi hu'naze. Tatama tami'za tazeri havizama nehaza vahe'mo'za hu'za Saioni agonomofo agirevare zagamera nehinketa musena hamneno hu'za tutu hu'naze. <sup>4</sup> Ana hianagi ru vahe mopafima eman'i'nonana inankna huta Ra Anumzamofo zagamera hugahune? <sup>5</sup> Nagrama Jerusalemi kuma'mokagu'ma nagane'ma kanisugen'o, naza tamaga'amo'ma eri'zama e'neria eri'zana mago'enena e'origahie. <sup>6</sup> Nagrama Jerusalemi kuma'mokagu'ma nagane'ma nekani'na, Jerusalemi kuma'mokagu'ma ugota musezani'a mani'nane hu'nama osanugen'o, nagefunamo'a marerino navagu'nafare ome rukamaresie. <sup>7</sup> Babiloni vahe'mo'zama Jerusalemi kuma'ma ha'ma eme hunte'za eri'za zupama, Idomu vahe'mo'za hu'za, Jerusalemi kumara maka tapage tapagu hutrenkeno havizantfa hinoma hu'za kezama ati'naza zankura, Ra Anumzamoka kaganera okanio. <sup>8</sup> Babiloni kuma'moka havizantfa hugahananki kagesa antahio. Tagrite'ma hurante'nana avu'ava zante'ma, nonama hugantesia vahe'mo'a muse hugahie. <sup>9</sup> Ana'ma hania vahe'mo'a Babiloni kuma'moka ne'onse mofavre nagaka'a zamazeriteno, haveraminte ruhapakopatino zmahegahie.

## 138

*Ra Anumzamofoma susu hunenteno hu' zagame Deviti asunte'nea zgamere*

<sup>1</sup> Ra Anumzamoka nagu'reti susu hu'na humuse hunegantoe. Havi anumzantamimofo zamavufi zagamera nehu'na, kagri kagi'a ahentesga hugahue. <sup>2</sup> Ruotagema hu'nea mono nonka'amofo avugama kepri hu'na kagia ahentesga nehu'na, susuma hunegantoana vagaore mevava kavesi zanka'agu anara nehue. Na'ankure Kagrama huvempama hu'nana naneke ka'amo rankagia negamie. <sup>3</sup> Nagrama nunamuma nehugenka nagri nunamuntera nona nehunka, naza hunka nazeri hankavetinke'na hankaveti'na mani'noe. <sup>4</sup> Maka ama mopafima mani'naza kini vahe'mo'za Ra Anumzamoka humuse hu'za susu hugantegahaze. Na'ankure kagri nanekema antahinuza anara hugahaze. <sup>5</sup> Ana nehu'za Ra Anumzamoka kagri kavukva zankura zagamepi erinte'za zagame hugahaze. Na'ankure Ra Anumzamoka hihamu masazamo'a rankrerfa hu'ne. <sup>6</sup> Ra Anumzamo'a marerisa Anumza mani'neankino, zamavufagama anterami'za maniza vahera kegava hunezmanteanagi, zamavufagama erisga nehaza vahera afeteti ko zamageno antahino nehie. <sup>7</sup> Tusi knazamo nazeri kagine'na nemanugenka naza nehane. Ha' vahenimo'za tusi zamarimpa ahenantegahazanagi, Kagra kegava hunantegahane. Kagra tamaga kaziga kazana rusutenga nagu'nevazine. <sup>8</sup> Ra Anumzamokama nazano nagri nomani'zampima fore hugahiemu hunkama huvempama hu'nana zantamina, eri fore hugahane. Na'ankure Ra Anumzamoka vagaore kavesi zamo'a mevava huno nevie. Kagra kazampinti nagrina nazeri fore hu'nananki kamefira huonamio.

## 139

*Anumzamo'a ko tagrira antahino keno hu'nea huno Deviti asunte'nea zgamere*

<sup>1</sup> Ra Anumzamoka nagra inanknahu vahe mani'noe, ko nagri nagu'rezaganenka ke'nane. <sup>2</sup> Nagrama manuampi, otuampi Kagra ko nagenka

antahinka nehunka, afete mani'noanagi, Kagra nagri antahi'zana ko keama hu'nane. <sup>3</sup> Kama vano nehfine, navu'ma masofinena Kagra kavua antenka nenagenka, maka navu'nav a zama huana, ko nagenka antahinka hu'nane. <sup>4</sup> Maka nanekea osu'nogenka, e'i nanke hugahie hunka Ra Anumzamoka ko antahinka kenka hu'nane. <sup>5</sup> Kagra navugane namefi'ene nevunka, kazanteti refite'nante'nane. <sup>6</sup> Kagri antahi'zamo'a so'e zantfa huno mareri agatere'neankina, nagra antahi amara osugahue! <sup>7</sup> Nagra Kagri Avamura atre'na iga vugahue? Nagra Kagri kvatetira atre'na korora fre'na, iga ome frakigahue? <sup>8</sup> Hagi nagrama monafima marerisuana, Kagra ko monafina mani'nane. Nagrama fri'na fri vahe kumapima vanuana, Kagra ko anampina mani'nane. <sup>9</sup> Hagi nanterama zahuфа zageema nehanatina, nagrama nageko'na huntesige'na hare'na vu'na hagerimofo amu'nompima me'nea mopafi umanuresina, <sup>10</sup> anantega kegava hunenantenka nazeri ako'na hasine. <sup>11</sup> Hagi tamagerfa hunka hani zamoka eme nazeri fra'nekigeno, zage ferupinagi ame hunka hani zamoka enka eme nazeri kagio hu'nama huresina, <sup>12</sup> ana hanimo'a Kagri kavurera nazeri frara okiresine. Ana nehigeno hanimo'a, Kagri kavurera masa huno zage ferukna hanigeno, hanimo'ene msamo'enena Kagri kavurera mago zanke hu'na'e. <sup>13</sup> Na'ankure maka nagu'a navufga Kagra tro hunante'nane. Ana hutenga antanimofo rimpafima mani'nogenka maka navufga Kagra rehati-nante'nane, <sup>14</sup> Kagrama nagrima tro'ma hunanana, so'e' zantfa hunku tro hunante'naku muse hunegantoe. Kagrama eri'nana eri'zamo'a, knare huno so'e zantfa hu'ne. Ana hu'neanki'na e'i ana zana nagra ke'na antahi'na hu'noe. <sup>15</sup> Kagri kavurera frara oki'noanki, maninenka nenagankeno oku'a nenrera arimpafina zaferinani'mo'a eme rekanuhe rekanuhe ne-hige'na fore hu'noe. <sup>16</sup> Nenrera'a kase onante'negenka, ko nagrira na-genka antahinka hu'nane. Ama mopafima kasefa'ma hu'na manisanua kna'afima tro'ma hanua zana, maka knamo'a ome'negenka maka zana ko avontafepi krente'nane. <sup>17</sup> Anumzamoka nagrik'u'ma nentahina antahizamo'a, soe'zantfa huno mareri agetere'ne. Ana hu'neanki'na ana maka zantamina hampari'na kegara osu'noe. <sup>18</sup> Hagi ana maka zana hampari'na kegahue hu'na hugahuanagi, hagerimofo ankenarega me'nea kaseparamina ana zantamimo'a rugatere'ne. Hagi mase'nofinti'ma omatuana Kagra magoka nagrane mani'nane. <sup>19</sup> Anumzamoka nagri'ma navenesiana, havi avu'ava zama nehaza vahe'ma zamahe frisanana knare hugahie. Hazenkema eri hakarema huta vahe korama eri neragiza vahe'mota, nagi navatetira atreta afete viho. <sup>20</sup> Ana vahe'mo'za Anumzamoka Kagrira huhaviza hunegante'za, ha'ma renegataza vahe'mo'za Kagri kagi'a amnene amnene nehaze. <sup>21</sup> Ra Anumzamoka Kagri'ma kavesinoganta vahera nagra navesra hunezmante'na, kagri'ma ha'ma renegataza vahera zamage henkami atregahue. <sup>22</sup> Nagra tamagerfa hu'na ana vahera tusi narimpa ahenezmante'na, ana vahe'ma nezamage'na nagri ha' vahe mani'naze hu'na nehue. <sup>23</sup> Anumzamoka nagri nagu'a rezaganenka keama nehunka, antahintahi hakare'ma nehua zana renahenka ko. <sup>24</sup> Anumzamoka krimpa knazama erigami navu'navazama nagripima me'nesiana refkohu so'e hunka nenagenka, manivava asimu'ma erino mani kante navrenka vuo.

*Anumzamo'ma kegava huntesigu Deviti hu'nea nunamu zagamere*

<sup>1</sup> Ra Anumzamoka havi avu'ava zama nehaza vahe'mokizmi zamazampintira nagu'nevazinka, hazenke vahe'mo'zama hazenkema namizankura kegava hunanto. <sup>2</sup> Ana vahe'mo'za havi avu'ava zama hanaza zanke zamagu'afina retro nehu'za, maka zupa ha' hiho hu'za vhahera zamarimpa revava nehaze. <sup>3</sup> Keagama haza nanekemo'a, osifavemofo agefumomo'ma asaneankna nehu'za, ha' osifavemofo avu'atga zamo zamagipina avite'neanki'za vhahera zamazeri haviza hu keaga nehaze. <sup>4</sup> Ra Anumzamoka havi avu'ava zama nehaza vahe'mo'zama nazeri havizama hu'zankura kegava hunanto. Hazenkema eri hakarema nehaza vahe'mo'zama hazenkema nami'zankura kegava hunanto, na'ankure nagrira nazeri haviza hunaku oku'a keaga retro nehaze. <sup>5</sup> Zamavufga rama nehaza vahe'mo'za, nagrima nazerinakura kukona antenenante'za, kama vano nehfina krifua anaginentaze. <sup>6</sup> Ra Anumzamoka Kagrikura, nagri Anumza mani'nane hu'na nehuanki, Ra Anumzamoka kasunku hunantogu'ma nunamuma nehanugenka, kagesa antenka nentahinka nunamuni'a antahinamio. <sup>7</sup> Anumzana nagri Ra Anumzamoka Kagra hankavenentake hu'nanankinka nagura vazinka ete nenavrane. Ha' knafina kagra hankogna hunka anteso hunenantenka, kegava hunante'nane. <sup>8</sup> Ra Anumzamoka havi avu'ava zama nehaza vahe'mo'za nazano erinakura tusiza huno zamave'nesianagi, zamatrege'za anazana e'oriho. Ana nehunka havi avu'ava zama hunaku'ma kema retro'ma hanaza zana eri atregeno, anazana forera osuno. Na'ankure ana'ma osnanke'za zamagra zamavufaga erisga hugahaze. <sup>9</sup> Nagri'ma ha'ma renenantaza vhahera, zamatregezo nagri'ma nazeri haviza hunaku'ma nanekema retro'ma nehaza zamo'a zamagrite efore huno zamazeri haviza hino. <sup>10</sup> Kagra teve nefake tankanu'za, atregeno ana vahe agofetura eramino. Ana nehunka ana vhahera zamazeri atrege'za tevefi vuge, tinkerifi uramige nehu'za, korora fre'za atioramio. <sup>11</sup> Havigema nehaza vhahera zamatrege'za tagri mopafina manine'za, maka zampina knarerera osiho. Hazenkema eri hakarema nehaza vhahera, knazamo zamavaririno zamazeri haviza hino. <sup>12</sup> Hianagi nagra ke'na antahi'na hu'noankino, knama zami'za zamazeri havizama nehaza vhahera Ra Anumzam'o'a zamaza nehuno, zamunte omene vhahera knare huno zamaza nehie. <sup>13</sup> Tamagerfa hu'za fatgo avu'ava zama nehaza vahe'mo'za, Anumzamoka kagi'a husga hugantegahaze. Ana nehanage'za Kagri kavukva zama amagemanentaza vahe'mo'za, kagrane magoka manigahaze.

## 141

*Kinagama hu nunamu zagame Deviti hu'nea zagamere*

<sup>1</sup> Ra Anumzamoka Kagritega kezanetuanki, ame hunka nagritega eno. Kagritega zavi krafama nehuana, nentahinka eme nazahuo. <sup>2</sup> Mana nentake'za insensima kre mna nevazagenka negenka musema nehanaza hunka, nagrama nunamuma nehua nunamuntera muse huo. Zagema unefrege'za kinagama ofama kresramna nehzaza hu'na, nazana erisga nehuanki antahinamio. <sup>3</sup> Ra Anumzamoka keagama hanufina, nagitera kegava hunanto. <sup>4</sup> Natrege'na havi avu'ava zama hu'zantera narimpamo'a oti'otira nosanigeno, havi avu'ava zama nehaza vhahera zamage ante'na ana avu'ava zana osa'neno. Ana nehunka hazenkema nehaza vahe'mo'zama ne'zama nene'za musema hanafina omanisue. <sup>5</sup> Fatgo

avu'ava'ma nehia vahe'mo'ma navesinenanteneno'ma sefu'ma namino naz-  
eri fatgoma haniana knare hu'n'e. E'inahu avu'ava zamo'a vahe'mofo  
asenire maseve tagino frentankna hu'neanki'n'a, i'o hu'n'a osugahue. Hi-  
anagi havi ava'ava zama nehaza vahekura, ana avu'avazamirera nona  
huzamanto hu'n'a, nunamuna huvava nehue. <sup>6</sup> Keagama refkoma nehaza  
kva vahera zamazerite'za matevu zamatresage'za zavenipi uramigahaze.  
Ana'ma hanage'za ana havi avu'ava zama nehaza vahe'mo'zama ke'za  
antahi'zama hanazana, nagrama hu'noa nankegura tamage naneke hu'n'e  
hu'za hugahaze. <sup>7</sup> Mopama reko'neria bulimakao afumo'ma, mopama  
reko'nerino havema refaragu'ma vaziaza huno, havi avu'ava zama ne-  
haza vahe'mokizmi zaferinamo'a, fri vahe kerimofo avazare ruherafino  
vuno eno hugahie. <sup>8</sup> Hianagi Ra Anumzana, Anumzanimoka kagrite  
navua kete'na nemanue. Kagrake'za fraki kuman'i mani'nanku, zama-  
trege'za nahe ofriho. <sup>9</sup> Nagri'ma nazerinaku'ma havi avu'ava zama ne-  
haza vahe'mo'zama anaginte'naza krifumo'a, atregeno naze'orino. <sup>10</sup> Havi  
avu'ava zama nehaza vahera zamatrege'za, zamagra'ama frakinte'naza  
kukompi ufreho. Ana nehanage'na nagrira mago zamo'a nazeri haviza  
osanige'na, knare hu'n'a vugahue.

## 142

### *Havegampi mani'neno Deviti asunte'nea zagamere*

<sup>1</sup> Ra Anumzamofontega ranke hu'n'a kezanetue. Ana nehu'n'a Ra  
Anumzamo asunku hunanteno naza haniegua agritega ranke hu'n'a  
nunamuna nehue. <sup>2</sup> Anumzamofo avuga knazani'a eri'na ne-ena,  
knazani'aramina Agri avure eri'na eme nesamue. <sup>3</sup> Nagu'amo'ma tusi  
knama nehigenka, nagra na'a hugahufi Kagra ko nagenka antahinka  
hu'nane. Nagrama kama vanoma nehfufina vahe'mo'za nagri nazerinakura  
krifua eme anagi fraki'naze. <sup>4</sup> Vahe'mo'zama eme naza hanagu navua  
omente emente hu'noanagi, mago vahe'mo'e huno eme naza osu'n'e.  
Ana hige'na fra'ma kisanua kumaku hake'noanagi, mago vahe'mo'e huno  
asunkura hunanteno naza osu'n'e. <sup>5</sup> Ra Anumzamoka naza huogu Kagritega  
nunamuna nehuanki, Kagrake'za fra'ma kisanua kumara mani'nane hu'n'a  
nehuankinka, ofri'na kase'fama hu'n'a manisanua kna'afina Kagrake'za  
nomani zanifina manigahane. <sup>6</sup> Naza huogu'ma krafagema nehuana,  
kagesa antenka antahinamio. Na'ankure ranknazamo narefitege'na  
mani'noanki, nazeri havizama hunaku'ma narotagoma nehaza vahe  
zamazampintira nagu'vazinka ete navro. Na'ankure zamagri hankavemo'a,  
nagri hankavea agatere'n'e. <sup>7</sup> Nagrira kinafintira katufenanto. An'a'ma  
hananke'na Kagri kagia ahena susu nehu'n'a humuse hugantegahue.  
Nagri'ma rama'a knare kavukvama hunantana avu'ava zanku, Kagri  
kavu'kava zama amage'ma nentaza vahe'mo'za e'za eme nazeri kagigahaze.

## 143

### *Anumzamoaza haniegua Deviti nunamu hu'nea zagamere*

<sup>1</sup> Ra Anumzamoka nazama hananegu'ma nunamuma nehuana kagesa  
antenka antahio. Na'ankure Kagra tamage hunka hugahue hunkama  
nehanaza nehunka, fatgo kavukvama'nehana Anumzamoka nunamuni'a  
antahinaminka nona hunanto. <sup>2</sup> Nagra Kagri eri'za vahe mani'noanki,  
refkoa huonanto. Na'ankure mago vahe'mo'e huno Kagri kavurera fatgo  
huno hazenke'a omene vahera omani'n'e. <sup>3</sup> Ha' vahe'nimo'za nagenere'za

nazerite'za, nahetrazage'na mopafi mase'noe. Ana hute'za natrazage'na fri' vahe'mo'zama fri' vahe kumapima nemanizaza hu'na hanizampi mani'noe. <sup>4</sup> Ana hazageno nagu'amoa evuramigeno hankaveni'a omane amne hige'na antahintahi hakare nehu'na koro hu'noe. <sup>5</sup> Korapa'ma fore'ma hu'nea zankura nagesa nentah'i'na, kagrama tro'ma hunte'nana zanku'ene, kzampinti'ma eri fore'ma hu'nana zankura nagesa antahintahi nehue. <sup>6</sup> Nazana erisga hu'na nunamuna kagritega nehue. Mopamo'ma hagage huno tinku'ma avesiazza hu'na, Kagrikura tusiza huno nave'nesie. <sup>7</sup> Ra Anumzamoka nagri nunamuntera ame hunka nona hunanto. Na'ankure nagu'mo'a evu neramie. Nagrira natrenka kamefira huonamio. Ana'ma hananke'na nagra fri'na haviza hugahue. <sup>8</sup> Natrege'na maka nanterana vagaore mevava kavesi'zankura nagesa antahigami'neno. Na'ankure na-mentintia Kagrite nehugu, kama vanua kana naveri huo. Na'ankure nagrani'a Kagri kazampi nentoe. <sup>9</sup> Ra Anumzamoka ha' vahe'nifintira nagu'vazio. Na'ankure kagripinka frakinaku nagare'na neoe. <sup>10</sup> Rempi huna-mige'na kagri kavesi zana amagera anta'neno. Na'ankure nagri Anumza Kagra mani'nane. Atregeno Kagri so'e Avamu'mo navareno fatgo hu'nesia kante vino. <sup>11</sup> Ra Anumzamoka rankagika'agu kagesa nentahinka, nagrira ete kegava hunanto. Kagra fatgo kavukva nehana Anumza mani'nanku, knazampintira naza hunka nazeri atro. <sup>12</sup> Vagaore mevava kavesi zan-teti kavesi nante'nananki, ha'ma renenantaza vahe'ene, nazeri haviza hunaku'ma nehaza vhahera zamazeri haviza hugahane. Na'ankure nagra Kagri eri'za vahe mani'noe.

## 144

*Deviti'a Ra Anumzamo aza higeno ha'ma agatere'nea zanku susu hunte'nea zagamere*

<sup>1</sup> Ra Anumzamo'a nagri hankave have mani'negu hu'na Agri agi'a husga huntegahue. Agrake'za nazane nazankonena eri hankavenetino, ha'ma hu'zana rempi hunenamie. <sup>2</sup> Agra vagaore avesizama'areti avesinenantea Anumza mani'neankino, hankave vihuni'a mani'ne. Agrake'za fraki kumania mani'neno, nagura'vazino ete nenavre. Agra hankoni'a mani'negena, agripinka fraki'na nemanugen, ru moparega vahetamina zamazeri nagafi atrege'na kegava hunezamantoe. <sup>3</sup> Vahera tagra nankna zaga mani'nonkena, Ra Anumzamoka kegava hunerantenka, vahetfankura antahintahi hakarea nehane? <sup>4</sup> Na'ankure vahe'ma mani'nonana, vahe'mo agonafinti magoke zupa asimu antegeno viankna nehuta, zage rentegeno vahe amema'amo efore huteno ame huno fanane hiaza huno vahe'mota nemanuna knatimo'a ame' huno nevie. <sup>5</sup> Ra Anumzamoka anami mona eri ankro hunka eramio. Ana nehunka agonaramintera kazana eme avako hugeno tevegumo'a vemagu vemagu huno marerino. <sup>6</sup> Kopasi'na atregeno ruganani huno vuno eno nehuno, Kagri'ma ha'ma renegantaza vhahera zamahe panani hino. Kagra keveraminka'a ahetrenka zamazeri koro huge'za freho. <sup>7</sup> Anagamu monafinkati kazana antefenka atrenka, tima hageno eme nazeri nenakrifintira naza hunka nagura nevažinka, ru vahe'mokizmi hankavefintira nagu'vazio. <sup>8</sup> Ana vahe'mo'za havi nanekege nehu'za, ana hugahune hu'za huvempa nehazanagi, ana zana osugahaze. <sup>9</sup> Anumzamoka kasefa zagame hu'na kagika'a erisga hugahue. Nagra 10ni'a nofi'ma me'nea hapu zavena nehe'na, zagamera hu'na kagika'a ahentesga hugahue.

<sup>10</sup> Kagrake'za kini vahera hankavea zaminke'za, ha' vahe'zamia hara huzamagate nerazagenka, eri'za vaheka'amo'na Deviti'na nagu'vazinke'za ha' vahe'nimo'za bainat kzinura nahe ofri'naze. <sup>11</sup> Ha' vahenimokizmi hankavefintira nagu'vazinka ete navro. Ana vahe'mo'za havi nanekege nehu'za, ana hugahune hu'za huvempa nehazanagi, havige nehaze. <sup>12</sup> Tagri ne' mofavre naga'mo'za zafamo ame huno hageno mareneriaza hu'za, ame hu'za ra ome hanaze. Mofa'ne negatimo'za kini vahe'mofo nom a vazisgama nehia zafaraminte'ma avasasema hunentaza kna hanaze. <sup>13</sup> Ruzahu ruzahu ne'zamo, ne'zama nentona nompina avitesie. Sipisipi afu kevutimo'za rama'a tauseni'a kasenente'za, rama'a 10 tauseni'a kasentesageno sipisipi afu'ma nentona keginamo'a avitesiegu nave'nesie. <sup>14</sup> Hagi bulimakao afutimo'za rama'a zantmi eri'za esaze. Tagri kumamofo have keginafintira ha' vahe'mo'za kama hage'za mareriza vahera zamavare'za kina ome huozmantesaze. Ana hanigeno ran kumatimofo kuma amunompima, knazama fore hige'za zavi krafama nehaza zana omanesie. <sup>15</sup> Iza'o e'inahu asomu'ma erisania vahe'mo'a muse hugahie. Ana nehanigeno Ra Anumzamo'ma zamagri Anumzama manisia vahe'mo'za muse hugahaze.

## 145

### *Deviti'ma Anumzamofo agima ahentesga hu'nea zagamere*

<sup>1</sup> Anumzamoka nagri kini mani'nanku hu'na Kagrira husga hugantegahue. Ana nehu'na maka zupa, Kagri kagia ahentesga huvava hugahue. <sup>2</sup> Maka kna Kagrira husga hunegante'na, kagia erisga hu vava hugahue. <sup>3</sup> Ra Anumzamo'a agrake'za tusi'a Anumza mani'neankino, agrake'za ra agia erigara hu'ne. Ana hu'neankino agrake'za tusi'a Anumzana mani'neankita Agrira rezaganeta kegara osu'none. <sup>4</sup> Vahe'ma fore hu anante anante'ma hu'za vanafina, Kagrama hankave eri'zama erifore'ma hu'nana zamofo agenkea zamasami anante anante hu'za nevu'za, kagri hankavegura huama hu'za vahera zmasamigahaze. <sup>5</sup> Kagri hihamu hankavegu'ene, knare'nare eri'zama eri'nana zankura, nagesa antahintahi hugahue. <sup>6</sup> Kagrama hankave eri'zama eri'nana eri'zamofo agenkea vahe'mo'za hugantu hugama hu'za nentahinage'na, tusi'a Anumza mani'nane hu'na vahera huama hu'na zamasamigahue. <sup>7</sup> Rama'a knare'nare kavukvama hu'nana zankura maka vahe'mo'za huge antahige nehu'za, fatgo kavukva zankura zagamera nehu'za musenkase hugahaze. <sup>8</sup> Ra Anumzamo'a knare avu'ava huneranteno asunku hunerantea Anumzankino, ame huno arimpa oheno, vagaore mevava avesi zanteti avesinerantea Anumza mani'ne. <sup>9</sup> Ra Anumzamo'a maka vahera knare avu'avaza hunezamanteno, maka zama tro'ma hunte'nea zantamina asunku hunezamantea Anumza mani'ne. <sup>10</sup> Ra Anumzamoka maka zama tro'ma hunte'nana zantamimo'a Kagrira humuse hunegantesage'za, kamage'ma nentaza vahe'mo'za Kagri kagi'a husga hugahaze. <sup>11</sup> Ana nehu'za kagrama maka mopama kegava hunana hihamu masa zanka'agura nanekea nehu'za, hanavéka'agura huama hu'za vahera zamasamigahaze. <sup>12</sup> Kagrama hankave eri'zama eri'nana zamofone, Kagrama kegavama hunana hihamu hankavea maka vahe'mo'za ke'za antahi'za hugahaze. <sup>13</sup> Kagrama kini maninka kegavama hunana kuma'mo'a vagaore mevava huno vugahie. Mika knafima forehu anante anante'ma hu'za vanaza vahe'enena kegava huzmantenka vugahane. <sup>14</sup> Tanafa'ma hu'za masaza vahera Ra Anumzamo'a zamaza nehuno, knazamo'ma rentrakoma nehia vahera zamazeri sga nehie. <sup>15</sup> Maka zagamo'za kagrite

zamavua antete'za amuhara nehu'za mani'nazagenka, kna fatgore ne'zana zaminke'za nenaze. <sup>16</sup> Maka zagagafamo'za ne'zama nesaza zanku'ma nehazagenka, Kagra kazana rutarenka ne'zana zaminke'za nezamu nehaze. <sup>17</sup> Maka zama hifina Ra Anumzamo'a fatgo avu'ava zanke nehuno, asunku huranteno ana maka zana hunerante. <sup>18</sup> Tamage zamagu zamagesa regati'ma Ra Anumzamofonku'ma kezamatiza vahetera, Agra erava'o nehie. <sup>19</sup> Agri'ma koro'ma hunte'za amage'ma nentaza vahe'mo'zama nazankuro atupa'ma nehaza zana nezamino, zavi krafama nehazana nentahino, zama huno zamagu nevazie. <sup>20</sup> Ra Anumzamofoma avesinentaza vhahera, Agra kegava hunezamante. Hianagi havi zamavu zamava'ma nehaza vhahera, zamazeri havizantfa hugahie. <sup>21</sup> Nagra Ra Anumzamofo agi'a ahentesga hugahuanki, maka zantamima agra azampinti'ma tro'ma higeta ama mopafima mani'naza zantamimota, ruotage'ma hu'nea agi'a ahentesga huvava huta vugahaze.

## 146

### *Ra Anumzamo'ma zamazama nehia zanku hu'za agi'a ahentesga hu'naza zgamere*

<sup>1</sup> Ra Anumzamofona agi'a ahentesga hanune. Nagra maka nagu'areti hu'na Ra Anumzamofona agi'a ahentesga hugahue. <sup>2</sup> Nagrama kasefa'ma hu'na manisanua kna'afina Ra Anumzamofona agi'a ahentesga hugahue. Nasimu'ma eri'na manisanua kna'afina, Anumzanimofontega zagamera hu'na agi'a erintesga hugahue. <sup>3</sup> Ama mopafima mani'naza kva vahe'mo'za taza hugahaze huza amuhara osiho. Na'ankure zamagra amne vahetfa mani'nazanki'za, tamaza hu'za tamagura ovazigahaze. <sup>4</sup> Hagi ana vahe'mo'zama frizageno'za zamavufagamo'a mopanese. Anama friza zupa, nazano hugahune hu'za antahintahima retro'ma hu'naza zamo'a amne zankna nehie. <sup>5</sup> Hianagi izano Jekopu Anumzamo'ma azama nehania vahe'mo'a muse nehanigeno, Ra Anumzana Anumzama'rema amuha'ma nehania vahe'mo'a muse hugahie. <sup>6</sup> Anumzamo'a monane, mopane, hagerine, maka zantamima anampima me'nea zantamina agrake'za tro hu'ne. Ana hu'neankino nazano hugahuema huno huvempama hu'nea zana hvava huno nevie. <sup>7</sup> Vahe'mo'za knama zami'za zamazeri havizama nehaza vhahera, fatgo huno refko hunezamanteno, ne'zanku'ma zamaga'ma nentaza vhahera ne'zana nezamie. Ana nehuno Ra Anumzamo'a kinafima mani'naza vhahera katufe zamantege'za fru hu'za nemanize. <sup>8</sup> Zamavu'ma asuhu'nea vhahera Ra Anumzamo'a zamavua eri hari nehuno, knazamo'ma zamazeri fenkami atre'nea vhahera zamazeri sga nehuno, fatgo avu'ava zama nehaza vhahera avesi nezamante. <sup>9</sup> Megi'ati ru vahe'ma tagranema enemaniza vhahera Ra Anumzamo'a kegava hunezmanteno, kento a'nane zagane megusa mofavre nagara zamaza nehie. Hianagi havi avu'ava zama nehaza vahe'mo'zama nazano hunaku'ma retro'ma haza antahi'zana eri savri nehie. <sup>10</sup> Ra Anumzamo'a kinia mani vava huno vugahie. Saioni vahe'mota Anumzamo'a fore hunante anante'ma hu'za vanaza vahetera kinia manivava huno vugahianki, agi'a ahentesga hanune.

## 147

### *Ra Anumzamofoma ra agima ami'zamofo zgamere*

<sup>1</sup> Ra Anumzamofona agi'a ahentesga hanune. Anumzantimofoma zgamema huta agi'ama ahentesga hanuna zamo'a knare hu'ne. E'ina

hu'neankino agri agima ahentesga hu avu'ava zamo'a so'e huno knare zantfa hu'ne. <sup>2</sup> Ra Anumzamo'a Jerusalemi kumara ete eri so'e huno ki'ne. Ana nehuno Israeli vahem'a zamavare'za ru moparegama ome kinama huzmante'naza vhahera ete ome zamavareno eme eritru nehie. <sup>3</sup> Knazamo'ma higeno zamagu'amo'ma havizama hu'nea vhahera ete zamazeri so'e nehie. Ana nehuno namuma zamare'nea zana anaki nezamante. <sup>4</sup> Anami monafima hanafi tamima me'neana agra ko keno antahino nehuno, mago mago hanafi'mofona agi'a amitere hu'ne. <sup>5</sup> Tagri Ra Anumzamo'a ra huno hankavenentake Anumiza mani'ne. Ana hu'neankino Agri antahi'zamo'a mareri agatereneankita, mago'zantera erinteta, e'ina hune huta kegara osu'none. <sup>6</sup> Zamavufgama anterami'za nemaniza vhahera Ra Anumzamo'a zamazerisga nehie. Hianagi havi avu'ava zama nehaza vhahera kugusopafi zamazeri netre. <sup>7</sup> Zgame huta Ra Anumzamofona susu henenteta humuse hunteho. Hapu zavena neheta zagameria huta, Ra Anumzana tagri Anumzamofona agi'a ahentesga hiho. <sup>8</sup> Anami monafina higeno hampomo'a rufiteno enevigeno, kora huntegeno ama mopafina kora runentegeno, agonaramimpina trazamo'a hageno marenerie. <sup>9</sup> Agra afi zaggagafa ne'zana nezamino, kotkoti namamofo anentamo'zama ne'zanku'ma krafama nehazageno'a ne'zana nezamie. <sup>10</sup> Ra Anumzamo'a hosi afu'mofo hankavegu'ene, mago vahe'mofo hanavegura antahinomie. <sup>11</sup> Hianagi Agriku'ma koro nehu'za, vagaore mevava avesi zanku'ma amuha'ma nehaza vaheku, Ra Anumzamo'a musena nehie. <sup>12</sup> Jerusalemi kumapima nemaniza vahe'mota Ra Anumzamofona agi'a ahentesga hiho. Saioni agonafima nemaniza vahe'mota, tamagri Anumzamofona agi'a ahentesga hiho. <sup>13</sup> Na'ankure rankumatamimofo kafante'ma eri rusima nehaza ainia agrake'za eri hankavenetie. Ana nehuno ana kumapima tamagri mofavre naga'ma mani'nazana asomu hunezmante. <sup>14</sup> Tamagri mopamo'ma ometre eme atrema hu'nerega agrake'za kegava higeta fru huta nemanizageno, knare zantfama hu'nea witia tamigeta neramura nehaze. <sup>15</sup> Agrama mago zanku'ma ama mopafima keagama hutregeno'a, ame huno ana nanekemo'a ama mopafina eneramie. <sup>16</sup> Ama mopafina aisia atregeno eramino refinetelegen, tanefa ruherafi atreaza huno aisia ruherafi atregeno mopa refi'nete. <sup>17</sup> Agra monafintira have komopa ko atregeno eneramie. Anazamo higeno tusi zasi nehiankino, mago vahe'mo'a ana zasipina omanigahie. <sup>18</sup> Hagi henka keaga nehigeno, keaga'amo ana aisia eri ze'ze hutregeno, zaho huntegeno eno ana tina eme ahesageno vu'ne. <sup>19</sup> Agra naneke'a eri ama huno Jekopuna nesamino, kasege'ane tra ke'anena Israeli vhahera huama huno zamasami'ne. <sup>20</sup> Amanahu avu'ava zama tro'ma huzmante'neana, ruga'a mopafi vahe'ma agri kasegema ontahi'naza vhahera anara huozmante'ne. Ra Anumzamofona agi'a ahentesga hanune.

## 148

*Maka'zama monafine mopafinema me'nea zamo'a Anumzamofona agi ahentesga hania zagamere*

<sup>1</sup> Ra Anumzamofona agi'a ahentesga hanune. Amenagame monafinkatira Ra Anumzamofona agi'a ahentesga nehinkeno, anami monafintira, Ra Anumzamofona agi'a ahentesga hiho. <sup>2</sup> Maka Agri ankeru nagamota Anumzamofona agi'a ahentesga nehanageta, monafima maka Agri sondia vahe'ma nemaniza vahe'mota agi'a ahentesga hiho. <sup>3</sup> Zagemokane

ikamokanena Ra Anumzamofo agi'a ahentesga nehikeno, remsama ne-haza hanafi'mota Anumzamofo agi'a ahentesga hiho. <sup>4</sup> Anami hampoma agatereno onagame'ma me'nea monaramimo'za Anumzamofo agi'a ahentesga nehanage'za, hampoma agatereno onagame'ma me'nea timo'enena Anumzamofo agi'a ahentesga hugahie. <sup>5</sup> Hagi ana zantamimo'za Ra Anumzamofo agi'a ahentesga hiho. Na'ankure agra fore hiho huno hige'za fore hu'za me'naze. <sup>6</sup> Agra amare megahaze huno nonkuma'ma huz-mantenere manevava hu'za neaze. Ana hu'neankino agrama huama'ma hu'nea kemo'a, mevava huno vugahie. <sup>7</sup> Maka ama mopafi zantamimo'za Ra Anumzamofo agi'a ahentesga nehinkeno, hagerimpima tusinasi zagama nemaniza zagamotane, hagerimofo amefenkamema nemaniza zagamota Ra Anumzamofo agi'a ahentesga hiho. <sup>8</sup> Hagi kopasi'namokane komopa ko'mokane, aisimokane ko'mokane, Anumzamofonkea amage anteho. <sup>9</sup> Maka ranra agona'motane, ne'onse agona'motane, rgama renentaza zafamotane, maka sida zafa'motane, <sup>10</sup> afi zagagafamotane, vahe'mo'zama kegava nehaza zagagafamotane, tamasagu regati'ma re-graromaheta vanoma nehaza zaga kafamotane, haretu vanoma nehaza nama'motane, <sup>11</sup> ama mopafi kini vahetamine, maka ama mopafi vahe'ene, ugagota kva vahe'motane, keagama refkoma nehaza kva vahe'motane, <sup>12</sup> nehzazave'motane mofa'nemotane, ozafamotane, ne'onse mofavre nag-amotanena Ra Anumzamofo agi'a ahentesga hiho. <sup>13</sup> Maka zantamimo'za Ra Anumzamofona agi'a ahentesga hugahaze. Na'ankure agri agimo'a rankr-erfa hu'neankino, agri hihamu hankavemo'a monane mohanena agatereno onagame mareri'ne. <sup>14</sup> Agra vahe'a antahizamino hankavea nezamie. Einama hige'za agri amage'ma nentaza vahe'mo'za agi'a ahentesga nehaze. Israeli vahe'ma agri tvaonte'ma nemani'naza vahe'mota, Ra Anumzamofona agi'a ahentesga hiho.

## 149

### *Musema huno Anumzamofo agima ahentesga hu zaghmere*

<sup>1</sup> Ra Anumzamofona agi'a ahentesga nehuta, Ra Anumzamofontega kasefa zagine hanune. Agri'ma amage nentaza vahe'motama atruma hanafina zagine huta Agri agi'a ahentesga hiho. <sup>2</sup> Israeli vahe'mota tamagri'ma tro'ma huramante'nea Anumzamofonkura muse huntegahaze. Jerusalemi kumapima nemaniza vahe'mota, kini ne'tamigura muse hunte-gahaze. <sup>3</sup> Tamagra Agri agia ahentesga huna avoa nehageta, nase'nasepane hapu zavenanena aheho. <sup>4</sup> Na'ankure Ra Anumzamo'a vahe'agura tusiza huno muse hunezmanteankino, zamavufagama anterami'za nemaniza va-hera zamaza hige'za ha' vahe'zamia hara huzmagate'neraze. <sup>5</sup> Anumzamofo amage'ma nentaza vahe'mota, ha'ma hugatemaneraza zankura muse hugahaze. Ana nehu'za nozamifima mase'naku'ma nehu'za ranke hu'za muse zagine hughahaze. <sup>6</sup> Zamagipintira Anumzamofo agi'a ahentesga nehu'za, tarega kazigama asane'nea bainati kazina zamazampi eri'ne'za, <sup>7</sup> maka ama mopafima mani'naza vhiera nona hu'za hara hunezamante'za, zamagrama hunenaza zamavu'zmava zanteru nona hu'za vhiera zamazeri haviza hughahaze. <sup>8</sup> Ana nehu'za kini vahezmia seni nofinu kina renezmante'za, kva vahe'zaminena ainireti tro hu'naza seni nofiteti kina rezmantete'za, <sup>9</sup> ke'ma refkohu vahe'mo'zama e'inahu knaza erigahaze huno'ma hu'nea kante amage ante'za, ana vhiera knazana zami'za zamazeri haviza hughahaze.

Ana hu'neanki'za Anumzamofoma amage'ma nentaza vahe'mo'za, knare zamagi erigahaze. Ra Anumzamofona agi'a ahentesga hanune!

## 150

### *Ra Anumzamofo agi'ma ahentesga hu zاغامەرە*

<sup>1</sup> Ra Anumzamofona agi'a ahentesga hanune. Ra Anumzamofona Agri nom'aifi eta, agi'a ahentesga hanune. Agri hihamu hankavema erinte ama'ma nehia mona kumapina, Agri agi'a ahentesga hiho. <sup>2</sup> Agrama han-kavenentake eri'zama eri'nea zamo'a, knare huno so'e zantfa hu'neanki' agi'a ahentesga hiho. <sup>3</sup> Ufena nereta Anumzamofo agi'a ahentesga ne-huta, laeriema nehaza zavenane hapuema nehaza zavenane neheta, Anumzamofo agi'a ahentesga hiho. <sup>4</sup> Nase'nasepa neheta zagame huta avoa nehageta, kita zavena neheta konkenenareta Anumzamofo agi'a ahentesga hiho. <sup>5</sup> Tare kapa tamazampi eri'neta runkasase hinkeno, agasasa neranigeta Anumzamofo agi'a ahentesga hiho. Anazana runkasase'ma hanageno ra agasasama neranigeta, Anumzamofo agi'a ahentesga hiho. <sup>6</sup> Maka zagama tamasimu'ma erita nemanisaza zaghama, Ra Anumzamofo agi'a ahentesga hugahaze. Ra Anumzamofo agi'a ahentesga hanune.

## Proverb-Knare Nomaniza Knare Nomanizamofo Naneke

<sup>1</sup> Ama avontafera knare nomanizamofo ke Israeli vahe'mokizmi kini ne' Solomoni, Deviti nemofo krente'ne. <sup>2</sup> Ama knare nomanizamofo ke'mo'a, knare antahi'za neramino, tavumro ante ke nerasmivo, taza hinketa oku'ama me'nea kea keta antahita hugahune. <sup>3</sup> Knare antahintahi neramino, tazeri fatgo nehanigeta, fatgo avu'ava nehuta, fatgo huta refko nehuta, maka vahe'mofona mago avamente knare avu'avara huzmantegahune. <sup>4</sup> Hagi ama ana nanekemo'a, antahi'zama'a omane'nesia vahera knare antahintahi nezamino, ne'mofara antahiza nezaminke'za knare hu'za maka zana refko hugahaze. <sup>5</sup> Knare antahintahima eri'nesimo'a, ama nanekea nentahinkeno rempi hunemina, mago'anee ama' antahi'zana e'nerinkeno, antahi ama'ma hania ne'mo'a, avumro kea erigahie. <sup>6</sup> Ama nanekemo'a zamaza hina, knare antahintahima eri kene, avame kea antahi ama' nehuta, antahi'zane vahe'mo'zama hu'naza kene, ruzahu ruzahu fraki kea erigahaze. <sup>7</sup> Anumzamofonku kore huntenu agorga'a manizana, antahi'zama eri'zamofo agafa'a me'ne. Hu'neanagi neginagi vahe'mo'za knare antahi'zane avumro kegura zamagena humigahaze. <sup>8</sup> Mofavre'nimoke, negafa'ma kavumro kema hania kea amage nentenka, negrerama rempima hugamisia kea ha'ontagio. <sup>9</sup> Ana kavumro kemo'a, avasase zanu anunte fetori anteankna nehuno, anankempi pasesu nofi anteankna hugantegahie. <sup>10</sup> Mofavre'nimoke, kumi vahe'mo'za kefoza huogu kavazuma hanazana, ana kefozana osutfa huo. <sup>11</sup> Tagrane egeta frakineta hazenkezmi omne vaheku ome zmahamneno hnagenka, ovutfa huo. <sup>12</sup> Fri vahe kumamo'ma vahe'ma zamasgahu nevaziankna huta, zamasimuma eri'za mani'naza vahera zamahe frisune. <sup>13</sup> Mika zago'amo mareri zantamima zamaheta hanaresuna zantamina refko huta nontifi eri antevi'neteta, <sup>14</sup> musufama erisuna zagoa refko hugamigahunanki, tagrane enoma hanagenka, <sup>15</sup> mofavre'nimoke, zamagranena ovutfa huo, zamagrama vanarega ovuo. <sup>16</sup> Na'ankure ame hu'za kumira nehu'za, vahera zamahe'za korana eri neragize. <sup>17</sup> Namamo'ma negesigenka krifu anaginte'sanana, ana namamo'a krifufina ohenigeno, krifumo'a amnezankna hugahie. <sup>18</sup> Anahu kna hu'za, vahe'mo'za ruvahe zamahe'naku hazanagi, zamagra'a zamahe nefrise. <sup>19</sup> E'inahu kanteti'ma musufama fenoma erizamo'a, kahe frigahie.

### *Knare antahizamo'a, mago a'kna huno keza netie hu'nea naneke*

<sup>20</sup> Knare antahintahizamo'a mago a'kna hu'neankino, kama vu'za e'za nehzafi oti'neno kezantino, vahe atru hu'za nemanizafi ranke huno kezatino kea nehie. <sup>21</sup> Ana a'mo'a tusi kereso nehaza kamofo atupare-gati kezatino, rankumapi ufre kafante mani'neno kea nehie. <sup>22</sup> Antahiza omane vahe'motma na'ma'a zupa musena hutma antahizantmi omane vahera manigahaze? Kiza zokago kema knare antahizanku'ma nehzazana, taganetma omanigahafi? <sup>23</sup> Nagrama i'oma hugantoa kema amage'ma antesanke'na, nagu'a neramina, knare antahi'zani'a rempi huramigahue. <sup>24</sup> Hianagi kema nehugenka antahi nonaminka, kagrite etragote'za nehugenka antahi nonamine. <sup>25</sup> Kavumro'ma negantogenka, keni'a non-tahinka, osuo huazama nehanku, <sup>26</sup> ana nona'a kagrite'ma esia hazenke-gura, kagiza regahue. Tusi'a hazenke zamo kazeri kagateresige'na, Nagra

kagiza regahue. <sup>27</sup> Zahoko'mo hiaza huno hazenke zamo'ma tamazeri agaterenko, hankro zaho'mo hiaza huno tinko'mo refitege, hazenke'zamo ene kore'zamo tmagritera egahe. <sup>28</sup> Ana hanige'za zamagra zamazama hanugura kezatigahazanagi, nagra kenona huozamigahue. Zamagra na-grikura hakresnazanagi, onagegahaze. <sup>29</sup> Na'ankure zamagra antahi'zama erizankura zamesra hunente'za, Ra Anumzamofona kore hunte zamagesa ontahi'naze. <sup>30</sup> Nagrama zamavumro antoankea erinetre'za, zamazeri fatgo huankea amage onte'naze. <sup>31</sup> E'ina hu'negu zamagrama hu'nesaza zamuzmamofona raga'a nesageno, oku'ma hu'naku retroma hu'nesaza zamav'u'zmavamofo nona'a havi miza erigahaze. <sup>32</sup> Antahintahizmi omane vahe'mokizmia, neginagi zamav'u'zmavamo zamahe nefrinkeno, knare hu'none hu'zama hanaza zamo, zamahe frigahie. <sup>33</sup> Hianagi aza'o nagri kema antahisimo'a, hazenke e'ori knare huno nemanino, havizankura korora osu mani fru huno manigahie.

## 2

### *Knare antahizamo'ma so'e zama kaminia zamofo naneke*

<sup>1</sup> Mofavre'nimoke, Nagri kema antahinka kasegenima eri kagu'afi nentenka, <sup>2</sup> knare antahintahire kagesa neminka, kagu tumokareti hunka ama' antahi'zana e'nerinka, <sup>3</sup> kagrama knare'zane havizanema refko hu antahintahigu'ene, ama' antahizanku'ma kezama netinka, <sup>4</sup> silvagu'ma hi-ankna hunka knare antahizankura nehakrenka, marerisa zantami frak-inte'nea zanku hakreankna hunka hakresunka, <sup>5</sup> Ra Anumzamofoma kore huntenu agoragama manizana keama nehunka, Anumzamofoma antahi'zana hakrenka erifore hugahane. <sup>6</sup> Na'ankure Ra Anumzamo'a knare antahiza neramigeno, Agri agipinti antahi'zane, antahi ama'ma huzamofo kea ne-e. <sup>7</sup> Fatgo vahe'mofona knare antahiza ante avitenteno, makazampima mani fatgoma huno mania vahe'mofona, Agra hanko zamigna nehie. <sup>8</sup> Na'ankure Agrake fatgo vahe'mokizmia kama vano hu'zazmifina kegava nehuno, zamagu tumoteti hu'za amage'ma antaza nagara kavu'za zamina zamagu nevazie. <sup>9</sup> Ana nehunka fatgo avu'avazane, fatgo huno ke refkohu avu'ava ene, maka vahe'ma mago avamente avu'ava'ma hunte'zana antahi ankeregahane. <sup>10</sup> Na'ankure knare antahintahimo kagu'afi une-frenigeno, antahi'zamo'a, kazeri muse hugahie. <sup>11</sup> Knare antahizamo'a kva hugante'enigeno, ama' antahintahimo'a kaguvazigahie. <sup>12</sup> Knare antahizamo'a kefo avu'avaza'ma nehu'za, akrehe krehe zmageru'ma neraza vahepintira, kaza huno kagu'vazigahie. <sup>13</sup> Iza'o fatgo avu'avamofo kama atremo'a, hani avu'avamofo kampi nevie. <sup>14</sup> Iza'o knare osu avu'ava'ma musema huno nehuno, akrehe krehe kefo avu'avazankuma muse nehimo'a, <sup>15</sup> kama vu'zama'amo fatgo osu'neankino, havige vahe manine. <sup>16</sup> Arumofo a'mo monk'za huno vano nehania a'mo, nagrane eno huno kazeri savri hu'naku hanianagi, ana knare antahintahim'a kahokeno kaguvazigahie. <sup>17</sup> Ana a'mo nevena netreno, kahefazniare Anumzamofa avure'ma huhagerafina'a huvempa kea amefi hunemie. <sup>18</sup> Na'ankure ana a'mofo nompima ufre'sanana, fri vahe'mokizmi kumate vu'nea kampi vugahane. <sup>19</sup> Agrite'ma vimo'a eteno omeno, knare asimu eri kana onkegahie. <sup>20</sup> E'ina hu'negu knare vahe'mo'ma nevia kante nevunka, fatgo avu'ava'ma nehia vahe'mofo kante vugahane. <sup>21</sup> Na'ankure hazenkezmi omane vahe'mo'za ana moparera nemani'nesage'za, maka zampima mani fatgoma nehaza

vahe'mo'za ana mopare manigahaze. <sup>22</sup> Hianagi kefo avu'ava'ma nehaza vahe'mokizmia ana mopafintira zamazu hunetreno, fatgoma hu'za omanisaza vhahera zamahe fanane hugahie.

### 3

#### *Kasefa vahe'mokizmi naneke*

<sup>1</sup> Mofavrenimoke, nagrama rempima hugamua kea kage'okanio. Hianagi kasegeni'a kagu'tumote erintegeno meno. <sup>2</sup> Na'ankure kaza nehanigenka, karimpa frune zaza kafuzage knare hunka maninka vugahane. <sup>3</sup> Atregeno vahe'ma knare kavukvama huntezamo'en, tamage avu'avamo'a katreno ovino. Hagi knankempi nofi kintegeno me'nene'a kagu'tumote avonkrentegeno meno. <sup>4</sup> E'ina'ma hanankeno'a, Anumzamo'en vahe'mozanena kavesinegante'za, husga hugantegahaze. <sup>5</sup> Anumzamofona mika kagu'reti hunka antahi'neminka, nagrani'a antahintahiretira makazana hugahue hunka osuo. <sup>6</sup> Hanki mikazama hanampina antahiminka agihanta nevazigeno, vanana kana azeri ante fatgo hugantegahie. <sup>7</sup> Kagraka'a antahizankura knare hu'ne hunka eri antesga osunka, Anumzamofonku koro huntenga agorga'a nemaninka, havi avu'ava zana kamefi humio. <sup>8</sup> E'i ana'ma hanankeno'a, kavufa kazeri neganamreno, zaferina ka'a kazeri hanavetigahie. <sup>9</sup> Feno zanka'anu'ene hozakafima pusama nenama hania nezanteti'ene Ra Anumzamofona aminka, agia erintesga huo. <sup>10</sup> Ana hanankeno Anumzamo'a kaza nehina nezama ante nonka'amo'a aviteno herafi neramina, waini tintafemofona kasefa waini timo aviteno tagiramigahie. <sup>11</sup> Mofavre'nimoka Ra Anumzamoma, kazeri fatgo hania kegura, kamefira huomige, kazeri fatgoma hunaku kazeri akorisiana karimpagna osuo. <sup>12</sup> Na'ankure mago ne'mo'ma mofavre'ama avesima nenteno azeri fatgo nehiankna huno, Ra Anumzamo'a avesimantea vhahera azeri fatgo nehie. <sup>13</sup> Iza'o knare antahintahigu hakreno e'nerino, antahi ama'huzama erisimo'a, muse hugahie. <sup>14</sup> Na'ankure ana knare antahintahimofona mizama'amo'a, silvaretima e'neriza zagoa agateneregeno, goliretimma e'neriza zagoa, mago'ane agatere'ne. <sup>15</sup> Knare antahintahimo'a mizama'amo mreri'nea havea agatere'ne, mago'a zankuma nentahinka kavesi kavesima nehana zantamina ageterene. <sup>16</sup> Zaza knama maninka vuzamo'a, knare antahintahimofona tmaga azampi megeno, hoga kaziga azampina fenone, agi husaga hu'za me'n. <sup>17</sup> Knare antahintahimofo avu'ava'ma huzamo'a, krimpafru nehunka muse hugahane. <sup>18</sup> Iza'o ana knare antahintahima azerimo'a, asimu eri zafagna hu'neankino, agri avesizama azeri hampo'na hanimo'a muse hugahie. <sup>19</sup> Ra Anumzamo'a knare antahi'zama'areti, ama mopamofo tra'a erifore nehuno, antahi ama' hu antahi'zama'areti mona eri fore hu'ne. <sup>20</sup> Agra'a antahizanteti higeno timo'a mopa agu'afintira katati huno marerigeno, hampomo'a atakora nerie. <sup>21</sup> Mofavre'nimoke atregeno knare antahintahizane, havizane knare zanema antahinka refkohu kavukva'zana kagripintira fanane osina, kegava huo. <sup>22</sup> Hagi ana antahizamo'a kasimu kamninigenka za'za kna nemaninankeno, asunku'zamo'a knankempi kavasese huganteaza hugahie. <sup>23</sup> Ana nehunka kama vananana, kva hugantenkenka traka osunka, knare hunka vugahane. <sup>24</sup> Kavu'ma masesanana kore osunka, haganentake kavu masegahane. <sup>25</sup> Ame huno hazenkema esigenka kagra

korera nosunka, kefo vahe'ma knazamo'ma azeri haviza hanigenka, korera osuo. <sup>26</sup> Na'ankure Ra Anumzamo kagrira kegava hugante'nesigeno, kagafina krifumo'a aze'origahie. <sup>27</sup> Kagrama azama huga kankamunte'ma mani'nesunka, atupa'ma hu'ne'naza vahera amane aza huo. <sup>28</sup> Tva'onkare nemani'simofona amiga'ma hu'nesunka, oki ege'na kami'neno hunka osuo. <sup>29</sup> Tva'onkare nemanisaza vahera hazenke zamikea retro osuo. Na'ankure kagrikura taza hugahie hu'za antahinegamize. <sup>30</sup> Kegafa'a omaneno, mago kefozama huogante'nesnigenka, mago nera azerinka keaga huonto. <sup>31</sup> Hazenkema hanaza vahe'mokizmi zamavu'zmavakura kegasane nosunka, zamagrama hanaza zamavu'zmavara osuo. <sup>32</sup> Na'ankure Ra Anumzamo'a akrehe krehe zamavu'zmava'ene vahekura avesra huno agote'nezmanteno, fatgo zamavu'zmava'ma nehaza vaheku avesi'nezmantane. <sup>33</sup> Kefo zamavu'zmava'ma nehaza vahe'mokizmi naga'zmimofona, Ra Anumzamo'a kazusi hunezmante. Hianagi fatgo ne'mofo nagapina asomu hunezmante. <sup>34</sup> Vahe'mokizmima azanava kema huzmante vahe'mofona, Ra Anumzamo'a agr'enena azanava ke huntegahie. Hianagi anteramino manimofona, asunku hunente. <sup>35</sup> Knare antahi'zane vahe'mo'a, ra agi erigahianagi, neginagi antahi'zane vahe'mo'za, zamagazegu hugahaze.

## 4

### *Kasefa ne'mofa'mofo zamavumro naneke*

<sup>1</sup> Mofavre naga'nimota, negafanama rempi hugamisua kavumro kema kagesa antahi ankeresunka, antahi ama'hu antahintahia erigahane. <sup>2</sup> Nagra knare antahiza negamuanki, rempi hugamisua kea kamefira huonto. <sup>3</sup> Nagrama nenfa nompima onensa mofavrema mani'norera, anta'nimofo magoke mofavre'a mani'nogeno kegava hunante'negeno, <sup>4</sup> amanage huno nenfa'a rempi hunami'ne, Mika kema kasamisua kea kagu tumote erintenka azeri hampo'na nehunka, kasegeni'a amage'ma antesunka, knare hunka manigahane. <sup>5</sup> Knare antahintahia erio, antahi amahu antahi'zana erio, kasamisua nanekea kagera okaninka, kamagenka huontetfa'za huo. <sup>6</sup> Knare antahintahimofoma kamagenama huontesankeno'a, kagu nevazina avesima antesankeno'a, kegava hugantegahie. <sup>7</sup> Knare antahintahi'zana raza me'neanki erio. Hagi maka'zana erigahananagi agatere'nea zana knare antahi'za erio. <sup>8</sup> Knare antahintahia zana azerisga nehugen, kagrira kazeri sga hino, agr'i'ma azeri akonama hanankeno'a, kagrira ran kagi kamigahie.

<sup>9</sup> Ana antahi'zamo'a, rimpia fru'zanu konariria kasenire huneganteno, kinimofo asinentike fetori kasenire resi hugantegahie. <sup>10</sup> Mofavrenimooke, nagrama huankema antahitenka, ana kema avaririnka amage'ma antesunka, rama'a kafuzage maninka vugahane. <sup>11</sup> Knare antahizampi vuogu nagra kazeri fatgo nehu'na, knare fatgo kante kavare'na nevue. <sup>12</sup> Ana kantema kagama renakerenka vananana mago zamo'a asevazi ogantena, tragi-naku'ma hananana tanafara osugahane. <sup>13</sup> Kagrama hananegu'ma amama kasamua kea otrenka azeri hanavenetinka atregeno ovino. Na'ankure e'i ana kema huogu'ma rempima hunegamua kemo'a mani'zanka'agna hugahie. <sup>14</sup> Havi kefo avu'ava hania vahe'mofo kantera ovunka, haviza huno kefoza hu'ne'nia vahe'mo hania zana ovaririo. <sup>15</sup> Ana kantera ovunka, atrenka rukagesenka vugahuema hantega vuo. <sup>16</sup> Na'ankure zamagra kefo avu'ava zama osu'nesu'za zamavura ovase'za mani'ne'za

kefozana hute'za zamavura masegahaze. Vahera zamazeri haviza hute-suzage, zamavura vasegahaze. <sup>17</sup> Kefo avu'ava'ma hu'zana, breti neankna nehu'za, hazenkema hu'zana waini ti ne'za negi neankna nehaze. <sup>18</sup> Hianagi fatgo vahe'mofo mani'zamo'a, zogemo zahufa nehanatino remsa hume ne-eno, eme remsa huno feru aseankna nehie. <sup>19</sup> Hianagi havi avu'ava ene vahe'mofo mani'zamo'a, hani hiankna hu'neanki'za, ana vahe'mo'za na'amo zamazeri tanafa nehie nonkaze. <sup>20</sup> Nagrama huankere mofavrenimoka kagesa antenerka, mika keni'a antahi ankero. <sup>21</sup> Hagi ana nanekea kavure antenenka negenka, ana mika kea kagu'afi erintenka kegava huo. <sup>22</sup> Na'ankure iz'a'ana kema erino agu'affima antemofona, mani'zama'amo'a knare hanigeno, mika avufgamo'a knare hugahie. <sup>23</sup> Ana mika'zana hugahananagi agatere'nea zama hananana, antahi zanka'a kegavahu so'e huo. Na'ankure e'i tamage asimu erisana tinkampui me'ne. <sup>24</sup> Havigema hu'zana netrenka, krunagema kagipinti'ma atiramizankura atregeno afete meno. <sup>25</sup> Kavua kegantigama osunka, ke fatgo hunka kavugage kavua kenka vuo. <sup>26</sup> Kagama rentenkama vanana kana kva hu'enka, kavua kenka nevugenyo, mika zamo'a kagritera agafa huno eme hanavetigahie. <sup>27</sup> Kagia antifi omerege amafi emerge osunka, kagamo'ma kefo avu'avapima kavareno vezankura kva huo.

## 5

### *Savari a'ene monko avu'avaza hu'zanku kva hanuna tavumro naneke*

<sup>1</sup> Mofavrenimoke, knare antahi'zane ama' antahi'zamofo kema kasamisuana kagesa antenka antahi so'e huo. <sup>2</sup> Anama hanunka ama' antahintahire nemalinka, keagama hananana antahintahine vahe'mo'za nehzankna hunka kea hugahane. <sup>3</sup> Na'ankure savri a'mofo agipinti kemo'a, tume rima'amo haga hiankna nehinkeno, agipinti'ma atiramisia nanekemo'a, olivi masavemo fru huno karoro hiankna hugahie. <sup>4</sup> Hianagi refaregama kesanana, ana a'mo'a akahe trazankna nehuno, tare kaziga asane'nea kazinkna hu'ne. <sup>5</sup> E'i ana a'mofo agamo'a fri'zampi uneramino, agama renakereno viazamo'a, fri vahe kerifi nevie. <sup>6</sup> Ana savari a'mo'a, asimu'ma erino manikankura nontahino, kama via kamo'a fatgoa nosianagi antahino keno nosie. <sup>7</sup> E'ina hu'negu mofavrenimota ke'ni'a antahitama, amama tamasamisua kemofona tamagena huomihu. <sup>8</sup> Ana savari a'mofona atrenka ogantu'a nemalinka, nomofo kasama'arera uravao osuo. <sup>9</sup> Anama hananana havi kagi e'nerinka, zahufaf i kasefa vahe mani'nesanke'za, havi vahe'mo'za kazeri haviza hugahaze. <sup>10</sup> Onke'nesana vahe'mo'za hanaveka'a atrenka eri'nanzana, e'nerisageno, knare zantamima amuho hunka eritru huntesana zantamina ru vahe'mo'za erigahaze. <sup>11</sup> Henkama frinaku'ma banana knama esigeno'a, krimo'a kavufafina ra nehuno, kazeri zaferinage hinkenka karagi nerunka, <sup>12</sup> anage hugahane, na'a hige'na navumaro kema nenasimige'na, navesra hunente'na, nazeri fatgo nehige'na, anankea ontahi'noane hugahane. <sup>13</sup> Nahige'na rempi hunami vahe'mo'zama nazeri kante ante kema nasamiza vahe'mokizmi kea ontahi'noane hunka hugahane! <sup>14</sup> Nagra mika vahe zamavurera haviza hu'na keforoe hugahane. <sup>15</sup> Ru vahe'mofo tintetira tina ono, kagra'a tintetike tina no, e'i a'ka'ane mani fatgo huzanku hu'ne. <sup>16</sup> Amanefina tinka'a ome tagi atre, eme tagitre osuo. Kagra a'enenke'za maso. <sup>17</sup> Atregeno kagri a'mofo suzanke meno, aru a'nenena monkozana osuo. <sup>18</sup> Kasefa'ma mani'enka e'rinana a'ka'ane muse hunka mani'negeno, Anumzamo'a

asomu hugantegahie. <sup>19</sup> A'ka'amo'a dia a' afu'mo'ma hiankna huno avesi avesi huno knare zantfa huneganteanki, amima'amo'a maka kna kavesizana kazeri knare nehina, kagri'ma kavesi kantenia zamo'a kazeri agrarega atre'na agri avesi'zampi manigahane. <sup>20</sup> Neve'enema mani fatgo huno'ma omanisia a'nea mofavre'nimoka ke'negeno kavufgamo'a oraotino. Atregeno amima'arera kavrenteno kanura okino. <sup>21</sup> Na'ankure Ra Anumzamo'a miko kama vano hunana, ke'ankereno refako huno tage'negeta vano nehune. <sup>22</sup> Kefozama nehia ne'mofona kefo avu'ava zama'amo'a kukomo azeriankna nehigeno, kumi'amo kina rentegeno nemanie. <sup>23</sup> Agra'a avesizama kegavama osaniazamo hanigeno frigahie. Rama'a havizama haniazamo hanigeno, fanane hugahie.

## 6

### *Mago'a kavukava'ma osnana zamofo nanenke*

<sup>1</sup> Mofavrenimoke, tava'onkare'ma nemanisimo'ma nofi hugahue hani-genka aza hugahue hananano, rumofonku'ma huvempa hunka kaza hugahuema hananana, <sup>2</sup> kagraka'a huvempama hu'nenana kemo'ma ki-nama regatenigenka, <sup>3</sup> mofavre'nimoka amana huo, hago agri azampi mani'nananki kagra'a kavufa anteraminka ana nete vunka, kasunku naneke ome hugeno, kina reogante'na amne fru hunka manigahane. <sup>4</sup> Kavu tokora osunka, kavura omasenenka, ame hunka vuo. <sup>5</sup> Kagra dia afumo'ene namamo enema zagagafama ahe vahe'mofo azampinti ame huno freankna hunka, kagra'a kavufga kaguvaazio.

<sup>6</sup> Eri'zama e'ori feru vahe'motma kipazuvemoza nehaza zante ome negeta, rempi huta nentahita, knare antahi'zana eriho. <sup>7</sup> Kipazuvemofona kva vahe'zmia omanigeno, zamazeri ante fatgohu kva vahe zamia omanigeno, kvama krizamante kva vahe zamia omari'neanagi, <sup>8</sup> ne'zamo'ma rama'ama fore hianknafina nezama omane knafima nesagura, ne'zana eri atru nehaze. <sup>9</sup> Eri'zama e'ori feru vahe'motma, nama'a zupa tamavura masegahaze? Nazupa masetamavuna segahaze? <sup>10</sup> Osi'agna ko kavura masenka hinkrafora antegenko, osiagna ko mago'ane manifru nehunka, osiagna ko mago'ane kagemazampare kazana antenka manifru hananana, <sup>11</sup> mago zanka'a omanetfa hanigenka, kumazafa vahemo atireti kazerino fenozanka'a erivagareankna hugahane. <sup>12</sup> Mago zazmi omane kefozama nehaza vahe'mo'za akrehe krehe zmageru aruza vano nehaze. <sup>13</sup> Ana vahe'mo'za havigema nehanu'za zamavu resukinegami'za, zamagiareti rekpasga nehu'za, zamazanteti'ene zamazankoreti'ene erigu'a hu'za avame'namera hugahaze. <sup>14</sup> Havi avu'avaza'ma erifore'ma hu'zamo'a zamagu'afina aviteneg'e'za, kefo avu'ava zana hakare zupa nehu'za, hazenkea eri hakare hu'za nevaze. <sup>15</sup> E'ina hu'negu e'inahu vahetera hantka huno havizamo'a agritera eno, ame huno azeri haviza hanigeno, ana'ma azeri havizama hania knazama eritre kana omanetfa hugahie.

### *Seveni'a avu'avazama Anumzamofoma ago'ma netea zamofo naneke*

<sup>16</sup> Sigisi'a zama Ra Anumzamofoma agomanetea zantamina me'neanagi, seveni'a zamo'a Ra Anumzamofoma avurera kasrino haviza me'ne.

<sup>17</sup> Agra avufga erisga nehuno, ru vahe kefenkami atre'zane, havigema hu'zane, hazenke'a omane vahe'ma aheno korama'a eri fegi atre'zane, <sup>18</sup> havi antahintahizamo antahintahifima mevite'zane, havi zante'ma ame huno avreno neviazane ave'nosie. <sup>19</sup> Keagama refkohu trate osu'nea

zanku tamage nehie huno havige hu vahe'ma, zamagipinti'ma krunagema hu'zama atineramia zane, naga'afima hazenke zama eri hakare nehiazana Anumzamo'a agonete. <sup>20</sup> Mofavrenimoke, negafa'ma kasamisia kasegea otretta nehunka, negrera'ma rempi hugamisia kea amge'anto. <sup>21</sup> Kagu'afi erintenka azeri antakro maka zupa nehunka, avaseseza hiankna hunka rugaginka knankempi anakio. <sup>22</sup> Kama vanoma hananana ana kemo kazeri fatgo nehuno, kavu'ma masesanana kegava huneganteno, mase-nesampinti'ma otisanana nankeea kasamigahie. <sup>23</sup> Na'ankure ama ana kasegemo'a rampe tavikna higeno, amama rempima huneramia kemo'a masa megeno, kazeri fatgohu kavumro'ma antea kemo'a, mani'zamofo ka me'ne. <sup>24</sup> Savri a'nemo'za kazeri haya huzankura ana kemo kza nehina, neve'enema mani fatgo osu savari avu'avazante vanoma nehania a'mofo haganentake ageru'mo'a kazeri havizana osugahie. <sup>25</sup> Ana a'mofo agi agonagura kegasanea osuge, atregeno kavazu hunaku'ma avureti'ma revumi'ma hugamisia zamo'a kavazua osino. <sup>26</sup> Na'ankure savri a'enema mase zamo'a kazeri kefo regahianagi, vereti a'mo'ma kavazu haniana kasimu ka'a erigahie. <sup>27</sup> Akru huno nerlesia tevema hankeri kasumpima antesanana kukenaka'a azerino ontegahifi? <sup>28</sup> Teve zugu'ma neresisima kaga vapa'ma vananana, kagagusa teonkasagegosif? <sup>29</sup> E'ina hukna hugahane, tava'onka'arema nemanisia ne'mofo a'enema masege, monkozama hananana hazenke erigahane. <sup>30</sup> Aga'ma netenigeno ne'zama nesia zanku'ma kumzafama erisia vahera, rama'a tamarimpa kna hunontaze. <sup>31</sup> Hu'neanagi ana ne'ma azerisageno'a, seveni'a zupa nama'aza eri'neo seveni'a zupa antegofetu huno miza segahie. Hagi atupa'ma hanuno'a, no'ma'afima ante'nesia fenoma'areti ene mizasegahie. <sup>32</sup> Hianagi ru ne'mofo a'enema maseno monkozama huntlesia ne'mo'a, ana negi' avu'ava zama'areti agra'a azeri haviza nehie. <sup>33</sup> Ahe'zama azeri agazema huntesaza zamo'a, agrite me'nesigeno agaze zamo'a vagaore agrite mevava hugahie. <sup>34</sup> Na'ankure ana a'mofo neve'ma rimpama ahelia zamo marerisigeno nona huno kahenaku esiana asuntagi'zana agripina omanegosie. <sup>35</sup> Ana hazenkere miza antege, rimpama azeri fru hu'naku rama'a zantami eme amisia zamo'a, azeri fru osugahie.

## 7

### *Savri a'mofonku'ma mani kore'ma hu'zamofo naneke*

<sup>1</sup> Mofavre'nimoke, Keni'a nentahinka, kasegeni'a eri kagu'afi antegeno raza segantena kva huo. <sup>2</sup> Kasegeni'ama amage antesanana kagra kasefa hunka nemaninka, rempima hugamisua zana kavurgama kegava nehanankna hunka kegava huo. <sup>3</sup> Kazeri kagesa hanigu rini kazampi antaniankna hunka kantu kagu'afi tumoka'are krento. <sup>4</sup> Knare antahin-tahigura nensaro'e nehunka, antahi amahu antahintahigura nenafu'e hunka huo. <sup>5</sup> Ve'ama mani'nesia a'mo'ma kazeri savri'ma hu'zama nehinkeno'a, ana kemo'a kaza nehina rugazigati a'mo'ma kazeri savri hu-naku'ma masavenkema nehanigeno'a, anankemo'a kagu'vazigahie.

<sup>6</sup> Mago zupa mani'ne'nua noniamofona zaho eri kampinti negogeno, <sup>7</sup> mago'a nehzave enevazafina kogeno amuno zamifina, mago nehzaza ne'kanora, knare antahi'zama'a omane'nea ne' ke'noe. <sup>8</sup> Agra monko'amofo nontava'onte vu'nea nonkaranka nevuno, ana a'mofo nonte vu'nea kampi

ufreno vu'ne. <sup>9</sup> Hanima huku'ma nehigeno hanimo'ma rentrako huza-hifi anara hu'ne. <sup>10</sup> Ana a'mo'ma kukenama hu'neana monko a'nemo'za nehzankna kukena hu'neno, ana ne'ma masavenkema asamino azeri savri'ma hanigura e'ne. <sup>11</sup> Ana a'mo'a kehagra hagra nehuno, nontera manirava oheno kankekanke nehige'za, rama vahe'mo'za ke'za antahi'za hu'naza are. <sup>12</sup> Ana a'mo'a hakarea zupa kampine, maketi kumapine, maka kaziga mani'neno vene'nema evazageno'a rezamaheno zamavazuma hanigu negea akino, <sup>13</sup> ana nehaza nera azeri anukiazamo antako huneten, avufga azeri ot'i'are avunutira negeno anage hu'ne, <sup>14</sup> Nagra menina narimpa fruma eri kresramana vugeno, huvempama hunte'noa kemo'a raga re'ne. <sup>15</sup> Hu'negu kagriku hakare'na kagenaku oregati hago eme kage'na eri forehue. <sup>16</sup> Isipi vahe'mokizmi pse'ane tavravereti mase tafera hunte'noe. <sup>17</sup> Hago knare manama vuzantamina miama, aloima, sinamon-inu mase tafepina rutri hu'na ahemna vunte'noe. <sup>18</sup> Hagi egeta umaseneta, zokagora nereta musena nehanukeno ko'aturanteno. <sup>19</sup> Nenave'a non-tera omani'neanki, hago afete ka vu'ne. <sup>20</sup> Zgom'o'a ku'afina avite'negeno vu'neankino kora omegosianki ama ikamofona amu'nontega esia kante vu'ne. <sup>21</sup> Ana a'mo'a masavenkema asamino avresia nanekea, rama'a naneke asami'ne. <sup>22</sup> Ana ne'mo'a ame huno ve bulimakao afu aheku avazu hu'za nevazankna huno ana a'mofona avaririno vu'ne. <sup>23</sup> Kevemo'ma tumo'ruragino ahesnia zankura agesa ana ne'mo'a nontahino, agra namamo hareno krifu anagintepi ufreankna nehuno, ahe frisia zankura non-tahie.

<sup>24</sup> Hanki mofavre'nimote, tamagesa anteso'e hutma nanekeni'a antahiho, <sup>25</sup> Atrenkeno tamagu'amo'a ana a'mofo kerera amagera ontege, kavareno agri kantera ovino. <sup>26</sup> Na'ankure ana a'mo'a rama'a vene'ne zamazeri haviza nehuno, zamahe fri'ne. <sup>27</sup> Hagi ana a'mofo nona fri vahe kerimofo ranka me'neankino, ana kamo'a fri vahe kumapi urami'ne.

## 8

### *Knare antahintahimo kezantetia naneke*

<sup>1</sup> Knare antahintahii'zamo'ene antahi amahu antahi'zamo'a mago a'kna hu'neankino agerura eri antesga huno kezana netie. <sup>2</sup> Agra kamofo tavaonte me'nea agonare, ka hatana hu'nefi ot'i'neno, <sup>3</sup> rankumapi ufre'nea kante ene kampi otineno ranke huno kezana netie. <sup>4</sup> Ana miko vahe'motmagu kezankea nehue. Vahe'motagu kezankea nehue. <sup>5</sup> Antahi'zantmi omane vahe'motma eta knare'ma huno refakomahu antahi'zana emeriho. Neginagi antahi'zane vahe'motma, eta antahi amahu antahi'zana emeriho. <sup>6</sup> Kama antahiho kema nehuana, na'ankure mareri agatere'nea zanku nehue, maka nanekema hanua kemo'a, fatgo huno tamage kege tamasamigahue. <sup>7</sup> Nagra tamage kege nehu'na, havi kegagama nagipinti'ma hu'zankura nagonete. <sup>8</sup> Maka nanekeno'ma tamage huno fatgo higeno, krunagene kazaki kema hu'zana omane'neanki, <sup>9</sup> ana maka kemo'a antahi'zane vahetera fatgo hu'ne. Ana antahi'zama erinaku'ma hakaza vahetera, fatgo hu'ne. <sup>10</sup> Nagrama hiho hu'nama rempima huneramua kemo'a, silva agateregeno, antahi'zama eri'zamo'a, goli'a agatere'neanki eriho. <sup>11</sup> Na'ankure knare antahi'zamo'a mareri agatere'nea havea agatereno, kavesi kavesima nehunka razane hunka nehanazana agatere'ne. <sup>12</sup> Nagra knare antahi'zamo'na knare huno refakohu avu'ava'zane nemanue, Nagripi antahi'zana me'neanki'na miko zana nagrake refko hu'na negoe.

13 Ra Anumzamofonku'ma koro'ma hunte'zana kefo avu'ava'ma huzankura kagotegahie. Agra'a agima erisga nehuno, avufga ra nehuno, havi avu'ava nehuno, akrahe akrehe ageru'ma aru'zana navesra hunentoe. <sup>14</sup> Knare antahi'zama ami'zane, refakoma hu'zana nagripi me'ne. Nagra antahi ama'ma hu'zane hanavenera nagri zane. <sup>15</sup> Nagra mani'noge'za kini vahe'mo'za kegava nehazageno, ugota kva vahe'mo'za fatgo hu'nea kasegea retro nehaze. <sup>16</sup> Kva vahe'mo'za nagra zamaza nehuge'za, vahera zamavare fatgo hu'za nevazageno, trakere kva vahe'mo'za fatgo hu'za refkoa nehaze. <sup>17</sup> Iza'o nagri'ma avesi nentemofona, nagra avesi nentoe. Hagi nagriku'ma hakre'nimo'a, nagrira nagefore hugahie. <sup>18</sup> Nagripi fenozane, ra agima eri'zana me'ne. Hanavetino za'zate'ma meno vu fenozane, fatgo avu'ava zana nagripi me'ne. <sup>19</sup> Nagrama nezamua zamo'a, golia agatenereno knare silvama mizama nesazazana agatere'ne. <sup>20</sup> Nagra fatgo avu'ava zamofo kante nevu'na, fatgo huno refakoma hu'zamofo kantamimpi nevue. <sup>21</sup> Iza'zo nagri'ma zamavesi nantesaza naga'mo'za, fenona erisanti neharesage'na, nagra feno nozamifina zago'amo'ma mareri zantamina antevi tezamantegahue. <sup>22</sup> Ra Anumzamo'a pusazana nagri nazeri fore huteno, mika'zana henka tro hu'ne. <sup>23</sup> Korapara ama mopama tro osu'neno ese zana nagri huhamprinante'ne. <sup>24</sup> Nagra fore hutogeno henka hagerina tro higeno, kampui tintamimo'a hanatino vu'ne. <sup>25</sup> Ranra agonane, onensa agona forera huno menima antenerera omanenege'na, nagra pusante fore hu'noe. <sup>26</sup> Miko mopane, hofa kokama ama mopafi me'nene, kugusopa nazana henka tro hu'ne. <sup>27</sup> Nagra korapa mani'nogeno monarera mika'zana tro hunenteno, hagerina tro huntogeno, tavumo'ma ometre emetre'ma hutera evu'ne. <sup>28</sup> Nagra ko mani'nogeno anagamua hampona tro hunenteno, tinkampu'ima hanatino tiru'ma umarenia keria tro hu'ne. <sup>29</sup> Nagra korapa mani'nogeno hagerinkura, e'i avamente tirura marenka emetro huno kase hunenteno, tiru'ma maresia mopa trohu'ne. <sup>30</sup> Nagra maka'zama tro'ma hu'nea Ne'mofo tavaonte mani'ne'na, aza nehugen muse nehige'na maka kna nagranena rama'a muse nehue. <sup>31</sup> Maka kokama tro'ma hu'nea zanku'ene vahe'ma anampima mani'nea zankura, nagra tusi'a muse nehue. <sup>32</sup> E'ina hu'negu mofavre'nimoka ke'ni'a antahinamio, na'ankure nagri navu'nava zama avaririsaza vahe'mo'za muse hugahaze. <sup>33</sup> Kavumro'ma antesua kea nentahinka, ama antahi'zana e'nerinka kavesra huontenka amage anto. <sup>34</sup> Ke'ni'a manta nentah'za, kumanimofo atirami kante'ma knane knanema naveganente'za, kahani'are'ma navegama nentaza vahe'mo'za, tusi muse hugahaze. <sup>35</sup> Na'ankure nagriku'ma hakremo'a, nomaniza hakeno erifore nehigeno, Ra Anumzamo'a avesinente. <sup>36</sup> Hianagi ha'marenanteno kumi'ma nehimo'a, agra'a hazenke enerie. Iza'o avesrama hunantemo'a, fri'zamofo avesinente.

## 9

*Knare antahi'zamo'a vahek'u kezati'nea naneke*

<sup>1</sup> Knare antahi'zamo'a mago a'kna hu'neankino noma'a negino, 7ni'a noma azeri oti zafa antreno eriso'e nehie. <sup>2</sup> Hagi ana a'mo'a ra ne'za retro nehuno, waini tina tro huno nenteno, ne'zama ante trara retro hunte'ne. <sup>3</sup> Ana huteno eri'za a'ne'a, vahe ome kehihogu hunezaman-teno, agra rankumapina marerisga hunereti ke'zana atino, <sup>4</sup> tamagi omene vahe'motane refakoma hutama kezampima atupa'ma hu'nesamota, <sup>5</sup> rukrehe huta nagrite etma ne'zana eme neneta, waini tima tro'ma

hunte'noana eme neho. <sup>6</sup> Hagi neginagi kavukava'ma nehanazana netrenka nomanizanka'a agafa hunka erintese nehunka knare antahintahizana rempi hunka nentahinka anzana hunka vuo. <sup>7</sup> Azanava kema hu vase'mofoma azeri fatgoma hananana, kema asamisana kegura huhaviza hugantegahie. Kefo avu'ava'ma nehanimofo azeri fatgo hu kema hananana, ana kegura kiza zokago ke hugantegahie. <sup>8</sup> Ana hu'negu azanava ke'ma nehia vhahera azeri fatgo osuo, avesra hugantegahie. Ama' antahi'zane vase'ma azeri fatgoma hanankeno'a, avesigantegahie. <sup>9</sup> Ama' antahintahine vase'ma avumrora nentegeno mago'ane antahintahifina, ama huno manino. Fatgo avu'ava zane ne' rempi hunemigeno antahintahia'afina mago'ane antahi'zana erino. <sup>10</sup> Ramofoma koro'ma huntenu agorga'ama mani'zamo'a, knare antahi'zamofo agafa me'ne. Ruotage'ma Hu'nemofo kagra antahi ama'ma hananana, ama' antahi'za erigahane. <sup>11</sup> Na'ankure knare antahi'zamo'a huno, nagriteti za'zakna nemaninka mago'ane rama'a kafu manigahane hu'ne. <sup>12</sup> Kagrama ama' antahizama erisanana, knare antahi'zamo'a, mizama'a kamigahie. Kagrama kiza zokagoma huntasanana kagra'a haviza hugahane. <sup>13</sup> Neginagi avu'ava'ma hu'zamo'a mago a'mo rankege nehiankna hu'neankino, ke antahi'zama'a omanegeno, antahintahizana agripina omane'ne. <sup>14</sup> Agrira noma'amo'a rankumamofona mesga huno me'negeno kahama'are manineno, <sup>15</sup> zamagra'a erizante'ma vu fatgo hu'za kante'ma agatere'za vu'za e'zama haza vahekura, kezatino, <sup>16</sup> atrenke'za zamagi omne vase'mo'za rukrahe hu'za eho, nehuno refko hu'zama ke ama' osu'naza vase'mokizmigura kea nehie. <sup>17</sup> Kumzafama ase'nana timo'a knare haga hugahie. Hagi ne'zama kagragu oku'ama ne'nana ne'zamo'a haga hugahie. <sup>18</sup> Hianagi fri'za me'ne hu'za nontahi'za, ko'ma ana a'mofo nontegama vu'naza vase'mo'zama fri'naza zankura non-tahize.

## 10

### *Solomoni knare antahi'zamofo naneke*

<sup>1</sup> Solomoni knare antahintahai zamofo naneke, erigofa huno krente'nea naneke. Ama' antahintahine mofavremo'a, nefana azeri muse nehie. Hianagi neginagi antahintahine mofavremo'a, nererana rimpa erihaviza higeno, asuzampi nemanie. <sup>2</sup> Havi kazigati'ma erisana feno zamo'a kaza osugahianagi, mani fatgoma hunka mani'zamo'a, fri zampintira kagu vazigahie. <sup>3</sup> Fatgoma huno'ma nemania vhahera, Ra Anumzamo'a atregeno agazankura nosie. Hianagi fatgo osu'zama haza vhahera, zamatrenige'za erinaku'ma maragu'zamaneti'za zana e'origahaze. <sup>4</sup> Feru'ma maniza vase'mokizmia zamuntera nomane. Hianagi amuhoma hu'za eri'zama erizamo'za, rama'a fenoza nentaze. <sup>5</sup> Ama' antahi'zama eri'nea vase'mo'a, ne'zamo'ma nenama hianknafina, ne'zana eritru nehie. Hianagi ne'zama hamareno eri atruhu knafima, avu'ma masea vase'mo'a agazegu hugahie. <sup>6</sup> Fatgo vase'mokizmia zamasenirera asomu'mo'a, kini fetori antani zamanteankna nehie. Hianagi kefovazama nehaza vase'mokizmi kemo'a, hazenkezana refi'nete. <sup>7</sup> Fatgo vase'mo'zama ko'ma knare zama hu'naza zankura, vase'mo'za antahinezmi'za muse nehaze. Hianagi kefovazama nehia vase'mofona, agi agenke'a omanegahie. <sup>8</sup> Ama' antahintahine vase'mo'za, eri'za kea nevaririze. Hianagi tavare vase'mo'za, haviza nehaze. <sup>9</sup> Iza'zo mika zampima mani fatgoma haza vase'mo'za, knare

hu'za nemanize. Hianagi fatgo zama osnimo'a, fra'okigahie. <sup>10</sup> Regavumi kavami huzamo'a, hazenke eri kamigahie. Hagi tavre vahe'mo'za zamagra'a haviza hugahaze. <sup>11</sup> Fatgo vahe'mofo zamagipinti'ma atiramia kemo'a, asimu ami tinkapui'mo atiramino eankna nehie. Hianagi kefozama nehaza vahe'mokizmi zamagipinti'ma atiramia kemo'a, vahe'ma hazenkema zami zamarimpa he'zana zana refi'nete. <sup>12</sup> Vahe'ma antahi havizama hu'zamo'a, ha' fra hu'za eri fore nehie. Hianagi vahe'ma avesima ante'zamo'a, miko kefozana refi'nete. <sup>13</sup> Knare antahizamo'a knare'ma huno refkomahu vahe'mofo zamagipinti atineramie. Hianagi knare antahintahi omene vahe'mofona agumpi sefu amigahaze. <sup>14</sup> Ama' antahi'zane vahe'mo'a, antahi'zana erite erite huno, rama'a enerie. Hianagi neginagi kema haza vahe'mo'za, mika zankura atupa nehu'za, ame hu'za haviza hugahaze. <sup>15</sup> Feno vahe'mokizmi feno zamimo'a, vihu huzmantankna hugahie. Hianagi zamunte'ma omaneazamo zamunte omene vahera zamazeri haviza nehie. <sup>16</sup> Fatgo zamavu'zamava'ma nehaza vahe'mokizmia mizazmia, knare nomaniza erigahaze. Hianagi kefozama nehaza vahe'mo'za, havi miza erigahaze. <sup>17</sup> Avumro'ma anteankema antahimia vahe'mo'a, knare nomaniza eri kante nevie. Hianagi zamazeri fatgoma hazanke'ma zamavesrama huntaza vahe'mo'za, havifi nevaze. <sup>18</sup> Rimpaknama hu'nea vahe'mo'za ana rimpaknama refitenakura, rama'a havige nehie. Hagi vahe'mokizmi zamagenkema hu vahera, neginagi vahere. <sup>19</sup> Rama'a kegagama huzamo'a, kumipi kavareno nevie. Hianagi iza'o agefu'nama kegavama himo'a, ama' antahi'zane vahe mani'ne. <sup>20</sup> Fatgo vahe'mofo kemo'a, knare silvagna hu'ne. Hianagi havi vahe'mokizmi antahintahimo'a, haviza huno mago kna'a omane'ne. <sup>21</sup> Fatgo vahe'mofo kemo'a, rama'a vahe zamazeri hanavenetie. Hianagi neginagi vahe'mo'za antahi amahu antahintahigura atupa hu'za nefrise. <sup>22</sup> Ra Anumzamo'a zamazeri feno vahe nesea asomumo'a, asunku'zana eri ozamigosie. <sup>23</sup> Neginagi vahe'mo'za, kefo avu'ava zana kiza zokago hazankna hu'za nehaze. Hianagi ama' antahintahine vahe'mo'za, knare antahintahifi muse hu'za makaza nehaze. <sup>24</sup> Kefo vahe'mo'zama koro'ma nehazazamo'a, zamagrite egahie. Hianagi fatgo vahe'mo'za zamave'ma nesiazana erigahaze. <sup>25</sup> Kefo avu'avazama nehaza vahe'mokizmia unu ko'ma atuno esuno'a, zamavareno fregahie. Hianagi fatgo vahe'mo'za oti hanaveti'za, mani'vava hugahaze. <sup>26</sup> Feru vahe'ma eri'za erinogu'ma huntesanana, ana vahe'mo'za aka'zamo vahe'mokizmi zamagipi ufreno akahankna nehu'za, tokimo vahe'mokizmi zamavurgafi ufreno aka heankna kagritera hugahaze. <sup>27</sup> Ra Anumzamofoma koro'ma hunteno agorga'ama mani'zamo'a, za'za kafuzage manigahane. Hianagi kefozama hu vahe'mokizmia knazamia erikofa hinke'za, za'zatera omanigahaze. <sup>28</sup> Fatgo vahe'mo'zama amuha'ma nehaza zamofo nena'a musezane. Hianagi havi avu'ava'zama nehaza vahe'mo'zama amuha'ma nehazazamo'a amene zankna hugahie. <sup>29</sup> Ra Anumzamofo avu'ava'zamo'a fatgo vahe'mokizmi, vihu huzmantankna hu'ne. Hianagi havi avu'ava'zama nehaza vahe'mokizmia, zamazeri haviza hugahie. <sup>30</sup> Fatgo vahe'mokizmia zamazeri torera osugahie. Hianagi havi zamavu'zamava'ma nehaza vahe'mo'za ama'na mopafina omanigahaze. <sup>31</sup> Fatgo vahe'mofo agipinti'ma atiramia kemo'a, knare antahi'za atiramino nevie. Hianagi akrehe krehe ageru'ene vahe'mofona azeri taganegahie. <sup>32</sup> Fatgo vahe'mofo zamagipintira vahe'mokizmi zamazahu naneke atineramie. Hianagi kefo vahe'mokizmi zamagipintira, akrehe krehe kemo

atineramie.

## 11

### *Fatgo zane havi zanemofo naneke*

<sup>1</sup> Havigema huno avamente'ma refkohu so'ema nosia vahera, Ra Anumzamo'a agoteno avesra hunente. Hianagi avamente'ma fatgo huno mizama asea vaheku avesinente. <sup>2</sup> Kavufga atare'zamo'a, kagazeza erigamigahie. Hianagi kavufga anteramizamo'a, knare antahintahiza erino eghahie. <sup>3</sup> Maka zampima tamage huno fatgo avu'ava'ma hanimofona, ana avu'avazamo kegava huntegahie. Hianagi hazenke vahe'mofo akrehe akrehe'zamo'a, zamagrira zamahe fanane hugahie. <sup>4</sup> Refkoma hugantesia knarer, feno zankamo'a kaza osugosie. Hianagi fatgoma huno mani'zamo'a frizampintira kagu'vazigahie. <sup>5</sup> Fatgo vahe'mokizmia tamage hu zamavu'zamava mo hanige za, kama nevaza kamo'a, knare hu'nesige za vugahaze. Hianagi havi vahe'mokizmia zamagra nehanaza kumimofo kna'amo, zamazeri traka hugahie. <sup>6</sup> Fatgo zamavu'zmava'ma nehaza vahe'mokizmia, fatgo zamavu'zmava zmimo'a zamagu nevazie. Hianagi fatgo osu vahe'mokizmia fatgo osu zamavu'zmava zamo zamazerigahie. <sup>7</sup> Kefozama nehia vahe'mo'ma erinaku'ma amuha'ma nehia zamo'a frisigeno'a anama erinaku'ma amuhama nehiazamo'a, amane zankna hugahie. <sup>8</sup> Hazenke zamo'ma fatgo vahete'ma esniana, Ra Anumzamo'a aza huno avare atrenigeno, ana hazenke zamo'a kefozama nehanaza vahete eghahie. <sup>9</sup> Anumzamofonku'ma kore'ma hunte'za agoragama omaniza vahe'mo'za, kezmireti tavalozmire'ma mani'namokizmia zamazeri haviza nehaze. Hianagi fatgo vahe'mo'za ama' antahi'za zamimo zamagu nevazie. <sup>10</sup> Fatgo vahe'mo'zama nomani'za zamifima knare hazageno'a, rankumapi vahe'mo'za musenkase nehaze. Hagi kefo zamavu'zamava'ma nehaza vahe'ma fri'zage'za, havizama nehia zana vagaregahie hu'za tusi muse nehaze. <sup>11</sup> Anumzamo'ma fatgo vahe'mofo nomani'zama asomu'ma huntegeno'a, rankuma'mofo agimo'a marenerie. Hianagi kefo avu'ava'ma nehia vahe'mofo agipinti'ma esia kemo'a, rankumara eri haviza hutregahie. <sup>12</sup> Tava'ozmire'ma nemaniza vahe'ma zamage henkaminetaza vahe'mo'za, neginagi vahe mani'naze. Hianagi fatgo antahi'zane vahe'mo'za kea osu akohe'za nemanize. <sup>13</sup> Iza'o vahe amefi kema huno vanoma hanimo'a, oku'a fraki'nesia zana huama hugahie. Hianagi tamage kema hu vahe'mo'a, nefu'ma hu'ne'nia zana huama huontegosie. <sup>14</sup> Ama' antahi'zane kva vahe'ma omanisigeno'a, kuma'mo'a haviza hugahie. Hianagi knare antahi'zama ami vahe'ma rama'ama mani'enageno'a, kuma'mo'a hankavetino knare hugahie. <sup>15</sup> Mago'mo'ma vahepinti'manofi'ma hu'nesigenka, anazamofo nona hu'na miza kamigahue hunka hanunka, knaza erifore hugahane. Hianagi ana'ma hu'zanku'ma avesrama hanimo'a, agra'a agu'vazigahie. <sup>16</sup> Rimpa fru avu'ava'ene a'mofona, agesga hunentaze. Hianagi vaheku'ma asuragionte ne'mo'a, feno zanek'e'nerie. <sup>17</sup> Vahe'mofo asuraginteno so'e avu'ava'ma hunte ne'mo'a, agra'a azeri so'e nehie. Hianagi vahe'mokizmi havizama huzmantea ne'mo'a, agra'a azeri haviza nehie. <sup>18</sup> Kefo avu'ava'ma nehaza vahe'mo'za antesaza feno zamimo'a atupa knafi megahie. Hianagi fatgo vahe'mokizmi mizamo'a, za'za kna megahie.

<sup>19</sup> Fatgo vahe'mo'za knare manizanku nehakaze. Hianagi havi avu'avazama nevaririza vahe'mo'za fri'zanku nehakaze. <sup>20</sup> Hagi

akrehe akrehe avu'ava zama agu'afima me'nea vahe'mofona, Ra Anumzamo'a agotenezmante. Hianagi fatgoma hu'za nemaniza vaheku, Ra Anumzamo'a musena hunezmante <sup>21</sup> Tamage, havi avu'ava'ma nehaza vahe'mo'za hazenkea agateore'za, ana hazenkea erigahaze. Hianagi fatgo vahe'mokizmi mofavreramina, Ra Anumzamo'a keaga huozmanteno zamagu'vazigahie. <sup>22</sup> Hentofa agi agonane a'mo'ma fatgo osu avu'ava'ma nehia a'mo'a, agra afu'mofo golire tro hunte rinima agonafi antanintaza kna hu'ne. <sup>23</sup> Fatgo avu'ava'ma nehaza vahe'mo'za, knare'zama erifore'ma hanaza zanku zamave'nesie. Hianagi havi zamavu'zamava'ma nehaza vahe'mo'za hazenkefi manigahune hu'za antahigahaze. <sup>24</sup> Zamagraru'ma ontahi'za vahe'ma zamaza nehaza vahe'mo'za, zamagra mago'aneru'ma eri avitegahaze. Hianagi rumofo amiga zama omisnazana, maka zankura eme atupa hugahaze. <sup>25</sup> Muse hu'za vahe'ma veva'ma nehaza vahe'mo'za zamagra rama'aza erigahaze. Vahe'ma zamazahu vahe'mo'za, ana nona'a erigahaze. <sup>26</sup> Iza'o ne'zama'ama zagore'ma otreno, azeri akonama hania vahe'mofona, vahe'mo'za huhaviza huntegahaze. Hianagi iza'o ne'zama'ama zagore'ma atresimofona, asomu'mo agritera megahie. <sup>27</sup> Iza'o knare avu'ava zanku'ma kzigazi huno hakesimo'a, knare'za erinkeno, kefo zanku'ma hake'simo'a, kefoza erigahie. <sup>28</sup> Iza'o rama'a fenoma ante'nesia zanku'ma antahintahima hanimo'a, evuramigahie. Hianagi fatgo vahe'mo'za zafamo anina eri mareankna hu'za tretre hugahaze. <sup>29</sup> Naga'amofoma hazanke'ma erimisimo'a, mago'zana erisinti oharegosie. Neginagima hanaza vahe'mo'za ama' antahi'zane vahe'mokizmi eri'za vahe manigahaze. <sup>30</sup> Fatgo vahe'mofo avu'avamo'a, asimu eri zafagna hu'ne. Hagi iza'o vahe'ma agu'mavazimo'a ama' antahi'zane vahe mani'ne. <sup>31</sup> Ama mopafina fatgo vahe'mo'za miza zamia e'nerisage'za, kefo zamavu'zamava'ma nehanaza vahe'mo'zane, kumi vahe'mo'za knazana erigahaze.

## 12

### *Fatgo vahe'ene kefo avu'ava nehanaza vahe'mofo naneke*

<sup>1</sup> Azerinte fatgohu kegu'ma avesintemo'a, ama' antahi'zamofonku avesinente. Hianagi azeri ante fatgohu kegu'ma avesrama hunte'mo'a, neginagi vahe mani'ne. <sup>2</sup> Knare zamavu'zamava'ma nehanaza vhahera, Ra Anumzamo'a avesi nezamanteanagi, havi zamavu'zamava'ma hunaku'ma retroma nehanaza vhahera, Ra Anumzamo'a haviza hu'naze huno huzmantegahie. <sup>3</sup> Kefozama hanaza zantetira mani'zazmia retrora osugahaze. Hianagi fatgo zamavu'zamavaza'ma hanazana, rafunare'za mani'nageno, vahe'mo'za eri tasagira osugahaze. <sup>4</sup> Hentofa avu'ava'ene a'mo'a, nevena knare agi nemie. Hianagi knare avu'ava osania a'mo'a, nevena zaferinafi namureno kasriankna hugahie. <sup>5</sup> Fatgo vahe'mo'ma antahi'zama retroma hania antahi'zamo'a, knare huno fatgo hu'ne. Hianagi havi zamavu'zamava nehanaza vahe'mo'zama, tam'i'naza antahi'zana, regavatga hugahaze. <sup>6</sup> Kefo zamavu'zamava'ma nehanaza vahe'mokizmi ke'mo'a, vahe zamahe nefria vahe'mokizmi zamazankna hu'ne. Hianagi fatgo vahe'mofo kemo'a, vahe'mokizmia zamagu'nevazie. <sup>7</sup> Kefo zamavu'zamava'ma nehanaza vahe'mo'za, haviza hu'za fanane nehanaza. Hianagi fatgo vahe'mokizmi naga'mo'za, oti hanavenetize. <sup>8</sup> Antahi'zama'amo'ma knare'ma hu'nesia nera, vahe'mo'za hasuga huntegahaze. Hianagi antahi'za zmimo'ma fatgoma osu vhahera, vahe'mo'za zamavesra huzmantegahaze.

<sup>9</sup> Eri'za vahe'ama mani'ne'nia vahe'mo'ma, anteramino amane vahe maniazama hanimo'a, zamunte omane vahe'mo'za zamagra'a zamavufaga erisga nehzageno ne'zazmia omane vahera zamagatere'naze. <sup>10</sup> Fatgo vahe'mo'za zagagafa'amofona kegavagriso'e hunezamante. Hianagi kefo zamavu'zamava'ma nehaza vahe'mo'za zagagafa zamia kegava hugahazanagi, kanonkeve zamigahaze. <sup>11</sup> Amuho hu'za hozama antaza vahe'mo'za, rama'a ne'za me'nenige'za negahaze. Hianagi neginagi vahe'mo'za, nena raga'a omne'zante knazmia ahe fri'za eri'zana e'nerize. <sup>12</sup> Kefo zamavu'zamava'ma nehaza vahe'mo'za kefo zamavu'zamava hu'za eri'za vahe'mokizmi zante ke zmanunu nehaze. Hianagi fatgo vahe'mo'za, arafuna rene'za raga rentegahaze. <sup>13</sup> Kefo zamavu'zamava'ma nehaza vahe'mo'za, havigema nehaza kezamifinti, krifu ahazankna nehaze. Hianagi fatgo vahe'mo'za ana krifufina ohe'za agateneraze. <sup>14</sup> Knare zamageru'ene vahe'mo'za, kezmireti knare'zana e'nerize. Hagi eri'za vahe'mo'za, anahu kna hu'za erizasmireti mizazmia e'nerize. <sup>15</sup> Neginagi vahe'mo'zama zamagesama antahi'zana, zamagrama nehaza zamo'a fatgo hu'ne hugahazanagi, ama' antahi'zane vahe'mo'za rumo'zama antahintahima zamizankea nentahize. <sup>16</sup> Neginagi vahe'mokizmia zamarimpa he'zamo'a ame huno amate eama hanigenka kegahananagi, ama' antahi'zane vahe'mo'za azeri havizama nehinkeno'a, rimp a he'zamo'a eama hanigenka onkegahane. <sup>17</sup> Tamagema hu vahe'mo'a, keagare'ma otisimofona tamage huno hufore huntegahie. Hianagi havigema hu vahe'mo'a, keagare'ma otisimofona havige huno hu frakintegahie. <sup>18</sup> Antahintahima osuno ame'ama huno hu ke'mo'a, kazimo vahe avufafi reankna nehie. Hianagi antahintahima huteno, keagagama hu vahe'mofo kemo'a, zamaza huno zamazeri neganamare. <sup>19</sup> Tamage ke'mo'a mevava hugahie. Hianagi havigema hu kemo'a, za'zatera omanegahie. <sup>20</sup> Kefo antahintahine vahe'mokizmi zamagu'afina vahe'ma rezmavataga hu antahi'zamo avite'ne. Hianagi rimp fru zanku'ma nehaza vahe'mo'za muse hugahaze. <sup>21</sup> Fatgo vahe'mokizmirera hazenke zana omegahie. Hianagi havi zamavu'zamava'ene vahe'mokizmirera, hazenke zamo'a avitegahie. <sup>22</sup> Ra Anumzamo'a havigema nehaza vahekura, tusiza huno agotezmanento avesra hunezamante. Hianagi, tamagema nehaza vahekura, tusi muse nehie. <sup>23</sup> Ama' antahi'zane vahe'mo'za ame hu'za antahintahи zazmia eri ante ama nosaze. Hianagi neginagi vahe'mo'za neginagi antahintahizamia ame hu'za huama nehaze. <sup>24</sup> Hanavetinka eri'zama erisanana, kva vah fore hugahane. Hianagi feru vahe'ma manisanana, kazokzo eri'za vah manigahane. <sup>25</sup> Antahintahи hakarema hu'zamo'a, vahe'mofona azeri antepri nehie. Hianagi zamazeri hanaveti ke'ma vahe'ma huzami zamo'a, zamazeri antesga nehige'za muse nehaze. <sup>26</sup> Fatgo vahe'mo'za tava'ozamire'ma nemaniza vahe'mokizmia, knare antahi'za zami'za knare kante zamavare'za nevaze. Hianagi kefo zamavu'zamava'ma nehaza vahe'mo'za zamavare'za havifi nevaze. <sup>27</sup> Feru vahe'mo'zama zagagafama ahesazana onkregahaze. Hianagi kazigazi huno eri'zama eri'zamo'a, vahe'mofona marerisa feno zama'e. <sup>28</sup> Fatgo avu'ava'ma huno mani'zamo'a, knare nomanizamofo ka me'ne. Hagi ana fatgo avu'ava'ma avaririzamo'a, fri'zana omane'ne.

## 13

<sup>1</sup> Ama' antahi'zane mofavremo'a nef'a'ma avumro'ma antesiankea antahigahianagi, veganokano kema hu mofavremo'a, vahe'mo'ma avumro'ma an-

tesiankea ontahigahie. <sup>2</sup> Knare kema vahe'mokizmima huzmi vahe'mo'za, knare zana e'neriza muse hugahaze. Hianagi hazenke vahe'mo'za vahe'ma zamazeri haviza nehu'za zamatama zamizanku zamave'nesie. <sup>3</sup> Iza'o agi'ma kegavama huno kema himo'a, agra'a maniza kegava nehie. Hianagi rama'a keagama hania vahe'mo'za, agra'a azeri haviza hugahie. <sup>4</sup> Feru vahe'mokizmi zamagu'amo'a, rama'a zama eri'zanku zamave'nesianagi, anazana e'norize. Hianagi amuho hu'za eri'zama erisaza vahe'mo'za zamavesinia zana eri knare hugahaze. <sup>5</sup> Fatgo vahe'mo'za havigema huzankura zamavesra nehaze. Hianagi kefo zamavu'zamava nehaza vahe'mo'za rumokizmirera zamagaze huno zamagote zamavu'zmava nehaze. <sup>6</sup> Fatgoma huno manizamo'a kva hugantena, knare hunka hazenkea omanesigenka manigahane. Hianagi kefo avu'avamo'a, kumi vahera azeri haviza hugahie. <sup>7</sup> Mago'a zamunte omane vahe'mo'za, feno vahe kna nehaze. Hagi mago'a feno vahe'mo'za, zamunte omane vahekna nehazanagi, feno vahe mani'naze. <sup>8</sup> Feno vahe'mo'za nomaniza'zmima eri havizama huzankura, miza hu'za manigahaze. Hianagi zamunte'ma omene vahe'mofona, mago vahe'mo'za azeri korera osugahie. <sup>9</sup> Fatgo vahe'mokizmi lamu tavimo'a, ru masa nehige'za, muse nehaze. Hianagi kefo zamavu'zamava'ma nehaza vahe'mokizmi lamu tavimo'a, asu nehie. <sup>10</sup> Avufga ra nehuno vahe'mofo agorga omani avu'avazamo'a, ha' fra hu'za avreno ne-e. Hianagi avumro kema antahino amagema ante vahe'pina, knare antahi'zamo'a megahie. <sup>11</sup> Revatga hunka havige kanteti'ma erisana zagomo'a, ame huno fanane hugahie. Hianagi eri'zama erino, osia eri atruma hute hutema himo'a, rama'a eri atru hugahie. <sup>12</sup> Vahe'mo'za fore hugahie hu'za amuha nehaza zamo'ma fore'ma osanige'za, zamagu'amo'a haviza hugahie. Hianagi ana zamo'ma e'ama'ma hania zamo'a, asimu ami zafagna hugahie. <sup>13</sup> Avumro'ma antesia kemofoma zokagoma antesimo'a, agra'a hazenkefi mani'noe huno hugahie. Hianagi kasegema asaminia kemofo agorga'ama mani'nimo'a, nomani'zama'afina knare hugahie. <sup>14</sup> Ama' antahi'zane vahe'mo rempima hugamisia zamo'a, asimu ami ti kapu'i hanatiakna hu'neankino, iza'o ana kema antahi'minimo'a fri'zamofo kri-fufintira agatenere. <sup>15</sup> Knare hu'za antahi amama haza vahe'mokizmia, vahe'mo'za zamavesi nezamantaze. Hianagi hazenke vahe'mokizmia zamavu'zmavamo'a, hanavetino haviza hu'ne. <sup>16</sup> Maka zamofo ankereno hu vahe'mo'a agesa antahiteno, maka zana nehie. Hianagi neginagi antahinhine vahe'mo'za, zamagesa ontahi neginagi zamavu'zmavaza eri ama nehaze. <sup>17</sup> Kefo vahe'mofoma katogema huntesigeno vaniana, hazenkefi ufregahie. Hianagi iza'o tamagema huno kema hu vahe'ma, ke erino vanigu'ma katogema huntesigeno erino vaniana, vahe'mokizmia zamazeri knare hugahie. <sup>18</sup> Iza'o avumaro'ma antesaza kema ontahisimofona amunte omnesigeno, agazegu hugahie. Hianagi izano azeri fatgohu kema asamisigeno antahino amage antesimofona, agrira husaga huntegahaze. <sup>19</sup> Ave'nesinia zama e'nerisigeno'a, agu'amo'a muse hugahie. Hianagi neginagi vahe'mo'za havi zamavu'zmava'ma nehaza zampinti'ma atreno attiramizankura zamavesra nehie. <sup>20</sup> Iza'o knare antahi'zane vahe'enema vanoma nehia vahe'mo'a, knare antahi'za erigahie. Hianagi neginagi vahe'enema tagrote'za vanoma nehaza vahe'mo'za, hazenke erigahaze. <sup>21</sup> Hazenke zamo'a kumi vahe'mokizmi nezmavaririe. Hianagi fatgo vahe'mokizmia, fenozmimo'a rama'a hugahie. <sup>22</sup> Knare vahe'mo'a mofavre'amo'ene henka negeho'ma erisintima haresia zana, ko retro huzmanteteno nefrie. Hianagi kumi vahe'mo'zama fenoma eri atruma haza

fenona, fatgo vahe'mo'za erigahaze. <sup>23</sup> Zamunte omane vahe'mokizmi hozafina, rama'a neza fore hugahianagi hazenke nomanizamo'a timo'ma hiaza huno eri harafi huno vugahie. <sup>24</sup> Iza'o mofavre'amo hazenke nehanigeno kanoma amino azeri fatgoma osanuno'a, mofavre'a avesinonte. Hianagi iza'o mofavre'ama avesima nentemo'a, hanavetino azeri fatgo hugahie. <sup>25</sup> Fatgo vahe'mo'za rama'a ne'za me'nege'za nezamu nehaze. Hianagi kefo vahe'mofoza, zamaga tevava nehaze.

## 14

<sup>1</sup> Knare antahi'zane a'mo'a nom'a erise higeno, naga'amo'a so'e nehie. Hianagi neginagi a'mo'a, nom'a'ne naga'anena eri haviza nehie. <sup>2</sup> Fatgo avu'avaza'ma nevaririmofona, Ra Anumzamofo kore'zamo agu'afina me'ne. Hianagi iza'o kefo avu'ava'ma nehimo'a Ra Anumzamofona korera hunonte. <sup>3</sup> Neginagi vahe'mo'ma kema hiankemo'a, agrazante kano eri agumpi nente. Hianagi fatgo vahe'mofo kemo'a, agu'vazigeno knare huno nemanie. <sup>4</sup> Bulimakao omari'nea afu nompina avusese nehie. Hianagi hanave bulimakaomo'a rama'a ne'za erifore nehie. <sup>5</sup> Tamage huno kemahu ne'mo'ma, keagare'ma ot'i'nea ne'ma aza huno huama haniana, tamage hugahie. Hianagi havigema hu ne'mo'a keagare'ma ot'i'nea ne'ma kema aza huno'ma haniana havige hugahie. <sup>6</sup> Hagi kiza zokago kehu vahe'mo'ma, knare antahizanku'ma hakesuno'a, keno eri fore osugahie. Hianagi ama' antahi'zane vahe'mo'a, fru huno antahi'zana erigahie. <sup>7</sup> Knare antahi'zama omane vahepintira, mani agetaginka manio, na'ankure knare antahi'zana e'origahane. <sup>8</sup> Knare antahi'zane vahe'mo'a kama vania kana antahi ani' hu'neno vugahie. Hianagi neginagi vahe'mo'za zamagrazmi rezmatga nehaze. <sup>9</sup> Neginagi vahe'mo'za kumimofo nona'ama erizankura, hunte'za kiza zokago nehaze. Hianagi fatgo avu'ava'enе vahepina, vahe'ma antahiami' avu'ava zana me'ne. <sup>10</sup> Mago'mago vahe'mo, agria'a rimpa aka'zana antahino keno nehie. Hagi mago'mo'e huno rumofo musezana mika'a erinte amara osugahie. <sup>11</sup> Kefo vahe'mofo nomo'a, haviza hugahie. Hianagi fatgo vahe'mofo seli nomo'a, hanavetino megahie. <sup>12</sup> Mago kamo'a vahe avurera knare hugahianagi, avaririno atuparega vaniana fri'za me'ne. <sup>13</sup> Musema huzampinenra rimpa akazana me'ne. Hagi musema hu'zamo'a vagamaresigeno'a, asuragi'za egahie. <sup>14</sup> Zamentinti osu vahe'mo'za zamagrama hu'nesaza zamavu'zmava zante, mizana erigahaze. Hagi knare vahe'mo'a agra'a, hu'nesia avu'ava zante, mizana erigahie. <sup>15</sup> Osi'a antahintahima eri'naza vahe'mo'za, maka zankura zamentinti nehaze. Hianagi knare antahi'zane vahe'mo'a kama vu zama'afina kva nehie. <sup>16</sup> Knare antahi'zane vahe'mo'a kva huso'e hu'neno, kefozana agatenere. Hianagi neginagi vahe'mo'a kva huso'e osuno, Maka'zana amane hugahue huno nehie. <sup>17</sup> Ame huno rimpama ahe vahe'mo'a, neginagi avu'ava nehie. Hagi kefozama hu antahintahima eri fore'ma nehia vahera, aversa hunentaze. <sup>18</sup> Osi'a antahintahine vahe'mo'za, neginagi avu'avaza erisantiharegahaze. Hianagi maka'zama ankere'za hu vahe'mo'za, kini fetori anteankna huno antahi'zana erigahaze. <sup>19</sup> Iza'zo kefo zamavu'zmava nehanamo'za knare'zama nehanaza vahe zamavuga zamarena regahaze. Havi zama nehamo'za fatgo vahe'mokizmi kegina kafante zamare'na ome re'za husga huzmantegahaze. <sup>20</sup> Amunte'ma omne'simofona, knampa'amo enena avesiontegahie. Hianagi feno vahe'ma manisimofona, rama'a vahe'mo'za knampa'a manigahaze.

<sup>21</sup> Inamo'o tava'oma'are'ma mani'nesimofoma kefenkami netreno knare'ma huontesimo'a, kumi hugahie. Hianagi iza'o amunte omane vahe'ma knare'ma huntесимofона, Anumzamo'a asomu huntегahie.

<sup>22</sup> Havi avu'ava'ma hu'zamofo kema retroma hanaza vahe'mo'za, havi kantera novazafi? Hianagi iza'zo knare avu'ava'ma huzamofo kema retroma hazamo'za, mani fatgoma huno mani'zane vagaore avesi'zana ke'za erigahaze.

<sup>23</sup> Hanaveti'za mika eri'zama eri'za vahe'mo'za, rama'a eriguhe'za erigahaze. Hagi mani'ne'za ke'agema hu vahe'mo'za, zamunte omane vahe manigahaze.

<sup>24</sup> Ama' antahi'zane vahe'mofo fenomo'a, anunte kini fetori meankna huno me'ne. Hianagi neginagi zamavu'zmava'ma nehaza vahe'mokizmia, neginagi zamavu'zmavamo'a zamazeri neginagi nehie.

<sup>25</sup> Keagama hunezmantesafima, tamage hunka kema huamama hanamoka, rama'a vahe zamagu'vazigahane. Hianagi keagafima havigema hunka huama'ma hanamoka, havige vahe manigahane.

<sup>26</sup> Ra Anumzamofoma kore'ma huntесимofона, Agra hanave vihu huntenkeno mani'nena, mofavre'amo'za hanave vihufi manigahaze.

<sup>27</sup> Ra Anumzamofoma kore'ma huntено Agri agorga mani'zamo'a asimu ami' kapu'i ti me'neankino, vahe'ma ahfri krifufintira azeri atregahie.

<sup>28</sup> Kinimo'ma rama'a vahe'ma kegavama hanige'za, agrira ragi amigahaze. Hianagi kinimo'ma osi'a vahe'ma kegavama hanuno'a, agra haviza hugahie.

<sup>29</sup> Ame' huno zamarimpa ohe vahe'mo'za, ama' antahi'za e'nerize. Hianagi hatuma hu'za zamarimpahe vahe'mo'za, neginagi zamavu'zmava eri ama' nehaze. (Jem 1:19-20.)

<sup>30</sup> Vahe'mo'ma rimpama ante fru huno'ma mani'zamo'a, avufgamofona asimu amigahie. Hianagi rumofo zante'ma kesanema nehanimofona, ana avu'avamo'a zaferinafi namureno kasriankna hugahie.

<sup>31</sup> Kagrama amunte omane vahe'ma zamazeri havizama hanunka, tro'ma huzmante'nea Anumzamofoma huhaviza nehane. Hianagi kagrama zamazeri so'e hanunka, Anumzamofona ra agi amigahane. <sup>32</sup> Kefo avu'ava'ma nehia vahe'mofona, ana kumi avu'ava'zamo azeri haviza hugahie. Hianagi fatgo vahe'mo'ma frisigeno'a, agu'vazigahie. <sup>33</sup> Knare antahi'zamo'a, ama' antahi'zane vahe'mofo agu'afi akoheno meso'e huno megahie. Neginagi vahe'mofo agu'afina ana knare antahi'zamo'a, agra'a azeri ante'ama nehie.

<sup>34</sup> Fatgo avu'ava hu'zamo'a ana mopafi me'nea kumara azeri antesga nehie. Hianagi kumi'ma nehaza avu'avazamo'a mika ana mopafi vahe'mofona, azeri agaze nehie. <sup>35</sup> Knare avu'ava'ma nehia eri'za ne'mofona, kinimo'a muse hunente. Hianagi agazema hu avu'ava'ma nehia eri'za vahera, kinimo'a rimpma ahentegahie.

## 15

<sup>1</sup> Akohenka antefru hunka kenona hanana zamo, rimpma akahe'zana eri'amane hugahie. Hianagi hakrugema hanana zamo'a, rimpahе'zana azeri otigahie. <sup>2</sup> Knare antahi'zane vahe'mofo agipintira, knare antahi'za e'nige'za vahe'mo'za antahi muse hugahaze. Hianagi neginagi vahe'mofo agipintira, neginagi kemo akaha huneramie. <sup>3</sup> Ra Anumzamo'a mika kaziga kefo vahete'ene, knare vahetera avua keteno nemanie. <sup>4</sup> Fru kema hu'zamo'a vahe'mofo asimu ami zafagna hu'ne. Hianagi akrehe akrehe kema hu'zamo'a, vahe'mofo agu'a ahenefri. <sup>5</sup> Neginagi antahi'zane

vahe'mo'a nef'a'ma azeri fatgo hiankea nontahie. Hianagi iza'o azeri fatgoma hiankema antahimo'a, knare antahi'za e'nerie. <sup>6</sup> Fatgo vahe'mokizmia nozamifina, fenozamo avinete. Hianagi kefo vahe'mo'za erisaza mizana, hazenke'za erigahaze. <sup>7</sup> Knare antahi'zane vahe'mo'za, antahi'zana vhahera nezamize. Hianagi neginagi antahi'zane vahe'mo'za, anahura osugahaze. <sup>8</sup> Kefo avu'ava'ma nehaza vahe'mo'zama, Ra Anumzamofonte'ma Kresramana ma vunentaza zankura, agonet. Hianagi fatgo vahe'mo'zama haza nunamunku, Agra muse nehie. <sup>9</sup> Kefo vahe'mo'ma hia avu'ava zankura, Ra Anumzamo'a agotenente. Hianagi fatgo avu'ava'ma huzanku'ma kazigazima hia vahe'mofona, Ra Anumzamo'a avesinente. <sup>10</sup> Fatgo kamofoma amefi humisimo'a, tusi'a hazenke erigahie. Iza'o azeri fatgohu kemofoma avesrama huntesimo'a, frigahie. <sup>11</sup> Fri' vahe'mofo kuma'mo'ene fri'zamo'a, Ra Anumzamofo avurera amate me'neankino, tagutumotia keno antahino hu'ne! <sup>12</sup> Veganokno kema hu vahe'mo'za, azeri fatgoma hanimofona avesra hunenteno, ama' antahi'zane vahe'mofontera aza hinogura urava'o osugahie. <sup>13</sup> Krimpamo'ma musema hu'nesigeno'a, kavu'gosafintira knare huno kizanki'za hugahie. Hianagi karimpamo'ma musema osu'nesigeno'a, kavugosamo'a rugaririgahie. <sup>14</sup> Ama' antahi'zane vahe'mo'za antahi'zama eri'zankura zamaganete. Hianagi neginagi antahi'zane vahe'mofona havi kemo'a, ne'zama'agna hugahie. <sup>15</sup> Zamunte omame vahe'mo'za mika zupa maniza'zmifina tusi'a amuho nehu'za maragu'zanetize. Hianagi muse arimpante manisimo'a, ne'zane tine neneno muse huvava hugahie. <sup>16</sup> Osi'a fenoma anteneta Ra Anumzamofonku'ma kore'ma hunte'nuna zamo'a, rama'a fenoza ante'neta hazenkema erizana agaterene. <sup>17</sup> Vahe'ma avesinentenka hozafi kamo'ma osia refko hunka ne'zamo'a, ra bulimakao afu'ma ahegino rimpagnanema refkoma huno ne'zana erifru nehie. <sup>18</sup> Ame huno'ma rimpama ahe vahe'mo, haframa hu'zana eri fore nehie. Hianagi akohenoma rimpma fru huno mani vahe'mofo kamo'a, ave'ave trazampima neviankna hu'ne. Hianagi mani fatgo hu'za mani vahe'mokizmi kamo'a ranka me'nege'za nevaze. <sup>19</sup> Eri'za e'ori feru'ma mani vahe'mofo kamo'a, ave'ave trazampima neviankna hu'ne. Hianagi neginagi ne'mo'a, nererana kefenkamine-tre. <sup>20</sup> Antahi'zama'a omame vahe'mo'a, neginagi avu'ava zankura muse hugahie. Hianagi ama' antahi'zane vahe'mo'a, knare zanke nehuno, fatgo kante nevie. <sup>21</sup> Knare antahi'zama vahepinti e'orinenka mago'a zama retro'ma hunaku'ma hananana, ana zamo'a forera osugahie. Hianagi rama'a knare antahintahima eritenka, retro'ma banana zamo'a, efore hugahie. <sup>22</sup> Fatgo huno'ma kenonama hanimo'a, muse hugahie. Hagi kna fatgore'ma huga kema hania kemo'a, knare'zantfa hugahie. <sup>23</sup> Knare antahi'zane vahe'mo'ma asimu erisia kamo'a anagamu marenerino, fri vahe kumapima uramizankura kegava hunente. <sup>24</sup> Ra Anumzamo'a avufama eri antesgama hanimofona nomani'zama'a, eri haviza hugahie. Hianagi kento a'mofo fenoma'ane nonkuma'a, kegava huntegahie. <sup>25</sup> Kefo avu'avaza'ma hu antahi'zama retro'ma huzankura, Ra Anumzamo'a avesra huno agonet. Hianagi avusese hu'nea kema huzankura, Agra muse nehie. <sup>26</sup> Iza'o mika'za rehatri huno nagrike zanema hu' vahe'mo'a, hazenke erino naga'afina efregahie. Hianagi havi kazigati'ma masavema huno mizama sezanku'ma avesrama huntesimo'a, knare huno manigahie. <sup>27</sup> Fatgo agu'ane vahe'mo'a agesa antahiteno, kenona nehie. Hanki kefo vahe'mofo

agipintira, kefoge atineramie. <sup>29</sup> Ra Anumzamo'a kefo zamavu'zmava'ma nehaza vahe'mokizmirera, afete nemanie. Hianagi fatgo vahe'mokizmi nunamunte, agesa anteno antahinezamie. <sup>30</sup> Musema nehia vahe'mofo avufima kesanana, muse hugahane. Knare'zama hu'nesia zamofo agenkema hu ke'mo'a, vahe'mofona zaferina kampina azeri fru hugahie. <sup>31</sup> Iza'o so'e no-mani'zama manisiegu'ma, azeri fatgoma hu kema nehinkeno antahisimo'a, knare antahi'zane vahe'mo'zama manisaza amu'nompi manigahie. <sup>32</sup> Iza'o azeri fatgo hu kema nehanigeno ontahisimo'a, agra'a azeri haviza nehie. Hianagi iza'o azeri fatgo hu kema nehinkeno, antahisimo'a, ama' antahintahi erigahie. <sup>33</sup> Ra Anumzamofonku kore'ma hunteno agragama mani avu'avazamo, vahe'mofona knare antahintahia rempi hunemie. Hagi kagrama anteraminka manisunka, rankagia erigahane.

## 16

<sup>1</sup> Vahe'mota e'ina hu'za hugahune huta antahintahia retro hugahunanagi, Ra Anumzamoke ana antahintahima retro'ma hanuntera, huvagare kea huntegahie. <sup>2</sup> Tagrama mika zama hu'nazamo'a knare hune huta tagesa antahigahunanagi, nanknuh tagutagesareti ana mika'zana nehune Ra Anumzamoke refako hugahie. <sup>3</sup> Mika'zama huku'ma hanana zana Ra Anumzamofo azampi antegeno, ana mika zama huku'ma antahintahima retro'ma hanana zamo'a, nena'a fore hugahie. <sup>4</sup> Ra Anumzamo'a agafa'a me'negeno maka'zana trohu'ne. Hagi zamahe fananema hania kefo zamavu'zmava'ma nehaza vahe'enena, tro huzmante'ne. <sup>5</sup> Ra Anumzamo'a zamavufga ra nehaza vahekura, avesra huzmanteno agotenezmante. Hagi zamavufara hanaza vahe'mo'za, knazampi manigahaze. <sup>6</sup> Tamage huta Ra Anumzamofo avesinteta mani fatgo huta manisunkeno'a, Ra Anumzamo'a kumitit eritregahie. Ra Anumzamofonku'ma kore hunteta Agri agorga manisunazamo, kefo zampintira tazeri amane hugahie. <sup>7</sup> Ra Anumzamo'ma musema nehia kante'ma tavutva'ma hanunkeno'a, ha' vahetimo'zanena zamarimpa fru hurantegahaze. <sup>8</sup> Fatgo mani'zane mani'enka osi'a fenoma ante'snamo'a, havi kampinti rama'a fenoma antesana zana agatere'ne. <sup>9</sup> Ana hugahune huta antahintahia retro hugahunanagi, Ra Anumzamo Agrake maka'zama hanuna kana erinte fatgo hugahie. <sup>10</sup> Kini vahe'mo'za Anumzamo'ma e'ina hihoma huno zamia antahi'zanteti kea nehaze. Hagi vahe'ma refakoma hanu'za, fatgo hu'za vahera refako hiho. <sup>11</sup> Fatgoma huno maka'zama refko hu'zana, Ra Anumzamofontegati ne-e. Hagi fatgoma huno maka'zama kna'amo'ma hu'nea avamente'ma refkoma huzanku ave'nesie. <sup>12</sup> Kini vahe'mofona kefo avu'ava zankura agoteno, avesra nehie. Na'ankure kini tra'ma me'neara, fatgo avu'avamofo agofetu me'ne. <sup>13</sup> Kini vahe'mo'za fatgo vahe'mofo kegu musena nehu'za, tamage keagama nehia vaheku zamavesinezamantaze. <sup>14</sup> Kini ne'mofo rimpaka aka'zamo'a frigahane naneke me'ne. Hianagi knare antahi'zane ne'mo'a, kini ne'mofona rimpaka azeri fru hugahie. <sup>15</sup> Kini ne'mofo avugosamo'ma kiza avu'ava'ma haniana, kasimu erinka manigahane huno nehie. Ana avu'avamo'a, mona hampomo ko runo eramigeno, ne'zamo afureankna nehie. <sup>16</sup> Knare antahi'zama eri'zamo'a golia agateregeno, ama' antahi'zama avesinteno eri'zamo'a, silva agatere'neankino hentofaza hu'ne. <sup>17</sup> Fatgo vahe'mofo kamo'a, ranka me'nege'za, kefo avu'ava zamofona azeri agateregahaze. Iza'o kva hu'neno ana kama avaririmo'a, agra'a agu'nevazie. <sup>18</sup> Kavufga ra huzamo'a, kazeri haviza hugahie. Kagra kavufga husgama hu'zamo'a, kazeri tanafa kofa

hugahie. <sup>19</sup> Akoheno anteramino amunte omane vahe'enema mani'zamo'a, avufga ra hu vhemo ha'pinti feno eri'neaza refko hu'zana agatere'ne. <sup>20</sup> Iza'o avumro antesaza kema avaririsimo'a, hakare'zama hanifina knare hugahie. Ra Anumzamofonte'ma amentintima hanimofona, asomu huntegahie. <sup>21</sup> Antahi ama'ma haza vaheku, ama' antahi'zane vhahere hu'za hugahaze. Knare kema hania nanekemo, vahe'mofona avare agrarega atregahie. <sup>22</sup> Ama' antahintahima eri'naza vahe'mofontera ana ama' antahi'zamo'a asimu ami kampu'i tinkna hu'ne. Hianagi neginagi avu'ava zamo'a, neginagi avu'ava'ma nehaza vhahetera, nona'a knaza nezamie. <sup>23</sup> Ama' antahi'zane ne'mofo agu'amo azeri ante fatgo higeno, mago'ane vahe'ma agu'ama azeri rukrahe hu kea agipintira atineramie. <sup>24</sup> So'e kema hu'zamo'a tumemofo rima'agna hu'neankino, vahe'mofo agu'amemofontera haga higeno, zaferinamofona azeri so'e nehie. <sup>25</sup> Mago'a vahe'mo'za knare kante nevune nahazanagi, anama nevaza kamofo atuparega fri'za me'ne. <sup>26</sup> Eri'zama e'neri'za vahe'mo'za antahi'naze, eri'zama zamu'nasisi hu'za e'orisanu'za ne'zana onegahazanki'za zamagamate'zamo hige'za, eri'zana e'nerize. <sup>27</sup> Kefo vahe'mo'za kefozama eri fore huzanku nehakraze. Ke'zmimo'a afe tevemo te'osa hiankna huno, vahe'mokizmia zamazeri haviza nehie. <sup>28</sup> Akrehe akrehe zamageru'ene vahe'mo'za, vahe'mokizmi amu'nompina kea erintage'za ha' fra nehaze. Vahe'mofo amefi agenke'ma huzamo knare arone'a, azeri netane. <sup>29</sup> Haframahu ne'mo'a, tava'oma'are'ma nemanimofona revatga huno avreno havi kante nevie. <sup>30</sup> Iza'o avuma mago ne' resuki nemimo'a, akrehe akrehe avu'avaza nehie. Hagi iz'a'o agi'ma haninkofisigenka, hazenke avu'ava nehie hunka antahigahane. <sup>31</sup> Fatgo avu'ava zama hu'zama nevaza vahe'mokizmia tu zamazokamo'a, kini fetori anunte antaninteakna nehige'za, ra agi nezamize. <sup>32</sup> Ame huno arimpa'gnama osu vahe'mo'a himamu vahera agateregeno, iz'a'o rimpia he'zama azerirava nehimo'a, tusi'a kuma'ma ha'ma huno eri'nemofona agatenere. <sup>33</sup> Mago'azama hunakura satu zokago renka antahiamma hugahue hnananagi Ra Anumzamoke hu izora hutenko, anazamo'a eforera hugahie.

## 17

<sup>1</sup> Vahe'mo'ma rimpia frune akoheno mani'neno naga'anema osia kave'ma ne'zamo'a, tusi'a ne'zama hafra nehuno kreno ne'zana agatere'ne. <sup>2</sup> Knare antahi'zane eri'za ne'mo'a, kva'amofo mofavre'mo'ma agaze hu avu'ava'ma hania mofavremofona ugota huno kegava hunte'neno, mofavre'amo'za erisanti haregahaze huzmante'nesafintira erigahie. <sup>3</sup> Koline silvanena tevefi kre'za eri agru nehaze. Hianagi Ra Anumzamoke tagu'amofona reheno nege. <sup>4</sup> Kefo avu'ava'ene vahe'mo'a, havigema nehazankea nentahie. Hagi tavre vahe'mo'a, vahe'ma azeri haviza hukema hazanke nentahie. <sup>5</sup> Amunte omane vahe'ma huhaviza huntisia vahe'mo'a, tro'ma huzmante'nea Ra Anumzamofa huhaviza hunente. Hagi hazenkema erisaza zanku'ma muse hanimo'a, agra'a havi mizana erigahie. <sup>6</sup> Nenama hu'za ra avuma omesaza vahe'mokizmia, zamagehe'mo'za kini fetorikna zamanuntera hu'nage'za, ra zamagi vahe'mo'za nezamize. Hagi mofavremo'za zamarerera zamafana muse huzmantegahaze. <sup>7</sup> Neginagi vahe'mofontera knare ke'ma hu'zamo'a, haviza hu'neanagi, kva ne'mo'ma havigema hu'zamo'a, havizantfa hu'ne. <sup>8</sup> Mago'mo'ma mago zama erinaku zagoreti'ma masve'ma amino erisia zamo'a agraragisa kaguvaza huno efore hiankna

nehie. Iza'o anazama himo'a maka zampina knare nehie. <sup>9</sup> Iza'o havizama huntесимофома kefo zama'a atrentesimo'a, amu'nozanifina avesinte avu'avazamo'a, meno vugahie. Hianagi arone'amofo havi avu'avazama'agu hugantigama hanimo'a, knare knampa'a azeri atanegahie. <sup>10</sup> Kemoфома refko huno antahi ankemare vahe'mofona, magoke zupama azeri fatgo hu kema asamisankeno'a antahigahianagi, neginagi vahe'mofoma azeri fatgo hunaku'ma 100'a zupa knona ami'sanana, avu'avara ruzahera osugahie. <sup>11</sup> Kefo avu'avazama vahe'mo'za, ha'ma erifore hu zankuke zamave'nesiankino, hazenkema zami vahera huntenko zamavaririgahie. <sup>12</sup> Anenta'ama kumzafama ase'nesaza beama, mago ne'mo'ma kantegama tutagihama hunte'zamo'a knare hu'neanagi, neginagi vahe'mo'za neginagi zamavu'zamava'ma nehaza vahe'enema tragoteno manizana agatere'ne. <sup>13</sup> Hagi mago vahe'mo'a knare'zama magamofoma huntесия zanku'ma, nona huno kefozama huntесия vahe'mofona, kefo zamo'a naga'afintira atreno ovutfa hugahie. <sup>14</sup> Haframa hu'zamo'ma agafama nehanigeta, koma eri amne osanunkeno'a, ti anagi atregeno ti hageno eankna huno rama'aza eri haviza hugahie. <sup>15</sup> Kefo avu'ava'ma nehia vaheku'ma fatgo vahere nehu'za, fatgo zmavu'avazama nehaza vaheku'ma, kefo vahere hu'zama nehaza tare zamavu'zmavakura, Ra Anumzamo'a agoteno avesra hunezmante. <sup>16</sup> Neginagi vahe'mo'za knare antahi'zama rempima hu'za eri zamave'sizama omane'nege'za, na'a hige'za avono huzama mizasesaza zagoa zamazampina eri'naze? <sup>17</sup> Mika zupa knampati'mo'za zamavesirantegahaze. Hagi knazampima taza hanagu tafuhe'mokizmia kasezmante'naze. <sup>18</sup> Knare antahi'zazmima omane vahe'mo'za zamagrazmi huvempa hu'za, tava'ozmire nemani'za vahe'mo'za nofi'ma hu'naza zama ovakanesageta, tagrati vakanezmantergahune hu'za nehaze. <sup>19</sup> Iza'o ha'frama hu'zankuma avesintemo'a, kumiku ave'nesie. Iza'o agra'a agima erintesgama nehimo'a, hazenke erigahie. <sup>20</sup> Akrehe akrehe agu'anе ne'mo'a, knare zana hakeno erifore osugahie. Hagi iza'o tavre kema nehimo'a, hazenkef ufreqahie. <sup>21</sup> Neginagi vahe'mofo nerera nef'a, tusi'a ataza e'nerie. Higeno nef a rimpamo'a, ana neginagi ne'mofonkura musena osugahie. <sup>22</sup> Musema huno mani'zamo'a, fusazamo vahe'ma azeri so'e higeno maniankna nehie. Hianagi vahe'mofo antahi'zamo'ma havizama haniana, havi krimo zaferinafi me'neno azeri haviza hiankna hu'ne. <sup>23</sup> Kema refkohu tratema kefo ne'mo'ma mani'nesuno'a, keagama eri haviza hinogu oku'a masevema huno amisia zagoa e'nerino, keaga eri rukrahe huno fatgo kantera ontahigosie. <sup>24</sup> Antahi'zane vahe'mo'a knare antahi'zante avua anteno nevie. Hianagi havi vahe'mofo avumo'a, mopa ataginare ame huno omegege, emegege huno nevie <sup>25</sup> Neginagi mofavremo'za nezmafana zamasuzana eri nezamie. Hagi kasema ante'nea zamarerahe'in, zamarimpa zamata erinezamize. <sup>26</sup> Fatgo hu'nesia vahe'ma knazama zamige, knare huno hazenke'a omene kva vahe'ma kanoma ami'zamo'a, haviza hu'ne. <sup>27</sup> Knare antahinhaima me'nea vahe'mo'a, rama'a keaga osugahie. Hagi ama' antahi'zama me'nenia ne'mo'a, ame huno rimpagna osugahie. <sup>28</sup> E'ina hu'negu neginagi vahe'mo'ma kema osuno manisia zankura, vahe'mo'za knare antahi'za eri'ne hugahaze.

## 18

<sup>1</sup> Agra'aku'ma nemanisia vahe'mo'a, agraguке agesa nentahie. Knare antahizama eri'nea vaheku'enena ana ne'mo'a avesiozmantergahie. <sup>2</sup> Neginagi

vahe'mo'a ama' antahintahima erizankura, musena osugosie. Hianagi agra'a antahi'zanke hu'netreno manigahie. <sup>3</sup> Kefo avu'ava'ene vahe'mo'a, mago'a vahekura antahi amane'za neseno, zamagi'a eri haviza nehuno, zamagaze erinezamie. <sup>4</sup> Knare antahi'zane vahe'mofo agipinti ke'mo'a, tiru kna hu'ne. Hianagi mika knare antahizamo'a, timo kerifinti aviteno herafiramino neviankna nehie. <sup>5</sup> Hazenkema huteno keagahu trate'ma otisigenka, hazenkema hu'nesia vahera aza osutfa huo. Hagi fatgo vahe'ma keagafima oti'nenigenka havigema huntenga azeri atre'zankura kva huo. <sup>6</sup> Neginagi vahe'mofo kemo'a, hafra hu'za eri fore nehigeno, ana ke'zmimo'a kanonkevegu meme nehie. <sup>7</sup> Neginagi vahe'mofo agi'mo'a, havi ke'agage nehanigeno, krifu agra'a avufare anaginente'ankna nehiakino, agrira azeri haviza hugahie. <sup>8</sup> Vahe agenkema hu'zamo'a, haga ne'zankna hu'neankino, ame huno vahe agu'afina ufregahie. <sup>9</sup> Zaferina omane feru vahe'mo'a, maka'zama eri havizama nehia vahe'mofo nefu manine. <sup>10</sup> Ra Anumzamofo agimo'a hanavententake vihugna hu'neankino, fatgo vahe'mo'za agritega zamagare'za nevazageno, zamagu nevazie. <sup>11</sup> Feno vahe'mofo fenomo'a ra kuma zmimofo vihugna hu'neakino, kegava hurantenketa knare huta manigahune hu'za nentahize. <sup>12</sup> Avufga ra hu'zamo'a, henka hazenkefi kavrentena manigahane. Hianagi knare hunka anteraminka mani'zamo'a, kazerisga huno knare kagi kamigahie. <sup>13</sup> Iza'o kema antahi anke ore'neno ke'nonama hanimo'a, agra neginagi avu'ava nehuno agaze zana agra'a erigahie. <sup>14</sup> Krima eri'nesimo'ma ana zankuma antahintahi hakarema osaniana, ana krifina amane manino vugahie. Hianagi vahe'mofo antahintahimoma havizama haniana, izaknarera huno manigahie? <sup>15</sup> Maka'zama antahi ankere vahe'mo'a, knare antahintahima erinakura muse nehie. Knare vahe'mo'a agesazofo huteno nemanie. <sup>16</sup> Musezama eri'neno esimofona, kafana anagisigeno keagama hukuma hania rankva nera negesigeno, keaga humigahie. <sup>17</sup> Keagafima otinesia ne'ma ese'ma keagama refkoma huno kesiana tamage hugahazanagi, anantema antahigesia ne'mo, hazenke'a keno erifore hugahie. <sup>18</sup> Taisi zokagoma re'zamo ha' frama hu'zana eri fru nehuno, hanave netremoke'ma ha'ma hu'zana zanazeri netane. <sup>19</sup> Kagrama negafu'ma arimpama azeri havizama hu'enana ne'ma avare'zamo'a, rankumamofo hanavententake vihu hunteankna huno negafu'ma avare'zamo'a amuho hu'ne. Ha' frama hu'zamo'a, rone ka'a hanavententake kafa erigino rentroko huno, refko hiankna hugahie. <sup>20</sup> Knare kema kagipintima atiramisuno'a, knare ne'zama nankeno kamuma hiankna huno kaza hugahie. Fatgo kema hanana kemo'a, kazeri knare hugahie. <sup>21</sup> Kekamo'a vahera zamazeri so'e nehuno, zamazeri havizana hugahie. Hagi kema huzantema avesima nentesimo'a, ana ke'amoma rentesia raga'a agra'a erigahie. <sup>22</sup> Iza'o a'ma hakreno erinesimo'a, knare'za hakreno eri'neankino, Ra Anumzamo'a avesinente. <sup>23</sup> Amunte omane vahe'mo'a, asumaraginteno azama hanigu meme nehianagi, feno vahe'mo'a, hanave kefinti kenona nehie. <sup>24</sup> Rama'a ronekamo'a kazeri haviza hugahianagi, tamage ronekamo'a negafuma nehiaza huno tava'onkare manigahie.

## 19

<sup>1</sup> Amunte omane vahe'ma mani'neno, maka zampima mani fatgoma hu'zamo'a, neginagi vahe'mo'ma akrehe krehe ageru'ma ruzana agatere'ne.  
<sup>2</sup> Mago vahe'mo'ma keno antahino'ma osu'nesia zama hunaku'ma haniana,

knarera osugahie. Iza'o ame'ama huno mago'zama hunaku'ma hanimo'a, ana zana eri haviza hugahie. <sup>3</sup> Mago'a vahe'mokizmi zamagri'a neginagi zamavu'zmava zamo zamazeri haviza nehige'za, Ra Anumzamofona zamarimpa ahenentaze. <sup>4</sup> Amunte'ma me'nea ne'mofona, rama'a knampa'a manigahaze. Hagi fenoma'a omane ne'mofona knampa'amo'za netraze. <sup>5</sup> Keagare'ma omati'nesia vahe'ma havigema huno huama'ma hunteno azama hanimo'a, knazana erigahie. Hagi havi kema hanimo'a, mizama'a erigahie. <sup>6</sup> Rama'a vahe'mo'za zamazama hania vahe arone manizanku zamave'nesie. Hagi maka vahe'mo'za muse zama nezami'za vahe'mofo rone nemanize. <sup>7</sup> Kagrima kamunte'ma omanesige'za, kafuhe'za kavesi ogantegahaze. Hagi knampa ka'amo'za mago'ane agatere'za zamavesra hugantegahaze. Kazama hanazegu'ma hakesanana, zamagra omanigahaze. <sup>8</sup> Kagrama knare antahi'zama erisunka, kagraka'agu avesinentane. Kagrama ama' antahi'zama azeri hamp'o'nama hanunka, knare hunka manigahane. <sup>9</sup> Keagafima otisia vahe'ma havigema huno huama huntiesia vahe'mo'a knaza erigahie. Hagi havigema hanaza vahe'mo'za frigahaze. <sup>10</sup> Neginagi vahe'mo'za marerisa zampina manigara osu'naze. Kazokzo eri'za vahe'mo'ma kva vahe manino, kva (princes) vahe'ma kegava huntezamo'a, knarera osutfaza hu'ne. <sup>11</sup> Knare antahi'zama eri'nesia ne'mo'a, ame huno arimpa ohegosie. Hagi havizama huntiesia zanku'ma agesama ontahisiana, husga huntegahaze. <sup>12</sup> Kini vahe'mofo rimpa he'zamo'a, laionimo rankrafa hiankna nehie. Hianagi vahe'ma zamavesinteno zamazama hu avu'ava zamo'a, trazante ata ko arunteankna nehie. <sup>13</sup> Mago ne'mofavremo'ma neginagi avu'avazama hiana, nefana tusi'a hazenke erinemie. Hagi mago ne'mofo a'mo'ma kefra nehuno, ke hu-vava hania a'mo'a, nomofo anuntupinti ko'arigeno varivri hiankna hugahie. <sup>14</sup> Negrera negafampinti none fenozanena erisanti haregahane. Hianagi Ra Anumzamoke, ama' antahi'zane a'ra kamigahie. <sup>15</sup> Feru vahe'moka kavu mase vava hugahane. Hagi eri'za e'ori vahe'moka ne'zanku frigahane. <sup>16</sup> Iza'o kasegema amage'antesimo'a knare huno manigahie. Hagi iz'a'o Ra Anumzamofo avu'ava'ma amefi'ma humisimo'a, frigahie. <sup>17</sup> Iza'o amunte omane vahe'ma knare avu'ava'ma hunentemo'a, Ra Anumzamofa anara hunente. Hagi agrama hania avu'avamofo avamente, mizana amigahie. <sup>18</sup> Mofavre kamofona azeri fatgoma hugama hu'nesire, avumarora antenka azeri fatgo huo. Hagi azeri fatgoma osnanana, frinogu kave'nesie. <sup>19</sup> Hantaka huno'ma arimpa ahe vahe'mo'a, hazenke'a erigahie. Na'ankure kagrama aza hunka eri amane hanankeno'a, henka ana ne'mo'a anazana nehinkenka aza huvava hugahane. <sup>20</sup> Kavumro antesia kema nentahinka, kazeri fatgoma hania kema avaririsunka, mani so'e hunka vugahane. <sup>21</sup> Vahe'mo'a rama'a zanku antahi'zana eri retro huno hugahue hugahianagi, Ra Anumzamo'ma antahino fore hugahie hu'nesia zamoke fore hugahie. <sup>22</sup> Ra zama me'neana huvempama hunte'nesia kere, amage'ma anteno mani'zane. Hagi amunte omane vahe'ma mani'zamo'a, havige vahera agatere'ne. <sup>23</sup> Ra Anumzamofonku'ma koro'ma hunteno agorga'ama mani'zamo'a, kavreno knare mani'zante vugahie. Hagi iz'a'o e'inahu'ma hanimo'a, mago'zankura korera osuno knare huno manigahie. <sup>24</sup> Eri'za e'ori feru vahe'mo'a, ne'za nenaku tafepi azana antesigeno vugahianagi, ana ne'zana agipina erinteno onegahie. <sup>25</sup> Vahe'ma huhaviza nehania vahe'ma azerinka sefu'ma amisankeno'a, knare antahi'zama omane vahe'mo'za nege'za, knare avu'avara amage antegahaze. Hianagi knare antahi'zama

me'nea vahe'ma azeri fatgo hanankeno'a, mago'ane antahi'zana erigahie. <sup>26</sup> Mago mofavremo'ma nef'a'ma neheno, nererama nompinti'ma ahenti atresia mofavremo'a, tusi'a agazeza erino naga'afina eme antegahie. <sup>27</sup> Kavumro'ma antesianke'ma ontahi'sanana, e'i knare antahi'zamofo kana atrenka havifi vugahane. <sup>28</sup> Havige hu vahe'mo'ma havigema huno keagafima omati'nea vahe'ma huama'ma hunte'zamo'a, keagama antahi trara kiza zokago zankna nehuno, havi avu'ava zana ne'za nazankna nehaze. <sup>29</sup> Vahe'ma huhavizama hunezmantaza vahe'mokizmi'a, mizazmia ko tro huzmantegeno me'neanki'za erigahaze. Nehanage'za neginagima hanaza vhahera, kanonkeve zamigahaze.

## 20

<sup>1</sup> Waini tima nenea vahe'mofona azeri neginagi higeno, vahe'ma huhaviza hu kea nehigeno, aka timo'a vahe'mofona azeri negi nenkeno ke huhaviza nehuno hara hugahie. Waini ti neno neginagi hu vahe'mofona, agripina ama' antahi'zana omanegahie. <sup>2</sup> Kinimofo arimpa akahe zamo'a, laionimo rankrafa hiankna hu'ne. Kini vahe'mofa azeri arimpa ahe'simofona, ahe frigahie. <sup>3</sup> Haframa hu'zanku'ma mani kore huno agatere'zamo'a, ra agi erigahie. Hianagi neginagi vahe'mo'za ame hu'za hafra nehaze. <sup>4</sup> Feru vahe'mo'ma hozama ante knare'ma mopama rekorino hozama ontesuno'a, hozama hamare knarerera ne'zana ohamaregahie. <sup>5</sup> Vahe'mofo antahi'zamo'a tirukna huno me'neanagi, ama' antahi'zane vahe'mo'a ana tirupintira ana antahi'zana afi anaga netre. <sup>6</sup> Rama'a vahe'mo'za, tavesi negantone hugahazanagi, mago mago vahe'mo'za tamage hu'za kavesigantegahaze. <sup>7</sup> Fatgo avu'ava'ene ne'mo'a, mani fatgo huno nemanie. Agri mofavre zagamo'za, asomu erigahaze. <sup>8</sup> Kini vahe'mo'ma keagama refako hunakura trate mani'neno, keaga refko huno havi avu'ava zana ke fore nehie. <sup>9</sup> Nagu'amo'a fatgo higena, nagra agru hu'noankino nagripina kumira omane'ne huno izu hugahie? <sup>10</sup> Havige hu'za maka'zama refko hu'za kna'ama ke'zane, havige hu'za avamente refkoma osu'zanena Ra Anumzamo'a avesra huno agote'nezmante. <sup>11</sup> Mofavremofona avu'avate negenka, agri avu'avamo'a agru hu'neanki, fatgo mofavre mani'neanki hugahane. <sup>12</sup> Tagesama me'neana keaga antahi'zane, tavuragama me'neana tavuma ke'za me'neankino, tarega'zana Ra Anumzamo museza tam'i'ne. <sup>13</sup> Kagrama kavu'ma masetenka manizankuma kavesi kavesima haniana, kamuntera omanegosie. Kavu'ma omasesanana ne'zama nesana zamo'a rama'a megaifie. <sup>14</sup> Knare osu'ne! Knare osune! Huno mago'a zama mizama sek'u'ma himo'a nehie. Hianagi mizaseno kantegama nevuno'a, ana zankura knare'za erue huno rama'a musenke hume nevie. <sup>15</sup> Antahi'zama ami kemo'a, goline zago'amo'ma marerisa havea ageter'e'ne. <sup>16</sup> Onke'nenana vahe'mo'ma nofi'ma nehinkeno magomo apasegahue hanigenka, anamofo anakreku'a huvame hunka eri'negeno, ana nofi'ma hu'neazana eme apaseno. Savri a'mo'ma nofi'ma hanigeno'ma mago'mo apasegahue hanigenka, aza hu'na apasentegahue huno kaminia zana erio. <sup>17</sup> Kumzafa kave'mo'a haganentake hugahianagi, refuzufupe havemo kagipi aviteno kagi traga hiankna henka'a hugahie. <sup>18</sup> Antahi'zana vahepinti eritenka eri'zama eri antahi'zana retro huo. Hagi knare antahi'zama mago'mofompinti'ma e'orinesunka hatera ovuo. <sup>19</sup> Vahe zamagenkema hu vahe'mokizmi oku'zana hu ama nehaze. E'ina hu'negu vahe zamagenkema hu vahe enena tragotenka omanio. <sup>20</sup> Nerera nefama huhav-

iza hentesia vahe'mofona tavi'amo asu hanigeno kumazu hanimpi mani-ankna huno frigahie. <sup>21</sup> Arera afama ofri mani'nesigeno'ma erisinti haren-gahanema hu'nesia zama ame'ama huno erisia mofavremo'a, atuparega asimu'a omanegosie. <sup>22</sup> Kefo avu'ava'ma hugante'sagenka anahukna hu'na nona huzamantegahue osuo. Hagi avega antenegeno Ra Anumzamo kaza huno ana knazana erino. <sup>23</sup> Mago'azama mizaseku'ma hanigeno kna'ama refako huno kezama (skel) erintento refako hu so'e osu avu'ava zana, Ra Anumzamo'a avesra huno agonete. <sup>24</sup> Vahe'mo'ma mika zama hiazana, Ra Anumzamoke azeri ante fatgo nehie. Inankna huno mago'a vahe'mo'a agra'ma nehia zana keno antahino hugahie? <sup>25</sup> Kagesa antahi ankeretenka Anumzamofontera huvempa huo. Ame'ama hunka huvempama hutesunka, henka'a anama hu'nesana kegu kagesa antahintahi nehunka ka-graka'a kazeri haviza hugahane. <sup>26</sup> Ama' antahi'zane kini ne'mo'a kefo zamavu'zamava nehaza vahera witi hona'a hareno eriherahe hianka huno rezaganeno ke ama huteno, henka knanentake havenu witi'a refuzafupeankna huno knazana zamigahie. <sup>27</sup> Ra Anumzamofo lampe tavi'mo'a, vahe'mofo kantu agu'afi ufnreno mika kefo agu'agesama me'neana hakeno eri ama nehie. <sup>28</sup> Kini ne'mo'ma vahe'mokizmima avesi nezamanteno knare avu'ava huzamantesiana, agra knare huno mani'neno, za'za kna kva eri'zanteria manino vugahie. <sup>29</sup> Nehazave ramimofona hanave zamimo ra zamagia nezamie. Hianagi ranra vahera efe'zmazoka nege'za vahe'mo'za husga hunezmantaze. <sup>30</sup> Hazenkema hania vahe'ma knokeve'ma ami'zamo, kefo avu'ava zana ahenati netreno, agu'a azeri agru hugahie.

## 21

<sup>1</sup> Tima eriante fatgo'ma higeno kama'are vu fatgo hiankna huno, Ra Anumzamo'a kini vahe'mofo agu'agesa azeri antefatgo nehigeno, Agri avesite nevie. <sup>2</sup> Vahe'mo'za maka zamavu'zamava'ma nehaza zankura, fatgo avu'avaza nehune hu'za hugahazanagi, Ra Anumzamoke zamagu'a refako huno nezamage. <sup>3</sup> Ra Anumzamofo avurera fatgo avu'ava zane, fatgo huno refako hu'zamo'a, Kresramanama vu zana agatere'ne. <sup>4</sup> Vahe'ma ke fenkamite zane, avufga ra hu'zamo'a, nena raga'a rentesiana kumire. <sup>5</sup> Knare huno antahintahima retro huteno, hanavetino eri'zama eri'zamo'a, rama'aza erifore hugahie. Hianagi ame'ama hu'zamo'a, amunte omane vahe manigahie. <sup>6</sup> Havigereti eri fenomo'a, hampogino kirga hiankna huno fanane nehuno, frikante kavreno vugahie. <sup>7</sup> Kefo avu'av'a ma nehaza vahe'mokizmi hazenke'zamo'a, zamavazu huno zamazeri haviza hugahie. Na'ankure zamagra fatgo zamavu'zamava huzankura, zamavesra hunentaze. <sup>8</sup> Hazenke zamima me'nea vahe'mo'za mani fatgo hu'za nomanize. Hianagi hazenke zamima omane vahe'mo'za fatgo avu'avate nemanize. <sup>9</sup> Fra vazivava a'ene mago nompi omanino, agraku'ma nomofo fegu'a mani'zamo'a, knare hu'ne. <sup>10</sup> Kefo avu'ava'ma nehaza vahe'mo'za, kefozama huzankuke zamave'nesie. Ana nehu'za tava'ozmire'ma nemaniza vahera zamazeri haviza nehaze. <sup>11</sup> Vahe'ma huhaviza'ma hu vahe'ma kanoma amiza azeri fatgoma hazageno'a, antahi ama' osu vahe'mo'za nege'za ama' antahi'zana erigahaze. Hianagi knare antahi'zama eri'nesaza vahe'mo'za zamazeri fatgohu kema zamasamisage'za mago'ene antahi'zana erigahaze. <sup>12</sup> Ra Anumzamo'a fatgo hu'neankino, kefo vahe'mo'ma noma'afima hia avu'ava'zana keno antahino nehiankino, ana vahera zamazeri haviza

hugahie. <sup>13</sup> Mago vahe'mo'ma amunte omane vahe'mofo kezanke'ma antahi omisimofona, agrama mago zanku'ma upama hu'neno kezatisige'za antahi omigahaze. <sup>14</sup> Rimpama hegante'nesia vahe'ma oku'ama musezama ami'zamo'a arimpa ahegante'nesia zana eri fru hugahane. <sup>15</sup> Vahe'mo'ma fatgo huno refako hu avu'ava'ma hanigeno'a, fatgo vahe'mo'za muse hugahaze. Hianagi kefo avu'ava'ma nehaza vahe'mo'za, tusi koro hugahaze. <sup>16</sup> Mago'mo'ma antahi ama'ma hu antahi'zamofo kama atreno havifima vanimo'a, frino ko'ma fri'naza vahe'ene umanigahie. <sup>17</sup> Knare ne'zama nenen, tima neno musehu zanku'ma mika zupama avesivava hanimo'a, zago'amo'a vagaresigeno amunte omane vahe manigahie. <sup>18</sup> Fatgo avu'ava'ma nehaza vahetema hazenkema esiana, kefo avu'ava'ma nehaza vahe'mo'za zamagri nona eri'za ana hazenkea erigahaze. Hagi hazenke vahe'mo'za fatgo vahe'mofo nona eri'za knazana erigahaze. <sup>19</sup> Mago ne'mo'ma kehakare nehuno, rimpma hevava nehania a'amofoma atreno ka'ma kopima umanisiana knare hugahie. <sup>20</sup> Ama' antahi'zama eri'nesia ne'mo'a, knare feno zantamine olivi masavena noma'afina erivitegahie. Hianagi neginagi antahi'zane vahe'mo'za, mika fenozazmia atre vaganeraze. <sup>21</sup> Mago vahe'mo'ma fatgo avu'avazane vahe'ma avesinte avu'ava'ma hankavetino avaririsimo'a, knare nomani'zanki, fatgo avu'ava'ene ra agine erigahie. <sup>22</sup> Ama' antahi'zane ne'mo'a, hanave vahe'mokizmi rankumara ha'huzamanteno e'nerino, hanave vihugu'ma amuha'ma hunemiza vihua tapage hutregahie. <sup>23</sup> Iza'o kema hu'zampima agi'ene aganefu'nanema kegavama hanimo'a, hazenkea e'origahie. <sup>24</sup> Vahe'ma huhavizama huzamante vahe'mo'a, avufga ra nehuno, vahera zamage fenkami netreno, agra'a avufga erisga hu'zanke nehie. <sup>25</sup> Eri'za e'ori feru vahe'mo'a mika zama eri'zankura avesi avesi nehuno, frigahie. Na'ankure agra azana eri avako huno, eri'zana e'ori'ne. <sup>26</sup> Feru ne'mo'a mika'zama eri'zankura antahi vava nehie. Hianagi fatgo ne'mo'a agra'agura ontahino, mika fenozana vahera nezamie. <sup>27</sup> Kefo avu'ava ene vahe'mo'ma kresramnama nevia zankura, Ra Anumzamo'a agoteno avesra hunenteankino, kefo zamagu'zamage'sareti'ma eri'za aza vahera mago'anе agatereno avesra hunezamante. <sup>28</sup> Keagama refako hu trate'ma havigema huno hu ama'ma huntismo'a, frigahie. Hianagi tamage kema hanimofona, ana agenke'amo'a mevava huno vugahie. <sup>29</sup> Kefo avu'ava'ma hu vahe'mo'a, havige huno nagra knare vahe mani'noe nehie. Hianagi fatgo vahe'mo'za zamagesa antahi so'e hute'za kana nevaze. <sup>30</sup> Ama' antahi'zana eri'enka, antahi ama'ma hu antahi'zana erigahananagi, Ra Anumzamofoma ha'ma rente'sanana ana antahi zankamo'a amne zankna hugahie. <sup>31</sup> Ha'ma hu'zana hosi afura azeri retro hugahazanagi, ha'ma azerigatere zana, Ra Anumzamofontegati egahie.

## 22

<sup>1</sup> Vahe'mo'ma knare kagi'ma kami'zamo'a, rama'a fenoma ante'zana agatere'ne. Hagi vahe'mo'ma kagri'ma kavesigante zamo'a, goline silvanena agatere'ne. <sup>2</sup> Feno vahe'ene amunte omane vahe'enena, Ra Anumzamo ana tarega vahera tro huzanantege'ne mani'na'e. <sup>3</sup> Antahi ankere antahi'zane vahe'mo'a, hazenke zama ne-esigeno'a negeno maniganesigeno agateregahianagi, knare antahizama omane vahe'mo'a, hazenkema fore'ma nehanigeno'a, negeno vuno ana hazenkezana erino knazampina manigahie. <sup>4</sup> Agra'a avufga anteramino nemanino, Ra Anumzamofonku'ma

koro hunteno, agorga'ama mani'zamo'a, rama'a fenoza nentesankeno kagia husga nehanagenka, za'za kna manigahane. <sup>5</sup> Akrahe krahe avu'ava ene vahe'ma nevaza kampina, ave'ave zane vahe'ma azeri kukone me'ne. Hi-anagi iza'o agr'a'ama kegavama himo'a afete nemanie. <sup>6</sup> Mofavreka'a knare kante'ma vu'za rempi humigeno knare nevuno, rama hanuno'a, ana avu'avara atreno rukrehe osino. <sup>7</sup> Feno vahe'mo'za zamunte omne vhahera, kegava hunezamantaze. Hagi zagoma nofi'ma nehaza vahe'mo'za zago'ama nofi'ma haza ne'mofo kazokazo eri'za vahe nemanize. <sup>8</sup> Kefozama kri-nenimo'a, henka ne'zama'a hazenke'za kafigahie. Hagi vahe'ma zamazeri havizama nehia himamu'amo'a, vagaregahie. <sup>9</sup> Iza'o zamunte'ma omene naga'ma muse zampinti'ma ne'zama zamisia vhahera, Ra Anumzamo'a asomu huzamantegahie. <sup>10</sup> Kehu haviza hu vhahera zamahe anati atrenkeno, vahe'ma huhavizama hu'zane, ha'ma hu'zane, fragema hu'zana vagareno. <sup>11</sup> Agu'amo'ma agru nehanigeno, fru kema huzanku avenesismo'a, kini ne'mofo rone'a manigahie. <sup>12</sup> Ra Anumzamo'a antahi'zama erizante avu'a anteno kegava nehianagi, hazenke vahe'mofo kea erinetre. <sup>13</sup> Feru vahe'mo'a amanage nehie, megi'a laioni mani'neankino, vanuana nahe frigahie huno nehie. <sup>14</sup> Savri a'mofo agipinti'ma ne-ea kemo'a, muri kankna hu'ne, izano Ra Anumzamo'ma arimpa hentesimo'a, ana muri kampi tamigahie. <sup>15</sup> Mofavremofo agu'afina negi'nagi avu'avazamo avitegahianagi, kanoma amino azeri fatgoma hu'zamo ana avu'ava zampintira azeri arukrahe hugahie. <sup>16</sup> Fenozami mago'aneru rama'a hunaku'ma zamunte omene vahe kna zamiza zamazeri haviza nehaza vahe'ene, feno vahe'ma musezama nezamiza vahe'mokizmia, zamuntera omanegahie. <sup>17</sup> Knare antahi'zane vahe'mofo kere kagesa antenka antahise nehunka, nagrama rempima hugamisauza huo. <sup>18</sup> Na'ankure anankemo'a knare hu'neankinka kagu'afi erintenankeno ana kemo'a, kagitera me'ne'na kea hutere hugahane. <sup>19</sup> Nagra menina rempi hunegamugu, nentahinka Ra Anumzamo-fonte kagranena kamentinti huo. <sup>20</sup> Nagra 30'a knare kegaga krentegan-tenofina, kavumro kene, antahiza eri zamofo naneke kregaminoankinka, <sup>21</sup> ama ana kereti tamage kea rempi hunka antahinenka, iza'o tamage kegu'ma hugantenigenka e'nesamofona fatgo'are kenona ome asamigahane. <sup>22</sup> Zamunte omene vahe'mokizmi zanaohanareho, na'ankure zamagra zamunte omene vahe mani'naze. Hagi zamunte omansige'zama atupama hu'nesaza vhahera, keagarera zamavarenteta zamazeri havizana osiho. <sup>23</sup> Na'ankure Ra Anumzamo'a, zamunte omene vhahera zamahoko zamazeri havizama hanaza vahe'mokizmia, zamazeri haviza hugahie. <sup>24</sup> Arimpa hevava vhahera rone huonto, ame huno rimpahae vahe'enena tagro oto, <sup>25</sup> ru ana vahe zamavu'zamava enerisankeno, kukomo kaz-eriankna huno kagu'a kazeri haviza hugahie. <sup>26</sup> Mago vhahera humempa hunka mago'za hugantegahue osuo. Hagi ru vahe'mo'ma nofi'ma hu'nesigenka, ana nofi'ma hu'nea zana nagra vakantegahue hunka osuo. <sup>27</sup> Anama nofi'ma hu'nesaza zama apa osesanke'za miko zanka'ane, tafe'ma masinkama nemasesana zanena eri vagaregahaze. <sup>28</sup> Tamagehe'mo'za ko'ma re'nenaza kanagi kana, akasi kantutretma rumofo mopa eri havia osiho. <sup>29</sup> Eri'zama eri antahi'zama eri'nea ne'mofo eri'zana negano? Agra kini vahe'mokizmi eri'za vahe nemanino, agi omene vahe'mofo eri'za vhahera omanigahie.

## 23

<sup>1</sup> Rankva ne'ene kave negahane hu'za kagima hanagenka umani'nenka ne'zama nekura, antahi so'e hutenga kva hunka ne'zana no. <sup>2</sup> Rama'a ne'zama ne' vahe'moka, kagraka'a knankenofi kazinuti taga hiankna ne-hane. <sup>3</sup> Rankva ne'mofo ne'zamo'a, kasanea osino. Na'ankure ana kaveteti, regavatga hugahie. <sup>4</sup> Feno vahe'ma mani'zankura maragu'zatinka kaz-eri havizana osunka, ama' antahi'za e'nerigeno feno vahe'ma mani an-tahi'zamo'a kazeri havizana osino. <sup>5</sup> Kavuma keramage'ma hanankna huno, feno zankamo'a fanane hugahie. Na'ankure agekona eri atareno tumpa namamo hareno hampompi mareriankna huno, afe hugahie. <sup>6</sup> Veva osu ne'mo'ma ne'za emeno huno kagi hania nezantera ovuo. Knare ne'za krentesia nezantera, ksanegura osuo. <sup>7</sup> Na'ankure agra e'inahukna ne'kino, nama'a mizana hugahie antahintahi hakare nehuno, ne'zana nenenka tina no hugahianagi, agri agu'amo'a, kagri'enena omane'ne. <sup>8</sup> Anama ne'nana ne'zana amu'atinetrenka, nanekema hu so'e hunte'nana zamo'a, amanezankna hugahie. <sup>9</sup> Neginagi vahe'ma mani'nena fina keaga osuo, na'ankure ama' antahi'zanteti hanana kea, huhaviza hugahaze. <sup>10</sup> Tamagehe'mo'za koma re'ne'naza kanagi kana akasi kantugma osuge, megusa mofavremofo mopa kavunofi ahenga e'orio. <sup>11</sup> Na'ankure zama-homa ke'nia Nera hankave Ne' mani'neankino, tamagira keaga Agra'a hur-mantegahie. <sup>12</sup> Kagu'areti kavumro kea nentahinka, antahizama kami kere kagesa antenka antahio. <sup>13</sup> Mofavrema azeri fatgoma huzankura, korera osuo. Kagrama kanoma amisanana ofrigahie. <sup>14</sup> Azeri fatgo hu kanoma ami'zamo'a, fri vahe kumapima vezankura agu amena agu'vazigahane. <sup>15</sup> Mofavre'nimoka ama' antahi'zama erisanana, Nagri nagu'amo'a muse nehuno, <sup>16</sup> kagipinti'ma fatgo ke'ma antahi'sugen'o, mika nagu'amo'a muse hugahie. <sup>17</sup> Kumi vahe'mokizmi zamavu'zmavakura kegasanea osuo. Hi-anagi Ra Anumzamofonku kore'ma hunteno agorga'ama manizanku maka kna, kagesa antahio. <sup>18</sup> Henkama fore hania zanku'ma tamage hunka kagesa nentahinka, amuha'ma nehana zamo'a amnezanknara osugahie. <sup>19</sup> Mofavre'nimoka, ke'ni'a antahinka knare antahi'zana erinka, fatgo kante kagu'a antenka vuo. <sup>20</sup> Rama'a aka'tima nene'za neginagi nehaza vahe'ene, rama'a zagagafamofo ame'are'ma nehaza vahe'enena, trago oteho. <sup>21</sup> Aka tinte vahe'ene rama'a ne'zama ne' vahe'mo'za zamunte omne vahe maniga-haze. Hagi zamavu'ma mase vava vahera, kukena zamimo'a tagato tagatu hugahie.

### *Savri monko avu'ava'ene a'mofonku kva hu naneke*

<sup>22</sup> Kasema kante'nea negafa ke'a nentahinka, negrera'ma tvavamaresi-genka kefenkamia otro. <sup>23</sup> Tamage kema mizase'nenunka zagonera otro, ama' antahizanki, huogu'ma rempima hugamisiazanki, antahi'ama huno refkoma hu'zana erio. <sup>24</sup> Fatgo avu'ava'ma nehia mofavremofo nef'a, tusi'a muse hugahie. Hagi ama' antahi'za eri'nea mofavre'agura, nef'a muse huntegahie. <sup>25</sup> E'inahu kavukva hunka negrera kfama azeri muse nehunka, ksegante'nea negrerana azeri muse huo.

<sup>26</sup> Mofavre'nimoke, kagu'tumoka'a Nagri nenaminka, kvuma ke'sanana, Nagri navu'navate kento. <sup>27</sup> Monko avu'ava'ma huno Savri'ma huno vanoma nehia a'mo'a, murigankna higeno, vema ante'nea a'mo'ma savrima huno vanoma nehia a'mo'a, osi tinkerigna huno urami'neankino, ana tin-kerifima uramisaza vahe'mo'za haviza hugahaze. <sup>28</sup> Ana a'mo'a kumza

vahe'kna huno kazeri savri hunaku kaveganteno mani'neankino, vene'nea azeri savri hanigeno, mani fatgo huno a'are'ma omani'zamo'a ra hugahie.

### *Rama'a negi ti nenaza vahe'mokizmi naneke*

<sup>29</sup> Iza hazenkefina mani'vava higeno, iza asu zampina nemanie? Iza ke hakarea nehigeno, iza hara azeri o'netie? Iza avuffamo hazenkea erigeno namuna nere? Iza avumo korankera nehie? <sup>30</sup> E'i anazama fore'ma nehiana zazate'ma aka tima nenaza vahe'ene, hanave waini tima tagi havia hu'za ne'naza vahe'tmimofonte fore nehie. <sup>31</sup> Atregeno wainimo'ma korankrema nehuno, agrema'amo taferopinti krakra huno mrenerino, knankente'ma fruma huno urami'nia zamo'a, kazeri kasanea osino. <sup>32</sup> Hianagi henka'a osifavemo kreankna nehuno, ha' osifavemo kamprino avuatgazama'a regatati huganteankna hugahie. <sup>33</sup> Kavumo'a ruzahu ruzahu'za negenkeno, antahintahi kamo'a savri nehina, kema hanana kemo'a savri hugahie. <sup>34</sup> Hagi e'inama nehanana, hageri amu'nompi me'nea ventefi mase'hankeno kranto kranto huno kazeri tore tore hiankna nehuno, ventemofo seli rente zafare mani'nankeno, zahomo kavregantugama hiankna hugahane. <sup>35</sup> Anage hugahane, nahazanagi nata onkrine hunka nehunka, kanona namizanagi antahina kena osu'n'o'e hugahane. Hanki nagrama ete otisuna, mago'ané ana tina negahue nehane.

## 24

<sup>1</sup> Havi vahe'mo'ma hania avu'ava zankura kegasane huge, ana vahe'enema tragotenka mani'zankura, kagesa ontahitfa huo. <sup>2</sup> Na'ankure antahiza zamifina vahe'ma hazenke'zami antahi'zamo avitegeno, zamagipinti'ma atineramia ke'mo'a, hazenke erinte kege nehaze. <sup>3</sup> Knare antahi'zanteti nona neginka, ama' antahi'zanteti eri hanavetigahane. <sup>4</sup> Antahi'zama eri'enanteti, knare fenozane zago'amo'ma mareri zantamina nonka'afina erinte avitegahane. <sup>5</sup> Ama' antahi'zane vahe'mo'za rama'a hanave eri'zageno, antahi'zama eri vahe'mo'za mago'ane hanavea e'nerize. <sup>6</sup> Ha'ma hu'zante'ma ama' antahi'zama hunka e'orinesunka, hatera ovuo. Na'ankure rama'a vahe'mo'zama hate'ma vanana kavumro'ma kantesagenka, hara azeri agateregahane. <sup>7</sup> Knare antahi'zamo'a mesga hu'neanki'za, neginagi vahe'mo'za erigara osu'nazanki'za, rankumamofo kafante'ma kva vahe'mo'zama atruma hu'zama mika hanafina, mago kea osugahie. <sup>8</sup> Kefo avu'ava'zama hu antahi'zama retro'ma nehaza vahe'mokizmigura, hazenke vhahere hu'za nehaze. <sup>9</sup> Neginagi avu'ava'ma hu'zama retro'ma hanazana, kumi nehaze. Vahe'ma huhavizama hunezmantea vahe'mofona, vahe'mo'za zamavesra hu'za zamagote'nentaze. <sup>10</sup> Knazampima unefrenka hanavema otisankeno'a, hanaveka'a omanegosie. <sup>11</sup> Havigema hu'za zamahe frinaku'ma hanaza vhahera, zamaza huta zamavareho. Hagi zamahe frinaku hanaza vhahera, zamaza huta zamavareho. <sup>12</sup> Antahi'nesunka ontahi'noe hunka havigea osuo. Na'ankure Anumzamo'a kagu'a kageno antahino nehuno, kagu'a kegava hunegantea ne'mo'a, kagu'a kageno antahino osugahie hunka osuo. Miko vahe'mokizmia zamagrama hu'nesaza zamavu'zmatave anteno mizana zamamigahie. <sup>13</sup> Mofavre'nimoka tume rima'a no, na'ankure knare hu'neankino, kagitera haga hugahie. <sup>14</sup> E'i anahukna huno, ama' antahi'zamo'a kagu'afina haga hugahie. Hagi hakenkama erifore'ma hanankeno'a, henkama erigahue hunka amuha'ma nehana zamo'a, amnezanknara osugahie. <sup>15</sup> Kefo vahe'moka

fatgo vahe'mo'zama nemaniza nontera, zamazeri haviza hunakura kva hunka omanio. Hagi fatgo vahe'mo'za nemaniza kumara eri havizana osuo. <sup>16</sup> Na'ankure fatgo vahe'mo'za, 7ni'a zupa evuramiga hazanagi, ete otigahaze. Hianagi kefo avu'ava'ma nehaza vahetema mago hazenkema esuno'a, eme zamazeri haviza hugahie. <sup>17</sup> Ha'ma renegantesaza vahe'ma evuramisagenka, musena osuo. Hagi tanafa'ma hanaza zankura, musena osuo. <sup>18</sup> Na'ankure Ra Anumzamo'a ana'ma hananken'o'a, negageno musena hunoganteno arimpahе zama'a anamofontetira eritregahie. <sup>19</sup> Kefo vahe'mofo avu'avakura korera hunka antahintahi hakarea nosunka, ana havi zamavu zamavakura kegasanea osuo. <sup>20</sup> Na'ankure kefo zamavu'zava'enе vahe'mokizmia, henkama knare huzama mani'saza mani'zana omanesige'za, lamu tavi'mo asu hiankna hugahaze. <sup>21</sup> Mofavre'nimoka, Ra Anumzamofone kinimofonena koro huneznantenka zanagorga nemaninka, ha'ma reznantesaza vahe'enena magopina tragoteta omaniho. <sup>22</sup> Na'ankure e'inahu vahetera, tusi'a hazenke zamo ame huno egahie. Ra Anumzamo'enе Kini ne'mo enema zamisaza knazana, mago'mo'e huno ontahitfa hugahie. <sup>23</sup> Ama' antahi'zama eri'naza vahe'mo'za amanahu ke hugahaze. Nanekema trate refkoma hanuza magomofonukera osugahaze. <sup>24</sup> Iza'o kefozama hu'nesia neku'ma, kefozana osune huno'ma hanige'za, rama'a vahe'mo'za anagema hania nekura, huhaviza hunentesageno, kokankoka vahe'mo'za antahi haviza huntegahaze. <sup>25</sup> Hu'neanagi iza'zo kefoza hu'nesia neku'ma, kefoza hu'ne hu'zama huama'ma hanamo'za, rama'a asomu eri'za rama'aza antegahaze. <sup>26</sup> Tamagema huno ke nonama hu'zamo'a, e'i knare kvate knampaka'amo kanukino kantako huganteankna hugahie. <sup>27</sup> Kotazana hozama antesanaza retro hunka hoza antetenka, henka nonka'a kigahane. <sup>28</sup> Tava'onka'are'ma nemanisimofoma trate'ma kegagama hunentezama, kenana zanku nehzafi huama huo hanagenka, havigea hunka hazenkema osu'nesia zankura, hazenke hu'ne huonto. <sup>29</sup> Hagi zamagrama hunantesaza zana nona hu'na huzamantegahue hunka osuge, mago'mo'ma havizama hugantesiana, nona hu'na havizana huntegahue hunka osuo.

### *Feru vahe'mofo naneke*

<sup>30</sup> Nagra feru ne'mofo hozafine antahintahi'a omane ne'mofo waini hozafi agatere'na nevu'nha koana, <sup>31</sup> ave've trazamo'ene hozafi inozamo hageno ana hoza refitegeno, have keginama hugagi'nea zamo'a fraguvazirami'ne. <sup>32</sup> Ana zama nege'na nagesama nentahugen'o, mago'aza rempi hunami'ne. <sup>33</sup> Osi'agna nagra navura masehimarege, osi'agna masege, osi'agna nazana anamagi'na manisga huge'ma hanugen'o, <sup>34</sup> musufa vahe'mo'za mika fenozmi kumzafa sage'za, mika zazmimo'a ame huno vagaresige'za, zumunte omane vahe maniankna hugahaze.

## 25

### *Mago'anе Solomoni knare antahintahi'amofo naneke*

<sup>1</sup> Ama'i Solomoni knare antahi'zamofo naneke, Juda vahe kini ne' Hezekia eriza vahe'mo'za eri'za krente'naza naneke. <sup>2</sup> Ra Anumzamo'a rama'a zama antahizama'afi erifrakindeg, ra agi nemune. Hagi kinimo'a anama

fraki'nea zama hakeno erifore nehigeta, agrira ra agi'a amita husga ne-hune. <sup>3</sup> Monamo onagamu me'geno, mopamo'a ufenkamu megeta antahita keta nosunankino, e'inahukna kante kini vahe'mokizmi antahinhizmia tagra antahita keta osugahune. <sup>4</sup> Silvama kre'za eri avusese hazageno, knare'ma hige'za anantetira zago'amo mareri zantamina tro nehaze. <sup>5</sup> Kefo avu'ava'ma hanaza vahe'ma kini ne'mofo kumapinti'ma zamahenati atresazana, agrama kegavama hu'nea kuma'mo'a, hanavetino fatgo huno megahie. <sup>6</sup> Kini ne' avure'ma emanisunka, nagra ra vahe'mani'noe hunka kavufga ra nosunka, zamagine vahe'mokizmi tratera eomanio. <sup>7</sup> Akoheno mani'nenkeno kema huno avrenagamute zamo knarerera hu'neanki, agine vahe'mofo avufima hugantesigenka anama mani'nenana tra'ma atrenka urami zamo'a kagaze hugahianki, antahinka kenka huntenga fatgoza huo. <sup>8</sup> Ame hunka naneke hu tratera magomofona avrentenka ke-hara huonto. Na'ankure tava'onkare'ma mani'naza vahe'mo'za, ana nanekeka'ama eriama hu'za kazeri kagazema hanazana, atuparega na'a kagra hugahane? <sup>9</sup> Kagrama tava'onkare'ma nemanisimo'enema ke ha'ma nehanunka, mago'mofo oku'a avu'ava'amofo nanekea hu amara osuo. <sup>10</sup> Henka'ama vahe'mo'za antahisu'za, fraki'za hazankea kagra franokine huge, kazeri kagaze nehu'za mika zupa antahi haviza hugante vava hugahaze. <sup>11</sup> Hagi vahe'mo'ma knare antahi'zama kna fatgo'are'ma hu'ama'ma hanigeno'a, ana ke'mo'a golire tro hunte'naza epoli zafa raga-mo silva zuompafi meanknka hu'ne. <sup>12</sup> Knare antahi'zanteti'ma azeri fatgoma nehanigeno agesa anteno antahisimo'a, golire tro hunte'naza avasaseza agesafi anteankna hu'ne. <sup>13</sup> Kema erino esia ne'mo'ma, ome huo huno huntesigeno esia kema eme fatgo huno anankema hu ne'mo'a, hozafinti neza hamare knare ata ko'mo rufru hiankna nehigeno, kva'amofo agu'amo'a fru nehie. <sup>14</sup> Mago vaheku'ma musea kamigahue huno'ma avufga ra hu kazigati huvempa hunteten, anazama omisia vahe'mo'a, ko aruku zaho e'nerino hampo ko atuno hanintiri huteno, kora oriankna nehie. <sup>15</sup> Hagi ame hunka krimpama ohe'zamo'a, kva va-hera rimpaa azerifru hunka, kagrarega avrentegahane. Ante fru hunka hukemo'a, ha' frama hu'zana mika azeri agatereghane. <sup>16</sup> Tume'mofo tima'amo'a haga hu'neanki, nenenkna avamente no, rama'a nesanana amu'atigahane. <sup>17</sup> Tava'onkare'ma nemanisimofo nontera hakare zupa vuvava osuo, anama hanankeno'a musema huno'ma negavreanknara osugosianki, avesra hugantegahie. <sup>18</sup> Tava'onkarema nemanisimofoma havigema huntenga, agenkema hanana zamo'a, kumpa knonu aheankna ne-hunka, kazinteti avufgama akafrankna nehunka, keve aheankna hugahane. <sup>19</sup> Kagrama kaza osuga vahe'ma antahinemisankeno havi knama esigeno'a, naza hugahiemha hananana, ave'neneno ata negrifi ne'zama neankna nehunka, agamo haviza hu'nea ne'mo revazamu revazamu huno viankna hugahane. <sup>20</sup> Vahe'mo'ma asunku zampima mani'nenigenka muse zagamema hananana, ana asunku zampi mani'nea vahe'mofona, zasi knafi nakreku'a zafi atreankna nehunka, aka tinu avufga taga hu'nefi tagi atreankna hugahane. <sup>21</sup> Ha' vahekamofoma aga'zanku'ma nehanigenka ne'zama nesia zana neminka, tinku'ma avenesinigenka tina amigeno neno. <sup>22</sup> E'inahu'ma hanankeno'a, teve tankanuza asenifi hampagenteankna hanankeno, agra'a havi avu'ava zama'agura agaze nehanigeno, Ra Anumzamo'a mizana kamigahie. <sup>23</sup> Vahe'ma amefiga ke'ma hu kemo'a, noti (north) kazigati zaho'mo ko atufeno eankna huno, ana vahe'mofonteria

arimpa ahe'za erino esigeno, avugosamo'a zahe hugahie. <sup>24</sup> Fegi'a anaga nomote kagraku manizamo'a, nogu'afima kehakarema nehia a'enema manizana agaterene. <sup>25</sup> Afete kumateti knare'zamofo agenkema egeno antahizamo'a, tinku avesinere zasi ti amigeno neankna nehie. <sup>26</sup> Fatgo ne'mo'ma kefo avu'ava ene ne'ma, avaririno kefo avu'ava'ma ome haniana, knare tinkerifi agamunke timo ufrenero eri haviza hiankna hugahie. <sup>27</sup> Vahe'mo'ma ra'ma'a tumerima ne'zamo'a, knarerera osu'nne. Vahe'mo'ma agr'a'a ra agima eri'zanku'ma mraguzamat'i'zamo'a, knarerera osu'nne. <sup>28</sup> Iza'o, rimpia aka he'zama azeri aravama ohesiana, mago ra kuma'mofo have keginamo fragu vaziramiankna hugahie.

## 26

<sup>1</sup> Neginagi vahe'ma ragima amizamo'a, zage knafi ko' ariankna nehigeno, ne'zamo afure knafi ko' ariankna huno knarerera nosie. <sup>2</sup> Mago'mo'ma hazenkema osu'enigeno kazusi hunte kema hanigeno'a, ana kazusi kemo'a kisave namamo mika zupa manigsa osuno hareno vano vano nehiankna huno, vahetera ana kazusi kemo'a forera osugahie. <sup>3</sup> Hosi afura sefu knonu ahe'za azeri ante fatgo nehzageno, donki afumofona aeni zamagipina rente'naza zante zamavazu hu'za zamazeri fatgo nehaze. Hagi neginagi vahera kanonteti zamagumpi zamahe'za zamazeri fatgo hugahaze. <sup>4</sup> Neginagi vahe'mofona neginagi naneke zamirera kenona huoazamoto, anama hananana zamagri kna hunka neginagi vahe manigahane. <sup>5</sup> Antahiso'e hutenga neginagi vahe'mo'za, neginagi nanekema hanaza nanekerera, kenona zmia huzamanto, ru zamagra antahisazana knare antahiza eri'none hugahaze. <sup>6</sup> Neginagi vahe'mofoma katogema hunte-sankeno kema erino vaniazamo'a, mago kaga akafri atreankna nehuno, avuatga ti neankna hugahane. <sup>7</sup> Neginagi vahe'mo'ma knare nomanizamofo nanekema hu'zamo'a, vahe'mofoma frino sti'nea agamo eri'za e'oriankna huno, ana naneke'amo'a erizana e'origahie. <sup>8</sup> Neginagi antahi'zane vahe'ma ra zamagima zmizamo'a, kumi'atifima have erinteno ahe atrenaku anteankna nehie. <sup>9</sup> Neginagi antahi'zane vahe'mo'zama knare nomanizamofo naneke hanazana, negi ti neno neginagi hu'nea vahe'mo, ave'ave nofi azampi azerineno traka truku huno vano hiankna nehie. <sup>10</sup> Neginagi antahi'zane vahe'ene karankama enevanaza vahe'ma zagore'ma eri'za erisazegu'ma zamavaresia zamo'a, keve ome ahetre emehetre huno rama'a vahe zamaheankna hugahie. <sup>11</sup> Kramo'ma amu'ma atirenere'ma eteno viaza hu'za neginagi vahe'mo'za koma nehaza neginagi zamavu'zmavara hutere nehaze. <sup>12</sup> Neginagi vahe'mo'za amuhama hazazamo'a, ama' antahi'zane vahe'ma mani'none hu'za antahiza vahera zamagateneraze. <sup>13</sup> Kampine ra kumamofo kantamimpina ha' zaga laioni manine hu'za feru vahe'mo'za nehaze! <sup>14</sup> Kafamo'ma hantintenare'ma me'neno anagino erigino hiankna hu'za, feru vahe'mo'za nemasaza tafe zamire, rukrahe rukrahe nehaze. <sup>15</sup> Feru vahe'mo'a ne'zama ante tafepintira ne'zana erigahianagi, agipina erinteno nezankura avesra hugahie. <sup>16</sup> Feru vahe'mo'a agragu'ma antahiana, 7nia knare antahi'zane vahera, nagra zamagetere'hoe huno nentahie. <sup>17</sup> Rumozama ha' frama nehazafima, anintaka huno kema hu'zamo'a, kramofo agesare avazu huno viankna nehie. <sup>18-19</sup> Tava'oma'are nemanimofofoma revatga nehuno, kiza zokago ke hugantoe huno'ma nehim'o'a, negi ne'mo teve nerea keve ome ahetre eme ahetre hiankna nehie. <sup>20</sup> Hagege teve rampama omanesigeno'a, tevea

rukru huno ontegahie. Hagi vahe zamefi kema hu'zama omanesigeno'a, ha' frama hu'zana omanegosie. <sup>21</sup> Tevemo'a tanknuzare tevea nereno hagage teve rampare rukru huno tevea nereankna hu'za keframa vazi vahe'mo'za, ha'ma hu'zana eri agafa nehaze. <sup>22</sup> Vahe'ma amefi agenke hu kemo'a, haganentake ne'zankna hu'neankino, vahe'mofo agu'afinka unefre. <sup>23</sup> Vahe'ma azeri havizahu antahi'zama kagu'afima me'negenka, amne kagiteti'ma fru kema humisanana, mopa kavomofo amega'a silva masave frenteno eri knare hiankna hugahane. <sup>24</sup> Mago'mo'ma avesra hunentesia vahe'mofoma amega agiteti avurera so'e ke humigahianagi, agu'afina antahi muginente. <sup>25</sup> Knare kema hanigenka ana kegura tamage hunka antahiomio, na'ankure agu'afina 7ni'a kasrino agote'zamo avite'ne. <sup>26</sup> E'i ana kefo antahi'zana frakigahianagi, mikä veamo'za, kefo avu'ava'afi eama hanige'za kegahaze. <sup>27</sup> Iza'o kerima asentesimo'a, anama asentesia kerifi agr'a tamisigeno, iza'o havema rezahe huno marenerinimofona, ana havemo'a ete eramino havema retufeno marerino nevanimofona eme rehapatigahie. <sup>28</sup> Havi kema hu vahe'mo'a, avesrama hunentea vhahera, havige huno azeri havizahu ke hunente. Rumofo zante ke'neno masave kema hu'zamo'a, ruga'a vhahera azeri haviza nehie.

## 27

<sup>1</sup> Okina e'inahu'za hugahue hunka kavufga rana osuo, na'ankure mago mago knamo'ma erino'ma e'nia zana ontahi'nane.

(Jem 4:13-16)

<sup>2</sup> Atregeno ru vahe'mo'za husga hunegantena, kagra'agura husga osuo. Rurega vahe'mo'za husga huganteho, kagra'a kavufga husga osuo. <sup>3</sup> Havemo'a kna higeno, kasepamo'a tusi'a knanentake hu'neanagi, neginagi vahe'mo'zama nehaza zamavu'zmavamo'a, ana tarega zana agatereno tusi'a knanentake hu'ne. <sup>4</sup> Rimpama ahe'zamo'a havizantfa higeno, asivazi zamo'a ti hageno eankna hugahianagi vahe'mofo zante'ma negeno arimpa haviza hu'zamo'a, tusia havizantfa hu'ne. <sup>5</sup> Havi avu'ava'ma hanigenkama amate huama huntenga azeri fatgo'ma hu'zamo'a, frakinkama avesima nentenka azeri fatgoma osanana zana agatere'ne. <sup>6</sup> Knampa kamo'ma kazeri fatgo hukuma katama kami'zamo'a, ha' vahekamo regavatga huno kagi'ma antako'ma hania avu'avara agatere'ne. <sup>7</sup> Amu'ma hu'nesimo'a, tumemofo rima'a one atregahie. Hianagi agazanku'ma nehania vahe'mofona aka hu'nesia nezamo'agi, agitera haga hugahie. <sup>8</sup> Nonkuma zamire'ma maniso'e osu vahe'mo'za, namamo'zama nozamire manirava osu kanke kankema hazankna nehaze. <sup>9</sup> Kavesima kanteno kavumroma ante'zamo'a, mninanentake masavemo'ene knare mnnavovo zamo mnnaviakna huno rone'amofo agu'a azeri muse hugahie. <sup>10</sup> Roneka'ane negafa rone'amofo kamefira huozamio. Hazenkema e'nerisunka kazama hinogura negafu nontega ovuo. Tava'onkare'ma nemanisimofo nontega vu'zamo'a, afete'ma mani'nenia nagafu nontegama vu'zana agaterene. <sup>11</sup> Mofavre'nimoka, ama' antahi'za e'nerigeno nagu'amo'a muse nehina, ana zamo'a knama nami'za huhaviza hunenantaza vhahera kenona zamia huzamantegahie. <sup>12</sup> Knare antahi'zama me'nlesia vahe'mo'a hazenkema agrite'ma eku'ma haniazana ko negeno, maniganenigeno agateregahie. Hianagi knare antahi'zama omane vahe'mo'a, avua onkeno ana hazenkefina vuno ufregahie. <sup>13</sup> Zamagenka antahinkama osu'nesana vahe'mo'za nofi'ma kagripinti hugahune hanagenka, amanea ozaminka

nakre kuzmia avame zana erinege'za, ana nofi'ma hu'nesaza zana eme vakanegahie. <sup>14</sup> Mago ne'mo'ma nanterama'afima kezatino, so'egane huno'ma haniana, vahe'ma sifna aheankna hugahie. <sup>15</sup> Ke fra nehuno kema huvavama nehia a'mo'a, nomo trovari huvava hiankna nehie. <sup>16</sup> E'ina hu kna a'nema zamazeri ante fatgohu kema zamasamia zamo'a, zaho'ma azeriankna nehuno, masave fre'nea azanteti azerigeno arugraru vaziankna hugahie. <sup>17</sup> Aenireti'ma, aenima kane'agonama nehiankna huno, vahe'mo'a, vahe'mofa antahintahia azeri fatgo hugahie. <sup>18</sup> Fiki zafama kegava hanimo'a, raga'a tagino negahie. Hagi iza'o kva'amofoma kegava huntesimo'a, ra agi agra erigahie. <sup>19</sup> Timpima kvugosama kanankna huno, kavukava'ma hanazamo'a kagu'afima me'neaza eri ama nehie. <sup>20</sup> Fri vahe kuma'mo'ene, fri vahe'mo'za avi'ma notazankna huno, vahe'mofa zamavenesia zamo'a zamura nosie. <sup>21</sup> Koline, silvama azeri agruma hunakura, tusi'a tevefi kre'za negazanagi, vahe'mofoma reheno negeana ragima amizanteti reheno nege. <sup>22</sup> Neginagi vahe'mofona neginagi avu'ava atresiegura, havereti witima refuzafupeno hona'a hareankna hunka zmahegahanananagi, ana neginagi zamavu'zamava'ma nehaza zampintira, zamazeri otregahane. <sup>23</sup> Memene, sipisipi afukamo'zama nemaniza nomaniza zamia rezaganenka ke so'e hunka negenka, kagu'areti hunka kegava huzamanto. <sup>24</sup> Na'ankure, fenozamo'a mevava osanigeno, ragima eri'zamo'a mago naga nofitera meno ovugahie. <sup>25</sup> Trazama akafri atresigeno'ma kasefa hagesigeno agonaregati trazana erinoma ufreshigeno'a, <sup>26</sup> sipisipi afu'mo'zane meme afu'mo'za nenesageno, sipisipi afumofona azoka'aretira kukena hatino nentanino, meme afura mopama mizasega'are zagrera atreno zagoa erigahie. <sup>27</sup> Hagi meme afumofo ami rima'a, rama'a me'enkeno agrane nom'a'afima nemaniza naga'amo'zane nenesageno, kazokzo eri'za mofane'amo'za nesazama'anena megahie.

## 28

### *Kegava huno manizamofo naneke*

<sup>1</sup> Kefo zamavu zamava'ma nehzamokizmia, vahe'mo'za zamarotgo nosazanagi, kore nefraze. Hianagi fatgo zamavu'zamava'ma nehaza vahe'mo'za, laionimo nehiankna hu'za hanaveti'za nemanize. <sup>2</sup> Mago kumapima vahe'mo'ma mago rimpama hu'zama omanesigeno'a, rama'a kva vahe fore hugahie. Hianagi antahi'zane vahe'ene antahi ama' hu antahi'zane vahe'ma mani'nesigeno'a, maka zamo'a knare huno vugahie. <sup>3</sup> Amunte omame vahe'mo'ma, amunte'ma omame vahe'ma azeri havizama nehiazamo'a, e'i ranko aruno hozamofo eri haviza hiankna nehie. <sup>4</sup> Kasegema ruhantagi vahe'mo'za, kefo avu'avaza'ma nehaza vahekura husga hunezmantaze. Hianagi kasegema nevaririza vahe'mo'za kefo vahe'mokizmia ha' renezmantaze. <sup>5</sup> Kefo zamavu' zamava'ma nehaza vahe'mo'za, fatgo huno refkohu avu'ava zana antahi amara nosazanagi, Ra Anumzamofonku'ma nehakamo'za makazana antahi amara nehaze. <sup>6</sup> Amunte omame vahe'ma mani'neno fatgoma huno mani'zamo'a, havi avu'avateti'ma feno vahe'ma mani'zana agatere'ne. <sup>7</sup> Kasegema amage'ma ante mofavre'mofona, ama' antahiza agripina me'ne. Hianagi ne'zama nehana hu vahe'enema tragoteno manisia ne'mo'a, nefana ra agaze erimigahie. <sup>8</sup> Zagoma agrama trohu kazigati'ma ra zago agima ahentesia vahe'mofona, ana zagomo'a agri kupina omanegosianki, zamunte

omane vahe'ma zamavesinte'za kegavama huzmantesaza vahe'mo'za eri-gahaze. <sup>9</sup> Kasegema antahizanku'ma amagena hunemia vahe'mofonena, Ra Anumzamo'a agri nunamuma antahizankura agotenente. <sup>10</sup> Iza'o fatgo vahe'ma avreno kefo avu'ava'ma hu kante'ma vanimo'a, agra'a asente'nesia kerifi tamigahie. Hianagi tamagema huno manisimo'a, knare'za erisanti haregahie. <sup>11</sup> Feno vahe'mo'a agra'agu'ma antahiana ama' antahi'zane vahe mani'noe huno hugahianagi, zamunte omane ama' antahi'zane vahe'mo'za, amane agrira age'za antahi'za hugahaze. <sup>12</sup> Fatgo vahe'mo'ma rankuma'mofoma kegavama higeno'a, mika veamo'a rimpa fru higeno, tusi muse nehaze. Hianagi kefo vahe'mo'ma kegavama higeno'a, mika vahe'mo'a franekie. <sup>13</sup> Iza'o kumi'ama framakinimo'a, nomani'zama'afina knarera osugahie. Hianagi kumi'ama huama nehuno, atreno arukrahe huno esimofona, Anumzamo'a asunku hunteno azeri so'e huntegahie. <sup>14</sup> Maka knama Ra Anumzamofonku'ma koro hunteno agoragama mani vahe'mo'a, muse hugahie. Hianagi izano agu'amo'ma hanavema atisimo'a, hazenke erigahie. <sup>15</sup> Kefo avu'ava'ma nehia kva vahe'mo'a, zamunte'ma omane vahe'mokizmia, laionimo vahe aheno nenaku krafa hiankna nehigeno, beamo'ma vahe'ma aheno nenaku arotago nehianka nehie. <sup>16</sup> Vahe'amofoma knama zami kva ne'mofona, ama' antahi'zana agripina omanene. Hianagi havigema huno fatgo osu kanteti'ma fenoma eri'zanku'ma avesrama huntlesia kva ne'mo'a, za'zate manino vugahie. <sup>17</sup> Mago vahe'ma ahefri'nesia ne'moma, vahe'ma ahe fri'nesia antahintahimo'ma knama neminkeno, nontema mani so'e osu vanoma nehina, aza osu atrenkeno frino. <sup>18</sup> Tamage avu'ava huno mani'zamo'a, hazenkefintira kagu vazigahie. Hianagi iza'o mani fatgoma huno'ma omanisimo'a, ame huno traka hugahie. <sup>19</sup> Hanavema atino eri'zama mopafima erisimofona, ne'zama'amo'a avitegahie. Hianagi iza'o agafa'ama omanezante'ma avaririsimo'a, amunte omane vahe manigahie. <sup>20</sup> Tamagema huno hugahue nehiazama fatgo huno'ma nehia vahe'mo'a, rama'a asomu erigahie. Hianagi iza'o ame'ama huno feno vahe'ma maninaku'ma hanimo'a, hazenkefi ufregahie. <sup>21</sup> Magomofo kazigama nemanino magomofoma atre'zamo'a, knarera osu'ne. Hianagi mago'a vahe'mo'za breti ankrare, kumi avu'avaza eri fore hugahaze. <sup>22</sup> Agraguke'ma antahi' vahe'mo'a, ame' huno feno vahe'ma mani'zanku agu'agesa nentahie. Hianagi henkama amunte omnesia zankura, keno antahino nosie. <sup>23</sup> Vahe'ma azeri fatgo hunaku azeri koneria ne'mo'a, vahe'mofoma masavenkema huzamante nera agatere-neankino, henka rama'a vahe'mo'za agrikuke hugahaze. <sup>24</sup> Iza'o nerera nefo zama kumzafama neseno kumira nosue nehimo'a, agra mikazama eri havizama nehia vahe'ene tragonete. <sup>25</sup> Agraguke'ma antahi vahe'mo'a, ha' azeri onetie. Hianagi Ra Anumzamofonte'ma amentinti nehanimo'a, nomani'zama'afina mani knare hugahie. <sup>26</sup> Iza'o agra'a antahi'zanku'ma knare hu'neanki'na amne hugahuema hanimo'a, neginagi vahekna nehie. Hianagi iza'o ama' antahi'zampima vanimo'a, knazana agateregahie. <sup>27</sup> Iza'o amunte omane vahe'ma amisimo'a, mago zankura upara osugahie. Hianagi iza'o ozamage vahe kna nehuno zamaza osanimo'a, rama'a kazusifi manigahie. <sup>28</sup> Kefo vahe'mo'zama kvama mani'za kegavama hazageno'a, mika vahe'mo'za fra'nekize. Hianagi ana kefo kva vahe'zagama frizage'za, fatgo vahe'mo'za ome rama'a nehaze.

## 29

<sup>1</sup> Iza'o rama'a zupama azeri fatgoma hanaza kema ontahino eritrenimo'a, ame huno havizantafa hanige'za, azeri fatgo hugara osugahaze. <sup>2</sup> Fatgo vahe'mo'zama kvama manizage'za, mika vahe'mo'za muse nehaze. Hianagi kefo vahe'mo'zama kegavama hazage'za, zamarimpa kna nehu'za, kragi neraze. <sup>3</sup> Ama' antahi'zama avesintea ne'mofo nef'a muse nehie. Hianagi savri a'enema tagroteno nemanimo'a, fenoma'a atre vaganere. <sup>4</sup> Fatgo avu'ava ene kini ne'mofo kuma'mo'a, oti hanavetigahie. Hianagi masavema ami kazigati'ma ami'naza zagoma eri ne'mo'a, kuma'amofona eri haviza hugahie. <sup>5</sup> Tava'o zamire'ma mani'nesia vahe'ma rezmatga hu'za masave kema huzmantaza zamo'a, zamagra'a kama nevazafi kuko anteankna nehaze. <sup>6</sup> Kefo vahe'mofona krifumo azeriakna huno kumimo'a azenerianagi, fatgo vahe'mo'za zagame hu'za muse nehaze. <sup>7</sup> Fatgo vahe'mo'za zamunte omne vahe'mofo nomani'zankura antahi nezamiza kegava hunezmantaze. Hianagi kefo vahe'mo'za, anara nosaze. <sup>8</sup> Vahe'ma hu havizama huzamante vahe'mo'za ra kumapi tevea tagintekna nehaze. Hianagi ama' antahi'zane vahe'mo'za, haframa hu'zana eri amane nehaze. <sup>9</sup> Ama' antahi'zane vahe'mo'ma neginagi vahe'ma keagarema avrentesiana, ana neginagi ne'mo'a, arimp ahetenge ana ke'arerka ki'za zokago ke nehanigeno zanarimpa fru'zana omanegosie. <sup>10</sup> Vahe'ma zamahe fri vahe'mo'za, hazenkezmi omane vahekura zamavesra hunezmantaze. Hianagi fatgo vahe'mo'za, hazenkezmi omane vahe'ma zamazeri so'ema hanaza zanku nentahize. <sup>11</sup> Neginagi vahe'mo'za zamarimpa he'zana azerirava nosazanagi, ama' antahi'zane vahe'mo'za, zamarimpa ahe'zana azerirava nehaze. <sup>12</sup> Kva ne'mo'ma havigemofoma amage'ma antesiana, mika eri'za vahe'amo'za haviza hugahaze. <sup>13</sup> Amunte omane vahe'ene, knama nezamiza vahe'enena, Ra Anumzamo'a ana taregamokiznima magozahu'zama, zanami'neana zanavuma ke'za zanamine. <sup>14</sup> Zamunte omne vahe'ma fatgo huno refakoma huzmantesia kini ne'mo'a, za'za kna kinia manino vugahie. <sup>15</sup> Mofavrema kanoma amino azeri fatgoma hu'zamo'a, ana mofavrea ama' antahi'za amigahie. Hianagi kanoma amino azeri fatgo osu mofavremo'a, nererana agaze eri nemie. <sup>16</sup> Kefo zamavu'zmava'ene vahe'mo'za kvama manizageno'a, kefo avu'ava zamo'a ra huno marenerie. Hianagi fatgo vahe'mo'za mani'ne'za nezamagesage'za evurami'za haviza hugahaze. <sup>17</sup> Mofavreka'a avumro antenka, azeri fatgoma hanankeno knare avu'ava'ma hanigenka, karimpa fru nehina muse hugahane. <sup>18</sup> Ra Anumzamo'ma henkama fore'ma hania zanku'ma, eri ama huno kasnampa kema ozamasmisige'za, vahe'mo'za savri hu'za magoke kantera omanigosaze. Hianagi iza'o kasegema amage'ma antesimo'a, muse hugahie. <sup>19</sup> Kazokzo eri'za vahe'mofona kegera hunka azeri antefatgo osugahane. Na'ankure ana kea antahi ama' hugahianagi, ana kemofona amagera anteno anzana osugahie. <sup>20</sup> Zamagesa ontahi ame'ama kema nehaza vahera nezamagano? E'i ana vahera neginagi zamavu'zmava'ma nehaza vahe'mo'za zamaza hu'zama erisaza kamo'a zamagetere'ne. <sup>21</sup> Osi'ma mani'nesigenka maka'zama hugnareke'ma hunte'nesana eri'za ne'mo'a, henka'a kazeri haviza hugahie. <sup>22</sup> Arimpama ahe vahemo ha'ma hu'zana eri agafa nehie. Hagi ame huno rimpa ahe vahe'mo'a, rama'a kumi nehie. <sup>23</sup> Zamavufga eri antesga hu vahe'mo'za evuramigahaze. Hianagi zamavufgama anteramiza mani vahe'mo'za, ra zamagi erigahaze. <sup>24</sup> Kumzafa vahe'enema tragoteno manisimo'a, agra'a azeri haviza ne-

hie. Keaga refakohu tratetima antahigesankeno huama'ma hanige'za kana amigahaze. Hagi huamama osniana, Anumzamo'a azeri haviza hugahie. <sup>25</sup> Vahe'mofoma koroma huntesanana, kagra'a krifu anaginentane. Hianagi iz'a Ra Anumzamofonte'ma amentintima hanimofona, agu'vazinkeno knare huno manigahie. <sup>26</sup> Rama'a vahe'mo'za kva vahe zamimozama zamavesima zamantesaza zanku zamavu'zmavara nehazanagi, Ra Anumzamo refako huno nege. <sup>27</sup> Fatgo vahe'mo'za kefo vahekura zamavesra hu'za zamago atenezmantaze. Hianagi kefo vahe'mo'za fatgo zmavuzmava'ene vahekura, zamavesra hu'za zamago'atenezmantaze.

## 30

### *Aguri hu'nea naneke*

<sup>1</sup> Ama'na nanekea, Jake nemofo, Aguri Itielintegane Ukalintega huama huno kre zanami'nea naneke. <sup>2</sup> Tamage nagra mago'a vahe'mo'zama nehaza havizana agatere'na havizantfa nehu'na, vahe'mo'zama antahi ama'ma nehazaza hu'na antahiamara nosue. <sup>3</sup> Nagra knare antahi'zana rempi hu'na e'ori'na, Anumzamo'ma Ruotage hu'nemofoma keno antahino'ma hu antahi'zana e'ori'noe. <sup>4</sup> Iza monafinka mareriteno ete erami'ne? Iza zahora aza agu'safina azeri'ne? Iza tavarave'afina tina anakino ante'ne? Iza mopa ometre emetretera mika'zana antegeno fore huno me'ne? Agri agi'a iza'e, nemofo agi'a iza'e? Antahinesunka nasamio! <sup>5</sup> Anumzamofo kema maka ke'za antahi'zama hu'nazana tamage ke me'ne. Agra mika zamagu vazinogu'ma Agrite'ma neaza vahe'mokizmia han-kogna hu'neno zamagu nevazie. <sup>6</sup> Anumzamofo nanekerera kagra'a kagesafintira amerasenka ruokamaro, ru kazeri korino havige vahe mani-nane huno kazeri ama hugahie. <sup>7</sup> Anumzamoka tare zantfanku kantahige'za huanki kavresra huonanto, ama mopafi ofri'na kasefa hu'na mani'nesurera, <sup>8</sup> ese' zanku'ma kantahigesuana, nazahuge'na vahe'ma revatgahu avu'ava'zane havigea osaneno. Anante zana natrege'na rama'a feno vahera omanige, namunte omane vahera omanisuanki magoke magoke knama nesugeno namuma hania avamente namio. <sup>9</sup> Na'ankure nagrama rama'azama antesuna, namefi hunegamina ru Ra Anumzamoka kage'na antahi'na osu'noe huge, ru namunte omanena musufa nesena, kagi eri haviza huzankura, avamente namio. <sup>10</sup> Mago kazokzo eriza nemo-fona kva'amofontera vunka ome azeri haviza hu kea osuo. Kagrama anama hnankeno'a, ana kazokzo eriza ne'mo'a antahi haviza hugantena, hazenkefi manigahane. <sup>11</sup> Mago'a vahe'mo'za nezmafana hu haviza hunezamante'za, nezamrerana musenkea hunozmantaze. <sup>12</sup> Mago'a vahe'mo'zama antahizana kumitia omne'ne nehazanagi, Anumzamofo avurera agrua osu'naze. <sup>13</sup> Mago'a vahe'mo'za knare hu'none huza zamavufaga ra nehu'za, mago'a vahe'mokizmia zimage fenkami netraze. <sup>14</sup> Mago'a vahe'mokizmi zamavemo'a, vahe'ma zamahe bainati kazinkna higeno, tuke zamavemo'a kazinkna huno asaneneankino zamunte omane vahe ene, mago'a zanku'ma atupa'ma hu'nesnaza vahera, ama mopafintira zamasga huvazigahaze. <sup>15</sup> Kukufamo'a taremofatre zanante'ne. Zanagi'a, Namio, Namioka! Zmavesizama eriknarema nosia zana 3'a za me'ne. Zmamuma nosia zana 4'a za me'neankino, <sup>16</sup> e'i ana zantamina, fri vahe kumaki, vene'ma mase a'mo'ma mofavrema nontea naravo aki, tima anihuma nehia hagege mopagi, ke'onke zama tefananema nehia tevemofonena zamura nosie. <sup>17</sup> Nefama negeno azanava kema hunenteno, nererama kefenkami atresnia vahe'mofo avurg,

kotkoti nama zaga'mo'za ana avurga ani kasonepesageno, tumpa nammamo'za avufga nevagaregahaze. <sup>18</sup> Nagritera 3'a zamo ruzahukna zana megeno, antahi ama'ma nosua zana 4'a za me'ne. <sup>19</sup> E'i ana zana ina kante tumpamo'a monafina hareno nevie, ina kante osifavemo'a have agofetura regraroheno vanoa nehie. Ina kante ventemo'a tusi'a hagerimpina vano nehie. Hagi na'a hu'nea zanku vene'nemo'za, vene omase akura zamave'nesie.

<sup>20</sup> Savri a'mofo avu'avamo'a amanahu hu'ne, venema maseteno'a, ne'za neteno agiteti eri ho'mu hiankna nehuno, kefo zana osu'noe nehie. <sup>21</sup> 3'a zamo ama mopamofona azeri tore nehanigeno, 4'a zamo raga oregosie. <sup>22</sup> E'i kazokzo eri'za ne'mo'ma kini mani'zane, neginagi antahi'zane vahe'mo'za nezama nezamuma hu'zane, <sup>23</sup> ave'sinontaza a'mo'ma ve'ma eri'zane, kazokzo eri'za a'mo'ma kva'ama maninesia a'mofo ve'ama rehanareno manizamo'a, ama mopa azeri tore nehie.

<sup>24</sup> Ama'na mopafina 4'a onensa zagaramina mani'nazanagi, knare antintahimo'a zamagripina avite'ne. <sup>25</sup> Kipzuvemofona hanave zmimo'a osi hu'neanagi, ko knafima nesagura ne'zana zagegnafi eritru nehaze. <sup>26</sup> Krofamofona hanavezmia omne'neanagi, havefi nozmia negize. <sup>27</sup> Kenumofona kini vahe'zamia omani'neanagi, sondia vahe'mo'zama nehazaza hu'za, vugota hu'za nevazageno, ana amage amage hu'za nevaze. <sup>28</sup> Tagovira kazanteti amne fru hunka azeriga zagamo'agi, kini vahe'mokizmi marerisa nompina ufregahaze.

<sup>29</sup> 3'a zagamo'za knare huza kana nevazagena kenasane nehuanagi, 4'a zagamoza fatgo hu'za nevazagena negoe. <sup>30</sup> E'i ana zaga laionigino mika zagamofona hanave'amo'a zamagatere'neankino, mago zagagura korora huno manigane ozamantegahie. <sup>31</sup> Ve kokoremoza zamahihiza eri antesga hu'za vazageno, ve memeki afumo'za zamasenia eri antesga hu'za vazankna huno, kini ne'mo'ma sondia vahe'anema nevuno'a, ana nehie. <sup>32</sup> Kagrama neginagi kavukava'ma hunka kavufa ra nehunka, kefo avu'ava'ma hu antahi'zama retro'ma nehanunka, kazanu kagite refintenka kea osuo. <sup>33</sup> Mememofo amirima tatziana bata tronehaze. Hagi kagona ru hapati'sazana, kora hugahie. E'ina hu'negu arimpama ahe'zamo'a, ha' eri fore nehie.

## 31

### *Kini ne' Lemuel hu'nea naneke*

<sup>1</sup> Ama'na nanekea, kini ne' Lemuelina nerera knare antahintahi ami ke rempi humi'ne. <sup>2</sup> Nagrani'a narimpafinti'ma kasegante'noa mofavre'nimoka, Ra Anumzamofonte hvempa hugeno nami'nea mofavre mani'nane. <sup>3</sup> Hanave ka'a a'nerera hunka otro. E'inahu a'nemo'za kini vahe'ma zamazeri havizama nehaza a'nerera osuo. <sup>4</sup> Lemueliga kini vahe'mo'za aka tina onesageno, kva vahe'mo'za hanave tima nezankura zamavesi zamavesi osugahaze. <sup>5</sup> Na'ankure aka tima nesu'za kasegemofona zamage'nekaniza zamunte omane vahera zamazeri so'e osugahaze. <sup>6</sup> Aka tina fri'zama nehanaza vahe nezamita, waini tina ra hazenkefima mani'naza vahe zaminke'za neho. <sup>7</sup> Zamatreke'za aka tina nene'za, zamunte omnea zanku'ene, ra knazama eri'naza zankura zamagekanaho. <sup>8</sup> Kema huga'ma osu'nesia vahe'mokizmima keagahu trate'ma zamavarente'za zamazeri havizama nehanageta, kea hutma zamaza hiho. <sup>9</sup> Zamunte'ma omane vahe'ene, zamagra'ama zamaza

hugama osanaza vahe'mokizmi knare'zankura, fatgo hu'za refkoma huzmantesaza zankura keaga hunka zamaza hugahane.

*Knare antahi'zane a'nemofo naneke*

<sup>10</sup> Izaga knare avu'ava ene ara erigahane? Na'ankure e'inahukna a'mo'a, zago'amo marerisa havea agatere'ne. <sup>11</sup> Neve'a ana a'mofonkura maka'zana hugahie huno antahinemiankino, mago zankura atupara osugahie. <sup>12</sup> Mika zupa nomani'zama'afina, ana a'mo'a, knare zanke'za nevena hunenteno, azeri havizana osugahie. <sup>13</sup> Ana a'mo'a muse nehuno sipisipi azoka ene kafina nofi'ene (flax) hakeno erino nofi zagiteno, agra'a azanu kukena hatino tro nehie. <sup>14</sup> Ana a'mo'a ventemo'za zagore atre feno eri avitete'za neazankna huno, afetetira ne'zana erino noma'afina egahie. <sup>15</sup> Agra masa osu'nesigeno nanterampi otino nevene, noma'afi naga'amofo ne'zana retro nehuno, eri'za mofamo'ma eri'zama emerisia zana retro huntiegahie. <sup>16</sup> Ana a'mo'a hozama ante mopa rezagneno keteno, agra'a eri'nesia zagoreti mizaseno waini hoza antegahie. <sup>17</sup> Ana a'mo'a hanavetino eri'zana eri a'kino, hanavetino eri'zana erigahie. <sup>18</sup> Ana a'mo'a zagoma erifore'ma hu eri'za eri kaziga knare hu'neanakino, tavira rekrusen teno eri'zana e'nerinkeno kenage segahie. <sup>19</sup> Ana a'mo'a agra'a, azanutinofira zagino kukena hatino tro nehie.

<sup>20</sup> Agra zamunte omane vahera zamaza nehuno, mago'a zanku'ma atupama haza vahera zamaza nehie.

<sup>21</sup> Ana a'mo'a zasi ko'ma atanigeno'a, noma'afima nemaniza naga'amo'zama zasiku'ma fri'zankura, korora osugahie. Na'ankure amuhoma hu tavravereti hatino kukena huzamante'ne. <sup>22</sup> Agra tafe'ma masi tafera hatino tafera nehuno, zago'amo mareri efeke ene fitunke tavravereti kukena hugahie.

<sup>23</sup> Rankumamofo kafante'ma ranra vahe'mo'zama atru hu'za kegagama nehazafina, ana a'mofo nevena antahimiza ke'za antahi'za hu'naza nere. <sup>24</sup> Mika zupa ana a'mo'a knare kukena nehatino, zamu'nofira tro nehige'za feno vahe'mo'za ene mizase'naze. <sup>25</sup> Agra hanave'reti'ene ra agima ami'zanteti kukena hiankna nehuno, henkama esia zankura kiza regahie.

<sup>26</sup> Ana a'mo'a ama' antahi'zanteti kea nehigeno, agipina vahe'mofoma knare kema hunte kemo avite'ne.

<sup>27</sup> Arga mika'zama noma'afima me'nea zantamina kegava hu so'e nehuno, ferura nomanie.

<sup>28</sup> Mofavre zaga'amo'za hu muse hunentesageno, neve'a husga huntiegahie. <sup>29</sup> Rama'a a'nemo'za knare avu'vara nehazanagi, kagra zama-gaterenka hiranto a'tfa mani'nane.

<sup>30</sup> Mago a'mo'ma fru huno knare avu'ava'ma hania zamo'a krevatga hanigeno, agi agonama keganunuma hananazamo'a, fanane hugahie. Hianagi Ra Anumzamofoma koro hunteno agoragama nemanisia a'mofona, husga huntiegahaze. <sup>31</sup> Agrama eri'zama eri'nesia avamente mizana neminkeno, knare avu'ava'ma nehuno, knare eri'zama eri'nesia zankura, vahe'mo'za ra kuma'mofo kafante husga huntiegahaze.

## Iklisiastis-Antahi'zane Vahe'mofo Naneke Antahi'zane Vahe'mofo Naneke

### *Mikazama hu'zamo'a agafa'a omane'ne hu'ne naneke*

<sup>1</sup> Rempu humi ne' Deviti nemofo Jerusalemi kumate kini ne' Solomoni naneke. <sup>2</sup> Rempu humi ne'mo'a huno, Mika zamofona agafa'a omaneno! Agafa'a omanegeno, ana maka zamo'a agafa'a omnetfa hu'ne. <sup>3</sup> Vahe'mo'za tusi amuho hu'za ama mopafina eri'zana e'nerizanagi, ana eri'zampintira na'a erifore hugahaze? <sup>4</sup> Vahera efore huno frino nevanigeno, ru vahera ete efore huno frino nevianagi, ama mopamo'a mevava huno ne-e. <sup>5</sup> Maka nanterana zagemo'a hanatiteno evuno kinagama segeno'a ufreteno, ete agareno anama hanati'nere enevie. <sup>6</sup> Hagi zaho'ma eriana sauti kazigati erino vuno ome arugagino, ete noti kaziga vuno ome arugagino, zahora erino kagigagi nehie. <sup>7</sup> Hagi maka timo'za kampui hanatite'za vu'za hager-impinke unefracanagi, hagerimo'a avira note. Hagi ana timo'za hager-impima vute'za, ete anama hanati'nazareti eme aru hanati'za ete hagerimpina nevaze. <sup>8</sup> Maka ama mopafi zantaminku'ma antahintahima hu'zamo'a, tusiza huno tavesra nehiankita hu amara hugara nosune. Tavumo'a rama'a zantmi negeanagi, mago'anee ke'nia agesage nehie. Anahukna huno tagesamo'a rama'a keaga nentahianagi, mago'anee antahinia agesage nehie. <sup>9</sup> Hakare zama menima fore'ma nehia zana, korapa fore hu'nea zamo fore nehie. E'ina hu'neankino ama mopafima fore'ma nehia zantamina magora kasefa zana forera nosianki, korapa fore hu'nea zantmi fore nehie. <sup>10</sup> Mago'mo'a huno amazana kasefaza fore nehianki keho huno osugahie. Na'ankure mika'zana korapa fore osu'nonkeno fore hu'neaza ete fore nehie. <sup>11</sup> Korapama fore'ma hu'nea zantaminkura antahintahia osu zama-genekanize. Hanki henkama fore'ma hanaza vahe'mo'za menima nehu'na zantaminkura zamage akanigahaze.

### *Knare antahi'zamofona agafa'a omne'ne hu'nea naneke*

<sup>12</sup> Nagra Rempu huzmi ne'mo'na Jerusalemi kumate mani'ne'na, Israeli vahe kinia mani'na kegava huzmantene'. <sup>13</sup> Ama mopafima me'nege'zama maka zama nehaza zana, nagra knare antahi'zanteti, refako hu'na ke'na antahi'nama huana Anumzamo'a tusi knaza vahe'mofona kofintegeno, knazana e'nerize. <sup>14</sup> Mika zana ama mopafima nehaza zama koana, agafa'a omane'za nehzanki'za, zaho'ma avararizankna nehaze. <sup>15</sup> Kazakinesia zana azeri fatgo osugahane. Hagi omne'nenia zana ohamprigahane. <sup>16</sup> Nagra'agura amanage hu'na hu'noe, mika Jerusalemi kumate'ma efore'ma hu'za kinima mani'ne'za vahe'ma kegavama huzmantene', kini vahetmina zamagatere'na nagra knare antahi'zana eri'noe. Kote'ma mani'zama e'naza kini vahetmina zamagatere'na, rama'a knare antahi'zane, antahintahizanena eri'noe. <sup>17</sup> Ana hute'na ete knare antahi'zane neginagi antahi'zane erinte'na refko hu'na ke'noanagi, e'i ana zampinti'ma ke'na eri fore'ma huana, e'i ana zamo'enena zaho'ma arotogoma hiankna hu'ne. <sup>18</sup> Na'ankure rama'a knare antahintahima eri zamo'a rama'a kasu zampi manigahane, mago'anema rama'a antahintahia zama eri'zamo'a anahukna hunka mago'anee mareri agatere kasunku zampi manigahane.

## 2

*Muse zampine fenoma antezampina agafa'a omane'ne hu'nea naneke*

<sup>1</sup> Nagra amanahu antahintahi hu'noe, Menina muse zampima knare zama me'nisigura refko hu'na kesue hu'noe. Hianagi ana muse zampima koana agafa'a omne'ne. <sup>2</sup> Hagi musema nehuno kiza zokagoma hu'zana agafa'a omne avu'ava zankino, mago knare zana eri forera osugahie hu'na hu'noe. <sup>3</sup> Ama mopafima vahe'mo'zama osi'a knafima mani'neza musema nehzaza ke'nue hute'na, waini tina nene'na musena nehu'na, neginagi avu'ava zana hu'noe. <sup>4</sup> Hanki ra eri'za eri'na tusinasi nontami kinente'na rama'a waini hozaramina nentena, <sup>5</sup> rama'a hoza nente'na, agona agona ruzahu ruzahu zafa ragama renentea zafaramina rama'a kri'noe. <sup>6</sup> Ana nehu'na tintamina ahentragi'na ana tirupinti tina afina zafa hoza tina ami'noe. <sup>7</sup> Kazokzo eri'za vene'nene a'nanenena mizasena zamavroge'za nonifina mani'ne'za mofavreramina kase hakare hu'naze. Hagi ko'ma mago'a kini vahe'ma Jerusalemima kinima mani'naza vahera, zamagatere'na rama'a sipisipi afutamine meme afutaminena ante'noe. <sup>8</sup> Ana nehu'na kuma'nifintira rama'a silvane golinena zogina eri atru nehu'na, ru kini vahe'mo'zama namiza fenonena rama'a ante'noe. Hagi zavenama nehe'za zagamema hu vahera, vene'nene a'nanenena rama'a zamavroge'za kumanifina emani'naze. Ana nehu'na nagra'a nazeri muse hanufi nehu'na henka a'hanea rama'a knare'nare a'nene eri'noe. <sup>9</sup> E'ina'ma nehu'na ko'ma Jerusalemi kumate'ma kinima mani'za e'naza vahetmina zamagatere'na rama'a feno ante'noe. Ana hugeno knare antahi'zamo'a nagri'ene me'ne. <sup>10</sup> Ina zanku'ma navesia zana amane e'neri'na, inanknahu musezama hunaku'ma huazana amane hu'noe. Ana nehu'na tusi muse hu'na eri'zana eneri'na, ana eri'zamofo nena'ama efore'ma hiazana ke'noe. <sup>11</sup> Hianagi maka zama hankaveniam atre'na erifore hua zantmima koana, ana zantamina agafa'a omane'ne. Amane zahoma avaririankna hu'noe. Mago knare zana ama mopafina kena eri amara osu'noe.

*Knare antahi'zampine neginagi antahi'zampinena agafa'a omnene hu'nea naneke*

<sup>12</sup> Hanki knare antahi'zane neginagi antahi'zanema erinte'na refkoma hu'na koana, henkama efore hania kini ne'mo'a tro'ma osu'nesua zana, naza tro hugahie? Maka zama tro'ma haniana, nagra ko tro hu'noaza tro hugahie. <sup>13</sup> Nagrama nagesama antahuana, masamo'ma hanizama agatereankna huno, knare antahi'zamo'a neginagi antahi'zana agatere'ne. <sup>14</sup> Na'ankure knare antahi'zane vahe'mo'a kama neviankana negeno nevianagi, neginagi antahi'zane vahe'mo'a hanimpi nevie. Hagi mago zama keama'ma huana ana taregamokea magozahu hu'na'e. <sup>15</sup> E'inahu'za me'nege'na nagra amanahu antahintahi hu'noe, neginagi vahetema fore'ma hania zamo'a, ana hukna za nagritera fore hugahie. E'na hu'neanki knare antahi'zamo'a nankna knare'za erifore huramigahie. Knare antahi'zama eri'zamofona agafa'a omane'ne. <sup>16</sup> Na'ankure knare antahi'zane vahe'mo'za neginagi vahe'mo'zama nehzaza hu'za frisage'za zamage akani zamattegahaze. Vahe'mo'zama maniza vanafina, ana tare kevufi vahekura zamage akanizmantegahaze. Ana hanigeno neginagi vahe'ma friaza huno knare antahintahine vahe'mo'ma fri'nige'za zamage akanintegahaze. <sup>17</sup> E'i zanku asimu'ma erino ama mopafima mani zankura tusi navesra nhie. Na'ankure mika zama hua zamo'a asunku zanke'za avreno eme nenamie.

Tusi amuhoma huta maka zama hu'na zamo'a agafa'a omne'neanki, amne zaho'ma avarirankna nehune.

### *Amuhoma huno eri'zama eri fore'ma hu'zamo'a agafa'a omanene hu'nea naneke*

<sup>18</sup> E'ina hu'negu maka zama ama mopafima amuho'ma hu'na eri fore'ma nehua zankura, tusi'za huno navresra hie. Na'ankure ete ru vahe azampi maka zama amuho hu'na eri fore'ma hua zantamina atre'na vu'zanku navesra hie. <sup>19</sup> Hagi nagri nom a erisia nera, knare antahi'zane nepi, neginagi antahi'zane nepi, nagra antahi'na ke'na osu'noe. Hianagi maka zama amuhoma hu'na eri fore'ma hu'noa zantamina, ana vahe'mo kegava hugahie. Na'ankure ana zantamina knare antahi'zanteti erifore hu'noe. E'inahu zamo'enana agafa'a omne'ne. <sup>20</sup> E'ina hu'negu ama mopafima tusi amuhoma hu'na eri fore'ma nehua zantaminkura antahintiahia hu'na namentintia nosue. <sup>21</sup> Mago'a vahe'mo'za knare antahintahi zamireti'ene antahi'za zamireti'ene maka zantamina eri retro huntete'za, amuho hu'za erifore osu'naza vahetmimofo zamazampi ana zantamina nentaze. Ama ana zama kogeno'a agafa'a omnegeno rankefoza fore nehie. <sup>22</sup> E'ina hu'neankino maka zamo'a agafa'a omne'ne. <sup>23</sup> Na'ankure maka kna eri'zama eruna zamo'a ata zane, asunku zanena avreno eme neramigeno, kenage'ene feru'enena antahintahi timo'a eri'zana eri vava nehie. E'ina hu'neankino maka zamo'a agafa'a omne'ne. <sup>24</sup> Amuhoma huno erifore'ma hia ne'zama neneno, tima neneno musenkasema hu'zamo'a mago'a zama hu'zana agatere'ne. E'i anama huno musema hu'zama ke'na antahi'nama huana, Anumzamofontegati ana zana ne-e. <sup>25</sup> Na'ankure Anumzamo'ma azama osanigeno'a mago vahe'mo'a agra'a hankaverera ne'zana erifore huno neneno musena osugahie. <sup>26</sup> Anumzamo'a agrama musema nehia zama nehaza vahera knare antahintahi zane, muse zanena nezmie. Hianagi kumi vahe'mo'zama feno vahe'ma nesazageno'a Anumzamo'a ana fenozmia erino agri'ma avesia avu'ava'ma nehaza vahe nezmie. E'i ana zamo'enena agafa'a omne'neankino amne zaho avaririaza nehie.

## 3

### *Mika'zama fore'ma hu kna metere hu'ne hu'nea naneke*

<sup>1</sup> Ama mopafina maka'zama fore'ma hu kna metere higeno, maka'zama hu kna metere hu'ne. <sup>2</sup> Vahe'ma kasente kna megeno, vahe'ma fri kna me'ne. Hoza hankare kna megeno, hozama hamare kna me'ne. <sup>3</sup> Vahe'ma ahfri kna megeno, vahe'ma azeri knamare kna me'ne. Maka'zama tapagema hutre kna megeno, ete kasefa'ma azeri otino ki kna me'ne. <sup>4</sup> Zavite kna megeno, kizamare kna me'ne. Asunku'ma hu kna megeno, musema huno avoma hage kna me'ne. <sup>5</sup> Havema erino ometre eme atrema hu kna megeno, havema zogi atru hu kna me'ne. Vahe'ma azeri anuki kna megeno, vahe'ma azeri anuoki kna me'ne. <sup>6</sup> Keonke zanku'ma hake kna megeno, avresra huno'ma ohake kna me'ne. Mago'a zama erinte kna megeno, ante'nea zama eritre kna me'ne. <sup>7</sup> Kukenama tagato hu kna megeno, tagato'ma hu'nea zama rehati kna me'ne. Kema osuno mani kna megeno, keagama hu kna me'ne. <sup>8</sup> Vahe'ma avesinte kna megeno, vahe'ma avesrama hunte kna me'ne. Ha'ma hu kna megeno, ha'ma osuno rimpafuru huno mani kna me'ne.

<sup>9</sup> Vahe'mo'ma tusi amuhoma huno eri fore nehia zamo'a, na'a knare'za eri fore nehie? <sup>10</sup> Anumzamo'ma knazama tagumpima nentea zana nagra

ke'noe. <sup>11</sup> Anumzamo'a mika zana kna fatgo'are knare zantfa huno tro hunte'ne. Ana nehuno manivava zana Anumzamo'a vahe'mofo tumopi ante'ne. Ana hu'neanagi Anumzamo'ma tro'ma hunte'nea zana eseteti'ma agafa huno vuno atumpare'ma vu'nea zantamina vahe'mo'a ke vagaore'ne. <sup>12</sup> E'ina hu'negu mago'zama ke'na antahinama huana, muse nehuno knare avu'ava'ma hu'zamo maka'zana agatere'ne. <sup>13</sup> Maka amuho'ma hu'zama eri fore'ma hanaza ne'zane, tinena nene'za musena hiho. Na'ankure e'i ana zantamina Anumzamo museza neramie. <sup>14</sup> Nagra antahi'na ke'na huana, Anumzamo'ma tro'ma hu'nea zanteria mago vahe'mo'a kasefa zana tro huntege, eri atregera osugahie. Anumzamo'ma tro'ma hunte'nea zana Agra ko tro hunte'neankino, mevava hugahie. Vahe'mo'zama Agri agoraga'ama mani'ne'za mono'ma huntesagu Anumzamo'a tro hunte'ne. <sup>15</sup> Mika zama menima fore nehia zana, ko fore hu'nea zamo ete efore nehiankino, ama ana zamo'a henka fore hugahie. Na'ankure Anumzamo'ma ko'ma eri fore'ma hu'nea zanke eri fore huvava nehie.

### *Vahe'mofo nomani'zamo'a knarera osu'ne*

<sup>16</sup> Mago zama ama mopafima koana, fatgo avu'ava'zama huga'zana netre'za, fatgo osu avu'ava zanke nehaze. <sup>17</sup> E'ina hige'na amanahu antahintahi nagu'afina antahi'noe, Anumzamo'a fatgo vahe'ene kefo avu'ava'ma nehaza vhahera keagare refko huzmantegahie. Na'ankure maka zama hu kna metere hu'neankino, miko tavutavara refko hugahie. <sup>18</sup> Hagi vahekura amanahu antahintahi nagra antahi'noe, zagagafa kna hu'none hu'zama ke'za antahi'zama hanagu Anumzamo'a vhahera rezmaheno nezamage. <sup>19</sup> Na'ankure zagagafare'ma fore'ma hania zamo'a, vhahetera fore hugahie. Zgagafamo'zama nefri'zaza hu'za vahe'mo'za nefrize. Magore huno vahe'mo'a zagagafa agateore'neanki, zagagafane vahe'enena mago zanke hu'na'e. E'ina hu zamo'a agafa'a omaneno knarera osu'ne. <sup>20</sup> Vahe'ene zagagafanema frisa'ana kugusopa segaha'e. Kugusopareti regripeno tro huzanante'negu, ete frisukea kugusopa segaha'e. <sup>21</sup> Vahe'mofo avamumo'a anagamu marenerisigeno, zagagafamofo avamumo'a mopafi ufregahie hu'za mago'a vahe'mo'za nehazanagi, tagra tamage kea ontahi'none. <sup>22</sup> E'ina hu'negu amuhoma huno'ma mago vahe'mo'ma eri fore'ma hania zana erinteno neneno musenkase hino. Na'ankure e'i amuhoma huno'ma eri'zama eri'nea zamofo Mizane. E'ina hu'neankino henkama fore'ma hania zamo-fona, izi knarera hu'nea averi hugahie?

## 4

### *Vahe'ma knama amino azeri haviza hu zamofo naneke*

<sup>1</sup> Hagi mago zama koana, ama mopafina vahe'ma knama amino azeri havizama hu zamo'a mevava huno nevige'na ke'noe. Ana nehige'za vahe'mo'za zavira netazanagi, vahe'mo'za zamazeri amnea nosaze. Vahe'ma knama zamiza zamazeri havizama nehaza vhahera hanave vaheki'za, hanavezmi omene vhahera zamazeri haviza nehaze. <sup>2</sup> E'ina hige'na fri'naza vahe'mo'za tasimu'ma erita mani'nona vhahera tagatere'za musena nehaze hu'na nagesa antahi'noe. <sup>3</sup> Hianagi knare zantfama hu'neana, kaseozmantenage'za ama mopafima havi avu'avazama onke'naza vahe'mo'za knarera hu'haze. <sup>4</sup> Hagi mago'zama koana, maka eri'zama vahe'mo'zama hankavezmima eri zamavuga atre'zama enerizana, tava'ozmire'ma nemaniza vahe'mokizmi zante kezmanunu nehu'za, anahu kna vahe asenaku amuhoa hu'za eri'zana

e'nerize. Hianagi ama ana zamo'enena agafa'a omaneza tro nehzankino, zaho'ma avaririankna nehaze. <sup>5</sup> Hagi neginagi vahe'mo'za eri'zana e'ori zamazana renamagiza mani'za zamo hige'za, zamagra zamagakura nehu'za fri'zana nehaze. <sup>6</sup> Hagi nagesama antahuana, osi'a fenoma anteno fruma huno mani'zamo'a, tusi amuho huno rama'a fenoma eritru hu'zana agaterene. Na'ankure rama'a zama eri atruhu antahintahireti'ma amuhoma huno eri'zama eri zamo'a, agafa'a omneno zaho'ma avaririankna nehie. <sup>7</sup> Hagi mago'ma agafa'a omane zama ama mopafima ke'noana ama'nahu knaza ke'noe. <sup>8</sup> Mago ne'ma afu agna'ma omanigeno, mofavre onte'neanagi, tusi amuho huno eri'zana erino fenoma eritru nehianagi, ana zamo'a knarera hunonte. Hianagi amanahu agenoka agra'a antahinonke, Izanku hu'na ama eri'zana e'nerue? Na'a hige'na maraguzati'na erizantera nehu'na musena hu'na nomanue huno nehie. Ana maka zamo'a agafa'a omne zamo kna nemie. <sup>9</sup> Tare vahe'mokema eri'zama eri'zamo magoke vahe'mo'ma eri'zama eri'zana agatere'ne. Na'ankure taremokea oza aza huke eri'zana erigaha'ankino, knare hugaha'e. <sup>10</sup> Hagi mago'mo'ma traka'ma hanigeno'a, magomo'a azeri otigahie. Hianagi trakama hanigenoma azahu vahe'ma omani'nimofona kasunku hunto. <sup>11</sup> Anahu kna huno, taremokema magopima masena'ana amuho huke masegaha'e. Hianagi magokemo'ma agraku'ma masesiana inankna huno amuhoa hugahie? <sup>12</sup> Magoke vahera ahe'za azeri haviza hugahazanagi, tare vahe'mokea hara huke ohevvari ahevri (oza aza) hugaha'e. Hagi 3'a nofima magokepima erinteno zagi'nenianofira ame hunora eri akamprura osugahie. <sup>13</sup> Amunte omane kasefa vahe'ma mani'neno, knare antahi'zane vahe'ma mani'zamo'a, ozafa kini ne' mani'neno avumro'ma ante ke'ma eri atre'zana agatere'ne. <sup>14</sup> Ana kasefa ne'mo'a amunte omne nagapinti fore hu'nenianagi, amne feno vahera fore hugahie. Ana nehuno kina nompintira amane kinia efore hugahie. <sup>15</sup> Ana'ma hige'na kogeno ana maka vahe'mo'ana (nehaza) kasefa kini ne'mofo amage'ntazae. <sup>16</sup> Ohampriga'a vaherkrerfamo'za kasefa kini ne'mofo kaziga mani'naze. Hianagi henkama fore hu'za esnaza, kasefa kini nekura musena huontegahaze. Ama ana zamo'enena agafa'a omneneankino, zaho'ma avaririankna nehie.

## 5

### *Anumzamofonte'ma huvempama hu zamofo naneke*

<sup>1</sup> Anumzamofo nompima unefresunka akohenka ufro. Anumzamofo tavaonte'ma akoheno umani'neno kema antahi'zamo'a, agesa ontahino neginagi ofama kre sramnavu zana agatere'ne. Na'ankure zamagra e'i haviza nehune hu'za nontahize. <sup>2</sup> Kagitetira ame'ama hunka keaga huge ame'ama hunka kagu'aretira maka antahintahi zanka'a Anumzamofo avuga huamara osuo. Na'ankure Anumzamofo monafinka manigenka kagra ama mopafi mani'nane. Ana hu'negu kagra osi'a naneke huo. <sup>3</sup> Mika zanku'ma antahintahi hakarema hanunka, rama'a avana kegahane. Rama'a kegagama hu zamo'a neginagi vahe asegaahane. <sup>4</sup> Anumzamofoma mago zama amigahue hunkama huvempa hu'nenuunka, zazatera azerinka ovuo. Na'ankure Anumzamofoma neginagi vahekura musena nosianki, Anumzamofoma amigahue hunkama huvempa hu'nenanana zana amio. <sup>5</sup> Anumzamofonte'ma huvempa osu zamo'a knare hu'ne. Hagi Anumzamofonte'ma huvempa huteno, ana nanekema amage'ma onte'zamo'a knarera osu'ne. <sup>6</sup> Hagi atregeno kagimo'a kavreno kumipina ovino. Ana

nehunka pristi vahetera kagraka'ama kaguvazi kazigatira hunka ruge hukanu hurega hantga hu'na huvempa Anumzamofontera hu'noe hunka osuo. E'inama hananana, Anumzamofona azeri arimpa ahesankeno, mika zama eri fore'ma banana zantamina eri haviza hugahie. <sup>7</sup> Rama'a nanekema nehuno, rama'a ava'nama ke zamo'a, agafa'a omane'ne. E'ina hu'negu Anumzamofo korora hunentenka agoraga'a manio.

### *Rama'a zago fenoma ante zamo'a agafa'a omne'ne hu'nea naneke*

<sup>8</sup> Kesakenoma kamani vahe'mo'zama zamunte omane vahe'ma knama zamiza zamazeri haviza nehu'za, zamazama hugazama atre'za zamazama nosnagenka antria hunka kagogogura osuo. E'i ana'ma nehaza vahe'mokizmia zamagri'enena kva vahezmia mani'neno, anahu avu'avara hunezmantege'za anara nehaze. <sup>9</sup> Mopafinti'ma amuhoma hu'za erifore'ma nehaza kavera, kini ne'moke erihna nehie. <sup>10</sup> Zagogu'ma avesi avesima nehania vahe'mo'a zagoa eri avi otegahie. Hagi fenoma ante'zanku'ma agesama nentahisia vahe'mo'a, fenozana eri knarera osugahie. E'i ana zamo'enena agafa'a omne'ne. <sup>11</sup> Rama'a fenoma ante'nea vahe'mofona, rama'a vahe'mo ana fenontera kregre huno eri fanane hugahie. E'ina hugahianki, ana fenozamo'a nankna knare'za avreno nafa'amofona eme amigahie? Magozana avreno eme omigosianki, negenigeno ana fenozamo'a fanane hugahie. <sup>12</sup> Amuho huno'ma eri'zama eneria vahe'mo'a osi'a neza nesio, rama'a neza nesianagi avura mase so'e nehie. Hianagi rama'a fenoma ante'nea vahe'mo'a avura mase so'e osugahie. <sup>13</sup> Hagi tusi'a kefo avu'avazama ama mopafima koana, tusi'a fenoma eri atruma nehia vahe'mofona, agri fenomo azeri haviza nehie. <sup>14</sup> Hagi rama'a zagoma tro hu kazigatima atraza zagomo'a, ome fanene nehige'za mofavre'mo'za erisaza zagoa nomane. <sup>15</sup> Hagi nerarera rimpafintira magozana e'orita tavufga avapa e'nonankita, frisuta mago'a fenozana e'rineta ovugahune. <sup>16</sup> Ama'na zamo'enena tusi'a kefo avu'avaza me'nne. Ama mopafima vahe'mo'ma fore'ma huno e'nea kante anteno, friana anahu kna huno nevie. Hiankino amuhoma huno eri'zama eri fore'ma nehia zamo'a, zahoma avaririaza huno amnezankna nehie. <sup>17</sup> Hagi ama mopafima mani'zama azafina hanimipi kavera nene'za tusi'a zamatafine, krifine, zamarimpa ahezampi mani'za neaze. <sup>18</sup> Anahu kna hu'na nagrani'ama mago knare zama ke'na eri fore'ma huana, iza'o amuhoma huno eri fore'ma hania zana neneno musenkase huno, osi'a knama Anumzamo'ma ami'nea knafina manino. Na'ankure e'i amuhoma hu'nea eri'zama eria zamofo mi'zama'e. <sup>19</sup> Hagi Anumzamo'ma mago vahe'ma zagine fenonema nemino'a, amuhoma huno erifore'ma hania zama neneno'ma musema hania antahintahia ami'ne. E'i ana zantamina Anumzamo'a muse'za ami'ne. <sup>20</sup> Anumzamo'a ana vahe'mofona ana zantamimpi antahintahia erintegeno ana zanku muse nehuno, ko'ma manino'ma e'nea nomania zankura agesa nontahie.

## 6

### *Asimu'mofona agafa'a omnene hu'nea naneke*

<sup>1</sup> Hagi mago kefo zama mopafima me'neno'ma vahe'mofoma knama nemia zama koana, <sup>2</sup> Anumzamo'a mago'a vhahera zago fenona nezmi-anagi, ana vahera atregeno amuho'ma huno eri fore'ma nehiazana neneno musena nosie. Hianagi ana vahe'mo'a ana zantamina atreno frigeno, ru vahe'mo'za e'nerize. E'i zamo'a havizantfa hu'neankino, agafa'a omne'ne.

<sup>3</sup> Hagi mago ne'mo'ma 100'a mofavreramima anteteno muse osu no-man'i'zama manime vuno ozafa omereno frisige'zama knare'ma hu'za aseontesageno'a, haviza hugahie. Arera arimpafima fri'negeno'ma kasentea mofavrema asente'zamo, ana nera agatereno knare zantfa hugahie. <sup>4</sup> Na'ankure e'inahu mofavremo'a arera rimpafima fritegeno kasentegeno, frino amnezankna higeno hanizamo refitegeno agi'a nomane. <sup>5</sup> E'i ana fri mofavremo'a zagea kege, mago zana keno antahinora nosianagi, 100'a mofavrema anteteno manime vuno ozafa omereno fria nera agatereno manigasa nehie. <sup>6</sup> Hagi ana ne'mo'ma 1 tausenia kafu'a maniteno ete mago'ane 2 tauseni'a kafua manigahianagi, mani'zama'afima musema huno mani'noma ovaniana knarera osu'ne. Na'ankure tarega'mokea magozahu huke frike magoke kumapi umanigaha'e. <sup>7</sup> Vahe'mo'ma maka eri'zama amuhoma huno eneriana agrama agipima nesia zanku eri'zana enerie. Hianagi ana nezamo'a amura nosie. <sup>8</sup> E'ina hu'negu inankna kazigati knare antahi'zane ne'mo'a, neginagi antahi'zane nera agatere'ne? Hagi amunte omne ne'mo'ma maka zama eri fore nehuno, vahe zamavugama knare avu'ava'ma huno vanoma hania zamo'a, nankna hunoaza hugahie? <sup>9</sup> Nazano ante'nenana zankura muse nehunka, onte'nenana zama erizankura antahintahia huvava osuo. E'inahu zamo'a zaho'ma avaririankna hu'neankino, agafa'a omane'ne. <sup>10</sup> Maka zama fore'ma huno me'neana, ko agia ante'nea zantaminke megeno, nanknahu zantami mago mago va-hetera fore hugahie, ko Anumzamo'a keno antahino hu'ne. E'ina hu'negu agafa'a omane zantera, Anumzamo'enena kehara osuo. <sup>11</sup> Rama'a kema hu zampintira, ana kemofo agafa'a ontahigahane. E'ina hu'negu rama'a kema hanunka, nankna knare'za erifore hugahane? <sup>12</sup> Osi'a knama ama mopafima manisunana, so'e manizama mani'zana iza antahino keno hu'ne. Mago'a zamofo amema'amo'ma hiaza huta, osi'a knafima agafa'a omane nomanizama manisuna knafina, knare'ma huno manisia zana magomo'e huno keno antahinora osu'ne. Fritama vutesunkenoma ama mopafima fore'ma hania zana, mago vahe'mo'a keno antahinora osugahie.

## 7

### *Knare antahi'zane havi antahizamofo refko huno kezamofo naneke*

<sup>1</sup> Knare avu'ava'ma hu zamofo zago'amo'a, marerirfa mnanentake masavena agatere'ne. Vahe'ma fri knamo'a, vahe'ma kasente kna agatere'ne. <sup>2</sup> Tahunte'ma vu knamo'a tusi ne'zama kreno neneno musema hu nompima vu'zana agatere'ne. Na'ankure maka vahera fri vaheke mani'nonanki, amnema mani'nona vahe'mota tagera okanisune. <sup>3</sup> Asunku'ma hu'zamo, kiza zokago'ma hu'zana agatere'ne. Na'ankure asunku'ma hu'zamo'a, tagu'a tazeri ani higeta, ruzahu ruzahu avu'ava'ma hu'zana antahita keta nehune. <sup>4</sup> Knare antahi'zane vahe'mo'a vahe'ma fri'negeno'ma asunku'ma huno mania nontega agu'amo'a nemane. Hianagi neginagi antahi'zane vahe'mo'a musema nehaza nontega agu'amo'a nemane. <sup>5</sup> Knare antahi'zane vahe'mo'ma hanave kema huno vahe'ma azeri fatgohu kema antahi'zamo, neginagi vahe'mo'ma zagame'ma nehia zama antahi'zana agatere'ne. <sup>6</sup> Neginagi vahe'mofo kiza zokago kemo'a, ne'zama kre'nea kavomofo henka kazigama ave'ave trazanuma tevema hugre'negeno'ma trage raragema hiaza nehie. Ama ana zamo'a agafa'a omnetfa hu'ne. <sup>7</sup> Vahe'ma knama amino azeri havizama hu'zamo'a, knare antahi'zane vahera azeri neginagi vahe nese. Anahu kna huno mago'zama

huntenogu'ma, zagoma atesino masavema hu zamo'a, vahe'mofo agu'a azeri haviza nehie. <sup>8</sup> Eri'zama eri afinare'ma ate zamo, eri'zama eri agafama hu zana agateregeno, arimpa fru huno mani'neno avegama ante'zamo avufga rama hu'zana agatere'ne. <sup>9</sup> Ame'amara hunka krimpa oho. Na'ankure ame'ama'ma huno arimpama ahe zana neginagi vahe'mofo avu'ava me'ne. <sup>10</sup> Nahigeno korapa'ma mani'nama e'noa knamo'a, menima mani'noa kna agatere'ne hunka kagenoka osuo. Na'ankure e'i knare antahi'zantetira kagenoka osugahane. <sup>11</sup> Knare antahi'zanteti'ma erisanti'ma hare'zamo'a knare hu'neankino, nomani'zama maninka vanampina knare huno kaza hugahie. <sup>12</sup> Zagomo'ma kazama nehiankna huno, knare antahi'zamo'a kazahugahie. Hianagi knare antahi'zamoke kagura vazigahie. <sup>13</sup> Anumzamo'ma tro'ma hu'nea zantamina kenka antahinka huo. Hagi kazaki zantamima Agrama tro'ma hunte'nea zantamina, iza eri fatgo hugara hu'ne? <sup>14</sup> Maka zama hana zantmimo'ma knare'ma hania knafina, muse huo. Hianagi maka zamo'ma amuhoma hanigenka, kenka antahinkama hananana Anumzamoke knare knane, havi knanena negamie. E'ina hu'negu mago'mo'a okima fore'ma hania zana keno antahinora osu'ne.

<sup>15</sup> Agafa'a omane nomanizama mani'na e'nofina, ama tare'za ke'noe. Fatgo avu'ava'ma nehaza vahe'mo'za ame hu'za nefrizageno, kefo avu'ava'ma nehaza vahe'mo'za, zazate maniza nevu'za kefo avu'avara hu'za nevaze. <sup>16</sup> Hagi fatgo avu'ava zana agaterenka fatgo vahetfa manisue hunka nosunka, knare antahi'zane vahera agaterena, knare antahi'zane vahetfa manisue hunka osuo. Na'ankure e'inahu kavukva zamo'a, kazeri haviza hugahie. <sup>17</sup> Kagra kefo avu'ava'ene vahera agaterenka kefo avu'ava zana nehunka, neginagi vahera oso. Nahanigenka kagra kasefa vahera mani'enka ame'amara hunka frigahane? <sup>18</sup> Anantarega koro kema antahino amage'ma ante'zamo knareru hu'ne. Na'ankure Anumzamofoma koroma huntenu, amage'ma ante zana anantarega avu'avazampi ne-e. <sup>19</sup> Mago knare antahi'zane ne'mofo hankavemo'a, 10ni'a ugagota kva vahetmima rankuma'ma kegavama hu'naza vahe'mokizmi hankavea agatere'ne. <sup>20</sup> Magore huno ama mopafina fatgo huno'ma mani'neno kumi'ma osu vahera omani'ne. <sup>21</sup> Ana maka nanekema vahe'mo'zama hanaza nanekea kagesa antenka ontahio, aru eri'za vahekamo huhaviza hugante'nia naneke antahigahane. <sup>22</sup> Na'ankure aru vahe'ma hu havizama hunentana zana, kagra kenka antahinka hu'nane. <sup>23</sup> Ama ana maka zana knare antahizanteti refko hu'na kete'na amanage nagra'agura hu'noe, knare antahi'zane vahe mani'nue hu'na huanagi, nagra knareru osu'noe. <sup>24</sup> Knare antahi'zamo'a afete me'neankino, hakeno'ma eri'amo'a tusi amuho hu'ne. <sup>25</sup> Maka kaziga knare antahi'zankura hake'na vano nehu'na, nagafare maka zana fore huno me'ne hu'na hakenaku antahintahia retro hu'noe. Nagafare vahe'mo'za kefo avu'avara nehu'za neginagi avu'avara nehaze hu'na ke'na antahi'na hunaku nagesa antahi'noe. <sup>26</sup> Mago zama ke'na eri fore'ma huana, mago'ma kefo zantfa huno fri'zama agatere'neana, a'nemofo krifumo'e. A'nemofo agu'amo'a krifugna hu'neankino, fru fru azamo'a vahe'ma kinama hunentea seni nofi kna hu'ne. Anumzamo'ma musema nehiazama nehia vahe'mo'a, ana akura koro fregahie. Hianagi kumi'ma nehia vahe'mofona, kati higeno aze'nerie. <sup>27</sup> Rempima humi ne'mo'a huno, maka zamofo agafa'ama hakena erifore'ma hunakura, mago mago zamofo agafa'a hakena ketere hu'noe. <sup>28</sup> Anama hake'nama

nevu'na mago zana onke'noanagi, 1 tauseni'a vahepina, fatgo avu'ava'ene nera magoke ke'noe. Hianagi magore hu'na fatgo avu'ava'ene ara onketfa hu'noe. <sup>29</sup> Magoke zama ke'na erifore'ma huana amane, Anumzamo'a fatgo vahe tro hunte'neanagi, vahe'mo'a rama'a kankamu retro huno kefo avu'avara nehie.

## 8

### *Kva vahe'ma amage'ma ante'zamofo naneke*

<sup>1</sup> Iza knare antahi'zane vahera mani'neno, maka zamofo agafa'ama eri ama'ma hu'zana antahine? Knare antahizamo'a vahe'mofo avugosafi remsa higeno, avugosamo'a rumsa huno nevie. <sup>2</sup> Kini ne'mofo ke antahinka amage anto hu'na nagra negasamue. Na'ankure kagra ko Anumzamofo avuga ke'a amage antegahue hunka huvempa hu'nane. <sup>3</sup> Ame'amara hunka kini ne'mofo avugatira eri'zanka'a atrenka vunka kini ne'mofoma ha'ma renentaza vahe'enena kea ome hu hageorafio. Na'ankure kini ne'mo'a nazano agri'ma avesinia zana amane hugahie. <sup>4</sup> Kini ne'mofo kemo'a, hihamu'a me'ne. Mago vahe'mo'a agenoka huno, na'a ne-hane hunora osugahie. <sup>5</sup> Hiankino kini ne'mofo kema amage'ma antea vahe'mo'a, knazana e'origahie. Knare antahi'zane vahe'mo'a maka zama hania knane, maka'zama eri fore'ma hania kna fatgoa keno antahino hugahie. <sup>6</sup> Na'ankure vahe'mofona hazenke zama'amo'a marerigahianagi, maka zamofona kna'a metere higeno kankamuma'a metere hu'ne. <sup>7</sup> Tamagerfa huno okima fore'ma hania zana, mago vahe'mo'a keno antahinora osu'neankino, okima fore'ma hania zamofona, iza huamara huno tasamigahie? <sup>8</sup> Mago vahe'mofona hihamu'a omane'neankino, fri'zama nehanigeno asimu'amo'ma atre'zama nehanigeno'a aze'origahie. Anahu kna huno fri'zana mago vahe'mo'a aze'origahie. Ha'ma hu knafima sondia vahe'ma hunontearkna huno, kefo avu'ava zamo'a magore huno kefo avu'ava'ma nehia vahera atresigeno ovugahie. <sup>9</sup> Maka zama ama mopafima fore'ma nehia zanku'ma antahintahima hufintira, mago zama kena eri fore'ma huana, vahe'mo'ma vahe'ma azeri haviza hu'zanke me'nege'na ke'noe. <sup>10</sup> Kefo avu'ava'ma nehia vahe'ma frige'za, antahimi'za knare'za hu'za asezamantazage'na zamage'noe. Ana'ma hu'za asentete'za, ete ana ne'mo'ma hazenkema eri hakarema nehia rankumapima ne-eza, ana ne'mofo agia ahentesga nehaze. E'inahu avu'ava zamo'a agafa'a omane'ne. <sup>11</sup> Hagi hazenkema nehaza vahe'ma keagazmima ame hu'zama refko'ma hu'za knama nozamizage'za, zamagrama zamagesama antahi'zana hazenkema hu'zana knare'za nehune nehu'za huvava huza nevaze. <sup>12</sup> Hianagi kefo avu'ava'ma nehaza vahe'mo'zama 100'a zupama hazenkema nehu'za za'za knama mani'za nevazage'na, nagrama antahi'na ke'nama huana Anumzamofoma koro'ma hunte'za agoraga'ama nemani'za vahe'mo'za zamagatere'za knare zantfa hu'za manigahaze. <sup>13</sup> Hagi kefo avu'ava'ma nehaza vahe'mo'zama maka zama hanaza zamo'a, knarerera huno hageno mareorigahie. Na'ankure Anumzamofona korora hunontazanki'za, knama mani'zama vanaza knamo'a kinaga zagemo'ma ufregeno vahe amema'amo'ma fanene nehiankna hu'za fanene hugahaze. <sup>14</sup> Hagi agafa'a omne zama mago'ma ama mopafima eri fore'ma nehiana, knare vahetmina kefo avu'ava'ma nehaza vahe'ma huzmantaza kna avu'ava hunezmante'za, kefo avu'ava'ma nehaza vahera knare vahetmima huzmantaza kna avu'ava hunezmantaze. E'inahu avu'ava zamo'enena agafa'a

omne'ne. <sup>15</sup> E'ina hu'negu ama mopafina magora knare zana omne'neanki, ne'zane tinema neneno musema huno'ma mani nomani'zamoke knarerera hu'ne. E'ina'ma hanu'za Anumzamo'ma eri'zama zamige'za ama mopafima amuhoma hu'za eri fore'ma nehaza zantami nene'za musena hugahaze. <sup>16</sup> Hagi knare antahi'za erisue nehu'na, ama mopafi vahe'mo'zama knazama e'neriza zama koana, vahe'mofona avumase zana omane'neanki, feru'ene kenage'enena vahe'mo'a eri'zana eri vava nehige'na ke'noe. <sup>17</sup> Anama hige'na nagrama ke'na antahi'nama huana, maka zama ama mopafima Anumzamo'ma tro nehia zana, mago vahe'mo'a keno antahinora osugahie. Knare antahi'zane vahe'mo'enena nagra knare hu'noanki'na, Anumzamo'ma tro'ma nehia zana amne ke'na antahina hugahue huno hugahianagi, ana maka zana keno antahinora osugahie.

## 9

### *Ana maka vahera fri vaheke mani'none hu'nea naneke*

<sup>1</sup> Ana hige'na ama ana maka zama rezaganena koana, fatgo avu'ava'ma nehia vahe'mo'ene knare antahi'zane vahe'mo'enema, maka zama neha'a zamo'a Anumzamofo azampi me'ne. E'ina hu'neankino mago vahe'ma avesintegi avesra huntege'ma hu'zana vahe'mo'a keno antahinora osu'ne. <sup>2</sup> Maka fatgo avu'ava'enе vahero, kefo avu'ava'enе vahero, knare vahero, havi vahero, agruhu vahero, agru osu vahero, mono vahero, mono ontahi vahera, ana maka vahe'mo'a mago'zahu kanteke vugahie. Hagi Anumzamofonte'ma hvempama nehaza vahete'ene Anumzamofonte'ma hvempama huzankuma koroma nehaza vahete'enena mago zahu zanke fore hugahie. <sup>3</sup> Ana maka vahe'motare'ma mago zahu'zama fore'ma nehia zamo'a knarerera nosie. E'ina hu'negu vahe'mo'za zamagra'a kegava hu'neza knare avu'avara nosazanki'za zamagra'a zamavesi'zamofo amage'nente'za, ome havizana nehaze. Hagi ana amefira mago'zana omane'neanki, fri'za nevaze. <sup>4</sup> Hianagi kasefa'ma hu'za mani'naza vahe'mokizmia amuha zazmia me'ne. Na'ankure zamagra amanage hu'za nehaze, kasefa huno mani'nea kramo'a fri'nea laionia agatere'ne hu'za nehaze. <sup>5</sup> Hagi kasefa'ma huta mani'nona vahe'mota, frigahune huta antahi'none. Hianagi fri'naza vahe'mo'za magozankura zamagesa ontahige, mago zamofo antahintahimo'a antahintahi zamifina nomanege'za, vahe'mo'zanena antahi nozamize. <sup>6</sup> Ana vahe'ma fri'zageno'a vahe'ma zamavesi nezmante'za, zamavaresrama hunezmante'za, kezmanunuma nehaza antahintahi zamo'enena ana maka fanene nehie. Ana hu'neankire ete ru'enena ama mopafima fore'ma nehia zantamina nege'za, antahintahia osugahaze. <sup>7</sup> E'ina hu'negu muse nehunka vunka nezanka'a ome nenenga, waini tinka'a ome no, na'ankure Anumzamo'a ko e'inhuzana hugahane huno hu izo hugante'ne. <sup>8</sup> Maka zupa knare'nare kukena nehunka, masavena kanuntera fre vava huo. <sup>9</sup> Ama mopafima agafa'a omne knama maninka vanana kna'afina, Anumzamo'ma kamigenka avesima nentana a'ka'anena muse hunka manio. Na'ankure ama mopafima amuhoma hunka maninka vanana zamofo mizama'a kami'ne. <sup>10</sup> Inanknahu eri'zama ama mopafima erisanana maka han-kaveka'reti hunka erio. Na'ankure frinka matitega vananana eri'zana ome e'orige, eri'za antahintahia ome retro huge, antahi'zana erige knare antahi'zanena erigera osugahie. <sup>11</sup> Hagi ete mago zama ama mopafima koana, tusi zama huno agama nerea vahe'mo'a agare zokago'ma reana, vahera zamagaterekera nosigeno, hankave ha' vahe'mo'za hara huzmangateregara nosaze. Anahukna huno knare antahi'zane vahe'mo'a agakura

nehigeno, maka zama knare huno tro'ma nehia vahe'mo'a feno vhahera nomanigeno, knare huno avonoma huno antahi'zama eria vahe'mofo nomani' zama'amo'a knarerera nosie. Hianagi knare kankamunte'ma ruhiza'ma huterema nehaza vahe'mo'za knarerera nehaze. <sup>12</sup> Na'ankure mago vahe'mo'a knazama avate'ma esiankna antahino keno osu'neankino, kukomo nozame azerigeno antri nehiaza huge, krifumo nama azerigeno antri nehiankna huno hazenke zamo'a vahetera ame huno ne-e.

### *Knare antahi'zamo'a neginagi antahi'zana agatere'nea nanake*

<sup>13</sup> Hagi ama mopafima fore'ma nehia zantmima negogeno'ma, mago knare antahintahima nenamino nazeri musema hiana ama'ne, <sup>14</sup> mago osi kumapina osi'a vahe mani'nazageno, hihamu'ane kini ne'mo'a sondia vahe'ane eno kuma keginamofo tavaonto mopa kateno ante hihi huno marerino hara huzmantre'za hu'ne. <sup>15</sup> Hagi ana kumapina mago amunte omne ne' nemania ne'mo'a, knare antahizama'reti ana kumara agu'vazi'ne. Hianagi mago vahe'mo'e huno ana'ma hu'nea zankura antahomi'naze. <sup>16</sup> Ana higeno knare antahi'zamo'a hankavea agatere'neanagi, amunte omane ne'mofo knare antahizankura vahe'mo'za antahimi'za za-zatera novaze. <sup>17</sup> Knare antahi'zane ne'mo'ma akoheno'ma hania ke'ma antahi'zamo'a, neginagi kini ne'mo'ma ranke'ma huno kema nehigeno'ma antahi'zana agatere'ne. <sup>18</sup> Knare antahi zama eri'zamo ha'zama ante zana agatere'ne. Hianagi kumike ne'mo'a rama'a knare'zantamina eri haviza hugahie.

## 10

### *Neginagi vahemo'ma atupa antahi'zama e'neria zamofo nanake*

<sup>1</sup> Mnanentake zama nentaza taferopima kosintamimo'zama fri'za mesu'za, kasri'za ana taferopima me'nea mnanentake'zana eri haviza hugahaze. Hagi e'ina hukna huno osi neginagi avu'ava zamo'a, knare antahi'zane knare agima vahe'mofoma amino husgama hunte'zana eri haviza nehie. <sup>2</sup> Knare agu'agesane vahe'mo'a knare avu'avaza nehigeno, havi agu'agesane vahe'mo'a, neginagi avu'avaza nehie. <sup>3</sup> Neginagi vahe'mofona kama vania avu'avate negenka, e'i neginagi vahere hunka hugahane. <sup>4</sup> Hagi kvakamo'ma arimpama aheganteno kema kasanigenka, eri'zana atrenka ovuo. Fru hunka mani'eneka kvakamofo kema antahisankeno'a, mago'anee arimpa aheogantegahie. <sup>5</sup> Hagi mago kefo avu'ava zama ama mopafima koana, ugagota kva vahe'mo'za eri'zana eri havizana nehaze. <sup>6</sup> Neginagi vahera marerirfa eri'zanke nezami'za, feno vahera evurami'nea eri'za nezamize. <sup>7</sup> Hagi mago zama koana, kazokazo eri'za vahe'mo'za hosi afu agumpi vano nehazage'za, ugagota kva vahe'mo'za kazokazo eri'za vahekna hu'za mopafi vano nehaze. <sup>8</sup> Mago vahemo'ma agra'ama kafinte'nesia kerifina agra'a uramigahie. Hagi korapama me'nesia have keginama ahe fragu'ma vazisanana anampintira osifavemo'a kamprigahie. <sup>9</sup> Hagi mago vahe'mo'ma havema frage eri'zama e'nerisigeno'a, ana havemo'a tamino hazenke amigahie. Hagi mago vahe'mo'ma zafama ape'ma nehanigeno'a, ana zafamo'a hazenke amigahie. <sup>10</sup> Hagi osane'nenia sasumereti'ma eri'zama erisanana rama'a hankave atrenka eri'zana erigahane. Hianagi knare antahi'zama erinenia vahe'mo'a knare huno eri'zana erigahie. <sup>11</sup> Ko'ma osifavemo'ma vahe'ma ampritesigeno'ma ana osifavema azeri agazonema haniana, ana osifavema

azeri agazonema hania vahe'mofo eri'zamo'a amnezankna hugahie. <sup>12</sup> Knare antahi'zane vahe'mo'a vahekura asunku hunezamanteno knare mani'zankuke keaga nehie. Hianagi neginagi vahe'mo'a hazenke'za avreno nomani'zama'afima esiankege nehie. <sup>13</sup> Neginagi vahe'mo'a neginagi kereti agafa huteno, neginagi avu'ava zanteti'ene kefo nanekereti'ene ome hu vagaregahie. <sup>14</sup> Naza henka fore hugahie mago vahe'mo'a antahino keno osu'neanagi, neginagi vahe'mo'a rama'a naneke hvuava huno vugahie. Hagi henkama fore'ma hania zana iza asamigahie? <sup>15</sup> Neginagi vahe'mo'za eri'zana eri'sazanagi tusi zamavaresragu hugahaze. Na'ankure nozamiregama nevaza kana ke'za eri forera osugahaze. <sup>16</sup> Mago osi mofavremo'ma kini manino kegavama hu'nesia mopafima nemanisaza kva vahe'mo'za nanterama ne'zama kre'za nene'za musema hanaza mopafi vahe'mota, razampi haviza hugahazanki kva hiho. <sup>17</sup> Mareri vahe'mofo mofavremo'ma kinima manino kegavama hu'nesia mopafi kva vahe'mo'za kna fatagore neginagi osu'are nezama nenesaza mopafi vahe'mota muse hugahaze. <sup>18</sup> Eri'za e'ori feru vahe'mofo nomo'ma varivarima nehanigeno ko'ma eri so'ema osanigeno'a varivari huno nomofo agu'afi efreno eri haviza hugahie. <sup>19</sup> Rama'a ne'zama kreno ne'zamo'a kiza zokagoma nehuno musenkasema huno mani'za avreno ne-enigeno, waini tima nezamo'a museza avreno neanagi, zagoretike makazana tro hugahane. <sup>20</sup> Antahizanka'afina kini nera antahi havizana huonto. Nemsampinka maninenka feno vahera huhavizana huonto. Na'ankure osi namamo'a ana nanekeka'a erino ana vahera ome asmi'nigura ontahi'nane.

## 11

### *Antahintahi hu so'e huteno eri'za eri'zamofo naneke*

<sup>1</sup> Kagra rama'a kaziga eri'zana e'nerinka, henka'a knare miza eriga-hane. <sup>2</sup> Zago fenonka'a 7ni'afino 8'afino refako hunka atregeno erizana erino. Na'ankure okima ama mopafima havizama fore'ma hania knazana ontahi'nane. <sup>3</sup> Hagi hampomo'ma ome knama nehuno'a, ko tagiramino nerie. Hagi zafama antagi atregeno'ma noti kazigo, sauti kazigama umasere anante nemane. <sup>4</sup> Hanki kagrama zahoku'ene hampo koku'ma avegama antesunka avimzana hankrenka hoza ovasgegahane. <sup>5</sup> Zaho'mofo kama kenka antahinka osuge, osi mofavrema areranku'afima fore'ma nehiazama kenka antahinka osanaza hunka, Anumzamo'ma e'neria eri'zane, maka zama tro'ma nehia zana kenka antahinka osugahane. <sup>6</sup> Nanterana avimza avinka'a nehankrenka, kinaganena avimza avina hankro. Na'ankure mago avimzamo'ma havizama hanigeno'a, mago avimzamo'a knare hugahie. Huge anantarega avimzamokea knare hugaha'e.

<sup>7</sup> Masa zamo'a haganentake hu'neankino, vahe'mo'za muse hu'za zagea negaze. <sup>8</sup> Hagi mago vahe'mo'ma rama'a kafu zagemma manino vunaku'ma hanuno'a, ana maka knafina muse huno manino vino. Hianagi ana knaramimpina rama'a havi knaramina me'neanki, agera okanino. Ana maka zama esnia zana agafa'a omne'ne. <sup>9</sup> Kasefa vahe'ma mani'zana knare hu'neanki, kasefa vahe'moka maka kna muse hunka nemaninka, nazano hunaku'ma hanana zana amne huo. Hianagi kagera okanio, maka zama hanana zana Anumzamo'a keaga huganteno refko hugahie. <sup>10</sup> E'ina hu'negu krimpa ahezana netrenka, kavufga kegava hunka manio. Na'ankure kasefa kavufgane hihamukanena amneza me'neankino agafa'a omane'ne.

## 12

### *Kasefa vahe'ma mani'nenante Anumzamofoma antahimi'nana zamofo naneke*

<sup>1</sup> Kasefa vahe'ma mani'nenante tro'ma hugante'nea Anumzanka'amofona antahineminka monora hunto. Hagi henkama havi knafima ufresunka nagra mani'zanigura musena osue hunka hugahane. <sup>2</sup> Zagene ikane, hanafi'mofo masamo'ma kavurgare'ma rehanintirma nosnigeno, ko'ma nerigeno'ma negia hampomo'ma rehanintirma osu'nesire Anumzamofona antahimio. <sup>3</sup> Hagi ana knafina tamazamo'a hanavemo'a omanena tamahirahi nerenko, osi'a tamave nemenkeno, tamavua asu hugahie. <sup>4</sup> Kagesamo'ma ankani orenesigenka eri'zama enerisaza agasasama nentahisante Anumzamofona antahimio. Hagi menina ese nama ageru arigenka onetine. Hianagi ana maka namaramimofo agerumo'a agerura rume vuno ome osi huno taganegahie. <sup>5</sup> Agonaregama mareri zanku'ma koroma osuge, ra'naregama uramizanku'ma koro'ma osuge, almoni zafa amosre gna huno kazokamo efeke osuge, fri'zama nehia kenumo'ma hagagi hagagi'ma nehiaza osuge, vea zama hu kavesi'zamo'ma evuoramige'ma hu'enire Anumzamofona antahimio. Mani vava kuma mati'matitegama vurava'o osuge, vogisifama omase'nenankeno vahe'mo'ma zavima ote'enire Anumzanka'amofona antahimio. <sup>6</sup> Kasefa vahe'ma mani'nenante Anumzanka'amofona antahimio. Hagi silva nofimo akampru osunenigeno, golireti'ma tro'ma hu'naza kavomo'ma takoma osu'enire tro'ma hugante'nea Anumzamofona antahimio. Avega ante'negeno tinkavomo'a takora huge, kavore'ma rente'nea nofi'ma avreno tinkerifima uneramia nofimo'a havizana osino. <sup>7</sup> Ana'ma hanigeno'a kugusopamo'a eteno moparega vinkeno, tami'nea netega avamutimo'a Anumzamofontega ete vugahie. <sup>8</sup> Mika zamo'a agafa'a omane'ne huno rempi humi' ne'mo'a hu'ne. Tamage huno ana maka zamo'a agafa'a omane'ne.

<sup>9</sup> Rempi humi ne'mo'a knare antahi'zana nagrike suzane huno osu'neanki, maka zama antahino keno'ma hu'nea zana vahetmina rempi huzmi'ne. Vahe'mofo knare antahi'zana antahino keno hu so'e huteno, isa'are erinte fatgo hutere huno krente'ne. <sup>10</sup> Hagi rempi humi ne'mo'a haganentake nanekema huama'ma hunakura hakeno keno erifore huteno, ana antahi'zana knare huno tamage nanekea eriama huno krente'ne. <sup>11</sup> Knare antahi'zane vahe'mofo nanekemo'a, sipsipi afu azeri fatgo nehia agona azotagna hu'ne. Hagi knare antahi'zane vahe'mofo nanekema eri atruma hu'zamo'a, rama'a nirireti zafa ahentroko higeno hankavetino meankna hugahie. <sup>12</sup> Hianagi mofavrenimoka mago'ene kavumro nanekea kasamigahue, rama'a avontafe'ma kre zankura kva huo. Na'ankure avontafe'ma kre'zamo'a atumpa'a omnegeno, avontafe'ma hamprino antahi'zama erizamo'a kazeri kavresa hugahie. <sup>13</sup> Hago ana maka nanekea huvagaroe. Hagi amanage hu'na vagare nanekea hugahue, Anumzamofonku korora huntenga agoraga'a nemaninka kasege'a avaririo, na'ankure e'i ana maka vahe'mo'ma amage antesia ke me'ne. <sup>14</sup> Hagi maka zantmima oku'a nehuna zane, knare tavutva nehuna zane, havi tavutva nehuna zanteria Anumzamo'a keaga huranteno refko hugahie.

## Solomoni Zagame

### Solomoni Kre'nea Zagamere

#### *Jerusalemi mofa'nemofo zagamere*

<sup>1</sup> Mika zagametamima agatere'nea zagame Solomoni kre'nea zagamere.  
**Mofamo'a huno,**

<sup>2</sup> Nagira antako nehunka nagira no. Na'ankure kavesima nenantana zamofo haga'amo'a waini timofo haga'a agater'e'ne. <sup>3</sup> Kavufagare'ma fre'nana mananentake masavemo'a, knare mna vu'ne. Kagimo'a mananentake zama tagitreankna nehie. E'ina hu'negeno kasefa a'neramimo'za kagritera tusi'zana nehaze. <sup>4</sup> Navregeta tagareta va'maneno. Kini ne'mo'a navareno nomo'arega vu'ne.

#### *Jerusalemi mofa'nemo'za hu'za,*

Kini ne'moka kagrikura tusi muse hugahune. Waini tima husgama hunenton-a zana agatereta, kagrira husga hugantegahune.

#### *Mofamo'a huno,*

Kagra knare zantfa hu'nanku, husga hunegantaze. <sup>5</sup> Jerusalemi mofa'neramimotma antahiho, navufgamo'a hokonke hu'neanagi, hentofaza nehuno, Kedari vahe'mofo seli nontaminkna nehuno, Solomoni seli nomofo tavravegna hu'ne. <sup>6</sup> Navufgamo'ma hokonke'ma hu'nea zankura uruhara onageho. Na'ankure zagemo navufga te hokonke hu'ne. Nasarahehe'za tusi zamarimpa ahenante'za waini hozatia kegava huo hu'za hazage'na kegava nehu'na, nagra waini hozani'a kevga osu'noe. <sup>7</sup> Nagu'areti'ma hu'na navesi negantoa ronenimoka, iga menina sipisipi afu kevuka'a avrenka vugahane. Kinaga iga sipisipi afuka'a ome zamantenka manigasa hugahane. Nahanige'na savri a'nenechnara hu'na kagri kavumo'zama sipisipi afutmima kegavama nehazafina vano hugahue.

#### *Higeno vemo'a huno,*

<sup>8</sup> Hentofa a'moka antahinka kenkama osu'nesunka, sipisipi afu kevu'nimofo agaka avaririnka neone meme afuka'aramina sipisipi kva vahetmimofo seli nomofo tvaonte eme zamantege'za trazana neho. <sup>9</sup> Navesima negantoa navate ronenimoka, Fero karisiramimofo amu'nompi karisi renteno avazu nehia a' hosi afukna kagra hu'nane. <sup>10</sup> Kameragemo'a knarezantfa higeno, kagesafima rente'nana rinimo'a kazeri hentofaza higeno, knankempima rente'nana pasesumo'a kazeri hentofaza hu'ne. <sup>11</sup> Kagesare'ma tafintenana konariri zana golireti trohu negamita, knankempima ante zana silvare pasesu trohu kamigahune.

#### *Higeno mofamo'a huno,*

<sup>12</sup> Kini ne'mo'ma ne'zama nenea tratema mani'negeno'a, nagrama navufgare'ma fre'noa masavemofo mana'amo'a ana nompina avi'nete. <sup>13</sup> Avesima nenantea ne'mo'a tare amintrenimofo amunompima mananentake'za merema anakintogeno meankna hu'ne. <sup>14</sup> Avesima nenantea ne'mo'a, En-Gedi waini hozafima henae nehaza zafa amosre'agna hu'ne.

#### *Vemo'a huno,*

<sup>15</sup> Navesima negantoa mofamoka, kagra hiranto kagi kagonane a' mani'nane. Tare kavurgamokea maho namagna hu'na'e.

#### *Higeno mofamo'a huno,*

**16** Navesima negantoa ne'moka kagra hentofaza hunka kagi kagonane ne'mani'nane. Kagra maka vahera agaterenka hentofa ne'mani'nane. Zamana zamana trazamo'a tagri tafe me'ne. **17** Nonti'ama ki'nazana, nomofo amagena zafa sida zafanu nente'za, meni zafanu nontamina runkre hugahaze.

## 2

### *Mofamo'ma vemofoma kenunu huno avesinenteno nehia zagamere Mofamo'a huno,*

**1** Nagra Saroni agupofi flaua kna nehu'na, agupofima nehagea lili flaua kna hu'noe.

### *Vemo'a huno,*

**2** Mofa'neramimofo amunompina navesima negantoa mofamoka, ave'ave trazampi me'nea lili flauamofo amosregna hu'nane.

### *Mofamo'a huno,*

**3** Navesima negantoa ne'moka zafaramimofo amu'nompina mareri agatere epoli zafagna hunka mago'a vene'ne amu'nompina mani'nane. Ana zafamofo tonapi mani'nena haganentake raga'a tagi'na neno. **4** Tusi neza retro hunte'nea ra nontega navareno nevuno, agu'reti'ma huno avesima nante'nea avu'avamo'a travravereti refite nanteaknna hu'ne. **5** Anante hagegema hu zafargareti'ma kre'nea bretia namige'na ne'na, hankavea eri'na mani'na nevu'na, epoli zafa raga namige'na nenavuna ha'neno. Na'ankure kagrikura tusiza hu'na navesi negante na kria e'nerue.

**6** Hagi hog'a azante nanuna ante harage nehugen, tamaga azanura nanuki'ne. **7** Jerusalemi mofaneramimota gazeline afi dia afu'mo'za nentahisageta nagritera huvempa hutma tamavesi'zana ame huta eri o'otinkeno kna fatgore eno. **8** Hagi avesima nentoa ne'mo'a, agonarega ne'e'na agasasanke'a nentahue. Takaure takoare huno agona kreneramino, vagri vagri huno ne'one agona kreramino ne-e. **9** Avesima nentoa ne'mo'a gazeliema nehaza afukna huge, agaho dia afukna hu'ne. Nosika mani'neno zaho eri kampinti mase nompinka retragino nege. **10** Nevesima nentoa ne'mo'a amanage huno nagrikura hu'ne, navesi navesima hunegantoa mofamoka otinka eno. Hentofa zagan'i'a mani'nananki egeta nagrane va'mneno. **11** Hagi zasi'ma nehianknamo'a vagaregeno kora aruse'ne. **12** Flaua trazamo'a hageno amosrea ahogeno, wainia taga huno eri fatgo nehigeno, namaramimo'a zanontera tusiza hu'za nani'nani nehazage'za, kugofa namaramimo'za kugokugo nehaze. **13** Fiki zafamo'a agafa huno raga neregeno, grepi zafamo'a amosre nehegeno, mna'amo'a antaguntagu nehie. Navesima negantoa mofamoka otinka eno. Hentofa zaganimoka nagri'ene eno huno navesima nentoa ne'mo'a hu'ne!

### *Vemo'a huno,*

**14** Maho namanimo'a fra'ma nekia havegampimka agonafi frakino mani'ne. Kavugosa naveri nehunka, kagerura aruge'na antahi'neno. Na'ankure kagerumo'a haga nehigeno, kavugosamo'a hentofaza hu'ne.

### *Jerusalemi mofa'nemo'za hu'za,*

**15** Avesima nentankeno kavesima negantea grepi hozatani'a eri haviza hanagi, maka neone afi kraramina zamazeri hana huo. Na'ankure grepi zafamo'a amosre ahente'ne.

### *Mofamo'a huno,*

**16** Navesima nentoa ne'mo'a nagri su'a manige'na, nagra agri su'a mani'noe. Ana hu'neankino liliema nehaza flaua hozamofo amu'nompi

vano nehuno, amosrema ahente'neana nene. <sup>17</sup> Rumasama osu'nenire gazeliema nehaza dia afumo'ma agonaregati'ma ne-eaza hunka, navesima negantoa ne'moka ete nagritega eno.

### 3

#### *Mofamo'ma ava'nama ke'nea zagamere*

<sup>1</sup> Maka kenagera tafeni'are mase'nena, navesima nentoa ne'mofonkura tusiza hu'na antahintahia Nehu'na, ava'nafina agrikura hakena vano hu'noanagi onke'noe. <sup>2</sup> Anama onke'na amanage hu'na hu'noe, menina ot'i'na rankumapine neone kampi vano Nehu'na, nagu'aretima hu'na navesima nentoa ne'mofonkura hakena vano hugahue. Anage Nehu'na otina hakena vano hu'noanagi onke'noe. <sup>3</sup> Anante kumama kegava hu'za vanoma nehaza vahe'mo'za eme nage'za eri fore hazage'na, navesima nentoa nera ke'nazo hu'na zamantahige'noe. <sup>4</sup> Kuma'ma kegavama nehaza vahetmima zamagate'ma nere'na, nagu'areti'ma hu'na navesi navesima Nehua nera ome ke'na erifore hutena, ome agazafe'na anukinena avre'na nenrera non-tega vu'na agrama amu'enema huno kasenante'nefinka vu'noe. <sup>5</sup>

#### *Vemo'a huno,*

Jerusalemi mofaneramimota gazeliema nehaza afu'ene, afi diamo'ma nehia zante tamagesa nentahita, navesizana azeri ora otigosune huta hvempa hunenkeno vuno kna fatgore vino.

#### *Jerusalemi mofa'nemo'za hu'za,*

<sup>6</sup> E'i iza ka'ma kopintira kumo'ma rentikenoma eaza huno kumagumagu huno ne-e? Hagi merema nehaza mna zane, frenkinsensie nehaza mna zane maka mnantenake zama feno vahe'mo'zama zagore'ma netrazankna'ma nehiana iza'e? <sup>7</sup> E'i Solomoninki'za, mase tafe'are mani'nege'za zamafunte zafa hu'za neazageno Israeli vahepima ugagotama hu'naza harafa sondia vhahera, 60'a vahe'mo'za azeri amu'nompi ante'za avre'za neaze. <sup>8</sup> Ana maka vahe'mo'za bainati kazinteti'ma ha'ma hu'areru yugota hunazanki'za, ha'ma hu'zana antahikasi'naze. Ha' vahe'mo'zama kini ne'ma kenage'ma eme ahe'zanku'ma kegava hurentaza vaheki'za mago magomo'za bainati kazina zamote anaki tragotetere hu'naze. <sup>9</sup> Hanki Lebanoni mopafinti'ma eri'za e'naza zafanu kini ne' Solomoni'ma manisia trara tro hu'naze. <sup>10</sup> Ana sesenkumofo noma antesgama hu zafa Silvreti tro Nehu'za, amagenama ante kaziga golireti eri fagaginente'za, fitunke tavravereti tafera mas-inte'naze. Jerusalemi mofanemo'za ana konararia tro huntenezankino, tusiza hu'za ana konararigura zamavesinte'naze.

#### *Mofamo'a huno,*

<sup>11</sup> Atiramita kini ne' Solomonina eme keho. A'ma masimigeno tusi musema hia knare'ma, nerera'ma ami'nea kini fetori antanino ne-e.

### 4

#### *Vemo'a huno,*

<sup>1</sup> Navesima negantoa mofamoka, kagi kagonamo'a arava ohe hento-fazaga mani'nanke'na kema hugamizankura amuho hue. Kavufima refite'nana tavravemofo amefira, kavurgararemokea maho namagna hu'na'e. Hanki kazokamo'ma evuramiazamo'a Giliati agonafinti sipsipi afu'mo'za takaire takaire hu'za evuramizankna nehie. <sup>2</sup> Kave'mo'a sipsipi afu anenta meni azoka harenteza ti frentageno efefe nehiankna huno efefe hu'ne. Magore huno kavemo'a hagro osu'neanki fenkamine anagami

kavemo'a mago tragave hu'ne. <sup>3</sup> Kagi'morenamo'a korankrenofikna hu'ne. Kagimo'a vahe'mo'ma kesane hu'are knare'zantfa hune. Kavugosama refite'nana tavravefina kameragemo'a korankre huno pomigreneti zafa rgagna hu'ne. <sup>4</sup> Hagi knankemo'a Deviti zaza nonkna huno hentofaza nehigeno, Deviti nonte'ma hankave sondia vahe'mo'zama tauseni'a han-kozmima eme hantinte'za enevazankna hu'ne. <sup>5</sup> Tare aminka'araremokea kugaveza dia anenta afumoke lili trazampi traza neneke vano ha'ankna huna'e. <sup>6</sup> Nanterama zasima osuno masama osu'nesige'na, ame hu'na mnanentake'za merene frenkinsensima me'nea agonafina marerigahue. <sup>7</sup> Navesima negantoa mofamoka kagrira kagi kagonamo arava ohe hentofa zaga mani'nankeno, maka kavufgamo'a afuhe afahera osuno hentofaza hu'ne. <sup>8</sup> Lebanonitira zahufa a'animoka, nagrane egeta va'mneno. Amanae nehaza agona finta eramio. Laionimo'ene lepatimo'enema nomakikema nemania agona Senirine Hemoni agona raremofo morusapintira eramio. <sup>9</sup> Zahufa a'animoka kagra marerisa zagani'a mani'nanankinka tumonire avako nehane. Kesgama hunka kavuma nenaganke'nama knankempima pasesuma hu'nana zama negogeno'a, tumoni'amo'a fakifaki hu'ne. <sup>10</sup> Zahufa a'animoka kavesi'nenantana zamo'a hentofaza hu'ne. Kavesima nenantana zamo'a waini timofo haga'a agatere'ne. Hagi kavufgare'ma fre'nana masavemofo mnamo'a, mika haganentake zana agatere'ne. <sup>11</sup> Zahufa a'animoka kagiteti'ma pakepakema nehia zamo'a tume rimo'ma nehiaza huno haganentake nehigeno, kagefu'namofo henka kaziga amirine tumerine me'ne. Ana nehigeno kukena ka'afinti mnamo'a Lebanon sida zafafintima neviankna mna nevie. <sup>12</sup> Zahufa a'animoka kagra nagrike hoza mani'enka, mareri fenozanai'a mani'nane. Refite'nea ti kampui kagra mani'enka, oku'a ti kampui tini'a mani'nane. <sup>13</sup> Kagri hozafina pomigreneti zafa'moza metru hutere hune'za, knare'nare raga renentaze. Hagi mnanentake zantmima henama nadima, <sup>14</sup> zafronima, kalamusine sinamoninema, ana maka frenkinsensima, merema, aloe trazane, maka knare'ma huno mananentakema nehia zantaminena ana hozafina me'ne. <sup>15</sup> Hozafi me'nea ti kampui kna nehunka, knare tirukna hu'nane. Lebanoni agona finti'ma eneramia tinkna hunka mani'nane.

### *Mofamo'a huno,*

<sup>16</sup> Noti kazigatira zahora erinka ne-egeno, sauti kazigati'enena zahora erino ne-ena huta, hozaniafinti mna'a erita vuta eta hi'o. Navesima negantomoka hozaka'afina enka hentofa zafa raga eme taginka nenka ko.

## 5

### *Vemo'a huno,*

<sup>1</sup> Zahufa a'animoka nagra hozani'afi ufre'na mnanentake'za merene, haganentake zanena eritru nehu'na, tumemofo anom'a'ane tima'anena ne-nena musena hu'noe. Ami rine waini tinena ne'noe.

### *Jerusalemi mofa'nemo'za hu'za,*

Ovesinte avesintema neha'a veatremota'a ne'zana neneta tina ne'o. Ante fenkamu atreta tanavesi'zana tima neaza hi'o.

### *Mofa'mo'a huno,*

<sup>2</sup> Navura mase'noanagi antahintahimo'a eri'zana eri vava hu'ne. Agasasa arige'na antahugenno avesima nenantea ne'mo'a kafante eme vagre vagre nehuno anage hu'ne, kafana anaginanto marerisa zaganimoka, maho namananimoka kafuhe kafahe omanegenka hentofa zaga mani'nane. Ata

komo'a nanuntera runtegeno atake nehigeno, nazokamo'a tinke huno pa-supanegie. <sup>3</sup> Hianagi nagra hago kukanen hutrena mase'noanki, inankna hu'na otigahue? hu'noe. Ko naga sese hutena mase'noanki, ete otina vanugeno nagamo'a pehana hugahie. <sup>4</sup> Avesima nenantea ne'mo'a azana antegamateno kafana eri anagi'za hige'na kogeno, tumonimo'a fakro fakro hu'ne. <sup>5</sup> Anama hige'na otina kafama nenagugenno'a, nazantegatira mnantake'za meremo'a pakepake hu'ne. Mnanentake'za meremo'a nazankoregatira pakepake nehige'na, kafama agu'atima ahentrokoma hu'noa zota avazu hu'noe. <sup>6</sup> Avesima nenantea nera kafana anagintenoanagi, rukrahe huno ko atreno vu'ne. Atreno'ma vigeno'a nagu'amo'a kna huno evuramino musena osige'na, hake'noanagi kena eri fore osu'noe. Ke'zana ati'noanagi, ke'niarera voera osu'ne. <sup>7</sup> Kuma'ma kegava nehaza vahe'mo'za, kuma kegava hu'za vano nehazaregati eme nage'za erifore nehu'za, nahe'za nakare kuni'a eri'naze. Ana vahetamina kuma kegina kegava nehaza va-hetamine. <sup>8</sup> Jerusalemi mofaneramimota, avesimanenantea ne'ma kesuta, avesima nentana mofamo'a kagrikura kri erino mani'ne huta asamigahune huta huvempa hunanteho.

### *Hige'za Jerusalemi mofa'nemo'za hu'za*

<sup>9</sup> Kagi kagonamo arava oheno hentofa mofamoka, ina kazigati avesima nentana ne'mo'a mago'a venenea zamagatere'ne? Ina kazigati aronekamo'a mago'a venenea agatere'negenka e'inahu kea hunka huvempa hihohunka nehane?

### *Hazageno ana mofamo'a huno,*

<sup>10</sup> Navesima nentoa ne'mo'a, hanavenentake neokino, avufamo'a tevenefea tagivazu hu'neankino, <sup>11</sup> 10 tausenia vahepina agra zamagatere'ne. Asenimo'a marerisa goligna nehigeno, azokamo'a egaraki egaraki huno kotkoti namagna huno haninke hu'ne. <sup>12</sup> Hanki tare avurgamokea tinkenafi nemania maho namamofo avurgagna nehuke, marerisa konarari zama ami rimpi sese higeno rumarave hianknna hu'na'e. <sup>13</sup> Ameragemo'a balsami zafamo'ma amosrema ahentegeno'ma mnama neviankna hu'ne. Hagi agi morenamo'a liliema nehaza trazamofo amosrefinti'ma meremo'ma viankna mna vu'ne. <sup>14</sup> Azampasamo'a goli vimagokna higeno, berilie nehaza havenu konarari hunteankna hu'ne. Avufamo'a elefanti aveteti'ma hiaza huno kanifuge higeno, safie nehaza havenu'ma konararima hunteankna hu'ne. <sup>15</sup> Tare agararemokea efeke havereti vimago zafa tro hunteeten, rusima hunte'zana goliretike tro huteno anampinka resi hunteankna hu'na'e. Avu'ava'amo'a Lebanonon agonaramimpima knare'nare sida zafaramima meankna hu'ne. <sup>16</sup> Agi'mo'a tusi haga nehie. Agra vahe'mo'za kesane huga ne' mani'ne. Jerusalemi mofo'nemota avesimanentoa ne'mo'a, e'inahu ne' mani'ne.

## 6

### *Vene a'ene tarega'mokema musema hana'a zagamere Jerusalemi mofa'nemo'za hu'za,*

<sup>1</sup> Kagi kagonamo'ma aravama ohe hentofa mofamoka kagu'aretima hunka kavesima nentana nera iga vu'ne? Kaza huta hakegahunanki, ina kantega rukrahera huno vu'ne?

### *Mofamo'a huno,*

<sup>2</sup> Avesima nentoa ne'mo'a manantake zama me'nea hoza'arega uramino, sipisipi afuzaga'a kegava nehuno liliema nehaza tra'zamofo

amosre'a asenaku vu'ne. <sup>3</sup> Nagra nagu'aretimu hu'na navesi nentoa nemofo suza manugeno, nagu'aretimu hu'na avesima nentoa ne'mo'a, nagri suza mani'neankino, agra liliema nehaza trazampi sipisipi afuzaga kegava huno vano nehie.

### *Vemo'a huno,*

<sup>4</sup> Kagra hentofa a'ni'a mani'nankeno, kavufgaretira Tirza kumamo'ma hiaza huno so'e zantfa hu'ne. Kagra Jerusalemi kumamo'ma knare'zantfama hiaza hunka knarezantfa nehunka, sondia vahe'mo'zama krauefama (flek) eri'za otizankna hu'nane. <sup>5</sup> Kavuraga keamne huo, na'ankure kavugura koro nehue. Kazokamo'a hagerimo'ma rukranto krantoma nehiaza ne-higeno, meme afu kevumo'za Giliati agonafinti takaire takaire hu'za eramizankna hu'ne. <sup>6</sup> Meni sipisipi afu ti frente'za azeri agru hazageno efe anentake hiankna kavemo'a hu'ne. Anagamine fenkamine kavemo'a tragave huno knare zantfa hu'neankino, regasima nehankeno'a efeke huno knare nehie. <sup>7</sup> Tare kameragemokea kavugosama refite'nana tavaravefintira pomigreneti, zafa ragamofo avufgaretima hiaza huno koranke nehie. <sup>8</sup> Kini ne'mofo a'nea 60'a kuini manizageno, henka a'ne'a 80'a manizageno, ohampriga'a vene omase mofa'nea mani'nazanagi, <sup>9</sup> nagri maho nama agra hiranto zaga mani'neankino, agra ruzahu knazaga mani'ne. Nerera'ma magoke'ma ante'neno agrikuke'ma nehia mofa mani'ne. Muna'nemo'za agrira husga hunentazageno, kini nemofo a'neramimo'zane henka a'neramimo'zane vene omase mofanemo'zanena zagame hu'za agi'a erisga nehaze. <sup>10</sup> Iza avufgafinti rumsa nehie? Avufgafintira ikamo'ma remsama nehiaza nehigeno, zagemofo avunasisimo'ma nehiaza nehigeno, sondia vahe'mo'za krauvefa eri'za oti'zankna huno konarari'amo'a hentofaza hu'ne. <sup>11</sup> Krepimo'ene pomigreneti zafamo'ma amosrema ahege, asinama eri marege'ma hu'ne'nia ome ke'naku, zafa rgama renentea zafa hoza agupofi urami'noe. <sup>12</sup> Navesizamo'a ugagota kva ne'mofo karisifi me'nege'na kena antahina nehu'na antri nehue.

### *Higeno Jerusalemi mofanemo'za hu'za,*

<sup>13</sup> Ete rukrahe hunka eno. Sulamu kumateti mofamoka ete eno, ete egeta kagamneno.

### *Higeno mofamo'a huno,*

Tarefima manipimpa hu'za zamagama netrazafina, Nagafare nage-nakura nehaze?

### *Vemo'a huno,*

<sup>1</sup> Kva ne'mofo mofamoka kagia nomu antaninana kagamo'a hirantoza hu'ne. Kagiamo'a knarezantfa hu'neankino, keonke'zama tro'ma hu'are'ma knare'ma hu'nea vahe'mo'ma havere'ma eri vimago huno marerirafa avasesezama tro hunteankna huno hentofaza hu'ne. <sup>2</sup> Hagi mnanentake zane wainima eri haviamma hunentaza kapugna huno kriko'mo'a knare zantfa hu'ne. Hagi kamumo'a witi herafintazageno hihi huno mareriaza huno marerinogeno, liliema nehaza trazamofo amosrenu avasase hugag-intazageno asivaziankna huno knare zantfa hu'ne. <sup>3</sup> Tare aminka' amokea tare anenta dia afukna nehuke, gezelie nehaza kugave'za dia afukna hu'na'e. <sup>4</sup> Knankemo'a mani'nezama kuma kegavama nehaza nomu elefanti aveteti kinazankna huno hentofaza hu'ne. Hanki kavurga raremokea Hesboni

kumapine, Bat-rabimi kuma kafante me'nea tirutamimpinti ru marave hi-ancka huno hentofaza hu'ne. Kagonamo'a Lebanoni kumate mani'nezama kegavama nehaza za'za nomo'ma Damaskasi kaziga avugosa hunteankna huno knare'zantfa hu'ne.<sup>5</sup> Hagi kasenimo'a mesga huno Kameli agonagna nehigeno, kazokamo'a kini ne'mofo tavravegna hu'ne. Hagi e'i ana kazoka kutera kini ne'mo'a evuramigahie.<sup>6</sup> Navesima negantoa mofamoka kagra marerigatere zagani'a mani'nane. Kagri kavufgare'ma mika zama me'nea zamo'a nazeri muse nehige'na, nagra tusiza hu'na navesinegantoe.<sup>7</sup> Kagra tofe zafagna hunka za'za hu'nankeno, aminka'araremokea tofe zafamo asite asite ragama renteankna hu'na'e.<sup>8</sup> Hagi nagra tofe zafare marerina raga'a azerigahue. Tare aminka'amokea grepri ragamo'ma hiaza nehigeno, kasimu'ma nentakeno'a epoli zafa ragamo'ma neviankna mna nevie.<sup>9</sup> Hagi nagi'ma nenankeno'a, haga'amo'a knare zantfama hu'nea wainima nenogeno, haganentake'ma huno nagipima uramiankna nehie.

### *Higeno mofamo'a huno,*

<sup>10</sup> Nagra ve'nimofo su'za manugeno, agra tusiza huno avesi nenante. <sup>11</sup> Navesima negantoa ne'moka egeta avo'nompi vano nehuta, osi kumatamimpi umasanneno. <sup>12</sup> Nanterame otita waini hozafi vuta, waini zafamo'ma amuma marege amosrema rupokrrasege'ma hu'enigura ome kegahu'e. Ana nehuta pomigreneti zafamo'ma amosrema ahenenigura negeta, anampi navesima negantoa zana eri kaveri hugahue. <sup>13</sup> E'i anampi mentreki zafa ragamo'a, tusi mna nevina kahantirera maka knare'nare zafa raga nemena, kasefa ragane korapa zafa raganena megahiankino, e'i ana suzantamina navesima negantomoka antegante'noe.

## 8

### *Mofamo'a huno,*

<sup>1</sup> Nenrera amima nenka ra hunka nagri nensarogama mani'nantesina, knare hisine. Na'ankure vahe'mo'za nenagazage'na korora osu, amne kagira antako nehuge'za mago kea osazasine.<sup>2</sup> Nagra kavre'na rempima hunami'nea a'nenrera nompinka vusine. Haganentake mnazanteti eri havia hu'nea waini tina kamugenka nenanke'na, haganentake pomigreneti tinena kamugenka nasine.<sup>3</sup> Hoga kazanu naseni fitara ante harage hunenka, tamaga kazanu nanuki fanki hasine.<sup>4</sup> Jerusalemi kumate a'nemota veamo'ma aravema hu antahintahia tazeri o'otinenunkeno kna fatgo'are egahie huta huvempa hoho.

### *Jerusalemi mofa'nemo'za hu'za,*

<sup>5</sup> Ina mofamo ka'ma kokana atreno ne-eno, avesima nentea ne'mofo asumpina maserino ne-e?

### *Mofamo'a huno,*

Negrera'ma atagu'ma nehuno kasegante'nea epoli zafa agafafima mani'nankena kavufga kazeri oti'noe.<sup>6</sup> Taferomofo avaza'a erigiankna hunka, tumoka'amofo agofetu navrenentenka asama nehiaza hunka kazampasanafina nagrike navrento. Na'ankure navesizamofo hankanavemo'a frizamofo hankavemo'ma hiaza huno tusi hankanaveti'ne. Navesizamo'a tusi hankanavetino matipima vahe'ma asenenteankna hu'ne. Navesizamo'a teve anefamo'ma hagana hagana'ma hiaza huno hagana hagana huno marenerie.<sup>7</sup> Avesizamofo tevea rama'timo'a resura osuge, tima hageno esia timo'a avesizana erino vugara osu'ne. Hagi

mago ne'mo'ma avesizama mika zago fenonteti'ma tesi'zama hanige'za, vahe'mo'za tusi kiza zokago ke huntegahaze.

*Higeno ana mofa'mofo asarehe'za hu'za,*

<sup>8</sup> Nerasaro'a osi mofa mani'negeno, amima'amo'a oharage'ne. Hagi mago'a vahe'mo'zama a'erintegahune hu'zama hanageta, tagra nerasarona na'a huntegahune? <sup>9</sup> Hagi nersaro'ma kuma keginagna'ma huno maniresina, ana kegina agofetura silvareti zaza nona kita manineta kegava huntosine. Hagi agrama kafama maniresina, tagra sida zafagna huneta, kahantera ahekanirentosine.

*Mofamo'a huno,*

<sup>10</sup> Nagra kuma keginagna hu'nogeno, amini'amo'a za'za nonkna hu'ne. Hagi navesimanentoa ne'mo'a agrama nenageno'a tusiza huno ananke nakrura nehuno avesinante'ne.

<sup>11</sup> Solomoni'a Ba'al-hamoni kumatera waini hoza ante'neanagi, ana waini hoza vahe'mo'za kegava hu'naze. Hagi ana hozama kegavama hu'neza zagoma troma nehaza vahe'mo'za hozama ante'za zafa rgama tagiza nona'a 1tauseni'a silva zago eme amitere hu'naze. <sup>12</sup> Hianagi nagri waini hoza nagri su'ankina amigahuankino, Solomoni'a 1tausenia silva zagoa miza osegahie. Hianagi 200'a sekeli zagoreti hozama kegavama nehaza vahera mizana zamigahue.

*Higeno vemo'a huno,*

<sup>13</sup> Hozafima mani'namoka, nagrane nemaniza vahe'mo'za kagri kagerukura zamagesa ante'za nentahize. Hagi natrege'na kagerura antahi'neno.

*Mofamo'a huno,*

<sup>14</sup> Navesima negantomoka gezeriema nehaza afi ve dia afumo'ma nehiaza nehunka, kasefa afi ve dia afumo'ma mananentake zama me'nea agonaramimpima vanoma nehiaza hunka ame hunka nagritega eno.

## Aisaia Aisaia Kre'nea Avontafere

*Israeli vahe'mo'zama Ra Anumzamofoma ha'ma rente'naza naneke*

**1** Hanki Juda kini vahera, Uzia'ma, Jotamu'ma, Ahasi'ene Hezeikaiki hu'zama kinima mani'za e'naza knafina, Amosi nemofo Aisaia'a Jerusalemine Juda mopafima nemaniza vahetema fore'ma hania zana amanahu avana knaza ke'ne.

**2** Ra Anumzamo'a amanage hu'ne, Monamoka nentahigeno, mopamoka antahio, mofavre naga'ma kegava huge'zama rama hu'naza mofavre naga'moza Nagrira zamefi hunenamize. **3** Hanki bulimakao afu'mo'a nafa'amofona keanke regeno, tonki afu'mo'a kegavama huntene'mo'ma ne'zama nemia kumara antahi ankere'ne. Hianagi Israeli vahe'mo'za nagrira ke'za antahi'za osazageno, Nagri vahe'mo'za antahi amara osu'naze.

**4** Israeli vahera kumike vahe manizageno, kumi'mofo knamo zamazeri reentrako hu'ne. Havi zamavu'zamava nehaza vahe'mo'za zamagrira kasezmante'naze. Zamagra fatgo osu zamavu zamava nehaza vahe mani'ne'za, Ra Anumzana nenatre'za, ruotagema hunemofona kefenkami netre'za, Israeli vahe'mokizmi Ra Anumzana zamefi humi'naze. **5** Na'a agafare e'inahu tamavutamvara huvava huta nevanageno knazana tamigahie? Na'ahigeta veganokanora huvava huta neaze? Zamasenifina kri me'negeno maka zamavufagamo'a hankave'a omane'ne. **6** Henkamu zamagigo avozareti marerino anagamu zamasenire marerigeno, mago knare zana omane'neanki, ruzahu ruzahu namumo avite'ne. Ana higeno ana namuna sesera huno olivi masavena anteno anakigara osu'ne. **7** Hagi mopatamimo'a haviza huno megeno, ranra kumatamia tevemo te fanane hu'ne. Hozatamifintira nezmagazage'za ru kumate vahetamimo'za ne'zana eme eri vagare'za vu'naze. Ru kumatega vahe'mo'za e'za kumatamia eri haviza hazageno, mopa tamifina mago'zana omanetfa hu'ne. **8** Higeno hentofazama hu'nea Jerusalemi kumara atrazageno, waini hozafi fugagi no kinteankna huge, kono hozafi tona no kinteankna huge, ha' vahe'mo'za mago rankuma'ma kafo eme ante'za avazagi kagintazankna hu'ne. **9** Hagi Hankavenentake Ra Anumzamo'a tataregetama menima mani'nona vahe'mota Sodomune Gomora kumatremokema havizama huna'aza huta haviza husine. **10** Hagi tamagra Sodomu kumate kva vahe'mota Ra Anumzamofo nanekea antahi ankenerenke'za, Gomora kumate vahe'mota Ra Anumzana tagri Anumzamofo kasegea tamagesa anteta antahih!

**11** Hagi hakare'a zupama Kresramanama nevaza ofamo'a, nagri navurera amne zankna hu'ne huno Ra Anumzamo'a hu'ne. Ve sipisipireti'ene knare zantfama hu'nea bulimakaomofo afova-areti'ma, kre fananehu ofama tevefima hu'naza zankura navesra hu'ne. Hagi ve bulimakaone ve sipisipine meme afumofo korankura nave'nosie. **12** Hanki tamagrama Nagri navure'ma monote'ma neazageno'a, iza ama ana zantamina eri'neta eho huno huramante'ne? Anama hazazamo'a Nagri mono nompina tusi'a agasasa ruta vano nehuta, renkrare nehaze. **13** Hagi Ofama erita neaza ofa agafa'a omame ofa erita neazanki Nagritera omeho. Mananentake'za insensima kre mnama nevaza zamo'a nago'nete. Kasefa ikante'ma musema hazafine, Sabati knare'ma nezama atretama mono'ma hazafine, mago'a

knare'ma mono'ma hazafinena omanisua nagesa nehie. Na'ankure tamagrama haza kumi'mo, atruma huta mono'ma haza monora eri haviza nehie.<sup>14</sup> Kasefa ikante'ene huhamparinte'naza knare'ma musema nehaza musenkura, Nagri nagu'amo'a musena nosie. Anazamo'a Nagrira tusi knaza namige'na, erisga huzankura nevesra hu'ne.<sup>15</sup> Hanki tamazama erisga huta nunamuma hanage'na, Nagra navua onke'nugeta, zaza nunamu hugahazanagi antahi oramigahue. Na'ankure ke'a omane vahe'ma zamaheta eri tagi'naza koramo'a tamazampina avite'ne.<sup>16</sup> Hagi tamagra ti fretma agru nehutma, Nagri navure'ma havi tamavu tamava'ma me'neana eri netreta, kumi'ma hu'zana atreho.<sup>17</sup> Hagi knare avu'ava hu'zana rempi huta nentahita, fatgo huno refkohu avu'ava zana nehutma, kento a'nanea zamazeri so'e nehuta, kefo zamavu'zamavama nehaza vahera zamazeri fatgo nehuta, megusa mofavrea kegava huzmanteho.<sup>18</sup> Hanki Ra Anumzamo'a huno, Tamagra enketa ana zankura magopi keaga erinte fatgo hamneno. Tamagri kumimo'a oninake korankre hu'neanagi, Nagra sese huramante sanugen, efeke huno hamponkna nehanigeno, koranentike hu'neanagi sipisipi afu'mofo azoka'moma hiaza huno efe'ntentake hugahie.<sup>19</sup> Hagi tamarimpamo'ma o'netisigeta Nagri kema antahisutma, ama mopafinti'ma knarenare ne'zama fore'ma hania ne'zana tamagra negahaze.<sup>20</sup> Hianagi tamefi'ma hunenamita ke'nia'ma ontahisazana, bainati kazimofo ne'za segahaze. Nagra Ra Anumzamo'na amana kea nehue.

### *Ra Anumzamo Jerusale kuma azeri fatgo huku hu'nea naneke*

<sup>21</sup> Jerusalemi rankumamoka kora Nagri kea antahinka mani fatgo hu'nanane. Hianagi menina mago savri a'kna nehane. Kora makazampina fatgo hunka refko nehanke'za, kagri agu'afima nemaniza vahe'mo'za fatgo zamavu zamava hu'nazane. Hianagi menina Jerusalemi kumapina vahe'ma ahe fri vahe'mo avite.<sup>22</sup> Kagra koteri knare silvagna hu'nananagi menina krogro ahenea silvagna nehunka, kora knare wainigna hu'nananagi menina amane tinkna hu'nane.<sup>23</sup> Jerusalemi kumamoka kva vahe'mo'za Nagri kea nontahi'za, kumazufa vahe'mokizmi knampa mani'naze. Zamagra masavema huno mago'a zama eri'zanku'ene, müsezama erite'za eri'zama eri zankuke nehakaze. Zamagra megusa mofavrea zamaza nosu'za, kento a'nanemokizmi kaziga ante'za keaga nosaze.<sup>24</sup> E'ina hu'negu hanavenente Ra Anumzana Israeli vahe'mokizmi hanave Anumzamo'a amanage hu'ne, Nagri'ma ha'ma renantaza vahera nona hu'na ha'huzmantegahue.<sup>25</sup> Hagi naza rusute'na knazanteti tamavumro ante'na tamazeri haviza nehu'na, tamazeri pehenage'ma nehiazana ana maka tevefi kre fanane hu'na eri atregahue.<sup>26</sup> Hagi Jerusalemi kumapima manine'za kema refko nehaza vahetamine, knare kanisol vahetamimo'za ko'ma ese agafare'ma mani'nazaza hu'na, ete zamazeri otigahue. Anama hutesuge'za vahe'mo'za henka'a hu'za, fatgo avu'avaza nehuno Ra Anumzamofo ke amagenentea rankuma me'ne hu'za hugahaze.<sup>27</sup> Saioni kumamofona fatgo avu'ava zanteti refko huno negeno ete avregahie. Ana nehuno ana kumapima nemaniza vahe'mo'za zamagu'ama rukrahe'ma hanageno'a, fatgo avu'ava huno zamagu vazigahie.<sup>28</sup> Hianagi kema ontahi vahe'ene kumi'ma nehaza vahe'mo'zanena havizantfa hanage'za, Ra Anumzamofoma zamefi'ma hunemiza vahe'mo'za omani'za fanane hugahaze.<sup>29</sup> Hanki tamagrama oki zafa agafafima havi anumzama mono'ma hunentaza zanku'ene, hozama kariteta anampima havi anumzama mono'ma hunentaza zankura tamagazegu hugahaze.<sup>30</sup> Hanki tamagra oki zafamofo ani'namo harari hiankna

nehuta, hozamo ti omanegeno hagege hiankna huta haviza hugahaze. <sup>31</sup> Hagi hankavenentake vahe'mo'za hagege zafagna hu'nesageno, havi tamavu tamavomo'a teve rukaru huno neramaresigeno, mago vahe'mo ana tevea rusu hugara osugahie.

## 2

### *Ra Anumzamo henkama maka'zama kegavama hania zamofo naneke*

<sup>1</sup> Hanki Jerusalemi vahete'ene Juda vahete'ma fore'ma haniaza Amosi nemofo Aisaia'ma ava'nagna zampi ke'nea zamofo naneke. <sup>2</sup> Hanki henkama vagareknama esigeno'a Ra Anumzamofo mono noma me'nea agonamo'a, mika agona agateregahie. Ana agonamo'a maka agonaramina agatereno ame'nagame merarigahie. Anama hanige'za maka kokankoka vahe'mo'za agrite zamavune ante'za egahaze. <sup>3</sup> Maka vahe'mo'za e'za amanage eme hu'za hugahaze, Enketa Ra Anumzamofo agonafi vuta, Jekopu Anumzamofona mono noma'afi vanunkeno, Agri avu'avapima vanuna zamofo avu'ava zana rempi huraminigeta, agri avu'avapina vughahune. Na'ankure Saiontira Ra Anumzamofo kasegem'o' nevinkeno, Jerusalemitira Ra Anumzamofo nanekemo'a atiramino vughahie. <sup>4</sup> Hanki kokankokama nemaniza vahe'mo'zama zamarimpama ohe ahema ne-haza zana, zamazeri fru hanige'za fru hu'za manigahaze. Ana nehu'za bainati kazinknozamia rukuta huza mopa rekori azota tro nehu'za, karugru keve zamia ruguta hu'za zafa azankunama nekafriza kazi tro hugahaze. Ana nehu'za hara hu'za zamagra zamagra ohe fri ahe fria osugahaze. <sup>5</sup> Hanki Jekopu nagara enketa Ra Anumzamofo masazampi kana vanune. <sup>6</sup> Hanki Ra Anumzamoka Israeli vaheka'a kamefi huzami'nane. Na'ankure zamagra zage hanati kaziga vahe'mokizmi zamavu'zamava amage nente'za, Filistia vahe'mo'zama nehzaza hu'za fri vahe hankrote za-mentintia nehu'za, meg'i vahe'ene hagerafi'za nemanize. <sup>7</sup> Hanki mopa zamifina silvamo'enе golimo'enena avitege'za, magore hu'za feno zankura atupara osu'naze. Mopa zamifina hosi afutamimo'za hakare hazage'za, karisigura atupara osu'naze. <sup>8</sup> Hanki ana mopazamifina kaza osu havi anumzantamimo avite'ne. E'ina nehu'za zamagra'a zamazanteti'ma tro hu'naza zante zamarena re'za monora huntentaze. <sup>9</sup> E'ina hu'negu va-hetamina Kagra zamazeri fenkami atrege'za, zamagazegu nehanagenka zamagina me'nea vahera mopaфи zamazeri fenkami atro. Ana nehunka Ra Anumzamoka kumizmia atre ozmanto. <sup>10</sup> Hanki tamagra makamota vuta have kampine, mopa kampine ome frakiho. Na'ankure Ra Anumzamo'ma Hihamu Masa'anema esanigetama kesuta koro huta haviza hugahaze. <sup>11</sup> Hanki ana knafina, hazenkema nehu'za ra zamagina eneriza vahera, Ra Anumzamo'a zamazeri fenkami atregahie. Ana nehina Ra Anumzamofo agige'za erisga hugahaze. <sup>12</sup> Hanki ra zamagina eneri'za havi zamavu zamava'ma nehaza vahera, Hankavenentake Ra Anumzamo'a mago kna huhampari zamante'neankino, ana knama esanigeno'a, zamazeri fenkami atregahie. Na'ankure vahe'mo'zama ra zamigima e'neriza zantamina maka eri fenkami atregahie. <sup>13</sup> Ana nehuno za'za huno mareri agatere'nea sida zafaramima Lebanonima me'nea zafaramine, Basani mopaffima ana makama me'nea oki zafaraminena antagi atregahie. <sup>14</sup> Anazanke huno ame'nametegama mareri agatere'nea zaza agonaramine, ne'onse ago-naraminenza zamazeri haviza hugahie. <sup>15</sup> Hanki mani'nezama kuma'ma kegava nehaza za'za nontamine, maka hankave nentake kuma keginanena

ahe fragu vazitregahie. <sup>16</sup> Ana nehuno fenozama erino vano nehia ranra venteramina eri haviza nehuno, maka avasase'ane ne'onse vente raminenamazazeri havizantfa hugahie. <sup>17</sup> Hanki zamagima erisgama nehaza vahera zamazeri fenkami netreno, nagre nagre huno'ma agima erisgama nehia vahera azeri atregahie. Ana hanigeno Ra Anumzamo'a Agrake'za ragia ananknama efore'ma hania zupa erigahie. <sup>18</sup> Ana hanigeno kaza osu havi anumzantamimo'za fanane hugahaze. <sup>19</sup> Hanki Ra Anumzamo'ma mopama eri tore hunaku'ma masanentake hihamu hankave'ane esanige'za, veamo'za koro nehu'za havegampine, muri kampine ome frakigahaze. <sup>20</sup> Hanki ana zupa ana maka vahe'mo'za kaza osu havi anumzantamima silvareti'ene golireti'ma tro'ma huntene'zama mono'ma hunentaza zana, ana maka eri'za kfamozane tampramozama nemaniza havegampi atregahaze. <sup>21</sup> Hanki ana zupa Ra Anumzamo'ma ama mopama eri tore nehuno, vahe'ma zamazeri koro hunaku'ma, masanentake hihamu hankave'anema esanige'za, veamo'za koro fre'za vu'za agonarega havegampine murigampine ome frakigahaze. <sup>22</sup> Hanki mago vahe'mo'a taza hugahie huta antah ozamiho. Na'ankure maka vahera amne vahetfa mani'nazanki'za, inankna hu'za tamagrira tamaza hugahaze?

### 3

#### *Jerusalemi kumate'ene Juda mopare'ma, henkama fore hania zamofo kas-nampa ke hunte'nea nanike*

<sup>1</sup> Hanki menina keho, Jerusalemi kumapine Juda mopafima nemaniza vahe'mo'zama mika'zama eneriza kane, zamaza hu'zama eneriza kana, Ra Anumzana Hankavementake Anumzamo'a rehiza nehuno, bretine tinema eneriza kanena rehiza hugahie. <sup>2</sup> Hanki harafa vahe'tamine, sondia vahetamine, kema refko hu' vahetamine, kasnampa vahetamine, amene vahetamine, rankumapi ranra vahetamine, <sup>3</sup> 50'a sondia vahete kva vahe'tamine, zamage vahetamine, kanisolo vahetamine, maka'zama tro'ma hu antahintahi eri'naza vahetamine, henka fore'ma hania zanku'ma havi kasnampa ke'ma nehaza vahera Ra Anumzamo'a maka zamazeri atregahie. <sup>4</sup> Hanki Ra Anumzamo'a huno, Nagra nehazaverami zamazeri otisuge'za Judane Jerusalemi kumatrentera kva vahe'zamia nemanisage'za, ne'onse mofavre naga'mo'za kegava huzmantegahaze. <sup>5</sup> Hanki vahe'mo'za zamagra zamagra ozeri haviza azeri haviza nehanageno, mago ne'mo'a mago nera ha'renente'na, tava'ozmire'ma nemaniza vahe'mo'za hara orente arente hugahaze. Ana nehanage'za kasefa vahe'mo'za ranra vahet kea antahi'za amagera nontesage'za, zamagi omne vahe'mo'za zamage me'nea vahe'mofo kea antahi ozamigahaze. <sup>6</sup> Hanki ana knafina mago ne'mo'a agra'a nefu nagapi vuno amanage huno nefuna ome asamigahie, Kagra nakre kuka'a ante'hanku kva vahetia mani'enka, amama mani havizama hu'nona knafina, kagra kegava hurantegahane. <sup>7</sup> Hianagi ana ne'mo'a kenona'a amanage huno hugahie, Nagra knara osu'noankina tamaza osugahue. Ana hu'negu nagrikura vahete kva manisanie hutma nazeri oraotih! <sup>8</sup> Hagi Jerusalemi kumamoka tanafa nehanankeno, Juda mopafima me'nea kuma'motanena traka hugahaze. Na'ankure Ra Anumzamofona huhaviza henenteta amagera onte'naze. Ana'ma ha'azamo Ra Anumzamofo hihamu hankave'a eri amnezankna hu'na'e. <sup>9</sup> Hanki tanavugosamo'ma hufore'ma hiana, Sodomu kumate vahem'o'zama hu'nazankna kumi hu'naze. Ana hu'negu mago'a zana eri frara okiho. Na'ankure hazenke zana tamagra'a eri tamavate atre'nazanki

kva hiho. <sup>10</sup> Hanki fatgo avu'avazama nehaza vahera so'e hu'za manigahazanki zamasamiho. Na'ankure eri'zama eri'naza eri'zamofo mizama'a erigahaze. <sup>11</sup> Hianagi kefo zamavu zamava'ma nehaza vahekura, ra hazenkefi manigahazankita tasunku huzmantone. Na'ankure zamagrama hu'naza havi zamavu zamavamofo mizama'a zamagra'a erigahaze. <sup>12</sup> Hanki tamagra Ra Anumzamofo vahe mani'nazanagi, kasefa vahe'mo'za knazana tamamiza tamazeri havizana nehanageno, a'nemo'za tamagrira kegava huramante'naze. Ana nehanage'za kva vahe'mo'za vahenimota tamavre'za kana atre'za havi kampi nevaze. <sup>13</sup> Hanki Ra Anumzamo'a maka kokankoka vahera keaga huzmante'naku keaga refko hu trate oti'ne. <sup>14</sup> Ana zanke huno ugota ranra vahetamine, Agri vahetema kvama hu'naza vahe'enena keaga eme huzmantegahie. Ana vahera e'i tamagra mani'nazankita, Ra Anumzamofo waini hoza eri haviza hu'naze. Ana nehutma zamunte omne vahe'mokizmi fenoza musufa erita, tamagra'a nompi ante avite'naze. <sup>15</sup> Hanki hankavenentake Ra Anumzamo'a amanage huno hu'n, Tamagra nahigeta Nagri vahera knazana zamita zamazeri havizana nehuta, zamunte omne vahera zamazeri haviza nehaze? <sup>16</sup> Hanki Ra Anumzamo'a amanage huno hu'n, Saioni kumate mofanemo'za zamavufaga ata nere'za, zamavufaga ra huza vano nehu'za, zamagazea eri amne hu'za zamavu masavea hu'za vano nehaze. Ana nehu'za zamasenia antesga hu'za vano nehu'za, zamanankena eri fatgo hu'za vano nehu'za, zamagia avozare'ma kama vanoma nehazageno'a, zamagiafima hu'naza avasese zamo'a ankro ankro nehie. <sup>17</sup> E'ina hu'negu Saioni kumate a'nane nagatera, Ra Anumzamo'a namu atresanigeno zamasenifina avitegahie. Ana hina zamasenirera magore huno zamazokara omneta hugahie. <sup>18</sup> Hagi ana knafina Jerusalemi a'nemo'zama knare'nare avasese zama antaninaza zantamima Ra Anumzamo'ma eri atresiana, zamasenire'ma anamaki'naza tvaravegi, zamimizare'ma hu'naza marenkenki, <sup>19</sup> zamagesare'ma renentaza rinigi, zamazampima nehaza asanki, zamavugosare'ma refinetaza tvaravegi, <sup>20</sup> zamagia avu'are'ma ananekiza zantamine, zamazoka'ma eri so'e nehaza zantamine, zamare'nafima ananekizanofiki, zamazonafima ante kareneramiza tavravegi, zamavufagare'ma nefraza masavene, mananentake zantamima nentaza tafene, safezama erineri'za ku'ene, <sup>21</sup> zamazampima nentaniza rinine, zamagonare'ma renentaza rinine, <sup>22</sup> knare nare kukanaramine, kankri tamine, nakre ku'zamine, zamavate kuzmine, <sup>23</sup> kapozamine, zamavate'ma nehaza efeke za'za kukanazamine, zamasenire'ma ananekiza efeke tavravene, zamafunte'ma ruganegiza tavravenena, ana maka Ra Anumzamo'a eri atregahie. <sup>24</sup> Hagi Jerusalemi a'nemo'za ko'ma nehazaza hu'za zamavufagarera mnanentake masavene ofresageno, zamavufagaretira havi mna nevanigeno, ko'ma knare renofi'ma nehaza zana atre'za, amne nofiteti renofira rentegahaze. Ko'ma masave fre'za zamazoka'ma eri neharariza zana osnageno, zamazokamo'a pupusegahie. Hagi ko'ma knare'nare kukanama nentaniza zana nosu'za, zamasunku kukanama antanigahaze. Ana nehanigeno knare'nare zamavugosa tevereti kresageno zamafuhe zamafahe hugahie. <sup>25</sup> Hanki Jerusalemi kumamoka antahio, vene'ne nagaka'a bainati kazinteti zamahe hana nehanage'za, hankave sondia vaheka'a hapinti zamahe hana hugahaze. <sup>26</sup> Ana nehanigeno Jerusalemi kumamofo ran kafaramimo'za anazama negesu'za, tusi zamasunku hu'za zavirategahaze. Ana nehanigeno miika zama'amia eri hana hute'za atrazageno mopafima mania akana Jerusalemi ran kumamo'a hugahie.

**4**

<sup>1</sup> Hanki ana zama fore'ma hania kna zupa, 7ni'a a'nanemo'za mago nera avazu hute'za amanage hu'za asamigahaze, Ne'zana tagra'a erifore huta neneta, kukanatia tagra'a haketa antanigahune. Ana hugahunanki amne ara tavrentegeno tagazema nehia zamo'a amne hino.

*Jerusalemi kuma'mo, zafa zankuna'agna huno ete hagesia zamofo naneke*

<sup>2</sup> Hagi mago kna ne-eankino ana knama efore'ma hanigeno'a, Ra Anumzamo'a hanigeno zafamofo azankunamo'a kasefa agata hageno knare zantfa nehina, ana mopafintira musenkase hu'za knare'nare ne'za hamaregahaze. Hagi ofri'ma mani'nesamo'za anazama negesu'za, tusi zamavufaga atanere'za ra zamagi erigahaze. <sup>3</sup> Hagi ofri'ma Jerusalemi kumapima Saionima mani'naza vahera, kasefa hu'za manigahaze huno Ra Anumzamo'a zamagia ko krente'ne. Ana hu'neanki'za ana vahekura ruotage hu'haze hu'za vahe'mo'za hugahaze. <sup>4</sup> Hagi Ra Anumzamo'a kema refko hu avamu'reti'ene amuho nentake asimu'reti'ene huno Jerusalemi kumapima mani'naza mofanemokizmi kefo avu'avazamia sese hunezman-teno, Jerusalemi kumapima koramoke'ma hu'nea zana sese huno erigrugahie. <sup>5</sup> Hanki ana nehuno Ra Anumzamo'a ferura hampo huntengeno, Saioni agonare'ene ana agonare'ma eme atru hu'za mono'ma hanaza vhahetera eno eme refitegahie. Ana nehuno kenagera Ra Anumzamo'a hunte'nigeno tevene toki'mo'ene remsa nehanigeno, ana agonamofona mago seli nomo rufiteankna huno maka kaziga hanavenentake masamo remsa huno rufite vagaregahie. <sup>6</sup> Ana hina ana hampomo'a mago seli nonkna huno me'neno, Jerusalemi kuma'mofona, zagegnafina re-fite'nenteno ko'mopa ko'ma rania knafina refitengahie.

**5***Waini hozamofonku zagame hunte'nea naneke*

<sup>1</sup> Hanki nagrama nave'masinentoa ne'mofo waini hoza'agu mago zagameria hugahue. Anama navesinentomo'a agona mopafina masavenke huno tretre hu'nefi mago waini hoza ante'ne. <sup>2</sup> Ana ne'mo'a mopa rehankorino haveramina zogi atreteno, anampina knare'nare waini rampa'a hankari'ne. Hagi anama huteno'ana hozafina, mani'neza hozama kegavama hanaza nona kisga huno zare kinte'ne. Ana huteno hozamofa amu'nompina waini rgama regatati'ma hu keria have taga huno tro hunte'ne. Hagi anama huteno mani'neno, knare krepi raga rentenefi huno'ma keana, akake krepi raga rente'ne. <sup>3</sup> Ana'ma higeno'a hoza nafa'amo'a amanage hu'ne, Waini hozani'mo havizana hu'nefi, nagra havizana hu'nofi, Jerusalemi kumapine, Juda mopafima nemaniza vahe'mota refko huta keho. <sup>4</sup> Nagrama waini hoza'nimofoma huntega zana hago hunte'noanki, na'a nagra mago'zana huonte'noe? Knare krepi raga rente'nefi hu'nama ome koana, na'a hu'negenopi agra akake krepi raga rente'ne. <sup>5</sup> Hanki menina ana waini hoza'nimofona na'a huntegahufi tamasamigahue. Ana hozamofa kegina kana eri netre'na, hozamofa have kegina tapage hutresnugen, afizaga gafamo'za ufre'za ana wainia zamagiaretintrantru ahe'za eri havizantfa hugahaze. <sup>6</sup> Ana nehanage'na ana hoza mopa eri haviza ha'nena, ka'makoka fore hugahie. Ana hanugenno mago vahe'mo'e huno mopa rehakorige, krepi nofi'mofo azanku namanku'a rosegara nosanigeno, havi trazamo'ene

ave've tra'zamo'a ana hozafina hageno marerigahie. Ana nehina ham-pomofona huntenugeno, ana hozafina kora ruontegahie. <sup>7</sup> Hanki Israeli vahe'ene Juda vahe'mo'zanena Hankavenentake Ra Anumzamofo waini hozagna hu'za mani'naze. Ana hu'nazageno fatgo huno refko hu avu'avaza hanafi huno zamagripina ke'neanagi, vahe'ma aheno korama eri tagi zamo avinetegeno, fatgo avu'avaza hanafi huno'ma ke'neanagi, vahe'ma zamahe friza krafagege antahi'ne.

*Havi zamatu'zmava nehaza vahe'mokizmi koro ke huzmante'nea naneke*

<sup>8</sup> Hanki hazenkefi manigahazanki antahihi, ko'ma nompima mani'naza vahe'ma zamahenati netreta nozamima mizaseta enerita, ko'ma hozama ante'naza mopama mizaseta zamahenati netraza vahe'mota maka vahe'mo'za tamatre'za fresageta ana mopafina tamagrake manigahaze. <sup>9</sup> Hianagi nagra nentahugenno hankavenentake Ra Anumzamo'a amanage huno huvempa kea hu'ne. Tamagerfa huno ama ana knare'nare ranra nontamimo'a havizantfa hina, mago vahe'mo'e huno ana nontamimpina omanitfa hugahie. <sup>10</sup> Hagi rama'a waini hoza antesazanagi, osi'a raga rentena tagita regatata hugahaze. Ana nehina 10ni'a kupinti fraguvazita witi avimzana hankregahaze. Hianagi vasagesazana magoke kuke eririgahaze. <sup>11</sup> Hagi nanterampima otita aka tima nenaza vahe'motane, kinagama aka tima nenazageno'ma vuno kenege'ma nesegeta neginagima nehaza vahe'mota hazenke erigahaze. <sup>12</sup> Hagi ana vahe'mo'za wainine aka tine ne'zanema kre'za nene'za musenkasema hazafina, lailiema nehaza zavenane hapu zavenane nasenasepane konkene nere'za musena nehaze. Hianagi zamagra Ra Anumzamofo avu'ava zanku'ene, azampinti'ma tro'ma hu'nea zanena nege'za agrira antahi nomize. <sup>13</sup> E'ina hu'negu Ra Anumzamo'a huno, Tamagerfa hu'za nagri vahe'mo'za nagrira antahi amara osazagu, ha' vahe'zamimo'za eme zamavare'za ru moparega ome kina huzmantegahaze. Hagi zamagima me'nea vahe'zamimo'za ne'zanku nefrisage'za, vea kevumo'za tinkura havizantfa hugahaze. <sup>14</sup> Hagi Jerusalemi kumapima mani'naza kva vahe'ene, vea kevumota aka tima neneta musenkasema nehuta, tamagima erisgama nehaza vahe'ma tamasgahu nakrinakura, fri vahe kerimo'a razampi agira eri aka nehie. <sup>15</sup> Ana nehuno mika vhahera zamazeri fenkami tregahie. Hagi zamagima me'nea vhahera zamazeri fenkami netreno, zamavufaga rama nehaza vhahera zamazeri fenkami atregahie. <sup>16</sup> Hianagi fatgoma huno refko'ma hu avu'ava zama'agu hu'za hankavenentake Ra Anumzamofona agi'a erisga nehanageno, ruotage'ma hu'nea Ra Anumzamo'a ruotage hu'noe huno fatgo avu'ava zana zamaveri hugahie. <sup>17</sup> Hagi ana knafina sipisipi afumoza knare trazana hake'za nene'nageno, afovage sipisipine agaho meme afumo'zanena havizama hu'nea kumapina vano nehu'za trazana negahaze. <sup>18</sup> Hagi havigema hu avu'ava zanu'ma kumima renteta avazuma huta nevaza vahe'mota, tamagra ra hazenke erita havizantfa hugahaze. <sup>19</sup> Hagi tamagra amanage nehaze, Israeli vahete'ma ruotage'ma hu'nea Anumzamo'ma eri'zama eri'naku'ma nehiana ame huno erisigeta negesunkeno, antahintahi'ama retromta hu'nea zana ame huno eri fore hanigeta tagra'a tavufinti ke'nune hutma nehaze. <sup>20</sup> Hagi tamagra kefo zanku'ma knare zane nehutma, knare zanku'ma kefo zane nehutma, haninkuma masae nehutma, masagu'ma hanine nehutma, aka zankuma haga zane nehutma, haga zanku'ma aka zanema nehaza vhahera hazenke erigahaze. <sup>21</sup> Hagi tamagra hutma, knare antahintahi eri'neta

mago'a vaher'a zamagate re'nonema hutama nehaza vahera hazenke erigahaze. <sup>22</sup> Hagi aka tima ne'zante'ene, aka tima eri haviamu hu' zante'ma uagotama nehaza vahera, tamagra hazenke erigahaze. <sup>23</sup> Hagi nanekema refko'ma hu' zupa, hazenke'ma hu'naza vahem'o'za masave hu'za zagoa tamizageta, zamatrazag'e'za fru hu'za nevazageta, hazenkezmima omne'nea vahem'ofo kea refko hutma keso'e osuta kna nezamize. <sup>24</sup> E'ina hu'negu, hagagema hu'nea trazama tevemo tefanane hiaza huno ana maka te fanana hanige'za, zafamofo rafu'namo hagage higeno ani'namo harari huneramigeno, flaua'ma renteana zaho'mo eripopo htureaza hugahaze. Na'ankure Israeli vahete'ma ruotage'ma huno hankavenentake'ma hu'nea Ra Anumzamofo kasegea amagera onte'nazagu anara hugahaze. <sup>25</sup> E'ina hu'negu Ra Anumzamo'a agri'a vahera rimpa ahenezmanteno azana rusuteno zamazeri haviza nehie. Hagi azana rusuteno agonaramina eri tore'vare nehuno, vahera zamahe frigeno, fri vahe zamavufagamo'a kumapima me'nea ne'onse kantamimpina amne zankna huno avite'ne. Ra Anumzamo'a agra ana hu'neanagi rimpa ahe'zamo'a frua osu'negeno azana erisga huteno mani'ne. <sup>26</sup> Hagi Ra Anumzamo'a mago avameza erisga hanige'za kokankoka vahem'o'za eme atru nehanageno, mopama ome atretegama mani'naza vahera hoge hanige'za tragiza egahaze. <sup>27</sup> Hanki ana vahera hankavenentake vaheki'za mago zamimo'e huno avesragura nosanigeno, mago'mo'a trakara huno nomasenigeno, mago zamimo'e hunora avutokora huno nomasenigeno, magomofo amu' nofimo'a krekoru nosanigeno ina, zamagia nomofo nofim'o'a magore huno akamprura osugahie. <sup>28</sup> Ana vahem'okizmi kevemofo agona'amo'a roro hu'nege'za, ati zami'a erigri krarape'za keve ahe'are tro hu'za mani'naze. Hagi hosi afuzamimofo agiamo'a hankavenentake havegna higeno, karisimofo wilimo'a kagikagi zahomo'ma ame'ma huno kagiankna huno kagigagi hu'ne. <sup>29</sup> Hagi laionimo krafama huno'ma eaza hu'za neageno, mago kasefa laionimo mago zaga azampi azeriteno, avazu huno fregeno mago vahem'o'ma agu'ma ovaziankna huza krafa hu'za egahaze. <sup>30</sup> Hanki anama ha'ma eri'za esaza zupa, ana vahem'o'zama krafama hu'za esaza krafa kemo'a hagerimo havere eme rupokraseteno, sasa huno eramiazza nehanige'za egahaze. Hagi vahem'o'ma kegamateno ama mopafima kesniana, kumamo'a havizantfa hina, hanizamo refite'nesnigeno kegahaze. Ana nehanigeno zagemofona hampomo avuga rufitesnigeno remsa osuno hanintiri hugahie.

## 6

### *Kasnampa ne'Aisaia'ma ava'nagna zama ke'nea naneke*

<sup>1</sup> Hagi kini ne' Uzia'ma fria kafufina, Ra Anumzamo'a kini tra'are on-agamu manisga huno mani'nege'na, mago avana gna zana ke'noe. Ana hu'negeno zaza kukena'amo'a ra mono nompina ruvit'e'nege'na ke'no'e.

<sup>2</sup> Hagi Anumzamofona anaga kaziga, serafimie nehaza ankeromo'za oti kagiza mani'nazage'na ke'noe. Ana ankeromokizmia 6si'a zamageko'na huzmantetere hu'nege'na zamage'noe. Hagi tare zamageko'naretira zamavugosa rufi'nete'za, tare zamageko'naretira zamagia refine'te'za, tare zamageko'naretira ru tafratafra hu'za hare'za vano hu'naze. <sup>3</sup> Hanki ana ankeromo'za ranke hu'za Hankavenentake Ra Anumzamo'a ruotage hu'ne, ruotage hu'ne, ruotage hu'ne hu'za nehu'za, agri hihamu masa'amo'a ama

mopafina avitene hu'za hu'naze. <sup>4</sup> Hagi ana ankeromo'zama ra zammeru'ma raza zamagasasamo higeno, ra mono nomofo kafa zafamofo tra'amo'a tore tore nehigeno, noma azeri oti'naza have ramimo'enena tore'vare nehigeno, ra mono nompina tokim'o avite'ne. <sup>5</sup> Hanki anama nehige'na nagra hu'na, hago hazenkefi mani'noe hu'na nentahina amanage hu'na hu'noe, Tamagerfa hu'na nagra menina haviza hugahue. Na'ankure maka zupa nagipina havi keagamo avite'nea ne' mani'ne'na, havi keagamo zamagipi avite'nea vahe amu'nompi mani'noe. E'ina hu'neanagi nagra navufinti Kini Nera Hankavenentake Ra Anumzana negoe. <sup>6</sup> Hagi anante mago ankeromo'a ofama hu itareti, teve nerea tankanu'za tuzareti hampageno erino nagritega hareno e'ne. <sup>7</sup> Hanki ana ankeromo'a ana tankanu'za nagitera eme nenteno, amanage huno hu'ne, Ko, ama tankanu'za kagite'ma antogeno kumika'a eri atreankinka agru hunka manigahane hu'ne.

### *Anumzamo'ma Aisaiama eri'zanke'ma hunte'nea naneke*

<sup>8</sup> Hanki anama hutege'na Ra Anumzamofo ageru antahugenno amanage huno hu'ne, iza huntegahue? Iza Tagri nanekea erino vugahie? Anagema hige'na amanage hu'na hu'noe, Nagra ama mani'noanki, nagri hunantege'na va'neno hu'na hu'noe. <sup>9</sup> Hagi anante Ra Anumzamo'a amanage huno hu'ne, kagra vunka vea nagara amanage hunka ome zamasamio, maka kna kea antahagahanagagi, antahi amara osugahaze. Maka kna tamavua kegahazanagi, ke'amara osugahaze. <sup>10</sup> Hagi menina ana vahe zamagu'a eri hankavenetinka, zamagesa erinkaninerenka, zamavua eri asu huo. Hanki anama osnanke'za zamavua ke so'e nehu'za, zamagesa antahini nehu'za, zamagu'ama rukrahe'ma hu'za Nagrite'ma esnage'na zamazeri kanamaregahue. <sup>11</sup> Higena Ra Anumzamoka nama'a knafi ama ana zamo'a meno vugahie hu'na antahige'noe. Anage hugeno kenona huno, Ama ana zamo'a me'nesnigeno, maka ranra kumatamimo'a haviza huvagaresnigeno, ana kumatamimpina vhahera omanitfa hanageno, nontamimpina vhahera omanitfa hanigeno, maka hoza zamifina magore huno ne'zana omnetfa hugahue. <sup>12</sup> Nagra Ra Anumzamo'na mopazamifintira zamavare atresuge'za afete moperega umanigahaze. Ana hanugenno mopazamifina vhahera omanisnageno, mopazamimo'a ka'ma koka megahie. <sup>13</sup> Hagi ana'ma hutesnige'za 10ni'a nagapima mago naga'ma manisaza naga'mo'zanena havizantfa hugahaze. Hianagi terebinti zafane, oki zafama antagitazageno agafa'ama tevemo'ma tetegenom'a agafa'a me'nefintima Nagrama huhampri'noa vahe'mo'za ruotage vahe'nia ete hage'za efore hugahaze.

## 7

### *Jerusalemi vahe'ma ha'ma eme huzmante'naza zamofo naneke*

<sup>1</sup> Hanki Uzia negeho, Jotamu nemofo Ahasi'ma Juda vahe kinima mani'nea knafina, Siria kini ne' Resini'ene, Israeli kini ne' Remalia nemofo Pekakea, marerike Jerusalemi kumate vhahera hara eme huzmante'na'e. Hianagi zanagra hara huzamagate ore'na'e. <sup>2</sup> Hanki Siria kini ne'mo'ma Efraemi naga'enema eri mago'ma hia nanekema, Deviti naga'mo'zama nentahiza antri nehazageno, zahomo zafa eri toretore hiankna hu'za zamahirahiku hu'naze. <sup>3</sup> Hanki anante Ra Anumzamo'a amanage huno Aisaiana asami'ne, kagrane negamofo ne' Siar-Jasubu'enena\* atiramita

\* <sup>7:3</sup> Siar-Jasubu'ema hu'neana agafa'a, osi'ama ofri mani'naza naga'mo'za ete egahaze hu'ne.

vuta, tiru'ma henkanite'za Jerusalemi kumapima tima avre'za erami'naza tinkante vutetna, kukanama sese'ma nehaza kante kini ne' Ahasina ome ke'o. <sup>4</sup> Hanki ome kenunka amanage hunka asamio, kagra kva hu'enka karimpa frune nemaninka korora osuo. Siria kini ne' Resenine, Jerusalemi kini ne' Peka kazinigura antahintahi hakarea osuo. Zanagri zanarimpa ahe'zamo'a tevemo'ma tegege vazigeno kumoke'ma nehiaza huno amne zankna hugahie. <sup>5</sup> Na'ankure Siria vahe'mo'zane, Efraemi naga'mo'zane, Remalia mofavre naga'mozanena, amanage hu'za kagri'ma kazeri havizama hanaza nankeea anaki'naze. <sup>6</sup> Tagra Juda mopafi vuta kumate marerita va-hera zamazeri koro nehuta, hahu zamagatereta mopazamia e'nerita, Tabeli nemofona azeri otita huhamprintesnunkeno, Juda vahe kinia manigahie hu'za hu'naze. <sup>7</sup> Hianagi Nagra hankavenentake Ra Anumzamo'na amanage hu'na nehue, anazamo'a forera huno eamara osugahie. <sup>8</sup> Na'ankure Siria mopamofo ugota ran kumara Damaskasi kuma megeno, kini ne' Reseni'a Damaskasi kumapinke mani'neno kegava hu'ne. Higeno Israeli mopamofo rankumara Samaria me'ne. Hianagi 65'a kafua agateore'nesnigeno, Israeli mopamo'a havizantfa hugahie. Hanki Ahasi'ene eri'za naga'amo'za Nagri ke'ma ontahisazana, zamazeri haviza hutregahaze. <sup>9</sup> Hagi Efraemi nagamokizmi ugota rankumazamia Sameria me'ne. E'ina higeno Same-ria kuma'ma kegavama hu'neana, Remalia nemofo kegava hu'ne. Hanki kamentintifima kagrama oti hankavema otisnanana, kagra oti hankavea otigahane.

*Anumzamo'ma tagrane mani'ne hu'zama keama'ma hanaza avame zamofo naneke*

<sup>10</sup> Hanki mago'ene Ra Anumzamo'a Ahasinkura amanage huno asami'ne, <sup>11</sup> Ra Anumzana kagri Anumzamo'ma mani'nema hunka hanunka mago amuhoma hu'enya avame zanku antahigegeno, amefenkame fri vahe kumapintiro, ame nagame monafintira avame'zana erifore hanigenka ko. <sup>12</sup> Hianagi Ahasi'a kenona amanage hu'ne, nagra Ra Anumzamo-fona e'inahura hu'na antahinege'na, Agri hankave'a rehe'na onkegahue. <sup>13</sup> Higeno Aisaia'a kenona'a amanage hu'ne, Deviti naga nofimota tamagesa anteta antahiko. Nagrama fruma huramante'na manua zankura renaheta negeta, Ra Anumzamo'ma anazanke huno arimpia fru huramante vava huno vugahie hutma tamagesa nentahita, antahigesageno'ma avame'zama eri fore'ma hanigeta kesaza zankura antahi'nogaze. <sup>14</sup> E'ina hu'negu Ra Anumzamo'a Agra'a mago avame'zana tamaveri hugahie. Ana avamezamo'a amanahu hugahie, mago vene omsenesnia mofa'mo amu'ene huno mago ne' mofavre anteno,<sup>†</sup> Imanueli'e huno agi'a antemigahie. <sup>15</sup> Hagi ana mofavremo'ma nenama huno e'i havi zanki knare zankima huno ke'ama'ma hania knafina, bulimakaomofone, sipisipi afu'mofo amir-inteti tro hu'naza ne'za sisi neneno, tumerine negahie. <sup>16</sup> Hagi ana mofavremo'ma e'i havi zanki knare zankima huno keama'ma osu'nesnia knafina, kagra Ahasigama koro'ma hunezanantana kini netremokizni mopamo'a havizantfa huno mago'zana omanetfa hugahie. <sup>17</sup> Hianagi kagrite'ene, veaka'are'ene, kagri naganofitera, Ra Anumzamo'a mago knaza atrenigeno egahie. Hagi ana knazana, ko'ma Efraemi naga'mozama Juda naga'ma zamatre'za zamagrugu'ma mani'naza knareti'ma eno meninte'ma egeno'a, fore osu'neankna knaza fore hugahie. Anama hanigeno'a, Ra

<sup>†</sup> 7:14 Imanueli'ema hu'nea agafa'a, Anumzamo'a tagrane mani'ne huno hu'ne.

Anumzamo'a Asiria kini ne' avreno Juda mopafina egahie. <sup>18</sup> Hagi ana knama esanigeno'a, Ra Anumzamo'a hoge hanige'za, kosimo'za hazaza hu'za sauti kaziga tinnenaregama nemaniza Isipi sondia vahe'mo'za vazintagu hu'za ne-esage'za, tumemo'za nehazaza hu'za Asiria sondia vahe'mo'za ruherafi'za egahaze. <sup>19</sup> Anama hanige'za ana maka Juda mopafine, krahopine, agona mopafine, have kampine, knare trazama me'nesnia mopafine, ave'ave trazama me'nesnia mopafine, tinkerifinena emani avitegahaze. <sup>20</sup> Hagi ana knafina Ra Anumzamo'a Yufretisi rantimofo kantu kazigati, eri'za vahe'a Asiria kini nera miza huntensigeno resa kazina erino eno, tamaseni tamazoka'ene tamagi tamazoka'ene tamavufga tamazokara vazagate atregahie. <sup>21</sup> Hagi ana knafina ha' vahe'mo'za afu krazamia zamahe hana hugahaze. Hianagi mago mago vahe'mo'a mago anenta bulimakaone tare meme afu antetere hugahie. <sup>22</sup> Hanki zamagra rama'a amirima zamisaretira, sisiema nehaza ne'zama eri kragefenesaza ne'za negahaze. Hagi ana mopafima osi'a naga'ma manisamo'za sisi ne'zane tumerinena me'nesige'za negahaze. <sup>23</sup> Hanki ana knafina 1tauseni'a waini zafa me'nenige'za 1tauseni'a silva zago (sekels) enerisaza waini hozafinagi, ave'ave trazamo'ene trazamo'enena hageno marerino eri haviza hugahie. <sup>24</sup> Ana hanigeno ana hozafima vuku'ma hania vahe'mo'za ati kevene eri'neno vugahie. Na'ankure ana maka mopafina ave'ave trazamo hageno refite vagaregahie. <sup>25</sup> Hagi osi agona ramimpima, ko'ma hozama hankorita anteta nevazafinagi, anampina ave'ave trazamoke avite'nenigetma koro hutma ovugahaze. Ana nehutma ana hoza atre'nage'za bulimakaone memene sipisipi afutamimo'za anampina vano nehu'za trazana negahaze.

## 8

*Ra Anumzamo Asiria vahe'ma zamaza hanige'za, Israeli vahe'ma zamazeri haviza hanaza naneke*

<sup>1</sup> Hagi anante Ra Anumzamo'a amanage huno nasami'ne, Kagra ra avontafe eritenka, ana avontafepina avo zotareti amatfama hu'are ranra avompinti, Maher-Salal-Has-Bazie hunka krento. \* <sup>2</sup> Hagi ana avoma negrana nanekenema eme ketekе huama'ma hana'a netre'na, pristi ne' Uriane, Jeberekia nemofo Zekaraiakizini huznantanena emani'neke kegaha'e. <sup>3</sup> Hagi anankema huteg'e'na a' ni'amo'a kasnampa a'kina agrane umasogeno amu'ene huno ne' mofavre kasente'ne. Ana higeno Ra Anumzamo'a amanage huno nasami'ne, Ana mofavremofona Maher-Salal-Has-Bazi'e hunka agi'a antemio hu'ne. <sup>4</sup> Na'ankure ana mofavremo'a nena huno nenfage nenrerage huno kea osu'nesnigeno, Damaskasi kuma'ene Sameria kumapinti fenozana, Asiria kini ne'mo ha' eme huzamagatereno ana maka erino mopa'rega vugahie. <sup>5</sup> Hagi mago'ene Ra Anumzamo'a amanage huno nasami'ne, <sup>6</sup> Siloa timo'ma akoheno fru huno'ma eneviaza hu'na Nagra Ra Anumzamo'na ama vhahera fru huzmante'na neoanagi, zamagra anazana ke amara osu'za zamefi hunenami'za kini ne' Resinine Remalia nemofo Israeli kini ne'enena razampi antahi musena huznante'naze. <sup>7</sup> E'ina hu'negu tamagerfa hu'na, Nagra Ra Anumzamo'na Asiria kini nera hunte'nugeno, Yufretisi rantimo'ma tusi ti hageno ne-eno ana maka'zama refite vagareaza huno, rama'a sondia vahe'anen eno hara eme huzmantegahie. <sup>8</sup> Hagi timo hageno ne-eno vahe'ma eme azeri anakrigeno anankempi eme atreaza

\* <sup>8:1</sup> Ame hunka rohu omerenka maka fenozama'a erinka vuo huno hu'ne.

huno, ana maka Juda mopafina ha' vahe'moke'za mani avitegahie huno hu'ne. Ana hu'neanagi [Imanueli] Ra Anumzamo'a tagrane mani'neankino, Agra agekona rutareno mopatamia refiteno kegava hugahie.<sup>9</sup> Hagi ha' vahe tima tva'onte'ene afete'enema mani'naza vahe'mota tamagesa anteta antahiho, tamagra sondia vahetamia eri tru hutma hara eme hurantegahaze. Hianagi kasamreta hara osnage'za, tamagrira tamahe'za rehapatitregahaze.<sup>10</sup> Tamagra atru hutma e'ina hugahune hutma kea anakigahaze. Hianagi ana nanekemo'a nena'a fore osuno, amne zankna hugahie. Na'ankure Ra Anumzamo'a tagrane mani'ne.

### *Ra Anumzamofo koro'ma hunte'zamofo naneke*

<sup>11</sup> Hagi Ra Anumzamo'a hankavenentake azanuti nagofetu nenteno koro ke hunanteno, kagra ama vahe'mokizmi zamavu zamavara amagera onto huno huhankevetino nehuno, amanage hu'ne. <sup>12</sup> Ama vahe'mo'za hu'za, mago'a vahe'mo'zama Juda vahe'ma zamazeri haviza hunaku ke ananekizema hu'zama hanaza nanekegura, tamage huta korora osiho. Ana nehuta zamagrama koro'ma nehazaza huta, koro'ma hanaza zanteria tamagra korera osiho. <sup>13</sup> Hianagi hanavenentake Ra Anumzamo'a huno, zamagrama keta antahitama hanazana Nagrikura ruotage hu'nea Ra Anumzana mani'ne hutma nentahita, Nagrikuke korora hoho. <sup>14</sup> Ana hu'neanki'na Nagra fra'maki havega mani'ne'na, Israeline Juda vahetera ra kampi mago tanafa'ma hu'za masesaza havevna hu'na mani'nesnuge'za, maka vahe'mo'za tanafa hu'za masegahaze. Ana nehu'na Jerusalemi kumapima mani'naza Israeli vahetera kukone krifumo zamazeriankna hu'na kama vanoma hanafina manigahue. <sup>15</sup> Hagi ana hu'nesnuge'za maka vahe'mo'za ana have agofetu tanafa hu'za masesage'za zamazeriza kina rezmantegahaze. <sup>16</sup> Hagi nagra Aisaia'na, Ra Anumzamo'ma nanekema nasamige'nama krentoa avontafera erigte'na, ana agofetura nazanko avona antete'na namage'ma [disaiopol] nentaza nagara zami'noe. <sup>17</sup> Hagi nagra Israeli vahe'ma amefima huzami'nea Ra Anumzamofonku avega ante'na mani'nena agrite amuhara hugahie. <sup>18</sup> Saioni agonafima nemania Hankavenentake Ra Anumzamo, nagranema amama mani'naza mofavreramina nami'ne. E'ina hu'neankino tagri'ma tatregetama mani'nonana, Israeli vahete'ma henkama erifore'ma hania zantamimofonte mago avame'zankna huta menina mani'none. <sup>19</sup> Hanki mago'a vahe'mo'za tamagrirkura hu'za, sumisumi'ma nehu'za fri vahe hankro'enema keagama nehaza vahete vuta antahintahi ome eriho hu'zama nehzana, inankna huno fri'nenia vahe'mo'a kasefa'ma huno mani'nea vahera antahintahia amigahie? Na'a hunege'za vahe'mo'za Anumzamofontega nunamuna hu'za antahia nonkaze? <sup>20</sup> Vahe'mo'zama keagama hanafima, Anumzamofo kasegene trakemo'ma hu'nenia kante'ma ante'zama keagama osnazana, e'i ana vahe'mo'za hanizampi mani'naze. <sup>21</sup> Tusi zamata negrina zamagakura nehanage'za, kokankoka ama mopafina vano vano hugahaze. Zamagazamo'ma tusizama hanige'za, eri zamarimpahae'za, kini zamimofone Anumza zamimofona huhaviza hugahaze. Ana nehu'za monafi zamavua ke nagamutegahaze. <sup>22</sup> Ana nehu'za mopafima kesnazana hazenke zamo'ene, atazamoke meni'geno korozamo zamazeri antrako hugahie. Ana hanigeno ana knazamo zamaretufeno hanizampi ome zamatreghahie.

<sup>1</sup> Hianagi knazampine hanizampima nemaniza vahe'mo'za mago'enena zamata gura osugahaze. Hagi Naftaline Zebuluni mopafima nemaniza vahera, korapara Ra Anumzamo'a zamazeri fenkami atrege'za zamagazegu hu'naze. Hianagi henkama esania knafina, Galili kumara megi'a vahe ku'ma me'neanagi, Ra Anumzamo'a ragi amigahie. Ana hanige'za Jodani timofo kantu kazigama nemaniza vahe'ene, Mediterenia ra hagerimofo ankenaregama evu'nea rankamofo tavaonte'ma nemaniza vahe'mokizminena zamagesga hugahaze. Ana hanage'za knazama eneriza zamo'a vagaresige'za fru hu'za manigahaze. <sup>2</sup> Hagi hanimpima nemaniza vahe'mo'za tusi'a masa kegahaze. Tusi'a hani zamo'ma refitege'zama nemaniza mopafi vahe'mokizmia, masazamo remsa huzmante-gahie. <sup>3</sup> Ra Anumzamoka Israeli vahera zamazeri rama'a nehunka, rama'a museza antevite zamantegahane. Ana nehanke'za hozafinti ne'zama nehamare'za muse nehzankna hu'za musena nehu'za, hapinti'ma rohure'za fenozama e'neriza musema nehzankna muse kagri kavuga hugahaze. <sup>4</sup> Na'ankure bulimakao afumofo anankempi kare'namare zafama nentaza zafagna hu'za kinama huzmante'neza knama nezami'za vahera, Midieni vahe'ma hu'nanaza hunka knama zamiza zamazeri haviza nehaza vahera zamahe pasaru nehunka, knazama nezamiza zama eri atrenka zamagu'ma vazi'nana zanku anara hugahaze. <sup>5</sup> Ana nehunka maka hankave sondia vahe'mo'zama hapima antani'nezama ha'ma hu'naza zamaga none, korapima ante'za regazari'naza kukenanena tevefi hanavazinka kres-nankeno tevemo te fanene hugahie. <sup>6</sup> Na'ankure tagriku huno mago mofavrea tamigahankino, ana mofavrema efore'ma hanigeno'a, agri afunte kamania me'nenkeno kegava hugahie. Ana hu'neankino agima ahesnazana, Knare zantfa huno Antahintahi tamisia nere nehu'za, Hankavenentake Anumzane nehu'za, Manivava Nafatia nehu'za, Tarimpa fruzamofo Kinie hu'za hugahaze. <sup>7</sup> Hagi Agri hankavemo'a vagaore mevava hanigeno, ha'ma hu'zana omanetfa hugahie. Ana nehuno kini ne' Deviti no erino kinia mani'neno, Deviti'ma kegava hu'nea kumatamina kegava hugahie. Hagi ana knareti'ma agafama huteno'ma vuvavama hanigeno'a, fatgo avu'ava zanteti'ene knare'ma huno refko'ma hu avu'ava zanteti, agra kamania hugahie. Hagi Hankavenentake Ra Anumzamo'a vahe'amo'zama knare hu'za manisnazegu, hankave antahintahi hu'neankino, ama ana zantamina eri fore huvagaregahie.

### *Ra Anumzamo'ma Israeli vahe zamazeri haviza hania zamofo naneke*

<sup>8</sup> Hagi Jekopumpinti'ma fore'ma hu'naza vahera Israeli vahete'ma knazama atre'nigeno esania zanku Ra Anumzamo'a koro ke huzmante'ne. <sup>9</sup> Hagi ana maka Efraemi naga'ene Sameria rankumate'enema nemaniza vahe'mo'za, ana zamofona ko antahi'naze. Hianagi zamagrira zamarimpamo'a hankavenetige'za zamavufaga erisga nehu'za amanage hu'naze. <sup>10</sup> Brikireti'ma kinona nontamina ru fragu vazitre'nazanagi, tagra havea kasefa taga huta nontia negita, sikamo fiki zafaramima antagi'naza nontera, eteta sida zafa hankregahune. <sup>11</sup> Hu'neanagi Israeli vahe'mokizmi ha' vahe Resinima ha'ma renentaza vahe Ra Anumzamo'a azeri otisigeno hara Israeli vahera eme huzmantegahie. <sup>12</sup> Hanki Anumzamo'a zage hanati kazigatira Siria (Aramia) vahe hunezmanteno, zage fre kazigatira Filistia vahe huzmantesnige'za e'za Israeli vahera eme hara huzmagateregahaze. Ama anazana forera hugahianagi Anumzamofo rimpa ahe'zamo'a Israeli vahetera me'nesnigeno, azana rusuteno zamazeri haviza huvava

huno vugahie. <sup>13</sup> Hianagi monafi hankavenentake sondia vahe'mofo Ra Anumzamo'ma zamazeri havizama hu'nea zankura, zamagesa nentahiza agritera ete'za zamagu'a rukrahera hu'za ome'naze. <sup>14</sup> E'na hu'negu magoke knafinke'za Ra Anumzamo'a Israeli vhahera zamasenine zamarisonanena runekafrino, magoke knafinke'za tofe ani'na rukafrino nompintima nehagea varozana rukafri atregahie. <sup>15</sup> Hanki zamagima me'nea vahe'ene, ranra vahe'mo'za e'i ana zamasenia manizageno, kruna kasnampa kema nehaza vahe'mo'za e'i ana zamarisona mani'naze. <sup>16</sup> Hagi ugota huzmante'neza kegavama huzmante'naza vahe'mo'za zamavare'za havi kampi vazage'za, anama zamavariri'za nevaza vahe'mo'za kana atre'za hazagre'naze. <sup>17</sup> E'na hu'neankino Ra Anumzamo'a nehazave raminkura musena hunozmanteno, megusa mofavre naga'ene kento a'nenena asuragi ozmantegahie. Na'ankure maka vahe'mo'za neginagi nanekege nehu'za, Anumzamofona avu'avara amagera nonte'za havi zamavu'zamava hu'naze. E'na rimp ahe'zamo'a vagaoresnigeno, azana erisga huno rusuteteno manigahie. <sup>18</sup> Tamagerfa huno veamokizmi kefo zamavu zamava'mo'a mago afe teve nereno, zafa tanopane avo'no traza neregeno toki'mo vemagu vemagu huno ame'nagame mareneriaza nehie. <sup>19</sup> Hankavenentake Ra Anumzamofona tusi arimpa aheankino, ama mopafi maka vahetamina zamazeri haviza hanige'za, tevemofo ne'za segahaze. Anama hanigeno'a mago'mo'e huno mago'mofona aza osugahie. <sup>20</sup> Ana nehu'za tamaga kazigane hoga kazigama nemanisaza vhahera zamahe'za negahazanagi zamura osanige'za zamagra'a mofavre zamahe'za negahaze. <sup>21</sup> Manase naga'mo'za Efraemi nagara zamahe'za nesageno, Efraemi naga'mo'za Manase nagara zamahe'za negahaze. Anama huteke eri mago'ma hana'ana, Juda nagamokizmia hahu zamantegaha'e. Anumzamo'a ama anazana atrenigeno zamagrriteria egahianagi, Agri rimp ahe'zamo'a vaga oresanigeno, azana erisga huno rusuteteno manigahie.

## 10

### *Anumzamo'ma Asiria vahe'ma huzmantesige'zama ha'ma eme hanaza naneke*

<sup>1</sup> Tamagra izagato keagafima vahe'ma zamazeri savri nehuta havigema huta kasegema tro'ma hu vavama nehaza vahe'mota ko hazenkefi mani'naze. <sup>2</sup> Anama hazazamo higeta zamunte omne vahe'ene, feno zanku'ma atupa'ma nehaza vhahera fatgo tamavu'tamavara huozmanteta fenozmia zamazeri savri huta e'nerita, kento a'nanemofo zana frakineta rerakaureta e'nerita, megusa mofavre'ramimofo zantamina musufa e'nerize. <sup>3</sup> Hanki tamagrama hu'naza avu'avazante'ma Anumzamo'ma knazama tamisia zupa tamagra na'a hugahaze? Tamagri'ma zamazeri havizama hu knazama afeteti'ma ne-esnigetma, tamagra izante tamaza hinogura nevuta, feno zantamina izante atresnageno kegava hugahie? <sup>4</sup> Hagi mago'zana omnetfa hanigeta kinama huzmante'nesaza vahe amu'nompi harononte huta manige, fri vahe amu'nompi frita manige hugahaze. E'na hu'zana hugahazanagi Agri rimp ahe'zamo'a me'nenigeno azana erisga huno rusuteteno manigahie.

### *Ra Anumzamo'ma Asiria mopa eri haviza hania naneke*

<sup>5</sup> Ra Anumzamo'a amanage huno hu'ne, Asiria vahe'ma Nagri kumpa knonknama hu'nazage'na tamagripima huvazina narimpa ahe'zama eri amama nehua vhahera hazenkefi mani'naze. <sup>6</sup> Asiria vahe huntessnigeno

Anumzamofoma amage'ma nonte'za agri'ma azeri arimpama nehaza va-hera hara eme hunezmanteno, feno zazamia zamaheno nehanareno ana va-hera kampi hapakna huno agianu zamare hapatigahie. <sup>7</sup> Hianagi Asiria kini ne'mo'a Anumzamo hunantegena ama eri'zana e'nerue huno ontahigahie. Agra agesama antahiana maka vhahera hara huzmante'na zamahe fanane hanue huno anara hu'ne. <sup>8</sup> Hagi Asiria kini ne'mo'a huno, sondia vhahete'ma ugagotama hu'naza vahenimoza kinia manigahaze hu'ne. <sup>9</sup> Hagi Kalno kuma'ma hu'noaza hu'na Kakemisi kumara eri haviza nehu'na, Hamati kuma'ma hu'noaza hu'na, Arpatia kumara erihaviza nehu'na, Sameria kuma'ma hu'noaza hu'na, Damaskasi kumara eri haviza hu'noe. <sup>10</sup> Hanki Jerusalemine Sameria kumate'ma havi anumzantamimofo amema'ama me'neana agatereno rama'a havi anumzantamimofo amema'a me'nea kumatamina eri haviza hu'noe. <sup>11</sup> Hanki Sameria kuma'ene anampima me'nea havi anumzantamimofo amema'araminena eri havizama hu'noaza hu'na, Jerusalemi kuma'ene anampima me'nea havi anumzantamimofo amema'a eri haviza hugahue. <sup>12</sup> Hagi Nagra Ra Anumzamo'nama ana maka'zama huoma hu'nama hunte'noa zama Saioni agonare'ene Jerusalemi kumate'ma huvagama retesnige'na, Nagra agrira azeri haviza hugahue. Na'ankure agra avufga erisga nehuno, agrama agesama antahiana knare hu'noe huno antahi'ne. <sup>13</sup> Ana nehuno agra amanage hu'ne, Nagra hanavereti'ene knare antahizanteti ama ana maka zana huvagare'noe. Na'ankure nagra ama' antahi'zanireti, mago'a kumatmimofo mopama umetre emetrema hu'neama'a, eri netre'na hara huzmante'na fenozazmia hanare'noe. Nagra hankavenentake neki'na, kini zamia ha' huzamagatere'noe huno antahi'ne. <sup>14</sup> Hagi namamofo amu'aramima anoma'afintima azanuma erinaku'ma nehiaza hu'na kokankoka kumatamimpintira fenozmia zogi tru hu'noe. Anama nehugen'o a namamofo amu'ma e'nerigeno krara krara huno avuma e'neriaza hunora mago'mo'e huno kea osu'ne. <sup>15</sup> Hagi sasumemo'o somo'a azampima erineno eri'zama eneria nemofo hanavea agatere'noe huno hugahifi? Hagi kumpa knomo'a, agra'a avesitera vhahera ahiegahie? Azompamo'a agra'a avesitera kana vugahifi? <sup>16</sup> E'ina hu'negu Monafi sondia vahe'mofo Hankavenentake Ra Anumzamo'a Asiria sondia vhahetera mago kefo kri atresigeno eno eme zamazeri haviza hugahie. Ana nehuno ana maka knarenare feno zazamia teve taginte'nigeno hagna hagna huno tefanane hugahie. <sup>17</sup> Hagi ruotage'ma hu'nea Ra Anumzamo'a, Israeli vhahetera mago tavi mani'ne. Hianagi ave'ave trazankna hu'neza Israeli vahe'ma knazama nezamiza Asiria vhahera, mago teve anefa kna huno magoke zupage ana havi trazana tefanane hugahie. <sup>18</sup> Hagi Ra Anumzamo'a zafa tanopane tretrema hu'nea mopazmia eri haviza hugahie. Ana hanigeno mago ne'mofoma mago krimo'ma azeri haviza higeno, avufgamo hariri hiaza huno mopazmimo'a haviza hugahie. <sup>19</sup> Ana hanigeno Asiria vahe'mokizmi zafa tanopamo'a, osi'a akavoza zafa me'enkeno, amne osi mofavremo ana zafaramina hamprigahie.

### *Israeli vhahera osi'a naga'mo'za ete mopa zamire esaza zamofo naneke*

<sup>20</sup> Hanki ana knafina Jekopu agehemmo'za Israeli vahepinti'ma ofri'ma osi'ama mani'naza naga'mo'za, zamahe hana'ma hu'naza vahekura mago'enena zamaza hu'zankura antahia ozamigahaze. Hianagi Israeli vahe'mokizmi ruotage'ma hu'nea Ra Anumzamofonteke zamazama hanigura antahimigahaze. <sup>21</sup> Hanki osi'a Jekopu naga'ma ofri'za mani'namo'za, Hankavenentake Ra Anumzamofontege ete'za egahaze.

<sup>22</sup> Hagi Israeli vahe'mota rama'a huta hagerinkenafi kahepankna hu'nazanagi, osi'a naga'ma ofri'za mani'zamo'za ete'za egahaze. Hagi zamagrama havi zamavu'zamavama hanageno e'inahu'za fore'ma hugahiema hu'nea kante anteno, Ra Anumzamo'a zamazeri haviza hugahie. <sup>23</sup> Hagi Monafi sondia vahe'mofo Hankavenentake Ra Anumzamo'a huvempa huno, mika ama mopafima mani'naza vhahera knaza zami'na zamazeri haviza hugahue huno hu'ne. <sup>24</sup> E'ina hu'negu Monafi sondia vahe'mofo Hankavenentake Ra Anumzamo'a amanage hu'ne, Jerusalemi kumapima nemaniza vahe'n'i'amota, Isipima hu'nazaza hu'za, Asiria vahe'mo'zama hegi kanonteti'ma erisgama hu'za sefu'ma tamisnageta korora osiho. <sup>25</sup> Hianagi kofta'a knafi tamagri'ma narimpama aheneramantoa zamo'a vagaregahie. Ana hanige'na ana narimpa ahe'zana erimare'na Asiria vahete atre'na zamazeri haviza hugahue. <sup>26</sup> Ana nehu'na Oreb have tvaonte'ma Midieni vahe'ma sefu'ma zami'noaza hu'na, Asiria vhahera hegi kanonteti sefu zamigahue. Hagi hagerimofo agofetu'ma hankaveni'ama eri amama hu azomparetimma huge'za Isipi vahe'ma tima nakri'nazaza hu'na Asiria vhahera zamazeri huviza hugahue. <sup>27</sup> Hagi tamafuntetira knazana eri netrena, karenamare zafa tamanankempintira eritrenugetma knare hutma manigahaze.

<sup>28</sup> Hagi tagri ha' vahe'mokizmi sondia vahe'mo'za Migroniti efre'za Aiti kumate ehanatite'za, ana maka kutuzmnia Mikmasi emeri atru hu'naze. <sup>29</sup> Hagi anama hute'za agonamofo kitagifafinti keramiza kantu kaziga uhanatite'za, mareri'za ana kenagera Geba kumate umase'naze. Anama hazageno'a Rama kumate vhahera tusi zamahirahite'ne. Ana nehazage'za Soli kumapima Gibiama nemaniza vahe'mo'zanena koro fre'naze. <sup>30</sup> Hagi tamagra Galimi kumate vahe'mota rankrafage hiho, Laisa kumate vahe'mota tamagesa anteta antahi so'e hiho, Anatoti vahe'mota tusi tamasu zampi mani'naze. <sup>31</sup> Matmena kumate vahe'mo'zane, Gebimi kumate vahe'mo'za kumara atre'za koro fre'za fra'maki kumaku hakre'za vu'naze. <sup>32</sup> Hagi tagri'ma ha'ma hurantesnaza sondia vahe'mo'za menina Nobu kumatera selli nonkumara eme antegahaze. Ana nehu'za kegamate'za Saioni agona nege'za, Jerusalemi kumara ha'hunteku trotra hu'none hu'za zamazana erisga hu'za erinakigahaze. <sup>33</sup> Hianagi keho, Monafi sondia vahe'mofo Hankavenentake Ra Anumzamo'a, ra zamagima eri'za hakavemati'naza Siria vhahera zafama antagi atreankna huno zamazeri fenkami atregahie. Za'za huno ra zafagna hu'neanagi, zafama antagi atreno azanku namanku'ma rukafari atreankna hugahie. <sup>34</sup> Ana maka zafaramina saumeretima antagi atrazankna huno Hankavenentake Anumzamo'a Lebanoni vhahera zamahe vagaregahie.

## 11

### *Jesi nagapinti kasefa zafa agata hageno marerisia zamofo naneke*

<sup>1</sup> Hanki Jesi naga'mo'za mago zafa agafagna hu'nazankino, henka mago kasefa agata ana zafamofo agafafintira hageno azanku'na omereno raga rentegahie. <sup>2</sup> Ana'ma hanigeno'a Ra Anumzamofo Avamu'mo'a ana ne'pi eman'i'neno, knare antahi'zane ama' antahi'zane ami'nigeno, fatgo huno hihamu'ane refko nehuno, Ra Anumzamofona antahino keno ne-huno, koro huntenu agoraga'a manigahie. <sup>3</sup> Hagi agra Ra Anumzamofoma koro huntenu agorgia'a manizanku tusi musena hugahie. Hagi agrama nanekema refko'ma haniana, agra avufinti'ma ke'nesnia zante'ene,

vahe'mo'zama asami'nesnaza kema antahisia nanekegura huno refkoa osugahie. <sup>4</sup> Hianagi zamunte omne vhahera fatgo avu'ava huno refko hunezmanteno, vahe'mo'zama zamazeri havizama nehaza vhahera magoke avamenteke anteno refko huzmantegahie. Hagi agra keagareti vhahera zamazeri haviza nehuno, agipinti zahonu kefo avu'ava'ma nehaza vhahera zamahe frigahie. <sup>5</sup> Ana kini ne'mofo fatgo avu'avazamo'a, amu'nofi reankna nehanigeno, ke'are'ma oti'neno anankema amage'ma ante avu'avazamo'a, efeke kukena azo'naregati ante kreramigeno asoparega evuramiaza hu'ne. <sup>6</sup> Afi kra'mo'a sipisipi afu' anenta'ene magopi mani'nakeno, Lepatimo'a anenta meme afutamine magopi maseno manisnigeno, anenta bulimakaone kasefa laionimokea magoka vano nehuke ne'zana nenesakeno, osi mofavremo zamavareno vano hugahie.

<sup>7</sup> Hagi bulimakao afu'ene beamokea magopi vano nehuke, trazana nenesakeno anenta zanimo'za magopi mase'za manigahaze. Hagi laionimo'a bulimakao afu'mo'za tra'zama nenazaza huno negahie. <sup>8</sup> Hagi amima nenesania mofavremo'a, kobra osifavemofo kerigantera amne zok-agora neresnigeno, ha' osifavemo'ma noma kino mase'nesifina osi mofavremo'a amne azanura avako hugahie. <sup>9</sup> Hagi Ra Anumzamo'na ruotage'ma hu'nea agonanirera, mago zamo'e huno eme eri havizana osanigeno, ana agonaera mago hazenkemo'enena ometfa hugahie. Ana hanigeno Ra Anumzamofoma keno antahinoma hu antahizamo'a, maka mopafima hagerimo ru viteaza huno avitegahie. <sup>10</sup> Hagi ana knafina Jesi naga nofipinti'ma fore'ma hania ne'mo'a, mago avame'zankna huno maka vahetera otigahie. Ana hu'nesnige'za ama mopafi vahe'mo'za agrite e'za emanigasa hugahaze. Ana hanigeno agrama mani'nia kumamo'a knare zantfa hugahie. <sup>11</sup> Hagi ana knama efore'ma hanigeno'a, Ra Anumzamo'na hankavenentake azana rusuteno, Agri vahe'ma osi'ama ofri'za Asiria moparegane, Isipine, Patrosine Kusi moparegane, Elamu moparegane, Sinari moparegane, Hamati moparegane, hageri amunompi me'nea moparegama umani'naza vahe'a ete mago'anee zamavareno nonkumazamire egahie. <sup>12</sup> Ana nehuno Agra mago avame'za erisga hanige'za ama mopafi vahe'mo'za negesnageno, Israeli vahe'ma ru moparegama kinama ome hu'naza vhahera ete zamavare tru nehuno, Juda vahe'ma maka kazigama panani hu'zama ama mopafi umani emanima hu'naza vhahera ete zamavare atru hugahie. <sup>13</sup> Ana'ma hanigeno'a, Efraemi vahe'mo'zama kanivema neraza zamo'a vagaresigeno, Juda vahe'ma ha'ma renezmantata zamo'a vagaregahie. Efraemi vahe'mo'za Juda vhahera kanivea rezmante'nageno, Juda vahe'mo'za Efraemi vhahera hara rezmantedegahaze. <sup>14</sup> Hanki anara nosu'za eri mago'ma hanazana, zage fre kazigama me'nea ne'onse agonaramimpima nemaniza Filistia vhahera ame hu'za eramiza hara hunezmante'za, zage hanati kazigama nemaniza vhahera hara huzmante'za, feno zazamia hanare'za erigahaze. Ana nehu'za Idomu vahe'ene Moapu vahe'ene Amoni vahe'enena hara huzamagatere'za kegava huzmante'nage'za zamagri zamagorga manigahaze. <sup>15</sup> Hagi Isipima me'nea hagerimo'ma efreneama'a Ra Anumzamo'na eri hagege nehuno, azana rusuteno amuhonentake zaho hunte'nigeno eno Yufretisi rantina eri ho'mu nehuno, ana tina 7ni'afi refko hanigeno, osi osi huno enevina, vahe'mo'za hagege mopare vugahaze. <sup>16</sup> Ana'ma hania zamo'a ranka efore hanige'za, Asiriati'ma agri vahe'ma ofri'zama osi'ama manisaza vahe'mo'za ko'ma Isipiti'ma Israelima e'nazaza hu'za egahaze.

## 12

### *Ra Anumzamofoma susuma hunenteno'ma nehia zagamere*

<sup>1</sup> Hagi anankna zupa tamagra amanage hugahaze, Ra Anumzamoka na-gra susu hu'na musenkasea hugantegahue, Kagra karimpa ahenante'nane. Hianagi ana karimpa ahe'zana netrenka, nazeri so'e hu'nane. <sup>2</sup> Tamagerfa huno Ra Anumzamo'a ete nagu'vazino navre'ne. Nagra Agrite namentintia nehu'na, korora osugahue. Na'ankure Ra Anumzamo'a hankaveni'ane zagameni'a mani'neankino, nagu'ma nevazino ete navresia nera Agrake mani'ne. <sup>3</sup> E'ina hu'negu muse nehuta tima hanatipinti'ma tima nefizaza hutma, tamagu'ma vazi'nea zankura Ra Anumzamofona musena huntegahaze. <sup>4</sup> Ana zupa tamagra amanage hugahaze, Ra Anumzamo'ma hu'nea avu'ava zankura agi'a ahentesga huta musenkea huntensnune! Agrama tagrite'ma tro'ma hu'nea avu'ava zankura kokankokama mani'naza va-hera huama huta nezamasamita, zamage'ma akani zankura Agri agimo'a ame'nagame mareri'neta huta huama hugahaze. <sup>5</sup> Ra Anumzamo'ma knare zantfama hurante'nea zankura, zagameria huta agi'a ahentesga hanune. Ama ana zankura huama huta maka ama mopafima mani'naza vahera za-masami vagaresnune. <sup>6</sup> Saionima mani'naza vahe'motma zagameria ranke huta nehuta musenkasea hiho. Na'ankure marerisa ne'ma ruotage'ma hu'nemo'a, Israeli vahe'mota amu'nompi tamagrane mani'ne.

## 13

### *Babiloni vahe'mo'zama knazama erisaza zamofo kasnampa naneke*

<sup>1</sup> Hagi Babiloni vahete'ma fore'ma hania zana avana'gna zampi Ra Anumzamo'a Amosi nemofo Aisaiana averi higeno ke'neana amanahu hu'ne. <sup>2</sup> Hagege agonafi mago avame'za eri ot'i'nenka ranke hunka kezanealinka, kazanu avame'name huge'za zamagima me'nea vahe'mo'zama rankumapima unefraza kafanteti ufreho. <sup>3</sup> Nagra zamazeri ruotage'ma hu'noa vaheni'ama hankavenentake sondia vahera huzamantesnuge'za, Nagri narimpahe'zana eriama hu'za Babiloni vahera hara huzmantegahaze. Hagi ana sondia vahe'mo'za muse nehu'za hara hugahaze. <sup>4</sup> Kagesa antenka agonaramimpinti'ma neria agasasankea antahio, ana agasasana rama'a vahe'mofa agasasankino, kokankoka vahe'mo'za hate vunaku sondia vahetami zamavare'za emeri atru nehu'za nerazankna agasasa nerianki kagesa antenka antahio. Hagi ana sondia vahera, Monafi sondia vahe'mofa Ra Anumzamo ha' hunaku sondia vahe zamavare tru nehie. <sup>5</sup> Ana sondia vahera afete moparegati e'naze. Ra Anumzamo'a ana sondia vahepi huvazino arimpa ahe'zana eriama nehuno, ana maka mopa eri haviza hugahie.

<sup>6</sup> Hagi Ra Anumzamofa knamo'a hago erava'o nehianki zavi krafage hiho. Ana knazana Hankavenentake Ra Anumzamo'a tusi'a knaza atre'nigeno egahie. <sup>7</sup> E'ina hu'negu mika vahe'mo'za zamazana erisga hugara os-anageno, tumo'zamimo'a hapatigahie. <sup>8</sup> Ana nehina zamagra tusi'koru nehu'za, mago a'mo mofavre anteku atagu nehiaza hu'za zamatagura nehu'za, zamagra zamagogogu nehu'za ovufi avufi nehanageno zamavu-gosomo'a korankifa hegahie. <sup>9</sup> Hanki antahio, tamagerfa huno Ra Anumzamofa kna ne-eankino ana knama efore'ma hanigeno'a, Agra tusi'a rimpia ahenezmanteno ama mopa eri ka'ma kokaneseno, ama mopafima mani'naza kumike vahera ranknaza zaminha vagaregahie. <sup>10</sup> Hagi

ana knafina monafima me'nea hanafitamine, atruma huterema hu'za nemanaza hanafi'mo'za remsa osugahaze. Ana nehanigeno zahufama hanatinoma marerisia zagemo'a ete rehani nehina, ikamo'a remsa osugahie. <sup>11</sup> E'inahu hu'na Ra Anumzamo'na ama mopafi vahe'mo'zama havi zamavu'zamava'ma nehu'za, kefo zamavu'zamava nehaza zanteria zamazeri haviza hugahue. Ana hukna hu'na zamavufaga rama nehaza vahera zamazeri haviza nehu'na, vahe'ma zamazeri haviza nehaza vahera zamahe vagaranena ana zamavu'zamava zana omanegahie. <sup>12</sup> Hagi vahera knare goligna hu'za osi'a vahe mani'nageno, Ofiriti'ma knare golima ke'zanku'ma amuhoma hu'za nehakazankna hu'za vahekura hakegahaze. <sup>13</sup> E'ina hu'negu Monafi sondia vahe'mofo Ra Anumzamo'na tusi narimpa aheanki'na ana zupa mona azerikazakaza nehu'na, mopa eri tore hanugenre tore'vare hugahie. <sup>14</sup> Hagi ana knafina vahe'mo'za Gazeriema nehaza dia afu ahenaku nehigeno koro huno nefreaza nehanageno, kva vahe omanigeno sipisipi afutamimo panani huno freaza hu'za, vahe'mo'za panani hu'za vahezmiregane mopa zamiregane fre'za vugahaze. <sup>15</sup> Hanki izano ha' vahe'mo'ma azerisnia vahera bainati kazinteti zamarenefri'za, izano ha' vahe'mo'ma azerisimofona bainati kazinteti zamahe frigahaze. <sup>16</sup> Ana nehu'za ne'onse mofavre nagara, negesnage'za a'nanelokizmi zamazampinti hanare'za ruragati'za mopafi zamavuga atresnage'za frigahaze. Hagi nozamia tapage hu'za fenozamia eneri'za, a'nanezamia zamazeri havi'za hugahaze.

*Midia vahepima huvazino Babiloni vahe'ma Anumzamo'mazamazeri hav-  
iza hania nanekie*

<sup>17</sup> Hagi ko, Nagra Ra Anumzamo'na Midia vahera zamazeri o'netuanki'za e'za Babiloni vahera hara eme huzmantegahaze. Zamagra silvagu'enel goligu'nenkura hu'za Babiloni vahera hara eme huozmantegahaze. <sup>18</sup> Hagi zamagra kevereti nehzaveramina zamahe nefri'za, amima nenesaza mofavre naga'ene, ne'onse mofavre nagara zamasunkura huozmante zamahe vagaregahaze.

<sup>19</sup> Hagi Babiloni rankumamofo konaririmo'a, knare zantfa huno ruga'a kumatamina agatere'neane. Ana hu'nege'za Kaldia vahe'mo'za ana kumakura tusi muse nehzane. Hianagi Ra Anumzamo'a Sodomune Gomora kumatre'ma hu'neaza huno, Babiloni kumara eri haviza hugahie. <sup>20</sup> Hagi ana kumapina meninteti'ma agafama huteno'ma nevanigeno, henkama forehu anante anante'ma hu'za mani'za vanaza vahe'mo'za magore hu'za ana kumapina nona kiza nomanisnagae'za, anampina Arapu vahe'mo'za seli nonkuma'zamia eme ante'za omanigahaze. Ana nehanage'za sipisipi afu kva vahe'mo'za sipisipi afu'zamia anampina atre'nage'za e'za tra'zana onegahaze. <sup>21</sup> Hianagi anampina afi zagagafamo'zane afi kramo'za nozamifina enemanisnagae'za, komutomo'zane Ostretiema nehaza namamo'zanena anampina emanigahaze. Ana nehanage'za anampina afi meme afu tamimo'za takaire takaire hu'za vano hugahaze. <sup>22</sup> Hagi Hainema nehaza afi kramo'za vihifi emani'neza krafagea nehanageno, Zekoriema nehaza afi kramoza kini vahe nompina emanine'za krafagea hugahaze. Tamagerfa huno Babiloni kumamo'ma havizama hania knamo'a hago eme kofta nehinkino, zazatera manino ovugahie.

## 14

*Ra Anumzamofo vahe'mo'zama henkama, mopazamire'ma ete'za esaza naneke*

<sup>1</sup> Hanki Ra Anumzamo'a Jekopu nagara asunku hunezmantero, nagri vahe fatgo mani'naze huno ete Israeli vhahera zamavaregahie. Ana nehanage'za meg'i'a vahe'mo'za Jekopu naga'ene eme hagerafi'za manigahaze. <sup>2</sup> Hagi mago'a mopafi vahe'mo'za Israeli vhahera zamaza hanage'za mopa zaminera ete egahaze. Anama hanage'za Israeli vahe'mo'za ana vhahera fenozama hiaza hu'za erisantihare'za ve kazokzo eri'za vahe nezmante'za, a' kazokzo eri'za vahe nezmante'za, zamazeri haviza nehu'za kinama huzmante'naza vahe'ene knazama zami'naza vhahera Ra Anumzamofo mopa-fina kegava huzmantegahaze.

<sup>3</sup> Hanki ananknama esanigeno'a, kinafima mani'nazagenoma tutuma huramantageta, tamatagu'ma nehuta amuho hutama eri'zama eri'naza zampintira, Ra Anumzamo'a mani fru tamigahie. <sup>4</sup> Ana'ma hanigeta Babiloni kini ne'mofona zagamepinti amanage huta ki'za zokago kea huntegahaze, tazeri havizama hu'nea nera hago evuramianki keho. Hagi tagri'ma arimpama aheneranteno ha'ma renerantea zana amare eme vagareankino, mago'enena anara osugahie huta hugahaze.

<sup>5</sup> Kefo zamavu'zmavama nehaza vahe'mofo azompama zamazampima me'negezama hihamu eri'nazema nehaza azompane, kini vahe'mo'zama zamazampima eri'nage'zama kini mani'nazema hu'za zamagesgama nehaza azotanena, Ra Anumzamo'a refutagitregahie. <sup>6</sup> Na'ankure ana kini vahe'mo'za vahe'ma tusi zamarimpa ahenezmante'za, ozamatre kazikazi hu'za maka mopafi vhahera hara huzmante vava hu'naze. <sup>7</sup> Hianagi menina maka mopafina ha'zana omege'za, akohe'za mani'naze. Ana hu'negu maka vahe'mo'za ranke hu'za zagamera nehu'za musena nehaze.

<sup>8</sup> Ana'ma nehazage'za Saipresi zafa'mo'zanena muse nehazageno, Lebanoni Sida zafamo'za hu'za, kagrikura hago evuramiankino, zafama antagi vahe'mo'a eno tagririra antagi otregahie hu'za hu'naze. <sup>9</sup> Fri vahe kumamo'a, maka zana trotra huno kamarara huno vanankenoma kavre'nigura kavega anteno mani'ne. Fri'naza vahe'mokizmi avamura zamazeri retro nehuno, maka fri'naza mopafi kini vahetamina zamazeri oti vagaregahie.

<sup>10</sup> Hagi makamo'za eme negage'za amanage hugahaze, Tagri'ma hiaza huno kagri'enena hankaveka'a omne'ne. Ana hu'neankinka tagrama manunaza hunka manigahane hu'za hugahaze. <sup>11</sup> Kora avasase'ane kukena hu'nanke'za, vahe'mo'za hapu zavena nehe'za zagamera hu'za kamarara hu'za rankagima negamiza zamo'a fri vahe kumapi uneramina, kanimo mase tafeke'a nemanesigeno, hagirafamo rufitegantegahie. <sup>12</sup> Kagra nantera ofunkna hunka remsa nehunka, maka kuma'ma hankavetinka hara hunka rama'a vahe zamagatere'nana ne' mani'nananagi, inankna hutenka monafintira menina mopafina evurami'nane! <sup>13</sup> Ana nehunka kagra kagu'afina amanage hunka antahi'nane, Nagra monafinka mareri'na, Anumzamofo hanafi tamimofona agatere'na, onaga'a kini trani'a ome ante'na manigahue. Ana hute'na noti kaziga afete, miko kazigati'ma eme atruma nehaza agonafi kini trani'a ante'na manigahue hunka hu'nane.

<sup>14</sup> Hagi nagra hampona agatere'na onagame marerite'na, Marerisa Anumzamo'ma mani'neankna hu'na umanigahue hu'nane. <sup>15</sup> Ana hugahue hu'nananagi menina kazeri atregenka evuraminka amefenkame fri vahe kumapi urami'ne. <sup>16</sup> Hagi ana fri vahe kumapima

mani'naza vahe'mo'za kagene'ne nehu'za, ama nera maka mopafi vahe'ma zamazeri kazama nehuno, maka kuma'ma azeri tore nehia nepi ru nere hu'za hugahaze. <sup>17</sup> Ama ana ne'mo ranra kumara eri haviza nehuno, ama mopanena eri haviza higeno ka'ma kokama fore hu'nea nere. Ana nehuno hapinti'ma zamazeria vhahera zamatrege'za kumazamirega novazageno, kina huzmant'e'ne nere hu'za hugahaze. <sup>18</sup> Maka ama mopafi kini vahe'ma nefarizage'za, zamagri'a matipi eri so'e hu'za knare avasese zampi asenezmantaze. <sup>19</sup> Hianagi kagrira matipina aseogante'za, kasagafe atresagenka zafa zankuna'a kitagi atrazaza hunka, bainati kazinteti zamahe fri'nesnaza vahe'ene karanka mase'nesnanke'za zamagiareti krehapati'za vano hugahaze. Hagi hakare'a vahe'ma hapinti zamahe frizage'za, rehagagi'za kerifima asenezmantazafi asegante'nagenka amefenkame uramigahane. <sup>20</sup> Kagrama frisnanke'za mago'a kini vahe'ma eriso'ema hu'za asenezmantazaza hu'za kagrira eriso'ea hu'za aseogantegahaze. Na'ankure kagra mopaka'a eri haviza nehunka, vaheka'a zamahe fri'nane. E'ina hu'negu kefo avu'ava'ma nehaza vahepinti'ma fore'ma hanaza vhahera zamagimo'a fanane hina zamagekani zamantegahaze. <sup>21</sup> E'ina hu'negu zamafahe'zama hu'naza kumimofo nona'a mofavre naga'zmia zamavaretma ome zamahe frisaza kumara retro huzmanteho. Ana'ma osnage'za ra hu'za mopa eri nafa'a' nehu'za, ranra kuma ante'za ama mopafina eri hakare hugahaze. <sup>22</sup> Hagi Monafi sondia vahe'mofo Ra Anumzamo'a amanage hu'ne, Nagra Babiloni vhahera hara huzmant'e'na zamahe vaganere'na, manisaza vahe'enena zamagi'a eri fanene nehu'na, henkama fore'ma hanaza mofavre nagazminena zamahe fanene hugahue. <sup>23</sup> Monafi sondia vahe'mofo Ra Anumzamo'a amanage hu'ne, Anampima mani'naza vhahera knaza zami'na, ruharafi hunetre'na, Babiloni kumara eri hapa hanugeno komutomo'za anampina emenigahaze.

### *Asiria mopamo'ma havizama hania zamofo kasnampa naneke*

<sup>24</sup> Hagi Monafi sondia vahe'mofo Ra Anumzamo'a amanage huno hvempsa kea hu'ne, tamagerfa hu'na nazano hugahuema hu'na hu'noa zamo'a fore nehinkeno, nazanoma retromta hu'noa zamo'a fore hugahie. <sup>25</sup> Nagri mopafima mani'naza Asiria vhahera miko zamazeri haviza nehu'na, Nagri agonaramimpima mani'naza vhahera nagiareti zamarehapatigahue. Bulimakao afu'mofo anankempima nentaza karenamare zafagna huno, Israeli vahe'ma knazama nezamiza zana zamafuntetira eri atregahue. <sup>26</sup> E'inahu avu'ava hunaku antahintahia retro hu'neankino, Anumzamo'a azana erisga huno maka kaziga ama mopafima me'nea kumatmina eri haviza hugahie. <sup>27</sup> Hagi Monafi sondia vahe'mofo Ra Anumzamo'ma antahintahima retro'ma huno hugahuema hu'nesnia zana, iza eri atregahie? Hagi azama rusute'nesnia azana, iza eri anakegahie?

### *Filstia vahe'ma havizama hanaza zamofo kasnampa naneke*

<sup>28</sup> Hanki kini ne' Ahasi'ma fria kafufina, Ra Anumzamo'a amanahu naneke nasami'ne, <sup>29</sup> Filistia vahe'mota sefu'ma neramia heginckoma rufutagia zankura musena osiho. Na'ankure osifavemofo mofavremo ha' osifavea fore hugahie. Anama huteno'a, ageko'na me'nea osifave efore huteno hareno vano hugahie. <sup>30</sup> Zamunte'ma omne vhahera ne'zana zamsuge'za nenesage'na, atupa'ma hu'naza vahe'mokizmia kegava huzmantesuge'za knare hu'za manigahaze. Hianagi mago'a Filistia vhahera zamagazanku hu'za nefrisageno, osi'ama manisazama'a zamahe frigahaze. <sup>31</sup> Filistia ran

kumapima mani'naza maka vahe'mota ran kumamofo kafante manineta rankrafa hutma zavira netenkeno tamasunnamo'a hapatino. Na'ankure noti kazigatira tusi sondia vahe'mo'za magopi manumanu hu'za neazageno, zamefitira kumo'a tusiza nehige'za neaze. <sup>32</sup> Hagi ha' vahetamimofo kema eri'za esaza kato vahe'mo'zama eme tamantahigesageta, amanage hutma zamasamaho, Ra Anumzamo'a Saioni kumara agri vahe'mo'zama ome zamagu'ma vazisaza kuma retro hunte'ne hu'ne.

## 15

### *Moapu mopama havizama hania zamofo naneke*

<sup>1</sup> Hanki Moapu mopama havizama hania zankura Anumzamo'a amanahu naneke nasami'ne, ha' vahe'mo'za mago kenage e'za Moapu mopafima me'nea Ari ran kuma'ene Kiri rankumatrena eri haviza hazageno, Moapu mopamo'a havizantfa hu'ne. <sup>2</sup> Ana maka Diboni rankumapima nemanza vahe'mo'za, havi anumzante'ma mono'ma hunentaza noma me'nea agonarega mareri'za zavi krafa hu'naze. Moapu vahe'mo'za Nebo rankumaku'ene Medeba rankumakura zamasunku hu'za zavira nete'za, zamagi zamazoka'ene zamaseni zamazokara vazagate tre'naze. <sup>3</sup> Kumamofo ne'onse kampina zamasunku kukena hu'za vano hu'naze. Nozami agofetu nemani'za atruma hu'za nemaniza kumamatimpina tusi zavi krafa nehazageno, zamavunumo'a tusiza hu'ne. <sup>4</sup> Hesboni ran kumati'eene Eleale rankumateti'ma zavi krafama haza agasasankea ogantu Jahasi rankumate vahe'mo'za antahi'naze. E'inama hiazanku Moapu hankave sondia vahe'mo'za zamahirahiku nehu'za hanavezamia omngege'za, tusi zavi krafa hu'naze. <sup>5</sup> Nagra Moapu vahekura nagu'reti hu'na tusi zavi ate'noe. Na'ankure vahe'mo'za mopazamia atre'za koro fre'za, Zoari ran kuma'ene Eglat-Silisia ran kumate vu'naze. Luhiti ran kuma'ma me'nea karanka mareneri'za zavira nete'za vu'naze. Horonaimi ran kuma'ma me'nea karankanema nevu'za, kuma'ma havizama hiazankura tusi zavi krafage hu'za vu'naze. <sup>6</sup> Nimrimi tintamina tanageno, tinkenaregama me'nea trazamo'enena hagege hune. Ana higeno anampina trazamo'enene zafamo'enena hagege higeno, kasefa huno zafaninage zana omnene. <sup>7</sup> E'ina hu'negu Moapu vahe'mo'za feno zazamima eri truma hu'nazana eri'za, ana zantamine korora fre'za, zafamoke'ma hu'nea tinkagomupinti rukatagi'za Moapu mopa atre'za vu'naze. <sup>8</sup> Moapu mopafinti'ma zavi krafama nehaza agasasamo'a, Moapu mopama ome atre'nea atumpare me'na'a kumatre, Eglaimi rankuma'ene Be-elim rankumate vige'za antahi'naze. <sup>9</sup> Na'ankure Dimoni timpina koramo aviteno e'ne. Hianagi Ra Anumzamo'a huno, mago'ene Moapu vhahera zamazeri haviza hugahue nehuno, laioni huntanena vuno koro'ma fre'za vanaza Moapu vahe'ene Moapuma osi'ama mani'naza vhahera zamaheno tagnavazino negahie.

## 16

### *Mago'ene Moapu mopare hazenke'za esania zamofo naneke*

<sup>1</sup> Moapu vahe'mota koro freta vuta Idomu vahe'mokizmi rankumate Sela umani'none. E'ina hu'neta kinimofona takisi zago amisnune nehuta, sipisipi anenta atronkeno Juda vahe kinima Jerusalemi kumate'ma mani'nere vu'za hu'none. Ana sipisipima avre'zama vanazana, hagege kokampima vu'nea karanka vu'za Saioni agonare vugahaze. <sup>2</sup> Hagi nama anenta'mo anom'a a atreno megi mani'neno tahaza tahaza hiazza hu'za, Moapu mofa'nemo'za Arnoni tina taka hegahaze. <sup>3</sup> Hagi Juda vhahera zamasami'za, Antahiso'e

huranteta taza hiho, ha' vahetimo'zama tarotago hazagetama koro'ma freta vu'nona vhahera, hanimo'ma feru zagema resoma nehiaza huta tonara huneranteta, tamefira huoramaho. Ana nehuta ha' vahe'mofo zamazampina tavre ontaho. <sup>4</sup> Tazeri havizama nehaza vahe'mokizmigura korora freta onanki tamagra hankotigna huta mani'enketa, tagra tamagrane manisune. Hagi tagra antahi'none, tazeri havizama nehaza vhahera atre'za vanageno, knazamo'a vagaregahie. Ana hanige'za ha' vahetimo'za mago'ene hara hunorante'za mopatia atre'za vuho huta hugahaze. <sup>5</sup> Hanki ana'ma hutena ana knafina Deviti nagapinti fatgoma huno'ma keagama refkoma hania nera mago efore hugahie. Ana ne'mo'a vahe'a avesi nezmanteno, fatgo avu'ava huno kegava hunezmantero, vea'amokizmi nanekea antahi so'e huteno, mago avamenteke anteno refko hugahie.

*Zamavufgama erisgama nehaza Moapu vahe'mo'za hazenke eri'naza naneke*

<sup>6</sup> Hagi Moapu vahe'mo'zama zamavufaga rama hu'naza nanekea hago tagra antahi'none. Zamagra mago'a vhahera zamagatere'none nehu'za, ra zamagi eri nanekege nehu'za, havige hu'za vahe'mokizmia ki'za zokago ke hunezmananza vahe mani'naze. Ana hu'negu Moapu vhahera havigehu vahe mani'nazanki, ke'zamia antahi ozamaho. <sup>7</sup> E'ina hu'negu zamatreke'za Moapu vahe'mo'za Moapu mopagura zavira nete'za, Kir-Haresetiti'ma krepi rgama tagi'za eri hagege hu'za nenaza zankura zamagesa nentahi'za zavi krafa hiho. <sup>8</sup> Hanki Hesbonima me'nea hozaramimo'a hagege nehigeno, Sibmanema me'nea waini hozamo'a ana zanke huno hagege hu'ne. Hagi mago'a kumapi kini vahe'mo'za ana waini hozafina e'za knare'ma hu'nea waini raga'aramina eme regatati hu'naze. Ana waini hozamofo agema'ama ometre emetrema hu'neana, Hesbonine Sibma rankumateti agafa huteno vuno, noti kaziga Jazeri ran kumate vuteno, zage hanati kazigama me'nea hagege kokantega vuteno, vuvava huno zage fre kaziga Fri'nea hagerinte uhanati'ne. <sup>9</sup> E'ina hu'negu Jaseli kumate vahe'mo'zama, Sibmama me'nea waini hozagu'ma zavi'ma atazankna hu'na nagranena zavirate'noe. Hesboni kumaku'ene Eleale kumakura navunu hu'ne. Na'ankure ko'ma kezati kantu kamama huta, ne'zama nevasage-tama musema nehazaza huta musena osugahaze. <sup>10</sup> Ne'zama vasage-tama hozaregati'ma ne-etama tusi musema nehaza zana omanegeno, waini hozafinti'ma muse zagame'ma nehuta kezaneti'za zanena omanegeno, krepima rentra'ma nehe'zama muse kezama neti'za zane, kezankema nehu'za musema nehaza zana omnegahie. Na'ankure Ra Anumzamo'a eri atre vagare'ne. <sup>11</sup> Ana'ma hige'na Moapu vaheku'ene Kir-Heresiti vahekura nasuragi zmantogeno, mago vahe'mo asuzampi mani'neno hapu zavena neheno zavi'ma ateankna hu'na nagu'areti hu'na zavirate'noe. <sup>12</sup> Hanki Moapu vahe'mo'za kaza osu havi anumzamofo mono noma me'nea agonarega mareri'za mono'ma hunte'nazana, amne zante hanavezmia atre'za monora hunte'naze. <sup>13</sup> Hanki ama'i Moapu mopamo'ma havizama hania zamofo nanekea, ko Ra Anumzamo keaga hunte'nea naneke. <sup>14</sup> Hianagi menina Ra Anumzamo'a amanage huno nehie. 3'a kafufima zagore eri'za erigahaze huzama kema anakite'za, vahe'ma zamavrazage'za eri'zama enerige'zama ana kema eri knare'ma nehazaza hu'na Moapu mopamofo ra agine avasase zanena atresugenzo zazatera menora ovani'na zamazeri zamagaze hugahue. Ana hanige'za osi'amo'za ofri'za kasefa hu'za manigahaze. Hianagi zamagrira hanavezmia omanegahie.

**17**

*Damaskasi rankuma'ma havizama hania zamofo kasnampa naneke*

<sup>1</sup> Hanki Damaskasi rankuma'ma havizama hania zamofo naneke Ra Anumzamo'a amanage huno hu'ne, Damaskasi rankuma'mo'a knare'ma huno menima me'nea zana huno omaneno, haviza huramino mopafi hihi huno megahie. <sup>2</sup> Ana nehanigeno Aroerima me'nea kumatamimpintira vahem'o'za atre'za vu'za e'za nehanageno, anampina sipisipi afu'mozage mani'nesnage'za, zamazeri korora osugahaze. <sup>3</sup> Hanki ha' vahe'mo'za e'za Efraemi mopafima me'nea kumate'ma hankavenentake vihuma hu'naza zana eri haviza nehu'za, Damaskasi kumate'ma kinima nemaniza zana eri netre'za, osi'a naga'ma ofri'za manisaza Aramu vhahera zamazeri fanene hugahaze. Ana hanage'za Israeli vahe'mokizmima hiaza huno hankavezmia omenegahie huno Monafi sondia vahe'mofo Ra Anumzamo'a hvempa hu'ne.

<sup>4</sup> Hanki ana knama esigeno'a, Israeli vhahera hanavezmimo'a evuramisnigeno, zamavufagamo'a hariri huno zaferinare akamregahie. <sup>5</sup> Ana nehina mago vhahero Refaimi agupofinti witi raga vasageno, e'nerino mago mago atreankna hu'za osi'a vahe manigahaze. <sup>6</sup> Ana nehina olivi zafare kanonteti amasagino ruharari higeno amuzare'ma osi'a olivi raga tareo 3'o 4'o 5fu'a meaza hu'za osi'a vahe manigahaze huno Israeli vahe'mokizmi Ra Anumzamo'a hvempa hu'ne. <sup>7</sup> Hagi e'i ana knafina zamagu'a rukrahe hu'za tro'ma huzmant'e'ne ne' Israeli vahe'mokizmi Ra Anumzama Ruotage'ma hu'nea ne'teke zamavua nege'za antahai amigahaze. <sup>8</sup> Zamagra Asera havi anumzamofo amema'a zamazanteti'ma antre'za tro hunte'naza havi anumzantera zamena nonte'za, ana havi anumzante'ma ofama hu' itama tro'ma hunte'narerera mnanentake zantamina kre mna vuontegahaze. <sup>9</sup> Hagi ana knafina ha' vahe'mokizmi ranra kumara Israeli vahe'mo'za hahu zamagatenere'za, ana kuma tamimpima nemaniza vhahera zamahenati atrehahaze. Ana hina ana kumatamimpina vhahera omanisigeno, zafa tanopamo hageno marerino refitegahie. <sup>10</sup> Na'ankure Israeli vahe'mota tamagu'ma vazi'nea Anumzana tamefi hunemita fraki havegantamia tamefi humi'naze. E'ina hu'negu megi'a onke'naza vahe'mofo havi anumzamofo knare waini hoza erita antegahaze. <sup>11</sup> Hagi ana wainima hankresaza knazupa, ana nanteranke'za ana wainimo'a agata rehakrufen marerino amosrea ahentegahianagi, tusi'a atama kri knama esigeno'a, ana wainimo'a raga rente so'ea osugahie. Na'ankure zamagra haviza hugahaze.

<sup>12</sup> Hanki kokankoka kumategati sondia vahe'ma emeri atru nehaza vahe'mo'za zamagasasama neraza agasasankemo'a, tiramo'ma agasasama neriankna nehie! <sup>13</sup> Hagi rama'a tiramo sasa huno zamagasasama neriazza hu'za krafa hugahazanagi, hankavetino zamarotago hanige'za, ete rukrahe hu'za e'narega vugahaze. Ana nehu'za agona fima zaho'mo vemagu vemagu huno raisi hona'ama eri hareno viankna huno zamarotgo hanige'za freghahaze. <sup>14</sup> Hanki kinagama sege'za veamo'za tusi zamagogogou hu'naze. Hianagi nanterana ha' vhahera omanizageno, ana korozana omame'nne. Hagi ha'ma hurante'za maka zantima eri'naza vhahera Anumzamo'a e'inahu huno mizana zamigahie.

**18**

*Itiopia mopare'ma knazama esania zamofo naneke*

<sup>1</sup> Kusi timofo kantu kazigama zamageko'nama hunte'nea ne'onse zagaramimo'zama hare'za vanoma nehaza mopafima me'nea kumatamikura nasunku huramantoe. <sup>2</sup> Hagi Isipi vahe'mo'za barozanteti ventea tro hute'za, Naeli timpi zamatrage'za nanekema eri'za vu vahe'mo'za kea eri'za neaze.

Hanki neazage'za amanage hu'za huzmante'naze, zaza hu'za zamavufagamo'ma hentofaza hige'za, mopa'zamifina ranra timo'ma tusiza higeno, ana mopafima nemaniza vahe'mo'zama, vahe'ma zamazeri haviza nehazageno maka mopafi vahe'mo'zama tusi koro hunezmantaza vahetega, ame huta viho hu'za huzmante'naze. <sup>3</sup> Hagi maka kokankoka mopafima nemaniza vahe'motane, maka zamotanena tamagesa antetma antahihi, agonafima mago avame'zama efore'ma hanigetma kesnagura tamavua keso'e ne-hutma, ufema resnagura tamagesa anteta manineta antahihi. <sup>4</sup> Na'ankure Ra Anumzamo'a amanage huno nasami'ne, Nagra nemanua kuma'nire mani'ne'na akohe'na, feru zagemo akoheno renteaza hu'na zamagegahue. Ana nehu'na ata ko'mo ne'za vasage knazupa hozafi ko runteaza hu'na, akohe'na maninena zmagegahue hu'ne. <sup>5</sup> Na'ankure ana kumamo'a, waini zafamo knare huno marerino amosre ahenteteno, raga rentegeno raga'amo afurenaku hiaza nehie. Hianagi waini ragamo afu orenefi vahe'mo, azanku'nama nekafria kazinteti azankunatamin'a roneseno ranra azankunatamina kitagi atregahie. <sup>6</sup> Itiopia vahera ha' eme huzmante'za sondia vahe'zamia zamahe hana hanage'za fri'za mopafina me'nenage'za, fri'naza zamavufaga tumpamo'za zagegnafina eme ne'nenage'za, zasi knafina afi zagaramimo'za eme negahaze. <sup>7</sup> Ana knafina Monafi sondia vahe'mofo Anumzantega musezanā eri'za esazana, Itiopia vahera zaza hu'za, zamavufagamo'ma hentofaza hige'za, ranra timo'ma tusiza higeno, ana mopafima nemaniza vahe'ma zamazeri haviza nehazageno, maka mopafi vahe'mo'za tusi koro hunezmantaza vaheki'za Hankavenentake Ra Anumzamofo agima erisgama nehaza mono nonte, Saioni agonare muse zazamia eri'za egahaze.

## 19

### *Isipi mopama haviza hania zamofo naneke*

<sup>1</sup> Hanki Isipi mopare'ma fore'ma hania zankura Ra Anumzamo'a amanage huno nasami'ne, Ra Anumzamo'a hampomofo agofetu mani'neno ame huno Isipi mopare nevie. Ana nehanigeno Isipi mopafi havi anumzantamimo'a, Agri agiaifi zamahirahiku nehu'za nemase'nageno, Isipi vahe'mofona hanavezmia omnena, kore nehanageno zamagu'amoa' hapatigahie. <sup>2</sup> Ra Anumzamo'a huno, Nagra Isipi vahera zamagu'a zamazeri otisuge'za zamagra zamagra ha' ohunte ahunte hugahaze. Nefu'a otino negnana hara hunentesnigeno, tava'oma'arema nemanisimo'a otino tvao'ma're'ma nemanisimofona hara huntegahie. Ana nehanigeno mago ran kumapi vahe'mo'za ot'i'za mago ran kumapi vahera hahu nezman-tesnage'za, mago kini ne'mofo naga'mo'za ot'i'za mago kini ne'mofo naga'rara hara huzmantegahaze. <sup>3</sup> Ana hanigeno Isipi vahera hankavezmia omanena, mago'azama hunaku'ma kema retro'ma hu'nesaza zana Nagra eri'savri hanuge'za, ana zana osugahaze. Ana hanuge'za antahintahima erinakura, zamazanteti tro hu'nesnaza havi anumzante'ene, zamavune vahete'ene, fri vahe hankro'enema keagama nehaza vahete zamagra vugahaze. <sup>4</sup> Hagi ana nehu'na Isipi vahera, vahe'ma zamazeri havizama nehia kini ne'mofo azampi zamavare ante'nugeno, vahekura asunku nosia

hankave kini nekino, ana ne'mo kegava huzmantegahie. Nagra Monafi sondia vahe'mofo Ra Anumzamo'na ama'na nanekea nehue. <sup>5</sup> Hagi hagerimo'a taneno hagege nehanigeno, Naeli ran timo'a tanesigeno hagege huno ho'mu hugahie. <sup>6</sup> Hanki ne'onse tintamima tanenigeno, hinimnamo'a tuisa hanigeno, Isipima me'nea tintamimo'za tane'za omanegahaze. Ana nehina timpima nehagaza varozamo'za kasriza himna vugahaze. <sup>7</sup> Hagi Naeli tinkenaregama me'nea varozane, hozama ante'naza zamo'enena hagege hanigeno, zaho'mo emeri hareno vanigeno, mago zana omanegahie. <sup>8</sup> Hagi Naeli timpinti'ma nozamezama nehaza vahe'mo'za zavi krafa nehanageno, Naeli timpima nozame huku'ma netresaza vahe'mo'za zamasunku hu'za zavitegahaze. Kukoma timpima atresaza vahe'mo'za nozamea aze'orisageno, zamarimpamo'a evuramigahie. <sup>9</sup> Ana nehina tra'zama eri'za tavaravema tro nehaza vahe'mo'za, zamarimpa kna nehanage'za, osi nofiteti'ma efeke tavaravema tro nehaza vahera, amuha zazamia omanegahie. <sup>10</sup> Hagi zago eri'zama eneriza vahe'mo'za na'a hugahuneha nehu'za neginagi nehanage'za, efeke kukenama hati'za tro'ma nehaza vahe'mo'za haviza hugahaze.

<sup>11</sup> Hanki Zoani ran kumate'ma nemaniza kva vahera mago knare vahera omani'nazanki, negi nagi vahe mani'naze. Hagi knare antahi'zane vahe'mo'zama Isipi kini ne' Feroma antahi'zama ami'nazana, havi antahizanke ami'naze. Tamagra na'a agafare Ferona amanage huta nesamize? Tagra antahi'zane vahe'mofo mofavre mani'neta, ko'ma antahi'zane kinima fore hu'za mani'naza nagapinti vahe mani'none huta nehaze. <sup>12</sup> Hianagi menina antahi'zane vahek'a iga mani'naze? Zamatrege'za Hankavenentake Ra Anumzamo'ma Isipi mopare'ma nazano tro'ma hunaku'ma retro'ma nehia zana eme eriama hu'za kasamaho. <sup>13</sup> Hagi Zoani ran kumate kva vahe'mo'za neginagi nehazage'za, Memfisi rankumate kva vahe'mo'za zamagra'a orevataga arevatga nehazageno, Isipi mopare kva vahe'mo'za Isipi mopa kegava hu so'ea osu'naze. <sup>14</sup> Hagi Ra Anumzamo'a neginagi avamu huntegeno, Isipi vahe antahi'zana eri savari hu'ne. Ana hu'neanki'za aka ti neteno neginagi hu'nea vahe'mo agra'a amuti atrenesi, re hapahapa hiaza nehu'za Isipi vahera zamavare'za havi kante vu'naze. <sup>15</sup> Hagi Isipia zamagi me'nea vahera manisnigeno, zamagi omne vahera manisnigeno hugahianagi, magomo'e huno Isipi mopa eriso'ea osugahie. <sup>16</sup> Hanki e'i ana knafina Isipi vahe'mokizmia a'negna huno hanavezmia omane amme hanige'za, tusi'a knaza erigahaze. Ana nehanageno Monafi sondia vahe'mofo Ra Anumzamo'azana erisga huno zamazeri haviza hunaku nehanige'za, tusi koro nehu'za zamahirahiku hugahaze. <sup>17</sup> Anama nehu'za Isipi vahe'mo'za Juda vahe'mokizmi zamagima nehesage'za nentahii'za tusi koro hugahaze. Na'ankure Hankavenentake Ra Anumzamo'ma zamagrite'ma fore'ma haniazama retro'ma hu'nea zanku anara hugahaze.

<sup>18</sup> Hagi e'i ana knafina Isipi mopafima me'nea 5fu'a ranra kumapima nemaniza vahe'mo'za, Kenani vahe'mokizmi zamageru neru'za, Monafi sondia vahe'mofo Ra Anumzamofo agifi huvempa hu'za, Anumzamofo agorga manigahune hu'za hugahaze. Ana 5fu'a kumapinti mago kumamofo agi'a Zagemofo Kumare hu'za agi'a ahegahaze. <sup>19</sup> Hanki ana knafina Isipi mopamofo amu'nompina Ra Anumzamofoma Kresramana vunte ita mago megahie. Ana nehanigeno Isipi mopama ometre atuparega, nege'zama Ra Anumzamofo agima erisgama hu'zana agri agifi huhampri'za mago have retru rentesnageno megahie. <sup>20</sup> Hagi Isipi mopafina ana zamo'a mago avame'za me'neno, Hankavenentake Ra Anumzamo'a Isipi mopafina mani'ne huno huzmagesa hugahie. Ana hu'nesnigeno ha' vahezmimo'zama

eme zamazeri havizama nehanageno, zavi krafama nehanageno'a Ra Anumzamo'a mago zamagu'vazi ne' huntesigeno eno eme zamaza huno zamagu vazigahie. <sup>21</sup> Ana hanigeno Ra Anumzamo'a Isipi vhetera Agra'a erinte ama hanige'za, ana knafina Isipi vahe'mo'za ke'za antahi'za nehu'za, monora hunente'za kresramna vu'zane ofanena eri'za eme huntegahaze. Ana nehu'za Ra Anumzamofo agifi hvempa nehu'za, anama hvempama hanaza zana amage ante fatgo hugahaze. <sup>22</sup> Tamage, Ra Anumzamo'a Isipi vhetera knazanteti sefu'zamino zamazeri haviza hugahie. Hianagi zamazeri havizama hutesuno'a, ete zamazeri knamaregahie. Ana hanige'za ete Agrite rukrahe hu'za nunamu hanageno, Ra Anumzamo'a nunamuzmia nentahino, zamazeri so'e hanige'za knare hu'za manigahaze. <sup>23</sup> Hanki ana knafina Isipitira mago ranka fore huno Asiria vugahie. Ana hu'nesnige'za ana kantera Asiria vahe'ene Isipi vahe'mo'za vu'za e'za nehu'za, Ra Anumzamofona Agriteke magoka monora huntegahaze. <sup>24</sup> E'i ana knafina Isipi mopane Asiria mopamokema ha'aza huno, Israeli mopamo'a eama huno zanagrite eme tragotegahie. Ana hanage'za zamagripinti kokankoka mopa fima nemani'za vahe'mo'za asomura erigahaze. <sup>25</sup> Hanki Monafi sondia vahe'mofo Ra Anumzamo'a ana 3'a kumara amanage huno asomu kea huzmantegahie. Isipi vhetera Nagri vale mani'nagu asomu hunezmante'na, Asiria vhetera Nagra nazampinti tro huzmante'nogu asomu hunezmante'na, Israeli vhetera Nagrani'a vhahere hu'na erisanti'ma hare'noa vahekina asomu huzmantegahue.

## 20

### *Isipi vahe'ene Itiopia vahe'mofonte'ma fore'ma hania zamofo naneke*

<sup>1</sup> Hanki ana kafufina Asiria kini ne'Sargoni'a sondia vahe'are ugota hu'nea kva ne'a huntogeno sondia vhahera zamavareno vuno, Astodi kumate vhahera hara ome huzmanteno zamazeri zamagatere'ne. <sup>2</sup> Hagi anama hia knafina, Ra Anumzamo'a Amosi nemofo Aisaiana amanage huno nanekea asami'ne, kasunku kukenama hu'nana zana kavufaretira ome zafi netrenka, kagia nomo vazi'nanana ome kazufe atro. Higeno kema hiaza huno zafi netreno, avufa avapako agia nona agiafina omanenegeno amne vano hu'ne. <sup>3</sup> Hagi anante Ra Anumzamo'a amanage hu'ne, eri'za vahe'ni'a Aisaia'ma avufga avapako'ene agianoma ontani'ma 3'a kafufima vanoma hu'neana, e'i Isipi kumamo'ene Itiopia kumamoke'ma knazampima ufresnanke'zama nege'za kva hanazegu, e'i ana avame'zana tro hu'ne. <sup>4</sup> Ana hu'negu Asiria kini ne'mo'a vuno ana tare kumatmimpinti vhahera ha' ome huzmagatereteno, tavava ozafaramine, kasefa veatamine, zamavufaga avapako zamagia nona omanesiaza zamavareno kina ome huzmanteku vugahie. Ana hanige'za Isipi mopare zamavufaga zamavapako mani'ne'za tusi zamagazegu hugahaze. <sup>5</sup> Hanki anama hanage'za Itiopia vaheku'ma amuha'ma nehu'za, Isipi vaheku'ma zamimizama runafe'ma nehaza vahe'mo'za, tusi koro nehu'za, zamagazegu hugahaze. <sup>6</sup> Hanki ana knafina hagerimofo ankenaregama mani'za vu'naza vahe'mo'za amanage hugahaze, keho, Asiria kini neku'ma koro'ma freta vanunke'zama tagu'vazigahazema huta antahima nezamuna vhahera hago haviza hu'naze. E'ina hu'neankita Asiria kini ne'mofo azampintira atreta ofregahune huta hugahaze.

## 21

### *Babiloni kumate'ma fore'ma hania zamofo naneke*

<sup>1</sup> Hagi hagerimofo ankenaregama me'nea hagege kokamo'ma havizama hania zamofo nanekea Ra Anumzamo'a amanage huno nasami'ne, Vahe'mo'za tusi koro hu'za novaza hagege kokampinti tusi'a zahomo'a vemagu vemagu huno otigahie. Ana huteno hagege kokampinti hankave zaho'mo otiteno avuntenteno eaza huno kumama eri haviza hu vahe'mo'a egahe. <sup>2</sup> Hagi mago havizantfa hu'nea ava'na Ra Anumzamo'a naveri hige'na ke'noe. Vahe'ma zamazeri havizama nehia vahe'mo'a vahera zamazeri haviza hu vava nehigeno, vahe'ma havigema huno rezamatga nehia vahe'mo'a, vahera rezmatvatahu vava nehie. E'ina hu'negu Elamu sondia vahe'mota ete Babiloni vahera hara eme hunezmantenke'za, Midia vahe'mota eta kumazmia eme avazagi kagihio. Ra Anumzamo'a huno, Babiloni vahe'mo'zama mago'a vahe'ma zamazeri havizama nehaza zana, nagra ana maka knazana eri atregahue. <sup>3</sup> Hagi ana avanagna zama nege'na, tusi koro nehu'na nahirahiku hu'noe. Ana nehugen a'nemo'za mofavre anteku nehazageno, zamarimpa zamata negriankna huno natagr'i'ne. Nagra ana zankura tusi koro nehugen, antahintahinimo'ka knarer osu'ne. Ana hige'na mago'zama kezanku'ene mago kema antahi zankura nave'osige'na pri hu'noe. <sup>4</sup> Nasenimo'ka kagigagi nehige'na, koro nehugen nahirahire'ne. Kenagera mase so'e hugaragi tusi koro nehugen nahirahire'ne. <sup>5</sup> Hanki nagra nezmagoge'za mago'a vahe'mo'za ne'zama nenaza trara retro nehu'za, mopafina tavarave eri tare'za tafera nehu'za ne'zana retro hu'naze. Anama hute'za ne'zane timena nene'za mani'naze. Hianagi mago ne'mo amanage huno kezati'ne, sondia vahete kya vahe'mota antahiko, ha' vahera hago azanki, ha'ma hu'zana hankotamia erita masavena freta retrotra hiho. <sup>6</sup> Na'ankure Ra Anumzamo'a amanage huno nasami'ne, kuma'ma kegava hania vahe mago huntogeno vuno naza fore nehifi ome keteno, na'a kegahifi eme kasamino hu'ne. <sup>7</sup> Hagi ana ne'mo'ma kesinigeno, hosi afu agumpima mago mago vahe'ma manitere hu'nesnage'za tare hosi afutrema taragoteterema hu'zama ne-esnage'za, donki afu'ene kemoli afutamimofo agumpima vahe'ma mani'nezama avazuhumpi huza neesageno'ma nezmagesuno'a naza fore hugahifi agesa anteno antahi so'e hino. <sup>8</sup> Hanki anama huntazageno'ma ome avuma anteno kesia ne'mo'a laionimo krafa hiaza huno amanage hugahie, Ra Anumzamoka ha' vahaku'ma mani'neza kvama nehaza nonte mani'nena maka feru'ene kenage'enena kegava huwava nehue. <sup>9</sup> Hagi menima koana, hosi afu agumpina rama'a vahe'mo'za mani'ne'za kantigama tare tragotetere hu'za maniza neazage'na negogeno, mago agerumo amanage hu'ne, Babiloni kumamo'a hago haviza huno evuramie, Babiloni kumamo'a hago haviza huno evuramie huno hu'ne. Ana higeno Babiloni vahe'mofo havi anumzantamimofo amemaa'tro hu'zama retru re'naza zantamimo'a evuramino mopafi rutma tamanu hu'ne! <sup>10</sup> Tamagra nagri vahera witi refuzafupazankna huno knazamo'a tamazeri havizantfa hu'ne. Hianagi Hankavenentake Ra Anumzana Israeli vahe'motma Anumzamo'ma nasamia nanekea hago huama hugeta antahize.

### *Idomu mopare'ene Arabia mopare'ma fore'ma hania zamofo naneke*

<sup>11</sup> Ra Anumzamo'a Duma ran kumate'ma fore hania zankura amanage huno kea nasami'ne, Seiri mopafintira mago vahe'mo amanage huno kezatino nantahige'ne, ha' vahesnagu'ma kavuma antenka negana ne'moka, nama'a kna manino kora tugahie. Nama'a kna manino kora tugahie, huno nantahige'ne? <sup>12</sup> Anage'ma higeno'a ha' vahaku'ma avuma

atenoma mani'nea ne'mo'a amanage huno kenona hunte'ne, hago kora atugahianagi, hanimo'enena egahie. Hanki nantahigenaku'ma hanuta henka eta eme nantahigegahaze.

<sup>13</sup> Hagi Arabia kumate'ma fore'ma hania zankura Ra Anumzamo'a amanage huno nasami'ne, Dedani vahe'mota feno zantamia kemoli agumpi er-inteta vutma, Arabia mopafima osi traza akavozafi ome anteta masegahaze. <sup>14</sup> Hanki tinku'ma tusiza hu'za hagege hanaza vhahera, Tema kumate vahe'motma tina afinezmita, hapinti'ma atre'za fresaza vhahera ne'zana zamiho. <sup>15</sup> Na'ankure ana vhahera ha' vahe zamimo'za bainati kazintet'iene ati kevereti zamahe'za zamarotago hazage'za hapinti koro fre'za e'naza vahe mani'naze. <sup>16</sup> Na'ankure Ra Anumzamo'a amanage huno nasami'ne, zagore'ma mago kafufi eri'za erigahaze hu'zama kema anakite'za vahe'ma zamavrazage'za, eri'zama energi'e'zama ana kema eri knare'ma nehazaza hu'na, ama ana kafumofona mago mago kna hamparintere nehuankino, ana knama efore'ma hanigeno'a, Kedari kumate'ma me'nea hentofa zantamimo'a haviza hugahie. <sup>17</sup> Hanki Kedari kumate sondia vhahera atiretira knare hu'za hara nehaza vahe mani'naze. Hianagi zamahe hana hanage'za, osi'a naga manigahaze. Ra Anumzana Israeli vahe Anumzamo ama ana nanekea hu'ne.

## 22

### *Jerusalemi kumate'ma fore'ma hania zamofo naneke*

<sup>1</sup> Hanki Ava'nagnazane nehaza agupofima fore hania zamofo nanekea Ra Anumzamo'a amanage huno nasami'ne, Na'a higeta mika vahe'mota nontamimofo agofetura marenerize? <sup>2</sup> Rankumapima nemaniza vahe'mota tusi tamagasa neruta kereso nehaza vahe mani'naze. Hagi kuma karampima fri'za mase'naza vhahera, bainati kazinteti zamahazage'za frige, hapinti zamahazage'za frigera osu'naze. <sup>3</sup> Hagi maka tamagri kva vahe'mo'za magoka koro fre'za afete vu'nazanagi, ha' vahe'mo'za ati keveretira hara huoramante amne akohe'za tamazeri'naze. Hagi koro freta afete vunazanagi, hake'za tamavre'za mika kina huramante'naze. <sup>4</sup> E'ina hu'negu amanage hu'na tamagrikura nehue, nagrikura kea osuta natrenke'na mani'nena vahe'nimo'zama havizama nehaza zanku zavi krafa nehu'na manigahuanki, nazeri fruma hu'zankura antahintahi hakarea osiho. <sup>5</sup> Na'ankure Ava'nagnazanema nehaza agupofima fore'ma hania zamonfonka Monafi hankavenentake sondia vahe'mofo Anumzamo'a huhampri ante'neankino, ana knama esigeno'a vahe'mo'za kezankege nehu'za agasasankemo'ma hania zankura koro nehanageno, ha' vahe'mo'za e'za kuma kegina eme tapage nehanage'za, agonaramintega kezati anagamu atregahaze. <sup>6</sup> Hagi Elamu sondia vahe'mo'za ati kevezamia zamazampi eri'ne'za hosi afu zamine, karisi zamine eri'za hahunaku neaze. Ana nehazage'za Kiri ran kumate vahe'mo'za ha'ma hanaza hanko zamia eri'za neaze. <sup>7</sup> Knare zantfama hu'nea agupo mopatamifina, karisimoke'za avite'ne. Ana nehige'za hosi afu agumpima mani'nezama ha'ma nehaza sondia vahe'mo'za ran kumamofona ranra kafaramintera ha'hunaku retrotra hu'za mani'naze. <sup>8</sup> Juda vahe'ma zamagu'ma nevaziza zana Anumzamo'a e'inahu huno eri atregahie. Ana hanigeta ana knafina Zafa tanope hu'za nehaza nompima ante'naza ha' zantaminte amuhara hugahaze. <sup>9</sup> Hagi tamagrama kazana Jerusalemi ran kumamofona keginafina, rama'a kantamimo ankronkru hu'negetma ke'haze. Ana hu'negetma fenka kaziga

Deviti rankumapima me'nea tirupi tina henkani'naze. <sup>10</sup> Ana nehutma tamagra Jerusalemi kumapima me'nea nontamina nehampritma, mago'a nona tapage hutma ana nom aki'naza haveraminteti kuma kegina eri hankavetita tro hu'naze. <sup>11</sup> Hanki tamagra anama huteta, ko'ma me'nea tirupinti'ma tima avrentenakura kuma keginamofo amu'nompi tima eme marevazi kumara retro hu'naze. Hianagi Anumzamo'ma korapa'ma e'inahu'za fore hugahie huno'ma kema hunte'nere'ma ama ana zamo'ma eforema nehia ne'mofona antahimita amagera onte'naze.

### *Zavi krafama hu knamofo naneke*

<sup>12</sup> E'ina hu'negu Monafi sondia vahe'mofo Ra Anumzamo'a ana knafina huzmanteno zavi krafa nehuta, tamaseni tamazokara vazagat netreta, tamasunku kukena erintaniho hu'ne. <sup>13</sup> Hianagi tamagra anara nosutma bulimakao afutamine, sipisipi afutamine aheta ne'zana kreta nenetma, waini tinena neta musenkase nehutma amanage nehaze, okina frisnunku enketa ne'zane tinena neneta, musenkasea hamneno nehaze. <sup>14</sup> Hianagi nentahugeno Monafi sondia vahe'mofo Ra Anumzamo'a eama huno amanage hu'ne, tamagrama hu'naza kumira eri atre oramantesugeta mani'neta frigahaze huno hu'ne.

<sup>15</sup> Hanki Monafi sondia vahe'mofo Ra Anumzamo'a amanage huno hu'ne, Kini ne'mofo nompima kvama hu'nea ne' Sibnante evunka amanage hunka ome asamio, <sup>16</sup> Sibnaga kagra amafina na'a nehane? Kagra izaga have ag-onafina huzmantanke'za havea taga hu'za unefraze. Ama ana havegamo'a kagri'ma asegañesnaza mati megahie. <sup>17</sup> Hagi kva huo! Kagra hankave ne'mani'nananagi Ra Anumzamo'a kazeriteno kavazu huno vuno matevuno katregahie. <sup>18</sup> Hagi kagrira mago baligna huno kazeri kagigagi huno kazeri antumo huteno, mago vahe omani ka'ma kokampi matevuno katregahie. Ana hanigenka anantega frisnankeno, konariri'ane karisikamo'a anantega megahie. Kagra kinimofo eri'za vahe mani'nananagi, kinimofo nagara zamagaze eri zamigahane. <sup>19</sup> Hagi Ra Anumzamo'a huno, kagrama enerina eri'zampintira kazeri henkami netre'na kahegasope tregahue. <sup>20</sup> Hagi ana knafina eri'za vaheni'a Hilkiia nemofo Eliakimina ke hanugeno esanige'na, <sup>21</sup> kagrama nentanina zaza kukena Nagra eri'na agri antanintegahue. Ana nehu'na kagrama kratimpafima renentana kamunofira, eri'na agri renente'na, kagri eri'zana agri erimigahue. Ana hanugeno maka Jerusalemi kumapima nemaniza vahete'ene, ana maka Juda vhahera nafa zamigna huno manigahie. <sup>22</sup> Ana hutena Nagra agri azo'narera Deviti naga'mofo ki nofira anakintegahue. Ana hanugeno, agrama erinagi'nia kahana mago vahe'mo'a eri onkinigeno, agrama erigi'nia kahana mago vahe'mo'a eri onagigahie. <sup>23</sup> Hanki ana eri'zama aminu'a eri'zampina, seli nomofo nofi avazuhumpi hu'za mopafi aini azota ahazageno ufreto azeri kona hiaza huno, ana eri'zampina mani hankavetino manigahie. Ana hanige'za Eliakimima erisnia erizantera agri naga'mo'za knare zamagi erigahaze. <sup>24</sup> Ana hanige'za naga'am'o'za agriteke zamazama hanigura zamavua antegahaze. Naga'am'o'zane agrama kasezmante'nimo'za, kavoramine kapuraminema azotare'ma hantintazaza hu'za agriteke hanti'za manigahaze. <sup>25</sup> Hagi Monafi sondia vahe'mofo Ra Anumzamo'na amanage nehue, Ana knafina ana azeri konama hu'nea azotamo'a hantagi ramigahie. Ana hanige'za agrite'ma hagerafine'zama knama nemiza naga'mo'za, kurarampe'za uramigahaze. Ra Anumzamo'na ama'na nanekea nehue huno hu'ne.

## 23

### *Tairi kuma'ma haviza hania zamofo naneke*

<sup>1</sup> Hagi Tairi kumate'ma fore'ma hania zamofo kasnampa naneke ama'ne, Tasisi kumate ventemotma zavi krafa huta zaviteho. Na'ankure Tairi kumamo'ene ventemo'ma enemania kumamo'a havizantfa hu'ne. Hagi ana kuma'ma havizama hu'nea zamofo nanekea hageri amunompi me'nea kuma Saiprusiti eme zamasami'naze. <sup>2</sup> Hagerimofo ankenaregama ne-maniza vahe'motane, Saidoni rankumate'ma fenozama zagore'ma netraza vahe'motanena tamasunku nehuta akoheta maniho. Tamagrite'ma fenoma eriza zagore'ma eme atrenakura hagerimpi neaze. <sup>3</sup> Hagi kagripintira feno vahe'mo'za hagerimofo agofetu vano nehu'za, nanazana zagore kokankona ome atre'za vano nehaze. Naeli timofo ankenaregati witia eri'za zagoa eme retro nehaze. Tairi kumamoka maka mopafi vahe'mo'za e'zama maka'zama zagore'ma netraza kuma me'nane. <sup>4</sup> Saidoni kumamoka tusi kagazegu huo, na'ankure hagerimo'ene hanave vihuma hu'nea hagerimo'enena amanage nehie, nagra mofavrema antenaku'ma atagu'ma nehiazana nosu'na, mofavrea nontena, mofa'nene ne' mofavreraminena kegava osu'noe. <sup>5</sup> Hagi Isipi vahe'mo'zama Tairi rankumate'ma fore'ma hia zamofo agenkema antahisu'za, tusi antahintahi hakare hugahaze. <sup>6</sup> Hagerimofo ankenaregama nemaniza vahe'mota, tamasunku huta zavi neteta, koro freta hagerina takaheta Tasisi kumate viho. <sup>7</sup> Tairi kumara hentofa kuma korapa menege'za ana kumapina tusi musenkase nehaza kuma me'ne. Korapara ana kumapi vahe'mo'za mago'a vahera huzmantage'za afete moparega vu'za e'za hu'za, ranra kumatmina ome azeri oti, eme azeri oti hu'naza kuma me'ne. <sup>8</sup> Ina vahe'mo ana knazana retro hu'nea knazamo Tairi kumatera forera nehie? Ama ana kumapintike'za kini vahera zamazeri fore nehie. Ama ana kumapi zago vahera mani'nage'za, kokankokatira ra zamagia nezamiza kuma me'ne. <sup>9</sup> Monafi sondia vahe'mofo Ra Anumzamo ama ana knazana fore hugahie huno retro hunte'hea zamo efore hu'ne. Na'ankure hankavezamigu zamagesa nentahi'za zamagi erisga nehaza vahe'enе, kokankokati'ma ra zamagima nezamiza vahe zamazeri zamagaze hunaku Anumzamo'a anara hu'ne. <sup>10</sup> Naeli timo'ma tima hagenoma eri harafi'ma huno eviaza huta Tasisi vahe'mota mago'zamo'a tamaze orinigeta mopatamifina amne vuta eta hugahaze. <sup>11</sup> Ra Anumzamo'a azana hagerimofo agofetu rusuteno, kini vahe'mo'zama kegavama hu'naza kumatmina azeri tore nehuno, Kenani mopafima hankavenentake fraki kuma'ma ki'naza kumatamina eri haviza hugahue hu'ne.

### *Tairi kuma'ma zamefi humisnaza zamofo naneke*

<sup>12</sup> Hagi Agra amanage hu'ne, Saidoni kumamoka ko'ma nehzaza hu'za husga huogantegahaze. Na'ankure evuraminka havizantfa hu'nane. Menina otitma hageri amu'nompi me'nea kumate Saiprusi vugahaze. Hinagi ana kumate'enena mani frua huta omanigahaze.

<sup>13</sup> Hanki menina Kaldia vahe mopa keho. Anampina vahera magore hu'za omani'naze. Na'ankure Asiria vahe'mo'za e'za kumazamia eri haviza hazageno, mopazamifina afi zagagafamo'za avite'naze. Asiria vahe'mo'za kuma kegina zamimofo tvaontera zaza no ki'za mani'ne'za hara huzmante'za hankavenentake vihu zamia tapage tapagu hu'za eri haviza hu'naze. <sup>14</sup> Tasisi kumate ranra ventema hageri agofetu'ma vanoma nehaza ventemota tamasunku huta zavi ateho. Na'ankure hankavenentake vihuma hu'naza kumatmimo'a hago haviza hu'ne. <sup>15</sup> Hagi ana zama fore

huno evutesanige'za, mago kini ne'moma nemania kna huno 70'a kafumofo agu'afi, Tairi kumara zamagera kanintegahaze. Hianagi ana 70'a kafuma evutesnigeno'a, mago monko a'mofo agire vare zagame'ma nehaza zagamemo'a, Tairi kumamofo avate fore hugahie. Ana zagamepina amanage hu'ne. <sup>16</sup> Monko a'moka vahe'mo'za antahiogamizanki mago hapue nehaza zavena eritenka, ran kumamofo amu'nompi vano nehunka, zavena aheso'e hunka nehenka, rama'a zagame nehuge'za vahe'mo'za ete antahigamiho. <sup>17</sup> Hagi ana 70'a kafuma evutesnigeno'a, Ra Anumzamo'a Tairi kumara atresanigeno, monko a'mo'ma nehiaza huno maka ama mopafi kini vahe'ene zagore savri huno vano hugahie. <sup>18</sup> Hianagi Tairi kumamo'ma eri'nia zagomofo ante agofetuma huno'ma aminia amema'a, agra erinte ruotage hanigeno Ra Anumzamofo su'zane huno ruotage huno megahie. Ana'ma hanageno'a ne'zana rama'a me'nesnige'za Ra Anumzamofo pristi vahe'mo'za nene'za, knare'nare kukena rama'a me'nesnige'za antanigahaze.

## 24

### *Ra Anumzamo ama mopama eri haviza haniza zamofo naneke*

<sup>1</sup> Antahihi, Ra Anumzamo'a ama mopa eri haviza hanigeno, ama mopamo'a ka'ma mopa megahie. Ana nehuno Agra ama mopamofo avugosa eri ruzahе zahu nehuno, vahetamina zamazeri panani hugahie. <sup>2</sup> Hagi pristi vahe'ma amne vahe'ma, eri'za vahe'ene kva vahe'ene, eri'za a'nanene kva a'nanenena anahu knazanke enerisageno, fenozama mizanesaza vahe'mo'zane, zagore'ma fenozama netraza vahe'mo'zane, zagoma nofi'ma nehaza vahe'mo'zane zagoma nofite'ma netraza vahe'mo'zanena anazanke hu'za anahu knazanke erigahaze. Ana zanke hu'za vahe'zama erite'za nezamiza vahe'mo'zane, vahe'zama eneriza vahe'mo'zanena anahu' knazanke erigahaze. <sup>3</sup> Ama mopamo'a havizantfa huno mago'zana omanena, ka'ma koka megahie. Ra Anumzamo ama ana nanekea hu'ne. <sup>4</sup> Ama mopamo'a hagege huno haviza nehina, asunku nehuno zavi krafa hugahie. Ana nehina ama mopafima zamagine vahe'ma nemaniza vahe'mokizmi zamagimo'a fanane hugahie. <sup>5</sup> Ama mopafima nemaniza vahe'mo'za ama mopa eri haviza hu'naze. Na'ankure zamagra Anumzamofo kasegene tra kenena runetagre'za Anumzamo'ma zamagranema mevava huhagerafi huvempa kema huhagerafi'nea kea ruhantagi'naze. <sup>6</sup> E'ina hu'negu Anumzamo'a ama mopa sifna hunteno azeri haviza nehige'za, ama mopafima mani'naza vahe'mo'zama havi zamavu'zamava'ma hu'naza zamofo nona'a knazana eri'za fri vagarazage'za osi'a naga mani'naze. <sup>7</sup> Hagi kasefa wainimoza zavi krafa nehzageno, waini nofimo'enena kassrine. Ana hige'za waini tima nene'za muse zagame'ma nehaza vahe'mo'za karagi ru'naze. <sup>8</sup> Hagi nase'nasepamofo agasasamo'a vagaregeno, hapu zavenanema nehe'zama musema nehaza zana vagare'ne. <sup>9</sup> Hagi waini tina ne'nazanagi muse zagamera osu'naze. Na'ankure waini timo'a zamagitera akahe'ne. <sup>10</sup> Hazenke zamo'ma avimate'nea kumamo'a fragu vazino evuramigeno ka'ma koka megeno, nontamimofo kafaramimo'a erigi vagare'neankino, mago vahe'mo'a ana nontamimpina uofregahie. <sup>11</sup> Ama mopafima musenkasema nehaza zana hago vagare'ne. Ana hige'za kumamofo karampi mani'ne'za musema nehaza wainigura krafa hu'za kezati'naze. <sup>12</sup> Hagi rankumamo'a havizantfa higeno, ana kumamofo kahamo'a tamana tamana huno evurami'ne. <sup>13</sup> Anahu kna avu'ava zamoke,

ana maka mopafima nemaniza vahepina fore hutere hugahie. Olivi rgama tagige, grepri rgama tagite'za osi'a ragama atrazageno zafare menege'za neragizankna hu'za osi'a vahe manigahaze.

### *Fatgoma huno refkohu Anumzamofo Agima hentesgama hanuna naneke*

<sup>14</sup> Hagi anama hanige'za zamagra zamagerura erisga hu'za muse zagame hugahaze. Ana nehanage'za zage fre kazigama nemaniza vahe'mo'za Ra Anumzamofo hihamu hankave'agura ranke hu'za Agi'a ahentesga hugahaze. <sup>15</sup> E'ina hu'negu maka vahe'ma zage hanati kazigama nemaniza vahe'mota Ra Anumzamofona agi'a ahentesga nehinkeno, hageri ankenama nemaniza vahe'mota Ra Anumzana Israeli vahe'mokizmi Anumzamofona Agi'a ahentesga huta ra agi amigahaze. <sup>16</sup> Hagi mopama ome atre eme atrema hu kazigatira muse zagame'ma nehzazana, amanahu zagame nehzanki antahihi. Fatgo avu'avazama nehia Anumzamofona agi'a ahentesga nehune hu'za hu'naze. Hianagi nagra amanage hu'na hu'noe, nasunku huanki'na musena nosu'na haviza hu'na amne zankna hugahue. Na'ankure nagrama koana, havi zamavuzmava nehu'za havige nehaza vahe'mo'za, mago'ene vhahera rezmatga nehu'za, zamazeri haviza nehzanki, ina vahku knare vhahera mani'ne huta antahimahune.

### *Koro'ma fre kama omanenia zamofo naneke*

<sup>17</sup> Ama mopafima mani'naza vahe'mota tamagri'ma tamazeri tamagogofe'nia zamo'ene krifumo'ene kukomo'enena tamazerinaku tamavega ante'naze. <sup>18</sup> Hagi knazama esania zamofo agasasankema nentahino koro'ma freno vania vahe'mo'a, kerifi uramigahie. Ana hanigeno iza'o ana kerifinti'ma atiramino koro'ma fre'nia vhahera kukomo azeri antarako hugahie. Anami monamo'a ruhagaro nehanigeno, ama mopamo'ma rigama anteno me'nea tramo'a kaza hugahie <sup>19</sup> Ana nehanigeno mopamo'a kekokako huno atamana huneraminigeno, mopamo'a rutragino vuno eno nehanigeno, tusiza huno mopamo'a tore tore hugahie. <sup>20</sup> Anama nehanigeno'a ama mopamo'a, vahe'mo negi ti ne'neno antifi omere emere hiaza nehuno, tusi'a zaho'mo mago osi nonte zaho erigeno, masete otite hiaza hugahie. Hagi ama mopafi vahe'mofo ke ontahi zamavu'zmavamo hanigeno, mopamo'a evuramino mago'enena ete oraotigahie. <sup>21</sup> Hagi ana knafina Ra Anumzamo'a anami monafima nemaniza havi ankero vahe'enе, ama mopafi kini vahetamina zamazeri haviza hugahie. <sup>22</sup> Ana nehuno murigampi vahe zamavare vazi'za kina huzmantazaza huno, Ra Anumzamo'a magopi zamavare atru huno kina huzmantegahie. Ana hanige'za zazate manitesnageno, henka knazana zamigahie. <sup>23</sup> Hagi ikamo'a kizmankizma nehanigeno, zagemoa' agazegu hugahie. Na'ankure Monafi sondia vahe'mofo Ra Anumzamo'a Saioni agonafi Jerusalemi kumate kinia emanino vhahera kegava hugahie. Ana hanigeno Agri masazamo'a, Jerusalemi kumate ugota kva vahe'amofa zamavuga me'nesnige'za kegahaze.

## 25

### *Anumzamofoma humusema hunte zagamere*

<sup>1</sup> Ra Anumzana kagra nagri Anumzanki'na, nagra kagika'a ahentesga nehu'na, musenkase hu'na susu hugantegahue. Na'ankure kagra korapa retro huntenga huvempa hu'nana kante amage antenka, so'e kavukvara hunka hentofa zana tro hunerantane. <sup>2</sup> Kagra ranra kumatamina eri haviza hankeno kugusopamo hihi hiaza nehigenka, hankave vihuma hu'naza

ranra kumatmina eri haviza nehunka, megi'a vahe'mokizmi ranra kumara eri haviza hananke'za ete'za ana kumara eri orati'za onkigahaze. <sup>3</sup> E'ina hu'negu hankave vahe'mo'za Kagri kagi'a ahentesga nehanage'za, kefo zamavu'zmavama hu'za osuga zama nehaza vahe'mokizmi ranra kumapima nemaniza vahe'mo'za Kagrikura tusi koro hugahaze. <sup>4</sup> Na'ankure Kagra zamazama hugama osaza vahe zamaza nehunka, zamunte omane vahe'ene keonke zanku'ma atupa nehaza vahe'mokizmia kegava hunezmanenka, komopa komo'ma zamazeri havizama nehia vahera Kagra nonkna hunka refitenezmantenka, amuho knafina turunara hunezman-tane. Na'ankure hazenke vahe'mo'za tusi ununkomo'ma nehiaza hu'za neazagenka reso hunerantane. <sup>5</sup> Ru kumateti vahe'mo'zama feru zagemo tusi amuho hiaza hu'za, tazeri haviza hunaku hu'nazanagi, hampomo zagemofoma reso higeno hankave'a omaneaza hunka resohurantake'za, kefo zamavu'zmavama nehaza vahe'mo'za ha'ma hugate nere'zama nehaza zagameru osu'naze.

### *Ra Anumzamo taguvazi'nea zamofo naneke*

<sup>6</sup> Hagi Monafi sondia vahe'mofo Ra Anumzamo'ma, ama Saioni ag-onare'ma ne'zama retro'ma haniana, knare'ma hu'nesnia afu ame'ane, zaza knafima retroma huntazageno knare zantfama hu'nesnia waini tine retro hanige'za, kokankokama mani'naza vahe'mo'za eme eritru hu'za tusi'a ne'za negahaze. <sup>7</sup> Hagi maka ama mopafi vahe'ma frizamo'ma refi'matenezmantea zana, Ra Anumzamo'a ama Saioni agonare eri atre-gahie. <sup>8</sup> Hankavenentake Ra Anumzamo'a fri'zamofo hankavea eri haviza hutrenigeno vaga nerena, maka vahe'mokizmi zamavunura eri ho'mu hugahie. Ana nehina Agri naga'ma ama mopafima zamazeri havizama nehaza zana anara osugahaze. Ra Anumzamo ama'na kea hu'n. <sup>9</sup> Hagi ana knafina amanage hugahaze, Ra Anumzana tagri Anumza mani'negeta Agrite tamentintia nehuta avega ante'nonane. Ana hu'neanki otinketa Agrama tagu'vazino etema tavre'nea zankura musena huntamneno hu'za hugahaze. <sup>10</sup> Ra Anumzamofona hankavenentake azamo'a Saioni agona kegava hugahie. Hianagi Moapu vahera Agra'a agiafi zamazeri atre'nige'za, ha' vahe'mo'za e'za ha' eme huzmante'za, zamazeri haviza hanage'za, bulimakao afu'mo hagege trazante rifa'a agiareti rehapa hiaza hugahaze. <sup>11</sup> Ana hanige'za timpima zamazama rutare'zama zanagoma nerazaza hugahazanagi Anumzamo'a zamavufaga rama nehaza zane, vahe'ma rez-mavatgama nehaza zana eri fenkami atregahie. <sup>12</sup> Ranra kuma zamimofo zaza vihu kegina'zamia, eri haviza hanigeno, faragu vaziramino mopafinke kugusopa segahie.

## 26

### *Anumzamo'ma kegava huzmantenigu antahinemi'za hanaza zaghmere*

<sup>1</sup> Hagi ana knama efore'ma hanige'za, Juda mopafima nemaniza vahe'mo'za ama zagame hugahaze. Rankumatimo'a hankaveti'ne hu'za hugahaze. Ra Anumzamo'ma tagu'ma nevazia zamo'a hankave kuma keginagna huno kegava hurantegahie. <sup>2</sup> Rankumamofo keginare kafantamina anagita eri hagaro hinke'za, fatgo veamo'za efreho. Ana maka zupa Anumzamofona amagenentaza vahe mani'naze. <sup>3</sup> Hagi maka zupa Kagrikuma antahintahima nehia vahe'mofona, knare zamarimpa frua nezamine. Na'ankure Kagrite zamentintia nehaze. <sup>4</sup> Ra Anumzamofonku maka knafina antahi nemita tamentintia Agritera hanune. Na'ankure Ra

Anumzana tagri Ra Anumzamo'a mevava hanavetia Agrake mani'ne. <sup>5</sup> Hagi zamavufaga rama nehaza vahera zamazeri fenkami netreno, rankumazmia ahe pasru higeno mopafi evuramino kugusopase'ne. <sup>6</sup> Hagi zamunte omne'ne vahé'ene, knazama e'neriza vahé'mo'za, zamagiareti rentrako hu'za rankumamo'ma haviza higeno kugupama me'nefina vano nehaze.

### *Ra Anumzamofo antahinemino amentinti hunte zamofo naneke*

<sup>7</sup> Hagi fatgo vahé'mo'zama vanoma nehaza kamo'a pehe hu'nege'za kana nevazagenka, fatgo vahé'mo'zama vanoma hanaza kana Ra Anumzamoka erinte fatgo nehane. <sup>8</sup> Ra Anumzamoka tagra Kagri kasegemo'ma hihoma hu'nea kante amage nenteta kavega nentone. Ana nehuta Kagri kagima ahentesgama huzankura tagu'reti tavesinentone. <sup>9</sup> Kenagera nagu'amo'a tusiza huno kavesinegantegeno, nanterana avamunimo'a kagrane manisia zankura tusiza huno ave'nesie. Hagi kagrama fatgo hunka'ma refko'ma nehana kavukvazamo'a ama mopafina me'nege'za, fatgoma huno mani avu'ava zana ama mopafi vahé'mo'za rempi hu'za nentahize. <sup>10</sup> Hianagi kefozama nehaza vahé'ma kasumantagi nezmantanke'za, fatgoma huno mani avu'ava zana rempi hu'za nontahize. Fatgo vahé'ma nemaniza mopafi mani'nazanagi, kefo avu'avaza huvava hu'za nevu'za, Kagri hi-hamu hankaveka'agura zamagesa nontahize. <sup>11</sup> Ra Anumzamoka Kagra kazana erisga hunka zamazeri haviza hunaku nehananagi, zamagra anazana nonkaze. Kagra zamazeri zamagaze nehunka, vaheka'ama tusizama hunka kavesi nezmantana zana erinte ama hananke'za neges-nagenka, ha' vahekama te fanane hanie hunkama retro'ma hunte'nana tevemo ana vahera te fanane hugahie. <sup>12</sup> Ra Anumzamoka Kagrake'za tarimpa frua tagrina neramine. Na'anckure maka zama nehuna zana Kagri hankaveretike nehune. <sup>13</sup> Ra Anumzana tagri Anumzamoka, ru vahé'mokizmi kva vahé'mo'za tagrina kegava hurante'naze. Hianagi Kagri kagine husga hunegantone. <sup>14</sup> Hagi fri'naza vahé'mo'za kasefara hu'za omanisageno, fri'zama vu'namo'za ete oraotigahaze. Kagra zamazeri haviza nehunka, zamazeri fenkami atranke'za haviza hu'naze. Zamazeri fanene hanke'za vahé'mo'za zamagekani nezmante'za, zamagesa antahi nozamize. <sup>15</sup> Hianagi Ra Anumzamoka mopatia eri ra nehunka, tazeri rama'a nehunka, mopatimofo ometre emetrema hu'nea agema'a miko erira nehunka eri za'za nehanketa, Kagrira rankagi negamune.

<sup>16</sup> Ra Anumzamoka, kagra vahekama zamazeri havizama hanke'za han-kavezamia nomane. Hianagi zamagra zamasunku nehu'za, ete kagrite e'za sumisumi hu'za nunamuna Kagritega hu'naze. <sup>17</sup> Hagi amu'ene hu'nea a'mo mofavre kasente'naku nehuno ata negrigeno maseno rukrahe krahe nehuno krafa nehiaza huta, Ra Anumzamoka kagri kavurera tusi'a knaza enerita tatazanku hu'none. <sup>18</sup> Hagi tagranena tamu'ene hu'neta tata negrigeta rukrahe krahe nehunanagi, zaho kasente'none. Ana nehuta ama mopafi vahera zamagura novazune. Ana higeta ama mopafima manisaza vahera kase ozmante'none. <sup>19</sup> Hianagi Kagri vahé'mo'zama fri'nafintira oti'sageno, zamavufagamo'a kasefa hanige'za manigahaze. Hagi fri'za kugupama se'naza vahé'mo'za oti'za muse zagame hugahaze. Na'anckure nanterama osi ata ko neriaza hunka ama mopa ru kasefa nehunka, fri'naza vahera fri'nafintira zamazeri otinka zamasimura zamigahane. <sup>20</sup> Nagri vahé'mota nontamifi unefreta, tamefira kafana erigiho. Osi'a knafi frakita mani'enkeno Anumzamofo arimpia ahe'zamo'a evino.

<sup>21</sup> Keho Ra Anumzamo'a agrama nemania kuma'afinti atiramino, ama mopafima nemaniza vahe'mokizmi kumi'mofo nona huno zamazeri haviza hunaku ne-e. Hagi mago'a vahe'mo'ma vahe'ma aheno eriragi'nesnia korana ama mopamo'a erinte ama hugahie. Iza'zo ra hazenkema hu'nesnaza vahera zamazeri ante ama hanige'za kegahaze.

## 27

### *Israeli vahe'ma Ra Anumzamo'ma zamavare'nea zamofo naneke*

<sup>1</sup> Hagi ananknafina hagerimpi vanoma nehia osifavegu'ma Leviataniema nehaza osifavea Ra Anumzamo'a hankavenentake huno asanenea bainati kazima vahe'mofoma amanoviziga bainati kazinu hagerimpima vanoma nehia osifavea ahe frigahie.

<sup>2</sup> Hagi ana knafina knare waini hozagura amanage huno zagamera hugahie. <sup>3</sup> Nagra Ra Anumzamo'na ana waini hoza kegava nehu'na, mika zupa tina ami vava nehu'na, vahe'mo'ma eno emeri haviza hu'zankura zagine haninen kegava huvava nehue. <sup>4</sup> Hagi menina ana waini hozagura narimpa ahenontoe. Hagi Nagrama kesnugeno havi trazamo'ene ave've trazamo'ma ana hozafima hageno marerisnige'na, ha' huzmantena zamarehatpitena ana trazana tevefi hanavazi'na kre fanane hugahue. <sup>5</sup> Hianagi nagriku'ma kegava hunantegahie huno'ma hania vahe'mo'a, Naganre arimpa fru huno nemaniokino, e'i anamo'a tamage huno nagrane arimpa fru huno manigahie. <sup>6</sup> Hagi mago kna neankino ana knama esanige'za, Jekopu naga'moza waini zafamo'ma hiazza hu'za rafuna nere'za, agata hage'za amosare ahe'za raga ahentesagano maka ama mopafina avitegahie. <sup>7</sup> Hagi Ra Anumzamo'a Israeli vahe'mokizmi ha' vahe'ma zamazeri haviza hu'neaza huno, Israeli vahera zamazeri havizana nosuno, Israeli nagamokizmi ha' vahe'ma zamahe fri'nea zana huno, Israeli vahera zamahe nefrio? I'o, anara nosie. <sup>8</sup> Ra Anumzamo'a naga'a arimpa ahezamanteno zamatrege'za vu'za vahe moparega kina ome hu'naze. Agra arimpa ahenezamanteno, zage hanati kazigati hankave zaho atufeno eno maka'za eri harafi huno viaza huno zamazeri harafi huno vu'ne. <sup>9</sup> E'ina hu'negu (Jekopu) Israeli vahe'mokizmi kefozamo'ene kumi'mo'enema vagamaresniana magoke kanke me'ne. Havi anumzante'ma ofama nehaza have ita ru tamana tamanu nehu'za, Asera havi anumzamofo amema'ama zafarema antrente'nezama mono'ma hunentaza kumatamina eri haviza nehu'za, mnanentake'za insensima kre manama nevaza ita ru tamana tamanu hutreho.

<sup>10</sup> Na'ankure hankavenentake vihuma me'nea kumamo'a menina haviza huno me'ne. Ana higeno ana kumapima nemaniza vahe'mo'za koro fre'za omanizageno, mago ka'ma kokakna higeno anampina bulimakao afu anentamo'za emanine'za traza nene'za, ne'onse zafamofo ani'naramina vatari'za nevaga neraze. <sup>11</sup> Hanki ana zafa azankuna tamimo'ma hagegema huteno'a hantagino mopafi evu neramige'za a'nemo'za zogi'za tevefi krazageno nere. Na'ankure ana vahe'mo'za ke ontahi vahe mani'naze. E'ina agafare azeri fore'ma hu'ne'mo'a zamasunkura huozmantegahie. Ana hu'neankino tro'ma huzmante'nea ne'mo'a asunkura huno zamatresnige'za omanigahaze. <sup>12</sup> Hagi ana knafina Ra Anumzamo'a maka mopafima Israeli vahe'ma mani'nazana zamavare tru hugahie. Yufretisi tinteti agafa huteno vuno, Isipi tinkenarega vanigeno, vahe'mo witi refuzafupeno zogiaza huno vahe'a magoke magoke zogi tru hugahie. <sup>13</sup> Hagi ana knafina

ufemo'a rankrafage nehanigeno, Israeli vahe'ma Asiria mopare'ene Isipi mopare'ma vu'za kinama ome hu'naza vahe'mo'za Jerusalemi kumate e'za Ra Anumzamofona ruotage'ma hu'nea agona'are monora eme huntegahaze.

## 28

### *Sameria kumate'ma knazama esania zamofo naneke*

<sup>1</sup> Tasunku hugantone. Efraemi naga'mo'zama nemaniza rankumamoka, knare'nare kavasase zankamo nehigenka mani'nanke'za, Efraemi naga'mo'za aka ti nene'za zamavufaga erisga nehaze. Hagi ana rankumamoka tra'zamo knare avasase renteaza hunka, agona kaziga knare agupo mopafi hentofa waini hoza ante'nane. Hianagi kavufgama erisgama nehana zana, mago zupa zagemo traza te vamagiaza hunka haviza hugahane. <sup>2</sup> Hanki ko, Ra Anumzamo'a hankavenentake sondia vahera ko huhampri'neankino ana vahe huzmantesige'za e'za tusi ko'mopa komo'ene tusi'a zahomo'ene timo'ene hageno refiteaza hu'za ame hu'za zamahe'za mopafi refitegahaze. <sup>3</sup> Hagi Efraemi naga'mozama aka tima nene'za, Sameria kumaku'ma zamimizama runafe'ma nehaza vahera ha' vahe'mo'za zamagiareti eme rentrako hu'za zamare hapatigahaze. <sup>4</sup> Hagi kagra knare agona mopafi flauamo avasase zama'ane me'neankna hunka mani'nane. Hianagi zafa raga tagi knama zahufama ome'negen, ame huno mago fiki zafa ragamo afure'negen, mago vahe'mo keteno ame huno tagino neankna hugahaze. <sup>5</sup> Hanki ana knafima osi'a naga'ma ofri'ma manisnaza nagatera Monafi sondia vahe'mofo Ra Anumzamo'a zamasenire'ma kini fetorima avasasezama anteaza huno Agra'a manigahie. <sup>6</sup> Ana nehuno trate'ma mani'heno kema refkoma hanimofona, fatgoma huno kema refko hu avamu Anumzamo'a nemino, hankavemati'za ha'ma hu'za kuma'ma aguvazisnaza sondia vahera hankave zamisige'za kuma kafantera otigahaze. <sup>7</sup> Hagi kasnampa vahe'ene pristi vahe'mo'za zamagranena waini tine aka tine nene'za tusi neginagi nehu'za, umasete emasete hu'za kana nevaze. Hagi Anumzamo'ma zamaveri'ma nehia kasnampa vahe'mo'za keso'ea nosazage'za, pristi naga'moza vahe'mokizmi knazama refkoma hazafina kezmifina hantga nehaze. <sup>8</sup> Hagi mani'naza tratera amu'mati'naza zamo avitegeno, magore huno amne kankamuna omanetfa hu'ne. <sup>9</sup> Ana vahe'mo'za amanage nehaze, agra iza antahi'zana rempi hunemino, naneke'a izante eri ama huno asaminakura nehuno, iza aminte osi mofavreia mani'nea mofavremofo asaminakura nehie hu'za nehaze. <sup>10</sup> Agra maka zupa ana naneke'za nehie. Mago ne'mo'ma osi mofavremofoma eri amatfa huno osite osite isare isare, trate trate e'ina huo huteno, amana huo huteno'ma hiaza nehie. <sup>11</sup> Ana hu'negu Ra Anumzamo'a ru vahe zamagipi huvazino, ontahi'nesnaza zamagerupinti vahe'amofona nanekea huzamigahie. <sup>12</sup> Hagi ana vahekura Anumzamo'a amanage huno zamasami'ne, ama kumara mani fruhu kumaki, zamatreke'za knazama eneriza vahe'mo'za mani fru hiho. Hianagi ana kea ontahi'naze. <sup>13</sup> E'ina hu'negu osi mofavreia rempi hunezamizaza huno, Ra Anumzamo'a agra'a eri amatfa huno isare isare, trate trate e'ina hiho huteno, amana hiho huteno osite osite fru huno kea nezmasamina zamefira rukrahe hu'za traka hu'za hazenke eri'za mase'nesage'za eme zamazeri'za vugahaze.

<sup>14</sup> E'ina hu'negu Jerusalemi rankumate'ma mani'netama ki'za zokago kema nehaza kva vahera Ra Anumzamofona nanekea antahiho. <sup>15</sup> Na'ankure tamagra amanage hutma nehaze, tagra fri'zane huvempa nehuta, fri vahe

kuma'ene keaga huhagerafi'none nehaze. Hagi henka knazama esania knazamo'a, tavakora osugahie. Na'ankure tagrama havigema nehuna kemo, tagu'vazina manigahune nehuta, vahe'ma rezmanvatgama nehuna zamo frakirantegahie huta nehaze. <sup>16</sup> E'ina hu'negu Ra Anumzamo'a amanage huno nehie, Antaihiho, nom a renagentete'ma asenentaza havea hanavenentake higeno zago'amo'a mareri'nea havea Saioni agonare asente'noankino, iza'o ana havere'ma amentintima hanimo'a agazegura huno antahintahi hakarea osugahie. <sup>17</sup> Hagi fatgoma huno kema refkohu avu'avara, kema refkoma hu'za nente'na, fatgoma huno refkoma hu avu'ava zana, fatgoma huno refkoma hu'za antegahue. Ana hanugen o havigema nehu'za framanekiza kumazmia, tusi ununko'mo runo tina hageno eno emeri haviza huno vugahie. <sup>18</sup> Hagi ofrigahunema huta fri'zanema huvempama hu'naza nanekea eri atresugeno, fri vahe kuma'enema huhagerafi'naza nanekemo'a amne zankna hugahie. Ana nehanigeno henkama esania knazamo'a, eme tamazeri haviza huno tamare hapatigahie. <sup>19</sup> Ana knazamo'a tamagerfa huno tamatrelo ovuno, hanine zagine maka knafinena tamagrane meno vugahie. Hagi ama ana kemofo agafa'ama antahi ama'ma hanutma antri nehutma tamagogogu hugahaze. <sup>20</sup> Hagi mase sipamo'a atupa higeno, kofino'ma mase kafe'mo'ma atupa hu'negeno vahe'mo kenage mase so'e nosiaza hutma mase so'ea osugahaze. <sup>21</sup> Na'ankure Perasimi agonafine, Gibioni agupofima ko'ma hu'neaza huno hankave'an Ra Anumzamo'a eno eri'zama'er erigahuema huno hu'nea eri'zana emerigahie. Hianagi ana eri'zama erisniana tamagrama antahi'naza kanterer e'orino, ruzahu kna eri'za erigahie. <sup>22</sup> E'ina hu'negu kiza zokago kema nehaza zana atreho. Hagi anama osnazana ko'ma mani'naza avamena agatereta tusi'a knazampi ufregahaze. Na'ankure Ra Anumzana Monafi sondia vahe'mofo Anumzamo'a, ama maka mopa eri haviza hugahue huno hu'nea naneke nehue.

<sup>23</sup> Hagi menina tamagesa ante so'e hu'neta, nagrama hanua nanekea antaihiho. <sup>24</sup> Hagi magora hozama nentea ne'mo'a hozama ante'nakura mopage'za rehankori vava huno nevifi? Anara nehuno mopage'za rupopo huvava huno vugahifi? <sup>25</sup> Hagi mopama rehankorino eri ante fatgoma huteno'a, anampina haninke mepo nehankreno, witia kankamunte erinte fatgo huno nehankreno, balia kankamu'are nehankreno, hozamofo ankinarega raisia kri kanegiaza me'n'e. <sup>26</sup> Hozama erinte fatgoma huno ante antahintahia Anumzamo'a rempi hunemie. <sup>27</sup> Hagi haninke mepo'a, witima refuzafumanepa zafaretira, refuzafuranope. Witima refuzafupe zafama donki afumo'ma renteno vano nehia zafaretira kohera refuzafunope. Hianagi mepoma amasaginakura osi kanonteti nemasagino, ra kanontetira nomasagiaza me'n'e. <sup>28</sup> Hagi witi raga refuzafupeno bretia tro nehie. E'ina hu'negu zazatera refuzafupe vava osugahie. Na'ankure hosi afutema rentesia karisiretimu witima zazate'ma refuzafumapeniana haviza hugahie. <sup>29</sup> Hagi ana maka eri'zama eri antahi'zana, Monafi sondia vahe'mofo Ra Anumzamofontegati ne-e. Vahe'ma azeri fatgoma hu kaziga knare hu'neno, knare antahi'zampina avite'n'e.

## 29

### *Jerusalemi kumamo'ma kva hinogu avumro ke hunte'nea naneke*

<sup>1</sup> Ra Anumzamo'a amanage hu'ne, Arieli kumamoka kva huo, Arieli kumamoka Devitima kumama eme ante'noma mani'nea kuma me'nane.

Hagi kafugu kafugu'ma musenkasema hu nezama krenka nenana zana huvava hunka vuo. <sup>2</sup> Nagra Ra Anumzamo'na knaza atresugen Arieli kumamokarega egahie. Ana hanuge'za kagripima nemaniza vahe'mo'za tusi zavi krafa hugahaze. Anama hanaza zamo hanigenka kagra Arieli kumamoka kresramna vu itani'agna nagriteru hugahane. <sup>3</sup> Nagra ha' vahera huzmantesuge'za e'za eme miko asoparegati kavazagi kagigahaze. Ana nehu'za mani'nezama ha'ma hugantesnaza zana, kuma keginamofo tvaontera mopa kate'za erinte hihi hanageno marerisige'za, zaza no kiza mareriza manine'za hara hugantegahaze. <sup>4</sup> Hagi kagrira mopafi kazeri fenkamu atresnagenka kamuragufati kugusopafi mase'nenka anampinti sumisumi ke hugahane. Kagerumo'ma kugusopafinti'ma osi'osi'ma huno esania zamo'a, mago hankro'mo mopa agu'afinti keaga hiaza hugahie. <sup>5</sup> Hianagi ha' vahekamo'za tusi'a kugusopagna hu'za tusi'a vahe'mo'za hara eme hugantegahaze. Hagi kema ontahi'za hazenkema eri hakarema nehaza sondia vahera mago hankave zaho'mo witimofo hona'a eri harafi huno viaza hu'za ame hu'za vugahaze. <sup>6</sup> Nagra Monafi sondia vahe'mofo Ra Anumzamo'na mona kereti'ene, iminti'ene tusi'a agasasane zahotet'iene ununkoteti'ene maka'za te fanane hu tevereti'ene hu'na zamahe fanene hugahue. <sup>7</sup> Hagi ru moparegati tusi'a sondia vahe e'za Arieli (Jerusalem) kumara eme avazagi kagine'za, fraki'za nemaniza ha'ma eme hunte'za azeri havizama hanaza zamo'a, kenage'ma ava'na keaza hu'za eme zamazeri haviza hute'za omanigahaze. <sup>8</sup> Anahu kna huno mago agazanku nehia ne'mo mase'neno ava'na keana, ne'za neneno ke'neanagi, o'matiana aga zamo'a vaga noregeno, tinku ave'nesia ne'mo mase'neno ava'na keana, ti neneno ke'neanagi, otiana tinku ave'nesigeno traka huno mase'ne. Maka moparegati tusi'a sondia vahe'ma e'za Saioni agonamofoma ha'ma eme hunte'naza vahetera e'ina huknaza fore hugahie.

<sup>9</sup> Hanki antri nehuta antahintahi hakare nehuta, tamavu sukita tamavu asuhu vahekna huta maniho. Tamagra waini tima nenaza vahe'mo'zama nehzaza huta neginagia hunazanagi, aka tina one'naze. Tamagra umasete emeset huta traka traku hu'nazanagi, aka tina one'naze. <sup>10</sup> Na'ankure Ra Anumzamo avu mase avamu huntesigeno tamagrriteria egahie. Ana hanigeno kasnampa vahe'mokizmi zamavua erisu nehuno tamasenirera rufitegeta kega'zana onke'naze. <sup>11</sup> E'ina hu'negu Ra Anumzamo'ma eri kaveri'ma higenkama kenanana, fuki rekamarente'naza avontafe knaza me'negenka ke'nane. Ana hunesigeno mago vahe'mo erino avoma nehamprisania vahe nemino hamprivio hanigeno'a, a'o fuki rekamare neanki'na eri vakare'na hamprigara osu'hoe huno hugahie. <sup>12</sup> Hagi ana'ma hutena avoma nohamprisnia vahe'ma ana avontafe'ma eri neminka, ama avona hamprioma hanankeno'a, nagra avoma hampri'zana ontahi noanki'na ohamprigahue huno hugahie. <sup>13</sup> Hanki Ra Anumzamo'a amanage huno hu'ne, ama vahe'mo'za kereti'ene zamagiteti hu'za nagia ahentesga nehzaze. Hi-anagi zamagu'amo'a nagriteru omane afete me'ne. Nagri'ma antahi'namiza mono'ma hunenanta zana vahe'mo'zama ante'naza kasege amage ante'za monora hunenantaze. <sup>14</sup> E'ina hu'negu nagra mago'ene hentofaza zamagrriteria eri fore hanuge'za kegahaze. Anama nehu'na knare antahi'zane vahe'mokizmi antahi'zana eri netre'na, antahi zane vahe'mokizmi antahi'zana eri atregahue. <sup>15</sup> Hagi havi zamavu'zamava'mahu antahintahima eri franeki'za, mago vahe'mo'a tageno antahino osugahie hu'za nehu'za Ra Anumzamofo avure franekune hu'za nehaza vahe'mo'za kva hihos. <sup>16</sup> Tamagra miko zana eri rukrahe nehzaze. Hagi mopa kavoma tro'ma nehia

ne'mo'a, mopagna hu'ne nehaze. Hagi mago zama tro'ma hunte'nesnia zamo'a, azama avako'ma huno tro'ma hunte'nesnia venafona, asamino kagra trora nagrira huonte'nanema haniana, e'i knare hugahifi? Hagi mopa kavoma tro'ma hu'nesnia ne'ma, mopa kavomo'ma asamino kagra mago'zana ontahi'nanema huno haniana, e'i knare antahi'zana e'origahie.

### *Azerifatgoma hutegenoma asomuma eneria zamofo naneke*

<sup>17</sup> Hagi osi'a knafi Lebanonzi zafa tanopamo'a rukrahe huno masavenke hoza mopa fore hugahie. Ana hanigeno hozamo'a tretre huno zafa tanopagna hugahie. <sup>18</sup> Hagi e'i ana knafina zamagesa ankanire vahe'mo'za avontafepi me'nea nanekema hamprisnazana antahigahaze. Hagi zamavu asuhu vahe'ma tusi'a hanimpima mani'naza vahe'mo'za ruhari hu'za ete zamavua kegahaze. <sup>19</sup> Vahe'mozama zamazeri havizama nehaza vahe'ene keonke zanku'ma atupa'ma nehaza vahe'mo'za, Ra Anumzana Israeli vahe'mokizmi ruotage'ma hu'nea Anumzamofona musenkase hunte'za agi'a erisga hugahaze. <sup>20</sup> Hianagi kema ontahi'za hazenke'ma nehaza vahe'ene, Anumzamofo kegu'ma kiza zokago kema nehaza vahera fanane hu'za omanigahaze. Ana nehanage'za kefо zamavu'zmava huzankuke'ma nehaza vahe'mo'za tamage hu'za fanane hugahaze. <sup>21</sup> Hagi vahe'ma havige huzmante'za keagafia zamavare nente'za, hazenkema hu'naza vahe'ma havige hu'za keagafima zamaza nehu'za, fatgo vahe'ma keagafima zamavarenentaza vahe'mo'za ana zanke hu'za knazana erigahaze. <sup>22</sup> E'ina hu'negu Abrahamuma agu'vazino avre'nea Ra Anumzamo'a amanage huno Israeli vahekura nehie, tamagra Jekopu agehe agehemota tamagazegura nosinkeno tamavugosamo'a evuoramino. <sup>23</sup> Hianagi Nagri nazanko avoma agri mofavre naga'ma amu'nompima mani'naza vahe'ma negenu'za, Nagri nagimo'a ruotge hu'ne nehu'za, Jekopu Anumzana ruotage hu'ne nehu'za, Israeli vahe Anumzamofona koro hunte'za agorga manigahaze. <sup>24</sup> Hagi antahintahi zamimo'ma hazama negrea vahe'mo'za tamage nanekea antahi ama' hugahaze. Hagi ke hakare nehu'za ke ontahi vahe'mo'za e'ina hihoma hu'na rempima huzamisnua kea amage antegahaze.

## 30

### *Juda vahe'ene Isipi vahe'enema hagerafiza omanisaza zamavumro nameke*

<sup>1</sup> Ra Anumzamo'a amanage huno hu'ne, ke ontahi mofavre nagani'a Juda vahera haviza hugahazanki kva hiho. Nagri kea nontahita tamagra'a kea retro nehutma, megi'a vahe'ene kea ome eri hagenerafize. Hianagi Nagri Avamutegatira nome. E'ina nehuta kumira tamagra'a tamavufare eri agofetu agofetu nehaze. <sup>2</sup> Nagrira nantahige'za nanekea e'nori'za, Isipi moparega zamazahu vaheku hake'za Isipi kini ne' Ferontega unerami'za, Isipi vahe kvafi mani'naku nevaze. <sup>3</sup> E'ina hu'negu Fero'ma kegavama huramantesnia zamo'a, tusi tamagaze'za fore hugahie. Isipi kini ne'mo'ma kegava hurantesie hutama amuha'ma hanazana tamagazegu hugahaze. <sup>4</sup> Na'ankure Juda mopare'ma ugota hu'naza kva vahera Zoani mani'nazage'za, eri'za vahe'amo'za Hanesi kumate vu'naze. <sup>5</sup> Hianagi Juda naga'moza tusi zamagazegu hugahaze. Na'ankure Isipi vahe'mo'za mago knare zana hu'za zamaza nosu'za, zamagaze eri nezami'za zamaz-eri fenkami atregahaze. <sup>6</sup> Hagi ama nanekea sauti kazigama Negevi ka'ma kokampi nemaniza afizagaramimofo naneke. Tamagra Juda kva vahe'mota donkine kemoli afu'mo agumpina fenozana erinteteta, zamaza huga'ma osu'naza vahetega musezana erita hagege kokampina nevaze.

Hagi ana kokampina hazenke eriga koka me'negeno, laionima, ha' osifa'vema, agekona hunte osifavemo'ma avite'nea kokampi nevaze. <sup>7</sup> Isipi vhahera tamaza hugahune nehu'za, havige nehaze vahe mani'naze. E'ina hu'negu Isipi kumakura, mago zama'a omaneno, hagerimpima nemania zagagu'ma Rehapu'e nehaza tusi zaga mani'ne hu'na nehue. <sup>8</sup> Hanki Ra Anumzamo'a vahe'agura nasamino, Zamagrama haza zamavu zamavakura menina vunka avontafepine, have tafete'ene ome krento. E'ina hu'nesnankeno ana nanekemo'a mevava huno nevuno, henka'anena keaga huzmanteno vino huno hu'ne. <sup>9</sup> Na'ankure zamagra ama ana vhahera ke ontahi vahe mani'ne'za, havige mofavre naga nemani'za, Ra Anumzamo'ma rempima huzamia nanekea amage'ma ante'zankura zamavesra nehia vahe mani'naze. <sup>10</sup> Ana nehu'za zamagra ava'nama negaza vahekura ava'na onkeho hu'za nehu'za, kasnampa vahekura mani fatgoma huta manisuna zankura kasnampa nanekea orasamiho huza nehu'za fru nankege neratasamita, havige kasnampa kege tasamiho huza nehaze. <sup>11</sup> Hagi tagri kana rehiza osutma, ogantu afete maniho nehutma, Israeli vahe'mofo Ruotage Ra Anumzankura erava'o huta orasamiho nehaze. <sup>12</sup> E'ina hu'negu Israeli vahe'mofo Ruotage Ra Anumzamo'a amanage huno hu'ne, Tamagra Nagri nanekea eri netreta, hazenke avu'ava'ene havige kegura taza hugahie hutma amuhara nehaze. <sup>13</sup> E'ina hu'negu tamagra kumi hu'nazankino, ana kumi'mo'a zazate mareri agatere'nea keginamofo asenire osi ka fore huteno, ana kamo omera hume vuno ranka fore higeno keginamo ame huno faragu vaziaza huno, ana kumimo'a tamazeri havizantfa hugahie. <sup>14</sup> Hagi ana havizama hanaza zamo'a, vahe'mo'zama mopa kavoma rufuzafupea kna hu'za haviza hugahaze. Hanageno ana kavofima tevema nerefintira tevea erinonteta, tinkerifintima tima ofiankna huta tamagra havizantfa hugahaze.

### *Ra Anumzamofoma antahimi zamofo naneke*

<sup>15</sup> Israeli vahe'mofo Hankavenentake Ruotage Ra Anumzamo'a amanage huno hu'ne, Tamagrama tamagu'a rukrahe hutma nagrite'ma eta tamarimpa frunema mani'sanuta tamaguvazi zana erigahaze. Nagra kegava huramantegahue. Hanki tamagrama akoheta mani'neta Nagri'ma antahi namisnazana, Nagra tamazeri hankavetigahue. Hianagi tamagra ke'n'i'a antahinamita amagera nonteta, <sup>16</sup> anage nehaze, Tagra agareno nevia hosi afu'mofo agumpi mani'neta, koro freta vugahune huta nehaze. E'ina hu'negu tamagri'ma tamarotago'ma hanazana ame hu'za tamavaririza tamefira vugahaze. <sup>17</sup> Magoke ne'mo'a amne 1 tauzeni'a vhahera zamarotago hanige'za korora fregahaze. Hagi ha' vahe kazigati'ma 5fu'a vahe'mo'zama e'za eme kezankema hanage'za ran kumapima mani'nesaza vhahera ana maka'mo'za kumara atre'za koro fregahaze. Ana hanageno agonafi (fleki) krauefa renentaza zafa atrazageno zafa rampage otiazza huno, kumapina vhahera omanigahie.

<sup>18</sup> Ana hu'neanagi Ra Anumzamo'a arimpa fruzane asunku zana tamagrite eri ama hunaku tusiza huno avenesigeno tamavega anteno mani'ne. Na'ankure Ra Anumzana fatgo avu'avaza hu Anumza mani'ne. Hagi agrite'ma zamentintima nehaza vhahera muse hugahaze. <sup>19</sup> Hagi Saioni vahe'ma Jerusalemi rankumapima menima mani'naza vahe'mota, tamasunkura hutma zavira otegahaze. Tamagrama zavi netesageno Anumzamo'ma nentahisuno'a tamagerfa huno asunku huramanteno tamaza hugahie. <sup>20</sup> Tamage Ra Anumzamo'a nezankna huno knazana

neramino, tinkna huno hazenkea tamigeta havizantfa hu'naze. Hianagi rempima huneramia vahe'mo'a amate tamagrane mani'nesanigeta, tamavufinti kegahaze. <sup>21</sup> Hagi kama nevanafinti'ma atretme ufrete efrete'ma nehanageno'a, tamefi mani'neno amanage huno tamasamigahie. Kana ama me'neanki, amare viho huno hugahie. <sup>22</sup> Anama hanigeta silvareti'ene golireti'ma eri anomia vazinoma tro'ma hunte'nea havi anumzantamimofo amema'ama, mago agru osu'noma pehanagezama matevu atreaza huta matevu netreta, henka'ane ontamagesnunku tatreta viho hutma hugahaze. <sup>23</sup> Hagi anama hanageno'a, hozafima avimzama hankresnaza zantera, kora atrenigeno runtegahie. Ana hanigeta hozafinti'ma ne'zama vasagesnaza knarera, ne'zana vasagesnageno ne'zamo'a amporegahie. Hagi ana knafina tamagri bulimakao afutamimo'za rama'a traza me'nesnifi mani'ne'za trazana negahaze. <sup>24</sup> Hagi mopama rehankoneriza bulimakao afutamine donki afutamina anomia'a hare'za eri so'e hu'nesaza witi raga'a zami'nage'za negahaze. <sup>25</sup> Hagi ana knafina tamagri ha' vahera rama'a zamahe nefrisageno, za'za nonte'ma mani'ne'za kuma'ma kegavama nehaza nomo'ma fragu vazino evuneramina, mareri agatere'nesania agonaramimpinti'ene ne'onse agonaramimpintira tintamimo hanatino egahie.

<sup>26</sup> Hagi ana'ma hania knafina, ikamofo masa zamo'a zagemofo masagna hanigeno, magoke zupa remsa hania zagemo'agi, 7ni'a knafima remrema huuvava huno vianknä huno remsa hugahie. Ra Anumzamo'a vahe'ama knazama zamino zamavufagama ru tragama hu'nea zana, Agra'a anaki zmanteno zamazeri kanamregahie. <sup>27</sup> Hagi Ra Anumzamo'ma afeteti'ma neana keho. Rimpia ahezamo'a tusi tevenefakna nehigeno, tevegumpi ne-e. Ana nehigeno Agripina tusi rimpia ahezamo avinetegeno, mika zama te fananehu tevemo agefunafintira atineramie. <sup>28</sup> Hagi Anumzamo'ma asimu'ma antegeno'a, ti hageno makaza eri harafi huno vahe'mofo ananke avamente eviaza nehie. Ama mopafi vahera Anumzamo'a zamazeri haviza nehige'za, zamahirahiku nehaze. Hagi hosi afumofo agipi aini atupa rentete'za, ovuku'ma hazarega zamavare'za vazaza huno, Anumzamo'a antahi antahi'zamia zamazeri savri huno ovuku hanarega vanige'za ome haviza hugahaze. <sup>29</sup> Hianagi tamagra Ra Anumzamofo vahe'mota mono'ma hu knare'ma musema nehzaza huta muse zagame hugahaze. Ana nehuta konkema neraza vahe'mo'zama Ra Anumzamo'ma Israeli vahe'mokizmi fraki havema mani'nea agonare Jerusalemima nevazage'za musema nehzaza huta musena hugahaze. <sup>30</sup> Hagi Ra Anumzamo'a vahe'mokizmi zamagesa eri hagarо haniqe'za, hankavenentake ke'zanke'a nentahisageno, zamavua eri hari haniqe'za zamaheku'ma erisgama nehia azana nege'za, arimpa he'zamo'ma mika'za teno eri fanane nehia tevegna huno'ma ne-e zane monagemo'ma tusiza nehigeno komopa komo'ma faragu vazarmino'ma eneramia zana kegahaze. <sup>31</sup> Hagi Ra Anumzamofo ageru'mo Asiria vahera zamazeri zamagogi nefesigeno, Agra hegj kanonteti sefura zamigahie. <sup>32</sup> Hagi Ra Anumzamo'ma hegj kanonteti'ma Asiria vahe'ma mekizami mekizamima nehanige'za, ana kanomofo agerute ante'za agri vahe'mo'za zozopane hapu zavenane nehe'za eri verave korave nehanageno zamahegahie. <sup>33</sup> Hagi tevema hanavazi'za Asiria kini ne'ma kresnageno tesia keria, korapa retro hunte'naze. Hagi ana keria rankeri ofenkame kafiza urami'naze. Ana nehu'za ana kerifima kresnaza tevea rama'a harente'naze. Ana hu'neankino Ra Anumzamo Agra'a zaho'reti huhu hanigeno ana tevemo'a rukaru huno salfa havere tevea tagintegeno

teaza huno agafa huno tegahie.

## 31

### *Ra Anumzamo'ma hanave'ama maka mopafi vahe zamaveri hu'nea naneke*

<sup>1</sup> Hagi Isipi vahe'mo'za taza hugahaze hutma uneramita, hosi afumofo hankavegu'ene, Isipi vahe karisigu'ene, hosi afu agumpima mani'za nevaza hankave sondia vahe'ma mani'naza zanku'ma hutama nevaza vahera kva hiho. E'ina nehazanagi Israeli vahe'mofo Ruotage Ra Anumzamofona haketa nonketa, tamazama hanigura antahi nonkaze. <sup>2</sup> Hagi Ra Anumzamo'a agranena knare antahintahigu atupa osu'neankino, nazano hugahuema huno hu'nea ke'a amage anteno nehia nekino, havi zamavu zamava'ma nehaza vahe'mokizmi naganofi'ene, ana havi zamavu'zmava'ma nehaza vahe'ma zamazama nehaza vahe'enena Agra zamazeri haviza hugahie. <sup>3</sup> Hagi Isipi vahera Anumzana omani'nazanki, ama mopafi vahetfa mani'naze. Hagi hosizmimo'a hosi mani'nazanki avamura omani'naze. Ana hu'neankino Ra Anumzamo'a azama erisga huno Isipi vahera zamazeri haviza nehuno, agripinti'ma zamazahu zama eneriza vahe'enena zamazeri haviza hanige'za haviza hugahaze. Ana hanigeke taregamokea omanike magoka fanane hugahae.

<sup>4</sup> Na'ankure Ra Anumzamo'a amanage huno nasami'ne, koro zama'a omame'nea laionimo takaireno sipisipi afu aheno azerino tapage huno nenigeno, agu'vaziku sipisipi afute kva vahe'mo'za kezankege nehazageno korora osiaza huno, Saioni agonare'ene agri tvaonte'ma megagi'nea agonaramintera Monafi sondia vahe'mofo Ra Anumzamo'a eramino hara eme huzmantegahie. <sup>5</sup> Hagi namamo'ma noma'amofo agofetuma hareno eme tafratrafra'ma nehuno, noma'a avunteno kegavama nehiaza hu'na, Nagra hankavenentake Ra Anumzamo'na Jerusalemi kumara kegava huntegahue. Ana hu'ne'na maka zupa navunte'na nege'na, agu'vazigahue. <sup>6</sup> Hagi tamagra Israeli vahe'mota Ra Anumzamofona ha' renenteta atreta vu'nazanki, ete rukrahe huta Agrite echo. <sup>7</sup> Hagi mago kna ne-eankino ananknama esanigeta, kumike tamazanteti'ma avako huta, silvaret'iene golireti'ma havi anumzantamima tro'ma hu'naza zana, miko'mota matevu netretma tamefi humigahaze. <sup>8</sup> Asiria vahera mago bainati kazimo zamahe fanane hugahie. Ana bainati kazina mago vahe'mofo kazina omne'neanki, Nagra Ra Anumzamo'na atresanugenogea gahie. Ana hanige'za ana bainati kazimofo koro hu'za nevnage'za, nehazave nagazamia zamavarenage'za kazokazo eri'za erigahaze. <sup>9</sup> Zamagra tusi koro nehanageno hankave vihu zamimo'a, faragu vaziramigahie. Ana nehanige'za sondia vahe zamire'ma ugota hu'naza vahe'mo'zama ha'mofo avame'zama nege'za koro atre'za fregahaze. Saioni agonarema tevema neregeno Jerusalemi kumapima tevenefaa'nema mani'nea Ra Anumzamo ama ana nanekea huama hu'ne.

## 32

### *Knare zama henkama fore'ma hania zamofo naneke*

<sup>1</sup> Hagi antahihio, mago zupa mago kini ne' efore huno fatgo avu'avazanteti vahera kegava nehanigeno, kva vahe'amo'za mago avamente ante'za vahera kegava huzmantegahaze. <sup>2</sup> Hagi mago mago vahe'mo'za tusi zahoku'ma ome fra'ma neki'za kuma kna nehu'za, ununko'matigeno vahe'mo'zama ome frama nekiza kumakna nehu'za, ti omame hagege kokampima neonse tintami hanatino eankna nehu'za, ka'ma kokampi

ra havemo zage reso huntogeno turuna hunteankna hu'za manigahaze. <sup>3</sup> Ana nehanige'za zamavufinti'ma kesnaza vahe'mo'za zamavua kesu nok-isnage'za, zamagesesa ante'za antahisnaza vahe'mo'za, antahi ankeregahaze. <sup>4</sup> Hagi antahintahi osu ame hu'za nanazama nehaza vahe'mo'za, menina ama' antahi'za eneri'za miko zampina refkohu so'e hugahaze. Ana nehanage'za zamagi'mo'ma kna nehige'za keagama hu so'ema nosaza vahe'mo'za keaga hu so'e hugahaze. <sup>5</sup> Hagi havi vahe'ene neginagi zama nehaza vahe'ma ra zamagima nezamiza zamo'a vaganerena, havi zamavu'zmava'ma hu'za eri'naza zama vahe'ma nezmizage'za, husgama hunezmante'za ra zamagima nezamiza zamo'a vagaregahie. <sup>6</sup> Na'ankure negi vahe'mo'za neginagi naneke nehantagaze. Mika zupa kumi'ma hu zankuke nehake'za, Ra Anumzamofona ave'osia avu'avaza nehu'za, Anumzamofonkura rama'a havige nehaze. Ana nehu'za zamagaku'ma nehaza vhahera ne'zana nozami'za, tinku'ma zamavesia vhahera tina nozamize. <sup>7</sup> Hagi havige vahe'mofo asenifina havi antahi'zamo avite'ne. Zamagra vahe'ma zamazeri havizama hunakura, havige eri'za kankamu retro hu'za havige kereti zamunte omne vhahera rezmatga nehaze. Ana nehu'za nanekere'ma otiza zupa, zamunte omane vahe'mo'za tamage nehazanagi, zamagra havige hu'za keagafina zamazeri havia nehaze. <sup>8</sup> Hianagi knare antahi'zane vahe'mo'za knare zanke retro nehanage'za, vahe'mo'za antahi zamigahaze. Ana nehu'za maka zupa anama retro'ma hu'naza antahizante oti hakaveti'neza knare avu'ava zanke hugahaze.

<sup>9</sup> Jerusalemi a'nemota, menina noma mani zantamifina so'e huta mani'netma, tamagrama antahi'zana anazanke huta manigahune hutma nentahize. Hianagi menima hanua nanekere tamagesa anteta antahiho. <sup>10</sup> Menina mago'zana forera osigeta, so'e huta mani'naze. Hianagi mago kafu huteta osi'a kna manita vanageno, grepri ragamo'a zahufafi harari huraminigeta ne'za raga'a oragigahaze. <sup>11</sup> Hagi mago zana fore osanigeta so'e huta manigahune hutama nehaza a'nemota, menina antri huta koro nehuta, kukanatamia tagato tagatu nehuta tamasunku kukena eri rugagita masiho. <sup>12</sup> Knare nare hoza tamigu'ene waini hozatamigura tamazana kofita tamasunku huta tamamizare nemasagita zavi ateho. <sup>13</sup> Nagri vahe'mokizmi mopagura tamasunku huta zavi ateho. Na'ankure ave'ave nofi'mo'ene havi tra'zamo ana mopafina hageno pogigahie. Hagi musema huta nemaniza nontamine, musema huta nemaniza ran kumamo'a omanegahie. <sup>14</sup> Na'ankure maka vahe'ma rankumapima mani avitene'zama kegekege'za hu'za vanoma nehaza zana atre'za fresnageno, vahe kugoa origahie. Onagamu mesga hu'nege'za mani'neza kuma kegava nehaza none, kini vahe nomo'a amne meno haviza hanigeno, tonki afutamimo'za muse nehu'za anampina vano nehanageno, sipisipi afu'mo'za anampina vano hu'za trazana negahaze. <sup>15</sup> Ana huta mani nesunkeno, Ra Anumzamo'a Avamu'a eri tagitrenigeno tagritera eramigahie. Ana hanigeno ana knafina ka'ma kokamo'a, masavenke huno tretre mopa fore nehanigeno, ana masaventretre hunenia mopafintira mago zafa tanopagna hugahie. <sup>16</sup> Hagi fatgoma huno refko hu avu'avazamo ka'ma kokampina fore huno meno nevina, tretre'ma hania mopafina fatgo avu'ava zamo efore huno meno vugahie. <sup>17</sup> Hagi fatgo avu'ava zamofo ne'za raga'ama efore'ma haniana, veamo'za korora osu'za akohe'za fru hu'za nemaniza maka zupa oti hankavetigahaze. <sup>18</sup> Ana hanigeno Nagri vahe'mo'za kuma zamifine, nozamifina mago zamo'a zamazeri koro osanige'za zamarimpa frune nemaniza, mago'a zamofo agasasankea ontahi'za akohe'za manigahaze.

**19** Ko'mopa ko'mo eramino zafa tanopa ru puraru nehuno, rankumara ahe fragu vazinigeno fragu vaziramino mopafi masegahie. **20** Ra Anumzamofo vahe'mota maka zupa muse hugahaze. Ana nehuta ne'onse timofo tvaonte ho'za anteta avimzana runeranita, bulimakao afutamine, tonki afutamia zamatresnake'za zamesite amne vano hu'za trazana negahaze.

## 33

### *Knafima mani'nenageno zamazama hania zamofo naneke*

**1** Hagi tamagrama vahe'ma zamazeri havizama nehaza vahe'mota tamagrira zahufa zamazeri havizana osu'nazanki kva hiho. Vahe'ma komoru hunka ha' vahe zamazampima zamavarentana vhahera kagrira komoru hu'za ha' vahe zamazampi kavre antegahaze. Hagi kagrama vahe'ma zamazeri havizama huvagama retesanke'za, henka kagrira kazeri haviza hugahaze. Kagrama vahe'ma komoru hunka ha' vahe zamazampima zamavarente vagama retesanke'za, henka kagrira komoru hu'za ha' vahe zamazampina kavre antegahaze. **2** Ra Anumzamoka kasunku huranto. Na'ankure kagrama tazama hanankura kavega anteta mani'none. Maka nanterana tazeri hankavenetinka, knafima une frenunkenka Kagra tagu'vazio. **3** Hagi kagrama kageru'ma nerankeno'a monagegna nehige'za, vahe'mo'za koro nefragenka, Kagrama o'netinke'za ama mopafi vahe'mo'za panani hu'za nefraze. **4** Hagi anama hanke'zama atre'za fraza vahe'mokizmi fenozana, tusi kenutami'moza eme atru hu'za hozafi ne'zama neza eri fanane nehazaza hu'za ana fenozana eri vagaregahaze. **5** Ra Anumzamo'a mika vhahera zamagatereno monafinka mani'ne. Ana hu'neankino Jerusalemi kumapina knare'ma huno refko'ma hu avu'ava zama'areti'ene, fatgo avu'ava zama'areti ante avitegahie. **6** Ana nehuno manitama vanaza kna'afina, Agra maka zupa hankave'areti tamagura nevazino, muse huno neramavreno, antahi'zana neramino, knare antahintahi zanena tamagrira tamigahie. Hagi Ra Anumzamofonku'ma koro'ma hu'zamo'a agritera mareri feno zankna huno me'ne.

**7** Hagi keho, Jerusalemi kumapi harfa sondia vahe'mo'za kumamofo karampi vano nehu'za, zavi krafa nehaze. Ana nehazage'za vahe'ma zamazeri mago zamarimpa hunakuma eri'zama eneriza vahe'mo'za tusi krafa hu'za zavi ate'naze. **8** Hagi ranra kam'o'a amne megeno, ana kampima vanoma nehaza vahe'mo'za vano osu'naze. Hara osugahune hu'zama huhageraft'naza naneke'a eri netre'za, mago'a vahe kumamofona huhaviza nehu'za, vhahera zamage fenkami atre'naze. **9** Hagi mopamo'a zavi krafa nehuno hagege huno havizantfa hu'ne. Ana nehigeno Lebanonzi zafa tanopamo'a agazegu nehuno hagege higeno, Saroni agupo mopamo'a hagege kokankna nehigeno, Basani kokampine Kameli agona fima me'nea zafaramimofo anina'amo'a harari hurami vagare'ne. **10** Hianagi Ra Anumzamo'a amanage huno hu'ne, Nagra menina oti'na hankave'nia erinte ama' hanuge'za husga hunenante'za Nagri nagi'a ahentesga hugahaze. **11** Tamagra Nagri'ma ha'ma renenantaza vahe'mota havigema nehaza zamo'a, tamu'enema nehiaza nehazankita, kasentesazana traza rampa kasentesageno, tamagrama zamasi mu'ma antesaza zamo'a tevegna huno tamagrira te fanane hugahie. **12** Tamagrira tevemo te tanefa nesena, ave've traza tevefi krazageno teno ta'nefa aseaza hugahaze. **13** Hagi Nagrama eri fore'ma hu'noa erizankura afete'ma mani'naza vahe'mota tamagesa

nentahinkeno, tvaonte'ma mani'naza vahe'mota Nagri hankavegura keta antahita nehuta huama hiho.

<sup>14</sup> Kumi vahe'ma Saionima nemaniza vahe'mo'za tusi koro nehanage'za, Anumzamofoma amage'ma nontaza vahe'mo'za zamahirahiku nehu'za tagra inankna huta maka'zama tefanenema nehia tevefina manigahune hu'za nehaze? Hagi iza tevavama huno nevia tevefina manigahie hu'za hugahaze. <sup>15</sup> Hianagi iza'zo fatgoma hu'za kama vanoma nehu'za, tamage kegema nehu'za, mago'a zante'ma masavema hu'za zami'naza zagoma e'nor'i'za, vahe'ma aheno korama eri taginogu'ma kema eme anankisaza kea nontahiza, kefozama huzanku'ma zamavuma ke amnema nehaza vahe'mo'za, <sup>16</sup> knare hu'za asgama hunerega manisga hu'za manigahaze. Ana nehu'za zamagra agonafi hankavenentake fraki kuma me'nefi mani'nesnige'za, mika zupa bretia eme zamisage'za nenenageno timo'enena knare huno me'nesnige'za negahaze.

<sup>17</sup> Hagi Masa'nentake huno konariri'ane kini nera tamagra tamufinti kegahaze. Ana nehutma kegavama hania mopamo'ma maseno afete'ma vuno eno hu'neama'a kegahaze. <sup>18</sup> Hagi ko'ma tamagrite'ma fore'ma hu'nea knazankura ete tamagesa antahintahi nehuta tamagu'afina amanage hutma tamagra'a tamagenoka hugahaze. Inantega tagripinti'ma takesi zagoma eri'za nehampriza vhahera mani'naze? Hagi tagri kumapima ha' vaheku'ma mani'neza kegavama nehaza zaza nontamima hampari'naza kva vahetamina iga mani'naze? <sup>19</sup> Hagi vahe'ma zamazeri koro nehu'za hazenkema nehu'za ru vahe zamageru'ma antahi ama' osuga nanekema nehaza vhahera, zamavugosafina onketfa hugahaze. <sup>20</sup> Hagi kesga huta Saioni agonare tamavua keho, ana kumatera ne'zama kreta neneta musema hanaza kuma huhamprinte'ne. Ana hu'neankino Jerusalemi kumate'ma masaza vahetera mago zamo'a zamazeri havizana osanige'za, knare huza mani'nesageta kegahaze. Mago seli nomo oti hanavetinege'za tagana vaziza reonamagige, zafa'a eri okasige, nofi'amo ruru ovaziankna huno Jurusalemi kuma'mo'a oti hankavetigahie. <sup>21</sup> Hianagi Hihamu Hankave'ane Ra Anumzamo'a anantega Agra ranra tine ne'onse tinkna huno mani'nenigeno ne'onse ventegi, ranra venteramimo'za ana timpina omegahaze.

<sup>22</sup> Na'ankure Ra Anumzamo'a keagatima refko hania nera agra'a nemaino, Agra kasegea neramino, kinitia mani'neankino, Agra'a tagura vazigahie. <sup>23</sup> Hagi tamagri ha' vahe'mo'za amanahu hu'naze, mago ventemofoma amu'nompi zafamo oti fatgo osu'negeno selima anaki nofitamimo'a ru kreko vako nehigeno selia ruta oreankna hu'naze. E'ina hu'nazankita tamagra vuta feno zazamia ome refko huta enerisnige'za, zamagia keni zamaza keni vahe'mo'za henka vu'za ome kesnazana mago'a fenozana me'nesnige'za zamagranena eri'za vugahaze. <sup>24</sup> Hagi Jerusalemi kumapima nemaniza vhahera Ra Anumzamo'a kumitamia atre ramantegahie. Ana hugahiankino magomo'e huno nagra kri eri'noe huno osugahie.

## 34

*Maka ama mopafi vahe'ma Ra Anumzamo'ma keaga huzmantesnia zamofo naneke*

<sup>1</sup> Maka kokankokama mani'naza vahe'mota erava'o hu'neta tamagesa anteta antahi so'e hiho. Anama nehanagetma ama mopamokane, ama mopafima ana maka'zama me'nana zamokanena ama nanekea kagesa

antenka antahio. <sup>2</sup> Ra Anumzamo'a maka kokankokama nemaniza vahekura rimpia ahenezamanteno, sondia vahezmigura tusi arimpa ahezman-teankino, zamahe hana hugahie. Ana nehuno ana vhahera zamatrengi'za zamahe'za rugitagi atregahaze. <sup>3</sup> Hagi anama hanigeno'a tamagerfa hu'za fri'naza zamavufaga eri'za asezmantegara osugahie. Ana hanigeno fri zamavufagamo'a amne zankna huno me'neno hinimna vugahie. Hagi kora-zamimo'a agonafina avitegahie. <sup>4</sup> Hagi monafinti hanafi tamimo'a atafari neramisnigeno, mago avontafe'ma regazariaza huno monamo'a regazarino vugahie. Ana nehina monafima me'ne'za remsama nehaza zantamina, zagma ikama hanafi tamimo'zanena, wainimofo ani'namo harari huramiaza nehanigeno, fiki zafamo hagege huno mopafi evuramiaza hugahaze.

<sup>5</sup> Hagi Ra Anumzamo'a huno, Bainati kazinimo'a monafima me'nea zantamintera eri'zama'a eri vagareteno, Edomu kumate vahe'ma zamazeri haviza hugahue hu'nama hu'noa vahe zamahe fri vagareku uramianki keho. <sup>6</sup> Sipisipi afutamine meme afutimima ofama hunaku'ma ahenegizageno, koramo'ene kre'areti af'o'va'amo'ma kazintegama hantohantoma nehiankna kazi Ra Anumzamo'a eri'neankino, e'inhukna huno Ra Anumzamo'a rama'a vahe Bozra rankumapi nezmaheno ana maka Edomu mopafima mani'naza vhahera ana zanke huno tusi'a vahe zamahegahie. <sup>7</sup> Hagi afi bulimakao afutamine, anenta ve bulimakao afutamine, hankave bulimakao afutaminena ana zanke huno zamahe frigahie. Ana hanigeno mopazmifina koramo'a tagiramino avinetesnigeno, zamafova'amo'a kugusopafina avitegahie. <sup>8</sup> Na'ankure Ra Anumzamo'a mago kna ko huhampri'ne. Ana hu'neankino ana kafuma esanigeno'a, Jerusalemi kuma'ma ha'ma rente'naza Idomu vhahera nona huno hara renezmanteno, (Saioni) Jerusalemi kumara agu'vazigahie. <sup>9</sup> Hagi Idomu mopafima me'nea tintamimo'a evuno fukinkna hugahie. Ana nehanigeno kugusopamo'a evuno salfa havere teve reaza nehanigeno, mopazamimo'a fukimo tevefi reaza huno teveregahie. <sup>10</sup> Hagi feru'ene kenage enena ana tevemo'a tevava nehanigeno, tusi toki huvava hugahie. Ana hanigeno Idomu mopa-fina henkama fore hu anante anante'ma hu'za vanaza knafinena vhahera omanitfa hina, ana mopa-fina mago vahe'mo'e huno vano vano osutfa hugahie. <sup>11</sup> Ana nehina ka'ma kopima nemaniza komutomo'ene, kotkoti namamo'zane tumpa namaramimo'ene kazin tumpamo'zanena ana mopa eri nafa'a hugahaze. Ra Anumzamo'a ana mopa atreni'geno havizantfa huno, mago have kevu eri tru hunteaza hugahie. Hagi agra nomofo za'za'ane mareri'anema eri fatgoma hu'zama negaza nofikna huno kumara eri haviza hutresigeno ka'ma koka fore huno mago'zana omanegahie.

<sup>12</sup> Hagi Idomu mopafima zamagima me'nea vahe'ene kva vahe'enena omanitfa hanageno, kinima maniga vahetamina magore hu'za omanigahaze. <sup>13</sup> Mani'nezama vaheku'ma kegavama nehaza zaza nontamintera ave've trazaramimo hageno marenerisigeno, agaso trazane havi tra'zamo'zanena hankave vihu keginazmirera hage'za marerigahaze. Ana nehanigeno anampina afi kraramimo'ene ostretiema nehaza mananinkna namamo'za e'za no eme ki'za manigahaze. <sup>14</sup> Hagege kokampima nemaniza afi zagagafaramimo'za, anampina e'za eme atru nehanage'za, afi meme afutamimo'za anampina eman'i'neza krafage hugantu hugama hugahaze. Ana nehanageno kenage'ma vanoma nehia zaga lilitiema nehaza zagamo anampina emasegahie. <sup>15</sup> Hanki anampina ko'mutomo no eme kino amura anteteno kegava hu'nesnigeno, horahora hina agekona'areti rutareno refi-

tentegahie. Ana nehanigeno tumpamo'za veate veate e'za anampina emanigahaze. <sup>16</sup> Hagi Ra Anumzamofo avontafepi me'neanki haketa hampriho. Ana maka kema hunte'nea zagagafa maka evaga neresnage'za, mago'mo'e huno ana zagagafamo'a agrakura omeno, tare tare huno etere hugahie. Na'ankure Ra Anumzamo agra'a agipinti e'ina huo huno huntesnigeno, Agri'a Avamu'mo zamavare atru huno zamavareno egahie. <sup>17</sup> Hanki inante manitere hugahazafi, Ra Anumzamo Agrakenofira mesarimi huno erinte fatgo huno keteno mopa refko huno zamisnige'za, mofavre kase anante anante hu'za mani'neza henka'anena mani vava hu'za vugahaze.

## 35

### *Ra Anumzamo Agra'a vahe zamazeri so'e hania zamofo naneke*

<sup>1</sup> Ka'ma kokamo'ene hagege kokamokea muse hugahae. Hagi hagege kokampina krokasiema nehaza flauamo marerino amosrea ahentesnigeno, ana hagege kokamo'a muse hugahie. <sup>2</sup> Hagege kokantamimpine maka kaziga flauamo'a amosre aheno avinetesigeno, ana kokamo'a musezagame huno muse hugahie. Ana kokamofo avasase'amo'a, Lebanoni zafa ta'nopamofo konaririgna nehina, Kameli agonane Saroni agupomofo konaririgna hugahie. Ana hanige'za Ra Anumzana tagri Anumzamofo hankave'ane masa'anena kegahaze.

<sup>3</sup> Hanki hanavezmima omne'nea zamazana zamazeri hankavenetino, zamarenamo'ma havizama hunege'zama zamahirahiku'ma nehaza zamar'enanena zamazeri hankavetinke'za oti hankavetigahaze. <sup>4</sup> Antahintahi hakarema nehu'za koroma nehaza vahera amanage hutma zamasamaho. Koro osutma oti hankavetihi. Na'ankure tamagri Anumzamo'a eno nona huno tamagri ha' vahera eme zamazeri haviza nehuno, tamagu vazi-gahie. <sup>5</sup> Hanki zamavu asuhu vahe'mo'za zamavua negesnage'za, zamagesa ankanire vahe'mo'za, zamagesa antahigahaze. <sup>6</sup> Ana nehina zamagama haviza hu'nesnia vahe'mo'za, dia afu'mo haru huno marerino tamino ne-huno vano hiaza hu'za vano hugahaze. Hagi keagama osu vahe'mo'za ranke hu'za muse zagamera hugahaze. Na'ankure hagege kokampintira timo'a restisti huno tina hageno ka'ma kokampina vuno eno hugahie. <sup>7</sup> Zagemo'ma te hagegema hu'nea kokampina tiru efore hugahie. Hagegema higeno tima omane'nea mopafintira, kampui tintamimo nehanatisnigeno, kora hagege mopa me'nege'za afi kramo'za nomagi'za mani'nafina, trazamo'ene barozamo'ene hageno marerigahie.

<sup>8</sup> Hagi anantera rankarega me'nesnige'za, ana rankankura Ruotage Avu'ava'mofo Rankane hu'za agia ahegahaze. Hanki ana kantera agruma osu'nesnaza vahe'mo'za kana vano osugahaze. Anumzamofo vahe'mo'zage ana kampina vano hugahaze. Ana nehanage'za neginagi zamavu zamava'ma nehaza vahe'mo'za ana kantera vano osugahaze. <sup>9</sup> Laionimo'ene afi zaga kafamo'za ana kampina vano osugahaze. Hianagi Ra Anumzamo'ma zamagu vazino ete zamavare'nesnia vahe'mo'za ana kampina zamagrake vano hugahaze. <sup>10</sup> Ra Anumzamo'ma zamagu vazino ete zamavare'nesnia vahe'mo'za muse hume ne-eza, Jerusalemi kumapina musezagame hu'za efregahaze. Hagi mevava musezamo zamaserirera kini fetorikna huno megahie. Tusi'a musezamo zamagripina aviteteno varehi ramigahie. Ana hina zamasu zamo'ene zamarimpa kna hu'zamo'a zamatreno fregahie.

## 36

*Asiria vahe'mo'za Juda vahe zamazeri koro ke huzmante'naza naneke*

<sup>1</sup> Hanki Hezekai'a ma kinima manino egeno 14nima hia kafufina, Asiria kini ne' Senakeribi'a marerino Juda mopafima hankavenentake vihuma hu'naza ranra kumatmina ha' eme huzmanteno eri vagare'ne. <sup>2</sup> Ana hu'neankino Asiria kini ne'mo'a Lakisi kumate mani'nereti sondia vahete kva vahe'ene rama'a sondia vahe'ene huzmantenge'za kini ne' Hezekai'a ma Jerusalemi kumate'ma mani'nerega vu'naze. Hagi Jerusalemi vute'za sondia vahete kva ne' Rabsaki'a vuno kumamofo anaga kazigama me'nea tirupinti'ma mopama kafi'za tima avre'za Jerusalemi kumapima urami'nazare oti'ne. Hagi anama kafi'za tima avre'naza tinkamo'a, kukenama sesema nehazaregama vu'nea kamofo tva'onte me'ne. <sup>3</sup> Hagi anante kinimofo nompi kva ne' Hilkia nemofo Eliakimiki avontafe'ma kre eri'zama eneria ne' Sibnaki, kinimo'ma tro'ma nehiazama avompima krenentea ne' Asapu nemofo Joaki hu'za ana ne'ma mani'nerega e'naze. <sup>4</sup> Hanki ana Asiria sondia vahete ugota kva ne' Rebsaki'a ana 3'a nagara amanage huno zamasami'ne, Hezekaiana amanage huta ome asamaho, marerisa Asiria kini ne'mo'a amanage hu'ne, kagra inankna hankaveka'agu antahintahia nehunka knare hu'noe hunka nehane? <sup>5</sup> Hagi keagage'ma hu'zampintira magora hara agateregahampi? Iza naza hugahie hunka kagesa nentahinka nagrira hara renenantane? <sup>6</sup> Hanki ko, menina Isipi vahe'mo'za naza hugahaze hunka kagra antahi amuha nehane. Hianagi Isipi kini ne' Fero avu'avamo'a, mago hakemo hagege hiaza hu'neankino, ana kanonte'ma azama erino rempimpima hanimofona ana azotamo'a futagino azampi kota aheaza hugahie. Hagi Feronte'ma amuha'ma hunemiza vahe'mo'za e'inahu hu'za haviza hugahaze. <sup>7</sup> Hianagi Hezekai'a menina Ra Anumzana tamagri Anumzamofonku antahi nemifi? Na'ankure kora Hezekai'a Ra Anumzamofoma agonaramimpima mono'ma hunentaza kumatamine kresramna vu itaraminem a me'neana, eri atre vaganereno, Juda vahe'ene Jerusalemita nemaniza vahek'u'ma zamasamino, Jerusalemita magoke'ma me'nea kresramna vu itareke ofa hoho huno hu'nea ne' mani'ne. <sup>8</sup> Hagi tamagrama antahintahi tamima rukrahe'ma hanaza nanekea menina kvani'a Asiria kini ne'mo'a amanage hu'ne, tamagrama sondia nagatamima knare'ma hu'nesnage'na, hosi agumpima mani'nezama ha'ma hanaza zana 2 tauseni'a hosi afutami tamigahue hu'ne. <sup>9</sup> Hagi tamagra Isipi vahek'u'ma antahizamita karisiramine hosi afutaminena eme taza hanageta hara hugahune hutma nentahize. Hianagi nagri kva ne'mofo sondia vahe'mokizmi kva vahepinti mago agi omane kva ne'mo tamagrira hara huramagateregahie. <sup>10</sup> Tamagrama antahi'zana agr'a antahi'zanteti e'no hara huranteno mopatia eri haviza huku nehie hutma nentahizafi? I'o. Ra Anumzamo hunanteno marerinka vunka ama kumara hara ome huntenga eri haviza huo huno hunante'ne. <sup>11</sup> Hagi anante Eliakimiki, Sibnaki, Joaki hu'za anankema nentahi'za, Asiria sondia vahete kva nera amanage hu'za asam'i'ne. Tagra eri'za vahekamota muse hugantonanki, Aramu kea antahi'nonanki, antahinoma kefinti tasamio, na'ankure kagrama Hibru tagerupinti'ma nerassaminanke'za, kuma keginamofo agofetu'ma mani'naza vahe'mo'za anankea antahigahaze. <sup>12</sup> Hianagi Asiria sondia vahete kva ne' Rebsakia amanage hu'ne, nagri kva ne'mo'ma ama'na kema atrege'nama eri'na e'noana, tamagri kva nete'ene tamagriteke'za atrege'na ome'noanki, anamu kuma kegina agofetu'ma mani'naza vahe'mo'zanena

ama nanekeea antahigahaze. Na'ankure ha'ma erita eta Jerusalemi kuma'ma eme avazagi kagisanunketa tamagra kva vahe'ene maka vahe'motanena rifane avinena retma negahaze. <sup>13</sup> Anage nehuno ana Asiria sondia kva ne'mo'a Hibru kefinti kezatino amanage hu'ne, marerisa Asiria kini ne'mo'a amanage hu'neanki antahiho. <sup>14</sup> Tamagra atrenkeno Hezeakaia'a reramataga osino, na'ankure Hezekai'a tamagrira hara huno tamagura vazigara osu'n. <sup>15</sup> Hezeakaia'ma huno Ra Anumzamo'a taza hanigeta Asiria vahera hara huzmagatereta Jerusalemi kumara agu'vazigahune huno'ma hania kegura tamentintia oshi. <sup>16</sup> Hagi Hezeakaia nanekeea tamagra antahi omiho. Asiria kini ne'mo'a amanage hu'neanki antahiho. Tamagrama fru huta mani'neta tamagra'a waini hozafinti tagita neneta, tamagra'a fiki zafareti tagita neneta, tamagra'a tinkerifinti'ma tima afitama nesanunema hanutma, atretma nagrite enketa tarimpa fru hutama manisnuna nanekeea erinte fatgo hamneno. <sup>17</sup> Hagi anama huta mani'nesnage'na nagra eme tamavre'na mago mopa tamagri mopagna moparega ome tamantegahue. Ana mopafina waini tima tro hu'zana, waini hoza rama'a megeno, bretima tro hu'zana, witi hoza rama'a me'n. <sup>18</sup> Hagi Hezeakaia'ma tamagriku'ma huno Ra Anumzamo'a taza hanigeta Asiria vahera hara hu zamageteregahune huno nehiana reramatga nehianki kva hiho. Hianagi ama mopafina mago'a vahe'mofona ru anumzamo'a aza higeno, Asiria kini nera hara hugatere'nefi? I'o. <sup>19</sup> Hagi Hamati vahe'ma Arpati vahe'ma Sefarvaimi vahe'ma huta ko'ma ha'ma hu zamagtere'nonana anumzazmimo'a iga mani'neno zamaza osu'n. Ana hige'na Sameria kuma'enema ha'ma hunte'noana anumza'zmimo'a zamaza osige'n, hara hugaterogeno Sameria kumamo'a nagri nazampi me'n. <sup>20</sup> Hanki tagra rama'a kumatmi hara hu zamagate re'nonanagi, anumza zamimo'za zamaza osazageta mopazmia eri'none. E'ina hu'negu inankna huno Ra Anumzamo'a tamaza hanigeta, hara hutma Jerusalemi rankumara agura vazigahaze? <sup>21</sup> Hianagi Asiria sondia vahete kya ne'mo'ma hia nanekerera magore hu'za kenona'a osu'naze. Na'ankure kini ne' Hezeakaia huzmanteno magore hutma ke'arerera kenona oshi huno huzmant'e nege'za anara hu'naze. <sup>22</sup> Anante kini ne'mofo nompima kegavama nehia ne' Hilkia nemofo Eliakimiki, avontafe'ma erinte fatgoma huno negrea ne' Sibnaki, kinimo'ma tro'ma nehia zamofoma avompima krenentea ne' Joaki hu'za, kukena zamia tagato tagutu hute'za kini ne' Hezekaiante vu'za, Asiria sondia vahete kya ne' Rabsaki'ma hu'nea nenekeea ome asami'naze.

37

*Hezekaia'a antahintahi erinaku kasnampa ne' Aisaia antahige'nea naneke*

<sup>1</sup> Hagi anankema kini ne' Hezekaia'ma nentahino'a, ame huno kukena'a tagato tagatu nehuno asunku kukena nehuno, Ra Anumzamofo ra mono nompinka ufre'ne. <sup>2</sup> Ana nehuno kini ne'mofo nompi kva ne' Eliakimine avontafe kre eri'zama eneria ne' Sibnane ugotama hu'za pristi eri'zama eneriza vahe'enena humzanteno, zamasunku kukena hu'neta vuta kas-nampa ne' Amosi nemofo Asisa ome keho huno humzante'ne. <sup>3</sup> Hagi Aisaia avure uhanatite'za, Hezekaia'a amanage hu'ne hu'za ome asami'naze, Menina ama knafina tusi'a knazamo'ene, tazeri fatgo hu'zamo'ene, tagaze hu'zamo tagritera e'ne. E'inama hu'neana mago a'mo mofavre'za negegeno mofavre anteku hianagi, hankave'a omneaza huno hankavetia omne'ne. <sup>4</sup> E'ina hianagi Ra Anumzana kagri Anumzamofontega nunamu hunka antahigegeno, Asiria sondia vahete kva ne' Rabsakima kva'amo Asiria

kini ne'mo'ma huntegeno eno, kasefa'ma huno mani'nea Anumzamo-foma huhavizama hunte'nea nanekerera antahino ete agrira azeri haviza hugahifi antahigenka nunamu hunka taza hugeta osi'a naga'ma mani'nomota ofrita mani'mneno. <sup>5</sup> Hagi Hezekai'a eri'za vahe'mo'zama Aisaiante'ma neazageno'a,

<sup>6</sup> Aisaia'a amanage huno zamasami'ne, Ra Anumzamo'a amanage hie huta kvatamimofona ome asamiho, Asiria kini ne'mofo eri'za vahe'mo'zama Nagri'ma eme huhavizama hunantaza nanekea nentahinka korora osuo. <sup>7</sup> Hanki antahio, Nagra Asiria kinimofo agu'afina mago avamu ante'nugeno mago naneke eme asaminageno nentahino, ete rukrahe huno mopa-arega nevanige'na, mago vahe azampi avrentesnugeno bainati kazinteti ahe frigahie. <sup>8</sup> Hagi Asiria sondia vahete kva ne' Rabsakima antahiam, Asiria kini ne' Senakeribi'a Lakisi rankumara atreno vu'ne nehazageno'a, Jerusalemi kumara ete atreno vuno ome antahiana kini ne'mo'a Libna kumate vuno hara ome nehie hazageno anantega ome ke'ne. <sup>9</sup> Hanki anante Asiria kini ne' Senakeribi'ma antahiam, Kusi kumateti Itiopia kini ne' Tirhaka'a hahugantenaku ne-e hu'za hazageno nentahino'a, ke'ma erino vu vahera amanage huno huzmanteg'e za Hezekaiantega kea eri'za vu'naze, <sup>10</sup> Amanage huta ome asamiho, kagrama kamentintima hunentana Anumzamo'ma huvempa huno, Asiria kini ne'mo'a eno hara hugagetereno Jerusalemi kumara e'origahiema hu'neana, regavataga hu'neanki ananke-gura kagesa ontahio. <sup>11</sup> Tagrama Asiria kini vahe'motama mago'a kuma'ma hahu zamagateretama maka zama eri havizama hu'nonana, kagra ko antahi'nane. Hanki kagrama antahinana mago'a vahe'ma zamazeri havizama hu'noa zana hu'na, kagrira kazeri havizantfana osugahufi? <sup>12</sup> Hagi Gosani kuma'ma, Harani kuma'ma, Rezezi kuma'ene, Edeni vahe'ma Tel-Asari kumate'ma nemaniza vahe'enema, ko'ma nagehe'mozama ha'ma huzmante'zama zamazeri havizama hu'nazana, anumza zamimo'a magore hunora zamaza osu'ne. <sup>13</sup> Hagi Hamati kini ne'ene Arpati kini ne'ene Sefar-vaim rankumate kini ne'ene Hena kini ne'ene Ivva kini ne'enena inantega mani'naze?

### *Ra Anumzamofontega Hezekai'a'ma nunamu hu'nea naneke*

<sup>14</sup> Asiria kini ne'mo'ma kretre'nea avona, ke'ma eri'za e'naza vahe zamazampinti Hezekai'a erino hamprino keteno, Ra Anumzamofo ra mono nontega ana avona erino marerino Ra Anumzamofo avure omeri atarente'ne. <sup>15</sup> Anama huteno'a Hezekai'a amanage huno Ra Anumzamofontega nunamuna hu'ne, <sup>16</sup> Ra Anumzana Israeli vahe'mota Anumzamoka Kagra hankavenentake hu'namoka, serabimi ankeroramimofo amunompi kini traka'a me'ne. Kagrake'za tamage Anumzana mani'enka, maka ama mopa kva hu'nane. Na'ankure monane mopanena kagrake tro hu'nane. <sup>17</sup> Ra Anumzamoka kavua negenka kagesa antenka nunamuni'a nentahinka, Asiria kini ne' Senakeribi'ma kasefa'ma hunka mani'nana Anumzamoka'ma kazanava kema atregeno'ma e'neana antahio. <sup>18</sup> Tamage huno Ra Anumzamoka, Asiria kini vahe'mo'za mago'a kumatmimpi vahe'ene mopazaminena eri haviza hu'naze. <sup>19</sup> Ana nehu'za anumza zaminena tevefi hanavazi'za kre'naze. Na'ankure zamagra tamage anumzana omani'nazzanki, vahe'mo'za havi anumzantamina zafareti'ene havereti erite'za zamazanteti tro hu'naza zantaminki'za anara hu'naze. <sup>20</sup> E'ina hu'negu menina Ra Anumzana Anumzantimoka taza hunka Senakeribi azampintira tagu'vazio. Anama hananke'za maka ama

mopafima mani'naza vahe'mo'za nege'za Ra Anumzana Agrake tamage Anumzana mani'ne hu'za kagriraga kage'za antahi'za hugahaze.

*Hezekaiā nunamunte Ra Anumzamo ke nona'a hunte'nea naneke*

<sup>21</sup> Hanki anante kasnampa ne' Amosi nemofo Aisaia'a amanage huno Hezekaintega kea atrentegeno, kema erino vu vahe'mo'a erino vu'ne, Ra Anumzana Israeli vahe'mota Anumzamo'a amanage hu'ne, Asiria kini ne' Senakeribi'ma hia zanku'ma nunamu hunka antahiganku, <sup>22</sup> Ra Anumzamo'a amanage huno hu'ne, Senakeribiga Saioni mofa'mo'a kazanava ke nehuno, kiza zokago ke huneganteno Jerusalemi mofa'mo'a koro'ma atrenka nefresnankeno'a agena rugahie. <sup>23</sup> Senakeribigama azanvanke hunentenka, huvahiza hunentenka, ranke hunka kavufga erisga hu keaga nehunka, kagrama kana kavugura nagra so'e hu'noe nehunka, Israeli vahete'ma Ruotage'ma hu'noa Anumzamo'nna nazeri haviza hu kea hu'nane. <sup>24</sup> Kagra eri'za vaheka'a huzmantanke'za e'za, Ra Anumzamo'nna nazeri havizahu kea hu'naze. Hagi kagra'agura amanage hunka hu'nane, nagra karisiramini'afi mani'nena, marerigatere'nea agonaramimofo morusapi vano nehu'na, Lebanoni zafa tanopafina vahe ovu'afi ufre'na knare'nare sida zafaramine, saipresi zafaraminen aantagi'noe hunka hu'nane. <sup>25</sup> Anage nehunka inantego vanoma huana nagra'a tinkerirami kafina anampinti tina nene'na, Isipi mopafima maka'ma me'nea tintamina nagareti rerane'noe hunka hu'nane. <sup>26</sup> Ana hu'nananagi Senakeribiga menina antahio, Nagra Ra Anumzamo'nna e'ina hu'za fore hugahie hu'na korapa retro hunte'noa zamo menina efore nehianki ontahi'nan? Nagra e'ina huo hu'na hugenka hankave vihu keginama hu'naza kumatmina tapage hunka, eri mopafi atrankeno kugupaseno hihi huno mareri'ne. <sup>27</sup> Ana nehige'za ana kumapi vahera hankavezamia omanege'za antahintahi hakare nehu'za zamagazegu hu'naze. Ana nehu'za hozafi ne'zamo mensi amumpa anteno nehagegeno, nomofo agofetu nehagea trazamo hageno ra osu'negeno zagemo te vamajankna hu'naze. <sup>28</sup> Hianagi kagrama noma nemaninazane, kama vanoma nehanazane, Nagri'ma tusi karimpama ahenantana zanena, nagra ko kage'na antahi'na hu'noe. <sup>29</sup> Na'ankure kagrama tusi krimpama ahenantenka, veganokino kavukvama hu'nana zana, nagra hago antahi'noe. E'ina hu'negu Nagra hukuni'a kagonagampi vazi rusi nehu'na, hosimofo agipima nentaza aini atupa kagipina ante'na kavazu hanugenka, ete e'nana kantega vugahane. <sup>30</sup> Hanki Hezekaiaga kagritera amanahu avame'za fore hugahie. Meni kafufina agra'ama hageno marerisnia witireti erita neneta, anaga'a kafufina ana witifinti'ma taniramino hageno rentesnia witireti erita negahaze. Hianagi nampa 3 kafurera tamagra'a hoza erita anteta neneta, waini hozanena nenteta raga'a tagita negahaze. <sup>31</sup> Hagi Juda vahe'ma zamahe nefri'za osi'ama eme zamatrage'zama mani'naza naga'mo'za, waini zafamo hiaza hu'za, rafuna atresnageno mopafi uramisnige'za hage'za mareriza raga rentegahaze. <sup>32</sup> Na'ankure ha' vahe'mo'za nezmahe'za osi'ama zamatresnaza naga'mo'za Jerusalemi kumapintira atiramiza ne-enageno, knazampintima ofrizama osi'a naga'ma manisnamo'za Saioni agonaretira egahaze. Hankavenentake Ra Anumzamo'nna e'ina hu'za fore hugahie hu'na hankave antahintahi retro hu'noankino, tamagerfa huno ana zana efore hugahie. <sup>33</sup> E'ina hu'negu Ra Anumzamo'a Asiria kini nekura amanage hu'ne, Agra ama Jerusalemi rankumapina eofrege, magore huno keve'a aheotrege, hanko'a erino erava'o osuge, mani'neno'ma ha'ma hania nonkumara have kegina

tvaontera eme trora osugahie. <sup>34</sup> Agra Jerusalemi rankumapi efreku egahianagi, ete rukrahe huno anama enesia kantega vugahie huno Ra Anumzamo'a ama ana nanekea huama hu'ne. <sup>35</sup> Ra Anumzamo'na ra nagigu'ene, eri'za vahe'ni'a Devitima hvempama hunte'noa kegu nagesa nentahi'na, Jerusalemi rankumara agu'vazina kegava hugahue!

### *Asiria kini ne' Sinakeribi'ma fri'nea zamofo naneke*

<sup>36</sup> Ra Anumzamo'a mago Ankero huntegeno Asiria vahe'ma seli nonkuma'ma eme ante'za mani'nafi vuno, ana kenageke'za 1hantret 85 tauseni'a Asiria sondia vahera zamahe fri vagare'ne. Ana higeno nanterama masama higeno ana kumapima kazana fri'nea vahe'mofo zamavufagamoke'za avite'ne! <sup>37</sup> Ana higeno Asiria kini ne' Senakeribi'a seli nonkumama eme ante'noma mani'neana atreno kuma'rega Asiria viazamo, Ninive rankumate umani'ne. <sup>38</sup> Mago knazupa Nisroku'e nehaza anum'za'amofo mono nompi Senakaribi'a mono hunenteno mani'negeke, tare mofavre'a Adrameleki'ene Sareselikea vuve bainati kazinteti ome ahe friteke, koro freke va'azamoke Araratı moparega umani'na'e. Ana hutakeno mago mofavre'a Esarhadoni agri nona erino kinia mani'ne.

## 38

### *Hezekai'a'ma kri'ma eriteno kanamare'nea zamofo naneke*

<sup>1</sup> Hagi ana knafina Hesekaia'a kri eriteno fri'za hu'ne. Ana higeno kas-nampa ne' Amosi nemofo Aisaia'a agrite eazamo, Ra Anumzamo'a amanage hie huno eme asami'ne, Krikamo'a vaga oresnigenka frigahananki, nagaka'a kehu atru hunka mika eri'zanka'a erinte fatgo huo. <sup>2</sup> Higeno Hezekaia'ma anankema nentahino'a, avugosa rukrahe huno nozafarega hunenteno, Ra Anumzamofontega amanage hu'ne, <sup>3</sup> nunamuna hu'ne, Ra Anumzamoka kagri kavure'ma maka nagu areti'ma hu'na keka'ama ruotagre'na amage'ma nente'nama, kagri kavure'ma knare navu'nava'ma hu'noa zankura kagesa antahi namio, nehuno Hezekaia'a krafage huno tusi zavi ate'ne. <sup>4</sup> Anama higeno'a, Ra Anumzamo'a ete Aisaiana amanage huno kea asami'ne, <sup>5</sup> Kagra ete vunka, Ra Anumzana negageho Deviti Anumzamo'a amanage hie hunka Hezekaiana ome asamio, Nagra nunamunka'a ko nentahin'a zavi'ma atana kavunurra ko koanki'na, 15ni'a kafuka'a erinte zaza ha'nena manitenka henka frigahane. <sup>6</sup> Ana nehu'na Asiria kini ne'mofo azampintira hara hu'na kagura nevazi'na, Jerusalemi rankuma'enena kegava hugahue. <sup>7</sup> Hagi Ra Anumzamo'ma avame'zama eri fore'ma hanigenkama negesunka, Ra Anumzamo'ma hvempama hu'nea zana tro hugahie hunka kagesa antahio. <sup>8</sup> Hagi Ahasi'ma latama ahentenege'za zagemofo kna'ama negaza latamofo amema'amo'ma ko'ma evu'neana ete 10ni'a zupa kamefeti renakerenka ete vuo huankino, ana huno ete vugahie, higeno kema hiankante anteno anzana before hu'ne.

### *Kini ne' Hezekai'a'ma muse zagame hu'nea naneke*

<sup>9</sup> Higeno Hezekaiama kri'amo'ma atrentegeno'a amanage huno avona kre'ne, <sup>10</sup> Nagrama antahuana zahufa kasefa vahe mani'nena fri'na vu'na kasefa'ma hu'na maniga knani'a, fri vahe kumapi umanigahue hu'na nagesa antahi'noe. <sup>11</sup> Nagrama antahuana kasefa'ma huzama mani'naza vahe'mofo mopafina Ra Anumzana Anumzanimofona onkegahue nehu'na, ama mopafima kasefa'ma hu'za mani'naza vahera zamavufina onkegahue hu'na nagesa antahi'noe. <sup>12</sup> Hagi nagri nomanizamo'a sipisipi afute kva

vahe'mo osi seli no ki'nea eri anafe huno viaza nehuno, kukena hati nofi'nu anaki antrako hiaza hige'na ko fri'noanagi ana nofipintira ahekano hutreno nazeri fru hu'ne. Anumzamoka zagine haninena knani'a eri atupa hanke'na nasimura atre'za hue. <sup>13</sup> Nagra akohe'na mani'nogeno nantera se'ne. Hianagi laionimo zaferina eri rarupeaza huno maka zaferinani'a nazeri rarupe'ne. Hagi feru'ene kenage'enena kagra nazeri haviza nehane. <sup>14</sup> Hagi kisave namamo'ene afi patomoke ha'aza hu'na krafa nehu'na, maho namamo'ma zavi'ma neteaza hu'na zavira ate'noe. Monafinkama kenagamutoa zamo higeno navumo'a nata negrigeno navunu hu'ne. Ra Anumzamoka hazenke zampi manuanki eme naza huo hu'na hu'noe! <sup>15</sup> Hianagi nagra na'ane hu'na kea hugahue? Ra Anumzamo'ma agrama nasami'nea kemofo amage anteno ana zana eri fore hu'ne. E'ina hu'negu nagrama kasefa'ma hu'nama mani'nama vanua kafu'afina, knazama namitenka nazeri knare'ma hu'nana zankura antahi kamigahue. <sup>16</sup> Ra Anumzamoka amanahu' zama vahete'ma eri fore'ma nehanana, vahe'mofo avu'ava az-eri rukrahe hankeno kasefa asimu e'nerie. Nagrite'ma amanahu' zama efore'ma hia zamo'a avamunimofona nazeri kasefa hu'ne. Ra Anumzamoka krini'a eri atrenka, nazeri so'e hanke'na ofri'na kasefa hu'na manue. <sup>17</sup> Tamage hunka nagri knare zanku hunka natrarkena ana knazampina vu'noe. Ra Anumzamoka kagra kavesi nante'nanankinka natrarkenae havizana hu'na kerifina uoram'i'noe. Ana nehunka maka kuminia eri atre'nane. <sup>18</sup> Na'ankure fri vahe kumapima nemanisaza vahe'mo'za Ra Anumzamoka hu muse hunogantesageno, fri vahe'mo'zanena kagia ahentesga osugahaze. Hagi fri vahe kumapima nemani'naza vahe'mo'za knare eri'zama enerina zankura amuhara huogamigahaze. <sup>19</sup> Nagrama menima musema hunegantoaza hu'za kasefa'ma hu'za mani'naza vahe'mo'zage humusea hugantegahaze. Hagi mago ne'mofonte'ma knare avu'ava zama hunte vava hu'nenana zamofo agenkea, mofavre'amofona asamitere huno vugahie. <sup>20</sup> Ra Anumzamo'a tamage huno nagu vazigahie. Ana hugahiankita kasefa'ma huta manisuna kna'afina maka zupa Ra Anumzamofo mono nompi vuta zavena neheta, zagame huta agia ahentesga hugahune.

### *Aisaia'ma kini ne' Hesekaima antahintahi ami'nea naneke*

<sup>21</sup> Hanki anante Aisaia'a amanage huno Hezekaiia eri'za vahera zamasami'ne, fiki zafa raga ante hagege huta regripeteta erita Hezekaiia us-agentera ome antenkeno teganino. <sup>22</sup> Higeno Hezekaiia amanage huno Aisaiana antahige'ne. Inankna avame'zamo nagritera efore hanige'na nege'na, Ra Anumzamofo mono nontega ete mareri'na monora ome huntegahue?

## 39

### *Hezekaiia'ma knare'nare zantamima zamaveri'ma hu'nea naneke*

<sup>1</sup> Hanki ana knafina Babiloni kini ne' Baladani nemofo Merodak-Baladani'a Hezekaiia'ma krima erino mase'nefinti'ma kanamre'ne hu'zama haza nanekema nentahino'a, mago avonkreto nanekema eri'za vu'za e'za hu vahe nezamino, muse zanena antentege'za eri'za Hesekaiantega vu'naze.

<sup>2</sup> Hesekaia'a ana vahe'ma azageno'a, muse nehuno zamazeri frufru huteno zagoma nentea nonki, silvane goline mnanentake zantamine knare'nare masavene ha'zama nentea none, ana maka fenozama nentea nontamina zamaveri huvagare'ne. Hagi Hesekaia'ma kegava hu'nea mopa'afima me'nea zantamine, kinimofo nompima me'nea zantaminena magore huno otreno ana maka zamaveri huvagare'ne. <sup>3</sup> Anante kasnampa ne' Aisaia'a, kini

ne' Hesekaiente eno amanage huno antahige'ne, Amama ete'zama vaza vhahera igati ete'za, na'anu hu'za eme hute'za vaze. Anage higeno Hesekaia'a kenona'a huno, afete mopa Babiloni moparegati e'naze. <sup>4</sup> Anage higeno Aisaia'a amanage huno antahige'ne, Kinimoka nompina na'a ke'naze? Higeno Hesekaia'a kenona huno, Kinimoka nompima me'nea zantamina ana maka kevagare'naze. Ana nehu'na zago fenoma nentoa nontamina magore hu'na otre'na ana maka zamaverihu vagaroge'za kevagare'naze. <sup>5</sup> Hagi anante Aisaia'a amanage huno Hesekaiana asami'ne, Monafi sondia vahe'mofa Hankavenentake Ra Anumzamo'a amanahu naneke hianki kagesa antenka antahio, <sup>6</sup> tamagerfa huno mago kna ne-eankino ananknama ehanats-nigeno'a, ana maka kinimoka nompima me'nea marerisa feno zantamine, kafahe'mozama ko'ma eritruma hazageno meno eno meninema me'nea zantaminena magore hu'za otre'za ana maka eri'za Babiloni moparega vugahaze huno Ra Anumzamo'a hu'ne. <sup>7</sup> Ana nehu'za kagripinti'ma fore'ma hanaza mofavrerpinti mago'a zamavare'za Babiloni moparega vute'za, zamagonknaza ome harisnagae'za mani'ne'za Babiloni kini ne'mofa nompi eri'zana erigahaze. <sup>8</sup> Hanki anagema higeno'a Hesekaia'a antahiten, agrama antahiana Aisaia'ma eme hia zantamimo'a, agrama manisnia kna'afina ha' zana forera osina mani fru huta manigahune huno agesa nentahino, amanage huno Aisaiana asami'ne, Ra Anumzamofo nanekema kagrama eme nasamina nanekemo'a knare hie.

## 40

### *Ra Anumzamo'ma naga'amokizmi zamazeri knare'ma hania zamofo naneke*

<sup>1</sup> Vahe'nimota mani so'e huta maniho, huno tamagri Anumzamo'a hu'ne. <sup>2</sup> Jerusalemi vahe'mofona fru kefinti nanekea zamasamio, Hapima manita neaza zamo'a amare eme vagare hunka kezatinka zamasamio. Na'ankure Ra Anumzamo'a kumi'ma hu'naza zanteria knazana ante agofetu huno ranknaza zamigahie. Hianagi menina maka kumi'zmia ko atrezmante'ne.

<sup>3</sup> Mago vahe'mofa ageru'mo kezatino amanage nehie, Ra Anumzamo'ma esania kana ka'ma kokampina retro nehuta, hagege kokampina Anumzamo'ma esania rankana varita eripehihi. (Matiu 3:3, Maki 1:3, Joni 1:23) <sup>4</sup> Ana nehutma maka urami erami hu'nesnia agupofina mopa kateta ante pehe nehutma, ranra agonaramine ne'onse agonaramina kafitma eri agupo nehutma, marerino tamino'ma hu'nesiam'a erinte fatgo hu so'e hiho. <sup>5</sup> Anama hanageno'a Ra Anumzamofona hankavenentake masa'amo'a eama hanige'za, maka ama mopafima mani'naza vahe'mo'za kevagaregahaze. E'i ama ana nanekea Ra Anumzamo'a agra'a agipinti huama hu'ne. (Luk 3:4-6.)

### *Anumzamofo nanekea fanane osu' mevava hania naneke*

<sup>6</sup> Hagi mago kezankemo'a huno, Ranke hunka kezatio huno higeno, Na'anu huna kezatigahue huno magomo'a higeno, Maka ama mopafima mani'naza vhahera trazankna hu'nazankino, tanopafi me'nea trazaramimo amosre aheteno rutri huramiaz huno, ra zamagima eneriza zamo'a fanene hugahie. <sup>7</sup> Trazamo'a hagege nehigeno, amosre'amo'a mopafi evuneramie. Na'ankure Ra Anumzamo'a agra'a zahora huhu hutregeno eno eme zamazeri tore hige'za mopafi evuneramize. Tamagerfa hu'za maka vahe'mo'za trazankna hu'naze. <sup>8</sup> Hanki trazamo'a hagege nehanigeno,

trazamofo amosre'amo'a mopafi evuramigahie. Hianagi tagri Anumzamofo nanekemo'a, vaga oreno mevava hugahie. (1 Pita 1:24-25.)

<sup>9</sup> Saioni rankumapinti'ma knare musenkema huama'ma nehana vahe'moka, agonarega marerinka kagerura erisga hunka hankavetinka ana musenkeua huama huo. Jerusalemi rankumapima mani'neta musenkema huama'ma nehaza vahe'mota, korora osutma kezatitma, Juda mopafima me'nea rankumatmimpima nemaniza vhahera tamagri Anumzana ama'nagi keho hutma zamasamaho! <sup>10</sup> Keho, Hihamu hankave'ane Ra Anumzamo'a eghahiankino Agra'a hankave'areti vhahera eme kegava hugahie. Ana hugahiankino mizama zamisia zana azampi eri'neno egahie. <sup>11</sup> Sipisipi afu kva vahe'mo nehiaza huno, agra vahe'a kegava hu so'e nehuno, Sipisipi afute kva vahe'mo sipisipi afu anenta'a asagufinka avrenteaza huno, agra vahe'a asagufinka zamavarenenteno, anenta'ma ante'naza sipisipi afutamina akoheno zamavareno vugahie.

<sup>12</sup> Hanki mago vahe'mo'a maka hagerina afino azampina erinteno refko'a huno kege, azamofo atumpa'aretira anteno mona refko huno kegahifi? I'za maka mopa kateno mago ekaeka kupina erinte vaga nereno, agonaramimofo kna'a erintenora refko huno negeno, ne'onse agonaramimofo kna'anena erinteno refko huno kegahie? <sup>13</sup> Iza Ra Anumzamofo antahi'zana keno antahino nehuno, e'na hunka maka zana trora huo hunora antahi'zana ami'ne? <sup>14</sup> Ra Anumzamo'a izampinti ama' antahi'zana enerino, antahintahi'zanena e'nerie? Antahi'zane fatgoma huno refkoma hu avu'ava zanena, iza rempia hunemie? <sup>15</sup> Tamagerfa huno ama mopafi vahe'ma Ra Anumzamo'ma zamageana, kavofinti timo osi'a pake huramiaza nehazageno, nanaza erinte'za kna'a negaza sigerire kugusopa meaza nehaze. Ana nehigeno hageri amu'nompima me'nea moparamina erinteno refko huno keana amne zankna hu'za osi kugusopagna hu'naze. <sup>16</sup> Lebanoni mopafima ana maka mani'naza bulimakao afutminteti'ene, Lebanonima me'nea zafaramina ana maka antagita Ra Anumzamofontega tevefi kre fanane hu ofa huntegahaze. Hianagi anazamo'a Ra Anumzamo'ma antahi'nea kantera ovugahie. <sup>17</sup> Agri avurera mika ama mopafi vahe'mo'za amane zaga mani'naze. Agrama zamageana amane zagama zamageaza huno nezmage. <sup>18</sup> Ina vhahete huntenka Anumzanena mago avame hu'ne hunka hugahane? Inazamofo amema'amo agriknara hu'ne hunka hugahane? <sup>19</sup> Mago'zamofo amema'a zafareti antreza tro hute'za golireti eri anovazinte'za silvareti seni nofira tro hu'za avasase'a hunte'naza havi anumzankna, Ra Anumzamo'a hu'nefi? <sup>20</sup> Hagi amunte omene vahe'mo'a havi anumzamofo amema'ama miza segama osia vahe'mo'a hankave zafa erino ana zama tro'ma nehaza eri'za vahe amigeno, ana havi anumzamofo amema'a zafare antreno tro hutegeni erinte fatgo huno antegeno me'neno avugosaregatira mopafina evunoramie.

<sup>21</sup> Kagra ontahi'nampi? Kagrirra onkasmi'nafi? Ra Anumzamo'ma mopamofo agafa'ama erigafa huno tro'ma hu'neazana kora kasamigenka ontahi'nampi? <sup>22</sup> Ra Anumzamo'a kini tra'are monafi manisga huno mani'nege'za, ama mopafi vahe'mo'za kenu taminkna hu'naze. Anamifima me'nea monaramina, selinoma hiaza huno eri atarentegeno enevigeno, vahe'ma mani seli nomi eri atareno kintegeno meaza huno nomi'a kintene. <sup>23</sup> Ama mopafi kva vahetmina, Ra Anumzamo'a zamazeri fenkami atrege'za amane zankna nehaze. <sup>24</sup> Mago vahe'mo mensintfa avimza avina vati krigeno rafu'namo zahuifa mopafi uoram'i'negeno, Ra Anumzamo'a amuho

nentake zaho atregeno ame huno eno ana avimza eri hagege higeno, kagikagi zaho'mo witi hona'ama eri harafi huno freaza nehaze. <sup>25</sup> Ruotge'ma hu'nea Ra Anumzamo'a amanage huno nehie, Ina vahete hunteta nagrikna vahe mani'ne huta hugahaze? <sup>26</sup> Kavua kesga hunka monafima me'nea hanafitmina iza trora hu'nefi ko? Ra Anumzamo agrake tro huzmanteteno, nama'a hanafitami me'neana, ana maka keno antahino nehuno, mago magomofona agi'a amitere hu'ne. Agrira tusi'a hankave'a me'negu huno kegava higeno, mago'mo'e huno fananea nosie.

<sup>27</sup> Hagi na'a higeta tamagra Israeli vahera Jekopu naga'mota amanage hutma ke hakarea nehaze, Ra Anumzamo'a knazantia nonkeno fatgo avu'avara humorante hutma nehaze. <sup>28</sup> Tamagra ontahi'nazafi? Tamagrira ontamasami'nazafi? Ra Anumzamo'a fanane osuno manivava Anumza mani'ne. Ama mopafima maka zama me'nea zantamina, agrake tro hu'ne. Magore huno agrira kasrora ahege, avesra hugera osugahie. E'ina hu'neankino mago vahe'mo'a agri antahi'zana hakenora eri forera osugahie. <sup>29</sup> Hankavezmima omne'nea vahera Ra Anumzamo'a hankavea nezamino, hankavezamima omanegezama kasrokasarama nehaza vahera mago'ene hihamua sotu huno nezamie. <sup>30</sup> Kasefa mofaveramimo'za zamavesra kosara hugahaze. Hankave kasefa vahe'mofonena hankavezmia omanesige'za traka hugahaze. <sup>31</sup> Hianagi Ra Anumzamo-fonte'ma, amuha nehu'za zamentintima nehaza vahe'mo'za, kasefa hankave eneri'za tumpamo hiaza hu'za haresga hu'za vano nehu'za, zamagama resnazana zmasafekura nosu'za, kama vanazana zamavesra osugahie.

## 41

### *Ra Anumzamo'ma Israeli vahe'ma zamazama hania zamofo naneke*

<sup>1</sup> Ra Anumzamo'a amanage hu'ne, Hageri amu'nompima me'nea mopafima mani'naza vahe'mota, tamagasasana eritaganeta mani'neta, nagri kea antahiho. Kokankokama mani'naza vahe'mota hanave eneritma, erava'o huta nanekea hiho. Hagi keagama eri fatgoma hu kumate enketa, keaga eri fatgo hamnenno. <sup>2</sup> Zage hanati kaziga kini nera iza azeri otigeno vuno maka kaziga hara huzmagatenere? Iza mago'a kumate kini vahera azampina zamavarentegeno, zamazeri havizana nehuno bainati kazinteti'ene ati keveretira zamahe hanara nehie? Ana hige'za zaho'mo witi hona'a eri hareno freanknara huno ati'aretira zamahe hanara hu'ne. <sup>3</sup> Korapara agra vanoa osu'nea kante Agra ame huno zamarotago huno vu'ne. Anama nehuno'a agra hazenkea e'ori'ne. <sup>4</sup> Iza ese agafarera ama ana zantamina forera huo higeno forera hu'ne? Iza ese agafareti vahera fore huo higeno fore huteno manino ne-e. Ese agafa Nagra Ra Anumzamo'na mani'ne'na, vagareranagrade mani'noe. <sup>5</sup> Hageri amu'nompima mani'naza vahe'mo'za anazama nege'za zamahirahi nerege'za koro nehaze. Ana nehazage'za afete mopafima mani'naza vahe'mo'za zamagogogu nehu'za magopi eme atru hu'naze.

<sup>6</sup> Hagi maka tavao'zamirema mani'naza vahera zamazeri hankaveneti'za, korora osu hankavetita maniho hu'za zamasami'naze. <sup>7</sup> Zafareti'ma antre'zama keonke'zama tro'ma nehaza vahe'mo'zane, golima aeni trate'ma ante'za ru kutama nehaza vahemo'zanena, zamagra'a ozamazeri hankaveti azamazeri hankaveti hu'za knare eri'za enerune hu'za nehu'za, nirireti ana zama tro'ma hu'naza zana ahentrako hazageno evunoramie. <sup>8</sup> Hianagi tamagra Israeli vahera Nagri eri'za ne' Jekopu naga'mota, nagri ronen'i'a

Abrahamumpinti efore hu'naza naga mani'nazage'na, nagri eri'za vahe manisnaze hu'na tamagrira ko huhampri ramante'noe. <sup>9</sup> Mopa ome atre eme atre hutegati tamagrira tamavre'na e'noe. Ana nehu'na nagri eri'za vahe mani'naze hu'na huhampri neramante'na, namefira huoram'i'noe. <sup>10</sup> E'ina hu'negu korora osiho, na'ankure nagra tamagrane mani'noe. Nagra tamagri Anumza mani'noanki, antahintahi hakarea osiho. Nagra tamazeri hankaveneti'na, tamaza hugahue. Nagra tamagerfa hu'na hankavenen-take tamaga nazampi tamazerigahue. <sup>11</sup> Hanki antahiho, tamagri'ma zamirimpia aheneramantaza vahe'mo'za zamagazegu nehanage'za, zamage-fenkami atregahaze. Ana nehanage'za tamagrima ha'ma reneramantaza vahe'mo'za fanane hu'za amne zankna hugahaze. <sup>12</sup> Hagi keha'ma ren-eramantaza vahekura keganti kegama hugahazanagi, ozmagetfa hugahaze. Ana nehanage'za ha'ma reneramantaza vahe'mo'za amne zankna hu'za fanane hugahaze. <sup>13</sup> Nagra Ra Anumzana tamagri Anumza mani'noe. Ana hu'noanki'na tamaga tamazante tamazerine'na kegava huneraman-toanki'na tamaza hugahuanki korora osiho hu'na neramasamue. <sup>14</sup> Israeli vahera Jekopu nagara hagirafagna huta hankavetamia omane vahemota korora osiho. Na'ankure nagrake'za tamaza hugahue. Nagra Ra Anumzana tamagu'ma vazina tamavre'noa Anumzankina, Israeli vahetema Ruotgema hu'noa Anumza mani'noe. <sup>15</sup> Antahiho, witima refuzafu nepaza zafare'ma, kasefa ave'ama antegeno witima refuzafuma nepeaza hu'na tamagrira tamazeri retro ha'nena, agonaramina refuzafu'nepeta, ne'onse agonaram-inna witi akruma hareaza hugahaze. <sup>16</sup> Witima harenaku zahopi mate-vigeno, zaho'mo hona'ama erino viaza huta zamazeri panini hanage'za vugahaze. Hianagi Ra Anumzana Israeli vahetema Ruotage'ma hu'noa Anumzamo'na nagi erisga nehutma, nagri hihamu hankavegura musena hugahaze. <sup>17</sup> Zamunte omne vahe'ene, nana zanku'ma atupa'ma nehaza vahe'mo'za tima ne'zankura zmanankemo'a tusiza huno hagege hanige'za tinkura hakegahazanagi onkegahaze. Hianagi nagra Israeli vahe'mofo Ra Anumza mani'noanki'na atupama hanaza zana nezami'na namefira huozmigahue. <sup>18</sup> Nagra hanugeno hagegema hu'nea agonaramimpintira ranra tintamimo hageno ne-esnigeno, krahopintira kampui tintamimo'a nehanatisnige'no, hagegema hu'nea ka'ma kokampina hanugen timo'a hanatino tirutamina marenevazisigeno, hagege huno kekokakoma hu'nesia mopafina tina evugahie. <sup>19</sup> Hagegema hu'nea ka'ma kokampina, sida zafama, akasia zafama, meni zafama, olivi zafama, saipresi zafane, agigu agigu zafaramina nagra hanugen magoka hageno marerigahie. <sup>20</sup> Anama hanige'za ana zantamima ke'za antahi'zama nehu'za, Ra Anumzamo'a agra'a azanteti tro hune hu'za nehu'za, Israeli vahetema Ruotage'ma hu'nea Anumzamo agra'a tro hu'ne hugahaze.

### *Anumzamo'ma havi anumzantamima keaga huzmantesia zamofo naneke*

<sup>21</sup> Ra Anumzamo'a huno, Keagatamia erita eme huama hiho. Israeli vahe kinimo'a keagafima ke hamaresaza nanekea erineta echo hu'ne. <sup>22</sup> Kaza osu havi anumzamofo amema'ama tro'ma hunte'nazana keagare'ma ne-eta eri'netma enke'za, na'a fore hugahifi eme tasamiho. Ko'ma evu'nea zamofo nanekea nerasamisageta, na'a fore hugahifi rezaganeta kamneno. Ana nehu'za henkama fore'ma hania zana hu fore hu'za tasamisageta antahisune. <sup>23</sup> Hanki ana nehu'za henkama fore'ma hania zankura tasamis-ageta nentahita mani nesanunkeno, anazama fore'ma hanigeta, tamage anumza mani'naze huta hugahune. Havi zano knare zano tro hinketa

negeta, antahintahi hakare nehuta korora hamneno. <sup>24</sup> Ana hu'neanagi zafare'ma antre'za tro'ma hu'naza havi anumzamota tamagra amneza manizageno, hankavetamia omne'ne. Hagi ana havi anumzante'ma mono'ma hunentaza vhahera haviza hu'za himanage avu'ava'ene vahe mani'naze. <sup>25</sup> Nagra noti kazigati mago nera ko huhampri ante'noankino, zage hanati kazigati ne-eno agra nagri nagi aheno husga hunantegahie. Ana nehuno mopa kavo tro nehaza vahe'mo'za zamagareti mopa henerazaza huno, zamagima me'nea kva vhahera mopafi zamazeri atre vagaregahie. <sup>26</sup> Mago'a kumamofo anumzamota, tamagripintira ina anumzamo, ko'ma maka'zama agafa huno fore'ma hu'neregati'ma, menima fore hania zamofonkura tasamigeta ko antahitonkeno ana zamo'a eforera nehigeta, e'i tamage hu'ne huta nehumpi? I'o magomo'e huno anara osigeno, mago vahemo'e huno kema hazankea ontahitfa hu'ne. <sup>27</sup> Nagra Ra Anumzamo'na nagrake, Saioni kumara asami'na, amanahu'za fore hugahianki ko hu'na hugeno keteg'e'na, Jerusalemi ran kumatera musenkema erino e'nia vhahera huntogeno e'ne. <sup>28</sup> Hianagi nagrama koana ana havi anumzampintira mago'mo'e huno keaga huge, knare antahi'zana vhahera amige, zamantahima kesuana mago'mo'e huno ke'niarera nona osugahie. <sup>29</sup> Hagi ko, zamagra amnezanki'za mago zana tro osugahaze. Ana havi anumzamofo zamema'a vahe'mo'za tro hu'naza zanki'za mago'zana osu'za fanane hu'za amne zankna hugahaze.

## 42

### *Ra Anumzamo'a eri'za vahe'agu hu'nea naneke*

<sup>1</sup> Ra Anumzamo'a huno, Nagrama huhampri ante'ne'nama azeri han-kavemaneti'na musema hunentoa eri'za vahe'ni'a ama'nagi keho. Nagra avamuni'a agripi antesanugen, ama mopafima kokankoka mani'naza va-hetera fatgoma huno refkohu avu'ava zana erino vugahie. <sup>2</sup> Agrama ke'ma haniana rankea nosuno, vahe zamavufina keaga osugahie. <sup>3</sup> Keta'mo futag-inaku rupagagi hiaza hugahianagi, rufura otaginigeno, tavi'mo asu huku ome osi'osi hiaza hugahianagi, asura osugahie. Agra kazigazi huno tamage ke'mo'ma hu'nea kante anteno fatgo avu'ava zana erinte ama hugahie. <sup>4</sup> Agra avesra osu hanavetino mani'neno kazigazi huno ama mopafine maka kaziganena, fatgo avu'ava zana eri fore hugahie. Ana nehina hageri amu'nompima me'nea mopafima nemaniza vahe'mo'za agri kasege'agu avega ante'za manigahaze. (Matiu 12:18-21.)

<sup>5</sup> Hagi Ra Anumzana Anumzamo'a monaramina tro huteno, eri rutareno enevuno ama mopa tro huteno agigu agigu zama me'nea zantamina eri fore nehuno, vhahera zamasimura nezamino, avamu'ma zamige'zama vanoma nehaza Anumzamo eri'za vahe'agura amanage nehie. <sup>6</sup> Nagra Ra Anumzamo'na, fatgo navu'navaza vhahera zamaveri huo hu'na kagi hu'noe. Ana hu'noanki'na kazante kazerine'na kegava hugantegahue. Ama mopafi vahe'enena kagri kagofetu huvempa hu'na huhagerafigahue. Ana nehanugenka kokankokama mani'naza vhahetera tavi masazami maniga-hane. <sup>7</sup> Zamavuma asuhu'nesnia vhahera zamavua eri hari nehunka, kinama hu'naza vhahera katufe nezmantenka, hanintiri kina nompima mani'naza vhahera zamazeri atre'snanke'za fru hu'za vugahaze. <sup>8</sup> Nagrake'za Ra Anumzana mani'noe, Ra Anumzanema hu'neana e'i nagri nagie. Hagi atre'nuge'za nagri'ma husgama hunenantaza za hu'za zafare'ma antre'za tro'ma hu'naza havi anumzantamina husga huozmantegahaze. <sup>9</sup> Hagi keho, ko'ma tamasami'na henkama efore'ma hugahie hu'nama tamasami'noa

zantamina, ko efore huno evie, ana hige'na kasefa zantamima henkama efore'ma hania zamofo menina erinte ama hu'na neramasamue. Ana zantamima efore osu'nesnige'na ko tamasami'nugeta antahitesnageno, henka anazana efore haniegua neramasamue.

### *Ra Anumzamofoma husgama huntesaza zagamemofo naneke*

<sup>10</sup> Kokankoka mopa fima mani'naza vahe'mota, Ra Anumzamofona kasefa zagame huta agi'a ahentesga hiho. Hagerimpima vano nehaza vahe'motane, hagerimpima nemaniza zaga kafamotane, hageri amu'nompima me'nea mopa fima nemaniza vahe'motanena, kasefa zagame huta Ra Anumzamofona agia ahentesga hiho. <sup>11</sup> Hagege kokampima nemaniza vahe'motane, hagege kokampima me'nea ranra kumatmimpima nemaniza vahe'motane, Kedari kuma tvaonte'ma me'nea ne'onse kumatmimota ranke huta agi'a ahentesga hiho. Ana nehinke'za Sela ran kumate'ma nemaniza vahe'mota agonaramimofo morusapi marerita muse zagamera ranke huta nehuta agi'a ahentesga hiho. <sup>12</sup> Ra Anumzamofona zamagra husga hunteho. Ana nehinkeno hageri akenama nemaniza vahe'mota agi'a ahentesga hiho. <sup>13</sup> Hankave sondia ne'mo hate vunaku rimpia nehegeno otino iyimo agazamo huno viaza huno, Ra Anumzamo'a atiramino ha'vahe'a zamahenaku nevie.

<sup>14</sup> Ra Anumzamo'a huno, Zazate kea osu narimpa fru hu'na mani'nena, narimpa ahe'zana erinte ama hu'na mago zana osu'noe. Hianagi menina mago a'mo mofavre kasentenaku higeno atakriaza huno nata negrige'na krafa nehu'na, nasimu'ma ante'zankura nasafeku hugahue. <sup>15</sup> Nagra ranra agonaramine ne'onse agonaramina aherava nehena, mikra trazantamina eri hagege hugahue. Ana nehu'na ranra tintamina eri tanes-nugeno, hagege mopa nesena, tirutamina eri hagege huvagaregahue. <sup>16</sup> Zamavuma asuhu'nea vhahera zamagrama ke'za antahi'zama osu'naza kante zamavare'na nevu'na, ke'za antahi'zama osu'naza kantera kegava huzmante'na zamavare'na vugahue. Hagi hanizana eri atresuge'za masa negesage'na, marerino tamino'ma hu'nesnia zana eri pehe hugahue. Hagi ama ana zantamina otre'na ana maka zana huvagaregahue. <sup>17</sup> Hianagi kaza osu havi anumzante zamentinti nehu'za, kre maramra hu'za tro'ma hu'naza amema'a raminku'ma hu'za anumzanti mani'nane huzama nehaza vahem'o'za tusi zamagazegu hugahaze.

<sup>18</sup> Hagi Ra Anumzamo'a huno, Tamagesa ankanire vahe'mota tamagesa nentahinkeno, tamavu asu vahe'mota tamavua keho. <sup>19</sup> Tamagra nagri eri'za vahe mani'nazanagi tamavua asu hu'ne. Hagi agesa ankanire vahe'mota huntogenoma kema eri'noma via vahekna huta, tamagesa ankanire vahe mani'naze. Nagri eri'za vahe maniho hu'nama huhampri zamante'noa vhahera zamavu asu hu'ne. <sup>20</sup> Tamagra rama'a zantami ke'nazanagi kenira nosutma, tamagesa anteta antahinazanagi mago nanekea antahinira nosaze. <sup>21</sup> Ra Anumzamo'a fatgo avu'ava zama'agu muse nehuno, hihamu hankave'ane kasege'a azeri sga hugahie. <sup>22</sup> Hianagi menina ha' vahetamimo'za ha' eme huramante'za fenozama eri'za vazaza hu'za tamavre'za vu'za kina nompi kina ome huneramante'za, mago'a kerifi ome tamatregahaze. Hanigeno mago vahe'mo'ma ete zamavareta ehoma nosiankna hugahaze. <sup>23</sup> Hagi tamagri amu'nompintira izo agesa anteno ama nanekea antahigahie? Ama knareti'ma agafama huno'ma vaniana, nagri kea tamagra antahiteta amage anteho. <sup>24</sup> Iza ha' vhahera huzmanteg'e'za Jekopu nagara rohura zamare'za fenozazmia eri'za nevu'za, Israeli vahe'mota hara eme huneramante'za, maka feno zantamina emeri'za vu'naze? Ra Anumzamofo kasegema rutagreta kumi'ma agri avure'ma

hu'naza zanku, agra atregeno anzana fore hu'ne. Na'ankure tagra agri avu'avara novaririta, agri amage'ma onte'nona zanku huno atregeno ana zana efore hu'ne. <sup>25</sup> Ana hu'negu Ra Anumzamofona tusi arimpa ahegeno, ha' vahe huzamanteg'e za e'za ha' eme hurantazageno, maka kaziga tevemo te kagiaza hu'ne. Ana hu'neanagi anzana keta antahita osu'none.

## 43

### *Ra Anumzamo agra vahe'a zamaza huno zamagu vazi'nea naneke*

<sup>1</sup> Hianagi Jekopu naga'ma tamagri'ma tro'ma huneramanteno, Israeli vahe'ma tamazeri fore'ma hu'nea Ra Anumzamo'a huno, Korora osiho, Nagra tamagu'vazi'na tamavre'noe. Na'ankure tamagra nagri su'za mani'naze hu'na tamagi ahe'na tamavre'noe. <sup>2</sup> Hanki tintamima takama ahenage'na nagra tamagrane mani'nenugeno tima hagenia timo'a tamazeri onakrigahie. Hagi teve neresifi ufregahazanagi, tevemo'a tamare orasagegahie. <sup>3</sup> Nagra Ra Anumzana tamagri Anumza mani'noe. Israeli vhahete'ma ruotage'ma hu'ne'na tamagu'vazi'na tamavre'noa Anumza mani'noe. Isipi vahe'ma, Kusi vahe'ma, Seba vahe'enena tamagri nona hu'na miza nezamina tamagrira tamavre'noe. <sup>4</sup> Na'ankure tamagra nagri navurera knare zantfa hu'nazage'na tamage sga hu'nena, navesi neramantoe. Ana hu'noanki'na tamagri'ma tamagu'ma vazi'na tamavrenakura mago'a vahe zamattroge'za tamagri nona eri'za nefrizage'na tamagrira tamavre'noe. <sup>5</sup> Nagra tamagrane mani'noanki korora osiho. Tamagri'ene mofavre nagatamima zage hanati kazigane zage fre kazigama mani'nazana nagra magopi tamavre atru hugahue. <sup>6</sup> Ana nehu'na noti kazigama mani'naza vahekura zamatreke'za echo nehu'na, sauti kazigama mani'naza vahekura zamaze'ori zamatreke'za echo hu'na hugahue. Hagi afete kokantegatira ne'mofavre naga'n'i a zamavare'na ne-e'na, mopamo ome atretegatira mofa'ne nagani'a ete zamavare'na egahue. <sup>7</sup> Nagriku'ma Anumzantie hu'zama nagima nehaza vahe'mo'za eme atru hugahaze. Na'ankure ra nagi namisaze hu'na trohu zmante'noanki'na, Nagrake'za zamazeri fore hu'na tro huzmantoge'za mani'naze.

### *Israeli vahe'mo'za Anumzamofonku'ma huama'ma hanaza naneke*

<sup>8</sup> Hagi Ra Anumzamo'a huno, Zamavuma ke'zana zamavurga megeno, kema antahi'zana zamagesa me'neanagi, zamavu asuhu vahe nese'za, zamagesa ankanire vahe'ma nesaza vahera ke hutru hiho. <sup>9</sup> Maka kokankokama ama mopafima mani'naza vahe'mo'za magopi eme eri atru nehaze. Hagi ana vahe amu'nompintira iza otino ama ana zankura huamara nehuno, ko'ma evu'nea zantamina taveri hugahie. Keagare'ma otti knazupa zamasaminke'za tamage nehaze hu'zama keagafima zamazama hanaza vahera zamavare'ne'za echo. Anama hanage'za mago'a vahe'mo'za nentahi'za e'i tamage nehaze hu'za hugahaze. <sup>10</sup> Hianagi maka'zama hu'noa zanku'ma tamage nehiema huta huamama hanaza vahera tamagra Israeli vahe mani'naze huno Ra Anumzamo'a hu'ne. Nagri eri'za vahe mani'naze hu'na huhampri tamante'noa vahe mani'nazankita, Nagrira nageta antahita huta tamentintia nehuta nagrikura Ra Anumza mani'ne huta hugahaze. Kora para nagrikna anumzana tro huntogeno omani'neankino, henka'a nagrikna anumzana tro huontegahaze. <sup>11</sup> Nagrake Ra Anumzana mani'noankino, nagrira nagatereno mago'mo'a anumzana manino tamagura ovazigahie. <sup>12</sup> Nagra erinte ama hu'na, tamagura vazite'na huama hu'noe. Ana hu'neankino magore huno ru anumzana tamagranena omani'ne. E'ina

hu'negu tamagra Nagriku'ma Anumza mani'ne huta huama'ma hanaza vahe mani'naze. Nagrake'za Anumzana mani'noe. <sup>13</sup> Korapara Nagrake mani'na e'noa Anumzana mani'nookino, mago zamo'a nazampima azer-inuesa vhahera avre otregahie. Nagrama mago zama hanugeño'a, mago vahe'mo'a eri otregahie.

### *Babiloni vahe'ma zamazeri haviza hania zamofo naneke*

<sup>14</sup> Israeli vahe'motare'ma Ruotage'ma hu'neno, ete tamavre'nea Ra Anumzamo'a amanage hu'ne, Tamagrama knare huta manisagu hu'na sondia vhahera huzmantesnuge'za vu'za, Babiloni vhahera ha' ome huzmantesnuge'za, musema nehu'za ra zamagima eneriza ventefi koro fre'za vugahaze. <sup>15</sup> Nagra tamagri Ra Anumzana Ruotage'ma hu'noa Anumza mani'noe. Ana hu'noanki'na nagrake Israeli vhahera zamazeri fore hu'nena, tamagri kinia mani'noe. <sup>16</sup> Ra Anumzamo'a huno, Iza hagerimpina kana eri fore nehuno hanavenentake timpina kana vari'ne. <sup>17</sup> Ana hige'za ana kampina hankave sondia vahetamine, hosi afutamine, karisiraminena huzmantoge'za e'naze. Ana hu'nazanagi lamu tavi husu higeno asu hiaza hu'za zamagra otigara osu'za timpi urami'za fri'naze. <sup>18</sup> Hianagi korapa'ma fore'ma hu'nesnia zankura tamagesa ontahiho. Ko'ma evu'nesnia zankura antahintahia osiho. <sup>19</sup> Hagi nagra menina kasefa'za tro nehuanki keho. Hagi ana zamo'a tima hanatiaza huno efore nehianki, tamagra nonkazo. Nagra ka'ma kokampina kana nevari'na, hagege kokampina hanugen timo'a hanatino evugahie. <sup>20</sup> Ana hanige'za afi zagagafamozane afi kramo'zane, mananinkna nama ostretimo'zanena nagi'a erisga hugahaze. Na'ankure hagege kokampine, ka'ma kokampinenaga Nagra hanugen tina hanatino egahiankiza, nagrama huhampri'noa vahe'mo'za tina negahaze. <sup>21</sup> Nagri vahe manisaze hu'namat tro huzmante'noa vahe'mo'za nagri nagi huama nehu'za ahentesga hugahaze. <sup>22</sup> E'ina hu'neanagi tamagra Jekopu naga'mota nagri nagi aheta monora hunontaze. Hianagi Israeli nagamota Nagrira tamavesra hunentaze. <sup>23</sup> Tamagra sipisipi afutamina avreta eta nagritega tevefina kre fananehu ofa nosuta, mago'a ofanena huta nagri nagi erisga osu'naze. Hianagi mago'a ofane, mnanentake'za insensia nagritera kreta ofa hunanteho hu'na tutu hu'na tamagrira knazana ontami'noe. <sup>24</sup> Hagi tamagra mnanentake'za insensia zagoretira mizaseta ofa huontege, ofama haza afutamimofo afovaretira nazeri musena osu'naze. Hianagi tamagra kumi huta kna nenamita, kefo tamavu tamava'ma hazazamo nazeri navesra nehie. <sup>25</sup> Hianagi Nagra Ra Anumzamo'na nagimofo knare zanku nagesa nentahi'na, maka kumitamia eri atre vaganere'na mago'enena nagesa ontahigahue. <sup>26</sup> Hanki keagare enketa magopi keaga huta eri fatgo nehanunketa, hazenketia omane'nea vahe mani'none huta keagafi huama hinketa, e'i tamage nehzafit antahimneno <sup>27</sup> Korapara tamagehe'za kumira nehzageno, tamagri tamagi'ma eriza keagama nehaza vahe'mo'za ha' renenante'za nagri kea rutagre'naze. <sup>28</sup> E'ina hu'negu tamagri pristi vahe'ma mono nompima eri'zama eneriza vhahera, zamazeri zamagaze nehu'na, Jekopu nagara zamazeri havizantfa hanuge'za, Israeli vhahera kiza zokago ke huramantesnageta tamagaze zanku hugahaze.

## 44

### *Ra Anumzamo Israeli vahe'ma huvempra huzmante'nea naneke*

<sup>1</sup> Hianagi menina tamagra Israeli vhahera Jekopu naga'mota Ra Anumzamo'a amanage hianki antahiho, Nagri eri'za vahe manigahaze

hu'na ko huhampari tamante'noe. <sup>2</sup> Hagi tamagri'ma tro'ma huno tamazeri fore'ma hu'nea Ra Anumzamo'a amanage nehie, antatamimofo rimpafina Nagra tamazeri fore hu'noanki'na, kegava huramantegahue. Nagri eri'za vahe Jekopugagu'ma Jeshurumu'ema\* nehazage'nama huhampri'noa ne'moka korora osuo. <sup>3</sup> Na'ankure hagege huno tima omane'nea mopafina tina tagi netre'na, hagege mopafina hanugenno tina evugahie. Ana nehu'na tamagrama kase zamantesnaza mofavre nagatera avamuni'a eri herafinetrena henkama zamagripinti'ma efore hunante anante'ma hu'za vanaza vahera asomu huzmantegahue. <sup>4</sup> Zamagra trazamo tretre huno hageaza nehu'za, tinkenare me'nea popra zafamo hageaza hugahaze. <sup>5</sup> Mago'mo'a huno, Ra Anumzamofo suza mani'noe nehanigeno, mago'mo'a huno nagra Jekopu suza mani'noe nehanigeno, mago'mo'a huno Ra Anumzamofo suza nagra mani'noe huno azantera krenentenigeno, mago'a vahe'mo'za hu'za tagra Israeli vaher mani'none hu'za zamagia erisga hugahaze. <sup>6</sup> Ra Anumzamo'a amanage hu'ne, Nagra Israeli vahe'mota kini mani'nena tamagu'ma vazi'noa Anumzankina Monafi sondia vahe'mofo Ra Anumza mani'noe. Ana hu'neankina Nagra'a ese agafa hu mani'nena, Nagra'a vagare'enena mani'noe. Magore huno Nagrikna Anumzana omani'ne. <sup>7</sup> Iza Nagri knara hu'nefi huama hino. Nagrikna vahe'ma mago'ma mani'nesniana hinkeno, nagri navure eno Nagrama vahe'ni'ama huhamprima zamante'noa vahetera korapara na'a fore hu'nefi eme huama nehu'za, henkama ne-ea zane henkama fore'ma hania zanena eme huama hino. <sup>8</sup> Nagri vahe'mota tamahirahikura nehuta korora osiho, ama ana zantamima fore'ma osu'nege'na e'inahuza fore hugahie hu'na ko'ma tamasami'noana tamagra ontahi'nazafi? Tamagra Nagrira ko keta antahita hu'nazanki, nagrikna Anumzana magora mani'neno, Nagrama huaza huno hankave havegnaro huno mani'nage'na nagra ontahi'nofi?

<sup>9</sup> Hanki havi anumzamofo amema'a zafare'ma antre'za tro'ma nehaza vahera amne'za mani'naze. Ana nehu'za ana zanku'ma mareri fenoza ante'none nehaza zantamina amneza me'ne. Ana havi anumzante'ma mono'ma hunentaza vahera, zamavu suhuno neginagi vahe mani'nazanki'za, tusi zamagazegu hugahaze. <sup>10</sup> Zafareti'ma antreno havi anumzama tro'ma huge, golireti'ma kreno havi anumzamofo amema'ama tro'ma nehia vahera, ana anumzamo'a mago zana aza osugahie. <sup>11</sup> Hagi antahihio, havi anumzantamima tromia nehia vahe'ene azama hu'za ana anumzama tro'ma nehaza vahe'mo'zanena zamagazegu hugahaze. Na'ankure ana havi anumzamofo ame'ma'a vahe'mo'za zamazanteti tro hu'naze. E'ina hu'negu zamatreke'za eme eri atru hute'za amare echo. Tamagerfa hu'na nagra zamazeri koro hanuge'za, zamagazegu hugahaze. <sup>12</sup> Ainireti'ma eri'zama eri antahi'zama eri'nea vahe'mo'a hama eri'neno hankave'a atreno ainia runtra aheno ana havi anumzamofo amema'a tro nehie. Hagi ana eri'zama e'neriana aganegeteno hankave'a omne amne nehigeno, tinkura ave'nesigeno ana zana tro nehie. <sup>13</sup> Hagi magora zafareti'ma antreno keonke zama tro'ma nehia vahe'mo'a, nofi avazu hu'neno, anante avona eri vakokino krenteno evuteno, ananka avaririno siselireti hanagatino vahe amema'a avaseseane tro huteno erino nompi ome nente. <sup>14</sup> Ana zantamima tro hunakura sida zafama, saipresi zafama oki zafareti'ene erino tro nehie. Ana nehuno menizafa, zafa tanopafi krinegeno ana zafafina kora runentegeno hageno mareneria zafa antagino

\* **44:2** Jeshurum hu'neana Hibru kefina fatgo eriza vahere hu'ne.

ana zana tro nehie. <sup>15</sup> Mago'a ana zafaramina, kave'ma kreno nesnia teve nehareno, mago'a tevema hugreno tohisigu nehare. Mago'a ana zafafintira erino havi anumzamofo amema'a tro hunteteno, monora hunente. <sup>16</sup> Ana zafa mago'a apapu huno afu ame'a kreno neneno muse nehie. Ana nehuno mago'a zafa erino tevefi kregeno neregeno teve tonehino, tevemo'a knare huno navufga temuho hie huno muse nehie. <sup>17</sup> Hianagi mago'a zafa erino havi anumzazamimofo amema'a antreno tro hunteteno ana zante monora hunenteno, amanage huno nunamuna nehie, kagra anumzani'a mani'nanku naza nehunka nagu'vazio huno nehie. <sup>18</sup> Tamagerfa hu'za havi anumzante'ma mono'ma hunentaza vahe'mo'za neginagi nehu'za, ama antahi'zana e'norize. Anazamo zamavua anteso hige'za nonke'za, antahintahi zamimo'a ankanire'neanki'za ama' antahi'zana e'norize. <sup>19</sup> Mago'mo'e huno amanahu antahi'zana e'norie. Mago zafa eri'na teve heg're'na bretia krege afu ame'anena krena ne'noe. Ana nehu'na mago'ama mesia zafaretira kasrino haviza huno agoterfa zana trora hutena ana zafa atuparera narena re'na monora huntegahufi? <sup>20</sup> Inankna hu'za vahe'mo'za negia nene'za tanefa'ma ase'nia zanteria zamentintia nehaze? Ana vahera havi antahi'zazmimo rezamatgta hige'za havi kante nevazankiza, zamagra'a zamagura ovazigahaze. Ana nehu'za tamaga kazigama eri'naza zankura havige'za eri'none hu'za ke'za antahi'zara osugahaze.

<sup>21</sup> Ra Anumzamo'a amanage huno nehie, Israeli vahera Jekopu nagamota ama zantaminkura tagera okaniho, nagra tamazeri fore hugeta nagri eri'za vaher mani'naze. Hagi Israeli vahe'mota Nagra nagera akani oramantegahue. <sup>22</sup> Zaho'mo hanintiri hampo erino eviaza hu'na, tamagri kefovana eri netre'na, kna'ane anafru huramia ata ko zahomo eri huhu huno eviaza hu'na kumi tamia eri atre'noe. Ana hu'negu Nagrite rukrahe huta echo, na'ankure nagra ko tamagu'vazina tamavre'noe. <sup>23</sup> Ra Anumzamo'ma ama anazama tro'ma hu'nea zama negetma, anami monaramimoka muse zagame nehugen, mopa agu'afima me'nea zamoka muse nehugen, agonaramimokane zafa tanopafima me'nana zafaramimotanena ranke huta muse zagamera hiho. Na'ankure Jekopu naga'ma aguvazino ete avre'nea Ra Anumzamo Israeli vahetera agra hankave'a erinte ama' nehie.

<sup>24</sup> Israeli vahe'mota ha' vahetmimofo zamazampinti'ma tamagu'mavazino neramavreno, antatamimofo zamarimpafima tamazeri fore'ma hu'nea Ra Anumzamo'a amanage hu'ne, Nagrake Ra Anumzana mani'nena maka zana tro nehu'na, anami monaramimpine ama mopafima me'nea zantamina nagrake tro hu'na erimpogeno me'ne. <sup>25</sup> Havi kasnampa kema nehaza vahera ana kasnampa kea eri atrogeno nena'a forera nosigeno, henkama fore hania zanku'ma zamema eri nentaza vahera antahintahi zamia zamazeri neginagi nehue. Ana nehu'na antahi'zane vahe'mokizmi antahi'zana eri atroge'za, neginagi vahe nemanize. <sup>26</sup> Nagri kasnampa vahe'ene, nagri kema erino vu vahe'mo'zama henkama fore hania zanku'ma huama'ma hu'naza zantamina, Nagra ana zantamina erifore nehua Anumza mani'noe. E'ina hu'negu menina amanage nehue, Jerusalemi rankumapina mani avinete'za, Juda mopafima me'nea kumatmina negi'za havizama hu'nea kumatmina nagra hanuge'za ete erioti vagare'za kigahaze. <sup>27</sup> Nagra hugeno hagerimo'a hagege hu'nea Anumzankina, nagra hanugen tirantamimo'za tanegahaze. <sup>28</sup> Nagra Sairusina huhamparugenio nagri sipisipi kva vahe mani'neankino, Nagri'ma nave'nesia zana ana maka agra eri fore hugahie. Ana hu'neankino agra

hanige'za Jerusalemi ran kumara ete eri kasefa hu'za negi'za, Nagri mono noma azeri oti'za ki tra'a agafa hu'za kigahaze.

## 45

### *Ra Anumzamofo kema Sairusi'ma amage ante'nea zamofo naneke*

<sup>1</sup> Masavema frenteno azeri ruotage'ma hu'nea ne' Sairusinkura Ra Anumzamo'a amanage hu'ne, Nagra tamaga kaziga azante azerine'na hankavea nemisanugen, ina kuma'mo ha'ma eme huntessiana hara hugate'nereno, kini vahera hara huzmagatereno hankavezamia eri atregahie. Nagra ranra kumatmimofo kafana anagi'na eri hagro hunentesugeno mago vahe'mo'a ana kafana eri onkigahie. <sup>2</sup> Nagra Sairusiga kavuga vugota hugante'na nevu'na, agonaramina aherava hu'na eri pehe hu'na nevu'na, bronsireti tro'ma hu'naza kuma kafantamine, ainireti'ma tro'ma hu'naza azotama kafantema rentroko'ma hunte'naza azotanena eri anafe hutregahue. <sup>3</sup> Ana nehu'na zago fenoma vahe'mo'zama hanintirrima hu'nefinkama oku'ama fraki'zama ante'naza fenona eri kamigahue. Anama hanugenka nagrikura Ra Anumza mani'neno Israeli vahe'mokizmi Anumzankino, nagi aheteno huhampari nante'ne hunka, kenka antahinka hugahane. <sup>4</sup> Eri'za vahe'ni'a Jekopunku'ene Israeli vahe'ma nagri vahere hu'nama huhampri zamante'noa vahe'mokizmigu nentahi'na, Nagrira kenka antahinka osu'nananagi, kagira kagia ahete'na, kavre'na kva kagia kaminoge'za husga hunegantaze. <sup>5</sup> Nagrake'za Ra Anumzana mani'noankino, magore huno nagrikna anumzana omani'ne. Nagrira kenka antahinka osu'nananagi, nagra hankavea kamigahue. <sup>6</sup> E'inama hanuge'za, zage hanati kazigati'ma evuno, zage fre kazigama mani'naza vahe'mo'za, Nagrikura agrake Ra Anumzana mani'neankino, magore huno agrikna anumzana omani'ne hu'za ke'za antahi'za hugahaze. <sup>7</sup> Nagra masa tro nehu'na, nagra haninena eri fore hu'noe. Nagra huge'za knare nomanizana nemanizage'na, Nagra huge'za vahe'mo'za knafina unefraze. Nagra Ra Anumzamo'na ama ana maka zana hugeno forera nehie. <sup>8</sup> Anami monaramina asamigeno, ne'onse ko'mo'ma nehiaza huno fatgo avu'avazamo'a kora runo eramino, kankamuna erifore hanigeno, tagu'ma vazizamo'a hageno ome ra nehina, fatgo avu'avazamo'a magoka hageke marerigaha'e. Nagra Ra Anumzamo'na ana zana eri fore nehue.

<sup>9</sup> Hagi tro'ma hunte'nemofoma ke ha'ma renentea vahe'mo'a kva hino. Mopa kavomo'a tro'ma hunte'nemofona hafra huntiegahifi? Hagi mopalomo'a kavoma tro'ma nehia nekura, na'a hu'za nehane huno huge, kazana omnene huno hugahifi? <sup>10</sup> Mago mofavremo'ma nefama antahigeno, mofavrea na'a nentane nehuno nereranku'ma antahigeno, mofavrea na'a kasenentanema huno'ma hania mofavremo'a hazenkefi mani'neanki kva hino. <sup>11</sup> Israeli vahetema ruotage'ma hu'neno, Israeli vahe'ma zamazeri fore'ma hu'nea Ra Anumzamo'a amanage nehie, Israeli vahete'ma henkama fore'ma hania zanku'ene nazampinti'ma tro'ma hu'noa zankura nagri nantahigeta keho. <sup>12</sup> Nagra ama mopa tro hute'na ana agofetura vahe tro hu'na ante'noe. Nagra nazampinti anami monaramina tro hu'na rufanara hunentena, maka zantamine, zagine, ikane hanafitamina tro huzmanteno. <sup>13</sup> Nagri fatgo navu'navaza amage ante'nogu Sairusina azeri oti'noe. Ana hu'negu kama vania kana eri fatgo hu'na eri pehe hugahue. Ana hanugeno agra Nagri

rankumara eri kasefa huno negino, nagri vahe'ma zamavare'za ome kinama huzmante'naza vhahera zagoa e'ori ana vhahera katufe zamantegahie huno Monafi sondia vahe'mofo Ra Anumzamo'a hu'ne.

<sup>14</sup> Ra Anumzamo'a amanage hu'ne, Isipi vahe'mo'zama tro hu'naza zantamimo'ene Kusi vahe'mofo zago fenomo'ene zamagima mareri'nea Seba vahe'mo'zanena tamagrike zanke segahaze. Ana nehanageta seni nofiteti kina rezmant'e'nesage'za tamagri tamefi ne-eza tamagiaifi zamarena eme nere'za anage hugahaze, tamagerfa huno Anumzamo'a tamagrane mani'neankino Agrikna anumzana magore huno omani'ne hu'za hugahaze. <sup>15</sup> Israeli vahe'mokizmi Anumzamoka, vaheka'a Israeli vhahera ete nezamavrana Anumza mani'nane. Ana nehunka mago'a vahetera eamara nosane. <sup>16</sup> Hayi anumzamofo amema'ama zamazanteti'ma tro'ma nehaza vahe'mo'za tusi zamagazegu hugahaze. <sup>17</sup> Hianagi Israeli vahemota fanane osu manita vanazegu, Ra Anumzamo'a tamagu vazino ete tamavrene. Ana hu'neankita vahe zamavurera tamagazegura osuta, mani vava huta vugahaze.

<sup>18</sup> Hagi monane mohanema tro huno erinte fatgo huteno, nom'a'rera antegeno mefatgo hunegeno amne omanenianki agigu agigu zamo mani avitesie huno tro hunte'nea Ra Anumzamo'a amanage hu'ne, Nagrake Ra Anumzana mani'noanki, magore huno Nagrikna Anumzana omani'ne. <sup>19</sup> Nagra fraki'na hanintirima hu'hea mopafina mani'nena Jekopumpinti'ma fore hu'naza Israeli nagara oku'a nankeea tamasami'na, vahe omani kokampina nagrikura hakeho hu'na osu'noe. Nagra Ra Anumzamo'na tamage nehuankino, maka nanekema nehuana fatgo nanektege nehue. <sup>20</sup> Tamagra ru kumapinti'ma fretama esaza vahe'mota magopi eri tru huteta erava'o hiho. Mago vahe'mo'ma havi anumzama azampi erineno zamagu'ma ovazi anumzante'ma nunamuma nehia vhahera antahintahi'a omane'nea vahe mani'ne. <sup>21</sup> Ana vahe'mota eta eme atru magopi huteta zamatreke'za ana havi anumzantmimo'za zamagra zamagra keaga hute'za huamara hiho, Iza menima fore'ma hania zankura kora huama hu'nea zamo eforera nehie? Nagra Ra Anumzamo'na ama anazankura huamara hutogeno eforera nehie. Nagrake fatgo navu'navara nehu'na, vaheni'a ete nezamavroa Anumza mani'noankino, magore huno Nagrikna anumzana omani'ne. <sup>22</sup> Maka ama mopafi vahe'mota Nagrite rukrahe huta enke'na tamagura vazi'nena maniho. Na'ankure Nagrake Ra Anumzana mani'noankino, magore huno Nagrikna anumzana omani'ne. <sup>23</sup> Nagra Ra Anumzamo'na nagra nagifi huvempa huankino, nagipinti'ma fatgo nanekema huama'ma nehua kemo'a, amne zanknara osuno nena raga rentegahie. Ana nehina Nagri nagifi maka vahe'mo'za zamare'na eme nere'za, Nagri nagorga manigahune hu'za huvempa hugahaze. <sup>24</sup> Zamagra Nagrikura amanage hu'za hugahaze, Ra Anumzamofona agripinke fatgo avu'ava zane hankavenena me'ne hu'za hugahaze. Ana nehanage'za Anumzamofoma zamarimpama ahente'naza vhahera esnageno zamazeri zamagaze hugahie. <sup>25</sup> Hianagi Jekopumpinti'ma fore'ma hu'naza Israeli vahe'mo'za, Ra Anumzamo'ma zamazeri fatgo hu'nea zanku ra zamagia erigahaze.

<sup>1</sup> Hagi Beli havi anumzamo'a arenaregeno, Nebo havi anumzamo'a urami'ne. Ana havi anumzantremofo amema'a zafareti antre'za tro hazageno knanentake hu'neankino, tonki afutamimofo agumpi erintazage'za, knagu nefri'za eri'za nevaze. <sup>2</sup> Ana havi anumzane ana havi anumzama kofiza vanoma nehaza vahe'mo'zanena zamarena re'za kepri hugahaze. Hagi ana havi anumzamo'a erino'ma vanoma nehaza vahera agura ovazinigeno erino'ma vanoma nehia vahe'mo'a ana havi anumzana agura ovazigahiankino, taregamokiznia zamavare'za kina ome huzmantegahaze. <sup>3</sup> Osi'a Israeli vahe'ma Jekopu naga'ma ofri'ma mani'naza nagamota kama antahiho, ese'ma fore'ma osu'nage'na Nagra hugeta forera hu'naze. Anama neramarera rimpafinti'ma fore'ma haza zupa agafa hu'na nazampi tamazeri sga hu'na tamavre'na e'noe. <sup>4</sup> Hagi tamagrira efe tamazoka resnigetma tavava ozafa regahazanagi, Nagra zahera osu'na magoke avamenteke manina vugahue. Tamagra ozafa tavava omeregahazanagi, Nagra nazampi tamavresga hu'nena, kegava huramante'na knazantamia eri o'za nehu'na, tamagura vazigahue. <sup>5</sup> Iza nagrikna vahera mani'nesnia vahete refkoa huta negeta, ama vahe'mofo avu'avamo'a Ra Anumzane mago'za hu'ne huta hugahaze? <sup>6</sup> Mago'a vahe'mo'za kuzamifinti golia eri henerafi'za, Silvanena erinte'za sigerire kna'a kete'za, golireti ne'onezama tro'ma hu eri'zama antahi'naza vahe, zago miza sezamante'naku zuruna hazage'za havi anumzamofo amema'a tro hutazage'za, ana zante zamarena re'za monora hunentaze. <sup>7</sup> Ana havi anumzamofo amema'a zamafunte erisga hu'za vu'za, noma'are ome retru rentazageno neme. Ana amema'amo'a kana vuno enora osugahiankino, retruma rentazageno mere megahie. Mago vahe'mo'a ana amema'are'ma naza huo huno'ma krafagema hanigeno'a, ana kerera nona huno knazampintira agura ovazigahie. <sup>8</sup> Tamagra amama hanua kea tamagera okanita antahintahifi erinteho. Tamagra kumi vahe mani'nazanki, ama ana nanekea tamagu'afi erinteho. <sup>9</sup> Korapa'ma evu'nea knafima tro'ma hu'noa zankura tamaganera okanita tamagesa antahiho. Nagrake Anumzana manugen, Nagri namefira mago anumzana omani'ne. Nagrake Ra Anumzana manugen, magore huno nagrikna Anumzana omani'ne. <sup>10</sup> Mago zana forera osu'nege'na, inankna huno anazamo'a eforera huteno ome vagaregahie Nagra korapa knafi ko huama hutogeno, kema hu'noa kante anteno, anazamo'a henka eforera nehie. Nagrama nazano hugahuema hu'na retrroma hunte'nesua ke'mo'a amne zankna osugahie. Nazano huku'ma hanua zana amne hugahue. <sup>11</sup> Nagra afete zage hanati kazigati mago vahera ke hu'noankino, agra mago tumpa namamo mago'zaga aheno nenaku eri fufukino eramiaza huno eno, Nagrama antahintahima retro'ma hu'noa zana agra emeri fore nehuno, Nagrama tro hugahuema hu'na hu'noa zantamina agra eme tro nehuno, e'inahu eri'za erigahue hu'nama huhampari'noa zana agra emeri vagaregahie. <sup>12</sup> Hagi keontahi vahe'mota tamagrama antahi'zana, Nagriku'ma fatgo avu'ava'ma huno ete tavresnia knama huhampari'nea knamo'a afete me'ne huta nehaza vaheki, Nagri ke antahiho. <sup>13</sup> Nagra fatgo navu'nava zani'a avrerava'o nehuankino afetera omanene. Ana hu'neankina ame huna tamagrira tamagu vazigahue. Nagra hu izo hanugen Saioni kumatera agu'vazizana fore nehina, Israeli vahera ra zamagi zamigahaze.

<sup>1</sup> Babiloni kumamoka vene omase mofaknama hu'nana kumamoka eraminka kugusopafi manio. Babiloni mofamoka kini traka'a atrenka mopafi umanio, Babiloni vahe'mokizmi mofamoka ko'ma nehana zana hunka kavasasea hunka vanoa nehananke'za vahe'mo'za kagenunua osugahaze. <sup>2</sup> Ana nehunka witima refuzafuma nepaza have erinka witia refuzafu nepenka, kavugosare'ma rufite'nana tavaravea eri netrenka, kenaka'a hatenetrenka, kagia anona zafi netrenka tina takahegahane. <sup>3</sup> Vahe'moza kukanaka'a hate atresnageno kagaze kavufgamo'a amate megahie. Kagrama hu'nana zante nona hu'na narimpa ahlegantena kazeri haviza nehu'na, mago vahere hu'na otregahuankina zamahe vagareshue. <sup>4</sup> Tagri'ma Tagu'vazino tavre'nea Anumzamofo agi'a, Mon-afi sondia vahe'mofo Ra Anumzane huno me'ne. Ana hu'neankino Israeli vahe'mokizmi Ruotage hu'nea Anumza mani'ne. <sup>5</sup> Babiloni kumamoka kuini mofaknama hunanke'za, kegavama hunana kumamo'zama kagesgama nehaza kumamoka kagira hamunkinka hani zampi manio. Na'ankure mago'anena kagesga osugahaze. <sup>6</sup> Nagra vaheni'amokizmi narimpa ahezamante'na, Nagri vahe manisaze hu'ha hu'noa vahera zamaz-eri haviza hanane huna kagri kazampi zamavare antogenka, kasunkura huozmantene. Ana nehunka tavavaneramine ozafaramineni tusi'a knaza eri zamagofetura ante'nane. <sup>7</sup> Kagrama antahinana zaza kna kuinia mani vava hu'na vugahue hunka antahi'nane. Hianagi henkama kagrite fore'ma hania zankura kagesga antahi so'ea osu'nane. <sup>8</sup> E'ina hu'negu kama antahio, mago zana nagritera fore osanigena knare hu'na manigahue nehunka, muse hunka manizankuke nehunka, nagrake mani'noankino magore huno nagrikna vahera omanine hunka nehane. Nagra kento ara omanige, mofavre nagani'a ofrigahaze hunka hu'nane. <sup>9</sup> Hianagi ama tare zantre'moke ame huke kagrite eke magoke zupage kazeri fenkami atregaha'e. Negave'ene mofavre nagakamo'za magoke zupage frigahaze. Kagrama antahinka ruzahu ruzahu avua tagazane avune zanema ante'noa zamo kegava hunantegahie hunka'ma nehana zantamimo'a, kza osanigenka ra hazenkefi ufregahane. <sup>10</sup> Kagrama hana kefo kavukva zampi frakinka mani'enka, vahe'mo'a nonage hunka nehane. Kagrama hunka knare antahi'zane ama' antahintahi eri'noema hunka hanazamo, kazeri havi kampina atregenka, kagra kagu'afina hunka nagrake'za maka han-kavea eri'noankino magore huno nagrikna vahera omani'ne hunka nehane. <sup>11</sup> Hianagi tusi'a knamo kagrite esanigenka, mago'a safezana hunka ana knazana eri amnea osugahane. Kagrama antahinka e'inahu knazana forera osugahie hunkama antahi'nesnana knazamo, kagritera ame huno efore hanigenka mago zantetira miza hunka ana kana rehizara osugahane. Hagi antahinka kenka osu'nana knazamo, ame huno kagritera egahie. <sup>12</sup> Kagrama kasefa'ma mani'enka'ma avuataga zane avunezanema antahi'nana zantamimo kaza hugahifi, avamera antenka negenka ha'vaheka'a azeri korora huo. <sup>13</sup> Vahe'mozama antahintahima kamii'haza zamo higeno kavesra nehie. Hagi ke huge'za monafima me'nea zantamima refkoma hu'zama negaza vahe'mo'zane, hanafitamima nege'za kasefa ikante'ma fore'ma hania zanku'ma kasnampa kema nehaza vahera huge'za, oti'za kagrite'ma fore'ma hu'zama nehia hazenke zampintira kagura vaziho. <sup>14</sup> Trazama tevemo tetegeni agafa'a meankna zamagra hu'naze. Ana hu'neankino ana tevemofo hanavefintira zamagra'a zamagura ovazigahaze. Hu'neankino ana tevemofo tankanuza me'nesige'za tevea tohige ana teve tavaontera manigera osugahaze. <sup>15</sup> Kagrama osi'ma mani'nantegati'ma

eno menima ege'za kagranema mani'neza antahintahi negami'za, henkama fore hania zanku havi kasnampa kema nehaza vahe'mo'za kagrira katre'za rure rure uvu evu hanageno kazama hania vahera omanigahie.

## 48

### *Israeli vahe'mokzimi zamagu'amo'ma hanaveti'nea zamofo naneke*

<sup>1</sup> Tamagra Jekopu naga'ma Israeli vahere huno'ma tamagima me'negeta, Juda nagapinti'ma efore'ma hu'naza vahe'mota ama'na nanekea antahilo. Tamagra Ra Anumzamofo agifi hvempa huta Israeli vahe'mota Ra Anumzamo'a Ra Anumza mani'ne hutma huama nehzaganagi, tamagra havige tamagiteti nehuta, fatgo tamavutamavara nosaze. <sup>2</sup> Tamagra Ra Anumzamo huhamparintegeno ruotge hu'nea Jerusalemi kumapi vahe mani'nonankino, Israeli vahe Anumzamo'a taza hugahie huta antahintahia nehuta, ana Anumzamofo agi'a Monafi sondia vahe'mofo Ra Anumzane huta nehaze. <sup>3</sup> Hagi henkama efore'ma hania zankura korapa huama hutogeno, ana zantamimo'a ame huno fore huno ko evu'ne. <sup>4</sup> Na'ankure tamagrira ko tamage'na antahi'na Nagra hu'noankino tamagu'amo'a hankavetigeno, tamanankemo'a hankavetino ainigna higeno, tamasenimo'a hanavetino bronsigna hu'ne. <sup>5</sup> E'ina hu'neanki'na ama anazama tamagrit-era forera osu'nege'na, ko huama hu'na tamasami'noe. Na'ankure ana zamo'ma tamagrite'ma efore'ma hanigeta, havi anumzamofo amema'a zafarer, ainireti'ma tro'ma hunte'naza zamo eri forera nehie huta hu'zanku ko tamasami'noe. <sup>6</sup> Ko'ma tamasami'na henkama fore hugahie hu'nama hu'noa zantamina ko fore higeta ke'naze. Hianagi tamagra tamage hu'ne huta ana zankura huamara osu'naze. Ana hu'neankina kora ontamasami'noa zantami kasefa zantaminku menina neramasamina, oku'ama frakinoma megeta onke'naza zantamina eri ama hu'na tamasamigahue. <sup>7</sup> Korapara fore higeta onke'nazaza menina kasefa'za eri fore nehue. Ana nehuankita tamagra huta, antahi'nonaza eri fore nehie huta osugahaze. <sup>8</sup> Hagi korapatima eno menima e'neana tamagesamo'a ankani renegetma ke ontahi vahe mani'nazanki'na, ama ana zankura huamara hu'na ontamasami'noe. Na'ankure Nagrama tamage'na antahi'nama hu'noana, esema fore'ma hunazaregatima manitama e'nazana keontahi vahe mani'naze. <sup>9</sup> Hianagi Nagra tamagrira narimpa aheramante'na tamahe fanane hunaku hu'noanagi, Nagrani'a nagimofo so'e zanku nagesa nentahi'na anara osu narimpama ahe'zana netroankiza, ana zankura nagia husga hugahaze. <sup>10</sup> Hanki antahilo, Nagra tamagri'ma tamazeri agruma hu'noana amuhonentake tevefima silvama kreno eri agruma nehiazana hu'na tamazeri agrua osu'noe. Hianagi nagra amuhonentake knaza tamari'na tamazeri agrua hu'noe. <sup>11</sup> Nagra nagimofo so'e zanku nagesa nentahi'na, nagia huhaviza osnaze hu'na e'inahu zana hu'noe. Ana hu'noanki'za nagrike'za ra nagia namigahaze. <sup>12</sup> Israeli vahera Jekopu nagamota nagri keaga antahilo, nagra tamagri'ma kema hu'noa Anumzamo'na nagrake Ra Anumzana mani'noe. Nagrake ese agafa manine'na, nagrake vagarera mani'noe. <sup>13</sup> Nagra nazampinti erivako hu'na ama mopamo'ma regri'nea tra'a trora hu'noe. Tamaga nazanteti mona tro hu'na eri atarentogeno me'ne. Nagrama e'ina hi'o hu'nama huanke antahike monamo'ene mopamokea oti fatgo neha'e. <sup>14</sup> Tamagra maka'mota amare magopi emetru hu'netma nagrama hanua kea antahilo. Mago havi anumzamo'a henkama fore hania zankura amanagea huno tamasami'neo? Ra Anumzamo'a avesinentea ne' huntensigeno eno,

Babiloni kumate fore hanie huno'ma agesama nentahia zana emeri forera hanigeno, Ra Anumzamo'a Agra'a azanteti Babiloni vahera zamazeri haviza hugahie hunora tamasami'nefi? <sup>15</sup> Nagra hu'noankina, ana nera ke hute'na avre'na esanugenro eri'zama eme erinia zamo'a knare hugahie. <sup>16</sup> Nagrite erava'o hutma amama hanua nanekea antahiho. Ese agafarera nagra oku'a nanekea osu'noe. Anazama efore'ma nehigena nagra anante ko mani'noe. Hagi menina Ra Anumzamo'a Avamu'a nenamino hunantege'na e'noe. <sup>17</sup> Israeli vahemotare'ma Ruotage'ma hu'neno, tamagu vazino tamavre'nea Ra Anumzamo'a amanage huno nehie. Nagra knare huno tamaza hania zama rempi hunerami'na, knare kante'ma tamavre'na nevua Ra Anumzana tamagri Ra Anumza mani'noe. <sup>18</sup> Tamagrama Nagri kasegema antahitama amage'ma antaresina, timo'ma hageno evu'vava hiaza huno maka zupa tamarimpa frumo'a mevava nehina, fatgo tamavu tamava'mo'a, hagerimo ankenarega eme runagrarseaza hisine. <sup>19</sup> Tamagripinti'ma fore'ma haza vahe'mo'za, hageri ankenaregama me'nea kahepankna hu'za hamprigara osazasine. Ana nehazagena Nagri navugatira zamagia eri fananea osusine. <sup>20</sup> Babiloni kumara atretma atiramiho, Babiloni vahera zamatretra fretma viho. Tamagra muse nehutma kezatita, Ra Anumzamo'a eri'za vahem'a Israeli vahera Jekopu nagara ete zamagu vazino zamavare hutma, kea atrenkeno ama mopafina maka kaziga vuno eno hino. <sup>21</sup> Ko'ma Ra Anumzamo'ma vahem'a zamavareno ka'ma kokampima e'neana, tinkura hagegea osu'naze. Agra havea rutanegeno timo'a herafiramige'za ne'naze. <sup>22</sup> Ra Anumzamo'a amanage nehie, Havi zamavu zamava'ma nehaza vahem'o'za mani so'e hu'za zamarimpa frunena omanigahaze.

## 49

### *Ra Anumzamofo eri'za vahe'mo'ma eri'zama erisnia zamofo naneke*

<sup>1</sup> Tamagra hageri amu'nomi me'nea mopafima nemaniza vahe'mota nentahinkeno, afete moparegama mani'naza vahe'motanena tamagesa anteta antahiho, anta'nimofo arimpafi mani'nogeno Ra Anumzamo'a Agri eri'za vahe mani'nuegu nagrira kea hu'neankino, kasema nenantegeno'a nagia ahente ama hu'ne. <sup>2</sup> Hagi bainati kazinkna huno nagira eri nesaneno, Agra azanteti refitentge'na mani'noe. Kevema tro huteno kanno eri fatgo huno ahe'arema retro huno kevegupi eririaza huno nazeri frakine. <sup>3</sup> Ra Anumzamo'a amanage hu'ne, nagrira nasami'ne, Israeliga Nagri eri'za vahe mani'nankina, nagra hankaveni'anee masazani'anena kagrite eri ama hanuge'za, maka vahe'mo'za kegahaze. <sup>4</sup> Hianagi nagra amanage hu'na hu'noe, nagra tusi maragu'zati'na eri'zana eri'noanagi, ana eri'zamo'a amne zankna higeno, ne'zama'a forera osu'ne. Hianagi ana eri'zama eri'noana Ra Anumzamo keno antahino hu'neankino, agrake ana eri'zantera mizana namigahie. <sup>5</sup> Hagi Ra Anumzamo'a amanage hu'ne, Nagri eri'za vahe mani'nenkä Jekopu naga Israeli vahera Nagrite zamavarenka esane huno'ma, nenrera arimpafima tro'ma hunente'nea Ra Anumzamo'a nagrira ra nagi nenamino, nagri Anumzamo'a hankavea nami'ne. <sup>6</sup> Ana hu'neankino Ra Anumzamo'a nagrikura amanage hu'ne, Nagri eri'za vahe mani'nenga Israeli vahem'a Jekopu naga'ma zamazeri frakuge'za ofri mani'nazama'a zamazeri hankavetio hu'na osi eri'za kam'i'noe. Hianagi e'i ana eri'zankera omne'neanki, menina Nagra kazeri ante'ama hu'na ra eri'za kamisugenka, mago tavikna hunka mani'nenkä, maka ama mopafi vahera zamaza hananke'na, ete zamagu'vazi'na zamavaregahue.

<sup>7</sup> Vahe'mo'zama azeri haviza nehu'za kokankoka vahe'mo'zama agomatenazageno kva vahe'mokizma eri'zama eneria nekura Israeli vahetema Ruotge'ma hu'neno, zamagu'ma vazi'nea Ra Anumzamo'a amanage hu'ne, Kini vahe'mo'za kagrica kagesga hu'za onetisageno, kva vahe'mo'za kagrica kagiafi eme kepri hugahaze. Na'ankure Israeli vahete'ma ruotage'ma hu'nea Anumzana, hugahuema huno hu'neaza nehia Ra Anumzamo kagrica ko huhamprigante'ne. <sup>8</sup> Ra Anumzamo eri'za vahe'agura amanage huno hu'ne, Nagrama knama huhampri'noa kna zupa nasunku hugante'na, nunamunka'a antahinegami'na kaza hu'noe. Ana hu'negu maka ama mopafi vahetera, kagra mago huhagerafi huvempa keni'a mani'nenankena, kegava hugante'nena kagriteti maka ama mopafi vahe'enena huhagerafihue. Ana nehananke'na Israeli mopa ete eri'soe hanuge'za, erisan-tima hare'naza mopa'zamima menima, vahe'ma omani'naza mopa'zamia ete eri'za manigahaze. <sup>9</sup> Hagi kinama hu'za hanimpima mani'naza vahekura, kinafintira atiramita fru huta viho hunka nehunka, karanka havege agonaramimpina ne'zamo'a ampore'nena neneta vugahaze hunka zamasamio. <sup>10</sup> Zamagakura nosu'za, tinkura nofrisnageno, zagehakura ofrigahaze. Na'ankure asunku'ma hunezmantea Anumzamo kampu'i tintamima me'nere zamavareno vutere hugahie. <sup>11</sup> Nagra agonaramini'a aherava nehe'na mopa ante marerinugeno, rankana fore hugahie. <sup>12</sup> Anama hanuge'za Nagri vahe'mo'za afete moparegati egahaze. Mago'a vahera noti kazigati ne-esnage'za, mago'a vahera zage fre kazigati ne-esnage'za, mago'a vahera Aswani ran kumateti'ene egahaze. <sup>13</sup> Anami monaramimota, ranke huta muse zagamera nehinkeno, ama mopamoka muse nehugen, agona ramimokanena muse zagame huo. Na'ankure Ra Anumzamo'a hazenkema eri'za mani'naza vahe'a asunku huzamanteno zamazeri so'e hugahie. <sup>14</sup> Hianagi Saioni kumate vahe'mo'za hu'za, Ra Anumzamo'a agekaniranteno amefi huneramie hu'za nehaze. <sup>15</sup> Hianagi Ra Anumzamo'a ananke-mofo nona'a amanage hu'ne, Mago a'mo'ma mofavrema anteno avre'neno amima nemisnia mofavrea agerakanintegahifi? Agrama kaseente'nesia mofavregura asunkura hunteno aza osugahio? Hianagi Nagra maka zupa namefira huozamigahue. <sup>16</sup> Hagi kamema'an e kaginena naza agusare eri vakaki'na kreントgeno me'nege'na, maka zupa nege'na antahinegahue. <sup>17</sup> Mofavre nagakamo'za ete ne-esnage'za, kagri'ma eme kazeri havizama hu'naza vahe'mo'za kat're'za koro fregahaze. <sup>18</sup> Kavua keganti kegama hunka kesnanana, maka mofavre nagaka'amo'za eri atru hute'za kagritega ne-esnagenka zamagegahane. Nagra kasefa hu'na mani'noa Ra Anumzamo'na huama nehuankinka, mago a'mo ve nontega yuku avasase hiaza hunka, zamavare kagrarega nezmanenka tusi muse hugahane. <sup>19</sup> Tamagerfa huno mopa tamimo'a havizantfa higeno, Jerusalemi kumapina vahera omanitfa hu'ne. Hianagi etema esnaza mofavre na-gakamo'za Jerusalemi kumara eme mani titipa hanageno kankamuna omanena, kagri'ma ha' eme hugante'za kazeri havizama hu'naza vahe'mo'za tvaonka'arerar ome'za afete manigahaze. <sup>20</sup> Afete kotegama kina nompima umanine'za kasezmante'naza mofavre nagakamo'za esu'za amanage hu'za eme kasamigahaze, ama kumamo'a osi hianki, kenka mago'a kankamunku eri fore hugeta anampi manisnune hu'za hugahaze. <sup>21</sup> Anagema hanagenka kagu'afina amanage hunka antahigahane, nagra naravo mani'na mofavrea kase ozmante'noanki, ama mofavre nagara iza nami'ne? Ha' vahe'mo'za eme kina hunante'za navre'za vazage'na nagrake umani'noanki, igati ama mofavre nagara e'naze? hunka hugahane. <sup>22</sup> Ra Anumzamo'a amanage

hu'ne, Nagra mago avame'za nazampina erisga hu'nesnuge'za, ru mopafi vahe'mo'za nege'za, ne' mofavretamia zamazampi nevre'za, mofa'netamia zamazo'nare zamavarente'za eme kamigahaze. <sup>23</sup> Kini vahe'mo'zane kuini a'nemo'za tamagri eri'za vahe mani'neza maka zantamintera kegava hugahaze. Kagiari eme zamarena nere'za kepri hu'za husga hunegante'za kagiarieti kugupa ham'i'za negahaze. Anama hanagenka nagri'ma kenka antahinkama hananana, Nagrake Ra Anumzana mani'noankino, iza'o nagrite'ma amentinti nehuno amuha'ma hania vahe'mo'a agazegura osugahie. <sup>24</sup> Hanki hankavenentake ha' vahe'mo'zama rohu'ma eme zama're'za eri'za vanaza fenozana, iza ome zamaheno hanarege, vahe'ma kina ome huzmantenaku zamavare'za vanaza vahera, iza ome zamagura vazino zamavaregahie? <sup>25</sup> Hianagi Ra Anumzamo'a Jerusalemi kumakura amanage hie, Ha' vahekamo'zama hankavenentake sondia vahekama nez-mavre'za feno zantaminema rohu'ma re'za eri'za vu'naza zantamina ete eri-gahue. Ana nehu'na tamagri'ma ha'ma eme huramantesia vahera hahunezmante'na, mofavre nagaka'a zamagu'vazi'na ete zamavaregahue. <sup>26</sup> Ana nehu'na kagri ha' vahetamina hanuge'za zamagra'a zamavufaga nene'za, waini tima nenenegiginagi hiaza hu'za, zamagra'a korana nene'za neginagi hugahaze. E'inama hania zana maka ama mopafi vahe'mo'zama nege'za, Nagrikura hu'za Jekopu nagamofona hankavenentake Anumzana Agrake Ra Anumzana mani'neankino naga'a zamagu'vazino ete nezamavarea Anumza mani'ne hu'za ke'za antahi'za hugahaze.

## 50

### *Ra Anumzamo'ma eri'za vahe'a aza hu'nea naneke*

<sup>1</sup> Ra Anumzamo'a amanage hu'ne, A'ma atre avona kre'za nezamarera'ma ami'naza avona Nagra kete'na neramarerana avre netrena, nofi'ma hu'noa zante apasenakura tamagrira zagonera otre'noe. Hianagi tamagrane neramarera'enema hu'naza kumimofo nona hu'na tamatroge'za, ru vahe'mo'za eme tamavre'za kina ome huramante'naze. <sup>2</sup> Nagra tamagriku'ma e'na eme hake'noana na'a higeno mago vahera mani'nege'na eme onke'noe. Kezama emeti'noana, na'a higeta ke'nirera, ke nona osu'naze. Tamagrama antahi'zana azamo'a atupa hu'neankino oravregahie nehuta hankave'a omanc'neankino tagura ovazigahie huta nehazo? Nagra hankave kea hugeno hagerimo'a hagege nehigena, tintamina hugeno hagege higeno ka'ma koka fore hu'ne. Ana higeno tempima mani'naza nozamemo'za tinku hu'za fri'za kasriza hinimna vu'naze. <sup>3</sup> Nagra kento kukenama nehiaza hu'na hanireti mona ramina kukena huzmante'noe. <sup>4</sup> Hankavenentake Ra Anumzamo'a keagama hu kaziga rempi hunami'neanki'na, knazama eneriza vahera knare ke hu'na zamazeri hankavetigahue. Maka nanterana nazeri o'netino, nagesa eri ankazo nehige'na, agrama rempi hunenamia zana avonoma rempima nehaza mofavremozama nehazaza hu'na nentahue. <sup>5</sup> Ra Anumzamo'a nanekeni'a antahio huno, nagesa eri ankazo hige'na nagra ke'a eri netre'na ete namefitira atre'na ofre'noe. <sup>6</sup> Nagra namefi huzamuge'za, namagenafina sefura nenami'za, nameragena zamuge'za nagi'nazokara zanefi'naze. Navugosarera rufira ote'noge'za, kiza zokago ke hunenante'za avetura ahenante'naze. <sup>7</sup> Hianagi Ra Anumzamo naza hige'na ana zankura nagazegura osu'noe. Na'ankure nagra havegna hu'na hankavetina agri eri'zana erigahue. E'na hu'negu ana eri'zama eri'noa zankura nagazea osugahue. <sup>8</sup> Nagri'ma nazama huno keaganima refko huno negeno tamage nehie hania nera tvaonte mani'neanki,

iza nagrikura haviza hu'nane hunora keaga hunantenakura nehie? Hagi atrenkeno navareno keagarera vuno, ama agafare keaga hunegantoe huno keagafi huama hinketa antahimneno. <sup>9</sup> Hankavenentake Ra Anumzamo nagririra naza nehiankino, ina vahe'mo nagrikura huno hazenkeka'a me'ne hunora hugahie. Havigema hunantaza vahe'mo'za, tavaravemo frupa re'negeno hakanomo anoseno eri vagareaza hu'za vagare'za haviza hugahaze. <sup>10</sup> Ra Anumzamofoma koro hunenteno Agri eri'za vahe'amofo kema amage'ma nenteno tavima omanenigeno hanimpima vanoma nehanimo'a, Ra Anumzamofo agire amentintia nehuno, Anumzanimo'a naza hugahie huno amuhara hino. <sup>11</sup> Hianagi tamagra'a teve hugreta rekru hutma manineta tamagra'ama hugraza tevere tevema toma nehiaza vahemota kva hiho. Nagra knaza tamisugeta rama'a tamataza erigahaze.

## 51

### *Ra Anumzamo vahe'ama zamagu'ma vazisia zamofo naneke*

<sup>1</sup> Ra Anumzamo'a amanage hie, Fatgo avu'avazama kazigazi hutma neveririta, Nagriku'ma hake vavama nehaza vahe'motma antahihi, ra havereti rutmana hu'na tamagri'ma tro'ma huramante'noa havere tamavua nenteta, mopama kafi'na tamavre'noa kerire tamavua keho. <sup>2</sup> Agripinti'ma fore'ma hu'naza ne' Abrahamu negeta kaseramante'nea a' Seranena keho. Abrahamuma kema hu'noana agrike ke hu'noe. Ana hute'na asomu huntogeno agripinti ohampriga'a vahera fore huhakare hu'naze. <sup>3</sup> Ra Anumzamo'a Saioni vahera zamazeri knare nehuno, havizama hu'nea mopa eri knare nehuno, hagegema hu'nea mopa'a eri knare hanigeno Ideni hozagna hugahie. Ana nehuno kama kokana eri knare hanigeno, Anumzamofo hozagna hugahie. Ana hanige'za zavena nehe'za, musenkase zagame hu'za, Ra Anumzamofo agia ahentesga hu'za susu huntegahaze. <sup>4</sup> Hagi Nagri vahe'mota tamagesa anteta antahihi, Nagriteti kasegem'o a nevanigeno, fatgoma huno refkohu avu'avazamo'a tavi'mo hiaza huno maka kokankoka mopafina remsa huno vuno eno hugahie. <sup>5</sup> Nagrama fatgo navu'nav a zama hu'na vahe'ma ete zamagu'vazi'na zamavaresnua knamo'a hago erava'o nehie. Nagra hankavenentake nazanteti fatgo navu'nav a huna maka ama mopafima me'nea kumamo'za Nagri hankavegura zamentinti nehu'za, hankave nazama rusute'na zamazama hanugu navega ante'za manigahaze. <sup>6</sup> Tamavua kesga hutma monarega negeta, anazanke hutma mopafina keho, tevegumo hiaza huno, monaramimo'a vaganeresnigeno, tavaravemo hiaza huno ama mopamo'a atafa neresnigeno, ama mopafima man'i'na vahe'mo'za kosima friaza hu'za frigahaze. Hianagi fatgo navu'nav'a ma hu'na vahe'ma zamagu vazi'na ete zamavare navu'nav a zamo'a vagaore mevava hugahie. <sup>7</sup> Fatgo avu'avazama keta antahitama nehuta Nagri kasegema tamagu'afi azeri antarako'ma hu'naza vahe'motma, nagri nanekea antahihi. Vahe'mo'zama huhavizama huramantesaza zankura korora huta antahintahi hakarea osiho. <sup>8</sup> Na'ankure ana vahe'mokizmi zamavufaga, hakanomo kukena taga huno neaza huno taga huno negahie. Hianagi Nagri fatgo navu'nav a vaga oreno mevava hugahie. Ana nehanigeno nasunku'ma hu'na ete vahe'ma zamagu'ma vazisua zamo'a, henkama forehu anante nante'ma hu'za vanaza vahetera meno vugahie. <sup>9</sup> Otio, Otio! Ra Anumzamoka otinka hankave ka'a eri ama hunka, korapa'ma evu'nea knafima tagri naga'ma zamazama hu'nanaza hunka, menina taza huo. Hagerimpima nemania afi'zaga Rehapuna kagra kanonteti reharuharu

hutenka, kazinteti kitagi osi'osira hu'nane. <sup>10</sup> Kagrake'za hagerina eri hagege nehunka, hageri amu'nompina kana eri fore nehunka, zamagu'ma vazinka ete zamavranke'za kagri vahe'mo'za ana kante e'naze. <sup>11</sup> Ko'ma zamagu'ma vazinka zamavare'nana vahe'mo'za, muse zagame nehu'za Saioni kumatega ete egahaze. Mevava musezamo'a kini fetorigna huno zamasenirera me'nesnigeno, tusi musenkase zamo zamagu'afina avitegahie. Ana nehanigeno asunku'ma huno zavi'ma ate'zana zamagripina omnegahie. <sup>12</sup> Nagrake'za Ra Anumzamo'na tamazeri hankaveneti'na, knazana eri atrena tamazeri knarerera nehue. E'ina hu'negu maka vahe'mo'za amne vahetfa mani'nazanki'za trazamo'ma ame huno hagege hiankna hugahazanki, mago vahekura korora osiho. <sup>13</sup> Nagra mona tro huntogeno nemege'na, mopamo'ma oti fatgoma hu'nea tra'a trora hu'noe. Hianagi tamagri Ra Anumzama tamagri'ma tamazeri fore'ma hu'noa Anumzamonagura tamaganekanize. Tamagri'ma zamarimpa aheramante'za tamazeri havizama hazo vahekura maka zupa na'a higeta tamagogogura nehaze? Anama tamarimpama aheneramantaza vahera menina iga mani'nazagetma nezamagaze? <sup>14</sup> Kinafima mani'naza vahe'mo'za kinafina mani'ne'za ofrigahazanki, ame hu'za kinafintira atre'za fru hu'za vugahaze. Ana nehu'za ne'zankura atupara osu rama'a me'nesige'za negahaze. <sup>15</sup> Nagra Ra Anumzana tamagri Anumzana mani'noanki'na, hagerina eri kranto kranto hugeno ra agasasana nerie. Ana nehiankino Monafi sondia vahe'mofo Ra Anumzane huno nagi'a me'ne. <sup>16</sup> Nagra tamagite nanekeni'a nente'na nazanteti refite'ramante'noe. Nagrake'za monaramina tro hunente'na mopama oti'nea trara trohu'noe. Ana nehu'na Saioni kumapima mani'naza vahekura Nagri vahe fatgo mani'naze hu'na nehue. <sup>17</sup> Jerusalemi kumapima nemaniza vahe'mota otiho, otita ru tamavuna nehutma, oti hankavetaho. Ra Anumzamofo arimpa ahe'zana, waini tima hiazza huno kapufi tamigeta nevagareteta tusiza huta neginagi nehuta, tamagia reso'e osu'naze. <sup>18</sup> Hagi kagrama kasezamantenka kegavama hu'nana ne' mofavre nagapintira magomo'e huno kazantera azerino kana kaverira osu'ne. <sup>19</sup> Kagrina tare knazamo eme kazeri haviza hune. Iza asunkura huganteno karimpa eri fruhu kea hugahie? Ana knazana ha'zamo'ene agatonto zamo'ene eme kazeri haviza hugahianki, Nagra inankna kampinti kazeri so'ea hanugenka karimpa frua hunka manigahane? <sup>20</sup> Kagri ne' mofavre naga'mo'za zamavu evuevu huno hankavezamia omañege'za, kukomo dia afu azerinteza hu'za maka kantu hanarera mase vagare'naze. Ra Anumzamo'a ana vahera zamazeri ko'nerino, zamazeri havizantza hugahie. <sup>21</sup> E'ina hu'negu hazenkefima mani'naza vahe'mota kama antahiho, tamagra neginagima nehzana waini ti neta neginagia nosaze. <sup>22</sup> Hankavenentake Ra Anumzamo'ma, kazama higenka'ma ha' vaheka'ama ha'ma huzamagaten-erana Anumzankamo'a amanage hie, Nagri narimpa ahe'zamo'ma kapufima me'negenka'ma kazampi eri'enkama nenenka neginagima hu'nana kapua ko eritre'noe. Ana hu'neanki'na henka'anena atrenugenka ana kapufintira narimpa ahe'zana onegahane. <sup>23</sup> Hianagi kagri'ma kazeri haviza nehu'za, kavugosaregati mopafi maso hazagenka mase'nanke'za, mopafima hiazza hu'za kamagenafina zamagiareti rentrako'ma hu'za vanoma hu'naza vahe'mokizmi zamazampi ana kapua antegahue.

<sup>1</sup> Otio, Otio Jerusalemi kumamoka otinka hankaveka'a eri kavugato. Knare'ma hu'nesnia avasase'ane kukenaka'a eri hankrenka so'e zantfa huo. Ruotage'ma hu'nana Jerusalemi kumamoka Ra Anumzamofo vahe'ma omaminesaza vhahera eofregahaze. <sup>2</sup> Jerusalemi kumamoka kinama hugantagenka mani'nampintira otinka kugupa rupopo hutro. Saioni mofa'moka knankempima seni nofi'ma rente'za kinama hugante'nafintira eri netrenka fru hunka manio. <sup>3</sup> Na'ankure Ra Anumzamo'a amanage huno hie, Tamagrira zagorera atroge'za mizase'za tamavre'za ovu'nazanki, amne tamavre'za vu'naze. Ana hu'neanki'na tamagrira zagoretira antesi'na ontamavregahuanki, amane tamagu'vazi'na ete tamavregahue. <sup>4</sup> Ra Anumzamo'a amanage hu'ne. Esera nagri vahe'mo'za Isipi moparega urami'za kraka vahe umani'naze. Hagi Asiria vahe'mo'za amane zampi zamazeri haviza hu'naze. <sup>5</sup> Hagi menina amafina na'a ante'nogeta negaze? Nagri vhahera hazenkezmia omane'neanagi amane zampi zamavare'za vu'naze. Ana hazage'za kegavama hunezmantaza vahe'mo'za tusi kiza zokago ke nehu'za, mika kna nagia huhaviza nehaze. <sup>6</sup> E'ina hu'negu Nagri nagia ke'za antahiza hugahaze. Ana hu'negu ana knarera kema hurami'nea Anumzane hu'za Nagrira ke'za antahiza hugahaze. Tamage e'i Nagra ama mani'noe. <sup>7</sup> Knare musenkema agonaramimpima erinoma ne-eno rimpa fruma huno manizamofo ke'ma huama nehuno, so'e huno'ma manizamofo kema huama'ma nehuno, agu'vazino avrezamofo kema huama'ma nehuno, Saioni kumapima nemania vahe'mofonku'ma kagri Anumzamo'ma kinima mani'neno kegava hugahiema huno'ma ne-hia vahe'mofo agia agusamo'a hentofaza hu'ne. <sup>8</sup> Hagi antahaho, ran kuma keginamofo agofetu'ma mani'neza kegavama nehaza vahe'mota, magoka kezatita muse zagamera hiho. Na'ankure tamagra tamavufinti'ma nege'sageno Ra Anumzamo'ma Saioni kumate'ma ete ne-esige'za anara hugahaze. <sup>9</sup> Jerusalemi kuma'ma havizama hu'nea kazigama mani'naza vahe'mota, magoka tamagerura eri mago huta ranke huta muse zagamera hiho. Na'ankure Ra Anumzamo'a vahe'a zamazeri so'e nehuno, Jerusalemi kumara agu'vazino ete nevare. <sup>10</sup> Ra Anumzamo'a hankavenentake huno ruotge'ma hu'nea azana ama mopafi vhahetera erinte ama nehianki'za, maka kaziga ama mopafi nemaniza vahe'mo'za kegahaze. Ana hu'neanki'za maka ama mopafima mani'naza vahe'mo'za, tagri Ra Anumzamo'ma vahe'ma zamagu vazino'ma zamavaresnia zana kegahaze. <sup>11</sup> Babiloni kumara atreta atiramita echo, atreta atiramita ne-etma, agruma osu'nesnia zana avakora osiho. Ana nehutma Ra Anumzamofo mono nompima eri'zama e'neriza zantamina eritama esnaza vahe'mota, tamagra'a tamazeri agru huteta ana zantamina erita echo. <sup>12</sup> Hianagi tamagra ame'amara hutma Babiloni kumara atretma vuge, korora freta vugera osiho. Na'ankure Ra Anumzane Israeli vahe Anumzamo vugota huramanteno ne-eno, ehenka huno kegava huramanteno vugahie.

<sup>13</sup> Hagi keho, maka zama nagri eri'za vahe'mo'ma haniana, knare antahizanteti nehanigeno, anazamo'a knare zanke hugahie. Ana ne-hanige'za vahe'mo'za nege'za ra agi nemiza, agri agia husga hugahaze.

<sup>14</sup> Hagi agri'ma ahazageno koramo'ma hu'nea zanku nege'za vahe'mo'za anthintahi hakarea hu'naze. Ana higeno vahe'mo'zama azeri haviza hazageno, avugosamo'a havizantfa huno vahe'mofo avugosagnara osu'ne.

<sup>15</sup> E'ina hu'negu huno Nagri eri'za nemo'a hakare'a ama mopafi vhahera zamazeri otisanige'za Nagrira monora hunantegahaze. Agrama haniaza nege'za kini vahe'mo'za keaga osugahaze. Na'ankure korapara ama ana

zankura zamasamige'za ontahi'naza za nezamasamino, zamaveri hazage'za onke'nazaza zamaveri hanige'za nege'za, antahi amara osu'nazaza zamasamige'za ama' antahi'zama eri'za zanku anara hugahaze.

## 53

### *Ra Anumzamofo eri'za vahemo'ma atama erisia zamofo naneke*

<sup>1</sup> Ra Anumzamo'ma hankavementake azanuti'ma eri'za vahe'are'ma han-kave'ama erinte ama'ma hu'nea zanku'ma, tagrama menima huama'ma huta tamasamisuna zankura, iza tamage hunora amentintia hugahie?

<sup>2</sup> Hagi agra ana ne'mo'a, mago zafa agatamo avofage huno retuheno hagege kokampi hageno mareriaza hugahie. Ana nera vahe'mo'za agenunu hugara osu'ne. <sup>3</sup> Ana nera vahe'mo'za zamefi hunemi'za, zamavesra huntazageno, tusi'a rimpa knane nemanino, asunku zampi mani'ne. Ana nehige'za vahe'mo'za avufima ke'zankura ke amne amne nehu'za keamara hu'za onke'naze.

<sup>4</sup> Tamagerfa huno ana ne'mo'a tagri knazane, tasunku zanena agra'a erigofi'ne. Tagrama antahunana Anumzamo'a kna amino azeri haviza hunaku atregeno knazamo'a azeri havizantfa nehie huta antahi'none.

<sup>5</sup> Hianagi tagri kumitigu hu'za avufagafina karugrua nere'za, tagri kefo zantigu hu'za ahe'za avufga agu'za ru'naze. Agri'ma kanama nemi'za, atama ami'naza zamo tagritera tarimpa frua avreno ne-egeno, agri avufgama rutraga trago'ma hu'naza zamo, tagrira tazeri kanamre'ne. <sup>6</sup> Tagra maka vahe'mota sipisipi afu'mo hiaza huta kana atreta, tavesia kampi ufre efre nehunkeno, tagrama hu'nona hazenke'mofo nona'a, tagra'a knazana erigaragi, Ra Anumzamo'a knazana ana ne'mofo agofetu erintegeno eri'ne.

<sup>7</sup> Vahe'moza ana nera azeri haviza nehu'za, atazana ami'nazanagi agira reakara huno keaga osu'ne. Ana nehuno sipisipi afumofo anent'a ahenaku avre'za vuge, sipisipimofo azoka harenaku avre'za nevazageno akoheno viaza huno agira reakara huno kea osuno akoheno vu'ne. <sup>8</sup> Ana nera azerite'za keagare avre'za vu'nazanagi, keaga'a refkohu so'e hu'za onke'za frigahie hu'za hu'naze. Hagi iza huama huno ana nekura ama naga nofipinti eforera hu'ne hunora hugahie? Ana hu'neankino nagri vahe'mota ke ontahi kumi tamavutamava zamofo nona'a agri agofetu erinte'za sefura nemi'za, ama mopafintira ame hu'za azeri atre'naze. <sup>9</sup> Ana nera havi zamavu zamava'ma nehaza vahe'ma zamahe nefri'za kante ante'za ahe friteza, zago feno vahe'mofo matipi ome asente'naze. Na'ankure agra mago hazenkea nosuno havigea osu'negu anara hu'naze.

<sup>10</sup> E'ina hu'neanagi Ra Anumzamo'a Agra'a avesite ana nera azeri henkamu atreno knazana amigeno asunkuzampina mani'ne. Ana ne'mo'ma vahe'mota kumimofo nonama huno frinegu huno agra zazate ofri manino nevuno, agigo azankomofona kegahie. <sup>11</sup> Ana ne'mo'ma erisia knazamo'ma vagama retesigeno'a, so'e huno manigahie. Ra Anumzamo'a huno Nagri eri'za ne'mofo avu'avazamo'a fatgo hu'neankino, antahintahi zama'reti maka vahera zamazeri fatgo vahera neseno, kumi zamimofo knazana erigofigahie. <sup>12</sup> E'ina hu'negu zamagima me'nea vahe'mo'zama fenoma erisafintira agrama erisia'ma nagra eri amigahue. Ana hanugenno hapinti'ma erisia zantamina harafa vahe'ene refko huno erigahie. Na'ankure agra maka avufga atre vagareno maka vahe kumiku huno frige'za, kumi nere hu'za zamagesa antahi'naze. Hianagi agra rama'a

vahe'mofo kumi enerino, kema rutrage'za kumi'ma nehaza vahe'mofontega anteno nunamuna hunezmante. (Luku 22:37.)

## 54

### *Ra Anumzamo kegavama hurantesania zanku huvempa hu'nea naneke*

<sup>1</sup> Jerusalemi kumakura Ra Anumzamo'a huno, Mofavre onte naravo a'moka ranke hunka musena huo. Kagra mofavrema nezamante'za zamatagu nehaza zana ontahi'nananki, ranke hunka zagamera nehunka musena huo. Na'ankure vere'ma mani'nesia a'mo'ma antesnia mofavre nagara, kagri mofavre naga'moza ohampriga'a fore hu'za zamagatere-gahaze. <sup>2</sup> E'ina hu'negu seli nonka'a erira nehunka, seli nonka'afima nerafina tavaravea eritarenka erira nehunka, seli nonte'ma anaki nofitamina eri zaza huo. Ana nehunka seli noma avazuhumpi huno'ma nofi'ma rente zafaramina asentenka eri hankavetio. <sup>3</sup> Na'ankure kagri kagehem'oza henka'a ome rama'a hanu'za, tamaga kaziga mopafine, hoga kaziga mopafinena mani vite'za vugahaze. Ana nehu'za maka kokankoka kumatamina kegava nehu'za, vahe kugoma orisnia ranra kumatmina eri'za manigahaze. <sup>4</sup> Tamagra korora osiho, na'ankure tamagrira tamazeri tamagazea osugahie. Kagraka'a antahi amne zanknara osuo. Na'ankure kagri kagazegura osugahane. Hianagi kasefa a'ma mani'nenka kentoma mani'nanke'zama, kazeri kagazema hu'naza zankura mago'ane antahinh-tahia osuo. <sup>5</sup> Na'ankure kagri'ma tro'ma hu'nea ne'mo'a kagri negave knara huno mani'ne. Ana ne'mofo agi'a Monafi sondia vahe'mofo Han-kavenentake Ra Anumzane huno me'ne. Agra kagri'ma kaguma vazino kavre'nea nekino, Israeli vahete'ma Ruotage hu'nea Anumza mani'ne. E'ina hu'neankino agra maka ama mopafi vahe'mofo Anumzane hu'za agia ahe-gahaze. <sup>6</sup> Na'ankure kagra mago kasefa a'mo mensintfa vea eri'neanagi, neve'a atregeno, tusia asunku zampima maniaza hunka mani'nankeno, Ra Anumzamo'a kagia hu'ne huno kagri Anumzamo'a nehie. <sup>7</sup> Na'ankure osi'a knafi namefira hugami'noe. Hianagi tusi nasunku hugante'na ete kavre-gahue. <sup>8</sup> Nagra tusi narimpa ahenegeante'na kagri kavufima ke'zankura, osi'a knafi keamne hu'noe. Hianagi maka knafina vagaore navesizant-teti nasunku hugante'na, navesigante vava hugahue huno Ra Anumzana kagu'ma vazi'nea Anumzamo'a nehie. <sup>9</sup> Noa knafina Nagra huvempa hu'na, ama mopa mago'ene tintetira eri havizana osugahue hu'na hu'noe. Ana hu'noanki'na meninena ana zanke hu'na mago huvempa kema han-uana, mago'enena narimpa aheneramantena tamazeri kora origahue. <sup>10</sup> Hagi agonaramimo'a noma'arera omnesigeno, ne'onse agonaramimo'a torevrara hugahie. Hianagi Nagrama navesi neramantoa navesi'zamo'a hankavetino nemesanigeno, tamagranema narimpa fru hu'na manisnue hu'nama huvempama hu'noa kea mago'zamo'e hunora eri otretfa hugahie huno asunku'ma hunegantea Ra Anumzamo'a hu'ne. <sup>11</sup> Jerusalemi kumamoka tusi'a knazampi ufrenka katagura hu'nane. Hagerimpi ventemo nevigeno zaho'mo retufe kantu te retufegma te hiazza huno, knazamo'a kazeri haviza higeno mago vahe'mo'a asunkura huogante'ne. Hianagi Nagra mizama'amo marerisa havea takosie nehaza havereti Jerusalemi kumara negina, safire nehaza havereti Jerusalemi kumamofo trara ante-gahue. <sup>12</sup> Rabie nehaza havereti sondia vahe'mo'zama manisnaza za'za nona negi'na, rankumamofo kafaramina belie nehaza havea avasase'amo'a marave'age netrea haveraminteti tro nehu'na, marerisa haveraminteti

kuma kegina tro hugahue. <sup>13</sup> Ra Anumzamo'na Nagrake'za mofavretamia rempia huzamisuge'za, tusi'a zamarimpa fru hu'za nemaniza makazampina knare hugahaze. <sup>14</sup> Fatgo avu'avazampina kazeri hanavetina kazeri nena hugahue. Ana hanugenno mago vahe'mo'e hunora kata kamino kazeri havizana osanigenka, mago zankura korora osugahane. Na'ankure kazeri koro'ma huga zantamimo'a kagritera eravao osugahie. <sup>15</sup> Hanki mago vahe'mo'ma ha'ma hugante'naku'ma esaniana, e'i ana vahera Nagra hara erita viho hu'na huozmante'noe. Ana hu'negu ha'ma eri'za esnaza vahe'mo'za hara osu tamagri agorga manisune hu'za hugahaze. <sup>16</sup> Hagi antahihi, ainireti'ma agigu agigu zama tro'ma nehaza vahera Nagra'a nazampinti zamazeri fore hu'noe. Ana hunoge'za ana ainia tevefi krete'za runtrantru ahe'za ha'ma huzantamina tro hunage'za ana zanteti hara nehaze. Ana hu'noanki'na ana ha' zantamina eri'nezama ha'ma hu'za mago'a vahe'ma zamazeri havizama nehaza sondia vahera Nagra zamazeri fore hu'noe. <sup>17</sup> Hianagi eri'nezama ha'ma hugante'naku'ma nehaza ha'zamo'a amne zankna hugahie. Ana nehina havigema hu'zama keagafima kavrentes-nagenka, oti hankaveti'enka keagama hugantesaza vahera keagafina zamatagateregahane. E'i ana zantamina Ra Anumzamofo eri'za vahete fore hanige'na rezagane'na nege'na zamagra knare hu'naze hu'na hugahue huno Ra Anumzamo'a hu'ne.

## 55

### *Ra Anumzamo tagi hu'nea zamofo naneke*

<sup>1</sup> Hagi antahihi, tinku'ma kavenesinimoka enka tina eme no. Zagoma omne'nesanimota eta zagoa ate'osita amne ne'zana neneta, waini tine bulimakaomofo amirinena zagoretira teosita amne neho. (Revalesen Hufo hu'ne 21:6, 22:17) <sup>2</sup> Na'a higeta ne'za ne'zanterompage amne zantera zagoa netraze. Ana nehutma eri'zama erita eri fore'ma nehaza zagoa tamazama osu'zantera netraze? Nagri nanekere kama tamagesa anteta nentahitma, knare nezanke nenenkeno tamu nehanigetma musena hiho. <sup>3</sup> Tamagesa antetma Nagri kea nentahita Nagritega echo. Hagi Nagri kema antahita amage'ma antesuta ofri manigahaze. Nagra ko'ma Devitinku'ma vagaore navesi zantet'i ma navesi kante vava hugahuema hu'na huvempa hunte'noaza hu'na, tamagri'enena anahukna hu'na vagaore navesizanteti hugarerafi huvempage hugahue. (Aposolo 13:34, Hibru 13:20) <sup>4</sup> Keho, agrira kva vahe Nagra azeri otugeno ugota huno maka vahera kegava hunezmanteno Nagri hihamu hankavea kokankoka vahetera eri ama hu'ne. <sup>5</sup> Tamagerfa huta ru moparega vahe'ma tamagra keta antahita osage'za, tamagri'ma ke'za antahi'za osu'nesnaza vahe'ma ke'ma hanage'za zam-agare'za tamagritega egahaze. Na'ankure Israeli vahe'mota ruotage Ra Anumzana tamagri Anumzamo'na, Nagrama hu'noa zanku hu'za rantamagia tamigahaze.

### *Ra Anumzamofo nanekemofo hankave'agu hu'nea naneke*

<sup>6</sup> Ra Anumzamo'a tamagri tva'onte mani'nesire, haketa azeri fore ne-huta, tamagri tva'onte'ma mani'nesire, agrikura kea hiho. <sup>7</sup> Kefo tamavu tamava'ma nehaza vahe'mota ana tamavu tamava'zana netrenke'za, fatgo osu antahintahima e'neri'za vahe'mota ana antahintahitamia netretma rukrahe huta Ra Anumzana tagri Anumzamofonte echo. Ana'ma hanageno'a Anumzamo'a tusi'a asunku huneramanteno kumitamia atreramantegahie. <sup>8</sup> Na'ankure Nagri antahi'zamo'a tamagri antahizanknara osigeno, tamagri tamavu tamavamo'a, Nagri navu'nava knara osu'ne huno Ra Anumzamo'a

hu'ne. <sup>9</sup> Monamo'ma mopama agatereno onagamuma meaza huno, Nagri navunavamo'ene Nagri antahizamo'a, tamagri tamavu tamava'ene tamagri antahi'zanena agatereno onagamu me'ne. <sup>10</sup> Ko'mo'ma monafinti'ma ama mopafima runenteana, amnea eteno novianki, mopamofona rufru higeno, hozafi ne'zamo'a agata hageno marenerie. Ana nehuno hu'zama nentea vahe'mofona avimzana nemino, vahe'mofona ne'zana amigeno nene. <sup>11</sup> E'ina hu'negu Nagrama nehua nanekemo'a, ete rukrahera huno Nagritera amne avapara omegahianki, Nagri'ma navesi'nea eri'zana erivaga nereno, na'a agafare ana nanekea atrogeno e'ne, anzana erinte ama huvagare-gahie.

### *Ra Anumzamofo vahe'mo'za musenkase hanaza naneke*

<sup>12</sup> Hagi tamagra tamarimpa frune atiramita nevuta musenkase hugahaze. Ana nehanage'za tamavugama me'nea ranra agona ramimo'zane, ne'onse agonaramimo'za muse zagame nehanage'za, karankama me'nea zafaramimo'za zamaza ahe'za musenkase hugahaze. <sup>13</sup> Menima ave'ave trazamo'ma me'nefina, saipresi zafamo agri nona erino hageno marenerisigeno, ave'ave nofi'ma me'nefina, zagasefage mentoli zafamo agri nona erino hageno marerigahie. E'i ana zamo'a mago mevava avame'za me'nesnige'za, ana zama nege'nu'za Nagira antahinami vava hugahaze.

## 56

### *Anumzamofo kema antahi'za amage'ma antesaza vahe'mo'za mizama erisaza naneke*

<sup>1</sup> Ra Anumzamo'a amanage huno hu'ne, Tamagra knare'ma huno refkohu avu'ava'zane, fatgo avu'ava'zane hiho. Na'ankure tamagri'ma ete tamagu'ma nevazina fatgo navu'navama erinte ama hanua knamo'a hago kofta nehie. <sup>2</sup> Iza'o mani fruhu kna Sabatimofo kasegema amage'ma nenteno, havi avu'avazama nosania vahe'mo'a asomu erigahie. <sup>3</sup> Ru moparega vahe'mo'ma Ra Anumzamofo amage'ma nentesania vahe'mo'a huno, Ra Anumzamo'a tagirira hu izora hanigeta Agri vahe'enena omanigahune hu'za zamagesa ontahaho. Ana nehanage'za zamagonknaza hari'nesnaza vahe'mo'za hu'za, tagra hagege hu'nea zafagna hu'none hu'za zamagesa ontahaho. <sup>4</sup> Na'ankure e'inahu vahekura Ra Anumzamo'a amanage huno nehie, Tamagonknazama hari'nea vahe'mota mani fruhu kna Sabati kasegea amage nenteta, Nagri'ma navenesia avu'avazama nehuta, huhagerafi huvempa ke'niamma azeri antrakoma hanage'na, <sup>5</sup> Nagra ana vahe'mokizmia zamagia noni'amofo agu'afine asopareganena krentenes-nuge'za, vahe'mo'za nege'za antahi zamigahaze. E'i ana zamagia tamagri ne'mofamokizmi zamagia agatre'nesia zamagi zamisugenno ana zamagimo'a vagaore mevava hugahie. <sup>6</sup> Ru moparega vahe'mo'ma Ra Anumzamofoma amage'ma nenteno, Agri eri'zama e'nerino Ra Anumzamofo agigu avesi avesi nehuno, Anumzamofo mono hunenteno, mani fruhu kna Sabatimofo kasegema amage nenteno, huhagerafi huvempa kenima azeri antrakoma nehania vhahera, <sup>7</sup> Nagra avre'na ruotage'ma hu'nea agona'niarega vu'na, Nagritegama nunamuma nehaza noni'afi vanugenno musenkase hugahie. Ana nehu'za Nagritegama kresramnama nevaza itare'ma tevefi kre fanane hu ofane mago'a ofanema hanage'na, Nagra nege'na muse hugahue. Na'ankure Nagri nomo'a maka ama mopafi vahe'mo'za nunamu eme hanaza no megahie hu'za hugahaze. <sup>8</sup> Israeli vahe'ma zamavare'za kinama ome huzmantre naregati'ma ete zamavare atruma hu'nea Ra Anumzamo'a

amanage nehie, Ko'ma Israeli vahe'ma zamavroge'za eman'i'naza vahepina, mago'ene ru vahera zamavaresnuge'za zamagrane emanigahaze.

*Israeli kva vahe'mo'zama Anumzamofofoma amagema onte'naza zamofo naneke*

<sup>9</sup> Hagi tanopafima nemaniza afi zagagafamotanena ne-enkeno, zafa tanopafima nemaniza afi zagagafamota eta ne'zana eme neho. <sup>10</sup> Israeli vahe'mokizmi kva vahera zamavu asuhu vahe manine'za, antahintahigura atupa hu'naze. Zamagra zuka kragna hu'nazankiza zamavu'ma mase'zankuke zamavenesige'za zamagira hamunkiza masene'za ava'na kevava nehaze. <sup>11</sup> Zamagra amu osu kramo'ma agraguke nentahino ne'zama nevava nehiaza hu'za zamagraguke nentahiza, ama' antahi'za omane sipisipi kva vahe mani'naze. Ana nehu'za mago mago'moza zamagra zamavesite vanovano nehu'za, zamagra havige hu'za vahera rezmataga hu'za fenozana e'nerize. <sup>12</sup> Ana vahe'mo'za hu'za enketa waini tina neneta aka tina rama'a nesune hu'za nehaze. Ana nehuta okinena aka tina negahunanagi amama nenona avamena agatereta rama'a negahune huza nehaze.

## 57

*Kefo zamavu'zmava'ma nehaza kva vahe zamazeri korinia naneke*

<sup>1</sup> Fatgo zamavu'zmavama nehaza vahe'ma nefrige'za, ana zankura vahe'mo'za antahinozamize. Anumzamofo avu'ava'ma neveririza vahe'ma nefrizage'za, vahe'mo'za antahi amara nosaze. Na'ankure fatgo avu'ava zama nehia vahe'ma nefrizana kefo avu'ava zampina oufresaze huno Anumzamo'a zamatrege'za nefrise. <sup>2</sup> Fatgo zamavu zamava'ma nehaza vahe'ma nefrizana, matipi umase'za mani fru nehaze.

<sup>3</sup> Hianagi tamagra havi kasnampa kema nehia a'mofo mofavre naga mani'neta, savri avu'ava nehuno monkote nehia a'mo kaseramante'nea mofavre mani'nazanki amare eravao hiho. <sup>4</sup> Tamagra izanku kiza zokago kea hunentaze? Tamagra izanku tamagira akara huta tamagefu'na rehakanara hunemize. Tamagra ke ontahi havige vahe'mofo mofavre mani'naze. <sup>5</sup> Hagi monko avu'avazama hu tamagu tamagesomo'a teve akrukru huno teaza ne-higeta, havi anumzante'ma mono'ma hunentaza zafa agafarega vuta savari avu'ava zana nehuta, mofavre nagatamia zamaheta osi tinkagomupine, havegampinenra havi anumzamofontega kresramna nevaze. <sup>6</sup> Hagi tinkagomupinti pehema hu'nea haверamima me'nefintira mago erita eme antazageno me'negeta, ana zante wainia tagitreta ofa nehuta, witi ofanena nehaze. Ana zama nehuta tamagra tamagesama antahi'zana Nagrikura muse hurantegahie huta nehzafi? <sup>7</sup> Tamagra mareri agatere'nea agonarega marerita monko avu'ava zana ome nehuta, anante havi anumzantega ofa kresramna nevaze. <sup>8</sup> Tamagra tamefi Nagrira hunenamita, kafantamimofo amefiga'ane, kafa zafarera havi anumzamofo amema'a tro hunenteta, savri anegna huta tafe'ma eritareta masi'naza tafetera tamavufga avapako mase'neta tamavufga oge age nehuta, havi avu'vazana nehaze. <sup>9</sup> Tamagra olivi masavenuti eri maseve huta nefreta, mnantake paurana rama'a tamavufgarera rutritri huteta vuta, Moleki havi anumzantera monora ome hunentaze. Ana nehuta mono'ma huntensaza havi anumzankura vahe huzmantazage'za afete moparega nevu'za, fri vahe matipinena ana havi anumzankura ome nehakaze. <sup>10</sup> Tamagra tusi afete nevazageno tamavesra nehianagi, amazama nehuna zamo'a amne zankna nehie huta tamagesa

nontahizanki tamagra kasefa hankave enerita, kazikazi huta anzana huta nevaze. <sup>11</sup> Tamagra izanku korora nehuta, Nagrira renavatga huta tamefira hunamita antahionami'naze? Nagrama akohe'na zaza knafima kema osuma manua zanku Nagrikura korora nosazafi? <sup>12</sup> Hagi maka tamavu tamava'zane, fatgo tavutava nehunema nehaza zanena, Nagra erinte ama hugahuanagi, ana zamo'a tamaza osugahie. <sup>13</sup> Hanki tamagrama hazenkefima unefreta, havi anumzantamina zogi atruma nehaza anumzantamina kehinke'za eme tamaza hiho. Ana hugahazanagi ana anumzaramina osi zaho'mo zamazeri faki hutresigeno zamavareno fregahie. Hianagi Nagripima frakino nemanisnia vahe'mo'ama mopa erisanti hareno nemanino, Nagri ruotage agonani'a eri nafa'a huno manigahie.

### *Zamagra'a zamaza osnaza vahe Ra Anumzamo zamaza hania naneke*

<sup>14</sup> Ra Anumzamo'a amanage hu'ne, Nagri vahe'mo'za ete egahazanki, kana varita eri ante fatgo nehuta, kampima me'neno zamazeri tanafa huga zantamina eritreho. <sup>15</sup> Ra Anumzana mani ruotage hu'neno manisga huno monafinka mani'neno manivava nehigeno agi'amo'ma ruotgema hu'nea Anumzamo'a huno, Nagra mareri ageterere'nea kumate mani'noanagi, iza'o avufgama erinte neramino, kumi'agu asunku'ma nehia vahe'ene nemanina, izano agu'amo'ma uramia vahe'ene mani'nena azeri hankavea netue. <sup>16</sup> Nagra vaheni'a narimpa ahezmante vava osugahue. Hagi e'inama hanuana nezmagesugenno hanavezmia omnena, Nagrama zami'noa zamasimura fri'za atre vagaregahaze. <sup>17</sup> Nagrama narimpama ahezmante'na zamazeri havizama hunoana, na'ankure zamagrama havigema hu'za maka zantamina eri zamagrafinke'ma atre'za kumi'ma haza zanku anara hu'noe. Hianagi zamagra'a zamavesite rukrahe hu'za ko'ma hu'naza kumi hvava hu'za nevaze. <sup>18</sup> Hagi zamagrama haza zamavu'zamavara hago Nagra zamage'noe. Hianagi Nagra zamazeri neganamrena zamazeri so'e hu'na kegava huzmante'na zamavare'na nevu'na, zamasunku zampima mani'neza zavi'ima netaza vahe'enena nasunku huzmante'na zamazeri hankavetigahue. <sup>19</sup> Ana hanuge'za ana vahe'mo'za zagamera hu'za Nagri nagia ahentesga hugahaze. Afete'ene tvaonte'enema me'nea mopafima nemania vahe'mo'za, mani fru hu'za Nagri narimpa fruzampi manigahaze. Ana nehanage'na krifintira zamazeri knamaregahue huno Ra Anumzamo'a hu'ne. <sup>20</sup> Hianagi havi zamavu zamava'ma nehaza vahe'mo'za, hagerimo kranto kranto nehuno, havi hava zantamine hapa'ene erino ankenarega eme ruvati treaza hu'za ana zamavu zamavara otre'za huvava nehaze. <sup>21</sup> Hagi havi avu'avazama nehaza vahe'mo'za knarerera hu'za zamarimpa frunena omanigahaze huno Nagri Anumzamo'a hu'ne.

## 58

### *Ne'zana a'o huno mani'neno nunamuma hu'zamofo naneke*

<sup>1</sup> Ra Anumzamo'a amanage hu'ne, Kagra akohenka ke'zana otinka ranke hunka ufema reaza hunka kezatinka, Nagri kema rufu'netagiza vaheni'a kea nezmasaminka, Jekopu naga'mo'zama nehaza kumi zamavu zamava zankura zamasamio. <sup>2</sup> Hianagi fatgo zamavu'zmaavama nehaza vahe'mo'zama nehzankna hu'za maka zupa Nagritega nunamuna nehu'za, Nagri navu'navaza'ma keama hu'zanku musena nehaze. Anumzazmimofo kasegea zamefi hunomiza, Nagri tava'onte'ma erava'oma huzankuke musena nehaze. <sup>3</sup> Ana nehu'za tagrama ne'za a'o nehuta, tavufgama anteramita nemanunana nonkano hu'za nehaze. Ana kema haza nona'a

Ra Anumzamo'na amanage nehue, anama ne'zama a'o huta nunamuma haza zupa, tamagra'ama tamazeri muse hu'zankuke tamagesa nentahita, eri'za vahetamia tutu huzmantazage'za eri'zana e'nerize. <sup>4</sup> Tamagra ne'zana atreta nunamuna nehazanagi, tamagra kehakare huta hafra ne-huta, tamazana anakita hara nehaze. Hagi ne'zama a'oma haza zupa e'inahu avu'ava'ma hanazana, Nagra monafinkatira nunamuntamia ontahigahue. <sup>5</sup> Tamagrama antahi'zana, ne'zama a'o hu'na zupa, zaho'mo traza eri pagagi higeno mopafi agona reaza huta tavufama eri anteneramita, tasunku kukena eri nehuta, tanefapi mase'neta nunamuma nehuna zankura, Ra Anumzamo'a muse nehie huta nehazanagi, tamagra havige nehaze. <sup>6</sup> E'ina huta ne'zama a'o huta nunamuma nehaza zankura nave'nosianki, Nagri'ma navenesiana, havigema huta kinafima zamavarente'naza vhahera katufenezmanteta, knazama zamita zamazeri havizama nehaza vhahera zamatreneke'za fru hu'za nevanageta, bulimakao afu'mofo anankempima karenamare zafama antazaza hutama vahe'ma knama nezamiza zana maka atre vagareho. <sup>7</sup> Nagri'ma navenesiana amanahu tamavutamava hiho, Ne'zanku'ma atupa'ma hanaza vhahera ne'zana nezamita, zamunte omane vahe'mo'zama nonku'ma nehakesageta, nontamifi zamavare nenteta, kuke-nagu'ma atupa'ma hu'nesnaza vhahera kukena zamiho. Ana nehutma tamagri koramo'zama knafima mani'nesanageta, ozamatreta zamaza hiho. <sup>8</sup> Tamagra ana avu'ava'ma hanaza zamo'a nantera zagemo'ma hanatino remsa hiaza nehina, ame hu'na tamazeri knamaresugeno fatgo tamavu tamava zamo'a ugota huno nevanigeno, Anumzamofo hihamu masazamo'a tamefira remsa huramanteno ne-eno kegava huramantegahie. <sup>9</sup> Hagi kezamatita nunamuma hanageno'a, Ra Anumzamo'a kenona huramantegahie. Hagi tamagra taza huo hutama krafama hanageno'a, Nagra ama mani'noe huno hugahie. Hagi vahe'ma knama nezamiza zana netretma, vahe zamavufina tamazana asuteta zamavufintankema nehaza zama netreta, <sup>10</sup> ne'zanku'ma atupa'ma nehaza vahe'ene knafima mani'naza vahe'ma zamazama hanageno'a, ana tamavu tamava zamo'a hanimpinti tavimo remsa nehiaza nehina, hanimpi manisazanagi zage ferupima maniaza huta manigahaze. <sup>11</sup> Ana nehanageno Ra Anumzamo'a maka knafina kegava huramanteno nevuno, hagege kokampina nazankuro atupa'ma hanazana tamazeri knare hugahie. Ana nehuno zaferinatamia azeri hankavetsanigeta, tretre huno nehagea hozagna nehuta, kampu'i timo oraneno evu vava hiaza hugahaze. <sup>12</sup> Hanki ko'ma havizama hu'nea ranra kumatamina tamagra ete eri so'e huta negita, tamagehe'zama korapa'ma noma ki'naza marufi eri zugage huta nona kigahaze. Ana nehanage'za vahe'mo'za tamagrikura hu'za, havizama hu'nea keginane, nontamine, kumapi ne'onse kantamina eri zugage hu'za ki vhahera hu'za hugahaze. <sup>13</sup> Ra Anumzamo'a huno, Nagrama mani fruhu knani'e hu'nama huham-pari'noa kna Sabatimofo kasegea rutagreta tamagra'a tamavesi'zana amagera onteho. Ana nehuta Sabati knagura Ra Anumzamofo kna me'ne huta antahinemita, tamagra'ama tamazeri musema hanaza zankura no-haketa, amunte omane nanekenena osiho. <sup>14</sup> Tamagrama mani fruhu kna Sabatimofo kasegema amage'ma antesageno'a, Ra Anumzamo'a asomu huramantegahie. Ana hanigeta neramageho Jekopuma eri santi hategahanema huno Ra Anumzamo'ma huhamparinte'nea mopafima me'nea agonafit tamatrenigeta mani so'e nehuta, ne'zana neneta musenkasea hugahaze. Ra Anumzamo'a agra'a agipinti ama nanekea huama hu'ne.

## 59

*Kumi'ma hutegen Ra Anumzamo'ma kumi'ma atre'nentea zamofo naneke*

<sup>1</sup> Antahihō tamagerfa hūno Ra Anumzamofo azamo'a atupara osu'neankino, tamagu nevazino, agesa akaniore Anumza omani'neankino nunamuma hanazana antahiramigahie. <sup>2</sup> Hianagi tamagrama nehaza kumi'mo, tamagri Anumzamofona refkohu afete netre. Ana hu'neankino tamagri kumi'mo'a Anumzamofo avua rehiza higeno, tamagri nunamuna nontahie. <sup>3</sup> Tamagri tamazampina vahe'ma zamahe friza vahe'mofo koramo avitegeno, kefo avu'ava'zamo tamazankofina hareki'ne. Tamagipina havigema hu'zamo avitegeno, tamagefunafina kefo ke'ma hantagezamo avite'ne. <sup>4</sup> Mago vahe'mo'ma magomofoma keagama hunteana havige hūno keaga hunentegeno, keagafima avrenteavahemo'enena agrama agu'ma vazinakura havige nehie. Ana nehuta tamagra'ama vahe'ma zamazeri haviza haza zamo'a, mofavre amu'ene nehiankna nehuta, kumima hazana mofavre kasenteankna nehaze. <sup>5</sup> Ana nehazageno havi antahintahi tamimo'a, ha' osifavemofo anenta'mo amu'afinti horaho hūno eviankna nehigeno, pamponkemofo nofi'mo ne'onse zagaramima anomagino eri antrakoma nehiaza nehie. Ana hu'neankino iza'o ana osifavemofo amu'ama nesanimo'a nefrisnigeno, mago amu'amo'ma rutako'ma hanigeno'a, mago ha' osifave horaho hugahie. <sup>6</sup> Tamagrama nehaza havi tamavu tamavamo'a vahera zamaza nosiankino, pamponkemofo nofi'mo haviza hu'negeno, kukanma tro'ma hu so'e osiānkna hu'ne. Ana hu'neankino havi tamavu tamava'ma nehuta, hazenkema hu'zamo tamazampina avite'ne. <sup>7</sup> Ana vahe'mo'za kumi'ma huzante zamagi'a eri'za nevu'za, kezami omame vahe korana ame hu'za zamahe'za eri neragi'za, kumi'ma huzankuke antahintahia nehu'za, maka'zana eri haviza hu'za vanovano nehaze. <sup>8</sup> Ana hu'neankitma vahe'enema tamarimpa fruma huta mani'zana nontahita, kama vanoma nehazafina, fatgoma hūno refkohu avu'ava zana nosaze. Ana nehazage'za tamagri tamagiakafima rente'za nevaza vahe'mo'za zamarimpa fru hu'za omanigahaze.

*Vahe'mo'za kumi'zami huama hu'naza naneke*

<sup>9</sup> E'ina hu'negu fatgo hūno refko hu avu'ava zamo'a tatreno afete me'negeta fatgo avu'avara nosune. Masaza kegahunanki huta amuhara hunanagi, hanizamo refine. Masa kegahunanki huta amuhara hunanagi, hanimpi vano nehune. <sup>10</sup> Ana knazamo higeta avu asuhu'nea vahe'mo kanku nehakeno azanteti asarega erieri hūno eneviaza huta vano nehune. Ana nehuta zage ferupi vano nehunangagi, hanimpima vano hia vahe'mo'ma masete otite hūno vanoma nehiaza huta vano nehune. Hankavezmima me'nea vahe'ma manizafina, fri vahekna huta nemanune. <sup>11</sup> Ana knazamo higeta beamo'za vahe amprinaku'ma regazigazi nehazaza nehuta, maho namamo'za kragima nerazankna nehune. Ana nehuta fatgoma hūno refko hu'zanku amuhara hu'nanagi afete nemegeta, tagu'mavazi zanku tavua anteta nehakonanagi afete me'ne. <sup>12</sup> Na'ankure Ra Anumzamoka Kagri kavurera rama'a hazenke hu'nonankino, tagri kumi'mo eriama hūno kumi vahe mani'naze hūno keaga hunerante. Ana nehigeta tagra kumi vahe mani'none huta keta antahita nehune. <sup>13</sup> Ra Anumzamoka kagri kea ruhanentagita, havige huta kagrira kageta antahita osu'none huta nehune. Ana nehuta Anumzantimoka tamefi hunegamita, vahera huhaviza hunezmaneta, tusi

hazenke erifore nehuta, tarimpafima me'nea havigea tagipinti huama nehune. <sup>14</sup> Hagi fatgoma huno refkomahu avu'ava zamo'a ete rukrahe huno nevigeno, fatgo avu'avazamo'a ogantu afete onetie. Ana nehigeno tamage'ma hu avu'ava zamo'a karampi masete otite nehie. Ana higeno anazamo'a tamage avu'ava zana retufenetre. <sup>15</sup> Tamagema hu'zamo'a inare-gafi fregeno, havi avu'avazama atrea vhahera vahe'mo'za hatati'za azeri haviza nehaze.

Hagi Ra Anumzamo'ma fatgo huno'ma refko hu avu'avazama nonkeno'a musena nosie. <sup>16</sup> Hagi agrama kegeno, zamazeri havizama nehaza vahe'ma mago vahe'mo'ma efreno azama hugama osigeno'a, antri nehuno Agra'a azanuti ete agu'vazino nevreno, agra fatgo avu'ava huno zamazeri knare hige'za nemanize. <sup>17</sup> Hagi fatgo avu'ava zana amimizare ha' kukenagna huno nentanino, agu'vazino etema avre'zana asenire kankrikna huno nentanino, havizama nehaza vahe'ma zamazeri havizama hania zana rimp ahezana kukenagna huno nentanino, kazigazima huno fatgo avu'avazama hu'zana nakre kukna huno antanine. <sup>18</sup> Zamagrama hu'naza zamavu zamavate anteno ha' vahe'a arimpa ahezmanento nona huno zamazeri haviza nehuno, agri'ma ha'ma renentaza vhahera nona huzmantegahie. Ana nehuno hageri ankenaregama maniza vu'naza vahe'enena nona huno zamazeri haviza hugahie. <sup>19</sup> Anama hanige'za zage fre kazigama nemaniza vahe'mo'za Ra Anumzamofonku koro hunte'za agorgia nemanisageno, zage hanati kazigama nemaniza vahe'mo'za Agri hihamu han-kave'agura husga huntegahaze. Na'ankure Ra Anumzamo'a asimu nentegeno zaho'amo ti hageno ne-eaza huno ne-esanige'za nege'za anara hugahaze. <sup>20</sup> Zamagu'ma vazioina ne'mo'a Saioni eno, Jekopu naga'ma kumi'ma atre'za zamagu'a rukrahe'ma hu'naza nagara eteno eme zamavaregahie huno Ra Anumzamo'a hu'ne. <sup>21</sup> Nagra Ra Anumzamo'na tamagranena mago huhagerafi huvempa kea amanage hu'na hu'noe, Nagra Avamuni'a tamagripi nente'na, nanekeni'a tamagipima ante'noa nanekemo'a me'ne"na huama huvava huta vugahaze.

## 60

### *Jerusalemi kumate'ma knare knama esania zamofo naneke*

<sup>1</sup> Jerusalemi kumamoka otinka remsa huo, na'ankure kagri masamo'a ko e'ne. Ana nehugen, Ra Anumzamofona hankavenentake masa zama'amo'a kagritera remsa hino. <sup>2</sup> Hagi ko, maka ama mopafina hanizamo refi'netegeno, tusi haninkino vhahera rufitezmant'e'ne. Hianagi Ra Anumzamo'a zage hanatiaza huno kagritera eama hanigeno, hihamu masa'amo'a kagrite remsa hugahie. <sup>3</sup> Ana nehanige'za kokankoka vahe'mo'za ana masa nege'za kagritega ne-esnage'za, kini vahe'mo'za ana zanke hu'za ana tavi'mofa masare egahaze. <sup>4</sup> Kavua kesga hu'nenga keganti kegama hunka ko, mofavre nagakamo'za magopi eri atru hute'za erimago hu'za kagritega neaze. Ne' mofavre nagakamo'za afete moparegati ne-esnage'za, mofa'ne nagaka'a zamavaresga hu'za neazanki ko. <sup>5</sup> Ana zama negesnankeno'a, kavugosafintira rumsa nehanigeno tumokamo'a fakifaki nehina, tusi'a musezamo kagu'afina avitegahie. Na'ankure fenozana eri'za hagerimpi kagrite ne-esageno, ana zanke hu'za maka ama mopafi vahe'mo'za feno zazamia eri'za kagritega egahaze. <sup>6</sup> Hagi rama'a kemoli

afu'mo'za avi'netesageno, Midiani vahe'ene Efa vahe'mokizmia, ohampariga'a agaho kemoli afutamimo'za Seba mopafi vu'za goline, mnanen-take zantamima kretnama vu'zana ome eneri'za, Ra Anumzamofo hus-gama hunte'zamofo knare musenkenena eri'za egahaze. <sup>7</sup> Ana nehan-age'za Kedari kumate zagagafaramina rama'a zamavare atru hute'za za-mavare'za kagritera ne-esage'za, Nabaiti kumateti ve sipisipi afutamina maka avre'za kresramnavu itare marerigahaze. Anama hañaza sipisipi-ramina aheta ofama nehaza itare'ma nagritegama ofama hanage'na Ra Anumzamo'na nege'na muse hugahue. Ana nehu'na mono noni'a hihamu hanavenireti avasesena hunte'na eri so'e zantfa hugahue. <sup>8</sup> Iza'za hampomo eaza hu'za neageno, maho namamo noma'arega hareno'ma eaza hu'za neaze? <sup>9</sup> Tamagerfa hu'za hageri ankenaregama nemaniza vahe'mo'za Ra Anumzamo'nama zamazama hanugura nagrite zamavua kete'za ne-mani'nageno, Tasisi kumate vahe'mo'za egota hu'za ne-eza ne'mofavre nagaka'a afeteti ventefi zamavarente'za ne-eza, ana ventefina rama'a sil-vane golinena erinente'za egahaze. E'inama hazana kagri'ma kazeri so'ema hugenka'ma so'e kagima eri'nanaza nege'za, Ra Anumzana tamagri Anumzama Israeli nagamotare'ma ruotage'ma hu'noa Anumzamo'na ra nagi namiku anara hugahaze.

<sup>10</sup> Jerusalemi kumamoka, kuma keginaka'a meg'i'a vahe'mo'za e'za emeri zugege hu'za neginageno, kini vahe zamimo'za kagri eri'za eri-gahaze. Kora kagirira narimpa ahenegante'na knazana kami'noe. Hianagi menina nasunku hunegante'na navesigantegahue. <sup>11</sup> Jerusalemi kumamoka, kuma kafankamo'a feru'ene kenage'enena hagro huteno me'nesnige'za, afete moparegati vahe'mo'za feno zamia eri'za kagritega ne-esnage'za, kini vahe'zamimo'za ugota huzmante'za zamavare'za ana vahera kagritega egahaze. <sup>12</sup> Hianagi mago kumapi vahe'mo'o, mago kini ne'mo'ma kegavama hu'nesia mopafi vahe'mo'zama kagri kagorgama mani'neno kagri eri'zama eri'zanku'ma ave'osinia vahe'mo'a, haviza huno fanane hugahie. <sup>13</sup> Lebanoni mopafima me'nea zafa ta'nopafintira, meni zafane saipresi zafane mago'a knare'nare huno za'zama hu'nea zafaram-inia antagi'za eri'za kagritega egahaze. Hagi ana zafa ramintetira na-gri mono nona eri zugege hu'za kisnageno knare zantfa hugahie. Ana hu'nesnige'na kini tra'ni'are mani'ne'na, nagia antesnua no me'heno nagri hankavea erinte ama' hugahie. <sup>14</sup> Ana hu'nesnige'za korapa'ma kazeri havizama hu'naza vahe'mokizmi mofavre naga'mo'za kagrite e'za, kagiafi zamarena eme nere'za kagrikura amanage hugahaze. Ra Anumzamofo ran kumakino, Saioni kumara Israeli vahe'mokizmi Anumzama ruotage'ma hu'nea Anumzamofo kumare hu'za hugahaze. <sup>15</sup> Jerusalemi kumamoka havizantfa hu'nanke'za, vahe'mo'za kavesi nogante'za zamefi hunegami'za, anampina mareriza atiramiza osu'naze. Hianagi nagra Ra Anumzamo'na kazeri so'e zantfa hu'nesnuge'za vahe'mo'za muse nehanage'za, henkama mani'za vanaza vahe'mo'zanena kagrikura muse hugante vava hugahaze. <sup>16</sup> Mofavremo nerera ami anivazu hiazza nehunka, maka kokantega vahe'mokizmi knare'nare feno zantamine kini vahemokizmi feno zanena erigahane. E'inama nehanagenka kagrama kenka antahinkama hananana, Jekopu nagamofo hankave nentake Anumzankino, nagu nevazino na-hokeno ete navre'nea Ra Anumzane hunka hugahane. <sup>17</sup> Hagi bronsi eri'na egaragi goli erina ne-ena, aini erina egaragi, silva eri'na ne-ena, zafa eri'na egaragi, bronsi eri'na ne-ena, have eri'na egaragi, aini eri'na egahue. Ana nehu'na rimpama fru huno mani avu'ava zana huntenugeno

kegava hunegante'na, fatgo avu'ava'zamo'a ugota huno mika zana kegava hugahie. <sup>18</sup> Tamagrama mani'naza mopafine, mopa tamimofo agema'ama ometre emetrema hu'nea atumpareganena, ha'mofo agenkene, ha'ma ne-huno keonke zama eri havizama hu'zamofo agenkenena magore hutma ontahitfa hugahaze. Hianagi kuma kegina ka'agura, Ra Anumzamo'a ete ko nagu vazino navre'ne hunka agia anteneminka, kuma kafanka'agura Ra Anumzamofo agia husga hanune hunka agi'a antemigahane. <sup>19</sup> Hanki zagemo'a koma ferupima remsa huneganteazana huno remsa nosanigeno, ikamo'ma kenage'ma remsa hunegantea zana huno remsa huogantegahie. Na'ankure Ra Anumzamo'a mevava taviareti remsa hunegantenio kagri Anumzamo'a hankave masaka'a manigahie. <sup>20</sup> Hanki kagrite'ma remsama hania zagemo'ene ikamokea magore huke tami ofregaha'e. Na'ankure Ra Anumzamo agra mevava tavika'a manisanigeno, maka kasuzamo'a vagaregahie. <sup>21</sup> Ana hanige'za kagri vahe'mo'za fatgo avu'avake nehu'za, mopa eri'za manivava hugahaze. Nagra'a nazampinti zafa avima kriaza hu'na hankre noanki'za, nagri nazanko avo mani'nesage'za vahe'mo'zama nezamage'za nagri nagia husga hugahaze. <sup>22</sup> Hagi menina osi'a naganofi mani'nazanagi, henka tusi'a vahe eforehu hakare huteta hankavenentake vahe efore huta manigahaze. Ra Anumzamo'na ama nanekea huankino, nagrama ko huhampari'noa knare ama anazamo'a ame huno efore hugahie.

## 61

### *Ra Anumzamo vahe'ma zamaza hania knama esania zamofo naneke*

<sup>1</sup> Ra Anumzamofo Avamumo'a nagrite eman'i'ne. Na'ankure Ra Anumzamo nagrira nanunte masave tagino frenenanteno, knama zamiza zamazeri havizama nehaza vhahera knare musenke ome huama hunka zamasamio huno hunantege'na e'noe. Ana nehuno rama'a knazampima mani'naza vhahera zamarimpa fru nezaminka, hapinti'ma zamazeri'za kinama huzmante'naza vhahera zamazeri netrenka, kinama hu'naza vhahera kinafintira atreta fruhuta viho hunka zamasamio huno hunantege'ne. <sup>2</sup> Hagi Ra Anumzamo'a naga'ama so'e avu'avazama huzmanteno zamazeri so'ema hania kfugura huama hunka nezmasaminka, vahe'ama knama zamiza zamazeri havizama hu'naza vhahera arimpa ahenezmanteno zamazeri haviza haniankna ome huama hunka nezmasaminka, zamasunku nehu'za zavi krafa nehaza vhahera zamarimpa fru zamio huno hunantege'na e'noe.

<sup>3</sup> Saioni kumapima mani'neza zavi krafama nehaza vhahera zamarimpa fru nezaminka, zamanunte'ma kugusopama erinte'nezama zavi'ma netaza zana ome erinetrenka, avasase'anefavaravereti anaki zamanto. Ana nehunka zavi'ma netaza zana eri netrenka, musema hu'zana masavema nehiaza hunka fre nezmantenka avesra gosrama nehiazana eri netrenka, kukenama nehiaza hunka Ra Anumzamofo agima ahentesgama hu'zana ante'zamanto. Anama hananke'za ete hankavea eri'za muse zagame nehu'za, Ra Anumzamofona muse huntegahaze. Ana nehanage'za vahe'mo'za nezamage'za, Ra Anumzamo oki zafa hankre'negeno oti hankave ti'neankna hu'naze hu'za nehu'za, Ra Anumzamofo agia ahentesga hugahaze huno hunantege'na e'noe. (Matiu 11:5, Luku 4:18, 19, 7:22)

<sup>4</sup> Anama hutesuge'za korapa'ma havizama hu'nea rankumazmia zamagra eri zugage hu'za kigahaze. Ana nehu'za maka zantamimo'ma havizama huno za'za knama meno'ma e'nea zantamina eri kasefa hu'za kigahaze.

<sup>5</sup> Keta antahita osu'nesaza vahe'mo'za e'za tamagri sipisipi afutamina eme

kegava nehanage'za, hozatamifine waini hozatamifina afete moparegati vahe'mo'za eri'zana eme eri ramantegahaze. <sup>6</sup> Hianagi tamagrikura Ra Anumzamofo pristi eri'za vhahere hu'za nehu'za, tagri Anumzamofo avuga eri'za eneriza vhahere hu'za tamagrikura hugahaze. Ana nehanageta kokankoka vahe'mo'za eri'za eme tamamisnaza zagofenoreti ne'zana neneta, ana vahe'mokizmi feno zante rantamagia enerita tamimiza runafage hugahaze. <sup>7</sup> Nagri vahe'mota tamagazegu hu'nazanagi ante agofetu hu'na tami'nugeta rama'a zantami eri santiharegahaze. Tamazeri tamagaze hu'nazanagi, ranke huta zagamera huta ana fenozama tami'nua zanterusuna musena hugahaze. E'ina hu'negu mopatamifina rama'a zantami eri agofetu huta erita manigahaze. Ana nehutma tusi'a muse nehanageno ana muse zamo'a vaga oreno mevava hugahie.

<sup>8</sup> Na'ankure fatgoma huno refkoma hu avu'ava zanku Ra Anumzamo'na nave'nesie. Musufamase avu'avazane, vahe'ma azeri havizama hu avu'ava zankura tamagerafa huno nave'nosie. Nagri naga'mo'za rama'a knaza eri'za hazenke eri'nazagu, nagrama zamigahuema hu'nama hu'noa kante amage ante'na musezana nezami'na, mevavama hania huhagerafi huvempa kea zamagrane huhagerafigahue. <sup>9</sup> Hagi zamagripinti'ma henkama efore'ma hanaza vhahera, maka ama mopafi vahe'mo'za zamagesga hu'za antahizamigahaze. Anama zamagesgama hanaza vahe'mo'zama zamage'za antahi'zama hanazana, Ra Anumzamofo vahe mani'nazageno agra'a asomu hunezmante hu'za hugahaze.

<sup>10</sup> Ra Anumzamofonkura tusiza hu'na muse nehanugeno, nagu'amo'a Anumzanimofonkura muse zagame hunteghie. Na'ankure Agrama nagu'mavazino navre'nea zana kukenagna huno antaninenanteno, fatgo avu'ava zanu, zaza kukenagna huno antaninante'ne. Ana'ma hige'na mago vemofo a'masiminaku higeno asenire knare tavrave anakiankna nehu'na, zagoamo'ma marerisa zantaminteti a'mofoma avasese hunteankna hu'noe. <sup>11</sup> Mopafinti keonke zamo rehakarufeno hageno marenerigeno, hozafi avimzamo amumpa anteno mareriaza huno, Ra Anumzamo'a hanigeno, fatgo avu'avazamo'ene Agri'ma husgama huntezamo kokankoka vahe'mofo avurera hageno marerigahie.

## 62

### *Saioni kumamo'ma kasefa agima erisnia zamofo naneke*

<sup>1</sup> Na'ankure Saioni kumamoka kagri knare zanku hu'na nagira hamunki'na omani kea hvavaha nehu'na, Jerusalemi kumamoka knare zankura akohe'na omanigahue. Ana hu'na nevanugeno nanterampi zage hanatino remsa hiaza huno, fatgo avu'avazamo'a kagripintira remsa nehanigeno, agu'mavazi zamo'a kenage tavi tagi karugaru huno nevigeno remsa hiaza huno remsa hugahie. <sup>2</sup> Maka ama mopafi vahe'mo'za fatgo kavukvazana negesnage'za, kini vahe'mo'za kagri hihamu masazana kegahaze. Ana nehu'za Ra Anumzamo'ma kasefa kagima antegamisnia kagi ahiegahaze. <sup>3</sup> Kagra Ra Anumzamofo azampi mago avasese'amoke hu'nea kini fetori meankna nehunka, kinimo'ma nentania fetori Ra Anumzankamofo azampi meankna hugahane. <sup>4</sup> Ra Anumzamo'a amefi humine hu'za kagia nehe'za, mopa'amo'a hagage koka fore hu'ne hu'za kagia ohegahaze. Hianagi mago kasefa kagima ahesazana, nagra agrikura muse hunentoe hu'za kagia nehe'nageno, vere'ma mani'nea a'mo'ma muse nehuno neve'enema maniaza huno mopakamo'a so'e huno

mesigeno, Anumzamo'a muse hugantegahie. <sup>5</sup> Mago kasefa ne'mo vene omase'nea mofa a' eriankna hu'za, kagri ne'mofavre naga'mo'za kagrane eri hagerafigahaze. Ana nehanageno menima a'ma e'neria ne'mo'ma, ana a'ma musema hunenteaza huno kagri Anumzamo'a kagrira musena hugantegahie. <sup>6</sup> Jerusalemi kumamoka kuma keginare'ma mani'neza kvama hanaza vahera ko huhampri zamante'noe. Ana hu'noanki'za kenage'ene feru'enena zamagira hamunkite'za omanigahaze. E'ina hu'negu Ra Anumzamofontegama nunamuma banana vahe'mokane, kezanke'ma banana vahe'mokanena mani frua osunka kezati vava huo. <sup>7</sup> Ana huta Ra Anumzamofontega kezati vava huta nevinkeno, Jerusalemi kumara ete eri hankavetisnigeno, maka ama mopafi vahe'mo'za anazama negesu'za husga huntegahaze. <sup>8</sup> Ra Anumzamo'a hankavenentake tamaga azana erisga huno huvempagea hu'neankino, ha' vahetamimo'za e'za tamu'na sisima huta hankre'naza witine, tamu'na sisima huta hankre'naza waini hozafintira afete moparegati vahe'ene tamagri ha' vahe'enena zamatrenuge'za e'za eme eri'za onetfa hugahaze. <sup>9</sup> Hianagi witi ragama hamare'nazana tamagra'a neneta, Ra Anumzamofona agia husga huntegahaze. Ana nehanage'za waini rgama tagisnaza vahe'mo'za ana wainia Nagri mono kumapina negahaze. <sup>10</sup> Jerusalemi kumapima menima mani'naza vahe'mota kumara atreta, kuma kfaramimpinti atiramita vuta vahe'ma esnaza kana eri ra nehuta, mopa kateta antemrenerita, kampima haveramima me'neana eritreho. Ana nehuta maka vahe'mo'zama kesnaza avame'zana, krauefa erisga hiho. <sup>11</sup> Jerusalemi kumamoka antahio, Ra Anumzamo'a maka ama mopafi vahera zamasami'neanki'za, kagrikura amanage hu'za hugahaze. Saioni kumamoka kagri'ma kaguvazino'ma kavresnia nera ne-eankino, musezane nonama huno kamisnia mizana magoka eri'neno ne-e. <sup>12</sup> Ana hu'neanki'za kagri vahekura hu'za, Ra Anumzamo'a zamagu vazino zamavare'nea vahe mani'nazanki'za ruotge vahe mani'naze hu'za hugahaze. Anage nehu'za kagrikura hu'za, Ra Anumzamo'a amefira huom'i'nea kumaki haketa vanune hu'za Jerusalemi kumamokagura hugahaze.

## 63

### *Ra Anumzamofo arimpa ahe'zamo ama mopafi vahete esania zamofo naneke*

<sup>1</sup> Idomu kaziga Bozra kumateti'ma za'za kukena'are'ma korankrema hunegeno'ma ne-ea nera iza'e? Iza kini ne'mofo za'za kukena hu'neno hilamu hankaveanena agatre azatre auno masia hunora ne-e? E'i ana nera Nagragi'na fatgo navu'nava zampinti nanekeia nehuanki'na hilamu hankavenireti zamagura vazigahue. <sup>2</sup> Hanki waini rgama rentra'ma nehazafima wainima rentra ahe'nea vahe'mofo kukanaregama hi-azama huno, tamagri kukanaregama kora penimoke'ma hu'neana nazamo anara hu'ne? <sup>3</sup> Mago vahe'mo'a nagranena mani'neno naza osige'na nagrake waini raga rentra ahe'na regatati hu'noe. Nagrira tusi'a narimpa ahege'na ha' vaheni'a krepima regatiti'ma nehiaza hu'na zamahe'na zamarehapa hugeno, kora zamimo'a rugatati huno maka kukananirega koramoke hu'ne. <sup>4</sup> Nagra vaheni'ama zamagu vazi'na ete'na zamavaregahue hu'nama huhampari'noa kna nagu'afi antahinoankina, zamagu vazi'na ete zmavrenua kafua hago e'ne. <sup>5</sup> Nagrama koana Nagri vahe'ma zamazama hanaza vahera omani'zagena antri hu'noe. E'ina hige'na tusi'a narimpa ahenezmante'na Nagra'a nazanteti zamagu vazi'na ete zamavare'noe. Ana

nehugen Nagri narimpa ahezamo'a mareri'ne. <sup>6</sup> Tusi'a narimpa ahenezmane'nna maka kokankoka vahera zamahen'e rehapatino'e. Ana nehu'na narimpama ahe'zana aka tima nehiaza hu'na zamuge'za nene'za neginagia hu'naze. Ana nehazage'na zamagri korana mopafi eri tagi atre'noe.

<sup>7</sup> Ra Anumzamo'ma tavesi neranteno so'e avu'avazama hunerantea zanku'ene Ra Anumzamofo agima husgama hunte'zankura huramagesa hugahue. Tamagerfa huno Ra Anumzamo'a asunku zama-areti'ene vagaore avesi zanteti Israeli vahera zamazeri so'e hu'ne. Maka'zama Anumzamo'ma tagri'ma hurante'nea kante anteno tusi'a asunku huranteno taza hu'ne.

<sup>8</sup> Ra Anumzamo'a huno, Ama ana vahera tamagerfa hu'za Nagri vahe fatgo mani'naze. E'ina hu'neanki'za zamagra nagri navurera havi kea osugahaze. Ana nehuno Agra zamagu'vazi ne' mani'ne. <sup>9</sup> Hanki zamagrama knazama eneri'za zamatafima nemani'zageno'a, Ra Anumzamo'enena ana knaza enerino, atazampi mani'ne. Ana nehigeno Agri tavaonte'ma nemania ankeromo zamagrane mani'neno zamagu vazi'ne. Ra Anumzamo'a avesizama'areti'ene asunku zama'areti huno ete zamavare'ne. Hagi korapa'ma mani'za e'naza knafina, maka zupa Ra Anumzamo'a azampi zamavaresga huno e'ne. <sup>10</sup> Hianagi Ra Anumzamofona ke'a rutagre'za zamefi hunemi'za Ruotage Avamu'amofona arimpagna erimi'naze. Ana hazagu huno ete rukrahe huno Ra Anumzamo'a zamagri ha' vahe fore huno Agra'a hara huzmant'e. <sup>11</sup> Anama huteg'eza Mosesa knafima korapa'ma fore'ma hu'nea zankura zamagesa ete nentahi'za amanage hu'za hu'naze. Hageri amu'nompima kama erifore huno vahe'anenaga'are'ma kegavama nehaza vahe'enema zamavareno'ma e'nea Anumzana iga mani'ne hu'za nehu'za, Agra Ruotage Avamu'ama atregeno amunozamifima enemanino, <sup>12</sup> hankavenentake azanu Mosesena azantamaga kaziga hankavea nemino, hagerina refkohu kanti kama huno kana erifore hige'za kantu kazigama vu'nazana, Ra Anumzamo'a agri agimo'ma agi'ama mevava hanigu anara hu'ne. <sup>13</sup> Hagerimo'ma amefenkame'ma tami'nefina agra'a ugota huno nevuno zamavareno vu'ne. Hagi hosi afumo'za hagege kokampima viaza hu'za vu'nazanagi, trakara hu'za omase'naze. <sup>14</sup> Hagi bulimakao afumo'za agupofi umani fru hazankna huno, Ra Anumzamofo Avamumo'a mani fru zami'ne. E'inahu avu'avaza hunka vaheka'a kegava hunka zamavarenka ne-enka Rankagia eri'hane.

### *Nunamu hanigeno Ra Anumzamo'ma asunku huntlesia zamofo naneke*

<sup>15</sup> Ra Anumzamoka monafinka masanentake huno hankave'ane kumapintira, kefenkma atenka tagrira tago. Inantega tusia hihamu hankaveka'a me'ne? Kagra kasunkura hurantenka knare kavukvara humorantane.

<sup>16</sup> Abrahamu'a tageno antinora osigeno, Israeli'a tagenira osu'neanagi, kagra nerfaga mani'nane. Kagra Ra Anumzamoka tagri nerfaga mani'enka, korapama tagu'vazinka tavre'nana ne' mani'nane. <sup>17</sup> Ra Anumzamoka na'a higenka tatranketa kagri kana novaririta, tagu'a kafana erinegita, kagririra korora huganteta kagorga nonamanune? Hagi nagri eri'za vahe mani'neta, Nagri naganofi mani'nazema hanunka, rukrahe hunka tagritega ete eno.

<sup>18</sup> Ruotage'ma hu'nea mono nonka'a osi'a knafi ruotge vahekamota erita mani'nohane. Hianagi menina tagri ha' vahe'mo'za ha' eme huranteza ana mono nona eme eri haviza nehu'za, zamagiareti renkrare re'naze. <sup>19</sup> Kagra hunka nagri vahe mani'naze hunka tagi nehunka kegava hurante'nananagi, ana'ma huozmante'nana vahe'mo'zama nehazankna tavutava nehuta, kagri kagima nohaza vahe'mo'za nehazankna tavutava nehu'ne.

## 64

<sup>1</sup> Ra Anumzamoka nagri'ma navesiana anami mona eri anafe hutrenka eramigeno, ama mopafima me'nea agonaramimo'a kagri kavurera tore'vare hino. <sup>2</sup> Tevemo zafare tevenereno ti tegrakra hiaza nehanagenka, kagra eraminka ha' vaheka'arerar ka'eme eri ama nehuge'za, maka ama mopafima mani'naza ha' vahekamo'za nege'za kagri kavurera zamahirahiku hoho. <sup>3</sup> Na'ankure tagra e'inahu'zana forera osugahie huta hu'nonaza fore higeta konana, kagra monafinti eneraminkeno, ama mopafima me'nea agonaramimo'a kagri kavurera tore'vare hu'ne. <sup>4</sup> Hagi korapara magora Kagri kna Anumzana mani'neno, kagrite'ma zamentintima nehu'za, kavegama antaza vahetera hankave'a erinte ama huno zamaza hu'ne hu'zama haza nanekea zamagesafintira nontahi'za, ana anumzana zamavufintira onke'naze. <sup>5</sup> Hagi musema hu'zama fatgo zamavu'zamava nehu'za, kagri kavukava'ma zamagema okaniza amage'ma nentaza vahera kagra zamaza nehane. Hianagi tagrama kumi'ma huvava hunkenka, kagra karimpa aherantenane. E'ina hu'neankino ina vahe'mo tagrira taguvazino taza hugahie? <sup>6</sup> Maka vahe'mota agruma osu'nea vahekna hunone. Tagrama fatgo tavutava nehune hutama nehu'na tavutavamo'a, pehanama regirri tavravegna hu'none. Tagrama hu'na hazenkemofo kumi'mo higeno, zafa an'i'namo uza re'negeno zaho'mo eri hareno viaza huno tagri kumi'mo tavareno afete vu'ne. <sup>7</sup> Mago vahe'mo'e huno kagri kagia aheno nunamuna osuge, kagritera erava'oa huno kamagera onte'ne. Tagri kumi'mo higenka kamefi huraminkeno, tagrama huna kumi'mo tazeri haviza higeta havizantfa huta mani'none. <sup>8</sup> Ana hu'neanagi Ra Anumzamoka tagri nerfaga mani'nane. Tagra higo mopagna huta manunkenka, kagra mopa kavoma tro nehia nekna hunka mani'nane. Kagraka'a kazampinti makamota tro hurantanketa mani'none. <sup>9</sup> Ra Anumzamoka zazatera krimpa ahenerantenka, tagri kumikura kagesa antahi vava osuo. Tagra kagri vahe mani'neta nunamu nehunanki kavua antenka tago. <sup>10</sup> Kagri routage rankumatamimo'a ka'ma kokankna higeno, Saioni kumamo'enena ka'ma kokankna higeno, Jerusalemi kumamo'enena haviza higeno anampina vahera omanitfa hu'ne. <sup>11</sup> Konariri amoke'ma huno ruotage'ma hu'nea mono nontima, me'nege'zama tagehe'moza anampima vu'za Kagri kagima ahentesgama nehaza mono nona, tevemo teno eri fanane nehigeno, ana maka knare narezanti'ma anampima me'nea zane, maka nontaminena tevemo te fragu vazigeno hihi huno marerino amne'za se'ne. <sup>12</sup> Ra Anumzamoka ama ana maká zama nehanazana, eri amnea osugahampi? Kagra amanea kea osu mani'nenka tazeri havizana huvava hunka vugahano?

## 65

### *Keontahi vahe Ra Anumzamo knaza zamisnia naneke*

<sup>1</sup> Hagi Ra Anumzamo'a huno, Nagra nunamuma hu'za nantahima nonkaza vahe'mo'zama nunamuma hu'za nantahima kesagu zamavega antena mani'noe. Nagriku'ma nohake'za Nagri nag'i'ma nohaza vahe'mo'za nagrira nage'za eri fore hazage'na Nagra ama mani'noe, ama mani'noe hu'na nehue. (Rom 10:20, 21) <sup>2</sup> Nagri kema runetragé'za knare osu kante'ma nevu'za, zamagra'a antahintahima nevarariza vahetera zamazama hukuraka nazana rusutetena maka knafina mani'noe.

<sup>3</sup> Ana havi zamavu zamava'ma huvava Nagri navufina nehu'za, naz-eri narimpa nehe'za, hoza zamifina havi anumzante kresramna nevuza,

simenire'ma tro'ma hunte'naza itarera mananentake'zana kremna vu'naze. <sup>4</sup> Ana nehu'za matipi maniza vano nehu'za, kenagera oku'a havi avamate monora nehu'za, afu'mofo ame'a nene'za, Anumzamo'na navure'ma agruma osu'nea zagagafama kre'naza tima'anena ne'naze. <sup>5</sup> Ana vahe'mo'za mago'a vahekura hu'za, tagri tavufgamo'a ruotage hu'neanki, tagri tavaontera omanita ogantu'a maniho hu'za nehaze. E'inahu zamavu zamava'ma nehaza zamo'a tevegumo nagonagampi fregeno kumagumaguma hiankna maka knafina nehie. <sup>6</sup> Keho, Ra Anumzamo'na maka tamagri havi tamavutamavara avontafepi krentogeno me'n'e. Ana hu'negu nagra akohe'na omani'na, maka kumitamimofo avamente antena nona hu'na mizana tamente tamente tamitere hugahue. <sup>7</sup> Ana hanuge'za zamagri kumi'ene zamagehe'i kumimofo knazanena erigahaze. Na'ankure zamagra agonaram-intega vu'za, havi anumzante tevefi ofa ome nehu'za, nagri nagia eri haviza hu'naze. E'ina hu'nazanki'na ana kumi'ma hu'naza zamofontera, nona hu'na mizazmia zami fatgo hutere hugahue. <sup>8</sup> Ra Anumzamo'a amanage huno hu'ne, Mago vahe'mo krepi raga regatiti huno tima'a eritenko akr'u'a atreaza nehigeno, mago vahe'mo huno matera ovuo. Na'ankure mago'a tima'a me'negenka regatiti hu so'e osu'nane huno nehiaza hu'na, nagri eri'za vaheni'a Israeli vaheku nagesa nentahi'na zamazeri haviza huvaga oregahue. <sup>9</sup> Nagra Jekopu naga'ene Juda vahepinti rama'a vahe zamazeri fore hanuge'za, nagri agonaramina eri nafa'a hu'za anampi manigahaze. Nagri eri'za vahe manigahaze hu'na ama ana vahera huhampari'noa vaheki'za, ana mopa erisanti hare'za manigahaze. <sup>10</sup> Ana hanigeno ana mopafina sipisipi afu zamimo'ene bulimakao afu'zamimo'za avite'za ne-maninageno, Saroni agupomo'a sipisipi afu kevumo'zama ne'zama nesaza agupo fore hinkeno, Akori agupomo'a bulimakao afu kevumo'zama manigasama hanaza mopa megahie. Nagriku'ma nehakaza vahetera e'inahu'za fore hugahie. <sup>11</sup> Hianagi Ra Anumzamo'na tamefi hunenamita, ruotge'ma hu'nea agonani'a tamage akaninenteta, Gati havi anumzante ne'za retro hunenteta waini tinena tagi havia huta Meni'e nehaza havi anumzante ofa nehaze. <sup>12</sup> E'ina nehazanagi ha' vahe kazinkante tamavrentes-nuge'za, ha' vahe'mo'za zamazeri pri huza bainati kazinteti tamahegahaze. Na'ankure nagrama kezamatuana nagri kea antahita nona nosuta, kema tamasamuana, nagri kea antahi so'ea osu'naze. Ana nehuta nagri navurera havi tamavu tamavaza nehuta, nagri'ma nave'nosia avu'avaza amage ante'naze. <sup>13</sup> E'ina hu'negu Ra Anumzamo'na amanage hu'na nehue, Nagri eri'za vahe'mo'za ne'zana negahazanagi, tamagra tamagaku hugahaze. Nagri eri'za vahe'mo'za tina negahazanagi, tamagra tinku hugahaze. Nagri eri'za vahe'mo'za muse hugahazanagi, tamagra tamagazegu hugahaze. <sup>14</sup> Nagri eri'za vahe'mokizmi tamagu'afina musezamo avitesanige'za, muse zagame hugahaze. Hianagi tamagri tamagu'afina tamasuzamo avinetena, tumotamimo'a netanesnigeta zavi krafa hugahaze. <sup>15</sup> Ana hu'nesnuge'za Nagri eri'za vahe'mo'zama vahe'ma sifnagema huzmantekura, tamagri tamagi ahe'za sifna kea huzmantegahaze. Na'ankure Ra Anumzamo'a tamagrira tamahe fanene nehuno, eri'za vahe'aramina ru zamagi zami-gahie. <sup>16</sup> Hanki iza'o ama mopafima mani'neno, agra'ama asomu erigahue huno'ma hanimofona tamage huno Anumzamo'a asomura huntegahie. Iza'o mopafima huvempama hanimo'a, tamage Anumzamofonte huvempa hugahie. Na'ankure ko'ma hu'naza hazenkeramina Nagra nagekani zamante'noe.

*Ra Anumzamo'ma kasefa monane kasefa mowanema tro hania zamofo*

***naneke***

<sup>17</sup> Hanki antahiho, Nagra kasefa monane kasefa mohanepa tro hugahuanki'za, ko'ma fore'ma hu'nea zamo'a antahintahi zamifina mago'enena omanesanige'za zamagesa ontahigahaze. (2 Pita 3:13, Revalesen-Hufo hu'nea naneke 21:1) <sup>18</sup> Hianagi Nagrama kasefa'zama tro'ma hanua zanku muse huvava nehuta manigahaze. Nagra Jerusalemi kumara vahe'mo'zama musema hu'za manisaza kuma retro hugahue. Ana kumapima manisnaza vahe'mo'za tusi muse huvava hugahaze. <sup>19</sup> Nagranena Jerusalemi kumakura muse hunente'na, vaheni'agura antahī so'e huzmantegahue. Ana nehanugeno Jerusalemi kumapima zavi krafama nentahiza zana hu'za mago'enena ontahitfa hugahaze. <sup>20</sup> Mofavre nentamo'ma osi'ma mani'neno'ma nefriazana osugahie. Maka vahe'mo'za zazate manite'za tavava ozafa re'za 100'a kafu hanazanagi, kasefa vahe mani'naze hu'za hugahaze. Hanki 100'a kafuma agateore'neno'ma ame huno'ma frisnia vahekura sifna ahentegeno frie hu'za hugahaze. <sup>21</sup> Nagri vahe'mo'za zamagra nontamina ki'za ana nontamimpi nemaniza, zamagra waini hoza ante'za raga'a negahaze. <sup>22</sup> Nagri vahe'mo'zama ko'ma noma kinage'za, ru vahe'mo'zama emerizama mani'nazanknara nosnageno, waini hozama ante'nage'za ru vahe'mo'zama eme tagi'za nenazanknara osugahaze. Na'ankure Nagri vahe'mo'za zafamo'ma nehiaza hu'za zazate maniza nevu'za, zamazampinti zam'u'na sisima hu'za eri fore'ma hu'naza zantamina nene'za musenkase hu'za maniza vugahaze. <sup>23</sup> Zamagrama erisnaza eri'zamo'a amne zanknara osugahie. Ana nehanage'za kasezmantesaza mofavre naga'zamimo'za hazenkea e'origahaze. Na'ankure ana naga'mokizmi mofavre nagara Ra Anumzamo'a asomu huzmante'neankino zamagripinti'ma henkama kase anante nante'ma hanaza vahe'enena asomu huzmantegahie. <sup>24</sup> Hagi zamavesinia zanku'ma nantahima onke'nenage'na, Nagra kenona huzmantegahue. Ina zankuro nunamuma nehanage'na nentahi'na, zahufa nunamuna nehanage'na ana zana zamigahue. <sup>25</sup> Afi kramo'ene sipisipi anentamokea magopi mani'neke trazana nenesakeno, laionimo'ene bulimakao afumo'enena magopi mani'neke hagege trazana negaha'e. Hianagi osifavemo'a kugusopa negahie. Ana hu'neanki'za Nagri ruotage agonafina havi avu'ava zana nosnageno, magomofoma azeri havizama hu'zana omanegahie. Ra Anumzamo'na amana nanekea nehue.

**66*****Mona kumamo'a Anumzamofo tra me'ne hu'nea naneke***

<sup>1</sup> Ra Anumzamo'a amanage huno hu'ne, Mona kumamo'a Nagrama nemanue tra megeno, ama mopamo'a nagiamma nentoa tra me'ne. Eina hu'neankita Nagri nona inantega kinantesnage'na, nagra mani frua hugahue?

(Matiu 5: 34, 35. Aposolo 7: 49, 50) <sup>2</sup> Na'ankure Nagra Ra Anumzamo'na monane mopane maka zantamina nazampinti tro huntogeno me'ne huno Ra Anumzamo'a hu'ne. Hagi zamavufagama anteramiza nemaniza, zamasunku hu'za zamagu'a rukrahe nehu'za, nagri nanekegu'ma koroma hunte'za zmahirahiku ma nehaza vaheku nagrira nave'nesie.

<sup>3</sup> Hianagi ve bulimakaoma ahe'za ofama nehaza zamo'a vahe'ma ahe friaza nehu'za, sipisipi anenta'ma ahe'za ofama nehaza zamo'a, krama ananke eri vamigino ofama nehzankna nehaze. Hagi witi ofama nehaza zamo'a, nagri navurera afumofo korama ofama hazankna nehu'za, mna

nentake'zama ofama haza zamo'a, nagrama koana havi anumzante kre mna nevazankna nehaze. Ana nehu'za zamagra'a zamavesite kasarino'ma agoterfa avu'ava zana nehu'za, kana atre'za zamagra'a zamavesi nevaririze.

<sup>4</sup> E'ina hu'negu zamagrama koro'ma nehaza knazana ko huhampri zamante'noanki'na, atrenugenzo zamagrite egahie. Na'ankure Nagramà kema hu'noana mago'mo'e huno kenona osigeno, kema nehugen'o mago'mo'e huno nagri kea ontahine. Nagri navurera kefo avu'ava nehu'za nagrama musema nosua zamavuzmava nehaze. <sup>5</sup> Hagi iz'a'o Ra Anumzamofo kegu'ma ahirahiku'ma nehania vahe'mo'a Ra Anumzamofo kea agesa anteno antahino. Nagri nagireku hu'za neramafu'za zamavesra humeramante'za kiza zokago ke huneramante'za Ra Anumzamo'a hankave'ane eno eme zamazeri muse nehina, kamaneno hu'za nehaze. Hianagi tamagerfa hu'za ana kema nehaza vahe'mo'za tusi'a zamagazegu hugahaze.

<sup>6</sup> Rankumapinti'ma tusi agasasankemo'ma nehiana nentahita, ra mono nompinti'ma nehaza agasasankea antahilo. E'i ana agasasankea Ra Anumzamo'a agri'ma ha'ma rente'naza vahe nona huno miža nezamige'za nehaza agasasamo'e! <sup>7</sup> Jerusalemi rankumamo'a mago a'mo mofavre anteku nehigeno ata negrigeno ne' mofavre omenteaza osu'neanki, ame huno ne' mofavre anteankna hu'ne. <sup>8</sup> Hanki e'ina hu'zana kora negeta nentahita hu'nazafi? Mago kumamo'a mago zupagera ame hunora eforera nehia zampi? Mago kumate vahe'mo'a ame hunora vahera forera huno eri hakare nehia zampi? I'o. Ana hu'neanagi Saioni kumamo'ma mofavrema antenakura agafa huno atama negrisnigeno'a, ame huno ne' mofavreramina kasezamantegahie. <sup>9</sup> Nagra hanugenyo mofavrema kasentezama nehaniretira mofavrea kase ontegahifi? Nagrama mofavrema fore hinoma hu'na hugeno'ma fore nehia Ra Anumza mani'noanki'na, nagra zamarimpa eri kugenyo mofavrea nontaze hu'na tamagri Ra Anumzamo'na nehue.

### *Jerusalemi kuma'mo'ma henkama musema hania zamofo naneke*

<sup>10</sup> Jerusalemi kumaku'ma avesinentamota, agrane tusi musena hiho. Maka vahe'ma Jerusalemi kumaku'ma tamasunku huta zavi'ma netaza vahe'mota, menina agrane musena hiho! <sup>11</sup> Ana nehinkeno mofavrema ami amiaza tamagrira nehina, agripintira amima anivazu huno neaza huta anivazu huta rama'aza enerita mani so'e huta manigahaze. <sup>12</sup> E'ina hu'negu Ra Anumzamo'a amanage huno hu'ne, Antahilo, Nagra hanugenyo tima hageaza huno maka ama mopafi vahe'mokizmi feno zamo'a Jerusalemi kumapina eme avitenigeno, mago zankura atupara osugahie. Ana zantamima erinutma tusi muse hugahaze. Mago a'mo mofavre'a azampi avre'neno ami amigeno neneno muse hiaza nehuta, nerera'a amote avrenteneno zokago renenteaza hugahaze. <sup>13</sup> Mago a'mo mofavre'a kvahu so'e hu'neno avavaseaza hu'na, kegava huzmantegahue. Ana hanugeta Jerusalemi kumapina fru huta manigahaze. <sup>14</sup> Anazama eri fore'ma hanua zama negesnageno'a, tamagu'afintira tusi muse nehanigeta, trazamo hageno amosre ahenteaza huta hankave vahe fore hugahaze. Ra Anumzamo'a hankave'a, agra'a eri'za vahe'are erinte ama hugahie. Hianagi ha' vahe'amokizmia arimpa ahezmantegahie. <sup>15</sup> Hanki tamagra negesnageno, Ra Anumzamo'a teve anefa'ene ne-eno, kagikagi zahomo'ma hiaza huno karisi'afi mani'neno ame huno egahie. Ana nehuno tusi arimpa ahezmanteno tevereti ha' vahe'a zamazeri haviza hugahie. <sup>16</sup> Ra Anumzamo'a tevereti'ene bainati kazinteti'ene maka ama mopafi vahera kumi zamimofo nona huno zamahe vagaregahie. Ana hanige'za rama'a vahe frigahaze.

<sup>17</sup> Ra Anumzamo'a huno, havi anumzante'ma vu'za hozafima mono ome hunteku'ma nehu'za, zamagra'a zamazeri agru hu avu'avaza nehazageno, amu'nozamifinti mago vahemo'ma afu'mofo ame'a neneno, kafane mago'a Ra Anumzamo'ma i'oma higeno agruma osu'nea zagaramima nenea vahekura, Ra Anumzamo'a zamazeri hanuge'za fanane hugahaze huno hu'ne. <sup>18</sup> Ra Anumzamo'a huno, Vahe'mokizmi antahintahi'zane zamava zanena ko ke'na antahi'na hu'noanki'na, kokankoka vahe'ene maka ruzahu ruzahu zamageru'ma neraza vahe'enena, e'na eme zamazeri atru hugahue. Anama hanuge'za zamagra e'za Nagri hihamu hankaveni'a kegahaze. <sup>19</sup> Hanki ama ana nanekema eri tamagema senakura, ofri'ma mani'naza vahera huzmantesnuge'zama mago'a ru kumategama vanazana, Tasisima, Putima, Ludima, Mesekima, Tubalima, Javani kumate'ene hageri amu'nompima me'nea kumatamimpine huzmantesnuge'za vu'za Nagri ma nageza antahi'za osu'naza vahetera nagri hankavegura ome huama hugahaze. <sup>20</sup> Hanki maka tamagri naga'ma umani'naza moparegati vahe'mo'za maka tamagri nagara zamagra hosi afu zamifine, tonki afu zamifine, kemoli afu zamifine, karisi zamifine zamavarentete'za zamavare'za nagri ruotge agona Jerusalemia egahaze huno Ra Anumzamo'a hu'ne. Israeli vahe'mo'zama witi ofama hunaku'ma, nagri navure'ma agruma hu'nea zuompa fima witima erinte'za nagri mono nompima vazaza hu'za zamagira zamavare'za egahaze. <sup>21</sup> Anama hutesnage'na mago'a nagara pristi erizante huhampari nezmante'na, mago'a nagara huhampari zamantesnuge'za Livae naga manigahaze huno Ra Anumzamo'a hu'ne. <sup>22</sup> Nagra Ra Anumzamo'na amanage hu'na nehue, Kasefa monane kasefa mopama tro'ma hanua monane mopamokea nagri navure mevava hugaha'e. E'na hukna huno tamagripinti'ma fore'ma hanaza vahe'mo'za mani vava hu'za vanageno, zamagri zamagimo'a fananea osuno mevava hugahie. <sup>23</sup> Mago kasefa ikanteti vuno mago ikante vutere hanigeno, mago Sabati knareti vuno mago Sabati knare'ma vuterema hanige'za, maka ama mopafi vahe'mo'za e'za nagri navuga zamarena eme re'za mono hunantegahaze huno Ra Anumzamo'a hu'ne. <sup>24</sup> Ana'ma hute'za atirami'za vu'za, nagri kema ruhantagi naza vahe'ma fri'naza zamavufaga ome zamagesnazana, anama fri'naza vahe zamavufagafima mani'naza kanimo'zanofrisnageno, tevema nezamarea tevemo'enena asura osugahie. Maka vahe'mo'zama ana vahe zamavufagama kesnazana, hinimnage huno zamagotegahie.

## Jeremaia

### Jeremaia Kre'nea Avontafere

*Anumzamo Jeremaiama agi huteno eri'zama ami'nea naneke*

<sup>1</sup> Ama nanekea Benjamiini nagamofo mopafi me'nea rankuma Anatoti kumeate nemaniza pristi vahepinti, mago ne' Hilkia'e nehaza ne'mofo nemofo Jeremaia huama hu'nea naneke. <sup>2</sup> Ama ana nanekema Ra Anumzamo'ma agafama huno Jeremaiama asami'neana, Amoni nemofo Josia'ma Juda vahe kinima manino egeno 13nima hia kafufi asami'ne. <sup>3</sup> Hagi Josia nemofo Je-hoiakimi'ma Juda vahe kinima manino'ma e'nea knafinena Ra Anumzamo'a ana zanke huno Jeremaiana nanekea asamigeno, huama huno ne-egeno, Josiana mago mofavre'a Zedeki'ama kinima efore huteno manino egeno 11nima hia kafure ehanati'ne. Anama 11nima hia kafumofona 5fu ikampi ha' vahe'mo'za e'za Jerusalemi kumapi vahera eme zamavare'za ru moparega ome kina humzante'naze.

<sup>4</sup> Anante Jeremai'a huno, Ra Anumzamo'a amanage huno nasami'ne. <sup>5</sup> Antakamofo arimpafina kazeri forera osune'na ko kagrira kage'na antahi'na hu'noe. Hagi negarera'a kaseogante'nege'na ko kagrira kazerinte ruotage nehu'na, kokankoka vahete Nagri kasnampa vahe manigahane hu'na kagrira huhampri'noe. <sup>6</sup> Ana ke'ma hige'na nagra kenona hu'na, Ra Anumzana Anumzamoka nagra mensi kasefa mofavre mani'noanki'na, vahe avufima keagama hu'zana antahini osu'noe hu'na hu'noe. <sup>7</sup> Hianagi Ra Anumzamo'a amanage huno kenona hu'ne. Kagra mofavre mani'noe hunka osuo. Nagrama inantego vuoma hu'na hugantesua kumatega nevunka, maka nanekema kasamisuana ome huama hunka vahera zamasamigahane. <sup>8</sup> Hagi mago vahekura kagra korera osuo. Na'ankure Nagra kagrane manine'na kegava hugantegahue huno Ra Anumzamo'a hu'ne. <sup>9</sup> Anagema huteno'a Ra Anumzamo'a azana antegamateno nagite avako nehuno amanage hu'ne, antahio, menina Nagra nanekeni'a kagri kagipi ama nentoe. <sup>10</sup> Hagi menina Nagra kagrira huhampruankinka, kokankoka vahete'ene kinimo'ma kegavama hu'nea mopafinena vano nehunka, ko'ma me'nesiazana eri tasagi hune atrenka, ko'ma menesiazana eri taganavinetrenka, ko'ma me'nesiazana eri haviza hunetrenka, ko'ma me'nesiazana eri akaha hunetrenka, kasefaza eri otinka neginka, kasefaza hankregahane. <sup>11</sup> Anante Ra Anumzamo'a amanage huno nantahige'ne. Jeremaiaga na'a negane? Huno hige'na nagra hu'na, Almoni zafamofo azankuna'a negoe hu'na hu'noe. <sup>12</sup> Anagema hugeno'a Ra Anumzamo'a huno, Ha tamage hunka keama hane. Hagi Nagra keni'are navu ante'na ke'nesanugenno maka zama fore hugahie hu'nama hu'noa nanekemo'a nena raga'a regahie. <sup>13</sup> Hagi anante Ra Anumzano'a mago'ene ete nantahigeno, Menina na'a kane? Hige'na nagra kenona hu'na, kavofi me'neno krakra nehia timo noti kazigati ruvarehi ramino tagrama mani'rontega e'za nehige'na negoe. <sup>14</sup> Anagema hugeno'a Ra Anumzamo'a huno, E'i ana zama kanana noti kazigati ranknazamo'a ru herafiramino eno ama mopafima nemaniza vahera eme zamazeri haviza hugahie. <sup>15</sup> Hagi antahio, Nagra noti kazigama me'nea moparamima kegavama hu'naza kini vahetamina ke hanuge'za e'za, Jerusalemi rankumamoho kafaraminte kini trazamia eme ante'za nemani'za, Jerusalemi rankumamoho vihu kegava eme kegava nehu'za

maka Juda mopafima me'nea kumataminena kegava hugahaze. <sup>16</sup> Hagi e'inahu zama hanua zamo'a, Nagri vahe'mo'zama havi zamavu zamava'ma hu'naza zante keaga huzmante'nna anara hugahue. Na'ankure zamagra Nagrira zamefi hunenami'za vu'za, zamazanteti'ma tro'ma hunte'naza havi anumzante kresramna nevu'za monora hunte'naze. <sup>17</sup> Hagi kagra Jeremaiaga otinka retrotra hunka, Nagrama huoma hu'na hugantoa nanekea vahera maka ome zamasamio. Kagra zamagrikura korora osuo. Hagi kagrama koro'ma hananke'na zamagri zamavuga kazeri koro hugahue. <sup>18</sup> Hagi Jeremaiaga antahio, mago rankumamofoma hanave vihu keginama hu kagizankna hu'na kagrira menina kazeri hanavenetina, aenireti fumaza zafa retru rentazankna kagrira nehu'na, bronsireti kuma kegina hugagi zankna hugahue. Ana hanugenka kagra oti hankave ti'nesanke'za, maka ama ana mopafi vhemo'zane Juda kini vhemo'zane, kva vhemo'zane, pristi vhemo'zane, Juda vahe'mo'zanena kazeri fenkami otregahaze. <sup>19</sup> Hagi zamagra hara hugantegahazanagi, hara hugagate oregahaze. Na'ankure Nagra kagrane mani'nena kaguvazigahue huno Ra Anumzamo'a huama hu'ne.

## 2

### *Israeli vahe'mo'za Ra Anumzamofo zamefi humi'naza naneke*

<sup>1</sup> Hagi Ra Anumzamo'a mago'ane amanage huno nasami'ne, <sup>2</sup> Kagra Jerusalemi kumapima nemaniza vahetega vunka, Ra Anumzamo'a amanage hie hunka ome huama hunka zamasamio. Zahufa vere vu'nea a'mo nevema avesi'ma hunteaza huta, maka tamagu'areti huta tamavesi nante'naza zankra nagesa antahi atrogeno nevie. Ana nehuta hozama onte hagage ka'ma kopima tamavrenama neogeta namagera navararita e'naze. <sup>3</sup> Hagi e'i ana knafina Israeli vahe'mota Nagri vahe fatgo mani'nazankita, hozafinti ne'zamo ese afu re'negeno hamreankna huta ruotge hu'nazane. Hagi ana ne'zama eri havizama haza vahera kumi hu'nazankino, knazamo zamazeri haviza hu'ne. Nagra Ra Anumzamo'na ama ana nanekea nehue.

<sup>4</sup> Hagi tamagra Jekopumpinti fore'ma hu'naza nagamotane maka Israeli mopafima mani'naza naga nofimota Ra Anumzamo'ma nehia nanekea antahio. <sup>5</sup> Ra Anumzamo'a amanage huno nehie, Tamagehemo'za Nagra nahaviza huzmantenoge'za nagrira natre'za afetera mani'naze? Zamagra kaza osu havi anumzana amanezante mono ome hunente'za, zamagra'a zamazeri amne'za se'naze. <sup>6</sup> Hagi Isipitima zamavare atiramina hagage ka'ma kopima mago'zama omanegeno vahe'ma vanoma nosazageno vahe'ma azeri haviza huzamo'ma avite'nea kokampima vugote'zamante'na vu'noa zankura zamagra Ra Anumzamo'na zamagekaninantaze. <sup>7</sup> Hagi Nagra tamagrira tamavre'na masaven tretre mopafina ogeta knare'nare ne'zana neneta zafa raganena ne'naze. Hianagi tamagra Nagri mopafima enemanita hinimnage avu'avaza huta mopa eri pehena hu'naze. Ana hazageno erisantima hategahazema hu'na tami'noa mopamo'a Nagri navurera hinimna vu'ne. <sup>8</sup> Hagi pristi vahe'mo'za Nagrikura, iga mani'ne? hu'za nohakaze. Ana nehazage'za kasegema kegavama hu'naza vahe'mo'za, Nagrira ke'za antahi'za nosaze. Hagi kva vahe'mo'zanena Nagrira keha renante'naze. Ana nehazage'za kasnampa vahe'mo'za Bali havi anumzamofo agifi kasnampa ke nehu'za, amunte omaneno kaza osu havi anumzante monora hunentaze.

<sup>9</sup> E'ina hu'negu Nagra mago'ane keaga huramante'naku nehue huno Ra Anumzamo'a hu'ne. Ana hu'neanki'na Nagrama keagama huramantesuanu, tamagrira keaga huramantene'na, tamagrama kase zamantesaza

mofavre naga'enena keaga hunezmantena, tamagri mofavre nagamokizmi mofavreraminena keaga huzmantegahue hu'na Nagra Ra Anumzamo'na nehue. <sup>10</sup> Hagi tamagra zage fre kaziga hagerina takaheta vuta ogantu Saiprusi mopafima nemaniza vhahera ome nezamageta, zage hanati kaziga vuta Kedari mopafima nemaniza vhahera ome zamageho. Kora amanahu zana fore higeta ke'nazaza fore nehifi? <sup>11</sup> Hagi mago'a mopafi vahe'mo'za tamage anumzana omani'neanagi havi anumza zamia atre'za ru anumzana amagera nentazafi? i'o anara nosaze. Hianagi tamagra Nagri vahe'mota hihamu masa'ane Anumzamo'na nontera, amunte omaneno kaza osu havi anumza avrente'naze. <sup>12</sup> E'i ana'ma nehaza tamavu tamava zanteria monamo'a antri huno koro nehuno, antahintahi hakare nehuno kea nosie huno Ra Anumzamo'a hu'ne. <sup>13</sup> Na'ankure Nagri vahe'mo'za tare hazenkema hu'nazana, Nagra enevia tinkna hu'na mani'noanagi nenatre'za, zamagra'a tinkeria kafi'nazanagi ana kerifina mopamo'a kekokako higeno timo'a mare novazie.

<sup>14</sup> Hagi Israeli vhahera kazokazo eri'za vahe omanige, kinafina manine'za kase zamantegera osu'neanki nagafare ha' vahe zamimo'za e'za maka zana eme agu'zanelu'za zamavare'za nevaze? <sup>15</sup> Ha' vahe zamimo'za laionimo krafagema nehiaza hu'za ranke huza kezati nezamante'za, mopazamia eri haviza hazageno anampina mago'zana omnetfa hu'ne. Ana nehu'za ne'onse kuma zaminena tapage hutrazageno anampina mago vhahera omanita hu'ne. <sup>16</sup> Hagi Isipi mopafina Memfisi kuma'ene Tapanesi kumapinti e'za Israeli vhahera eme tamazeriza tamaseni zokara vazagate atre'haze. <sup>17</sup> Hagi tamagri hazenkemofo mizama'a ama ana kna zamo'a tamagritera e'ne. Ra Anumzana tamagri Anumzamo'ma tamavreno kante'ma neviana atreta tamefi'ma humiza zante anara hu'naze. <sup>18</sup> Hagi Isipi vahe mopafima vu'nazana na'a mago knare'za erinaku vu'naze. Tamagra Naeli timpinti ti nenaku vu'nazafi? Na'a mago knare'zana erinaku Asiria mopafinena vu'naze. Tamagra Yufretisi timpinti ti nenaku vu'nazafi? <sup>19</sup> Tamagrama hu'naza kefozamo kna zana tamino tamazeri fatgo hugahie. Ana nehina Nagri'ma natretama vu'naza zamo keaga huramanteno tamazeri fatgo hugahie. Ra Anumzana tagri Anumzama atreta tamefi'ma hunemita agri agoragama omani nonana, haviza huno osugaza hu'none huta antahigahaze. Nagra Anumzana Monafima sondia vahe'mokizmi Ra Anumzamo'na ama ana nanekea nehue.

<sup>20</sup> Hagi korapara tamagrira karenamare zafareti tamanankempina rusi hute'za knama neramiza zafa ru tamana hunetre'na, seni nofiteti'ma kinama huramantegahue kazokazo eri'zama e'neriza nofira rukano hutre'noe. Hianagi tamagra huta Agri eri'zana e'origahune huta nehaze. Anage nehuta agonaramimpine anina kuronkuroma hu'nea zafa agafafina monko a'nemo'za nehazaza huta havi anumzantera monora hunentaze. <sup>21</sup> Hianagi knare zantfama hu'nea wainimofo nofiteti kitagi'za mopafi hankraza kna hu'na tamagrira hankre'noe. Hianagi menina na'a higeta hageteta havizama hu'nea afi wainia fore nehaze? <sup>22</sup> Hagi tamagra laema nehaza hankave marasini reti'ene rama'a soporeti tamavufga sese hugahazanagi, ana havi zama hu'naza zamofo avame'zana Nagri navurera amne me'nege'na negoe, huno Ra Anumzamo'a hu'ne. <sup>23</sup> Hagi ana kegura tamagra huta, tagra Bali havi anumzamofo amema'arera monora huonte'nonanki, inankna huta tagra'a tazeri pehena hu'none huta nehaze. Hianagi tamagrama kasrino havizama hu'nea avu'ava zama agupofima hu'naza zana keho. Hagi tamagra a' kemoli afu'mofo agifi

he'negeno, krahakraha huno ve kemoligu hakeno vano hiankna huta havi anumzankura haketa vano nehaze. <sup>24</sup> Hagi tamagra, afi' a' donki afu'mo agafi ahe'negeno zahopi agona antesga huteno mana'mana huno vano hiankna nehaze. Ana knafina agriku'ma hazza ve tonki afu'moza agrikura hakeza vano nosazanki agra'a hakeno ve tonkigura vano nehie. <sup>25</sup> Hagi tamagra Israeli vahe'mota, tamagareta havi anumzante'ma vano nehzageno tamanankemo'ma hagagema nehia zana nazupa atregahaze? Hianagi tamagra huta, havi anumzama avesima nenteta amage'ma nentona zana otregahunanki, kagra kea osunka manio huta Nagrikura nehaze.

<sup>26</sup> Hagi tamagra Israeli vahe'motane, Israeli kini vahe'motane, kva vahe'motane, pristi vahe'motane, kasnampa vahe'motanena, tamagra kumzafa vahe'mo kumzafa nesageno keno eri fore higeno agazegu hiankna huta tamagazegu hugahaze. <sup>27</sup> Hagi tamagra zafareti antre'za tro'ma huntenuaza havi anumzankura huta nerafa'e nehuta, havere'ma eri pehe hu'za tro'ma hunte'naza havi anumzankura agra kaserantene huta nehuta tamefi hunami'naze. Hianagi tamagra'ma hazenkefima unefreta Nagrikura eme tagu'vazio huta krafagea nehaze. <sup>28</sup> Hianagi tamagra'a tamazanteti'ma tro'ma hunte'naza havi anumzantamina iga mani'naze? Zamagrama muha'ma hu'nesanu'za eme tamaza hugahazanki, knazampima ufresuta ana havi anumzantami kehinke'za e'za eme tamagu vaziho. Na'ankure ana havi anumzantamima tro'ma huntenuaza, Juda mopafima me'nea ranra kumatamimofo amente amente tro huntetere hu'naze. <sup>29</sup> Tamagra nahigeta Nagrama osu'noa zankura huta hazenke hurante'ne huta nehuta Nagrira kehara renenantaze huno Ra Anumzamo'a hu'ne. <sup>30</sup> Tamagri mofavre nagara zamazeri fatgo hunaku knazana zamuanagi, zamagra ana zankura ontahi'naze. Ana nehzageta tamagra laionimo zagagafa aheno neankna huta kasnampa valera zamahe fri'haze. <sup>31</sup> Hagi ama knafima fore huta mani'naza vahe'mota Ra Anumzamo'ma nehia nanekea antahiho. Nagra Israeli vahetera hagege kokankna nehu'na, hanizamo kintrako hu'nea kokankna zamagridera hu'nofi? Hagi nahigeta Nagri vahe'mota huta, hago menina Anumzamo'ma kegavama hurante'nea zana atreta fru huta manunankita Agri kvafina omanigahune huta nehaze. <sup>32</sup> Hagi tamagrama antahi'zana mago mofamo'a avasasema nehia zankura agera nekanigeno, zahufa a'mo'a ese'ma neve'enema aravema ha'a zupama antani'nea kukenagu'enena aganera nekanifi? I'o anara nosaze. Hianagi Nagrira za'za knafi zamagera kani-nenamize. <sup>33</sup> Tamagra Israeli vahe'mota, karuna kereti'ma masave huno monko avu'ava zama hu'zantera antahini hu'naze. Ana hu'nage'za monko zante'ma vugotama hu'naza a'nemo'za tamagripinti rempi hu'za nentahize. <sup>34</sup> Hagi zamunte omaneno ke'zami omane vahe'mokizmi koromo'a tamagri kukenarega tusiza hu'ne. Tamagra tamavufintira negazage'za tamagri nona eme tapage hu'za musufa ose'nazanagi, tamagra zamahe fri'haze. <sup>35</sup> Hagi kagra amanage hunka nehane, nagra mago hazenkea osu'noankino Ra Anumzamo'a arimpa ahe onantegahie hunka nehane. Hianagi antahio, kumira osu'noe nehanankinka keagafi manigahane. <sup>36</sup> Nahigenka kama nevana kana atrenka kavua keganti kegama hunka kazama huzankura nehakane? Korapa'ma Asiria vahe'mo'zama kazama osazagenkama kagazegu'ma hu'nana hunka, Isipi vahe'mo'za kazama osanagenka kagazegu hugahane. <sup>37</sup> Hagi kagrama muha'ma nehana valera Ra Anumzamo'a amefi huzamisigenka kagazegu nehunka kazana kasenire ante'enka ana kumara atrenka egahane. Ana vahe'mo'za kagrira tamage

hu'za kaza osanagenka knarera hunka omanigahane.

### 3

#### *Israeli mopama eri havizama hu'naza zamofo naneke*

<sup>1</sup> Hagi mago ne'mo'ma nenaroma a'ma atrenigeno ana a'mo'ma vuno ru vema ome eritenigeno, neve'a ete vuno ana ara ome avregahifi? E'inama hanuno'a Israeli mopa eri himna vugahie. Hianagi tamagra monko a'mo ve erige atrege huno vano hiaza huteta, menina Nagrite neazo huno Ra Anumzamo'a hu'naze. <sup>2</sup> Hagi tamavua kesga huta mago zama omane agonaramimpima kesazana, ana maka agonafina havi anumzante mono hunenteta monko avu'avaza hu'naze. Tamagra monko a'mo vene'nema esagu kante mani'neno avunteno keaza nehuta, nonkuma'a omne Arapu vahe'mo'zama ka'ma kokampi vano vano hiaza huta savri avu'avazane kefo avu'avazama huta vanoma nehaza zamo mopa eri haviza nehie. <sup>3</sup> E'i ana agafare Nagra ata kora atrogeno mopafina runontege'na, ko'enena atrogeno mopafina runonte. Ana nehuhanagi tamagra monko avu'avaza hu'nea a'mo agaze eri amne hiaza huta tamagazegura nosaze. <sup>4</sup> Hianagi tamagra Nagrikura huta, osi'ma mani nontegati'ma eno amare'ma e'neana, kagra nerafaqa mani'nenga, tagrira tavesirantenka e'nane huta nagrikura nehaze. <sup>5</sup> Anage nehuta tagrira za'zatera arimpa aherante vava huno nevuno tazeri haviza osugahie huta Nagrikura nehaze. Hianagi tamagra'a tamavesi avaririta kea ontahi havi avu'ava zana huvava huta nevaze.

#### *Israeli vahe'mo'za Anumzamofoma atre'naza naneke*

<sup>6</sup> Hagi Josaia'ma kinima manino Juda vahe'ma kegavama hu'nea knafina, Ra Anumzamo'a amanage huno nasami'ne. Nagri'ma natre'naza Israeli vahe'mo'zama hu'naza avu'ava zana kenampi? Nevente'ma mani fatgo osu a'mo'ma hiaza hu'za maka agonaramimpine, ranra zafaramimofo agafafinena vu'za monko a'nemo'za nehzaza hu'za havi anumzantera monora ome hunte'za vano hu'naze. <sup>7</sup> Hagi ana'ma hazage'na Nagrama nagesa antahuana, ana a'mo'a ana'ma huno vano hutesuno'a, nagrite ete egahie hu'na nagesa antahi'noe. Hianagi anara osigeno keontahi nenunkna 'a Juda'a anama hia avu'ava zana avufinti ke'ne. <sup>8</sup> Hagi nagri'ma natre'za vu'naza Israeli vahe'mo'za havi anumzante vu'za mono hunente'za monko avu'ava zama nehzaza zama nege'na, a'ma netre'za krenezamiza avo krenezami'na huzmante'noe. Ana'ma hua zana keontahi nenunkna Juda'a ko ke'neanagi korora huno ana monko avu'ava'ma nehiazana otre'ne. <sup>9</sup> Na'ankure Israeli vahe'mo'za monko avu'ava zana amane zane hu'za zamagesa nentahi'za zafare'ene havereti'enema tro'ma hu'naza havi anumzante mono'ma hunente'za, monko zama haza zamo mopa eri haviza hu'naze. <sup>10</sup> Hagi Israeli nenunkna Juda'a Nagrira natreno vuno havi avu'ava zana ome hu'neanagi, nagritera rukrahera huno eno agu'reti huno asunkura osu'ne. Hianagi agra Nagrira eme renavataga huno, amega'ati agu'a rukrahe hu'naze. Nagra Ra Anumzamo'na amana nanekea nehue. <sup>11</sup> Hagi anante Ra Anumzamo'a mago'ane amanage huno nasami'ne, Israeli vahe'mo'za nagrira natre'za vazage'za, Juda vahe'mo'za keontahi avu'ava hu'naze. Hianagi Israeli vahe'mo'za Juda vhahera zamagatere'za osi'a knare hu'naze. <sup>12</sup> E'ina hu'negu Jeremaiaga noti kazigama me'nea mopafima nemaniza vahetega vunka amanage ome huo, Isreliga nagrira natrenka vu'nana a' mani'nananki etenka nagrite eno. Anama hananke'na Nagra narimpa aheogantegahue. Na'ankure nagra nasunku Anumza mani'noankina narimpa ahegante vava osugahue huno

Ra Anumzamo'a hu'ne. <sup>13</sup> Hagi tamagra hago hazenke hu'none huta kumitamia huama nehuta, Ra Anumzana tagri Anumzamoka keka'a runetrageta, ani'na kuronkuro zafaramimofo agafafina, havi anumzantera monora ome hunenteta, kagri nanekeea rutagreta amagera onte'hone huta tamasunkura hiho huno Ra Anumzamo'a nehie. <sup>14</sup> Hagi ke nontahita mani fatgo nosaza mofavre nagamota, Nagrite ete echo huno Ra Anumzamo'a hu'ne. Na'ankure nagra tamagri kva mani'noe. Mago kumapintira mago vahe nev're'na mago nagapintira tare vahe zamavaretere hu'na Saioni agonare vugahue. <sup>15</sup> Ana hute'na Nagri nagu'amo'ma hu'nenia zama hu'nesaza vahe kva huhampari zamantegahue. Ana hanuge'za manine'za Nagri antahi zanteti'ene ama' antahizanteti kegava huramante'za tamavre'za vugahaze. <sup>16</sup> Hagi ana knafima rama'a vahe'ma ome forehu hakarema huta ana mopafima mani avi'matesanuta, Nagri huhagerafi hvempage vogisima ko'ma knare knafima tamagranema me'nea zankura tamagesa antahi atresageno ovugahie. Ana vogisigura tamagesa ontahi tamagane kaninemita onkegahaze. Ana nehutma ru'enena huhagerafi hvempage vogisia kasefara trora osugahaze huno Ra Anumzamo'a hu'ne. <sup>17</sup> Hagi ana knazupa Jerusalemi kumakura Ra Anumzamofo kini tra me'ne hu'za nehanage'za, mika ama mopafi vahe'mo'za Jerusalemi kumate eme atru hu'za Ra Anumzamofo agi'a ahentesga hugahaze. Ana nehu'za keontahi havi zamagu zamagesamofona amagera ontegahaze. <sup>18</sup> Hagi ana knafina Juda naga'mo'zane Israeli vhahemo'zanena noti kaziga moparegama umani naregatira eri mago hute'za erami'za, Nagrama zamafahe'ima zamuge'za erisantima hare'naza mopafina ete emanigahaze.

<sup>19</sup> Hagi Ra Anumzamo'a huno, Nagra amanage hu'na antahintahia hu'noe. Nagra ama vahera zamavare'na Nagra'a mofavregna hu'na kegava huzamantegahue hu'na nagesa antahite'na, erisantima haresaza zana ama mopafina magore huno omane'nea kna mopa hentofa mopa tam'i'noe. Ana nehu'na nagesama antahuana, Nagrikura nerafa'e ne-huta natreta ovu namage antesazegu antahintahia hu'noe. <sup>20</sup> Hianagi tamagra Israeli vahe'mota mago a'mo'ma nevente mani fatgo osiakna huta, nagriteria mani fatgo osu'naze huno Ra Anumzamo'a hu'ne. <sup>21</sup> Hagi agonaramimpintira rankrafage nehazage'za vahe'mo'za antahi'naze. E'i Israeli vahe'mo'za Ra Anumzamofontega zavi krafa nehu'za zamasunku hu'naze. Na'ankure Ra Anumzana zamagra'a Anumzana atre'za havi avu'avaza nevariri'za, antahi omi'naza zanku anara hu'naze. <sup>22</sup> Hagi ke ontahi mofavre nagamota ete nagrite enke'na ana ke ontahi tamavu tamava zampintira tamazeri kanamara'neno. Anagema hanuge'za veamo'za hu'za tagra ete kagrite'ma neonana, na'ankure kagra Ra Anumzana tagri Anumza mani'nanketa kagritera neone hu'za hugahaze. <sup>23</sup> Tagrama monko avu'avazama nehuta, ne'onse agonaramimpine ranra agonaramimpima havi anumzantaminte'ma mono'ma huzmanteta vanoma hu'nona zampintira mago tazahu'zana e'ori'none. Tamage Ra Anumzana tagri Anumzamo agrake Israeli vahe'mota tagura vazigahie. <sup>24</sup> Hianagi tagra mofavrema mani nontegati'ma eno meninte'ma egetama keta e'nonana, tafahe'za maraguzati'za eri fore'ma hu'naza sipisipima, bulimakaoma, ne' mofavrezamima, mofa'nezaminena agaze'a omne Bali havi anumzamofo ami vagare'naze. <sup>25</sup> Ana hu'negu tagra tagazegu huta kepri nehune. Na'ankure tagrane taghe'zanena Ra Anumzana tagri Anumzamofo avufi kumira hu'none. Tagrama mofavrema mani'nonteti'ma eno amare'ma egeta,

Anumzamofo nanekea antahita amagera onte'none.

## 4

### *Noti kazigati'ma Juda mopare'ma knazama e'nea zamofo naneke*

<sup>1</sup> Hagi Ra Anumzamo'a huno, Israeli vahe'mota enaku'ma hanuta nagrite ete rukrahe huta echo. Hagi haviza huno agoterfa anumzaramina Nagri navureti'ma eri atresuta kana atreta hazagreta havifina ovugahaze. <sup>2</sup> Hagi tamagrama fatgo huno refkohu avu'ava nehuta, fatgo avu'ava'ma nehuta kasefa hu'na mani'noa Anumzamo'na nagifima hvempama hanage'na, Nagra asomu huramantenuge'za ruga'a vahe'mo'zama nege'za, e'im a hanaza hunka asomu huranto hu'za eme nehu'za, Nagri nagi'a ahentesga hugahaze. <sup>3</sup> Hagi Ra Anumzamo'a amanage huno Juda vahe'ene Jerusalemi vaheku'enena hu'ne. Avimzana ave've trazampina ohankretra, hankave mopamo'ma nehiaza huno tamagu'amo'ma hankavema ti'neazana, rekorita rupopo huteta avimzana aseho. <sup>4</sup> Hagi Juda vahe'motane Jerusalemi vahe'motanena havi tamagutamagesa atreta tamagu'a rukrahe hihi. A'nama osnazana Nagri narimpa he'zamo'a tevemo hiza huno rukru hina, mago vahe'mo'a rusura osugahie. Na'ankure tamagra kefo avu'ava'ma hu'naza zante anara hugahue.

<sup>5</sup> Hagi Ra Anumzamo'a huno, Juda vahe'ene Jerusalemi vaheku'enena amanage hunka zamasamio hu'ne. Amama mani'naza mopamofo agu'afina maka kaziga ufena nereta, ranke huta kezatita amanage hihi. Maka vahera eme eri tru hutenketa, koro freta hankave vihu keginama hu kagi'naza kumatamimpi ufresune huta hihi! <sup>6</sup> Hagi mago avame zana flekia tro huteta anamifi erintesga huta nevuta, Jerusalemi kumapima mani'naza vahera amanage huta korokea huzamaho. Ame huta koro freta vuta fra'ma kisaza kumaku hakeho. Na'ankure Nagra noti kazigati ranknaza atre'nugeno eno eme tamazeri haviza hugahie. <sup>7</sup> Hagi laionimo frakino mani'nefinti atriamiaza huno, ha' vahe'mo'za kumazamifintira e'za tamagri kumara eme eri haviza hugahaze. Ana vahera maka nonkumatami eri haviza nehaza vaheki'za maka zama mopatamifima me'neana eme eri haviza nehu'za, ranra kumatamina eme ahetapage hutresageno anampina magore huno vahera omanitfa hugahie. <sup>8</sup> E'ina hu'negu tamagra tamasunku kukena nentanita, tamasunku huta tusi zavi krafage hihi. Na'ankure Ra Anumzamo'a tusi arimpa aheneranteankino, ana rimpa ahezamo'a mevava huno nevie. <sup>9</sup> Hagi Ra Anumzamo'a huno, anazama fore'ma hania knafina kini vahe'ene kva vahe'mo'zanena, antri nehanageno muha zazamia omanegahie. Ana nehanage'za pristi vahe'mo'za tusi koro nehanage'za, kasnampa vahe'mo'za antahintahi hakare nehu'za mago nanekea osugahaze. <sup>10</sup> Hagi anante nagra amanage hu'na hu'noe. Ra Anumzamoka Jerusalemi kumapi vaheku'ma hunka, tamarimpa frune knare huta manigahaze hunka'ma hu'nana kegura, zamagra hu'za agra reravatga hu'neankino, ha' vahe'mo'za bainati kazinteti tananke eme rukafari'za nehaze hu'za nehaze.

<sup>11</sup> Hagi mago kna ne-eankino Ra Anumzamo'a Jerusalemi vahekura huno, hagage kokampima me'nea agonaramimpinti amuhonentake zaho'mo zahora erino nagri vahetera egahie. E'ina zahora zamana zamana hu'neno witi honama eri neharea zahora omane'neanki, <sup>12</sup> e'i ana zahora Nagra huntanena egahiankino, hankavenentake zaho atufeno egahie. Ana nehu'na Nagra ana vahera keaga huzamantegahue. <sup>13</sup> Hagi anante nagra Jeremaia'na amanage hu'na vahera zamasam'i noe. Keho, ha'ma hurantesia ne'mo'a ko'ma runaku'ma nehia hampomo rehanintiri hiankna huno

tagrama mani'nontega ne-e. Ana ne'mofo karisiramimo'za kagigagi zahokna hu'za neazage'za, hosi afu'aramimo'za tumpamo'ma tusi avunema anteno hareno vanoma nehiamo'a agatere'za zamagare'za neaze. Anazama nege'na hazenkefi manunankita haviza hu'none hu'na hu'noe.<sup>14</sup> Hagi tamagra Jerusalemi kumapima nemaniza vahe'mota, kefo avu'ava zama nehaza zana atreta tamagu'a eri agru hiho. E'ina'ma hanuta tamagu vazi'zana erigahaze. Nama'a zupa tamagra kefo antahi'zana atre'nageno tamagu'afina meno vugahie.<sup>15</sup> Hagi tamagrite'ma fore'ma hania knazamofo nanekema eri'za eme huama hunaku'ma neaza vhahera, Dani kumateti'ene Efraemi agona kokampima me'nea kumatamimpi vahe'mo'za eri'za neaze.<sup>16</sup> Hagi ana vhahera Anumzamo'a zamasamino, ana mopafima mani kagi'naza vahetamine, Jerusalemi kumapima nemaniza vahetaminena amanage huta zamasamaho, Afete moparegati ha' vahe'mo'za ibige nehu'za Juda mopafima me'nea ranra kumatamina hahu zamantenaku neaze huta hiho.<sup>17</sup> Ana ha' vahe'mo'za e'za Jerusalemi kumara, hozare kegava nehaza vahe kna hu'za kumatamia eme avazagi kagigahaze. Na'ankure Jerusalema nemaniza vahe'mo'zama Nagri nanekema ru hantagi'za ha'ma renante'naza zante anara huzmantegahaze huno Ra Anumzamo'a hu'ne.<sup>18</sup> Hagi tamagrama manita azafima hu'naza hazenkere ama ana knazamo'a tamagritera egahie. Ana hugahiankino ana knazamo'a tusi'a akama hiiankna huno tamata neramino tumo'tamia retanegahie.

### *Jeremaia'ma vahe'agu asunku huno zavi ate'nea naneke*

<sup>19</sup> Hige'na nagra Jeremaia'na anankema nentahugen'o, nagu'amo'a razampi nata negrigeno, tumonimo'a vagri vagri nehige'na mani so'ea osu'noe. Na'ankure ha' vahe'mo'za ha' eri'za ne-eza, ibige nehu'za ufema neraza agasasagema nentahugen'o anara hu'ne.<sup>20</sup> Hagi nagra negogeno knazamo'a kankamuna omino anamagenare anamagenarera huno ne-eno mika ama mopafi vhahera zamazeri haviza nehige'na ke'noe. Ana ne-huno nagri seli nontamina ame huno eri tapage hunetreno, asante'ma tafi tavaraveramina eri tagato higeno mopafi evurami'ne.<sup>21</sup> Hagi ha' vahe'mo'za nazupa krauefa (fleki) zamia erikasi atre'za nevanage'na nege-sugeno ibigema nehu'za ufema neraza agasasankea ome vagaregahie?<sup>22</sup> Hagi Ra Anumzamo'a huno, hago Nagri vahe'mo'za negi nene'za Nagrira ke'za antahi'za osaze. Ana nehu'za ne'onse mofavre naga'mo'zama ne-hazaza hu'za ama' antahi'zana e'orize. Hagi tamagra havi avu'ava zama hu'zantera knare hu'nazanagi, fatgo avu'ava zama hu'zana ontahi'naze.

### *Jeremaia'ma ava'na gna zama kene'a zamofo naneke*

<sup>23</sup> Hagi nagra ama mopafima ke'noana mago zana omanetfa higeno, menima me'neankna huno omame'neanki mopamo'a avugosa osu'ne. Ana hige'na monare'ma koana remsama nehia tavitamina omame'ne.<sup>24</sup> Hagi ranra agonaramine ne'onse agonaramima zamagoana imi enerigeno, tore vare nehazage'na ke'noe.<sup>25</sup> Hagi anama nehige'nama keganti kegamama hu'na koana, magore hu'na vhahera ozamage'noe. Ana higeno maka namamo'za hare'za fre vagare'naze.<sup>26</sup> Hagi nagramma koana ko'ma afovage nehuno masavenke huno tretre'ma hu'nea mopamo'a menina hagege huno ka'ma kokankna higeno, miko rankuma tamimo'a haviza huvgare'ne. E'ina zantamima fore'ma hu'neana Ra Anumzamo tusi rimpa ahezamantegeno anara hu'ne.<sup>27</sup> Hagi Ra Anumzamo'a amanage hu'ne. Nagra amama mani'naza mopa maka eri haviza hugahuanagi, ana makara eri haviza

huvaga oregahue. <sup>28</sup> E'ina agafare mopamo'a zavi krafa nehanigeno, monamo'a evuno hanintiri hugahie. Na'ankure nagra henkama fore'ma hania zana ko huama hu'noanki'na, antahizani'a ete eri rukrahera osugahue. <sup>29</sup> Hagi hahunaku hosi agumpi mani'za neaza sondia vahe'ene, atifi keve erinte'za nehaza sondia vahe'mokizmi zamagasarankema nentahi'za, maka rankumatamimpima nemaniza vahe'mo'za kumara atre'za avonompine, have agonafine frazageno magore huno ana kumatamimpina vahera omanitfa hu'ne. <sup>30</sup> Hagi maka zanka'ama aguzama eme neruza maka zanka'ama eri hana'ma hu'za nevaza vahe'moka kagra na'a hugahane? Nahigenka kagra korankre hentofa kukena hu'enka, golireti'ma tro'ma hu'naza avasase zantamina eri nehankrenka kavurera penia fre'nane? E'ina avasase zantamima eri hankare'nana zantamimo'a kaza osugahie. Na'ankure kagrama kavesi nezmantana vahe'mo'za, kagrira kavesinogante'za kahe frisaza kanku nehakaze. <sup>31</sup> Hagi mago a'mo ese kna'a mofavrema anteku'ma nehigeno ata negrigeno krafama nehiankna krafage nentahue. Ana hu'neankino Saioni kumapi vahe'mo'za zamasimu ante'zanku nehu'za, kezati'za ha'vahe'mo'za nahe friku nehzanki eme naza huo, naza huo hu'za nehaze.

## 5

### *Maka Juda vahe'mo'za kumi hu'naza naneke*

<sup>1</sup> Hagi Ra Anumzamo'a huno, Jerusalemi kumapima ne'onse kantamima me'nefine, vahe'ma atruma nehaza kumapinenam tamagareta ufre efre huta fatgo vahe'ma mani'nesagura hakevagareho. Hagi ana'ma nehuta fatgo avu'ava'za nehuno tamage avu'ava zanke'ma nehania vahe'ma mago'ma keta eri fore'ma hanage'na, Jerusalemi rankumara kumi'a atrentegahue. <sup>2</sup> Hagi kasefa huno mani'nea Ra Anumzamofo agifi huvempa nehune nehazanagi, zamagra havige nehaze. <sup>3</sup> Ra Anumzamoka tamage avu'ava zanke'ma nehaza vaheku kavua antenka nehakane. Kagra vaheka'a sefura zaminka zamazeri fatgo nehananagi ana zankura zamagesa ontahi'naze. Kagra knazanteti zamazeri haviza hu'nananagi, Kagrama zamazeri fatgoma hu'zankura zamavesra hu'ne. Zamavugosamo'a han-kavetino havegna hu'nege'za, zamagu'ama rukrahe'ma hu'zankura zamavesra nehaze. <sup>4</sup> Ana hige'na nagra amanage hu'na hu'noe. E'ina vahera zamunte omaneno antahintahizamia omane vaheki'za, Ra Anumzamofo avu'ava zana ke'za antahi'za osu'naze. Ana nehu'za zamagri Anumzamo'ma amage anteho huno'ma hu'nea avu'ava zane tra kenena amagera non-taze. <sup>5</sup> E'ina hu'neanki'na nagra vu'na kva vahezamine ome keaga hu'na kegahue. Na'ankure Ra Anumzamofo avu'avaene Anumzazmimofo tra kenena keza antahiza hu'naze. Hianagi ana kva vahe'mo'za zamagnena Anumzamo'ma zami'nea eri'zana e'nor'i'za Agri nanekea rutagre'za agorga'a omani'naze. <sup>6</sup> E'ina'ma hu'nazagu huno zafa tanopafinti laonimo eno eme zamahe nefrisigeno, hagage kokampinti afi kramo eno eme zamazeri haviza hugahie. Ana nehanigeno afi pusimo'a eno ranra kumazamimofo tvaonte eme kafo anteno mani'neno, iza'o kumapinti'ma atiramisia vahe zamaheno nenaku emanigahie. Na'ankure keontahi kefo zamavu zamava hu'nazagu anara hugahie. <sup>7</sup> Ra Anumzamo'a huno, tamagrira kumira atre oramanterahue. Na'ankure tamagri mofavremo'za zamefi hunenam'i'za, anumzana omani'neanagi amne zante huvempa hu'naze. Nagra ne'zana zamuge'za nezamu hu'nazanagi, zamagra monko avu'avaza nehu'za monko avu'ava zama nehaza nontega erintaghu'za vu'haze. <sup>8</sup> Zamagra ve hosi

afu'mo'a a' hosi afu negegeno agafi neheanka hu'za, tava'ozamire'ma ne-maniza vahe'mokizmi a'nea ke zamanunu nehaze.<sup>9</sup> Ra Anumzamo'a huno, E'inahu zamavu zamava zanteran hazenke zamigahue. Nagra tamagerfa hu'na tamagrama hazankna avu'ava zama hanazā vhahera knazana zami'na zamazeri havizana nosu'na, e'inahu avu'ava zama nehaza vhahera nona huo zamantegahufi.<sup>10</sup> Tamagra ha' vahe'mota Juda vahe waini hozafi tinkante tinkante nevuta ragama rente'nesiana eri haviza nehuta, osi'a netreta waini azankuna tamimo'ma havizama hu'neniana akafrita eri atreho. Na'ankure zamagra ana vhahera Ra Anumzamo'na vhahera omani'naze.<sup>11</sup> Hagi Israeli vahe'ene Juda vhahemo'zanena Nagrira zamefi hunami vagare'naze huno Ra Anumzamo'a hu'ne.

<sup>12</sup> Israeli vahe'mo'za Ra Anumzamofonkura havige hu'za, Agra mago zana hunoranteno, hazenke zana atresigeno tagritera omegahie. Ana nehuno ha' zane agatonto zanena atre'nigeno omegahie hu'za nehaze.<sup>13</sup> Hagi kasnampa vahe'mo'za e'inahu naneke nehazanagi ana naneke zamimo'a zahokna huno nena'a omane naneke nehaze. E'ina hu'negu hazenke'za fore hugahie hu'zama nehaza kasnampa kemo'a zamagri zamavate efore hanige'za kegahaze.<sup>14</sup> Ana hu'negu huno Monafi sondia vahe'mokizmi Ra Anumzamo'a amanage huno hu'ne. Vahemo'zama e'inahu kema nehaza agafare Jeremaiaga kagipi Nagra naneken'i a antesanugenka huama nehanankeno, kagipintira teve nefakna huno atiramino, tevema teaza huno ana vhahera tesige'za akrukru hu'za teveregahaze.<sup>15</sup> Hagi Ra Anumzamo'a huno, Nagra ru kazigati ha' vahe'ma zamavare'na esuana hankavenentake vhaheri'za korapa knafi mani'za e'naza vahe zamavare'na a'nena maka Israeli vahe'mota hara eme huramantegahaze. Ana vahe'mokizmi zamerura tamagra ontahi nazankita kema hanazana antahi amara osugahaze.<sup>16</sup> Ana ha' vahe'mokizmi sondia vahe'mo'za hankaveti'za hara nehaza vhaheri'za, keveretira hantga osu'za rama'a vahe zamahe nefrizva vahe mani'naze.<sup>17</sup> Hagi ana vahe'mo'za tamagri hozafima mene'a kave'ene, nontamifima me'nea kavera eme ne'za eri hana nehu'za, mofavre naga'mokizmi ne'zanena eme ne'za eri hana hugahaze. Ana nehu'za sipisipine bulimakao afutaminena zamahe'za nevaga nere'za, grepi ragane fiki raganena tagi'za nevaga nere'za, hankave vihu keginama hu kagi'naza kumapi frakita tagu vazigahunema nehaza kuma'enena bainati kazinteti ha' eme huramante'za eri haviza hugahaze.<sup>18</sup> Hianagi ana knafima huzamantenuge'za e'za eme tamazeri havizama hanaza ha' vahe'mo'za, ana makara tamahne fanane huvaga oregahaze huno Ra Anumzamo'a hu'ne.<sup>19</sup> Hagi Jeremaiaga vahemamo'zama kantahige'za, nahigeno Ra Anumzana tagri Anumzamo'a amazana hunerante? hu'zama hanagenka amanage hunka zamasamio. Tamagrama mopatamifima mani'neta Anumzamofona tamefi hunemita, ru vahe'mokizmi havi anumzante monora hunte'naze. Ana hu'nazagu menina ru vahe mopafi umani'neta ana vahe'mokizmi eri'za eri zamantegahaze hunka zamasamio.

### *Ra Anumzamo'a hankave koroke huzamante'nea naneke*

<sup>20</sup> Hagi Ra Anumzamo'a huno, Israeli vahe'ene Juda vahe'enena amanage hunka zamasamio.<sup>21</sup> Kea ontahi neginagi vahe'mota kama antahih. Tamagrira tamavua me'neanagi tamavua nonketa, tamagesa me'neanagi nanekea nontahize.<sup>22</sup> Tamagra nahigeta Nagrira nagesga nosuta, Nagri navurera antri nehuta korora huta tamarena noraze. Nagra Ra Anumzamo'na hagerina tro hute'na, hagerimo'a amare eme tregahie hu'na mevava avame zana kahepa ante'na, evu'noankino ana isagana timo'a agatereno ovugahie. Hagi hagerimo'a kranto kranto huno ne-eno

rekazarino ra ageru runo egahianagi, anama ante'noa isagana agate ore-gahie. <sup>23</sup> Hianagi tamagra keontahita hankave tamagu tamagesane vahe mani'naze. Ana hu'nazankita rukrahe huta tamefi hunenamita natreta ufre efre nehaze. <sup>24</sup> Hagi zamagra hu'za, tagu'areti huta Ra Anumzana tagri Anumzamofona koro hunteta agri agorga manisune huza nosaze. Agra kora atregeno ne'zama hankre knare'ene, ne'zama hamre knarerera kora runen-tegeno, Agrake'za higeno ne'zamo'a kna fatgore fore nehigeta, huhampari terema hu'nea kna fatgore ne'zana nehamarone huta tamagesa nontahize. <sup>25</sup> Tamagrama haza havi avu'ava zamo kana rehiza higeno, knare'nare zantamimo'a eforera higeta nonkaze. Tamagri kumi'mo kana rehiza higeta ana asomura e'norize. <sup>26</sup> Nagri vahe'mota amu'nompina mago'a havi avu'ava nehaza vahe mani nazanki'za ana, vahe'ma zamazeri havizama hunakura, namazama nehu'za krifu ante'neza zaga kfa ufrerogu kva hazankna hu'za kva hune'za vahera zamazenerize. <sup>27</sup> Ana vahe'mokizmi nompina ruzahu ruzahu namarami azerite'za ekaeka kupi erivita zankna hū'za, vahera karuna kereti rezamatga hu'za fenozana eri'za, nozamifina eri avinetaze. E'ina'ma haza zamo higeno zamagimo'a haruharu hige'za feno vahera ne-manize. <sup>28</sup> E'ina'ma hazazamo hige'za zore'za afovage nehu'za, masavenke hu'naze. Ana nehuza havi avu'ava zana otre kazigazi hu'za nehaze. Ana nehu'za megusa mofavreramina fatgo avu'avara hunozamante'za, zamuunte omane vahetega ante'za zamaza nosazage'za zamagrama eriga zana e'norize. <sup>29</sup> Nagra Ra Anumzamo'na anazanteria tamage hu'na nona huz-mante'na zamazeri haviza hugahue. Mago mopafai vahemo'ma amanahu avu'ava'ma hania vahe'enena, ana zanke hu'na nona huzmant'e'na zamazeri haviza hugahue. <sup>30</sup> Hagi vahe'mofona azeri antrima nehuno azeri koroma hu'zamo hago ama Juda mopafina efore hu'ne. <sup>31</sup> Kasnampa vahe'mo'za havi kasnampa naneke huama nehzage'za, pristi vahe'mo'za nazano hukanu'ma haza zana zamagra'a hankavere tro nehzage'za, Nagri vahe'mota ana avu'avaza zama negeta tavesinentaze. Hianagi ana knazamo'ma evu vagamaresigeta tamagra na'a hugahaze?

## 6

### *Jerusalemi kumate hazenke'za esania zamofo naneke*

<sup>1</sup> Tamagra Benzameni nagamota Jerusalemi kumapintira atiramita atreta freho. Hagi Tekoa kumatetira ufena nereneke'za, Bet-hakeremi kumate-tira mago avame zana inuna kreta resu nehinke'za nege'za vahe'mo'za korora fre'za ome zamagura vaziho. Na'ankure noti kazigati hankave sondia vahe neazanki'za knazana eme tamiza zamazeri havizantfa hugahaze. <sup>2</sup> Jerusalemi kumamoka hentofaza hunka frufru kavuvgane mo-fani'agna hu'nananagi Nagra kazeri haviza hugahue. <sup>3</sup> Kini vahe'mo'za ha' huramante'naku sondia vahezamia zamavarettere hu'za e'za Jerusalemi rankumamofo megi'a mopa eme refko huza eri zmante hute'za seli nozmia kiza manine'za avazigi kagigahaze. <sup>4</sup> Ana vahe'mo'za kezati'za, otita retrotra hinketa kinaga vuta hara ome huzmantamneno hu'za huga hazanagi, ete henka amanage hugahaze, ko zage ufre'za higeno zage tamema'amo'a ko ome zaza hie hu'za hugahaze. <sup>5</sup> E'ina hu'neanagi ame huta otinketa hanimpi hara ome huzmanteta, hankave vihu keginazamia vuta ome tapage hutresanune hugahaze. <sup>6</sup> Hu'neanagi Monafi sondia vahe'mofo Ra Anumzamo'a amanage hu'ne, Jerusalemi kumamofo megi'ama megagi'nea zafaramina antagitreta ana zafareti tukera aheta kuma keginamofo tavaonte ante hihi

hinkeno marerina, anante manineta hara huzmantegahaze. Na'ankure Jerusalemi kumapina vahe'ma azeri haviza hu'zamo avite'ne. <sup>7</sup> Hagi Jerusalemi kumapintira, kefo avu'ava zamo'a tinkerifinti timo aviteteno herafiramino eviankna huno enevie. Ana kumapina vahe'ma hazenkema nezamiza zamo'ene, maka zama eri havizama nehaza zamofo agasasamo avite'ne. Ana hige'na Nagrama koana kri vahe'ene zamahe kuzafa'ma ante'naza vaheke'za zamage'noe. <sup>8</sup> Hagi Jerusalemi vahe'mota ama koro kema hanuua antahiho. Tamagra ama nanekema ontahisage'na, Nagra namefi hunerami'na mopatamia eri haviza hanugeno, ama ana mopafina vhahera omanitfa hugahie.

<sup>9</sup> Hagi Monafi sondia vahe'mofo Ra Anumzamo'a amanage huno hu'ne. Mago vahe'mo waini hozafi vuno grepri ragama neragino atre'neama'a hakeno tagi vagareankna hu'za, Israeli vahe'ma osi'ama mani'naza vhahera ha' vahe'mo'za eme zamahe vagaregahaze. <sup>10</sup> Hagi ana koro kea ina vhahete vu'na ome huama hugahue. Iza nagri kea antahigahie? Zamagesamo'a ko ankani re'neanki'za kea ontahigahaze. Ra Anumzamofo nanekemo'a kiza zokago zankna hige'za zamavesra nehaze. <sup>11</sup> E'ina hu'negu Ra Anumzamofo rimpia ahezamo nagripina avitege'na azeri'nama vuazamo'a tusiza huno navesra hu'ne. Anagema hugeno'a Ra Anumzamo'a huno, ana narimpa ahe'zana eri kaha hutregeno kumamofo karampima zokago'ma neraza mofavre nagate'ene, atruma hu'za nemaniza nahezave nagate'ene, veneneraminte'ene a'ne zamire'ene, tavava ozafaraminte esanige'za narimpa ahe'zana erigahaze. <sup>12</sup> Hagi Nagra zamazeri haviza hanuge'za ru vahe'mo'za nozamine mopazamine a'nezaminena erigahaze. Na'ankure Nagra han-kavenentake nazana erisga hu'na ama'na mopafima nemaniza vhahera zamazeri haviza hugahue. Ra Anumzamo'na ama ana nanekea huama nehue. <sup>13</sup> Hagi maka zamagima omane vaheteti'ma vuno zamagima me'nea vhahete'ma vigeno'a, antahintahi zamifina agraguks'ma nentahino havige'ma huno zagoma erino fenoma erivite zankuke zamave'nesie. Kas-nampa vahe'mo'zane pristi vahe'mo'zanena anazanke hu'za vhahera rezmataga hu'za zagoa e'nerize. <sup>14</sup> Hagi Nagri vhahera zamavufagafina ra namu me'neanagi pristi vahe'ene kasnampa vahe'mo'za antahi amneza hu'za ana namuna anaki so'e hunozamante'za anage nehaze, hazenkezana omne'neanki fru huta manigahaze hu'za vhahera nezamasamize. Hianagi fruma huno manizana nomane. <sup>15</sup> Hagi Israeli vahe'mo'za agoterfa avu'ava zama hu'naza zankura zamagazea nosifi? I'o ana zankura havi zamavugosa nehu'za magore hu'za zamagazegura nosaze. E'ina hu'neanki'na Nagrama zamazeri haviza hanua zupa mago'a vahe'ma zamahema frisufi zamagrena frigahaze huno Ra Anumzamo'a hu'ne.

<sup>16</sup> Hagi Ra Anumzamo'a amanage huno hu'ne. Kama hatna'ma hu'nere ot'i'netu korapa'ma knare kama me'nege'za tagehe'zama vanoma hu'naza kana ina me'ne huta hiho. Hagi knare kama keta eri fore'ma hanuta ana kante nevuta tamarimpa frua erigahaze. Hianagi tamagra amanage huta nehaze, I'o e'i ana kantera ovugahure huta nehaze. <sup>17</sup> Hagi Ra Anumzamo'a huno, Nagra hanine zagenena tamagrite'ma kvama hanaza vhahera huham-pari zamantoge'za mani'neza, ufe krafama antahisagu tamagesa anteta antahiho hu'za neramasami zanagi tamagra ontahigahune huta nehaze. <sup>18</sup> E'ina hu'negu Ra Anumzamo'a huno, kokankokama ama mopafima nemaniza vahe'mota antahiho. Vaheniare'ma eri fore'ma hanua zana akoheta mani'netu keho. <sup>19</sup> Hagi kokankokama ama mopafima nemaniza vahe'mota

antahiho. Nagra Israeli vahete'ma hazenke zama atresanugenoso esaniana, zamagrama havi antahintahima retro'ma hu'naza zante nona hu'na knazana zamigahue. Na'ankure Nagrama hua nanekea amagera nonte'za, kasegeni'a zamefi humi'naze. <sup>20</sup> Hagi Tamagra Seba kumateti'ma erita e'naza mananentake zama frenkinsensi reti'ma ofama nehaza ofagu'ene, Kalamusiema nehaza mananentake hake zotama, afete moparegati'ma eri'za e'naza zanteti'ma ofama hunantaza zankura Nagra musena nosue. Ana nehu'na tevefima kre fananehu ofama nehaza ofane ruga'a ofaramima nehaza ofama negogeno'a, Nagri navurera knarera nosie. <sup>21</sup> E'ina hu'negu Ra Anumzamo'a amanage hu'ne. Nagri vahem'o'zama kama vanoma nehazafina tanafa'ma hanazaza ante'nesanuge'za anampinti tanafa nehanage'za, venenemoza'ne ne' mofavrezamine, tvaonte'ma nemaniza vahem'eone rone zamimo'zanena maka tanafa hu'za mase'za frivaga regahaze.

<sup>22</sup> Hagi Ra Anumzamo'a amanage huno hu'ne. Noti kazigama me'nea moparegati ha' vahera neazanki keho. Ana vahera mopa ome atretegati vaheki'za, zamagra hankavenentake hu'nazanki'za menina ot'i za ha'zana retrotra nehaze. <sup>23</sup> Hagi ana sondia vahem'o'za atine kevenena zamazampi eri'neza neaze. Hagi zamagra vahekura zamasunku osu'za vahem'a hazenkezmi vahekiza zamagra hosi afu'mofo agumpi mani'neza hahunaku erimpi hu'za neazankino, zamagasarosamo'a hagerimo rupokraneleno neriankna zamagasasane neaze. Anama neazana so'e zantfama hu'nea Jerusalemi kuma eri haviza hunaku retro hu'za neaze. <sup>24</sup> Hagi Jerusalemi kumapi vahem'o'za hu'za, tagra ana ha' vahem'okizmi zamagenkea ko antahi nonankita, menina tahirahiku nehunkeno zaferinati omne amne nehie. Ana nehigeta menina tasu zampi mani'neta antahintahi hakare nehuta, mofavre antenaku nehia a'mo ata hoza e'neriankna huta tusi tatazampi nemannune. <sup>25</sup> Hagi ha' vahetimo'za mika kaziga manivaga razanki kampina vano nosuta, hozareganena vuta eta osiho. Na'ankure ha' vahem'o'za bainati kazi eri'neza mika kaziga mani vagare'naze. <sup>26</sup> Anage higeno Anumzamo'a huno, Nagri vahemota tamasunku kukena erinentanita, ta'nefa erita nefreta magoke ne'mofavrema ante'nea vahemo'ma ana mofavrema frigeno asunku huno zavi'ma ateaza huta tusi zavi krafa hiho. Na'ankure maka zama eri havizama nehaza sondia vahem'o'za ame hu'za e'za eme tamazeri haviza hugahaze.

<sup>27</sup> Hagi Ra Anumzamo'a nagrikura huno, ainima tevefi kreteno e'i ainifi huno rezaganeno keso'ema nehia vahekna hu'na, Jeremaiaga huhampri kantoe. Ana huankinka Nagri vahem'okizmi zamavu'zmava zana rezaganenkia keso'e hugahane. <sup>28</sup> Hagi zamagra zamagu'amo'a hankavetige'za keontahi vahem'o'za mani'naze. Ana vahera ke huhaviza hu'za vahera ke nezamasaza vahem'o'za mani'naze. Ana hu'nazanki'za zamagra vahem'a zamazeri haviza huke hu'za vano nehazanki'za bronsimo'ene ainimoke'ma hankavema tianknka huno antahintahizmimo'a hankaveti'nea vahem'o'za mani'naze. Ana hu'nazanki'za maka kefo avu'avazaran nehaza vahem'o'za mani'naze. <sup>29</sup> Tevema hugre akru'ma nehia tefereti tevea hugre anefa higeno silva te maramra huno aenia eri otege nehie. Hianagi ana silvafintira retiema nehia aenia kreno eri zo-onkigeno ana eri'zamo'a vuno amne zankna nehie. E'ina avamente vahem'o'za havi avu'ava zana otre'za huvava hu'za nevaze. <sup>30</sup> Hagi zamagra haviza hu'nea silvama eri trazankna vahem'o'za mani'naze. Na'ankure Ra Anumzamo'a ko amefi huzami'ne.

*Jeremaia'ma ra mono nompi ufre kafante ot'i'nenō hu'nea naneke*

<sup>1</sup> Ra Anumzamo'a Jeremaiana mago'ene amanage huno nanekea asami'ne. <sup>2</sup> Ra Anumzamofo mono nompima unefraza kafante ome ot'i'nenka, amanage hunka vhahera zamasamio. Juda vahe'ma ama kafantet'i ma ufrete Ra Anumzamofoma mono'ma hunentaza vahe'mota Ra Anumzamo'a amanage hianki antahiho! <sup>3</sup> Hagi Monafi sondia vahe'mokizmi Ra Anumzama, Israeli vahe'mokizmi Anumzamo'a amanage huno hu'ne. Tamagrama havi avu'ava zama nehaza zama netreta mani fatgoma hanage'na, Nagra tamatresanugeta mopatamifina manigahaze. <sup>4</sup> Vahemo'za rezamatga hu'za, Ra Anumzamofo mono nona ama me'ne. Ra Anumzamofo mono nona ama me'ne, Ra Anumzamofo mono nona ama me'neankita knare huta manigahune hu'za rezmatagama hanaza nanekea antahi ozamaho.

<sup>5</sup> Hagi tamagra havi antahintahi zane havi avu'avazanena netreta, tamagra'a fatgo avu'ava'za ohunte ahunte nehuta, <sup>6</sup> ru vahe'ma tamagrane enemaniza vahe'ene, megusa mofavre naga'ene, kento a'neraminena zamazeri haviza osiho. Ana nehuta ke'zami omane vhahera zamahe nefrita, havi anumzanteria monora huonteho. Ana'ma hanazana tamagra'a tamazeri haviza hugahaze. <sup>7</sup> Hagi tamagrama Nagri kema antahita amage'ma antesage'na, Nagra tamatresanugeta tamagehe'ima eri santiharetia manivava hugahazema hu'na zami'noa mopafina manigahaze.

<sup>8</sup> Hianagi keho! Tamagra havige kere tamentintia nehazankino, ana nanekemo'a tamaza osugahie. <sup>9</sup> Hagi tamagra kumazafa neseta, vhahera zamahe nefrita, monko'zana nehuta, havige nehuta, Bali havi anumzante mnantake zana kre mna nevuta keta antahita osu'naza anumzantami amagera nenteta ete, <sup>10</sup> Nagri nagima erisga hugahazema hu'noa nompi eta, hago tagu vazigeta knare huta mani'none huta nehuta ete vuta agoterfa avu'ava zana ome nehaze. <sup>11</sup> Hagi tamagrama antahi'zana Nagri nagima eme erisgama nehaza mono nona, kumzafa vahe'mo'za eme frakisaza havega me'ne huta nehazafi? Tamage! Ama anampima nehaza avu'ava zana hago ke'noe huno Ra Anumzamo'a ama nanekea hu'ne. <sup>12</sup> Hagi Nagri nagima me'nesige'za mono hunantegahazema hu'na huhamparuge'za seli mono noma kinaza kumate Silo vuta, nagri naga'ma Israeli vahe'mo'zama kumi'ma hazage'na ana kuma'ma eri havizama hu'noa zana ome keho. <sup>13</sup> Hianagi tamagranena ana havi avu'ava zana huta nevazage'na, Nagra ana zankura kea hvahava hu'na vuanagi keni'a ontahize. Nagra kezatuanagi nagri kerera izo osu'naze. <sup>14</sup> E'ina hu'negu Silo kuma'ma eri havizama hu'noaza hu'na, Nagri nagima me'nesige'za mono'ma hunanteho hugeno me'negeta, tazahu zana erigahunema huta muha'ma nehaza mono nona eri haviza nehu'na, tamagehe'ima zami'noa mohanena eri haviza hugahue. <sup>15</sup> Hagi Nagri navugama mani'naretira Nagra tamavre atresugeta tamafuhe'za Israeli naga'mo'zama hu'nazaza huta vugahaze.

<sup>16</sup> Hagi Jeremaiaga, ama vahe'ma zamazama hanugura Nagritega zavi krafa nehunka nunamuna hunka zamaza huo hunka nantahi onko. Na'ankure kagri nunamunkeea ontahigahue huno hu'ne. <sup>17</sup> Hagi kagra Juda mopafima me'nea kumatamimpine, Jerusalemi kumapima me'nea ne'onse kampima nehaza havi avu'ava zana nonkano? <sup>18</sup> Hagi mofavre naga'mo'za teve hare'za azage'za zamafahae'za teve erinte fatgo nehazage'za, a'ne naga'mo'za flauateti keki tro hazage'za, mago a' havi anumzanku'ma Monafi Kuiniema nehaza a'tega ofa hunte'za nehaze. Ana nehu'za mago'a havi anumzaramintega wainima tagitre ofanena nehu'za Nagrira nazeri

narimpa nehaze. <sup>19</sup> Hagi Ra Anumzamo'a huno, Ana avu'ava zama nehazana Nagrira nazeri havizana nosazanki, zamagra'a zamazeri haviza nehazanki'za zamagazegu hugahaze. <sup>20</sup> E'ina hu'negu Ra Anumzamo'a amanage hu'ne. Nagri narimpa ahe'zamo'a tusiza huno teve rukru nehianki'na, ama kumapima mani'naza vahete'ene zagagafare'ene zafaraminte'ene hozafi ne'zaraminte'enena ana narimpa ahe'zana eri kaha hutresugeno, tevegna huno akrukru huno nerisigeno mago vahe'mo'a rusura osugahie.

<sup>21</sup> Hagi Monafi sondia vahe'mokizmi Ra Anumzama Israeli nagamokizmi Anumzamo'a amanage hu'ne. Tamagrama tevefima kre fananehu ofama hunantenaku'ma nehaza ame'a, erinteta ruga'a ofama hunanteku'ma haza zantamine tamagra'a neho. <sup>22</sup> Hagi Nagrama tamagehe'ima zamavare'na Isipitima atrami'na e'noana, tevefima kre fananehu ofane ruga'a ofanena ofa hunanteho hu'na Nagra huozamante'noe. <sup>23</sup> Hianagi Nagra amanage hu'na zamasami'noe. Nagri ke antahita amagenentenke'na, Nagra tamogra Anumza manisugeta, tamagra Nagri vahe manigahaze hu'na hu'noe. Maka zama hihoma hu'na hanua zama antahita amage'ma antesanuta, maka'zama hanaza zamo'a knare'zanke hugahie. <sup>24</sup> Nagra anage hu'na hu'noanagi, zamagra Nagri nanekea ontahi'naze. Ana nehu'za zamagu'amo'a hankavetigege hige'za kefo avu'avazamimofo amage ante'naze. Ana nehu'za zamavugama vugazana atre'za zamefi nevaze. <sup>25</sup> Hagi tamagehe'zama Isipima atre'za e'naza knaret'i'ma eno ama knarema ege'na, Nagra eri'za vaheni'ka kasnampa vahera huzmantoge'za knane knanena nanterana evava hutere hu'za nanekea eme zamasami'naze. <sup>26</sup> Hianagi zamagra magore hu'za Nagri kea antahi'za amagera onte'naze. Ana nehu'za zamagu'a eri hankaveneti'za zamafah'e'zama hu'naza havi avu'ava zana agatere'za havi avu'ava zana hu'naze. <sup>27</sup> Hagi Jeremaiaga amanage hunka zamasamio huno Ra Anumzamo'a nasami'ne. Ama ana zanku'ma huama'ma hunka zamasamisanke'za, kagri kea ontahigahaze. Kezatinka koro kea zamasamio. Hianagi kagri kea antahi'za nona huogantegahaze. <sup>28</sup> Ana'ma hanagenka amanage hunka zamasamio. Ama vahe'mo'za Ra Anumzana Anumzazmimofo nanekea amagera nonte'za, Anumzamo'a zamavumarora anteno zamazeri fatgoma hunaku'ma hiazana amagera onte'naze. Ana nehu'za tamage avu'avazamo'a zamagripintira fanane ne-higeza ana zankura nanekea nosaze. <sup>29</sup> E'ina hu'negu Jerusalemi kumapima nemaniza vahera zamasamige'za, zamasunku hu'za zamaseni zamazokara hare netre'za, zavi krafa hu'za mago'zama omane agonaramimpina vano hoho. Na'ankure menima fore'ma haza vahe'mo'za Ra Anumzamofona tusiza hu'za azeri arimpa hazageno ana zanku huno Agra zamatreно amefi huzami'ne. <sup>30</sup> Hagi Ra Anumzamo'a huno, Juda vahe'mo'za Nagri navurera rama'a havi avu'ava hu'nazanki'na Nagra namefi huzami'noe. Nagri nagma me'nesanige'za mono hunante'gahazema hu'na hu'noa mono nompingina, agoterfa havi anumzaramimofo amema'ama tro'ma hu'za ante'naza zamo ana mono nona eri pehenage hu'ne. <sup>31</sup> Hagi havi anumzante'ma mono'ma huntesaza kumatamina, Hinomu agupofi Tofetiema nehaza kumate trohuntete'za anante ne'mofa'zmia zamahe'za tevefina kre tasage'za havi anumzantera ofa hu'naze. E'inahu avu'ava zama hu'nazana Nagri antahi'zampina omanegeno, Nagra ana hoho hu'na huozamante'noa avu'ava'za tro hu'naze. <sup>32</sup> Ana hu'negu Ra Anumzamo'a huno, kva hoho! Mago kna ne-eanki'za vahe'mo'za mago'enena Tofeti kumare nehu'za Hinomu agupoe hu'za osugahazanki, vahe'ma zamahe fri agupoe hu'za huga-

haze. Na'ankure ana mopafina vhahera asente'za nevanageno kankamuna omnetfa hugahie. <sup>33</sup> Ana hanigeno fri'nesaza vahe'mokizmi zamavufagamo'a amne zankna hina, namamo'zane afi zagagafamo'za e'za zamavufaga'a eme negahaze. Ana hina mago vahe'mo'a kasefa huno mani'neno ana zagagafaramina rehari otregahie. <sup>34</sup> Hagi Juda mopafima me'nea rankumamatimpine, Jerusalemi kumapima me'nea ne'onse kantamimpina vahe'mo'za vano nehu'za zagameru nehu'za musena hu'za vano osugahaze. Hagi anampina aravema nehu'za musema nehaza zamofo agasasankea mago'enena ontahigahaze. Hagi ana mopamo'a havizantfa hina mago vahe'mo'a anampina omanigahie.

## 8

<sup>1</sup> Hagi Ra Anumzamo'a huno, Ana knafina ha' vahe'mo'za eza Juda kini vahe'ene kva vahe'enema asezamante'naza matipintira tapage huza eri hagaro hutre'za zaferina zamia e'neri'za, Jerusalemi kumapi vahe'mati'ene, pristi vahe' mati'ene, kasanampa vahe'mokizmi mati'enena tapage hu'za zaferinazamia erigahaze. <sup>2</sup> Hagi ana zaferinaramina eri'za zamagrama zamavesi nente'za eri'zama erinente'za mono'ma hunentaza havi anumzaramina, zugema, ikama, ofuramimo zamavuga ana zaferinaramina rufanara huza evugahaze. Ana vahe'mokizmi zaferina ete eri tru hu'za aseozamante atresageno me'neno rifamo'ma mopama eri masavema hiaza hugahie. <sup>3</sup> Hagi kefo avu'ava'ma nehaza Juda vahe'ma fri vagaresageno osi'a naga'ma ru moparega umani emanima hanuza, nahigeta kora ofari kasefa huta mani'none, hu'za hugahaze huno Monafi sondia vahe'mofo Ra Anumzamo'a hu'ne.

### *Havi kasnampa vahe'mo'za vahe'ma rezamatga hu'naza naneke*

<sup>4</sup> Hagi Jeremaiaga amanage hunka vhahera zamasamio huno Ra Anumzamo'a nasami'ne. Hagi vahe'mo'ma tanafa'ma huno maseteno'a ete ora netigeno, vahe'mo'ma havi kante'ma vuteno'a ete rukrahe huno eza me'ne. <sup>5</sup> Hianagi na'a hige'za Jerusalemi kumapi vahe'mo'za Nagrira natre'za vuvava nehu'za, krunagema nehaza avu'ava zana azerintrako nehaze? Ana nehu'za Nagriterera ete rukrahe hu'za nomaze. <sup>6</sup> Zamagrama haza nanekerera Nagra nagesa ante'na antahi so'e nehuhanagi, tamage nanekea nosaze. Hagi mago vahe'mo'e huno hazenkema huteno'a, hago haviza tro hu'noe huno keno antahino nehuno asunkura nosie. Hosi afu'mo'ma mago zanku'ma ontahino agareno hapima ufreaza hu'za, maka vahe'mo'za hankaveti'za zamagra'a antahi'zanke amage ante'za nevaze. <sup>7</sup> Hagi ruzahu ruzahu namaramima, erintaguma hu'za magopima hare'za vanoma nehaza namaramimo'za, mago kuma'ma atre'za ru kumate'ma hare'zama vanaza kna fatgo'a zamagra ko ke'za antahi'za hu'naze. Hianagi Nagri vahe'mo'za Ra Anumzamo'na kasegea ontahi'naze. <sup>8</sup> Tamagra huta, ama' antahi'zane vahe mani'nonkeno, Ra Anumzamofo kasegemo'a tagrane me'nne nehaze. Hianagi antahiho, kasegema rempima huneramiza vahe'mo'za, kasegea eri rukrahe hu'za havige krente'naza naneke rempi huneramize. <sup>9</sup> Knare antahi'zane vhahera zamazeri zamagaze hanage'za zamahirahiku nehu'za antahintahi hakare nehanage'za, zamazeri'za zamavare'za vugahaze. Zamagra Ra Anumzamofo nanekea antahi'za amagera onte'nazanki, nankna knare antahi'za zamagra eri'naze? <sup>10</sup> E'ina hu'negu a'nezamia ru vene'ne avrenezami'na, mopa zamia ru vahe eri zamisuge'za eri nafa'a hugahaze. Na'ankure zamagi omane vahetet'i'ma vuno zamagine vahete'ma vige'za, maka vahe'mo'za zamagraguke

nentahi'za kruna, kezmireti feno eri truhu vahe mani'naze. Hagi maka kasnampa vahe'ene pristi vahe'mo'zanena ana zanke hu'za vhahera rezamatga nehaze. <sup>11</sup> Hagi Nagri vahe'ma ra namuma zamare'neana pristi vahe'ene kasnampa vahe'mo'za eri age'a hu'za havi tusa kinezmante'za osi zankita knare huta tamarimpa frune manigahaze hu'za nehazanagi, tamage hu'za zamarimpa frunena nomanize. <sup>12</sup> Hagi Israeli vahe'mo'zama agoterfa avu'ava zama hu'naza zankura zamagazea nosifi? I'o zamagazegu'ma nehu'za kepri'ma hu avu'avara ontahi'naze. E'na hu'negu Nagra zamazeri havizantfama hanua knama esige'na, zamazeri haviza hanuge'za mago'a vahe'ma urami'nafi zamagra'enena urami'za haviza hugahaze huno Ra Anumzamo'a hu'ne. <sup>13</sup> Ra Anumzamo'a huno, Nagra atre'nugeno hoza zamifina ne'zana rentesige'za ne'zana ohamaregahaze. Grepri ragamo'a nofi'arera raga reontesigeno, fiki zafamo'a raga re'ontegahie. Ana nehanigeno ani'na ramimo'a harari hugahie. Nagrama zami'noa zantamimo'a zamagripintira fanane hugahaze. <sup>14</sup> Anante Juda vahe'mo'za amanage hu'za hugahaze. Tagra nahanieta amarerera maniteta hugahune? Erinketa vuta hankave vihuma me'nea kumatamimpi vuta umanineta anampi frisanune. Na'ankure Ra Anumzana tagri Anumzamofo avufima kumi'ma hu'nona agafare, frigahaze huno avuataga zana timpi anteno tamigeta neneta fri'za nehune hu'za hugahaze.

<sup>15</sup> Tagra arimpa fruma huno manizanku amuhara hunanagi, arimpa fruma huno mani'zana omane'ne. Tagra krifintira kanamareta manigahumpi huta hunanagi, ana knamo'a omegeno koro zamo eno eme tazeri tagogofe'ne. <sup>16</sup> Hagi ha' vahetimo'za hago erava'o nehazageno, ve hosi afu zamimo'zama zamagonafinti'ma ne-ezama hankra kasa'ma hu'za aza agasasankea noti kazigama Dani nagamokizmi mopafima nemaniza vahe'mo'za antahi'naze. Ana agasasankemo'a amama mani'nona mopa maka eri momi hu'ne. Ana ha' vahe'ma e'nazana tagri mopafima me'nea zantamine ranra kumataminena maka eri haviza huvaga nere'za vahe'enena tazeri haviza hunaku neaze. <sup>17</sup> Hagi Ra Anumzamo'a huno, antahiho, Nagra ha' osifa'verami huzamanta'nena e'za eme tamamparisageta ana osifa'veramina mago zana huta rutafritre kankamuna omanegahie.

### *Jeremaia'ma vahe'agu asunku huno zavi ate'nea naneke*

<sup>18</sup> Hagi nagra tusi nasunku nehugenno mago zamo'a nazeri knare hugara osu'ne. Ana nehigeno tumonimo'a netane. <sup>19</sup> Nagri vahe'mo'zama afete moparega mani'neza zavi'ma nete'za Ra Anumzamo'a Jerusalemi kumapina kinia manino kegava osu'nefi hu'zama haza agasasankea antahiho. Ana nanekerera Ra Anumzamo'a kenona huno, Nahigeta tamagra kaza osu havi anumzaramimofo amema'arera monora hunenteta, meg'i'a ru vahe'mokizmi havi anumzaramintera monora hunenteta nazeri narimpa ahe'naze? <sup>20</sup> Hagi Juda vahe'mo'za amanage hu'naze. Hozama vasage knamo'a hago evu tagateregeno, knare'ma huno kintuma nerea knamo'a sago evie. Hianagi tagu'ma vazi kankamuna omane. <sup>21</sup> Hagi nagra Jeremaia'na, koge'za vahe'himozama havizama hazageno'a nagri'enena nagu'amo'a havizantfa hu'ne. Ana nehige'na nagra tusi zavi nete'na antahintahi hakare hu'noe. <sup>22</sup> Hagi Gileati mopafina marasinia omanegeno tota vahe'enena omani'nazafi? Nahige'za nagri vahe'mo'za karifintira kana-mare'za knarerera hu'za nomanize?

## 9

*Jeremaia'ma vahe'agu zavi neteno hu'nea naneke*

<sup>1</sup> Hagi nasenifima mago tinkeri megeno navunumo'a navurga kampintima kampu'i tima hanatino eazama hiresina nagri naga'ma zamahe fri'naza nagakura kenage'ene feru'enena zavira tevava huresine. <sup>2</sup> Hagi nagra vaheni'a zamatre'na ka'ma kopima vu'na karankama nevaza vahe'mo'zama unemasaza nompinka umanuresina knare hisine hu'na nagesa nentahue. Na'ankure zamagra monko a' kna hu'za vano nehu'za mani fatgoa nosu'za, Anumzamofona ha' renentaza vahe mani'naze.

<sup>3</sup> Hagi Ra Anumzamo'a huno, Nagri vahe'mo'za atifi keve erinte'za ahenaku krinkekema hazaza hu'za zamagefu'na eri fagagite'za kevema ahe trazaza hu'za krunagea nehaze. Ana hazageno tamagema hu'zamo'a omanegeno krunagemo ana mopafina zamunekie. Ana nehu'za Nagrikura zamagenekaniza kefo avu'ava zana huvava hu'za nevaze huno Ra Anumzamo'a nehie. <sup>4</sup> Hagi mago mago vahe'moka tvaonka'are'ma nemanisia vahekura kva nehunka kafukaganana antahi omio. Na'ankure zamagra zamagra orevatga arevatga nehanageno, tava'o zamire'ma nemanisaza vahe'mo'za oti'za krunage ohunte ahunte huza zamagra'a zamazeri haviza hugahaze. <sup>5</sup> Mika vahe'mo'za tava'o zamire'ma nemaniza vhahera orevatga arevatga nehu'za, magore hu'za tamagea nosaze. Zamagra karunagema hu' zantero ko rempi hu'za antahi'naze. Ana hu'nazanki'za kumi'ma hazazamo'a zamagrira zamazeri zamasafe nehie. <sup>6</sup> Hagi tamagra karunagema hu' avu'avazamofo amunompi mani'neta, Nagri'ma keta antahitama hu'zankura tamavresra nehaze huno Ra Anumzamo'a hu'ne. <sup>7</sup> E'ina hu'negu Monafi sondia vahe'mofo Ra Anumzamo'a huno, silvama tevefi krazageno silva'age eri zogiankna hu'na, knazanteti rezamahe'na kegahue. Hagi Nagri vahe'mota kumikura, mago zana naza osu'nesuaza hugahue? <sup>8</sup> Hagi tamagrama nanekema haza nanekemo'a havigege nehazageno ana nanekemo'a vahe ahefri kevegna hu'ne. Ana nehuta tava'ontmire'ma nemaniza vhahera tamarimpa fru naneke nezmasamizanagi, tamagri antahizampina zamagri'ma zamahe frisaza antahi'za retro hu'naze. <sup>9</sup> Hagi Ra Anumzamo'a huno, E'inahu avu'ava zama nehaza zantero zamazeri haviza hugahue. Ana nehu'na ana avu'ava zantero ama ana vhahera Nagrani'a nona huzmantegahue. <sup>10</sup> Hagi nagra Jeremaia'na agonaraminku'ene ka'ma kokampima sipisipima kegavama nehaza mopagura nasunkura nehu'na zavira ategahue. Na'ankure anampina mago zana omanegeno vhahemo'enena vano osigeno bulimakao afu'mofo agerura omanegeno, namaramimo'zane afi zaga kafamo'zanena maka kore atre'za fre vagare'sagu anara hugahue. <sup>11</sup> Hagi Jerusalemi kumara eri haviza hanugenno haveramimo hihi huno megahie. Ana hu'nesanige'za afi kramo'za e'za anampina eme nogi'za manigahaze. Ana nehanage'na Juda mopafima me'nea kumatamina eri haviza hanugenno ana kumatamimpina vhahera omanitfa hugahie. <sup>12</sup> Hagi iza knare antahi'zana eri'nesania vahe'mo amama fore'ma nehia zamofona antahi amara hugahie? Hagi Ra Anumzamo'a iza nanekea asmi'nesia vahe'mo, ana nanekea eri amara huno vhahera zamasamigahie? Hagi nagafare mopamo'a havizana huno ka'ma kokanknara higeno, anampina vahe'mo'a kana anteno vanoa nosie? <sup>13</sup> Hagi anante Ra Anumzamo'a amanage hu'ne. Amanahu zama fore'ma hu'neana, na'ankure Nagri vahe'mo'za amage'ma anteho hu'na zaminoa kasegeni'a zamefi hunemi'za, Nagrama hua nanekea

amagera onte'nazagu anara hu'ne. <sup>14</sup> Hianagi zamagri zamagu'amo'a hankavetige'za, zamagra'a zamavesi'za amage nente'za zamafahe'zama huzamaveri hu'nazaza hu'za, Bali havi anumzamofo amema'are monora hunte'naze. <sup>15</sup> E'ina hu'nazagu Ra Anumzana Monafi sondia vahe'mofo Anumzama Israeli vahe'mokizmi Anumzamo'a huno, Nagra menina aka ne'za zamisanuge'za nenesage'na, timpina vahe'ma ahe nefriaza antete'na zamisuge'za negahaze. <sup>16</sup> Hagi Nagra zamazeri panani hanuge'za maka ama mopafina zamagehemo'za, ke'za antahi'za osu'nesaza moperega umani emani hugahaze. Ana hu'nesage'na ha' vahe huzmanta'nena anantega vu'za bainati kazinteti ome zamahehana hugahaze.

### *Jerusalemi kumapi vahe'mo'za zavi krafa hu'naza naneke*

<sup>17</sup> Hagi Monafi sondia vahe'mofo Ra Anumzamo'a huno, Ana zantamima tamagrite'ma fore'ma hania zankura tamagesa antahi so'e nehuta, zavi'matesaza a'neramina zamagi hinke'za eho. <sup>18</sup> Hagi ana a'nemoza ame hu'za e'za zagamera eme nehu'za zavira netesageno tavunura nehuno, tavunumo'a tavufintira tinkna huno heraframino. <sup>19</sup> Hagi Jerusalemi kumapi vahe'mo'za zamasu zampi manine'za zavira nete'za amanage nehzanki antahihi. Tagra havizantfa huta mani'neta tagazegu nehnankita mopaatia atreta vugahune. Na'ankure ha' vahetimo'za nonkumatia ko tapage hutre'naze. <sup>20</sup> Hagi Jerusalemi kumapima nemaniza a'nanemota Ra Anumzamo'a amanage nehianki tamagesa ante so'e hu'neta antahihi. Asunku'ma huno zavi'ma ate'zana mago mago'mota mofo'ne nagatamia rempi huzamitere nehuta tavaontamire'ma nemaniza a'neneraminena rempi huzamitere hiho. <sup>21</sup> Na'ankure fri'zamo'a nontimofona zaho eri kampinti ko takaireno enefreno, marerisa nontifinena ko efre'ne. Ana nehuno ne'mofatimo'za ra osu'nageno fri'zamo'a zamazeri atrege'za, karampina vanoa nehu'za zokagora ore'naze. Ana nehige'za nahezave naga'mo'za kumamofo amunompima atruma hu'za ne-maniza zana hu'za omani'naze. <sup>22</sup> Hagi Ra Anumzamo'a amanage hie hunka zamasamio. Frisaza vahe'mokizmi zamavufagamo'a, mopafina amne zankna hanigeno, afu'rifama hagi'za hozafima antazankna hugahie. Ana nehanigeno hozafinti'ma witima taga hute'za eri tru osu atrazageno, meankna huno fri zamavufagamo'a me'nesanige'za vahe'mo'za eri tru hu'za aseozamantegahaze. <sup>23</sup> Hagi Ra Anumzamo'a huno, knare antahi'zane vahe'mo'a knare antahi zama'agura avuvgfa rana nosina, han-kave vahe'mo'a hankave'agura nentahino avuvgfa rana osino. Ana ne-hina feno vahe'mo'a fenoma ante'nea zankura nentahino avuvgfa rana osino. <sup>24</sup> Hianagi avuvgfa rama hunaku'ma hania vahe'mo'a Nagriku'ma Ra Anumzana agrake mani'neno, vaga ore mevava aesi zane fatgoma huno refko'ma hu avu'ava zane, fatgo avu'ava'zanena Agrake nehiema hu'zama ke'za antahi'zama nehaza vahe'mo'za zamavufaga rana hiho. Na'ankure Nagra e'inahu avu'ava zanku musena nehue huno Ra Anumzamo'a hu'ne. <sup>25</sup> Hagi Nagra Ra Anumzamo'na amanage hu'na nehue, mago kna ne-eankino ana knama esanige'na zamagoza anomaa tagama osu'naza vahe'ene tagama hu'naza vahe'enena knaza zami'na zamazeri haviza hugahue. <sup>26</sup> E'i ana vhahera Isipi vahe'ma, Juda vahe'ma, Idomu vahe'ma, Amoni vahe'ma, Moapu vahe'ene, ka'ma kopima nemani'za zamazoka'ma tagahu atupa'ma nehaza vahe'ene zamazeri haviza hugahue. Na'ankure zamagra zamagaze zamavufagamofo nomo'a taga osazageno, maka Israeli vahe'mo'zanena zamagu'a rukrahera osu'naze.

## 10

*Ra Anumzamo'ma havi anumzamofoma kiza zokago ke'ma hunte'nea  
zamofo naneke*

<sup>1</sup> Ra Anumzamo'ma Israeli vahe'motagu'ma nehia nanekea antahih. <sup>2</sup> Ra Anumzamo'a amanage huno hu'n. Monare'ma fore'ma nehia zana negeta korera osiho. Na'ankure kokankokama nemaniza vahe'mo'za ana zantaminkura tusi koro nehzanki, anama hanaza zana negeta zamagera onteho. <sup>3</sup> Ana vahe'mo'za amunte omanea avu'avaza nehaze. Zamagra zafa antagi atrazage'za, zafareti keonke zama tro'ma nehaza vahe'mo'za ana zafa antre'za kaza osu havi anumzana tro nehaze. <sup>4</sup> Ana amema'ama tro'ma nehaza zanter, silvareti'ene golireti'ene avasasea hunte'naze. Ana hute'za hama eriza nilia ahentrako hazageno evu noramie. <sup>5</sup> Hagi e'i ana kaza osu havi anumzantamina kono hozafi namamo'za e'zanku vahe amema' tro hu'za antazankna anumzanki'za, zamagra keaga osugahaze. Ana hu'nazanki'za kana vano nosage'za vahe'mo'za erisga hu'za vano nehaze. E'inahu anumzantaminkura korora osiho. Na'ankure tamagrira tamazeri havizana nosu'za, mago knare'zana huoramantegahaze. <sup>6</sup> Ra Anumzamoka mago vahe'mo'a Kagri knara osu'n. Kagra ran krerfa hu'nanankino kagri kagimo'a ra huno hankavenetake hu'n. <sup>7</sup> Hagi Kagra maka ama mopafi vahe kinia mani'nananki'za, kagrikuke korora hugantegahaze. E'na hu'neanki'za vahe'mo'za kagri agoragage manigahaze. Na'ankure ama mopafima maka ama' antahi'zane vahe'ma mani'naza vahepinti'ene maka kini vahe'pinti'enena mago'mo'e huno Kagri kna vahera omani'n. <sup>8</sup> Hagi kaza osu havi anumzante'ma mono'ma hunentaza vahe'mo'za knare antahi'zana omanege'za zamagra neginagi vahe mani'naze. Zamagrama mono'ma hunentaza zantamina zafareti antre'za tro hunte'naza zantami me'n. <sup>9</sup> Hagi zamagra Tasisiti eri'za e'naza silvane, Ufaziti eri'za e'naza golinena eri'za golireti'ma keonke zama tro'ma nehaza vahe zamizage'za, ana havi anumzantamina eri anovazi zamante'naze. Ana hute'za kunavenke tavaravene koranke tavaravenena eri'za ana eri'zama antahini'ma hu'naza vahe zamizage'za zaza kukena hatitage'za ana havi anumzantamina antani nezamantaze. <sup>10</sup> Hianagi tamage Anumzana, Ra Anumzamo agrake mani'n. Agra kasefa huno nemania Anumzankino, manivava kini mani'n. Agrama arimpa he'zama erinte ama'ma nehigeno'a, ama mopamo'a torevare nehige'za ama mopafi vahe'mo'za mani so'ea osugahaze. <sup>11</sup> Hagi ru anumzante'ma mono'ma hunentaza vahera amanage hutu zamasamaho. Tamagri anumzamo'za monane mopanena trora osu'nazanki'za, ama mopafinti'ene monamofo fenka kazigatira fanane hu'za omanigahaze. <sup>12</sup> Hianagi Ra Anumzamo'a agra'a hankavereti ama mopa tro huteno agra'a knare antahizanteti mopamofo tra'a tro huno eri hankavenetino, Agra'a antahi'zanteti monaramimpima me'nea zantamina tro huteno rufanara huntogeno me'n. <sup>13</sup> Hagi agrama keagama nehigeno'a monage nehigeno, monafintira ko'mofo agasasanke nehie. Ana nehigeno mopama ome atretegatira hampo'mofona huntogeno marerino mopa rufi'nete. Agra kopasi'n a huntogeno magoka ko'ene ne-ege, agra fenoma nentea nompinti eri anagino zahora huntogeno ne-e. <sup>14</sup> Hagi miko vahera neginagi hu'za antahintahi omane vahe mani'naze. Golireti'ma havi anumzantamima tro'ma hu'naza vahe'mo'za, anazama tro'ma hu'naza zankura tusi zamagazegu hugahaze. Na'ankure ana amema'ama tro'ma hu'naza zantamina havigeza tro hu'naze. Ana havi anumzantamimo'za

zamasimura ante'za kasefara hu'za nomanize. <sup>15</sup> Hagi zamazanteti'ma antre'za tro'ma hu'naza havi anumzantamina amneza me'naze. Ana hu'neanki'za vahe'mo'za kiza zokago ke huzamantegahaze. Hagi zamagri'ma keaga huzmanteno zamazeri havizahu knama esanige'za, haviza hu'za fanane hugahaze. <sup>16</sup> Hianagi Israeli vahe Anumzamo'a zamazanteti'ma antre'za tro hu'nazankna anumzana omani'ne. Agra maka'zama tro hunte'nea Anumza mani'ne. Hagi Israeli vahekura Nagri vahe mani'naze huno Agra'a huhampari zamante'ne. Ana hu'neankino Monafi sondia vahe'mofo Ra Anumzane huno agi'a me'ne.

### *Henkama esania knazamofo naneke*

<sup>17</sup> Hagi ha' vahe'mo'za e'za kuma'ma eme vazagi kagisageta Jerusalemi kumapima nemaniza vahe'mota ama mopa atreta vugahazanki, kutuntamia retrotra hiho. <sup>18</sup> Na'ankure Ra Anumzamo'a amanage huno nehie. Nagra Juda mopamofo agu'afima nemaniza vahera knaza zami'na zamazeri panini hanuge'za ufre efre hugahaze. Ana nehu'na rama'a hazenke'za atre'nugeno eno eme zamazeri haviza hanige'za, Nagri narimpa ahe'zana kegahaze. <sup>19</sup> Hagi tamagra Jerusalemi vahe'mota amanage hugahaze. Tagri namumo'a teonkanigeta tusi'a tasu'zampi manune. Ana hianagi ana knazana amne erita vugahune huta nehaze. <sup>20</sup> Hagi nemanuna seli nontimo'a haviza huno evuramigeno, noma avazuhumpima nehia nofimo'a akanokanu hu'ne. Ana higeno mago vahe'mo'a taza huno ete eri otigara osu'ne. Ne' mofavre nagatia hago zamavare'za vu'nazankita henka'a mago'enena ozamagegahune. <sup>21</sup> Hagi kva vahetimo'za hago neginagi hu'nazankiza Ra Anumzamofona antahige'za knare antahi'zana e'norize. E'ina hu'negu maka'zama nehaza zamo'ka knarera nosigeno, sipisipi kevu naga'mo'za panani hu'za ufre efre nehaze. <sup>22</sup> Hagi tamagesa ante'neta antahihi. Noti kazingati rama'a sondia vahe'mo'za ha' eme huramante'naku tusi zamagasasa ru'za erava'o nehaze. Ana hu'neanki'za Juda mopafima me'nea kumatamina eme eri haviza hanageno mago'zana omnena afi kramo'zage anampina manigahaze.

### *Jeremaia'ma nunamuma hu'nea naneke*

<sup>23</sup> Ra Anumzamoka nagrama kena antahinama huana, mago vahe'mo'a agra'a avesitera kana ontege, agra'a antahintahia retro huteno kana vano osugahie. <sup>24</sup> E'ina hu'negu Ra Anumzamoka nazeri fatgo huo. Hianagi karimpa ahenantenka anara osunka, fatgo kavukva hunantenka nazeri fatgo huo. Na'ankure kagrama karimpama ahenantesanke'na nagra fri'na amane zankna hugahue. <sup>25</sup> Hagi kagri'ma kage'za antahizama nosu'za, kagri kagire'ma zamentintima nosaza vahete karimpa ahe'zana eri rukaha hutro. Na'ankure ana vahe'mo'za tagri naga Israeli vahera zamahe'za eri hana hu'naze. Ana vahe'mo'za vahe'ma zamahe'za eri hana'ma hazageno'a mopatifina vahera omanigeno ka'ma koka efore hu'ne.

## 11

### *Juda vahe'mo'za kasege rutagre'naza naneke*

<sup>1</sup> Hagi Ra Anumzamo'a amanage huno Jeremaia'na nasami'ne. <sup>2</sup> Juda mopafivah'e'ne Jerusalemi kumapima nemaniza vahete'enema huhagerafi huvempa kema hanua kea antahi so'e hutenga vunka ome huzamagesa huo. <sup>3</sup> Ra Anumzana Israeli vahe'mokizmi Anumzamo'a amanage hie hunka ome zamasamio. Iza'o kasegem'o'ma hu'nea nanekema amage'ma ontessania vahe'mo'za kazusifi manigahie. <sup>4</sup> Na'ankure Isipi mopafima

tamagehe'za kazokazo eri'zama e'neri'zama mani'nazafinti'ma zamavare atirami'na e'noa kna zupama zamasami'noana, Nagri kema antahita amage'ma antesuta, tamagra Nagri vahe manisage'na, Nagra tamagri Anumza manigahue hu'noe. <sup>5</sup> Hagi Nagra tamagehe'ima huvempama huzamante'na, amirim'o'ene tumerimo'ma avimate'nea mopa tamigahue hu'na hu'noa nanekema eri ragama re'noa mopafi menina tamagra mani'naze. Anagema hige'na nagra hu'na, Ra Anumzamoka tamage hane hu'noe.

<sup>6</sup> Hagi anante Ra Anumzamo'a amanage huno nasami'ne. Kagra vunka Juda mopafima me'nea kumatamimpine Jerusalemi kumapima me'nea ne'onse kantamimpi vano nehunka amanage hunka zamasamio, huhagerafi huvempageva antahi so'e nehu amage anteho hunka zamasamio. <sup>7</sup> Hagi Nagrama tamagehe'ima zamavare atirami'na Isipiti'ma ne-ena, kenia ruotagreho hu'na koro kea zamasamime neogeno eno ama knareraha hanati'ne.

<sup>8</sup> Hianagi tamagehe'za ana nanekea antahi'za amagera onte'naze. Ana nehu'za zamagu'amo'a hankave netige'za, mago mago'mofoma agu'afinti otia havi avu'avaza tro hutere hu'naze. Ana hazagena Nagri ke'ma antahita amage'ma onte'nuta e'inahu knaza erigahaze hu'nama kasegefima huvame'ma hunte'noa knazana zami'noe. <sup>9</sup> Anante Ra Anumzamo'a amanage huno nasami'ne. Juda vahe'mo'zane Jerusalemi kumapima nemaniza vahe'mo'za Nagri nanekea ontahi sanune hu'za nanekea oku'a retro hu'naze. <sup>10</sup> Zamagra zamagehe'zama hu'nazaza hu'za rukrahe hu'za kumi ome hu'naze. Nagra kema hua nanekea nontahi'za, vu'za ru anumzantamina amagera ome ante'naze. Israeli vahe'ene Juda vahe'mo'zanena, zamagehe'zanema huhagerafi'noa huvempa nanekea ruhantagi'naze. <sup>11</sup> E'ina hu'negu Ra Anumzamo'a amanage hu'ne. Nagra knaza atre'nugeno eme zamazeri haviza hanige'za ana knazampintira atre'za ofregahaze. Nagrikura kasunku huranto hu'za zavi krafagea hugahazanagi, ke'zamia antahi ozamigahue. <sup>12</sup> Ana'ma hanuge'za Judama me'nea kumatamimpima nemaniza vhemo'zane Jerusalemi kumapima nemaniza vahe'mo'za, mananentake zama ofama hunentaza havi anumzantaminta vu'za zavi krafagea ome hugahaze. Hianagi ana havi anumzantamimo'za knazampintira zamaza osugahaze. <sup>13</sup> Na'ankure Juda vahe'mota tamagri'ma rama'a kumatamima meaza huno, tamagrica rama'a havi anumzantami me'ne. Jerusalemi kumapima rama'a ne'onse kantamima meaza huta, havi anumzantaminte ofama huntesaza itaramina rama'a tro hunte'neta, agoterfa Bali havi anumzante mana nentake zana kresramna vunaku nehaze. <sup>14</sup> E'ina hu'negu Jeremaiaga ama ana vahekura nunamuna huozamanto. Zamagri'ma zamaza huogura zamagri zamagira erinka Nagritega zavi krafagea osuo. Na'ankure knazamo'ma eme zamazeri havizama hanige'za zavi krafama hanage'na antahi ozamigahue. <sup>15</sup> Hagi Nagrama navesi neramanta vahe'nimota, hago rama'a havi avu'ava zana hu'nazanki, izu hu izo higeta nagri mono nompina neaze? Tamagrama afu ame'areti'ma ofama hanaza ofamo'a, anama esania knazamofo kana rehiza hanigeta, tamagra musena huta vugahazafi? <sup>16</sup> Hagi Ra Anumzamo'a Israeli vahe'motagura huno, olivi zafamo zagasefage anina renenteno, knare ragamarenteankna vahe mani'naze huno tamagica ante'ne. Hianagi tusi ununko'mo'ene monagemo'enema nehiaza huno Agra eno ana olivi zafaramina teve tagintesigeno nereno azanku'natamina tefutagi ramigahie. <sup>17</sup> Nagra Monafi sondia vahe'mofo Ra Anumzamo'na ana olivi zafa krite'na, haviza huo hugenka haviza hu'nane. Na'ankure Israeli vahe'motane Juda vahe'motanema Bali havi anumzante'ma ofama kre manama nevaza zamo nazeri narimpa

ahege'na anara hu'noe.

*Jeremaiama ahenaku ke retro hu'naza naneke*

<sup>18</sup> Hagi nagri'ma ha'ma renenantaza vahe'mo'zama nazeri haviza hunaku'ma kema retro haza nanekea Ra Anumzamo'a eri ama huno nasami'ne. <sup>19</sup> Nagrira mago sipisipi anenta'ma ahenaku'ma avre'za nevazageno agazonema huno neviaza hu'za navre'za vu'naze. Nagri'ma nahenakura amanage hu'za nanekea retro hu'nazana nagra kena antahi'na osu'noe. Ama zafa antagi atresunkeno raga'amo'a amne zankna nehina, ahe frisunkeno ama mopafina agia omanesie hu'za hu'naze. <sup>20</sup> Hianagi Ra Anumzamofona amanage hu'na asami'noe. Monafi sondia vahe'mofo Ra Anumzamoka kagra fatgo hunka keaga refko nehunka, vahe'mofo agu'affine antahi'zampinema me'nea zana keama nehane. Zamagrama nehaza avu'ava zante'ma nonama hunka zamazeri havizama hanana zanku navua ante'na negoe. Na'ankure nagra maka zana ko kagri kazampi ante'noe. <sup>21</sup> Hagi Anatoti kumate vahe'mo'za hu'za, kagrama kasnampa kema Ra Anumzamofo agifima hunka vananketa kahe frigahune hu'za hu'naze. <sup>22</sup> E'ina hu'negu Monafi sondia vahe'mofo Ra Anumzamo'a ana vahekura amanage hu'ne. Nagra knaza zamisanugen, nehazave zamia hapinti zamahe hana hugahaze. Ana nehanage'za ne'mofa zamimo'za ne'zama nesaza zanku hu'za frigahaze. <sup>23</sup> Ana hanigeno Anatoti kumate vhahera magore huno kasefara huno omanitfa hugahie. Na'ankure zamazeri havizama hanua knama esanige'na Anatoti kumate vhahera zamazeri havizama hanuge'za ana knazana erigahaze.

## 12

*Jeremai'a'ma nunamu huno Ra Anumzamofo antahige'nea naneke*

<sup>1</sup> Ra Anumzamoka kagra fatgo kavukva'ene ne' mani'nankena nagra keaga Kagrane hu'za nehue. E'ina hu'negu menina natrege'na fatgoma huno refkoma hu avu'ava zanku Kagranena keaga ha'neno. Hagi nahige'za havi avu'ava zama nehaza vahe'mo'za maka zampina knareru hu'za nemanizage'za, havigema hu'za vahe'ma rezmatagama nehaza vahe'mo'za musena hu'za fru hu'za nemanize? <sup>2</sup> Zafama hankrazankna hunka Kagra zamagrira hankrank'e'za rafu'na re'za nomani'zampina knare nehaze. Ana vahe'mo'za kagrikura tusiza hu'za zamagitetira kagi hanta nevazize. Hianagi zamagu'amo'a kagri tava'ontera omane'neanki afete me'ne. <sup>3</sup> Hianagi Ra Anumzamoka nagri nagu'amo'a inankna huno Kagritera me'nefi ko rezaganenka ke'nane. Havi avu'ava zama nehaza vhahera, sipisipi afu'ma ahenaku'ma zamavazuma hu'zama vazaza hunka zamavarenka nevunka, zamazeri rure huge'za mani'neza zamahema frizasa knagura avega anteho. <sup>4</sup> Hagi ama mopamo'a nama'a knafi asunkura huno zavira netegen, trazamo'a hagegea nehigeno, afi zagagafamo'zane namaramimo'zanena nomanize? Na'ankure ama mopafima nemaniza vahe'mo'zama nehaza havi avu'ava zamo higeno anara hu'ne. Ana'ma hige'za vahe'mo'za hu'za, tagrite'ma henkama fore'ma hania zana Anumzamo'a onkegahie hu'za nehaze.

*Ra Anumzamo Jeremaiama kenona hunte'nea naneke*

<sup>5</sup> Hagi Ra Anumzamo'a Jeremai'a'na amanage huno kenona hunante'ne, Kagra menina vahe'ene traginka nevanke'za kagatenerazagenka kasefukura nehananki, inankna hunka hosi afu'enena kagia regahane? Hagi knare'ma huno pehe'ma hu'nea mopafima tanafa'ma hanunka, inankna

hunka Jodani tinkenaregama tra'zanke hu'nea kokampina kagia regahane? <sup>6</sup> Hagi kagrira kafu kaganah'e'zane nagakamo'zanena ko kagrira ha' regante'naze. Ana nehu'za kaheku kea retro nehaze. E'ina hu'negu zamagrama so'ema hugantesaza zankura antahi ozamio. <sup>7</sup> Hagi Nagri vahere hu'na huhamprima zamantoge'zama marerisa feno zani'agna'ma hu'za mani'naza vahera namefi huzamigahue. Ana nehu'na navesima nezamanta vahera ha' vahezmimokizmi zamazampi zamavarentegahue. <sup>8</sup> Hagi Nagri vaherema hu'na huhamprima zamante'noa vahe'mo'za, zafa tanopafi laionigna hu'nazanki'za, ra zamageru ru'za krafage hunante'naze. E'ina hu'negu Nagra navesra huzamante'noe. <sup>9</sup> Hagi Nagri vaherema hu'na huhamprima zamante'noa vahe'mo'za mago namagna hu'nazankino, tumpamo'za eme zamazeri kagi'neza zamazeri haviza hunaku nehaze. Hagi mago'a afi zagagafaraminena kehinke'za e'za ana namamofo avufga eme neho. <sup>10</sup> Hagi rama'a sipisipi kva vahe'mo'za e'za Nagrama hankre'noa waini hozani'a eme eri haviza nehu'za hozani'a zamagareti rentrako hu'naze. Ana nehu'za knare zantfama hu'nea mopani'a eri haviza hazageno, vahe omani ka'ma koka fore hu'ne. <sup>11</sup> Hagi ana hu'za ana mopa eri haviza hazageno, mago zana omanetfa hu'ne. E'ina hazageno mopamo'a asunku huno Nagritega zavite'ne. Maka mopamo'a haviza hina vahera omani-gahie. Ana hugahankino ana mopagura mago vahe'mo'a antahi omigahie. <sup>12</sup> Rama'a ha' vahe'mo'za maka'za eri haviza hunaku hagage kokampima me'nea agonaramimpina hago e'naze. Na'ankure Ra Anumzamo ana vahera hanige'za e'za mopamofona mago atumpareti vuno mago atumparega vanige'za bainati kazinkanonteti vahera eme zamahe hana hugahaze. Ana hina mago vahe'mo'a atreno freno agura ovazigahie. <sup>13</sup> Hagi tamagra Israeli vahe'mota witi hoza antegahaze. Hianagi witima vasage knazupa ave've traza vasagegahaze. Tusi tamu'nasisi hu'za eri'zana enerisageno zamavesra hugahie. Hianagi anampintira mago ne'zana e'ori'za zamagazegu hugahaze. Na'ankure Nagra Ra Anumzamo'na tusi narimpa ahezamante'sanua zamo anara hugahie.

<sup>14</sup> Hagi Ra Anumzamo'a amanage hu'ne. Nagrama mevava fenozane hu'na Nagri vahe Israeli naga'ma zamuge'za nemaniza mopamofo tavaonte'ma nemani'za havi avu'ava'ma nehaza vahe'mo'zama, ana mopama eri havizama hu'naza vahera mopa zamifintira zamahenati atregahue. Ana nehu'na Juda vahe'enena ana vahe amu'nompintira zamahenati atregahue. <sup>15</sup> Hianagi ana'ma hutesu'na ana vahera nasunku huzamante'na ete zamavare'na vanuge'za, erisantima hare'za mani'naza mopazmire umanitere hugahaze. <sup>16</sup> Hagi vahe'mo'zama tamage zamagu zamagesareti'ma Nagri vahe'mokizmi avu'ava zama amage nente'za, korapa'ma Bali havi anumzamofo agifi huvempa hihoma hu'za Nagri vahe'ma rempima huzami'naza zana netre'za, Nagri nagifima huvempama hu'za, Ra Anumzamo'a kasefa huno mani'ne hu'zama hanu'za, Nagri vahe'ene magoka manigahaze. <sup>17</sup> Hianagi mago mopafi vahemo'ma Nagri kema antahino amage'ma ontесanía vahera, Nagra zamazeri haviza nehu'na, zamahe kasope atregahue huno Ra Anumzamo'a hu'ne.

## 13

### *Jeremaiana afafafi efeke tavrave nofi'mofo naneke*

<sup>1</sup> Hagi Ra Anumzamo'a amanage huno nasami'ne. Kagra vunka efeke tavaravenofira ome mizasenka kafafafi anakinto. Hianagi ana tavravea atregeno timo'a avakora osino. <sup>2</sup> Hige'na Ra Anumzamo'ma hunantea

kante ante'na, nafafafima anakisua efeke tavaravenofira ome mizasete'na nafafafifi anakinte'noe. <sup>3</sup> Anante Ra Anumzamo'a ete mago'ene amanage huno nasami'ne. <sup>4</sup> Kagrama mizasenka'ma kafafafima anakintana efeke tavaravenofira erinka, Yufretisi tintega vunka havefima rutane'nesania kampi ome frakinka anto. <sup>5</sup> Anage hige'na Ra Anumzamo'ma nasamia kante ante'na, Yufretisi tintega vu'na, ana tavaravea ome fraki'noe. <sup>6</sup> Hagi za'za kna evutegeno, Ra Anumzamo'a nasamino, Yufretisi tintegama hugan-togenka'ma vunka, kafafafifi efeke tavaravenofira ome fra'ma ki'nana nofira ome erio. <sup>7</sup> Hige'na Yufretisi tintega vu'na ana tavaravenofira ome fra'ma ki'nore vu'na mopa ome kafi'na koana, hago frupareno atraga trago higeno ana tavaraveretira mago zana hugara osu'ne. <sup>8</sup> Anante Ra Anumzamo'a amanage huno nasami'ne. <sup>9</sup> Nagra Ra Anumzamo'na huanki'na, ana tavaravemo'ma havizama hiaza hu'na, Juda vahe'ene Jerusalemi vahe mo'zanema ra zamagima e'neriza zana eri haviza hugahue. <sup>10</sup> Hagi amama havi avu'ava zama nehaza vahe'mo'za Nagri kea antahi'za amagera nontazanki, zamagu'amo'a hankavetige'za zamagra'a zamavesi amage'nente'za, havi anumzantamimofo eri'za eneriza monora hunte'naze. E'ina hu'nazagu ana efeke tavaravemo'ma farupareno haviza higeno erino mago zama osiankna hugahaze. <sup>11</sup> Hagi kora Israeli vahe'ene Juda vahe'enena, afafafima zaza tavravema rugagino anaki antrako'ma nehiaza hu'na, zamazeri antrako hu'noane. Ana'ma hu'noana Nagri vahe fatgo manine'za nagia erisga nehu'za, ra nagia namisaze hu'na hu'noanagi zamagra Nagri kea antahi'za amagera onte'naze.

<sup>12</sup> Ana hu'negu Ra Anumzana Israeli vahe Anumzamo'a amanage hie hunka ome zamasamio. Maka mopa kavoma tro'ma hu'nazana, waini ti afiviteno ante'za tro hu'naze hunka huo. Anagema hananke'za amanage hu'za kasamigahaze. Izo mopa kavoa waini ti afinteno ante'za me'nanki, tagrikura ontahi'naze hunka nehampi? <sup>13</sup> Anagema hanagenka, Ra Anumzamo'a amanage hie hunka zamasamio. Ama mopa fima nemaniza vhahera waini tina rama'a eri hakare hanuge'za nene'za neginagi hugahaze. Deviti noma erino kinima manisiana ne'teti vuno, pristi vahe'ene kasnampa vahe'ene maka Jerusalemi kumapima nemaniza vhahete'enema vanige'za waini tina nene'za neginagi hugahaze. <sup>14</sup> Hagi mopa kavomo evuramino mopa kavore rurako hiankna hu'na zamazeri haviza hanuge'za, zamafahae'za oti'za mofavre naga zaminena ha' orente arente hugahaze. Nagra antahi fru huno zamante'na, nasunku'ene narimpa frunena huo-zamante zamazeri haviza hugahue. Nagra Ra Anumzamo'na amana nanekea nehue.

### Zamavufga rama nehaza vahe'ma zamazeri havizama hania naneke

<sup>15</sup> Hige'na nagra anante amanage huna Juda vhahera zamasamio. Tamagra tamufga rana osuta Ra Anumzamo'ma nehia nanekea tamagesa ante'neta antahi so'e hiho. <sup>16</sup> Ra Anumzana tamagri Anumzamofona ra agi amiho. Ru ana osu'nesageno kna hina haniza avreno tamagritera egahie. Ana hanigeta agonaramintegama vanoma hanazana hanimpina tanafa huta masegahaze. Tamagra tavi masama kesaza zankura tusiza huno tamavesigahie. Hianagi Anumzamo'a tavi masa eri amne hina tusi hanizampi manigahaze. <sup>17</sup> Hianagi Anumzamo'ma hia nanekema tamagra antahita amage'ma ontessage'na, nagra Jeremaia'na tamavufga rama nehaza zankura tusi zavi ateramanategahue. Ana nehanugenonavunumo'a tusiza

huno herafiramigahie. Na'ankure Ra Anumzamofo vahera ru mopare-gati vahe'mo'za eme tamavre'za ome kina huramantegahaze. <sup>18</sup> Hagi Ra Anumzamo'a huno, kini ne'ene kuini a' nereranena amanage hunka ome zanasamio. Tanagrama neman'i a Kini trara atreta utiramita kugusopafi umani'o. Na'ankure kini fetorira tanaseniretira evurami'nne. <sup>19</sup> Hagi sauti kaziga Negevi mopafima me'nea kuma tamimo'za kuma kafana erigi vaga'renageno, mago vahe'mo'za kafantamina eri onagigahie. Juda vahera maka zamavare'za vu'za ru vahe'na moparega ome kina huzmantegahaze. <sup>20</sup> Hagi noti kazigati'ma ha' vahe'ma neazana tamavua kesga huta keho. Kegava hihoma huno tamigeta kegavama nehaza hentofa sipisipi nagara menina iga mani'naze? <sup>21</sup> Hagi kagra ha' vahekagu'ma ronen'i hunka zamazeri so'ema hu'nana vahe'ma, Ra Anumzamo'ma kvama zamazeri otisige'za kegavama hugantesagenka, kagra na'ane hugahane? Kagrina a'nemo'za mofavre antenaku nehazageno zamata negriankna kata krigahie. <sup>22</sup> Hagi kagraka'a kagenoka hunka, Na'a agafare ama zamo'a nagritera fore nehie? hunka hugahane. E'ina'ma hiana na'ankure kagra rama'a kumi'ma hu'nana zante, kenaka'a eri tagato hutresageno kagaze kavufgamo'a amate megahie. <sup>23</sup> Hagi haninke avufgangane Itiopia vahe'mo'za ruzahera huno agrono avufga erigahifi? Hifi lepatimo'za zamazokate'ma tupritapri'ma hu'neana eritregahazo? I'o anara osugahaze. E'inama nehiaza hunka havi kavukvazana hvavava hunka nevunka, knare kavukava zana nosane. <sup>24</sup> Ra Anumzamo'a huno, e'ina agafare hagege kokampinti zaho'mo eno witi honama eme eri harafi huno viaza hu'na tamagrira tamazeri panani ha'nena ufre efre hugahaze. <sup>25</sup> Hagi Ra Anumzamo'a huno, Ama ana zamo'a tamagrite fore hugahie hu'na Nagra ko huhampari'noa zamo tamagrit-era efore nehie. Na'ankure tamagra Nagrira tamagekani nenanteta havi anumzante tamentintia hu'naze. <sup>26</sup> E'ina hu'negu Nagr'a kenatamia erisga hu'na tamavugosa rufitesuge'za, vahe'mo'za tamagaze zamavufaga kegahaze. <sup>27</sup> Hagi tamagra monko a'nemo'za nehazaza huta krahakraha huta havi anumzantera monko avu'ava zana agonafine trampinema huta vano nehuta agoterfa avu'ava zama nehazana Nagra ko tamage'noe. Jerusalemi kumapima nemaniza vahera nasunku huramantoe, nama'a knafi agru osu avu'avazampina manita vugahaze?

## 14

### *Ko'ma origeno zagemo ne'za tefanane hu'nea zamofo naneke*

<sup>1</sup> Hagi Juda mopafima ko'ma origeno maka zamo'ma hagege hianknafina Ra Anumzamo'a amanage huno anazankura Jeremaia'na nasami'nne. <sup>2</sup> Juda vahe'mo'za tusi zavi krafa nehazage'za, ranra kumapima kuma kafama erigi'zama mani'naza vahera zaferina zamia omane amane nehie. Maka vahe'mo'za mopafi masene'za zavira nete'za zamasunkura nehaze. Ana nehazageno Jerusalemi kumapinti'ma tusi zavi krafama nehaza zamofo agasasamo'a amenagame mareri'nne. <sup>3</sup> Hagi ugota kva vahe'mo'za, ti ome afiho hu'za eri'za vahe zamia huzamantage'za vu'naze. Hianagi maka tinkerimo'a hagege hu'nege'za ana eri'za vahe'mo'za na'a hugahune hu'za antahintahi hakare nehu'za, tintaferamina amne eri'za e'naze. Ana hute'za zamagazegu nehu'za zamazana zamasenire ante'za rufite'naze. <sup>4</sup> Hagi mopamo'a hagege huno kekokako hu'ne. Na'ankure ana mopafina kora ruonte'ne. Ana hige'za hozama nentaza vahe'mo'za zamagranena zamazana zamasenire rufite'za zamasunku hu'naze. <sup>5</sup> Hagi afi a' dia afu'mo'za

zamagranena anentazamia zamatre'za fre'naze. Na'ankure trazama ne-saza zana omanege'za anara hu'naze. <sup>6</sup> Hagi afi donki afumo'za hagege agonaramimpi oti'za, afi kramo'ma hiaza hu'za zamasafeku nehu'za, zam-aganefuna hagana hagana hu'naze. Trazama nesaza zanena omanegeno zamavumo'a kagikagi hu'ne. <sup>7</sup> Hagi zamagra hu'za, Ra Anumzamoka tagrama hu'nona havi avu'ava zamo ama hazenkea avreno eme neramie. Hianagi kagrika'a kagi'mofa knare zanku nentahinka tazahuo. Na'ankure tagra rama'a zupa tamefira hunegamita, Kagri kavufina kumira huwava huta e'none. <sup>8</sup> Hagi tagra Israeli vahe'mota Kagrite amuhara nehuta kavega ante'nonkenka, knazamo'ma tagrite'ma ne-egendenka, kagra tagu'nevazine. Hanki kagra nahigenka, ru moparegati amane kanteno ea vhemo magoke kenage tagrane emaseteno viazana nehane? <sup>9</sup> Hagi nahigenka antahintahi hakarema nehia vaheklnara nehunka, harafa ne' mani'noaanagi vahe'ma azama osianknara nehane? Hianagi Ra Anumzamoka tagrane magoka mani'nane. Ana nehunka Nagri vahe mani'naze hunka tagrira huhampari rante'nananki, Kagra orataro. <sup>10</sup> Anante Ra Anumzamo'a ana vahekura amanage hu'ne. Tamagra Nagri'ma natreta afete'ma mani'zankuke tamavenesigeta, akoketa mani so'e nosaze. E'ina hu'negu Nagri vahe mani'naze hu'na antahi noramue. Nagra menina havi avu'ava zama hu'naza zanku nagesa nentahi'na, knazana tami'na tamazeri havizana hugahue.

### *Ra Anumzamo Jeremaiana asamino vahekura nunamuna osuo hu'nea naneke*

<sup>11</sup> Anante Ra Anumzamo'a amanage huno nasami'ne, Jeremaiaga ama vahe'ma knare hu'za manisazegura Nagritega nunamuna osuo. <sup>12</sup> Hagi ne'zama atre'za nunamuma hana zana Nagra antahi nozami'na, tevefi kre fanane hu ofane, witi ofanema hanaza zankura Nagra musena osugahue. Hianagi Nagra ha' vahe huzmanta'nena eme zamahe nefrisage'na, zam-agatonto zanteti'ene' ruzahu ruzahu krireti zamahe frigahue. <sup>13</sup> Hianagi nagra amanage hu'na hu'noe. Ra Anumzamoka ama ana vahe'mokizmi kasnampa vahe'mo'za ko zamasami'za, ha'ma hu'zane zamagatonto hu knamo'a omesanigeta knare huta manigahaze hu'za nezamasami'za, Ra Anumzamo tamarimpa frua tamisnigeta ama mopafina manigahaze hu'za nehaze. <sup>14</sup> Anante Ra Anumzamo'a huno, e'i ana kasnampa vahe'mo'za Nagri nagifgi havi kasnampa naneke nehaze. Nagra mago vahera huntege, nanekea asamigera osu'noe. Zamagra havige hu'za ava'nagna zana ke'none nehu'za, fri vahe hankro'ene nanekea nehu'za, zamagra'a antahintahifinti agafa'a omne nanekea nehaze. <sup>15</sup> E'ina hu'negu Ra Anumzamo'a amanage hu'ne. Nagra huozamante noanagi Nagri nagifima havi kasnampa kema hu'za, ha'ma hu' zane zamagatonto zanena ama mopafina omegahie hu'za hu'naze. Hianagi ana kasnampa kema hu'naza vahera hapinti'ene zamagatonto zamo'ene zamahe frigahie. <sup>16</sup> Hagi ana kasnampa kema nehazage'zama antahi'naza vahe'enena hapinti'ene zamagatonto zamo'ene zamahe frigahie. Ana hanage'za ha' vahe'mo'za veneneramine, a'ne za-mine ne'mofavre naga'zmimokizmi fri'naza zamavufaga eri atresageno Jerusalemi kumamofo ne'onse kantamimpi megahie. Ana hu'za maka fri vagaresageno mago vahe'mo'a kasefara huno mani'neno aseozamantegahie. Na'ankure zamagrama hu'naza kumi'mofa nona'a knazana zamagri agofetura antegahue. <sup>17</sup> Hagi Jeremaiaga ama ana vahera menina amanage hunka zamasamio. Hanine zagenena zavira tevava nehugenonavunumo'a tinkna huno fragu vazineramie. Na'ankure mofa'hane gna'ma hu'nage'na,

nagrama navesima nezamantoa vaheni'a ha' vahe'mo'za zamahe'za re-hapatizage'za zamatagu hu'naze. <sup>18</sup> Hagi nagrama vu'na kuma'mofo fegi'ama ome kesuana, hapinti'ma zamahe fri'nesaza vahe zamavufaga ome kegahue. Hagi rankumamofo agu'afima ufresuana ne'zanku hu'za fri'nesaza vahe zamavufaga ome kegahue. Hagi pristi vahe'ene kasnampa vahe'mo'zanena ke'za antahiza osu'naza moparega vu'naze.

### *Zamaza huzama erisagu nunamu hu'naza naneke*

<sup>19</sup> Ra Anumzamoka tamagerafa hunka Juda vhahera hago kamagena huzami'nampi? Hagi Saioni kumara hago kavesra huntenka kagote'nentampi? Kagra nahigenka tazeri haviza hutenga zazatera tatranketa tatafina mani'nonkeno anazamo'a ameria huno vagarenorante? Tagra tarimpa frune manisanumpi huta muhara hunanagi, mago knare'zana ome'ne. Tagrama kanamaresuna knagu muhara huta avega antonanagi, tusi koro zampinpe mani'none. <sup>20</sup> Hagi Ra Anumzamoka tagehe'zama hu'naza kumiku'ene tagrama hu'nona kumikura hago kagri kavufi kumi hu'none huta huama hune. <sup>21</sup> Hagi Ra Anumzamoka Kagraka'a rankagimofo knare zanku kagesa nentahinka, kamefira huoramio. Ana nehunka masamentake kini traka'a eri ante fenkamia otro. Tagranema huhagerafi huvempa kema hu'nana kegura kagesa nentahinka ruha'ontagio. <sup>22</sup> Hagi ru vahe'mokizmia kaza osu havi anumzaramimo'za kokura hanageno kora rugahifi? Monafintira agra'a avesitera kora rugahifi? I'o, Ra Anumzana tagri Anumzamoka Kagrake'za nehankeno kora nerie. E'ina hu'negeta kagrama taza hananku muhara nehuta kavega nentone. Na'ankure ama ana maka zana kagrake hankeno fore nehie.

## 15

### *Juda vahe'ma keagafima refko huzmanten'nia zamofo naneke*

<sup>1</sup> Anante Ra Anumzamo'a amanage huno nasami'ne, Moseseko Samue-likea Nagri navuga otike ama ana vahekura kasunku huzamanto huke nunamuna huke nantahige'saanagi, Nagra nasunkura huo zamantegahue. Hinke'za ana vhahera Nagri navugatira manigane'za viho. <sup>2</sup> Hagi zama-grama kantahige'za, tagra inantega vugahune? Hanagenka amanage huno Ra Anumzamo'a hie hunka zamasamio. Iza'zo krima eri'za frisaza vhahera, ko huhampri'na, iza'zo hapinti'ma frisaza vhahera ko huhampri'na, iza'zo ne'zanku'ma hu'za frisaza vhahera ko huhampri'na, zamavare'za ru moparegama kinama ome huzmantesaza vhahera, ko huhampri'noe. <sup>3</sup> Nagra 4'a kankamu retro hu'na ana vhahera zamahe hana hugahue huno Ra Anumzamo'a hu'ne. Nagra hanuge'za ha' vahe'mo'za bainati kaz-inteti zamahe nefrisage'za, kraramimo'za zamavufaga avazuvahe hu'za nefresage'za, namamo'za zamavufaga tagnataganu hu'za nenesage'za mesiama'a afi zaga kafamo'za ne'za eri hana hugahaze. <sup>4</sup> Ama anazama hanuana na'ankure, Juda kini ne' Hezekaiia nemofo Manase'ma, kinima mani'nea knafima Jerusalemi kumapima havi avu'ava zama hu'nea zante anara hanuge'za, maka ama mopaifima mani'naza vahe'mo'za nentahi'za zamagogogou hugahaze. <sup>5</sup> Ra Anumzamo'a huno, Jerusalemi kumapima nemaniza vahe'mota iza asunkura huneramante'sanigeno, Iza zavira ateramantesigeno, Iza knare huta mani'nazo huno tamantahigegahie? <sup>6</sup> Nagra Ra Anumzamo'nama nehuana, tamagra tamefi hunenamita natreta rukrahe huta vu'naze. E'ina hu'nazagu Nagra nazana erisga hu'na tamazeri haviza hugahue. Nagra nasunku'ma huramante'nama neozamo'a tusi navaresra

hie. <sup>7</sup> Hagi maka Juda mopafima me'nea ranra kumatamimofo kafantera, witi honama azotareti'ma erihera'e'ma hazageno zaho'mo eri harenio viaza hu'na, vaheni'a zamazeri panini hugahue. Ana nehu'na mofavre naga zaminena zamahe hana hugahue. Na'ankure zamagra havi avu'ava zana atre'za zamagu'a rukrahera osu'naze. <sup>8</sup> Hagi hageri ankenaregama me'nea kaheparamina rugatere'za rama'a kento a'nerami manigahaze. Nagra zage ferupi ha' vahera zamavare'na esanuge'za, nahezave naga'mokizmi zamarerahe'ina eme zamahe frigahaze. Ame hu'na ana knazana zamsanuge'za antahintahi hakare nehu'za tusi koro hugahaze. <sup>9</sup> Hagi 7ni'a ne' mofavrema zamante'nesia a'mo'a ana maka mofavre naga'a frisageno, hankave'a omanesigeno, mani'neno asimu ante'zanku hugahie. Tusi zage ferupinagi, ana a'mofo zagemo'a ufregahie. Ana hanigeno agazegu nehuno, kepri hufeno manigahie. Nagra Ra Anumzamo'na huankino mago'ama mani'naza vahera ha' vahe zamazampi zamavarente sanuge'za zamahe frigahaze.

### *Jeremaia'ma Ra Anumzamofo antahige'nea naneke*

<sup>10</sup> Hagi anante nagra Jeremaia'na hu'na, nagra nasunku huanki nahigeno nenerara'a nagrira kasenante'ne? Amama mani'noa mopafi vahe'enena maka zupa kehakare nehu'na, kefra nevazue. Nagra mago vahe'mofo zananofira osugeno, mago vahe'mo'a nagri'zananofira osu'ne. Hianagi maka vahe'mo'za nagrikura hu'za sifnafi manigahie hu'za nehaze. <sup>11</sup> Hianagi Ra Anumzamo'a huno, Jeremaiaga Nagra kagu'vazisugenka mani'enkena knare eri'zana erigahane. Kagri ha' vahe'mo'za knafima mani'neza antahintahi hakarema nehu'za, nagrikura kasunku hurantenka taza huo hu'za eme meme hugahaze. <sup>12</sup> Anumzamo'a huno, noti kazigati'ma neaza ha'vahe'mo'za, ainimo'ene bronsi mokema huna'aza hu'za hankavenentake vaheki'za, mago vahe'mo'a zamazeri otregahie. <sup>13</sup> Miko tamagri feno zantamine zago'amo marerisa zantaminena, amne fru'hu'na eri zamisanuge'za tamagri ha' vahe'mo'za arohu eme tamare'za erigahaze. Na'ankure amama mani'naza mopatamimofo agu'afina rama'a kumi hu'naze. <sup>14</sup> Nagra hanuge'za ha'vahetamimo'za eme kina huramante'za tamavre'za vanageta, keta antahita osu'nesaza moperega kina ome hugahaze. Na'ankure Nagrira narimpa he'zamo'a, teve rukru hiankna huno tamagritera eghahie. <sup>15</sup> Hige'na nagra Jeremaia'na amanage hu'noe. Ra Anumzamoka nagrite'ma fore'ma nehia knazana, ko kenka antahinka hu'nane. Kasunku hunenantenka nazeleri havizama nehaza vahera nona huzamanto. Na'ankure nagra Kagri eri'za vahe mani'noa zanku hu'za, nahe fri'za nehzanki antahi nemaminka kegava hunanto. <sup>16</sup> Kagri nanekemo'ma nagrite'ma nege'na ne'zama hiaza hu'na neno. Ana nanekemo musezana nemamigeno, nagu'amo'a musenkasea nehie. Na'ankure Ra Anumzana Monafi sondia vahe'mofo Anumzamoka, kagri kagimo'ma nagripima me'neazanku anara nehue. <sup>17</sup> Nagra ne'zama kre'za nene'za musenkasema nehaza vahe'enena nomanuanki, nagraku nemanue. Na'ankure kagri hankavemo'a nagrane me'nege'na, ana vahe'mo'zama nehaza kumikura tusi narimpa ahenezmantoe. <sup>18</sup> Nahigeno nagri knazamo'a zazatera meno nevie? Nahigeno namumo'a tenonkanie? Kagra enevia timo vahe revatga huno hagege hunegeno, vahe'mo ome antegeno eankna nagritera hugahampi? <sup>19</sup> Hagi anagema hugeno'a Ra Anumzamo'a kenona amanage hu'ne. Kagrama kag'u rukrahera'e'ma hunka nagrite'ma ete esananke'na, ete kasefa hankavea kamisanugenka, nagri eri'zana erinka vugahane. Kagra agafa'ama omne nanekema nehana zana netrenka, knare nanekte'ma hanunka, Nagri

nagi'ma erinka keagama hu vahe manigahane. Ana hananke'za vahe'mo'za rukrahe huza kagritechegahazanki, kagra zamagri zamagera ontegahane. <sup>20</sup> Nagra kagrira kazeri hankaveti'sanugenka, bronsireti'ma eri hanaveti'za tro hu'naza vihu keginagna hunka ama vahe zamavurera manigahane. Ana hu'nesanke'za hara regantegahazanagi kazeri otregahaze. Na'ankure Nagra kagrane mani'ne'na kegava hunegante'na kagu'vazi'na ete kavregahue. Nagra Ra Anumzamo'na ama nanekea nehue. <sup>21</sup> Nagra havi avu'ava zama nehaza vahemokizmi zamazampintira kaza hu'na kavare atregahue. Ana nehu'na hazenke vahe'mokizmi zamazampintira ete kagu'vazina kavare-gahue.

## 16

### *Henkama Juda vahete'ma esania hazenke zamofo naneke*

<sup>1</sup> Hagi mago'ene Ra Anumzamo'a amanage huno nasami'ne. <sup>2</sup> Hagi amama mani'nana kumapina ara erinka ne' mofavreramine mofa'nerami'nena ozamanto. <sup>3</sup> Na'ankure ama kumapima kasezamante'naza mofavreraminte'ma fore'ma hania zanku'ene zamarera zamafante'ma fore'ma hania zankura Ra Anumzamo'a amanage huno hu'ne. <sup>4</sup> Zamagrira ruzahu krimo zamahe frigahie. Ana hina mago vahe'mo'za zavira ateno ase ozamantesige'za fri'za mopafi umase emase hu'nesageno, zamavufagamo'a rifagna hugahie. Mago'a vahera ha' vahe'mo'za zamahe nefrisageno, mago'a vahera ne'zanku hu'za frigahaze. Ana hanage'za namamo'zane, afi zaga kfamo'zane zamavufaga traga hu'za negahaze.

<sup>5</sup> Hagi Ra Anumzamo'a mago'ene huno, ama ana vahe'ma fri'enenge'za zavi'ma atesaza nompina vunka zavira netenka kasunkura huozamanto. Na'ankure narimpa fru zana zamagritetira ko eri netre'na, vagaore navesi'zane nasunku zanena eri atre'noe. <sup>6</sup> Hagi feno vahero zamunte omene vahero amama mani'naza mopamofo agu'afima nemaniza vahera maka frisage'za mago vahe'mo'za zavira ateno aseozamantegahie. Vahe'mo'za ana vahekura zamasunku hu'za zamavufaga taga huge, zamazokara taga hugera osugahaze. <sup>7</sup> Hagi mago vahemo'ma frisige'za zavi'ma nete'za mani'nesaza vahera mago vahe'mo'a ne'zane tinena erino eme ozamigahie. Zamarera zamafa'zanena frisige'za ana zanke hu'za vahe'mo'za eme zamasunkura hunezamante'za tina afiza eme ozamigahaze. <sup>8</sup> Ana hu'neanki vahe'mo'zama tusi ne'zama kre'za nene'za tinema nene'za musenkasema hanaza nompina kagra umani'enka, ne'zane tinena onetfa huo. <sup>9</sup> Na'ankure Monafi sondia vahe'mofo Ra Anumzana Israeli vahe Anumzamo'a amanage hu'ne, Kagrama ofri kasefa'ma hunka manisana kna'afina mani'enka kavufinti negesanke'na, ama mopamofo agu'afima mani'neza muse zagame'ma nehu'za ki'za zokago'ma nehaza avu'ava zana Nagra eri fanane nehu'na, aravema nehazage'za musenkasema nehaza zamagasanena eri atregahue. <sup>10</sup> Hagi ama anazamofo nanekema vahe'ma nezamasamisanke'za zamagra anage hugahaze. Nagafare Ra Anumzamo'a ama ana hazenke zantamina atre'nigeno tagritera egahie? huza hugahaze. Tagra na'a havizana hu'nona zante tazeri haviza hunakura nehie? Ra Anumzana tagri Anumzamofo avufina inan kumi tagra hu'none hu'za hugahaze? <sup>11</sup> Anagema hanagenka amanage hunka zamasamio. E'ina'ma hanuana na'ankure tamagehe'zama zamefi hunenami'za havi anumzaraminte'ma mono'ma hunezamante'za, eri'zama eri nezamante'za, zamefi

hunenami'za, Nagri kasegema amagema onte'nazagu anara hugahue huno Ra Anumzamo'a hu'ne. <sup>12</sup> Ana nehuta tamagehe'zama hu'naza havi avu'ava zana zamagatereta tamagra hu'naze. Tamagri tamagu tamagesamo'a han-kavetigeta tamagra'a tamavesite havi avu'ava zana nehuta, Nagri nanekea nontahize. <sup>13</sup> E'ina hu'negu amama mani'naza mopafintira tamazeri mate'venugeta tamagehe'zane tamagranema keta antahita osu'naza mo-parega vugahaze. Anantega umani'neta hanine zagenena kaza osu havi anumzantamintera monora huzamantegahaze. Ana'ma nehanage'na Na-gra nasunkura huramante'na tamazeri so'ea osugahue.

<sup>14</sup> Hianagi Ra Anumzamo'a huno, Mago kna ne-eankino ana knama esanige'za, mago'a zante'ma huvempama hunakura, Israeli vahe'ma za-mavareno Isipiti'ma atiramino e'nea Ra Anumzama kasefa huno mani'nea Anumzante huvempa nehune hu'za osugahaze. <sup>15</sup> Hianagi zamagra amanage hugahaze, tamagerafa huno ofri kasefa huno mani'nea Ra Anumzamofo agifi huvempa hunankino, Israeli vahe'ma tavaretregeta vuta noti kaziga moparegane ru moparamintegama ome kinama huta mani'nontegati tavreno ete mopatire e'ne. Anagema hanazana na'ankure Nagra zamagehe'ima zami'noa mopafi ete zamavare'na esua zanku anagea hugahaze. <sup>16</sup> Hianagi Ra Anumzamo'na menina rama'a ha' vahe huza-mantesuge'za e'za, nozame zama nehaza vahe'mo'zama kuko atre'za nozamema aze'nerizaza hu'za, ama ana vahera ha' vahe'mo'za zamazerigahaze. Ana'ma hutesage'na ete henka mago'ene ha' vahera huzamantesuge'za e'za, zagagafa zama nehaza vahe'mo'zama zaga kfama zamarotago hu'za nehazaza hu'za, ranra agonaramimpine, ne'onse agonaramimpine, haveg-ampinema fra'ma ki'za mani'nafintira zamavazu hugahaze. <sup>17</sup> Na'ankure Nagra maka zama nehazana navunte'na nezamagoanki'za, havi avu'ava zama nehaza zamo'a nagri navurera franokie. Ana hu'neanki'za nagri navurera kumi zamia eri frara okigahaze. <sup>18</sup> Hagi kotazana, zamagrama kumi'ma nehu'za hazenke'ma hu'naza zanteria, knazana nagra mago'ene eri agofetu hu'na zamazeri haviza hugahue. Na'ankure zamagra kaza osuno agoterfa havi anumzaramimofo amema'ama tro'ma hu'za eri hakarema nehaza zamo Nagri mopa eri haviza hu'ne.

<sup>19</sup> Hagi anante nagra hu'na, Ra Anumzamoka hazenke knafima mani'nogenka kagra nagri hankave mani'enka, fra'ma kisanua hankave kumani'a mani'nane. Kokankonka maka ama mopafima mani'naza vahe'mo'za kagrite e'za amanage hugahaze. Tagehe'zama amage'ma ante'naza anumzaramina tamage anumzana omani'naze. Zamagra amne zanki'za mago'zana huozmante'naze. <sup>20</sup> Hagi vahe'mo'za zamazantetira amne anumzazamia tro hugahaze. Hianagi ana anumzantamima tro'ma hanazana e'i tamage anumza omani'naze. <sup>21</sup> Hagi Ra Anumzamo'a huno, menina Nagra'a hihamu hankaveni'a zamaveri hanuge'za kegahaze. Ana nehu'za Ra Anumzanema hu'za nehaza nagia ke'za antahiza hugahaze.

## 17

### *Juda vahe'mo'zama hu'naza kumite knaza zamisania zamofo naneke*

<sup>1</sup> Hagi Juda vahe'mokizmi kumira roro hu'nea aini zotareti havegna'ma huno hankaveti'nea zamagu'arera hanagati'za krenente'za, Kresramanama nevaza itaraminte'ma me'nea pazivetaminte'enena hanagati'za krente'naze. <sup>2</sup> Hagi ana vahe'mo'za havi anumzantaminte'ma Kresramanama nevaza itama tro nehu'za, Asera a' havi anumzamofo amema'ama zafare'ma antre'za tro'ma hute'za, ranra zafa agafaramimpine

agonaramimpinema ante'naza zantaminkura mofavre naga'zmimo'za zamagera okani'za vu'za monora ome hunezmantaze. <sup>3</sup> E'ina hu'negu Nagra tamagri ha' vahera zamatresuge'za Nagri agonaramimpina ne-eza havi anumzante'ma mono'ma hunentaza kumatamina eme eri haviza nehu'za, zagone marerisa feno zantaminena rohu eme tamare'za eri'za vugahaze. Na'ankure tamagrama mopatamifima kumi'ma huta eri hakarema hu'naza zante anara hugahaze. <sup>4</sup> Erisanti harendahazema hu'nama tami'noa mopa azeri so'e osu atregahaze. Nagra tamatresugeta keta antahitama osu'naza moparega ha' vahetamimofo eri'za vahe umanigahaze. Na'ankure tamagrama hazazamo narimpa ahe'zana eri akru hazageno, tusi narimpa ahe vava nehiankino, mago vahe'mo'a ana tevea rusura osugahie.

### *Ra Anumzamofo knare antahizamofo naneke*

<sup>5</sup> Hagi Ra Anumzamo'a amanage huno hu'ne, Vahete'ma amuha'ma nehuno vahe'mo naza hugahie nehuno, vahe'mofo hankavegu'ma nentahino, Nagri'ma amefi'ma hunenamia vahe'mo'a sifnafi manigahie. <sup>6</sup> E'inahu'ma hania vahe'mo'a hagege kokampi me'nea trazankna hu'neankino, henkama manino vanifina so'e nomani'zana omanigahie. Ana hu'neankino agra hagege kokampima hagemoke hu'negeno vahe'ma nomanifi manigahie. <sup>7</sup> Hianagi iza'o Ra Anumzamofonte amentinti nehuno, Agritema amuha'ma nehania vahe'mo'a asomu'ene manigahie. <sup>8</sup> Hagi e'inahuma nehia vahe'mo'a, tinke'nare hankre'naza zafamo'ma rafu'na atregeno fenkame timpi urami'negeno, zagegnama egeno'a korera nosiankna nehie. E'ina hu'neankino zage knafinena ani'na eri nemareno raga rente vava huno vugahie. <sup>9</sup> Hagi vahe'mofo agu'afina vahe'ma revatagama hu'zamoke aviteno mago krigna hu'neankino kanamaregara osu'ne. Ana hu'negu iza ana zana keno antahino hugahie? <sup>10</sup> Hianagi Nagra Ra Anumzamo'na vahe'mofo antahi'zana ke'na antahi'na nehu'na, vahe'mofo agu'anena rezagane'na negoe. Ana nehu'na zamagrama nehaza zamavu zamavate ante'na mizana zamitere nehue.

<sup>11</sup> Hagi fatgo osu kanteti'ma zago fenoma eri atruma nehaza vahe'mo'za, namamo agra'a onte'nea amute anukino mase'negeno horaho hiankna nehaze. Ana hu'neanki'za kasefa vahe mani'neza ana feno zana atre vagarete'za, ozafama ome resazana zamunte omane negi nagi vahe manigahaze.

### *Jeremaia'ma Ra Anumzamofonte amentinti hu'nea naneke*

<sup>12</sup> Hagi nagra amanage hu'noe, Ra Anumzamofo hihamu hankave'ane kini tra'mo'a ese agafareti mesga huno meno e'nen, mono nom'aafi me'negeta monora huntentone. <sup>13</sup> Ra Anumzamoka Israeli vahe'mo'za Kagrite'ma amuha'ma nehaza Anumza mani'nane. Iza'orukrahe'ma huno katreno vania vahe'mo'a agazegu nehuno kugusopafi avon krente'negeno fanene hiankna hugahie. Na'ankure Ra Anumzamoka kagra vahemo'ma neneno kasefa'ma huno manisia kampui tinkna hu'nananagi, kagri'ma katre'naza agafare anara hugahaze. <sup>14</sup> Ra Anumzamoka krifintira nazeri kanamarege'na kanamare'na neman'i'na, nagu'vazinka navarege'na knare hu'na manisue. Na'ankure kagri kagige'za husga hunegantoe. <sup>15</sup> Hagi antahio, Israeli vahe'mo'za kiza zokago kea hunenante'za, Ra Anumzamofo naneke hunka huama'ma nehana nanekea, iga me'nefi atregeno ana nanekemo'a nena'a efore hinketa kamneno? hu'za nehaze. <sup>16</sup> Ra Anumzamoka nagri vahe'ma kegava huo hunka'ma nami'nana eri'zana atrena ofre'noe. Ana nehu'na mago zupa kagrikura hu'na, ama vahetera kari atregeno eme

zamazeri haviza hino hu'na osu'noe. Maka nanekema hu'noana kagra ko kenka antahinka hu'nane. <sup>17</sup> Ra Anumzamoka kagra nazeri korora osuo. Na'ankure hazenke zama ne-esigenka kagrake'za fra'ma kisanua kuman'i a manigahane. <sup>18</sup> Hagi knama nami'za nazeri havizama nehaza vhahera zamazeri zamagaze huo. Hianagi nagrira natrege'na nagazegura nehu'na, antahintahi hakarea osa'neno. Hagi ana vhahera kna nezaminka mago'an ante agofetu hunka zamazeri haviza huo.

### *Mani fruhu kna Sabatima kegava hu'zamofo naneke*

<sup>19</sup> Hagi Ra Anumzamo'a nagrira nasamino, Kagra vunka Jerusalemi kuma kafaraminte ome otio. Ese'ma uotisanana veamokizmi kafanema hu'nea kafanteti'ma, Juda kini vahe'mo'zama ufre'za atirami'zama ne-haza kafante uotio. Ana'ma hutenga vunka maka kafaraminte'enena ome otitere nehunka, <sup>20</sup> amanage hunka maka vhahera zamasamio. Ama kuma kafaramimpinti'ma ufretta atiramitama ne-haza vahe'motane, Juda kini vahe'motane Jerusalemi kumapima nemaniza vahe'motane, maka Juda vahe'motanena Ra Anumzamo'ma hania nanekea kama antahih. <sup>21</sup> Ra Anumzamo'a huno, Nagrama hanua koro kea antahih. Tama-grama knare huta mani'sanunema hanuta, mani fruhu kna Sabatirera Jerusalemi kumamofo kafaramimpintira feno zana erita marerita atiramita osiho. <sup>22</sup> Sabati knarera nontamifintira knama huga zana eri fegira nonteta, eri'zanena e'oriho. Hianagi Nagra tamagehe'ima zamasami'na Sabati kna ruotge hu'ne hu'nama zamasami'noa kante amage anteta kegava hiho. <sup>23</sup> Hianagi tamagri tamagehe'za ana nanekea antahih amagera nonte'za rukrahema hu'za ana nanekema antahih zankura zamavaresra hu'ne. Ana nehu'za zamavumro'ma ante kema huana zamagesa ante'za ontahihaze. <sup>24</sup> Hianagi Nagri nanekema antahita, kuma kafaramimpinti'ma feno zama erita atiramita mareritama nosuta, zagore'ma notreta, Sabati kna zupa eri'zama e'norita, Sabatima kegavama hanage'za, <sup>25</sup> kini vhahemo'zane eri'za vahe zamimo'zanena ama ana kuma kafaramimpinti mareri'za atirami'za huvaha hugahaze. E'ina nehanigeno Deviti nagapinti kinia efore hunante anante hu'za Jerusalemi kumapina kini tratera manigahaze. Maka zupa kini vhahemo'zane eri'za vahe'zamimo'zanena, karisizamifine hosi agumpine mani'neza, kuma kafaramimpintira mareri'za atirami'za nehu'za, Juda vahe amu'nompina vano hugahaze. Ana nehanage'za ama rankumapina vhahera manivava hu'za vugahaze. <sup>26</sup> Hagi Jerusalemi kuma'mofoma megagi'nea kumatamimpinti'ene Juda mopafima me'nea kumatamimpinti'ene, Jerusalemi kuma'tavaonte'ma megagi'nea ne'onse kumatamimpinti'ene, Benzameni naga'mokizmi mopafinti'ene, zage fre kazigama me'nea ne'onse agonaramimofo agafinti'ene, agonaramimpima me'nea mopafinti'ene, Negevi kazigatiki hu'za vhahera ne-e'za, tevefima kre fananehu ofane, mago'a ofaramine, witi ofaramine, mana nentake'za insensine, muse ofanena eri'za Ra Anumzamofo mono nontega egahaze. <sup>27</sup> Hianagi tamagra Nagri kema ontahita Sabatima kegavama nosuta, mago'a knare'ma nehazaza huta, Jerusalemi kumamofo kafaramimpinti'ma fenozama erita marerita atiramita nehuta Sabati zupama ke'onke zama zagore'ma atresage'na, Nagra Jerusalemi kuma kafaramintera teve tagintesanugen noreno, Jerusalemi kumapima me'nea ranra nontaminena teno vuno eno huno neresigeno, mago vahe'mo'a ana tevea rusura osugahie.

# 18

*Jeremaia'ma mopa kavoma tro nehia ne'mofo nompi vu'nea naneke*

<sup>1</sup> Hagi Ra Anumzamo'a amanage huno Jeremaia'na nasami'nne. <sup>2</sup> Kagra mopa kavoma tro nehia ne'mofo nontega uramige'na, anante Nagra nanekeni'a kasami'neno. <sup>3</sup> Anage hige'na nagra mopa kavoma tro nehia nemofo nontega urami'na ome koana, kagikagi nehigeno mopa kavoma tro'ma nehia zante ana ne'mo'a mago kavo tro nehige'na ke'noe. <sup>4</sup> Hianagi mopa kavoma tro nehia ne'mo'ma keana ana kavomo'a agrama antahi'nea kantera forera osigeno, anama tro'ma nehia mopa kavoa ete eri regripeteno agrama antahi'nea kante ete ru kavo tro hu'ne. <sup>5</sup> Anante Ra Anumzamo'a amanage huno nankeea nasami'nne. <sup>6</sup> Tamagra Israeli vahe'motama Nagriku'ma antahi'zana, mopa kavoma tro'ma nehia nemo'ma mopa kavore'ma hiazana tagritera osugahie huta nehzafi? Tamagra Israeli vahe'mota mopa kavoma tro'ma nehia ne'mofo azampima, higo mopama meaza huta, Nagri nazampi mani'naze. <sup>7</sup> Hianagi Nagra mago'a zupa huama hu'na, mago mopafi vaheku'ene mago kinimo'ma kegavama hu'nesia mopafi vaheku'ma hu'na, zamazeri haviza nehu'na zamavare atregahuema hanuge'zama, <sup>8</sup> ana koro kema huzamisanua mopafi vahe'mo'zama kefo avu'ava zama tro'ma nehaza zama atresage'na, Nagrama zamazeri haviza hugahue hu'nama hu'noa zana osugahue. <sup>9</sup> Hagi Nagra mago'a zupa huama hu'na, mago mopafi vaheku'ene mago kinimo'ma kegavama hu'nesia mopafi vahekura hu'na, tamazeri so'e hanugeta hankavetita manigahaze hanuge'za, <sup>10</sup> ana nanekema antahi'za amage'ma nonte'za, Nagri navufima kefo avu'ava zama hanage'na, tamazeri knare hugahue hu'nama huvempama hu'noa zana osugahue. <sup>11</sup> E'ina hu'negu Jeremaiaga vunka Juda vahe'ene Jerusalemi vhahera Ra Anumzamo'a amanage huno koro kea hie hunka ome zamasamio. Tamagri'ma tamazeri knare'ma huga zana atre'na tamazeri haviza hugahuanki, makamota kefo avu'ava zama nehaza zana atreta fatgo avu'ava'za hiho. <sup>12</sup> Hianagi ana vahe'mo'za anage hu'za kenona hugantegahaze. Kagrama nehana nankeea antahi nonkamune. Tagra nazano hunaku'ma hanuna zana, keka'a ontahi tagri tagu'amo'ma hihoma hania havi avu'ava zana huta vugahune. <sup>13</sup> E'ina hu'nagu Ra Anumzamo'a huno, amanahu kefo avu'ava'ma nehaza zamofo agenkea mago'a vahe'mo'za nehazageta antahi'nazo hunka ome zamantahigenka ko. Israeli vahe'mo'za Nagri navurera vene omase mofakna hu'nazanagi, menina haviza huno kefozantfa hu'nea avu'ava'za hu'naze. <sup>14</sup> Hagi mago'a knafina Lebanonima me'nea havege agonaramimpintira aisimo'a ze'zera huno hagegea hugafi? Hifi ana agonaramimpinti'ma zasi nentake tintamima hanati'zama eneramiza timo'za tane'za hagegea hugahazafi? I'o anara nosaze. <sup>15</sup> Hianagi Nagri vahe'mo'za nagrikura zamagenekani'za, vu'za kaza osu havi anumzaraminte mnantake zantamina ome kremana vu'naze. E'inama haza zamo hige'za traka hu'za korapa'ma knare hu'negeza'ma neaza kana eme atre'naze. Ana hute'za menina haviza huno hapake hu'nea kante nevaze. <sup>16</sup> E'ina hu'nazagu huno mopa zamoto'a haviza hina ka'ma koka fore huteno mago avame'za megahie. Ana hu'nesanige'za maka zupa kante'ma vanoma hanaza vahe'mo'zama nege'za, antri huza zamagena rugahaze. <sup>17</sup> Hagi ha' vahe'zamimo'za negesage'na zage hanati kazigati zahomo'ma eno kugusopama eri harafi'ma huno viaza hu'na zamazeri panani hanuge'za ufre efre hugahaze. Ana

nehu'na knazama erisazana Nagra namefi hunezami'na, knazamo'ma za-mazeri havizama haniana, rukrahera hu'na ozamagegahue.

### *Jeremaiama ahenaku ke retro hu'naza naneke*

<sup>18</sup> Hagi anante veamo'za amanage hu'naze. Enketa mago'a kanku haketa Jeremaiama azeri havizama hanuna nanekea oku retro hammeno. Tagranena rama'a pristi vahe manizageno, knare antahi'zane vahe'ene kasnampa vahe'enena rama'a mani nazankita agrira antahi omi'none. E'ina hu'negu agrama nanekema rempi huneramino antahintahi neramino, kasnampa nanekema tasami'zankura tavesra humentone. Enketa nanekereti azeri haviza nehuta, agrama hania nanekea ontahisanune hu'naze.

<sup>19</sup> Hagi anante nagra anage hu'noe. Ra Anumzamoka nagri nunamuna antahinamio. Ana nehunka nagri'ma ha'ma renenantaza vahe'mo'zama nehaza nanekea antahio! <sup>20</sup> Knare avu'ava zama hua zanteria nona hu'za havi avu'ava zanteti mizana nami'za nehazafi? Na'ankure zamagra nagririra nahenaku keri kafintet'i eme zamahe friho. Vene'ne naga'ene mofavre naga'enena eme zamahe vagaresnage'za a'nezmimo'za mofavreaonte kento a'nene maniho. Zamatrege'za ranra vahera kri eri'za nefrisagenka, nehazaveramina zamatrege'za bainati kazinteti hapi zamahe friho. <sup>22</sup> Ha' vahe'mokizmi sondia vahe'mo'zama nozamifima ame hu'zama emarerisage'za, tusi koro nehu'za nozamifintira krafage hugahaze. Na'ankure nagrama uramisua kerima kafintere'za, kama vanufima krifuma anagi ante'nazagu anara hugahaze. <sup>23</sup> Hianagi Ra Anumzamoka nagri'ma nahe fri'naku'ma kema retro'ma hu'nazana kagra ko antahi'nane. E'ina hu'negu ana kefozazamine kumi'zaminena atre ozamantenka krimpa ahenezamantenka nezmagege'za ru vahe'mo'za e'za eme zamazeri haviza hiho.

## 19

### *Jeremai'a mopa kavoma rurako hutre'nea naneke*

<sup>1</sup> Ra Anumzamo'a amanage huno nasami'ne. Mopa kavoma tro ne-hia netega uraminka, mopa kavoa mago ome miza huo. Ana hutenka mago'a kva vahe'ene pristi vahe'enena kea hunka zamavare'nenka vuo.

<sup>2</sup> Hagi Jerusalemi kuma'mofona, kavo rurakohu kafanema nehaza kafanteti atiramita vuta Ben-Hinomu agupofi viho. Anantegama vuteta amanage hunka ome zamasamio. <sup>3</sup> Tamagra Juda kini vahe'motane Jerusalemi kumapima nemaniza vahe'motanena Ra Anumzamo'ma hiankea antahiho, Monafi sondia vahe'mofo Ra Anumzana, Israeli vahe'mokizmi Anumzamo'a amanage hie, antahiho Nagra rama'a knaza avre'na ama agupofina es-uge'za ana zamofo agenkema vahe'mo'za nentahisu'za antri hugahaze.

<sup>4</sup> Na'ankure Israeli vahe'mo'za zamefi hunenami'za ama agupofina ru anumzamofo mono hunte kuma eri fore hu'naze. Ana nehu'za Juda kini vahe'mo'zane, zamagehe'zane zamagranena ke'za antahi'za osu'naza havi anumzante mananentake'za insensia kre mana vu'naze. Ana nehu'za ke'zami omene mofavre nagara rama'a zamahe'za anampina korana eri tagi atre'naze. <sup>5</sup> Ana nehu'za zamagra Bali havi anumzante'ma mono'ma huntesaza kumatami tro huntesa hu'ne'za, ne' mofavre'zamia zamahe'za

Bali havi anumzantega tevefi kre fanenehu ofa nehaze. Nagra kea humramante'na, e'ina hiho hu'na huozamante'noa avu'avaza nehu'za, Nagri antahi'zampinena e'inahu antahi'zana omane'neaza tro hu'naze. <sup>6</sup> E'ina hu'negu antahilo, Ra Anumzamo'a huno mago kna ne-eanki'za ama mopagura Tofeti agupoe nehu'za, Ben-Hinomu agupoe hu'za osugahazanki, vahe zamahe'za rukitagi netraza agupoe hu'za hugahaze. <sup>7</sup> Tamagra Jerusalemi vahe'motane Juda vahe'motanena rama'a antahintahi retro hugahaze. Hianagi nagra ama agupofi ana antahintahi zana eri haviza hugahue. Nagra ha' vahetamia zamatreasanuge'za e'za bainati kazinteti eme tamahe frigahaze. Ana hutesage'na namaramine afi zagagafarami huzmante'sanuge'za e'za fri tamavufga eme traga hu'za negahaze. <sup>8</sup> Nagra ana hanugeno Jerusalemi kumamo'a haviza huno me'nesige'za, kantegama vanoma hanaza vahe'mo'za anazama nege'za antri nehu'za zamagogogu hugahaze. Na'ankure rama'a hazenke'zamo'ma enoma emeri havizama hu'nea zanku anara hugahaze. <sup>9</sup> Hagi ha' vahe'mo'zama eme ha'ma huramantenaku'ma esu'za Jerusalemi kumara eme avazagi kagigahaze. Ana hanageno ne'zana vagaresanigeta ne'zama nesaza zanku hugeta tamagri tava'onte'ma nemanisaza vahera zamaheta neneta, ne'mofavre nagataminena zamaheta negahaze. <sup>10</sup> Jeremaiaga nanekema huvagama nerenka, kagranema vu'naza vahe'mo'za negesagenka mopa kavoma erinka vu'nana kavoa rurako nehunka, <sup>11</sup> amanage hunka zamasamio, Monafi sondia vahe'mofo Ra Anumzamo'a huno, ama mopa kavoma ete eri so'e osu'are'ma rufuzafupeaza hu'na, Juda vahe'ene Jerusalemi kumapima nemaniza vahe'enena e'inahu avu'ava huna zamazeri haviza hugahue. Ana nehu'na Nagra ama ran kumara eri haviza hutresanugenio Tofeti mopamo'ma hu'neaza huno agru osugahie. <sup>13</sup> Jerusalemi kumapima me'nea nontamine Juda kini vahe'mokizmi nontamimo'za, Tofeti mopamo'ma hiazza hu'za Nagri navurera agrua osugahaze. Na'ankure ana nontamimofo agofetura marerita monafima me'nea hanafitaminte, mananentake'za insensia kre mna nevuta, kaza osu havi anumzantamintera waini tina tagita ofa hu'naze. <sup>14</sup> Hagi Ra Anumzamo'a hunantege'na Tofetima mani'nena kasnampa nanekema nehuretira nagra atrena vu'na Ra Anumzamofo mono nomofo kumapi ome ot'i'nena amanage huna vahera zamasami'noe. <sup>15</sup> Monafi sondia vahe'mofo Ra Anumzama Israeli vahe Anumzamo'a huno, amama me'nea ran kumate'ene ne'onse kumatamima megagi'nea kumatamintera, huvempama hu'noa knazantamina kofa'a knafi atrenugenio egahie. Na'ankure tamagrira tamagu'amo'a hankavenetigeta Nagri nanekea ontahi'naze.

## 20

### *Jeremaiane Pesurikizni naneke*

<sup>1</sup> Hagi Ra Anumzamofo mono nonte'ma ugota huno kegavama hu'nea pristi ne' Imeri nemofo Pasuri'a, mani'neno Jeremaiama kasnampa kema hiana antahi'ne. <sup>2</sup> Ana nanekema nentahino'a Pasuri'a hige'za kasnampa ne' Jeremaiana azeri'za sefu amite'za avre'za vu'za, Ra Anumzamofo mono

nonkumamofo anaga kaziga Benzameni kafanema nehzare tare agiarenta zafafi eri rusi hu'za kina hunte'naze.<sup>3</sup> Hagi anante knarer Jeremiana kinafintira Pasuri'a katufente'n. Ana'ma nehigeno'a amanage huno Jeremai'a Pasurina asami'n. Ra Anumzamo'ma kagri kagima aheana Pasuri'e huno nosianki, Magor-Misabibie \* huno kagia nehe.<sup>4</sup> Na'ankure Ra Anumzamo'a kagrikura amanage huno nehie. Nagra hanugeno kagrite'ma fore'ma hania zamo'a kagri'ene roneka'araminenam tamazeri koro hugahie. Kagra negesanke'za ha' vahe'mo'za e'za maka roneka'a bainati kazinteti eme zamahe frigahaze. Ana nehina maka Juda vahera Babiloni kini ne'mofa azampi zamavarentesugenno zamavarenno Babiloni kumate ome kina huzamante'neno, bainati kazinteti zamahe frigahie.<sup>5</sup> Ana nehu'na ha' vaheka'a zamatre'nuge'za e'za ama ran kumapinti zago fenona eme ha' hu'za eri'za vugahaze. Ana nehu'za tamagramma eri'zama erita eri fore'ma hu'naza zantamine, zago'amo marerisa zantamine, tamagri kini vahe'mo'zama ante'naza zantamine, goline silvanena maka eri'za Babiloni kumatega vugahaze.<sup>6</sup> Hagi kagra Pasurigane maka nagakanena tamavre'za Babiloni vu'za kina ome hūramantegahaze. Kagra havige kasnampa naneke hunka roneka'aramina zamasami'nanku, kagrane kasnampa nanekema zamasami'nana ronekanena Babiloni mopafi frisage'za anantega aseramante-gahaze.

### *Jeremaia'ma Ra Anumzamofontega arimpa knaza huama hu'nea naneke*

<sup>7</sup> Ra Anumzamoka Kagra renavatga hanke'na, anama renavatgama hana naneke antahi'na amage ante'noe. Kagra nagri hankavea agatere'nanku kagri nanekea eri otre'noe. E'ina hu'negu maka vahe'mo'za maka zupa kiza zokago zankna hu'na mani'noge'za maka vahe'mo'za kiza zokago kea hunenantaze.<sup>8</sup> Hagi nagrama kasnampa kema huterema hua zupa nagra kezati'na, ha' zana esanigeta haviza hugahaze hu'noe. E'inagema hu'na Ra Anumzamofo nanekema hua zanku vahe'mo'za huhaviza hunante'za kiza zokago ke hunante vava hu'naze.<sup>9</sup> Hianagi nagrama hu'na, Ra Anumzamofa agi'a huama nosu'na, agri nanekea mago'enena huama osugahue hu'na huanagi, ana nanekemo'a nagu'afina tevemo'ma hiaza huno nereno, zaferinanifina tevema reaza nehie. Nagra nanekeka'a huama osu nagu'afi az-erisue hu'na huanagi, azeri'agura amuho nehue.<sup>10</sup> Hagi nagra rama'a vahe'mo'zama sumisumima nehaza nanekema antahuana, maka kaziga koro'zamo avite'ne nehia nere nehu'za, nagrira koroke hunante'za, kagrama mago'a nanekema hananketa, huama huta vahera zamasamigahune nehaze. Nagrite'ma havi zama fore'ma huno nazeri traka'ma hanige'za kenakura, rone'nimo'zanena zamavu ante'za nenagaze. Ana nehu'za amanage hu'za nehaze. Agra'a traka huno masesigeta, agrama hu'nea avu'ava zanteria knazana amigahune hu'za nehaze.<sup>11</sup> Hianagi Ra Anumzamo'a harfa sondia kna huno nagrane mani'n. E'ina hu'negu nagri'ma nazeri haviza hunaku'ma nehaza vahe'mo'za Agri avuga tanafa hu'za nemase'za nagrira nazeri nagate'oregahaze. E'ina'ma hania zamo hanige'za zamagazegu nehanageno, havi zamagima erisaza zamo'a vagaoren mevava huno vugahie.<sup>12</sup> Monafi sondia vahe'mofa Ra Anumzamoka fatgo zamavu'zmavama nehaza vahera kagra rezmahenka negenka, zamagu'ane antahintahi zazaminena negane. Kagra krimpa ahe'zana zamagritera erinte ama huo. Na'ankure maka knazani'a kagrite eri'na neoe.<sup>13</sup> Ra

\* **20:3** Magor-Misabibie'ema hu'nea agimofo agu'agesa'a, Korozamo'a maka kaziga megagine huno hu'ne.

Anumzamofontega zagame nehuta, Ra Anumzamofona Agi'a husga hunte-sanune. Na'ankure havi avu'ava zama nehaza vahe'mo'zama, ke'onke zanku'ma atupa'ma nehaza vahe'ma zamazeri havizama nehzageno'a, ana vahe'mokizmi zamazampintira Agra zamagu'vazino nezamavare. <sup>14</sup> Hagi antanimo'ma kasenante'nea knagura huhaviza hu'na sifna huntoe. Ana huankino anama kasenante'nea knagura mago vahe'mo'a antahimino musenkasea osanie. <sup>15</sup> Hagi anama kasenantegeno'ma, ne' mofavre fore hia huno nanekema erino nenfama eme asamigeno musema hu'nea nera, sifna huntoe. <sup>16</sup> Ra Anumzamo'ma korapa'ma me'nea rankuma'ma asunku osuno eri haviza hiankna huno ana ne'mo'a haviza hanie. Atrenkeno ana nemo'a nanterama ha' vahe'mo'zama hanaza krafagea nentahino, fero'ma ha'ma eri'za ne-ezama hanaza ibigemofo agasasankea antahino. <sup>17</sup> Na'ankure Ra Anumzamo'a antanimofo arimpafima nahe friasina, antanimofo arimpamo'a nagri mati kna huteno kase onantesine. <sup>18</sup> Nahigeno antanimo'a kasenante'nege'na, maka zupa hazenke zampine asunku zampinena mani'na ne-e'na, maka zupa nagazegura hu'na neoe.

## 21

### *Jeremaia'ma Zedekaiantega keagama atrente'nea naneke*

<sup>1</sup> Hagi Ra Anumzamo'ma Jeremaama ama nanekema asami'neana, kini ne' Zedekaia'a, Markija nemofo Pasurine Ma'aseia nemofo pristi ne' Zefan-akiznima huznantergeke Jeremaia'ene keaga ome hunaku vuteke amanage ome hu'na'e. <sup>2</sup> Muse hugantonanki tagri tagi erinka Ra Anumzamofona antahigegegeno taza hino. Na'ankure Babiloni Kini ne' Nebukatnesa'a ha' eme hurantenaku nehie. Ko'ma hu'nea zana huno Ra Anumzamo'a asunkura huranteno hankave kaguva zama eri fore'ma hanigeno'a, Nebukatnesa'a sondia vahe zaga'a zamavareno ete rukrahe huno vugahifi antahigenka ko. <sup>3</sup> Hianagi Jeremaia'a amanage huno ana netrena zanasami'ne. Zedekaiana amanage huta ome asami'o. <sup>4</sup> Ra Anumzana Israeli vahe Anumzamo'a amanage huno hie, Babiloni kini ne'enе sondia vahe'amozanema kuma keginamofo fegi'ama eme kaftoma ante'za mani kagi'nesaza vahe'enema ha'ma hunaku'ma tamazampima eritama vanaza ha' zantamina erineta ete rukrahe huta rankumapi efregahaze. Anama hanage'na Nagra ana ha' vahera zamatresanuge'za rankumapina efregahaze. <sup>5</sup> Nagra hankavenen-take nazana rusute'na Nagrani'a hara huramantegahue. E'inama hanuana Nagra tusi narimpa aheramante noanki'na tamazeri havizantfa hugahue. <sup>6</sup> Ana nehu'na ama rankumapima nemaniza vahete'ene, zagagafa re'enena kefo kri atresugenno eno eme zamahe frigahie. <sup>7</sup> Hagi Ra Anumzamo'a huno, anazama fore'ma hutesige'na anantero, Juda kini ne' Zedekaiane, eri'za vahe'ane krimo'ma zamahe ofrisia vahe'ene, hapinti'ene zamagaku'enema hu'za ofrisaza vahe'enena, zamavare'na Babiloni kini ne' Nebukatnesa azampine sondia vahe'amo'zama tamahenaku'ma nehaza vahe zamazampi tamavre antesugenno, tamazoa onkiza zmasunkura huoramante'za bainati kazinteti tamahe frigahaze. <sup>8</sup> Hagi Ra Anumzamo'a mago'ene amanage hie hunka vahera zamasamio hu'ne. Keho! Tamasiu'ma erita manisaza zamofo kane, fri'zamofo kanena tamagri tamavuga antogeno me'ne. <sup>9</sup> Hagi rankumamofo agu'afima manisaza vahera mago'a bainati kazinteti zamahe nefrisage'za, mago'a ne'zanku hu'za nefrisage'za, mago'a kri eri'za frigahaze. Hianagi iza'o rankumapinti'ma atiramino fegi'ma vuno, Babiloni sondia vahe'ma kfoma eme avazagi kagi'za ha'ma huramantenaku'ma

nehaza vahe zamazampima ufresania vahera ahe ofrisageno asimu erino manigahie. <sup>10</sup> Nagra ama rankumamofona mago knare zana huontegahuanki, hazenke'za eri'na agritera egahue hu'na nagesa antahi'noe. Ama rankumara Babiloni kini ne'mofo azampi erintesanugeno, teve taginteno eri haviza hugahie huno Ra Anumzamo'a huama hu'ne.

*Juda kini vahe'mofo naga'mozama knazama erisaza zamofo naneke*

<sup>11</sup> Hagi Juda kini ne'mofo nagara, Ra Anumzamo'a amanage hie hunka zamasamio hu'ne. <sup>12</sup> Deviti naga'mota Ra Anumzamo'a amanage hianki antahihi, maka nanterana vahe knazama keagafima refko'ma hanazana fatgo huta refko hiho. Hagi mago vahe'mo'ma mago vahe'ma kna nemino, ke'onke zama'ama musufama eri'nesanigeta, ana musufa vahe'mofo kaziga anteta agura ovaziho. Hagi ana'ma osanageno'a, narimpa ahe'zamo'a tevemo hiaza huno rukru hina mago vahe'mo'a rusura osugahie. Na'ankure tamagrama hu'naza kefo avu'ava zamo hanige'na anara hugahue. <sup>13</sup> Hagi amama haveg'e'ma hu'nea agonafima nemanita, kefenkamutet aogupofima negeta, izu amuhara hu'nesia vahemo hara eme hurantegahiema huta nehaza vahe'mota antahihi. Nagra hara huramantegahue. <sup>14</sup> Hagi Ra Anumzamo'a huno, Tamagrama hu'naza kefo tamavu tamava zanter, Nagra nona hu'na knazana tamigahue. Ana nehu'na zafaraminte teve tagintesugeno teno nevuno, maka zantamima kuma tva'onte'ma megagi'nea zantaminena tevereno erihana hugahie.

## 22

*Juda kini vahe'mo'zama hazenkema erisaza zamofo naneke*

<sup>1</sup> Hagi Ra Anumzamo'a amanage huno hu'ne. Kagra Jeremaiaga Juda kini ne'mofo nonte uraminka amanage hunka nanekea ome zamasamio. <sup>2</sup> Juda kini ne'ma Deviti kini trate'ma mani'nana ne'mokane, eri'za vahe kamo'zane, ama kuma'mofo kafaramimpinti'ma efresaza vahe'motanena tamagesa ante'neta Ra Anumzamofo nenekea antahihi. <sup>3</sup> Hagi Ra Anumzamo'a huno, Fatgo avu'avaza huta refkoma hanazana, vahe'mo'zama zamazeri havizama nehu'za ke'onke'za zamima musufama erisageta, zamazeri havizama hanaza vahetega anteta zamaza hiho. Ana nehuta ru vahe'ma tamagranema enemaniza vahe'ene, megusa mofavre naga'ene, kento a'nane naga'enena zamazeri havizana huta hara reozmanteho. Ana nehuta ke'zami omene vahera zamaheta ama kumapina korana eri tagi otreho. <sup>4</sup> Hagi tamagrama ama nanekema antahita amage'ma antesageno'a, kini ne'ma nemania nomofo kafaramimpinti Deviti kini trate'ma kinima emanisaza vahe'mo'za karisine hosi afumofo agumpi mani'ne'za enefresage'za, kini ne'mofo eri'za vahemo'zane veamo'zanena ana kafaramimpinti efregahaze. <sup>5</sup> Hianagi tamagra Nagri kema antahita amage'ma ontesazana, Nagra'a nagifi huvempa huankino ama nomo'a havizantfa hanigeno anampina mago zana omanegahie huno Ra Anumzamo'a hu'ne.

<sup>6</sup> Hagi Juda kini ne'mo'ma nemania kumakura amanage huno Ra Anumzamo'a hu'ne. Kagra nagri navurera knare'zantfama hu'nea Gileati mopagna nehunka, Lebanoni mopafima me'nea za'za agonagna hu'nane. Hianagi menina kazeri haviza hanugenka, ka'ma kokamo'ma hiaza nehunka, havizama hu'nea kumapima vahe'ma omaniaza hugahane. <sup>7</sup> Nagra tamagri ha'vahera huzmantenuge'za ha'ma hu'zantamine erine'za e'za knare'nare sida zafaraminteti'ma noma ki'naza zafaramina eme

tagana vazi'za teve hanavazi'za kregahaze. <sup>8</sup> Hagi ana'ma hutesage'za henka kokankoka moparegati vahe'mo'zama ama rankuma tavaonte'ma enevanu'za, amanage hu'za zamagra'a zamagenoka hugahaze. Nahigeno Ra Anumzamo'a agima vu'nea Jerusalemi rankumara amanahu avu'ava zana trohunte hu'za hugahaze. <sup>9</sup> Ana ke'zamirera zamagra'a kenona amanage hu'za hugahaze. E'ina'ma hu'neana, na'ankure Ra Anumzana zamagra'a Anumzanema huhagerafi huvempa kema hu'naza nanekema zamefi hunemi'za, havi anumzaraminte kepri hu'za mono'ma nehu'za eri'zama eri zamante'naza zanku anara hu'ne hu'za hugahaze.

<sup>10</sup> Hagi kini ne' Josaia'ma fria zankura zavira neteta tamasunkura osuta, agri nemofo kini ne' Jehoahasinku tamasunkura nehuta zaviratoho. Na'ankure ha' vahe'mo'za eme avre'za ru moparega ome kina hutesageno, anantega umani'neno mopa'a eme onketfa hugahie. <sup>11</sup> Hagi Josaia nemofo Jehoahasima nefu noma erino Juda kinima maninege'za avre'za kinama ome hunte'naza nekura Ra Anumzamo'a huno, ete ama kumatera omegahie hu'ne. <sup>12</sup> Anama avre'za vu'za ome kinama hunte'naza moparega umani'neno frigahankino, ama mopa ete mago'enena eme onkegahie.

<sup>13</sup> Hagi Ra Anumzamo'a huno, Kini ne' Jehoiakimi'a ra knazampi ufregahianki kva hino. Na'ankure agra fatgo osu avu'ava huno tva'oma'are'ma nemaniza vhahera hige'za noma'ane noma'amofo agofetu'ma me'nea nonema ki'naza vhahera, mizana ozami'ne. <sup>14</sup> Hagi ana kini nemo'a huno, nagra noni'a ra nonkrefa kite'na nomofo agofetu'ma me'nea nompina ranra zante ome hunaraginte eme hunaraginte nehu'na, zaho'ma eri kana rama'a hagenente'na, sida zafareti nomofo agu'afina ahiegagintegahue. Ana hute'na koranke pentireti eri masave hu'na frentesugenohentofaza hugahie huno nehie. <sup>15</sup> Hagi kagrama antahinana mago'a vahe'ma zamagatere'na rama'a sida zafareti'ma noma ki'noa zamo hige'na kinia mani'noe hunka nehampi? Hagi negafa Josaia'ma ne'zane tinema neneno, fatgo avu'ava zama ne-huno, fatgoma huno vahe'ma refkoma hiazamo higeno knare'ma huno nomani'zama mani'neana kagra antahi'nampi? <sup>16</sup> Hagi Josaia'a zamunte omene vahe'ene ke'onke zanku'ma atupa'ma hu'naza vahe'enena zamagri kaziga anteno zamaza hu'ne. Ana'ma hiazamo higeno maka'zama hiazamo'a knare zanke hu'ne. Ra Anumzamo'a huno, Nagri'ma nageno antahino'ma hu'nesania vahe'mo'a e'inahu avu'avaza hugahie huno hu'ne. <sup>17</sup> Hianagi kagra maka zana kavureti keganunu nehunka fatgo osu kanku hakenka fenozana eri avi'netane. Ke'zami omene vhahera zamahe nefrinka, zamunte omene vhahera zamazeri haviza nehunka, zago'zamia hanarenka e'nerine. <sup>18</sup> E'ina hu'negu Juda kini ne' Josaia nemofo Jehoiakiminkura Ra Anumzamo'a amanage huno hu'ne. Jehoiakimi'ma frisige'za vahe'mo'za agrikura zamasunku hu'za zavira nete'za, nerarfunkura tasunku hune nosanageno, nerasarokura tasunku hune hu'za osugahaze. Ana nehanage'za vhahemo'zanena zavira atenente'za kvatimofonkura tasunku huntone nosanageno, hankave kini nekura tasunku huntone hu'za nosu'za, agrikura zavira otegahaze. <sup>19</sup> Hagi agri'ma asente'sazana tonki afu'ma frige'za asente'naku'ma avazu hu'za megia nevazankna huza Jerusalemi kumapintira avazuvaze hu'za kuma kafante vute'za megi'a ome matevu atregahaze.

<sup>20</sup> Hagi Ra Anumzamo'a huno, Jerusalemi kumapima nemaniza vahe'mota, ana maka vahe'ma zamagranema nanekema huhagerafi'naza vhahera hago haviza huvagarazanki zamagrikura Lebanoni mopafi marerita zavira ome neteta, Abarimi mopafina ranke huta zavi krafa ome nehuta

Basani mopafinena zavirateta vano hiho. <sup>21</sup> Hagi kagrama maka zampima knare'ma hunka mani'nana knafi ko nagra koro kea kasami'noane. Hianagi kagra hunka, ana nanekea ontahigahue hunka hu'nane. E'inahu kema hanana ko'ma osi'ma mani'nantegati'ma hunka'ma e'nana naneke ana nanekege menina nehane. Ana nehunka nagri kea antahinka amagera nontane. <sup>22</sup> Hagi kagri ha' vahe'mo'za zaho'mo hiaza hu'za e'za kva vaheka'a eme zamavaresga hu'za vugahaze. Kagrama eri hagerafinka'ma nemanina vhahera zamavare'za maka kina ome huzamantegahaze. Ana hanigenka kagrama hu'nana havi kavukva zankura krimpamo'a kna nehina kagazegu hugahane. <sup>23</sup> Hagi Lebanonima nemaniza vahe'mota, namamo sida zafafi nomi ki'no nemaniaza huta, sida zafareti nona kita mani'nazanagi, mofavre ante'naku nehia amo'ma atagu nehiaza huta kofta'a knafi tusi tamatagu nehuta kragira rugahaze. <sup>24</sup> Hagi Ra Anumzamo'a huno, Nagra Ra Anumzama kasefa hu'na mani'noa Anumzamo'na huankinka, Juda kini ne' Jehoiakimi nemofo Jekoniaga tamaga kaziga nazampi nentanua rinigna kagra hu'nananagi, kagrira ana rinima eri zafitreankna hugahue. <sup>25</sup> Ana hute'na kahefrinaku'ma nehazagenka koro'ma hune zamantana vhahera, Babiloni kini ne' Nebukatneses Babiloni sondia vahe'mokizami zamazampi kavrentegahue. <sup>26</sup> Hagi kagri'ene negrerenena tanazerite'na matevu atresugeta ru moparega vugaha'e. Ana mopa tanagri mopa omame'neanagi anantega umaninta frigaha'e. <sup>27</sup> Ama mopafima e'zankura tusiza huno tanavesigahie. Hianagi ometfa hugaha'e. <sup>28</sup> Hagi nahigeno Jehoiakimi'a tako'ma huno haviza hu'nea mopa kavognara nehuno, vahe'mo'za avesi nontaza mopa kavognara hu'ne? Nahanige'za agri'ene mofavre naga'anena zamavare'za vu'za ome zamasgafe tresage'za ke'za antahi'za osu'nesaza mopafina kina hugahaze? <sup>29</sup> Hagi mopamoka, ama mopamoka, ama Israeli mopamoka Ra Anumzamofo nanekea antahio. <sup>30</sup> Hagi Ra Anumzamo'a huno, Jehoiakimi agigenkema krentesana avontafepima krentesanana, agrikura mofavre onte'nea nere hunka krento. Na'ankure ne' mofavre naga'afintira magomo'a agri kumara erino Deviti kini tratera kinia omanigahie. Ana nehina henka'anena kinia eforera hu'za Juda vahetera kegava osugahaze.

## 23

### *Ra Anumzamo'a agra'a fatgo eri'za vahe'a huhamprisia zamofo naneke*

<sup>1</sup> Hagi Ra Anumzamo'a huno, Nagri vahetema kegavama nehaza kva vahe'mota, Nagri vhahera zamazeri haviza nehazankita, hago hazenkefi mani'naze. Sipisipima kegavama nehaza vahe'mo'za sipisipi naga'ma repanani hazage'za hazagre'za frazankna tamagra nehaze. <sup>2</sup> E'ina hu'negu Ra Anumzana Israeli vahemota Anumzamo'a ana sipisipi kva vahe'motagura amanage huno nehie. Tamagra Nagri sipisipi nagara repanani nehuta, kantera zamavare fatgo huta ovu'naze. Ana nehuta kegava hu so'e huozamante'naze. Tamagrama e'inahu havi avu'ava zama hu'naza agafare Nagra nona hu'na tamazeri haviza hugahue huno hu'ne. <sup>3</sup> Hagi ana'ma hute'na Nagra vaheni'ama zamazeri panani huge'zama ru moparegama umani emanima hu'nazaregatira, osi'a naga'ma ofri'ma mani'nazama'a ete zamavare tru hugahue. Ana hanuge'za ete mopa zamire e'za emanine'za mofavrea kasezmante'za hakare hu'za ome ra hugahaze. <sup>4</sup> Hagi Nagra kasefa kva vahe zamazeri otisuga'za kegava huzmantegahaze. Ana hanuge'za mago'enena korora huge zmagogogura osugahaze.

Anampintira magomo'e huno fananea osugahie huno Ra Anumzamo'a hu'ne. <sup>5</sup> Hagi Ra Anumzamo'a huno, magokna ne-eanki'na Nagra Deviti nagapintira mago fatgo avu'ava ene kini ne' azeri otigahue. Ana hanugen agra kinia mani'neno, knare antahi zanteti'ene fatgo avu'ava zanteti'ene fatgoma huno refkoma hu avu'avazante'ene huno agrama kegavama hania mopafi vahera kegava huzmantegahie. <sup>6</sup> Hagi agrama kinima manino kegavama hania knafina, Juda vahe'ene Israeli vahe'mo'zanena mago zankura zamagesa ontahi knare hu'za zamagu'vazi'za manigahaze. Ana hanage'za vahe'mo'za ana ne'mofo agima ahesazana, Ra Anumzamo'a tagri fatgo avu'ava zamofo agafa'a mani'ne hu'za agia ahegahaze. <sup>7</sup> E'ina hu'negu Ra Anumzamo'a huno, mago kna ne-eankita tamagra amanage huta osugahaze. Tamagerfa huno Ra Anumzana ofri mani'nea Anumzankino, Israeli vahera tavre atiramigeta Isipi mopafintira e'none huta osugahaze. <sup>8</sup> Hianagi zamagra amanage hu'za hugahaze. Ofri kasefa huno mani'nea Ra Anumzamo'a noti kaziga mopafintira Israeli vahera zamavare atiramino ne-eno, ru moparegama zamavare trege'zama kinama ome huterema hu'naregatira ete zamavare atru hugahie. Ana hanige'za ete mopazamifi emanigahaze hu'za hugahaze.

### *Havige kasnampa vaheku Jeremaia'ma huhaviza huzmante'nea naneke*

<sup>9</sup> Hagi Ra Anumzamo'ma ruotage'ma hu'nea naneke'ama kasnampa vahem'a ome zamasamio huno'ma nenasamigeno'a, tumo'nimo'a nata negrigeno zaferinani'a omne amne hu'ne. Ana nehigeno aka ti ne'neno rama'a waini ti ne'nea vahe'mo, negi nagi nehuno traka huno umasete emasete hiaza hu'noe. <sup>10</sup> Hagi rumofo a'ene rumofo venema monko'zama hu avu'ava'zamo'a mopafina avitegeno, amama mani'naza mopamo'a sifnafi mani'neno kragi'nerie. Ana higeno mopamo'a hagege nehigeno, ka'ma kokampima me'nea trazamo'enena hagege hu'ne. Na'ankure kasnampa vahem'o'za maka'zama nehaza zamo'a kumi zanke nehu'za, zamagrama eriga eri'zana hankaveti'za e'ori'naze. <sup>11</sup> Hagi mago'ene Ra Anumzamo'a huno, Kasnampa vahemo'zane pristi vahemo'zanena Nagri navu'nav a zana amagera nontaze. Ana nehu'za Nagri mono nompinena havi avu'ava zana nehazage'na nezamagoe. <sup>12</sup> E'ina hu'negu kama vanaza kamo'a kriri hatu hu'nea kampi vazankna nehanage'na, zamaretufe atresuge'za ome traka hu'za masegahaze. Na'ankure zamagrama hu'naza avu'ava zante'ma nonama hu'na zamazeri haviza hanua kafumo'a ne-eanki'na, knaza zamigahue huno Ra Anumzamo'a hu'ne. <sup>13</sup> Hagi ana nehazage'za Samelia kumate'ma nemaniza kasnampa vahe'mo'zama mago kasrino havizama hu'nea avu'ava zama hu'naza zama ke'noana, zamagra Bali havi anumzamofo agifi kasnampa kea nehu'za, Israeli vaheni'a zamavare'za havi kante vu'naze. <sup>14</sup> Hianagi Jerusalemi kumapima nemaniza kasnampa vahem'o'za zamagranena, havizama hu'nea zamavu'zmava zama nehazage'na Nagrama zamage'noana, ru vahe a'nene monko avu'avaza nehu'za, maka zupa havige kege hu'naze. Ana nehu'za havi avu'ava zama nehaza vahera hu izo huzmantage'za mago'ene havi avu'ava zana huvava nehu'za atre'za rukrahera hu'za ome'naze. Nagrama maka vahe'ma zamagoana Sodomu kumate vahe kna hu'za haviza nehazage'za, Jerusalemi kumapi vahe'mo'za Gomora kumate vahe kna hu'za haviza hu'naze. <sup>15</sup> E'ina hu'negu Monafi sondia vahe'mofo Ra Anumzamo'a kasnampa vahekura amanage hu'ne, Nagra aka traiza nezamina avuataga zama me'nea tinena zamsuge'za negahaze. Na'ankure Jerusalemi kumapima nemaniza kasnampa vahepinti havi avu'ava zamo'a agafa huteno ama mopafina vuno eno hu'ne.

<sup>16</sup> Hagi Monafi sondia vahe'mofo hankavenentake Ra Anumzamo'a huno, Kasnampa vahe'mo'zama kasnampa kema nehaza nanekea ontahilo. Na'ankure tamagrikura knare huta manigahaze hu'za havi kasnampa nanekea nehaze. Ana nanekema nehazana Ra Anumzamo'n'a Nagra osu'noa naneke nehazanki, zamagra'a antahintahifinti havige huza ava'nagna zana ke'none huza nehaze. <sup>17</sup> Hagi ama ana kasnampa vahe'mo'za Nagri nanekema amage'ma nontaza vahekura hu'za, Anumzamofo rimpa fru zamo'a tamagrane mesie nehu'za, kema nontahi'za zamagra'a zama vesite'ma vanoma nehaza vahekura hu'za, hazenke zamo'a tamagritera omegahie hu'za nehaze. <sup>18</sup> Hianagi nagra Jeremaia'n'a hu'na, ana kasnampa vahepintira iza Ra Anumzamofo atrufina Agri avuga mani'neno, agra avufintira Anumzamofona negeno nanekema hiana antahi'ne? Ana hu'neankino Agrama hia nenekea mago'mo'e huno agesafintira ontahi'ne. <sup>19</sup> Hagi keho! Ra Anumzamofo arimpahe zamo'a, ununkomo'ma nehiaza huno ne-e. Ana nehiankino Agri rimpa ahe'zamo'a kagikagi zahomo nehiaza huno ruherafi ramino eno, havi avu'ava zama nehaza vahe'mokizmi zamasenia eme rentrako hugahie. <sup>20</sup> Hagi Ra Anumzamofo arimpa ahe'zamo'a vagaore mevava huno nevanigeno, nazano hugahuema huno antahi'nesia zana ana maka huvagaregahie. Henka'a ana maka zama ome vagaresania zupa, tamagra ama ana zankura antahi ama' hugahaze. <sup>21</sup> Ra Anumzamo'a huno, Nagra ana kasnampa vahera huozamante'noe. Hianagi zamagra'a zamagesafinti kasnampa kea hu'za nevu'za, Nagra nanekea ozamasami noanagi, zamagra zamagesafinti havi kasnampa kea ome huama nehaze. <sup>22</sup> Hianagi Nagri atrufima zamagra mani'ne'za nagri nanekema antahi'naresina, Nagri nanekea huama hu'za vaheni'a zamasamizage'za nentahi'za, kefo avu'azama nehaza kante'ma nevaza zana atre'za rukrahe hu'za ne-eza, havi avu'ava zampintira atre'za azasine. <sup>23</sup> Ra Anumzamo'a huno, Tamagrama antahi'zana, amama mani'nona mopa'afinke Anumzana Agra mani'neno, afete ru moparega Anumzana omani'ne huta nehazafi? <sup>24</sup> Hagi Ra Anumzamo'a huno, tamagrama antahi'zana mago vahemo'ma fra'ma ki'nesaniana Nagrikura onkegahie huta nehazo? Ra Anumzamo'a huno, monafine mopa'finema Nagrama mani avi'mate'noana tamagra ontahi'nazafi? <sup>25</sup> Hagi Ra Anumzamo'a huno, ama ana kasnampa vahe'mo'zama Nagri nagifima havige kasnampa nanekema hu'nazana, nagra ko antahi'noe. Ana kasnampa nanekea amanage hu'naze. Nagra mago ava'na ke'noe, nagra mago ava'na ke'noe hu'za hu'naze. <sup>26</sup> Hagi ama ana kasnampa vahe'mo'zama zamagra'a zamagu'afinti'ma eri fore hu'zama havi kasnampa nanekema huama'ma hu'za nevaza zana, nazupa ome atregahaze. Zamagrira zamagu'amo rezmatavga hige'za havi kasnampa naneke eri fore hu'za huama nehaze. <sup>27</sup> Hagi zamagra havige ava'nama ke'naza ava'na kea huge antahige nehu'za, zamagrama antahi'zana ana nehanunke'za Anumzamofona antahi omisaze hu'za hu'naze. Zamagehe'za e'inahu avu'avaza hu'za Nagrira antahi onami'za Bali havi anumzante monora hu'naze. <sup>28</sup> Hagi mago kasnampa ne'mo'ma ava'nama ke'nesaniana atrenkeno agra ana ava'na huama hino. Hagi mago vahe'mo'ma Nagritegati'ma nanekema eri'nesania vahe'mo'a Nagrama asami'nesanua nanekea hu fatgo huno vahera zamasamino. Nagri nanekemo'a witimofo raga'agna hu'ne. Hianagi ana kasnampa vahe'mokizmi nanekemo'a witimofo akrua gna hu'ne. <sup>29</sup> Ra Anumzamo'a huno, Nagri nanekemo'a tevegna hune'no, hamankna hu'neankino havea rufrageno rako huno rufuzafu petregahie. <sup>30</sup> Hagi Ra Anumzamo'a huno,

Antahihō! Nagrama mago vahe'ma asami'nenua nanekema musufama erino, Anumzamo nesam'i'neā naneke hūno'ma huama'ma hania kasnampa vahera ha'rentegahue. <sup>31</sup> Ra Anumzamo'a hūno, zamagra'a zamagiteti havi kasnampa nanekema nehu'za, Anumzamo tamia naneke nehunēma hū'za nehaza kasnampa vahera tamagerfa hū'na ha' rezamantegahue. <sup>32</sup> Hagi Ra Anumzamo'a hūno, Ava'nama ke'naza zanku'ma havi kasnampa kema nehaza vahera ha' rezamantegahue. Zamagra havige hū'za vaheni'a rezamatga hū'za zamavare'za havi kante nevaze. Nagra ana vahera huham-parite'na huzamantoge'za ome'naze. Ana hū'neānkin zamagrama haza zamo'a ama vahera zamaza osutfa nehie, hūno Ra Anumzamo'a hū'ne.

<sup>33</sup> Hagi Ra Anumzamo'a Jeremaianagura hūno, Mago vahemo'o, mago kasnampa nemo'o, mago pristi vahemo'o kagrite'ma eno, henkama fore'ma hania zankura Ra Anumzamo'a mago'a kasnampa kea kasaminefi tasamioma hanagenka, mago kasnampa kea omneneanki, Ra Anumzamo'a tamatregahie hunka zamasamio. <sup>34</sup> Hagi mago vahe'mo'o, mago kasnampa vahem'o'o mago pristi vahemo'ma havigema hūno ama kasnampa kea Ra Anumzamo nasamige'na huama nehuema hūno hania vahera, Nagra ana vahe'ene noma'afima nemaniza naga'enena ana maka ranknaza zamigahue. <sup>35</sup> Hagi nagra Jeremaia'nama tamaśam'i'nuana, tamafuh'e'zane tamagri tavaonte'ma nemaniza vahe'enena amanage huta ontahige antahige hiho. Na'ane hūno Ra Anumzamo'a kenona nehie nehuta, na'ane hūno nanekea nehie? huta hiho. <sup>36</sup> Hianagi Ra Anumzamofo kasnampa kemo'a amanahu hune huta mago'enena huamara osiho. Na'ankure tamagra'a naneke huama nehuta, tagri Anumzama Monafi sondia vahe'mofo Anumzama kasefa'ma hūno mani'nea Ra Anumzamofo naneke eri akrake krahuh nehaze. <sup>37</sup> Hagi mago vahemo'ma ana kema hania kasnampa vahem'a antahigenakura amanage hūno antahigeno. Na'ane hūno Ra Anumzamo'a kenona huneganteno, na'ane hūno nanekea kasam'i'ne? <sup>38</sup> Hianagi tamagra huta ama'i Ra Anumzamofo kasnampa naneke huta nehazanagi, Nagra e'inahu nanekea osiho hū'na i'o huramante'noe. Hianagi Nagri kea eri netreta, ete ama'i Ra Anumzamofo kasnampa naneke huta nehaze. <sup>39</sup> E'ina hū'nego Nagra naganekani nezam'i'na, Nagri tava'ontetira tamaretufe atresugeta, tamafah'e'ine tamagri'enema tami'noa rankumara atreta vugahaze. <sup>40</sup> Hagi Nagra tamatrenugeta tamagaze zampi mani vava huta nevuta, havi tamagia erita vuvava nehuta anazankura tamagera okanigahaze.

## 24

### *Havi fiki ragane knare fiki rgamofo fronka naneke*

<sup>1</sup> Hagi Babiloni kini ne' Nebukatnesama, Juda kini ne' Jehoiakimi nemofo Jekonaia'ma eme nevreno, eri'za vaher'ane keonke zama zamazantet'i'ma tro'ma nehaza vaher'ene ke'onke zamofo amema'ama negraza vaher'ene eme zamavareno kina ome huzmantetegeno, Ra Anumzamo'ma ava'nagna zampi naveri'ma hū'neana, fiki zafamofo raga tare ekaeka kupi erintete'za Ra Anumzamofo mono no kafante antageno me'nea naveri hū'ne. <sup>2</sup> Hagi mago ekaeka kupima ke'noana, knare hūno afure'nea fiki rgarami megano, mago ekaeka kupima koana, haviza hūno kasri'nea fiki rgarami vahemo negara osu'negena ke'noe. <sup>3</sup> Anante Ra Anumzamo'a nantahigeno, Jeremaiaga na'a kane? hūno hige'na nagra hū'na, knare fiki rgaramima koana, knare zantfa higeno, havizama hū'nea fiki rgaramima koana havizantfa higeno vahem'o'a negara osu'nege'na ke'noe hugeno, <sup>4</sup> anante

Ra Anumzamo'a amanage huno nasami'ne. <sup>5</sup> Nagra Ra Anumzana Israeli vahe'mota Anumzamo'nama nehuana, Nagrama ama mopafinti'ma zamavare atroge'za vu'za Babiloni mopafima kinama ome hu'naza Juda vahe'mo'za, nagri navurera e'i knare'ma hu'nea fiki rgaraminkna hu'haze. <sup>6</sup> E'ina hu'neanki'na Nagra navu ante'na nezamage'na knare hu'na kegava huzmantegahue. Ana nehu'na ete zamavare'na mopazamifi e'na, eme zamazeri hankaveneti'na zamazeri fenkamia otegahue. Avimzama mopafi hankrazankna hu'na mopafi zamazeri nehankre'na mopafintira zamazeri vati otregahue. <sup>7</sup> Hagi Nagra zamagu'zamagesa zamazeri otisuge'za Nagrikura Ra Anumza mani'ne hu'za ke'za antahi'za hugahaze. Ana nehanage'na Nagra zamagri Anumza mani'nena, zamagra Nagri vahe manigahaze. Na'ankure zamagra maka zamagu'reti hu'za Nagrite ete rukrahe hu'za egahaze. <sup>8</sup> Hianagi Ra Anumzamo'a huno, Havizama huno vahe'mo'ma negama osu'nea fiki ragamo'ma hiaza hu'na, Juda kini ne' Zedekaiane eri'za vahe'ane, Jerusalemi kumapima nemaniza vahe'ma ofri osi'a naga'ma ana mopafi mani'nesazo, vu'za Isipi mopafima umani'nesaza naga'enena namefi huzamigahue. <sup>9</sup> Hagi Nagrama zamazeri havizantfama hanua zana maka ama mopafi vahe'mo'zama negenu'za, tusi zamagogogu hugahaze. Hagi zamavare atre sanuge'zama umanisaza mopafi vahe'mo'za zamage fenkami netre'za, kiza zokago ke huzamantegahaze. Hagi ana vahe'mo'za vahe'ma huhavizama huzmantenakura Juda vahe'mo'zama havizama hu'nazaza huta sifnafi maniho hu'za huzmantegahaze. <sup>10</sup> Hagi Juda vhahetera ha' vahe'ene agatonto zane krine atrenugeno eme zamahe frigahie. Ana hanige'za zamagehe'ine zamagri'enema zami'noa mopafintira fanane hu'za omanigahaze.

## 25

### *Juda vahe'mo'za 70'a kafufima ru moparega kinama ome hanaza naneke*

<sup>1</sup> Hagi Josaia nemofo Jehoiakimi'ma Juda vahe kinima manino egeno nampa 4ma hia kafufina, Nebukatnesa'a Babiloni vahe kinia ese kafu kinia mani'ne. E'i ana knafi Ra Anumzamo'a maka Juda vahekura ama nanekea Jeremaia'na nasami'ne. <sup>2</sup> Ana hige'na kasnampa ne' Jeremaiana maka Juda vahe'ene maka Jerusalemi kumapima nemaniza vhahera zamasami'na, <sup>3</sup> Amoni nemofo Josaia'ma Juda vahe kinima manino egeno 13nima hia kafureti'ma, eno meni amare ehanatigeno'a ana makara 23'a kafu hu'ne. E'i ana kna'afina Ra Anumzamo'a nanekea nasamige'na tamasami vava hu'na e'noanagi, tamagra ana nanekea ontahi'naze. <sup>4</sup> Ra Anumzamo'a eri'za vahe'a maka kasnampa vahe'aramina huzmanteg'e'za knane knanena e'za nanekea eme tamasami'naze. Hianagi antahi amne nehuta, ana nanekerera tamagesa anteta ontahi'naze. <sup>5</sup> Hagi ana kasnampa vahe'mo'za hu'za, tamagra havi kante'ma nevaza zane, havi avu'ava zama nehaza zana atreho. Tamagra e'ina'ma hanuta, Ra Anumzamo'ma tamafahe'ine tamagri'enema tami'nea mopafina mani vava huta vugahaze hu'za tamasami'naze. <sup>6</sup> Hagi tamagra ru anumzaramintera eri'zama'a eri nenteta monora huonteho. Ana nehuta ana anumzantamimofo amema'a tamazantetira avako huta tro hunteta nazeri narimpa oheho. Hagi tamagra anama osnage'na tamazeri havizana osugahue. <sup>7</sup> Hianagi Nagri nanekea ontahi'naze. E'ina nehuta tamazantet'i'ma havi anumza ramimofo amema'ama tro'ma haza zamo, Nagrira nazeri narimpa neheta, hazenke zana avreta tamagra'a tamavatera e'naze. <sup>8</sup> Hagi Monafi sondia vahe'mofo Ra Anumzamo'a huno, Tamagra

Nagri nanekea antahita amagera onte'nazagu, <sup>9</sup> antahihoh! Nagra noti kazigama me'nea mopafima nemaniza vahe'ene eri'za vaheni'a Babiloni kini ne' Nebukatnesanena huzmantenuge'za e'za maka amama mani'naza mopamofo agu'afisima nemaniza vahera hara huneramante'za, tamagri tavaonte'ma nemaniza vahe'enena hara huzamantegahaze. Ana hanage'na ama mopa eri havizantfa hanuge'za vahe'mo'za nege'za antari nehu'za kiza zokago ke hugahaze. Ana hanigeno mopamo'a haviza huno mevava huno vugahie. <sup>10</sup> Ana nehu'na musenkasema nehaza agasasazane a'ma ovasimi avasimima nehutama nehaza krafagene witima refuzafupe have-mofo ageru'ene lampe tavimofo masanena tamagripintira eri atrenugen omanegahie. <sup>11</sup> Ana hina ama mopafina mago vahera omanitfa hanigeno kama koka megahie. Hagi Israeli vahe'ene zamagri tavaonte'ma nemaniza vahemo'zanena 70'a kafufi Babiloni kini nemofo eri'za vahera umaniga-haze.

<sup>12</sup> Hagi anante 70'a kafuma evutesige'na Babiloni kini ne'ene kegavama hu'nea mopafi vahe'enena kumi'ma hunaza zanteria Nagra kna zami'na zamaizeri haviza nehu'na mopazmnia eri haviza hanugen haviza huvava huno meno vugahie. <sup>13</sup> Hagi maka ama mopafima me'nea kumatamimpima fore huterema hania zanku'ma, Jeremaia'ma maka kasnampa kema asamugenno ama avontafepima krente'nea zantamimo'a maka fore hugahie. <sup>14</sup> Hagi Babiloni vahe'mo'zama hu'naza zamavu'zmava zanteria Nagra nona huzamantegahue. Ana hanuge'za ru moparegati hankave kini vahe'mo'zane ru moparegati vahe'mo'zanena e'za Babiloni vahera eme zamavare'za kina ome huzamante nesage'za kazokazo eri'za erigahaze.

<sup>15</sup> Hagi Ra Anumzana Israeli vahe Anumzamo'a amanage huno nasami'ne. Narimpa ahe'zamofo waini timoma avite'nea kapua nazampintira erinka, hugante'nua mopafi vahete vuge'za maka ana mopafi vahe'mo'za neho.

<sup>16</sup> Hagi ana waini tima ne'za neginagima nehu'za traka hu'za umasete emasete hugahaze. Na'ankure Nagra ha' vahe'zami huzmantenuge'za e'za eme hara huzmantesage'za anara hugahaze. <sup>17</sup> Hagi anagema huteg'e'na ana kapua Ra Anumzamofo azampintira erite'na, maka Ra Anumzamo'ma ome zamio huno'ma hunantea moparamimpi vahete vu'na ana waini tina ome zamuge'za ana maka vahe'mo'za ne'naze. <sup>18</sup> Hagi ese'ma agafa hu'noana Jerusalemi kuma'ene Juda mopafima me'nea kumatamimp vu'na kini vahe'ene eri'za vahe'zamine ome zamuge'za ana kapufinti waini tina ne'naze. Ana'ma hazageno'a kumazmimo'a havizantfa huno me'nege'za, vahe'mo'za antri nehu'za kiza zokago ke hunezmante'za, vahe'ma sifnama huzmante'nakura e'ima hazaza huta sifnafi maniho hu'za nehaze. E'i ana zamo'a meninena meno eno ama knarerha ehanati'ne. <sup>19</sup> Hagi anantetira Isipi vu'na, kini ne' Ferone mika eri'za vahe'ane, kamani eri'za vahe'ene mika vahe'enena ome zamuge'za ana waini tina ne'naze. <sup>20</sup> Ana nehu'na ru moparega vahe'ma Isipi mopafima enemaniza vahe'enena zamuge'za ne'naze. Anantetira maka Uzi mopafima nemaniza kini vahe ome zamuge'za ne'naze. Hagi Filistia vahe kinia 4'a kumate'ma mani'nazana, Askelonima, Gazama, Ekonine osi'a naga'ma ofri'ma mani'naza Asdoti naga'mokizimi kini vahe'ene ome zamuge'za ana waini tina ne'naze. <sup>21</sup> Hagi Idomu vahe'ene Moapu vahe'ene Amoni vahe'enena ana waini tina ome zamuge'za nenage'na, <sup>22</sup> maka Tairi kini vahe'ene maka Saidoni kini vahe'ene hagerimofo kantu kaziga ankenaregama nemaniza vahetaminena ome zamuge'za nenage'na, <sup>23</sup> anantetira vu'na Dedani kini vahe'ene Tema kini vahe'ene Buzi vahe'ene afete'ma umani emanima hu'neza zamagi

zamazokama neharaza vahe'mokizmi ome zami'noe. <sup>24</sup> Hagi maka Arabia kini vahe'ene ru moparegati vahe'ma hagege kokampima enemaniza vahe'mokizmi kini vahe'enena ome zamuge'za nenazage'na, <sup>25</sup> anantetira maka Zimri kini vahe'ma Elamu kini vahe'ma, Midia kini vahe'ene ome nezami'na, <sup>26</sup> anantetira vu'na maka noti kaziga mopafima nemaniza kini vahera, afete mani'nazo tvaonte mani'nazo, maka zami vaganere'na, maka ama mopamofo agofetu'ma mani'naza kini vahera zami vagareghue. Ana hutesanugen ome vagarettega Babiloni kini ne'mo ana waini tina negahie. <sup>27</sup> Hagi Jeremaiaaga amanage hunka ome zamasamio. Monafi sondia vahe'mofo Ra Anumzana Israeli vahe Anumzamo'a huno, ama ana waini tina neta neginagi nehuta, amuranetita traka huta umase emase nehuta ete mago'enena oraotih. Na'ankure Nagra ha' vahera huzmanta'nena e'za, hara eme huramante'za tamazeri haviza hugahaze. <sup>28</sup> Hianagi ana waini tima zamagra kazampinti'ma eri'za onesagenka, kagra amanage hunka zamasamio. Monafi sondia vahe'mofo Ra Anumzamo'a huno, Otreta neho huno hu'ne hunka huo. <sup>29</sup> Hagi keho! Jerusalemi kumaku'ma hu'na Nagri nagima mesiema hu'na hu'noa kuma esera eri haviza hute'na, ana maka vahera zamazeri haviza hugahanki tatresigeta amne manigahune huta tamagesa ontahih. Nagra Ra Anumzana hankavenentake Anumzamo'na huanki'na, ha' vahe huzmantenuge'za ama mopafina vano nehu'za maka vahera hara huzamante'za vano hugahaze. <sup>30</sup> Hagi Jeremaiaaga zamazeri havizama hanua kasnampa nanekea maka amanage hunka zamasamio. Ra Anumzamo'a ruotage'ma hu'nea kuma'afintira ranke huno mopa'amofona ke'za tinemisigeno ageru'amo'a ra agasasa rugahie. Grepri rgama zamagareti'ma regatati'ma nehu'za, kezama netizankna huno ranke huno ama mopafima nemaniza vahera zamazeri haviza hugahie. <sup>31</sup> Hagi ana kezankemo'a, mika mopa atuparega vuno eno hanige'za antahigahaze. Na'ankure Ra Anumzamo'a miko ama mopaf vahera keaga huzmanteno zamazeri haviza nehuno, kefo avu'ava'ma nehaza vahera tamatesige'za bainati kazinkonteti zamahe frigahaze. Ra Anumzamo ama ana nanekea hu'ne.

<sup>32</sup> Hagi Monafi sondia vahe'mofo Ra Anumzamo'a huno, Antahih, ama ana knazamo'a mago kaziga mopareti agafa huteno, miko kokantega vuno eno huvagareghie. Hagi ana nehiankino ama mopamofo atumparegati mago ununko agafa huno eankna nehie. <sup>33</sup> Hagi ana knafina Ra Anumzamo'ma zamahe frisia vahe'mokizmi zamavufagamo'a ama mopamofo agofetura maka kaziga amne zankna hugahie. Ana hina mago vahemo'e huno ana vahekura zavira neteno erise ozamantegahie. Anama frisaza vahe zamavufagamo'a kasrino rifagna hugahie.

<sup>34</sup> Hagi sipisipi afute kva vahe'mota tusi tamasunku nehuta zavira ateho. Sipisipi afu nagamokizmi rankva vahe'mota tamagri'ma tamahe nefrino tamare tufetresia knamo'a hago eanki, kugusopafi maseta rukrahe krahe hiho. Na'ankure knare mopa kavomo'ma evuramino rutako'ma nehiaza huta havizantfa hugahaze. <sup>35</sup> Hagi sipisipi afute kva vahe'motane, sipisipi afumokizmi rankva vahe'motanema tamagareta ome frakisaza kuma'ene, fre'naza kantaminena omanetfa hugahie. <sup>36</sup> Hagi sipisipi afute kva vahemo'zane, sipisipi afumokizmi rankva vahemo'zanena rankrafa hu'za zavira netazanki antahih. Na'ankure sipisipi afu'mo'zama trazama nenaza mopa Ra Anumzamo'a eri haviza nehige'za anara nehaze. <sup>37</sup> Hagi Ra Anumzamofo arimpa ahe'zamo hanigeno, sipisipi afu'mo'zama trazama nene'za mani fruma nehaza mopamo'a haviza huno ka'ma koka meghahie.

<sup>38</sup> Hagi laionimo fraki kuma'a atreno eaza huno Ra Anumzamo'a ne-e. Na'ankure Agra tusi arimpaa hezmanteno ha' vahe huzmantesanige'za e'za Juda vhahera ha' eme huzmantegahaze. Ana hanageno mopa zamimo'a haviza huno ka'ma koka megahie.

## 26

### *Jeremaiama ahe frinaku keha re'naza naneke*

<sup>1</sup> Hagi Josaia nemofo Jehoiakimi'ma agafa huno Juda vahe kinima nemanigeno'a, Ra Anumzamo'a amanage huno Jeremaia'na nanekea nasami'ne, <sup>2</sup> Ra Anumzamo'a huno, kagra vunka Nagri mono nomofo kuma amu'nompi ome oti'eneka, maka Juda mopafima me'nea kumapi vahe'mo'za ana mono nompima mono'ma hunaku'ma esaza vhahera, Nagrama huo hu'nama kasamua nanekea magore hunka otrenka ana maka zamasami vagaro. <sup>3</sup> Hagi kagrama ome huama'ma hanana nanekema antahi so'ema nehu'za, kefo avu'ava zama nehaza zama atre'za rukrahe hu'za esage'na, zamagrama havi avu'ava zama nehaza zante'ma zamazeri haviza hugahuema hu'noa knazana eri tregahue. <sup>4</sup> Hagi Ra Anumzamo'a amanage hie hunka ome zamasamio. Nagri nanekema nontahita, Nagrama tami'noa kasegema amage'ma nonteta, <sup>5</sup> knane knanena eri'za vaheni'a kasnampa vhahera huzmantoge'za e'za nanekea eme tamasami'naze. Hinanagi tamagra ana nanekea antahita amagera onte'naze. <sup>6</sup> Ana hu'nazagu ko'ma Sailo ran kuma'ma eri havizama hu'noaza hu'n, ama mono nona eri haviza hanuge'za, maka ama mopafima me'nea kumapi vahe'mo'zama, ha' vahe'zamima kema zamasunakura Jerusalemi kumamo'ma havizama hiaza huta sifnafi maniho hu'za hugahaze.

<sup>7</sup> Hagi Jeremaia'ma ama ana kasnampa kema vuno Ra Anumzamofo mono nompima ome huama'ma hige'za, pristi vahe'ene kasnampa vahe'ene miko vahemo'zanena antahi'naze. <sup>8</sup> Hagi Jeremaia'a Ra Anumzamo'ma asmi'nea nanekea ana maka hvugama retege'za, anante pristi vahe'ene kasnampa vahe'ene miko vahe'mo'zanena e'za Jeremaiana eme azeneri'za, kagra meni frigahane nehu'za, <sup>9</sup> kagra nahigenka Ra Anumzamofo agifi kasnampa kea hunka, ama mono nomo'ene rankuma mo'enena Sailo kumamo'ma havizama hu'neankna huke haviza hanakeno, anampina mago vhahera omanitta hugahie hunka nehane? Anagema hutage'za Ra Anumzamofo mono nompi Jeremaia'a mani'nege'za vahe'mo'za e'za eme regagi'naze. <sup>10</sup> Hagi Juda kva vahe'mo'za kini ne'mofo nompi mani'nazareti anankema nentahi'za Ra Anumzamofo mono nontega mareri'za, mono nompima ufre kafanku'ma Kasefa Kafanema nehaza kante umani'naze. <sup>11</sup> Anante pristi vahemo'zane kasnampa vahemo'zanena, amanage hu'za Juda kva vahe'ene mika vahe'enena zamasami'naze. Ama ne'mo'a frigahie. Na'ankure tamagra'a tamagesafinti nentahizageno agra kasnampa kea huno ama rankumamo'a haviza hugahie huno hu'ne. <sup>12</sup> Anante Jeremaia'a otino Juda kva vahe'ene mika vahe'enena amanage huno zamasami'ne. Ra Anumzamo'a hunanteno ama mono nomo'ene ama rankumamo'enena haviza hugaha'anki vunka kasnampa nanekea ome huama hunka zamasamio hige'nama e'noa nanekea ana maka hago hugeta antahi'naze. <sup>13</sup> Ana hu'negu kama nevaza kana atreta ne-eta, tamavutamava zanena erinte fatgo nehuta, Ra Anumzana tamagri Anumzamofo kea antahita amage anteho. E'ina'ma hanageno'a Ra Anumzamo'a antahintahi'a rukrahe hanigeno, tamazeri havizama hugahuema huno hu'nea knazana atresigeno tamagritera omegahie. <sup>14</sup> Hagi menina tamagri

tamazampi nagra mani'noanki, nazano tamagrama kesageno fatgo huno knare hugahiankima huta hanaza zana amne hunanteho. <sup>15</sup> Hianagi nagri'ma nahe frisuta tamagrama keta antahitama hanazana, keni'a omane'nea ne' nahe frigahazankino nagri kora kumi'mofo knazamo'a tamagrite'ene ama rankumate'ene maka ama ana kumapima nemaniza vahete'ene megahie. Na'ankure maka amama huama'ma hu'na tamasamuwa nanekea tamage nanekegino, Ra Anumzamo hunantege'na eme huama hugeta tamagra'a tamagesafinti antahi'naze. <sup>16</sup> Anante Juda vahete kva vahe'mo'zane, maka vahe'mo'za amanage hu'za pristi vahe'ene kasnampa vahetaminena zamasami'naze. Ama ne'mo'a mago hazenkea osu'neankita ahe ofrigahaze. Na'ankure Ra Anumzana tagri Anumzamofo agifi, agra nanekea eme huama huno tasami'ne. <sup>17</sup> Hagi mago'a Juda mopafi ranra vahe'mo'za anampinti oti'za, anama atruma hu'naza vahera amanage hu'za zamasami'naze. <sup>18</sup> Hezeakaia'ma Juda vahe kinima mani'nea knafina, More-seti kumateti kasnampa ne' Maika'a maka Juda mopafima nemaniza vahera amanage huno kasnampa kea zamasami'ne, Monafi sondia vahe'mofo Ra Anumzamo'a huno, Saioni agona fima hozama antenaku mopama rekori atreaza hanugeno Jerusalemi kumamo'a haviza hanigeno anampina havemoke'za hihi huno megahie. Ana nehina menima Ra Anumzamofo mono noma me'nea agonafina, zafa tanopamo hagegahie huno hu'ne. <sup>19</sup> Hagi Maika'ma anagema hige'za, Hezeakaia'ene maka Juda vahe'mo'za Maikana ahe fri'nazafi? I'o anara osu'naze. Hagi Hezeakaia' Anumzamofo koro huno agri agorga nemanino, kasunku hunanto huno Anumzamo-fontega nunamu higeno, Ra Anumzamo'a antahintahi'a rukrahe huno knazanteti tamazeri haviza hugahuema huno hu'nea zana atregeno ome'ne. E'ina hu'negu menima Jeremaia'ma hunte'naku'ma nehu'na avu'ava zamo'a, tagra'a tavate knazana avreta eri agofetu nehune. <sup>20</sup> Hagi henka mago nera Kiriat-jearimi kumateti ne' Semaia nemofo Uriakino, Jeremaia'ma hiankna naneke Ra Anumzamofo agifi kasnampa ke huno, Jerusalemi kuma'ene Juda mopamo'enena haviza hugahie huno hu'ne. <sup>21</sup> Hagi kini ne' Jehoiakimi'ene maka hankave sondia vahe'amo'zane maka eri'za vahe'amo'zanema ana nanekema nentahizageno'a, kini ne' Jehoiakimi'a Uriana ahe frinaku hu'ne. Hianagi Uria'a ana nanekema nentahino'a koro freno Isipi moparega vu'ne. <sup>22</sup> Hianagi kini ne' Jehoiakimi'a Akbori nemofo Elnatanine mago'a vahetamine huzamanteg'e'za Isipi vu'za, <sup>23</sup> Uriana ome avre'za kini ne' Jehoiakiminte azageno, bainati kazinteti ahe friteno avufga'a erino zamagi omne vahe'ma asene zamantaza matipi ome atre'ne. <sup>24</sup> Hianagi Jeremaia'ma ahe frinaku'ma nehazageno'a, Safani nemofo Ahikami'a Jeremaiana aza hige'za ahe ofri'naze.

## 27

### *Juda vahe'mo'zama Nebukatnesa eri'za vahe'ma manisaza zamofo naneke*

<sup>1</sup> Hagi Josaia nemofo Zedekaia'ma agafa huno Juda vahe kinima nemanigeno'a, Ra Anumzamo Jeremaia'na nasami'nea naneke. <sup>2</sup> Ra Anumzamo'a nasamino, Bulimakao afumofo anankempima nentaza karenamare zafaka'a tro hutenga, ana zantero bulimakao akruteti'ma tro hu'naza nofi anakitenka ana zafa kagra knankempi eri rusi hunto hu'ne. <sup>3</sup> Hagi ana'ma hutenga Idomu kinine Moapu kinine Amoni kinine Tairi kinine Saidoni kini neteganena kea atrezmanteg'e'za, kema eri'za vu'za e'zama nehaza vahe'ma, Juda kini ne' Zedekaia'ene keaga hunaku

Jerusalemi kumapima emani'naza vahe'mo'za ana nanekea eri'za viho. <sup>4</sup> Hagi ana eri'za vhahera zamasaminka, Monafi sondia vahe'mofo Ra Anumzana Israeli vahe Anumzamo'a amanage hie hunka nezmasminka, huzmanteg'e'za kva vahezamia ome zamasamiho. <sup>5</sup> Nagra hankavenentake nazanteti ama mopane, vahe'ene maka zagagafanena tro hu'noankina, ana zantamina Nagra'a navesite izano aminaku'ma hua vhahera refko hu'na nemue. <sup>6</sup> Hagi menina ana maka mopatamia eri'na Nagri eri'za ne' Babiloni kini ne' Nebukatnesa azampi antegahue. Ana nehu'na afi zagagafaraminena avre amisugeno agrake'za kegava huzamantegahie. <sup>7</sup> Hagi ana maka mopafi vahe'mo'za Babiloni kini ne' Nebukatnesa eri'za vahe manime nevanageno hanige'za, mofavre'amofo eri'za erime nevuza negeho eri'za vahe umanigahaze. Ana hume nevanageno vuno Babiloni kuma'ma haviza hugahiema hu'na huhampari'noa knare uhanatigahie. Ana hanige'za maka kokantegati hankave kini vahe'mo'za Babiloni vhahera ha' eme huzamagatere'za kegava huzamante'nage'za kazokzo eri'za vahe manigahaze. <sup>8</sup> Hagi mago kumapi vahe'mo'o mago kinimo'ma kegavama hu'nesania mopafi vahe'mo'ma kini ne' Nebukatnesa'ma agarenamare zafama anankempima antenigeno agazonema huno agri agoragama omanisia vhahera, Nagra Anumzamo'na azeri haviza hugahue. Hagi hapinti mago'a vhahera zamahe nefrisageno, krimo mago'a zamahe nefrisigeno, ne'zanku hu'za mago'a frigahaze. Ana nehanage'na Nebukatnesa hunte'nugeno ana kumatamimpi vhahera zamaheno erihana hugahie, huno Ra Anumzamo'a hu'ne. <sup>9</sup> E'ina hu'negu havige kasnampa vahe kene, avune vahe'ene, ava'na kema huama nehaza vahe'ene, hankro'ene keagama nehaza vahe'ene, afa zama nehaza vahe'omo'zanema hu'za, Babiloni kini ne'mofo eri'za vhahera omaniho hu'za hanaza nanekea ontahaho. <sup>10</sup> Hianagi zamagra havige kasnampage nehzankita ana nanekegu'ma tamage nehzaze hutama hanage'na, Nagra tamavre atresanugeta mopatamia atreta ru moparega umanineta anantega fri hana hugahaze. <sup>11</sup> Hagi karenamare zafama bulimakao afu'mofo anankempi ante'nageno kvama hunte'nea vahe'mofo amage anteno mopa rekoria kna hu'za, Babiloni kini ne'mofo agoragama mani'saza vhahera zamatresanuge'za zamagra'a mopafi manine'za hoza ante'za nene'za manigahaze huno Ra Anumzamo'a hu'ne. <sup>12</sup> Hagi Juda kini ne' Zedekaina anahukna nanekea asami'na, tamagrama ofri knare'ma huta manisunema hanuta atrenkero Babiloni kini ne'mo'a karenamare zafa tamanankempi rusi hanigeta, agri'ene agri vahe'mokizmi eri'za vahe maniho. <sup>13</sup> Hianagi Babiloni kini ne'mofo eri'za vahe'ma omani'naku'ma hania vhahete'na, Ra Anumzamo'ma huno mago'a vhahera hapinti nefrisage'za, mago'a krimo zamahe nefrisigeno, mago'a ne'zanku hu'za frigahazema huno hu'nea knazamo'a kagri'ene vaheka'anena eme tamahe frigahie. <sup>14</sup> Ana hunegu havige kasnampa ke huza, Babiloni kini ne'mofo eri'za vhahera omanigahazema hu'za hanaza nanekea ontahaho. Na'ankure zamagra havige kasnampa naneke neramasamize. <sup>15</sup> Hagi Ra Anumzamo'a huno, ana kasnampa vhahera Nagra huozamante'noanki, Nagri nagifi e'za havige kasnampa naneke eme nehzaze. Ana hu'neankita tamagra ana nanekema antahita amage'ma antesage'na, ana kasnampa vahe'ene tamagri'enena mopa tamifintira tamahe kasopetresanugeta ru moparega umanineta fri vagaregahaze.

<sup>16</sup> Hagi anagema hu'na kini ne'ma asamite'na, anante Ra Anumzamo'a amanage hie hu'na pristi vahe'ene maka vaheku'enena zamasami'noe. Ra

Anumzamofo mono nompinti feno zama eri'za Babilonima vu'naza zantamina kofa'a knafi ete eri'za egahaze hu'za havige kasnampa nanekema nehaza nanekea havige nehzanki ontahiho.<sup>17</sup> Tamagra ana vahe'mokizmi nanekea ontahiho. Hagi Babiloni kini ne'mofo eri'za vahe'ma manisuta, ofri knare huta manigahaze. Hianagi tamagra ana kasnampa vahe'mokizmi nanekema antahisazana, ama rankuma'mo'a havizantfa hugahie.<sup>18</sup> Hagi zamagra tamage kasnampa vahe'ma mani'nesageno Ra Anumzamo'ma keagama nezmasamisia vahe'ma mani'nesu'za, Monafi sondia vahe'mofo Ra Anumzamofona nunamu hu'za antahigesageno, Babiloni vahera zamatresige'za Ra Anumzamofo mono nompima mago'ama me'nea zantamine, Juda kini ne'mofo nompima me'nea zantamine, Jerusalemi kumapinena me'nea zantaminena eme eri'za Babiloni moparera ovugahaze.<sup>19</sup> Hagi mono nompima me'nea zantamina, bronsireti tro'ma hu'naza zafaramine, bronsireti'ma ra zuompama tro'ma hu'naza zuompagu'ma hagerinema hu'za nehaza zoumpane, agiama hunte tra'ma tro huntene'za keonke zama ante'neza eri kanti'kamama nehaza zane, mago'a zantamima Jerusalemi kumapinti'ma e'ori'naza zantaminku, Monafi sondia vahe'mofo Ra Anumzamo'a amanage hu'ne.<sup>20</sup> E'i ana marerisa zantamina, Babiloni kini ne' Nebukatnesa'ma Juda kini ne' Jehoiakimi nemofo Jekoniane Juda kva vahe'ene Jerusalemi kva vahe'enema zamavareno Babilonima kina ome hunezmanteno atreno vu'nea zantamine.<sup>21</sup> Hagi Ra Anumzamofo mono nompima me'nea zantamine, Juda kini ne'mofo nompima me'nea zantamine, Jerusalemi kumapima me'nea zantaminku'enena, Monafi sondia vahe'mofo Ra Anumzana Israeli vahe Anumzamo'a huno,<sup>22</sup> Ana maka zantamina eme eri'za Babiloni kumatega umani'nesageno vuno Nagrama ete antahi zamisua knama huhampri'noa knare uhanatigahie huno Ra Anumzamo'a hu'ne. Anantetira ete zamavare'na ama kumate eme zamante'nena makaza zamia ete eri knare huzmantegahue.

## 28

### *Havige kasnampa ne' Hanania naneke*

<sup>1</sup> Hagi Zedekaia'ma Juda vahé kinima manino egeno namba 4ma hia kafumofona 5fu ikanteria, Gibioni kumateti kasnampa ne' Azuri nemofo Hanania'a, ra mono nompi mani'nogeno eno, pristi vahé zamavufine maka vahé zamavufinena amanage eme hu'ne.<sup>2</sup> Monafi sondia vahé'mofo Ra Anumzana Israeli vahe Anumzamo'a huno, Babiloni kini nemo'ma knama neramia zamo'ma karenamare zafama bulimakao anankempima antenegeno mopama rekoma nerianknama huno knama nehia knazana emeri atregahue.<sup>3</sup> Babiloni kini ne' Nebukatnesa'ma Nagri mono nomofo agu'afinti'ma maka zama erino Babiloni kumate'ma vu'nea zantamina, tare kafumofo agu'afi ete maka eri'na ama kumatera egahue.<sup>4</sup> Ana nehu'na Jehoiakimi nemofo Juda kini ne' Jekoniane, maka Juda mopafi vahé'ma vu'za Babiloni kumate'ma ome kinama hu'naza vahé'enena, zamavare'na ama ana kumate egahue. Na'ankure Babiloni kini nemo'ma karenamare zafama zamanankempima ante'neana rufutagi netre'na zamavare'na egahue huno Ra Anumzamo'a hu'ne.<sup>5</sup> Hagi anante pristi vahé'ene maka vahé'ma, Ra Anumzamofo mono nompima ot'i'naza vahé zamavufi, kasnampa ne' Jeremaia'a amanage huno havige kasnampa ne' Hananiana kenona hunte'ne.<sup>6</sup> Tamage naneke Hananiaga hanankino, Ra Anumzamo'a anama hana zantamina nehuno, maka kasnampa nanekema hana nanekea Ra Anumzamo'a

erinena ragaresanie. Ana nehuno Ra Anumzamofo mono nompinti zantamima eri'za Babiloni kumate'ma vu'naza zantamine, kinama ome hu'naza vahe'enena kasnampa kema hana kante anteno, Ra Anumzamo'a maka zamavareno Jerusalemi kumate'ma esanigu kesanune. <sup>7</sup> Hianagi nagra menima hanua nanekea kagra nentahige'za, maka vahemo'zanena antahihio. <sup>8</sup> Hagi tagrama fore osu'nonke'zama ko'ma mani'za e'naza kasnampa vahe'mo'za, rama'a kumapi vahete'ene, kini vahe'mo'zama kegavama hu'naza mopafima nemaniza vahete'ma ha'ma esania zanku'ene, zamagatonto zanku'ene krima esania zanku'enena kasnampa kea huama hu'naze. <sup>9</sup> Hianagi mago kasnampa vahemo'ma kasnampa kema huno, ha' zana omanena mani fru huta manigahaze huno hania kemo'ma nena rgaresanigeta, e'i tamage Ra Anumzamo keaga asamigeno eme huama hu'neane huta keta antahita hugahune. <sup>10</sup> Hagi anagema hutegenoa'anante Jeremaia'ma karenamare zafama anankempima ante'neana, Hanania'a erino rufutagi atre'ne. <sup>11</sup> Hagi ana'ma huteno'a Hanania'a mika vahe zamayuga otino amanage hu'ne, Ra Anumzamo'a huno, ama ana hukna hu'na Babiloni kini ne' Nebukatnesa'ma maka mopafi vahetamima, karenamare zafama zamanankempima ante'neana tare kafumofo agu'afi rufutagi atregahue hu'ne. Hianagi Jeremaia'ma ana nanekema nentahino'a atreno vu'ne.

<sup>12</sup> Hagi Hanania'ma karenamare zafama Jeremaia anankempima me'nea zafama erino rufutagi atretogeno, mago'a knama evutegenoa'a Ra Anumzamo'a amanage huno Jeremaiana asami'ne. <sup>13</sup> Ra Anumzamo'a amanage hie hunka Hananiana ome asamio. Kagra zafareti tro hu'naza karenamare zafa erinka rufutagi'nanku, anama rufutagi trana kare'namare zafamofo nontera aenire karenamare zafa tro huntegahue hu'ne. <sup>14</sup> Hagi Monafi sondia vahe'mofo Ra Anumzana Israeli vahe Anumzamo'a amanage huno nehie, Nebukatnesa eri'za vahe maniho hu'na Nagra maka mopafi vahera aenireti tro hu'naza karenamare zafa zamanankempina ante zamante'noe. Ana hu'noanki'za agri eri'zanke erigahaze. Na'ankure afizaga kafa'nena agra kegava hugahie hu'na ko hankavea ami'noe. <sup>15</sup> Hagi kasnampa ne' Jeremaia'a anagema huteno'a anante kasnampa ne' Hananiana amanage huno asami'ne. Hananiaga antahio, Ra Anumzamo'a kagrira huogante'neanagi, kagra havige eme hunka masavenke eme hanke'za vahe'mo'za ana keka'a antahigami'naze. <sup>16</sup> E'ina hu'negu Ra Anumzamo'a amanage nehie, Kagrirama mopa fintira kazeri atresugenka omanigahane. Kagra meni ama kafufi frigahane. Na'ankure kagra vahera rempi huzaminke'za Ra Anumzamofona ha' rente'naze. <sup>17</sup> Higeno ana kafumofo 7ni ikante kasnampa ne' Hanania'a fri'ne.

## 29

### *Kinafima mani'naza vahe'ma Jeremaia'ma avoma krezami'nea naneke*

<sup>1</sup> Hagi Nebukatnesa'ma Jerusalemi kumateti'ma kasnampa vahe'ene, ranra kva vahe'ene pristi vahe'ene mika vahe'enema zmavareno Babilonima ome kinama huzamante'nea vahetega kasnampa ne' Jeremaia'a Jerusalemi kumate mani'neno ama avona kre atre'ne. <sup>2</sup> Hagi kini ne' Jekoniane kuini a' nererane, eri'za vahe'ene, Juda kva vahetamine, maka'zama zamanteti trohu antahi'zama eri'naza vahe'ene, maka zama golireti tro'ma nehaza vahe'ene, Jerusalemi kumapima nemaniza vahe'enema Jerusalemi kumateti'ma zamavare'za Babilonima ome kina huzmantetageno henka ama ana avona kre'ne. <sup>3</sup> Hagi ana avoma Jeremaia'ma kretegenoa'a, Juda

kini ne' Zedekaia'a, Safani nemofo Elasa'ene Hilkaia nemofo Gemariakizni ana avona zanamigeke erike, Babiloni kini ne' Nebukatnesantega Babiloni kumatega vu'na'e. Ana avomo'a amanage hu'ne.

<sup>4</sup> Hagi Monafi sondia vahe'mofo Ra Anumzana Israeli vahe Anumzamo'a, Jerusalemi kumateti'ma tamavre atregetama vuta Babiloni kumate'ma kinama ome hu'naza vahe'motagura amanage huno nehie. <sup>5</sup> Tamagra nona kita nemanita, hozanena erita antenkeno ne'zamo'a nena hanigeta erita neneta maniho. <sup>6</sup> Tamagra ara enerina, vea enerina huta ne'mofara kasezmanteho. Ana nehuta ne' mofavretamirera a'nea avre nezamita, mofa'netamia verera nenteta nehinke'za zamagranena ne'mofara kase hakare hiho. Ana nehuta osi'a vhahera omanisazanki rama'a vahe fore hiho. <sup>7</sup> Hagi Nagrama tamavre atrogeta kinama ome huta mani'naza kumamo'ma knare huno mesiema hanuta, tamagra mago'a kanku haketa ana kumara aza nehuta, Ra Anumzamo'narega nunamuna hiho. Na'ankure ana kumamo'ma knare'ma huno mesigeta, zamagranena knare huta fru huta manigahaze. <sup>8</sup> Hagi Monafi sondia vahe'mofo Ra Anumzana Israeli vahe Anumzamo'a huno, Tamagranema mani'naza kasnampa vahe'ene zamavune vahe'enena zamatreñke'za tamagrira tamareramatga osiho. Ana nehuta ava'nama ke'nesaza zanku'ma nehanageta ontahiho. <sup>9</sup> Na'ankure Nagra ana vhahera huozmantenoanki, Nagri nagifi havige kasnampa naneke zamagra neramasamize huno Ra Anumzamo'a hu'ne. <sup>10</sup> Hagi Ra Anumzamo'a amanage nehie, Babilonima kinafima umani'nenageno 70'a kfumfa evu vagama resige'na, Nagra antahinerami'na huvempama huramante'noa nanékea eri rgare'na, ete tamavre'na ama Jerusalemi kumatera egahue. <sup>11</sup> Na'ankure nazano Nagrama huramantenu'ku'ma hu'noa antahintahizana ko retro hunte'noe. E'ina antahi'zama retro'ma hu'noana, tamazeri haviza hu antahintahizana retro osu'noanki, henkama knare'ma huta nemanisageno muhama nehaza zamo'ma knare'ma hania antahintahi retro hu'noe, huno Ra Anumzamo'a hu'ne. <sup>12</sup> Ana'ma hanugeta tamagra Nagritega kezantetita, Nagrite'ma eta nunamuna hanage'na, Nagra ana nunamu ketmia antahiramigahue. <sup>13</sup> Hagi tamagrama miko tamagu'reti'ma huta Nagriku'ma hakenuta, Nagrira nageta eri fore hugahaze. <sup>14</sup> Ana'ma hanage'na maka moparegati'ene maka kumatamimpima, kinama ome hutama mani'naregatira ete tamavre atru hanugeta, ko'ma mani'nage'nama tamazeri atrogetama vu'naza kumate ete egahaze. <sup>15</sup> Hagi Babilonima mani'nonkeno'a Ra Anumzamo'a kasnampa vahetia ko zamazeri ot'i ne huta tamagra nehaze. <sup>16</sup> Hianagi Deviti'a kini trate'ma mani'nea kini ne'ene ama rankumapima mani'naza maka vahe'ene tamafu'tamagna zama kinafima ovu mani'naza vaheku'enena Ra Anumzamo'a amanage nehie. <sup>17</sup> Monafi sondia vahe'mofo Ra Anumzamo'a amanage hie, ha' vahe huzmantesuge'za bainati kazinteti eme hara huzmantegahaze. Ana nehanage'za mago'a vhahera ne'zanku hu'za nefrisage'za, mago'a vhahera krimo zamahe frigahie. Ana hanuge'za haviza huno kasri'nea fiki rgama vahemo'ma oneankna hugahaze. <sup>18</sup> Hagi Nagra ha' vahe huzmantesuge'za bainati kazinteti eme zamarotago nehanage'na, agatonto zanteti'ene krireti'ene hu'na zamarotago hugahue. Anama hanuge'za fre'za umani emanima hanaza kumatamimpi vahe'mo'za tusi koro nehu'za, huhaviza hune zamante'za, kiza zokago ke huzmantesugahaze. Anage nehu'za ana vahe'mo'za ha' vahe'zamima huhavizama huzmante'nakura, Juda vahe'mo'zama havizama hu'nazaza huta sifnafi maniho hu'za hugahaze. <sup>19</sup> Ra Anumzamo'a huno, Na'ankure Nagra

eri'za vaheni'a kasnampa vhahera knane knanena, huzmantoge'za evava hu'za keni'a eme huama hu'nazanagi ana nanekeaa antahita amagera onte'naze huno Ra Anumzamo'a hu'ne. <sup>20</sup> E'ina hu'negu Jerusalemi kumateti'ma tamavre atrogetama vuta Babilonima umani'naza vah'e'mota, Nagra Ra Anumzamo'nama nehua nanekeaa antahihio. <sup>21</sup> Hagi Monafi sondia vah'e'mofo Ra Anumzana Israeli vahe Anumzamo'a amanage nehie, Kolaia nemofo Ahapuke Ma'a'seia nemofo Zedekaiakea Nagri nagifi havige kasnampa ke hūnaku, Nagra Babiloni kini ne' Nebukatnesa azampi zanavre anta'nena mikamota negesageno zanahe frigahie. <sup>22</sup> E'ina hu'negu Juda mopareti'ma vu'za Babilonima kina ome hu'naza vah'e'mo'za, mago vah'e'ma huhavizama hunte'nakura, Ra Anumzamo'a kazeri haviza hanigenka, Babiloni kini ne'mo'ma Zedekaiane Ahapunema tevefima kre rasage'nea kna hugahane hu'za sifna kea huzmantegahaze. <sup>23</sup> Na'ankure ana netremokea Israeli vahe agu'afina havizantfa hu'nea avu'ava'za hu'nae. Zanagra tava'ozanire'ma nemaniza vah'e'mokizmi a'nene monko'zana nehuke, Nagra huo zante'noanagi Nagri nagifi eke havige kasnampa nanekeaa hu'nae. Nagra anazana ko ke'na antah'i'na hu'nena nehue huno Ra Anumzamo'a hu'ne.

#### *Jeremaia'ma avoma Semaiantega kre atre'nea naneke*

<sup>24</sup> Hagi Nehelamu nagapinti ne' Semaiana ome asami'nogu'ma Ra Anumzamo'ma Jeremaiama asami'nea naneke. <sup>25</sup> Hagi Monafi sondia vah'e'mofo Ra Anumzana Israeli vahe Anumzamo'a amanage nehie, Semaiaaga kagraka'a kagesafinti amanage hunka avona kretenko atrankeno, maka Jerusalemima mani'naza vahete'ene, pristi ne' Ma'a'seia nemofo Zefanaiantegane, maka pristi vaheteganena vu'ne, <sup>26</sup> Hagi Ra Anumzamo'a pristi ne' Jehoiada nontera kagri Zefanaiaga kavrenenteno, Nagri mono nontera kegava hu'eneka iza'o neginagi vah'e'mo'ma kasnampa nanekema hania vhahera azerinka agafina zafareti runtrako hunka kina hunentenka, anankempina ainireti'ma tro'ma hu'naza rini rusi huo huno kazeri otti'ne. <sup>27</sup> E'ina hu'negu nahigenka Anatoti kumateti kasnampa ne' Jeremaia'ma tamagri amu'nompima kasnampa nanekema nehigenka, agrira azeri konerinka azeri fatgoa osu'nane? <sup>28</sup> Na'ankure Jeremai'a amanage huno avona kretregeno Babilonima mani'nona nagatega e'ne. Tamagra ana kumatera za'za kna manigahazanki nona kita nemanita, hozanena anteta neneta maniho hu'ne. <sup>29</sup> Hianagi Semaia'ma kre'nea avona pristi ne' Zefanai'a erino vuno Jeremaiavaure ome hampri'ne. <sup>30</sup> Ana'ma hutegenoa'anante Ra Anumzamo'a Jeremaiana amanage huno asami'ne. <sup>31</sup> Babilonima kinama ome hu'za mani'naza vahetegama kema atrezmant'e sanana, Ra Anumzamo'a Nehelamu kumateti ne' Semaiankura amanage hie hunka zamasamio. Nagra asamua naneke eme huama osu'neanki, agra havige kasnampa naneke eme higeta ana naneke'a antahimi'naze. <sup>32</sup> E'ina hu'negu Ra Anumzamo'a huno, Nehelamu nagapinti ne' Semaiante agripinti'ma fore'ma hanaza vah'e'enena zamazeri haviza hugahue. Ana hanugen magore huno agri nagapintira ama vah'e'mo'za mani'neno, vaheni'ama Nagrama zamazeri knare'ma hanua zana onketfa hugahie. Na'ankure Nagrikura ha'renteho huno vhahera rempi huzami'negu anara hugahie. Nagra Ra Anumzamo'nna ama ana nanekeaa nehue.

<sup>1</sup> Hagi ama nanekea Ra Anumzamo'ma Jeremaiama asami'nea naneke. <sup>2</sup> Ra Anumzana Israeli vahe Anumzamo'a huno, Nagrama kasamua nanekea mago avontafepi ana maka krento. <sup>3</sup> Hagi antahiho! Mago kna ne-eankino ana knama esige'na, Nagra vaheni'a Israeli vahe'ene Juda vahe'enena kinafintira ete zamavare'na esanuge'za zamagehe'ima zami'noa mopa ete eme eri nafa'a hu'za manigahaze huno Ra Anumzamo'a hu'ne. <sup>4</sup> Hagi Ra Anumzamo'a Israeli vahe'ene Juda vaheku'enena amanage hu'ne. <sup>5</sup> Ra Anumzamo'a huno, Vahe'mo'ma koro'ma nehuno krafagema nehia zana nentahue. Ana hu'neankino koro'zamo avitegeno, knare huno arimpa fru huno mani'zana omane'ne. <sup>6</sup> Hagi vene'nemo'za zamu'enea hu'za mofavrea kasenezamataza za me'nefi zmantahigenka ko? Hagi nahige'za a'nemo'za mofavre ante'naku nehazageno, zamata negrige'za zamarimpire zamazama refita zanknara hu'za venenemo'za zamarimpirera zamazana refinetaze? Hagi nahigeno zamavugosamo'a, kore nehaza vahe'mofo zamavugosamo'a nehiazana nehie? <sup>7</sup> Hagi antahiho, korapara egeta onke'naza kna hazenkeza egahiankino Jekopu nagara eme tamazeri haviza hugahie. Hianagi zamagrira zamagu vazigahue. <sup>8</sup> Hankavenentake Ra Anumzamo'a huno, ana knama e'nige'na Israeli vahe zamanankempima ante'naza karenamare zafa eri'na rufutagi netre'na kinafintira katufe zamatgahue. Ana hanuge'za ru vahe'mokizmi kazokazo eri'za vhahera mago'enena omanigahaze. <sup>9</sup> Hianagi zamagra Ra Anumzamo'na Nagrieri'za vahe nemani'za, Deviti nagapinti'ma kinima azeri otisanua ne'mofo eri'za vahe manigahaze. <sup>10</sup> Hagi ana hu'negu Nagri eri'za vahe Jekopu naga'mota antahintahi hakarea nosuta, Israeli vahe'mota korora osiho. Na'ankure Nagra Ra Anumzamo'na ru moparegama mani'naregatira, ete tamavre'na ne-ena, ne'mofa'ma ru kuma tamimpima kinama ome hu'naregatira ete zamavare'na egahue. Ana hanugeta Jekopu nagamota mopatamia ete eme erita akoheta mani fruhuta manisageno, mago vahemo'e huno tamazeri korora osugahie, huno Ra Anumzamo'a hu'ne. <sup>11</sup> Na'ankure Ra Anumzamo'a huno, Nagra tamagrane manine'na tamagu vazigahue. Nagrama tamazeri panani'ma hugeta umani emanima hu'naza mopafi vhahera zamahe hana hugahue. Hagi tamagrira tamatresugeta amnea omanigahazanki, knaza tami'na tamazeri haviza hugahue. Hianagi Nagra fatgo avu'avaza hu'na knazana tamina tamazeri fatgo hugahue.

<sup>12</sup> Hagi Ra Anumzamo'a huno, Tamagrira tamavufga rutraga hu'za tamahe nazankino namumo'a teganigara osu'ne. <sup>13</sup> Hagi tamagri'ma tamaza hanugu'ma Nagritegama keagama hania vhahera omanigeno, tamagrira namunte'ma fre marasinia omene'neankino, tamagri namumo'a teoganigahie. <sup>14</sup> Hagi ko'ma tamagri'ma tamavesineramantaza vahe'mo'za menina zamagekani tamante'za, mago'a zana hunoramantaze. Hagi mago vahe'mo'ma asunku'ma osuno, ha' vahe'ama azeri havizama hiaza hu'na Nagra tamazeri haviza hu'noe. Na'ankure tamagra ra hazenke nehuta kumi'ma huta eri hakarema hu'nazagu anara hu'noe. <sup>15</sup> Hagi nahigeta hazenkema tamavuffima tami'naza namuma teogania zankura krafagea nehaze? Nagra ama ana knazama neramuana, na'ankure tamagra ra hazenke huta tusi kumi hu'nazagu anara huneramantoe. <sup>16</sup> Hianagi afi zaggafamo'za mago'zagama aheno'ma nehanama nehiankna hu'zama eme tamahe hana'ma nehaza vhahera, anahukna hu'za eme zamahe hana hugahaze. Ana nehanage'za tamagri ha' vhahera maka zamavare'za kina ome huzmantegahaze. Hagi rohu'ma eme tamare'za maka zantamima eri'zama vu'naza vhahera, ana zanke hu'za zamagrira rohu ome zamare'za maka zaza-

mia eri'za vugahaze. <sup>17</sup> Hianagi Nagra tamavufga tamazeri knare nehu'na, tamagri namuna eri hagege hugahue. Na'ankure zamagra hu'za tagri vhahera omani'naze nehu'za, Saioni kumara amneza me'neankino mago vahem'o'a antahi nomie hu'za nehaze. <sup>18</sup> Hagi Jekopu naga Israeli vhahera Nagra nasunku hunezamante'na, kinafintira zamavare'na mopazamire vanuge'za, ko'ma mani'nazaza hu'za nonku'ma ome ante'za manigahaze. Ana nehu'za Jerusalemi kuma'ene kinimofo nonena, ko'ma me'nea marurera ete eriso'e hu'za kigahaze. <sup>19</sup> Hagi zamagrama muse zagame'ma nehu'za musenkasema hanaza agasasamo'a tusiza hugahie. Nagra zamazeri rama'a hanuge'za, osi'a nagara omani rama'a vahe manigahaze. Ana nehu'na ra zamagi zamisuge'za, vahe'mo'za zamage fenkamia otregahaze. <sup>20</sup> Hagi mofavre naga'zamimo'za ko knafima knare hu'za mani'nazankna hu'za manigahaze. Ana nehanageno mani'zazmimo'za knare nehina Nagri navurera mani so'e nehanage'na, knama zami'za zamazeri havizama hanaza vhahera, nona hu'na zamazeri haviza hugahue. <sup>21</sup> Hagi zamagri amu'nompinti mago'zmimo kva nera fore huno kegava huzmantegahie. Nagra ana nera avre tava'o hanugen Nagri navate manigahie. Na'ankure Nagri tava'ontera mago vahemo'e huno agra'a avesitera omegahie. <sup>22</sup> E'ina hu'negu tamagra Nagri vahe manisage'na, Nagra zamagri Anumza manigahue. <sup>23</sup> Hagi antahih! Ununkomo'ma atufeno eankna huno Ra Anumzamofo arimpape zamo'a ne-eankino, ana rimp ahezamo'ke fo'ru'ava'ma nehaza vahe'mofo zamasenire egahie. <sup>24</sup> Hagi Ra Anumzamofo arimpape ahe'zamo'a ameru huno vagaoren me'nesigeno, nazano hugahuema huno agu'afima antahih'nesia zana huvgaregahie. Henka ama ana zana tamagra keta antahita hugahaze.

## 31

### *Israeli vahe'mo'za ete mopa zamire'ma emanine'za musenkasema hanaza naneke*

<sup>1</sup> Hagi Ra Anumzamo'a huno, Mago kna huhampri ante'noankino ana knama esige'za mikha Israeli vahepima mani'naza naga nofimo'za Nagri vahe mani'nage'na, Nagra zamagri Anumza manigahue. <sup>2</sup> Hagi Ra Anumzamo'a huno, Israeli vahe'ma hapinti'ma zamahe ofrisaza vahe'mo'za hagege ka'ma kokampi manisazanagi knare hu'za manigahaze. Na'ankure Nagra Israeli vhahera mani fru zamigahue.

<sup>3</sup> Hagi ko'ma zamagrite'ma eamama hu'nea Ra Anumzamo'a amanage hu'ne, Nagra Israeli vhahera vagaore mevava navesi zanteti, zamavare nagrarega ante'noe hu'ne. <sup>4</sup> Israeli vhahera Nagra ete tamazeri hankavetisugeta tamagra hankave vahe manigahaze. Hagi Israeli vahe'mota vene omase'nea mofakna hu'nazankita, ko'ma nehzaza huta muse zagamera nehuta tamboinia neheta avoa hagegahaze. <sup>5</sup> Hagi tamagra ko'ma nehzaza huta Sameriamma me'nea agonaramimpina waini hoza kasefa antegahaze. Hagi waini hozama antesaza vahe'mo'za, ana hozafintira raga'a tagiza nene'za musena hugahaze. <sup>6</sup> Hagi mago kna ne-eankino ana knama esanige'za, kuma kvama nehzaza vahe'mo'za, Efraemi agona kokampi manine'za, amanage hu'za kezan kea hugahaze. Otinketa Saioni agonare vuta Ra Anumzana tagri Anumzamofona monora ome huntesanune hu'za hugahaze.

<sup>7</sup> Hagi Ra Anumzamo'a amanage hu'ne. Jekopu nagakura ranke huta muse zagamera huzmanteho. Ana vahe'mo'za maka vhahera zamagatere'naza vahe mani'haze. Hagi ranke huta Nagri nagima musema huta husgama

hanazana amanage hiho, Ra Anumzamoka, Israeli vaheka'a osi'ama ofri mani'naza vahera zamagu vazinka zamavare huta hiho. <sup>8</sup> Hagi antahihi! Nagra noti kaziga moparegatira zamavare'na ne-e'na, mopama ome atre eme atrema hutegatira maka zamavare tru hugahue. Hagi anampina zamavare suhu vahe'ene, zamaga haviza hu vahe'ene, zamu'ene a'nanene, mofavre antenaku'ma nehaza a'nenea egahaze. Ana hanuge'za Israeli vahera rama'a vahe ete mopa zimirera egahaze. <sup>9</sup> Hagi zamavare'nama ne-esuge'za zamagra zavi nete'za Nagritega nunamuna nehanage'na, zamavare'na ete egahue. Hagi Nagra tinkenarega zamavare'na ne-e'na, knare huno pehe hu'nesia kante zamavare'na ne-esuge'za tanafara osugahaze. Na'ankure Nagra Israeli vahe'mokizmi nezmafana manugen, Efraemi'a zage mofavreni'a mani'ne. <sup>10</sup> Hagi kokankoka vahe'mota Ra Anumzamofo nanekea nentahinkeno, afete'ma hageri ankenaregama nemaniza vahe'mota amanage huta huama hiho, Israeli vahe'ma zamazeri panani'ma hu'nemo ete zamavareno eteno sipisipi afute kva vhemo'ma sipisipi afutamima kegavama nehiaza huno kegava huzmantegahie huta hiho. <sup>11</sup> Na'ankure Ra Anumzamo'a Jekopu nagara hankavenentake ha' vahe zamimofo zamazampintira ete zamagu vazino zamavaregahie. <sup>12</sup> Hagi zamagrama etesanu'za Saioni agonafi mareri'za manine'za ranke hu'za kezati'za zagamera nehu'za musenkasea hugahaze. E'ina'ma hanazana Ra Anumzamo'ma knare'nare zantamima witima, wainima, olivi masavema, sipisipine, bulimakao afu kevumo'zama anenta'ma ante hakarema hanaza zanku'ene hu'za musena hugahaze. Ana hanigeno nomaniza zamimo'ma mago'ma masaventre'rema hu'nea hozagna hanige'za, mago'enena zamasunku zampina omanigahaze. <sup>13</sup> Hagi ananknafina vene omase mofa'nemo'za musenkase hu'za avo nehagesage'za, nahezavemo'zane ranra vahe'mo'zanena ana zanke hu'za avo hagegahaze. Na'ankure zamasunku zampima mani'naza zana eri atresuge'za musenkasea hugahaze. Nagra zamagu'a zamazeri hankaveneti'na zamasunku zana eri netre'na museza zamigahue. <sup>14</sup> Hagi Nagra pristi vahe'mofo zamagu'afina museza antevite nezmante'nai, knare'nare zantami vaheni'a antevite zamantesuge'za musenkasea hugahaze, huno Ra Anumzamo'a hu'ne.

<sup>15</sup> Hagi Ra Anumzamo'a huno, Rama kumatetira ra zavi krafage ne-haze. E'i ana zavi krafagema nehiana Reselikino, agra mofavre'agu huno zavira netegeno mago vahe'mo'a azeri amne hugara nosie. Na'ankure miko mofavre naga'amo'za fri vagare'naze. <sup>16</sup> Hianagi Ra Anumzamo'a huno, Reseliga mofavre nagaka'agu'ma zavi krafama nehana zana atrenka kavunura eri amne huo. Na'ankure kagrama zavi'ma te'nana zamo'a amne zanknara osugahie. Mofavre nagakamo'za ha' vahe mopa atre'za ete kagritega egahaze. <sup>17</sup> E'ina hu'negu henka knare'za fore hugahianki amuhara nehunka manio. Ana hanage'za mofavre nagakamo'za ete mopa zamire egahaze. <sup>18</sup> Hagi Efraemi (Israeli) naga'mo'za zavira nete'za amanage nehazage'na antahi'noe. Agazone osu bulimakao afu' anenta azeri fat-goma hiazza hunka sefu taminka tazeri fatgo nehunka ete tavrenka enka eme tazeri knare huo. Na'ankure kagra Ra Anumzana tagri Anumza mani'nane. <sup>19</sup> Hagi Ra Anumzamoka kagrira katreta vu'nonanagi, menina Kagrite eta tasunka eme nehune. Hagi tazeri fatgoma hanketa tagra'a kefozama keta antahitama nehuta, tagazegu huta kepri nehune. Na'ankure nehazavema manitama e'nontegatima hu'nona kefo avu'ava zankura tagazegu nehune. <sup>20</sup> Hagi Ra Anumzamo'a huno, Efraemina Nagra navesinentoa mofavre mani'ne. Nagra knazana amigahuanagi maka zupa nagesa antahinemua

mofavreni'a mani'ne. Ana hu'neankino nagu'amo'a agrite me'negu Nagra tamagerfa hu'na nasunku huntegahue. <sup>21</sup> Hagi tamagra Israeli vahe'mota kuma'ma atreta vu'naza kana keso'e nehuta, negetama ete esaza avame zana, zafaramina asenteta viho. Hagi Israeli vahe'nimota vene omase mofa kna hu'nazanki ete echo. Ete eta ranra kumatamifi emanaho. <sup>22</sup> Hagi tamagra Nagri mofakna hu'nazanagi, tamagra natreta ufre efre huta zazate mani'haze. Nazupa tamagra atreta rukarahe huta Nagritega egahahue? Nagra Ra Anumzamo'na kasefa'za ama mopafina erifore nehue. E'i ana avu'ava zana a'mo'a vemofo azeri anukiankna hu'ne.

<sup>23</sup> Hagi Monafi sondia vahe'mofo Ra Anumzana Israeli vahe Anumzamo'a huno, Nagra Israeli vahera ete zamavare'na esuge'za mopa zimirera emanigahaze. Maka Juda mopafine ranra kuma tamimpima emanisaza vahe'mo'za amanage hu'za hugahaze. Ruotage'ma hunenka fatgo avu'ava zama nehana agonamoka Ra Anumzamo'a, asomu hugantesie. <sup>24</sup> Hagi Juda mopafima me'nea kuma tamimpima manisaza vahe'mo'zane, hozama ante vahe'mo'zane sipisipi afu'ma avre'za vanoma hanaza vahe'mo'zanena magopi knare huza manigahaze. <sup>25</sup> Hagi avesragu'ma hania vahera ete azeri kasefa nehu'na, hankave'ama omanesia vahera ete hankavea amigahue. <sup>26</sup> Hagi masenena ana zantmima ketena, oti'na keganti kegamama huana, haganentake navu mase'nofinti oti'noe.

<sup>27</sup> Hagi Ra Anumzamo'a huno, Hozafi avimza hankregeno hageno rama'a rgama ahenteaza hu'na, mago kna ne-eanki'na Israeli vahe'ene Juda vahe'enena zamazeri amporesanuge'za rama'a vahe fore nehanageno, zaga kafamo'enena rama'a forehu hakare hugahie. <sup>28</sup> Hagi korapara Nagra navu antete'na manine'na, zamagrira zanefi netrena, tapage hunetrena knazana zami'na zamazeri haviza hu'noane. Hianagi menina navunte'na kegava hunezamante'na, zamazeri trure'na noma hiaza hu'na negi'na, avimazama hiaza hu'na mopafi zamazeri hankaregahue, huno Ra Anumzamo'a hu'ne. <sup>29</sup> Hagi ana knafina amanahu fronka kea osugahaze. Zamafahe'za afu ore'nea waini raga nazageno, mofavre naga zamiyofo zamagitera aka hu'ne hu'za osugahaze. <sup>30</sup> Hianagi anopa waini rgama negeno agite'ma akaheaza huno, mago'magomo'a agra'ama hu'nesia kumimofo kna'a erino fritere hugahie.

<sup>31</sup> Hagi Ra Anumzamo'a huno, Mago kna ne-eankino ana knama esanige'na, Israeli vahe'ene Juda vahe'enena kasefa huhagerafi huvempa kea zamagrane hu hagerafigahue. <sup>32</sup> Hagi ana huhagerafi huvempa kemo'a, ko'ma zamagehe'ima Isipi mopafinti'ma zamazante zamavazu hu'na oa zupama zami'noankna huvempa nanekea omane'ne. Nagra nezamave kna hu'noanagi huhagerafi huvempa kema zamagranema hu'noana runetrage'za amagera onte'naze, huno Ra Anumzamo'a hu'ne. <sup>33</sup> Hagi Ra Anumzamo'a huno, ana kasefa huhagerafi huvempa kema Israeli vahe'enema hanuana, Nagra kasegeni'a antahintahi zamifi nente'na, zamagu'afi krentegahue. Ana nehu'na Nagra zamagri Anumza manisanuge'za, zamagra Nagri vahe manigahaze. <sup>34</sup> Hagi ana knaret'i'ma agafama huno vaniana, magomo'a otino tvaoma'are'ma nemanisimofone afu'agananena rempi humino, Anumzamofona kenka antahinka huo hunora osugahie. Na'ankure agi omane vaheteti'ma vuno agima me'nea vahete'ma vaniana maka'mo'za Nagrira nage'za antahi'za hugahaze. Na'ankure kumizamia eri netre'na, ana kumi zamigu'ma nagesa anti ozamisua zanku anara hugahaze. <sup>35</sup> Hagi zagema huntegeno feru'ma remsa

nehigeno, ikane hanafi taminema higeno nonkuma'are me fatgo hu'neno hanimpina remsa nehigeno, hagerima eri kranto kranto'ma higeno ra agasasama neria Ra Anumzamofo agi'a Monafi sondia vahe'mofo Ra Anumzankino, agra amanage hu'ne. <sup>36</sup> Nagra Ra Anumzamo'na hvempa huankino, zugene ikane hanafi tamima huge'za nonku'ma zamire'ma me fatgoma hazaza hu'za, Israeli vahe'mo'za manivava hu'za vugahaze. Hianagi zugene ikane hanafi tamimo'zama Nagrama zami'noa eri'zama e'oriza zupa fananema hazaza hu'za, Israeli vahe'mo'za mopazamia atre'za fanane hugahaze. <sup>37</sup> Hagi Ra Anumzamo'a huno, mago vahemo'ma monamofo agema'ama nofi avazu huno kevanereno, mopama azeri oti'na tro'ma hu'noa agafa'ama kevama retesige'na, ana zupa Israeli vahe'mo'zama hu'naza havi avu'ava zanteria namefi huzamigahue huno, Ra Anumzamo'a hu'ne.

<sup>38</sup> Hagi Ra Anumzamo'a huno, Mago kna ne-eankino ana knama esanige'za, ama Jerusalemi ran kumara Ra Anumzamo'na nagire ete eriso'e hu'za kigahaze. Ana'ma hanazana Hananeli Zaza Nonema nehazareti eri agafa hute'za vu'za, Renagente'nere Kuma Kafanema nehazare vugahaze. <sup>39</sup> Hagi anantetira nofi'ma avazuma hu'za kesaza nofimo'a vufatgo huno Garepiema nehaza osi agonare vuteno, anantetira rukrahe huno Goa kumate evugahie. <sup>40</sup> Hagi fri vahe'ma ome asenezamante'za ta'nefa'ma ome netraza agupone, Kldroni tinkagomupima me'nea mohanena maka erigu'a netreno vuvava huno, zage hanati kaziga kuma keginamofoma, Hosi Kafanema nehazare uhanatigahie. E'ina hanigeno rankumamofo agu'afima mesania mophomo'a Ra Anumzamofo suza me ruotage huno megahie. Ana hanigeno mago vahe'mo' a eno hara eme hunteno ama ana rankumara erige, eri havizana hugera osugahie. Ana hanigeno ama ana kuma'mo'a knare huno mevava huno vugahie.

## 32

### *Jeremaia'ma mopa mizase'nea naneke*

<sup>1</sup> Hagi Zedekaia'ma Juda vahe kinima manino egeno 10nima hia kafufina, Ra Anumzamo'a Jeremaia'na ama nanekea asami'ne. Hagi ana'ma hu'neana Nebukatnesama Babiloni kinima manino egeno 18nima hia kafufi anara hu'ne. <sup>2</sup> Hagi ana knafina Babiloni kini ne'mofo sondia vahe'mo'za e'za Jerusalemi kumara eme vazagi kagi'naze. Ana nehazageno Juda kini ne'mofo kumapima sondia vahe'ma nemanizafi kasnampa ne' Jeremaia'a kina huno mani'ne. <sup>3</sup> Na'ankure Juda kini ne' Zedekaia'a, Jeremaiana kina hunenteno amanage huno hu'ne, kagra nahigenka kasnampa kea hunka, Ra Anumzamo'a huno, Nagra ama rankumara Babiloni kini ne'mofo azampi antesanugenno hara huramanteno ama anankumara erigahie. <sup>4</sup> Ana hanigeno Juda kini ne' Zedekaia'a Kaldia vahe zamazampintira zamatreno ofregahie. Hianagi Zedekaiana avre'za Babiloni kini nete vanageno, zanagra zanavuji oge age nehu keaga hugantigma hugaha'e. <sup>5</sup> Hagi anantetira Babiloni kini nemo'a Zedekaiana avreno Babiloni vanigeno umani nesanige'na, Nagra anantega ome kegahue. Hagi kagra Babiloni vhahera hara huzamante'gahananagi kassamarenka hara huzamagate ore-gahane huno, Ra Anumzamo'a hie hunka kasnampa kea hu'nane ne-huno, Zedekaia'a Jeremaiana kina hunte'ne. <sup>6</sup> Hagi Jeremaia'a huno, Ra Anumzamo'a amanage huno nanekea nasami'ne. <sup>7</sup> Antahio! Negafana negna mofavre Salumu nemofo Hanameli'a kagrite eno amanage hugahie.

Nagri mopama Anatoti kumate'ma me'nea mopa mizaso huno hugahie. Na'ankure kagra agrira avate nefuga ugota vahe mani'nanku amane ana mopa mizasegahane. <sup>8</sup> Hagi Ra Anumzamo'ma nasami'nea kante anteno, nenfa negna mofavre Hanameli'a eno, kini ne'mofo kumapima sondia vahe'ma nemanifima kinama hu'na mani'nofi eno amanage hu'ne. Benzameni nagamokizmi mopafima Anatoti kumate'ma Nagri mopama me'neana kagra mizaso. Na'ankure kagra nagrira navate nena fuga ugota vahe mani'enka ana mopa ete mizasenka eriga vahe mani'nanankinka, kagra'a suza mizasegahane. Anagema hige'na nagrama antauhana, e'i Ra Anumzamo naneke nasamianki'na ana hugahue hu'na hu'noe. <sup>9</sup> Anage nehu'na anante 17ni'a silva zagoa sigerire erinte'na kna'a kete'na, nenfa negna mofavre Hanamelina mizana senente'na, Anatoti kumate'ma me'nea mopa eri'noe. <sup>10</sup> Hagi ana mopama mizamasoa mopamofo avona eri fatgo hu'na nagia krena eri vakaki nente'na, ananteria vahera manine'za negage'na ana avontafera eri renamagi'na fukinteti retrako nehu'na, mizama hua zagoa sigerire erinte'na nege'na Hanamelina erimi'noe. <sup>11</sup> Hagi ana mopama mizama hua mopamofo kasege'a tare avontafete anahukna hu'na krete'na mago avona repasi hu'na fukinu rentarako nehu'na, mago avontafera repasi osu atre'noe. <sup>12</sup> Hagi anantarega avona eri'na Maseia negeho Neri nemofo Baruku ami'noe. E'ina'ma hu'noana nenfa negna mofavre Hanameli avufine, anama mizamasoa avontafete'ma zamazanko avoma ante'naza vahe zamavu fi anazana hu'noe. Ana nehu'na maka Juda vahe'ma, kini ne'mofo kumapima sondia vahe'ma nemaniza kumapima mani'naza vahe zamavufine ana zana hu'no'e. <sup>13</sup> Hagi maka vahe'mo'za negage'na amanage hu'na Barukuna asami'noe. <sup>14</sup> Monafi sondia Vahe'mofo Ra Anumzana Israeli vahe Anumzamo'a amanage huno nehie, mopama mizamasoa mopamofo kasege'ama krente avontafetrena fukima rekamare su'anee amnema me'nea avontafe'enena anantarega erinka mopa kavofi antegeno havizana osu zazate meno. <sup>15</sup> Na'ankure Monafi sondia Vahe'mofo Ra Anumzana Israeli vahe Anumzamo'a huno, vahe'mo'za henka'a nontamine mopane waini hozanena zagoreti mizasegahaze.

### *Jeremaiama Anumzamofontega nunamu hu'nea naneke*

<sup>16</sup> Hagi mopama miza hu'noa mopamofo kasege'ama krente avontafe'ma Neria nemofo Barukuma amite'na, Ra Anumzamofontega amanage hu'na nunamuna hu'noe. <sup>17</sup> Ra Anumzamoka kagra tusi'a hihamu hankave ka'reti kazana rusutenga monane mohanena tro hu'nane. Ana hu'neankino kagratera mago zamo'a amuhoa osu'ne. <sup>18</sup> Hagi Kagra vagaore kavesizanteti, rama'a tauseni'a vahera kavesi nezamantane. Hianagi nefaa'ma hu'nea kumitera nona hunka nemofona azeri haviza nehane. Anumzamoka kagra tusi hankavenentake ne' mani'nanokino, kagri kagi'a Monafi sondia vahe'mofo Ra Anumzane. <sup>19</sup> Kagra knare antahintahia vahera nezaminka, hankave eri'za erifore nehane. Ana nehunka vahe'mo'zama maka zamavu'zmavama nehazana kavua antenka negenka, zamagrama nehaza avu'avate antenka mizazmia refko hunka nezamina Anumza mani'hane. <sup>20</sup> Hagi kagra Isipi mopafina kaguva zane avame'zanena erifore hu'nanankinka, meninena Israeli vahepine maka kokankokama nemaniza vahete'enena kaguva zane avame'zanena erifore nehanke'za maka vahe'mo'za nege'za meninena rankagia negamize. <sup>21</sup> Hagi Kagra hankavenentake kazana rusutenga, Isipi mopafina kaguva

zane avame zanena eri fore hunka vhahera zamazeri koro nehunka, vaheka'a Israeli vhahera Isipitira zamavarenka atirami'nane. <sup>22</sup> Hagi ana hutenga kagra zamagehe'ima huvempa huzmantenka, tumerimo'ene amirimo'enema avite'nea mopa mopa zamigahue hunka hu'nana kante antenka ama mopa zami'nane. <sup>23</sup> Ana hanke'za tagehe'za ama mopa eme eri'nafa'a hu'za mani'naze. Hianagi kagri nanekea nontahi'za kasegeka'a amagera onte'naze. Kagrama amage anteho hunkama huzamante'nana nanekea magore hu'za amagera ontogenka ama hazenke zantamina atrankeno zamagritera ne-e. <sup>24</sup> Hagi menina Babiloni vahe'mo'za e'za Jerusalemi rankumara eme vazagi kagine'za, kuma keginamofo asoparega mopa antehihi hu'za mareri'za hara hurante'za kumara erinaku nehaze. Hagi anama nehazana, na'ankure Kagrama hunana kante amage ante'za Babiloni vahe'mo'za kazintetira mago'a nerahesageno, mago'a ne'zanku huta nefrisunkeno, mago'a krimo tahe nefrisige'za kuma'ma erinaku'ma nehaza zana ko negane. <sup>25</sup> Hagi tamagerfa hu'za Babiloni vahe'mo'za ama rankumara erigahaze. Hianagi kagra Ra Anumzamoka hunka, vhahera kehinke'za negesagenka zagoreti mopa mizana huo hanke'na anara hu'noe.

<sup>26</sup> Anante Ra Anumzamo'a Jeremaiana amanage huno asami'ne. <sup>27</sup> Nagra Ra Anumzana miko vahe'mofo Anumza mani'noankino, mago zamo'a nagritera amuhoa osugahie. <sup>28</sup> E'ina hu'negu Ra Anumzamo'a huno, menina ama rankumara Babiloni vahe zamazampine, Babiloni kini ne' Nebukatnesa azampine anta'nena hara huzmagatereno erigahie. <sup>29</sup> Hagi Babiloni vahe'ma ama rankuma'ma ha'ma eme hunentaza vahe'mo'za, kumara teve tagintesageno tegahie. Nontamimofo agofetura Bali havi anumzante'ma ofa kresramna nevuta, ru anumzantaminte'ma waini tima tagitretha ofama ne-huta, Nagri'ma nazeri narimpama nehaza nontaminena teve taginte'sageno te vagaregahie.

<sup>30</sup> Hagi Israeli vahe'ene Juda vhahemo'zanena, kasefa zamireti'ma eno amare'ma ege'na, Nagrama zamagoana mago knare zana osu'nazanki havi avu'ava zanke hu'za e'naze. Zamagra Israeli vahe'mo'za mago knare zana osu'nazanki, zamazanteti'ma avako'ma hu'za tro'ma hu'zama e'naza zamo nazeri narimpahe'ne huno Ra Anumzamo'a hu'ne. <sup>31</sup> Hagi ama Jerusalemi rankuma'ma erigafama hu'za ki'naza knareti'ma eno meni ama knare'ma ege'za, vahe'mo'za nagrira nazeri narimpa ahe'nazankina, zamazeri atresuge'za Nagri navurera omanigahaze. <sup>32</sup> Na'ankure Israeli vahe'ene Juda vhahemo'zanena maka kefo avu'ava zama nehaza zamo Nagrira nazeri narimpa ahe'ne. Ana nehazage'za kini vahe zamimo'zane, kva vahe zamimo'zane, pristi vahe zamimo'zane, kasnampa vahe zamimo'zane, maka Juda venenemo'zane, Jerusalemi rankumapima nemariza vahe'mo'za zamagranena havi avu'ava zanke hu'za nazeri narimpa ahe'naze. <sup>33</sup> Hagi zamagra zamavugosa rukrahe nehu'za, zamefi hunami'naze. Nagra maka zupa rempi huzmi vava hu'noanagi, Nagrama zamasamua zamavumro nanekea antahi'za amagera onte'naze. <sup>34</sup> Hagi zamagra kasrino agoterfa havi anumzamofo amema'a eri'za vu'za, Nagri nagima me'nesige'za mono hunantegahaze hu'noa mono nompi omente'za, ana nona eri pehena hu'naze. <sup>35</sup> Hagi Ben-Hinomue nehaza agupofi Bali havi anumzante'ma mono'ma huntesaza kumatamina tro hunte'naze. Ana hute'za anante ne' mofavre naga'zamia zamahe'za Moreki havi anumzante Kresramana vu'naze. Nagri antahi'zampina e'inahua antahintahia omanegeno, e'ina huno kasri'neal havi avu'ava zana hihou hu'na Nagra huozamante'noa avu'avaza nehu'za, Juda vhahera zamatu fazage'za kumira hu'naze. <sup>36</sup> Hagi e'ina hu'negu Ra Anumzana Israeli vahe Anumzamo'a huno, Tamagra

huta ha'zamo'ene agatonto zamo'ene krimo'ene tazeri haviza nehiankino, Babiloni kini ne'mo hara huragatereno ama rankumara erigahie hutama nehaza kumakura Nagra amanage nehue. <sup>37</sup> Hagi antahihō! Nagri narimpahe zamo'ma teve rukaru'ma hige'na, zamazeri panini huge'za ru moparegama umani emanima hu'naregatira, ete zamavare'na ama kumate esuge'za, mago zankura ontahi knare hu'za emanigahaze. <sup>38</sup> Hagi zamagra Nagri vahe manisage'na, Nagra zamagri Anumza manigahue. <sup>39</sup> Hagi Nagra magoke antahizanke nezami'na, magoke ka zamaveri ha'nena nevu'za nagrira koro hunante'za namage antegahaze. Na'ankure e'i ana'ma hanazana zamagri knare zanku'ene henkama kase zamantesaza mofavre naga'zamimofo knare zanku'ene anara hugahaze. <sup>40</sup> Hagi Nagra knare avu'ava zama hunezmantoa zana atre'na rukrahera osugahue hu'na, zamagranena mevava huhagerafi huvempa kea hugahue. Ana nehu'na zamagu'afina Nagri'ma koro'ma hunante'za nagorgama manisaza avu'avaza ante zamante sanuge'za, ru'enena natre'za ovugahaze. <sup>41</sup> Hagi Nagra zamagrikura muse nehu'na knare avu'ava zana huzmantegahue. Ana nehu'na avimzama nehiaza hu'nama ama mopafi hankre sanuge'za mani'nенаге'на, Nagra maka nagu'reti hu'na nazano huzmantegahue hu'na hu'noa zana huvagaregahue.

<sup>42</sup> Hagi Ra Anumzamo'a huno, Nagrama ranra knazanteti'ma ama vahe'ma zamazeri havizama hu'noaza hu'na, knare'nare zantamima huzmantegahue hu'na huvempama huzmante'noa zantamina ana maka zamazeri knare hugahue. <sup>43</sup> Hagi tamagra huta, Ra Anumzamo'a Babiloni vahe zamazampi ama mopa erintegeno, mopamo'a havizantfa higeno magore huno vahe'ene zagagafanena omanitfa hu'ne huta nehaze. <sup>44</sup> Hagi mopama mizasesazana, mago'a vahe'mo'za anante manine'za ke'nonkeno mopa mizase hu'za ana mopamofo kasege'ama krentesaza avontera zamagi'a eri vakakite'za ana avona eri rentarako huntegahaze. Hagi mopama mizama sesazana, Benzameni naga mopafine, Jerusalemi kuma tvaonte'ma me'nea mopafine, Juda kuma tamimpima me'nea mopafine, ne'onse agona kokampima me'nea kumatamine, Sefela agupo kokane, Negevi kaziganema me'nea kuma tamimpinti'enena, mopa zagoreti miza hu'za erigahaze. Na'ankure ana knafina Nagra ete kinafintira zamavarena mopa zamire esuge'za knare hu'za manigahaze huno Ra Anumzamo'a hu'ne.

### 33

#### *Ra Anumzamo tamazeri knare hugahue huno huvempa hu'nea naneke*

<sup>1</sup> Hagi Jeremaia'ma kini ne'mofo kumapima sondia vahe'ma nemanifima, kinama huno mani'nefi mani'negeno, ete nampa 2 zupa Ra Anumzamo asami'nea naneke. <sup>2</sup> Ra Anumzama mopama tro huteno, antegeno noma'arema me fatgo hu'nea Anumzanku'ma agi'a Ra Anumzanema hu'za nehaza Ra Anumzamo'a amanage nehie, <sup>3</sup> Kagra nantahigege'na keka'arera Nagra ke nona hu'na ranra zantamima fra'ma ki'negenka kenka antahinka'ma osu'nana zantamina eri kaveri hanena ko. <sup>4</sup> Hagi rankumapima me'nea nonteti'ene, Juda kini vahe'mokizmi nonteti'ma, tapage'ma hu'za kuma keginare'ma omente hihi hu'za mareriza mani'neza ha'ma hu'naza nontaminkura, Ra Anumzana Israeli vahe Anumzamo'a amanage huno hu'ne. <sup>5</sup> Zamagra Babiloni vahe'enema ha'ma nehu'za anara hugahaze. Ana nehanageno Nagri narimpa ahe'zamo'a teve rukru hiankna nehanige'na, Jerusalemi kumapi vahera narimpa ahezmante'na zamahe frisugenno rankumapina frisaza vahe zamavufagamo'a avitegahie.

Na'ankure Jerusalemi kumapima nemaniza vahe'mo'zama nehaza havi avu'ava zamo hanige'na, navugosa rukrahe nehu'na namefi huzamigahue. <sup>6</sup> Hianagi henka'a ama rankumara Nagra ete eri knare nehu'na, vahe'enena zamazeri kanamaregahue. Ana hanuge'za knare nomari'zampi muse hu'za nemanisage'za mago'enena hara eme huozamantegahaze. <sup>7</sup> Hagi Israeli vahe'ene Juda vahe'enena kinafintira ete zamavare'na e'na, eme zamazeri so'e hanuge'za ko'ma mani'nazaza hu'za manigahaze. <sup>8</sup> Hagi zamagra kumi'ma hu'naza kumi'zamia maka sese hunezamante'na, Nagri'ma ha'ma renante'naza kumi'enena maka atre'zmanategahue. <sup>9</sup> Hagi ana'ma hutesuge'za maka kokankoka vahe'mo'za Jerusalemi kumate'ma maka knare'nare zama eri fore'ma hanua zamofo agenkea nentahi'za, Nagri nagine hihamuni'agura husga hugahaze. Hagi Jerusalemi kuma'mofoma maka zampima azeri knare'ma hanua zamo hanige'za, vahe'mo'za koro nehu'za zamahirahiku hugahaze. <sup>10</sup> Hagi Ra Anumzamo'a huno, Tamagra huta ama kumamo'a havizantfa higeno, magore huno vhemo'ene zagagafamo'enena omani'ne huta nehuta, Judama me'nea kuma tamimpine Jerusalemi kumapima me'nea ne'onse kantamimpina, magore huno vahe'ene zagagafanena omanitfa hu'ne huta nehaze. Hianagi henka ana kuma tamimpina vahera ete esageta zamagerura antahigahaze. <sup>11</sup> Hagi musenkasema nehu'za kiza zokago'ma hanaza zamagerura nentahita, veamo'za eri hagerafinaku'ma nehu'zama hanaza zamageru'enena antahigahaze. Ana nehuta Ra Anumzamofo mono nompima muse ofama eri'za ne-e'zama zagame'ma hanazana amanage hu'za nehanageta antahigahaze. Hankavenentake Ra Anumzamofona humuse huntesanune, na'ankure Ra Anumzamo'a knare hu'neankino, avesiranteno knare avu'ava'ma hunerantea zamo'a mevava huno vugahie hu'za hugahaze. Na'ankure Nagra ete zamazeri so'ema hanuge'za ko'ma mani'naza avamente'ma manisaza zanku anara hugahaze huno Ra Anumzamo'a hu'ne. <sup>12</sup> Hagi Monafi sondia vahe'mofo Ra Anumzamo'a huno, Menina ama mopamo'ene maka ranra kuma tamimo'enena havizantfa higeno, magore huno vhemo'ene zagagafamo'enena omanitfa hu'ne. Hianagi henka vahera enemanisage'za, sipisipi kva vahe'mo'zanena sipisipi afu zugazmia zamavare'za knare trazama me'nesirega vanage'za ome mani fru hugahaze. <sup>13</sup> Hagi ne'onse agona kokampima me'nea kuma tamimpine, Sefela agupo mopafima me'nea kuma tamimpine, Negevi mopafima me'nea kuma tamimpine, Benzameni naga mopafima me'nea kuma tamimpine, Jerusalemi kuma tava'onte'ma me'nea mopafine, maka Juda mopafima me'nea kuma tamimpinemana manisaza vahe'mo'za, ko'ma nehazaza hu'za ete sipisipi afu'zamia hampari'za erinte fatgo hugahaze. Nagra Ra Anumzamo'a ama ana nanekeea nehue.

<sup>14</sup> Hagi Ra Anumzamo'a huno, Mago kna ne-eankino ana knama esanige'na, Israeli vahe'ene Juda vahe'enema knare'zanku'ma huvempama huzmante'noa nanekeea eri knare hugahue. <sup>15</sup> Hagi ana knafina zafareti kasefa azankuna rehakarufeno mareriaza hu'na, Deviti nagapinti magora fatgo avu'ava'ene ne' azeri ot'i'nena maka ama mopafi vahera fatgo avu'avateti refko huzmantegahie. <sup>16</sup> Hagi ana knafina Juda vahe'mokizmi zamagu nevazisageno, Jerusalemi kumapi vahe'mo'za knazana omanesige'za knare hu'za manigahaze. Ana nehu'za Jerusalemi kumakura hu'za, Ra Anumzamo'a tagri fatgo avu'avazane hu'za agia antemigahaze. <sup>17</sup> Na'ankure Ra Anumzamo'a huno, Deviti nagapintike

Israeli vahe kinia mani vava hu'za nevanageno, <sup>18</sup> Livae nagapintike pristi vhahera fore hu'za nevu'za, Nagri navurera tevefi kre fanane hu ofane, witi ofane, mago'a ofanena huvava hu'za vugahaze. <sup>19</sup> Hagi Ra Anumzamo'a Jeremaiana amanage huno asami'ne, <sup>20</sup> Nagrama masane haninemoke'ma eforema huterema hana'a knama ante'noa kna mago vahe'mo'a eri atresigeno, ru knarerera eforera osugaha'e. <sup>21</sup> E'i ana kanteke Nagrama huhagerafi huvempa kema hu'na, eri'za vaheni'a Deviti nagapintike kinia mani'za nevanageno, Livae nagapintike pristi vhahera mani'za nevu'za Nagri eri'zana erigahazema hu'na huvempama hu'noa nanekea mago vahe'mo'a eri otregahie. <sup>22</sup> Hagi Nagri eri'za ne' Deviti naga'ene, eri'za vaheni'a Livae naga'enena rama'a vahe zamazeri fore ha'nena, monafi hanafi kna nehu'za hageri anke'nafi kahepankna nehanage'za vahe'mo'za ohamprigahaze. <sup>23</sup> Hagi Ra Anumzamo'a Jeremaiana asamino, <sup>24</sup> Vahe'mo'zama hu'za, tare naga nofi'ma Israeli vahe'ene Juda vahe'enena, Ra Anumzamo'ma Nagri vaherema huno nehia vahe'ma amefi hunezamie hu'za vahe'mo'zama nehazana kagra nontahimpi? Anage hu'za Nagri vahera kezamasu'za zamazeri fenkami netre'za, Israeli vahera zamage amneza nesaze. <sup>25</sup> Nagrama masane haninemoke'ma me'nekema efore'ma huterema hana'a kasegene monane mopa'nemokema kankamuznire'ma me fatgoma hana'a kasegema huhagerafi'noana mago vahe'mo'a eri otregahie. <sup>26</sup> E'i ana kante, Jekopu naga'ene Nagri eri'za ne' Deviti nagara namefira huozamigahue. Nagra Deviti nagapinti kinia zamazeri otitere hanuge'za, Abrahamune, Aisakine, Jekopumpinti'ma forehu anante nante'ma hu'za esaza vahera, kinia mani'za kegava huzmantegahaze. Ana nehanage'na Nagra nasunku hunezamante'na kinafintira ete zamavare'na mopazmire esuge'za eman'i'neza maka zampina knare hu'za manigahaze.

## 34

### *Ra Anumzamo'a Zedekaiangu koro ke hunte'nea naneke*

<sup>1</sup> Hagi Babiloni kini ne' Nebukatnesa'ene sondia vahe'ane, maka agrama kegavama hu'nea mopafi vahe'mo'zane, maka vahe'mo'zanena e'za Jerusalemi kuma'ene, tva'onte'ma megagi'nea kumataminena hara eme huzamante'naze. Ana'ma nehaza knafi Ra Anumzamo'a ama nanekea Jeremaiana asami'ne. <sup>2</sup> Ra Anumzana Israeli vahe Anumzamo'a amanage hie hunka Juda kini ne' Zedekaiana ome asamio. Kagra antahio! Ama rankumara Babiloni kini ne'mofo azampi erinta'nena teve taginte'nigeno tegahie. <sup>3</sup> Hagi kagra Zedekaiaga agri azampintira atrenka ofregahane. Na'ankure kagrira kazeriza Babiloni kini nete vanagenka kavufinti ana kini nera ome negenka, agrane keaga hugantugama hugaha'e. Anantetira kavre'za Babiloni kumate vugahaze. <sup>4</sup> Hianagi kagra Juda kini ne' Zedekaiaga antahio! Nagra Ra Anumzamo'na huvempa huanki'za, hapintira kagrira kahe ofrigahaze. <sup>5</sup> Hianagi kagra knare hunka mani'nenka krimpa frune frigahane. Ana hananke'za kagehe'zama ko'ma kinima mani'neza frizage'za, mananentake zantamima kre manama nevu'za ra zamagima zami'nazaza hu'za, kagrama frisanke'za vahe'mo'za ana nehu'za, zavira nete'za amanage hugahaze. Kva ne'timofonkura tasunku hune hu'za hugahaze. Na'ankure Nagra Ra Anumzamo'na ama ana nanekea huvempa nehue huno hu'ne. <sup>6</sup> Anagema hutegen'o a kasnampa ne' Jeremaia'a vuno, Juda kini ne' Zedekai'a Jerusalemi mani'negeno ana miko nanekea ome asami'ne. <sup>7</sup> Hagi e'i ana knafina Babiloni kini ne'mofo sondia

vahe'mo'za e'za, Jerusalemi kuma'ene Lakisi kuma'enena Azeka kuma'ene hara eme huzamante'naze. Hagi kora e'i ana 3'a kumara Juda mopafina hankavenentake vihu kegina me'nege'za hara hu'za e'ori'naza kumatami hara eme huzmante'naze.

*Kazokazo eri'za vahe'ma zamatresage'za fruma hu'za manisaza zamofo nanake*

<sup>8</sup> Hagi Kini ne' Zedekaia'a kazokazo eri'za vahe'ma zamatresage'za fruma hu'za manisaza zamofo nanekema maka Jerusalemi vahe'enema huvempama hutegeno, henka Ra Anumzamo'a Jeremaiana ama nanekea asami'ne. <sup>9</sup> Hagi Zedekaia'a huno, mika Hibru vene a'enema kazokazo eri'zama e'neriza vahera, zamatrenke'za fru hu'za maniho. E'na hina magore huno Hibru vahe'mo'a, otino Hibru vahera kazokazo eri'za vahera zamavare ontegahaze. <sup>10</sup> Hagi ana nanekema huhagerafino huvempama hia kerera maka eri'za vahe'mo'zane, maka vahe'mo'zanena mago zamarimpa nehu'za, mago'anena kazokazo eri'za vahera ozamavare-gahune nehu'za kazokazo eri'za vene'nene a'enena zamatrage'za fru hu'za vu'naze. <sup>11</sup> Hianagi henka mago'a knama evutege'za, antahintahi zamia rukrahe hige'za zamatrage'za fruma hu'za vu'naza kazokazo eri'za a'ene venenea ete zamavare'za, kazokazo eri'zana zami'naze. <sup>12</sup> Ana hazageno Ra Anumzamo'a Jeremaiana asamino, <sup>13</sup> Nagra Ra Anumzana Israeli vahe Anumzamo'na, tamagehe'za Isipi mopafima kazokazo eri'zama e'neri'za mani'nage'na zamavare atirami'nama ne-e'na amanage hu'na huhagerafi huvempa kea huzmante'nana amanage hu'noe, <sup>14</sup> nehamprinkeno 7nima hutere hania kafurera tamagra Hibru vahe'mota, Hibru vahe'ma zagoreti'ma mizama sesage'za, kazokazo eri'zama erisaza vahera 6si'a kfuma eri'zama eritesageta 7nima hania kafufina zamatrenke'za fru hu'za maniho hu'na hu'noanagi, ana nanekea tamagehe'za zamagesa ante'za nentahiza amagera onte'naze. <sup>15</sup> Hagi osi'a knama evia knafina tamagra, Nagri nagima me'nesige'za mono'ma hunantegahaze hu'noa mono nompi vuta, tamagu'a rukrahe nehuta, Nagri navurera knare avu'ava'za huta huvempa hufa tamagra'a vahepinti'ma kazokazo eri'za vahe'ma zamavare'nazana zamatrage'za fru hu'za vu'naze. <sup>16</sup> Hianagi tamagra rukrahe huta menina Nagri nagia eri haviza huta, kazokazo eri'za vene a'enena zamatrage'za fruma hu'za zamagra zamavesite'ma vu'naza eri'za vahera ete zamavareta kazokazo eri'zana zamige'za erinezamantaze. <sup>17</sup> E'na hu'negu Ra Anumzamo'a huno, tamagra Nagri nanekea amagera anteta tamagra'a vahepinti'ma zamavrage'za kazokazo eri'zama e'neriza vahera zamatrage'za fru hu'za ovu'naze. E'na hu'negu antahilo! Nagra hanuge'za ha' vahe'mo'za bainati kazinteti mago'a tamahe nefrisageta, mago'a krimo tamahe nefrina, mago'a ne'zanku huta frigahaze. Ana hu'na tamagri'ma tamazeri havizama hanua zamofo agenkema ama mopafi vahe'mo'zama nentahi'suza, tusi zamagogogogu hugahaze. <sup>18</sup> Hagi tamagra ana huvempa nanekema Nagri navure'ma huhagerafi'nazana, e'i ana'ma huvempama haza nanekema eri hankavetinaku'ma, agaho bulimakaoma ahete'za amu'nompinti rutane kanti kamama huntene'za, amunompi vazankna hu'naze. Hianagi maka'mota ana'ma huvempama hu'haza nanekea amagera onte'naze. Ana hu'nazagu tamagrira bulimakao afu'ma aheteta amu'nompinti'ma rutane atrazankna hugahue. <sup>19</sup> Hagi Juda kva vahe'ene, Jerusalemi kva vahe'ene, kini ne'mofo nompi eri'za vahe'ene, pristi vahe'ene, ana mopafi mika vahemo'zanena huvempama hu'naza ke'zamia amagera onte'nazanki'za, anazanke hu'za bulimakao

afu'ma rutane kantigama hunte'naza amu'nompi vugahaze. <sup>20</sup> Nagra ha' vahe'zamimofo zamazampi zamavare anta'nena zamahe frigahaze. Ana hanage'za fri zamavufaga anamifima hare'za vanoma nehaza namamo'za nenesage'za, afi zagagafamo'zanena negahaze. <sup>21</sup> Hagi Nagra Juda kini ne' Zedekaiane eri'za vahe'anena, zamahe frinaku'ma nehaza ha' vahe zamazampi zamavare antegahue. E'i ana ha' vhahera Babiloni kini ne'mofo sondia vaheki'za menina ko tamagrira tamatre'za vu'naze. <sup>22</sup> Hagi antahiho! Nagra ha'nena ete Jerusalemi kumate e'za ha' eme huramante'za ama ana kumara eri'za teve tagintegahaze. Hagi Juda mopafima me'nea kumatamina ana maka eri haviza ha'nena anampina magore hu'za vhahera omanitfa hugahaze huno Ra Anumzamo'a hu'ne.

## 35

### *Rekapu naga nofi'mofo naneke*

<sup>1</sup> Hagi Josaia nemofo Jehoiakimi'ma Juda vahe kinima mani'nea knafina Ra Anumzamo'a Jeremaiana amanage huno asami'ne, <sup>2</sup> Kagra Rekapu naga'ene vunka ome keaga hutenga, zamavarenka ege'za Ra Anumzamofo nonte etesagenka, zamavarenka mago hunaragintepinka umareriteta, anampinka waini tina ome zamige'za neho. <sup>3</sup> Hagi anagema huno Ra Anumzamo'a nasamitege'na, nagra vu'na Habazinia negeho ne' Jeremaia nemofo Jazaniane, ana maka ne' mofavre naga'ane afu'aganahe'inema nezamavare'na, maka Rekapu naga'enena, <sup>4</sup> zamavarena Ra Anumzamofo mono nonte'ma ete'na, Anumzamofo eri'za ne' Igdalia negeho ne' Hanani ne' mofavre naga'ma nemaniafinka zamavare'na ufre'noe. Hagi ana'ma hunaraginte naza nomo'a, hunaraginte'nage'za mago'a eri'za vahe'ma nemania nomofo tavaonte me'nea nompi zamavare'na ufre'noe. Hagi ana'ma hunaraginte naza nomo'a, mono no kafante kva nehia ne' Salumu nemofo Masseia'ma nemania nomofo anaga kazigama me'nea nompinka zamavare'na vu'noe. <sup>5</sup> Hagi anante waini timo'ma avi'mate'nea tintafentamine kapuraminena eri'na e'na, Rekapu naga'mokizmi zamavuga eme nente'na, waini tina erita neho hu'na hu'noe. <sup>6</sup> Hianagi zamagra amanage hu'za kenona hunante'naze. Tagra waini tina onegahune, na'ankure tagri nerafa Rekapu nemofo Jonadabu'a tasamino, tamagra waini tina nonenke'za tamagrip-inti'ma forehu anante nante'ma hu'za vanaza mofavre naga'mo'zanena onetfa hiho huno tasami'ne. <sup>7</sup> Anage nehunu tamagra nona nonkita, hoza erita nonteta, waini hozanena erita ontetfa hiho. Hianagi tamagra kraka vahe'ma manitama vanoma hanaza mopafina, maka kna tamagra seli nompima manita vanoma hanuta za'zate manigahaze huno tasami'ne. <sup>8</sup> E'ina hu'negu nerafa ne' Rekapu nemofo Jonadabu'a huranteno, tamagrade a'nane nagatamine, ne'mofavretamine mofa'ne naga tamimo'zanena waini tina onetfa hiho huno higeta, ana naneke amage anteta neonkeno eno ama knarera ehanati'ne. <sup>9</sup> Ana nehuta nona kita nomanita, waini hoza nonteta hozanena erita avimzana nohankrone. <sup>10</sup> Hianagi tagra seli nompi nemanta, nerageho ne' Jonadabu'ma amage antehoma huno hu'nea nanekea maka amage ante'none. <sup>11</sup> Hianagi Babiloni kini ne' Nebukatnesama eno ha'ma eme hunerantegeta, tagra Kaldia sondia vaheku'ene Siria sondia vaheku koro nehuta amanage hu'none. Enketa Jerusalemi kumate vanune nehuta, e'nonku menina Jerusalemi kumate mani'none. <sup>12</sup> Hagi anagema hutazageno anante Ra Anumzamo'a amanage huno Jeremaiana asami'ne, <sup>13</sup> Monafi sondia vahe'mofo Ra Anumzana Israeli vahe Anumzamo'a huno,

kagra vunka Juda vahe'ene Jerusalemi kumapima nemaniza vahe'enena ome zamasamio. Tamavumro'ma antenaku'ma nehua kene, Nagri naneke-nena antahita amagera ontogahazafi? <sup>14</sup> Hagi Rekapu nemofo Jonad-abu'a mofavre naga'a zamasamino, waini tina oneho huno huzamanteg'e za one'za neageno eno ama knarer aghanati'ne. Na'ankure nezamafa'ma hia naneke amage ante'naze. Hianagi Nagra rama'a zupa tamagrira tamasami vava hu'na e'noanagi, tamagra Nagri nanekea antahita amagera onte'naze. <sup>15</sup> Hagi Nagra Ra Anumzamo'na eri'za vaheni'a kasnampa vahera rama'a zupa huzmantoge'za evava nehu'za, amanage hu'za eme tamasami'naze. Maka'mota havi avu'ava zama nehaza zana atreta tamagu'a rukrahe huta fatgo avu'avaza hiho. Ana nehuta havi anumzantaminte'ma mono'ma hunezamanteta, zamage'ma nentaza zana atreho. E'ina'ma hanuta tam-agehe'ine tamagri'enema tam'i'noa mopafina knare huta manigahaze hu'za eme tamasami'naze. Hianagi ana nanekea tamagesa anteta nentahita amagera onte'naze. <sup>16</sup> Hagi Rekapu nemofo Jonadabu mofavre naga'mo'za nezmageho'ma hu'nea nanekea antah'i'za amage ante'naze. Hianagi tamagra Nagri nanekea antahita amagera onte'naze. <sup>17</sup> E'ina hu'negu Hankaven-entake Ra Anumzana Israeli vahe Anumzamo'a amanage nehie. Nagra Juda vahe'ene Jerusalemi kumapima nemaniza vahe'enena, knaza zami'na zamazeri haviza hugahuema hu'na hu'noa knazanteti zamazeri haviza hugahue. Na'ankure Nagra keaga zamasmuhanagi Nagri nanekea antah'i'za amagera nontazage'na, zamagrikura kezati'noanagi ana kerera kenona osu'nazagu anara hugahue. <sup>18</sup> Hagi anante Jeremaia'a Rekapu nagara zamasamino, hankavenentake Ra Anumzana Israeli vahe Anumzamo'a huno, Na'ankure tamagra neramafa Jonadabu'ma huramante'nea nanekene tra ke'anena maka amage nenteta, nazano hihoma huno huramante'nea zanena maka amage ante vagare'naze. <sup>19</sup> E'ina hu'nagu Monafi sondia vahe'mofo Ra Anumzana Israeli vahe Anumzamo'a huno, Rekapu nemofo Jonadabu nagapintira mago'mo otino Nagri eri'zana erino nevanige'za, zamagripinti'ma henkama forehu anante nante'ma hanaza vahepintira otitere hu'za ana eri'zana erivava hu'za vugahaze.

## 36

### *Jeremaia'ma kre'nea avontafe'ma ra mono nompi hampri'naza naneke*

<sup>1</sup> Hagi Josaia nemofo Jehoiakimi'ma Juda vahe kinima manino egeno nampa 4ma hia kafufina, Ra Anumzamo'a amanage huno Jeremaiana asami'ne. <sup>2</sup> Kagra mago avontafe eritenka, Israeli vahete'ene Juda vahete'enena maka kumatamimpima fore'ma hania knazanku'ma kasami'noa nanekea ana maka avontafepi krento. Hagi ana nanekema krentesanana, Josaia'ma kinima mani'nea knafima agafama hu'na nanekema kasami'noregati krenteme enka ama knare ehanatio. <sup>3</sup> Hagi maka Juda vahe'mo'za zamazeri haviza hunaku'ma antahintahima nehua zamofo nanekema antahizaresina, kefo avu'ava zazmia atre'za zamagu'a rukrahe hazage'na, kumi zamia atre zmantoresine. <sup>4</sup> Hagi anante Jeremaia'a Neria nemofo Barukuna ke higeno egeno, mika nanekema Ra Anumzamo'ma asami'nea nanekea nesamigeno, Baruku'a mago avontafepi miko krent'e'ne. <sup>5</sup> Hagi ana hutegeno anante Jeremaia'a Barukuna amanage huno asami'ne, Nagra amafi kina hu'na mani'noanki'na Ra Anumzamofo mono non-tega ovugahue. <sup>6</sup> E'ina hu'negu Ra Anumzamofo nanekema kasamu-genka avontafepima krentana nanekea, ne'zama a'o hu'za nemaniza kna

zupa Ra Anumzamofo mono nompi erinka vunka, ome hamprige'za maka mono nompima mani'nesaza Juda vahe'mo'za antahi vagareho. Ana nehuge'za Juda mopafima me'nea ranra kumatamimpinti'ma esaza vahe'mo'zanena antahigahaze. <sup>7</sup> Hagi zamagra kefo avu'ava'ma nehaza zama atre'za makamo'za zamagu'a rukrahe nehu'za, nunamuma hanageno'a Ra Anumzamo'ma asunku'ma huzmantesiana knare hugahie. Na'ankure Ra Anumzamo'a vahe'agura huno, tusi narimpa ahenezamante'na zamazeri haviza hugahue huno huama hu'ne. <sup>8</sup> Hagi anante Neria nemofo Baruku'a, kasnampa ne' Jeremaia'ma asami'nea nanekea, Ra Anumzamofo mono nompi ana maka nanekea ome hampri'ne. <sup>9</sup> Hagi Juda kini ne' Josaia nemofo Jehoakim'i'ma kinima mani'negeno vuno 5fuma hia kafumofona 9ni ikantera, Jerusalemi kumapi vahe'mo'zane maka Juda mopafima me'nea kuma tamimpima nemaniza vhemo'zanena Jerusalemi kumate e'za, ne'zana a'o hu'za manine'za Anumzamofo mono huntenuku hu'naze. <sup>10</sup> Hagi avontafepima maka'zama krenentea ne' Safani nemofo Gemaria'ma Ra Anumzamofo mono nompima nemanifi, maka vahe'mo'za nentahizageno Baruku'a Jeremaia'ma hu'nea nanekea avontafepinti hampri'ne. Hagi hunaragine'nageno Gemaria'ma nemania nomo'a Ra Anumzamofo mono nomofo anaga kazigama me'nea kumapima, Ra mono nompima ufre kafanku'ma, Kasefa Kafanema nehaza kafama me'nea tva'onté me'ne.

<sup>11</sup> Hagi Ra Anumzamofo nanekema Baruku'ma avontafepinti'ma hampriana Safani negeho Gemaria ne'mofo Mikai'a ana maka nanekea antahi vagare'ne. <sup>12</sup> Ana'ma huteno'a agra kini ne'mofo nonte uramino, avoma kreno erinte fatgoma nehia ne'mofo nonte'ma viana, ana maka kini ne'mofo eri'za vahetami mani'nazageno vu'ne. Ana vahetamina avonkreno erinte fatgo nehia ne' Elisamaki, Semaia nemofo Delaiaki, Akbori nemofo El-nataniki, Safani nemofo Gemariaki, Hanania nemofo Zedekaia e'ne maka eri'za vahe'amo'za mani'nageno ome zamage'ne. <sup>13</sup> Anante Baruku'ma avontafepinti'ma hamprige'za maka vahe'mo'zama antahi'naza nanekea, Mikai'a ana nanekea ome zamasami vagare'ne. <sup>14</sup> Ana'ma hutege'za maka kini ne'mofo eri'za vahe'mo'za oti'za, Kusi nagapinti ne' Selemaia negeho Netania nemofo Jehudi hunte'za, Barukuna amanage hunka ome asamio, e'ima hamprige'zama veamo'zama antahiza avontafera erino eno hu'za huntazageno vuno ome asamigeno, Neria nemofo Baruku'a ana avontafera erino zamagritega e'ne. <sup>15</sup> Hagi ana vahe'mo'za Barukuna asami'za, muse hugantonanki amare mani'nenka ana avona hamprio, hu'za hazageno Baruku'a ana avona hamprige'za antahi'naze. <sup>16</sup> Hagi Baruku'ma ana maka nanekema hamprige'za antahi vagama rete'za, zamanogu hu'za ovufi avufi nehu'za, Barukuna amanage hu'za asami'naze. Tamagerfa huta maka ama nanekea vuta kini ne' ome asamighahune. <sup>17</sup> Hagi anante Barukuna antahige'za, muse hugantonanki inankna hunka ama avona kre'nampi tasamio? Jeremaia'a agra'a agipinti nehigenka maka ama avona kre'nampi? <sup>18</sup> Anage hazageno Baruku'a kenona huno, Izo agra agipinti nehige'na avo zota eri'na ana maka nanekea ama avontafepina krente'noe. <sup>19</sup> Anante maka kini ne'mofo eri'za vahe'mo'za Barukuna asamiza, vahe'mo'za onkesarega kagrane Jeremaia'enena vuta ome fraki'o.

### *Jeremaia avontafe'ma kini ne'mo tevefi kre'nea naneke*

<sup>20</sup> Hagi anagema hute'za ana avontafera eri'za kini ne'mo'ma nemania kumapi vu'za, avoma kreno eri fatgoma nehia ne' Elisama nompi ome

antete'za, vu'za ana maka nanekea kini ne' ome asamizageno antahi'ne. <sup>21</sup> Hagi ana avontafe ome erinka eno huno kini ne'mo'a Jehudina huntogeno vuno, avoma kreno erinte fatgoma nehia ne' Elisama nompinti ome erino eno, kiri ne'ma mani'nere agri eri'za vahe'amozanena ot'inazageno ana avona eme hamprige'za antahi'naze. <sup>22</sup> Hagi ama ana zama fore hu'neana, 9ni ikana zasi nehia knagino kini ne'mo'a zasi'ma nehigeno nemania nOMPI, teve hugre'za nemaniza zama kapareti'ma tro'ma hunte'nafi tevea hugreno tonehino mani'ne. <sup>23</sup> Hagi Jehudi'a ana avoma osi'a hamprino 3'o 4'a isama nevigeno'a, kini ne'mo'a osi kazinteti anama'a ahesagane huno teve hugre'zama nemaniza zama tro'ma huntenufi kretere hu'ne. Ana huno nevigeno ana avontafera tevemo teno eri fanane hu'ne. <sup>24</sup> Hagi kini ne'mo'ene maka eri'za vahe'amo'za magore hu'za ana nanekema nentahi'za korora nehu'za, kukenazamia tagatora osu'naze. <sup>25</sup> Hagi Elnatani'ma Delaia'ma Gemariaki hu'za kini nekura ana avontafera tevefina onkro hu'za asami'nazanagi, zamagri nanekea ontahi'ne. <sup>26</sup> Ana'ma huteno kini ne'mo'a nemofo Jeramilinki, Azrieli nemofo Seraianki, Abdili nemofo Selemianki huno hunezmanteno, avoma kreno erinte fatgoma nehia ne' Barukune, kas-nampa ne' Jeremaia kiznia vuta ome zanazerita eho huno huzamanteg'e za vu'naze. Hianagi Ra Anumzamo'a ana netrena zanazeri fraki'ne.

### *Jeremaia'ma ete ru'ene anahu kna avontafe'ma kre'nea naneke*

<sup>27</sup> Hagi Jeremaia'ma nehigeno Baruku'ma kre'nea avontafe'ma kini ne'mo'ma tevefima kretegeno'a, anante Ra Anumzamo'a Jeremaiana amanage huno asami'ne, <sup>28</sup> kagra mago avontafe erinka, ko'ma krente'nankeno kini ne' Johoiakimima tevefima kre'nea nanekea ana avontafepi ana maka nanekea ete krento. <sup>29</sup> Ana nehunka kini ne' Jehoiakiminkura amanage hugahane. Ra Anumzamo'a huno, kagra avontafera tevefi negrenka amanage hu'nane. Nahigeno Jeremaia'a avontafepina kreno, Babiloni kini nemo'a eno ama kumara eri haviza nehuno vahe'ene, zaga-gafanena zamaheno erihana hugahie huno hu'ne? <sup>30</sup> E'na hu'negu Ra Anumzamo'a Juda kini ne' Jehoiakiminkura amanage hu'ne. Agri nagapintira magore huno henka'a agri nona erino Deviti kini tratera kinia omanitfa hugahie. Hagi fri'nige'za avufga'a fegi eritre'nesageno, masarera zagemo renentesigeno, kenagera aisi komo runtegahie. <sup>31</sup> Hagi zamagrama hu'naza kumitera, Nagra nona huzamante'na agri'ene mofavre naga'aner'i'za vahe'anena zamazeri haviza hugahue. Ana nehu'na zamagrite'ene Jerusalemi kumapi vahete'ene, Juda vahete'enena hazenke'za atresugenogea hie hu'na hu'noanagi ana nanekea ontahi'naze huno Anumzamo'a hu'ne. <sup>32</sup> Hagi anante Jeremaia'a ru'ene mago avontafe erino avoma kreno erinte fatgoma nehia ne' Neria nemofo Barukuna nemino higeno, koma kre'nea avoma Juda kini ne' Jehoiakimi'ma tevefima kre'nea nanekeramina, ete Jeremaia'a nehigeno avontafepi krente'ne. Ana nehuno mago'ene ana agofetura rama'a anahukna nanekenena nehigeno krente'ne.

## 37

### *Feronkura amuhara osiho huno Jeremaia'ma hu'nea naneke*

<sup>1</sup> Hagi Babiloni kini ne' Nebukatnesa'a, Jehoiakimi nemofo Jehoiakinina mago agi'a Koniakino agri no erino Juda vahe kini manisiegu huno, Josaia nemofo Zedekaiana kinia azeri ot'i'ne. <sup>2</sup> Hagi Zedekaia'ene eri'za vahe'amo'zane ana maka vahemeo'zanena Ra Anumzamo'ma asamigeno

kasnampa ne' Jeremaia'ma hia nanekea ontahitfa hu'naze. <sup>3</sup> Hagi kini ne' Zedeka'a mago zupa Selemia nemofo Jehukaline Ma'aseia nemofo pristi ne' Zefanianena huznanteno, kasnampa ne' Jeremaiana amanage huta ome asami'o. Muse hugantoanki Ra Anumzana tagri Anumzamofontega nunamu hugeno taza hino huta ome asami'o. <sup>4</sup> Hagi Jeremaia'a fru huno mani'neno agra avesite vahepina vuno eno nehuno mani'nene. Na'ankure agrira ana knafina kina huonte'nageno anara hu'nene. <sup>5</sup> Hagi ana knafinena Fero sondia vahe'mo'zama Isipima atre'za karankama neazema nehaza nanekema, Jerusalemi kuma'ma eme avazagi kagi'zama mani'naza Kaldia vahe'mo'zama nentahiza, Jerusalemi kumara atre'za vu'naze. <sup>6</sup> Anante Ra Anumzamo'a kasnampa ne' Jeremaiana asamino, <sup>7</sup> Ra Anumzana Israeli vahe Anumzamo'a amanage hie hunka, Juda kini ne'mo'ma Nagri navesi'zama keno eri fore hunaku'ma huzmante'sanige'zama esaza vhahera amanage hunka zamasamio. Antahiho! Fero sondia vahe'mo'zama tamaza hunaku'ma aza vahe'mo'za ete rukrahe hu'za mopa zamirega Isipi vunaku nehaze. <sup>8</sup> Ana'ma hanage'za Babiloni sondia vahe'mo'za ete rukrahe hu'za e'za ama Jerusalemi rankumara hara eme hugatenere'za teve tagintesageno tegahie. <sup>9</sup> Hagi Ra Anumzamo'a mago'ene huno, Tamagra'a amanage huta tamare ramataga osiho. Tamagerfa hu'za Babiloni vahe'mo'za hago tatre'za vaze huta tamagesa ontahio. Na'ankura zamagra ovu'za ete rukrahe hu'za eghahaze. <sup>10</sup> Hagi Babiloni sondia vhahera tamagra maka zamahe vaganereta, mago'a zamahe kuzafa'ma hanaza sondia vahe'mo'zage seli nozamifina manigahaze. Hianagi anama zamahe kuzafa'ma hanaza sondia naga'mo'za otivare'za e'za ama rankumara teve eme tagintesageno tegahie.

### *Jeremaiana azer'za kinama hunte'naza nanekema*

<sup>11</sup> Hagi Fero sondia vahe'mo'zama neazema haza nanekema Babiloni sondia vahe'mo'za nentah'i'za, Jerusalemi kumama eme avazagi kagi'za mani'naretira atre'za vu'naze. <sup>12</sup> Ana knafina Jeremaia'a Jerusalemi rankumara atreno, Benzameni nagamofo mopafi vuno, naga'afinti mopa'a ome erinaku vu'nene. <sup>13</sup> Hagi rankumamofona Benzameni kafanema nehaza kafante'ma egeno'a, sondia vhahete kva ne' Hanania negeho, Selemia nemo-fokino agi'a Irija'e. Ana hu'neankino ana ne'mo'a eno kasnampa ne' Jeremaiana eme azenerino amanage hu'nene. Kagra koro frenka vunka Babiloni vahe'ene umaninaku vu'za nehane. <sup>14</sup> Hagi anagema higeno'a Jeremaia'a huno, i'o kagra havige nehane. Nagra korora fre'na Babiloni vahe'ma mani'nazarega novue. Hianagi Irija'a anankea nontahino Jere-maiana avreno kini nemofo eri'za vhahete vu'nene. <sup>15</sup> Hagi ana'ma hutege'za kva vahe'mo'za Jeremaiana tusi zamarimpa ahenente'za sefura amite'za avre'za vu'za, avoma kreno erinte fatgoma nehia ne' Jonatani nompi ome kina hunte'naze. Na'ankure Jonatani nona kina no erise'naze. <sup>16</sup> Hagi ana kina nona mopafi kafi'za uram'i'naza kina nonkino, Jeremaia'a anampina za'za kna umani'nene. <sup>17</sup> Hagi henka kini ne' Jedekaia'a vahe huzmanteg'e'za Jeremaiana ome avre'za azageno, noma'afi oku'a amanage huno antahige'ne. Ra Anumzamo'a mago'a nanekea kasami'nefi? higeno Jere-maia'a huno, i'zo me'ne nehuno amanage hu'nene. Kagrrira Babiloni kini ne'mofo azampi kavrentegahaze. <sup>18</sup> Hagi anage nehuno Jeremaia'a kini ne' Jedekaiana asamino, nagra na'a mago hazenkea kagrite'ene, kagri eri'za vhahete'ene, ama vhahete'enena hu'nogenka, kinafina navrente'nane? <sup>19</sup> Hagi Babiloni vahe'mo'za e'za kagri'ene amama mani'nana mopafi vahe'enena hara eme huoramantegahaze hu'zama, kasnampa kema nehaza kema

antahi'nana kasnampa vaheka'a iga mani'naze? <sup>20</sup> Hagi menina muse hugantoanki, naza huogu kini nera ranimoka kantahi negoanki antahi nenaminka, natrege'na avoma kreno erinte fatgoma nehia ne' Jonatani nompina ova'neno. Ana'ma hananke'na anampima umanine'na fri'zankura navesra nehie. <sup>21</sup> Anagema hutegenoa' kini ne' Jedekaia'a hige'za Jeremaiana avre'za vu'za, kini ne'mofo kumapima sondia vahe'ma nemanifi ome kina huntageno mani'nege'za, bretima negraza vaheteti mago mago knarera bretia eri'za ome amitere hazageno neneno mani'ne. Ana nehazageno vuno rankumapima me'nea bretimo'a maka vagare'ne. Hianagi Jeremaia'a sondia vahe'ma nemanizafi kina huno mani'ne.

## 38

### *Jeremaiama tinkerifi avre vaz'i'naza naneke*

<sup>1</sup> Hagi Matani nemofo Sifatiaki, Pasuri nemofo Gadaliaki, Selemaia nemofo Jukaliki, Malkia nemofo Pasuriki hu'za mani'ne'za nentahizageno Jeremaia'a maka vahera amanage huno zamasami'ne, <sup>2</sup> Ra Anumzamo'a huno, iza'o ama rankuma'mofo agu'afima manisia vahera hapinti ahe frige, ne'zanku huno frige, krimo ahe frige hugahie. Hianagi iza'o Kaldia vahe zamazampima freno vania vahe'mo'a ofri manigahie. Anama ofri manisaza vahera hapinti fenozama rohure'za erizankna hu'za, ozamahe zamatresage'za manigahaze. <sup>3</sup> Hagi Ra Anumzamo'a huno, Ama Jerusalemi rankumara Babiloni kini ne'mofo sondia vahe zamazampi erintesuge'za hahugatere'za erigahaze hu'ne. <sup>4</sup> Hagi Jeremaia'a anagema hige'za anante kini ne'mofo eri'za vahe'mo'za kini nera asami'za, ama nera ahe frigahune. Na'ankure amanahu nanekema nehia zamo'a, ama rankumapima nemaniza sondia vahe'ene maka vahemo'zanema koro'ma hanaza naneke nehie. Na'ankure agra ama vahe'mokizmi knare zankura keaga nosianki, hazenkema erisaza nanekege nehie. <sup>5</sup> Hagi anante kini ne' Zedekaia'a huno, antahiho! Agra menina tamagri tamazampi mani'neanki'na, nagra kini ne'mo'na mago zana osugahue. <sup>6</sup> Hagi anagema hige'za Jeremaiana avre'za kini ne'mofo nemofo Malkiza tinkerifi ome atrageno urami'ne. Anama ome atre'naza tinkerimo'a sondia vahe'ma nemaniza kumapi me'ne. Ana hu'negeno ana kerifina tina omanegeno hapamoke me'nefi Jeremaiana nofi rentene'za atrazageno anampi uramino hampakane'ne. <sup>7</sup> Hagi mago nera Ebet-Melekikino kini ne'mofo nompi eri'za e'neria nere. Agra Itiopia mopafinti neokino, kini ne'mofo nompi mani'neno, Jeremaiama avre'za tinkerifima ome atre'naza nanekea antahi'ne. Hagi ana zupa kini ne'mo'a rankumamofona Benzameni kafanema nehaza rankafante mani'ne. <sup>8</sup> Hagi Ebet-Meleki'a kini ne'mofo nompima mani'neretira atreno vuno, kini nera amanage huno ome asami'ne. <sup>9</sup> Kini nera ranimoka, ama vahe'mo'za havi avu'avaza hu'za, kasnampa ne' Jeremaiana avre'za vu'za tinkerifina ome atre'nazankino, anampi manineno agazanku huno frigahie. Na'ankure magore huno rankumapina ne'zana omanetfa hu'ne. <sup>10</sup> Anagema higenoa' kini ne'mo'a Ebet-Melekina amanage huno huntene, Ru frisnigi vunka 30'a vahe ome zamavarenka ana kerifintira kasnampa ne' Jeremaiana ome avre atreho. <sup>11</sup> Anage higenoa' Ebet-Meleki'a ana vahera ome zamavarege'za kini ne'mofo nompi vu'za, feno zama nentaza nomofo fenka kazigama me'nea nompima, tagato tagatu'ma hu'nea kukenane atafa kukenama nentazafinti ana kukena ome eriteno vuno nofi ome anakiteno atregeno Jeremaiama'ka kerifima mani'nere urami'ne. <sup>12</sup> Hagi ana Itiopia ne' Ebet-Meleki'a

Jeremaiana amanage huno asami'ne, Ana tavarave nofi erinka tarega kazo'namofo fenka kaziga atregeno rugagino, ana hutenga nofimo'ma katama kami'zankuranofira erinka kavuga ana tavravemofo amu'nomp'i anakio. Higeno anama asamia zana amage anteno Jeremaia'a hu'ne.<sup>13</sup> Ana hute'za ana nofite Jeremaiana ana kerifintira avazuhu anagate'naze. Ana hutazageno kini ne'mofo kumapima sondia vahe'ma nemanizafi mani'ne.

### *Zedekaia'ma Jeremaiama agenoka hu'nea naneke*

<sup>14</sup> Hagi mago zupa kini ne' Zedekaia'a vahe huzmantenge'za vu'za Jeremaiana ome asamizageno Ra Anumzamofo mono nomofona nampa 3 kafama unefrazare mani'negeno eme ke'ne. Higeno kini nemo'a amanage huno Jeremaiana asami'ne. Nagra mago zanku kantahige'za nehuanki magore hunka nagritera eri frara okio.<sup>15</sup> Anage higeno Jeremaia'a amanage huno Zedekaiana asami'ne. Nagrama kekare'ma nonama hu'na kasami'nuana nigrira tamagerfa hunka nahe frigahane. Hagi nagrama knare antahintahima kamisuana, ana nanekeni'a ontahigahane.<sup>16</sup> Hianagi kini ne' Zedekaia'a oku'a zanagrake mani'neke Jeremaiana amanage huno huvempa hunte'ne. Ra Anumzana kasefa huno mani'nea Anumzama, tasimu'ma tamigeta mani'nona Anumzamofo avufi huvempa huanki'na kagrira kahe ofrigahue. Ana nehu'na kahe frinaku'ma nehaza vahe zamazampina kavre ontegahue.<sup>17</sup> Anante Jeremaia'a amanage huno Zedekaiana asami'ne. Ra Anumzana Monafi sondia vahe'mofo Anumzana Israeli vahe Anumzamo'a huno, ha'ma osu kagrama atrenka Babiloni kini ne'mofo eri'za vahe zamazampima ufresunka, kagra knare hunka manigahane. Ana'ma hananke'za ama Jerusalemi rankumara tevea tagi ontegahaze. Ana hanagenka kagranne nagaka'anena knare huta manigahaze.<sup>18</sup> Hianagi kagrama atrenka Babiloni kini ne'mofo eri'za vahe zamazampima uofresanke'na, Nagra Kaldia vahe zamazampi ama Jerusalemi rankumara erintesuge'za teve tagintesageno tegahie. Ana hanigenka kagra ana vahe zamazampintira zamatrewnka ofregahane.<sup>19</sup> Hagi kini ne' Zedekaia'a amanage huno Jeremaiana asami'ne. Koma Juda vahe'mo'zama atre'za Babiloni vahe'enema umani'naza vaheku koro nehue. Nagri'ma navre'za Babilonima vu'za Juda vahe zamazampi ome antesege'za, nazeri havizama huzanku korora nehue.<sup>20</sup> Higeno Jeremaia'a ana kenona huno, Kagrira kavre'za Juda vahe zamazampina ome ontegahaze. Hagi Ra Anumzamo'ma hige'nama kasamuua nanekea antahinka amage'anto. Ana'ma hananke'za kagrira kahe ofrisagenka knare hunka manigahane.<sup>21</sup> Hianagi kagrama kema ontahinka, kagraka'ama atrenka Babiloni vahe zamazampima uofresanana, Ra Anumzamo'a amanahu huno ava'nagna zana naveri hige'na ke'noe.<sup>22</sup> Juda kini ne'mofo nompima mani'naza maka a'nane nagara, ana maka zamavare'za vu'za Babiloni kini ne'mofo eri'za vahe ome zami'naze. Ana hazage'za ana a'nemo'za hu'za, kagrama antahima nezamina ronekamo'za kagrira hara hugagatenere'za regavatga hazagenka zamagri nanekea antahi'nane. Ana hankeno kagiamo'ma hapapima hampakaneg'eza, kagrira rukrahera hu'za onkage'naze.<sup>23</sup> Ana maka a'ne naga'kane mofavre naganena ana maka zamavare'za vu'za Kaldia vahe ome zamigahaze. Ana hanagenka kagra zamagri zamazampintira zamatrewnka ofregahane. Hianagi kagrira Babiloni kini ne'mo'a kaze'nerinige'za ama rankumara teve tagintesageno tegahie.<sup>24</sup> Hagi anante Zedekaia'a amanage huno Jeremaiana asami'ne. Amama hana nanekea atregeno mago vahe'mo'a ontahino. Vahe'ma zamasamisanana kagra frigahane.<sup>25</sup> Hagi kagranema keagama

hu'a nanekema nagri eri'za vahe'mo'zama antahisu'za, e'za kagri'ma eme kantahige'za, kagra na'ane hunka hankeno kini ne'mo'a na'ane hifi magore hunka ana nanekea eri frara okinka tasamio. Anama hananketa kagrira kahe ofrigahune hu'za hugahaze. <sup>26</sup> E'inahu nanekema hanagenka kagra amanage hunka zamasamio. Nagrama kini ne'ene keagama huana, nagra Jonatani nompima umanine'na fri'zanku ete natrege'na ana nompina ova'neno hu'na antahige'noe hunka zamasamio. <sup>27</sup> Hagi anante maka kini ne'mofo eri'za vahe'mo'za Jeremaia ante e'za eme antahigageno, kini nemo'ma asami'nea kante anteno agra kenona huzmante'ne. Hige'za Jeremaia'enena mago'ene keaga osu'naze. Na'ankure kini nemo'enema keagama hu'na'a nanekea mago vahe'mo'a ontahitfa hu'negu anara hu'naze. <sup>28</sup> Hagi Jeremaia'a sondia vahe'ma nemaniza kumapima kinama huno nemanifi anampinka mani'nege'za, ha' vahe'mo'za e'za Jerusalemi kumara hara eme hugatere'za eri'naze.

## 39

### *Jerusalemi kumamo'ma havizama hu'nea zamofo naneke*

<sup>1</sup> Hagi Juda kini ne' Zedekaia'ma kinima mani'negeno 9nima hia kafumofona 10ni ikante, Babiloni kini ne' Nebukatnesa'ene maka sondia vahe'amo'zane e'za, Jerusalemi kumara eme avazagi kagine'za Jerusalemi vahera hara huzmante'naku hu'naze. <sup>2</sup> Hagi Zedekaia'ma kinima mani'negeno 11nima hia kafufina 4 ikamofona 9ni zupa kuma keginafinti anafe hu'za Jerusalemi kumapina ufre'naze. <sup>3</sup> Hagi anante maka Babiloni kini ne'mofo eri'za vahe'mo'za rankumapi ufre'za, kuma keginamofona Amu'no Kafanema nehaza kafante eman'i'zane. Ana vahe zamagi'a, Negal-Sareseliki Samgal-Neboki Sarsekimiki Rabsarisiki kini ne'ma antahintahima nemia ne' Negal-Sareseli'ene ruga'a Babiloni kini ne'mofo eri'za vahemo'zanena ananteke eman'i'zane. <sup>4</sup> Hagi Juda kini ne' Zedekaia'ene maka sondia vahe'mo'za ana vahe'ma nezamage'za, zamagra kenage atre'za koro fre'za, kini ne'mofo hozama me'nea kantegama nevaza kantega vu'za, tare keginamofo amu'nompima me'nea kafanteti atirami'za fegi vu'naze. Ana'ma hute'za fre'za Araba kaziga Jodani agupoma me'nerega vu'naze. <sup>5</sup> Hianagi Babiloni sondia vahe'mo'za zamarotago hu'za vu'za, Zedekaiana Jeriko agupofi ome azeri'naze. Ana hute'za Zedekaiana avre'za Hamati mopafina Ribla kumate Babiloni kini ne' Nebukatnesa'ma mani'nere mareri'naze. Ana hazageno e'inahu knaza erigahie huno anante huama hu'ne. <sup>6</sup> Hagi ana Ribla kumate, Babiloni kini ne'mo'a Zedekaia ne' mofavre nagara, Zedekaia'a negegeno zamahe fri'ne. Ana nehuno Juda mopafi kva vahe'enena maka zamahe fri'ne. <sup>7</sup> Hagi ana'ma huteno'a Zedekaiana tarega avua reragati netreno Babiloni avreno vunaku bronsire seni nofiteti kina hunte'ne. <sup>8</sup> Hagi Babiloni vahe'mo'za kini ne'mofo none, vahe'mokizmi nonena teve tagintageno nerege'za, Jerusalemi kuma'mofo keginaramina rutapage tapagu hutre'naze. <sup>9</sup> Hagi Babiloni sondia vahete'ma ugotama hu'nea ne' Nebusaradani'a Jerusalemi rankumapima mago'ama mani'naza vahera kina ome huzmante'naku Babiloni zamavareno vu'ne. Ana nehuno ruga'a vahe'ene, ko'ma koro'ma fre'za agranema eman'i'zane vahe'enena zamavareno magoka vu'ne. <sup>10</sup> Hianagi ana sondia vahete kva ne' Nebusaradani'a zamunte omene vahe'ma mago'a zazimima omane'nea vahera Juda mopafi zamatreno nevuno, waini hozama ante mopanena nezamino vu'ne.

*Nebukatnesama hige'za kinafinti'ma Jeremaiama avre atre'naza naneke*

<sup>11</sup> Hagi Babiloni kini ne' Nebukatnesa'a, Jeremaia kazigagura amanage huno sondia vahete kva ne' Nebusaradanina hunte'ne. <sup>12</sup> Kagra vunka Jeremaiana ome avrenka kegavahu so'e nehunka mago hazenkea omio. Ana nehunka nazano huoma huno kasaminia zana amage antenka anazana huo. <sup>13</sup> Hagi anage nehuno sondia vahete ugota kva ne' Nebusaradaninki, kini ne'mofo eri'za vahete kva ne' Nabusasbaninki kini ne'ma antahaintahima nemia ne' Negal-Sareseline mago'a kva vahe'enena huzmantege'za vu'za, <sup>14</sup> mago'a vahe ome huzmantage'za Jeremai'a'ma sondia vahe kumapima kinama huno mani'nefinti ome avre'za e'naze. Ana hazage'za Jeremaiana avre'za Safani negeho ne' Ahikamu nemofo Gedalia azampi antazageno avreno noma'rega vu'ne. Ana higeno Jeremai'a agra'a vahe'ene magoka mani'ne.

<sup>15</sup> Hagi sondia vahe'ma nemaniza kumapima ko'ma Jeremai'a'ma kinama huno mani'negeno'a Ra Anumzamo'a amanage huno asami'ne. <sup>16</sup> Itiopia kumate ne' Ebetmelekina amanage hunka ome asamio. Monafi sondia vahe'mofo Ra Anumzana Israeli vahe'mofo Anumzamo'a huno, Ama kuma'ma eri haviza hugahuema hu'na hu'noa kante amage ante'na ame hu'na eri haviza hugahue. Ana nehu'na azeri knarer osugahue. Ana hanigenka ana zupa kagra kavufinti kegahane. <sup>17</sup> Hianagi Nagra Ra Anumzamo'na huanki'na, ana zupa kagu'yazi'na kavretregahue. Ana hanuge'za kagrama zamagoro'ma nehana vahe zamazampina kavreontegahaze. <sup>18</sup> Na'ankure kagra Nagrite'ma kamentintima nehana mizama'a kva hugantesuge'za hapintira kahe ofrigahaze, huno Ra Anumzamo'a hu'ne.

## 40

*Jeremaiama kinafinti katufentageno Juda mopafima mani'nea naneke*

<sup>1</sup> Hagi Jeremaiiane, maka Jerusalemi kumapi vahe'ene Juda mopafi vahe'enena Babiloni vahe'mo'za zamazeri'za seni nofiteti kina rezmantte'za zamavare'za Babiloni kina ome huzmante'naku vu'za, Rama kumate'ma uhanatizageno'a Babiloni sondia vahete ugota kva ne' Nebusaradani'a Jeremaiama kinama rente'naza seni nofira katufente'ne. Ana hutegeno henka Ra Anumzamo'a Jeremaiana nanekea asami'ne. <sup>2</sup> Hagi Babiloni sondia vahete ugota kva ne'mo'a Jeremaiana ke higeno egeno amanage huno asami'ne. Ra Anumzana kagri Anumzamo'a huama huno, ama kumatera ama hazenke zana fore hugahie huno hu'ne. <sup>3</sup> Ana hu'neankino Ra Anumzamo'a kema hu'nea kante amage anteno ana maka zana huvagare'ne. Na'ankure Ra Anumzamofo avurera tamagra kumi nehutma Agri nanekea antahita amagera onte'naze. Ana hu'nazagu huno ama ana knazantamimo'a tamagridera fore nehie. <sup>4</sup> Hu'negu menina ko! Kazante'ma kinama regante'naza seni nofira ama katufe atroe. Hagi kagrama antahisankeno knare'ma haniana, amne nagranena Babiloni vananke'na knare hu'ne ome kegava hugantegahue. Hagi nagrane vu'zamo'ma antahisankeno knare'ma osaniana, nagranena omo. Hianagi inantego kagrama antahisankeno knare'ma haniregama vunaku'ma hanunka, maka mopamo'a kagri kavuga me'neankinka amne vugahane. <sup>5</sup> Hagi kagra maninaku'ma hanunka ete vunka, Babiloni kini ne'mo'ma huhampari antegeno'ma Juda mopafima me'nea kumatamima kegavama hu'nea ne', Safani negeho ne' Ahikamu nemofo Gedalia'ma mani'nere vunka, vahe amunompi agrane umanio. Ana'ma osunaku'ma hanunka inantego vunaku'ma hanantega amne vugahane. Anage nehuno sondia

vahete kva ne' Nebusaradani'a Jeremaiana ne'zane musezanena nemino atregeno vu'ne. <sup>6</sup> Hagi ana'ma hutegeno'a Jeremaia'a ete Mizpa kumate vuno Ahikamu nemofo Gedali'ene mago'a vahe'ma Juda mopafima zamatrage'zama mani'naza vahe'ene umani ne.

<sup>7</sup> Hagi mago'a Juda sondia vahete kva vahe'ene mago'a sondia vahe'ma ka'ma kokampima umani'naza vahe'mo'zama antahizama, Babiloni kini ne'mo'ma Ahikamu nemofo Gedaliaama huhampri antegeno ana maka mopane, zamunte omane vene a'ene mofavre naga'ma zamavare'za Babilonima ovu'za zamatrage'zama mani'naza vahete'ma kegava hia nanekea antahi'naze. <sup>8</sup> Ana hute'za zamagra Gedalia kenaku Mizpa kumate vu'naze. Hagi anampima vu'nazana Natania nemofo Ismaeliki, Karea nemofo Johananiki, Tanhumeti nemofo Seraiaiki, Netofa nagapinti ne' Efai ne' mofavre nagaki, Ma'aka nagapinti ne' Jezani'ene agri nagapinti vene'nemozane maka vu'naze. <sup>9</sup> Hagi anante Safani negeho ne' Ahikamu nemofo Gedalia'a ana kva vahe'ene, zamagranema vu'naza vahera amanage huno huvempa huno zamasami'ne. Tamagra ama mopafi manineta, Babiloni kini ne' Nebukatnesa eri'za vahe'ma mani'neta agri agoraga mani zankura korora osiho. Na'ankure e'i ana'ma hanazana knare huta manigahaze. <sup>10</sup> Hagi menina antahihio, tamagri tamagi eri'na nagra Mizpa kumate manine'na, Babiloni vahe'ma tagri'ma eme tagenaku'ma eterema hanaza zupa, nagra zamagrane keaga hugahue. Hianagi tamagra waini ragane, zafa rgaramine, olivi masavenena kavoramimpi eri atru nehuta, tamagrama erita mani'naza kuma tamimpina maniho. <sup>11</sup> Hagi Juda vahe'mo'zama vu'za e'zama hu'za Moapu mopafine, Amoni vahepine, Idomu mopafine, mago'a mopareganema umani emanima hu'naza vahe'mo'za zamagranema antahizama, Babiloni kini ne'mo'a osi'a vahe'ma zamatrege'za Juda mopafina mani'nageno, Safani negeho Ahikamu nemofo Gedaliaama kva azeri otigeno kvama huzmantea nanekeana nentahi'za, <sup>12</sup> Juda vahe'ma zamahe panani'ma hazage'za fre'za maka kazigama umani emanima hu'naregatira Juda mopafi ete e'za, Mizpa kumate'ma Gedalia'ma mani'nere e'naze. Ana hute'za wainine mago'a zafa rgaramina tagiza eri atru hu'naze.

<sup>13</sup> Hagi Karea nemofo Johanani'ene ana maka sondia vahete kva vahe'ma, vahe omani kokampima umani naregatira, Gedalia'ma Mizpa kumate'ma mani'nere e'naze. <sup>14</sup> Hagi zamagra anante Gedaliana amanage hu'za asami'naze, kagrira eme kahe frisie huno Amoni kini ne' Balisi'a huntogeno Natania nemofo Ismaeli'ma ne-e hu'za nehaza nanekea antahi'nampi ontahinano? Hianagi Ahikamu nemofo Gedalia'a ana kezamirera antahi amuhara osu'ne. <sup>15</sup> Hagi anante Karea nemofo Johanani'a Mizpa kumate Gedaliana oku'a amanage huno ome asami'ne, kagra hu izo huge'na vu'na vahe'mo'za ontahi'sazama'a, Netania nemofo Ismaelina ome ahe fri'neno. Na'a agafare kagrira kahe frisige'za, amama eme atruma hu'za kagrifikafima mani'naza Juda vahe'mo'za panani hu'za fresageno, osi'ama mani'naza Juda vahera frigahaze? <sup>16</sup> Hianagi Ahikamu nemofo Gedalia'a Karea nemofo Johanani amanage huno kenona hunte'ne. Kagra e'inahu avu'ava zana osuo, na'ankure kagrama Ismaeliniku'ma nehana nanekea havige nehane.

<sup>1</sup> Hagi ana kafumofo 7ni ikantera, Elisama negeho ne' Netania nemofo Ismaeli'a, kinima nemaniza nagapinti nekino, kini ne'mofo eri'zama e'neriza vahepinti mago zamimo'e. Ana hu'neankino 10ni'a vahe zamavarege'za Ahikamu nemofo Gedalia kenaku Mizpa kumate e'naze. Hagi zamagra Gedalia'ene manine'za magoka ne'za nenazafinti, <sup>2</sup> Netania nemofo Ismaeli'ene agranema vu'naza 10ni'a vahe'mo'za oti'za, Babiloni kini ne'mo'ma kva azeri otigeno Juda mopama kegavama hu'nea ne' Safani nemofo Gedaliana bainati kazinteti ahe fri'naze. <sup>3</sup> Hagi Ismaeli'a Juda vahe'ma Gedalia'enema Mizpa kumate'ma mani'naza vahera anazanke huno zamahe nefrino, Babiloni sondia vahe'ma anante'ma mani'naza vahe'enena zamahe fri'ne. <sup>4</sup> Hagi Gedaliama ahe fri'nea nanekea vahe'mo'za ontahi'nageno, anante kna zupa, <sup>5</sup> Sekemine Silone Samearia kumatetiki hu'za, 80'a vahe'ma e'nazana, zamagi zamazokara ne-hare'za, kukena zamia tagato nehu'za, zamavufaga taga nehu'za, witi ofama hu'zane, mananentake zantamima kre manama vu'zanena eri'neza Ra Anumzamofo mono nompi ofa hunaku e'naze. <sup>6</sup> Hagi ana'ma nehazageno'a Netania nemofo Ismaeli'a ana vahe zamagenaku Mizpa kumapintira zavira neteno atiramino e'ne. Hagi eme nezamageno'a amanage huno hu'ne, tamagra evuta Ahikamu nemofo Gedaliana keho. <sup>7</sup> Hagi anagema hige'za zamagra rankumapima ufrage'za, Netania nemofo Ismaeli'ene agranema mani'naza vahe'mo'za ana vahera zamahe frite'za zamavufaga'a eri'za mago tinkerifi ome matevu atre'naze. <sup>8</sup> Hianagi ana vahepintira 10ni'a vahe'mo'za Ismaelina asami'za, tagrira tahe ofrio, na'ankure witine bali ragane olivi masavene tume rima'agi huta frakunkeno me'nne. E'i anage hazageno Ismaeli'a antahintahi'a rukrahe huno zamagri'ene mago'a vahe'ma zamagranema mani'naza vahera zamahe ofri'ne. <sup>9</sup> Hagi Ismaeli'a Gedali'eneme mago'a vahe'ma agrama zamahe fri'nea vahe zamavufagama eri vazi'nea tinkeria rankrerfa hu'neankino ana kerima kafinte'nea nera, Israeli kini ne' Ba'asa'ma ha' eme huntenuku nehigeno, kini ne' Asa'ma kafinte'nea tinkerie. Ana hu'nefi Netania nemofo Ismaeli'a anama zamahe fria vahe zamavufaga erinte avite'ne. <sup>10</sup> Hagi Netania nemofo Ismaeli'a ana'ma huteno'a ana maka Mizpama mani'naza vahera kina huzmanteteno zamavarege'za, Mizpa kumara atre'za Amoni vahe mopama me'nea kantega vu'naze. E'i ana vahera kini ne'mofo mofa'ne zagane, Mizpa kumate'ma zamatrage'za mani'naza vahe'ma, Babiloni Sondia vahete kva ne' Nebusaradan'i'ma Ahikamu nemofo Gedalia azampima antegeno, kegavama hu'nea vahe zamavareno vu'ne. <sup>11</sup> Hagi Karea nemofo Johanani'ene mago'a sondia vahete kva vahe'mo'za, Netania nemofo Ismaeli'ma hu'nea kefo avu'ava zamofo nanekea ana maka antahi vagare'naze. <sup>12</sup> Ana'ma hute'za zamagranema mani'naza vene'ne nagara ana maka zamavare'za Netania nemofo Ismaelina ha' ome huntenuku vu'za, Gibeoni kumate'ma rantiru'ma me'nhere nevige'za ome ke'naze. <sup>13</sup> Hagi ana maka vahe'ma Ismaeli'enema nevaza vahe'mo'za, Karea nemofo Johananine sondia vahete kva vahetaminema nezamage'za tusi musenkase hu'naze. <sup>14</sup> Hagi Ismaeli'ma ana maka vahe'ma Mizpa kumate'i'ma kinama huzmanteno zamavareno vu'nea vahe'mo'za, ete rukrahe hu'za Karea nemofo Johananinte e'naze. <sup>15</sup> Hianagi Netania nemofo Ismaeli'a 8'a vahe zamavarege'za Johananinku koro fre'za Amoni vahe moparega vu'naze. <sup>16</sup> Hagi anante Karea nemofo Johanani'ene maka sondia vahete kva vahe'ma agranema mani'naza vahe'mo'za, Netania nemofo Ismaeli'ma, Ahikamu nemofo Gedaliama ahenefrino kinama huzmanteno zamavareno nevige'za Gibeoniti'ma ome zamavare'naza vahera

ana maka Mizpa kumatetira zamavare'za vu'naze. Anampima vu'nazana, sondia vahe'ene, a'nane naga'ene, mofavre naga'ene, kini nemofo eri'za vahe'enena zamavare'za vu'naze. <sup>17</sup> Hagi zamagra Isipi vunaku karanka nevu'za, Betlehemu kuma tvaonte Gerut Kimham umani'naze. <sup>18</sup> Na'ankure Babiloni kini ne'mo'ma Ahikamu nemofo Gedaliama kva azeri otigeno Juda mopare'ma kegavama hu'nea ne'ma, Netania nemofo Ismaeli'ma ahe fri'nea zanku Babiloni vahe koro hu'za umani'naze.

## 42

### *Isipi mopafina oviho huno Anumzamo koroke huzamante'nea naneke*

<sup>1</sup> Hagi maka sondia vahete kva vahe'ene Karea nemofo Johanani'ene Ho-saia nemofo Jezania'ene zamagi omane vaheteti vuno zamagima me'nea vahete'ma vige'za, ana maka vahe'mo'za erava'o hute'za, <sup>2</sup> kasnampa ne' Jeremaiana amanage hu'za asami'naze. Muse hugantonanki Ra Anumzana kagri Anumzantega nunamuna hugeno, ama osi'a vahe'ma mani'nona vahera asunku huranteno taza hino. Na'ankure kora rama'a vahe mani'nonanagi menina osi'a vahe mani'nonkenka neragane. <sup>3</sup> Hagi Ra Anumzana kagri Anumzantega nunamuna hunka antahigegeno, nazanoma hanuna zane, inantego vanuna kanena taveri hino. <sup>4</sup> Hagi anante kasnampa ne' Jeremaia'a amanage huno zamasami'ne. Tamagrama nehaza nanekea hago antahuanki'na, nazankuro tamagrama haza zana Ra Anumzana tamogra Anumzamofona nunamu hu'na antahigesugeno, na'ane nanekema nasaminia zana magore hu'na erifra okigahuanki ana maka tamasami vagaregahue. <sup>5</sup> Hagi anante zamagra amanage hu'za Jeremaiana kenona hunte'naze. Ra Anumzana kagri Anumzamo'ma kasamisia nanekema tagrama antahita amage'ma ontесunkeno'a, tamage huno magozana eri frara okino keagafina huama hurantegahie. <sup>6</sup> Hagi Ra Anumzana tagri Anumzamofoma omego huta hugantonkenkama nevana Anumzamo'ma musema hanuna nanekeo musema osanuna nanekema hanigeta, tagra amne antahita amage antegahune. Ra Anumzana tagri Anumzamofo kema antahita amage'ma antesunana maka zamo'a knare hurantegahie.

### *Jeremaia'ma hia nunamunte Ra Anumzamo kenona hu'nea naneke*

<sup>7</sup> Hagi 10ni'a zage knama evutegeno'a, Ra Anumzamo'a Jeremaiana nanekea asami'ne. <sup>8</sup> Ana'ma hutegeno'a Karea nemofo Johananine maka sondia vahete kva vahe'ma agranema mani'naza vahe'ene, zamagi omane vaheteti vuno zamagima me'nea vahete vigeno, ana maka Jeremaia'a ke-hige'za eme tru hu'naze. <sup>9</sup> Ana hutageno Jeremaia'a ana vahera amanage huno zamasamine, Ra Anumzana Israeli vahe Anumzantega ome nunamuna hugeno, asunku hurante'noma huta hunantage'nama nunamuma ome hugeno'a amanage huno hu'ne. <sup>10</sup> Tamagra ama Juda mopafima manisage'na, Nagra tamazeri hankavenetina tamazeri havizana osugahue. Ana nehu'na ama mopafina tamagrira avimzama hankreankna nehu'na, ete tamazeri vati otregahue. Na'ankure knazama tami'noa zankura tusiza hu'na nasunkura nehue. <sup>11</sup> Hagi tamagra Babiloni kini ne'mofonku'ma koro'ma nehaza zana mago'anena korora osiho. Na'ankure Nagra tamagranne manine'na agri azampintira tamagu'vazi'na tamavregahue huno, Ra Anumzamo'a huama hu'ne. <sup>12</sup> Hagi Nagra tamagrikura nasunku huneramante'sugeno, agranena asunku huneramanteno tamatreningeta ama mopatamifina manigahaze. Na'ankure Nagra tamagranne manine'na agri azampintira tamagu vazina tamavregahue huno, Ra Anumzamo'a huama hu'ne. <sup>13</sup> Hianagi tamagrama huta ama mopafina omanigahunema

huta Ra Anumzana tamagri Anumzamofo ke runetagreta, <sup>14</sup> tagra Isipi mopare vuta umanineta ha'ma hu'zana nonketa, ufema resaza agerura nontahita, ne'zanku'enena atupara osugahune huta hugahaze. <sup>15</sup> Hagi e'inahu nanekema hanuta Juda vahe'ma osi'ama mani'naza nagamota Ra Anumzamofo nanekea antahihi, Monafi sondia vahe'mofo Ra Anumzana Israeli vahe'mota Anumzamo'a huno, Isipi mopare'ma vu'zanku'ma hankave antahintahima hanazana, <sup>16</sup> tamagra Isipi mopaf'i umani'nesage'za, tamagrama koro'ma hune zamantaza ha' vahe'mo'za bainati kazinteti tamahe frigahaze. Ana nehanigeno agatonto zanku'ma koro'ma huta nevaza zamo tamavaririno Isipi moparera vanigeta anantega ufrigahaze. <sup>17</sup> Hagi Isipi mopare'ma umani zanku'ma hankave antahintahima hu'naza vene'ne nagara, anantega umani'nesage'za bainati kazinteti tamahe nefrisageno, ne'zanku huta nefrisageno, krimo'ene tamahe frigahie. Ana hina knazama atre'nugeno eme zamazeri haviza hania knazamo maka tamahe fanane hina, mago'mo'e huno kasefara huno omanigahie. <sup>18</sup> E'ina hu'negu Monafi sondia vahe'mofo Ra Anumzana Israeli vahe Anumzamo'a huno, Nagri'ma narimpa ahege'na knazama atrogeno Jerusalemi kumapima ne-maniza vhahete'ma e'neaza hu'na, Isipi mopare'ma vanage'na narimpa ahe'zana atre'nugeno tamagrriteria egahie. Ana hanuge'za vahe'mo'za neramage'za, tusi koro nehu'za vahe'ma kazusima huzamante'nakura ama vahe'mo'zama havizama hazaza huta haviza hihohu'za hugahaze. Ana hanigeta mago'ene eta ama kumara eme onkegahaze. <sup>19</sup> Hagi Juda vahe'ma ofri osi'ama mani'naza vahe'motagu'ma Ra Anumzamo'ma huno Isipi mopare'ma oviho huno'ma koro kema huramante'nea nanekegura menina tamagra antahi ankeraho. <sup>20</sup> Ra Anumzana tamagri Anumzamofontega hunanteta, tagri Anumzantega vunka tazama hanigura nunamuna hugeno, nazano tagri Ra Anumzamo'ma hihoma huno hurantesania nanekaea eme huama hugeta nentahita, nazano hihoma huno hania zana amage anteta hugahune huta hu'naza zana, havige nehuta amagera onte'naze. <sup>21</sup> Hagi ana nanekaea huama hu'na tamasami'noe. Hianagi Ra Anumzamo'ma tamagri Anumzamo'ma hia nanekaea antahita amagera nonteta, maka zanku'ma hige'nama eme tamasamua zanena amagera onte'naze. <sup>22</sup> E'ina hu'negu menima antahi ankeraho, inantego vunakure hutama nehaza moparega umani'nesageno anantega, ha' vahe'mo'za bainati kazinteti mago'a vahera tamahe nefrisageno, mago'a vahera ne'zanku huta nefrisageno, mago'a vahera krimo tamahe frigahie.

## 43

### *Jeremaia'ene vea kevumo'za atre'za Isipima vu'naza nanekae*

<sup>1</sup> Hagi Ra Anumzana zamagri Anumzamo'ma vea kevuma zamasamio huno Jeremaiama asamia nanekema, ana maka nanekema zamasami vagama neregeno'a, <sup>2</sup> anante Hosaia nemofo Azaria'ene, Karea nemofo Johanani'ene maka veganokno vahemo'zanena Jeremaiana asami'za, Ra Anumzana tagri Anumzamo'a huno Isipi moparega vuta uomanihou huno hu'ne hunka'ma nehanana kagra havige nehane. <sup>3</sup> Hianagi Neria nemofo Baruku'a antahintahi kami'negenka tagri tazeri haviza hunaku nehane. Ana nehunka Babiloni vahe zamazampi tavrentesanke'za tahe frige, tavre'za Babiloni kina ome hurantege hugahaze. <sup>4</sup> Hagi anage nehu'za Karea nemofo Johanani'ene, maka sondia vhahete kva vahemo'zane, maka vahemo'zanena Ra Anumzamofo kea rutagre'za Juda mopafina omani'naze. <sup>5</sup> Hagi Karea nemofo Johanani'ene maka sondia vhahete kva vahe'enene,

Juda vahe'ma zamahe panima hazage'za, ru moparegama umani emanima hu'naza vahe'ma osi'a naga'ma ete Juda mopare'ma maniku'ma aza vhahera mika zamavare'za vu'naze. <sup>6</sup> Hagi ana nehu'za zamagra mika vene'ne zagane a'nameramine, mofavre zagane, kini ne'mofo mofane zagane, maka vahe'ma, Babiloni sondia vhahete kva ne' Nebusaradani'ma, Safani negeho Ahikamu nemofo Gedalia azampima zmantegeno kvama huzmante'nea vahe'enena nezamavare'za, kasnampa ne' Jeremaiane Neria namofo Barukunena zanavare'za vu'naze. <sup>7</sup> Hagi ana nehu'za Ra Anumzamofo kea rutagre'za Isipi mopafi ufrete'za, vuvava hu'za Tapanesi kumate uhanati'naze.

<sup>8</sup> Hagi Tapanesi kumate'ma umani'nageno'a, Ra Anumzamo'a Jeremiana amanage huno asami'ne, <sup>9</sup> Juda vahe'mo'za negesagenka kazampina ranra have eritenka vunka, Tapanesi kumapima kini ne' Fero'ma nemania nontegama vu'nea kampima brikima ante pehe'ma hu'za vu'naza brikia akerinenka anampi ana haveramina kafinka asento. <sup>10</sup> Ana hutenga amanage hunka zamasamio. Monafi sondia vahe'mofo Ra Anumzana Israeli vahe Anumzamo'a huno, Antahiho! Nagra eri'za vaheni'a Babiloni kini ne' Nebukatnesana huntesugeno ne-esige'na Nagra avre'na esugeno amama fra'makua haveraminte kini tra'a eme anteno mani'neno, ana haveraimofo agofetu mani'neno kini eri'zama erisania seli noma'a eritareno kintegahie. <sup>11</sup> Hagi agrama esuno'a Isipi mopa eme eri haviza hugahie. Ana nehina krimo zamahe frigahiema hu'na huhampri'noa vhahera krimo zamahe nefrina, kinafima vugahazema hu'na huhampri'noa vhahera kinafi nevanage'za, bainati kazinteti zamahe frigahazema hu'na huhampri'noa vhahera bainati kazinteti zamahe frigahaze. <sup>12</sup> Hagi Nagra agri azante hanugeno, Isipi vahe havi anumzantamimofo mono nontamina teve taginenteno, ana mono nompinti havi anumzantamimofo amema'a erino mopa'arega vugahie. Ana nehuno sipisipi kva vahe'mo'zama kukena zamireti'ma zmauvfgama azeri anomia vazi'zankna huno Isipi mopa mika azeri kagintegahie. Ana huteno mago vahe'mo aze'orisageno ete mopa'arega vugahie. <sup>13</sup> Hagi Isipi vahe'mo'za zugere'ma mono'ma hunentaza havi anumzamofo amema'ama tro huntene'za mono'ma hunentaza zafaramina eri haviza hunetreno, Isipi vahe havi anumzantamimofo mono nontamina teve tagintesanigeno tegahie.

## 44

*Isipi mopafima mani'naza Juda vahe'mo'zama knazama erisaza zamofo naneke*

<sup>1</sup> Hagi Isipi mopafima me'nea kumatamina, Migdolina, Tapanesima, Memfisine, Patrosi kazigama hu'za nemani'naza Juda vahe'ma zamasamisia nanekea Ra Anumzamo'a amanage huno Jeremiana asami'ne. <sup>2</sup> Hagi Monafi sondia vahe'mofo Ra Anumzana Israeli vahe Anumzamo'a huno, Jerusalemi kumate'ene, Juda mopafima me'nea kuma taminte'ma knazama atrogeno'ma eme zamazeri havizama hu'neana, ko keta antahita hu'naze. Hagi antahiho, menima kesazana ana kuma tamimo'a havizantfa hazageno, anampina magore hu'za vhahera omani'naze. <sup>3</sup> Na'ankure zamagra kefo avu'ava'ma hazazamo Nagrira nazeri narimpa nehe'za, zamagran, tamagrane, tamafah'ezanena keta antahita osu'naza anumzaraminte mnanentake zana ofa kremna vunte vavama huta vu'nazagu anara hu'noe. <sup>4</sup> Hagi Nagra knane knane eri'za vaheni'a kasampa vhahera huzmangtoge'za tamagritega e'za, amanage hu'naze. Nagri'ma nave'hosia hi'mnage

avu'ava zana osiho hu'za eme tamasami'naze. <sup>5</sup> Hianagi zamagra ana nanekerera zamagesa ante'za nontahi'za, kefo avu'ava zama nehu'za havi anumzantaminte'ma ofama nehaza zanena atre'za zamefira huomi'naze. <sup>6</sup> E'ina'ma hazageno'a Nagrira tusi narimpa ahege'na Juda mopafima me'nea ranra kumataminte'ene Jerusalemi kumapima me'nea ne'onse kantamimpinera narimpa ahe'zana eri kaha hutre'na ana kumatamina eri haviza hutrogeno ka'ma koka meno eno ama knarerera menina ehanati'ne. <sup>7</sup> Hagi menina Monafi sondia vahe'mofo Ra Anumzana Israeli vahe Anumzamo'a huno, Nahigeta tamagra'a tamavatera hazenkea huta knazana avreta neeta venene naga'ene a'nanene naga'ene mofavre naga'ene, ne'onse mofavre naga'enena fanane hanageno Juda vhahera omani'sazegura anara ne-haze? <sup>8</sup> Hagi nahigeta tamagra Isipi mopafima emanineta tamazantet'i'ma avako'ma huta tro'ma haza zamo'ene, ru anumzantaminte'ma ofama haza-zamo'a Nagrira nazeri narimpa ahe'naze? Ana hu'nagu tamagra'a tamazeri havizantfa hanage'za, ru moparega vahe'mo'za neramage'za kizazokago ke huneramante'za, ha' vahezamima sifnagema huzmantehaz. <sup>9</sup> Hagi tamagehe'zane, Juda kini vahe'ene a'ne zamimo'zane, tamagranee a'ne tamimo'zanema, Juda mopafine Jerusalemi kumapima me'nea ne'onse kantamimpima hu'naza havi avu'ava zankura ko tamage kani'nefi? <sup>10</sup> Hagi meninenam tamagra tamavufga anteramita Nagri agorga nomanita, tamagri'ene tamafahe'inema zami'noa kasegene tra keni'anena amagera onte'naze.

<sup>11</sup> E'ina hu'negu Monafi sondia vahe'mofo Ra Anumzana Israeli vahe Anumzamo'a huno, Nagra navugosa rukrahe hu'na hara huneramanta knazana tami'na Juda vhahera maka tamazeri haviza huvagaregahue. <sup>12</sup> Hagi Juda vahe'ma osi'ama mani'naza naga'ma, Isipi mopafi vanunema hu'za hanavemati'za e'naza vhahera zamazeri tregahue. Ana hanuge'za mago'a bainati kazinteti zamahe nefrisage'za, mago'a ne'zanku hu'za frigahaze. Hagi zamagine vaheteti vuno zamagina omane vahete'ma vanige'za ana maka vhahera bainati kazinteti zamahe nefrisage'za mago'a ne'zanku hu'za frigahaze. Ana hu'za ana maka Isipi mopafi fri hana hanage'za, vahe'mo'zama nezamage'za zamanogu nehu'za, kiza zokago ke hunezamante'za, vahe'ma sifnama huzmantehaz. <sup>13</sup> Hagi Isipi mopafima umani'naza vhahera, Jerusalemi kumapima mani'naza vahe'ma hu'noaza hu'na bainati kazinteti'ene, zamagatonto zanteti'ene, krireti'ene hu'na zamazeri haviza hugahue. <sup>14</sup> Ana hanuge'za osi'a Juda vahe'ma Isipi mopafima eman'i'naza vahepintira magomo'e huno ana knazana agatereno vuno, ete umanisunema hu'zama zamavesi zamavesi'ma nehaza Juda moparera uomanigahaze. Hianagi anampintira osi'a naga'mozage ete vugahaze. <sup>15</sup> Hagi anante maka vene'nemo'zane, a'nezmimo'zama ru anumzante'ma mananentake zama kre mnama vu ofama nehage'zama antahi'naza vene'neramine, Isipi mopafima Patrosi kumate'ma nemaniza Juda vahe'mo'zanena eme atru hute'za Jeremaiana amanage hu'za kenona hunte'naze. <sup>16</sup> Kagra Ra Anumzamofo agifi eme neramasamuema hunka nehana nanekeea tagra ontahigahune. <sup>17</sup> Hianagi tagra tamagerfa huta mikazama hugahunema huta huvempama hu'nona nanekere otineta, monafi kuini a'mofonte mananentake zantamima kre mnau ofa nehuta, waini tinema tagitreta ofa hugahune. Tagehe'za e'inahua avu'ava hu'nazankita tagrane, kini vahetimo'zane, kva vahetimo'zanena Judama me'nea ku-

matamimpine, Jerusalemi kumapima me'nea ne'onse kantamimpinena ofa hu'none. Ana hu'nonanagi ana knafina ne'zankura atupara osuta knare huta nemanita, hazenkea e'ori'none. <sup>18</sup> Hianagi tagrama monafi kuini ate'ma mananentake zama kre manama ovuta, waini tima tagi tre ofama osu'nana, tagra maka zankura atupa nehunkeno, mago'a bainati kazinteti tahe nefrizageta, mago'a ne'zanku huta fri'none. <sup>19</sup> Hagi anankema haza agofetura a'nemo'za hu'za, tagrama monafi kuini a'te'ma mananentake zantamima kre manavu ofama nehuta, waini tima tagi tre ofama nehuta, agri avugosama me'nea kekiramima tro huta waini tinema tagita ofama hu'nonana, tagra'a antahi zantetira osu'nonanki nerave'za hu izo hazageta anara hu'none. <sup>20</sup> Hagi anante Jeremaia'a ana maka veamokizmi nanekerera amanage huno ke nona huzmante'ne. <sup>21</sup> Tamagrama antahi'zana tamagrane tamagehe'zane, kini vahetamimo'zane, kva vahe'tamimo'zane, maka vahe'motanema Juda mopafima me'nea kumatamimpine Jerusalemi kumapima me'nea ne'onse kantamimpinema, mana nentake zantamima kre mnavu ofama hu'naza avu'ava zankura, tamagrama antahi'zana Ra Anumzamofo antahi'zampina omanegeno hago agekanine huta nehazafi? <sup>22</sup> Hagi tamagrama hu'naza havi avu'ava zane, kasrino hi'mnage'ma hu'nea avu'ava zanema hu'naza zankura Ra Anumzamo'a avua anteno kegara osuno tusi avesra huramante'ne. E'ina hu'negu mopatamimo'a sifnafi megeno, mago zana omaneno ka'ma koka fore higeno, anampina magore huno vahera omanitfa higeno, meno eno ama knarerera ehanati'ne. <sup>23</sup> Na'ankure tamagra mananentake zantamima kre mnavu ofaramima nehuta, Ra Anumzamofo avufi kumi nehuta, Ra Anumzamofo nankeea amagera nonteta, agri kasegene tra kenena rutagre'naze. Ana nehuta Agri eri'zama keama'ma osaza zanku huno knazana atregeno eme tamazeri haviza higeno, eno ama knarerera ehanati'ne. <sup>24</sup> Hagi anante Jeremaia'a maka vahe'ene a'nene naga'enena amanage huno zamasami'ne. Maka Isipi mopafima mani'naza Juda vahe'mota Ra Anumzamo'ma hia nanenkea antahihi. <sup>25</sup> Monafi sondia vahe'mofa Ra Anumzana Israeli vahe Anumzamo'a huno, Tamagrane a'nene naga'tamimo'zanena huta, tagra'a tagipinti'ma huvempama hu'nona nanekere amage antegahune nehuta amanage hu'naze. Tagra monafi kuini a'tega mananentake zama kre mnavu ofaramina hunenteta, waini tima tagitre ofanena huntegahune hu'haze. E'ina hu'nazagu tamagra menina vuta nazano huvempama hu'naza zana amage anteta anazana hih. <sup>26</sup> Hianagi Juda vahe'ma Isipi mopafima nemaniza vahe'mota Ra Anumzamo'a amanage hianki antahihi, Nagra Ra Anumzamo'na hankavenentake nagifi huvempa huankino, Juda vahe'ma Isipi mopafima nemaniza vahe'mota Nagri nagifina magore huta huvempa huta, Ra Anumzana kasefa huno mani'nea Anumzamofo agifi huvempa nehune huta osutfa hugahaze. <sup>27</sup> Hagi antahihi! Nagra navua ante'na zamagegahuanagi, knare zama esanigu anara osugahuanki, knazama esanigu navua ante'na kegahue. Hagi Juda vahe'ma Isipi mopafima nemaniza vahera, bainati kazinteti zamahe nefrisage'za, mago'a ne'zanku hu'za friga-haze. Ana hume nevu'za ana maka ome fri vagare'za omanitfa hugahaze. <sup>28</sup> Hagi ana hina osi'a naga'ma bainati kazinteti'ma zamahe ofrisaza vahe'mo'za Isipi mopa atre'za ete vu'za, Juda mopafi umanigahaze. Hagi osi'a vahe'ma Juda mopama atre'za Isipi mopafima umani'naza vahe'mo'za zamagri nanekemo tamagea me'nefi, Nagri nanekemo tamagea me'nefi zamagra'a ke'za antahi'za hugahaze. <sup>29</sup> Hagi Ra Anumzamo'a huno, Tam-

agrama ama ana mopafima mani'nesage'nama tamazeri havizama hanua zamofo avame'zana meni tamaveri hugahue. E'ina'ma hanugeta tamagrama keta antahitama hanazana, Nagrama tamazeri haviza hugahuema hu'na hu'noa nanekemo'a, tamagerfa huno efore hugahie. <sup>30</sup> Hagi Ra Anumzamo'a huno, Antahihi! Juda kini ne' Zedekaiama avre'na, Babiloni kini ne' Nebukatnesama ha'ma hunenteno ahe frinaku'ma nehia ne'mofo azampima avrente'noaza hu'na, Isipi kini ne' Hofrana avre'na, agri ha' vahem'o'zama ahenaku'ma nehaza vahe zamazampi avrentegahue.

## 45

### *Jeremaia'ma Ra Anumzamofo kema Baruku'ma asami'nea naneke*

<sup>1</sup> Hagi Josaia nemofo Jehoiakimi'ma Juda vahe kinima mani'no egeno nampa 4ma hia kafufina, kasnampa ne' Jeremaia'a nanekea nehigeno Neria nemofo Baruku'a avontafepi krente'ne. Jeremaia'a amanage huno Barukuna asami'ne, <sup>2</sup> Ra Anumzana Israeli vahe Anumzamo'a Barukugagura amanage huno hie, <sup>3</sup> kagra hunka, nagra ko hazenke zampi manue hunka hu'nane. Na'ankure natazampima mani'nofina Ra Anumzamo'a mago'ene knazana eri agofetu huno nenamige'na, nasuzampina nemani'na mani frua osu tusiza hu'na karagira nerue. <sup>4</sup> Kagra amanage hunka Barukuna asamio, Ra Anumzamo'a huno, antahio! Nagrama eri oti'nama ki'noa zana, eri tagna vazinetre'na, Nagrama hankre'noa zana eri vati atregahue. E'ina'ma hanuana maka mopafi anara hugahue. <sup>5</sup> E'ina hu'negu kagra nahigenka knare zamoke nagritera fore hanie hunka kagesa nentahine? Hagi antahio! Nagra ranknaza avre'na maka vahetera egahue, Ra Anumzamo'na ama nanekea hue. Hianagi inantego vananana kagrira kegava hugante'nuge'za kahe ofrigahaze.

## 46

### *Isipi mopamo'ma havizama hania zamofo kasnampa naneke*

<sup>1</sup> Hagi Ra Anumzamo'a ru kumataminte'ma fore'ma hania zankura amanage huno Jeremaiana asami'ne. <sup>2</sup> Hagi ama nanekea Isipi vahe nanekegino, Isipi kini ne' Niko sondia vahe'mo'za, Yufretisi timofo tavaonte Kakemisi kumate mani'nazageno Babiloni kini ne' Nebukatnesa'a sondia vahe'ane eno hara eme huzmagatere'ne. Hagi ama ana zama fore'ma hu'neana, Juda kini ne' Josaia nemofo Jehoiakimi'ma kinima manino egeno nampa 4ma hia kafufi fore hu'ne. <sup>3</sup> Hagi tamagra Isipi vahe'mota ranra hankotamine tamazante'ma azeri hankotamia eri retro nehuta, hapima uf're'are retro huta maniho. <sup>4</sup> Hagi tamagra hosi afutamia retrotra nehuta, hosi agumpima manita ha'ma hu sondia vahe'mota hosi agumpi ko marerita maniho. Ana nehuta aini kankrira nentanita, karugaru kevetamia kane fatgo nehuta, tamimizama refite ha' kukenatamia tamavate eri hankare'neta tro huta maniho. <sup>5</sup> Hagi menina naza fore hie? Isipi sondia vahe'ma zamagoana tusi koro nehu'za, ete rukrahe hu'za koro fre'za e'naze. Ana nehazage'za Isipi harfa sondia vahetamina ha' vahe'mo'za hara huzmagaterage'za koro fre'naze. Maka kaziga koro'zamo zamazeri kagige'za rukrahe hu'za onke nefrage'na zamage'noe, huno Ra Anumzamo'a hu'ne. <sup>6</sup> Hagi tusizama huno agamaneresia vahe'mo'a agareno atreno ofresigeno, harfa sondia vahem'o'enena korora ofregahie. Ana nehu'za noti kaziga Yufretisi tinnenarega tanafa hu'za mase'naze. <sup>7</sup> Hagi ina vahe'mo'za Naeli timo'ma tima hagetenno antepapa huno'ma eaza huza neaze? <sup>8</sup> E'i ana vahera

zamagra Isipi vahekiza Naeli timo'ma hageno repapa huno neaza hu'za ne-eza amanage hu'naze, tagra ome ra huta ama mopafina mani avineteta, ranra kumatamina eri haviza huvaga nereta, ana kuma tamimpima nemaniza vahe'enena zamazeri haviza hugahune huza nehaze.<sup>9</sup> Hagi hosi afumota ame huta tamagareho, karisimota ame huta taragita viho, harfa sondia vahemota avazuhumpi huta hate nevinke'za, Sudani sondia vahe'ene, Libia sondia vahe'ma hankore'ma e'neriza vahe'motane, Lidia kumate sondia vahe'ma atireti'ma ha'ma nehaza vahe'motanena vuta ha'ome hiho.<sup>10</sup> Hianagi e'i anankna Monafi sondia vahe'mofo Ra Anumzamofo knagino, Agra ha' vahe'a nona huno zamazeri haviza hugahie. Hagi aga'ma ate'nea kazimo'ma vahe zamavufagane koranema negeno amu'ma hiaza hu'za, bainati kazinteti zamahe hana hugahaze. Na'ankure Monafi sondia vahe'mofo Ra Anumzamo'a Agra'a zamahe frigahiankino, mago ofama hiaza huno noti kaziga Yufretisi timofo tvaonte ana vahera zamahe hana hugahie.<sup>11</sup> Hagi vene omase Isipi mofa'moka krika'ama kanamaresiema hanunka, Giliati moparega marerinka tusa trazankura ome hako. Hagi rama'a marasini erinka negahananagi, ana zamo'a amne zankna hanigeno krika'amo'a vagaoregahie.<sup>12</sup> Hagi rama'a kuma tamimpima nemaniza vahe'mo'za kagrama kagazegu'ma hana nanekema nentahi'za, kagri zavi krafamo'ma maka mopafima avi'matea zanena antahi'naze. Na'ankure harfa sondia vahetamimo'za zamagra zamagra ozeri tanafa azeri tanafa hu'za umase emase hu'naze.

<sup>13</sup> Hagi Babiloni kini ne' Nebukatnesa'ma eno Isipi mopafi vahe'ma ha'ma eme huzmantesia zankura, Ra Anumzamo'a kasnampa ne' Jeremaiana amanage huno asami'ne.<sup>14</sup> Ama nanekea huama huta maka Isipi mopafi vahe'ene, Migdoli kumapi vahe'ene, Memfisi kumapi vahe'ene, Tapanesi kumapima nemaniza vahe'enena zamasamita, tamagra otita ha'ma hu'are trotra huta maniho. Na'ankure ha' vahe'mo'za e'za maka Isipi vahera bainati kazinteti eme tamahe hana hugahaze.<sup>15</sup> Hagi nagafare harfa sondia vahetamimo'za mopafina zamavugosa regatira masene'za, ora otigahaze? Na'ankure Ra Anumzamo'a mopafi zamazeri atresige'za masene'za anara hugahaze.<sup>16</sup> Hagi Agra zamazeri taraka hanige'za tanafa hu'za agofetu agofetu hu'za nemase'za, amanage hugahaze. Otinketa kaserantageno korama tam'i'nea mopatieregane, vahetima mani'narega vammeno. Na'ankure ha' vahetimo'za bainati kazinteti ha' eme hurante'za tazeri haviza nehaze.<sup>17</sup> Hagi Isipi kini ne' Ferona kasefa agi ante'miza, Rankege nehuno mago'za osu nere hu'za hugahaze.<sup>18</sup> Hagi Kini ne'ma Monafi sondia vahe'mofo Ra Anumzanema huzama agima nehaza Ra Anumzamo'a huno, Nagrama kasefa hu'na mani'nomo'na huankino, mago vahe'mo'a Isipi vahe ha' huzmante'naku ne-eankino, agra Tabori agonamo'ma zaza huno'ma agatereankna nehuno, Hageri ankenare'ma me'nea Kameli agonamo'ma mareri agatereanknara hu'ne.<sup>19</sup> Hagi Isipi mopafima mani'naza vahemota ru moparegama kinama ome huta manisagu kutuntamia eri retrotra hiho. Na'ankure Memfisi kumamo'a evuramino haviza hina anampina mago vahera omanitifa hugahie.<sup>20</sup> Hagi Isipi mopamo'a mago knare zantfa hu'nea a' agaho bulimakao afukna hu'ne. Hianagi noti kazigati mago urunkosimo eno eme amprigahie.<sup>21</sup> Hagi Isipi vahe'mo'za zagoreti'ma mizasage'za zamagranema emani'naza sondia vahe'mo'za afovage hu'za anenta bulimakao afukna hu'nazanki'za oti hankavetine'za hara osu, Isipi vahe'mo'zama hazaza hu'za zamagranena atre'za fregahaze. Na'ankure zamagrama hu'naza avu'ava zante nona huno ra hazenke zamo eme za-

mazeri haviza hanige'za atre'za fresaza knamo'a hago kofta hie. <sup>22</sup> Hagi Isipi vahe'mo'za osifavemo sisi nehuno regararo heno freaza hu'za akohe'za regararohe'za fregahaze. Na'ankure ha' vahe zamimo'za zafama antagi tre'naku'ma hiaza hu'za, sasume erine'za hahu zamante'naku egahaze. <sup>23</sup> Hagi Ra Anumzamo'a huno, Isipi mopafima me'nea zafa tanopamo'a tusi titipa huno vhahera uofrega hu'neanagi, ufre'za zafa ome antagitre eme antagitre hugahaze. Na'ankure zamagra rama'a kenukna hu'za, ohampriga'a vahe egahazanki'za anara hugahaze. <sup>24</sup> Hagi Isipi vhahera tusi zamagazegu nehanage'na, noti kaziga vahe'mokizmi zamazampi zamavare antegahue. <sup>25</sup> Hagi Monafi sondia vahe'mofa Ra Anumzana Israeli vahe Anumzamo'a huno, Tebesi vahe'mokizmi havi anumza Amonine, Isipi kini ne' Ferone, Isipi vahe'ene kini vahe'zamine, havi anumzazamine Fero'ma taza hugahiema hu'za muha'ma nehaza vahe'enena Nagra knazana zami'na zamazeri haviza hugahue. <sup>26</sup> Hagi Isipi vhahera zamahe frinaku'ma nehaza vahe Babiloni kini ne' Nebukatnesane, eri'za vahe'amokizmi zamazampi zamavarentegahue. Ana hanuge'za Isipi mopafima manisaza vahe'mo'za korapa knafima mani'naza avamente ete vugahaze huno Ra Anumzamo'a huama hu'ne.

<sup>27</sup> Hianagi Nagri eri'za vahe Jekopuga korora osuo. Ana nehugenno Israeli vahe'mota antahintahi hakarea osiho. Na'ankure afete moparegama mani'nazaregatira ete tamagu'vazi'na tamavre'na ne-ena, mofavre naga'tamima kinama ome hu'za mani'naza moparegatira ete zamavare'na egahue. Ana hanugeta Jekopu nagamota ete mopatamire ha' zana omanesigeta fru huta emanigahaze. Ana nehanageno mago vahe'mo'a tamazeri korora osugahie. <sup>28</sup> Hagi Ra Anumzamo'a huno, Eri'za vaheni'a Jekopuga korora osuo. Na'ankure Nagra kagrane manigahue. Hagi tamavre atrogetama umani'naza kuma tamimpi vahetamina ana maka zamazeri havizahu vagaregahue. Hianagi tamagrira anara osugahue. Hagi Nagra knaza tam'i'na tamazeri fatgo hugahuanagi avamente knazana tamigahue. Ana nehu'na tamatrenugeta amnea omanigahue.

## 47

### *Filistia vahete'ma hazenke zama esania zamofo kasnampa naneke*

<sup>1</sup> Hagi Fero'a Gaza kumara hara eme huonte'negeno, Filistia vahete'ma fore hania zankura Ra Anumzamo'a kasnampa ne' Jeremaiana amanage huno asami'ne. <sup>2</sup> Ra Anumzamo'a huno, antahihio, noti kazigatira mago ranti hageno ne-eankino mopa eme refi'neteno, maka'zanena refitegahie. Ana nehuno rankuma'ene ana kumapima nemaniza vahe'enena zamahe refi'netesige'za, vahe'mo'za tusiza hu'za kezatigahaze. Ana nehanage'za ana mopafima nemaniza vahe'mo'za tusi zavi krafa hugahaze. <sup>3</sup> Hagi hosi afutamimo'za zamagare'za ne-esageno, zamagiafintira vagri vagri nehina, karisiramima ne-esigeno agafinti'ma agasasama rania zama vene'nemo'zama antahisu'za, mofavre naga'zamia rukrahera hu'za ozamge fregahaze. Na'ankure zamazamo'a stino zuzufrinige'za anara hugahaze. <sup>4</sup> Hagi Filistia vahe'ma knazamo'ma eme zamazeri havizama hania knamo'a hago meni efore hu'ne. Ana hu'neanki'za Tairi vahe'ene Saidoni vhahera zamaza osugahaze. Na'ankure hageri amu'nompima Kriti kumateti'ma Filistia vahe'ma osi'ama eman'i'naza vhahera, Ra Anumzamo'a knaza zaminno zamazeri haviza nehie. <sup>5</sup> Gaza kumapi vahe'mo'za zamamsunku nehu'za zamaseni zamazoka nehare'nageno, Askeloni kumapintira mago zamofo agasasa omanetfa hugahie. Hagi agupo kokampima osi'ama

maniza vahe'mota, tamavufgama taga nehzageno korama nehia zana ina zupa atregahaze? <sup>6</sup> Hagi Ra Anumzamofo bainati kazimoka vahe'ma zamazeri havizama nehana zana nazupa atrenka amnea manigahane huta tamagra kezatihu. Kagra bainati kazimoka kuka'afi ufrenka, akenhenka umanio. <sup>7</sup> Hianagi Ra Anumzamo'ma bainati kazimofofoma huntenu, Askeloni rankuma'ene hagerimofo ankenaregama nemaniza vahe'enema ha' ome huzamanto huno huntesigeno eno, eri'zama eme e'nerisuno'a, inankna huno mani frua hugahie?

## 48

### *Moapu vahete'ma esia hazenke zamofo kasnampa naneke*

<sup>1</sup> Hagi Moapu vahete'ma fore'ma hania zankura, Monafi sondia vahe'mofo Ra Anumzana Israeli vahe Anumzamo'a amanage hu'ne. Nebo kumakura tamasunku hunteho, na'ankure ha' vahe'mo'za eme eri haviza hanageno, haviza huno megahie. Hagi Kiriataimi kuma'ma hankave vihu keginama me'nea kumara, ha' vahe'mo'za eme eri haviza nehu'za, kuma keginanena tapage hutresage'za, ana kumapima nemaniza vahe'mo'za tusi zamagazegu hugahaze. <sup>2</sup> Hagi Moapu vaheku'ma husgama hunezman-taza zana mago'ene anara osugahaze. Ha' vahe'mo'za Hesboni kumapi emanine'za, Moapu vahe'ma zamazeri havizama hanaza zamofo nanekea amanage hu'za retro hugahaze. Enketa vuta Moapu vahera ome zamahe hana hanunkeno zamagia omanesie huza hugahaze. Hagi Matmeni kumapima nemaniza vahera bainati kazinteti zamahe hana hanageno zamagasasa omanegahie. <sup>3</sup> Hagi Horonaimi kumapinti'ma ranke hu'za tusi zavi krafagema nehzana antahiho. Ana zavi krafagema hunazana maka'zamo'a haviza hie, maka'zamo'a haviza hie hu'za krafagea hu'naze. <sup>4</sup> Moapu vahe'mo'za havizantfa nehanage'za, mofavre naga zamimo'za tusi zavi krafa hugahaze. <sup>5</sup> Hagi Moapu vahe'mo'zama koro'ma fre'za Luhiti agonomofo asoparega mareneri'za zavira nete'za, kuma zamimo'ma havizama hania zamofo agasasankema antahisu'za, Horonaimi kumatega zavira nete'za uramigahaze. <sup>6</sup> Hagi tamagra tamavufgura freta vuta, hagage kama kokampi me'nea junipe nehaza trazankna huta ome frakiho. <sup>7</sup> Hagi Moapu vahe'mota antahitama tagri hankavemo'ene, fenozamo'ene taza hugahiemta huta nehaza vahera, tamagri'enena eme tamavre'za kinafi nevu'za, Kemosi havi anumzanka'ane, pristi vahe'ane, eri'za vahe'anena zamavare'za ru moparega kinafi vugahaze. <sup>8</sup> Hagi ha' vahe'mo'za e'za maka kumara eri haviza hanageno, mago kumamo'e huno amnea omani-gahie. Agona kokampima me'nea agupo mopama eri haviza nehu'za, fenkamu agupo mopanena eri haviza hugahaze. Ra Anumzamo'ma hu'nea kante anteno ama ana zamo'a fore hugahie. <sup>9</sup> Hagi Moapu mopafina hage eme ruherafi atregahazankino, vahera zamageko'nama hunte'nige'za hare'za vazaresina knare hisine. Na'ankure ranra kumazmimo'a havizantfa huno megahie. Ana hina anampina vahera omanitfa hugahie. <sup>10</sup> Hagi Ra Anumzamo'ma zami'nea eri'zama zamayesra kosrama hu'za eriso'ema nosaza vahera kazusifi manigahaze. Hagi bainati kazima erino vahe'ma ahe ofrisia vahe'mo'a kazusifi manigahie.

<sup>11</sup> Hagi Moapu vahera ese'ma agafa hu'za mani'za e'nazaregatira, waini tro huteno tagiganti kama osu mopa kavofi antegeno me'negeno, ana waini timofo haga'amo'ene mna'amo'ma vagaore knare huno meankna hu'za mago vahe'mo'a hara eme huzmanteno eme zamavreno vige'za kina osu

knare hu'za mani'naze. <sup>12</sup> Hianagi Ra Anumzamo'a huno, mago kna ne-eanki'na ana knama esige'na mago'a vahé huzmantesuge'za e'za Moapu vahera eme zamazeri haviza hugahaze. Ana hanuge'za Moapu vahera waini tina mopa kavofinti eri tagi trazankna nehu'za, mopa kavoma ru takotaku hutrazankna hugahaze. <sup>13</sup> Hagi ana'ma hutesige'za, Israeli vahé'mo'za havi anumzamo taza hugahie hute'za Beteli kumate zamagazegu hu'nazaza hu'za, Moapu vahé'mo'za Kemosi havi anumzazmigura tusi zamagazegu hugahaze. <sup>14</sup> Hagi tamagra Moapu vahé'mota huta, tagra harfa vahé manineta hankave sondia vahé mani'nonankita, hankavetita hara hugahune huta nehaze. <sup>15</sup> Hagi Monafi sondia vahé'mofo Ra Anumzanema hu'za agima nehaza Kini ne'mo'a huno, ha' vahé'mo'za e'za Moapu vahera eme zamazeri haviza nehu'za, ranra kuma'zaminena eri haviza hugahaze. Ana nehu'za knare'nare nehazave nagara bainati kazinteti zamahe hana hugahaze. <sup>16</sup> Hagi Moapu vahé'mo'zama knazama eri'za havizama hanaza knamo'a hago erava'o hie. Ana hugahiankino ana hazenke zamo'a ame huno egahie. <sup>17</sup> Hagi Moapu vahé'tvaone'ma nemaniza vahé'motane, agri'ma keta antahitama hū'naza vahé'motanena, agrikura tamasunku hunteta zavira neteta amanage hihio. Kinima mani'neno ragima e'neria hankavemo'a nankna higenopi, hago evuramie huta hihio. <sup>18</sup> Hagi Diboni kumapima nemaniza vahé'mota rantamagima e'neriza zana atreta amne vahekna huta kugusopafi uramita maniho. Na'ankure Moapu vahé'motama eme tamazeri havizama hanaza vahé'mo'za e'za kumamofo vihu kegi-naramima hu'nazana eme tapage tapagu hutregahaze. <sup>19</sup> Hagi Aroeri kumapima nemaniza vahé'mota kantega ome ot'i'neta tamavua anteta ne-genke'zama koro'ma fre'za esaza vahera na'a fore hie? huta zamantahigeho. <sup>20</sup> Hagi tamagra anagema hanage'za zamagra kenona hu'za, Moapu kumamo'a haviza hige'za, mika vahé'mo'za tusi zamagaze zanku nehaze. E'na hu'negu tamagra tamasunku nehuta tusi zavi neteta, Arnoni ti tva'onter'e'ma nemaniza vahera ome zamasamita, Moapu kumamo'a haviza hie huta hihio. <sup>21</sup> Hagi agona kokampima me'nea agupo mopafima me'nea kumatamina, Holoni kumaki, Jasa kumaki, Mafati kumaki, <sup>22</sup> Diboni kuma'ene Nebo kuma'ene Bet-diblataimi kuma'ene, <sup>23</sup> Kiriataimi kuma'ene Bet-gamuli kuma'ene Bet-meoni kuma'ene, <sup>24</sup> Kerioti kuma'ene Bozra kuma'ene, ana maka Moapu mopafima me'nea kumatamine, afetero tva'ontero ana maka'ma me'nea kumatamimo'za zamagrama hū'naza zamavu'zmavate ranknaza erigahaze. <sup>25</sup> Hagi Ra Anumzamo'a huno, Moapu vahera zamazamo'a stinigeno hankave zamia omanegahie.

<sup>26</sup> Hagi Moapu vahé'mo'za Ra Anumzamofona veganokano hunente'za, zamavufaga erisga hu'naze. Ana hu'negu ha' vahé'mo'za eme zamazeri haviza hanage'za, aka ti ne'naza vahé'mo'za neginagi nehu'za, zamagra'a amuti trazampi mase'za rukrahekrehe nehazaza hugahaze. Ana nehanage'za vahé'mo'za nezamage'za tusi zamagizaregahaze. <sup>27</sup> Hagi kora Moapu vahé'mota Israeli vahekura musufa vahé mani'naze huta nehuta, kiza zok-agoke hune zamanteta, zamagriku'ma keagama nehuta tamagena ru'naze. <sup>28</sup> Hagi tamagra Moapu vahé'mota ranra kumatamina atreta koro freta vuta havegampi umaniho. Ana nehuta maho namamo havegampima ufre kante'ma noma kino maniaza huta umaniho. <sup>29</sup> Hagi Moapu vahé'mo'za zamagra'agu'ma antahi'zana knare hu'none nehu'za, zamagra razampi zamavufaga erisga nehu'za, zamagra'a antahisga nehu'za, keontahi avu'ava zama nehaza zamofo nanekea ko antahi'none. <sup>30</sup> Ra Anumzamo'a huno, Moapu vahé'mo'zama keontahi avu'ava zama hu'za vanoma nehaza zana

Nagra ko ke'na antahi'na hu'noe. Hianagi zamagra zamavufa erisgama hu kema nehaza zamo'a magore huno ne'zama'a forera osugahie. <sup>31</sup> E'ina hu'negu menina ana maka Moapu vahekura nasunku hunezamante'na tusi zavi ate'zmantegahue. Ana nehu'na Kir-hareseti kumate'ma nemaniza vene'negura tusiza hu'na zavira ate'zmantegahue. <sup>32</sup> Hagi Jazeri vahe'ma zavi'ma atezamante noama'a agatere'na Sibma vahe'motagura zavira at-eramantegahue. Na'ankure tamagri waini hozamo'a vuvava huno Fri Hagerintega nevuno, Jazeri hagerintegane vu'ne. Hianagi ha'vahekamo'za e'za mago'a zafa ragaramine grepri raganena emeri haviza hugahaze. <sup>33</sup> Hagi kora Moapu mopamo'a knare zantfa hu'nege'za hoza antete'za musenkase nehu'za nenaza zamo'a hago vagare'ne. Hagi wainima rentra ahe'za tro'ma nehaza kumapina mago'ene wainia rentra ohegahaze. Hagi kezati'za musenkasema nehu'za wainima rentra'ma nehaza zana osugahaze. Zamagra kezankea hugazanagi, e'i musenkasema nehaza kezankea omame'ne. <sup>34</sup> Hagi Moapu vahe'mo'zama zavi krafama hanazana, Hesboni kumateti agafa huteno vuno, Eleale kumate vuteno, vuvava huno Jahasi kumate nevanigeno, Zoari kumatetira agafa huteno vuno, Haronaimi kumate vuteno, vuvava huno Eglat-Selisia kumate vanige'za zavi krafa hugahaze. Anama nehanigeno'a Nimrimi tintamimo'a hagege hanigeno tina e'ovugahie. <sup>35</sup> Hagi Ra Anumzamo'a huno, Moapu vahe'mo'zama agonaregama mareri'za havi anumzante'ma mananentake zama kremana vu'za ofama nehaza vahera maka zamazeri atregahue. <sup>36</sup> Hagi konkema nere'za zavi nehzaza hu'na nagu'areti Moapu vaheku'ene Kir-hareseti kumate vaheku'enena tusi nasunku nehu'na zavira ategahue. Na'ankure zamagrama eri truma hu'naza feno zamo'a maka fanane hugahie. <sup>37</sup> Hagi ana'ma hanige'za maka Moapu vahe'mo'za zamasunku nehu'za zamaseni zamazokara vazagate netresage'za vene'nemo'za zamagi zmazoka'enena hare tregahaze. Ana nehu'za zamazana taga hanageno korana nehanige'za, zamasunku kukena erintanigahaze. <sup>38</sup> Hagi Ra Anumzamo'a huno, Mago vahe'mo avesra higeno mopa kavo rurako hutreaza hu'na, Moapu vahera maka zamazeri haviza hugahue. Ana hanuge'za nozamimofo agofetu'ene kuma amu'hompima atruma nehaza kumapinena manine'za zavi krafa hugahaze. <sup>39</sup> Na'ankure Moapu mopamo'a havizantfa hanige'za Moapu vahe'mo'za zavira ategahaze. Ana hanige'za Moapu vahe'mo'za zamagazegu nehu'za zamavugosa rukrahe hugahaze. Hagi Moapu vahe'tva'onte'ma nemaniza vahe'mo'za zamagrite'ma fore'ma hania zama nege'za tusi zamagogogu nehu'za, kiza zokago ke huzmantegahaze.

<sup>40</sup> Hagi Ra Anumzamo'a amanage nehie, Keho! Tumpamo mago'a zaga azerinaku ageko'na eri fafukiteno ame huno hareno eramino ageko'nareti eme rufiteaza hu'za, ha' vahe'mo'za e'za Moapu vahera eme zamazeri haviza hugahaze. <sup>41</sup> Hagi ha' vahe'mo'za Kerioti rankumara ha' eme hugatere'za eneri'za, hankave vihu kegina zaminena eri nafa'a hugahaze. Ana nehanage'za ana zupa Moapu harafa sondia vahe'mokizmi zamagu'amo'a a'nemo'za mofavre antenaku nehzageno zamata negriankna zamata krigahie. <sup>42</sup> Hagi Moapu vahera zamazeri havizantfa hanigeno zamagia omanegahie. Na'ankure Ra Anumzamofo avurera veganokano nehu'za zamavufaga eri'za mareri'naze. <sup>43</sup> Hagi Ra Anumzamo'a huno, Koro zamo'ene kafinte kerimo'ene krifumo'enena Moapu vahe'mota tamazeri haviza hugahie. <sup>44</sup> Hagi hapinti'ma koro huno fre'nia vahe'mo'a kerifi unefresigeno, kerifinti'ma atiramino fre'nia vahera krifumo azerigahie. Na'ankure nonama hu'na zamazeri havizama hanua kafu egahianki'na,

Nagra ama ana knazantamina atre'nugeno Moapu vahetera egahie huno Ra Anumzamo'a hu'ne. <sup>45</sup> Hagi Moapu vahe'mo'za koro fre'za Hesboni kumate vu'gahazanagi, ome kesazana Hesboni kumara teve neresige'za kesazanagi, mago zana osu hankave'zami omanesiaza otigahaze. Hagi Hesboni kuma'ma tesania tevemo'a ko'ma Sihoni nomina tevema re'nea avamente tegahie. Ana tevemo'a Moapu vahe zamasenia tehana nehuno, rankege'ma nehaza vahe zamaseni zaferina tehana hugahie. <sup>46</sup> Moapu vahe'mota hago hazenkefi mani'naze. Havi anumza Kemosinte'ma mono'ma hunentaza vahera haviza hugahaze. Na'ankure ne'mofatamia zamavare'za ru moparega kina ome huzmantegahaze. <sup>47</sup> Hianagi henkama esia knafina Moapu vahera ete zamazeri knare hugahue huno Ra Anumzamo'a hu'ne. Ra Anumzamo'ma Moapu vahe'ma keagama huzmantesia zamofo nanekea amare eme vagare'ne.

## 49

### *Amoni vahete'ma esia hazenke zamofo kasnampa naneke*

<sup>1</sup> Hagi Amoni vahekura Ra Anumzamo'a amanage huno hu'ne, Israeli vahe'mo'za ne' mofavrea kase ozmante'nafi? Zamafahe'mokizmi mopama erisantima haresaza mofavre nagara omani'nazafi? Hagi nahige'za Moleki havi anumzante'ma mono'ma hunentaza vahe'mo'za, Gati naga'mofo mopa eme eri nafa'a hu'za ranra kuma zamifina mani'naze? <sup>2</sup> Hagi e'na'ma hu'nazagu Ra Anumzamo'a huno, Mago kna ne-eanki'na Nagra ha' vahe huzmante'sanuge'za e'za Amoni vahe mopafima me'nea Raba kumara ha' eme hunte'za eri haviza hanageno moriri huno marerigahie. Ana nehina ana kuma tva'onte'ma me'nea ne'onse kumatamina teve tagintesageno tefanane hugahie. Ana hanige'za Israeli vahe mopama eri'naza vahera Israeli vahe'mo'za zamavare netre'za mopa'zamia ete erigahaze, huno Ra Anumzamo'a hu'ne. <sup>3</sup> Hagi Hesboni kumate'ma nemaniza vahe'mota tamasunku huta zavi ateho, na'ankure Ai rankumara eme eri haviza hanageno moriri huno marerigahie. Hagi Raba kumate vahe'mota tamasunku kukena huta zavira neteta freta vuta kuma keginamofo agu'afi ome frakilo. Na'ankure Moleki havi anumzane, pristi vahe'ane eri'za vahe'anena zamavare'za ru moparega kina ome huzamantegahaze. <sup>4</sup> Hagi tamagra nahigeta Amoni vahe'mota masavenke huno tretre'ma hu'nea agupo mopafima ne'zama hankregeno knare'ma huno ne'zama ahentea zankura rantamagia enerita tamavufga erisga nehaze. Tamagra ke ontahi mofakna hu'nazankita, tamagra'a feno zanku muhara nehuta, iza eno hara eme hurantegahie? huta nehaze. <sup>5</sup> Hianagi antahiho, tamagri tvaonte'ma mani kagi'naza vahera zamazeri otisuge'za e'za eme zamazeri koro hugahaze. Ana nehu'za Amoni vahera eme tamahe kasopetresageta mago'mofonkura antahi omi maka kaziga ufre effe hugahaze. Ana hanage'za koro'ma freta vanaza vahera mago vahe'mo'e huno tamazeri atrua osugahie huno Anumzana Monafi sondia vahe'mofo Ra Anumzamo'a hu'ne. <sup>6</sup> Hianagi henki Amoni vahera zamavare'na esuge'za ete knare hu'za mopazmire manigahaze huno Ra Anumzamo'a hu'ne.

### *Ra Anumzamo Idomu vahe zamazeri haviza hania naneke*

<sup>7</sup> Hagi Idomu vahekura Monafi sondia vahe'mofo Ra Anumzamo'a amanage huno hu'ne, Knare antahi'zane vahera Temani kumatera omani'nazafi?

Hifi knare antahi'zama nezamiza vahera omanitfa hu'nazafi? Ana hazageno knare antahizamo'a zamagripintira hago vagare'nefi? <sup>8</sup> Hagi tamagra Dedani kumapima nemaniza vahe'mota rukrahe huta koro freta vuta ofenkame urami'nesia kerifi ome frakiho. Na'ankure Idomu vahe'ma zamazeri havizama hanua zupa Iso naga'ma zamazeri havizama hu'noaza hu'na Idomu vahera kumi zamimofo nona hu'na zamazeri haviza hugahue. <sup>9</sup> Hagi grepri rgama neragiza vahe'mo'za maka tagi vaga norazanki mago'a netraze. Hagi kenage'ma musufama nesaza vahe'mo'za maka zana eri vaganorazanki, zamavesiama'a e'neriza mago'a netraze. <sup>10</sup> Hianagi Iso naga'mofo mopafintira Nagra maka zana eri hana hanugen mago zana omanetfa hugahie. Ana nehu'na zamagrama fra'manekiza kumara eri ama hanuge'za zamagra frara okigahaze. Zamogra mofavre naga'ene naga'zamimozane zamagrī tvaonte'ma nemaniza vahemo'zanena haviza hu'za fanane hugahaze. <sup>11</sup> Hagi Idomu vahe'mota megusa mofavre naga'tamina atrenke'na Nagra kegava huzmante'nuge'za ofri manigahaze. Ana nehanuge'za kento ane'tamimo'za Nagriku taza hugahie nehu'za muhara hugahaze. <sup>12</sup> Hagi Ra Anumzamo'a amanage hu'ne, Hazenkea osu'nesaza vaheragi Nagri narimpa he'zamofo kapufinti tina negahaze. Hagi nahanige'na Nagra tamatresugeta amnea manigahaze? Tamagrira knazanteti zamazeri haviza hugahue. <sup>13</sup> Hagi Ra Anumzamo'a huno, Nagra'a nagifi hvempa huankino Bozra kumamo'a haviza huno evuramino hihī huno me'nesige'za vahe'mo'za nege'za tusi koro nehu'za, kiza zokagoke huzamantegahaze. Ana nehu'za vahe'ma sifna kema huzamantenakura zamagrama hazaza huta haviza hiho hu'za hugahaze. Ana hanigeno Idomu vahe ranra kuma zamimo'a haviza huno meno vugahie. <sup>14</sup> Hagi Ra Anumzamo'ma nagri'ma nasami'neana amanage hu'ne. Nagra amanage hu'na kema erino vu vahera mago huntogeno maka kazigama mani'naza va-hetega kea erino vu'ne. Hinke'za maka vahe'mo'za magopi eme eritru hu'za retrotra hute'za oti'za e'za Idomu vahera ha' eme huzamanteho. <sup>15</sup> Hagi Ra Anumzamo'a Idomu vahekura amanage hu'ne, Antahiho, Nagra zamazeri amane hanugeta ruga'a kumapima nemaniza vahe amu'nompina osi'a naga manigahaze. Ana hu'nesage'za vahe'mo'za huhaviza huramantegahaze. <sup>16</sup> Hagi tamagra vahe'ma zamazeri koro'ma haza zamo higeta tamavugra ra nehuta tamagra'a reramatga nehaze. Hagi tumpamo have agonafi nomagino amu anteaza huta, have agonafina onagamu ranra kuma tamina kita nemanize. Hianagi anamu anantetira zamazeri mopafi atregahue, huno Ra Anumzamo'a hu'ne. <sup>17</sup> Hagi Ra Anumzamo'a huno, Idomu vahe'mo'za havizantfa hanage'za, karankama vu'za e'zama nehu'za kesaza vahe'mo'za tusi koro hu'za antri nehu'za, zamagena rugahaze. <sup>18</sup> Hagi korapara Sodomu kuma'ene Gomora kuma'ene tvoaozanire'ma megagi'nea kumataminema eri havizama hu'noaza hu'na, Idomu mopa eri haviza hanuge'za ana mopafina magore hu'za vahera omanisage'za, anampina magomo'a nona kinora omanigahie huno Ra Anumzamo'a hu'ne. <sup>19</sup> Hagi Ra Anumzamo'a huno, Jodani tintega me'nea zafa tanopafinti laionimo'a ame huno takaireno eno, knare traza me'nefi sipisipi afu'moza traza nenageno eme zamarotago hiaza hu'na, Idomu vahera mopa zamifintira ame hu'na Nagra zamahe kasopetregahue. Ana nehu'na Nagra mago ne' huhamprisugeno ana ne'mo kegava huzamantegahie. Na'ankure izi Nagri kna nera mani'nesia ne'mo hara renenantesigeno, ina kva ne'mo Nagri navurera otigahie? <sup>20</sup> Hagi e'ina hu'negu Ra Anumzamo'ma Idomu mopafi vahe'ma zamazeri haviza

nehuno, Temani kumapi vahe'enema zamazeri havizama hania zamofo antahintahia amanahu huno retro hu'neanki antahihi. Ne'onse sipisipi anen-tatamima hazaza hu'za, ne'onse mofavre nagatamina zamavazu hu'za vugahaze. Ana nehu'za zamagrama hu'naza avu'ava zamofo nona'a, masavenke huno tretre'ma hu'nea Idomu mopa eri havizantfa hugahaze.<sup>21</sup> Hagi Idomu vahe'mo'zama mopafima trakama hu'za masesaza zamofo agasasamo'a maka ama mopa eri tore hugahie. Ana nehina Idomu vahe'mo'zama zavi krafama hanaza zamofo agasasankea Koranke Hagerintegama nemaniza vahe'mo'za antahigahaze.<sup>22</sup> Hagi antahihi, tumpamo mago'a zaga azerenaku ageko'na eri fufukiteno ame huno hareno eramino ageko'nareti eme rufiteaza hu'za, ha' vahe'mo'za e'za Bozra kumate vahera eme zamazeri haviza hugahaze. Ana'ma hanage'za Idomu vahe'mokizmi harafa sondia vahe'mo'za a'nemo'za mofavre antenaku nehazageno zamata negrige'za koro nehzankna hu'za koro hugahaze.

### *Damaskasi vahete knazama esania zamofo kasnampa naneke*

<sup>23</sup> Hagi Ra Anumzamo'a Damaskasi kumate vahekura amanage hu'ne, Hamati kumate vahe'ene Arpati kumate vahetera, zamagrite'ma esania knamofo nanekema nentahi'za zamagu'amo'a hapanetisige'za tusi koro nehu'za, hagerimo fruhuno omani tusiza huno kranto kranto hiaza hugahaze.<sup>24</sup> Hagi Damaskasi kumate vahe'mo'za hankavezamia omanesige'za ete rukrahe hu'za atre'za koro fregahaze. Ana nehanageno koro zamo zamazeri ananekisige'za, mofavre anteku nehia a'mo ata negrigeno hiaza hu'za tusi koro nehu'za, antri huza nava'navahugahaze.<sup>25</sup> Hagi Damaskasi kumara agi me'nea kuma me'nege'na muse hunentoa kumaki, nahige'za ana kumara atre'za vahe'mo'za korora fre'naze?<sup>26</sup> Hagi e'ina nehazage'za zamagri nehzaveramina ha' vahe'mo'za kuma amu'nompima me'nea neonse kantamimpi zamahe nefri'za, ana zupa Damaskasi kumapi sondia vahera maka zamahe hana hugahaze, huno Monafi sondia vahe'mofo Ra Anumzamo'a hu'ne.<sup>27</sup> Hagi ana nehu'na Nagra Damaskasi rankumamofo kuma keginafina teve tagintenugenno nereno Ben-hadati'ma ki'nea zaza nontaminena tevemo teno eri hana hugahie.

### *Kedari kuma'ene Hazori kumate'ma esania knazamofo kasnampa nanake*

<sup>28</sup> Hagi Kedari kumaku'ene Hazori mopafima me'nea kumatamima, Babiloni kini ne' Nebukatnesama ha'ma huzmagatere'nea kumataminkura Ra Anumzamo'a amanage hu'ne. Ha' vahe'mota otita Kedari kumate vahera hara hunezamanteta, zage hanati kazigama nemaniza vahera zamazeri haviza hiho.<sup>29</sup> Hagi ana nehu'za ha' vahe'mo'za seli nozamine, sipisipi afu'zamine, seli noma negiza tavarav zamine maka fenoza zaminena e'neriza, kemori afu'zminena zamavare'za vugahaze. Ana nehanage'za vahe'mo'za kezatizami'za, tamagri'ma tamazeri koro'ma hania zamo'a maka kaziga tamazeri kagie hu'za hugahaze.<sup>30</sup> Hagi Ra Anumzamo'a huno, Hazori kumate vahe'mota koro freta vuta afete me'nesia muri kampi ome frakihi. Na'ankure Babiloni kini ne' Nebukatnesama ha'ma eme huraman-teno tamazeri havizama hania zamofo nanekea ko retro hunte'ne.<sup>31</sup> Hagi Ra Anumzamo'a Babiloni vahera zamasamino, Tamagra otita vuta mago zanku'ma ontahi akohe'zama nemaniza vahera ha' ome huzamanteho. Ana vahetva'ontera mago'a vahera omani'naze, ana nehzage'za, kuma kafane kafama erigi'za retrako'ma nehaza zanena omene'nea kumapi nemanize.<sup>32</sup> Hagi kemoli afu'zamine bulimakaone sipisipi afu'zamia rohure'za eri'za vugahaze. Hagi zamaseni zamazoka'ma tagahu atup'a'ma nehaza

vahera, ha' vahe hanuge'za maka kazigati e'za knazana eme nezami'za, zaho'mo hiaza hu'za eme zamazeri harafi hanage'za maka kaziga vu'za e'za hugahaze, huno Ra Anumzamo'a hu'ne. <sup>33</sup> Hagi Hasori kumamo'a haviza huno za'zate nemanigeno, anampina afi kraramimo'za emanigahaze. Ana nehanigeno anampina magore huno vahera omanitfa nehanigeno, ana kumapina vahe'mo'a kana eme anteno vano osugahie.

### *Elamu kumate'ma fore hania zamofo naneke*

<sup>34</sup> Hagi Juda kini ne' Zedekaia'ma agafa huno kinima nemanigeno'a, Ra Anumzamo'a kasnampa ne' Jeremaiana Elamu vahete'ma fore'ma hania zankura amanage huno asami'ne. <sup>35</sup> Hagi Monafi sondia vahe'mofo Ra Anumzamo'a huno, Elamu vahe'mo'za atireti hankavea e'nerizanki'na ana ati zamia eri'na rehantagi atregahue. <sup>36</sup> Hagi Nagra maka kazigati ha' vahera zamavare'na esanuge'za, ra zaho'mo eaza hu'za Elamu vahera ha' eme huzmantegahaze. Ana hanage'na Elamu vahera Nagra zamazeri panani hanuge'za ama mopafina maka kaziga fre'za vu'za e'za hu'za kumate kumatera manitere hugahaze. <sup>37</sup> Hagi Elamu vahe'ma zamahe frinaku'ma hanaza ha' vahe'mo'za negesage'na, Elamu vahera zamazeri koro hugahue. Nagra Ra Anumzamo'na huanki'na tusi narimpa ahenezmante'na knazana zami'na zamazeri haviza hugahue. Ana nehu'na ha' vahe huzamante'nuge'za bainati kazinteti eme zamaheme vu'za ome zamahe hana hugahaze. <sup>38</sup> Hagi ana hute'na Nagra Elamu kumate kini trani'a ante'na manine'na, kini vahe'zamine eri'za vahe'zaminena zamazeri haviza hugahue, huno Ra Anumzamo'a hu'ne. <sup>39</sup> Hianagi henka Elamu vahe'ma kinama ome hu'za mani'nesaregatira, ete zamavare'na mopazamire egahue, huno Ra Anumzamo'a hu'ne.

## 50

### *Babiloni mopafi nemaniza vahete fore hania zamofo kasnampa naneke*

<sup>1</sup> Hagi Babiloni vahek'u'ene Babiloni mopafima nemaniza Kaldia vahekura Ra Anumzamo'a amanage huno kasnampa ne' Jeremaiana asami'ne. <sup>2</sup> Kagra mago avame'za erisga hu'eneka mika kumatamimpima nemani'naza vahetega vunka, mago nanekea eri frara okinka kezatinka amanage huo. Ha' vahe'mo Babiloni kumara eme e'nerigeno, Babiloni vahe havi anumza Belinku'ma Maduku'ema nehaza havi anumzamofo amema'a rurakoraku hunetre'za Babiloni vahe'mo'zama havi anumzantamimofo amema'ama tro'ma hu'naza zantami'na rurakoraku hunet're'nageno kaza osu havi anumzamo'a agazegu hugahie. <sup>3</sup> Na'ankure noti kazigati vahe'mo'za e'za Babiloni vahera ha' eme huzmante'za zamazeri haviza hanage'za, maka vahe'ene bulimakaone sipisipine mago'a afu'zmimo'zanena Babiloni kumara atre'za koro fre vagaresageno mago vahera omanitfa hugahie.

<sup>4</sup> Hagi Ra Anumzamo'a huno, Anazama fore'ma hania knafina Israeli vahe'ene Juda vahe'mo'zanena magopi eme atru hute'za zaviteme ne'e'za Ra Anumzana Anumzazmimofonkura hake'za egahaze. <sup>5</sup> Hagi ana nehu'za Saioni kumategama nevaza kanku vahera zamantahige'za nege'za, ana kuma'ma me'nea kaziga zamavugosa hunte'za vugahaze. E'ina'ma zamagrama hu'nazana Ra Anumzamo'ene mevava huhagerafi hvempa ke ome huhagerafi'neza zamage'ma okaninagu anara hugahaze. <sup>6</sup> Hagi Nagri vahe'mo'za sipisipi afu'tamimo'zama nehzaza hu'za hazagre'za ufre efre hu'naze. Hagi sipisipi afute kva vahe'mo'za, sipisipi afu'tamima zamavare'za ranra agonaramimpine ne'onse agonaramimpine vazage'za

kanku ome hazagre'za vano nehu'za, nemaniza nom a zamage akani'zankna nehaze. <sup>7</sup> Hagi tutagi ha'ma huzmantaza vahe'mo'za zamahe frizage'za, ha' vahe zamimo'za amanage hu'naze. Anama zamahe frisaza zamofo kna'a tagra e'origahune. Na'ankure Agripima mani'nesageno fatgo avu'ava zama huno kegavama huzmantesia Ra Anumzamofo avufi kumira nehu'za, zamafahe'mo'za Agrite'ma muha'ma hu'naza Ra Anumzamofo avufi kumira hu'naze. <sup>8</sup> Hagi Juda vahe'mota Babiloni vahe mopafintira ame huta atreta nevuta, ve meme afumo'ma sipsipi afu'tami zamagatere'za vugota hazaza huta viho. <sup>9</sup> Na'ankure noti kaziga mopafima nemaniza hankavenen-take vahetamina Nagra zamazeri otisuge'za, magopi eme eri tru hute'za avazuhumpi hu'za Babiloni vahera ha' eme huzmantegahaze. Hagi ana ha' vahe'mo'za atima ahe'arera knare hu'naza va-heki'za mago'zama ahazana hantga nosaza vahe mani'nazankiza, Babiloni vahera ha' eme huzmagatere'za zamavare'za kina ome huzmantegahaze. <sup>10</sup> Hagi Babiloni vahera hara eme huzmantegahaze. Ana hugahazankino mago mago ha' vahe'mo'a avemasinia feno zana erimente huno eri avitetere huno vugahie, huno Ra Anumzamo'a hu'ne.

<sup>11</sup> Hagi Ra Anumzamo'a huno, Babiloni vahe'mota Nagri vahera ha' huzmanteta kumazmnia eri haviza nehuta, mika zazamia rohu zamarella erita ne-eta, ve bulimakao afu'mo witi hona refuzafu'nepeno takaire takaure hiaza nehuta, ve hosi afu'mo nehiankna krafa huta e'naze. <sup>12</sup> Hagi e'inama hanageno'a kaseramanteno anima tam'i'nea neramarera'a tusi agazegu hugahie. Ana hanigeno ama mopafima me'nea kumatamimofo amu'nompina agia omanena haviza huno vahe omani hagage ka'ma koka fore hugahie. <sup>13</sup> Na'ankure Ra Anumzamofo arimpa ahe'zamo hanigeno Babiloni kumamo'a haviza hina, anampina mago vahemo'e huno omanitfa hugahie. Hagi ru kumapi vahe'mo'zama ana kuma tva'onte'ma vu'za ezama nehu'za ana zama kesu'za tusi antri hu'za nava'navahugahaze. <sup>14</sup> Hagi Babiloni vahe'mokizmi ha' vahe'mota avazuhumpi huta maka kazi-gati eta Babiloni kumara eme azeri kaneginke'za atifima kevema erinte-tama nehaza vahe'mota keveva magore huta otreta ahetrenkeno Babiloni kumapina ufreno. Na'ankure zamagra Ra Anumzamo'na navufi kumi hu'naze. <sup>15</sup> Hagi tamagra Babiloni kumamofona maka vahe'mota kezatta rankege nehinke'za, zamazama erisga hu'za hara osanunemahu'za tamagrittegama esageta, Babiloni kuma kegina ahenafage hunetreta, ma-nine'za kuma kvama nehaza zaza nontamina tapage hutreho. Na'ankure e'i Ra Anumzamofo arimpa ahe'za me'neanki, vahe'ma zamazeri havizama hu'nazaza huta zamagri'enena zamazeri haviza hiho. <sup>16</sup> Hagi Babiloni mopafima hozama eri'za avimzama nehankraza vahe'ene, ne'zama hamare zupama kazinteti'ma ne'zama nehamaraza vahe'enena zamahe hana hugahaze. Hagi Babiloni vahe'ma ha' vahe'zamimo'zama bainati kazin-teti'ma ha'ma eme huzmantesage'za, ru vahe'ma zamagranema eman'i'zama vahe'mo'za koro atre'za mopa zamirega uvuevu hugahaze.

<sup>17</sup> Hagi Israeli vahe'mo'za sipsipi afu kevugna hu'nage'za, ha' vahe'mo'za laionigna hu'za eme zamarotago hazage'za panani hu'za fre'naze. Hagi esera Aselia kini ne'mo eme zamaheno netegen, anantera Babiloni kini ne' Nebukatnesa eno zaferina eme hakaneno ne'ne. <sup>18</sup> E'ina hu'negu Monafi sondia vahe'mofo Ra Anumzana Israeli vahe Anumzamo'a huno, Antahihi, Asaria kini ne'ma knama ami'na azeri havizama hu'noaza hu'na, Babiloni kini nera azeri haviza nehu'na, Babiloni mohanena eri haviza hugahue.

**19** Hagi sipisipi nagara, Israeli vhahera ete zamavare'na mopa zamire esuge'za, Kameli agonafinti'ene Basani mopafinti'ene Efraemi agona kokampinti'ene Gileati mopafinti'enena trazana nezamu hu'za negahaze. **20** Hagi Ra Anumzamo'a huno, Anazama fore'ma hania knafina Israeli vahepine Juda vahepinena mago kumira omanegahie. Na'ankure Nagrama zamatresuge'za osi'a naga'ma ofri manisaza nagara kumi'zamia eritresuge'za vahe'mo'za kumi'zamia onkegahaze.

**21** Hagi Babiloni vahe'mokizmi ha' vhahera Ra Anumzamo'a huzmanteno, Marerita Merataimi kumate vahe'ene Pekodi kumate vahe'enena hara ome hunezmaneteta maka zazmi'nena eri haviza hiho. Ana nehuta hihoma hu'na huramante'noa zana ana maka huvagareho, huno Ra Anumzamo'a hu'ne. **22** Hagi Babiloni mopafina ha' zamofo agasasamo'a tusiza nehanigeno, ana mopafina maka zamo'a ome haviza hugahie. **23** Hagi Babiloni vahe'mo'za ama mopafi vahetera mago hanavenentake hamankna hune'za vhahera zamazeri haviza hu'nazanagi, menina ha' vahe'amo'za Babiloni kumara eme eri anafe hunetre'za eri haviza hugahaze. Ana hanage'za vahe'mo'zama ana zama nege'za tusi antri nehu'za zmagogogu hugahaze. **24** Hagi Ra Anumzamo'a huno, Nagra Babiloni vahemota tamaz-erinaku kuko ante'nogeno tamazeri'ne. Hianagi anazana keta antahita osu'naze. Na'ankure Ra Anumzamofo ha' rente'nagu ana kukomo'a tamazeri'ne. **25** Hagi Ra Anumzamo'a ha' zama nentea noma'a anagi hagro huno arimpa ahe'zana eri fegi atre'ne. Na'ankure Monafi sondia vahe'mofo Ra Anumzamo'a Babiloni vahe'mopafi eri'za erinaku anara hu'ne. **26** Hagi afete moparegati ha' vahe'mota eta Babiloni mopafi vhahera hara eme huzmanteta, ne'zama nentaza nontamina tapage hutreho. Ana nehuta witima hiaza huta maka zantamina magopi eri hihhi nehuta, mago zana otreta maka eri haviza hutrenkeno anampina mago'zana omanetta hino. **27** Hagi Babiloni vahe'mokizimi ve agaho bulimakao afu'tamina maka zamahe hana huta traga hiho. Na'ankure Babiloni vahe'ma Ra Anumzamo'ma nona huzmanteno zamazeri havizama hania knamo'a hago e'neanki kva hiho. **28** Hagi mago'a Juda vahe'ene Israeli vahe'mo'zanema Babiloniti'ma koro fre'za Saioni kumate'ma esaza vahe'mo'za huama hu'za, Ra Anumzana tagri Anumzamo agri mono noma eri havizama hu'naza vhahera arimpa ahene'zamanteno ana zante zamazeri haviza nehie hu'za hugahaze. **29** Hagi atireti'ma ha'ma nehaza vhahera maka ke hinke'za e'za Babiloni kumara eme avazagi kagine'za, zamagrama hu'naza ayu'ava zanteranazanke hu'za nona huzmanteha'za zamazeri haviza nehinke'za, magore hu'za zamatre'za ofreho. Na'ankure zamagra zamavufaga ra nehu'za, Ra Anumzana Israeli vhahete'ma ruotage'ma hu'nea Anumzamofona ha' rente'naze. **30** E'ina hu'negu agri nehzaveramina kumamofo neonse kantamimpi zamahe tresage'za frigahaze. Ana nehu'za ana zupa sondia vahe'zaminena maka zamahe hana hugahaze, huno Ra Anumzamo'a hu'ne. **31** Hagi Monafi sondia vahe'mofo Ra Anumzamo'a huno, Antahihi! Tamavufga rama nehaza Babiloni vhahera nagra hara huzmantegahue. Na'ankure tamagri'ma knazama tami'na tamazeri havizama hanua knamo'a hago menina efore hu'ne. **32** Hagi kema ontahi veganokano'ma nehana kuma'moka, traka hunka mase sankeno mago vahe'mo'za kazeri oraotigahie. Ana nehanige'na Nagra ranra kumatamimpina teve tagintesugeno nereno ana kumatamimoho tva'onte'ma me'nesia zanena teno erihana hugahie. **33** Hagi Monafi sondia vahe'mofo Ra Anumzamo'a huno, Israeli vahe'ene Juda vahe'enena ha' vahe'mo'za eme zamazeri haviza hute'za zamavare'za kina ome huz-

mantete'za ozamatre'za zamazeri antrako hu'naze. <sup>34</sup> Hianagi zamagri'ma zamagu'vazino zamavaresia ne'mo'a hankavenentake hu'neankino, Monafi sondia vahe'mofo Ra Anumzane huno agia me'ne. Ana hu'neankino tamagerfa huno Agra zamaza huno hara huno nezamanteno, maka ama mopafi vahera mani frua zamigahie. Hianagi Babiloni vahera zamatresigeno nomaniza zamimo'a haviza hanige'za mani so'ea osugahaze. <sup>35</sup> Hagi Ra Anumzamo'a huno Babiloni mopafima nemaniza Kaldia vahera bainati kazinteti eme nezmahe'za, Babiloni kumapima nemaniza vahe'ene eri'za vahe'ene knare antahi'zane vahetaminena bainati kazinteti ha' eme huzmante'za zamazeri haviza hugahaze. <sup>36</sup> Hagi henkama fore'ma hania zanku'ma havi kasnampa kema nehaza vahe'zamia bainati kazinteti ha' eme huzmantesage'za, neginagi vahekna nehanage'za, harafa sondia vahe'zamia ha' eme huzmantesage'za tusi koro hugahaze. <sup>37</sup> Hagi Babiloni vahe hosi afutamina ha' vahe'mo'za bainati kazinteti eme zamahe nefri'za karisi zamia eri haviza hugahaze. Ana nehu'za ruregati sondia vahe'ma zamagranema emanine'za zamaza hu'za ha'ma nehaza sondia vahera zamazeri haviza hanageno hankavezmi omanena a'negna hugahaze. Hagi ha' vahe zamimo'za maka feno zazimia rohure'za eri'za vugahaze. <sup>38</sup> Hagi Nagra hanugenno mopazamifina kora ruontesigeno maka ranra timo'enena taneno hagage kokankna hugahie. Na'ankure Babiloni mopafina havi anumzaramimofo amema'amo'a avite'nege'za, Babiloni vahe'mo'za ana zante amagera nente'za neginagi vahekna hu'nazagu anara hugahie. <sup>39</sup> E'ina hu'negu Babiloni kumapina magore huno vahera omanitfa hanigeno anampina afi zagagafamo'ene afi kraramimo eno enemanisigeno, mananinkna huno zaza anankene nama ostretie nehaza namamo'ene anampina emanigahie. Ana hina Babiloni kumapina mago vahera omanitfa hanigeno, henkama mani'za vanaza knafinena anampina vahera omanigahaze. <sup>40</sup> Hagi korapara Nagra Sodomu kuma'ene Gomora kuma'enena eri haviza nehu'na, zanagri tvaonte'ma megagi'nea kuma taminea eri haviza hu'noe, huno Ra Anumzamo'a hu'ne. E'ina'ma hu'neankna za Babiloni kumatera fore hanigeno, mago vahe'mo'a anampina nomanisigeno, mago vahe'mo'a eno anampina kana anteno vano osugahie. <sup>41</sup> Hagi noti kazigati'ma sondia vahe'ma neazana keho. Ana vahera tusi'a vahe mani'za hankavenentake vaheki'za, rama'a kini vahe'ene mopama ome atretegati eme eri tru hu'za ha' eme huramante'naku trotra nehaze. <sup>42</sup> Hagi zamagra ana vahe'mo'za vahekura zamasunku huozamante vaheki'za, zamazampina atine karugru kevenena eri'naze. Ana hune'za zamagra hosi afu agumpi manine'za ne-esageno zamagasarasomo'a hagerimo rupokra nesenno hiankna agasasa rugahie. Hagi Babiloni vahemota tamagri hara eme huramante'naku avazuhumpi hu'za egahaze. <sup>43</sup> Hagi ana ha' vahe'ma aze nanekema Babiloni kini nemo'ma nentahino'a, koro nehanigeno azamo'a hankave'a omanena zuzu frino evuramigahie. Ana nehanigeno antahintahi hakare Nehina, a'nemo mofavre anteku nehigeno hiankna ata krigahie. <sup>44</sup> Hagi Jodani tintegama me'nea zafa tanopafinti laionimo ame huno atiramino eno, sipisipi afumo'za afovage hu'nea traza nene'za mani'nageno eme zamarotago hige'za frazankna hu'na, Nagra ame hu'na Babiloni vahera mopazmifintira zamahegasopetregahue. Ana nehu'na mago ne' huhampari antesugenno ana mopa kegava hugahie. Hagi ana'ma hanua zankura ina vahe'mo Nagri'enena kehara neresigeno, ina kva ne'mo nagrikura huno e'i haviza nehane huno hugahie? <sup>45</sup> E'ina hu'negu Babiloni kumate'ma fore'ma hania zanku'ene, Babiloni mopafima nemaniza Kaldia vahete'ma fore'ma

hania zanku'ma Ra Anumzamo'ma retro'ma hunte'nea antahintahi zana tamagesa ante'neta antahiho. Hagi maka vahe'ene mofavre naga'enena sipisipi afu anentama avazu hu'za nevazankna hu'za zamavazu hu'za vanageno nonku'ma zamifina vhahera omanigahie. <sup>46</sup> Hagi ha' vahe'mo'zama Babiloni kuma'ma ha' eme hu'za erisaza zamofo agasasamo'a mopa eri tore nehina, Babiloni vahe'mo'zama zavi'ma atesaza zamofo agasasankea mago'a mopafi vahe'mo'za antahigahaze.

## 51

*Babiloni vahe'mo'za hu'naza kumite Ra Anumzamo kenona huzmante'nia kasnampa naneke*

<sup>1</sup> Hagi Ra Anumzamo'a amanage huno hie, Nagra maka zama eri havizama nehaza vahe zamarimpa eri otisuge'za, ra zaho'mo hiaza hu'za e'za Babiloni mopafi vhahera eme zamazeri haviza nehu'za, Leb-kamai kumapi vahe'enena zamazeri haviza hugahaze. <sup>2</sup> Hagi Nagra ru moparegati ha' vahe huzamantesuge'za e'za witi hona zahopi vazi herahe hufrageno zaho'mo onoma'a eri hareno viaza hu'za Babiloni vahe'ma ha'ma eme huzmantesa-saza zupa, maka zazamia eri vagare'za vanageno mago zana omanetfa hugahie. <sup>3</sup> Hagi ha' vahe'mota Babiloni vhahera zamatreke'za ha' kukena zamia eri nehu'za, kevea atifina erinte'za eri onkariho. Maka Babiloni sondia vhahera zamahe vaganereta, nahezave raminena ozamatreta maka zamahe hana hiho. <sup>4</sup> Hagi kevereti vhahera zamahe atresge'za Babiloni mopafina traka huza nemasesage'za, zamahe kuzafa'ma hanaza vahe'mo'za kumamofo ne'onse kantamimpina traka hu'za umase emase hugahaze. <sup>5</sup> Na'ankure Israeli vhahete'ma ruotage'ma hu'nea Anumzamofo avure'ma hu'naza kumimo'a mopazmifina avite'neanagi, Monafi sondia vahe'mofo Ra Anumzana zamagri Anumzamo'a Israeli vahe'ene Juda vahe'enena amefira huozami'ne. <sup>6</sup> Hagi Babiloni mopafintira tamagareta freho. Babiloni vahe'mo'zama nona hu'za erisaza knazampintira maka vahe'mota atreta freta tamagu'vaziho. Na'ankure Babiloni vahe'mo'zama hu'naza havi avu'ava zante Ra Anumzamo'ma arimpa ahezmantero nona huzmanteno zamazeri haviza hania kna menia me'ne. <sup>7</sup> Hagi kora Babiloni kumamo'a, golireti tro hu'naza kapumo Ra Anumzamofo azampi me'neankna hu'negeno, mika kote-gati vahe'mo'za ana kapufinti Babiloni vahe waini tina eme ne'naze. Ana hu'nazagu maka kokantega vahe'mo'za neginagi hu'naze. <sup>8</sup> Hianagi Babiloni kumamo'a ame huno evuramino haviza hugahie. Ana hu'negu tamagra zavira atenenteta atama negrire'ma fresania masavena keta erinteho. Ana'ma hanageno'a ete kanamarege nazana hugahie. <sup>9</sup> Hagi ruregati'ma e'za Babiloni mopafima eman'i'zaza vahe'mo'za hu'za, tagra Babiloni vhahera knamaresazegu zamaza hu'none. Hianagi mago vahemo'e huno onkanamare'ne. Ana hu'negu mago mago vahe'mota atreta mopatirega vuta eta hanune. Na'ankure Babiloni vahe'mo'zama hu'naza kumi'mofo knazamo'a hihi huno monafi mareri'negeno Anumzamo'a zamazeri haviza nehie. <sup>10</sup> Hagi Ra Anumzamo'ma Babiloni vahe'ma zamazeri havizama hia zamo'a, tagrikura fatgo hunaze huno tazerinte ama nehie. Ana hu'negu enketa Saioni vuta Ra Anumzana tagri Anumzamo'ma eri'nea eri'zankura ome huama hamneno. <sup>11</sup> Hagi Babiloni vahe ha' vahe'mota kevetamia ahegona nehuta hankotamia erisga hiho. Babiloni vahe'mo'zama Ra Anumzamofo mono noma eri havizama hu'naza zanku huno, Ra Anumzamo'a arimpa ahenezmantero zamazeri haviza hunaku,

Midia kini vahera zamazeri otisige'za e'za Babiloni vahera hara eme huzmantegahaze. <sup>12</sup> Hagi mago avame zana krauvefa (flek) erisga hu'neta Babiloni kuma keginamofo tva'ontera hara huta echo. Ana nehuta sondia vahera rama'a huzmantenke'za Babiloni kumatera kafona ante'za mani kagine'za zamavua ante'za keho. Na'ankura Ra Anumzamo'ma Babiloni vahem'a zamazeri haviza hugahuema huno retro'ma hunte'nea zana meni erifore hunaku nehie. <sup>13</sup> Hagi tamagra Babiloni vahe'mota ranra tintamimofo ankenarega nemanita, rama'a feno zantami nentaza vahe mani'naze. Hianagi tamagri'ma tamaha fananema hania knamo'a kofta hiankino zamazeri fanene hugahie. <sup>14</sup> Hagi Monafi sondia vahe'mofa Ra Anumzamo'a agr'a agifi hvumpa huno, Nagra tamagerfa huanki'na tusi kenutami eaza hu'na rama'a ha' vahe zamavare'na esuge'za, tamagrira hara eme huramagetener'e za kezati'za tusi musenkase nehu'za kanikahara regahaze. <sup>15</sup> Hagi Ra Anumzamo'a hankave'areti mopa tro hunenteno, knare antahizama'areti mopamofona azerinte fatgo higeno noma'arera me'ne. Ana nehuno ama' antahi'zama'areti monaramina tro huno eri rufanara hunte'ne. <sup>16</sup> Hagi Agrama agi'ma reaka'ma huno keagama ne-higeno'a, agerumo'a timo hiaza huno monaramimpintira agasasa nerie. Ana nehigeno mopama ome tre eme atrema hutegatira amu'mo'a eri tru huteno hampona kino marenerie. Hagi Agra higeno kopasi'namo'a rumarave nehigeno, kora nerigeno, fenoma nentea nompintira higeno zahomo'a atiramino zahora erino ne-e. <sup>17</sup> Hagi mika vahera neginagi hu'za knare antahi'za omane'nea vahe mani'naze. Hagi golireti'ma havi anumzantamima tro'ma nehaza vahe'mo'za tusi zamagazegu hugahaze. Na'ankure anama tro'ma nehaza amema'aramina tamage zana omane'neankino ana zantamimo'za zamasmura ante'za kasefara hu'za nomanize. <sup>18</sup> Hagi ana havi anumzantamina amneza me'neanki'za, vahe'mo'za ana zantaminkura kiza zokago ke huzamantegahaze. Hagi keagama refko huzamante knama esania zupa, haviza hu'za fanane hugahaze. <sup>19</sup> Hianagi Jekopu nagamofo Anumzamo'a Agra kaza osu havi anumzanknara osu'neanki', Agra ruza-hukna hu'ne. Na'ankure Agrake'za maka zana tro hu'ne. Ana hu'neanki'za Israeli vahera Agrama erisantima hare'nea naga nofi vahe mani'naze. Hagi Agri agi'a Monafi sondia vahe'mofa Ra Anumzane huno me'ne.

<sup>20</sup> Hagi Ra Anumzamo'a Babiloni vahekura huno, Ha' nehaza konte kano nazampi eruankna huta tamagra mani'nazage'na tamagripi hu-vazi'na kokankokama nemaniza vahera zamahe pasaru nehu'na, tamagripi huvazina kinimo'zama kegavama hu'naza mopanena eri haviza hu'noe. <sup>21</sup> Hagi tamagripi huvazi'na hosi agumpima manine'za ha'ma nehaza sondia vahe'ene hosi afutaminena mopa kavoma rurako'ma nehiaza hu'na zamazeri haviza nehu'na, karisifima manine'za ha'ma nehaza vahe'ene karisi raminena zamahe'na rufuzafupe atre'noe. <sup>22</sup> Hagi tamagripi huvazi'na veatamina zamazeri haviza nehu'na, kasefa vahe'ene ranafa vahe'enena zamazeri haviza nehu'na, ne' mofavre naga'ene mofa'ne naga'enena zamazeri haviza hu'noe. <sup>23</sup> Hagi tamagripi huvazi'na sipisipi afutamine kva vahe'zminena zamazeri haviza nehu'na, hoza afu'ma nehaza vahe'ene mopama rekonleriza bulimakao afuzminena zamazeri haviza nehu'na, gavana vahetamine kamani eri'za vahe'enena zamazeri haviza hu'noe. <sup>24</sup> Hianagi menina tamagra tamavufinti negesage'na Babiloni kumapima nemaniza vahemo'zane Babiloni mopafima nemaniza Kaldia vahe'mo'zama Saioni kumapima hu'naza havi zamavu'zamava zanteria nona huzmante-gahue, huno Ra Anumzamo'a hu'ne. <sup>25</sup> Hagi Ra Anumzamo'a huno, Babiloni

vahe'mota mago agonagna huta hankavenentake hu'neta maka mopafi vahera zamazeri haviza hu'naze. Hagi menina Nagra nazana rusute'na hara hunegante'na, kazerite'na katrenugenka zavenitegati tamisankeno tevemo'a kagrica tehana hanigenka, mago agonama afe tevemo'ma teosa hiankna hugahane. <sup>26</sup>Hagi tamagri kumamo'a haviza hanigeno ana kumap-intira havea eri'za noma retrure trara tro huge, noma azeri sgama hania havea, noma renagentetera aseontegahaze. Na'ankure kagrama haviza hanankeno'a, ka'ma koka fore huteno meno vugahie, huno Ra Anumzamo'a hu'ne.

<sup>27</sup> Hagi ha'ma hu avame'zana krauvefa erisaga nehuta ufenanerenke'za kokankoka vahe'mo'za eme eri atru hu'za Babiloni kuma'ma ha'ma hunte'nakura eme trotra hiho. Hagi zurunama hanage'za ha'ma eme huntesaza vahera, Ararati mopafi vaheki, Mini mopafi vaheki, Askenazi mopafi vaheki huta kehinke'za etesageta, sondia vahete kva vahera huham-prinke'za, kenu tamimo ruherafiramino viaza hu'za, sondia vahera zamavare'za hosi afutamimofo agumpi mani'za hatera vugahaze. <sup>28</sup> Hagi Midia mopafima nemaniza kini vahe'ene gavana vahe zamine, maka eri'za vahe zaminena kehu tru nehuta, maka zamagrama kegavama hu'naza mopafi vahe'enena kehu atru huteta Babiloni vahera hara ome huzmanteho. <sup>29</sup> Hagi mopamo'a antri nehuno ata negrisigeno ahirahiku hugahie. Na'ankure Ra Anumzamo'ma Babiloni mopama eri haviza hanugen kama koka fore hina anampina mago vahera omanitfa hugahiema huno hu'ne nanekemo'a nena raga fore hanigeno anara hugahie. <sup>30</sup> Hagi Babiloni vahe'mokizmi harfa sondia vahera a'nenegna huno hankavezmia omane-sige'za hara osu atre'za, kuma keginamofo hankave vihu zamifi mani-gahaze. Hagi rankuma zamifima me'nea nozamia tevemo te hana ne-hanigeno, kuma keginamofo kafantamina tapage hutregahaze. <sup>31</sup> Hagi ha' vahe'mo'zama ran kumamofona maka asoparegama eme eri vagare'zama maniza zamofo nanekea, kema eri'za vu vahe'mo'za zamagia re'za Babiloni kini nera ome asamitere hu'naze. <sup>32</sup> Hagi tima takama nehazare sondia vahe'mo'za eme kva hu'ne'za, timpima me'nea ketatamina teve tagintesageno tegahie. Ana hazage'za Babiloni sondia vahe'mo'za tusi koro nehu'za neginagi negahaze. <sup>33</sup> Hagi Monafi sondia vahe'mofo Ra Anumzana Israeli vahe Anumzamo'a huno, Ha' vahe'mo'za e'za Babiloni mopamo'a witima refuzafuma nepaza kumakna hu'neankino witima refuzafuma nepazankna hu'za zamazeri haviza hugahaze. Ana hu'neankino witima hamareankna huno ana vahe'ma zamazeri havizama hania knamo'a hago egofta hu'ne. <sup>34</sup> Hagi Jerusalemi kumapima nemaniza vahe'mo'za hu'za, Babiloni kini ne' Nebukatnes'a tagrica eme taheno nehana nehuno, agareti trehapa tinetreno, tima omane tintafema mopafima rerarakama hutreankna ne-huno, hagerimpima nemaniza tusi zagamo'ma mago zagama asgahu nakri-aza huno tasga hu'nenakrino, Jerusalemi kumapinti feno zantaminena negeno amura nehigeno, ete agipintira tagrica amuti tre'ne. <sup>35</sup> Hagi Salonima nemaniza vahe'mota huta, Babiloni vahe'mo'zama tagri'ma eme hazenkema nerami'za Jerusalemi kuma'ma eri havizama hu'nazankna hu'za ha' vahe'mo'za Babiloni mopafima nemaniza vahera zamagri'enena hazenke eme zamigahaze nehinke'za, Jerusalemi kumapima nemaniza vahe'mo'za hu'za, tagri'ma tahe'za korama eri tagi'naza zanterona nona hu'za, Babiloni vahera korana zamahe'za eri tagigahaze hu'za hugahaze.

<sup>36</sup> Hagi e'ina hu'negu Ra Anumzamo'a amanage huno Jerusalemi vahekura hu'ne. Keho, Nagra tamagri kaziga ante'na tamaza hu'na Babiloni

vahe'mo'zama eme huramante'naza avu'ava zantera nona hu'na Babiloni  
 vahe'mokizmi hagerina eri hagage nehu'na, ne'onse tintaminena eri ranegahue. <sup>37</sup> Ana hanugeno Babiloni kumamo'a fragu vaziramiteno hihi huno megahie. Ana huno me'nesige'za anampina afi kramo'za enemanisage'za vhahera omanitfa hugahaze. Hagi vahe'mo'za anazama nege'za koro hu'za zamagena neru'za, kiza zokago ke huzmantegahaze. <sup>38</sup> Hagi Babiloni vahe'mo'za kasefa laionimo krafage hiaza hu'za krafa nehu'za, anenta laionimo karagugaragu hiaza hugahaze. <sup>39</sup> Hagi zamagrime havi avu'ava zama hu' zamofo zamavesi zamo'ma teve rukaruma hanige'na, ne'zama nesaza zana trate retro hunte zamantesanuge'za nene'za waini tinena nene'za neginagi hugahaze. Ana hute'za oraoti'are mase vava hu'za vugahaze, huno Ra Anumzamo'a hu'ne. <sup>40</sup> Hagi sipisipi anenta afu'tamine, ve sиписи афутамине ве меме афутамима замаһенаку'ма замазери фенками атразаза hu'na, замагріра замазери фенками атргахуе. <sup>41</sup> Hagi Babiloni vhahera ha'vahe'mo'za hara huzmagateresage'za ama mopafi vahe'mo'zama ra zamagima nezamiza zamo'a vagaregahie. Ana'ma hanige'za vahe'mo'za nezamage'za tusi antri nehu'za zamagogogu hugahaze. <sup>42</sup> Hagi hagerimo'ma eme runagrama seteno hageri ankenama rufite vagareaza hu'za, ha'vahe'mo'za e'za Babiloni vhahera eme zamarefite vagaregahaze. <sup>43</sup> Hagi Babiloni mopafima me'nea kumatamimo'za haviza huza ka'ma koka fore hanageno, anampina vhahera omanitfa hanigeno, mago vahemo'e huno anampina ufreно ovugahie. <sup>44</sup> Hagi Babiloni vahe havi anumzanku'ma Beliema nehaza anumzana, Nagra knaza ami'na azeri haviza hanugeno, maka zama asgahu nakri'nea zantamimo'a agipinti rukha huramigahie. Ana hanige'za ru moparegati'ma Babiloni vahe'ma eme nezamagaza zana eme ozmagegahaze. Ana nehina Babiloni kumamofo have keginamo'a mopafi faragu vaziramigahie. <sup>45</sup> Hagi mika Nagri vahe'mota Babiloni mopafintira atreta atiramita freta vuta ome tamagu vaziho. Na'ankure ana'ma hanazana Ra Anumzamofo arimpahe zamo'ma Babiloni vahete'ma ne-ea zana agateregahaze. <sup>46</sup> Hagi ama mopafima nazano fore'ma hania zanku'ma vahe'mo'zama eme tamasamisaza nanekema nentahisnageno'a, tamagu'amo'a antria nehina korora osiho. Hagi ama kafufina mago naneke nentahita, anaga'a kafufina ru naneke antahigahaze. Ana nehuta ha'ma hanaza zamofo agenkea nentahita, mago kini nemo'ma otino mago kini ne'ma ha'ma huntisia zamofo agenkenena antahigahaze. <sup>47</sup> E'ina hu'negu antahiho! Babiloni vahe'mokizmi kaza osu havi anumzantamina, mago kna ne-eanki'na ana knama efore'ma hanige'na, zamazeri haviza hugahue. Ana hanuge'za maka ana mopafima nemaniza vahe'mo'za tusi zamagazegu hugahaze. Ana nehanageno ha'vahe'mo'za Babiloni vahe'ma zamahe frisaza vahe'mo'za traka hu'za mopafi umase emase hugahaze. <sup>48</sup> Ana hanige'za monaramimo'zane, mopamo'ene anampima me'nea zantami'mo'zanena, Babiloni kumamo'ma havizama hania zankura musenkase nehu'za zagame hugahaze. Na'ankure Babiloni vahe'ma e'za eme ha'ma huzamante'za zamazeri havizama hanaza vhahera noti kazigati egahaze, huno Ra Anumzamo'a hu'ne. <sup>49</sup> Hagi Babiloni vahe'mo'za Israeli vahe'ene kokankoka vahe'enena zamahe fri'nazankino, Babiloni kumamo'a agranena haviza hugahie. <sup>50</sup> Hagi bainati kazinteti'ma tamahe ofrisageta fraza vahe'mota otiteta omanita ame huta freho. Hagi tamagra afete kotega umanigahazanki, Ra Anumzamofonkura tamagera okanita, Jerusalemi kumakura tamagesa are'are hiho. <sup>51</sup> Hagi vahe'mo'za tagrira tazeri haviza

hu naneke hazageno, tusi tagaze zamo tavugosa refite'ne. Na'ankure ru mopafi vahe'mo'za e'za Ra Anumzamofo mono nompima, ruotage'ma hu'nefinkama umareriza eri pehanama hu'naza zanku anara hu'none. <sup>52</sup> E'ina hu'negu Ra Anumzamo'a huno, henka mago kna ne-eankino ana knama esige'na, Babiloni vahe'mokizmi havi anumzamofo amema'a eri haviza hugahue. Ana nehanuge'za ha' vahe'mo'za maka Babiloni mopafi vhahera hara eme hunezamante'za, rama'a vahe zamahe kuzafa hanage'za masene'za karagi rugahaze. <sup>53</sup> Hagi Babiloni vahe'mo'za marine'za ha'ma hanaza vihua kegina eri hankaveti'za hampompi kiza marerigahazanagi, Babiloni kuma'ma eme eri havizama hanaza vhahera, Nagra huzmante sanuge'za e'za emeri haviza hugahaze, huno Ra Anumzamo'a hu'ne. <sup>54</sup> Hagi Babiloni vahe'mo'za ra zavi krafa nehanageno, Babiloni mopafima maka zama eri haviza hanaza zamofo agasasamo'a tusiza hugahie. <sup>55</sup> Na'ankure Ra Anumzamo'a Babiloni vhahera zamazeri haviza nehuno, rankege'ma nehaza zamagerura ruraganeku nehie. Hagi Babiloni vahe'ma ha'ma eme huzmantesaza vahe'mokizmi zamagerumo'a, rama'a tintamimo'ma hiankna hu'za zamagasasa ante'za ne-esageno, zamagerumo'a ome rahuno egahie. <sup>56</sup> Hagi maka zama eri havizama nehaza vahe'mo'za e'za Babiloni vhahera hara eme huzmante'za zamazeri haviza hugahaze. Ana nehu'za harafa sondia vahe'zamia zamavare'za kina hunezamante'za, ati zamia eri'za refutagi atregahaze. Na'ankure Ra Anumzana nonahu Anumzankino, Babiloni vahe'mo'zama hu'naza avu'ava zanteria tamagerfa huno nona huzmanteno zamazeri haviza hugahie. <sup>57</sup> Hagi Babiloni vahe'mokizmi kva vhahetamine, antahi'zane vhahetaminena, Nagra hanuge'za waini tina nete'za neginagi hugahaze. Ana nehu'na gavana vahe'ene, sondia vahete kva vahe'ene, harafa sondia vhahetaminena hanuge'za masehimare'za ora otigahaze, huno Kini ne'ma Monafi sondia vahe'mofa Ra Anumzanema huno Agima me'nea Anumzamo'a ama ana naneke huama nehie. <sup>58</sup> Hagi Monafi sondia vahe'mofa Ra Anumzamo'a amanage nehie, ha' vahe'mo'za e'za Babiloni ran kumamofo vihu kegina eme tapage hutresageno tamino mopafi megahie. Ana nehu'za zaza kuma kafantamina teve tagintesageno tegahie. Hagi vahe'mo'zama zam'u'na sisima hu'naza zamo'a amne zankna nehina, Babiloni mopafi vahe'mo'zama maka zantamima, hankavema atre'za eri fore'ma hu'naza zantamimo'a tevemofo ne'zanke asegahe.

<sup>59</sup> Hagi Zedekaia'ma Juda vahe kinima 4'a kafuma nemanigeno'a, kasnampa ne' Jeremaia'a mago naneke atregeno Maseia negeho Neria nemofo Seraia'a erigeke Juda kini ne' Zedekaia'ene Babiloni vu'na'e. Hagi Seraia'a kini ne'mo'ma kama anteno vanoma haniazamofo kankamuma erinte fatgoma nehia nere. <sup>60</sup> Hagi ana avompima\* Jeremaia'ma krente'neana Babiloni vhahete'ma mika hazenke zama fore'ma hania zanku'ma, Anumzamo'ma asami'nea kasnampa nanekea mika krente'ne. <sup>61</sup> Hagi Jeremaia'a amanage huno Seraiana asami'ne, Babilonima uhanati'sunka, kagra ama avona otrenka ranke hunka ana maka nanekeha hampri vagaro. <sup>62</sup> Ana'ma hutenka kagra amanage hunka huo, Ra Anumzamoka Kagra hunka, Babiloni mopa eri haviza hanugen, ana mopafina vahe'ene zagagafanena omanitfa hanigeno mago zana omanesigeno ka'ma koka mevava hugahie hunka hu'nane. <sup>63</sup> Hagi ama avontafepima me'nea nanekema hampri vagamarettesunka, nofi erinka

\* <sup>51:60</sup> Avontaferema hu'neana, zafa akrutema krente'neza renegazriza avontafeku hu'ne.

ana avontafetera have rentetenka, Yufretisi rantimofo amu'nompi ome matevu atregeno vino. <sup>64</sup> Hagi ana'ma hutenga amanage hunka huo. Ama avontafe'ma atrogeno timpima uramiaza huno, Babiloni kumamo'a uramino ome fanane huteno, ete ora otigahie. Na'ankure Nagra ra hazenke atresugenno eno eme zamazeri haviza hanige'za zamasafeku hugahaze. Jeremaia'ma hu'nea kasnampa nanekemo'a amare eme vagare'ne.

## 52

### *Jerusalemi kuma'ma haviza hu'nea zamofo naneke*

<sup>1</sup> Hagi Zedekaia'a 21ni'a kafu nehuno kinia fore huno Jerusalemi kumate mani'neno, 11ni'a kafufi Juda mopa kegava hu'ne. Hagi nerera'a Libna kumateti ne'ru Jeremaia mofakino, agi'a Hamutali'e.

(2 King 24:18-25:7 Jeremaia 39:1-10) <sup>2</sup> Hagi Jehoiakimi'ma hu'neaza huno Ra Anumzamofo avurera Zedekaia'a kefo avu'avaza hu'ne. <sup>3</sup> Hagi Jerusalemi kumapima nemaniza vahe'mo'zane, Juda vahe'mo'zanema haza havi zama'uzmava zamo higeno, Ra Anumzamofona arimpa ahogeno Agri avure'ma mani'naretira zamahe kasopetrege'za ru moparega umani'naze. Hagi Zedekaia'a Babiloni kini ne'mofo kea antahino amagera onte'neanki ha' arente'ne. <sup>4</sup> Hagi Zedekaia'ma kinima mani'no egeno 9nima hia kafufina, 10ni ikamofona 10ni zupa, Babiloni kini ne' Nebukatnesa'a sondia vahe'aramine eno Jerusalemi kumara ha'hunte'naku eme avazagi kagine'za, manine'zama ha'ma hanaza zana, kuma keginamofo tva'ontera megi'a mopa kate'za ante hihi hu'za mareri'naze. <sup>5</sup> Hagi Babiloni vahe'mo'za atre'za ovu'za Jerusalemi kumara vazagi kagiza mani'nageno vuno, Zedekaia'ma kinima manino vigeno, 11nima hia kafure uhanati'ne. <sup>6</sup> Hagi ana kafufina 4 ikamofona 9ni zupa, Jerusalemi rankumapina tusi agatontoza fore higeno, vahe'mo'zama ne'zama ne'saza zana omanetfa hu'ne. <sup>7</sup> Hagi e'i ana knazupa Babiloni sondia vahe'mo'za Jerusalemi rankumapina ufrenaku kuma kegina tapage hu'naze. Hianagi ana'ma nehu'za avazagi kagi'nazama'agu Zedekaia'ene sondia vahe'amo'zanena kenage kumara atre'za, kini ne'mofo hozama me'neregema ante'nateti atirami'za fre'za, Araba kaziga vu'naze. <sup>8</sup> Hianagi Babiloni sondia vahe'mo'za kini ne' Zedekaiana rotago hu'za vu'za Jeriko agupofi ome azeri'naze. Ana hazage'za maka Zedekaia sondia vahe'mo'za agrira atre'za panani hu'za ufre efre hu'naze. <sup>9</sup> Hagi Zedekaina azerite'za, Babiloni kini ne'ma mani'nerega Hamati mopafi Ribla kumate avre'za vazageno, keagafi azeri otiteno agrama hu'nea avu'ava zantera, e'inahu knaza erigahane huno hunte'ne. <sup>10</sup> Hagi Ribla kumate Zedekaia mani'neno negegeno agri avufi, Babiloni kini ne'mo'a ne' mofavre naga'a zamahe nefrino, Juda kva vahetaminena ana maka zamahe fri vaga're'ne. <sup>11</sup> Hagi ana'ma huteno'a anante Zedekaiana tare avuraga reragati atretno, bronsireti tro hu'naza seninofiteti kina rentetenno avreno Babiloni vuno ome kina huntogeno mani'neno anampi fri'ne.

### *Ra Anumzamofo mono noma teve tagintageno te'nea naneke*

(2 Kin 25:8-17) <sup>12</sup> Hagi Babiloni kini ne' Nebukatnesama kinima manino egeno 19nima hia kafufina 5fu ikamofo 10ni zupa, Nebukatnesa avate'ma kvama nehaza sondia vahete'ma ugotama hu'nea kva ne' Nebusaradani'a Jerusalemi kumatera e'ne. <sup>13</sup> Ana'ma huteno'a agra Ra Anumzamofo mono nona teve taginenteno, kini ne'mofo nonena teve taginenteno, Jerusalemi

kumapima me'nea nontamina maka teve taginte'ne. Ana nehuno zamagima me'nea vahe'mokizmi nontaminena teve tagintegeno te'ne. <sup>14</sup> Hagi kini ne'mofo avate'ma kvama nehaza sondia vhete'ma ugotama hu'nea ne'enema e'naza sondia vahe'mo'za, Jerusalemi kumamofo keginarera mani kagine'za ana kegina maka tapage hutrazageno kegina omane'ne. <sup>15</sup> Hagi kini ne'mofo avate'ma kvama nehaza sondia vhete'ma ugotama hu'nea ne' Nebusaradani'a, zamunte omane vahe'ma mani'nazana nezamavareno, rankumapima mago'ama zamatre'naza vahe'enena nezamavareno, koro'ma hu'za Babiloni vahe zamazampima atre'za umani'naza vahe'enena nezamavareno, ruzahu ruzahu zantamima troma nehaza vahe'ma mago'ama mani'naza vahe'enena zamavareno Babiloni vuno ome kina huzmante'ne. <sup>16</sup> Hianagi Nebusaradani'a, Juda mopafi mani'neta waini hozane, mago'aza hozanena erita nenteta maniho huno zamunte omane vhahera mago'a zamatrege'za mani'naze. <sup>17</sup> Hagi Babiloni vahe'mo'za Ra Anumzamofo mono nompi vu'za, bronsireti'ma tro'ma hu'naza fumaza zafaramina runafe'nafu hu'za e'neri'za, Ra Anumzamofo mono nompima bronsireti'ma tro'ma hu'naza zuompama tima afintageno'ma nemanea zuompane, agia'r a raminena ru tamana tamanu hute'za ana maka bronsiramine eri'za Babiloni vu'naze. <sup>18</sup> Hagi ana nehuz'a kavoramine, sipetiramine tavi'ma erisu'ma nehaza zotaramine, ranra zuomparamine ne'onse zuompa raminena eri'naze. Ana nehuz'a bronsireti'ma tro'ma hu'naza zantamima mono nompima me'nege'za eri'zama e'neriza zantamina ana maka eri'za vu'naze. <sup>19</sup> Hagi Babiloni kini ne'mofo avate'ma kvama nehaza sondia vhete'ma ugotama hu'nea ne' Nebusaradani'a, ana zanke huno ne'onse zuomparamine, tevema taginentaza kavoramine, ranra zuomparamine, waini ti ofama nehaza amu mani tin taferaminema golireti'ene silvareti'enema tro'ma hu'naza zantamina, ana maka erino Babiloni vu'ne. <sup>20</sup> Hagi ko'ma kini ne' Solomoni'ma Ra Anumzamofo mono nompi mesie huno bronsireti'ma tro'ma hu'nea zantamina, tare fumaza zafa rarenki, tima afinentaza zuompane, bulimakaomofo amema'a ramima fenka kazigama tro'ma hunte'nea zantamine, anazama azerisgama hu'nea agia raminena eri'za vu'naze. Hagi ana maka bronsireti'ma tro'ma hu'naza zantamimofo kna'amo'a agateregeno sigerirera erinteno kegara osu'ne. <sup>21</sup> Hagi ana tare zafararema bronsireti'ma tro'ma hu'nazana, za'za amo'a 8mita higeno, kagi'amo'a 5mitagi 30'a sentimita higeno, agu'afina hagro hu'ne. Hagi anazama tro'ma hu'naza bronsimofo tapa'amo'a 75 milimita hu'ne. <sup>22</sup> Hagi ana fumaza zafararemofo zanesenirera bronsiretike kankrira tro hu'nazankino ana zamofo mareri'amo'a 2mitagi 20ti sentimita hu'ne. Ana hu'nege'za bronsiretike pomigreneti zafa rgamofo amema'a, anazanteria krente'za avasase'a hugagi'naze. Hagi mago fumaza zafamofona anazanke hu'za pomigreneti zafa rgamofo amema'a krente'za avasase'a hunte'naze. <sup>23</sup> Hagi ana fumaza zafa raremofo zanasenire'ma tro'ma hunte'naza zamofo asoparegama pomigreneti zafa rgamofo amema'ama krente'nazana, 96si'a krentetere hu'naze. Ana nehuz'a ana fumaza zafararemofo zanesenire'ma tro'ma hunte'naza zanteria, pomigrenetimofo raga 100'a tro huntetere hu'naze.

(2 Kin 25:18-21) <sup>24</sup> Hagi Babiloni sondia vhete kva ne' Nebusaradani'a vugota pristi ne' Seraiane agri amagenare'ma hu'nea pristi ne' Zefanaiane 3'a vahe'ma mono no kafante'ma kvama nehaza vahe'enena kina huzmanteno zamavareno vu'ne. <sup>25</sup> Hagi ana nehuno Nebusaradani'a Jerusalemi rankumapintira sondia vhete'ma kvama hu'nea nera nevreno, kini ne'ma

antahintahima nemiza vahera 7ni'a vahe zamageno nezamavareno, sondia vahete'ma kvama hu'nea ne'mofo avonkre eri'zama e'rinenteno, sondia vahete'ma kasefa zamavareno zamazerinte fatgoma nehia ne'enena avre'ne. Ana nehuno Jerusalemi rankumapintira, 60'a vahe mani'nageno zamageno zamavare'ne. <sup>26</sup> Hagi Babiloni sondia vahete kva ne' Nebusaradani'a anama zamavarea vahera ana maka zamavareno Babiloni kini ne'ma Ribla kumate'ma mani'nere vu'ne. <sup>27</sup> Hagi ana hutegeno Babiloni kini ne'mo'a Hamati kaziga Ribla kumate ana maka vahera zamahe fri'ne. Ana hute'za Juda vahera mopazamifintira zamavare'za kina ome huzmanteku Babiloni moparega vu'naze. <sup>28</sup> Hagi Nebukatnesama kinima manino egeno 7nima hia kafufina, 3 tausen 23'a Jiu vahera zamavareno kina ome huzmante'ne. <sup>29</sup> Hagi Nebukatnesama kinima mani'negeno 18nima hia kafufina, Jerusalemi kumapintira 832'a vahe zamavareno kina ome huzmante'ne. <sup>30</sup> Hagi Nebukatnesama kinima manino egeno 23ma hia kafufina, Babiloni sondia vahete kva ne' Nebusaradani'a 745fu'a Jiu vahe zamavareno kina ome huzmante'ne. Ana higeno ana makara 4 tausen 600'a Jiu vahe zamavare'za kina ome huzmante'naze.

*Juda kini ne' Jehoiakinima kinafinti katufente'naza nanenke*

(2 Kini 25:27-30) <sup>31</sup> Hagi Juda kini ne' Jehoiakin'i'ma kinafima manino egeno 37nima hia kafumofona 12fu ikamofo 25 zupa, Babiloni kini ne' Evil-Merodaki'a Jehoiakinina asunku hunteno kinafintira katufente'ne. Na'ankure agra ana kafufi Babiloni kinia efore huteno anara hu'ne. <sup>32</sup> Hagi Evil-Merodaki'a Jehoiakinina so'e avu'ava hunenteno, mago'a kini vahete'ma agranema Babiloni kumapima umani'naza kini vahete'mo'zama nemaniza tra'ma agatere'nea trate higeno mani'nne. <sup>33</sup> Hagi ana hutegeno Jehoiakin'i'a antanineno kinafima mani'nea kukena'a hatenetreno, kasefa kukena eri hankreteno, ananteti'ma agafama huno viana maka zupa Babiloni kini ne'mo'ma nezama nenea tratetira ne'zana netere hu'ne. <sup>34</sup> Hagi mago mago zupama ne'zama mizaseno'ma nesia zago'a, Babiloni kini ne'mo'a Jehoiakinina amitere huno nevigeno vuno agrama fri'nea knare ome vaga're'ne.

## Lamentesen-Zavi Krafa

### Lamentesen-Zavi Krafa

*Jerusalemi ran kumapi tusi zavi krafage hu'naza naneke*

<sup>1</sup> Jerusalemi kumapina kora vahe'mo'a tusiza hu'nea kumamo'agi, atreno vuno eno higeno, menina vahera omanitfa hie. Kora ama mopafima me'nea kumatmimpina zmagatereno agri agimo'a anagame mareneria kuma me'neane. Hianagi menina mago kento a'mo hiaza huno tusi'a knazampi mani'ne. Kora kini ne'mofo mofa kna huno mani'neno, ne'onse kumatmina rama'a kegava hu'neanagi, menina mago kazokazo akna hie. <sup>2</sup> Jerusalemi kumamo'a mago a'mo nehiaza huno kenagera tusi zavikrafa hu'ne. Ana nehigeno avunumo'a tusiza huno ameregentega erami erami hu'ne. Kora tusi vahe ronea huzmante'neno savrira huno vano hu'neanagi, magomo'e huno eno eme azeri vavaose'ne. Ana nehigeno maka rone'amo'za komoru hunte'za, agri ha' vaheke mani'naze. <sup>3</sup> Hagi Juda vahera ha' vahezmimo'za eme zamavare'za vu'za mopazmirega ome kina huzmante'neza, kazokazo eri'za zamiza zamazeri haviza hu'naze. Ana hazage'za Juda vahe'mo'za ru vahepi umani emanı hu'neza, magore hu'za mani fru osu'naze. Ana nehu'za tusi knazimpina mani'nageno'a, ha' vahe'mo'za zamarotago hu'za ome zamazeri havizantfa hu'naze. <sup>4</sup> Hagi Saioni kumategama vu'nea kantamimo'za tusi zavi krafa hu'naze. Na'ankure knama huhamparinte'nezama knane knanema ne'zama kre'zama nene'za mono'ma huterema nehaza knarerera mago vahe'mo'e hunora ome'nea zanku anara hu'naze. Jerusalemi ran kumamofo kuma kafaramimpina vahe'mo'a marerino atiramino osigeno, pristi vahe'mo'za tusi karagi ru'naze. Ana nehazage'za Jerusalemi kumapi mofa'nemo'za zavi netazageno, Jerusalemi kumamo'a tusi'a atazampi mani'ne. <sup>5</sup> Jerusalemi kuma'ma ha'ma eme huntaza vahe'mo'za ana kumara kegava hazageno zamagri eri'za vahe mani'ne. Ana nehu'za agri ha' vahe'mo'za Jerusalemi kumapina knare hu'za mani fru hu'za mani'naze. Jerusalemi kumapi vahe'mo'za tusi kumi hu'nazagu huno, Ra Anumzamo'a knazana atregeno eno eme zamazeri haviza hu'ne. Ana hazageno ha' vahezmimo'za mofavre nagazmia zamavare zamavugate'za vu'za afete moparegama kina ome huzmante'neze. <sup>6</sup> Jerusalemi kumamofona knare avasase zama'amo'a atreno vu'ne. Kva vahe'amo'za dia afu'mo trazanku hakeno vano hiaza hu'naze. Ha' vahe'zamimo'za zamarotgo hazage'za fre'za nevazageno hankave zamia omane'neanagi, fre vava hu'za vu'naze. <sup>7</sup> Anama hige'za afete moparegama umani emanima hu'nezama knazama eneri'za, marerisa fenozama ante'naza zankura zamesa antahi atrazageno vu'ne. Hagi ha' vahe'mo'zama zamavare'zama nevazageno'a, mago vahemo'e hunora zamagura ovazi'ne. Ana nehazage'za ha' vahezmimo'za hazenke zama zamagrite'ma fore hiazama nege'za zamagizare'naze. <sup>8</sup> Jerusalemi kumamo'a tusi'a kumi huno mago himnage zankna hu'ne. E'ina agafare ana rankumo'a agrua osu'ne. Kora ana kumamo'a knare zantfa hunege'za vahe'mo'za kenazanagi, menina havizantfa hie. Jerusalemi kumamo'a asunku nehuno franekie. <sup>9</sup> Jerusalemi kumamo'a mago akana hu'neankino, agru'ma osu'nea avu'avazamo'a frara okino amate kena'arera me'ne. Hianagi agrite'ma henkama fore'ma hania zankura agesa ontahi'ne. Hagi Jerusalemi kumamo'ma havizantfama higeno'a, mago vahemo'e hunora asunkura huonte'ne. Ana higeno amanage

huno hu'ne. Ra Anumzamoka nagriknazana ko. Na'ankure ha' vahenimo'za zmauvufga ra nehaze. <sup>10</sup> Jerusalemi kumamo'a mago akna hu'neankino, ha' vahe'mo'za eza rohu emere'za marerisa feno zantamima'a eri vagare'naze. Ra Anumzamo'a huno, ru moparegati vahe'mo'za Nagri Mono nompina umareoriho huno asevazi zmante'neanagi mani'neno negege'za ru moparegati vahe'mo'za Mono nompina umarer'i'zane. <sup>11</sup> Jerusalemi kumapima mani'naza vahe'mo'za karagi neru'za ne'zama nesaza zankura tusiza hu'za hake'naze. Ana nehu'za ne'zama nene'za ofri kasefa'ma hu'za manisnagura, knare'nare feno zazamia vahe nezami'zage'za, nona'a ete ne'za zami'naze. Hagi Jerusalemi kumamo'a mago akna hu'neankino amanage huno hu'ne. Ra Anumzamoka nagrira nazeri haviza nehazanki, nago huno hu'ne. <sup>12</sup> Jerusalemi kumamo'a kantegama enevaza vahekura kezatino, amama nagrite'ma fore'ma nehia knazana amnezane huta nehazafi? Kesga huta keganti kegama hiho, nagrama enerua knazana mago'a enerizageno, Ra Anumzamo'a arimpa ahenanteno nazeri haviza nehifi? Ra Anumzamo Agra'a nazeri havizana nehie. <sup>13</sup> Ra Anumzamo'a onagamuti teve nef atregeo eramino zaferinan'i'afi teno ufre'ne. Ana nehuno krifureti nagifina nazeri antrako huno nazeri rukrahe hu'ne. Ana higeno zaferina omneamne higeno, maka zupa navu evuevu nehige'na nagraku mani'noe. <sup>14</sup> Ra Anumzamo'a karenamare zafama hiaza huno kumin'i' magopi erinteteno Agra'a azanteti nanankempi anaki antrako hunte'ne. Ana kumimofo knazamo higeno hankaveni'a omne'ne. Ana nehuno Ra Anumzamo'a nagrira ha' vahe'nimokizmi zamazampi navre antege'za, eme nazeri haviza nehazage'na hankaveti'na hara huzmantega osu'noe. <sup>15</sup> Hankavenentake sondia vaheni'a Ra Anumzamo'a amefi hunezamino, Agrama huhampri'nea kna fatgore ha' vahera zamatrege'za e'za nehazaveramina eme zamahe vagare'naze. Juda mopamo'a mago vene omase'nea mofakna hu'neankino, vahe'mo'zama zamagareti wainima regatiti'ma nehazaza huno Ra Anumzamo'a rehapatitre'ne. <sup>16</sup> E'inahu zama fore'ma hiazamo hige'na, tusi zavi netogeno navunumo'a tinkna huno eneramigeno, mago vahe'mo'a tavao'nirera mani'neno nazeri navaneseno, nazeri hankavea ot'i'ne. Na'ankure ha' vahenimo'za hara huna-gaterazageno, mofavre nagani'a zamazeri so'ea osige'za tusi'a knazampi mani'naze. <sup>17</sup> Saioni kumamo'a mago mofakna hu'neankino, vahe'mo'zama eme azama hanagura azana rusute'neanagi, mago vahe'mo'a eno asunkura hunenteno azeri hankavea ot'i'ne. Ra Anumzamo'a Jekopu nagakura huama huno, Tavaoma'arema nemaniza vahe'mo'za ot'i'za ha' vahe'a fore hugahaze huno hu'neankino, ha' vahe'mo'zama Jerusalemi kuma'ma kazana, agru osu zankna hu'nege'za ke'naze. <sup>18</sup> Jerusalemi kumamo'a huno, Ra Anumzamo'ma nagri'ma hunantea avu'avazamo'a fatgo hu'ne. Na'ankure amage antoma huno hunantea nanekea namefi humi'noe. Ana hu'negu maka vahe'mota tamagesa anteta nentahita, nagrama erua knazante tamavua anteta keho. Ha' vahenimo'za e'za vene omase mofane nagan'i'ane, nehazave naga'nianena eme zamavare'za vu'za, afete moparega ome kina huzmante'naze. <sup>19</sup> Zamagranemana savri'ma hu'na vanoma nehua venenemo'za eme naza hanazegu'ma kema huana, havige hu'za renavatga hu'naze. Pristi vahenimo'zane, ugagota kva vahenimo'za ne'zanku fri'za hute'za, ne'zama nesaza zanku hake'za vano hazanagi, onke'za ran kumapi fri'naze. <sup>20</sup> Ra Anumzamoka ko, rama'a knaza e'neri'na havizantfa nehue. Narimpamo'a nevamagigeno, tumonimo'a rutane'ne. Na'ankure kagri kea ontahi'noe. Kumamofo ne'onse kantamimpine, nompinena bainati kaz-

inteti nagri vahera zamahe fri'naze. <sup>21</sup> Nagrama karagi'ma ruana maka vahe'mo'za antahi vagare'naze. Ana hu'neanagi mago vahemo'e hunora eno asunkura hunenanteno, nazeri hanavea oti'ne. Ra Anumzamoka'ma atrankeno eno nazeri havizama hia knazamofo agenkea ha' vahenimo'za nentahi'za, tusi muse hu'naze. Hagi Ra Anumzamoka'ma zamazeri haviza hugahue hunka'ma huvempama hu'nana kante antenka, ame hunka zamazeri haviza huo hu'za zamagra hu'naze. <sup>22</sup> Hagi zamagrama hu'naza kefo avu'ava zana negenka, nagrama hu'noa kumi'nire'ma nazeri haviza hankenoma tumonimo'ma natama negrige'na karagi'ma ru'noaza hunka zamagri'enena zamazeri haviza huo.

## 2

### *Ra Anumzamo'ma Israeli vahe'ma rimpa ahezamante'nea zamofo naneke*

<sup>1</sup> Saioni kumamo'a vene omase mofakna hu'neankino Ra Anumzamo'a arimpa ahenezenteno, arimpahe'zana hamponkna huno atregeno eramino Saioni kumara refite'ne. Ana knafina Ra Anumzamo'a agiama nentea trakura agesa ontahi, Israeli vahe'mo'ma ra agima eneria konaririzama'a eri mopafi atre'ne! <sup>2</sup> Ra Anumzamo'a Jekopu nagamokizmia asunkura huozmanteno, afi zagamo'ma mago zagama asgahu nakriaza huno zamaheno eri vaganereno, magore huno nonkumazmia otre eri haviza huvagare'ne. Ana nehuno tusi arimpa ahenezmanteno, ana maka Juda mopafima me'nea ranra kumatamimofo vihu kegina tapagehu atre vagare'ne. Ana maka mopane kva vahe'enena mopafi zamazeri atre vagarege'za tusi zamagazegu hu'naze. <sup>3</sup> Ra Anumzamo'a Israeli vahera tusi arimpa ahenezmanteno, maka hankave zamia eri atre'ne. Ana nehuno ha'vahe'zamimo'za ha'ma eme huzmante'naku'ma erava'oma nehzageno'ma, tamaga azanu'ma anteso huno'ma zamazama nehzana eritreno zamaza osu'ne. Teve nefafmo hagna hagna huno maka'za teno eri vagareaza huno, Jekopu nagara zamazeri havizantfa hu'ne. <sup>4</sup> Ha' vahe'mo'ma hiaza huno kevea atifi erinteno kri krarapeno, Saioni kumara hara hunte'ne. Jerusalemi kumamo'ma avesinentea vahe'a, Ra Anumzamo'a hankave'a erinteara huno zamahe fri vagare'ne. Ra Anumzamofo arimpa ahe'zamo'a, tusi'a teve nefafmo hiaza huno Jerusalemi rankumara teno eri vagare'ne. <sup>5</sup> Hagi ha' vahe'mo hiaza huno, Ra Anumzamo'a Israeli vahera ha'rezmanento maka mopa'zamia eri haviza nehuno, kini vahe nontamine hankave vihu zaminena eri haviza huvagare'ne. Anama hiazamo hige'za mofanemo'zama nehzaza hu'za maka Juda mopafima nemaniza vahe'mo'za tusi zamasunku zampi mani'neza, zavi krafa hu'naze. <sup>6</sup> Ra Anumzamo'a hozafi fugagi noma hiaza huno, mono noma'a eri tapage hutre'ne. E'ina nehuno atruma hu'za mono'ma hunentaza nona eri tapage hutre vagare'ne. Ana nehuno Saioni kumapima ne'zama kre'za nene'za musema nehzaza knane, mani fruma nehzaza Sabati knanena zamazeri zamagekanine. Ana nehuno Ra Anumzamo'a kini vahe'ene pristi vahera tusi arimpa ahenezmanteno, eri'za zamifintira zamazeri atre'ne. <sup>7</sup> Ra Anumzamo'a Agritegama kresramna vunentaza ita amefi hunemino Mono noma'anena amefi humi'ne. Ana nehuno ha' vahe zamazampi zamavarentege'za Jerusalemi kumapima kinimofo nontamima azeri agu'ma vazi'nea vihu keginaramina emeri anafa'a hu'naze. Ana nehu'za mono'ma hu knare'ma hiaza hu'za, ha'vahe'mo'za Ra Anumzamofo Mono nompi mareri'za ivimo agazamo huza tusi zamagasasa ru'naze. <sup>8</sup> Ra Anumzamo'a Jerusalemi kumamofo kuma kegina tapage hutrenigeno haviza haniegua gesa antahi'ne. Ana nehuno nofi avazuhumpi huno anteno

keteno, azama rusuteno kuma keginama eri havizama hunaku'ma nehia azana eri onamagi'neanki rusuteno, kuma keginane, manisga hu'nezama ha'ma nehaza nonena eri haviza higeke zanasunku nehuke zavi ate'na'e.  
 9 Ana higeno Jerusalemi kumamofo rankafaramina mopamo refinetegeno, kafante'ma eri rusima nehaza ainiramina, Ra Anumzamo'a rufutagi atrene. Hagi kini vahe'zamine kva vahe'zaminena ha' vahe'mo'za eme zamavare'za afete moparega vu'za kina ome hunezmantageno kasegem'o'enena fanane hu'ne. Ana nehigeno Ra Anumzamo'a ava'nagna zampina eforera huno kas-nampa vahera nanekea eme ozmasami'ne.  
 10 Hagi Jerusalemi kumapi ranra vahe'mo'za zamasunku kukena nehu'za, kugusopa kate'za zamanunte nefre'za, kea osu akohe'za mopafi mani'naze. Ana nehazage'za vene omase mofa'nema Jerusalemi kumapima nemaniza mofanemo'za mopafi kepri hu'naze.  
 11 Nagri vahe'ma knama eri'zazama nege'na, ne'onse mofavre naga'moza, hapinti ahe kuzafa hu'naza sondia vahe'mo hiaza hu'za, kumamofo kankamumpima hankavezmi omanege'zama umase emasema nehaza zama negena, zavira netogeno navumo'a pro nehigeno, tumonimo'a atane'ne. Ana nehigeno nagu'afi zamo'a marerino nanankempi titipa hu'ne.  
 12 Ne'onse mofavre naga'moza, hapinti ahe kuzafa hu'naza sondia vahe'mo hiaza hu'za, kumamofo kankamumpi mani'neza ne'zanku fri'za nehu'za, antazamimofonku hu'za ne'zane tinena tamaho hu'za nehazage'za antazamimo'za zamazampi zamavare'nage'za nefrise.  
 13 Hagi Jerusalemi kunamokagura nasunku hugantanki, na'ane hu'na kagrikura hugahue? Magora ina kuma'mo kagrama eri'nankna knazana kora eri'neane hu'na kagri'enena erinte'na kegahue? Saioni mofa'moka na'ane hu'na kazeri hankaveti nanekea hugahue? Kagrama eri'nana hazenke zamo'a, hagerimo'ma hiaza huno amefenkame antuntu huno urami'ne. Ana hu'neankino mago vahe'mo'ka kazeri onkanamregahie.  
 14 Kasnampa vahekamo'zama avanagnaza ke'none hu'zama huama'ma hu'nazana, havige hu'za kagrira regavatga hu'naze. Hagi kagrama hu'nana kumira erinte amara hu'za kasamizagenka nentahinka, ana kumimofo kinafintira atrenka fru hunka omani'nane. Anumzamofontegati eri'nona kasnampa ke hu'zama kagri'ma kasami'nazana havige hu'za kavre'za havi kampi vu'naze.  
 15 Jerusalemi kumamoka kagri tvaonte'ma enevuza kasunku zampima mani'nana zama nege'za, zamazana rupro nehu'za kiza zokago ke hunegante'za, Jerusalemi kumapima mani'naza vahe'ma nezamage'za zamagena ru'naze. Ana nehu'za amanage hu'za hu'naze. Kora ama kumamo'a knare zantfama huno konariri'ane kuma me'nege'za maka ama mopafi vahe'mo'zama nege'za muse nehu'za husgama hunte'naza kumapi rukumare? hu'za hu'naze.  
 16 Jerusalemi kumamoka maka ha' vahekamo'za sifna kea hunegante'za, zamavera aninkreki nehu'za zokago kea amanage hu'za nehaze. Amanahu knama fore hanie hutama avegama ante'nona kna meni efore higeta ofri kasefa huta mani'neta Jerusalemi kumara eri haviza nehune hu'za nehaze.  
 17 Ra Anumzamo'ma korapa'ma huno, e'ina hu'za hugahuema huno retroma hunte'nea zamo efore nehigeno, hugahuema huno'ma hu'nea nanekea eri rganere. Ana hu'neankino Jerusalemi kumamoka asunkura huoganteno, kazeri mopafi atre'ne. Ha' vaheka'a han-kave nezamino, zmatrege'za e'za, hara eme hugagatere'naze. Ana nehu'za kagrama havizama hana zankura tusi musenkase hu'naze.  
 18 Jerusalemi kumapima mani'naza vahemota Ra Anumzamofontega zavi krafagea hiho. Ana nehuta feru'ene kenage'enena zavira netenkeno, tamavunu'mo'a tinka huno eramino. Kagra amnea omaninka, zavira tevava nehugen

kavumo'a pro hino. <sup>19</sup> Kenagera otinka mani'enka, tima eri tagi treaza hunka, knazane krimpa haviza hu'zanena erinte ama hunka kazama hanigura Ra Anumzamofona asamio. Ana nehunka ne'onse mofavre nagaka'ama zamagaku'ma nehu'zama kuma kankamumpima fri'zama nehaza nagama zamazama hanigura, kazana erisga hunka Ra Anumzamofontega nunamuna huo. <sup>20</sup> Ra Anumzamoka Kagra'a vahete'ma amanahu knazama eri fore'ma nehana zana negenka kagesa antahio. Ane'mo'zama zamavesi zamavesi'ma hunezmantza mofavrezamia zamahe'zama nenazana, e'i knare nehifi? Pristi vahe'ene kasnampa vahe'enema ha' vahe'mo'zama Kagrri mono nompima mareri'zama zamahe nefri'zana, e'i knare nehifi? <sup>21</sup> Ha' vahe'mo'za kasefa vahe'ene tavava ozafaramima zamahe frizage'za, kuma kankamumpina, kugusopapi mase'naze. Nahezaveramine mofa'neramina bainati kazinteti zamahe fri'naze. Ra Anumzamoka anama krimpama ahea knafina, magore hunka ozmatre zamahe fri' vagare'nane. <sup>22</sup> Ra Anumzamoka karimpahe knama egenka ne'zama kreno neneno musema hu kna zupa vahe'ma zurunama hanke'zama azankna hunka, ha' vaheni'a zuruna hanke'za e'za maka kazigatira eme nazeri koro nehu'za hara huanter'za nagrama kase zamante'na kegavama nehua ne'onse mofavre nagan'i'ozmatre'za ana maka zamahe hana hu'naze.

### 3

#### *Israeli vahe'mo'za zavi'ma tete'za henkama musema hanaza zamofo naneke*

<sup>1</sup> Ra Anumzamo'a arimpa ahenanteno, knaza namino nazeri haviza hige'na, tusi natama kria zana nagra ke'noe. <sup>2</sup> Ana nehuno narotago higena, hanimpi tavira omane'nea kante vu'noe. <sup>3</sup> Tamagerfa huno maka zupa nagrike'za nazeri haviza huvava huno nevuno, mago'a vahera anara osu'ne. <sup>4</sup> Ama navufga nazeri navesra nehuno, navufga nazeri haviza nehuno zaferinani'aramina ruhantagi'ne. <sup>5</sup> Knaza atregeno eno eme nazeri kanegigeno, hazenke zamo'a maka kaziga nazeri kagi'ne. <sup>6</sup> Korapa'ma fri'za vu'naza vahe'mo'zama hanimpima mani'nazaza huno, natrege'na hanimpi mani'noe. <sup>7</sup> Tusi'a vihu kegina huno nazeri agu'atege'na, anampintira atre'na atiorami'noe. Ana nehuno seni nofiteti nagi nazampina kinarente'ne. <sup>8</sup> Nazama hinogu'ma Anumzamofontega nunamuna hu'na antahige'noanagi, krafa keni'a eri atre'ne. <sup>9</sup> Kama vunaku'ma hua kampina Anumzamo'a ra have ome anteno rehiza nehuno, vunaku'ma huankana eri kazakinkazoko hige'na haviza hu'nea kante vu'noe. <sup>10</sup> Beamo'o laionimo'o afi zaga azerinaku kafo anteno maniaza huno, Ra Anumzamo'a nazeri haviza hunaku kafonteno mani'neno, <sup>11</sup> navazuhi kanti atreno, laionimo nehiaza huno navufga tagnataganu vaziteno, natrege'na vahe'mo'za eme naza osige'na mase'noe. <sup>12</sup> Anumzamo'a keve'a atifi erinteteno, avazuhi krarapeno nahenaku krinkenke hu'ne. <sup>13</sup> Ana huteno keve'areti tumoni'a ahetane'ne. <sup>14</sup> Maka nagri vahe'mo'zama nenage'za tusi nagiza re'naze. Ana nehu'za amnea omani'za maka zupa zagame nehu'za ana zagamepi kiza zokago ke hunante vava hu'naze. <sup>15</sup> Rama'a knazanteti nagu'afina antevi'neteno, aka trazanteti tro hu'naza ti namige'na ne'noe. <sup>16</sup> Anumzamo'a ne'onse haverami nagipina eri hatrenteg'e na navera ani futagi'noe. Ana nehugenno kugusopa hatreno nagofetu ante'ne. <sup>17</sup> Arimpa fruma huno mani'zana nomanizanifina omanegeno, knare huno musema huno mani'zankura nagekani'noe. <sup>18</sup> Ana hige'na amanage hu'noe, hanaveni'a omanegeno,

Ra Anumzamofonkuma amuhama nehuazana huonantegahie hu'na antahi'noe.

<sup>19</sup> Hagi nagrama ranknazama eri'noa zamo'ene vahe moparegama kraga vahe kna'ma hu'na vano vanoma hu'noa zamo'enena, mago aka tima neazama hu'noa zana nagera okani'ne. <sup>20</sup> Maka zupa ana zanku'ma nagesa nentahugeno'a, nagu'amo'a kna nehigeno havizantfa hu'ne. <sup>21</sup> E'ina hu'neanagi mago zanku nagesa nentahi'na, amuhara nehue. <sup>22</sup> Ra Anumzamo'ma avesiranteno knare'ma hunerantea avesi'zamo'a, tamagerfa huno vagaore mevava nehie. Na'ankure agri asunkuzamo'a vagaore meno nevie. <sup>23</sup> Maka nanterana Anumzamoka kagri kasunku zamo'a egasefa huvava nehiankino, hugahuema hunka hu'nana zama nehana kavukvazamo'a tusi zankerfa me'ne. <sup>24</sup> Nagra'ma nagesa antahuana, Agra nagri Ra Anumza mani'negu nagra Agriteke amuhara huntegahue. <sup>25</sup> Ra Anumzamo'ma agrite'ma amuha'ma nehu'za, zamagu'reti'ma hu'za agriku'ma nehakaza vhahera zamazeri knare nehie. <sup>26</sup> Akoheno avega anteno mani'nenigeno Ra Anumzamo'ma ete agu'vazino avre avu'ava zamo'a knare hu'ne. <sup>27</sup> Nahezavema mani'nesire'ma knazama eri'zamo'a, e'i knare hu'ne. <sup>28</sup> Ra Anumzamo'ma mago vahe'ma knazama neminigeno'a, anazankura keaga osu agraku akoheno manino. <sup>29</sup> Anama nehanigeno keaga osu agra avufgama anteramino kugusopafima mani'nesigeno, negeno azama hunaku'ma hanuno'a aza hugahie. <sup>30</sup> Hagi mago vahemo'ma amer-agente'ma rupro huminaku'ma nehanigeno'a, amne ante vivi hu'nesnigeno rupro humina, agra amne agazea erigahie. <sup>31</sup> Na'ankure Ra Anumzamo'ma mago vhahera amagena humi vava huno ovugahie. <sup>32</sup> Ra Anumzamo'ma vhahera knazana amigahianagi, Agra vaga ore mevava avesi zama'agu nentahino, avesinezmanteno knare avu'ava hunezmante. <sup>33</sup> Ra Anumzamo'ma knazama atregeno eno vahe'ma zamazeri havizama nehana, Agra'a anaza hunakura nosie. <sup>34</sup> Hanki vahe'mo'zama kina vahe'ma zamazeri havizama huge, <sup>35</sup> mago vahe'mo'ma Marerisa Anumzamofo avure'ma fatgo avu'ava'ma nehanigeno'ma, haviza hane huno'ma huntege, <sup>36</sup> keagare'ma otu zupama havige hu'za zamazeri havizama nehaza avu'ava zanku'enena Ra Anumzamo'ma ave'nosie. <sup>37</sup> Ra Anumzamo'ma osu'nenia nanekerera, iza agra'a avesitera mago zana eri forera hugahie? <sup>38</sup> Ra Anumzana Marerisa Anumzamo'ma Agra agipinti huama huno, knare zane havi zanena forera huo huno higeno forera nehie. <sup>39</sup> Ofri kasefa'ma huno mani'nesnia vahe'mo'a, agri kumi'mofo nonama huno azeri havizama hania zankura ke hakarea osino. <sup>40</sup> Hagi tagrama nehuna tavutavara rezaganeta ke so'e huteta, ana tavutva zampintira ete rukrahe huta Ra Anumzamofontega esanune. <sup>41</sup> Hanki tagu'reti huta tazana erisga ne-huta, monafinkama mani'nea Anumzamofontega amanage huta nunamuna hugahune, <sup>42</sup> tagra kumi huta kagrira tamefi hugamunkenka, kumitia atre orante'nane. <sup>43</sup> Kagrira karimpa ahe'zamo'a avitegenka, kasunkura hunka oratrenka tavaririnka tahe fri'nane. <sup>44</sup> Kagrira tusi hampomo refitegenka mani'nanketa, nunamuna hu'nonanagi tagri nunamumo'a kagritera ovu'ne. <sup>45</sup> Tagrira tatranketa vahe moparega vano nehunke'za, amne zama hiazza hu'za tage so'ea osu'naze. <sup>46</sup> Maka ha' vahetimo'za huhaviza hurante'naze. <sup>47</sup> Anama hazageta koro hu'none. Na'ankure tagesa ontahuna hazenke zamo eme tazeri havizantfa hu'ne. <sup>48</sup> Knazamo'ma eno nagri vahe'ma eme zamazeri havizama hiazama negogeno'a, navunumo'a tima eviankna huno, <sup>49</sup> navufintira navunura hu vava nehie. <sup>50</sup> Ana zavira ontagane ate

vava nehanugen, Ra Anumzamo'a monafinti kefenka ateno nagegahie. <sup>51</sup> Jerusalemi rankumanifi a'neneramima, ha' vahe'mo'zama eme zamaz-eri havizama hazazama negogeno'a, tumonimo'a netanegeno nagu'amo'a havizantfa hu'ne. <sup>52</sup> Nagra mago havizana osu'noanagi, ha' vahe'nimo'za namama ahenakuma rotago'ma hazaza hu'za nagene re'naze. <sup>53</sup> Zamagra nahe'za nagrira kerifi eri nevazi'za, ana keriguna havenu refite'naze. <sup>54</sup> Ana hazageno timo nazeri nakari'aza higena, nagra frigahue hu'na antahi'noe. <sup>55</sup> Ana kerifima mani'nofintira Ra Anumzamoka kagra naza huogu kagri kagia ahe'na nunamuna nehue. <sup>56</sup> Hagi Kagra nunamu keni'a nentahinanki, kagesa renkani oro. <sup>57</sup> Hagi nazama huogu'ma kema hugenka Kagra nagrite erava'o nehunka, korora osuo hunka nasami'nane. <sup>58</sup> Ra Anumzamoka keagani'a refko hunka nentahinka nagu'vazinke'na knare hu'na mani'noe. <sup>59</sup> Ra Anumzamoka nagri'ma hazenkema eme nami'naza vahera hago kenka antahinka hu'nane. Ana hu'nananki nagri kaziga antenka agra fatgo hu'ne hunka ana vahera keaga huzmanto. <sup>60</sup> Ana vahe'mo'zama nagri'ma nazeri havizama hunaku'ma, maka keagama retro'ma hu'nazana hago ke'nane.

<sup>61</sup> Hagi ana vahe'mo'zama kiza zokago kema hunenante'za, nagri'ma nazeri haviza hu kema anakiza nanekea Ra Anumzamoka hago antahi'nane. <sup>62</sup> Ha' vaheni'amo'za maka zupa, nagri'ma nazeri havizama hanaza nanekea, zamagira magopi ante'neza sumisumi hu'za keaga huvava nehaze. <sup>63</sup> Manizafina zagamepi erinte'za kiza zokago zagame ke hunante'naze. <sup>64</sup> Ra Anumzamoka ana vahe'mo'zama hu'naza havi zamavu'zamava negenka, mizana zamitere hugahane. <sup>65</sup> Ana vahe'mokizmi zamagu'a eri han-kavetige'za, sifnafi maniho. <sup>66</sup> Ana vahera Kagra krimpa ahenezmantenka, zamarotago hunka zamahe hana huge'za, Ra Anumzamoka mopamofo agofetura omanitfa hiho.

## 4

### *Anumzamofo arimpa ahe'zamo eri'za eri'nea naneke*

<sup>1</sup> Kora mago zamo'a okamaregeno knare zantfa hu'nea golimo'agi, menina ome haviza higeno masa zama'a omane'ne. Ana nehigeno Ra Mono nompima ruotage'ma hu'nefima mizama'amo'ma marerisa hav-eramima ante'naza haveramina, kumamofo ne'onse kantamimpina ru-panani hutre'naze. <sup>2</sup> Jerusalemi kumapi vahe'mo'za kora zago'amo'ma marerisa golimo'ma hiazza hu'za knare zantfa hu'nazanagi, menina havizantfa hu'za vahe'mo'ma azampinti tro hu'nea mopa kavogna hu'naze. <sup>3</sup> Afi kramo'a anenta'amofona antahinemino, amina amino azeri so'ea ne-hie. Hianagi nagri vahe'mo'za kama kokampi ostritsie nehaza mananimo anenta'agu antahi nomino amefi humiazza hu'za mofavre naga'zamia za-mefi hunezamize. <sup>4</sup> Ne'one mofavre naga'zamimo'za amima nesaza zana omanegeno, zmanankemo'a hagage nehigeno, zamagefu'namo'a marerino zamagi'mofa zamavagu'nafafi akamare'ne. Mofavre naga'mo'za ne'zanku memea hu'nazanagi, mago vahe'mo'e hunora ne'zana ozami'ne. <sup>5</sup> Feno vahe'mo'za kora mizama'amo marerifa ne'za ne'nazanagi, menina ku-mamofo ne'onse kantamimpi mani'neza zamagaku nehaze. Ana nehu'za kora knare'nare huno avasase'amoke hu'nea kukanama antani'za vanoma hu'naza vahe'mo'za menina kazokzo eriza vahe mani'naze. <sup>6</sup> Nagri vahe'ma Jerusalemi kumapima nemaniza vahe'mo'zama hu'naza kefo za-mavu'zamava zamo'a, Sodomu rankumapima nemaniza vahe'mo'zama ne-hazageno'ma, Ra Anumzamo'ma ame huno eri haviza higeno'ma mago

vahe'mo'e huno'ma zamazama osu'neankna kefo avu'vazana agatere'ne.

<sup>7</sup> Kora Jerusalemi kumapi kva vahe'mofo zamavufagamo'a aisigna huno efenentake nehigeno, amirinkna huno efenentake nehigeno, hankave vahe mani'nageno, zamavufagamo'a masanentake huno mizama'amo marerisa havemofonku'ma Safirie nehaza havemofo avuvgaregati'ma rumsa nehiaza hu'ne. <sup>8</sup> Hianagi menina zamavufagamo'a hokonke hu'ne. Ana hu'nege'za kampima vanoma nehazage'za zamage amara osu'naze. Zafamo hagage hiaza huno zamavufagamo'a tro azotagna huno harari hige'za, zaferinage hu'naze. <sup>9</sup> Bainati kazinteti'ma zamahe fri'naza vahera knare hu'za fri'nazanagi, ne'zanku'ma hu'za friza vahe'mokizmi fri'zamo'a havizantfa hu'ne. Na'ankure ne'zanku'ma hu'za friza vahe'mo'za, za'zate zamagakura hazageno, zamavufagamo'a tro azotagna huno harari huno hokonke hige'za fri'naze. <sup>10</sup> A'nanemo'za mofavre naga zamigura tusi zamasunku huzmante'naze. Hianagi ana mofavre naga'ma frizage'za, ana a'nanemo'za zamagra'a ana mofavrezmia kre'za ne'naze. E'inahu zama fore'ma hu'neana, ha' vahe'mo'zama nagri vahe'ma ha'ma eme huzmante'za zamazeri havizama hu'naza knafi anazana fore hu'ne. <sup>11</sup> Ra Anumzamofona arimpa ahe'zamo'a tusiza higeno, arimpama ahe'zana eri kaha huno, Jerusalemi kumara teve tagintegeno teno uramino kuma'ma retru re'zama kinaza haveramina tefaragu vazirami'ne. <sup>12</sup> Ama mopafi kini vahe'mo'zane, ama mopafi vahe'mo'zama antahi'zana, ha' vahe'mo'za Jerusalemi kuma keginamofo kafana tapage hu'za kumapina uofregahaze hu'za antahi'nazane. <sup>13</sup> Hianagi pristi vahe'mo'zane kasnampa vahe'mo'zama Jerusalemi kumapima nemaniza fatgo vahe'ma zamahe fri'zama korama eri tagitre'naza kumiku huno Anumzamo'a ha' vahera zamatrege'za e'za, Jerusalemi kumara eri haviza hu'naze. <sup>14</sup> Ana pristi vahetamine kasnampa vahemo'zanena zamavu asuhu vahekna hu'za, kumamofo ne'onse kantamimpi eri'eri hu'za vano nehaze. Ana vahera koromo zamazeri pahenage hu'nege'za, vahe'mo'zama kukena zamire'ma avako'ma hu'zankura tusi koro hu'naze. <sup>15</sup> Vahemo'za ana vahekura kezati'za amanage hu'naze. Tamagra agru osu'nazanki tagritera erava'oa osuta atreta viho hu'naze. Anagema hazage'za pristi vahe'ene kasnampa vahe'mo'za atre'za vu'za ru moparega umani'naze. Hianagi ana mopafi vahemo'zanena hu'za, ama mopafina omanigahazanki atreta viho hu'za hu'naze. <sup>16</sup> Ra Anumzamo agra'a zamazeri panini hige'za vu'za e'za hazageno, ana vahera avua anteno kegava huozmante'ne. Ana higeno pristi vahe'ene ranra vahetaminena vahe'mo'za zamavesi nozamante'za zamagesga osu'naze. <sup>17</sup> Tagri'ma eme taza hanaza vahekku kantega tavu anteteta mani'nonkeno tavumo'a tatagri'ne. Za'za noma kinte'nompi marerita mani'neta mago'a moparegati vahe'mo'zama eme tazama hanagu tavua anteteta mani'nonanagi, eme tagura ovazi'naze. <sup>18</sup> Neone kampima vanoma hunaku'ma hu'naza ha' vahetimo'za zamavua tagrite antete'za manigagenta, kana vano osu'none. Tagrama knama eritama havizama hanuna knamo'a hago egofta hu'ne. Ana hu'neankita osi'a kna manisanunkeno, havizama hanuna knamo'a egahie. <sup>19</sup> Ha' vahetimo'za tahenaku'ma tagenema re'nazana, tumpamo'ma ame huno hareno viaza hu'za, agonaramimpina tahe'za tagenea nere'za, ka'ma kokampina tahenaku ome kafo ante'za mani'naze. <sup>20</sup> Ra Anumzamo'ma masavema frenteno azerinte ruotage'ma hu'nea kini ne'mo, kegava hurante'nigeta ru vahe kumapina manigahune huta hu'none. Hianagi ha' vahe'mo'za azeri'naze. <sup>21</sup> Idomu vahe'ma Usi

mopafima nemaniza vahe'mota, Jerusalemi kuma'mo'ma havizama hia zankura musenkase nehaze. Hianagi Anumzamofo arimpa ahe'zamo'a, kapufi waini ti meaza hu'neankino, tamagrite'enena eri tagitresnigeta, neneta neginagi huta kukanatamia hatetre vagaregahaze. <sup>22</sup> Saioni kumamoka kefo avu'ava'ma hankeno Ra Anumzamo'ma ana kumimofo nonama huno kazeri havizama hu'nea zamo'a hago vagaregahie. Ana hu'neankino Saioni vahe'ma kinama ome hu'naza vhahera za'zatera tamatre'nigeta kinafina omanigahaze. Hianagi Idomu kumamoka, Ra Anumzamo'a kumika'ane kefo zanka'anena erinte ama huno, ana kumi'mofo nona'a kagri'enena knazana kamigahie.

## 5

### *Anumzamofo asunku zanku'ma hu nunamune*

<sup>1</sup> Ra Anumzamoka menima tagrite'ma fore'ma nehia knazamo'ma tazeri havizama nehitama tusi'a tagazema e'nerunana neragenka antahiramio. <sup>2</sup> Onke'nona vahe'mo'za e'za tagri mopa eme enerizage'za, ru moparegati vahe'mo'za e'za tagri nontamina emeri nafa'a hu'za mani'naze. <sup>3</sup> Tafahe'za omani megusa mofavregna huta tagra nemanunke'za, trerahe'za kento a'nanegna hu'za mani'naze. <sup>4</sup> Tima nenompi, tevema enerunana zagoretike'za mizaseta eri'none. <sup>5</sup> Ha' vahetimo'za rama'a zampi tazeri haviza huvava nehazageta mani fru huta omani'none. <sup>6</sup> Tagri'ma ne'zama tamisnageta nesunku huta Isipi vahe'ene, Asiria vahe'mokizmi zmagorga mani'none. <sup>7</sup> Tagri tagehe'za kumi hute'za ko fri'za menina omani'naze. Ana hu'nazageta menina zamagri kumi'mofo knazama'a e'nerune. <sup>8</sup> Tagrira kazokzo eri'za vahe'mo'za kegava hurantazageta mani'nonkeno, mago vahe'mo'e huno ana vahe'mokizmi hankefintira tagura vazino taza osu'ne. <sup>9</sup> Hagi nezanku'ma vuta eta huta hakeku'ma hunana, ka'ma kokampina ha' vahe'mo'za bainati kazinteti tahe frinaku kafonte'za mani'naze. <sup>10</sup> Tusi taga'matea zamo higeno, tavufgangamo'a sikonima negraza avenimo'ma teve ha'ma hiaza huno tusi amuho hu'ne. <sup>11</sup> Saioni kumapi a'nanea zamagra zamazeri haviza nehu'za, Juda mopafima me'nea ranra kumatamimpima nemaniza vene omase mofa'nea ha' vahe'mo'za eme zamazeri haviza hu'naze. <sup>12</sup> Kva vahetia zamazeri'za zamazante nofi anakite'za, zafare hanti'naze. Ana nehu'za ranra vahetia so'e avu'ava zana hunozmante'za, zamazeri zamagaze hu'naze. <sup>13</sup> Hagi nehazave nagara huzmantazage'za witima refuzafunepaza have rezahe nehazage'za, mofavre nagatia tusinasi teverami hare'za kofizmantazage'za, knazamigu nehu'za eri'naze. <sup>14</sup> Ranra vahetamimo'za kuma kafante'ma nemaniza zana atre'za nevazage'za, nahezave naga'mo'za zavena ahe'za zagamera osu'ne. <sup>15</sup> Muse zagame'ma nehuta avoma nehagona zana atreta, zavi zagame nehuta tasuzampi mani'none. <sup>16</sup> Rantagina e'neruna zamo'ma, tasenire'ma kini fetorikna'ma hu'nea zamo'a mopafi evuramigeta, tasuzampi mani'none. Anama hu'neana tagrama hu'nona kumi'mo higeno anara hu'ne! <sup>17</sup> Anazama fore'ma nehigeno'a, tarimpamo'a havizantfa nehigeno, zavi'ma atonazamo higeno tavumipamo'a evuno hanintiri higeta, tavua keso'e osu'none. <sup>18</sup> Saioni ran kumapina vhahera omanino atreno vuno eno higeno, ka'ma koka fore higeno anampina afi kraramimozage mani'neza vano hu'naze. <sup>19</sup> Hianagi Ra Anumzamoka kagrake kinia mani'nenga, henkama fore hu'anante nante'ma hu'za vanaza vahetera

manivava hunka vugahane. <sup>20</sup> Ra Anumzamoka na'a hu'negenka za'zatera kamefira huneraminka antahi noramine? <sup>21</sup> Ra Anumzamoka menina ete tazeri knare hananketa knare huta nemanisunkenka, knatia eri kasefa hananketa, ko'ma knare hutama mani'nonaza huta manisnune. <sup>22</sup> Hifi tagrira tusi karimpa herantenka kamefi huneraminka, kavesra hurante vaganerampi?

## Izikiel Izikieli Kre'nea Avontafere

### *Izikieli'ma 4'a zagaramima ke'nea naneke*

<sup>1</sup> Hagi 30ma hia kafumofona namba 4 ikamofona 5fugnare kina vahzagane Kebar tinkenare Babiloni mani'nogeno, monamo'a anagige'na ava'nagna zampi Anumzamofona ke'noe. <sup>2</sup> Hagi ana 5fu kna zupa kini ne' Jehoiakinima kinama huno mani'nea kafumo'a 5fu'a kafu hu'ne. <sup>3</sup> Hagi nagra Busi nemofo pristi ne' Izikeli'na Babiloni vahe mopafi Kebar tinte mani'nogeno Ra Anumzamo'a keaga nenasamino, azana nagrite ante'ne.

<sup>4</sup> Hagi negogeno noti kazigati tusi'a ununko atuno ne-egeno, hampomo'ene kopsinamo'enena tusiza nehigeno, ana hampona tusi hankavenentake masamo rugagintegeno, amu'nompina teve neregeno, ainima tevefima kre fizoma higeno koranentake'ma hiaza nehigeno tevemo'a ruragareno vuno eno hu'ne. <sup>5</sup> Hagi ana tevemofo amu'nompina 4'a kasefa'ma hu'za mani'naza zagarami mani'naze. Hagi ana 4'a zagama zamagoana, vahe kna hazageno, <sup>6</sup> mago magomofona 4'a avugosagi, 4'a agekonagi huno metere hu'ne. <sup>7</sup> Hagi zamagiamo'a fatgo higeno, zamaga agusamo'a bulimakao afu anentamofo agiamo'ma hiaza higeno, ana zamaga agusamo'a bronsi eri masave huntazageno masanentake huno tampretampre hiankna hu'ne. <sup>8</sup> Hagi ana 4'a zagaramimofona 4'a kaziga zamageko'namofo henka kaziga, vahe aza huntetere hu'ne. Ana higeno magoke magokemofona 4'a avugosane, agekonane metere higeno, <sup>9</sup> zamagekonama rufanara'ma hazageno'a mago'mofo ageko'namo'a mago'mofo agekona ome avako hutere hu'ne. Hagi kama vazana mago mago'mo'a rukrahera osu vu fatgo hu'naze. <sup>10</sup> Hagi ana 4'a zagaramimofo zamavugosamo'a amanahu hu'ne, avuga kaziga vahe avugosa huntogeno, tamaga kaziga laioni avugosa huntogeno, hoga kaziga ve bulimakao afu'mofo avugosa huntogeno, zamefira tumpamofo avugosa hunte'ne. <sup>11</sup> Zamavugosamo'a e'ina hu'ne. Hagi mago mago zagamofona 4'a ageko'na huntetere hu'neankino, tare zamageko'namo'rufanara higeno, magomofo agekonamo'a magomofo agekonare ome avako hutere hu'ne. Hagi tare zamageko'nanura zamavufaga eri fraki'naze. <sup>12</sup> Hagi mago magomo'a avugosama huntenerega vu fatgo nehigeno, Avamumo'ma vuoma hirega rukrahera osu ana zagaramimo'za nevaze. <sup>13</sup> Hagi ana zagaramimofo amu'nozmifina tevema nereazamo'a, tankanu'zagna huge, tosi tavikna zamo vuge ege hu'ne. Hagi ana tevemo'a tusiza huno hagna hagna huno remsa nehigeno, ana tevefintira kopsinamo'a rutrage huno vuno eno hu'ne. <sup>14</sup> Hagi ana tevefina kasefa'ma hu'zama mani'naza zagamo'za kopsinamo'ma hiaza hu'za trage hu'za vuge'ege hu'naze. <sup>15</sup> Hagi ana zagaramima zamagoana, mago mago zagamofo asoparega mopafina mago mago wili metere higeno, ana makara 4'a me'nege'na ke'noe. <sup>16</sup> Hagi ana wilimo'za amanahu hu'naze, zamavufaga'amo'a berilie nehaza havereti'ma nehiaza huno ana wilimo'za mago zanke hu'za marave marave nehazageno, mago mago wilimo agu'afina mago wilimo rugeka huno metere hu'ne. <sup>17</sup> Hagi ana zagaramimo'za 4'a kaziga zamavugosa hunte'nazanki'za, vunaku'ma hazankazigama nevu'za, rukrahera osu amne vu fatgo hu'naze.

**18** Hagi ana wiliramimofoma eri koravema hunte'nea ainiramimo'a ra huno za'za hu'negeno rama'a avurgaramimo megagi'ne. **19** Hagi kasefa'ma hu'za mani'naza zagamo'zama kama nevazageno'a, ana wilimo'za magoka vuge, haresgama hu'za marerizage'za zamagranena ana nehaze. **20** Ina kazigoma avamu'mo'ma virega nevazageno, wilimo'zanena vu'naze. Na'ankure kasefa'ma huza mani'naza zagaramimokizmi avamu'mo'a ana wiliramimpina mani'ne. **21** Hagi ana zagaramimo'zama nevazageno'a, ana wiliramimo'za nevazageno, ome otizage'za ome oneti'za, haresgama hazage'za, zamagranena magoka ana zanke huza haressa hu'naze. Na'ankure kasefa'ma hu'za mani'naza zagaramimokizmi avamu'mo'a, ana wiliramimpi mani'ne. **22** Hagi ana zagaramimofo zamasenirega anagamu kankamumpina aisire'ma zagema rentegeno'ma rumarave nehiaza huno rumsa huvagare'ne. **23** Hagi fenkama kazigama me'nea kankamumpina ana zagamo'za tare zamagekona rutare'za mago'mofo agekonamo'a magomofo agekonare avako hutere nehazageno, tare zamagekonanura zamavufaga refitetera hu'naze. **24** Hagi ana zagamo'za hare'zama nevazageno'a zamagekonamofo zamagasasamo'a rama'a timofo agasasagna nehigeno, Hankavenentake Anumzamofo agerumo'ma nehiankna nehigeno, rama'a sondia vahetmimofo zmagasasankna nehigena antahi'noe. Hagi kaza'ma osu uomaneti'za, zamagekona atrazageno urami'ne. **25** Hagi zamagekona atrazageno uramige'zama o'matizageno'a, anagamu zamasenirega kankamumpinti mago ageru aru'ne. **26** Hagi ana zagaramimofo zamasenirega anagamu kankamumpina safie nehaza havereti tro hu'naza kini tra me'ankna higeno, ana tratera vahem'a maniaza hu'nege'na ke'noe. **27** Hagi ana vahemofona afafafinti'ma mareri anagate'nea avufgamo'a, tefi'zoma hu'nea ainireti'ma hiaza huno rumsa hugagi'ne. Hagi afafafinti'ma mefenkamuma te'nea avufgamo'a tevenefa kna higeno, tusi'a masamo masanentake huno ana nera rugaginte'ne. **28** Ana ne'mofoma rugagima ante'nea masazamo'a, ko'ma ru knafima furagenamo'ma rugagintankna hu'ne. Ra Anumzamofo hanavemofo masamo e'inara hu'ne. Hagi ana zama nege'na, navugosaregati mopafi masene'na nentahugenno mago vahem'o nanekea hu'ne.

## 2

### Ra Anumzamo'ma Izikieli kema higeno kasnampa eri'zama eri'nea naneke

**1** Ra Anumzamo'a amanage huno nasami'ne, Vahem'ofo mofavremoka, otinege'na nanekea kasmi'neno. **2** Hagi anagema nehigeno'a Avamumo'a nagu'afi efreno nazeri otige'na, otinena nanekema nasamiana antahi'noe. **3** Hagi Agra amanage hu'ne, Vahem'ofo mofavremoka, Nagra Israeli vahetega hunegantoe, keontahi kumapi vahem'a ha'ma renante'naza vahetega hunegantoe. Zamagrane zamafahe'mozanena ke'ni'a rutrageme e'za menina ama knarerera ehanatize. **4** Hagi zamagu'amo'a havegna huno hankavetigeno, zamagu'a rukrahe osu vahetega hunegantoanki, amanage hunka ome zamasamio, Ra Anumzana Hankavenentake Anumzamo'a amanage nehie. **5** Hagi anankea antahisazo ontahisazo kasnampa nera amu'nontifi eman'i'nenohu'neane hu'za zamagra ke'za antahi'za hugahaze. Na'ankure zamagra keontahi vahem'a mani'naze. **6** Hagi vahem'ofo mofavremoka ave'ave' trazampine segintaveramimofo amu'nompi vano hiankna hugahananki, kagra zamagrik'uene kezmigura korora osuo. Na'ankure zamagra keontahi vahem'a mani'naze. **7** Hagi ana vahem'oza kea

antahisazo ontahisazo Nagri' nanekea eri ama hunka zamasnio. Na'ankure zamagra keontahi vahe mani'naze. <sup>8</sup> Hianagi vahe'mofo mofavremoka kema kasaminua kea antahio. E'i ana vahe'mo'zama nehazaza hunka kea ontahisanki, kagira aka hunka amama kami'naku'ma nehua zana no. <sup>9</sup> Anage hige'na negogeno azana rusute namigeno, ana azampina avonkre'za regazarinte'naza avontafe me'nege'na ke'noe. <sup>10</sup> Hagi ana avontafera eri rupuma hige'nama ke'noana, ana avontafemofo avugane amiganena vahe'mo'zama zmasunku'ma hu keagane, zavi krafagema hu keagane, hazenke zamofo keagane krente'naze.

### 3

#### *Ra Anumzamo'ma Izikelima eri'za kema hunte'nea naneke*

<sup>1</sup> Anante Ra Anumzamo'a nasamino, Vahe'mofo mofavremoka kavugama regazarinte avontafema me'neana erinka netenka, vunka Israeli vhara ome zamasamio. <sup>2</sup> Anagema hige'na nagira aka hugeno, ana avontafera namige'na ne'noe. <sup>3</sup> Ana avontafe'ma nenogeno'a amanage huno nasmi'ne, vahe'mofo mofavremoka amama negamua avontafera negamu hugeno kagu'afina aviteno meno. Hige'na ana avontafe'ma nenogeno'a, nagitera haga'amo'a tumerinkna hu'ne. <sup>4</sup> Ana higeno, Ra Anumzamo'a anage huno nasami'ne, vahe'mofo mofavremoka menina vunka Israeli vhara nanekeni'a ome zamasamio. <sup>5</sup> Hagi amama hunegantoana ru zamageru'ma neraza vhahetega hugantegi, zamagerumo'ma amuhoma hu'nea zamageru'ma neraza vhahetega hugantegera nosuanki, Israeli vhahetega hunegantoe. <sup>6</sup> E'i ana Israeli vhara rama'a hu'za ru zmageru ru zamageru norazankinka, zamageru'ma antahi'amo'a amuhoa osu'nea vhahetega hunegantoe. Tamage hunki e'inahu vhahetegama hugantoresina keka'a antahizasine. <sup>7</sup> Hianagi Israeli vahe'mo'za keka'a ontahigahaze. Na'ankure zamagra Nagri kema antahizankura, zamavesra nehianki'za kagri kema antahizankura zamavesra hugahie. Tamage huno maka Israeli vahe'mofo zamagu'amo'a hankavetino havegna hu'ne. <sup>8</sup> Hianagi menina zamagri zamagu'amo'ma hankavetiankna hu'na kagri kagu'anena kazeri hankaveti'nena zamagrikura zamagorora osugahane. <sup>9</sup> Zamagra keontahi vahe mani'nazanagi, kagrira hankavenentake daimoni havegna hu'na kaz-eri hankavetisugenka, ana vhahetaminkura zamagorora huge, kahirahikura osugahane. <sup>10</sup> Mago'ane amanage huno nasmi'ne, Vahe'mofo mofavremoka, nanekema kasmuana antahi so'e nehunka, maka nanekema kasmuana kagu'afi erinto. <sup>11</sup> Hagi vhahetega vunka, hanavenentake Ra Anumzana, Agra Anumzamo'a amanage hie hunka ome zamasamio. Ana nanekea antahisazo ontahisazo amne ome huama hunka zamasnio. <sup>12</sup> Hagi anante Avamu'mo'a navresga nehige'na nentahugeno, namefitira tusi'a agasasa nerifinti amanage hu'ne, Ra Anumzamofona kuma'afi himamu masa'agura agia ahentesga hugahaze. <sup>13</sup> Hagi e'i ana agasasana kasefa'ma hu'za mani'naza zagaramimofo zamagekonamofo agasasane, tava'ozmirema meterema hu'nea wilimofo agasasa antahi'noe. <sup>14</sup> Hagi Avamumo'a navresga huno navareno nevige'na, tusi narimpagna nehu'na vu'noe. Hianagi Ra Anumzamo'a hankavenentake azana nagofetu anteno nazeri'ne. <sup>15</sup> Ana higena Juda vhahetmima mani'naza kumate Kebab timofo tava'onte Tel-abibi e'noe. Hagi narimpamo'a tusi kna nehige'na ana kumatera ana kina vhahetaminena 7ni'a zagegna mani'noe.

*Israeli vahe'mo'zama kegavama hu'za mani'nazeguma hu'nea naneke  
(Izikiel 33:1-9)*

<sup>16</sup> Hagi 7ni'a knama evutegeno'a Ra Anumzamo'a amanage huno nasmi'ne, <sup>17</sup> Vahe'mofo mofavremoka, kagrira Israeli vahete kavu antenka mani'eneka kegava huo hu'na kazeri otuanki, amama kasminua nanekea antahitenka Nagri nagira erinka Israeli vahera koro kea zamasamio. <sup>18</sup> Hagi kefo avu'ava'ma nehia vaheku'ma hu'na, tamage hunka frigahane hu'nama hanugenkama vunka ana vahe'ma ana koro ke'ma ome osamige, vunka avumro ome antenka ana kefo avu'ava zama'a azeri fatgo osnankenoma frisiana, agri korankumira kagra erigahane. <sup>19</sup> Hianagi kefo avu'ava'ma nehia vahe'ma koro kema nesamisankena ana kema ontahino, agu'ama rukrahe osuno, kazigazi huno kumi avu'ava'ma nehuno ufrisiana, kagra'a kagu vazigahanankino, agri korankumimo'a kagriteria omegahie. <sup>20</sup> Hagi menima fatgo avu'ava'ma nehia vahe'mo'ma fatgo avu'ava'ma atreno rukrahe huno kefo avu'ava'ma hanige'na, kama vanoma nehfina tanafa hu'zama Nagrama antesugeno'a agra frigahie. Na'ankure kagra koro kea osamisankeno frigahiankino, fatgo avu'avazama hu'nea zankura nagesa ontahigahue. Hianagi ana vahe'mofo korankumira kagra erigahane. <sup>21</sup> Hagi kagrama fatgo avu'ava'ma nehia vahe'ma kumira osuo hunka koro kema huntesanke'noma kumi'ma osniana, agra ofri amne manigahie. Na'ankure agra koro kema asmi'nanana antahino, agra'a agu vazi'neankino agri korankumi'mo'a kagriteria omegahie.

<sup>22</sup> Hagi anante Ra Anumzamo'a azana nagrite anteno amanage hu'ne, otinka agupofi vuge'na anantega nanekea ome kasmi'neno huno hu'ne. <sup>23</sup> Anage hige'na ot'i'na aguporega vu'na ome koana, Kebar tinkenare'ma kenoankna huno Ra Anumzamofona hankavenentake masamo'a atrureno ot'i'nege'na nege'na, navugosaregati mopafi mase'noe. <sup>24</sup> Hianagi Avamu'amo nagu'afi efreno nazeri otige'na otugenno amanage huno nasmi'ne, nonka'afi vunka agu'ati kafana omeriginka manio. <sup>25</sup> Hagi vahe'mofo mofavremoka ko, kagrira nofi'nuti anaki kantenagenka ana vahe kevufina ovugahane. <sup>26</sup> Hagi kagrira kagefuno kavagunafare eri kamarentanena kefo avu'ava'ma nehaza zankura kea hunka zamazeri fatgoa osugahane. Na'ankure zamagra keontahi vahe mani'naze. <sup>27</sup> Hianagi nanekema kasmisnuankna kavagunafarema kagefunama akamare'neana eri atrenugenka amanage hunka zamasigahane, Ra Anumzana Agra Anumzamo'a amanage hie, Iza'oma kema antahinaku'ma hanimo'a, kea antahino. Hagi iza'oma kema ontahinaku'ma hanimo'a, kea ontahino. Na'ankure zamagra keontahi vahe mani'naze.

## 4

*Jerusalemi kuma'ma eme avazagi kagiza ha'ma huntesaza kasnampa  
naneke*

<sup>1</sup> Hagi menina vahe'mofo mofavremoka hapateti'ma brikima tro'ma hunte'nazana erinka kavuga antenenka anante Jerusalemi rankumamofa amema'a eri vakakinka tro huntu. <sup>2</sup> Hagi ana hapateti'ma regripenkama tro'ma hanana brikimofona ha' vahe'mo'zama rankuma'ma avazagi kagine'za mopama kate'za ante hihi hu'ne'zama ha'ma nehaza zana tro huntanka kagio. Ana nehunka ha'ma hunaku'ma rankuma keginamofo megi'ama ha' vahe'mo'zama vihuma hu'za kanegizaza hunka, ana havemofona vihua hunka kagio. Ana hutenga ha' vahe'mo'zama

rankumamofoma seli nonkuma'ma kiza kanegizaza hunka seli nonkumara kinka ana kumamofona kagio. <sup>3</sup> Hagi ana'ma hutenga ainire fraipani erinka kagrane ana rankumamofo amu'nompinena antegeno ainire keginagna huno me'nena kavugosa anantega huntenege, ha' vahe'mo'zama rankuma'ma avazagi kagine'zama hankaveti'za ha'ma hunezmanta zankna hino. Hagi e'i ana maka zama tro'ma hanana zamo'a, Israeli vahe'mo'zama nege'za kvama hanaza zamofo avame'za megahie. <sup>4</sup> Ana hutenga Israeli vahe'mofo kumimofo knazana hoga kaziga'a mase'enka eri agofetu anto. Na'ankure anama mase'nana kna'afina Israeli vahe knaza erinka vugahane. <sup>5</sup> Hagi Israeli vahe'ma knazama erisaza avame'zana 390'a knafi kamigahuankino, mago knamo'a mago kafu huvame huno metere hugahiankino, 390'a kafufi kumi'ma hu'naza zanteria knazana zami'na vugahue. <sup>6</sup> Hagi e'i su'ama vagamarena rukrahe hunka tamaga kazigati ete mase'enka, Juda vahe'mokizmi kumimofo knazana erio. Hagi 40'a kna kamuankino, 40'a knamo'a 40'a kafu huvame huno me'ne. <sup>7</sup> Hagi rukrahe hunka Jerusalemi kuma'ma tro huntenga, ha' vahetamima trohunte kaginte'nana kumamofona kazana rusutenga knazama erisaza zamofo kasnampa kea hunto. <sup>8</sup> Nagra nofiteti anaki kantenugenka rukrahe osu ana kazigatike mase'nenkeno, ha' vahe'mo'zama rankuma'ma avazagizama ha'ma huzmante'naza knamo'a evu vagaregahie.

<sup>9</sup> Hagi kagra witine balinenki, kohe'ene lentoli koheki, milietaima ne-haza ne'zanki witigna ragama renentea ne'za emema nehaza ne'zane ante avitetenga kanenka zuompafi eri havia hunka bretia tro huo. Hagi 390'a knama masenka manisana kna'afina ana bretia negahane. <sup>10</sup> Hagi mago mago kna'upama nesana bretimofo kna'amo'a, 200'a gremi hugahianki anampinti refko hunka nezama neknarera netere huo. <sup>11</sup> Ana hukna hunka mago mago knarera kasefa tina mago lita kapu netere huo. <sup>12</sup> Hagi vahe'mofo rifamo'ma hagegema hu'nesia rifare, tevea hugrenka ana bretia krenka nenege'za vahe'mo'za kageho. <sup>13</sup> Hagi Ra Anumzamo'a mago'ane amanage hu'ne, Israeli vahe'ma zamahegasopenuge'za ru vahe'enema umani'neza, amama hanaza hu'za agru osu ne'za negahaze. <sup>14</sup> Anage hige'na nagra hu'na, Ra Anumzamoka e'inahu avu'ava zana kora hu'na nazeri pehena osu'noe. Nagra ositeti'ma mani'nama e'noa kna'afina agra'ama fri'nea bulimakao afuro sipisipi afuro, afi zagamo aheno traga hu'nea bulimakao afuro sipisipi afuro, agru osu afu ame'a onetfa hu'noe. <sup>15</sup> Anage hugeno Ra Anumzamo'a amanage hu'ne, Knareki vahe rifa atrenka bulimakao rifare tevea hugrenka bretia kregahane. <sup>16</sup> Anage nehuno Ra Anumzamo'a mago'ane amanage huno nasm'i'ne, Vahe'mofo mofavremoka, Nagra Jerusalemi kumapima me'nea ne'zana eri fanene hanenkeno, nezankura atupa nehu'za osi'a nezama mesiama'a sigerirera erinte'za refko huza osi'a netere nehu'za antahintahi hakare nehu'za, osi'a tima nesu'za tusi zamagogogu hugahaze. <sup>17</sup> Nagra e'inahu'za hanuge'za bretigu'ene tinku'enena atupa nehu'za, ovufi avufi hu'za tusi zmagogogu hugahaze. Na'ankure kumi'ma hu'naza zanteku hu'za ome haviza hu'za zaferinage hugahaze.

## 5

*Jerusalemi kumapima knaza esnia zamofonku hunte'nea kasnampa naneke*

<sup>1</sup> Ra Anumzamo'a huno, Menina vahe'mofo mofavremoka asane'nesia bainati kazi erinka azokama tagahu vahe'mofo resa kazinkna hunka kagi kazoka'ene kanu kazoka'enena haro. Ana huntenka sigerire erintenka kna'a negenka, 3'afi refko hunto. <sup>2</sup> Hagi ha' vahe'mo'ma Jerusalemi kuma'ma avazagino ha'ma hunte knama vagamare'na, ana 3'a kevufintira mago kevua Jerusalemi kumamofo amema'ama tro'ma huntanana kuma agu'afi teve hugrenka kro. Hagi anante kevua taga hunka eri osi'osi hunka ana kumamofo agu'afi atrenka vano huo. Hagi namba 3 kevua zahopi eritregeno zaho'mo eri hareno nevina Nagra kazina eri'na zamefi zamavaririna vugahue. <sup>3</sup> Hianagi osi'a kazokara erinka zaza kukanaka'amofo atumpare anakintegeno meno. <sup>4</sup> Hagi anampintira ete osi'a kazokara erinka tevefi kregeno teno. Hagi ana tevemo'a mika Israeli vahe'ma mani'nazarega teno vuno'eno hugahie. <sup>5</sup> Hagi Anumzana Ra Anumzamo'a huno, Jerusalemi kumara maka kokankoka vahe'mofo amunompi antogeno me'nege'za, ama mopafi kumatmimo'za megagint'eaze. <sup>6</sup> Hianagi Jerusalemi kumapi vahe'mo'za kokankoka vahe'mo'zama Nagri kasegene trakema amagema nontageno'a zamagri tava'onte ma manigagi'naza vahe'mo'zama kasege'nine tra keni'anena zamagena hunemi'za zana zamagatere'za Nagri navu'navara novaririze. <sup>7</sup> E'ina hu'negu Ra Anumzana Anumzamo'a huno, Tamagri tavaonte'ma manigagi'naza kumapi vahera zamagatereta keontahi vahe mani'neta kasegeni'ne tra ke'ninenia novaririze. Mago'a kumatmima tamagri tavaonte'ma megagi'nea kumapi vahe'mo'za tra kezamia avaririza knare hu'nazanagi zamagri knara tamagra osu'naze. <sup>8</sup> E'ina hu'negu mika'zama kegavama hu'nea Ra Anumzamo'a huno, Nagra'nia Jerusalemi kumate vahera hara reramante'na, tamagri tavaonte'ma megagi'naza kumapi vahe'mo'za neramagesage'na knazana tamigahue. <sup>9</sup> Hagi kasrino hi'mnage hu'nea avu'ava'ma haza zanku kora osu'noaza hugahuanki'na, henka anara mago'enena osugahue. <sup>10</sup> E'ina hu'negu zamafahae'za mofavre nagazmi zamavufaga nenengeno, mofavre naga'zmimo'za zmafahae'i zamavufaga negahaze. Tusi knaza tamami'na tamazeri haviza hanugen, amnema manisaza vahetmina zamazeri panani hanuge'za mago mago hu'za vahe mopafi umani emanı hugahaze. <sup>11</sup> E'ina hu'negu Nagra kasefa hu'na mani'noa Ra Anumzamo'na tamage hu'na huankina, kasrino hi'mnage hu'nea avu'avaza huta mono noni'a eri haviza nehuta, eri hi'mnage hu'nazagu Nagra tamatregahue. Ana nehu'na Nagra nasunkura huramante'na tamatrenugeta omanigahaze. <sup>12</sup> Hagi 3'a kevufintira mago kevu vahe'mofona agatonto zamo'ene krimo'ene zamazeri haviza hanige'za Jerusalemi kuma agu'afi frigahaze. Hagi mago kevu vahera kumamofo megia ha' vahe'mo'za kazinteti zamahe frigahaze. Hagi mago kevu vahera zamahe panani hanenke'za mago mago hu'za vahe kumatega vu'za e'za hanagena, ha' vahe huzmanta'nena bainati kazinteti zmarotago hu'za zamahegahaze. <sup>13</sup> Hagi e'ina hanugeno nasima vazi'zamo'a amnea hanigeno narimpama ahezamo'a ome vagaregahie. E'ina hanuge'za Nagrikura Ra Anumzana hihamua'ane Anumzamo ama anazana nehie hu'za ke'za antahi'za hugahaze. <sup>14</sup> Hagi tamazeri havizantfa hanugen kumatmimo'enena haviza hu'enkeno, megagi'naza kumatmimpi vahe'mo'za ana kante'ma enevu'za kesu'za zamagena neru'za ama kumamo'a havizantfa hie hu'za hugahaze. <sup>15</sup> Ra Anumzamo'na nehuanki'na, narimpa ahe'zama tamaveri'ma hanuana knaza atre'na tamazeri havizantfa nehanugen, kumatmimo'enena haviza hu'enkeno, megagi'naza kumatmimpi vahe'mo'za nege'za antri hu'za zmagogogu

nehu'za kiza zokago ke huramantegahaze. <sup>16</sup> Hagi agatontozama atresanuana vahe'ma zamahe fri kevegna huna ahe tranenkeno agatontoma huno ke'onke'zama eri haviza hu'za avreno egahie. Hagi agatonto zana atre'va hu'na ne'zana eri fanane hutfaza hugahue. <sup>17</sup> Hagi agatonto zane afi zagaramine huzmantesuge'za maka mofavremia eme zamahe hana hanageta, mofavre onte vahekna huta manigahaze. Ana nehu'na ruzahu ruzahu kefo krine ha' vahe'ene huzmanta'nena eme tamazeri havizantfa hugahaze. Nagra Ra Anumzamo'na ama nanekea nehue.

## 6

### *Agonaramimpima mono'ma hu kuma'ma eri haviza hu ke hu'nea naneke*

<sup>1</sup> Ra Anumzamo'a amanage huno nasami'ne, <sup>2</sup> Vahe'mofo mofavremoka, Israeli agonaramintega kavugosa hunte'nenga amanage hunka kasnampa kea hunto, <sup>3</sup> Israeli agonaramimoka Ra Anumzamofo nanekea antahio! Ra agonaramine osi agonaramine, tinkrahotamine, aguporaminenkura Ra Anumzamo'a huno, Nagra ha' vahetami huzmanta'enkeno agonaramimpima havi anumzama mono'ma hunentaza kumara eri haviza hugahaze. <sup>4</sup> Ana nehu'za havi anumzante'ma kresramnama nevaza itaramina, tapagehu netre'za mnacentake zama kre'mnاما nevaza itaramina rurakoraku nehu'za, kaza osu havi anumzantmimofo zamavuga vahetmina zamahe datu hugahaze. <sup>5</sup> Hagi Israeli vahe'ma fri'naza zamavufaga kaza osu havi anumzazmimofo zamavuga eri tru hunente'na, zaferinazmna kresramna vu itaraminte rupanani hu'na atrena kagigahue. <sup>6</sup> Mika nemaniza kumatamine, rankumatumimo'enena havizantfa hinkeno, mono'ma nehaza agona kumatmimo'enena haviza hugahie. Hagi mono'ma nehaza agona kumatmimpima me'nea kresramna vu itaramine, kaza osu havi anumzantamine, mnacentake zama kre mnاما nevaza itaraminenetra taganavaziza eri havizantfa hanageno, tro'ma huntaneta mono'ma nehaza zantmimo'a maka fanane hugahie. <sup>7</sup> Hagi maka kaziga ha' vahe'mo'za vahera zamahe fri vagaresageta, manisaza nagamota negeta Nagrikura Ra Anumza mani'ne huta keta antahita hugahaze. <sup>8</sup> Hianagi mago'a vahera ozamahe zamatregahue. Na'ankure ha' vahe'mo'za zamavare'za vanage'za ru kumategane mago'a mopafi mago mago hu'za umanigahaze. <sup>9</sup> Hagi kina huzamante'za zamavare'za vanaza vahetmimofo kumatega umani'neza, Nagri'ma zamagenama hunenamiza havi anumzama kezamanunuma hu'za mono'ma huntazage'nama narimpa knama hu'noa zankura zamagesa antahigahaze. Na'ankure zamagra hi'mnage huno kasri avu'ava hu'naza zanku zamagazegu hugahaze. <sup>10</sup> Ana nehu'za Nagrikura Ra Anumza mani'ne nehu'za, kema hu'nea kemo'a amne zanknara osu'neanki, knaza tamino tazeri haviza hie hu'za ke'za antahi'za hugahaze. <sup>11</sup> Ra Anumzamo'a huno, Kazana nerunka kagia mopare nemasaginka amanage huo, Avo! Israeli vahe'mo'za kasrino hi'mnage avu'ava'ma hazazamo higeno ha' vahe'mo'zane, agatonto zane, kefo kirimimo'enena zamazeri haviza hie hunka huo. <sup>12</sup> Hagi afete moparegama mani'nesaza vahetmina kefo krimo zamahe nefrinigeno, tavaonte'ma manisaza vahera ha' vahe'mo'za zamahe nefrisageno, mago'ama manisaza vahe'mo'za zamagaku hu'za frigahaze. E'ina hu'na maka narimpa ahe'zana zamagrite maka rupopo hutre vagaregahue. <sup>13</sup> Hagi ha' vahe'mo'zama zamahesage'za frisaza vahe'mokizmi zamavufagamo'a maka osi agonaramimpine, ranra agonaramimpine, zafa agafafine, anina kuronkuro hu oki zafa agafafine,

kaza osu havi anumzazmimofo amu'nompine, mnanentake'zama kremnama nevaza itaramimofo avuganena megagi'enige'za nege'za Nagrikura Ra Anumza mani'ne hu'za ke'za antahi'za hugahaze. <sup>14</sup> Ana hute'na mopazmire nazana rutare'na ka'ma mopareti agafa huteno vuno Ribla kumate'ma uhanati'nia mopa eri havizantfa hanuge'za, Nagrikura Ra Anumza mani'ne hu'za ke'za antahi'za hugahaze.

## 7

*Maka zamo'ma vagare knama esia zamofo naneke*

<sup>1</sup> Ra Anumzamo'a anage huno nasami'ne, <sup>2</sup> Vahe'mofo mofavremoka, Ra Anumzana Agra hanavenentake Anumzamo'a Israeli vahe mopagura amanage hie, Ha' vagare! Maka Israeli mopamo'ma knazampima ufresia knamo'a kofta huno egahie. <sup>3</sup> Hagi menina knazama tamisua knamo'a, eankina narimpama ahe'zana atresugenno tamagrite egahie. Tamagrama hu'nesaza tamavu tamavate antena refako hu'na ana kante mizana tamamigahue. Na'ankure tamagra hi'mnage huno kasri avu'ava hu'naze. <sup>4</sup> Hagi nasunkura huoramante'na ne vua keamne nehu'na oramatregosuanki, kasrino hi'mnage avu'avazama hu'naza zantera tamazeri havizantfa hanugeta, Nagrikura Ra Anumza mani'ne huta keta antahita hugahaze. <sup>5</sup> Hagi Ra Anumzamo'a amanage hu'ne, Tusi'a hazenke'za ne-e. <sup>6</sup> Tamagri'ma tamazeri havizama hania knamo'a hago eankino, hago egofta hie. Hagi kahe fananema hania knamo'a, kavega anteno mani'neanki ko. <sup>7</sup> Israeli mopafima nemaniza vahe'mota havizantfa hanaza knamo'a hago ne-ejeno, ana knamo'a hago egofta nehianki, agonaramimpina zagame'ma nehu'za musema nehaza zamo'a vagaresigeno, zamagogogu hugahaze. <sup>8</sup> Hagi menina tusi'a narimpa ahe'zana tamagri tamavufgare eri rukaha hutre vagaregahue. Ana nehu'na tamavu tamava'ma hu'naza kante antena re-fko hu'na hi'mnage avu'ava'ma hu'nazarera hazenkea tamigahue. <sup>9</sup> Hagi nasunkura huramante'na oramatregahue. Na'ankure maka avu'ava'ma hu'nazare'ene kasrino hi'mnage avu'avazama hu'naza zantera nona hu'na tamazeri havizantfa hanugeta Nagrikura Ra Anumza mani'neno amanahu zana hurante huta keta antahita hugahaze. <sup>10</sup> Ko, anankna ama efore nehie! Knazama esia knamo'a ama ne-e! Vahe'ma azeri havizama huzamo'a rumpamu huno egeno, azotamo'a agata hageno amu'maregeno, avufga rama hu'zamo'a nena huno amosre ahe'ne. <sup>11</sup> Hagi veganokno avu'avazamo ome ra huno nevuno vahe'ma sefu'ma nezamiza azota aseno agatarenkino kumima nehaza vahera zamazeri haviza hanigeno, mago'mo'e huno omanigahie. Maka fenozmimo'ene maka marerisa fenozmimo'enena amne zankna huno fanane hugahie. <sup>12</sup> Hago ana kna e'ne, ana knamo'a ama ehanatie. Hagi nanazama mizase vahe'mo'za musena nosinke'za, zagore'ma nanazama atre vahe'mo'za zamasunkura osiho. Na'ankure rim-pama ahe'zamo'a magoke vahetera omegahanki, maka'a vahete egahie. <sup>13</sup> Hagi zagore'ma mopa'ama atresia vahe'mo'a, ana tarega'mokema ofrike mani'nena'a knafina mopa'a ete e'origahie. Na'ankure maka vahete'ma fore'ma hania zama ava'nagna zampima eri averi'ma hu'nesia zana ete rukrahera osugahankino, mago vahe'mo'e huno kefo avu'avazampina mani vava huno ovugahie. <sup>14</sup> Hagi hate'ma vunakura ufena re'za mika ha' zana retrotra hugahazanagi, hatera ovugahaze. Na'ankure maka vahe'mo'za nazeri narimpa ahe'haze.

<sup>15</sup> Kumamofo meg'i ha' vahe nemanisageno, ran kumamofo agu'afina krimo'ene agatonto zamo'enena megahie. Hagi meg'i a kokampima nemania vahera bainati kazinteti zamahe nefrisage'za, agatonto zamo'ene, kefo krimo'ene kuma agu'afima nemaniza vahera zamahe frigahie. <sup>16</sup> Hagi ana zamo'ma zamazeri havizama osnia vahe'mo'za agonarega fre'za umani'neza, agupofi maho namamo'ma nehiaza hu'za mago magomo'za kumi zamigura zamasunkura hu'za zavira ategahaze. <sup>17</sup> Hagi maka va-hetmimofo zamazamo'a satino frisigeno, zamarenamo'a hefa hofa huno hankavezmia omanegahie. <sup>18</sup> Anama hanige'za zamasunku kukena hu'neza tusi zmahirahiku nehu'za zamagogogu hugahaze. Ana nehu'za zamagazegu nehu'za zamavugosa refinete'za, zamazokara vazagate'za eri rampage hugahaze. <sup>19</sup> Hagi silva zagozmia kampi herafi netre'nageno, golizmimo'a amne zankna hugahie. Hagi Ra Anumzamo'ma arimpama ahe'zamantesia zama atresigeno esia knafina, silvamo'ene golimo'enena zamagura ovazigahie. Hagi silvane golimo'enena kaga'ma ate'zana eri amne osuge, zamarimpafina avitesigenora zamura osugahie. Na'ankure e'i ana silva zagomo'ene golimo'enena vahe'mofona kumipina avrenente. <sup>20</sup> Hagi zamagra e'i ana hentofa konariri zantminku zamavufaga ra nehu'za, ana zanutu kasrino hi'mnage huno kaza osu havi anumzana trohu'naze. E'ina hu'negu e'i ana zantamina eri arukrahe hanugeno, agru osu'za segahie. <sup>21</sup> Hagi ana zantamina ru mopafi vahetamine, kefo avu'ava'ma nehaza vahe'mokizmi eri zami'nuge'za, rohu emere'za ana zantamina eri pehana hugahaze. <sup>22</sup> Hagi Nagra namefi huzmi'nuge'za kefo avu'ava'ma nehaza vahe'mo'za mono noni'afina ufre'za keonke zana eri pehana nehanageza, musufa vahe'mo'za mareri'za ruotge'ma hu'nea zantamina eri pehana hugahaze. <sup>23</sup> Hagi seni nofi retrotra hoho. Na'ankure ama mopafina vahe'ma aheno korama eri tagi hazenke zamo avitegeno, rankumapina vahe'ma ohefri ahefri hu'zamo'a avite'ne. <sup>24</sup> Ana hu'negu megagi'naza kumatmimpima kefo avu'ava zante'ma vugotama hu'naza vahe zamavare'na esuge'za, nonkumazmia eme zamahe'za hanaregahaze. Hagi tamavufga rama nehaza hanavetamia eri atrenugeno, ruotge'ma hu'nea kumatamina eri pehana hugahaze. <sup>25</sup> Hagi zamazeri zamagogoma fesia zama esige'za mani fruma huno mani'zanku hakegahazanagi, ke'za eri forera osughaze. <sup>26</sup> Hagi hazenke zamo'a ana agumpi ana agumpi huno zamagritera ne-enigeno, ana zamofo agenkemo'a ana agumpi ana agumpi huno egahie. Kasnampa vahe'mo'zama ava'nagna zama ke'zama zamasamis-agura nehakesageno, pristi vahe'mo'zama kasegema rempi huzmi'zamo'a fanane nehanigeno, ranra vahe'mo'zama antahintahima zami'zamo'enena fanane hugahie. <sup>27</sup> Hagi kini ne'mo'a zavira neteno asunkura nehanigeno, mareri eri'za vahe'amo'za tusiza hu'za zamarimpa knafi nemanisageno, ana mopafi vahe'mokizmi zamazamo'a zamahirahitegahie. Zamagrama nehaza avu'avazante nona hu'na knazana nezami'na, zamagrama vahe'ma zamazeri havizama nehaza hu'na, zamagri'enena zamazeri haviza hugahue. E'inama hanuge'za zamagra Nagrikura Ra Anumza mani'ne huza ke'za antahi'za hugahaze.

<sup>1</sup> Hagi namba 6si kafumofona namba 6si ikantera 5fu knazupa, Juda vahemokizmi ugagota vahe'tmina navuga manizage'na noni'afina mani'nogeno Ra Anumzamofo azamo'a nagrira nazerigeno hanave'amo'a nagrite e'ne. <sup>2</sup> Ana hige'na koana vahe amema'agnaza ke'noe. Hagi ana vahe amema'agna zagamofo afafareti ma urami'nefina teve anefakna higeno, afafareti'ma mareri anagamuma atre'nea avufgamo'a, ainireti'ma hiaza huno tusi tampretampare huno masanentake hu'ne. <sup>3</sup> Hagi ana vahekna zagamo'a azana rusuteno naseni nazokate nazeritege'na ava'hagnaza kogeno, Avamu'mo'a navresga huno monane mopane amu'nompi vuno, Jerusalemi mono kumapima unefraza kafama noti kazigama avugosama hunte'nerema havi anumzamofo amema'ama tro huntazageno me'neno Anumzamofoma azeri arimpama nehegeno kanivema nerere navareno vu'ne. <sup>4</sup> Anante'ma vu'nama koana navuga Israeli vahe Anumzamofo himamu masa'a Kebar timofo tavaonte'ma me'nege'nama ke'noankna huno me'nege'na kogeno, <sup>5</sup> Anumzamo'a nagrikura amanage hu'ne, Vahe'mofo mofavremoka noti kaziga kavua ko. Anage hige'na noti kaziga navua kesga hu'na kogeno, noti kazigama kuma kafa tava'onte'ma kresramna vu itama me'nea tava'onteria havi anumzamofo amema'a me'negeno, Anumzamo'ma arimpagu'ma nehuno kanivema nerea havi anumzamofo amema'a me'negena ke'noe. <sup>6</sup> Anama negogeno'a Anumzamo'a amanage hu'ne, Vahe'mofo mofavremoka, Israeli vahe'mo'zama kasrino hi'mnagema hu'nea avu'ava'ma nehu'za mono noni'afinti'ma afete'ma nahenati netrazana negampi? Hianagi ete mago'ene tusi'a hi'mnage huno kasri avu'ava zana kegahane. <sup>7</sup> Hagi anantetira mono kumamofo kafante navareno vige'na koana, ana kumamofo have keginafina mago kamo hagro hunege'na ke'noe. <sup>8</sup> Negogeno Anumzamo'a amanage hu'ne, Vahe'mofo mofavremoka, have keginafima hagro hu'negekama ke'nana kana kafio higena kafina koana mago kafa me'negena ke'noe. <sup>9</sup> Anama negogeno'a Anumzamo'a anage huno nasami'ne, Vunka agu'a ufrenka kasrino hi'mnage'na hu'nea avu'avazama nehaza zantamina ko! <sup>10</sup> Hige'na anampinkama ufre'na koana, ana nomofo agu'afina rugaraga asoparega ruzahu ruzahu zagama zamasaguregati'ma regrarohe'zama vanoma nehaza zagaramimofo amema'ane, agru osu zagaramimofo amema'aramine, Israeli vahe'moma kaza osu havi anumzama mono'ma hu'uentaza anumzantmimofo amema'aramine tro hunte'za evu'nazage'na ke'noe. <sup>11</sup> Hagi ana zamofo zamavuga Israeli ranra vahera 70'a otizageno, Safani nemofo Zasania'a amunoznifina oti'nege'na ke'noe. Hagi ana 70'a vahe'mo'za, mananentake'za negraza zuompa zamazampi eritere hu'za oti'nageno tevegumo'a zamasenirega marenerige'na ke'noe. <sup>12</sup> Hagi anante Anumzamo'a amanage huno nasami'ne, Vahe'mofo mofavremoka, mago mago Israeli ranra vahe'mo'za'ma hanimpima keonke zagaramimofo amema'ama tro'ma hunte'nazafinkama nehaza avu'ava zana negano? Na'ankure zamagra hu'za Ra Anumzamo'a ama mopa amagena humi'neankino nontage hu'za nehaze! <sup>13</sup> Anage nehuno amanage huno nasmi'ne, Menina mago'ane tusiza huno kasrino havizanfta hu'nea avu'ava nehanagenka zamagegahane. <sup>14</sup> Anage nehuno navareno Ra Anumzamofo mono nomofona noti kaziga kafante vige'na, koana anampinka a'neramimo'za Tamusi havi anumzankura tusi zavi netazage'na ke'noe. <sup>15</sup> Anama negogeno'a Anumzamo'a amanage huno nasami'ne, Vahe'mofo mofavremoka, ama zana negano? Hianagi menina mago'ane

kasrino havizanfta hu'nea avu'ava zana kaveri hugahue. <sup>16</sup> Anage nehuno navaren Ra Anumzamofo nomofona agu'afinka ufrege'nama koana, Ra Anumzamofo mono nomofo kafantera ko noma kinte'naza nomofone, kresramnama vu itamofo amu'nompina 25'a venenemo'za ana mono nona zamefi humiza zage hanati kaziga zamavugosa huntene'za kepri hu'za zagemofonte monora hunentazag'e na ke'noe. <sup>17</sup> Anama negogeno'a Anumzamo'a huno, Vahe'mofo mofavremoka negano? Juda vahe'mo'za kasrino haviza hu'nea kefo avu'ava'ma nehzana, kagrama antahinana osi'za nehzafi? Hagi zamagra ana nehu'za ama mopafi vahe'ma ha'ma omerente emerente nehu'za, ohefri ahefri hu avu'avaza hu'za ama mopa eri antevite'za nazeri narimpa ahe'za nehzao? Ko, zamagra kefo avu'ava'ma nehaza zamo'a, Nagrira antahionami'za zafa azankuna hantagi'za zamagonare antazankna nehzaze. <sup>18</sup> E'ina hu'negu tusi narimpa ahezmante'na zamazeri haviza hugahue. Hagi nasunkura huzmantne'na magomofona otregahue. Antahina zamazama hanuegu'ma ranke hu'za kezankea hugahazanagi, kezankezmia ontahigahue.

## 9

### *Havi anumzante mono'ma hunentaza vahe zamahe'naza naneke*

<sup>1</sup> Hagi anante Ra Anumzamo'a ranke huno amanage nehige'na antahi'noe, Vahe'ma zamahe nefri'za vahera huzmantenke'za zamazampina ha' zana erine'za rankumapina echo. <sup>2</sup> Anage hige'na kogeno, anagamu noti kaziga kuma kafama me'nea kazigati 6si'a vene'neramina vahe'ma zamahe fri ha'zana zamazampina eriri eriri hu'za neazageno, anampina efeke kukena hu'nemo afafafina avontafe'ma kre vogisi me'negeno e'ne. Hagi ana vahe'mo'za agu'afi ufre'za bronsire itamofo asoparega uoti'naze. <sup>3</sup> Hagi ana'ma hazageno'a Israeli vahe Anumzamofo hihamu masazamo'a serabimiema nehaza ankeronte'ma me'neretira, marerino mono nomofo kafante vu'ne. Ana higeno efeke kukena hu'neno, afafafima avontafe bogisima anakinte'nea nera Ra Anumzamo'a amanage huno asami'ne, <sup>4</sup> Jerusalemi kuma agu'afi vano nehunka, kasrino himnage'ma hu'nea kefo avu'ava zama nehaza zanku'ma aza'o avesra nehuno, zavi'ma netea vahe'mofo kokovitera avame'zana antetere huo huno asmi'ne. <sup>5</sup> Hagi nentahugen Ra Anumzamo'a mago'a nagara amanage huno zamasami'ne, Amefi avaririta rankumapina nevuta, mago vahekura tamasunkura huzmanteta ozamatreta zamahe friho huno hu'ne. <sup>6</sup> Hagi maka ozafanafama, kasefa vene'nema, kasefa mofa'nema, neone mofavreramima, a'neraminena maka zamahe hana hiho. Hianagi avame'zama kokovite'ma me'nea vahera zamavakora osiho. Ra mono nomofo avugama mani'naza vaheteti agafa huteta viho. <sup>7</sup> Anama huteno'a mago'ane amanage hu'ne, Zamahesaza vahetamimofo zamavufaga erita mono nompi ome ante aviteta ana nona eri pehena hiho huno nezmasamino, ko atiramita viho huno hu'ne. Anagema hige'za atiramiza rankumapi nevu'za, vahetmina zamahe'za vu'naze. <sup>8</sup> Hagi ana vahetmima zamahe'zama nevazage'na nagrake mani'nena navugosaregati mopafi mase'na amanage hu'noe, Ra Anumzana kagra Anumza mani'nane! Hagi Jerusalemi kumapi vahe'ma karimpama ahe'zmantenkama zamazeri havizama nehanke'zama osi'ama maniza Israeli vahera maka zamahe hana hugahampi? <sup>9</sup> Anage hugeno Ra Anumzamo'a amanage huno nasami'ne, Israeli vahe'ene Juda vahe'mofo kumi'mo'a ome rankrerfa hie. Ama mopafina vahe koramo'a

avitegeno, rankumapina agraguuke'ma antahino vahem'a azeri savri'ma hu ava'ava zamo'a avitene. Na'ankure zamagra amanage hu'za nehaze, Ra Anumzamo'a ama mopa amefi hunemino, nonke hu'za nehaze. <sup>10</sup> E'ina hu'negu Nagra mago vahera nasunkura huzmante'na ozmatregahue. Hinanagi maka zamavu'zamava'ma hu'naza zamofo avamente nona'a huzmantetere hugahue. <sup>11</sup> Anagema hutegeno'a efeke kukenama hu'neno afafafima avontafe bogisima rente'nea ne'mo'a amanage eme hu'ne, huo hunkama kema nasmina kante ante'na, ana zantamina hu vagare'noe huno Anumzamofona eme asmi'ne.

## 10

### *Ra Anumzamofo hihamu masazamo mono noma atreno nevigeno ke'nea naneke*

<sup>1</sup> Anagema nehige'na avanagna zampima koana, serabimie nehaza ankeromofo asenirega safie nehaza havereti tro hu'naza kini tra me'nege'na ke'noe. <sup>2</sup> Hagi anante Ra Anumzamo'a efeke kukenama hu'nea ne'mofonkura amanage hu'ne, 4'a vahekna zagaramima oti'nazafi vunka, zamagafinti tevema nerea tankanuzaramina rama'a ome zoginka kazampi eri avitetena, rankumapina rupanani hunka atro huno asmigeno, Ra Anumzamofo ke antahino nevige'na ke'noe. <sup>3</sup> Hagi serabimie nehaza ankeromo'a mono nomofo sauti kaziga otino mani'negeno, ana ne'mo'a umarerigeno mono kumamofo agu'afima me'nea kumapina hampomo'a avite'ne. <sup>4</sup> Ana hige'na negogeno serabimie nehaza ankeromofo agekonamofo anaga kazigatira Ra Anumzamofo hihamu masazamo'a atreno mono nomofo kafante vigeno, ana nomofo agu'afina hampomo avitegeno, Ra Anumzamofo hihamu masazamo'a mono nonkumara remsa hu'ne. <sup>5</sup> Hagi ana serabimi ankeroramimofo zamageko'namofo zamagasasamo'a, Ra Anumzana hihamu'anee Anumzamo'ma kema nehigeno'ma nerianka ageru aru'ne. Hagi ana agerura mono nomofo fegiatira amne antahiga hu'ne. <sup>6</sup> Hagi Ra Anumzamo'a efeke kukena hu'nea nekura huno, wiliramimofo amu'nompinti'ene serabimi ankerontamimofo amu'nompinti tevea tagio higeno, ana ne'mo'a vuno mago wilimofo tava'onte uoti'ne. <sup>7</sup> Ana higeno anante mago serabimi ankeromo'a azana rusuteno amu'nozmifima me'nea tevefinti mago'a tankanu'za tevea hanageno efeke kukenama hu'nea ne'mofo azampi antegeno erino atirami'ne. <sup>8</sup> Hagi ana serabimi ankeromokizmi zamageko'namofo fenka kaziga, vahem'ofo zmazankna hu'neaza me'ne. <sup>9</sup> Hagi ana serabimi ankeromofo tava'ontera 4'a wili me'neankino, mago mago ankeroma oti'nerera mago wili metere hu'neno ana wiliramimo'za berielie hu'za nehaza havegna hu'za mareve marave hu'naze. <sup>10</sup> Hagi ana mika 4'a wilimo'za mago zanke hu'nazankino, mago mago wilimofo agu'afina mago wilimo rugeka huno metere hu'ne. <sup>11</sup> Hagi 4'a kaziga ana serabimi ankeromo'za zamavugosa hunte'nazanki'za, inan kazigama vunakura rukrahera osu'za, ana kaziga vu fatgo hu'za vute'za, fatgo hu'za ete'za hugahaze. <sup>12</sup> Hagi ana mika serabimi ankeromokizmi zamagenafine, zamazampine zamageko'hafine, maka zamavufafina ana 4'a wiliramimo'ma hu'neankna huno avuragaramimo'a avite'ne. <sup>13</sup> Hagi nentahugenno mago agerumo'a amanage hu'ne, rukrahe rukrahe nehia wiliramine huno hu'ne. <sup>14</sup> Hagi mago mago serabimi ankeromofona 4'a avugosa huntetere hu'ne. Hagi ana 4'a avugosafintira, mago avugosamo'a ve

bulimakaomofo avugosagna higeno, mago avugosamo'a vahé avugosagna higeno, mago avugosamo'a laionimofo avugosagna higeno, namba 4 avugosamo'a tumpamofo avugosagna hu'ne. <sup>15</sup> Hagi anantetira ana 4'a serabimi ankeromo'za oti'za mareri'naze. Hagi e'i ana zagaramina kasefa'ma huza mani'naza zagaramima Kebar tinkenare'ma zamage'noa zagaramine. <sup>16</sup> Hagi ana serabimi ankeromo'zama nevazageno'a, 4'a wilimo'zanena zamavariri'za magoka vu'naze. Hagi ana ankeromo'zama zamageko'nama rutare'za mopafinti'ma neharazage'za, anazanke hu'za ana wiliramimo'za magoka vu'naze. <sup>17</sup> Hagi ana Serabimi ankeromo'zama kaza'ma osu oti fatgoma nehazageno'a, ana wilimo'zanena kaza osu oti fatgo hu'naze. Hagi ana ankeromo'zama haresgama nehazageno'a, ana wilimo'zanena magoka vu'naze. Na'ankure kasefa'ma hu'zama nemaniza zagaramimofo avamu'mo'a ana wiliramimpina mani'ne. <sup>18</sup> Hagi Ra Anumzamofo hihamu masa'amo'a mono no kafantetira atreno, ana serabimi ankeroramimofo zamagofetu eman'i'ne. <sup>19</sup> Hagi negogeno ana serabimi ankeromo'za zamageko'na rutare'za neharazageno, wilimo'zanena magoka vu'za zage hanati kaziga Ra Anumzamofo mono no kahante uoti'naze. Ana hazageno Israeli vahé Ra Anumzamofo hihamu masazamo'a zamagofetu umanenege'na ke'noe. <sup>20</sup> Hagi e'i ana zagaramina kote'ma Kebar ti ankenare'ma kasefa hu'za mani'naza zagaramima Israeli vahé Anumzamo'ma mani'nemofo fenkama kazigama mani'nage'na ke'noa serabimi ankerontamine hu'na kena antahina hu'noe. <sup>21</sup> Hagi mago magomofona 4'a avugosama, 4'a agekonama huno huntetere higeno, ana agekonamofo fenkma kaziga vahé azankna za huntetere hu'ne. <sup>22</sup> Hagi ana zagaramimofo zmavugosamo'a Kebar tinkenare'ma ke'noa kasefa'ma hu'za mani'naza zagaramimofo zamavugosagna hu'ne. Hagi mago magomo'a rukrahera osu inantegama virega vu fatgo huno vu'ne.

## 11

### *Jerusalemi kumate kefo avu'ava'ma nehia kva vahetami zamazeri haviza hu'nea naneke*

<sup>1</sup> Hagi anante Ra Anumzamofo Avamumo'a navresga huno mono nomofo zage hanati kazigama avugosama hunte'nea kafante vige'na koana, kafantera 25'a vene'ne mani'nazage'na zamage'noe. Hagi ana vene'nemofo amu'nompina kva netrena Asuri nemofo Ja'azania'e, Benaia nemofo Pelatiaeke otinake'na zanage'noe. <sup>2</sup> Hagi Ra Anumzamo'a amanage huno nasm'i'ne, Vahe'mofo mofavremoka antahio, ama ana venenemo'za rankumapina kefo avu'ava'ma hu antahintahia retro nehu'za, vahe'mokizmia kefo antahi'zana zami'naze. <sup>3</sup> Hagi zamagra amanage hu'za nehaze, nontamima ki kna zahufa erava'o osu'ne. Hagi rankuma'mo'a ne'zankre kavogna higeta, tagra ana kavofi afu ame'a meaza huta knare huta manigahune hu'za nehaze. <sup>4</sup> E'ina hu'negu vahe'mofo mofavremoka kasnampa kea hunka huhaviza huzamoto. <sup>5</sup> Higeno Ra Anumzamofo Avamumo'a nagrite eno amanage huno eme nasm'i'ne, Ra Anumzamo'a amanage huno hu'ne, Israeli vahemota tamagrama antahintahima nehaza zana Nagra ko kena antahina hu'noe huno nehie. <sup>6</sup> Hagi tamagra rama'a vahé zamahe frizageno, mika kuma kantamimpina fri vahe'mokizmi zamavufagamo avite. <sup>7</sup> E'ina hu'negu Ra Anumzana Agra Anumzamo'a amanage hie, rankumapima vahe'ma zamaheta zamavufagama eritruma

hazana, e'i ame'a megeno rankumamo'a kavo me'ne. Hianagi tamagrira rankumapintira tamavaririnugeta atreta atiramigahaze. <sup>8</sup> Hagi tamagra kazinkanonus korora hazankina, Nagra bainati kazinknonu hara huramantegahue huno Ra Anumzana hankavenentake Anumzamo'a hie. <sup>9</sup> Hagi rankumapintira tamahe kasopetre'nna ru vahe zamazampi tamavrente'nugeno, ru vahe'mo'za knazana tamigahaze. <sup>10</sup> Hagi bainati kazinteti tamaheme vu'na Israeli vahe mopa atupare uhanati'nugeta, Nagrikura Ra Anumza mani'ne huta keta antahita hugahaze. <sup>11</sup> Hagi ama rankumamo'a tamagritera kavognara osanigeno, ete tamagra ama ana kavofi afu ame'a meaza huta knarerera huta omanigahaze. Hagi tamagrira knazana tamami'na vu'na Israeli vahe mopa atupare uhanatigahue. <sup>12</sup> Ana hanugeta Nagrikura Ra Anumza mani'ne huta keta antahita hugahaze. Na'ankure tamagra Nagri kasegea ovariri'naze. Hianagi tamagri tavaonte'ma mani kagi'naza kumatamimpi vahe'mofo zamavu'zamava avariri'naze. <sup>13</sup> Hagi ana kasnampa kema nehugen, Benaia nemofo Pelataia'a fri'ne. Ana hige'na navugosaregati mopafi mase'na rankrafa hu'na amanage hu'noe, Ra Anumzana kagra Anumzamoke! Israeli naga'ma osi'ama mani'naza naga zamahe hana hu'za nehano?

*Israeli vahe'ma kinafinti'ma zmavre atiramino esiazamofo huhampri zmante'nea naneke*

<sup>14</sup> Hagi anante Ra Anumzamo'a amanage huno nasami'ne, <sup>15</sup> Vahe'mofo mofavremoka, Jerusalemi kumate'ma mago'ama mani'naza vahe'mo'za hu'za, kafuhe'zane kagranema magokama kinama hutama mani'naza nagamotane maka Israeli vahe'motagu'enena hu'za, Ra Anumzamofo tava'ontetira atre'za afete umani'nazageno, ama mopa eri santihareho huno tagri ko tam'i'ne hu'za Jerusalemi vahe'mo'za nehaze. <sup>16</sup> E'ina hu'negu amanage huo, Ra Anumzana Agra Anumzamo'a amanage hie, Zamahe kasopoge'za ru vahe mopafina mago mago hu'za umanizageno, zamahe panani huge'za ru vahe kumapina umani emanu hu'nazanagi, osi'a knafima umani'naza kumatmimpina Nagra mono nozmigna hu'noe. <sup>17</sup> E'ina hu'negu amanage huo huno Ra Anumzana Agra Anumzamo'a hu'ne, ru moparegama umani emanima hu'nazaregatira tamavre atru hute'na, Israeli mopa ete tamigahue. <sup>18</sup> Hagi ete rukrahe huza mopazmire'ma esu'za Nagri navure'ma kasrino havizama hu havi anumzamofo amema'aramima me'neana emeri atre vagaregahaze. <sup>19</sup> Ana hanage'na Nagra magoke zamagu zamageda nezamina, kasefa avamu zamagu'afina antegahue. Ana nehu'na han-kavetin havegna hu'nea zamagu'a eri netrena, kasefa zamagu'a zami-gahue. <sup>20</sup> Ana hanuge'za tra keni'ane kasegeni'anena kegava nehu'za avaririgahaze. Ana nehu'za zamagra Nagri vahe mani'nage'na, Nagra zamagri Anumza manigahue. <sup>21</sup> Hianagi havi anumzamofoma amage'ma nente'za kasrino havizama hu'nea zamofoma amage'ma antesia vahera zamagrama hu'naza zamavu'zmvate ante'na knazana zamitere hugahue huno Ra Anumzana Anumzamo'a hu'ne.

<sup>22</sup> Hagi anante Serabimiema nehaza ankeromo'za zamagekona rutare'za hare'za nevazageno'a wilimozanena magoka nevazageno, Israeli vahe Anumzamofo hihamu masa'amo'a zamasenirega me'nege'na ke'noe. <sup>23</sup> Hagi Ra Anumzamofo masazamo'a, rankumapintira atreno marerino zage hanati kaziga me'nea agonomofona onagamu umane'ne. <sup>24</sup> Anama hutegen'o'ava'nagna zana negogeno Avamumo'a navresga huno Babilonima kinama hu'nazare vu'ne. Hagi anante'ma navrenoma vigen'o'ana ava'nagna

zamo'a vagare'ne. <sup>25</sup> Ana higena Ra Anumzamo'ma naveri'ma higenama maka zama ke'noa zantamina kinafima mani'naza vhahera zamasmi vagare'noe.

## 12

### *Izikieli'a Israeli vahe'ma kinama hanaza zamofo retrotra hu'nea nanake*

<sup>1</sup> Ra Anumzamo'a amanage huno nasami'ne, <sup>2</sup> Vahe'mofo mofavremoka, keontahi vahe amu'nompi mani'nane. Zamavuma ke'zana zamavurga huzmante'neanagi, zamavua nonkaze, keagama antahi'zana zamagesa huzmante'neanagi, keaga nontahize. Na'ankure zamagra keontahi vahe mani'naze. <sup>3</sup> E'ina hu'negu vahe'mofo mofavremoka, zage ferupi kagra fenonka'a retrotra hunka kina ome hu'naku'ma neviaza hunka nevuge'za kageho. Kagra'a kumateti'ma ru kumate'ma kinama ome hu'naku'ma viaza hunka nevuge'za keho. Hagi zamagra keontahi vahe mani'nazanagi, Nagrama nagesama antahuana, e'inama hananke'za zamagra ke'za antahiza hugahaze. <sup>4</sup> Hagi negesagenka, zageferupi fenonka'a eri fegi atrenka retro nehugeno, kinagama sena kinama huzmante'za zamavare'zama nevaza vahekna hunka vuo. <sup>5</sup> Hagi nege'nagenka have kuma kegina hagenkro hutenga, fenonka'a erinka ana kampinti frenkrohuramio. <sup>6</sup> Hagi rehanima nehanigenka negesagenka kuka'a erinka kafunte nentenka, atrenkama vanana mopama kezankura kavogasafina tavrave erinka refite'nenka vuo. E'inama hananana Israeli vahe'mo'za kagehogu avame'name'za tro hugantoe. <sup>7</sup> Hige'na Ra Anumzamo'ma nasami'nea kante antena ana zana hu'noe. Kina vahe'mo'zama nehzaza hu'na ferura fenoni'a eri megi netre'na, kinaga kuma have kegina, nazanuti kafina hagenkro hu'noe. Hagi kinagama hanintirima higena, fenoni'a nafunte erigonef'i na negazage'na vu'noe. <sup>8</sup> Hagi nanterama segeno'a, Ra Anumzamo'a amanage huno nasami'ne, <sup>9</sup> Vahe'mofo mofavremoka keontahi Israeli vahe'mo'za e'i na'a nehane hu'za kantahi onke'nazafi? <sup>10</sup> Hagi amanage hunka zamasamio, Ra Anumzamo'a amanage hie, Ama avamezama hua avamezamo'a Jerusalemi kumapima nemaniza ugota kva vahe'ene maka Israeli vahe'mo'za kesaza avame'za hue. <sup>11</sup> Hagi amanage hunka zamasmio, tamagrama hanaza zamofo avame'za nagra nehuankita, ama ana zana tamagrite efore hugahie. Hagi tamagrira ha' vahe'mo'za kina eme huramante'za tamavre'za ru moparega vugahaze. <sup>12</sup> Hagi zagma ufrenigeno'a Jerusalemi kumate ugota kva ne'mo'a fenozama'a afunte erigonefino vugahie. Hagi kumamofo have kegina kafiza hagenkro hu'neza avre atiramigahaze. Hagi avugosafina tavrave refite'neno atre'noma vania mopa onkegahie. <sup>13</sup> Hagi kukoni'a rutarente'nenugeno ana kukomo azerigahie. Ana hutena avre'na Babiloni va'nena Babiloni mopafi umanisianagi ana mopa onke mani'neno frigahie. <sup>14</sup> Hagi agri'ma manigaginte'naza vhahera zahopi zamazeri panani hutregahue. Hagi eri'za vahe'ane, sondia vahe'anena bainati kazina anom'a eri atretena ana bainati kazinteti zmavaririgahue. <sup>15</sup> Hagi zamahe panani'ma hanuge'zama mago mago hu'za ru moparegane ru kumamatimpima umani emanu'za, Nagrikura Ra Anumza mani'ne hu'za ke'za antahi'za hugahaze. <sup>16</sup> Hianagi osi'a nagama zamagu'ma vazisugenoma bainati kazinteti'ma zamahe nofrisageno, agatonto zamo'ene ruzahu ruzahu kriramimo'ma zamahe ofrisia vahe'mo'za

maka kefoza huno hi'mnage avu'avazazmia anama vanaza mopafi vahet-mintera huama nehu'za, Nagrikura Ra Anumza mani'ne hu'za ke'za antahi'za hugahaze.

<sup>17</sup> Hagi Ra Anumzamo'a amanage hu'ne, <sup>18</sup> Vahe'mofo mofavremoka, kagogonefena kahirahiku nehunka, ne'zane tinena no. <sup>19</sup> Hagi ana mopafi va-hera amanage hunka zamasamio, Israeli mopafima Jerusalemi kumate'ma mani'naza vahekura, Ra Anumzana hankavenentake Anumzamo'a amanage hie, zamagogogu nehu'za zamahirahi nerena ne'zane tinena negahaze. Na'ankure maka anampima nemaniza vahe'mo'zama hafra nehu'za, vhahera ohefri ahefri nehaza zanteku huna mopazmifintira miko zantamina eri fanane hanugeno, mago'zana omnetfa hugahie. <sup>20</sup> Hagi vahe'ma nemaniza kuma'mo'a havizantfa hinkeno, mopa zamimo'enena havizantfa hugahie. E'ina hinkeno Nagrikura Ra Anumza mani'ne hu'za ke'za antahi'za hugahaze.

<sup>21</sup> Hagi Ra Anumzamo'a amanage huno nasami'ne, <sup>22</sup> Vahe'mofo mofavremoka, Israeli mopafima mani'naza vahe'mo'za mago kea amanage hutere nehaze, knamo'a tagatere tagatere nehigeno, avanagema tasami'nana kemo'a amne zankna huno nena raga'a nore nehaze. <sup>23</sup> Hagi amanage hunka zamasamio, Ra Anumzana Agra Anumzamo'a amanage hie, Zamagrama nehaza nanekea eri atra'nenkeno, Israeli agu'afina mago'enena ana nanekea osugahaze. Hanki mika avanagna zama kenana zamo'ma efore'ma hania knamo'a hago kofta nehie hunka zamasamio. <sup>24</sup> Hagi Israeli vahepina mago'anena havige ava'nagene havige kasnampa kenena huama osugahaze. <sup>25</sup> Na'ankure Nagra Ra Anumzanki'na nanknahu nanekema hunaku'ma hanuana amne hanugeno, ana zamo'a fore hugahie. Hagi ana kemo'a zazatera meno ovugahianki, tamagri knafi ana zana fore hugahie. Tamagra keontahi vahe mani'nazanki'na, nanknahu nanekema huankemo'a nena raga'a rentegahie huna Ra Anumzana, Anumzamo'na hue. <sup>26</sup> Hagi Ra Anumzamo'a mago'anen amanage huno nasami'ne, <sup>27</sup> Vahe'mofo mofavremoka ko, Israeli vahe'mo'za amanage nehaze, avanagna zama ke'nea zamo'a kora forera osanigeta za'za kna manita vugahune nehu'za, kasnampa kema nehiana afete me'nea zanku nehie hu'za nehaze. <sup>28</sup> E'ina hu'negu amanage hunka zamasamio, magore huno kema hunte'noa ke'ni'amo'a zazatera meno ovugahianki, ame hu'na ana ke'ni'a eri nenanaga regahue huno Ra Anumzana Anumzamo'a hie hunka huo.

## 13

### *Havige kasnampa vahe'mo'zama knazama eri'naza naneke*

<sup>1</sup> Ra Anumzamo'a amanage huno nasami'ne, <sup>2</sup> Vahe'mofo mofavremoka, Israeli mopafi vahe'mo'zama havige kasnampa kema zamagra'a zamagesafinti'ma nehaza vhahera amanage hunka zamasamio, Ra Anumzamo'a amanage nehianki antahihi. <sup>3</sup> Hagi Ra Anumzana hankavenentake Anumzamo'a amanage hu'ne, Neginagi kasnampa vahe'mo'za mago'zana nonkazanagi zamagra'a antahintahima nevaririza vahe'mo'za kva hiho. <sup>4</sup> Hagi Israeli vahe'mota, tamagri kasnampa vahe'mo'za haviza hu'nea kumapi nemaniza afi kragna hu'naze. <sup>5</sup> Hagi ana vahe'mo'za kumamofo have keginama havizama hu'neana, mareriza eriso'ea osu'naze. Ana hu'neanki'za Ra Anumzamo'ma huhampri ante'nea kna zupama ha'ma eme nehanage'za hankaveti'za hara osugahaze. <sup>6</sup> Hagi zamagra havige ava'hagnaza nege'za, havige kasnampa nehu'za, Ra Anumzamo tasamia ke

nehune hu'za nehazanagi, Nagra ozmasami'noa naneke nehu'za, zamagra ana naneke zmimo'ma eama'ma hanigu avega ante'za nemanize. <sup>7</sup> Hagi tamagra havige avana negeta, Nagra osu'noa kegura Ra Anumzamo hie huta havige kasnampa kea nehaze. <sup>8</sup> E'ina hu'negu Ra Anumzamo'a amanage hu'ne, Na'ankure tamagra havige nehuta, havige ava'nane negazagu, Nagra hara reneramantoe huno Ra Anumzamo'a hu'ne. <sup>9</sup> Hagi havige ava'nagna zama nege'za, havige kasanampa kema nehaza kasnampa vahera nazana erisga hu'na hara huzmantegahue. Ana hanuge'za Nagri vahe kevufina omanige, Israeli vahetmima zamagima krente'naza avontafepina zamagia kreontegahaze. Ana hanage'za Israeli mopafina vano osugahaze. E'ina hanuge'za Nagrikura Ra Anumza mani'ne hu'za ke'za antahi'za hugahaze. <sup>10</sup> Na'ankure havige kasnampa vahe'mo'za vahe'ni'a rezamatga hu'za amanage nehaze, hazamoke'ma hu'nefina hara omane'nigeta tamarimpa fru huta manigahaze hu'za nehaze. Hagi vahe'mo'zama kumamofo have keginama hapa'ma kate'za hunaku'ma nehzage'za, ana kasnampa vahe'mo'za efeke masave fre'za eri nehananaze. <sup>11</sup> E'ina hu'negu kuma keginare'ma efeke hapama fre hanane'naza vahera, ana keginamo'a traka huno masegahie huta zamasamaho. Nagra tusi ko'ene komopa ko'ene, ununko'ene huntanenkeno ana have kegina eri fragu vazitregahie. <sup>12</sup> Hagi ana kuma have keginamo'ma tapage'ma huraminige'za ana kasanampa vahera zaman-tahige'za, efeke hapama fre hanane'naza kegina, iga me'ne hu'za hugahaze. <sup>13</sup> E'ina hu'negu Ra Anumzana Agra miko'zama kegavama hu'nea Anumzamo'a amanage hie, Narimpa ahe'zamante'na ununkora hunente'na, nasivazi zamante'na ko'ene komopa ko'enena huntanenkeno vazihagagino maka zana eri havizantfa hugahie. <sup>14</sup> Hagi efeke pentima hu'naza kuma have kegina eri tapage hutre'nugeno mopafi masenigeno tra'ma anteta tro'ma hu'naza tra'mo'a amate megahie. Hagi ana have keginamo'ma faragu vaziramino tamarefitenketa, Nagrikura Ra Anumza mani'ne huta keta antahita hugahaze. <sup>15</sup> Anama hutena have keginane, ana keginare'ma efeke hapa'ma fre hananenaza vahe'enena, narimpa ahe'zana zamagrite rupopo huvagaregahue. Ana nehu'na amanage hu'na hugahue, have keginamo'a nomanegeno, ana keginare'ma efeke hapa'ma fre hananenaza vahe'enena omani'naze hu'na hugahue. <sup>16</sup> Israeli kasnampa vahetmima, Jerusalemi kumaku'ma kasnampa kema nehu'za, havige ava'nama nege'za, ha'zana omanegahianki fru huta maniho hu'zama nehaza zanena omanegahie huno Ra Anumzamo'a hu'ne.

<sup>17</sup> Hagi vahe'mofo mofavre'moka, menina Israeli a'nemo'zama zamagra'a zamagesafinti'ma havige kasanampa kema nehaza a'neramina, zamazeri haviza hu kasnampa ke huzmantenka, <sup>18</sup> amanage huo, Ra Anumzana Mikozama Kegavama Hu'nea Anumzamo'a amanage hie, Safezanema ne-huta vahe zamazampi avasase zama tro huta antani nezmaneteta, tavravema hatita zamasenire'ma anaki nezmantaza zamo'a krifufima zagagafa aze-riaza huno vahera aze'nerianki kva hiho. Hagi tamagesama antahi'zana vaheni'a zamazeri haviza hugahune huta nehuta, tamagra knare huta manigahune huta nehazanagi, Nagra ana zantamina eri haviza hutre-gahue. <sup>19</sup> Hagi osi'a bali azampi eri avite'za tro hu'naza bretine, osi'a breti ankra'a Nagri vahepintira enerita, Nagri nagia eri haviza hu'naze. Ana nehuta ofriga vahetmina zamahe nefrita, friga vahetamina zamatrage'za nemanizageta ofrita knare huta manigahaze huta havigea nezmasamize. <sup>20</sup> E'ina hu'negu Ra Anumzana Mikozama Kegava Hu'nea Anumzamo'a

amanage hie, Safezama huta vahe zamazampi asama tro'ma huntazageno krifufima namama azeriazama huno zamazeri'nea zana zamazampintira rutraga hutre'nugeno, namaramimo'za krifufinti aru kruuvazi'za hare'za frazankna hu'za kinafintira fru hu'za manigahaze. <sup>21</sup> Ana nehu'na tavaravema hatita zmasenire'ma anaki zmante'naza zana eri tagato hutre'na, vaheni'a zamagu vazinuge'za mago'enena tamagri hihamufina omanigahaze. E'ina hanugeta Nagrikura Ra Anumza mani'ne huta keta antahita hugahaze. <sup>22</sup> Na'ankure tamagrama havige zama hazazamo fatgo vahe'mokizmia muha zana eri netraze. Hianagi Nagra mago zana hu'na zamazeri zamasunkura osu'noanagi, tamagra zamazeri fatgo hazage'za kefo avu'ava zana atre'za zamagura ovazi'naze. <sup>23</sup> E'ina hu'nazagu havige avanagna zama negaza a'nemota ru'enena nonketa, safezanena osugahaze. Tamagri tamazampintira vahe'ni'a zamagu vazi'nena, Nagrikura Ra Anumza mani'ne hu'za ke'za antahiza hugahaze.

## 14

*Havi anumzante mono'ma nehaza ranra vahetami huhaviza  
huzmante'nea naneke*

<sup>1</sup> Hagi anante mago'a Israeli ranra vahe'mo'za e'za navuga emanizageno, <sup>2</sup> Ra Anumzamo'a amanage huno nasm'i'ne, <sup>3</sup> Vahe'mofo mofavremoka, ama kva vahe'mo'za kaza osu havi anumzazmia zamagu'afi avrenente'za, kefo avu'ava'ma nehu'za tanafa'ma hanaza zana zamavuga ante'naze. E'ina hu'negu zamatrengue'za Nagri'enena nanekea osugahaze. <sup>4</sup> E'ina hu'negu Ra Anumzana miko zama kegavama hu'nea Anumzamo'a amanage hie hunka zamasamio, Mago Israeli vahe'mo'za kaza osu havi anumzama avre agu'afima nenteno, kefo avu'avazanu traka huno mase'za avuga tro hunenteno, kasnampa vahete'ma ne-ea vahera agrama hu'nenia avu'avazante ante'na Ra Anumzamo'na Nagrani'a kenona huntegahue. <sup>5</sup> E'ina hu'na Nagri'ma natre'za kaza osu havi anumzama nevaririza Israeli vahe'mokizmi zamagu'za eri rukrahe hugahue. <sup>6</sup> E'ina hu'negu Ra Anumzana Mikozama Kegavama Hu'nea Anumzamo'a amanage hie hunka Israeli vahera zmasamio, Kaza osu anumzana tamefi hunemita, hi'mnage avu'ava'ma nehaza zana atreta tamagu'za rukrahe hiho. <sup>7</sup> Hagi Israeli vahe'mo'o, ruregati'ma enemania vahe'mo'za Nagri'ma amefima hunenamino, kaza osu havi anumzama agu'afi avre nenteno, kefo avu'avaza nehuno, tanafa'ma runo trakama hania zama avuga tro hunenteno Nagri antahintahima erinaku'ma kasnampa vahetema nevia vahera Nagra Ra Anumzamo'na kenona huntegahue. <sup>8</sup> Ana nehu'na namefi humi'na ha'rentena mago avame'za azeri tro nehu'na Israeli vahe'ni'afintira ahe kasopetresugen omanigosie. E'ina hanuge'za Nagrikura Ra Anumza mani'ne hu'za ke'za antahi'za hugahaze. <sup>9</sup> Hagi kasnampa ne'mo'za kasnampa kema haniana, e'i Nagra revataga hanugeno hugahianki'na, vahe'ni'amokizmi amu'nompintira naza rusute'na ahe frigahue. <sup>10</sup> Hagi kasnampa vahe'ene kasnampa vahete'ma mago'a antahintahima erinaku'ma neaza vahe'enena magozahu knaza zamigahue. <sup>11</sup> E'ina hanenke'za Israeli vahe'mo'za mago'anena kana atreza havi kampina ovuge, kumira huza zamazeri pehena osugahaze. Hianagi zamagra Nagri vahe mani'nage'na, Nagra zamagri Anumza manigahue huno Ra Anumzana mika zama kegavama hu'nea Anumzamo'a hu'ne.

<sup>12</sup> Hagi Ra Anumzamo'a amanage huno nasm'i'ne, <sup>13</sup> Vahe'mofo mofavremoka, mago mopafi vahe'mo'zama Nagritema mani fatgoma osu'za kumi'ma hanage'na, nazana rutare'na ne'zazamia eri fanane nehu'na,

agatontoza atrenugenō ne'zanku hu'za zagagafamo'za fri vagaregahaze. <sup>14</sup> Hagi Noa'ma, Danieli'ma, Jopu'ma hu'za ana mopafina manigahazanagi, zamagri fatgo avu'avazamo'a zamagura ovazizasine. Nagra mikazama kegava hu'noa Ra Anumzamo'na nehue. <sup>15</sup> Hagi Nagrama mago'a afi zagaramima huzmantesuge'za ana mopafi vahe'ma zamahe'za neza eri vagamare'nageno, mopamo'ma havizama hinkeno'a vahe'mo'za koro hu'za ana mopafina vano osugahaze. <sup>16</sup> Tamage hu'na Nagrama miko zama kegavama hu'noa Ra Anumzamo'na huankino e'i ana 3'a vahetmina anampina mani'naresina, ne'mofazmia zamagura ovazitfa hazasine. Zamagri-ake zamagu nevazi'na, anama nemaniza mopa eri havizantfa husine. <sup>17</sup> Ana huge ha' vahe huzmantoge'za ana mopafi vahe'ene afukra zminena eme zamahe'za eri vagarazasine. <sup>18</sup> Tamage hu'na Nagra kasefa hu'na mani'noa Ra Anumzamo'na huankino, e'i ana 3'a vahetmina anampina mani'naresina ne'mofazmia zamagura ovazi'tfa hazasine. Hagi zamagrama hu'naza fatgo zamavu'zamava zanterā zamagrike zamagu nevazi'na mopazmia eri havizantfa husine. <sup>19</sup> Ana huge ruzahu ruzahu kefo krirami netre'na, narimpahe'zana ana mopafi eri tagitrogeno vahe'ene afukra zaminena amanezama hiaza hu'za zamahe'za eri vagaresine. <sup>20</sup> Tamage Nagra kasefa hu'na mani'noa Ra Anumzamo'na huankino, Noa'ma, Danieli'ma, Jopu'ma hu'za anampina mani'naresina ne'mofazmia zamagura ovazi'tfa hazasine. Hagi zamagri'a fatgo zamavu'zamava zamo'a zamagrike zamagura vazisine. <sup>21</sup> Na'ankure Ra Anumzana Anumzamo'a amanage hu'ne. Ama'na 4'a knazana atrogeno zamazeri haviza hisine, ana 4'a knazana, ha' vahe huzmantegē, agatontoza atrege, afi zagarami huntege, kefo kri atrege hugeno Jerusalemi kumapi vahe'ene afu krazminema zamahe hanara huresina tusi havizantfa hisine. <sup>22</sup> Hianagi anampina mago'a vahe'ma zamatre'nage'za mani'naza vahe'ene ne'mofazmine zamavare'za e'nage'za, tamagrane Babiloni emanigahaze. Hagi ana vahe'mo'zama zamavu'zamava eme nehu'za mago'a avamenename zama eme hanaza zama kesunka, ruzahu ruzahu knazama atrogeno'ma Jerusalemi kuma'ma eri havizama hia zana kagra'a kavufinti kegahane. <sup>23</sup> Hagi ana mofavre'ramimofo zamavuzzmava'ene mago'a avamenename'ma hanaza zama kesunka, tusi kasunku huzmantegahane. Na'ankure Agra amnea ana zana osu'noanki, agafa'a me'nere anara hu'ne hunka kenka antahinka hugahane huno Ra Anumzamo'a hu'ne.

## 15

*Jerusalemi vaheku haviza hu'nea waini nofi kna hu'naze huno hunte'nea  
naneki*

<sup>1</sup> Hagi Ra Anumzamo'a amanage huno nasmi'ne, <sup>2</sup> Vahe'mofo mo-favremoka, hagagema hu'nea waini rampa'amo'a zafafi zafaramimofo rampa'a agaterenefi? <sup>3</sup> Hagi ana waini nofimofo ramparetira eri'za mago'a knare'zana tro nehu'za, mago'a eri'za kavoma hantinte'zana trora nehazafi? <sup>4</sup> Hagi ana waini rampama tevefima kresageno'ma urefa erefa'ama nereno amunoma'ama tegege vazintesiama'a eri'za mago'azana trora hugahazafi? <sup>5</sup> Hagi tevema ore'nhere'ma eri'za mago'a zama tro huga'ma osu'nea waini rampa, inankna hu'za tevemo'ma tegege vazint'e'nesiama'a eri'za mago'azana trora hugahaze? <sup>6</sup> E'ina hu'negu Anumzana Mikozama Kegavama Hu'nea Ra Anumzamo'a amanage hu'ne, Waini teve rampama zafafi tevenema eri haviamma hu'na tevema kroaza hu'na Jerusalemi kumapi vahera namefi huzamigahue. <sup>7</sup> Hagi namefi huzminenkeno tevefinti atre'za

atiramigahazanagi, ete tevefinke kasagegahaze. E'ina hanugeta Nagrikura Ra Anumza mani'ne huta keta antahita hugahaze.<sup>8</sup> Nagra mopazmia eri havizantfa hugahue. Na'ankure zamagra Nagrira tamage hu'za namagera onte'naze huno Ra Anumzana Mikozama Kegava Hu'nea Anumzamo'a hu'ne.

## 16

*Jerusalemi kumate vahe'mo'za Anumzamofonte mani fatgo osu'naza  
naneke*

<sup>1</sup> Ra Anumzamo'a mago'ane amanage huno nasmi'ne, <sup>2</sup> Vahe'mofo mofavremoka, Jerusalemi kumate vahe'mo'zama hi'mna vuno kasri'nea avu'ava'ma nehaza zana eri ama hunka nezmasaminka, <sup>3</sup> Jerusalemi kumapi vhahera tamagra Kenani vahe'mofo mopafi fore hu'nazankino, neramafa'a Amori neki, neramarera'a Hiti a' mani'ne huno Ra Anumzamo'a hie hunka zamasamio. <sup>4</sup> Hagi fore'ma hu'nanana ama'na hu'ne, kasema kantea knarera mago vahe'mo'e huno karikonofira taga huge, tinura koranka'a sese hugantege, hagea fregantege, tavravefina kazeri anovazi kantegera osu'ne. <sup>5</sup> Ana nehazageno mago'a vahe'mo'za kasuntagi kante'za kazeri so'ea osu'nazanki, megia trazampi katre'naze. Na'ankure kasema negantege'za zamavaresra hugante'naze. <sup>6</sup> Hige'na karanka enevu'na koana, kagra korampi ki'mu'nerenka mase'nanke'na, negage'na amanage hu'noe, ofri kasefa hunka manio! Hu'na nehu'na koranka'agura, ofri kasefa hunka manio hu'na hu'noe. <sup>7</sup> Kegava hugantogenka trazankna hunka marerinka ome nena hankeno, kavasasemo'a kagateregeno aminka'amo'a nena higeno, kavufafina kazokara tagi'neanagi, kukena osu kavapako mani'nane. <sup>8</sup> Ana hanke'na karanka ete mago'ane enevu'na kagoana, ko ve eri avamente kavufga avapa'ma mani'nankena, tavraveni'a eme rutare'na refitegante'noe. Ana nehu'na, hunagru hugante'na Nagri su'a kagra mani'nanankina, a' erigantegahue hu'na Ra Anumzamo'na hu kase hugante'noe. <sup>9</sup> Nagra tina fregante'na kavufgaretira korana sese hugantete'na, masavena fregante'noe. <sup>10</sup> Ana hute'na avasese'ane efeke zaza kukena eri'na hunegante'na, kagia nona kagafina hunegante'na, kasenirera knare tavrave anakinegente'na, knarezantfa hu'nea nakreku kavufgarera antanigante'noe. <sup>11</sup> Ana nehu'na asana kazampina antani negante'na, pasesua knankempina hunegante'na zago'amo marerisa zanteti kavasasea hugante'noe. <sup>12</sup> Ana nehu'na maremarea kagonafi renegante'na, rinia kagesafinena renegante'na, kuinimo nentania hento fafetori kasenifina antanigante'noe. <sup>13</sup> E'ina hu'na golireti'ene silvareti'ene konariria hunegante'na, knare huno zamana zamana hu'nea efeke tavravenu kukena hugante'noe. Hagi ne'zama kami'noana knare huno kne osi'osi hu flauaki, tume rima'agi, olivi masavenki hu'na kami'noe. Ana hugenka ra hunka konariri kamo'a kagateregenka kuini a'kna hu'nane. <sup>14</sup> Hagi ana'ma hankeno'a, konariri zanka'amofo agenkemo'a maka kumatega haru haru hu'ne. Na'ankure marerifa zantmima kami'noa zamo konararika'a eri knarezantfa hu'ne, huno Anumzana Mikozama Kegava Hu'nea Ra Anumzamo'a hu'ne. <sup>15</sup> Hianagi kagraka'a konaririgu antahinkeno raza nesegenka, ra kagi e'nerinka savri avu'ava zana hu'nane. Inankna vahe'ma kante'ma evia vahe'enena savri nehunka, ana konariri zanka'a ana vahetami ome zami'nane. <sup>16</sup> Hagi mago'a knare kukanaka'a erinka havi anumzantami kumatami avasasea hunezmantenka anampi savri avu'avara hu'nane. E'inahu avu'ava zana eri fore osuga

avu'ava eri fore hu'nane. <sup>17</sup> Hagi golireti'ene silvareti'enema marerisa konariri'ane zantmima tro'ma hugante'noana erink ve havi anumzantami tro humzantenka, ana havi anumzantamine savri avu'avara hu'nane. <sup>18</sup> Hagi Nagrama kami'noa avasese'ane kukanutu zamazantetumi tro'ma hunte'naza havi anumzamofo kofinentenka, Nagrama kami'noa olivi masavene mnanentake'za insensinuti kre mna nevunka monora hunentane. <sup>19</sup> Hagi knare huno kne osi'osi hu flauaki, tume rima'agi, olivi masavenki hu'nama ne'zama nesana zanema hu'nama kami'noana, havi anumzamofo avuga knare mna vu'zane hunka ofa hu'nane huno Anumzana miko zama kegava hu'nea Ra Anumzamo'a hu'ne. <sup>20</sup> Ana'ma hutenka Nagrama kami'noa ne'mofara zamahenka havi anumzantaminte kresramna vunte'nane. E'inahu monkoo avu'ava'ma huvavama hunka nevanana knare hunoganteo? <sup>21</sup> Hagi mofavreni'aramina zamahenka kaza osu havi anumzantaminte tevefi ofa Kresramana vu'nane. <sup>22</sup> Hagi ana kasri avu'ava'ma nehunka, savari hunka vanoma nehunka osi'ma mani'enkama hu'nana kavukava zana kage kani'nano! Kagra kavufga kavapa'ma mani'enkama kagra korampi'ma ki'mu'ma re'nana zankura kagesa nontahine. <sup>23</sup> Maka kefo avu'ava'ma hu'nana zanteria, rama'a knazana kagritera efore hugahie, huno Anumzana mika'zama kegavama hu'nea Ra Anumzamo'a hu'ne. <sup>24</sup> Hagi rankumamofo amu'nompina kaza osu havi anumzatmimofo mono'ma hunte kumatamina avasese huntetere hu'nane. <sup>25</sup> Hagi kumamofo kamo'ma maka vuno enoma hu'nerega havi anumzatmimofo mono hunte kumatami tro husga huntetere nehunka, konaririka'a azeri hi'mnage nehunka kante'ma enevaza vahe'enena savarira nehane. <sup>26</sup> Hagi kagri'ma negage'za tusiza hu'zama kavesinegantaza Isipi vahe'ene savrira hunka nevunka, nazeri narimpa nehane. <sup>27</sup> E'ina hu'negu nazana rusute'na hara renegante'na, mopaka'a eri osi hu'noe. Ana nehu'na zamragagu'ke'ma antahi ha' vahetami, Filistia mofa'neramomofo zamazampi kavrentoge'za, kefo monkoo kavukva zankura tusi antri nehu'za zamagogogu hu'naze. <sup>28</sup> Ana nehunka mago'ane Asiria vahe'enena savri hunka monkoo'zana hu'nane. Na'ankure monkoo zama hana zamo'a onkagare'e. Hagi ana vahe'enema monkozama banana onkagareta hu'ne. <sup>29</sup> Ana nehunka mago'ane Babiloni vahe'ene ana savri monkoo avu'ava zana ome hu'nananagi, ana monkoo avu'ava zamo'a onkagareta hu'ne.

<sup>30</sup> Hagi kagu'afina monkoo avu'avamo aviteno kri kami'ne. Na'ankure zamagaze osu monkoo anemo'zama nehazaza hunka ana monkoo avu'avara nehane huna Miko'zama Kegavama Hu'noa Ra Anumzamo'na nehue. <sup>31</sup> Hagi rankumamofo neone kamo'ma ometre emetre'ma hu'nerega havi anumzamofo mono'ma hunte kumatamina tro huntetere hu'nane. Hianagi kagra mago'a monkoo a'nemozama nosazaza hunka kagranema monkoo'zama hugantaza vahetetira zagoa e'ori'nane. <sup>32</sup> Kagra vere a'mo nevema atreno savri huno vano hiankna hunka, negave'ene hugazana kenka antahinka osu'nana vene'nene hunka vano nehane. <sup>33</sup> Hagi monkoo a'nemo'za zagore monkoo zana hu'za vano nehazanagi, kagra maka kazi-gati'ma aza vene'neramina zago nezaminka masave hunka zamavranke'za, kagri'enena eme monkozana nehaze. <sup>34</sup> E'ina hu'negu kagra ruga'a monkoo a'mofaknara osu'nane. Hagi vene'nemo'za monkoo'za hanune hu'za zagoa kami'za kantahi onke'nazanki, kagra'a zagoa nezaminka ke hanke'za monkoo'zana kagri'enena eme hu'naze.

<sup>35</sup> E'ina hu'negu monkoo a'moka Ra Anumzamo'ma nehiankea kama

antahio! <sup>36</sup> Anumzana Mikozama Kegava Hu'nea Ra Anumzamo'a amanage hie, Kagra vahe'mofoma azeri agafihе kavukva nehunka, oku kavufga zamaveri hunka monkozana hunka vano nehunka, kasrino hi'mnama vu'nea kaza osu havi anumzamofonte mofavreka'a ahenka korama'a ofa hunane. <sup>37</sup> E'ina hunanku monkozama nehunka musema hunka vanoma nehanke'zama kavesima negantaza vahe'tamine, zamavaresrama hunegantaza vahetaminena maka zamavare atru hugahue. Maka zamavare atru hanuge'za manigagine'za negagesage'na kukenaka'a hatetresugenka kavufa kavapako mani'nesanke'za mika oku kavufga kegahaze. <sup>38</sup> Ana nehu'na vema ante'naza a'nemo'za savri'ma hazage'za keaga huzmante'za knama nezami'zankna hu'na knazana negami'na, vahem'a zamahe frizageno'ma nezamizankna knaza kamigahue. Ana nehu'na tusi narimpa ahegante'na kahe frigahue. <sup>39</sup> Ana hute'na kavesima kante'za monko'zama hunegantaza vahe'mofo zamazampi kavre anta'enke'za, ana vahem'o'za kazeri haviza nehu'za, monkozama nehana kumatamine, havi anumzamtamima mono'ma hunentana nontaminena kahe'za tagana vazitregahaze. Ana nehu'za kukenaka'ane kavasese zanka'anena kahe'za eri hatetresagenka kavufga avapako manigahane. <sup>40</sup> Ana rama'a vahetami ke hanage'za e'za havenknonu eme kahe frite'za, bainati kazinknonu kavufga ru krakru hu osi'osi hutregahaze. <sup>41</sup> E'ina'ma hu'nana kavukva zanter a rama'a a'nemo'za negagesage'za, ana vahem'o'za nonka'a taginte'za knazana kamigahaze. E'ina hu'na monkozama nehana kavukvara asevazi kantesugenka, ete ru'enena monkozama hugante'nazegura vahera mizana osegahane. <sup>42</sup> Ana hanugenka narimpama ahegante'noa zamo'a ome vagarenigeno, kanivema reneganta zamo'a amne hina mago'enena narimpa aheogantegahue. <sup>43</sup> Na'ankure kote'ma osi'ma mani'nanke'nama knare'zama hu'na kegava krigante'na e'noa zankura kagesa ontahi, kefo avu'ava'zana hunka nazeri narimpa ahe'nane. E'ina hu'nanku kasrino hi'mnagema hu'nea avu'avazama hu'nana zanter nona hu'na knazana kamigahue huno Anumzana Mikozama Kegava Hu'nea Ra Anumzamo'a hu'ne. Ana hanugenka ko'ma hu'nana monko avu'ava zana kagra mago'anе agaterenka osugahane. <sup>44</sup> Hagi ko, maka vahe'mo'za kema hanafina kagrikura amanage hu'za hutere hugahaze, mofa'amo'a nererama nehia avu'ava nevaririe hu'za hugahaze. <sup>45</sup> Kagra negrera mofa mani'nanankino, negrera'a nevenku'ene mofavre'araminkura zamagote'zmanteno avresra huzmante'nea a'mofo mofa mani'nane. Hagi kagra kanunknahe'mofo nezmaganaga mani'nanankinka, zamavenenehe'ine mofavre'zmigura zamagote'zmante'za zamavaresra hunezmantaza a'nemokizmi nezmaganaga mani'nane. Hagi negrera'a Hiti a' manigeno negafa'a, Amori ne' mani'ne. <sup>46</sup> Hagi nunakamofo agi'a Sameriakino, mofane'aramine noti kaziga manigeno, negagna'a Sodomukino sauti kaziga mofa'nе naga'anе mani'ne. <sup>47</sup> Hagi kagra kefo avu'avazazmia nezmavaririnka, hi'mnagema hunku kasri avu'ava'ma nehazankna avu'ava zankera osu'nananki, zamagrira zamagaterenka maka kefo avu'ava zana hu'ne. <sup>48</sup> Kasefa hu'na mani'noa Ra Anumzamo'a tamage hu'na huanki, Sodomu'ene mofane'aramimo'za osu'nazankna avu'ava hu'nane huno, Anumzana miko'zama kegavama hu'nea Ra Anumzamo'a hu'ne. <sup>49</sup> Hagi nunakamo Sodomu'a amanahu kumi hu'ne, agrane mofane'amozanena zamavufaga ra nehu'za, rama'a ne'za nene'za mago zankura atupara nosazanagi, zamunte omnege'za atupama hu'naza vahera zamaza osu'naze. <sup>50</sup> Zamagra zamavufaga ra nehu'za hi'mnaga

zamavu'zmava Nagri navufina hu'naze. E'ina hu'nazagu mika vahera Nagra nezamage'na zamahe fri'noe. <sup>51</sup> Hagi Sameria'a kumira hu'neanagi, kagrira kagatereno rama'a kumira osu'ne. Na'ankure hi'mnage kumira kagra Sameriana agaterenka rama'a kumi hu'nane. Hagi tare nunaka'amokea kumira hu'na'anagi, osi'a knare hu'ne. Hianagi zanagrira zanagaterenka hi'mnage'ma hu'nea kumira hu'nane. <sup>52</sup> Hagi kagra tusi kagazegu huo, na'ankure kumi ka'amo'a kagateretfaza hu'ne. Hagi ana kumi'mo higeno nunaka'amokea kumi'zani'a omne vahekna hu'na'e.

<sup>53</sup> Hianagi Sodomune mofane'aramimofo fenonema rohure'za eri'za vu'nazana, ete eri avite'nezmante'na, Sameriane mofane'aramimofo fenozmima rohu'ma re'zama eri'za vu'nazana ete erivite nezmante'na, kagri fenonena ana zanke hu'na eri avite'gantegahue. <sup>54</sup> Ana hanugenka tamage hunka kagra maka zama hu'nana zankura kagazegu hugahane. Nagrama kazeri havizama hanua zama nunakamokema negesukea muse hugaha'e. <sup>55</sup> Hagi Sodomu'ene mofane'aramimo'zane, Sameria'ene mofane'aramimo'zanena, ete ko'ma mani'nazankna hu'za knare hu'za manisagenka, kagrane mofanekanena ana huta koma mani'nazankna huta knare huta manigahaze. <sup>56</sup> Hagi ko'ma knare hunka mani'nenka kavufga rama hana knafina, Sodomuna kefenkami atrenka mago kea huomi'nane. <sup>57</sup> Hianangi e'i ana kefo avu'ava zankamo'a eama hige'za maka vahe'mo'za ke'naze. Hagi menina Siria mofa'nemozane, agri tava'ontema manigagi'naza kumapi mofa'nemofozane, Filistia mofa'nemo'zanena hunte'za kagiza neraze. <sup>58</sup> Hagi monko avu'ava'ma hunka kasrino hi'mnagema hu'nea avu'ava'ma hu'nana zantera, mizama'a erigahane huno Ra Anumzamo'a hu'ne.

<sup>59</sup> E'ina hu'negu Ra Anumzana miko zama kegava hu'nea Anumzamo'a huno, kagrama hu'nana kavukva zante kazeri havi'zana hugahue. Na'ankure huvempama hunka Nagri'enema huhagerafi'nana kea ruhantagi'nane. <sup>60</sup> Hianagi ko'ma osi'ma mani'nanke'nama kagranema huhagerafi'noa huvempa kegu nagesa nentahi'na, ana huhagerafi huvempagea eri hankaveti'nena mevava huhagerafi huvempage megahie. <sup>61</sup> Hagi nunaka'amo'ene negagana'enema kagrite'ma ne-esakenka kagrama hu'nana avu'ava zanku kagesa nentahinka kagazegu hugahane. Hagi nunaka'amofone negagananena mofaka'ararenka hu'na kamigahuanagi, huhagerafi huvempa kema hu'noa zantera onkamigahuanki, amne kamigahue. <sup>62</sup> Hagi huhagerafi huvempa kea kagri'ene eri kasefa hu'na hanugenka, Nagrikura Ra Anumza mani'ne hunka kenka antahinka hugahane. <sup>63</sup> Hagi maka kumi'ma hu'nana kumika'ama atregantesugenka ana zanku'ma kagesama nentahisunka, kagazegu nehunka mago kea osu akohenka manigahane huno Anumzana miko zama kegava hu'nea Ra Anumzamo'a hu'ne.

## 17

### *Tare tumpantre'ne mago waini nof'mofo fronka naneke*

<sup>1</sup> Ra Anumzamo'a amanage huno nasm'i'ne, <sup>2</sup> Vahe'mofo mofavremoka, fronka kema kasamisua nanekea Israeli vahera zamasmio. <sup>3</sup> Amanage hunka zamasamio, Mikozama Kegava Hu'nea Ra Anumzamo'a amanage hie hunka zamasamio, mago ra tumpamofona ra agekonarare hunte'negeno, azokamo'a za'za huno ruzahu ruzahu avonkrenakre huno konarari'amo'a agatere'nea tumpamo hareno Lebanonzi zafafi vuno sida zafamofo amumpa ome nekafrrie. <sup>4</sup> Hagi ana sida zafa amumpama akafrifeno'a

erino keonke'zama zagore'ma netraza vahe'mokizmi mopafi vuno, ana vahe'mokizmi rankumapi ome kri'ne. <sup>5</sup> Hagi ana'ma huteno'a ana tumpamo'a mago'a avimzana Israeli mopafintira erino vuno, knare huno tima'ane mopafi ome hankre'ne. <sup>6</sup> Ana avimzamo'a hageno waini zafa sampreno, mopafi rafu'nare'ne. Hagi ana azankunamo'za eri arufagagi'za ana tumpama mani'nerega zamavugosa hunente'za, agata hage'za azankunara omere emere hu'naze. <sup>7</sup> Hagi ete mago ra tumpamofona anahukna huno ra agekona hunte'negeno, rama'a azoka me'ne. Hagi ana waini zafamofo arafu'naramine azankunatmimo'za ana tumpamo'a ti erino egahie hu'za zamagesa nentahi'za, rukrahe hu'za ana tumpama mani'nea kaziga zamavugosa hunte'naze. <sup>8</sup> Hianagi ana waini zafama hankre'neana rama'a azankuna reno rama'a ragarami renenteno, knare waini zafa fore hinogu knare mopafi tinkenare hankre'ne. <sup>9</sup> Hanki Ra Anumzana miko'zama kegavama hu'nea Anumzamo'a amanage hie hunka zamasamio, ana wainimo'a knare huno hageno marerino raga reontegahianki, Nagra rafuna'a eri vati trenugenno raga reontenigeno a'ninamo'a hariri hanigeno osaparegahie. Nagra amuhoa osu'na fru hu'na eri vati tregahuankino, mago hankave vahe'mo'a eme vati otresigeno rama'a sondia vahe'mo'zanena eme vati otregahaze. <sup>10</sup> Hagi ana wainima ete vatinoma krisiana, knare huno hagegahifi ko? Ifi zage hanati kazigati'ma esia zaho'mo eme eri hagage hugahio? I'o, anama knare'ma huno hageno mareri'nea mopafi mani'neno hagage hugahie.

### *Fronka kemofo agafa'a eri ama hu'nea naneke*

<sup>11</sup> Hagi Ra Anumzamo'a amanage huno nasmi'ne, <sup>12</sup> Keontahi Israeli vhahera amanage hunka zamasamio, Tamagra tumpamofa fronka kemofo agafa'a antahi ani' hu'nazafi? Babiloni kumate kini ne'mo'a Jerusalemi kumate eno, kini ne'ene ugagota kva vahe'araminenam zama varenno Babiloni vu'ne hunka zamasamio. <sup>13</sup> Hagi Juda kva vahe'mofo mofavre'ramimpinti mago ne' avreno ana ne'ene huhagerafi huvempage nehuno, agri agor-agama mani'neno maka kema haniamma antahimisigura huvempage hu'ne. Ana nehuno ana mopafima ugagotama hu'naza kva vahetmina zama varenno Babiloni kumate vu'ne. <sup>14</sup> Hagi e'inama hu'neana Israeli vahe'mo'za hanaveti'za hara huonte'za, agri agorga mani'neza agri kema nevaririza mopazmire'ma manisagu huvempa kea hu'naze. <sup>15</sup> Hianagi Juda kini ne'mo'a Babiloni kini nera ha' arenenteno, ha'ma eme aza huza hanagu rama'a sondia vahetamine hosi afutaminena Isipi kumateti ome zama varenka eno huno agri agi'ma erino Isipima unemania eri'za ne'a hunte'ne. Hagi ana antahintahi'amo'a ome knare hugahifi? E'i ana'ma hania zamo'a Babiloni kini ne'mofo azampintira rugraru vazigahifi? Nanekema huvempa huke huhagerafina'a kea ruhantgino atreno fregahifi? <sup>16</sup> Kasefa hu'na mani'noa Ra Anumzana Nagra hankavenentake Anumzamo'na huankino, tamage huno Juda kini ne'mo'a kinima azeri otigekema kema anakike huhagerafi huvempa kema hu'na'a kini ne'mofo kumapi Babiloni frigahie. <sup>17</sup> Hagi Babiloni sondia vahe'mo'ma Juda vahe kuma'ma avazagi kagiza mani'neza ha'ma hanaza zama kuma keginamofo meg'i'ama mopama ante hihi hu'za mani'neza rama'a vahe'ma zama he fri'zama nehanageno'a, Isipi kini ne' Fero'a hankave sondia vahe'a zama varenno egahianagi, zama osugahaze. <sup>18</sup> Hagi Juda kini ne'mo'a kema ananekino huvempama hu'nea kea ruha'nentagino Babiloni kini ne'enema huhagerafi'nea

kea ovariri'ne. Na'ankure agra azana ante nagamuteno hvempa huteno, ana kea ovariri'neankino ana knazana agate'oregahie. <sup>19</sup> E'ina hu'negu miko'zama kegava hu'noa Ra Anumzamo'na huankino, Nagri nagifima huhagerafi hvempa kema hu'neana ruhanentagino ovariri'neankina, Nagra ana nona'a knazana amigahue. <sup>20</sup> Nagra kukoni'a eri atranenkeno ana kukomo azerinige'na avre'na Babiloni kumate knazana ome amigahue. Na'ankure hvempama hu'nea kea rutagreno, Nagritera mani fatgo hunora omani'ne. <sup>21</sup> Hagi hankave sondia vahe'aramina bainati kazinteti zamahe hana hanige'za, manisaza sondia vahe'mo'za maka kaziga atre'za panani hu'za fresagenka, Ra Anumzamo hu'nea kante amanara hie hunka kenka antahinka hugahane. <sup>22</sup> Hagi Mika'zama Kegava Hu'nea Ra Anumzamo'a amanage hu'ne, Nagra zaza sida zafamofo amumpa'a akafr'i'a, Israeli mopafima za'za huno mareri agatere'nea agonafi ome krigahue. <sup>23</sup> Hianagi Israeli mopafima za'za huno mareri agatere'nesia agonafi ome krisugeno, hageno ome rahuno azankunatamina vuno eno huno ragaramina renen-teno marerisa zafa fore hanigeno, agigu agigu namaramimo'za e'za ana sida zafa tonapinka nona eme ki'za manigahaze. <sup>24</sup> Hagi zaza zafaramina eri atupa nehu'na, atupa zafaramina eri za'za nehu'na, kasefa zafaramina eri hagage nehu'na, hagage zafaramina eri kasefa hanenkeno kasefa huno hageno marerinke'za, Nagrikura Ra Anumza mani'ne hu'za zafaramimo'za ke'za antahi'za hugahaze. Nagra Ra Anumzamo'na huanki'na ana zana hugahue.

## 18

### *Anumzamo'ma fatgoma huno vahe'ma refkoma hania zamofo naneke*

<sup>1</sup> Ra Anumzamo'a amanage huno nasmi'ne, <sup>2</sup> Zamafah'e'moza aka krepi raga nazageno mofavre'zmimofo zamagitera akahune hutama Israeli vahe'motama nehaza fronka nanekemofo agafa'amo'a nankna hu'ne? <sup>3</sup> Nagra kasefa hu'na mani'noa Ra Anumzamo'na huankino, mago'mo'e huno Israeli mopafina ama fronka nanekea osutfa hugahaze. <sup>4</sup> Na'ankure mika vhahera Nagri vaheke mani'naze. Hagi nefae'ene nemofo'enena Nagri vahe mani'na'ankino, iza'o kumi'ma hanimoke frigahie. <sup>5</sup> Hagi mago fatgo avu'ava'ma nehania vahe'mo'ma knare huno fatgo avu'ava'ma nehuno, <sup>6</sup> havi anumzamofonte'ma Kresramanama vantesaza ne'zama onege, Israeli vahe'mofo kaza osu havi anumzante mono huontegi, ru vahe'mofo a'nene savri nosuno, ika kri eri'nesia a'ene monko'za nosuno, <sup>7</sup> mago vahe'mofo havige huno keonke'zama'a eri havia nosuno, amigahue huno'ma eri'nesia zana ete ami fatgo nehuno, musufa noseno, amunte omne vahe ne'za nemino, kukena'a omane vahe kukena hunenteno, <sup>8</sup> zagoma nofi'ma huno eri'nea vhahera agofetu huno zago agia ahenteno e'norino, havi avu'ava'ma huzankura koro nehuno, tare vahe'mofo kea fatgo kazigati refko nehuno, <sup>9</sup> kasegeni'ane tra ke'ni'anema kegava huno amage'ma antesuno'a, agra fatgo vahe manigahiankino tamage huno ofri manigahie huno Miko'zama Kegava Hu'nea Ra Anumzamo'a hu'ne.

<sup>10</sup> Hianagi e'inahu huno'ma fatgo avu'ava'ma nehania vahe'mofo mofavremo'ma vahe'ma aheno korama'a eri neragino, nefuma knare osu avu'ava'ma hunenteno, <sup>11</sup> nefae'ana osugahianagi, agra havi anumzamofonte'ma kresramanama vantesaza ne'zana neneno, ru vahe'mofo a'nene

savri nehuno, <sup>12</sup> zamunte omne vahe'ene miko zankuma atupama ne-haza vhahera zamazeri savri huno fenozmia enerino, vahe'za musufa enerino, kamigahue huno'ma hvuempa huno eri'nea zana nomino, havi anumzamofonte monora hunenteno, hi'mnage avu'ava nehuno, <sup>13</sup> zagoma nofi'ma hu'nea vhahera rama'a agofetu huno zago agia ahenteno e'neria vahe'mo'a agra ofri amne manigahio? I'o. Agra amnea omanigahianki, frigahie. Na'ankure kasrino hi'mnage avu'ava zantmi hu'neankino, tamage huno kumi'amofo knazana agra'a erino frigahie. <sup>14</sup> Hagi e'inahu kefo avu'ava'ene ne'mofo mofavremo'ma nef'a'ma hu'nea kumi avu'avazama negeno, avaririno ana avu'avara osu mani koro huno mani'neno, <sup>15</sup> havi anumzante'ma Kresramanama vuntesaza ne'zama onege, Israeli vahe'mofo kaza osu anumzante'ma mono huontegi, ru vahe'mofo a'nene savri nosuno, <sup>16</sup> mago vhahera havige hunteno keonke'zama'a eri havia nosuno, amigahue huno'ma eri'nesia zana ete nemino, musufa noseno, amunte omne vhahera ne'zana nezamino, kukenagu atupa hu'naza vhahera kukena hunezman-teno, <sup>17</sup> zamunte omane vhahera zamazeri haviza nosuno, zagoma nofi'ma hu vhahera agofetu huno zago agia ahenteno e'norino, kasegeni'ane tra ke'ni'anema kegava huno amage'ma antesuno'a, agra nef'a'ma hu'nea kumi avu'avazamofo nona hunora ofrigahianki, tamage huno amne manigahie. <sup>18</sup> Hagi nef'a'ma frigahie. Na'ankure agra havige huno vahe'mofo zantamina eri savri nehuno, musufa neseno, vahe'amofona knare avu'avara huoz-mante'neankino, ana kefo avu'va'zama hu'nea zanteri frigahie. <sup>19</sup> Hagi mofavre'amo'ma knare huno fatgo avu'ava'ma nehuno, kasege'nine tra ke'ni'anema kegava huno amage'ma nenteno, ofrino amnema manisigeta, amanage huta nantahigegahaze, nahigeno nef'a'ma hu'nea kumi'mofo mizama'a nemofo'a e'orie? huta hugahaze. <sup>20</sup> Hagi kumi'ma hania vahe'moke frigahie. Hagi mofavremo'ma nef'a'ma hu'enedia kumimofo nona'a knazana e'orisigeno, mago ne'mo'a mofavre'amo'ma hu'nesia kumimofo nona'a knazana e'origahie. Hagi fatgo avu'ava'ma nehania vhahera agri fatgo avu'avate mizana nemino, kefo avu'ava'ma hania vhahera, agri'a kefo avu'ava zante azeri haviza hugahie. <sup>21</sup> Hianagi kefo avu'ava zama nehania vahe'mo'ma kefo avu'ava zama netreno agu'a rukrahe huno tra keni'a amage nenteno, knare avu'ava'ene fatgo avu'ava'enema hanuno'a, ofrigahianki amne manigahie. <sup>22</sup> Hagi magore hu'na mago kumi'agura nagesa on-tahigosue. Na'ankure fatgo avu'avaza hugahiankino ofri amne manigahie. <sup>23</sup> Miko'zama Kegava Hu'nea Anumzamo'a huno, kefo avu'ava'ma nehia vahe'ma nefrigeta, tamagesama antahi'zana Nagrikura musena nehie huta nehazo? I'o. Nagra musena nosue. Hagi kefo avu'ava zama'a atreno am-nema mani'zanku nave'nesie. <sup>24</sup> Hianagi fatgo avu'ama nehania ne'mo'ma atreno'ma kefo avu'ava ome nehuno, kasrino hi'mnage avu'avazama ome haniana, agra manigahio? I'o. Agra omanigahianki frisigeno maka fatgo avu'ava'ma hu'nea zamo'a amnezankna hanige'na, Nagra ana zankura nagesa ontahigahue. Na'ankure kefo avu'ava huno kumi hu'neankino ana kumimofo nona'a omanigahianki frigahie. <sup>25</sup> Hianagi amanage huta hugahaze, Ra Anumzamo'ma hia avu'ava zamo'a fatgo osie huta hugahaze. Hagi Israeli vahe'mota antahiho, Nagri navu'navamo fatgoa hunefi, tamagri tamavu tamava'mo fatgoa hu'ne? <sup>26</sup> Hagi Fatgo avu'ava'ene vahe'mo'ma ana fatgo avu'ava'ama atreno kumi'ma haniana, agra kumi hugahianki frigahie. Na'ankure fatgo osu avu'azama hania zanku huno agra

frigahie. <sup>27</sup> Hagi kefo avu'ava'ma nehania vahe'mo'ma ana kefo avu'ava'ma atreno agu'ama rukrahe huno'ma fatgo avu'ava zama haniana, agra'a agu'vazigahie. <sup>28</sup> Na'ankure agra maka kefo avu'ava'ma hu'nea zana keno antahino nehuno, ana avu'ava zana atreno agu'a rukrahe hu'neankino, tamage huno agra ofrino manigahie. <sup>29</sup> Hianagi Israeli vahe'mota huta, Ra Anumzamofo avu'avamo'a fatgo osu'nne huta nehaze. Hagi tamage huno Nagri navu'navamo'a fatgoa osu'nefi? I'o. Tamagri tamavu tamava'mo fatgoa osu'nne. <sup>30</sup> E'ina hu'negu Israeli vhahera, magoke magoke'mota tama-grama hu'nesaza avu'ava zante ante'na Nagra refko huramantegahue huno Mikozama Kegava Hu'nea Anumzamo'a hu'ne. Hagi aru tamagri kumi avu'ava zamo tamazeri haviza hanigi kefo avu'ava zana atreta tamagu'a rukrahe hiho. <sup>31</sup> Hagi kefo avu'avazama nehaza zana netreta tamagu'a rukrahe huta kasefa tamagesa enerita kasefa avamu eriho. Hagi Israeli vahe'mota nahanigeta tamagra frigahaze? <sup>32</sup> Na'ankure vahe'ma nefrizage'na Nagra musena nosuanki, tamagu'a rukrahe huta ofri amne maniho hu'na Miko'zama Kegava Hu'noa Anumzamo'na nehue.

## 19

### *Israeli vahetmimofo ugagota kva vahetaminku zavi'ate'naza naneke*

<sup>1</sup> Ra Anumzamo'a amanage huno Izikieli'na nasami'ne, Israeli ugagota kva vaheku'ma zagamema hunka zavi'ma atesanana, <sup>2</sup> amanage hunka za-vira tegahane, negrera'a kore osu laioni mani'neankino, kasefa laionirami-mofo amu'nompina mani'neno anenta'aramina knare huno kegava hu'ne. <sup>3</sup> Hagi anampintira mago ve laioni anentara knare huno kegava higeno, hankavenentake Laioni efore huteno zagagafane vahe'enema ahenoma nesia avu'avara rempi hu'ne. <sup>4</sup> Hagi ana zamofo agenkema miko mopafi vahe'mo'zama nentahi'za, kerise'za krifu anaginte nazageno ana kerifi ana laionimo'a tamige'za azeri'za nofi rente'za avazu hu'za Isipi mopafi vu'naze. <sup>5</sup> Hagi nerera'a nontegama esigu aveganteno maniana, ana laioni anentamo'a ometfa hu'ne. Hagi ana anenta'mo'ma ufanene higeno'a, anenta'aramimpinti mago avreno kegava nehigeno ome ra huno hankave-nentake laioni efore hu'ne. <sup>6</sup> Hagi laioniramime vano nehuno rama huno hankavema netino'a, zagagafama aheno ne'zana rempi huteno vhahera aheno ne'ne. <sup>7</sup> Hagi agra hankave vihuramina tapage hunetreno, ranku-matamina eri haviza nehuno, ranke huno agerura runo vano nehuno, ana mopafima mani'naza vhahera zamazeri koro hu'ne. <sup>8</sup> Ana hige'za mika mopafi vahe'mo'za eza keri eme kafinte'nazafi uramige'za kukozmia agofetu rutarente'za azeri'naze. <sup>9</sup> Hagi ana kerifintira azeri'za vogisifi antete'za avre'za Babiloni kini nete vute'za kina ome huntazageno, Israeli agonaramimpina mago'enena ra agerura runo vano osu'ne. <sup>10</sup> Hagi negrera'a tinkenare'ma me'nea waini hozaka'afima me'nea waini zafamo'ma rama'a tima e'nerino, rama'a azankunatami omere emere nehuno rama'a rgama renteankna hu'ne. <sup>11</sup> Hagi ana zafamofo azankunatmimo'za ome hankaveti'za kini vahe'mo'zama zamazampima eneriza azota fore hu'naze. Hagi ana waini zafamo'a za'za huno mika zafa agatereno marerigeno rama'a azankunatami me'ne. <sup>12</sup> Hianagi tusi Narimpa ahente'na ana waini zafa tasagihu mopafi atrogeno zage hanati kazigati zaho'mo'a maka raga'a eri harari hutregeno, azankunatmimo'za hantagiramiza hagege hutazage'za tevefi krazageno teno eri hana hu'ne. <sup>13</sup> Hagi menina hagage

huno ti omne kokampi ana wainia vatino ome kri'ne. <sup>14</sup> Hagi ana waini zafamofo azankunaramimpinti tevea arukru agata'ane raga'anena teno eri hana higeno, azankunamo'zama kini vahe azompama fore'ma huga azankuna tamina anampina magore huno omnetfa hu'ne. Hagi ama zavi zagamekino, zاغامه huno zavimate zagame megahie.

## 20

### *Israeli vahe'mo'za Anumzamofonke ontahi'naza naneke*

<sup>1</sup> Hagi Babilonima kinama huta mani'nonkeno 7nima hia kafumofo, namba 5fu ikamofona 10ni knazupa Israeli ranra vahe'mo'za Ra Anumzamofontegati antahintahi erinaku navuga emani'naze. <sup>2</sup> Ana hazageno Ra Anumzamo'a amanage huno nasmi'ne, <sup>3</sup> Vahe'mofo mofavremoka, Israeli ranra vahetamina amanage hunka zamasamio, Mikozama Kegava Hu'nea Ra Anumzamo'a huno, tamagra Nagri nagenoka huta antahintahi erinaku e'nazo? Nagra kasefa hu'na mani'noa Ra Anumzamo'na huankita, tamagra nagenoka huta antahintahia e'origahaze. <sup>4</sup> Hagi kagra keaga huzmantenka refko huzmanto, vahe'mofo mofavremoka, keaga huzmantenka zamafahe'mofo hi'mnage avu'ava zama zamavariri zama nehaza zana eri ama' huge'za negenagenka, <sup>5</sup> amanage hunka zamasamio, Mikozama Kegava Hu'nea Anumzamo'a amanage huno hie, Israeli vahe'ma Nagri vahe manigahaze hu'nama huhampri'noa kna zupa, Isipi mopafi Jekopu mofavreramina huvempa huzmante'na Nagra Ra Anumzanamo'na tamagri Anumza mani'noe hu'na huama hu'noe. <sup>6</sup> Hagi ana knarer Nagra Isipi mopafintira zamavare atirami'na kasefa mopama zamigahuema hu'na huhampri'noa mopafi zamavare'na vugahue. Ana mopafina ami rine tume rimo'enena avitegeno maka mopa agatere'nea mopagino knare'zantfa huno hentofaza hu'nea mopa me'ne. <sup>7</sup> Hagi nagra amanage hu'na zamasami'noe, hi'mnage zama ante'nazana mago mago'mota eri netreta, Isipi vahe'mofo kaza osu havi anumzana monora hunteta tamagra'a tamazeri pehena osiho hu'noe. Nagra Ra Anumzana tamagri Anumza mani'noe hu'na zamasami'noe. <sup>8</sup> Hianagi zamagra ha'renante'za ke'ni'a ontahi'naze. Ana nehu'za ana hi'mnage zama zamavugama ante'nazana zamefira huomi, Isipi vahe'mofo havi anumzantera monora hunte'za vu'naze. Ana nehazageno Nagrira tusi narimpa ahege'na, narimpa ahezmante'na Isipi mopafi zamazeri haviza hugahue hu'noe. <sup>9</sup> Hianagi umani'naza kumate vahe'mofo zamavufima huvempama hu'na, Isipi'ma zamavare'na egahue hu'nama hu'noa zanku nagesa nentahi'na, Nagima eri haviza nehu'za nagazema erinami zanku'ene ana zana osu'noe. <sup>10</sup> E'ina hu'negu Isipi mopafintira zamavare'na atirami'na, ka'ma kokampina e'noe. <sup>11</sup> Nagra tra ke'ni'a nezami'na, kasegeni'a zamasmi'noe. Na'ankure ana kasegeni'ama amage'ma antesimo'a, ofri manigahie. <sup>12</sup> Hagi ana nehu'na mani fruhu kna Sabatima zami'noana, Nagri'ene zamagri'ene amu'nompi mago avame'za me'nenige'za, Ra Anumzamo huhampri ranteno tazeri ruotge hu'nea vahe mani'none hu'za ke'za antahi'za hugahaze. <sup>13</sup> Hianagi Israeli vahe'mo'za ka'ma kokampima ne-eza Nagri kea amage nonte'za, kasege'ni'ane tra ke'ni'anena zamefri humi'naze. Zamagrama tra keni'a amage'ma antazaresina knare hu'za manizasine. Sabati manigasa knani'a kegava osu'naze. E'ina hu'nagu ka'ma kokampima neazage'na narimpa ahezmante'na zamazeri haviza hugahue hu'noe. <sup>14</sup> Hianagi

negazage'nama Isipiti'ma zamavare'na atirami'nama e'noa vahe'mokizmi zamavufima, e'inahu'ma hanu'na Nagra'a nagima eri haviza huzanku Israeli vahera zamazeri havizana osu'noe. <sup>15</sup> Hagi ka'ma kokampima neazage'na nazana erisga hu'na amanage hu'na hvempa hu'noe, miko mopama ageterenea mopama amirine tumerimo'enema avite'nea mopama zamigahuema hu'na hvempama hu'noa mopafina zamavare'na ovugosue hu'na hvempa hu'noe. <sup>16</sup> Na'ankure zamagra keni'a amagera nonte'za, tra keni'a zamefi hunemi'za, Sabati knani'a kegava nosu'za, vahe'mo'za zamazanteti trohu'naza anumzantaminte monora hunte'naze. <sup>17</sup> Hianagi zamavufima koana nasuntagige'na zamahe ofri'na, ka'ma kokampina zamazeri havizana osu'noe. <sup>18</sup> E'ina hu'negu mofavre naga'zmia amanage hu'na zamasmi'noe, tamafahe'mokizmi zamavu'zmavara novaririta, zamagrama hu'naza zana huta kaza osu havi anumzantamina monora hunteta tamazeri pehena osiho hu'na zamasami'noe. <sup>19</sup> Hagi Nagra Ra Anumzana tamagri Anumza mani'noanki, keni'a amage nenteta tra keni'a amage anteho. <sup>20</sup> Ana nehuta Sabati knani'aramina kegava hiho. Na'ankure amu'nontifina e'i ana knamo'a mago avame'za me'nena Ra Anumzamo'na tamagri Anumza manisugeta, tamagra Nagri vahe manigahaze. <sup>21</sup> Hianagi ana mofavreramimo'za ke'ni'a nontahi'za, ke'ni'a amagera nonte'za tra keni'a kegava nosu'za, ana kasegema amage'ma antazasina, ofri so'e hu'za manizasine. Hianagi anara osu'naze. Ana nehu'za Sabati knani'a kegava osu'naze. E'ina hazage'na ka'ma kokampina narimpa ahezmante'na zamazeri haviza hunaku hu'noe. <sup>22</sup> Hianagi Nagra e'inara osu'noe. Na'ankure mago'a kumapi vahe'mofo zamavufima Isipiti'ma zamavare'na e'noa zanku nagesa nentahi'na, Nagima eri haviza hu'zanku'ene ana zana osu'noe. <sup>23</sup> Ana nehu'na Nagra amanage hu'na ka'ma kokampina hvempa hu'na zamasami'noe, Israeli vahera zamahe panini hanuge'za hazagre'za mika mopafi vu'za e'za hu'za mago mago hu'za umani emanı hugahaze hu'noe. <sup>24</sup> Na'ankure zamagra kasegeni'a amagera nonte'za, tra keni'a zamefi hunemi'za Sabati knani'a kegava nosu'za, zamazanteti tro hu'naza anumzantaminte'ma zamafahe'mo'zama mono'ma hunte'naza havi anumzante monora hunte'naze. <sup>25</sup> Ana hazage'na Nagra zamatroge'za zamasimuma eri'za omani tra kene, kasegene amage ante'naze. <sup>26</sup> Ana nehu'na zamatroge'za musezazmia zamagonesa mofavrezmia zamahe'za Kresramana nevu'za, zamagra'a zamazeri pehena hu'naze. E'inama hu'noana Nagra zamazeri haviza hanuge'za Nagrikura Ra Anumza mani'ne hu'za ke'za antahiza hihogu anara hu'noe. <sup>27</sup> E'ina hu'negu vahe'mofo mofavremoka amanage hunka Israeli vahera zamas mio, Miko'zama Kegava Hu'nea Ra Anumzamo'a huno, Tamafahe'za anahu kna hu'za huhaviza hunante'za zamefi hunami'naze. <sup>28</sup> Hagi zamigahue hu'nama hvempama huzmante'noa mopafi zamavare'na oge'za, maka za'za agonafine maka anina kuronkuroma hu'nea zafa agafaramimpina ofazmia havi anumzazamirera Kresramana nevu'za nazeri narimpa nehe'za, mnacentake zana kre mna nevu'za, waini tina tagiza ofa hu'naze. <sup>29</sup> Ana hazage'na Nagra zamantahige'na amanage hu'noe, Ina'na agonarega monora ome nehaze hu'na zamantahige'noe. Hagi ana kumakura Bamae hu'za menina agia nehaze.\* <sup>30</sup> E'ina hu'negu Israeli vahera amanage hunka zamas mio, Miko'zama Kegavama Hu'nea Ra Anumzamo'a amanage hie, Tamagri tamafahe'mozama hu'nazaza huta

\* **20:29** Bamae hu'nea agimofo agafa'a mesga hu'nea kumare nehaze.

agoterafa havi anumzantera a'nemo ru vene savri hiankna huta monora hunenteta tamagra'a tamazeri pehena hu'naze. <sup>31</sup> Hagi havi anumzantega mofavretamia aheta ofa kresramna nevuta, vahe'mo'zama zamazanteti'ma antre'za tro'ma hunte'naza havi anumzantera monora hunenteta tamagra'a tamazeri pehena hume eta ama knarerera ehanatize. Hagi Israeli vhahera Nagra tamatre'nugeta nagritetira eta knare antahi'zana eme e'origahaze. Tamage Nagra kasefa hu'na mani'nena Miko'zama Kegavama Hu'noa Ra Anumzamo'na huanki'na, magore hu'na tamatre'nugeta eme nagenoka huta Nagritegatira antahintahia e'origahaze. <sup>32</sup> Hagi tamagrama antahi'zana, manigagi'naza ru mopafi vahe'mo'za nehazaza huta havere'ene zafare'ene antre'zama tro hunte'naza anumzantami monora hunteta vugahune huta tamagesa antahi'naze. Hianagi antahitahi tamifima retroma hu'naza antahintahimo'a eforera osugahie.

<sup>33</sup> Hagi Nagra Ra Anumzana miko'zama kegava hu'noa Anumzamo'na kasefa Hu'na mani'noa Anumzanki'na hankavenentake nazana rusute'na narimpa aheneramante'na, kini mani'nena kegava huramantegahue. <sup>34</sup> Hagi narimpa aheneramante'na tamahe panani'ma hugeta vahe mopafine kumapinema mago mago huta umani emanima hu'nazana, hankavenentake nazana rusute'na ete tamavre atru hugahue. <sup>35</sup> Hagi ru vahe'mokizmi hagege kokampi tamavre'na vu'na, navugosafina negesage'na tamavugosafina nege'na keaga huramante'na knazana tamigahue. <sup>36</sup> Hagi kote'ma Isipi vahe hagege kokampima tamafahe'ima knazama zami'noaza hu'na tamagrira knazana tamigahue huno Miko'zama Kegava Hu'nea Ra Anumzamo'a hu'ne. <sup>37</sup> Hagi e'ina hanugeta mago mago'mota azompani'amofo fenka kazigati ankaroju neramisage'na, huhagerafi hvempagea hu'na tamazeri hagerafigahue. <sup>38</sup> Ana nehu'na amu'nontmifintira keni'ama nontahi'za, ha'ma renenantaza vahetamina zamahe fanane hugahue. Hagi anama umani'naza mopafintira zamavare'na atiramigahuanagi, Israeli mopafina eofregahaze. E'ina hanugeta Nagrikura Ra Anumza mani'ne huta keta antahita hugahaze. <sup>39</sup> Hagi Israeli vahe'motagura Miko'zama Kegava Hu'nea Anumzamo'a amanage hie, ke'ni'ama ontahisuta amne zamazanteti'ma antre'za havi anumzama tro hunte'nazana monora huntaho. Hianagi henka tamagra namagera nenteta, havi anumzantera monora hunteta ruotge'ma hu'nea nagia eri havizana osugahaze. <sup>40</sup> Na'ankure Nagri ruotge agonama, Israeli mopafima za'za agonama me'nere maka Israeli naga'mo'za atru hu'za monora hunantegahaze huno Miko'zama Kegava Hu'nea Ra Anumzamo'a hu'ne. Hagi e'i anante tamantahi kenugeta ofaramine, knare'nare muse zantamina erita enesage'na, antahi muse huramantegahue. <sup>41</sup> Hagi ru vahepinti'enе ru vahe'mokizmi mopafinti'ma ete tamavre'na atirami'na esu'na, mnanentake zama kre mana vazage'na manama nentahi'na musema hunezmantoankna hu'na tamagrirkura musena huramantegahue. Ana nehu'na tamagri amu'nompi ruotge navu'navu zani'a eriama hanuge'za, ru kumate vahe'mo'za kegahaze. <sup>42</sup> Hagi ko'ma tamafahe'ima zamigahue hu'na nazama erisga hu'na hvempama hu'noa mopama Israeli mopafima tamavre'na ufrisugeta, Nagrikura Ra Anumza mani'ne huta keta antahita hugahaze. <sup>43</sup> Hagi e'i anante kefo tamavu tamava'ma huta tamazeri pehanama hu'naza zankura tamagesa nentahita, kefo tamavu tamava'ma hu'naza zankura tamagra tamagazegu hugahaze. <sup>44</sup> Hagi kefo avu'ava'ma nehuta havi avu'ava'ma hu'naza zanteria, nagima eri haviza hu'zanku nagesa nentahi'na, Israeli vahe'mota tamazeri havizana osugahue. E'ina

hanugeta nagrikura Mikozama Kegava Hu'nea Anumza mani'ne huta keta antahita hugahaze.

<sup>45</sup> Hagi Ra Anumzamo'a amanage huno nasami'ne, <sup>46</sup> Vahe'mofo mofavremoka, sauti mopa kaziga kavugosa hunte'nenka sauti kaziga mopamofona sifna ahenentenka sauti kaziga Negevi mopafima me'nea zafaramimofona kasnampa kea hunka huhaviza huzmanto. <sup>47</sup> Hagi sauti kazigama Negevi mopafima me'nea zafaramina amanage hunka zamasamio, Ra Anumzamo'o naneke kama antahio, Mikozama Kegava Hu'nea Anumzamo'a huno, antahio, Nagra teve taginte'nugeno mika kasefa zafane osapa zafanema zafafima me'neana teno erihana hugahie. Hagi anama taginte'nua tevemo'a, asura osu anefa huno nereno maka sauti kazigama me'nea zafaramina tehana huno marerino, noti kazigama me'nea zafaraminena tehana hugahie. <sup>48</sup> Hagi Nagra Ra Anumzamo'na ana tevea taginte'noankino, asura osugahie hu'za maka vahe'mo'za ke'za antahi'za hugahaze. <sup>49</sup> Anage hige'na nagra amanage hu'noe, Mikozama Kegava hu'nana Anumzamoka, vahe'mo'za nagrikura hu'za, kgra nena raga'a omane fronka ke nehane hu'za nehaze.

## 21

*Ra Anumzamo'ma bainati kazinknom'a'reti'ma Jerusalemi vahe zamahe-sia naneke*

<sup>1</sup> Ra Anumzamo'a amanage huno nasami'ne, <sup>2</sup> Vahe'mofo mofavremoka, Jerusalemi kumatega kavugosa hunte'nenka mono nomofona sifna ahenen-tenka, kasnampage hunka Israeli mopa huhaviza hunka, <sup>3</sup> amanage huo, Ra Anumzamo'a amanage hie, antahio, Nagra ha'renegante'na bainati kazinknoni'a anom'aafintira avazuhu saga hu'na fatgo avu'ava'ma nehaza vahe'ene kefo avu'avazama nehaza vahera kagripintira zamahenati atre-gahue. <sup>4</sup> Na'ankure Nagra tamagripintira fatgo avu'ava'ma nehaza vahe'ene kefo avu'ava zama nehaza vahera bainati kazinknoni'a anore'na eri'nena sauti kazigati'ma marerino noti kazigama uhanati'nea vahera maka hara rezmantegahue. <sup>5</sup> E'ina hanuge'za maka vahe'mo'zama ke'za antahi'zama hanazana, Nagra Ra Anumzamo'na bainati kazinia anom'aafintira avazuhu sga hu'na eri'noankina ete anom'aafina vazi ontegahue. <sup>6</sup> Hagi vahe'mofo mofavre Izikieliga, kgra ana vahetamimoza zamavuga krafagea nehunka, tumoka'amo'a netanenigenka zavira netenka tusiza hunka kasunkura huo. <sup>7</sup> Hagi ana'ma nehananke'za negage'za, na'a nehigenka katagura nehunka zavi krafa nehane? hu'zama kantahigesagenka, amanage hunka kenona huzmanto, na'ankure fore'ma hania zamofo agenke nentahi'na anara ne-hue hunka huo. Mika vahe'mofo tumo'mo'a atanenko, zamazampina hanavea omanenko zamahirahi nerena, zamagu'amo'a kna nehanigeno, zamarenamo'a hanavezmia omaneno hefa'hofa hugahie. Mikozama kegavama hu'nea Anumzamo'a huno, knazamo'a ne-e. Knazamo'a kantega ne-e huno hu'ne!

<sup>8</sup> Hagi Ra Anumzamo'a amanage huno nasami'ne, <sup>9</sup> Vahe'mofo mofavremoka amanage hunka kasnampa kea huo, Ra Anumzamo'a amanage hie, bainati kazinknona, kume knazageno asanetege'za masave frentehaze. <sup>10</sup> Hagi ana bainati kazinknom'a kumema kanente'neana vahe akafrinaku higeno kumera kaneno masavena frentegeno, kopsinamo'ma nehiaza huno ru marave marave hu'ne. Ne'nimofo Juda azompagura tamagra musena huta tamentintia osiho! Na'ankure ana bainati kazinknom'o'maka azompa

antagi akafri kafro hugahie. <sup>11</sup> E'ina hu'negu bainati kazinknona amigeno masavena frenteno vahe'ma ahe vahe'mo'ma eri'are retro hunte'ne. <sup>12</sup> Hagi vahe'mofo mofavre Izikieliga, katagura hunka zavi krafa nehunka kazana ruge ruge huo. Na'ankure ana bainati kazinknonura vahe'ni'anee, maka Israeli vahetamimofo ugagota kva vahetaminena hara huzmantegahie. Hagi ana Israeli ugagota kva vahe'mo'zane, Israeli vaheni'anena bainati kazinknonu maka zamahegahaze. <sup>13</sup> Nagra vahe'ni'a rezamahe'na kegahuokino, zamagrama keni'ama ontahisazana maka ama ana zantmimo'a zamagrite fore hugahie huno Miko'zama Kegvama Hu'nea Anumzamo'a hu'ne. <sup>14</sup> Hagi vahe'mofo mofavre Izikieliga, amanage hunka kasnampa kea huo. Kazana nehenka atregeno vahe'ma ahe kazinknom'o a tare zupa vahera zamahege, 3'a zupa zamahege hino. Ana bainati kazinknom'o rama'a vahe zamahegahiankino, maka kazigati vahera zamavazagi kagino zamahe frigahie. <sup>15</sup> Ana hanageno tumo'zamimo'a netanenkeno, hankavezmia omanegahie. Hagi ana bainati kazinknona maka kuma kafantera vahe'ma ahe fri'are retrurente'nageno me'neno kopsinagna huno rumarave nehuno vahe'ma ahe fri'are retrotra huno me'ne.

<sup>16</sup> Hagi ana bainati kazinknomoka tamaga kaziga rukrahe hunka runekafrinka, hoga kaziga rukrahe hunka runekafrinka, ina kazigo rukrahe'ma hanantega rukafrio. <sup>17</sup> Hagi Nagra nazana nehesugenno, nasima vazi'nea zamo'a ome amne hugahie huno Ra Anumzamo'a hu'ne.

<sup>18</sup> Hagi Ra Anumzamo'a amanage huno nasami'ne, <sup>19</sup> Vahe'mofo mofavre Izikieliga, Babiloni kini ne'mofo bainati kazinknom'o ma esiankana tare huhamprinto. Hagi ana tare kamokea magoke moparetike agafa hugahae'. Hagi avame'za trohunka rankumategama agafa huno'ma nevaza kantu hanare retru rentetere huo. <sup>20</sup> Hagi bainati kazinknom'o ma Amoni vahepima Raba kumate'ma vania ka huhamprinentka, kazinknom'o ma Judane vihumo'ma agatere kumapima Jerusalemima vanianka huhamprio. <sup>21</sup> Na'ankure Babiloni kini ne'mo'a tare kamokema hatana'ma hunate otineno, amena erinteno negeno, keve'aramina ruroretore huno zagoa reno negeno, vahe'mo'zama zamazanteti'ma tro'ma hu'naza havi anumzana ina kante vanue huno agenoka huno antahi negeno, Kresramanama vu afu'mofo tumorarezaganeno keso'e hugahie. <sup>22</sup> Hagi amenezama tro'ma nehanigeno'a, tamaga azampina Jerusalemi kumare huno krente'nenia kevemo efregahie. Ana'ma hanigeno'a ame huno ha'ma hu'kezana netino, zamaheho huno'ma hanige'zama vahe'ma zamahesagu ve meme afutamina zamazeri retro huzmante'ne. Hagi ana kezama ati'neana ana ve meme afutamimo'za Jerusalemi kuma kafante hara nehu'za, mopa ka'fiza ana kuma keginamofo megia ante hihi hu'za mareriza mani'neza kahama renafe hu'za mareri'zana za'za zafareti tro hu'za renafe kahana hu'za mareri'za vahera hara huzmantegahaze. <sup>23</sup> Hianagi Jerusalemi kumapima mani'naza vahe'mo'za kesazana, havige'za hu'za ameneza tro nehaze hu'za antahigahaze. Hagi zamagra Jerusalemi vahe'ene Babiloni vahe'ene mago rimpama huno mani'keaga huke huvempa huna'anagi, Babiloni kini ne mo'a kumima hu'naza zanteru huzmagesa huno kina huzmanteno zamavareno vugahie. <sup>24</sup> E'ina hu'negu Ra Anumzana Miko'zama Kegava Hu'nea Anumzamo'a amanage hu'ne. Na'ankure Jerusalemi vahe'motama kumi'ma hu'naza zana hunagesa hazage'na, kumitamigura nagesa antahi'noe. Hagi ana avu'ava'ma hazafi maka kasegema hantagi avu'ava'ma hu'naza zamo'a, frara okino eama higeno maka avu'ava zama nehuta kumi'ma hu'naza zamo'a eama hu'ne. Na'ankure tamagra mika avu'ava'ma hu'naza zana

hunagesa hazankino, ha' vahe'mo'za eme tamazeri'za kina huramante'za tamavre'za vugahaze. <sup>25</sup> Hagi kagra Israeli kva nera kefo avu'avaza hunka kasri avu'avaza nehana nekino, knaka'amo'a atuparega egeno, knazama eri knamo'a atumpare egeno, <sup>26</sup> Ra Anumzana Mikozama kegavama Hu'nea Anumzamo'a amanage hie, Kanunte'ma anaki'nana tavravea eri netrenka, kini fetorira eritro. Ko'ma me'neaza huno keonke zamo'a omanegahie. Agima omne vahe'ma anteramino'ma mani'nesia vahera agia aminka az-erisga nehunka, agima me' vahe'ma manisgama hu'nesia vahera azeri anteraminka ra agi'a eritregeno agi omne vahe aseno manino. <sup>27</sup> Nagra Jerusalemi kumara eri haviza nehu'na eri havizantfa hugahue. Ana hutena ana kumara eri so'e osu atranenkeno, eri so'e hugahie hunama hu'noa ne'ma esige'na, agri azampi antegahue.

<sup>28</sup> Hagi vahe'mofo mofavre Izikeliga amanage hunka kasnampa kea huo, Amoni vahe'mo'zama Israeli vahe'ma kema zamasu'za zamazeri havizama nehaza vahera Mikozama Kegavama Hu'nea Ra Anumzamo'a amanage hie hunka zamasamio, bainati kazine, bainati kazimo'a vahe ahenaku anoreno masave frentegeno kopsinamo rumarave marave nehiaza nehie. <sup>29</sup> Ana'ma nehigeno'a Amoni vahe'motagura havige ava'na keneramante'za havige kasnampa ke humeramante'za kefo avu'ava'ma hu'za savri'ma nehaza vahera kazinkno erita zmanankempi nentaze. Ana higeno knazama erisaza knamo'a hago egofta nehie. <sup>30</sup> Hagi bainati kazinknona ete anomaf'i vazinto. Tamagri'ma tro'ma huramante'nea kumapi, tamagehe'mokizmi mopafi keaga Nagra huramantegahue. <sup>31</sup> Ana hute'na nasima vazi'nea zana tamagridera eri ama hu'na, vahe'ma zamatama zami'za zamahe fri'zama antahi ani'ma hu'naza vahe zamazampi tamavre antegahue. <sup>32</sup> Ana hanugeta tamagra tevema tevemo'ma te fanene hiankna hanageno korantmimo'a tagiramina, vahe'mo'za tamagrikura mago'anena zamagesa ontahigahaze hu'na Nagra Ra Anumzamo'na nehue.

## 22

### *Israeli vahe'mokizmi kumi refko hu'nea naneke*

<sup>1</sup> Ra Anumzamo'a amanage huno nasami'ne, <sup>2</sup> Vahe'mofo mofavre Izikeliga, Jerusalemi kumara keaga hunto. Agra vahe kora eritagi rankumaki, keaga huntenga maka hi'mnage avu'ava zama'a eri ama huo. <sup>3</sup> Ana nehunka Mikozama kegava hu'nea Anumzamo'a amanage hie hunka zamasamio, Rankumamo'a rama'a vahe kora aheno eri neragino, vahe'mo'zama zamazantem'a antre'zama tro'ma hu'naza havi anumzante monora huntento azeri pehena nehuno agra zante knazana avreno e'ne huo. <sup>4</sup> Hagi kagra vahe zamahenka korana eri neraginka, vahe'mo'zama zamazantem'a antre'zama tro'ma hu'naza havi anumzante monora huntenga kagra'a kazeri pehena nehunka kumi hu'nane. E'ina hunka knaka'a eri atupa nehunka, kafu zageka'a eri atupa hu'nane. E'ina hu'negu maka kumapi vahete'ene maka mopafi vahe'mokizmi zamavurera ki'za zokago'za kazeri tro hanuge'za hunte'za kagiza regahaze. <sup>5</sup> Hagi tava'onte'ma mani'naza vahe'mo'zane, afete'ma mani'naza vahe'mo'zanena hunte'za keontahi tamavutamavama huta tamagima eri pehenama haza zanteria zokago ke huramantegahaze. <sup>6</sup> Hagi keho, mago mago ugagota Israeli kva vahe'mo'za zamagra'a hihamu erigote'za, vahera zamahe'za korana eri tagitere hu'naze. <sup>7</sup> Hagi Jerusalemi kumapina mofavreramimo'za

zamarera zamafankea nontahizageno, ruregati'ma emani vahe'ma, me-gusa mofavre, kento a'nenea knare huta kegava huozmante zamaz-eri haviza nehaze. <sup>8</sup> Ana nehuta ruotge'ma hu'nea zantamina eri pe-hana nehuta, Sabati knani'a kegaya osu'naze. <sup>9</sup> Hagi ana kumapima mani'naza vahe'mo'za ru vahe'mokizmia havige huzmante'za zamahe nefrizageno, mago'a vahe'mo'za havi anumzamofo mono nompima havi anumzante'ma Kresramanama vunte'naza afu ame'a agonafina nene'za savri monko avu'ava zana hu'naze. <sup>10</sup> Hagi mago'a vahe'mo'za nezmafa a'ene monko'zana nehazageno, mago'a vahe'mo'za ika kri'ma eri'naza a'nene monkozana hu'naze. <sup>11</sup> Hagi mago'a vahe'mo'a tavaonte'ma nemania vemofo a'ene savri huno monko'zana hu'ne. Hagi mago'a vahe'mo'za nezmanofero azeri savri hu'za ante'za nevasazageno, mago'a vahe'mo'za nezmasaro zamazeri savri hu'za zamante'za nemasazageno, mago'a vahe'mo'za nezmafa mofane zamazeri savrira hu'naze. <sup>12</sup> Hagi mago'a vahe'mo'a zago atesige'za vhahera zamahe nefrizageno, nofima hu'za zagoma eri'za vhahera rama'a zago agi ahezmante'za agofetu zagoa eri'za feno vhahera nemanize. Hianagi Nagrira tamagekani nante'naze huno Ra Anumzana Mikozama Kegavama Hu'nea Anumzamo'a hu'ne.

<sup>13</sup> Hagi havigema huno vahe zagoma erino feno vahe'ma nemania vahe'ene, havigema huno vahe'ma zamahe nefria vhahera tamage hu'na Nagra narimpa ahezmantegahue. <sup>14</sup> Hagi tamagri'ma knazama tami'nua knafina, tamagra kazigazi huta ana knazana erita vuge, hankavetita manigera hugahazo? Nagra Ra Anumzamo'na huanki'na ana zana hugahue. <sup>15</sup> Hagi Nagra zamahe panani hanugeta vahe kumategane, vahe moparega mago mago huta umani emani hanage'na pehenage avu'ava zantamia eri fanane hugahue. <sup>16</sup> E'ina hu'na ru kumate vahetamimofo zamavufina zamazeri haviza neha'nena, Nagrikura Ra Anumza mani'ne huta keta antahita hugahaze.

### *Tevefi kreno eri agruhu fronka naneke*

<sup>17</sup> Ra Anumzamo'a amanage huno nasami'ne, <sup>18</sup> Vahe'mofo mofavre Izikieliga, Israeli vahe'mo'za Nagri navurera karogro ahe'naze. Maka bronsima, tinima, ainima, lidi haveramima kre'za eri agru nehu'za, havizama hu'neama'a atrazankna hu'naze. Ana nehu'za zamagra silva kre'za eri agru hute'za havizama'a atrazankna hu'za knarerla osu'naze. <sup>19</sup> E'ina hu'negu Ra Anumzana Miko'zama Kegavama Hu'nea Anumzamo'a amanage hie, Na'ankure tamagra maka karogro ahe'nazagu, Jerusalemi kumate tamavre atru hugahue. <sup>20</sup> Hagi vahe'mo'zama karogro ahe silvama, bronsima, tinima, ainima, lidima tevefima kre maramra huno eri agru hunaku'ma eri atruma hiaza hu'na, tusi narimpa aheneramante'na nasivazi neramante'na tamazeri atru hu'na kre agruma hiakna hu'na tamazeri haviza hugahue. <sup>21</sup> Hagi Nagra tamazeri atru hu'na tusi narimpa ahe'zanu kre tasage'nugeta ana tevefi tasagegahaze. <sup>22</sup> Ana hanugeta silvamo tevefi te agru hiaza huno te agru hanigeta, Nagrikura Ra Anumzamo'a arimpa ahe'za atregeno tagritera ne-e huta keta antahita hugahaze.

<sup>23</sup> Hagi Ra Anumzamo'a amanage huno nasami'ne, <sup>24</sup> Vahe'mofo mofavre Izikieliga amanage hunka Israeli vhahera zamasamio, rama'a haviza hu'za mopazmia eri haviza hazagu, Narimpama aheramante'noa knafina tamagra agru osuno ko ruonte mopagna hu'naze. <sup>25</sup> Hagi kas-nampa vahe'mo'zama laionimo zagagafa aheno tagana vaziankna hu'za kea anaki'za kezmi omne vhahera zamahe nefri'za fenozmia eri'za feno

vahera nemanizageno, amu'no zamifina rama'a kento a'ne erifore hu'naze. <sup>26</sup> Hagi ana kumapi pristi vahe'mo'za kasege'ni'a ha'rente'za noviriri'za, ruotge'ma hu'nea zana eri pehena hu'naze. E'ina zamo ruotge hu'nea zantaminki, e'i amane zantaminki nehu'za, e'i agru hu'nea zantaminki, agru osu zantaminki hu'za vahe'mo'za keamara nosaze. Sabatia kegava nosu'za, Sabatia ru hantgi'za Nagi'a eri haviza nehaze. <sup>27</sup> Hagi Jerusalemi rankumapima mani'naza ugagota kva vahe'mo'za, havigema hu'za vahe fenoma erinakura, afi' kramo zagagafa aheno tagna vaziankna hu'za vahe korana eri tagiza zamahe nefri'za zagozmia e'nerize. <sup>28</sup> Hagi ana'ma ne-hazage'za kasnampa vahe'mo'za havige hu'za ava'nagnaza kenone nehaza kereti'ene, havigema huza zagoma eri avu'avazanu kefo avu'avazamia refite nezmante'za, Ra Anumzana Mikozama Kegava hu'nea Anumzamo'a amanage hie hu'za Ra Anumzamo'ma magore huno'ma osu'neankea ne-haze. <sup>29</sup> Hagi ana mopafi vahe'mo'za havige hu'za vahe zagoa e'neriza, musufa nesaze. Ana nehu'za zamunte omne vahe'ene, miko zanku'ma atupama nehaza vahera zamazeri savri hu'za keonke zazmia e'neriza, ruregati'ma emani'naza vahera fatgo zamavu'znavara huozmante'naze. <sup>30</sup> Hagi ana'ma hazage'na ana kuma'mofoma have keginama tro nehuno, ankro kante'ma navugama otino maniso hanige'nama ana kuma'ma eri havizama osanua vaheku'ma hake'na koana mago vahera onketfa hu'noe. <sup>31</sup> E'ina hu'negu tusi narimpa ahezmante'na zamazeri haviza hugahue. Ana nehu'na maka kefo avu'ava'ma hu'naza zamofo nona'a zamagrite erinte'na maka zamahe fanane hugahue, huno Ra Anumzana Mikozama Kegava Hu'nea Anumzamo'a hu'ne.

## 23

### *Tare a'tremokizni fronka naneke*

<sup>1</sup> Ra Anumzamo'a amanage huno nasami'ne, <sup>2</sup> Vahe'mofo mofavre Izikeliga, mago a'mofo mofa'trena tare mani'na'e. <sup>3</sup> Isipi kumate'ma kasefa mofa'trema mani'na'a knafi agafa huke savrira nehuke, monko avu'ava zana nehakeno ven'e'nero'za amiznimofona azeri'za zopasi'na nere'za zanavufagarera zokagora rezanante'naze. <sup>4</sup> Hagi nuna'amofo agi'a Oholaki, negana agi'a Oholib'a'e. Hagi zanagra nagri su'aseke mani'neke ne'mofavreramina kasenezmanteke mofaneramina kasezmante'na'e. Hagi Ohola'a e'i Sameria kumaki, Oholib'a e'i Jerusalemi kumare. <sup>5</sup> Hagi Ohola'a nagri a' mani'neanagi monkotera tusiza huno vano nehuno, tavaoma'arema nemania Asiria sondia vahera zamavaririno savarira huno vano hu'ne. <sup>6</sup> Hagi ana vahetamina hokonke kukena hu'naza gavana kva vahetamine, sondia vahete kva vahetaminki'za ana makamo'za hosi agumpi vano nehaza hentofa nehzaveramine. <sup>7</sup> Hagi ana a'mo'a maka ana hentofa nehzaveramina zamavesi nezmanteno monkozana nehuno, ana Asiria vahe'mofo kaza osu havi anumzante monora hunteno azeri pehena hu'ne. <sup>8</sup> Hagi ko'ma Isipima kasefa mofa'ma mani'neno'ma monkote'ma nehige'zama, venenemo'zama ante'za nemase'za, avufaga zopasi'nama nere'za, monkozama hunte'za e'naza avu'ava zana otre'ne. <sup>9</sup> E'ina hu'negu agrama avesima nezmantege'zama, azerisavari hu'za monko'zama hunentaza Asiria vahe zamazampi antoe. <sup>10</sup> Hagi ana vahe'mo'za Oholana mika'a kukena'a eri hatetre'za azeri agaze nehu'za, ne' mofavreramima'anemofane'araminenam zamatavare'za nevu'za, agrira bainati kazinteti ahe fri'naze. Ana higeno a'nemo'za Ohola avufare'ma fore'ma hu'nea zankura huge

antahige hu'naze. <sup>11</sup> Hagi negna Oholiba'a ama ana zana ke'neanagi, agu'a rukrahera osu'neanki, nuna'amo'ma hu'nea avu'avara agatereno vene'nea kenunu nehuno ana veneneraminena rama'a monko avu'ava hu'n. <sup>12</sup> Hagi Oholiba'a Asiria kva vahetamina ke anunu nehuno, gavana vahetamine, sondia vahete kva vahetamine, hosi agumpima maniza nevaza vahe'ene, knare kukenama hu sondia vahetamina maka hentofaza hu'naza kasefa veneneraminkino zamagenunu huno avesi'zmante'n. <sup>13</sup> Ana hige'nama koana nuna'amo Oholiba'ma hu'neaza huno monko'zana nehuno, agra'a tusiza huno azeri pehena hu'n. <sup>14</sup> Hianagi Oholiba'a rama'a monko avu'ava zana huno vu'n. Ana nehuno have keginare'ma Babiloni vahe'mofo amema'ama frage'za krentete'za koranke masavema frente'naza vahe zamma'ama zamage'neana, <sup>15</sup> zamu nofi'ma zamafafima ananeki'za, zamanunte'ma anaki tavarave zmanuntera anaki'za, ana makamo'za Babiloni kamani eri'za vahe kna hu'nageno zamage'ne. <sup>16</sup> Hagi ana vahe'mokizmi zamma'ama negeno'a, kenunu huno avesi nezmantero, ana vahe'ma esanageno'ma zamagranema monkozama hanigu kema erino vuno eno'ma hu'vahera huzmanteg'eza Babiloni vu'naze. <sup>17</sup> Ana hige'za Babiloni vahe'mo'za eme ante'za mase'ne'za monkozana hunte'za azeri pehena hu'naze. Hagi ana'ma hu'za monkozama hu'za azeri pehenama hutazageno'a, ana vahetamina tusiza huno avesra huzmanteno agote'zmante'n. <sup>18</sup> Hagi ana monko avu'ava zana Oholiba'a amate avufga avapako vano nehuno ana avu'ava zana nehige'za ke'naze. E'inama nuna'amo'ma higenama Nagra navesra hunte'na nagotenente'na namefi'ma humi'noaza hu'na namefi humi'noe. <sup>19</sup> Hianagi Oholiba'a Isipima mofa'ma mani'neno'ma monkote'ma huno vanoma hu'nea agesa nentahino, tusiza huno mago'anee monkozana huwava huno vu'n. <sup>20</sup> Ana nehuno donki afu'mofo agozagna zamago'za huntogeno, hosi afu'mofo agozarimo'ma aviteankna'ma hu'nea Isipi vahe'enena monkozana huno vano hu'n. <sup>21</sup> Ana nehunka Oholibaga Isipima mofa'ma mani'nanke'zama aminka'arema azeriza, zopasi'nama nere'za knara'ma kante'za monkozama hugante'naza zanku tusiza hunka antahintahi nehunka, ana'ma hanana zanku kave'nesie.

<sup>22</sup> Hagi e'ina hu'negu Oholibaga Mikozama Kegavama Hu'nea Ra Anumzamo'a amanage hie, monkozama hugantazagenka kagote zamantenka kamefi'ma huzami'nana vahetamina zamarimpa re'nuge'za, maka kazigati eme kavazagi kagi'za ha' eme hugantegahaze. <sup>23</sup> Hagi e'i ana vahetamina zamavare atruma hanuana, Babiloni vahetamima, maka Kaldia vahetamima, Pekodi vahe'ma, Soa vahe'ma, Koa nagapinti vahetamima, maka Asiria gavana vahetmima, sondia vahete kva vahetamima, hosi agumpima maniza vano nehu'za ha'ma nehaza hentofa nehazaveramina zamavare atru hanuge'za hara huramantegahaze. <sup>24</sup> E'ina hanuge'za tusi'a vahe'mo'za ha'zazmia eri'neza aini fetori zamia nentaniza avazuma nehaza karisifine ha' zazmia erinte'za e'za nazanoma huramante'naku'ma hanaza zana zamagra avu'avapi avrente'za maka kazigati e'za hara eme hugantegahaze. <sup>25</sup> Ana nehu'na kanive regante'noankino zamagra zamarimpa ahenegante'za kazeri havizantfa hugahaze. Ana nehu'za kagesane kagonanena taga hunetre'za, amanema manisaza vahera kazinteti zamahe nefri'za ne'mofatamia zamavare'za nevu'za, amnema manisazama'a zamazeri'za tevefi kre tasagegahaze. <sup>26</sup> Ana nehu'za kukenaka'a maka hatenetre'za, zago'amo'ma marerisa kavasese zanka'a hate'za erigahaze. <sup>27</sup> E'ina hu'na Isipima mani'nenga erigafa hunka hu'nana monko kavukava zana eri amanea hugahue.

**28** Na'ankure Ra Anumzana Miko'zama Kegava Hu'nea Ra Anumzamo'a amanagea hie. Kavresra hunezmanterka kago'ma ate'zmantenka kamefi'ma huzamina vahe'mokizmi zamazampi Nagra kavrente'za nehue. **29** Ana vahe'mo'za kazeri haviza nehu'za, amuhoma hunka erifore'ma hunana fenonka'aramina eri hana hu'za vanagenka, kavufga kavapako manigahane. Ana hanankeno maka vahe'mo'za monko zama nehana kavufga amate kegahaze. Kagrama savri'ma hunka monko zama hunkama vano hanazamo, **30** higeno ama ana hazenkea avreno eme kamie. Na'ankure ru kumatamimpi venenemo'zama monko zama hugantesazegu zamavesi nezmanterka, zamazanteti'ma antre'za tro'ma hu'naza havi anumzantaminte monora huntenga kagraka'a kazeri pehena hu'nane. **31** Hagi kagra nunakamo'ma hu'nea avu'ava amage antenka hu'nananki'na, agri'ma narimpa ahente'na knazama ami'noankna knazana kagrrira kamigahue. **32** Hagi miko'zama kegavama hu'nea Ra Anumzamo'a amanage hie, Nunakamo'ma ne'nea rankapufi narimpa ahe'zana tagi kaminugenka rama'a negahane. Ana hananke'za vahe'mo'za hunte'za kagi'za regahaze. **33** Hagi ana tima nesnunka neginagi nehunka, kasunku'ma banana zamo'a kazeri havizantfa hugahie. Na'ankure e'i ana kapua nunakamofo Sameria kapue. **34** Hagi ana kapufinti tina nehana hanankeno hagege hugahie. Ana hutenga ana kapua aru praro nevazinka aminka'a nemasaginka kasunkura hugahane huno Mikozama Kegava Hu'nea Ra Anumzamo'a hu'ne. **35** E'ina hu'negu Ra Anumzamo'a amanage hie, Kagra kamefi Nagrira hunaminka kagekani nenantenka, savri'ma hunka vano nehunka, monkozama hunka vanoma hu'nana mizama'a kagra erigahane.

**36** Hagi Ra Anumzamo'a amanage huno nasami'ne, Vahe'mofo mo-favre Izikieliga, knare Oholane Oholibakiznia keagarera zanavrentenka keagaznia refko hugahampi? Hi'mnage avu'ava'ma neha'a avu'ava'znia huama hunka zanasamio. **37** Na'ankure zanagrama savri huke ru vene monko zama ome nehuke, vahe'ma zamahe fri'na'a koramo'a zanazampina me'ne. Vahe'mozama zamazanteti'ma antre'za tro'ma hunte'naza havi anumzantamine monko zana nehuke, ne'za ofama nehiazha huke Nagrama zanami'noa mofavreramina zamaheke ana havi anumzante Kresramana vunte'na'e. **38** Hagi mago'ene nagritera anahu kna avu'ava hunante'na'e. Zanagra ana zupage seli mono noni'a eri pehena nehuke, Sabati knani'a kegava osuke, eri haviza hu'na'e. **39** Hagi vahe'mo'zama zamazanteti'ma tro'ma hu'naza havi anumzante mofavrezania aheke Kresramana vuenteke, anankna zupa seli mono noni'afina emarerike eri pehena hu'na'e. E'inahu knaza Nagri mono nompina hu'na'e. **40** Hagi ana nehuke kema erino vuno eno'ma hu vahete kea atrake'za, vu'za afeteti vahera ome zamavare'za e'naze. Hagi ana vene'nema avre'za neazageta'tanagra tina freta masave konariria nehuta, zago'amo'ma marerisa avasesezanu tanavasasea hu'na'e. **41** Hagi tanagra zamana zamana tafe hu'naza sipayre mani'neta, tanavugama me'nea tratera Nagri mananentake'za insensine masavenena ante'na'e. **42** Hagi anampina ruzahu ruzahu vahe'mo'za kereso nehazageno, tima ne'za neginagima nehaza vahe'ma hagege kokamp-inti'ma zamavare'zama e'naza vahe'mo'za ana atre'mokizni zanazampina asana antani nezanante'za, zanasenifina avasese'ane kuini fetorira antani zanante'naze. **43** Anama hutazage'na ve'ama atreno monkote'ma vano nehige'zama, monko zama hunte'za nevazageno avresragu'ma nehia akura nagra amanage hu'noe. Menina ama ara ama venenemo'za zamatrenke'za monko a'nema nehazaza hu'za monkozama huntaho. Na'ankure agra

monko a' mani'ne. <sup>44</sup> Hagi ana vahe'mo'za monko a'nema monko zama hunentazaza hu'za, ana ara ante'za mase'ne'za monko'zana hunte'naze. Ana hukna hu'za Oholane Oholibanena zanante'za mase'neza monko zana huznante'naze. <sup>45</sup> Hianagi fatgo zamavu'zmavama nehaza vahe'mo'za, ve'zanima atreke monko'zama huke vanoma nehuke vahe'ma zamahe nefri'a zanterea keaga huznante'za knazana zanamigahaze. Na'ankure zanagra ve'zania atreke monkote huke vano nehuke, vahe'ma zamaheke korama eri tagina'a zante zanagra knazana erigaha'e. <sup>46</sup> Hagi Miko'zama Kegavama Hu'nea Anumzamo'a amanage hie, tusi'a sondia vahetami zamavarenka ege'za, ana atre'mofo zantamina arohu eme zanare'za eneri'za zanazeri koro hiho. <sup>47</sup> Hagi ana sondia vahe'mo'za ana a'trena havenknou zanahe frite'za, bainati kazinknou rukafri netre'za ne'mofazania zamahe nefri'za nozania teve taginte'hageno tegahie. <sup>48</sup> E'ina hu'na ana mopafina savari monko avu'ava zana eri fanane hanugen, maka a'nanemo'za nege'za ana a'tre'mokema hu'na'a monko zanavu'zanava zana ovaririgahaze. <sup>49</sup> Hagi tanagrama monko avu'ava zama nehuta, vahe'mo'zama zamazanteti'ma antre'za tro'ma hunte'naza havi anumzante'ma mono'ma hu'na'a zante tanagra knazana e'nerita, Ra Anumzana Miko'zama Kegavama Hu'nea Anumza mani'ne huta Nagrikura keta antahita hugaha'e.

## 24

### *Ne'zama krenegeno krakra'ma nehia kavore hunte'nea fronka naneke*

<sup>1</sup> Hagi Babilonima kinama ome hutama mani'nonkeno'a, 9ni kafumofona 10ni ikantera 10ni knazupa Ra Anumzamo'a amanage huno nasami'ne. <sup>2</sup> Vahe'mofo mofavre Izikieliga, ama knamofo agi'a avompi krento. Na'ankure Babiloni kini ne'mo'a Jerusalemi kumara ama ana knare avazagi kagino hara huntegahie. <sup>3</sup> Keontahi vahetamina ama'na fronka ke zamasamio, Miko'zma Kegavama Hu'nea Anumzamo'a amanage hie, Ne'zama negraza kavofina tina taginteta tevefi anteho. <sup>4</sup> Hagi sipisipimofona knare'ma hu'nea azo'na ame'ane, amo' ame'anena tagahu osi'osi huta ana kavofina kreho. Knare'ma hu'nesia zaferina'aramina ana kavofina kre viteho. <sup>5</sup> Sipisipi afu kevufintira knare'ma hu'nesia afu avreta anara hiho. Tevea kitagita ra teve hugreteta ana kavofina ti taginteta ana teve agofetu antenkeno timo'ma amuho huno'ma krakra nehanifi, ana afu'mofo zaferina'a anteho. <sup>6</sup> E'ina hu'negu Mikozama Kegavama Hu'noa Ra Anumzamo'na amanage hue, Vahe'ma zamaheno korama eri neragia Jerusalemi kumamo'a agu'afima karogroma ahe'negeno, ana karogroma sesema hu'za eri agruma nosaza kavogna hu'neankino haviza hugaha'e. Hagi ana kavofintira mago mago ame'a eritre eritre nehugeno ome vagareno. <sup>7</sup> Hagi vahe'ma zamaheno korazmima eri tagi'nea koramo'a, ana kuma amu'nompi me'ne. Hagi vahe'ma zamahe'nea korana mopafi tagitregeno, kugusopamo'a refi'otenieu have agofetu tagitre'ne. <sup>8</sup> Hagi amate'ma me'nenama Nagrama narimpama ahenente'na nonama hunte'nugu ana a'mo'ma zamahe'nea vahe korana have agofetu amate tagitre'noe. <sup>9</sup> E'ina hu'negu Ra Anumzana Mikozama Kegavama Hu'nea Anumzamo'a amanage hie. Vahe'ma zamaheno korama eriragi'nea rankuma'mo'a haviza hugahie. Ana kuma'ma kre tasagesua zana Nagra tusi teve hanavazintegahue. <sup>10</sup> E'ina hu'negu tevea kitaginka, tusi teve hanavazitenka tevea taginto. Ame'a kregeno tes'o'nehina, hagemare zantamina anampina atregeno zaferinamo'a tes'o'ne hino. <sup>11</sup> Hagi ana kavofina mago zana onte teve tankanuzare ante'negeno, ana kavomo'a ome

amuho huno agu'afima me'nea kopamo'a ome tefizo huteno, karogroma ahe'nea zana teganoperamino. <sup>12</sup> Hagi anama karogroma ahe'nea zana rekanopetrenaku ana'anara hiana, ana karogromo'a kanope orami'ne. Hagi tevefima kreana karogroa tegano ope'ne. <sup>13</sup> Hagi menina havi kavukva hunka monko kavukava nehana zamo'a kazeri pehena hu'ne. Kazeri agru hunaku'ma kazeri agruma huana agrua osu'nane. Hagi ru'enena kazeri agru osu katrenugenka mani'nenanke'na narimpa ahe'zana kagrite rupopo hutregahue. <sup>14</sup> Nagra Ra Anumzamo'na huankino ana zana efore hukna eankina Nagra ana zana hugahue. Nagra narimpa ahe'zana aze'orina antahintahini'a rukrahera osugahue. Hagi mago vahekura nasunkura hunte'na, otregahuanki, agrama hu'nenia avu'avate'ene agrama hu'nea zante ante'na knazana amigahue hu'na Mikozama Kegavama Hu'noa Ra Anumzamo'na hue.

### *Izikieli nenaro'ma fri'nea naneke*

<sup>15</sup> Hagi Ra Anumzamo'a amanage huno nasami'ne, <sup>16</sup> Vahe'mofo mofavre Izikieliga, kavuma negenka kavesi kavesima huntentara aka'a kavugatira ame hu'na avre atre'za nehuanki kagra kasunkura nehunka, zavira netegeno kavunura osino. <sup>17</sup> Vahe'mo antahisigi hunka akohenka zavira netenka, fri vahetera kasunkura osuo. Kanunte'ma ana'ma nekina tavravea eri otrenka, kaga anona hate otrenka, kagi kagona refi'otenka, tahu ne'zama eri'za eme kamisaza ne'zana ono. <sup>18</sup> E'inahu ke higena nanterana va-hetaminena nanekea hutogeno, ana kinaga a'nimo'a fri'ne. Ana higeno anante nanterana nanekema nasami'neaza hu'na mani'noe. <sup>19</sup> Ana zama vahe'mo'zama nege'za, na'a tagritera fore hunaku nehigenka nehampi tasamio? <sup>20</sup> Anage hu'za nantahigazage'na amanage hu'na zamasm'i'noe, Ra Anumzamo'a amanage huno nasami'ne, <sup>21</sup> Amanage hunka Israeli va-hera zamasamio, Mikozama Kegavama Hu'nea Ra Anumzamo'a amanage hie, antahihoh, tamagrama ran tamagima enerita tamavesi tamavesima hunentaza mono noni'a eri haviza hugahue. Hagi ne' mofavre nagatamima, mofa'netamia zamatretra azage'zama Judama mani'naza mofavretmia bainati kazinteti zamahe vagaregahaze. <sup>22</sup> E'ina hanigeta nagrama huaza huta tamagi tamagonarer refi'noteta, tahune'zama eme tamisazana onegahaze. <sup>23</sup> Ana nehuta tamanunte'ma ananeki'za tavar-avene, tamagia anonena hate otregahaze. Ana nehuta tamasunkura huta zavira ote mani'neta, kefo avu'ava zampi ome haviza nehuta, kumi'ma hu'naza zankura kragira rugahaze. <sup>24</sup> Hagi Izikieli'a tamagri avame'za mani'nenketa, agrama hu'nea maka avu'ava zana tamogra hugahaze. Ama ana zamo'ma efore'ma hanigeta Mikozama Kegava Hu'nea Ra Anumza mani'ne huta Nagrira keta antahita hugahaze. <sup>25</sup> Hagi Ra Anumzamo'a anage huno nasami'ne, Vahe'mofo mofavre Izikieliga, Israeli vahe vihu kumara eri netre'na, musema nehu'za ra zamagima e'neri'za zana eri netre'na, zamagu'reti'ma tusiza hu'zama zamavesi nentaza zana erine-tre'na, ne'mofazmia zamahe hana hugahue. <sup>26</sup> Hagi ana'ma hanua knar-era ana knazampinti'ma freno esia ne'mo'a, ana zama fore'ma hania zamofo agenkea eme kasamigahie. <sup>27</sup> Hagi e'i ana knazupa kagra mago avame'za mani'nenka fre'zama esaza vahera keaga hunezaminka, agafa hunka nanekea hananke'za ke'za antahizama hanazana, Miko'zama kegava hu'nea Ra Anumzane hu'za Nagrira nage'za antahiza hugahaze.

## 25

### *Amoni vahe'ma zamazeri haviza hania zamofo kasnampa naneke*

<sup>1</sup> Ra Anumzamo'a amanage huno nasami'ne, <sup>2</sup> Vahe'mofo mofavre Izikelliga, Amoni vahe moparega kavugosa hunte'nenka, Amoni vahe'mo'zama havizama hanaza kasnampa kea huzmanto. <sup>3</sup> Amanage hunka Amoni vhahera zamasamio, Mikozama Kegavama Hu'nea Ra Anumzamofo kea antahih, Ra Anumzana Agra Anumzamo'a amanage hie, Na'ankure kagra amanage hunka puaha kagerura ru'nane, ra mono nona haviza higeno, Israeli mopamo'a haviza higeno, Juda vhahera kina huzmante'za zamavare'za vu'naze hunka hu'nane. <sup>4</sup> E'ina hu'negu tamagrira tamavre'na zage hanati kaziga vahe zamisuge'za, tamavre'za kegava huramantegahaze. Ana nehu'za amu'nontamifi seli nonkumara eme kiza manine'za, zafa aragatimia tagiza nene'za, bulimakao afutamimofo amirina tati'za negahaze. <sup>5</sup> Hagi Raba rankumara kemori afutamimo'zama traza nesaza mopa eri fore nehu'na, Amoni kumara sipisipi afu'mokizmi kuma erifore hugahue. E'ina hanugeta Nagrikura Ra Anumza mani'ne huta keta antahita hugahaze. <sup>6</sup> Hagi Mikozama Kegavama Hu'nea Ra Anumzamo'a amanage hie, Israeli vahe'mo'zama knazampima unefrazageta tamazana neheta, haruhuta marerita tamita nehuta, vahe'nimo'zama havizama nehazageta musena hu'naze. <sup>7</sup> E'ina hu'nagu Nagra nazana rusute'na hara reneramante'na, rohu'ma tamaresaza vahe'mokizmi zamazampi tamavre anta'nena tamazeri haviza hugahaze. Ana nehu'na tamahe vagara'nena ana mopafintira fanane hugahaze. Anama hanugeta Nagrikura Ra Anumza mani'ne huta keta antahita hugahaze.

### *Moapu vahe'ma zamazeri havizama hania zamofo kasnampa naneke*

<sup>8</sup> Miko'zama kegavama hu'nea Ra Anumzamo'a amanage hie, Moapu ne, Seiri vhahemo'zanena zamagrama antahi'zana Juda vahe'mo'za ruzahura osu'nazanki, ruga'a mopafi vahe kna hu'naze hu'za nehaze. <sup>9</sup> E'ina hu'negu ha' vahe'tami huzmante'nuge'za Moapu vahe'mokizimi mopa atumpare-gati agafa hu'za rankumazmia Bet-Jesimotima, Ba'al-Meonima, Kiriataimi kuma'zmia zamahe'za hanaregahaze. <sup>10</sup> Hagi Nagra Moapu vahe'ma hu'noaza hu'na Amoni vhahera zage fre kaziga vahe'mokizmi zamazampi zamavare anta'nena, ana vahe'mokizmiza sesageno ruga'a mopafi vahe'mo'za zamagesa antahi nozmisage'na, <sup>11</sup> Nagra Moapu vhahera keaga huzmante'na knazana zamigahue. E'ina hanuge'za Nagrikura Ra Anumza mani'ne hu'za ke'za antahi'za hugahaze.

### *Idomu vahe'ma zamazeri havizama hania zamofo kasnampa naneke*

<sup>12</sup> Hagi Mikozama kegavama hu'nea Ra Anumzamo'a amanage hie, Na'ankure Idomu vahe'mo'zama Juda vahe'ma nona hu'za ha'ma huzmante'naza zamo'a, ra hazenke eri fore hu'naze. <sup>13</sup> E'ina hu'nagu Mikozama Kegavama Hu'nea Ra Anumzamo'a amanage hie, Nagra nazana rusute'na Idomu vahe'ene zagagafazminena zamahe fri hana hugahue. Ana hu'na Temani kumateti'ma erigafa huno Detani kumate'ma uhanati'nea kumazmia eri haviza nehu'na, milka vhahera bainati kazinteti zamahe vagarenugenohu vhahera omanitfa hugahie. <sup>14</sup> Hagi Israeli vaheni'a huzmantesuge'za nona hu'za Idomu vhahera zamahegahaze. Nagri narimpa ahe'zamo'ma hu'enienia avamente ante'za zamazeri haviza nehu'za, zamahesage'za Nagri narim-pahe'zana ke'za antahi'za hugahaze huno Miko'zama Kegavama Hu'nea Ra Anumzamo'a hu'ne.

### *Filistia vahe'ma zamazeri havizama hania zamofo kasnampa naneke*

<sup>15</sup> Hagi Ra Anumzana Agra Anumzamo'a amanage hie, Filistia vahe'mo'za Israeli vahekura tusi zamavaresra hunezmante'za, hara huzmante vava hu'za neaze. <sup>16</sup> E'ina hu'nazagu Mikozama Kegavama hu'nea Ra Anumzamo'a amanage hie, Nagra nazana rusute'na Filistia vhahera hara hunezmante'na, Kereti vahetamine, ra hagerimofo anke'regama mani'naza vahetaminena zamahe hana hugahue. <sup>17</sup> Hagi kefo avu'ava'ma hu'nazarera, Nagra tusi narimpa ahezmante'na nona hu'na zamazeri haviza hanuge'za Nagrikura Ra Anumza mani'ne hu'za ke'za antahi'za hugahaze.

## 26

### *Tairi vahe'ma zamazeri haviza hania zamofo kasnampa naneke*

<sup>1</sup> Hagi Babilonima kinama ome hutama mani'nona knafina, 11ni kafumofona ese ikana ese knazupa Ra Anumzamo'a amanage huno nasami'ne. <sup>2</sup> Vahe'mofo mofavre Izikieliga, Tairi vahe'mo'za Jerusalemi vahe kumakura amanage hu'za hu'naze, mika kumatmimofo kuma kafamo'a hantagiramigeno, ana kuma kafamo'a anagino ruhagro hu'ne. Ana higeta ana kuma'mo'a haviza higeta, tagra feno vhahera se'ta manune hu'za hu'naze. <sup>3</sup> E'ina hu'nagu Mikozama Kegavama Hu'nea Ra Anumzamo'a amanage hie, Keho, Nagra Tairi vahe'motma ha' vahe ase'na, rama'a kumatmimpi vahe zamavare'na a'nena hagerimo moriri huno eno ankenarega eme runagrama seaza hu'za, tusi vahekrefamo'za hara eme huramantegahaze. <sup>4</sup> Zamagra Tairi rankuma'mofo have kegina eme tapage nehu'za, mani'nezama kuma'ma kegavama nehaza za'za nozminena tapage hugahaze. Ana nehu'na mopazmia reganope atre vagaresugeno havege fore hugahie. <sup>5</sup> Ana hanugenohageri amu'nompi nozame kuko rutare'za kanarahu kuma megahie. Na'ankure Nagra Mikozama Kegavama Hu'noa Ra Anumzamo'na huankino maka kumate vahe'mo'za arohu eme re'za mika zama'a eneri'za, <sup>6</sup> ne'onse kuma'aramima ra mopafima me'nea kumatamina bainati kazinteti ha' vahe'mo'za e'za eme zamazeri haviza hugahaze. Ana hanage'za zamagrama Nagrikura Ra Anumza mani'ne hu'za keza antahi'za hugahaze. <sup>7</sup> Na'ankure Miko'zama Kegavama Hu'nea Ra Anumzamo'a amanage hie, antahio. Nagra noti kazigati Babiloni kini ne' Nebukatnesana ama mopafima mani'naza kini vahe'mokizmi rankini ne'ki'na avre'na a'enkeno mika hosiramima'an, karisiramima'an, hosi agumpima vano nehu'za ha'ma nehaza vahetamine, tusi'a sondia vahetmima'anena zamavareno esige'za hara eme huzmantegahaze. <sup>8</sup> Hagi agra ana mopafima neonse kumatamina me'neana eri haviza hu vagareghie. Hagi zamagra kumamofo have keginamofona mopa katente'za ita tro hute'za, hanko'zamia eri'za anante mareri'za hara huzmantegahaze. <sup>9</sup> Hagi agra sondia vahe'arami huzmantenige'za tusinasi zafa kitagi'za ana kuma have kegina rufrage mafrage nehu'za, aeni kanonteti kuma'ma kegavama nehaza za'za nona ahe tapage hutregahaze. <sup>10</sup> Agra rama'a hosi afu'tamimi maniza hara eme hugahazankino ne-esageno'ma zamagafinti'ma marerisia kugusopafinti kumagunamo'a refite ramantegahie. Hagi karisiramine, hosi afutamimo'zanema, tapage hu'nea kuma have keginafima mareriankna huno'ma kuma kafampima marerinkeno'a, ana keginamo'a momi huno kaza hugahie. <sup>11</sup> Hosi afu'aramimofo zamagigomo'a mika kuma kampina rentrako hu'za vano hugahaze. Hagi agra maka vhahera bainati kazinteti zamahe vagaresigeno, noma vazisgama hu'naza

anumza zafamo'za mopafi ampararu humasegahie. <sup>12</sup> Ana vahe'mo'za maka fenonka'a eri vaganere'za, keonke zama tro hunka zagoma e'nerina zantaminena maka eri vaganere'za, tamavesima nentaza nontamina eri haviza nehu'za, havene zafaramine, kugusopanena eri hantagu hu'za hagerimpi atregahaze. <sup>13</sup> Hagi hapuema nehaza zavenama nehenka zagame'ma hunka musema nehana zana eri atresugen, vahe'mo'za zavenama nehanke'zama nentahiza zana hu'za zavena krafagea ru'enena ontahigahaze. <sup>14</sup> Hagi kagrira hageri amu'nompi have kazeri tro ha'nena, nozame'ma nehaza vahe'mo'za kukoma knarama hu kumasenka maniga-hane. Na'ankure Nagra Ra Anumzamo'na huankinka ete rankumaka'a eriso'ea osugosane huno Mikozama Kegavama Hu'nea Ra Anumzamo'a hu'ne. <sup>15</sup> Amanage huno Mikozama Kegavama Hu'nea Ra Anumzamo'a Tairi vahe'motagura hie, Kagrama traka'ma hana agasasane, ahe kuzafa'ma antesia vahe'mo'zama kragi'ma ranaza zane, bainati kazinteti'ma zama-hesia zamofo agasasama ra hagerinkenama me'nea mopafi vahe'mo'za antahisu'za zmahirahiku nehu'za koro hugahaze. <sup>16</sup> E'ina hanigeno hageri anke'na nemaniza ugagota kva vahe'mo'za kini tra zamiretira eranu'za kini fetori zamia nezafi'za, avonkre avankre kukenazimia hatetregahaze. Zamagra mopare mani'neza maka kna zamahirahikura nehu'za, kezmia omanenige'za antri hu'za nava'nava hugahaze. <sup>17</sup> Zamagra amanage hu'za zavi zagamera hu'za zavira ategantegahaze. Kagimo'ma haruharuma hi-genka marerisa ranku'mamoka, nahigenka havizana hane. Kagra hagerina kegava hunenka, maka zago fenontera kegava hankeno tava'onka'are'ma mani'naza vahe'mo'za zamahirahiku hu'naze. Hianagi ventekamo'a menina haviza hu'ne. <sup>18</sup> Hagi menina Tairi kuma'mo'a haviza nehigeno, ra hagerinkena mani'naza vahe'mo'za nege'za zmahirahiku nehazageno, hageri amunompima mani'naza vahe'mo'za traka'ma hana zankura tusi zamagogogu nehaze. <sup>19</sup> Hagi Mikozama Kegava Hu'nea Anumzana Ra Anumzamo'a amanage hie, ruga'a kumamo'zama hu'nazankna hu'na, Tairi kumara Nagra eri haviza hu atrenugenno mago'zana omanegahie. Hagerimo'ma aheno refiteankna hu'na ha' vahera huzmantesuge'za eme kahe vaguesageno ka'ma koka fore hugahie. <sup>20</sup> Nagra hugante'nugenka korapama fri vahe kumapima umani'naza vahetamine umanigahane. Havizama hu'nea kumapima maniaza hunka hugante'nugenka, fri vahe kumapina umanigahane. Ana hanugenka kasefa'ma hu'za mani'naza vahe'mokizimi mopafina ete omegahane. <sup>21</sup> Hagi tamazeri havizantfa hanena, kefoza huta frisageno tamagimo'a ome fanane hugahie. Ana hanageno vahe'mo'za tamagrikura eme hakregahazanagi, eme tamage'za eri forera osugahaze huno Mikozama Kegavama Hu'nea Ra Anumzamo'a hu'ne.

## 27

### *Tairi vahe'mokizimi zavi zagamere*

<sup>1</sup> Ra Anumzamo'a amanage huno nasami'ne, <sup>2</sup> Vahe'mofo mofavre Izikieliga, Tairi vahe'mokizmia zavi hunka zavira ate'zmanto. <sup>3</sup> Kagra hageri ankena kante mani'nankeno, miko kazigati vahe'mo'za kagripinti mika fenozana zagoreti eme miza nesaze. Miko'zama Kegvama Hu'nea Ra Anumzamo'a amanage hie hunka zamasamio, Tairi kumamoka hunka, nagra mika kumara zamagatere'na navasase'ane kuma mani'noe hunka ne-hane. <sup>4</sup> Hagi mopa atupakamo'a hageri amunompi evu'negeno, noma kine-gantaza vahe'mo'za anampi konarari'ane no kigante'za vu'haze. <sup>5</sup> Hanki

ventema tro'ma hu meni zafa Seniri kumateti antagi'za vente'mofo zafa'a tro nehu'za, sida zafa Lebanoniti antagi'za ventemofo selima rente zafa retrure'za ahente'naze. <sup>6</sup> Hagi Basani kumateti oki zafa antagi'za tima rupapama hu'za ventema erino vu kuta zafa tro nehu'za, vahe'ma vanoma hanaza trara Saiprusi kumateti Saipresi zafa ahente'za enevu'za ananter elefanti aveteti avasesea hunte'naze. <sup>7</sup> Hagi avonkre avankre tavravea ventere'ma rente'negeno zahoma erino ventema avreno vu tavravea Isipiti erinka rente'nane. Hagi ventemofo ko' nona hokonke'ene fitunke tavrave Elisa hageri ankenaregati erita tro hu'naze. <sup>8</sup> Hagi Saidoni kumateti vahe'ene Aravati kumateti vahe'mo'zane ana ventea eri'za vano nehazankino, zamagra ventema eri'za vanoma hu'arera knare'zanfta hu'naze. Hagi ventefima vanoma hu vhahera, Tairi vahekiza zamagra ventea eri'za vano nehaze. <sup>9</sup> Hagi Gebali kumateti vahe'ma eri'zama eri'ama antahinima hu'naza ranra vahe'mo'za ventemo'ma hagroma hige'za fukina rekamare'za tro nehaze. Hagi mika'a hagerimpima vano nehaza venteramimo'za kagritetike miko fenozana eme mizanesaze. <sup>10</sup> Hagi Pesia vahe'ma, Lidia vahe'ma, Puti vahe'mo'za kagri sondia vahe emese'za nemanize. Hagi hankozmine fetori zamia kagri kumapi eme ante'za rankagia negamize. <sup>11</sup> Hagi have keginaka'arerar Aravati vahe'ene Heleki vahe'mo'za kegava hazageno, Gamadi vahe'mo'za za'za nontera manine'za kumara kegava hu'naze. Hanki hankozmia have keginare eme hanti'za kagizageno, konarakomo'a marenerie. <sup>12</sup> Hagi Tasisi vahe'mo'za kagritega fenozmia zagrera netre'za, mago'a fenona kagripinti miza nehaze. Na'ankure kagririra fenonkamo'a kagatere'ne. Zamagra silvama, golima, ainima, tinima, Lidinena eri'za eme negami'za nona hu'za zamavesia zana kagripintira eme eri'naze. <sup>13</sup> Hagi zagoma tro'ma hu'zane, kazokzo eri'za vahe'ene bronsiretim tro hu'zanena Grisi vahemozane, Tubali vahe'mo'zane, Mesheki vahe'mo'zane eme kami'naze. <sup>14</sup> Hagi Bet-Togarma vahepinti eri'zama erisia hosine, hapima eri'za vano hanaza hosiramine, miuli tonki afutaminena miza hu'nane. <sup>15</sup> Hagi Detani vahe'mo'za keonke zazmia eri'za eme negamiza, nona hu'za zamavesia zana kagripintira eme negamizagenka zagoa zami'nane. <sup>16</sup> Hagi rama'aza kagra ante'nanke'za, Aramu vahe'mo'za kagripinti keonke'zana eme mizanese'za mago'a zazmia zagrera eme kami'naze. Hagi tekusie nehaza havene, korankre tavravene, knare'za huza avonkre avankre hu'za hati'naza zantamine, knare'za huza tro hu'naza za'za tavaravene, kororiema nehaza zama hagerimpi nemanea zantamine, rubie nehaza haveraminena eri'za eme negamiza, nona hu'za zamavesia zana kagripintira eme eri'naze. <sup>17</sup> Hagi Miniti kazigati witine, fikireti trohu nezane, tumerine, olivi masavene, bamue nehaza manarentake pauranena, Juda vahe'mo'zane Israeli vahe'mo'zane eme negamize. <sup>18</sup> Hagi kagra rama'a feno zantami ante'nanke'za, Damaskasi vahe'mo'za Helboni kazigati wainine Sahari kumategati efekenofira eri'za eme negamiza, nona hu'za zamavesia zana kagripintira eri'naze. <sup>19</sup> Hagi Javani vahe'mo'zane Uzari vahe'mo'zane ainine, kasia manarentake zafane, haganentake kifagnaza kalamusine eri'za eme negamiza, nona hu'za zamavesia zana kagripintira eri'naze. <sup>20</sup> Hagi Detani vahe'mo'za hosimofo agofetu'ma ante'za mani'za nevazaza eri'za eme negami'za, nona hu'za zamavesia zana kagripintira emeri'naze. <sup>21</sup> Hagi Arabia vahe'ene Keteri mopafi ugagota kva vahe'mo'za zamagra sipisipi anentatamine, ve sип-

isipi afutamine memeramine avre'za eme negamiza nona hu'za kagripintira zamavesia zana emeri'naze. <sup>22</sup> Hagi Seba vahe'ene Ra'ama vahe'mo'zanena fenozmia eri'za eme negamiza vaheki'za, zamagra knare'zanfta hu'nea mananentake zantamine, zago'amo marerisa haveramine, goline eri'za eme negamiza, nona hu'za zamavesia zana kagripintira eri'naze. <sup>23</sup> Hagi Harani vahe'ma, Kane vahe'ma, Edeni vahe'ma, Seba vahe'ma Asuri vahe'ma, Kilmati vahe'mo'zanena fenozmia eri'za eza mago'a zante eme negamiza vahe mani'naze. <sup>24</sup> Hagi maketi kumaka'afina ama ana vahe'mo'za knare'nare tavravene, hokonke tavravene, kapeti'ema nehaza avonkre nankre tavravera mi eri'za eme negami'za nona hu'za zamavesia zana kagripintira emeri'naze. <sup>25</sup> Hagi Tasisi kumate venteramimo'za ana fenozana kaza hu'za eri'za e'naze. Hagi hageri amu'nompima me'nea mopafima tusi feno ante aviteankna nehane.

<sup>26</sup> Hagi ventema eri'za vanoma nehaza eri'za vahekamo'za kavre'za hageri amu'nompina nevazanagi, zage hanati kazigati zahomo'a, ana hageri amunompi ana venteka'aramina eri tapage tapagu huno kazeri haviza ne-hie. <sup>27</sup> Anama higeno'a mika zago fenonka'ane, zagore'ma fenoma netrana zantamine, ventefima vanoma nehaza vahetamine, ventema eri'za nevaza vahetamine, ventema eri so'ema hu vahetamine, zagore'ma fenoma netraza vahetamine, sondia vahetamine, maka ventefima vu'naza vahe'mo'zanena ventemo'ma havizama hige'za maka hagerimpi tam'i'na. <sup>28</sup> Hagi anama nehazage'za ventefima vanoma nehaza eri'za vahe'mo'zama krafama hazzage'za, hagerinkenama me'nea mopamo'za momi hu'naze. <sup>29</sup> Hagi ventefi eri'za vahe'ene ventema eriza vanoma nehaza vahe'mo'zanena ventefintira atre'za atiramiza hagerinkena eme otighahaze. <sup>30</sup> Ana nehu'za rankrafa hu'za kagrikura tusi zavi atenegante'za, kugusopa kate'za zamasenifina nefre'za, tanefa'pina mase'za rukrahe krahe hugahaze. <sup>31</sup> Hagi kagrikura zamasunku hu'za zamanu zamazokara ase'za eri rampage nehu'za, zamasunku kukena hune'za tumo'zmimo'a netanenige'za, zavira ate'za krafa hugahaze. <sup>32</sup> Hagi zamasunku'ma hu'za zavima nete'za amanage hu'za zavi zagamera hugahaze. Inankuma'mo hageri amu'nompima me'nea Tairi kumamo'ma havizama huno me'neno agasasa'ama omnea kumaknara hu'ne? <sup>33</sup> Hagi maka mopafi vahe'mo'za kagripinti maka zana eme mizama nehu'za musena nehaze. Keonke'zama tro'ma hana zantaminkura mika mopafi kini vahe'mo'za musena hu'naze. <sup>34</sup> Menina kagririra hagerimo kazeri haviza higenka, hagerimofo aro'are amefenkame uraminka mani'nane. Ana hankeno vente'ma eri'za vanoma nehaza maka vahe'tamine, ventefi eri'za vahe'mo'zane feno zanka'ane ventemo'enena maka hageri agu'age fre'naze. <sup>35</sup> Hagerinkena mani'naza vahe'mo'za ana nanekema nentahiza antri nehzageno, kini vahe'mo'za tusi zamagogogu nehzageno koro zamavugosa hu'ne. <sup>36</sup> Hagi maka mopafi feno vahe'mo'za kagrite'ma fore'ma higenka fananema hana zankura zamagena neru'za, anahu knazana tagrite fore hanigi hu'za tusi zamagogogu nehaze.

## 28

### Tairi kumamo'ma haviza haria zamofa kasnampa naneke

<sup>1</sup> Ra Anumzamo'a amanage huno nasami'ne, <sup>2</sup> Vahe'mofo mofavre Izikieliga, Tairi kumate ugagota kva nera Mikozama Kegavama Hu'nea Ra Anumzamo'a amanage hie hunka asamio, kagra kavufga ra nehunka nagra anumza mani'nena anumzantmimofo trate hageri amu'nompi mani'noe

hunka kagesa antahi'nane. Hianagi kagra anumzana omani'nananki, kagra amne ama mopafi vahetfa mani'nane. Anumza mani'nena knare antahiza eri'noe hunka nehananagi anara osu'nane. <sup>3</sup> Kagrama kage-sama antahi'nana, Danielina agaterena knare antahi'zana eri'nena, maka oku'ama me'nea zana antahi'noe hunka nehane. <sup>4</sup> Hagi kagra knare antahi'zanka'areti feno vahera nemaninka, goline silvanena zagoma ante nompina eri ante avite'nane. <sup>5</sup> Hagi kagra zagoma trohu'arerara knare hu'nanankinka, knare antahi zanka'areti feno vahera se'nane. E'i ana fenonka'amo higenka kavufa ra hu'nane. <sup>6</sup> E'ina hu'nanku Mikozama Kegavama Hu'nea Anumzamo'a amanage hie, na'ankure kagrama antahinana, nagra mago anumza mani'noe hunka antahintahia nehane. <sup>7</sup> E'igu kefozama hu'za vahe'ma zamahe'zama zamazeri havizama ne-haza vahetami ruregati zamavare'na esuge'za, knare antahi'zanka'aretimu amuhoma hunka eri atru'ma hu'nana zantamine, konarari zantaminena hara eme hugante'za eri haviza hugahaze. <sup>8</sup> Hagi ha' vahe'mo'za kahe'za kerigampi ome katresagenka, hageri amu'nompi fri haviza hugahane. <sup>9</sup> Hagi kagri'ma kahe frisaza vahe'mokizmi zamavufina nagra anumza mani'noe hunka hugahano? Kagra zamazanteti'ma kahesaza vahe'mokizmi zamavufina anumzana omanigahananki amne vahe manigahane. <sup>10</sup> Nagra Ra Anumzamo'na huankinka, kagra zamagoza no taga osu vahe'ma friaza hunka ruregati vahetamimofo zamazampi frigahane huno Ra Anumzana Anumzamo'a hu'ne.

### *Tairi kumate kini ne'mofonku'ma hu'za zavi zagame hu'naza naneke*

<sup>11</sup> Hagi Ra Anumzamo'a amanage huno nasami'ne. <sup>12</sup> Vahe'mofo mo-favre Izikeliga, Tairi kumate kini ne'mofona amanage hunka zavi zagam-era hundo. Ra Anumzana Agra Anumzamo'a amanage hie, kagra knare hunka mago zanka'amo'a haviza osigeno knare antahizamo'a kagripina avitegeno, konararika'amo'a marerifa' ne' mani'nane. <sup>13</sup> Kagra Anumza ne'mofo hozafi Ideni mani'nankeno, zago'amo'ma marerirfa haveramina rubi havema, topasi havema, Daimonima, berili havema, onksi havema, jaspa havema, lapis lazuri havema, emereli havema, tekusi havenu'ene huno kukena hugante'neane. Hagi ana haveramina golinitu eri anovaziteno kagri'ma kazeri fore'ma nehuno'a kavasesea hugante'ne. <sup>14</sup> Kagrira huhampri kantogenka Anumzamofo ruotge agonare mani'enka, kageko'na rutarenka kegava hu'nana. Ana hu'enkena amuho huno tefizo hu'nea haveramimofo amu'nompi vano hu'nane. <sup>15</sup> Ese'ma tro'ma hugante'noregatira mago hazenkeka'a omne ne' mani'nane. E'ina hunka hazenkeka'a omene ne' maninka neankeno, kefo avu'ava zamo'a kagrip-intira efore hu'ne. <sup>16</sup> Hagi mika zama zagore'ma netrenka mizane-senka hana avu'ava zampinti hafra hu'zana kagripina avitegenka, kumira hu'nane. E'ina hanke'na Anumzamofo ruotge agonafintira pehenama hu'nea zama eri atreankna hu'na kazeri netrena, amuho huno tefizoma hu'nea haveramimpima vanoma nehana zana, kahe kasopogenka atrenka atirami'nane. <sup>17</sup> Hagi knare kagi kagonama hugantea zanku kavufaga ra nehunka, kumira hu'nane. Konararika'agu kavufaga rama hanazamo knare antahizanka'amo'a ome haviza higeno, ama mopafi kini vahe'mo'za kagehogu ama mopafina kahe kasopegat're'noe. <sup>18</sup> Hagi kagra tusi kumi avu'avaza nehunka, fatgo osu kankamunteti'ma zagoma retro'ma hana zamo mono nonka'a eri pehena hu'ne. E'ina hu'negu maka vahe'mo'za

negagesage'na teve huntenogeno kagripinti rukru huno kagrira tegassage-gahie. <sup>19</sup> Hagi ruzahu fri'zama frinka ome fananema hanankeza kagri'ma kage'za antahi'zama hu'naza vahe'mo'za tusi zamagogogu hugahaze.

### *Saidoni vahe knaza zami'nea naneke*

<sup>20</sup> Hagi Ra Anumzamo'a amanage huno nasami'ne, <sup>21</sup> Vahe'mofo mofavre Izikieliga, Saidoni kuma'ma me'nea kaziga kavugosa hunte'nenka, ana kumamo'ma havizama hania kasnampa kea, <sup>22</sup> amanage hunka hunto, Ra Anumzamo'a amanage hie, Saidoni kumamoka Nagra ha'regante'na hihamu masazani'a tamagri amu'nompi eriama hugahue. E'inama hu'na ruotage avu'ava zani'ama eri ama'ma hanuge'za, Nagrikura Ra Anumzamo kanazana neramie hu'za ke'za antahi'za hugahaze. <sup>23</sup> Nagra kefo kria atresugenno eme zamazeri haviza nehanige'na, ha vahe huzmantanane maka kagini hara eme huzmante'za zamahesageno, koromo'a kumazmifina avitegahie. E'na hanuge'za Nagrikura Ra Anumza mani'ne hu'za ke'za antahi'za hugahaze. <sup>24</sup> Ana hanigeno Israeli vahe'mofo tava'onte'ma mani'ne'za ave've trazamo'ma hiaza hu'zama zamarege zamaregema hu'za Israeli vahe'ma zamazeri haviza nehu'za, huhavizama hunezmantaza vahetamina omanigahaze. E'na hanuge'za Nagrikura Ra Anumza mani'ne hu'za keza antahi'za hugahaze.

### *Henkama Israeli vahe'ma zamazeri atruma hania zamofo naneke*

<sup>25</sup> Hagi Ra Anumzana Agra Anumzamo'a amanage hie, Israeli vahe'ma zamahe panani'ma huge'za ufre efrema hu'nazaregati'ma zamavare atruma hanu'na, zamagri amu'nompi ruotge navu'navani'a erinte ama hanuge'za ruga'a kumatamimpi vahe'mo'za kegahaze. E'na hanuge'za eri'za vaheni'a Jekopuma ami'noa mopafina manigahaze. <sup>26</sup> Hagi Israeli vahe'mo'za ana mopafina knare hu'za manine'za, nona kiza nemaniza waini hoza ante'za negahaze. Hagi ruga'a kumatmimpima nemaniza vahe'mo'zama Israeli vahe'ma hu havizama hunezmantaza vahetmina knaza nezamisuge'za, zamagra knare hu'za manigahaze. E'na hanuge'za Israeli vahe'mo'za Nagrikura Ra Anumza mani'ne hu'za ke'za antahi'za hugahaze.

## 29

### *Isipi vahe'ma havizama hugahazema hu'nea zamofo kasnampa naneke*

<sup>1</sup> Hagi Babilonima kinama ome hutama mani'nonkeno 10nimia hianka-fumofona 10ni ikantera 12fu knazupa Ra Anumzamo'a amanage huno nasami'ne. <sup>2</sup> Vahe'mofo mofavrea Izikieliga, Isipi kini ne' Fero'ma nemania kaziga kavugosa hunte'nenka, agrane Isipi vahe'mo'zanema havizama hanaza zamofo kasnampa kea, <sup>3</sup> amanage hunka huo, Ra Anumzana Agra Anumzamo'a amanage hie, Antahio, Isipi kini ne' Feroga kagra tusi'a osifave krerfa tinka'afina masenanku Nagra hara regantegahue. Hagi kagra hunka Naeli tina nagra tro hunte'noankino, nagri ti me'ne hunka hu'nane. <sup>4</sup> Hianagi Nagra kagemazampafi hukua eri rusi hu'na, ana timp-intira kavazuhu atresugenno ana timpima nemani'za nozamemo'za kahe-heka'are akamarenesage'na ana maka zamavazu hu atitregahue. <sup>5</sup> Hagi kagri'ene mika nozameraminena tamavre'na hagege kokampi ome tam-tregahue. Ana hanugeno vahe'mo'za ome zoraonkisageta afi zagagafane, namaramimofo ne'za segahaze. <sup>6</sup> E'na hanuge'za Isipima mani'naza vahe'mo'za Nagrikura Ra Anumza mani'ne hu'za ke'za antahiza hugahaze. Na'ankure Israeli vahe'mo'za kagrikura hankave azompa mani'nampi

hu'za hu'nazanagi, hake azotagna huno hankaveka'a omane'ne. <sup>7</sup> Israeli vahe'mo'za azompama hiaza hu'za kagrira zamazampi kazerine'za nevaza-genka, kagra ru hantaginka zamazampi vazinka zamare'nane. Kagrite'ma zamagenama rentintima hazagenka zamaza osu zamatranske'za traka hu'za mase'naze. <sup>8</sup> E'ina hu'negu Ra Anumzamo'a amanage hie, Nagra mago ha' vahe zamavare'na esuge'za bainati kazinteti maka vahe'ene zagagafanena eme zamahe vagaresigeno, <sup>9</sup> Isipi mopafina vahera omaninkeno haviza hugahie. E'ina hanuge'za Isipima mani'naza vahe'mo'za, Nagrikura Ra Anumza mani'ne hu'za ke'za antahi'za hugahaze. Na'ankure kagra hunka, Naeli tina nagra tro huntogeno nagri ti me'ne hunka hunaku, <sup>10</sup> Nagra menina kagri'ene tinka'anena ha' rerantanena, Isipi mopa Migdoli kazigati agafa huteno vuno Aswani kaziga vuteno, vu vava huno Itiopia mopama eme atrete uhanatisige'na mika eri haviza hanenkeno, vahera omanitfa hugahie. <sup>11</sup> Hagi 40'a kafufina magore huno vahe'mo'zane zagagafamoza-nena ana mopafina vano vanoa osugahaze. <sup>12</sup> Hagi mago'a moparamima haviza hu'za me'naza amu'nompina, Isipi mopa eri havizantafa hanugen rankumatmimo'za 40'a kafufina haviza hu'za megahaze. Ana nehu'na Isipi vahetamina zamahe panani hanuge'za, ru vahe mopafine vahe kumap-inena mago mago hu'za umani emanı hugahaze. <sup>13</sup> Ana hugahazanagi Ra Anumzana Agra Anumzamo'a huno, Isipi vahetamina vahe kumategama umani emanima hu'nazana, 40'a kafuma agaterena, anantegatira ete zamavare atru hugahue. <sup>14</sup> Ana nehu'na kinama ome hunaregatira ete zamavare'na mopa agafazmire Patrosi kumate esuge'za, zamagi omane vahe emanigahaze. <sup>15</sup> Ana huno himamu'a omane kuma me'neno kote'ma hu'neaza huno hihamua erino ruga'a kumapi vahera zamagate oreghahie. Hagi hanavezmia eri atresugeno magore huno mago'a kumatamina kegava huozmantegahie. <sup>16</sup> Israeli vahe'mo'za mago'enena tamagritegatira zamazama hu'zana eme e'origahaze. Na'ankure tamagri'ma eme tamantahige'za zamaza hu'zama eri'za kumi'ma hu'naza zanku zamagesa nentahiza anara hugahaze. E'ina nehu'za Nagrikura Ra Anumzana Agra Anumza mani'ne huza ke'za antahi'za hugahaze.

<sup>17</sup> Hagi Babilonima kinama ome hutama mani'nonkeno, 27nima hia kafumofona ese ikantero ese knazupa Ra Anumzamo'a amanage huno nasami'ne. <sup>18</sup> Vahe'mofo mofavre Izikeliga, Babiloni kini ne' Nebukatnesa'a Tairi kumate vahe'enena tusi ha' nehuno sondia vahe'a ra eri'za zamige'za enerizageno zamanu zamazokamo'a pupunesegeno zamafumo'a pro hu'ne. Hianagi Tairi vahe'ma ha'ma huzmantazana mago knare mizana e'ori'naze. <sup>19</sup> E'ina hu'negu Ra Anumzana Agra Anumzamo'a amanage hie, antahiho, menina Nagra Isipi vahe mopa Babiloni kini ne' Nebukatnesa eri ami'nugeno, ana mopafima me'nea maka fenozana rohu'reno eri vigureno vugahie. E'i ana zama erisiana sondia vahe'mofo mi'za megahie. <sup>20</sup> Nagri kema amage'ma ante'za, sondia vahe'ane agranema amuhoma hu'za Tairi vahe'ma zamazeri havizama hu'naza zante mizazamigna hu'na Isipi mopa zamigahue huno Mikozama Kegavama Hu'nea Ra Anumzamo'a hu'ne. <sup>21</sup> Hagi ana knazupa Israeli vahera hihamu hankavea nezami'na, Izikeliga kagira eri aka hanen zamagri amu'nompi maninenka nanekea zamasamigahane. E'ina hanuge'za Nagrikura Ra Anumza mani'ne hu'za ke'za antahi'za hugahaze.

<sup>1</sup> Ra Anumzamo'a amanage huno nasami'ne. <sup>2</sup> Vahe'mofo mofavre Izikieliga amanage hunka kasnampa kea huo, Mikozama Kegavama Hu'nea Ra Anumzamo'a amanage hie, Hago kna efore hianki, zavi krafa huo. <sup>3</sup> Na'ankure knamo'a kofa hie, Ra Anumzamofo knamo'a kofa hie. E'i anankna maka mopafi vahetera hamponokino hanintiri hanigeno havi kna fore hugahie. <sup>4</sup> Hagi ha' vahe huzmant'e'nugeno Isipi vahera bainati kazinteti e'za eme zamahehana nehanage'za, Itiopia kumate vahe'mo'za zamatagu nehu'za zavi krafa hugahaze. Ana nehanageno mika fenozazmia erihana nehu'za kumazmia eri haviza hu'za vugahaze. <sup>5</sup> Hagi Itiopia sondia vahe'ma, Puti vahe'ma, Ludi vahe'ma, Lidia vahe'ma, maka Arabia vahe'ma, Libia vahe'ma, Israeli vahe'enena ha'vahe huzmantanena magoka Isipi vahe'ene maka bainati kazinteti eme zamahe vagaregahie. <sup>6</sup> Hagi Ra Anumzamo'a amanage hu'ne, Isipi vahe'ma eme zamazama hanaza vahe'enena ha'vahe'mo'za zamahe hana hanageno, Isipi vahe'mo'zama zamavufaga rama nehaza hankavemo'a evuramigahie. Hagi noti kaziga Migdoli kumati maniza vu'za sauti kaziga Aswani kumate'ma uhanati'naza vahera maka bainati kazinteti zamahe vagaregahie, huno Ra Anumzamo'a hu'ne. <sup>7</sup> Hagi mika havizama huno me'nea moparamimofo amu'nompina Isipi mopamo'a haviza huno mesigeno, havizama hu'naza rankumatamimofo amu'nompina zamagri rankuma'mo'za haviza hu'za megahaze. <sup>8</sup> Hagi Nagrama Isipi mopafi kumatamima teve taginente'na, Isipi vahe'ma eme zamazama nehaza kumatamima zamazeri havizama hanuge'za, Nagrikura Ra Anumza mani'ne hu'za Isipi vahe'mo'za ke'za antahi'za hugahaze. <sup>9</sup> Hagi ana zupage kema erino vuno eno'ma hu vahetami huzmanta'nena ventefi ame'hu'za vu'za, knare hu'za mani'naza Sudani vahera (mago'a agia Kusima, Itiopiama, Sairini) vahe'enena ome zamazeri zamagogogo fegahaze. E'ina hu'na Isipi mopama eri havizama hanuge'za, hago hazenke zana egahie hu'za zamagogogura nehu'za zavi krafa hugahaze. <sup>10</sup> Ra Anumzamo'a amanage hu'ne, mika Isipi vahe kevua Babiloni kini ne' Nebukatnesa azampi zamavarenta'nenko, rama'a vahe kevu mani'nazanagi zamahe hana hugahie. <sup>11</sup> Hagi Nebukatnesa'a keontahi sondia vahe'ane eno Isipi mopa eri haviza nehuno, bainati kazina anoma'afinti avazu huno maka vahera zamahe frisage'za zamavufagamo'a ana mopafina avitegahie. <sup>12</sup> Hagi Nagra Ra Anumzamo'na huankina, Naeli tirana eri nerane'na, kefo zmavuzmava'ma nehaza vahe zamazampi ana mopa erinta'nena zamagra eme eri haviza hanageno hagege ka'ma koka fore hugahie.

<sup>13</sup> Hagi Ra Anumzana Agra Anumzamo'a amanage hu'ne, Isipi vahe'mo'zama zamazanteti'ma antre'za tro'ma hu'naza havi anumzantamina Nagra eri haviza nehu'na, keonke'zamofo amema'ama Memfisi kumate'ma tro'ma hunte'ne'za mono'ma hunentaza havi anumzanena eri haviza hugahue. Ana hanugen Isipi mopafina magore huno ugagota kva vahera omanisigeno, ana mopafi vahe'mo'za zmagogogu hugahaze. <sup>14</sup> Hagi Patrosi kumara eri haviza nehu'na, Zoani kumara teve taginte'nugeno teveregahie. Ana nehu'na Tebesi kumapi vahera zamagrama hu'naza zantera knaza zami'na zamazeri haviza <sup>15</sup> Hagi Isipi vahe vihu kuma Pelusiumi kumapi vahera narimpama ahenezmante'na, Tebesi kumapi vahe kevua zamahe hana hugahue. <sup>16</sup> Hagi Isipi mopafina teve tagintenugeno, Pelusiumua vahera (mago agi'a Sinigi'za) tusi'a zamata ener'nageno, Tebesi vahera antri hanazaza hu'za hara eme hunezmante'nage'za, Memfisi kumate vahe'mo'za zamatafina maka kna

mani'za vugahaze. <sup>17</sup> Hagi Oni kumate kasefa vahe'ene, Pi-beseti kumate kasefa vahe'enena bainati kazinteti zamahe vagaregahaze. Ana hanageno ana kumatamimpi vhahera zamavare'za kina ome huzmantegahaze. <sup>18</sup> Hagi Isipi vahe'mo'za ra zamagima eneriza hanave'zmia eri havizama hanugen'a, anankna zupa Tafenesi kumapina tusi hani hugahie. Hagi hampomo'a Isipi mopafina refite'nigeno maka vahetamina zamavare'za, Babiloni kina ome huzmantegahaze. <sup>19</sup> E'ina hu'na zamagrama hu'naza avu'ava zanteria Isipi vhahera kna zana zamisuge'za, Nagrikura Ra Anumza mani'ne hu'za ke'za antahi'za hugahaze.

### *Babiloni vahe'mo'zama Isipi vahe'ma zamazeri havizama hanaza naneke*

<sup>20</sup> Hagi Babilonima kinama ome hutama mani'nonkeno, 11nima hiankafumofona ese ikantera 7ni knazupa Ra Anumzamo'a amanage huno nasami'ne. <sup>21</sup> Vahe'mofo mofavre Izikeliga, Nagra Isipi kini ne' Fero azana ru hantagi'noe. Hagi ana azanteria teganinogura mago'a zana frege mago'a zana anteno anara oki'neankino, kazinknona erino hara hugara osu'ne. <sup>22</sup> E'ina hu'nagu Ra Anumzana Agra Anumzamo'a amanage hie, Nagra Isipi kini ne' Ferona ha'rente'na knare'ma hu'nea azane, havizama hu'nea azanena anantarega ruhantagisugeno bainati kazinknomo'a azampintira hanareramigahie. <sup>23</sup> Ana nehu'na Isipi vhahera zamahe panani hanuge'za, vahe mopafine vahe kumatamimpi umani emani hugahaze. <sup>24</sup> Ana nehu'na Babiloni kini ne'mofo azana eri hanaveti'na hihamuua nemina bainati kazini'a azampi antegahue. Hianagi Isipi kini ne' Ferona tarega azantrena ru hantaginugeno Babiloni kini ne'mofo avuga ahe kuzafa ante vahe'mo atagu nehuno krafa hiankna hugahie. <sup>25</sup> Hagi Babiloni kini ne'mofo azana, eri hanavetigahue. Hianagi Isipi kini ne' Fero azana eri haviza hanugen'o stino evuramigahie. E'inama hanuge'za Nagrikura Ra Anumza mani'ne hu'za ke'za antahi'za hugahaze. <sup>26</sup> Ana nehu'na Isipi vhahera zamahe panani hanuge'za, vahe mopafine, vahe kumatamimpi umani emani hugahaze. E'ina hanuge'za Nagrikura Ra Anumza mani'ne hu'za ke'za antahiza hugahaze.

## 31

### *Lebanoni sida zafamofo fronka naneke*

<sup>1</sup> Hagi Babilonima kinama ome hutama mani'nonkeno, 11nima hiankafumofona namba 3 ikantera, ese knazupa Ra Anumzamo'a amanage huno nasami'ne. <sup>2</sup> Vahe'mofo mofavre Izikeliga, Isipi kini ne' Ferone sondia vahe'anena amanage hunka zamasamio, tamagra mika vhahera zamagatereta, tusi hihamu vahe mani'naze. <sup>3</sup> Hagi ko, Asiria vahe'mo'za Lebanononi sida zafagna hu'za knare'nare azankuna omente amente hazageno mago'a zafaramina tonu huzmantene. Agra za'za huno amunagamu hampompi marerino, mika zafaramina zamagatere'ne. <sup>4</sup> Hagi ana zafamofo timo ne'zana nemigeno, mopa agu'afima me'nea timo ana zafa ne'zana amigeno zazara hu'ne. Hagi ana zafaramima tima ne'zamiana, timo mika zafafina nevuno tina nezamie. <sup>5</sup> E'ina hunegu ana zafamo'a mika zafaramina hageno agatenereno, rama'a azanku'narenano ani'na kuronkuro hu'ne. Na'ankure agra rama'a ti agafafintira eri'negu anara hu'ne. <sup>6</sup> Hagi maka namaramimo'za ana zafa azankunataminte nona eme negizageno, mika zaga kafamo'za ana zafa agafafi anentara eme kasente'naze. Hagi ana zafamofo turunapi mika zamagima me'nea

vahe'mo'za kokantegatira enemanize. <sup>7</sup> Hagi ana zafamofona hentofa azankunatmi me'nne. Na'ankure ana zafamofo arafu'namo'za rama'a tima me'nefi amefenkame urami'za tina ani avazu nehaze. <sup>8</sup> Hagi Anumzamofo hozafima me'nea sida zafamo'za ana zafa gnara osazageno, meni zafane mago'a zafaramimo'za ana zafa gnara osu'naze. Anumzamofo hozafima me'nea zafamo'zanena ana zafa gnara osu'naze. <sup>9</sup> Na'ankure Nagra ana zafa rama'a azankunataminu konariria huntogeno knare'za higeno, mika Anumzamofo hozafima me'nea zafaramimo'za kezmasane nehaze. <sup>10</sup> E'ina hu'negu Ra Anumzana Agra Anumzamo'a amanage hu'ne, Na'ankure agra mika zafaramina zamagatereno amunagamuma mareri'nea zanku agra avufga ra hu'ne. <sup>11</sup> Ana hu'negu Nagra ana zafa nagotente'na namefi hunemina hankavenentake ha' vahe'mokizmi zamazampi zamavare atanenkeno, zamazeri havizantfa hugahie. <sup>12</sup> Hagi ruregati vahe'ma zamazeri haviza hu'rema vugota hu'naza kefo vahe'mo'za ana zafa antagi atre'naze. Hagi ana zafamofo azankuna'mo'a agonaramimpine, agupofine, krahopina hantagiramino mase'ne. Hagi ana zafa agafafima nemaniza vahe'mo'za atre'za vu'za e'za hu'naze. <sup>13</sup> Hagi maka namaramimo'za anama antagitre zafa atupare nemanizageno, zagagafamo'za ana zafamofo azankunatamimofo agofetu vano hu'naze. <sup>14</sup> E'inama hanigeno'a tinke-nafima me'nea zafamo'za hage'za zaza hu'za mago'a zafaramina zamagate'nere'za zamavufaga rana osugahaze. Na'ankure zamagranena e'inahu kna hu'za frisaza vahe mani'nazanki'za, fri'za kerifima urami'za mani'naza vahe'ene umanigahaze. <sup>15</sup> Hagi Ra Anumzana Agra Anumzamo'a amanage hie, sida zafamo'ma frino fri vahe kumapima urami'nea kna zupa, mopa agu'afima me'nea tintamina hanuge'za zavi krafa hu'za zamasunku nehanage'na, mika tintamina eri tanegahue. Anama hanige'za maka Lebanoni zafamo'za zamasunku huza zavi nete'nageno maka zafamo'za hagege hugahaze. <sup>16</sup> Hagi ana zafama trakama huno'ma nemaseno vagri'ma hia agasasa kenu mago'a mopafi vahera Nagra zamazeri koro hu'noe. Hagi fri kumapima nevaza vahe'enema huntoge'noma nevige'za, Idenima me'naza zafamo'zane knare'nare zafama Lebanoni me'naza zafamo'zane, knare'ma hu'za tima e'neriza zafamo'zanena fri vahe kumapi mani'ne'za musena hu'naze. <sup>17</sup> Hagi ana zafamofo tonapima nemaniza, agri'enema eriga-herafiza nemaniza vahe'mo'za bainati kazinteti'ma zamahe'naza vahe'ene magoka matipina urami'naze. <sup>18</sup> Hagi Ideni hozafima me'nea zafaramimpintira ina zafamo kagri knara huno za'zara huno ragi'ane zafa me'ne? Hagi kagra Ideni hozafima me'nea zafaramine, magoka fri vahe kumapima uramita zamagoza anomia taga osu' vahe'ma kazinteti'ma zamahazage'zama mase'naza kumapi vugahaze. Ama ana zantamina Ferone mika sondia vahe'are fore hugahie huno Ra Anumzamo'a hu'ne.

## 32

### *Ferone Isipi vaheku'ma hunte'nea zavi zagamemofo naneke*

<sup>1</sup> Hagi Babilonima kinama ome hutama mani'nonkeno, 12fuma hia kfumofona 12fu ikantera, ese knazupa Ra Anumzamo'a amanage huno nasami'ne. <sup>2</sup> Vahe'mofo mofavre Izikeliga, Isipi kini ne'Feronkura amanage hunka zavi zagamera nehunka zavira atento, Kagra maka vahetamimofo zamavurera laionigna nehunka, timpi tusi zankna osifavegna hunenka kaganutira tina amasagi agrenke nehunka, ti rantintamina regamu hunka

rehaba hu'nane. <sup>3</sup> E'ina hunanku Ra Anumzana Agra Anumzamo'a amanage hu'ne, Nagra tusi'a vahekrerfa zamavare'na vanuge'za, kuko ome atre'za ana timpintira kazerite'nagena, <sup>4</sup> mago'za omane mopafi matevu'na ruhapat'i na katregahue. Ana nehu'na maka kokantega namarami agi huntenugeno kavufagarera hare'za enemanisageno, zagagafamo'za kavufaga traga hu'za nezamu hugahaze. <sup>5</sup> Hagi kavufaga ru tragatrago hu'na agonaramimpi ometre emetre hanugenno mesiama'amo'a aguporamimpina avitegahie. <sup>6</sup> Hagi koranka'a tinkase'na humisugenno mika agonafina vuno eno nehuno, tinkrahopinena ome aviteno marerigahie. <sup>7</sup> Hagi e'inama hu'na kahe fananema hutesu'na, hamponteti mona refita'enkeno hanafitamima, ikama, zagedo'enena hanintiri hu'za remasa osugahaze. <sup>8</sup> Mika monafima me'nea tavitamina eri asu ha'nkeno, remasa huogantegahie. Ana nehanige'na hani atrenugenno haninkino maka mopaka'a refitegahie huno Ra Anumzana Agra Anumzamo'a hu'ne. <sup>9</sup> Hagi hazenkema tam'i'noa zamofo agenkema maka keta antahitama osu'naza mopafi vahe'mo'zama antahisu'za, antahintahi hakare nehu'za tusi koro hugahaze. <sup>10</sup> Hagi rama'a vahetami zamazeri zamagogofesuge'za negage'za zamagogogugu nehanageno, kini vahe'mo'zama negagesu'za tusi antri nehu'za zamagogogugu hugahaze. Na'ankure zamagra negesage'na bainati kazinknona eri vereave korave huna vugahue. Ana knaret'i'ma agafama huno vanige'za, ana zankura mika zupa zamagesa nentahi'za zamagogogogura hugahaze. <sup>11</sup> Na'ankure Ra Anumzana Agra Anumzamo'a amanage hu'ne, Isipi kini ne'moka, Babiloni kini ne'mo hara hugantegahie. <sup>12</sup> Hagi Nagra hanavenen-take sonda vahetamina huzmant'e nuge'za vu'za rama'a vahetmina ome zamahe vagaregahaze. Hagi e'ina sonda vahe'mo'za, vahe'ma zamazeri havizama hu'za zamahe'areru vugota hu'naze. Ana hu'nazanki'za zamagra Isipi vahe'motama rantamagima eneriza zantamina eri haviza nehu'za, rama'a vahe zamahe frigahaze. <sup>13</sup> Ana nehu'na mika tinke'nfima nemaniza zagagafazmia zamahe fri vagaregahue. Ana hanugenno tinke'nfina vahe'mo'zo zagagafamo'zanena timpina zamagia re'za vano hu'za tina regamua osugahaze. <sup>14</sup> Ana hute'na ana tina eri fru hanugenno masavemo'ma hiaza huno akoheno vugahie huno Ra Anumzana Agra Anumzamo'a hu'ne. <sup>15</sup> Isipi mopama eri haviza hanugenno, ana mopafima me'nea zant-mimo'a haviza nehanige'na, ana mopafima mani'naza vahetamina zamahe hana'ma hanuge'za, Nagrikura Ra Anumza mani'n'e hu'za keza antahiza hugahaze. <sup>16</sup> Amana zagamera Isipi vaheteku'ma hu'za zavima atesaza zagamere. Hagi Isipi mopagu'ene Isipi vahekura ru mopafi a'neramimo'za magoke avamente zamagerura erinte'za zagamera hu'za zavira ategahaze huno Ra Anumzana Agra Anumzamo'a hu'ne.

<sup>17</sup> Hagi Babilonima kinama ome hutama mani'nonkeno, 12fuma hia kfumofona ese ikantera, 15nima hia knazupa Ra Anumzamo'a amanage huno nasami'ne. <sup>18</sup> Vahe'mofo mofavre Izikieliga, Isipi vahetaminkura ka-sunkura hunka zavi krafa huo. Na'ankure nagra huzmantenuge'za hanavenen-take kumapi vahe'mo'zama ko'ma fri'zama mopa agu'afi urami'za umani'naza vahe'ene mago'a vahe'enema mani'nazarega umanigahaze. <sup>19</sup> Na'ankure tamagra mago'a vahetamina zamagatereta knare vahera omuni'nazanki, uramita fri vahe kumapi zamagoza ano taga osu vahe'ma fri'za umani'nafi umaniho hunka huzmanto. <sup>20</sup> Ha' vahe'mo'za zamagrira bainati kazinkonteti zamahegahaze. Menina bainati kazinknona anona reno azampi eri'neanki, mika Isipi vahe kevu krerfa zamavare'za

vugahaze. <sup>21</sup> Hagi fri vahe kumapintira, ru kumapi hankavenentake kva vahe'mo'za Isipi vaheku'ene zamazama nehaza vahe'mokizmigura kiza zokago kea huzmante'za amanage hugahaze, ama vahe'mo'za zamagoza anomia taga osu vahetamima bainati kazinteti'ma zamahe fri'naza vahe mani'nafi mani'naku eramize hu'za hugahaze. <sup>22</sup> Hagi Asiria vahe'ma frizage'za asezmantane'nazza matimofona, maka sondia vahe'ama bainati kazinteti'ma zamahe'naza vahe'mo'fo zamavufagamo megagi'ne. <sup>23</sup> Hagi Asiria vahe'ma asezmantane'nazza matimofo kerimo'a ame fenkame me'ne. Ana vahera ama mopafima vano nehu'za, vahe'ma zamazeri koroma nehaza vahe'ma bainati kazinteti'ma zamahazage'za asezmantane'nazza mati me'ne. <sup>24</sup> Hagi Elamu vahera anampi asente'nazageno, rama'a hanave sondia vahe'aramina anampi asezmente kagi'naze. E'i ana sondia vahetamina bainati kazinteti'ma zamahe fri'naza vahetamimofo mati me'ne. Hagi kora ana vahe'mo'za ama mopafima vanoma nehu'za, vahe'ma zamazeri koro'ma nehaza vaheki'za, zamagoza anomia taga osu vahe'mo'zama fri vahe kumapima umani'nafi zamagazegu nehu'za umanigahaze. <sup>25</sup> Hagi Elamu vahe'ma masesaza tafema hunte'nazana, kazinteti'ma zamahe'naza sondia vahe'aramimofo mati'mo agri mati'mofona megagi'ne. Ana maka sondia vahera bainati kazinknonteti zamahe fri vagare'naze. Na'ankure ana vahe'mo'za ama mopafi vano nehu'za, vahe'ma zamahe'za zamazeri koroma hu'naza vahekiza zamagoza anomia taga osu vahe'ene zamagra zamagazegu nehu'za ana kerifina uramiza fri vahetamimofo amu'nompi umani'naze. <sup>26</sup> Hagi Meseki vahe'ene Tubali vahe'enena anampi asezmantageno, sondia vahe'zanimofa matimo megagi'zanante'ne. Hagi kora ana vahe'mo'za ama mopafima vano nehu'za, vahera zamazeri koro hu'naza vahe mani'naze. Hianagi menina bainati kazinteti zamahe fri vagare'naze. <sup>27</sup> Hagi ana vahetamima asezmantesazana, zamagoza anomia taga osu ko'ma vano nehu'za vahe'ma zamazeri koro'ma hu'naza vahe'ma frizage'za zamagesaga hu'za ha'zazmima fita ruzmante'za asezmantane'nazza kna hu'za ase ozmante'naze. <sup>28</sup> Hagi Feroga kagri'enena kahe frisagenka, zamagoza anomia taga osu vahe'ma bainati kazinteti'ma zamahe frizage'za asezmantane'nazza amunompi asegantegahaze. <sup>29</sup> Hagi Edomu vahe'ene mika kini vahe'ane, ugagota kva vahe'araminena mareri zamagi eri'naza vahe mani'nazanagi, bainati kazinteti'ma zamahe fri'naza vahe'ene, zamagoza ano taga osu vahe'ma frizage'za asezmantane'nazza matipi asezmantane'nazza. <sup>30</sup> Hagi maka noti kazigati kva vahe'mo'zane Saidoni vahe'mo'zanena kora vahera zamazeri koro hu'naza vaheki'za, bainati kazinteti zamahe frizage'za anampina asezmente'naze. Na'ankure zamagra hihamu zaminuti vahera zamazeri koro hu'nazankiza, zamagazegu nehu'za fri'za zamagoza ano taga osu vahe'ma fri'za umani'nazafi umani'naze. <sup>31</sup> Hagi Fero'ene sondia vahe'amo'zama fri vahe kumapima uramiza, bainati kazinteti'ma ru mopafi sondia vahe'ma zamahe fri'naza sondia vahe'ma ome zamagenu'za Fero'a asunku'ma nehia zana atreno osi'a antahi muse hugahie. Huno Ra Anumzamo'a hu'ne. <sup>32</sup> Nagra huntogeno Fero'a ama mopafi vahera zamazeri zamagogofeno vano hu'neanagi, Ferone maka sondia vahe'araminena zamagoza ano taga osu vahe'ma asezmantane'nazafi asezmantegahaze huno Ra Anumzana Agra Anumzamo'a hu'ne.

<sup>1</sup> Ra Anumzamo'a amanage huno nasami'n'e, <sup>2</sup> Vahe'mofo mofavre Izikieliga, vaheka'a amanage hunka zamasamio, Nagrama ha' vahe'ma huzmantenuge'za, ha'ma eme huramante'nageta ha' vahe'ma esigeno'ma avuma anteno kegava huno mani'neno, kezama atino huramasami vahera mago ama mopafi vahepinti hu hamprintenko mani'neno, <sup>3</sup> negesigeno ha' vahe'ma esageno kesuno'a, ha' vahe neanki kva hiho huno ufe reno vahera huzmasamino. <sup>4</sup> Hagi ufema resigeno'ma nentahino'ma zofe'zafema nehuno mani'enigeno, ha' vahe'moma eme ahesageno frisiana agri korankumimo'a mago vahetera eovugosianki, agra'a erigahie. <sup>5</sup> Agra ufema regeno nentahino'a koro freno agura vazigaragi, neginagi huno mani'negeno eme ahe'nazankino, mago vahe'mo'a agri korankumira e'origahie. <sup>6</sup> Hianagi avuma anteno ha' vaheku'ma kegavama hu'nea ne'mo'ma kesigeno, ha' vahe'ma esigeno'ma ufema reno koro kema vahe'ma ozamasami'ma mani'enigeno, ha' vahe'mo'za e'za mago'mofoma eme ahesageno frisiana, e'i ana nera kefo avu'ava'ma nehia nona'a frigahianagi, agri korankumira avuma ante'noma ha' vahe'ma esigu'ma kvama hu'nea ne'mo erigahie. <sup>7</sup> E'ina hu'negu vahe'mofo mofavre Izikieliga, ha' vahe'ma esigu Israeli vahete kegava huo hu'na hu hamprigante'noe. E'igu Nagrama hanuankea erinka korokea zamasamigahane. <sup>8</sup> Hagi kefo avu'ava'ma nehia vaheku'ma Nagrama hu'na, tamage kagra frigahane hu'nama hanugenkama, ana nanekema erinka ome osamisankeno ana ne'mo'ma havi avu'avazama atreno agu'a rukrahe'ma osaniana, agra kumi'ma hu'nea zanterea frigahie. Hianagi agri korankumimo'a kagrite evugahie. <sup>9</sup> Hianagi kefo avu'ava'ma nehia vahe'ma ana nanekema erinka ome asamisankeno nentahino, havi avu'avazama atreno agua rukrahema osaniana, agra kumima hu'nea zanterea frigahie. Hianagi kagra'a kaguvazigahane.

<sup>10</sup> Hagi kagra vahe'mofo mofavre Izikieliga amanage hunka Israeli vahera zamasamio, tamagra amanage nehaze, tagrama huna hazenke zamo'ene kumi'mo'ene refiterantegeta haviza huta mani'none. Hagi inankna huta tagura vazigahune? huta nehaze. <sup>11</sup> Hagi amanage hunka zamasamio, Nagra kefo avu'ava'ma nehia vahe'ma nefrige'na musena nosue. Hianagi kefo avu'ava'ma nehia vahe'mo'ma agu'ama rukrahe huno mani'zanku nave'nesie. Hagi kagu'a rukrahe huo, kagu'a rukrahe huo. Nahanigeta Israeli vahe'mota kumi avu'ava zampina mani'neta frigahaze? <sup>12</sup> Hagi vahe'mofo mofavre Izikieliga zamasamio, mago fatgo avu'ava'ma nehania ne'mo'ma kumi'ma haniana, ko'ma hu'nea fatgo avu'ava'mo'a agura ovazigahie. Hagi mago kefo avu'ava'ma nehania ne'mo'ma, agu'a rukrahe huno fatgo avu'ava haniana, ko'ma hu'nea kefo avu'ava'mo'a azeri havizana osugosie. <sup>13</sup> Hagi fatgo avu'ava'ma nehania vaheku'ma hu'na, kagra ofrinka amne manigahane hu'na hunte'nenua ne'mo'ma, fatgo avu'ava zama'are'ma amentintima nehuno, kumi'ma haniana magore hu'na fatgo avu'ava'ma hu'nea zankura antahiomigosuanki, ana kumi avu'ava'ma hu'nea nona'a frigahie. <sup>14</sup> Hagi kefo avu'ava'ma nehia vaheku'ma frigahane hu'nama huntesua vahe'mo'ma, ana kumi avu'avazama atreno agua'ama rukrahe huno fatgo avu'avazama nehuno, <sup>15</sup> negami'na erisue huno humvempa nehuno vahe'mofo zama eri'nesia zana eme nemino, musufama eri'nesia zana venafa ome nemino, vahe'mo'ma kasefa'ma huno mani kasege amage'ma antesia vahe'mo'a, agra ofri knare huno manigahie. <sup>16</sup> Ana hanige'na kumi'ma hu'nea kumi avu'ava'agura mago'enena nagesa ontahigosue. Hagi agra fatgo avu'ava hu'neankino, tamage huno ofrigahi-

anki amne kasefa huno manigahie. <sup>17</sup> Hianagi Izikieliga vaheka'amo'za hu'za, Ra Anumzamo'a fatgo avu'avara nosie hu'za nehaze. Hianagi fatgo avu'ava'ma osu vahera zamagra Israeli vahe mani'naze. <sup>18</sup> Hagi fatgo avu'ava'ma nehania vahe'mo'ma atreno kefo avu'ava'ma haniana, agra ana kefo avu'ava'ma haniana zantera frigahie. <sup>19</sup> Hagi kefo avu'ava'ma nehania vahe'mo'ma ana kefo avu'avazama atreno agu'ama rukrahe huno knare huno fatgo avu'ava'ma haniana, agra ana fatgo avu'ava'ma hu'nea zantera ofri amne manigahie. <sup>20</sup> Hanki tamagra Israeli vahe'mota huta, Ra Anumzamo'a fatgo avu'avara nosie huta hu'nazanki'na, Nagra mago mago vahe'mota tamavu tamavara refko hu'na ketere hugahue.

### *Jerusalemi kumamo'ma havizama hania zamofo naneke*

<sup>21</sup> Hagi Babilonima kinama ome hutama mani'nonkeno, 12fuma hia kafumofona 10ni ikantera 5fu knazupa, Jerusalemiti mago ne'mo'a freno Babiloni ehanatino, Jerusalemi rankumara ha' vahe'mo'za eme eri haviza hazage'na koro frena oe huno eme hu'ne. <sup>22</sup> Hagi anama koro freno esia nera oki egahianki nehuno, kinaga Ra Anumzamofo hankavemo'a nagrite eno, nagira eri knare huno nagerura nami'neankina ana ne'ma nanterama esige'na agefunu atupa hu'nea vahe knara osu'na, amne agranena keaga hugara hu'noe.

<sup>23</sup> Hagi Ra Anumzamo'a amanage huno nasami'ne, <sup>24</sup> Vahe'mofo mofavre Izikieliga, Israeli mopafima haviza hu'nea ranra kumatmimpima nemani'za vahe'mo'za amanage hu'za nevaze, Abrahamu'a magoke ne' mani'neanagi Anumzamo Israeli mopa amigeno erisantiharen mani'neane. Hianagi menina tagra rama'a vahe mani'nonokino, tamagerfa huno ama mopa Anumzamo'a tagri tami'ne hu'za nehaze. <sup>25</sup> E'ina hu'negu amanage hunka zamasamio, Ra Anumzana Agra Anumzamo'a amanage hie, Tamagra korama me'nea ame'a neneta, zamazantet'i ma kaza osu havi anumza'ma tro'ma hunte'naza zana monora hunenteta, vahe'ma zamahe nefriza vahe'mota, ama mopa tagri mopa me'ne huta nehazo? <sup>26</sup> Tamagra hateti rehatri huta vahe'zana nehanareta, tava'ontamirema nemaniza vahe'mokizmi a'nanema renehanaraza vahe'mota ama mopa erisanti hategahune huta nehazo? <sup>27</sup> Hagi amanage hunka zamasamio, Ra Anumzana Agra Anumzamo'a amanage hie, Nagra kasefa hu'na mani'noa Anumzamo'na huankino, tamage huno Israeli mopafima havizama hu'nea kumatmimpima nemaniza vahera bainati kazinteti zamahe frigahaze. Hagi kumamofo meg'i'ama vanoma hanaza vahera, afi zagagafamo'za zamahe'za nesanageno, hankave vihufine havegampinema frakiza manisaza vahera krimo zamahe frigahie. <sup>28</sup> Hagi ana mopa eri haviza hanenke'za Israeli vahe'moma zamavufaga rama nehaza zamo'a omanenigeno, agonaramimo'a hagege huno magozana omnenkeno anampina vahera vanoa osugahie.

<sup>29</sup> Hagi e'ina'ma hu'na ana mopama eri haviza hanugenno maka zamo'ma havizama hanige'za Nagrikura Ra Anumza mani'ne hu'za ke'za antahi'za hugahaze.

<sup>30</sup> Hagi vahe'mofo mofavre Izikieliga, vaheka'amo'za kuma kegina tavaonte'ma atruma huge, nonkafa zamire atruma huge'ma hazafina ka grikura amanage hu'za zamagra zamagra mani'zafina nehaze, enketa Ra Anumzamo'ma kasampa vahe'ama asamigenoma nehia naneke ome antahisune hu'za nehaze. <sup>31</sup> Hagi zamagra kentahi vahe tro hu'za kagritega ne-eza, Nagri vahekna hu'za kavuga eman'i'za kema hanankea nentahizanagi,

ana nanekea ovaririgahaze. Na'ankure zamagraguke'ma antahizamo zamagu'afina avite'neankiza, vahe'ma zamazeri savri'ma hu'za zagoma eri'za feno vahe'ma mani'zankuke nentahize. <sup>32</sup> Hagi kagrama hana nanekemo'a zamagrama antahi'zana, ogenunu agenunuma hu'zagame'ma hentofa zamanke'ma ante'za zavenama ahe so'ema nehu'za nehzankna hu'ne. Na'ankure kema hanankea antahi'nazanagi, ana nanekea ontahi'za novari-rize. <sup>33</sup> Hagi tamagerfa huno ama ana nanekemo'a nena raga regahankino, ana zamo'ma efore'ma hanige'za negesu'za, kasnampa nera kora tagrane mani'neane hu'za ke'za antahi'za hugahaze.

## 34

### *Israeli kva vahe'mo'za knaza erisaza zamofo kasnampa naneke*

<sup>1</sup> Ra Anumzamo'a amanage huno nasami'ne, <sup>2</sup> Vahe'mofo mofavre Izikieliga, sipisipi afute kva vahe'mo'zama nehzaza hu'za, Israeli vahe'ma kegavama hune zamantaza kva vahera amanage hunka knazama erisaza kasnampa kea zamasamio, Ra Anumzana Agra Anumzamo'a amanage hie, Israeli mopafima mani'naza sipisipi afute kva vahe'mota tamagrama nenaza zankuke nentahita sipisipi afutamina ne'zana nozamize. <sup>3</sup> Tamagra sipisipi afutamina aheta afova'a neneta, azoka'aretira kukena trohuta nentanita, afovagema hia sipisipia ahegita nenazanagi, ana sipisipi afutamina kegava huso'e nehuta ne'zana nozamize. <sup>4</sup> Hagi han-kave'zmima omene sipisipia zamazeri hankavea notita, krima eri'naza sipisipine namuma zamare'nea sipisipi nagara zamazeri nonkanamareta, zamagia zamazama rehantagi'naza sipisipia anakinozmanteta, hazamagrene'za kankuma nehkaza sipisipia haketa zamavareta nomaze. Hianagi tamagra hankavetita zamazeri haviza nehuta, kegava hunozmantaze. <sup>5</sup> E'ina hazage'za Nagri sipisipi naga'mo'za panani hu'za ufre efre hu'za hazagrazage'za, maka afi zagagafamo'za eme zamahe'za ne'naze. Na'ankure sipisipi kva vahera omni'nagu anara hu'naze. <sup>6</sup> E'ina hazage'za Nagri sipisipi afu nagamoza hazagre'za maka agonaramimpine, maka zaza agonaramimpina vano nehaze. Ana hu'za maka ama mopafina hazagre'za vano nehzageno, mago vahe'mo'e huno ana sipisipiraminkura hakege, avua ante'nora kegera osu'ne. <sup>7</sup> E'ina hu'negu tamagra sipisipi kva vahe'mota Ra Anumzamofo nanekea antahio. <sup>8</sup> Hagi Nagri Ra Anumzana kasefa hu'na mani'noa Anumzamo'na huanki, Nagri sipisipi afute kva vahera mani'nazanagi zamatrage'za afi zagamo'za zamahe'za nenage'za hake'za ozamavare'naze. Hianagi sipisipi kva vahe'mo'za zamagraguke antahi'za zamagra'a ne'zana ne'zamu nehu'za, sipisipin'aramina ne'zana ozami'naze. <sup>9</sup> E'ina hu'negu sipisipi kva vahe'mota Ra Anumzamofo nanekea antahio. <sup>10</sup> Hagi Ra Anumzana Agra Anumzamo'a amanage hie, Antahilo, Nagra hara huzmante'na sipisipi kva vahetamimofo zamazampintira sipisipi afu'niaramina zamavrenuge'za sipisipi afutamina ne'zana ozamigahaze. Ana hanuge'za ko'ma nehzaza hu'za sipisipi kva vahe'mo'za zamahe'za onegahaze. Sipisipi afu'niaramina sipisipi kva vahetamimofo zamagipintira zamahe'na zamazeri varinuge'za zamahe'za onegahaze.

### *Israeli vahe zamazeri so'e hu'nea naneke*

<sup>11</sup> Na'ankure Ra Anumzana Agra Anumzamo'a amanage hie, Antahilo, Nagra sipisipi afu'niagura hakre'na zamazeri fore nehu'na kegava huzmantegahue. <sup>12</sup> Hagi panini'ma hu'za ufre efrema hu'naza sipisipi afutaminku'ma sipisipi kva vahe'mo'ma hakeankna hu'na sipisipi afu'nagania

hakena hampo komatuno tusi hanima hige'zama hazagre'za ufre efrema hu'naza sipisipi nagara maka kazigatira zamagu'vazina zamavare atru hu'na kegava huzmantegahue. <sup>13</sup> Hagi ru vahe mopafine kumatmimpinema umani emanima hu'naregatira zamavare atru hanuge'za, zamagra'a mopafi emeri atru hugahaze. E'ina hutena Israeli agonaramimpine, tinkrahopine, vahe'ma omani kumatamipine, mani'nesagena ne'zana zamigahue. <sup>14</sup> Hagi Israeli mopafima knare trazama me'nea agonaramimpi zamante'nuge'za ana agonaramimpi masene'za ana tra'zana negahaze. <sup>15</sup> Hagi Nagra sipisipi afuni'aramina kegava nehu'na, knare tra'zama me'nenifi zamavare'na vano nehanena tra'zana nene'za masegahaze huno Ra Anumzana Agra Anumzamo'a hu'ne. <sup>16</sup> Fananema hu'naza sipisipi afutamina hakena nezamavare'na, hazama gre'naza sipisipi afutamina zamavare'na ne-ena, zagmaia zamazama rehantagi'naza sipisipi afu'tamina anakinezmante'na, krima eri'naza sipisipi afutamina zamazeri kanamregahue. Hianagi afovage'ma hu'za hankavemati'naza sipisipi afu'tamina, zamazeri haviza nehu'na fatgo hu'na refko huzmantegahue.

<sup>17</sup> Hagi tamagra Nagri sipisipi afu'motagura Ra Anumzana Nagra Anumzamo'na amanage hue, Nagra mago mago sipisipi afumota tamente tamente keaga refko hutere nehu'na, ve sipisipi afutamine, ve meme afutamimofo keaga refko hutere hugahue. <sup>18</sup> Hagi mago'amota rama'a knare tra'zama nazageno tamu'ma higeta, amnema mea tra'zama tamagianuma reprimapri huta rehaviza hunetreta, avusesema hu'nea tima nazageno tamu'ma higeta, ana timpi vano huta regamuma nehzana e'i knarerera osu'ne. <sup>19</sup> Hagi Nagri sipisipi afutamimo'za, tamagiaret'i'ma repripro'ma hutraza traza nene'za, regamuma haza ti nenazana e'i knare nehifi? <sup>20</sup> E'ina hu'negu Ra Anumzana Agra Anumzamo'a amanage huno zamagrikura hie, Keho, Nagrani'a afovage'ma hu'nea sipisipine, asozage'ma hu'nea sipisipinen refko huznantegahue. <sup>21</sup> Hagi tamagra afovagema hu'naza sipisipimota, hankavezmima omne sipisipiramina tamaseninuti'ene tamazonanu'ene ome zamaretufe eme zamaretufe nehuta, pazine ome zamare eme zamare hazage'za, hazagre'za ru kumatega ufre efre hu'naze. <sup>22</sup> Hagi Nagra sipisipi afu nagani'a zamagu vazi'nuge'za, ru'enena zamazeri havizana osugahaze. Ana nehu'na knare sipisipine, havi sipisipinen refko huznantegahue. <sup>23</sup> Ana nehu'na magoke sipisipi afu kva ne' Devitina Nagri eri'za ne' azeri otisugenno mani'neno ne'zana nezamino kegava huzmantegahie. <sup>24</sup> Nagra Ra Anumzamo'na Anumzazmia manisugenno, eri'za ne'ni'a Deviti ugagota kvazmia manigahie. Nagra Ra Anumzamo'na ama nanekea hue.

<sup>25</sup> Hagi Nagra mani fruma hu'za manisaza huhagerafi hvempagea zamagrana huhagenerafina, afi zagaramina ama mopafintira zmahanati atranena, ka'ma kopine zafafinena koro osu mase'za vanoma nehanageno, afi zagamo'za ozmamprigahaze. <sup>26</sup> Hagi zamagri'ene agonanimofoma megagi'nea kumataminena asomu huzmantegahue. Ana nehu'na ata ko'ma ahe knarerera mopazmifina ata kora atresugenno asomu ata kora runtegahie. <sup>27</sup> Hagi ana'ma hanugeno'a zafamo'za raga ner esageno, hozafina nezamo'a amponerenige'za knare hu'za mopazmifina manigahaze. Hagi karenamare zafama hiazza hu'za, knama eneri'za zana erinetre'na kinama huzmant'e naza vahe'mokizmi zamazampinti'ma kazufezmante'na zamagu'ma vasinuge'za, Nagrikura Ra Anumza mani'ne huza ke'za antahiza hugahaze. <sup>28</sup> Hagi ete ru'enena ha' vahe'mo'za eza rohura eme nozamisage'za, afi

zagagafamo'zanena zamahe'za negera osugahaze. Zamagra knare hu'za zamagu vazi'za manisage'za mago'a vahe'mo'za eme zamazeri korora osugahaze. <sup>29</sup> Ana nehu'na hozama antesaza mopazmia eri kasefa hu'na eri masave hanuge'za, ru'enena zamagakura nosañage'za, ru vahe'mo'zanena eme huhavizana huozmantegahaze. <sup>30</sup> E'ina hanuge'za Nagrikura Ra Anumzana tagri Anumzamo tagrane mani'ne hu'za nehu'za, Israeli vahera Anumzamofo vahe mani'none huza nehu'za Nagrira nage'za antahiza hugahaze huno Ra Anumzana Agra Anumzamo'a hu'ne. <sup>31</sup> Hagi tamagra Nagri sipisipi afu nagakita, Nagri keginafi mani'naze. Ana hu'nazankita tamagra Nagri vahe manizage'na Nagra tamagri Anumza mani'noe huno Ra Anumzana Agra Anumzamo'a hu'ne.

## 35

### *Seiri agonamo'ma havizama hania zamofo kasnampa naneke*

<sup>1</sup> Ra Anumzamo'a amanage huno nasami'ne, <sup>2</sup> Vahe'mofo mofavre Izikieliga, Seiri agonarega kavugosa hunte'eneka, havizama hania zamofo kasnampa kema huntesanana, <sup>3</sup> amanage huo, Ra Anumzana Agra Anumzamo'a amanage hie, ko, Nagra Seiri agonamoka nazana rusutena hara hunegante'na, kazeri havizantfa hanugenka ka'ma koka fore hugahane. <sup>4</sup> Nagra maka ranra kumatamia eri havizantfa hanugenno mopatamimo'a ka'ma koka fore hanigeta, Nagrikura Ra Anumza mani'ne huta tamagra keta antahita hugahaze. <sup>5</sup> Na'ankure tamagra Israeli vahera hara huzmante vava huta ne-eta, kumi'ma hu'naza zante'ma nona hu'na Israeli vahe'ma ha' huzmantehogu'ma huge'za aza ha' vahe'ene eri mago huta Israeli vahera hara huzmante'naze. <sup>6</sup> E'ina hu'negu Nagra kasefa hu'na mani'noa Ra Anumzamo'nua huanki'na, katresuge'za vahe'ma zamahe'za korama eri neragi'za vahe'mo'za karotago hugahaze. Na'ankure vahera ozamatre zamahenka korazmia eri taginanku, zamahenkama korama eri tagi'nana vahe'mo'za kagrira kavaririgahaze. <sup>7</sup> Hagi Seiri agona eri havizantfa ha'nena ka'ma koka fore hina, ana mopafina vahera ufre'za atiramiza osugahaze. <sup>8</sup> Hagi ha' vahetami huzmantenuge'za e'za bainati kazinteti eme tamahe fri'nageno, tamavufgamo'a tamagri ranra agonafine, neone agonafine krahopinena avitegahie. <sup>9</sup> Hagi Nagra tamazeri haviza ha'nena mopatamimo'a haviza huno meno nevi'na, kumatamia eri haviza hanena anampina vahera omanisageta, Nagrikura Ra Anumza mani'ne huta keta antahita hugahaze. <sup>10</sup> Nagra Ra Anumzamo'nama Israeli vahe'ene Juda vahe'enema mani'noa zankura tamagesa ontahita amanage nehaze, zamaheta mopazmia hanareta erisanti hategahune huta nehaze. <sup>11</sup> E'ina hu'negu Nagra Ra Anumzana kasefa hu'na mani'noa Anumzamo'na huankina, Nagri vahe'ma tamarimpama ahezmaneta zamazeri havizama hu'nazaza hu'na, tamagrira ana hugahue. Hagi tamagrama hu'naza kante antena refkoa huneramante'na, Nagrani'a nazeri ama ha'nena, nage'za antahiza hugahaze. <sup>12</sup> Ana nehuta Israeli mopafima me'nea agonaraminku'ma huhavizama hu'nanana Ra Anumzamo'a antahi'ne huta Nagrikura keta antahita hugahaze. Hagi tamagra amanage hu'naze, mopazmia eri haviza hanunke'za ana mopazmia tagri tamisageno tagri su'za megahie huta hu'naze. <sup>13</sup> Tamagra tamavufga ranke nehuta, huhavizama hunanteta e'naza kea Nagra antahi'noe. <sup>14</sup> Ra Anumzana Agra Anumzamo'a amanage hie, Nagra tamazeri haviza ha'nena mopatamimo'a ka'ma koka fore hina, kokankoka vahe'mo'za muse hugahaze. <sup>15</sup> Israeli vahe'mo'zama knazampima ufre'za havizama hazageta Idomu vahe'mota

muse hu'nazankina, Seiri agonafi vahe'ene Idomu vahe'motanena knazana tamina, tamazeri haviza nehu'na tamahē fanane hanugeta, Nagrikura Ra Anumza mani'ne huta keta antahita hugahaze.

## 36

### *Israeli vahe'ma zamazeri so'ema hania zamofo kasnampa naneke*

<sup>1</sup> Vahe'mofo mofavre Izikieliga, amanage hunka Israeli mopafima me'nea agonaraminkura kasnampa kea huzmanto, Israeli agonaramimoka Ra Anumzamo'ma hiankea antahihi. <sup>2</sup> Ra Anumzana Agra Anumzamo'a amanage hie, Ha' vahekamo'za amanage hu'za kagrikura nehaze, kagri ranra agonaramimo'za ko tagri'za se'ne hu'za nehaze. <sup>3</sup> E'ina hu'negu amanage hunka kasnampa kea huo, Ra Anumzamo'a amanage hie, Na'ankure maka kazigatira ha' vahe'kamo'za hara eme huramante'za maka zantmia eri nafa'a nehazage'za ana zankura vahe'mo'za tamefi kea nehu'za tamagenkea hu'naze. <sup>4</sup> E'ina hu'negu Israeli mopafima me'nea agonaramimota, Ra Anumzamo'a amanage hianki antahihi, Ra Anumzamo'a huno, Israeli mopafima me'nea ranra agonaramine, neone agonaramine tinkrahottamine, aguporamine, havizama huno me'nea kumatamine, vahe'ma omani rankumataminkura tamagri tava'ontema mani'naza vahe'mo'za kiza zokago kea huneramante'za, tamefi kea huneramante'za, tamagenkea hu'naze. <sup>5</sup> E'ina hu'negu Ra Anumzamo'a amanage hie, Tamage huno narimpa ahe'zamo'a teve rukru hiankina, ruga'a mopafi vahe'ene Idomu vahe'enena narimpa ahezmante'na huhaviza huzmanteno'e. Na'ankure Nagrira nage fenkami netre'za, tusi muse nehu'za nagri mopa eme aguza ru'za eri nafa'a hu'naze. <sup>6</sup> E'ina hu'negu Israeli mopafima me'nea ranra agonaramine, neone agonaramine, tinkrahottamine, aguporaminkura amanage hunka kasnampa kea huo, Ra Anumzamo'a amanage hie, Ko, ruga'a mopafi vahe'mo'zama huhaviza huneramante'za knazama tamigeta tamagazegu'ma hu'naza zantera, tusi narimpa ahezmantegahue. <sup>7</sup> E'ina hu'negu Ra Anumzana Agra Anumzamo'a amanage hie, Nagra nazana erintesaga hu'na hvempa huankino, tamagri tava'onte'ma mani'naza mopafi vahe'mo'zama tamagrikuma hu'za, haviza hugahazema hu'za huramante'naza nanekeia, zamagrite antenuge'za ana knazana zamagra'a eri'za zmagazegura hugahaze. <sup>8</sup> Hianagi Israeli agonaramimpima me'nea zafamota Nagri vahe'mo'zama eme nesaza zana rama'a azanku'na ahenteta zafa raga'a renteho. Na'ankure kofa hu'za ete kumazmirera egahaze. <sup>9</sup> Hagi ko, Nagra tamagri su'a mani'noanki'na tamagrite ete rukrahe hu'na tamaza hanugeta mopafina hoza erita krigahaze. <sup>10</sup> Ana nehu'na vahera zamazeri rama'a hugahuankino, maka Israeli vahe anara hugahue. Hagi ranra kumatmimpina mani avi'nete'za havizama hu'nea ranra kumatamina ete eri so'e hu'za kigahaze. <sup>11</sup> Hagi ana kumapina vahe'ene zagagafenna zamazeri hakare ha'nena mofavrea kasezmante hakare hugahaze. Ana hanugeta tamafafe'i knafima hu'nazaza huta ana mopa mani vinetenege'na, ko knafima osu'noaza hu'na knare'za huramantegahue. E'ina hanugeta Nagrikura Ra Anumza mani'ne huta keta antahita hugahaze. <sup>12</sup> Hagi Israeli vahe'n'i'a huzmantenuge'za ana agonaramimota tamagofefura vano hugahaze. Ana nehu'za tamagrira zamazeri santi haresageta, zamagri'za neseta ru'enena mofavrezmia zamazeri havizana osugahaze. <sup>13</sup> Hagi Ra Anumzana Agra Anumzamo'a amanage hie, Vahe'mo'za tamagrikura amanage hu'za nehaze, tamagra vahera zamazeri haviza nehuta,

mofavreramina zamazeri kefoneraze. <sup>14</sup> E'ina hu'negu kagra ru'enena, vahe'ene mofavre naga'enena zamazeri havizana osugahane huno Ra Anumzana Anumzamo'a hu'ne. <sup>15</sup> Hagi ru mopafi vahe'mo'za mago'enena huhavizama huramante'naza nanekeea nontahisageno, tamazeri tamagazea nosanageno, ru'enena ru mopafi vahe'mo'za tamazeri tanafara osugahaze huno Ra Anumzana Anumzamo'a hu'ne.

<sup>16</sup> Hagi Ra Anumzamo'a amanage huno nasami'ne, <sup>17</sup> Vahe'mofo mofavre Izikieliga, Israeli vahe'mo'za mopazmifima mani'neza hu'naza havi zamavu'zmava zamo, Nagri navurera mopazmia eri haviza hu'naze. Hagi ana zamavuzmavama hu'naza zamo'a, a'nemo'za ikankri eri'za agru osu'nazankna hu'naze. <sup>18</sup> E'ina hu'nagu narimpa ahezmante'na zamazeri havizana hu'noe. Na'ankure zamagra vahera zamahe'za ana mopafina korana eri neragi'za, havi anumzantera monora hunte'za, ana mopazmia eri haviza hu'nazagu anara hu'noe. <sup>19</sup> Nagra ana hukna hu'na zamahe panani huge'za, vahe mopafine, kumatamimpine hazagre'za mago mago hu'za umani emani hu'naze. Zamagrama hu'naza zante'ene, zamavu zamatave'ene keaga huzmanten'a refko huzmanten'noe. <sup>20</sup> Hagi ana'ma huza vahe moparegane, vahe kumategama nevu'za Ruotge'ma hu'nea nagia eri haviza nehazage'za, ana kumapi vahe'mo'za hu'za, ama vahetamina Ra Anumzamofo vahetaminagi, Agri mopafintira atre'za e'naze hu'za hu'naze. <sup>21</sup> Hianagi Israeli vahe'mo'zama ru mopafima vu'za ezama hazaregama ruotge'ma hu'nea nagima eri havizama nehaza zankura, Nagra ra nagesa nentahue.

<sup>22</sup> E'ina hu'negu Israeli vahera amanage hunka zamasamio, Ra Anumzana Agra Anumzamo'a amanage hie, Ama zama hu'za huana Israeli vahe'mota so'e zanku hu'na osuanki, vahe kumategama vazaregama ruotge'ma hu'nea nagima eri havizama nehaza zanku hu'na amanara hu'za hue. <sup>23</sup> Hanki ru moparegama umani'neta ruotge'ma hu'nea nagima eri havizama hu'naza nagia eriama hu'na ahentesga hugahue. E'inama hu'na nagima eriama hu'na hentesgama hanuge'za, anama umani'naza mopafi vahe'mo'za Nagrikura Ruotge hu'nea Ra Anumza mani'ne hu'za ke'za antahiza nehanage'na, Nagrani'a ruotge hu'noe hu'na eri ante ama hanuge'za zamagra kegahaze. <sup>24</sup> Hagi maka kumatamimpinti'ene maka mopafintira tamavre'na ete tamagri mopafi emeri atru hugahue. <sup>25</sup> Ana nehu'na avusese tinuti ru ani'ani hu'na tina freramante'na, agru osu tamavutamava zane, vahe'mo'zama antre'za troma hunte'naza havi anumzama mono'ma hunentaza zampintira tamazeri agru hugahue. <sup>26</sup> Ana nehu'na kasefa tumo anteneramante'na, kasefa avamu anteramanteregahue. Hagi hankavetino havegna'ma hu'nea tumorra erinetre'na, fru'ma huno kema amage ante tumo anteramanteregahue. <sup>27</sup> Hagi Avamuni'a tamagu'afina anteramante'nugeta tra ke'n'i'ane kasegeni'anena kegava nehuta avaririgahaze. <sup>28</sup> E'ina hanugeta tamagehe'ima zami'noa mopafi umanineta, tamagra Nagri vahe mani'nage'na, Nagra tamagri Anumza manigahue. <sup>29</sup> Ana nehu'na Nagra maka agru osu tamavutamava zampintira tamagu nevazi'na, witi hozama hankre'nage'na, raga'a eri rama'a hanenkeno, witimo'a ome rama'a hinkeno mopatamifina agatontozana omegahie. <sup>30</sup> Hagi zafa ragane hozafi ne'zanena eri rama'a hanenkeno tamagatonto'ma nehazage'za ru mopafi vahe'mo'zama huhaviza huneramante'za kiza zokago kema huramante'naza zana osugahaze. <sup>31</sup> E'ina hanugeta kefo avu'ava zama nehuta, kefo zama nehuta, kasri avu'ava'ma hu'naza zankura, Israeli vahe'mota tamagesa nentahisageno tamagoteno amu'ati tamagesa hugahie. <sup>32</sup> Hagi

antahi'neni hoho, ama ana zama hanuana, tamagrikure hu'na osugosue huno Ra Anumzana Anumzamo'a hu'ne. Hagi Israeli vahemota tamagazegu hoho. <sup>33</sup> Hagi Ra Anumzana Agra Anumzamo'a amanage hie, Kefo tamavutamava zampinti'ma tamazeri agruma hanua kna zupa, kumatmifina vhahera zamazeri ante avinetena, havizama hu'nea kumatamina eri so'e hugahue. <sup>34</sup> Hagi mopatimo'ma havizama huno ka'ma kokama menege'zama negaza mopafina hoza erita ante'nesage'za karanka vu'za e'zama hanaza vahe'mo'za kegahaze. <sup>35</sup> Ana hanuge'za amanage hugahaze, hozama onte ka'ma mopamo'a, Ideni hozagna hie nehu'za, havizama higeno vahe'ma omani'nea ranckumatamimpina vahe'mo'za avitegeno kuma keginamo'a hanavenentake huno knare hie hu'za hugahaze. <sup>36</sup> E'ina hanuge'za tamagri tava'onte'ma manigagi'naza mopafi vahe'mo'za nege'za, Nagrikura hu'za Ra Anumzamo ama kumatmina eri so'e nehuno, havizama hu'nea mopa eri knare higeno, hozamo'a ampore hu'za ke'za antahi'za hugahaze. Nagra Ra Anumzamo'na huanki'na ana zana Nagrani'a hugahue. <sup>37</sup> Ra Anumzana Agra Anumzamo'a amanage hie, Nagra Israeli vahe'mokizmi nunamu kea antahizami'na zamazeri rama'a hanuge'za, sipisipi afu kevugna hu'za rama'a vahe fore hu'za manigahaze. <sup>38</sup> Hagi Kresramana vu kna zupama ofama hanaza sipisipi afu'tamima Jerusalemi kumapi avre'za eme rupazima hazaza hu'za havizama hu'nea ranra kumatmimpina rupazi hugahaze. E'ina hanige'za Nagrikura Ra Anumza manine hu'za ke'za antahi'za hugahaze.

## 37

### *Hagege hu'nea zaferinarami ava'nagna zampi ke'nea kasnampa naneke*

<sup>1</sup> Hagi mago zupa Ra Anumzamo'a azana nagrite antegeno, Avamumo'a navareno vuno vahe zaferinamo avite'nea agupofini ome nante'ne. <sup>2</sup> Hagi Ra Anumzamo'a navareno ana agupofina vano nehige'na omegem emergema huana, rama'a fri vahe'mofo zaferinarami'mo hagege huno ana agupofina avitente'ne. <sup>3</sup> Ra Anumzamo'a amanage huno nantahige'ne, vahe'mofo mofavre Izikieliga ama vahe zaferinaramimo'za zamasimura ete amane eri'za manigahazafi? Hige'na nagra hu'na, Ra Anumzana Anumzamoka Kagrake'za kenka antahinka hu'nane. <sup>4</sup> Anagema hugeno'a, ete amanage huno nasami'ne, ama zaferinaraminkura amanage hunka kasnampa kea huzmanto, ama hagege zaferinaramimota Ra Anumzamo'ma nehia nanekea antahiko. <sup>5</sup> Ra Anumzana Agra Anumzamo'a ama zaferinaramotagura amanage hie, Nasimura atresugenno tamagu'afina efre'na tamasimura erigahaze. <sup>6</sup> Nagra tamagrunganofira ome hagerafi emeri hagerafi huneramante'na, tame'a zaferinarera eri rukamre neramante'na, tamavufgareti tamazeri ano vazineramantena, nasimura huhu huvaziramantane'na tamasimura erita ete kasefa huta manigahze. E'ina hanugeta Nagrikura Ra Anumza mani'ne huta keta antahita hugahaze. <sup>7</sup> Hige'na Ra Anumzamo'ma huananteaza hu'na kasnampa kea hu'noe. Ana kasnampa kema hugeno'a, ana zaferinaramimo'za zamagasasa nerazage'na nentahugen, ankrare ankraru nehuhu'za zamagrare uvu evu hu'za ome rekanu eme rekanu henaze. <sup>8</sup> Hagi negogeno ana zaferinaramintera agrunaramina efore higeno, ame'arami'na efore huno zaferinaramintera ukamaregeno, zamavufagamo'a ana zaferinaramina eri hananegeno vahe fore hu'naze. Hinanagi zamagra zamasimura e'ori'naze. <sup>9</sup> Ana'ma higeno'a Ra Anumzamo'a amanage huno nasami'ne, Vahe'mofo mofavre Izikieliga, amanage hunka

zaho'mofonkura kasnampa kea huo, Ra Anumzana Agra Anumzamo'a amanage hie, 4'a asoparegati zahomoka enka amama fri'za mase'naza vahera zamasimura eme zamige'za, zamasimura eri'za ete kasefa hu'za maniho. <sup>10</sup> Anagema hige'na hunanteaza hu'na ana kasnampa kea hugeno, zamasimumo'a ufreto zamazeri otige'zama oti'nazana, rama'a sondia va-hekrerfa oti'naze.

### *Ana ava'namofo agu'agesa'a eri ama hu'nea naneke*

<sup>11</sup> Ana'ma hazageno'a Ra Anumzamo'a amanage huno nasami'ne, vahe'mofo mofavre Izikieliga, ama zaferinaramina e'i Israeli vahetami mani'naze. Ana hu'neankiza zamagra hu'za zaferinatimo'a hagege higeno, amuha zantia omane nehaze. <sup>12</sup> Hianagi amanage hunka kasnampa kea zamasamio, Ra Anumzana Agra Anumzamo'a amanage hie, Keho, Nagra mati keria eri anagi hagro hu'na matipintira tamazeri otina tamavre'na Israeli moparega ete vugahue. <sup>13</sup> E'na hu'nama mati kerima eri anagi hagro hu'nama vahe'nimotama tamazeri oti'nugeta, Nagrikura Ra Anumza mani'ne huta keta antahita hugahaze. <sup>14</sup> Ana nehu'na Avamuni'a tamagu'afina ante'ramantenugeno tamasimura taminigeta kasefa huta nemanisage'na, tamavre'na vanugeta zamagra'a mopafi umanigahaze. E'na'ma hanugeta, Nagrikura Ra Anumzamo Agra hu'neankino, hugahuema hu'nea zana hie huta keta antahita hugahaze huno Ra Anumzana Agra Anumzamo'a hu'ne.

### *Juda vahe'ene Israeli vahe'enema erimago'ma hanaza naneke*

<sup>15</sup> Hagi Ra Anumzamo'a amanage huno nasami'ne, <sup>16</sup> Vahe'mofo mofavre Izikieliga, mago azota erinka ana azotarera Juda vahe'ene agri'enema eri mago'ma hanaza avameza me'ne hunka krenentenka, ete mago azota erinka ana azotarera, Efraemi naga'mozama Israeli vahe'enema eri mago'ma hanaza avame'za me'ne hunka krento. <sup>17</sup> Hagi ana tare zota erinka atupa'arare'na magopi eri rekanu heznantegeno magoke azota kna hi'o. <sup>18</sup> Hagi ana'ma hu'nenanke'na kagri vahe'mo'zama kantahige'za, nagafare e'inara hunampi tasamio hu'zama hanagenka, <sup>19</sup> amanage hunka zamasamio, Ra Anumzamo'a amanage hie, menina Nagra Efraemi nagap-inti' ne' Josefente'ma mago'a Israeli naga'ma hageraf'i'nazza azota eri'na Juda azotare eri rekanu ahe'nuge'ne Nagri nazampina mago azota megahie. <sup>20</sup> Hagi avoma krente'nana azotarare'na zamavure kazampi eri'nege'za negesagenka, <sup>21</sup> amanage hunka zamasamio, Ra Anumzamo'a amanage hie, Keho, nagra Israeli vahetamina vahe kamategama umani emanima hu'naregatira uzamavare ezamavare hu'na zamazeri atru hutena, zamavare'na mopazmire vugahue. <sup>22</sup> Hagi ana mopafina, Israeli agonaramimpina Nagra magoke vahe zamazeri tro hugahue. E'na hanugen magoke kinimo kegava huzmante'na, ete ru'enena atane'za tare mopafi vahera forera osugahaze. <sup>23</sup> E'na hanuge'za ete ru'enena havi anumzante'ne, kasrino agote zantaminte'ma mono'ma huzmante'za kumima nehu'za zamazeri pehenama hu'naza mago'enena osugahaze. Hianagi kumi'ma hu'za zamagenama hunami naza zampintira, zamagu'nevazi'na zamazeri agru ha'nena zamagra Nagri vahe mani'nage'na, Nagra zamagri Anumza manigahue.

### *Deviti'ma kegavama hania zamofo naneke*

<sup>24</sup> Hagi Nagri eri'za ne' Deviti'a kini ne'zmia mani'nigeno, magoke sipisipi kva ne' azampi manigahaze. Ana nehu'za Nagri kasegene

tra kenena amage ante fatgo hugahaze. <sup>25</sup> Hagi eri'za ne'ni'a Jekopuma amugenō tamagehe'zama mani'naza mopafi manigahaze. Hagi zagrane, mofavrezmine, zamagehe'mozane forehu anante'ma hu'za maniza vanaza vahe'enena mani'veva hu'za nevanageno, eriza ne'ni'a Deviti ugagota kva mani'veva huno vugahie. <sup>26</sup> Hagi Israeli vahe'mo'zanema narimpa fru hu'nama manisua huhagerafi huvempa ke hanugenō, ana huhagerafi huvempa kemo'a mevava huno vugahie. Ana nehu'na mikazama hanazana zamazeri ampore'nugeno rama'a vahe rupazi hu'za manisage'na, amuno'zmifina mono noni'a antesugeno mevava huno vugahie. <sup>27</sup> Hagi Nagrama manisua kumamo'a zamagrane me'nena, Nagra zamagri Anumza mani'nugeno, zamagra Nagri vahe manigahaze. <sup>28</sup> Hagi mono noni'a zamagri amu'nompima antesugeno mevavama hanigeno'a, ama mopafi vahe'mo'za Nagrikura Agra Ra Anumzamo'a Israeli vhahera zamazeri ruotge hie hu'za ke'za antahiza hugahaze.

## 38

### *Gogi mopagu'ma Ra Anumzamo'ma hu'nea naneke*

<sup>1</sup> Ra Anumzamo'a amanage huno nasami'ne, <sup>2</sup> Vahe'mofo mofavre Izikieliga, Gogu kuma'ma Magogu mopafima me'neno Meseki kuma'ene Tubali kumatre'ma ugagota huno kegavama huzanante'nea kumatega kavugosa hunte'eneka, havizama hania zamofo kasnampa kea hunto. <sup>3</sup> Hagi Ra Anumzana Agra Anumzamo'a amanage hie, Meseki vahe'mokizmine Tubali vahe'mokizmi ugagota kva ne' Gogiga Nagra ha'regantegahue. <sup>4</sup> Hagi Nagra kazeri rukrahe hu'na kagemazampafi huku rente'na kavazu nehu'na, maka sondia vaheka'ane, hosi afutamine, ana hosi afu agumpima vanoma hu'za ha'ma nehaza vahe'enе, tusi'a sondia vaheka'ane, ha' kukena zamine, neone hankozmine, ranra hankozmine, ha'ma hu zantamine bainati kazinena eri'nenage'na maka zamavare atramigahue. <sup>5</sup> Hagi kagri'enema esaza sondia vhahera, Pesia sondia vaheki, Kusi (Itopia) sondia vaheki, Puti (Libia) sondia vaheki hu'za hankozmine, aeni fetori antani'neza ha'zazmi eri'neza kagrane ne-enage'za, <sup>6</sup> anampina Goma'ene sondia vahe'aramine, noti kaziga afete mopa Bet-Togarma vahetamine egahazankino rama'a vahe'mo'za kavaririza egahaze. <sup>7</sup> Hagi kagra retrotra nehunka, kagranema mani'naza sondia vahe kevukerfa zamazeri ante fatgo huge'za ha'ma hu'are tro huza maniho. <sup>8</sup> Hagi rama'a knama evutene'na henkama esia kafufina hugantane'na vunka, hapinti'ma kumazmi'ma eri haviza hazage'za ru mopafima umani emanima hu'nazaregati'ma ete e'za kumazmi'ma emeri so'ema hu'za Israeli mopafima me'nea agonaramimpima mani fru'ma hu'za knare'ma hu'za mani'naza vahe'enе hara eme huzmantegahane. <sup>9</sup> Hagi kagrane maka sondia vaheka'ane, ru moparegati sondia vahe'mo'zanena ununko'ma atiaza huta hatera marerigahaze. Rama'a vahe vugahazankino, hampomo kino runtrako hiazza hufa tusi'a sondia vahetamine mopa ante hananeta marerigahaze. <sup>10</sup> Hagi Ra Anumzana Agra Anumzamo'a amanage hie, Ana knazupa mago antahintahi antahintahika'afina enkenka, kefo avu'avazama hu antahintahiri retro nehunka, <sup>11</sup> kagra amanage hunka hugahane, vihu osu kumatmimpi vhahera ha' ome huzmantegahue. Zamagra mago zankura zamagesa ontahi, hara omegahie hu'za nehu'za kumazmimofona vihu kegina nosu'za, kuma keginamofo kafana hagenonte'za, kahama erigi'za rentrakohu zafanena

trohu onte'nazankina ha' ome huzmantegahue hunka hugahane. <sup>12</sup> Hagi atrezama ru moparegama vu'za e'zama hazageno'ma havizama hu'nea kumatamima ete emeri so'ema hu'za ama mopamofo amu'nompi emanine'za rama'a bulimakoane sipisipi afutamine eri ampore'za mani'naza vahera ome rohuzmaren'a maka zazmia erigahue hunka nehane. <sup>13</sup> Hagi Siba kumate vahe'mo'zane, Dedani kumate vahe'mo'zane, zagore'ma keonke'zama miza hu'za atre'zama nehaza Tasisi vahe'mo'zane, maka neonse kumazmifima nemaniza vahe'mo'zanena amanage hu'za kagrikura hugahaze. Kagra sondia vaheka'aramima zamavarenka e'nanana, vahe arohu zamarenka feno zamine, silvane, goline, bulimakao afutamine, sipisipi afutamine, maka fenozmia erinaku e'nano? hu'za kantahigegahaze. <sup>14</sup> E'ina hu'negu vahe'mofo mofavre Izikieliga, Gogina amanage hunka kasnampa kea hunto, Ra Anumzana Agra Anumzamo'a amanage hie, Israeli vahe'nimozama zamagu'ma vazi nonkumapima ko'ma mani'nazana kagra onke'nampi? <sup>15</sup> Hagi kagra afete kumaka'arega noti kazigati, tusi'a sondia vahetamine, ru kumatmimpinti vahetamimozane kagri'ene esagenka, tusi'a vahekrfamozane hanavenentake sondia vahetamine hosi afu agumpi maniza egahaze. <sup>16</sup> Hagi hamponkino mopama refite vagareankna huta, Israeli vahen'i hara eme huzmantegahaze. Hagi mago'a kna evutenige'na henka'a kavre'na esugenka, Nagri mopafi vahera hara eme huzmante'nanke'na, Gogiga kagripi huvezina ruotgema hu'nea nagini'a erintesga hanenke'za, ama mopafi vahe'mo'za Nagrikura Ra Anumza manine hu'za nage'za antahi'za hugahaze.

<sup>17</sup> Hagi Ra Anumzana Agra Anumzamo'a amanage hie, Koma evu'nea knafima Nagri eri'za vahe Israeli kasnampa vahe'mofo zamagipima nanekema antoge'zama huama hu'za, henka mago'a kafuma evutesigeno Israeli vahera ha' eme huzmantegahie hu'zama hu'naza nepi, ru ne' mani'nane? <sup>18</sup> Hianagi Gogi'ma Israeli vahe'ma ha'ma huzmantenia kna zupa, narimpa ahe'zamo'a marerinkeno tusi nasivazigahie huno Ra Anumzana Agra Anumzamo'a hu'na'e. <sup>19</sup> Na'ankure tusi narimpa neheno nasivazi zamo'a tevenefa nehige'na Nagra huama huankino, ana knazupa Israeli mopafina tusi eminkrera erigahie. <sup>20</sup> Hagi hagerimpima nemaniza nozameramimo'zane, monafima hare'za vanoma nehaza namaramimo'zane, maka zagagafamozane, maka zamasaguregati'ma rekrarohe'za vanoma nehaza zagamozane, maka ama mopafi vahe'mo'zanena Nagri navuga zamahirahiku hugahaze. Ana nehanageno agonaramimo'za ankarise'za eneramisageno, vanoma nehaza kamo'a mehi enerisigeno, keginamo'za mopafi fragu vaziramigahaze. <sup>21</sup> Hagi Nagra hanuge'za agonaramini'afina bainati kazinteti Gogiga hara hugantegahaze. Ana nehanage'za sondia vahetmimo'za zamagra zamagra hahu'za ohefri ahefri hugahaze huno Ra Anumzana Agra Anumzamo'a hu'ne. <sup>22</sup> Ana nehu'na ruzahu ruzahu kri atresugenno tamazeri haviza nehina, ha' vahe huzmantenuge'za eme tamahegahaze. Hagi ana'ma nehanafina komopa ko'ene, amuho huno fizo hu'nenia haveraminu ko'mariaza hu'na atresugenno tamagri'ene ru vahetmima tamagri'enema mani'naza vahera tamea frigahie. <sup>23</sup> E'inahu avu'ava'za hu'na Nagrani'a hihamuni'ane Nagrani'a ruotge navu'navenena ama mopafi vahe zamavurureriama hugahue. E'ina hanuge'za Nagrikura Ra Anumza mani'ne hu'za keza antahi'za hugahaze.

## 39

*Gogi sondia vahetami zamahesaza kasnampa naneke*

<sup>1</sup> Vahe'mofo mofavre Izikielia, Gogi'ma havizama hania zamofo kasnampa kea amanage hunka huo, Ra Anumzana Anumzamo'a amanage hie. Meseki vahe'ene Tubali vahe'mofo kini ne' Gogiga Nagra hara regantegahue huno hie. <sup>2</sup> Nagra kazeri rukrahe hu'na kavazu hute'na afete noti kazigati hugantenugenka Israeli agonaramimpi vahera hara ome huzmantegahane. <sup>3</sup> Ana nehu'na hoga kaziga kazampintira atika'a ruhanare netrena, tamaga kaziga kazampintira keveka'a ruhanare atregahue. <sup>4</sup> Hagi Israeli agonaramimpi kagrane sondia vaheka'ane, kagranema vu'naza vahe'mo'zanena frigahaze. Ana hanage'na namazagaramine afi zagagafa huzmantenuge'za kavufga eme traga hu'za negahaze. <sup>5</sup> Hagi ana'ma hunka frisanana mago'za omene zampi ufrinte efrinte hugahaze. Na'ankure Ra Anumzana Nagra Anumzamo'na hue. <sup>6</sup> Hagi Magogi mopafine, hagerinkenama me'nea mopafinema nemaniza vahe'mo'zama so'e huta mani'nonema hu'za nehaza mopare teve tagintanena neresige'za Nagrikura Ra Anumza mani'ne hu'za ke'za antahiza hugahaze. <sup>7</sup> Hagi Israeli vahe'nimofo amunompina ruotgema hu'nea Nagia eriama hanuge'za, ru'enena ruotge'ma hu'nea nagia huhavizana osugahaze. E'na hanuge'za ama mopafi vahe'mo'za Nagrikura Israeli vahe'mofo Ruotge Ra Anumza mani'ne hu'za ke'za antahi'za hugahaze. <sup>8</sup> Hagi keho, ana zama fore'ma hania kna neiankindo tamage huno ana zana fore hugahie. Hagi e'i ana kna Nagra ko huhampri ante'noankino, anazana fore hugahie huno Ra Anumzana Agra Anumzamo'a hu'ne. <sup>9</sup> Hagi ana knama efore hina, Israeli mopafima me'nea ranra kumapima nemaniza vahe'mo'za, hapima fri'naza sondia vahe'mokizmi hanko'zmima, ati kevezmima, kumpa knozminena maka eri'za 7ni'a kafufi tevea kregahaze. <sup>10</sup> E'na nehu'za zafafintira teve'zana osuge, zafa antagigera 7ni'a kafufina osugahaze. Na'ankure zamagra fri'naza sondia vahe'mokizmi ha'zanteti tevea hugregahaze. Hagi rohu'ma eme zamare'za zamazeri havizama nehu'za mika zazimima eri'naza vahera, ana hu'za zamagrira arohu ome zamare'za mika zazmia erigahaze huno Mikazama kegavama hu'nea Ra Anumzamo'a hu'ne.

<sup>11</sup> Hagi ana knarer Gogima asentesaza matira Israeli mopafi amigahue. Hagi ana mopama amisuana, fri hagerimofo zage hanati kaziga kama nevaza agupo mopa zami'nuge'za, Gogine ana maka sondia vahe'a ana agupofi asezmantesageno, kama nevaza kana rehiza hugahie. E'na hanige'za ana agupogura Hamon-gogie hu'za agia ahegahaze. <sup>12</sup> Hagi Israeli mopama Israeli vahe'mo'zama eri agruma hunakura, 7ni'a ikampi ana vahetamina asezmantegahaze. <sup>13</sup> Hagi maka Israeli mopafi ana vahetamina asenezmante'za Nagri nagia ahentesga nehanageno, e'i ana knama esige'za Nagrira antahinamitere hugahaze huno Ra Anumzana Agra Anumzamo'a hu'ne. <sup>14</sup> Hagi ana mopama eri agruma hunakura 7ni ikamofo atumparega mago'a vahe huzmantesage'za maka kna ana mopafina vano nehu'za, fri vahe zamavufaga zogi'za asezmantegahaze. <sup>15</sup> Hagi ana fri vahe zamavufagagu'ma hakeza nevanage'no mago zamin'ma vahe zaferinama ome kenuno'a, mago avame'za tafintenenigeno vahe'ma asente vahe'mo'za emeriza Hamon-Gogi Agupofi ome asentegahaze. <sup>16</sup> Hagi anama vahe'ma asezmane'naza rankumamofona mago agi'a Hamonae hu'za agi'a ahegahaze. E'inahu hu'za mopa eri agru hugahaze. <sup>17</sup> Hagi vahe'mofo mofavrea

Izikieliga, Ra Anumzana Agra Anumzamo'a amanage hie hunka maka namarimimku'ene afi zagagafagu'enena zamasamio, Israeli agonaramimpina Kresramana vunaku tusi'a ne'za retro nehuanki, emeri atru huneta ame'anee korama'anena negahaze hunka zamasamio. <sup>18</sup> Hagi Basani mopafinti afovage ve meme afutamine, sipisipi afu'tamine bulimakao afutamimofo korane avufga'anema neaza huta, hankavenentake sondia vahe'mokizmi zamavufagane, ugagota kva vahe'mokizmi koranena negahaze. <sup>19</sup> Hagi ana ne'zama retro'ma hanua ne'zama nesazana vahe zamavufaga neramu nehuta, korana nene'nageno tamu'mo'a hihi huno enevina neginagi hugahaze. <sup>20</sup> Hagi Nagri ne'za trate emanineta, hosi afutamimofo zamavufagane, karisifima vanoma nehaza vahe'mokizmi zamavufagane, hankavenentake vahe'mokizmi zamavufagane, ruzahu ruzahu sondia vahe'mokizmi zamavufaganena neramamu hugahaze huno Ra Anumzana Agra Anumzamo'a hu'ne.

<sup>21</sup> Hagi ama mopafi vahetera hihamu hankaveni'a eriama hanenkeno, maka negesage'na, tamagrama hu'naza avu'ava zanter keaga huneramante'na nazana rusutena knazana tamigahue. <sup>22</sup> Hagi ana hutesuge'za ana knareti'ma agafama huno vaniana, Israeli vahe'mo'za Nagrikura Ra Anumzana tagri Anumza mani'ne hu'za ke'za antahi'za hugahaze. <sup>23</sup> Hagi Israeli vahe'mo'za kefo avu'ava ma hu'naza zante ha' vahe'mo'za eme zamahe'za kina ome huzmante'naze hu'za, ru mopafi vahe'mo'za ke'za antahi'za hugahaze. Na'ankure zamagra kefo avu'ava nehu'za, Nagri namagera onte'nagu navugosa ru krahe hu'na namefi hunezmi'na ha' vahe'mokizmi zamazampi zamavarentogeno, bainati kazinteti zamahehana hu'naze. <sup>24</sup> Hagi zamagrama hu'naza pehenage avu'ava zante'ene kasegema rutagre'naza zante navugosa rukrahe hu'na namefira hunezmi'na, knazana zami'noe.

### *Israeli vahe'ma zamazeri so'ema hu'nea naneke*

<sup>25</sup> E'ina hu'negu Ra Anumzana Agra Anumzamo'a amanage hie, menina Nagra Israeli vahera Jekopu agehe'mokizmia nasunku huzmant'e na kinama hunazaregatira zamavare'na e'na mopazmia eme nezmi'na, Ruotge'ma hu'nea nagima vahe'mo'zama eri havizama hu'zankura frage hugahue. <sup>26</sup> Hagi mago vahe'mo'ma zamazeri koro osanige'za knare'ma hu'za mopazmifima umanisu'za, Nagrite'ma mani fatgoma osu'naza zanku'ene zamazeri zamagaze'ma hu'noa zankura zamage akanigahaze. <sup>27</sup> Hagi ru vahe mopafinti'ene ha' vahe'mokizmi mopafinti'ma zamavare atruma hanuge'za, kokankoka vahe'mo'za nagrikura Ruotge hune hu'za ke'za antahiza hugahaze. <sup>28</sup> E'ina hanuge'za Israeli vahe'mo'za Nagrikura Ra Anumzana tagri Anumza mani'ne hu'za ke'za antahiza hugahaze. Na'ankure Nagra ha' vahe huzmantoge'za eme zamahe'za zamavare'za vu'za kumazmirega kina ome huzmantetazage'na ete zamavare'na mopazmire e'noe. Hagi magore hu'na magomofona ha' vahe kumatega atresugenno kinafina omanigahie. <sup>29</sup> Ana nehu'na Avamuni'a Israeli vahepinia eri akaha hutresugenno ne-esige'na, ru'enena namefira huo zamigahue huno Ra Anumzana Agra Anumzamo'a hu'ne.

<sup>1</sup> Hagi Babilonima kinama ome hutama mani'nonkeno, 25 fuma hia kafumofona, ese ikamofona 10nima hiankna zupa, Jerusalemi rankuma'ma ha' vahem'o'zama eri havizama hunareti'ma e'neana, e'i 14ni'a kafu nehigeno, ana knazupa Ra Anumzamo'a avanagna zampi navareno (Jerusalemi) vu'ne. <sup>2</sup> Hagi ana ava'nagna zampina Anumzamo'a navareno Israeli mopafima zaza agonama me'nere vu'ne. Hagi ana agonamofo sauti kaziga me'nea zamo'a, mago rankuma kna huno me'nege'na ke'noe. <sup>3</sup> Hagi Ra Anumzamo'ma navareno anante vige'na koana, mago ne'mofo avufaretira bronsigna higeno, ana ne'mo'a mago kaziga azampina, efeke nofi erino mago kaziga azampina mesarimima huno ke azota azerineno mono no kumapima ufre kafante oti'negena ke'noe. <sup>4</sup> Negogeno ana ne'mo'a amanage huno nasami'ne, vahem'ofo mofavre Izikieliga, maka zama kaveri'ma hanuana kavunura negenka kagesa antenka antahi ankero. Na'ankure ama ana zantmi kaveri hunaku kav're'na e'noe. Hanki ama ana maka zana huama hunka Israeli vhahera zamasamio.

### *Mono noma mesarimima huno ke'nea zamofo naneke*

<sup>5</sup> Hagi ese zama ke'noana, keginamo mono nona rugaginte'negena ke'noe. Hagi ana ne'mo'a azampina mesarimima nehaza zota azeri'neankino, ana azotamofo zaza'amo'a 3.6 mita hu'ne. Hagi ana have keginama ana ne'mo'ma mesarimima huno keana, anagamima mareria'amo'a 3.6 mita higeno, rama hu'amo'a 3.6 mita hu'ne. <sup>6</sup> Hagi zage hanati kazigama me'nea kafante umarerino kantigamama me'nea kafa zafararema mesarimima huno rama hu'neama'ama (tapa'a) keana 3.6 mita hu'na'e. <sup>7</sup> Hagi ana keginamofo kafante'ma kuma kva vahem'ofo nontrena ana kafamofo kanti kama tare nontre me'neankino, ana nontre'mofona zazaznimo'a 3.6 mita higeno, upama huno kanti'kama vu'neama'amo'a 3.6 mita hu'ne. Hagi ana nontre'mofa amu'nompimpama kama ufre'amo'a 2.5 mita hu'ne. Hagi agu'afima ufre kama mesarimima huno keana zaza'amo'a 3.6 mita hu'ne. <sup>8</sup> Hagi ana kafamofoma agu'afima kinte'nea noma mesarimima hu'neana, zaza'amo'a 3.6 mita hu'ne. <sup>9</sup> Hagi agu'afima umarereri kankamuma mesarimima hiana 4mita higeno, tare zafararema kanti kamama retruma rentenea zafararemofo tapa'amo'a 1mita hu'ne. Hagi ana zafararemokea zanavugosa agu'afi huntene'a. <sup>10</sup> Hagi ana kafama ufretera, kuma kva vahem'ofo noma me'neana 3'a nontami kanti kaziga megeno, 3'a nontami kama kaziga me'ne. Hiankino ana nontmimofo zaza'amo'ene atupa'amo'enena magozahu hu'ne. <sup>11</sup> Hagi ana kuma kafamofona atupa'amo'a 5 mita higeno, zaza'amo'a 6.5 mita hu'ne. <sup>12</sup> Hagi ana nontmimofo avugama kegina ma hu'neana, zaza'amo'a 50 sentimita marerigeno, 50 sentimita atupa kaziga hu'ne. Hagi kuma kafante'ma kegavama hu vahem'ofo noma hunaragi'naza, miko kaziga zaza'amo'ene atupamo'enena 3mita hutere hu'ne. <sup>13</sup> Hagi kuma kafa'ma kegavama nehaza vahem'ofo nompina anagami mago kaziga nomumpareti'ma mesarimima huno kantu kaziga nomumpare'ma viana zaza'amo'a 12.5 mita higeno, kantu kamama me'nea nontremofo kafamokea ohumi ahumi hu'na'e. <sup>14</sup> Hagi ana kuma kafamofoma agu'afima kanti kamama retruma rente'naza zafararema mesarimima huno ke'neana, zaza'amo'a 30 mita hu'ne. Hagi ana maka kuma kafantamintera zaza'amo'a magozahu huno 30 mita hu'neza zafarami kanti kama asentetere hu'ne. <sup>15</sup> Hagi ana kafamofona kama ufreteri'ma marerino agu'a nonte'ma ufre'nea kankamuma mesarimima hu'neana, 25mita hu'ne. <sup>16</sup> Hagi ana nontmimofona ne'one zaho eri kana megagigeno, ana nontamima hunaragi'nea

asafinena neone zaho kana (windua) kuma kafantega hagegamu atre'ne. Hagi kuma kafamofo kanti kamama retruma rente'nea zafararemofo zanasenirera tofe zafamofo amema'a tro huntetere hu'ne. Hagi ana maka kuma kafanteria anahuke'za hu'ne.

### *Megi'a mono kumamofo naneke*

<sup>17</sup> Hagi ana ne'mo'a mono no kumapi navareno vige'na koana, ana kumamofona 30'a neone hunaraginte nontami megeno, vahe'ma vuno eno'ma hu kana ana nontmimofo zamavuga arugagino evigeno, ana nontamimo'za zamavugosa kama vutega hunte'nazage'na ke'noe. <sup>18</sup> Hagi ana kamofona zaza'amo'a ana nontmimofo zaza kaziganena magozahu hu'ne. Hagi e'i ana kama vu'neana mono nona onagamu mesga higeno fenkma evu'ne. <sup>19</sup> Hagi fenkma kazigama me'nea kafamofona, agu'a nomofona agu'afinti vuno megiamama uhanati'nea kankamuma mesarimima hu'neana, zage hanati kazigane noti kaziga kankamumo'a 50 mita huno magozahu hu'ne.

<sup>20</sup> Hagi ana ne'mo'a, noti kaziga ufre kafamofona za'za kazigane atupa kaziganena ome mesarimi huno ke'ne. <sup>21</sup> Hagi ana kafante'ma kegavama hu'za manisaza vahe'mokizmi noma hunaragi'nazana, kafamofona kanti kama 3'a metere hu'ne. Hagi ana nontmimofo zaza'amo'ene atupa'amo'enena ese kafante'ma me'nea nontaminkna huno zaza'amo'a 25 mita higeno, atupa'amo'a 12.5 mita hu'ne. <sup>22</sup> Anahukna huno zaho'ma eri kafane, avunoma kigamumate'nea nomo'ene, kanti kamama me'nea retruma rente'nea zafararente'ma tofe anina zafama trohunte'nea avasase zamo'a zage hanati kaziga kafantema me'nea kna huno magozahu hu'ne. Hagi ana nontamintera 7nia ladamo marerino uhanatine. <sup>23</sup> Hagi zage hanati kazigama me'neankna kafa noti kaziga kafamofo mago kaziga asoparega me'ne. Hagi agu'a kafanteti'ma mesarimima huno megia kafante'ma vigeno'a, kankamuma'amo'a 50mita hu'ne.

<sup>24</sup> Ana huteno sauti kaziga nevreno vige'na, sauti kazigama me'nea kafana ke'noe. Hagi ana nomofo kafante'ma me'nea zantamima mesarimima huno ke'neana, ruga'a kafante'ma hu'neaza huno magozanke hu'ne. <sup>25</sup> Hagi ana kafante'ma zaho'ma eri kafama hagente'nea kafamo'ene avu noma ki'nea nomo'enena, ruga'a kafante'ma hu'neaza huno magozahu hu'ne. Hagi ana kafamofona zaza'amo'a 25 mita higeno, atupa'amo'a 12.5 mita hu'ne. <sup>26</sup> Hagi 7ni'a latare marerinka ana kafamofo ko'noma kintenerera uhanatigahane. Hagi ana kafamofona rugaragama me'nea zafararentera, tofe zafamofo amema'a trohuno konariria hunte'ne. <sup>27</sup> Hagi agu'a mono kumamofona noti kaziga mago kafana hagente'naze. Hagi megi'a kafanteti'ma agu'a kumamofo kafante'ma vu'nea kankamuma mesarimima hu'neana 50 mita hu'ne.

<sup>28</sup> Ana huteno ana ne'mo'a agu'a mono kumapi navareno vuno sauti kazigama me'nea kafante vuno, ana kafana ome mesarimima huno keana, ruga'a kafamo'zama hu'nazaza huno magozahu hu'ne. <sup>29</sup> Hagi ana kafamofona mago'a kafante'ma hu'neaza huno kumama kegavama ne-hia vahe'mofo nona 3'afi hunaraginento anahukna huno rugaraga zafararena megeno, zahoma eri kafama hagente'nea zamo'enena mago'zanke hu'ne. Hagi kafantetima vuno avu nontema vunea kankamumofona zaza'amo'a 25 mita higeno, atupa'amo'a 12.5 mita hu'ne. <sup>30</sup> Hagi ana kafamofona avunomofo zaza'amo'a 25 mita higeno, atupa'amo'a 2.5 mita hu'ne. <sup>31</sup> Hagi ko, noma ki'nea nomo'a megi'a kumatega avugosa hunte'ne.

Hagi ana kafamofo rugaragama asente'naza zafararentera tofe zafamofo amema'a trohunte'za avasasea hunte'naze. Hagi ana kafante'ma rerakaureno mareri'zana 8'a lada tro hunte'naze. <sup>32</sup> Hagi anantetira navareno agu'a mono kumamofona zage hanati kaziga kafante vuno ana kafana ome mesarimima huno ke'neana, ruga'a kafankna huno magozanke hu'ne. <sup>33</sup> Hagi ana kafante'ma rugaragama hunaraginte notamimo'ene, rugaraga vihu kafama ufre nomo'enena ruga'a kafantaminte'ma hu'neaza huno magozanke hu'ne. Hagi ana kafantema mareriza rugaraga me'nea notamintera zahoma eri kafantami me'ne. Hagi ana kafamofona zaza'amo'a 25 mita higeno atupa'amo'a 12.5 mita hu'ne. <sup>34</sup> Hagi avu nomo'a, fegia kumatega avugosa huntogeno, ana kafante'ma kantikama retruma rente'naza zafararemofo zanasenirera tofe zafamofo amema'a tro hunte'naze. Hagi anantetira ana ne'mo'a navareno noti kaziga kafante vuno, noti kaziga kafana ome mesarimi huno ke'ne. Hagi noti kaziga kafamofo zaza'amo'ene atupa'amo'a ruga'a kafankna huno magozanke hu'ne. <sup>35</sup> Ana kafante'ma rugaragama hunaraginte nontamimo'ene, kafama ufre nomo'enena magozanke hu'ne. Ana higeno zaho eri kafama hagen-tetere'ma hu'nea zamo'a magozanke hu'ne. Hagi ana kafamofo zaza'amo'a 25 mita higeno, upa'amo'a 12.5mita hu'ne. <sup>37</sup> Hagi ana kafamofo avu nomo'a meg'i a kumatega avugosa hunte'ne. Hagi ana kafamofo rugaraga kazigama retruma rente zafararemofo zanasenirera, tofe zafamofo amema'a trohunte'ne. Hagi ana kafante'ma mareri'zana 8'a zupa agia renake reno mareri lada trohu'za mareri'naze.

<sup>38</sup> Hagi ana kafante'ma avunoma kinte'nomofa kantikaziga tevefima kre fananehu ofama hu afu ame'aramina sese nehaze. <sup>39</sup> Hagi anama hunaraginte nompina taretare huno rugaraga ofama ante itararena me'ne. E'i ana itararamintera tevefima kre ofane, kumimo nonama huno hu ofane, havi avu'av'a ma hu'nea zantema hu ofama hu'zana sipisipi afuzaga ahegahaze. <sup>40</sup> Hagi meg'i a kumamofa noti kaziga kafante'ma mareri ladarera meg'i a kanti kama tare itarare megeno, agu'afina kanti kama tare itarare me'ne. <sup>41</sup> Hagi ofama hu itaramina 8'a me'neankino, 4'a agu'a mono kumamofa kafante megeno, 4'a meg'i a mono kumamofa kafante me'ne. E'i ana itaraminte kresramnama vu sipisipia ahe'za tagana nevazize. <sup>42</sup> Hagi havere itaramina Kresramanamavu sipisipi afutmima aheno tagnavazintezana 4'a trohunte'ne. Hagi ana itaramimofo zaza'zmimo'ene atupa'amo'enena 50 sentimita higeno, atrure'amo'a 75 sentimita hu'ne. Hagi ana itaramintera ana sipisipi afutmima ahegisaza zantamine anama ahegisaza sipisipi afutami antegahaze. <sup>43</sup> Hagi zaza'amo'a 7 sentimitagi hafu hu'nea eri fagagine hukurami nozafarera hantinte'za kagi'naze. Hagi itaramima tro'ma hunte'nazana sipisipi afutmima aheno taganavazinte itarami tro hunte'naze.

<sup>44</sup> Hagi fegiatima agu'afi kumapima ufre kantera tare nontre zagamema hu vahe'mofo nona hunaragintegeno me'ne. Mago nomo'a noti kaziga kafante avugosa huntogeno, mago nomo'a sauti kaziga kafante avugosa hunteno me'ne. <sup>45</sup> Hagi ana zantamima naveri'ma huno vanoma hia ne'mo'a amanage huno nasami'ne, sauti kazigama avugosama hunte'nea nona mono nom akegavama hania pristi vahe'tmimofo none hu'ne. <sup>46</sup> Hagi sauti kazigama me'neno noti kazigama avugosama hunte'nea nona Kresramanama vu itama kegavama hanaza pristi vahetamimofo none huno hu'ne.

Hagi Livae nagapintira Zadoki amohezage Ra Anumzamofontera erava'o hu'za eri'zana erintegahaze.

<sup>47</sup> Hagi ana ne'mo'a agu'afima me'nea mono kumara mesarimi huno keana, ana maka kazigamo'a 50 mita hu'ne. Ana higeno kresramna vu itamo'a mono nomofo avuga me'ne. <sup>48</sup> Ana huteno mono nomofo avunoma kinte'nazare navareno vuno kantigama kafa zafararema ome mesarimima huno ke'neana 2.5 mita hu'ne. Hagi kama ufre kankamuma mesarimima hu'neana 1.5 mita hu'ne. <sup>49</sup> Hagi ana nomofo zaza'amo'a 10mita higeno, atupa'amo'a 5mita hu'ne. Hagi ana nomofona kantigama tare vimago zafarare megeno ladaramimo marerino ana kahantera uhanatine.

## 41

### *Agu'afinka mono nomofo naneke*

<sup>1</sup> Hagi anantetira ana ne'mo'a mono nomofo agu'afi navareno umarerino agu'afima hunaraginte nomofona kafantetima ufre kankamuma kanti kamma mesarimima hiana 3 mita hu'ne. <sup>2</sup> Hagi kama ufre'ama mesarimima hiana 5 mita higeno, kafama ufrete'ma kantikamama me'nea zafararema mesarimima hiana, tapa'amo'a 2.5 mita hu'ne. Hagi meg'i'a mono noma mesarimima huno keana zaza'amo'a 20 mita higeno, upa'amo'a 10 mita hu'ne. <sup>3</sup> Hagi hunaragintegeno ruotge'ma huno ruotge'ma hu'nefinka, ana ne'mo'a umarerino kafama ufrete'ma kantikamama kafa zafararema mesarimi huno keana, atupa'amo'a 1mita higeno, zaza'amo'a 3 mita hu'ne. Hagi kafama ufre kankamumo'a 3.5 mita hu'ne. <sup>4</sup> Hagi anama hunaraginte noma mesarimima huno keana, anantarega kaziga 10 mita hutere hu'ne. Hagi amama hunaraginte nomo'a, ruotge huno ruotge hu'ne huno nasami'ne.

<sup>5</sup> Hagi ana ne'mo'a ruotge'ma hu'nea mono none, ruotge'ma huno ruotge'ma hu'nea mono nomofo asa'ama mesarimima huno keana, tapa'amo'a 3mita hu'ne. Hagi ne'one nontamina ana nomofona hunaraginteno kagi'neankino, ana nontamimofona maka kaziga 2 mita hutere hu'ne. <sup>6</sup> Hagi ana ne'one nontamimofo agofetura 3'a agofetu agofetum huno nona kino mareri'ne. Hagi 3'a noma agofetu agofetum huno ki'nerera 30'a neone nontami hunaragintetere huno kagi'ne. Hagi ana mika neone nontamimofo asamo'a ra mono nontera eme rutrago ote'ne. <sup>7</sup> Hagi ana nontamima agofetu agofetum huno kinoma mareri'nea nontmimofo asamo'a fenkamia osi higeno, amunompi nontera omera higeno, amuzare nomofona ome rankrefa hu'ne. Hagi mago nomoma ome tregeno mago noma ana agofetu'ma erigafama hu'nerera lada tro huntetere huno anagamua mareri'ne. <sup>8</sup> Hagi ana mono noma ki'neana, havea anteno marenerigeno 3.6 mita hutegeno, mono nona ki'neankino ana mono nomofo asoparega ne'one nontamina kino kagi'ne. <sup>9</sup> Hagi hunaraginte nontamimofo fegi'a asamofo tapa'amo'a 2.5 mita hu'ne. Hagi ana ne'one nontamine, <sup>10</sup> mono nomofo amu'nompima me'nea kankamuma mesarimima hu'neana 10 mita hu'ne. <sup>11</sup> Hagi anama hunaraginte nontmimofona mago'zama omane kaziga kafana metere hu'neankino, mago kafamo'a noti kaziga avugosa huntegeno, mago kafamo'a sauti kaziga avugosa hunte'ne. Hagi kankamuma me'noma kagi'neana kankamumofo rama hu'amo'a 2.5 mita hu'ne.

<sup>12</sup> Hagi mono nomofo zage fre kaziga avugosama hunte'nea mono nomofo atupa'amo'a 35 mita higeno, zaza'amo'a 45 mita higeno, asamofo tapa'amo'a

2.5 mita huno kagi'ne. <sup>13</sup> Ana huteno ana ne'mo'a mono noma mesarimima huno keana, zaza'amo'a 50 mita hu'ne. Hagi mono kumama mesarimima huno keana, zaza'amo'a 50mita hu'ne. <sup>14</sup> Hagi mono nomofa zage hanati kazigama kuma'ma mesarimima huno keana, zaza'amo'a 50mita hu'ne. <sup>15</sup> Hagi mono nomofona zage fre kazigatima mesarimima huno ruotge'ma huno ruotge'ma hu'nea mono nomofa kafante eana, anahukna huno 50 mita hune. Anantera ana mono nomofona kumama me'nea zaza kazigane, hunaraginte nontaminema mesarimima huno keana, 50 mita hu'ne. Hagi mono nomofona meg'i'ama, agu'ama, avunoma,

<sup>16</sup> kafa zafama, eri osi'ma hu'za zaho eri kantamima hagente'nazane, hunaraginte nontamima kafantegama avugosama hunte'nea nontaminena zafaretike ahe'ne. <sup>17</sup> Hagi ruotgema huno ruotge'ma hunefinkama ufre kafanteria, mesarimi huza negeza agu'ane meg'i'anena zafaretike asa ahe'za avonkre nankrera hunte'naze. <sup>18</sup> Hagi ana avoma kre'nazana, tofe anina kna zafa trohunente'za serabimie nehaza ankero trohundetere hazageno, tofe zafa megeno ankero manigeno hutere hu'ne. Hagi mago mago serabimi ankeromofona tare avugosa huntetere hu'ne. <sup>19</sup> Hagi kanti kama hanagati'za ankerontre trohundetere hazageno, zanavugosa tofe zafa humitere hu'na'e. Hagi ana ankerontremofona, mago kaziga vahe avugosa huntogeno, mago kaziga'a laioni avugosa hunte'neankino, tofe zafa amunompi me'negeno zanavugosa ohumi ahumi hu'na'e. Ana hu'zanke hu'za ana mono nomofona mekagi'naze. <sup>20</sup> Hagi meg'i'ama mono nomofone, mono nomofonena mopareti'ma marerino anagamuma mareri'neana, ankeromofo amema'ane, tofe zafamofo amema'a hanagatino tro hunte'ne. <sup>21</sup> Hagi mono nomofona zaza kafa zafa hagente'nazankino, hunaragintegeno ruotge huno ruotge'ma hu'nea nomofa kafana anahu hu'za hagente'naze.

<sup>22</sup> Hagi mnantenake zama kremna vu ita zafare tro hunte'nazankino, atrure'amo'a 1.5 mita higeno, zaza'amo'ene atupa'amo'enena 1mita hu'ne. Hagi ana itamofona renagentete'ene, asoparegane, riga'anena maka zafa aheno kagi'ne. Hagi ana ne'mo'a amanage huno nasami'ne, ama ita Ra Anumzamofo avugama me' ita mene huno nasami'ne.

<sup>23</sup> Hagi ruotgema hu'nea mono nonte'ene, hunaragintegeno ruotge huno ruotge'ma hu'nefinkanena tare tragote kafana metere hu'ne. <sup>24</sup> Hagi ana kafantamimofona repasihu'a megeno, tare inisi metere hu'ne. <sup>25</sup> Hagi ana tare kafanteria areharare zafare'ma hu'neaza hu'za, serabimi ankeromofo amema'a hanagati'za tro hunente'za, tofe zafa trohundetere hu'za evu'naze. Hagi anagami kaziga avu nomofona zafa ahe harare'za evu'naze. <sup>26</sup> Hagi ana avu nomofona kanti kama asoparega tofe zafa trohunte'za enevu'za, zaho kana eri osi hu'za tro huntetere hu'aze.

## 42

### *Pristi vahe'mokizmi noma hunaraginte'nea naneke*

<sup>1</sup> Hagi anantetira ana ne'mo'a navareno meg'i'ama mono kumamofona noti kaziga vuteno, navareno mono nomofona kantu kaziga hunaraginte nontaminte vu'ne. Hagi anama hunaraginte nontmina, noti kaziga meg'i'ama me'nea asamofona, mago kaziga asoparega me'ne. <sup>2</sup> Hagi mago nona noti kaziga avugosa hunte'nea nomofona zaza'amo'a 50 mita higeno atupa'amo'a 25 mita hu'ne. <sup>3</sup> Hagi ana nontmimofone mono nomofo amu'nopimpima me'nea kankamumo'a 10mita hu'ne. Hagi kantigama

nontamina 3'a agofetu agofetu hu'za ki'za mareri'nageno zamavugosa ohumi ahumi hu'naze. <sup>4</sup> Hagi ana nontmimofo noti kaziga, kafana megeno zamavuga mago ka evu'neankino, anankamo'a 5 mita kahesa higeno, zaza'amo'a 50 mita hu'ne. <sup>5</sup> Hagi agofetu'ma hunaraginte'nea nomo'a ositfa higeno, amu'nompima hunaraginte'nea nomo'ene mopafi nomo'enena ra hu'na'e. Na'ankure fenkma kazigama me'nea nontamimofona ra kankamu me'ne. <sup>6</sup> Hagi amu'nompine mopafinema hunaraginte nontre'mofoma azerina zafa meankna huno agofetura nampa 3 nomofona azerina zafa omane'ne. <sup>7</sup> Hagi ana nontmimofo asoparega megia keginamo'ma hiaza huno mago kegina evu'neankino, zaza'amo'a 25mita hu'ne. <sup>8</sup> Hagi hunaraginte nontamimofa isamofo zaza'amo'a 25mita higeno'a, mono no tava'onte'ma me'nea keginamo'a 50'a mita hu'ne. <sup>9</sup> Hagi fenkma kazigama me'nea nontmimofona megia kumapinti'ma ufresaza kafana, zage hanati kaziga me'ne. <sup>10</sup> Hagi ana keginamofo agu'afina hunaraginte nontmi meno vuno, mono nonkuma keginare ome reh'e'ne. <sup>11</sup> Hagi ana nontmimofo zamavuga, mago ka vu'ne. Hagi e'i ana nontamimo'za noti kazigama me'nea nontaminkna hunazankino, zaza'zmimo'ene atupazmimo'ene, kafazmimo'zanena magozanke hu'naze. <sup>12</sup> Hagi ana keginamofona zage hanati kaziga, ana nontamimpima nevaza kafana me'neankiza, anampinkati ufre'za kagi'za sauti kaziga vute'za, noti kazigama nehazaza hu'za ufregahaze. <sup>13</sup> Anante ana ne'mo'a amanage huno nasami'ne, noti kazigama hunaraginte nontamine, sauti kazigama hunaraginte nontamina, mago kaziga me'neankino, ruotge hu'nea nontmi me'ne. Hagi Ra Anumzamofonte'ma enaku'ma hanaza pristi vahetamimo'za, ana nontamimpi ruotge'ma hu'nea ofa ne'zana negahaze. Ana nehu'za ruotgema hu'nea zantine, witi ofane, kumite'ma hu ofane, kefozama hu'nea zante'ma hu ofanena anampi antegahaze. Na'ankure ana kumamo'a ruotge hu'ne. <sup>14</sup> Hagi pristi vahe'mo'zama antanine'za Ruotge'ma hu'nea kumapima uffrenesaza kukenazamia ana nontamimpi ome hatentete'za, megi'a mono kumapina vugahaze. Hagi anama hutesu'za amne kukena hu'za vahetamima mani'nazarera vugahaze.

<sup>15</sup> Hagi mono no kumapima me'nea zantmima mesarimima huvgareteno'a, zage hanati kaziga kafanteti navareno atiramino vuteno, mono kumamofona megi'a mesarimi huno kagine. <sup>16</sup> Hagi mesarimima hu azotanu'ma zage hanati kazigama mesarimima huno keana, zaza'amo'a 1 tausen 800 mita hu'ne. <sup>17</sup> Hagi noti kazigama mesarimima huno keana, zaza'amo'a 1tausen 800 mita hu'ne. <sup>18</sup> Hagi sauti kazigama mesarimima huno keana, zaza'amo'a 1tausen 800 mita hu'ne. <sup>19</sup> Hagi zage fre kazigama mesarimima huno keana, zaza'amo'a 1tausen 800 mita hu'ne. <sup>20</sup> E'ina huno ana maka 4'a kaziga mesarimi huno ke'neana, ana maka kaziga 1 tausen 800 mita hutere hu'ne. Hagi ruotge'ma hu'nea kuma'ene amne kuma'enena, mago keginamo huta'nene.

## 43

### Ra Anumzamofo hihamu masa'mo ete mono no eme ante vite'nea naneke

<sup>1</sup> Hagi anantetira navareno zage hanati kazigama avugosama hunte'nea kafante vu'ne. <sup>2</sup> Anante'ma vige'nama koana, Israeli vahe Anumzamofo hihamu masa'amo'a zage hanati kazigati ne-ege'na ke'noe. Hagi anama negeno'a agasasamo'a rama'a tizogesamofo agasasankna higeno, himamu masa'amo'a mopa remsa hu'ne. <sup>3</sup> Hagi e'i ana avanagnna zama ke'noana,

rankuma'ma eri haviza hu'za nehige'nama ke'noankna avanagna zane, Kebar tinkenare'ma mani'nena ke'noankna za nege'na navugosaregati mopafi mase'noe. <sup>4</sup> Hagi Ra Anumzamofo hihamu masazamo'a, zage hanati kaziga kafanteti mono nompina efre'ne. <sup>5</sup> Ana'ma higeno'a Ra Anumzamofo Avamu'mo'a e'i anantetira navresga huno agu'a mono kumapi ufrege'na ke'noana, Ra Anumzamofo hihamu masazamo'a mono nona aru vite'ne. <sup>6</sup> Ana higena ana ne'ene oti'nena nentahugen mago vahe'mo'a mono nompinkati kea hunamino, <sup>7</sup> amanage hu'no nasami'ne, Vahe'mofo mofavre Izikieliga, e'ama kumara kini tranima menia kuma'ene, naga trama ante'nua kuma me'ne. Hagi e'i ama ana kumara Israeli vahe amu'nompima manivava hanua kuma me'ne. Hagi Israeli vahe'mo'zane, kini vahe'zmimozanena savari avu'ava huge, havi anumzantera monora huntege, fri'naza kini vahe'mofo zamavufaga eri'za eme ante'za ama kumara eripehana hu'za eri kefozana osugahaze. <sup>8</sup> Zamagra kaza osu havi anumzamofo kremnavu ita Nagri kresramna vu itamofo tavaonte ante'za amunompina asa hunenteza, Nagri kafante kahana hagente'nagu, Nagra tusi narimpa ahezmante'na zamazeri haviza hu'noe. <sup>9</sup> Hagi Israeli vahe'mo'zama savri monko zamavu'zamava nehaza zane, kini vahetamimofo fri zamavufanema eri atre'nage'na, zamagrane Nagra emanivava hugahue. <sup>10</sup> Hagi vahe'mofo mofavre Izikieliga, kasefa mono noni'amo'a inankna hunefi Israeli vhahera zamasamige'za nentahiza kumi'ma hu'naza zankura zamagazegura nehu'za, ana mono nomofo amema' mesarimi hu'za keho. <sup>11</sup> Hagi maka zama hu'naza zanku'ma zamagazegu'ma hanagenka ama mono nomofo amema'ama, eri ante ama hunka ana mono noma ki'naza antahinti'ama ana mono nompinti'ma marerino atiraminoma hu kafantamima, ana nomofona maka tra ke'anе kasege'anena nezamasaminka, avontafepi krente'nege'za nege'za zamagu'reti hu'za avariraho. <sup>12</sup> Hagi ana mono nomofo kasegea ama'ne, agona hanakupima me'nea mono nonkuma'mo'a ruotge hu'ne. Mono nomofo kasegea e'ine.

### *Kresramna vu itamofo naneke*

<sup>13</sup> Hagi kresramna vu itamofo zaza'amo'ene atupa'amo'enena amana hu'ne. Ana Kresramana vu itamofo agafa'amo'a, 50 sentimita ana maka kaziga higeno, ana itamofoma anamare'ma avama rente'neana 25 sentimita hu'ne. <sup>14</sup> Hagi ana itamofoma mopareti'ma marerino amu'nompima e'neana 1 mita higeno, rama hu'amo'a 50 sentimita hu'ne. Hagi amu'nompinti'ma marerino ofama hute'ma uhanati'neana, 2 mita higeno, rama hu'amo'a 50 sentimita hu'ne. <sup>15</sup> Hagi kresramna vu itamofona avamare'amo'a 2 mita marerigeno, renagentetema menea 4'a pazivemo'a agatereno anagamu marerine. <sup>16</sup> Hagi ana kresramna vu itamofo agofetura 4'afi renagentegeno, ana 4'a kaziga 6 mita hutere hu'naze. <sup>17</sup> Hagi anagamuma me'nea tra'amo'a, ana maka kaziga 7 mita hutere higeno, avamare'neama'amo'a 25 sentimita hu'ne. Hagi agafa'amo'a 50 sentimita hutere huno kagi'ne. Ana hute'za zage hanati kaziga lada tro huntazageno kre sramnavu itarera mareri'naze.

<sup>18</sup> Anante Agra amanage huno nasami'ne, Vahe'mofo mofavre Izikieliga, Ra Anumzana, Anumzamo'a amanage hie, kresramnavu itama tro'ma huntetenuta, ama'na kasege avaririta kre fanene hu ofa nehuta, korana tagita rutri trira hiho. <sup>19</sup> Hagi Livae vahepinti'ma Zadoki naga'mo'zama pristi eri'zama nagri tava'onte'ma mani'ne'za eneri'za vhahera kumimofo nonama hu ofa hu'zana kasefa ve bulimakao zamiho, huno Ra Anumzana Agra Anumzamo'a hu'ne. <sup>20</sup> Hagi ana ve bulimakao afu'mofo korama'a

mago'a taginka, Kresramana vu itamofona 4'a renagentete'ma me'nea pazivetera nefrenka, itare'ma ahe harari'noma kagi'nea zafare'enena frentenka kagio. E'ina hunka ana kresramnavu ita eri agru hunka kumi nona hugahane. <sup>21</sup> Hagi kumite'ma ofama hu bulimakao afura erino mono kumamofona meg'i'a e'ifi kregahiema hu'zama huhamprinte'nenafi ome kre fanene hugahie. <sup>22</sup> Hagi namba 2 knazupa mago anenta ve meme afu'ma afuhe afahe osu'nesia ahenka kumi ofa hugahane. E'ina ana hutenga bulimakao afuteti'ma Kresramana vu itama eri agru'ma hu'nazaza hunka, ana kre sramnavu ita eri agru hugahane. <sup>23</sup> Hagi ana'ma hutenga afuhe afahe osu'nesia kasefa ve bulimakao afu'ma, ve sipisipi afuma hunka ahenka Kresramana vu ita eri agru hugahane. <sup>24</sup> Hagi ana afutamina Ra Anumzamofo avuga ofa hanage'za, pristi vahe'mo'za ana afutera hagea ante'za vu'za eza hute'za eri'za tevefima kre fananehu ofa Ra Anumzamofontega hugahaze. <sup>25</sup> Hagi 7ni'a knamofo agu'afina, mago mago knarerera afuhe afahe osu'nesia ve meme afuki, kasefa ve bulimakao afuki, ve sipisipi afuki hu'za ahe'za kumi ofa hutere hugahaze. <sup>26</sup> Hagi 7ni'a knamofo agu'afina mago mago knarerera kumimofo nona huno kresramna vu ita eri agru huno eri ruotge hugahie. E'ina hanigeno ruotge huno nagri su'a megahie. <sup>27</sup> Hagi ana'ma nehanigeno 7ni'a knama vagare'na, namba 8ti knarerera pristi vahetmimo'za agafa hu'za vahetamimo'zama tevefi kre fananehu ofane, rimpia fru ofama eri'za esaza ofa ana kresramna vu itarera kresramna vugahaze. E'ina hanage'na Nagra antahi muse hunezmante'na zamavare Nagrarega antegahue huno Ra Anumzana Agra Anumzamo'a hu'ne.

## 44

### *Ugota kva ne'mofo kuma kafamofo naneke*

<sup>1</sup> Ana huteno agu'a mono kampintira navareno meg'i'a mono kumapima zage hanati kaziga kafante vianagi, ana kafana erigi'naze. <sup>2</sup> Ra Anumzamo'a amanage huno nasami'ne, Ama kuma kafana erigi'neankino, ete ru'enena onagigosaze. Mago'mo'he huno ama ana kafantetira eofretfa hugahie. Na'ankure Ra Anumzana Israeli vahe Anumzamo ama ana kafantet emarereri'ne. E'ina hu'negu ama ana kafamo'a erigiteno megahie. <sup>3</sup> Hagi Israeli vahe'mokizmi ugagota kva ne'moke'za, ama ana kafanterera mani'neno Ra Anumzamofo avuga ne'zana negahie. Hagi agra avunoma kinte'nea kafantet ufreteno, ete ananteti atiramigahie.

<sup>4</sup> Hagi anantetira ana ne'mo'a noti kaziga kafante navareno mono nomofo avuga vige'na koana, Ra Anumzamofo masazamo'a mono noma'afina avite'negena navugosaregati mopafi umase'noe. <sup>5</sup> Ana hugeno Ra Anumzamo'a amanage huno nasami'ne, Vahe'mofo mofavre Izikeliga, Ra Anumzamofo mono nomofo tra kene, kasegenema kasamisuana, keso'e nehunka kagesa antahi so'e huo. Mono nompima ufre kafane, mono nompinti'ma atirami kafanenku'ma kasamisuana kagesa antenenka antahi so'e huo. <sup>6</sup> Hagi keontahi Israeli vhahera amanage hunka zamasmio, Ra Anumzana Mikozama Kegavama Hu'nea Anumzamo'a amanage huno hie, Israeli vahe'mota kasrino hi'mnage avu'avazama nehaza avu'avara hanki atreho! <sup>7</sup> Ana nehuta mago'ane tamagra tamagoza anomaa taga osu vahe'ene, zamagu'amo'ma agruma osu'nea vahetimma, zamavareta Nagri mono noni'afina efrazage'za, nezane afu afova'ane, afu koranema ofama eme nehu'za mono noni'a eri pehana hu'naze. Ana nehuta huhagerafi'nona

kasegea ru hantagi'naze. <sup>8</sup>Hagi ruotge'ma hu'nea zantaminte'ma kegavama huneta, erizani'ama erihoma hu'nama huramante'noana atreta, ru kumate vahetami humzantage'za mono noni'a kegava hu'naze. <sup>9</sup>E'ina hu'nazagu Ra Anumzana Agra Anumzamo'a amanage hie, ru vahe'ene, ru vahe'ma tamagranema nemaniza vahe'mo'zanena zamagoza ano taga nehu'za Ra Anumzamonrema zamentintima osanu'za, Nagri mono nompina mareorigahaze.

<sup>10</sup> Hianagi Israeli vahe'mo'zama natre'za kaza osu havi anumzama nevaririzageno, Livae naga'mozama natre'za kama hazagre'za afete'ma vu'naza vahe'mo'za anama hu'naza zamavu'avazamofo mizama'a erigahaze. <sup>11</sup>Hagi zamagra Livae naga'moza mono nomofo kafanteria kegava nehu'za, ofama hu afutamima eri'zama esanazana ahe'za akasintesageno, pristi vahe'mo'za eri'za tevefima kre fanane hu ofa ome nehu'za, vahera zamaza hu'za eri'zana erigahaze. <sup>12</sup>Hianagi ana Livae vahe'mo'za zamagra humzagesa hazage'za kaza osu havi anumzantaminte monora hunte'naze. E'ina hu'negu hankave ke humzantoanki'za, kumi'ma hu'naza zamofo mizama'a erigahaze huno Ra Anumzana Agra Anumzamo'a hu'ne. <sup>13</sup>Hagi zamagra Nagri tvaontera e'za erizani'a eri nanteg, ruotge'ma hu'nea zantmintero, ruotge huno ruotge'ma hu'nea ofaramintera, erava'oa osugahaze. Na'ankure kasrino hi'mnama vu'nea avu'ava'ma hu'naza zanteria zamagazegu hugahaze. <sup>14</sup>Hianagi mono nompima ne'one eri'zama me'nea eri'za zamisuge'za eneri'za, mono nompima me'nea maka eri'zana erigahaze. <sup>15</sup>Hianagi Israeli vahetmimo'zama Nagri'ma natre'za kaza osu havi anumzantamima ome avaririzage'zama Livae pristi vahetamima Zadokimpinti'ma fore'ma hu'naza vahe'mo'zama Nagrite'ma mani fatgo hu'neza navariri'naza vahemozage Nagri navuga otine'za afu afovane koranena ofa hugahaze huno hanavenetake Anumzamo'a hu'ne. <sup>16</sup>Hagi zamagrake mono noni'afina emarer'i'za navuga mani'neza, kresramna vu tratera erizani'a erigahaze. <sup>17</sup>Hagi agu'afi me'nea mono kumapima vunakuma hanu'za efeke zaza kukena hu'neza umarerigahaze. Hagi sipsisip azokateti'ma tro'ma hu'nesaza kukena antanine'za agu'afima me'nea mono kumapino, mono nompina mareriza eri'zana e'oriho. <sup>18</sup>Hagi zamasenirera efeke tavravereti'ma tro'ma hu'ne'naza kankri nentani'za, efeke tavravereti'ma tro'ma hu'nesaza kukena agu'afina antaniho. Hagi zamazeri amuho huno zamu'nama hagega kukena ontaniho. <sup>19</sup>Hagi ruotge'ma huno ruotge'ma hunefinkati'ma atre'za fegi ruotgemu hu'nea nompima enaku'ma hanuza, anama antanineza eri'zama eri'nesaza kukena ana nompinka hatentete'za ru kukena hu'za rama'a vahe'ma mani'nazafina egahaze. Hagi ana'ma osnageno'a ana kukanafintira ruotge'ma hu'nea zamo'a vahera zamazeri ruotge hugahie. <sup>20</sup>Hagi pristi vahe'mo'za zamazokara hare'za eri rampagera osuge, zamazokara atresagenora hageno zazara osugahianki, hare'za eri atupa hugahaze. <sup>21</sup>Hagi pristi vahe'mo'zama hankave waini tima netesu'za mono nonkumapina uofregahaze. <sup>22</sup>Hanki pristi vahe'mo'zama a'ne'ma erinaku'ma hanu'za, ru vahe'mokizmi kento a'neo, ru vahe'mo'ma atre'neni a'nea e'origosie. Hagi zamagra a'nema erinaku'ma hanu'za, vene omase Israeli mofane erige, pristi vahe'mokizmi kento a'ne erige hugahaze. <sup>23</sup>Hagi ina avu'avazamo ruotgera higeno, ina avu'ava zamo ruotagera osigeno, ina avu'avazamo agrua higeno, ina avu'avazamo agrua osune zamagra vahe'ni'a rempi huzamigahaze. <sup>24</sup>Hagi pristi vahe'mo'za zamagra keaga refkoma hu kva vahe mani'neza, vahe'nimo'zama mago zamarim-

pama osnaza zantera, Nagri kasegemo'ma hu'nesia kante ante'za keagazmia refko hugahaze. Ana nehu'za kasegeni'ane tra keni'anena pristi vahe'mo'za nevariri'za, trakene huvempa kene, nezama kre'za nene'za mono'ma ne-haza knane, mani fruhu kna Sabatinena kegava hugahaze. <sup>25</sup> Hagi pristi vahe'mo'za fri kerafamofo tava'ontera vu'za zamazeri pehana osugahaze. Hianagi nezmarera'o, nezamafa'o, mofavrezmio, kora nefuo negna'o, ve e'ori nezmasaroma frinesige'za amne fri kerafa tava'ontera vu'za zamazeri pehana hugahaze. <sup>26</sup> Hagi anama huno naga'amofo fri kerafa tavaonte'ma vuno agra'ama azeri pehanama hutesuno'a, agra'a azeri agru huteno, 7ni'a kna avega anteno manigahie. <sup>27</sup> Hagi anama hutesuno'a agafama huno ruotge'ma hu'nea mono nompima ufrenaku'ma hania knarera, agra'a kumi'mofo ofa hino huno Ra Anumzana Agra Anumzamo'a hu'ne. <sup>28</sup> Hagi pristi vahe'mo'za mago zana erisantiharege, mopanena erisantiharegera osugahaze. Na'ankure Nagrake'za zamagri fenozana mani'noe. <sup>29</sup> Hagi pristi vahe'mo'zama ne'zazmima erisazana, vahetmimo'zama witi ofane, kumite'ma hu ofane, havi avu'ava'ma hu'nesaza zante'ma eri'za esaza ofafinti erigahaze. Ana nehu'za mika zama Ra Anumzamofo suzane hu'za eri ante ruotge'ma hu'za eri'za esaza zantami erigahaze. <sup>30</sup> Hagi hozafinti ese nezane, maka zantamima muse zanema hu'za eri'za Ra Anumzamo-foma eme amisaza zantamina, pristi vahe'mo'za erigahaze. Ana nehuta ese witima hamareta heruta bretima tro'ma hanazana, pristi vahetami eme zaminkeno Ra Anumzamo'a asomura huramanteno. <sup>31</sup> Hagi pristi vahe'mo'za fri'nenia namao, zagagafao, afi zagamo aheno traga hu'enienia zugagafa onegahaze.

## 45

### *Mopa refko hanaza naneke*

<sup>1</sup> Hagi Israeli vahe'ma mopama refko huta nezamisuta anampintira Nagri mopa regorinthe. Hagi anama regorintesaza mopamofo zaza'amo'a 90 kilomita hanigeno, atupa'amo'a 72 kilomita hugahie. Hagi ana mika mopamo'a ruotge hugahie. <sup>2</sup> Hagi e'i ana mopafintira mono noma ki mopama regorinte'sazana ana maka kaziga atumpa'amo'a, 250 mita hino. Hagi ana noma kisaza nomofo meg'i'a mopa kankamuna, 25 mita meno kagino. <sup>3</sup> Hagi anama ruotge mope hutama regorinte'naza mopafinti'ma rankna mopa regori antegahazankino, ana mopamofo zaza'amo'a 90 kilo mita hanigeno, atupa'amo'a 36 kilo mita hugahie. E'ina mopamofo agu'afi mono nona mesigeno ruotge'ma huno ruotge'ma hu'nea kumara megahie. <sup>4</sup> Hagi e'i ana mopamo'a me ruotge huno me'nенke'za, ra mono nompima eri'zama eneri'za Ra Anumzamofo avugama erava'oma hanaza pristi vahe'mo'za nona kiza nemanisageno, anampina mono nona megahie. <sup>5</sup> Hagi Livae naga'ma mono nompima eri'zama erisaza vahe'mokizmi mopama regorisazana, zaza'amo'a 90 kilo mita hinkeno, upa'amo'a 36 kilo mita hino. Hagi e'i ana mopamo'a Livae vahe'mokizmi mopa me'nенke'za anampi rankumazmia kiza manigahaze. <sup>6</sup> Hagi ana mopamofo tavaontera rankumama kisaza mopa regorigahazankino, zaza'amo'a 90 kilo mita hanigeno, upa'amo'a 18 kilomita hugahie. Hagi ana mopafim'iza'o, Israeli vahep-inti'ma noma eme kinaku'ma hanimo'a amne eme kigahie.

### *Ugagota kva vahe'ma manisaza mopamofo naneke*

<sup>7</sup> Hagi ugagota kva ne'mofona mopama amisazana, ruotge'ma hu'nea kuma'ene ran kuma'ma ami'naza mopamofo zage fre kazigane, zage hanati

kaziganema me'nea moparare amigahaze. Ana mopararemofo atupa'a raremokea, zage fre kazigane, zage hanti kaziga mopama ometre eme atrema hu'nere vuke eke hugaha'e. Ana hanigeno anagamu kaziga, mago nagamofo mopa mesigeno, fenka kaziga mago naga'nofimofo mopa megahie. <sup>8</sup> Hagi e'i ana mopamo'a Israeli mopamofo agu'afina ana kva nemofo mopa megahie. Hagi ugagota kva vahe'mo'za Israeli vahe'ni'a zamazeri havizana osugahazanki, mopa refko hu'za Israeli vhahera nagate nofite hu'za zamigahaze.

<sup>9</sup> Hagi Ra Anumzana Agra Anumzamo'a amanage hie, Tamagra Israeli vahe'mokizmi ugagota kva vahe'mota rama'a zampi havi tamavu'tamavara huta, vahe'ni'amofo zamazeri haviza hazanki atreho! Hagi havi tamavu tamavama huta vahe'ni'a mopama zamahenatita enerita, nozmifinti'ma zamahe kasonepeta fatgo osu tamavu'tavama nehaza zana atreho huno Ra Anumzana Agra Anumzamo'a hu'ne. <sup>10</sup> Hagi hagegezamofo kna'ane, timofo kna'ama refkoma huta negeta mizama atesinaku'ma hanuta, tamage huta refko huta negeta mizana atesi fatgo hiho. <sup>11</sup> Hagi efaema nehaza zana hagege zamofo kna'ama refkoma hu'za negaza zanki, batiema nehaza zana timofo kna'ama refko hu'za negaza zane. E'ina hu'negu 10ni'a bati kevufintira, mago kevumo'a mago homagna higeno, 10ni'a efamo'a mago homagna hu'na'ankino, ana taregamokea mago avamenteke 21.6 lita hutere hu'na'e. <sup>12</sup> Hagi maka zamofo kna'ama refko huta kesazana sekolie nehaza zagomofo avamente refko hugahaze. Ana hu'neakino mago sekoli zagomofo kna'amo'a 20'a gera zagomofo kna'agna higeno, 60'a sekoli zagomofo kna'amo'a (silva) mago minamofo kna'agna hu'ne. <sup>13</sup> Hagi ofama erita esuta amana hiho. Witima 6'a ku'ma eri avite'nuta, mago kura ofa erita egahaze. Hagi balima anahukna huta 6'a kuma eri avimatesuta, mago kura ofa erita egahaze. <sup>14</sup> Hagi olivi masavema 10ni'a kavoma avite'nuta, mago kavoa ofa erita egahaze. (Mago korimo'a 10ni'a batigna nehuno, mago homagna knazanimo'a hugahie.) <sup>15</sup> Hagi tretre'ma hu'nesia mopa fima 200'a sipisipi afu'ma ante'nenuka, mago avrenka ofa eme hugahane. Hagi witi ofama, tevefima kre fananehu ofama, arimpa fru ofaramina, e'inahu huta kumi'mofoma nonama hu ofa eme hugahaze huno Ra Anumzana Agra Anumzamo'a hu'ne. <sup>16</sup> Maka Israeli vahe'mo'za ama ana ofa eri'za Israeli kva nera eme amigahaze. <sup>17</sup> Hagi tevefima kre fanene hu ofama hu'zane, witi ofama hu'zane, tima tagitre ofama hu'zanena kini ne'mo zaminig'e'za hugahaze. Hagi maka mono'ma hu knare'ene, kasefa ikante'ma mono'ma nehu'za musema hu'za nezama kreza ne'naza knare'ene, Sabati knare'ene, maka atruma hu'za mono'ma nehaza knare'enena, kumitema hu ofane, witi ofama huzane, kre fanenema hu ofane, rimpa fru ofama hu'zana agra kini ne'moke'za zami'nige'za Israeli vahe'mo'za kumizmirera nona hu'za ofa hugahaze.

<sup>18</sup> Hagi Ra Anumzana Agra Anumzamo'a amanage hie, ese ikamofo Ese knazupa, mago agaho ve bulimakao afu'ma afuhe afahem'a osu'nesia bulimakao afu aheta mono nona eri agrua hiho. <sup>19</sup> Hagi pristi vahe'mo'za ana bulimakao afuma ahe'za kumi ofama hanaza afu'mofo korama'a eri'za agu'a mono nomofo kaha zafarerera nefre'za, kresramna vu itamofo anaga kaziga 4'a renagentetema aheharari zafarerera nefre'za, mono kumamofo agu'afima me'nea kuma kafa zafarerera ome fregahaze. <sup>20</sup> Hagi ana ikamofo 7ni knazupa, vahe'mo'za mago'azama haniregama hantga huno hu'nenia kumi'ene, ontahineno'ma hu'nenia kumira anahukna huta zamazeri agrua

nehuta, mono nona eri agru hugahaze. <sup>21</sup> Hagi ana ikamofona 14ni knazupa ozmaheno'ma zmagatere'nea knagura tamagesa antahinemita ne'zana kreta neneta musena hugahaze. Hagi 7ni'a knamofo agu'afi ne'zana kreta neneta, musena hugahazankino anankna'afina zo-ore bretige negahaze. <sup>22</sup> Hagi ana knarera kini ne'mo'a agrare'ene maka Israeli vhete'ma kumi ofama hu bulimakao afura avrentegahie. <sup>23</sup> Hagi ana 7ni'a knamofo agu'afina kini ne'mo'a mago mago knare'ma hanaza ofa 7ni'a afuhe afaha osu'nesia bulimakao afutaminki, 7ni'a ve sipisipi afutaminki huno zaminig'za ahe'za Ra Anumzamofontega tevefi kre fananehu ofa hutere hugahaze. Ana nehu'za mago ve meme afu ahe'za mago mago knarera kumitema hu ofa hutere hugahaze. <sup>24</sup> Hagi witi ofama hu'zana 14ni'a kilo hu'nenia knare witine, olivi masavea 4 lita nemino mago bulimakao afu'ene ve sipisipi afu'ene agra amitere hanageno kumitera ofa hugahie. <sup>25</sup> Hagi 7ni ikamofona 15ni knazupa seli nompima mani'za ka'ma kopima e'naza zamofoma antahimi knamo'a agafa hugahie. Hagi 7ni'a knamofo agu'afina ozmahe zamagatere'nea knare'ma ofama nehazakna huno mago mago knarera kini ne'mo'a kumi ofane, tevefima kre fananehu ofane, witi ofane, olivi masave ofanena erino egahie.

## 46

### *Kini ne'mo'ma ofaramima erino eme ofama hania zamofo naneke*

<sup>1</sup> Ra Anumzana Agra Anumzamo'a amanage hie, Agu'a mono kumamofo zage hanati kazigama me'nea kafana 6si'a eri'za knafina eriginteno meno. Hianagi manigasa kna Sabatire'ene kasefa ikante'ma ne'zama kreno ne-neno musema hu knare'enena ana kafana eriogita anagintenkeno meno. <sup>2</sup> Hagi Israeli vahe'mokizimi ugagota kva ne'mo'a, meg'i'a mono kumapintima agu'afima unefrea kafante'ma asente'naza zafare azerino ot'i'nenige'za agri ofa pristi vahe'mo'za eri'za tevefima kre fananehu ofane, arimpia fru ofa hugahaze. Hagi agra anante kepri huno monora huteno, ete e'nea kantegati atiramigahie. Hagi ana kafana erionki atre'nageno vuno kinaga omasegahie. <sup>3</sup> Hagi manigasa kna Sabati knaraminte'ene kasefa ikante'ma mono'ma nehaza knarera, ana mopafi Ra Anumzamofo avuga ana kafante monora eme hugahaze. <sup>4</sup> Hagi mago mago Sabati knarera ugagota kva ne'mo'a, 6si'a afuhe afahne osu sipisipi anentataminteti'ene mago ve sipisipireti'ene huno Ra Anumzamofontega tevefima kre fananehu ofa hugahie. <sup>5</sup> Hagi witi ofama haniana, knare'ma huno kane so'ema hu'nea witia mago ekaeka kuki (21.6 lita) mago ve sipisipi afu'enena ofa nehuno, agra avesite mago mago sipisipi anentera witia refko huntetere huno ofa hugahie. Hagi olivi masavema ofama haniana, witima mago mago ekaeka kuma refkoma hunteterema hanire olivi masavena 4lita tagintetere huno ofa hugahie. <sup>6</sup> Hagi kasefa ikante'ma mono'ma nehaza knarera ugagota kva ne'mo'a, mago bulimakao afuma afuhe afahne'ma osu'nesianki, 6si'a sipisipi afu anentaki, mago ve sipisipigi huno avreno egahie. <sup>7</sup> Hagi ve bulimakao afu'ma avreno'ma ne-eno'a witi ofama hu zana mago ekaeka ku knare'ma huno osi'osi'ma hu witia erino eno. Hagi ve sipisipinemra ofama hu witia mago ekaeka ku erino eno. Hagi mago mago sipisipi anenta'enema ofama hu witia agra'a avesite erino egahie. Hagi mago mago ekaeka witi ku'ma eri'zama e'narerera, mago kavo olivi masavema erino etere hugahie. <sup>8</sup> Hagi ugagota kva ne'mo'ma zage hanati kaziga

kafanteti'ma emareritesuno'a, ete ana kafanteti fegira atiramigahie. <sup>9</sup> Hagi ne'zama kre'za nene'za musema nehu'za Ra Anumzamofoma mono'ma hunte knare'ma esaza vahe'mo'za noti kaziga kafanteti'ma emarerite'nuz'a, ete ana kafantetira atiorami, sauti kaziga kafanteti atiramihio. Hagi sauti kaziga kafanteti'ma emarerite'nuz'a noti kaziga kafanteti atiramihio. Hagi emarer'i'enaza kafantetira atioramitifa hiho. Hagi ru kafanteti atiramitere hiho. <sup>10</sup> Hagi ugagota kva ne'mo'a ana vahetamine umareriteno, ete atinerami'nazana agra'enena atiramigahie. <sup>11</sup> Hagi nezama kreno neneno musema nehuno atru huno mono'ma hu knarer, mago ekaeka ku eriviteta witi ofa bulimakao afu'enena nehuta, mago ekaeka ku witia eriri aviteta ve sipisipi afu'enena ofa hiho. Hagi sipisipi afu anentataminema ofama hanazana, witia agra ayesite mago mago sipisipi afu anentatera refko huntetere hugahie. Hagi mago kavo 4lita hu'nenia olivi masavena mago mago witi ekaeka kutera refko huntetere hugahie. <sup>12</sup> Hagi kini ne'mo'ma agra ayesite'ma hu ofane, tevefima kre fananehu ofane, arimpa fru ofanema agra ayesite'ma Ra Anumzamofontegama hunaku'ma esanigeta, agu'a mono kumamofo zage hanati kazigama me'nea kafa anagintenkeno, manigasa kna Sabatire'ma nehiaza huno ofa eme Kresramana vino. Hagi e'i ana'ma huteno'ma atramisigeta ana kafana erigahaze. <sup>13</sup> Hagi mika nanterana afuhe afahe osu, mago kafu hu'nesia sipisipi anenta aheta Ra Anumzamofontega kre fananehu ofa huntetere hiho. <sup>14</sup> Hagi mago mago nanterama mago mago sipisipima aheta kre sramana vanafina 2kilo witine 1lita olivi masavene eri havia huta ofa hiho. Ama kasegea eriotre atrenkeno meva meva huno vino. <sup>15</sup> Hagi mago sipisipi anentaki witigi, olivi masavena otreta mika nanterana ofa hunante vava hiho.

<sup>16</sup> Hagi Ra Anumzana Agra Anumzamo'a amanage hie, kini ne'mo'ma mofavrerami ma'afinti'ma mago mofavre'ama mago mopama amisiana, ana mofavremofo mopa me'nenko agripinti'ma forehu anante anante'ma hanaza vahe'mo'za erisantihare'za vugahaze. <sup>17</sup> Hianagi kini nemo'ma mago mopama refko huno eri'za vahe'ama ami'niana, ana mopamo'a agrisu'a me'nena hoza anteno nenena 50'a kafuma evanigeno'a, eteno ana mopa kini ne' amigahie. Hianagi kini ne'mo'ma mofavre'ama ami'nenia mopamo'a agri mopa mevava hugahie. <sup>18</sup> Hagi kini ne'mo'a vahera knazmino zamahe kasonepeno, vahe mopa e'orino. Hanki mopama refko huno mofavre'ama aminaku'ma hanuno'a, agra'a mopafinti refko huno amino. Hagi Nagri vahe'mo'zama mopazmima atre'za vu'za eza huzankura nave'nosie.

<sup>19</sup> Hagi avanagana zampima navareno'ma vanoma nehuno maka zama naveri'ma nehia ne'mo'a, kuma kafamofo tavaonte'ma me'nea kafanteti navareno ruotge'ma hu'nea nompinka vu'ne. E'i ana nona pristi vahe nonkino, noti kaziga avugosa huntene. Hagi anama hunaraginte nontamimofona, amefiga zage fre kaziga atumparega mago kuma naveri hu'ne. <sup>20</sup> Hagi ana kumakura amanage huno nasami'ne, Kefo avu'ava'ma hu'nesare'ma eri'za esaza ofane, kumi ofanema hanaza afu ame'a pristi vahe'mo'za amafi negre'za, witi ofanena kregahaze. Ruotge'ma hu'nea ofama eri'za meg'i'a mono kumapima vanage'zama vahe'ma zamazeri ruotge'ma huzankura amafi kregahaze. <sup>21</sup> Ana huteno fegi'a mono kumapi navareno kuma'mo'ma 4'affima omerenagente eme renagente'ma hu'nere vige'na koana, mago kuma metere hu'negena ke'noe. <sup>22</sup> Hagi meg'i'a kumamofona 4'affima renagentetera osi kuma megeno, kegina hugaintetere hu'naze. Hagi ana ku-

matamimofo zaza'amo'a 20mita higeno, atupa'amo'a 15mita hutere hu'ne. Hagi ana maka kumatmimofo zaza'amo'ene atupa'amo'enena magozahu hu'ne. <sup>23</sup> Hagi ana ne'one kumatampina ofama hanaza ne'zama kre'zana asoparega ita tro hunte'za kagine'za, henka kaziga teve hugre'za tro hunté-ag'i'zane. <sup>24</sup> Hagi ana ne'mo'a amanage hu'ne, vahe'mo'zama ofama eri'za esazana, mono nompima eri'zama e'neriza vahe'mo'za ana nontamimpi kregahaze.

## 47

### *Ra mono nompinti'ma ne-ea timofo naneke*

<sup>1</sup> Hagi ana ne'mo'a ete navareno mono no kafante vu'ne. Hagi anante'ma oti'nena ke'noana mago timo'a mono no kafamofona fenka kazigati enevige'na ke'noe. Hagi ana timo'a mono nompinka sauti kazigati hanatiteno vuno, kresramna vu itamofona tamaga kaziga soparegati arugagino evuno zage hanati kaziga nevige'na ke'noe. <sup>2</sup> Hagi ana ne'mo'a mono kumamofona noti kaziga kafanteti navareno atiramiteno, megia keginamofona arugagino zage hanati kaziga kafante vu'ne. Hagi sauti kazigati timo'a osi'osi huno hanatino ne-egena ke'noe. <sup>3</sup> Hagi ana ne'mo'a efeke nofi eri'neno zage hanati kaziga evuno ana tima mesarimima huno uramino keana 500mita hunegeno navareno ana tina takaheno vigeno, ana timo'a nagia merumpare eme atre'ne. <sup>4</sup> Hagi ana ne'mo'a ete mago'an 500 mita mesarimi huno ana tina vuteno navareno takaheno vigeno, ana timo'a marerino nare'nafi eme atre'ne. Ana huteno ete mago'an 500 mita mesarimi huno ana tina vuteno, navareno takaheno vigeno, ana timo'a nafafafai emetre'ne. <sup>5</sup> Hagi eteno mago'an 500mita mesarimi huno vuteno, navareno takahege'na vu'noana, ana timo'a ame fenkame urami'neankino, zanago aruno takahega hu'ne. <sup>6</sup> Ana ne'mo'a amanage hu'ne, Vahe'mofo mofavre Izikieliga, amama kaveri'ma huazana hago kano? Anage nehuno rukrahe huno ana tinkena navareno vu'ne. <sup>7</sup> Hagi ete rukrahe hu'na ne-ena koana, ana timofona rugaraga ankenarega zafamo'a tusiza hu'nege'na ke'noe. <sup>8</sup> Anante ana ne'mo'a amanage huno nasami'ne, Ama timo'a zage hanati kaziga hagage kokampi vuno, Jodani agupofi vuteno, Fri hagerimpi ufrenero ana hagerina ome azeri kasefa hanigeno, hagemoke'ma hu'nea zamo'a amane hugahie. <sup>9</sup> Hagi ana tima nevirega keonke zagafamo'za tusiza hugahaze. Ana nehanageno ana timpina nozameramimo'za tusiza hugahaze. Na'ankure ana timo'a ome kasefa hugahie. Ana hinkeno keonke zagamo'za ana tima vanirega mani avitegahaze. <sup>10</sup> Hagi nozamema ahe vahe'mo'za ana hagerinke'na oti'za vugahaze. En-Gediti'ma vuno En-Eneglaimima vaniana, ante hagegema hanaza kukomo'a hagerinkena avitegahie. Hagi Medeterena hagerimpima nehiaza huno Fri Hagerimpina ruzahu ruzahu nozamemo'a avitegahie. <sup>11</sup> Hianagi Fri Hagerimofo ankenarega me'nea hapa tirupima me'nea hagemoe'a amnea osu hagea me'nesige'za, anampinti hagea eri'za negahaze. <sup>12</sup> Hagi ruzahu ruzahu zafaramimo'a ana tinkenarega kanti kama hageno ruzahu ruzahu zafaraga rentegahie. Hagi ana zafaramimofo anina'amo'a, arena renoramisigeno, raga rentevava' hugahie. Maka ikantera raga rente vava hugahankino, tagiza raga nenenageno asina'amo'a vahera zamazeri knamaregahie. Na'ankure ana timo'a mono nompinti hanatino egahie.

### *Mopama refko'ma hanaza zamofo naneke*

<sup>13</sup> Ra Anumzana Agra Anumzamo'a amanage hie, Mopama refkoma hu'zama 12fu'a Israeli naga'nofi'mozama erisazana, Josefempinti'ma fore'ma hu'naza vahe'mo'za tare mopa erigahaze. Hagi mopama refkoma hanuta mago zahu huta mago'mago nagara zamitere hiho. Na'ankure Nagra zamafahe'mofona ama mopa zaminuge'za erisanti hategahaze hu'na huhampri zamante'noe. Ana hu'negu mago avamenteke anteta refko huta mopa zamitere hinke'za erisanti hare'za maniho. <sup>14</sup> Hagi mopama refkoma hanuta mago zahu huta mago'mago nagara zamitere hiho. Na'ankure Nagra zamafahe'mofona ama mopa zaminuge'za erisanti hategahaze hu'na huhampri zamante'noe. Ana hu'negu mago avamenteke anteta refko huta mopa zamitere hinke'za erisanti hare'za maniho. <sup>15</sup> Hagi mopama ometre emetre hu atupamo'a amana hugahie. Noti kaziga mopa atupamo'a Medeterenia hagerinteti erigafa huno vuno, Hetloni uhanatiteno, Lebo-hamati rugitagino vuno Zedati vugahie. <sup>16</sup> Hagi anantetira Damaskasi mopane Hamati mopamofo amunompima Berotane Sibraimi kumatre'ma me'nate rugitagino vuno, Haurami mopa atumpare Hazeri-Hatikoni kuma tavaonte uhanatigahie (ana mopa atupamo'a noti kazigane zage hanati kaziga amu'nompi evu'ne). <sup>17</sup> Hagi ana mopa atumpamo'a, Medeterenia hagerinteti agafa huteno vuno Damaskasi mopa atumpamofo anaga noti kaziga vuno Hazar-enani vugahiankino, e'i noti kaziga mopa atupa megahie. <sup>18</sup> Hagi zage hanati kazigama ometre'nea mopa atupamo'a, Haurani kuma'ene Damaskasi kuma'ene amu'nompinti agafa huteno uramino vuno sauti kaziga Jodani tinkenare vuteno, Israeli mopane Giliati mopamofo amu'nompinti uramino fenkamu Fri Hagerinte vuno sauti kaziga Tamari kumate uhanatigahie. E'i ana mopa atumpa zage fre kaziga mopa atupa megahie. <sup>19</sup> Hagi sauti kaziga mopa atumpamo'a Tamar kumateti agafa huno zage fre kaziga evuno Mariba tima me'nerega Kadesi kumate vuteno, Isipi tinkraho avaririno ra hagerinkenare uhanatigahie. E'i ana mopa atumpa sauti kaziga mopamofo atupa megahie. <sup>20</sup> Hagi zage fre kaziga mopa atupamo'a, sauti kaziga mopa atupamo'ma emetre'nereti agafa huno Medeterenia hageri anke'narega marerino anagamu noti kaziga Lebo Hamati kumamofona zage fre kaziga uhanatigahie. E'i ana mopa atupa zage fre kaziga mopa atumpa megahie. <sup>21</sup> E'i ama ana mopa refako hu'za Israeli vahe'mo'za nagate nofite hu'za erigahaze. <sup>22</sup> Hagi tamagra mopa refko huta enerita, ru vahe'mo'zama Israeli vahere hu'zama tamagranema emanine'za mofavrema kasezmantesaza vahe'enena mopa refko hu so'e huta zamiho. Zamagra Israeli vahekna hu'za manigahazanki, Israeli naga nofima mani'nafi mopa zaminke'za emanoho. <sup>23</sup> Hagi Israeli naga'nofimota mopafima rurega vahe'ma mani'naza mopa, ana mopa zaminke za maniho. Ra Anumzamo'nna amana nanekea nehue.

## 48

### *Mopama refko hanaza zamofo naneke*

<sup>1</sup> Hagi mopama refko hu'za nagate nofite'ma hu'za zamisaza naga'mofo zamagi'a amana hu'ne, Noti kaziga refaregama me'nea mopa Dani naga'mo erigahie. Hagi mopa atumpazamimo'a Hetloni kantega vuno Lebo-hamati vuteno, Damaskasi mopamofo atuparega Hamati tavaonte noti kaziga Hazar-enani uhanatigahie. E'ina hanigeno Dani mopamo'a zage hanati kazigatira evuno, zage fre kaziga evugahie. <sup>2</sup> Hagi Dani nagamofo mopamo'ma ome atresirera, zage hanati kazigati evuno zage fre kazigama evaniana,

Asa naga'mofo mopa megahie. <sup>3</sup> Hagi Asa nagamofo mopama ome atresirera, zage hanati kazigati evuno, zage fre kazigama evaniana Naftali naga'mofo mopa megahie. <sup>4</sup> Hagi Naftali nagamofo mopama ome atresirera, zage hanati kazigati evuno zage fre kazigama evaniana, Manase nagamofo mopa megahie. <sup>5</sup> Hagi Manase nagamofo mopama ome atresirera, zage hanati kazigati evuno zage fre kazigama evaniana Efraemi naga'mofo mopa megahie. <sup>6</sup> Hagi Efraemi naga'mofo mopama ome atresirera, zage hanati kazigati evuno zage fre kazigama evaniana, Rubeni naga'mofo mopa megahie. <sup>7</sup> Hagi Rubeni naga'mofo mopama ome atresirera, zage hanati kazigati evuno zage fre kazigama evaniana Juda naga'mofo mopa megahie.

<sup>8</sup> Hagi Juda naga'mofo mopa atuparera, zage hanati kazigati evuno zage fre kazigama evaniana, ruotge musezane huta mopa regorintesageno megahie. Hagi ana mopamofo zaza'amo'ene atupa'amo'enena mago'a mopama regorinazankna huno mago avamenteke 90 kilomita hugahiankino, ana mopa atupamo'a zage hanati kazigati vuno zage fre kaziga uhanatigahie. E'ina hanigeno ana mopamofo amu'nompi mono nona megahie. <sup>9</sup> Hagi ana mopamofo amu'nompima Ra Anumzamofoma regorimisaza mopamofo zaza'amo'a 90 kilomita hinkeno, atupa'amo'a 36 kilomita hugahie. <sup>10</sup> Hagi ana mopafinti'ma pristi vahetmima regorizmisaza mopamofo zaza'amo'a noti kaziga 90 kilomita hina, upa'amo'a zage fre kaziga 36 kilomita hina zage hanati kaziga 36 kilomita hina, sauti kaziga zaza'amo'a 90 kilomita hugahie. E'ina hanigeno Ra Anumzamofoma ra mono nomo'a amu'nompi megahie. <sup>11</sup> E'i ana mopafima manisazana Sadoki nagapinti'ma fore'ma hu'nеназа pristi vahetaminke manigahaze. Na'ankure Israeli vahе'mо'за mago'a Livae naga'mo'за hazaza hu'за natre'за namefira huonami'за, nagrira navariri fatgo hu'naze. <sup>12</sup> Hagi pristi vahetmima regori zami'naza mopamo'a ruotge hugahiankino, Livae vahе'mokizmi mopamo'ma ome atre atupareti pristi vahera mopa regori zamigahaze. <sup>13</sup> Hagi Livae naga'ma regori zamisaza mopamofo za'za'ane atupa'amo'enena, pristi vahetamimofo mopanana magozahu hugahie. Hagi anantarega mopamofo za'za'amo'a 90 kilomita hinkeno, atupa'amo'a 36 kilomita hugahie. <sup>14</sup> Hagi magore huta pristi vahе'motane Livae vahemota ama ruotge'ma hu'nea mopa zagonera otrege mago'a zantera nona huta vahera ozamitfa hugahaze. Na'ankure ama ana mopamo'a ruotge hu'neakino, Ra Anumzamofoma mopa megahie. <sup>15</sup> Hagi ana ruotge'ma hu'nea mopafina sauti kaziga mago mopa regorintegahazankino, zaza'amo'a 90 kilomita hanigeno, atupa kaziga'amo'a 18 kilomita hugahie. E'i ana mopamo'a ruotgera osugosianki, ruga'a Israeli vahе'mо'за ana mopafina amne nona negi'za hoza antegahaze. Hagi e'i ana mopamofo amunompi rankumara megahie. <sup>16</sup> Hagi ana rankuma'mofona 4'a asopa me'nigeno, ana maka asopamo'a 16.2 kilomita huno magozahu hugahie. <sup>17</sup> Hagi ana rankumamofona megi'a hozama antesaza mopama meno kagi'nia mopamofona rama hu'amo'a 900 mita hugahie. <sup>18</sup> Hagi rankumamofoma zage hanati kaziga mopafine, zage fre kaziga mopafinena Jerusalemi kumapima manisaza vahе'mо'за hoza antegahaze. Hagi ana mopararemofa zazaznimo'a 36 kilo mita hanigeno, atupazanimo'a 18 kilomita hutere hugahie. <sup>19</sup> Hagi mago mago Israeli nagapinti'ma e'za rankumapima eri'zama emeneri'za manisaza vahе'mо'за ana mopafina hoza antegahaze. <sup>20</sup> Hagi ana maka erinte ruotge'ma hu'nea mopamofo za'za'amo'ene atupa'amo'enena, magozahu

huno 90 kilomita hugahiankino ana mopamofo agu'afi ran kumara megahie.

### *Ugagota kva ne'mo'ma mopama eri'nea naneke*

<sup>21</sup> Hagi erinte ruotge'ma hu mopafima ran kumama mesia mopamofo zage hanati kazigane, zage fre kazigama amnema me'nia mopa kini ne'mofo mopa megahie. Hagi zage hanati kazigama Jodani tinte'ma vu'nea mopane, zage fre kazigama Medeterenia Hagerinte'ma vu'nea mopamokea, noti kazigati uramino sauti kazigama vu'neana 90 kilo mita hutere hu'na'e. <sup>22</sup> Hagi kini ne'mofo mopamo'a Livae vahe'mokizmi mopane rankumama mesia mopamo'a rure megahie. Hagi ana hanigeno kini nemofo mopamofo agema'amo'a noti kaziga Juda nagamofo mopare ome atre'nigeno, sauti kaziga Benzameni naga'mofo mopare ome atregahie.

### *Ruga'a Israeli naga'mozama mopama eri'naza zamofo naneke*

<sup>23</sup> Hagi ruga'a Israeli naga'mo'za amana hu'za nagatenofitera hu'za mopa refko hu'za erigahaze. Hagi kini ne'mofo mopama sauti kazigama ome atretetira, zage hanati kazigati evuno zage fre kazigama evaniana, Benzameni naga'mokizmi mopa megahie. <sup>24</sup> Hagi Benzameni naga'mofo mopama ome atresiretira, zage hanati kazigati evuno zage fre kazigama evaniana, Simioni nagamofo mopa megahie. <sup>25</sup> Hagi Simioni naga'mofo mopama ome atresirera, zage hanati kazigati evuno zage fre kazigama evaniana, Isaka naga'mofo mopa megahie. <sup>26</sup> Hagi Isaka naga'mofo mopama ome atresirera, zage hanati kazigati evuno zage fre kazigama evaniana, Zebuluni naga'mofo mopa megahie. <sup>27</sup> Hagi Zebuluni naga'mofo mopama ome atresirera, zage hanati kazigati evuno zage fre kazigama evaniana, Gati naga'mofo mopa megahie. <sup>28</sup> Hagi Gati nagamofo mopa atumpamo'a sauti kaziga Tamari kumateti agafa huno Mariba tinte Kadesi kumate vuteno, Isipi tinkraho avaririno vuno Medeterenia hagerinte uhanatigahie. <sup>29</sup> Ama ana mopa Israeli naga'mokizmi refko huta zamisage'za, eri santihare'za manigahaze huno Ra Anumzana Mikozama Kegava Hu'nea Anumzamo'a hie.

### *Jerusalemi rankuma kafantamimofo naneke*

<sup>30</sup> Hagi ama'i rankumapinti'ma atiramiza esaza kuma kafantaminkino, noti kaziga kuma keginamofo zaza'amo'a 2 tausen 250 mita hugahie. <sup>31</sup> Hagi ana kumamofona 12fu'a kafa megahiankino, mago mago kafanteria 12'a Israeli naga'mofo zamagi metere hugahie. Hagi noti kaziga 3'a kafa megahiankino, ese kafanteria Rubeni agi mesigeno, anante kafanteria Juda agi mesigeno, namba 3 kafanteria Livae agi megahie. <sup>32</sup> Hagi zage hanati kaziga kuma keginamofo zaza'amo'a 2tausen 250mita hanigeno, 3'a kuma kafa megahie. Ese kafanteria Josefe agi mesigeno, anante kafanteria Benzameni agi mesigeno, namba 3 kafanteria Dani agi megahie. <sup>33</sup> Hagi sauti kaziga kuma keginamofo zaza'amo'a 2 tausen 250 mita hanigeno, 3'a kuma kafa megahie. Ese kafanteria Simioni agi mesigeno, anante kafanteria Isaka agi mesigeno, nampa 3 kafanteria Zebuluni agi megahie. <sup>34</sup> Hagi zage fre kaziga kuma keginamofo zaza'amo'a, 2tausen 250 mita hanigeno, 3'a kuma kafa megahie. Ese kafanteria Gati agi mesigeno, anante kafanteria Asa agi mesigeno, namba 3 kafanteria Naftali agi megahie. <sup>35</sup> Hagi ana rankuma keginama rugagi'nea zaza'amo'a ana makara 9 tausen mita hugahie. Ana hina e'i ananknareti'ma agafama huno'ma vaniana, ana rankumamomofo agi'a, Ra Anumzamo'a Amafi Mani'ne hu'za agi'a ahegahaze.

## Daniel Danieli Avontafere

*Danieline mago'a nehazave naga'ma zamavare'za Babilonima vu'naza  
zamofo naneke*

<sup>1</sup> Juda kini ne' Jehoiakimi'ma 3'a kafuma kinima nemanigeno'a, Babiloni kini' ne' Nebukatnesa'a Jerusalemi kumate vahe ha' eme huzmante'naku sondia vahe zaga'ane eno Jerusalemi kumara eme avazagi kagi'ne. <sup>2</sup> Hagi Ra Anumzamo'a Nebukatnesa azampi Juda kini ne' Jehoiakimina avrentegeno azenerino, Anumzamofo ra mono nompima eri'zama eneriza zantamienena eri'ne. Ana huteno erino Babiloni vuno, havi anumza'amofo mono nompima fenozama nentazafi omente'ne. <sup>3</sup> Ana huteno kini ne' Nebukatnesa'a, agri nompima eri'zama eneriza vahete'ma ugotama huno kegavama hu'nea ne' Aspенасина huntено, Israeli kini ne'mofo nagapinti'ene Juda kva vahe'mokizmi nagapintira, <sup>4</sup> vunka kasefa vahe'ma zamafuhe zamafahе'ma osu'nesiane, hiranto zamavugosa huzmante'nesiane knare antahi'zampima avite'nesazane, maka antahintahi'zama rempi hu'za antahi'zantema knare hu'nesazane, maka nanekema ame hu'za antahiam'a'nehu'za, kini ne'mofo nompima eri'zama eri antahi'zama ani'ma hu'nesaza nahezaverami, ome zamavarenka enka Babiloni vahe'mokizmi zamagerura rempi hunezaminka, avoma kreno hampri'zana rempi huzamio huno hunte'ne.

<sup>5</sup> Nehuno kini nemo'a huno, Maka zupa nagri nompinti knare zantfama hu'nea ne'zane waini tinena negahaze huno huzmante'ne. Ana nahezaveramina 3'a kafufi rempia huzamitesnаге'za, henka ufre'za kini ne'mofo eri'zana erigahaze. <sup>6</sup> Ana vahe amunompina, Juda naga'nofipinti nehazaveramina, Danieli'ma, Hanania'ma, Misaeli'ma, Azariaki hu'za mani'naze. <sup>7</sup> Hanki ugota kva ne' Aspенеса'a ana nagara ru zamagima ante zami'neana amanahu hu'ne. Danielinkura Belsasa'e nehuno, Hananankura Setraki'e nehuno, Misaelinkura Misaki'e nehuno, Azariankura Abetnego'e huno za-magia antezami'ne.

<sup>8</sup> Hianagi Danieli'a Anumzamofo avure'ma agra'ama azeri pehenama hu'zanku, kini ne'mofo nompinti'ma ne'zane waini tinema negahazema huno'ma hia nanekegura Aspенасина antahigeno, knare natresankena kini ne'mofo nompintira ne'zana onegahuo huno antahige'ne. <sup>9</sup> Hanki anante Anumzamo'a Aspенаси агу'afina asunku'za antentegeno, Danielina asunku hunenteno aza hunaku hu'ne. <sup>10</sup> Hianagi Aspенаси аманаже huno Danielina asami'ne. Nagra kini nekura koro nehue. Na'ankure agra'a huhamprino e'inahu e'inahu ne'zane tinena negahaze huno huham-prи'ne. Ana hu'neankino tamagri tamavufgamo'a hariri huno, mago'a tamagranema e'naza nehazavemokizmi zamavufaga gna'ma osanigeno'a, kini ne'mo'a nananke rukafrigahie. <sup>11</sup> Anante kini ne'mo'a huntegeno, Danielima, Hananiam, Misaelinema, kegavama huzmante'ne a ne' Aspенаси а mago eri'za ne' huntegeno Danieli'a amanage huno asami'ne. <sup>12</sup> Muse hugantoanki eri'za vahekamota avame antenka, 10ni'a knamofo агу'afina, hozafi ne'zane, kasefa tine tamigeta namneno. <sup>13</sup> Hagi 10ni'a knama evutesigenka, kini ne'mofo nompinti'ma ne'zama nenaza nehazavemokizmi zamavufaga negenka, tagri tavufga negenka hutenkа, henka nazano kagri eri'za vahe'motama hurante'naku'ma hanana zana amne hugahane.

<sup>14</sup> Higeno anama kegavama huzmante'nea ne'mo'a anagema haza nanekerera mago arimpa nehuno, 10ni'a knafi avamera anteno zamage'ne. <sup>15</sup> Hagi 10ni'a knama evutegen'o'a, kegavama huzmante'nea ne'mo'a zamageana, Danieline 3'a nagamokizmi zamavufagamo'a masavenke huno knare zantfa nehuno, kini ne'mofo nompinti'ma ne'zama nenaza nehazaveramina zamagatere'ne. <sup>16</sup> Ana higeno kegavama huzmante'nea ne'mo'a, knare'nare ne'zane waini tinema zamio huno'ma kini ne'mo'ma hu'neana netreno, hozafi ne'zane kasefa tine zaminu vu'ne.

<sup>17</sup> Hanki Danieline ana 3'a nehazave nagara Anumzamo'a antahinhahi'zane ama' antahi'zanena zamige'za, avontafepima ruzahu ruzahu nanekema krente'nazana rempi huvagare'za ana maka antahi'naze. Ana nehazageno ruzahu ruzahu avanagna zane, ava'namofo agafa'a eriama hu antahi'zana Anumzamo'a Danielina ami'ne. <sup>18</sup> Hagi kini ne'mo'ma knama ante'nea knamo'a ehanatigeno, kini nemo'a ana nehazaveramina zamavreta efreho huno higeno, kini ne'mofo eri'za vahete kva ne' Aspenasi'a zamavreno kini ne' Nebukatnesa avuga vu'ne. <sup>19</sup> Ana higeno kini ne'mo'ma ana nehazaveraminenka keagama huno zamageana, Danieli'ma, Hanania'ma, Misaeli'ma Azari'enema hazankna vhahera magore huno omanine. Ana higeno kini ne'mo'a zamavarentege'za agri'ma antahintahima ami' eri'za vahet mani'naze. <sup>20</sup> Kini ne'mo'ma ana 4'a nehazaveramima, knare antahintahine, ama' antahi'zanku'ma zamantahigeno'ma keana, maka Babiloni mopafima antahi'zane vahet'ene, kagu'vazama erifore'ma nehaza vahet'ene, zagoma neraza vahet'ene kini ne'mofoma antahi'zama nemiza vhahera razampi ruzmagatere'naze. <sup>21</sup> Hagi Danieli'a ana eri'zama'a erino nevigeno vuno, Sairusi'ma erigafa huno Babiloni kinima mania kafure uhanati'ne.

## 2

### *Nebukatnesa'ma ava'nama ke'nea zamofo naneke*

<sup>1</sup> Hagi Nebukatnesa'ma nampa 2 kafuma kinima mania kafufina, mago'a ava'naramina ke'ne. Ana avanaramima keteno'a tusi antahintahihakare nehuno avura omase'ne. <sup>2</sup> Anama huteno'a ana ava'namofo agafa'ama eme eriama'ma hanazegura, zamavune vahet'ene, zamema nentaza vahet'ene, henkama fore hania zanku'ma kasnampagema nehaza vahetegane Kaldia vaheteganena kea atregeno vuno eno hu'ne. Hagi ana kea antahi'za kini ne'mofo avuga emeri atru hutazageno, <sup>3</sup> Kini ne'mo'a amanage huno zamasami'ne, Nagra mase'ne'nha mago ava'na kete'na, ana avanama ke'noa zankura inankna avana ke'noeha hu'na antahintahihakare hu'noe. <sup>4</sup> Hige'za ana Kaldia vahet'ene za amanage hu'za Arami vahet'ene zamagerupinti kenona'a hunte'naze. Kini ne'moka za'zate kinia maninka vugahane. Ana hu'nego kagri eri'za vahet mani'nonanki, ana ava'na huama hugeta nentahita, ana ava'namofo agafa'a eriama huta kasamineno!

<sup>5</sup> Hianagi kini ne'mo'a ana Kaldia vhahera amanage huno zamasami'ne. Nagra tamage hu'na tamasamuankita, ana ava'nafima ke'noa zama onasamita, ana avana'mofa agafa'ama eri ama'ma huta onasami'nazana, vahet huzmante'nuge'za tamagrira tamahe'za rukafri kafro hutregahaze. Ana nehu'za tamagri nona tapage tapagu hu'za magopi eri hihi hugahaze. <sup>6</sup> Hianagi ana ava'nafima ke'noa zama nenasamita, ana ava'namofo agafa'ama eri ama'ma huta nasamisage'na, nagra rama'a museza nerami'na rantamagi tamigahue. E'ina hu'nego menina ana avanamofo agafa'a eriama huta nasamaho.

<sup>7</sup> Hagi mago'ene ana vahe'mo'za kini nera amanage hu'za asami'naze. Hagi kini ne'moka, ana avanaka'a huama hunka kagri eri'za vahe'mota tasamitegeta antahiteta, ana ava'namofo agafa'a huama huta kasami'neno. <sup>8</sup> Hazageno kini ne'mo'a amanage hu'ne, tamagrama antahi'zana zate nanekeea huta avazu huta nevanukeno, ko'ma huvempama hu'nea nanekeea atreno antahintahi'a rukrahe hugahie huta nehaze. <sup>9</sup> Hagi ana ava'nafima ke'noa zamofo agafa'ama eri ama'ma huta onasamineg'e'na, mago avamenteke knazana tamigahuema hu'noa kegu tamagesa nentahita, tamagra mago tamarimpa huta, antahintahi'a rukrahe hugahie huta havige huta nagrira renavatga nehaze. Ana hu'negu menina ana avana kema nasami'nage'na antahisuna, ana avana'mofo agafa'anena eri ama huta nasamigahaze hu'na hugahue. <sup>10</sup> Hanki ana Kaldia vahe'mo'za kini ne'mofona amanage hu'za kenona hunte'naze. Kini ne'moka tagriku'ma hihoma hunkama hana zana, magore huno ama mopafima mani'nea vahe'mo'a huamara huno onkasamigahie. Kini ne'moka ko'ma ama mopafima hankavenentake hu'za ra zamagima eri'za mani'naza kini vahe'mo'za, e'inahu agenoka zamavune vahe'ma, zameema nentaza vahe'ma, henkama fore hania zanku'ma huama nehaza vahe'mokizmia zamantahi onke'nazankna agenoka kagra tantahinegane. <sup>11</sup> Kini ne'moka tagri'ima tantahimagana zama eri ama'ma hu'amo'a, tusiza huno amuho tavesie. Ana hu'neankin'o mago vahe'mo'a eri amara huno onkasamigahianki, vahe'enena nomaniza anumzantamimoke ana zana eri amara hugahie. <sup>12</sup> Kini nemo'ma ana nanekema nentahino'a, tusi arimpa nehegeno, Babiloni mopamofo agu'afima antahi'zane vahe'ma mani'naza vahera zamahe hana hihogu sondia vahera huzmante'ne. <sup>13</sup> Antahi'zane vahe'ma zamahe fri nanekemo'a mago kasege efore hige'za, antahi'zane vahera zamahe hana hunaku vu'za e'za hu'naze. Ana nehazage'za mago'a vahera huzmantazage'za Danieline 3'a nagara ome hake'za zamahe frinaku vu'naze.

<sup>14</sup> Hanki kini ne'mofo avate'ma kegavama nehaza sondia vahete kva ne' Arioku'a, Babiloni mopamofo agu'afima antahi'zane vahe'ma mani'naza vahera zamahe fri'naku vu'ne. Anama nehigeno'a Danieli'a knare antahi'zama'areti Arioku'enena keaga hu'ne. <sup>15</sup> Danieli'a amanage huno Arioku'ha antahige'ne. Na'ane huno kini ne'mo'a e'ina hu hankave kasegea anakino, antahi'zane vahera zamahe frigahue huno nehie? Anagema higeno'a Arioku'a anazamofo agafa'a eriama huno Danielina asami'ne.

<sup>16</sup> Anante Danieli'a ame huno kini nete vuno, Osi'a kna namineg'e'na ana ava'namofo agafa'a eriama hu'na kasami'neno huno ome antahige'ne. <sup>17</sup> Ana kerera kini ne'mo'a hu i'zo higeno, Danieli'a noma'rega vuno 3'a afuhe'ina Hananiane, Misaheline, Azaria kizmia ana nanekeea omerinte ama huno nezmasamino, <sup>18</sup> amanage hu'ne, monafinkama mani'nea Anumzamofontega nunamu hanunkeno, agra asunku huneranteno ana ava'namofo agafa'a erinte ama huno tasami'nie. Anama hanigeno'a tagri'ene, ruga'a knare antahi'zane vahe'ma Babilonima mani'naza vahe'enena kini ne'mo'a tahe ofrigahie huno hu'ne.

<sup>19</sup> Hagi ana kenagera Danieli'a mase'negeno, Anumzamo'a ana ava'hane, ana avanamofo agafa'a, ava'nagna zampi erinte ama huno averi hu'ne. Anama higeno'a monafinkama mani'nea Anumzamofo agi'a Danieli'a ahentesga huno, <sup>20</sup> amanage hu'ne, Maka kna Anumzamofo agi'a ahentesga huvava hugahune. Na'ankure knare antahi'zane, maka hankavenena

Anumzamofopinke me'ne. <sup>21</sup> Ama mopafima ruzahu ruzahu knama fore'ma nehiana, Anumzamo Agrake higeno fore nehie. Agrake kini vhahera azeri fore nehuno, azeri netreno nehie. Ana nehuno Agrake knare antahi'zana vahe'mofona amigene ama' antahi'zana enerie. <sup>22</sup> Framakino oku'ama me'nea zana Anumzamoke eri ama huno vhahera nezamasamino, masare nemania Anumzankino hanimofo agu'afima me'nea zana keno antahino hu'ne. Ana hu'neankino Agra masafi nemania Anumza mani'ne.

<sup>23</sup> Nagri nagehe'mokizmi Anumzamoka muse hunegante'na Kagri kagia ahentesga nehue. Na'ankure knare antahi'zane, hankavenena Kagra nenamine. Ana nehunka kini ne'mofo ava'nagu'ma nunamuma hutama kantahigona zana, Kagra eri ama' hunka nasami'ne.

*Kini ne'mo'ma ke'nea ava'namofo agafa'ama Danieli'ma eriama hu'nea  
naneke*

<sup>24</sup> Hagi anante kini ne'mo'ma Babiloni mopamofo agu'afima knare antahi'zane vahe'ma mani'naza vahe'ma vunka zamahe frio huno'ma hunte'nea ne' Ariokunte Danieli'a vuno, amanage huno ome asami'ne. Knare antahi'zane vahe'ma Babiloni mopamofo agu'afima mani'naza vhahera kagra zamahe ofrinka nezman trenka navrenka kini nete vuge'na, kini ne'mofo ava'na ome eriama hu'na asami'neno. <sup>25</sup> Anante Arioku'a, Danielina ame huno avreno kini nete vuno, amanage huno kini nera ome asami'ne. Juda nagapinti vene'nema kinama eme hu'naza nagapintira mago nera ama hakena avre'na oankino, kagrama ke'nana ava'namofo agafa'a erinte ama huno kasamigahie. <sup>26</sup> Anante kini ne'mo'a amanage huno Danielina mago agi'a Belsasana antahige'ne. Nagrama ava'hafima ke'noa zana nenasaminka, ana ava'namofo agafa'a eri amara hunka nasamigahano? <sup>27</sup> Anagema higeno'a Danieli'a amanage huno kini nera asami'ne. Mago antahi'zane vhahemo'o, amema nentea vhahemo'o, avune vahe'mo'o, henka fore hania zanku'ma kasnampa nanekema nehaza vahe'mo'za, anama ke'nana ava'namofo agafa'a erinte ama hu'za kini nemoka kasamigara osu'naze. <sup>28</sup> Hianagi monafinkama mani'nea Anumzamo, fra'ma kino oku'ama me'nea zana eri fore nehia Anumza mani'neankino, Anumzamo'a henkama fore hania zamofo sipakare'ma masenankeno'a ava'nafi kini ne'moka eri kaveri hu'ne. <sup>29</sup> Hagi kini ne'moka kagrama mase'nenkama ava'nama ke'nanagan, henkama fore'ma haniazza ke'nane. Ana hu'neankino oku'ama framakino me'nea zama erifore nehia Anumzamo, ana ava'na eri kaveri hu'ne. <sup>30</sup> Hagi ama ana ava'namofo agafa'ama eriama'ma huno nagri'ma nasami'neana, nagra mago'a antahi'zane vhahera zamagatere'na, antahi'zana eri'nogu huno anara osu'ne, i'o. Anumzamo ana ava'namofo agafa'a nasami'neanki'na, huama hanugenka ava'na kamofo agafa'a antahi ama' hugahane.

<sup>31</sup> Hagi kini ne'mokama ava'nama ke'nampina, mago ne'mofo amema'a kavuga oti'negenka ke'nane. Ana amema'amo'a tusizankna huno masinentake huno ruzahukna hu'negenka negenka tusi koro hu'nane. <sup>32</sup> Ana vahe amema'amofo aseni'a goliretike tro nehu'za, tare azantrene amimiza'a silvareti tro nehu'za, amukofareti'ma uramino amote'ma ome atre'neana, bronsireti tro nehuno, <sup>33</sup> arenareti'ma uram'i'nea agiararena ainireti tro hu'naze. Hagi agia'a ainireti'ene higo hapateti eri havia huza tro hu'naze. <sup>34</sup> E'i anama hunkama avanama negankeno'a, mago havea vahe'mo azampinti rutamana huot'reneki, agonafinti agra'a atamanasiteno eramino, ana vahe amema'amofo agiararema, ainireti'ene higo hapatetima eri haviamma

hu'za tro'ma hu'naza agia rarena rufuzafupetre'ne. <sup>35</sup> Ana higeno ana maka ainine, higo hapa'ene, bronsine, silvane, golinena magokage rufuzu-fupegeno, witima neharegeno zaho'mo eno, onoma'a magore huno otreno eme eri harafima huno viaza huno erino vu'ne. Hianagi anama eno ana vahe amema'ama rufuzafupea havemo'a, ra agona seteno maka ama mopa ruvite'ne.

<sup>36</sup> Hagi kini ne'moka e'inahu ava'na ke'nanankita menina ana ava'namofo agafa'a eriama huta kasamigahune. <sup>37</sup> Kini ne'moka, kagra maka kinia zam-agaterenka vugote'nane. Hagi monafinkama mani'nea Anumzamo kagrira kinia manio huno huhamprigenka kinia mani'nankeno hankavene rank-aginena kami'ne. <sup>38</sup> Ana nehuno kagrira hankavea kamigenka vahe'ene zaga kfane namaraminena kegava hu'nane. Ana hu'neankinka ana vahe amema'amofo aseni'ama golireti'ma tro hu'nagenka'ma kenanana, e'i kagra mani'nane.

<sup>39</sup> Hanki henka'a kagri kamefira mago kini ne' efore hugahiankino, ana kini ne'mofa hankavemo'a, kagri hankavea agateoregahie. Hagi anan-tera nampa 3 kini efore huno, maka ama mopa kegava hugahie. Ana hu'neankino agra ana vahe amema'ama bronsireti'ma tro'ma hu'nazankna hu'ne. <sup>40</sup> Hagi ana amefira nampa 4kini efore hugahiankino, han-kavenentake huno ainigna hugahie. Na'ankure ainimo'a maka'zana rufuzafu'nepeaza me'ne. Ana hu'neankino ainimo'ma maka'zama rufuza-funepeaza huno, ana kini ne'mo'a maka vahera hahu zamanteno za-mazeri haviza huvagaregahie. <sup>41</sup> Hagi ana ava'nafima ke'nanana, ana amema'amofo agia ainireti'ene higoreti'ene eri havia hu'za tro hu'naze. E'inama hu'neana, agafa'amo'a amanahu hu'ne. Ana kini ne'mo'ma kegavama hu'nesnia vahe'mo'za zamagrare zamagrare hu'za otitere huga-hazankino, mago'amoza aenigna huza hankavenetisageno, mago'amo'za hankave otigahaze. <sup>42</sup> Hagi ana vahe amema'amofo agia'a ainireti'ene higoreti eri haviamma hu'za tro hu'nagenkama ke'nana zamofo agafa'amo'a amanahu hu'ne. Anama efore'ma hania kini nemo'ma kegavama hania vahe'mo'za, mago kaziga hankave netiszage'za, mago kaziga hankavea otigahaze. <sup>43</sup> Ana vahe amema'amofo agiama ainireti'ene higoreti'ma eri haviamma hu'za tro'ma hu'nagenka'ma ke'nana zamofo agafa'amo'a amanahu hu'ne. Anama refko haza kini yahe'mo'za mofa'nezmi omeri emeri nehu'za, eri mago hunaku hanazanagi, zamagra magopina omaniga-haze. Na'ankure ainine higomo'enena ruohamprigaha'e.

<sup>44</sup> Hagi anankini vahe'mo'zama kinima mani'zama esnaza knafina, Monafinkama nemania Anumzamo'a mago kasefa kuma (Kindom) erifore hugahiankino, mago vahe'mo'a eri havizana osutfa huge, mago vahe'mo'a eno hara hunora ana kumara ohanaregahie. Ana hu'neanki'za Anumzamo'ma eri fore hania kumapima mani'snaza vahe'mo'za, mago'a kini vahera zamazeri fenkami atre vaganere'za, zamagra manivava hu'za vugahaze. <sup>45</sup> Kagrama ana ava'nafima kankeno'a, mago havea vahe'mo azanuti ruofregeneanki, agra'a frageramino ana vahe amema'ama ainireti'ene bronsireti'ene hapa'ene silvareti'ene golireti'ma tro'ma hu'naza vahe amema'ama rufuzafupe'nea havemofo agafa'amo'a e'inahu hu'ne. Hagi Ra agi'ane Anumzamo'a henkama fore'ma haniaza kini nemoka ava'nafi eri kaveri hu'ne. Ama ana ava'na tamage ava'na ke'nane. Ana hu'neankino amama eri fore'ma hu'na kasamuua kante anteno efore hugahie.

*Kini ne'mo Danielina muse hunenteno, museza ami'nea naneke*

<sup>46</sup> Kini ne' Nebukatnesa'a Danieli'ma hia nanekema nentahino'a, Danielina agiafi avugosaregati kepri huno umaseno husga hunenteno, ofane mna nentake zantamina erita eta eme kre mna vunteho huno vahera zamasami'nne.

<sup>47</sup> Hanki anante kini ne'mo'a amanage huno Danielina asami'ne. Tamagerfa huno kagri Anumzamo'a anumzamokizmi Anumza mani'neno, kini vahemokizmi Razami mani'neno, oku'ma me'nea zama eri fore'ma ne-hia Anumza mani'nene. Ana hu'neankinka ava'nama ke'noa ava'namofo oku antahi'zama'a emeri ama hunka nasami'nne. <sup>48</sup> Anante kini ne'mo'a Danielina eri'zama'afintira avre anagamutegeno Babiloni mopafina ugota kva ne' mani'ne. Ana nehuno kini nemo'a mago'a marerirfa musezan-tami Danielina nemimo, huntogeno Babiloni mopamofo agu'afima knare antahi'zane vahemana mani'naza vahera kegava huzmante'nne. <sup>49</sup> Hagi kini ne'mo'ma anama nehigeno'a Danieli'a kini nera antahigegeno, Satrakine, Mesakine, Abetnekonena huhampri zamantege'za, Babiloni mopafina mago'a eri'zantera kegava hu'naze. Ana nehazageno Danieli'a agra kini ne'mofo nompi mani'ne.

### 3

*Kini ne' Nebukatnesa'ma golire vahemana tro hu'nea zamofo naneke*

<sup>1</sup> Kini ne' Nebukatnesa'ma vahemana tro hu'neana zaza'amo'a 27ni'a mita higeno, kahesa'amo'a 3'a mita hu'neankino ana amema'a Babiloni mopafina Durae nehaza agupofi retru rente'nne. <sup>2</sup> Ana huteno ana vahemana amema'ama erinte ama hu'zupama vahemana esazegu'ma kini ne'mo'ma kema hu'neana, ugota kva vahemana, kiapu vahemana, gavana vahemana, antahintahima nemiza vahemana, kanisolo vahemana, zagoma kegavama nehaza vahemana, keagama refko nehaza vahemana ana vahemana zamaza Nehaza vahemana maka kamani eri'zama eneriza vahemana zamagi hu'ne. <sup>3</sup> Ana hutege'za ugota kva vahemana, kiapu vahemana, gavana vahemana, antahintahima nemiza vahemana, kanisolo vahemana, zagoma kegavama nehaza vahemana, keagama refko nehaza vahemana ana vahemana zamazama Nehaza vahemana maka kamani eri'zama eneriza vahemana, Nebukatnesa'ma ana vahemana amema'ama erinte ama'ma hunaku'ma hianknarerera emeri atru hute'za ana amema'amofo avuga otinaze. <sup>4</sup> Anama hutazageno'a kezamanetia vahemana otino, ranke huno amanage hu'ne. Kokankokati'ma e'naza vahemana, ru vahemana ru vahepinti'ma e'naza vahemana ruzamageru ruzamageru'ma neraza vahemana amama hanua nanekea antahita amage antebo. <sup>5</sup> Hagi tamagrama antahisageno, ufema nere'za, hapue nehaza zavenane laerie nehaza zavenane nehe'za, konkema nere'za, mago'a zavenane nehesagetama nentahisanuta, tamarena nereta kepri huta, kini ne' Nebukatnesa'ma golireti'ma tro'ma hunte'nea vahemana amema'arera monora hunteho. <sup>6</sup> Hanki iza'o ana vahemana amema'are'ma kepri huno renaren mono'ma huontesnia vahera, ame huta zamazerita haganama huno tusi tevema nerea kerifi zamasgafe atregahune. <sup>7</sup> Anagema hutege'za maka vahemana, kokankokati'ma e'naza vahemana, ru zamageru ru zamageru'ma neraza vahemana ufema, konkema, laeri zavenana, hapu zavenane mago'a zavenaramima nehage'zama nentahiz'za kini ne' Nebukatnesa'ma golire vahemana amema'ama tro'ma hu'nea zante zamarena re'za monora hunte'naze. <sup>8</sup> Hianagi mago'a Babiloni vahemana zanku kini nera eme asami'naze. <sup>9</sup> Kini ne' Nebukatnesana amanage huna'za asami'naze. Kini ne'moka, za'zate kinia

maninka vugahane! <sup>10</sup> Kini nemoka kagra mago kasegea amanage hunka huvempa hu'nane. Ufene, konkene, laeri zavenane, hapu zavenane mago'a zavenaramima nehesnagē'zama nentahisu'za, maka vahe'mo'za mopafi kepri hu'za zamarena nere'za, golireti'ma tro'ma hunte vahe amema'a monora huntegahaze hunka hu'nane. <sup>11</sup> Anage nehunka iza'o ana vahe amema'are'ma renama nereno, kepri huno mono'ma huontesnia vahera azeri'na hagana haganama huno tusi tevema nerea kerifi asagafe atregahue hunka hu'nane. <sup>12</sup> Hianagi 3'a Jiu nagara, Setrakima, Misakima, Abetnegoma hunka huhampari zamantanke'zama, Babiloni mopafima kvama mani'naza naga'mo'za, kini nemoka kagri kea ontahi'za, kagrama amage'ma nentana anumzantamina monora hunonte'za, golireti vahe amema'ama tro'ma hunka retruma rente'nana zante'enena monora huonte'naze.

### *Tevenefake kerifi Nebukatnesa'ma 3'a naga'ma zamasga fetre'naza naneke*

<sup>13</sup> Ana nanekema Nebukatnesa'ma nentahigeno'a tusi arimpa ahegeno, mago'a vahe huzmantegē'za vu'za, Setrakima, Mesakima, Abetnegoma hu'za ome zamavare'za agri avuga e'naze. <sup>14</sup> Azageno Nebukatnesa'a amanage huno ana nagara zamantahige'ne. Setrakigane, Mesakigane Abetnegogata, nagri anumzaramintē'ene, golireti'ma vahe amema'ama tro'ma hu'na retruma rente'noa zanterā monora huonte'nazema hu'za nehazana, e'i tamage nehazo? <sup>15</sup> Hanki menina tamagrama antahisanage'zama ufema nere'za hapue nehaza zavenane, lairie nehaza zavenama nehe'za, konkema nere'za, mago'a zavenanema nehesnagetama nentahisanuta, kepri huta tamagra tamarena nereta, golireti'ma vahe amema'ama tro'ma hunte'noa zanterā monora hunte so'e hiho. Hagi ana zante'ma mono'ma huontesnagē'na, hanuge'za tamagrira tamazeri'za hagana haganāma huno tusi tevema nerea kerifi tamasga fetregahaze. Anama hanage'na ina anumzamo nagri nazampintira tamagrira tamagu vazino ana tevenefake kerifintira tamaza hugahifi tamagegahue? <sup>16</sup> Anagema hige'za Setraki'ma, Mesaki'ma, Abetnego'za kini ne' Nebukatnesana amanage hu'za asami'naze. Kini ne'moka kagrama hana nanekerera mago kea huta tagra tagura ovazi-gahune. <sup>17</sup> Hagi kagrama hagana haganāma huno'ma tusi tevema nerea kerifima tagri'ma tasagafe atresnankeno'a, tagrama amage'ma nentona Anumzamo'a taza huno ana tevefintira tavrenetreno, kini ne'moka kazamp-intira tagu'vazino taza hugahie. <sup>18</sup> Hianagi tagrama amage'ma nentona Anumzamo'ma tazama osaniana, e'i ana zankure huta kagri anumzaramintē'ene vahe amema'ama golireti'ma tro'ma hunka retruma rente'nana zante'enena kepri huta monora huontegahune. <sup>19</sup> Hagi Setraki'ma, Mesaki'ma, Abetnego'za anagema hazageno'a, Nebukatnesana tusi arimpa ahegeno avugosamo'a rugrari'ne. Anama higeno'a huzmantegē'za hagana haganāma huno tusi tevema nerea tevea mago'ene hugrazageno 7ni'a zupa amuhoa huno, ko'ma amuhoma nehia avamena agatereno tusi amuho hu'ne. <sup>20</sup> Ana hutazageno Setrakima, Mesakima, Abetnegonena ome zamazeriza nofiteti anakite'za, hagana haganāma huno tusi tevema nerea kerifi zamasgafe atrehogu hankavenentake sondia vahe'a huzmantegē'ne. <sup>21</sup> Anagema hige'za ana 3'a nagara zamazeri'za, zaza kuke-nane, nakre kuzmine, kankri zamine mago'a kukanazminena zamavate maka me'nege'za nofiteti anakite'za, hagana haganāma huno tusi tevema nerea kerifi zamasgafe tre'naze. <sup>22</sup> Kini nemo'ma huzmantegē'za tevema mago'ene hugrazageno tusi amuhoma nehuno hagana haganāma nefifi, Setrakima Mesakima Abetnegoma hu'za zamasga fetre'naze. Hianagi anama zamasga fetraza sondia vahera hagana haganāma huno nerea

tevemo terasagege'za fri'naze. <sup>23</sup> Hagi Setrakima, Mesakima, Abetnegonemanofi'ma anakite'za hagana hagana'ma huno tusi tevema nerea kerifi zamasgafe atre'naza nofimo'a, me'nege'za ana tevemofo agu'afina mani'naze. <sup>24</sup> Anama hutazageno'a, kini ne' Nebukatnesa'a ana naga'ma nezamageno, antri huno o'netino antahintahima nemiza vahera amanage huno zamantahige'ne. Tagra 3'a vahe nofitetira anakiteta tevefina zamasga fetre'nompi? Anagema hige'za zamagra kenona hu'za, i'zo 3'a naga'mokizmi anara hu'none. <sup>25</sup> Hagi Nebukatnesa'a huno, Menima koana anakima zamante'nona nofimo'a zamagafina omanege'za, 4'a vahe ana tevemofo agu'afina mani'neza, mago hazenkea zamavufagarera omaneaza vano ne-haze. Hagi nampa 4 ne'ma ke'noa ne'mofo avu'avamo'a, anumzamofo mofavregna hu'ne. <sup>26</sup> Anagema higeno'a anante Nebukatnesa'a anama hagana hagana'ma nehia tevemofo kafante urava'o nehuno, amanage huno kezati'ne. Setrakigane Mesakigane Abetnegogata, Marerisa Anumzamofo eri'za vahe mani'nazanki, tevefintira atreta atiramita amare echo. Anagema hige'za Setraki'ma Mesaki'ma Abetnego'ma hu'za ana tevefintira atirami'za e'naze. <sup>27</sup> Anante ugota kva vahe'ma, kiapu vahe'ma, kini ne'mofoma antahintahima nemiza vahe'ma, gavana vahe'ma hu'za ana naga'mokizmire erava'oma hu'za kazana, tevemo'a zamavufaga oregeno, zamaseni zamazokara teorasagegeno, zaza kukena zamia tevemo'a tevararo'vararura osigeno, tevemofo mna'anena zamavufaga regatira ontahi'naze! <sup>28</sup> Anante kini ne' Nebukatnesa'a amanage huno hu'ne. Setrakima, Mesakima, Abetnegokizmi Anumzamo'a ankero'ama huntogeno eno eri'za naga'ama zamagu'ma vazia zankura, Agri agia ahentesga hanune. Na'ankure zamagra agrite zamentintia nehu'za, fri'zankura antahi amane hu'haze. Ana nehu'za nagrama ante'noa kasegegura koro nosu'za, ru anumzantera monora hunonte'za, zamagra'a Anumzanteke monora hunte'naze. <sup>29</sup> E'ina hu'negu menina mago kasege ante'na hvempa huankino, mago nagamo'o, mago kumate vahe'mo'o, ru zamageru ru zamageru'ma neranaza vahemo'zanema, Setrakima, Mesakima, Abetnego Anumzamofoma huhavizama huntensaza vahera, zamahe'za zamavufaga rutragatragu hutresnage'za frigahaze. Ana nehanage'za nozaminena tagana taganu vazi'za mopafi eri hihi hugahaze. Na'ankure mago anumzamo'a zamagri Anumzamo'ma hiazana huno, amage'ma nentesnia vahera agura ovazigahie. <sup>30</sup> Hagi kini ne' Nebukatnesa'ma anagema huteno'a, Setrakima, Mesakima, Abetnegogoma huno kasefa eri'za zamige'za, koma eri'naza eri'zana rugatere'za, Babiloni mopamofo agu'afina eri'zana eri'naze.

## 4

### *Nebukatnesa'ma ava'nafi mago tusizankna zafa ke'nea zamofo naneke*

<sup>1</sup> Kini ne' Nebukatnesa'a amanage huno avona kreteno, atregeno maka vahetegane, kokankoka mopafima nemaniza vahetegane, ru zamageru ru zamageru'ma neraza vahe'ma maka mopafima nemaniza vahetega vuno eno hu'ne. Maka'motarega musenkea atreramantoanki, tamarimpa frune maniho. <sup>2</sup> Nagra menima musema nehu'na tamasamisuana, Marerisa Anumzamo'ma kaguvezane avame'zama nagrite'ma eri naveri'ma hu'nea zanku tamasamigahue. <sup>3</sup> Agra Anumzamo'ma tagrite'ma eri taveri'ma nehia kaguva zamo'a, ruzahu huno hankavenentake hu'ne. Ana hu'neankino Agrama kegavama hania kumamo'a vaga ore mevava huno nevanigeno,

henkama forehu anante' ma hu'zama vanaza vahete'enena kegava huna vugahie.

<sup>4</sup> Nagra Nebukatnesa'na noni'afi mani so'e hu'na mani'nogeno, maka zago fenonimo'a knare zantfa hige'na muse hu'na mani'noe. <sup>5</sup> Hianagi mago kenagera, sipa'nire masene'na avanagna zama ke'noa zamo'a, nazeri nagogofeno vu'ne. <sup>6</sup> Ana hige'na ana ava'namofo agafa'ama eme eri ama hu'za nasamisaze hu'na, Babiloni mopafima knare antahi'zane vahe'ma mani'nazarega kea atrogeno vuno eno hu'ne. <sup>7</sup> Anama hutoge'za kagu'vazama eri fore'ma nehaza vahe'ma, zagoma neraza vaheki, ofuntamima nehampriza vahe'ma, henkama fore'ma hania zanku'ma kasnampa kema nehaza vahe'mo'za nagrite azage'na ana ava'nama ke'noa zamofo nanekea zamasami'noe. Hianagi magomo'e huno ana ava'namofo agafa'a eri amara huno onasami'ne. <sup>8</sup> Ana vahetamima evu vagaretazageno henkarfama e'neana, nagrama amage'ma nentoa havi anumzamofo agire'ma asamre'na Belsasa'e hu'na agima antem'i'noa ne'mofona, ruotage'ma hu'naza anumzantamimofo avamumo agrane mani'nea ne' Danieli'a efreno nagri navuga eme otige'na, <sup>9</sup> ana avanama ke'noa zamofo nanekea amanage hu'na asami'noe. Belsasaga ruzahu ruzahu antahi'zama eri'naza vahe'mokizmi ugota huzmantenka kegava huzmante'nana ne' mani'nane. Nagrama antahi'noana ruotage'ma hu'naza anumzantamimofo avamumo kagripina mani'neankinka, mago zamo'a kagritera frara okisanigenka, ana maka zana eri ama huvaga regahane. Ana hu'negu nagrama ke'noa avanama menima kasamisua ava'namofo agafa'amo'a, inankna hu'nefi eri ama hunka nasamio. <sup>10</sup> Nagra sipa'nire mase'nena amanahu ava'na ke'noe. Ama mopamofona amu'no amu'nompina, mago tusi zankna zafa za'za huno amunagamu mareri'negena ke'noe. <sup>11</sup> Hagi ana zafamo'a hagera hunka hankavenentake nehuno, za'za huno onagamu monafi mareri'nege'za maka kazigama ama mopafima mani'naza vahe'mo'za ke'naze. <sup>12</sup> Ana zafamofo ami'na ramimo'a knare'zantfa huno zagasefage nehigeno ragamo'a avite'neanki'za maka mani'naza vahemo'zane zagagafamo'zanena raga'a ne'naze. Ana zafamofo tonapinka afi zagagafamo'za enemanizageno, namamo'za azankuna'afina e'za no eme ki'naze. Ana nehazage'za maka ama mopafi zagagafamo'za ana zafaretike ne'zana eme ne'naze.

<sup>13</sup> Hagi sipanire'ma mase'nena ana avanagna zampima kogeno'a, ruotge'ma hu'nea ankeromo mona atreno eramige'na ke'noe. <sup>14</sup> Ana ankeromo'a amanage huno kezati'ne. Ana zafa antagi atretma azankuna'aramina akafri akafro hunetreta, ani'na'aramina ru vatari atre vaganereta, raga'aramina eritma rupanani hutreho. Ana nehutma afi zagagafamo'zama e'za ana zafamofo tonapima eman'i'nazana zamorotgo nehuta, namamo'zama e'za azankuna'afima noma eme ki'za mani'nazana zamarotgo hinke'za hare'za freho. <sup>15</sup> Hianagi ana zafamofo agafa'ane rafuna'anena tasagira osutma atrenkeno mopafi me'nena trazamo'a hageno refinetenkeno, ainireti'ene bronsireti tro hu'nesnaza seninofi'nu anakinteho. Ana huteta atrenkeno fegi mani'nesnigeno, kenage'ma ata ko'ma tam'i'nia ko'mo agofetura runentesanigeno, agra afizaga kafane mani'neno trazana neno. <sup>16</sup> Hanki agra vahe antahi'zana e'orino, afi zagagafamofo antahi'za enerino mani'nesnigeno, 7ni'a kafumo'a evugateregahie. <sup>17</sup> Ama ana nanekema eri'za eme huama'ma hu'nazana, ruotage'ma hu'naza ankeromo'za ama anazana fore hugahie hu'za

huhankaveti'za eme huama hu'naze. E'ina hu'negu maka vahe'mo'zama ke'za antahi'zama hanazana, Marerisa Anumzamo maka ama mopa kegava hu'neankino, agi me'nesnia vahero, agi omne vahero amne huhampri antesnigeno kinia manigahie hu'za maka vahe'mo'za ke'za antahi'za hugahaze. <sup>18</sup> Hagi nagra kini ne' Nebukatnesa'na e'inahu ava'na ke'noanki, kagra Belsasaga ana ava'namofo agafa'a eri ama hunka nasamio. Na'ankure ruzahu ruzahu antahi'zane vahe'ma nagrama kegavama hu'noa mopafima mani'naza vahe'mo'za ana ava'namofo agafa'a eri amara hu'za nasamigara osu'naze. Hianagi kagra eri ama hunka nasamigahane, na'ankure ruotage'ma hu'naza anumzantamimofo avamumo kagrane mani'ne.

### *Danieli'ma ava'nagna zamofo agafa'ama eriama hu'nea zamofo naneke*

<sup>19</sup> Hanki ana ava'nagema huama higeno'a, Belsasa'a ko antahintahi'afina rezaganeno antahiteno, ana zamo'a azeri koro agesa higeno, ana ava'namofo agafa'ama eri ama hu'zankura koro nehuno, osi'a knafi akoheno mani'neno antahintahi hakare hu'ne. Ana'ma higeno'a kini nemo'a amanage huno asami'ne. Belsasaga ama ana ava'nagu'ene, ana ava'namofo agafa'ama eriama hunka nasamizankura kagogogura osuo. Anage higeno Belsasa'a kini nera asamino, ama ana ava'nafima ke'nana zantamimo'a kagritera efore osanianki, kagri ha' vahete efore hanie. <sup>20</sup> Hagi ava'nama ke'nampina mago zafamo'a hageno zaza huno hankavenentake huno anagamu monafi marerinegeno, ama mopafima maka kazigama mani'naza vahe'mo'za ke'naze. <sup>21</sup> Hagi ana zafamofo ani'naramimo'za knare'zantfa hu'za zagasefage hu'nageno, ama mopafima mani'naza maka vahe'mo'za nesaza avamente rama'a zafa raga rente'ne. Ana zafamofo tonapinka afi zagagafamo'za enemanizage'za, namaramimo'za azankuna'afina e'za no eme ki'za mani'nazagenka ke'nane. <sup>22</sup> Kini ne'moka ava'nafima ke'nana zafa, e'i kagra mani'nane. Na'ankure kagra mago hankavenentake kini efore hankeno, kagimo'a ame nagame monarega haruharu huno mareri'ne. Ana nehigenka ama mopafi vahera maka kagrake kegava huzmante'nane. <sup>23</sup> Hanki ana ava'nafima kankeno'a monafinkati mago ruotage'ma hu'nea ankeromo eramino amanage eme hu'ne. Ama ana zafa antagita eri haviza hutreho. Hianagi agafa'ane rafuna'anena tasagi huotreho. Ana nehutma ainireti'ene bronsireti'ma tro'ma hu'nesaza nofi'nu erita ana zafamofo agafa'arera anakiteta atrenkeno, me'nenigeno tra'zamo hageno kagino. Ana hu'nesnigeno kenage'ma ata ko'ma rania zamo, asenirera runtetere nehina, afi zagagafane mani'enigeno 7ni'a kafumo'a evu agatereno huno hu'ne.

<sup>24</sup> Hanki kini ne' ranimoka kagrite'ma fore hania zanku, Marerisa Anumzamo'a eme eri ama huno kaveri hu'neankino, ana ava'namofo agafa'amo'a amanahu hu'ne. <sup>25</sup> Kagra vahe'enena omaninka atrenka vunka afi zaga kafane umanigahane. Ana nehunka 7ni'a kafumofo agu'afina, bulimakao afu'mozama nehzaza hunka traza nenesnankeno, ata ko'ma kenage'ma runte'nea zamo'a, kasenirera runtetere hugahie. Ana nehanigenka anantega mani'enka kenka antahinka'ma hananana, Marerisa Anumzamo maka ama mopafi vahera kegava hu'neno, izano huhampri ante'naku'ma hanimofo, amne huhampri antegeno kinia nemanie hunka kenka antahinka hugahane. <sup>26</sup> Hianagi ankeromo'ma huno, Ana zafamofo agafa'ane rafu'nanena atrenkeno mopafima menoma huno hu'nea zamofo agu'agesamo'a amanahu hu'ne. Kagrama kenka antahinkama nehunka, monafinkama mani'nea Anumzamo Agrake maka zana kegava hu'ne

hunkama hanunka, ete kinia emaninka kegava hugahane. <sup>27</sup> E'ina hu'negu kini ne' Nebukatnesaga amama kasamisnua knare antahi'zana eri otro. Kagrama kumi'ma nehana zana netrenka, fatgo kavukva zanke huo. Ko'ma havi kavukavazama hu'nana zana kamefi huneminka, zamunte omane vahera kasunku huzamanto. Anama hanunka knare hunka nemaninankeno, nazanoma hanana zamo'a knare zanke huno vugahie.

### *Nebukatnesa'ma avanama ke'nea zamo'ma nena rgama efore'ma hu'nea naneke*

<sup>28</sup> Hagi ana maka zama Danieli'ma kini ne' Nebukatnesama asami'nea zamo'a agritera efore huvagare'e. <sup>29</sup> Hagi henka 12fu'a ikama avutegeno'a, mago zupa Babiloni kumapina kini ne' Nebukatnesa'ma noma'amofo agofetu'ma mani'neno zasi'ma eneria nonte vano hu'ne. <sup>30</sup> Hagi agrama keganti kegamama huno Babiloni ran kuma'ma negeno'a amanage huno hu'ne. Ama agima marerisa Babiloni kumara nagra hankavereti eri fore nehu'na, avasase'ane kumara kintoankino, kinima manisnua noni'amo'a ama ana kumapi megahie. E'ina hanigeno nagimo'a vuno eno hanige'za, maka vahe'mo'za antahi vagaregahaze. <sup>31</sup> Hianagi ana nanekema kini ne'mo'ma huvaga ore'negeno, monafinkati mago ageru'mo huno, kini ne' Nebukatnesaga ama nanekea antahio, amama kegava hu'nana mopa menina kagri kazampintira eri atroe. <sup>32</sup> Ana hanuge'za kavazu hutresagenka vahe'enena omaninka vunka afi zaga kfane umani'nenga, bulimakao afu'mozama nehzaza hunka traza negahane. Ana nehunka mani'nesnankeno 7ni'a kafumo evu agateresanigenka, kagrama kenka antahinkama hananana, Marerisa Anumzamo'a maka vahera kegava hu'neankino, izano huhampri antenaku'ma himofona huhampridente hunka hugahane. <sup>33</sup> Hanki anante nazano Nebukatnesanku'ma ankeromo'ma hu'nea zamo'a ame huno kini ne'mofo avate fore hige'za, vahe'enena omanisnue hu'za avazuhu atrazageno vuno, afi zagagafane umani'neno bulimakao'mo'zama nehzaza huno traza ne'ne. Ana nehuno mani'negeno kenage'ma ata ko'ma tami'nea zamo anu azokapina hampo kine. Ana nehuno anantega mani'negeno aseni azokamo'a zaza huno, tumpamofo azokakna nehigeno, agigo azankomo'a namamofo agigogna hu'ne.

### *Nebukatnesama Anumzamofo agima hentesga hu'nea naneke*

<sup>34</sup> Hanki ana knama evu vagaretege'na nagra Nebukatnesa'na, monafinka kesga hu'na kogeno, antahi'zanimo'a ete ege'na, Marerisa Anumzamofo agia husga hu'na monora hunente'na, mani vavama nehia Anumzamofona muse hunte'noe. Agra mani vava nehia Anumzankino, Agrama kegavama hania kumamo'a fore'ma hu anante anante'ma hu'za vanaza vahetera vagaore mevava huno vugahie. <sup>35</sup> Maka ama mopafima mani'naza vahe'mo'za amne zaga mani'naze. Monafi ankeromo'zane ama mopafi vahe'mo'za Agri agorga mani'naze. Ana hu'neankino nazano hunaku'ma hania zana, amne hugahiankino mago vahe'mo'a e'inara osuo huno hunonteno, na'ante amazana nehane hunora osugahie. <sup>36</sup> Hagi anankema nehugen'o' ame huno antahintahi nimo'a ete e'ne. Ana hige'na ete kinia emani'na knare nagine hankave ni'anena ete eri'noe. Ana huge'za ko'ma antahintahima nami'naza vahe'ene, nagranemama eri'zama eri'naza vahe'mo'za ete e'za nagrane emani'naze. Ana hige'na ko'ma kegavama hu'noa mopa ete kegava nehu'na, ko'ma kinima mani'nogeno'ma nagimo'ma hu'neama'a rugatereno amenagame mareri'ne. <sup>37</sup> Hanki menina nagra Nebukatnesana, monama

kegava hu'nea Anumzamofona muse hunente'na, Agri agia ahentesga nehu'na, ragi amigahue. Agrama maka zama hia zamo'a fatgo huno knare zanke nehie. Ana nehuno zamavufagama erisgama nehaza vhahera zamaz-eri fenkami netrea Anumza mani'ne.

## 5

### *Vahe'mofo azamo asarega avonkre'nea zama ke'naza naneke*

<sup>1</sup> Hagi mago'a kafuma evutegeno'a, Belsasa'a Babiloni kumatera kinia efore huno maniteno, mago zupa tusi'a ne'za negreno, agri agoragama mani'neza ranra eri'zama eneriza kva vahetamina 1 tauseni'a vahe kehige'za azageno zamagrane waini tina ne'ne. <sup>2</sup> Hagi Belsasa'a waini tima neno neginagima nehuno'a, ko'ma nefha Nebukatnesa'ma Jerusalemi Ra Anumzamofo mono nompinti'ma golireti'ene silvareti'ma tro'ma hu'naza kapuramima erino e'nea kapuramina eri'za esazegu huzmante'ne. Na'ankure agrane, agri agoragama eri'zama eneriza vahe'ane, a'nane'ane henkama eri'nea a'nane'ane ana kapuramimpi waini ti nenaku anara hu'ne. <sup>3</sup> Anagema hige'za Jerusalemia Anumzamofo mono nompinti'ma golireti tro'ma hu kapuramima eri'za e'naza kapuramina ome eri'za azage'za, kini ne'ene, agri agoragama eri'zama eneriza vahe'ane, a'nane'ane, henkama eri'nea a'nane'ana kapuramimpintira waini tina ne'naze. <sup>4</sup> Hagi ana kapuramimpinti'ma waini tima nene'za, golireti'ene, silvareti'ene, bronsireti'ene, ainireti'ene, zafareti'ene, havereti'ma tro'ma hunte'naza havi anumzazamimofo zamagi husga hu'naze. <sup>5</sup> Anama nehzageno'a, kini ne'mo'ma kesga huno noma'amofo asarega, tavi'ma rekru'ma hunentaza azotama me'nea tvaonte'ma keana, mago vahe'mofo azamo efore huno avona negregeno ke'ne. <sup>6</sup> Anama higeno kini nemo'ma negegeno'a, avugosamo'a ruzahne nehigeno, tusi koro hu'ne. Ana nehigeno agiamo'a ahirahi neregeno, zaferina'a omne'amne nehigeno, oti hankavetigara osu'ne. <sup>7</sup> Anama higeno'a kini ne'mo'a ruzahu ruzahu antahi'zama eri'naza vhahera kehige'za e'naze. Anante antahi'zane vahe'ma Babiloni kumapinti'ma e'naza vhahera amanage huno zamasami'ne. Iza'o ama avoma hamprino antahiteno, ana avomofo agafa'ama eriama huno nasamisnimofona, kini vahe'mo'zama nentaniza koranke zaza kukena antanintegahue. Ana nehu'na golireti trohu seni nofi anankempina antegahue. Ana hanugenog nagrama kegavama hu'noa mopafina nagri namefira nampa 3 kva ne' efore hugahie. <sup>8</sup> Kini ne'mo'a anage hutuge'za knare antahi'zane vahe'amo'za efretere hu'za ana avona ke'nazanagi, magomo'e huno ana avona hampriteno, ana avomofo agu'agesa'a eri amara huno asamigara osu'naze. <sup>9</sup> Hagi ana'ma hazageno'a kini ne' Belsasana mago'ene avugosamo'a ruzahne nehigeno, tusi koro hu'ne. Ana hige'za agri agoragama eri'zama eneriza vahe'mo'za na'a hugahune nehu'za tusi savri hu'naze. <sup>10</sup> Hianagi kini ne'mofo nerera'ma anazama fore hia zamofo nanekema nentahino'a, ne'zama nenaza nompi ame huno umarer'i'ne. Ana huteno Belsasana amanage huno ome asam'i'ne. Za'zate kinia maninka vugahananki, ana zankura antahintahi hakarea nehunka kamanogura osugeno, kavugosamo'a ruzahera osino. <sup>11</sup> Ama kegavama hu'nana mopamofo agu'afina mago ne' mani'neankino, ruotage'ma hu'naza anumzaramimofo avamu'mo agripina mani'ne. Ko'ma negafa Nebukatnesa'ma kinima mani'nea knafina, ana ne'mofona anumzaramimofo antahi'zamo'ma hiaza huno, antahintahi zama'amo'ene, knare antahi'zamo'ene ama' antahi'zamo'a agripina avite'nea ne' mani'ne.

Hagi negafa Nebukatnesa'a ana nera huhamprintegeno, Babiloni vahe'ma zagoma re'za negaza vahe'ma, ikante zاغere'ma ke avame'ma huza nanekema nehaza vahe'ma, zamene vahe'ma, ruzahu ruzahu antahi'zama eri'naza vahetera kegava huzmante'nea ne' mani'ne. <sup>12</sup> Hanki ana nera Danielikino, kini ne' Nebukatnesa'a agi'a eri rukrahe huno Belsasa'e huno antemi'ne. Ana ne'mofona ruzahu antahi'zamo'ene ama' antahi'zamo agripina avite'nea nekino, ava'nane kaguvazanena amne agafa'a eriamanéhuno, amuhoma hu'nea knazanena erioza nehie. Ana hu'neanki Danielinku hugeno eno anama ke'nana avomofo agafa'a eriamanéhuno kasamino. <sup>13</sup> Anagema hutege'za Danielina ome avre'za kini ne'mofa avuga azageno, kini ne'mo'a antahigeno, kagra Danieligema nehaza ne'ma Juda mopareti'ma nenfa kini ne' Nebukatnesa'ma zamavareno eno kinama huzmanteneva hepinti ne' mani'nampi? <sup>14</sup> Vahe'moza kagrikumänasamina zana, ruotage'ma hu'nea anumzaramimofo avamu'mo agrane mani'negeno, antahi'ama'ma hu' antahizamo'ene knare antahi'zamo kagripina avite'nea nere hu'za hu'naze. <sup>15</sup> Hagi asaregama kreinte'nea avomofo agafa'ama eme eri ama huta nasamaho hu'na knare antahi'zane vahe'ene kaguvazama eri fore'ma nehaza vahera kehuge'za e'nazanagi, ana avomofo agu'agesa'a eri amara hu'za onasami'naze. <sup>16</sup> Hianagi vahe'mo'za kagrikura eme nasami'za, maka zamofo agu'agesa'a eri ama nehunka, amuhoma hu'nesnia zanena eri fru hugahane hu'za hu'naze. E'ina hu'negu kagra ana avoma ke'noa avomofo agu'agesa'a eri ama hunka nasamisanke'na, husga hugante'na kini vahe'mo'za nentaniza fitunke kukena eri hankre negante'na, golireti trohu seni nofi knankempina antegantegahue. Ana nehu'na huhampri kantesugenka, nagrama kegavama hu'noa mopamofo agu'afina, nagri namefira nampa 3 kvane before hugahane. <sup>17</sup> Hagi anante Danieli'a kini ne'mofona kenona hunteno, nagri'ma namiku'ma hana muse zantamina kagraka'a erige, vahe zamige huo. Hianagi nagra anama ke'nana avona hamprite'na ana avomofo agu'agesa'a eri ama hu'na kini ne'moka kasamigahue.

*Danieli'a kini ne' Belsasa'ma ke'nea avomofo agu'agesa'a eriamanéhuno  
naneke*

<sup>18</sup> Hagi kini ne'moka antahio, Marerisa Anumzamo negafa Nebukatnesana huhampri antegeno, hankavenentake kinia before higeno, agimo'a haru haru huno vuno eno hu'nne. <sup>19</sup> Hagi Anumzamo'a azerintesga huno ra agi amigeno, ruzahu ruzahu zamavufagane vahe'ma, ru zamageru ru zamageru'ma neru'za kokankokama nemaniza vahe'mo'za, agrikura koro nehu'zma zamahirahiku hu'naze. Ana nehuno negafa'a hankave nekino, izano ahe frinaku'ma himofona ahe nefrino, izano atre'nugeno manisanie himofona atregeno nemanigeno, agra avesite ragima aminaku'ma himofona ra agia nemino, azeri fenkami atrenaku'ma himofona azeri fenkami netre. <sup>20</sup> Hianagi negafa'a avufga erisga nehuno, keontahi avu'ava'za higeno, Anumzamo'a kini tra'aretira avre atregeno, ragima e'neria zamo'a omanene. <sup>21</sup> Anumzamo'a vahe antahintahia eritreno afi zaga kfamofo antahintahia nemino, avre atregeno vahe'enena omanino vuno afi donki afutamine umani'neno, bulimakao afu'mozama nehzaza huno trazana neneno mani'negeno kenage'ma ru'nea ata ko'mo'a aseni azokapina runtetere nehigeno, agrama keno antahino'ma hiana Marerisa Anumzamo maka ama mopafi vahera agrake kegava hu'neno, izano avesinte'mofa huhamparintegeno kinia nemanie huno antahi'ne. <sup>22</sup> Hianagi kagra agi

mofavre Belsasaga ama ana zamofona ko kenka antahinka hu'nane. Hianagi kagra kavufga anteraminka omani'nane. <sup>23</sup> Ana nehunka kagrama musema hanazamo higenka, monama kegavama hu'nea Anumzamofo agi'a eri haviza nehunka, huzmantanke'za vu'za mono nomo afinti'ma eri'za e'naza kapua ome eri'za azagenka, kagri agoragama eri'zama eneri'za vaheka'ane a'naneraminka'ane, henka a'neraminka'ane ana kapufina waini tina ne'naze. Ana nehutma kaza osu havi anumzaramima silvareti'ene golireti'ene bronsireti'ene ainireti'ene zafareti'ene havereti'ma keaga on-tahi, avu onke, antahino keno osu havi anumzama vahe'mo'zama tro'ma huzmante'naza zantamimofo zamagi husga hu'naze. Hianagi kasimu'ma negamino, maka zama nehana zama kegava nehia Anumzamofo agia husga huonte'nane. <sup>24</sup> Ana hu'negu Anumzamo'a huntegeno mago vahe'mofo azamo eno ama ana avona asarega eme kregenka ke'nane. <sup>25</sup> Hagi amanahu avonkrente'negenka ke'nane, MENE, MENE, TEKEL, PAR SIN. <sup>26</sup> Hanki anama krente'nea kemofo agu'agesamo'a amanahu hu'ne. MENEMA hu'neana, hago hampari'ne hu'neankino, nama'a knama kinima manisnana kna hago Anumzamo'a hampri atupa hu'neankino menina vagare knaka'e. <sup>27</sup> TEKELIEMA huno krente'nea kemofo agu'agesamo'a, Maka kavukvara sigerire erinteno rezaganeno keana, kagri kavukvamo'a knare osigenka kinima maniga avamentera omani'nane. <sup>28</sup> PAR SINIEMA huno krente'nea kemofo agu'agesa'amo'a, Amu'nompinti refko hu'ne huno krente'ne. Ana hu'neankino Anumzamo'a kagrama kegava hu'nana mopa ko refko huno, mago kaziga mopa Midia vahe nezamino, mago kaziga mopa Pesia vahe zami'ne hu'ne. <sup>29</sup> Hagi anankema kini ne' Belsasa'ma antahiteno'a, huzmantege'za kema hu'nea kante ante'za, kini vahe'mo'zama nentaniza fitunke kukena eri hankrenente'za, golireti tro hu'naza seni nofi anankempina ante'nentazageno, Belsasa'a Danielinkura huama huno anage hu'ne, nagri namefira nampa 3 kva ne' menina efore hie. <sup>30</sup> Hianagi ana kenagera Midia sondia vahe'mo'za ran kumapi efre'za Babiloni kini ne' Belsasana ahe fri'naze. <sup>31</sup> Ana hutazageno Midia mopareti ne' Dariusi'ma 62'a kafu nehuno, agafa huno Babiloni moparera kinia manino kegava hu'ne.

## 6

### *Laionimofo kerifima Danielima avre vazi'naza naneke*

<sup>1</sup> Hanki Midia mopareti ne' Dariusi'ma kinima efore huno maniteno'a, anama kegavama hia mopa 120'afi mopa refakohu osi osi huteno, ana mopa kegava hutere hanazegu gavana vahe huhampri zamante'ne. <sup>2</sup> Hagi anama huhampri zamante'nea vahete'ma kegavama huzmantesnaza vhhera 3'a vahe huhampri zamante'ne. Ana 3'a vahe'ma huhampari zamante'nefina magora Danieli huhampari ante'neanki'za, kini ne'mofo zantaminte'enena zamagra kegava hugahaze. <sup>3</sup> Hanki anama huhampri zamante'nea vahepinha Danieli eri'zamo'a knare zantfa higeno, kini ne'mo'a negeno anama kegavama hu'nea mopamofo agu'afina hunte'nigeno ugota kva ne' manisniegu antahintahi retro hu'ne.

<sup>4</sup> Hagi anama huhampri zamante'nea kva vahe'mo'za, Danieli'ma kmani eri'zama eri haviza hanige'za nege'zama kini ne'ma ome asamisnaza kankamunku hake'nazanagi, onketfa hu'naze. Na'ankure Danieli'a fatgo nekino, eri'zama eri'neana tamage kazigatike e'nerino, mago zana eri havizana osu'ne. <sup>5</sup> Ana hu'negu ana kva vahe'mo'za mago zupa zamagra'a amanage hu'za hu'naze. Danieli eri'zampina mago havizana

keta eri forera osune. Ana hu'negu magoke kama me'neana, agrama Anumza'amofoma amage'ma nentea kasege'afi ufretta azeriteta keagafina avrentegahune. <sup>6</sup> Anagema hute'za ana kva vahe'mo'za eri vararumi'za kini nete vu'za, amanage hu'za ome hu'naze. Kini ne' Dariusiga za'zate kinia maninka vugahane! <sup>7</sup> Kagri'ma kaza huta eri'zama e'neruna kva vahe'ene, antahintahima negamuna vahe'ene, gavana vahe'mota maka mago trimpa huta, kini ne'moka kantahigonanki, knare hu izo nehunka mago kasege antenka huhankavetisnanke'za, 30'a zage gnamofo agu'afina mago vahe'mo'a, mago'mofontero, mago anumzantero, mago vahete'enena nunamuna osanianki, kagriteke monora hugantesaze. Hagi mago vahemo'ma ana kasegema rutagresia vahera avre atresnankeno laionimofo kerifi uramigahie. <sup>8</sup> E'na hu'negu kini ne'moka menina hananke'za ana kasegea avontafete kretesnagenka, ana avontera kazanko avona krentesnankeno, Midia vahete'ene Pesia vahetera mago kasege efore huno me'nesnige'za eri otregahaze. <sup>9</sup> Anagema hutazageno'a kini ne' Dariusi'a huzmantegie'za ana kasegea avontafete kretazageno, ana avomofo agofetura agra'a agi kreno eri vakakinte'ne. <sup>10</sup> Hianagi Danieli'ma ana kasegere kini ne'mo'ma agima krenteno eri hankavetia nanekema nentahino'a, koma nehiaza huno noma'arega vuno, noma'amofo agofetu'ma me'nea nomofo hunaragintepinka rena ome nereno, zaho eri kama Jerusalemi kazigama me'neana eri nagi hagaro hu'ne. Ana nehuno mago zagemofo agu'afima 3'a zupama nunamuma huno Anumza'amofoma susu huntetere'ma nehiaza huno nunamuna hu'ne. <sup>11</sup> Anante kini ne'mofo eri'za vahe'mo'zama kema anaki'naza kante amage ante'za magoka eri vararumi'za vu'za Danieli nonte ome kazana, Anumza'amo'ma azama haninogu nunamu nehige'za ome ke'naze. <sup>12</sup> Hagi ana vahe'mo'za kete'za kini nete e'za, Kagra kini ne'moka mago kasegea huhankavetinka, 30'a zagemofo agu'afina mago vahe'mo'a mago anumzante'ene mago vahetera nunamuna huonteno nagriteke nunamuna hugahie hunka nehunka, iz'a'o anama osania vahera azeri'na laionimofo kerifi atregahue hunka hunampi anagea osu'nane? Hazageno ana kenona kini ne'mo'a huno, Izo e'i Midia vahe'ene Pesia vahe'mokizmi kasege ko me'neankino, mago vahe'mo'e hunora eri otregahie. <sup>13</sup> Anante kini nera asami'za, Juda ne'ma kinafima eman'i'nea ne' Danieli'a kagri kasegea rutagreno amagera onte'ne. Ana nehuno agra'a Anumzamofotega mago zagegnamofo agu'afina 3'a zupa nunamuna nehie. <sup>14</sup> Hazageno kini ne'mo'ma ana kema nentahigeno'a arimpamo'a tusi kna nehigeno mani'neno, inankna hu'na Danielina aza hugahueha huno antahintahi hakare nehuno, mani'negeno ana zupa zagemo'a ufregeno kinaga se'ne. <sup>15</sup> Hagi kinaga zagema unefrege'za kini ne'mofo eri'za vahe'mo'za ete eri vararumi'za kini nete vu'za amanage ome hu'naze. Kini ne'moka kagra ko antahi'nane, Midia vahe'ene Pesia vahe'mo'za mago kasegema kini ne'mo'ma huhankaveti'nesnia kasegea mago vahe'mo'a ruotagregahie.

<sup>16</sup> Anagema hazageno'a kini ne' Dariusi'a huzmantegie'za vu'za Danielina ome avre'za laionimofo kerifi ome atre'naze. Ana hutazageno kini ne'mo'a Danielina asamino, Maka zupa kagu'areti'ma hunka agri eri'zama enerina Anumzankamo'a kaza huno kavresie. <sup>17</sup> Hanki Danielima retufe vazi'naza kerimofo avazarera mago have eri'za renkani rente'naze. Anante kini ne'mo'ene eri'za vahe'amo'za ana havemofo agofetura avame'zana zamagia krete'za fukireti rekamarente'naze. Na'ankure vahe'mo'ma Danielima eme avre atre'zanku anara hu'naze. <sup>18</sup> Ana'ma hute'za kini nemo'a marerisa nonkuma'arega atreno vuno umani'neno, ana kenagera ne'zana oneno,

ko'ma nehiazana huno eri'za vahe'a hige'za eme azeri musena osu'naze. Ana hazageno ana kenagera mani'neno avura omasetfa hu'n'e.

<sup>19</sup> Hanki nanterame kini nemo'a otiazamo, ame huno laionimofo kerima me'nerega vu'n'e. <sup>20</sup> Ana kerire'ma kini ne' Darius'i'ma uhanatiteno'a, tusi asunku nehuno amanage hu'n'e. Kasefa'ma huno mani'nea Anumzamofo eri'za ne' Danieliga, kagu'areti'ma hunka agri eri'zama erintenkama nevana Anumzamo'a kegava hugantege'za laionimo'za kahe'za one'nazafi? <sup>21</sup> Anagema higeno'a Danieli'a kenona huno, Kini nemoka knare hunka za'zate kinia mani vava hunka vugahane! <sup>22</sup> Nagri Anumzamo'a ankerio vahe'a huntogeno eno laioniramimofo zamagira eri hamunkige'za hazenkea onami'naze. Na'ankure Anumzamofo avurera hazeke'n'i'a oma-nege'n'a, kini nemoka kagri zana magora eri havizana osu'nogu anara hu'n'e. <sup>23</sup> Kini ne'mo'a tusi muse nehuno huzmanteg'e'za, Danielina ana kerifintira avre atre'naze. Magore huno Danieli avufga reohakanene. Na'ankure agra'a Anumzamofonte amentinti hu'negu anara hu'n'e. <sup>24</sup> Anante kini nemo'a hankavege huno vahera huzmanteno, Vuta Danielima havige hu'za kanivema rent'e'aza vahera ome nezamavareta, a'mofavre zaminena zamavareta vuta laionimofo kerifi ome zamaretufe vazihonu huzmante'n'e. Anage hige'za vu'za anazana ome hu'naze. Hianagi zahufa moparera uoram'i'nage'za, laionimo'za haru hu'za mareri'za zamazerite'za zaferi'nazamia anifunetagi'za taganataganu vaziza nenaze. <sup>25</sup> Hagi anante kini ne' Darius'i'a mago avona kreteno, atregeno kokankoka ana mopafima ru zamavufagane ru zamavufagane ru zamageru'en'e ru zamageru'en'e vahe'ma mani'narega nevigeno amanage hu'n'e, musenke atre ramantooankita knare huta tamarimpa frune manigahaze. <sup>26</sup> Maka ama nagrama kegavama hu'noa mopafi vahe'mota kasefa'ma huno mani'nea Anumzana Danieli Anumzamofonku korora hunteho. Na'ankure kasefa huno mani'neno, manivava nehia Anumzankino, agra kinia manivava huno nevanigeno, hankave'amo'a vaga oregahie. <sup>27</sup> Ana hu'neankino ana Anumzamo'a agra vahe'a zamagu vazino nezmareno, monafine mopafinena kaguva zane avame'zanena eri fore nehia Anumzankino, laionimofo hankavefintira Danielina aza huno avre'n'e. <sup>28</sup> Ana hutegen Darius'i'ma kinima mani'nea knafina, Pesia kini ne' Sairusi'ma kinima mania knafina, Danieli avatera mago zana fore osigeno knare huno mani'n'e.

## 7

### *Danieli'ma ava'nafi 4'a afi zagama ke'nea zamofo naneke*

<sup>1</sup> Hagi Belsasa'ma agafa huno Babiloni kinima efore'ma huno mania kafufina, Danieli'a mago zupa sipa'are mase'neno ava'nagnaza keteno amanage huno avona krente'n'e.

<sup>2</sup> Nagra Danieli'na kenage'ma mase'nena ava'nagna zama koana, ama mopafina maka asoparegatira zaho eazamo ra hagerina emeri kranto kranto hu'n'e. <sup>3</sup> Anama huteg'e'na koana, hagerimpintira 4'a tusizankna ruzahu ruzahu afi'zaga atiramiza e'naze. <sup>4</sup> Kotama atirami'nea afi zagamo'a laionigna higeno, tumpamofoma hiaza huno ageko'na hunte'n'e. Anama hute'za atrazageno'a vahe'mo'ma hiaza huno, tare agiareti mopare reno oti'n'e. Hagi ana afi'zagamofona vahe antahintahi ami'n'e.

<sup>5</sup> Anante nampa 2 afi'zagama koana beagna hu'neankino, agia mopafi reno oti'neg'e'na kogeno, mago zagamofona 3'a asoza zaferina agipi

haninkofi'ne. Anante antahugen mago vahe'mofo agerumo'a asamino, Otio! Otinka nama'a vahe'mofo avufgama nenaku'ma hanunka no hu'ne. <sup>6</sup> Anante nampa 3 afi'zagama ke'noana lepatigna higeno, amagenafina namamofoma hiaza huno 4'a agekona huntogeno, 4'a aseni hunte'nea zaga efore hige'na ke'noe. Ana higeno ana zagamofona mikazama kegavama hu hihamu hankavea ami'ne.

<sup>7</sup> Hagi anante kenage'ma ava'nagna zama kofina, magora nampa 4 afi zaga ke'noe. Ana zagamofona koro huga avugosa huntenegeno, hankavenentake hu'neno ainire ave hunte'neankino, ana aveteti ha'ma huntaza vahera anintrantru huno neneno zamatreva he'nenena agianutu maka rentrantru ahe vagare'ne. Ana zagamo'a 3'a afi zagagafa zamagatereno ruzahu hu'neankino, 10ni'a pazive asenifina hunte'nege'na ke'noe. <sup>8</sup> Hanki ana zagamofo 10ni'a pazivetamima negogeno'a, ana pazivemokizmi amu'no zamifintira ame huno mago osi pazive mareri'ne. Ana pazivemo'a ko'ma me'nea 3'a pazivetamina retagre netreno, zamagri nona eri'ne. Ana osi pazivemofona vahe avurgagna avurgarare hunte'negeno, agi'ma hunte'nefintira veganokno ke nehuno, avufga erisgahu naneke nehige'na antahi'noe. <sup>9</sup> Ana ava'nafima koge'za kini trara eri'za e'za noma'are erinte fatgo hu'za eme nentage'na ke'noe. Anama hutazageno'a korapa'ma mani'neno, mani vava nehia Anumzamo'a tra'a erino mani'neno vahe refko huzmantenaku eme ante'ne. Kukenama hu'nea kukenamo'a efeke hampomo hiaza huno efenentake nehigeno, azokamo'a efenentake hu'ne. Hagi agrama mani'nea kini tra'mofona tevemo hagna hagna nehigeno, anama mani'nea tra'mofo wirifina tevemo akarukaru huno nerege'na ke'noe. <sup>10</sup> Ana nehigeno agrama mani'nefintira teve tirupinti tatkna huno varehirami varehirami huno tevemo'a e'ne. Ana nehige'za tausen tausenia agatereno rama'a vahetamimo'za agri tvaontera mani'neza agri eri'zana erinentazageno, ohampri'ga'a vahe krerfamo'za Agri avuga ot'i'zaze. Anante keagafina ufreno agafa huno keaga refko hu'za higeno, avontafe tamimo'a ru vakarente vagarege'na ke'noe. <sup>11</sup> Hagi ana ava'nafima koana ana osi pazivemo'a tusiza huno avufga erisga hu nanekea nehige'na ke'noe. Ana nehige'na negoge'za nampa 4 afi zaga ahe'za avufga'a tevefi kre fanane hu'zaze. <sup>12</sup> Hagi ana 3'a afi zaga kafamokizmia hihamu hankave zamia eri atre'neanagi, huhampri ante'nea kna'ama esigu osi'a kna zamatrege'za mani'zaze. <sup>13</sup> Ana kenage'ma mago'anema ke'noa ava'nafina, vahe'mofo mofavregna ne'mo hampompi mani'neno monafintira e'ne. Ana hume eazamo korapa'ma mani'neno manivava huno ne-ea Anumzamo'ma mani'nea tavaonte egeno agrama nemanifinka avreno ufre'ne. <sup>14</sup> Ana huteno ragine, hankavene maka ama mopafima mani'naza vahe'ma kegavama hania hihamu hankavea agrike ami'neanki'za, maka ama mopafima ru zamavufagane ru zamavufagane vahe'ma mani'ne'za, ru zamageru ru zamageru'ma neraza vahe'mo'za agri kege antahigahaze. Agrama kinuma manino kegavama haria kumamo a, mevava hanigeno mago zamo'a eri haviza osugahie.

<sup>15</sup> Hagi nagra Danieli'na ana ava'nama ketena tusi antri nehugen, nagu'amo'a kna nehige'na, antahintahi hakare hu'noe. <sup>16</sup> Ana hige'na Anumzamo'ma nemania kini tra'mofo tvaonter'e mani'za vahepi mago'mofonte vu'na, ana ava'namofo agu'agesa'a eri ama hunka nasamio hu'na antahige'noe. Anama hugeno'a amanage huno eri ama huno nasami'ne. <sup>17</sup> Kagrama 4'a afi zagagafama ava'nafima ke'nana zamofo agu'agesamo'a amana hu'ne, ama mopafintira 4'a hankavenentake kinia

efore hugahaze. <sup>18</sup> Hianagi marerisa Anumzamofo avure'ma ruotage'ma hu'naza vahe'amokizmia, ana mopa zamisnige'za kegava hu vava hu'za vugahaze.

<sup>19</sup> Hagi nampa 4 afi zagama ke'noa zamofo agu'agesa'a eri ama huno nasamisniegu hu'noe. Na'ankure agra mago'a afi zagakfa zamagatereno ruzahu hu'neankino, vahera zamazeri koro huga zaga mani'ne. Ana hu'neankino agri'ma ha'ma hunte'naku'ma nehaza vahera ainire aveteti'ene bronsire azankonuti anintrantu neheno atreema'a agareti rehapa titre'ne. <sup>20</sup> Anazanke hu'na ana zagamofo asenifima 10ni'a pazine'ma me'nea zamofonku'ene, 3'a pazine'ma retagare netreno'ma zamagri noma eri'nea osi pazine'mofo agu'agesa'a eri ama huno nasamisniegu hu'noe. Ana osi pazivemo'a ruzahu huno mago'a pazivera zamagatere neankino, vahe avurga huntogeno agi'enena hunte'neankino, ana agipintira ke hakarea nehuno avufga erisga hu naneke hu'ne. <sup>21</sup> Ana ava'nafima kogeno'a ana pazivemo'a Anumzamo'ma huhampri'nea vahera ha' humzagatere'ne. <sup>22</sup> Anama nehigeno'a Marerisa Anumzama korapa mani'neno mani vavama huno ne-ea Anumzamo anante eno, keaga eme refko huno agra vahe'a zamaza hu'ne. Anama hutege'za Anumzamofo vahe'mo'zama kinima mani'za maka zama kegavama hanaza knamo'a ehanati'ne.

<sup>23</sup> Anante amanage huno eriama huno nasami'ne, nampa 4 afi zagama ke'nana zamofo agafa'amo'a, nampa 4 hankave kuma efore hugahankino, ruga'amokizmia zamagatereno ruzahu kna hugahankino, maka ama mopafi vahera zamazeri haviza nehuno, agiareti zamare hapatigahie. <sup>24</sup> Hanki 10ni'a pazine'ma ke'nana zamofo agafa'amo'a, anama hankavenentake kinimo'ma kegavama hu'nesnia mopafintira 10ni'a kini vahe efore hu'za mopa kegava hugahaze. Anama hutesnageno'a, ananteria mago kini efore huno mopa kegava hugahie. Hianagi 10ni'a kini vahera ru zamagatereno ruzahukna hugahankino, 3'a kini vahera zamazeri atregahie. <sup>25</sup> Ana kini ne'mo'a Marerisa Anumzamofo agia huhaviza hunenteno, Anumzamo'ma huhampari zamante'nesnia vahera zamazeri haviza hugahie. Ana nehuno mono'ma nehu'za musenkasema nehaza knane, kasegenena eri ruzuhe nehuno, agrama kegavama huzmantesniana 3'a kafugi 6si'a ikamofo agu'afi kegava huzmantegahie. <sup>26</sup> Hianagi Anumzamo'a keagafi azeri otino refko hunenteno, maka hankave'a eri atrevaga resnigeno ru'enena otino mago zana osugahie. <sup>27</sup> Hanki anante ama mopafi kini vahe'mo'za e'neriza hihamu hankavene, ra zamaginenia Marerisa Anumzamo'a zamagripintira erimareno, Agrama huhampari zamante'nea vahe zamigahie. Agra kinia mani vava huno vugahanki'za, maka kva vahe'mo'za agri eri'zanke eneri'za agri kege antahigahaze. <sup>28</sup> Hagi nagra Danieli'nama ke'noa ava'namofo nanekemo'a amare emente. Nagra ana ava'nama kete'na tusi koro nehu'na antahintahi hakare nehugen, navugosamo'a rukrahe hu'ne. Hianagi ana zamofo nanekea vahera ozamasami atrogeno nagu'afi me'ne.

## 8

### *Danieli'ma ava'nafi ve sipisipi afu'ene memene ke'nea zamofo naneke*

<sup>1</sup> Hagi Belsasa'ma kinima manino egono nampa 3ma hia kafufina, nagra Danieli'na mago'ene nampa 2 avanagnaza ke'noe. <sup>2</sup> Ana ava'nagna zampima ke'noana, Elamu mopafima ugagotama hu'nea ran kuma Susa

kumate Ulai timofo ankenare ot'i'nena ana ava'nagna zana ke'noe. <sup>3</sup> Hagi anante nagra kesgama hu'na koana, tare za'za pazine hunte'nea ve sippisipi afu'mo tinkenare ot'i'nege'na ke'noe. Hagi tare pazine'mokea za'za hu'na'anagi henkarfama hageno mareri'nea pazivemo'a, kotama marerinea pazivemofona agatereno za'za hu'ne. <sup>4</sup> Ana ve sipisipimo'a hankavene-nake hu'neakino kogeno'a, zage fre kazigane, noti kazigane, sauti kazigane vuno eno nehuno, maka zama avugama me'nea zana ome mitre eme mitre hu'ne. Ana higeno mago'a afi'zagamo'za ot'i hankavetine'za hara hunente'za, agrama ha'ma huzmantea vahera zamagu vazigara osu'naze. Ana hazageno agra avesite nazano hunaku'ma hiazana nehuno hankave nentake afi'zaga efore hu'ne. <sup>5</sup> Hanki ana ava'nama koa zanku antahintahi hakare nehu'na koana, mago ve meme afu'mo'a zage fre kazigati efore huteno, moparera agiamo'a avako osiaza, ame huno maka ama mopa-fina agareno vuno e'no hu'ne. Ana mememofona tare avurgararemofo amunompina mago tusizankna pazine mareri'ne. <sup>6</sup> Hagi tinkenare'ma ot'i'nege'nama ko'ma ke'noa ve sipisipi afu'ma mani'nerega, ana ve meme afu'mo'a tusi arimpa nehegeno taragino vu'ne. <sup>7</sup> Ana hige'na anante kogeno ana mememo'a sipisipi afu'mofona tusi arimpa ahenenteno, eme ahe nefrino, tare pazine'ararena rufutagi atre'ne. Ana sipisipimo'a hankavetino hara hugara osigeno, meme afumo'a ahettregeno masegeno agiareti rehappati'ne. Ana higeno mago afi'zagamo'a, mememofo hankavefintira aza huno agura ovazi'ne. <sup>8</sup> Anama huteno'a mememo'a tusi hankavenetake zaga efore hu'ne. Hianagi hankave'amo'ma ome rama nehigeno'a, hankavenen-take pazine'amo'a ruhantagirami'ne. Ana higeno anampintira 4'a hankave pazivetami hanatiteno, ama mopamofona 4'a kaziga asoparega avugosa ome hunte eme hunte hu'ne. <sup>9</sup> Hagi mago pazinepintira mago osi pazine hanatiteno, ana pazivemo'ma ome ran kerfama huno hankavema enerino'a, sauti kaziga vahe'ene zage hanati kaziga vahe'ene, knare zantfama hu'nea Israeli mopafi vahera zamazeri haviza hu'ne. <sup>10</sup> Ana nehigeno ana pazive-mofo hankavemo'a ra ome huno monafinkama nemaniza sondia vahe ha'ome huzmante'ne. Ana nehuno monafima me'nea hanafitamina eri atafri atreno agareti zamare hapati'ne. <sup>11</sup> Ana nehuno monafima nemaniza sondia vahete Kva nekna hanue nehuno agrite'ma mago mago zupama ofama hunentaza ofanena erinetreno, mono'ma hunentaza nonena eri haviza hutre'ne. <sup>12</sup> Vahemo'zama kumi'ma nehaza zamo ana pazine'mofona hankave amigeno, monafima nemaniza sondia vahe hankavea eri netreno, mago mago zupama ofama nehaza zana eri netreno, tamage nankeea eritre'ne. Ana nehuno ana pazivemo'ma nazano hunaku'ma hiazana amne tro huke'za hu'ne. <sup>13</sup> Anante ruotage'ma hu'na'a ankerontre'ma mani'nampintira magomo'a amanage huno magomofona antahige'ne. Ke ontahi havi avu'ava zama ama ava'nagna zampima fore hia zantamina nama'a kna maniteno vagaregahie? Ana hanige'za vahe'mo'za ina zupa ete eri agafa hu'za mago mago zupama huterema nehaza ofa hugahaze? Ina zupa ana pazivemofo hankavea vagaresnigeno, Monafi sondia vahetamima zamazeri haviza nehuno, mono noma agiareti'ma eri havizama nehia zamo'a vagaregahie? <sup>14</sup> Higeno mago ankeromo'a kenona huno, ama ana knazamo'a 2tausen 300'a zagine hanine maniteno ome vagaresnige'za, Anumzamofo mono nona ete eri so'e hugahaze.

<sup>15</sup> Hanki nagra Danieli'na ana avana gnazama nege'na, ana ava'nagna zamofo agafa'agu'ma antahintahi hakarema nehugen'o'a, ame huno mago ne'mo navuga eme oti'ne. <sup>16</sup> Anante antahugeno mago vahe'mofo ageru'mo Ubai tintegati kezatino, Danieli'ma ke'nea ava'nagna zamofo agafa'a Gebrieliga eri ama hunka asamio hu'ne. <sup>17</sup> Higeno ankero ne' Gebrieli'ma eno nagrama oti'noa tvaonte'ma ege'na, nagra tusi koro nehu'na navugosaregati mopafi kepri hu'na masogeno, Gebrieli'a huno, mopafi vahetta mani'nane. Hianagi monane mopenema vagareku'ma hania knafima fore'ma hania knaza ava'nafima kana zantamimofo agafa'a antahi ama' hugahane. <sup>18</sup> Hagi ana ankeromo'ma agi'ma reaka huno keagama nenasamigeno'a, navumo'a kagigagi hige'na navugosaregati mopafi traka hu'na mase'noe. Hianagi ana ankeromo'a navako huno nazeri otige'na oti fatgo hu'noe. <sup>19</sup> Anama huteno'a anante amanage hu'ne. Henkama knazama fore'ma hania zamofo kasaminaku e'noe. Anumzamo'a arimpa ahe'zama'ama eri ama'ma hania kna ko huhamprinte neankino, kagrama ava'nafima ke'nana kante anteno, ana maka zamo'a eama hugahie. <sup>20</sup> Hagi mago ve sipisipi afu'mofoma tare pazine'ma hunte'negenka ke'nanana, e'i Midia kini ne'ene Pesia kini netrente huvame huke me'nae. <sup>21</sup> Hagi azokake'ma hu'nea ve meme afumo'a Grisi kini nete huvame huno me'ne. Ana mememofoma tare avurgamofo amu'nompima mago ra pazine'ma hunte'negenka'ma ke'nanana, e'i ko'ma Grisi mopare'ma kinima efore hu'nea nete huvame huno me'negenka ke'nane. <sup>22</sup> Hagi ana mememofoma 4'a ne'onse pazivetamima hanati'za ra pazine'ma ruhantagi netre'za agri noma eri'naza zamofo agafa'amo'a, Grisi mopa 4'afi refko hanige'za, 4'a kini vahe'mo'za kegava hugahaze. Hianagi ko'ma Grisi mopare kinima mani'nea ne'mofo hankavea agateore-gahaze. <sup>23</sup> Hanki henka'a ana 4'a kini vahe'mo'zama kinima mani'za ome vagareku'ma hanaza knafina, vahe'mo'za tusi kumi hu'za eri hakare hugahaze. Anama hanaza knafina mago kini ne' efore hugahiankino, vhahera zamamage fenkami neteno, havigege nehuno, knare avu'avara huozmantegosie. <sup>24</sup> Ana ne'mo'a tusi'a hankave kini efore hugahie. Hianagi agra'a hankaver- era anazana osugahie. Ana nehuno hankave kva vahetamine Anumzamofo vahe'enena zamazeri haviza hugahie. <sup>25</sup> Ana ne'mo'a havigema huno vahe'ma revatgama hania avu'avazamo hanigeno, maka zampina knarera nehuno, agrama agesama antahisiana nagra maka vhahera zamagatere'noe huno antahigahie. Ana nehuno rama'a vhahera antri hanazaza huno zamahe nefrino, maka kini vahe'mokizmi Kini nera ha' huntiegahie. Hianagi mago vahe'mo ha'hunteno azeri haviza osaniaza agra'a haviza hugahie. <sup>26</sup> Hagi ava'nagna zampima mika nantera ofaramima nehaza zama negenka, mika kinaga ofaramima nehaza zama ke'nanana, e'i tamage'za ke'nane. Hianagi ana zamo'a ame' huno forera osu zazate meteno fore hugahianki, eri amara hunka vhahera ozamasaminka atregeno frakino meno. <sup>27</sup> Hagi nagra Danieli'na anankema antahitogeno'a hankavenimo'a omanege'na, mago'a kna kri eri'na mase'noe. Anama hutege'na ete oti'na kini ne'mofo eri'zama e'nerua eri'zante vu'noe. Ana nehu'na ana ava'nama ke'noa zanku antahintahi hakare hu'noanagi, ana ava'namofo agafa'a antahi amara osu'noe.

<sup>1</sup> Hanki Midia mopareti ne' Ahasuerusi nemofo Dariusi'ma agafa huno Babiloni (Kaldia) mopare'ma kinima mania kafufina, <sup>2</sup> agafa huno ese kafuma kinima nemanige'na, Anumzamo'ma kasnampa ne' Jeremaiante eri ama huno'ma, Jerusalemi kumamo'a 70'a kafumofo agu'afi havizana huno megahie higeno'ma krente'nea avona hampri'na nentahi'na, tusi nagesa antahintahi hu'noe.

*(Jeremaia 25:11)*

<sup>3</sup> Anama hute'na nasu'zana erinte ama hu'na, nasunku kukena nehu'na, ta'nefa nefre'na, ne'zana a'o hu'na mani'nena tazama hanigura, Anumzamofontega nunamuna hu'noe. <sup>4</sup> Hagi Ra Anumzana nagri Anumzamofontega amanage hu'na kumitigura huama hu'na nunamuna hu'noe. Ra Anumzana so'e zantfa hunka marerisa Anumzamoka, maka zupa navesiramante vava hugahue hunka huhagerafi'nana huvempa keka'are oti'nenna, kavesi negante'za kagri kasegema amagema nentaza vhahera, knare kavukvara hunezmantane. <sup>5</sup> Hianagi tagra kumi huta kefo avu'ava nehuta, ha'reneganteta, amage'ma anteho hunka'ma tam'i'na kasegene tra kenena tamefi humi'none. <sup>6</sup> Kagri eri'za vahe kasnampa vahe'mo'zama, tagri kini vahete'ene ugagota kva vahete'ene tafafe'int'e'ne, ana maka Israeli vahetema kagri kagifima eme huama hu'naza nanekea tagesa anteta ontahi'none. <sup>7</sup> Ra Anumzamoka kagra fatgo kavukva'ene ne' mani'nane. Hianagi menima tagri'ma tagesnanana, tusi'a tagazegu hume onkeno eno ama knare ehanatie. Amanahu'ma hiana tagrama Juda mopafine, Jerusalemi kumapine Israeli mopafinema mani'nona vahe'motama tamefi hunegamita, kagri kema rutagrona zanku hunka, tahe panani hanketa maka ru moparega umani emanı hu'none. <sup>8</sup> Ra Anumzamoka, tagrane kini vahetine ugagota kva vahetine tafafe'zanena kagritera kumi hu'nonku huta tagazegu hune. <sup>9</sup> Tagra Ra Anumzamoka nanekea rutagreta tamefi hugami'none. Hianagi Ra Anumzana tagri Anumzamoka kasunku hunka kumiti eri netrana Anumza mani'ne. <sup>10</sup> Anumzamoka eri'za vaheka'a kasnampa vahe zamagipi huvazinke'za kasegekane tra kekanema eme huama hu'za tasami'nazaragi, Ra Anumzana tagri Anumzamoka nanekea antahita amagera onte'none. <sup>11</sup> Maka Israeli vahe'mota Kagri kasegea rutagreta tamefi hugami'none. Ana hu'nonku hunka, maka knazama tagritema fore'ma hania zamofo nanekema tazeri havizama hania zamofo nanekema kagri eri'za ne' Mosese'ma krent'e'ne kemo'a, tagrama kumi'ma hu'nona nona'a tagri tavufgare ana knazana fore nehie. <sup>12</sup> Tagrama hu'nana naneke amage antenka, kva vahetire'ene tagrite'enena tusi'a knaza atrankeno e'ne. E'i ana knazana kora ama mopafina atrankeno ome'nea knaza atrankeno Jerusalemi kumatera efore hu'ne. <sup>13</sup> Hanki Mosese'ma kasegefima krente'nea knazamo'a, tamage huno maka tagrite efore hu'ne. Hianagi tagra rukrahera huta, Ra Anumzana tagri Anumzamofo asunku zankura memea nehuta, kumi avu'ava zantia atreta tamage naneke'a amagera onte'none. <sup>14</sup> E'ina hu'nonku huno Ra Anumzamo'a knazama retro'ma hunte'nea knazanteti tazeri havizana hu'ne. Tagra agri nanekea rutagreta kea ontahi'nonku huno, Ra Anumzana tagri Anumzamo'a fatgo avu'ava'za huno tazeri haviza hu'ne.

<sup>15</sup> Hagi menina Ra Anumzana tagri Anumzamoka, kagra tusi'a hankaveka'ama erinte ama hunka, Isipi mopareti'ma vaheka'ama hankave-nentake kazanteti'ma zamavarenka'ma e'nana zankura, vahe'mo'za kagri kagia ahentesga hu vava nehaze. Hianagi tagra tamagerfa huta tusi kumi

huta havizantfa hu'none. <sup>16</sup> Ra Anumzamoka kagra fatgo kavukva nehana ne' mani'nananki, ruotage'ma hu'nea agonakare'ma me'nea Jerusalemi kumakuma krimpama ahenentanta zana atro. Na'ankure tagri tvaonte'ma mani kagi'naza vahe'mo'za, tagrama huna kumimo'ene tagehe'mozama hu'naza kumi'mo hige'za, Jerusalemi kuma'ene kagri vahekura kiza zokago ke hurante'naze. <sup>17</sup> Hagi menina tagri Anumzamoka, kagri eri'za vahemo'nama taza huogu'ma nehua nunamuna antahinenaminka, Ra Anumzamoka kagri kagimofo knare zanku nentahinka, atregeno kavugosafinti masazamo'a havizantfama hu'nea mono nonka'a remsa hunteno. <sup>18</sup> Anumzanimoka muse hugantonanki kagesa antenka nunamu ketia antahiramio. Knafima mani'nona zana kavua antenka neragenka, Kagri kagimo'ma me'nesnige'zama mono'ma hunante vava hugahazema hunka hu'nana rankumaka'mo'a haviza huno me'nea zana ko. Tagra fatgo vahemani'netta, taza huogura amanahu kea nosune. Hianagi tagrama antahi'nonana, kagra kasunku Anumza mani'nanketa anagea nehune. <sup>19</sup> Ra Anumzamoka nunamuntia antahineraminka, kumitia atrenerantenka za'zatera omaninka nunamuntia antahineraminka, Kagraka'a kagifima zamagima hu'nana vaheku'ene Nagri nagimo'ma Jerusalemi kumate me'nesnige'za monora hunante vava hugahazema hunka hu'nana kumaku'ene kagesa nentahinka, ame hunka taza huo.

*Ankero ne' Gebrieli'ma eno kasnampa kema eri ama huno Danielima asami'nea naneke*

<sup>20</sup> Nagra Danieli'na kuminigu'ene Israeli vaheni'amokizmi kumira Ra Anumzana Nagri Anumzamofontega nunamuna huna huama nehu'na, ruotage'ma hu'nea agonagura nunamuna hu'noe. <sup>21</sup> Hagi ana nunamuna nehu'na koana, ko'ma ke'noa ava'nafima ke'noa ankero ne' Gebrieli'a kinaga ofama kresrammama vu knare nagrama mani'norega e'ne. <sup>22</sup> Eteno amanage huno nasami'ne, Danieliga nagrama e'noana, kagri antahintahi eri ama hanugenka antahi ama' hananegu e'noe. <sup>23</sup> Danieliga kagrama agafama hunka nunamuna nehankeno, nunamunkamofo nona'a Anumzamo'a ame huno kea atregante'ne. Ana hige'na menina ana kemofo agafa'a eri ama hu'na kasaminaku e'noe. Na'ankure kagra Anumzamofo avurera so'ezza hankeno kavesigante'ne. E'ina hu'negu kagesa ante'enka ava'nagna zama ke'hana zamofo agafa'ama eriama'ma hu'na kasamisnuana antahi so'e huo. <sup>24</sup> Anumzamo'ma 7ni'a zupa 70'a kafua huhampri neankino, kagri vahe'ene kagri ranku'ma Jerusalémi kumapintira, keontahi avu'ava zana eri atregahie. Ana nehuno kefo avu'ava zantamifintira miza senezmanteno kumi zamia eri atregahie. Ana hanige'za vahe'mo'za maka zupa fatgo avu'ava zanke amagera antegahaze. Ana nehanageno agrama eri kaveri'ma hu'nea ava'nagna zama eri nenarga nereno, ruotage'ma hu'nea kuma'ma masave freno erinte ruotage hunaku e'i ana zantamina hugahie. <sup>25</sup> E'ina hu'negu menima ame kema nentahisanunka antahi ama huo. Jerusalemi kuma'ma eriso'e huta ete kihoma huno kini ne'mo'ma hania knareti'ma agafa huteno vuno, ugagota Kini ne' Mesaiana efore'ma hania knare'ma uhanatisniana, e'i 49ni'a kafugi 434'a kafugi ana mikama erintesiana 483'a kafumofo agu'afi Jerusalemi kumara ete eri so'ea huza negi'za, kumapi ne'onse kantamina tro nehu'za, fra'ma ki'za mani'neza ha'ma hanaza kumataminena trora hugahazanagi, zamagra tusi'a knazamofo agu'afi mani'neza ana eri'zana erigahaze. <sup>26</sup> Hagi 434'a kafuma evutesanige'za, Anumzamo'ma huhamprinete'nea ne' Mesaiana ahesnageno nefrisanige'za, mago zama'a otregahaze. Ana hanageno mago hankave kini ne'mofo sondia vahe'mo'za e'za

Jerusalemi kuma'ene ra mono nona eri haviza hugahaze. Ana knazama esaniana mago timo hageteno, makaza eri harafi huno viaza hugahie. Ana hanigeno ana ha'mo'a me'nesaniganu vuno maka zama vagare knare uhanatisanigeno, Anumzamo'ma hu'nea kante anteno, maka zamo'a havizantfa hugahie. <sup>27</sup> Anama efore'ma hania kini ne'mo'a 7ni'a kafumo agu'afina hara osu fru huta manisanune huno vahe'enena hvempa hugahie. Anagema huteno 3'a kafugi 6si'a ikama nemanino'a, Anumzamofontegama kresramnama nevaza zane, ofaramima nehaza zana eri atregahie. Ana nehuno maka havi avu'ava'ma hania zamofo agofetura havizantfama hu'nea avu'ava'ma haniana, Anumzamofo mono nomofo agofetura kasrino havizantfama hu'nesnia za erino marerino antegahie. Hagi maka zama eri havizama hania ne'mo'a anante mani'nesnigeno, Anumzamo'ma huhamprinte'nea knazamo'a, agri avate rupopo hugahie.

## 10

### *Danieli'a ava'nagna zampi mago ne' ke'nea zamofo naneke*

<sup>1</sup> Hagi Plesia kini ne' Sairusi'ma nampa 3 kafuma kinima nemanigeno'a, Danielina mago agi'a Belsasokino ru'ene mago ava'nagnaza Anumzamo'a eri averi higeno ke'ne. Agrama ana zama keno antahino'ma hiana, tamage huno henka fore'ma hania zamofo ke'neankino, tusi'a ha'zane knazane egahie.

<sup>2</sup> Hagi ama ana ava'nama nagra Danieli'nama kete'na, 3'a sontamofo agu'afina nasunkura nehu'na zavirate'noe. <sup>3</sup> Ana knafina knare'nare ne'zane, afu me'ané, waini tinena magore hu'na nagitera erinte'na one'noe. Ana nehu'na ana knafina magore hu'na nazokapine navugafina masavena fre'na erisera osu'na mani'nogeno 3'a sontamo'a evu nagatere'ne.

<sup>4</sup> Hagi ese ikamofona 24zupa nagra Taigrisi rantimofo ankenare ot'i'nena, <sup>5</sup> kesgama hu'na koana, mago ne'mo'a efeke zaza kukena antani'neno, Goliretike tro hu'naza amu nofi afafafina rugagino rente'nege'na ke'noe.

<sup>6</sup> Ana ne'mofo avufgaregatira rumsa huno, krisolaitie nehaza haveretima nehiaza huno rumsa hu'ne. Hagi avugosafintira kopasi'namo'ma nehiaza huno rumarave nehigeno, avurgafintira tosi tavi'mo'ma nehiaza huno rugananini hu'ne. Azamo'ene agiamo'enena masave freza eri avugosa hu'naza bronsigna nehigeno, agerumofo agasasamo'a rama'a vahe'mokizmi zamagerumofo agasasamo'ma hiaza hu'ne. <sup>7</sup> Danieli'na ana avanagna zana nagrake ke'noanagi, nagranema mani'naza vahe'mo'za amä ana ava'nagna zama ke'noana, zamagra onke'naze. Hianagi zamagra tusi koro nehu'za, frakinaku koro fre'za vu'naze. <sup>8</sup> Ana hazage'na nagrake anantero ot'i'nena ruzahu ava'nagna zana ke'noe. Hankaveni'a omanegeno navugosamo'a rukrahe nehigeno, zaferinani'a omame amane hu'ne. <sup>9</sup> Hagi anante ana nemo'ma keagama nehige'na ageru'ama nentahugen'o, navumo'a kagigagi hige'na navugosaregati mopafi traka hu'na mase fatgo hu'noe. <sup>10</sup> Anante mago vahe'mofo azamo navako huno nazeri ot'i'ne. Hianagi nahirahi neregena nazanteti vazisga hune'na mopafi narena re'na mani'nena nahirahiku hu'noe. <sup>11</sup> Anante ana ne'mo'a amanage huno nasami'ne, Danieliga Anumzamofo avurera knare hu'nankeno Agra avesigante'ne. Ana hu'negu nagrama kasamisnua nanekea kagesa ante'nenka antahio so'e huo. Kagriku huno hunantege'na e'noanki, ot'i'nenka antahio. Anagema hige'na nahirahiku nehu'na ot'i'noe.

<sup>12</sup> Ana hugeno anante agra nasamino, Danieliga korora osuo, kagrama ese kna zupama Anumzamofo avure'ma kavufga erinte raminka mani'nenkama, agafa hunka ama' antah'i'zanku'ma nunamuma nehankeno'a, Anumzamo'a monafinkatira nunamunka'a antahiteno, hunantege'na nunamunka'amofo nona'a hunaku e'noe. <sup>13</sup> Hagi nagra ko ame hu'na enaku hu'noanagi, Pesia mopare'ma kegavama hu'nea ankeromo kana rehiza hige'na, 21ni'a zagegna mani'noe. Anante vugota hu'naza ankerompinti magora Maikoli'e nehaza ankeromo eno eme naza hu'ne. Na'ankure Pesia kini vahe amunompina nagrake mani'nogeno eme naza hunaku anara hu'ne. <sup>14</sup> Hanki nagrama menima e'noana, kagri vahete'ma henkama fore haniaza eri ama hu'na kasaminaku e'noe. Na'ankure ama ana ava'nagna zama ke'nanana henkama fore'ma haniaza ke'nane.

<sup>15</sup> Hagi agra anagema huno nenasamige'na navugosaregati mopafi masena kea hugara osu'noe. <sup>16</sup> Hagi ana nemo'a tagrama hunaza huno mopafi vahekna hu'neankino, nagite azana eme anteno navako hige'na, nagira reaka nehu'na agafa hu'na keaga hu'noe. Ana nehu'na ana ne'mo'a navuga ot'i'nege'na amanage hu'na asami'noe. Ranimoka nagra ava'nagna zama ke'noa zamo higeno navufgamo'a tusi nata negrigeno hankaveni'a omane'ne. <sup>17</sup> Ana hu'neanki'na na'anue hu'na kagri eri'za vhemo'na ranimoka kasamigahue. Hankaveni'a omanege'na nasimu'ma ante'zankura tusi amuho hue. <sup>18</sup> Hanki anante vaheknama hu'nea ne'mo'a ete mago'ene navako higeno, hankavenimo'a ete e'ne. <sup>19</sup> Anante ana ankeromo'a huno, Korora osunka karimpa frune manio! Na'ankure Anumzamo'a avesigante'neankino, Agra kagesga hu'negu korora osunka ot'i hankavetio. Hagi ama ana nanekema nenasamige'nama nentahugen'o'a, ete hankavenimo'a osi'a ege'na amanage hu'na asami'noe. Muse hugantoanki ranimoka, ana zankura menina keaga nasamio. Na'ankure kagra ko nazeri hankaveti'nane. <sup>20</sup> Anagema hugeno'a amanage huno kenona hunante'ne. Nagrama menima e'noa zamofo agafa'a kagra kenka antahinka hu'nampi? Nagra amafina za'zatera omani'na ete ame hu'na vu'na, Pesia mopare'ma kegavama hu'nea havi ankerone hara ome hu'na azeri agateregahue. Anama hutesnugen'o'a Grisi mopare'ma kegavama hu'nea ankeromo a eme hara hunantegahie. <sup>21</sup> Anante ana ankeromo'a amanage huno nasami'ne. Menina tamage nanekema avontafepima krente'naza nankeea eri ama hu'na kasamigahue. Hagi mago vahe'mo'a nagrira naza hige'na ana havi ankeroraminena hara osu'noanki, Israeli vahe'mota tamagrite'ma kegavama nehia ankero ne' Maikoli naza hige'na hara hu'noe.

## 11

<sup>1</sup> Hagi Midia mopareti ne' Dariusi'ma agafama huno kinima mania kafufina, nagra ankero ne' Maikoli'n aza hu'na azeri hankavetinaku agri tavaonte ot'i'noe.

*Sauti kazigati'ene noti kazigati'ma efore'ma hanaza kini vahe'mokizmi nanekem*

<sup>2</sup> Hagi menina Danieligama eri ama'ma hu'na kasamisnuu nanekemo'a tamage me'neankino, henka fore hania zanku kasamigahue. Henka'a 3'a kini efore hu'za Pesia mopa kegava hutesnageno, zamagri zamefi'ma nampa 4 kinima efore hania kini ne'mo'a zamagatereno tusi zago feno ante'nesnia ne' efore hugahie. Ana huteno tusi'a feno ne'ma mani'nia zamo hanavea aminkeno maka vahera zamazeri ot'i'nige'za Grisi mopafi

vahera hara ome huzmantegahaze. <sup>3</sup> Anama hutena henka mago han-kavenentake kini efore huno rama'a vahe kegava hugahiankino, nazano hunaku'ma hania zana amne hugahie. <sup>4</sup> Hianagi agri hankavemo'ma ome rama nehanigeno'a, agri hanavemo'a evuraminkeno agrama kegavama hu'nea mopa <sup>4</sup>a kini vahe'mo'za refko hu'za kegava nehanage'za, anampina agri nagapintira kinia omanigahaze. Na'ankure hankave zamimo'a ko'ma mani'nea kinimofo hankavegnara osugahie. <sup>5</sup> Hagi sauti kaziga mopama kegavama hu'nea kini ne'mo'a hankave kinia manigahie. Hianagi ana kini ne'mofo eri'za ne'mo'a rugateregahiankino, agra'a kuma kegava huno kinia manigahie. <sup>6</sup> Hagi mago'a kafuma evute'na, noti kaziga kini ne'ene sauti kaziga kini netremokea, hara osu fru huta manisanu'e huke nanekea anakigaha'e. Ana nanekema eri hankavema tinakura sauti kaziga kini ne'mo'a, mofa'a amisanigeno noti kaziga kini ne'mo'a a' erintegahie. Hianagi ana a'mofo hankavemo'a za'zatera omanesigeno, neve hankavemo'enena vagaregahie. Ana hanige'za ana a'ene nevene nefane agri'ma amage'ma vanaza vahe'enena zamahe hana hugahaze. <sup>7</sup> Hianagi ana a'mofo nagapinti mago ne'mo sauti kaziga moparera kinia efore hugahie. Anama huteno'a sondia vahe'a zamazeri atru huno, noti kaziga mopare'ma kegavama hu'nesia kini ne'mofona, hankave vihu hugagi'nesnia kuma'afi ufreno hara huno azerigateregahie. <sup>8</sup> Anama hutesuno'a anumazazmine, aerireti'ma tro'ma hunte'naza amema'ane, zago'amo'ma marerisa zantamima golireti'ene silvareti'ma tro'ma hu'nesaza zantaminena erino Isipi vugahie. Anama hute'nuno'a noti kaziga kinia mago'a kafufina hara huontegahie. <sup>9</sup> Hagi henka noti kaziga kini nemo'a vuno, sauti kaziga kini nera hara ome hunteteno, ete rukrahe huno mopa'are egahie. <sup>10</sup> Hianagi noti kaziga kini ne'mofo mofavre naga'moza rama'a sondia vahe'zaga zamazeri atru hute'za, tima hageno repapa huno eaza hu'za, sauti kaziga kini nera hara eme hunte'za rama'a kumatamina eri agatereme vu'za ogantu kini ne'mo'ma nemania hanave vihu keginare uhanatigahaze. <sup>11</sup> Ana hugahazanagi sauti kaziga mopare kini ne'mofona tusi arimpa ahesanigeno, sondia vahe zaga'ane vuno, noti kaziga kini ne'mo'ma zamazeri atruma hu'nea sondia vahe krerfa hara ome huzmagateregahie. <sup>12</sup> Hagi sauti kaziga kini ne'mofoma ha'ma eme huntesaza sondia vahe'ma zamahe hana'ma hangeno'a, sauti kaziga kini ne'mo'a tusi muse nehuno, avufga erisga hugahie. Hianagi agri sondia vahe'mo'za mago'enena hanaveti'za maniza ovugahaze. <sup>13</sup> Hagi mago'a kafuma evutesnigeno'a, noti kaziga kini ne'mo'a, ko'ma zamavareno hate'ma e'hea sondia vahera rugatereno, rama'a sondia vahe'ene rama'a ha'zane eri'neno, hara erino egahie. <sup>14</sup> Hagi ana knafina rama'a vahe'mo'za sauti kaziga kini ne'mofona hara rentegahaze. Ana nehanage'za ama ana ava'nama eri rgama renakura Danieliga kagri vahepinti mago'a harfa vahe'mo'za zamagranena hara rentegahaze. Hianagi zamagra hantaga hanageno, anazamo'a amne zankna hugahie. <sup>15</sup> Anante noti kaziga kini ne'mo'a sondia vahe'ane eno, sauti kaziga mopare'ma hankave vihu kegina-ma hugagi'naza rankumara eme avazagi kagino hara hugateregahie. Ana hanige'za sauti kaziga moparera hankave sondia vahe mani'nazanagi oti hankaveti'neza hara osugahaze. <sup>16</sup> Ana hanigeno noti kaziga kini ne'mofona mago vahe'mo'a hara huontesnigeno, nazano agrama hunaku'ma hania zana, amne agra avesite tro hugahie. Ana nehuno knare zantfama hu'nea Israeli mopafi umani'neno, ana mopa eri haviza hunaku agesa antahigahie. <sup>17</sup> Hagi noti kaziga kini ne'mo'a agrama kegavama hu'nea mopafinti maka sondia vahe'a zamavare hara huteno vuno, hara osuta fru huta man-

isanu'e huno sauti kaziga kini ne'ene keaga ome anaki'naku antahintahi hugahie. Ana huteno mopa'ama hanare'nakura haviza huno, sauti kaziga mopare kini ne'mofona mofa'a amisanigeno ara erintegahie. Hianagi ana antahizamo'a eri'zana e'orisanganigo, ana zamo'a amne zankna hugahie.

<sup>18</sup> Anama huteno'a henka agra rukrahe huno hageri ankenaregama me'nea ranra kumatamimpi vahetamina hara ome huzamanteno zamazeri agatere-gahie. Hianagi mago sondia kva ne'mo hara hugateresanigo, agrama hu'nea veganokno avu'ava zankura tusi agazegu hugahie.

<sup>19</sup> Anama hutesanigeno'a ete rukrahe huno esania zamo, mopa'afima hankavenentake vihuma hugagi'naza ran kumapi emanigahie. Hianagi agra traka huno masenige'za, mago'enena onkegahaze.

<sup>20</sup> Ana hanigeno agri noma erino kinima manisnia ne'mo'a, kini nompima marerirfa feno zama eri avi'ma atesigura mago ne' huntessigeno vano huno agrama kegavama hania moparamimofo agu'afintira, takisi zagoa vahetetira zogigahie. Hianagi atupa knafi kinia fore huno maniteno frigahiankino, mago vahe'mo'a arimpa ahenteno ahe frige, hapinti frie hu'za ke'za antahi'za osugahaze.

<sup>21</sup> Hagi agri noma erino kinima manisnia nera, kini ne'mofo nagapinti agri noma erino kinima omaniga vahemo kinia manigahie. Anama hutesuno'a agra ame huno kinia efore huno maka mopa kegava nehuno havige huno va-hera rezmatga huno kini eri'zana erigahie.

<sup>22</sup> Rama'a sondia vahe'mo'za ana kini nera hara hunte'nakura eghazanagi, ana sondia vahera zamahe vagaregahie. Ana nehuno ana zanke huno Ra Anumzamo'ma huhagerafinea ugagota pristi ne'enena azeri haviza hugahie.

<sup>23</sup> Hagi ana ne'mo'a mago'a mopa'fima nemaniza vahera rezmatvaga huno hara osu fru huta manisnune huno huhagerafigahie. Ana nehuno agri vahera osi'a vahe mani'nazanagi agra hankave kini efore hugahie.

<sup>24</sup> Ana ne'mo'a vahera ozamasami'neno antri hanazaza huno, afu afa'za osu'nazaza huno, fenomo'ma agatere'nea provinsifi ufreno vahera ome rohu'reno maka fenozazamia erino agri amage'ma vanaza vahe refko huzamigahie. Hianagi amana avu'ava zana za'zatera huno ovugahianki, atupa knafi ome vagaregahie.

<sup>25</sup> Hagi agra ana kini ne'mo'a korora osu, sauti kazigama nemanisa kini ne' ha' huntenuku rama'a sondia vahe'zaga zamavare atru hugahie. Ana hanigeno sauti kaziga kini ne'mo'a hankave sondia vahe'a zamavaren vanigeke hara hugaha'e. Hianagi sauti kaziga kini ne'mo'a hara hugate'oregahie. Na'ankure mago'a vahe'mo'za agrira havige hu'za revataga hanageno anara hugahie.

<sup>26</sup> Ana nehanageno agrane magoka manine'za agri nompinti'ma knare ne'zama nenaza vahe'mo'za oti'za azeri haviza hugahaze.

Ana hanage'za tima hagenoma eaza hu'za ha' vahe'mo'za e'za sondia vahe'a rama'a zamahe frigahaze.

<sup>27</sup> Hagi anantarega kini netremokea magoka trate mani'neke havige huke orevatga arevatga hugaha'e. Hianagi kema anakisna'a kemo'a amne zankna hugahie.

Na'ankure Anumzamo'ma hunte'nea kna fatgore maka'zama vagama resania knamo'a eghahie.

<sup>28</sup> Anante noti kaziga kini nemo'a rama'a fenoza eri'neno ete rukrahe huno mopa'arega vugahie.

Hianagi karankama nevuno'a Anumzamofo vahe'mo'zama mono'ma ne-haza zantamina eri haviza nehuno, maka zanena eri haviza huteno ete nonkuma'rega vugahie.

<sup>29</sup> Hagi Anumzamo'ma huhampri'nea knama efore'ma hanigeno'a, noti kazigati kini ne'mo'a ha' erino vuno sauti kaziga kini nera ha' ome hunttagahie.

Hianagi ko'ma hu'nea zana hunora hara hugateoregahie.

<sup>30</sup> Zage fre kazigama me'nea hagerimofo ankenaregama nemaniza vahe'mo'za ventefi e'za hara eme hunte'za, azeri koro hugahaze.

Anama hanageno'a ete atreno mopa'arega vugahie.

Hianagi agrira tusi

arimpa nehesanigeno nevuno, tamage Anumzamofo mono'ma hunentesaza zana eri haviza nehuno, Anumzamofoma zamefi hunemiza vahe'mokizmi nanekea antahigahie. <sup>31</sup> Ana ne'mofo sondia vahe'mo'za ra mono nomofo hankave vihu kegina eri nafa'a nehu'za, mono nona eri pehenage nehu'za, mago mago zupama Kresramanama nevaza zana asevazi nezamante'za, Anumzamofo mono nompina kasrino'ma havizama hu'neaza eritru regahaze. <sup>32</sup> Anumzamofo kasegema zamefi'ma humisnaza vahera ana kini nemo'a havige huno rezamatavga hanige'za, agri amage antegahaze. Hianagi Anumzamofoma ke'za antahi'zama hu'nesnaza vahe'mo'za oti hankave ti'neza agri nanekea eri atregahaze. <sup>33</sup> Hagi amu'nozamifima knare antahi'zama eri'nesnaza kva vahe'mo'za, rama'a vahe knare antahi'zana zami'za zamazeri fatgo hugahaze. Hianagi ana avu'ava zana ana kva vahe'mo'za za'zatera hu'za ovu'nesnage'za, kva vahera kazinteti zamahe nefrisage'za, mago'a kva vahera tevefi kre tasagesage'za frigahaze. Ana nehu'za mago'a kva vahera kinafi zamazeri nente'za, fenozamia rohu zamare'za erigahaze. <sup>34</sup> Hagi ama ana knazama fore'ma hania knafina ana kva vahe'mo'za osi'a zamazama hu'zana erigahaze. Ana nehanage'za rama'a vahe'mo'za ana kva vahera kaziga antegahazanagi havige hu'za anara hugahaze. <sup>35</sup> Ha' vahe'mo'za anama knare antahi'zama eri'naza kva vahera mago'a zamazeri haviza hugahaze. E'inahu zama hanaza zamo'a kva vahera Anumzamofo avurera zamazeri agru huno zamazeri avusese hanige'za Anumzamo'ma agesama rentahia vahekna hu'za mani'nesageno henka maka zamo'ma vagama resnia kna efore hugahie. Na'ankure Anumzamo'ma huhampari'nea knamo'a zahufa ne-e. <sup>36</sup> Ana kini ne'mo'a agri'ma avesi'nia zana amne tro nehuno, agra'agura huno nagra maka anumzantamina zamagatere'noe huno avufga erisga nehuno, maka havi anumzantamima zamagatere'nea Anumzamofona huhaviza huntegahie. Ana avu'ava zana hume nevanigeno, Anumzamofo arimpa ahe'zamo'ma ome vagamaresia zupa, agri avu'ava zamo'enena ome varegahie. Na'ankure Anumzamo'ma huno henka fore hugahiema huno hu'nesnia zamo'a tamage huno efore hugahie. <sup>37</sup> Hagi ana kini ne'mo'a agehe'mokizmi anumzana antahi nozamino, a'nane mo'zama mono'ma hunentaza havi anumzanena antahi nomino, mago'a havi anumzanena antahi ozamigahie. Na'ankure agra avufga erisga nehuno, nagra maka anumzantamina zamagatere'noe huno agesa antahigahie. <sup>38</sup> Hianagi agrama mono'ma huntessiana, hankave vihu keginama kegavama nehia havi anumza monora huntegahie. Hagi ana havi anumzana agehe'mo'za ke'za antahi'za osu'naza anumzankino, golima, silvama, zago'amo marerisa haveramine mago'a musezane ofa nemino monora huntegahie. <sup>39</sup> Hagi ana kini ne'mo'ma vahe'ma ha' ome huzmanteno hankave vihuma hu'nesnaza kuma'ma erinaku'ma hanuno'a eme azama hanigeno ha'ma hanigura ru vahe'mokizmi anumzantaminku kea hugahie. Ana nehuno agri kema antahisaza vahera, zamazeri ante ama' huno rankva zamazeri o'netino, mopa refko huno zagore atresige'za miza hugahaze. <sup>40</sup> Hagi maka zama ome vagamare knama enaku'ma nehanigeno'a, sauti kaziga kini nemo'a eno, noti kaziga kini nera ha' eme huntegahie. Anama hanigeno'a noti kaziga kini ne'mo'a ame huno karisifima mani'neza ha'ma hanaza vahe'ene karisiramine, venteramine erino hagerimpima ha'ma nehaza vahetamina zamavaren vanige'za, sauti kaziga kini nera hankaveti'za hara ome huntahazie. Timo'ma hageno maka zama erino viaza huno maka mopafi vahera hara huzmanteno zamazeri zamagateregahie. <sup>41</sup> Ana kini ne'mo'a sondia

vahe zaga'ane knare zantfama hu'nea Israeli mopafi ufreto eri agrarega nenteno, rama'a kumapi vahera hara huzamagateregahie. Hianagi Moapu vahe'ene Idomu vahe'ene Amoni mopafinema nemaniza vahera hara hu zamagate oregahaze. <sup>42</sup> Ana nehuno ana kiri ne'mo'a rama'a kumapi vahera hara huzmagatereno kegava huzmantegahie. Hanki Isipi vahe'mo'zanena atre'za ofregahaze. <sup>43</sup> Ana kini ne'mo'a Isipi mopafima me'nea goline silvane maka marerisa feno zantamina agrake kegava hugahie. Ana hanige'za Libia vahe'ene Itiopia vahe'mo'za agri eri'za vahe manigahaze. <sup>44</sup> Hianagi zage hanati kazigati'ene noti kazigati vahe'mo'zama hanaza nanekema nentahisuno'a, tusi koro agesa hugahie. Ana nehuno tusi arimpa nehesnigeno vuno maka zana eri haviza nehuno, ha' vahe'a ome zamahé vagarenaku hugahie. <sup>45</sup> Ana'ma hutesuno'a vuno Medeterenia ra hageri anke'nane, Saioni agonamofo amu'nozanifi agra kini nemo'ma manisnia seli nona ome kino manigahie. Hianagi anante'ma mani'nesnige'za ome ahe frisnageno, mago vahemo'e hunora aza osugahie.

## 12

### *Henkama maka zamo'ma vagama renaku'ma hania knafima fore'ma hania zamofo naneke*

<sup>1</sup> Hanki ugota ankeronkino, ana knafina agra otigahie. Ana knafima fore'ma hania knazana, magore huno ama mopafina fore osu'neankna knaza fore hugahie. Hianagi Danieliga kagri vahe'ma zamagima avontafepima me'nesnia vahera Anumzamo'a zamagu vazi'nige'za knare hu'za manigahaze. <sup>2</sup> Hanki ko'ma frizage'zama ase zamante'naza vahera fri'nafintira ete otigahaze. Anama hute'za mago'amo'za manivava zamasimu enerisnige'za, mago'amo'za tusi zamagazegu nehu'za ana zamagazefi manivava hu'za yugahaze. <sup>3</sup> Hanki knare antahi'zane vahe'mo'za monamo'ma remssama hiaza hu'za remsa nehanage'za, rama'a vahe'ma zamavare'za fatgo avu'avapima nevanaza vahe'mo'za, ofumo'ma hiaza hu'za maka zupa remsa huvava hu'za yugahaze. <sup>4</sup> Hianagi kagra Danieliga ama'na nanekema me'nea avontafera eri runkanirentenka, atregeno oku meno vuno maka zama ome vagarenaku'ma hania knare uhanatino. Rama'a vahe'mo'za ama'na nanekemofo agafa'a antahi ama' hunakura tusiza hu'za hake'za vu'za e'za nehanageno antahintahizmimo'a ome ra huno vugahie.

<sup>5</sup> Hanki nagra Danieli'na koana, timofo kantu kama anke'narera tare netre oti'nake'na ke'noe. <sup>6</sup> Ana ankerontrepinti mago'mo'a, efeke zaza kukenama hu'neno timofo agofetu'ma oti'nea ne'mofona amanage huno antahige'ne. Nama'a kna manitesnunkeno ama'na ruzahu'zama tasami'nea zamo'a eforera huvagaregahie?

<sup>7</sup> Higeno efeke zaza kukenama antani'neno, timofo agofetu'ma oti'nea ne'mo'a, tare azantre'na monarega erisga hu anagamu netreno, mani vavama nehia Anumzamofo agifi huvempa huno amanage hu'ne, Nagra huvempa huankino, anazama fore'ma haniana 3'a kafugi 6si'a ikampi fore hugahie. Anumzamofo vahe'mokizmi hankavemo'ma vagama resanigeno, ana knazamo'enena vagaregahie.

<sup>8</sup> Hagi nagra Danieli'na ana nanekema hiana antahi'noanagi, Ana nanekemofo agafa'a antahi amara osu'noe. Ana hige'na amanage hu'na antahige'noe, Ranimoka ama ana zamo'ma evu vagama retesigeno amefira na'a efore hugahie? hu'na antahige'noe. <sup>9</sup> Hianagi agra amanage

huno hu'ne, Danieliga menina atrenka vuo. Na'ankure nanekema krente avontafemo'a runkanireno me'nenigeno vuno henkama maka zamo'ma vagama renaku'ma hania knafi eforera hugahie. <sup>10</sup> Ana knazama fore'ma hania zamo'a, rama'a vahe zamazeri agru huno zamazeri avusese hugahie. Hianagi kefo zamavu zamava'ma hanaza vahe'mo'za kefo zamavu zamava huvava hu'za nevu'za, antahiamara osugahaze. Ana nehanage'za antahi'zane vahe'mo'za zamagrake anazamofo agafa'a antahi amara hugahaze.

<sup>11</sup> Hanki Anumzamofontegama maka zupama kresramnama nevaza zama ase nevazi'za kasrino havizama hu'nea zama Ra mono nompima retru rente'nesnage'zama mono'ma hunteszana 1tausen 2hantret 90'a zagegnamofo agu'afi anara hugahaze. <sup>12</sup> Hanki ana knazamofo agu'afima oti hankaveti'za mani'neza Anumzamofoma avega ante'za mani'nesageno'ma 1tausen 3hantret 35'a zage gnamo'ma evania vahera Anumzamo'a asomu huzmantegahie.

<sup>13</sup> Hanki kagra menina Danieliga oti hankavetinka mani'negeno vuno atuparera uhanatino. Kagra frinka mani fru hugahananagi, maka zamo'ma vagama resania knazupa ete otinka Anumzamo'ma refko huno'ma ante-gante'nea zantamina erisanti haregahane.

## Hosea Hosea Avontafere

### *Hosea a'mofavremofo naneke*

<sup>1</sup> Hagi Usia'ma, Jotamu'ma, Ahasi'ma Hesekaia'ma hu'za Juda vahe kinima mani'za azageno, Joasi nemofo Jeroboamu'ma Israeli vahe kinima mani'nea knafina Ra Anumzamo'a Beri nemofo Hoseana amanage huno asami'ne.

<sup>2</sup> Ra Anumzamo'a Beri nemofo Hoseampima huvazino Israeli vhahera amanage huno zamasami'ne, Kagra vunka savri'ma hu'za vanoma nehaza monko a'nene finti ara ome erigeno, savri mofavrerami kasezmanteno. Na'ankure e'i ana avu'avazamo'a, monko a'nemo'za savri hu'za vano ne-hazankna hu'za Israeli vahe'mo'za havi anumzante mono ome hunente'za Ra Anumzamo'na natre'naza avu'avaza zamaveri hugahie. <sup>3</sup> Ana higeno Hosea'a Diblaimi'e nehaza ne'mofo mofa Goma ara omerigeno, Goma'a amu'ene huno mago ne' mofavre kasente'ne. <sup>4</sup> Hagi Ra Anumzamo'a Hoseana asamino, Ana mofavremofona Jesrili'e hunka agi'a antemio. Na'ankure Nagra kofta hu'na Jesrili agupofima vahe'ma aheno'ma korama eri tagi'nea zanteria, Jehu nagara knazana nezmi'na, Jehu nagapinti'ma kinima mani'za neaza zana eri atregahue. <sup>5</sup> Hagi ana knazupa Israeli vahe'mokizmi ati zamia Jesrili agupofi ruhantagi atregahue. <sup>6</sup> Hagi Goma'a mago'ane amu'ene huno mago mofa kasentegeno, Ra Anumzamo'a Hoseana asamino, Mofaka'amofo agia, Lo-Ruhama'e, nasunkura huozmantegahue hunka antemio. Na'ankure Nagra mago'enena Israeli vhahera nasunkura huozmanten'a kumizmi'apase ozmantegahue. <sup>7</sup> Hianagi Nagra Juda vahe'mokizmia nasunkura hunezmante'n'a, zamagu'ma vazinuana atire-tiro, bainati kazintetiro, ha'ma hu'zantetiro, hosine, hosi afu agumpima mani'neza ha'ma nehaza vahetii'enena hu'na zamagura ovazigosuanki, Nagra Ra Anumzana zamagri Anumzamo'na zamagu'vazigahue. <sup>8</sup> Hagi Lo-Ruhama'a ome rama huno amima netregeno'a, Goma'a mago'ane amu'ene huno mago ne' mofavre kasente'ne. <sup>9</sup> Ana higeno Ra Anumzamo'a huno, Agi'a Lo-Ami'e, nagri vhahera omani'naze hunka antemio. Na'ankure zamagra nagri vhahera omani'nage'na, Nagra zamagri Anumzana omanigahue.

<sup>10</sup> Ana hugahianagi henka'a Israeli vahe'mo'za hageri anke'nafi kahep-ankna hu'za rama'a vahe fore hanageno, vahe'mo'a hamprigara osugahie. Ana hanigeno, Nagri vhahera omani'naze huno'ma hu'nea ker-era, ete rukrahe hu'za Agra kasefa huno mani'nea Anumzamofo mofavr-erami mani'naze hu'za hugahaze. <sup>11</sup> Ana hanigeno Israeli vahe'ene Juda vahe'mo'zanena eri mago hu'za mago vahe nemaniza, magoke kva ne'azeri otite'za, ana mopafintira atre'za marerigahaze. Na'ankure Jesrili mopafina rankna fore hugahie.

## 2

<sup>1</sup> Hagi kagra kafuhe'inkura, Ami'e, Nagri vhahera nehunka, kasara-hehe'inkura Ruhama, navesinentomo'e, hunka hugahane.

*Israeli vahe'mo'zama mani fatgoma osazageno kna zami'nea fronka naneke*

<sup>2</sup> Mofavrenimota neramarerana hankavetita nanekea asaminkeno, monko ane'mo'zama zamavugosama eri ruzahu ruzahu'ma nehu'za,

ami'mo'ma amate'ma hu kukenama nentaniza zana osino. Na'ankure agra nagri ara omanige'na, nagra agri vea omani'noe. <sup>3</sup> Ana'ma osniana mika kukena'a ahena hate atranenko, nerera'ma kasentegeno kukena osu avapama mani'nea kna huno avapa manigahie. Ana hute'na hagage kokampi atreankna hu'na atranenko tinku huno frigahie. <sup>4</sup> Hagi Nagra mofavre'aramina nasunkura huozmantegahue. Na'ankure agra monkote huno vano nehuno, kase zmante'nea mofavrerami mani'naze. <sup>5</sup> Hagi nezmarera'a agaze'a omane monko a'kino, agra tusi agaze avu'avaza huno amu'enena hu'ne. Na'ankure agra ana a'mo'a huno, nagrama navesinentoa vene'neramimo'zama ne'zama, tima, sipisipi azokate kukenama, efeke kukenama, olivi masavema, wainima hu'za nami'naza vene'neramina zamavaririgahue huno hu'ne. <sup>6</sup> E'ina hu'negu nagra ave'ave trazanteti kama vanoma nehia kana asevazintegahue. Ana nehu na have kegina hu'na kama vano nehia kana rehiza hanugeno, kama vanoma hu'zankura hakegahie. <sup>7</sup> Hagi ana a'mo'ma agrama avesi nezmantea vene'neramima zamarotago huno'ma vaniana ome zamaze'origahie. Hagi ana vene'neraminkura hakeno vano hugahianagi, zamageno eri forera osugahie. Zamageno'ma erifore'ma osnuno'a agra amanage hugahie, nagra ete ese ve'ni'are vanue. Na'ankure agranema mani'noana knare hu'na mani'noane huno hugahie. <sup>8</sup> Hagi rama'a witima, kasefa wainima, olivi masavema, silvama golima hu'na ami'noa zankura nagriku nami'ne huno agesa ontahino, erino Bali havi anumza ami'ne. <sup>9</sup> E'ina hu'negu hozama vasage knarerera nagra witini'a eneri'na, zafa ragama rente knarerera wainini'a erigahue. Ana hukna hu'na kukenama huno avufgama refite'nogu'ma sipisipi azokate kukenane efeke zaza kukenanema ami'noana ete'na erigahue. <sup>10</sup> Nagra menina miko kukena'a hate atranena agri'ma avesima nentaza vahe zamavuga avufga avapako otigahiankino, mago'moe huno nagri nazampintira agura ovazigahie. <sup>11</sup> Hagi ne'zama kreno neneno musema nehia zane, kasefa ikantero mago Sabati knarerero, nezama kreno neneno musema nehia zana miko eri atregahue. <sup>12</sup> Hagi navesima nenantaza vahe'mo'za mizani'a nami'naze huno'ma nehia waini nofitamine, fiki zafanena eri haviza hanugeno anampina zafa avono fore hinkeno afi zagagafamo'zage ana zafa ragaramina negahaze. <sup>13</sup> Hagi Bali havi anumzantaminte'ma mnantake'za insensima kremana vunezmantea zanku, Nagra knazana ami'na azeri haviza hugahue. Ana nehuno agesafi rinia eri renenteno, marerisa avasese'za eri nentanino avesima nezmantea vene'nerami nezmavaririno Nagrikura agenekanie.

### *Ra Anumzamo'a Israeli vaheku asunku huzmante'nea nanke*

<sup>14</sup> E'ina hu'negu Nagra ami'mi hu'na hagage kopi ome antete'na, akohen fru nanekea asami'na nagrarega avrentegahue. <sup>15</sup> Hagi anantega waini hoza'a nemi'na, Hazenke Agupoe hu'zama nehaza agupo eri rukrahe ha'nena, amuha'ma hu'zamofo kaha megahie. Hagi ana a'mo'ma mofa'ma mani'nege'nama, Isipiti'ma avre'na ati'neramugenzo zagamema hu'neaza huno zagamera hugahie. <sup>16</sup> Hagi Ra Anumzamo'a huno, Ana knarerera, Nagrikura nenave'e hunka nehunka, kvani'a mani'ne hunka Bali havi anumzankura osugahane. <sup>17</sup> Na'ankure Nagra Bali havi anumzamofo agiramima nehea zana agipintira eri atrenugen, ana zamagiramina neheno monora huontegahie. <sup>18</sup> Hagi ana knarerera zagagafama, namaramima, mopa agofetu'ma zamasaguregati'ma regrarohe'za vanoma nehaza zagaramina, huhagerafi hvempage hugahue. Ana nehu'na maka atirami'ne,

bainati kazinknone, maka ha'zanena ana mopafintira eri atre'nuge'za korora osu knare hu'za manigahaze. <sup>19</sup> Nagra a'kavra'nena Nagri a'mani vava hugahane. Nagra a'ma kavresuana, fatgo avu'ava zanteti'ene fatgoma huno refkoma hu zanteti'ene avesima anteno knare avu'ava'ma hunte zanteti'ene nasunku zanteti'ene, <sup>20</sup> hugahue hu'nama hu'noa zama amage ante'na hu navu'nav a zantetiki huna ara kavra'nena, Nagrikura Ra Anumzane hunka kenka antahinka hugahane. <sup>21</sup> Hagi Ra Anumzamo'a huno, Ana knarera Nagra hanugeno, monamo'a kora atrenigeno mopafina neranigeno, <sup>22</sup> mopamo'a witine, wainine olivi rgaramina Jesrili agupofina rentegahie. <sup>23</sup> Hagi avimzama hankreankna hu'na ana ara ana mopafi nehankre'na, nasunkura Huogantegahue hu'nama hu'noa agia eri rukrahe hu'na, Nasunku Hugantegahue nehu'na, Nagri vhahera omani'naze hu'noa agia ete eri rukrahe hu'na, Nagri vhahera hanuge'za, ete zamagra Nagrikura tagri Anumzane hu'za hugahaze.

### 3

#### *Hosea'a ete nenaro avre'nea nanake*

<sup>1</sup> Anante Ra Anumzamo'a amanage huno nasami'ne, Kagra ete vunka ru vene'nemo'zama avesintazageno savri huno monkote'ma vanoma ne-hia a'ka'a ome avesinto. Israeli vahe'mo'za e'inahu kna hu'za monko a'nemo'za nehazaza hu'za havi anumzantera monora ome hunente'za, kaza osu havi anumzantaminte ante hagagema hu'naza waini raga'a ofa hunezmantazanagi, Ra Anumzamo'na navesinezmantoe. <sup>2</sup> Higena 15'a silva zugogi, 6'a bali kutetiki, waini tintetiki hu'na ana ara mizasena ete avre'noe. <sup>3</sup> Anante ana ara asami'na, kagra zazate nagranena maninka nevunka, monkote'ma hunka vano nehana zana atro. Kagra ru vene'nenena savrira hunka vano osuge, ru vea ome e'orige huge'na, nagra kagri ve mani fatgo ha'neno. <sup>4</sup> Ana hukna hu'za Israeli vahe'mo'za rama'a knama mani'za vanaza knafina, kini vahe'ene ugagota kva vahezmia omanisageno, kresramana vu zane, retru rene'za mono'ma hunentaza havenena omane-sigeno, pristi vhahera omanisageno, kaza osu havi anumzantamina omanegahie. <sup>5</sup> Ana hanigeno Israeli vahe'mo'za ete rukrahe hu'za Ra Anumzana zamagra'a Anumzante'ene kinizmi Devitinte'ene egahaze. Ana nehu'za Ra Anumzamofonku korora hunte'za agoraga'a mani'neza, henkama maniza vanaza knafina Agripinkati knare'zana erigahaze.

### 4

#### *Ra Anumzamo'ma Israeli vahe'ma keaga huzmantesia nanake*

<sup>1</sup> Hagi Ra Anumzamo'a amanage hianki Israeli vahe'mota antahihi, Ra Anumzamo'a amanage huno ama mopafima mani'naza vhahera keaga huramanteanki antahihi, Tamagra avariri fatgo nosuta, avesi ante'zana omanegeno, Anumzamofoma keno antahino'ma hu'zana ama mopafina omanene. <sup>2</sup> Hagi tamagripina vahe'ma sifna hunte'zanki, havigema huzanki, hazenkezmi omane vahe zamahe fri'zanki, kumzafa zane, monko avu'avazane, mika kaziga ha' frama hu'zane, vahe'ma aheno korama eri tagi'zamo avite'ne. <sup>3</sup> E'i ana agafare mopatamifina zavi krafagemo'a avitegeno, mopafina tina omaneno hagege nehigeno, monafima hare'za vano nehaza namaramine, hagerimpi nozameramine, afi' zagagafamoza-nena fri vagare'naze. <sup>4</sup> Hagi mago vahe'mo'a mago vahekura huno kagri hazenke me'ne huno osino. Na'ankure ama hazenkea pristi vahe'mota eri

fore hu'nagu keaga huneramantoe. <sup>5</sup> Hu'negu tamagra zage ferupina tanafa huta nemasesage'za, havige kasnampa vahe'mo'zanena hanimpina tanafa hugahaze. Hagi anta'tamimofo Israelina azeri haviza hugahue. <sup>6</sup> Hagi vahe'nima zamazeri havizama hanuana, na'ankure Nagrira nage'za antahiza zamagra osu'nazagu anara hugahue. Hagi pristi vahe'mo'za Nagrira nagenira osu'nagu, zamagri'enena antahi nozamue. Hagi tamagra Nagri kasegea tamagekanizagu, tamagrira tamagekani neramante'na mofavretamia asomura huozmantegahue. <sup>7</sup> Hagi rama'a pristi vahe'ma fore'ma nehu'za, rama'a kumi hu'naze. Hagi ra zamagina eneriza zana zamazeri zamagaze hugahue. <sup>8</sup> Hagi vahe'mo'zama kumizmire'ma ofama hunaku'ma eri'za aza ofa pristi vahe'mo'za ne'naze. E'ina hu'negu vahe'mo'zama kumima nehazage'za, pristi vahe'mo'za rama'a muse nehaze. <sup>9</sup> Hagi nazano pristi vahe'mo'zama haza zamavu zamavara vahe'mo'zanena ana zamavu zamava avaririza kefo zamavu zamavara nehaze. Ana hu'nazagu pristi vahe'ene amne vahe'enena ana zamavu'zmava hu'naza zante zamazeri haviza hugahue. <sup>10</sup> Hagi rama'a ne'zana negahazanagi, zamura osugahie. Hagi savri monko avu'ava zana hugahazanagi, mofavrea kase hakarea osugahaze. Na'ankure tamagra Nagrira Ra Anumzana natreta ru anumzamofo amage ante'nazagu anara hugahaze. <sup>11</sup> Hagi waini tine, kasefa waini tine, savri monko avu'ava'ma hu'zamo, antahi ama'ma hu'zana Nagri vahepin-tira eri netre.

<sup>12</sup> Hagi Nagri vahe'mo'za zafare'ma kaza osu havi anumzama antre'za tro hunte'naza havi anumzane, rampa zante'ma tro'ma hunte'naza havi anumzana antahinegaze. Hagi zamagra savri monko avu'avazama haz-azamo zamazeri havia hige'za zamagra Anumzamofontera mani fatgo hu'za nomaniza monora huonte'naze. <sup>13</sup> Hagi zamagra agonaramimpi mareriza kaza osu havi anumzantera kresramana vunentaze. Hagi knare ton'a'ma hu'nea oki zafane, popra zafane, terebinti zafa agafafi kre man-avu ofa hunte'naze. E'ina agafare mofa'netamimo'za ana zanke hu'za monkote hu'za vano nehazageno, tamanoferehe'za ana zanke hu'za savri hu'za monkote vano nehaze. <sup>14</sup> Hianagi monkozama hu'za vanoma nehaza mofa'netamine, tamanoferehe'inena Nagra knazana zami'na zamazeri havizana osugahue. Na'ankure tamagra vene'nemotanena ana zanke huta zagore'ma monkoza nehaza a'nanene monkozana ome ne-huta, havi anumzamofo mono nompi savri'ma nehaza a'nene ofa ome Kresramana nevaze. E'ina hu'negu ama' antahi'zana omanenigeta haviza hugahaze. <sup>15</sup> Hagi Israeli vahe'mota monko a'negna huta mani fatgo huta nomanizanki, Juda vahe'motanema ana zama huzankura kva hiho. Hagi havige anumzante'ma Gilgalima mono'ma hunentaza zankura kva nehuta, kasefa'ma huno mani'nea Ra Anumzamofo agifima huvempa ne-haza zankura kva hiho. <sup>16</sup> Hagi Israeli vahe'mokizmi zamasenimo'a han-kavetigege huno keontahi bulimakao afu'mofo asenimo'ma hiaza hu'ne. Hianagi inankna hu'na e'inahu vahera sipisipi afu anentama avare'nomu vanoma nehigeno tra'zama nenea knara hu'na kegava huzmantegahue. <sup>17</sup> Hagi Israeli vahera zamatrengke'za zamagra'a zamavesi'za avaririza kaza osu havi anumzantera viho. <sup>18</sup> Hagi Israeli vahe'mo'za aka tima nete'za monko a'negu ome hake'za ana a'nene monkoza ome nehaze. Hagi ranra kva vahe'mo'za zamagina eri'zana netre'za zamagazema hu avu'ava zanku zamave'nesie. <sup>19</sup> Hagi hanave zaho'mo mikaza eme eri hareno freankna hu'na zamavare atregahue. Na'ankure zamagrama havi anumzantema kresramnama vunte'nazagu anara hanuge'za zamagazegu hugahaze.

## 5

*Israeli vahe'mokizmi naneke huzmante'nea naneke*

<sup>1</sup> Pristi vahe'mota ama nanekea antahihi! Israeli vahe'mota tamagesa anteta antahihi! Kini vahe'mota tamagesa anteta antahihi! Keaga tamagri huneramante. Na'ankure tamagra Mizpa vahetera kriku anagi anteankna huta monora havi anumzante Tabori agonafina hunentaze. <sup>2</sup> Hazenke zamita rama'a vahe zamazeri haviza hu'nazagu ana zantera Nagra kna zana tami'na tamazeri fatgo hugahue. <sup>3</sup> Hagi Efraemi vahera Nagra zamage'na antahi'na hu'noanki, Israeli vahe'mota Nagri navurera frara oki'naze. Efraemi vahe'mota monko anemo'zama nehzaza huta savri huta vano nehuta, Israeli vahe'mota tamazeri pehana hu'naze. <sup>4</sup> Hagi kefo avu'ava'ma nehzaza zamavu'zmava'zamo zamazeri antrako hige'za rukrahera hu'za Anumza zmimofontera nomaze. Na'ankure savri monko avu'avazama hu'zamo zamagu'afina me'negeno, Ra Anumzamofona ke'za antahi'za nosaze. <sup>5</sup> Hagi Israeli vahe'mo'zama zamavufaga rama hu' zamavu'zamava nehzaza zamo, zamagri avu'ava zana huama nehie. Hagi Israeli vahe'ene, Efraemi vahe'mo'za zamagri'a kumimo zamazeri tanafa nehanige'za, Juda vahe'mo'zanena magoka tanafa hugahaze. <sup>6</sup> Hagi Ra Anumzamofa avesizanku hakenaku sipisipi afu kevu'zamine, bulimakao afu kevu'zmine egahazanagi, Ra Anumzamofona eme ke'za eriforera osugahaze. Na'ankure Agra ko zamatreно zamagrira vu'ne. <sup>7</sup> Zamagra Ra Anumzamofona tamage hu'za avariri fatgoa osu'naze. Na'ankure zamagra savri mofavrerami kasezmante'naze. Menina kasefa ikante'ma ne'zama kreza nene'za musema hu'za mono'ma hu'zamo'a zamazeri havizantfa nehuno, hozazminena eri haviza hugahie. <sup>8</sup> Hagi pazivete'ma tro'ma hu'nea ufeni Gibea kumateti nerenko, Rama kumatetira ufeni nerenko, Bet-Aveni kumatetira ranke huta kezankea nehuta, tagra Benzameniga kavaririta hatera vugahune huta hiho. <sup>9</sup> Hagi knazama amino vahe'ma azeri havizama hu'knarera, Efraemi vahe'mo'za ka'ma kokamo'ma nehiaza hu'za havizantfa hugahaze. Hagi Israeli vahe amunompima huama'ma nehua zamo'a tamage huno fore hugahie. <sup>10</sup> Hagi Juda ugagota kva vahe'mo'za kanagi kama akasi'za mopama eri havlama huza musufama nesaza vahe kna hu'naze. E'ina hu'neankina narimpama ahe'zamante'zana tima tagitreankna hu'na zamagri zamagofetu narimpa ahe'zana erikaha hutregahue. <sup>11</sup> Hagi keagama refkohu knafina Efraemi vahera knazamo'a zamazeri havizantfa hugahie. Na'ankure kaza osu havi anumzamofa amagera ante'za nevazagu anara hugahaze. <sup>12</sup> Hagi Nagra havi (moth) kfamo kukena hagenkro kru hiankna hu'na Efraemi vahera zamazeri haviza nehu'na, kasri zamo kasrino keonke'za eri haviza hiaza hu'na Juda vahera zamazeri haviza hugahue. <sup>13</sup> Hagi Efraemi'a agrama krima eri'nea zana kegeno, Juda'a namuma'a ke'ne. Hagi Efraemi'a rukrahe huno Asiria vuno agine kini ne' ome ke'neanagi, ana kini ne'mo'a kri'a azeri kanamaregara osuge, ra namuma re'neana eri osaparentegara osu'ne. <sup>14</sup> Na'ankure Nagra Efraemi vahetera laionigna nehu'na, Juda vahetera kasefa huno hanave laionigna hu'nena zagagafama aheno tagana vaziankna hu'na zamahe'na tagana vazi-gahue. Nagra zamahete'na haninkofi'na nevanugeno, mago vahe'mo'e huno zamazeri ovarigahie. <sup>15</sup> Hagi ana hute'na ete rukrahe hu'na nemanurega umani'nenuge'za, kefozama hu'naza zankura zamasunku nehu'za, zamagra tusiza hu'za Nagrikura hakregahaze. Hagi ana knazampima mani'neza nagrikura tusiza hu'za hakegahaze.

**6***Israeli vahe'mo'zama zamagu'a rukrahe osu'naza naneke*

<sup>1</sup> Hagi enketa ete rukrahe huta Ra Anumzamofontega vamaneno. Na'ankure Agra tagrira tavufga rutraga trago hu'neankino, Agrake tazeri so'e hugahie. Hagi Agra tavufga rutraga tarago hu'neakino, Agrake namuntera anaki rantegahie. <sup>2</sup> Hagi tare knama evanigeno'a, Agra tazeri kasefa hugahie. Hagi nampa 3 kna zupa tazeri soe hanigeta, agri avuga manigahune. <sup>3</sup> Hagi Ra Anumza mani'ne huta Agrira keta antahita hanune. Hagi Agrama atiramino'ma vania zamo'a, nanterama rumsa huno koma'tiankna nehanigeno ete efresia zamo'a, trazama nehagea knafima neria kokna hugahie.

<sup>4</sup> Hagi Efraemi vahe'mota Nagra na'a tamagrira huramantegahue? Hagi Juda vahe'motanena Nagra na'a huramantegahue? Tamagrama tamavesi nenantaza zamo'a nantera hampo kiteno ame huno fanane hiankna nehigeno, nantera ata aheteno ana ata'mo ame huno hagege hiankna nehaze. <sup>5</sup> E'ina hu'negu kasnampa vahe'nia huzmantanena tamahe'za rutraga trago hunetre'nage'na, nagipinti'ma atiraminia keaganu tamahe'na rutraga tarogo hunetre'na, kopsinamo rutarage huno mikaza eri ama hiaza hu'na, keaga refko huramantegahue. <sup>6</sup> Na'ankure Nagri'ma nave'nesiana ofama huzankura nave'nosianki, tamagu'aretima huta Nagri'ma navesinante zanku nave'nesie. Anumzamo'nama nageno antahinoma huzankura nave'nesianki, tevefi kre fananehu ofama hu'zankura nave'nosie. <sup>7</sup> Hianagi tamagra Adamu kna huta Nagri huhagerafi hu'vempagea runetagreta, Nagririra tamage huta tamagu'aretira huta namagera nontaze. <sup>8</sup> Hagi Giliati rankumapina kefo avu'ava'zama nehaza vahe'mo'za avitazageno, zamagakafina koromo avite'ne. <sup>9</sup> Hagi vahe'ma ahe frinaku'ma kfafoma ante'za nemaniza vahekna hu'za pristi vahe'mo'za Sekemu kumategama vu kantega kfafona antene'za, vhahera zamaha nefri'za, hazenke zana eri fore nehaze. <sup>10</sup> Hagi Israeli vahepinina knare osu'kefoza me'negena ke'noe. Efraemi vahe'mo'za monko avu'avaza nehazageno, Israeli vahe'mo'za zamagra'a zamazeri pehana hu'naze. <sup>11</sup> Hagi vahe'nima zamazeri knare'ma hanua zupa, Juda vahe'motanena tamazeri havizama hanua kna ko huhamprinte'noe.

**7***Israeli vahe'mo'zama kumi'ma hu'naza zamofo naneke*

<sup>1</sup> Nagra Israeli vhahera zamazeri so'e hunaku huanagi, Efraemi vahe'mofo kefo avu'avazamo'a eama nehigeno, Sameria vahe'mofona havi zamavu'zamava zamo'a zamagripina avite'ne. Zamagra kefo zamavu'zamava nehazage'za, musufa vahe'mo'za nona tagna nevazizage'za, megia musufa vahe'mo'za vano nehu'za vahe'mofo zana musufa enerize. <sup>2</sup> Hianagi ana kumi'zamigu'ma nage'ma nokanua zana zamagra ke'za antahiza osu'naze. Kumima haza zamo'a maka kaziga megagi zmante'nege'na, Nagra ana maka kumizmi'a amate negoe. <sup>3</sup> Hagi kefo avu'ava zanteti kini nera azeri muse nehu'za, havigema huzanteti ugagota kva vahe'zmia zamazeri musena nehaze. <sup>4</sup> Hagi zamagra savri monko avu'avaza hu vahe mani'nazanki'za, breti krenaku'ma witi flaua'ma heneru'zama avenifima tevema hugrazageno tusi amuhoma nehiankna huno, monkozama hu zamagu'zamagesamo'a teve rukru nehie. <sup>5</sup> Hagi kini ne'mo'ma ne'zama kreno nenenonu musema nehia knarera,

ugagota kva vahe'mo'za hankave tina ne'za neginagi nehazageno kini ne'mo'a zamagri'enena kiza zokago kea nehie. <sup>6</sup> Hagi kefo avu'ava'ma hu antahiza zamimo'a avenimo'ma tusi amuhoma nehiankna huno, amuho huteno kenagera amuhomo'a ome osi osi nehuno, nanterama segeno'a tevenefa'mo'ma nehiaza huno hagana hagana nehie. <sup>7</sup> Hagi zamagra avenimo'ma tusi amuhoma hiaza hute'za, kva vahe'zmia zamahe hana nehaze. Hagi miko kini vahezamia zamahe vaganere'za nagrama zamazama hanugura nagritega kea nosaze. <sup>8</sup> Hagi Israeli vahe'mo'za ru vahe'ene ruhavia hu'za nemaniza, te so'e osu'nea kekigna hu'naze. <sup>9</sup> Hagi ru vahe'mo'za hankavezamia eri amne nehazanagi, zamagra ana zana keza antahiza nosaze. Hagi tu'zamazokamo'a tusiza nehianagi, zamagra e'i ana zana ke'za antahiza nosaze. <sup>10</sup> Hagi Israeli vahe'mokizmi keontahi zamavu'zamava zamo'a eriama huno nezmasamianagi, zamagra rukrahe hu'za Ra Anumzana zamagra'a Anumzantera omäge Agrikura hakegera nosaze. <sup>11</sup> Hagi Efraemi vahe'mo'za mago antahi'zana omne maho namagna vahe mani'naze. Zamagra Isipi vaheku zamazama hanagura kezaneti'za, kegavama huzmante'sazegura Asiria vahekura kea hu'naze. <sup>12</sup> Hagi anantegama vanage'na namama hareno enevigeno, kukoma rutare ante'neno azeneriankna hu'na Nagra kukoni'a atrena zamazerite'na, knazana zamigahue. <sup>13</sup> Zamagra ra hazenkefi manigahaze. Na'ankure nagrira zamefi hunami'za fre'nazankiza, zamagra haviza hugahaze. Hagi ete nagra zamavarenaku nehuanagi, zamagra havige hu'za renavatga nehaze. <sup>14</sup> Hagi zamagra zamagu'aretira hu'za nagritega krafagea nosazanki, tafe'zamire mani'neza amne krafagea nehaze. Zamagra wainire'ene witire'ene ome eritru nehu'za, Nagrira zamefi hunami'naze. <sup>15</sup> Hagi Nagra rempi huzami'na zamazeri hankaveti'noanagi, zamagra nazeri haviza hunaku oku'a kea anaki'naze! <sup>16</sup> Hagi zamagra rukrahe hu'za e'nazanagi, Nagritera ome'nazanki haviza hu'nea atigna hu'naze. Hagi kva vahe'zamimo'zama knare osu kema hu'nazagu hu'za ha' vahe'mo'za kva vahera eme zamahe fri vagaregahaze. E'ina hanage'za Isipi vahe'mo'za zamagi'za regahaze.

## 8

### *Anumzamo keaga Israeli vahe huzmanteno knaza zamisia zamofo naneke*

<sup>1</sup> Hagi ufena tamagite anteta reho! Tumpa namamo nehiaza hu'za ha' vahe'mo'za Ra Anumzamofo nona eme avazagi kanegize. Na'ankure zamagra huhagerafi huvempa keni'a ruha'nentagi'za, kasegeni'a ha'rente'nazagu anara hugahaze. <sup>2</sup> Israeli vahe'mo'za nagritega amanage hu'za zavi krafagea hu'naze. Anumzamoka tagri Anumza mani'nanketa tagra keta antahita kagrira hu'none hu'za hu'naze. <sup>3</sup> Hianagi Israeli vahe'mo'za knare avu'ava zana zamagena humi'nazankino, ha' vahe'amo'za zamahe'za zamarotago hugahaze. <sup>4</sup> Hagi zamagra nagripintira hu izo kea e'orine'za, kini vahera zamazeri ot'i'naze. Nagra ke'na antahina osu'noge'za, kva vahera zamazeri ot'i'naze. Hagi silva zamireti'ene golireti'enena kaza osu havi anumzana tro hunte'nazanagi, ana zamo'a zamazeri haviza hugahie. <sup>5</sup> Hagi Sameri'a vahe'mota bulimakao anenta'amofo amem'a ma golire'ma tro'ma hunte'naza zankura, nagra tusiza hu'na narimpa ahenezmantoe. E'i ana zanteras tu'siza huno narimpa neheanki, nazupa kefo avu'ava zana atretta knareruta manigahaze? <sup>6</sup> Hagi mago Israeliti eri'za vahe'mo ana havi anumzana azanteti tro hunte'neankino, e'i anumzana omanine. E'ina hu'negu ana zantamina erita ru tamanatamanu hutreho. <sup>7</sup> Hagi tamagra

menina zaho nehankrazankita henka ra zahokrerfa hamaregahaze. Hagi witia hankre'nageno marerigahianagi, raga reontegahie. Hagi marerino ragama rente'niana, ha' vahe'mo'za musufa emergahaze. <sup>8</sup> Hagi Israeli vhahera zamasagahu nakarisige'za, haviza hu'neā kavo meaza hu'za kokankoka vahe amu'nompi mani fankanu haregahaze. <sup>9</sup> Na'ankure zamagra afi donki afumo agra'a avesi'zante vano hiazza hu'za Asiria mareriza vu'naze. Hagi Efraemi'a zagore monko avu'avara huno vano hu'ne. <sup>10</sup> Hagi zamagra ru vhahete zamavufaga zagore ome atre'nazanagi, Nagra zamazeri atru hu'na keaga huzmantegahue. Hanki hankave kini ne'mo knazana zamino zamazeri haviza hume nevanige'za, osi'a vahe maniga-haze. <sup>11</sup> Hagi Efraemi vahe'mo'za ofama hu ita rama'a tro hu'nazanagi, e'i ana itaramimo'a Nagri navurera kumima hu itarami efore nehie! <sup>12</sup> Hagi Nagra rama'a kasege kreza'mi'noanagi, zamagra ana kasegea kazageno amanezankna hige'za, tagri'zana omene'ne nehu'za, ana kasegeni'a amagera onte'naze. <sup>13</sup> Hagi zamagra nagritega ofa eme kresramana nevu'za, ana afu'mofo ame'a ne'nazanagi, Ra Anumzamo'a ana ofagura musena nosue. Hagi menina kefo avu'avaza zamigura agesa nentahino, kumi'ma hu'naza zanteria knazana zaminige'za, ete Isipi rukrahe hu'za vugahaze. <sup>14</sup> Hagi Israeli vahe'mo'za tro'ma huzmant'e'nea Anumzana zamage kani-nente'za, kini vahe'mokizmi nonkumazmi kinte'naze. Hagi Juda vahe'mo'za rankumamofo have kegina eri hankaveti'za tro hu'haze. Hianagi Nagra teve atresugenno rankumazmia tefanane nehina, vihu kumazminena tevemo tefanane hugahie.

## 9

### *Israeli vahe'mo'za knaza eri'naza naneke*

<sup>1</sup> Israeli vahe'mota, ru kumate vahe'mo'zama nehazaza huta musenkasea osiho. Na'ankure tamagra monkote huta vano nehuta Anumzamofona tamage huta avariri fatgoa nosaze. Hagi tamagra witi honama neharaza kumapima zagore savari monko avu'avazama huzanku tamave'nesie. <sup>2</sup> E'ina hu'negu witi honama neharaza kumapintira vahe'mo'za witia e'orisageno, wainima regatati'ma nehaza kumapintira, waini tina e'origahaze. E'ina hanigeno kasefa wainima troma hu grepri raga omanegahie. <sup>3</sup> Hagi tamagra Israeli vahe'mota Ra Anumzamofo mopafina omanigahaze. Hianagi Efraemi vahe'mo'za Isipi mopafi ete rukrahe hu'za nevu'za, Asiria umani'neza agruma osu ne'zana negahaze. <sup>4</sup> Ana nehu'za Ra Anumzamofontega waini ti ofa nosu'za, ofama Kresramanama vanaza zanku'enena Ra Anumzamo'a musena osugahie. Hagi ofama hanaza zamo'a vahe'ma frite'ma zavi'ma netazageno, nezmia bretigna hugahie. Anama ofama hu'zama nesamo'za zamagra'a zamazeri pehena hugahaze. Na'ankure ana bretima nesazana zamaga'ma tege'zama nenazankna hu'za negahazankino, ana ne'zana eri'za Ra Anumzamofo mono nompina eofregahaze. <sup>5</sup> Hagi ne'zama kreno neneno musenkasema hu knarer na'a hugahaze! Nezama kreno neneno Ra Anumzamofoma antahimi knarer na'a hugahaze? <sup>6</sup> Hagi keho, hazenke zamofo korora fregahazanagi, Isipi vahe'mo'za tamazeri atru nehanage'za, Memfisi vahe'mo'za aseramantegahaze. Hagi silvareti'ma tro'ma hu'naza feno zantamimofo agofetura, traza nehagenigeno, ave'ave trazamo seli nontamia hageno refitegahie. <sup>7</sup> Hagi knazama tamino vahe'ma tamazeri havizahu kna hago ne-egeno, mizama eri knamo'a hago ama fore nehianki,

Israeli vahe'mota keta antahita hoho. Na'ankure kumitamimo'a rankrerfa huno havizantfa hu'negeta, kasnampa vahekura neginagi vahere huta nehuta, Anumzamofo Avamumo'ma nanekeema asmigeno'ma neramasmia vahekura tamavesra hunezmantaze. <sup>8</sup> Hagi Anumzamo'a kasnampa vah'e'a huntegeno Efraemi vahete'ma havizama fore'ma hu'zankura kegava hu'neanagi, kama vanoma hirega tamagra krifua anaginteta vano nehuta, Anumzamofo nompi manineta hara renenteta, knare osu avu'avara hunentaze. <sup>9</sup> Hagi korapa'ma Gibea kumate'ma hu'naza hu'za zamagra kefo avu'ava zana hu kasrikasri hu'za hu'naze. Hagi Anumzamo'a ana kefo avu'avaza zamigura ageranokanino, kumi avu'ava zamigura knazana zamino zamazeri haviza hugahie.

<sup>10</sup> Hagi Ra Anumzamo'a huno, Israeli vahe'ma ese'ma zamage'na eri fore'ma hu'noana, hagage kokampinti'ma grepri ragama tagiankna hu'noe. Hagi ese'ma zamagehe'ima ke'noana, fiki ragama rente'nefinti'ma ese'ma afuma re'nea ragagna hu'nazage'na zamage'noe. Hianagi zamagra Ba'al-Peori eme natre'za kaza osu havi anumzante monora hunente'za, zamagra'a zamazeri zamagazea hu'za himanage zama zamavesinenta zankna zamagra hu'naze. <sup>11</sup> Hagi Efraemi vahe'mo'zama ra zamagina e'neriza zamo'a namamo'ma hiaza huno hareno frenige'za, mofavrea kase ontege, zamu'enena osuge, zamarimpafina mofavrea forera osuge hugahie. <sup>12</sup> Hagi zamagra mofavrea kasente'za zamazeri ra hugahazanagi, Nagra ana maka hanare vagaregahue. Nagrama zamagri'ma zamatresuge'za zamagra ra hazenkefi manigahazanki, kva hoho. <sup>13</sup> Hagi Tairi vahe'mo'zama knare mopafima mani'nazankna hu'za kotera Efraemi vahe'mo'za knare kumapi mani'nazanagi, Efraemi vahe'mo'za mofavrezmia zamavare'za vanage'za, zamahe frigahaze.

<sup>14</sup> Hagi Ra Anumzamoka naza zamigahampi, amne zamio. Hagi nagrama kantahigenuana, mofavrema kase kuntra'ma hu zamarimpa nezminka, amina eri hagage huge'za mofavrea amina ozamaho.

<sup>15</sup> Hagi Gilgali kumateti eri agafa hu'za kefo avu'ava zana hazage'na, ananteti agafa hu'na navesra huzamante'noe. Kefo zamavu'zmava'ma haza zanku noniafintira zamahekasope netre'na, nagra ru'enena navesi ozmantegahue. Na'ankure kva vahe'zmimo'za ha'renenantaze. <sup>16</sup> Hagi zafa arafunama tasagi hiaza hu'na Efraemi vahera zamazeri haviza hanuge'za raga reontegahaze. Mofavrea kasente'za zamavesi zmante'gahazanagi, Nagra ana mofavrezmia zamahe frigahue.

<sup>17</sup> Hagi Nagri Anumzamo'a avresra huzmanteno zamatrengi'za, ru vahe mopafi kokankoka vano hugahaze. Na'ankure zamagra Anumzamofonkea antahi'za amagera onte'naze.

## 10

### *Israeli vahe'mo'zama hu'naza kumite'ma nona huno zamazeri havizama hania naneke*

<sup>1</sup> Hagi Israeli vahe'mo'za knare'zama huno hageteno rama'a ragama renentea wainigna hu'naze. Hianagi zamagra rama'a fenoza nente'za ante'za havi anumzante'ma kresramna vunte ita rama'a tro hu'haze. Hagi rama'a ne'za mopafintira nehamare'za, havi anumzama mono'ma hunentaza have-mofonena rama'a avasase'zana hunentaze. <sup>2</sup> Hagi ana vahe'mokizmi zamagu'afina havigema hu'zamo avite'neanki'za, menina ana zamofo knazana erigahaze. Ra Anumzamo'a Kresramanama nevaza itaramina

eri taganavazi netreno, havema retrurente'nezama mono'ma hunentaza haveramina erino rutamanatamanu hutregahie. <sup>3</sup> Hagi zamagra amanage hugahaze, Tamage huno menina tagrina kini vahetia omani'ne. Na'ankure tagra Ra Anumzamofona korora hunontone hugahaze. Hianagi mago kini vahe'ma manisiana, agra na'a hurantegahie? <sup>4</sup> Hagi zamagra agafa'a omane nanake nehu'za, hugahune hu'zama huvempama nehaza zantamina nosaze. E'ina hu'negu knare'ma hu'zama keagama refkoma osu avu'ava'ma zama nehaza zamo'a avuatga (poisin) trazamo hozafi hageno mareriankna nehie. <sup>5</sup> Hagi bulimakao anentamofo amema'ama Bet-Aveni kumate'ma troma hunte'naza havi anumzantera naza fore hugahie hu'za Sameria kumate'ma nemaniza vahe'mo'za tusi zmagogogu nehaze. Anampima ne-maniza vahe'mo'zane, kaza osu havi anumzante'ma mono'ma hunentaza pristi vahe'mo'zanena tusi zavi krafa hugahaze. Na'ankure ra zamagina e'neriza zana eme zamahe'za hanare'za vugahaze. <sup>6</sup> Hagi ana kaza osu havi anumzazmia eme eriza Asiria vu'za kini ne' Jarebina muse'za ome amigahaze. Hagi Efraemi vahe'mo'za tusi zamagazegu nehanageno, Israeli vahemo'zamena zamagra'a antahintahima amage'ina ante'naza zankura zamagazegu hugahaze. <sup>7</sup> Hagi Sameria vahe'ene kini ne'enena teve as-esama timo'ma erino viankna huno zamavareno vugahie. <sup>8</sup> Hagi Israeli vahe'mo'zama marerisgama huneregama havi anumzamofoma mono'ma hunte'za kefo zamavuzamava zama nehaza Aveni kumara eri haviza hugahie. Havi anumzante'ma Kresramanama nevaza itazmirera ave'ave trazantamimo agofetura hageno refitegahie. Ana hanige'za ranra agonagura hu'za ankrisenka refiteranto huge, osi agonagura hu'za tagumpi emasenka frakiranto hu'za hugahaze.

<sup>9</sup> Hagi Israeli vahemota Gibea kumateti agafa huta kumira huteta huvava huta neaze. E'ina hu'neankino Gibea kumate'ma kefo avu'ava'ma hu'naza vahera hapi zamahe vagare'naze. <sup>10</sup> Hagi Nagrama knazama zaminaku'ma hanua knarerka knazana zami'na zamazeri fatgo nehu'na, kokankoka vahera zamazeri atru hanuge'za atru hute'za, hara eme huramante'za tare zupama kumi'ma hu'nazarera kina huramantegahaze. <sup>11</sup> Hagi Israeli vahera azeri agazonema hu agaho a' bulimakaomo'ma witi honama refuzafuza zanku'ma ave'nesiakna nehianki'na, zamana'zamana huno hento-faza hu'neaza anankempina karenamere zafa antegahue. Efraemina karenamare zafa anankempi ante'nugenio erizana enerina, Juda vahera hanugeno mopa rekonerinigeno, Jekopu naga'mo'za mopa rupopo hugahaze. <sup>12</sup> Tamagra'a fatgo avu'ava zana nehankreta, vagaore avesizana nehamareta, rekorino mopa rupopoma nehiaza huta tamagua eri fatgo hugahaze. Na'ankure menina Ra Anumzamofonku'ma hakekna neanki Agriku nehakenkeno, Agra eno fatgo avu'ava zama'a koma runteaza huno eme asomu huramantegahie. <sup>13</sup> Hianagi tamagra kefo avu'ava zamofo hoza enerita, knare osu avu'avaza nehamareta, havige zamofo raga'a ne'naze. Na'ankure tamagra'a hanavegu tamentintia nehuta, rama'a sondia vahe'mo'za taza hanageta knare huta manigahune huta tamentintia nehaze. <sup>14</sup> E'ina hu'negu ha'ma huramante'naza krafagea tamagri vahe'mo'za nentahisageno, Bet-Abeli kuma'ma kini ne' Salmani'ma eri havizama hu'neaza huno kuma vihutamia eri haviza hugahie. Higeno aneramine mofavrezmienena zamahe fri vagare'naze. <sup>15</sup> E'inahu knaza Beteli kumatera fore hugahie. Na'ankure kumi avu'ava zama hu'naza zamo'a amenagame mareri'ne. Hagi knazama esania knamofo nanterana, Israeli kini nera ahe

frigahaze.

## 11

### *Ra Anumzamo'a Israeli vahe avesi zamante'nea naneke*

<sup>1</sup> Hagi Israeli vahe'mo'zama mofavrema mani'nazage'na navesi'nezmant'e'na mofavreni'e hu'na Isipitira zamavare'noe. <sup>2</sup> Hianagi Nagrama kema zamagriku'ma nehuge'za, mago'ane natre'za afete vu'naze. Ana nehu'za Bali havi anumzantaminte'ene kaza osu havi anumzantaminte'ene ofane mananentake zanena ome kremana vu'naze. <sup>3</sup> Hagi Israeli vhahera zamazaranta Nagra zamavazu hu'na vano nehu'na, kama vanoma hu avu'ava zana rempi huzmi'noe. Hianagi Nagrama zamazeri knamare'noa zana ke'za antahi'za osu'naze. <sup>4</sup> Nagra nasunku hunezmante'na navesi nezmante'na Israeli vhahera zamavare'na vu'noe. Ana nehu'na zamanankempintira karenamare zafa eri netre'na, pri hu'na ne'zana zami'noe. <sup>5</sup> Zamagra ete rukrahera huza Isipia ovugahaze. Hianagi Asiria vahe'mo'za kegava huzmantegahaze. Na'ankure Nagrite'ma e'zankura zamavesra hu'nazagu anara hugahaze. <sup>6</sup> Hanki rankumazmifina bainati kazinteti ha' vahe'mo'za eme ha' huzmante'za ku'ma kafazmia tapage hunetre'za, zamahe vagaregahaze. Ana hanageno antahintahima retro'ma hu'naza zamo'a amne zankna hugahie. <sup>7</sup> Na'ankure Nagri vahe'mo'za natre'za rukrahe hu'za nevaze. Ana nehu'za Marerisga hunemo'hu'za zamagra hugahazanagi, Nagra zamazeri so'ea osugahue. <sup>8</sup> Hagi Efraemi vahe'mota inankna hu'na tamatregahue? Inankna hu'na Isareli vahe'mota tamatregahue? Hagi inankna hu'na Adma kumate vahe'ma zamazeri havizama hu'noa zana hugahue? Hagi inankna hu'na Zeboimi kumate vahe'ma zamazeri havizama hu'noa zana hugahue? Nagra nagu'reti tusi'za hu'na nasunkura huramantoe. <sup>9</sup> Hagi narimpa ahe'zamo'ma tevema reana atrenugen evuramina, Israeli vhahera zamahe vaga'oregahue. Na'ankure Nagra vahetfana omani'noanki, Anumza mani'noe. Nagra Ruotage hu'noa Anumzama amu'nontamifima nemanua Anumzanki'na, Nagra narimpa aheramante'na e'na eme tamehanara osugahue. <sup>10</sup> Mago knafina Ra Anumzamofona amage antegahaze. Nagra Ra Anumzamo'na laionimo'ma nehiaza huna ranke nehanuge'za, mofavre naga'nimo'za zage fre kazigatira zamahirahiku nehu'za egahahue. <sup>11</sup> Hagi maho namamo'zama nehazaza huza Isipitira hare'za ne-esageno, Asiriati'ma maho namamo'za zamahirahiku nehu'za hare'za azankna nehanage'na, ete zamavare'na kumazamire ome zamatregahue hu'na Ra Anumzamo'na nehue.

<sup>12</sup> Hagi Efraemi vahe'mo'za havigege huza nevazageno, Juda vahe'mofo Anumzamofo kea ontahi vano vano nehu'za Ruotge'ma Hu'nemofona zamagu'aretira hu'za avariri fatgoa nosaze.

## 12

### *Israeli vahe'mo'za kumi hu'naza naneke*

<sup>1</sup> Hagi Efraemi vahe'mo'za ne'zama neankna hu'za zahora nene'za, maka kna zage hanati kazigati'ma ea zaho nevaririze. Zamagra havige avu'ava zane, vahe'ma ohe fri ahe fri hu avu'avaza hu'za eri hakare nehaze. Ana nehu'za Asiria vahe'ene eri mago hu'za nemani'za, zamazama hu'zama eris-agura olivi masavena atrage'za Isipi eri'za nevaze. <sup>2</sup> Ra Anumzamo'a Juda vhahera keaga hunezmanteno, zamagrama hu'naza zamavu zamavatera Jekopu nagara knazana zaminio zamazeri haviza hugahie. <sup>3</sup> Hagi Jekopu'a

nerera arimpafima mani'neno'a, nefu agiare azerino hara hunte'ne. Hagi ra vahe'ma neseno'a, Anumzane hara hu'ne. <sup>4</sup> Hagi agra ankero ne' hara huno agatenereno, agri'ma asomu'ma hunte'nigura zavira neteno antahige'ne. Hagi agra Anumzamofona Beteli eme keno erifore huno keaga nehuno, asunkuma hunteno azama hanigura agri'enena keaga hu'ne. <sup>5</sup> Ra Anumzana Agra Monafi sondia vahe'mofo Anumzankino, agi'a Ra Anumzane. <sup>6</sup> Ana hu'negu menina tamagra'a Anumzante rukrahe huta eta vahe'ma avesinte avu'avazane, vahe'ma knare hunte avu'ava zanena eme azeri hankavetih. Ana nehuta tamagra'a Anumzamofonte amuhara huta viho. <sup>7</sup> Hagi zagore fenoma atre'za eri'zama nehaza vahe'mo'za, fatgo kazigatira zagoa retro nosazanki, havige hu'za vahe'mofo zana kna'a refko hu so'e huza nege'za mizana te'nosizanki, zamazeri savri hu'za miza nesaze. <sup>8</sup> Hagi Efraemi vahe'mo'za hu'za, tagra feno vahe mani'neta, rama'a feno ante'none hu'za zamavufaga ra nehaze. Ana nehu'za amanage nehaze, Vahe'ma zamazeri savri'ma huta fenoma retroma huna kumira mago vahe'mo'a tageno eri forera osugahie hu'za nehaze.

<sup>9</sup> Hianagi Nagra Ra Anumzana tamagri Anumzamo'na, Isipitira tamavre'na atirami'noa Anumza mani'noankina, ko'ma fugagi noma kita manita e'naza zanku'ma antahimita seli noma kita nemaniza kna huta, ete tamatrenugeta ete seli nompi umanigahaze. <sup>10</sup> Hagi Nagra kasnampa vaheni'afi huvazi'na nanekea nehu'na, avanagna zana rama'a eri zamaveri nehu'na, rama'a fronka kea zamagrili huvazi'na tamasmi'noe. <sup>11</sup> Hianagi Gileati vahe'mo'za kefo avu'ava'ene vahe mani'nazanki'za, knare osu vahe mani'naze. Hagi Gilgali kumate'enena bulimakao afu ahe'za havi anumzantera Kresramana vu'nazankino, Kresramana vu itama tro'ma hu'naza zamo'a hozama rekointe agupomofo refarega have eri hihi huntazankna huno meno vu'ne. <sup>12</sup> Hagi korapara Jekopu'a (Israeli) Aramu moparega freno umani'neno, sipisipima kegava hia zanteti ara eri'ne. <sup>13</sup> Hagi Ra Anumzamo'a kasnampa ne'mofompi huvazino Israeli vahera Isipitira zamavareno atirami'ne. Ana nehuno ana kasnampa ne'mofompi huvazino kegava huzmante'ne. <sup>14</sup> Hianagi Efraemi vahe'mo'za kefo avu'ava zantfa hu'za Ra Anumzamofona azeri arimpa ahe'naze. E'ina hu'negu menina Ra Anumzamo'a vahe'ma zamahe'za korama eritagi'naza knazana eri zamagofetu nenteno, kumi avu'avazama hu'naza zantera nona huno mika zamazeri haviza hugahie.

## 13

### *Ra Anumzamo Israeli vahe zamazeri haviza hania zamofo naneke*

<sup>1</sup> Hagi kora Efraemi naga'mozama kema hazage'za vahe'mo'za koro huza zmahirahiku nehazageno, Israeli vahepin Zamagimo'a mareri'ne. Hianagi Efraemi vahe'mo'za Bali havi anumzante monora hunte'za kumira hu'nazagu fri'naze. <sup>2</sup> Hagi meninena Israeli vahe'mo'za mago'anee kumira huvava hu'za nevu'za, kaza osu havi anumzamofo amema'a silvareti tro hunte'naze. Ana nehu'za ana zantera Kresramanama vunenteta agira antako hunteho hu'za nehaze. <sup>3</sup> E'ina hu'nagu zamagra nantera hampomo fanane hiankna nehu'za, nantera zage rentegeno ata'mo fanane hiankna ana vahe'mo'za hugahaze. Ana nehu'za witi honama hare kumapinti zahomo witi hona eri hareno viankna nehu'za, tokima mareri kampinti teve tokimo atiramino ome vagareankna nehaze. <sup>4</sup> Hianagi Nagra tamagri

Anumzamo'na Isipitira tamavre'na e'noa Anumza mani'noe. Hagi tamagra ru anumzamofo agia ahentesga osiho. Na'ankure tamagu'ma vazi Anumzana magora omani'neanki, Nagrake'za mani'noe. <sup>5</sup> Hagi hagege huno tima omane ka'ma kopina, Nagra kegava huramante'noe. <sup>6</sup> Hianagi Nagra ne'zana tamugeta neramu'ma nehuta, tamagra tamavufga erisaga nehuta, Nagrira tamage kaninante'naze. <sup>7</sup> E'ina hu'negu Nagra laionimo zagagafa aheaza hu'na neramahe'na, lepatimo karanka frakineno zagagafa aheno tagana vaziankna hugahue. <sup>8</sup> Hagi Nagra a' beamo'ma anenta'a avre'nageno ha'hiankna hu'na zamahe'na zamimiza eri tapage hunetrena, laionimo zagagafa aheno neankna nehu'na, afi zagamo zagagafa aheno tagana vazinkna hu'na zamahena tagna taganu vazitregahue. <sup>9</sup> Hagi Israeli vahemota tamagra havizantfa hugahaze. Na'ankure tamagra tamazama nehua Anumzamo'na ha' renante'naze. <sup>10</sup> Hagi ranra kumatamifinti'ma tamagu'ma vazio kini vahetamia iga mani'noe? Hagi kini vahe'ene kva vahetaminema tamio huta hu'naza kini vahe'tamine kva vahetamina iga mani'noe? <sup>11</sup> Anagema hazage'na narimpa aheneramante'na, kini vahera tamamite'na ete tusi narimpa ahe neramante'na, ana kini vahera zamavare atre'noe. <sup>12</sup> Hagi Efraemi vahe'mokizmi kefo avu'ava zana kona anakintegeno me'negeno, kumizmia avompi krentegeno me'ne. <sup>13</sup> Hagi Israeli vahe'mo'za anemo'zama mofavre antenaku'ma nehazageno nehiankna zamata erigahazanagi, ana mofavrea knare antahiza omane mofavre kasenteankna hugahaze. Hagi mofavrema kasente knarera, ana mofavremo'a nerera arimpafintira atioramigahie. <sup>14</sup> Hagi Nagra fri vahe kumapintira (Seol) ete ozamavaregahufi? Hagi fri'zamofo hanavefintira ozamavaregahufi? Hagi nagra ama ana vahekura nasunkura osugahue. <sup>15</sup> Hagi miko kafuhe'i amunompina Efraemiga knare'za hunka nehagenka tretre hunka mareri'nane. Hianagi Ra Anumzamo'a zage hanati kazigati zahora hunte'nigeno hagege kokampina zahora erino ne-eno, tinkeria eri neraneno, neonse tinena eri hagege nehuno, maka mareri zago fenozana emeri vagareno vugahie. <sup>16</sup> Hagi Sameria vahe'mo'za kumi'ma hu'nazarera knazana erigahaze. Na'ankure zamagra Anumzamo'na ha'renante nazankino, kazinteti zamahe vaganere'za neone mofavreramina zamahe'za rutraga hunetre'za, amu'ene aneramina zamahe'za zamarimpa reraragu fegahaze.

## 14

### *Zamagu'ama rukarahe'ma hanu'za asomu eri'naza naneke*

<sup>1</sup> Israeli vahe'mota kumi'tamimo tamazeri tanafa hu'negu tamagu'a rukarahe huta Ra Anumzana tamagri Anumzamofontega echo. <sup>2</sup> Hagi tamagra Ra Anumzamofonte ete rukarahe huta eta kumitamia amanage huta eme huama hiho. Miko kumitia atrenerantenka kasunku hurantenka tavaregeta kagia ahentesga hugantamneno. <sup>3</sup> Hagi Asiria vahe'mo'za tagura ovazigahaze. Tagra ha' vahe'mo'zama vano nehu'za ha'ma nehaza hosi afu agumpina vano osugosune. Ana nehuta tagra'ama tromta hunte'nona zankura ru'enena tagri anumzane huta osugosune. Na'ankure kagrade'za megusa mofavreraminkura kasunkura hunezmantane.

<sup>4</sup> Hagi Ra Anumzamo'a huno, Nagri'ma natreta havi tamavu tamava'ma nehaza zampintira tamavre'na tamazeri so'e hugahue. Na'ankure tamagri'ma narimpa aheneramanta zamo'a evuramie. <sup>5</sup> Hagi Israeli vahetera Nagra ata ko'ma eramiaza hanuge'za, lili flauamo amosre ahenteaza

nehu'za Lebanoni zaza sida zafamo'ma nehiaza hu'za arafu'nazmia mopa-fina atre'nageno amefenkame uramigahie. <sup>6</sup> Ana nehu'za olivi zafamofo agatamo'ma tragun tragu huno hageno vuno eno nehiankna nehanageno, mana'zmimo'a Lebanoni zaza sida zafamofo amosremo'ma neviankna mana' vugahaze. <sup>7</sup> Hagi Israeli vahe'mo'za ete e'za, Nagri turunapinka mani'neza hoza ante'nageno witi zamimo'a rama'a raga renentenige'za, rama'a hoza vasagegahaze. Zamagra grepimo afova tretre'ma huno hageaza nehanageno, Lebanoni wainimofo agenkemo'ma haruharuma ne-hiaza huno zamagenkemo'a haruharu hugahie. <sup>8</sup> Hagi Efraemi vahe'mota, kaza osu havi anumzana mago'enena avako osuta atreho! Nagra nunamu tamirera nona huneramante'na kegava huneramantoe. Nagra saipresi zafagna hu'nogeta, Nagripinti zafa raga neragize. <sup>9</sup> Hagi knare antahi'zane vahe'mo'za amama nehua nanekea antahi ama' hugahaze. Hagi ama' antahi'zane vahe'mo'za amama nehua nanekea ani' hugahaze. Na'ankure Ra Anumzamofo avu'ava zamo'a tamage huno fatgo hu'neanki'za, fatgo zamavu zamava'ma nehaza vahe'mo'za Agrira nevaririze. Hianagi kumi vahe'mo'za tanafa hu'za traka nehaze.

# Joel

## Joeli Avontafere

*Kenutamimo'za keonke'za eme ne'za erihana hanaza naneke*

<sup>1</sup> Hagi ama nanekea Ra Anumzamo'a Petueli ne'mofo Joelis asami'nea naneke.

<sup>2</sup> Hagi ranra vahe'mota ama nanekea nentahinkeno, ama mopafima mani'naza vahe'motmanena ama ana nanekea antahihio. Tamagri knafine tamagehe'i knafinena, amanahu zana fore hu'neaza fore nehifi? <sup>3</sup> Hagi tamagra ama ana nanekea mofavre'tamimofo zamasaminke'za, zamagra mofavre'zmia zamasami anante anante hu'za viho. <sup>4</sup> Hagi tra'zama akafri'za nenaza kenumo'zama nege'zama atrazama'a, magopima manu manu hu'za hare'za vanoma nehaza kenumo'za nazageno, zamagrama nege'za atrazama'a takaire takaire'ma hu'zama vano nehaza kenumo'za nazageno, atrazama'a ana maka zama vatri'zama nehana'ma nehaza kenut-mimo'za ne'za erihana hu'naze. <sup>5</sup> Hagi aka tima neta neginagima nehaza vahe'mota otitma tamasunku hutma zavi krafa hiho. Na'ankure haganentake waini timo'a vagarenigeta, mago'anena onegahaze. <sup>6</sup> Hagi tusi'a hanavenentake huno hampriga osu kenutmimo'za, sondia vahe'mo'za hate vazankna hu'za nagri mopafina mani vite'naze. Hagi ana kenu-tamimofona zamavemo'a a' laionimofo avekna hu'ne. <sup>7</sup> Ana hu'neankino waini hozani'a ne'za eri haviza nehu'za, fiki zafani'aramina ani anagazape atrere hu'naze. Ana nehu'za ana zafa akrutamina tavrofetre vagarazageno azankuna'aramimo'a efeke huvagare'ne. <sup>8</sup> Hagi tamagra mago mofa'mo ve erinaku hu'nea vemo frigeno, kento kukena hu'neno, nevenku zavi krafa hi-anckna huta zavira ateho. <sup>9</sup> Hagi Ra Anumzamofo mono nompima ofama hu witine waininena omanegahie. E'ina hanige'za Ra Anumzamofo eri'zama eneriza pristi vahe'mo'za tusi zavi krafa hugahaze. <sup>10</sup> Hagi hozamo'a haviza higeno, mopamo'a hagege higeno, witi ragamo'a ome haviza higeno, wainimo'a hagege higeno, olivi masavema eneriza zafamo'enena hagege hu'ne. <sup>11</sup> Hagi hozama erita nentaza vahe'mota tamagazegu hiho. Grepri hozafima eri'zama eneriza vahe'mota zavi krafa hiho. Na'ankure witine balimo'enena hozafina nena'a reontegeno hozamo'enena hagege hu'ne. <sup>12</sup> Hagi waini nofimo'a hagege higeno, fiki zafama, pomigreneti zafama, deti zafama, epoli zafamo'zanena hagege hu'naze. Ana maka zafaramimo'a hagege higeno, vahe'mo'zama musema nehaza zamo'a vagare'ne. <sup>13</sup> Hagi pristi vahe'ma krekre sramana vu itare'ma eri'zama eneriza vahe'mota tamasunku kukena hunetma zavi krafagea hiho. Anumzamofo eri'za vahe'mota tamasunku kukena hunetma kenage'enena maniho. Na'ankure tamagri Anumzamofo mono nompima ofama huntesaza wainine witinena omanegahie. <sup>14</sup> Hagi ke omenta emente huta vahera ke hutru huta ne'zana a'o hutma nunamu hiho. Ranra vahetamina ke hutru huta, mika ama mopafima nemaniza vahera zamavreta Ra Anumzana tamagri Anumzamofo ra mono nompi marerita, Ra Anumzamofontega rankea huta kezatihi. <sup>15</sup> Knare osu kna fore hugahianki, kva hiho! Na'ankure Ra Anumzamo'ma knazama tam'i'sania knamo'a, hago kofta niehie. Ana knazamo'a Hihamu Hankave'ane Anumzamofontegati egahie. <sup>16</sup> Hagi tagra'a tavufinti negonkeno nezantimo'a vaganeregano, musenkasema huta Anumzantimofo mono nompima mono'ma hunentona

zamo'a vagare'ne. <sup>17</sup> Hanki mopafima hankre'naza avimzamo'a, hagege huno nefrigeno, nezama vasagente nomo'a haviza nehanigeno, witima vasagente nomo'a haviza huno frugu vaziramine. Na'ankure witimo'a hagege huno haviza hu'ne. <sup>18</sup> Hagi bulimakao afutamimo'za ne'zankura krafa nehu'za, ne'zama nesaza zankura hake'za vano nehzageno, sipisipi afu kevumo'zanena ne'zama nesnaza tra'zana omanege'za tusi zamagaku hu'naze. <sup>19</sup> Ra Anumzamokarega nagra nunamuna nehune. Na'ankure sipisipi afu'mo'zama nenaza trazana afeteno erihana nehuno, mika zafanena terasage vagare'ne. <sup>20</sup> Hagi afi zagagafa'moza tima nesaza zankura tusiza nehu'za Kagritega krafa nehaze. Na'ankure ana miko timo'a tane vagaregeno, maka avo'nona afe tevemo teno erihana hu'ne.

## 2

### *Kenutamimo'za sondia vahekna hu'za esaza zamofo naneke*

<sup>1</sup> Hagi Saioni agonareti ufena nereta, Nagri ruotage agonaretira kezatinke'za ana mopafima nemaniza vahe'mo'za zamagogogu nehu'za, zamahirahiku hiho. Na'ankure Ra Anumzamofo knamo'a hago ne-eankino, hago erava'o hu'ne. <sup>2</sup> Hagi e'i ana knama fore'ma haniana tusi'a hanintiri hanigeno, komanetigeno agonaregama rumsama nehiankna huno hanavenentake sondia vahe'mo'za ruherafiramiza eghahaze. Anama hanazana kora anahukna zana forera osu'neanknaza fore hugahankino, henka'a forehu anante anante'ma hu'za vanaza vahepin, anahukna zana forera osugahie. <sup>3</sup> Hagi tevemo'a maka zana teno zamavuga nevigeno, zamefira tevemo'a hagana hagana huno mika zana tefanane huno vu'ne. Hagi zamavuga maka zamo'a Ideni hozagna hu'neanagi, zamefira mago zana omanetfa higeno kugusopa fore hu'ne. <sup>4</sup> Hagi ana kenumo'za hosi afu kna hu'nazankino, hosi afumo'zama hate'ma zamagama reza nevazankna hu'za zamagare'za e'naze. <sup>5</sup> Hate'ma nevia karisimo'ma neriankna zamagasasa ru'za ana kenutmimo'za agona morusapina takaire takaire nehu'za mugafu afe'ma neregeno, tarage tregema hiaza hu'za tusi'a sondia vahe'mo'za hahunaku avazuhumpi hu'za vazankna hu'naze. <sup>6</sup> Hagi kokankoka vahe'mo'zama ana kenutamima nege'za, tusi zamatagu nehu'za koro zamavugosa hu'naze. <sup>7</sup> Hagi ana kenumo'za hanave sondi'a vahe kna hu'za ne-eza, ran kumamofo kuma keginarera sondia vahe'mo'zama nehzaza hu'za mareri'naze. Hagi zamagra vuganti kama osu'za zamagra'a kanteke vu fatgo hu'za vu'naze. <sup>8</sup> Hagi anama vu'nazana, magomofo kana ome rehiza eme rehiza hu'za ovu'nazanki, zamagra'a kante vu fatgo huza kuma kegina anafe hu'za vutere hu'za vu'naze. <sup>9</sup> Ana nehu'za ana kenumo'za ran kuma'ma me'nerega zamagare'za vu'za, kegina agofetu mareri'naze. Ana nehu'za maka nontmimpina mareneri'za, musufama nesazaza hu'za zahoma eri kampinti'ene nompina umareri'naze. <sup>10</sup> Hagi nevazageno'a imi enerigeno, monamo'a ahirahiku nehigeno, zagine ikanemokea rehanintiri nehakeno, hanafimo'za remasa osu'naze. <sup>11</sup> Hagi Ra Anumzamo'a monagema hiaza huno kea nehuno, ohampriga'a sondia vahetmina vugota huzmanteno zamavareno nevie. Ra Anumzamo'ma keagama refkoma hania knamo'a, knare osu kna fore hugahankino iza knarera hu'nesia vhemo ana knazupa oti hankavetigahie?

### *Tamagua rukrahe hiho hu'nea naneke*

<sup>12</sup> Hagi Ra Anumzamo'a huno, ne'zana a'o nehuta, zavira neteta, mika tamagu'areti huta Nagritega eho. <sup>13</sup> Hagi kasunku'ma hanunka amega kavufgare kukena tagatora osunka, tumokamo'a netanena kasunka hunka Ra Anumzana kagra'a Anumzamofontera eno. Na'ankure Agra asunku Anumzana mani'neno, ame huno arimpa ohe Anumzankino, vahe'ma avesinte zamo'a Agripina avite'ne. Ana hu'neankino Agra ame hunora vahera knazana zamino, zamazeri havizana osugahie. <sup>14</sup> Hagi Agra arimpa fru huramanteno, asomu huramantesigeta witi ofane waini ofanena erita Ra Anumzana tamagra'a Anumzantera ofa eme hugahazafi? tagra ontahi'none. <sup>15</sup> Hagi Saioni agonareti ufena nereta, ne'zana a'o huta nunamu nehuta, vahera kehutru huta monora hiho. <sup>16</sup> Hagi mika vahera zamazeri atru hiho, ranra vahe'ene mofavreramine, amintem'a mani'nesnaza mofavreraminea zamavare atru hiho. Hagi kasefa vene a'enema menima aravema huke maninena'a vene a'enena nompintira atirami'o. <sup>17</sup> Hagi Ra Anumzamofo eri'zama eneriza pristi vahe'mo'za, ra mono nomofo avugane, kresramana vu itama me'nea kankamumpi mani'neza amanage hu'za zamasunkura hu'za zavi krafage hiho. Ra Anumzamoka vaheka'a zamagu nevazinka, atrege'za kiza zokago kea huozmanteho. Zamatrege'za meg'i'a vahe'mo'za huhavizana hunezmante'za kiza zokago kea hu'za iga mono'ma hunentaza Anumzana mani'ne hu'za osiho.

### *Ra Anumzamo'a kenona huzami'nea naneke*

<sup>18</sup> Hagi Ra Anumzamo'a mopa'ama agu'ma vazi'sanigura tusi agesa nentahino, vahe'agura asunku huzmantegahie. <sup>19</sup> Hagi anante Ra Anumzamo'a amanage huno vahe'a kenona huzamante'ne, keho Nagra rama'a witine wainine, olivi masavenerena tam'i'nugeta rama'a neza ante avite'nageno, ru kumapi vahe'mo'za mago'enena hunte'za kiza zokago kea huoramantegahaze. <sup>20</sup> Hagi Nagra noti kazigatima e'naza sondia vahetamina zamahe vararisanuge'za hagege kokampi vugahaze. Hagi tamavugama mani'naza sondia vahetamina zamarotago hanuge'za zage hanati kaziga Fri hagerimpi urami vagaregahaze. Hagi kamefima mani'naza sondia vahetamina zamarotago hanuge'za zage fre kaziga Mediterenia hagerimpi uramigahaze. Ana hanugeno zamavufagamo'ma kasri'nia zamo'a tusi'a himna vuno ama mopa refitegahie. Tamage Ra Anumzamo'a raza erifore hu'ne. <sup>21</sup> Hagi nagri mopamoka korera osunka, musenkase huo. Na'ankure tamage huno Ra Anumzamo'a raza erifore hu'ne. <sup>22</sup> Hagi afi zagagafamota korera osiho, na'ankure hagege kokampina kofta huno trazamo'a afovage huno tretre hugahie. Hagi zafamo'za ete raga rentenageno, fiki zafamo'zane grepi nofimo'zanena rama'a raga rentegahaze. <sup>23</sup> Hagi Saioni kumate vahe'mota muse hiho. Ra Anumzana tamagri Anumzamo'ma huneramantea zankura musena hunteho. Agra knare avu'ava zama'a eri ama huno ese ata kora atregeno etegeno, rugnare henka kora ete atregeno ne-e. <sup>24</sup> Hagi witi hona'ama refuzafupe kumapina witimo'a avinetesnigeno, waini tima regatatima hunentaza kerifina olivi masavemo'enena aviteno varehiramigahie. <sup>25</sup> Hagi ohampriga'a sondia nagania, tra'zama akafri'za ne-naza kenutamine, magopima manumanuma hu'za hare'za vanoma nehaza kenutamine, takaire takaire'ma hu'za vanoma nehaza kenutamima huzmantoge'za, nama'a kafufi eman'i'neza mika zama vatri'zama nehana'ma hu'naza zanterea ete nona huramantegahue. <sup>26</sup> Ne'zamo'a amporena ne'zana neramu nehuta, knare zama huramantoa zankura Ra Anumzana tamagri Anumzamo'na ra nagi namigahaze. Ana hanuge'za ru vahe'mo'za

mago'enena vahe'nimota tamazeri tamagazea osugahaze. <sup>27</sup> Hagi ana hanugetma Nagrikura Israeli vahe amunompi mani'ne huta tamagra keta antahita hugahaze. Nagra Ra Anumzana tamagri Anumza mani'noankino, nagrikna anumzana magore huno omani'ne. Ana hu'neankino ru'enena vahe'mo'za nagri vahera zamazeri zamagaze osugahaze.

### *Avamu'ma esia zanku huvempa hu'nea naneke*

(Aposolo 2:17-21)

<sup>28</sup> Ana zantamima evu vagamaretena Nagra Avamuni'a maka vahepi eri herafi atresugen, tamagri ne'mofatamimo'za, kasnampa kea huama nehanageno, kasefa vahe'mo'za avana'gnaza negenageno, ranafa tamimo'za ava'na kegahaze. <sup>29</sup> Ana knafina kazokazo eri'za venenere'ene a'nere'enena Nagra Avamu'n'i'a eri herafi atregahue. <sup>30</sup> Hagi Nagra monafina ruzahu ru'zahu kaguvaza eri fore nehu'na, ama mopafina kaguvaza erifore hanugen, korane, tevene, toki'enena hugahie. <sup>31</sup> Zagemo'a rukrahe huno hani hanigeno, ikamo'a rukrahe huno kora fore hanigeno henka tusi'a hanave'nentake Ra Anumzamofo kna egahie. (Matiu 24:29 Maki 13:24, 25, Luku 21:25 Hufo hu'nea naneke 6:12,13.)

<sup>32</sup> Hianagi e'i ana knafina iza'o Ra Anumzamofo agima ahesia vahe'mofona agu'vazigahie. Na'ankure mago'a vahe'ma Jerusalemi kumapima Saoni agonare'ma mani'naza vahe'mo'za Ra Anumzamo'ma hu'nea kante ante'za knare hu'za manigahaze. Hagi e'ina vahetamina Ra Anumzamo'ma kema hige'za e'naza vahekiza knare hu'za manigahaze.

## 3

### *Ama mopafi vahe'mo'zama keagafima mani'naza naneke*

<sup>1</sup> Hagi Ra Anumzamo'a huno, Ana zama fore'ma hania knafina Juda vahetmimofo feno zantamine, Jerusalemi kumate vahetmimofo feno zantaminena ete erinte avite zmantegahue. <sup>2</sup> Ana nehu'na mika kokankoka vahetmina Jehosafeti agupofi zamavare atru hu'na, mareri feno zani'agnama hu'naza Israeli vahe'nima zamahe panani'ma hazage'za panani'ma hu'za vahe mopafima umani emanima hazage'za, Nagri mopama refkoma hu'za eri'naza zanteri keaga huzmantegahue. <sup>3</sup> Hagi zamagra vahe'nima zamavarenakura satu zokago re'za nege'za, ne' mofavreramina monko a'nere nona hu'za eneriza, mofaneramina waini tinte nona hu'za zami'naze.

<sup>4</sup> Hagi maka Tairi vahe'ma, Saidoni vahe'ma, Filistia mopafima nemaniza vahe'motanena nahigetma e'inahu zantamina hunantaze? Tamagra mago'a zante nona huta nazeri haviza hu'za nehzao? Tamagrama mago'a zante'ma nona hunanteta nazeri havizama hunaku'ma ana'ma nehanazana, Nagra ame hu'na ana zantamina eri rukrahe hu'na, tamagrira tamazeri haviza hugahue. <sup>5</sup> Na'ankure Nagri silvane goline, mareri fenoza ni'araminena tamagra eritma havi anumzantamimofo mono nontamimpi ome ante'naze.

<sup>6</sup> Hagi Juda vahe'ene Jerusalemi vahe'enena zamavareta Griki vahete zagore zamatrazage'za zamavare'za kumazmia atre'za afete moparega vu'naze. <sup>7</sup> Hianagi Nagra anama zagore'ma zamatre'nazaregatira zamavare vagare'na ne-ena nazanoma huzmantenaza zanteri, nona hu'na tamagrira ana huramantegahue. <sup>8</sup> Hagi ne'mofavretamine mofa'netaminena zamavare'na zagore Juda vahete atranena, zamagra zamavare'za Sabia kumate vahetega zagore zamatre'nage'za afete're vugahaze. Nagra Ra Anumzamo'n'a nehue. <sup>9</sup> Hagi ama ana nanekea kokankoka vahera huama hunka zamasamige'za ha'ma hanagura sondia vahezmia retro nehu'za,

makamo'za emarer'i'za erava'o hiho. <sup>10</sup> Hozama reko'ma neriza ainia rukuta huta bainati kazinkno tro nehuta, zafa azanku'nama romaseta eri hagroma nehaza kazintamia rukuta huta karugru keve tro hiho. Ana nehinkeno hankave'ama omane vahe'mo'a, nagra hankave vahe mani'noe huno hino. <sup>11</sup> Hagi mika kokankoka vahe'mota ame huta vahe'ma refkoma hu agupofi eme atru hiho. Hagi Ra Anumzamoka sondia vahek'a'aramina zamavarenka eramio. <sup>12</sup> Hagi mika kokankoka vahe'mo'za zamagra'a zamaerinte trotra hu'za Jehosafati agupofi omeri atru hiho. Na'ankure e'i anante Nagra mani'nena mika kokankoka vahera keaga huzmantegahue. <sup>13</sup> Hagi agena fagagi kazinteti apritma hoza hamareho, na'ankure hozamo'a uzate'ne. Hagi eta grepia eme regatati hiho. Na'ankure krepima regatati'ma hu kumara grepimo'a aviteno varehirami'ne. E'i anahu kna huno ama ana vahe'mokizmi kefo avu'ava zamo'a aviteno varehirami'ne. <sup>14</sup> Hagi rama'a ohampriga'a vahe kevumo'za keagama eri fatgoma hu agupofina avegante'za mani'naze. Na'ankure Ra Anumzamofo knamo'a, hago erava'o ana agupofina nehie. <sup>15</sup> Hagi zugene ikamo'enena haninkisakeno, ofumo'a remasa osugahie. <sup>16</sup> Hagi Ra Anumzamo'a Saioni agonaretira kezana netinigeno, Jerusalemi kumapintira agerumo'a monagema hiaza hugahie. Ana hanigeno monane mopanemokea imima eriaza huke momi'momi hugahae'. Hianagi Ra Anumzamo'a Agra'a vahe Israeli vahetera fraki havegazmi manigahie.

#### *Anumzamofo asomu eri'naza zamofo naneke*

<sup>17</sup> E'ina'ma hanugeta tamagrama keta antahitama hanazana, Nagrikura Ra Anumzana tagri Anumzamo'a ruotge agonare Saioni mani'ne hugahaze. Hagi Jerusalemi kumamo'a ruotage hanigeno, ru vahe'mo'za mago'enena hara eme huzamagate oregahaze. <sup>18</sup> Hagi ana knafina agonaramimpina grepimo'a rama'a hanigeno, haganentake wainimo'a avitegahie. Ana nehanigeno bulimakao afutamimo'za ana agonaufina ome rama'a nehanageno, bulimakao amirimo'a avitegahie. Hagi Judia kazigama me'nea tintamimo'za tane'nea tintamimo'za kampu'i hanati'za evugahaze. Ana nehanigeno Ra Anumzamofo mono nompinti kampu'i tina hanatino Akasia agupofina nevuno, maka zana tina amino vugahie. <sup>19</sup> Hianagi Isipi kokamo'a haviza nehanigeno, Idomu kokamo'a hagege koka fore hugahie. Na'ankure zamagra Juda vahera hazenkezami omane vahe zamagri mopafi zamahe'za korazmia eri tagi'naze. <sup>20</sup> Hagi Juda mopafina vahera mani vava hu'za nevanageno, vahe'ma forehu anante anante'ma hu'za vanaza vahe'mo'za Jerusalemi kumapina mani vava hu'za vugahaze. <sup>21</sup> Hagi zamagri'ma zamahe'za korama eri tagi'naza zante'ma nonama osu'noa zanter, Nagra nona huzamante'na zamahegahue. Na'ankure Nagra Ra Anumzana Saioni nemanua Anumza mani'noe.

## Amos Amosi Avontafere

<sup>1</sup> Hagi Juda mopafina Tekoa kumateti sipisipi kva ne' Amosi kre'nea naneke. Ama ana nanekea imina e'orinegeno zahufa tare kafua me'negeno, Usia'ma Juda vahe kinia manigeno, Joasi nemofo Jeroboamu'ma Israeli vahe kinima mani'nea knafi avanagna zampi Amosina Anumzamo'a averi hu'ne. <sup>2</sup> Hagi Amosi'a amanahu knaza ke'ne, Ra Anumzamo'a Saioni agonaret'iene Jerusalemitira kema hu'neana, mona kemo hiaza huno agerumo'a ne-higeno, sipisipimo'zama trazama nenaza trazamo'za hagege hazageno, Kemoli agonafima me'nea zantamimo'zanena hagege hu'naze.

### *Israeli vahe tava'onte'ma mani kagi'naza vahetamima knazama zami'nea naneke*

<sup>3</sup> Hagi Ra Anumzamo'a amanage hu'ne, Damaskasi vahe'mo'za kumira huvava huza vazanki'na amanea zamatrengue'za omanigahazanki, kna zamina zamazeri haviza hugahue. Na'ankure Giliati vahera witima hare kumapi witi hareaza hu'za aini kanonteti zamahe'naze. <sup>4</sup> E'ina hu'negu Nagra kini ne' Hazaeli'ma nemania kumara teve taginente'na, Benhatati'ma nemania hankave vihu kumara eri haviza hugahue. <sup>5</sup> Hagi Nagra Damaskasi rankumamofo kahana tapage hunetrena, Aveni agupofima nemaniza vahera nezamahe'na, Bet-edeni kumate kva vahera nezamahesugen, Aramu kumate vahera zamavare'za Kiri kumate kina ome huzamantegahaze huno Ra Anumzamo'a hu'ne.

<sup>6</sup> Hagi amanage huno Ra Anumzamo'a hie, Gaza vahe'mo'za kumira huvava hu'za vazankina amanea zamatrengue'za omanigahazanki, knazami'na zamazeri haviza hugahue. Hagi zamagra nagri vahera nozmifintira zamazeri'za Idomu vahete zagore zamatre'naze. <sup>7</sup> E'ina hu'negu hu'na Gasa kuma'enena nagra tevi tagintane'na, Gaza rankumamofo hankave vihu kegina teno erivaregahie. <sup>8</sup> Hagi Nagra Astoti vahera zamahe vaganere'na, Askeroni kini nera azeri haviza hugahue. Hagi anantetira ete Ekroni vahera nezamahe'na, osiamma mani'naza Filistia vahera zamahegahue huno Ra Anumzamo'a hu'ne.

### *Anumzamo'a Tairi vahe keaga huzmante'nea naneke*

<sup>9</sup> Hagi amanage huno Ra Anumzamo'a hie, Tairi vahe'mo'za kumira huvava hu'za vazankina, amanea zamatrengue'za omanigahazanki, kna zamina zamazeri haviza hugahue. Na'ankure zamagra kora Israeli vahe'ene huvempa huza koganagna huta manigahune hu'nazza kea amagera onte'za, miko vahera zamavare'za zagore ome zamatrage'za Idomu vahe'mo'za kazokazo eri'za vahe zamavare'za vu'naze. <sup>10</sup> E'i ana agafare Tairi hankave vihu keginare teve tagintesugen rankuma zaminena te fanane hugahie.

### *Idomu vahe'ma kna zami'nea naneke*

<sup>11</sup> Hagi amanage huno Ra Anumzamo'a hie, Idomu vahe'mo'za kumira huvava hu'za vazankina amanea zamatrengue'za omanigahazanki, knazami'na zamazeri haviza hugahue. Na'ankure Idomu vahe'mo'za zamagra'a vahera zamahe nefri'za zamasunkura huno zamantaze. Hagi zamarimpa hevava nehige'za hara azeri oti vava nehaze. <sup>12</sup> E'ina hu'nagu Nagra Temani kumara teve taginte'nugeno nerena, Bozra kuma'enena teve tagintanena teno eri vagaregahie.

### *Amoni vahe'ma knaza eri'naza naneke*

<sup>13</sup> Hagi amanage huno Ra Anumzamo'a hie, Amoni vahe'mo'za kumira hu-vava hu'za vazankina amanea zamatrenuge'za omanigahazanki, knazamina zamazeri haviza hugahue. Na'ankure Mopama erinakura zamu'enema hu'naza a'nemokizmia zamarimpa zamahe'za reragufe'naze. <sup>14</sup> E'ina hu'nagu Raba kumamofo hankave vihu keginare tevea tagintanenkeno ana kumara teno eri vagaregahie. Hanave zahomo'ma erino eaza hu'za ivimo agazamo hu'za hatera eza eme zamazeri haviza hugahaze. <sup>15</sup> Hagi Amoni kini ne'ene ugagota kva vahe'anena kinafi zamavare'za vugahaze huno Ra Anumzamo'a hie.

## 2

### *Moapu vahe'mo'zama knazama eri'naza zamofo naneke*

<sup>1</sup> Hagi Ra Anumzamo'a amanage hu'ne, Moapu vahe'mo'za kumira hu-vava hu'za vazankina, amane zamatrenuge'za omanigahazanki, kna zamina zamazeri haviza hugahue. Na'ankure zamagra Idomu vahe kini ne'mofo zaferina eri'za tevefi krazageno tanefa'sene. <sup>2</sup> E'ina hu'nagu Nagra teve taginte'nugeno Moapu kumara tevea nerenko, Kerioti kumamofo hanave vihu kegina tevemo te hana hugahie. Ha' vahezmimo'za ivimo agazamo'ma hu'za Moapu vahe'ma eme zamahesaza agasasane ufe krafa kenena antahigahaze. <sup>3</sup> Hagi kini vahe'zamine maka kva vahezmanena zamahe hana hugahue huno Ra Anumzamo'a hu'ne.

### *Juda vahe'mo'za knaza eri'naza naneke*

<sup>4</sup> Hagi Ra Anumzamo'a amanage hu'ne, Juda vahe'mo'za kumira hu-vava hu'za vazankina amane zamatrenuge'za omanigahazanki knaza zami-gahue. Na'ankure zamagra Ra Anumzamo'na kasegea zamefi hunenamiza tra kea ovariri'naze. Hagi zamagehe'ima zamazeri savri'ma hu'naza havigereti zamazeri savri hazage'za, havi anumzantera monora hunte'naze. <sup>5</sup> E'ina hu'nagu Nagra Juda kumara teve tagintenugeno nereno hanave vihu keginama hugagi'naza Jerusalemi kumara teno eri hana hugahie.

### *Israeli vahe'mo'zama knazama eri'naza naneke*

<sup>6</sup> Hagi Ra Anumzamo'a amanage hu'ne, Israeli vahe'mo'za kumira hu-vava hu'za vazanki'na amane zamatrenuge'za omanigahazanki kna zamina zamazeri haviza hugahue. Na'ankure zamagra fatgo vahera zagore nezamatre'za zamunte omane vahera zamaga nonte nona hu'za zamatr'eaze. <sup>7</sup> Hagi zamagra zamunte omane vahera zamasunkura huoz-mante kugusopafi zamare hapati atre'naze. Hagi nefi'ma anteno masea mofara nemofo'a ana mofake anteno masene. E'ina nehu'za ruotge'ma hu'nea Nagia eri haviza hu'naze. <sup>8</sup> Hagi nofi'ma hu'za vahe'mokizmi tavravema eri'nazana havi anumzazmimofo mono nompima kresrama vu itama me'nefi tafe ome hu'za nemase'za, havigema hu'za zago agima ahezmante'za eri'za zagoa, eriza waini ti miza hu'za ne'za negi-nagi hu'naze. <sup>9</sup> Hagi Amori vahe'mo'za za'za hu'za sida zafagana hazageno, hanave zamimo'a oki zafagna hu'neanagi, Nagra Israeli vahekure hu'na Amori vahe'mofo ragane rafu'hane eri haviza hu'noe. <sup>10</sup> Hagi Nagra Isipi mopafinti'ma tamavre'na mareri'noana, Amori vahe mopa erinafa'a hanazegu 40'a kafufina kegava huramante'na vahe'ma omani hagege kokampina e'noe. <sup>11</sup> Hagi tamagri mofavre nagapintira Nagra mago'a veneneramina kasnampa vahe zamazeri oneti'na, mago'a vahera

Nagrite mani ruotge hu'za manisaza kva vahe (Nazirites)\* zamazeri ot'i'noe. Hagi Ra Anumzamo'a huno, Ama kema nehuana tamage nehuvi Israeli vahe'mota hu'ama huta zamasamiho hu'ne. <sup>12</sup> Hianagi mani ruotge'ma hu'za mani'naza kva vahetamia tamagra waini tina zamizage'za ne'za neginagi nehzageta, kasnampa vahera kasnampa kea osu taganeta maniho huta zamazeri kori'naze. <sup>13</sup> E'ina hu'negu Nagra witima refuzafupeankna hu'na knazama tami'nena, tamagra knazama eri'naza vahe'mo'za'ma pripri hu'za nevaza vahekna hugahaze. <sup>14</sup> Hagi ame'ama hu'za zamagama neraza vahe'mo'za fregara osanageno, hanave vahe'mokizmia hanavezamia omanenigeno, harafa sondia vahe'mo'za kasamare'za hara hu'za zamagura ovazigahaze. <sup>15</sup> Hagi atireti'ma ha'ma nehaza vahe'mo'za ot'i hanavetine'za hara osanageno, zamagama neraza vahe'mo'za zamagare'za ome frara oki'nageno, hosi afumofo agumpima mani'neno ha'ma nehia vahe'mo'a hara huno agra'a agura ovazigahie. <sup>16</sup> Hagi koro'ma osu ha'ma nehaza sondia vahe'mo'za ana knazupa maka ha'zazimia atre'za zamavapa fregahaze huno Ra Anumzamo'a hu'ne.

### 3

#### *Maka Israeli naga nofimo'za kumi hu'naza naneke*

<sup>1</sup> Hagi Israeli vahe'ma mika'a Isipiti'ma tamavreno e'nea vahe'motagu'ma Ra Anumzamo'ma keagama huneramantea nanekea antahiho. <sup>2</sup> Ama mopafima nagate nofite'ma hu'za mani'nafintira tamagri huhampri tamante'na Nagri vahe mani'naze hu'noe. E'ina hu'negu Israeli vahe'mota maka kumi'ma hazarera knazana tamina zamazeri haviza hugahue.

<sup>3</sup> Hagi tare vahe'moke'ma magoka vugahu'e hukema kema retro osu'nesukea, magoke kantera knare amnea vugahapi? <sup>4</sup> Hagi laionimo'ma mago zagagafama ohe'nenu'a amanea krafa hugahio? Hagi anenta laionimo'ma havegampima ne'zama one mani'nenu'a, amane krafa hugahifi? <sup>5</sup> Hagi nama'ma azeriku'ma krifuma ome anaginte'neno anampinkama ami'mi huno azeri'nigu'ma ne'zama onte'enkeno'a, amane namamo'a ana krifufina ufregahifi? Krifuma anaginte'nenia zafamo'a agra'a amanea ruhategahifi? <sup>6</sup> Hagi ha'ma hu ufema rankumapinti'ma renkeno'a, ana kumapima nemaniza vahe'mo'za fru hu'za manigahazafi? Hifi mago kumamo'ma knazampima unefreana Ra Anumzamo'a ana knazana keno antahino osu'negeno ne-efi? <sup>7</sup> Hagi Ra Anumzamo'a nazanoma hunaku'ma oku'ama retromta nehia antahintahia eri'za vahe'a kasnampa vahetami nezamasamie. <sup>8</sup> Hanki laionimo'ma krafama hanigeno'a, iza korora osugahie huta hugahune? Hagi hanavenentake Ra Anumzamo ama nanekea nehianki, iza ama ana kasnampa kea hugahie?

<sup>9</sup> Hagi ama nanekea Asdoti vihu kumapima nemani'za vahe'ene Isipi kumapima nemaniza vahera zamasamiho. Hagi zamagra Sameria agonaramimpi omeri atru hu'za mani'neza, miko kefo zamavu'zamava zama nehaza zana keho. <sup>10</sup> Hagi Nagri knare navu' navama hu'zana zamenekanigeno, hanave vihuma me'nea kumazamifina ha'ma orente arente hu'zamo'ene kumazafa zamo'ene hazenke zamo'a avite'ne huno Ra Anumzamo'a hu'ne. <sup>11</sup> E'ina hu'nagu Ra Anumzamo'a huno, Ha' vahe'zmimo'za eza maka hanave vihu keginama hu'naza kumazmia eri haviza nehu'za, mika'zazmia rohu eme zamare'za erivagare'za vugahaze hu'ne.

\* <sup>2:11</sup> Nazirites huno'ma hu'nea agu'agesamo'a Anumzamofontema mani ruotgema huno nemania vaheku hu'ne. Nam-Ham 6:1-12

**12** Hagi Ra Anumzamo'a huno, Sipisipi afute kva vahe'mo'ma laionimofo agipinti'ma sipisipi afu'mofo agarareno agesama eri variankna huno, Sameria kumapima nemani'za Israeli vhahera osia zamagu vazigahie. E'ina'ma hania zamo'a tafe'ma masi'za nemaniza tavravema osi'a eri sgane hu'za vazankna hugahie.

**13** Hagi Ra Anumzana Monafi sondia vahe'mofo Anumzamo'a huno, Ama nanekea antahiteta Jekopu naganofira koro kea huzmanteho. **14** Nagrama Israeli vahe'mo'zama hu'naza kumite'ma knazama zami'nua knazupa, Betelima me'nea kresramana vu ita eri haviza hugahue. Hagi ana kresramana vu itamofo pazine'a, ruhantagi atresugenno mopafi evuramigahie. **15** Hagi Nagra zasi knafima mani'nagu'ma kinte'naza nontamine, zage knafima mani'nagu'ma kinte'naza nontamine, elefanti aveteti'ma knare'nare non-tamima kinte'naza nontamina eri haviza hugahue huno Ra Anumzamo'a hu'ne.

## 4

### *Israeli vahe'mo'zama zamagu'amarukrahe'ma hu'za Anumzamofonte'ma ome'naza zamofo naneko*

**1** Hagi Basani kumapinti afovage bulimakao afu'ma Sameria agonafima mani'naza afumota ama nanekea antahihio, Tamagra a'nemota zamunte'ma omene vahe'ma knama nezamita, tamavenenehe'mofonkura huta, waini tina mago'ane eme taminketa namaneno huta nehaze. **2** Hagi hankaventake Ra Anumzamo'a ruotge avu'ava zama'afi huvempa huno, Magokna neankino tamagrira afu'ma renentaza hukureti tamarente'za tamavazu hu'za nevanageno, nozamema nehaza hu'za tamagona kampi nofi' eme rente'za tamavre'za vugahaze. **3** Hagi kuma keginamofo ankaro kampinti tamavre'za atiramiza fegu'a vute'za, tamavre'za Hamoni vugahaze huno Ra Anumzamo'a hu'ne.

**4** Hagi Beteli kumate'ene Gilgali kumate'ma yuta kaza osu havi anumzante'ma kresramanama vunezamanteta, kumi'ma nehaza zana huta viho. Gilgali kumatema kema nontahita mika nanterama kresramanama nevuta, 10 ni'a kevufinti mago kevuma erita 3'a knamofo agu'afima ofama nehaza zana huvava huta viho. **5** Hagi zisti'ma ante witiretira ko susu ofa eme nehuta, tamagra'a tamavesite'ma eritama eme hanaza ofarerko tamagra rantamagia eriho. Na'ankure Israeli vahe'mota ana avu'ava'ma huzankura tamave'nesie.

**6** Hagi kora Nagra agatontoza atrogeno maka rankumapina ne'zana nomageno, neonse kumatamimpinena bretia omene'ne. Hu'neanagi e'i anama hiazankura zamagu'a rukrahe huta Nagritera ome'haze huno Ra Anumzamo'a hu'ne. **7** Hagi nezama hamarekna 3'a ika me'neanagi kora atrogeno hoza tamifina runonuge'na, mago rankumapina kora atrogeno nerige'na, mago rankumapina kora azerugeno runonte. Hagi mago hoza-fina kora nerigeno, ko'ma atroge'noma runontea hozamo'a hagege nehie. **8** Hagi tare rankumaro tagufa rankumapi vahe'mo'za tinkura masege otigera hu'za hakeza mago kumapina vugahazanagi tina onegosaze. Hianagi tamagrama anama nehuta ete Nagritega rukrahe huta nomaze huno Ra Anumzamo'a hie. **9** Hagi Nagra amuho zaho zage hanatitegati huntogeno hozatamia te hagege nehige'na, kenutami huzmantogez'a waini hozatamine fiki hozatamine, olivi zafa hozatamine, olivinena ne'za eri hana hu'naze. Hianagi tamagra anazama negeta tamagra ete Nagritega rukrahe huta nomaze huno Ra Anumzamo'a hie. **10** Hagi korapama Isipi vahe'ma hu'noa kna

hu'na tusi'a knaza tamagrira nerami'na, nehzave tamia bainati kazinteti zamahe nefri'na hosi afutamia zamatroge'za kumazafa sez a nevazageno, seli nonkuma'ma ome anteta mani'neta ha'ma hu'naza kumapina fri'naza vahe zamavufagamofo hi'manamo'a tamazeri haviza hu'ne. Hianagi ana zama negeta rukrahe huta Nagritega nomaze huno Ra Anumzamo a hie. <sup>11</sup> Hagi Sodomune Gomora kumatre'ma hu'noaza hu'na, mago'a kumatamia eri haviza hu'noe. Hagi tamagra tevefima me'neno nerea zafa rampagna hu'nazageno, hampage atreankna hu'na tamagrira hampage atre'noe. Hi-anagi tamagra anazama negeta ete rukrahera huta Nagritega nomaze huno Ra Anumzamo'a hie. <sup>12</sup> E'ina hu'nagu Israeli vahe'mota ama anahu knaza tamigahuanki, retro huta manineta tamagri Anumzamo'na nageho huno hu'ne. <sup>13</sup> Na'ankure Ra Anumzamo'a Agrake agonaramina tro hunenteno, zahora azeri otigeno zahora enerigeno, antahizama'a vahe'mokizmirera eri ama nehie. Hagi Agra nantera masama nehiana ete eri hani nehuno, mika mopa Agra kegava hu'ne. Hagi Agra Monafinka Hanavenentake sondia vahe'mofo Anumzane huno Agri agi'a me'ne!

## 5

### *Zamagu'a rukrahe hiho huno Ra Anumzamo hu'nea naneke*

<sup>1</sup> Hagi asunku zagame hugahuanki, Israeli vahe'mota antahihi, <sup>2</sup> Vene omase mofa knama hu'nea Israeli kumamo'a, haviza huno mopafi evuramianki'za mago'anerisaga hu'za onkigahaze. Hagi agra mopafi evuramino maseankino, mago vahe'mo'a aza huno azeri ora otigahie. <sup>3</sup> Hagi Hanavenentake Ra Anumzamo'a huno, mago Israeli vahe rankumappinti'ma 1tauseni'a sondia vahe'ma hate' huzmante'nage'za vugahazanagi, ete 100'a vahe'mo'za egahaze. Hagi mago kuma'mo'ma 100'a vahe'ma huzamante'nage'za hate' ma vanazana, 10n'i age ete egahaze.

<sup>4</sup> Hagi menina Ra Anumzamo'a amanage Israeli vhahemotagura hie, Tamagrama nagri'ma haketa eri fore'ma hanuta ofri kasefa huta manigahaze!

<sup>5</sup> Hagi Beteli kumate'ene Gilgali kumatera vuta nagrikura ome haketa vano nosuta, Beseba rugitagit ovihi. Na'ankure Gigali vahe zamavare'za kina ome hunezmante'za Beteli vahera ha' vahe'mo'za eme zamahe hana hugahaze. <sup>6</sup> Hagi tamagra Ra Anumzamofoma haketa azeri fore'ma hanuta, tamagra ofri kasefa huta manigahaze. Hagi ana'ma osanazana, Agra tevegna huno eno Josefe nagara eme teno eri vagaregahie. Ana nehuno Beteli kumara tevemo tesigeno, anampima mani'naza vahera teve zamare'nigeno, mago vahe'mo'a ana tevea resu hugara osugahie. <sup>7</sup> Hagi keaga fatgo huta refko osu havige nehuta, fatgo vahera knaza nezami'za vahe mani'naze.

<sup>8</sup> Hagi Agra Ra Anumzamo'a atruma hu'za nemaniza hanafi taminku'ma Pleiadesiema nehaza hanafitamina tro hunenteno, Agrake monafima Orioniemma nehaza hanafitamina tro huntege'za remsa hu'za me'naze. Hagi Agra hanina eri ruzah higeno masa fore nehie. Hagi Agra hagerimpintira tina eri atru huteno kora atregeno, mopafina ete eneramie. Hu'neankino Agri agi'a Ra Anumzane. <sup>9</sup> Hagi Agra hanave vahera ame huno zamazeri haviza nehuno, hanave vihuzmia ahe fragu vazinetre.

<sup>10</sup> Hagi keagafima fatgoma huza tamazeri fatgoma haza vahera tamavesra hunezamanteta, tamage'ma haza vahera tamago ate'nezmantaze. <sup>11</sup> Hagi tamagra zamunte omene vahera zamazeri haviza huta rama'a takisi zago agi ahezamanteta witzimia enerita, fatgo huta miza agia ahenozmantaze. E'ina hu'nagu tamagra knare'nare nontami kinte'nazanagi ana nontamifina

omanigahaze. Hagi tamagra knare'nare waini hoza ante'nazanagi, ana waini hozafintira tagita tima'a onegahaze. <sup>12</sup> Na'ankure Nagrama kena antahinama huana, tamagra tusi'a kumi hu'naze. Hagi zagoa enerita keagafina knare vahera zamazeri haviza nehuta, rankumamofo kahampima zamunte omane vahe'ma mani'nazana zamaza nosaze. <sup>13</sup> E'ina hu'negu ama' antahi'zane vahe'mota, ama'i havi kna me'negu tamagira hamunkita maniho. <sup>14</sup> Hagi knare zama huzanku nehaketa, havi avu'ava zana atreta freho. Anama hanazana kasefa huta manigahaze. E'ina hanageno Monafi sondia vahe'mofo Hankavenentake Ra Anumzamo'a tamagrama taza hugahiema huta hanaza kante anteno tamaza hugahie. <sup>15</sup> Hagi havi avu'ava zana tamavesra hunenteta, knare avu'avazanku tamavesinenteta, keagama refako hanazana fatgo huta refako hiho. E'ina'ma hanageno'a Hanaventake Ra Anumzamo'a Josefe naga'ma osi'ama manisaza nagara asunku huramanteno tamaza hanigu'enene.

<sup>16</sup> E'ina hu'negu Ra Anumzana Monafi sondia vahe'mofo Hankavenentake Anumzamo'a amanage hie, mika kuma kantamipinen vahe'mo'za tusi zavi ategahaze. Hagi hozama nentaza vahera ke hinke'za eza zavira eme netenageta, zagoreti miza sazage'zama zavi'ma netaza vahera ke hinke'za eza zagamera eme hu'za zavira ateho. <sup>17</sup> Hagi waini hozafintira rama'a zavi krafa hugahaze. Na'ankure Nagra tamagri amunompi nevanugeno anazana fore hugahie huno Ra Anumzamo'a hie.

<sup>18</sup> Hagi Ra Anumzamofo knama efore hanigeta kesaza zankura tusiza huno tamagrira tamave'nesie. Hagi ana knareraza naza fore hugahie tamagra ontahi'naze. Hagi ana knare'ma fore'ma haniana, hanimo rentrako hanigeno masazana omanegahie. <sup>19</sup> Hagi ana knafina tamagra mago vahe'mo'ma laionigu'ma koroma freno vuno beama ome tutagihama huntea kna hugahaze. Huge mago vahe'mo'ma noma'afi umanigasama ne-huno, aza anteganti antegeno osifavemo ampriankna hugahize. <sup>20</sup> Hagi Ra Anumzamofo knamo'a haninentake hinkeno masazana omnetfa hugahie.

<sup>21</sup> Hagi Nagra Ra Anumzamo'na atruma huta ne'zama kreta neneta musenkasema nehaza knagu'ene mono'ma nehaza knagura tusiza hu'na navesra huntue. <sup>22</sup> Hagi tamagrama krefanane hu ofama nehuta, witi ofama nehuta, afovage afutamima aheta tamarimpa fru ofama nehaza ofatamia, Nagra antahi oramigahue. <sup>23</sup> Hagi sigrosigroma nehia zagame'ma nehuta, hapu zavenama nehaza zama antahi zankura tusiza huno navesra hianki erita freho. <sup>24</sup> Hianagi tima hageno'ma evu vavama nehiankna hutma fatgoma huno refkoma hu tamavu tamavara huvava huta vihogu Nagrira neve'nesie. <sup>25</sup> Hagi Israeli vahe'mota 40'a kafufima hagege ka'ma kopima manita e'nazana Kresramana vu ofane, witi ofanena hunante'nazafi? <sup>26</sup> I'o, tamagra'a tamazantet'i'ma tro'ma hunte'naza Sakuti kini havi anumzamofo amem'a're'ene, Kizuni hanafi'mofo amem'a'ama tro'ma hunte'naza zante monora hunte'naze. <sup>27</sup> E'ina hazagu Nagra tamagrira tamatrenuge'za Damaskasi kumamofo zage hanati kaziga tamavre'za kina ome huraman-tegahaze huno Monafi sondia Vahemofo Ra Anumzamo'a hu'ne.

## 6

### *Israeli vahe'mo'za ome kina hanaza naneke*

<sup>1</sup> Hagi Jerusalemine Sameria rankumapinema nemaniza vahe'mota hazenkea omesigeta fru huta manigahune huta nentahizo? Hagi tamagra Israeli vahe agu'afina, rantamagi me'nea vahe mani'nage'za, ru vahe'mo'za

tamagripinti zamazahu zana eme enerize. Hianagi haviza hugahazanki, kva hiho. <sup>2</sup> Hagi tamagra Kalne nehaza kumate vuta na'a fore nehifi ome keteta ete anantetira Hamatiene nehaza rankumate vuteta, anantetira henkamu Filistia vahe rankumatega Gati uramita ome keho. Hagi tamagra zamagrira zamagate ore'nazanagi, zamagrama eri'naza hazenkea keho. Mopazmimo'a tamagri mopa agatereno rana osu'ne. <sup>3</sup> Hagi hazenke zama fore'ma hania knagura tamagra nontahizanagi, tamagrama nehaza havi avu'avazamo'a hazenke'zana avre tava'o nehie. <sup>4</sup> Hagi knare sipare'ma nemaseta bulimakao afu ame'ane sipisipi afu ame'ama nenaza vahe'mota kva hiho. <sup>5</sup> Hagi tamagra agafa'a omane zagame nehuta, hapu zavena neheta Deviti'ma hu'neaza hanune huta nehaze. <sup>6</sup> Hagi tamagra rama'a waini tina neneta, rama'a mananentake zanteti tamavufga ahe mana nevuta, masavena freta tamavufga erise nehaze. Hianagi Josefe nagate'ma zamazeri haviza hu'zama e'nia zankura, tamagra tamasunkura nosaze. <sup>7</sup> E'ina hu'negu ese'zana tamagri kina eme huramante'za tamavre'za ru moparega vanageno, nezama kreta neneta musenkasema nehaza zana omanegahie. <sup>8</sup> Hagi Hanavenentake Ra Anumzamo'a Agra'a agifi huvempa huno amanage hie, Zamavufaga rama nehaza Jekopu nagakura nagote nezmante'n'a, hankave vihu keginama hu'naza kumazamigu'enena navesra huntoankina, miko zaziminena ha' vahe'mokizmi zamazampi antegahue. <sup>9</sup> Hagi 10ni'a vahe'ma ofri mago nompima manisaza vahe'mo'za miko fri vagaregahaze. <sup>10</sup> Hagi ana fri vahe'mokizmi nagapinti mago'mo fri'naza vahe erino ome asenteku ne-eno, nomofo agu'affima mani'nenimofo eme antahigeno, Mago'a vahera amne mani'nafi? hanigeno, I'o miko fri'naze hanigeno, ana nemo'a huno, Mago kea osunka, Ra Anumzamofo agia oho huno hugahie. <sup>11</sup> Hagi Ra Anumzamo'ma huno, Ra nomokane osi nomokanena mika mopafi fragu vaziramio hanigeno'a, amane fragu vaziramino mopafi rutamana tamanu hutregahie. <sup>12</sup> Hagi tamagra tamagesama antahi'zana hosi afumo'za havege'ma hu'nefina, amane zamagare'za vugahazafi? Hifi havefina amane bulimakao afura avreta mopa ome rehankorrigahazafi? Hianagi tamagra neginagi huta fatgoma huno refako hu'zana eri rukrahe hazageno, avuataga zankna nehigeta, fatgo avu'ava zamofo haga'a eri rukrahe hazageno, aka zankna nehie. <sup>13</sup> Hagi ha'ma huta Lodebari kumama eri'naza zankura musenkase nehuta, tamagra tamavufga ra nehuta tagra'a hanavereti Karnami kumara hara huzmagatere'none huta nehaze. <sup>14</sup> Hianagi ha' vahetamia zamavare'na esanuge'za mopatamifi hara eme huramantegahaze huno Hankavenentake Ra Anumzamo'a hie. Hagi tamagri'ma knama emerami'za tamazeri havizama hanazana, noti kaziga Lebohamati kumateti agafa hute'za vuno sauti kaziga Araba agupofima mani'naza vahera ana maka tamazeri haviza hugahaze.

## 7

*Ava'nagna zampi kenutami ke'nea naneke*

<sup>1</sup> Hagi Hankavenentake Ra Anumzamo'a mago ava'nagnaza naveri higena koana, ama mopafima huzmant'e'nige'za e'nagu Agra kenutamina kevure kevure retrotra huzmant'e'ne. Hagi ana kenutamima e'nazana kini ne'mo'ma hozama hamaretenigeno, kasefa'ma revu huno hagenia knare egahaze. <sup>2</sup> Hagi ana ava'na gnazama kofina kenumo'za mikozana ne'za eri vaganerazage'na nege'na, amanage hu'na hu'noe, Hankavenentake Ra Anumzamoka muse hugantoanki kumitia atrerantenka tagu'vazio. Anama

osnanketa Israeli vahera osi'a vaher mani'nonankita omanita vagaregahune.  
**3** Hagi Ra Anumzamo'a antahi'zama'a rukrahe nehuno, retro'ma hu'noa zana osugahue huno hu'ne.

**4** Hagi Hankavenentake Ra Anumzamo'a ete mago'ane mago ava'nagnaza naveri hu'ne. Hagi nagra koana, Agra vaher a tevereti zamahe hana hunaku teve retro hunte'nege'na ke'noe. Hagi ana tevemo'a hagerina teno eri vaganereno, hozama ante mohanena tevagare'ne. **5** Anante nagra hu'na, Hanavenentake Ra Anumzamoka muse hugantoanki tevea atregeno omeno. Tagra Israeli vahera osi'a vaher mani'nonkeno, hanavetia omaneneanki tataro hu'na hu'noe. **6** Anage hugeno Ra Anumzamo'a antahintahi'a rukrahe nehuno, anara osugahue huno hu'ne.

**7** Anantero ete mago'ane Ra Anumzamo'a ava'nagnaza naveri hige'na koana, noma eri fatgoma nehaza nofi'ma aenima rente'naza nofi (plumb line) Ra Anumzamo'a azampina eri'neno, ana nofiteti'ma ante'za nege'za hu'naza kegina tava'onte ot'i'nen ana keginamo'ma fatgoma hu'enigu anteno ke'ne. **8** Hagi Agra amanage huno nantahige'ne, Amosiga na'a negane? Hige'na nagra kenona hu'na, Nomofo mesarimima nehaza nofire hugeno, Ra Anumzamo'a keno'a hunanteno, Nagra vaheni'a amanahukna hu'na mesarimi hu'na ante fatgo hu'na koankina, zamagra fatgoa osu'nazagu kumizmua atre ozmantegahue hu'ne. **9** Hagi Aisaki negeho'zama agonaramimpima havi anumzante'ma mono'ma hunentaza kumatamina eme eri haviza nehu'za, Israeli vaher'mo'zama havi anumzante'ma mono nehaza nonena eri haviza hugahaze. Hagi kini ne'Jeroboamune vaher'anena bainati kazinteti zamahegahaze.

**10** Hagi Beteli kumateti pristi ne' Amazia'a amanage huno Israeli kini ne' Jeroboamuntega kea atrenteno, Amosi'a Israeli vaher amunompi manineno kagrira kahenagenka frigahane huno kasnampa kea nehie. Ana higu tagra agri kea ontahigahune. Na'ankure agra mopatimo'ma havizama hania kege nehie. **11** Hagi Amosia huno, Jeroboamuna ahenefri'za Israeli vahera ama mopafintira zamavare'za ru moparega kina ome huzmantegahaze huno nehie. **12** Hagi Amazia'a amanage huno Amosina asami'ne, amafina kasnampa kea osunka atrenka Juda kaziga umani'eneka anantega kasnampa kea nehuge'za zagoa kamiko! **13** Hagi ama kini ne' Jeroboamu'ma mono nehia kuma megeno, maka Israeli vaher'mo'zama mono'ma nehaza kuma amafina me'negu, kagra mago'anena ama Beteli kumapina kasnampa kea eme osuo. **14** Hige'na nagra Amosi'a kenona hunte'na, nagra kasnampa vahera omuni'na, kasnampa eri'zama eri'zana rempi hu'na ontahi'noanki, nagra sipisipi kegava nehu'na fiki zafane kegava nehua ne' mani'noe. **15** Hianagi Ra Anumzamo'a ana sipisipima kegava nehua eri'zampintira nagi huno amanage hu'ne, Vunka Israeli vaheni'a kasnampa kea ome zamasamio huno hunante'ne. **16** Hagi Ra Anumzamo'ma hiankea kagra antahio, kagra hunka, Israeli vahepina kasnampa kea eme nosunka, Aisaki agehe'ina zamazeri haviza hugahaze nanekea eme osuo nehane. **17** Hianagi Ra Anumzamo'a amanage huno Amaziagagura hianki antahio, A'kamo'a ama rankumapi savri huno monkote huno vano hanigeno, bainati kazinteti ne'mofaka'a zamahe fri vaganere'za mopaka'a refko huza eri vagaregahaze. Ana hanagenka kagra rurega vaher mopafi ufrigahane. Hagi Israeli vaher'mo'za mopazmia atre'za rurega kina ome hu'za mani'neza anantega frigahaze.

<sup>1</sup> Hagi Hankavenentake Ra Anumzamo'a ete mago'ane ava'nagnaza naveri hige'na koana, uzate'nea zafaragamo'za ekaeka kupina avite'za me'nazage'na ke'noe. <sup>2</sup> Hagi Ra Anumzamo'a nantahigeno, Amosiga na'a negane hige'na, uzate'nea zafa ragamo'za eka eka kupina avite'za me'nazage'na negoe hugeno, Ra Anumzamo'a huno, Israeli vahe'mo'za knazama eri'nagura e'inahukna hu'za ko uzate'nazanki'na, ame hu'na knazana zamina zamazeri havizana hugahue. <sup>3</sup> Hagi ana knafina, ra mono nompima muse zagame'ma nehaza zana atre'za zamasunku zagame hu'za zavi krafa hugahaze. Na'ankure fri vahe zamavufagamo'za mika kaziga umase emase hugahaze. Hagi ana vahera kumamofo fegu'a eri'za ometre ometre hugahaze, hu'na Nagra maka'zama kegava hu'noa Ra Anumzamo'na nehue.

<sup>4</sup> Hagi zamunte omane vahe'mokizmi zama kumazafa neseta, nanazanku'ma atupama hu'naza vahe'ma knazama nezamiza vahe'mota, kama antahiho. <sup>5</sup> Hagi tamagragura amanage nehaze, inanknare kasefa ikante'ma ne'zama kreta neneta, musema nehu'na knamo'a ome vagarenigeta, havigea huta witia zagrora ome atregahune huta nehaze. Anage nehuta mani fruma nehuna Sabati knamo'a vagarenigeta nezantia zagore ome atregahune huta nehaze. Tamagra zamunte omane vahe'ma rezamavatagama hanagu ko ete nevaze. Hagi witi raga ne'zama refakoma hunakura, knarera huta refako osuta, havige huta osi'a zante ra zago agi ahezmantage'za mi'zana nesaze. <sup>6</sup> Hagi witima zagore'ma atre'naku'ma nehuta hona'a mopafinti zogita eri havia huta netraze. Hagi zamunte'ma omane vahe'ma kazokzo eri'za vahe'ma zamavareneta, mizazmia mago silva zago zamige, aga ano zamige nehaze. <sup>7</sup> Hagi Hankavenentake Ra Anumzamo'a huvempa huno, tamagra Jekopu naga'mota hu'naza kefo tamavu'tamava zankura nagera akani oramantegahue. <sup>8</sup> Hagi e'inama haza zamofontera mopamo'a momi hanigeno, miko vahe'mo'za zavi krafa hugahaze. Hagi mopamo'a Naeli timo'ma hageno vazi zore'noma eviaza huno ome ra huteno, ete ome uramiankna hugahie. <sup>9</sup> Hagi Hankavenentake Ra Anumzamo'a huno, Ananknafina Nagra feru kopi zagea huntenugeno ame huno unefrena, masa me'nenifi ame hu'na eri hani hugahue. <sup>10</sup> Hagi musenkasema nehaza zana eri rukrahe hanena, zavi krafa hugahaze. Hagi tamasunku kukena nehuta, tamazokara vazagategahaze. Hagi magoke mofavrema frinege'za nehazaza huta zavira ategahaze. Hagi ana kna, e'i kefo knarafa fore hugahie. <sup>11</sup> Hagi Hankavenentake Ra Anumzamo'a huno, Mago kna ne-eankina agatontoza atrenugenoma mopafina egahiankino, ana agatonto zana tinkuro nezankura huza zamagara otegahazanki, Ra Anumzamofo kema antahizanku tusi zamagara tegahie. <sup>12</sup> Hagi Anumzamofo nanekegura hake'za hagerima ome atre emetre'ma hutegane, noti kazigane, sauti kaziganena vu'za e'za hugahazanagi, hake'za eri forera osugahaze. <sup>13</sup> Hagi ana knafina knare'nare mofa'nanene, kasefa nehazavemo'zanena Anumzamofo kema antahizankura tinkuma hiaza huza tusiza nehanageno zamavu evu evu hanige'za traka huza masegahaze. <sup>14</sup> Hagi Sameria vahe havi anumzante'ma huvempama hu'naza vahe'enе, Beseba havi anumzante'ene Dani havi anumzante'ma huvempa hu'naza vahe'enena, mika fri vagare'za oraotigahaze.

<sup>1</sup> Hagi anante'ma avanagna zama koana, kresramana vu itamofo tavaonte Ra Anumzamo'a otinege'na kogeno amanage huno nasami'ne, mono nomofo zaza vimago zafaramima noma vazisgama hu'nea zafaramimofo agofetu hankavetinka amasagigeno evuramino fenkama mani'naza vahera zamaheno. Hagi mago'a manisaza vahera magore huza omanigahazanki bainati kazinteti zamahe'nuge'za fri vagaregahaze. <sup>2</sup> Hagi zamagra mopa agu'afi hanagati'za amefenkame fri vahe'ma asenezmantafi vugahazanagi, Nagra anampinkati hankave nazanteti zamavazu hu'na zamahegahue. Zamagra monafi mareriza umani'gahazanagi, anantegati ome zamavarefenka atregahue. <sup>3</sup> Hagi amenagame Kameli agonafi ome fraki'nazanagi, anampinkati hakena zamazerigahue. Hagi zamagrama hagerimofo ro'are'ma ufrakinage'na, nagra hagerimpi ra osifave hunt'a'nena zamarotago huno ome zamaprigahie. <sup>4</sup> Hagi ha'vahe'zmimo'zama zamavare'za kinama ome huzmantesnarega, ha' vaheku hanuge'za bainati kazinknonteti zamahe fri'nage'za, vahe kopi frigahaze. Hagi Nagra zamazeri knarera zamagrira osugahuanki, zamazeri haviza hugahue.

<sup>5</sup> Hagi Monafi sondia vahe'mofo Ra Anumzamo'ma ama mopama avako'ma nehigeno'a, mopamo'a ze'ze huno maramra huno evuneramigeno, ana mopafima nemaniza vahe'mo'za zavi krafage hugahaze. Hagi mopamo'a Naeli timo'ma ti hageno vazi'zoreno eviankna huteno ete evurami'ne. <sup>6</sup> Hagi Ra Anumzamo'a kuma'a monafinka tro hunenteno, noma'amofo trara mopafi tro hunte'ne. Hagi Agra hagerimpinti tina eri vanaheno mareriteno, atregeno ama mopafina kora nerie. Hagi Agri agia Ra Anumzane.

<sup>7</sup> Hagi Israeli vahe'mota tamagra Itiopia vahera zamagatereta ruzahu vaher mani'none huta nehaze huno Ra Anumzamo'a nehie. Hianagi Nagra Israeli vahera Isipiti zamavare'na atirami'na, Filistia vahera Krittira zamavare'na atinerami'na, Aramu vahera Kiri kumatetira zamavarena atirami'noe. <sup>8</sup> Hagi Nagra Hihamu'ane Anumzamo'na rama'a kumi'ma nehaza Israeli vahe'mota neramagoankina, mika tamahe vagaregahue. Hianagi Jekopu nagara tamahe vagaore'na osi'a tamatre'nugeta manigahaze huno Ra Anumzamo'a hu'ne. <sup>9</sup> Hagi Israeli vahera hanave ke hanugen, ruga'a mopafi vahe'ene Israeli vahera refakoa huramantegahie. Ana hugahankino mago vahe'mo'ma witima vazi herehema higeno, havizama hu'nea witimo'ma mopafi evuramiankna hu'za Israeli vahe'nimo'za ru mopafi umanigahze. <sup>10</sup> Hianagi nagri vahepinti'ma kumima nehuta, mago'zana fore osugahie hutama nehaza vahera mika'a bainati kazinteti tamahe fri vagaregahaze.

<sup>11</sup> Hagi ana knafina Deviti nona ete eri hanavetina negi'na, tapagema hu'naza kuma kegina ete eri so'e nehu'na, kumamo'ma mopafima havizama huno evuramino me'nefintira ete eri oti'na ki'nugeno, ko'ma me'neaza huno konaririane hankavenentake kuma megahie. <sup>12</sup> Ana hanuge'za Israeli vahe'mo'za Idomu mopa eri nafa'a nehu'za, ru kumapi vahe'ma nagrama huhampri zamante'noa vahe'enena kegava huzmantegahaze. Hagi ama ana nanekea Ra Anumzamo'nehiankino, ana zana hugahie. <sup>13</sup> Hagi Ra Anumzamo'a huno, Mago kna ne-eankino grepine witinema hankre'nageno'a ame huno hageno marerino raga rente'nige'za hoza vazage vahe'mo'za erige erigetete'za hozafi atrenageno megahie. Hagi Israeli agonafinti wainimo'a tusi'a haga hugahie. <sup>14</sup> Nagra Israeli vaheni'a kinama

hu'nazaregati zamavarena mopazamifi e'nuge'za, mika kuma'zmima hav-izama hu'neana emeri kasefa hu'za ki'za nemaniza, waini hozane, zafa raga hozanena ante'za nene'za manigahaze. <sup>15</sup> Hagi Nagrama zami'noa mopafi zamavare'na ome nezamante'na, ete mago'anena ana mopafintira zamavare otregahue, huno Ra Anumzana tamagri Anumzamo'a hie.

## Obadaia Obadaia Kre'nea Avontaferé

*Ra Anumzamo Idomu vahe zamazeri haviza hania zanku Obadaia asami'nea naneke*

<sup>1</sup> Ama'i Ra Anumzamo'a ava'nagna zampi Obadaina eri averi higeno Idomu vahete'ma fore'ma hania hazenke zamofo keteno, Idomu vahekura Ra Anumzamo'a amanage hie huno ome huama hu'ne. Hagi keagama erino vu vahe Ra Anumzamo'a mago ne' hunenteno, amanage hunka ama mopafima nemaniza vhahera ome zamasamige'za, Maka vahe'mo'za retrotra nehu'za, sondia nagazmia zamazeri tru'hute'za Idomu vhahera hara ome huzmanteho huno hunte'ne. <sup>2</sup> Ra Anumzamo'a Idomu vahekura amanage huno hu'ne. Ama mopafima nemaniza vahe amu'nompintira tamagrira zamazeri anteramisuge'za, vahe'mo'za tamagefenkami atregahaze. <sup>3</sup> Tamagrama tamavufga rama nehaza zamo reramavatga hu'ne. Na'ankure tamagra havemoke higeno, mesga hu'nea agonaramimpim ne-manita amanage huta tamagra nentahize, Mago vahe'mo'za amaretira eme tazeri fenkami otregahie huta nehaze. <sup>4</sup> Hagi tamagra tumpamo onagamu hampompi hareno vano hiaza nehutma, ofuramima me'nea amu'nompi nona negize. Hianagi anantetira zamazeri fenkami atregahue hu'na Nagra Ra Anumzamo'na nehue. <sup>5</sup> Hagi kumazufa vahe'mo'zama kenage'ma musufama eme e'neriza mago'a zana netraze. Hagi waini hozafinti'ma grepi rgama taginaku'ma aza vahe'mo'za maka tagi vaganorazanki mago'a netraze. <sup>6</sup> Hianagi Iso (Idom) nagamotma tamagri feno zantamina maka eme agu'zaneru'za, marerisa feno zantamina fra'ma ki'nazana hake'za eri'za vugahaze. <sup>7</sup> Tamagritegama eme ante'za zamazama hu'za ha'ma nehaza vahe'mo'za, rukrahe hu'za ha' huneramante'za mopatamifintira ha'rерamante'za tamahenati atregahaze. Tamagranema fru huta manisanune hu'zama kema huhagerafi'naza vahe'mo'za havige hute'za tamagrira zamazeri haviza hugahaze. Tamagrama antahima nezamiza ronetamimo'za, tamagrira zamazerinaku kriku anaginte gahazanagi tamagra anazana keta antahita osugahaze. <sup>8</sup> Hagi ana knafina magore hu'na knare antahi'zane vhahera Idomu mopafina zamatre sug'e'za omanigahaze. Ana nehu'na Idomu mopafima me'nea agonaramimpima ama' antahi'zane vahetamima nemaniza vhahera maka zamazeri haviza hugahaze. <sup>9</sup> Temani kumate harfa sondia vahe'mo'za tusi koro hugahaze. Ana nehanage'za Idomu mopafima me'nea agona ramimpima nemaniza vhahera zamahe hana hugahaze.

<sup>10</sup> Na'ankure Jekopu naganofira tamagri tamafuhe'za mani'nazanagi, tamagrama zamazeri havizama hu'naza agafare, tamagaze zamo refite neramante'na, Nagra tamagrira zamazeri haviza hanugeta tamagaze zampi manivava huta vugahaze. <sup>11</sup> Hagi Juda naga'mokizmi ha'vahe'mo'zama e'za, Jerusalemi kuma keginamofo kafaramima tapage hu'za zago fenozmima e'neri'za, Jerusalemi kuma'ma refko hu'za erinaku'ma satu zokago'ma neragazegeta tamagranena ha' vahe tro huta oti'neta zamaza osu'naze. <sup>12</sup> Tamagri tamafuhe'za Juda nagama kna zampima mani'nazageta anazankura antahi muse nehuta kiza zokago ke huzmantehaze. Ana nehutma Juda naga'ma eme zamazeri

havizama nehazageta, osuga'za huta musena nehuta, hazenkema eme zami'za zamazeri havizama nehazage'za tusi'a knazampima mani nazageta, tamagra osuga'za huta tamimiza runafage nehuta rantamagi eri'naze. <sup>13</sup> Ana knazamo'ma Nagri vahe'ma zamazeri havizama hige'zama mani'nazageta, rankuma zamifi ufreta feno zamia aguza ruta eri'naze. Hazenke zamo'ma zamazeri havizantfama hige'zama mani'nazageta, kiza zokago ke hunezmanteta osugaza huta, tusi'a knazampima mani'nazageta feno zamia aguzaruta eri'naze. <sup>14</sup> Tamagra kantu hanare otineta Juda naga'ma koro'ma fre'za vaza nagara zamahe nefrita, ozamahe zamatrage'zama mani'naza nagara tusi knafi mani'nazanagi zamazerita ha' vahe zamazampi ante'naze. <sup>15</sup> Ama mopafima kokankokama mani'naza vahe'ma Ra Anumzamo'ma refko hune zamanteno, zamagrama hu'naza avu'ava zante'ma mizama zamitere hania knamo'a hago erava'o nehie. Tamagra vahe'ma huzmante'naza kna avu'ava zana tamagri huramantegahaze. Hu'neankita ana avu'ava zamofo knazama'a tamagra'a erigahaze. <sup>16</sup> Ruotage'ma hu'nea agonanifinti'ma tima neaza huta nagri vhahera zamahe'nagu, maka ama mopafima kokankokama nemaniza vahete'ene tamagrite'enena knaza atre'na tamahe fanene hanugen tamagia omanegahie. <sup>17</sup> Hianagi osi'a naga'ma hapinti'ma ozamahenaza naga'mo'za, Saioni Agonafi manisnageno, ete ana kumamo'a ruotage kuma megahie. Ana'ma hanige'za Israeli vahe'mo'za ete e'za mopa'zamia erisanti hare'za manigahaze. <sup>18</sup> Jekopu naga'mo'za tevemo kaninkani huno teaza nehanageno, Josefe naga'mo'za tevemo hagna hagna hiankna hu'za, Idomu vhahera hagege hu'nea trazankna hu'nazanki'za tevemo traza te fanane hiazza hu'za Idomu vhahera ozmatre maka zamahe hana hugahaze. Nagra Ra Anumzamo'na ama nanekea huama nehue. <sup>19</sup> Hagi Nagri vahe'ma Negevi kazigama nemaniza vahe'mo'za vu'za, Idomu agona mopama me'neana omeri'za umanigahaze. Juda mopafima me'nea agona ramimofo asoparegama nemaniza vahe'mo'za, Filistia vahe'mokizmi agupo mopa erigahaze. Ana nehu'za Efraemi naga'mokizmi hoza mopane, Sameria vahe'mokizmi mopanena ete eri nafa'a nehanage'za, Benzameni naga'mo'za Gileati mopa ome eri'za manigahaze. <sup>20</sup> Hanki Israeli vahe'ma ru moparegama kina ome hu'za mani'naza vahe'ma ete mopa zamire'ma esanu'za, mopama erisna zana Fonesia vahe mopa atupareti agafa huteno, vuvava huno noti kaziga Zarefat mopa vanige'za eri'za manigahaze. Jerusalemi kumapi vahe'ma zamavare'za noti kazigama kinama ome huzmante'naza vahe'mo'za Negevi mopafima me'nea ranra kumatamimpi emanigahaze. <sup>21</sup> Hanki ha'ma hugatere'naza vahe'mo'za Saioni agonare mareri'za mani'neza, Idomu mopafima me'nea agonaramina kegava hugahaze. Ana'ma hutesageno'a Ra Anumzamo'a Agra'a kinia manino ana mopa kegava hugahie.

## Jona Jona Avontafere

### *Anumzamofo kema Jona rutagre'nea naneke*

<sup>1</sup> Ra Anumzamo'a Amitai nemofo Jonana, amanage huno asami'ne, <sup>2</sup> Otinka tusi'a rankumate Ninive vunka, kefo avu'ava'ma nehaza zankura kezatinka Anumzamo'a keaga huneramante hunka zamasmio. Na'ankure kefo zamavu'zamava'ma hu'nazana hago Nagra ke'noe. <sup>3</sup> Higeno Ra Anumzamo'ma Jonama hunteno, vuoma hirega ovuno atreno freno Tasisi vunaku agesa nentahino, Jopa uramino Tasisi vuku nehia vente ome kefore huteno, vania zana tafera mizaseteno Ra Anumzamofona atreno freno, afete Tasisi kumate vu'naku ventefi mareri'ne.

<sup>4</sup> Ana higeno Ra Anumzamo'a tusi'a zaho ko huntogeno hagerimo emeri kranto kranto nehigeno ana ventemo tagana vaz'i za hu'ne. <sup>5</sup> Ana ventefima eri'za e'neriza vahe'mo'za tusi koro nehu'za zamagra anumaza zamire kezankeha nehu'za fenoma ventefima me'neana o'za hurantesie hu'za asgahu'za hagerimpi atre'naze. Ana hazanagi, Jona'a ana ventemofo agu'afi fenka uramino avu uvaseno, hinkrafo ante'ne. <sup>6</sup> Mase'negeno ana vente'ma eneria ne'mo'a agrite uramino, nahigenka kagra kavura mase'nane? Otinka anumzankamofontega nunamuna huo, kagri anumzamo'a tagrikura asunku huranteno taza hanigeta tagra ofrisune! <sup>7</sup> Ana ventefi eri'za vahe'mo'za ke hugantu kama hu'za, E'eneketa satu zokagora reta ama'na hazenke'mofona aza ugagota hu'nefi kamneno, nehu'za satu zagoma re'za kazana Jona agimo efore hu'ne. <sup>8</sup> Ana hute'za Jonana anage huza antahige'naze, Iza hu'nea hazenkere hagerimo'a tagrira tahe refite'zana nehie? Kagra nankna eri'za e'nerina ne' mani'nane? Kagra igati e'nane? Rankuma ka'a igatire? Kagra ina vahepinti fore hunane? Hu'za antahige'naze. <sup>9</sup> Jona'a ke nona huzmanteno anage hu'ne, nagra Hibru nere, monafinka Anumzama hagerine, hagege mopanema tro hu'nea Ra Anumzamofonte nagra monora hunentoe. <sup>10</sup> Anagema hige'za ventema eneriza vahe'mo'za nentah'i'za, tusi zamanogu nehu'za, anage hu'za Jonana antahige'naze. Kagra inankna hazenke hu'nane? Na'ankure Jona'ma Anumzamofonkema rutagreno fre'nea kea ana nagara zamasamige'za antahi'nareti hu'naze. <sup>11</sup> Hagerimo'a mago'ene tusiza huno kranto kranto huno regazarino avune ante'no e'ne. Hige'za Jonana antahige'naze, Inankna kagrirra hugante sunkeno hage rimo'a rurava hegahie? <sup>12</sup> Hazageno nagrira nasgahutma hagerimpi matevu natrenkeno, timo'a rurava hino. Nagra hago ke'na antahina nehue, na'ankure nagri hazenke zamofo agofetu hagerimo'a tamagritera avunea nente, huno zamasmi'ne. <sup>13</sup> E'inama nehiana netre'za ana vahe'mo'za tusiza hu'za avame ante'za tin ankenare vu'zante maraguzati'naze. Ana hu'nazanagi, amuhara osu'naze. Na'ankure hagerimo'a mago'anee erirankasege'za ankenarega vugara osu'naze. <sup>14</sup> Anante Anumzamofo kezatimi'za, Ra Anumzamoka muse (plis) hugantonanki ama ne'ma ahe frisuna zankure hunka tagrira tahe fanane osuo. Ama ke'a omane ne'ma ahe frisuna zankura, tagrira tazerinka keaga huoranto, Kagriku huta amanahura huntegahune, Ra Anumzamoka kavesiniazza Kagra huo. <sup>15</sup> Anante Jonana asgahu'za hage rimp i matevu'za atrageno, avunema nentea hagerimo'a aru rava ahe'ne. <sup>16</sup> Anama hiazanku ana vahe'mo'za,

Ra Anumzamofona tusi'a koro hunte'za, Kresramana vunente'za, mago'a hvuempa kea Agrite hu'naze.

<sup>17</sup> Ana hazageno Ra Anumzamo'a tusi'a nozame huntogeno Jonana asga hvuazigeno, Jona'a nozamemofo rimpafina tagufa zagegi, tagufa kenageki huno mani'ne.

(Mat 12:39-41)

## 2

### *Jona nunamumofo naneke*

<sup>1</sup> Jona'a nozamemofo arimpafinti, Ra Anumzana agra'a Anumzamofontega nunamu hu'ne.

<sup>2</sup> Agra anage hu'ne,

Nagra tusi'a hazenkefi mani'ne'na Ra Anumzamofontega hazenke zanimo-fona asamugeno, Agra ke'ni'a antahinami'ne.

Fri vahe'mofo kumapi mani'nena fri'za nehu'na nazama huogu'ma kezatugenka, kagra zavi krafa ke'ni'a antahinami'nane. <sup>3</sup> Kagra nasga hunka ame fenkame hagerimofo agu'afinka natre'nane.

Anampina timofo hanavemo nazeri kagigagi hu'ne.

Kagra hanave'ane zaho huntankeno haferina eri kranto kranto huno e'nea timo, nagrira nazeri nakrino refite'ne. <sup>4</sup> Ana hige'na Kagripintira ko nagrira nahe anati atre'nane hu'na nagra antahi'noe.

Kagri ruotge ra mono nonka'a mago'ene onkegahue, hu'na nagesa antahi'noe. <sup>5</sup> Kagigagi huno avune ante'nea timo, nazeri nakrino nanankempi marerige'na ti nakrika ate'noe.

Ame fenkame tam'i'nea timo nazeri kagigeno,

Hagerimpi inozamo nanuna eri ano vazi'ne. <sup>6</sup> Agonamofo agafafi nagra urami'noe.

Ana mopamofo agu'afinka rentrako hunantesige'na kina hu'na manivava hugahue hu'na nagesa antahi'noe.

Hu'neanagi Kagra Ra Anumzamoka, ana kerifintira naza hunka navare atre'nane. <sup>7</sup> Navu evuevu hige'na frinaku nehu'na,

nagra Ra Anumzamoka nagesa antahi kamugeno, nunamuni'amo ruotge ra mono nonka'afine, Kagrite'ene e'ne.

<sup>8</sup> Knare osuno havi anumzante mono hunentaza vahe'mo'za, Anumzamofo asunku'zana zamagra erigaragi, zamagena hunemize.

<sup>9</sup> Hianagi Ra Anumzamoka kezati'na kagia erisga nehu'na, nagra zagamepinti Kagritega ofa hugantegahue Ra Anumzanimoka nagrama hvuempama hua kea, amage antegahue, na'ankure nazahu hanavea Ra Anumzamoka Kagrake mani'nane.

<sup>10</sup> Anante Ra Anumzamo'a nozamea huntogeno ke'a zafa huno, Jonana hageri ankenare hagape naneke amu ome atitre'ne.

## 3

### *Ninive rankumate vahe'mo'za zamagu'a rukrahe hu'naza naneke*

<sup>1</sup> Anante Ra Anumzamo'a mago'ene Jonana anage huno asami'ne,

<sup>2</sup> Mensintfa otinka, tusi'a kumate Ninive vunka, Nagrama kasmisua nanekea vhahera ome zamasamio. <sup>3</sup> Anage higeno, Jona'a otino Ra Anumzamo'ma asamia kante anteno Ninive vu'ne. Ninive kumara tusi'a ranku'ma me'negeno ana kumapina tagufa zagegna rukitagi'za mago atuparega kana nevaze. <sup>4</sup> Jona'a ana kumapi agafa huno, magoke zagegnafi vuno, agra

kezatino anage hu'ne, 40'a zagegna evanigeno Ninive kumamo'a haviza hugahie. <sup>5</sup> Anante Ninive vahe'mo'za Anumzamofo kere zamentinti nehu'za, zamagra ne'zana a'o nehu'za, ranteti vuno osite'ma vu'nea vahe'mo'za zamasunku kukena (sek klos) eri hankre'naze. (Mat 12:41, Luk 11:31-32.)

<sup>6</sup> Ana nanekemo'ma Ninive kini nete'ma uhanatigeno'a, kini tratetira otiazamo, kini kukena'a atova hutreno, asunku kukena erino antaniteno, ta'nefapi mani'ne. <sup>7</sup> Anante kinine, kagota eri'za naga'ané amage'ma antesaza naneke atrageno ran kumapi vahe'zagare vuno eno higeno, kinimo'a huno magore hunka kagro, zagagafaka'a, atregeno ne'zane, tinena one'tfa hino, huno hu'ne. <sup>8</sup> Mago mago'moka kasunku kenage eri nehunka, hagi ana zanke hunka zagagafaka'a asunku kukena eri hundo. Kagranena Anumzantega kagu'areti hunka nunamuna nehunka, kumi hu'zane, ha' fra huno vahe azeri haviza hu'zana atreho. <sup>9</sup> Ontahi'none, Anumzamo'a nentahino asuragi ranteno Agra'a rimpia ahe'zana atresigeta ofri manigahune. <sup>10</sup> Kefo avu'ava zama nehaza zama atre'za zamagu'a rukrahe hazageno, Anumzamo'a negeno, Agra asunku huzmanteno zamahe frigahuema hia agu'agesa atre'ne.

## 4

### *Anumzamo asuragi zamantegeno, Jonana asi vazi'nea naneko*

<sup>1</sup> Hagi Jona'a musena osuno tusi asi vazigeno, <sup>2</sup> Ra Anumzamofontega anage huno nunamuna hu'ne, Ra Anumzamoka muse (plis) hugantoe. Ese agafareti nagra ko antahi'noe, Ninivea eri haviza osugahane hu'na kuman'i're mani'nena antahi'noe. Antahite'na mopani'a atre'na, Tasisia nagra fre'na vu'noe! Na'ankure, Kagra kasunku nehunka knare kavukva vahera huzmante Anumza mani'nane, agazone hunezmanenka kasunku'zamo avite Anumzankinka, zamazeri haviza hugahue hana vahera anara nosane. <sup>3</sup> E'izanku nona'a, Ra Anumzamoka nagri menina nahege'na fri'neno. Nagrama omani'na, frisugen'o'a knare hugahie. <sup>4</sup> Ra Anumzamo'a anage hu'ne, knare kegafa me'negenka krimpa nehano?

<sup>5</sup> Anage higeno, Jona'a ra kumara atreno zage hanati kaziga via'zamo, zage tonare huno osi no ome kino anampinka mani'neno, inankna'za Ninivea fore hugahie nehuno avu anteno mani'ne.

<sup>6</sup> Hagi Ra Anumzamo'a aza huno Jonana anumofo tona huntengou, nofi traza huntegeno hageno mareri'ne, ana nofi'ma hage'nea zankura Jona'a, tusi'za huno musena hu'ne. <sup>7</sup> Hianagi maseno ko'atigeno nanterampi, Anumzamo'a havigafa huntegeno ananofira eme ani traga hutregeno, ana nofi'mo'a hagege hu'ne. <sup>8</sup> Zagema hanatigeno'a, Anumzamo'a amuho nentake zaho, zage hanati kazigati huntengeno, zagemo'a Jona anuntera tentegeno, avu evu evu higeno Jona'a fri'za nehuno, anage huno kezati'ne, nagrama nagesa antahuana frisugen'o'a knare hugahie, kasefa hu'na mani'zankura nave'osie. <sup>9</sup> Anante Anumzamo'a Jonana amanage huno asmi'ne, Knare ke agafare nofikura kasia nevazio? Huno antahigegeno Jona'a knare ke agafare nagrira nasivazige'na friku nehue hu'ne.

<sup>10</sup> Higeno Ra Anumzamo'a amanage hu'ne, Eri'za erinka, krinka kegava hu'nana nofiku kagra krimpagna nehano, nofimo'a mago kenage hageteno mago zage knafi fri'ne. <sup>11</sup> Ninive rankumapina 120 tauseni'a agatere'nea vahe mani'hazankiza e'izana tamazanki, havizanki hu'za osugahaz. Afu'

kevuzaga rama'a mani'naze. Hianagi, kagrama antahi'nana, Nagra e'i ana rankumakura nagesa nontahuo? Huno asmi'ne.

## Maika Maika Avontafere

*Israeli vahete'ene Juda vahete'enema hazenke'za fore hania naneke*

<sup>1</sup> Hanki ama nanekea Ra Anumzamo'ma, Moreseti kumateti ne' Maikama ami'heana, Jotamu'ma, Ahasi'ma, Hezekai'a'ma hu'za Juda mopare'ma kinima maniterema hu'za aza kafu ramimpi Sameria kumate'ene Jerusalemi kumate'ma fore hania zamofo naneke Maikana asmi'ne.

<sup>2</sup> Maka ama mopafima mani'naza vahe'mota ama nanekea nentahinke'za, Ama mopa agofetu'ma me'nea zantami motanena tamagesa ante'neta antahihi. Ra Anumzamo'a ruotage'ma hu'nea mono moma'afi mani'neno, menina keaga huneramante. <sup>3</sup> Hagi antahihi! Ra Anumzamo'a agrama nemania tra'a monafinka atreno ne-eankino ama mopafima havi anumzantamimo foma mono'ma hunentaza za'za agonaramimpi agia eme regahie. <sup>4</sup> Ana'ma hanigeno'a agonaramimo'a tinkna huno agiafina maramara nehanigeno, agupo moparamimo'a runetanenigeno, kragefe'nea masavema teze'zema hiaza hanigeno, agonaramintegati timo'ma vazi hagagino uramiaza huno aguporega vugahie. <sup>5</sup> Hanki ama ana zama fore'ma haniana na'ankure, Israeli vahe'ene Juda vahe'mo'zama Anumzamofo nanekema eri tre'za kumi'ma hu'naza zanku huno fore hugahie. Maka Israeli vahe'mo'za kumira hu'nazankino, iza ana knazana erigahie? Ugagota ran kuma Sameria kuma'mo ana knazana erisanigeno, Juda vahe'mo'zama havi anumzante'ma mono'ma hunentaza kumara iga me'ne? E'i Jerusalemi kumakino agra'a knazana erigahie. <sup>6</sup> Ana hu'neanki'na nagra Ra Anumzamo'na Sameria kumara eri haviza hanugen kugusopamo'ma hihi huno mareriaza hugahie. Ana hanugen ana kumapi mopamo'a pehe hanige'za anampina waini hoza antegahaze. Ana nehu'na kuma keginamofo have ramina ahefaragu vazisanugen agupofinke'za uramisigeno, keginama retrure'za tro'ma hu'naza tramo'a amate megahie.

<sup>7</sup> Samaria kumapima havi anumzamofo amema'ama antreta tro'ma hunte'nazana ru takohu osi osi hunetre'na, havi anumzante'ma mono'ma hunentaza nompima, mizama eri'naza zama eme ante'naza zantamina tevemo tefanane hugahie. Ama ana zantamima mizama se'nazana, monko zama nehaza vahe'ma miza sezamante'naza zagoret miza se'naza zantamine. Ana hu'neanki'za ana zantamina eri'za ru moparega vu'za monko avu'ava zama nehaza vahe ome mizase zamantegahaze. <sup>8</sup> E'ina hu'negu nagra Maika'na tuni nasunku hu'na zavira nete'na, navatetira kukena hate netre'na nagia nonena ontani vano hugahue. Afi kramo'ma hiaza hu'na krafa huna vano nehu'na, mananinkna nama, ostritsimo'ma hiaza hu'na zavira tegahue. <sup>9</sup> Na'ankure nagri vahemokizmi namumo'a teganigara osu'neankino, ana namumo'a takaireno Juda vahete'enena nevie. Ana namumo'a Jerusalemi kumamofo rankafanteria vuteno, agu'a ufrenero eri haviza hu'ne. <sup>10</sup> Ama ana zankura huamara huta Gati kumapima nemaniza vahera ozamasamaho. Ana nehuta magore huta tamavunura otreho. Hagi Bet-Leafra kumate'ma nemaniza vahemota tamarasunku nehuta, kugusopafi maseta rukrahe krahe hiho. <sup>11</sup> Hanki Safiri kumapima nemaniza vahe'mota, tamagazegu nehuta tamavatera kukena omanesiaza kina vahe kna huta ru moparega viho. Za'anani kumapima nemaniza vahe'mo'za kuma zamimofo vihufintira atre'za atioramigahaze.

Ana nehuta zavi krafama hanazana Bet-Ezeli kumapi vahe'mo'zama eme tamazama osnaza zanku anara hugahaze. <sup>12</sup> Maroti kumapima nemaniza vahe'mo'za tusi zamatafi neman'i'za, ina zupa knare zana fore hugahie nehu'za avega antete'za manigahaze. Na'ankure ama ana knazamo'a Ra Anumza mofontegati e'neankino, Jerusalemi kumamo'enena ama ana knazana erigahie. <sup>13</sup> Hanki Lakisi kumapima nemaniza vahe'mota karisiramina erita hosi afutamire rente vaganereta, anampi takaureta koro freho. Na'ankure Juda mopafima me'nea ranra kuma tamimpintira Israeli vhahera zamavaririta tamagra esera keontahi avu'ava zana nehuta, Jerusalemi kumapima nemaniza vhahera zamavareta kumpina ufre'naze. <sup>14</sup> E'ina hu'negu Juda vahemota, Moreset-Gati kumate'ma nemaniza vahekura tamasunku huta huso'e hunezamanteta musezana tre zamanteho. Na'ankure ana kumara ru vahe'mo'za erisanageno tamagri kumara mago'enena omanegahie. Hanki Aksibi kumapima nemaniza vahe'mo'za Israeli kini vhahera karunage hu'za rezamavataga nehu'za zamaza osugahaze. <sup>15</sup> Hanki Moreseti kumapima nemaniza vhahera, Nagra Anumzamo'na tamagri ha' vhahera huzmantesuge'za e'za, ha' eme huramante'za tamagri kumara eri nafa'a hugahaze. Ana hanage'za Israeli ranra kva vahe'mo'za koro fre'za Adulamu ran kumatega vugahaze. <sup>16</sup> Juda vahe'mota tamagrama tamavesi nezamantaza mofavre nagatamina, ame hu'za hanare'za vugahazanki tamasunku hunezamanteta tamaseni tamazokara vazagategahaze. Na'ankure mofavre nagatamima zamavare'za afete moparegama kinafima vanaza zanku huta tamaseni tamazokara vazagate atresageno fankimofo kokovite azoka'ma omaneaza huno tamanuntera tamazokara omanegahie.

## 2

### *Vahe'ma zamazeri havizama nehaza vahe'mo'zama kva hanaza naneke*

<sup>1</sup> Hagi Maika'a mago'ane huno, Zamavu'ma omase kenage'ma oti'za mani'neza havi avu'ava zama hanaza zanku'ma antahintahima retro'ma nehaza vahe'mo'za kva hiho. Nanterama sege'za kefo avu'avazama hunaku'ma antahintahima hu'naza avu'avaza nehaze. Na'ankure hankavea zamagripi me'negu, nazanoma hunaku'ma haza zana amne nehaze. <sup>2</sup> Hanki zamagrama mago vahe'mofo hozama ke zamasanema nehu'za, ana mopa enerize. Hagi mago vahe'mofo noma erinakura ana nomofo venaflo azeri haviza nehu'za noma'a eneri'za, vhahera rezamatga hu'za fenozmine nozminena eneriza, naga'zamimo'zama erisantima hare'naza mopa havige hu'za zamazeri havia hu'za eri nafa'a nehaze. <sup>3</sup> Hianagi Ra Anumzamo'a amanage huno nehie. Tamagrama havi avu'ava zama nehaza zante'ma nonama huramante'nua zana retro nehuankina, havi avu'ava zanteti nona huramante'na tamazeri haviza hanugeta tamagra'a tamagura ovazigahaze. Ana hanugeta ko'ma tamavufga rama nehuta vanoma nehaza zana huta vanoa osugahaze. Na'ankure kefo knamo tamagritera egahie. <sup>4</sup> Hanki ana knafina tamagri ha' vahe'mo'za amanage hu'za zagamepina huvazi'za kiza zokago kea huramantegahaze. Tagra hago havizantfa hunkeno, Anumzamo'a moppatia hanareno, tagri'ma komoru hu'za ha' vahe zamazampima tavre ante'naza vahe eri zami'ne. <sup>5</sup> E'ina hu'negu Ra Anumzamofo kevu naga'mo'zama taisi zokago'ma re'za mopama refko hu'za erisageta, tamagra mago'zana e'origahaze. <sup>6</sup> Anagema huge'za e'inahu nanekea nosunka, e'inahu kas-nampa kea osuso hu'za vea kevumo'za hu'naze. E'inahu knazamo'a tagritera eno eme tazeri havizana hanigeta, tagazegura osugahune hu'za hu'naze.

<sup>7</sup> Hagi Jekopu nagamota tamagra e'inahu nanekea nehazo? Tamagrama antahi'zana Ra Anumzamofo Avamumo'a arimpa ahenorante huta nehazafi? Hagi iza'o fatgo avu'ava zama hania vahe'mofona nagri nanekemo'a azeri so'e hugahie huno hu'nefi? <sup>8</sup> Hianagi Anumzamo'a huno, nagira ha'renenanteta vahe'mokizmi nakre ku'zamia tamagra musufa ne-seta, mago zana fore osanigeta knare huta manigahunema hu'za nehaza vahé'ene, hategati'ma aza vahe'mokizmi zanena musufa nesaze. <sup>9</sup> Nagri vahepima mani'naza a'hanea, knare'nare nozamifintira zamavare netraze. Ana nehuta mofavre naga zamimo'zama musezama erisanti haresaza zama zaminaku'ma nehaza zana musufa nesaze. <sup>10</sup> Ana hu'nazagu menina tamagra otita ama mopa atreta viho! Mago'ene ama mopafina nonkumara anteta mani frua osugahaze. Na'ankure tamagra kumi eri hakare nehuta ama mopa eri havizantfa hu'nazankita knaza erita havizantfa hugahaze. <sup>11</sup> Hagi mago ne'mo'ma eno, nagra kasnampage huankino wainimo'ene aka timo'enena rama'a fore hugahie huno'ma havigema hania neku veamo'za avesintegahaze. <sup>12</sup> Anumzamo'a huno, Mago zupa maka Israeli vhahera zamavare atruma hanuana, osi'a naga'ma ofri mani'naza naga'a ana maka zamavare tru hugahue. Ana nehu'na sipisipi afu zagama keganafima zamavare atruma hazaza hu'na, zamavare atru hanuge'za manigahaze. Ana hanuge'za rama'a sipisipi afuzagamo'zama knare tra'zama me'nefi atru hu'za mani'neza zamagasasamoke'ma nehazaza hu'za manigahaze. <sup>13</sup> Ru moparegama kinama huta mani'nesafintira, kegavama huramante'nea ne'mo'a tamaza huno kinafintira anafe huno tamavre atiraminigeta, ha' vahe'mokizmi kuma'mofo kafaramimpintira etiramita egahaze. Tamagri kini ne' Ra Anumzamo agra'a ugota huramanteno nevuno, kegava huramanteno tamavreno vugahie.

### 3

#### *Israeli kva vahe'mokizmima keagama refko huzmantesania naneke*

<sup>1</sup> Hanki nagra ama nanekema huana, Israeli nagatema ugotama hu'naza kva vahe'mota antahihio, e'i zana fatgo zanki havi zanki huta ko keta antahita hu'naze. <sup>2</sup> Hianagi tamagra knare avu'ava zankura tamavesra nehuta, kefo avu'ava zama hu'zankuke tamave'nesie. Nagri vahe'mo'za ofri kasefa mani'nazageta zamavufaga eri tragatragu nehuta, zaferina zamiretira ame'a zamia eri hazori netraze. <sup>3</sup> Tamagra Nagri veamokizmi zamufga neneta, maka zamavufaga hakaneta eri vaga neraze. Ana nehuta zaferina zamia rufu netagita, afu me'ama osi kavofine ran kavofinema krenaku'ma tagahu osi'osi'ma hazaza nehaze. <sup>4</sup> Ana nehuta kna zamo'ma tamagrite'ma ne-egeta Ra Anumzamo'ma tamaza hanigura zavi krafa ne-hazanagi, Ra Anumzamo'a eme tamaza osugahie. Na'ankure tamagra rama'a havi avu'avaza hu'nazankino avugosa, rukarahe nehuno ontamegahie. <sup>5</sup> Ra Anumzamo'a amanage huno nehie. Tamagra havige kasnampa kema nehaza vahe'mota, Nagri vhahera zamavareta havi kante nevaze. Ana nehutma ne'zama tamamiza vhahera fruge hunezmantaze. Hianagi ne'zama ontamamiza vhahera, agafa hutma koro kea ha' vahe'mo'za tamazeri haviza hugahaze huta hunezmantaze. <sup>6</sup> E'ina hu'negu tamagritera hanizamo eme refitesigeta hanimpi mani'neta mago'enena

ava'nagna zana onketfa hugahaze. Ana hanigetma henkama fore'ma hania zankura mago'enena huamara osugahaze. Ana kasnampa kema nehaza vahe'mota masare manigahazanagi hanimpima maniaza huta manigahaze. <sup>7</sup> Ana'ma hanigetma henkama fore'ma hania zanku'ma havige kasnampa kema nehaza vahe'mota tusi tamagazegu nehuta kepri hugahaze. Na'ankure Anumzamo'a naneke tamirera kenona huoramigahie. <sup>8</sup> Hianagi Ra Anumzamofo Avamumo'a nagripi emanu viteno hankavea nemamie. Ana nehuno fatgo avu'ava zane fatgoma huno refkoma hu avu'avazanena naza hige'na kena antahina nehue. Ana nehuno nazeri hankanavetige'na Israeli vahe'motama keontahi avu'ava zama nehaza zanku'ene kumi tamigura, korora osu'na huama nehue. <sup>9</sup> Israeli vahe'mokizmi kva vahe'mota tamagesa ante'neta ama nanekea antahiho. Fatgoma huno refko'ma hu avu'ava zankura tamavesra nehutma, fatgo avu'ava zana netretma akrahe karahe avu'avaza nehaza vahe mani'naze. <sup>10</sup> Hagi Jerusalemi kuma'ma eri agafama huta kinte'nazana, vahe'ma ahe fri avu'ava zamo'ene havi avu'ava zamo avite'nea agofetu kinte'naze. <sup>11</sup> Tamagra kva vahe'mota keagama refko'ma hazana, masavema hu'za ramiza zago e'nerita, keaga refkoia nehaze. Tamagra pristi vahe'motane kasnampa vahe'motanena zagoma eritetage kasnampa nanekea nehuta vahera rempia hunezmize. Ana nehutma makamota huta Ra Anumzamo'a tagrane magoka mani'neankino hazenke zamo'a tagritera omegahie huta nehaze. <sup>12</sup> E'ina hu'negu kva vahe'motane, pristi vahe'motane kasnampa vahe'motanema hu'naza avu'ava zamofo hazenke Ra Anumzamo'a Jerusalemi kumamofo agofetu anteno kumara eri haviza hanigeno, fragu vaziramino kugusopamo'ma hiaza huno hihi huno marerigahie. Ana hanigeno Saioni agonafima menima Anumzamofo mono noma me'nea agonafina, zafa tanopamo hageno refitegahie.

## 4

### *Henkama Ra Anumzamo kini manisanigeno knare nomani'za fore hania zamofo naneke*

<sup>1</sup> Hagi henka mago kna ne-eankino ananknama efore'ma hanigeno'a, menima Ra Anumzamofo mono noma me'nea agonamo'a mago'a agonaramina zamagatereno onaga'a me'neno, marerisa agona meganie. Ana hu'nesige'za kokankokama ama mopafima mani'naza vahe'mo'za timo'ma evuvavama nehiaza hu'za ana agonafi evava hugahaze. <sup>2</sup> Kokankokati'ma esaza vahe'mo'za amanage hugahaze. Enketa Ra Anumzamofo agonafima Israeli vahe'mokizmi Anumzamofo mono nompi vanunkeno, Agra'a avu'ava zana rempi huramisigeta, Agri kante vano hanune hu'za hugahaze. Na'ankure Ra Anumzamo'ma rempima huramisia kasegemo'a Saioni agonafinti atiramino vuno eno nehanigeno, Agri nanekemo'a Jerusalemi kumapinti atiramigahie. <sup>3</sup> Anumzamo'a vahe'mokizmi nenekea refko huno knaza zamia e'nerino, hankave vahe'ma afete moparegama umani emanima hu'naza vahe'mo'zama ha'ma hunaku'ma hanazana eri amne hugahie. Ana hanige'za vahe'mo'za bainati kazinkno zamia rukuta huza mopama rekori azota tro nehu'za, karugru keve zamia ruguta huza zafama rosesaza kazi tro hugahaze. Mago kumamo'ma otino mago kuma'ma ha'ma hunentea zana, omanesigeno ha'ma hu avu'ava zama rempima nehaza zamo'enena omanegahie. <sup>4</sup> Ana hanigeno mago'mago vahe'mo'a agra'a krepimofo agafafine, fiki zafamofo agafafi manitere hugahie. Na'ankure mago vahe'mo'a eno eme zamazeri korora osugahie. Monafima mani'naza

Sondia Vahe'mofo Ra Anumzamo ama ana nanekea huvempa nehie.<sup>5</sup> Maka ama mopafima nemaniza vahe'mo'za zamagra'a anumza amage antetere hugazanagi, Ra Anumzana Anumzantimofo amage anteta tagra vuava hugahune.

### *Israeli vahe'mo'zama kinafinti'ma atre'za esaza zamofo naneke*

<sup>6</sup> Ra Anumzamo'a huama huno, Ana knafina Nagra agiamma haviza hu'nesia vahe'ene, ru moparegama kinama ome hu'naza vahera zamazeri atru nehu'na, knazama zami'na zamazeri haviza huge'za zamasu zampima umani'naza vahe'enena ete zamazeri atru hugahue.<sup>7</sup> Hagi zamagama havizama hunege'za kama vuga'ma osu'naza vahe'ma osi'ama mani'naza nagara zamazeri atru hugahue. Ana nehu'na ru kumategama kinama ome hu'za mani'naza nagamokizmia zamazeri hanavetisuge'za hanave vahe fore hugahaze. Ana nehanage'na Ra Anumzamo'na Jerusalemi kumate mani'nena Nagrания kegava huzmante vava hugahie.<sup>8</sup> Hianagi kagra Jerusalemi kumamoka, Ra Anumzamofo vahe'mokizmi hankave vihu kegina mani'nanokino, kinima maninka kegavama nehana hankavemo'ene hihamuka'amo'enena ete kagrite egahie. Ana hanigeno kinima mani anante anante'ma huno kegavama hu'zamo'a hentofa Jerusalemi kumanifi meno vugahie.<sup>9</sup> Hianagi Jerusalemi kumamoka nagafare rankea hunka krafagea nehane? Kinima manino kagri'ma kegavama hugante vahera omani'nazafi? Knare antahintahima kamino kazeri fatgoma hu vahera omani'nazafi? Hagi mago a'mo'ma mofavre ante'naku nehigeno atama negriankna huno katazamo kazeri anakinte'ne.<sup>10</sup> Jerusalemi kumapima nemaniza vahe'mota, mago a'mo'ma mofavre antenaku'ma higeno atama negrigeno omeru emeru nehuno karagi'ma riaza hiho. Na'ankure menina ran kumara atreta kama kokampi amate umanigahaze. Tamagra Babiloni moparega vuta kina ome hugahaze. Hianagi anantegatira Ra Anumzamo'a tamagu'vazino, tamagri ha' vahe'mokizami hankavefintira ete tamavregahie.<sup>11</sup> Hianagi menina ama knarera rama'a kumapi vahe'mo'za eri tru hu'za hara huramantenaku nehu'za amanage hu'za nehaze. Jerusalemi kumara eri haviza huteta, havizama haniazana kesanune hu'za nehaze.<sup>12</sup> Hianagi ana vahe'mo'za Ra Anumzamofo antahizamo'a inankna hu'nefi antahi amara nosaze. Anumzamo'a magopi zamazeri tru huteno, witima magopi erintete'za havereti refazafuma nepazankna hunaku antahintahia retro nehuno zamazeri atru nehanagi, zamagra anazana ke'za antahi'za nosaze.<sup>13</sup> Jerusalemi kumapima nemaniza vahe'mota otita tamagri ha' vahe'ma mani'nazana ome zamaheta zamazeri havizantfa hiho huno Ra Anumzamo'a hu'ne. Na'ankure Nagra hankanayea tamisanugen, tamagri hankavemo'a hankavenentake huno mago ainireti tro hu'naza pazivekna nehanigeno, tamagiamo'a bronsigna hu'nesanigeta, rama'a kumatamimpi vahera hara huzamanteta zamazeri havizantfa nehutma, havi kanteti'ma eri'naza feno zantamina eritma, maka ama mopama kegavama hu'noa Ra Anumzamo'na eme namigahaze.

## 5

### *Betlehemi kumapinti mago kini efore huno kva manisania zamofo naneke*

<sup>1</sup> Hianagi tamagra menina Jerusalemi kumapima nemaniza vahe'mota, sondia vahetamina zamazeri atru huta erinte fatgo hiho. Na'ankure ha' vahe'mo'za Jerusalemi kumara eme avazagi kanegize. Ana nehanaki'za Israeli kva vahe'mota kumpa kanonteti tamarametare rupro huzamigahaze.<sup>2</sup> Hianagi Juda mopafima Efrata nagamokizmi kumatamima

me'nefintira Betlehemi kumamoka, kagra osi kumatfa me'nane. Hianagi Nagri nagi erino kagripinti Israeli vahe'mokizmia mago kva ne' efore hugahie. Anama fore hania kva ne'mofo agigo azankomo'za korapa mani'za e'naza nagaki'za, meninena naga zamia mani'naze. Ana hū'neankina makazana fore osu'negena korapa huhampri ante'noa nekino kva efore hugahie. <sup>3</sup> Ana hu'neankino Anumzamo'a Israeli vhahera amefi huzamisige'za, ha' vahe'zamimo'za kegava huzmanteme ne-esageno eno, mago a'mo mofavrene hu'neno atafi manino ne-esia a'mo mofavrema antesania knare ehanatigahaze. Anama kasentesia ne'mofo naga'mo'za vu'za ru moparegama kinama ome hu'nesaregatira atre'za mopa zamirega Israeli ete e'za, nagazamine eme eri atru hugahaze. <sup>4</sup> Ana ne'mo'a kva efore huteno, Ra Anumzamofo hihamu hankavere'ene, Ra Anumzana agri Anumzamofo hankavenentake agifine vahe'a kegava huzmantegahie. Ana hanigeno mago zamo'a eno agri vhahera eme zamazeri antria osugahie. Na'ankure maka ama mopafima kokankokama mani'naza vahe'mo'za agri hankavea ke'za antahiza nehu'za agi'a husga huntegahaze. <sup>5</sup> Ana ne'moke'za zamarimpa frua zamigahie. Hagi Asiria vahe'mo'zama mopatifima efre'za, hankave vihutima tapage hu'zama efresageta, 7ni'a kva vahe huhamparizamante sanunke'za tagrira kegava hunerantesnageta, sondia vahete kva vhahera 8'a huhampari zamantegahune. <sup>6</sup> Hagi zamagra ana kva vahe'mo'za hankaveti'za Asiria vhahera bainati kazinteti hara ome huzamagatere'za kegava hunezamante'za, Nimroti vahe'mokizmi mopafima unefraza kantamimpinti ufre vagare'za bainati kazinteti hara ome hu'za mopa erigahaze. Hagi Asiria vahe'mo'zama isagama agatere'za tagri mopafima efrenaku'ma zamazatre zamagatrema hu'za ne-esageno'a, tagri kin'i ne'mo'a taza huno tagu vazigahie. <sup>7</sup> Hagi Israeli vahepinti'ma ha' vahe'mo'za ozamahe zamatresage'za osi'a manisaza vahe'mo'za atre'za ru moparega umani eman hugahaze. Ana hugahazanki'za, nanterama ata ko'mo trazante'ene mopare runteankna nehu'za, ko'mo trazante runteankna huza maka kaziga umani eman hugahaze. Anazama haniana mago vahe'mo'a aze'origahianokino, Ra Anumzamo'a Agra'a hankanevefi hugahie. <sup>8</sup> Hagi Jekopu nagapinti'ma osi'a naga'ma zamatresage'za, kokankokama ru vahepima umani emanima hanaza vahe'mo'za, zafa ta'nopafima ruzahu ruzahu afi zagagafama mani'naza amu'nompima laioni maniaza nehu'za, sipisipi afu'ene meme afu kevuma maniza amu'nompi, hankavenentake hu'nea kasefa laionimo kva vahe'zami omani'negeno zamagumpi takia ureno ana afutamima zamaheno tagana taganu vaziaza hanige'za mago'a vahe'mo'za zamaza osugahaze. <sup>9</sup> Tamagra Israeli vahe'mota maka ha' vahetamina hara huzmanteta zamahe fanane huvagaregahaze. <sup>10</sup> Ra Anumzamo'a Israeli vahekura huno, Ana knafina tamagri hosi afutamina zamahe frivaga nere'na, karisi taminena eri haviza huvaga regahue hu'ne. <sup>11</sup> Ana nehu'na ranra kumatamina eri haviza huvaga nere'na, ana kuma tamire'ma hankave vihuramima hugaginazana tapage hu'na eri atre vaganere'na, <sup>12</sup> afa ha'ma nehaza avu'ava zana Nagra tamagripintira eri atre vaga regahue. Ana hanugen magore huno tamagri amunompina, henkama fore hania zanku zagoma nereno havige kasnampa nanekema nehia vhahera omanigahie. <sup>13</sup> Ana nehu'na havi anumzamofo amema'ama zafare antreta tro'ma hunte'naza zantamine, havere'ma havi anumzamofo amema'ama tro'ma hunte'naza zantamine eri atre vagaresanugeta, tamagra'a tamazampinti'ma tro'ma hunte'nesaza zantero tamare'na reta monora huontegahaze. <sup>14</sup> Ana nehu'na Asera havi anumzamofo amema'ama zafare'ma antreta tro'ma hunte nazana erikasi

atre vaganere'na, ranra kuma taminena eri haviza huvaga nere'na, <sup>15</sup> Nagri nanekema antahino amage'ma ontlesia kumapi vahera narimpa ahenezmante'na zamazeri haviza hugahue.

## 6

### *Anumzamo'a vahe'a Israeli naga keaga huzmantesania zamofo naneke*

<sup>1</sup> Ra Anumzamo'a amanage huno nehianki tamagesa ante so'e hu'neta antahilo, Ranra agonaramine neonse agonaramimo'za nentahisageta zamagri zamavufi naneketamia huama hiho. <sup>2</sup> Hagi menina agonaramimotane, ama mopamofo tra'amo kanena Ra Anumzamo'ma keagama nehiana antahio. Na'ankure Ra Anumzamo'a vahe'a keaga huzmantenaku nehiankino, Israeli vahe'mo'zama hu'nesaza kefo zamavu zamava'za erinte ama huno keaga huzamantegahie. <sup>3</sup> Anumzamo'a huno, vahe'nimota Nagra naza mago havizana huneramante'na, na'a mago zana hua zamo tamagrira tamazeri tamavesra hu'nefi Nagri kerera nona huta nasamihi? <sup>4</sup> Isipi mopafima kazokazo eri'zama enerita mani'nage'na Nagra ete tamagu'vazi'na tamavre'na e'noe. Mosesema Aronima Miriamuma hu'na huzmantoge'za kva huramante'za nevazageta zamage vu'naze. <sup>5</sup> Tamagra Nagri vahe'mota tamagesa nontahizafi? ko'ma Moapu kini ne' Balaki'ma, Beori nemofo Balamunku huno kazusi huzamanto huno nehigeno, Balamu'ma ana kazusi kema osu'no asomu kema huramante'neana ontahi nazafi? Sitiim kumate'ma mani nazareti'ma atretta Gilgali kumate vunaku'ma neazage'na, Nagra Ra Anumzamo'na eri fore'ma hu'noa kaguva zankura tamagera okaniho. E'i ana zantamima tamaveri'ma hu'noana, Ra Anumzamo'na fatgo navu'nava'za keama hihogu anara hu'noe.

### *Knare avu'ava'ma huzamofo naneke*

<sup>6</sup> Anante Maika'a huno, e'ina'ma hu'nea zamofo nona'a, nagra Ra Anumzamofo avugama eme kepri hu'na mono'ma hunte'naku'ma esanu'na, na'a eri'nena ofa eme huntiegahue? Mago kafu hu'nesania ve bulimakao afu anenta azerina kresramnavu ofa eme huntiegahufi? <sup>7</sup> Nagra 1,000ni'a ve sipisipi afu'ma ahe'na ofama hunente'na, 10tauseni'a kavofima olivi masavema taginte'na ofa eme amisua zankura Anumzamo'a musena huanantegahifi? Ana nehu'na nagrama kasentesua agonesa mofavre'nima ahena kumi'nimofo nona hu'na ofa hugahufi? I'o anara osugahue. <sup>8</sup> Ra Anumzamo'a knare avu'ava zama hanaza zana ko tamasami'neankino, Agri'ma ave'nesiana, fatgo avu'ava zanke nehuta, vahe'ma asunkuma hunte avu'avazanku tamavenesita, tamagri Anumzamofo avugama tamavuvgama anteramita mani avu'ava zanku ave'nesie.

### *Israeli vahe'mo'zama kefo avu'ava'ma hu'naza zamofo naneke*

<sup>9</sup> Jerusalemi ran kumapima nemaniza vahe'motagura Ra Anumzamo'a amanage huno nehianki antahilo. Tamagrama knare antahi'zane vahe'ma mani'naku'ma hanuta, Ra Anumzamofo koro hunenteta, Agri agoraga maniho. Tamagri'ma tamazeri fatgoma hania vahera ko huhampri ante'neanki, anazankura antahintahi nehuta anazama huhampri ante'nemofo nanekegura tamagesa anteta antahilo. <sup>10</sup> Hagi kefo avu'ava zama nehaza vahe'mo'za havigereti fenozana nozmifina eri avinete'za, witima sigerire erinte'za nege'za zagore'ma netrazana, osi'a witiagi ra zagore netrage'na, e'i ana avu'avazamigura Nagrira nave'nosie. <sup>11</sup> Mago vahemo'ma havigema huno vahe'ma azeri havia hu kazigati'ma, kruna sigerima nehania vahe'mofo kumira Nagra atre ontegahue. <sup>12</sup> Feno

vahe'ma Jerusalemi ran kumapima nemaniza vahe'mota, zamunte omane vahe'mokizmi zama erinakura, kazigazi huta hanareta e'nerize. Ana nehzageno maka ana kumapima nemaniza vahe'mokizmi zamagipina havigemo'ene, vahe'ma zamazeri havizama hu' nanekemo avite'ne. <sup>13</sup> E'ina hu'negu Nagra menina agafa hu'na tamagri kumimofo nona'a tamazeri haviza hunaku nehue. <sup>14</sup> Tamagra ne'zana negahazanagi tamura osugahie. Nontamifina fenozana eri tru hugahazanagi, ana zantamimo'a tamagranena mevava osugahie. Na'ankure eri atruma hanaza feno zantamina ha' vahe zamatre sanuge'za e'za ha' eme huramante'za eri'za vugahaze. <sup>15</sup> Tamagra hoza erita antegahazanagi, ne'zama'a vasageta onegahaze. Olivi zafamofo raga'a tagita regatati hugahazanagi, tamavufgare'ma fresaza masavema rama'a e'origahaze. Grepimofo raga'a tagita regatiti hugahazanagi, anampintira tima'a erita waini tina trora huta onegahaze. <sup>16</sup> Hagi havi avu'ava'ene kini ne' Omri'ma ante'nea kasegege tamagra amagera nenteta, kefo avu'ava'ene kini ne' Ahapu avu'ava'za amagera nentaze. Ana nehzanki'nna Nagra tamagrira tamazeri haviza hanuge'za, vahe'mo'za neramage'za zamafi hunerami'za, kiza zokago ke huramantesnageta tamagazegu hugahaze.

## 7

### *Israeli vahe'mo'za haviza hu'naza zamofo fronka naneke*

<sup>1</sup> Nagra tusi nasunku hue. Mago vahe'mo agategeno zafa raga ragino nenaku viana, magore hu'za otare'za maka tagi hana hu'nazageno, anampintira grepio fiki ragama tagino oneno agaku'ma nehiaza hu'noe. <sup>2</sup> Anumzamofoma zamagu'reti'ma hu'za amage'ma nentaza vhahera ama mopafina omanizageno, fatgo zamavu'zmavama nehaza vhahera omanitfa hu'naze. Hagi maka vahe'mo'za havigege nehu'za vahe'ma zamahe'za korama eri tagi zankuke nehu'za, zamafu zamagnana zamahe nefri'za vaheke mani'naze. <sup>3</sup> Ana vahe'mokizmi zamazamo'a kefo avu'ava zama hu' zanteke knareru hu'ne. Gamani eri'za vhahemo'zane keagama refko'ma nehaza vahe'mo'za masavema hu'za zagoma zamizage'za eri'zana e'nerize. Ana nehzage'za zamagima me'nea vahe'mo'za, zamagri'ma zamave'nesia zankuke nenekea nehu'za fatgoma huno refkohu avu'ava zana eri rukrahekrahu nehzaze. <sup>4</sup> Knare vahe'mo'za ave've trazankna nehzage'za, fatgo avu'ava'ma nehaza vahe'mo'za ave've trazana agatere'za ha' zankna hu'naze. Hianagi tamagri'ma keagama huramantesania knamo'a hago eankino, tamagrira tamazeri haviza nehanigeta neginagi hugahaze. <sup>5</sup> E'ina hu'negu tavaonka'are'ma nemanisia vahe'ene, roneka'ane, akamofonena knare hu'naze hunka antahi nezaminka oku nanekenena huamara hunka ozamasamio. <sup>6</sup> Hagi ananknafina ve mofavremo'a otino nefi arimpa eri haviza neharigeno, mofa'mo'a otino nererana ha' renente sanigeno, zahufa amo'a otino a' nenoferona ha' rentegahie. Ana hugahiankino kagri'ma ha'ma regantesania vhahera fatgo huno kagri nagapi mani'ne.

### *Vahe'ma agu'vazi zane tavi'mofo agafa'a Anumzamo Agrake mani'ne huno hu'nea zamofo naneke*

<sup>7</sup> Hianagi nagri'ma nazama hanigu Ra Anumzamofonteke navua nentoe. Anumzamo'ma nagri'ma nagu'vazisinigu hu'na Agrikuke avega ante'na manigahue. Ana hu'neankino nagri Anumzamo'a antahinamigahie.

<sup>8</sup> Nagri ha' vahe'motama knafima mani'nenugeta nenageta musena osi-ho. Na'ankure nagra tanafa hu'na masegahuanagi ete otigahue. Nagra hanizampina manigahuanagi, Ra Anumzamo nagri tavira mani'neno remsa hunantegahie. <sup>9</sup> Nagra Ra Anumzamofo avurera kumi hu'noankino, knazama namino nazeri fatgoma nehanige'na, navufga anterami'na manigahue. Hianagi osi'a knafi arimpa ahenanteteno, ete nagri kaziga anteno nagri ha' vahera knama nami'za nazeri havizama hu'naza zantera nona huzmantegahie. Ana huteno Ra Anumzamo'a navareno tavitte vanige'na, fatgo avu'ava zama'a keama hugahue. <sup>10</sup> Ana'ma hanige'za nagri ha' vahe'mo'zama nege'za Ra Anumzamo'a agri kaziga mani'ne hu'za nehu'za, Ra Anumzana kagri Anumzamo'a iga mani'ne hu'zama hu'naza naneke-gura zamagazegu hugahaze. Nagri ha' vahe'mo'zama havizama hanaza zana, nagra navufinti zamagegahue. Ana hugahazankino kampi hapa me'nege'za vahe'mo'za rehapa kopa hu'za vano hazaza hu'za haviza hugahaze. <sup>11</sup> Ana huga hiankino ana knama esanigeta, Israeli vahe'mota ranra kuma tamimofo kegina ete eri kasefa huta nehuta, mopa tamimofo isa kana erinte ra huta yuta eta hugahaze. <sup>12</sup> Ana knafima tamagritegama vahe'ma esazana, Asiria mopareti agafa huteno vuno, Isipi mopare uhanatiteno, Isipi moparetira vuvara huno Yufretisi ran tima me'nea mopega vanigeno, mago hagerinteti vuno mago hagerinkenare vanigeno, mago agonaregati vuno mago agonaregama nemaniza vahe'mo'zanena tamagritega egahaze. <sup>13</sup> Hianagi ana vahe'mokizmi mopafina vahera omanitfa hanigeno, ka'ma koka fore hugahie. Na'ankure ana mopafima mani'naza vahe'mo'zama hu'naza kefo avu'ava zanku anara hugahie. <sup>14</sup> Ra Anumzamoka Nagri vhahere hunka huhampari zamante'nana vaheka'arera, sipisipi kva vahe kna hunka zafa tanopafima menima mani'naza vaheka'a kegava huzamanto. Hagi kagra zamatrege'za ko'ma hu'nazaza hu'za, Basani mopane Gileati mopama afovage'ma hu'nea mopafi hoza ante'za nene'za maniho. <sup>15</sup> Ana nanekerera Ra Anumzamo'a tamage huno ne-huno, korapa'ma Isipi mopafima kinama hu'neta kazokazo eri'zama enerita mani'nazage'na, Nagra hankavenentake kaguva zantami eri fore nehu'na, tamavre'na atirami'noa kna hu'na, tamagritera hanave kaguvaza eri fore hugahue. <sup>16</sup> Ra Anumzamo'ma tamagrite'ma eri fore'ma hania avu'ava zama, ama mopafi vahe'mo'zama negesageno'a hankave zamimo'a amne zankna nehanige'za, zamagazegu nehu'za antahintahi hakare hugahaze. Ana nehu'za keaga osu zamagitera rehamunenki'za, negi vahe mani-aza hugahaze. <sup>17</sup> Ana nehu'za osifa'vemo hiazza hu'za zamasaguregati regraro ahe'za vano nehu'za, kugusopa nene'za fra'ma ki'za nemaniza kumapinti'ma atirami'za Ra Anumzana tagri Anumzamofo avure'ma eme otisanu'za, tusi koro nehu'za zamahirahiku hugahaze. <sup>18</sup> Anumzamoka magora kagrikna anumzana omani'ne, Ana hu'neankino kagri vahepinti'ma osi'a naga'ma ozamahe zamatrage zama mani'naza nagamokizmi kumi'ma atre zamantega anumzana omani'ne. Anumzamoka kagrira krimpa ne-heanagi ana zamo'a za'zatera mevava hunora novie. Na'ankure Kagra muse hunerantenka mevava kavesi zanteti kavesi'nerantane. <sup>19</sup> Kagra mago'ene kasunkura hunerantenka, tagri kumira erinka kagianu rehapatitenka, erinka hagerimofona amefenkame ro'are mate vutregahane. <sup>20</sup> Kagra korapa tagehe'i Abrahamune Jekopu kiznima huvempama huznante'nana kante amage antenka, vagaorenno mevava kavesi zana taveri hugahane.

## Nahum Nahum Avontafere

### Anumzamo'a hentofaza hu'nea naneke

<sup>1</sup> Ama nanekea Ninive kumate'ma fore hania zanku Elkosi kumateti kasnampa ne' Nahumuna Anumzamo ava'nagna zampi eri averi humigeno keteno, ama avontafepina krente'ne.

<sup>2</sup> Ra Anumzana agra kanive nereno nona hu Anumza mani'ne. Ra Anumzamo'a Agra tusi arimpa nehegeno nona nehie. Iza'zo Ra Anumzamofoma ha'ma renentaza vahe'mokizmia Agra arimpa ahenezmanteno nona nehie. Ana nehiokino Agri rimp ahe'zamo'a ha' vahe'arera meno vugahie. <sup>3</sup> Ra Anumzamo'a ame huno arimpa noheanagi, Agrira tusi'a han-kave'a me'ne. Ana hu'neankindo hazenkema nehaza vahera zamatrengie'za amanea omanigahaze. Agra hankave'a zahopi erinte ama nehuno, unukopi erinte ama nehie. Ana nehigeno agiafinti'ma evia kugusopamo'a hampona negie. <sup>4</sup> Anumzamo'a hagerimofonku huntenu, hagege huo huno'ma higeno'a, hagerimo'a hagege nehanageno, mika tintamina eri nerane. Ana nehigeno Basani mopafine, Kameli agonaramima masave tre-tre'ma hu'nea mopafima me'nea traza'mo'za hagege nehanageno, Lebanoni mopafima zagasefage zafa tanopama me'nea tanopamo'a hagege huno harari nehie. <sup>5</sup> Anumzamofo avuga agonaramimo'za torevare nehazageno, ne'onse agonaramimo'za mara'mra hu'za mekineramize. Ana nehigeno ama mopafima mani'naza vahe'mo'zane, ama mopamo'enena Agri avuga zamahirahiku nehaze. <sup>6</sup> Ana hu'neankindo Anumzamofo arimpahe zama esanigeno'a, iza oti hankavetino nemanisigeno, iza knareru hu'nesia vahemo rimp ahe'zana oti hankavetineno erino vugahie? Anumzamofo arimpa ahe'zamo'a teve nefamo'ma hiaza huno ruhagana hagana huno herafiramigahie. Ana nehanigeno Agrama kama ne-e sanigeno'a hav-eramimo'a tamana tamanu huno fuzauperamigahie. <sup>7</sup> Ra Anumzamo'a knare hu'neankindo, tamagerfa huno knazama esania knafina hankave vi-hugna hurantegahie. Agrite'ma amuhama nehu'za taza hugahiema hu'za nehaza vahera Agra zamageno antahino hu'neankindo, knazama esania knafina Agra kegava hunezamante. <sup>8</sup> Hianagi Agri'ma ha'ma renentaza vahera, tima hageno eaza huno eme ruharafi huno vugahie. Ana ne-huno ha' vahe'a zamarotago hanige'za hanimpi ufregahaze. <sup>9</sup> Tamagra Anumzamofoma ha'ma renentaza vahe'mota, Agri'ma ha'ma rentenaku'ma mago nanekema anakisazana, tamagrira tare ragufa zupa anara osuno, magoke zupage ame huno tamagrira tamazeri haviza hanigeta fanane hugahaze. <sup>10</sup> Zamagra ave'ave trazamo zamazeri traka hiaza nehuta, aka ti ne'nea vahe'mo hiaza huta traka taraku nehanageno, hagege ave've traza harafi hu'za tevefi krazankna huno tamazeri fanane hugahie. <sup>11</sup> Ninive kumamofo agu'afintira mago vahe eama huno, Ra Anumzamofo avure'ma havi avu'ava zama hu' antahintahia retro nehuno kefo antahi'zana nezamie. <sup>12</sup> Ra Anumzamo'a amanage huno Israeli vahe'motagura nehie, Asiria vahera rama'a vahe maniza hankavenentake vahe mani'nazanagi zamagra haviza hu'za fanane hugahaze. Nagri vahe'mota kora tamazeri haviza hu'noane. Hianagi menina mago'enena tamazeri havizana osugahue. <sup>13</sup> Asiria vahe'mo'zama tamagri tamanankempima karenamare zafama eri

rusima hunte nazana eri'na ru tamana hunetre'na, seni nofiteti'ma kinama rezamante nazana rukano hutregahue. <sup>14</sup> Hanki Ra Anumzamo'a Asiria vahe'ma Ninive kumapima nemaniza vahekura amanage hu'ne. Tamagri tamagina eri'za manisnaza mofavre nagara, mago'enena omanifa hugahaze. Tamagrama mono'ma hunentaza havi anumzaramimofo mono non-tamimpima havi anumzamofo amema'aramima ante'nazana eri haviza hvugaregahue. Tamagra omanita frita vanagu matimati tamina retro huneramantoe. Na'ankure tamagra kefo vahetfa mani'neta ama mopafina manigara osu'naze. <sup>15</sup> Tamagra Juda vahe'mota keho, knare musenkema erinoma ne-ea vahe'mo'a agonaramintegati ne-e. Agra arimpa fru huno mani zamofo naneke erino ne-e. Hanki ne'zama kreta neneta musenkasema nehuta Anumzamofoma mono hunte knaramima esanigeta, ana knarerera monora nehuta, nazano Anumzamofo amigahune hutama huvempama hu'nesaza zana amiho. Ana'ma hanage'za tamagri ha' vahe'ma kefo avu'ava zama nehaza vahe'mo'za mago'enena mopatamia eme e'origahaze. Na'ankure Anumzamo'a tamagri ha' vahera ko zamazeri haviza hvugare'ne.

## 2

### *Ninive kuma'mo haviza hania zamofonku hu'nea naneke*

<sup>1</sup> Ninive kumamoka kagri'ma eme ha'ma huganteno kahe panini'ma hania vahera hago ne-e. Ana nehigu kuma'ma kegavama hanaza vahera huzmanteg'e za kumamofo vihu keginare manine'za, ha' vahe'ma esnaza kantega zamavua antene'za kegava hiho. Ana nehanageta sondia vahera zamazeri retrotra nehuta hankavetita hara hiho. <sup>2</sup> Ha' vahe'mo'za kora Israeli vahera hara eme huzamante'za maka zana eri haviza nehu'za waini hoza zaminena eri haviza hu'nazane. Hianagi menina Ra Anumzamo'a Israeli vahera ete zamazeri so'e nehuno, ko'ma hu'neaza huno ra zamagi zami'naku nehie. <sup>3</sup> Hankave sondia vahe'mo'zama ha'ma eme huzramante'naku'ma esazana koranke hankorami eri'ne'za, koranke kukena antani'nesaza vahe'mo'za egahaze. Hanki ana vahe'mokizmi karisimofo ainiretira zamagama neresageno'a tevemo'ma nehiaza huno ruganani nehanige'za egahaze. Ana nehanage'za sondia vahe'mo'za karugaru kevezamia erintesga hanageno tevesesaza nemesanige'za egahaze. <sup>4</sup> Rankumamofo amu'nompima ne'onse kantamima me'nefine, kumamofo amunompima kankamuma me'nege'za vahe'ma atruma nehazafinena, sondia vahe'mo'za karisifi mani'neza ame hu'za rugitagi'za vu'za e'za hugahaze. E'inama hanaza zamo'a kopasi'namo ruganani huteno, tavi tagi vazu huno vuno eno hiaza hugahaze. <sup>5</sup> Kini ne'mo'a eri'za vahe'a huzamantenige'za ame hu'za vunaku hanazanagi, tanafa hu'za masegahaze. Ana'ma nehu'za ame hu'za kumamofo vihu keginare vu'za, fra'ma ki'za manine'za ha'ma hanaza kumara retro hugahaze. <sup>6</sup> Rantimofo kahana ahenagisigeno, ana timo'a kini ne'mofo nonkumara emeri haviza hugahie. <sup>7</sup> Ninive kumapima nemaniza vahera zamavare'za kina ome huzmanteho huno kea ko hunte'ne. Anama hanage'za zamagazegu nehanage'za kazokazo eri'zama e'neriza mofa'nemo'za zamimizare nemasagi'za, maho namamo'ma nehiaza hu'za zamasunku nehu'za zavi krafa hugahaze. <sup>8</sup> Ko'ma meno e'nea knafina Ninive kumamo'a mago tirukna hu'neane. Hianagi menina ana kumapi vahe'mo'za atre'za freza vu'za e'za hu'naze. Ana nehazageno mago vahe'mo'a huno anante otihoh! anante otihoh! Huno hu'neanagi, magomo'e huno ana kea ontahino rukrahera huno ome'neanki maka'moza atre'za fre'naze. <sup>9</sup> Ha'ma eme huzamantaza vahe'mo'za

kezati'za, Ninive kumapina marerisa feno zantamimo'a aviteno hamprigara osu'neanki rohu zamareta maka silva zagone golinena eri vagareho hu'za hu'naze. <sup>10</sup> Ninive kumara ha' vahe'mo'za eme rohu zamare'za maka zana eri havizantfa hazageno, mago zana omanetfa hu'ne. Vahe'mokizmi tumo'mo'a atanegeno zamarenamo'a zamahirahi re'ne. Ana nehazageno hankave zamimo'a omanetfa nehige'za, zamanogu nehazageno zamavugosamo'a korankifa ahene. <sup>11</sup> Kora Ninive kumara hankavenentake kuma me'neankino, ana kumapima mani'naza vahe'mo'za mago havegampi laionimo'za anenta'aramine manine'za, anampina ne'zana nene'za mago zankura korora nosu'za knare hu'za nemanizankna hu'neane. Hinagi menina ana kumamo'a iga vu'ne? <sup>12</sup> Kora Ninive kumapima nemaniza sondia vahe'mo'za hankavenentake hu'nazanki'za, laionimo zaggaga aheno anenta'arami eme ante hihi huzmantegeno, a' laionimo'za nemaniza havegampima zaggafamo aviteaza hu'za, hapinti zana eri'za eme eri hihi hu'naze. <sup>13</sup> Hankavenentake Ra Anumzana Monafi sondia vahe'mofo Anumzamo'a huno, Nagra Ninive kumamoka hara hugantenuku nehuankina karisiraminika'a teyefi hanavazi'na negresuge'za, ha' vahe'mo'za nehazaveraminka'a bainati kazinteti zamahe hana hugahaze. Ko'ma vahe'mokizmi feno zama ha'ma huzamagaterenka eri'nana knara hunka ru'enena e'origahane. Huzmantanke'za kema eri'za vu'za e'zama nehaza vahe'mo'zama, kema eri'za ha' vhete'ma vanazana, ko'ma nehazaza hu'za kezmia ontahigahaze.

### 3

#### *Ninive kuma'mo haviza hania zanku mago'ene hu'nea naneke*

<sup>1</sup> Ninive rankumapima nemaniza vahe'mota kva hiho. Tamagra havige nehuta vahe zamahe nefrika vahe mani'naze. Ana nehuta hapinti vahe feno zantamina rohu zamareta Ninive kumapina eri ante avite'naze. <sup>2</sup> Ha' vahe'mokizmi sondia vahe'mo'za karisi zamifi mani'neza hosi afu zamima sefu'ma rumeki nezami'zama neazageno neria agasasane, karisi zami-mofo tazamo'ma havema refaragu'ma vazino ne-ea zamofo zamagasasankea antahigahaze. <sup>3</sup> Ha' vahe'mo'za hosi agumpi manine'za taragi'za ne-eazageno, bainati kazi zamireti'ene karugaru keve zamiretira ru marave marave nehanige'za egahaze. Ana nehu'za rama'a vahe eme zamahe frisnageno, frisaza vahe'mokizmi zamavufagamo'a hihi huno amne zankna huno hamprigara osugahie. Ana hanige'za vahe'mo'za zamaga ana zamagofetu re'za vano nehu'za tanafara hugahaze. <sup>4</sup> E'i ana zama fore'ma haniana na'ankure, Ninive kumamo'a mago knare agi agonane monko a'mo'ma safeza huno vene'nema zamavare agrarega atreankna huno, maka kumatamimpi vahera zamazeri savari hige'za eme monko avu'ava zana nehazageno, safe'zama nehia zantamina rempi huzamige'za ana avu'ava hu'nazagu anara hugahie. <sup>5</sup> Hankavenentake Ra Anumzamo'a amanage huno nehie, Ninive kumamoka hara hugante'na siketi kenaka'a erisga hu'na kavugosa refitenunka kavufga kavapako oti'nesanke'za maka ama mopafi vahe'mo'za negagesagenka tusi kagazegu hugahane. <sup>6</sup> Nagra himna vu'nesania tetemuteti kazeri haviza hugahae. Nagrama kazeri havizama hanua zana maka ama mopafi vahe'mo'za negesu'za kiza zokago ke hugantegahaze. <sup>7</sup> Ana maka vahe'mo'zama kagri'ma kagesaza vahe'mo'za, zamagia zamefigati reme reme nevu'za amanage hugahaze. Ninive kumamo'a haviza huno kugusopafi maseanagi, iza eno zavira eme

atenentesigeno, izo eno eme asunkura hunenteno azeri so'ea huntegahie? hu'za hugahaze. <sup>8</sup> Naeli ran timofo ankenaregama Tebesi kumamo'ma knare'ma huno me'negeno'ma, timo'ma kagintegeno'ma me'nea kumara kagra Ninive kumamoka rugaterenka knarera hu'nampi? Ana kumamofona hagerimo vihugnara huntogeno timo'a maka asoparega keginagna huno mekaginte'neno agura nevazie. <sup>9</sup> Itiopia mopafi vahe'mo'zane, Isipi mopafi vahe'mo'za Tebesi rankumapi vahera ozmatre zamazahu vava nehaze. Ana nehakeno ana knafinena Puti mopafi vahe'mo'zane Libia mopafi vahe'mo'za zamagranena Tebesi mopafi vahera zamaza huke hara hu'na'e. <sup>10</sup> Hianagi Tebesi rankumara ha' vahe'mo'za eme ha' hunte'za eri haviza nehu'za vahera zamavare'za kuma zamirega kina ome huzmante'naze. Ne'onse mofavre naga zaminena zamazerite'za maka kumamofo kantu hanafi ruragati'za zamahe'naze. Sondia vahe'mo'za satu zokago re'za nege'za, Isipi kamanimofo eri'za vahera refko hu'za eri'za vahe'zami zamare'naze. Ana nehu'za Tebesi rankuma'ma kvama hu'naza kva vahetamina seni nofiteti kina huzmante'naze. <sup>11</sup> Ninive kumamoka, kagranena aka ti ne'naza vahe'mo'za neginagi nehazankna hugahane. Ana nehunka ha' vahe'mokizmigu koro nehunka frakisana kumaku hakegahane. <sup>12</sup> Kagri'ma ha'ma eme hugantena vahe'mo'za, kumamofo vihu keginaka'a eme tapage hutrenageno, mago vahe'mo fiki zafa eri tagosi tagosi nehigeno, ese'ma afure'nea fiki ragamo evuramino vahe agipi freankna hugahie. <sup>13</sup> Kagri sondia vahe'mokizmia, a'nemofoma hiaza huno hankave zamia omane amane hanige'za mago zana osugahaze. Kagri mopafima ha' vahe'mo'zama efresaza kamo'a ruhagro hugahie. Ran kumamofo kafante'ma eri rusima nehaza zafa tevemo teno eri hana hugahie. <sup>14</sup> Kagri ha' vahe'mo'zama kuma'ma eme avazagi kagi sagenka'ma kumamofo agu'afima mani'eneka'ma nesana zana tina afinka retro huo. Ana nehunka kumamofo vihu kegina eri hankavetio. Higo mopa kafinka eri hapa hapa hunka simentia tro hutenga, kuma kegina hunka eri hankavetio. <sup>15</sup> Hianagi Ninive kumamoka kagria tevemo teno eri hana nehanige'za, ha' vahe'mo'za bainati kazinteti vahera eme zamahe hana hugahaze. Ha' vahe'mo'za kenu'mo traza neno eri fananema hiaza hu'za tamagrira tamahe vaga nere'za, nazamo'ma zamavugama evania zanena kege'za otre ne'za eri fanane hugahaze. Tamagra kora kenu'mo hiaza huta rama'a vahe fore huta eri hakare hu'nazanagi, tamagrama freta ome tamagu'ma vazisaza kana omanetfa hugahie! <sup>16</sup> Monafi hanafi'ma me'neama'a rugatere'za zugorema nanazama atre'za eri'zama nehaza vahe'mo'za tamagripina kora mani'hazane. Hianagi kenumo'za zafani'na vataru hana hute'za, zamageko'na rutare'za hare'za frazankna hugahaze. <sup>17</sup> Tamagri sondia vahe'mo'zane, kva vahe'mo'za zamagranena kenukna hu'nazanki'za, zasi ko'matia knafima kenumo'zama magopi hare'za e'za keginare eme rukamrazankna nehaze. Hianagi zagema hanatige'za ana kenu tamimo'za hare'za frazankna hu'za, inantego frazage'za vahe'mo'za nozamagaze. <sup>18</sup> Asiria kini ne'moka, sipisipi afute kva vahekamo'zane, eri'za vahekamo'zanena zamavu mase'naze. Ana hu'nazage'za sipisipi afute kva vahe omani'negeno sipisipi afutamimo agona agona panani huno freankna hu'za, kagri vahe'mo'za panani hu'za ufre efre hu'naze. Ana hu'nazankino mago vahe'mo' zamazeri tru hugara osu'ne. <sup>19</sup> Kagrama hazenkema eri'nana zamo'a, mago namunkna hu'neankino marasinimo'a kazeri kanamaregara osu'ne. Kagrama hazenkema erina nanekema vahe'mo'zama antahisu'za,

muse nehu'za zamaza ahegahaze. Na'ankure kagra mago vahera otre havi  
avu'ava zama huzamante vavama hu'nana zanku anara hugahaze.

## **Habakuk Habakuk Avontaferie**

*Habakuku'ma Ra Anumzamofontega arimpa gnaza huama hu'nea naneke*

<sup>1</sup> Ama naneka kasnampa ne' Habakukuma ava'nagna zampi Anumzamo eri averi higeno ke'ne'a zamofo nanke. <sup>2</sup> Ra Anumzamoka kagrama nazama hananegura za'zate krafa hu'na e'noe. Hianagi kagra antahi on-ami'nane. Kagritega krafa hu'na hazenke zamo'a avite hu'na huanagi, kagra enka eme nagura ovazi'nane. <sup>3</sup> Na'a agafare havi avu'ava zana eri naveri hanke'na negoe? Ana nehunka nagafare natranke'na kefo avu'ava zana negoe? Navuma keganti kegamama huana, hazenke zamo'e'ne kefo avu'ava zamoke avite'na'e. <sup>4</sup> Hanki kasegemofona hankave'a omanegeno, keagafima nanekema fatgoma huno refkohu so'e huno keteno miza agima ahente avu'ava zamo'enena ome haviza hie. Havi avu'ava zama nehaza vahe'mo'za, fatgo avu'ava zama nehaza vahera ru zamagatere'za rama'a vahe mani'naze. E'i ana agafare fatgoma huno refkohu avu'ava zana erirukrahe krahuhaze.

## *Habakuku nunamunte Ra Anumzamo ke'nona hunte'nea naneke*

<sup>5</sup> Hagi Ra Anumzamo'a kenona huno, Ama mopafima me'nea kumatamimpima keganti kegama hunka kavuma kesanunka antri hugahane. Na'ankure menima kagrama mani'nana kna'afina mago'a zana tro nehuankinka, ana zanku'ma kasamisnagenka antahi ozamigahane. (Aposolo 13:41) <sup>6</sup> Hagi keho, Babiloni vahera kea ontahi hazenke vahe mani'nazanki'na zamazeri hankavetisuge'za ama mopafina maka kaziga vano nehu'za, ru vahe'mokizmi nonkumara zamahe'za hanaregahaze. <sup>7</sup> Ana Babiloni vahekura maka vahe'mo'za tusi koro hunezmante'za zmagogogu nehaza vahe mani'naze. Ana nehu'za mago kasegea ovariri'za zamagra'a kasegeva oti vahe mani'naze. <sup>8</sup> Ana vahe'mokizmi hosi afu tamimo'za zamagama nerazana, lepatimoza'ma zamagama nerazama'a agatere'za zamaga neraze. Ana nehu'za afi kramo'ma kenagema segeno ha'ma hukanu'ma erisivazino vanoma nehiama'a, rugatere'za kafona nente'za hara nehaza vahe mani'naze. Hagi hosi agumpima mani'neza ha'ma nehaza vahe'mo'za tumpamo ne'zama'a aheno nenaku afeteti erifafukino tamino azeriaza hu'za afeteti zamaga neraza vahe mani'naze. <sup>9</sup> Ana vahe'mokizmi antahi'zamo'a, ha' huno maka zama eri haviza hu'areke antahintiahia nehu'za neaze. Ka'ma kokampi zahomo'ma hiaza hu'za akasi hu'za egota nehu'za, kahepama magopi harafi huno eri atru hiankna hu'za, vahera zamavare'za kina ome hunezmantaza vahe egahaze. <sup>10</sup> Ana vahe'mo'za kini vahekura zokagoke hunezmante'za, kva vahe'mokizmia zamagi'za regahaze. Hankave vihu keginama hugagi'naza ranra kumakura kiza nere'za, vihu kegina zamirera fegiati mopa kate'za ante hihi hu'za mareri'za hara huzmante'za kumara e'neriza vahe egahaze. <sup>11</sup> Zaho'mo hiaza hu'za ame hu'za e'za mago kumara eri haviza nehu'za, mago kumate vu'za ana ome nehaza vaheki'za, zamagra hankavegu'ma antahizageno anumza asenezmantea vahe mani'naze. Hianagi zamagra ko havi avu'ava hu'naza vahe mani'naze.

*Habakuku'ma mago'ane Ra Anumza mofontega arimpa gnaza huama hu'nea naneke*

<sup>12</sup> Ra Anumzana nagri Anumzana Ruotage'ma hu'nana Anumzanimoka, kagra ofri mani vava hunka neana Anumza mani'nane. Tamagerfa hunka tagrira tazeri fanane hunakura nosane. Hagi ha' vahetia Kagra huhampari zamantanke'za e'za tagrama hu'nona tavutava zantera mizama'a eme tami'naze. Tagrama fra'ma kisuna haveti'moka, Kagra Babiloni vhahera huhampri zmantanke'za e'za tagrama hu'nona kumimofo nona'a knazana eme tamiza tazeri fatgo hu'naze. <sup>13</sup> Kagri kavumo'a agru hu'neankinka havi avu'ava zantera kavua nonkane. Ana nehunka kumikura kavesra hunentane. Hagi na'a agafare havi avu'ava zama nehu'za havigema nehaza vhahera zamaza nehane? Hagi havi avu'ava zama nehaza vahe'mo'zama e'za, fatgo zamavu zamava'ma nehaza vahe'ma eme zamazeri havizama nehazagenka, na'a higenka kea osu akohenka nemani'ne? <sup>14</sup> Kagra hagerimpi nozamegna hunka vhahera tro nehunka, zamasaguregati'ma regraroma ahe'za vanoma nehaza zagaramimofo kva vahe'zamima omani'nazankna tagra nehumpi? <sup>15</sup> Hagi mago vahemo'ma huku atreno nozame avazu huge, kuko atreno nozamerami zamavazu hiaza hu'za Babiloni vahe'mo'za vhahera zamavare'za kina ome huzmantete'za musenkasea nehaze. <sup>16</sup> Ana'ma hute'za kuko zamigu musena nehu'za, ana kukonte monora nehu'za Kresramana vunente'za, ama kukona mago anumzankino tagrira taza higeta feno vahe manita ne'zankura atupara nosune hu'za nehaze. <sup>17</sup> Kagra zamatre-sanke'za ana avu'ava zana hu'za vuvava hugahazafi? Ana nehu'za maka ama mopafi vhahera zamasunkura huozamante zamazeri haviza huvava hu'za vugahazo?

## 2

### *Habakuku nunamunte Anumzamo mago'ane kenona hunte'nea naneke*

<sup>1</sup> Za'za nonte'ma mani'neza kumama kegava nehazankna noni'afi mareri'na nagra manine'na, Ra Anumzamo'ma keagama nasamisigu avega ante'na mani'nena, inankna huno nagri narimpa knazanterea kenona hunantegahifi kegahue. <sup>2</sup> Hagi anante Ra Anumzamo'a amanage huno nasami'ne, Nagrama ke nonama hugantesanua nanekeea erinte ama hunka tafete krentetegeno, iza'o ana nanekema erino ome huama hunaku'ma hania vahe'mo'a, hampri so'e huno vhahera zamasamino. <sup>3</sup> Ama ava'nagna zampima kaveri'ma hanua zama kesanana, henka fore haniaza kegahane. Henkama knamo'ma ome vagaresirega fore'ma hania avame'za kegahanankino, ana zamo'a eme nena raga regahie. Anazamo'ma ame huno eama'ma nosanigenka, antahintahi hakarea osunka akohenka manio. Na'ankure ana zamo'ma esiana mago'zamo'a kana ase vaziontesigeno ame huno before hugahie.

<sup>4</sup> Hagi avufga rama nehia vhahera keho! Agra'a hankavegu antahi amuhara nehuno, fatgo avu'ava zana nosie. Hianagi fatgo avu'ava zama nehia vahe'mo'a amentintire otigahie. (Rom 1:17, Galesia 3:11, Hibru 10:38)

<sup>5</sup> Hanki avufga rama nehia vhahera waini timo'a azeri haviza nehigeno, noma'afina mani so'ea nosie. Ana hu'neankino fri vahe kerimo vahe eri nenakrianagi amu nosiankna huno maka kokankokama mani'naza vhahera, agra vahekna huno zamavare tru nehie. <sup>6</sup> Hianagi kokankokati'ma zamavare'zama kinama ome huzmantehaz, tamagra musufaza erita antevineteta feno vahe nemanizanki, kva hiho. Hianagi ama ana avu'ava zana nama'a knafi huvava huta vugahaze? <sup>7</sup> Tamagrama vahe zama

nofi'ma hutma eri'naza vahe'mo'za antri hanazaza hu'za, tamagra oti'neta tamahirahiku nehuta tamavumoke nehanage'za, maka zama musufama erita eme ante'naza zantamina eme eri hana hu'za vugahaze. <sup>8</sup> Na'ankure kokankokama nemaniza vahe'ma tamagrama rohu'ma zamareta fenozamima eri'naza zanter, nona hu'za osi'a naga'ma ofri mani'naza vahe'mo'za tamagri fenozana eme rohu tamare'za erigahaze. Na'ankure tamagra vahera zamaheta korana eri neragita, mopazmine kumazminena eri haviza nehuta, ana mopafima maniza vahe'enena zamazeri haviza hu'nazagu anara hugahaze. <sup>9</sup> Vahe'mokizmi fenozama havigema huta erita non-tamifima ante hihi nehutma, magozana fore osanigeta knare huta mani-gahunema nehaza vahera kva hiho. <sup>10</sup> Rama'a mopafi vahe zamaheta zamazeri haviza hu'nagu, tamagri kefo tamavu tamavamo tamazeri haviza nehie. <sup>11</sup> Nomofo asoparegama anteta mareri'naza haveramimo'za kezatiza keaga huneramante'nage'za, noma vazisgama hu'naza zafa ramimo'zanena ana nanekere zamavaharo hu'za keaga huramantegahaze.

<sup>12</sup> Tamagra vahe'ma zamaheta korama eri taginretre, hazenke avu'ava'ma nehuta, eri'naza zanteti'ma ran kuma'ma eri otita ki'naza vahe'mota haviza hugahazanki, kva hiho. <sup>13</sup> Na'ankure Monafi sondia vahe'mokizmi Ra Anumzamo'a huvempa huno, ama mopafima mani'naza vahe'mo'zama maraguzamat'i'za eri atru'ma nehaza feno zamo'a, tevemofo ne'za nesenigeno, ana maka vahe'mokizmi eri'zamo'a amne zankna hugahie. <sup>14</sup> Ra Anumzamofo hihamu hanavegu'ma keno antahinoma hu antahizamo'a, ama mopafina hagerimo'ma kankamuma'ama otreno ruvite'neaza huno ruvitiegahie.

<sup>15</sup> Tamagri tvaonte'ma nemaniza vahe'ma waini tima zamizage'za nene'za neginagima nehazageta, oku zamavufagama kesagu'ma tutu huta waini tima zamizage'za nenaza vahe'mota, kva hiho. <sup>16</sup> Hagi menina ran tamagima e'neriza zana atreta tamagazegu nehuta, waini tina neneta neginagi nehuta, kukena tamia hate atresage'za, oku tamavufga tamagegahaze. Ra Anumzamo'a arimpa ahe'zana zuompafi azantmaga kaziga eri'neankino, tamagrite rukaha hutregahie. Ana hanigeno ran tamagima e'neriza zamo'a eri rukrahe hanigeta tamagazegu hugahaze. <sup>17</sup> Tamagrama Lebanoni vahe zafafinti'ma zafama antagi hana'ma huta e'naza zante, nona huno Anumzamo'a tamagri'enena zamazeri atregahie. Ana zafafima mani'naza afi zaga kafama zamazeri havizama hu'naza avamente, antri hanazaza huno knazamo'a tamagrriteria egahie. Tamagra rama'a vahe mopafina zamahe netreta, ran kuma zamifinena hazenkea eri hakare hu'naze.

<sup>18</sup> Hagi vhemo'ma avako huno azanteti'ma tro hu'nea havi anumzamo'a, na'a mago knare zana eri forera hunezamigeno, tevefima kre maramrama hu'za tro'ma hu'naza havi anumzamofo amema'amo'a na'a mago knare zana rempi hunezamie? Na'ante ana kegaga osu havi anumzantamima tro'ma hu'nea vahe'mo'a ana zantamintera amuhara nehie? <sup>19</sup> Zafare'ma antre'za tro'ma hu'naza havi anumzanku'ma huta, mase'nampintira otinka tagu'vazio nehuta, havere'ma hanagati'za tro'ma hu'nazageno keagama nosia havi anumzanku'ma huta, otinka rempi huramio hutama nehaza vahe'mota, haviza hugahazanki, kva hiho. Ana anumzantamina golireti'ene silvareti'ene eri ano vazintageno, agu'afina asimura omane'neankino kazara osugahie. <sup>20</sup> Hianagi Ra Anumzamo'a ruotage'ma hu'nea mono noma'afi mani'neanki, maka ama mopafima kokankokama nemaniza vahe'mota Agri avuga kea osu akoheta maniho.

## 3

*Habakuku'ma Anumzamofontega nunamu hu'nea naneke*

<sup>1</sup> Ama'i kasnampa ne' Habakuku'ma zagamepi erinteno hu'nea nuna-mune. <sup>2</sup> Ra Anumzamoka kagri kagi kagenkea nentahi'na, vahemo'ma tro osuga zama tro hu'nana kavukva zankura tusiza hu'na koro hue. Amama mani'nona kafumofo agu'afina ete ana kavukva zana eri kasefa huge'za, tagri knafima mani'naza vahe'mo'za keho. Krimpa ahe'zamo'ma esania knafina kaganera kanioraminka kasunku huranto. <sup>3</sup> Anumzana ruo-tage'ma hu'nea Anumzamo'a Temani kazigati ne-eno, Parani agonaregati ne-ege'na ke'noe. Ana nehigeno monafina hihamu masa'amo refi'netegeno, ama mopafina maka kokankoka vahe'mo'za Anumzamofo agi ahentesga hu'naze. <sup>4</sup> Agri hihamu masa'amo'a zagemofo masamo'ma hiaza huno rumsa hu'ne. Ana nehigeno azampintira kopsi'namo ruganini huno vuno eno hu'ne. E'i hankave'ama fra'ma ki'nefinti anara hu'ne. <sup>5</sup> Vahe'ma azeri havizahu krimo Agri avuga nevigeno, ruzahu ruzahu krima maka zantamima eri havizama nehia kri'mo Agri amagera nevie. <sup>6</sup> Agrama kama nevifinti'ma oti fatgoma higeno'a, mopamo'a imi e'nerie. Hagi Agrama amne avuma zamagea zankura kokankokama me'nea kuma tamimpima ne-maniza vahe'mo'za antri nehaze. Korapa'ma me'za neaza agona ramimo'za ankarise'za mopafi nemasage'za, vagaore mevava ne'onse agonaramimo'za mopafi evurami'za rugahesa hu'naze. Agrama vano nehia kamo'a korapa me'nea kankino, menina me'neno, henka'anena mevava hugahie. <sup>7</sup> Kusani vahe'mokizmi seli nontamimo'za ra hazenkefi me'nage'na nege'na, Midieni vahe'mo'za tusi koro nehu'za zamahirahiku nehazage'na zamage'noe. <sup>8</sup> Ra Anumzamoka ranra tintamina karimpa ahezamantenka nezamasaginka, hagerinena eri kranto krantora nehampi? Ama anazama fore'ma nehi-an, Kagrama zamagu'ma nevazina hosi afu ka'amofo agumpine, ha'ma hugatenerana karisi agumpima maninka nevana zamo anara nehifi? <sup>9</sup> Kagra atika'a erisga nehunka, kevemofo kupinti keveramina hefinka eri'nane. Ana nehunka tiranteti mopa rugitagine'e. <sup>10</sup> Agona ramimo'za Kagri'ma negage'za, momi'momi nehazageno, timo'ma amutu'mutu huno hageno eneramigeno, hagerimo'a kranto kranto huno tusi ageru neruno, hihi huno amunamu zampi marenerie. <sup>11</sup> Kagra kevema ahe atranke'noma vuno eno'ma nehiazamo'a kopasi'namo'ma nehiaza huno rumarave huno teve tagi avazu huno vuno eno nehie. Ana'ma nehigeno'a anami monafina zagemoe'ne ikamokea kaza osuke anante oti fatgo hu'na'e. <sup>12</sup> Kagrira tusi karimpa nehegenka, kokankokama nemaniza vahera karimpa ahezaman-tenka zamare ha'panetine. <sup>13</sup> Ana nehunka Kagrama masave fre zamantenka huhampari zamante'nana vahe'ma zamagu vazinaku'ma nevunka, havi avu'ava zama nehaza vahe'mokizmi kva vahera zamare hapa'netinka, zamasenireti'ma vuno zamagare'ma vu'nea zaferinazamia maka avazuhu atre'nane. <sup>14</sup> Kagigagi zahomo'ma hiaza hu'za tahe panani hunaku'ma erintaguma hu'za aza harfa sondia vahe'mokizmi kva nera, agri kevereti asenifina rerapone'nane. Zamagra muse nehu'za zamunte omane nagara mago vahe'mo'a zamaza osanigeta zamahe hana hugahune nehaza vahera zamagri kevereti nezmahane. <sup>15</sup> Kagra hosi afutaminka'afi mani'nenga hagerina rentarako hunka nevankeno, hagerimo'a tusiza huno avune nente. <sup>16</sup> Ama ana zantamimofo nanekema nentahugen'o'a tusi nahirahi neregeno, nagararemokea tore tore hu'na'e. Ana nehigeno nagiamo'a nahirahi te'ne. Nagra ana knagura akohe'na avega ante'na mani'nena negesugeno, tagri'ma

eme tazeri havizama hu'naza vahe'ma knazamo'ma zamazeri havizama hania zana kegahue. <sup>17</sup>Hagi fiki zafamo'a amosrema'a aheontesigeno, wainimo'a nofi'arera raga'a reontegahie. Ana nehanigeno olivi zafamo'a raga renontesigeno, hozafi ne'zamo'enena nena raga reontegahie. Sipisipi afutamimo'za nemaniza keginafina nomanisageno, bulimakao afutamimo'za nozmifina omanitfa hugahaze. <sup>18</sup>Ana hugahianagi nagra Ra Anumzamo-fona husga hunente'na Anumzamo'ma nahokeno nagu'ma vazi'nea zankura nagra musenkase hugahue. <sup>19</sup>Hankavenentake Ra Anumzamo'a nagri hankaveni'a mani'ne. Dia afu'mofo agiamo'ma hankavema ti'neaza huno nagri nagia eri hankavenetie. Ana hu'neanki'na agona ramimpina amne vano vano hugahue. Ama nunamu zagamera, zamamema huzante'ma ugotenoma nehia vahe'mo'ma kitagna zavenarami neheno hu'zagamere.

## Zefanaia Zefanaia Avontafere

*Ra Anumzamo'ma Juda vahe keaga huzmanteno knazama zamisia zamofo naneke*

<sup>1</sup> Ra Anumzamo'a ama nanekema Zefanaiama ami'neana, Amoni nemofo Josia'ma Juda vahe kinima mani'nea knafi ami'ne. Hagi Zefanaia nef'a'a Kusiki, Kusi nef'a Gedaliaki, Gedalia nef'a Amariaki, Amaria nef'a Hezekai'a'e. <sup>2</sup> Nagra ama mopamofo agofetu'ma me'nea zantamina maka eri harafi hutregahue huno Ra Anumzamo'a hu'ne. <sup>3</sup> Maka vahe'ene zaggaganena ruharafi hutre vaganere'na, anamifima hare'za vanoma ne-haza namaramine, hagerimpi nozameraminena ruharafi hutre vagaregahue. Havi avu'ava zama nehaza vhahera zamahe vagarete'na magopi zma-mavufga'a erinte hihi hanuge'za tetemukna nehanagena, ama mopamofo agofetutira maka vhahera zamahe vagaregahue huno Ra Anumzamo'a hu'ne. <sup>4</sup> Juda mopafima nemaniza vahete'ene Jerusalemi ran kumapima nemaniza vahetera nazana rusute'na zamazeri haviza hugahue. Bali havi anumzante'ma mono'ma hunentaza vahe'ma, ama ana mopa'afima osi'ama manisazama'a maka zamahe vaganere'na, ana havi anumzaramint'e'ma pristi eri'zama e'neriza vahe'enena zamahe vagarenugeno zamagia omanegahie. <sup>5</sup> Ana vahe'mo'za nozamimofo agofetu mareri'za mani'ne'za, zage're'ene ikante'ene ofuramint'e'ene zamarena re'za monora hunezamantaze. Zamagra Ra Anumzamofo amage nentone nehu'za, Moleki havi anumzante monora nehaze. <sup>6</sup> Ko'ma Ra Anumzamo'na namage'ma antete'za natre'naza vahe'mo'za, kegavama hunezamante'na asomuma huzmante'sanugura nantahia nonkaze.

<sup>7</sup> Hagi Ra Anumzamo'ma vahe'ma refko hunezamanteno keagama huzmantesania knamo'a hago kofta nehianki, Agri avurera keaga osu akoheta emanaho. Zgagafama aheno kresramnama viaza huno Ra Anumzamo'a, Agra vahe'a zamahenaku trotra nehie. Ana nehuno zamagri'ma zamazeri havizama hanaza vhahera ko zamagi hu'ne. <sup>8</sup> Ra Anumzamo'a huno, anama zamahe'nua kna knazupa, Juda vahe'mofo kva vahetamine, kini vahe'mokizmi mofavre naga'ene, ru vahe'mokizmi zamavu'zamavama neveririza vahe'enena knazana zamina zamazeri haviza hugahue. <sup>9</sup> Meg'i vahe'mokizmi havi anumzante'ma mono'ma hunentaza vahe'ene vahe'mokizmi fenozama zamahe'za nehanare'za, havigema hu'za fenozama eri'za kva ne' zamimofo nompima eme nentaza vahe'enena ana zupa zamazeri haviza hugahue. <sup>10</sup> Ra Anumzamo'a huno ana zupa, ran kumamofona nozame kafanteti mago ran krafage hugahie. Ana hanigeno zamasunku'ma huza zavi'ma atesaza krafagemo'a ran kumapina vuno eno hugahie. Ana'ma nehanigeno'a agonaramimpintira ra agasasa neranigeta antahigahaze. <sup>11</sup> Maketi kumapima mani'naza vahe'mota tamazana kofita zaviteho. Na'ankure maka zama zagore'ma eme netraza vahe'ene zogoma rezahe'ma nehaza vahe'enena fanane hugahaze. <sup>12</sup> Ana knafina Jerusalemi kumapima hanima hu'nea ma'afima mani'nezama kumi avu'ava'ma nehu'za, oku'a nehune hu'za nehu'za zamagrama antahi'zana, Ra Anumzamo'a mago knare zano mago havizana osugahie hu'za nehaza vahe'mokizmia, ramu tavi'n'i'a tagina hakre'na zamazeri haviza hugahue. <sup>13</sup> Zamagri fenozana vahe'mo'za eme

agu'za neru'za, nozamia tapage hutregahaze. Ana hanage'za nozamia kasefa kigahazanagi, ana nontamimpina omasegahaze. Waini hoza antegahazanagi, raga'a tagi'za tima'a onegahaze.

### *Ra Anumzamo keaga huzmantesania knamofo naneke*

<sup>14</sup> Hagi Ra Anumzamo'ma vahe'ma keaga hunezamanteno refko'ma huzmantesania knamo'a hago kofta nehiankino, ame huno ana knamo'a efore hugahie. Ana knama efore'ma hania knazupa, hankave sondia vahe'mo'za tusi zavi krafa hugahaze.

<sup>15</sup> E'i ana kna Anumzamofo arimpa ahekna efore hugahiankino, vahe'mo'a hazenkezampi manino nomaniza mani so'ea nosanigeno, tusi'a hazenkeza fore hina maka zamo'a havizantfa nehanigeno, hanima haniana tusi hani huno rentrako hugahie. <sup>16</sup> Ana knafina ufe krafamo'a tusiza nehanigeno, sondia vahe'mo'za ibimo agazamo nehu'za erintagu hu'za hankave vihu kegina me'negeno, kuma kegava nehaza za'za nontamima me'nea ranra kumatamintega vugahaze. <sup>17</sup> Ra Anumzamo'a huno, Nagri navufima kumi'ma hu'nazagu hu'na hazenke zana atrenugeno eno eme tamazeri haviza hanigeta, zamavu suhu vahe'mo'zama nehzaza huta rege'rege huta vano hugahaze. Tamagri koramo'a kugusopafi tagi neramisanigeno, tamavufgamo'a mopafi me'neno kasrino rifagna huno hi'mna vugahie. <sup>18</sup> Ra Anumzamofo arimpa ahe'zamo'ma esania knazupa, silvane golinema ante'naza zamo'a tamagura ovazigahie. Na'ankure Anumzamofo arimpa ahe'zamo'a, tevegna huno ama mopa teno erihana hugahie. Tamagerfa huno, maka ama mopafima nemaniza vahe'mo'za, antri hanazaza huno zamahe vagaregahie.

## 2

### *Tamagu'a rukrahe hiho huno Ra Anumzamo hu'nea naneke*

<sup>1</sup> Tamagaze zama omane Juda vahe'mota, tamagra magopi eme eritru hiho, eme eritru hiho. <sup>2</sup> Anumzamo'ma keagama huramantesiana knamo'ma ome'nesigeno, kagrama kagu'ama rukrahe'ma hanana knamo'ma witi honama zaho'mo ame huno eri hareno viaza huno ovanigeno, Ra Anumzamofo arimpa ahe'zama ome'nesire, <sup>3</sup> tamavufga eri anteramita nemanita, Ra Anumzamo'ma hihoma hianke'ma amage'ma nentaza vahe'mota Anumzamofonku hakeho. Fatgo avu'ava zana hankavetita nehuta, tamavufga anteramita maniho. Ana'ma hanageno'a Anumzamofo arimpa he'zamo'ma esania knazupa, Agrama kegava huramantesigu'enena ontahi'naze.

<sup>4</sup> Hagi Gaza kumapina vhahera omanitfa hanageno Askeloni kumara maka eri havizantfa hanageno, Astoti kumapi vhahera kinagama senkeno'a ha' vahe'mo'za e'za eme zamahe panini hanage'za nefresage'za, Ekroni kumapi vhahera trazama vati'netreaza hu'za maka zamahe vagaregahaze.

<sup>5</sup> Hageri anke'nama nemaniza Kereti vhahera kva hiho. Na'ankure Ra Anumzamo'a Kenani mopafima nemaniza Filistia vhahera keaga huramanteno, tamazeri haviza hanigeta maka vhahera omanita huza fanane hugahaze hu'ne. <sup>6</sup> Hagi hageri ankenaregama me'nea Filistia vhahera mopafina, traza nehagesigeno, sipisipi afu'ma kegavama nehaza vahe'mokizmi nontamimo'ene sipisipi afutamimofo keginamo'ene anampina megahie.

<sup>7</sup> Juda naga nofipinti vhahera osi'ama ofri manisaza vhahera mo'za anampina trazama nenaza afu'zamia kegava hu'za manigahaze. Ana nehu'za hanima

hanige'za Askeloni vahe'mokizmi nompi umasesageno Ra Anumzana zam-agri Anumzamo'a kegava hunezmanteno, zamazeri knare hugahie. Kumap-inti vahe'mo'za atre'za fresageno azumateni'a nontamimpi eri nafa'a hu'za manigahaze. Na'ankure Juda vahe'mokizmi Anumzana Ra Anumzamo so'e avu'ava hune zamanteno, ete zamazeri knare nehanige'za makazampina knare hu'za manigahaze.

### *Moapu vahe'ene Amoni vahe'enema knazama zami'nia zamofo naneke*

<sup>8</sup> Hagi Ra Anumzamo'a huno, Moapu vahemo'zane Amoni vahe'mo'zama Nagri vahe'ma huhavizama hunezmante'za kiza zokago kema hunezmante'za, mopazmima zamazeri koro hu'za erinaku'ma nehaza zana Nagra ko antahi'noe. <sup>9</sup> Monafi sondia vahe'mofo Ra Anumzamo'a huno, Nagra kasefa hu'na mani'noa Anumzana Israeli vahe'mokizmi Anumzamo'na tam-age huanki'na, Moapu vahe'mo'za Sodomu vahe'mo'zama hu'nazaza ne-hanage'za, Amoni vahera Gomora vahe'ma hu'noaza hu'na ozamatre maka zamazeri haviza hanugen, anampina ave'ave trazamoke nehanigeno hagema kafiza eri'naza kerimoke'za hugahie. Nagri naga'ma osi'ama man-isaza vahe'mo'za, ana vahe'mokizmi fenozana rohu zamare'za e'neriza, mopazmia eri nafa'a hugahaze. <sup>10</sup> Hagi Moapu vahe'mo'zane Amoni vahe'mo'zama zamavufaga rama hu'naza zamofo mizama'a erigahaze. Na'ankure zamagra Monafi sondia vahe'mokizmi Ra Anumzamofo vahera huhavizama hunezamante'za, kiza zokago ke huzamante'nagu anara hugahaze. <sup>11</sup> Ra Anumzamo'a maka ama mopafima me'nea havi anumzantamina eri haviza huvaga nereno, vahera zamazeri koro hugahie. Ana hanige'za kokankokama nemaniza vahe'mo'za mopazamire manitere hu'ne'za, Ra Anumzamofona monora huntegahaze.

### *Itiopia vahe'ene Asiria vahe'mo'zanema knazama erisaza zamofo naneke*

<sup>12</sup> Hagi Itiopia vahe'motanena Nagri bainati kazimo tamahe frigahie! <sup>13</sup> Ra Anumzamo'a azana rusuteno noti kzigama nemaniza vahera hara hunezamanteno, Asiria vahera zamazeri haviza hugahie. Ana nehuno ugagotama hu'nea Ninive kumara eri haviza hina, vahera omanisigeno ka'ma koka fore hugahie. <sup>14</sup> Hagi ana kumapina trazante afu'tamimo'za e'za anampina eme vano nehanageno, afi zagagafamo'za e'za anampina emanigahaze. Ana nehanage'za komutomo'za nontamimofo azeri hanaveti zafare umani emani hu'ne'za krafa nehanageno, zamagerumo'a zaho'ma eri kafanteti atiramino evu evu hugahie. Faragu vaziramino hihima hania haveramimo, nomofo kafaramina rehiza hugahie. Ana nehanigeno noma vazisgama hu'nea sida zafaramimo'a amate megahie. <sup>15</sup> Ninive ran kumapima nemaniza vahe'mo'za kora tusi muse nehu'za zamavufaga erisga nehu'za, zamagrama antahi'zana mago zana tavatera fore osanigeta knare huta manigahune hu'za antahi'naze. Zamagra hu'za mago kumamo'e huno tagri kuma knara osu'ne hu'za nehaza kumamo'agi menina evuramino haviza hige'za, afi zaga kfamo'za anampi eme nogi'za mani'naze. Ana hazage'za karankama evaza vahe'mo'za ana kuma'ma nege'za, kiza zokago ke hunente'za zamazana ruharakihariki hu'naze.

## 3

### *Jerusalemi kumapima henkama fore'ma hania zamofo naneke*

<sup>1</sup> Jerusalemi kumapima nemaniza vahe'mota kva hiho, na'ankure ana kumapima nemaniza vahe'mota keontahi havi avu'ava huta vahera zamazeri haviza nehuta, kumara eri pehena hu'naze. <sup>2</sup> Jerusalemi kumapi

vahe'mo'za kea runetagre'za, zamavumro'ma anteankea antahi'za novaririze. Ana nehu'za Ra Anumzana zamagri Anumzantera zamentintia nosu'za, Agritera erava'oa nosaze. <sup>3</sup> Jerusalemi kumate kva vahe'mo'za, laionimo ran krafa huno vano nehiankna nehazage'za, keagama refko'ma nehaza kva vahe'mo'za, kinagafima vanoma nehaza afi kramo'za kenage zagagafa ahe'za nevaga retazageno masa nehiankna nehaze. <sup>4</sup> Jerusalemi kumapima nemaniza kasnampa vahe'mo'za zamavufaga ra nehu'za, tusi hazenke vahe mani'naze. Pristi vahe'mo'za Anumzamofo kasegea runetagare'za, Ra Anumzamofo Mono nona eri pehena hu'naze. <sup>5</sup> Hianagi Ra Anumzamo'a Jerusalemi ran kumapina ko'ma nemanire mani'neankino, Agra mago havizana nosie. Knane knanena Agra fatgo huno vahera refko hunezamante'neanagi, vahe'mo'za Agrira keamara nosaze. Hianagi kefo avu'ava zama nehaza vahe'mokizmia zamagaze zana nomane. <sup>6</sup> Nagra rama'a kumatamimpi vahera zamahe vagarogeno, mani'nezama kuma'ma kegavama nehaza zaza nozmimo'a haviza huno me'ne. Kuma zamifima vanoma nehaza ne'onse kantamina eri haviza huge'za vahera vano osazageno, ranra kumazmimo'a haviza huno megeno, anampina magore huno vahera omanitfaza hu'ne. <sup>7</sup> Nagrama antahuana tamagerfa hu'za Nagri agoraga neman'i'za, Nagrama zamavumro'ma antoanke'ma antahisage'na kumazmia eri haviza osugahue hu'na antahi'noe. Hianagi zamagra maka'zama hazafina, kazigazi hu'za havi avu'ava zana hu'za vu'naze. <sup>8</sup> E'ina hu'negu akoheta Nagri navega anteta maniho huno Ra Anumzamo'a hu'ne. Na'ankure Nagrama ot'i'na keagama humante'sanua knazupa, ko antahintahi retro hu'noanki'na kokankokama nemaniza vahe'ene kinimo'ma kegavama hu'nea mopafima nemaniza vahera zamazeri atru hute'na, narimpa ahe'zana zamagrite eri akaha hu atregahue. Nagrama kanivema rezamantesanua narimpa ahe'zamo'a, teve nefakna huno maka ama mopa teno eri fanane hugahie. <sup>9</sup> Ana zupa maka kokankoka vahera zamagerura eri agru hanuge'za, ana maka vahe'mo'za mago zamarimpa hu'za Ra Anumzamo'na Nagia ahentesga hu'za monora hunante'gahaze. <sup>10</sup> Nagri'ma mono'ma hunenantaza vahe'nima zamahe panani'ma hazage'za Itiopia mopafima mane'nea timofo kantu kazigama umani'naza vahe'mo'za, Nagritega ofa eri'za egahaze. <sup>11</sup> Nagri kema nontahita veganokino'ma hu'naza zankura, e'i ana zupa tamagazegura osugahaze. Na'ankure ru'enena tamagra Nagrira hara reonantegahaze. Tamagri amu'nompintira zamavufaga rama nehu'za kema nontahiza vahera zamazeri atregahue. Ana hanugenruo tage'ma hu'nea agona'nifina zamavufaga rama nehaza vahera omanigahaze. <sup>12</sup> Hianagi akohe'zama neman'i'za, zamavufagama anteramiza nemaniza vaheke zamatrengue'za manigahaze. Na'ankure zamagra Ra Anumzamofo agifi frakiza nemaniza vaher mani'naze. <sup>13</sup> Israeli naga'ma osi'ama manisaza vahe'mo'za mago hazenke nosu'za, mago havigea nosu'za, magore hu'za havigea huza vahera rezamataga osugahaze. Ana nehu'za zamagra ne'zana nezamu nehu'za, mani fru hu'za neman'i'nageno mago vahe'mo'e huno zamazeri korora osugahie.

### *Musema nehuno hu zugamemofo naneke*

<sup>14</sup> Hagi Saioni mofamoka zugamera nehuge'za, Israeli vahe'mo'za rankea hu'za kezati'za zugamera hiho. Jerusalemi mofa'moka maka kagu'reti hunka musenkasea nehugenro, karimpamo'a so'e hino. <sup>15</sup> Na'ankure Ra Anumzamo'ma keaga huneramante'no tamazeri haviza hugahuema

huno hu'nea zana eri netreno, tamagri ha' vahe'mokizmi sondia vahera zamaretufege'za vu'naze. Ana hu'neankino Ra Anumzana Agra'a Israeli vahe'mota Kinimo tamagri amu'nompina manigahie. Ana hanigeta hazenke'zama e'zankura korora osugahaze. <sup>16</sup> Ana kna zupa Jerusalemi kumakura hu'za, Saioni agonomaka korora nehunka atregeno kazamo'a arage oramino hu'za hugahaze. <sup>17</sup> Na'ankure Ra Anumzana kagri Anumzamo kagri amu'nompina mani'ne. Agra hankavenentake harafa ne' mani'ne. Agra kagrikura tusi muse hugahankino, avesi zama'areti koroma nehana zana maka eri amne hugahie. Kagrikura ranke huno zagamera nehuno, Agra musenkasea hugahie. <sup>18</sup> Ra Anumzamo'a huno, musenkasema nehaza knare'ma musema osu'naza zanku'ma tamasunku'ma nehaza vahera zamavare atru hugahue. Ana hanuge'za mago'enena tamazeri tamagazea hanageta tamagazegura osugahaze. <sup>19</sup> Tamagri'ma knazama tamiza tamazeri havizama hu'naza vahera, ana knazupa hazenke zamigahue. Hanki zamagama havizama hu'nea vahera zamagu'nevazi'na, vahe'mo'zama zamahé'za zamarotago'ma hazage'zama fre'naza vahera ete magopi zamavare tru hugahue. Ru kumategama vuta kinama ome hutama mani'nage'za, ana kumapi vahe'mo'za kiza zokago ke huneramante'za huhaviza huramante'naze. Hianagi menina ete zamagu'a eri rukrahe hanuge'za, tamagrira husga huramantegahaze. <sup>20</sup> Ana kna zupa tamagrira magopi tamavre tru hute'na, tamavre'na nonkuma tamire ete egahue. Ama mopafima mani'naza vahe amu'nompintira, tamagrira knare tamagi tamisuge'za tamagesga hugahaze. Tamagra'a tamavufinti negesage'na tamazeri so'e hugahue. Nagra Ra Anumzamo'na ama nanekea hue!

## Hagai

# Hagai Avontafere

### *Ra Mono No kiho huno hu'nea naneke*

<sup>1</sup> Pesia mopafi kini ne' Darius'i'ma kirima manino egeno nampa 2ma hia kafufina, 6si ikamofona ese knazupa, ama nanekea Ra Anumzamo'a kasnampa ne' Hagaina nemino, Juda mopare ugagota hu'nea Gavana ne', Sieltieli nemofo Zerubabeline, ugagota Pristi ne' Jehozadaki nemofo Josuakizani zanasamio huno asami'nea naneke. <sup>2</sup> Monafi sondia vahete'ma ugagotama hu'nea Ra Anumzamo'a amanage hu'ne. Vahe'mo'za amanage nehaze, Ra Anumzamofo mono noma ete eri kasefa'ma huno ki kna za-hufa ome'ne hu'za nehaze. <sup>3</sup> Anagema hazazanku Ra Anumzamo'a kasnampa ne' Hagai agipi huvazino amanage hu'ne, <sup>4</sup> Tamagra na'a higeta Nagri mono nona atrazageno havizana huno me'negeta, marerisa non-tamimpina tamagra nemanize? <sup>5</sup> E'ina hu'negu Monafi sondia vahe'mofo Ra Anumzamo'a huno, tamagrama nehaza avu'ava zantamia refkohu so'e huta keho. <sup>6</sup> Tamagra rama'a hoza nentazanagi, nezama'a osi'a e'nerize. Tamagra ne'zana nenazanagi, tamamura nosie. Tamagra tina nenazanagi, mago'ene tinkura tamave'nesie. Tamagra kukena nehazanagi, anazamo'a tamavufga azeri amuhoa nosie. Tamagra zago eri'zana erita kutamifina erinerizanagi, hagro hu'nea kutamifina erinerize. <sup>7</sup> Monafi sondia vahe'mofo Ra Anumzamo'a amanage hu'ne. Tamagrama nehaza avu'ava zana refkohu so'e huta keho. <sup>8</sup> Tamagra agonaramimpi marerita zafa ome antagita eta Nagri mono nona eme kiho. Ana'ma hanage'na Nagra anazankura muse nehanuge'za, anampina Nagri nagia husga hugahaze huno Ra Anumzamo'a hu'ne. <sup>9</sup> Hozafintira tamagra knare huta ne'zana hamaregahune huta amuhara hu'nazanagi, ne'zamo'a hunte so'e nosie. Tamagra ana ne'zama erita nontamire'ma azana, Nagra ana ne'zantamina huhu hunetroe. Na'a hige'na anara nehue? Na'ankure Nagri mono nomo'a evuramino haviza huno me'negeta, atreta tamagra'ama knare'nare nontamima kisaza zante maragu'zama neti'za zante, anara nohue huno Monafi sondia vahe'mofo Ra Anumzamo'a hu'ne. <sup>10</sup> E'inahu tamavu tamava'ma nehaza zanku huno, hampompintira komo'a eoramigeno, hozafina ne'zamo'a hunte so'e nosie. <sup>11</sup> Nagra kora atresugenno mopafina ruontegahianokino, agonaramimo'ene mopamo'enena hagege nehanigeno, witimo'ene waini ragamo'ene olivi zafa ragamo'enena hagege nehanigeno, maka ama mopafima hageno mareneria zantamimo'enena hagege hugahie. Ana'ma hanigeno'a vhemo'ene afutamimo'zanena ne'zama ne'zankura hakegahaze. Anazanke huno tamagrama maraguzamatita eritruma hu'naza zantamimo'a maka haviza hugahie.

<sup>12</sup> Anante Sieltieli nemofo Zerubabeli'ene, pristi ne' Jehozadaki nemofo Joshua'ene, pristi vahe'mo'zane Anumzamofo vahe'ma ofri osi'ama mani'naza vahe'mo'zanena Ra Anumzana Anumzazamimofo naneke amage ante'naze. Ra Anumzana zamagri Anumzamo'ma kasnampa ne' Hagaima asamigeno, eme zamasamia kante ante'za zamagu'reti hu'za ana nanekea amage ante fatgo hu'naze. Ana nehu'za Ra Anumzamofonku koro hunente'za Agri agorga mani'naze. <sup>13</sup> Anante Ra Anumzamofo kato ne' Hagai'a amanage huno Ra Anumzamofo nanekea vahera zamasami'ne. Ra Anumzamo'a

huno, Nagra tamagrane mani'noe huno huama hu'ne. <sup>14</sup> Hanki anante Juda mopare ugota hu'nea Gavana ne' Sieltieli nemofo Zerubabeline, ugota pristi ne' Jehozadaki nemofo Josuakiznia Ra Anumzamo'a antahintahi zanamino zanarimpa zanazeri onetino, Anumzamofo vahe'ma osi'a ofri'ma mani'zana vahe'enena anazaneku hu'ne. Ana hige'za Monafi sondia vahe'te'ma ugagotama hu'nea Ra Anumzama Anumzazamimofo mono nona erigafa hu'za ki'naze. <sup>15</sup> Ana eri'zama eri agafama hu'nazana, Dariusi'ma kinima manino egeno nampa 2ma hia kafufina 6si ika mosfona 24ma hianknazupa eri agafa hu'naze.

## 2

### *Ra Mono Noma kisaza zamofo naneke*

<sup>1</sup> Hanki ana kafufina 7ni ikamofona 21ni knazupa Ra Anumzamo'a kas-nampa ne' Hagai agipi huvazino mago'ene amanage hu'ne. <sup>2</sup> Juda mopafima ugagota hu'nea Gavana ne' Sieltieli nemofo Zerubabeline, ugagota pristi ne' Jehozadaki nemofo Josuane, Anumzamofo vahe'ma ofri osi'ama mani'naza vahera amanage hunka zamasamio. <sup>3</sup> Amama mani'naza vahe kevufintira iza kora mani'neno, ama mono nomofo avasase zama'a ke'ne? Menima kazana tamagri tamavurera inankna nehie? Tamagrama kazana koma hu'nea zana avasase'a omaneno amne zankna nehifi? <sup>4</sup> Hianagi menina Ra Anumzamo'a amanage huno hie, Zerubabeliga menina oti hankavetio. Ugota pristi ne' Jehozadaki nemofo Josuagane, osi'a naga'ma ofri'ma ana mopafima mani'naza vahe'mota oti hanavetineta eri'zana eri agafa hiho. Na'ankure Nagra tamagrane mani'nena tamaza hugahue huno Monafi sondia vahe'mofo Ra Anumzamo'a nehie. <sup>5</sup> Tamagehe'zama Isipi mpareti'ma neazage'na huvempama huzmante'noa kante, Nagri Avamu'mo'a tamagri'ene mani'negu tamagra korora osiho. <sup>6</sup> Monafi sondia vahe'mofo Ra Anumzamo'a amanage nehie. Nagra osi'a knafi mago'ene monane, mopane, hagerine, eri kaza hugahue. <sup>7</sup> Maka ama mopafima me'nea kumatamina eri kaza hugahue. Ana hanuge'za maka kokankoka vahe'mo'za marerisa zago feno zamia eri'za ama mono nompi egahaze. Nagra ama mono nompina hihamu masa zanteti ante avitegahue huno Monafi sondia vahe'mofo Ra Anumzamo'a hu'ne. <sup>8</sup> Silva Nagri suza megeno, golia Nagri suza me'ne huno Monafi sondia vahe'mofo Ra Anumzamo'a huama hu'ne. <sup>9</sup> Ama mono nomofoma kote'ma me'nea avasase zama'a, henkama esania avasase zama'a rugateregahie. Ana hanige'na ama kumapina arimpa fruza eri'na egahue huno Monafi sondia vahe'mofo Ra Anumzamo'a huama hu'ne.

### *Agru osu vahe'mo'zama asomu'ma erisaza zamofo naneke*

<sup>10</sup> Hagi kini ne' Dariusi'ma kinima manino egeno nampa 2ma hia kafumofona, 9ni ikampina 24zupa Ra Anumzamo'a mago'ene kasnampa ne' Hagaina amanage huno nanekea eme asami'ne, <sup>11</sup> Monafima mani'naza sondia vahe'mofo Ra Anumzamo'a amanage huno hie. Kasegem'o na'anee huno hu'nefi pristi vahera zamantahigeta keho. <sup>12</sup> Hagi ofama ne-hanaza afupinti mago vahe'mo'ma ruotagema hu'nea ame'ama erino zaza kukena'afi erinte kafagino erino nevanigeno, ana kukenamo bretirero, kre ne'zantero, waini tintero olivi masaventero, mago'a ne'zante'ma avako'ma hanigeno'a, ana zantamimo'a ruotage hugahifi anara osugahie? Anagema hige'za pristi naga'mo'za hu'za, i'o anara osugahie hu'za hu'naze. <sup>13</sup> Hagi anante Hagai'a amanage huno zamantahig'e, Mago vahemo'ma fri'nesia

vahe avufgare'ma avako huteno, ete ne'zama avako hanigeno'a, ana zantamimo'a agru hugahifi agrua osugahie? Anagema hige'za pristi naga'mo'za kenona hu'za, I'zo agru osugahie hu'za hu'naze. <sup>14</sup> Anante Hagai'a huno, Ama vahe'mo'zane, ama kokampima nemaniza vahe'mo'zanena e'inahu hu'naze, maka'zama nehu'za, maka ofama nehaza zanena kumizmi'mo eri pehena hu'ne. <sup>15</sup> Hianagi Anumzamo'a huno, Tamagra Ra Anumzamofo mono noma eri agafa huta tra'a onki'nazageno'ma tamagrite'ma fore'ma hu'nea zankura, refkohu so'e huta keteta anara hiho. <sup>16</sup> Ne'za kevuma ante'nazana tamagra ome erinaku'ma nevuta, 20'a kupi eririgahune huta tamagesa antahi'naze. Hianagi 10ni'a kupinke'za eriri'naze. Waini ragama regatati'ma nehuta 50'a kavofafi afi avitegahune huta tamagesa antahi'naze. Hianagi 20'a kavofinke'za afi avite'naze. <sup>17</sup> Nagra hozama eri havizama nehia kriramine, ranra komopa ko'ene atrogeno maraguzamatita hozafima eri fore'ma hu'naza ne'zantamina eri haviza hu'neanagi, tamagra Nagritera rukrahera huta nomaze, huno Ra Anumzamo'a hu'ne. <sup>18</sup> Meninteti'ma agafa huno vanigeta, 9ni ikamofo 24zupama Ra Anumzamofo mono nomofo tra'ama eri agafama huta ki'naza knagura tamagesa antahintahi hiho. <sup>19</sup> Avimzama ohankreta atrazageno nompima menegeno, witima ohamarazageno, waini ragamo'ma nofitema reontegeno, fiki zafamo'ene pomgreneti zafamo'ene olivi zafamo'zanena raga reonte'nazare huvempa hu'na neramasamue. Hagi menima ama knareti'ma agafama huno vaniana, Nagra asomu huramantenugeta rama'aza antegahaze.

#### *Ra Anumzamo Zerubabeli huhampri ante'nea naneke*

<sup>20</sup> Ra Anumzamo'a ana ikamofona 24 zupa amanage huno mago'ene Hagai'na nanekea nasami'ne, <sup>21</sup> Juda mopare'ma ugotama hu'nea Gavana ne'Zerubabelina asaminka, Nagra Anumzamo'na kofa'a knafi monaramine mopanena eri kaza hugahue huno hie hunka asamio. <sup>22</sup> Nagra ama mopafi kini vahera kini tratetira zamazeri netre'na, meg'i'a kini vahe'mo'zama kegavama nehaza hankavezmia eri haviza nehu'na, karisiramime agumpima mani'za vanoma nehaza vahe'enena zamazeri atregahue. Hosi agumpima mani'za vanoma nehaza vahe'mo'za bainati kazinteti zamagra'a ohefri ahefri hugahaze. <sup>23</sup> Hianagi Monafi sondia vahe'mofo Ra Anumzamo'a huno, ama ana zama fore'ma nehanige'na Sieltieli nemofo Zerubabeliga, Nagri eri'za vahe mani'nanku kazerisga hu'na rankagi kamigahue. Na'ankure Nagra ko kagreira huhampri kante noankinka, kini vahe'mo'zama zamazampima ante'neza avame'zama renekamaraza rinigna hu'nane huno Monafi sondia vahe'mofo Ra Anumzamo'a huama hu'ne.

## Zekaraia Zekaraia Avontaferé

### *Zamagu'a rukrahe hihogu zamagi hu'nea naneke*

<sup>1</sup> Dairusi'ma mago kafuma kinima mani vagareteno namba 2 kafuma unemanigeno'a, ana kafumofona 8ti ikanter Ra Anumzamo'a Berekia nemofo, Ido negeho Zekaraiana amanage huno nanekea asami'ne, <sup>2</sup> Nagra Ra Anumzamo'na kagehemokizmia tusi'a narimpa ahezmante'noe. <sup>3</sup> E'ina hu'negu amanage hunka vahetmina zamasamio, Hihamu'ane Ra Anumzamo'a amanage nehie, Ete rukrahe huta Nagrite enkena, Nagra Hihamuane Anumzamo'na ete rukrahe hu'na tamagritera va'neno, huno Hihamunentake Ra Anumzamo'a nehie. <sup>4</sup> Ko'ma tamagehe'mozama hu'naza zana osiho. Hagi tamagehemo'zama kefo zamavu'znavazama nehazage'za ko'ma mani'za e'naza kasnampa vahe'mo'zama huama hu'za, Hihamunentake Ra Anumzamo'a amanage nehie, menina kefo avu'ava zama nehaza zana atreta tamagu'a rukrahe hilo hu'za hunazanagi, ana keni'a antahi'za zamagu'a rukrahera osu'naze, huno Ra Anumzamo'a nehie. <sup>5</sup> Tamagehe'za menina iga mani'naze? Hagi kasnampa vahe'mo'za ofri mani vava hu'za nevazafi? <sup>6</sup> Hianagi maka nanekema eri'za vaheni'a kasnampa vahepima huvazi'nama hu'noa kemo'a, tamagehe'mofona zamagate ore'neanki, Nagrama hu'noa kante anteno ana zana before hu'ne. E'inama higeno'a zamagu'a rukrahe nehu'za amanage hu'naze. Na'anoma Monafinka Sondia vahe'mofo Ra Anumzantegati'ma erisunema huta hu'nona zana erune. Agra nazano huramantegahuema huno'ma hu'nea zana hurante'ne.

### *Mopama keno vano hu naga'mofo naneke*

<sup>7</sup> Hagi Dairusi'ma mago kafuma kinima marivagareteno namba 2 kafuma nemanigeno, 11ni ikamofona 24 zupa Ra Anumzamo'a mago'anee Kasnampa ne' Berekia nemofo, Ido negeho Zekaraia'na amanage huno kea nasami'ne, <sup>8</sup> Kenagera ava'nagnaza negogeno, mago krahopi miteli zafarami me'nefi koranke hosi afumo'a ot'i'negeno, ana hosi afu agumpina mago ne' mani'nege'na ke'noe. Hagi ana ne'mofo amefira koranke'ma, osapake'eene efeke hosi afutami mani'nazage'na ke'noe. <sup>9</sup> Anazama nege'na nagri'enema nanekema nehia ankerona amanage hu'na antahige'noe, Ranimoka, ama zana nazane? Anagema hugeno'a nagri'enema nanekema nehia ankeromo'a amanage huno kenona hu'ne, E'i zana nazampi, nagra kaveri hugahue huno hu'ne. <sup>10</sup> Hagi miteli zafaramimofo amu'nompi mani'nea ne'mo'a amanage huno nasm'i'ne, Ama nagara Ra Anumzamo'a ama mopafima vano huta na'a fore nehifi keho huno'ma huzmante'nea nagare. <sup>11</sup> Anage higeno hosi agumpima mani'naza naga'mo'za Ra Anumzamofo ankeroma miteli zafa amu'nompima ot'i'nea nera amanage hu'za asami'naze, Ama mopafima vanoma huta konana, mika ama mopafima mani'naza vahe'mo'za fru hu'za akohe'za mani'naze. <sup>12</sup> Anagema higeno'a Ra Anumzamofo ankeromo'a amanage hu'ne, Monafi sondia vahe'mokizmi Ra Anumzamoka nama'a zupa Jerusalemi kumaku'ene Juda mopafima me'nea rankumataminkura kasunkura huozmante krimpa ahezmantenka vugahane? Karimpama ahezmantenkama e'nanana hago 70'a kafu evie. <sup>13</sup> Higeno Ra Anumzamo'a asunku huntenu fru kefinti, nagri'enema

keagama nehia ankerona kenona hunte'ne. <sup>14</sup> Ana hutegeno nagri'enema keagama hu'nea ankeromo'a amanage hu'ne, Monafinka sondia vahe'mofo Ra Anumzamo'a amanage hie hunka ranke hunka huama huo. Jerusalemi kumaku'gu'ene Saioni kumaku'enena tusiza hu'na navesia nentoe. <sup>15</sup> Hagi kokankoka vahe'ma zamarimpa fruma hu'za nemani'za vahekura, tusi narimpa ahenezmantedoe. Na'ankure osi'ama vaheni'ama narimpama ahezmantoge'za, zamagra razampi zamazeri haviza nehaze. <sup>16</sup> E'ina hu'negu Ra Anumzamo'a amanage nehie, Nagra nasunku hunezmante'na ete rukrahe hu'na Jerusalemi oankino, Nagri nona ana kumapina ete eri so'e hu'za ki'nageno, mesarimima nehaza nofinu Jerusalemi kumara ante'za ke'za mesarimia hugahaze, huno Monafi sondia vahe'mofo Ra Anumzamo'a hu'ne. <sup>17</sup> Monafi sondia vahe'mofo Ra Anumzamo'a amanage hie hunka ete mago'ene ranke hunka huama huo, Nagri rankuma'mo'a ete mago'ane mika zampina knare huno hageno maererinigeno, Ra Anumzamo'a mago'ane Saonia azeri so'e nehuno, nagri rankumare huno Jerusalemia huhamprigahie.

<sup>18</sup> Anante nagra kesga hu'na navuga koana, 4'a pazine me'nege'na ke'noe. <sup>19</sup> Nagranema keaga nehia ankerero nera anante amanage hu'na antahige'noe. Ama zana nazane hu'na antahigogeno, amanage huno kenona hu'ne, E'i pazivetamina Juda vahe'ene, Israeli vahe'ene, Jerusalemi vahe'enema zamahe panani'ma hazage'za panani'ma hu'za fre'naza pazivetamine hu'ne. <sup>20</sup> Anante Ra Anumzamo'a 4'a vahetmima ainireti'ma keonke zama troma nehaza vahetmina naveri hu'ne. <sup>21</sup> Anante nagra antahige'na, ama vahe'zaga zamagra na'a hunaku neaze hu'na antahigogeno, amanage hu'ne. Ama 4'a pazivemo'za Juda vahera zamahe panani hazage'za panani hu'za fre'naze. Hianagi menima neaza vahe'mo'za ama ana 4'a pazivetamina, e'i 4'a kumate vahetaminki'za zamazeri zamagogonefe'za zamazeri haviza hunaku neaze.

## 2

### *Anumzamo'ma Saionigu'ma avesinte'nea naneke*

<sup>1</sup> Anante kesga hu'na koana, mago ne'mo'a anteno keno mesarimima hunofi azampina erinege'na ke'noe. <sup>2</sup> Nege'na amanage hu'na antahige'noe, Kagra iga nevane? Hu'na antahigogeno anage hu'ne, Jerusalemi kumamofo atupa'ane, zaza'ane ante'na mesarimi hu'na kenaku neoe huno hu'ne. <sup>3</sup> Anante nagranema keagama nehia ankeromo'a natreno nevigeno'a, ete ru ankeromo eme tutagiha hunte'naku eno, <sup>4</sup> amanage huno eme nasmi'ne, Kagarenka yunka antu nehaza nera ome asmio, Jerusalemi kuma kegina omanesige'za kuma kegina omame kumakna hugahaze. Na'ankure anampina vahe'mo'zane, afu zagamozanena tusiza hu'za mani vite'za kuma keginamofo fegianena manigahaze. <sup>5</sup> Hianagi Nagra ana kumamofona teve anefanu kegina hunente'na, ana kuma amunompina hankavenen-take masanuti remsa hugahue huno Ra Anumzamo'a hu'ne. <sup>6</sup> Otiho! Otiho! Noti kaziga moparega atreta viho, huno Ra Anumzamo'a nehie. Na'ankure Nagra monafi zahomo'ma 4'a kazigama zaho'ma erino vuno eno'ma hiazza hu'na, tamahe panani hugeta ru moparega ufre efre hu'naze. <sup>7</sup> Otio! Babiloni mofa'neraminema nemanizamota freta Saioni viho. <sup>8</sup> Na'ankure Monafinka sondia vahe'mofo Ra Anumzamo'a amanage hu'ne, Agra hihamu masazama'amofo hanavefi hunanteg'e'na, rohu'ma kreno keonke zanka'ama eri'naza vahe'ma zamazeri havizama hunakura vu'noe. Na'ankure kagri'ma kavako'ma hanazana, Agria avuragamofo raga'a avako

hugahaze. <sup>9</sup> Kama antahiho, Nagra nazana eri verave hanuge'za, ko'ma kazokazo eri'zama eri zamante'naza vahe'zimimo'za zamarohura zamare'za keonke zazmia eri hana hugahaze. E'ina hanugenka Monafinka sondia vahe'mofo Ra Anumzamo hunantege'na e'noe hunka kenka antahinka hugahane. <sup>10</sup> Saioni mofa'moka zagame hunka muse huo, na'ankure Nagra amu'nonka'afi maninaku neoe huno Ra Anumzamo'a huama hu'ne. <sup>11</sup> Ana knarerera rama'a megi'a kokankoka vahe'mo'za Ra Anumzanena emeri hagerafiza nagri vaherase'za manigahaze. E'ina hanigenka nagrikuta, Monafi sondia vahe'mofo Ra Anumzamo ama nera huntogeno nagritega e'ne hunka kenka antahinka hugahane. <sup>12</sup> Hagi Ra Anumzamo'a ruotge'ma hu'nea mopafina Juda nagara agrarega zamavare nenteno, Jerusalemi kumara ete mago'ane erigahie. <sup>13</sup> Maka vahe'mota Ra Anumzamofo avuga akoheta maniho, na'ankure Agra ruotge'ma hu'nea noma'afintira oti'ne.

### 3

#### *Ugagota pristi ne' Josua naneke*

<sup>1</sup> Hanki ana ankeromo'a ugagota pristi ne' Josua'a Ra Anumzamofo ankeromofo avuga oti'negeno naveri hu'ne. Hagi vahe'mofoma huhaviza huno, e'ina hu'ne amana hu'nema nehia ne' Sata'a ana ankeromofona azantamaga kaziga oti'neno, Josuana keaga hunte'naku retro huno mani'ne. <sup>2</sup> Ra Anumzamo'a Satankura huno, Ra Anumzamo'a Sataga keonke kema nehanana, havige nehane huno nehie. Tamage, Ra Anumzana Jerusalemi kuma'ma huhampri'nea Ra Anumzamo'a ama ne'ma keagama huntanana eri atrore huno kazeri ko'nerino anage hu'ne, Ama nera tevefinti'ma tevema tagisga nehiaza hu'noe. <sup>3</sup> Josua kukenamo'a tusi pehanage hu'negeno ana ankeromofo avuga oti'ne. <sup>4</sup> Hagi ana ankeromo'a mago'a ankerontamima anante'ma oti kagi'naza ankeroramina amanage huno zamasami'ne, pehanage kukena'a hate atreho, huno nehuno rukrahe huno Josuankura amanage hu'ne, Kumika'a atrenegante'na marerirfa kukena rehankre kantoe huno hu'ne. <sup>5</sup> Anante nagra amanage hu'noe, atrege'za anuntera agru tavravenu vafoa anakinteho hu'na huge'za, agru hu'nea tavrave pristi vahe'mo'zama zamanunte'ma vafoma negiza tavrave anuntera kinente'za, kasefa za'za kukena eri'za eme hunte'naze. Ana'ma hazageno'a Ra Anumzamofo ankeromo'a tavaonte otino mani'ne. <sup>6</sup> Anante ana ankeromo'a amanage huno Josuana avumro nanekea asami'ne. <sup>7</sup> Monafi sondia vahe'mofo Ra Anumzamo'a amanage hie, kagrama Nagri navu'nava'ma nevaririnka nagrama hanua kema amage'ma antesanke'na, nagra hu izo hugantengenka noni'ane nonkumanianena kegava nehunka, amama oti'naza vahe munompina hu izo huganta'nena vano hugahane.

#### *Zafa azanku'namofo naneke*

<sup>8</sup> Ugagota pristi ne' Josuagane, maka ruga'a pristi vahe'ma kavugama mani'nazamotanena menina antahiho, tamagra henkama fore'ma hania zantmimofo avameza mani'naze. Nagra eri'za vahe'ni'amofo agi'a Zafa Azankunare hu'neanki'na avre'na egahue. <sup>9</sup> Kama go, mago have 7ni'a avurga hunte'nea have Josua avugama ante'noa havere avona krenente'na, ama mopafima me'nea kefo avu'ava zana magoke knafi eri atregahue, huno Monafi sondia vahe'mofo Ra Anumzamo'a hu'ne. <sup>10</sup> Ana zupa mago magomota tava'ontamire'ma nemani'namokizmia ke hanage'za tamagri grepino fimofo turunapine, fiki zafamofo turunapi emanigahaze.

**4***Golire ramu tavi azotane Olivi zafaramimofo naneke*

<sup>1</sup> Anante nagri'enema keaga hu'nea ankeromo'a ete nagrite eno eme nazeri otige'na mase'nefinti'ma antrima huno otiankna hu'na otugeno, <sup>2</sup> amanage huno nantahige'ne, Kagra na'a negane? Hige'na amanage hu'na asmi'noe. Goliretike tro hu'nea tavi zota me'negeno, agofetura masave tafe megeno, ana masave tafemofona 7ni'a ramu tavi megagigeno, 7ni'a ramu tavimofona 7ni'a wikirami tavi'ma rekruma hu'zana metere hu'ne. <sup>3</sup> Hagi tare Olivi zafamokea ana tavi zota eri amu'no hakeno amunom-pima masavema taginte zompamofo tamaga kaziga mago'mo'a otigeno, mago'mo'a hoga kaziga otinege'na ke'noe. <sup>4</sup> Anante nagranema kema nehia ankerona amanage hu'na antahige'noe, Ranimoka ama zantamina nazantamine? hu'na hu'noe. <sup>5</sup> Kagra antahinka kenka hu'nano huno ana ankeromo'a nantahigege'na, i'o ranimoka antahina ke'na osu'noe hu'na hu'noe. <sup>6</sup> Anage hugeno amanage huno nasm'i'ne, Ra Anumzamo'a amanage huno Zerubabelinkura hu'ne, ama ana zana hankaveka'reti'ene hi-hamuka'aretira eri forera osugahananki, Nagri Avamumofo hankavereti ana zana hugahane, huno Monafi sondia vahe'mofo hankavenetake Ra Anumzamo'a hu'ne. <sup>7</sup> Kagima me'nea agonamoka kagra izage? Zerubabeli avuga agupo segahane. Hagi agrama mono nomi ki vagare havema agofetuma ante vagama renigeno'a, vahe'mo'za kezati'za, Anumzamo'a asomu hanie, Anumzamo'a asomu hanie hu'za hugahaze. <sup>8</sup> Anante mago'ane Ra Anumzamo'a amanage hu'ne, <sup>9</sup> Zerubabeli agafa huno mono nona ki'neankino, agra ki vagaregahie. E'ina hanige'za Monafi sondia vahe'mofo Ra Anumzamo hunantege'na kagritega e'noe hu'za vahe'mo'za ke'za antahiza hugahaze. <sup>10</sup> Osi'zama eri agafama hu knagura antahi amnea osuo. Na'ankure Ra Anumzamo'a Zerubabeli azampima noma eri fatgo hu'za negi'za nofi'ma kesuno'a, muse hugahie. Hagi 7ni'a ramu tavira, e'i Ra Anumzamofo avuraga huvame huno me'neankino ama mopafima me'nea maka zana ke hagro huno nege. <sup>11</sup> Anage hige'na amanage hu'na ankerona antahige'noe, ramu tavi'ma rekruhunte azotamofo tamaga kazi-gane, hoga kaziganema oti'na'a olivi zafararena e'i na'an? <sup>12</sup> Nehu'na mago'ane amanage hu'na antahige'noe. Kanti kamama mena'a olivi zafamofo azanku'namoke'ma golire tafentremppima goli masavema tagimanevazi'ana, e'i na'an. <sup>13</sup> Hugenno agra kenona huno, Kagra ama zantamina antahinka kenka osu'nan? huno nantahigege'na, I'o ranimoka ontahi'noe hu'na hu'noe. <sup>14</sup> Anante agra amanage huno hu'ne, ama tare netrena Ra Anumzamo'ma masavema tagino freneznanteno huham-prino asomu huznantege'ne maka ama mopama kegavama hu'nea Ra Anumzamofo eri'za netre mani'na'e.

**5***Hareno vano nehia avontafemofo naneke*

<sup>1</sup> Anante kesga hu'na kogeno mago regazari'naza avontafemo'a mon-afi hareno enevige'na kogeno, <sup>2</sup> ana ankeromo'a anage huno nantahige-ne, Na'a negane? Hige'na nagra amanage hu'na hu'noe, regazarinte avontafe'mofona zaza'amo'a 10 mita higeno, atupa'amo'a 5 mita hu'nea avontafemo hareno vano nehige'na negoe. <sup>3</sup> Hugenno anante agra amanage huno nasami'ne, Ama'i maka mopafima mani'naza vahe'ma zamazeri

havizama hania kazusi zane. Na'ankure kumzufama nesaza vahera mago kaziga ayontafepi kemo'ma hu'nea kante anteno, ama mopafintira maka zamazeri atre vaganereno, havigema hu'za huvempama nehaza vahera mago kaziga avontafepi kemo'ma hu'nea kante anteno, ama mopafintira zamazeri atregahie.<sup>4</sup> Monafi sondia vahe'mofo Ra Anumzamo'a huno, Nagra ana kazusizana huntesugenou kumazufama nesaza vahe nompine, nagri nagifima havigema hu'za huvempama nehaza vahe'mokizmi nompinena ufreno, ana nontamimpi mani'neno, maka nom a ki'naza zafane havenena neno eri vagaregahie.

### *Mago a'mo ekaeka kupi mani'nea naneke*

<sup>5</sup> Ana zama ketogeno'a nagri'enema nanekema nehia ankeromo'a eazamo amanage huno eme nasami'ne, Na'a ne-efi kesga hunka ko. <sup>6</sup> Anage hige'na nagra hu'na, e'i zana na'an? Hu'na antahigogeno amanage huno nasami'ne, ama zana witima erinte'za kna'ama refkoma nehaza ekaeka kukino, (ephah) ama zana mika ama mopafima nemaniza vahe'mokizmi kefo avu'avazane. <sup>7</sup> Ana ekaeka ku'mofona knanentake avaza'a eri anagisga higena koana, ana kupina mago a' mani'negena negogeno, <sup>8</sup> ana ankeromo'a amanage hu'ne, Ama a'mo'a kefo avu'avazamofo hu avame huno mani'ne, nehuno ana ara retufegeno ana ekaeka kupi uramigeno knanentake'ma hu'nea avaza'a erigi'ne. <sup>9</sup> Anante kesga hu'na koana, tare a'tremokea zahopi hareke e'na'e. Ana a'tremokizni zanagekonamo'a tusizankna afi patomofo agekona'agna hu'neankike, ekaeka kupima mani'nea ara, ana ekaeka ku'aga eme azerisga huke vu'na'e. <sup>10</sup> Anante nagri'enema nanekema nehia ankerona antahige'na, iga e'i ekaeka kura erike neva'e? <sup>11</sup> Anagema hu'na antahigogeno'a amanage huno nasami'ne, Sinari moparega mono nom a ome ki'za ante'naku avre'za nevazankino, nom a'ama ome ki vagama retenu'za, ana ekaeka kura trate ome antegahaze.

## 6

### *4'a karisimofo naneke*

<sup>1</sup> Anante kesga hu'na kogeno tare bronsire agonararemokizni amu'nompinti 4'a karisirami ne-ege'na ke'noe. <sup>2</sup> Hagi esera koranke hosi afu'moza karisia rente'za avazu hu'za azageno, haninke hosi afu'mo'za ananteria karisia rente'za avazu hu'za e'naze. <sup>3</sup> Hagi nampa 3a efeke hosi afu'moza karisia rente'za avazu hu'za azageno, efeke hosi afutamimofo zamefira tupri tapri hosi afutamimo'za karisia rente'za avazu hu'za e'naze. Hagi ana maka 4'a hosi afu'mokizmia hankavezamimo'a mareri'ne. <sup>4</sup> Anante nagranema nanekema nehia ankerona antahige'na amanage hu'noe, ranimoka, ama zantamina nazantamine? <sup>5</sup> Hugeno ana ankeromo'a anage huno kenona hu'ne, E'i 4'a monafi avamutamine. Ama ana maka mopama kegavama hu'nea Ra Anumzamofo avuga mani'nazareti, Agri eri'za erinaku atiramiza nevaze. <sup>6</sup> Hagi haninke hosi afumo'za karisia rente'za avazu hu'za noti kaziga vazageno, Efeke hosi afumo'za karisia rente'za avazu hu'za zage fre kaziga vazageno, tupri tapri hosi afumo'za karisia rente'za avazu hu'za sauti kaziga vu'naze. <sup>7</sup> Hagi ana hankavenentake hosi afutamimo'za atirami'zama ne-eza ama mopaf vano hu'za kenaku nona mani soe osu'naze. Ana'ma hazageno'a Ra Anumzamo'a huno, Ome vano huta mopa keho, huno huzmanteg'e'za ana hosi afumo'za ame hu'za vu'naze. <sup>8</sup> Agra kezatino amanage huno nasami'ne, kama

antahio, noti kaziga kokampima vaza hosi afutamimo'za, noti kokamofoma narimpama ahente'noa zana eri ravahe'naze.

### *Josuama kini fetori asenifi antente'naza naneke*

<sup>9</sup> Ra Anumzamo'a amanage huno nasm'i'ne. <sup>10</sup> Kinama ome hu'naza nagara Heldai'ma, Tobija'ma, Jetalama hu'za Babilonitira silvane, golinena eri'za e'nazanki omerinka ana zupage Zefanaia nemofo Josaia nonte vuo. <sup>11</sup> Hagi ana vahe'mo'zama eri'za e'naza silvane golinena erinka kini fetori tro hutenga, ugagota pristi ne' Jehozadaki ne'mofo Josuana kini fetoriira asenifi antaninto. <sup>12</sup> Ana nehunka Monafi sondia vahe'mofo Ra Anumzamo'a amanage hie hunka asamio, ama nera Azanku'nare hu'za agia nehaza nekino, agrama mani'nea kumapintira azanku'narenlo Ra Anumzamofo ra mono nona kigahie. <sup>13</sup> Agra Ra Anumzamofo mono nona kite'no, kini tratera mani'neno kegava huno kinia mani'enige'za ragia amigahaze. Hagi ana trate mani'neno pristi eri'zanena erigahiankino, ana tare eri'zamokea hara ore area osugaha'aniki, fruhuke mago kan-teke vugaha'e. <sup>14</sup> Hagi Heldaiama, Tobijama, Jedaama, Sefanaia nemofo Henikizmi avamezankna huno ana kini fetorimo'a Ra Anumzamofo mono nompi me'nena, vahe'mo'za zamagesa antahi zamigahaze. <sup>15</sup> Hagi afete kumate'ma nemaniza vahe'mo'za ete ete hu'za Ra Anumzamofo mono nona eme kinagenka, nagrikura Monafi sondia vahe'mofo Ra Anumzamo huntegeno, eme nasami'ne hunka kenka antahinka hugahane. Hagi ka-grama Ra Anumzana kagri Anumzamofo kema tamagema hunka amage'ma ante fatgoma hanankeno'a, ama ana zana efore hinkenka kegahane.

## 7

### *Hankavetino havegna agu'e hu'nea naneke*

<sup>1</sup> Hagi Dairusi'ma kinima mani'neno kegavama huno e'neana 4'a kafu evutegeno 9ni ikana Kislevie hu'za nehaza ikamofona 4 kna zupa Ra Anumzamo'a Zekaraia'na amanage huno nasm'i'ne. <sup>2</sup> Hagi Beteli kumate vahem'o'za Ra Anumzamofo avesizanku antahige'za kehogu, Sareza'ma, Regem-melekine, mago'a vahetaminena huzmante'naze. <sup>3</sup> Zamagra e'za Monafi sondia vahe'mofo Ra Anumzamofo nompima eri'zama eneriza kas-nampa vahe'ene pristi vahetaminena amanage hu'za eme zamantahigehaze. Rama'a kafuzagefima zavi krafagema nehuta, ne'zama a'o huta nunamuma hutama e'nonaza huta, 5fu ikampina zavi krafa nehuta ne'zana a'o huta nunamuna huta vugahuno? <sup>4</sup> Anante Monafi sondia vahe'mofo Ra Anumzamo'a amanage huno nasami'ne, <sup>5</sup> Maka ama mopafi vahe'ene pristi vahetaminena amanage hunka zamantahigo, tamagra 70'a kafufima 5fu ikante'ene 7ni ikante'enema ne'zama a'o huta zavi krafa ne-huta, nunamuma hu'nazana tamage huta Nagrite ne'zana a'o huta nunamuna hu'nazafi? <sup>6</sup> Hagi ne'zane tinema ne'nazana tamagra'agu nentahita ne'nazafi? <sup>7</sup> Hagi ama ana nanekea Jerusalemi kumapima knare nomani'zante mani'nazageno, ana tavaonte'ma me'nea kumatmimpine sauti kazigama me'nea mopafi Negevi vahe'mo'zama mani vite'zama mani'nageno'a, Ra Anumzamo'a ko'ma mani'naza kasanampa vahetamimpina huvazino, ama ana nanekea ontamasami'ne? <sup>8</sup> Anante Ra Anumzamo'a amanage huno Zekaraiana asami'ne. <sup>9</sup> Monafi sondia vahe'mofo Ra Anumzamo'a amanage hu'ne, knare huta maka vahe knazana refko nehuta, mago'mota asunku ohunte ahunte nehuta knare avu'ava ohunte

ahunte hiho. <sup>10</sup> Ana nehuta kento a'nene, megusa mofavreramine, rure-gati'ma tamagri'enema emani'naza vahe'ene, zamunte omane vahe'enena knazana zamita zamazeri havizana nosuta, tamagra ramagra ontahi haviza antahi havizana huta tamazeri haviza osiho. <sup>11</sup> Hianagi zamagra ana kema antahizankura zamavaresra nehu'za, zamagu'a eri hankaveti'naze. Ana nanekema antahizankura zamefi hunemi'za, zamagesa renkanire'naze. <sup>12</sup> Monafi sondia vahe'mofo Ra Anumzamo'ma Avamu'afima korapa'ma mani'naza kasnampa vahete'ma atregeno'ma e'nea nanekea zamagu'amo'a havegna huno hankaveti'neankiza ontahi'naze. E'ina hu'negu Monafi sondia vahe'mofo Ra Anumzamo'a tusi'a arimpa ahezmante'ne. <sup>13</sup> Monafi sondia vahe'mofo Ra Anumzamo'a anage hu'ne, Nagrama kema nehuge'za, nagri nanekea ontahi'nazanki'na, zamagrama kema hanage'na, zamagri nanekea ontahigahue huno hu'ne. <sup>14</sup> Ana nehu'na hankro zahomo kagikagi huno kugusopa eri hareankna hu'na zamazeri atrenuge'za, antahiza keza osu'nesaza mopapi umani emanı hugahaze. Ana hanugeno atre'zama vanaza mopamo'a, haviza huno vahe omani ka'ma mopa megahie.

## 8

### *Jerusalem kumapima knare zama esnia zamofo naneke*

<sup>1</sup> Monafi sondia vahe'mofo Ra Anumzamo'a amanage huno hu'ne. <sup>2</sup> Nagra Saionigura tusiza hu'na navesi nentoe. Tamagerfa hu'na navesinente'na, ha' vahe'agura tusi narimpa ahenezmantoe. <sup>3</sup> Hagi Ra Anumzamo'a huno, Nagra ete Saioni vu'na Jerusalemi kuma amu'nompi umani'nugeno, Jerusalemi kumakura hugahuema hu'nea zama avariri fatgo nehuno tamage avu'ava'ma nehia rankumare nehu'za, Monafi sondia vahe'mofo Ra Anumzamofo agonagura, ruotge hu'nea agone hu'za hugahaze. <sup>4</sup> Monafi sondia vahe'mofo Ra Anumzamo'a huno, ete mago'ene ozafa nafamo'zane tavavane'mo'za Jerusalemi kumapina eri tru hu'za azompazamia zamazampina eri'za mani'neza nanekea hugahaze. <sup>5</sup> Hagi ana rankumapina ne'mofa'mo'za avite'neza zokagore'za vano hugahaze. <sup>6</sup> Monafi sondia vahe'mofo Ra Anumzamo'a huno, Anumzamofo naga'ma osi'ama mani'namotarera tusi amuho huramantegahie. Hianagi nagritera amuhoa hunantegahifi? huno Marerisa hihamu'ane Ra Anumzamo'a hie. <sup>7</sup> Monafi sondia vahe'mofo Ra Anumzamo'a huno, vahe'ni'a zage hanati kaziga kokampinti'ene zage fre kaziga kokampintira zamagu vazigahue. <sup>8</sup> Ana vahera nagra zamavare'na esuge'za, Jerusalemi kumapi emanigahaze. Zamagra Nagri vahe manisage'na, Nagra zamagri Anumza mani'ne'na, ruzache osu navu'nava zanteti'ene fatgo navu'nava zanteti'ene hu'na kegava huzmantegahue. <sup>9</sup> Monafi sondia vahe'mofo Ra Anumzamo'a huno, Hihamu'ane Ra Anumzamofo mono noma eri agafama hu'za kiza zupama, kasnampa vahe'mo'zama hu'naza kema antahi'nesaza vahe'mota menina hankavetita mono nona kiho. <sup>10</sup> Kote'ma mono noma ki eri'zama agafama osu'nerera, eri'zana omanegen, eri'zama enerisage'noma atesizmante zagoa omane'negeno, afu'mo'zama eri'zama enerisagenoma tesizmantiesa zagoa omanene. Hagi vahe'mo'a afete kana vano osu'ne. Na'ankure Nagra zamazeri otuge'za ha' vahe'mo'za maka kaziga ot'i'za hara nehazage'za, agra agra ohe ahema hu'zamo'a avite'ne. <sup>11</sup> Hianagi menina osi'ama maniza vahera Nagra kote'ma hu'noa kna navu'navara hu'na narimpa ahe ozmantegahue huno Hihamu'ane Ra Anumzamo'a hu'ne. <sup>12</sup> Na'ankure avimzama krisageno'a knare huno nehage'na, krepimo'za knare hu'za raga

rentegahaze. Ana nehanigeno monafintira ata kora hozafina runtenkeno, mopamo'a fru hugahie. <sup>13</sup> Ama mopafima manigagi'naza vahe'mo'za korapara Judane Israeli vahe'motagura sifana kea huranante'za huhaviza hu'nazanagi, ete tanavre'na asomu huranantegahuanki, koro osuta oti hankanaveti'o. <sup>14</sup> Na'ankure Monafi sondia vahe'mofo Ra Anumzamo'a huno, Ko'ma tamagehe'zama nazeri narimpama ahazage'na narimpam ahezmante'na zamagrira zamazeri haviza hunaku hu'noe. Hanki Nagra antahi'zani'a zahera osugahue. <sup>15</sup> Hianagi menina Jerusalemi kumate vahe'ene Juda kumate vahe'enena knare navu'nava huramante'na, tamazeri so'e hu'za huanki, korora osuta tamarimpa fru huta maniho. <sup>16</sup> Hianagi tamagra amanahu hugahaze, tamagra kema hanazana tamarimpa fru huta tamage kege'za nehuta, keaga trate'ma keagama hanazana, tamage huta fatgo kazigati refko hugahaze. <sup>17</sup> Magomofoma azeri havizama hu nanekea retrora osuta, havigema huno huvempama huzankura tamavesi tamavesia osiho. Ama ana maka zantaminkura tusiza huno nagonete huno Ra Anumzamo'a hu'ne. <sup>18</sup> Monafi sondia vahe'mofo Ra Anumzamo'a nagrite eno amanage huno kea eme nasmi'ne. <sup>19</sup> Monafi sondia vahe'mofo Ra Anumzamo'a amanage hie, 4 ikante'ma, 5fu ikante'ma, 7ni ikante'ma 10ni ikante'ma ne'zama a'oma huta nunamuma nehazazana menina eme vagare. Hagi ana knaramimo'za Juda vahe'motarera ne'zama kreno neneno musemahu knarami fore hugahie. E'ina hu'negu tamage nanekegu'ene arimpa fruma huno mani'zanku tamavesinteho. <sup>20</sup> Hihamu'ane Ra Anumzamo'a amanage hie, Vahe'mo'za ne-enageno ranra kumatmimpima nemaniza vahe'mo'zanena egahaze. <sup>21</sup> Mago rankumapima nemantisaza vahe'mo'za eza, mago rankumapima nemani'naza vahera eme zamatihige'za amanage hugahaze, enketa vuta Ra Anumzamofo avesizankura ome antahinegeta, Hihamu'ane Ra Anumzamo'ma tazama hanigura ome hakamaneno hu'za hugahaze. <sup>22</sup> Anage nehu'za rama'a vahetamine kokankokama hihamu'ane vahe'ma nemaniza vahe'mo'zanena e'za Ra Anumzamofo avesi zankura eme antahinege'za, Hihamu'ane Ra Anumzamofonkura hakegahaze. <sup>23</sup> Monafi sondia vahe'mofo Ra Anumzamo'a huno, e'i ana knafina 10ni'a ru kumateti ru zamageru neranaza vahe'mo'za, mago Jiu nemofo kukena'are azerine'za amanage hugahaze, Tatregeta kagra'ene vamneno. Na'ankure Anumzamo'a tamagranne mani'ne hu'za hazageta antahi'none hu'za hugahaze.

## 9

### *Tava'onte'ma nemaniza vahe'mokizmi kasnampage hu'nea naneke*

<sup>1</sup> Ra Anumzamo'a Hadraki mopafi vaheku'ene Damaskasi kumate vahera keha rezmantne'. Na'ankure maka vahe'mo'zane, maka Israeli vahe'mo'zanena Ra Anumzamofonku zamavua ke'naze. <sup>2</sup> Ra Anumzamo'a Hamati kumate vahe'enena ana huno keha rezmantne'. Tairi vahe'mo'zane Saidoni vahe'mo'zanena ama' antahi'zane vahe mani'nazanagi anazanke huno keha reneznante. <sup>3</sup> Tairi kuma'mo'a hankave vihu kegina hu'ne. Kumapina silva eritru higeno kugusopagna huno marerigeno, golima eritru hu'nea zamo'a hapa kna huno kumapina moriri huno mareri'ne. <sup>4</sup> Hianagi menina Ra Anumzamo'a Tairi kumamofa fenozana eri atre vaganereno, vihu kegina'a ahe fragu vazitresigeno hagerimpinke frena maka zana tevemo teno eri hana hanigeno mopage megahie. <sup>5</sup> Askeloni kumapi vahe'mo'za Tairi kumapima fore'ma hania zama kesu'za, tusi zamagogogu hugahaze. Gaza kumate vahemo'zane,

Ekroni kumate vahe'mo'zanena ana zanke hu'za zamahirahiku hugahaze. Na'ankure amuha'ma nehaza zamo'a haviza hugahie. Gaza kumate kini nera ahe nefrisageno, Askeloni kumapina vahera omanigahaze. <sup>6</sup> Hagi ruregati vahe'mo'za Asdoti kumara emeriza nemanisage'na, Filistia vahe'mo'zama zamavufaga rama nehaza zana eri haviza hugahue. <sup>7</sup> Zamagipintira korana eri netre'na, zamave kampima nago'manetoa zantmima rusima huno'ma me'neana eritregahue. Ana hanuge'za osi'ama mani'naza Filistia naga'mo'za Juda vahe kna hu'za agru hu'neza Anumzamo'na monora hunantegahaze. Ko'ma Jebusi vahe'mo'zama hu'nazaza hu'za Ekronima nemaniza Filistia naga'mo'za nagri vahe'ene eme hagerafiza manigahaze. <sup>8</sup> Nagra mono noni'a kegava hanenkeno, ha' vahe'mokizmi sondia vahe'mo'za vu'za eza osugahaze. Magore huno knama tam'i'zama tamazeri havizama nehaza vahe'mo'za tamazeri havizana osugahaze. Na'ankure menina Nagrani'a navua ante'na kegava huzmantegahue.

*(Luku 19:28-40, Matiu 21:1-11, Maki 11:1-11, Joni 12:2-19)*

<sup>9</sup> Hagi Saioni mofara anage hunka asmio, ko, kagri kinimo'a kagritega ne-eanki, avufa anteramino, donki agumpi manino, ve agaho donkifi ne-e. <sup>10</sup> Nagra Efraemi vahe karisiramina eritre vaganere'na, Jerusalemi vahe'mo'zama hate'ma eri'za vano nehaza hosi afutamina eri haviza huvganere'na, maka ha'ma nehaza ati'zmia eri haviza hugahue. Ana hanugenno agra fru huno'ma mani nomanizamofo naneke nehuno, mago hagerinteti'ma mago hagerinte'ma evigeno, Yufretisi tintetima vuno mopa atumpare'ma evu hanati'nea mopa kegava hugahie.

*Juda vahe'ene Efraemi vahe'enema kinafinti'ma katufe zmante'nia naneke*

<sup>11</sup> Hagi huhagerafi huvempa kema ko'ma koranteti'ma hu'nogu hu'na ti omene kerifima kinama hu'naza kina vahetmia katufe zamantegahue. <sup>12</sup> Amuha'ma nehuta mani'naza kina vahetmina eteta hankave vihu kumapi enke'na, ko'ma atre'naza zamofontera ante agofetu hu'na maka zantmia ete tamamigahue. <sup>13</sup> Na'ankure Judana atima refagagino kreankna nehu'na, Efraemina azeri keveni'agna hugahue. Ana nehu'na Saioni ne'mofavreramina zamazeri bainati kazinkno kna hu'nena, ha' vahe'moma nehiaza hu'na Grisi vahetera ana kazinknona eri verave hugahue. <sup>14</sup> Ra Anumzamo'a vahe'arema efore huno, anagami mani'neno kevema ahe atrenigeno'a kopasina eriankna huno vugahie. Sauti kaziga hagege kokampima kagikagi zaho'ma eriaza huno Hihamu'ane Ra Anumzamo'a ufenkrafa nehuno, zahopi eno hara hugahie. <sup>15</sup> Monafi sondia vahe'mofo Ra Anumzamo'a Agra'a vahera kegava huzmantenige'za, kumi atifinti ha' vahe'zmia hara huzmantenige'za, kumi atifinti ha' vahe'zmia hara huzmante'za hara huzamagateregahaze. Waini tima ne-nea vahe'mo neginagi huno ranke ranke hiaza hu'za hapina ranke ranke hugahaze. Kre sramna vu itamofo renagenteteti koramo'ma aviteno varehi neramiaza huno, ha' vahe'ma zamahesaza koramo'a varehiramigahie. <sup>16</sup> Ana knazupa Ra Anumzana zamagri Anumzamo'a sipisipi kva vahe'mo'za afuzami zamagu'vaziankna huno, Agra'a vahera zamagru'vazigahie. Ana hanige'za zago'amo marerisa havere tro hu'naza avasese'zamo kini fotorite me'neno taperape hiänkna hu'za agri mopafina taperape hu'za remasa hugahaze. <sup>17</sup> Vahe'mo'zama kesazana zamagri konararizmimo'a hentofaza huno knarezantfa hugahie. Ana hanige'za nehazavemo'za witia nene'za knare vahe zoneresageno, mofanemo'za kasefa waini ti nene'za zama-gra'enena knare hu'za zoregahaze.

**10**

<sup>1</sup> Hozagnama esigeno ne'zamo'ma hagesigura Ra Anumzamofo antahigenkeno kora atrenkeno runo. Na'ankure agra ko'ma ru hampona eri fore nehigeno kora nerie. Agra mago'magomofona kora amigeno hozazmimo'a afova tretre huno nehage. <sup>2</sup> Nozmifima mono'ma hunentaza anumzantmimo'za havi antahintahi nezamasamizage'za, zamene vahe'mo'za havige nehazage'za, ava'nama eri rukrahe'ma hu vahe'mo'za havige hu'za ava'na kea eri rukrahe hu'za vahe'mofona zamazeri haviza nehaze. E'ina hazage'za vahe'nimo'za sipisipi kva vahe omanige'za sipisipi afutamimo'za hazagrazankna nehazage'za, ha' vahe'mo'za eme zamazeri haviza nehaze. <sup>3</sup> Sipisipi afu kva vaheku'ene kva vahetaminku'enena tusiza huno narimpa ahe'zamo'a tevereankina, ve mementamina ha' huzmantegahue. Na'ankure Hihamu'ane Ra Anumzamo'a Juda vahetmina, agra'a sipisipi afutmima kegava nehiankna hugahie. Ana nehu'na Juda vahera zamazeri knare zantfa hanuge'za, hapima eri'za vanoma nehaza hosi afukna nehanage'na, <sup>4</sup> ana nagapinti nomofoma renagentete'ma azeri hanaveti havea eri fore nehu'na, zamagripinti seli noma avazuhumpi huno ki azota eri fore nehu'na, zamagripinti ha'ma hu atia eri fore nehu'na, ugagota kva vahetaminena zamazeri fore nehanuge'za, <sup>5</sup> zamagra hihamu'ane ha' vahetami fore hu'za ha' vahe'zmia kama vanoma nehaza hu hapapi zamah'za zamagareti rehampakanegahaze. Na'ankure Ra Anumzamo'a zamagrane mani'neankiza, hosi afu agumpima vanoma nehu'za ha'ma nehaza vahera hara huzmagateregahaze. <sup>6</sup> Nagra Juda nagara zamazeri hankaveneti'na, Josefe nagara zamagu'vazigahue. Nagra ete zamavare'na egahue. Na'ankure Nagra zamagrikura tusiza hu'na nasunkura hunezmantoe. Nagra Ra Anumzana zamagri Anumza mani'noanki'na zavi krafagezmia antahi'na zamaza hugahue. <sup>7</sup> Efraemi naga'mo'za hankave ha' vahe fore nehanageno, zamagu'amo'a waini tima nazageno musema nehiankna hugahie. Mofavre naga'zamimo'za nege'za zamagu'areti hu'za Ra Anumzamofona musena huntegahaze. <sup>8</sup> Nagra hogefinti kezati'nena eme atru hugahaze. Na'ankure Nagra'a zamahora ke'na ete zamavare'noe. Ana hanogu ge'za rama'a vahe fore hu'za kote'ma mani'nazankna vahe fore hugahaze. <sup>9</sup> Avimza avima ru herahe'ma hutreaza hu'na zamazeri mago mago huge'za ru mopafi ru mopafi hu'za umani emanı hugahazanagi, afete moparegama umanine'za zamagesa antahi namigahaze. Ana nehazanki'za zamagra'ene mofavrezminena knare hu'za ofri mani'neza, ete Israeli moperera egahaze. <sup>10</sup> Isipi mopareti'ene Asiria mopareti'enena zamavare'na e'na Giliati mopafine, Lebanoni mopafinena emeri atru hanuge'za mani kankamuna omanetfa hugahie. <sup>11</sup> Hägerimo'ma hiazza huno'ma hazenke zamo'ma kama renkani renigeno'a, Ra Anumzamo'a agra'a ana mopafina rugitagino nevuno, eri arava ahegahie. Ana'ma hanigeno'a Naeli tiramo'a tanenigeno, Asiria vahe'mo'ma avufga rama nehia zana ahe haviza hanigeno, Isipi kinimofo hankavemo'a anante eme vagaregahie. <sup>12</sup> Nagra Ra Anumzamo'na zamazeri hankaveti'nena Nagri nagifi kana vano hugahaze huno Ra Anumzamo'a hu'ne.

**11***Havizama hanaza sipisipi afu kevumofo naneke*

<sup>1</sup> Lebanoni kumamoka kafanka'a anagi'negeno tevemo'a sida zafaka'a teno eri hana hino. <sup>2</sup> Saiprisi zafamota zavi krafa hiho, na'ankure sida

zafamo'za evuramize. Knare'nare zafaramimo'za mopafinke'za masaze. Basanima me'nana oki zafamoka, zavi krafa huo, na'ankure zafa tanopaka'a ahe huti namati hu'naze. <sup>3</sup> Sipisipi afu kva vahetmimo'zama zavi krafagema nehzaza antahio, na'ankure sipisipi afu'ma kegavama nehzaza avonona eri havizantfa nehzageno, kasefa laionimo'za krafage nehzaze. Na'ankure Jodani vahe'mo'zama zamavufaga rama nehzaza zamo'a haviza hie. <sup>4</sup> Ra Anumzana nagri Anumzamo'a amanage hie, Zamaheginaku'ma avame'zama antetereme hu'naza sipisipi afutamina vunka ome kegava huo. <sup>5</sup> Ana sipisipi afutamima tesite'za hegi'za eri'zama vaza vahe'mo'za afu'ma aheli'za zaantero zamarimpamo'a kna osige'za ahiegiza eri'za vu'naze. Hagi ana sipisipi afutmina zagore'ma atre'za zagoma eriza vahe'mo'za hu'za, Ra Anumzamo'a ra agi erisie, na'ankure tagra zago feno vahe fore hune hu'za nehzaze. Hagi sipisipi kva vahe'mo'za ana sipisipigura zamasunkura huozmante'naze. <sup>6</sup> Anahukna hu'na ama mopafi vahekura nasunkura osugahue, huno Ra Anumzamo'a nehie. Nagra zamatrenuge'za zamagra zamagra ohefri ahefri nehanageno, zamagri'a kini ne'mo'enena zamahe frigahie. Nagra zamaza hu'na ozamavaresuge'za zamahe hana hanageno mopazmimo'a ka'ma mopa megahie. <sup>7</sup> Ana hazage'na zamahenaku'ma huhamprinte'neza, knazama zami'za zamazeri havizama nehzaza sipisipi afu kevumofo kva vahe nagra mani'noe. Ana nehu'na sipisipi kva vahe'mo'zama eneriza azompa fare erite'na, mago azompagura Asunku zane hu'na agia nente'na, mago azompagura Erimago hanune hu'na agi'a antemi'noe. <sup>8</sup> Mago ikamofo agu'afi 3'a sipisipi kva vahetmina erizazmifintira zamazeri tre'noe. Na'ankure nagra ana sipisipi kva vahetaminkura mago narimpa huozmantoge'za zamagra zamagote'nante'naze. <sup>9</sup> Ana hazage'na amanage hu'na zamasmi'noe, Nagra sipisipi kva vahera mani'na tamagrira kegava osugahue. Iza'oma frinaku'ma hanimo'a frisigeno, ahenaku'ma hanaza su'ana ahiegahaze. Hagi mani'nazama'amo'za zamagra zamagra ohe ahe hu'za zamavufaga traga hu'za negahaze. <sup>10</sup> Anante Asunkure hu'nama agima antemi'noa azompa amu'nompinti ruhanentagi'na, kokankoka vahetaminema huhagerafi huvempagema hu'noana anante ruhantagi'noe. <sup>11</sup> Zamagri'enema huhagerafi huvempagema hu'noana e'i ana knare eme vagare'ne. Hagi knazampima mani'naza sipisipi afutamimo'zama ana zama hugezama nege'za, Ra Anumzamo'a amama hia avu'ava zampi hvazino naneke neratasamie hu'za keza antahiza hu'naze. <sup>12</sup> Anante amanage hu'na zamasami'noe, Tamagrama antahisageno knare'ma hanigeta mizani'a namaho, hagi knare'ma osanigeta azeriho. Anage huge'za kna'a erinte'za kete'za 30'a silva zago nami'naze. (Exodus-Uti 21:32) <sup>13</sup> Ra Anumzamo'a amanage huno nasami'ne, Ama marerisa zagoma nagri'ma mizama saza zagoa erinka mopa kavoma tro'ma nehia ne' matevunka amio. Anage hige'na ana zagoa eri'na mono nontega vu'na mopa kavoma tro'ma nehia ne' ome mate vumi'noe. <sup>14</sup> Ana hute'na Juda vahe'ene Israeli vahe'mo'zama koganama huza magopima mani'naza zana ama ruhantague hu'na nehu'na, Erimago hanune hu'nama agima ante'noa azompa eri'na amu'nompinti ruhantagi'noe. <sup>15</sup> Anante Ra Anumzamo'a amanage huno nasami'ne, Ete mago'ene neginagi sipisipi kva vahe'mofo eriza zantamina erio. <sup>16</sup> Hagi keho, merina sipisipi kva vahera kefo sipisipi afu kva vahe azeri oti'za nehue. Ana sipisipi afu kva vahe'mo'a hazenkema eri'nesia sipisipi afu'e, anenta sipisipi afu'e, krima eri'nesaza sipisipi afutamina kegava nosuno, knare'ma hu'za mani'naza sipisipi afutaminena ne'zana ozamigahie. Anara osugosianki, afovage sipisipi afutaminke ahiegino neno

eri hana nehuno agigo azanko'age atregahie. <sup>17</sup> E'inahu kefo sipisipi afu kva vahe'mo'a ra hazenkefi ufregahianki kva hino. Bainati kazinteti aheza azana runekafri'za, tamaga kaziga avurga repro hugahaze.

## 12

### *Jerusalemi kumapi vahe ha' huzmante'naza naneke*

<sup>1</sup> Ra Anumzamo'ma Israeli vaheku hu'nea naneke. Monama eri rutareno tro hunenteno, mopamofo tra'ama tro hunenteno, vahe'ma tro huno avamu'ma agu'afima ante'nea Ra Anumzamo'a amanage hie, <sup>2</sup> Nagra Jerusalemi kumara azeri retro hanugenaka tinkna hu'nena, Jerusalemi kuma'mofoma megag'i'nea kumapi vahe'mo'zama sondia vahe'zmima huzmantesage'za Jerusalemi kuma'enae Juda kuma'enema ha'ma huzmanteku'ma esanu'za neginagi eme hugahaze. <sup>3</sup> Ana knarera Jerusalemi kumara mago knanentake have erise'nugeno, iza'o ana havema erisgama hunaku hanimo'a tusi hazenke erigahie. Ana nehanige'za Jerusalemi kumara ha' hunte'naku maka kokankoka vahe'mo'za emeri atru hugahaze. <sup>4</sup> Ra Anumzamo'a huno, ana knarera maka hosi afutamina zamazeri koro nehu'na, ana hosi afutamimofo agumpima vanoma nehaza vahetmina zamazeri savri hugahue. Juda vahetmina navunte'na kegava hu'nena ha' vahetamimofo hosi afutamina zamavurga eri asu hugahue. <sup>5</sup> Juda mopafi kva vahe'mo'za amanage hu'za zamagu'afina antahigahaze, Jerusalemi kumapi vahe'mo'za Monafi sondia vahe'mofo Ra Anumzana zamagri Anumzamo hankavea nezmie hu'za hugahaze. <sup>6</sup> E'i ana knarera Juda vhahera zamazeri tevenefa kna hanenkeno teve hanavazi'negeno akrukru hiankna huge, afe tagintageno witi hoza ruhagna huno tefanane hiankna hugahaze. Tava'ozmire'ma nemaniza mopafi vhahera tevemo ruhagana hiankna huza zamazeri haviza hu vagaregahaze. Hianagi Jerusalemi kumapima nemaniza vahe'mo'za mago zankura antri osu' knare hu'za manigahaze. <sup>7</sup> Hagi Ra Anumzamo'a esera Juda vahe zamagura vasinigeno, Deviti nagamo'ma ra agima eneria zamo'ene, Jerusalemi kumapima nemaniza vahe'mo'zama ra zamagima e'neriza zamo'enena Juda nagara zamagate'oregosie. <sup>8</sup> E'i ana knarera Ra Anumzamo'a Jerusalemi kumapi vhahera zamahokegahie. Hagi amu'nozmifima hankavezmima omene'nesia vahe'mo'za kini ne' Deviti kna hu'za hankave vahe nemanisageno, kini ne' Deviti naga'mo'za Anumzankna nehu'za, Ra Anumzamofo ankeromo vugote zmanteno viankna hugahaze. <sup>9</sup> Hagi ana knafina Jerusalemi kumapi vahe'ma ha'ma renezmantaza mopafi vhahera agafa hu'na zamahe vagaregahue.

### *Krugru zotareti are'naza vahete zavi'tesaza naneke*

<sup>10</sup> Ana hute'na Deviti nagate'ene Jerusalemi kumapi nemaniza vahete'enena asunku'ma nehuno nunamuma hu avamu tagitregahue. Ana hanuge'za karugru kevema nare'naza ne' nagri nenage'za, magoke'ma ante'nea mofavre'ama fri'negeno nerera afa'ma tusi zavi krafa hiankna huza tusi zavi ategahaze. <sup>11</sup> Ana knare'ma Jerusalemi kumapi vahe'mo'za zamasunku'ma hu'za zavima atesazana, Megido agupofima Hadad-Rimoninku'ma zavi'ma ate'nazankna hu'za zavira ategahaze. <sup>12</sup> Ana maka Israeli vahe kevumo'za zavira ategahazankino, mago mago naga nofimo'a agra'a eri atru huno zavira atetere hugahie. A'nemo'zane vene'nemo'zanena arure arure zavira netesageno, Neteni naga'mo'za arure zavira netesage'za, Deviti naga'mo'zanena arure zavira ategahaze. <sup>13</sup> Levi naga'mo'za arure zavira atesageno, a'nezamimo'za arure zavira

netesageno, Simei naga'mo'za arure zavira netesageno a'nezmimo'za rure zavira ategahaze. <sup>14</sup> Mago'mago naga nofi'ma mani'naza naga'mo'zanena ana hu'za vene'ne'amo'za arure zavira netesageno zamanarafehe'za arure zavira ategahaze.

## 13

### *Kumi'ma sese hania kampui timofo naneke*

<sup>1</sup> Ana knarera Deviti nagamofo kumi'ene, Jerusalemima nemariza vahe'mokizmi kumi'ene, agru osu avu'ava zanema sese huno zamazeri agruma hania tina anagi tregahie. <sup>2</sup> Hihamu'ane Ra Anumzamo'a huno, ana knarera zamazanteti antre'za tro hunte'naza anumzantmimofo zamagia ana mopafintira eri atre vagarenugeno, ana zamagiraminkura zamage kanigahaze. Ana nehu'na ana mopafintira maka havige kasanampa vahetmina zamazeri atregahue. Ana nehu'na agru osu avamutaminena ana mopafintira zamahenati atregahue. <sup>3</sup> Ana hanugenno mago'mo'ma kasnampa kema hanimofona, agri nererake nefakea amanage huke asamigahe'e, kagra frigahane, na'ankure kagra Ra Anumzamofo agifi havige kasanampa ke nehane. Hagi ana kasanampa kema huno vanigeno'a nererake nefakea kazinteti ahe fri'nakeno frigahie. <sup>4</sup> Ana knarera kasanampa vahe'mo'za ava'nagna zama nege'za huama'ma nehaza zankura zamagazegu nehu'za mago'anena kasanampa vahe'mo'zama nentaniza azokake kukena hu'za vhahera revatga osugahaze. <sup>5</sup> Hianagi agra anage hugahie, nagra kasanampa vhahera omanni'noanki hozama ante vahe mani'noe. Osi'ma mani'nogeno'a kazokazo eri'za vahe zagore natrazage'na nagra hoza erizanke eri'na e'noane. <sup>6</sup> Ana hanige'za mago'a vahe'mo'za agrira antahige'za, kamimizafina na'amo kahe'ne? hu'zama antahigesageno'a anage hugahie, ronenimokizmi nonte vu'noge'za nahe'naza zamo'e huno hugahie. <sup>7</sup> Otio, bainati kazimoka, tavaonire'ma oti'nea sipisipi afute kva nera amasagio, huno Hihamu'ane Ra Anumzamo'a hu'ne. Sipisipi afute kva nera ahe frigeno sipisipi afu'aramimo'za panani hu'za nefre'nagenka ne'onese sipisipi nagara hara huzmantagahue. <sup>8</sup> Hagi maka mopafina 3'a kevu vahepingintira tare kevu vahe'mo'za fri vagaregahaze. Hianagi magoke kevu vaheke manigahaze, huno Ra Anumzamo'a hu'ne. <sup>9</sup> Hagi mago kevu vahe'ma mani'naza vhahera tevefi zamavare'na ufre'na, tevefima silvama kreno eri agru hiankna nehu'na, golima tevefi kreno'ma eri zogiankna hugahue. Ana hanuge'za zamagra nagri nagi ahe'za nunamuna nehanage'na nunamuzmia antahi'na nona huzmante'na, Nagri vahe mani'naze hu'na nehanuge'za, zamagra hu'za Ra Anumzamo'a, tagri Anumza mani'ne hu'za hugahaze.

## 14

### *Ra Anumzamo'ma esia knamofo naneke*

<sup>1</sup> Keho, Ra Anumzamofo kna neankino, Jerusalemi vhahera arohu eme tamare'za feno zantmia negesage'za refko hu'za erigahaze. <sup>2</sup> Na'ankure maka kokankoka vhahera zamavare atru hanuge'za Jerusalemi kumapi vhahera hara eme huzmante'za kumazmia e'neriza, arohu zamare'za maka'zazmia e'neriza a'naneramina zamazeri haviza hugahaze. Vahetmina amu'nompinti refko hu'za kina huzmante'za zamavare'za vanageno, zamatre'zama vanaza vahe'mo'za eri havizama hutre'zama vanaza kumapi manigahaze. <sup>3</sup> Ana huteno, ko'ma ha'ma huzmante'nea knafima hu'neaza huno Ra Anumzamo'a kokankoka vhahera hara huzmanteno vano hugahie. <sup>4</sup> E'i ana knarera Ra Anumzamo'a Jerusalemi kumamofona

zage hanati kaziga Olivi agonare agia eme reno oti'nigeno, Olivi agonomo'aamu'nompinti ankariseno zage hanati kaziga vanigeno, zage fre kaziga vanigeno, mago agupo efore hugahie. Hagi mago kaziga agonomo'a noti kaziga vanigeno, mago kaziga agonomo'a sauti kaziga vugahie. <sup>5</sup> Ama ana agupofi korora freta vugahaze, na'ankure ama ana agupomo'a Azeli uhanati'ne. Juda kini ne' Uzia knafima imima erige'zama fre'nazankna huta korora fregahaze. Ana'ma nehanageno'a Ra Anumzana nagri Anumzamo'a ruotge'ma hu'naza naga'ane egahie. <sup>6</sup> E'i ana knarerera masa forera nosanigeno, zasira omanenkeno, aisia oramigosie. <sup>7</sup> Ana knamo'a ruzahu knarafa fore hugahiankino, ana zama fore'ma haniana Ra Anumzamoke antahino keno hu'ne. Feru'ene kenage'enena omanegosiankino kinagama senigeno'a, masamo'a hanina osugosianski anante megahie. <sup>8</sup> E'i ana knarerera vahe'ma asimu'ma ami timo'a Jerusalemi kumapinti hanatiteno amu'nompinti refko huno mago kaziga timo'a Fri Hagerima me'nerega vinkeno mago kaziga timo'a Mediterenia Hagerima me'nerega vugahiankino zage knafine ko knafinena ontane evuva evuva hugahie. <sup>9</sup> Ana hanigeno Ra Anumzamo'a maka mopafi vahetera kinia manigahie. E'i ana knarerera magoke Anumza maninkeno, magoke agige aheza monora huntegahaze. <sup>10</sup> Geba moparetima vuno Jerusalemi kumamofona sauti kaziga Rimonima uhanati'niana, ana maka mopamo'a agupo mopa segahie. Hianagi Jerusalemi kuma'mo'a agonan mesa huno me'nenige'za vahe'ma anampima mani'nazana, Benzameni kafantetira vuno Kona kafante vuteno, Hananeli Zaza nonte uhanatino vuteno, kini ne'mofo wainima regatati'ma nehzare vugahie. <sup>11</sup> Ana kumapina vahera mani vitesageno ru'enena Jerusalemi kumara hara eme hu'za eri havizana osnageno, knare huno mevava hugahie. <sup>12</sup> Hagi maka kokankoka vahe'mo'zama Jerusalemi kumapi vahe'ma ha'ma eme huzmante'naza vahetega Ra Anumzamo'a kefo kri atresigeno eme zamazeri haviza hugahiankino, oti'za mani'nenageno zamavufagamo'a negasrinigeno, zamavu kerifina zamavurgamo'a negasrinigeno, zamagikampina zamagefunamo'a ana zanke huno kasrigahie. <sup>13</sup> E'i ana knarerera Ra Anumzamo'a zamazeri zamagogofena zamahirahiku nehu'za zamagra zamagra zamazankano hara hugahaze. <sup>14</sup> Juda vahe'mo'zanena Jerusalemi kumapi vu'za hara ome hugahaze. Jerusalemi kuma tavaonte'ma megagi'nea kumatamimpintira fenozantmina eri atru hugahazankino, goline, silvane, kukenanena rama'a eritru hugahaze. <sup>15</sup> Hagi ha've'hokizmi seli nonkumapima mani'naza hosi afutaminte'ene, miuli donki afutaminte'ene, kemoli afutaminte'ene, donki afutaminte'ene, maka bulimakao afu'taminte'ene anahu kna kefo krimo egahie. <sup>16</sup> Ana'ma hutesige'za, Jerusalemi vahe'ma ha'ma eme huzmantesaza vahe'ma, ana krimo'ma zamahe ofri'nige'za mani'naza vahe'mo'za, mago mago kafura Jerusalemi kumate mareri'za Kini ne' Monafi sondia vahe'mofo Ra Anumzana monora ome hunente'za, Anumzamo'ma zamavareno'ma e'nea zanku'ma fugagi nompima mani'nezama nezama kre'za nene'za musema nehaza knaraminkura musena eme hugahaze. <sup>17</sup> Hagi ama mopalinti'ma ina nagamo'zo Jerusalemima mareriza Kini ne', Monafi sondia vahe'mofo Ra Anumzamofoma mono'ma ome huontesaza vahe'mofontera ko'mo'a ruontegahie. <sup>18</sup> Hagi ka'ma kokampima Anumzamo'ma zamavareno'ma e'nea zanku'ma musema nehaza knare'ma, Isipi vahe'mo'zama zamagranema mareri'za musenkasema osnazana, Ra Anumzamo'a ruga'a vahete'ma hu'neaza huno kora atrenigeno zamagrriteria runontesigeno, kefo krima atregeno ruga'a vahe'ma zamazeri havizama hu'neankna hugahie.

19 Hagi ne'zama kreza nene'za seli nompima mani'za e'naza knagu'ma antahimi'za musenkasema nehaza knare'ma, Isipi vahe'ene ruga'a mopafi vahe'mo'zanema mareriza musenkasema osanaza vahera anahu knaza zaminino zamazeri haviza hugahie. <sup>20</sup> Ana knarera hosi afu'mofo anankempima rente'naza berotera, Ra Anumzamofontera ruotge hu'ne hu'za krentegahaze. Hagi kresramna vu itamofo avugama me'nea zuomparamimo'ma ruotge'ma hu'neaza huno Ra Anumzamofo nompima nezama negraza kavoramimo'enena ruotge hugahie. <sup>21</sup> Ana maka ne'zama kre'za nenaza kavoramima Jerusalemi kumapine, Juda mopafinema me'neana, Monafi sondia vahe'mofo Ra Anumzamofontera ruotge hugahie. Iza'o mono'ma hunaku'ma esia vahe'mo'a, amne ama ana kavoramina erino kresramnamava vania ne'zana kreno negahie. Hagi ana knarera Monafi sondia vahe'mofo Ra Anumzamofo nompina zagore'ma keonke'zama atre vahera omanigahie.

## Malakai Malakai Avontafere

### *Ra Anumzamo'ma Israeli vahe avesizmante'nea zamofo naneke*

<sup>1</sup> Ama'i nanekea Ra Anumzamo'a kasnampa ne' Malakaiampi huvazino Israeli vahe zamasmi'nea naneke, <sup>2</sup> Ra Anumzamo'a uno, Nagra navesi neramantoe. Hianagi tamagra amanage hutma nantahinegaze, Kagra inankna kazigati tavesia nerantane? Anagema hazageno'a, Ra Anumzamo'a anage hu'ne, Jekopu'a Iso negna mani'neanagi, nagra Jekopuna navesi ante'noe. (Rom 9:13) <sup>3</sup> Hianagi Isona navresra hunente'na, agona kokama erisantima hare'nea kokana eri hagage hugeno, hagage koka me'negeno, ana kokampina afi kraramimo avite'ne. <sup>4</sup> Idomu vahe'mo'za amanage hugahaze, tazeri haviza hazageta havizantfa hu'nonanagi, ete vuta nonkumatia omeri so'e huta kigahune. Hianagi Monafi sondia vahe'mofo Ra Anumzamo'a uno, nonkumara tro hu'za manigahazanagi, Nagra ana nonkumazmia eri tagna taganu vazitrenugeno, ana mopagura kefo avu'avazamo avite'nea mope hu'za nehu'za, anampima nemaniza vahekura, Ra Anumzamo arimpa ahezmante vava nehia vahere hu'za hugahaze. <sup>5</sup> Tamagra'a tamavufinti negeta amanage huta hugahaze, Ra Anumzamofo hihamu'amo'a rankrerfa hu'neankino, Israeli vahe mopa atupa agatereno vuno eno hu'ne huta hugahaze.

### *Knare osu'nea zantamima Kresramanama vu zamofo naneke*

<sup>6</sup> Monafi sondia vahe'mofo Ra Anumzamo'a pristi vahetaminkura amanage hie, ne'mofavremo'a nefana antahimino kesga nehuno ke'a antahinemigeno, eri'za vahe'mo'a kva'amofona kesga uno ke'a antahinemie. Hanki Nagrikura huta nafatimo'e nehuta, kvatimo'e nehaze. Hianagi nahigeta nagesga nehuta keni'a nontahize? uno Monafi sondia vahe'mofo Ra Anumzamo'a hu'ne. Hianagi tamagra huta, inankna huta Kagri kagia eri haviza nehune? huta nehaze. <sup>7</sup> Tamagra agru osu ne'za erita kre sramana vu itanirera Kresramana nevaze. Hianagi tamagra amanage nehaze, inankna huta kagri kagia eri pehana nehune? huta nantahinegaze. Ra Anumzamofo ita kehenkami netrone huta nehuta, tamagra ana ita keamane zankna nehaze. <sup>8</sup> Avuma asuhu afu'ma avreta nagrite'ma ofama eme kre sramana vanazana, e'i knare avu'avaza hugahazafi? Agia azamo'ma haviza huge, kri erige'ma hu'nesia afu'ma kre sramanama vanazana, e'i knare avu'avaza hugahazafi? E'ina'ma hu'nenia afura avrenka gavana nera ome aminenka ko, agra musena hugantegahifi? uno Monafi sondia vahe'mofo Ra Anumzamo'a hu'ne. <sup>9</sup> Hagi menina Anumzamofo asunku zankura pristi vahe'mota antahigeho. E'ina ofama tamagra tamazanuti'ma hanaza zana Anumzamo'a negeno musena hugahifi? uno Monafi sondia vahe'mofo Ra Anumzamo'a hu'ne. <sup>10</sup> Hagi mago'mo'ma mono no kafama erigisigeta knare osu ofama Kresramanama nevaza zama eme Kresramanama ovanazana, e'i knare hugahie. Nagra tamagrikura musena hunoramantoanki'na, ofama hanazana musena hu'na antahi oramigahue, uno Monafi sondia vahe'mofo Ra Anumzamo'a hu'ne. <sup>11</sup> Zage hanati kazigati evuno zage fre kazigama mani'naza vahepin, nagri nagimo'a marerigahie. Hagi nagri nagire maka kaziga mananentake'za insensine agru ofanena hugahaze. Na'ankure nagri nagimo'a kokankoka vahetera

marerigahie, huno Ra Anumzana Monafi sondia vahe'mofo Anumzamo'a hu'ne. <sup>12</sup> Hianagi tamagra Nagri Kresramana vu ita keamne zankna nehuta, knare osu zana erita Kresramana vu itarera eme ofa nehuta kresramna vu itani'a eri pehana hu'naze. <sup>13</sup> Tamagra amanage nehaze, Ra Anumzama amage'ma ante zamo'a tusi amuho hu'ne huta nehuta, kasegeni'ama amage'ma ante'zankura tamagona remaku hu nagamunetraze, huno Monafi sondia vahe'mofo Ra Anumzamo'a hu'ne. Musufasege, agaza haviza huge, kri erige'ma hu'nenia afu'ma ofama erita eme Nagrite'ma nehzana Nagra ana ofatamirera musena nehufi? huno Ra Anumzamo'a hu'ne. <sup>14</sup> Hagi iza'o knare ve sipisipi afu ofa hugahue huno'ma huteno, agaza haviza huge kri erige'ma hu'nenia sipisipi afu'ma eme ofama Ra Anumzamofonte'ma hanimo'a, kazusifi manigahie. Na'ankure Nagra ra kini ne' manugenoo kokankoka vahe'mo'za Nagri nagigura koro nehaza ne' mani'noe, huno Monafi sondia vahe'mofo Ra Anumzamo'a hu'ne.

## 2

### *Pristi vaheku koro ke hunte'nea naneke*

<sup>1</sup> Hagi Ra Anumzamo'a huno, Pristi vahe'mota antahihi, ama'i tama-grama amage'ma antesaza kasege. <sup>2</sup> Hagi tamagra tamagu'areti huta nagi'a ahentesga hiho. Hagi ana'ma osana zana, Monafi sondia vahe'mofo Ra Anumzamo'a huno, asomu'ma eri'naza zantamina eri haviza hugahue. Tamage Nagra ko kazusi huramante'noe, na'ankure tamagra tamagu'aretila huta keni'a antahita novaririze. <sup>3</sup> Tamagripinti'ma fore hu'naza mofavr-eramina kna zami'na zamazeri haviza nehu'na, tamagrama ofa Kresramana vunaku'ma eme ahegisaza ofa afumofo arifa eri'na tamavugosafina rehame hu'na freneramante'na, tamazeri matevanugeta afu arimpama hute'za arifa'ama eri'za ome netrazafi umanigahaze. <sup>4</sup> E'ina hanugeta Nagriku ama kasegea atregeno e'ne huta keta antahita nehanageno, Livae nagate'ma huhagerafi huvempa kema hu'noa kemo'a meno vugahie, huno Monafi sondia vahe'mofo Ra Anumzamo'a hu'ne. <sup>5</sup> Livae vahe'enema huhagerafi huvempagema hu'noana, asimu'ma erino mani ke'ne, arimpa fruma huno mani ke ami'noe. Nagri'ma koro'ma hunanteno, nagoraga'ama mani huhagerafi huvempage amugenoo agra Nagri nagorga koro hunanteno mani'ne. <sup>6</sup> Agrira tamage nanekemo agipina me'negeno, mago havige nanekea osu'ne. Agra Nagri'ene arimpa fru zampine fatgo avu'ava zampine nevuno, kumi avu'ava zampintira rama'a vahe zamazeri rukrahe hu'ne. <sup>7</sup> Hagi pristi vahe'mo'za vahe'ma zamaza hanage'za Anumzamo'nama nage'za antahi'zama hanaza vahe mani'naze. Ana hu'negu vahe'mo'zama knare antahi'zama erinaku'ma hanu'za zamagrite vanage'za rempi huzamigahaze. Na'ankure pristi vahera Monafi sondia vahe'mofo Ra Anumzamofo kema erino vuno eno'ma hu vahe mani'naze. <sup>8</sup> Hianagi pristi vahe'mota Anumzamo'na kana atreta hazanegraze. Rama'a vahe tamagra antahintahia zamizage'za kumipina trakara hu'naze. Livae vahe'enema huhagerafi'noa huvempa kea ru hantagi'naze, huno Monafi sondia vahe'mofo Ra Anumzamo'a hu'ne. <sup>9</sup> Tamagra Nagri kea amagera nonteta, veamokizmima Nagri kema rempima hunezamita mago'amofona masavenke hunezamita, mago'amokizmia ha'renezmantaze. Ana hu'negu Israeli vahe'mo'za tamefi huramigahaze.

### *Mani fatgoma huno manizamofo naneke*

<sup>10</sup> Maka vahemota antahita ketama hanunana magoke Nerafa'a mani'ne. Ana hu'neankino Agrake'za Anumzana mani'neno, mika vahera tro hurrante'ne. Hagi nahigeta hara ore are nehuta, Anumzamo'ma tafaha'inema huhagerafi hvempagema hu'neana ruha'nentagune? <sup>11</sup> Juda vahem'o'za zamentintia atre'za hazagrazageno, kasrino hi'mnama vu'nea avu'ava zana Israeli mopafine Jerusalemi kumapinena hu'naze. Hagi Juda venenemo'za kaza osu havi anumzante'ma mono'ma hunentaza a'neramina ara eri'za Ra Anumzamofo mono nona eri pehana hu'naze. <sup>12</sup> Ra Anumzamo'a Israeli vahepinti'ma iza'o ana avu'ava'ma nehia vahem'e, ana avu'ava'ma nehuno ofama erino Monafi sondia vahem'ofo Ra Anumzamofonte'ma esia vahera ahe fanane hugahie. (Jen-Agafa 2:18-25) <sup>13</sup> Hagi ana nehuta mago zama nehzana tamagra amana nehzaze, Ra Anumzamofo Kresrama vu ita zavi krafage nehuta tamavunuteti repasupa negita, kragira neraze. Na'ankure ofama eme nehaza ofagura musena huno e'norie. <sup>14</sup> Hianagi tamagra agenoka huta, nahigeno Anumzamo'a antahinoramie? hutama nehzana, na'ankure Ra Anumzamo'ma neramagegetama nehzavema manineta hvempa huta eri'naza a'enena mani fatgo huta nomanize. <sup>15</sup> Anumzamo'a tanagrira vene a'enena trohu tanantegeta, arave huta magoke tanavufga huta mani'na'e. Amega tanavufgare'ene avamupine tanagra Agri su'a mani'na'e. Hagi Agra naza tanagripintira eri'za nehie? Tanagripinti'ma fore'ma hanaza mofavreramimo'ma Agri'ma koroma hunte'za agoraga'ama mani zanku ave'nesie. E'igu kagu'a kegava hunenka nehzavema mani'nenka eri'nana aka'are mani fatgo huo. <sup>16</sup> Na'ankure aravema atane zankura tusiza huno nevresra nehie huno Ra Anumzana Israeli vahem Anumzamo'a hu'ne. A'ma netranana, nomani'zama'a azeri amuho nehunka, tusi'a ataza nemine, huno Monafi sondia vahem'ofo Ra Anumzamo'a hu'ne. E'igu kagu'a kegava hu'eneka, aka'are mani fatgo hunka manio. <sup>17</sup> Tamagra rama'a naneke huta Anumzamofona azeri avesra nehzaze. Nehuta inankna huta azeri avesra nehune? huta agenoka nehzaze. Kefo avu'ava'ma nehaza vahemota huta, Ra Anumzamofo avurera tagra knare hu'nonankino, Agra muse hunerante hutama nehaza kemo'a, Ra Anumzamofona azeri avesra nehigeta, iga fatgo huno'ma refkoma nehia Anumzana mani'ne? huta agenoka nehzaze.

### 3

#### *Henkama fore'ma hania zamofo naneke*

<sup>1</sup> Hagi antahihi, Nagri nanekema erino vania kato vaheni'a huntoankino agra vugoteno nevuno, kama vanua kana retro hugahie. Ana hanigeno, tamagrama nehakaza Ra Anumzamo'a antri hanazaza huno mono nom'a're egahie. Huhagerafi hvempagema huama'ma hania kato neku'ma nehakaza ne'mo'a tamage huno egahie, huno Monafi sondia vahem'ofo Ra Anumzamo'a hu'ne. <sup>2</sup> Hianagi Agrama esanigeno'a, iza knarera huno ana knarera otigahie? Iza knarera hu'enenimo ot'i'nenora kegahie? Na'ankure Agra aenima krefizo huno'ma azeri agruma nehia teve nefakna huge, pehenage kukanama sese huno azeri agruma nehia sopegnna huno mani'ne. <sup>3</sup> Agrama eri'zama erisiana, tevefima silvama kreno eri agruma nehianknna huno, Livae vahera zamazeri agru hanige'za, agrunenteake goline silvagna hu'ne'za Ra Anumzamofontera fatgo avu'ava hu'za ofa hugahaze. <sup>4</sup> Ana hanage'za, ko'ma evu'nea knaramimpine kafuramimpinema hu'naza ofama antahizami'nea kna huno Ra Anumzamo'a Juda vahem'e Jerusalemi vahemokizmi ofa antahi zamigahie. <sup>5</sup> Ana knarera Nagra erava'o hu'na

keagare tamavrente'na keaga huramantegahue. Avuatga vahe'ene savri hu'za monko avu'avazama hu'zama vanoma nehaza vahe'ene, zamagi'ari vahe'enena Nagra ame hu'na keagare zamavarente'na keaga huzmantegahue. Hagi iza'o eri'za vahe'ama zagoma atesinte so'ema nosuno, kento a'nene, megusa mofavreramima zamazeri haviza nehuno, ruregati'ma emani vahe'enema zamazeri havizama nehia vahe'ene koroma hunante'za nagorgama nomaniza vahe'enena Nagra keaga huzmantegahue. Na'ankure ama ana vahe'mo'za Nagrira korora hunante'za nagoraga'a nomanize, huno Monafi sondia vahe'mofo Ra Anumzamo'a hu'ne.

### *Vahe'mo'ma Anumzamofo zama musufama nesea naneke*

<sup>6</sup> Nagra Ra Anumzana ruzahe osu Anumza mani'noe. E'ina agafare Jekopu mofavreramimota tamazeri haviza osugeta fananea osu'naze. <sup>7</sup> Tamafahé'mofo knareti'ma e'neana, kasegeni'a kehenkami netreta ovariri'naze. Menina ete rukrahe huta nagrite enkena, Nagra ete rukrahe huna tamagrite vaneno, huno Monafi sondia vahe'mofo Ra Anumzamo'a hu'ne. Hianagi tamagra nagenoka huta, inankna huta tagra rukrahera huta egahune? huta nehaze. <sup>8</sup> Vahe'mo'a Anumzamofo zantamina amane musufa segahifi? Hianagi Anumzamo'na zantamina tamagra musufa nesaze. Hianagi tamagra huta, inankna huta Anumzamofo zana musufa nesone? Taitine ofane tamagra musufa nesaze. <sup>9</sup> Tamagra ana maka'mota kazusifi mani'naze, na'ankure tamagra maka ama mopafima mani'naza vahe'mota Nagri'za musufa nesaze. <sup>10</sup> Hagi maka'zama refkoma nehanageno 10ni'ma hania kevua erita ne'zama nentazafi ome antenkeno nezamo'a aviteno mono nonifina meno. Ana nehuta menina renaheta keho, zahoma eri kana monafintira Nagra eri anagi'na tusi'a asomura eri tagitresugenonontamifina fenomo'ma aviteno varehiramina fenoma ante kankamunkura hakegahaze huno Monafi sondia vahe'mofo Ra Anumzamo'a hu'ne. <sup>11</sup> Hagi anama hanage'na hozatamia kegava huramante'nugeno havi kafamo'za zafa ragatamia neza eri hana nosanageno, waini zafamo'a ragama rente'nuno'a zahufafina havizana huno hariri huoramigahie, huno Monafi sondia vahe'mofo Ra Anumzamo'a hu'ne. <sup>12</sup> Ana hanige'za maka kokankoka vahe'mo'za asomu'ene nemaniza vhahere hu'za hugahaze. Na'ankure mopatmimo'a hentofaza hu'ne huno Monafi sondia vahe'mofo Ra Anumzamo'a hu'ne. <sup>13</sup> Tamagra hankave kege huta Nagrira nazeri haviza nehaze huno Ra Anumzamo'a hu'ne. Hianagi tamagra huta, tagra inankna huta hankave kea huta kazeri haviza nehune? huta nehaze. <sup>14</sup> Tamagra huta, nanknare zama'agu Anumzamofona eri'zama'a erinenteta, nanknare'za agripintira erisunku huta kasege'a amagera antegahune nehuta, Monafi sondia vahe'mofo Ra Anumzante'ma kumitigu'ma tasunku huta zavi'matesunana na'a eri fore hugahune? huta nehaze. <sup>15</sup> Hianagi menina huta, zamavufaga rama nehaza vahe'mo'za asomu eri'za nemanizageno, kefo avu'ava zama nehaza vahe'mo'za feno vahe'nesazageno, Anumzamofoma rehe'za negaza vahe'mo'za knazana e'norize huta nehaze.

### *Age'okani agesa antahi avontafemofo naneke*

<sup>16</sup> Hagi anante Ra Anumzamofoma koro'ma hunente'za agoraga'ama nemaniza vahe'mo'za keaga huganti kama nehzageno, Ra Anumzamo'a agesa anteno nentahie. Ana nehzageno age'okani antahimi vava avontafema Agri avugama me'nea avontafezi, Ra Anumzamofoma koroma hunente'za,

agoraga'ama nemaniza vahe'mokizmi zamagia krente'ne. <sup>17</sup> Nagra ana vhahetmima mareri fenozama hiaza hu'nama zamazeri nafa'ama hanua knarerma, kema antahi mofavrema nef'a'ma kegava hiaza hanuge'za, zamagra nagri vahe manigahaze, huno Monafi sondia vahe'mofo Ra Anumzamo'a hu'ne. <sup>18</sup> E'ina hanugeta, e'i fatgo avu'ava'ene vaheki, kefo avu'ava'ene vaheki, e'i Anumzamofoma eri'zama erinentea vaheki, Anumzamofoma eri'zama'ama eri nontea vaheki huta mago'ane keta antahita hugahaze.

## 4

### *Ra Anumzamofo knare'ma ranra zama fore hania zamofo naneke*

<sup>1</sup> Monafi sondia vahe'mofo Ra Anumzamo'a anage hie, maka'zama re-fkoma hanua knamo'a, avenifima tevema hugre'nageno keonke zama tefizo nehiankna kna neankino, avufga rama nehia vahe'ene, kefo avu'ava'ma nehia vahe'enena, hagage trazama tevemo'ma tefanenema hiaza hugahie. Ana tevemo'a arafunama, azankuna'ma, maka'zama 'anena tefanenema hugahie. <sup>2</sup> Hianagi Nagri nagigu'ma koro'ma nehuta, nagoraga'ama nemaniza vahe'motarera, hanavenimo'a tamagrite'ma efore'ma haniana, fatgo avu'avaza zamo'a zagemo'ma hiaza huno remsa hunermanteno, tamazeri knamarena bulimakao anentamo'ma keginafinti'ma atiramino ne-eno muse huno haru huno takaire takaire huno vano hiankna hugahaze. <sup>3</sup> E'i ana knazupa kefo avu'ava'ma nehaza vahe zamagofetu tamagia reta vano hugahaze. Na'ankure e'i ana kna zupa ana vahe'mo'za tamagia agu'samofo fenka kaziga tanefa samparegahaze. E'i anazama fore'ma hania kna retro nehuankino ana zana fore hugahie huno Monafi sondia vahe'mofo Ra Anumzamo'a hu'ne. <sup>4</sup> Eri'za vaheni'a Mosesema kasegema ami'noa zanku tamagesa antahiho. Maka kasegene tra kenema maka Israeli vahe'mo'zama avaririsaze hu'nama Sainai (Horep) agonafima ami'noa kasegene tra kenena tamagera okaniho. <sup>5</sup> Hagi antahiho, Nagra kasnampa vaheni'a Elaizana huntanenko egotha hutenigena, Ra Anumzamofo knama efore hanigeno ranra knazama efore huno vahe'ma zamazeri koro'ma hania kna henka egahie. (Luku 1:17) <sup>6</sup> Agra zamafahe'ina zamagu'a eri rukrahe hanige'za mofavrezmire ne-enageno, mofavreramimofo zamagu'a eri arukrahe hanige'za zamafahe'intega vugahaze. Anama osnage'na Nagra e'na ama mopa emeri haviza hugahue.

## Matiu Knare Musenke Matiu Kre'nea Naneke

*Jisas Kraisina, agigo azankomo'za fore hu'nante anante hu'za e'naza naneke*  
(Luk 3:23-38)

<sup>1</sup> Ama'na avona Jisas Kraisi agigo azankomofo naneke. Agra Deviti naga panti fore higeno, Deviti'a Abrahamu nagapanti fore hu'ne. <sup>2</sup> Abrahamu'a, Aisaki nef'a'e, Aisaki'a Jekopu nef'a'e, Jekopu'a, Judane afu'aganahe'ina kasezmanente'ne. <sup>3</sup> Juda'a, Perezine, Zerakizni neznafe'a'e, neznarera'a Tamari kasezanante'ne, Perezi'a, Hezroni nef'a'e, higeno Hezroni'a, Rami nef'a'e. <sup>4</sup> Rami'a, Aminadabu nef'a'e, Aminadabu'a, Nasoni nef'a'e, higeno Nasoni'a, Salmoni nef'a'e. <sup>5</sup> Salmoni'a Boasi kasente'ne. Hagi Boasi nerera agi'a Rehapan'e. Boasi'a Oveti kasente'ne. Hagi Oveti nerera agi'a Ruti'e. Oveti'a Jesi kasentegeno, <sup>6</sup> Jesi'a, kini ne' Deviti nef'a'e.

Deviti'a Solomon nef'a'e, Betsibama Uria a'ma eri'nea a'mo kasente'ne. <sup>7</sup> Solomoni'a Rehoboam nef'a'e, Rehoboamu'a Abija nef'a'e, hagi Abija'a Asa nef'a'e. <sup>8</sup> Asa'a Jehosafati nef'a'e, Jehosafati'a Joramu nef'a'e, hagi Joramu'a, Uzia nef'a'e. <sup>9</sup> Uzia'a Jotamu nef'a'e, Jotamu'a Ahasi nef'a'e, Ahasi'a Hezekai'a nef'a'e. <sup>10</sup> Hezekai'a Manase nef'a'e, Manase'a Amoni nef'a'e, hagi Amoni'a Josaia nef'a'e. <sup>11</sup> Josaia'a Jekonaia nefakino, afu'aganahe'ine kase zamante'ne. Anama hu'neana kinafima zamavare'za Babiloni vuku haza knafine.

<sup>12</sup> Babilon kumate kina ome hutageno Jekonaia'a, Seatieli nef'a'za hu'ne, Seatieli'a, Zerubabel nef'a'e. <sup>13</sup> Zerubabeli'a, Abihuti nef'a'e, Abihuti'a, Eli-akim nef'a'e, hagi Eliakimi'a, Azori nef'a'e. <sup>14</sup> Azori'a, Zadoki nef'a'e, Zadoku'a, Akimi nef'a'e, hagi Akimi'a, Eliuti nef'a'e. <sup>15</sup> Eliuti'a, Eliaza nef'a'e, Eliaza'a, Matani nef'a'e, hagi Matani'a, Jekopu nef'a'e. <sup>16</sup> Jekopu'a, Josefe nef'a'za higeno, Josefe'a Mariana neve'e. Hagino Jisasima kasenteg'e'za, agi'a Kraisi'e hu'za antemi'naze.

<sup>17</sup> Abrahamunteti vuno Devitint'e ma vahe'ma forehu anante anante hu'nazana 14ni'a naga nofi fore hu'naze. Hagi Devitintet'i'ma eno Babiloni kina huzmant'e nare'ma e'neana 14ni'a naga nofi fore hunante anante hu'naze. Hagi kinama huzmant'e nareti vuno Kraisi knare'ma e'neana 14ni'a naga nofi forehu'nante anante hu'naze.

*Jisasima kasenteg'e'za naneke*  
(Luk 2:1-7)

<sup>18</sup> Jisasi Kraisi'ma fore hu'neana amanahu hu'ne, Agri nerera Mariana, Josefente huhampri ante'nageno, nomago hu'ne omani'nakeno, Ruotge Avamu'mo rimpafii emanigeno, amu'ene hu'nege'za before hu'naze. <sup>19</sup> Ana hazageno, agri neve Josefe'a fatgo ne' mani'negu, Mariana azeri agaze hu'zanku, oku'a a' atrenaku agu'agesa antahi'ne. <sup>20</sup> Hianagi ana antahin-tahima retro nehigeno'a, mago Ramofo ankeromo ava'nafi eno anage huno asmi'ne, Josefe, Deviti nemofoge, korera osunka Mariana aka'agi avro, na'ankure agri rimpafima mani'neana, Ruotge Avamu'mofo mofavre mani'ne. <sup>21</sup> Ne'mofavre kasentegahianki, ana mofavremofo agi'a, Jisasi'e hunka agi'a antemio, na'ankure Agra vahe'amokizmi kumi'zmifinti zamaza

hugahie. <sup>22</sup> Ama ana maka'zama efore hu'neana, korapa Ra Anumzamo kasnampa ne'te ke hunte'nea zamo nena'a efore hu'ne.

***23 Keho vene omani'nea a'mo mofavre amu'ene huno, Ne'mofavre kasentegahie, ana hanige'za zamagra Agri Agi'a Imanueli'e hugahaze,*** ana agima eri rukrahe haniana, Anumzamo tagrane mani'ne hu'ne. (Ais 7:14) <sup>24</sup> Mase'nefinti Josefe'a otino Ramofo ankeromo asmino hunte'nea kante anteno, Mariana a' avare'ne. <sup>25</sup> Hianagi anteno omaseno amne kegava hu'negeno, ne'mofavre kasentegeno, Josefe'a, Jisasi'e huno agi'a ante'ne.

## 2

### *Antahi'zazimi'ne vahe'mo'za Jisasi eme ke'naza naneke*

<sup>1</sup> Jisasi'ma Betlehemi Judia kaziga mopare, Heroti'ma kini mani'nea knafi fore'ma hige'za, zage hanatitegati antahi'zane vahe'mo'za Jerusalemi ehanati'za, anage hu'naze, <sup>2</sup> Jiu vahe'motma Kinima manisia nera inantega kasente'ne? Na'ankure tagra Agri ofuna zage hanati kazigati keteta, mono huntoku e'none. <sup>3</sup> Ama ana nanekema Heroti'ma kini ne'mo nentahino'a, agu'agesamo kore nehuno tarerare nehigeno, Jerusalemi kumate vahe'mo'zarenna agrama hiazza hu'naze. <sup>4</sup> Heroti'ma pristi vahe'zagane, kaseger'e ma ugagota hu'naza vahe'ma magopi zamazeri atru huteno'a, inantega Mesai'a fore hugahie? huno zamantahige'ne. <sup>5</sup> Hige'za zamagra, agri husmi'za, Judia kaziga Betlehe kumate kasentegahie, na'ankure korapa Anumzamofo kasnampa (profet) ke huama hu'nea ne'mo avon tafepi amanage huno krente'ne, <sup>6</sup> ***Hagi kagra, Betlehemia, Juda vahe mopafina, kagra Juda vahe'mokizmi ranra kumapintira osasi ku-matfana omani'nane, na'ankure kagripinti magora ra nera Israeli vahe ni'ama kegavama hania nera fore hugahie.*** (Mai 5:2.)

<sup>7</sup> Hagi Heroti'a frakino oku'a antahi'zane vahera zamagenoka huno, Nankna ana ofumo'a fore hu'ne huno zamantahige'ne. <sup>8</sup> Heroti'a Betlehemu viho huno hunezmanteno, anage huno zamasmi'ne, Vutma ana Mofavrea ome haketa ketetma, Agri'ma kefore'ma hanutma eme nasminke'na, naganena anazanke hu'na monora ome huntaneno. <sup>9</sup> Ana nanekema kini ne'mo'ma hige'za antahite'za, nevu'za ko'ma zage hanati kaziga mani'neza ke'naza ofumo kagota huzmanteno nevige'za keme nevazageno ana Mofavre mani'nea nomofo agofetu eme otige'za ke'naze. <sup>10</sup> Ana ofuma ne-gageno'a tusi'a muse zamo zamagu'afina avite'ne. <sup>11</sup> Ana nompi emareriz'a ana Mofavrene nerera Mariane nege'za, zamugosa regati kepri hu'za mono hunte'nez. Eri'zama vu'naza feno'zana anagi'za, musezama ami'nazana, golima, mananentake paurane (frankincense), mere'ne (myrrh) ami'nazana. <sup>12</sup> Anumzamo'ma ava'nafi zamasmimo Herotintera oviho huno'ma hu'nea kea nentahiza, antahi'zane vahe'mo'za ot'i'za rugantegati mopa zamirega vu'naze.

### *Josefema ana tramentre zanavreno Isipi freno vu'nea naneke*

<sup>13</sup> Antahi'zane vahe'ma vutageno'a, Ra Anumzamofo ankeromo Josefena ava'nafi efore huno asmi'ne, Otio! Mofavrene, nerera'nena znavrenka Isipi frenka vuo, anantega umani'nege'na Nagrama kasmisugenka eno, na'ankure Heroti'a ana Mofavre hakreno ahe friku nehie huno asami'ne. <sup>14</sup> Anage higeno Josefena otino ana Mofavrene, nererane ana kenage agu'afi zanavreno Isipi vu'ne. <sup>15</sup> Anantega Isip vuno umani'negeno Heroti'a fri'ne. Ana'ma hu'neana Anumzamo kasnampa ne'mofo asmigeno korapa kre'nea

kemofo nena'a efore hu'ne, ***Isipitira Nagra Ne'mofavre'ni'a agi hugeno e'ne.*** (Hos 11:1.)

*Heroti onse'anse mofavre zaga zamahe fri'nea naneke*

<sup>16</sup> Anante Heroti'ma keama, antahi'zane vahe'mo'za revatgama hazageno'a, agra tusi'a rimpaa he'ne. Agra vahe huzmanteno, Betlehem kumapinti ene, ana tva'onte me'nea kumapinti, zagegafu'zmimo tare zagekafureti urami'nea mofavre'zaga ome zamahe friho huno antahi'zane vahe'mo'za ofugu'ma asami'za, e'inahu'zana fore hugahie hazageno antahi'nea knagu anage hunora zamasami'ne. <sup>17</sup> Anante korapa mago kasnampa ne' Jeremaia Anumzamo asmigeno hu'nea kemofo nena'a fore hu'ne, <sup>18</sup> ***Mago ageru Rama kumateti antahi'naze, zavi neteno tusi'a asuza eri'ne, Reseli'a mofavre rmima'agu zavi ate'ne, higeno agri'ma azeri tagane'zankura ave'osi'ne, na'ankure magore huno omani tfa higeno'e.*** (Jere 31:15.)

*Ete'za Nazareti vu'naza naneke*

<sup>19</sup> Heroti'ma fritegeno, mago Ra Anumzamofo ankeromo Josefena ava'nafi eno Isipi eme asmi'ne, <sup>20</sup> Otinka, Mofavrene nererane zanavarenka Israeli mopare vuo, na'ankure ahe'naku hakre'naza vahera hago fri'naze. <sup>21</sup> Anage higeno Josefe'a otino ana Mofavrene, nererane zanavreno ete Israeli mopare e'ne. <sup>22</sup> Hianagi Heroti nemofo Akelasi, nefä no erino Judia kaziga kegava hie kema nentahino'a, ana kaziga vuzanku koro hu'ne. Anumzamo ava'nafima asmi'nea kante anteno, agra (Josefe) atreno Galili kaziga vu'ne. <sup>23</sup> Agra zanavreno viazamo, Nasareti kumate umani'naze. Anama hu'neana korapa kasnampa vahe'mo'za hunte'naza kemo nena'a efore hiankino Jisas-inkura ***Nazareti Nere hu'za agia hegahaze.***

### 3

*Mono ti frezmanente Joni mono eri'za eri'nea naneke*

<sup>1</sup> Ana knafina mono ti frezmanente Joni'a, Judia kaziga ka'ma mopafi ne-eno amanage huno Anumzamofo ke huama huno zamasmi'ne. <sup>2</sup> Kefozantamigu tamasunke huta tamagu'a rukrehe hiho. Na'ankure mona kuma'mo'a hago tava'o nehie. <sup>3</sup> Na'ankure korapa ama'na kegu kasnampa ne' Ai-saia'a Joninku anagea hu'ne, ***Mago ageru'mo ka'ma mopafinti kezatino, Ramofo kana varinenteta, agri kana eri ante fatgo hiho hu'ne!*** (Ais 40:3) <sup>4</sup> Joni'a kemori azokateti trohunte kena masi'neno, trazama nenaza afu'mofo akruteti amu'nofira nehuno, kenu'ene, afi' tumemofo rima'ane ne'ne. <sup>5</sup> Anante Jerusalemi kumate vahemo'zane, Judia kazigati ene, ana mika Jodani kazigati vahe'mo'zane mika eri hantage'za Joninte etere hazageno, <sup>6</sup> Joni'a Jodani timpi huama kumi'zmi hutere nehazageno, mono ti fre zamante'ne. <sup>7</sup> Hianagi agrama kege'za hakare'a Farisi vahe'ene, Sadusi vahe'ma mono ti frekure hu'za ageno, Joni'a anage huno zamasmi'ne, tamagra ha' osifavemofo mofavre nagare, aza tmasmino amuma ne-ea Anumzamofo rimpaahe zampintira fregahaze huno tamasami'ne. <sup>8</sup> Ana hu'nagu raga rentenkeno, tamagu'a rukrehe hunaze huno tamage'za sena, <sup>9</sup> hagi Abrahamu'a nerfakita, tagra knare hu'none hutma osiho. Na'ankure nagrama tamagri'ma tamasamisuana, Anumzamo'a amne hanigeno ami havemo'a, Abrahamuna mofavre nagara fore humigahie. <sup>10</sup> Meninena hago sasumemo'a mika zafa agafare kriri'neankino, hakare zafamo knare ragama reontesia zafaramina, antagino tevefi mate'vuno atregahie.

<sup>11</sup> Nagra amne tinteti mono tina fre nermantoe, tamagu'a rukrahe hanazegu, hianagi Agra henkama ne-emo'a nagrira nagatereno hihamu'anee' egahie, hige'na nagra Agri aganona (sendol) erizafiga osu'noe. Ruotge Avamuteti'ene tevenu'ene Agra mono tina fre ramantegahie. <sup>12</sup> Witi ne'za eri atru hania kna hago atupa nehigeno, Agra vazihehehu azota azampi erino mani'ne. Hanki witi akru hare kuma eri hagro nehuno, anampinti nena' a zogirino erino nompi Agra ome nenteno, hona'a tevava tevefi krenkeno tegahie.

*Joni'a, Jisasi mono ti frente'nea naneke  
(Mak 1:9-11; Luk 3:21-22)*

<sup>13</sup> Anante Jisasi'a Galiliti atreno Joni mono ti frente'snie huno Jodani tinte e'ne. <sup>14</sup> Hianagi Joni'a tima Agri'ma frente'zankura i'o nehuno, Kagra, nagrira tina fre nantesankeno knareru hugahie, hianagi Kagra nagritega neano? <sup>15</sup> Hianagi Jisasi'a ke nona' Jonina asmino, **Menina amne fre nantegahane, na'ankure tagrati'a e'inama hanu'ana fatgo avu'avaza hugahue**, higeno Joni'a Agri ke antahino, <sup>16</sup> mono tima frentegen, Jisasi'a ana timpinti ame huno otino ankenarega mrerino ne-egeno, monamo hagro nehigeno, keana Anumzamofo Avamu'mo maho nama'gna huno akoheno eramino Jisasinte emani'ne. <sup>17</sup> Higeno, monafinkati mago ageru'mo huno, Ama'i Nagrama avesinento'a magoke Mofavreni'agi'na Nagra tusi'a muse Agrira hunentoe.

## 4

*Sata'a, Jisasi revatga hu'nea naneke  
(Mak 1:12-13; Luk 4:1-13)*

<sup>1</sup> Anante Jisasina Avamu'mo'a avreno vahe omani ka'ma mopafi Sata revatga hinogu vu'ne. <sup>2</sup> Ka'ma kokampi 40'a hanine zagene ne'zana oneno a'o huno mani'ne. Ana huteno Agra tusi'a aga'zanku hu'ne. <sup>3</sup> Revatga hu ne'mo'a anante ehanatino Jisasinku anage hu'ne, Kagrama Anumzamofo mofavre mani'nesunka, ke nehugenoma have'zagamo'a breti fore hino. <sup>4</sup> Hianagi Jisasi'a ana ke nona' huno, **Anumzamofo avontafepi anage huno krente'ne, Vahe'mo'a bretige neneno kasefara huno omanigahie. Hianagi maka kema Anumzamofo agipinti atirami'nea nanekema amage antesu'za manigahaze.** (Diu-Kas 8:3) <sup>5</sup> Higeno anantetira Sata'a, Jisasina avreno Jerusalemi ruotge rankumate vuno, ra mono nomofo amumpare ome antegeno oti'negeno, <sup>6</sup> anage huno Jisasina asmi'ne, Kagrama Anumzamofo Mofavrema mani'nesunka, Kagra amareti takauro, na'ankure Anumzamofo avontafepina anage hu'za krente'naze, **Anumzamo'a ankero naga'a kagriku huno huzmantesige'za, zamagra zamazanteti kazeri sga hanagenka, kagrira haverera kagiafina kavavera onkahegosie.** (Sam-Zga 91:11-12) <sup>7</sup> Hianagi Jisasi'a agrikura anage hu'ne, **Mago'ene anage hu'za Anumzamofo avon tafepina kre'naze, Kagra Ra Anumzanka'a revatga hunka onkegahane hu'ne.** (Diu-Kas 6:16) <sup>8</sup> Ete ru'ene Sata'a avreno Jisasina mago za'za agonarega marerino, maka mopa kagi'afima me'nea kumatmimpi me'nea konariri zama'a averi hu'ne. <sup>9</sup> Hagi Sata'a anage huno Jisasina asmi'ne, Kagrama krenarenka nagiafi mono hunantesnanana ama zantamina maka Kagri kamigahue. <sup>10</sup> Higeno anante Jisasi'a agrikura huno, **Sataga manigno! Na'ankure Anumzamofo avontafepina anage hu'za krente'naze, Kagra Ra, Anumzanka'a Agrike krena renka monora hunentenka Agri eri'za**

**erintegahane hu'ne.** (Diu-Kas 6:13) <sup>11</sup> Higeno anante Sata'a, Agrira atreno vige'za, ankero vahe'mo'za e'za Jisasina emeaza hu'naze.

*Jisasi'ma mono ke Galili erigafa hu'nea naneke  
(Mak 1:14-15; Luk 4:14-15)*

<sup>12</sup> Ana huteno Jisasi'ma antahiamma Jonima azeri'za kina nompi ante'naze kema nentahino'a, Agra atreno Galili kaziga vu'ne. <sup>13</sup> Hagi Nazaretia atreno Kapaneamu nonkumate umani'naku ran tiru ankenare, Zebulunine, Nafatalikizni mopa kaziga vu'ne. <sup>14</sup> Ama'i korapa kasnampa ne' Aisaiana Anumzamo asamigeno huama huno kre'nea kemofo nena'a efore hu'ne. <sup>15</sup> **Zebuluni mopane Nafatali mopane, hageri anke'narega, Jodani timofo kantu kaziga, Galili megi'a vahe'ma,** <sup>16</sup> **hanizampi nemaniza vahe'mo'za tusi'a masaza ke'naze. Hagi ana mopafi nemani'za, fri'zamofo tonapi mani'naza vhahera, zamagri zamagofetura masazamo remsa hu'ne.** (Ais 9:1-2) <sup>17</sup> Ana knareti agafa hu'neana, Jisasi'a mono ke huzmasamino anage hu'ne, **Tamagu'a rukrahe hihō, na'ankure Anumzamofo mona kuma'mo'a hago tava'o nehie.**

*Jisasi'a amagema ante'saza disai pol naga zamagi hu'nea naneke  
(Mak 1:16-20; Luk 5:1-11)*

<sup>18</sup> Galili tiru ankenarega nevuno, Agra tare kogna ome znage'ne, Saimeoni'e, mago agi'a Pita'e, hagi negna'a Endru'e. Zanagra nozame kuko tirupi atre'na'e, na'ankure zanagra nozame zante netrenki'ne ana hu'na'e. <sup>19</sup> Agra anage huno zanasmi'ne, **Eta eme namage anteke'na, vahe'ma zamavazu hana'azana huranaveri ha'neno.** <sup>20</sup> Hantaka hu'ne kuko zani'a netre'ne, amage'antene vu'na'e. <sup>21</sup> Jisasi'a ananteti'ma viana, tare kogna ome zanage'ne, Jemsi Zebeti nemofoiki, negna Jonine votifi neznafa, Zebeti ene kukozmi nehati'za mani'nageno anante ome zanagi hu'ne. <sup>22</sup> Hantaka huke votifi neznafana atre'ne, Agri amge vu'na'e.

*Jisasi kri eri amne hu'nea erizamofo naneke  
(Luk 6:17-19)*

<sup>23</sup> Jisasi'a maka Galili kaziga vano nehuno, osi mono nozmifi (singog) marerino Knare Musenkea (gospol) mona kuma'mofo naneke rempi hunezmino, maka zamufa haviza hu'nea kri vahe'ene krimo amu'nozmifi me'nea vhahera zamazeri so'e huzmante'ne. <sup>24</sup> Ana nehigeno Jisasi agenkemo Siriane maka kaziga vuno eno hige'za, nentahi'za zamagra maka kri vhahera zamavare'za Agrite e'naze, ruzahu ruzuhu krima eri'naza vahe'ene, zamufa zamatazane, kefo avamu'mo zamagu'afi mani'nane, manani kri'ne, zamufa fri'nea vahe'ene (paralais) zamare'za Agrite ageno zamazeri so'e hu'ne. <sup>25</sup> Ana higeno rama'a vahe krerafamo Jisasima amage ante'nazana, Galiliti'ma, Dekapolisi kazigati'ma, Jerusaleti'ma, Judia kazigatiki, Joda timofo asoparegati etere hu'za amage ante'naze.

## 5

*Jisasi agonare marerino mani'neno hu'nea mono naneke  
(Luk 6:20-23)*

<sup>1</sup> Hagi Jisasi'ma hakare vea kevuma nezmageno'a, mago agonare mareri'ne. Anante'ma umanige'za, amage'ma nentaza disai pol naga'mo'za Agrite e'naze. <sup>2</sup> Anante Agra agafa huno rempi hunezamino, amanage hu'ne,

<sup>3</sup> Zamufama anterami'za avamupima manisaza vahe'mo'za, Anumzamofo asomura erigahaze. Na'ankure mona kumara zamagri kumare.

<sup>4</sup> Zamasu zampi mani'ne'samokizmia, Anumzamo'a asomu huzmantegahie. Na'ankure Agra zamazeri fru hugahaze.

<sup>5</sup> Akohe'za nemanimokizmia Anumzamo'a asomu huzmantegahie. Na'ankure maka mopa zamisige'za erigahaze.

<sup>6</sup> Fatgo avu'avaku zamaganeteno, tinku zamesiaza nehazamokizmia Anumzamo'a asomu huzmantegahie. Na'ankure Agra zamagrira knare huzmantegahie.

<sup>7</sup> Vaheku'ma zamasunku hunezmantamokizmia Anumzamo'a asunku huzmantegahie. Na'ankure Anumzamo'a asuntgi zamantegahie.

<sup>8</sup> Zamagu'amo'ma agru hu'nesamo'za, Asomu erigahaze. Na'ankure zamagra Anumzana kegahaze.

<sup>9</sup> Ha'ma erifru nehazamo'za, asomu erigahaze. Na'ankure zamagrikura Anumzamofo mofavre hugahaze.

<sup>10</sup> Knare zamavuzmama nehanage'za hafra huzmantesamo'za, asomura erigahaze. Na'ankure mona kumamo'a zamagri'za segahie.

<sup>11</sup> Vahe'mo'ma huhaviza huneramanteno, kanonkeve neramino, maka hankromofo nanekea havige huno hugofi neramanteno, Nagriteku huno havigema huramantesimota, asomu erigahagahaze. <sup>12</sup> Kaninkaha hutma muse hiho, na'ankure avamutami'mofo fenozana rama'a monafinka me'ne. Na'ankure korapara kasnampa vahera anahukna hu'za zamahe'naze.

*Hagene tavi'kna hu'za mani'saza naneke  
(Mak 9:50; Luk 14:34-35)*

<sup>13</sup> Tamagra ama'na mopare hage mani'naze. Hianagi ana hagemo'ma haga'ama omanesigeno'a, inanknahu huno hage'a ete erigahie? E'i mago knare'za hugara osiankindo, atresnage'za vahe'mo'za zamagareti rehaviza hutregahaze.

<sup>14</sup> Tamagra ama mopamofo tavi mani'naze. Mago rankumamo agonare me'nesia rankumamo'a fra okigahie. <sup>15</sup> Vahe'mo'za ramu tavi rekrhu hu'za basketifina nontaze. Tavi ante azotare hantintenageno remasa nompina nehie. <sup>16</sup> Anahu kante tavika'a atregeno, vahe'mokizmirera remsa hanige'za, knare kavu kvara nege'za, monafi mani'nea Negafana ra agi amigahaze.

*Anumzamofo kasegegu Jisasi hu'nea naneke*

<sup>17</sup> Tamagra kasegene, kasnampa vahe ke eri atreku e'ne hutma Nagrikura osiho. Nagra kasegene kasnampa ke eri atrenaku ome'noanki, eri knare hunaku e'noe. <sup>18</sup> Nagra tamagerafa hu'na neramasmue, monane mopane vaga'oreno me'nena, mago onensa avoma kasegefei me'nea zamo'a vagaore me'enkeno, hakare zamo'a efore hugahie. <sup>19</sup> Hagi iza'o ana kasegefinti mago rufutagino, rumofo rempi humino, ana hiho hanuno'a, agra ositfa mona kumapina manigahie. Hianagi mago vahe'mo'ma Anumzamofo kasegema amage nenteno, rempi vahe huzmisuno'a, mona kumapina henka ra agine vahe manigahie. <sup>20</sup> Na'ankure Nagra neramasmue, tamagri tamavu'tamavamo'ma fatgo huno kasegere ugagota hu'naza vahe'mofone, Farisi vahe'mokizmima, zamagatema oresiana, tamagra mona kumapina ovugahaze.

*Rimpia he'zane vahe ahe fri'zamofo naneke*

<sup>21</sup> Tamagra ko antahi'naze, tamagehe'ima zamasmi'naza kea, *Kagra mago vahera ahe ofrio, hagi iza'o vahe'ma ahe frisimo'a, keagare otigahie* hu'ne.

<sup>22</sup> Hianagi Nagra anage nehue, iza'o nefuma rimpaka kna huntesimo'a, agra keagare otigahie. Aza'o mago nefuma huhaviza hunte'simofona, avaré'za kanisolo kva vahete (Sanhedrin) vugahaze. Hagi iza'o neginagi ke nehie huno hanimofona, tusi'a tevefi avare tregahaze. <sup>23</sup> E'ina hu'negu, kagrama ofa ka'a erinka kre sramanavu itare'ma esunka, negafu'ma rimpaka hegante nenia zanku antahisunka, <sup>24</sup> ana kresramana vu itare ofa ka'a atrenka ete vunka, kotazana ana negafu'ene ome kasunke hutenga, henka ofaka'a eme amio.

<sup>25</sup> Hagi mago'mo naneke hugantenaku hanimofona karanka nevutna ame'ama hunka rimpaka eri fru huo, aru kagrira kavreno ke refakohu vahete vanigeno, anante ke refakohu ne'mo'a kavreno kina kva ne'te vanigeno, hagi kagrira kasaga huno kina nompi katre'zanku, ana huo. <sup>26</sup> Tamage hu'na kagrira negasamue, kagra anampintira atioramitfa hugahane, hagi agima ahegantesiama'a mizase varesunka henka kina nompintira atiramigahane.

### *Ru vene, a'ene monkоза huzamofo naneke*

<sup>27</sup> Tamagra antahi'naze amanagema hu'nea kea, *Tamagra ru vene, a'ene monkоза osugahaze* hu'ne. <sup>28</sup> Hianagi Nagra neramasgue, aza'o mago a' negeno kesane hanimo'a, hago ana a'ene monkоза agu'afina hu'ne.

<sup>29</sup> Tamaga kavurgamo kazeri kumipi katre'na, eri tagitinka mate vuo, na'ankure ru maka kavufa tevefi (hell) vu'zankura, mago kvufamo fanane hani'ana, knare hugahie. <sup>30</sup> Kazantmaga'amo kumipi kavrentena, taga hunka mateyu atro. Ru mika kavufamo tevefi vu'zankura mago kavufa atresanana, e'i knare'za hugahie.

### *A'ne zamatre zamofo naneke (Mat 19:9; Mak 10:11-12; Luk 16:18)*

<sup>31</sup> Korapara anage huno avona krente'ne, *Iza'o a' ama huntenaku hanuno'a, a' atre avonkre amino* hu'ne. <sup>32</sup> Ana hanigeno Nagra anage tam-agrikura nehue, mago vahe'mo a' a'mo monkоза osu'nenigeno atre'siana, ana ne'mo'a ana ara huntesigeno monkоза hugahie. Hanigeno iza'o, vemo'ma atre'nesia a'ma erisia ne'mo'a, monkоза hugahie.

### *Huvempa naneke*

<sup>33</sup> Mago'ene tamagra korapama, tamagehe'ima zamasmi'nea kea antahi'naze, Huvempa kea ha'ontagigahane. Hianagi Ra Anumzantera *hu-vempa hu'na kea eri knare huo* hu'ne. <sup>34</sup> Hianagi Nagra anage hu'na neramasgue, mona kumaku hunteta huvempa osiho, na'ankure Anumzamo nemania tra'e, <sup>35</sup> mopa'mofonku hunteta huvempa osiho, na'ankure Agra agia nentea trare, hifi Jerusalegura osiho, na'ankure *tusi'a kinimofo rankumare* hu'ne. (Ais 66:1-2) <sup>36</sup> Kagra kasenire huntenka huvempa osuo, na'ankure kagra mago kazokara eri efeke osuge, haninkera osugahane. <sup>37</sup> Hianagi kema hananana, izo hanunka, izo huo, i'oma hnunka i'o huo, mago'a amana kema agatereno hanuno'a, hankro'mofontegati eanke hugahie.

### *Nona huno ozmahenia, naneke (Luk 6:29-39)*

<sup>38</sup> Tamagra anagema hu'nea kea antahi'naze, *Avu rupro hanimofona, agri enena avu rupro huo. Ave rutafri simofona, agri enena ave rutafrio* hu'ne. <sup>39</sup> Hianagi mago'ene anage hu'na neramasgue, haviza huramante

simofona, azeri havizana osiho. Hianagi iza'o tamaga kaziga kamera-gente'ma kahena, rukrehe hugeno, mago kaziga kameragente kaheno.  
<sup>40</sup> Mago'mo'ma sioti ka'agu namio hanigenka, anakre kuka'anee amio.  
<sup>41</sup> Iza'o kagri'ma tutu huno fenoni'a erinka, mago kilo mita vuo hanigenka, eriagaterenka tare kilo mita vuo. <sup>42</sup> Mago zanku kantahige simofona amne amio, erite'nna kamisue huno kantahigena, i'o osuo.

*Ha' vaheti avesi antesuna naneke  
(Luk 6:27-28; Luk 6:32-36)*

<sup>43</sup> Tamagra antahi'nageno korapara anage hu'naze, Kagri tava'onte mani'nemofona kavesintetfa nehunka, ha' vahe ka'a krimpa hento hu'ne.  
<sup>44</sup> Hianagi Nagra anage hu'na neramasmue, ha' vahetmia zamesizmantfa nehuta, tamahesia vhahera nunamu huzmanteho. <sup>45</sup> E'inama hanuta monafi nemania Nafatamimofo mofavre manigahaze. Agra zagegu higeno, zagea knare vahete ene, havi vahetera neregeno, fatgo vahete'ene, fatgo osu vahete enena kora atregeno nerie. <sup>46</sup> Na'ankure tamavesima antenia vahe'ma, tamavesi zamantenuta na'a mizama'a erigahaze? Tagra antahi'none, takesi zagoma eri vahe'mo'za anahu knara nehaze. <sup>47</sup> Tamagrama nermafunke'za zamazeri so'e hanazana, na'a mago'a zana hugahaze? Megi'a vahe'mo'za zamagranena anahu kna nehaze. <sup>48</sup> E'ina hu'negu tamagra monafi neramafa'ma fatgo huno agru hu'nea kna hutma fatgo hutma agru hiho huno zamasmi'ne.

## 6

*Vahe zamaza hu'zamofo naneke*

<sup>1</sup> Vahe'mofo avure fatgo avu'ava nehanage'za kagezankura kva hiho, monafi mani'nea Neramafa'a mizana ontamigahie.

<sup>2</sup> Hanki kagrama zamunte omane vahe'ma zamaza hunka keonke'zama zamisunka, ufenkrafahu vhahera huzmanteg'e'za ufre'za ugota osiho, havige vahe'mo'za mono nompine (sinagog) kantegane nehaza knara osuo, e'ina hanankeno'a vahe'mo'za kagi erisaga hugahaze. Nagra tamage hu'na neramasmue, hago zamagra mizazmi'a eri'naze. <sup>3</sup> Hianagi zamunte omane vahe zamaza hanunka, atregeno hoga kazamo'a, tamaga kazamo'ma hania zana onkeno, <sup>4</sup> e'ina hunka oku'a amigeno, oku'a me'negeno negea Negafa Anumzamo'a mizana kamigahie.

*Nunamu huzamofo naneke  
(Luk 11:2-4)*

<sup>5</sup> Nunamuma hunaku'ma hanuta, havige vahe'mo'za nehzankna osiho. Na'ankure zamagra mono nompi ot'i'za mani'ne'za, meg'i'a kampine ot'i'ne'za nunamu nehzage'za, vahe'mo'za negazazana osiho. Tamage hu'na Nagra neramasmue, zamagra ko mizazimia eri'naze. <sup>6</sup> Hianagi tamagrama nunamu hunaku hanuta, nomofo agu'afi ufreta, kafa eri kiteta Neramafantega oku'a nunamu hiho. Hinkeno oku'aza negea Neramafa'a mizana tamigahie.

<sup>7</sup> Nunamuma hanuta, agu'agesa omne vahe'mo'za revahe revahe hu'za, meg'i'a vahe'mo'za (gentiles) hantgazankna kea osiho, na'ankure zamagrama antahi'zana, rama'a nameke nehusunkeno Anumzamo'a antahisie hu'za nehzaze. <sup>8</sup> E'i ana hu'negu zamagri knara osiho. Na'ankure antahi onkenageno atupa'ma hu'naza zana ko tamagri Neramafa'a antahi'ne. <sup>9</sup> Amanahu kna hutma nunamuna hiho. Tagri Nafati'moka monafi mani'nane, Kagri Kagimo ruotage huno mesie. <sup>10</sup> Kagri mona kumara

esie, Kagri kavesi'zana monafinka nehzankna huno, ama mopafi efore hanie. <sup>11</sup> Mago mago knare'ma nesuna ne'zana menina tamio. <sup>12</sup> Kumitia atre'rantegeta, anahu kna huta kumi'ma hurante'namokizmi'a atre'zmanta maneno. <sup>13</sup> Ana nehunka tatregeta rerahe'zampina uoframaneno. Hianagi hankromofo azampintira taza hunka tavro. [Na'ankure Kagri mona kumamo mevava hugahie. Tamage.]\* <sup>14</sup> Hagi tamagrime kefoza hurmantesamokizmi kumi'zami atrezmane sageno'a, monare nemania Nafatimo'a, kumi'tamia eri atre ramantegahie. <sup>15</sup> Hagi vahe'mokizmi kefozazimi atre ozmante snageno'a, monare nafatmimo'a, kefo zantamia atre oramantegahie.

#### *Neza atreno nunamu huzamofo naneke*

<sup>16</sup> Ne'zama a'o hanuta tavre vahe'mo'za nehaza knara hutma havi tamugosa osiho. Na'ankure e'inahu tamugosa nehanage'za, vahe'mo'za nege'za, ne'za a'o hu'naze hu'za hugahaze. Nagra tamage hu'na neramasmue, ko zamagra mizama'a eri'naze. <sup>17</sup> Hianagi ne'zama a'o hanutma, tamasenire masavena nefretma, tamugosa sese hiho. <sup>18</sup> E'ina hanageno nezama a'oma hanaza zana vahe'mo'za onkeho. Hianagi tamagri Neramafa oku'a nemanimo kagegahie. Nehuno oku'a me'negeno negea Neramafa'a mizana tamagrira tamigahie.

#### *Mevava fenoza eritru hanaza naneke*

(Luk 12:33-34)

<sup>19</sup> Ama mopafina knare'nare fenona eritru osiho, havi kafamo'ene, krogroheno erihaviza nehanigeno, kumza vahe'mo'za nona anafe hu'za kumza nesaze. <sup>20</sup> Hianagi monafinka fenona havi kafamo'ene, krogro ohegeno, kumza vahe'mo'za nona tagana vaziza kumza ose fenotamina, tamagra eritru hiho. <sup>21</sup> Na'ankure fenonka'a me'enirega, e'i anantega kagu'amo'a megahie.

(Luk 11:34-36)

<sup>22</sup> Kavurgamo'a kavufa'mofo rampe tavi me'ne, ana hu'neankino kavurgamo knare huno me'nenigeno'a, mika kavufamofona remsa hugantegahie. <sup>23</sup> Hianagi kavurgamo'ma haviza hanigeno'a, mika kavufa hanizamo refitegahie. Hianagi kagu'afi me'nea tavimo asu'ma hanigeno'a, tusi'a hani hugahie.

#### *Tare kva vahe'mofonte eri'za e'orisnaza naneke*

(Luk 16:13)

<sup>24</sup> Mago'mo'a tare kva netrenera eri'zana e'origahie. Na'ankure anamo'a mago'mofona avesra hunenteno, mago'mofona avesi nenteno, mago'mofonte amage nenteno, mago'mofona kefenkami atregahie. Kagra Anumzante'ene zagore'enena erizana eri otegahane.

#### *Mago zankura hakare kagesa ontahisana naneke*

<sup>25</sup> E'ina hu'negu, Nagra neramasmue, tamagrama manisnaza zankura tamagesa antahintahi hakare osuta, naza kávera negahune, igati tina negahune, kukena tavufarera na'a hugahune huta ontahilo. Anampina kavemo'a mani'zana agaterenefi, hipu kukenamo'a tavufa agatere'neo?

<sup>26</sup> Namamo'ma hareno vano nehiana keho, zamagra hoza ante'za, kafiza, eri atru hu'za, kave ante'nompina nontazanagi, monare nemania Neramafa ne'zana nezamie. Namamo'za tamagrira tamagaterenafi? A'o. <sup>27</sup> Hagi mago

\* **6:13** Mago'a antahi'zane vahe'mo'za, vagare naneke'mo'a ese'ma kre'nafina kre onte'naze, hu'za hu'haze.

tamimo'ma knare'zama huno mani'zanku'ma antahintahi hakarema hania zamo'a, asimu'a erizazara hugahio? A'o.

<sup>28</sup> Nahigetma kukena huzankura hakare antahintahia nehaze? Flauamo'a nankna huno nehagefi keho, zamagra eri'za e'oriza kukena trora nosaze. <sup>29</sup> Ana hianagi Solomoni'a avasese'amo hu'nea knare nare kukena hu'neanagi, ami flauamofo avasese'amo'a agatere'ne. <sup>30</sup> Hianagi Anumzamo'ma, amuma me'nea trazama kukenama huma ante'neana, menina me'neanagi vahe'mo'za okina tevefi eri kregahaze. Ana hu'neug tamagrira Anumzamo'a agatereno kukena hurnantegahie. Tamagra osi'a tamentinti'nne naga mani'naze. <sup>31</sup> Ana hu'nagu tamagra nanezane tine neneta nakukena hugahune hutma hakare antahintahi osiho. <sup>32</sup> Na'ankure mono ontahi vahe'mo'za, miko zankura nehakaze. Na'ankure monafi nemania Neramafa'a miko zankuma upama hu'nazana ko antahi'ne. <sup>33</sup> Hianagi kota zana, Anumzamofo kumaku'ene, fatgo avu'avazanku haketenkeno, ana maka'zana anazanke huno tamamigahie. <sup>34</sup> E'i zanku oki fore hania zankura tamagesa hakare osiho. Na'ankure okizana atrenkeno, agra'a kva krino, mago knare'ma esia hazenkea, ana knazupage knaza megahie.

## 7

*Vahe refako huzamofo naneke*  
(Luk 6:37-38; Luk 6:41-42)

<sup>1</sup> Jisasi'a anage huno mago'anе zamasami'ne, Rumofona refako huo zamantenkeno, anahu kna huno Anumzamo'a tamagri e'nena refako huoramanteno. <sup>2</sup> Na'ankure rumofoma refako huntesante, ana avamente Anumzamo'a kagrira refako hugantegahie. Kagrama rumofoma refakoma hanana avamente, anazanke huno kagrira refako hugantegahie. <sup>3</sup> Nahigenka osi zama negafu avufima me'neazana negenka, kagri kavufima ra zafa rampama me'neana nonkane? <sup>4</sup> Na'ane hunka negafunkura, natregena osi'zama kavufi me'neana eri traneno nehane, kagri kavufi'ma ra zafa rampama me'neana? <sup>5</sup> Kagra tavre vahere, esera ra zafa ranpama kavufima me'neazana eri atrenka kavua keama hutenga, ete negafu avufi me'neea osi'zana eri atregahane.

<sup>6</sup> Tamagra ruotage hu'eniazana kramofona omiho, hiro zantamia afumofona omiho. Zamagra eri'za zamagianu rehapa atiza eri haviza hugahaze. Ana hute'za Arukrehema hanuza tamahe'za traga trogo hugahaze.

*Kazigazi huno Antahinegeno, nehakeno, kafante vagre vagre hania zamofo naneke*  
(Luk 11:9-13)

<sup>7</sup> Antahigesankeno anazana kamigahie, hakesunka before hugahane, kafante vagre vagre hanankeno, anagi kantegahie. <sup>8</sup> Na'ankure maka vahe'mo'za antahima nege'za e'nerize. Iza'o, hake'noma vanimo'a, keno eri fore hugahie. Kafante vagre vagre nehanimofona, anagi antigahie. <sup>9</sup> Hagi tamagri amu nompinti magomofo ne' mofavremo, breti eri namio hanigetma, havea knare eri amigahza? <sup>10</sup> Hifi nozame eri namio hanigeno'a, agra knare osifavea eri amigahio? <sup>11</sup> Hianagi tamagra havi avu'ava'zama nehaze vahe'mota antahi'naze, mofavre'tmima knare muse'zama ami'zana, monafima nemania Neramafa'a, knare musezana, iz'a'o Agri'ma antahigemofona rama'a zantami nemie! <sup>12</sup> Vahe'mo'zama

maka zampima kagri'ma, hugantesaze hunka nehanana avu'avara, kagra ana avu'ava zamagrira huzmanto. Na'ankure e'i kasegene kasnampa vahe'mokizmi kenena eri knare hugahaze.

*Osi kafa'mofo naneke*

(Luk 13:24)

<sup>13</sup> Tamagra osi kafampinti ufreho, na'ankure fananehu kantema vu'nea kamo'a, ra huno fru hu'ne. Ana kantera rama'a vahe'mo'za amage ante'za nevaze. <sup>14</sup> Ana hianagi asimu eri kumate vu'nea kafamo'a osi higeno, ana kamo'a kakanino amuho hu'nege'no, osi'amoza ana kana nege'za nevaririze.

*Zafane rga'amofone naneke*

(Luk 6:43-44)

<sup>15</sup> Kva hiho havige kasnampa vahekura, sipisipimofo avufa eri hankre'za egahazanagi, zamagu'afinka afi kra egahaze. <sup>16</sup> Kagrama zamagenka, antahinka zamagrime hananana, rgama rentesare kegahane, krepia ave'ave zafafinti noragize, hifi ave'ave trazampinti fikia tagigahaze? A'o, anara osugahaze. <sup>17</sup> Anahu kante hakare knare zafamo'za, knare raga renentageno, havi zafamo'za havi raga renentaze. <sup>18</sup> Knare zafamo'za havi zafa raga ore-gahaze, ete havi zafamo'ma knare zafa raga ore-gahaze. <sup>19</sup> Miko zafamo'za, knare ragama reontesazana, antagiza matevu'za tevefi atregahaze. <sup>20</sup> E'ina hu'negu ana kante, zamavu'zmavama hanare zamageta antahita hugahaze.

*Anumzamo havige vahe refako hania naneke*

(Luk 13:25-27)

<sup>21</sup> Hagi mago'a vahe'mo'za Nagrikuma Ra Anumzanti, Ra Anumzantie nehaza vahe'mo'za, mona kumapina ovugahaze. Hianagi iza'o monafi nemania Nafanimofo avesi'ma nevariri'samo'za ufregahaze. <sup>22</sup> Ana knazupa rama'a vahe'mo'za anage hu'za Nagrikura hugahaze. Ra Anumzane, Ra Anumzane, Kagri kagifina mono nanekea hu'none. Kagri kagifina havi avamura hunenteta, kaguvaza (mirakol) eri fore hu'nonane hanagena, <sup>23</sup> ana knazupa Nagra anage hu'na zamasamigahue, tamagra kasegeni'a amage'onte vahe mani'nazage'na tamagrira tamantahina kena osu'noanki, maniganeho hu'na zamasmigahue.

*Tare vahe'moke nonki'na'a naneke*

(Luk 6:47-49)

<sup>24</sup> E'ina hu'negu, iza'zamo ama keni'a nentahi'za amage nentamo'za, knare antahi'zane ne'mo hanave nentake havemofo, agofetu nona kiankna nehaze. <sup>25</sup> Hagi kora nerigeno, tina hageno ne-egeno, zaho kora atuno ana nona eri tagna vazinaku ana'ana hianagi, ana nona eri tagna ovazi'ne. Na'ankure keri kafino tamino havemofo agofetu nona ome ki'negu anara hu'ne. <sup>26</sup> Hagi iza'zamo, ama Nagri naneke nentahiza amage ontessamo'za, negi vahe'mo noma'a kasepampi kiankna hugahaze. <sup>27</sup> Kora arigeno, tina hageno ne-egeno, zahomo'ene huno ana nona eri traka hutregeno asaga huramino, razampi tagana taganu vazirami'ne.

<sup>28-29</sup> Jisasi'a ana naneke zamasami vagarege'za mika vahe anante atru hu'namo'za antahi'nazana, kasegere ugagota hu'naza vahe'mokizmi avamentera ozamasmi'ne. Rankva vahe'mo rempi hunezamia kante, hilamu'anee naneke nehige'za nentahi'za muse hunente'za, hakare zamagesa antahi'naze.

## 8

*Jisasi'a fugo namu ne' azeri avusese hunte'nea naneke  
(Mak 1:40-45; Luk 5:12-16)*

<sup>1</sup> Hagi Jisasi'ma agonaregati'ma eramige'za, tusi'a vea krerfamo'za amage vu'naze. <sup>2</sup> Mago fugo namure'nea ne'mo'a, avuga rena emereno amanage hu'ne, Ramoka Kagrama naza huku'ma nehanunka, Kagra amane nazeri avusese hugahane. <sup>3</sup> Higeno Jisasi'a azana antegantuteno ana ne'mofo avufare avako nehuno, anage hu'ne, **Nagrime navesiana, fugo namunka'amo'a amane hugahie.** Higeno ame huno ana fugo namumo'a afe higeno, avusese hu'ne. <sup>4</sup> Jisasi'a ana nera asami'ne, **Kagra kva hunka, ama zankura mago'mofona osamitfa huo.** Hagi pristi nete vunka, kavufa ome averinka ofa erinka vunka, Mosesema hu'nea kante antenka zamagrite eri ama huo.

*Jisasi'a 100ti'a sondia vahete kva ne'mofo eri'za ne'a azeri so'e hu'nea naneke*

<sup>5</sup> Jisasi'ma Kapeniumu kumate uhanatigeno'a, 100'a sondia vahe'mokizmi kva ne'mo (sensurien), Agrite eno aza hinogu antahige'ne. <sup>6</sup> Agra anage hu'ne, Ranimoka eri'za ne'ni'a avufgamo'a frigeno, tusi'a atazampi nonte maseno mani'ne. <sup>7</sup> Higeno **Knareki'na vu'na ome eri so'e huntegahue.** <sup>8</sup> Hianagi ana sondia kva ne'mo'a kenona'a anage hu'ne, Ramoka, nagra knarerera osu'hoankinka, eno hanugenka nagri nompina omegahane. Hanki amane ke'age nehugen, eri'za ne'nia knare hunteno. <sup>9</sup> Na'ankure nagrenena mago kva vahe'mofo hinkanaga mani'nogeno, sondia vahe'mo'zanena nagri hinkanaga mani'nazage'na, mago'mofonku hu'na vuo hugeno, agra nevie. Mago'mofonku eno hugeno agra ne-e. Hagi nagrani'a kazokzo eri'za neku, amana huo hugeno, agra anazana nehie. <sup>10</sup> Hagi Jisasi'a ana ke nentahino'a, tusi antri nehuno, amage'ma vu'naza nagara anage huno zamasmi'ne, **Nagra tamage huna neramasamue, mago nera Israeli vahepina amanahu hanave amentintine nera, Nagra onketifa hu'noe.** <sup>11</sup> Amanage hu'na neramasamue, hakare'a veamo'za zage nehanatia kazigati'ene zage fre kazigati'ene eri hantage'za Abraha'ene Aisaki'ene Jekopu'ene monafina muse nehu'za, ne'za nene'za manigahaze. <sup>12</sup> Hu'neanagi rama'a zamagri kumarema huno'ma huzmantea'ne Israeli vahe'mo'za tusi'a kumazu han-impi megi'a zamatese'za, anantega manine'za zavira nete'za, zamavera aninkreki hugahaze. <sup>13</sup> Anante Jisasi'a 100'a sondia vahete kva nera anage huno asami'ne, **Kagrama kamentinti hanku kagrira kaza hugahianki amne vuo,** huno humanentegeno'a, ana kna fatgore eri'za ne'amofona kri'amo'a atrente'ne.

*Pita nonte kri vahe zamazeri so'e huzmantea'ne naneke  
(Mak 1:29-34; Luk 4:38-41)*

<sup>14</sup> Pita nompi Jisasi'ma umarerino ome keana, nenemo ara avufa amuho amaho kri erino mase'negeno omeg'e'ne. <sup>15</sup> Ana huteno ana a'mofo azante ome avako higeno, avufa amuho zamo'a atrentegeno, otino neza tro huno zami'ne.

*Jisasi'a hakare kri vea zamazeri so'e hu'nea naneke*

<sup>16</sup> Kinagama segeno'a, hakare havi avamutami zamagu'a fre'nea vahe zaga zamare'za Agrite e'naze. Agra ana havi avamura kereti ahenati netreno, maka krima eri'naza vhahera zamazeri knamare'ne. <sup>17</sup> Amana zana kasnampa ne'mo, Aisaia korapa hunte'nea kemofo avufa'a before hu'ne. **Agra kumitia e'nerino kritia eri atrerante'ne hu'ne.**

(Ais 53:4.)

*Jisasi amage'ma vu'zamofo naneke  
(Luk 9:57-62)*

<sup>18</sup> Anante Jisasi'ma kegeno tusi'a vahe'mo'za Agrira azeri kagigeno'a, Agra zamasmino timofo kantu kaziga viho huno amage'ma nentaza disaipoli nagara huzmante'nne. <sup>19</sup> Anante magora kasegere ugagota hu'nea ne'mo Agrite eno amanage hu'nne, Rempi hurami nere, inantego vnanana, nagra kamage ante'na vugahue. <sup>20</sup> Higeno Jisasi'a amanage huno agrira asami'nne, **Afi kramofona mopafi nemasea kerigama'a me'nne. Hare'za vanoma nehaza namaramimofona nozamia me'nne.** Hianagi Vahe'mofo Mofavre'mofona asenima anteharege huno masesia zana omane'nne. <sup>21</sup> Jisasi amagema nentaza disaipol nagapinti mago zamimo anage hu'nne, Ramoka natrege'na pusazana nenfana ome asenteteno huno hu'nne. <sup>22</sup> Hianagi Jisasi'a anage huno asami'nne, **Nagri namage eme nentenka, atrege'za fri kerfamo'za, zamagr'i'a fri kerfa asenteho.**\*

*Jisasima tusi'a zahoko azeri aravahe'nea naneke  
(Mak 4:35-41; Luk 8:22-25)*

<sup>23</sup> Jisasi'ma votifima marenerige'za, Agri amage'ma nentaza disaipol naga'mo'za avaririza vu'naze. <sup>24</sup> Nevazageno tusi'a zaho komo ana tirupinti agafa huteno, ana timo'a eri kranto kranto huno votia refite'za hu'nne. Jisasi'a masenegeno anara hu'nne. <sup>25</sup> Hige'za amagema nentaza disaipoli naga'mo'za, Agrite eza eme azeri oneti'za anage hu'naze, taza huo Ramoka, Hago tagra friza nehune. <sup>26</sup> Hianagi zamagrikura anage hu'nne, **Nahigetma korera nehaze, onensa tamentintine nagara?** Nehuno Agra anante otino hanave ke huno ana zaho ene, tinena rurava huo higeno, kranto krantomata nehiretira, arane'nne. <sup>27</sup> Hige'za ana disaipol naga'mo'za tusi zamagogogu nehu'za, zahomo'ene, timo'ene ke'a erizafa nehiangi, ama inankna vahere? hu'naze.

*Hankromo znagu'a fre'nea netre Jisasi zanazeri so'e hu'nea naneke  
(Mak 5:1-20; Luk 8:26-39)*

<sup>28</sup> Jisasi'ma timofo kantu kaziga Gadara uhanatigeno'a, hankaro'mo znagu'a fre'negeke matipi nemani'a netremoke, Jisasi'ene tutagiba hu'na'e. Zanagra tusi hamponatikeno vahe'mo'za koro hu'za ana kantera novazane. <sup>29</sup> Zanagra tusi kezatike, Anumzamofo Mofavre'moka, nago'azana huorantenka tataro. Kagrama amafima e'nanana tagri tazeri haviza hunaku e'nano, knama osu'nefina? <sup>30</sup> Hagi mago'a ogantu'agna rama'a afu zagamo'za ne'za nene'za mani'naze. <sup>31</sup> Anante ana hankaromo'za anage hu'za antahige'naze, Tagri'ma tahe natitresunka, hurantegeta antu afu'zagafi uframneno. <sup>32</sup> Hazageno Jisasi'a anage hu'nne, **Viho!** Hige'za atiramiza afu'zagafi ufrageno, ana afu'zagamo'za zamagage zamagage hu'za zaveniteti tirupi tkaure'za ti nakri'naze. <sup>33</sup> Unefrizage'za afu' kva vahe'mo'za zamaga re'za vu'za kumate uhanati'za, anama hu'naza zamofo naneke vea' ome nezamasami'za ana netremokizni zanagu'afinti'ma hankro'mo'za atirami'zama afu'mofo agu'afi ufre'zama fri'naza naneke zamasmi'naze. <sup>34</sup> Anante ana kumapinti vahe kerfamo'za eri hantge'za Jisasinte e'za, emema nege'za, Ama tagri kazigatira ko atrenka vuo, hu'za hunte'naze.

\* <sup>8:22</sup> avamupima fri'naza vahe'mo'za, ama avufarema fri'nea vahera asentehogu hu'nne.

## 9

*Jisasi'a agia fri'nea ne' azeri so'e hu'nea naneke  
(Mak 2:1-12; Luk 5:17-26)*

<sup>1</sup> Hagi Jisasi'ma votifima mareriteno'a, tina takaheno kantu kaziga Agra'a rankumate vu'ne. <sup>2</sup> Anama hutenge'za vahe zagamo'za agamo fri'nea nera sesenku hu'za erizafa hu'za Agrite e'naze. Jisasi'ma zamagri zamentintima negeno agama fri'nea nekura huno, **Korera osuo mofavre'nimoka, kagri kumira hago eri atroe.** <sup>3</sup> Higeno mago'a kasegere ugagota hu'naza vahe'mo'za, zamagra zamagra anage hu'naze, ama'na ne'mo'a Anumzamofo huhaviza hunente. <sup>4</sup> Hazageno Jisasi'a zamagri antahintahizmia negeno, anage hu'ne, **Nahigetma kefo antahintahia tamagu'afina nentahize?** <sup>5</sup> **Inanke'mo oza hugahie, kefo zanka'a eri ataroe hanua kemopi, otinka vuo hanua kemo'e?** <sup>6</sup> **Hianagi Nagrama tamaverima hanuana, Vahe'mofo mofavremo'a ama mopafina hanave'a me'neankino kefovaz eri fanane huga vahe mani'ne. Hankina tameri ha'nena kegahaze,** huno nehuno rukrahe huno, ana agaza sti'nea ne'mofonku, **Otinka sesenkuka'a erinka nonka'arega vuo huno higeno,** <sup>7</sup> anante otino noma'arega vu'ne. <sup>8</sup> **Ana'ma hiaza vahe'mo'za nege'za, zamagra tusi kore nehu'za, Anumzamo'ma e'inahu hanave'ma Jisasima ami'nea zankura, Anumzamofo agi'a ahentesga hu'naze.**

*Jisasi'a Matiuma agi hu'nea naneke  
(Mak 2:13-17; Luk 5:27-32)*

<sup>9</sup> Ananteti Jisasi'a nevuno, mago nera agi'a Matiu'e nehaza ne' takisi zago zonegi'za onensa nompi mani'negeno omegeno, **Nagri namage eme anto,** higeno agra otino amage vu'ne. <sup>10</sup> Hagi Jisasi'ma vuno Matiu nompi ne'za ome nenege'za, rama'a takisi zagoma zonegiza vahe'ene, kumi vahe'mo'zanena e'za Jisasi'ene amage'ma nentaza disaipol naga'ane kave eme ne'naze. <sup>11</sup> **Ana'zama farisi vahe'mo'za nege'za, amage'ma nentaza disaipol nagara anage hu'za zamantahige'naze, Nahigeno tamagri'ma rempima hurami ne'mo'a, takisi zago zogi naga'ene, kumi naga'enena ne'zana nene hu'za zamantahige'naze?** <sup>12</sup> Hagi Jisasi'ma anankema nentahino'a amanage hu'ne, **Kri'zamima omane'nesia vahe'mo'za tusa (dokta) netera ovugahaze, hagi krima eri'nesaza vahe'mo'zage tusa netera vugahaze.** <sup>13</sup> **Jisasi'a zamasamino, Vutma avontafepi ome rezaganeta antahiho, ama kemo'a na'ane hu'nefi, Nagrira rumofo asuragitezanku nave'nesie, hagi (ofagura) kresramana vezankura nave'nosie.** Na'ankure Nagrama e'noana, fatgo vahe zamagi hunaku ome'noe. Hagi kumi vahe zamagi hanuge'za, zamagu'a rukrahe hihogu e'noe. (Hos 6:6.)

*Korapa avu'avale kasefa avu'avamofo naneke  
(Mak 2:18-22; Luk 5:33-39)*

<sup>14</sup> Hagi ana knafina Jonima amage nentaza disaipoli naga'mo'za Jisasinte e'za, Nahigeta tagrane Farisi vahe'enena ne'za a'o nehunke'za, Kagri kamage'ma nentaza disaipol naga'mo'za, ne'zana a'o nosaze? hu'za antahige'naze. <sup>15</sup> Hazageno Jisasi'a zamagrikura anage hu'ne, **Aravema hute'ma kenaku eme atruma hu'naza vahe'mo'za, aravema husia ne'ma zamagranema mani'nesige'za zamasunkura osugahaze, tamagefi?** Hu'neanagi mago kna ne'eankiza aravema hunaku'ma hania nera, zamagripintira avaretrete'za, anante zamagra ne'zana a'o hugahaze.

<sup>16</sup> **Mago'mo'a kahefa tavaravea korapa kenarera erinteno ohatigahie. Anama antenoma hatisia kenamo'a ampimpi huno eri tagato hura hugahie.**

<sup>17</sup> **Ana nehuno vahe'mo'a kahefa wainia, meme akruteti tro'ma hu'nea**

atafa waini tafempina tagi ovazigahie. Na'ankure meme akaruteti tro'ma hu'nea atafa tafemo'a, pro hanigeno wainimo'a tagisigeno, ana tintafemo'a haviza huzanku, kahefa wainia, kahefa meme akruteti tro hunte tafempi tagi vazisigeno, taregamoke knare hugaha'e.

*Fri'nea mofa azeri o'netino korankri eri amane hu'nea naneke  
(Mak 5:21-43; Luk 8:40-56)*

<sup>18</sup> Ana kema nehigeno, mago ugoteno keaga nehia ne'mo'a eno, Agrite eme kepri nehuno, anage hu'ne, Mofanimo'a mensi fri'neanki, enka kaza agrite eme antegeno, agra otino asimu erino mani'no. <sup>19</sup> Higeno Jisasi'ene Agri amage nentaza disaipol naga'mo'za otiza ana ne' avariri'za amage vu'naze. <sup>20</sup> Higeno mago ara korankri erino 12fu'a zagegafu mani'nea a'mo, Jisasi amefi eno zaza kena'amofo atupa'are eme avako hu'ne. <sup>21</sup> Na'ankure agrama agesama antahiana, nagra magoke'zana Agri za'za kenarafate az-eri sugeno'a, kri'nimo'a atrenantegahie huno agu'afina antahi'ne. <sup>22</sup> Hianagi Jisasi'a rukrahe huno negeno amanage hu'ne, **Mofani'moka korera osuo, kagrika'a kamentintimo kazeri knare hie**, nehigeno ana kna fatgo'are ame'ama huno ana ara kri'amo'a, so'e hunte'ne.

<sup>23</sup> Jisasi'ma vuno ana ugoteno keaga nehia kva ne'mofo nompima ufrenero, uvire tafema neraza vahe'ene, zavisu krasu nehu'za zamasuzampi mani'naza vahe krerfa ome nezmageno, <sup>24</sup> amanage huno zamasmi'ne, **Atretma eviho, na'ankure ama mofara ofri'neanki, amane avu mase'ne**. Angema hiazanku Agrira tusiza hu'za kiza zokago ke hunte'naze. <sup>25</sup> Hianagi ana vahe krerfa'ma huzmanteg'e'za meg'i' vazageno'a, ana nomofo agu'afi ufrea zamo akoheno ana mofa'mofo azante azerigeno ame huno ana mofa'mo'a oti'ne. <sup>26</sup> Higeno anama hiazamofo agenke'mo'a, ana kaziga vuno eno huno zamukine.

*Jisasima zanavu asu hu'nea ne'trene, agefu'na atupa hu'nea ne' zamazeri so'e hu'nea naneke*

<sup>27</sup> Ananteti Jisasi'ma nevigeno'a, zanavu asu hu'nea netremoke avariri'ne nevuke kezati'ne, Deviti mofavre'moka kasuragiranto huke hu'na'e. <sup>28</sup> Hagi ana nompima Jisasi'ma ufregke, ana zanavu asuhu ne'tremokea Agrite e'na'e. Hagi Jisasi'a amanage huno zanagrikura hu'ne, **Amana zana Nagrikura eriamane hugahie hutna, tanamentintia neha'o?** Higene zanagra Agriku anage hu'na'e, ozo Ramoka, <sup>29</sup> anante Jisasi'a zanavuragare avako nehuno, anage hu'ne, **Tanamentinti'ma haku anazamo'a tanavufare fore hugahie.** <sup>30</sup> Higeno zanavurgamo'a hari hu'ne. Jisasi'a hanave zanavumro zananteno, **Mago vahe'mo'a atrekeno ama'na nanekea ontahitfa hino.** <sup>31</sup> Hianagi zanagra atreke nevuke, ana nanekea ome hugantugama ana kaziga hu'na'e.

<sup>32</sup> Hagi vu'za e'zama nehzana, mago nera havi hankaro'mo ke'a erita-ganegenko kea nosia ne' avare'za Jisasinte e'naze. <sup>33</sup> Ana kefo avamu'ma ahenatitregeno'a, kema nosia ne'mo'a keaga hu'ne. Mika vea krerfamo'za antri nehu'za amanage hu'naze, amanahu'zana Israeli vahe'motafina kora-para fore higeta onke'nonazane hu'za hu'naze. <sup>34</sup> Hianagi Farisi vahe'mo'za amanage hu'naze, Jisasi'ma hankaroma ahenenatiana, hankromokizmi ugagota hankromofo\* (Satan) hankave'afi ana nehie hu'za hu'naze.

*Ne'zama eri atruhu vahe'mofo naneke*

\* **9:34** Hankrorema hu'neana havi avamuku hu'ne

<sup>35</sup> Ananteti Jisasi'a osi kumate'ene rankumatera vano nehuno osi mono nompi rempi hunezmino, Anumzamofo mona kumakura mono nanekea nezamasmino, mika kri eri amane hu'ne. <sup>36</sup> Ana vahe krerfama nezmageno, Jisasi'a tusiza huno asunkura huzmante'ne. Na'ankure zamagra tusi negine'za zamaza osu'are, kva vahezmi omani sipisipimo hiankna hu'naze. <sup>37</sup> Ananteti Jisasi'a amage nentaza disaipol nagaku amanage hu'ne, Ne'zamo'a hozafina rama'a anare'neanagi, eri'za vahera osi'a mani'naze. <sup>38</sup> Ana hu'negu anare'nea hozamofo nefo, Ramofo nunamu hutma antahigenkeno, mago'a eri'za vahera huzmantesige'za ome hamareho.

## 10

*12fu'a Aposolo naga huzmanteg'e'za vu'za e'za hu'naza naneke  
(Mak 3:13-19; Luk 6:12-16)*

<sup>1</sup> Jisasi'a amage'ma nentaza disaipol nagara zamagi hige'za ageno, zamagrama hankro'ma ahe natinetre'za, ruzahu ruzahu krima zamagu'afi me'nea vahe'ene, krima erinesaza vahe'ma zamazeri so'e hanaza hanavea zami'ne. <sup>2</sup> Ana 12fu'a aposol naga'mokizmi zamagi'a ama'ne, pusana, Saimoni'e (Pita'e hu'za nehaze) Andru'a agri negna'e, Jemisi'e Zebeti nemofo Joni nefu'e. <sup>3</sup> Filipiki Batolomiuki Tomasiki Matiu zamagire takesi zago eneria nere, Jemis Alfias ne'mofo ene, magora Tadiasi'e. <sup>4</sup> Romu vahe ha'renezmantaza Zaretie nehaza nagapinte nera Saimoni'e, hagi magora Judas Iskalioti Jisasima avrezmi'nea Aposolo nere.

*Jisasi'a eri'za zami'nea naneke  
(Mak 6:7-13; Luk 9:1-6)*

<sup>5</sup> Jisasi'a ana 12fu'a aposolo nagara hunezmanteno, amanahu ke huno zamavumro ante'ne, Megi'a vahe'mokizmi kaziga oviho, ana nehutma mago Sameria vahe kumapina u'ofreho. <sup>6</sup> Hianagi vanazana, Israeli vahe'ma sipisipigna hu'za fanane hu'naza vaheteke viho. <sup>7</sup> Tamagrama nevusutma, ama'na naneke hiho, Anumzamofo kumamo'a hago erava'o nehie, nehutma, <sup>8</sup> kria eri amane nehutma, fri vahera zamazeri o'netitma, fugo namure'nea vahera zamazeri so'e nehutma, hankrora ahenatitreho. Hankavea amane tamuanki, amane zamiho. <sup>9</sup> Magore hutma golio, silvo, kopa tamasopare kupina eri'oritfa hiho. <sup>10</sup> Nantuma vukura tmavate kutamia e'oriho, mago'a anakrekuro, tamaga none, azompanena e'oritfa hiho. Na'ankure eriza vahe'mo'ma upama haniazana amigahie. <sup>11</sup> Osi taonifi vanazano, kumatema vanazana, haketma erifore hutma aza anampina knarera hu'neo, zamagrane maninetma, vukuma hanaza kna vugahaze. <sup>12</sup> Hagi ana nompima unefresutma, tamagra musenkea huzmanteho. <sup>13</sup> Kegeno ana nompi vahe'mo'ma knare'ma hanagenka, karimpa fru nanekea atregeno ana nonte meno. Hianagi knarema osnagenka, karimpa fru nanekea ka'a atregeno kagripi meno. <sup>14</sup> Hanki mago'a vahe'mo'zama muse hu'za tmareontegi, nanekema hanazama ontahisagetma, anankumama netresutma tmagareti kugusopa arupopo hunetretma, ana kumara atretma viho. <sup>15</sup> Tamage hu'na neramasmue, Anumzamo'ma keagama refako hu knazupa, Sodomune, Gomora kumate korapa hu'neazana, agatereno ranknaza erigahie.

*Hakare knaza fore hania naneke  
(Mak 13:9-13; Luk 12:12-17)*

<sup>16</sup> Antahiho, Nagrama humanermantoana afi kramo'za avite'za mani'nafi sipisipi afumo ufrea kna hu'na huneramantoe. Hagi osifave'mo'ma ne-hia kna hutma kva hunetma, knare antahintahi eneritma, maho na-mamo nehia avu'ava hutma mago havizana osiho. <sup>17</sup> Hu'neanagi va-hekura kvahihio, na'ankure kanisolo vahete zamagra tamavre'za vu'za keaga huneramante'za, osi mono nompi omeramante'za sefukno tamiga-haze. <sup>18</sup> Ana nehu'za mago'ene tamavre'za Gavanane, kini vahetaminte vugahaze. Na'ankure tamagra Nagri namage'nentaza nagare. Hagi Nagri nanekea Jiu vahera nezmasamita, meg'i vahera anahu hutma za-masamaho. <sup>19</sup> Hianagi tamagrima tamavre'za vanagetma, inankna keaga hugahune hutma tamagesa ontahihio. Na'ankure nankna kema hanaza kea, anakna fatgore Anumzamo'a tmasamisnigeta hugahaze. <sup>20</sup> Na'ankure tamagra'a ana keaga osugahaze. Hagi tamagri neramafa Avamumo tam-agripi efreno hugahie. <sup>21</sup> Nefu'a ami'mi huno nefuna ahe frigahie, nef'a mofavre'a anazanke hugahie. Hanigeno mofavre zagamo'za, arera afana ha'rezmanente'za zamahe frigahaze. <sup>22</sup> Hakare vahe'mo'za Nagri nagima hesaza'zanku ha'reramantegahaze. Hianagi aza'o oti hanavetino refare'ma vanimofona agu'vazigahie. <sup>23</sup> Hianagi mago kumate'ma vnageno tmazanza hanagetma atretma ru kumate viho. Tamage hu'na neramasmue, Israeli kumapina vuvaga ore'nesageno, Vahe'mofo Mofavrea egahie.

<sup>24</sup> Amage'ma nentea disai-pol nemo'a rempi huzami nera agatereno mani anagamu otrene. Kazokzo eriza nemo'a, kva ne'amofona agate'oren. <sup>25</sup> Amne amage'a nentea ne'mo'a rempima humi ne'a gnara hugahie. Hanigeno kazokzo eri'za vahe'mo'a kva ne'agnara hugahie. Hagi mago naganomo ugotama huzmant'easia ne'kuma ugagota hankrore (Belzabul) haniana, naga'amofonena mago'ane havi zamagi zamigahie!

*Vahekura kore osunka, Anumzamofonku kore hunto hu'nea naneke  
(Luk 12:2-7)*

<sup>26</sup> Zamagrirkura korera osiho, hakare fraki'neazana efore hugahie, hakare'zama oku'a me'neazamo'a efore hugahie. <sup>27</sup> Nagrama hanimpima tmasamisua kea, masare zamasamaho. Hagi sumi kema tamagesafima antahisaza kea, nomoteti kezatitma hugahaze. <sup>28</sup> Tamufama tamaha fri vahekura korera osiho. Hianagi tamagu'a ahe ofrigahie. Anazanku kore'ma huntessazana, tamagu'anee tamavufanema teve tirupima kre fanane hanimofo Anumzamofonku korera hunteho. <sup>29</sup> Tare kisave nama azeriza osi zagonera netrafi? Ana hu'neanagi, mago zanimo'a mopafina negafa avesi zampintira asgahu orami'ne. <sup>30</sup> Kanunte'ma me'nea kazokara ko miko hampri'ne. <sup>31</sup> Ana hu'negu korera osuo, kagra miko kisave nama'zaga zamagaterenka raza mani'nane.

*Jisasi agenke huama hanuna naneke  
(Luk 12:8-9)*

<sup>32</sup> Aza'o vahepi huama huno, Jisasi vahe mani'noe hanimofona, Nagra monafinka Nenfante agrira huama hu'na nagri vahe mani'ne huntegahue. <sup>33</sup> Hianagi aza'o, Nagrama vahepi hufra kisimofona, Nagra monafinka Nenfa avurera agrira hufra kintegahue.

<sup>34</sup> Nagrama e'noa zankura rimpa fruza erino ama mopafi e'ne hunka kagesa ontahio. Nagrama e'noana rimpa fruza erina om'e'noe, hagi ha' kazi bainati eri'na e'noe. <sup>35</sup> Na'ankure Nagrama e'noana vahe kankamu retro hanenkeno nefana ha' rentesigeno, mofa'amo nerera ha' rentesigeno,

Nenofero'a a' nenofero ha' rentesigeno,<sup>36</sup> hagi ana ne'ma ha'ma rentesazana agri'a naga'amoza otiza hara rentegahaze.<sup>37</sup> Aza'o nefano, nererama avesinte zamo'ma ra hanigeno, Nagri'ma avesinante zamo osima hanimo'a, Nagri'ma namage'ma antezantera knarera osugahie. Hanigeno aza'o ne'aguro mofa'agu'ma avesinte zamo'ma ra hanigeno, Nagri'ma avesinante zamo osima hanimo'a, Nagri'ma namage'ma antezantera knarera osugahie.<sup>38</sup> Hanigeno iza'o keka zafa'a erisaga huno namage ontesimo'a, Nagrima namage antezantera knare osu'ne.<sup>39</sup> Iza'o agra'a nomanizama'are asimu'a atresimo'a, asimura e'origahie. Hagi iza'o Nagriku huno nomanizama'a atresimo'a henka'a asimura erigahie.

*Museza erisanaza naneke  
(Mak 9:41)*

<sup>40</sup> Iza'o kagrima kavaresiana, Nagri navaregahie. Hagi aza'o Nagrima navaresimo'a, hunantegen a e'nomofa avaregahie.<sup>41</sup> Aza'o kasanampa ne'ma avaresimo'a, kasnampa ne'mo'ma erisia avamente mizana erigahie. Aza'o fatgo ne' avaresimo'a, fatgo ne'mo'ma erisia avamente mizana erigahie.<sup>42</sup> Hagi azago zasi tintafama taginka namage'ma nentaza nagapinti mago agima omame'nesi mofoma amisamoka tamagerafa hunka mizanka'a erigahane.

## 11

*Joni amage nentaza naga'mo'za Jisasinte vu'naza naneke  
(Luk 7:18-35)*

<sup>1</sup> Jisasi'a 12fu'a amage'ma nentaza disaipol nagamokizmi naneke zamasmi vagareteno, anantetira rankumate'ene ne'onse kumate ene mono ke nehuno, rempi huzamiku vu'ne.

<sup>2</sup> Hagi Joni'a kina nompi mani'neno, Kraisi'ma eria erizamofo ke nentahino, Joni'a agri'a amagema nentaza disaipol naga agenoka ome hutma keho huno huzamanteg'eza,<sup>3</sup> vu'za, Kagra avegama ante'nomokafi ru nere, hifi tagra mago'a vaheku kegahahue?<sup>4</sup> Ana ke nona'a Jisasi'a anage huno zamasmi'ne. Tamagra vutma, nentahita, kaza zana Jonina ome asamiho,<sup>5</sup> avu suhu vahe'mo'za kazageno, zmaga havizahu vahe'mo'za kana vazageno, fugo namuzmaren'ea vahe'mo'za knare hazageno, zamagesa ankanire vahe'mo'za antahi'zageno, fri vahe'mo'za otizageno, zamunte omame vahe'mo'za knare muse ke antahi'naze.<sup>6</sup> Hanki iza'o Nagrima huazanku'ma amentintima ataresigeno uoramisimofona, Anumzamo'a asomu huntegahie hutma ome asamiho.

<sup>7</sup> Joni amagema nentaza disaipol naga nevazageno, Jisasi'a agafa huno anampi mani'naza kevua Joninkura zamasmi'ne, Ka'ma kopima vu'nazana na'a ome ke'naku vu'naze? Zahomo traza eri tagosi hiazza ke'naku vu'nazafi?

<sup>8</sup> Hagi na'a ome kenaku vu'naze? Mago vahe'mo marerisa kukena hu'nea kenafi? Kinimofo kumapi nemaniza vahe'mo'zage marerisa kukena eri nehankraze.<sup>9</sup> Hu'neanagi na'a ome kenaku vu'naze? Mago kasnampa nepi? Tamage hu'na Nagra neramasamue, hakare kasnampa vahera zamagatereno mani'nea ne'ome ke'naze.<sup>10</sup> Ama ana neku avontafepina amanage huno krentene, *Antahio, kema erino vu vahe'ni'a Nagra huntojeno ugagota huganteno kama vanana kana varino vugahie* hu'ne. (Mal 3:1)<sup>11</sup> Tamage hu'na Nagra neramasamue, a'nemo'za kasema zamante'naza vahepintira, mago'mo'e huno mono tima frezamante Joni knara osu'ne! Ana hianagi Anumzamofo kumapima osi hu'nemo, anamo agrira agatere'ne.<sup>12</sup> Mono ti

frezamante Joni knareti eno menima eana, Anumzamofo kumama erikura hanavetiza kazigazi hu'za ha' nehaze.<sup>13</sup> Hagi miko kasnampa kene, kasegea nehzageno eno Joni knare eme atre'ne.<sup>14</sup> Hagi Nagrama nehua kema antahinakuma hanutma, antahihi, Elaijae egahie hu'nea nera agra'a Joni'e.<sup>15</sup> Iza'o agesama me'nenimo'a, ama nanekea antahi ankereno.

<sup>16</sup> Hianagi amagnafi mani'naza vahe kura inankna ke zamagrakura hunte'na hugahue? Amanahu kna hu'ne, maketi kumapi mofavre'zagamo'za kanuzage hu'za mani'ne'za, mago'amokizmigu ke'za atigantu zami'za,

<sup>17</sup> tagra konke tafe reneramantonketa, tamagra avoa nohagaze, zavi nehunketa, tamagra zavira notaze hu'za hu'naze.<sup>18</sup> Hagi Joni'ma manino e'nea knafina, ne'zana rama'a oneno, waini tina onege'za, zamagra havi avamu agripina mani'ne hu'naze!<sup>19</sup> Vahe'mofo mofavremo eno ne'zane tine nenege'za, zamagra anage hu'naze, keho ne'za nevaganerero, aka tinte nehuno, takesi eri vahe'ene kumi vahe'mokizmi ronezamie hu'naze! Ana hu'neanagi anama hu'nefina knare antahi'za, eriama hu'ne.

*Zamagu'a rukarahe osu'naza kumamoza knaza erisaza naneke  
(Luk 10:13-15)*

<sup>20</sup> Anante Jisasi erigafa huno mago'a kaguvaza higeza ke'naza ranra kumateti vahe'mo'za zamagu'a rukarehe osaza zanku, ke ontahi vahere huno huhaviza huzamantene.<sup>21</sup> Kva hiho Korasini vahe'mota! Kva hiho Bedsaita vahemota tusi nasunku huramantoe! Na'ankure kaguvazama huazama Tairine, Saidoni kumatema huasina, zamagra zamasunku kukena nehu'za, tanefa fare'za zamagu'a rukarehe ko hazasine.<sup>22</sup> Tamage hu'na neramasamue, Tairi vahe'mo'zane, Saidoni vahe'mo'za Anumzamoma vahe'ma refakoma huknare osi'a knaza erigahazanki, zamagra rama'a knaza zamagareta erigahaze.<sup>23</sup> Hagi tamagra Kapaniumu vahe'mota monarerar marerigahafi? Anara osugahaze. Tamagra fri vahe'mofo kumapi Hedes uramigahaze, Nagrama tamagripima hua kaguvaza Sodomu huasina, menina amane mesine.<sup>24</sup> Tamage hu'na neramasamue, vahe'ma refakohu knarera, Sodomu mopafi vahe'mo'za erisaza knazana, agateretma ra knaza erigahaze.

*Jisasinte ne-enunkeno tagu'amo fru hania naneke  
(Luk 10:21-22)*

<sup>25</sup> Ana knazupa Jisasi anage huno nunamuna hu'ne, Nenfaga monane, mopamofo Ra mani'nane, susu hu'na musenke hugantoe. Antahi'zane vahe manita, antahi ankerenone nehaza vahetera, eri frakinenga, osi mofavre'gna hu'naza vhete eri ama hu'nane.<sup>26</sup> Hagi Nafa'nimoka amanahu'zama hua zamo'a, Kagri kazeri muse nehie.

<sup>27</sup> Miko'azana Nenfa nami'ne, magomo'a Nemofona antahino keno osu'neanagi, Nefake antahi'ne. Mago'mo'e huno Nefana antahino keno osu'neanagi, Nemofoke antahino keno hu'ne. Hagi Nemofoma eri averi hugahue himofo, eri averi hugahie.

<sup>28</sup> Ana'ana nehuta maragu'za neti'nageno, knama tamavenesinimota nagrite enkena tamazeri fru ha'neno.<sup>29</sup> Nagri agarenamare zafa eri kofinetma, Nagriteti rempi hiho. Na'ankure Nagra akohena nagu'a antefru hu'na nemanue. Hanigeno tamagu'amo'a fru hugahie.<sup>30</sup> Nagri agarenmare zafama eri'amo'a oza higeno, knazanima erisaga hu'amo'a, amuho osu'ne.

## 12

*Jisasima mani fruhu knamofo (Sabat) Rane hu'nea naneke  
(Mak 2:23-28; Luk 6:1-5)*

<sup>1</sup> Hagi ana kna mani fruhu knazupagino (sabat), Jisasi'a witi hozafi nevige'za, Agri amage nentaza disaipol naga'mo'za zamaga'atege'za witi-mofo raga'a taniza ne'naze. <sup>2</sup> Hianagi Farisi vahe'mo'za, anama hazaza nezmage'za, anage hu'za Jisasina asmi'naze, Ko! Kagri kamage nentaza disaipol naga'mo'za, kasegemo osuo hu'neaza mani fruhu knarera nehaze. <sup>3</sup> Hianagi Jisasi'a anage huno zamasmi'ne. Deviti ene magokama vu'naza naga'mo'za zmagamatege'za hu'naza zana hampritma avontafepina ontahinazo? <sup>4</sup> Zamagrama Anumzamofo nompi mareriza ruotge hu'nea bretima omeri'za ne'nazana, kasegemo huno pristi vahe'moke negahie hu'nea bretia? (1 Sam-Zga 21:1-6) <sup>5</sup> Hifi kagra kasegefina hamprinka onke'nano, pristi vahe'mo'za mani fruhu (Sabati) kna rufunetagizanagi havizana nosaze? <sup>6</sup> Hianagi Nagrama neramasmuana, mono noma agatere'neazana ama me'ne. <sup>7</sup> Tamagrama amana kemofo agafa'ama antahiamma hanutma, *Nagrime navesiana vaheku'ma asuragine zanku navesianki, kresramna vuuzankura nave'osie hu'ne.* (Hos 6:6) *Ke a omne vahera tamagra huhaviza huozmanegahaze.* <sup>8</sup> Na'ankure Vahe'mofo Mofavremo mani fruhu knamofona Rana mani'ne.

*Mani fruhu knazupaaza sti'nea vahe azeri so'e hu'nea naneke  
(Mak 3:1-6; Luk 6:6-11)*

<sup>9</sup> Ananteti Jisasi'a atreno osi mono nozimifi (Sinagok) vu'ne. <sup>10</sup> Anampina Mago aza sti'nea ne' mani'negeno, zamagra Jisasina keaga hunte kanku nehake'za, Jisasina antahige'za, Kasegemo'a vahera mani fruhu knazupa azeri knare huo hunefi? hazageno, <sup>11</sup> Jisasi'a zamagrikhu huno, *Amu'no tamifintira ina ne'moka sipisipi afukamo mani fruhu knare'ma kerifi uramisi-genka avazuhu anaga otregahano?* <sup>12</sup> *Vahe'mofo kna'amo'a inankna higeno, sipisipimofo kna'amo'a inankna hu'ne, e'ina hu'negu manifruhu (sabat) knarera vahera amne aza hugahane.* <sup>13</sup> Anante aza sti'nea nera anage huno asmi'ne, *Kazana ru fatgo huo!* Higeno azana ru fatgo higeno, mago kaziga azamo hu'neaza huno fatgo hu'ne. <sup>14</sup> Hianagi Farisi vahe'mo'za atre'za atinerami'za, ahesaza kanku hakeza keaga huge antahige hu'naze.

*Jisasi'a Anumzamofo eri'za vahe mani'nea naneke*

<sup>15</sup> Jisasina ahenaku nehazageno nentahino, anampinti atreno nevige'za, rama'a vahe'mo'za amage avaririza nevazageno, Agra mika kri'zmia zamazeri knare hunezmantero, <sup>16</sup> anage huno zamasmi'ne, Agra'a inanka ne' mani'nefi vahera ozmasmiho huno hanavetino zamasmi'ne. <sup>17</sup> Ama'i Aisaia kasnampa ne'mo hu'nea kemofo nena'a fore hu'ne. <sup>18</sup> *Keho Nagri eri'za vaheni'a huhamapri ante'noana, Nagra navesi nentogeno nagu'amo muse agrikura nehie. Nagra avamu ni'a agripi ante-sugen, agra fatgo zamofona huama meg'i'va hetehugahie.* <sup>19</sup> *Agra fra ovazino, ranke osuno, ranke huno kampina vano osugahie.* <sup>20</sup> *Hakea erifu otagogahie, tevemo'a tegege vazigahianagi Agra fatgo zanke nehanigeno fatgo'zamo agateregahie.* <sup>21</sup> *Agri agifi meg'i'va vahe'mo'za zamentinti'a hugahaze.* (Ais 42:1-4)

*Jisasine, havi avamu kva ne' Belsebul naneke  
(Mak 3:20-30; Luk 11:14-23)*

<sup>22</sup> Anante hankro'mo agu'afi fre'nea ne'mofona avurga asu higeno kea nosia ne' avre'za Jisasinte vazageno, Agra eriknare huntogeno kea nehuno avua ke'ne. <sup>23</sup> Anama hige'za miko vahe kevumo'za antri nehu'za anage hu'naze, Agra ama Nera David nemofopi? <sup>24</sup> Hianagi Farisi vahe'mo'za ana ke nentahi'za anage hu'naze, Ama ne'mo hankro'ma hunte'neana, hankro'mofo kagota kva Belsebuli hanavefi hunte'ne hu'naze. <sup>25</sup> Jisasi'a antahintahizmi refako huno nezmageno anage huno zamasmi'ne, Mago mago rankumapi vahe'mo'za amu'nompinti refakoma hanuza, zamagrazmi zamazeri haviza hugahaze. Hagi mago rankumamo'o, nomo o refako osnu'za hanavetigahaze. <sup>26</sup> Ana hu'neanagi Satama, Satanima humegi atesiana, agra'a ha' arentegahie. Inankna huno agri rankumamo'a megahie. <sup>27</sup> Nagrama hankromofo kva Belsebuli hihamure, hankroma \* hunentanena, iza hihamure tamagri mofavremo'za hunentaze? E'ina agafare tamagrira refako hurmantegahie. <sup>28</sup> Hianagi Nagrama Anumzamofo hanavefi hankro'ma hunentanena, Anumzamofo kumamo'a tmagrite ko e'ne. <sup>29</sup> Inankna huno mago ne'mo'a hanave vahe'mofo nompina vuno miko'zama'a erigahie. Anara osuneno kota'zana ana nera azerino kina renteteno, anante noma'afi mrerino kumzafa nese. <sup>30</sup> Nagranema ommani'enamomo'za ha' Nagrira renenantaze. Hagi iza'zo Nagrane atru huza ommani'namoza, fragu vaziza vu'za e'za hugahaze. <sup>31</sup> E'ina hu'negu Nagra amanage hu'na nerasmamue. Mika azanavankene kumi'ma vahe'mo'zama hanazana, Anumzamo'a atre zmantegahie. Hianagi Ruotge Avamumofo azanava ke hunteszazana, Anumzamo'a kumi zmia atre ozmantegahie. <sup>32</sup> Iza'o Vahe'mofo Mofavregu mago kema huhaviza hunte'sazana, Agra kumizmi'a atre zmantegahie. Hianagi iza'o Ruotge Avamumofonku huhaviza hunteszaza vahera menine, henka'anena kumi zami'a atre ozmantegahie.

*Zafane rga'amofo naneke  
(Luk 6:43-45)*

<sup>33</sup> Hagi Jisasi'a mago'ene huno, Knare zafamo'a knare raga'a regahie. Hagi havi zafamao'a havi zafa raga rentegahie. Na'ankure ragare negenka zafamofona knare hu'neanki haviza hu'neanki hugahaze. <sup>34</sup> Tamagra ha' osifave'mofo mofavre kevu mani'naze. Havizama nehana vahe'moka, inankna hunka knare'zana hugahane? Na'ankure krimpafi me'nea kea kagi'mo nehie. <sup>35</sup> Knare vahe'mo'a knare'zama rimpafima erinte'neaza, agimo'a eriama nehie. Havi vahe'mo'a havizama rimpafi erinte'nea agi'mo'a eriama nehie. <sup>36</sup> Hianagi Nagra amanage hu'na neramasamue, Anumzamo'ma vahe'ma refakoma huknarera, miko'a havigema nehaza kere, tamagenoka huzmantegahie. <sup>37</sup> Naneke hunante fatgo hu'nane huno refako hugantegahie. Naneke hunenante haviza hu'nane huno refako hugantegahie.

*Avame'za Jonante fore hu'nea naneke*

<sup>38</sup> Anante mago'a kasegere ugagota hu'naza vahe ene Farisi vahe'mo'za anage hu'za asmi'naze, Rempi Hurami ne'moka, mago avame'za Kagra hananketa kesunegu nehune. <sup>39</sup> Hianagi Jisasi'a kenona anage huno zamasmi'ne, Ama knafi vahe'mo'za kefoza nehu'za zamentinti nosaza vahe'mo'za avame'za kenaku nehazanagi, mago avame'zana onkegahaze, kasnampa ne' Jona avame'zanke kegahaze. (Jona 1:17) <sup>40</sup> Anahu kna huno, Jona'a tagufa zagegi tagufa haninki huno nozamemofo rimpafi

\* 12:27 Hankrorema hu'neana, havi avamuku hu'ne.

*mase'neankna huno Vahe'mofo Mofavremo tagufa zagegi, tagufa haninki huno mopa agu'afi masegahie.* <sup>41</sup> Ninive vahe'mo'za Anumzamoma refakoma hania knarera, ama knafi vahe ene magoka oti'za, keaga hurmantegahaze. Na'ankure Jona'ma huama hia kere zmagu'a rukrahe hu'naze. Hagi keho Jonama agatere'neana ama'ne. <sup>42</sup> Hanki sauti kazigati kuini a'mo Anumzamo'ma refakoma hania knarera otino, ama knafi vahe'motma keaga hurmantegahie. Na'ankure afete moparegati eno Solomonini knare antahintahi antahinaku e'ne. Hagi ko, Solomonima agatere'neazana ama me'ne.

*Havi avamu'mo ete rukrahe huno nea naneke  
(Luk 11:24-26)*

<sup>43</sup> Hagi havi avamu'mo, vahe'ma atreno vuno, noma manisia kumaku hagege kokampi ome hakeana kefore osu'ne. <sup>44</sup> Ana huteno anage hu'ne, ko'ma mani'nena atre'na e'nofi umanisue nehuno, eno eme keana harafi huno eri antefatgo hu'negeni ke'ne. <sup>45</sup> Eteno vuno 7ni'a havi avamu tmimo'ma agri'ma agtere'nea ome zamavreno ege'za ufre'za mani'naze. Henkama mani'nea mani'zamo'a, pusama mani'nea mani'zana agtereno havi zantfa hu'ne. E'inahu avu'avaza ama knafi havi zamavu'zmava nehaza vhahetera fore hugahie.

*Jisasi nererane aganahe'i naneke*

<sup>46</sup> Jisasi'a ana naneke atru hu'naza vahe kevumokizmi nezmasmige'za, Nerera ene aganahe'za Agri'ene keaga hunaku meg'i a eman'i'aze. <sup>47</sup> Anante mago'a vahe'mo Agrira asmino, Negrera'ene kagnahe'za Kagrane keaga hunaku meg'i a eman'i'aze higeno, <sup>48</sup> anama asmi'mofonku anage huno asmi'ne, Nagri nenrera ene nagnahe'za izaza mani'naze? <sup>49</sup> Ana nehuno amage nentaza disaipol naga'a mani'narega azanu zmerino anage hu'ne. Ko, nenrera ene naganahe'za ama mani'naze. <sup>50</sup> Iza'o monafi mani'nea Nenfa avesi'zama amage'ma antesimo'a, agra nenagna'ene nensarozane, nenreraza mani'naze.

## 13

*Hozafî avimza atre'nea fronka naneke  
(Mak 4:1-9; Luk 8:4-8)*

<sup>1</sup> Ana knareke Jisasi'a nompinti atreno vuno, tiru ankenare umani'ne. <sup>2</sup> Rama'a vahe'mo'za mani'nere umani korave hazageno, votifi marerino umanige'za, rama'a vahe'mo'za tiru ankenare oti'aze. <sup>3</sup> Ana huteno Rama'a fronka kea anage huno zamasmi'ne. Antahiko hoza kri ne'mo'a avimza krinaku vu'ne. <sup>4</sup> Ana'ma huno avimzama negrigeno'a, mago'a avimzamo'a kamofo ankinafi evuramigeno, nama zagamo eno eme ne'ne. <sup>5</sup> Mago'a avimzamo'a havege huno osi'a mopa me'nefi evurami'ne. Na'ankure osi'a mopa me'negeno, ame huno hageno mareri'ne. <sup>6</sup> Hianagi zagemo hanatino mrerino temagi atre'ne, na'ankure rafu'namo krakaka kigeno, zagemo te osapare'ne. <sup>7</sup> Hagi mago'a avimzamo'za ave'ave trazampi evuramigeno, ana ave'ave trazamo hageno rentrako higeno haviza hu'ne. <sup>8</sup> Hu'neanagi mago'amo'a knare mopafi evuramino ne'zana rente'ne. Mago'amo'a 100'a rentegeno, mago'amo'a 60'a rentegeno, mago'amo'a 30'a rente'ne. <sup>9</sup> Iza'o agesama me'nenimo'a ama kea antahise hino.

*Fronka kema zamasmi'nea kemofo agafa naneke  
(Mak 4:10-12; Luk 8:9-10)*

<sup>10</sup> Hagi agri'ma amage'ma nentaza disaipol naga'mo'za Jisasinte e'za anage hu'za antahige'naze, Nahigenka fronka kefintikera nezmasmi'ne?

<sup>11</sup> Hazageno Jisasi'a ke nona huno, *Anumzamofo kumapi oku'a me'nea zantamina kehogu tamaveri nehie*. Hianagi zamagrira zameri nosie. <sup>12</sup> Iza'o mago'azama eri nenimofona, mago'ene ami'nigeno, agra eri avitegahie. Iza'o e'ori nenimofona, mago'a zama eri'eniana hanregahie. <sup>13</sup> Ama'na agafare, Nagra fronka kefintira nezmasmoe. *Na'ankure zamagra negazanagi keso'e osugahaze, antahigahazanagi antahi so'e hu'za amara osugahaze.*

<sup>14</sup> E'inama hu'naza'zamo'a kasnampa ne' Aisaia hu'nea nanekemo'a avufa'a fore hu'ne, *Tamagra antahigahazanagi, amara osugahaze. Tamagra kega-hazanagi, keanke oregahaze.* <sup>15</sup> *Na'ankure vahe'mokizmi zmarimpamo hanavetino anaki'ne. Higeno zmagesareti'ma kema antahizamo'a amuho hunezmantege'za zmua asu'nekiza, zmurgaretira zamua onke'za, zmagesa nontahiza, zamagu'aretira amara nosazankiza, zamagu'a rukrehera osnagena, Nagra zamaza osugahue.* (Ais 6:9-10.)

<sup>16</sup> Hianagi tamagra ketama antahitama hazazante Anumzamo asomu huneramante. Na'ankure tamavua negeta tamagesamo'a nentahie.

<sup>17</sup> Tamage hu'na nerasmoe, korapa rama'a kasnampa vahe'mo'zane, fatgo vahe'mo'za amama negaza'za kenaku hu'nazanagi onke'za, nentahizankea, antahinaku hu'nazanagi ontahi'naze.

*Avimzama ase'nea fronka kemofo agafa'amofo naneke  
(Mak 4:13-20; Luk 8:11-15)*

<sup>18</sup> Jisasi'a mago'ene anage hu'ne, *Antahihi, Avimza ase'nea fronka kemofo agu'agesa'a, ama'ne*, <sup>19</sup> Mago'a vahe'mo'za Anumzamofo kumamofo knare naneke nentahi'za, antahi ama osaza nagamofona, Sata'a eno zamarimpafi me'nea kea emeri atre'ne. Amana hu'ne, kamofo ankinifi avimza kri'nea kna hu'ne. <sup>20</sup> Mago avimazamo have mopafi evurami'neana, amanahu kna vaheku hu'noe. Anumzamofo naneke nentahino, ame'ama huno muse hu'ne. <sup>21</sup> Ana hianagi rafu'na uorminegeno, osi'a kna mani'negeno ana nanekemofonte rehe'za egeno'a, ana nanekea ame huno atreno traka nehie. <sup>22</sup> Hagi ave'ave trazampi evu rmi'nea avimazana anahu kna hu'ne, Anumzamofo kea antahiteno, ama mopafi afufenonku agesa nentahigeno, ana zamo avazu higeno Anumzamofo kemo'a nena raga'a reonte'ne. <sup>23</sup> Hianagi so'e mopafi kri'nea avimza avimo'a, amanahu vaheku hu'noe, naneke nentahino ana nanenkemofo agu'agesa'a ama nehuno, nena raga'a renteno mago'amo'a 100'a rentegeno, mago'amo 60'a rentegeno, mago'amo 30'a rente'ne.

*Hozafi za'araza tagi'nea fronka naneke*

<sup>24</sup> Jisasi'a anage huno mago'ene fronka ke zamasmi'ne, Anumzamofo kuma'mo'a mago ne'mo hoza'afi knare avimza aseankna hu'ne. <sup>25</sup> Hianagi avimaza asseteno umasenegeno, ha' vahe'amo havi traza'mofo avi ana witi hozafi eme neseno vu'ne. <sup>26</sup> Anama hutegeno'a witimo hageno raga ome renentegeno, havi trazamo enena hage ama hu'ne. <sup>27</sup> Hagi nena nehigeno kazokzo eri'za vahe'amo'za e'za, hoza nefana antahige'za, ramoka kagra knare avimzanke hoza ka'afina kri'nampi? Inankna huno havi trazana hage'ne? hu'za antahige'naze. <sup>28</sup> Hoza nef'a'anage huno zamasmi'ne, Ha' vahetimo anara hu'ne! huno hige'za, kazokzo eri'za vahe'mo'za anage

hu'za asmi'naze, knare tatresanketa ome zanegi atregahumpi? hu'za antahige'naze.<sup>29</sup> Hianagi hoza nef'a anage huno zamasmi'ne, a'o tra'za zanefisafima witine zanefigahazanki atrenkeno meno.<sup>30</sup> Athrenkeno magoka tarega moke hage'ne hoza hamare knare uhanati'o, hozama hamareknare, hoza hamaresaza vahera nagra zamasmigahue. Kotazana havi traza zanegita nofi anakita tevefi kresigu eri atru hiho. Hianagi witi eri atru hutma nezama ante noni'afi eri antegahaze huno zamasami'ne.

*Masteti zafamofo fronka naneke*

(Mak 4:30-32; Luk 13:18-19)

<sup>31</sup> Jisasi'a anage huno mago'ene fronka ke zamasmi'ne, Anumzamofo kumamo'a masteti zafa rgamofo avima'agna hu'neankino, vahe'mo erino hoza'afi negrie.<sup>32</sup> Mago'a zafa avigna osu'neanki onensa avima'a me'ne. Hianagi ana osi zafamo'a ra huno mago'a hozafima me'nea zantamina agteregeno zafa segeno, *Nama'zagamo'za eza no azankunate emegiza amu ante'naze.* (Ezi 31:3-14.)

*Zistimofo fronka naneke*

(Luk 13:20-21)

<sup>33</sup> Jisasi'a anage huno mago'ene fronka ke zamasmi'ne, *Mona kumamo'a amanahu hu'ne, mago a'mo zisti erino witi flauapi herafinteno kregeno ra hiankna hu'ne.*

*Fronka kemofo agafa'a eriama hu'nea naneke*

(Mak 4:33-34)

<sup>34</sup> Jisasi'ma maka kema vea kevufi hu'neana fronka kege zamasmi'ne. Hagi Agra amate kea ozmasmi'ne.<sup>35</sup> Amanage huno kasnampa ke hu'nea kemofo avufa'a fore hu'ne, *Nagra fronka kefintike kea hugahue. Nagra monane mopa fore osu'nereti'ma eno menima ama knare'ma e'neana, oku'a me'nea kea eri ama hugahue.* (Sams-Zga 78:2.)

*Za'arazama hozafima hage'nea fronka kemofo agafa'e*

<sup>36</sup> Ana huteno ana vahe kevua, zamatreno nompi ufre'ne. Agri'ma amage'ma nentaza disai pol naga'mo'za Agrite e'za, anage hu'za asmi'naze, Hozafi hage'nea havi tra'zamofo agu'agesa'a tasmio.<sup>37</sup> Hazageno Jisasi'a anage huno zamasmi'ne, *Knare avimza ase'nea nera, Vahe'mofo Mofavre.*

<sup>38</sup> Hagi hoza, ama mope, knare avimzana, Anumzamofo mofavrermine, havi tra'zana, Sata mofavreramine.<sup>39</sup> Hagi ha'vahe'mo havi traza kri'neana Sata'e. Hozama hamare kna, mopa vagare kne, hoza hamare vahera, ankerovahezage.<sup>40</sup> Havi traza eri tru hu'za tevereti kre'nazana anahu hu'ne, vagaresia knarerera tevefi kregahie.<sup>41</sup> Ana knarerera Vahe'mofo mofavremo'a ankerovahe'a humzantesige'za, kumi'ma nehu'za vahe'mokizmima zamazeri kumipima nentaza vahera, Agr'a kumapintira zamazeri megi atrehagie.<sup>42</sup> Hagi zamagrira zamazeri mate vanage'za amuho tevefi mani'n'e'za zavira nete'za, zamavera aninkreki hugahaze.<sup>43</sup> Ana'ma hanige'za fatgo vahe'mo'za nezmafa kumapina zugemo remsa hiankna hu'za manigahaze. Iza'o agesama me'nene'geno'a, ama naneke antahise hino. (Dan 12:3.)

*Anumzamofo Kuma'mofo fronka naneke*

<sup>44</sup> *Mona kumamo'a, zago'amo'ma mareri'neaza hozafi frakiankna hu'negeno, mago'mo ome keno eri fore huteno, ete eri franekino, musezamo higeno viazamo miko zama'a zagore ome atre vagareteno, ana mopa ome mi'za hu'ne.*

*Mizama'amo mreri'nea zamofo fronka naneke*

<sup>45</sup> Mago'ene mona kumamo'a, feno ne'mo knare kintna me'negeno hakrea kna nehie. <sup>46</sup> Ana hu'neankino zago'amo mareri'nea kintana mago hakeno eri fore'ma huteno'a, ete vuno miko zama'a mizante ome atreno zago erino, ana kintna ome mizase'ne.

*Noza kukomofo fronka naneke*

<sup>47</sup> Mago'ene mona kuma'mo'a, noza kuko timpi atreno rama'a ruzahu ruzahu nozame azeriankna hu'ne. <sup>48</sup> Hagi avi'matetegen'o'a avazu hu'za kasepampi atrete'za, knare nozamea eri'za zuompafi ante'naze. Hianagi havi'za hu'nea nozame'a matevu atre'naze. <sup>49</sup> Anahu kna huno mona mopa vagare knarera ankeromo'za e'za fatgo vahe amu'nompinti keontahi vhahera eme zamavare'za, <sup>50</sup> tevefi matevu'za zamatresege'za ana kumapina zavi nete'za, zamavera ani kreki hugahaze.

<sup>51</sup> Tamagra maka kema huana antahi ama nehazafi? Huno zaman-tahigege'za kenona'a anage hu'za Jisasina asmi'naze, izo. <sup>52</sup> Jisasi'a anage huno zamasmi'ne, E'ina hu'negu miko kasegere ugagota hu'naza vahe'mo'za mona kumamofonku e'ina hugahaze hu'za hunezmazamiza vahe'mo'za, nomofo nafa'amo noma'afi ufreto korapa fenozane, kasefa fenozama'a erino atineramia kna nehaze.

*Jisasina kuma'are vahe'mo'za zamagena humi'naza naneke*

<sup>53</sup> Ana fronka kea Jisasi'a zamasmi vagareteno, ana kuma atreno, <sup>54</sup> Agra kuma agafa'are Nazareti eno osi mono nompi eme rempi hunezmig'e'za, antri hu'za anage hu'naze, Ama ne'mo'a knare antahi'zane, kaguvaza er-iforehu hankavea igati eri'ne? <sup>55</sup> Ama kapenta ne'mofo mofavrefi? Ner-erankura Maria'e nehazafi? Aganahe'za Jemsi ene Josefe ene Saimoni ene Judasizafi? <sup>56</sup> Hagi asarahe'za tagrane omani'nazafi? Inaregati ama ne'mo'a ama maka'zana eri'ne. <sup>57</sup> Nehu'za antahi haviza hunentageno, Jisasi'a anage huno zamasmi'ne, Kasnampa vahe'mofona Agri kumate vahe'mo'zane, maka naga'amo'za ra agi nomize. <sup>58</sup> Ana hu'negu rama'a kaguvazana amafina osugahie. Na'ankure zamagra zamentintia nosaze.

## 14

*Heroti'a Jisasinkura Joni frinefinti otine hu'nea naneke  
(Mak 6:14-29; Luk 9:7-9)*

<sup>1</sup> Hagi ana knafina Heroti'a Galili kumate ugota kva ne'mo, Jisasi agenke antahiteno, <sup>2</sup> eri'za vahe'a zamasmino, E'i mono ti frente Joni fri'nefinti otine, e'ina hu'negu kagu'vaza hu hanavea agripina me'ne. <sup>3</sup> Hagi Heroti'a Jonina azerino kina nompi kina rente'ne. Na'ankure nefu Filipi a' Herodiasi eri'nea zanktekure. <sup>4</sup> Na'ankure Joni'a anage huno asmi'ne, negafu a'ma rehanre'nanana tra kea hantaginane. <sup>5</sup> Ana higeno Heroti'a ahe frinaku hianagi, rama'a vahe kevu mani'nageno kore hu'ne. Na'ankure Jonina mago kasnampa ne' mani'ne hu'za vahe'mo'za ke'za antahi'za hu'naze. <sup>6</sup> Hianagi Herotima kasente kna egeno, Herodiasi mofa'mo zamavuga avo eme reazamo, Herotina tusiza huno azeri muse higeno, <sup>7</sup> tusi'za huno avesinteno, agra hanave ke huno huvempa huno, Na'anku'ma nantahige-nanke'na amne kamigahue huno asmi'ne. <sup>8</sup> Nerera'ma amia antahizante ana mofa'mo'a huno, Mono ti frente Joni agenopa kitaginka zuompafi eme namio. <sup>9</sup> Kini ne'mo'a kamigahue hu'nea kegura keke hianagi, ne'zama

nenaza vahe'mokizmi zamavufi huvempa hu'negu, amigahaze huno huzmante'ne. <sup>10</sup> Agra mago'mofo huntogeno kina nompi vigeno, sondia vahe'mo'za Joni agenopa akafri amizageno, <sup>11</sup> aseni'a tafepi erinteno, ana mofa'mofo eme amigeno, erino vuno nerera ome ami'ne. <sup>12</sup> Anante Joni amage nentaza disaipol vahe'amo'za e'za avufa'a emeri'za, ome asentete'za vu'za Jisasina ana kea ome asami'naze.

*Jisasi 5 tauseni'a vahe ne'za zami'nea naneke  
(Mak 6:30-44; Luk 9:10-17; Jon 6:1-14)*

<sup>13</sup> Heroti'ma Jonima ahe fri'nea naneke Jisasi'a nentahino, ana kuma atreno vahe omani'hea ka'ma mopare agrake votifi marerino vu'ne. Vige'za hakare veamo'za nentahi'za maka kumateti eri hantge'za avariri'za mopafi vu'naze. <sup>14</sup> Vu'za uhanatizageno, Jisasi'a ventefinti takaunereno keana hakare vea nezmageno tusi'za huno asunku hunezmanteno kri eri'namokizmi zamazeri so'e hu'ne. <sup>15</sup> Kinaga sege'za, amage nentaza disaipol naga'mo'za Jisasinte e'za anage hu'naze, ama vahe omani ka'ma kopí mani'nonkeno, hago hani hu'za nehianki, ama vahe'zaga huzmanteg'e'za kumatega vu'za, zamagra'a nesaza ne'zana ome miza seho. <sup>16</sup> Hianagi Jisasi'a anage huno zamasmi'ne, **Zamagra ovugahazanki ne'zanku keta zaminke'za neho!** <sup>17</sup> Hige'za, zamagra anage hu'za Jisasina asmi'naze, 5fu'a bretigi, tare nozaki huta ama eri'none hazageno, <sup>18</sup> **Erita eme namiho**, huno hige'za eri'za eme ami'naze. <sup>19</sup> Ana vahetmina apeate maniho huno nezmasmino, ana 5fu'a bretine, tare nozara erino, monafi ke'nagamuteno negeno, asomu ke huno susu huteno, bretia korino amage'ma nentaza disaipol naga zamige'za, ana vahetmina zami'ne. <sup>20</sup> Makamo'za ana ne'za nageno zamu hu'ne. Nege'za atrazama'a zogi'za 12fu'a ekaeka kupi zogiri avitente'naze. <sup>21</sup> 5 tauseni'a vene'ne nazamo'za ne'naze, hagi a'nene mo-favre'zaga ohampri'naze.

*Jisasima ti avozare vu'nea naneke  
(Mak 6:45-52; Jon 6:15-21)*

<sup>22</sup> Amage'ma nentaza disaipol naga ame huno huzmanteno, Ko votifi mareritma kantu kaziga viho nehuno, anampima mani'naza vahekrerfa huzmanteg'e'za vu'za e'za hu'naze. <sup>23</sup> Ana veara huzmanteg'e'za vutageno, Agra agonarega nunamu hunaku mrerino umani'negeno, kinagasegeno Agra'ake anante mani'ne. <sup>24</sup> Anama nehige'za, amage'ma nentaza disaipol naga'mo'za ti amu'nompi nevazageno, hanave zahoko atigeno timo'a kranto kranto huno votia eri rukrahe hu'za hu'ne. <sup>25</sup> Ana nehigeno kotu afa'za nentegeno, Jisasi'a ana ti avozare ne-egeno, <sup>26</sup> amage'ma nentaza disaipol naga'mo'za negageno ti avozare ne-ege'za tusi koro nehu'za, Amanu han-krore nehu'za koro hu'za krafa hu'naze. <sup>27</sup> Hianagi ame huno Jisasi'a anage huno zamasmi'ne, **Korora osuta akoheta maniho, ama Nagre**, huno higeno, <sup>28</sup> Pita'a anage huno asmi'ne, Ra'moka kagrama mani'nenunka, eno hunka huge'na kagritega va'neno. <sup>29</sup> Higeno **Knareki eno!** higeno Pita'a votifinti uramino ti avozare Jisasintega vu'ne. <sup>30</sup> Hianagi tusi'a zaho energeno negeno koro huno, ana timpi uneramino kezatino, Ramoka nazahuo! <sup>31</sup> Higeno Jisasi'a ame huno azana antegantu ateno avazu nehuno, anage huno asmi'ne, **Kagra osi kamentinti hane, Na'a higenka tare kagu kagesa nentahine?** huteno, <sup>32</sup> ana votifi marerikeno, zaho'mo amane hu'ne. <sup>33</sup> Ana

votifi mani'namo'za Jisasina mono hunente'za, tamage Kagra Anumzamofo mofavre mani'nane hu'za hu'naze.

*(Mak 6:53-56)*

<sup>34</sup> Hagi ana timofo kantu kaziga ankenare, Kenesareti mopare vu'naze.

<sup>35</sup> Ana kumate vahe'mo'za Jisasi'ma e'ne hazankema nentahi'za, kea huzmantageno ana kumamofo tava'onte me'nea kumapi vahe'mo'za kri eri'naza vhahera zamavare'za Jisasinte e'naze. <sup>36</sup> Kri vahe'mo'za Jisasinku muse hugantonanki tatregeta kena atupaka'are avako hamneno, nehu'za avako'ma hazamokizmi krizamimo'a vagare'ne.

## 15

*Vahe'mofo kasege ruhantagi'nea naneke*

*(Mak 7:1-13)*

<sup>1</sup> Anante mago'a Farisi vahe'ene kasegere ugagota hu'naza vahe'mo'za Jerusaleti, Jisasinte e'za anage hu'za asmi'naze. <sup>2</sup> Na'a hige'za kamage nen-taza disaipol naga'mo'za tagehe'i avu'ava zana ruhanentagize? Na'ankure zamazana sese osu ne'zana ne'naze. <sup>3</sup> Jisasi'a ana ke nona'a, amanage huno zamasmi'ne, **Nahigeta tamagra tamagehe'i avu'ava avriri zankuke nehutma, Anumzamofo kasegea rufunetagize?** <sup>4</sup> Na'ankure, Anumzamo'a anage hu'ne, **Negafane, negrera ke amage antenka zanagi erisaga huo, iza'o nererano, nefano huhaviza huntesimofona ahe friho hu'ne.** <sup>5</sup> Hianagi tamagra anage nehaze, iza'o nererano nefanku huno, kazahu'za ante'noa zana Anumzamofo ami'none haniana, <sup>6</sup> agra nererano nefana antahi omino amagera nonte. Hagi anama nehutma Anumzamofo kea, nermageho avu'avakuke nehutma retufe netraze. <sup>7</sup> Tamagra tavre vahere, Aisaia'ma kasnampa kema hunte'neana tamagriku tamage hu'ne, <sup>8</sup> **Ama vahe'mo'za amega zamagiteti Nagia erisaga nehaze. Hianagi nagritetira zamagu'amo'a afete'are me'ne** <sup>9</sup> **Hianagi nena'a omne mono hunenante'za, rempima hazana vahe'mofo keage nehaze.** (Ais 29:13.)

*Vahe'mokizmi zamazeri haviza nehia zamofo naneke*

*(Mak 7:14-23)*

<sup>10</sup> Jisasi'a vahe kevu kehutru huteno anage hu'ne, **Antahi ankeretma antahi ama hiho.** <sup>11</sup> **Vahe'mo'za zamagipima nazazamo'a zamazeri haviza nosie. Hianagi zamagipinti'ma atiramia zamo zamagu'a zamazeri haviza nehie.** <sup>12</sup> Anante amage nentaza disaipol naga'mo'za e'za, anage hu'za asmi'naze, Farisi vahe'mo'za kema hana antahite'za zmarimpama ahe-gante'nazana Kagra antahi'nano? <sup>13</sup> Hianagi Jisasi'a kenona'a amanage huno zamasmi'ne, **maka'zama Nagri Nenfama onkri'neana, mika zanefi tregahie.** <sup>14</sup> **Zamatrenke'za zamu suhu kva vahe'mo'za, zamusuhu vahera kana zameri'za viho.** Na'ankure zamavu suhu vahe'mo'za, zamavu suhu vahera kana zameri'za vanazana, **taregamoke kerifi uramigaha'e.** <sup>15</sup> Hianagi Pita'a amanage huno hu'ne, ana fronka kemofo agafa'a eriama hugeta antahi maneno higeno, <sup>16</sup> **Jisasi'a amanage huno hu'ne, Tamagranena antahi so'e osu'neta nehzafi?** <sup>17</sup> **Tamagipima nageno tamarimpafi uneramigeta arifama neraza'zana ontahi'hazo?** <sup>18</sup> Hianagi agipinti atiramia zamo'a agu'afinti neankino, azeri haviza nehie. <sup>19</sup> Na'ankure agu'afinti havi antahintahizane, vahe ahe fri'zane, monko'zane, arave osu'neno monko'za hu'zane, kumzafa sezane, havigegu eri tamage hu'zama, knare vahe'mofo huhaviza hunte'zana ne-e. <sup>20</sup> **Ama'na zantamimo vahera zamazeri haviza**

nehie. Hianagi azama sese osu'neno ne'za nezamo'a, vahera azeri havizana nosie.

*Megi'a a'mo Jisasinte amentinti hu'nea naneke  
(Mak 7:24-30)*

<sup>21</sup> Anantetira Jisasi'a ana kumara atreno, Tairine Saitoni kumate vigeno, <sup>22</sup> mago Kenani a' ana kaziga nemania a'mo eno ranke huno kezatino, kasunku hunanto Ramoka, Deviti nemofoga, mofanimofona havi han-kro'mo agu'afi fre'negeno tusi haviza hu'ne. <sup>23</sup> Hianagi Jisasi'a ana a'mofo kenona osu'ne. Agri amage nentaza disaiopol naga'mo'za e'za anage hu'za asami'naze. Muse hugantonanki huntegeno vino, na'ankure agra tusi kereso nehianki huntegeno vino. <sup>24</sup> Hianagi Agra amanage huno kea hu'ne, Nagri'ma hunante'neana Israel vahe'ma fanane hu'naza sipisipiguke huno hunante'ne. <sup>25</sup> Hianagi ana a'mo'a eno Jisasi avuga kepri huno amanage hu'ne, Ramoka Kagra naza huo! <sup>26</sup> Higeno Agra ana kenona anage hu'ne, Mofavre bretima eri'na matevu'na kraramimofo ami'zamo'a knarera osu'ne. <sup>27</sup> Hu'neanagi ana a'mo'a anage hu'ne, izo Ramoka, hianagi ana kramoza razzmimofo itareti ankra heramiam'a nenaze. <sup>28</sup> Anante Jisasi ana a'kura anage huno asmi'ne, A'moka, Kagri kamentintimo'a ra krefahie, kagrima kavesinia kante anzazana fore hugahie. Higeno, ame huno ana mofa'amofo krimo'a atrente'ne.

*Jisasi'a hakare kri vahe zamazeri so'e hu'nea naneke*

<sup>29</sup> Hagi ana kuma atreno Jisasi'a Galili tinkenarega vuno, agonarega umrerino anantega umani'ne. <sup>30</sup> Rama'a vahe'mo'za anantega Agrite ne-eza, zamagia zamaza sti'nea vahe'ene, zamagia haviza hu'nea vahe'ene, zamu suhu'nea vahe'ene, zamazama haviza hu'nea vahe'ene, zamage-funa atupa hu'nea vahe'ene, mago'a ruga'a vahe'ene zamare'za Jisasi agafi eme zmantageno zamazeri so'e hu'ne. <sup>31</sup> Tusi'a zmanogu nehu'za antri hu'naze. Kageno agefunu atupahu vahe'mo ke nehigeno, zamaza haviza hu'nea vahe'mo'za knare nehazageno, agia havizahu vahe'mo otino nevigeno, zamavu asuhu vahe'mo'za zamavua negage'za, Israeli vahe'mokizmi Anumzamofo agi zamagra ahentesga hu'naze.

*Jisasi'a 4 tauzeni'a venene ne'za zami'nea naneke  
(Mak 8:1-10)*

<sup>32</sup> Jisasi'a amage nentaza disaiopol naga'a ke huno anage huno zamasmi'ne, Nagra ama vahetaminkura nasunku huzmantoe, na'ankure zamagra tagufa kna Nragranena mani'nageno nezama nesazazana omne'ne. Nagrama huzmantesuge'za zamaga ene vezankura navenosie. Na'ankure kantega nevu'za zamavu evu evu hanige'za traka ome hugahaze. <sup>33</sup> Amage'ma nentaza disaiopol naga'mo'za anage hu'za Agriku hu'naze, Inantegati rama'a bretia erita ama tusi vahe krerfa zmisunke'za, ama vahe omani kokampina erignare hugahaze? <sup>34</sup> Jisasi'a anage huno zamasmi'ne, Nama'a breti tamagra eri'naze? Hige'za zamagra anage hu'naze, 7ni'a bretigi, mago'a osi nozamerame. <sup>35</sup> Ana huteno vea kevua huzmanteg'eza mopafi mani'naze. <sup>36</sup> Manitageno ana 7ni'a bretine noza'ene erino Anumza'mofo susu huntetenno, tmanasino amage nentaza disaiopol naga'a zamige'za eri'za ana vea kevu zami'naze. <sup>37</sup> Ana hige'za maka vahe'mo'za ana neza nazageno zamu hutege'za, atrazama'a eri atru hu'za 7ni'a ekaeka kupi eri avite'naze. <sup>38</sup> Hagi ana nezama ne'nazana 4tauseni'a vene'ne nazamo'za ne'naze. Anampina a'nene, mofavre'ramina ohampri'naze. <sup>39</sup> Hagi ananteti Jisasi'a,

ana tusi'a vea kevu huzmanteg'e za nozimirega vu'za e'za nehazageno, votifi marerino Magadani kaziga vu'ne.

## 16

### *Farisi vahe'mo'za Jisasi rehe'za ke'naza naneke (Mak 8:11-13; Luk 12:54-56)*

<sup>1</sup> Anante Farisi vahe'ene Satusi vahe'mo'za Jisasinte e'za, monafinti avame'za huraveri hu'za rehe'za ke'naze. <sup>2</sup> Hianagi Agra anage huno zamasami'ne, Kinagamasegeno korimpe'nare kamupaseko atigeta, okina zo'ego tugahie nehaze. <sup>3</sup> Hagi nanterama monare kamupse ko netigeta negetma, zaho ko atugahie nehazageno, zaho kora netie. Menina monare fore'ma hiazana refako hutma negazanagi, ama knafima fore'ma hiazana refako hutma nonkazo? <sup>4</sup> Ama knafi havi tamutma ene tamentinti netraza veamotma avame'zanku nantahi negazanagi, mago avame'za eri fore ha'nena onkegahazanki, kasnampa ne' Jonama hu'nea avame'zanke kegahaze. Anage huteno zamatrevo vu'ne. (Jona 1:17-2:10.)

### *Farisine Satusi vahe'mokizmi zamuzma'zamofo fronka naneke (Mak 8:14-21)*

<sup>5</sup> Hagi amage nentaza disaipol naga'amo'za tirumofo kantu kaziga ankenare unehanati'za, zimage'akani'za breti e'ori' e'naze. <sup>6</sup> Hagi anante Jisasi'a zamasamino, Kvahih, Farisi vahe'ene Sadusi vahe'mokizmi zistigura huno Jisasi'a zamasmi'ne. <sup>7</sup> Anage hige'za, zamagra'zmi hugantu kama huza bretima e'orima onazanteku nehie hu'naze. <sup>8</sup> Jisasi'a antahino keno nehuno, Agra anage hu'ne, Tamagra osi'a tamentinti nehaza vahe'mota, amu'notamifi bretima e'ori'naza zankura nahigeta ke hakare nehaze? <sup>9</sup> Tamagrira tamage'akaninefi? 5fu'a bretima, 5 tauseni'a vahe'mo'za netazageno, nama'a nege'atregre hu'nazama'a eka eka kupina erivite'naze? <sup>10</sup> Hifi 7ni'a bretiretima 4 tauseni'a venenemoza nene'za zamu'ma hiama'a, eka eka kutamimpima eriri avite'nazana tamagra antahi'nazo? <sup>11</sup> Inankna huta keta antahita nosaze, Nagra bretigura nosue? Hianagi Farisi vahe'ene Sadusi vahe'mokizmi zistigura kva hiho. <sup>12</sup> Anante zamagesa antahi ama nehu'za, bretifi nentageno zonerea zistigu kva hiho nosie. Hianagi Farisine Sadusi vahe'mo'za rempima hunemiza zanku kva hiho nehie.

### *Pita'a Jisasinku huama hu'nea naneke (Mak 8:27-30; Luk 9:18-21)*

<sup>13</sup> Ananteti Jisasi'ma eno Sisaria Filipai kumate enehanatino, anage huno amage'ma nentaza disaipol naga zamantahige'ne, Iza'e hu'za Vahe'mofa mofavregura nehaze? <sup>14</sup> Hige'za zamagra ana kenona anage hu'za asmi'naze, Mago'amo'za mono ti frezmante Joni'e nehaze, ruga'amo'za Elaija'e nehaze, mago'amo'za Jeremaiapi nehazageno, mago'amo'za hu'za mago kasnampa nere hu'za nehaze. <sup>15</sup> Jisasi'a amanage huno zamantahige'ne, Hu'neanagi tamagra iza'e, huta Nagrikura nehaze? <sup>16</sup> Higeno Saimon Pita'a kenona'a anage hu'ne, Kagra Kraisige, kasefa huno mani'nea Anumzamofo mofavre mani'nane. <sup>17</sup> Jisasi'a anage huno asmi'ne, Saimoniga, Jona nemo fogga, Anumzamo'a asomu hugantesie. Na'ankure vahe'mo amazana erigaveri nosie. Hu'neanagi Nenfa monafi mani'nemo erigaveri nehie. <sup>18</sup> Nagra anage hu'na negasamue, kagra Pitage, hanki'na ama ana havere, mono noni'a ki'nugeno, fri'zamofo hanavemo'a azeri agete'oregahie. <sup>19</sup> Nagra mona kumapi kinofitmina kamigahue. Kagrama ama mopafima na'ano anakisanana, monafina anakigahie. Na'ano mopaf'i ma atresana zana,

**monafina atregahie.** <sup>20</sup> Anante amage nentaza disaipol naga'agura, Kraisi'e hutma vahera ozmasmiho huno zamasmi'nne.

**Friteno otisia zamofonku Jisasi'a pusante hu'nea naneke**  
(Mak 8:31-9:1; Luk 9:22-27)

<sup>21</sup> Ana knareti'ma e'neana, Jisasi'a amage nentaza disaipol naga'a agafa huno zamasamino, Agrama Jerusalemi vanige'za, ugota mono kva (elda) vahe'mo'zane, ugagota pristi vahe'mo'zane, kasegere ugota hu'naza vahe'mo'za, rama'a zampi azeri haviza nehu'za ahe frisageno friteno tagufa knarera otigahie, huno zamasami'nne. <sup>22</sup> Pita'a, Jisasina avare rure anteno, agafa huno anage huno kesu'nne, O'e Ranimoke! E'ina hu'zana Anumzamo'a atresigeno, Kagritera forera osugahie! <sup>23</sup> Hianagi Jisasi'a rukrahe huno Pitankura anage hu'ne, Maniganenka namefi evuo Sataga! Nagri kana rehiza nehane. Na'ankure kagra Anumzamofo antahintahi e'norine, vahe'mofo antahi'za e'nerine.

<sup>24</sup> Anante Jisasi'a amage nentaza disaipol naga'a zmasamino, Mago vahe'mo Nagri namage antenaku hanuno'a, agra'a avesizana, atretno rugeka zafa'a erino namage eno. <sup>25</sup> Na'ankure asimu'a aguvaziku hanimo'a, asimu'a atregahie. Hianagi iza'o Nagriku huno asimu'a atresimo'a asimu'a erigahie. <sup>26</sup> Mago'mo mika mopafi zantami eri tru nehuno, agra'a agu amema atre'siana, na'a azahu'zana erigahie? Hifi agu amemofo nona huno na'a amigahie? <sup>27</sup> Vahe'mofo mofavremo ankero tmima'ane, Nafa'amofo hanavefi esuno'a, Agra magoke magoke'moma hu'enenia avu'avate anteno mizana amigahie. <sup>28</sup> Nagra tamage hu'na neramasmue, menima amama otitma mani'nafintira mago'amota ofri mani'netma negesageno Vahe'mofo mofavremo'a kini manino egahie.

## 17

**Jisasi avuvgamo zahe huno ruzahu hu'neazamofo naneke**  
(Mak 9:2-13; Luk 9:28-36)

<sup>1</sup> Hagi 6si'a knamofo amefi kna zupa, Pitama, Jemisima, Joni Jemisi nefuma huno Jisasi'a zamagri'ake zamareno za'za agonarega mareri'nne. <sup>2</sup> Zamuga umani'nege'za negageno, avugosafintira zage avunasisimo'ma hiaza nehigeno, kukena'amo efeke huno tavimo'ma hiaza huno remsa hu'ne. <sup>3</sup> Anante Mosesi ene Elaijake zamuga efore hu'ne naneke Jisasi' ene hu'naze. <sup>4</sup> Hagi Pita'a amanage huno Jisasina asmi'nne, Ramoke, amafima mani'nonana knare hu'ne, Kagrama knarere hananana, nagra tagufa tona nona kigahue. Magora Kagriki, magora Mosesinki, magora Elaijanki hu'na kigahue, <sup>5</sup> huno kema nehigeno, masa'ane hampomo tamino refite'nezmantegeno, mago ageru'mo hampompinti anage hu'ne, Ama'i Nagri Ne'mofavre, Agriku navesi nentena, tusiza hu'na musena hunentoe, ke'a antahi amiho! <sup>6</sup> Amage' nentaza disaipol naga'mo'za nentahi'za tusi zmagogo fege'za mopafi ruhapat'i'za zmugosaregati mase'naze. <sup>7</sup> Hianagi Jisasi eno zmako nehuno, **Koro osuta otiho**, huno zamasmi'nne. <sup>8</sup> Kesga hu'za kazana mago'a vahera onke'nazanki, Jisasi'a Agrake mani'nege'za ke'naze.

<sup>9</sup> Ana hute'za agona atre'za eneramizageno, Jisasi'a hu kase huzmanteno, **Amama avana'gnazama kazazana mago vahera osmi'enkeno, Vahe'mofo mofavremo fripintira otino.** <sup>10</sup> Amage nentaza disaipol naga'mo'za anage hu'za antahige'naze. Nahige'za kasegere ugagota hu'naza vahe'mo'za, koteno Elaija'a ete'ne hu'za nehaze? <sup>11</sup> Jisasi'a kenona huno, **Elaija'ma**

tamage huno esuno'a maka'zana emeri zo'e hugahie. <sup>12</sup> Hu'nazanagi Nagra neramasmue, Elaija'a ko e'ne. Ana hu'neanagi agrira ke'za antahi'za osu'naze. Hianagi Agri'ma hunte'nazana, zamagri'ma zmesiazza hu'naze. Anahukna hu'za, Vahe'mofo mofavre'mofona azeri haviza hugahaze. <sup>13</sup> Anante amage nentaza disaipol naga'mo'za antahini nehu'za, Mono ti frezmanente Joninku Agra nehie hu'naze.

*Havi avamumo agu'a fre'nea mofavre Jisasi'a azeri so'e hu'nea naneke  
(Mak 9:14-29; Luk 9:37-43)*

<sup>14</sup> Hakare vea kevufi azageno, mago ne'mo'a eno, Jisasi agafi rena emereno, <sup>15</sup> anage hu'ne, Ramoke, kasunku mofavre'nimofona hundo, na'ankure mananiza negegeno ran kna enerino, mago'a kna traka huno teve tanenokino, timpi traka huno masetere nehie. <sup>16</sup> Nagra avare'na kamage'ma nentaza disaipol nagate oanagi, zamagra azeri onkanamare'naze. <sup>17</sup> Jisasi'a kenona huno, Tamagra tamentintia nosuta fatgo tamagutamagesa ontahi vahe mani'naze! Nama'a kna Nagra tamagranena manigahue? Nama'a zupa knaza tmia erigahue? Nagrite avretma amare echo. <sup>18</sup> Anante Jisasi'a havi avamu kesigeno atiramino vigeno, ana knazupage mofavremofo krimo'a so'e hu'ne. <sup>19</sup> Anante amage' nentaza disaipol naga'mo'za zamagraku Jisasinte e'za anage hu'naze. Na'a higeta havi avamura huntonkeno atinoramie. <sup>20</sup> Jisasi'a anage huno zamasmi'ne, Na'ankure tamagra osi tamentinti hu'naze. Nagra tamage hu'na neramasmue, masteti zafamofo osi avima'agna tamentintimo'ma hu'nena, anage hutma ama agonagura hugahaze. Amarera atrenka anture vuo hanageno'a, amne vugahie. Mago'zamo'a amuho huormantegahie. <sup>21</sup> [Hagi amanahukna havi avamumo'a, vahe agu'afinti atioramigahie. Hagi kave atretma nunamuma hanutma amne huntegahaze.] \*

*Mago'ene Jisasi'ma friteno otisia zanku hu'nea naneke  
(Mak 9:30-32; Luk 9:43-45)*

<sup>22</sup> Hagi Galili utruma hutazageno, Jisasi'a anage huno zamasmi'ne, Vahe'mofo Mofavre komoru hu'za avare'za vahe zamazampi antegahaze. <sup>23</sup> Zamagra ahe frisageno friteno, tagufa knare Agra otigahie, huno hige'za amagema nentaza disaipol naga'mo'za nentahi'za zamarimpa kna hu'naze.

*Mono no takesi zagogu hu'nea naneke*

<sup>24</sup> Kapeniumu etageno ra mono nompi zago e'neri'za vahe'mo'za, Pitante e'za anage hu'naze, Tamagri'ma rempi huneramia ne'mo'a, ra mono nompi tare takesi zagoa nentefi nonte? <sup>25</sup> Pita'a izo nehuno nompi umrerigeno, Jisasi'a ese antahigeno, Saimoniga na'ane kagesa nentahine? Ama mopafi kini vahe'mo'za izampinti takesi zagoa e'nerize? Zamagra vahepintipi ru vahepintire? <sup>26</sup> Higeno Pita'a ru vahepinti e'nerize hutegen, Jisasi'a anage hu'ne, Hagino naga'amo'za miza osegahaze. <sup>27</sup> Hianagi tagra zamarimpa kna eri ozamisunanki, tirute vunka huku nofi ome atrenka ese'ma avazu hanana nozara agi eri aka hunka mago zago me'nena kegahane. Ana zago erinka Nagrite'ene kagra re'enena ome miza hugahane.

## 18

*Mona kumapina iza ra vahera manigahie hu'nea naneke  
(Mak 9:33-37; Luk 9:46-48)*

\* <sup>17:21</sup> Korapama kre'naza avontafepina 21 omanene.

<sup>1</sup> Hagi ana knafi amage nentaza disaipol naga'mo'za Jisasinte e'za amanage hu'naze. Aza mona kumapina ugagota vahera manigahie? <sup>2</sup> Hazageno Jisasi'a mago osi mofavre ke higeno egeno, amunozamifi azeri otiteno, <sup>3</sup> amanage hu'ne. Nagra tamage hu'na neramasmue, Tamagra ruzahе huta osi mofavre'gna osanuta, mona kumapina ovutfa hugahaze. <sup>4</sup> Aza'o agra avufa antermimo ama osi mofavre'gna hanimo, mona kumapi rana manigahie. <sup>5</sup> Hagi aza'o ama anahukna huno osi mofavrema Nagri nagifima avresimo'a, Nagri navregahie.

*Zamentinti eri haviza nehiazamofo naneke  
(Mak 9:42-48; Luk 17:1-2)*

<sup>6</sup> Hu'neanagi iza'o ama ne'one mofavre nagapinti'ma Nagrite amentinti nehimofoma kumipi avarente'simofona, ne'zama refuzafuma nepaza ra have eritma anankempi tafiteta, asgahutma hageri amu'nompi atresageno tima nakriniana knare hugahie. <sup>7</sup> Iza'o rumofoma kumipima avrenentea vahekura nasuragie, na'anckure hakare zupa vahe'ma zamazeri kumipi netreazana me'ne. Hianangi iza'o rumofoma kumipi avrentesimo'a tusi'a hazankefi manigahie.

<sup>8</sup> Hagi kazamo'o, kagiamo'ma kavareno kumi kante'ma vanigenka, akafrinka matevu atro. Kagra'ma magoke kazane kaganema me'nesigenka manivava kasimuma erisanana knare hugahie. Hagi tare kazane kagane me'enige'za tevava tevefi mate'vu katregahaze. <sup>9</sup> Kavurgamo'ma kumipi kavrentesigenka, tagatinka matevu netrenka, manivava kasimuma magoke kavurgane erisanana knare hugantegahie. Hagi tarega kvurgama mene-sigeno'a, tevava tevefi matevu katregahie.

*Fanane hu'nea Sipisipimofo fronka naneke*

<sup>10</sup> Tamagra kva hiho, amana ne'onse mofavre nagara zimage fenka otreho. Na'anckure Nagrama nermasmuana monafina zamagri ankeromo'za, mika zupa monafinka mani'nea Nenfa avugosa negaze. <sup>11</sup> [Vahe'mofo mofavre'ma e'neana fanane hu'naza vahe hakreno zmarenaku e'ne.] \*

<sup>12</sup> Na'ane tamagesa nentahize? Magomo'ma 100'a sipisipi ante'nesnifinti, mago'ma fanane hanigeno'a, 99'a agonarega zamatrenero mago'ma fananema hu'nemofonkura ome hakreno ovregahio? A'o. <sup>13</sup> Agra hakreno erifore hanuno'a, tamage neramasmue, 99ni'a fananema osu'naza sipisipi afuzaga agatereno mago'ma fananema hu'nemofona tusi'a muse huntegahie. <sup>14</sup> Anahu kna huno, monafinka Nermafa avesi'zamo'a, ama ne'onse nagapintira magore huno frino fanane osanie nehie.

*Kumi'ma nehanigenka aza hanana naneke*

<sup>15</sup> Mono negafu'ma kumi'ma hugantesigenka, vutna tanagragu umani'neta ana havizama hu'nesia zana ome azeri fatgo hundo. Agrama keka'ama antahisiana, negfuna avare kamatane. <sup>16</sup> Hagi keka'ama ontahisnigenka, magoro tareo znavrenka vunetma, nentahisageno mika hazenkea erifatgo huno eriama hugahie. <sup>17</sup> Hanigeno agrama antahi oramisiana, mono kevumofo asamio. Hanankeno mono kevumofo ke ontahisiana, atregeno agra mono ontahi vahero, havige huno takesi zago eri vahekna vahe manino.

<sup>18</sup> Nagra tamage hu'na neramasmue, inankna zama mopare'ma anakisnaza zana, anazanke huno monarera anakigahie. Hagi inankna

\* <sup>18:11</sup> Ama'i isa (11) korapa avontafepina omnene hagi ruga'a avontafepi tafepi me'ne.

zama mopare'ma vakane atresnaza zana, anahu'kna huno monarera vakane atregahie.

<sup>19</sup> Ete mago'ene Nagra tamage hu'na neramasmue, taremotna ama moperera mani'netna, mago tnarimpa hutetna, mago'a zanku antahigesna'ana, monafinka mani'nea Nenfa'a amne hugahie. <sup>20</sup> Na'ankure ama mopare'ma taremo' tagufamo'za, Nagri nagire emeritru hanafina, Nagra zamagri amu'nozmifi manigahue.

### *Kazokzo ne'mo nofi hu'nea fronka naneke*

<sup>21</sup> Anante Pita'a, Jisasinte eno anage hu'ne, Ramoke, kumi hunantesia nenafuna, nama'a zupa kumi'a atrentegahue, 7ni'a zupa atrentegahufi?

<sup>22</sup> Higeno Jisasi'a Pitankura anage hu'ne, <sup>23</sup> Ama ana agafare mona kumamo'a amanahu hu'ne, mago kinimo'ma kazokzo eri'za vahe'amoza zagoa nofi hu'naza ete erinaku hige'za eri'za refako hu'za eme amizankna hu'ne. <sup>24</sup> Anama huno zaganeno hakeno negege'za, 10 tauseni zago'a nofi hu'nea ne' agrite avare'za e'naze. <sup>25</sup> Na'ankure ana ne'mo'a nofima hu'neana ovaknegeno, ramo hamponage ana ne'ku huno, a'mofavre'ane mika tuzampaza ante'neazana zagore ome atrenka, nofima hu'neama'a etenka vakenento higeno, <sup>26</sup> anante kazokzo eriza ne'mo'a mopafi agri avuga mseno keke huntenu, kagra agazone hunamineg'e na, mika nofi'ma hunoana ete'na nagra vaknaneno hu'ne. <sup>27</sup> Ana kazokzo eri'za ne'mofo Ramo'a kazokazo nera asuragi antreno avrenetreno nofima hu'nea zana atrentene.

<sup>28</sup> Ana higeno atiramino fegi vuteno'a, magoka kazokazo eri'za eneri'a ne'mo agripinti 100'a silva zago nofi hu'nea ne'omege'ne. Anante ananke nofite avazu nehuno anage hu'ne, nagripinti nofi'ma hu'nana zana etenka vakano hu'ne. <sup>29</sup> Anante ana kazokzo eri'za ne'mo mopafi unemaseno keke huntenu, agazone hu'nantenege'na nagra eme vaknaneno. <sup>30</sup> Hianagi ana kea ontahino ruvahe hiazamo kina nompi avreno ome retufe vazigeno mani'neno, nofi'ma hu'nea zana vaknegahie. <sup>31</sup> Magoka kazokzo eri'zama eneriza naga'mo'za fore'ma hiazana kete'za, tusiza hu'za zamasunku hute'za vazamo'za mika zama fore hiazana ra zamimofo ome asmi'naze.

<sup>32</sup> Anante rankva ne'amo'a ugota kazokzo eri'za ne'kehuno, Kagra havi kavukva'ene kazokzo eri'za nere! Na'ankure kagrama keke ke hunantake'na maka nofi'ma hu'nana zana atregante'noe. <sup>33</sup> Nagrama hugante'noaza hunka kazokzo eri'za negafuna kasunkura huontegahampi? <sup>34</sup> Nehuno tusi asi vazigeno, agri rankva'amo kina nonte kva nehaza vahete, azeri haviza nehanageno mani'neno nofi'ma hu'neaza vaknenogu avreno ome zami'ne.

<sup>35</sup> Ana hu'negu, mago mago'mokama negafuma kagu'areti hunka kumi'ama apase ontesanana, monare Nenfa'a tamagrira anazanke hurmantegahie.

## 19

### *Arave atane'zamofo naneke (Mak 10:1-12)*

<sup>1</sup> Jisasi'a ana naneke zamasmi vagareteno, Galili kumara atreno, Judia kaziga, Joda tina agatereno vu'ne. <sup>2</sup> Tusi'a vahe krerfamo'za avaririza nevazageno, anantega zamazeri so'e humzante'ne.

<sup>3</sup> Anante mago'a Farisi vahe'mo'za rehe'za kenaku Agrite e'za, mago'azama hanigeno'a amne nenanrona ahenatigahie huno kasegem'o'a

hu'nefi? hu'za antahige'naze. <sup>4</sup> Jisasi'a ke nona huno, Tamagra hampritma onke'nazo, ese agafare'ma Anumzamo'ma vene, a'enema tro huneznanteno, <sup>5</sup> amanage hu'ne, ama kegafare vemo'a nerera afana atreno, nenaro'ene hagerfigeno, ana tarega'moke eri mago hune, magoke zanavufa manigaha'e. (Jen-Agf 2:24) <sup>6</sup> Hanige'ne, mago'anе tare vahe omanigaha'e. Hagi magoke znavufa manigaha'e. E'ina hu'negu na'ano Anumzamo'ma eri hagerfima ante'nesia zana, mago ne'mo'a ovakanegahie. <sup>7</sup> Hige'za Farisi vahe'mo'za Agriku anage hu'naze. Na'a higeno Mose'sa tagrikura huno, a'ma hunte avona kretma nemita hunteho hu'ne? <sup>8</sup> Jisasi'a anage zamagrikru hu'ne, Mose'a tamasmimo a'netmia atregahaze hu'neana, na'ankure tamagri'ma tamarimpamo usasi ki'negu hu'ne. Hianagi Anumzamo pusantet'i'ma agafa hu'neana amanahu kana omne'ne. <sup>9</sup> Hagi menina tmagrikura amanage nehue, Aza'o nenaro'ma savri monko avu'ava \* osu'nesigeno netreno ru a' erisimo'a, monko avu'ava hugahie. <sup>10</sup> Agri amage nentaza disaipol naga'mo'za anage hu'naze, Amana ke'mo'ma arave hu'nea vene a'enenku'ma hu'nesiana, arave osuta amane manisunkeno'a knare hugahie. <sup>11</sup> Jisasi'a anage zamagrikru hu'ne. Amama huntua kea, hakaremo'a e'origahie. Hagi azano Anumzamo'ma ami'nemimo anara hugahie. <sup>12</sup> Na'ankure kase zmantetegati zmufamo knare huozmant'e'nesomo'za arave osugahaze. Hagi mago'amo'za zmagonkna'za hari'naza vahe'mo'za arave avu'ava zana osugahaze, mago'amo'za arave osu'za mona kumaku nentahize. Inamo'ma ama rempima humi kema humiazama erisimofona atregeno erino.

*Jisasi'a mofavre'zaga asomu huzmante'nea naneke  
(Mak 10:13-16; Luk 18:15-17)*

<sup>13</sup> Anante ne'onse mofavrezimi zamavare'za aza anteno nunamu huzmantesiegu Jisasinte e'naze. Hianagi Jisasima amage nentaza disaipol naga'mo'za ana vahera ke zamasu'za, i'o huzmante'naze. <sup>14</sup> Hianagi Jisasi'a huno, Zamahe onatita zamatrenke'za ne'onse mofavre zaga Nagrite echo, mona kumara e'ina hu vahe'mokizmi kumare, <sup>15</sup> nehuno azana zamanunte anteno asomuke huzmanteteno zamatreno vu'ne.

*Afufenone nehazave ne'mofo naneke*

<sup>16</sup> Anante mago ne'mo Agrite eno amanage hu'ne, Rempi hurami ne'moka, inanknahu knare navunava hutena mani vava nasiura eri-gahue? <sup>17</sup> Higeno Jisasi'a anage huno ana ne'ku hu'ne, Nahigenka na'amo knare hune hunka Nagrira eme nantahinegane? Agra magoketfamo knare hu'ne. Hianagi kasimu erinaku'ma hanunka, kasege amage anto, <sup>18</sup> higeno ina su'ane? Huno antahi'gegeno, Jisasi'a ke'nona huno, Vahera ahe ofrio, monko zana osuo, kumzafa oso, hazenkema osu'nesia yahekura hazenke hu'ne hunka havigea huonto, <sup>19</sup> antaka'ane nafaka'mofonena ra zanagi zanamio. Hagi kagra kavufga avesi antanankna hunka tava'onkare nemanisimofona avesinto. <sup>20</sup> Ana nehazave ne'mo, anage hu'ne, nagra nagu'areti ana miko kasegea amage'pentoe, hagi inaza nagra nosue? <sup>21</sup> Higeno Jisasi'a agrikura anage hu'ne, Kagrama fatgo hugahuema hanunka, vunka zagore afufenonka'a ome atrenka, ana zagoa erinka zamunte omne vahe ome nezminka, hagi kagra monafinka feno eri santi haregahane. Hutenga Nagrira eme namage anto. <sup>22</sup> Hianagi ana nehaza'mo'ma anankema nentahino'a, tusi'a asuzampi vu'ne. Na'ankure agra tusi'a afufeno ante'negu anara hu'ne.

\* 19:9 Adultery

<sup>23</sup> Jisasi'a amage'ma nentaza disaipol nagara anage huno zamasami'ne, Tamage hu'na neramasmue, afufeno ne'mo mona kumate vunaku haniana, tusi amuho huntegahie. <sup>24</sup> Mago'ene Nagra nehue, kemolimofona amuho huontenkeno nekazamofo kampintira frenkro huramigahie. Hagi feno ne'mo'ma Anumzamofo kumapi vuku'ma haniana, tusi'a amuho huntegahie. <sup>25</sup> Amage nentaza disaipol naga'mo'za, ana kema nentahiza, tusi antri hu'za zmagogogu nehu'za anage hu'naze. Hagi aza knare huno agura vazisigeno manigahie hu'naze. <sup>26</sup> Hazageno Jisasi'a ana mokizmi nezmageno amanage hu'ne, Vahe'mo'a amuho huntenko osugahie. Hianagi Anumzamo'a mika'zana amuhoa huontenkeno amine hugahie.

<sup>27</sup> Higeno Pita'a amanage agrikura hu'ne, hagi kamago. Hakare zanti atreta Kagri kamage nentone! Tagra naza erigahune? Higeno, <sup>28</sup> Jisasi'a amanage huno zamasmi'ne, Tamage hu'na neramasmue. Miko zama azeri kasefa'ma hania knarerera, Vahe'mofo mofavremo'ma, Agri'a masanentake tra'are umanisigenka, tamagrama namage'ma nentamotma tamagranena 12fu'a kini trate umani'neta, 12fu'a Israeli naganofira refako huzmantegahaze. <sup>29</sup> Hagi azago, nonka'o, kafuhe'mofono, kasarahehe mofono, negafano, negrerano, mofavre'kao, hoza'ka'ama Nagri'kuma hunka atresamoka, 100'a rugaterenka ama knafina enerinka, henka esia knafina manivava kasimu erigahane. <sup>30</sup> Hu'neanagi hakare ugagota hu'namo'za ehenka hanageno, ehenka hu'namo'za vugagota hugahaze.

## 20

### Krepi tagi'naza eri'za vahe'mokizmi fronka naneke

<sup>1</sup> Jisasi'a mago'ene huno, Anumzamofo kuma'mo'a, mopamofo nef'a'ma nante'rampi viazamo zagore'ma eri'zama erisaza vahe ome zamavareno ege'za agri waini hozafi eri'za emeri'zankna hu'ne. <sup>2</sup> Hige'za eri'za vahe'ene mizama mago zagefima erisaza zante, mago zamarimpa hutageno, huzmanteg'e'za waini hoza'afi vu'naze. <sup>3</sup> Nanterana 9 kilokinaza nehigeno, mago'ene vuno omegeana ruga'a naga'mo'za eriza e'ori maketi kumapi ot'i'za mani'nageno omezimage'ne. <sup>4</sup> Zamagriku Agra anage hu'ne, tamagrene waini hozani'afi eri'za omenerinkena, mizana fatgo hu'na tamigahue. <sup>5</sup> Hige'za vu'naze. Hagi kva ne'mo'a eteno ana feru'ene kinaga zagemo'ma rukraha higeno (3 kiloki) vuno magokna ke ome hu'ne. <sup>6</sup> Ana kinaga 5 kiloki naza higeno, viazamo mago'amo'za eri'za e'ori amne ot'i'za mani'nageno ome zamagefore nehuno, nahigetma ama zageferura eri'zana e'oritma otita amnea mani'naze? Huno zamantahige'ne. <sup>7</sup> Hige'za zamagra anage Agrikura hu'naze, Mago'mo'e huno zago erizantera oravregeta anahu huta mani'none. Hazageno, vutma waini hozani'afi tamagranena eri'za ome eriho hu'ne. <sup>8</sup> Kinagasegeno hozamofo nafa'amo eri'za kva ne' asamino, eri'za vahe ome ke hunka zagozimi zamio, henkama e'namokizmireti agafa hunka kotama e'namokizmire vuo. <sup>9</sup> Hagi 5 kiloki kinaga eri'za eme eri'naza vahe'mo'za, mago kante e'za nanterama emeri'naza vahe kna hu'za mago zagemofo agu'afi miza eri'naze. <sup>10</sup> Pusantema eri'zampima zmavrege'za eri'namo'za e'za, rugatereta rama'a erigahune hu'za zmagesa antahinazanagi, mago avamente miza zamia eri'naze. <sup>11</sup> Ana miza eneriza, agafa hu'za ana hozamofo nefana ke hakare hunte'za, <sup>12</sup> anage hu'naze, henkama e'naza naga'mo'za, osia knafi (1 au) eri'zana emeri'nagenka, tusi'a knanentake eri'za zage tasageta eri'nonkenka, magoke avamente mizana neramine. <sup>13</sup> Hianagi hoza nafa'amo kenona huno mago'mofo

asmi'ne, knampa nimoke, havizana hunogantoe. Mago zage'mofo agu'afi  
mizankura mago trimpia hunopi osu'no'e? <sup>14</sup> Mizanka'a e'nerinka vuo.  
Nagra henkama eri'za emeri'naza vahera, magozahu avamente tamagrima  
tamua kante zaminaku nehue. <sup>15</sup> Nagra zantema nazano hugahue hanu-  
azamo'a knarerera osu'nefi? Hipi havi antahintahima e'nerinana Nagrama  
knare'zama huazankupi? <sup>16</sup> Hu'negu, henkama hunenimo'a ugagota  
hanigeno, ugagota hunenimo'a uhenkategahie.

### *Jisasi'a friteno oti sniazanku hu'nea naneke*

<sup>17</sup> Jisasi'ma Jerusalemi mrerino nevuno'a amage nentaza disaipol nagara,  
zamavare otage atreno anage huno kantega zamagri'ake zamasamime  
vu'ne, <sup>18</sup> Keho, Jerusalemi nevunankiza, Vahe'mofo Mofavrea avare'za ra  
mono kva vahete ene, kasegere ugagota hu'naza vahe zmisage'za, frigahie  
hu'za keaga huntegahaze. <sup>19</sup> Ana nehu'za avare'za mono ontahi megi'a va-  
hete vnage'za, kiza zokago ke hunente'za sefu kanonteti kanonkeve nemiza  
ahe'za hantigahaze. Hanageno tagufa knarerera agra otigahie.

### *Jemisi'ene Jonike Jisasi'ene manisa'egu neznarera'a antahige'nea naneke (Mak 10:35-45)*

<sup>20</sup> Anante Zebeti ne' mofavre rarene neznarera ene Jisasinte e'za, mopafi  
neznerera'a renarenio mago zanku antahige'ne. <sup>21</sup> Jisasi'a anage huno ana  
aku asami'ne, **Na'an ku kavenesie?** Higeno ana a'imoi Jisasina anage huno  
asami'ne, Hugnare hugeke tare mofavre treniafinti mago'mo'a kazamofona  
tamaga kaziga manisigeno, magomo'a hoga kaziga mani'nogu Kagri kumap-  
ina nehue. <sup>22</sup> Higeno Jisasi'a kenona'rera anage hu'ne, **Tamagra nantahima**  
**negazana ontahineti nehaze!** **Knare Nagrama nenaku'ma nehua tafemp-**  
**intira amne negahazafi?** huno zmantahigege'za, zamagra anage hu'naze,  
Tagra amne negahune, hu'naze. <sup>23</sup> Agra zanagri znamsmi'ne, **Nagri taferopin-**  
**tira amne negaha'anagi tamagani'ane, hoga kaziga mani'zana, Nagrizana**  
**omane'neakina ontanasamigosue.** **Hagi zamagri'ma Nenfama erigahaze**  
huno'ma huhampri zmanteno retromta humzante'nemo'za erigahaze.

<sup>24</sup> Anante 10ni'a amagema nentaza disaipol naga'mo'za nentahiza, tu-  
siza hu'za tare kognagura zamarimpa hezmante'naze. <sup>25</sup> Hianagi Jisasi'a  
zamagi hutru huno zamasmi'ne, **Koma antahinazane, megia mono on-**  
**tahi vahete kvamo'za, kva huzmante'naze.** Higeno iza'o agatereno eri'za  
kantema mani'nemo'a hankave'a zmagrity nenteno kva kri'nezmante.  
<sup>26</sup> Tamagripina amanahu'zana omneno. Hagi iza'o tamagripinti ugagota  
hugahue hanimo'a, atregeno eriza vahe manino. <sup>27</sup> Hagi iza'o kagota  
hugahue hanimofona, atregeno kazokzo eriza ne'ka'a manino. <sup>28</sup> Anahu  
kna huno Vahe'mofo Mofavre'ma e'neana, Agri eriza erintehogura ome'ne,  
Agra'a erizana enerino, asuragino rama'a vahe zamaza huno miza senaku  
asimu'a atregahie.

### *Jisasi zanavurga asu hu'nea netre zanazeri hari hu'nea naneke*

<sup>29</sup> Zamagrama atre'za Jerikoma nevzage'za, tusi vahe kevu krerfamo'za  
avariri'za vu'naze. <sup>30</sup> Tare znavu asuhu netre'moke kamofo ankenare  
mopafi mani'neke, Jisasi evie kema nentahikea, zanagra kezatike, Ramoke,  
Deviti nemo fogga kasunku huranto. <sup>31</sup> Hakeno vahe kevumo'za kne hu'za  
taganetna mani'o hu'nazanagi, tusi kezatike mago'anee vivi huke, Ramoke,  
Deviti nemo fogga kasunku huranto huke hu'na'e. <sup>32</sup> Jisasi'a anante eme otino,  
znagi hiazamo anage hu'ne, **Na'a Nagra hurnantenuegu neha'e?** hige'ne,  
<sup>33</sup> anage zanagra hu'na'e, Ramoka tavurga eri hari huranto hakeno, <sup>34</sup> Jisasi'a

asuntgi znanteno zanavurgare znavako higeno, ame huno zanavurga ruhari higeke nege'ne Jisasi avaririke vu'na'e.

## 21

*Jisasi'a donki afu'mofo agumpi Jerusalemi ra kumate vu'nea naneke*

<sup>1</sup> Jerusalemi kumara emeri atupa hu'za Betfage kumate ehanati'za, Olivi agonare emanine'za, Jisasi'a amage nentaza disaipol nagapinti tare'mokizni huznanteno, <sup>2</sup> anage huno zanasmi'ne, **Vutna antu kumate ome kesakeno, a' donki afura, anenta'ane kina rentenenigeno mani'neankitna ome kegaha'e.** Kina katufetna zanavreta Nagrite e'o. <sup>3</sup> Avareta ne-esnakeno mago'moma kema hina, eri'za me'negeno Ramo'a hurantegeta enevro'e hutna hi'o. Anagema hanakeno'a, ko avretna vi'o hugahie. <sup>4</sup> Amazama fore hu'neana korapa avontafepi kasnampa vahe'mo hunte'nea, kemo eama hu'ne. <sup>5</sup> **Saioni mofara anage hunka asmio, ko, kagri kinimo kagritega ne-eanki, avufa anteramino, donki agumpi manino, ve agaho donkifi, ne-e.** (Zek 9:9.)

<sup>6</sup> Amage nenta'za disaipol nagapinti vu'namoke Jisasima kema huzanante'neaza hu'na'e. <sup>7</sup> Ana a' donkine, anenta'ane znavre'ne eke anakre kuzni'a zafike ana donki agumpi vasi'nakeno, Jisasi'a ana agofetu mrerino mani'ne.

<sup>8</sup> Manino nevige'za rama'a veamo'za nakre ku'zami zafiza kante vasi'za nevzage'za, mago'amo'za zafa azankuna akafri'za kampi vasinageno anante vu'ne. <sup>9</sup> Rama'a vahe kote'za Agri avuga vu'naza vahe'zagane, henkamaaza vahe'mo'za tusi muse nehu'za kezati'za, **muse huntesune Deviti ne'mofavrea, agrira asomu hunto ramofo agifi ne-emofona, muse huta agi'a erintesga hunagamu atresune.**

<sup>10</sup> Ana nehazageno Jisasi'ma, Jerusalemi kuma agu'afi uhanatige'za mika veamo'za antri nehu'za muse hu'za, ama nera iza'e? <sup>11</sup> Nehu'za ana vahe kevumo'za hu'za, ama'i kasnampa ne' Jisasi'e, Nasareti kumateti, Galili kazigati e'nea nere hu'naze.

*Ra mono nompinti zmahananti atrenea naneke  
(Mak 11:15-19; Luk 19:45-48; Jon 2:13-22)*

<sup>12</sup> Jisasi'a mono nomofo agu'afi ufrenero maka zagore netre'za miza neseza nehaza vahe'zaga zamahe anatige'za fegi'a atirami'naze. Hagi zago rezahe nehaza vahe sipa eri herafi netreno, mizante maho nama zaga ante'naza vahe tra'zmi eri rukrahe hutre'ne. <sup>13</sup> Jisasi'a anage huno zamasmi'ne, **Anumzamofo avontafepima kre'nazana, nagri nona Anumzamofonte nunamu hunte no megahie hu'ne. Hianagi tamagra kumzafa vahe frakiza manisnaza kuma retro nehaze.** (Ais 56:7)

<sup>14</sup> Ana hige'za zmuraga asu hu'nea vahe'ene, zmaga haviza hu'nea vahe'mo'za Agrite ra mono nompi ageno zamazeri so'e huzmante'ne.

<sup>15</sup> Hianagi pristi vahe'ene kasegere ugagota hu'naza vahe'mo'za Jisasi'ma kaguvaza hiaza negazageno, mofavre ramimo'za ranke hu'za, Deviti Nemofo muse huntone hazazamo zamarimpa hege'za, Jisasinku anage hu'naze, <sup>16</sup> Amama mofavre ramimo'zama nehaza kea nentahino? Hazageno Jisasi'a anage hu'ne, **Ozo, tamagra mono avontafera hampritma onke'nazo, osi mofavrene, aminte mofavremokizmi zamagipi, kagri rankagi kami'zana retro hunte'nane.** (Sam-Zga 8:2.)

<sup>17</sup> Jisasi'a anage huteno Jerusalemi rankumara atreno Betani kumate vuno, anante umase'ne.

*Jisasi'ma fik zafa kesigeno osapate'nea naneke  
(Mak 11:12-14,20-24)*

<sup>18</sup> Jisasi'a nanterana otino ete Jerusalemi rankumatega vunaku nevuno aga'zanku hu'ne. <sup>19</sup> Keana kama vutega magoke fiki zafa oti'negeno, Agra ana zafa tava'onte eno eme keana magore huno nena'a omneno ani'namoke hu'negeno, Agra ana zafagu huno, <sup>20</sup> Mago'enena kagripina raga fore osugahie. Ana zafamo'a osapategeno amage nentaza disaipol naga'mo'za nege'za zmanogu nehu'za antahige'naze. Nankna huno ama fiki zafamo'a ame huno osaparare? <sup>21</sup> Hu'za hazageno, Jisasi'a anage huno kenona zamirera hu'ne, Tamage hu'na neramasmue, tamentinti nehutma tare tagufa tamagesa on-tahisnutma, tamagra fiki zafa huntoa kna'zana ageteretma amne hazasine. Hianagi ama'na agonagu hutma, otinka hage rimp i tka'uro hanageno'a amne ana hugahie. <sup>22</sup> Hanki nazankuro kamentinti hunka, nunamu hunka antahigesanana, amne erigahane.

*Na hihamu eri'nane? hu'za Jisasi antahige'naza naneke  
(Mak 11:27-33; Luk 20:1-8)*

<sup>23</sup> Jisasi'a ra mono nomofo kumate marerino rempi hu'nezmige'za, pristi vahemo'zane, Jiu kva vahe'mo'za Jisasinte e'za aramanage hu'za antahige'naze, Ina hihamure ama eri'zana Kagra e'nerine, Aza ana hihamua Kagriria kami'ne? <sup>24</sup> Jisasi'a zamagri kenona huno, Nagra anazanke hu'na mago zanku tmantahigegahue, anazama Nagri'ma nasmisse'na, Nagra ina hihamufi ana eri'zana e'nerufi anazanke hu'na tmas-migahue. <sup>25</sup> Joni'ma mono tima frezmante'neana, iza'e agafa'a, monafintipi vahe'mo'za huntageno eri'ne? Hige'za ana vahe'mo'za nanekea nentahi'za agafa'agu naneke ohumi ahumi hu'za, tagrama huta, monafintire hanunkeno'a, Agra tagriku anage hugahie, hanki nahigetma agrit-era tamentintina nosaze? Huno hugahie. <sup>26</sup> Hianagi tagrama hutma, vahe'mo'za huntageno eri'ne hanunk'ea, vahe'mo'za tahegahaze hu'za koro hu'naze. Na'ankure maka vahe'mo'za Joninkura kasnampa nere ne-haze. <sup>27</sup> Nehu'za Jisasina ke nona'a hunte'za, Tagra ontahi'none hazageno, Agra anazanke huno zamasmi'ne, **Nagranena igati eri'noa hihamufi eri'zana eneruo ontamasmigahue.**

*Tare ne'mofavremokizni fronka naneke*

<sup>28</sup> Hianagi tamagra na'ane tamagesa nentahize? Mago ne'mo'a tare ne'mofavre zanante'ne. Pusa ne'te viazamo anage hu'ne, mofavre'nimoka menina vunka waini hozafi eri'za omerio hu'ne. <sup>29</sup> Ana mofavremo'a ke nona hunteno, Nagra ovugahue hutenoagi, henka agu'a zahe huno vu'ne. <sup>30</sup> Neznafa'a henka'mofonte viazamo anahu ke huno ome antahige'ne. Ana mofavremo ke nona huno, nagra ana hugahue hutenoagi, ovu'ne. <sup>31</sup> Taremokiznifintira inamo nefä avesizana avaririne? Zamagra hu'za Pusante'mo'e, hazageno Jisasi anage huno, Nagra tamage hu'na neramasmue, takesi zagoma vahepinti zonegiza vahe'ene, monkote'ma nehaza vahe'mo'za tamagrira tamagatere'za Anumzamofo kumapina yuga-haze. <sup>32</sup> Na'ankure Jonima tmagritega e'neana fatgo avu'ava huramerinaku e'negetma, tamagra agrit-era tamentinti osu'naze. Hianagi vahepinti takesi zagoma zogi vahe'mo'zane, monko vahe'mo'za agrit-era zamentinti hu'naze. Hagi tamagra ana zana negetmagi, tamagu'a rukrahe hutma tamentinti huonte'naze.

*Havi hoza kva vahe'mofo fronka naneke  
(Mak 12:1-12; Luk 20:9-19)*

<sup>33</sup> Mago fronka kea antahiho. Mago mopa agafa ne'mo'a waini hoza kri'ne. Ana hoza kegina huno wainima tatisia keria asenteteno, hagi mani'neno kvahu nona kintene. Zoka mani'neno ikante zago mizaseterehu (rent) vahehoza'a netreno afete ka vu'ne. <sup>34</sup> Hozama anarere knama egof-tama higeno'a, kazokzo eri'za vahe'a huzmantege'za, agri'ma refako hu'za amisnazama'a erisnagu kegava hu'ne'za ikante mizama (rent) nezamiza nagate e'naze. <sup>35</sup> Ana hianagi, anama kegavama hu'naza naga'mo'za zmarotago hu'za, magora knonkeve nem'i'za, magora ahe nefri'za, magora have kanonu ahe'naze. <sup>36</sup> Mago'ane kazokzo eri'za vahera pusante'ma huzmante'neama'a agatereno hakare huzmantege'za vazage'za, anazanke huzmante'naze. <sup>37</sup> Henkarfana, ne' mofavreni'a agazone humigahaze nehuno mofavre'a huntogeno vu'ne. <sup>38</sup> Hianagi ana hoza ikante kva hu'ne'za miza nesaza vahe'mo'za, kageno nemofo'ma ege'za, ama fenoma erisia mofavre ama eanki erinketa ahenefrita ana fenona erigahune. <sup>39</sup> Anage hute'za, ana waini hozafinti avazuhi fegu atre'za ahe fri'naze. <sup>40</sup> Hagi anantema waini hozamofo nafa'amo'ma esuno'a, hozama kegavama hu'naza vahera, na'a huzmantegahie? <sup>41</sup> Agrira anage hu'za asmi'naze, Agra havi avu'ava hanaza vahera zamazeri havizahutfa hugahie. Huteno ana waini hoza zamazamp-inti hanare'mreno, hoza kegava hu'ne'za hoza anerere knare, agrama erigahue hu'nesiam'a'ama amisaza vahe zamigahie hu'naze. <sup>42</sup> Jisasi'a anage huno zamasmi'nne, Anumzamofo avontafepina tamagra hampritma nonkazo? *Nogi vahe'mo'za knare osu'ne hu'za eritre'naza havemo'a, nomofo renagentete asente'nageno azeri hanaveti have menina fore nehie. Ama'i Anumzamo tro hu'neankino, tvurera so'e zantfa fore nehie.*

(Psa-Zga 118:22-23) <sup>43</sup> Ama ana agafare, Nagra kea tamagrira tamasmina, Anumzamofo kumara tamagripintira hanareno, iza'zo Anumzamofo kuma'mofo nena rgama renentesnamokizmi zamigahie. <sup>44</sup> Hagi mago'mo'ma amana havere'ma asaga humrisimo'a, korino rupanini hugahie. Hianagi ana havemo'ma inamofo agofetru asagahu ramisimo'a fuzafuleno kugupa segahie. <sup>45</sup> Hige'za ugagota pristi vahe'mo'zane, Farisi vahe'mo'za ana fronka kema hia nentahi'za, zamagra antahi'zazmifina, tagiku nehie hu'za hu'naze. <sup>46</sup> Jisasina azerisaza kanku hakre'nazanagi, zamagra tusi'a vahe kevugu kore hu'naze. Na'ankure ana vahe kevumo'za, Agrikura kasnampa nere hu'za nehaza zankure.

## 22

*Arave hute ne'za retro hu'neazamofo fronka naneke  
(Luk 14:15-24)*

<sup>1</sup> Hagi Jisasi'a fronka kea mago'ene zamagrikura anage huno zamasami'nne. <sup>2</sup> Mona kumamo'a mago kini ne'mo mofavre'amo arave huku higeno kave retro hu'neankna hu'ne. <sup>3</sup> Huteno agra kazokzo eri'za vahe'a, zamagima hu'noa vahe'zaga ome kehinke'za, aravemahu nezantera eho huno huzmantege'za vazanagi, zamagra omegahune hu'naze. <sup>4</sup> Mago'ene ruga'a kazokzo eri'za vahera hunezmanteno, anage hu'ne, zamagima hu'noa nagara zamasamaho, Nagra aravehu ne'zana hago retro huntogeno me'ne. Ve bulimakaoe agusage afu'zagani'a, ko ahe'za traga huvazi antazageno, mika'zana retro hunte'naze. Ana hu'negu aravemahu nezante eho. <sup>5</sup> Hianagi anankea ontahiza atre'za vu'za e'za hu'naze. Mago'mo'a hoza arega vigeno, mago'mo'a zago eri'za ma'are vu'ne. <sup>6</sup> Ruga'amo'za eri'za vahe'zamia zamazeri haviza nehu'za, zamahe fri'naze. <sup>7</sup> E'ina

hazazamo, kini ne'mofona tusiza huno rimpia haviza higeno, sondia vahe'a huzmanteg'e'za vu'za ana vahe'ma zamahe fri'naza vahera ome zamahe nefri'za, rankumazmia teve taginte'naze. <sup>8</sup> Anante Agra kazokzo eri'za vahe'agura anage huno zamasmi'ne, aravema hu ne'zana hago trotra hunte'ne. Hu'neanagi zamagima hu'nona vahe'mo'za efregara osu'naze. <sup>9</sup> E'ina hazagu, ranra kampi vutma inankna vahe'ma zmagesuta, zmagi hinke'za aravema hu nezantera eho. <sup>10</sup> Hige'za ana kazokzo eri'za vahe'amo'za rankuma kampi vu'za e'za hu'za zmagaza vahe'a, havi avu'ava nehaza vahero, knare vahero kehutru hazage'za, ana aravehu nompina, zamagi hu'naza vahe'krerfamo'za avite'naze.

<sup>11</sup> Hu'neanagi, Kini ne'mo'ma efreno arave hutema zmagi hu'nea vahepima eme keana, anampina mago nera aravehu kukena osu'nea ne'emani'negeno ke'ne. <sup>12</sup> Hagi Agra ana neku anage hu'ne, nenfuga aravemahu kukenama osu'enka kagra inankna hunka amafina efre'nane? Hianagi agrama hukeaga omne'geno mago keaga osu'ne. <sup>13</sup> Anante Kini ne'mo eri'za vahe'a zamasamino, azeritma nofi agare azante anakitetma, asgahutma tusi'a hanizampi matevutrenkeno, anampinka zavira neteno, ave aninkreki hino hu'ne. <sup>14</sup> Na'ankure ra'ma'amokizmi ke hu'neanagi, osi'a naga huhampri nezmanente.

*Sisa amisaza takesi zagogu Jisasi antahige'naza naneke  
(Mak 12:13-17; Luk 20:20-26)*

<sup>15</sup> Anante Farisi vahe'mo'za magopi omeri truhu'za, rehesageno, Agra'a hania kefinti azerisune hu'za ke retro hu'naze. <sup>16</sup> Hute'za zamagri zimage nentaza naga'ene, Herodima amage nentaza disaipol naga'ane, magoka huzmantage'za Jisasinte vu'za anage hu'naze. Rempi huzami nere, tagra antahi'none, Kagra tamage ne'tfa mani'enka, tamage ke'moma hu'nea kante antenka Anumzamofo kankura rempi hunezmire. Mago'mofonkukera nosane, na'ankure mago'mofontega nontane. <sup>17</sup> Hagi tagrira tasmio. Kagra nankagesa nentahi'ne? Knare hu'negu, Sisama ami takisi zagoa amigahumpi omigahune? <sup>18</sup> Hianagi Jisasi'a havi antahi'zama eri'zana nezmageno anage hu'ne, **Tamagra tavre vahere!** **Na'a higetma revatga huta negaze?** <sup>19</sup> Mago'ma takisima nehaza zagofinti eri naveriho, hige'za mago zago eri'za Agrite e'naze. <sup>20</sup> Jisasi'a zamagrsku anage hu'ne, **Ama aza amema'ane aza naneke krente'naze?** <sup>21</sup> Zamagra ke nona'a hu'naze, Sisa su'ane hazageno, Agra zamagrsku anage hu'ne, **anama huno, Sisa'zama me'nesiana, Sisa amiho.** Hagi Anumzamofo zama me'nesiana, **Anumzamofo amiho.** <sup>22</sup> Anankema nentahi'za antri nehu'za, Agrira atre'za vu'naze.

*Fripinti ot i snaza kegu Jisasi antahige'naza naneke  
(Mak 12:18-27; Luk 20:27-40)*

<sup>23</sup> Ana zupage Satusi mono vahe'mo'za, (vahe'mo'za fripintira o'otigahaze nehaza vahe'mo'za) Jisasinte e'za eme antahige'naze, <sup>24</sup> Rempi huzami ne'moka, Mosesie'a huno, **Mago'nem'o'ma mofavre kase onte'nenoma frisigeno'a, nefu'a ana kentora a'erineno nefu fri'nea ne'mofa mofavre kasentegahie.** <sup>25</sup> Hagi tagripina 7ni'a kogna mani'nafinti, agonesa mofavremo a' eriteno, mofavre onteno fri'geno, ana ara negna erinte'nne. <sup>26</sup> Anantemo'a anazanke hu'ne, hagi 3mo'a anazanke huno tamino 7nifofonte vu'ne. <sup>27</sup> Ana ara henka fri'ne. <sup>28</sup> Ana hu'negu Fripinti otisaza kna'zupa, ana kognafintira iza a' manigahie? Na'ankure ana miko'mo'za ana

ara erinte'naze. <sup>29</sup> Jisasi'a kenona'a anage huno zamasmi'ne, Tamagratmi tamazeri havia nehaze, na'ankure avontafero, Anumzamofo hanavea antahi'amara nosaze. <sup>30</sup> Na'ankure fri'nehnafinti'ma oti snazana, arave hu'zana omnesigeno, ara vasi omiami hu'zana omnesigeno, monafinka ankero vahe'kna hu'za manigahaze. <sup>31</sup> Hianagi fri'naza vahe'ma otisaza zanku'ma Ra Anumzamo'ma tamagriku'ma hu'nea kea hamprita ontahinazo. <sup>32</sup> Nagra Abrahamuma Aisaki'ma Jekopu Anumza mani'noe hu'neana? Agra fri vahe'mofo Anumzana omani'ne, hagi kasefa hu'za mani'naza vahe'mofo Anumzane. (Eks-Ati 3:6) <sup>33</sup> Tusi'a vea kevumo'za ana nanekema nentahi'za, rempima huzmia kegura tusi antri hu'naze.

### *Vugotama hu'nea kasegemofo naneke*

<sup>34</sup> Hianagi Farisi vahe'mo'zama antahi'zama, Satusi vhahera keosza kema Jisasi' huzmanteg'e'za, Farisi vahe'mo'za magopi eritru hu'naze. <sup>35</sup> Zamagripinti mago'zmimo'a, kasegere ugagota hu'nemo, reheno kenaku anage huno agenoka hu'ne. <sup>36</sup> Rempri huramine'moka, inana tra kemo mareri'agetereno vugagota hu'ne? <sup>37</sup> Jisasi'a kenona'a asmino, Rana, kagrika'a Anumzana, mika tumokareti ene, mika kagu kamenteti ene, mika antahintahi ka'areti avesinto. (Diu-Kas 6:5) <sup>38</sup> Ama e'i pusama huno, vugagote'nea kasege. <sup>39</sup> Anante'ma hu'neana, kagrugu'ma kavesi'nentanaza hunka, tvaonkarema nemanisimofona avesinto hu'ne. (Lev-Pris 19:18) <sup>40</sup> Mika kase'gemo'ene, kasnampa vahe'mofo kemo'a, asma tare tra kemo-fonte aniri'ne.

### *Jisasi'a Farisi vahe'mokizmi Kraisinku zmantahige'nea naneke (Mak 12:35-37; Luk 20:41-44)*

<sup>41</sup> Farisi vahe'ma eri'tru'ma nehzageno'a Jisasi'a mago zamagenoka ke zmantahige'ne, <sup>42</sup> Tamagra Kraisinkura nankna tamagesa nentahi'ze? Agra iza ne' mofavre? Huno zmantahigege'za, Deviti mofavre hu'naze. <sup>43</sup> Agra zamagrira anage huno zamasmi'ne, Nahigeno Avamumo'a Devitina as-migeno Ranimoke hu'ne? <sup>44</sup> Ramo'a nagri Rantega anage hu'ne, tamaga kazigani'a mani'negena, ha' vaheka'a zamare kagri kagafi antaneno hu'ne. (Psa-Zga 110:1) <sup>45</sup> Deviti'ma, Rane huno'ma hu'neana, inankna huno agri mofavrea manigahie? <sup>46</sup> Ana kemofo nona'a, mika'amo'za mago'a kea huntega osu'za, ana knareti'ma vu'neana koro hunente'za mago'anena, Agrira agenoka osu'naze.

## 23

### *Kasegere ugota hu'naza vaheku'ene Farisi vaheku hu'nea naneke (Mak 12:38-39; Luk 11:43-46; Luk 20:45-46)*

<sup>1</sup> Jisasi'a anante ana vea kevugu'ene, amage nentaza disaipol nagaku anage hu'ne. <sup>2</sup> Kasegere ugagota hu'naza vahe'ene, Farisi vahe'mo'za, Mosesi kasege kemofonte nemanize. <sup>3</sup> Ana hu'negu nankna ke'ma tamasmisa'sazana, tamagesa antahi ankeretma, tamasmisazaza hihio. Hi-anagi zamagrama hanaza zana osiho, na'ankure zamagrama rempima huzami'za zana amage' ante'za nosaze. <sup>4</sup> Zamagra kna'nentake huno erisaga huama'a amuho hu'nea zantmi anakiza vahe zamafunte nentaze. Hu'neanagi zamagra zamazana ante'za zamazankonutira retufe zimage'sa nontahize. <sup>5</sup> Ana mikazama nehzana vahe'mo'za zimagehogu zamagra ana nehaze. Na'ankure zamagra osi nunamu vogisifina mago'a mono kea kre vazite'za, zmazante'ene kokovite'ene anaki'za nofi arente arente zaza

kukenare nehaze. <sup>6</sup> Hakare vahe atru hu'za ne'za nena fi kva vahe trate mani'zanku zamavenesi'za, osi mono nompi kva vahe trate manisnaza zanku zame'nesie. <sup>7</sup> Hagi vahe'mo'za maketi kumapima humusema hunezmante'za, rempi huzami vahere'ma hu'za hanaza'zanku zmenesie. <sup>8</sup> Hu'neanagi tamagrikura rempi huzami vahere hu'za osiho. Na'ankure Rempi hurami'nera Magoke mani'negetma, tamagra ana miko'a kogna mani'naze. <sup>9</sup> Hagi ama mopafina nenfa'e hunka mago'mofonkura osuo, na'ankure tamagrira Magoke Nafa'tmimo monafinka mani'ne. <sup>10</sup> Anazanke hutma kvatia hutma mago nekura osiho. Na'ankure magoke Kva tamia Kraisi mani'ne. <sup>11</sup> Ugagotama tamagri'pima hu'nesnimo'a, tamagri eri'za ne' manino. <sup>12</sup> Iza'o agra'ama ante marerisimofona, azeri anteramigahie, izo'a agra'ama anterami'simofona, azeri antesga hugahie.

*Jisasi'a huzmasmi vahe'mo'za haviza hu'naza zanku zmasmi'nea naneke  
(Mak 12:40; Luk 11:39-42,44,52; Luk 20:47)*

<sup>13</sup> Hu'neanagi kva hiho, kasegere ugagota hu'naza vahe'ene, Farisi vahe'mota, tamagi'ari hutma tavre vahe mani'naze. Mona kumapima vu-naku haza vahera, tamagra kafa erigita ahenkani renezmantaze. Na'ankure tamagrata mia unofretama zamatrage'za ufrengaku'ma haza vahera un-ofraze. <sup>14</sup> [Kva hiho, kasegere ugagota hu'naza vahe'ene, Farisi vahera tamagi'ari hutma tavre vahe mani'naze. Na'ankure tamagra kento a'nemokizmi havige hunezmanteta nozimine, maka zazimine rezmatga hutma kumzafa eri vaganereta, kefo zama nehaza zantami refitenaku za'za nunamu nehaze. E'i ana'ma nehazagu tusi'a kna erigahaze.]\*

<sup>15</sup> Kva hiho, kasegere ugagota hu'naza vahe'ene, Farisi vahera, tamagiri hutma tavre vahe mani'naze. Mago'mo agu'a akarahe hinogura, tamagra mopafina vanohutma, hagerina takia nehaze. Anama hutma mago'ma nevretma, anamofona tamagra mani'naza avamena ageteretma tarezupa tevemofo mofavre azerinesaze. <sup>16</sup> Kva hiho, tamavu suhu kva vahera, tamagra anage nehaze, izo'a ra mono nonte huntenu huvempa haniana, amne zane! Hianagi inamo'ra mono nompima me'nea golimofo agire'ma huvempa hanimo'a, agrama huvempama hunte'nea kere amage anteno. <sup>17</sup> Tamavu suhuno neginagi vahe mani'naze! Ina'nazamo tusi'a razana me'ne, goli mopi, hipi ra mono nomo'ma goliretima azeri ruotge hu'nea zamo'e? <sup>18</sup> Hianagi tamagra anage nehaze, izo'a kre sramnavu itamofonte huntenu, huvempa haniana amne'zane. Hianagi izo'a kre sramnavu itamofonte agofetu me'nea ofare huntenu huvempama hanimo'a, huvempama hunte'nea ke'are amage anteno. <sup>19</sup> Tamusuhi vahe mani'naze! Ina'nazamo razana me'ne, ofamopi, kre sramnavu itamo ofa azeri ruotgera nehio? <sup>20</sup> E'ina hu'negu, izo'a kre sramnavu itamofonte huvempa hanimo'a, kre sramnavu itare me'neazanku'ene huvempa nehie. <sup>21</sup> Hagi izo'a ra mono nonte'ma huvempama himo'a, anampirkama nemania Anumzante ene huvempa nehie. <sup>22</sup> Iza'o monamofonte huvempa hanimo'a Anumzamofo traku'ene, anantema nemania Anumzanku huvempa nehie. <sup>23</sup> Kva hiho, kasegere ugagota hu'naza vahe'ene Farisi vahera, tamagi'ari hutma tavre vahe mani'naze. Na'ankure tamagra migufa'ene, nasene, zonkofea ofa nentaze. Hianagi kasegefima ugagota hu'neazana, fatgo avu'ava huzanki, asunkuzane, ke amage ante'zana tamagena hu'nemize. Hianagi ama zantamine, mago'azama nehaza zane tamagena huomitma amne hugahaze.

\* <sup>23:14</sup> Amana isa'a [vs 14] koma krenaza avontafepina mago'a agaterenazageta krentenone.

**24** Tamagra tamuvusuhu kva nagare, havigafa kuko antetma azeri netraze, hianagi kemoli afura asagahu nevazize.

**25** Kva hiho, kasegere ugagota hu'naza vahe'ene, Farisi vahera, tamagi'ari hutma tavre vahe mani'naze. Na'ankure amega kapumofone, zuompamofona tamagra azeri avusese nehaze. Hianagi zamagu'afina kumzafa'sezane zamagranguke huzamo avitene. **26** Tamavu asuhu Farisi vahekure, pusantera zuompane kapumofona agu'afi sesehugen, amega avufamo'a anahu kna huno avusese hino.

**27** Kva hiho, kasegere ugagota hu'naza vahe'ene, Farisi vahera, tamagi'ari hutma tavre vahe mani'naze. Na'ankure tamagra efeke paseteti vahe kerire frentageno amega kerimo'a avusese huno knare'za hiakna nehaze. Hianagi agu'afinka fri vahe'mokizmi zaferinamo'ene avusese osu'nea zantamimo avite'ne. **28** E'inahu kante amega'a vahe zamurera tamagra fatgo huta mani'none nehaze. Hianagi tamagu'afinka tavrema hu'zamo'ene tra kema amage'ma onte'zamo osu'zamo avite'ne.

**29** Kva hiho, kasegere ugagota hu'naza vahe'ene, Farisi vahera, tamagi'ari hutma tavre vahe mani'naze, na'ankure tamagra kasnampa vahe'mokizimi keri tro nehutma, fatgo vahe'mokizmi keri konariri hunentaze. **30** Ana nehutma amanage huta nehaze, korapa tagehezane mani'nona sinifa, tagra anampina ufret, zamagra'nena kasnampa vahe korana eri megira otro'sine nehaze. **31** Amanahu kema nehazana agafatami hufore hutma, tagra kasnampa vahe'ma zamahe fri'naza vahe'mokizmi zamagehete hutma nehaze.

**32** Tamagra nermageho'zama hunaza'zana huvagareho. **33** Tamagra osifave, tamagra ha' osifavemofo mofavre zage. Inankna hutma tevefima vugahaze huno huramante'neana maniganegahaze? **34** E'ina hu'negu keho, Nagra kasnampa vahe'ene, antahi'zane vahe'ma, kasegere ugagota hu'naza vahezaga, huzmantoge'za neaze, mago'amokizimia zamahetma hantigahaze. Mago'amokizmia osi mono'nontamifi zamazeritmanofi knonu sefu nezamitma, rankumate kumate zamazeri haviza hutma vano hugahaze.

**35** Ana'ma hanageno'a mika fatgo vahe ama mopafi zamahageno tagirami'nea koramo mofo kumimo'a tamagrite egahe. Fatgo ne' Eboli koranteti agafa huno Berekaia nemofo Zekaraiama, tamagrama ra mono none, kre sramanavu itamofo amu'nompima ahe fri'naza ne'mofo koramofo knazana tamagra erigahaze. **36** Nagra tamage hu'na neramasmue. Amana knafi vahe'motmage', ama ana knazana erigahaze.

*Jisasi'a Jerusalemi rankumate vaheku asuntgi'nea naneke  
(Luk 13:34-35)*

**37** Jerusalemi vahere, Jerusalemi vahere. Kasnampa vahe zamahe nefritma, huzmantege'za tamagritega aza vahera have kanonu zamahe'naze. Nama'a kna mofavre'zagatamia kokoremo anenta'a zaga agekonanu zamazeri atru huno refite zamanteankna hunaku nehuangagi tamagria tamave'nosie. **38** Keho, tamagri ra mono nomo'a, vahera omanigeno megusa avu'ava hie. **39** Na'ankure Nagra neramasmue, meninteti agafa hutma tamagra Nagrira onagetma manime nevuta anage hugahaze. *Anumzamofo agifima e'nemofona asomu huntenu huta hugahaze.*

## 24

*Jisasi'ma enaku hania knare fore hania zanku antahige'naza naneke  
(Mak 13:1-2; Luk 21:5-6)*

<sup>1</sup> Hagi Jisasi'ma mono nonkuma'ma atreno nevige'za, amage'ma nentaza disaipol naga'mo'za ra mono nonte'ma kinaza nontami eme averisagu e'naze. <sup>2</sup> Hianagi zamagrikura anage Jisasi'a hu'ne, **Amama me'nea nontamina negazafi? Nagra tamage hu'na neramasmue, mago havemo'e huno mago havemofo agofetura omanetfa hugahie.** Ana miko'mo'a tagnavazi ramigahie.

*Jisasi'a tusi'a knaza fore hugahie hu'nea naneke  
(Mak 13:3-13; Luk 21:7-19)*

<sup>3</sup> Olivi agonarema vuno unemanige'za amage'ma nentaza disaipol naga'mo'za, zamagra'agu e'za Jisasina eme antahige'za, Nazupa kema hanazana fore hugahifi tasamio. Kagrama eku'ma nehnankeno'ene, ama mopama vagareku'ma hanigeno'a, nankna avame'za fore hugahie? Hu'za hu'naze. <sup>4</sup> Jisasi'a ke'nona zimirera anage hu'ne, **Mago'a vahe'mo'za havi kante tmavare'za vuzankura kva hiho.** <sup>5</sup> Na'ankure rama'a vahe'mo'za, Nagri nagihe'za, tagra kraisigate nehu'za rama'a vahe'zaga zamazeri savri hugahaze. <sup>6</sup> Ha'mofo nanekea nentahitma, ha'mofo agigenkea antahigahazanagi tamagra korera osiho. Na'ankure amanahu'zana amne fore hugahie. Hianagi mopa vagarekna zahufa ne-e. <sup>7</sup> Na'ankure mago rankuma naga'mo'za, oti'za mago rankuma nagara ha' huzmanteg'e'za, mago kini ne'mofo naga'mo'za oti'za mago kini nemofo nagara hara huzmanteg'e'za, agate'zamo'ene iminkomo hakare kaziga tusi'za hugahie. <sup>8</sup> Hianagi ana maka zama fore haniana, mofavre kasenteku'ma eneria kna ataza ama erigafa nehie.

<sup>9</sup> Henka'a, ha' vahete tamagrira tamavare'za vnage'za tamata neramiza tamaha frigahaze. Hakare kuma'mo'za tusi'za hu'za zmavesra huramantegahaze. Na'ankure Nagri nagireku hu'za ana huramantegahaze. <sup>10</sup> Ana knafina hakare'mo'za nagrite'ma zamentintia hunaza zana atre'za vu'za, komoru ohunte ahunte nehu'za, zmavesra ohunte ahunte nehanage'za, <sup>11</sup> hakare havige kasnampa vahetamina fore hu'za mika vahera havigante zamavarentegahaze. <sup>12</sup> Hagi na'ankure ke ontahi'zamo'a ame'namepi agatereno marenerinkeno, hakare vahe'mofo avesinte avu'avazamo zasi hugahie. <sup>13</sup> Hu'neanagi aza'o amentintifima oti hampo'nama huno atupare'ma vanimofona aguvazigahie. <sup>14</sup> Anumzamofo kuma'mofo Knare Musenkea miko mopane mopane huama hutesageno, hagi vagarekna egahie.

*Maka'za agatereno haviza hania naneke  
(Mak 13:14-23; Luk 21:20-24)*

<sup>15</sup> Hianagi tusi'a haviza'mo'ma ruotge hu'nea kumapima efreno knare'zama ahe fanane nehanigetma negesutma ksanampa ne' Danieli hunte'neazamo'e hiho. Hagi ama nanekema hamprisamo'za antahi ama hiho. (Dan 9:27, 11:31, 12:11) <sup>16</sup> Hagi Judiama mani'namo'za fre'za agonarega viho. <sup>17</sup> Aza'o nomote mani'nesimo'a, uramino noma'afintira mago'zana e'orino. <sup>18</sup> Hagi hozafima mani'nesimo'a ruvahe huno nakre ku'a ome e'orino. <sup>19</sup> Zamu'ene hu'naza a'nene, mofavre aminuntage ana knafi hanaza a'nemo'za, tusi'a knaza fore hugahianki kva hiho. <sup>20</sup> Nunamu nehinkeno fretma vuzamo'a, zasi knarerero manifruhu knazupa (sabat) fore osino. <sup>21</sup> Na'ankure ana knafima fore'ma hania knazamo'a, ese'ma mopa fore'ma huneregati fore osu'nea knaknaza tusi'a knaza fore hanigeno, henka'a anahu knazana fore osugahie. <sup>22</sup> Hanki ana knamo atupama osanigeno'a, magomo'e huno omanigahie. Hu'neanagi huhampri

zmante'nea vaheku huno knamofona eritupa hugahie. <sup>23</sup> Mago'mo'ma tamagriku huno, keho, Kraisi'a amananki huge, Agra antune hania kerera tamentinti osiho. <sup>24</sup> Na'ankure havige krais'i'ene, havige kasnampa vahe'mo'za efore hu'za, tusi'a avame'zane kaguva'za hu'za zamazeri savari nehu'za, hampo'nama atisu'za, Anumzamo'ma huhampri'zmante namokizmia zamazeri savari hugahie. <sup>25</sup> Hagi antahi ankereho, korapa Nagra fore hugahie hu'na tmasmi'noane. <sup>26</sup> Hagi henka'ma mago'mo kagriku huno'ma, Agra ka'ma kopi eanki ko hanigenka ovutfa huge, ko, antu hunaraginte nompi mani'ne huno hanigeta, tamentinti osiho. <sup>27</sup> Na'ankure kopsi'namo zage hanatitegati zage fretega tevenefa tagivazu huno viankna nehanigeno, Vahe'mofo mofavrea egahie. <sup>28</sup> Na'ankure frino kasrine'niazama me'nesirega, anantega tumpa namamo'za utru hugahaze.

(Mak 13:24-27; Luk 21:25-28)

<sup>29</sup> Tusi'a knazama evutesigeno'a, ana knafina ame huno zagemo'a tusi'a haninkisigeno, ikamo'a tavira ontogeno, ofuzagamo'a monafintira atafriramisigeno, hagi monamofo hankavemo'a kogekoge hugahie. (Joel 2:31, Rev-Huf 6:12, 13) <sup>30</sup> Ana hanigeno Vahe'mofo Mofavremofo avame'zana monare fore hanige'za, mika kazigatira nagatenofite vahe'mo'za zamasunku nehu'za negesageno, Vahe'mofo Mofavre'a tusi'a hanave'ane masazama'afi mona hamponte eramigahie. <sup>31</sup> Hagi ankerero vahe'zaga'a huzamantesige'za ufena nere'za, mopa omete emete huneregati'ma Agrama huhampri'ma zmante'nemokizmi, monamofo mago agentega vuno mago agentegatira zmavare atru hugahaze.

*Fiki zafare hunte'nea fronka naneke*

(Mak 13:28-31; Luk 21:29-33)

<sup>32</sup> Fiki zafareti fronka kea rempi huta antahiho, knare huno amena'mo vuno eno huno ani'nama erimaregetma, zagegna egofta nehie hutma ne-haze. <sup>33</sup> Anahu kna kante, tamagrama ama ana zantmima negesutma, Agrama esia knamo'a kofta huno kafantfante me'ne hutma tamagesa antahiho. <sup>34</sup> Tamagerafa hu'na Nagra neramasmue. Ama knafima mani'naza vahera ofrita mani'nesageno, ana mika'zana fore hugahie. <sup>35</sup> Monane mopanena fanane hugahie. Hianagi Nagri nanekemo'a fanane osu mevava hugahie.

*Tro hutma maniho huno Jisasi hu'nea naneke*

(Mak 13:32-37; Luk 17:26-30,34-36)

<sup>36</sup> Hu'neanagi anama esia knane zagenena, mago nemo'a ontahi'tfaza hu'ne. Monafinka ankeromo'zane Nemofo'enena ontahine. Hagi Nenfake'za antahi'ne. <sup>37</sup> Na'ankure Noa knafi hu'nazankna avu'ava'za nehnageno Vahe'mofo Mofavrea egahie. (Jen-Agf 6:5-8) <sup>38</sup> Na'ankure tina ohage'nege'za, ana knafina, vahem'o'za ne'zana nene'za, aka tina nene'za, a'nea e'neriza, ara masi omiami nehazage'no, Noa'a ventefina umarer'i'ne. <sup>39</sup> Zamagra mago zankura ontahi'za mani'nageno tinko'mo hageno eme zmaheno refite vagare'ne. Vahe'mofo mofavrema enaku'ma hanigeno'a, e'inahua'za fore hugahie. (Jen-Agf 7:6-24) <sup>40</sup> Hagi tare ne'trena hozafi tragote'ne mani'nesnakeno mago'mofo netreno, mago'mofona avregahie. <sup>41</sup> Tare a'tremoke'a witi raga neganesakeno, mago'mofona netreno mago'mofo avregahie. <sup>42</sup> E'ina hu'negu kavua ketenka manio, na'ankure kagri Ramo'a nanknare egahio, kagra ontahi'nane. <sup>43</sup> Hianagi ama'na kea antahi ankerenka antahio, nomofo nef'a'ma musufa ne'mo'ma kenagepima

ne-esia knama antahi ankere'nesuno'a, agra kvahu ankere'neno atresigeno noma'a tagana vazino uofregahie. <sup>44</sup> E'ina hu'negu tamagranena trotra hoho, na'ankure Vahe'mofo mofavremo'a tamagra egahie hutma antahi omisaza knazupa egahie.

*Havi eri'za vahe'ene tamage eri'za vahe'mokizmi naneke  
(Luk 12:41-48)*

<sup>45</sup> Aza'o ke amage'anteno knare antahintahine kazokazo eri'za ne'ma mani'nesiana, kva'amo noma'afi vahete kva hunte'nesigeno, ruga'a kazokazo eri'za vhahera kna fatgorera ne'zana zamigahie. <sup>46</sup> Kazokzo eriza ne'mo kegava huno mani'nesigeno, kva'amo eno eme kesimo'a muse hino. <sup>47</sup> Tamage hu'na Nagra neramasme, kva'amo eri'za nera huntesigeno, miko zama'arera kegava hugahie. <sup>48</sup> Hu'neanagi ana havi kazokzo eriza nemo'ma agragu'ma huno, Nagri kva ne'mo'a hago zaza kna umanie nehuno, <sup>49</sup> agra agafa huno, magoka eri'za e'neriza kazokzo eri'za vahe nezmaheno, aka ti ne'za neginagi nehaza vahe'ene ne'zane, tinena ne'ne. <sup>50</sup> Anante ana kazokzo eri'za ne'mo kva'agu omegahie huno, keno antahino osnia knare'ma esuno'a, <sup>51</sup> aheno rutnerare huteno, huntenko tavre vahe'mofo kumapi umanigahie. Ana kumate zavike nehuno, ave' aninkreki hugahie.

## 25

*10ni'a vene'nene omase mofa'nemokizmi fronka naneke*

<sup>1</sup> E'i ana knafina mona kumamo'a 10ni'a venenene omase mofanemo'za lampe tavizami'a eriri eriri huza, a' erinaku hia ne' ome tutagiba hunaku vu'naza kna hu'ne. <sup>2</sup> Mago 5fu'a vene omase mofane'mokizmia knare antahintahia omanene. Hagi mago 5fu'a vene omase mofane'mokizmia knare antahintahi me'ne. <sup>3</sup> Hagi knare antahintahima omanenea mofane'mo'za rampe tavi zamia eri'nazanagi, mago'a masevena e'ori'naze. <sup>4</sup> Hu'neanagi knare antahintahima me'nea mofane'mo'za tafero zamifina mago'a masevena eririza rampe tavi zaminena vu'naze. <sup>5</sup> Hagi a'ma erinaku'ma hu'nea nera kora omegeno zamu toko hige'za mase'naze. <sup>6</sup> Hianagi kenage amu'nompi mago ne'mo kezatino, A'ma eri nera hago e'ne! Atiramita eme keho! Hige'za, <sup>7</sup> anante ana maka mofanemo'za ot'i'za tavizmi erira hu'naze. <sup>8</sup> Anante knare antahintahima omane'nemo'za, knare antahintahima me'nemokizmia zmantahige'za, mago'a masavena tamaho, na'ankure tavi timo'a asu nehie huza hazage'za, <sup>9</sup> knare antahintahima eri'namo'za kenona huzamante'za, i'o masave timo'a tamagri'ene tagri'enena knarera huorantegosianki, feno nontega vuta, tamagra su'zana ome miza seho hu'naze. <sup>10</sup> Ana masave mizasenaku nevazageno, a'ma eriku'ma hu'nea nera ege'za, tro'ma hu'za mani'naza mofa'nemo'za, aravehu ne'zama retro hunte'nea nompi agrane marerizageno kahana erigi'ne. <sup>11</sup> Henka ana knare antahizazmi omane 5fu'a mofa'nemo'za e'za Ramoke, Ramoke kahana anagiranto hu'naze. <sup>12</sup> Hianagi kenona huzamanteno, tamage hu'na neramasme, nagra tamagena antahina osu'noe. <sup>13</sup> E'ina hu'negu kva huta maniho, na'ankure Vahe'mofo Mofavremo ete esiankna ontahi'naze.

*Kazokzo eri'za vahe'mokizmi zago refako huzami'nea fronka naneke  
(Luk 19:11-27)*

<sup>14</sup> Mago'ane Jisasi'a anage hu'ne, mona kuma'mo'a amanahukna hu'ne, Mago ne'mo'a ru kaziga umanigeno enaku nehuno, eri'za vahe'a ke-hutru huno, zamagri'zmi avamente zago'a refako huzami'ne. <sup>15</sup> Hagi mago'mofona 5tauseni'a zago amino, mago'mofona 2tauseni'a zago amino, magomofona 1tauseni zago ami'ne. Hanave zamimofo avamente refako huzamiteno, atreno afete kana vu'ne. <sup>16</sup> Anama kva amo'ma nevigeno, ame huno 5tauseni'a zagoma eri'nea ne'mo'a, ana zagonuti eri'za erino mago'ane 5tauseni'a zago eri fore hu'ne. <sup>17</sup> Anahu kna huno 2tauseni'a zago eri'nea ne'mo'a, mago'ane 2tauseni'a zago erifore hu'ne. <sup>18</sup> Hu'neanagi 1tauseni'a zagoma eri'nea eri'za ne'mo'a, mopafi keri ome kafino kva'amofo zagoa asente'ne. <sup>19</sup> Hagi zazakna kva zimimo'a umaniteno, eno kazokzo eri'za naga'a ke hutru huno, zagoma zami'nea zago eri fatgo huno kenaku zamantahige'ne. <sup>20</sup> 5tauseni'a zagoma eri'nea eri'za ne'mo'a, mago'ene 5tauseni'a zagoa eri agofetu huno eno amanage hu'ne. Ramoke kagra antahi naminkama 5tauseni'a zagoma nami'nana zagoreti, mago'ane 5tauseni'a zago eri agofetu hu'na zagoa erifore hu'noe higeno, <sup>21</sup> kva'amo'a kenona hunteno, knare'zantfa hane, kgra knare hunka fatgo eri'za nere. Osi'a zanteria knare hunka kegava hanku, Kgra kavare antesnugenka rama'a zante kegava krigahane. Hagi enka Nagrane muse eme huo hu'ne. <sup>22</sup> Anante 2tauseni'a zagoma eri'nea ne'mo eno amanage hu'ne, ramoka, antahi naminkama 2tauseni'a zago nami'nantetira ko, ete 2tauseni'a zago eriagofetu hu'noe higeno, <sup>23</sup> kva'amo ke nona huno, knare'zantfa hane, kgra knare hunka fatgo eriza nere, osi'a zanteria knare hunka kegava hanku, Nagra kavarentesnugenka rama'a zante ke kva krigahane. Hagi enka Nagranena musena eme huo hu'ne. <sup>24</sup> Anante 1tauseni'a zagoma eri'nea eri'za ne'mo eno amanage hu'ne, Ramoka kgra himamu ne' mani'nankena kage'na antahi'na hu'noe, kgra ohankre'nana hoza nevsagenka, avimza orani'nana ne'za nevasganku, <sup>25</sup> kagoro hugante'na zagoka'a keri ome kaf'i'na mopafi asente'noreti, ama ana maka zago ka'a vati'na eri'na oanki ko higeno, <sup>26</sup> kva'amo kenona hunteno, kgra haviza hunka, eri'za e'ori ne' mani'nane. Kgra ko nagenka nantahinka hu'nane, ohankre'noa hoza nevasage'na, avimza orani'noa ne'za enerugu, <sup>27</sup> kgra zagoni'a zago nompi ome ante'nankeno, mago'ane zagoa erifore nehige'na, ete eme eruresine. <sup>28</sup> E'ina hu'negu zagoa agripintira eritma, 10tauseni'a zagoma eri'nemofo amiho hu'ne. <sup>29</sup> Na'ankure mago'azama ante'nesamo'za mago'ane eneri'za, zamesi' nesiazana rama'a erigahaze. Hu'neanagi mago'a zama onte'nesimofompintira eri'nesnia zana eritregahie. <sup>30</sup> Hagi ama kefo eri'za nera avreta fegi'a kumzu hanimpi ome matevuta atreho, e'i anampina vahe'mo'za zavi krafa nehu'za, zamave anikreki hugahaze.

### Mika vahe refako hania naneke

<sup>31</sup> Hagi Vahe'mofo Mofavremo ete hanave'afine masa zama'afima mika ankeru zaga'anema esuno'a, Agra masa nentake tra'are emanigahie. <sup>32</sup> Mika kokankokati vea'mo'za Agri avure emeritru hanageno afu kva nemo, afu kevufinti memene sipisipi afutami refako hugantugma hiankna huno, zamazeri kantugma hugahie. <sup>33</sup> Sipisipi afu'tmina, Agra aza tamaga kaziga zmvarenenteno, meme afutamina aza hoga kaziga zamavarentegahie. <sup>34</sup> Anante kinimo'a azantmaga kazigama mani'namokizimigura amanage huno hugahie. Nafa'nimo'a asomu huramante'neanki, etma mona mopa tro osu'nenoma retro huramante'nea kuma emerihō hugahie.

<sup>35</sup> Na'ankure nagama'netegeta Nagrira ne'za namizage'na ne'noe. Tinku nave'nesigeta Nagrira tina namizage'na ne'noe. Nantu vahe Nagra neogetma nontamifi navrente'naze. <sup>36</sup> Navufa navapa mani'nogetma Nagrira kukena hunante'naze. Kri eri'nogeta Nagrira kegava hunante'naze, Kina nompi mani'nogeta, Nagrira eme nage'naze hanige'za, <sup>37</sup> anante fatgo vahe'mo'za ke nona hunte'za, Ramoke, nazumepaga kagakura nehanketa ne'zana kami'none? Inazupa tinkura kave'nesigeta, kamunkenka ne'nane? <sup>38</sup> Nazumepaga kagonkenka Kagra nantu vahera neanketa kavare nontifina kante'none? Nazupa Kagra kavufa kavapara mani'nanketa, kukena hugante'none? <sup>39</sup> Nazumepaga kagonkenka, Kagra kria eri'nane, nazupa Kagra kina nompina mani'nanketa, ome kagenone? <sup>40</sup> Kini ne'mo kenona huzmanteno amanage hugahie, tamage hu'na neramasamue, amama zamagima omane nafuhe'impinti mago zmimofoma nankna avu'ava huzmante'nazana, Nagri hunante'naze.

<sup>41</sup> Nehuno anante aza hoga kazigama mani'namokizmia amanage huzmantegahie, tamagra kazusifi mani'naze, maniganeta kefo nemofone, ankeru naga'amofoma retro'ma huzmante'nea tevava tevefi ufreho. <sup>42</sup> Na'ankure naga'ma netegeta magore hutma ne'zana namizage'na one'noe. Tinku nave'nesigeta magore hutma tina afi onami'naze. <sup>43</sup> Nantu vahe neogeta nontimifina navre onte'naze. Navufa navapama mani'nogetma kukena huonante'naze. Krima eri'noane, kina nompima mani'nogeta eme onage'naze. <sup>44</sup> Ana vahe'mo'za kenona huntegahaze, Ramoka, nazu'mepa kagonkenka kagakura hu'nane, hifi tinkura kavesi'ne, hifi nantu vahera e'nane, hifi kavufa kavapa mani'nanketa, kukena huogante'none, hifi kria eri'nane, hifi kina nompina mani'nanketa kaza osu'none? <sup>45</sup> Hanageno Agra ke nona huzmantegahie. Tamage hu'na neramasmuae, amama zamagi omne'nea vahe'pinti, mago zmimofoma mago'zama huonte'nazana, Nagri huonante'naze. <sup>46</sup> Hanige'za ana vahe'mo'za manigane'za mani'vava zamatazampi vugahaze. Hianagi fatgo vahe'mo'za mani'vava mani'zampi vugahaze.

## 26

*Jisasi ahefriku ke retro hu'naza naneke  
(Mak 14:1-2; Luk 22:1-2; Jon 11:45-53)*

<sup>1</sup> Hagi Jisasi'ma ana maka nanekema huvagareteno, amanage huno amage'ma nentaza disaipol nagara zamasmi'ne. <sup>2</sup> Antahi'naze Anumzamo Israeli vahe'ma kinafinti zmare'nea kna, tare knama agteresigeno egahie. Hagi Vahe'mofo Mofavre avare zamisage'za, ahe'za keka zafare hantigahaze.

<sup>3</sup> Hanki ugagota pristi vahe'mo'zane, Israeli vahe'mokizmi ranra kva vahe'mo'za ugagota mono kva ne' Kaiafasi kumapi atru nehu'za, <sup>4</sup> Jisasima havige hunte'za, azeri'za ahefrisaza naneke, oku'a huge antahige hu'naze. <sup>5</sup> Hu'neanagi anage hu'za aru amu'nozmifinti ke hakare hu'za ha' eri fore hu'zanku kinafinti zmare'nea knagu antahimi'za ne'zane knareru anara osugahune hu'naze.

*Masave Jisasi frente'nea naneke  
(Mak 14:3-9; Jon 12:1-8)*

<sup>6</sup> Jisasi'a Betani kumate Saimoninku fugo ne're nehaza nemofo nompi umarerino mani'negeno, <sup>7</sup> mago a'mo hentofa have tafempi mananentake

huno mizama'amo mareri'nea masave erineno, Jisasi'a aza tununte itare mase'negeno, asenire tagino frente'ne. <sup>8</sup> Hianagi amage'ma nentaza disai pol naga'mo'za, anama hiaza nege'za zamarimpa haviza nehige'za, ama masavena na'a higeno amne zanknara nehie hu'naze? <sup>9</sup> Ra mizante atreno, zago erino amunte omne vahe zamigare nehazageno, <sup>10</sup> Jisasi'a keno antahino nehuno'a anage hu'ne, Nahigetma ama ara antahi haviza hunentaze? Na'ankure agra knare avu'avaza hunenante. <sup>11</sup> Zamunte omne vahera zamagra mika zupa tamagrane manigahaze. Hagi Nagra mika zupa tama-granena omanigahue. <sup>12</sup> Ama a'mo'ma navufare masavema frenenanteana, asemanante'zamo noazeri retro nehie. <sup>13</sup> Tamage hu'na neramasmuae, mopane mopane vu'za e'za nehu'za, knare muse keni'a huama hanarega, ama a'mo hia avu'avazankura huama hu'za vahera nezmasmisage'za, zamagesa antahimigahaze.

*Judasi'a komoru hanige'za Jisasi azerisnaza naneke  
(Mak 14:10-11; Luk 22:3-6)*

<sup>14</sup> Anante 12fu'a amage nentaza disaipol naga'afinti Judas Isakarioti'e ne-haza ne'mo, ugagota pristi vahete vuno, <sup>15</sup> amange huno zamantahige'ne. Na'a namisagu nagra Jisasina avreramigahue? Hige'za 30'a Silva zagoa hampriza ami'naze. (Zek 11:12-13) <sup>16</sup> Ana knaretima vu'neana Jisasima avare zamisia kankamu fore hanigu Judasi'a hakrene.

*Jisasi'a amage nentaza disaipol naga'ané vagare ne'za ne'nea naneke  
(Mak 14:12-21; Luk 22:7-14,21-23; Jon 13:21-30)*

<sup>17</sup> Hagi zo'ore Breti nenaza hompa knamofona ese zupa, amage nenaza disaipol naga'mo'za Jisasisinte e'za eme antahige'za, inantega kinafinti zmare'nea knagu antahimi ne'zana retro hugante'sunkenka negahane?

<sup>18</sup> Jisasi'a ke nona'a huno, **Rankumate ufresuta'a mago ne' ome kegaha'anki amanage huta ome asami'o, rempi hurami' ne'mo'a amanage huno hu'ne.** Knani'a atupa nehigu nonka'afi namage'ma nentaza disaipol nagani'anekinafinti zmare'nea knagu antahimi ne'zana negahune hune hutna hi'o.

<sup>19</sup> Higene Jisasi'ma huznantea kante anteke, amage'ma nenta'a disaipol netremokea ne'zana ome retro hu'na'e.

**20** Anama higeno Jisasi'a 12fu'a amage' nentaza disaipol naga'aneneza nenaza trate zamaza tununte mani'naze. **21** Ne'za nenageno Jisasi'a zamasamino, **Tamage hu'na neramasmiae, mago'moka ha'ma renenantaza yah'e'mokizumi zamazamii komoru hunka neurentegabane**

Referantaza Vahemokizimi zamazampi komoru hunka nevarentegahane.  
22 Amage'nentaza disaipol naga'mo'za zmusunku nehu'za magoke magokemo'za Jisasinku anage hu'naze, Ramoka tamage nagriku nehampi? 23 Higeno Jisas'i a kenona'a huno, ama tafepinti'ma ne'zama magoka Nagrane nenompinti, mago'moka nagrira ha' vahemazampi navarentegahane. 24 Agriku'ma hu'za krente'naza kante, Vahemofomo favremo frigahie. Hianagi kva hino, komoru huno ha' vahete navre zamisnia ne'mo'a, nerera'ma kase ontene'sinia knare hisine. 25 Komoru huno ha' vahemavare zmisia ne' Judasi'a amanage hu'ne, Hurami' ne'moka tamage nagriku nehampi? huno higeno, Izo kagra ha e'i nehane, huno Jisas'i asmi'ne.

*Jisasi'a hame ne'za zamige'za ne'naza naneke  
(Mak 14:22-26; Luk 22:15-20; 1 Kor 11:23-25)*

<sup>26</sup> Anama nenageno, Jisasi'a breti erino Ramofonte susu hunu nunamu huteno, erigorino amage'ma nentaza disaipol naga'a nezmino amange hu'ne, **Ama'i nagri navuvgagi erita neho.** <sup>27</sup> Anante Jisasi'a mago waini

tafero erino Anumzantega susu huno nunamu huteno nezamino, **Mika'mota** ama anampinti neho hu'ne. <sup>28</sup> Na'ankure Anumzane huhagerafita man-isnaza'zamo avempa huno mesnigu ama'i korani'e. Mika vahe'mofo kefo zazmi eri apase zmantenu korani'a tagi neramue. <sup>29</sup> Amanage hu'na neramasmue, meninteti'ma vaniana wainia mago'ene one'na henka'a, Nafa'nimo kumapi tamagrane kasefa wainia negahune. <sup>30</sup> Hutege'za anante mago zagame hute'za, atirami'za Olivi agonare vu'naze.

### *Jisasi'a vahane hugahane huno Pitanku hu'nea naneke*

<sup>31</sup> Jisasi'a amanage huno zamasmi'ne, Meni kenegetfa Nagrite'ma fore'ma hania zanku natretma fregahaze. Na'ankure ko avontafepina krenteno, *Nagra sipisipi kva ne' ahesuge'za sipisipi kevumo'za panini hu'za ufre efre hugahaze hu'ne.* (Zek 13:7) <sup>32</sup> Hianagi friprinti ot'i'na Galili ugote'na vugahue. <sup>33</sup> Higeno Pita'a kenona huno, mikamo'za kagrite'ma fore'ma hania zankura kat're'za fre vagaregahaze. Hianagi nagra onkatretpa hugahue. <sup>34</sup> Jisasi'a huno, **Tamage hu'na negasamue, meni kenegetfa kokorege osu'enkenka, tagufa zupa Nagrikura onke'noe hunka vahane hugahane.** <sup>35</sup> Pita'a amanage huno asmine. Ha nagra Kagrane fritfa hugahue, hanki'na Kagrira onkage'noe hu'na vahane huogantegahue. Hige'za ana miko amage'ma nentaza disaipol naga'mo'za ana kege hu'naze.

### *Jisasi'a Anumzane naneke hu'nea naneke*

(Mak 14:32-42; Luk 22:39-46)

<sup>36</sup> Higeno Jisasi'a amage nentaza disaipol naga'ene Getsamenie nehazarega vuteno, anage huno zamasami'ne, **Amare mani'enkena Nagra amanure nunamu ome huteno** nehuno, <sup>37</sup> Pita nevreno Zeveti ne'mofavare zanagri kogna Jemisine Jonine zanavreno nevigeno agafa huno rimpamo tusi kna avenesigeno agu'amo haviza nehigeno, <sup>38</sup> amanage huno zamasmi'ne, **Nagu namemo'a tusiza huno kna nehuno, nazeri fri kante nevie. Amare mani'neta Nagrane kvahuta maniho.** <sup>39</sup> Osi'a vu ogamnu'a atreno avugosaregati mopafi unemaseno, Anumzamofontega nunamu huno, **Nafa'nimoka knare'ma hu'nesiana, ama'i knazana eri atrenanto. Hu'neanagi Nagri navesira ovaririo. Kagri kavesizamo forehino.** <sup>40</sup> Ananteti amage'ma nentaza disaipol nagate eno, zamageana, zamu mase'nageno, Pitanku amanage hu'ne. **Tamagra mago auafina Nagranena kva osugahazo?** <sup>41</sup> Reramatagafi ufretta traka hanagi, kva huneta nunamu hiho. Avamu timimo'a ave'nesianagi, amega tamavufgamo'a avenosie. <sup>42</sup> Ete mago'ene vuno nunamu ome huno, **Nafa'ni moka ama'i knazamofo taferora eri atre onante hanke'na nesuana, Kagri kvesimo forehugahie.** <sup>43</sup> Ete eno eme zamageana zamu toko hige'za zamu mase'nageno, <sup>44</sup> ete zmatreno vuno tagufa zupa ko'ma hu'neankna ke huno Anumzantega nunamu ome hu'ne. <sup>45</sup> Ananteti eno amage'ma nentaza disaipol naga'a zamasmi'ne, **Tamagra manigsa nehutma tamu masenazo? Keho, Vahe'mofo mofavrema komoru hu'za kumi vahe'mokizmi zamazampi avremisaza knahie.** <sup>46</sup> **Otinke' vamneno, komoru huno navre zamisia nera ama ne-e.**

### *Jisasinu komoru hu'za azerinaza naneke*

(Mak 14:43-50; Luk 22:47-53; Jon 18:3-12)

<sup>47</sup> Jisasi'a ke huvaga ore'negeno 12fu'a amage'ma nentaza disaipol naga'afinti mago'mo Judasi ehanitino tusi'a vahe kevune e'ne. Ugagota pristi kva vahe'mo'zane, Jiu kva vahe'mo'za huzmantage'za kazinknorne kumpa knone eri'za e'naze. <sup>48</sup> Judasi'a komoru hu'nemo zamasmino, Agi'ma antako

hanuana, e'i ana neki azeriho. <sup>49</sup> Judasi'a ame huno Jisasinte vuno, Knare kenegere hurami ne'moke nehuno, agi antako hu'ne. <sup>50</sup> Jisasi'a ke nona'a huno, **Rone'nimoka hunakurema hunka anzana huo.** Anante ruga'amo'za e'za Jisasina eme azeri'naze. <sup>51</sup> Hianagi mago Jisasi'ene mani'nea ne'mo, kazinknoma'a erino ugagota pristi ne'mofo kazokzo eri'za ne' agesa rukafri atre'ne. <sup>52</sup> Ana higeno Jisasi'a amanage huno asmi'ne, **Kazi knonka'a aroma'afi vazinto.** Kazi knonu ha' nehaza vahe'mokizmi'a kazi knonu zamahe frigahaze. <sup>53</sup> Kagra ontahinampi, Nagrama Nenfanku antahigesugeno'a, mago'ane 12 tauseni'a sondia ankero kevu vahe menitfa erami'za naza hanazana? <sup>54</sup> Hianagi Nagrama anama hanugeno'a, amanahu kante fore'ma hino huno Anumzamofo avontafepima kre'nea kemo'a, inankna huno efore hugahie?

<sup>55</sup> Ana knafi Jisasi'a ana vahe kevu amanage huno zamasmi'ne, **Nagri naz-erikura nahigeta kazinknone kumpa kno erita kumzafa vahe zamazeriku nehzankna hutma neaze?** Knaneknane ra mono nompi mani'nea na naneke huneramasmugeta naze'ori'naze. <sup>56</sup> Hagi ana maka zama fore hu'neana korapa kasnampa vahe'mo'za, fore hugahie hu'za kre'naza'zamo avufga'a fore hu'ne. Ananknafi amage nentaza disaipol naga'mo'za atre'za fre'naze.

### *Jisasina kanisol vahete avare'za vu'naza naneke*

<sup>57</sup> Jisasima azeri'za vu'naza vahe'mo'za, Kaiafasi ugagota pristi nemofo nompi avare'za vu'naze, ana nompinas kasegera ugagota hu'naza vahe'ene Jiu ranra kva vahe'mo'za atru hu'za mani'nazafi avare'za vu'naze. <sup>58</sup> Hu'neanagi Pita'a ogama'a zamavaririno nevuno, ana mono ne'mofo nonkumapi ufreno, Jisasinte'ma fore haniaza kenaku eri'za vahe'ene umani'ne.

<sup>59</sup> Hagi ugagota pristi vahe' mo'zane ana miko kanisol (Senhitren) vahe'mo'za, Jisasima havige huntesage'za ahefrisaza vaheku hakare'naze. <sup>60</sup> Hianagi miko vahe'mo'za eama hu'za havige huntazanagi, mago havizama'a hake'za eri fore osu'naze. Hianagi henka'a taremoke eama huke, <sup>61</sup> Jisasinku anage hu'na'e, Ama ne'mo Anumzamofo ra mono nona tapage hu'na tagufa knafi ki vagaregahue, huno hu'nea nere. <sup>62</sup> Anante ugagota pristi ne'mo'a otino amanage hu'ne, Ama nanekema hunegantarera kenona osugahampi? Na'a hu'nanke'za ama vahe'mo'za kea hunegantaze? <sup>63</sup> Jisasi'a ke osu' mani'negeno ana ugagota pristi ne'mo amanage hu'ne, Kasefa huno mani'nea Anumzamofo agire nehuanki tasamio. Kagra, Kraisiga Anumzamofo Nemofogafi? higeno, <sup>64</sup> **Izo Kagraka'a hago nehane.** Hianagi amanage hu'ha mika motmagura nehue, henka'a Vahe'mofo mofavremo'a, negesnageno Anumzamofo azantmaga kaziga manino hihamu'ane mona hampompi ne-enketa kegahaze.

<sup>65</sup> Higeno ugagota mono kva ne'mo kukena'a eritagato hunetreno amanage hu'ne, keho Anumzamofonku azanava ke nehie! Mago'ene naneke huontegosune, tamagra tami azanava kema huntea kea nentahize. <sup>66</sup> Hagi na'ane tamagesa nentahize? Hige'za kenona hu'za, hazenke hu'neankino frisi.

<sup>67</sup> Nehu'za Jisasina avufi zmetu henente'za zamaza kano ahe'naze. Mago'amo'za zamaza rutarete'za nehe'za, <sup>68</sup> amanage hu'za antahige'naze, Kagra Kraisige, aza negahefi kasnampa ke hu'ama hunka tasimio?

*Pita'a Jisasinku onke'noe, hu'nea naneke*  
(Mak 14:66-72; Luk 22:56-62; Jon 18:15-18; Jon 18:25-27)

<sup>69</sup> Ana kumapi fegi'a Pita'a umani'negeno mago eri'za mofa'mo eno, Kagrarena Galili ne' Jisasi'ene vano nehazafinti mago zamimoke, hu'ne. <sup>70</sup> Pita'a maka vea zamufi vahane huno, Nagra ontahi'noa zanku nehane. <sup>71</sup> Ananteti atiramino ana kumamofo kafante vigeno, mago ru eriza mofa'mo negeno, Anante'ma mani'naza vahera zamasmino, ama nera Jisasi Nazareti ne'ene nemania nere. <sup>72</sup> Pita'a mago'ene vahane huhampo'na huno, Nagra onke'noa neku nehane hu'ne. <sup>73</sup> Anante osi'a kna evige'za, oti'za mani'naza vahem'o'za Pitante eza, anage hu'naze, tamage kagra mago zamimoke, na'ankure kageru'mo hufore nehie. <sup>74</sup> Pita'a hanave kefinti agra'agu huhaviza nehuno, monamo'a antahine, tamage nagra onke'noa neku nehaze, higeno kokoremo'a ana agi'ene krafa hu'ne. <sup>75</sup> Anante Jisasi'ma hu'nea kere Pita'a agesa antahigeno vu'ne, **Kokoremo krafa osu'enkenka onke'noa nere hunka tagufa zupa vahane hugahane** hu'nea kegu nentahino, Pita'a fegi atiramino tusi asunku huno zavi ate'ne.

## 27

### *Judasifri'nea naneke (Apo 1:18-19)*

<sup>1</sup> Ko'matigeno nanterama'a maka ugagota mono kva vahe'ene, ranra kva vahe'mo'za atru huza Jisasi ahefrisnaza naneke hunaki'naze. <sup>2</sup> Ana hute'za Jisasina azeri'zanofi kite'za, rankumamofo kagota kva ne' (Gavana) Paeroti avare'za omemi'naze.

<sup>3</sup> Hagi komoru huno avare zami'nea ne' Judasi'a antahiamma Jisasi frigahie kema nentahino'a, rama'aasuza e'nerino, 30'a silva zago ami'naza zago'a erino ugagota mono kava vahete'ene ranra vahete vuno, <sup>4</sup> amanage hu'ne, Hazenke'a omane ne'ma komoru hu'na avare tamuana, nagra kumi hue huno hige'za zamagra anage hu'naze, tagri zana omane'neanki kagri'zane hu'naze. <sup>5</sup> Judasi'a ana zago'a mate'vuno ra mono nomofo agu'afi netreno, vuno kana ome he'ne. <sup>6</sup> Ugagota mono kva vahe'mo'za ana zago eneriza anage hu'naze, Trakemo'a i'o hu'negu vahe'ma zamahe frikuma mizama ase'naza zago'a mono nomofo zago tafempina ontegahune. <sup>7</sup> Anante kehuge antahige hute'za, ana zagonuti mopa kavo tro nehia ne'mofo mopa, ru kazigati emani vahe fri hanageta asezamantesuna mope hu'za mizase'naze. <sup>8</sup> Amana kegafare, ana mopagura kora mope hu'za meninena nehaze. <sup>9</sup> Anante kasnampa ke Jeremaih hunte'nea kemo avufga'a fore hu'ne. **Israeli vahe'mo'za agri avufgaruhuhamprinte'naza 30'a silva zagoa zamagra eri'naze,** <sup>10</sup> **nehu'za ana zagoa eri'za, Ramo nasmi'nea kante mopa kavo tro' nehia ne'mofo mopa miza senaze.**

### *Jisasi'a Paeroti avuga keagare oti'nea naneke (Mak 15:1-5; Luk 23:1-5; Jon 18:28-38)*

<sup>11</sup> Jisasi'a anante rankumamofo kva (Gavana) ne' avuga uotigeno agenoka huno, Kagra Jiu vahe'mokizmi Kini mani'nano? **Izo e'ima kagra nehanane**, huno Jisasi'a ke'nona hu'ne. <sup>12</sup> Hagi ra mono kva vahe'mo'zane, ranra kva vahe'mo'za naneke humanentageno'a Jisasi'a kenona huozmant'e ne'. <sup>13</sup> Anante Paeroti'a amanage hu'ne, Hakare hazenkema hu'nana zanku'ma naneke'ma huma negantazana nentahimpi? <sup>14</sup> Hianagi Jisasi'a magore huno, keagama huntea kerera, kenona'a osutfa higeno, Paeroti'a tusi'a antri hu'ne.

*Jisasi frisnia naneke  
(Mak 15:6-15; Luk 23:13-25; Jon 18:39-19:16)*

<sup>15</sup> Hagi rankumate kva ne'mo'a agri'a avu'avakino mika kafurera kinafinti zamavare'nea knare muse hu'za kave'ma nenaza zupa (pasova) kinafinti zamesimofonku hazageno aware fegu'a netreane. <sup>16</sup> Hagi ana knafina mago nera agi'a Barabasi'e tusi hazenketi'nea ne' kina nompi mani'ne. <sup>17</sup> Maka veama atru hutageno'a, Paeroti'a zamantahigeno, azanku tamenesi'a katufe tamisue? Barabasipi, Jisasinku Kraisi'ema nehaza nere? <sup>18</sup> Kruronkema Jisasi hunte'za avare'za eme ami'nazana agra antahinokeno hu'ne. <sup>19</sup> Paeroti'a ke refakohu tra'are'ma mani'negeno'a, nenaro'a ke atregeno vu'ne. Meni kenagera mase'ne'na Agrite'ma ke'noa avanamo'a tusi nagogofe'ne. E'i Nera fatgo ne' mani'neanki, mago zana huonto.

<sup>20</sup> Hianagi ra mono kva vahe'mo'zane, ranra kva vahe'mo'za, Barabasi tamiho nehutma Jisasina ahefrio hutma hiho, hu'za mika atru hunaza veara masave ke zmasami'naze. <sup>21</sup> Hagi rankuma kva ne'mo'a, ama tare netrempitira inamofonku tamenesigu nagra katufe tamisue? Higeza zamagra Barabasie hu'naze. <sup>22</sup> Paeroti'a zmasamino, Jisasinku tazahu ne' Kraisi'ema nehaza nera na'a huntesuegu tamenesi'e? Hige'za ana mika veamo'za, Rugeka zafare aho, hu'za kezatiza hazageno, <sup>23</sup> Paeroti'a kenona huzmanteno, naza havizana hu'negeta neheze? huno hige'za, mago'enе kezati'za, Rugeka'zafare ahegeno frino. <sup>24</sup> Hazageno Paeroti'a keana maka veamo'za rankege hazageno, mago'za huga nosuno tifino hakare vea zamufi aza sese nehuno, ama ne'mofo kora kumira nagripina omanegahianki, tamagri zane. <sup>25</sup> Hige'za hakare veamo'za kenona'a hu'za, atregeno agri kora kumimo'a, tagripine mofavretifine meno hu'naze. <sup>26</sup> Anante Paeroti'a Barabasina atregeno vigeno, Jisasina sefu amite'za rugeka zafare hesnazegu avare'zmine.

*Sondia vahe'mo'za Jisasi huhaviza hunte'naza naneke*

<sup>27</sup> Rankumate kva ne'mofo sondia vahe'mo'za Jisasi avare'za ana nemofo kumapi mika sondia vahe nemaniza kumate ufrageno regaginte'naze. <sup>28</sup> Anante Jisasina kukena'a eri'hate netre'za koranke kukena hunente'za, <sup>29</sup> ave'avenofite kini vahe'mokizmi fetorikna huza tro hu'za asenire antaninte'za, azota tmaga azampi erinte'naze. Hagi avuga kaziga zamarena renamagi'za revatga nehu'za, Jiu vahe'mokizmi kini nera ama'ne, hu'za hu'naze. <sup>30</sup> Zametu ahenente'za azampinti azota hanare'za anumpi amasagi'naze. <sup>31</sup> Ana hu'za huhaviza hunte'za, ana koranke kukena hatenetre'za, agri kukena ete erihuntete'za, rugeka zafare ahe'za hantinaku avare'za vu'naze.

*Jisasina rugeka zafare ahe'naza naneke  
(Mak 15:21-32; Luk 23:26-43; Jon 19:17-27)*

<sup>32</sup> Anama atinerami'za mago nera Sairini kazigati Saimoni'e hu'za nehaza ne' eme nege'za, Jisasi rugeka zafa eri kofino vinogu tutu hunte'naze. <sup>33</sup> Mago kumara aseni zaferine nehzare (Golgota) uhanati'naze. <sup>34</sup> Anante waini timpi akaza erihava hute'za, Jisasina amizageno neno keana higeno, one'ne.

<sup>35</sup> Rugeka zafare azerinte'za hanto'ma ahete'za kukena refako huku kasi zokago (tais) re'naze. \* <sup>36</sup> Anante Jisasinte kvagri'za mani'naze.

\* <sup>27:35</sup> Kasi zokagorema hu'neana, havere avo kreteneza atrazageno mareri nambama erimo erinia zokagore.

**37** Hagi anuntega avoma kre'za ahente'nazana, **ama nera Jisasi'e. Jiu vahe'mokizmi kini nere** hu'naze.

**38** Anante ruga raga asopare kumzafa netrena rugeka zafare zanahe'za magoka hanti'haze. **39** Hagi ana kante agatere'za vu'za e'za haza vahe'mo'za, azanva ke nehu'za zmagena ru'za, **40** amanage hu'naze, Kagra ra mono nona tapage hunka tagufa knafina ete kivaga'regahue hu'nane, hagi Anumzamofo Mofavre mani'nesnunka kagraka'a kaza hunka rugeka zafaretira eramio. **41** Anahu kante anteza ugagota pristi vahe'mo'zane, kasegera ugagota hunaza vahe'mo'zane, ranra vahe'mo'za azanva ke nehu'za amanage hu'naze. **42** Ru vahe'mokizmi zamagu vazineanagi Agra'a agura novazie. Israeli vahe'mokizmi Kinima maninesuno'a! Atregeno rugeka zafaretira menina eraminketa, tagra Agrite tamentinti hamaneno. **43** Anumzanku amentinti nehie. Atregeno Anumzamo avesima antesuno'a menina aguvazino, na'ankure Anumzamofo Mofavre mani'noe huno hu'ne. **44** Hagi tare kumzafa netre Agri'ene znahe'za hantinaza netremokea, ana zanke huke huhaviza hunte'na'e. (Sam-Zga 22:7-8.)

### *Jisasi fri'nea naneke*

(Mak 15:33-41; Luk 23:44-49; Jon 19:28-30)

**45** Hagi zagemo anuntupi me'negeno mika mopafina haninkino kinaga 3 kiloki uhaniti'ne. **46** Jisasi'a ranke huno, **Eloi eloi lema sabaktani**, Hibru kefina Anumzanimoke, Anumzanimoke, nahigenka kamagena hune'namine huno hu'ne. (Sam-Zga 22:1) **47** Anage hige'za anante mago'a oti'za mani'namo'za nentahiza, Ilaijanku ke nehie hu'naze. **48** Ame huno mago'zimimo agarenkapuku (Spans) urino aka waini timpi areteno zotare antenagamu teno Jisasi nesiegu ami'ne. **49** Ruga'amo'za anage hu'naze. Elaija eme agu vazigahifi atre'nenketa kamaneno, hu'za hu'naze. **50** Jisasi'a mago'ene kezatino ra krafa nehuno, asimu'a atreno fri'ne.

**51** Anama nehigeno'a, ra mono nomofo kasante tfi'nea tavravemo amu'nompinti sgane huno nagamuti tami'ne. Ana nehigeno imi energeno, ranra haveramimo rutane herafine. **52** Ana nehigeno fri vahe'mofo keriramimo, hagro nehige'za korapa'ma rama'a fatgo veama fri'namo'za oti'naze. **53** Jisasima otitege'za, matipinti otite'za Jerusalemi ruotage hu'nea rankumapi ufre'za hakare vahete eama hu'naze. **54** Anante 100'a sondia vahe'mokizmi kva ne'ene, mago'ama Jisasinte kvagri'naza sondia vahe'mo'za imima energeno fore hiazza nege'za tusi kore nehu'za, Tamage ama Nera Anumzamofo Mofavre! hu'naze. **55** Galili kazigati hakare a'nenemo'za, aza nehu'za magoka vano nehazamo'za anampi ogamu'a mani'ne'za ke'naze. **56** Ana a'nefina, mago a'ra Maria'e Makdala kazigatire. Hagi mago a'ra Jemisine Josefegizni neznerera Maria'e. Hagi mago a'ra Zeveti mofavre'mokizini neznera'e.

### *Jisasi asente'nea naneke*

(Mak 15:42-47; Luk 23:50-56; Jon 19:38-42)

**57** Kinaga segeno mago afufenone nera agi'a Josefe, Jisasi amage nentea ne' Arimatia kazigati e'ne. **58** Paerotinte vuno Jisasi avuflga amisiegu ome antahige'ne. Paeroti'a Jisasi avuflga eriamihon higeno, sondia vahe'mo'za eri ami'naze. **59** Josefe'a kahefa tavaravefi erinteno ano vazino, **60** agri'a keri havefi kasefa asente'nazafi ome asenteno, ra have retufeno ana have kana runkni reteno vu'ne. **61** Hagi ana kerimofo tva'onte kanti kaziga, mago ara Maria Makdala kazigati a'ene, Mariake ananteria mani'nene ke'na'e.

### *Sondia vahe'mo'za Jisasi mati kva hu'naza naneke*

<sup>62</sup> Trotra huknamo † vagaregeno mani fruhu knamofo amefi zupa ra mono kva vahe'mo'zane, Farisi mono vahe mo'zane Paerotinte vu'za, <sup>63</sup> amanage hu'naze. Ra nemoke ana havige ne'mo ofri mani'neno amanage hu'ne. Frite'na tagufa kna manitena, ete otigahue hu'nea kegu nentahune. <sup>64</sup> Ana hu'negu huzmanteg'e'za, vu'za ana kerire tagufa knafina ome kva hiho. Ru agri'ma amage'ma nentaza disaipol vahe'mo'za e'za avuufga'a musufa emeneriza, vahe'mokzimi zmasamiza Jisasi'a frinefinti otine hanaza kemo'a, kote krunage zmia agatereno, rankrunage fore hugahie. <sup>65</sup> Paeroti'a amanage huno zamasmi'ne, Sondia vahe ome zamavareta tamagrama antahizaza huta ome kva hiho. <sup>66</sup> Hagi zamagra sondia vahe'ene vu'za, ana have rezahe hutre'zanku kase ome hunente'za sondia vahe'mo'za kegava hu'naze.

## 28

### *Jisasi'a fri'pinti ot'i'nea naneke* (Mak 16:1-10; Luk 24:1-12; Jon 20:1-10)

<sup>1</sup> Hagi mani fruhu kna vagaregeno ese knazupa ame nanterampi, Makdala kumateti Maria ene Mariake matimati havega kenaku e'na'e. <sup>2</sup> Ame huno tusi'a imikrefa erine, na'ankure Ramofo ankeromo monafinti eramino matite runkani re'naza have eme revahe hugantu atreno ana agofetu manine. <sup>3</sup> Ana ankeromofo masa'amo'a kopsinamoma hiaza nehigeno, kukena'amo'a efeke hampomo'ma hiaza hu'ne. <sup>4</sup> Matite kva hu'naza vahe'mo'za ana ne'ku tusi agoro hunente'za zmahiritege'za fri vahe kna hu'naze. <sup>5</sup> Hianagi ankeromo'a ana a'trena zanismino korora osi'o, na'ankure nagra antahinue, Jisasima rugeka zafare ahe'zama hantinaza neku eme nehaka'e. <sup>6</sup> Agra amafina omanine, na'ankure koma hu'nea kante ot'i'ne. Amare eta avifama ante'nazafina eme ke'o. <sup>7</sup> Ame' hutna amage nentaza disaipol nagara, Agra ko fripintira otine huta ome smasami'o, Galili vugotegahianki Agrira anantega ome kegahaze. Nagrama tanasamua nanekeea antahi ankere'o. <sup>8</sup> Higeke ana keria atreke kore nehune tusi musezampi zanagareke amage nentaza nagatega ananke zamasminaku vu'na'e. <sup>9</sup> Antari ha'aza huno Jisasi'a tutagiha huznenteno, **Nanterane** huznantegeke, zanagra Agrite eke agiare eme azeri hanavetineke mono hunte'na'e. <sup>10</sup> Anante Jisasi'a zanasmino, **Korora osio, vutna nafuhe'ina Galili viho hutna ome zamismi'o. Anantega Nagrira nagegahaze.**

### *Matite kva hu'naza sondia vahe'mokizmi naneke*

<sup>11</sup> Hagi ana a'trema nevake'za matite'ma kva hu'naza sondia vahepinti, mago'amo'za rankuma agu'afi ufre'za, fore'ma hu'nea zama'a maka ugagota pristi vahetaminte huama hu'naze. <sup>12</sup> Hagi vugota pristi vahe'mo'za mono kva vahe enema atru hu'za kema retro hute'za, ana sondia vahe'mokizamia rama'a zago nezamiza, <sup>13</sup> anage hu'za zamasmi'naze, Amanahu ke tamagra hugahaze. Amage'ma nentaza disaipol naga'mo'za ana nera kenage'afi tavu mase'nonke'za kerfa'a musufa emeriza fre'naze, hutma hiho. <sup>14</sup> Ama kemo'ma rankuma kva (Gavana) ne'mofo agesare hanigeta, tagra kaziga avrenenteta, hazenkefima ufreku hanazana tamaza hugahune. <sup>15</sup> Hazage'za sondia vahe'mo'za ana zago eneri'za, zamisminaza kante kea Jiu vahepina huganti kama hazarde'za ana kemo'a meninena meno ne-e.

† 27:62 Trotrahu kna Frante zupagu hu'ne.

*Jisasi'a ra erizanke hantagi zmi'nea naneke  
(Mak 16:14-18; Luk 24:36-49; Jon 20:19-23; Apo 1:6-8)*

<sup>16</sup> Ananteti 11ni'a Jisasi amage nentaza disaipol naga'moza Galili vu'za, Jisasi'ma zmasamino vihoma hu'nea agonare. <sup>17</sup> Agri'ma ome nege'za mono hunte'naze. Hianagi mago'amo'za tare antahintahi hu'naze. <sup>18</sup> Anante Jisasi zmagrite eno amanage hu'ne, **Maka monafine mopafinema kegavahu hi-hamu'a, Anumzamo'a ko Nagri namine.** <sup>19</sup> E'ina hunegu kokankoka vutma, namage ante disaipol naga zamazeri retro hunezmaneteta, Nefa agifine, Mofavre'amofo agifine, Ruotge Avamumofo agifi mono tina frenezamaneta, <sup>20</sup> Nagrama huramantoa kasege rempi huzaminke'za ana miko vahe'mo'za avariraho. Hagi kama antahiho, Hakare zupa tamagra ne manina neva-nenkeno makaza vagaregahie.

## Mak Knare Musenke Maki Kre'nea Naneke

*Ti frezmanente Joni eri'zamofo naneke  
(Mat 3:1-12; Luk 3:1-18; Jon 1:19-28)*

<sup>1</sup> Hagi Anumzamofo Mofavre Jisas Kraisi Knare Musenkea ama agafa hu'ne.

<sup>2</sup> Kasnampa ne' Aisaia'a amanage huno avona krentene, **Antahiho, nagra huntanenko nagri naneke erino ome huamahu ne'mo'a ugagota kagrira huganteno, kana retro hugahie.** <sup>3</sup> **Ka'ma kopinti mago'mofo agerumo amanage huno kezanetie, ramofo kana retro nehutma, kama vania kana erinte fatgo hiho.**

*(Ais 40:3; Mal 3:1)*

<sup>4</sup> Ka'ma mopafinti mono ti frezmanente Joni'a eama nehuno, agafa huno kumi'zmigu zamagu'ama rukrahe hanageno apasezmante mono tima fre-saza'zanku huama huno zamasmi'ne. <sup>5</sup> Maka Judia kazigati vahe'mo'zane Jerusaleti'ene, agrite maka'mo'za vu'za huama kumizmia ome hazageno, Jodani timpina mono tina frezmanente'ne. <sup>6</sup> Hagi Joni'a kemori azokate tro hu'hea anakre ku'a hu'neno, zaggaga akruteti tro hu'hea amunofi afafafi rugagino hu'neno, kenu'ene afi' tumemofo tima'ane nenea nere. <sup>7</sup> Hanki mago'ma henkama ne-emo'a nagrira nagetereno hanave'ane ne' neankina, prihu'na aga anomofonte anakineanofira kazufega osu'noe. <sup>8</sup> Nagra tint-fanu mono tina freneramantoe. Hianagi Agra Ruotge Avamunu, mono tina freramantegahie, huno huama huno zmasamine.

*Joni'a mono ti Jisasina frente'nea naneke  
(Mat 3:13-4:11; Luk 3:21-22, 4:1-13)*

<sup>9</sup> Ana knafi Galili kaziga Nazareti kumateti Jisasi'a egeno, Joni'a Jodani timpi mono tina frente'ne. <sup>10</sup> Timpinti anama Jisasi'a marerino ne-egeno, mona kamohagro nehigeno Ruotge Avamumo maho namagna huno hareno Agrite emanine. <sup>11</sup> Monafinti mago agerumo'a amanage hu'ne, Kagra naves-imanegantoa mofavre'nimokagina muse hugantoe. <sup>12</sup> Avamumo'a ame huno ka'ma kopi atufegeno vu'ne. <sup>13</sup> Ka'ma kopina 40'a kna umani'negeno, Sata'a revatga hu'ne. Agra afizaga kfane maninegeno, ankero vahe'mo'za aza hu'naze.

*Jisasi'a Galili kaziga mono eri'za erigafa nehuno, amage'ma antesaza vahezaga zamavare'nea naneke*

*(Mat 4:12-22; Luk 4:14-15; Luk 5:1-11)*

<sup>14</sup> Hagi Jonima kina huntogeno, Jisasi'a ana knafi Galili vuno Anumzamofo knare so'e naneke huama huno, <sup>15</sup> **Anumzamo'ma huhampri'nea kna hago eforehie. Anumzamofo kumamo'a hago eravao hie. Tamagu'a rukrahe huta Knare Musenkere tamentinti hiho.**

<sup>16</sup> Galili timofo ankenare Jisasi'a nevuno Saimoni'ene Endrukea, kogana-nararemake, kuko timpi netrakeno ome znagene. Na'ankure zanagra nozame ahe ne'trene. <sup>17</sup> Jisasi'a anage huno zinasami'ne, **Enamage antenkena, Nagra vahe'ma avazu hu'zana huranami'neno.** <sup>18</sup> Higeke ame huke kuko zani'a netre'ne amage anteke vu'na'e. <sup>19</sup> Ananteti Jisasi'a mago'enе osi'a nevuno, Jemisi'a Zebeti nemofokino nefu'enе votifi mani'ne'za kukoza-mia nehatizageno ome zamage'ne. <sup>20</sup> Neznageno zanagi higeke, neznafa

Zebetine eri'za vahe'a ana votifi nezmatreke ame huke amage eme ante'ne vu'na'e.

*Jisasi'a havi avamu hu megi atre'nea naneke  
(Luk 4:31-37)*

<sup>21</sup> Hagi zamagrama Kapaneam kumate'ma umahanatite'za, mani fruhu knama egeno'a ame huno Jisasi'a osi mono nompi vuno rempi ome huzami'ne. <sup>22</sup> Vahe zagamo'za tusiza hu'za rempima huzamia zankura antri hu'naze. Na'ankure kasegere ugagota hu'naza vahe'mo'za nehazaza osu'neanki, hanave'ane agi me'nea vahe'mo rempi hu'nezamiankna hu'ne. <sup>23</sup> Anama nehigeno'a mago'mofona agu'afi havi avamu fre'nea ne'mo osi mono nompinti kezatino, <sup>24</sup> Nazareti Jisasiga na'a hurantenaku nehan? Tagri tazeri haviza hunaku neampi? Nagra antahi'noe, Kagra Anumzamofona Ruotge hunamoke. <sup>25</sup> Hianagi Jisasi'a kesuno, **Taganenka atrenka atiramio!** <sup>26</sup> Ana havi avamumo'a azeri hirahi hirahi nehuno, tusiza huno krafage nehuno ana ne' agu'afinti atiramino evu'ne. <sup>27</sup> Ana'ma hige'za vahe'mo'za tusiza hu'za zmagogogu nehu'za, ontahige antahige hu'za, amazana na'a fore nehie, kahefaza hanave'ane rempi nehuno, havi avamumofona kea higeno ke'a amagenente. <sup>28</sup> Anama hiazamofo agenkemo'a maka Galili kaziga ame huno vuno eno hu'ne.

*Pita nenemo Jisasi'a azeri knamare'nea naneke  
(Mat 8:14-17; Luk 4:38-41)*

<sup>29</sup> Hanki osi mono nompinti' atirami'za Saimonine Endru kizini nonte Jemisi'ene Joniza vu'za umarer'i'aze. <sup>30</sup> Hagi Saimoni nenaro nerera'a avufa amuhohu kri erino maseno maninegeno, Jisasina krima eri'nea kea ame hu'za ome asami'aze. <sup>31</sup> Anama hige'za ana a'te vuno azante ome azeriotigeno, avufgama tevehama nehiazamo'a atrentegeno, otino ne'za kre zamante'ne.

*Jisasi'a hakare kri vahe' zamazeri knamarenea naneke  
(Mat 8:16-17; Luk 4:40-41)*

<sup>32</sup> Hagi zagea uramino kinagasegeno, vahe'zagamo'za krima eri'nazvahe'en, havi avamu'mo'ma zamagu'afi mani'nea vahera zamavare'za Jisasinte e'aze. <sup>33</sup> Ana rankumate vahe'mo'za ana kasante eme eritru huvagare'aze. <sup>34</sup> Ana nehazageno rama'a ruzahu ruzahu krima eri'nazavahera zamazeri so'e nehuno, havi avamu'mo'zama rama'a zamagu'afi mani'nazana hufegi netreno, ama anazankura kea osiho huno havi avamura i'o huzmantene. Na'ankure havi avamumo'za Agrira ke'za antahi'za hu'aze.

*Jisasi'a nunamu nehuno rempi huzami'nea naneke  
(Luk 4:42-44)*

<sup>35</sup> Hagi kotu hanimpi Jisasi'a ana nompinti atiramino vuno vahe omani'afi umani'neno, anantega nunamu hu'ne. <sup>36</sup> Hagi Saimoni ene mago'amo'za oti'za hake'aze. <sup>37</sup> Hagi ome age'za erifore nehu'za, mika vahe'mo'za kagriku nehakraze hu'za asami'aze. <sup>38</sup> Anage huno Agra kenona zamirera zamasmi'ne, **Erinketa tava'onte'ma me'nea kumatamimpi vuta, anantega mono kea huama haneno.** Na'ankure Nagra e'ina agafare e'noe. <sup>39</sup> Anage nehuno maka Galili kaziga vano nehuno, osi mono nontamimpi mono naneke huama nehuno, havi avamutmina zamagu'afima freneana hufegi atrezmante'ne.

*Jisasi'a fugo namune ne' azeri so'e hu'nea naneke  
(Mat 8:1-4; Luk 5:12-16)*

<sup>40</sup> Hagi mago fugo namurenea ne'mo Jisasinte eno kepri huno agiafi traka humaseno, Muse hugantoanki Kagrama nazeri knamrenaku hanunka, amne nazeri agru huo, huno antahigene. <sup>41</sup> Higeno Jisasi'a asunku hunenteno, azana asuteno avako nehuno anage hu'ne, **Nagri'ma navesiana knare huo!** Higeno, <sup>42</sup> ana fugo namumo'a ame huno vagarentegeno agru hu'ne. <sup>43</sup> Hanki Jisasi'a amazama hugantoazankura vahera ozamasamio huno hanave avumro nenteno, ame huno hunenteno, <sup>44</sup> **Kama antahio, ama'nazama hugantoa zankura mago'mofona osamitfa huo.** Hianagi pristi nete vunka kavufga ome averi hugeno keno. Anante Mosese'ma ko'ma huno kazeri agrumahu ofa ome hugahane hu'nea kante ome hugeno, veamo'za nege'za hago agru hu'ne hu'za hiho. <sup>45</sup> Hianagi ana ne'mo nevuno, kri'ama azeri knamare neazankura vahepi huama nehige'za, rama'a vahe'mo'za nentahizageno, ana kemo'a ra hiazanku, rankumapina Jisasi'a eamara huno omeno, megia rama'a vahera omani'naza kumapi umaninege'za rama'a vahe'mo'za anantega eme ke'naze.

## 2

*Jisasi'a aga stinea ne'ma azeri so'e hu'nea naneke  
(Mat 9:1-8; Luk 5:17-26)*

<sup>1</sup> Mago'a kna evutegeno Jisasi'a rukrahe huno Kapaneamu nemania kumate emani'nege'za, Jisasi'ma e'ne kema veamo'za antahi'naze. <sup>2</sup> Hagi rama'a vahe krerfamo'za atru hu'za nompine kasante'ene mani titipa ne-hazageno, mono kea zamasmi'ne. <sup>3</sup> Hagi mago'a vahe'mo'za aga sti'nea ne' avare'za e'naze. Hagi 4'a vahe'mo'za sesenku hu'za erizafa hu'za e'naze. <sup>4</sup> Zamagra zafahu'za ufrega osu'naze, na'ankure rama'a vahe krefamo'za manihiza hazageno, Jisasi'ma mani'nea avamenteti nomuza eri anasege'za, ana nera sesenkufi mase'nege'zanofite azerineza atrageno akoheno urami'ne. <sup>5</sup> Anama hazageno'a Jisasi'a avare'za e'namokizmi zamentinti negeno, agama sti'nea nera amanage huno asami'ne, **Ne'nimoka kumika'a apasegantoe.** <sup>6</sup> Hianagi anampina mago'a kasegere ugagota hu'naza vahe'mo'za mani'ne'za, anage hu'za zamagu'afina antahi'naze. <sup>7</sup> Na'a higeno ama ne'mo'a kumira atregantoe nehie? Anumzamofo huhaviza hunente! Iza Agra kumira atregantoe nehie, Anumzamoke kumira atrentegahie hu'za antahinaze? <sup>8</sup> E'i anage hu'za zamagesa nentahizageno, Jisasi'a zamagu'afi negeno, ame huno zamasami'ne, **Na'a higetma tamagua-fina e'inahu antahintahia nehaze?** <sup>9</sup> Agama sti'nea nera ina'i kema hanua kemo fru huntegahie. Kumi ka'a atregantoe hanua kemopi, ontinka sesenku ka'a erinka vuo hanua kemo fru huntegahio? <sup>10</sup> Hianagi tamagra antahitama ketma hugahaze. Vahe'mofo Mofavremo'a, ama mopafi vahe'ma kumi'ma atrente hihamua erineankino, kumira atrentegahie. <sup>11</sup> Nagra hugantoanki otinka sesenkuka'a erinka nonka'arega vuo. <sup>12</sup> Higeno ame huno otino sesenku'a eri kofino mika vahe zamure atiramino vu'ne. Nevige'za mika vahe'mo'za zamagogo fege'za, Anumzamofo agi erisaga nehu'za, e'inahu ruzahu ruzahu avu'ava zana nonkonaza erifore nehie, hu'naze.

*Livaema agi hu'nea naneke  
(Mat 9:9-13; Luk 5:27-32)*

**13** Henka ete Jisasi'a Galili tiru ankenarega nevige'za, veamo'za eri hantage'za mani'nerega azageno rempi huzami'ne. **14** Agra nevuno Alfiasi nemofo agi'a Livae takisi e'neriza osi nompi mani'negeno ome negeno amanage hu'ne, **Eme namage anto** higeno otino amage vu'ne.

**15** Hagi Jisasi'ma Livae nompi ne'za ome ne'negeno'a, rama'a takesi zagoma eneriza vahe'mo'zane, kumi vahe'mo'za Jisasi'ene amage'ma nentaza disaipolo naga'anе magopi ne'za ne'naze. Na'ankure rama'a vahe'mo'za Jisasina amagera ante'naze. **16** Hagi kasegere ugagota hu'naza vahe'ene, Farisi vahe'mo'zama, kazageno kumi vahe'ene takisi zagoma e'neri'za vahe'ene, magopima manineno tine ne'zama nenzageno, na'a higeno takesi e'neri'za vahe'ene kumi vahe'enena magopina ne'zana nene? Hu'za amage'ma nentaza disaipol nagara zmantahige'naze. **17** Jisasi'a ana naneke nentahino amanage huno zamasmi'ne, **Krima e'orinaza vahe'mo'zage tusa vahetera novaze.** Hanki krima eri'naza vahe'mo'za tusa vahetera nevaze. Nagra fatgo vahe kehunakura omenoanki, kumi vahe kehuku e'noe.

*Ne'zama a'o huzamofo naneke  
(Mat 9:14-17; Luk 5:33-39)*

**18** Hagi Joni amage'ma nentaza disaipol naga'mo'zane, Farisi mono vahe'mo'za, ne'zana a'o nehaze. Anama hu'naza zanku mago'a vahe'mo'za Jisasinte e'za anage hu'naze. Na'a higeno Joni amage'ma nentaza disaipol vahe'ene Farisi vahe'mo'za ne'za a'o nehanzanagi, Kagri kamagema nentaza disaipol vahe'mo'za ne'zana a'o nosaze? **19** Hazageno Jisasi'a anage huno zamasami'ne, **Aravema hunakuma hirema etruma hu'naza naga'mo'za aravema hunaku hu'nesia ne'ma zamagri enema mani'enige'za ne'zana a'o hugahazafi?** Aravema hu'naku hu'nesia ne'ma mani'enigeno'a, ne'zana a'o osugahaze. **20** Hianagi mago'a kna ne-eankino, aravema hunaku hania ne'ma avare'za vutesageno, ana knafi ne'zana a'o hugahaze. **21** Hagi mago vahe'mo'e huno atafa kenama tagato hu'nerera kasefa tavravea erinteno ohatigahie. Sese nehanigeno ampimpi nehuno mago'ene ruragato hura hu'zanku anaranosie. **22** Magore huno vahe'mo'a kahefa wainia, atafa tintafema meme akrute tro huntepina taginonte. Na'ankure wainimo'a ana tafena rutagato hanigeno, wainimo'ene ana tintafemo'enena haviza hugaha'e. Hagino kahefa waini'ka kahefa tintafempi tagintegahie.

*Mani fruhu knazupa (Sabati) kasege ruhantagi'naza naneke  
(Mat 12:1-8; Luk 6:1-5)*

**23** Mago mani fruhu knazupa Jisasi'a witi hozafi rukitagino nevigeno, Agri'ma amage'ma nentaza disaipol naga'mo'za mago'a witi eritaniza nene'za vu'naze. **24** Ana hazageno Farisi vahe'mo'za anage Jisasinkura hu'naze. Ko, na'a hige'za kasegemo mani fruhu knazupa osiho hu'neazana nehaze? **25** Hazageno agra anage huno zamasami'ne, **Devitima mago zupama hu'nea zana tamagra hamprita ontahinazo?** Agra'ene magokama vu'naza vahe'mo'za, zamaga'ma ateg'e'za hu'naza zana zanku nehue. **26** Abiatama, ugagota Prisima maninerera, Deviti'ma Anumzamofo nompi ufrenero, pristi vahe'moke nenea bretia erino neneno zami'neana, kasegemo'a pristi vahe'mo'zage negahaze hu'nea bretia ne'neazamofo kea ontahineta nehazo? **27** Huteno Jisasi'a anage huno zamasami'ne, Anumza'mo'ma mani fruhu knama anteneana, vahe'mofo aza hinogu antene. Hagi vahe'mo'za mani fruhu kna aza hanazagura ontene. **28** Hagi Vahe'mofo Mofavremo'a mani fruhu knamofo ra mani'ne.

### 3

*Jisasi'a aza sti'nea ne'ma mani fruhu knazupa eri so'e hunte'nea naneke  
(Mat 12:9-14; Luk 6:6-11)*

<sup>1</sup> Mago'anee Jisasi'a osi mono nompi ufregeno, aza stinea nera anampinka mani'ne. <sup>2</sup> Hagi vahe'mo'za Jisasi'ma aza stinea ne'ma azeri so'e mani fruhu knazupa hanige'za, keagama Agrira huntesagu zamua antete'za mani'naze. <sup>3</sup> Hagi Jisasi'a azama sti'nea ne'mofonku anage hu'ne, **Ama vahe'zagamofo zamavuga eme otio!** <sup>4</sup> Anante Jisasi'a anage huno zamasami'ne, **Mani fruhu knazupa vahe aza hanuna zamo'a kasegefina knare tavutava hugahumpi, havi tavutava hugahune, hifi vahe aza hugahumpi, vahe ahe frigahune?** Higeno ke'zamia omane'ne. <sup>5</sup> Hagi zamarimpamo hanavetia zanku, arimpa henezmanteno keganti kegama huno nezmägeno, asunku huno aza sti'nea nera **Kazana rusuto** higeno azana rusutegeno, azamo'a so'e hunte'ne. <sup>6</sup> Anama hige'za Farisi vahe'mo'za ame hu'za atrami'za Heroti naga'ene Jisasima ahe frisnaza naneke ome huge antahige hu'naze.

*Tusi'a vea tinkenarega mani'naza naneke*

<sup>7</sup> Hagi anampinti Jisasi'ene amage'ma nentaza disaipol naga'mo'za atre'za tinkenarega nevazageno, Galiliti'ene Judiat'i'enena tusi'a vahe krerfamo'za avaririza vu'naze. <sup>8</sup> Jerusalemi kumateti'ene, Itumia kuma Jodani tim-ofo kantu kazigati'ene Tairi kumapinti ene Saidoni kuma agu'afinti'ene tusi'a veamo'za Jisasi'ma hiazamofo kema nentahiza, erihantge'za Agrite omeri atru hu'naze. <sup>9</sup> Hagi tusi'a vahe'ma emetruma hazazanku, amage'ma nentaza disaipol naga'agu mago voti retro hunantenkeno veamo'za naretufe'za omeho huno zmasamine. <sup>10</sup> Na'ankure rama'a vahezagama zamazeri so'e hu'negu, krima eri'naza vahe'mo'za Jisasima avako hanageno kri zamimo'a atre zamantesiegu oretufe aretufe hu'naze. <sup>11</sup> Hagi agru osu havi avamu'mo'za, Jisasi'ma nege'za upri hu'za ranke hu'za, Anumzamofo nemofoge hu'naze. <sup>12</sup> Hianagi ana havi avamukura Jisasi'a huhankavetino, Nagra iz'a mani'noe vahera ozmasamiho huno huzmante'ne.

*12fu'a Aposol naga'a huhampri'nea naneke  
(Mat 10:1-4; Luk 6:12-16)*

<sup>13</sup> Hagi Jisasi'a agonarega marerino umaniteno, avesi'nea vaheke zama-gi hige'za agra mani'neregaa e'naze. <sup>14</sup> Azageno 12fu'a aposol namage'ante nagare huno huhampri zmantene. Agrane mani'ne'nageno huz-mantesige'za mono kea huama hanagu huhampri nezmanteno, <sup>15</sup> havi avamu'ma huzmante hihamua zami'ne. <sup>16</sup> Hagi 12fu'a huhamprizmanteno, Saimoninkura Pita'e huno agi'a antemi'ne, <sup>17</sup> Zebeti mofavre'rarena, Jemisine Joni kizanigura Boaneges'ne, ana agimofona agafa'amo'a mona krafagemofo Mofavre huno znagia ante'ne. <sup>18</sup> Hagi Endruki, Filipiki, Vatoromuki, Matiuki Tomasi'e, hanki Arafiasi nemofo agi'a Jemisi'e. Hagi Tatiasiki, mago ne' agi'a Saimoni'a Zelati nagapinti nere. <sup>19</sup> Hanki Judasi Isakariotikino, henka'a Jisasima ha' vahe'amokizmi zamazampi komoru huno avrentesige'za ahesaza nere.

*Jisasinku Belsebuli hanavefi eri'za enerie hu'za hu'naza naneke  
(Mat 12:22-33; Luk 11:14-23; Luk 12:10)*

<sup>20</sup> Hagi Jisasi'a kumatega ete vige'za, hakare veamo'za eri hantage'za ome atru hazage'za, Jisasi'ene amage'ma nentaza disaipol naga'mo'za ne'za neknazmia omanene. <sup>21</sup> Ana kema naga'amo'za nentahiza avrenaku vu'naze. Na'ankure zamagra'ma zamagesama antahi'zana hago negi

nenegahie hu'za hu'naze. <sup>22</sup> Hagi Jerusaleti erami'naza kasegere ugagota hu'naza vahe'mo'za anage hu'naze. Belsebuli agu'afi fre'negeno, ugagota havi Avamumofo hanavefi, havi avamura hunente hu'naze. <sup>23</sup> Anage nehazageno Jisasi'a nentahino, kehige'za azageno fronka kea anage huno zamasmi'ne, Inankna huno Sata'a, Satana ahenanti tregahie? <sup>24</sup> Hagi mago rankumapi vahe'mo'za refko hu'za ha' orente arente hanu'za oti hanave otigahaze. <sup>25</sup> Hagi mago nompi vahe'mo'za refko'ma hu'za ha' orente arente hanu'za, oti hanave otigahaze. <sup>26</sup> Hagi Sata'ma otinoma agra'ama ha'ma renenteno, amu'nompinti refko'ma haniana, oti hanave otino vagaregahie. <sup>27</sup> Hianagi mago'mo'e huno hanave ne'mofo nompinti kumzafama ase-nakura, amane vuno musufa ose'neno, ana nera azerino anaki atreteno, anante nom'aafinti'zana enerie.

<sup>28</sup> Tamage hu'na neramasmue, Anumzamo'a vahe'mo'za ana miko kumi'ma hanaza zane huhavizama huntesaza kumira apase zamantegahie. <sup>29</sup> Hianagi Ruotge Avamumofo huhaviza huntesimofona, kumi'a eri atre ontesigeno, kumi'amo'a mevava hugahie. <sup>30</sup> Na'ankure zamagra hu'za, Jisasi'a agru osuno havi avamu ene mani'ne hu'za hu'naza kegu hu'ne.

*Tamage naga'agu Jisasi'a hu'nea naneke  
(Mat 12:46-50; Luk 8:19-21)*

<sup>31</sup> Hagi anante Jisasi nerera'ene aganahe'zane e'za fegi'a eme oti'neza, ome asaminkeno eno hu'za ke huzmante'naze. <sup>32</sup> Anante tusi'a vahe'mo'za mani kaginte'nazafi anage hu'za ome asami'naze, antahio, negarera'ene ka-ganahe'zane kasarahe'za megia mani'ne'za kagriku ke nehaze. <sup>33</sup> Hazageno ana kenona'a amanage huno zamasami'ne, Iza'za nagri nenrerera'ene na-ganahe'za mani'naze? <sup>34</sup> Keganti kegama huno manigagi'naza vea nez-mageno anage hu'ne, Keho, nenrerera'ene naganahe'za ama mani'naze. <sup>35</sup> Hagi izo'zo Anumzamofo avesizama amage'ma nentamo'za, nenaganaki nensaroki nenreraki hu'za mani'naze.

## 4

*Avimaza avi rurani'nea fronka naneke  
(Mat 13:1-9; Luk 8:4-8)*

<sup>1</sup> Mago'ene Jisasi'a rantiru'mofo ankenare mani'neno naneke erigafa huno rempi huzami'ne. Ana nehige'za tusi'a vahe krerfamo'za regorave hazageno, Jisasi'a votifi marerino mani'nege'za, tusi'a vahe krerfamo'za tiru ankenarega mani'naze. <sup>2</sup> Ana nehuno agra rama'a fronka ke zamasami'ne. Rempima huzamifina, anage hu'ne, <sup>3</sup> Kama antahiho! Hoza ne'mo avimaza ruraniku hozarega vu'ne. <sup>4</sup> Ana'ma huno ome runeranigeno, mago'a avimzamo'a kamofo ankinafi evuramigeno, namamo'za eme ne'naze. <sup>5</sup> Mago'a avimaza avimo'a havege huno rama'a mopa omanenefi evuramiteno ame huno hagene. Na'ankure havege huno osia mopa me'negeno'e. <sup>6</sup> Hagi zagemo'a hanatino teosaparene, na'ankure rafu'namo'a fempina uoram'i'negeno osapare'ne. <sup>7</sup> Mago'a avimaza avimo'a ave'ave trazampi evuramigeno, aveave trazamo'a hageno, retrako higeno raga'a reonte'ne. <sup>8</sup> Hu'neanagi mago'a avimzamo'a tima'ane mopafi evuramiteno hageno raga'a rente'ne. Mago'amo'a 30'a rentegeno, mago'amo'a 60'a rentegeno, mago'amo'a 100'a rente'ne. <sup>9</sup> Ana nehuno anage hu'ne, Izano agesa me'nenigeno nentahisimofona, atregeno ama kea antahise hino.

*Fronka kema zamasmi'nea kemofo agafa'e  
(Mat 13:10-17; Luk 8:9-10)*

<sup>10</sup> Hagi anama huteno Jisasi'ma Agrake'ma umani'nege'za, mago'a manigagi'naza vahe'mo'zane, 12fu'a amage'ma nentaza disaipol naga'mo'za, ana fronka keramimofo agafa'a antahise hunaku antahige'naze. <sup>11</sup> Jisasi'a anage huno zamasami'ne, Anumzamofo kumamofo oku'a antahintahia tamagrira ko tame. Hianagi meg'iama mani'naza vahe'mo'za fronka kege nentahize. <sup>12</sup> Ana higu Avontafepina anage hu'ne, *kegahazanagi keama osugahaze. Antahigahazanagi antahi amara osugahaze.* Zamagra aru zmagu'a rukrahe hanageno Anumzamo kumizimi eri atrezankure anara hugahie. (Ais 6:9-10) <sup>13</sup> Anante Jisasi'a anage huno zamasami'ne, Ama fronka kemofo agafa'a antahi ama'ma osanutma, inankna hutma mika fronka kemofo agafa'a antahi amara hugahaze? <sup>14</sup> Avimaza rurani'nea ne'mo'a, Anumzamofo ke ome krine. <sup>15</sup> Mago'a avimazama kamofo ankinarega evurami'neana, mago'a vahe'mo'za Anumzamofo kea nentahizageno, Sata'a ame huno zamagu'afima krinea kea eritrene. <sup>16</sup> Havege mopafima rurani'neana, Anumzamofo kema nentahi'za, muse hu'za ame hu'za eneri'ze. <sup>17</sup> Hianagi zamagu'afina rafuna ore'neza oti hanave oti'nazankiza, anante'ma Anumzamofo kegu hu'za hazenke zano, zamazeri haviza huzama fore hige'za, ame hu'za atre'za nevaze. <sup>18</sup> Mago'amo'za ave'ave trazampi avimaza ruranineankna hu'naze. Anamo'za Anumzamofo kea antahinazanagi, <sup>19</sup> mopafi zankuke zamagesa nentahi'za, zago afu fenoma eri atruma huzamo rezmatga nehuno, mago'azama zamesinte'zamo zamagu'afina efreno Anumzamofo nanekea rentrako higeno ne'za raga'a renonte. <sup>20</sup> Hianagi tima'ane mopafi rurani'nea avimazana, zamagra Anumzamofo kea antahi ankere'za, ana kea e'neri'za nena raga'a renentaze. Mago'mo'a 30'a rentegeno, mago'mo'a 60'a rentegeno, mago'mo'a 100'a renente.

*Tavi'mofo fronka naneke  
(Luk 8:16-18)*

<sup>21</sup> Jisasi'a amanage huno mago'ane zamasmi'ne, Rampe tavi'ma rekruma hazana, sipagampi ome nentafi, kavo agu'afinka ome nentazo? A'o anara nosaze. Rekru hutma tavima rekru hunte azotare ome nentaze. <sup>22</sup> Na'ankure miko'zama fra'ma ki'nesiazamo'a, eama nehanigeno, oku'a me'nesiazamo'a, masare eama hugahie. <sup>23</sup> Izano agesa me'nениgeno nentahisimofona, atregeno ama kea antahise hino. <sup>24</sup> Mago'ane anage huno zamasmi'ne, Kema nentahizana antahi so'e hiho. Tamagrama amisaza avamente, ana avamente tamagrira neramamino, mago'ane agofetu huno tamamigahie. <sup>25</sup> Na'ankure iza'o eri'nenimofona mago'ene agofetu huno amigahie. Hagi iza'o e'orinesimofona, osiama eri'enenia zana eritre vagaregahie.

*Avimaza hage'zamofo fronka naneke*

<sup>26</sup> Hagi Jisasi'a mago'ane anage hu'ne, Anumzamofo kumamo'a, mago vahe'mo avimza avi mopafi ruranino kriankna hu'ne. <sup>27</sup> Kriteno umase-negeno feru ene kenage'enena hageno, ana avimza avimo'a ru hanana huno hagegeno, anama hageana nankna huno hage'neo agra ontahine. <sup>28</sup> Mopamo'a agra'a azerinena higeno ne'zama'a rente'ne, esera asina reno rampa'a fore huteno, anante amosare aheno, ramparera ne'zana rente

avinete. <sup>29</sup> Anantero raga'a renteno nena hutegen, agena kazaki kazinteti eme taga hu'ne. Na'ankure hozama hamarekna egeno'e.

*Masteti ragamofofronka naneke*

(Mat 13:31-32,34; Luk 13:18-19)

<sup>30</sup> Hagi Jisasi'a mago'anane anage huno zamantahige'ne, Inankna ke hunteta Anumzamofo kumakura hugahune. Inankna fronka ke hunteta eriamma hugahune? <sup>31</sup> Masteti raga'agna hunege'za mopafi negrize, ama mopafima me'nea avimzana agatereno onensatfa hu'ne. <sup>32</sup> Hagi kritageno'a hageno nena huno, maka hozafima me'nea ne'zana ra huno agetenereno, rama'a azankuna'a hageno vuno eno higeno, maka afi' namamo'za ana zafamofo tonapi nona eme kigahaze.

*Jisasi'a fronka kefinti ke zamasami'nea naneke*

<sup>33</sup> Ana nehuno rama'a fronka kefinti zamagramma antahi ama' hanaza avamente zamasami'ne. <sup>34</sup> Agra mago'a kema hunakura fronka kefintike zamasmi'ne. Ana hu'neanagi amage'ma nentaza disaipol nagamo'zama zamagrake'ma mani'nageno, eriamma huno maka'zana zamasami'ne.

*Jisasi'a ke higeno timo rurava ahe'nea naneke*

(Mat 8:23-27; Luk 8:22-25)

<sup>35</sup> Hagi ananzupa kinagasegeno Jisasi'a amage nentaza disaipol naga'agura anage hu'ne, Erinketa kantu kaziga tinkenare vammeno huno hige'za, <sup>36</sup> vahe krerfa zamatrete'za Jisasi'ma mani'nea votifi mareri'za vazageno, mago'a ventea zamagrane vu'naze. <sup>37</sup> Nevazageno tusi'a ununko atuno, tina erikranto kranto nehuno, ana votifi timo'a marevite'za higeno, timpi votimo'a tam'i'za hu'ne. <sup>38</sup> Hagi Jisasi'a votimofona arigarega fita runo mase'negeza, azeri ot'i'za anage Agrikura hu'naze. Rempi hurami ne'moka, timo'ma tazeri nakri'za nehiana nonkano? <sup>39</sup> Anante otino zaho'mofona kesuno, Tami avazago huno timofona higeno, akoheno urami avazagene. <sup>40</sup> Ana higeno Jisasi'a anage huno zmantahige'ne, Nahigetma amanahu huta koro nehaze? Tamentintia nosazo? <sup>41</sup> Ana nehige'za zamagra tusi'a zamagogo fege'za, inankna ne'mo kea nehigeno zahomo'ene timokea ke'a antahinezmi'e hu'za hu'naze.

## 5

*Jisasima negi ne'mofo agu'afinti havi avamu hunte'nea naneke*

(Mat 8:28-34; Luk 8:26-39)

<sup>1</sup> Hagi Ventefi vu'za Galili timofo kantu kaziga'a Gerasin uhanati'naze. <sup>2</sup> Anama Jisasi'a votifinti eneramigeno'a, agru osu havi avamumo agu'afi fre'nea ne'mo'a, ame huno hezamopinti (matipinti) eme tutagiha hunte'ne. <sup>3</sup> Ana ne'mo vahe asenentea kumapi mani'nege'za, mago vahemo'e huno azerino anaki ontege, seni nofinu anaki onte'ne. <sup>4</sup> Na'ankure ana ne'mofona azeriza seni nofi'nu azampi kina renentaza aeni agare azantero kina rente'naze. Hianagi ana ne'mo'a azampine agafinema rente'nea nofira rukampruhu osi osi hu'ne. Ana higeno mago vahe'mo'a hanaveti'za azeri arava hugara osu'naze. <sup>5</sup> Mika zupa hanine, zagene vahe asenentaza kumapine agonaregane vano nehuno, rankege huno, have erino avufa tagarago hu'ne. <sup>6</sup> Jisasi'a afete mani'negeno ana ne'mo negeno, agareno agafi ome renaren, <sup>7</sup> anante ranke huno kezatino, Jisasiga marerisa Anumzamofo Mofavremoka, na'a hurante'za nehane! Nagra Anumzamofo agifi huhanavetina negasamue, tazeri havizana osuo!

<sup>8</sup> Na'ankure Jisasi'a havi avamumofonku huno, **Ama ne'pintira atiraminka evuo** huno hu'nego'e! <sup>9</sup> Jisasi'a **Kagi'a iza'e** huno antahigegegeno? Nagini'a hakarena mani'noe, Na'ankure tagra rama'a sondia vahe mani'none. <sup>10</sup> Jisasiga amafintira hurantegeta atreta ovamneno huno kazikazi huno asami'ne.

<sup>11</sup> Hagi agonamofo asoparega rama'a afu'mo'za ne'za nene'za mani'naze. <sup>12</sup> Ana havi avamumo'za kazigazi hu'za antahige'za, tataregeta antu afutamimofo zamagu'afi uframano hudo huna'z. <sup>13</sup> Jisasi'a knareki viho huno ana havi avamutamina huzmanteg'e'za, ana ne'mofo agu'afinti atiram'i'za, afu'mokizmi zamagu'afi uf're'naze. Ana maka afu'tamina 2 tauseni'a afu'mo'za agonaregati tragi'za uramiza zavaniteti timpi takaire'za ti nakri'za fri'naze.

<sup>14</sup> Anante afu kva vahe'mo'za koro nehu'za, fre'za vu'za rankumate'ene osi kumate'ene ke huganti hugma hu'za vahera zamasmi'naze. Nezmasmige'za ana veamo'za nentahi'za ana'ma hu'neaza kenaku eri hantage'za e'naze. <sup>15</sup> Jisasinte e'za eme kageno havi avamu'mo'ma agu'afi fre'nea ne'mo'a anante mani'nege'za ke'naze. Kukena nehuno fatgo antahintahi erino mani'nege'za, rama'a havi avamumo agu'afi fre'nea nere nehu'za koro hu'naze. <sup>16</sup> Hagi ana nete'ma fore'msa nehuno afute'enema fore hu'neazama ke'naza vahe'mo'za onke'naza vahe'mokizmi zamasmi vagarage'za antah'i'z. <sup>17</sup> Hagi ana vahe'mo'za Jisasinku hankavetiza, ama mopa atreno vanie hu'za hunte'naze. <sup>18</sup> Hagi Jisasi'a votifi marenerigeno havi avamu'mo'ma agu'afi fre'nea ne'mo'a, natregena kagrane va'neno huno antahige'ne. <sup>19</sup> Hianagi Jisasi'a nagranena ovugahane nehuno, anage huno asami'ne, **Kumakarega vunka, vahe ka'afi Ramo'ma asunku'ma huganteno, razama so'ezu hugante'nea zankura ome zamasamio.** <sup>20</sup> Anage huno asamigeno atreno Dekapolisi 10ni'e nehaza kumate vuno Jisasi'ma knare huno aza hu'nea nanekea zamasmige'za, maka vahe'mo'za nentahi'za antarintru hu'naze.

*Kva ne'mofo mofa'ene korankri eri'nea a'mofo naneke  
(Mat 9:18-26; Luk 8:40-56)*

<sup>21</sup> Hagi Jisasi'a ete votifima vuno kantu kaziga Galili tiru ankenare'ma umahanatige'za, hakare veamo'za agrite e'za eme regagi ante'naze. Anama hazazanku Jisasi'a anante mani'ne. <sup>22</sup> Anante osi mono nonte kva vahe zagafinti mago ne'mofo agi'a Jairusi'e nehaza ne'mo'a, eno Jisasima eme negeno'a, agafi emaseno, <sup>23</sup> muse hugantoanki, osi mofa'nimo'a fri'za higena neonki, enka kazana agofetu eme antegeno ofrino manino huno antahige'ne. <sup>24</sup> Higeno Jisasi'a ana ne'ene nevigeno tusi'a vahe krerfamo'za otufe atufe hu'za vu'naze.

<sup>25</sup> Hagi mago ara korankria 12fu'a zage kafufi eri'nea a'mo anampi mani'ne. <sup>26</sup> Zago afufenoma'a ana krimoma vagarentesigu atrevagareno rama'a tusa vahe'mofo ome miza hu'neanagi, atage'za amizageno ana kri'amo'a vagaore rura hu'n. <sup>27</sup> Hagi ana a'mo'a Jisasi agenke antahiteno tusi' vea kevufinti, Jisasina amefiti zaza kena'are eme avako hu'n. <sup>28</sup> Na'ankure antahintahi afina kukena'are ome avako hanugenoke kri'nimo'a atrenantegahie huno nentahino, <sup>29</sup> ome avako higeno ame huno korankrima eri'neazamo'a atrentegeno keno antahino hu'n. <sup>30</sup> Hagi Jisasina mago'a hanave'amo agripinti nevigeno nentahino, ame huno ana vahe kevufinti rukrahe huno anage hu'n, **Kenani'arera iza avako hu'n?** <sup>31</sup> Higeno Agri amage'ma nentaza disaipol naga'mo'za anage

hu'za, mika vahe'mo'za oretufe aretufe hu'nazanki nahigenka, aza navako hu'ne nehane? <sup>32</sup> Hianagi Jisasi'a rukrehe huno keganti kegma huno avako hu'nemofonku hakare'ne. <sup>33</sup> Nehakregeno ana a'mo'a koro nehuno agu'amo'a fakifaki nehigeno kri'ama amane hu'nea zanku nentahino, avuga kepri huno maka kri'amo vagarenteazana huama huno asami'ne. <sup>34</sup> Jisasi'a anage huno ana akura hu'ne, **Mofa, kagri ka'a kamentintimo kazeri knare hianki, karimpa frune vugeno krikamo'a atreganteno.**

<sup>35</sup> Anage huno nehigeno'a, osi mono nomofo kva ne' nompinti e'naza vahe'mo'za, Jairusinku hu'za mofa kamo'a hago fri'neanki rempi hurami ne'mofona kna omio. <sup>36</sup> Hianagi anama hazankea Jisasi'a antahi amane nehuno, ana kva nera anage huno asami'ne, **Korora osunka kamentinti huo.** <sup>37</sup> Nehuno maka vahera maniho hunezmanteno, Pitama Jemisi nefu Joni'ma Jemisima huno zamavarege'za amage ante'za vu'naze. <sup>38</sup> Zamagrama ana mono kva ne'mofo nontema uhanatiza kazana, ranke hu'za tusi zavi krafa hu'za zavira netageno, Jisasi'a zamage'ne. <sup>39</sup> Ana nompima une-freno'a, **Na'a higetma ranke hutma zavira netaze, mofavremo'a ofrineanki amane mase'ne.** <sup>40</sup> Anagema hiankegura zamagra kiza re'naze. Hianagi miko meg'i a huzmanteg'e'za mani'zageno, ana mofa'mofo nererane, nefane nezanevareno amage'ma nentaza disaipol naga'a nezamavareno ana mofa'ma hunaragi antepinka ante'nazafinka ufre'naze. <sup>41</sup> Anante ana mofamofo azante akoheno aze'nerino **Talita kum!** Zamagr'i kefina osi mofa'moka Nagra kagriku huanki otio hu'ne. <sup>42</sup> Ana mofamo'a 12fu'a zagegafu hu'neakino ame huno otino kana vano hige'za tusi antri hu'naze. <sup>43</sup> Jisasi'a hanavetino ama zankura mago vahere hutma ozmasamiho ne-huno, ne'za aminkeno neno huno zamasami'ne.

## 6

*Jisasina Nazareti kuma'are veamo'za zamefi humi'naza naneke  
(Mat 13:53-58; Luk 4:16-30)*

<sup>1</sup> Hagi Jisasi'a ana kumara netreno kuma'arega ege'za, amage'ma nentaza disaipol naga'mo'za avariri'za e'naze. <sup>2</sup> Mani fruhu knama (Sabat) egeno'a agafa huno osi mono nompi rempi huzamigeno, rama'a vahe'mo'za antahizamo'za, antri hu'za zmagogogu nehu'za anage hu'naze, igati amanahu antahintahia erine? Iza amanahu knare antahintahizana ami'ne, nankna huno kagu'vazana eri fore nehie? <sup>3</sup> Ama kapenta ne' Maria mofavrefi? Jemisi'ma Josefema Judasima Saimonikizmi nempu'zimi mani'ne. Hanki asarahe'za tagrane mani'nazafi? Anage nehu'za ha' arente'naze. <sup>4</sup> Anante Jisasi'a anage huno zamasami'ne, **Kasnampa ne'mofona mika vahe'mo'za antahi amiza, ra agi'a amigahazanagi, kuma'are vahe'mo'za antahi nomizageno, naga'amo'zane, noma'afi vahe'mo'zanena antahi omi'naze.** <sup>5</sup> Anampina mago'a kaguvazana Agra eri fore osu'neanagi, mago mago kri vahete azanteno zamazeri so'e huzmantetere hu'ne. <sup>6</sup> Hanki zamentintima osaza'zankura Jisasi'a antahintahи hakare nehuno, mago'a kuma tamimpi vano huno, Agra rempi huzami'ne.

*12fu'a Aposol vahe'ma mono erizante huzmante'nea naneke  
(Mat 10:5-15; Luk 9:1-6)*

<sup>7</sup> Hagi Jisasi'a 12fu'a amage nentaza disaipol naga zamagi hige'za ageno, tare tare huno hunezmanteno, agru osu havi avamu humazmante hihamu zami'ne. <sup>8</sup> Agra amana hugahaze huno zamasami'ne, **Nevanutama bretine, kutamine, zagonena erinetama oviho, azompage eritma viho.** <sup>9</sup> Tamaga

ano vazigahazanagi, tare kukena hutma oviho. <sup>10</sup> Ina nonte'ma vanutma, ana nompinke maninetma ana kumara atretma viho. <sup>11</sup> Hagi mago kumate nevanage'za oramavrege, naneketimi ontahisagetma zamatreta nevuta, tamagareti kugusopa rupopo hundretma vinke'za, anazama hanaza zamo'a hazenkefi mani'naze huno zamaveri hino. <sup>12</sup> Ana hige'za amage'ma nentaza disaipol naga'mo'za vu'za, zmagu'a rukrehe hanazegu, mono kea ome huama hu'za mika vahe zmasami'naze. <sup>13</sup> Ana nehu'za zamagra rama'a havi avamura hunezmante'za, krima eri'naza vahe'mokizimi, masave tagi'za frenezmante'za, zamazeri kanamare'naze.

*Mono ti frezmante Jonima fri'nea naneke  
(Mat 14:1-12; Luk 9:7-9)*

<sup>14</sup> Hagi kini ne' Heroti'a Jisasi agi agenkemo'a ra higeno nentahige'za, mago'amo'za hu'za mono ti frezmante Joni fri'nefinti oti'negu kagu'vazana nehie hu'naze. <sup>15</sup> Hianagi mago'amo'za Elaiaj'e hu'za nehazageno, mago'amo'za hu'za, agra korapa mani'naza kasnampa vahekna nere hu'naze. <sup>16</sup> Hagi mago'anee Heroti'ma nentahino'a anage hu'ne, Joni agenama akafrinoa ne'mo otino e'negahie! Hu'ne. <sup>17</sup> Na'ankure nefu, Filipi nenaro Herotiasi, Herotima rehanare'nea agenke Jonima huama hu'neazanku, Heroti'a huzmanteg'eza Jonina ome azeri'za kina nompi ome ante'naze. <sup>18</sup> Na'ankure Joni'a hanavetino ke huvava huno Herotina asamino, negafu a'ma rehanarenka a'ma erinanana kasege rufutaginka knare avu'avara osu'nane. <sup>19</sup> Ana higeno Herodiasi'a Jonina rimpaa henteno ahe frinaku hu'ne. Hianagi ahe ofri'ne. <sup>20</sup> Na'ankure Heroti'a Joninku koro nehuno, kegava krintene. Na'ankure agra antahino keno hu'ne. Joni'a fatgo huno ruotage hu'nea nere. Joni agenke nentahino agogogu hu'neanagi, Joni hania kema antahinakura muse hu'ne.

<sup>21</sup> Mago kankamu eforema hu'neana, Herotima kasente'nea kna fore higeno, muse huno kasente'nea kna'are ne'za nenaku atru nehu'za, agri nompima eri'zama e'neriza vahe'ene, sondia vahe'mokizimi ugagota kva vahe'ene, Heroti'a ne'zana ne'ne. <sup>22</sup> Herodiasi mofamo'a efreno avoa eme nehagegeno, Heroti'ene ne'za neku zamagima hu'nea vahe'mo'za muse hu'naze. Ana hazageno Heroti'a ana kasefa mofara asamino, na'ankuro kave'masinia zanku'ma nantahi kesnanke'na, amane kamigahue hu'ne. <sup>23</sup> Heroti'a huvempa huno ana mofara asamino, na'ankuro kavesinesia zanku'ma nantahi kesnankena amane negamina, kegavama kri'noa kumara amu'nompintira refko hu'na kamigahue. <sup>24</sup> Anage higeno ana mofa'mo atiramino vuno, nererankura na'ane hu'na ome antahigegahue? Higeno nerera'a anage hu'ne, mono ti frezmente Joni agenope hunka ome huo huno asamigeno, <sup>25</sup> ana mofa'mo'a ame huno Herotinte vuno, menintfa Mono ti frezmante Joni agenopa rukafrinka zuompafi antenka erinka eme namisane huno higeno, <sup>26</sup> Kini ne'mo'a nentahino Joninkura tusiza huno asuragi ante'neanagi, hanave huvempa kema mofa'ama agrane mani'naza vahe zamufi hunte'nea kegu nentahino, i'ora osu'ne. <sup>27</sup> Hagi kini ne'mo'a ame huno agenama ome akafri vahe huntogeno kina nompi vuno, Joni agena ome akafrine. <sup>28</sup> Ana ne'mo'a agenopa'a zuompafi erino vuno, ana mofa ome ami'geno, ana mofamo erino vuno nererana ome ami'ne. <sup>29</sup> Hagi Joni amage'ma nentaza disaipol naga'mo'za ana kema nentahi'za, avufa'a emeri'za havegampi ome asente'naze.

*Jisasi'a 5 tauseni'a venene ne'za zami'nea naneke  
(Mat 14:13-21; Luk 9:10-17; Jon 6:1-13)*

<sup>30</sup> Anante Jisasi aposol naga'mo'za, ehanati'za miko'zama nehu'za, vahem'a rempima hu'zami'naza nanekea eme asami'naze. <sup>31</sup> Jisasi'a anage huno zamasami'ne, **Nagrane enketa vahem' omanitega onsia umanikasa hamneno**, (na'ankure vahem' oza vute'ete hazageno, ne'zama nesaza knazimi omanenegure.) <sup>32</sup> Zamagraku vahem' omani kaziga vunaku votifi mareri'za vu'naze. <sup>33</sup> Hianagi zahufama nevazageno, hakare veamo'za e'irega vazanki hu'za nentahi'za, mopafi rugagi'za miko kumapinti veamo'za kote'za anama umanisare, ko umani'naze. <sup>34</sup> Hagi Jisasi'ma anante uhanitino votifinti'ma takaireno, tusi'a vea kevu nezamageno'a asunku huzmante'ne. Na'ankure zamagra kvazimi omani sipisipigna hu'nazageno agafa huno hakare kea rempi huzami'ne.

<sup>35</sup> Hagi kinaga nesegen'a amage'ma nentaza disai pol naga'mo'za Jisasi'inte e'za anage hu'naze, Vahe omani ka'ma kopi mani'nonkeno hago kinaga nesegu, <sup>36</sup> huzmanteg'e'za hozafi kiza mani'naza kumapine, kuma tamimpi vu'za ne'zama nesazazana ome miza seho hu'naze. <sup>37</sup> Hianagi Jisasi'a anage huno zamasami'ne, **Tamagratmi ne'zana zaminke'za neho**, hige'za zamagra anage hu'naze, 8'a ikampi eri'za erino miza eriga mizanteti ne'zana mizaseta zamigara hu'ne hu'za asami'naze. <sup>38</sup> Agra anage huno zamasami'ne, **Nama'a breti eri'nazafi ome keho?** Huno hige'za ome kete'za e'za 5fu'a bretigi, tare nozame me'ne hu'za hu'naze. <sup>39</sup> Anante Jisasi'a amage'ma nentaza disai pol naga'a huzmanteno, zafa asinage hu'nea aepate huzmantenke'za omeri atru, eme eritru hu'za maniho huno huzmant'e'ne. <sup>40</sup> Maka vahem' oza refko hu'za mago'a kevufina 100'a vahem' nemanizageno, mago'a kevufina 50'a nemanizageno hutere hu'naze. <sup>41</sup> Mani'nageno 5fu'a bretine, tare noza'ene erino kesga huno monafi negeno, Anumzamofontega susu huteno, eri korino amage'ma nentaza disai pol naga'a veva hanazegu nezamino, nozamea anazanke huno refko huno zami'ne. <sup>42</sup> Ana maka'mo'za nazageno zamu hu'ne. <sup>43</sup> Nene'zama atraza bretine, noza enena zogi'za, 12fu'a eka eka kupi eri avite'naze. <sup>44</sup> Bretima ne'nazana 5tauseni'a venenemo'za ne'naze.

*Jisasi'a timofo agofetu vu'nea naneke  
(Mat 14:22-33; Jon 6:15-21)*

<sup>45</sup> Hagi Jisasi'a ame huno amagema nentaza disai pol naga'a votifi vu'gote'za kantu Betsaida kaziga vihogu huzmanteg'e'za nevazageno, vahetaminkura viho huno huzmant'e'ne. <sup>46</sup> Viho huno huso'e huzmanteteno, agonarega nunamu hunaku vu'ne. <sup>47</sup> Kinagama segeno'a votimo'a timofo amunompi nevigeno, Agrake moparera mani'ne. <sup>48</sup> Jisasi'a nezmagege'za, tusi maraguzati'za azotanu tina vakakiza vu'naze. Na'ankure zahomo tusiza huno eme zamaretunefefe'za, maraguzati'za nevazageno ko'ma atu masa hu'za nehigeno, Jisasi'a timofo avozare eno zamagatere'za nehige'za, <sup>49</sup> zamagrama timofo agofetu nevigeza nege'za, zamagesama antahi'zana hankrore nehu'za zamagogogo nehu'za krafa hu'naze. <sup>50</sup> Na'ankure makamo'za nege'za zmagogogu hu'naze. Hianagi hantaka huno anage huno zamasami'ne, **Nagrabi oti hanavenetita, korora osiho.** <sup>51</sup> Anage huteno mani'naza ventefi marerigeno, zaho'mo amane nehige'za tusiza hu'za antri hu'naze. <sup>52</sup> Na'ankure bretima tamanasino zami'nea zamofo agafa'a, ke so'e osazageno zamagu'amo hanavetine.

*Jisasi'a Genesareti kaziga kri veamokizmi zamazeri so'e hu'nea naneke  
(Mat 14:34-36)*

<sup>53</sup> Hanki kantu kaziga takahē'za Genesareti mopare uhanati'za, votia kina rentete'za, <sup>54</sup> ana votifinti atineramizageno'a, vahe'mo'za ame hu'za Jisasi'e hu'za keama nehu'za, <sup>55</sup> zamaga re'za vu'za e'za hu'za, ana kazigama me'nea maka kumatamimpinti kri vahetamina sesenku hu'za zamavarante'za, Jisasima mani'ne hu'zama hazankumate vu'naze. <sup>56</sup> Hagi ina osi kumatero rankumatero, hozafi ki'za mani'naza kumapino, Jisasi'ma virega kri vahera zamavare'za maketi kumapi ome zmantene'za, Knare zamatresanke'za za'za kena kamofo atupare azerigahuno huza antahinege'za, kukena'rema avakoma hazamokizmia kri zamimo'a vagare'ne.

## 7

### *Anumzamofo kemo vahe'mofo kea agatere'nea naneke (Mat 15:1-9)*

<sup>1</sup> Hagi Farisi mono vahe'mo'zane kasegere ugagota hu'naza vahe'mo'za Jerusalemi kumateti' e'za, Jisasinte emeri atru nehu'za, <sup>2</sup> Jisasi amage'ma nentaza disaipol nagapinti mago'amo'za zamazana sese osu'za bretia nenage'za ke'naze. <sup>3</sup> Na'ankure Farisi vahe'ene, mika Jiu vahe'mo'za, zimagehe'mofo zamavu zmavama avaririza, zamazana sese huso'e osune'za ne'zana nonaze. <sup>4</sup> Hagi maketi kumapinti ne-e'za, zamagra ne'zana onene'za zamazana sese hute'zage ne'zana nenaze. Hagi zamagra rama'a zimage-hemofo kasegea eri'naze. Kapuma kavoma tinkavoma nezama anteno ne' zantamima sesehu agruma hute'za, ne'zama ne'zana azenerize. <sup>5</sup> Hagi Farisi vahe'mo'zane, kasegere ugagota hu'naza vahe'mo'za Jisasina antahige'za, Nahige'za kamage'ma nentaza disaipol nagakamo'za tagehei'i avu'avamofo kea amage onto'za, ne'zama nenakura zamazana sese nosaze? <sup>6</sup> Hazageno Jisasi'a anage huno zamasmi'ne, *Aisaia'a fatgo huno krunage vhahere huno krenteneana, tamagriku hu'ne, Ama vahe'mo'za zamagiteti nagi'a ahentesga nehaze. Hianagi zamagu'amo'a nagritera omaneno, afete'are me'ne.* <sup>7</sup> *Amegati nezama'a omane mono hunenante'za, vahe'mofo kasege rempi nehaze.*

*(Ais 29:13)*

<sup>8</sup> Hagi Anumzamo'ma hihoma hu'nea kasegea netre'za, vahe'mofo zamuzma'mofo ke azeri hanavetiza amage nentaze. <sup>9</sup> Anage huno mago'anee zamasami'ne, Anumzamofo kasegema eritre kaziga knare hu'naze. Hanki tamagehe'i avu'ava'mofo amagera nentaze. <sup>10</sup> Na'ankure Mosesi'a anage hu'ne, negafane negraranena antahiminka agoraga'a manio. Hagi iza'o nefama nererama agoraga'a omanino, huhaviza huntesimofona, ahe friho hu'ne hutma nehaze. <sup>11</sup> Hianagi tamagra anage nehaze, aza'o nefama nererama asamino, Nagrama tanaza hu'zama ante'noana, Anumzamofo ami'naku ante'noe haniana e'i knare hu'ne huta nehaze. <sup>12</sup> Ana nehutma, ana ne'mofona atrageno nefane nereranena mago'zana aza nosie. <sup>13</sup> Tamagri tami tamavu tamava'za rempima huzamiza'zamo higeta Anumzamofo ke'mofo hanavea eri netreta, rama'a ama anahu'zana nehaze.

*Vahe'mokizimi zamazeri pehena nehia zamofo naneke  
(Mat 15:10-20)*

<sup>14</sup> Hagi maka veaku Jisasi'a ke hige'za ageno anage huno zamasmi'ne, Tamagra nanekeni'a nentahita antahi ama' hiho. <sup>15</sup> Magore huno fegiatima vahe'mofo agu'affima ufresiazamo'a, vahera azeri pehena osugahie. Hianagi vahe'mofo agu'affinti atiramino esiazamo, vahera azeri pehena hugahie. <sup>16</sup> [Kagesa antahinamoka antahio.] <sup>17</sup> Anage huteno, ana

vahe zamatreno Jisasi'a nompi marerige'za, amage'ma nentaza disaipol naga'mo'za, ana fronka ke'mofo agafa'agu antahige'naze. <sup>18</sup> Anante Jisasi'a anage huno zamasami'ne, **Tamagrira knare antahi'zana omane'nefi? Tama-gra antahi amara nosazo, inankanzamo'ma fegiatima vahe'mofo agu'afinka ufrezamo'a, vahe'mofona azeri pehena nosie.** <sup>19</sup> Na'ankure anazamo'a vahe'mofo agu'afina novie. Hanki rimpafi uramiteno, anantetira rifa kerifi nevie. (Jisasima anagema hu'nea kemo'a, mafka ne'zamo'a agru huno hu'ne.) <sup>20</sup> Hagi Jisasi'a anage huno zamasami'ne, **Vahe'mofo zmagua finti atiramiazamo, zamazeri pehena nehie.** <sup>21</sup> **Vahe'mofo agu'afinti'ma efore'ma nehiana, havi agu'agesa antahi'zane, monko zane, kumzafa se'zane, va-hema ahe fri'zana ne-e,** <sup>22</sup> arave hu'nea a'ene vene monko avu'ava hu'zane, agraguke antahi'zane, havi avu'ava'e, vahe'mofo krunage hunte'zane, vahe'mofo kumipi avrente avu'avazane, vahe'mofo zanku kenunu hu'zama, knare vahe'mofo havige hunte'zane, neginagi avu'ava hu'zane, avufga eriantesga hu'zane, <sup>23</sup> ana mafkazana vahe'mofo agu'afinti atiramiazamo vhahera azeri pehena nehie.

*Mago a'mo Jisasinte amentinti hu'nea naneke  
(Mat 15:21-28)*

<sup>24</sup> Hagi Jisasi'a otino ana mopa atreno Tairi kuma kaziga vu'ne. Vuno mago nompi ufrenero, vahe'mo'za emenine huza ontahisaze nehuno umanine, hianagi frakigara osu'ne. <sup>25</sup> Ana hianagi mago mofara havi avamu'mo agu'afi fre'nea mofo nerera'a Jisasi'ma emani'nea kema nentahino, ame huno eno agafi eme prihuno, <sup>26</sup> ana ara Sairofonesia kumateti Griki megi'a vahepinti a'kino, Jisasinkura muse hugantoanki havi avamura ome hunto huno asami'ne. <sup>27</sup> Higeno Jisasi'a anage huno ana akura hu'ne, **Mo-favremofo bretima erita kramofo amizamo'a knarer a osu'neanki, atregeno mofavremo kotazana nemu huteno.** <sup>28</sup> Higeno ana a'mo'a anage hu'ne, Ramoka tamage hananagi, itaretima mofavre'mo'za nenazageno ankrama heramiam'a kramo'za zogi'za nenaze. <sup>29</sup> Anante Jisasi'a anage hu'ne, **E'inahu kenona hanku vuo, havi avamumo'a mofaka'amofo agu'afinti hago atiramino vu'ne.** <sup>30</sup> Higeno noma'rega vuno ome keana, mofo'amofona havi avamumo'a ko atreno vigeno, sipaye mase'negeno ome ke'ne.

*Agesa anari renegeno ageru noria ne' Jisasi'a azeri knamare'nea naneke*

<sup>31</sup> Anante Jisasi'a Tairi kumara atreno, Saido kumapinti rugitagino Dekapolisi kaziga, Galili tirutega uhanatige'za, <sup>32</sup> mago agesa ankaniregeno kea nosia ne' avare'za e'za, Jisasinku muse hugantonanki kazana agofetu anto hu'naze. <sup>33</sup> Jisasi'a vevara nezmatreno ana ne' avareno znagrake umanine'ne, agesa gampi azana nevazino, avetu aheno azankonu aganefunare avako nehuno, <sup>34</sup> kesga huno monafi negeno ra asimu nenteno, **Efata** huno hu'ne, (ana kemofo agafa'a ruhagro huo hu'ne.) <sup>35</sup> Higeno ame huno ana ne'mofo agesamo'a ru hagro higeno, agefunamo'a oza higeno, knare huno kea hu'ne. <sup>36</sup> Jisasi'a amazama huazana vhahera ozmasamiho huno nezmasamiana netre'za, ete mago'ane vhahera huama hu'za zamasami'naze. <sup>37</sup> Hagi tusi zamagogo fege'za, Agra mika' zana knare'za nehie hu'za nehu'za, zamagesa ankanire'naza vahe erinkro huzmantenge'za, knare hu'za kea nentahize. Hagi zamagnefu'na kna hu'nea vahe zamazeri so'e hige'za knare hu'za kea nehaze hu'za hu'naze.

## 8

*Jisasima 4tauseni'a venenerami ne'za zami'nea naneke  
(Mat 15:32-39)*

<sup>1</sup> Hagi ana knafina maka veamo'za mago'ene eritru hazageno, ne'zana omanegeno, Jisasi'a amage'ma nentaza disaipol naga ke hige'za ageno anage huno zamasmi'n. <sup>2</sup> **Nagra ama vea krerfagura nasunku huzmantoe.** **Na'ankure zamagra tagufa kna nagri'enena mani'zageno, ne'zama ne'zana omane'ne.** <sup>3</sup> **Nagrama huzmantesuge'za kuma zimirega zamaga'ma nete-sige'za vanu'za, mago'amo'za afeteti e'nazanki'za kantega utraka hugahaze.** <sup>4</sup> Hige'za Agri amage'ma nentaza disaipol naga'mo'za anankemofo nona'a anage hu'za asami'naze, vahe omani mopafi mani'nonanki inantegati ne'zana erizamisunke'za neganare hugahaze? <sup>5</sup> Hazageno Jisasi'a huno, **Nama'a breti eri'naze?** huno zamantahigege'za, 7ni'a breti eri'none, <sup>6</sup> hazageno, Jisasi'a ana maka veara mopafi maniho huno zamasamige'za manizageno, 7ni'a bretia erino Anumzamofo susu hunteteno, tamanasino amage'ma nentaza disaipol nagara zamige'za, ana veara refko hu'za zami'naze. <sup>7</sup> Ana nehazageno onensa nozamene mago'a me'negeno erino Anumzamofo susu hunteteno, amagema nentazana disaipol nagakura eritma zamiho huno zamasmi'n. <sup>8</sup> Maka vahe'mo'za ana ne'za nenageno zamu hige'za ankra'ama atrazama'a, amagema nentaza disaipol naga'mo'za 7ni'a ra eka eka kupi zogiri avite'naze. <sup>9</sup> Ana vahera 4tauseni'a vahe nazamo'za netageno, huzmanteg'e'za vu'za e'za hu'naze. <sup>10</sup> Jisasi'a anama huteno, ame huno amage'ma nentaza disaipol naga'anee votifi mareri'za Talmanuta kaziga vu'naze.

*Farisi vahe'mo'za Jisasinku avame'za huraverio hu'za hu'naza naneke  
(Mat 16:1-4)*

<sup>11</sup> Anante Farisi vahe'mo'za e'za Jisasina ke hakare hunte'za, Monafinti ruzahu hankave kaguvaza erifore hugeta kamneno hu'za rehe'za ke'naze. <sup>12</sup> Hagi Jisasina rimpamo'a kna nehigeno anage hu'n. **Na'a hige'za meni knafi vahe'mo'za avame'za kenakura nahaze?** **Nagra tamage hu'na neramasamue, mago avame'zana ama knafi vahe'mo'za onkegahaze.** <sup>13</sup> Ana huteno zamatrenero ete votifi marerino kantu kaziga vu'n.

*Herotine Farisi vahe'mokizmi havige kemofonku, zistire hunteno zamasami'nea fronka naneke*

*(Mat 16:5-12)*

<sup>14</sup> Hagi amage'ma nentaza disaipol naga'mo'za zimagekani'za bretia eri'za omazanagi, magoke bretige votifina me'nege'za vu'naze. <sup>15</sup> Nevazageno Jisasi'a huno, **Farisi vahe'mokizmi zistigu'ene kini ne' Heroti zistigura kva hiho.** <sup>16</sup> Hige'za zamagra zamagra ke huge antahige hu'za bretima erita ome'nona zanku nehugahie hu'za hu'naze. <sup>17</sup> Nehazageno Jisasi'a antahino keno nehuno, **Nahigeta breti omane'nea zankura huge antahige nehaze?** Tamagra ketma antahi amara osu'nazafi? Tamagri tamagu'amo'a eriginefi? <sup>18</sup> Tamavurga me'neana ke so'e nosazafi? Tamagesama me'neana antahi so'e nosazo? Tamagrira tamage'kaninegahie. <sup>19</sup> Ko'ma 5fu'a breti tamanasina, 5tauseni'a venene zami'noge'za nene'za atrazama'a, nama'a eka eka kupi erivite'naze? 12fu'a eka eka kupi zogiri'none hu'naze. <sup>20</sup> Hagi 7ni'a bretireti tamanasi'na 4tauseni'a vahe'ma zami'noge'za nene'za atrazama'a, nama'a eka eka kupi zogiri avite'naze? Hige'za 7ni'a kupi zogiri'none hu'za hu'naze. <sup>21</sup> Anante Jisasi'a anage huno zamasami'n, E'ina'ma hu'noazankura menina tamagra tamagesa antahi'ama nosazafi?

*Jisasi'a avusu hu'nea ne' azeri hari hunte'nea naneke*

<sup>22</sup> Ana hige'za zamagra Bedsaita kumate azageno, mago'a vahe'mo'za avusu hu'nea ne' avare'za Jisasinte e'naze. Avurgare avako hinkeno so'e huntenogu hanaveti'za Jisasina antahige'naze. <sup>23</sup> Ana hazageno, Jisasi'a avusu hu'nea ne'mofo azante avazu huno kumara atreno megi'a vuteno, Jisasi'a avufi avetu ahenenteno, azanu avako nehuno, **Mago'azana negano?** Huno antahigene. <sup>24</sup> Higeno kesga huno avua negeno, Vahera vano nehazage'na zamagoanagi, zafamo vano nehiaza nehige'na nezmagoe huno hu'ne. <sup>25</sup> Anante Jisasi'a mago'e azanu avurgare avako higeno, ana ne'mofo avurgamo'a hari higeno, ke ankereno negeno maka'zana keama huno ke'ne. <sup>26</sup> Anante Jisasi'a hunenteno, **Kumapina ufrege efrege osunka, fatgo hunka nonkarega vuo** huno asami'ne.

*Pita'a huama Jisasinku hu'nea naneke*  
(Mat 16:13-20; Luk 9:18-21)

<sup>27</sup> Jisasi'a amage nentaza disaipol naga'ane Sisaria Filipai kumatamimpi vu'naze. Kantegama nevu'za Jisasi'a anage huno zmantahige'ne, **Nagrikura vahe'mo'za iza'e hu'za neheze?** <sup>28</sup> Hagi mago'amo'za, hu'za mono ti frezamante'nea Joni'e hu'za nehaze. Hagi mago'a mo'za, kasnampa ne' Elaija'e hu'za nehaze. Hagi mago'amo'za korapa kasnampa vahepinti mago'zmimo'e hu'za neheze. <sup>29</sup> Anage hazageno Jisasi'a zamagri zamtahigene, **Hagi tamagra iza'e hutma Nagrikura nehaze?** Higeno Pita'a kenona huno, kagra Kraisige, Anumzamo'ma huhamprino vahe'ama zamavaregahanema hu'nea nere hu'ne. <sup>30</sup> Agra hu hankavetino mago vahera ana naneke huama hutma ozmasmiho huno zamasmi'ne.

*Jisasi'a knafima ufreto frisnia ke zamasmi'nea naneke*  
(Mat 16:21-28; Luk 9:22-27)

<sup>31</sup> Anante Jisasi'a erigafa huno amage'ma nentaza disaipol naga'a rempi huzamino, Vahe'mofo Mofavremo'a rama'a ata e'nerisigeno, mono kva vahe'mo'zane, ugagota kva vahe'mo'zane, kasegere ugagota hu'naza vahe'mo'za zamefi humiza ahefrisageno, tagufagna maseteno otigahie huno zamasami'ne. <sup>32</sup> Hagi ana nanekea huama huno amate zmasamigeno, Pita'a nentahino Jisasina avaregantiteno, agafa huno e'inahu kea osuo huno kesu'ne. <sup>33</sup> Hianagi Jisasi'a rukrahe huno, amage nentaza disaipol nagatega nezmageno Pitana kesuno, **Sataga manignenka namefiga'a evuo, Anumzamofo antahintahi novaririnanki, vahe'mofo antahintahi nevaririne.**

*Jisasima amage'antezamofo naneke*

<sup>34</sup> Anante Jisasi'a maka veamokizmi ke hige'za, amage'ma nentaza disaipol naga'ene emetru hazageno, anage huno zamasami'ne, **Mago vahe'mo nagri namage'ma antenaku'ma hanuno'a, agra'a avesi'zana netreno, keka zafa'a erigofino namage egahie.** <sup>35</sup> Na'ankure iza'o, agra'a agu'vazino eri so'e huku hanimo'a, asimu'a atregahie. **Iza'o nagriteku'ene Knare Musenkerema asimu'a atresimo'a agu'vazigahie.** <sup>36</sup> Mago vahe'mo'ma ama mopafi fenoza eri atruma nehanigeno, agu amema'a fnanema haniana, nankna aza hu'za erigahie? <sup>37</sup> Na'a vahe'mo'a asimuma erisigura nona'a huno Anumzamofona amigahie? <sup>38</sup> Iza'o ama knafi keontahi kumike vahepi, Nagrik'u'ene Nanekenimofoma agaze huntesimofona, henka Vahe'mofo Mofavremo Nafa'amofo hanavefima routage ankeru vahe'ane esuno'a, Agra nena zamagaze hunte'nesamokizmia, eme agaze huzmantegahie.

## 9

<sup>1</sup> Hagi Jisasi'a mago'ane zamasamino, Tamage hu'na neramasmue, amafi otiza mani'naza vahepintira, ofri mani'ne'za Anumzamofo kumamo'a hanave'ane esige'za kegahaze.

*Jisasi avufgamo masanentake nehige'za kenaza naneke  
(Mat 17:1-13; Luk 9:28-36)*

<sup>2</sup> Hagi 6'a zagegna evutegeno, Jisasi'a Pitama, Jemisima, Jonikizmia zamavareno za'za agonaifi mareriza zamagrake umani'ne'za, negageno Jisasi avufagamo'a rukrehe huno ruzaha nehigeno, <sup>3</sup> kukena amo'a efe anentake huno tampre tampre hu'ne. Mopafina kukena sese nehigeno e'inahukna efentake nosiaza huno efentake hu'ne. <sup>4</sup> Hagi Elaija'a Moses'i'ene zamavuga efore huke Jisasi'ene naneke hu'naze. <sup>5</sup> Ana higeno Pita'a anage huno Jisasina asami'ne, Hurami' ne'moke, knare amafina mani'none. Hagi tagufa tona nona kigahune. Mago nona Kagriki, mago nona Mosesinki, mago nona Elaijanki huta kigahune. <sup>6</sup> Na'ankure zamagra tusi koro nehazageno, na'ane naneke hugahie, Pita'a ontahineno ana kea hu'ne. <sup>7</sup> Anante hampomo refitenezmantegeno, mago agerumo amanage ana hampompinti hu'ne, amai'tusiza hu'na navesima nentoa Mofavreni'e. Agrama hania kea antahi amiho! <sup>8</sup> Hagi keganti kegma hu'za kazana, ame huke Moseke Elajake omani'nakeno, Jisasi'a Agrake mani'nege'za ke'naze.

<sup>9</sup> Hagi zamagrama agonaregati magoka eneramizageno hanave ke zamasamino, ke'naza zana vahera ozmasamitfa hu'enkeno, Vahe'mofo Mofavremo'a fripinti otiteno hu'ne. <sup>10</sup> Hagi fritena otigahema hia nanekema zamagra'a nentahiza, na agu'agesare nehie hu'za hu'naze. <sup>11</sup> Anante zamagra Jisasina anage hu'za antahige'naze, na'a hige'za kasegere ugagota hu'naza vahe'mo'za, hu'za Elaija'a etenkeno'e hu'za nehaze? <sup>12</sup> Jisasi'a anage huno zamasami'ne, Tamage Elaija ko eno maka'zama haviza hu'neazana eriso'e hu'ne. Hagi na'a higeno avontafepina krenteno, Vahe'mofo Mofavremo'a rama'a ataza erina, vahe'mo'za zamefi humigahaze hu'ne?

<sup>13</sup> Hianagi anage hu'na neramasamue, Elaija'a ko' ehanatige'za nanknazama hunte'naku'ma haza'zana avontafepima kre'nea kante ante'za maka'zana hunte'naze.

*Jisasi'a mago mofavre azeri knamre'nea naneke  
(Mat 17:14-21; Luk 9:37-43)*

<sup>14</sup> Jisasi'ene tagufa amage'ma nentaza disaipol naga'mo'zama, ete ruga'a amage'ma nentaza disaipol nagatema, e'za eme zamagazana kasegere ugagota hu'naza vahe'mo'za keha renezmantazage'za eme zamage'naze. <sup>15</sup> Anante ana maka vahe'mo'za Jisasina nege'za antri nehu'za, ame hu'za zamagare'za vu'za muse ome hunte'naze. <sup>16</sup> Jisasi'a huno, Na'antru kehara zamagranena nehaze huno zamantahige'ne? <sup>17</sup> Tusi'a vahepinti mago'mo ana kemofo nona'a anage hu'ne, Rempi hurami ne'moke, havi avamumo agu'afi mani'neno agira eri antrako higeno, ke nosia mofavreni'a awarena Kagrite neoe. <sup>18</sup> Anama havi avamu'mo'ma agu'afi nefreno'a azeri traka hutregeno mopafi masenegeno, ahirahi neregeno agipinti agremo zuzu nehigeno, avera anikreki nehuno mase havavu nehie. Ana nehige'na avre'na Kagri kamage'ma nentaza disaipol nagate havi avamu humegi atresazegu zamantahigo'anagi, azeri so'e huonte'naze. <sup>19</sup> Ana kemofo nona'a Jisasi'a anage huno zamasami'ne, Tamagra tamentinti osu vahere! Nama'a gna tamagra nena manigahue? Nama'agna tamagri kna erina vugahue? Ana mofavre avaretma Nagrite echo. <sup>20</sup> Hagi ana mofavre avare'za azageno, havi

avamumo Jisasima anama negeno'a, ana mofavre azeri traka hutregeno mopafi traka huno maseno rukre rukre nehigeno, agipintira agremo'a zuzu hurami'ne. <sup>21</sup> Ana nehigeno Jisasi'a ana mofavremofo nefana antahigeno, **Nanknafi ana zana agafa hu'ne?** Higeno, mofavre mani'negeno anazana fore humine huno hu'ne. <sup>22</sup> Rama'a zupa tevefine tirupine ahefri'naku azeri traka hunetra. Hagi Kagrama azahuga hunesunka, kasunku hurantenka taza huo huno hu'ne. <sup>23</sup> Higeno Jisasi'a anage huno ana mofavremofo nefana asami'ne, **Na'a higenka kagrama azahuga hunesunka azeri otio hunka nehane?** Hagi mago'moma amentinti huno, **maka'zana fore hugahie hanimofontera, amane maka'zana fore hugahie.** <sup>24</sup> Ana mofavremofo nef'a ranke huno anage hu'ne, namentinti huanki namentintima osu'zana naza huo! <sup>25</sup> Hagi Jisasi'ma keama rama'a vahe'mo'za ame hu'za eritru nehazageno, havi avamura hanavetino hunteno, **Kagra vahe'mokizmi zamazeri negi nenenka zamagi zamazeri antrako nehana havi avamumoka, hugantoanki agu'afintira atiraminka nevunka, mago'anena eofro.**

<sup>26</sup> Higeno ranke huno azeri tagosi tagosi nehuno atiramino enevigeno, ana mofavremo fri vahekna huno mase'nege'za, hago frine hu'za hakare vahe'mo'za sumi sumi ke hugantigama hu'naze! <sup>27</sup> Hianagi Jisasi'a azante akoheno azeri otigeno oti'ne. <sup>28</sup> Ana huteno Jisasi'a nompi umarerige'za, amage'ma nentaza disaipol naga'mo'za, Agrane zamagraku umani'ne'za, na'a higeta havi avamura ahenati notrone hu'za antahige'naze? <sup>29</sup> Hazageno Jisasi'a anage huno zamasami'ne, **Amana huknazana, nunamuhi kantetike huntesageno atiramigahie.**

*Jisasi'a friteno otisia zamofonku hu'nea naneke  
(Mat 17:22-23; Luk 9:43-45)*

<sup>30</sup> Hagi Jisasi'ene amage'ma nentaza disaipol naga'mo'za ana kumara atre'za, atiramiza Galili kaziga rukitagiza vu'naze. Hianagi Jisasi'a kama vazama'a mago yahemo antahi zankura ave'osine. <sup>31</sup> Na'ankure amage'ma nentaza disaipol nagara rempi hunezamino, anage huno zamasami'ne, **Vahe'mofo Mofavre avare'za ha' vahe zamazampi antesage'za ahe fritesageno, tagufa kna maniteno kerifintira otigahie.** <sup>32</sup> Hianagi ana naneke antahi ama nosu'za, antahige'zankura koro hu'naze.

*Amu'nontifina i'za rana mani'ne hu'naza naneke  
(Mat 18:1-5; Luk 9:46-48)*

<sup>33</sup> Anantetira Kapaneamu kumatega ete'za, Jisasima nompinka emanino'a anage huno zamantahige'ne. **Kantegama ne-eta na'anku keaga huta e'naze?** <sup>34</sup> Hianagi kantegama ne-eza i'za amu'nontifintira ugagota hu'ne hu'za hugantugama hu'nazagu, zamagra kea osutfa hu'naze. <sup>35</sup> Anante'ma Jisasi'ma mopafima nemanino'a 12fu'a amage'ma nentaza disaipol naga'a, kehuno anage huno zamasami'ne, **Iza'o ugagota hunaku'ma hanimo'a, henkarfa nemanino, maka vahe'mofo eriza vahe manigahie.** <sup>36</sup> Agra osi mofavre amunozmifi azante azerino azeri onetino, anage huno zamasami'ne. <sup>37</sup> **Iza'o amanahu'kna osi mofavre, Nagri nagifi avreno azeri so'e huntesimo'a, Nagri navareno nazeri so'e hunantegahie. Iza'o Nagri'ma nevareno nazeri so'e hunante'nimo'a, Nagrike navareno nazeri so'e osug-ahianki, Nenfa hunantegahie'na e'nomofo avreno azeri so'e huntiegahie.**

*Erizanti eri haviza nosimo'a tagri kaziga mani'ne hu'nea naneke  
(Luk 9:49-50)*

<sup>38</sup> Anante Joni'a Jisasina asamino, Hurami ne'moka mago ne'mo kagri kagifi havi avamutamina humegi netregeta negeta, ana osuo huta hunte'none. Na'ankure ana ne'mo'a tagranena vano osu'negu ana osuo huta asevazinte'none. <sup>39</sup> Hianagi Jisasi'a anage hu'ne, I'o huonteho, na'ankure mago vahe'mo'e huno Nagri nagifima kaguvezama nehanimo'a, hantga huno hu haviza hu onantegahie. <sup>40</sup> E'ina hu'negu iza'o tagri'ma ha'marema norante'nimo'a, tagri kaziga mani'ne. <sup>41</sup> Na'ankure tamage hu'na neramasamue, iza'o, Kraisi amage'ma nentaza disaipol naga zamaza hanue huno nehuno, tima afi tamisimofona, mizama'amo'a fanane osugahie.

*Havi avu'avazamo zamentinti zamazeri haviza nehia naneke  
(Mat 18:6-9; Luk 17:1-2)*

<sup>42</sup> Jisasi'a anage huno zamasami'ne, Iza'o ama osi mofavremo'za, Nagrite'ma zamentinti nehaza mofavre nagama kumipi zamarentesamokizmia, tusi'a monu havereti anankempi rentete'za, hagerimpi matevu'za atresageno uramisiana knare'zantfa hugahie. <sup>43</sup> Hagi kazamo'ma kumipi kavare nentesigenka akafri atro. Na'ankure ru tare kaza me'nenigeno asu osu tevava tevefi kavarente zanku, magoke kaza me'nena manivava asimu erisanana knare hugahie. <sup>44</sup> [Anampina kanimo'a zamufgafi manivava hugahie. Hanki tevemo asu osu tevava hugahie.] <sup>45</sup> Hagi kagamo'ma kumipi kavare nentesigenka akafri tro, na'ankure ru tare kaga me'neno asu osu tevava tevefi kavarente'zanku, magoke kaga me'nena, manivava asimu erizampi ufresanana knare hugahie. <sup>46</sup> [Anampina kanimo'a zamufgafi manivava hugahie. Hanki tevemo asu osu tevava hugahie.] <sup>47</sup> Hagi kavurgamo'ma kumipi kavare nentesigenka, anankavuraga tagati atro, na'ankure ru tare kavurga me'neno, asu osu tevava tevefi kavretre'zanku, magoke kavurgama me'nena, Anumzamofo kumapima ufresanana knare hugahie. <sup>48</sup> *Anampina kanimo'a zamufgafi manivava hugahie. Hanki tevemo asu osu tevava hugahie.* (Ais 66:24) <sup>49</sup> Na'ankure hagereti'ma ofama eri hagama nehiaza huno ana mikomofona tevenu kre fatgo hugahie. <sup>50</sup> Hagemo'a knare hu'neanagi, haga'ama atresigenka, inankna hunka ete kagra eri haga hugahane? Tamagra hagegna huta amuno tamifina ovesinte avesinte hutma tamarimpa frune maniho.

## 10

*Jisasi'a arave atane zanku zamasami'nea naneke  
(Mat 19:1-12; Luk 16:18)*

<sup>1</sup> Hagi Jisasi'a ananku'ma atreno Judia kaziga vuno Jodani tina takaheno kantu kaziga vu'ne. Nevige'za tusi'a veamo'za mago'ene Agrite emeri atru hazageno anante umani'neno, ko'ma nehiaza huno naneke mago'ene agafa huno rempi huzami'ne. <sup>2</sup> Farisi vahe'mo'za e'za Jisasina rehe'za anage hu'za antahige'naze, vemoma nenaro atrezamo'a kasege amage antegahifi? <sup>3</sup> Hu'za nehzageno ana kenona'a anage huno zamasami'ne, **Na'a hihonu Mosesi'a kasegea krerami'ne?** <sup>4</sup> Hige'za Zamagra anage hu'naze, Mosesi'a avompina, vemo'a nenaro atrenakura amane katroe huno eriamahu avona kre nemino, huntenko vugahie. <sup>5</sup> Hianagi Jisasi'a amanage huno zamasmi'ne, **Na'ankure tamarimpamo'a hankavetino erigi'nea** zanku huno Mosesi'a ana kasegea kreno tamami'ne. <sup>6</sup> Hianagi Anumzamo'a ese agafare **vene a'ene trohu zanante'ne.** <sup>7</sup> E'i ana agafare vemo'a nefane nereranena netreno, nenaro'ene hagerfino, (Diu-Kas 24:1, Jen-Agf

1:27, 5:2) <sup>8</sup> erimago znavufa neseke, mago'ane tare vahera omanina'anki, magoke mani'na'e. <sup>9</sup> E'ina hu'negu nazano Anumzamo'ma eri hagerafi neniazana, atregeno mago vahe'mo'a eri ovasaneno. <sup>10</sup> Ete mago'ene nompi umarerira mani'neza amage'ma nentaza disaipol naga'mo za aravema refutagizankura antahige'naze. <sup>11</sup> Jisasi'a ke'nona zamire anage huno zamasami'ne, Iza'o ese a'ma netreno aru a'ma erisia ne'mo'a, ese a'mofona kumi huntenu monko avu'avaza hugahie. <sup>12</sup> Hagi mago a'moma neve netreno, aru ve eri snimo'a, monko avu'ava hugahie.

*Jisasine ne'one mofavre naga'mofo naneke  
(Mat 19:13-15; Luk 18:15-17)*

<sup>13</sup> Anante vahe'zagamo'za ne'one mofavreramina Jisasi'ma azanteno asomu huzmantenogu zmauvre'za neage'za, amage'ma nentaza disaipol naga'mo'za kezamasu'za azeri amuho osiho hu'naze. <sup>14</sup> Hianagi Jisasisima nezmageno asi vazigeno, anage huno zamasami'ne, **Zamazeorita zamatrenke'za osi mofavre'mo'za Nagrite eho.** Na'ankure Anumzamofo kumara e'inahu vahe'mofo kuma me'ne. <sup>15</sup> Tamage hu'na neramasamue, iza'o Anumzamofo kumama mofavre'moma eneriaza huno e'orisimo'a, uofretfa hugahie. <sup>16</sup> Jisasi'a anage huteno, ana mofavre'rami zamavareno, azana zamagofetu anteno agafa huno asomu kea huzmante'ne.

*Afufenone ne'mo Jisasi antahige'nea naneke  
(Mat 19:16-30; Luk 18:18-30)*

<sup>17</sup> Hagi Jisasi'a otino kantega nevigeno mago ne'mo negeno, agareno agafi rena omenereno anage huno hu'ne, knare rempi hurami ne'moka, nankna hanuna manivava asimura erigahue? <sup>18</sup> Higeno Jisasi'a anage huno ana nera asami'ne, **Na'a higenka kagra knare hu'nane hunka nehane?** **Mago vahe'mo'e huno knare osu'neanki, Anumzamo Agrake knarera hu'ne.** <sup>19</sup> Hagi kasegefina ko amanage hu'negenka antahinane, vahe ahe ofrio, ru-mofo a'enena monko'zana osuo, kumzafa oso, vahera havige huozmanteho, **vahezana eri savarira osiho, negrerane negafa kea antahi zanaminka zanamage antegahane hu'negenka antahinane.** <sup>20</sup> Anante ana ne'mo'a Jisasina anage huno asami'ne Rempi hurami ne'moka, osi'ma mani'noretima eno menima ama knarema eana, nagu'areti hu'na maka ana kasegea amage ante'noe. <sup>21</sup> Jisasi'a ana nera negeno avesinteno anage hu'ne, **Mago'zanku atupa hu'nane, vunka inanknazama ante'nesnana zana, maka zagore ome atrenka eritenka, ana zago erinka zamunte omane vahe nezamigeno, monafinka fenonka'a meno.** Ana nehunka kagra, Nagri eme namage'anto. <sup>22</sup> Ana naneke nentahigeno, avugosamo ruzahе higeno, rama'a afufeno ante'negu rimpagna nehuno atreno oti'no vu'ne.

<sup>23</sup> Vigeno Jisasi'a ome zamage eme zamage nehuno, amanage huno amage'ma nentaza disaipol naga'a zamasmi'ne, **Afufenozamine vahe'mo'za Anumzamofo kumapi ufrenaku'ma hanazana, tusi'a amuho hugahaze!** <sup>24</sup> Anagema hige'za amagema nentaza disaipol naga'mo'za antri ana kegura hu'naze. Hianagi mago'ene Jisasi'a anage huno zamasami'ne, **Mofavre naga'mote, Anumzamofo kumapima ufrezamo'a tusi'a amuho hu'ne!** <sup>25</sup> Kemoli afumo'za \* nekazamofo kampima ufrenakuma nehazana amuhoa hunozmanteho. Hianagi afufenone vahe'mo'za **Anumzamofo kumapi ufre'naku hanazana, tusi amuho huzmantegahie.** <sup>26</sup> Mago'ene antri hu'za tusi zmagogogu nehu'za, zamagra zamagra anage hu'naze, hagi iza

\* **10:25** Nekazamofo kampinema hu'neana osi kahanku hu'ne.

manivava manizana erigahie? <sup>27</sup> Hazageno Jisasi'a nezmageno ana kenona amanage huno hu'ne, **Vahetfamota amanahu'zana hugara osu'nazanki, Anumzamo'a amane maka'zana hugara hu'ne.**

<sup>28</sup> Higeno Pita'a anage huno Jisasina asmi'ne, ko, tagra mafka'zana atreta kagri kamage'nentone. <sup>29</sup> Higeno Jisasi'a anage hu'ne, **Tamage hu'na neramasamue, iza'o Nagriku'ene Knare Musenkerekuru'ma huno noma'afi, afuhe'impi, asarahehe'impi, nererampi, nefampi, mofavre'zaga'afi hoza ramima'ama atresimo'a,** <sup>30</sup> ana nona'a maka'zana 100'a agatereno menina ama knafina rama'a e'nerino, rama'a kuma'ene, nefu'zane nesaro'zane nererane mofavre' naga'anе, hoza'anе e'nerisige'za, vahe'mo'za azeri haviza nehanageno, henkama esia knarera manivava asimu erigahie. <sup>31</sup> Hianagi rama'amo'za ugagota hu'enamо'za, henka esnagе'za, rama'a henka e'enamо'za, ugagota hu'za vugahaze.

*Jisasi'a friteno otisia zanku hu'nea naneke  
(Mat 20:17-19; Luk 18:31-34)*

<sup>32</sup> Hagi Jerusalemi vu kantega mareri'za nevazageno, Jisasi'a ugota huno vu'ne. Hianagi amagema nentaza naga'mo'za antri nehazageno, zamavaririza vu'naza vahe'mo'za koro hu'naze. Hianagi Jisasi'a 12fu'a amage'ma nentaza disaipol nagara zamare kanti mago'ene zamanteno, agafa huno agrite'ma fore hania zamofo naneke zamasami'ne. <sup>33</sup> Keho, Jerusalemi kumate marerita meni nevunankino, Vahe'mofo Mofavrea azeriza ugagota mono kva vhahete'ene kasegere ugota hu'naza vahe zamazampi avrentegahaze. Zamagra ahe friho nehu'za, fegi'a vahe zamazampi avrentegahaze. <sup>34</sup> Ana vahe'mo'za huhaviza hunente'za, zamavetu ahenente'za sefunemiza, ahe frigahaze. Hianagi tagufa zagekna zupa frinefintira otigahie.

*Jemisike Jonike kota vahe maninaku Jisasina antahige' na'a naneke  
(Mat 20:20-28)*

<sup>35</sup> Anante tare Zebeti nemofoke Joni'ene Jemisikea Jisasinte e'ne anage hu'na'e, Hurami ne'moka, menima tagrima tavemanesiza hurantogu kantahinego'e? <sup>36</sup> Jisasi'a anage hu'ne, **Na'a huranantesuegu neha'e?** <sup>37</sup> Anage huke asami'na'e, monafima hihamu hanaveka'afima kinima uman-inunka tatregeno, mago'mo'a kazantmaga manina, mago'mo'a kaza hoga'a maninogu nehue. <sup>38</sup> Hianagi Jisasi'a anage huno znasami'ne, **Tanagra antahitna ketna osu na'azanku nantahinega'e!** **Tanagra** nesua kapufintira negaha'o, hifi tima fresuaza hutna, tina fregaha'o? <sup>39</sup> Higeke ana netremoke anage huke Jisasina asami'na'e, tagra amane negahu'e huke hakeno, anante Jisasi'a anage huno znasami'ne, **Nagrama** nesua kapufintira amane neta, tima frezama nehua tina fregaha'e. <sup>40</sup> Hu'neanagi nazantamaga mani'zane, naza hogama mani'zana Nagri'zana omane'ne. Anumzamo'ma huhampri zamanteno, retro'ma huzmanteno erigahazema hu'nea vahe'mo'za erigahaze.

<sup>41</sup> Anage nehige'za 10'a amage'ma nentaza disaipol naga'mo'za ana naneke nentahi'za, Jemisine Jonigiznia agafa hu'za zamarimpa ahe-nante'naze. <sup>42</sup> Hagi Jisasi'a mika'amokizmi ke hige'za ageno anage huno zamasmi'ne, **Megi'a** vahepinti kva vhahete'za, iza'zo ra zamagima eri'za vahe'mo'za ra vahe'zimi nemanizage'za, iza'zo ra zamagima eri'za vahe'mo'za hanave zamireti zmagatere'za kegava hunezmantaze. <sup>43</sup> Hu'neanagi tamagra anahuknara osugahaze. Hianagi iza'o ra vahe mani'naku hanimo'a, tamagri amu'nompina eri'za vahe manino. <sup>44</sup> Iza'o amunotamifintima ugagota

huramante'nakuma hanimo'a, mika'motma kazo kazo eriza vahe manigahie. <sup>45</sup> Ana hu'negu Vahe'mofo Mofavre'mo enena, eri'za erintehogura ome'ne. Hianagi eri'za erino tamagri tamaza nehuno, Agra'a asimura atreno rama'mokizmi miza sezmantenaku e'ne.

*Avusu hu'nea ne' Batamiasi naneke  
(Mat 20:29-34; Luk 18:35-43)*

<sup>46</sup> Hagi zamagrama Jeriko kumate ehanatite'za, Jisasi'ene amage'ma nentaza disaipol naga'ene tusi'a veamo'za ana kuma atre'za nevazageno, Timeasi nemofo Batamiasi'a avusuhi ne'mo, kamofo ankenarega mani'neno, azama hanagu meme hu'ne. <sup>47</sup> Hagi ana ne'mo'a antahiamma Nazareti Jisasi ne-e hiankema nentahino'a, agafa huno kezatino, Jisasiga Deviti nemofoga nagrira kasunku hunantenka nazahuo! <sup>48</sup> Hage'za rama'a vahe'mo'za kesu'za, kagra tagano hu'naze. Hianagi mago'ene kezatino, Jisasiga Deviti nemofoga nagrira kasunku hunantenka nazahuo! <sup>49</sup> Higeno Jisasi'a nevifinti uotino, **Ke hinkeno eno** hige'za, zamagra ana avusuhi neku, kagriku ke nehianki krimpamo'a so'e nehinkenka otinka eno hu'za hu'naze. <sup>50</sup> Ana ne'mo zanra anakreku'a netreno ame huno otino Jisasinte e'ne. <sup>51</sup> Higeno anante Jisasi'a anage hu'ne, **Na'a hugante'nuegu kave'nesie?** Hurami ne'moka, ete navu kenaku nehue. <sup>52</sup> Higeno, Jisasi'a anage huno asami'ne, **Kamentintimo kazeri so'e hanki vuo** higeno, ame huno avurgamo'a ete hari higeno amage'avaririno kantega vu'ne.

## 11

*Jerusalemi kumapi Jisasi'a donki afu'mofo agumpi manino kini vahekna huno ufre'nea naneke  
(Mat 21:1-11; Luk 19:28-40; Jon 12:12-19)*

<sup>1</sup> Hagi Jerusalemi kuma tava'onte e'naze. Betfakene Betania Olive agonare me'nea kumate ne-eza, Jisasi'a tare amage'ma nenta'a disaipol netre'na huznanteno, <sup>2</sup> anage huno znasami'ne, Tanagra ugoteta antu kumapi vi'o. **Kasefa donki vahe'mo'a agumpi omaninenia kina arente nenigeta ome kenutna,nofira eri katufetna avazu huta e'o.** <sup>3</sup> Hanki ana nehanakeno mago'a vahe'mo, na'a hu'naku nevra'e huno hinketna'a anage hi'o, Ramofona eri'za me'nne hutna hanakeno'a, ame huno atrenketna avretta egaha'e.

<sup>4</sup> Huno huznantegeke karanka nevu'ne ome ka'ana, fegia nomofo kafante rente'nagene ome negene katufe'na'e. <sup>5</sup> Anante oti'naza vahe'mo'za, na'a hunaku donkia katurefa'e hu'za znantahige'naze? <sup>6</sup> Hazageno Jisasi'ma hu'nea kea nezmasamige'za, anante'ma oti'naza vahe'mo'za knarere hu'za huznante'naze. <sup>7</sup> Anante ana kasefa donkina avre'ne Jisasinte ne-ene anakreku'zani zafi'ne ana donkimofa agumpi tafevasi nentakeno, Jisasi'a ana agofetu manino vu'ne. <sup>8</sup> Mika veamo'za zaza anakre ku'zimi zafiza kampi vasiza nevazage'za, mago'amo'za zafa asina hozafinti akafri'za kampi tafe vasiza nevazageno, Jisasi'a ana tafete vu'ne. <sup>9</sup> Hagi kote'za vaza vahe'mo'zane henkama aza vahemo'zanena amrara hu'za ranke hu'za muse hunente'za, **Tazahu nera, hosanna ramofo agifi ne-emofona asomu huntesanie!** (Sam-Zga 118:25-26) <sup>10</sup> Nerafa Deviti nagapintima ne-emofonkura marerisa Anumzamofona muse hunenteta, Tazahu ne'mofona agi'a ahentesga hanune. <sup>11</sup> Anante Jisasi'a Jerusalemi kumapi vuno, ra mono nompi ufreno maka'za ome kagino ke vagareteno, atiramino 12fu'a amage'ma nentaza disaipol naga'a zagemo kinaga segeno nezamavareno atreno Betani kumate vu'ne.

*Fiki zafamo raga'a oreno huno sifna hente'nea naneke  
(Mat 21:18-19)*

<sup>12</sup> Hagi masete'za nanterana Betani kumara atre'za neageno, Jisasina aga ate'ne. <sup>13</sup> Fiki zafa'mofo asina kuronkuro huno ogamanu me'negeno negeno, nezama rente'nenigu kenaku eme ke'ne. Hianagi eme keana asinage me'negeno ke'ne. Na'ankure fiki zafa raga rentekna omane'ne. <sup>14</sup> Ana higeno ana zafamofonkura anage huno hu'ne, **Mago'ene raga oresnanke'za veamo'za tagi'za onegahaze.** Anage hige'za amage'ma nentaza disaipol naga'mo'za ana naneke antahi'naze.

*Ra mono nompi maketi nehaza vahe Jisasi'a zamahe fegi zmatre'nea naneke*

*(Mat 21:12-17; Luk 19:45-48; Jon 2:13-22)*

<sup>15</sup> Hagi Jisasi'ene amagema nentaza disaipol naga'ane Jerusalemi kumate uhanati'zageno, Jisasi'a ra mono nompi mareriteno agafa huno make-tima nehaza vahera zamahenati netreno, zagore netre'za miza nesaza vahe'mokizmi trara erikaha hunetreno, mani'ne'za maho nama zagore ne-traza tra'ene zagoma rezahema nehaza vahe trara erikaha hutre'ne. <sup>16</sup> Ana huteno feno zantamia mago vahe'mote hutma eritma ra mono nompina aru kitagita vuta eta osutfa hiho huno hu'ne. <sup>17</sup> Ana huteno agafa huno rempi hunezamino anage huno zamasmi'ne, **Amanage huno Anumzamofo avontafepina krente'ne, Nagri nona mika kaziga vea'moza nunamu hanaza no me'ne, hianagi tamagra kumzafa vahe'mo'za fraki nonkuma eri tro nehaze.** (Ais 56:7, Jer 7:11) <sup>18</sup> Hagi ra mono kva vahe'mo'zane, kasegerema ugagota hu'naza vahe'mo'za nentahiza, inankna huta ahiegahune hu'za ah-esaza kankamunku hakrenaze. Na'ankure zamagra koro Agrikura hu'naze. Hagi maka vahe'mo'za rempima huzamia zankura antri hu'naze. <sup>19</sup> Ana kinaga Jisasi'ene amage'ma nentaza disaipol naga'mo'za, rankuma atre'za fegi'a vu'naze.

*Sifnama ahente'nea fiki zafamo hagege hu'nea naneke  
(Mat 21:20-22)*

<sup>20</sup> Nantera enevu'za kazana, sifnama Jisasi'ma ahente'nea fiki zafamo'ene arfu'na'amo'a, osapa re'nege'za ke'naze. <sup>21</sup> Pita'a Jisasi'ma hu'nea kegu age'sa nentahino anage hu'ne, Rempi hurami ne'moka ko! Okima sifna kema hunka raga renontenka osaparo hu'nana Fiki zafamo'a osapa re'ne.

<sup>22</sup> Jisasi'a kenona anage huno zamagrira zamasami'ne, **Anumzamofonte tamentinti hiho.** <sup>23</sup> Tamage hu'na neramasamue, mago vahe'mo'ma ami ag-onagu'ma huno, otinka hagerimpi takauro huno tare agesa ontahi amentinti nehuno hanigeno'a, amane ke haniazza huno fore hugahie. <sup>24</sup> E'ina hu'negu anage hu'na neramasamue. Nazankuma nunamu hunka Anumzamofo antahima kesunka, hago eri'noe hunka kamentinti hanunka erigahne. <sup>25</sup> Hagi otinka nunamu hunakuma hanunka, mago'mo haviza hugante'nesnia zana atrento. Anama hanankeno'a, monafi nemania Nafakamo'a kagri'enena kumika'a atregantegahie. <sup>26</sup> [Hu'neanagi kagra vahe'mofo kefoza atre oz-mantesanana, monare mani'nea Nafakamo kagri kefozana ana zanke huno atre ogantegahie.]

*Jisasi hanavegu agenoka hu'naza naneke  
(Mat 21:23-27; Luk 20:1-8)*

<sup>27</sup> Hagi Jerusalemi kumate ete uhanatizageno, Jisasi'a ranmono kumapi nevige'za, ra mono kva vahe'mo'zane, kasegere ugagota hu'naza vahe'mo'zane, mago'a ugagota kva vahe'mo'zane, nege'za Jisasinte e'za,

28 anage hu'za antahige'naze, Kagra ina hihamure hakare zana eri fore nehane? Iza hihamua kamigenka hakare zana nehane? <sup>29</sup> Jisasi'a zamagrikura anage huno hu'ne, **Nagra ete tamagrira mago'zanku tamantahigegahue, ana kenona'a hutenkoa, aza hihamu namige'na eri'zana e'nerufi tamasmigahue.** <sup>30</sup> Hagi nasamiho, Jonima mono ti frezmante'e'nea, zana monafinti e'nefi, vahe'mo erifore hu'ne? <sup>31</sup> Jisasi'a nehige'za zamagra ohumi ahumi nehu'za anage hu'naze. Tagrama monafintire huta hanunkeno'a, Agra anage hugahie. Hagi nahigetma tamentintia ana zankura nosaze? huno hugahie. <sup>32</sup> Hianagi vahe'mo eri fore hu'ne, huta osugosune, nehu'za maka veaku koro hu'za atre'naze. Na'ankure maka veamo'za Joninkura tamage kasnampa nere hu'za antahi'naze. <sup>33</sup> Anage nehu'za Jisasina kenona hunte'ze, ontahi'none hazageno Jisasi'a anage huno zamasami'ne, **Nagranena iza hihamufi eri'zana enerue ontamasmigahue** huno hu'ne.

## 12

*Hoza nafa'amofo mofavrene eri'za vahe'a zamazeri haviza hu'naza fronka naneke*

(Mat 21:33-46; Luk 20:9-19)

<sup>1</sup> Jisasi'a erigafa huno fronka kea zamasami'ne, **Mago mopa agafa ne'mo'a waini hoza kri'ne.** Ana hoza kegina huno, wainima tatisia keria asenteteno, mani'neno kvahu nona kinte'ne. Hagi zoka umani'neno enaku ikante zago miza seterehu (rent) vahete, hoza'a netreno afete ka vu'ne. <sup>2</sup> Hagi hozama vasage knama egeno'a, kazokzo eri'za ne'a huntegeno, agri'ma re-fko hu'za amisnazama'a erisnigu, kegava hune'za ikantema mizama (rent) nezamiza naga'mokizmire e'ne. <sup>3</sup> Ana hianagi, anama kegavama hu'naza naga'mo'za, azeri'za knonkeve nemi'za, atrageno mago'zana e'ori amane vu'ne. <sup>4</sup> Ete mago'ane ru kazokazo eri'za ne'a huntegeno vige'za, anu rutane'za ahete'za, ke huhaviza hazageno atreno e'ne. <sup>5</sup> Ana hazageno ete mago'ene huntegeno vimofona, ahe frigeno hakare'a huzmantenge'za nevazageno, mago'a knonkeve nezami'za, mago'a zamahe fri'naze. <sup>6</sup> Ana hazageno, magoke avesi avesi hunentea mofavrege mani'ne. Ana huzmante vagareteno, henkarfana magoke mani'nea mofavre'a hunenteno, zamagra magoke mofavre ni'agi'za antahimigahaze hu'ne. <sup>7</sup> Hianagi ana hoza kva hu'naza vahe'mo'za, zamagra zamagra anage hu'naze, nafa'amofo zama erisanti haresia nera ama eanki, enketa ahe frisunkeno nefo fenozamo'a, tagrizase'nie! Hu'za hu'naze. <sup>8</sup> Ana nehu'za azeri'za ana mofavrea ahe frite'za, avufa'a waini hozafinti meg'i mate vu'naze.

<sup>9</sup> Hagi waini hozamofo nefo'a nankna eme hugahie? Agra eno waini hoza kegava krinaza vahera eme zmaheno, waini hoza ru vahe'mokizmi eri zaminke'za, kegava hugahaze. <sup>10</sup> Hanki ama naneke Anumzamofo avontafepi krente nazana hampritma ontahinazo? **Nogi vahe'mo'za haviza hie huza atre'naza havemo'a, no renage antepinka no azeri hanaveti have fore hu'ne.** <sup>11</sup> **Anumzamo ama anazana hu'neanki, tavuma konana knare zantfa hu'ne.** (Sam-Zga 118:22-23.)

<sup>12</sup> Hagi ana vahe'mo'za azeri'saza kanku hakre'naze. Na'ankure fronka kema hu'neana zamagrikru hu'ne. Hianagi zamagra tusi'a vahe kevugu koro nehu'za atre'za vu'naze.

*Takisi zago Sisama amizanku Jisasina antahige'naza naneke*  
(Mat 22:15-22; Luk 20:20-26)

<sup>13</sup> Hagi Juda kva vahe'mo'za Jisasina rehe'za kema huhaviza hanige'za, ana ke eri'za keaga hunte'naku, mago'a farisi vahe'ene, Heroti naga'anе huzmantage'za vu'naze. <sup>14</sup> Zamagrama Jisasinte'ma ne-eza anage hu'naze, Hurami ne'moka, tagra antahi'none, kagra tamagege nehunka, mago vahekura koro nosunka, havi vahe'ene fatgo vahe'ene mago'zanke hunka Anumzamofo fatgo kankura rempi huneraminketa nentahune. Hagi knare Sisana takesia amigahumpi omigahune? <sup>15</sup> Hianagi krunage haza nezamageno, anage huno zamasami'ne, **Na'a higetma Nagira renahetma negaze?** **Mago zagoa eritma enkena kaneno,** <sup>16</sup> hige'za mago zago eri'za eme amizageno, **Iza amema'ane avone me'ne?** Hige'za zamagra hu'za, Sisane hu'za hu'naze. <sup>17</sup> Anante Jisasi'a amanage huno hu'ne, **Knareki Sisa zana Sisa amigahaze.** Hagi Anumzamofo zana, Anumzamofo amigahaze huno hige'za tusiza hu'za antri hu'naze.

*Fripinti otino arave hanaza zanku antahige'naza naneke?  
(Mat 22:23-33; Luk 20:27-40)*

<sup>18</sup> Hagi mago'a Satusi mono vahe'mo'za (fripinti o'tigahaze nehaza vahe'mo'za) Jisasinte e'za anage hu'za antahige'naze. <sup>19</sup> Hurami ne'moke, anage huno korapa Mosesi'a avona krerami'ne, mago ne'mo'ma **ara eriteno mofavre onteno frinkeno'a, nefu ana ara erineno, mofavre kasentesigeno, nefu agimo'a fanane osugahie huno avona krente'ne.** (Diu-Kas 25:5-6) <sup>20</sup> Hagi 7ni'a kogna mani'nazafinti, agonesa zimimo ara eriteno mofavre onteno frine. <sup>21</sup> Nagna'amo ana ara eri'ne. Eriteno mofavre onte frigeno, anante'mo'a anazanke huno ana ara eriteno, mofavre onteno fri'ne. <sup>22</sup> Ana 7ni'a kogna naga'mo'za, magore hu'za mofavre kase onte fri vagaretogeno, ana ara henka'a fri'ne. <sup>23</sup> Fripinti'ma oti knazupa, ana maka kognamo'za fripinti'ma oti'nageno'a, iza a' manigahie? Na'ankure maka ana 7ni'a kognamo'za ana ara kazo eritere hute'za fri'naze. <sup>24</sup> Jisasi'a anage huno zamasami'ne, **Hantagama hazana, tamagra Anumzamofo avontafepi kre'nea kea antahitama ketma osuta, Anumzamofo hihamu'a onkenetma nehazafigure.** <sup>25</sup> Na'ankure fri'nehnafinti'ma oti snazana, arave hu'zana omnesigeno, ara vasi omi ami hu'zana omnesigeno, monafinka ankeru vahe'kna hu'za manigahaze. <sup>26</sup> Hianagi tamage nanekema me'neana frite'za otigahaze. Anumzamo'a onensa zafa tevenerefinti Mosesenku ke higeno antahiteno, avontafepi krente'neana omne'negeta hamprita onkenetma nehazo? Anumzamo amanage huno asami'ne, **Nagra Abrahamu Anumza mani'na, Aisaki Anumza mani'na Jekopu Anumza mani'noe.** (Eks-Ati 3:2, 6) <sup>27</sup> Huno hu'negu, Agra fri vahe'mokizmi Anumzana omani'neanki, kasefa hu'za mani'naza vahe'mokizmi Anumza manine, tamagra tusi'a hantaga nehaze.

*Ugota hu'nea kasegemofo naneke  
(Mat 22:34-40; Luk 10:25-28)*

<sup>28</sup> Hagi mago kasegere ugagota hu'nea ne'mo eme antahiamu ke hakare nehazageno, Jisasi'a so'eza huno kenona zimirera nezmasamigeno, ananke eme nentahino, Jisasina antahigeno, Maka kasegefina ina kasegemo vu-gota hu'ne? <sup>29</sup> Higeno Jisasi'a amanage huno hu'ne, **Kagota kasegea amanahu me'ne, Israeli vahe'mota antahihu, Ramo'a tagri Anumzane. Rana agrake mani'ne.** <sup>30</sup> **Kagra kagu'reti Anumza ka'amofona avesinto, maka kamema'reti hunka avesinto, maka antahintahi ka'reti hunka avesinto, maka hanave ka'reti hunka avesinto hu'ne.** (Diu-Kas 6:4-5) <sup>31</sup> Ananteru amanahu kasege me'ne, **kagrugu kavesi nentanaza hunka tva'onkare'ma**

*mani'nenimofona avesinto.* (Lev-Pris 19:18) **Ama tare kasegemofona mago kasegemo'e huno znagateore'ne** <sup>32</sup> Higeno kasegere ugota hu'nea ne'mo'a anage hu'ne, Hurami ne'moka, tamage hunka hane, Agra magoke mani'neankino magore huno amefiga'a vhahera omani'ne. <sup>33</sup> Ana hanigeta Anumzamofona tagu'areti avesinteta, maka antahintahireti avesinteta, maka hanavereti avesinteta, tagragu tavesi nentonaza huta tva'onte maniesaza nagara zmavesinte sunazamo'a, Kresramana vuzane, Anumzamofa hakare zanka'a ami'zana agatereno ugagotaza me'ne. <sup>34</sup> Jisasima antahama ana ne'mo'ma kenona'a hu so'e higeno, anage huno asami'ne, **Kogra Anumzamofo kuma tava'onte mani'nane.** Higeno mago'a vahe'mo'za antahige zankura koro hu'za antahi onke'naze.

*Kraisi'a aza mofavre hu'za hu'naza naneke  
(Mat 22:41-46; Luk 20:41-44)*

<sup>35</sup> Jisas'i'ma ra mono nompi rempi hunezamino'a anage hu'ne, **Na'ante kasegere ugagota hu'naza vahe'mo'za Kraisinkura, Deviti nemofo'e nehaze?**

<sup>36</sup> Hagi Ruotge Avamu'mo Devitina azeri otigeno amanage hu'ne, **Ramo'a anage huno Ranimofonkura hu'ne, Nazantmaga kaziga trate manige'na, ha' vaheka'a kagafinka zamazeri fenkamu atraneno hu'ne.** (Sam-Zga 110:1)  
<sup>37</sup> Devitima agra'ama huno Ranimo'e hanigeno'a, inankna huno Deviti mofavre manigahie?

*Kasegere ugagota hu'naza vaheku kva hanaza naneke  
(Mat 23:1-36; Luk 20:45-47)*

<sup>38</sup> Rempima huzamifina Jisas'i'a anage huno mago'ene zamasami'ne, **Kasegere ugagota hu'naza vahekura kva hiho. Zamagra za'za kukena hu'za maketi kumapi vano nehazage'za hakare vahe'mo'za nezmage'za muse huzmante zanku zamavesi vhahera.** <sup>39</sup> Hanki osi mono nompi vugota hu'nea trate unemaniza, nezama nepina zamagi eri trate nemanize. <sup>40</sup> Kento a'nemokizmi krunage hu'za fenozimi eneri'za zamo, eama hu'zanku za'za nunamu nehaze. Ana hu'negu ama anazamofo mizama'a, agatere'za ranknaza erigahaze.

*Kento a'mo ofa zago ante'nea naneke  
(Luk 21:1-4)*

<sup>41</sup> Jisas'i'ra mono nompi, zagoma nentaza taferomofo tva'onte mani'neno zagoma eme antazana zmage'ne. Fenozimi me'nea vahe'mo'za rama'a zago eme ante'naze. <sup>42</sup> Ana nehageno amunte omane kento a'mo eno, tare osi koranke zago mago toza avamente me'nea erino ana taferoppi eme netregeno, <sup>43</sup> Jisas'i'a amage'ma nentaza disaipol nagara ke hige'za ageno anage huno zamasami'ne, **Tamage hu'na neramasmue, ama amunte omane kento a'mo rama'a zagoa ruga'a vhahera zamagetereno taferopina eme ante'ne.** <sup>44</sup> Na'ankure maka vahe'mo'za rama'a ante'nafinti, osi'a ofa zagoa eme ante'naze. Hianagi ama kento a'mo'a amunte omanetfa hunefinti eri'neama'a ante vaga reneankino, miza seno neneno manisazana omane'ne.

## 13

*Ra mono no tapage hugahie hu'nea naneke  
(Mat 24:1-2; Luk 21:5-6)*

<sup>1</sup> Hagi Jisas'i'ma Ra mono nompinti atiramigeno'a, amage'ma nentaza disaipol nagapinti mago'mo'a anage hu'ne, Hurami ne'moke, asinentike

havereti'ma hiro naro nontamina ki'nazanki ko! <sup>2</sup> Higeno Jisasi'a anage huno zamasami'nne, Tamagra ama hironaro nontami negazo? Mago havemo'a, mago havemofo agofetura omane'tfa hugahie. Mika havemo'a fragru vazi ramigahie.

*Maka'zama vagarenaku hania knafi fore'ma hania zamofo naneke  
(Mat 24:3-14; Luk 21:7-19)*

<sup>3</sup> Anante ra mono nomofo kantu kaziga, Olive agonare Jisasi'a marerino umaninege'za, Pita'ma, Jemisi'ma, Joni'ma, Endru'ma hu'za zamagrake emanine'za Jisasina amanage hu'za antahige'naze. <sup>4</sup> Tagrira tasamio, nankna zupa anzazana fore hugahie? Anazama fore hunaku'ma hanigeno'a, nankna avame'za fore hinketa ketenunkeno, ana knazana fore hugahie? hu'za hu'naze. <sup>5</sup> Hazageno Jisasi'a agafa huno zamasami'nne, Mago'mo havige huno tamavareno havi kante vu'zankura, kva hiho. <sup>6</sup> Rama'a vahe'mo'za Nagri nagifi ne-eza anage hugahaze, nagra ana ne' ama'i neoe nehu'za, rama'a vahe havi kante zamavrentegahaze. <sup>7</sup> Hanki ha'ma hanina kema nentahita, ha'mofo zaho nanekema antahisanuta korora osiho. E'ina hu'zana fore hugahie. Hianagi vagare kna om'e'ne. <sup>8</sup> Hanki anantero mago kumate naga'mo'za, oti'za mago kumate nagara zamahegahaze. Mago kaziga vahe'mo'za oti'za, mago kaziga vahera ha' rezmantegahaze. Ana nehanageno mago'a kumapina imi e'nerisigeno, mago'a kumapina agate'za fore hugahie. Ama ana zamo'a, a'mo'ma mofavre kasentenaku higeno, agafa huno ata negriankna ataza fore hugahie.

<sup>9</sup> Hanki tamagrataenia kva hutma maniho. Kanisolo vahete tamavare'za nevu'za, osi mono nompinti tamavre'za kanonkeve ome nerami'za, rankuma kva vahete'ene kini vahe zamavure tamavrentesageta otigahaze. Na'ankure nagriteku ana hanageno, e'i anazama fore'ma haniana nagri musenkema eri'ama hutma nezmasami'za zanteku fore hugahie. <sup>10</sup> Hanki esera maka mopane mopanena vahe'mo'za Knare Musenkea huama hanageno antahi vagaresageno'e. <sup>11</sup> Hagi keaga hurmanteku tamazeri'za vanagetma, na'ane huta hugahune hutma antahintahi hakarea osiho. Ana knafima hiho huno'ma hania nanekea amare hiho. Na'ankure ana nanekea tamagra'a osugahazanki, Ruotage Avamumo hugahie. <sup>12</sup> Ana knafi nefuna ahe frinogu avare nezaminkeno, nef'a nemofona avreno ahe frinogu ana zanke nehinkeno, mofavremo'za ana zanke huza nerera nefana zamahe frinogu avare zamigahaze. <sup>13</sup> Maka vahe'mo'za tamagrira zamarimpa kna huneramante'za ha' reramantegahaze. Na'ankure Nagri nagimo'a tamagripi me'negu hu'za anara huramante'gahaze. Hianagi iza'o otu hanavetino marinu vu refarega vanimofona agu vazigahie.

*Maka'za agtereno haviza hania zamofo naneke  
(Mat 24:15-28; Luk 21:20-24)*

<sup>14</sup> Hagi Jisasi'a anage huno zamasami'nne, Nanekema hampri snamota, nehamprita ama hiho. Tusi'a havizantfa huno agotenesiazamo, agra otiga osu'nenia trate otina, ana knazupa Judiama mani'nesaza veamo'za freza agonare viho. (Dan 9:27, 11:31, 12:11) <sup>15</sup> Nomofo agofetuma mani'nesamo'za, uramiza nompintira mago'a zana eriza atioramigahaze. <sup>16</sup> Hozafima mani'ne snimo'a, kuma'aregati nakre ku'a eme e'orino. <sup>17</sup> Ananknafima amu'ene hu'nesnia a'negu'ene, mofavre aminte mani'nesnia a'negura, nasunku huzmantoe. <sup>18</sup> Hianagi nunamuna nehinkeno, tusi'a zasi knafina anzazana forera osino. <sup>19</sup> Na'ankure ananknafina tusi'a knaza fore hugahiekino, Anumzamo'ma mopama tro hu'hereti eno menima ehanatinerera,

fore osu'neankna knaza fore hugahie. Hagi henka'a ana hukna knazana fore osutfa hugahie. <sup>20</sup> Ramo'a ana knama eri atupa osanigeno'a, mago'a vahera omanigahie. Hianagi Nagri vahere huno hunefinti huhampri'nea vahekuma agesama antahiteno, ana kna eri atupa hugahie. <sup>21</sup> Ana knafi mago'a vahe'mo'za hu'za, keho ama'i kraisi'e huge, agra antu mani'ne hanagetma tamentintia osutfa hiho! <sup>22</sup> Na'ankure ana knafina mago'a havige kraisi'e huza efore nehu'za, kasnampa vahе efore hu'za, haviza hu'za kagu'vazane avame'za hugahaze. Anama hanazana Anumzamo'ma huhampri zmante'nea vahe'mokizmi, rezmataga hu'naku hugahaze. Hi-anagi zamagra Anumzamo'ma huhampri zamante'nea vahe'ma zamazeri savari hu'nakuma hanuza anara hugahaze. <sup>23</sup> Hagi tamagra kva hutma maniho! Ana maka'zana fore osunege'na, tamagrira neramasamue.

*Vahe'mofo Mofavremo ete esianknamofo naneke  
(Mat 24:29-31; Luk 21:25-28)*

<sup>24</sup> Hianagi ana knafina tusi'a knazamo vagama resigeno'a, zagemo hani hanigeno, ikamo'a remsa osanigeno, <sup>25</sup> monafinti hanafi tamimo'za atafri neraminage'za, monafi me'nea hanave zantamimo'za tore hugahaze. (Ais 13:10, 34:4, Joel 2:31-32) <sup>26</sup> Anante Vahe'mofo Mofavremo'a hampompi, tusi'a hihamu'ane masa'afi ne-esigeta kegahaze. (Dan 7:13) <sup>27</sup> Anante an-kerо vahe'a huzmantena, Anumzamo huhampri zamante'nea vahera mona mopa ome tre emetre kazigatira ome zmavare eme zmavare hu'za zamazeri atru hugahaze.

*Fiki zafamofo fronka naneke  
(Mat 24:32-35; Luk 21:29-33)*

<sup>28</sup> Ama fronka kema fiki zafare'ma hanua fronka kereti antahi'zana eriho. Azanku'namo asinarenо amosrema nehegetma, hago zagegna tava'o nehie hutma nentahize. <sup>29</sup> Hagi tamagra anahu zama fore'ma hanigetma negesnutma, hago Vahe'mofo Mofavre esia kna'a tava'o huno kafante me'ne hutma tamagesa antahilo. <sup>30</sup> Tamage hu'na tamagrira neramasamue. Ama knafi veamota ofri mani'nesnageno, ana zana fore hugahie. <sup>31</sup> Monane mopane fanane hugahianagi, Nagri nanekemo'a fanane osu' mevava hugahie.

*Jisasi'ma esia kna mago vahe'mo'e huno ontahine hu'nea naneke  
(Mat 24:36-44)*

<sup>32</sup> Hianagi mago vahe'mo'e huno anazama fore'ma hania knane zagenena ontahi'ne. Monare nemaniza ankero vahe'mo'za ontahi'zageno, Mofavre'amo'a ontahi'ne. Nefa Agrake ana kna antahi'ne. <sup>33</sup> Kva hunetma retro hutma maniho. Na'ankure tamagra anazama efore'ma hania kna ontahi'naze. <sup>34</sup> Amanahu hugahie, mago ne'mo afete vunaku, kazokzo eriza vahe'a noma'a kegava hiho hunezmanteno, magoke magoke eri'za vahe'a eri'za refko hunezamino, kafante kva nekura kavu antenka maninenka kva hu so'e huo huno hunte'ne. <sup>35</sup> E'ina hu'negu tamagra anahu kna huta, kva hu so'e huta maniho. Nomofa nafa'amo esnia kna ontahi'naze. Kinaga esifi, kenage amu'no esifi, kokore ke nehinkeno esifi, nantera esifi ontahi'naze. <sup>36</sup> Aru masenenageno, ame huno eno eme tamageno eri fore hanigi, kva hutma maniho. <sup>37</sup> Hanki tamagri'ma neramasmuana mifka veaku nehue. Kva huso'e hiho.

## 14

*Kva vahe'mo'za Jisasima ahesnageno frisnia ke retro hu'naza naneke  
(Mat 26:1-5; Luk 22:1-2; Jon 11:45-53)*

<sup>1</sup> Hagi Anumzamo'ma Israeli veama kinafinti zamare'nea kanagu antahimi'za zo'ore breti nenaza kna zahufa tare zagegna me'nege'za, ra mono kva vahe'mo'zane, kasegere ugagota hu'naza vahe'mo'zane, Jisasima havige hunte'za oku azerizama ahesaza kanku hake'za ahe fri'naku huge antahige hu'naze. <sup>2</sup> Na'ankure mafka vahe'mo'za ana ne'zama (pasova) nenaza knare'ma ana'ma hanunke'za, ke hakare nehu'za ha'azeri ot'i'za hugahaze.

*Mago a'mo Jisasina mnanentake masave tagino frente'nea naneke  
(Mat 26:6-13; Jon 12:1-8)*

<sup>3</sup> Hagi Jisasi'a Betani kumate ko'ma fugo namumare'nea ne'mofo Saimoni nompi, zamaza tununte manine'za trateti ne'za nenageno, mago a'mo'a zago'amo'a mareri'nea, manamentake masave zafa rafunareti tro hu'naza, alabasta tafempi erino e'ne. Ana tafe avaza'a runagino Jisasina anumpi taginte'ne. <sup>4</sup> Hianagi mago'amo'za anampi mani'namo'za zamasigu nehu'za, zamagra zamagra anage hu'naze, Na'a higeno ana masavena amne tagi netre? <sup>5</sup> Mizante atreta 300'a silva zago nazana erita zamunte omane vahe zamantesine. Hianagi nahigenka amnefina tagi neutrane? Anage nehu'za ana ara kesu'haze. <sup>6</sup> Hianagi Jisasi'a amanage huno zamasmi'ne, **Arenkeno manino, nahigeta ama ara knanemize?** Agra knare so'eza hunenante. <sup>7</sup> Hianagi zamunte omane veara hakare kna tamagrane mani'enageta, ina knare'ma, knare tamavu tamavama huzmantenaku'ma hanutmä, amne huzamantegahaze. Hianagi Nagra hakare kna tamagranena omanigahue. <sup>8</sup> Agra nazano hunantenaku hiazana hago hunante. Kerifima ufresugu masave frenanteno retro hunante. <sup>9</sup> Nagra tamage hu'na neramasamue, inantego knare musenkeni'a, eri'za kokankoka ome huama hanarega, ama a'mo hu'nea avu'avamofo agenkea, nehanage'za antahigahaze.

*Judasi'ma komoru huno Jisasina ha' vahe avrezmisia naneke  
(Mat 26:14-16; Luk 22:3-6)*

<sup>10</sup> Hagi 12fu'a amage'ma nentaza disaipol nagapinti, Judas Iskarioti'a Jisasina komoru huno avrezamisia naneke vugota mono kva vhahera ome zamasami'ne. <sup>11</sup> Ana nanekema nentahiza muse hunte'naze. Judasina zago kamigahune hu'za huvempa kea asamizageno, Jisasima komoru huno ha' vahe zamazampi avare'zamisia, kanku agafa huno hakre'ne.

*Vagare ne'za Jisasi'a disaipol naga'ane ne'nea naneke  
(Mat 26:17-25; Luk 22:7-14; Jon 13:21-30)*

<sup>12</sup> Hagi (Zo'ore breti nenaza kna efore higeno) ese knazupa kinafinti Anumzamo'ma ozmahe zamagatere'nea kna antahimiza sipisipi afu anenta aheza Kresramana nevaza knazupa, Jisasima amage nentaza disaipol naga'mo'za anage hu'za antahige'naze, Inantega Kagrira kinafinti zmavre'nea knagu antahimi'za nenaza (Pasova) ne'zana retro hugantesunegu kave'nesie? <sup>13</sup> Hazageno Jisasi'a tare disaipol ne'tre amage'ma nentaza nagapinti zanasmino, **Jerusalemi kumapi ufresakeno'a, mago ne'mo'a tima afi kavofi tifino ne-enketa ome tutagiha huntesuta, ana ne'avaririta vugaha'e.**

<sup>14</sup> Hagi ana ne'mo'ma ina nompino umarerisiana, ana nomofo nefana amage huta antahige'o, Rempi hurami ne'mo'a kagrikura huno, inantega disaipol naga'nianena Anumzamo'ma ozmaheno zamagtere'nea

zanku antahimiza nenaza ne'zana, kankamuna me'nea negahune hu'ne. <sup>15</sup> Hanankeno'a mago hunaraginte nomofo anaga kaziga, ra kakamu me'nesifi agra tanaveri hugahie. Anampina ne'zane sipa ko retro hunte'naze. Ana nompi mareritina ne'zana ome retro huranteho. <sup>16</sup> Anage hige'ne ana netre mokea rankumate vu'na'e. Anante Jisasi'ma zanasami'nea kante fore higene ke'na'e. Anumzamo'ma ozmahe zamagatere'nea knagu antahimiza nenaza ne'zana ome retro hu'na'e. <sup>17</sup> Kinaga sege'za, Jisasi ene amagema nentaza 12fu'a disaipol naga'ane e'naze. <sup>18</sup> Ne'zane sipare mani'neza ne'za nenageno, Jisasi'a amanage huno zamasmi'ne, Tamage hu'na neramasamue, amafima magoka nezama nenompinti, mago'moka komoru hunka ha' vahe zamazampi navrentegahane. <sup>19</sup> Hige'za zamarimpamo'a ana kegura kna nehige'za, mago mago'mo'za nagra anara hugahue hunka nehampi? <sup>20</sup> Hazageno Jisasi'a kenona zamirera amanage huno zamasmi'ne, <sup>21</sup> 12fu'a nagamotafinti, Negrane magoka zoumpafinti breti areno nenesnimo'e. <sup>21</sup> Na'ankure Anumzamofo avontafepi krente'nea kante, Vahe'mofa Mofavremo'a vugahie. Hianagi Vahe'mofa mofavrema komoru huno ha' vahe zamazampima avrente'simo'a, knaza erigahiankina nasunku huntoe. Nererama kase onteasina knare'zantfa hisine!

*Jisasi'a bretine wainine zamige'za ne'naza naneke  
(Mat 26:26-30; Luk 22:15-20; 1 Kor 11:23-25)*

<sup>22</sup> Hagi ne'zana nenageno, Jisasi'a mago breti erino Anumzamofo antahigegeno asomu hutegeno, tamanasino nezmino amanage huno zamasmi'ne, *Ama'i Nagri navufe, erita neho.* <sup>23</sup> Hagi waini tintafe erino Anumzamofo nunamu huno antahigegeno asomu huntogeno, zamige'za maka'mo'za anampinti ne'naze. <sup>24</sup> Nenageno amanage huno zamasmi'ne, *Ama'i Nagri korane, ama ana koromo Anumzane huhagerafita manisaza manizana eri kasefa hugahie.* Maka'mofonku huno tagine. <sup>25</sup> Tamage hu'na neramasamue, Waini ragamofo tima'a mago'ene one'na henka'a Anumzamofo kumapi kasefa waini negahue.

<sup>26</sup> Mono zagame hute'za, atirami'za Olive Agonarega vu'naze.

*Pita'a amagena Jisasi humisnia naneke  
(Mat 26:31-35; Luk 22:31-34; Jon 13:36-38)*

<sup>27</sup> Hagi Jisasi'a amanage huno zamasmi'ne, Tamagra makamota na-treta fregahaze. Na'ankure Anumzamofo avontafepina amanage huno krentegeno me'ne, *Anumzamo'na sipisipi afu kva vahe'mofona, ahanena sipisipimo'za panani hu'za ufre efre hugahaze hu'ne.* (Zek 13:7.)

<sup>28</sup> Hianagi fritena otisuna, tamagrira vugota huramante'na Galili vugahue. <sup>29</sup> Higeno Pita'a anage huno Jisasina asami'ne, mika'mo'za kat're'za vanazanagi, nagra katrena ovutfa hugahue. <sup>30</sup> Higeno Pitana kenona Jisasi'a amanage huno asami'ne, *Tamage hu'na negasamue, meni kenagera tare zupa kokoremo'a krafa osu'nesigenka, tagufa zupa Jisasina onke'noa nere hunka vahane hugahane.* <sup>31</sup> Hianagi Pita'a agra'a kere hu hankavetino, vahane huogantegosue nehuno, amne kagranena friga hanigena frigahue huno hu'ne. Hige'za mika'mo'za ana kege'za hu'naze.

*Jisasi'a Getsameni hozafi nunamu hu'nea naneke  
(Mat 26:36-46; Luk 22:39-46)*

<sup>32</sup> Hagi Jisasi'ene amage nentaza disaipol naga'mo'za Getsamenie ne-hazare ehanati'naze. Anante Jisasi'a zmasamino, *Amare mani'enkena nunamuna haneno.*

<sup>33</sup> Anante Pitanki, Jemisinki, Joninki huno zmareno nevigeno, agu'amo'a tusi'gna nehigeno, asunku hu'ne. <sup>34</sup> Jissasi'a amanage huno zamasmi'ne, **Nagu' namemo'a tusi kna navenesino nahe friza nehianki, amare mani'neta kva hiho.** <sup>35</sup> Nehuno osi'a vugamuteno mopafi vutrakahu maseno, Anumzamofonte nunamu ome nehuno, knare'ma hanigeno'a, ana knamo'a evu nagateresie hu'ne. <sup>36</sup> Agra huno, **Aba, Nafanimoke! Maka'zana amane hugahane, ama kapua eri atro.** Hianagi Nagri navesira ovarario, Kagra kavesi avaririo. <sup>37</sup> Ana huteno eno eme amagema nentaza disaipol nagama zamageana masenageno, Pitanku amanage huno antahige'ne, **Saimoniga kavu mase'nano? Knare osi'agnafina kva krigahampi?** <sup>38</sup> Kvahuta mani'neta, nunamuna nehuta revatgazama esifina evuoramiho. Tamagu'amofona avenesianagi, tamavufamofona hanave'a nomane. <sup>39</sup> Ete mago'ane vuno, anahu kna nunamu ome hu'ne. <sup>40</sup> Agrama mago'ene ete eno eme zimageana, mase'nagenokino zamuma hari huzamo'a kna huzmante'ne. Na'ane huta ke'arera hugahune hu'za kegura hake'naze. <sup>41</sup> Anante Jissasi'a mago'ene tagufa zupa zamagrite eno, amanage hu'ne, Tamavu nemaseta manigasa nehazo? Ha vagare! Nagrira knani'a ama eanki keho. Vahe'mofo Mofavrea kumi vahe'mokizmi zamazampi komoru hu'za avrente'gahaze. <sup>42</sup> Otinketa tagra vamaneno! Keho Nagri'ma komoru huno ha'vahe zamazampima navrentesia nera, ama erava'o nehie.

*Komoru hige'za Jisasi azeri'naza naneke  
(Mat 26:47-56; Luk 22:47-53; Jon 18:3-12)*

<sup>43</sup> Hagi anankea huvaga ore'negeno, amage'ma nentaza 12fu'a disaipol nagapinti mago'zmimo, Judas Iskarioti anante ehanatine. Agri'enena sondia vahe'mo'za kazikontamine, kumpa knozmine eri'neza, pristi kva vahe'mo'zane, kasegere ugagota hu'naza vahe'mo'zane, ugota kva vahe'mo'za huzmantage'za e'naze. <sup>44</sup> Hagi Judasi'a ha'vahe zamazampi komoru huno avrezmi ne'mo'a anage huno zamasami'ne, Amanahu avame'za hugahuanki keho, ome agi'ma antakoma hanuana, e'i ana neki ome azerita kegava huta avreta viho. <sup>45</sup> Hagi Judasi'ma anantema ne-eno'a, Jisasinte hantka huno vuno, Rempi Hurami Nemoke, nehuno agira antako hu'ne. <sup>46</sup> Anante mafka vahe'mo'za zamaza ante'za, azeri'naze. <sup>47</sup> Hianagi oti'nazafinti mago'mo kazinknoma'a erisaga huno, ugagota pristi ne'mofo kazokzo eriza ne'mofo agesa rukfri atre'ne. <sup>48</sup> Jissasi'a amanage huno zamasami'ne, **Nahigeta Nagri nazeriku bainati kazintamine kumpa knontaminena eneritma kumzafa vahe zamazeri ku nehazankna hutma neaze?** <sup>49</sup> Maka knane knane, ra mono nompi tamagrane maninena rempi huneramugeta, naze'ori'naze. Hianagi amama fore'ma nehizana, korapa avontafeipi kre'nea kemofo avufga'a fore nehie. <sup>50</sup> Anage nehige'za amage'ma nentaza naga'mo'za, atre'za koro fre'naze. <sup>51</sup> Mago nehaza nera amage anteno vu'nea ne'mo'a, mago'a kukena osu'neanki za'za kukenage'za hu'nea ne' azeri'naze. <sup>52</sup> Hianagi ana za'za kukena'a ruzafi atreno, avufa avapa koro fre'ne.

*Jisasina avre'za mono kanisolo vahete vu'naza naneke  
(Mat 26:57-68; Luk 22:54-55,63-71; Jon 18:13-14,19-24)*

<sup>53</sup> Hagi anante Jisasina avare'za ugagota pristi kva nete vazageno, ranra pristi kva vahe'mo'zane ranra kva vahe'mo'zane, kasegere ugota hu'naza vahe'mo'za atru hu'naze. <sup>54</sup> Pita'a, Jisasina amefi afete avaririno, ugagota pristi ne'mofo kumapi ufre'ne. Teve hegare'nare avufa ome tonehino ra mono noma kegava nehaza ati vahe'ene umani'ne. <sup>55</sup> Ugagota pristi

vahe'mo'zane, maka kanisolo vahe'mo'za Jisasina havige hunte'za ahesnaza ke agafa'agu hakre'naze. Hianagi magore hu'za ke'za eri fore osu'naze. <sup>56</sup> Rama'a vahe'mo'za havige hunte'nazankino, ana kezmimo'a magoke kantera ovu'ne.

<sup>57</sup> Mago'amo'za oti'za amanage hu'za havige hunte'za, <sup>58</sup> Tagra nentahun-keno ama ne'mo'a anage hu'ne, Ra mono nona vahe'mo'za zamazanuti ki'naza nona tapage hunetrena, tagufa knamofo agu'afi vahe'mo azanuti onki'nea mono no ru kigahue hu'ne. <sup>59</sup> Hianagi kezamimo'a fatgo osu'ne.

<sup>60</sup> Anante ugagota pristi kva ne'mo zamuga otino, anage huno Jisasina antahige'ne, na'ane hunka kezimirera huzmantegahane? Na'anku Kagririra keaga hunegantaze? <sup>61</sup> Hianagi ke nona'a osu akoheno mani'negeno, mago'ene ugota pristi ne'mo'a antahigeno, Kagra Kraisigo, Mrerisa Anumzamofo mofavremokafi? <sup>62</sup> Jisasi'a huno, *E'i Nagre kagra negesankeno, Vahe'mofo Mofavremo Anumzamofona azantmaga kaziga manino hampompi tusi'a hanave'ane egahie.* (Eks-Utr 3:14, Sam-Zga 110:1)

<sup>63</sup> Anankema nentahino, ugota pristi ne'mo agra'a kukena eri tagato nehuno anage hu'ne. Na'anku mago'enena keagama hufore hunte vahekura hakegahune. <sup>64</sup> Hagi tamagra nentahizageno Ramofona huhaviza hunte'ne! Tamagra na'ane hutma hugahaze? Makamo'za huza Anumzamofo huhaviza hunteankino frisie hu'za hunte'naze. <sup>65</sup> Anante mago'amo'za zamavetu ahenente'za avu kisu hune'za, zamaza knonu nehe'za, Kagra kasnampa ke hunka, iza negahefi hufore huo. Mago'a ra mono noma kegava nehaza ati vahe'mo'zanena avugosa ruhapat'i za ahe'naze.

*Pita'a Jisasinku, onke'noe hu'nea naneke  
(Mat 26:69-75; Luk 22:56-62; Jon 18:15-18,25-27)*

<sup>66</sup> Hagi Pita'a ufenkamuteno kva nemofo kumapi mani'negeno, anante ugagota pristi nemofo eri'za mofane zaga finti mago'mo e'no, <sup>67</sup> Pita'ma teve tonehino mani'negeno eme negeno, kagranena Nazareti kumateti' Jisasi'ene vanoma nehana ne' mani'nane hu'ne. <sup>68</sup> Hianagi Pita'a vahane huno, nagra antahina kena osu'nogenka nehane! Anante kama emrerite nevigeno mago kokorege hu'ne. <sup>69</sup> Ete ana mofa'mo mago'ene Pita' negeno anante oti'naza vahe zmasmino, e'i nera Jisasi amage anteno vano nehia nere huno hu'ne! <sup>70</sup> Hianagi ete Pita'a, mago'ene vahane hu'ne. Anante oti'naza vahe'mo'za, osiagna manige'za Pitankura anage hu'za, tamage kagra mago zmimoke. Na'ankure Galili ne' tfa mani'hane. <sup>71</sup> Anante Pita'a Ontahinoa neku nehaze nehuno, nagra tamage ana nekuma havigema hanenkeno'a, huvempa huankino Anumzamo nazeri haviza hanie huno, <sup>72</sup> nehigeno, ame huno mago'anee anante kokorege nehigeno, Pita'a, Jisasi'ma asmi'nea kegu agesa antahi'ne. *Tare zupa kokorege osurenigenka, tagufa zupa Nagrikura onkenoe hunka vahane* hugahanema huno asami'nea kegu agesa nentahino zavite'ne.

## 15

*Jisasina Paerotinte avare'za vu'naza naneke  
(Mat 27:1-2,11-14; Luk 23:1-5; Jon 18:28-38)*

<sup>1</sup> Hagi nanterame ranra pristi mono kva vahe'mo'zane, ranra kva vahe'mo'zane, kasegere ugagota hu'naza vahe'mo'zane, maka kanisol vahe'mo'za, ome atru hute'za, Jisasina nofi kinte'za avre'za Paeroti ome ami'naze. <sup>2</sup> Paeroti'a agenoka huno, Kagra Jiu vahe'mokizmi kini mani'nano? huno Jisasina antahige'ne. *E'i kagra nehanane* huno Jisasi'a

hu'ne. <sup>3</sup> Anante ranra pristi kva vahe'mo'za, Jisasinkura rama'a haviza hu'ne hu'za hunte'naze. <sup>4</sup> Paeroti'a mago'ane agenoka huno, Ko, Kagrirra rama'a ke hunegantazanki, Kagra ke zamirera kenona hugahampi? <sup>5</sup> Hianagi Jisasi'a ana kemofo nona'a osu mani'negeno, Paeroti'a tusiza huno antri nehuno agogogu hu'ne.

*Jisasi ahe nefrinka Barabas tamio hu'naza naneke  
(Mat 27:15-26; Luk 23:13-25; Jon 18:39-19:16)*

<sup>6</sup> Kafune kafune Anumzamo kinafinti zmauvre'nea knama egeno'a, Paeroti'a kina vahepintima zmavesimofonku hazageno kazufe netrea kna e'ne. <sup>7</sup> Hagi ana knafina mago nera Barabasi'e nehia ne'ene, mago'a kamani vahe'mo'zane ha' hu'naza knafi, vahe zamahe fri'naza zanku kina huzmante'naza vahe'ene anampina mani'naze. <sup>8</sup> Hagi maka veamo'za Paerotinte e'za, ana kna'ma egeno nehiaza huno kina vahe katufe atresnigu antahige'naze. <sup>9</sup> Anante Paeroti'a kenona huno anage hu'ne, Jiu vahe kini ne' katufe tamisuegu tamave'nesio? <sup>10</sup> Na'ankure agra, ranra pristi kva vahe'mo'za kanive renente'za, avare'za eme ami'zama'a ko antahi'ne. <sup>11</sup> Hianagi ranra pristi kva vahe'mo'za maka vahe zamarimpamereku'za, Barabasi kazufe tamio hutma hiho hu'za zmasami'naze. <sup>12</sup> Anante Paeroti'a mago'ene kenona huno, Jiu vahe kinie hutma nehaza nera, na'a huntuesuegu tmave'nesie? <sup>13</sup> Hige'za ete mago'ane kezati'za, Aheta kekazafare hantiho hu'naze. <sup>14</sup> Hianagi Paeroti'a anage huno zamasami'ne, na'a kefoza hune, inankna kefoza hu'negeta aheta hantiho nehaze? Hianagi zamagra mago'ene ranke hu'za, ahe friho hu'naze. <sup>15</sup> Na'ankure Paeroti'a ana maka veamokizmi zamarimpamo so'e hania kazigati, Barabasi kazufe nezamino, Jisasina sefu amiho hige'za, sefu amitazageno keka zafare ahe'za hantisagu avrezmi'ne.

*Sondia vahe'mo'za Jisasina azanva ante'naza naneke  
(Mat 27:27-31; Jon 19:2-3)*

<sup>16</sup> Anante sondia vahe'mo'za avare'za marerisa kumapi ufre'naze. (E'i ana kumara Gavana ne'mofo kumapi) maka Romu sondia vahetamina ome ke hutru hu'naze. <sup>17</sup> Zamagra fitunke kukena hunente'za, ave'ave nofite kini vahe'mokizmi fetorikna huza fetori tro hu'za asenire antaninte'naze. <sup>18</sup> Kezanke hunte'za, Jiu vahe'mofo kinimokagura ferure hugatone. <sup>19</sup> Mago'ane kno eriza asenire nemasagi'za, zmavetu ahenente'za, zmarena renamagiza, pri hu'za havi mono hunte'naze. <sup>20</sup> Zamagrama azanava anteteza fitunke kukena erizafi netre'za, ete Agri kukena eri huntete'za, keka zafare aheza hantinaku megi'a avare'za vu'naze.

*Keka zafare Jisasina ahe'naza naneke*

<sup>21</sup> Hagi Sairini kumateti ne' Saimoni, (Aleksendane Rufusikizni neznafa) fegu'ati rankumapi evu frenaku enevige'za, Jisasi keka zafa'a erio hu'za hunente'za kofintageno eri'ne. <sup>22</sup> Hagi Jisasina avare'za Golgotu nehaza agonare uhanati'naze. (Tagri kefima rukrahe'ma hanunana, anu zaferine hu'ne.) <sup>23</sup> Anante waini tine mere zafa arima'anemagopi taginte'za eri havia hute'za tagiam'i'zana, one atre'ne.

<sup>24</sup> Hagi Jisasina rugeka zafare ahe'za hantite'za, mago'mo tagatere simo erisie nehu'za taisi zokogo re'za kukena'a refko hu'naze. <sup>25</sup> Nanterama zage hanatino 9 kiloki hige'za, Jisasina rugeka zafare ahe'za hanti'naze.

**26** Ahe'naza nanekemofo agafa'ama avoma krente'nazana, JIU VAHE'MOKIZMI KINI NERE, hu'za krente'naze. **27** Ana nehu'za tare kumzafa netrena magoka zanahete'za, magomofona azantmaga'a nehantiza, magomofona hoga'a hanti'naze. **28** [Ana hazageno korapa'ma Anumzamofo avontafepima kre'nea kemofo avufga'a efore' hu'ne. Ana kemo'a, hazenke vahé'kna hugahie hu'ne (Ais 53:12)]. **29** Hagi anante'ma vute ete nehu'za vahé'mo'za azanava ke hu'za, Oho! Kagra ra mono nona tapage hunka tagufa knafi kigahue hu'nana nere, nehu'za zmage'na ru'naze. **30** Kagra ka'a kaza hunka keka zafaretira eramio, hu'naze! **31** Anahukna hu'za ranra pristi kva vahé'mo'zane kasegere ugagota hu'naza vahé'mo'za, azanava ke hunte'za, Ru vahé azama nehiaza huno Agrá'a aza osugahifi? **32** Atregeno Kraisi'a Israeli vahé'mokizmi kini ne'mo'a, keka zafaretira menina eraminketa negeta, tamentinti hamaneno! Tare ne'trema keka zafare'ma ahe'za hanti'naza ne'tremokea, anazanke huke Jisasina azanava ke hunte'nae.

*Jisasi fri'nea naneke  
(Mat 27:45-56; Luk 23:44-49; Jon 19:28-30)*

**33** Hagi ana knazupa zagemo'a feru trage higeno, maka ana mopafina hanimo refitegeno vuno kinaga 3 kiloki higeno rumasa hu'ne. **34** Tri (3) kiloki higeno Jisasi'a Arami kefinti ranke huno kezatino, **ELOI ELOI LEMA SABATANI?** Anankemofo agafa'amo'a anage hu'ne, **ANUMZANIMOKE ANUMZANIMOKE, NAHIGENKA KAMAGENA HUNENAMINE?** (Sam-Zga 22:1)

**35** Hanki tava'onte mani'naza vahé'mo'za nentahi'za, anage hu'naze, Antahiho, Elajanku ke nehie hu'za hu'naze. **36** Hagi mago'mo aga reno vuno mi'mi'tata hu'nea waini timpi kapukua ome reteno, zotare vazigase huno erino Jisasi'ma nesigu eme nemino anage hu'ne, Atrenenketa Elajama eme avarefenka atresigura kamneno! **37** Hianagi Jisasi'a rankrafa nehuno, vagare asimu anteteno fri'ne. **38** Ana nehigeno ra mono nomofo agu'afi hanti'naza tavaravemo, anagamuti ruhakeke hutare huno henkamu erami'ne. **39** Hanki 100'a sondia vahete kva (centurian) ne'mo Jisasina avuga mani'neno Jisasima nefrinoma hiazana keteno anage huno hu'ne. Tamage ama nera Anumzamofo Mofavre mani'ne huno hu'ne! **40** Hagi mago'a a'nemo'za ogantu'a mani'ne'za uruha ke'naze. Ana a'nefina, Mak-dala kumateti Mariaki, Saromeki mago Mariaki (osi Jemisine, Josefekizni neznarerakji) hu'za mani'naze. **41** Ana a'ne zagamo'za Jisasi Galili mopare mani'nege'za amage nente'za aza nehaza ane zagane, mago'a anampina Jerusalemi ne-ege'zaavaririza e'naza ane zagane mani'naze.

*Jisasi'ma asente'naza naneke  
(Mat 27:57-61; Luk 23:50-56; Jon 19:38-42)*

**42** Hagi anazama fore hu'neana Frante zupa kinage. Mani fru hukna esigu (Sabat) retro tra nehaza kna e'ne. **43** Arimatia kumateti ne' Josefe'a koro osu hanave enerino, Jisasi avufa'ama erisigu Paeroti ome antahige'ne. (Ana nera kanisol vahepina agi me'negeno, Anumzamofo Kuma esigu nentahino aveganentea nere.) **44** Hagi Jisasi'ma frine higeno'a, Paeroti'a antri nehuno, 100'a sondia vahete kva (centurian) ne' ke huno frinesigu antahige'ne. **45** Ana sondia kva ne'mo hago fri'ne huno Paerotinaasmigeno, Knareki avufga'a erinka vuo huno Josefena hunte'ne. **46** Higeno Josefe'ma efeke tavrave miza huno avufa'a eri mopafi atreno, ana efeke tavravenu kazrinteno, havefi frage'za tro hunte'naza kerifi ome asenteteno, have

rekrehe huno kama ufrete runkanire'ne. <sup>47</sup> Makdala kumateti Mariaki, mago Mariaki Josefe nereraki huke anama asentea kumara ke'na'e.

## 16

### *Jisasi'a fripinti oti'nea naneke*

<sup>1</sup> Hagi mani fruhu kna (Sabat) vagarege'za Makdalati Mariaki, mago Maria Jemisi nereraki, Salomeki hu'za manamentake masave Jisasi avufare ome frentenaku miza se'naze. <sup>2</sup> Ana wikimofo ese knazupa (Sonta) nanterame zage nehanatige'za, Jisasi kerirega vu'naze. <sup>3</sup> Nevu'za ontahige antahige hu'za, kerimofo kafantema rehiza hu'nea havea iza rekrehutregahie, hu'za hume vu'naze. <sup>4</sup> Hianagi tusi'a haveagi, ko revahe hutrenege'za ome ke'naze. <sup>5</sup> Anante have kerigampi ufre'za kazana, mago nehaza ne'mo efeke kukena huno tamaga'a kaziga mani'nege'za ome nege'za zamagogogou hu'naze. <sup>6</sup> Hianagi anage huno zamasami'ne, Tamagogogura osiho. Nazareti Jisasima keka zafarema ahe'naza ne'ku nehakaze. Hianagi Agra ko oti'ne. Amafina omanine, avufa'ama ante'nazarera ami'nagi keho! <sup>7</sup> Hianagi vutma amage'ma nentaza disaipol naga'an, Pitanena ome zmasamihio, Agra vugota huno Galili vu'ne, koma tmasami'nea kante antetma anantega Jisasina ome kegahaze. <sup>8</sup> Anagema hige'za zmagare'za keria atre'za atinerami'za, zmahirahi nerege'za zamagogogou hu'naze. Na'ankure zamagra koro nehu'za, mago vahere hu'za ozmasami'naze.

### *Jisasi'a amage'nen taza disaipol nagate efore hu'nea naneke (Mat 28:9-10; Jon 20:11-18)*

<sup>9</sup> [Hagi ana wikimofo ese zupa (Sonta), nanterame Jisasi'a fri'nefinti otiteno, esera Makdala kumate a' Mariana, 7ni'a havi avamu agu'afi mani'negeno eri atrente'nea ate efore hu'ne. <sup>10</sup> Hagi Jisasi'ene vano nehaza vahe'mo'za zavi krafage nehazageno ana a'mo'a ome zamasami'ne. <sup>11</sup> Ana a'mo'a, Jisasi'a otino asimu erino maninege'na ke'noe huno'ma hia kegura, antahi omi'naze.

### *Tare amage'ma nenta'a disaipol netremoke Jisasi ke'na'a naneke (Luk 24:13-35)*

<sup>12</sup> Hagi ana'ma hutegeno tare netremo'kea Jerusalemi atreke fegi'a nevakeno, Jisasi avufagamo'a ruzahne nehigeno zanagrite efore hu'ne. <sup>13</sup> Fore nehige'ne kete'ne rukrehe hune e'ne, mago'a disaipol nagama mani'namokizmi eme zamasamizage'za, anankegura zamentinti osu'naze.

### *Jisasi'a amage'nen taza naga'a eri'za zmi'nea naneke (Mat 28:16-20; Luk 24:36-49; Jon 20:19-23; Apo 1:6-8)*

<sup>14</sup> Ana huteno 11ni'a amage'ma nentaza disaipol nagatera, ne'za nene'za maninageno, Jisasi'a zmagrite efore nehuno, frinefinti oti'ne hu'za zmasami'naza kere antahi ozami'naza zankura, nahigeta tamentintia osu'naze huno ke zamasu'ne. <sup>15</sup> Anage hu'ne, maka moparega vutma Knare Musenkea ome huama hutma, hakare vahera zamasamihio. <sup>16</sup> Hagi iza'o Nagrite'ma amentinti nehuno, mono ti fresnimofona Anumzamo'a agu'vazina knare huno manigahie. Hianagi iza'o amentinti osanimo'a, keagafi manino fanana hugahie. <sup>17</sup> Hagi zamentinti hanamo'za amanahu avame'za erigahaze. Nagri nagirera havi avamura hunente'za, kasefa zamageru arugahaze. <sup>18</sup> Ha' osifa'vea zamazanu azeneri'za, avuataga zama nesnaza'zamo'a zamazeri haviza nosinke'za, kri vahete zamazama antesageno'a, krizamimo'a amane hinke'za, knare hu'za manigahaze.

*Jisasina avregeno monafi mareri'nea naneke  
(Luk 24:50-53; Apo 1:9-11)*

<sup>19</sup> Hagi anagema huno Rana Jisasima zamasmitegeno'a, Anumzamo'a Jisasina awareno monafi marerino, azantmaga kaziga ome antegeno mani'ne. <sup>20</sup> Ana huno vutege'za, amage'ma nentaza naga'mo'za maka kaziga vano nehu'za, Ramofona ke'a huama nehazageno, Jisasi'a ana kezmia eri hanavetino avame'zane, kaguva'zanena anama hazankefina hu'ne].

## Luk Knare Musenke Luku Kre'nea Naneke

### *Luku ama avona Tiofolisima kre ami'nea naneke*

<sup>1</sup> Hagi Tiofolisiga, korapara rama'a vahe'mo'za zamazanu kre'za eritru hute'za, Anumzamo tagripi erifore hu'nea zamofo nanekea kre'naze. <sup>2</sup> Ese agafare'ma Ramofo eri'za e'neri'za zamavunuma ke'naza vahe'mo'za, anama ke'nazaza krente'naza hunerasamizageta, ama ana naneke krente'none. <sup>3</sup> Ana hu'negu ese agafare'ma fore'ma hige'za krente'naza zana, rezagane so'e hu'na kogeno knaretfa hunantege'na, anama hu'nea kante ante'na, knare ne'moka Tiofolisiga krenegamue. <sup>4</sup> E'i anazanku koma rempima hugamigenka antahinana tamage nanekea, nentahinka tamage huogu nehue.

### *Jonima kasentesia zamofo ke ankeromo Zekaraia asami'nea naneke*

<sup>5</sup> Hagi Herotima kinima Judia kaziga mani'nea knafina, mago pristi nera Zekaraia'e nehia nera, Abaiza nagapinti ne' mani'ne. Hagi nenaro agi'a Elisabeti'e, Aroni nagapinti efore hu'ne. <sup>6</sup> Ana aravemokea Anumzamofo avurera fatgo hu'ne ne' mani'ne, Ramofo maka kasegene tra kea amage nentene, mago havi avu'avara osuke, fatgo huke Ramofontera mani'na'e. <sup>7</sup> Hu'neangi mofavre onte'na'e. Na'ankure Elisabeti'a mofavre onteno nar-avo mani'gene tavava ozafa re'na'e.

<sup>8</sup> Mago zupa Zekaraia ene ra mono nompi Anumzamofonte kre sramnavu pristi eri'za eneri'za naga'mo'za, zamagrama eri'zama eneri'za kna ege'za emetru hu'naze. <sup>9</sup> Hagi pristi vahe'mo'za koma zamuzmapina Kresramana vunaku taisi zokago razageno, iza agimo'ma e'amama himofo huntageno Ra Anumzamofo ra mono nompi ufreto Ramofonte Kresramana nevia kante, Zekaraina ana hu'za huntageno Kresramana mananentake'za hu'naku ufre'ne. <sup>10</sup> Hagi rama'a vahe'mo'za fegi'a ra mono no agu'afi manine'za, ana gnamofo agu'afina (hour) nunamu nehazageno agu'afina mananentake'za Kresramana vu erizana eri'naze. <sup>11</sup> Magora Ramofo ankeromo kre sramnavu tra'mofona tmaga kaziga efore huno oti'ne. <sup>12</sup> Ana'ma higeno'a Zekaraiama ankeroma negeno'a, antri nehuno koro hu'ne. <sup>13</sup> Hianagi ankeromo'a anage huno hu'ne, Zekaraiaga korora osuo, na'ankure nunamunka'a Anumzamo'a antahi'neankino, neganaro Elisabeti'a mago ne'mofavre kasentegahie. Agi'a Joni'e hunka antemigahane.

<sup>14</sup> Ana mofavre kasentenkeno krimpa so'e nehina muse hugahane. Hanki rama'a vahe'mo'za ana mofavrema kasente'nia kema antahisuza anazanke hu'za muse hugahaze. <sup>15</sup> Na'ankure Ramofo avurera ra vahe trohuno manigahie. Agra waini tine, hanave tinena onetfa hugahie. Na'ankure nerera rimpafi mani'enigeno'a Ruotge Avamumo'a agu'afi fre avitegahie. <sup>16</sup> Ana mofavremo'a hakare Israeli vahe'mokizmi zamazeri rukrahe hinke'za, Rana Anumzazimire egahaze. <sup>17</sup> Ana nehuno agra Ramofona ugota huno nevuno, Elaija'ma eri'neankna hanavene avamu'ene enerino, **afahemokizmia zamagu'a zamazeri rukrehe hina mofavrezmire ne-enageno** keontahi vahe'mokizamia zamazeri rukrehe hinke'za kentahi vahe manisaza zamo'a, Ramo'ma esiazamofonka retro huntegahie. (Mal 4:5-6.)

<sup>18</sup> Hanki Zekaraia anage huno ankeromofona asami'ne, nankna hanige'na nagra kena antahi'na hugahue? Nagra ozafa rogeno, a'nimo'a anahukna huno tavavate'ne higeno, <sup>19</sup> ankeromo'a anage huno asami'ne, Nagra ankeromo ne' Gebrieline, Anumzamofo tava'onte nemanuankino, Anumzamo hunanteno, ama Knare Musenke erinka ome asamio huno hunanteg'e'na, eme negasamue. (Den 8:16) <sup>20</sup> Hanki kagra kama antahio, knare ke negasamugenka kamentinti osanku, kagerura orunka mani'nenankeno ana kna forehina kea hugahane. <sup>21</sup> Hagi meg'i ra mono nompi Zekaraia avega mani'naza vahe'mo'za, agafa hu'za antahintahi hakare nehu'za, na'a higeno agru huno Ruotage hu'nea nompina zazakna nemanie hu'za hu'naze. <sup>22</sup> Hianagi agrama megia ne-eno'a kea eme huozami avame name hige'za, zamagrama zmagesama antahi'zana, mago'aza agru huno routage nompina efore higeno ke'ne hu'za hu'naze. <sup>23</sup> Ra mono nompima kre sramnavu eriza kna'amo vagaregeno, atreno noma'arega vu'ne.

<sup>24</sup> Hagi mago'agna evigeno, Elisabeti'a amu'ene huno mani frakino mani'negeno, 5fu'a ika enevigeno, amanage huno hu'ne. <sup>25</sup> Amazana Ramo asunku hunenanteno vahe'mo'zama mofavre onte a're hu'za nehu'za nagazema eri nemamiza zana eri atre'nante.

### *Jisasima kasentesia zamofo naneke*

<sup>26</sup> Elisabeti'a 6si'a ika amu'ene huno mani'negeno, mago ankeromofo agi'a Gebrieli'e nehimifo Anumzamo'a huntegeno, Galili kaziga osi kuma Nazaretie nehaza kumate uhanatino, <sup>27</sup> Maria'a vene omase'nea mofara, Josefe Deviti negeho a' erigahie huza huhampriante'naza mofate uhanati'ne. <sup>28</sup> Ana ankeromo'a Mariante ehanatino anage hu'ne, Knare kne Mariaga, Anumzamo'ma avesigantenemoka, Ramo'a kagrane mani'ne. <sup>29</sup> Hianagi ana mofa'mo'a, ana musenkema nentahino'a, antahintahi hakare nehuno, ama kea nankna agu'agesa me'nea musenke nehie huno hu'ne. <sup>30</sup> Ana higeno ankeromo'a ana mofamofonkura anage hu'ne, Korora osuo Mariaga, na'ankure Anumzamo'a kagrira antahi muse hunegante. <sup>31</sup> Hanki kama antahio, kagra kamu'ene hunka ne'mofavre kasentenka agi'a, Jisasi'e hunka antegahane. <sup>32</sup> Ana mofavremo'a ra vahe fore nehinke'za vahe'mo'za, Marerisa Anumzamofo Mofavre nehnageno, negeho Deviti kini trara, Anumzamo'a eri aminigeno kini manigahie. <sup>33</sup> Agra, Jekopu nagate kegava huzmante vava nehinkeno, kini eri'zama'amo ene Agrama kegava hania kumamo'a mevava hugahie. <sup>34</sup> Maria'a anage huno ankeromofo asami'ne, Nagra venena omase'noanki inankna huno fore huku higenka nehane? <sup>35</sup> Higeno ankeromo'a kenona'a anage huno asami'ne, Ruotge Avamumo kagrite ne-enkenka, Marerisa Anumzamofo hihamu'amo refitegantegahie. E'ina hu'negu ksentesana Mofavremo'a ruotge hanigeno, Anumzamofo mofavre hu'za hugahaze. <sup>36</sup> Hanki ko, negamomo Elizabeti'a anahukna huno tavava'tefinka amu'ene hu'ne. Naravo a' manino mofavre onte are hu'nazanagi, menina amu'ene higeno' 6si'a ika agatere'ne. <sup>37</sup> Na'ankure Anumzamofontera mago'zamo'e huno amuho osugahie. <sup>38</sup> Higeno Mari'a anage hu'ne, Izo nagra Ramofo kazokzo eri'za a' mani'noe. Hagi atregeno kema hanankante efore hino, higeno ankeromo'a atreno vu'ne.

### *Maria'a Elizabeti ome kenaku vu'nea naneke*

<sup>39</sup> Ana knafina Maria'a agona kumatega ame huno otino Judia kaziga rankumate uhanatino, <sup>40</sup> Zekaraia nompi umarerino, knare kne huno Elisabetina humuse huntene. <sup>41</sup> Maria'ma knare kne huntea kema, Elisabeti'ma nentahigeno'a, rimpafi mani'nea mofavremo'a muse nehuno, haru huno marerigeno Ruotage Avamumo'a Elisabetina agu'afi frevite'nne. <sup>42</sup> Ana higeno ana amo'a ranke huno, Maka a'nerofo asomura agatereno kagira rama'a asomu Anumzamo'a huneganteno, karimpafima mani'nea mofavrea asomu huntene! <sup>43</sup> Nagra iz'a na mani'nogeno Ranimofo nerera'a, eno eme nage. <sup>44</sup> Hanki antahio, kagra humuse hunka, anama knare kne hunka nehankena nentahugenno'a, narimpafi mani'nea mofavremo'a haru huno marenerino muse hu'ne. <sup>45</sup> Hagi Ramo'ma hu'nea kemofo kamentinti hanku, asomu hunegantena, anama hu'nea kemo'a, kagripi avufa'a efore hugahie.

### *Maria'a Anumzamofo muse hunenteno zagame hu'nea naneke*

<sup>46</sup> Maria'a amanage hu'ne, Nagu'amo'a Ramofo ragi amigeno, <sup>47</sup> nagri avamunimo'a naguvazi Anumzamofo agafa huno muse huntene. <sup>48</sup> Na'ankure Agra anteramina kazokzo eriza vahe'ama mani'noana navu'navara nage'ne. Menima agafa huno vaniana maka vahe'mo'za Anumzamo'a asomu hunte'ne hu'za hugahaze. <sup>49</sup> Na'ankure Hihamu'anee Anumzamo'a raza hunante'ne, Agri agi'a ruotage hu'nemo'e. <sup>50</sup> Izazo Agriku koro hunentaza mokizmia Agra asuragizmanteno zamaza nehuno, zamagripinti efore hunante anante hanamokizmia anazanke huzmantegahie. <sup>51</sup> Ramo'a hanavenentake avu'avaza azanura eri fore nehuno, antahintahizmifima zamagima eri'za marenere'i'za vahera zamahe panani hu'ne. <sup>52</sup> Agra hanave kini vahera, kini tratetira zamazuhu fenkama netreno, anteramiza nemaniza vahera ana kini trate zamavare ante'ne. <sup>53</sup> Zamagaku haza vahera, knare'zanu erivite'nezmanteno, fenomo avite'nea vahera, zamaza zamavapa huzmanteg'e'za nevaze. <sup>54</sup> Agra eri'za vahe'a Israeli vahe zamaza nehuno, asunku huzmantegahue huno huvempa hu'nea kegura agera nokanie. <sup>55</sup> Tahi'mofo koma mevava huvempa ke Abrahanku asamino, agehem'o'ma fore hunante fore hunante knane knane hu'noma esia vahe zamaza huku hunte'ne. <sup>56</sup> Maria'a anage huno Elisabetina asamiteno, 3'a ika agranena maniteno noma'arega vu'ne.

### *Elisabeti'a Joni kasente'nea naneke*

<sup>57</sup> Hagi Elisabeti'a mofavre kasentesia kna egeno, ne' mofavre kasente'ne. <sup>58</sup> Ana a'mofo naga'mo'zane, agri kumapi naga'mo'za Ramofo asuntagizamo'ma Elisabetinte'ma eama hu'nea kema nentahiza rama'a musenkase agrane hu'naze. <sup>59</sup> Hagi 8 knazupa Mosesese kasegemo'ma hu'nea kante ante'za avufa taga huku e'za, nefu agire Zekaraia'e huta agi'a asamresune hu'za hu'naze. <sup>60</sup> Hianagi nerera'a kenona huno, Ama mofavre'mofo agi'a Joni'e huta antegahune higeno, <sup>61</sup> zamagra anage hu'naze. Tamagri naga'pina mago'mofo agi'a Joni'e agine vahera omani'ne. <sup>62</sup> Hu'za nehu'za, nefana zamazanu avame'name hu'za iz'a'e hunka agi'a antegahane hu'za antahigageno, <sup>63</sup> avontafe eritma echo huno azanu avame'name hige'za eri'za eme amizageno, agi'a Joni'e huno avonakre zamige'za nege'za antri hute'za, hakare zamagesa nentahizageno, <sup>64</sup> ame huno Zekaraia agimo'a aka higeno, agefunamo'a agafa huno eri'za erigeno, Anumzamofo agi' erisaga hu'ne. <sup>65</sup> Hagi ana higeno, anama megagi'nea kumate maka vahe'mokizimi tusi

zamagogo nefefe'za, maka Judia agona kumatega ana agenkea hugantugma hu'naze. <sup>66</sup> Maka ana nanekema antahizamo'za zamagu'afi netre'za, anage hu'naze. Henka ama mofavremo'a nankna vahe manigahie? Na'ankure Anumzamofo hanavemo'a agrane me'ne.

### *Zekaraia'a Anumzamofo ragi nemino kasnampa ke hu'nea naneke*

<sup>67</sup> Hagi nefea, Zekeraiana Ruotge Avamumo agu'afi frevitegeno, amanage huno kasnampa kea hu'ne,

<sup>68</sup> Israeli vahe'mofo Rana, ra agi amisune. Agra'a vahe'a zamaza huno zamagu'vazinaku e'ne. <sup>69</sup> Tagri Anumzamo'a, Agri eri'za vahe'a Deviti nagapinti hankavenentake ne' kefozampinti tahokeno taza hania ne' neramie. <sup>70</sup> Korapara Ramo'a ruotge kasnampa vahe'mofo zamagipi huuvazino kea hu'ne. <sup>71</sup> Menina ha' vahetimofo azampinti taza nehuno, maka antahi haviza hurantesaza vahepintira taza hugahie. <sup>72</sup> Amazama hiana tagehe'i asunku hunezmantero, korapa ruotge hunea huhagerafino huuvempage huno zamasmi'nea hanave kasegegu, agesa nentahino eriam nehie. <sup>73</sup> Huvempa huhagerafi kema neregeho Abrahanku huntene. <sup>74</sup> Ha' vahe'mofo zamazampintira tagu'vazinketa, koro osu manineta eri'zama'a erintegahune. <sup>75</sup> Mani ruotge nehuta, fatgo avu'ava huta tasimuma erita manisuna kna'afina Agri avurera hakare gna manivava hugahune. <sup>76</sup> Hagi kagra ama mofavre'moka, Marerisa Anumzamofo kasnampa vahere hugahaze. Na'ankure kagra Ramofona vugotenka Agri kana retro huntegahane. <sup>77</sup> Kagra, Agri vahera Anumzamo'ma zamaguma vazino kumizimi eri apasezmante'nia kea zmasami'sanke'za, zamasunku hanageno zamagu'vazigahie. Agra monafi masa huntenigeno eme remsha hugahie. <sup>78</sup> Na'ankure Anumzamo'a avesiranteno fru avu'ava'ma hurantea zamo'a, nanterama zagemo monafinti hanatino remsa hiankna huno remsa hurantegahie. <sup>79</sup> Zamagrama hanimpi manine'za frizamofo turinapi mani'namokizmia masa nezamino, tagrira tazeri fatgo huno rimpia fru kante tavereno vugahie. <sup>80</sup> Joni'ma ra huno avamupima hanavetiteno, ka'ma mopafi vuno umani'negeno, kna'a egeno Israeli vahepina eama hu'ne.

## 2

### *Maria'a Jisasi kasente'nea naneke (Mat 1:18-25)*

<sup>1</sup> Hagi ana knafi milka Romu kamani vahe'mo'za kva hu'naza mopafina, Romu rankva ne' agi'a Sisa Ogastusi'a kasege erinteno, maka vahe'mo'za zamagia eme kreho hu'ne. <sup>2</sup> Hagi Siria mopafina Kuiriniasi Gavana mani'nere, ana knafi ese kna agafa hu'za zamagia kre'naze. <sup>3</sup> Ana hige'za maka vahe'mo'za zamagi kre'naku mopa agafa zimire vutere hu'naze. <sup>4</sup> Josefe'a agranena kini ne' Deviti nagapinti ne'kino, Nazareti kuma Galili kazigati atreno, Betlehemue nehaza Deviti kumate vu'ne. <sup>5</sup> Josefe'a a'isa kinte'nea a' nevareno, Kamani vahe'mo'za zanagima krenagu amu'ene hu'negene vu'na'e. <sup>6</sup> Hagi anantega umaniinakeno, Mariana mofavremo kasentesia kna egeno, <sup>7</sup> ese ne' mofavre kasenteno tavravenu ano vazino, bulimakamofo ne'za zuompafi antegeno mase'ne. Na'ankure miza seno mase nontamina ana mika vahe'moke hisa higeno'e.

### *Ankeromo'za sipisipi afu kva vahe zamasmi'naza naneke*

<sup>8</sup> Hagi ana kuma tva'onte, sipisipi kva vahe'mo'za kenage sipisipia kva hu'za megi'a mani'nageno, <sup>9</sup> ame huno ankeromo efore nehigeno, Ramofo masa'amo anamokizmi remsa hunezmantege'za koro hu'naze. <sup>10</sup> Hianagi ankeromo anage huno zamasami'ne, Kore osuta antahi so'e hiho, nagra Knare Musenke eri'na neonkino, maka ama mopafi vahe'mo'za tusi muse hugahaze. <sup>11</sup> Na'ankure menina Deviti kumatera, tamagri'ma tamagu'vazinia mofavre kasente'ne. Hanki ana nera Ramo, Kraisi'e. <sup>12</sup> Hanki avame'za ome kesnazana amana hu'ne, ana mofavre tavaravefi antegafino bulimakao ne'za zuompafi ante'enketa ome kegahaze. <sup>13</sup> Anage nehigeno, ame huno rama'a ankeromo'za monafinti anante efore hu'za, Anumzamofo agi erisaga nehu'za anage hu'za,

<sup>14</sup> Monafi marerisa kumapi nemania Anumzamo'a Ra agi erino. Hagi mopafina vahe'mo'za zamarimpa frune maniho. Anumzamo'a rimpfa fruhuzmante!

### *Sipisipi kva vahe'mo'za Jisasi ome ke'naza naneke*

<sup>15</sup> Anage hute'za ankerovo vahe'mo'za zamatre'za monafi ete marerizage'za, sipisipi afu kva vahe'mo'za zamagratura anage hu'naze, Erinketa Ramo'ma menina Betlehemu kumate hentofazana forehie huno tasamiazana ome kesune. <sup>16</sup> Nehu'za ame hu'za ot'i'za vu'za ome kazana Maria'ene Josefeka, mofavre'zinia bulimakamofo ne'za zuompafi antemase nege'za ome ke fore hu'naze.

<sup>17</sup> Sipisipi kva vahe'mo'za ome ke fore nehu'za, ankerovo vahe'mo'zama ana mofavregu hu'naza kea, nererane nefanena znasami'naze. <sup>18</sup> Hagi ana kema maka vahe'mo'za antahi'zamo'za, antri nehu'za antahintahi hakare hu'naze. <sup>19</sup> Hianagi Maria'a ana nanekema hazankea nentahino, agu'afi ana maka kea nenteno ana kea agera okani'ne. <sup>20</sup> Hagi sipisipi kva vahe'mo'za rukrahe hu'za nevu'za, ankerovo vahe'mo'za hu'naza kemofo nena'a maka fore hige'za, nege'za nentahiza hu'naza zanku, Anumzamofo muse hunente'za, Agi'a erisaga hume vu'naze. <sup>21</sup> Hagi 8 knazupa avufa taga nehu'za, agi'a Jisasi'e hu'za antemi'naze. Ana agi'a ankeromo nerera rimpafima fore osu'negeno Jisasi'e hunka agi'a antegahane hu'nea kante ante'za agi'a ante ami'naze.

### *Josefe'ene Mariakea Jisasina avare'ne ra mono nompi vu'na'a naneke*

<sup>22</sup> Hagi zamazeri agruhu knama vagaregeno, Mosesee kasegemo'ma hu'nea kante ante'ne Josefe ene Mariakea Jisasina avare'ne Ra Anumzamofo aminaku Jerusalemi kumate ra mono nompi vu'na'e. <sup>23</sup> Ramofo kasegefi krente'neana, **Maka ese ne'mofavrema kasentesiana ramofo ami'nigeno, ruotge mofavre manigahie hu'ne.** (Eks-Ati 13:2) <sup>24</sup> Ramofo kasegefi huno, kre sramanama huntesazana, **Tare maho namanuro, tare kasefa namamu kre sramana vugahaze hu'nea kante ante'ne ome ana hu'na'e.** (Lev-Pri 12:8)

<sup>25</sup> Hagi mago nera Jerusalemi kumate mani'nea ne' agi'a Simioni'e. Ana nera fatgo nekino, kazigazi huno Anumzamofo amage anteno nevuno, Israeli vahe'mokizmi zamahoke ahesnia vahe fore hanigu avega anteno mani'negeno, Ruotge Avamumo'a agripina avite'ne. <sup>26</sup> Ruotge Avamumo korapa averi huno, ofri mani'nenka, Ra Anumzamo taza hania ne' Kraisia huntena fore hinkenka ketenka frigahne, huno asami'negeno antahino mani'ne. <sup>27</sup> Ana higeno Simionina Ruotge Avamumo azeri otigeno, ra mono nompi marerino umani'negeno, Jisasi nerera ene nefakea avare'ne

kasegemoma hu'neaza huke e'na'e. <sup>28</sup> Simioni'a ana mofavre nevareno, Anumzamofo ra agi erisaga nehuno amanage huno hu'ne.

<sup>29</sup> Ramoka kazokazo eri'za vaheka'amo'na, huvempa kema hunante'nana zana hago fore hige'na koe. Hagi natrege'na kema hunana kante ante'na narimpa frune fri'neno. <sup>30</sup> Na'ankure tahokeno taza hanimofona, nagra navunu koe, <sup>31</sup> Kagra korapa retro hunte'namo maka vahe zamufi efore hie. <sup>32</sup> Agra masagino maka meg'i a vahetera remsa hunezmantena, Israeli vahe kamofona ra agi amigahie. <sup>33</sup> Ana mofavremofo nerera'ene nefakea ana kema huntea kegu tusiza hu'ne antri nehune antahintahi hakare hu'na'e. <sup>34</sup> Ana huteno, Simioni'a asomu ke hunezmanteno, anage huno Mariana asami'ne, Antahi so'e huo. Ama mofavre kamo'a rama'a Israeli vahe'mofo zamazeri traka nehuno, mago'a nagara zamazeri onetino, mago avame'zankna huno mani'nena, rama'a vahe'mo'za zamefi humigahaze. <sup>35</sup> Ana hina tamage maka vahe'mofo oku'a antahintahimofona eri ama nehina, kagri'enena asane kazimo tumoka'a reaza hugahie.

### *Ana'e nehaza a'mofo naneke*

<sup>36</sup> Hagi anampina anahu kna huno kasnampa ara agi'a Ana'e, Fanuel mofakino, Asa nagapintire. Ana a'mo ve erino neve'ene 7ni'a kafuzage mani'negeno, neve'a frigetegeno, manime vuno tavava teno mani'ne. <sup>37</sup> Ana a'mo'a kentoza huno maninegeno kafuzage'amo'a 84'a hu'negeno mono nona notreno, monora Anumzamofona hunenteno, ne'za a'o huno nunamuna kenage'ene feru enena nehuno mani'ne. <sup>38</sup> Anama nehigeno anante ana a'mo'a eno, Anumzamofona susu hunenteno, Jerusalemi vahe'ma zamaza huno zamavaresanigu avegama ante'naza mofavre fore hie huno huama huno zamasami'ne.

### *Ete Nazarete vu'naza naneke*

<sup>39</sup> Hagi Josefe ene Mariakea Ramofo kasegemo'ma hu'neazana ana mika huteke, ete Galili mopare vu'za, Nazarete kumazinire umani'naze.

<sup>40</sup> Ana hu'ne umaninakeno, Mofavre'zinimo nena huno hanave netino, knare antahintahifi avitegeno, Anumzamofo asunkuzamo'a Agrane me'ne.

### *Jisasima avare'ne Jerusalemi ra mono nompi vu'n'a'a naneke*

<sup>41</sup> Maka kafuma ne-egeno'a Jisasi nerera ene nefakea, Anumzamo Israeli vahe kinafinti ozmaheno zmagaterenea kna (Pasova) fore'ma nehigeke, Jerusalemi vutere hu'na'e. <sup>42</sup> Hagi Jisasi'a 12fu'a kafuzage higeno, koma neha'aza hu'ne ra knamofo ne'za nenaza kna fore higeke avare'ne marerine vu'n'a'e. <sup>43</sup> Hianagi ne'za neknamo vagamaregeno, nontegama yunaku neazageno, Jisasi'a Jerusalemi kumate mani'negene, nerera ene nefakea onke atreke e'na'e. <sup>44</sup> Hianagi zanagrama zanagesa antahi'ana, magoka e'hona vahe'ene ne-e hu'ne nentahine nevakeno kinagase'ne. Kinaga onke'ne rone'zinine, mago'a vahe zamantahigazana, a'o tagranena nome hu'naze. <sup>45</sup> Hakreke erifore osuke, ete rukrehe huke Jerusalemi ome hakenaku vu'n'a'e. <sup>46</sup> Hagi 3'a zagegnama enevige'ne, ra mono nompi kasegemofo rempi huzami vahe'mofo amunompi manineno, kema hazana nentahino zamantahige kea nehigeke, ome kene eri fore hu'na'e. <sup>47</sup> Hagi Jisasi'ma antahino keno nehuno, kenonazamima hiazankura, maka'mo'za ana kema nentahiza, zamagra antri hu'za hakare antahintahi hu'naze. <sup>48</sup> Hagi nererake nefake nege'ne, antri nehune, nerera'a anage huno hu'ne. Mofavre timoka na'a higenka amanahu kavukvara hunerantane? Ko, negafa'ene, nagranena amuhohuta kagrikura nehako'e. <sup>49</sup> Hianagi Jisasi'a kenona

huno, **Nahigeta Nagrikura nehaka'e? Nafa'nimofo nompi manigahuanki tanagra ontahina'o?**<sup>50</sup> Hianagi anagema hiankemofo agafa'a nerera'ene nefakea antahi amara osu'na'e.<sup>51</sup> Anante Jisasi'a nerera'ene nef'a'ene Nasareti uramino umani'neno, nererane nefane kea amage ante'ne. Hianagi nerera'a maka'zama hiazana agu'afi erintegeno me'ne.<sup>52</sup> Jisasi'a knare antahintahizane hanavene nena nehigeno, Anumzamo'a avesinente'geno, vahe'mo'zanena avesinte'naze.

### 3

*Mono ti frezmante Joni mono ke hu'nea naneke  
(Mat 3:1-12; Mak 1:18; Jon 1:19-28)*

<sup>1</sup> Hagi Taiberias Sisa'ma Romu kumate 15ni'a zage kafuma kinima mani'negeno'a, Pontius Pailoti'a Judia mopare ugagoteno kva mani'geno, Heroti Antipasi'a rankva Galili manigeno, nefu Filipi'a rankva Ituriane, Trakoniasi kaziga mani'geno, Laiseniasi'a rankva Abilini kumate mani'ne.  
<sup>2</sup> Ana knafina Anasike, Kaifasikea mono nonte ugagota pristi netre mani'na'e. Higeno Anumzamofo kemo, vahe omani hagege kokampi Zekaraia nemofo Joninte e'ne.<sup>3</sup> Joni'a mika Jodani rantima me'nea kaziga vano nehuno, tamagu'a rukrahe nehutma mono ti nefrenkeno, kumi tamia atreramantero huno mono ke hu'ne.<sup>4</sup> Kasnampa ne' Aisaia avontafepina amanage huno krente'ne, **Mago vahe'mofo agerumo'a, vahe omani ka'ma kopinti kezatino, Ramo'ma esia kana retro nehuta, Agri kana azeri ante fatgo hunteho hu'ne.**<sup>5</sup> **Mika ker'i'a antevineteta, mika agona eri agupo nehutma, kazaki nesia zantamina erintefatgo, ne-hinkeno,**<sup>6</sup> **ana mika vahe'mo'za Anumzamo'ma tahokema heazana kegahaze.** (Ais 40:3-5) <sup>7</sup> Higeno Joni'a agrite'ma mono ti frerantesie hu'za e'naza vahe kerfamo'za anage huno zamasami'ne, Tamagra ha' osifave'mofo mofavre nagare! Aza hanigetma Anumzamofo rimpia hezamp-intira korera fregahaze?<sup>8</sup> E'ina hu'negu, tamagrama tamagu'ama rukrehema hu'unenutma knare tamavutmava hinkeno hago zamagu'a rukrehe hu'naze hu'za hugahaze. Tamagra agafa hutma Abrahamu'a tagri nerageho mani'ne huta osutfa hiho. Na'ankure tamagri'ma neramasmuana, Anumzamo'a amne ama haveramintetira Abrahamuna mofavrea erifore humigahie.<sup>9</sup> Menina hago sasumemo'a zafa antaginaku agafafi kriri'ne, hagino anampinti'ma knare ragama reontesia zafa antagino tevefi asaga huno kregahie.

<sup>10</sup> Hige'za ana vahe kevumo'za Jonina anage hu'za antahige'naze. Hagi tagra na'a hugahu'ne?<sup>11</sup> Hu'za antahigageno, Joni'a, zamagari kenona anage huno zamasmi'ne, azagama tare kenama ante'nesamoka, magora onte'nesimofo ome fako humio, hagi azagama ne'zama ante'nesamoka, anazanke hunka fako huzamio.<sup>12</sup> Takisi zagoma zonegiza vahe'mo'zane, ti frerantegahie hu'za e'namo'zanena, Jonina anage hu'za antahige'naze. Rempi huzami nemoke, tagranena nankna hugahune?<sup>13</sup> Agra anage huno zamasmi'ne, Kvamo'ma eriho hu'nesia kana arugateretma mago'ene zagoa zo'onkiho.<sup>14</sup> Anante mago'a sondia vahe'mo'za antahige'naze. Hagi tagaranena na'a hugahune? Hazageno Joni'a anage huno zamagrira zamasmi'ne, Vahe'mokizami zagoa tutu huzamanteta havigea hutma e'oriho. Hagi tamarimpa fru hutma mizantami eri fatgo hiho.

**15** Anagema hianke vahe'mo'za nentahi'za, Joninkura Kraisi hago ama e'nefi nehu'za, tare tagufa zamagesa antahi'naze. **16** Joni'a mika'mokizmi kenona anage hu'ne, Nagra amane tintafanteti fre'neramantoe. Hianagi magoma ne'emo'a nagirira nagatereno tusi hihamu'anee ne' egahie. Nagra amuha osu'noankina Agri aganomofonofira katu ofegahue. Agra mono tina Ruotage Avamuteti'ene, tevereti'ene freramantegahie. **17** Agra witi eri herahehu fokua azampi eri'no, witi hona'a hare kuma harafi nehuno, nena'a witi ante nompi eri'nenteno, hona'a vaga ore tevefi kre fanene hugahie.

**18** Ana huno amanahu kante, Joni'a rama'a knare antahintahi erinteno, vahera Knare Musenkea zamasami'ne.

### *Heroti'a Joni kina hunte'nea naneke*

**19** Hianagi Joni'a rankva ne' Herotina haviza hu'nane huno hanavetino asami'ne, na'ankure nefu nenaro rehanereno Herodiasina a' erinte'nea zanku'ene, havi avu'avazama hiazanku anagea hunte'ne. **20** Heroti'a mago'ene ana agofetu kefozama hu'neana, Jonina kina hunte'ne.

### *Joni'a mono ti Jisasi frente'nea naneke*

(Mat 3:13-17; Mak 1:9-11)

**21** Maka veamo'za mono ti fretageno, Jisasi'enena mono ti freteno, nunamu nehigeno mona kafamo'a anagigeno, **22** Ruotage Avamumo'a maho namagna huno eramino avufare emanigeno, monafinkati mago agerumo'a anage hu'ne, Mofavrenimoka tusiza hu'na Kagrikura kavesinegante'na muse hunegantoe.

### *Jisasi ahi'mokizmi zamagi kre'nea naneke*

(Mat 1:1-17)

**23** Jisasi'ma mono eri'zama'ama erigafa hu'neana, 30'a kafuzage naza huteno erigafa hu'ne. Hanki vea'mo'za zamagesa antahi'zana, Josefe mofavre mani'ne, hu'za zamagesa antahi'naze. Hanki Josefe nefu agi'a Eli'e. **24** Eli nefu agi'a Matati'e. Matati nefu agi'a Livae'e. Livae nefu agi'a Melki'e. Melki nefu agi'a Janai'e. Janai nefu agi'a Josefe'e. **25** Hagi Josefe nefu agi'a Matataiasi'e. Matataiasi nefu agi'a Emosi'e. Emosi nefu agi'a Nahomu'e. Nahomu nefu agi'a Esli'e. Esli nefu agi'a Nagai'e. **26** Hagi Nagai nefu agi'a Mati'e. Mati nefu agi'a Matataiasi'e. Matataiasi nefu agi'a Sime'i'e. Simei nefu agi'a Joseki'e. Joseki nefu agi'a Jota'e. **27** Hagi Jota nefu agi'a Joanani'e. Joanani nefu agi'a Resa'e. Resa nefu agi'a Selubabeli'e. Selubabeli nefu agi'a Sieltieli'e. Sieltieli nefu agi'a Neri'e. **28** Hagi Neri nefu agi'a Melki'e. Melki nefu agi'a Ati'e. Ati nefu agi'a Kosamu'e. Kosamu nefu agi'a Elmadamu'e. Elmadamu nefu agi'a Er'e. **29** Er nefu agi'a Josua'e. Josua nefu agi'a Eliesa'e. Eliesa nefu agi'a Jorimi'e. Jorimi nefu agi'a Matati'e. Matati nefu agi'a Livae'e.

**30** Hagi Livae nefu agi'a Simioni'e. Simioni nefu agi'a Juda'e. Juda nefu agi'a Josefe'e. Josefe nefu agi'a Jonamu'e. Jonamu nefu agi'a Eliakimi'e. **31** Hagi Eliakimi nefu agi'a Melea'e. Melea nefu agi'a Mena'e. Mena nefu agi'a Matata'e. Matata nefu agi'a Neteni'e. Neteni nefu agi'a Deviti'e. **32** Hagi Deviti nefu agi'a Jesi'e. Jesi nefu agi'a Obeti'e. Obeti nefu agi'a Boasi'e. Boasi nefu agi'a Salmoni'e. Salmoni nefu agi'a Nasoni'e. **33** Hagi Nasoni nefu agi'a Aminatabu'e. Aminatabu nefu agi'a Edmini'e. Edmini nefu agi'a Arni'e. Arni nefu agi'a Hesroni'e. Hesroni nefu agi'a Peresi'e. Peresi nefu agi'a Juda'e. **34** Hagi Juda nefu agi'a Jekopu'e. Jekopu nefu agi'a Aisaki'e. Aisaki nefu agi'a Abrahamu'e. Abrahamu nefu agi'a Tera'e. Tera nefu agi'a

Nahori'e. <sup>35</sup> Hagi Nahori nefä agi'a Seruki'e. Seruki nefä agi'a Reu'e. Reu nefä agi'a Peleki'e. Peleki nefä agi'a Eberi'e. Eberi nefä agi'a Sela'e. <sup>36</sup> Hagi Sela nefä agi'a Kenani'e. Kanani nefä agi'a Arfaksati'e. Arfaksati nefä agi'a Semi'e. Semi nefä agi'a Noa'e. Noa nefä agi'a Lemeki'e. <sup>37</sup> Lemeki nefä agi'a Metusela'e. Metusela nefä agi'a Inoku'e. Inoku nefä agi'a Jareti'e. Jareti nefä agi'a Mahalale'e. Mahalale nefä agi'a Kenani'e. <sup>38</sup> Kenani nefä agi'a Enosi'e. Enosi nefä agi'a Seti'e. Seti nefä agi'a Adamu'e. Adamu nefä agi'a Anumzane.

## 4

### *Sata'ma revatga Jisasima hu'nea naneke (Mat 4:1-11; Mak 1:12-13)*

<sup>1</sup> Jisasi'a Jodani timpi mono ti fretegeno, Ruotage Avamumo agu'afi efre viteno avareno ka'ma kopi vu'né. <sup>2</sup> Hagi 40'a zageferupi Satana mago agi'a hankromofo kvamo, ne'za a'o huno mani'nea kna'afi Jisasina revatga hu'né. Anama nehigeno Jisasi'a agaku hu'né. <sup>3</sup> Sata'a amanage huno Jisasinkura hu'né, Kagrama Anumzamofo mofavre mani'nesnunka ama havegura breti fore huo hunka hugeno breti fore hino. <sup>4</sup> Jisasi'a ana kemofo nona'a amanage hu'né, **Avontafepi anage huno krentene. Vahe'mo'za breti nesafintikera zmasimura e'origahaze huno krente'ne.** (Diu-Kas 8:3) <sup>5</sup> Sata'a Jisasina avareno za'za agonare marerino, maka ama mopafima me'nea ranra kumatamina ame huno averi'né. <sup>6</sup> Ana huteno Sata'a amanage huno asami'né, maka'zana nagrike kvafi me'neankina, ama ana makazana kamigahue. Na'ankure ama ana mikazana, izano aminaku'ma hanumofona amane amigahue. <sup>7</sup> E'ina hu'negu kagrama krenarenka mono hunantesankena, ama ana maka'zana kaminugenä kagriza segahie huno higeno, <sup>8</sup> Jisasi'a ananke nona'a anage huno hu'né, **Avontafepina anage huno krente'ne, Kagra ranka'a Anumzamofo monora hunentenka, agri eri'zanke erigahane huno krente'ne.** (Diu-Kas 6:13)

<sup>9</sup> Anante Sata'a Jisasina avareno Jerusalemi kumate vuno, ra mono nomofo amumpare ome nenteno, amanage huno asami'né, Kagra Anumzamofo mofavre mani'nenuka fenamufi takauro, <sup>10</sup> na'ankure avontafepina anage huno krente'ne, **Anumzamo'a ankerø vahe'a huzmantenke'za kva hugantesageno, havemo'a kagia taga hu'zanku zamazampi kavresga hanageno, kagia taga osugahie huno krente'ne,** (Sam-Zga 91:11-12) <sup>12</sup> Jisasi'a ana kemofo nona'a anage huno asami'né, **Avontafepi anage huno krente'ne, Ranka'a Anumzamofona rehenka onko huno hu'né.** (Diu-Kas 6:16)

<sup>13</sup> Sata'ma mika revatga huvagareteno, henka'a kankamuma fore hanigeno revatga hanigu atreno vu'né.

### *Jisasima eri'zama'a erigafa hu'nea naneke*

<sup>14</sup> Jisasi'a ete Galili mopare Avamumofo hihamufi vigeno, agenke'amo ana mopafina vuno eno hu'né. <sup>15</sup> Ana nehuno Jisasi'a, agafa huno osi mono no zimifi mono kea nehige'za, agi'risga hu'naze.

### *Nazarete vahe'mo'za Jisasima zamarimpä ahente'za zamefi humi'naza naneke*

#### *(Mat 13:53-58; Mak 6:1-6)*

<sup>16</sup> Hagi Jisasi'a nenama hu'nea kumate Nazarete eno, nehiaza huno mani fruhu knazupa (sabat) osi mono nompi marerino avontafe hamprinaku o'netige'za, <sup>17</sup> Kasnampa ne' Aisaia avontafe regazarinte'naza eri'za eme

nemizageno, eri vakanereno, hakreno amanage huno kre'nea ke hampri'ne,  
<sup>18</sup> *Ramofo avamumo Nagrane emani'ne. Na'ankure agra huhampri nantenno, zamunte omane vahepi Knare Musenkea huama huo huno hunante'ne. Agra hunanteno huama hugeno, kinafi mani'nesaza vahe'mo'za katufe'za nevnageno, zamu suhu vahe'mo'za negesageno, vahe'mo'za zamazeri haviza nehanaza nagamoza fru hu'za nemarisageno,* <sup>19</sup> *Ramo tamaza huno tamazeri so'ema hiazankura huama hu'na tmasaminaku e'noe.*

(Ais 61:1-2.)

<sup>20</sup> Anage huno hampriteno, ana avontafe regazarino, avontafemofo kva ne' nemino manige'za, ana osi mono nompi mani'namo'za zamua Agri kete'za mani'naze. <sup>21</sup> Ana huteno agafa huno zamasmi'ne, *Amama hamprugetma antahiza kemofo avufa'a meni fore nehie.* <sup>22</sup> Hagi maka vahe'mo'za knare kema hia kegura antri nehu'za, mago'ene ontahige antahige nehu'za, ama Josefe mofavre omaninefi? hu'za nehazageno, <sup>23</sup> Jisas'i a anage huno zamasami'ne, *Tamage hutma huvame kea hunantegahaze. Tusa ne'moka kagra kavufa kazeri knare huo!* Nehuno anage hu'ne, *Kapeniamu kumate kaguvazama erifore hu'nanketa antahi'nonanki, e'i anazana kumaka'are huo hutma hugahaze.* <sup>24</sup> *Tamage hu'na neramasamue.* Magore huno kasnampa vahe'mofona kuma'afinti vahe'mo'za ke'a antahi omigahaze. <sup>25</sup> *Hianagi tamage hu'na neramasamue, Israeli vahepina rama'a kento'ane Elaija knafina mani'nageno, monafinti 3'a kafugi 6si'a ikana kora origeno, tusi agate'za maka mopafina fore hu'ne.* <sup>26</sup> *Ana hu'neanagi Elaijana huntogeno Israeli mani'naza kento a'nerera ovu'neanki, rurega kento ate huntogeno Sarefatni kumate Saidoni mopare vu'ne.* (Jem 5:17-18, 1 Kin 17:1-16.)

<sup>27</sup> *Hanki Israeli mopafina, rama'a fugo namuma zmare'nea vahera kasnampa ne' Elisa knafina mani'nazanagi, mago'mofone huno ana vahepina fugo namumo'a vagareonte'neanki, Siria ne' Nemaninke ana fugo namumo'a vagarentene.* (2 Kin 5:1-14.)

<sup>28</sup> Anage hige'za, osi mono nompi mani'naza maka vahe'mo'za nentahiza tusiza hu'za zamarimpa ahente'naze. <sup>29</sup> *Zamagra oti'za Jisasina rankumati retufe'za, kuma zamimofo zava ankinareti aretufe atrenaku vu'naze.* <sup>30</sup> *Hianagi Jisas'i amu'no zimifinti nezamatreno vu'ne.*

### *Jisas'i agru osu avamu hunte'nea naneke (Mak 1:21-28)*

<sup>31</sup> Ana huteno Kapaneamu rankumate Galili kaziga uramino umani'neno, mani fruhu knarer (sabat) mono kea rempi huzami'ne. <sup>32</sup> *Zamagra rempima huzamia kegu zmagogogu hu'naze. Na'ankure hanave'a me'nea vahe'mo'ma nehiaza huno rempi huzamine.* <sup>33</sup> *Hanki osi mono nompina agru osu havi avamumo agu'a fre'nea vahemo mani'neno, ranke huno kezati'ne.* <sup>34</sup> *Ee! Tatregeta mani'maneno Nazareti Jisasiga, Kagra tazeri haviza hu'naku ne-eampi?* *Nagra antahi'noe, Kagra izage, Kagra Anumzamofona Ruotage hu'namoke!* <sup>35</sup> *Hianagi Jisas'i kesuno, Kea osu atrenka atiramio!* *Higeno havi avamumo'a ana nera amuno zimifi rutraka hunetreno, azeri haviza osu atiramino vu'ne.* <sup>36</sup> *Ana nehige'za mafka vahe'mo'za antri nehu'za zamagogogu nehu'za ke ohumi ahumi hu'za anage hu'naze.* *Nankna hihamu'anee ke ama ne'mo'a nehie?* *Na'ankure agi me'nea vahe'mo nehiaza huno tusi'a hihamu hanave'reti, agru osu havi avamura huntogeno ke'a antahino atineramie!* <sup>37</sup> *Ana higeno Jisas'i agenke'amo'a ana mopa kagiafina vuno eno huvagare'ne.*

*Jisasi'a Pita nenemo azeri knamarena naneke  
(Mat 8:14-17; Mak 1:29-34)*

<sup>38</sup> Jisasi'a ana osi mono nompinti atiramino Saimon nompi ufre'ne. Saimoni nenemo'a avufga teve ha kri erino mase'nege'za, aza haniegu Jisasina asami'naze. <sup>39</sup> Jisasi'a ana a'te vuno, teveha kri huntegeno fanane higeno, ame huno ana a'mo'a otino ne'za kre'zmante'nne.

*Jisasi'a ruzahu ruzahu kri erinaza vahe zamazeri so'e hu'nea naneke*

<sup>40</sup> Zage uramino kinaga sege'za, ruzahu ruzahu kri eri'za mase'naza vahe'mokizmia, naga'zmimo'za zamavare'za Jisasinte e'haze. Ageno magoke magoke'mofona azanu zamako hutere huno zamazeri knamaregeno, ana krizmimo atre zamante'nne. <sup>41</sup> Ana hukna huno rama'a vahepinti, havi avamutamina huzmanteg'e'za atinerami'za ranke hu'za, Kagra Anumzamofo mofavre! Hu'neanagi Agra zamazeri korino, e'inage osiho huno hu'ne. Na'ankure Kraisi'e hu'za zamagra ko antahi'nazageno'e.

*Jisasi'a Judia kaziga mono ke zamasmi'nea naneke  
(Mak 1:35-39)*

<sup>42</sup> Jisasi'a maseno ko' atigeno ka'ma moparega vu'nege'za, vahe'mo'za hakre'za ome ke'za erifore nehu'za tagrane manigahananki, tatreka ovuo hu'za kazigazi hu'za antahige'naze. <sup>43</sup> Hianagi Jisasi'a anage huno zamasami'nne, **Nagra Anumzamofo kuma'mofo knare musenkea aruga'a kumapine huama hu'na vugahue. E'ina agafare Anumzamo'a hunanteg'e'na ama mopafina e'noe.** <sup>44</sup> Anage nehuno mago'ene Judia osi mono non-tamimpi vuno, vahera mono kea ome zmasamino vano hu'ne.

## 5

*Jisasi'a ese aposel naga zamavare'nea naneke  
(Mat 4:18-22; Mak 1:16-20)*

<sup>1</sup> Mago knazupa Jisasi'a Genesareti tiru ankenare otino mani'nege'za, tusi'a vahe kevumo'za Anumzamofo naneke antahinaku ome eritruhu'za manititipa hu'naze. <sup>2</sup> Ana tiru ankenare tare onensa vente me'negeno ke'ne. Hianagi nozamema nehaza naga'mo'za anampintira urami'za, kukozimi umaniza sese hu'naze. <sup>3</sup> Mago votifi Agra umarerine, ana suzana Saimoni votifi marerino antahigegeno tinkenaretira osi'a aretufe ogantu'a atre'nne. Hagi Jisasi'a anampi marerino tamu mani'neno, mika vahe mono kea ana onensa ventefinti zamasmi'ne. <sup>4</sup> Ana nanekema huvama nereno'a Saimoninkura anage hu'ne, **Antuma timo'ma avuhanihanima hu'neama'afi aretufe kantu antenka, kukonka'a nozamema avazu hananku atrenkago.**

<sup>5</sup> Hianagi Saimoni'a kenona'a anage hu'ne, Ramoke, tagra tusi amuho huta meni keragera noza azeri naku tusi'a amuho eri'za erinonanagi, magora aze'oritfaza hu'none. Hianagi Kagrama hana kere kukoni'a ataregahue. <sup>6</sup> Anama hute'za zamagra tusi nozamezaga azerizageno kukozamimoa agafa huno tagato hu'za hu'ne. <sup>7</sup> Anama hige'za, zamagra mago votifi mani'naza knampa zamirega eme zamaza hihogu kezanke hugantu atrage'za zamagra e'za tarega votirarenemera emeri avitageno, anantarega votiraremokea tirami'za hu'na'e. <sup>8</sup> Hianagi Saimon Pita'a ana zama negeno'a, Jisasi agafi renarenemera anage hu'ne, Ramoka nagri navatetira ogantua vuo. Na'ankure nagra kumimo avite'nea ne'tfa mani'noe! <sup>9</sup> Na'ankure Pita'e, ruga'a nagama agrane mani'naza naga'mo'za nozamema zamagrama azeri'naza zankura, tusi'za hu'za antri hu'naze. <sup>10</sup> E'i anazanke huke Zebeti

ne'mofo Jemiske, Jonikea znagogogu hu'na'e, Saimoni ene tragote'za erizana e'nerizane. Higeno Jisasi'a Saimoninku anage huno asami'ne, **Korera osuo, amaretima agafa hunka vnanana, vahera zamavaregahane.**<sup>11</sup> Onensa vente'zamia eri'za tinkenare'ma vute'za, mikazasmia anante netre'za, Jisasi amage ante'naze.

*Jisasi'a fugo namu re'nea ne' azeri knamare'nea naneke  
(Mat 8:1-4; Mak 1:40-45)*

<sup>12</sup> Jisasi'ma mago rankumapima umani'negeno'a, mago nera fugo namumo miko avufga azeri anovazi'nea ne'mo, Agrite e'ne. Jisasima eme negeno'a, avugosaregati mopafi prihuno unemaseno anage hu'ne, Ramoka nazeri so'e hunaku'ma kavemasisigenka, kagra amane nazeri so'e huo.

<sup>13</sup> Higeno Jisasi'a azana avufare avako nehuno anage hu'ne, **Nagri'ma navesiana, kagra so'e huo** higeno, ana fugo namumo'a ame huno ana zupage atrente'ne. <sup>14</sup> Anante Agra ana nera asamino, **Vahera ozamasimio**. Hianagi **kagra Pristi nete vunka, kagraka'a ome averinka Mosesima huneagante, ofa erinka ome hugeno, fugo namumo'a hago vagare hu'za vahe'mo'za kageho.**

<sup>15</sup> Hianagi anama hu'nea avu'avazamofo kemo vuno eno higeno, tusi'a vahe kevumo'za Agri ke nentahisageno, krizmia eriamane hanie hu'za e'naze.

<sup>16</sup> Hianagi anama hutageno'a, Jisasi'a zamatreno vahe omani ka'ma kopi viazamo nunamu ome hutere hu'ne.

*Jisasi'a avufga fri'nea ne' azeri knamare'nea naneke  
(Mat 9:1-8; Mak 2:1-12)*

<sup>17</sup> Mago knazupa Jisasima rempima hu'nezamige'za anampina Farisi vaheki, kasegerema ugagote'naza vahe'enena tavaoma're mani'naze. (Zamagara mago mago ana kumatamina Galilitima, Judiati'ma, Jerusaletima hu'za Agrane emani'naze.) Higeno Ra Anumzamofo vahe'ma zamazeri knamare hanavea, Agripi me'negeno zamazeri so'e hu'ne. <sup>18</sup> Anama hutegenoa'anante mago'a vahe'mo'za sesenku hu'za avufa fri'nea nera zafa hu'za e'naze. Zamagara ana krima eri'nea nera Jisasi avuga eri'za ufre'za ome antenaku ana'ana hu'naze. <sup>19</sup> Hianagi eri'za ufre kankamuna hakare'za erifore osu'naze. Na'ankure tusi'a vahekrekfamo'za hisa hazzage'za, ana nera avre'za nomote mareri'za, no amumpa eri akasine'za ana sesenku'aga atrageno vahe amu'nompinti Jisasinavaugafatgo huno urami'ne. <sup>20</sup> Jisasi'ma ana nagamokizmi zamentintima negeno'a, Agra anage hu'ne, **Ronenimoke, miko kumika'a ama apase kantoe.** <sup>21</sup> Anante kasegerem ugagota hunaza vahe'ene, Farisi vahe'mo'za agafa hu'za ke hakare hu'za, ama nera iza Anumzamofona huhaviza nehie? Iza Agra huno kumira apasenegantoe nehie. Anumzamoke kumira apasegahianki? <sup>22</sup> Hianagi Jisasi'a ha'arente antahintahima antahi'zana nezmageno, Agra anage hu'ne, Nahigetma tamagra e'inahu antahintahia tamagu'afina nentahize? <sup>23</sup> Inana kemo oza hanigena hugahue, Kumika'a apasegantoe kemopi, Otinka vuohanua kemo'e? <sup>24</sup> Hu'neanagi e'inahu hanigeta, tamagra keta antahita nehuta, Vahe'mofo Mofavremo'a ama'na mopafina, hanavea eri'neankino kumira amane apase zamantegahie huta hugahaze. Nehuno ana avufa fri'nea nera asami'ne, **Nagra negasamue, otinka sesenku'a enerinka nonkarega vuohuno** hunte'ne. <sup>25</sup> Hagi zamogra zamufi ame' huno otino, mase'nea tafe'a enerino Anumzamofo agi erisaga hume noma'arega vu'ne. <sup>26</sup> Anama hiazamo zamagrira zamazeri zamanovazig'za, ananteti

agafa hu'za Anumzamofo agia erisga nehazageno, kore'zamo zamagripina avitege'za, ruzahu zantafa menina kone, hu'za hu'naze.

*Jisasi'a Livae agi hu'nea naneke  
(Mat 9:9-13; Mak 2:13-17)*

<sup>27</sup> Anama huteno Agra meg'i a nevuno omegeana, takisi zago zonegia nera agi'a Livae'e mago'a agi'a Matiu'e nehaza ne'mo zago zogi nompi mani'negeno ome negeno anage agriku huno, **Namage eno**. <sup>28</sup> Higeno agra miko'zana anante netreno, otino amage'anteno vu'ne. <sup>29</sup> Hagi Livae'a tusi'a ne'za noma'afi Jisasina krentenege'za, anantega takisi zagoma zogi vahe krerafane, ruga'a vahe'enena zamaza tununte kave'ne sipaye zanagrane atru hu'za mani'neza ne'zana ne'naze. <sup>30</sup> Farisi vahe'ene, kasegatna ugagota hu'naza vahe'mo'za, Jisasi amage nentaza disaipol nagara kanunkanu hu'za ke ha' rezmantze'za anage hu'naze, na'ahigetma tamagra kave ene, tinena takisi zagoma eneriza naga'ene, kumike naga'enena nenaze? <sup>31</sup> Jisasi'a kenona huzamanteno anage hu'ne, **Knare huza mani'nesaza vahe'mo'za tusa vahekura ohakegahaze**. Hagi krima erinesaza vahe'mo'za tusa vahekura hakegahaze. <sup>32</sup> Nagra fatgo vahera zamagi hukura ome'noe, hagi kumi vahe'mo'za zamagu'a rukrehe hihogu e'noe.

*Kave a'o huno nunamu hu'zamofo naneke  
(Mat 9:14-17; Mak 2:18-22)*

<sup>33</sup> Mago'a vahe'mo'za Jisasina amanage hu'za asmi'naze, Jonima amage'ma nentaza disaipol naga'mo'za, hakare zupa ne'zana a'o hu'za mani'ne'za nunamu huvava hu'naze. Hagi Farisi mono vahe'mokizmi disaipol vahe'mo'za anazanke nehazanagi, kagrima kamage'ma nentaza naga'mo'za nezane, tinena nevava nehaze. <sup>34</sup> Anage hazageno Jisasi'a kenona anage huno zamagrikura hu'ne, **Tamagra mago ne'mo'ma aravema huku'ma mani'enigeta, ana ne'mofo ru ne' a'mofonkura, ne'zana a'o huta maniho hugahazo?** Ana ne'ma mani'enigeta anara osugahaze. <sup>35</sup> Hianagi mago kna ne-eankino, aravema huku'ma hunesimofoma zamagripinti avretesigeza, e'i ana knafina ne'zana a'o hugahaze. <sup>36</sup> Jisasi'a anazanke huno mago fronka kea zamasmi'ne. Mago'mo'a kahefa kenaretira tagato huno atafa kenarera anteno ohatigahie. E'inama hanigeno'a, kasefa kena eri tagato hanigeno, kasefa kenamo'a korapa kenarera mago knara osugahie. <sup>37</sup> Ana hanigeno magomo'e huno kahefa wainia, meme afu akruteti tro hunte'nea atafa waini taferopina tagi ovazigahie. Anama haniana, kahefa wainimo'a ana akru taferora rezoren prohuno tagiramisigeno, ana akarura erihaviza hutregahie. <sup>38</sup> Anama hunakura, kasefa wainia, kasefa waini akru tafempi tagi vazigahaze. <sup>39</sup> Mago'mo'a atafa wainima netesuno'a, kasefa wainigura aveosigahie. Na'ankure Agra huno, atafa suamo'a knare'za hu'ne huno hugahie.

## 6

*Jisasi'a mani fruhu knamofo Ra mani'nea naneke  
(Mat 12:1-8; Mak 2:23-28)*

<sup>1</sup> Hagi mago mani fruhu kna (Sabat) zupa Jisasi'a witi hozafi ufreng nevige'za, amage nentaza disaipol naga'amo'za mago'a witi raga eritaniza, zamazampi arekasegasufe'za ne'naze. <sup>2</sup> Ana nehazage'za mago'a Farisi vahe'mo'za anage hu'naze, nahigetma osihoma hu'neazana mani fruhukna (Sabat) zupa nehaze? <sup>3</sup> Jisasi'a kenona zamire anage hu'ne, **Tamagra hampritma ontahi'nazo, Deviti'ene, naga'anema, zamagategenoma**

hu'nea zana? <sup>4</sup> Anumzamofo seli mono nompina marerino, nagru hu'nea breti erino ne'neana, kasegemo'a o'e huno magomo'a onegahianki, pristi vahemoke'za negahie hu'nea bretiagi, Deviti'a neneno naga'a zami'ne.

<sup>5</sup> Nehuno zamagriku anage hu'ne, Vahemofo Mofavremo'a, Agranena mani fruhu knamofona (Sabat) Ra mani'ne.

*Jisasi'a mani fruhukna zupaaza sti'nea ne'mofo azeri so'e hu'nea naneke  
(Mat 12:9-14; Mak 3:1-6)*

<sup>6</sup> Hagi ru mani fruhu kna zupa (sabat) Jisasi'a osi mono nompi (sinagok) marerino mono naneke rempi hu'nezamigeno, mago nera tamaga kaziga azamo'a sti'nea ne' mani'ne. <sup>7</sup> Kasegere ugagota hu'naza vahen'e, Farisi vahem'o'zanena, zamua ante'soe hu'za kete'za mani'naze. Jisasima mani fru knarema ana nera azeri'soe hanige'za, hagi zamagra kegafa erifore hu'za Agrira azerinaku, kete'za mani'naze. <sup>8</sup> Hianagi inankna antahintahima hu'nazana, Agra ko antahino keno nehuno, azama haviza hu'nea neku huno, **Ama maka vahemoke'za zamavure otinka eno!** Higeno ana ne'mo'a otino e'ne.

<sup>9</sup> Jisasi'a zamagriku anage hu'ne, **Nagra tmantahinegoe, mani fruhukna** (Sabat) zupa knare zama hanuna zamo kasegefina knarera hunefi, havi tavutavama hanuna zamo knarera hu'ne? **Vahera zamaza hugahumpi, vahera zamazeri haviza hugahune?** <sup>10</sup> Arukrahe huno ome zamagege, eme zamagema huteno Jisasi'a azamo'ma stinea ne'ku anage huno asami'ne, **Kazana arusuto!** Higeno agra ana hu'ne. Anama higeno'a, azamo'a eteno so'e hu'ne. <sup>11</sup> Hianagi kasegere ugagota hu'naza vahen'e, Farisi vahera zamarimpamo'a aka hege'za, Jisasina naza huntegahune hu'za zamagra kehugantu hugama hu'naze.

*Jisasi'a 12fu'a aposolo naga huhampri'nea naneke  
(Mat 10:1-4; Mak 3:13-19)*

<sup>12</sup> Anankafina Jisasi'a nunamu hunaku agonarega marerino, Anumzamofontega ana kenegera nunamu ome nehigeno ko atune. <sup>13</sup> Ko'ma netigeno'a amagema nentaza disaipol naga'a kehige'za ageno, anampinti 12fu'a aposolo nagare huno huhampri, zamagi'a zami'ne. <sup>14</sup> Saimoninku Pita'e huno mago agi'a nenteno, nefunku Endru'e hu'ne. Hagi Jemisi'e, Joni'e, Filipi'e, Bataromio'e. <sup>15</sup> Matiu'e Tomasi'e, Alfiasi nemofo Jemisi'e, Saimoni Zelati nagapinti nere. <sup>16</sup> Hanki Jemisi nemofo agi'a Judasi'e. Hagi mago ne'mofo agi'a Judas Isakarioti'e, ha' vahemoke'za zamazampi Jisasina komoru huno avarentesia nere.

*Jisasi'a hakare'a vahemoke'za zamazeri knamarena naneke  
(Mat 4:23-25)*

<sup>17</sup> Jisasi'a amage'ma nentaza disaipol naga'ane agonaregati erami'za agupofi eme otinege'za, anante amage'ma nentaza tusi'a disaipol veamo'za eritru nehzageno, maka Judia kazigatiki Jerusaletiki, Saitonitiki, Tairi hageri ankena regati'enena, <sup>18</sup> ana vea'mo'za Jisasi naneke nentahisageno krizimi zamazeri knamresiegū emeri atru nehzageno, agru osu havi avamumo'za zamazeri haviza hu'naza vahera zamazeri knamare'ne. <sup>19</sup> Hagi tusi'veamo'za avako hunaku hu'naze. Na'ankure tusi'a hihamumo Agripinti ne-egeno, avako'ma hia vahera maka krizmimo'a atrezmante'ne.

*Muse hanaza zamofo naneke*

<sup>20</sup> Jisasi'a amage'ma nentaza disaipol naga'a zamufi nezmageno, amanage huno zamasami'ne, **Tamamunte omane vahemoka muse hiho. Na'ankure Anumzamofo Kumara tamagrire.** <sup>21</sup> Tamagaku'ma menina nehanamota, muse hiho. Na'ankure tamagira Anumzamo'a tamaminigetma neramu

hugahaze. Zavi'ma menima netenamota muse hiho. Na'ankure tamagra kiza regahaze. <sup>22</sup> Vahe'moza antahi haviza huneramante'za, tamahenati'za, kema neramasu'za, Vahe'mofo Mofavrerekhu hu'za havi tamagima tamisazana! Anumzamo'a asomu huramantegahie. <sup>23</sup> Ana knazupa musenkase hugahaze. Na'ankure mizantimimo'a rama'a monafina me'nne. Na'ankure korapa zimagehe'za anahukna kasnampa vahera huzmante'naze. <sup>24</sup> Hianagi fenone vahe'mota tmasunku hutma ranknazampi manigahaze. Na'ankure tamagra ko tamazeri so'e hu'zana erivite'naze. <sup>25</sup> Menima tamagrama knare hutma ne'za neramu nehaza vahe'motma ranknazampi manigahaze. Na'ankure tmagaku hugahaze. Menima kizama neraza vahe'mota, tamagra ranknazampi manigahaze. Na'ankure tusi zavi krafa hugahaze. <sup>26</sup> Mika vahe'mo'za knare vahe mani'naze hu'za tmagiku'ma nehaza vahe'mota ranknazampi manigahaze. Na'ankure zamagri nezmageho'za havige kasnampa vahetera anahukna huzmante'naze.

*Ha'vahe'zmimofo avesintesaza zamofo naneke  
(Mat 5:38-48; Mat 7:12)*

<sup>27</sup> Hianagi anage hu'na neramasamue, izagato kema hugeta nentahimota, ha' vahetamia zamamesi nezmanteta, antahi haviza huneramantesaza vahera, knare tamavutmava huzmanteho. <sup>28</sup> Tamazeri havizahu ke huramantesaza vahera, asomu ke hunezmanteta, havi zamavu'zmava huramantesaza vahera nunamu huzmanteho. <sup>29</sup> Kameragente kahesimofona, rukrahe hugeno mago kaziga kameragente kaheno. Nakre kuka'a erisimofona, atregeno sioti ka'anee erino. <sup>30</sup> Mago'a zanku kantahi'gesagenka zami'nenana vahe'mokizmia, ete ome hanavege huzmantenka e'orio. <sup>31</sup> Kagri'ma rumo'zama so'e zmuzma hugantesazegu'ma kave'nesiankna hunka rumokizmia, kagra so'e kavukva huzmanto. <sup>32</sup> Tamagri'ma tamesintesia vahe'ma, zamesi zmantesuta, nankna knare'za erigahaze? Na'ankure kumi' vahe'mo'zanena, zmesizmantaza vahera zamagri'enena anahukna hu'za zmesi nezmantaze. <sup>33</sup> Tamagrama, knare zamavuzmava huramantesaza vahe'ma, knare tamavutmava huzmentesuta, nankna knare'za erigahaze? Na'ankure kumi vahe'mo'za anahukna zmatavuzmava zamagranena nehaze. <sup>34</sup> Nofi'ma hu'za erite'za, ete anama'a eme tamigahaze huta antahi nezamita zamisazana, nankna knare'za erigahaze? Kumi' vahe'mo'zanena anahukna hu'za kumi vahe'mokizmia fozana erite'za, etenofima hu'nazana ana maka eme apanesaze. <sup>35</sup> Hianagi ha' vahe tamia tamavesinezmanteta knare tamavutmava hunezmanteta nofi'ma hu'za erisazana mago'zana ete nona'a erigahune huta ontahaho. E'inama hanuta mizantamimo'a rama'a me'nena, tamagra Marerisa Anumzamofo mofavrerami manigahaze. Na'ankure susu hunontaza vahe'ene, havi vahe'mokizmia so'e hunezmante. <sup>36</sup> Nafatmimo'ma asunku hunermanteaza hutma, tamagranena tmasunku huzmanteho.

*Vahe refko hu'zamofo naneke  
(Mat 7:1-5)*

<sup>37</sup> Hagi rumokizmi mani'zama refako'ma huozmantesageno'a, tamagri mani'zanena Anumzamo'a refako huoramantegahie. Hagi Vahe'mofo kumi'zmi atrezmantesnageno'a Anumzamo'a tamagri'enena kumitamia atreramanteregahie. Haviza huramantesaza vahe'mokizmia kumizmi atrezmante'nage'za tamagri'enena atreramanteregahaze. <sup>38</sup> Vahe'ma tamagrama zaminageno'a tamagri'enena anazanke huno Anumzamo'a neramino, knare'za huno rentrako traku huno tamamina, aviteno

herafiramino evugahie. Na'ankure tamagrama vahe'ma zamisnaza avamente, tamagri'enena anzanke huno tamigahie.

<sup>39</sup> Jisasi'a anage huno fronka kea zamasami'ne. Avu asuhu ne'mo'a, ete mago avu asuhu nera avazu huno vugahifi? I'o zanagra ana taregamoke kerifi uramigaha'e. <sup>40</sup> Mago avo noma nehim'o'a, rempima humi nera agateore'ne. Hianagi iz'a'o rempima humia antahiza eri vagaretenu rempima huzami vahekna nehie. <sup>41</sup> Na'a higenka kugusopa negafu avufima me'neana negenka, tusi'a zafa kofa kavufima me'neana ke'so'e nosane? <sup>42</sup> Nankna hunka negafunkura, nena fuo osasi'za kavufima me'neana natregena eri atraneno nehunka, tusi'a zafa kofa kavufi me'neana ke so'e nosane? Kagra tavre vahe mani'nane! Ese'zana tusi'a zafa kofa kavufi me'neana eri atrenka, kavua ke so'e nehunka, osi kugusopa negafu avufi me'neana eritregahane.

*Zafane, raga'amofo naneke  
(Mat 7:16-20; Mat 12:33-35)*

<sup>43</sup> Na'ankure knare zafamo'a havi raga'a renonte. Hagi havi zafamo'a knare raga renonte. <sup>44</sup> Na'ankure magoke magoke zafamo'a agra'a gna rgama rentenire kegahane. Ave'ave trazampintira vahe'mo'za fiki raga noragize. Ave'ave trazampintira vahe'mo'za krepi raga noragize. <sup>45</sup> Knare vahe'mofona agu'afima knare'zama antegeno me'neazamo, knare'zana efore nehie. Hanki havi vahe'mofona agu'afina haviza antegeno aviteno me'neazamo, haviza efore nehie. Na'ankure nanknazama agu'afima me'neazana, agi'mo hufore nehie.

*Tare netremoke noma kisa'a zamofo naneke  
(Mat 7:24-27)*

<sup>46</sup> Nahigeta Nagrikura, Ramo'e Ramo'e nehutma, kema tmasamuazana nosaze? <sup>47</sup> Iza'o Nagrite ne-eno huankema antahino amage' anankemofo ante'mofona, Nagra kaveri hugahue. Ana'mo'a ama anahu'kna hu'ne. <sup>48</sup> Agra mago ne'mo'ma noma kiankna hu'neankino, mopa kafino uramino have omeri fore huteno, ana agofetu ki'ne. Tima hageno eno ana nona eritagana vazinaku hianagi, eri torera osugahie. Na'ankure hanave nentake hu'nea havere nona ki'ne. <sup>49</sup> Hianagi Nagri kema nentahino amagenonte'mo'a, noma azeri hanaveti trara ontenegro kahepampi noma kiankna hu'neankino tima hageno eno emeri tagana vazitregeno, pasaru huno evu ramino haviza hiankna hugahie.

## 7

*Jisasi'a sondia vahe'mokizmi kva ne'mofo eri'za ne' azeri knamare'nea naneke*

*(Mat 8:5-13)*

<sup>1</sup> Jisasi'ma ana miko veama rempima huzami vagaretenu zamatreno Kapaneamu kumate vu'ne. <sup>2</sup> Mago 100'a sondia vahete kva nera, vahe'mo'za antahi nemiza ne'mofo, kazokzo eri'za ne'amo'a, kri erino fri'za ne-higeno, <sup>3</sup> ana sondia vahete kva ne'mo'a Jisasinkema nentahino, Jiu ranra vahe'mokizmi huzmanteg'e'za kazokzo eri'za vahe'a eme azeri so'e hunte-nieg uome antahigenaku Jisasintega vu'naze. <sup>4</sup> Zamagrama Jisasinte enehanati'za amanage hu'za hanaveti'za antahige'naze. Ana sondia kva nera knare'za nehia nekinka, Kagra amne aza hugahane. <sup>5</sup> Na'ankure agra tagrikura avesineranteno, osi mono nontinena ki'ne. <sup>6</sup> Jisasi'a magoka zamagrane vuno, nontava'onte uravao nehigeno, ana sondia kva ne'mo'a

rone'amokizimi huzmantege'za Jisasinte vu'za, huzmante'nea kea ome asami'naze. Ramoka nagri nontegama ezankura amuho osuo. Na'ankure nagri nontega kagrama e'arera knarer a osu'noe. E'ina hu'nogu, Kagrite'ma esuana knare osu'noe. <sup>7</sup> E'ina hu'nogu, Kagrite'ma esuana knare osu'noe. Hianagi eri'za vahe'nimofo magoke ke hugeno kri'amo'a amne huntenu. <sup>8</sup> Na'ankure nagranena rankva ne'mofo agoraga'a mani'noge'za, ete sondia vahe'mo'za nagri nagorga mani'nage'na, nagrama anamofonku hu'na, vuo hugeno'a agra nevie. Hagi magomofonku eno hugeno'a, agra ne-e. Kazokzo eri'za vahenigu hu'na, e'ina huo hugeno anaza nehie. <sup>9</sup> Higeno Jisasi'ma ana ne'mofo kema nentahino'a tusi'a antri nehuno, rukrahe huno avariri'za vu'naza vahekura anage huno zamasami'ne. **Magore hu'na Israeli vahepin aamanahu amentintine vahera onketfa hu'noe.** <sup>10</sup> Huzmantege'za e'naza vahe'mo'za rukrahe hu'za nontega ome kazana, ana kazokzo eri'za ne'mo knamreno mani'nege'za ome ke'naze.

### *Kento a'mofo nemofo azeri ot'i'nea naneke*

<sup>11</sup> Anama huteno henka Jisasi'a Nainie nehaza rankumate amage'ma nentaza disaipol naga'ane nevige'za, tusi'a veamo'za avariri'za magoka vu'naze. <sup>12</sup> Ana kuma kasante nevigeno, mago fri'nea nera eri'za atirami'zma e'naze. Ana a'mofona magoke mofavregino, kento'a mani'negeno ana kumapi tusi'a vahe krefamo'za ana a'enena e'naze. <sup>13</sup> Ramo ana a'ma ome negeno'a asunku hunenteno, **Zavira oto** nehuno, <sup>14</sup> anante eno sesenku'are ome avako nehigeza, zafa hu'za nevaza vahe'mo'za anante ot'i'aze. Jisasi'a anage hu'ne, **Nehazavemoka Nagra otio hu'na kagrirkura nehue!** <sup>15</sup> Anama fri'nea ne'mo'a otino nemanino, agafa huno keaga nehigeno, Jisasi'a ana nera avazuhuno nererana ami'ne. <sup>16</sup> Tusi koro nehu'za Anumzamofo agi erisaga hu'za anage hu'naze. Agatererfa kasnampa ne' amu'nontifina efore nehigeno, Anumzamo'a Agra'a vahe'a eno zamaza nehie hu'naze! <sup>17</sup> Ama anazama Jisasi'ma hiazamofo agenkemo'a maka Judiane mika megagi'nea kumatamimpina vuno eno hu'ne.

*Joni'a tare amage'ma nenta'a ne'trena huznantegeke Jisasinte vuna'a naneke*

(Mat 11:2-19)

<sup>18</sup> Mono ti frente Jonima amage'ma nentaza disaipol naga'mo'za maka'zama Jisasi'ma hu'neazamofo agenke'a ome Jonina asamizageno, tare amage'manenta'a disaipol ne'tre kehuno, <sup>19</sup> Jisasi ome antahige'ogu huznanteno, Kagra egahiema hu'nea ne Mesaiaga tazama hunka taguvazi ne'pi, rumofonku avega antegahuno? <sup>20</sup> Higeno ana netremoke e'ne anage hu'ne Jisasina asami'na'e, Mono ti fre Joni'a amanage huno hurantegeta kantahigenaku neo'e. Kagra egahiema higeta avegama ante'nona tazahu ne' Mesaiagafi, rumofonku avega antegahuno? <sup>21</sup> Anankna fatgorera hakare rumofo rumofo kri eri'naza vea Jisasi'a zamazeri so'e nehuno, havi avamutmi zmagu'afinti hunezmanteno, rama'a zmurga asu hu'nea vahera zamazeri hari huzmante'ne. <sup>22</sup> Ana huteno anage huno kenona zanirera, zanasami'ne, **Vuta nazano negeta nentahita ha'azana Jonina ome asami'o,** zamavu asu hu'nea vahe'mo'za hari nehazageno, zamagia haviza hu'namo'za zamagia refatgo nehazageno, fuginkrina eri'naza vahera neganamrazageno, zamagesa ankanire vahe'mo'za nentahizageno, fri vahe'mo'za onetizageno, zamunte omane vahe'pina Knare Musenkea huama nehie. <sup>23</sup> Hanki iza'o Nagri'ma ha'ma reonantesimo'a muse hugahie.

<sup>24</sup> Joninkema eri'ne e'na'a netremokea vutakeno, Jisasi'a agafa huno tusi'a veapi Joninku huno, *Ka'ma kopima vu'nazana na'a kenaku vu'naze?* *Jaho'mo hakema eri tagosi hu'nea zampi? I'o.* <sup>25</sup> Hianagi Na'a ome kenaku vu'naze? Fru fru huno konariri'ane kukanma hu'za, so'e zampima nemaniza vahera, kini vahemompri nemanize! <sup>26</sup> Hianagi na'a ome kenaku vu'naze? Kasnampa nepi? Izo tamage hu'na neramasmue. Ana ne'mo mika kasnampa vahera zmagatere'ne. <sup>27</sup> E'i ana nekura avontafepina amanage huno krente'ne, *Ko, nagri ke erino vu vahera, hntogeno ugagota huganteno neviankino, agra kana variganteno vugahie.* (Mal 3:1)

<sup>28</sup> Nagra neramasamue, a'nemo'za kase zamante'naza vahepintira mago'mo'e huno Jonima agatere'nea nera omani'ne, ana nehigeno *Anumzamofo Kumapina osi hu'nemo, agrira agetere'ne.* <sup>29</sup> Maka vahemop'zane havige hu'za takesi zago eneriza vahemop'zanena ana nanekema nentahiza, Anumzamofo avu'avazamo'a fatgo hu'ne hu'naze. Na'ankure Joni'ma mono tifre zmantenegu ana hu'naze. <sup>30</sup> Hianagi Farisi mono vahemop'zane, kasegere ugagota hu'naza vahemop'za, Anumzamo'ma zamagri'ma zamaza hunaku retro hu'neazana zmeifi humi'naze. Na'ankure zamagrira Joni'a mono tina fre ozmante'ne. <sup>31</sup> *Hagi na'ante huntena ama knafi vahemofo avu'avazankura avame kea hugahue.* Zamagra nankna hu'naze hu'na hanue? <sup>32</sup> Zamagra mofavre'ramimo'za maketi kumpi mani'ne'za kehugantigama hiaza nehaze. *Nehu'za roane'amokizmigura anage hu'naze, Tagra konke tafe ronanagi, tamagra avoa noraze. Zavite zagame hunanagi, zavira notaze.* <sup>33</sup> Na'ankure mono tifrente Joni eno, bretine waini tine nenegetma, tamagra hutma havi avamu agripi mani'ne hu'naze. <sup>34</sup> Vahemofo Mofavremo eno ne'zane tine nenegetma, tamagra hutma, keho ne'za nevava nehuno, waini ti nenen, takesi zago eneriza vahemop'zane kumi vahemop'zane raru huno nemanie nehaze! <sup>35</sup> Hianagi knare antahintahizana Agri'ma avaririza vahepi eriaman nehie.

### *Kumike a'mo avununu'ene masavenu'ene Jisasi agare frent'e'ne naneke*

<sup>36</sup> Mago Farisi ne'mo'a, Jisasina ne'za agrane ome nesniegu agi higeno vu'ne. Farisi ne'mofo nomaf'i ne'zane trate aza tununte anteno mani'ne. <sup>37</sup> Anante ana kumateti mago kumi a'mo'a, Farisi ne'mofo nompi Jisasima nezama nene nehazankema nentahino, mago mananentake masave aravasta have tafempi me'negeno erino eno, <sup>38</sup> amefiga'a agare emaniteno, zavi neteno avunuteti agia sese nehuno, azokanu eri ho'mu nehuno, rama'a zupa agia antako nehuno, mana nentake masave tagino agare frent'e'ne. <sup>39</sup> Hagi Jisasima ke higeno e'nea Farisi ne'mo'a anazana negeno, amanage huno agu'afina agesa antahi'ne, ama kasnampa ne'ma mani'neresina, kumi' hu'nea a'mo avako Agrira nehiankino, agafa'a keno antahino nehuno kumi are huno hisine. <sup>40</sup> Jisasi'a Saimoni antahintahia negeno kenona'a huno, *Saimoniga, naneke kasminaku nehue higeno,* Saimoni'a huno, knareki Rempi hurami ne'moka amne kea huo. <sup>41</sup> Higeno Jisasi'a amanage hu'ne, *Magora nofihu zago netrea ne'mo'a, tare ne'retare zagoa zanami'ne.* Magomo'a 500ti zago nofi huno erigeno, mago'mo'a 5fu'a zota erine. <sup>42</sup> Hanki ana zagofo nona'a hu'ne amiga osakeno, knareki atre'o, huno huzanante'ne. Iza agtereno ana zagoa nofitema netrea nekura avesinenteno tusi musena huntiegahie? <sup>43</sup> Saimoni'a kenona anage hu'ne, nagesama antahuana rama'a zagoa nofi'ma hu'nemo'e. Higeno Jisasi'a huno, *Tamage hufatgo*

hunka hane. <sup>44</sup> Anante rukrehe huno ana ara negeno, Saimoninku huno, Kagra ama'i ara negano? Nagra nonka'afi emarerugenka nagia sese hanua tina afi onami'nane. Hianagi ko, ama a'mo'a avunuteti nagia sese nehuno, azokateti erihomu hunante'ne. <sup>45</sup> Kagra nonka'afi enefrogenka nantako hunka onavre'nane. Hianagi nonka'afi efreregatira ama amo'a agafa huno nagiamofona antako huvava hu'ne. <sup>46</sup> Kagra masavena taginka nanumpina freonante'nane. Hianagi ama a'mo a mananentake masevena tagino nagiamofona masavena frenante'ne. <sup>47</sup> E'ina agafare Saimoniga anage kagriku nehue, rama'a kumi ama amo hu'nege'na eri atrentogeno rama'azampi avesinenante. Hianagi osi'a kumi'ma atrente'nomo'a osi'a avesinenante. <sup>48</sup> Ana huteno Jisasi'a ana a'ku anage huno asami'ne, Kumika'a eritregantoe. <sup>49</sup> Hianagi trate'ma agrane zamaza tununte ante'za mani'namo'za, zamagra'a anage hu'naze. Iza'e ama nera, kumi'ma erinetreana? <sup>50</sup> Jisasi'a amanage huno ana ara asami'ne, **Kamentintimo kaguvazianki, krimpa frune vuo.**

## 8

### *Mago'a a'nemo'za Jisasina aza hu'naza naneke*

<sup>1</sup> Hagi mago'agna evutegeno Jisasi'a rankuma tamimpine, osi kuma tamimpine vano nehuno, Knare Musenkea rempi hunezamino, Anumzamofo Kumamofo kea huama nehige'za, 12fu'a amagema nentaza disaipol naga'mo'za magoka vano hu'naze. <sup>2</sup> Hagi mago'a, havi avamu mani'negeno eri atrezmante'nea a'nene, krizimifinti zamazeri so'e hu'nea a'nene vu'naze. Anampina Makdala kumateti Meri'e nehaza a' 7ni'a havi avamu hufegi atre'nea a'ki, <sup>3</sup> Joana Kusa nenaro'e (Heroti eri'za vahe'mofo kva nere) Susana ene, mago'a rama'a a'nema zamagra'a fenozampinti Jisasima azama nehaza a'nene vu'naze.

### *Mago ne'mo avimaza ruran'i'nea fronka naneke*

(Mat 13:1-23; Mak 4:1-20)

<sup>4</sup> Tusi'a vahem krefamo'za eritru hu'za mani'nageno, mago'a ranra kumateti veamo'za Jisasinte azageno, amanage huno fronka kea zamasmi'ne. <sup>5</sup> Hozafi avimza ruran'i'ne'mo'a, avimaza ruranino nevigeno, mago'a avimzamo'a kampi evuramigeno rentroko hazageno, namamo eme ne'ne. <sup>6</sup> Mago'a avimzamo'za have mopafi evurami'za hage'naze. Hianagi tima'a omnenegu huza amagiza osapa re'naze. <sup>7</sup> Hanki mago'a avimzamo'za ave'ave trazampi evuramiza ave'ave trazane magoka hage'za marerizageno, ave'ave trazamoza hageza no ki rentrako hu'naze. <sup>8</sup> Hanki mago'a avimzamo'za rima'ane mopafi evuramiza hage'za 100'a raga'a agatere'za rente'naze. Anage huteno ranke huno, Iza'o agesama me'nenigeno'a ama nanekema antahisimo'a antahise hino!

<sup>9</sup> Anagema hige'za amage'ma nentaza disaipol naga'amo'za, ana fronka kemofo agafa'agu, nankna agu'agesa me'nefi tasamio hu'za Jisasina antahige'naze. <sup>10</sup> Agra anage huno zamasami'ne, Tamagra Anumzamofo kumapi oku'azana nentahize. Hianagi mago'amo'za fronka kege nentahize. Ana nehu'za, *kegahazaragi onkegahaze. Antahigahazaragi antahise huza agafa'a antahii amara osugahaze.* (Ais 6:9-10.)

<sup>11</sup> Ana fronka kemofo agafa'a amanahu me'ne. Ana avimazana Anumzamofo ke me'ne. <sup>12</sup> Hanki mago'a avimazamo'za kamofo ankinare evurami'nazana, amana hu'naze, Anumzamofo kea vahe'mo'za antahii'naze. Hianagi aru zamentinti hanageno Anumzamo'ma zamagu

vazizanku, Sata'a eno zamagu'afinti anankea emeri atre'ne. <sup>13</sup> Hanki mago'a avimazama havege mopafi evurami'neana, Anumzamofo kema nentahi'za muse huza eri'nazanagi, rafuna ore'naze. Osi'a knafi zamentinti nehu'za, rezmatga'zama ege'za traka hu'za atre'za nevaze. <sup>14</sup> Hagi ave'ave trazampima evurami'nea avimzana, Anumzamofo kea antahi'naze. Hianagi zamavufamofo zamavesi zankuke nehu'za, mopafi zanku antahintahi hakare nehu'za, fenoma eri'za mani'zazmima eri so'e hanaza zankuke antahintahi hakare nehazageno, anazamo kintrako hige'za, raga renontaze. <sup>15</sup> Hianagi tima'anе mopafima rurani'nea avimzana, Anumzamofo kea e'i anamo'za antahite'za azeri antrako hu'za, tamage hu'za fatgo zmarimparesi nena raga'a rente'za kazigazi hu'za nevaze.

*Tavi'ma rekru nehaza zamofo naneke  
(Mak 4:21-25)*

<sup>16</sup> Mago vahe'mo'e huno tavira rekru huno, kavofi runkani rentege, sipa kampina antegera nosie. Hianagi tavira amate ante'nazageno remsa hu'negeno, nompima effraza vahe'mo'za negaze. <sup>17</sup> Na'ankure mago'zamo'a fraoki'nigeno, oku'ama me'nesiazamo'a magore huno frara kino omne'nenige'za onkegahaze. Hanki eama masare hanige'za maka vahe'mo'za kegahaze. <sup>18</sup> Ana hu'negu kva hu'neta antahi ankereho, iza'o mago'ama eri'enemifona mago'ane amigahie. Hianagi iza'o e'orinenimofona, eri'noe huno agesama antahisiam'a, anama'a hanare vaga regahie.

*Jisasi'a nererane afuheinku'ene hu'nea naneke  
(Mat 12:46-50; Mak 3:31-35)*

<sup>19</sup> Jisasina nerera'ene aganahe'zane agritega e'naze. Hianagi zamagra tvoama'arera ovu'naze. Na'ankure tusi'a vea mani'nazageno'e. <sup>20</sup> Ana higeno Jisasina asami'za, negarer'aene kaganaha'za kavega ante'za meg'i'a otine'za kagenaku nehaze hu'za asami'naze. <sup>21</sup> Hianagi kenona zimirera anage huno zamasami'ne, **Nenrera ene naganaha'za, Anumzamofo ke'ma antahi'za amage'ma nentamo'za mani'naze.**

*Hagerimo kranto kranto nehigeno Jisasi'a ke higeno rurava he'nea naneke  
(Mat 8:23-27; Mak 4:35-41)*

<sup>22</sup> Mago zupa Jisasi'a amage'ma nentaza disaipol naga'ane votifi marenenerino anage huno zamasami'ne, **Tirumofo kantu kaziga vanune** hige'za vu'naze. <sup>23</sup> Ana hu'za nevazageno, Jisasi'a avu mase'negeno, tusi'a zaho'mo eramino timofona eri kranto kranto nehuno, votifi marerino erinakrizia nehige'za hazenkefi mani'naze. <sup>24</sup> Zamagra Jisasina eme azeri oti'za anage hu'naze. Ramoke, Ramoke, tagra tinakrita fri'za nehune hazageno, Jisasi'a otino zahoku'ene kranto kranto nehia timofona kesigeno, timo'a rurava he'ne. <sup>25</sup> Anante Jisasi'a anage huno amage'ma nentaza disaipol nagakura zamasami'ne, **Tamentintia iga me'ne?** Hianagi zamagra zamagogo nefefe'za antri nehu'za, zamagra zamagra anage hu'naze. Iza'e ama nera Agra tine zahomofonku enena ke higeke amagera nenta'e?

*Mago negine'mofo agu'afinti Jisasi'a havi avamutmi huzmane'nea naneke  
(Mat 8:28-34; Mak 5:1-20)*

<sup>26</sup> Ana hutege'za zamagra voti eri'za Geresa mopafi kantu kaziga Galili timofona vu'naze. <sup>27</sup> Anante uhanati'zageno Jisasi'ma votifinti takau reno uneramigeno, ana kumateti mago nera havi avamu'mo agu'afi fre'nea

ne'mo'a eme tutagiha hunte'ne. Ana ne'mo'a za'za knafi kukena'a no-suno, nompina omani'ne. Hianagi vahe asenentaza havegampi nemani-anane. <sup>28</sup> Ana ne'mo'a Jisasima negeno'a, avuga eme traka humaseno, ranke huno anage hu'ne, Jisasiga Marerisa Anumzamofo mofavremoka nataro! Keke hugantoanki nazeri havizana osuo! <sup>29</sup> Na'ankure Jisasi'a ko ana agru osu havi avamukura ana nemonofa atrenka atiramio huno hanave ke hunte'negeno'e. Ana havi avamumo'a rama'a zupa retufenetregeno, ana kumate vahe'mo'za agiare azante seninofinu anakinte'za kavagri'za mani'nazane. Hianagi ana ne'mo'a,nofira rukno hunetregeno, havi avamumo'a avreno ka'ma kotamimpi vu'ne. <sup>30</sup> Anante Jisasi'a anage huno antahige'ne, **Kagika'a izage?** Ana ne'mo'a anage hu'ne. Nagini'a hakare'ne. Na'ankure rama'a havi avamu agu'afina maninegu hu'ne. <sup>31</sup> Ana agru osu havi avamumo'za hu'za, keke hugantonanki hanave kea hurantegeta ro'a omane kerifina ovamneno hu'za hu'naze. <sup>32</sup> Hagi rama'a afutamimo'za agonamofo asoparega ne'za nene'za mani'nageno, havi avamumo'za zamatresige'za vnagu Jisasina keke hunte'za, tataregeta antu afu tamimofo zamagu'afi uframneno hu'za antahigageno, knareki viho huno huzmante'ne. <sup>33</sup> Hanki havi avamumo'za ana ne'mofo agu'afinti atirami'za afu'mokizmi zmagu'afi ufrage'za, agonaregati zmagare'za zavateti tirupi takauramiza ti nakri'za fri'naze.

<sup>34</sup> Afu kva vahe'mo'za anazama fore hiaza nege'za, koro fre'za ra kumate'ene osi kumate'ene vu'za, anama fore hiazamofo kea ome zmasami'naze. <sup>35</sup> Anazama hiazanku vahe'mo'za ome kenaku Jisasinte e'naze. Zamagrama eme kazana, havi avamuma atirami'nea nera Jisasi agafi kukena huno knare antahintahi erino maninege'za eme nege'za koro hu'naze. <sup>36</sup> Anazama fore hige'za ke'naza vahe'mo'za, inankna huno ana havi avamuma agu'ama fre'nea nera azeri so'e hunte'nea agenkea onke'namokizmi zamasami'naze. <sup>37</sup> Anante maka Gerasa vahe'mo'zane, ana kaziga mani'naza vahe'mo'za hanavetiza, tatrenka vuo hu'naze. Na'ankure zamagra tusi zamano vazige'ze. Ana hazageno Jisasi'a votifi marerino zamatreno ete vu'ne. <sup>38</sup> Havi avamu'mo'za atirami'naza ne'mo'a atresigeno avaririno vanigu antahige'ne. Hianagi Jisasi'a ana nera hunenteno anage hu'ne. <sup>39</sup> **Kuma ka'arega ete vunka, Anumzamo'ma huganteazana vaheka'a ome zamasamio huno Jisasi'ma hiazanku, rukrehe huno rankumapi nevuno, maka vahera knare'za huno azeri so'ema hunte'neazana huama huno zamasamino vu'ne.**

*Jisasi'a kva ne'mofo mofa fri'nefinti azeri otinaku nevuno korankri eri'nea a'mofo azeri so'e hunte'nea nanekē*

(Mat 9:18-26; Mak 5:21-43)

<sup>40</sup> Anantegatima ete Jisasi'ma egeno'a, tusi'a veamo'za muse hu'za avre'naze. Na'ankure zamagra avega ante'za mani'nazaretire. <sup>41</sup> Anante Jairusi'e nehaza ne'mo osi mono nomofo kva nekino, Jisasi agiafi eme rena reno noma'afima esigu tutu huno antahige'ne. <sup>42</sup> Na'ankure 12fu'a kafunaza hu'nea magoke mofa'amo, fri'za nehigeno hu'ne.

Jisasi'ma kantegama nevigeno'a, hakare veamo'za oretufe aretufe hu'za vu'naze. <sup>43</sup> Anampina mago ara 12'a kafu zagefi korankria eri'nea a'mani'ne. Hianagi mago vahe'mo'e huno ana ara azeri so'e osu'ne. <sup>44</sup> Ana a'mo Jisasina amefigati zaza kena'amofo atumpare eme avako higeno, ana korankrimo'a ame huno vagarente'ne. <sup>45</sup> Anante Jisasi'a zmantahigeno, **Iza navako hu'ne?** Hige'za zamagra onke'none hu'za hazegeno, Pita'a huno,

Kva Nimoka, tusi'a vahekrefamo'za rugagagiza kavate rentrako hu'naze. <sup>46</sup> Hianagi Jisasi'a anage hu'ne, magomo navako hu'ne, na'ankure Nagripintira mago'a hanave'nimo'a natreno vu'negena nehue. <sup>47</sup> Ana a'mo'ma keno antahinoma hiana, frakigama nosuno'a ahirahi neregeno avuga eme traka humaseno, eme avako higeno, kri'amo'ma ame huno vagarente'nea kea maka vahe zamasami'ne. <sup>48</sup> Anante Jisasi'a anage huno ana ara asami'ne, Mofamoke, kamentintimo kazeri so'e hianki krimpa frune vuo. <sup>49</sup> Jisasi'ma anagema nehigeno'a, mago ne'mo osi mono nomofo kava ne' Jairusi nontegati eno, anage huno eme asami'ne. Mofa kamo'a fri'neanki mago'anena, Rempima hurami nera kna omio. <sup>50</sup> Hianagi Jisasi'a ananke nentahino, anage huno kenona hu'ne. Kagra korora osuo, kamentinti hugeno ana mofamo'a knamareno manino. <sup>51</sup> Hanki nonte'ma eteno'a mago'a vhahera zmatrege'za uofre'naze. Hanki Pitane, Jonine, Jemisine ana mofamofo nefane nererane ke hige'za zamagrake ufre'naze. <sup>52</sup> Anampina maka zamagra zavi nete'za tusi krafa ana mofaku nehazageno Jisasi'a anage hu'ne, Ofri amne mase'neanki zavira oteho. <sup>53</sup> Hige'za ana veamo'za agiza re'naze. Na'ankure ana mofamo'a frinege'za ke'nazagure. <sup>54</sup> Hianagi Jisasi'a akoheno azante azeri onetino anage hu'ne, Mofavre'moka otio. <sup>55</sup> Ana mofamofo agu amemo ete agu'afi efregeno, ame huno otigeno, ne'za aminkeno neno huno zamasami'ne. <sup>56</sup> Ana mofa'mofo nerera'ene nefakea antri nehakeno, amama huazana vhahera ozmasamitfa hi'o huno znasami'ne.

## 9

*Jisasi'a 12fu'a Aposol naga'a huzmante'nea naneke  
(Mat 10:5-15; Mak 6:7-13)*

<sup>1</sup> Hagi Jisasi'ma 12fu'a amage'ma nentaza disaiopol naga'a ke hutruma huteno maka havi avamu'ene krinema eritresaza hanavene hihamune zami'ne. <sup>2</sup> Hanki Anumzamofo Kumamofonku huama nehu'za, kri vahe zamazeri knamarehogu huzmante'ne. <sup>3</sup> Agra anage huno zamasami'ne, Mago zantfane hutma erineta oviho. Azompafi kipi bretifi zagofi tare kukena erinetma oviho. <sup>4</sup> Mago kumate'ma vutma mago nompima umrerinutma, ana nonte manineta, atreta vunakuma hanutma, atretma rankumara viho. <sup>5</sup> Inaregama vanagenoma vahe'mo'za ontamaresnageta, ana kumateti atreta vukuma hanuta, tamagiareti kugusopa rupopo hunetretma vinkeno, ana avu'avazama hanaza zamo'a hazenkefi manize hugahie. <sup>6</sup> Hanki anage'ma hutege'za, atre'za kumatamimpi vu'za eza nehu'za, Knare Musenke huama nehu'za, hakare kazigareti kri vhahera zamazeri knamare'naze.

*Heroti'a Jisasi agenke nentahino hakare agesa antahi'nea naneke  
(Mat 14:1-2; Mak 6:14-29)*

<sup>7</sup> Ana knafina Heroti'a rankva ne'mo, ana makazama fore hu'nea zamofo agenke'a nentahino, antahintahi hakare hu'ne. Na'ankure mago'a vahe'mo'za mono ti frezamante Joni frinefinti oti'ne nehazageno, <sup>8</sup> mago'amo'za Elaija efore hie nehazageno, mago'amo'za mago korapa kasnampa ne' fri'nefinti oti'ne hu'naze. <sup>9</sup> Heroti'a anage hu'ne, nagra Jonina ko agena akafri'noanagi, iza e'inahuzana nehige'na agenke'a nentahue? Anage nehuno, Herotia Jisasina kenaku hu'ne.

*Jisasi'a 5 tauseni'a venene ne'za zami'nea naneke  
(Mat 14:13-21; Mak 6:30-44; Jon 6:1-14)*

<sup>10</sup> Aposolo naga'mo'za vu'nazaregati ete ehanatiza, eri'zama eri'naza zamofonkea mika Jisasina eme asami vagare'naze. Anante zamagrike zamavarege'za anampinti atre'za Betsaide nehaza kumate vu'naze. <sup>11</sup> Hianagi tusi'a vahe kerfamo'za Jisasi'ma vu'ne kema nentahiza avaririza vu'naze. Agra muse huno nezamavareno, Anumzamofo kumamofo ke huama huno nezmasamino, krizmima eri atrenogu'ma zamesi'nea vahe'mokizmi kria zamazeri knamare'ne. <sup>12</sup> Hanki kinagaseno hanima hu'za hiazanku, 12fu'a disaipol naga'mo'za e'za Jisasina anage hu'za eme asami'naze. Ama vahe krefa huzmanteg'e'za tva'onte kuma tamimpina vu'za e'za hu'za mase nonku'ene, ne'za zimigu'ene ome hakreho. Na'ankure vahe omani kokampi mani'none. <sup>13</sup> Hianagi Jisasi'a anage huno zamasami'ne, **Tamagra ne'zana zaminke'za neho.** Zamagra kenona hu'za, tagra rama'a ne'zana e'orinonanki, 5fu'a bretigi tare nozamegi huta eri'none. <sup>14</sup> Anampina 5 tauseni'a venene mani'naze. (Anampina a'nene mofavreramina ohamprine) Anante Jisasi'a amage'ma nentaza disaipol nagara huzmanteno, **Zamasaminke'za 50'a refko hu'za mago mago kevufina manitere hiho.** <sup>15</sup> Anama Jisasi'ma zamasamiaza hu'za amagema nentaza disaipol naga'mo'za, ana maka vahera zamazeri atru hutere hazage'za mani'naze. <sup>16</sup> Jisasi'a 5fu'a bretine tare noza'ene erino, monafi kesga huno negeno, Anumzamofo susu hunteteno, ana bretiramina eritamanasi zamizmi nehige'za, ana amagema nentaza disaipol naga'mo'za ana ne'zana eri'zami'naze. <sup>17</sup> Ana mikomo'za nazageno zamuma hutege'za, meama'a eritru hu'za 12fu'a eka eka kupi eriri'naze.

*Pita'a Jisasi agafa'a huama hu'nea naneke  
(Mat 16:13-19; Mak 8:27-29)*

<sup>18</sup> Mago zupa agraku Jisasi'a nunamu nehigeno, amagema nentaza disaipol naga'mo'za, tava'onte eman'i nazageno anage huno zamantahige'ne, **Nagrikura veamo'za iza'e hu'za neheze?** <sup>19</sup> Hige'za zamagra kenona'a anage hu'za hu'naze, mono ti frente Joni'e hu'za mago'amo'za nehazageno, mago'amo'za Elaija'e nehazageno, mago'amo'a korapa kasnampa ne'frinefinti oti'ne hu'za nehaze. <sup>20</sup> Jisasi'a amanage huno zamantahige'ne. **Hianagi tamagra iza'e hutma Nagrikura nehaze?** Pita'a ana kenona huno, Kagra Anumzamo hugantegenka (tahoke henka tagu'vazi ne' e'nana ne' Kraisige.

*Jisasima friteno otisiazamofo naneke  
(Mat 16:20-28; Mak 8:30-9:1)*

<sup>21</sup> Hianagi Jisasi'a amana kea mago vahere hutma ozmasmitfa hiho huno hunezmante'no, <sup>22</sup> anage hu'ne, **Vahe'mofo mofavremo'a ruzahu ruzahu knazampi unefresige'za, mono kva vahe'mo'zane, ugagota pristi vahe'mo'zane, kasegere ugota hu'naza vahe'mo'za, zamefi humiza ahe-sageno friteno, tagu'a zagegnare otigahie.**

<sup>23</sup> Anante Jisasi'a ana maka'mokizmigu anage huno zamasami'ne, **Iza'o namage'ma antenaku'ma hanimo'a, agra'agura age'nekanino maka knafina keka zafa'a erino navaririgahie.** <sup>24</sup> Na'ankure iza'o asimu'a eriso'e hu'naku hanimo'a, asimu'a atregahie. Hagi iza'o Nagriku huno asimu'a atresimo'a, asimu'a erigahie. <sup>25</sup> Mago vahe'mo'ma ama mopafi zankuke nehuno, agra'a agu'amema atresiana, nankna so'ez a erigahie. <sup>26</sup> Iza'o nagriku'ene keniagu'ene agazema hunante'simofona, Vahe'mofo Mofavremo'ma Agra'a masa'affine, Nefa masa'affine ruotge ankero vahe zagamofa masafinema

esuno'a agrira eme agaze huntegahie. <sup>27</sup> Hianagi Nagra tamage hu'na nera-masamue, amama otinazafintira, mago'amotma ofrinetma Anumzamofo kumara kegahaze.

*Jisasi avufamo masanentake hu'nea naneke  
(Mat 17:1-8; Mak 9:2-8)*

<sup>28</sup> Anagema Jisasima huteno, 8'a zagegnanaza evutegeno, Pitama, Jonima, Jemisima, huno zamavarege'za, agonarega nunamu hunaku vu'naze. <sup>29</sup> Nunamuma ome nehigeno, avugosamo'a ruzahu higeno, kukena amo'a tusi efe'nentake hu'naze. <sup>30</sup> Anantera ame huke tare netre Mose'ene Elaijakea oti'nene, Jisasi'enena nanekea hu'naze. <sup>31</sup> Mosese'ma Elaija'ma Jisasi'ma hu'za tusi'a masafi mani'nega'za, Jerusalema Jisasi'ma friteno otino vani-azamofo nanekea hu'naze. <sup>32</sup> Pita enema mani'naza naga'mo'za zamavutoko hige'za mase'naze. Hianagi zamagrama oti'za nege'za, Jisasi'a tusi'a masa'afi tare netrene oti'za mani'nageno zamage'naze. <sup>33</sup> Anante tare netremoke atrene nevakeno, Pita'a anage Jisasinku hu'naze. Kva'nimoka, amare'ma manunana knare hie. Tatregeta tagufa tona nona kimneno, magora Kagriki, magora Mosesenki, magora Elaijane. Anama hu'nea kemofo agafa'a antahini' osu'neno hu'naze. <sup>34</sup> Pita'a anagema nehigeno'a, hampomo tamino refite nezmentegeno, ana hampompi mani'nega'za koro hu'naze. <sup>35</sup> Anante mago agerumo hampompinti anage hu'naze. Ama'i Nagri Mofavre, Nagra huhampri ante'nomo'e. Hanki ke'amofona antahimaho. <sup>36</sup> Ana agerumo'ma kea huvagama retegeno, Jisasi'a Agrake mani'nege'za amagema nentaza disaipol naga'mo'za ke'naze. Ana hiazanku zamagra kea eri tagane'za mani'nega'za, ana knafina mago vahere hu'za ke'naza'zana ozmasamitfa hu'naze.

*Jisasi'a havi avamu agu'afi fre'nea mosfavre azeri so'e hunte'nea naneke*

<sup>37</sup> Nanterana agonaregati eneramizageno, hakare veamo'za eri hantage'za kantega tutagiha hunte'naze. <sup>38</sup> Anante ana vahe amu'nompinti mago nemo'a ranke huno, Rempi hurami ne'moka, keke hugantoanki, magoke ne'mofavre'niagi ko. Na'ankure agra mago mofavre'ni'e! <sup>39</sup> Havi avamumo azeri haviza higeno krafa nehigeno, azeri traka hutregeno, kentu kentu nehigeno, agremo zuzu nehigeno, azeri haviza hutere mago'agnafina nehie. <sup>40</sup> Nagra kamagema nentaza disaipol nagaku keke huzmante'na, havi avamura humegi atreho huanagi, zamagra humegi atregara osu'naze. <sup>41</sup> Jisasi'a kenona huno, Tamentinti osutma fatgo osu vahe ama knafina mani'naze. Nama'a knafi tamagranena mani'nena tamagri knazana erigahue? Avrenka negamofona amare eno. <sup>42</sup> Ana mofavrema avreno ne-eogeno'a havi avamumo azeri traka hutregeno, mopafi maseno kentu kentu hu'naze. Hianagi Jisasi'a ana havi avamu ke nesuno, azeri so'e huteno nefana ami'ne. <sup>43</sup> Anama hige'za Anumzamofo tusi'a hihamuma nege'za, antri hu'za zmagogogu hu'naze.

*Jisasi'a frisnia ke mago'ane zamasmi'nea naneke  
(Mat 17:22-23; Mak 9:30-32)*

Anama hu'za mika'mo'za antrima nehu'za zamagogogu nehazageno, Jisasi'a amage'ma nentaza naga'a zamasami'ne. <sup>44</sup> Ama tmasamisua nanekea eritma tamagu'afi anteho. Vahe'mofo Mofavrea komoru hu'za ha' vahe'mofo zamazampi avre'za antegahaze. <sup>45</sup> Hianagi ana nanekea zamagridera frakino me'nege'za anankea antahi amara osazageno, zamagra

ana naneke mofo agu'agesa'a antahi ama osu'za, azeri akona osu'naze. Ana nehu'za ana kegura koro hu'za antahi onke'naze.

*Iza ra vahera manigahie hu'nea naneke*

(Mat 18:1-5; Mak 9:33-37)

<sup>46</sup> Jisasima amage nentaza disaipol naga'mo'za, agafa hu'za iza rana manigahie hu'za zamagra zamagra hu'naze. <sup>47</sup> Hianagi Jisasi'a zamagu'afi nezmageno, osi mofavre avazu huno eme azeri o'netino, <sup>48</sup> anage huno zamasami'ne, Iza'o ama mofavrema Nagri Nagifi avreno azeri so'ema huntessimo'a, Nagri navareno nazeri so'e hunantegahie. Iza'o Nagri'ma naveresimo'a, hunantege'na e'nomofo avaregahie. Na'ankure iza'o amuno tamifi anteramino manisimo'a, maka'motma tamagatereno ra vahe manigahie.

*Ha'ma reoramate'samo'za tamagri vahe mani'naze hu'nea naneke*

(Mak 9:38)

<sup>49</sup> Joni'a kenona anage hu'ne, Kva nemoka, negonkeno Kagri kagifi, mago ne'mo havi avamura hunetregeta anara osuo huta i'o hunte'none. Na'ankure agra kamagera anteno tagranena vano nosigu hu'none. <sup>50</sup> Hianagi Jisasi'a anage huno zamasami'ne, **Tamagra i'o huonteho. Na'ankure tamagri'ma ha'ma reormantesamo'za, tamagri vahe mani'naze.**

*Jisasi'a amagema nentaza disaipol naga'ane Jerusalemi vu'nea naneke*

<sup>51</sup> Agrama monafima marerisia knamo tava'oma nehigeno, Jisasi'a Jerusalemi kumate vunaku hanave agesa antahi'ne. <sup>52</sup> Agra mago'a ke eriza vugotahu vahe huzmante'ne. Zamagra Sameria kumate nevnu'za, mago'azana ko ome retro hu'nenageno vunaku huzmante'ne. <sup>53</sup> Hianagi anampi vahe'mo'za ozamavare'naze. Na'ankure Agra Jerusalemi vunaku hu'negeze. <sup>54</sup> Ozamavare'nage'ne amagema nentaza disaipol naga'afinti Jemiske Jonike nentahike amanage hu'ne Jisasina antahige'na'e. Ramoka tagra ha'manena monafinti tevemo eramino zamaresniegu nehano? <sup>55</sup> Hianagi Jisasi'a rukrahe huno ke'zanasutege'za, <sup>56</sup> ana kumara atre'za ru kumatega vu'naze.

*Jisasi'a amage antesaza zanku hu'nea naneke*

<sup>57</sup> Kantega zamagrama nevazageno, mago vahe'mo Jisasinku huno inantegama vanantega nagra kamage' ante'na vugahue. <sup>58</sup> Hagi Jisasi'a anage huno asami'ne, **Afi' kramokizmia nozimia mopagampi me'negeno, monafi namamofona nozamia me'nene.** Hianagi **Vahe'mofo Mofavre'mofona anu anteharege huno mase'zana omane'ne.** <sup>59</sup> Jisasi'a magomofonku huno, Enka **namage emento.** Hianagi agra ke'nona huno, Ramoka kotazana, natregena vuna nenfana ome asenteteno. <sup>60</sup> Hianagi Jisasi'a huno, **Atregero fri vahe'mo'za, fri vahera asezmanteho. Hianagi kagra vunka Anumzamofo kumaku ome huama huo huno asami'ne.** <sup>61</sup> Mago'mo enena anage huno asami'ne, Ramoka nagranena kamage antegahue. Hianagi natrege'na nonirega vuna nagani'a ome huso'e huzmantetena, ena kamage emeantaneno higeno, <sup>62</sup> Jisasi'a anage huno asami'ne, **Mago'mo'ma hozama erino nevuno, rukrehe rukrehe huno vanimo'a, Anumzamofo Kumaparo vugara osu'ne.**

## 10

*Jisasi'a 72'a vahe huzmante'nea naneke*

<sup>1</sup> Hagi ama anazama huteno, Ramo'a 72'a vahe huhampri zamanteno, Agra'ama vunaku'ma hia rankuma ene maka osi kuma tamimpi, ugote'za vihogu tare tare huzmantetere hu'ne. <sup>2</sup> Jisasi'a anage huno zamasami'ne,

Hozafina rama'a ne'zamo'a nena huno meanagi, hoza vasage vahe'mo'za osi'a mani'naze. E'ina hu'negu nunamu hutma hozamofo Nefa antahigenkeno, eriza vahera huzamantenkeno hoza ome vasageho. <sup>3</sup> Tamagra viho! Hianagi antahihō, sipisipi afu anenta naga, afi' kra nagamofo amunompi huzmantankna hu'na huneramantoe. <sup>4</sup> Tamagra zagoma eriri ku'ene ku'ene tmagamofo anona e'ori nevutma, kantegama vahe'ma zamagedesuta huso'e sa'e huo zamanteho. <sup>5</sup> Ina nompima ufresuta ese'zana ama nompina, Anumzamofo rimpia fruzamo mesie hutma ome hiho. <sup>6</sup> Ana nomofo nefama rimpia fru ne'ma mani'nesnigeno'a, tamagri tamarimpa fruzamo'a, agrite megahie. Hianagi rimpia frune vahe'ma omani'enkeno'a, ana asomu kemo rukrehe huno ete tamagrite egahie. <sup>7</sup> Anama vnaza nompi umaninetma nazanoma tamisazana netemta tina neho. Na'ankure eriza vahe'mo'a mizama'a e'nerie. Ru nontamimpina vutma etma osiho. <sup>8</sup> Rankumate nevnageno vahe'mo'za tamavrente'za, ne'za retroma huramantesa zana neho. <sup>9</sup> Ana kumate kri erinesaza vahera krizmia zamazeri so'e nehutma, anage hutma zmasamiho. Anumzamofo kumamo'a tamagrite erava'o nehie hiho! <sup>10</sup> Hianagi ina kumate'ma vnagenoma vahe'mo'za otamavresagetma, atretma ana kuma kampi nevutma anage hiho. <sup>11</sup> Tamagri kumate kugusopa tagia agusareti rupopo hutrona zamo'enena, Anumzamo'a ha' reneramante nehie. Hianagi antahihō, Anumzamofo kumamo'a ko tamagrite e'ne. <sup>12</sup> Antahihō, Nagra anage hu'na neramasamue. Anumzamo'ma refko hania knazupa, Sodomu kumate vahe'mo'zama erisaza knazana, tamagra ageteretma ra knaza erigahaze.

*Korasinine Betsaida kumate vahe'mo'za kea ontahi'naza naneke  
(Mat 11:20-24)*

<sup>13</sup> Nasunku hurmantoe Korasin vahe'mota! Nasunku hurmantoe Betsaida vahe'mota! Na'ankure kaguvazama tamagripi hu'noazana, Tairine Saidoni kumate huasina, ko zamasunku kukena nehu'za, tanefa fre'za zamasunku hu'za zamagu'a rukrehe hazasine. <sup>14</sup> Hianagi Anumzamo'ma vahe'ma refkoma hania knazupa, Tairi vahe'mo'zane Saidoni vahe'mo'zanema erisaza knazana, tamagra agatereta ranknaza erigahaze. <sup>15</sup> Tamagra Kapaneamu kumate vahe'mota monafi marerigahazafi? A'o, tamavretresigetma fri vahe kumapi (Hedes) vugahaze. <sup>16</sup> Anante Jisasi'a disaipol nagakura anage huno zmasamine, Iza'zo tamagri kema antahi tamamisamo'za, Nagri ke antahi namigahaze. Iza'zo tamagrime tamatresamo'za Nagri natregahaze. Hagi Nagri'ma natresimo'a hunantege'na e'nomofo atregahie.

*72'a eri'za vahe'mo'za rukrahe hu'za e'naza naneke*

<sup>17</sup> Henka 72'a vahe'mo'za huzmantegge'za vute'za ete muse hume ne-eza, anage eme hu'naze. Ramoka havi avamumo'zanena Kagri kagifi hunezmanterke'za ketia amage ante'naze! <sup>18</sup> Jisasi'a ana kezmirera anage hu'ne, Sata'a monafinti kopsinamo' hiankna huno takaundergena ke'noe! <sup>19</sup> Antahihō, Nagra osifavene ha' segintavene, rehapatii hihamua neramina, ha' vahe'mokizmi mika hanavema azeri agateresaza hanavea tami'noankino, mago'zamo'a tamazeri haviza osutfa hugahie. <sup>20</sup> Hianagi havi avamumo tagri ketia antahino amage ante'ne hutma musena osiho. Hanki tamagri tamagima Anumzamo'ma monafi krente'nea zanku musena hiho.

*Jisasi'a Anumzamofo muse hunte'nea naneke  
(Mat 11:25-27; Mat 13:16-17)*

<sup>21</sup> Ana zupage, Ruotge Avamumo azeri muse Jisasina higeno, anage huno hu'ne. Nafanimoka monane mopamofo Ramoka susu huna muse hugantoe. Na'ankure kagra ama zana antahi'zane vahe'mofontera erifira nekinka, osi mofavre nagakna hu'naza nagate eri ama nehane. Izo, Nafanimoka ama'i kagrima kavesiaza hu'nane. <sup>22</sup> Jisasi'ma nunamu huvagamareteno agafa huno kea zamasami'ne. Nafanimo'a maka'zama kegavahuhihamu namine. Mago vahe'mo'a, iza'ne Nagrira ke'za antahiza osu'nazanki, Nefake antahine, Nef'a iza'e, Nemofoke antahine. Nemofo'ma avesite zmagrea vahe'mokizmia, Nefana zamaveri nehie. <sup>23</sup> Anante Jisasi'a rukrehe huno amage'ma nentaza disaipol nagara zamagrike anage huno zamasami'ne, E'ima negazazama kesaza vahe'mokizmia asomu huzmantegahie. <sup>24</sup> Na'ankure anage hu'na neramasamue, korapara rama'a kasnampa vahe'mo'zane, kini vahe'mo'za e'ima negaza'zana'kenaku huanazanagi, anazana onke'naze. Nentahizaza antahinaku huanazanagi on-tahi'naze.

### *Sameria ne'mo ha' vahe'agu asuntgi'nea fronka naneke*

<sup>25</sup> Hagi mago nera kasegere ugota hu'nea ne'mo otino, Jisasi reheno kenaku anage hu'ne. Rempi hurami nemoka, nankna hutena manivava asimura erigahue? <sup>26</sup> Jisasi'a kenona'a anage huno asami'ne, Na'anee huno kasegefina krentene? Nankna hunka ana kasegemofa agu'agesa hamprinka kenka antahinka hunane? <sup>27</sup> Higeno ana kasegere ugagota hu'nea nemo'a kenona huno, **Anumzankamofona maka tumokareti'ene, kagu kamenteti'ene hanave kareti'ene, maka antahintahi kareti'ene avesinentenka, tva'onkare mani'nemofona, kagragu'ma kavemasinentanaza hunka, kavesinto.** (Diu-Kas 6:5, Lev-Pri 19:18)

<sup>28</sup> Higeno Jisasi'a anage huno kenona'a asami'ne, Kagra fatgo hunka kenonana hananki, anama hana kema amage'ma antesunka mani vava kasimura erigahane. <sup>29</sup> Hianagi ana ne'mo'a, agra'a fatgo hu'noe hunaku anage huno Jisasina antahige'ne, tavaonire'ma nemaniza naga'ku'ma banana inamokizmigu hane? <sup>30</sup> Jisasi' kenona'a fronka ke huno, Mago ne'mo'a Jerusalemi kumateti Jeriko vunaku uneramigeno, kumzafa vahe'mo'za eme ahe'za kutuma'a nehanare'za, kukena'a eri varoro hutre'za ahetrageno fri'za huno nemasege'za, atre'za fre'naze. <sup>31</sup> Mago pristi ne'mo ana kante uramino nevuno ana nera ome ke'ne. Hianagi ana nera eme agatereno magokazigati vu'ne. <sup>32</sup> Anahu kna huno Livae ne'mo'a eramino, eme keme agatereno vu'ne. <sup>33</sup> Hianagi magora Sameria ne'mo'a ana ne'ma masenea kantega ne-eno, eme negeno asuragi ante'ne. <sup>34</sup> Ana huteno ana nete eno, ahenaza avufga'are, masavene wainine tagino frenenteno anakin-tene. Ana huteno donki afu'amofo agumpi avrenteno, avreno miza sez aemasaza nompi ome anteno, ana kenege kegava hunte'ne. <sup>35</sup> Nanterana otino ana nomofo kva nera, tare silva zago nemino anage hu'ne. Nama'a zagoma atrenka mago'ane kegavama krintesanama'a, etenama esu'na atrenesanama'a eme miza segantegahue nehuno vu'ne. <sup>36</sup> Ana 3'a vahepintira ina ne'mo kagrama kagesama antahinana, anama kumazafa vahe'mo'za ahe'naza ne'mofona tva'onte neknara huno manigahie? <sup>37</sup> Kasegere ugota hu'nea ne'mo huno, asunkuma hunte'nea ne'mo'e higeno, **Vunka anahukna ome huo** huno Jisasi'a hunte'ne.

### *Jisasi'a Matane Mariakizni nontega nantu vu'nea naneke*

<sup>38</sup> Jisasi'ene amage'ma nentaza disipol naga'ane kantega nevu'za, mago kumapi zamagra vazageno, Mata'e nehaza a'mo Jisasina agi hige'za noma'afi ufre'naze. <sup>39</sup> Matana nenunkna agi'a Meri'e hu'za nehaza a'kino, Ramofo agafi mani'neno, kema hiana antahine. <sup>40</sup> Hianagi Mata'a ne'zama retromahu erizanku antahintahi hakare nehuno, Jisasinte eno anage hu'ne. Ramoka kagra nogano, nenanunknama natrege'na maka ne'zama na-grake'ma retro'ma nehuana? Huntogeno eme naza hino. <sup>41</sup> Hianagi Ramo'a, kenona'a anage hu'ne, Mata, Mata, kagra antahintahi hakare maka'zanku nehunka antahigna nehane. <sup>42</sup> Hianagi magoke'zantfa razana me'ne, e'i anazana Meri'a hentofaza huhampriankino, anazana agripintira eri otrega-haze.

## 11

### Nunamuma huzamofo naneke

(Mat 6:9-13; Mat 7:7-11)

<sup>1</sup> Hagi mago zupa, Jisasi'a magokaziga mani'neno nunamu huvagaretegeno, amagema nentea disaipol ne'mo'a anage huno ome antahige'ne. Ramoka nunamuma hu'zana, Joni'ma amagema nentaza disaipol naga'ama huzami'neaza hunka rempi huramio huno antahige'ne.

<sup>2</sup> Higeno Agra anage huno zamasami'ne, Nunamuma hanutma anage hiho, Tafatimoka Kagri Kagimo'a ruotge huno mesie. Kagri kumamo'a e'nie. <sup>3</sup> Magoke mago ke zage knafima nesuna ne'zana (bretia) neraminka, <sup>4</sup> kumitia apaserantegeta, tagranena anazanke huta miko kumima hurantesamokizmia atrezmantamneno. Hagi tatregeta reravataga zampina u'oframneno.

<sup>5</sup> Huteno anante Jisasi'a anage huno zamasami'ne, Hagi magomoka roneka'amofontega kenage vunka, tagufa breti namitegena, henka nonahuna kamieno, <sup>6</sup> na'ankure ronenimo'a afeteti eno emaninegena, ne'zama amisuazana omanenegena nehue hanankeno'a, <sup>7</sup> nomofo agu'afinti ana ne'mo'a kenona anage hugahie. Ko kafa erigi'na mofavre'ni'ane, nagranena tafete mase'nonanki, mago'zana eri onkamigahuanki eme nazeri oraotio hugahie. <sup>8</sup> Nagra neramasamue, nomofo agu'afima mani'nea ne'mo'a, arone'amo mani'neanagi otino agrira ne'zana omigahie. Hianagi na'ankure kazikazima hania zanku avesinesiama'a eri amigahie. <sup>9</sup> Ana hu'negu Nagra neramasamue, antahigegeno, anazana kamino, hakesunka, kenka eri fore hugahane. Kafante vagre vagre hugeno, kafamo'a anagi kantegahie. <sup>10</sup> Na'ankure antahigaza vahe'mo'za e'nerize. Hakraza vahe'mo'za, keza eri fore nehaze, kafante vagre vagre hanamokizmia, kafana anagi zmantegahie. <sup>11</sup> Ina ne'mo amuno tamifintira, mofavre'amo'ma aganetenkeno nozamegu'ma antahigesigeno'a, nozamea omi osifavea eri amigahio? <sup>12</sup> Hifi kokore amuku'ma antahigesigeno'a, amane segintave (Scorpion) amigahio? <sup>13</sup> Hanki tamagra havizama nehzamota, tamagra antahinaze. Knare museza mofavretmia nezamize. Mago'ane monafi mani'nea Neramafa'a, Ruotge Avamuku'ma antahigaza vahera zamigahie!

### Jisasine havi Avamumofo Belsebul naneke

(Mat 12:22-30; Mak 3:20-27)

<sup>14</sup> Mago zupa ageruma eri tagane havi avamu mago ne'pinti Jisasi'a humegi atrene. Ana havi avamumo atineramigeno, kema nosia nemo'a agafa huno kea nehige'za, tusi'a veamo'za antri hu'naze. <sup>15</sup> Hianagi

mago'amo'za hu'za, havi hankromofo ugagota kvazmimofo Belsebuli hanavefi, Agra havi avamura hunente hu'naze. <sup>16</sup> Mago'amo'za rehe'za kenaku, agafa hu'za monafinti mago avame'za huraveri huo hu'za han-kavetiza antahige'naze. <sup>17</sup> Hianagi Jisasi'a antahintahizmia negeno, anage huno zamasmi'ne, Mago rankumo amu'nompinti refko huno ha' orente arente haniana, taregamoke haviza hugaha'e. Mago nompi naga'moma amu'nompinti refkoma hanuno'a traka huno haviza hugahie. <sup>18</sup> Hagi Sata-ma agra'a naga'ane amu'nompinti refko huno ha' orente arente haniana, nankna huno ana kuma'amo'a oti hankavetigahie? Tamantahimanegoana, na'ankure tamagra hutma, Belsebul ugagota havi hankromofo hanavefi, havi hankrora hunente hazazanku nehue. <sup>19</sup> Hagi Nagra'ma ugagota havi hankromofo \* Belsebul hanavefima, havi hankroma huntesugen'o, iza hanavefi tamagri'ma tamagema nentaza naga'mo'za hunentazae? E'ina hu'neankiza zamagra refko hurnantegahaze. <sup>20</sup> Hianagi Anumzamofo hanaveretima havi avamu hunentesuana, Anumzamofo kumamo'a ko tam-agrite e'ne. <sup>21</sup> Hanave ne'moma kuma'ama kegava huno manisigeno'a, maka zama'amo'a mane so'e hugahie. <sup>22</sup> Hianagi mago hanavenentake ne'mo'ma ha' eme hunteno agateresuno'a, maka ati keve'ane, so'e zama'a erino ome refko hugahie. <sup>23</sup> Iza'o Nagranema nomanimo'a ha' renenante. Iza'o Nagrane emeritru nosimo'a repanini higeno nefre.

*Havi avamumo'za ete neaza naneke*  
(Mat 12:43-45)

<sup>24</sup> Agru osu havi avamumo vahepinti atiramino vuteno, ti omane'nea kokampi nevuno, manigasahu kumaku hakeana onkeno anage hu'ne. Ete rukrahe hu'na ko'ma mani'no'a vahe'mofo agu'afi vanue nehuno, <sup>25</sup> vuno ana nonte ome keana, nona harafi huno eri so'ehu fatgo hunte'ne. <sup>26</sup> Anante ete vuno mago'a 7ni'a havi avu'ava agetereno nehia avamutmi ome zmavareno ege'za, ufre'za umani'naze. Hankino ana ne'mofona henka nomani'zamo'a, kote nomanizana agatereno havizantfa hu'ne.

*Muse hanaza naneke*

<sup>27</sup> Jisasi'a anage huno nehigeno, mago a'mo vea kevumofo amuno'zimifi mani'neno kezatino, amanage hu'ne, Negrera kaseganteno ami kami'nemo'a muse hugahie. <sup>28</sup> Hianagi Jisasi'a kenona huno, Ana hu'neanagi Anumzamofo naneke nentahino amagema nentemo, agatereno musena hugahie.

*Jona avame'zamofo naneke*  
(Mat 12:38-42)

<sup>29</sup> Tusi'a vea krefamo'za mago'ane etruhu rama nehazageno, Jisasi'a agafa huno anage hu'ne, Ama knafi vhahera havi vahemani'ne'za avame'za kenaku nantahinegaze. Hianagi mago avame'za onkegahazanki, Jona avame'zanke kegahaze. <sup>30</sup> Na'ankure Ninive kumate vahemokizmire, Jona'a avame'za mani'neankna huno, Vahemofa Mofavremo enena anahukna huno menima mani'naza vahemotarera huramaverina kegahaze. <sup>31</sup> Anumzamo'ma vahem'a refko huno keagama huzmantesia knarera, Sauti kaziga Siba kumateti Kuini a'mo'a otino, Anumzamo'ma keagama refkoma hanirera, ama knafi vhahera keontahi vahemani'naze huno keaga huzmantegahie. Na'ankure ana kuini amo'a afete'arega mani'neanagi, Solomon'i knare antahintahi'a antahinaku e'ne. Hianagi

\* **11:19** Hankrorema hu'neana, havi avamuku hu'ne

antahiho, mago nera Solomonima agaterenea nera amuno tamifina mani'ne. <sup>32</sup> Anumzamo'ma vahe'ma refkoma hania knarera, Ninive vahe'mo'za oti'za ama knafi vahera keontahi vahe mani'naze hu'za keaga huzmantegahaze. Na'ankure Jona'ma hia kerera zamagu'a rukrehe hu'naze. Hanki keho, Jonama agaterenea nera amafi mani'ne. (Jona 3:4-10,1 Kin 10:1-13.)

*Tavufgamofo tavimofo naneke*

(Mat 5:15; Mat 6:22-23)

<sup>33</sup> Hagi vahe'mo'za tavira rekru hu'za oku'a antege, ekaeka kupina eririza refinotaze. Hianagi tavira tagiza tavima rekru hunte azotare antenesageno, remsa hu'nenige'za ufresaza vahe'mo'za kegahaze. <sup>34</sup> Tamavurgamo'a tamavufgamofo tavire, tamavurgamo'ma keama nehanigeno'a, maka tamavufgamofa masa hugahie. Hianagi haviza hanigeno'a maka tamavufgamofa hani hugahie. <sup>35</sup> Hanki tamagripima me'nea tavi'moma hanima huzankura, kva hiho. <sup>36</sup> E'na hu'negu maka tamavufgafima msamoma avimatenenkeno'a, tamavufgafina hanina omnenena, maka tamavufgamofa tavimoma hiaza huno remsa hu vagaregahie.

*Jisasi'a farisi mono kva vahe kezmasu'nea naneke*

<sup>37</sup> Jisasi'a ana kea huvagaretogeno, mago Farisi ne'mo'a huno, nagrane feru ne'zana eme no huno antahigegeno, vuno neza nenaza trate aza tununte (reclined) umanine. <sup>38</sup> Ana Farisi ne'mo'ma keama, zamagra Farisi vahe'mo'zama zamazama sesema hute'za nezama nenazaza osu, Jisasima nezama amne nenegeno'a, antri hu'ne.

<sup>39</sup> Hianagi Ramo'a anage huno ana nera asami'ne, Tamagra Farisi vahe'motma kapune, pletinena amega sese nehaze. Hianagi tamagu'afina kumazafa zamo'ene, havi avu'avazamo avite'ne. <sup>40</sup> Tamagra negi vahe mani'naze, Agra amegama troma hu'nemo'a, agu'afinena trora osunefi? <sup>41</sup> Tamagrama erinenaza zama, muse nehutma tamagu'areti huta zamunte omane vahe'ma zamamisazana, tamagrira maka zantamimo'a agru hugahie.

<sup>42</sup> Hianagi Farisi vahe'mota kva hiho! Na'ankure tamagra izane aruine, maka hozafinti mananentake ne'zana 10ni'a kevufinti, mago kevua refko huta nemizanagi, Anumzamofo fatgo avu'avazane, avesizamofona netreta, vahera so'e hunozmantaze. <sup>43</sup> Kva hiho Farisi vahe'motma! Na'ankure tamagra osi mono nontamimpi ugota trate mani'zanku tamavenesigetma, maketi kumatamimpi vahe'mo'za antahiramiza husgama haramantezankuke nehaze. <sup>44</sup> Tamagra Kva hiho! Fri vahe'mokizmi keri re-fiteankna huta mani'nage'za, vahe'mo'za ana agofetu ontahiza vano nehaze.

<sup>45</sup> Kasegere ugagota hu'naza vahepinti mago'mo kenona anage hu'ne, Rempi hurami ne'moka, kagrama ama kema hanana, tagriku'ene huhaviza hurantane huno hu'ne. <sup>46</sup> Hianagi Jisasi'a amanage hu'ne, Kasegere ugagota hu'naza vahe'motmanena kva hiho. Na'ankure tamagra vahe'mokizmia tusi'a knaza zamizage'za kanagu hu'za eri'za nevazagetma, tamagra mago tamazankoa antetma knaza zmia e'norize. <sup>47</sup> Tamagra kva hiho! Na'ankure korapama neramagehozama zamahe'naza kasnampa vahe'mokizmia keri tamagra negafize. <sup>48</sup> E'i ana avu'avazamofona, tamagra vahera zmaveri hutma, neramagehoma hu'neazankura knare hu'ne hutma nehaze. Na'ankure neramageho'za kasnampa vahera zamahe fri'nazagetma, tamagra kerizmia kafinentaze. <sup>49</sup> E'i ana agafare, tamagri havi tamavu tamavazamofonku, Anumzamofo knare

antahintahimofo kemo'enena huno, Nagra kasnampa vahe'ene, aposol nagara huzmantesugeno e'nagetma, mago'amokizmia zamahe nefritma, mago'amokizmia zamazeri haviza hugahaze hu'ne. <sup>50</sup> E'ina hu'negu, mona mopama fore'ma hu'neregatima kasnampa vahe'ma zamahe'za korazmima eritagi atre'za e'naza zanteria, nona hu'za meni gafima mani'naza vahe'mo'za knazana erigahaze. <sup>51</sup> Abelima ahegero korama'ama tagiraminereti eno, Kresramana vu itane ra mono nomofo amu'nompima Zekaraiama ahazageno, korama'ama tagitre'nea knarema ehanati'nea vahe'mokizmi koramofo nona'a, tamage ama knafi vahe'motra refko huno nona huramantegahie. <sup>52</sup> Kasegere ugagota hu'naza vahe'motma kva hiho! Na'ankure antahi'zama eri kinofira erinetretma, tamagra'a anampina unofreta, anampima ufrenaku'ma nehaza vahe'mokizmi kana rehi'za hunezmantaze. <sup>53</sup> Jisasi'ma anama huteno'a, ananteti atreno nevige'za, kasegere ugagota hunaza vahe'mo'zane, Farisi vahe'mo'zanena agafa hu'za zamarimpa henente'za, rama'a zanku agenoka nehu'za, <sup>54</sup> mago'a kema hanifinti azerinaza kanku hake'naze.

## 12

### *Vahekura kore osu, Anumzamofonku koro hanaza naneke (Mat 10:26-27)*

<sup>1</sup> Anama nehazage'za mika veamo'za emeritru nehazageno, rama'a tauseni'a vahem'o'za titipa hu'za zamagiareti orentrako arentrako hu'naze. Pusantera Jisasi'a rukrahe huno, amage' nentaza disaipol naga'a zamatavumro ante'ne, Farisi vahe zamuzmakura havige vaheki kva hiho. <sup>2</sup> Na'ankure mago'zamo'a refiotegahie. Hakare'za oku'a me'nesnia zana, henka'a amate fore hugahie. Hakare zama refitenesnia zamo'a, amate efore hanige'za kegahaze. <sup>3</sup> Inankna kema hanimpima hu'nesana kemo'a, masare eama hanige'za vahe'mo'za antahigahaze. Hagi sumike'ma oku'a hanaraginte'pinkama hu'nesanana, anagamu nomumpare marerino huama hanige'za antahigahaze.

*(Mat 10:28-31)*

<sup>4</sup> Rone'niomotma, Nagra neramasamue, avufgama ahe frisimofonkura korera osiho. Anama hutesu'za henka'a, mago'enena zamagra anara huoramantegahaze. <sup>5</sup> Hu'neanagi Nagra kore kea huneramantoe, Tamagri'ma tamahe frino hanave'reti tevefima tamasga hu'tresimofo korora hunteho. Nagra neramasamue, Agri korera hunteho! <sup>6</sup> Hagi 5'a kisave nama tare kasage zugore netraze. Ana nehazankino Anumzamo'a ana namazagagura agera nokanie. <sup>7</sup> Hagi tamagerafa nehue, tamasenire'ma me'nea tamazokara maka kohampari'ne. Korera osiho! Tamagara rama'a kisave namazaga agateretma ra'za mani'naze.

*(Mat 10:32-33; Mat 12:32)*

<sup>8</sup> Nagra neramasamue, iza'o Nagri nagi nagenkema vahe'mokizmi zmavurema huama hanimofona, Vahe'mofo Mofavremo'a, Anumzamofo ankeromo'kizimi zamurera agi'a huama hugahie. <sup>9</sup> Hu'neanagi mago'mo'ma Nagriku'ma onke'noe huno vahe zamufi hufrakisi'mofona, Anumzamofo ankeromokizmi zamavurera Nagranena, zamagrira ozamage'noe hu'na hu frakizmantegahue. <sup>10</sup> Hagi iza'o Vahe'mofo Mofavre mago kema huhaviza huntesimofona, kumi'a eri atrentegahie. Ana hugahianagi iza'o Ruotage Avamumofo huhaviza huntesimofona, kumi'a atreontegahie.

<sup>11</sup> Hu'neanagi, osi mono nonte kva vahete'ene, ruga'a kva vahetema tamavre'za vanageta, nanege hugahune hutma tamagesa ontahiho.  
<sup>12</sup> Na'ankure Ruotage Avamumo kema huku'ma hanaza kea rempi huramisigetma ana knafina hugahaze.

*Rama'a feno ante'nea ne'mofo naneke*

<sup>13</sup> Tusi'a veapinti magomo'a amanage huno Jisasinku hu'ne, Rempi humrami nemoke, nenfuna asamigeno nerfama erisanti haregaha'e huno anterante'nea zampintira, refako hunamino. <sup>14</sup> Jisasi'a ana kenona huno, Kagri'ene negafu amu'nompina, iza kva mani'enka kezani'a nentahinka refko huzanantu huno hunante'ne? <sup>15</sup> Anante amanage huno zamasmi'ne, Kva hiho! Maka'a ruzahu ruzahu agraguuke antahizamofona ha' renenteta, kva huta maniho, vahe'mofo mani'zana fenoma eri'zampina omnene. <sup>16</sup> Nehuno fronka ke zamasmino anage hu'ne, Mago afufenone ne'mofo hozamo'a, so'ezo huno hakare'a raga rentene. <sup>17</sup> Ana ne'mo'a anage huno agesa antahi'ne, nezani'a erintesua nona omaneanki nagra nankna hugahue? <sup>18</sup> Nagra ne'zama erinte nona tagna vazina erira huna kitena, anampi maka ne'zane, mago'a zani'a erintegahue huno antahi'ne. <sup>19</sup> Anantero nagrani'agura anage hugahue, nagra rama'a kafufima nazama hania zantamina eritru huankina mani fru hu'nena tine nezane nenena musenkase hugahue hu'ne. <sup>20</sup> Hianagi ana ne'ku Anumzamo'a anage hu'ne, kagra neginagi vahe maninane! Meni kenageke frigahananki, maka'za eri atru hu'nazana iza erigahie hu'ne? <sup>21</sup> E'inahu'za zamagra'aguuke nentahiza mopafi fenozmima eritru hanaza vahe'mokizmia fore huza-migahie. Hianagi Anumzamofontera e'inahu vahe'mokizmia fenozazmi omnene vahe mani'naze.

*Avufamofo azahu zanku antahintahi hakare hu'zamofo naneke  
(Mat 6:25-34)*

<sup>22</sup> E'i ana agafare Jisasi'a amanage huno amage'ma nentaza disaipol nagara zamasmi'ne. Tamagra tamavufagura antahintahi hakare osiho. Nane'za neneta manigahune, nankukena antanita tavufa refitegahune huta osiho. <sup>23</sup> Na'ankure tasimuma erita manizamo'a ne'zana ageteregeno, tavufamo'a kukenama hu'zana agaterene. <sup>24</sup> Namamofo keho, zamagra hoza kriza ne'zana nogafize. Nezama erinte'za nesaza nona omne'neanagi, Anumzamo ne'zana nezamie. Tamagra namamofona agatereta raza vahera mani'naze. <sup>25</sup> Mago'mo tamagripintira antahintahi hakarema haniazamo'a, asimu'a osi'a erizaza hugahio? <sup>26</sup> Tamagrama ama osizama osanutma, na'a higeta mago'a zankura antahintahi hakare nehaze? <sup>27</sup> Inozamo'ma hageno amosrema neheaza keho. Zamagra mragu'za atiza kukena hatiza nontanize. Hianagi Nagra neramasamue, kini ne' Solomoni'ma avasese'anee kukena hu'neanagi, ama flauamofo amosaremo agetereno knarezantfa hu'ne. <sup>28</sup> Hianagi Anumzamo'a meni mesigeno okima eriza tevefima kres-naza inozana e'inahukna huno kukena hunezmanteanki, Osi tamentintine vahera! Anumzamo'a agetereno vahe'mota kukena huormantegosio? <sup>29</sup> Naneza neneta, nanti negahune huta antahintahi hakarea osiho. <sup>30</sup> Na'ankure zamentinti osu vahe'mo'za anazankura tusi'za hu'za nehakaze. Hianagi tamagri, Neramafa'a atupama hanaza'zana ko antahino keno hu'ne. <sup>31</sup> Hu'neanagi kotazana, Anumzamofo kumaku haketenkeno, ana miko atupama hanaza zana tamigahie.

*Monare hirozama eritru hanuna zamofo naneke  
(Mat 6:19-21)*

<sup>32</sup> Onensa sipisipi afu kevumota korora osiho. Na'ankure tamagri Nafatmimo'a, mona kuma'a muse huno tamiku hu'n'e. <sup>33</sup> Afufenontamia zagore atretma, zago erita amunte omane vahe nezminkeno monafi fenozantamimo'a meno, anazamo'a monafina havizana nosanageno, kumzafa nosesageno, havi kafamo'za eri havizana osu kumapi antegahaze. <sup>34</sup> Na'ankure feno zanka'ama me'nenirega, anantegae kagu'a antegahane.

*Ramo'ma esia zanku kva hu'za manisaza naneke*

<sup>35</sup> Hagi Kukena tamia huta, tro huta mani'neta, tavi tamia rekru hutma maniho. <sup>36</sup> Kva'zmimo arave hu nezantegati esigu kva hu'za manine'za, kafante eme vagre vagre nehige'za, ame hu'za anagi nentazankna huta kva huta maniho. <sup>37</sup> Hagi kazokzo eriza vahe'mo'za, kva zmimoma esigu kva hu'za mani'nesaza vahe'mo'za muse hugahaze. Tamage hu'na neramasamue, Agra'a ana kva nemo amu'nofi nehuno, kukena'a eri atupa huteno, eri'za vahe'a hanige'za zamaza tununte mani kaginiageno, kavera agra eme zamigahie. <sup>38</sup> Kenege esio, kotu avame esio, zamunte'za kva hu'za maninesageno, eme zamagesia kazokzo eri'za vahe'mo'za, muse hugahaze. <sup>39</sup> Hu'neanagi ama'nankea antahiho, mago nomofo nefama e'i knazupa kumzafa vahe'mo'za noni'a tagna vazigahaze huno antahinesuno'a, kvagrino mani'neno zamatesige'za noma'a tagna vaziza uofrehahaze. <sup>40</sup> Tamagranena tamavu anteta kva huta maniho. Vahe'mofo Mofavremo'a, omegahie huta hanaza knafi, egahanki kva hutma maniho.

*Havi eri'za vaheku'ene knare eri'za vaheku'ene hu'nea naneke  
(Mat 24:45-51)*

<sup>41</sup> Pita'anage huno antahige'ne, Ramoka ama fronka kea tagrikuke nehampi, maka vaheku'ene nehane? <sup>42</sup> Anante Ramo huno, Knare antahizanteti eri'zama'a erifatgo nehania ne'mofo kva'amo'a, huntenkeno mago'a eri'za vahe'a kva krinezmanteno, nezama nesaza zana kna fatgore refko huzamisia vahera iza'e? <sup>43</sup> Ana kazokzo eriza ne'mo'ma eri'zama enerino mani'enigeno, kva'amo'ma eme kenimo'a, asomu erigahie. <sup>44</sup> Tamage hu'na neramasamue. Ana nera kva'amo'a huhamprintenkeno, maka zama'a kegaya hugahie. <sup>45</sup> Hianagi ana kazokzo eri'za ne'mo'a agu'afina huno, kvanimo'a za'za kna maniteno egahie nehuno, agafa huno eri'zama eneriza kazokzo eri'za vene'nene, ananene nezmaheno, ne'zana neneno, aka ti neno neginagi nehuno, <sup>46</sup> kva'amo egahie huno antahiominesia knare'ma esuno'a, eme aheno rutateneno, zamentinti osu vahe'mo'za manisaza kumapi antegahie. <sup>47</sup> Hanki ina kazokzo eriza ne'mo'ma, kva'amofo avesizama keno antahino hu'neno, ana avesimofonte kva osuno, amagema ontsemofona rama'a zampi azeri haviza hugahie. <sup>48</sup> Hianagi iza'o antahino keno osu'neno, knaza erigaza hu'nesimo'a, osia knokeve erigahie. Maka vahe'ma rama'ama zminemofompintira, mago'ane rama'a ante agofetu hu'za amisazegu hugahie. Hagi izano antahimino rama'a ami'enimofompintira, mago'ane rama'a erinaku agesa antahigahie.

*Jisasi'a amu'nontifi atane'za erino e'nea naneke  
(Mat 10:34-36)*

<sup>49</sup> Nagra ama mopa teve taginteku e'noe. Nagri'ma navesiana tevearukru hanie! <sup>50</sup> Hianagi tusi'a knazamo navega ante'neankina ti freankna

hu'na, ana kanazampina ufretena atiramisugeno, ana knazupa vagaregahie! <sup>51</sup> Tamagrama tamagesama antahi'zana, ama mopafina rimpia fru'za erina enofi? A'o, amu'nontamifina atane'za eri'na e'noe. <sup>52</sup> Meninena mago nompi 5fu'a naga mani'nenamo'za amunozamifina atane'za fore hanigeno, tagufamo'za refko hu'za taremokiznia ha'reznantesageke, taremokea tagufamokizmia ha'rezmantegaha'e. <sup>53</sup> *Famo tremokea refko huke, nef'a nemofo ha'rentena, nemofo a' nef'a ha'rentegahie. Anazanke huno nerera'a refko huno mofa'amo ha'rente'na, mofa'amo a' nererana ha'rentegahie. Mago a'mo a' nenoferona ha'rentesigeno, nenofero'a, vemofo nererana ha'rentegahie.*

(Mat 16:2-3)

<sup>54</sup> Hagi Jisasi'a anage huteno, tusi'a veara anage huno zamasami'ne, Kazageno hampomo zage ufretegama reraga higeta, ko arugahie nehazageno, kora nerie. <sup>55</sup> Hanki mago kaziga asoparegati (sauti) zahoma erigeta, zage ha hugahie nehazageno, ana nehie. <sup>56</sup> Tamagra tavre vahere! Tamagra mopafine monafinema fore hiazana refko hutma negaze. Hianagi menima ama knafima fore'ma hiazana na'a higetma refko hutma nonkaze?

(Mat 5:25-26)

<sup>57</sup> Hagi nahigetma tamagra'a refko hutma fatgoma hu'neazana nonkaze? <sup>58</sup> Na'ankure magomo naneke huganteku kavreno kanisol vahete nevani-genka, karankama nevanuta, ko keaga hunka agranena erifatgo huo. Ana'ma osnanana ana ne'mo'a kavreno ke refkohu nete vanigeno, kavreno kina nonte kva nete kantena, kina hugantegahie. <sup>59</sup> Nagra anage hu'na neramasamue, ana kina nompi mani'neta, zagoma miza segahaze huno hurmantenesiama'a miza sevagareteta atiramigahaze.

## 13

### *Agu'a rukrahe osanimo'a fanane hania naneke*

<sup>1</sup> Jisasi'a anante mani'negeno, Galili vahe'ma Paeroti zamahe frino korazmi erino Anumzamofonte Kresramana vu'zane eri havia huza-mige'za, Kresramana vu'naza nanekea mago'a vahe'mo'za eme asmizageno, <sup>2</sup> Jisasi'a anage huno eme zamasami'ne, Tamagra tamagesa antahi'zana, ana Galili vahe'mo'za mago'a Galili vahe'mokizmi zmagetere'za tusi'a kumi hu'nazankino anazamo hige'za, ama knazana eri'naze hutma nehazo? <sup>3</sup> Nagra neramasamue, a'o. Hianagi tamagrama tamagu'a rukrahe osanutma, mikatomta anahu hutma frigahaze. <sup>4</sup> Hifi tamagra antahi'zana 18ni'a vahe'ma Siloamu kumate zaza nomo kriteno zamahe fri'nea vahe'mokizmi kumi'zmimo'a, maka Jerusalemi mani'naza vahetmimofo kefotana zamagetere'za hu'naza vahe fri'naze huta nehazo? <sup>5</sup> Nagra i'o hu'na neramasamue. Hianagi tamagu'a rukrahe osnutma e'inahu kna hutma tamagranena mika frigahaze.

### *Raga'a ore'nea fiki zafamofo fronka naneke*

<sup>6</sup> Anage nehuno, Jisasi'a ama fronka ke zamasami'ne, Mago ne'mofona waini hoza'afina, fiki zafa kri'neankino, nena raga'ama rente'enigu ome keana, raga'a reonte're. <sup>7</sup> Hoza nef'a, ana hoza'ama kegava kri'nea neku huno kamago, tagufa kafu zagefima etevute hu'na koana, ama zafamo'a raga'a reonteanki antagitro! Nahanigeno mopamofo tima'a eri vagaregahie? <sup>8</sup> Higeno hozare kegava nehia ne'mo'a, hoza nefana anage huno asami'ne, atregeno ama kafufina me'nena, agafafina mopa kafina mago'a azeri masavema hu'zana antanena, <sup>9</sup> ragama anaga'a kafufima renteniana,

knare hugahie. Hanki raga'ama reontesigenka eme antagi atresane huno asami'ne.

*Jisasi'a mani fruhu kna zupa mago ara azeri so'e hunte'nea naneke*

<sup>10</sup> Mani fruhu (Sabati) knazupa Jisasi'a osi mono nompi umrerino rempi hunezmigeno, <sup>11</sup> mago ara 18ni'a kafu zagefi havi avamumo amagena azeri fagagigeno, pripri huno vano nehuno, oti fatgo huno vano nosia ara, <sup>12</sup> Jisasi'a negeno ke higeno egeno, **Ama a'moka, krimofo kinafintira katufegantoe.** <sup>13</sup> Nehuno ana a'mofa agofetu azana antegeno, ame huno ana kri'amo'a vagaregeno oti fatgo nehuno, agafa huno Anumzamofo agi erisaga hu'ne. <sup>14</sup> Hianagi osi mono nonte kva ne'mofona rimpia he'ne. Na'ankure Jisasi'ma mani fru knazupa (sabat) ana a'mofa eri so'e hunte'nagu, maka veara amanage huno zamasmi'ne. 6si'a eri'za eneruna kna me'nagu, tamazeri so'e hanie hanutma, e'i ana knafi egahaze. Hanki mani fruhu (Sabati) knazupa tamazeri so'e hanie hutma omeho. <sup>15</sup> Hianagi Ramo'a ana kenona'a anage huno asami'ne, **Tamagra tavre vahe mani'naze. Makamotma mani fruhu (sabat) knazupa bulimakaotamifi, donki tamimofona kegina zamifinti ti nesnagu katufeta zamavareta novazo?** <sup>16</sup> Hanki ama ara Abraha mofakino, Sata'a zaza kna 18ni'a kafuzagefi kina rentegeno mani'nege'na, mani fruhu (sabat) knazupa katufe netrogeta, mani fruhu knagi anahura osuo hutma nehazo? <sup>17</sup> Anagema nehigeno'a, ke ha'ma rentaza vahe'mo'za zamagazegu nehazageno, maka veamo'za hirozantfama hu'nea zankura muse hu'naze.

*Zistigu'ene masteti zafa avima'agu hu'nea fronka naneke  
(Mat 13:31-33; Mak 4:30-32)*

<sup>18</sup> Anante Jisasi'a amanage hu'ne, **Anumzamofo kumara inankna hu'ne?** Nazante avame kea hunte'na hugahue? <sup>19</sup> Masteti zafamofo raga'a, osi raga'a me'negeno, mago ne'mo erino hoza'afi krigeno hageno ra zafasege'za, hare'za vanoma nehaza namamo'za azankunate nozamima eme kizankna hu'ne.

<sup>20</sup> Hagi mago'ane Jisasi'a anage hu'ne, **Nazante avame kea Anumzamofo kumakura huntena hugahue?** <sup>21</sup> Amanahu kna hu'ne, mago a'mo sikoni krenaku rama'a flauapi, osi'a zisti herafinteno eri havia huntogeno, ana mika flauamo zonerea kna hu'ne.

*Osi kahamofo naneke  
(Mat 7:13-14,21-23)*

<sup>22</sup> Anage huteno, Jisasi'a ranra kuma'tamimpine, osi kumatamimpi ufrempo rempi huzamime Jerusalemi vunaku nevigeno, <sup>23</sup> mago vahe'mo amanage huno antahige'ne, Ramoka Anumzamo'ma zamaguma vazi'nea vahera osi'a mani'nafi? Jisasi'a anage huno zamasami'ne. <sup>24</sup> **Osi kafantema ufrenakura hanavetita ufreho. Na'ankure rama'a vahe'mo'za osi kafanteti ufrenakura hanazanagi, uofregahaze.** <sup>25</sup> Nomofo nafa'amo otino kafa erigina, kafante eme otineta vagre vagre nehuta, Ramoka kafa anagiranto! Hanageno ana ne'mo'a huno, igati vahe mani'naze, tamagrira ontmage'noe huno hugahie. <sup>26</sup> Hanigetma tamagra anage hugahaze. Kagrane magopi mani'neta ne'zane, tinena neneta kumatifi rempi huraminketa antahi'nomota neone hanageno, <sup>27</sup> Nagra ontamagenoanki, igati vahe mani'naze, Kefo zanke hu vahe'mota amafintira maniganeho huno huramantegahie. <sup>28</sup> Anampina zavira neteta tmavera anikreki nehuta, Abrahamune Aisakine Jekopune, maka kas-nampa vahera Anumzamofo kumapina kegahaze. Hu'neanagi tamagrira

tamasgafetrena meg'i'a mani'neta krafa hugahaze.<sup>29</sup> E'ina hanige'za maka veamo'za zage hanati kazigati'ene, zage fre kazigati'ene, ruga raga sopare-gati'ene Anumzamofo kumapi eme eri atru hu'za zamaza tununte (recline) manigagine'za ne'za netrate ne'zana negahaze.<sup>30</sup> Hanki henka mani'nenaza vahe'mo'za ugota hanage'za, ugota hu'enaza vahe'mo'za uhenkategahaze.

*Jisasi'a Jerusalemi vaheku asuntgi zamante'nea naneke  
(Mat 23:37-39)*

<sup>31</sup> Anagema nehigeza, Farisi vahe'mo'za e'za amanage hu'za Jisasina asmi'naze, atrenka amafintira ru kaziga vuo. Na'ankure Heroti'a kahenaku nehie.<sup>32</sup> Jisasi'a huno, Afi' kragna vhahera amanage huta ome asmiho, antahihohavi avamu'tamina hunentena, kri vhahera menine oki'nena zamazeri neganamrena, anante knazupa eri'zama erivagareku e'nore uhanatigahue.<sup>33</sup> Tamage Nagra menine oki'nena vuna tagufa knazupa uhanatigahue. Na'ankure kasnampa nera, Jerusalemi kumamofo meg'i'a ahe ofrigahaze.<sup>34</sup> Jerusalemi kumare, Jerusalemi kumare, Kva huo! Anumzamo huntogeno kagriku'ma e'nea kasnampa vhahera zmahenefrinka, haven-kno zamahe'nane! Nama'a zupa Nagra mofavre raminka'a, a' kokoremo anenta'a agekona kampi azeri franekiaza hunaku huanagi, kagrira kave'nosie!<sup>35</sup> Hagi antahihoh, nonkumatmimo'a vahe omani kokankna hugahie. Nagra anage hu'ha neramasamue, tamagra Nagrira onage mani'nesageno mago knama esigetma, anage hugahaze. *Ramofo agifi ne-emofona asomu hentesie hutma hugahaze.*

## 14

*Jisasi'a kri eri'nea ne' mani fruhu kna zupa eri so'e hunte'nea naneke*

<sup>1</sup> Mago mani fruhu knazupa (Sabati) Jisasi'a Farisi kva ne'mofo nompi ne'za nenaku vuno umani'neg'e'za, nankna hugahie hu'za zamagra kete'za mani'naze.<sup>2</sup> Ana higeno avuga mago nera avufga zore krimo azeri haviza hu'nea ne' mani'ne.<sup>3</sup> Kasegere ugota hu'naza vahe ene, Farisi vhahera Jisasi'a anage huno zmantahigene. *Mani fruhu knazupa (Sabat) knare vhahera zamazeri so'e hugahumpi osugahune?*<sup>4</sup> Hianagi zamagra ke osu manizageno, ana nera avufare azerino kri'a azeri so'e huteno huntogeno vu'ne.<sup>5</sup> Ana huteno anage huno zamasami'ne, *Inamoka mofavrekamo'bu-limakao afukamo ti afi kerifi uraminenigenka, mani fruhu (Sabati) knazupa ame hunka ome avare anaga otegahano?*<sup>6</sup> Zamagra ana kemofo nona'a hugara osu'naze.

*Anteramino manizamofo naneke*

<sup>7</sup> Jisasi'a kegeno ne'za nehogu ke hazage'za e'naza vahe'mo'za, ra zamatima eri trateke emanizageno, Jisasi'a anage huno fronka kea zamasami'ne.<sup>8</sup> Mago'a vahe'mo'ma, tamagri'ma ke hanigetma arave hu nezantema vanutma, ra agima ami tratera uomanaho. Na'ankure mago vhahera tamagri'ma tamagatere'nesia vhahera kea hu'nesigu'enene.<sup>9</sup> Hagi ana taregamota tanagi hu'nesimo eno, traka'a ama ne' amio huno hanigenka, kagazegu nehunka atrenka refarega umanigahane.<sup>10</sup> Tamagima hanigetma vanutma henka trate umani'nenkeno, tamagima higeta vu'nazamo'ma esuno'a, anage huno hugahie. Ronenimota, enagagafeho hanigetma, maka trate'ma mani'naza vahe zmufina ra tmagia erigahaze.<sup>11</sup> Na'ankure maka

vahe'mo'za zmauvufga ra hanamokizmia, Anumzamo'a zamazeri fenka tre-gahie. Hianagi zamagra zmauvufga anteramisamokizmia, Anumzamo'a zamazeri sga hugahie.

<sup>12</sup> Anage nehuno, ne'za nehoguma ke hige'za e'naza kva nera asamino, ra ne'za kresnunka roneka'ane, kafu kaganaha'e'ine, vaheka'ane afufeno zimine vahe'ene zamagrike zamagi osuo. Ru ana vahe'mo'za kagri'enena ke hu'za nona hu'za kamisagenka mizanka'a erigahane. <sup>13</sup> Hu'neanagi ra nezama retromta nehanunka, zmuute omne vahe'ene, agia aza stinesia vahe'ene, aga havizahu vahe'ene, avusu hu'nesnia vahe kea huge'za echo. <sup>14</sup> E'inahu vahe'mo'za nona hu'za kamigara osu'nazankinka, kagra asomu erigahane. Na'ankure fatgo vahe'mo'za frinesafintima otisaza knazupa mizanka'a erigahane.

<sup>15</sup> Mago'mo nezane trate zamaza tununte mani'nafinti ana kema hia nentahino, anage huno Jisasina asmi'ne. Maka vahe'mo'za Anumzamofo Kumapima bretima nesamo'za asomu erigahaze! <sup>16</sup> Hianagi Jisasi'a ana kemofo nona'a anage huno asmi'ne, Mago ne'mo'a ra ne'za retro huteno hakarea vea ana nezante echo huno ke hu'ne. (Mat 22:1-10) <sup>17</sup> Ne'zama nesaza kna egeno, kazokzo eri'za vahe'a hunteno, koma zamagi hu'noa vahete vunka echo hunka ome zamasamio. Na'ankure nezantamia hago retro huramante'ne hunka ome zmasamige'za echo. <sup>18</sup> Hianagi maka'mo'za hu'za tasunku hunanki, eri'zanti me'ne hu'naze. Ese'mo'a anage huno ana kazokzo eriza nera asmi'ne. Nagra mago mopa mizasenoa ome kegahuankina, nasunku huanki ovugahue. <sup>19</sup> Anante'mo'a anage hu'ne, 10ni'a hoza eri bulimakao miza sentenorega vu'na ome avame ante'na kegahuankina, nasunku huanki omegahue. <sup>20</sup> Anante'mo'a anage hu'ne, meni ara eri'noanki'na omegahue. <sup>21</sup> Ana kazokzo eriza ne'mo rukrehe huno kva'amofonte eno eme asmi'geno, kva nemo'a rimpaa hegeno, ana kazokzo eri'za nera anage huno asmi'ne. Ame hunka ra kumamofo osi kampine ra kampine nevunka, afufenozmi omne'nesnia vahe'ene, zmagia zamaza stinesia vahe'ene, zamaga haviza hu'nesnaza vahe'ene, zamavu asu hu'nesnia vahe'ene zamavarenka amare eno huno hunte'ne. <sup>22</sup> Anante kazokzo eri'za ne'mo'a huno kva'nimoka, kema hunantanazana hago huanagi nompina mago'a kankamuna me'ne higeno, <sup>23</sup> kva ne'mo'a anage huno kazokzo eri'za nera asmi'ne. Atiraminka ranra kampine nomofo kegina kante vunka tutu hunka ome zmasamige'za, e'za noni'afina emanu aviteho. <sup>24</sup> Na'ankure Nagra anage hu'na negasamue, magore hunka ko'ma zamagima hu'noa vahe'mo'za, nezani'afintira onetfa hugahaze.

### *Agesa antahi so'e huteno Jisasi amage vaniazamofo naneke*

<sup>25</sup> Jisasina tusi'a vea krerfamo'za amage avaririza nevazageno, rukrehe huno amanage huno zamasmi'ne.

<sup>26</sup> Mago'mo Nagrite enaku nehuno, nefane nererane a'amofone, mo-favre'ane afuhe'ine, asarehe'ine, agra'agu'enema ha'ma reontesimo'a, Nagri disaipol omanigahie. <sup>27</sup> Iza'o agra'a keka zafa erigofino Nagri namage omesimo'a, Nagri disaipol omanigahie. <sup>28</sup> Iza'o tmagripintima zaza noma kinaku hanuno'a, kotazana manineno nama'a zagonu nona ki vagaregahue huno refako huno keteno nona kino. <sup>29</sup> Za'za no kinaku eri agafa huno tra'a tro hunteten, kivaga oresigeno, kesnaza vahe'mo'za hunte'za agiza nere'za, <sup>30</sup> ama ne'mo'a knare huno nona agafa hianagi, nona kivagaregara osie hunka hugahaze.

<sup>31</sup> Hagi mago kini ne'mo'ma, mago kini ne'ma ha'ma ome huntenakura, esera mani'neno antahino nagrira 10 tauseni'a sondia vaheni'a maninazankita 20 tauseni'a sondia vahe'mo'zama ha'ma eme hurantesaza vhahera zmageteregahumpi, zmagete oregahune huno refko huno nege.  
<sup>32</sup> Ha'ma agateregama osnuno'a, ha' vahe'amoma afete ne-esigeno, agra mago'a vahe huzmantenke'za vu'za agri agi eriza magoaza ome huhampri nezmante'za ha'ma osu'za zamarimpa fru hu'za manisagu ome asmigahaze.  
<sup>33</sup> Ana hu'negu mago'mo'e huno, mikozama'amofo amagena huomisimo'a, Nagri disaipol omanigahie.

### *Hage'mofo fronka naneke*

<sup>34</sup> Hagemo'a knare hu'neanagi, haga'ama omnena, ete inankna huno haga'a erigahie? <sup>35</sup> E'i haviza hu'neno mopamofonena masevena amigara osu'neankino, atresigeno amnezankna hugahie. Iza'o agesa me'nenigeno nentahisimo'a, atregeno agesa antahise hino.

## 15

### *Sipisipi afu fanane hu'nea fronka naneke*

(Mat 18:12-14)

<sup>1</sup> Hanki maka takisi zago e'neriza vahe'mo'zane, kumi vahe'mo'za Jisas-inte erava'o hu'za naneke'a antahinaku hu'naze. <sup>2</sup> Hianagi Farisi vahe'ene kasegere ugota hu'naza (sraib) vahe'mo'za zamagra'a ke hugantu hugama hu'za, ama nemo'a kumi vahe zmarenlo ne'zana zamagrane magopi nene hu'za nehazageno, <sup>3</sup> Jisasi'a ana kenona amanage huno fronka kea zamasami'ne, <sup>4</sup> Mago'moma tamagripintima, 100'a sipisipi ante'enenifinti mago'mo fanane hanigeno'a inankna hugahie? 99ni'a zamatrengi'za agupofi mani'nenageno, fananema hu'nemofonku hakeva hakeva huno keno erifore hugahie. <sup>5</sup> Ome keno eri fore huteno, afunte avrenteno muse nehuno, <sup>6</sup> avreno nontema ehanatino'a, roneamokizmine tva'onte'ma nemaniza nagara ke harige'za esageno, anage huno zmasamigahie. Muse nagri ene eme hinketo. Na'ankure fnanema hu'nea sipisipia hago hakena eri fore hu'noe huno hugahie! <sup>7</sup> Hanki Nagra amanage hu'na neramasmue. Anahukna kante, 99ni'a vahe'mo'za fatgo hu'nazankiza zmagu'a rukrehe osugahazanagi, mago kumi vahe'mo, agu'a rukrehe nehigeno'a monafina tusi muse nehaze.

### *Zgomo nompi fanane hu'nea fronka naneke*

<sup>8</sup> Jisasi'a mago'ane huno, Mago a'mo'ma 10ni'a zago ante'enenifinti, magoke zogoma fanane hu'enkeno'a, rampe tavi taginteno noma'a harafi huno hakeva hakeva huno keno eri fore hugahie. <sup>9</sup> Ana a'mo'ma ome ke fore huteno'a, rone'agu'ene, tva'oma'are nemaniza vaheku'enena zmasamino, Muse nagrane eme hinketo, na'ankure zagonima fananema hu'neana hago hakena erifore hu'noe huno hugahie! <sup>10</sup> Hanki amanage hu'na neramas-mue, anahu kante mago kumi vahe'mo'ma agu'ama rukrahe'ma nehige'za, Anumzamofo ankeromo'za tusi muse nehaze.

### *Tare kognafinti mago'mo nefu atreno vu'nea fronka naneke*

<sup>11</sup> Jisasi'a amanage huno zamasmi'ne, Mago ne'mo tare ne' mofavre zanante'ne. <sup>12</sup> Henka ne'amo nafa'amofoonku anage huno asami'ne, afufeno ka'a nagrama eri sruama'a refko hunka namisnane higeno, nefu'a fenoma'a refko huno znam'i'ne. <sup>13</sup> Zaza kna omanineno henka ne'amo, fenoma'a erino afete moparega vu'no anantega umani'heno, aza osu havi avu'avazante

fenozama ome atre eme atre hu'ne. <sup>14</sup> Maka'zama'a atre vagaretegeno, ana mopafina tusi agate'za fore higeno, ana ne'mofona mago'zama'a omnegeno tusi'a agazanku hu'ne. <sup>15</sup> Ana higeno mago mopa agafa nete vuno, erizampi avresigu ome antahigegeno, ana nemo'a afu'a kegava hinogu huntegeno afu kevuma mani'narega vu'ne. <sup>16</sup> Magore huno vahe'mo'za ne'zana omizageno, afumo'za kohe akru'a nenazafinti nemu hu'naku agesa antahintahi hu'ne. <sup>17</sup> Hianagi agrama knare antahintahima e'nerino'a, agra'a anage hu'ne. Mika'a nenfa eri'za vahe'mo'za rama'a breti nenaze. Hianagi nagra amafi mani'nena nagakura fri'za hue! <sup>18</sup> Nagra otina nenfante vuna, anage hu'na ome asamigahue. Nafanimoka Anumzamofonte'ene kagritera kumi hu'nogu, <sup>19</sup> ne'nimo'e hunka kagra nagrikura osunka, eri'za vaheka'agna hunka navro hu'na hugahue huno agesa antahine. <sup>20</sup> Anage huteno otino nefantega e'ne, ogamanu ne-egeno, nafa'amo negeno asuntaginteno, agareno vuno ome agazafeno, agi antako hu'ne. <sup>21</sup> Ana nehigeno ana ne'amo anage huno nafa'amofo ome asmi'ne, Nafa'nimoke, Anumzamofonte ene kagrite'enena kumi hu'noe. E'ina hu'negu ne'nimo'e hunka nagrikura hugara osu'noe. Hanki eri'za vahe'agu anage huno zmasamine, ame hutma hentofa kena erita eme antaninentetma, azampina asane agia anone eme antantieho. <sup>23</sup> Agaho bulimakamo'ma afovage hu'nesia avreta eme ahetma, krenketa neneta maka'mota musena hamneno. <sup>24</sup> Na'ankure ama ne'nimo'a fri'neanagi, ete asimu eri'ne. Fanane hu'neanagi, ete hago ehanatine, nehige'za tusi'za hu'za muse hu'noe.

<sup>25</sup> Hagi zage ne'mofavre'amo ehanatino nomofo tva'onte ne-eno, zavena neheza avogema nehzana nentahino, <sup>26</sup> mago eri'za vahe ke huno, na'a anamafina nehaze huno antahige'ne. <sup>27</sup> Ana ne'mo'a anage huno asmi'ne, negagna'a ehanatigeno negafa'a afovage hu'nea agaho bulimakao aheno krege'za nene'ze. Na'ankure negagnana mago'zamo'a azeri haviza osigeno ete ehanatigeno'e huno asmine. <sup>28</sup> Hianagi nempu'amofona rimpa hegano, ana nompima ufrezankura avesra hu'ne. Nefa'a megia atiramino mofavre'a azeri fru huke hu'ne. <sup>29</sup> Hianagi ana nona'a amanage huno nafa'amofo asmi'ne, kama antahio! Kagri eri'zana kazahu'na vu'noe. Rama'a zagegfufi erizanka'a erinegantena, mago zupe hu'na keka'a rufu'otagine. Ana ne-hugenka magore hunka osi memena naminkena, rone ni'amozanena aheta kreta neneta musena osu'noe. <sup>30</sup> Hianagi ama mofavre kamoma maka zanka'a monko avu'avazante ome atre vagareno eri haviza huteno egenka, kagra afovage agaho bulimakao ahenka krente'nane. <sup>31</sup> Higeno nef'a'anage huno asmi'ne, ne'nimoka kagra hakare zupa nagrane mani'nanankino, maka'zama ante'noana, Kagri su'a me'ne. <sup>32</sup> Hianagi tagra neza neneta muse huntegahune. Na'ankure ama negagna'a fri'ne huta hu'noanagi, kasefa huno mani'ne. Fanane hu'ne huta hunanagi, efore hu'ne huno asami'ne.

## 16

### Fatgo osu kva eri'za vahe'mofo fronka naneke

<sup>1</sup> Jisasi'a, mago'ene amage nentaza disaiopol naga'amokizmi anage huno fronka kea zamasmi'ne, Magora afufenone ne'mo'a, fenoma'are ugagota huno kva nehia eri'za ne'mo, fenoma'a eri havia hu'nea nanekea, <sup>2</sup> nentahino ugagota eri'za ne'a agi higeno egeno, na'a hu'nana naneke antahi'noe? Mafka eri'zama eri'nana avontafe ka'a erinka enka eme

erifatgo huo. Na'ankure kagra mago'ene ugagota kva omanigahane huno higeno, <sup>3</sup> ana ugagota eri'za kva ne'mo'a amanahu ke agra'a agu'afina antahi'ne, na'a nagra hugahue. Kva ni'amo'a eri'za ni'a eri atreanki? Nagrira hoza eri hanaven'i omnegahiankina vaheku nzahuo huzankura nagaze hugahie huno nehuno, <sup>4</sup> Nagra naza hugahue hago antahue, ugagotahu kva eri'za'niafinti hunante'na, vahe'mo'za muse hunante'za navare'za nozmifi ome nantegahaze. <sup>5</sup> Nehuno ozafa'amofo zama nofi huno eri'nea vahe, mago mago ke higeza ageno, ese'ma emofo agra anage huno antahige'ne, nama'a ozafa'nimofo'zananofira hunka eri'nane? <sup>6</sup> Higeno ana ne'mo'a anage hu'ne, 100'a Olivi masaventafe eri'noe higeno, ana fenonte ugagota hu'nea kva ne'mo anage hu'ne, ame hunka mopafi maninka avontafeka'a erinka 50'a masaventafene hunka avona krento huno asami'ne. <sup>7</sup> Anante rumo egeno ana ugagota kva eri'za ne'mo antahige'ne, Nama'a kagra nofira hu'nane? Higeno ana ne'mo'a 100'a witigure higeno, ugagota eri'za kva nemo'a huno avon tafe erinka 80'a witigure hunka avona krento hu'ne. <sup>8</sup> Henka kva ne'mo'a, fenozante ugagota huno kvahu so'e osu'nea kva ne'muse hunte'ne. Na'ankure antahiza me'nea kva vahemo nehiaza hu'negure. Hagi ama knafi havizama nehaza vahe'mo'za zamagra zanteria knare hu'za kva nehu'za, tavi masare'ma nemaniza vahera zamagateneraze. <sup>9</sup> Amanage hu'na Nagra neramasmue, fenoma erinka ama mopafi fatgo osu'zante'ma netrana zana, netrenka ana zanteti vahera zamazeri knampa huzmante'negeno, ana fenoma vagama resige'za, muse hu'za kavare'za mani vava nonkuma zamirega vugahaze. <sup>10</sup> Mago'mo'ma osi'zantema so'e huno kegavahu fatgo hanimo'a, anahu kna huno ra zana kegavahu fatgo hugahie. Hagi osi'zama kegavahu fatgo osanimo'a, ra zana kegavahu fatgo osugahie. <sup>11</sup> Kagrama ama mopafi fenozama kegavahu fatgo osnankeno'a, iza tamage fenoma kvama kri'zana kamigahie? <sup>12</sup> Kagrama vahe'zama kegava huhaviza hanankeno'a, kagri'zana iza kamigahie. <sup>13</sup> Mago eri'za ne'mo'a tare ozafarerera eri'zana e'origahie. Mago'mofona antahi haviza hunenteno, mago'mofona avesi antegahie. Huge mago'mo'ene mani tragoneteno, mago'mofona atregahie. Kagra Anumzante ene zagrera eri'zana eriontegahane.

*Farisi vaheku kore ke mago'ene huzamante'nea naneke  
(Mat 11:12-13; Mat 5:31-32; Mak 10:11-12)*

<sup>14</sup> Farisi vahe'mo'za ana maka ke nentahi'za, (zagogu zamesi zamesi nehaza naga'mo'za) agiza nere'za, hupri hunte'naze. <sup>15</sup> Hu'neanagi Jisasi'a amanage huno zamasmi'ne, Vahe'mofo zamavurera tamagra fatgo vahere hutma nehazanagi, Anumzamo'a tamagu'a ke'ne. Na'ankure vahe'mo'za knarezantfa me'ne nehaza'zamo'a, Anumzamofo avufina havizantfa me'ne. <sup>16</sup> Mosese kasegene, kasnampa vahe'mofo kea huama huno Joni knare eme atre'ne. Hagi ananteti'ma e'neana Anumzamofo kumamofo musenke huama nehigeno, hakare vahe'mo'za hanaveti'za ana kumapi vanagura kazigazi hu'za nevaze. <sup>17</sup> Hu'neanagi amane fru huno monane, mohanena fanane hugahianagi, kasege kefima me'nea osi avomo'a vaga oregahie.

*Jisasi'a arave netanaza zanku hu'nea naneke  
(Mat 5:31-32)*

<sup>18</sup> Iza'o a'ma netreno ru a'ma erinuno'a, anamo'a monko'za hugahie. Hagi mago ne'mo'ma, ve'a atre'nesi'a a' erisanimo'a, monkoza hugahie huno hu'ne.

*Afufenone ne'ene Lasarusikizni naneke*

<sup>19</sup> Jisasi'a amanage hu'ne, Mago ne'mo afufenoma'a hakare me'negeno tusi'a zago atreno, koranke kukena nehuno, asanema nehia ne'za knane knane erino neneno, so'e huno mani'he. <sup>20</sup> Ana nehigeno nom'a a kasante mago nera fenoma'a omame'nea fugo namune ne' antazageno manitere nehiane. Ana ne'mofo agi'a Lasarusi'e. <sup>21</sup> Lasarusi'a maseno mani'neno, feno ne'mo'ma ne'za nenesigeno ankra heramisiam'a erina nesue huno nehuno emani'negeza, kramo'za namuma'reti zamaganefu'nanu hu'ne hane hu'naze. <sup>22</sup> Anante amunte omame'nea frige'za, ankero vahe'mo'za eri'za Abrahamu nemania kumate vu'naze. Vutageno afufunero anante frige'za eri'za ome asentageno, <sup>23</sup> hagi tevefi manineno tusiza huno ata negrigeno kenagamuteno Abrahamuke Lasarusikea, afete magopi mani'nakeno zanage'ne. <sup>24</sup> Neznageno kezatino, Abrahamuga nafa'nimoka teve nenrege'na natagu nehuanki kasuntagi nantenka, Lasarusina huntegeno timpi azanko agona'a reteno nagefu'nare eme rentenkeno fru hunanteno hu'ne. <sup>25</sup> Abrahamu'a amanage huno asmi'ne, Mofavre'moka kagesa antahio. Mopafi mani'nenga knare zampi mani'nankeno Lasarusi'a haviza huno mani'ne. Hu'neanagi menina Lasarusi'a fruzampi emani'negenka kagra kata zampi mani'nane. <sup>26</sup> Hanki mago'zana amanahu kna'za me'ne. Tamagri'ene tagri'ene amu'nompina tusi'a tinka me'negeno, hagro hu'neankita tamagritegama takaheta vu'zanku'ene tagritega ezankura tusi'a amuho hurantegahie. <sup>27</sup> Anante anage higeno, afufenone ne'mo'a amanage hu'ne. Nafa'nimoka Abrahamuga muse hugantoanki Lasarusina huntegeno nenfa nontega vino, <sup>28</sup> na'ankure nafa'nimofo nompina 5fu'a nafuhe'ina zamatre'na e'noanki, Lasarusina huntegeno hanave'nentake kore ke ome huzmasamisige'za tusi'a ata eri kumapina omeho hu'ne. <sup>29</sup> Hu'neanagi Abrahamu'a kenona huno, Moses nanekene kasnampa vahe'mokizmi namekea me'neanki'za zamagra ana nanekea antahigahaze. <sup>30</sup> Ana hianagi afufenoma'ane ne'mo'a anage hu'ne, a'o nafa'nimoke higeno, Abrahamu'a anage hu'ne, frinefinti otino ome zamasamisiana zamagu'a rukrahera hugahazo! <sup>31</sup> Anage hianangi Abrahamu amanage huno asami'ne, I'o. Moses nanekene, kasnampa vahe'mokizmi namekema nontahisu'za, inankna hu'za fripinti otino ome zamasami'nia kerera zamagu'a rukrehe hugahaze huno hu'ne.

## 17

*Kefoza nehaza naneke*

(Mat 18:6-7,21-22; Mak 9:42)

<sup>1</sup> Jisasi'a amanage huno amagema nentaza disaipol naga'a zamasami'ne, Reheno kezana egahie. Hianagi iza'o reramatga nehimofonkura nasunku huntoe! <sup>2</sup> Witi refuzafu nepaza havere nofi anakiza, anankempi rentete'za, hagerimpi atrenageno uramisiana knare zantfa hugahie. Neone nagapinti magomofo azeri trakama huzankura, <sup>3</sup> tamagra kva hiho! Neramafuma kumima hanigeta, haviza nehane huta hinkeno, agu'ama rukrehema hanigeta, kumi'a atrentegahaze. <sup>4</sup> Ana ne'mo'ma mago knamofo agu'afi 7ni'a zupa (seven times) 7ni'a kumi huramanteteno, ana kefozama'agu agu'a rukrahe huno 7ni'a zupa eno nasunku hue hanigeta, kumi'a atrentegahaze.

<sup>5</sup> Aposol naga'amo'za, Ramofona anage hu'za asmi'naze, tamentintia eri ra huo hu'za hazageno, <sup>6</sup> Ramo'a anage huno zamasami'ne, Tamagrime tame-mentintimo'ma masteti zafa ragagna hu'enigeta, mulberi zafagura amne

tasagi hunka hagerimpi ome regrio hanageno'a, ketamia amage'anteno amne anara hugahie.

*Eri'za vahe'mofo naneke*

<sup>7</sup> Ina'imoka amuno tamifina kazokzo eri'za vahe ka'amo'ma hoza tinka eri'zano, sipisipi kegava nehaniregati enkenka, ame hunka emaninka ne'zana no hugahano? <sup>8</sup> Hu'neanagi kva'amo'a amanahu kea kazokzo eri'za ne'agura osugahio, kukenaka'a eri hutenga nezama nesuazana retro hunenanteg'e'na, tine nezanena netesugenka, henka tine nezane kagra negahane hugahie? <sup>9</sup> Hanki agra kazokzo eri'za ne'agura musenkea huontegahio? Na'ankure huo huno ma hunte'neazana hu'ne. <sup>10</sup> Ana hu'negu kagranam, maka'zama Anumzamo huo huno hugante'neazama hanunka anage huo, tagra knare osunona kazokzo eriza vahemota, Anumzamo eriho huno hurante'nea eri'za e'nerune huta hugahaze.

*Jisasi'a 10ni'a fugo namune vahe zamazeri so'e hu'nea naneke*

<sup>11</sup> Jisasi'a Jerusalemi vunaku nevuno, Sameria kuma'ene Galili kumamofo amunompi rugitagini vu'ne. <sup>12</sup> Nevuno mago kumapi ufregeno, 10ni'a fugo namune vahe'mo'za ogamnu otiza mani'ne'za ome tutagiha hunte'naze. <sup>13</sup> Hagi zamagra amanage hu'za kezati'naze, Jisasiga kva ne'moke, kasuntagiranto! hu'za nehazageno, <sup>14</sup> Jisasi'a nezmageno amanage huno zamasmi'ne, **Tamagra vuta pristi vahete tamavufga ome zamaveri hilo**, hige'za nevazageno fugo namuzmimo'a amne higeza agru hu'naze. <sup>15</sup> Hagi mago'zmimo'a keana avufgangmo so'e higeno, rukrahe huno ranke huno Anumzamofo agi erisaga nehuno, <sup>16</sup> Jisasi agafi avugosaregati epri huno, susu huno musenke huntene. Ana nera Sameria nere. <sup>17</sup> Anante Jisasi'a anage hu'ne, 10ni'a vahe'mokizmi fugo namumo'a so'e hige'za agru hu'naze. **Hianagi 9ni'a vahe zaga iga mani'naze?** <sup>18</sup> Mago vahe'mo'a eama huno Anumzamofona ra agi omigeno, ama meg'i'a ne'mokepi? <sup>19</sup> Jisasi'a anage huno ana ne'mofonku hu'ne, **Kamentintimo kazeri so'e hianka otinka vuo.**

*Vahe'mofo Mofavre'mo enaku nehanigeno fore'ma haniazamofo naneke  
(Mat 24:23-28,37-41)*

<sup>20</sup> Farisi vahe'mo'za Anumzamofo kumakura, inan knare egahie hu'za Jisasina antahigazageno, kenona zimirera anage hu'ne, **Anumzamofo kumara mago avame'zane esigeta onkesageno**, <sup>21</sup> amagi keho huge, antugi keho hu'za zamagra osugahaze. **Na'ankure Anumzamofo kumamo'a ko tamagri amu'nompi me'ne.** <sup>22</sup> Anage nehuno, amagema nentaza disaipol naga'a zamasamino, **Mago kna ne-eankino, ana knarera Vahe'mofo Mofavre kenaku hanazanagi**, zamagra onketfa hugahaze. <sup>23</sup> Zamagra anage hu'za tmasamigahaze, antufi mani'neanki keho huge! Amafi mani'neanki keho! Hanigetma anantega ovuta, zmavaririta ana vahera oviho. <sup>24</sup> **Vahemofo Mofavre'ma esia kna'arera kopsis'namo monare rurarage huno remsa ne-higeno**, mago kazigati remsa huno mago kaziga atuparega neviankna hugahie. <sup>25</sup> Hu'neanagi ese'zana **Agra rama'a knazampi unefresigeno**, ama mani'nona gnafei vahe'mo'za zmfefi humigahaze. <sup>26</sup> Noa knafima hu'nazaza hu'za, **Vahe'mofo Mofavremoma enaku'ma hania knafina**, anahu zamavuzamava nehu'za, <sup>27</sup> zamagra ne'zana nene'za, tina nene'za, arave nehu'za, ara masi omi ami nehazageno, **Noa'a vente agu'afi marerigeno**, timo'a miko zamahe refite'ne. (Jen-Agfa 7) <sup>28</sup> Loti gnafinena anahukna hu'za, ne'zana nene'za, tina nene'za, miza neseza, zagore netre'za hoza negriza nona negiza hu'naze. <sup>29</sup> **Hianagi Lotima zamatreno Sodomu**

kumapinti atiramino vu'nea knazupa, tefizo hu'nea havemo ko' riaza huno zamahe refite'ne. <sup>30</sup> Vahe'mofo Mofavrema eama hunaku'ma hania kna-era, anahukna zamavuzmava hugahaze. <sup>31</sup> Ana knazupa nomofo agofetu mani'nenigeno, fenozama'a agu'afi me'nesimo'a eramino fenoma'a erino ati oramigahie. Anahukna huno hozafima mani'nenimo'a rukrehe huno omeno. <sup>32</sup> Hanki Loti nenanaronte fore hu'nea zanku tamagesa antahihi. (Jen-Agf 19:24-26) <sup>33</sup> Iza'o asimu'a azeri kona hunaku hanimo'a, asimu'a atregahianki, iza'o asimu'a atresimo'a, asimu'a erigahie. <sup>34</sup> Hanki Nagra anage hu'na neramasamue. Ana knazupa tare vahe sipare kenage mase'nesnake'no, mago'mofo nevreno mago'mofo atregahie. <sup>35</sup> Tare atre'mokea witi raga'a refuzafunepeke mani'nesnapinti, magomofo nevreno mago'mofo atregahie. <sup>36</sup> Hagi tare netremoke hozafi mani'nesnakeno, mago'mofona nevreno, mago'mofona atregahie. <sup>37</sup> Anankemofo nona zamagra Jisasinku hu'za, Ramoka inantega anazana fore hugahie? Hu'za amage'ma nentaza disaipol naga'mo'za antahigazageno, anage huno zamasami'ne, Fri'nea avufgama, me'nesirega anantega tumpa namamo'za eri atru hugahaze.

## 18

### *Kento a'te huntenu nunamu huzamofonku hu'nea fronka naneke*

<sup>1</sup> Zamavesra osu maka zupa nunamu hanagu, fronka ke Jisasi'a amagema nentaza disaipol naga'a anage huno zamasami'ne, <sup>2</sup> Mago rankumatera ke refkohu (jas) kva nera mani'neakino, Anumzamofonku korera nosuno, vahe'mokizmia zmagefenkami netreua nere. <sup>3</sup> Magora kento ara ana rankumapina mani'nea amo, ke refkohu nehia kva nete eva eva nehuno, anage hu'ne. Mago vahe'mo nazeri haviza nehianki naza huo hu'ne. <sup>4</sup> Mago'a knafina ana a'mofo kea antahi omi'neanagi, henka anage huno agesa antahine. Nagra Anumzamofonkura korera nosu'na, vahe'mokizmia zmagefenkami netroanagi, <sup>5</sup> ama kento a'mo tutu hunenanteno hakare zupa evava nehuno nazeri navesra nehianki, ru evava huno nazeri naveresra hanigi aza hanue hu'ne. <sup>6</sup> Ramo'a anage huno zamasmi'ne, Fatgo osu ke refkohu kva nemo'ma hu'nea kegu tamagesa antahiho hu'ne. <sup>7</sup> Hanki Anumzamo'ma huhampri zmantenea vahe'mo'za, hanine zagene antahigevava nehanageno'a, fatgo avu'avara huno zavikezmia antahino zamaza osugahio? <sup>8</sup> Amanage hu'na neramasamue. Agra ame huno zamasu ragizmanteno zamaza hugahie. Ana hugahianagi Vahe'mofo Mofavremo'ma esuno'a, Agra ama mopafi vahe'mofo zamentintia eme zamagegahifi eme ozamagegahie?

### *Farisi ne'ene takisi zago eneria ne'mofo fronka naneke*

<sup>9</sup> Mago'ane fronka kea huno, zamagrazmigu antahi'za tagra fatgo vahe mani'none nehu'za, ruga'amo'za knare osu vahe mani'naze hu'za zamagefenkami netrazamokizmi zamasami'ne, <sup>10</sup> Tare netremoke nunamu hunaku ra mono nompi mareri'na'e. Magora Farisi nere, magora takisi zago e'neria nere. <sup>11</sup> Farisi ne'mo'a otineno anage huno agragu nunamu hu'ne. Anumzamoka Nagra susu huna muse nehue, mago'a vaheknama osu'na havige huno musufa nesea vaheklnara nosuna, kefoza nehaza vahekna osu'na, arave netanaza vahekna nosuna, ama takesi zago eneria ne'kna osu'noe. <sup>12</sup> Maka santomofo agu'afina tare zupa ne'zana a'o nehu'na, maka'zama atrena zagoma erufintira, 10ni'a kevufintira musezana mago kevu refko huna Anumzamoka negamue. <sup>13</sup> Hianagi takisi zagoma e'neria ne'mo ogantu otino manino monafinka kesga huno nonkeno, kepri

huno amimizare nemasagino amanage hu'ne. Kumike vahe mani'noanki Anumzamoka kasuntaginanto huno hu'ne! <sup>14</sup> Amanage hu'na neramasamue, takisi eneria ne'mo'a Farisi ne'mofona agetereno Anumzamofo avurera fatgo huteno noma'arega vu'ne. Na'ankure agra avufga erisagama hanimofona, Anumzamo'a azeri fenka atregahie. Hianagi iza'o avufama anteramisimofona, Anumzamo'a azeri sga hugahie.

*Jisasi'a neonse mofavre'rami asomu ke huzmante'nea naneke  
(Mat 19:13-15; Mak 10:13-16)*

<sup>15</sup> Mago'a veamo'za ne'one mofavre'zmia Jisasi zamufare zmvavko ne-huno, asomu ke huzmantenogu zamavare'za neage'za, amage'ma nentaza disaipol naga'mo'za nege'za, ke zamasu'naze. <sup>16</sup> Hianagi Jisasi'a mofavr-eramina ke hige'za Agrite azageno amagema nentaza disaipol nagara zamagi huno zamasmi'nne, Zamatrene'za ne'one mofavreramina Nagrite eho. Kazmia renkanire ozmanteho. Na'ankure Anumzamofo Kumara, e'inahu vahe'mokizmi kuma me'ne. <sup>17</sup> Tamage hu'na neramasamue, iza'zo ama mofavre'mo'za enerizankna hu'za Anumzamofo Kumama e'orisamo'za, uofrehahaze.

*Afufenoma'ane kahefa kva ne'mofo naneke  
(Mat 19:16-30; Mak 10:17-31)*

<sup>18</sup> Mago afufenone kva ne'mo'a amanage huno Jisasina antahige'ne, Knare Rempı Hurami Ne'moke, nankna hute'na mani vava asimura erigahue? <sup>19</sup> Higeno Jisasi'a anage huno kenona ana ne'mofona asmi'nne, Na'a higenka Nagrikura knare hu'nane hunka nehane? Mago vahe'mo'a knarerera osu'neanki, Anumzana magokemo knarerera hu'ne. <sup>20</sup> Hanki kagra kasegea antahinane, rumofo aro vea avazu osuo. Vahera aheofrio. Maka'zana musufa oso. Ru vahe'mofonkura havigea huonto. Negrerane negafane kezna erizafa huo, hu'nea kea antahinane. Huno Jisasi'a higeno, (Eks-Ati 20:12-16, Diu-Kas 5:16-20)

<sup>21</sup> ana kva ne'mo'a mofavre mani'na enoregatira ana mika kesegae amage ante'na e'noe, huno higeno, <sup>22</sup> Jisasi'a ana ke antahiteno amanage huno ana ne'mofona asmi'nne, Mago zantfa atupara hu'nane, maka zanka'a zagore atrenka zago erinka, zamunte omne vahe nezamigeno, monafi fenonka'a mesigenka enka eme namage anto. <sup>23</sup> Hianagi ama ana naneke nentahino, rimpagna afufenoma'agura hu'ne. Na'ankure agra tusi'a afufeno antenegu ana hu'ne. <sup>24</sup> Jisasi'a ana nemofo negeno anage hu'ne, Fenozmine vahe'mo'za Anumzamofo Kumapima vunaku'ma hanazana tusi'a maraguzatigahaze! <sup>25</sup> Na'ankure kemorimo'za fru hu'za nekazamofo kampina ufregahazanagi, afufenone vahe'mo'za tusi'a maraguzati'za Anumzamofo Kumapina ufregahaze. <sup>26</sup> Anampi mani'naza vahe'mo'za ana ne'kuma asamia kema nentahiza, hagi iza manivava asimura erigahie hu'za antahige'naze? <sup>27</sup> Hianagi Jisasi'a anage hu'ne, Maka'zama vahe'mota osugazana, Anumzamo'a amne hugahie higeno, <sup>28</sup> Pita'a amanage huno hu'ne. Ko, mika zantia atreta, Kagri kamage anteta neone. <sup>29</sup> Higeno Jisasi'a anage huno zamasmi'nne, Tamage hu'na neramasamue, magomo'a noma'o nenanrono, afu aganano, nererano nefano, mofavre'ama Anumzamofo Kumaku'ma huno atresimo'a, <sup>30</sup> amama mani'nea knafina rama'azantmi e'herino, henkama esia knafina monarera, manivava asimura erigahie.

*Jisasi mago'ane frisnia zanku zamasmi'nea naneke  
(Mat 20:17-19; Mak 10:32-34)*

<sup>31</sup> Jisasi'a 12fu'a amage'nentaza disaipol naga'a zmavrekanti anteno, anage huno zamasami'nne, **Antahiho, Tagra Jerusalemi kumate marerita vanunkeno**, maka kema kasnampa vahe'mo'za, Vahe'mofo Mofavregu hu'za kre'naza kemofo avufa'a fore hugahie. <sup>32</sup> Na'ankure meg'i'a vahe zamazampi avare amisageno, azanva ke hunente'za, azeri haviza nehu'za, avetu ahentegahaze. <sup>33</sup> Ana nehu'za, sefu amite'za, ahefrisageno friteno, ete tagufa **knazupa otigahie**. <sup>34</sup> Hianagi amage'ma nentaza disaipol naga'mo'za fritena otigahue hiankemofo agafa'amo'a frakino oku'a me'nege'za, ana kemofo agafa'a antahi amara osu'naze.

*Batimiasi avurga azeri hari hunte'nea naneke  
(Mat 20:29-34; Mak 10:46-52)*

<sup>35</sup> Jisasi'ma Jeriko kumate vugofa nehigeno, mago avusuhi ne'mo kamofo ankenarega meme nehuno mani'neno, <sup>36</sup> antahigeno rama'a vahe enevazageno, naza fore nehie? huno zmantahigege'za, <sup>37</sup> zamagra asami'za, Nazareti kumateti ne' Jisasi enevie nehzageno, <sup>38</sup> Ranke huno kezatino, Jisasio Deviti Nemofoga kasuntginanto! Higeno, <sup>39</sup> kotama vaza vahe'mo'za ana ke nentahi'za kesu'za, kea osunka kagira hamunkinka manio hu'naze. Hianagi mago'ane kezatino, Deviti Nemofoga kasuntginanto! <sup>40</sup> Jisasi'a neviretira anante uotino, kehinkeno eno hige'za, ana nera ome avare'za erava'o hazageno, anage huno antahige'ne. <sup>41</sup> **Na'a huganteku hugenka nehane?** Higeno, Ramoka ete navua keso'e hanuegu nehue! <sup>42</sup> Higeno Jisasi'a anage huno asmi'ne. **Kamentintimo kazeri hari hianki kavua ko** higeno, <sup>43</sup> avurgamo'a ame huno anante hari higeno, ete knare huno negeno, Jisasina amage'anteno nevuno, Anumzamofo agi erisaga nehige'za, miko vahe'mo'za nege'za zamagranena Anumzamofo agi erisaga hu'naze.

## 19

*Sakiasi naneke*

<sup>1</sup> Hagi Jisasi'a Jeriko rankumapi ufrenero nevigeno, <sup>2</sup> mago nera Sakiasi'e nehaza nera, takesi zago eneriza vahe'mokizmi kva nekino, afufeno ne'mani'ne. <sup>3</sup> Nankna ne' Jisasi'a mani'ne huno Sakiasi'a kenaku hianagi, tusi'a vahe'mo'za rehiza huntazageno onke'ne. Na'ankure agra atupa ne'mani'ne. <sup>4</sup> Ana higeno agareno vugoteno, vunaku'ma hiankante me'nea sikamo zafare umarerino kenigu mani'ne. Na'ankure Jisasi'a ana kante enaku higeno'e. <sup>5</sup> Jisasi'a anama mani'nere ne-eno, kenagamuteno negeno anage huno asami'ne, **Sakiasiga ame hunka eramio, na'ankure menina kagri nompi umanigahue**. <sup>6</sup> Higeno Sakias'a ame huno eramino, muse nehuno avreno noma'arega vu'ne. <sup>7</sup> Ana'ma hige'za maka vahe'mo'za nege'za, ke hakare hunte'za, kumi vahe'mofo nompina nantura antenente hu'naze. <sup>8</sup> Hanki Sakiasi'a otino amanage huno Ramofona asmi'ne. Ramoka antahio, fenoni'a amu'nompinti refko hu'na zmunte omne vahe nezamina, nagrama rezmatga hu'na eri'noazana refko hu'na 4'a zupa zamigahue. <sup>9</sup> Higeno Jisasi'a amanage huno asami'ne, **Menina ama nompi mani'naza vahetera, Anumzamo'a zmahokeno zamavare'neazamo ko e'ne**. Na'ankure agranena Abrahamu mofavre mani'ne. <sup>10</sup> Na'ankure vahe'mofo Mofavremo'a, fanane hu'naza vaheku hakeno zamavarenaku e'ne.

*10ni'a eri'za vahe fronka naneke*

<sup>11</sup> Ana nanekema nentahizageno, Jisasi'a mago'ane fronka kea zamasami'ne. Na'ankure mago'a vahe'mo'za antahi'zana, Anumzamofo kumara ame huno egahie hu'za nentahizageno, Jisasi'a Jerusalemi tavaonte mani'neno zamasamino, <sup>12</sup> Mago ne'mo'a mago kumatega vuno anantega kva umaniteno ete enaku nehuno, <sup>13</sup> 10ni'a kazokzo eri'za vahe'a kehuno, 10ni'a zago nezamino, anage huno zamasami'ne. Eri'za kante erinenteta mago'a zagoa retro nehinkena etena henka egahue.

<sup>14</sup> Hianagi ana kumapi nemaniza vahe'mo'za zamasivazinte'za, mago'amokizmi huzmantage'za vu'za anage hu'naze. Tagra ama ne'mo'ma kvagri rante'zankura tave'osie hu'naze. <sup>15</sup> Ana kumama omeriteno ete eno, kazokzo eri'za naga'a koma zami'nea zagoretira, nankna huza mago'a zagoa retrora hu'naze keno antahino hunaku zamagi hu'ne. <sup>16</sup> Ese ne'mo'a eno anage hu'ne, Ramoka tare zotama zago naminantetira, mago'ane ana zagoretira eri'za eri'na 200 zagoa retro hu'noe, higeno, <sup>17</sup> ana ne'mo'a anage huno asami'ne, so'e hunka eri'za eri'nane, knare eri'za nemoka, na'ankure osi'zante knare hunka kegava hu'nanku, menina 10ni'a rankuma kegava hugahane higeno, <sup>18</sup> anante'mo'a eno anage hu'ne, Ramoka tare zotama zagoma nami'nantetira eri'za eri'na 100 zagoa retro hu'noe higeno, <sup>19</sup> Ana ra ne'mo'a anage agri enenkura huno asami'ne, kagranena 5fu'a kuma kegava hugahane huno asmi'ne. <sup>20</sup> Mago'mo anante eno anage hu'ne, Ramoka, zagoma nami'nanana hankasipifi ante'novxitena ante'noankina ama erina oe. <sup>21</sup> Na'ankure kagra hihamu ne' mani'enka kema hunka hugahue hanazana nehunka, kagra rumo'za kri'nazaza enerinka, onkrinanazana negafinka nehanku kore hu'na fraki'noane. <sup>22</sup> Ana ne'mo'a anage huno asmi'ne, Kagrama hana kere, kefo kazokzo nemoka kagrira refko hugahue. Kagra ontah'i'pane, Nagra himamu ne' mani'nena, nagrama onte'noazana eneri'na, okri'noazana nevasaguana kagra ontahinano? <sup>23</sup> Na'a higenka zagoni'a zagoma nentaza nompi antenankeno, ruguheno mago'a erifore nehigena ehanatina e'orue? <sup>24</sup> Anage huteno, anante oti'naza vaheku anage huno zamasami'ne, tare zota'a zago eritma 200 zagoma erifore hu'nea nemofo amiho. <sup>25</sup> Ana vahe'mo'za anage hu'za ana nekura hu'naze. Ramoka, agra 10ni'a zagoa ko eri'ne hu'za hu'naze. <sup>26</sup> Hanki amanage hu'na neramasamue, maka vahe'mo'zama rama'a erinesamokizmia, mago'ane anteaguheno zamigahie. Hianagi e'orinesimofompintira, erineniam'a hanaregahue. <sup>27</sup> Hianagi ama ha' vahe'nimo'za, kvama nagra huzmantezankura zamesra hunantaza vhahera, zamavareta nagri navure zamaheta rukafritreho huno hu'ne. <sup>28</sup> Jisasi'a anage huno zamasmiteno, ugagota huzmanteno Jerusalemi kumate vu'naku vu'ne.

*Jisasi'a Jerusalemi kumate nevige'za amrara hu'naza naneke  
(Mat 21:1-11; Mak 11:1-11; Jon 12:12-19)*

<sup>29</sup> Jisasima Jerusalemi vunaku Betfagene Betani kumatema nevuno, Olive nehaze agonare erava'o nehuno, amagema nenta'a disaipol ne'trena huznanteno, <sup>30</sup> anage huno zanasami'ne, Ugota huta antu kumapi ufreta ome kesa'ana, vahe'mo'za agofetura mani'za ovu'nesaza donki afu kinare mani'nesigeta kegaha'anki, kazufeta avazu huta amare e'o. <sup>31</sup> Mago'a vahe'mo'zama tanantahimage'za na'a hunaku katunefa'e? Hanageta anage huta znasamaho, Ramofona eri'za me'negeno hurantegeta'e hi'o. <sup>32</sup> Jisasima anage huno huznantegike vu'ne ome ka'ana, kema huzanante'neaza hu'negene ome ke fore hu'na'e. <sup>33</sup> Nofi'ma ana donki rentenea ome katu nefakeno, ana donki afu'mofo nafa'amo'a znantahigeno, Na'a hunaku donki

afura katu nef'a'e? huno znantahigege'ne, <sup>34</sup> Ramofona eri'za me'negeno hurantegeta eme katu nef'o'e hu'na'e. <sup>35</sup> Ana hutene avare'ne Jisasinte uhanatike, zanagra nakre kuzani ana donkimofo agofetu zafike antekeno Jisasi'a agofetu mani'ne. <sup>36</sup> Jisasi'ma nevige'za vahe'mo'za nakrekuzmi zafiza kampi tafe vasinte'nageno ana agofetu vu'ne. <sup>37</sup> Ana'ma huno Olive agonare vu kantema uneramigeno hanatigeno, maka amagema nentaza disaipol naga'mo'za, Anumzamofo agi erisaga hu'naze. Na'ankure maka kaguvazama hige'za ke'naza zanku ranke hu'za musenkase nehu'za amara hu'za, <sup>38</sup> ranke hu'za, **Ramofo agifima ne-emofona ra agi amisune.** Monafina rimpia fru menkeno, Anumzamofo hihamu hanavemo'a marerigateresie. (Sam-Zga 118:26, 148:1) <sup>39</sup> Ana veapinti mago'a Farisi vahe'mo'za anage huza asmi'naze, Rempi hurami nemoka, kamagema nentaza disaipol nagaka'a ke zamasuge'za anage osiho hu'za asami'naze. <sup>40</sup> Hianagi Jisasi'a kenona anage hu'ne, **Zamagrama kema tagananenageno'a hankami havemo'za, Anumzamofo agi'a erisaga hugahaze!**

### *Jerusalemi kumate vaheku Jisasi zavite'nea naneke*

<sup>41</sup> Jisasima Jerusalemi kuma tavaonte vugofa huno, ana ran kuma'ma negeno'a zavi neteno, <sup>42</sup> anage hu'ne, **Ama knare'ma kagrima krimpa fruma hu'zama fore'ma nehiazana, kagra nonkane!** Hianagi kagri kavurera rimpia fruzamo'a frakino me'negenka nonkane. <sup>43</sup> Na'ankure mago'a kna ne-eankino, ha' vahe'timimo'za eme tamavazi kagiza, maka asopa eme regagi ramante'za, <sup>44</sup> makazantmi eritagna vazi atresigeno, mopafi fragu vaziramino mena, tamagr'i'ene mofavretamine haviza nehanageno, zamagra mago havea atresageno mago havemofo agofetura omnegahie. Na'ankure kagrima Anumzamo'ma kazama hunaku'ma eazana kenka antahinka osu'nane.

### *Ra mono nompi maketi nehazageno Jisasi'a zamahe fegi te'nea naneke (Mat 21:12-17; Mak 11:15-19; Jon 2:13-22)*

<sup>45</sup> Jisasi'a ra mono nonte vuno, miza neseza zagore netraza nagamofona, agafa huno zamahe meg'i netreno, <sup>46</sup> amanage huno zamasmi'ne, **Anage huno avontafepina krentene, Nagri nomo'a nunamu hu no megahie.** Hianagi kumzafa vahe'mofo nonkna eri nehaze. (Ais 56:7, Jer 7:11) <sup>47</sup> Mago mago knarer Jisasi'a ra mono nompi rempi huzami'ne. Hianagi pristi vahe'mo'zane, kasegere ugagota hu'naza vahe'mo'zane, ranra vahe'mo'zanena azeri haviza hanaza kanku hakre'naze. <sup>48</sup> Jisasima azeri haviza hanaza kana ke'za eri forera osu'naze. Na'ankure maka vahe'mo'za Jisasima hu'nea ke antahi'nazageno'e.

## 20

### *Hihamu'agu Jisasina antahige'naza naneke (Mat 21:23-27; Mak 11:27-33)*

<sup>1</sup> Hagi mago zupa ra mono nompi mani'neno, Knare Musenkea Jisasi'a veamokizmi rempi hunezmigeno, pristi vahe'mo'zane, kasegere ugota hu'naza vahe'mo'zane, ranra vahe'mo'zanena eme nege'za, <sup>2</sup> anage hu'za Jisasina asami'naze, Nankna himamu eri'enka amazana nehampi tasamio. Hifi i'za ama hihamuva kaminegenka nehane? <sup>3</sup> Hazageno Jisasi'a kenona anage hu'ne, **Nagranena tamagrira tamagenoka hugahuanki nasamiho.** <sup>4</sup> Joni'ma mono ti frezmante'nea zana, vahe'mofo eri'zampi, monafinti eri'za eri fore hu'neo? <sup>5</sup> Huno zamantahigege'za, zamagra zamagra hugantu

hugama hu'za, Monareti eri'za erifore hu'ne huta hanunkeno'a, nahigeta Jonima hu'nea zankura tamentinti osu'naze? Huno hugahie. <sup>6</sup> Hianagi tagrama huta mopafi vahe'mofo eri'zanema hanunkeno'a, maka vahe'mo'za have knonu tahefrigahaze. Na'ankure zamagra ko keza antahiza Joni'a kasnampa ne' mani'ne hu'naze. <sup>7</sup> Anage hu'za nehu'za, Jisasina kenona hunte'za, Mono tima frentezana igati e'neo tagra ontahi'none hazageno, <sup>8</sup> anage huno Jisasi'a zamagrira zamasami'ne, **Nagranena i'za hihamu namin-gena e'nerufi ontamasmigahue** huno hu'ne.

*Waini hoza kva hu'nea vahe'mofo fronka naneke  
(Mat 21:33-46; Mak 12:1-12)*

<sup>9</sup> Hagi Jisasi'a veamokizmia amanahu fronka kea agafa huno zamasmine. Mago ne'mo'a waini hoza anteteno, kna'are kna'are mizaseterehu (rent) vahete waini hoza'a netreno, afete zazakna umaninaku vu'ne. <sup>10</sup> Waini ragama tagi knarerako eri'za ne'a, waini hozama kegava hu'ne'za mizasetere hugahune hu'naza vahete huntogeno vu'ne. Hianagi ana waini hoza kegava hu'naza vahe'mo'za kanonkeve nemiza, huntageno aza avapa vu'ne. <sup>11</sup> Ete mago'an, mago kazokzo eri'za ne'a huntogeno vige'za, zamagra kanonkeve nemiza azeri agaze nehuza huntageno, aza avapa vu'ne. <sup>12</sup> Anante ana hozamofo nef'a, ete mago'an rumofo huntogeno vige'za, anazanke hu'za ahe kuzafa nente'za, ana hozafintira fegi'a asagafe atre'naze. <sup>13</sup> Na'a nagra hugahue? huno ana hozamofo nef'a nehuno, nagrama navesi navesima hunentoa ne' mofavreni'a huntenugeno vanige'za, zamagra antahimigahazi huno hu'ne. <sup>14</sup> Hianagi waini hozama kegava hu'naza vahe'mo'za nege'za, zamagra zamagra hu'za, amana mofavre'mo nefazana erisanti haregahianki, enketa aheta erisantima haresiazama'a erisune hu'naze. <sup>15</sup> Anage nehu'za azeri'za ana hozafinti fegi'a mate nevu'za ahageno fri'ne. Hanki e'i anama hu'naza zantero hoza nafa'amo'a, na'a zamagrira huzmantegahie? <sup>16</sup> Hoza nef'a Agra eno ana vahera eme zamahe nefrino, ana waini hoza rumokizmi hanare zamigahie. Jisasima ana kema hige'za nentahiza, anahura osugahie hu'za zamagra hu'naze! <sup>17</sup> Hianagi Jisasi'a nezmageno anage hu'ne, **Na'ante amanage huno avontafepina krentene. Nogi vahe'mo'za zamesra huntaza havemo'a, no renegentete ugagota huno azeri hanaveti have fore hu'ne?** (Sam-Zga 118:22) <sup>18</sup> Maka vahe'ma ana have agofetuma takauresamo'za, kori kofagofa hugahaze. Hianagi ana havemo'ma iza agofetu takauresuno'a, rehapatisigeno kugusopa fore hugahaze.

*Takisi zago amizanku Jisasi antahige'naza naneke  
(Mat 22:15-22; Mak 12:13-17)*

<sup>19</sup> Kasegere ugota hu'naza vahe'mo'zane, pristi vahe'mo'za Jisasina anante azerinaku hunazanagi, vaheku kore hu'naze. Na'ankure Agrama fronka kema hu'neana zamagrama nehaza zamuzmaku hu'negeze. <sup>20</sup> Ana nehu'za zmauvu anteza keteza manine'za, afure vahe huzmantage'za, fatgo vahekna huza umanine'za kema hania kore azeriza ugagota vahete (gavana) vanage'za, kva vahete avrenente'za kegaga huntehogu vu'naze. <sup>21</sup> Zamagra anage hu'za Jisasina agenoka hu'za, tagra antahinone, Rempi hurami nemoka, kema nehunka rempi huzaminana fatgo hunka nehunka, mago vahe aza huzankuke nosunka, rempima huzaminana fatgo hunka Anumzamofo avu'avazankuke nehane. <sup>22</sup> Hanki Romu kva ne' Sisama takisi zago nemunazamo'a knare hunefi, haviza hu'ne? <sup>23</sup> Hianagi Jisasi'a revatga hunaku'ma

hazana ko negeno, amanage huno zamasmi'ne, <sup>24</sup> Naveri hinkena mago zagoa kaneno, iza amema'a megeno, na'an e hu'za anantera krente'naze? Higeno, zamagra Sisa amema'e hu'za hu'naze. <sup>25</sup> Jisasi'a anage huno zmasamine, Sisa zama me'eniana Sisa amiho. Hagi Anumzamofo zama me'eniana Anumzamofo amiho. <sup>26</sup> Hige'za rama'a vahe zamavufi manineno kea nehige'za, zamagra revatga hu'za ke'afintira magore hu'za azerigara nosu'za, kenona zmima hiankegura antri hu'za kea osu'naze.

*Fri vahe otizanku Jisasi antahige'naza naneke  
(Mat 22:23-33; Mak 12:18-27)*

<sup>27</sup> Anante mago'a Sadusi vahe'mo'za, fripintira o'otigahaze nehaza vahe'mo'za, Jisasinte e'za, <sup>28</sup> anage hu'za antahige'naze. Rempি hurami ne'moka, Mose'a anage huno avontafema kreraminefina hu'ne, **Nem-puamo a' erino manineno, mofavre kaseonteno frinigeno'a, negna ana ara erino, nefu mofavre erifore hino huno hu'ne.** (Diu-Kas 25:5-6) <sup>29</sup> Hanki 7ni'a kogna mani'nazankino nempuzmimo ara erino mofavre onte manineno frigeno, <sup>30</sup> negna ana ara eri'ne. Eriteno mofavre onte manineno fri'ne. <sup>31</sup> Anantemo'a anazanke huno ana ara erinteno, mofavre ontene frine. Anahukna hu'za ana maka'mo'za ana ara eri'za mofavre kaseonte manine'za fri'naze. <sup>32</sup> Fri vagaretazageno henkarfana ana ara fri'ne. <sup>33</sup> Hanki fri'nafinti oti snaza knazupa, inamofo a' manigahie? Na'ankure ana maka 7ni'amo'za ana ara erinte'naze, hu'za hazageno, <sup>34</sup> Jisasi'a amanage huno zamasmi'ne, Ama knafi mani'naza vahe'mo'za ara e'neriza, ara masi ome ami nehaze. <sup>35</sup> Hianagi Anumzamo'a huno, veamo'za fri'nenafinti'ma oti'za henka manigahaze hu'nea veamo'za, arave osu'za ara masi omi ami osugahaze. <sup>36</sup> Na'ankure zamagra mago'ane ofrigahaze. Na'ankure zamagra ankero vahekna hu'za, Anumzamofo Mofavre nemaniza, kerifinti oti'nea mofavregna hu'za manigahaze. <sup>37</sup> Hianagi frite'za oti'naza zankura, Mosese'enena osi zafafinti teve anefa nehigeno ke'neazamofo naneke krenefina eriamma huno, Abrahamuma, Jekopuma, Aisaki Ra Anumza mani'noe huno hu'ne. (Eks-Ati 3:6) <sup>38</sup> Hagi Agra fri vahe'mofo Anumzana omanine. Hianagi zamasimu eri'za nemaniza vahe'mofo Anumza mani'ne. Na'ankure mikamo'za agriteti zamasimura eri'za mani'naze. <sup>39</sup> Mago'a kasegere ugota hu'naza vahe'mo'za kenona'a hu'za, Rempি Hurami Ne'moka knare ke hane hu'za hu'naze. <sup>40</sup> Na'ankure mago'ene Jisasi'ma mago'azankuma agenoka hugara osu'za, antahionke'naze.

*Kraisi'a iza nemofo'e hu'nea naneke  
(Mat 22:41-46; Mak 12:35-37)*

<sup>41</sup> Anante Jisasi'a amanage huno zamantahige'nne, Inankna hu'negu zamagra Kraisinkura Deviti nemofo'e hu'naze? <sup>42</sup> Na'ankure Deviti'a zagame avontafepina huno, Ramo'a nagri Ramofonku huno, nazantmaga kaziga mani'negena, <sup>43</sup> ha' vaheka'a kagiafi zamare antanena zamagofetu kagia antenka manio hu'ne. (Sam-Zga 110:1) <sup>44</sup> E'ina hu'negu Deviti'ma Ranimo'e hu'neana, inankna huno Deviti mofavrea Ramo'a manigahie?

*Jisasi'a mono kva vahe'mokizmi mani'za zimigu hu'nea naneke  
(Mat 23:1-36; Mak 12:38-40)*

<sup>45</sup> Hakare veamo'za ana naneke nentahizageno, Jisasi'a amage'ma nentaza disaipol nagakura anage huno zamasami'ne, <sup>46</sup> Kasegere ugota hu'naza vahekura kva hiho. Zaza kukena hu'za vahe zmvugva vu'zankuke nehu'za,

maketi kumapi vahe'mo'za antahinezmiza hu frufra huzmantesaza zanku nehu'za, osi mono nompina ugota trate manisaza zanku nehu'za, ra nezama nezupa, knare trate mani'zankuke nentahize.<sup>47</sup> Kento a'nemokizmi fenozantami havige hu'za eneriza, anaza nosaza vahekna hu'za, vahe'mo'za antahiramisazegu zaza nunamu nehaze. E'inahukna zmavuzmava nehaza vhahera, refkoma hania zupa tusi'a knaza zamigahie.

## 21

### *Kento a'mo mono nompi zago ante'nea naneke (Mak 12:41-44)*

<sup>1</sup> Hagi Jisasi'a ra mono nompi mani'neno kesga huno nezmagege'za, feno vahe'mo'za zagoma arte taferopi ofa zagoa ante'naze. <sup>2</sup> Hagi amunte omne kento a'mo'a tare osi zago ana taferopi netregeno negeno, <sup>3</sup> Jisasi'a anage huno hu'ne, Tamage hu'na neramasamue, ama amunte omne kento a'mo'a makamokizmia zamagatereno ante'ne. <sup>4</sup> Na'ankure zamagra rama'a antenafinti, taferopina mago'a eme ante'naze. Hianagi ama a'mo'a omnetfa hunefinti, agri'ma aza hanigeno manisiam'a miko ante vagarene.

### *Vagare knafima fore'ma hania avame'zamofo naneke (Mat 24:1-2; Mak 13:1-2)*

<sup>5</sup> Mago'a amagema nentaza disai pol naga'mo'za ra mono noma knare have eri'za noma negiza, vahe'mo'za museza eri'za ementazaza, eriza avase'e hunte'aza zantaminku naneke nehzageno, Jisasi'a amanage hu'ne, <sup>6</sup> Amazama me'negeta negazazana, magokna esigeno'a mago havemo'e huno, mago havemofo agofetura atresageno omanegosianki, ana maka tagna vazitregahaze.

*(Mat 24:3-14; Mak 13:3-13)*

<sup>7</sup> Hige'za, ana kegu anage hu'za antahige'za, rempi hurami ne'moka, nanknafi anazana fore hugahie? Ana knama atupama hinkeno'a nankna avame'za fore hinketa ketesunkeno anazana fore hugahie? <sup>8</sup> Jisasi'a anage hu'ne, Tamagra kva huneta atrenkeno mago'a vahe'mo'za havi kantera tamavreza oviho. Na'ankure rama'a vahe'mo'za Nagri nagifina eza anage hugahaze, nagra ana neki, hago knamo'a koftahie hanigeta, tamagra zamage anteta ovutfa hiho. <sup>9</sup> Tamagra ha'ma hanaza agenkene, hazenkeza fore'ma haniazamofo agenkema antahisuta korera osiho, na'ankure ese'zana ana zantamina fore hugahianagi, ame huno vagareknka omegahie.

<sup>10</sup> Jisasi mago'an huno, Mago rankumate vahe'mo'za, mago rankumate vhahera hara huntesigeno, mago kinimofo naga'mo,

mago kinimofo naga hara hunentesigeno, <sup>11</sup> tusi'a imi enerisigeno, mago'a kaziga tusi'a kri fore nehinkeno, mago'a kaziga tusi'a zamaga netenkeno, monarera ruzahu ruzahu avameza fore huno vhahera zamazeri zamagogofegahie. <sup>12</sup> Hu'neanagi anazana fore osu'nena, esera tamagrira tamazeri'za kanonkeve neramami'za, tamavre'za osi mono nompine, kina nompi ome neramante'za, kini vahete'ene kamani vahetera, Nagri nagireku hu'za tamavre'za vugahaze. <sup>13</sup> Zamagrama e'inama hanaza zamo'a, mago kankamu tamamisigeta, Nagri nagi nagenkea huama zamagrira hugahaze. <sup>14</sup> Ana hu'negu antahiantahi hakare hutma, inankna hu kehuta tagra'a taguvazigahune hutma osiho.

<sup>15</sup> Na'ankure Nagri nanekema hanaza kene antahintahine tamisugeta, kea hanageno, kema huramantesaza vahe'mo'za, ana kema hanazana eri otregahaze. <sup>16</sup> Hianagi tamagritami tamarera tamafazane, tamafuhezane, tamagri'a

naga'mo'zane, ronetamimozone, komoru hu'za mago'amota tamahe frigahaze.<sup>17</sup> Hagi maka'mo'za, tamagrira antahi haviza huramantegahaze. Na'ankure Nagri nagima tamagripi me'neazanteku anara hugahazanagi,<sup>18</sup> magore huno tamasenifi tamazokamo'a fanane osugahie.<sup>19</sup> Tamagrama ana knazampima oti hanavetita vanutma tamasimura erigahaze.<sup>20</sup> Hianagi tamagrama negesageno sondia vahe'mo'za Jerusalemi kumama eme regagisagetma, Jerusalemi kuma azeri haviza hu'zamo'a egofta hie hutma antahiho.<sup>21</sup> Anama hanigeno'a Judiama mani'naza vahe'mo'za freza agonarega vnageno, rankumamofo amunompi mani'nesamo'za atre'za vinkeno, megiamma mani'nesamo'za rankumapina uofreho.<sup>22</sup> Na'ankure ama'i ana kna, Anumzamo kefovazmire nona'a huzmanteknagino, maka avontafepi krente'nea kea eama hugahie.<sup>23</sup> Zamuenema hu'nesaza ananene, ana knafi mofavrema ami nemisaza nagamofonkura nasunku huzmantoe. Na'ankure Anumzamofo tusi'a rimpaheteknagino, ama mopafine vahete'enena egahie.<sup>24</sup> Hagi bainati kazinu eme zamahe nefri'za, zamavre'za maka kokantega kina ome hunezmantesageno, Jerusalemi kumara megia' vahe'mo'za zamagiareti regugupa negrisageno, megia' vahe'mofo knamo'a vagaregahie.

### *Vahe'mofo Mofavrema esia naneke*

<sup>25</sup> Jisasi'a anage hu'ne, Avame'zana zagerema ikante'ma ofunte fore nehina, mopafina vahe'mokizmia antahintahizmimo'a savri nehina, hanavezmi nomnenkeno, hagerimo kranto kranto huno tusi'a agasasa nerina nentahiza tusi'a kore hugahaze. (Joel 2:31) <sup>26</sup> Mopafima fore'ma hanizamofo nege'za vahe'mo'za zamu evuevu hanige'za traka hu'za masegahaze. Na'ankure monafima me'nea hanave zantamimo'a toretore hinke'za anara hugahaze.<sup>27</sup> Ana nehina Vahe'mofo Mofavremo'a hampompi himamu'ane, tusi'a masa'afi ne-ena kegahaze. (Dan 7:13) <sup>28</sup> Hianagi ana maka'za erigafa huno fore nehinketa, oti hanavetita tamasenia antesga hutma keho. Na'ankure tamagri'ma tamavresia knamo'a egofta nehie.

### *Zafamofo fronka naneke*

(Mat 24:32-35; Mak 13:28-31)

<sup>29</sup> Anante Jisasi'a anage huno mago fronka kea zamasmi'ne, Fiki zafare'ene maka ruga'a zafataraminte keta antahita hiho.<sup>30</sup> Zafamo'ma kasefa asinama regeta, zagegna fore hunaku higen'e hutma nehaze.<sup>31</sup> E'inahu avame'zama negesutma, Anumzamofo kumara kofta hie hutma tamagesa antahito.<sup>32</sup> Nagra tamage hu'na neramasmue, ama knafi mani'naza veamo'za ofri mani'nesnageno, ana maka'zana fore hugahie.<sup>33</sup> Monane mopane fanane hugahianagi, Nagri kemo'a fanane osu mevava hugahie.

### *Eri'za vahe'mo'za kva hanaza naneke*

<sup>34</sup> Jisasi'a mago'ane anage hu'ne, Tamagra kva hiho. Ru negi ti neta negineneta, makazana kva huso'e nosuta, tmavufamofo zanku antahintahi hakare hanagi, e'inahuma hanageno'a krifumo zagagafa azeri-ankna hu'nenigeno, ana knamo'a ame huno onkesageno tamagritera efore hugahie.<sup>35</sup> Na'ankure maka ama mopafi mani'naza vahete ana knamo'a efore hugahie.<sup>36</sup> Hanki tamagra maka knafina kva hutma maninetma, nunamuna huvava nehutma, hankavetita mani'neta ana maka knazama efore'ma haniana agateneretma, Vahe'mofo Mofavrema esigura avega an-teho.

<sup>37</sup> Maka mago mago knafina ra mono nompi veara rempi hunezmino, kinagasegeno'a Olivie huza nehaza agonare marerino umanine. <sup>38</sup> Hagi maka vahe'mo'za nanterampi otiza rempima huzamisige'za antahisagu ra mono nompi vutere hu'naze.

## 22

*Judas'i a komoru hinke'za Jisasi azerisnaza naneke  
(Mat 26:1-5; Mak 14:1-2; Jon 11:45-53)*

<sup>1</sup> Hagi Anumzamo'a Israeli vahe ozamahe zamagaterenege'za ana knagu antahimiza, (Pasova) zo'ore bretima kreza nenaza kna fore hu'za nehige'za, <sup>2</sup> ugagota pristi vahe'mo'zane kasegere ugota hu'naza vahe'mo'za Jisasima ahefrisaza kanku hake'naze. Na'ankure vahetaminku kore hu'naze. <sup>3</sup> Ana nehazageno, Jisasima amage'manentaza 12fu'a disaipol nagapinti, mago zmimofo Judasinku, Iskarioti'e nehaza ne' agu'afi Sata'a ufre'ne. <sup>4</sup> Hagi ana ne'mo'a pristi vahe'ene, ra mono nonte kegava nehaza vahe'mokizmi kva vahetaminte vuno, Jisasima komoru huno avare zamisige'za ahesaza kea ome retro hu'naze. <sup>5</sup> Zamagra muse nehu'za, mago zamarimpa hu'za zago amisaza naneke hu'naze. <sup>6</sup> Judasi'a mago rimpia ana kerera huteno, Jisasi'ma Agraku mani'enigeno, komoru huno avrezamisia kankamunku hakre'ne.

*Tare disaipol netre'moke Anumzamo ozmahe zamagaterenea (Pasova)  
ne'za retrotra han'a naneke*

*(Mat 26:17-25; Mak 14:12-21; Jon 13:21-30)*

<sup>7</sup> Anantero zo'ore bretima nenaza kna ege'za, ese knazupa sipisipi anenta ahe'za Kresramana (Pasova) nevaza kna fore hu'ne. <sup>8</sup> Anante Jisasi'a Pitane Jonigizni amanage huno huzanante'ne, **Israeli vahe'ma Anumzamo'ma ozmahe zamagatere'nea zanku antahimiza nenaza ne'za retro hinketa ome namneno.** <sup>9</sup> Zanagra anage hu'nae, inante ome retro hanuegu nehan? huke hakeno, <sup>10</sup> Jisasi'a anage huno zanasami'ne, Tanagra rankumapi ufrakeno'a, mago ne'mo kavofi tina afino afunte nevanigetna ome kesanutna'a, avaririta umarerisia nompi ufre'o. <sup>11</sup> Ana nomofo nefana anage huta asami'o, Rempi hurami ne'mo'a anage kagrikura hu'ne. Anumzamo'ma Israeli vahe ozmahe zamagatere'negu zamagesa antahimiza nenaza ne'zana, inantega namage nentaza disaipol nagani'anena negahune? hune huta ome asami'o. <sup>12</sup> Anagema hanakeno'a, agofetu nomofona, ra kankamu hunaragintenefinka ko retro hunteneankino, tanaveri hanigeta, anante ne'zana retro hugaha'e. <sup>13</sup> Higene zanagra vune ome ka'ana, kehiaza huno makazana fore higene, ana ne'zana ome retro hu'nae.

*Ramofo ne'za ne'naza naneke  
(Mat 26:26-30; Mak 14:22-26; 1 Kor 11:23-25)*

<sup>14</sup> Ana ne'za nesnaza kna egeno, Jisasi'ene aposol naga'mo'za, ne'za nenaku trate zamaza tununte magopi mani'naze. <sup>15</sup> Anante anage huno zamasami'ne, **Nagra knazampina uofrenena, Anumzamo ozmaheno zamagaterenea zanku antahimiza nenaza ne'za tamagrane nesuazankura tusiza huno navesie.** <sup>16</sup> Na'ankure Nagra anage hu'na neramasamue, Nagra mago'ene amanahu ne'za onenesugen, henka Anumzamofo Kumapi avufa'a fore hugahie. <sup>17</sup> Anagema huteno, Jisasi'a waini ti me'nea kapu erino Anumzamofo susu hunteten, anage huno hu'ne, **Ama'i waini tina eriom ami hutma magopinti neho.** <sup>18</sup> Na'ankure Nagra anage huna neramasamue,

Nagra magore hu'na waini tina onena maninenugeno, Anumzamofo Ku-mara egahie. <sup>19</sup> Hagi Jisasi'a bretima erino Anumzamofo susu hunteteno korino nezamino anage hu'ne, Ama'i Nagri navufa tamagrikure huno tam'i'neanki, nenesutma tamagesa antahinamaho. <sup>20</sup> Ne'zama netageno'a, anahukna huno kapu erino anage huno zamasmi'ne, Ama'i korani'afi kasefa huvempage hagerafita maninunku tamagratera tagitroe. <sup>21</sup> Hu'neanagi keho, komoru huno ha' vahe zamazampi navrentesnia ne'mo, Nagrane magote mani'neno neza nene. <sup>22</sup> Tamage hu'na neramasamu, Anumzamo hu'nea kante anteno, Vahe'mofo Mofavre'mofontera fore hugahianagi, ha' vahe'mofo zamazampima avrentesimofona, nasunku huntoe! <sup>23</sup> Anage hige'za zamagra zamagra ontahige antahige hu'za, iza e'inahu'zana hu'naku higeno nehie? hu'za hu'naze.

### *Iza pusa vahe manigahie? hu'za fra vazi'naza naneke*

<sup>24</sup> Jisasima amage'ma nentaza disaipol naga'mo'za, zamagra zamagra kehakare hu'za, i'za amu'nontifina ra vahera manigahie hu'za nehazageno, <sup>25</sup> Jisasi'a anage huno zamasami'ne, Megi'a vahe'mokizmi kinimo'za zamagra'a vahera kegava krineza huzmantaza kea amage'uentaze. Hankave kva mani'noe haza vahe'mo'za, maka vahe'mokizmi rone mani'none hu'za nehaze. <sup>26</sup> Hianagi zamagra anara osugahaze. Hanki mago'mo'ma ra vhema amu'nontamifima mani'naku hanimo'a, osi'tfa manino. Kva vahe maniku amu'nontamifi hanimo'a, eri'za vahetami manigahie. <sup>27</sup> Hanki i'za rankvama manigahie. Nezane trate aza tununte maninemopi? Nezama retromta nehimo'e. Hianagi tamagri amu'nompina, Nagra ne'zama refkoma nehia vahekra hu'na mani'noe. <sup>28</sup> Miko knazama e'nerugeta, zamagra nonatrade. <sup>29</sup> Nenfama kuma'ama nami'neaza hu'na, Anumzamofo kumara neramuankita, <sup>30</sup> anahukna hutma tamagra Nagri kumapina, Nagrane kini trate maninetma, tine nezane nenetma, Israeli vahe'mokizmi 12fu'a naga nofimofona kini trate maninetma refko huzmantegahaze.

### *Pita'a Jisasi amagena humisnia naneke (Mat 26:31-35; Mak 14:27-31; Jon 13:36-38)*

<sup>31</sup> Saimoniwoe Saimoniwoe, kagra antahio, witi rgamofo anomaa'hare-anckna huno Sata'a regaheno kenaku nehie. <sup>32</sup> Hianagi Saimoniga ka-grikura nunamu hugantenoankino, kamentintimo'a evu oramigahie. Hanki henkama rukrahe'ma hanunka, kagra kafuhe'ina zamazeri hanavetio. <sup>33</sup> Hianagi Pita'a anage hu'ne, Ramoka, nagra tro hunoankina, Kagra kina nompi vnanana, nagrane vugahu'e. Frisanana nagrane frigahu'e. <sup>34</sup> Higeno anage Agra hu'ne, Pitaga Nagra negasamue, meni kenage kokorege osu'enkenka, Jisasina onke'noe, hunka tagufa zupa vahane hugahane. <sup>35</sup> Nehuno anage huno zamasami'ne, Nagrama erizania omerisazeguma hunermantena, zago eriri ku'ene, agia nona erineta ovihoma hugeta vazana, tamagra magozankura atupara hu'nazafi? Hige'za zamagra hu'za, i'o atupara osu'none hu'naze. <sup>36</sup> Jisasi'a anage huno zamasami'ne, Hi-anagi menina, zagoma eriri kura enerita, anahukna hutma kura eneritma, bainati kaziknoma e'orinenamotma nakre (saket) kutmia zugore atretma zago eritma bainati kazinknona magora mizaseho. <sup>37</sup> Na'ankure Nagra anage hu'na neramasamu, avontafipima krente'nea kemo'a, kumi vahe'ene Agira hampri'naze hu'neana, Nagriku huno krentenea kemo'a nagrite eama hugahie. (Ais 53:12) <sup>38</sup> Hige'za amage'ma nentaza disaipol naga'mo'za

amanage hu'za hu'naze, Ramoka ko, tare kazi eri'none hu'za hazageno, **Sa eri'naze**, huno zamasmi'ne.

*Jisasi'a Getsameni hozafi nunamu hu'nea naneke  
(Mat 26:36-46; Mak 14:32-42)*

<sup>39</sup> Jisasi'a anage huteno, nompinti atiramino koma nehiaza huno Olivi agonare nevige'za, amagema nentaza disaipol naga'mo'za avariri'za vu'naze. <sup>40</sup> Jisasi'a ana agonare uhanatiteno, amanage huno zamasami'ne, **Nunamu nehutma reramehe'zama esigetma evuoramiho**. <sup>41</sup> Anage huteno, have matevazageno uneramia avamente zamatreno vuno, ome renarenamagino agafa huno nunamu huno, <sup>42</sup> anage hu'ne, **Nenfaga Kagri kavesima me'nenigenka ama knazana eri atrenanto**. **Hianagi nagri navesira ovaririnka, Kagra kavesi avaririo**, huno nehigeno, <sup>43</sup> anante monafinti mago ankeromo Agrite efore huno azeri hankavetine. <sup>44</sup> Jisasina tusiza huno knavenesigeno, mago'ane hanavetino nunamu nehigeno, kora amunasisi huno mopafi tagiramine. <sup>45</sup> Nunamuma huteno otino vuno ome zmageana, amagema nentaza disaipol nagara zamasunkuma hazazamo kna zamesino, zamazeri zamavutoko hige'za mase'nazageno, <sup>46</sup> anage huno zamasami'ne, **Nahigeta tamavura mase'naze?** **Reramahe'za esigetma traka hu'zanku**, otitma nunamu hiho.

*Judas'i'a komoru huno Jisasina ha' vahe zamazampi avrentenia naneke  
(Mat 26:47-56; Mak 14:43-50; Jon 18:3-11)*

<sup>47</sup> Jisasi'a anage huno nezmasamigeno, hakare vahekrefamoza eri hantage'za neazageno, ananpina 12fu'a amagema nentaza disaipol nagapintira magozamimo, Judasi'ema nehaza ne'mo zamavreno ne-eno, eama huno Jisasina agi'antako hunaku e'ne. <sup>48</sup> Hianagi Jisasi'a amanage huno Judasina asami'ne, **Judasiga nagi antako nehunka, komoru hunka ha' vahe zamazampi, Vahe'mofo Mofavre avrente'za nehampi?** <sup>49</sup> Anama hige'za, Jisasi'enema mani'namo'za fore'ma hunaku'ma hiazana nege'za, Ramoka, bainati kazinkanou zamantagi sanumpi? nehazageno, <sup>50</sup> magozmimo bainati kazinkno erino ugagota pristi nemofo kazokzo eri'za nera tamaga kazinga agesa antagi akre'ne. <sup>51</sup> Hianagi Jisasi'a anage hu'ne, **Atro, amanahuzana mago'ane osuo** nehuno, agesare avako higeno so'e hu'ne. <sup>52</sup> Anante Jisasi'a ugota pristi vaheku'ene, mono nompi kegava nehaza vaheku'ene, mono kva vahe'mo'za azerinakuma aza vahekura anage huno zamasami'ne, **Tamagra bainati kazinknonu'ene kumpa kanonu kumzafa vahe'ma azerinakuma hiaza hutma hara renantenaku neazo?** <sup>53</sup> Hakare zupa kna'ane kna'ane ra mono nompi tamagrane magopi mani'noana nazori'naze. Hinki ama kna tamagrizane. Hanizamofo hanavemo'a agatere.

*Pita'a Jisasinku onke'noe, hu'nea naneke  
(Mat 26:57-58,69-75; Mak 14:53-54,66-72; Jon 18:12-18,25-27)*

<sup>54</sup> Jisasina azerite'za avre'za ugota pristi ne'mofo nonte nevazageno, Pita'a zmavaririno ogamu'a e'ne. <sup>55</sup> Ugota pristi nemofo kuma amunompi teve hugrete'za, mani'nageno, anampi Pita'a zamagrane umani'ne. <sup>56</sup> Mago eri'za mofamo'a Pita'ma teve anefate mani'negeno ke'nene huno negeno, ama nera Jisasi'ene nemania nere. <sup>57</sup> Hianagi Pita'a anage hu'ne, ama a'moka nagra antahina kena osu'noa neku nehane huno vahane hu'ne. <sup>58</sup> Anante osi'agna evigeno, mago nemo negeno Pitanku huno, kagranena mago zimimoke! Hianagi Pita'a huno, ama ne'moka nagra ana nera omani'noe!

<sup>59</sup> Mago'a osi'a (aua) knama evigeno, mago ne'mo eno mago'anee hanavetino, ama nera agrane vano nehigena kenoa nere. Na'ankure agranena

Galili ne' mani'ne. <sup>60</sup> Hianagi Pita'a anage hu'ne, ama ne'moka, nagra kena antahina osu'noa neku nehane nehigeno, kokorege hu'ne. <sup>61</sup> Ramo'a rukraha huno Pita negegeno, Kokoremo ageru orunenigenka, 3'a zupa **Nagrikura onkenoa nere hunka vahane hugahane** huno, Ramo'ma asami'nea kegu Pita'a agesa antahi'ne. <sup>62</sup> Pita'a meg'i a vuno tusiza huno zavi ome ate'ne.

*Jisasina azanva ke hunte'naza naneke*  
(Mat 26:67-68; Mak 14:65)

<sup>63</sup> Hagi Jisasima azeri'namo'za azanava ke hunente'za kano nemiza, <sup>64</sup> avua kisu hunente'za, iza negehefi kasnampa ke hunka huama huo hu'za antahige'naze. <sup>65</sup> Mago'ane hakare azanava ke hunente'za, huhaviza hunte'naze.

*Jisasina avare'za kanisol vahete vu'naza naneke*  
(Mat 26:59-66; Mak 14:55-64; Jon 18:19-24)

<sup>66</sup> Nanterama segeno'a, kva vahezagane, ugota pristi vahe'ene, kasegere ugota hu'naza vahe'mo'za, Jisasina avare'za mono kanisolo vahete vu'za anage hu'naze, <sup>67</sup> Kagra Kraisiga maninenunka tasamio hazanagi, Jisasi'a anage huno zamasami'ne, **Nagrama tamasamisugetma, tamentintia osughahaze.** <sup>68</sup> **Hanki Nagrama tamantahiganena, tamagra kenonani'a osughahaze.** hu'ne. <sup>69</sup> **Hianagi amaretime vaniana, Vahe'mofo Mofavremo'a, Anumzamofo hanavefi azantmaga'a kaziga manigahie.** (Sam-Zga 110:1) <sup>70</sup> Hige'za zamagra makamo'za hu'za, e'ina hu'negu kagra Anumzamofo mofavre mani'nampi? Hu'za hazageno, **Tamagrama nehzana, izo Nagra anane,** hige'za <sup>71</sup> anante zamagra hu'za, mago'enena na'ane hanigeta antahisunku antahigegahune. Na'ankure tagra nentahunkeno Agra'a agipinti Anumzamofo mofavre mani'noe hu'ne.

## 23

*Jisasina Paerotinte avre'za vu'naza naneke*  
(Mat 27:1-2,11-14; Mak 15:1-5; Jon 18:28-38)

<sup>1</sup> Ana maka vahe'mo'za erihantage'za Paerotinte, Jisasina avre'za vu'za, <sup>2</sup> amanage hu'za erigafa hu'za naneke hunte'za, tagra konkeno ama ne'mo'a havi kante Jiu vahetia zmarenovnevuno, Sisana takesi zagoa omiho ne-huno, Agra'agura huno Nagra Kraisina kini mani'noe hu'ne. <sup>3</sup> Ana hazageno, Paerot'i'a Jisasina anage huno antahigene, Kagra Jiu vahe'mofo kinio? Jisasi'a ana kenona'a anage huno hu'ne, **Ha e'i kagraka'a nehane.** <sup>4</sup> Anante Paerot'i'a ugagota pristi vahe'ene, ana vahe kevugura anage huno zmasamine, nagra ama ne'mofompina mago hazenke zama'a kena eri fore osue. <sup>5</sup> Hianagi zamagra hu hankveti'za, agra rama'a vahe'mokizmi zamirimpama zamazeri otino, maka Judia kaziga rempi huzami'ne. Anazamo'a Galiliti agafa huno amarera ehanati'ne.

*Paerot'i'a Jisasina avreta Herotinte viho hu'nea naneke*

<sup>6</sup> Paerot'i'a ana naneke nentahino, Jisasi'a Galili ne' mani'neo huno hu'ne. <sup>7</sup> Hagi Paerotima antahiamma, Jisasi'a Heroti kvagri'nea mopafinti e'ne ne-huno'a, Herotinte hunte'ne. Heroti'a ana knafina Jerusalemi emaninegeno huntege'za avare'za vu'naze. <sup>8</sup> Herotinte avare'za vazageno, Heroti'a Jisasima negeno'a tusi muse hu'ne. Na'ankure Jisasina agenke'a hakare zupa antahitere nehuno, magokna Agra kaguvaaza eri fore hanigena kesue huno antahinegu hu'ne. <sup>9</sup> Heroti'a rama'a antahige naneke hianagi, Jisasi'a

kenona'a osu mani'ne. <sup>10</sup> Hagi ugagota pristi vahe'mo'zane, kasegere ugota hu'naza vahe'mo'za, anante oti'za mani'ne'za, hu hankveti'za Jisasina kegaga hunte'naze. <sup>11</sup> Hanki Heroti'ene sondia vahe'ane, Jisasina revatga vatago nehu'za, azanava anteza azeri haviza hute'za, knare avonke kukena eri antaninente'za, huzmanteg'eza Paerotinte ete avre'za vu'naze. <sup>12</sup> Na'ankure zanagra kora ha' vahe tro hune manina'ankino, ana knazu-page, Paeroti'ene Herotikea erimago zanarimpa hu'na'e.

### *Paeroti'ma Jisasima zami'nea naneke*

<sup>13</sup> Hagi Paeroti'a ugota pristi vahezagane, kva vahezagane, vahetamine kehutru huno, <sup>14</sup> anage huno zamasami'ne, Ama ne'ma avretma nagritema aza nekura hutma, vahetamina avreno havi kante nevie hutma hazanagi keho, nagrama tamagri tamavuga Agri'ma rezaganena koana, tamagrama hunentaza kemofona agafa'a kena erifore osue. <sup>15</sup> Heroti'enena magozahu antahintahi hu'negu, ama nera huntogeno tagrитега e'ne. Antahihi, ama nera magore huno ahefriga hazenke osu'ne. <sup>16</sup> E'ina hu'negu, kanonkeve amitenamitena atresugenogu vugahie huno Paeroti'a hu'ne.

### *Barabasi katufegeno vu'nea naneke*

<sup>17</sup> [Amanahukna nehzane, kafune kafunena Anumzamo'ma Israeli vahem ozamahe zamagtere'negu antahimi ne'za neknarera, Paeroti'a kina nompinti mago vahe kazufe zamitere nehiane.] <sup>18</sup> Hianagi maka vahe'mo'za ranke hu'za kezati'za, Jisasina avreta ome ahenefrita, Barabasi katufe tamio! hu'naze. <sup>19</sup> [Barabasi'a, Jerusalemi rankumate kamani vahe ha' renezmanteno, mago vahe ahefrigeza kina huntogeno mani'nea nere.] <sup>20</sup> Paeroti Jisasima atresigeno vanigu, mago'ene veara zamantahigene. <sup>21</sup> Hianagi zamagra mago'ane kezatiza, Rugeka zafare aheta hantihi! Rugeka zafare aheta hantihi! Huza nehzageno, <sup>22</sup> Paeroti'a mago'ene 3'a zupa zamantahigene, Nagafarere? Nankna hazenke ama ne'mo'a hu'negeta nehaze? Nagrama kena eri fore'ma huana, friga hazenke'a osu'ne. E'ina hu'negu nagra kanonkeve amitenamitena atresugenogu vugahie. <sup>23</sup> Hianagi zamagra kazigazi hu'za, rankefinti antahige'za, Rugeka zafare ahefrihu'zama hazankemo, Paerotina agu'a azeri rukrehe hu'ne. <sup>24</sup> Hagi kema hazare, Paeroti'a antahintahi'a retrohuno Jisasinkura ahefrihu'ne. <sup>25</sup> Hagi zamagrama kamani vahe ha' renezmanteno vahe zamahe fri'nege'za kina hunte'naza neku'ma antahigaza ne' katufe nezamino, hanki Jisasina ahefrisunema hazagu avarezami'ne.

### *Jisasina rugeka zafare ahe'naza naneke (Mat 27:32-44; Mak 15:21-32; Jon 19:17-27)*

<sup>26</sup> Jisasima avare'za nevazageno mago Sailiniti (Afrika) nera agi'a Samonikino, Jerusalemi ne-ege'za kantega ome nege'za, Jisasina rugeka zafa erio hu'za eri kofintageno erino Jisasina avaririno vu'ne. <sup>27</sup> Jisasina tusi'a vea kevumo'za avaririza nevazageno, ananpina mago'a a'nengam'o'za zamasunku hunente'za, zavite'za vu'naze. <sup>28</sup> Hianagi Jisasi'a rukrahe huno nezmageno amanage huno zamasm'i'ne, Jerusalemi kumate a'nemota nigrirkura zavira oteta, tamagrugu'ene mofavretamig'enenku zavira ateho. <sup>29</sup> Antahihi, mago kna ne-eankiza vahe'mo'za anage hugahaze, narvo a'ne mo'zane, mofavre onte'anene, mofavre ami anuntage nosnamo'za muse hilo hu'za hugahaze. <sup>30</sup> Ana nehu'za zamagra agafa huza, ra agonomoka

*ankrisenka refiteranto, hu'za nehu'za, osi 'agonagura refiteranto hu'za hugahaze.* (Hos 10:8) <sup>31</sup> Na'ankure kasefa huno me'nenia zafamofoma e'inahuma hentesuza, osapa zafamofona inanknaza fore hugahie?

<sup>32</sup> Tare kumzafa netrene, Jisasine magoka zanahe frisazegu zanavre'za vu'naze. <sup>33</sup> Aseni zaferine (Golkote) nehaza agonarema zamagra vute'za, Jisasine tare kumzafa netrena keka zafare zamahe'za hanti'naze. Magomofona Jisasi azantmaga ahe'za nehantiza, magomofona aza hog a hanti'naze. <sup>34</sup> Hianagi Jisasi'a anage hu'ne, **Nafanimoke, ontahine'za anara nehzanki, kumizmia atrezmanto.** Anage nehige'za sondia vahe'mo'za zaza kena'a refko huza erinaku taisi zokogo re'naze. (Sam-Zga 22:18) <sup>35</sup> Ana nehzageno, hakare veamo'za anante otine'za uruha nehzageno, kva vahe'mo'zanena azanvanke hunte'za, vahe'mokizmia zamza nehia neki, Anumzamo huham-printenemo Kraisi'ma mani'nesuno'a atregeno agra'a agu'vazisnigura kamano hu'za nehzageno, <sup>36</sup> sondia vahe'mo'zanena azanava ke nehu'za, akahe'nea waini tina eme nemiza, <sup>37</sup> Kagra Jiu vahe'mokizmi kinima mani'nesunka, kagra ka'a kaguvazio! hu'za hu'naze. <sup>38</sup> Hanki asenirega anage hu'za avona kreza ome hentenaze, **ama'i Jiu vahe'mokizmi kinie.**

<sup>39</sup> Mago kumzafa ne'ma aheza hantinaza nemo'enena Jisasina kesuno, Kagra Kraisiga omaninano? Kagraka'a kagu'nevazinka, tagri'enena taguvzio! <sup>40</sup> Hianagi mago'mo'a azerikorino, kagra Anumzamofonkura korera nosano? Ana mikomota anahukna knazampi mani'none. <sup>41</sup> Tagra tamage huta hazenke hu'noa zamofo nona'a, eriga knaza eneru'e. Hianagi ama ne'mo'a mago hazenke osu'ne. <sup>42</sup> Anantero anage huno ana ne'mo'a hu'ne, Jisasiga hihamukafima manusunka kagesa antahinamio. <sup>43</sup> Higeno Jisasi'a anage huno ana nera asami'ne, **Tamage hu'na negasamue, kagra menina Nigrane mona avasese zama'anee kumapina Paradaisi umanigahane.**

### *Jisasi'ma fri'nea naneke*

(Mat 27:45-46; Mak 15:33-41; Jon 19:28-30)

<sup>44</sup> Hagi 12 kilokinaza higeno, maka mopafina hanimo refitegeno, kinaga 3 kilokuma higeno rumsa hu'ne. <sup>45</sup> Na'ankure zagemo'a ananknafina remsa osu'ne. Hagi ra mono nompi tafinaza tavravemo'a amu'nompinti ruhakeke huno fenkamu uramine. <sup>46</sup> Jisasi'a ranke huno, **Nafa'nimoka kagri kazampi avamuni'a antoe** nehuno vagare asimu atreno frine. (Sam-Zga 31:5) <sup>47</sup> Sondia vahe'mokizmi kva ne'mo'a anazama hiazama negeno'a, agafa huno Anumzamofo agi erisaga nehuno, tamage ama fatgo nekino hazenkeea omnene hu'ne. <sup>48</sup> Hanki maka vea kevumo'za anazama fore hu'neaza ome kete'za ne-eza, zamasunku zampi zamariimpire zamaza refiteriri hu'za vu'naze. <sup>49</sup> Hanki maka Jisasi rone'amo'zane, Galili kazigati Agrane e'naza a'anemoo'zane, ogantu umani'ne'za ana zama fore hiazana ke'naze.

### *Jisasi afufgama erisente'naza naneke*

<sup>50</sup> Mago nera Josefe'e nehaza nekino knare huno fatgo avu'va ene ne', kanisol vahe'pina mani'ne. <sup>51</sup> Kanisol vahe'mo'za Jisasima ahenakuma kema retroma hazankerera agra mago rimpa osu'nea nere. Ana nera Jiu vahe'mofo rankumapinti Aramatia nekino, Anumzamofo kumaku avega ante'ne. <sup>52</sup> Ana ne'mo'a Jisasi avufga erino ome asentenigu, Paeroti ome antahigeten, <sup>53</sup> vuno rugeka zafaretii Jisasi avufga ome eri fenkma atreno, efeke tavravefi anovazino erino have fregeno hanagatinte'nea kampi ome antene. Magore huno ana havegampina kora fri vhahera ome ontenevi ome ante'ne. <sup>54</sup> Mani fruhu kna (Sabat) eza hige'za ana knarera retrotra nehaza

kna fore hu'ne. <sup>55</sup> Galiliti Jisasi amagema ante'za e'naza a'nemo'za, ana havegampima avufga'ama antazana ke'naze. <sup>56</sup> Anante rukrahe hu'za vu'za mana nentake'zane, masavene retro ome hu'naze. Mani fruhu kna (Sabat) zupa kasegemoma hu'nea kante anteza manigsa hu'naze.

## 24

### *Jisasima fri'nefinti oti'nea naneke*

<sup>1</sup> Hanki ese knazupa Sonta nanterana rumsa osu'nege'za, mananentake'zama tro hu'nazaza eri'za Jisasi afufga'ama havegampi ome ante'narega vu'naze. <sup>2</sup> Hagi zamagrama vu'za ome kazana, ana havegante'ma runkanire'nea havea rezahe hutrenage'za ke'naze. <sup>3</sup> Hianagi zamagrama havegampima ufre'za kazana, Ramofo Jisasi avufga omnenege'za ome ke'naze. <sup>4</sup> Avufa'a nonke'za tusi zamagesa nentahizageno, masanentake huno efeke kukena hu'na'a netremoke ame hu'ne anante otinake'za, <sup>5</sup> ana a'nemo'za zamagogogu nehu'za, kepri hu'za mani'nageno, ana netremoke anage hu'ne zamasami'na'e. Na'a higeta kasefa huno mani'nea vahekura, fri vahe kumapina nehakrake? <sup>6</sup> Amafina Agra omanine, frinefintira ko oti'ne. Hanki tamagranema Galili mani'neno tamasami'nea kegu tamagesa antahiho. <sup>7</sup> Vahe'mofo Mofavrea kumike vahe'mofo zamazampi avrentena, rugeka zafare ahesnageno friteno, tagufa kna manino otigahie, huno hu'nea kegu tamagesa antahiho, <sup>8</sup> hu'ne nehake'za ana a'nemo'za Jisasi'ma hu'nea kegu tamagesa nentahi'za, <sup>9</sup> ana havegana atre'za rukrehe hu'za vu'za, 11ni'a amagema nentaza naga'ane, ruga'amokizminena maka nanekea ome zamasmi vagare'naze. <sup>10</sup> Hanki ana a'nemokizmi zamagi'a, Makdala kumateti' a' Mariaki, magora Joanaki, Jemisi nerera agi'a Maria ene, mago'a a'nemo'zane, ana nanekea aposolo nagara ome zmasami'na'e. <sup>11</sup> Hianagi anankema nentahiza amne kehaze nehu'za, anankegura zamentinti osu'naze. <sup>12</sup> Hianagi Pita'a otino agareno vuno havegante ome kepri huno agu'afi keana, efeke tavravema ana kinte'naza tavravege me'negeno negeno, rukrahe huno anazanku tusiza huno agesa antahime vu'ne.

### *Tare netremoke Emeusi vu kantega Jisasi ke'na'a naneke*

<sup>13</sup> Ana zupage tare amagema nenta'a disaipol netremokea Emeus ne-haza kumate vu'na'e. Ana kumateti Jerusalemi vanazana 11 kilomitanaza me'ne. <sup>14</sup> Zanagra maka'za fore'ma hu'nea zanku naneke hume nevakeno, <sup>15</sup> Jisasi'a Agra'a ehanatige'za magoka ana netrene vu'naze. <sup>16</sup> Hianagi zanavurgamofona rehiza higene Jisasi'e huke ke anke orena'e. <sup>17</sup> Jisasi'a anage huno zanasami'ne, **Na'antru ama nanekea tanagra hugantugma hutna nea'e?** huno znantahigegene anante zanasunku nehuke uoti'na'e. <sup>18</sup> Hagi magomofo agi'a Kriopasi'e nehaza ne'mo ana kemofo nona'a huno, kagrake'za Jerusalemi nantu antenka ne-enka amagnafima fore hu'nea zana ontahi'nan? <sup>19</sup> Jisasi'a anage huno zanasami'ne, **Nanknaza fore hu'negeta neha'e?** Higeno Nazareti Jisasant'e fore hu'nea zanku nehu'e. Agra kasnampa ne'kino, Anumzamofo avure'ene, maka vahe'mofo avurera, eri'zama'amo'enae keamo'enana hanaventake hu'nea ne'ma, <sup>20</sup> ugagota pristi vahe'mo'zane, kva vahetimo'zane ahesageno frisniegu, avarezamizage'za ahe'za keka zafare hantinaza ne'ku nehu'e. <sup>21</sup> Hianagi tagrama tagesa antahunana, Israeli vahe'mota knazantifinti tahoke ahesia nere huta nentahune. Tamage, ama anazama fore'ma hu'neana 3'a zategna

evu'ne. <sup>22</sup> Hianagi tagripinti ana havegante nanterame ome ke'naza, a'nemo'za antri hu'na ke eme tasamiza, <sup>23</sup> avufa'a omne'nege'za ome negazageno, avana kazankna huke, tare ankero netremoke, kasefa huno Jisasi'a mani'ne huke huna'a naneke eme tasami'naze. <sup>24</sup> Hagi tagripinti mago'amo'za havegantega anaza ome kenaku vu'naze. Mika zanku'ma ana anemo'za hu'nazaza ome kazanagi, Jisasina onke'naze. <sup>25</sup> Jisasi'a amanage huno zanasami'ne, **Kasnampa vahe'mo'za hu'naza maka nanekegura negi nenetma tamagu'afina tamentintia nosaze!** <sup>26</sup> **Kraisi'a ataza eriteno, masa'afi ufresiana, knarera osugahio?** I'o. <sup>27</sup> Huteno anante agafa huno, Mosesinteti vuno maka kasnampa vahe'mo'zama, Agrikuma hu'za krentenaza kea eriama huno zanasamime vu'ne. <sup>28</sup> Hagi zanagrama vunu'ka ma hu'na'a kumate unehanatizageno, Jisasi'a ana kumara agatereno vaniaza hu'ne. <sup>29</sup> Hianagi hanavetike agaterenko ovugahane huke zanagra nehuke, hani huza nehianki masetenka vanane hu'ne kazigazi hakeno, ana nompi zanagrane umarerine. <sup>30</sup> Jisasima nezama nenaku trate umanineno breti erino, Anumzamofo susu hunteten, tamanasino agafa huno neznamigeno, <sup>31</sup> zanavurgamo hari higeke Jisasi'e huke ke ankenerakeno, Jisasi'a ru fanane hu'ne. <sup>32</sup> Zanagra zanagra anage hu'na'e, kantegama neokenoma keagama nerasamino, Anumzamofo avontafepinti kema eriama nehigeno'a, tagu'amo'a otianagi, keta antahita osu'no'e. <sup>33</sup> Zanagra anage nehuke, ame huke rukrehe huke Jerusalemi kumate vu'na'e. Jisasima amage'ma nentaza 11ni'a disaipol naga'mo'zane, mago'a naga'moza'nena eri atru hu'nage'za ome nezmagake'za, <sup>34</sup> Zamagra anage hu'naze, tamage Ramo'a otino, Saimoninte ufore hu'ne! Hu'za nehazageke, <sup>35</sup> ana amagema nenta'a disaipol netremoke kantega fore hu'neazane, breti erino tamanasino znamigeke, Jisasina ke ankerena'a agenke huama hu'na'e.

### *Jisasi mago'ane amage'ma nentaza vahete efore hu'nea naneke*

<sup>36</sup> Ana zanku'ma naneke nehazageno'a, Jisasi'a amu'nozimifi efore huno otineno anage hu'ne, **Tamarimpa frune maniho.** <sup>37</sup> Hianagi zamagra hav'i avamu negone hu'za zamagesa nentahi'za, antri hu'za koro hu'naze. <sup>38</sup> Ana nehazageno Jisasi'a anage huno zmasamine. **Nahigeta korera ne-huta, tare tamagutmagesa nentahize?** <sup>39</sup> **Ama Nagrani'a mani'noanki na-gane, nazanena navako hutma keho. Na'ankure Nagrima hu'neaza huno, hankromofona avufgane zaferinanen omane'ne.** <sup>40</sup> Anagema huteno'a, agane, azane anamokizmi zameri hu'ne. <sup>41</sup> Na'ankure zamagra tusi muse nehu'za, antri nehu'za zamentinti nosazageno, Jisasi'a anage hu'ne, **Tama-gra mago'a ne'zana ante'nazafi?** <sup>42</sup> Zamagra kre hagege hunte'nea nozame eri amizageno, <sup>43</sup> anamokizmi zamure erino nenege'za ke'naze.

<sup>44</sup> Jisasi'a anage huno zamasmi'ne, **Nagra tamagrane mani'nena, an-age hu'noe, maka kema Nagrikuma hu'za Mosesse kasegefina, kasnampa vahe'mo'za krenaza kefine, zagame avontafepima krente'nea zamo'a nena'a fore hugahie.** <sup>45</sup> Anante Jisasi'a zamaza huno antahintahizmia zamazeri ama hige'za, maka Anumzamofo avontafepima krente'nea kea antahini hu'naze. <sup>46</sup> Agra anage huno zamasam'i'ne, **Avontafepina amanage huno krente'ne, Kraisina ahesageno ata erino friteno, tagufa knare otigahie.** <sup>47</sup> **Vahe'mo'za Agri agifi, zamagu'a rukrahe hanageno, Anumzamo'a ke-fozazimi eritrezamantesia kea, Jerusalemi kumate erigafa hute'za, mika kokankoka vahete vughahaze.** <sup>48</sup> **Tamagra Nagritema fore higetma ke'naza**

zana huama hugahaze.<sup>49</sup> Hanki antahiho, Nafa'nimo huvempa huno tamigahue hu'nemofona, huntesugeno tamagrite egahie. Hu'neanagi tamagra (Jerusalemi) rankumapi manineta monafinti hanavea eriteta vuta eta hiho.

*Jisasi'a ete monare mareri'nea naneke*

<sup>50</sup> Jisasi'a anage huteno zamavareno Betani vuno azana erisaga hunagamuteno, asomu ke huzmantene.<sup>51</sup> Anama hunezmantegeno, Anumzamo'a avregeno zmatreno monafi mareri'ne.<sup>52</sup> Zamagra mono huntete'za, tusi musenkase hume Jerusalemi kumate ete vu'naze.<sup>53</sup> Ana hute'za ra mono nompi mareri'za Anumzamofo agi erisaga huvava hu'naze.

# Jon Knare Musenke Joni Kre'nea Naneke

## Kemo vahe fore hu'nea naneke

<sup>1</sup> Ese agafare Ke me'neane, higeno ana Kemo'a Anumzane me'ne, ana Kea e'i Anumzane. <sup>2</sup> Ese agafarera Agra Anumzane tragoteno mani'neane. <sup>3</sup> Maka'zana Agrake'za tro hu'ne, hagi mago'zana ru kampintira fore osu'ne, makazana Agrake tro hu'ne. <sup>4</sup> Agripi asimura me'ne, hagi ana asimumo'a vahe'mofa Masa'e. <sup>5</sup> Ana masamo'a hanizana remsa hunetreankino hanizamo'a agateore'ne.

<sup>6</sup> Hagi mago nera Anumzamo huntogeno e'ne, Ana ne'mofo agi'a Joni'e. <sup>7</sup> Ana ne'ma e'neana, Masamofo naneke hanigu e'ne. Ana hanige'za naneke'a nentahiza zamentinti hugahaze. <sup>8</sup> Agra ana masa omani'ne, hanki ana masamofo naneke hu'ama hanigu e'ne.

<sup>9</sup> Agra tamage masamo ama mopafi maka vahe remsa huzmentesigu ne-e. <sup>10</sup> Ama mopafi Agra mani'ne, hagi Agra'a ama mopa tro hu'ne, hu'neanagi ama mopafi vahe'mo'za Agrira antahi'za ke'za osu'naze. <sup>11</sup> Agra'a vaheku huno e'ne, hianagi Agri vahe'mo'za ovare'naze. <sup>12</sup> Hianagi iza'zo nevare'za Agri agifima zamentintima nehaza vahe'mokizmia, Agra'a hugnare hige'za Anumzamofo mofavre se'naze. <sup>13</sup> Hagi Anumzamofo mofavrema senazana arera afa zamesitero, vahe avesitero, neve avesitera forera osunazanki, Anumzamo zamazeri fore hu'ne.

<sup>14</sup> Ana Kemo vahe fore huteno, tagri'ene mani'ne. Agri masazama'a tagra ke'none, magoke ante'nea Ne'mo hanave'ane masa zama'ane Nefantegati e'ne. Asunku zamo'ene tamage kemo'a avite'nea Nere. <sup>15</sup> Joni'a huama huno Agriku hu'ne. Agra kezatino amanage hu'ne, nagrama amama nehuana Agriku nehue, nagri namage'ma ne-emo'a, nagrira nageretfa hu'ne. Na'ankure nagra fore osu'nogeno Agra pusante fore huno mani'neane. <sup>16</sup> Higeta tagra ana maka'mota hakare zana Agripi avitenefinti e'nerunkeno, asunku huranteno muse zama'a agumpi agumpi huno neramie. <sup>17</sup> Na'ankure kasegea Mosesempi tami'ne. Hagi asunku'zane tamage kea, Jisas Kraisimpi tami'ne. <sup>18</sup> Mopafi vahe'mo'a magore huno Anumzana onketfa hu'ne. Anumzamofo mofavrea magoke mani'neno, Nafa'amofo asumpinka mani'ne, Agra'a Anumzana mani'neno huama hu'ne.

## Joni'a agra'agu huama hu'nea naneke (Mat 3:1-12; Mak 1:1-8; Luk 3:1-18)

<sup>19</sup> Hagi Jiu kva vahe'mo'za, mono kva pristi vahe'ene Livae vahera Jerusalemi' kumateti huma zamantage'za Jonina antahigeku vu'za, Kagra azage? hu'za ome antahige'naze. <sup>20</sup> Antahigageno'a agra huama nehuno vhahane osuno, huama huno, Nagra tamazahu nera Kraisi'n'a omani'noe. <sup>21</sup> Hige'za, hagi azaga mani'nane? Elaijago? hu'za hazageno, a'o, nagra Elaijana omani'noe huno hige'za, kagra kasnampa nero? hu'za antahigageno, agra kezmi nona huno, i'o huno hu'ne. <sup>22</sup> Hagi hurantagetama e'nona vahe ome zamasmisunku nehune. Azaga mani'nane huta kagrikura ome zamas-migahune? Kagragura azage hunka nehane? <sup>23</sup> Hazageno Agra anage hu'ne, **Mago Kezanke ka'ma mopafi mani'neno keza tino, Ramofo ka azeri**

**ante fatgo hiho huno Aisaia kasnampa ne'mo korapa hunte'nea ne' mani'noe.** (Ais 40:3)

<sup>24</sup> Hu'zmantage'za e'naza Farisi vahe'mo'za, <sup>25</sup> zamagra antahige'za, amanage agriku hu'naze, kagra Kraisigafi, Elaijagafi, mago Kasnampa ne'ma omaninenka, nahigenka mono tina fre nezmantane? <sup>26</sup> Joni'a kenona zamirera anage hu'né, nagra amne tintfanteti mono tina frenermantoe. Hu'neanagi tamagri amunompina magora tamagra keta antahita osu'naza ne' oti'ne. <sup>27</sup> E'ima Agra nagri nmage'ma esanimofona Agri aga'nona knare osu'noankina katu ofegahue. <sup>28</sup> Ana nanekea Betani kumara Jodani timofo asoparega Joni'ma mono tima frenezmanterega antahigazageno zmasami'ne.

<sup>29</sup> Anante kotigeno Jisasi'a agrite egeno negeno, Joni'a amanage hu'né, keho, Anumzamofo Sipisipi anentara, ama mopafi vahe'mokizmi kumira, Agra eri atregahie! <sup>30</sup> Ama'ne ana nera, Agriku'ma hu'na nagrama kema hu'noana, nagri namge'ma esnia nera, nagrira nagatereno ra agi eri'nea nere, nagra fore osu'nogeno, Agra korapa Agraragisa mani'nea nere. <sup>31</sup> Nagra antahi'na ke'na Agrira osu'noanagi, Israeli vahe'mo'za Agrira antahiza keza hanaze hu'na, nagra ena mono tina eme frezmanente'noe. <sup>32</sup> Joni'a huama huno amanage hu'né, Nagra kogeno Avamura maho namamo hiaza huno monafinti eramino Agrite emanige'na ke'noe. <sup>33</sup> Nagra ke'na antahi'na Agrira osu'noanagi, mono tima frezmanento huno'ma hunante'nea ne'mo' a anage huno nasm'i'ne, kesnankenoma Avamumo'ma monafinkati'ma eramino Agrite'ma emani'nea ne'mo, Agra Ruotge Avamupina mono tina fre zamantegahie hu'ne. <sup>34</sup> Nagrani'a kete'na, huama hu'na ama Anumzamofo mofavre hu'na neramasmue.

*Jisasima ese disaipol eri'za vahe'a zamavare'nea naneke*

<sup>35</sup> Anante zupa Joni'a, amage'ma nenta'a disaipoli netrema'ane oti'neno, <sup>36</sup> Jisasi'a ne-egeno Joni'a negeno amanage huno hu'né, Keho, amu Anumzamofo Sipisipi anentare, <sup>37</sup> anage hige'ne, Joni amagema nenta'a disaipoli netremoke nentahi'ne, Jisasi amage'anteke vu'nae'. <sup>38</sup> Jisasi'a amage'a nevakeno rukrahe huno neznageno, **Na'anku nehakra'e?** huno znantahige'ne, Rempi hurami ne'moka inante Kagra nemanine? hu'né antahigena'e. <sup>39</sup> Agra anage zanagriku hu'né, **E'netra tanagratan'i'a emege'o** hige'ne, Agrane vuke nemania nonkuma omenege'ne ana zupa Agrane mani'nakeno, 4 kiloki hu'né. <sup>40</sup> Hagi nanterana mago'mo Joni hiankema antahiteno Jisasi amage'ma vu'nea nera Endru'e, Saimon Pitana nefu'e. <sup>41</sup> Hagi Endru'a, Jisasima keteno pusante Endru'a nefu Saimoni keno, amanage huno asami'ne. Tagra hago Mesaiana hakreta erifore hu'none. (E'i ana agima eri rukrehe'ma hu'neana Krais'i'e hu'ne.) <sup>42</sup> Jisasinte Endru'a, Saimonina avreno vu'ne. Vigeno Jisasi'a negeno anage huno asmi'ne, **Kagra Saimonige Joni nemofo mani'nane, kagri kagi'a Sifasi'e hugahaze.**\* (E'i ana agima eri rukrehe'ma hu'neana Pita'e hu'ne.)

*Jisasi'a Filipine Nataniel kizni zanagi hu'nea naneke*

<sup>43</sup> Mseno kotigeno Jisasi'a Galili vunaku nehuno Filipi ome negeno, **Nagri namage anto** hu'ne. <sup>44</sup> Hanki Filipi'a Betsaidati ne' Andrune, Pitakiznia rankuma zani'areti nere. <sup>45</sup> Filipi'a, Natanieli'e nehaza ne' before huteno amanage huno asmi'ne, Mosesi'enе kasnampa vahe'mo'zama avontafepima

\* <sup>1:42</sup> Pita'e hu'nea agimofo agafa'a have hu'ne.

agenke'ama krente'naza Ne'ma, Nazareti kumati Josefe nemofo Jisasi'e hu'naza nera hago hakreta erifore hu'none, huno asmi'ne. <sup>46</sup> Natanieli'a anage huno Filipina antahige'ne, Nazaretia knare'zana efore hugahio? Filipi'a anage hu'ne, kagraka'a enka emego. <sup>47</sup> Natanieli'a Agritega ne-egeno Jisasi'a negeno amanage hu'ne, **Keho, tamage Israeli vahere agu'afina havige hu'zana omne'ne!** <sup>48</sup> Natanieli'a Agriku anage hu'ne. Kagra inankna hunka nagrira nage'nane? Jisasi'a ke nona huno amanage hu'ne, **Filipi'a kagi osu'negenka fiki zafa agafafi mani'nanke'na ko kage'noe.** <sup>49</sup> Higeno Natanieli'a Agri ke'nona amanage hu'ne, Hurami nere, Kagra fatgo hunka Anumzamofo nemofoga mani'nane. Kagra Israeli vahe'mokizmi Kini nere. <sup>50</sup> Higeno, Jisasi'a ke'are anage huno asmi'ne, **Na'ankure Nagrama hu'na fiki zafa agafafi mani'nanke'na kage'noema huazanku kamentinti nehano?** Henka'a agatere'neaza ruzahu'za kagra kegahane. <sup>51</sup> Higeno Jisasi'a mago'ane amanage huno Natanielina asami'ne, **Tamagerafa hu'na Nagra kagriria negasamue, kagra negesankeno mona kafamo'a anagisigeno, Anumzamofo ankero zagamo'za, Vahe'mofo Mofavrere mareriza tamiza nehanigenka kegahane.**

## 2

### *Tintfanu waini tro hu'nea naneke*

<sup>1</sup> Hagi tare knamofo amefi knazupa, arave hunaku Kana kumate Galili kaziga nehzageno, Jisasi nerera'a anante mani'ne. <sup>2</sup> Ana hige'za Jisasine Agri amagenentaza disaipol naga'anena, aravema huku'ma hazarega zahage'za vu'naze. <sup>3</sup> Wainima vagaregeno'a, Jisasi nerera'a asmino, waini tina hagovagare'ne huno Agrira asmi'ne. <sup>4</sup> Higeno Jisasi'a nererana amanage huno asmi'ne, **Ama a' moke, Nagra naza ama zampina huku hugenka nehane? Nagri kna zahufa efore osu'ne.** <sup>5</sup> Jisasina nerera'a eri'za vaheku anage huno zamasmi'ne, Agrama inankna kema tamagri'ma tamasminia'zana hiho. <sup>6</sup> Higeno keana 6si'a havereti tro hunte ti afi kavo Juda vahe'mokizmi avu'avapina kavofinti ankeh'i'za tina fre'za avu sese nehzane, tina mago 100 lita azeritere huga tin kavorami me'ne. <sup>7</sup> Jisasi'a eri'za vahe huzmanteno **Ana kavo zagafi ti ome afi viteho** hige'za tina ome afi vite'naze. <sup>8</sup> Higeno Jisasi'a anage hu'ne, **Anampinti mago'a afita ne'zante kva hu'nea nera ome amiho,** hige'za afi'za ome ami'naze. <sup>9</sup> Ana ne'mo tima neno keana waini ti fore higeno, igati efore hu'neo antahino keno osu'ne, (hagi tima omefi'naza vahe'mo'za antahiza ke'za hu'naze), kavete kva hu'nea ne'mo aravema hia ne' asmino, <sup>10</sup> maka vahe'mo'za pusante knare wainia tagi zamige'za kema hazage'za, azu vahe'mo'za netageno, anante evurami'nea wainia tagi zamige'za nenaze. Nehazanagi kagra knare wainia ante'nanteti menina eri fore hane! <sup>11</sup> Ama kaguvezana Agra'a ese erigafa huno Jisasi'a Galili kaziga Kana kumate nehuno, Agri a hihamu masa zama'a eri ama hige'za, Agri amage nentaza disaipol naga'mo'za Agrite zamentinti hu'naze. <sup>12</sup> Anama huteno Jisasi'a Kapaneamu urami'ne, Agrane nerera ene afuhe'zane amagema nentaza disaipol naga'anena ana kumate vu'za mago'a zagegna umani'naze.

### *Ra mono nompinti Jisasi'a zamahenati'nea naneke (Mat 21:12-13; Mak 11:15-17; Luk 19:45-46)*

<sup>13</sup> Hagi Jiu vahe'ma kinafinti zamare'nea (Pasova) ne'za'ne knamo kofta higeno Jisasi'a Jerusalemi kumate mareri'ne. <sup>14</sup> Vuno ra mono nompi

omege'neana vahe'mo'a bulimakaoma, sipisipi'ma, maho namane, zago rezahe nehaza vahe'mo'za tra omente emente hu'za maketi nehzageno ome zamage'ne. <sup>15</sup> Ome zamageteno nofite kano tro hiazamo ra mono nompintira sipisipi'nne bulimakaone vahe'ene zamahenati'netreno zagoma rezahe'ma nehaza naga'mokizmi zagoa ruherafi netreno, ita zamia eriru-vahe huherfi'ne. <sup>16</sup> Hagi maho namama maketima nehaza vaheku, **Ama nama avreta viho.** **Nafa'nimofo nona maketi kumara eri tro osiho,** huno zamasmi'ne. <sup>17</sup> Agri amage nentaza disaipol naga'mo'za, kasnampa vahe'mo'za avontafepi kre'nea kegu zamagesa antahi'naze. Amanage huno kre'ne **Kagri noma kegava hu'na mani'navesizamo'a nagu'afina tuzisa huno navenesie.** (Sam-Zga 69:9) <sup>18</sup> Jiu vahe'mo'za Agriku anage hu'naze, Kagra inankna avame'za tagrira huraverisanketa negeta ama nera mmerisa nere huta hugahune? <sup>19</sup> Hazageno Jisasi'a ana kemofo nona'a amanage hu'ne, **Ama ra mono nona tgana vazitma eri haviza hinkeno tagufa zagegna manite'na azeri oti'neno,** huno hige'za, <sup>20</sup> anante Jiu vahe'mo'za anage hu'naze, 46'a zagegafu eri fri'za ama mono nona ki'naze. Hagi Kagra inankna hunka tagufa zage knafina kigahane? <sup>21</sup> Hianagi ra mono nonku'ma kema hu'neana, Agra avufagu huntenu hu'ne. <sup>22</sup> Anagema hu'nere, fri'nefinti'ma otige'za, Agri amage nentaza disaipol naga'mo'za e'inahu zanku hu'ne hu'za zamagesa antahi'naze. Nentahi'za avon tafemo hu'nea kere ene, Jisasi'ma hu'nea nanekere zamagesa nentahi'za zamentinti hu'naze.

### *Jisasi'a maka vahe zamagu'a ke'nea naneke*

<sup>23</sup> Hagi kinafinti zamavare'nea kna antahimiza (Pasova) muse ne'zama ne'knare Jerusalemi mani'nege'za, hakaremo'za kaguvazama Agrama hi-azana nege'za ke'naze Agri agire zamentinti hu'naze. <sup>24</sup> Hu'nazanagi, Jisasi'a Agra kazigatira antahi ozami'ne. Na'ankure miko vahera Agra zamantahino zamage'ne. <sup>25</sup> Na'ankure, Agra antahiantahi zankura upara osu'neankino magomo'a hugesa osugahie. Na'ankure Agra vahe'mofo agu'afina na'a me'neo, ko antahino keno hu'ne.

## 3

### *Nikodimasi'a, Jisasi antahige'nea naneke*

<sup>1</sup> Hagi Farisi vahepinti mago nera agi'a Nikodimasi, Jiu vahe'mokizmi mono kanisol ne' mani'ne. <sup>2</sup> E'i ana ne'mo'a kenage hanimpi Jisasinte eno amanage huno antahige'ne. Rempni hurami ne'moka antahi'none, Kagrama hurami ne' Anumzamofontegati e'nane. Mago'mo'a Kagrama nehanaza huno amanahu avame zana osugahie, Anumzamo agrane mani'nesimo hugahie. <sup>3</sup> Higeno Jisasi'a kenona'a amanage huno asami'ne, **Tamagerafa hu'na ama kea negasamue.** **Runema kasefa osnimo'a, Anumzamofo kumapina uofregahie,** <sup>4</sup> Nikodimasi'a kenona'a huno, inankna huno ra vahe'mo'a ete osi mofavregna huno fore hugahie? Ete ra vahe'mo'a anta'amofo arimpafina ufrenkeno eteno kasentegahifi? <sup>5</sup> Higeno Jisasi'a ana kemofo nona'a amanage huno asmi'ne, **Tamagerafa hu'na kagrira negasamue.** **Aza'o tinteti'ene Avamuteti'ene kasefa osnimo'a, Anumzamofo kumapina uofregahie,** <sup>6</sup> **Mopafi vahe'mo'ma kasente'nesiana vhahere.** Hanki Ruotge Avamu'mo'ma eri fore hu'nesia zana avamure. <sup>7</sup> Amama kasamisua zankura Nagriku hie hunka kmanogura osunka, kagra etenka kasefa mofavre hampro, <sup>8</sup> Zahomo'a inantega vunaku hirega nevigenka

agasasa'a nentahine. Hagi inantegati eteno, inantega nevio antahinka kenka nosane. E'ina hu'za mika vahe'mo'za Avamupina kasefara nehaze. <sup>9</sup> Higeno Nikodimasi'a ana zanku, amanahu zamo'a inankna hugahie? huno higeno, <sup>10</sup> Jisasi'a ana kemofo nona'a amanage huno hu'ne, Israeli vahe'mokizmi rempi huzami ne' mani'enka, ama nanekea antahi amara nosano? <sup>11</sup> Tamagerfa hu'na negasamue. Kema nehunana, antahita keta hu'nona zanku huama nehunketa, ana nanekegura tamagra antahinoramize. <sup>12</sup> Mopafi zanku'ma neramasamisunketa tamagrama tamentintima osanuta inankna huta monafi zanku'ma tamasami'sunana tamentintia hugahaze? <sup>13</sup> Mago'mo'a monafinka mrerino ovu'n'e. Hagi Agra monafinkati'ma erami'neana, Vahe'mofo Mofavremo erami'n'e. <sup>14</sup> Mosesema hagine kokampi osifa'vema erintesga hu'nea kna hu'za, Vahe'mofo Mofavrea azeri antesga hugahaze.\*

<sup>15</sup> Hanigeno aza'o, Agripi amentinti hanimo'a, manivava asimu erigahie.

<sup>16</sup> Anumzamo tusiza huno mopafi vaheku avesi nezmanteno, magoke ante'nea Ne'mofavre'a zami'n'e. Agrite zamentinti hanamo'za fanane osu'za manivava zamasimu erigahaze. <sup>17</sup> Na'ankure Anumzamo Mofavre'a huntegeno ama mopafima e'neana, mopafi vahe refko hinogu huntegeno ome'n'e. Hagi Agripinkati vahe'mo'za zamagu'vazizana erisaze huno huntegeno erami'n'e. <sup>18</sup> Aza'o Agrite'ma amentintima himofona refko huno nanekea hunonte, iza'o Agrite'ma amentintima nosimofona, trate ko avrenteno keaga hunte'n'e. Na'ankure Anumzamofona magoke Mofavre'amofo agirera, agra amentinti osigu ana nehie. <sup>19</sup> Nanekema huzmante'siana, ama kemofo agafare huzmantegahie. Masamo'a ama mopafima efregeno'a, vahe'mo'za hani avu'ava'zanku avesinente'za masamofona avesi onte'naze. Na'ankure havi zamu'zamake'za hu'naze.

<sup>20</sup> Aza'o havizama nehia vahe'mo'a, tavi'mofona zamesra hunente'za, masarerar nomaze. Na'ankure haviza nehazazamo eama huzanku nomaze. <sup>21</sup> Hu'neanagi aza'o tamage avu'ava'ma nehimo'a tavitera egahie. Na'ankure hakaremo'za nege'za Anumzamofo avenesiaza nehie hu'za hugahaze.

### *Joni'a Jisasinku hu'nea naneke*

<sup>22</sup> Hagi ananteti Jisasi'a amagenentaza disaipol naga'an, Judia kaziga vu'za mago'a kna umani'n'za mono tina fre zamante'naze. <sup>23</sup> E'i ana knafi Joni'a, Salim kumamofo tava'onte Ainoni kumate mono tina frezmante'n'e. Na'ankure anantega rama'a tina me'nege'za vahe'mo'za ete'vute hu'za mono tina fre'naze. <sup>24</sup> Na'ankure Jonina kina huonte'naza knafine.

<sup>25</sup> Ana nehazage'za Jonima amage nentaza disaipol naga'an, mago Jiu ne'ene, Juda vahe'mokizmi avu'avapi ti fre'za avu sese nehaza zanku keaga hu'naze. <sup>26</sup> Nehu'za Joninte e'za amanage hu'za asmi'naze. Hurami (Rabbai) ne'moke, Jodani timofo kantu kaziga kagrane mani'neama, Agri agi hu'ama hu'nana ne'mo'a, mono ti frenezmanteg'e'za mika vahe'mo'za Agrite nevaze. <sup>27</sup> Hazageno Joni'a anage hu'ne, mago vahe'mo'a, Mago zana e'origahie, ana hugahianagi monafinkati mago'zama amisigeno'a amne erigahie. <sup>28</sup> Tamagratmi antahi'nage'na amanahu kea hu'noe, Nagra Kraisi'na omanni'noe hu'na hu'noe. Hianagi Agrira azeri henka atreno, nagrira pusante hunantege'na e'noe. <sup>29</sup> Mago vemo'ma a'ma erinaku nehigeno rone'amo oti'neno antahi nemino, aravema huku hia vahe'mofo ageru

\* <sup>3:14</sup> Nam-Ham 21:9

nentahino muse nehie. E'ina higu nagrira muse zamo'a avite'ne. <sup>30</sup> Agri agimo marerisigeno nagri nagimo uramisie.

<sup>31</sup> Agra anagamiti e'nemo'a maka'zana agatere'ne, aza'o ama mopafinti'ma e'nesimo'a, ama mopafi vahekino, ama mopafi zankuke kea hugahie. Agra aza'o monafinkati'ma e'nemo'a, Agra maka'zamofona zamagtere'ne. <sup>32</sup> Agrama antahino keno hu'nea zante Agra naneke'a huama nehie, hianagi mago'mo'e huno agi agenke'a antahi anira osu'ne. <sup>33</sup> Iza'o, Agri agi agenke'a erimo'a, tamage huno Anumzamofo nanekegura nehie. <sup>34</sup> Na'ankure Agrira Anumzamo huntege'no e'neankino, Anumzamofo keaga nehie. Na'ankure Agra refko osuga'are Avamura aviteno ami'ne. <sup>35</sup> Nef'a, Nemofona avesinteno mika'zana kva hugahie huno, Agri azampi ante'ne. <sup>36</sup> Aza'o Nemofonte amentintima hanimo'a manivava asimura erigahie. Hagi izo'o Nemofo kema rutagresimo'a manivava asimura e'origahie. Hanki Anumzamofo tusi'a rimpahé knazamo agrite megahie.

## 4

### *Jisasi'a Sameria a'ene kegaga hu'nea naneke*

<sup>1</sup> Hagi Jisasi'a antahiamma Farisi vahe'mo'za hu'za Jisasi'a, Jonina agatereno rama'a amage antesaza disaipol nagara zamazeritru huno, mono tina frenezmante hu'za nehazanke antahi'ne. <sup>2</sup> (Anage hazanagi Jisasi'a Agra'a mono tina freozmante'ne. Hagi Agri'ma amage nentaza disaipol naga'mo'za mono tina fre zamante'naze.) <sup>3</sup> Judia kaziga atreno Agra mago'ene Galili vu'ne. <sup>4</sup> Galilima vunakura Sameria mopa kazigati nevaza kantega rugitagino vu'ne. <sup>5</sup> Anante Sameria mopa kaziga nevuno, ana mopafi mago kuma agi'a Sika nehazare uhanati'ne. Korapara Jekopu'a ana mopa tva'oma'are me'nea mopa, Josefena ami'neane. <sup>6</sup> Ana kuma tva'onte Jekopuna tinker'i'a me'ne. Hagi Jisasi'a kama e'nea zamo avesra higeno ana tinkerire umanisa hu'ne. Feru avame zageha higeno anante umani'ne.

<sup>7</sup> Anante mago Sameria a'mo ti afinaku ana tinkerire egeno, Jisasi'a ana a'mofonku huno, **Tina afi namio** huno hu'ne. <sup>8</sup> Na'ankure Agri amage nentaza disaipol nagara rankumategati ne'za mizasenaku zamagra vu'nazageno mani'neno anagea hu'ne. <sup>9</sup> Anage higeno ana Sameria a'mo Jisasisuku huno, Kagra Jiu ne' mani'nananki nahigenka Sameria a' mon-agura, tina afi namio hunka nantahi'negane? (Na'ankure Jiu vahe'mo'za Sameria vahe'enena tragote'za nomanize.) <sup>10</sup> Jisasi'a ana ke nona'a anage huno asami'ne, **Anumzamo negamia musezama antahi'enekasina, izo'o kantahigeno kagriku'ma, tina afi namige'na na'neno nehia ne'ma kagra antahigakeno, Agra asimu eri tina kamisine.** <sup>11</sup> Ana a'mo Agriku huno, Ra ne'moke Kagra tima afisana tafena e'ori'nankeno tinkerimo'a zaza huno urami'ne. Hagi Kagra igati ana asimu eri tina afigahane? <sup>12</sup> Jekopu neragehona Kagra agterenka onaga'a mani'nampi? Na'ankure agra ama tinkeria tamime, agra ana tinkerifinti nenege'za, mofavre naga'amozone afu'zaga'amoza ne'naza tine. <sup>13</sup> Higeno Jisasi'a ana a'mofo ke nona'a huno asmi'ne, **Maka'mo'za ama tima nesanuza ete ru'ene tinkura zamesigahie.** <sup>14</sup> **Hianagi izano Nagrama amisua tima nesuno'a, mago'ene tinkura ave'osigahie. Hianagi Nagrama aminaku nehua timo'a, kampu'i timo'hiaza huno agu'afi me'neno, evava nehuno manivava asimu amigahie.** <sup>15</sup> Higeno ana a'mo Agriku amanage hu'ne, Ra nemoka, ana tina namigeno, nagrira tinkura nave'osisige'na tima afi'zantera oma'neno, huno hu'ne. <sup>16</sup> Agra ana akura huno, **Vunka, negavena ome ke hunka avrenka amare eno.** <sup>17</sup> Higeno

ana a'mo kenona'a huno asmi'ne, Nagra ve onte'noe higeno, Jisasi'a ana ara anage huno asmi'ne, **Kagra vema onte'noe hunkama nehanana tamage hunka nehane,** <sup>18</sup> na'ankure kagra kotenka 5fu'a ve eri'nane, hagi menima kagrane mani'nea **vea negave'a omani'ne.** E'igu kagra tamage hunka nenasmine. <sup>19</sup> Higeno ana a'mo Agrira asmino, Ra nemoke, nagrama negagoana Kagra mago kasnampa ne' mani'nane. <sup>20</sup> Tagrira tafafe'za ama agonafi monora hunte'naze. Jiu vahe'motma Jerusalemi kumateke monora huntegahaze hutma tamagra nehaze. <sup>21</sup> Higeno Jisasi'a amanage huno ana ara asami'ne, **Ama a'moka, kema hanua kerera kamentinti huo, mago kna ne-eankino efore'mahina, ama agonafino, Jerusalemi kumatero tamagra Nerfantera monora huontegahaze.** <sup>22</sup> Tamagra ontahi'naza zante monora nehaze, tagra antahi'nona zante monora nehune. Na'ankure vahe'ma zamagu'vazizana Jiu vahe'motafi me'ne. <sup>23</sup> Hianagi mago kna ne-ea knamo'a hago menina ama fore hu'ne. Nenfama tamage mono huntaku hanamo'za, avamupi tamage avu'avateti monora huntegahaze. E'inahu hu'za mono'ma huntesaza vaheku Nenfa'a nehakre. <sup>24</sup> Na'ankure **Anumzana Agra Avamure, hu'negu mono'ma huntaku hanamo'za, zamagra zamagu'areti avamuzmifi tamage monora huntegahaze.** <sup>25</sup> Higeno ana a'mo Agrira amanage huno asmi'ne, Nagra antahi'noe M esaia'a (tazahu ne') egahie, (Kraisi'e hu'zama agima ante'naza nera), \* ana ne'ma esnuno'a, maka'zana tasmi ama harigeta antahi'gahune. <sup>26</sup> Jisasi'a ana ara asmino, **Ama nanekema nehua ne'mona ana ne'Mesaia'ne.**

<sup>27</sup> Anage nehakeno Jisasima amage'ma nentaza disaipol nagara anante enehanatiza ana a'ene naneke nehige'za nege'za antri nehu'za hakare antahintahi hu'nazanagi, nazanku nehakre huge, nazanku a'ene kegaga nehie? Hunora mago'mo'a antahi onke'ne. <sup>28</sup> Anante ana a'mo tinkavo'a netreno, rankumatega viazamo vene'ne zaga ome zamasmino, <sup>29</sup> Eta eme keho, maka'zama hu'hoa zanku'ma huama huno nasmi'nea nera, Kraisi'ema hu'naza ne' e'negahie? <sup>30</sup> Ome zamasmige'za, rankumara atre'za zamagra atirami'za Agritega e'naze.

<sup>31</sup> Vahe'ma zamarenaku vu'nege'za amage nentaza disaipol naga'mo'za Jisasina tutu hunte'za, hurami ne'moka (Rabbai), ne'zana no hu'naze. <sup>32</sup> Hianagi Jisasi'a zamasmi'no, **Nagrama nesua ne'zama me'neana tamagra onke'naze,** huno zamasmi'ne. <sup>33</sup> Anage hige'za amagema nentaza disaipol naga'mo'za, ke ohumi ahumi nehu'za, zamagra hu'za mago'mo ne'zana eme amigeno ne'neno Agra nehifi? <sup>34</sup> Jisasi'a amanage huno zamagrira zamasmi'ne, **Nagri ne'zana aza'o hunanteg'e na e'nofo avesite eri'zama'a eri vagaresanugu hunanteg'e na e'noe.** <sup>35</sup> 4'a ika maniteta tamagra hozama hamare kna me'nne huta nosafi? Nagra neramasmuanki keho, kesga hutma hozafina tmua keho, ne'zamo afureno ta'nefa ruherafino hoza hamare kna kofta nehie. <sup>36</sup> Ana ne'zama hamare'namo'za hago mizazamia knare hu'za eri'naze. Hagi ana raga'ama hamare'nazana manivava mani'zante vhahera zamare'za vu'naze, ana nehina aza'o hozama nehankremo'ene, hozama nehamremokea, zanagu'a musena magoka hugaha'e. <sup>37</sup> Na'ankure ama ana nanekea tamage ke me'ne. Mago'mo hoza hankretegeno, rumo hoza nehamare hu'za nehaze. <sup>38</sup> Tamagra zamaza hutma avimzana ose'naza hozafi Nagra huneramantoe, rumo'za amuho hu'za eri'za hankre'naza hozafi, tamagra ne'za hamare'sagu huneramantoe.

\* <sup>4:25</sup> Hibru kefina M esaia'a hu'neana tazahu nere, Griki kefina Kraisi'e hu'neana tazahu nere, English kefina Savior hu'neana tazahu nere hu'ne.

<sup>39</sup> Sameria rankumateti hakare vahe'mo'za Agrite zamentinti hu'naze. Na'ankure ana a'mo'ma huno maka'zama nagra ko'ma hu'noa zana, Agra huama hunante'nne. <sup>40</sup> E'nage hige'za, Sameria vahe'mo'za Jisasinte e'za, tagrane manigahane hu'za hanaveti'za antahigageno, Agra tare zategna zamagrane mani'ne. <sup>41</sup> Hagi Jisasi'ma zamasmia ke nentahi'za, hakare'a ontahi'naza vahe'mo'zane zamentinti hu'naze. <sup>42</sup> Zamagra ana ara amanage hu'za asmi'naze, kagrama hana kegukera tamentinti nosune, hagi tagra tagesafinti antahita tamentinti nehune. Agra tamage maka kokankoka vahe'mota tazahu nere.

<sup>43</sup> Tare zage knama maniteno, Jisasi'a ana kumara atreno Galili vu'nne. <sup>44</sup> Na'ankure Jisasi'a Agra'a huama huno, Kasnampa (profet) vahe agi'a mopa agafa'arera erisaga osugahaze huno hu'nne. <sup>45</sup> Hagi anante Galilima ehanatige'za, kinafinti zamare'nea knagu nentahiza muse ne'za kreza nenaza knarera (pasova) Jerusalemi vu'nne'za ke'naza vahe'mo'za musena hunte'naze.

### *Kamani ne'mofo mofavre krifinti azeri knamre'nea naneke*

<sup>46</sup> Ana hazageno Kana Galili kaziga, tinteti waini'ma trohu'nea kumate eteno e'ne. Anante mago kamani eri'za ne'mofo mofavre'mo Kapenium kumate kri erino mase'ne. <sup>47</sup> Jisasi'a Judia atreno Galili kaziga ehanatia kema nentahino'a, kri eri'nea mofavre'mofo nef'a Agrite viazamo asuragi kefinti, Enka mofavre ni'a eme azeri so'e huo huno nemofo'a fri'kante mase'negeno antahige'ne. <sup>48</sup> Anage higeno Jisasi'a asmino, **Avame'zane kaguvaza hanuazana ketetage'za, tamagra tamentintia hugahazo!** <sup>49</sup> Ana kamani eri'za ne'mo'a Jisasinkura huno, Ramoke mofavreni'a frisanigi ko eramio. <sup>50</sup> Higeno Jisasi'a ana nera asmino, **Nonkarega vuo, negamofo'a ofrino amne mani'ne.** Ana ne'mo tamage Jisasi'a nehie huno amentinti nehuno atreno ete noma'rega vu'nne. <sup>51</sup> Atreno kantega uneramige'za, kazokzo eri'za vahe'amo'za eme asami'za, negamofona kri'a atrentegeno mani'ne hu'za eme asmi'naze. <sup>52</sup> Anagema hu'za asmizageno kri'ama atrente'nea knagu zamantahigege'za zamagra asami'za, Okina wan kiloki higeno avufa teve ha'zamo'a atrente'ne. <sup>53</sup> Anagema nehazageno nef'a a agesa antahi'ne, Jisasi'a ana knareku huno, **Negamofo'a ofri amne mani'ne** huno hu'nne, nehuno agrane noma'afi nemaniza naga'ane, maka'moza zamentinti hu'naze. <sup>54</sup> Jisasi'ma Judia kazigama atreno Galilima emanineno'a, ama'i nampa 2 avame'za eri fore hu'nne.

## 5

### *Mani fruhu kna zupa (Sabat) Betsaida tirute Jisasi'a mago ne'ma azeri so'e hu'nea naneke*

<sup>1</sup> Ana maka'zama higeno agateretegeno, Jiu vahe'mo'za mono nehaza kna fore higeno, Jisasi'a Jerusalemi kumate mareri'ne.

<sup>2</sup> Jerusalemi kuma'mofo kaha hagente'za, Sipisipi Kafane hu'naza tavaonte mago tiru me'nege'za, Hibru kefina Betsaida\* hu'za nehaze. Anantero 5fu'a hanko no kinte'naze. <sup>3-4</sup> Ana hanko nontera hakare'a kri vhahera mase'za mani'naze, zamusuhu vahe'ene zamagia krere hu'nea vahe'ene zamaga zamaza sti'nea vahe'ene mani'naze. <sup>†</sup> <sup>5</sup> Mago nera 38'a

---

\* <sup>5:2</sup> tare kampi kre'ne, magora, Bezaida, magora Betsaida      † <sup>5:3-4</sup> Mago'a antahi'zane vahe'mo'za antahi'zana, Anumzamo ankeru huntogeno ana tiru'ma ome eri kaza nehnigeno ana tirupi ese'ma tmi'nea vahe'mofo kri'amo vagaretere hu'ne.

kafufi kri eri'nea ne', ana tirutera mani'ne. <sup>6</sup> Anante maseno mani'negeno Jisasi'a negeno, za'za kna ana krifina mase'ne huno antahi'ne. Jisasi'a anage huno asami'ne, **Kagesama antahinana krika'a knare hugantesie hunka nentahino?** <sup>7</sup> Ana kri ne'mo kenona'a asmino, Ra vahe'moka timoma kazama nehanigeno navareno ome nantesia vahera omani'nege'na, ana'ana hu'na nevuge'za rumo'za tirupina nagtere'za unermize. <sup>8</sup> Jisasi'a nentahino ana neku huno, **Otinka, tafeka'a renamginka e'nerinka vuo.** <sup>9</sup> Hantaka huno kri'amo atrentegeno, tafe'a erirenamgino e'nerino otino agafa huno kana vu'ne.

Ana kna mani fruhu kna (Sabat) zupa ana kaguvazana hu'ne. <sup>10</sup> Ana hige'za Jiu kva vahe'mo'za kri'ama eri amne huntea ne' antahige'naze, menina mani fruhu (Sabat) kna meno nagru hu'neankinka, naverisaka'a erinka vano osugahane. <sup>11</sup> Hianagi ana ne'mo'a huno, Kri'nima eri amne hu'nea ne'mo'a nasamino, tafeka'a erinka vuo huno hunante'ne. <sup>12</sup> Zamagra anage hu'za agrira antahige'naze, Iza ana nera huganteno, tafeka'a erinka vuo huno hugante'ne? <sup>13</sup> Hianagi azeri so'ema hunte'nea ne'mo'a, izu anara hu'neo antahino keno osu'ne, na'ankure Jisasi'a maka vahepi ruhavia huno vu'ne. <sup>14</sup> Henka Jisasi'a ana nera ra mono nompi ome kefore huno asmi'ne, Ko, **krika'a hago vagare, mago'enе kumira osuo, e'inama hanunka tusi'a knaza henka'a erigahane.** <sup>15</sup> Ana ne'mo'a atreno viazamo, Jiu vahera ome zamasmino, Jisasi kri'ni'a eri amane hunante'ne huno zamasmi'ne.

### *Jisasi'a Anumzane mago tragave hu'noe hu'nea nanake*

<sup>16</sup> E'inage hige'za, Jiu kva vahe'mo'za agafa hu'za Jisasina azeri haviza hu'naze, na'ankure ana zantamina mago'a mani fruhu kna (Sabat) zupa hu'nea zante ana hu'naze. <sup>17</sup> Hianagi Agra zamasmino, **Nenfa'a meninena eri'zana otreno e'neriankina, Nagra'nena eri'zana enerue.** <sup>18</sup> E'i ana agafare, Jiu kva vahe'mo'za Agri ahenaku maraguza'ati'za maka kanku hakre'naze. Na'ankure Agra mani fruhu kasege hantagia zantekukera ana osu'naze. Hagi agra Anumzanku Nenfa'ema hiazamo, agrira azeri Anumzane mago tragave hia zante'ene ahenaku hu'naze.

<sup>19</sup> E'inage hazageno Jisasi kenona zamirera amanage huno zamasmi'ne, **Nagra tamagerafa hu'na neramasamue, Nemofo'a Agra'a avesitera mago'zana hugara osu'neankino, ke'nesigeno Nef'a ma huveri'nesia zanke, Nemofo'a ana zanke hugahie.** <sup>20</sup> Na'ankure Nenfa'a, Nemofo a avesinenteno, Agra maka'zama nehia zana averi nehie. Ana nehuno Nef'a agatereno tusi'aza averi hugahie. Anama hanigeta tamagra antri hugahaze. <sup>21</sup> Na'ankure Nef'a fri' vahe'ma zamazeri otino, asimu nezmia kna huno, Nemofo'a azano, Agri'ma avesi'nimofona asimura amigahie. <sup>22</sup> Na'ankure Nenfa'a Agra veara refko osugahie. Hagi maka vahe'ma refko hu'zana, Nemofo ami'ne. <sup>23</sup> Ana hina maka'mo'za nef'a agima eri sga nehzankna huza Nemofo agi'a erisaga hugahaze. Aza'o Nemofo agima erisaga osanimo'a, huntegeno'ma e'nea Nefana, anazanke huno agi'a erisaga nosie. <sup>24</sup> Nagra tamage hu'na neramasamue, aza'o Nagri nanekema nentahino hunanteg'e na e'nomofonte amentinti nehimo'a manivava asimu eri'neankino, vahe'ma refko hania knafina, fri'zana agatereno ko asimu erino mani'ne.

<sup>25</sup> Nagra tamage hu'na neramasamue, knamo'a kofta huno ne-eno hago menina ama efore hu'ne, fri'naza vahe'mo'za Anumzamofo Ne'mofavremofo ageru nentahi'za, ana ageru'ma antahisnamo'za manigahaze.

26 Na'ankure Nef'a asimu erino mani'zamofo agafa'a Agripi me'ne. Nemofona anahu kna huno asimu erino mani'zamofo agafa'a Agri ami'ne. 27 Ana nehuno Agra Nemofona kema hugnare hunte hanavea (atoriti) ami'neankino, vahe'ma refko hu'zana Agri ami'ne, na'ankure Agra Vahe'mofo Mofavre. 28 Ama kegura antria osiho, na'ankure mago knama fore'ma hina kerifi asezamante'naza vahe'mo'za Anumzamofo Mofavre'agerura antahi'za, 29 oti'za esnageno knare avu'ava hu'nesaza naga'mo'za, oti'za kasefa mani'za erigahaze. Hagi kefo avu'avazampi mani'ne'za fri'ne hanamokizmia, refako huno naneke huzmantegahie. 30 Nagra navesitera mago'zana osugahue. Anumzamofo ke nentahi'na anante zaganena refko nehue. Ana kema refko'ma huana mago kante ante'na refko nehue. Na'ankure Nagra navesi'zantera kenontoe, hagi Agrama hunantege'na e'nomofo avesite refkoa nehue.

*Jisasi avu'ava zamofo huama hu'nea naneke*

31 Hagi Nagrama, tamage nehue hu'na Nagrani'agu huama hanuana, Nagra havige hugahue. 32 Hianagi Nagri nagenkema rumo huama (testimoni) nehige'na, Agrama Nagriku huama hianke nentahi'na, tamage nehie hu'na nehue. 33 Tamagra Joninte vahe huzmantage'za ome antahi'nazana, Joni'a tamage nanekege huzmasmi'ne. 34 Hu'neanagi Nagrama hua kema azeri haveti kea mopafi vahe'mo'za antemiza hugahaze hu'na antahi nozamue. Hianagi Nagrama nehuana tamagri'ma tamaza huno tamagu vasinigu nehue. 35 Joni'a lampe tavi kna huno tavi'nereno remsa hurmantegeta, ana tavikura osasi'a knafi tamagu'a musena hu'naze. 36 Hianagi Nagrama hanuua navu'navamo'a, Joni'ma hu'nea avu'ava zana agatere'ne. Na'ankure Nenfa'ma nami'nea eri'za Nagra eri vagaresanugu e'neruankino, ana eri'zama e'nerua eri'zamo, Nagrira veamokzimi zamavurera eriama huno Nafa'nimo hunantege'na e'noe huno nehie. Na'ankure Nafa'nimo hunantege'na e'noe. 37 Nenfa'ma hunantege'na Nagrama e'noana, Nagriku huama Agra hu'ne. Hianagi tamagra mago'a knarera Agri agerura ontahitma, avugosa onke'naze. 38 Agri nanekemo'a tamagri tamagu'afina omne'ne, na'ankure Agrama hunantege'na Nagrama e'nogura, tamagra tamentintia Agritera nosaze. 39 Tamagra Anumzamofo avontafepi ne-hakraze, na'ankure tamagra mani'vava mani'zana hago eri'none hutma nentahize. Hianagi e'i ana avontafemo'a Nagriku huama nehie. 40 Hianagi Nagrite'ma e'netma tamasimu eri'zankura tamagrira tamavesra nehie.

41 Nagrira vahe'mo'za nagi erisaga (glori) hihogura nosue. 42 Hianagi Nagra tamagrira tamage'na antahi'na hu'noe, Anumzamofo avesite'zana tamagri tamagu'afina omne'ne. 43 Nagra Nenfa agifi e'nogeta tamagra nonavraze, hagi mago'mo agra agire'ma esanimofona ame huta avregahaze. 44 Tamagra inankna huta tamentintia hugahaze, tamagri'ma ru vahe'mo'za tamagina erisaga nehzana, magoke Anumzamo tamagri'ma muse huramante'sia zankura ohakre'gahazo? 45 Nefante naneke hurantegahie hutma Nagrikura tamagesa ontahijo, kema hurmantesia nera Moses'e, Mosesente tamentintina huta taza hugahie huta hu'naze. 46 Hianagi tamagrama tamage hutma Mosesente'ma tamentinti hunetasina, Nagrite ene tamentinti hazasine, na'ankure agrama kre'neana, Nagriku huno kre'ne. 47 Hianagi Mosesema kre'nea nanekema tamentinti osanutma, inankna huta tamagra Nagri nanekegura tamentintia hugahaze?

## 6

*Jisasima 5 tauseni'a vea ne'za zami'nea naneke  
(Mat 14:13-21; Mak 6:30-44; Luk 9:10-17)*

<sup>1</sup> Hagi anazama vagaregeno'a, anantetira Jisasi'a zamatreno Galili tirumofo mago kaziga vu'ne, mago agi'a Taiberias tirure hu'za nehaze. <sup>2</sup> Tusi'a vahe krerfamo'za Agrira avariri'za vu'naze, na'ankure krima vase'naza vahe'ma kaguvazama huno zamazeri so'e hige'za ke'nagu avariri'za vu'naze. <sup>3</sup> Anante Jisasi'a agonarega mrerino amage nentaza disaipol naga'ane Agrane anante umani'naze. <sup>4</sup> Hagi Jiu vahe kinafinti zamar'nea kna (Pasova) muse hu'za ne'za ne kna'zmi atupa hu'ne. <sup>5</sup> Anante Jisasi'a, keganti kegma huno keama hakare vahe krerfa Agritega neageno Filipina asmino, **Inantegati bretia miza hanunke'za ama vahe'mo'za negahaze?** <sup>6</sup> Hagi ama kema Jisasi'ma hiana Filipina reheno ke'ne, na'ankure Agra inankna zano hani'ana antahi'neno, reheno antahige'ne. <sup>7</sup> Filipi'a ke nona'a amanage huno asmi'ne, 2 hantreti'a silva zagoreti \* mizama hania bretimo'a, mago'mago'mo'ma osi'a neterema haniana ama vea krerfafina knarera huozmantegahie. <sup>8</sup> Anante Agri amagema nentea disaipol ne' Endru, Saimon Pitta negna amanage huno Jisasina asmi'ne, <sup>9</sup> Amafi mago osi mofavre emani'neno 5fu'a bali bretigi, tare nozamegi huno eri'neanagi, asi'amo'a inankna huno ama veapina knareru hugahie? <sup>10</sup> Jisasi'a amanage huno hu'ne, **Zamasaminke'za mopafi maniho.** Anampina trazamo hu'nefi 5 tauseni'a vahe'naza mopafi mani'nage'za, vene'ne age hampri'naze. <sup>11</sup> Hagi Jisasi'a breti erino Anumzamofonte nunamu hunteten, erigorino mani'nare refko huno nezmino, anazanke huno nozamea zamige'za nenazageno zamu hu'ne. <sup>12</sup> Nazageno zamu'ma higeno'a, Agri'ma amage' nentaza disaipol naga'a zamasmino, **Atraza ne'zama'a eri atru hiho, e'inahinkeno amne zankna osnie.** <sup>13</sup> Anage hige'za eri atru hazageno, 5fu'a bali bretima kori'za neneza atraza atupa atupa'a, 12fu'a eka'eka kupi eriri'naze. <sup>14</sup> E'ina hige'za veamo'za ana kaguvazama Agrama hiaza nege'za, zamagra anage hu'naze. Ama'i tamage huno Kasnampa nere, ama mopafima henka'a egahie hu'za hu'naza ne' mani'ne. (Diu-Kas 18:15.)

*Jisasima ti agofetu vu'nea naneke  
(Mat 14:22-33; Mak 6:45-52)*

<sup>15</sup> Hagi ana vahe'mo'za zamagraregati eme azeriza kini kvazmi manisie hu'za azeri otiku hazageno, Jisasi'a antahino keno nehuno, anantetira zamatreno agonarega Agraku mareri'ne.

<sup>16</sup> Kinaga sege'za, Agri amage' nentaza disaipol naga'mo'za ana kumara atre'za hagerintega urami'naze. <sup>17</sup> Anante votifi marerite'za, hagerina takahē'za Kapenium vu'naze. Hago haninkigeno Jisasi'a zamagrama mani'narega uohanati'ne. <sup>18</sup> Hagi hagerimo'a tusiza huno kranto kranto hu'ne, na'ankure tusi'a zaho'mo atufeno egeno anara hu'ne. <sup>19</sup> Ana ne-hige'za kuta azotareti tina vakakiza 5fu'o, 6si'a kilo mita naza nevu'za zamagra kazana Jisasi'a hagerimofo agofetu ne-eno votimofo tavaonte era'a'o hige'za nege'za, zamagra tusi zamanogu hu'naze. <sup>20</sup> Hianagi Jisasi'a anage huno zamasmi'ne, **Ama Nagragi, korera osiho.** <sup>21</sup> Anante zamagra muse nehu'za, Agrira votifi avrentazageno, vunaku zamagesa antahi'naza mopalare ana votimo'a ame huno uhanati'ne.

\* <sup>6:7</sup> eiti'a ikamofo mizane

*Jisasima asimu eri bretigu huzmasmi'nea naneke*

<sup>22</sup> Hagi mase'za ko'atige'za, ana hagerimofo ankenare mani'naza va-hetmimo'za kazana magore huno votiramimpintira omne'neanki magoke me'ne. Anampina Agri amage nentaza disaipol naga'enena Jisasi'a mare-orige'za ke'naze. Hianagi Agri'ma amage<sup>†</sup> nentaza naga'mo'za zamagraku vu'naze. <sup>23</sup> Hianagi mago'a ne'one vente rami Taberias kumateti e'za, Jisasi'a susu huteno breti zamige'za ne'naza mopa tava'onte eh-nati'naze. <sup>24</sup> Ehanati'za kazama Jisasi'e, Agri'ma amagenentaza disaipol naga'anema omani'nage'za nege'za, zamagra osasi venteramimpi mareri'za, Jisasinku hakre'za Kapaneamu vu'naze.

<sup>25</sup> Hagi ome hakre'za hagerimofo kantu kaziga Jisasima azeri fore nehu'za, amanage hu'za Agrira antahige'naze, Hurami ne'moka (Rabbai) Kagra nazupa amarera e'nane? <sup>26</sup> Jisasi'a kenonazmia anage huno zamasmi'ne, Tamage hu'na Nagra neramasmue, tamagra Nagriku ne-hakra'zana, kaguvazma hua zantekura nohakraze. Hagi tamagra bretima nazageno tru'ma hia zanteku nehakraze. <sup>27</sup> Fanane hania ne'zantera eri'zana e'oriho. Hagi fanane osu manevava hanaza ne'zanku nentahita eri'zana eriho, e'i ana ne'zana Vahe'mofo Mofavremo tamigahie. Na'ankure Nefa, Anumzamo azanko avoma'a retro huno Agri hugnare hunte'ne.

<sup>28</sup> Higeno anankere zamagra anage hu'za Jisasina asmi'naze, Tagra naza huteta, Anumzamo'ma hania eri'zana erigahune? <sup>29</sup> Jisasi'a kenona'huno zamasmi'ne, Anumzamofona amanahu eri'za erihogu avenesie, Agri'ma huntegeno e'nemofonte tamentinti hiho. <sup>30</sup> Anankere zamagra Agri asmi'naze, Kagra na'a avame'zana nehnanketa negeta, tamage huta Kagrit-era tamentinti a hugahune? Kagra nankna'za hugahane? <sup>31</sup> Tagri tfahe'za ka'ma mopafi mana ne'za ne'naze, hu'za krente'naze, **Agra monafinti breti neho huno zami'ne.** (Eks-Ati 16:4-36) <sup>32</sup> Anante Jisasi'a zamagrira zamasmi'ne, Nagra tamagerfa hu'na neramasmue, Moses'a monafinti bretia agra ontami'ne, hagi menina tamage bretia Nagri Nenfa monafinti neramie. <sup>33</sup> Na'ankure Anumzamofo bretia e'i ama monafinti erami'neankino, miko mopafi vahera zamasimu zamigahie. <sup>34</sup> Zamagra anante Jisasina asmi'naze, Ramoke, e'i ana bretia maka'zupa tmivava huo.

<sup>35</sup> Jisasi anage huno zamasmi'ne, Nagra asimu eri bretia mani'noe, aza'o Nagrite esanimo'a aga'zankura osugahie. Hagi aza'o Nagriku amentinti hanimofona tinkura mago'ene ave'ositfa hugahie.

<sup>36</sup> Hianagi Nagra neramasmue, tamagra ko Nagrira nage'nazanagi, tamagra tamentintia nosaze. <sup>37</sup> Maka vahe'ma Nenfa'ma, Nagri'ma nemia vahe'mo'za Nagrite egahaze, hanige'na Nagrite'ma esimofona Nagra vuo hu'na retufe otregahue. <sup>38</sup> Na'ankure Nagra monafinti erami'noe, Nagra navesi'za hunaku ome'noe, hagi hunantege'na e'nomofa avesite erinaku e'noe. <sup>39</sup> Anumzamo hunantege'na Nagra e'nomofa avesira anahu hu'ne! Nagri'ma maka vahe'ma nami'nefintira mago'moe huno fanane osugahie, hagina vagare knarerera zamazeri otigahue. <sup>40</sup> Na'ankure Nenfa avesi'zana amanahu hu'ne, maka'mo'za Nemofo nege'za Agrite zamentinti hunte-samo'za manivava zamasimu erisage'na, vagamaresia knarerera Nagrani'a zamazeri otigahue.

<sup>41</sup> E'igu Jiu vahe'mo'za Agrikura ke hakare hu'naze, na'ankure Agrama huno, **Nagra ana breti monafinti erami'noe** hiazante zamarimpa haviza ne-hige'za ke hakare hu'naze. <sup>42</sup> Zamagra anage hu'naze, ama Jisasi'ma, Josefe nemofo, nefane nereranema zanageta antahita hu'nona nepi? Nankna

huno menia monafinti Nagra e'noe huno nehie? <sup>43</sup> Hazageno Jisasi'a ana kemofo nona'a, amanage huno zamasmi'ne, Tamagra ke hakare os-  
iho. <sup>44</sup> Mago'mo'a Nagritera omegahie, Nenfa'ma hunantege'na e'nomo  
agu'a avazu hanigeno Nagrite esige'na, vagare kna zupa azeri otigahue.  
<sup>45</sup> Kasnampa vahe'mo'za amanage hu'za Avontafepina kre'naze, *Ana hanigeno Anumzamo maka'mokizmia huzmasmigahie.* (Ais 54:13)  
Maka'mo'za Nenfa ke nentahi'za rempi hanamo'za Nagrite egahahie <sup>46</sup> Mago  
mo'e huno Nefana onke'ne, Anumzane mani'neno e'nemo Agrake Nefana  
ke'ne. <sup>47</sup> Tamage hu'na Nagra neramasmue, aza'o amentinti hanimo mani-  
vava asimura erigahie. <sup>48</sup> Nagra'ni'a manivava hu'mofo bretia mani'noe.  
<sup>49</sup> Tmagehe'za ka'ma mopafi mana nete'za zamagra fri'naze. <sup>50</sup> Ama'ina  
bretia monafinti ermi'neankino, mago'mo'ma nesuno'a ofri manigahie.  
<sup>51</sup> Nagra kasefa mani'zamofo breti monafinti eramino'e, mago'mo ama ana  
bretima nesuno'a, agra manivava hugahie, E'i ana bretia Nagri navufa  
me'ne, ana navufamo maka mopafi vahe manivava asimu zamigahie.

<sup>52</sup> Anage nehige'za anante Jiu vahe'mo'za nentahi'za, zamagra ke  
hugantigma hu'za anage hu'naze, Inankna huno ama ne' mo'a Agra  
avufa tamisigeta nenaku hunkeno nehie? <sup>53</sup> Ananku Jisasi'a anage huno  
zamasmi'ne, Tamagerfa hu'na neramasgue, Vahe'mofo Mofavre'mofo  
avufane, korane onesutma tamasimu eritma mani'zana tamagripina  
omnegahie. <sup>54</sup> Mago'mo, Nagri navufa nenen, Nagri kora nesimo'a  
manivava asimu erisanige'na, Nagra vagare knazupa azeri otigahue.  
<sup>55</sup> Na'ankure Nagri navufgamo'a tamage ne'za megeno, Nagri koromo'a  
tamage ti me'ne. <sup>56</sup> Mago'mo Nagri navufa nenen, Nagri koroma nenen  
agra Nagripi manige'na, Nagra agripi nemanue. <sup>57</sup> Mani'nea Nenfa, Nagrira  
hunante'ne, na'ankure Nenfa'ma mani'nego Nagra mani'noankino, aza'o  
Nagri'ma nesimo'a, Nagra mani'nogu agra manigahie. <sup>58</sup> Ama'i monafinti  
erami'nea breti me'ne. Tamagehe'za ka'ma mopafi nete'za fri'naza ne'zana  
omane'ne, aza'o mago'mo'ma ama bretima nesimo'a manivava hugahie.  
<sup>59</sup> Hagi ama naneke zaga Kapaneamu Jiu vahe osi mono nompi (sinagog)  
mani'neno Agra'a rempi huzami'nea naneke.

### *Mago'a Jisasi amage nentaza naga'mo'za atre'za vu'naza naneke*

<sup>60</sup> Anazanku hu'za hakare'a Jisasi amage nentaza disaipol naga'mo'za,  
Ama ana nanekema nentahi'za, ama kna'nentake naneke nehianki, iza  
agesa anteno antahigahie? hu'za hu'naze. <sup>61</sup> Hianagi Jisasi'ma hiankere  
amage'ma nentaza disaipol naga'mo'za ke hakare nehzageno nezmageno,  
Jisasi amanage huno zamantahighe'ne, Amama hua nanekegu tamarimpaa  
kna nehazo? <sup>62</sup> Vahe'mofo Mofavremo'ma negesageno ko'ma mani'nerega  
ete marerisigetma na'a hugahie? <sup>63</sup> Avamu'mo asimura neramie,  
tavufgamo'a mago'zana eri fore nosie. Nagrama tamagrime neramasgue  
kemo'a, avamu ene kasefa mani'zane me'ne. <sup>64</sup> Hianagi mago'amota  
tamentintia nosaze. Na'ankure ese agafareti Jisasi'a zamentinti os-  
naza vahera, nezmageno iza'o komoru hanige'za Agri'ma ahe simofona  
agu'a ko ke'ne. <sup>65</sup> Anante Agra anange hu'ne, Ama'na agafare Nagra  
tamagrira tamasmi'noe, mago'mo'a Nagritera omegahie, Nenfa'ma avare  
namisimoke'za egahie.

### *Pita'a amentintia huama hu'nea naneke*

<sup>66</sup> Hagi ana kema hiazanku Agri amage nentaza disaipol nagapintira  
ruga'amo'za atre'za, Agranena vano osu'naze. <sup>67</sup> Eigu Jisasi'a 12fu'a naga'a

zamantahige'ne, **Tamagrane natretma vunaku nehazafi?** <sup>68</sup> Higeno Simon Pita'a ana kemofo nona'a Agrira asamino, Rantimoka izante katreta vunaku hunkenka nehane? Kagri kemo manivava asimura vahe'mofona nemie. <sup>69</sup> Tagra tamentinti nehuta Kagrira antahita keta hu'none, Kagra magoke Anumzamofo Ruotge' ne', hugantegenka e'nane. <sup>70</sup> Jisasi'a ke nona'a zamagri zamasmi'ne, **Nagra 12fu'a nagara huhampri tamante'noe, hianagi mago'moka havi avamu mani'nane.** <sup>71</sup> E'i anagema hu'neana Saimon Iskarioti nemofo Judasinku hu'ne, na'ankure 12fu'a nagapinti, agra magozmimo'ma henkama komoru huno Jisasima ha' vahe zamazampi avrezamisige'za ahesamofonku hu'ne.

## 7

### *Fugagi no ki'neza, muse ne'za nenaza knafi fore nehia naneke*

<sup>1</sup> Hagi ana nanekema huteno Galili kaziga vano nehuno, Judia kaziga vu'zankura ave'osi'ne, na'ankure Jiu kva vahe'mo'za ahenaku ke retro nehazageno ovu'ne. <sup>2</sup> Jiu vahe'mo'za fugagi nompi mani'neza, kave eri'za eme ante'za muse hu'za ne'za nekna kofa hu'ne. (Lev-Pri 23:34) <sup>3</sup> Ananku hu'za afu'aganahe'za Jisasina anage hu'za asmi'naze, amafina atrenka Judia kaziga vuge'za, kagri kamagenerata disaipol naga'mo'za, kagrama eri fore nehana avame'zana kageho. <sup>4</sup> Na'ankure mago'mo'a oku'a mago'zana osugahie. Vahe'mo'ma amate antahino keno haniema hanunka, avamezama maka mopafi vhahete kagraka'a kazeri ama hunka huge'za kageho, hu'za hu'naze. <sup>5</sup> Na'ankure Agri afu'aganahe'za anazanke hu'za, Agritera zamentinti osu'naze. <sup>6</sup> Anazanku Jisasi'a zamagrira zamasmino, **Nagri knamo'a kofta osu'ne, hagi tamagra amne vano hugahaze.** <sup>7</sup> Mopafi vahe'mo'za tmagrikura zamarimpa aheormantegahaze. Hagi Nagrira zamarimpa ahenantegahaze, na'ankure Nagrama huama hu'na avu'ava tmimo'a haviza hu'ne, huazanteku ana nehaze. <sup>8</sup> **Tamagra'tmi ana muse nezantera mrerihu, Nagra ana muse nezantera ovugosue, na'ankure Nagri knamo'a eohanati'ne.** <sup>9</sup> Ama ana nanekema zamasmiteno, Galili kaziga mani'ne.

<sup>10</sup> Hianagi Agri afu'aganahe'za ana muse ne'zantera mareritazageno, anante Agraku anazanke huno zamage'a mrerino, oku'a vu'ne. <sup>11</sup> Ana hige'za Jiu kva vahe'mo'za Agriku ana muse ne'za neknare nehakre'za anage hu'naze. Inantega Jisasi'a mani'nesie? hu'za hu'naze. <sup>12</sup> Jisasinku ana vahe kevufinti sumi ke ohumi ahumi hu'za, Agra knare Ne' mani'ne, nehzage'za ruga'amo'za huza a'o havi ne'kino, vahera zamavareno havi kante nevie hu'naze. <sup>13</sup> Anage hzanagi mago'mo'e huno eri amateno Agrikura osu'ne, Jiu kva vaheku kore hu'za ana osu'naze.

### *Jisasima Jerusalemi marerino ran mono nompi rempi huzami'nea naneke*

<sup>14</sup> Hianagi muse ne'zante mani'nageno knamo'a amu'nompi egeno Jisasi'a ra mono nompi mrerino, ome agafa huno rempi huzami'ne. <sup>15</sup> Rempi hunezmige'za jiu kva vahe'mo'za nentahii'za antri nehu'za, anage hu'naze, Inantegati ama ne'mo'a antahii'zana eri'nesnie, avonona osu'nea ne'mo'a? <sup>16</sup> Ana kemofo nona'a Jisasi'a amanage hu'ne, **Nagrama rempima huneramuana, Nagri zana omne'ne, Nagri'ma hunantegi'ha e'nomofo Agri sune.** <sup>17</sup> Aza'o agu'amo otinkeno Anumzamofo avesi'za huku hanimo'a, rempima nehuana agra antahino, Anumzamofonteti e'nefi, Nagrani'a navesite nehufi refko huno kegahie. <sup>18</sup> **Agra'a agu'areti nehanimo'a, agra avufa erira**

hunaku nehie. Hagi huntenege no e' nemofo agi erira nehim'o'a, Agra tamage vahe mani'n'e. Hagi mago kazaki zama'a Agripina omane'n'e. <sup>19</sup> Mosese'a kasegea taminefi, ontami'negeta, mika'mota ana kasegea amagera nontazo? **Tamagra nahigeta nahe frinakura nehaze?** <sup>20</sup> Ana vahe kevumo'za ke nona'a asmi'naze, Kagri kagu'afina havi avamu mani'n'e! Iza Kagrira kaheku higenka nehane? <sup>21</sup> Hazageno Jisasi'a ke nona'a anage huno zamasmi'n'e, **Nagra magoke avame'za hu'noe, anazanku maka'mota antri hu'naze.** <sup>22</sup> Ama ana agafare Moses'e a eit (8) zupa mofavre zamufa taga hiho hu'n'e. Na'ankure Mosesena agripintira ome'n'e. Hagi tamagri tamagehe'impinti e'n'e, higetma mani fruhu kna zupa (sabat) vahe zamufa taga nehaze. <sup>23</sup> Mago ne'mo avufa mani fruhu kna zupa taga hanigetma, Mosesa kasege ruhanontagie nehaze. Hagi tamagrira tmarimpa nehe, na'ankure Nagrama vahe'ma mani fruhu knazupa avufa eri so'e hunte'noa zamo tmasia nevzio? <sup>24</sup> Amega zamufarera vahera refko hutma keaga (kotim) huozmanteho. Hagi fatgo avu'avate refko huta nanekea huzmanteho.

<sup>25</sup> Anage hige'za mago'a Jerusalemi kumate vahe'mo'za amanage hu'naze, Ama'n'a Nera aheku'ma nehakraza nepi? <sup>26</sup> Keho, Agra amate kevumokizmi zamufi naneke nehiana nahige'za kea nosaze? Kva vahe'mo'za Agrama Kraisi mani'negura, antahi'nafi? <sup>27</sup> Ana hu'neanagi, tagra antahi'none igati ama nera e'neo, hianagi ina knarema Kraisi'ma esiana, mago ne'mo'a Agra igati e'neo ontahigahie. <sup>28</sup> E'i anage nehazageno Jisasi'a ra mono kumapinti (tempol) kezatino rempi hunezmino anage hu'n'e, **Tamagra, Nagri ene, inantegati Nagra e'noe tarezana hago antahita, ke'naze.** Hagi Nagra navesitera ome'noe, hianagi aza'o hunantege'na e'nomo, Agrake tamage nere, tamagra ana nera onke'naze. <sup>29</sup> **Nagra, Anumzamofona ke'ha antahi'noe, na'ankure Nagra, Agritegati Agra hunantege'na e'noe.** <sup>30</sup> Anage hige'za Jisasi'n'a azerinaku hu'nazanagi, mago'mo'a aze'orine, na'ankure Agri kna zahufa ome'n'e. <sup>31</sup> Hianagi ana vahe kevufinti hakaremo'za, Agrite zamentinti nehu'za anage hu'naze, Mesaia'ma \* esuno'a, Agra hakare'a avame'zama ama ne'moma nehia zana agatereno hugahifi ana osugahie?

<sup>32</sup> Hagi atru hu'naza vahe'mo'za Jisasinku sumi ke hugantu hugma ne-hazage'za, Farisi vahe'mo'za nentahi'za, vugote'naza mono kva (Pristi) vahe'mo'zane Farisi vahe'mo'za, Jisasi azerihogu ra mono nonte kegava hu'naza vahe (tempol gats) huzmantage'za vu'naze. <sup>33</sup> Anazanku Jisasi'a zamasmi'n'e, **Osi'a kna tamagrane manite'na, ete Agrama hunantege'na e'noa Netega Nagra vugahue.** <sup>34</sup> **Tamagra, Nagrikura hakre gahazanagi, Nagria nagefore osugahaze.** Hagi Nagrama umani'surega tamagra ovu-gahaze. <sup>35</sup> Jiu kva vahe'mo'za zamagra zamagra ke hugantu hugma nehu'za anage hu'naze, Inantega Agra vnigeta Agrira onkeku hunkeno nehie? Agra tatreno Jiu vahe'mo'za Griki umani'naza vahe ene, Griki vahe rempi huzamiku Jisasi'a nehio? <sup>36</sup> Inanknahu ke Agra huno, Tamagra, Nagrikura hakre'gahazanagi, Nagria nage fore osugahaze, hagi Nagrama mani'nesurega tamagra vuga osu'naze huno nehie?

### *Manivava Tinku'ene, Avamu'enenku Jisasi'a rempi huzami'nea naneke*

<sup>37</sup> Ne'za nene'za musenkase nehazageno, vagare kna zupa ran knagino, Jisasi'a otino kezatino anage hu'n'e, **Tinku avesinimofona, atrenkeno Nagrite eno eme neno.** <sup>38</sup> **Anumzamofo avontafepima kre'nere, Aza'o, Nagrite**

\* <sup>7:31</sup> Anumzamo huntogeno e'ne. Hibru kefina Mesaia'e nehaze, hagi Griki vahe kefina, Kraisi'e nehaze.

**amentinti nehanimo'a negahie. Agri agu'afinti manivava timo hageno evugahie.** (Ais 58:11)<sup>39</sup> Hianagi Agrama amanahu kema hu'neana Ruotge Avamuku hu'ne, Agrite zamentinti hanamo'za erisagu hu'ne, na'ankure Jisasi'a ra agi e'orineno, Ruotge Avamura eoraminegeno hu'ne.

### Tarefi refko hu'za Jisasinku hu'naza naneke

<sup>40</sup> Hagi ana kema mago'a vahe'mo'za nentahi'za, amanage hu'naze, Ama'i tamage huno kasnampa ne' mani'ne hu'za hu'naze. <sup>41</sup> Ruga'amo'za anage hu'naze, Ama'i Kraisi'e nehzageno, ruga'amo'za hu'za, Galili kazigatira Kraisi'a omesnifigure? <sup>42</sup> Anumzamofo avontafe'mo huno, Deviti nagap-inti Betlehemia Kraisi'a fore hugahie. Deviti mani'neno hu'nea kumateku osu'nazo? (Sam-Zga 89:3-4, Maik 5:2) <sup>43</sup> Ana vahe kevufinti Agriku hu'za antahi'zazamifi refko hu'naze, <sup>44</sup> mago'amo'za Jisasina azerinaku hu'nazanagi, mago'mo'e huno aze'orine.

### Kva vahe'mo'za Jisasinte zamentinti osu'naza naneke

<sup>45</sup> Anante ra mono nonte kva vahe'mo'za azage'za, vugota pristi kva vahe'ene Farisi vahe'mo'za anage hu'naze, Nahigetma Jisasina avretma ome'naze? <sup>46</sup> Ana ra mono nonte kva vahe'mo'za kenona'a hu'za, Mago ne'mo'a kora higeta ontahi'nona naneke, ama ne'mo'a nehie. <sup>47</sup> Farisi vahe'mo'za kenona zamirera amanage hu'za zamantahige'naze. Tamagri'enena anazanke huno havi kante tmareno nevifi? <sup>48</sup> Hagi mago rankva vahe'motafi, Farisi vahe'mota, Jisasintera tamentintia nehumpi nosu'n'e? <sup>49</sup> Hianagi ama vahe kevua, kasegema ontahi'nagu havizamofo agu'afi mani'naze. <sup>50</sup> Hagi Nikodimasi'ma kenagepi Jisasinte vu'nea kva ne'mo, amu'no zamifi mani'nereti amanage huno zamasmi'nne. <sup>51</sup> Tagri kase kemo'a mago nera refko huno kegaga hunonteanki, pusante agripinti na'a hu'nesie kea eriteno, tamagefi havige huteno keaga huntegahie. (Diu-Kas 17:6) <sup>52</sup> Zamagra kenona'a asmi'naze, Kagra anazanke hunka Galili kazigati e'nampi? Anumzamofo avon tafepi hamprinka ko, mago kasnampa (profet) nera Galilia fore osugahie, hu'za Nikodimasi asmi'naze. <sup>53</sup> <sup>†</sup>Ana nanekema hute'za, mago mago'mo'a noma'arega vuno eno hu'ne.

## 8

### Vere a'mo ru vene mase'nea naneke

<sup>1</sup> Hianagi Jisasi'a Olivi Agonare vu'ne. <sup>2</sup> Hagi nanterame otino Agra ra mono kumapi eteno ege'za, maka vahe'mo'za Agrite ageno, Agra tamumanino agafa huno rempi huzami'nne. <sup>3</sup> Kasegere ugagota hu'naza vahe'mo'zane, Farisi vahe'mo'za ru vene monko'za hu'nea a' avare'za, vahe'mokizmi amu'nompi eme azeri oti'za, <sup>4</sup> zamagra anage hu'za Jisasina asmi'naze, Rempi hurami ne'moka, ama a'mo'a monko'za nehigeta keta eri fore hu'none. <sup>5</sup> Mosesa kasegemo'a huramino, monko'za hu'nesia a'nea, have knonu ahe frihi hu'ne. Hagi Kagra na'ane hunka hugahane? <sup>6</sup> Zamagra anagema hu'nazana Jisasi revatga hu'za naneke huntenaku, kema huntesaza agafa'a keza eri fore hunaku hu'naze. Hianagi Jisasi'a kepri huno azankonu mopare avon kre'ne. <sup>7</sup> Hianagi zamagra kazigazi hu'za antahi'negageno, Jisasi'a otino amanage huno zamagrira zamasmi'nne, **Aza'o amu'nontamifi'ma kumi'a omne'nenimo, pusanter ahave erino aheno.** <sup>8</sup> Ete pri huno mago'anee azankonu mopare avon kre'ne. <sup>9</sup> Ana naneke

<sup>†</sup> **7:53** Mago'a vahe'mo'za antahi'zana Jon 7:53-8:11 vu'nea kea korapa avo tafepina omne'neanki, mago'a vahe'mo'za henka'a kre'naze.

zamagra nentahi'za, esera ranra vahe atirami'za nevazageno, ana amage'a magoke magoke'mo'za atirami'za vutere hu'za vuahna hazageno, Jisasi'ene ana a'ene zanagrake anampina mani'na'e. <sup>10</sup> Anante Jisasi'a otino anage huno ana ara asmi'ne, **Kahaku'ma haza vhahera iga vaze?** Magora iza ke naneke hugantegahie? <sup>11</sup> Higeno ana a'mo'a anage hu'ne, Ramoka mago'mo nanekea hunonante, anante Jisasi'a huno **Nagranena nanekea hunogantoe.** Kagra nevunka, menintetira agafa hunka mago'ene kumira osuo.

### *Jisasi'a mopafi vahe'mokizmi masazimi mani'nea naneke*

<sup>12</sup> Anante Jisasi'a mago'ene anage huno zamasmi'ne, **Nagra'ni'a ama mopamofo Masa mani'noe, aza'o namge'ma esimo'a hanimpina vano os-ugahie.** Hianagi asimu eri Masa erigahie. <sup>13</sup> Nehigeno Farisi vahe'mo'za anage hu'za asmi'naze, Kagrama kema nehanana, Kagra kagenke huama nehan, Kagrama huama nehanana tamagea nosane. <sup>14</sup> Hazageno Jisasi'a anankemofo nona'a amanage huno zamasmi'ne, **E'ima Nagrama ke huama Nagragu'ma nehuana, Nagri nanekemo'a tamage, na'ankure Nagra igati e'na, ete'na iga vugahuo, Nagra antahi'noe, hianagi Nagra igati e'na, iga Nagra vugahuo tamagra ontahi'naze.** <sup>15</sup> Amega zamuzmate tamagra vahera refko nehaze, Nagra mago vhahera menina refko nosue. <sup>16</sup> Hianagi Nagrama mago'mofo refko huntegahue hanuana, Nagrama troma hanua antahi'zamo'a fatgo hugahie, na'ankure Nagrakera refko nosue, hianagi Nagrane hunantege'na e'noa Nenfa ene refko nehu'e. <sup>17</sup> Tamagri kasegefina anage huno krente'ne, tare vahe tremoke ke'ne'na'a zankuma (witnes) hana'ana tamage. (Diu-Kas 17:6, 19:15) <sup>18</sup> Nagra tamage ke huama Nagrani'agu nehugen, hunantegena e'noa Nenfa'a Nagriku tamage huno huama **nehie.** <sup>19</sup> Zamagra amanage hu'za asmi'naze, Negafa'a iga mani'ne? Jisasi'a kenona'a zamasmi'ne, **Nagrira nageta antahita osu'nazankita Nen-fana antahita keta osu'naze.** Hagi tamagrama Nagri'ma nage'anke resuta, anahu kna hutma Nenfana kegahaze. <sup>20</sup> Ama nanekema hu'neana ra mono nompi zagoma nentazare mani'neno, Jisasi'a rempi hunezmige'za mago'mo'a aze'ori'ne, na'ankure Agri kna'a ome'ne.

### *Vahe'mo'za Jisasima vanirega ovugahaze hu'nea naneke*

<sup>21</sup> Anante ete mago'ene anage huno zamasami'ne, **Nagra tamatre'na vanugeta Nagrikura hakregahaze, tamagra kumitmifi frigahaze,** Nagrama vanurega tamagra ovugosaze. <sup>22</sup> Hige'za Jiu kva vahe'mo'za anage hu'haze, Agra huno Nagrama vanurega, tamagra ovugahaze huno'ma nehiana agrazante ahe fri'naku nehifi? <sup>23</sup> Jisasi'a anage huno zamasmi'ne, **Tamagra amafinti vahe mani'naze, Nagra anagamutire, tamagra ama mopafi vahe mani'naze, Nagra ama mopafi vhahera omuni'noe.** <sup>24</sup> E'ina hu'negu, kumi-tamifi tamagra frigahaze hu'na Nagra neramasmue, na'ankure tamagrama ama kema nehia Nera ama'ne, hutma tamentintima osnazana, tamagra kumi tamifi frigahaze. (Eks-Ati 3:14, Jon 8:28, 8:58, 13:19, 18:5-8) <sup>25</sup> Hige'za zamagra anage hu'za Jisasina asmi'naze, Kagra izage? Jisasi'a anage huno zamasmi'ne, **Na'anee hu'na ese agafarera Nagra tmasami'noe?** <sup>26</sup> Nagra rama'a zanku keaga nehu'na tamagrira refko huramante'naku nehue. Hianagi hunantege'na e'nomo'a tamage Nere, Agripinti antahi'noa ke, Nagra ama mopafi vhahera nezmasmue. <sup>27</sup> Nefanku Agra nehige'za zamagra antahi ama osu'naze. <sup>28</sup> Anante Jisasi'a anage hu'ne, **Tamagrama Vahe'mofo Mofavrema azeri sgama hanutma, tamagra antahi ankeretma Agra ama ana Nere hugahaze, Nagra'ni'a nagesafintira nosuanki, Nenfa'ma rempi**

hunami'nea ke'age nehue. <sup>29</sup> Anumzamo hunantege'na e'nomo, Nagrane nemanie, Agra natrege'na Nagrakera nomanue. Na'ankure Nagrama, Agri avesizama hvavava huazankura, Agra muse nehie. <sup>30</sup> Anagema nehige'za rama'a vahe'mo'za Agrite zamentinti hu'naze.

*Abrahamu mofavre zagane, Sata mofavremokizmi naneke*

<sup>31</sup> Jisasi'a Jiu vahe zamentinti hu'namokizmia amanage huno zamasmi'ne, Nanekeni'a miko knama erizafa hvavava hanuta, tamagra Nagri namage ante disaipol naga manigahaze. <sup>32</sup> Ana nehutma tamagra tamage naneke antahisnageno, ana tamage nanekemo katufe tmantegahie. <sup>33</sup> Zamagra kenona'a anage hu'naze, Tagra Abrahamu agehete, magore huta mago netera kazokzo eri'zana e'ori'none, Kagra nahigenka katufe tmantesageta amne vugahaze hunka nehane?

<sup>34</sup> Jisasi'a anage huno zamasmi'ne, Tamagerafa hu'na tamagrira ner-masmue, maka kumi'ma nehaza vahe'mo'za kumi'mofo kazokzo vahe mani'naze. <sup>35</sup> Kazokzo vahe'mo'a nompina manivava nosie, hanki mofavremoke nompina manivava nehie. <sup>36</sup> E'inahigu Nemofo'ma katufe tmantena knare hutma mani so'e hugahaze. <sup>37</sup> Nagra antahi'noe, tamagra Abrahamu ageheta mani'nazanagi' Nagri nahe frinaku kanku nehakaze, na'ankure Nagri nanekemo'a tamagri tamagu'afina omne'ne. <sup>38</sup> Nagrama kema nehuana, Nenfa'ene mani'nena ke'noa zanku neramasmue, tamagra nehzazana neramafampinti'ma antahinazaza nehaze.

<sup>39</sup> Zamagra kenona'a Jisasina anage hu'za asmi'naze, Abrahamu'a tagri nerfa'e, Jisasi'a anage huno zamasmi'ne, A'o, tamagrama Abrahamu mofavrema mani'nenutma Abrahamu hu'nesia avu'ava hugahaze. <sup>40</sup> Nagra tamage naneke Anumza'mofompinti antahi'noa ke neramasmue, hianagi Nagrira nahe'za nehaze. Abrahamu'a e'inahura osu'neaza tamagra hunaku nehaze. <sup>41</sup> Tamagra neramafa avesiza nehaze. Zamagra kenona'a anage hu'naze, Tagra savri avu'avafetira fore osu'none, tagrira magoke Nerfa, Anumzana Agrake mani'ne. <sup>42</sup> Jisasi'a anage huno zamagrira zamasmi'ne, Anumzamo'ma tamagri nerfa'ma mani'neasiana, tamagra Nagrira navesi nantasine, na'ankure Nagra efore hu'noana, Anumzamo hunantege'na e'noe. Nagrani'a navesitera om'e'noe, hagi Anumzamo hunantege'na e'noe. <sup>43</sup> Nahigeta kema hua nanekea antahi amara nosaze? Na'ankure Nagrama hua nanekea antahi ama nosazagu, ana nehaze. <sup>44</sup> Tamagra Sata mofavre naga mani'naze, ana hunetma nermafa'ma avenesia avu'avaza nehaze. Ese agafare vahe ahe fri'nea ne' mani'neno, tamage nanekemofona amage nonte. Na'ankure tamage kea agripina omne'ne. Kema hifina, havigege nehie, agra avu'ava zanku kea nehie. Na'ankure havige ne' mani'neno, havigemofo nefae'. <sup>45</sup> Hianagi na'ankure Nagra tamage nehugetma, tamagra nanekeni'arerar tamentintia nosaze. <sup>46</sup> Amama, mani'nafitira izaga Nagrikura kumi hu'ne hunka nanekea hunantegahane? Nagrama tamage nehusugetma, nahnigetma tamentintia osugahaze? <sup>47</sup> Aza'o Anumzamofo naga mani'enimo'a, Anumzamofo naneke nentahie, ama'na agafare tamagra nontahize. Na'ankure tamagra Anumzamofo nagara omani'naze.

<sup>48</sup> Jiu vahe'mo'za anage hu'za kenona'a asmi'naze, Hufatgo huta negasmune, Kagra Sameria vahe mani'nankeno hankromo kagu'afi fre'nefi? <sup>49</sup> Jisasi'a anage huno kenona hu'ne, Nagrira nagu'afina hankrrora omani'nne, hianagi Nagra Nenfa ra agi nemugetma, tamagra Nagrira nazeri fenka nenatra'ze. <sup>50</sup> Nagra ra nagi erinakura nosuanki, Anumzamo Nagri

nagi'a eri ra nehuno, naneketi refko hurantegahie. <sup>51</sup> Tamagerfa hu'na neramasmue, Keni'a antahino amagema nentemo'a agra ofrigahie. <sup>52</sup> Jiu vahe'mo'za Jisasinku anage hu'za asami'naze, Menina tagra antahi'none, havi hankromo kagu'afi mani'ne. Abrahamu'a fri'negeno, kasnampa vahe'mo'zanena ana zanke hu'za fri'nazagenka, kagra anage nehane, iza'o nanekeni'a avaririsimo'a, agra ofrigahie hunka nehane. <sup>53</sup> Abrahamu nerfa'a ko fri'neanki, Kagra agtere'nano? Kasnampa vahera ko fri'nazanki! Kagra kagesa antahi'nana aza'ne hunka nehane? <sup>54</sup> Jisasi'a anage huno zamasmine, Nagra nagi erira hanuana, ana Nagimo'a amane'za segahie. Hianagi Nenfa'a Nagri nagi erira nehiteta, Agrikura tamagra hutma, Agra, tagri Anumzane nehaze. <sup>55</sup> Tamagra Agrira antahinomize, hianagi Nagra antahi'na ke'na Agrira hu'noe, hankina Nagrama hu'na, Agrira antahi'na kena osu'noe hanuana, havige hu'na tamagrikna hugahue, hianagi Nagra Anumzamofona antahina kena hu'nena, ke'a erizafa nehue. <sup>56</sup> Neramafa Abrahamu'a Nagri kna kenaku muse nehuno, keteno tusi'a muse hu'ne. <sup>57</sup> Jiu vahe'mo'za Jisasinku anage hu'naze, Kagra 50'a kafuzage osu'nane, Kagra Abrahamuna ke'nano? <sup>58</sup> Jisasi'a anage huno zamasm'i'ne, Tamagerafa hu'na neramasmue, korapa Abrahamuna kase onte'negena Nagra mani'noane. <sup>59</sup> E'inagema hiazanku have eri'za mate vuza ahe'za hu'naze. Hianagi Jisasi'a ra mono nompinti (tempol) oku'a atiramino fegi'a vu'ne.

## 9

### *Avurga asu' hu'nea ne'mofo naneke*

<sup>1</sup> Hagi anama Jisasi'a vugatereno nevuno, mago nera reranku'afinti avu asuhu'nea ne' kasente'nea omege'ne. <sup>2</sup> Agri'ma amage nentaza disaipol naga'mo'za antahige'za, Rempi hurami ne'moka (Rabbai) aza kumira hu'negeno ama avu asuhu nera kasente'ne, agra'afi nererapi nef'a'e? <sup>3</sup> Hazageno Jisasi'a amanage huno kenona hu'ne, Ama ne'mo kumira osigeno, nerera nef'a' kumira osu'ne. Hu'neanagi e'i zama fore hu'neana Anumzamofa eri'zamo agripinti eriama hanigu e'inahu hu'ne. <sup>4</sup> Hunantege'na e'noa ne'mofo eri'zana, tagra zugema me'neshire Agri eri'zana erisune. Hanima esigeno'a mago vahe'mo'a erizana e'origahie. <sup>5</sup> Nagrama ama mopafima emani'noa kna'afina, Nagra ama mopafi vahe'mofo Tavire. <sup>6</sup> Anage Agra huteno, mopa're avetu heno eri igri huno, higogna huteno, ana mopa tarega avure frenenteno, <sup>7</sup> amanage huno asami'ne, Vunka Siloamu tirupi ti omefro. (Siloamue hu'nea kemofo agafa'a, huntogeno vu'ne hu'ne.) Ana hutegeni vuno ti ome freteno, avurga hari higeno mika'zana negeno e'ne. <sup>8</sup> E'ina hige'za, ana ne'mofo tavaonte nemani'za vahe'mo'zane, ana ne'mo ke'zatino meme nehige'za negaza vahe'mo'zanena amanage hu'naze, Ama ne'mo mani'neno kezatino meme nehigeta negona nepi ru nere? <sup>9</sup> Mago'amo'za anage hu'naze, Ama ana nere nehazageno, mago'amo'za hanaveti'za anage hu'naze, A'o agra ana ne' kna'nehie. Ana ne'mo huno, Nagra ana ne' mani'noe, huno zamasm'i'ne! <sup>10</sup> Zamagra anage hu'za antahige'naze, Inankna hankeno kavurga eri hari hugante'ne? hu'za agenoka hu'naze. <sup>11</sup> Agra ana ke'nona anage hu'ne, Mago ne'ma Jisasi'e nehaza ne'mo, mopa erino tinuti eri igri huteno navurgare frenenteno, amanage huno nasmi'ne, Siloamu vunka tirupi omefro hige'na, vu'na tina ome frogeno, navu ragamo'a hari hige'na navua ke'noe. <sup>12</sup> Hige'za zamagra ana ne'ku anage hu'naze, Kavuma eri so'e hu'nea

nera inantega mani'ne? Hazageno avuma azeri harima hunte'nea ne'mo'a, Nagra onke'noe hu'ne.

*Farisi vahe'mo'za avurga eri hari hu'nea ne' antahige'naza naneke*

<sup>13</sup> Hagi anama avu asu hu'negeno azeri hari hu'nea nera, avare'za Farisi vahete vu'naze. <sup>14</sup> Anankna mani fruhu kna (sabat) zupa Jisasi'a hapara erino avurga eri hari hu'negeze. <sup>15</sup> Anante Farisi vahe'mo'za mago'ene antahige'za, Nankna hankeno kavumo'a hari hu'ne hazageno, ana avuma eri so'e hunte'nea ne'mo anage huno zamasmi'ne, Agra hapa erino navure frenantege'na, ti ome frogeno navumo'a hari hige'na ke'noe. <sup>16</sup> E'ina hu'negu mago'a Farisi vahe'mo'za anage hu'naze, E'i ana nera Anumzamo'a huntegeno ome'ne, na'ankure mani fruhu kna ana ne'mo'a kegava nosie. Hianagi mago'amo'za anage hu'naze, inankna huno kumi ne'mo'a amanahu kaguvazana erifore hugahie? Anage nehu'za keha're'za amu'nompinti vahera refko hu'naze. <sup>17</sup> Ana hute'za mago'ene avuma asu hu'negeno'ma, eriso'e hu'nea nera antahige'za, na'ane hunka kavurgama eriso'e hu'nea nekura nehane? Hazageno ana ne'mo'a huno, Agra kasnampa nere.

<sup>18</sup> Jiu kva vahe'mo'za, avurga asu osu'nea neku nehaze, nehu'za zamentinti osu'za, ana ne'mofo nererane nefane zanagi hu'naze. <sup>19</sup> Zamagra nererane, nefane zanantahige'za avusuhunegeta kasente'noe huta huna'ana ama'i mofavrefi? Hanki inankna huno menina avua nege? <sup>20</sup> Nererake, nefake kenona'a anage hu'na'e, Tagra antahi'no'e, ama tagri mofavre, avu asu hu'nea kasente'no'e. <sup>21</sup> Hianagi tagra antahita keta osu'none, menima avuma negea'zane, aza avua eri so'e hunte'neo ontahi'no'e. Agra ra vahe mani'neanki, antahigenkeno agra'a tamasamino. <sup>22</sup> Nererake nefakea amanahu kema hu'na'ana, na'ankure Jiu mono kva vaheku koro huke anage hu'na'e. Na'ankure Jiu mono kva vahe'mo'za ke retro hu'za, mago'mo Jisasinku Kraisi'e huno, huama hanimofona, Jiu mono nompinti (Sinagog) ahe natigahune, hu'naze. <sup>23</sup> Ana ke agafare nererake nefakea huke, agra ra vaheki agri antahigeho hu'na'e.

<sup>24</sup> Ete mago'ene, ko'ma avu asuhu'nea ne' agi hu'za asmi'naze, Anumzamofo avure tamage hunka huo, kavu eri hari hu'nea nera, kumi ne' mani'negeta tagra antahi'none. <sup>25</sup> Hazageno ana ne'mo'a anage hu'ne, nagra ontahi'noe Agra kumi ne' mani'neo, magoke'zama nagra antahi'noana, navua asu hu'neane, menina navu negoe. <sup>26</sup> Anante Farisi vahe'mo'za asami'za, Jisasi'a nankna'za kagrira hugante'ne? Inankna huno Agra kavurga eri hari hu'ne? <sup>27</sup> Avuma eri harima huntenea ne'mo anage hu'ne, nagra ko tamasmi'noanagi ontahi'nazo. Nahigetma ru'ene antahinakura nehaze? Tamagra nena Agri amage'ante disaipol naga maninaku nehzafi? <sup>28</sup> Zamagra ana kemofo nona'a knara kefinti fra vazinte'za, kagra Agri amage nentana disaipol ne' mani'nananki, tagra Moses amage nentonavahe mani'none! <sup>29</sup> Anumzamo Mosesena kea humigeta tagra antahi'none, hianagi ama'i nera igati e'neo, tagra ontahi'none. <sup>30</sup> Ana ne'mo anage huno zamasmi'ne, Ama ruzahu'zama hu'nea nera, Agra igati eno, navurga eri hari hige'na ke'noe, tamagra ontahi'naze! <sup>31</sup> Tagra antahi'none, kumi vahera Anumzamo'a antahi'nomie, hianagi iza'o mono hunenteno Agri amage' ante fatgo hani'mofona, Anumzamo antahiamigahie. <sup>32</sup> Mona mopa fore hu'nea knareti, avu asu hu'nea vahera mago ne'mo'e huno avurga eri hari hu'nea kea ontahi'none. <sup>33</sup> Hazageno ama ne'ma Anumzamofontegatima ome'nesuno'a, Agra mago'zana osugahie. <sup>34</sup> Hige'za Farisi vahe'mo'za anage hu'naze, Kagrira miko kumi'zampi kasegante negenka, tagri rempi

hurami'za nehano? Anage nehu'za Jiu vahe mono nompintira (Sinagog) avazu hu'za, atufu atrageno vu'ne.

### *Avamupi zamu asuhu'nea naneke*

<sup>35</sup> Hagi ana ne'ma avazuhu megi atraze kea Jisasi'a nentahino, ome kefore huno Agra amanage hu'ne, **Kagra Vahe'mofo Mofavrere kamentinti nehano?** <sup>36</sup> Higeno ana ne'mo'a anage hu'ne, Agra iza'e ramoka, nagrama Agrite namentinti'ma hanuana? <sup>37</sup> Jisasi'a anage huno asmi'ne, **Kagra Agrira negane, e'i ana ne'mo kagri'enena keaga nehie.** <sup>38</sup> Avuma eri hari hu'nea ne'mo anage hu'ne, Ranimoka nagra namentinti hue, nehuno anante mono hunte'ne. <sup>39</sup> Jisasi'a amanage hu'ne, **Vahe refko hunaku ama mopafina ermi'noe, e'ina hanugenzo zamuma nonke'samo'za kesageno, zamuma negesa'mokizmi zamumo'za asu hugahie.** <sup>40</sup> Mago'a Farisi vahe Agrane anante mani'namo'za, ana naneke nentahi'za anage hu'za Jisasina antahige'naze, Tagri tavumo'enena asu hu'nefi? <sup>41</sup> Jisasi'a anage huno zamasmi'ne, **Tamavurgamo asu hu'neasina kumi'tmia omne sine, hianagi tamogra huta tavua negone nehzagu, kumi'mo'a tamagripina me'ne.**

## 10

### *Jisasi'a Knare Sipisipi Kva Nere hu'nea naneke*

<sup>1</sup> Jisasi'a mago'ene amanage hu'ne, Nagra tamagerafa hu'na nerasmhue, iza'o sipisipi keginamofo kafanteti agu'afi uofreno, ruganteti taka'uresimo'a, kumzafa vahe mani'neno, vahe'za avazu hugahie. <sup>2</sup> Hianagi iza'o kahantegati ufresimo'a sipisipi kva fatgo mani'ne. <sup>3</sup> Kafante kva ne'mo agrira kafana anagintegeno, sipisipimo'za agri ageru nentahize. Ana afu kva ne'mo Agri'a sipisipimokizmi zamagi neheno, zamavareno vugota nehie. <sup>4</sup> Agrama sipisipi afu'zaga'ama zamavare atru huteno, vugoteno nevige'za, amage' aviriri'za nevze. Na'ankure zamagra agerura antahi ani' nehu'za amage nevaze. <sup>5</sup> Onke'nesaza vahera, tamage hu'za zamagra amagera ovugahaze. Hagi atre'za fregahaze, na'ankure zamagra ontahi'nesaza agerutera kore hugahaze. <sup>6</sup> Hagi Jisasi'a fronka kefinti zamasmineanagi, zamagra nankna kema Agrama zamasmiana, ana kemofo agafa'a antahi amara osu'haze.

<sup>7</sup> Ana hazageno Jisasi'a mago'ene zamasmino, Tamagerfa hu'na tmgrikura nehue, Sipisipimokizmi kafana Nagra'ni'a mani'noe. <sup>8</sup> Ko'ma egote'za e'naza vahe'mo'za, kumza vahekiza, vahe'za avazu hugahaze. Hianagi sipisipimo'za zamagerura ontahigahaze. <sup>9</sup> Nagra'ni'a kafana mani'noe, iza'o Nagri'teti efresimo'a knare huno mani'neno, efreno atiramino nehuno knare tra'zankura hakregahie. <sup>10</sup> Hanki kumzafa vahe'ma ne-eana kumzafa seno, ahe nefrino, eri haviza hunakuke eghahie. Nagrama e'noana zamagra zamasimu e'neri'za, ana asimu eri aviteta hanazegu e'noe. <sup>11</sup> Nagra'ni'a knare sipisipi kva ne' mani'noe, Knare sipisipi kva vahe'mo'a Agra'a sipisipireku huno asimura atregahie. <sup>12</sup> Zago erinakuma avrema antesigeno eri'zama erisia ne'mo'a, sipisipi kva omanino sipisipi nef'a omani'neankino, kesigeno afi krama esigeno'a, sipisipia atreno fresigeno, afi'kramo (wulf) zamagene reno zamahe panani hugahie. <sup>13</sup> Na'ankure agrira zago erizante avrente'nazankino sipisipigura agesa ontahino, agra zamatreno fregahie. <sup>14</sup> Nagra'ni'a knare sipisipi kva mani'noe, Nagra sipisipi nagani'a ke'na antahi'na huge'za, zamagra Nagrira nage'za nantahi'za hu'haze. <sup>15</sup> Anahuukna huno Nenfa'a, Nagrira nageno antahino

hige'na, Nagra Nenfana age'na antahi'na hu'noankina, Nagra nasimura sipisipimokizmire atregahue. <sup>16</sup>Ruga'a sipisipini'a ama kegina agu'afina omani'naze, Nagra anahu kna hu'na zamaresuge'za, nagerura nentahi'za, zamagra magoke afu kevu hu'za mani'nageno, magoke afu kva vahe manigahie. <sup>17</sup>Ama'na agafare Nenfa'a avesi'enanente, na'ankure Nagra nasimura atretena, hagi ete nasimura erigahue. <sup>18</sup>Mago'mo'a nasimura Nagripintira eriotre'gahie, hianagi Nagra'ni'a navesite antregahue. Nagrira hanavene'a me'neankina antete'na, Nagripi hanavea me'neankina ete nasimura erigahue. Ama'na kea Nenfa huhanavetino hunanteno huo hu'neankina hugahue.

<sup>19</sup>Hagi anagema hiazanku, Jiu vahe'mo'za zamagra'zmi mago'ene tarefi refko hu'naze. <sup>20</sup>Rama'amo'za hu'za, Kefo hankro'mo\* agu'a fre'negeno negi neneanki, nahigetma naneke'a nentahi'ze? <sup>21</sup>Mago'amo'za anage hu'naze, kefo hankro'mo agu'afi fre'nea vahe nanekeea omne'ne. Kefo hankromo'a avu asuhu vahera erihari hanigeno kegahifi, onkegahie?

*Mono noma kafa anagi'naza kna eme antege'za ne'za neku, hazare Jisasi'a hanati'nea naneke*

<sup>22</sup>Anante mono noma renagi'za Anumzamofo ami'naza knagu antahimi'za ne'za nenazankna Jerusalemi kumate fore hu'ne. <sup>23</sup>Zasi ko atu knafi, Ra mono kumapi Jisasi'a, Solomon agire asamare'naza no kinte'nafi vano hu'ne. <sup>24</sup>Jiu kva vahe'mo'za Jisasina eme regagi'za, anage hu'za asmi'naze, Nama'a kna kagra tazeri antesanketa kvega antegahune? Kagra Kraisiga mani'nenunka huama hunka amne tasmio. <sup>25</sup>Hageno Jisasi'a kenona zamire anage huno zamasmi'ne, Nagra ko tamasmi'nogetma, tamagra tamentinti nosaze, mika eri'zama Nenfa agifima enerua eri'zamo, Nagrira nazeri ama nehie. <sup>26</sup>Hianagi tamagra tamentintia nosaze, na'ankure Nagri sipisipia tamagra omani'naze. <sup>27</sup>Nagri sipisipimo'za nagerura nentahize, hige'na Nagra zmagenta antahina hu'noge'za, zamagra Nagrira namage neaze. <sup>28</sup>Nagra manivava zamasimura nezmue. Hagi zamagra fanene osugahaze. Mago ne'mo'a nazampintira eri hanaren ozmavre-gahie. <sup>29</sup>Nenfa'ma ana vahe nami'nemo, maka zampina ra mani'neankino, mago'moe huno Nenfa azampintiraohanaregahie. <sup>30</sup>Nenfa'ene, Nagrena magoke mani'no'e.

<sup>31</sup>Huno nehige'za Jiu kva vahe'mo'za ahe frinaku ru'ene havenkno eri'naze. <sup>32</sup>Hagi Jisasi'a amanage huno zamasmi'ne, Nenfantegati knare eri'zana hakare'a hurmeri'noanki, ama anampintira ina erizanteku hutma have knonura naheku nehaze? <sup>33</sup>Jiu kva vahe'mo'za ke nona'a anage hu'naze, knare eri'zama eri'nana zanterta tagra have knonura onkahe'gosune, hianagi Anumzana huhaviza nehunka, kagra amne vahe'moka, Anumza mani'noema hanazanku kaheku nehune. <sup>34</sup>Jisasi'a kenona'a zamasmi'ne, Tamagri kasegefina na'ane huno korapara krente'ne, *Anumzamo'a huno, tamagra tamia anumza mani'naze hu'ne?* (Sam-Zga 82:35) <sup>35</sup>E'ina hu'negu korapara Anumzamo'a vahetaminkura huno, tamagra anumzantamine hu'neankino, (Anumzamofo avontafepi krente'naza kemo'a fuotgigahie). <sup>36</sup>Nenfa'a nazeri ruotge huteno, hunantege'na ama mopafi e'nogu, tamagra Anumzamofo huhaviza hunentane huta Nagrikura nehaze, na'ankure Nagra hu'na Anumzamofo mofavre mani'noe huazankuro? <sup>37</sup>Nagrama Nenfa eri'zama e'norisuana,

\* **10:20** Hankrorema hu'neana havi avamuku hu'ne

tamagra Nagritera tamentintia osiho. <sup>38</sup> Hianagi Nagra eri'zama'a e'nerugetagi, tamagra tamentintia Nagrikura nosaze, eri'zama eruazante negetma tamentinti hiho, e'inama hanuta keta antahita hanazana, Nagra Nenfampi manugen, Nenfa'a Nagripi mani'ne hugahaze. <sup>39</sup> Mago'ene azerinaku nehazageno, zamatreno rufanene hu'ne.

<sup>40</sup> Jisasi'a eteno Jodani ti takaheno Joni'ma mono ti ese'ma frezmante'nea kaziga vuno, anantega umani'ne. <sup>41</sup> Hakare vahe'mo'za mani'nerega uhanati'za amanage hu'naze, Joni'a mago avame'za osu'ne, ana hu'neanagi Joni'ma ama ne'ku'ma maka kema hu'neana tamage hu'ne. <sup>42</sup> Anage hige'za, anante rama'a vahe'mo'za Jisasinte zamentinti hu'naze.

## 11

### *Lasarusi fri'zamofo naneke*

<sup>1</sup> Hagi mago nera Lasarusi'e nehaza ne'mo'a kri eri'ne. Agra Betanitire, Maria'ene nenunkna Matake nemani'a kumate nere. <sup>2</sup> Maria'a mananentake masavenu Ramofo agare frenteteno, anu azokateti ana agama eri ho'mu hu'nea a'mofo nesaro kria eri'ne. <sup>3</sup> Ana nanunkna'moke Jisasintega kea atrenteke, anage hu'na'e, Ramoka antahio, Kagrama avesima nentamo'a kri eri'ne. <sup>4</sup> Higeno Jisasi'a ana ke nentahino, anage hu'ne, **Ana krimo'a fri kantera avreno ovugahie, na'ankure Anumzamofo ra agi ami'nigeno, ana zantetira Anumzamofo Mofavremo ra agi erigahie.**

<sup>5</sup> Jisasi'a Matane nenunkname, Lasarusine avesizamante'ne. <sup>6</sup> Hianagi Lasarusi kri eri'ne nanekema hazageno nentahino'a, tare zage'gna anama mani'nea kumate mani'ne. <sup>7</sup> Ana huteno amage'nentaza disaipol nagaku huno, **Judia kaziga ete vanune** huno zamasmi'ne. <sup>8</sup> Hige'za amage nentaza disaipol naga'mo'za anage hu'za asmi'naze, Rempi hurami ne'moke (Rabbi), Jiu kva vahe'mo'za mensintfama have knonu kahenaku nehzarega, Kagra ete vu'za nehano? <sup>9</sup> Jisasi'a kenona zamire anage hu'ne, **12fu'a kna (aua) mago zagefina omane'nefi?** Mago vahe'mo'ma zage ferupima vanuno'a agra traka osugahie, na'ankure ama mopafi masa agra nege. <sup>10</sup> Hu'neanagi mago'mo hanimpima vanuno'a ome traka hugahie, na'ankure masa agripina omne'ne. <sup>11</sup> Anagema huteno, mago'ene Jisasi'a anage hu'ne, **Ronetimo Lasarusi'a avu mase'ne, hianagi menina Nagra ome azeri otigahue.** <sup>12</sup> Hige'za amage'nentaza disaipol naga'mo'za anage hu'naze, Ramoka, agra avu'ma mase'nesuno'a, knare hugahie. <sup>13</sup> Hagi Jisasi'ma hu'neana, Lasarusi'a ko fri'nea zanku hu'neanagi, zamagrama antahi'zana amne avu mase'hea zanku nehie hu'za antahi'naze. <sup>14</sup> Jisasi'a anante huama huno zamasmi'ne, **Lasarusi'a ko fri'ne,** <sup>15</sup> **Tamagri tamaza hanigu Nagra muse nehu'na, ana kumatera omani'noe, e'ina hanigeta tamagra tamentinti hugahaze.** Hianagi erinketa agritega vammeno. <sup>16</sup> E'ina hianagi Tomasi (Didimasi'e hu'neana kugavezare) nehaza ne'mo, magoka Jisasi amage nentaza disaipol nagaku huno, tagranena erinketa vuta Agrane ufri'maneno hu'ne.

### *Matane, Maria kizni Jisasi'a ke huznami'nea naneke*

<sup>17</sup> Hagi Jisasi'a ana kumate uhanatino, ome antahiana Lasarusina ko havegampi asentageno, 4'a zagegna evu'ne. <sup>18</sup> Betani kumara Jerusalemi tava'onte 3 kilo mitanaza me'ne. <sup>19</sup> Rama'a Jiu vahe'mo'za e'za Matane Maria kiznia, neznasaro fri'negeza e'za zname rentinti hu'naze. <sup>20</sup> Jisasi ne-e hia kema Matama nentahino, kantega ome kenaku vu'ne. Hianagi Maria'a

nompi mani'ne. <sup>21</sup> Mata'a, Jisasina ome keno anage huno asmi'ne, Ramoka, Kagrama amafima mani'nantesina, nensaro Lasarusi'a ofrisine. <sup>22</sup> Hianagi meninena nagra antahi'noe, na'anku'ma Anumzamofo antahige'sankeno'a, Anumzamo'a anazana kamigahie. <sup>23</sup> Jisasi'a kenona huno asmi'ne, Negsaro Lasarusi'a ete otino asimu erigahie. <sup>24</sup> Mata'a amanage huno Jisasina asmi'ne, Nagra antahi'noe, henkama otisaza zupa vagare knarerera, agra otino asimu erigahie. <sup>25</sup> Jisasi'a amanage huno Matana asmi'ne, Fripinti otino asimu erino mani'zamofo agafa'a Nagra mani'noe, iz'a'o Nagrite'ma amentinti hanimo'a, frigahianagi asimu erino manigahie. <sup>26</sup> Maka vahem'o'za mani'neza Nagrite zamentinti hanazana, ofri'tfa hugahaze. Amama nehua kegura kagra kamentintia nehampi? <sup>27</sup> Higeno Mata'a anage huno asmi'ne, Izo Ramoka, nagra namentinti hue, Kagra Kraisige, Anumzamofo mofavre'moka Kagra ama mopafi erami'nane.

<sup>28</sup> Mata'a anage huteno, vuno nenunkna Mariana sumi huno agesafi asami'ne, Hurami ne'mo'a ne-eno kagriku ke nehie huno asamigeno, <sup>29</sup> ana kema nentahino'a, ame' huno otino Jisasinte vu'ne. <sup>30</sup> Jisasi'a ana kumapina uofreno, kantega Matama omege'nere mani'negeno, Maria'a emege'ne. <sup>31</sup> Anante Jiu vahe'mo'za Maria'ene nompi ame rentinti hu'za mani'nareti, kageno'ma agra ame' huno otino meg'i'a vige'za, zamagra amage nevu'za, keri'are zavi ome ate'naku nevie hu'za antahi'naze. <sup>32</sup> E'ina higeno, Maria'a Jisasi'ma mani'nere eno eme negeno, agiafi emaseno, anage huno asmi'ne, Ramoka, kagrama amafima mani'nantesina, nensaro Lasarusi'a ofrisine. <sup>33</sup> Jisasima kegeno zavi'ma netegeno'a, ana a'ene e'naza Jiu vahe'mo'zanema zavi atageno, Jisasi'a nezmageno agu'afina tusi'za huno rimpamo'a kna nehigeno, <sup>34</sup> Jisasi'a zamantahigeno, Inantega ana nera asente'naze? Zamagra kenona hu'za Agrira asmi'naze, Ramoka enka emego. <sup>35</sup> Hazageno Jisasi'a zavi' ate'ne. <sup>36</sup> Zamasuma ragiku'ma e'naza Jiu vahe'mo'za anage hu'naze, Keho agrira tusi'za huno avesinte'ne! <sup>37</sup> Hianagi mago'amo'za anage hu'naze, Ama ne'mo avu suhu ne' eri hari hunte'neankino, Agra Lasarusina mago'a zana huntogeno ofrino manisimpi?

### *Lasarusina kerifinti Jisasi'a azeri oti'nea naneke*

<sup>38</sup> Anante Jisasi mago'ene, rimpamo'a kna nehigeno ana ne'mofo kerire uhanati'ne. Havega me'nege'za ufrekantera have eri'za runkani re'naze. <sup>39</sup> Jisasi'a huno, Ana have rezahe hutreho, higeno fri'nea ne'mofo nesaro Mata'a anage huno asami'ne, Ramoka, menina kno hi'mana vugahie. Na'ankure 4'a zagegna ko mani'ne. <sup>40</sup> Higeno Jisasi'a anage huno ana ara asmi'ne, Ko kasami'noe, kagrama kamentinti hanunka Anumzamofo hihamu hankave'a (glori) kegahane hu'na kasmi'nofi? <sup>41</sup> Hige'za anankema nentahi'za ana have rezahe hutre'naze. Anante Jisasi'a kesga hunagamuteno, anage hu'ne, Nenfaga, Nagra muse hugantoe, Kagra ke'nia antahi nam'i'nane. <sup>42</sup> Nagra antahi'noe, hakare zupa keni'a nentahine, hianagi kema nehuana ama oti'za mani'naza vaheku hu'na Nagra nehue. Kagra hunantanke'na e'noe hu'za zamagra zamentinti hanagu nehue. <sup>43</sup> Jisasi'a anagema huteno'a, kezatino Lasarusiga, atiraminka eno! <sup>44</sup> Higeno fri'nea ne'mo atiramino e'ne, agiane, azanena, tavrave nofi'nu ana'neki'za, avugosa tavravenu anovazinageno Jisasi'a zamasmino, Tavarave'a vakneta eri atrenkeno vino.

*Jiu kva vahe'mo'za Jisasi ahenaku hu'naza naneke  
(Mat 26:1-5; Mak 14:1-2; Luk 22:1-2)*

<sup>45</sup> E'ina hige'za, rama'a Jiu vahe'ma Maria'ene e'namo'za, Jisasi'ma hiza nege'za, Agrite zamentinti hu'naze. <sup>46</sup> Hianagi mago'amo'za vu'za Farisi mono vahete uhanati'za, Jisasi'ma hu'nea zamofo naneke ome zamasmi'naze. <sup>47</sup> E'ina hige'za vugota pristi vahe'ene Farisi Vahe'mo'za vu'gota mono kanisol vahe kehutru (Sanhedrin) hu'za anage hu'naze, Ama ne'mo'a rama'a kaguvaza nehie. Na'a menina hugahune? <sup>48</sup> Atresnunkeno anazanke huno Agra vaniana, maka vahe'mo'za Agrite zamentinti hanageno, Romu vahe'mo'za e'za ra mono nontine, mopatinena tarega hanare-gahaze. <sup>49</sup> Anante mago'zmimo, Kaifasi'a ra mono kva (hai pristi) ana kafufina mani'nea ne'mo, anage huno zamasmi'ne, tamagra mago'za antahintahitamifina nontahize. <sup>50</sup> Na'a hanigeno maka kumatine, mopatia eri havizana hugahie? Atrenkeno magoke'mo miko vahekura frisnie. <sup>51</sup> Kaifasi'a agra antahi'zampinti ama kea osu'ne, hianagi ana kafufina ran mono kva (hai pristi) mani'neno, kasnampa ke huno Jisasima frino maka Jiu vahe zamaza hania zanku hu'ne, <sup>52</sup> Nehuno Jiu kuma vaheke Agra zamaza osugahie, e'inama hanuno'a hazagre'za vu'za e'za hu'naza vhahera zamazeri mago hanige'za Anumzamofo mofavre manigahaze. <sup>53</sup> E'i ana knareti erigafa hu'za, Jisasima ahe frisaza ke retro hu'naze.

<sup>54</sup> E'inama hazazanku Jisasi'a mago'ene Jiu vahe zamurera kana onte'ne. Hianagi atreno vuno mago ka'ma kokampi me'nea rankuma kaziga Efraimie nehzarega amage'nentaza naga'ane umani'naze.

<sup>55</sup> Menina Anumzamo Jiu vahe kinafinti zamare'nea knare (Pasova) ne'za ne kna atupa nehige'za, rama'amo'za kuma'zmi atre'za Jerusalemi mareri'za, ne'za nesagu zamagrazmi zamazeri agru huza retro hu'naze. <sup>56</sup> Ana nehu'za ra mono nomofo (tempol) kumapi oti'za mani'neza Jisasinku nehakre'za, tamagra zamagra anage hu'naze. Na'anе hutma tamage'sa nentahize? Agra ama (Pasova) nezanterea egahifi, omegahie? <sup>57</sup> Anante vugota hu'naza pristi vahe'ene, Farisi vahe'mo'za, anage hu'za rama'a vahepi hu'naze, iza'o Jisasima kesimo'a, eme tasamisigeta tagra azerisune hu'naze.

## 12

### *Maria'a, Jisasi agiare masave frent'nea naneke (Mat 26:6-13; Mak 14:3-9)*

<sup>1</sup> Hagi kinafinti Jiu vahe zamare'nea kna (Pasova) 6si'a zagegna atupa nehigeno, fri'nefinti azeri oti'nea ne' Lasarusi'ma nemania kumate Jisasi'a Betani uhanati'ne. <sup>2</sup> Anante Jisasi'ma hu'nea ne'zana retro hunte'naze. Mata'a ne'za netigeno Lasarusi'ene, mago'a vahe'ene kave'ne sipare mani'naze. <sup>3</sup> Trazamofo rafu'nareti tro hu'naza msavema, zago'amo mareri'nea masaventafe Maria'a erino, Jisasina agiare tagino frenteteno, anu azokateti eri ho'mu huntegeno, ana nomofona mana'amo avite'ne. <sup>4</sup> Hianagi Judas Iskarioti'a, mago amagenentea disaipol ne'mo, komoru huno Jisasina avreno ha' vahe zamazampi antesimo'a anage hu'ne, <sup>5</sup> Na'a hanigeta ama masavema 3 hantreti'a silva zagorera atreta, zago erita\* zamunte omne vhahera zamaza osugahuno? <sup>6</sup> Menima Judas Iskariotima ama kema nehiana, na'ankure agra zamunte omne vahe zamaza hunaku nentahino nosie, hagi agra kumza nere. Zago tafente kva nehia nekino, mago'a zagoma ome nentazana anampinkati musufa eritere nehia ne'mo anage higeno, <sup>7</sup> Jisasi'a anage hu'ne, **Asenante'saza knagu avega ante'nea**

\* **12:5** 11ni'a ikamofo mizankna hu'ne.

zanki, atrenkeno agra ana hino. <sup>8</sup> Na'ankure zamunte omne vahe'mo'za maka kna tamagra ne manigahaze, hianagi Nagra, tamagra nena maka kna omanigahue.

<sup>9</sup> Hagi maka Jiu vahe'mo'za antahi'zana Jisasi emani'ne hige'za, zamagra Jisasinke kenaku ome'nazanki, Lasarusima, fri'nefinti azeri oti'nea ne' kenaku e'naze. <sup>10</sup> Hianagi vugota pristi vahe'mo'za Lasarusi'nena ahe frinaku ke anaki'naze. <sup>11</sup> Na'ankure Lasarusinte'ma fore hu'nea'zanku, rama'a Jiu vahe'mo'za atre'za nevu'za Jisasi zamentinti hu'naze.

*Jisasi'ma Jerusalemi ufre'nea naneke  
(Mat 21:1-11; Mak 11:1-11; Luk 19:28-40)*

<sup>12</sup> Anante nanterana rama'a vahe'mo'za, kinafinti zamare'nea knagu antahimiza ne'za (Pasova) nenaza knare e'namo'za, Jisasi'a Jerusalemi ne-ea ke antahi'naze. <sup>13</sup> Antahite'za tofe zafamofo an'i'na (Palm tree) hantagi'za e'neri'za, ome ke'za amrara nehu'za kezati'za, **Taza huogu ke'za netune!**

**(Hosana!) Ramofo Agifi ne-ea nera agi'a hentesga hanune! Israeli vahe'mofo kinia agi'a hentesga hanune!** <sup>14</sup> Hagi Jisasi'a mago agaho ve tonki afu keteno, agumpi mrerino mani'ne, kasnampa vahe'mo'za korapa krente'naza kemo efore hu'ne. <sup>15</sup> **Korera osiho Saioni veara, Keho tamagri Kinimo'a, agaho ve donki afumofo agumpi manino ne-e.**

(Zek 9:9) <sup>16</sup> Hagi agri amage nentaza disaipol naga'mo'za e'inama pusante hiazana antahi so'e osu'naze. Hianagi Jisasi'ma hanave'afi mrerino, Ra agi erige'za zamagra zamagesa nentahi'za, e'i Agriku huno avontafepina krente'negeno, amazana Agrite fore hie hu'naze. <sup>17</sup> Ana higeno, rama'a vahe'mo'za, Jisasi'a kerifinti Lasarusi azeri otige'za ke'naza vahe'mo'za, mago'ene ome huama hume vu'naze. <sup>18</sup> Ama'na agafare, vahe'mo'za anahu kna hu'za ome Agrira ke'naze. Na'ankure vahe'mo'za nosaza kaguvaza (mirakol) hu'nea ke nentahi'za ome ke'naze. <sup>19</sup> Ana hige'za Farisi vahe'mo'za ohumi ahumi hu'za zamagra anage hu'naze, keho tagririra nerat're'za maka vea'mo'za Jisasi amage avriri'za nevze.

*Griki vahe'mo'za Jisasi kenaku hakre'naza naneke*

<sup>20</sup> Hagi ana zupage Griki vahepinti mago'a vahe'mo'za, kinafinti zamare'nea ne'za ne'knare mono hunaku mareri'naze. <sup>21</sup> Ana vahe'mo'za Galili kazigati Betsaida kumateti ne' Filipinte uhaniti'za antahige'za, ramoka Jisasi kenaku nehune. <sup>22</sup> Filipi'a eno Andruna eme asmitege'ne, tarega'moke vu'ke, Jisasina ome asmi'nae. <sup>23</sup> Jisasi'a anage huno kenona zani'rara hu'ne, **Vahe'mofo Mofavremo ra agi erisia kna atupa nehie.** <sup>24</sup> **Tamage hu'na neramasmue, witi ragamo'ma mopafi taniramino ofrisigeno'a anante megahie.** Hianagi taniramino mopa agu'afi frisigeno'a rama'a raga'a rentegahie. <sup>25</sup> Aza'o agragu'ma avesi antesimo'a, asimu'a atregahie. Iza'o ama mopafi mani'zama'a ha'rentesimo'a, manivava asimu'erigahie. <sup>26</sup> Iza'o, Nagri eri'za erinaku hanimo'a, namage eno. Nagrama umanisure, eri'za vahe nimo'enena anante umanigahie, iz'a'o, Nagri eri'za erisimofona, Nenfa'a ra agi amigahie.

*Jisasi'a frisia ke zamasmi'nea naneke*

<sup>27</sup> **Menina Nagu namemo kna navenesianski, na'anee hu'na Nagra hugahue, Nafa'nimoka, ama knare (aua) fore hania knazampinti naza huo, hianagi ama'na agafare ama knarera (aua) e'noe.** <sup>28</sup> Nafa'nimoka, ra kagi erio. Anante mago ageru monafinti eno amanage hu'ne, Hago Nagra erisaga hu'noanki'na, rune Nagra erisaga hugahue hu'ne. <sup>29</sup> Rama'a vahe'ma

atru hu'za anante oti'namo'za, ana ageru nentahi'za, monage nehie ne-hazageno, mago'amo'za ankeromo naneke hu nemigahie hu'za hu'naze. <sup>30</sup> Jisasi'a kenona'a anage hu'n'e, **Ama'na agerura Nagri naza hunakura nosianki, tamagri tamaza hunaku nehie.** <sup>31</sup> Menina ama mopa refkohu knae, menina ama mopafi kva hu'nea nera retufe atregahie. <sup>32</sup> Hanki, Nagri'ma mopafinti nazeri'sga hanige'na, hakare vahera zamare Nagrarega atregahue. <sup>33</sup> E'inagema hu'neana, fri'zamo avate'ma fore hanigeno frisnigu huama hu'n'e. <sup>34</sup> Hakare vahem'a atru hu'namo'za, Agrikura amanage hu'naze, tagrama kasegefinti'ma antahi'nonana, Kraisi'a manivava hugahie hu'neanki, nahigenka Kagra hunka, **Vahe'mofo Mofavrea azerisga hugahie nehane?** Iza'e ana Vahe'mofo Mofavre'a? <sup>35</sup> Hazageno Jisasi'a kenona anage huno zamasmi'ne, **Osi'a knafi Msamo'a tamagri amu nompina me'ne.** Msama me'enire kana nentenkeno hanimo'a tmagate oreno, iza'o hanimpima nevimo'a, iga nevio antahino keno nosie. <sup>36</sup> Masama me'enire, kagra Masagura kamentinti'a huo, e'inama hanunka kagra Masamofo mofavre manigahane. Jisasi'a anage huteno, Agra zamatreno vuno ome frakino mani'ne.

### *Jisasi'a vahepi eri'za eri'nea zamo fore hu'nea naneke*

<sup>37</sup> Jisasi'a rama'a kaguvaza (mirakol) huzmeri hu'neanagi, zamagra za-mentintia Agritera osu'naze. <sup>38</sup> Ana higeno kasnampa ne'mo Aisaia hu'nea kemofo avufa'a fore nehie, **Ramoka iza tagri kerera amentintia nehie?** **Ramofo hanave'amo'a izante eama hu'n'e?** (Ais 53:1) <sup>39</sup> E'i ana agafare vahe'mo'za zamentinti nosaze. Aisaia'a mago'ene anage hu'n'e, <sup>40</sup> **Ramo'a zamurga erisu nehuno, zamarimpa kafana erigi'ne, e'ina hanige'za zamurga nonke'za, zamarimpa erigisige'za zamagu zamagesa antahi ama nosuza, zamagu'a rukrehe osnage'na, zamazeri so'e osugahue hu'n'e.** (Ais 6:10.)

<sup>41</sup> Hagi ama'i zanku'ma Aisaia'ma hu'neana, na'ankure Jisasi'a hanave'afi mani'negeno ke'negu huno, Agriku hu'n'e.

<sup>42</sup> Ana hianagi hakare'a mono kva vahe'mo'za zamentinti Agrite hu'naze. Hianagi Farisi vaheku kore hu'za Jisasi'a, Kraisi'e hu'za huama osu'naze, anagema hanage'za mono nompinti (Sinagog) zamahe fegi atre'zanku kore hu'za osu'naze, <sup>43</sup> Na'ankure vahe'mo'za husga huzmante zanku nehu'za, Anumzamo husga huzmante zankura ontahi'naze.

### *Jisasi'a vagare naneke'a vahe zamufi hu'nea naneke*

<sup>44</sup> Jisasi'a ranke huno amanage hu'n'e, **Iza'o Nagrite amentinti nehim'o'a hanimo'a, Nagritekera amentinti nosianki, Agrama hunantege'na e'nomofonte amentinti hugahie.** <sup>45</sup> Iza'o Nagri'ma nenagemo'a, hunantege'na e'nomofonte nege. <sup>46</sup> Nagra ama mopafi Masa e'noe, maka vahe'mo'za Nagrite zamentinti hanamo'za hanimpina omanigahaze.

<sup>47</sup> Iza'o nanekeni'a nentahino, amage nontemofona nanekea huontegahue. Na'ankure Nagra ama mopafi vahe refko hunaku ome'noe. Hianagi mopafi vahe zamaza hu'na zamavarenaku e'noe. <sup>48</sup> Iza'o Nagri nenatrelo, ke'ni'a ontahisimofona, e'i anamofona refko'ma haniana, ama nanekema nehua nanekemo maka'za vagare knare, henka'a refko huntegahie. <sup>49</sup> Na'ankure Nagrani'a antahintahifinti ama nanekea nosue, hianagi Nfanimo Agra hunantege'na e'nomo, zamasnio hianke ana naneke'age nehue. <sup>50</sup> Nagra antahi'noe, Agrama hiho hia kefi mani vava asimura me'ne. E'ina hu'negu Nagrama nehua kea Nenfa'ma huoma hia ke'age nehue.

# 13

*Amage'ma nentaza disaipol naga Jisasi'a zamaga sese hu'nea naneke*

<sup>1</sup> Hagi menina kinafinti zamare'nea knagu antahimiza (Pasova) ne'za nekna atupa higeno, Jisasi'a antahi'ne, ama mopa atreno Nefantega vania kna egeno, amage nentaza disaipol nagara, Agrama zamesi nezmantea zamo'a atupare ehanati'ne.

<sup>2</sup> Jisasi'a amage' nentaza disaipol naga'an e ne'za nenegeno, Hankromo (Sata) Judas Iskarioti, Saimon nemofo rimpafi ha' vahe zamazampi komoru huno avrentesia antahi'zana eme ante'ne. <sup>3</sup> Hagi Jisasi'a antahi'ne, Nefa'a maka'zana Agri azampi ante'ne, Anumzamofonteti e'neankino, ete Anumzamofontega vugahie. <sup>4</sup> Ne'za nena finti otino, anakre ku'a zafi nenteno, tauri erino afafafu rugagino anakine. <sup>5</sup> Anante Jisasi'a zompaifi ti taginteno, amage nentaza disaipol naga zamaga agafa huno sese huteno, afafafu rugagi'nea taurinu zamagia eriho'mu huzmante'ne. <sup>6</sup> Anante Saimon Pitante aga sese hunte'naku egeno, agra Jisasinku anage hu'ne, Ramoka nagia sese hugahano? <sup>7</sup> Higeno Jisasi'a kenona anage huno asmi'ne, **Menima ama nehuazana kagra ontahi'nane, hianagi henka'a antahi ama' hugahane.** <sup>8</sup> Pita'a anage huno Jisasina asmi'ne, Kagra nagia sese osu'tfa hugahane! Higeno Jisasi'a anage huno kenona'a hu'ne, **Nagra kagiama sese osanugenka, Nagranena omanigahane.** <sup>9</sup> Higeno Saimon Pita'a anage huno Jisasina asmi'ne, Ramoka nagiarafana sesera osuo. Hianagi anazanke hunka nazane, nanune sese huo! <sup>10</sup> Higeno Jisasi'a anage huno asmi'ne, **Iza'o ko'ma tima fre'nemo'a, agiage sese hugahie.** E'ina nehuno **avu sese huno manigahie.** **Hanki kagra ko avu sese hu'nane, hianagi ana maka'mota avu sese osu'naze.** <sup>11</sup> Na'ankure mago'mo komoru huno ha'vahe zamazampina avrentesimofona, Agra ko antahi'ne, e'ina hu'nea agafare, tamagra maka'mota avu sese osu'naze hu'ne.

<sup>12</sup> Anage huteno Jisasi'a zamagia sese huvaga rezmantete'no, Nakre ku'a erino mani'neno hu'nere umaniteno, Jisasi'a anage huno zamsmi'ne, **Amazama tamagri'ma hunermantoana antahi'nazo?** <sup>13</sup> **Tamagra Nagrikura rempi hurami Ne'ene, Rantie nehzana, tamagra tamage nehaze, Nagra ana nere.** <sup>14</sup> **Nagrama Rantimi manina, hurmasmi Ne'mona tmagia sese hunermantesugeta, tamagra nena anazanke huta rumokizmi zamagia, sese ohunte ahunte hihio.** <sup>15</sup> **Nagra hurmeri nehuanki, tamagranema anahu kna hutma rumokizmi'a zamagia sese huzmantegahaze.** <sup>16</sup> **Tamage hu'na Nagra nermasmue, kazokzo eri'za vahe'mo'a kva'amofona agateore-gahie.** Kema erino vnimo'a, katogema huntegeno vu'nemofona agateore'ne. <sup>17</sup> **Tamagrama amazama keta antahita nehuta, anazama hanutma asomu erigahaze.**

*Jisasima komoru hu'za ahesaza naneke  
(Mat 26:20-25; Mak 14:17-21; Luk 22:21-23)*

<sup>18</sup> Hagi nagrama nehuana makamotagura nosue, Nagra huhampri'noa vahera antahi'noe. Hianagi Anumzamofontega avontafepi kre'nea nanekea eri knare hugahie. **Nagrane breti nenemo ha'renantegahie huno kre'neana, hago avufga'a fore hugahie.** (Sam-Zga 41:9) <sup>19</sup> Meninena Nagra anazana efore osu'nege'na neramasmue, anazama efore'ma hanigeta, tamagra tamentinti

nehuta, ana nere hutma Nagrikura hugahaze. <sup>20</sup> Tamage hu'na neramas-mue, Nagrama huntesugen vania vahe, avreno azeri so'e huntessimo'a, Nagri navareno nazeri so'e hunantegahie. Iza'o Nagri'ma nazeri so'e hanimo'a, Agra hunantege'na e'nomofo azeri so'e hugahie.

<sup>21</sup> Hagi Jisasi'ma anage huvgama reteno, agu'amo kna nehigeno anage hu'ne, **Tamage hu'na nermasmue, tamagripinti mago'mo ha' vahe azampina navre antegahie.** <sup>22</sup> Hige'za amage nentaza disaipol naga'mo'za zamagra zamagra oge age nehu'za, inamo anara hunaku higeno nehie hu'za hu'naze. <sup>23</sup> Anate amage' nentaza disaipol nagapinti, Jisasi'ma avesi nentemo, azant-maga kaziga tavaonte mani'ne. <sup>24</sup> Ana higeno Saimon Pita'a avesima nentea disaipol nera avame'name huno, Izanku Jisasi'a nehifi antahigenka ko huno asami'ne. <sup>25</sup> Higeno anante avesima nentea ne'mo, Jisasi asumpi mase kantiteno, anage huno Agrira antahige'ne, Ramoka ana nera iza'e? <sup>26</sup> Jisasi'a kenona anage hu'ne, **Bretima sosifima rete'na amisuana e'i ana nere**, nehuno bretia sosifi reteno, Saimon Iskarioti nemofo Judasina ami'ne. <sup>27</sup> Ana bretima netegeno, Sata'a havi avamumofo kvamo agu'afi ufre'ne. E'ina nehigeno Jisasi anage huno asmi'ne, **Ina knazama hunaku'ma hnunka, kvune antenka huo.** <sup>28</sup> Mani'ne'za ne'za ne'naza vahe'mo'za, anama Judasinku'ma hia kea na'a agafare hu'nefi, antahi amara osu'naze. <sup>29</sup> Judasi zago taferote (bogisi) kva nehia neki'za, mago'am'o'za antahi'zana mago'a upama hunona ne'za ome miza sege, amunte omne vahe, zago ome zaminogu Jisasi'a hunente hu'za zamagesa antahi'naze. <sup>30</sup> Ana higeno, Judasi'a bretima nehana nehuno'a, atiramino meg'i vu'ne. (Ko hani hu'negeno ana hu'ne.)

### *Kasefa kasegemofo naneke*

(Mat 26:31-35; Mak 14:27-31; Luk 22:31-34)

<sup>31</sup> Judasi'ma meg'i a vutegen, Jisasi'a anage hu'ne, **Menina Vahe'mofo Mofavremo ra agi erisigeno, Anumzamo'a ra agi Agriteti eri'nia kna ne-e.** <sup>32</sup> Anumzamo ra agi Agriteti eritesuno'a, anazanke huno Anumzamo ra agi Agrira amigahie, nehuno hantaka'a ra agi amigahie. <sup>33</sup> Hagi mofavre zagamota antahih, Nagra osi'a knafi tamagra nena manigahue. Tamagra Nagrikura hakregahaze, Jiu mono kva vahera anankea ko zamasmi'noe. Meninena ana kege neramasamue, Nagrama inantega vanurega tamagra omegahaze. <sup>34</sup> Nagra kasefa kasege tamagrira neramue, Nagrama navesi neramantoa kna huta rumokizmia zmesinezmanteta, anahu kna hutma ovesinte avesinte hiho. <sup>35</sup> Tamagrama mago'mofo ovesinte avesinte nehnage'za, maka vahe'mo'za nege'za, tamagra Nagri namage nentaza disaipol naga mani'naze hu'za hugahaze.

<sup>36</sup> Higeno Saimon Pita'a anage huno Jisasinkura hu'ne, Ramoka, kagra iga vunaku nehane? higeno Jisasi'a ana kenona'a huno, **Nagrama vanurega, menina kagra navaririnka omegahane, hianagi kagra henka ega-hane.** <sup>37</sup> Higeno Pita'a anage Jisasinku hu'ne, Ramoke, na'a hanige'na nagra menina Kagri kmagera omegahue? Nagra Kagriteku hu'na frinaku menina tro nehue. <sup>38</sup> Higeno Jisasi'a kenona'a anage huno asami'ne, **Nagrikura hunka frigahano?** **Tamage hu'na negasamue, Nagrikura onke'noe hunka 3'a zupa vahane hutesankeno, henka kokoregea hugahie.**

<sup>1</sup> Hagi atrenkeno tamagu'amo'a kna osino, Anumzamofonte tamentinti nehuta, anahu kna huta Nagrite'ene tamentinti hiho. <sup>2</sup> Nenfa nompina rama'a hunaraginte nona me'nne, omne'neresina Nagra ko tamasmusine, Nagra, nonkuma tamia ome retro hunaku nevue. <sup>3</sup> Nagrama vu'nna nonkumatmi ome retro hutesu'na, ete e'na eme tamavresugeta, Nagrama umanisire, tamagra Nagrane umanigahaze. <sup>4</sup> Hagi Nagra inantega vugahuo, tamagra antahi'naze. <sup>5</sup> Tomasi'a anage huno Jisasina asmi'nne, Ramoke tagra ontahi'none, iga Kagra vugahane, tagra inankna huta ana kana keta antahita hugahune? <sup>6</sup> Higeno Jisasi'a anage huno asami'nne, Nagra kana mani'na, tamage ke manina, asimumofo agafa Nagra mani'noe, mago'mo'a aru kantetira Nenfantera ovugahie. A'o, Nagriteti vugahie. <sup>7</sup> Nagri'ma nagenka nantahinka kagra hantesina, Nenfanena anahu kna hunka kenka antahinka kagra hantesine, meni agafa hunka Agrira nentahinka negane. <sup>8</sup> Filipi'a anage huno Agrira asami'nne, Ramoke Negafana tveri hugeno tagrina knare huranteno. <sup>9</sup> Jisasi'a anage huno asmi'nne, Nagra tamagnena rama'a kna mani'noanki, Filipiga kagra nahigenka Nagrira nagenka antahinka osu'nane? Iza'o Nagri'ma nagemo'a, Nenfana ke'ne! Nahigenka kagra hunka, Negafana naveri huo hunka nehane? <sup>10</sup> Nenfampi Nagra manugen, Nenfa'a Nagripi mani'ne hua kegura, nahigenka kamentintia nosane? Nagra nagesafinti kea kagrira nonkasamue. Hianagi Nenfa'a nagu'afi mani'nemo, Agra kaguvaza hu eri'za e'nerie. <sup>11</sup> Tamentintima hanazana, Nagra Nenfampi manugen, Nenfa'a Nagripi mani'ne hiho, hu'neanagi ana'ma osnutma kaguvazama eri forehu eri'zama eri'nogu nen-tahitma tamentinti hugahaze.

<sup>12</sup> Tamage hu'na Nagra neramasmue, iza'o Nagrite amentinti hanimo'a, Nagrama e'nerua eri'zana anahu kna huno kaguvazama eri forehu eri'za e'nerino, Nagatereno ra eri'za erigahie, na'ankure Nagra Nenfantega vugahue. <sup>13</sup> Inankna zanku'ma Nagri nagifi nantahigesazana, Nagra amne hugahue. Ana hanugen Nenfa'a ra agi Nemofompinti erigahie. <sup>14</sup> Tamagrama inankna zankuro Nagri nagifima nantahi kesage'na, Nagra anazana amne hugahue.

### *Jisasi'a Avamumofo eri'zanku rempi huzami'nea naneke*

<sup>15</sup> Jisasi'a mago'an huno, Nagri'ma navesinantesuta keni'a amage antegahaze. <sup>16</sup> Nenfana antahigesugen, Agra mago tamaza hu'zana tamisnigen, Agra tamagrane manivava hugahie. <sup>17</sup> E'i ana tamaza hu'zana tamage Avamure, ama mopafi vahe'mo'za e'origahaze. Na'ankure zamagra ke'za antahi'za osu'naze. Hianagi tamagra Agrira (Avamura) keta antahita hu'naze. Na'ankure Agra tamagrane mani'neno, tamagu'afi manigahie.

<sup>18</sup> Nagra tamatresugetma megusa mofavregna huta omanigahaze. Nagra tamagritega egahue. <sup>19</sup> Osi'a knafi mopafi vahe'mo'za Nagrira onagegahaze, hianagi tamagra Nagrira nagegahaze. Na'ankure Nagra mani'noankita, tamagranena anahu kna huta manigahaze. <sup>20</sup> E'i ana knazupa, tamagra antahigahaze Nagra Nenfana agu'afi manugeta, tamagra Nagri nagu'afi manisagena, Nagra tamagri tamagu'afi manigahue. <sup>21</sup> Iza'o Nagri kasegema amage antesimo'a, Nagrira avesinantegahie, iza'o Nagri'ma avesinantemofona Nenfa'a agrira avesintegahie, hanige'na Nagra avesintena, Nagra'ni'a agrite before hugahue. <sup>22</sup> Higeno ru Judasi'a amanage huno Ramofona antahig'e, Nankna hunka Kagra tagritera eama nehunka, ama mopafi vahetera eamara osugahane? <sup>23</sup> Higeno Jisasi'a ana kenona'a anage huno

zamasmi'ne, Iza'o Nagri'ma avesi nantesimo'a, ke'nia amage antesigeno, Nenfa'a avesintena tagra, agrane emanigahune. <sup>24</sup> Iza'o Nagri'ma avesi onantesimo'a, Nagri kea amage ontegahie. Ama kema nentahizana Nagri kea omne'ne, hianagi Nenfa'ma hunanteg'e na e'nomofa ke nontahize.

<sup>25</sup> Ama zantaminku'ma Nagra nehuana, tamagrane mani'nena nehue. <sup>26</sup> Hianagi tamaza hu'zana, Ruotge Avamu, Nenfa'a Nagri nagifi huntesigeno eno, Agra maka'zanku eme rempi huramigahie. Nagrama maka'zanku tmasmi'noana hurmagesa hugahie.

<sup>27</sup> Tamarimpa fruza Nagra tamagripi nentoe, Nagra narimpa frua tamagri neramue, ama mopafi vahe'mo'za neramizankna tamarimpa frua Nagra noramue. Atrenkeno tamagu'amo'a kna nosina korora osiho. <sup>28</sup> Tamagra nentahizage'na Nagra tamagrira tamasmi'na, tmatre'na vute'na, ete tamagrite egahue hu'noe. Tamagrama Nagri'ma navesinatazaresina muse hazaresine. Na'ankure Nagra Nenfantega vugahue. Nagrira Nenfa'a nagtereno Ra mani'ne. <sup>29</sup> Nagra menina fore osu'negena neramasmue, fore'ma hania zupa, tamagra Nagrite tamentinti hugahaze. <sup>30</sup> Nagra za'zatera nanekea ontamasmigahue, ama mopa kva nehiā ne' Sata'a hago ne-e, agrira hanave'a omne'neankino, Nagrira nagateoregahie. <sup>31</sup> Hianagi ama mopafi vahe'mo'a antahino keno hugahie, Nagra Nenfana navesinentoe, Nagra Nenfa'ma huo huno'ma humanante'neaza nehuanki, otinketa amafintira vammeno.

## 15

### *Waini zafane, azankuna'amofo naneke*

<sup>1</sup> Jisasi'a mago'ane anage hu'ne, Nagra tamage waini zafamofo nena'a mani'noe. Nenfa'a waini hozamofo nef'a'. <sup>2</sup> Hakare azankuna'amo Nagripi me'neno raga reontesimofona, Agra akafri netreno, hakare azankuna'amo raga rentesiana, mago'ene traga huno eri fatgo hanigeno, aguheno raga rentegahie. <sup>3</sup> Tamagra ko agru hu'naze, na'ankure kema tamasmi'noa kemo tamazeri agru hu'ne. <sup>4</sup> Nagri nagu'afi emaninenke'na, Nagra tamagri tmagu'afi mani'neno. Zafa azankuna'amo agra avesitera raga'a reontegahie, waini zafare azankuna'amo ru okamare snuno'a raga reontegahie. Hagi Nagrite'ma ruokamare'sutma raga'a reontegahaze. <sup>5</sup> Nagra waini zafa mani'nogeta, tamagra azankuna' a mani'naze. Iza'o Nagripi manige'na agripi mani'nomo'a, rama'a raga renente, Nagri'ma natresuta mago'zana osu'tfa hugahaze. <sup>6</sup> Mago vahe'mo'ma Nagri'ene tragoteno omanisimofona, azankuna eritru hu'nazageno osaparea kna hina, mate vu'za tevefi kregahaze. <sup>7</sup> Tamagrama, Nagri'ene tragoteta mani'ne'nageno, naneke ni'amo tamagri tamagu'afi'ma me'nena, tamesinia zankuma nantahigesazana amne erigahaze. <sup>8</sup> Tamagra rama'a raga renentenkeno, Nenfa'a ra agi erisige'za nege'za, Nagri namage nentaza disaipol vahere hu'za tamagrikura hugahaze. <sup>9</sup> Nenfa'ma, Nagri'ma navesi nante'neaza hu'na, Nagranena anahu kna hu'na tmesi nermantoanki, ana navesimofo agu'afi maniho. <sup>10</sup> Tamagrama kasege ni'ama amage' antesuta, tamagra Nagri navesimofo agu'afi manigahaze, Nagrama, Nenfa kasegema amage ante'na, Agri avesizamofo agu'afi mani'noankna huta manigahaze. <sup>11</sup> Ama zanku'ma Nagra nermasmuana, Nagri muse zamo tamagri tamagu'afi me'nigeno, musezantmimo'a avitegahie.

<sup>12</sup> Ama'i Nagri kasege, tamararunku ovesinte, avesinte hiho. Nagrama, tamagri'ma navesi tamante'noa kna hiho. <sup>13</sup> Mago'mo'ma rone'agu

avesinteno, agra asimuma atreno frisimo'a, tusi'a ugota hu'nea avesiza huzmerigahie. <sup>14</sup> Nagrama nerasmusma kasegema amage antesutma Tamagra, Nagri rone manigahaze. <sup>15</sup> Nagra ru'ene kazokzo eri'za vahe'ni'e hu'na tmagrikura osugahue, na'ankure kazokzo eri'za vahe'mo'a kva'amo'ma hiazana ontahi'ne. Hianagi Nagra rone'nimote hu'na tmagrikura nehue, na'ankure Nenfantegati maka'zama Nagrama antahuazana, tamagrira nerasmusme. <sup>16</sup> Tamagra, Nagrira huhampri'onante'naze, hianagi Nagra, tamagrira huhampritamantena, tamazeri ofi'noe, vuta nena raga'a ome rentesageno, ana ragamo me'nena, na'ankuro Nagri nagifi Nenfama antahigesageno'a, Agra amne tmigahie. <sup>17</sup> Nagra ama kasege nerasmusme, tmararuna ovesinte avesinte hoho.

### *Ama mopafi vahe'mo'za ha'rezmanter'saza naneke*

<sup>18</sup> Jisasi'a amanage huno zamasmi'ne, Ama mopafi vahe'mo'za ha'remantesaza zanku kva hoho, na'ankure ese agafare, Nagri ha'renante'naze. <sup>19</sup> Ama'na mopafi vahe mani'naresina, ama mopafi vahe'mo'za tagri vhahere hu'za zamesi rmantasine, ana hu'neanagi na'ankure tamagra ama mopafi vhahera omani'naze. Hianagi Nagra ama mopafinti tamagrira tmavre'noe, ana agafare ama mopafi vahe'mo'za hara reneneramantaze. <sup>20</sup> Ko'ma tamasmi'noa kegu tamagesa antahihoko, kazokzo eri'za ne'amo'a, kva vahe'a knara osu'ne. Nagri'ma nazanza ante'nesu'za, tamagri enena anahu kna hu'za tamazanza antegahaze, ke'ni'a amage antenare'sina, tamagri kea ana zanke hu'za antahizasine. <sup>21</sup> Hianagi Nagri nagimo tamagripi me'nenigeno'a, e'ina hu'zana hurmantegahaze, na'ankure hunantege'na e'nomofona ke'za antahihoko osu'nagu ana hurmategahaze. <sup>22</sup> Nagrama naneke e'na eme ozmasmuasina, zamagrira kumi'zmi omanesine. Hianagi menina kumi'zmia eri fraki kazamia omnegashe. <sup>23</sup> Higeno Nagri'ma ha'ma renantesimo'a, ana zanke huno Nenfana ha'renente. <sup>24</sup> Mago'a vahe'mo'za e'orinaza kaguva eri'zama zamagri amu'nompi e'ori'noasinia, kumi'zmia omnesine. Hianagi menina kaguva eri'zani'a kazanagi, Nagri'ene Nenfanena ha'renerantaze. <sup>25</sup> Menima anazama nehazana, zamagri kasegefi kre'naza ke eri knare nehaze, *Mago havizana Nagra osunoge'za, hara renenentaze.* (Sam-Zga 69:4) <sup>26</sup> Hagi tamazama hu'zama huntesugen Nenfantegati tamagrite'ma esuno'a, Agra Tamage Avamukino Nagri nagenkea eriama hugahie. <sup>27</sup> Tamagranena ana zanke hutma Nagri nanekea huama hugahaze, na'ankure tamagra Nagrane mani'nage'na, eri'zana eri agafa hu'na eri'noe.

## 16

<sup>1</sup> Hagi ama nanekea ru tamentintifinti evuramizanku, menina neramusme. <sup>2</sup> Jiu vahe mono nompinti (sinagog) tamahenati atregahaze. Mago kna ne-eankino, tamahe frisu'za zamagesa antahisazana Anumzamofo eri'za e'nerune hu'za antahigahaze. <sup>3</sup> E'na hu'za zamagra hurmantegahaze, na'ankure Nenfane Nagri enena ontahi'nagu anara hurmantegahaze. <sup>4</sup> Hianagi ama zanku Nagra nermasmuankino, ana zagegna (aua) efore'ma hina, Nagrama tamasmi'noa kegu tamagra antahigahaze. Ese agafare Nagra ontamasami'noe, na'ankure Nagra tamagrane mani'nogu ontamasmi'noe.

### *Ruotge Avamu'mo eri'za erisia naneke*

<sup>5</sup> Hianagi menina Agra hunantege'na e'nomofonte, Nagra vunaku ne-hugeta mago'moka nantahigenka, iga vunaku nehane? hunka nantahi

nonkane. <sup>6</sup> Hianagi vugahue hu'na Nagrama tamasmua kemo, tamagri tamagu'a erigna nehie. <sup>7</sup> Hianagi Nagra tamage neramasmue, tamagrime eme tamaza hanigu vugahue, na'ankure Nagrama tamatre'na ovanugen'a, tamaza hu'zana tamagratera omegahie. Hianagi Nagrama vanuna, huntanena, Agra tamagritega egahie. <sup>8</sup> Hankino Agra esuno'a, mopafi vahe'mokizmi kumi'ene, Anumzamofo fatgo avu'ava zane, henkama refko huno keaga humzantesiaza zameri nehuno, <sup>9</sup> kumi zamimofonku zamasmigahie. Na'ankure zamagra Nagritera zamentintia osu'naze. <sup>10</sup> Na'ankure fatgo navu'navama hanuana, Nenfantega vanugeta, tamagra Nagrira onagegahaze. <sup>11</sup> Hagi kema refko haniaza eme huramerigahie. Na'ankure ama mopa kva hu'nemofona hago keaga hunte'noe.

<sup>12</sup> Nagra mago'a rama'a naneke tamasmusine, hianagi menina tamagra antahise osugahaze. <sup>13</sup> Hianagi Tamage Avamu'ma esuno'a, antahi antahimofona eri ama hina tamage nanekea keta antahita hugahaze. Na'ankure Agra'a antahintahi'ane, hanave'arera ana nanekea osugahie, hianagi na'ano Agrama antahisia kege nehuno, henkama esia zamofonku tamasmigahie. <sup>14</sup> Avamumo'a, Nagri nagi erisaga hugahie, na'ankure Nagripi me'neazana erino tamagrira tamasmigahie. <sup>15</sup> Maka'zama Nenfa'ma ante'neana Nagri'zane hu'na hu'noe, e'ina hu'negu Avamumo'a Nagripinti ana nanekea erino tamagrira tamasmigahie.

### *Musezamo zamarimpa knazamofo kumara erigahie hu'nea naneke*

<sup>16</sup> Hagi Osi'a knafi omani'nanena tamagra onagegahaze, hagi ete osia knafi tamagra nagegahaze. <sup>17</sup> Mago'a amage' nentaza disaipol naga'mo'za zamagra zamagra ohumi ahumi nehu'za anage hu'naze, Ama'i nankna naneke tasmino, osi'a knafi tamagra onagegahaze nehuno, ete osi'a knafi nagegahaze nehie. Na'ankure Nagra Nenfante vugahue nehie? <sup>18</sup> Amage' nentaza disaipol naga'mo'za anage hu'naze, Ama'i na'anku Agra anage huno, osi'a knafine nehie? Tagra ontah'i'none, na'anku Agra nehifi ontah'i'none hu'za hu'naze. <sup>19</sup> Zamagra antahigenaku Jisasina nehazageno nentahino, anage huno zamasmi'ne, Nagra hu'na, osi'a knafi onageta, ete osi'a knafi nagegahaze hua kegu, tamagra antahintahi hakare nehazo? <sup>20</sup> Tamagerfa hu'na neramasgue. Tamagra tamavunu nehina ranke huta zavira ategahaze, hianagi ama mopafi vahe'mo'za muse hugahaze. Tamagra tamarimpa kna hugahazanagi ete tmarimpa knamo'a eri rukrahe hanigeta, muse hugahaze. <sup>21</sup> A'mo mofavrema nenteno'a atagu nehie, na'ankure mofavrema kasente kna egeno'e, hianagi mofavrema ksentete'no'a, ana atagura agesa nontahie. Na'ankure ama mopafi mofavrema kasentea muse nehie. <sup>22</sup> E'i ana hu'negu tamagra menina zavira netaze, hianagi Nagra henka nermage-sugeno, tamagu'amo muse nehina, mago'mo ana musezana tamagripintira eri otregahie. <sup>23</sup> Ana knarera Nagrira mago'zankura nantahi onkegahaze. Tamagerfa hu'na tamagrira neramasgue, Nenfama mago zanku'ma Nagri nagifima antahigesageno'a, amne tamigahie. <sup>24</sup> Korapara Nagri nagifina mago'zankura antahi onke'naze. Hianagi tamagra antahigetma erigahaze, e'ina hanageno muse zantmimo'a avitegahie.

<sup>25</sup> Nagra amanage hu'na fronka kefinti neramasgue, mago kna ne-eanki'na, ana kna zupa fronka kefintira ontasmigahue. Hianagi huama hu'na Nenfankura tmasmigahue. <sup>26</sup> E'i ana knazupa, Nagri nagifi Nenfana antahigegahaze. Nagra tamagri tamagi eri'na, Nenfana asmigahue hu'na nosue. <sup>27</sup> Hagi Nenfa'a tamagrira Agra'a avesineramante, na'ankure

tamagra Nagrira tamavesinenteta Nagrikura Anumzamofonteti e'ne huta tamentinti hu'naze. <sup>28</sup> Nagra Nenfantegati e'na, ama mopafina e'noe, hianagi ama mopa ete atre'na Nenfa hirega vugahue.

<sup>29</sup> Hige'za Agri amage' nentaza disaipol naga'mo'za anage hu'naze, Ko menina Kagra amate ke huama nehunka, fronka kea osane. <sup>30</sup> Tagra menina antahi'none, Kagra maka'zana antahi'nane, mago zankura vahe'mo'a kagenoka osugahie. E'na'ma hanazante tagra tamentinti nehuna, Anumzantegati e'na'e huta nehune. <sup>31</sup> Jisasi'a kenona huno, Menina tamagra tamentinti nehazo? <sup>32</sup> Keho, knamo'a (aua) hago eno ama e'ne, mago mago'moka nonkarega nevunka, natresanke'na Nagrake manigahue, ana hugahazanagi Nagrakera omanigahue. Na'ankure Nenfa'a Nagrane mani'ne. <sup>33</sup> Ama'ina nanekema Nagra neramasmuana, Nagripinti tamarimpa fru erigahaze. Ama mopafina hazenke zane, tamasuzamo egahianagi, oti hanavetihio. Na'ankure Nagra ama mopafi hanavea azeri haviza hu'na hago agatere'noe.

## 17

### *Jisasima ra agi aminogu Nefantega nunamu hu'nea naneke*

<sup>1</sup> Hagi Jisasi'a ana naneke hvaretreno, Agra kesga huno monafi negeno amanage hu'ne, Nenfaga hago kna (aua) eforehie, Negamofona ra agi amigeno, Negamofo anazanke huno, Kagrrira rankagi kamo. <sup>2</sup> Maka vahete kvahu hihamu ami'nane, ana hankeno maka ami'nana vahera, Agra zamaza huno manivava mani'za zamigahie. <sup>3</sup> Ama'i manivava mani'zane hu'za, zamagra kage'za antahi'za nehu'za, magoketfa tamage Anumzane nehu'za, Jisas Kraisi huntankeno e'ne huza keza antahiza hugahaze. <sup>4</sup> Nagra ama mopafi Kagri kagi eri ra nehu'na, Nagri'ma eri'za erio hunka nami'nana eri'zana hago eri vagare'noe. <sup>5</sup> Menina Nenfaga, Kagra kaziga navrento, korapa'ma mopa fore osu'nere mani'neta hu'no'a konariri zampi, Kagrane umanisu'e. (Eks-Utr 3:14.)

<sup>6</sup> Nagra Kagri kagi kagenkeka'a kokankoka vahe'pinti'ma avare nami'nana vahera zamasmi' ama hu'noe. Zamagra Kagrika'a vahe maninagenka Kagra Nagrira nami'nane. Hagi zamagra keka'a antahi'za amage ante'naze. <sup>7</sup> Menina maka nami'nana zankura, Kagra nami'nane hu'za ke'za antahi'za hugahaze. <sup>8</sup> Na'ankure Kagrama nasm'i'nana kea Nagra zamasmi'noe. Zamagra anankea eneri'za Nagrikura tamage Agriteti e'ne nehu'za, Agra huntogeno e'ne hu'za zamentinti hu'naze.

<sup>9</sup> Nagra, zamagri zamagi' eri'na nunamuna nehue. Nagra kokankoka vahe zamagi' eri'na nosue, hagi Nagri'ma nami'nana vahe zamagi' eri'na nunamuna nehue. Na'ankure zamagra Kagri suza mani'naze. <sup>10</sup> Hagi maka Nagri vahe'mo'za Kagri vahere, maka Kagri vahera Nagri vahere, ana vahe'mo'za Nagrira ra nagi nenamize. <sup>11</sup> Mago'ene Nagra ama mopafina omanigahue, zamagrazmi ama mopafina manigahaze. Hige'na Nagra Kagritega neoe. Ruotge hunana Nenfaga, Kagrama ante nami'nana nagifi zamagu vazisanke'za, tagrama mago huno'ankna hu'za zamagra mago hugahaze. <sup>12</sup> Nagra zamagranema mani'nena, Kagri kagire manis-naze hu'ha zamagu'vazina kva huzmante'noe. Kagrama nami'namokizmia mago'mo'a fanane osu'ne, hianagi magoke'mofo fanane hinogura huham-printe'ne, ana hanigeno Anumzamofa avontafe'mo hu'nea kantera avufa'a fore hugahie. (Sam-Zga 41:9) <sup>13</sup> Hu'neanagi Nagra, Kagrite menina ne-e'na, ama mopafina Nagra amanahu kea nehuankino, Nagri muse zamo'a (joy)

zamagripi avitegahie. <sup>14</sup> Nagra, Kagri nanekea ko zamasmi'noe, huge'za mopa kagi'afi vahe'mo'za zamesra huzmante'naze, na'ankure zamagra ama mopapi vahera omani'naze, Nagrama ama mopapi vahe'ma omani'noa kna hu'naze. <sup>15</sup> Nagra ama mopareti zamavare atrogura nosue, hagi havi ne'mofo azampinti zamazeri anovazisanegu nehue. <sup>16</sup> Zamagra ama mopapi vahera omani'naze. Nagra'enena anahu hu'na, ama mopapi vahera omani'noe. <sup>17</sup> Tamage kefi zamazeri avusese hunka zamazeri otage huo. Kagri keka'amo'a tamage me'ne. <sup>18</sup> Kagrama hunantanke'na ama mopafina e'noankina, Nagra ana zanke hu'na mopa kagi'afi hunezmantoe. <sup>19</sup> Nagra zamagri huzmeri'na avusese hu'na mani' otage hu'noe, ana nehuanki'za zamagranena anazanke hu'za Kagrite avusese nehu'za, tamage hu'za mani' otage hugahaze.

<sup>20</sup> Nagrima namage nentaza disaipol nagakuke hu'na nunamuna nosue, hagi ke'ni'a huama nehzage'za, Nagrite zamentinti hanaza naga'enenu nehue. <sup>21</sup> ana hanige'za zamagra maka'mo'za magoke hu'za, Nenfaga, Nagrane mago huta mani'no'a kna hu'za, Tagra ene mago hu'za zamagra mani'nesage'za, kokankokati vahe'mo'za nege'za, Kagra hunantanke'na e'noe hu'za zamentinti hugahaze. <sup>22</sup> Kagrama hanavema Nagri nami'nana hanavea, Nagra zamagri zami'noe. Tagrama mago huta mani'no'a kna hu'za manisazegu zami'noe. <sup>23</sup> Nagra zamagripi manugenka, Kagra, Nagripi mani'nane, hanige'za zamagra magoke zamarimpa hu'za manigahaze. Ana hananke'za ama mopapi vahe'mo'za nege'za, Kagra hunantanke'na ama mopafina e'noe hu'za keza antahiza nehanagenka, Nagri'ma kavesi nante'nana kna hunka, zamavesi nezmantane huza keza antahiza hugahaze. <sup>24</sup> Nenfaga, Nagri'ma nami'nana vahe'zaga, Nagrama manisufi manisazegu nave'nesie. Ana hu'ne'za Nagri'ma nami'nana hanavea kesaze, na'ankure Kagra korapa mopa omne'nea knafi, Nagrira kavesinantenka kagu'a antenka hanavea nami'nane. <sup>25</sup> Fatgo Nenfaga, kokankoka vahe'mo'za kage'za antahi'za osugahazanagi, Nagra kage'na kantahi'na hu'noe, hagi amama namage'nentaza naga'moza Kagra hunantanke'na e'noe hu'za keza antahiza nehaze. <sup>26</sup> Nagra, Kagri kagi'a hu'ama hu'na zamagrira nezmasamue, hagi'na mago'ene hagerfi'na hu'ama hu'na zamasmigahue. Kavesima nenantana kavesi zamo'a, zamagri zamagu'afi mesige'na, Nagra anazanke hu'na zamagripi manigahue.

## 18

*Judasi'a ha' vahe zamazampi Jisasi avarente'nea naneke  
(Mat 26:47-56; Mak 14:43-50; Luk 22:47-53)*

<sup>1</sup> Hagi ana nanekema hvaretreno, Jisasi'a atreno disaipol naga'anee Kidroni agupofi vute'za, ananteti vumare'za mago knagune zafa hoza me'nefi vu'naze. <sup>2</sup> Judasi'ma komoru huntlesia ne'mo'a, ana zafa knagune hoza ke'ne, na'ankure Jisasi'a disaipol naga'anee knagune hozafi mago'a knafina zamarenlo vutere'ma higeno keno antahino hu'ne. <sup>3</sup> Higeno Judasi'a mago'a Romu sondia kevune, ra mono nonte kva nehaza naga'ma (Gats), vugote'naza pristi vahe'mo'zane Farisi vahe'mo'zama huzmantaza vahe'mo'za olivi zafa hozafi tosine, tafentavi'ene, ha'zane eri'nageno Judasi'a zamavareno vu'ne. <sup>4</sup> Mika'zama Agrite fore haniazana, na'ankure Jisasi'a antahino keno nehuno, **Azanku nehakraze?** huno zamantahige'ne. <sup>5</sup> Zamagra ana kemofo nona'a Agriku hu'za, Nazareti kumateti Jisasinku nehakrone, hazageno, **Nagra ana Nere.** higeno Judasi'ma komoru huno ha'

vahe zamazampi avrentesia ne'mo zamagrane anante oti'ne. <sup>6</sup> Hagi Jisasi'a anage zamagrikura hu'ne, Nagra ana Nere hige'za, zamefiti vu'za mopafi traka truku humse'naze. <sup>7</sup> Ana hazageno, Jisasi'a mago'ene zamantahige'ne, **Tamagra azanku nehakraze?** Hige'za zamagra hu'za, Nazareti kumateti Jisasinku nehakrone. <sup>8</sup> Hazageno Jisasi'a ke nona'a huno, **Ko'ma Nagra ana Nere hu'na tamasmi'noe, Nagriku'ma nehakrehanuta, ama vahera zamatrenke'za viho.** <sup>9</sup> Agrama hu'neana, ko'ma Agra'ama hunte'nea kemofo nena'a fore hinogu hu'ne. **Kagrama nami'nana vahepintira magore hu'na Nagra zamatroge'za afe osu'naze,** hu'nea kegu hu'ne. <sup>10</sup> Hagi Pita'a bainati kazinkno eri'nereti anom'aafinti avazu hia zamo vugote'nea pristi ne'mofo kazokzo eri'za nera tamaga kaziga agesa ahe tavrofe atre'ne. Ana kazokzo eri'za ne'mofo agi'a Malkusi'e. <sup>11</sup> Ana higeno Jisasi'a Pitankura huno, **Bainati kazinka'a anom'aafi vazinto. Nenfa'ma nami'nea tin tafempintira (kapu) Nagra onesuo?**

### *Jisasina avare'za Anasinte vu'naza naneke*

<sup>12</sup> Anante mago sondia kevune, sondia vahete vugota huno kvagri zmante'nea ne'ené, Jiu vahe'mokizmi ati vahe'mo'zane, Jisasina azeri'za azante nofi kinte'naze. <sup>13</sup> Anakite'za esera Anasinte avare'za vu'naze, na'ankure agra Kaiafasi nenemo'e. Kaiafasi'a ana kafumofo agu'afina vugota pristi ne' mani'ne. <sup>14</sup> Korapara Kaiafasi Jiu kva vahera antahintahizamino, hakare vahe'mokizmi nona huno magoke ne'mo frigahie huno hu'nea nere.

### *Pita'a, onke'noe huno Jisasinku hu'nea naneke (Mat 26:69-70; Mak 14:66-68; Luk 22:55-57)*

<sup>15</sup> Saimon Pita ene, magora Jisasima amage' nentea disaipoli ne'ene Jisasima avare'za Anasinte vazage'za anantega zamavririke vu'na'e. E'i anama vu'nea disaipoli nera, pristi ne'mo'a ke'nea disaipoli ne'kino Jisasi'ene vugota pristi ne'mofo kumapina ufre'ne. <sup>16</sup> Hianagi Saimon Pita'a kasante fegi'a otino mani'ne. Ana higeno Jisasi amage' nentea disaipoli nera vugota pristi ne'mo ke'nea ne'mo atiramino, kazokzo eri'za mofa'mo kafante kva hu'nea mofa asamigeno, Pitana avreno agu'afi emarer'i'ne. <sup>17</sup> Anante kazokzo eri'za mofa'ma kafante kva nehia mofa'mo Pitanku amanage huno antahige'ne, Kagra ama Ne' amage' nentana disaipol nere, tamage ana nepi? Huno antahigegeno, A'o, Nagra ru nere. <sup>18</sup> Ananteria kazokzo eri'za vahe'ene, nonte kva nehaza vahe'ene, tanknuzare teve heg're'za ot'i'za mani kagi'naze. Na'ankure zasi hige'za teve tohiku hugre'naze. Pita'enena ana tevere uoti'neno teve tohi'ne.

### *Anasi'a, Jisasi agenoka hu'nea naneke (Mat 26:59-66; Mak 14:55-64; Luk 22:66-71)*

<sup>19</sup> Ana zama fore nehigeno'a, vugota pristi ne'mo, amage nentaza disaipol naga'ene, rempi'ma huzami'nea kegu Jisasina agenoka hu'ne. <sup>20</sup> Jisasi'a ana kenona'a anage hu'ne, **Nagra amate mika kaziga nanekea hu'noe. Nagra maka zupa Jiu vahe osi mono nompine (sinagog) ra mono noma (tempol), Jiu vahe maka atru nehaza nomofo meg'i' rempihuzami'noe, Nagra magore hu'na oku'a nanekea huozmi'noe.** <sup>21</sup> Na'anku Nagria nantahi negane? Nentahizage'na huzmasmi'noa **vahe zamantahigenka ko, Nagrama hu'noa nanekea, zamagra antahi'naze.** <sup>22</sup> Jisasi'ma ana nanekema higeno'a, mago ra mono nonte kva nehia ne'mo, Jisasina avugosafi ruhapatino neheno amanage hu'ne, E'inahu hunka vugota pristi vahe kerera ke nona hugahanano? <sup>23</sup> Higeno Jisasi'a ke nona huno agri asmi'ne, **Havigema**

hu'nesua zanku'ma nehanugenka, havizani'a hufore huo, hianagi tamage kema nehuana nahigenka kagra nenhane? <sup>24</sup> Higeno anante Anasi'anofira ovasneno huntogeno, Kaifasi vugota pristi nete avare'za vu'naze.

*Pita'a onke'noe huno, Jisasinku mago'ene, tare zupa hu'nea naneke  
(Mat 26:71-75; Mak 14:69-72; Luk 22:58-62)*

<sup>25</sup> Hagi Saimon Pita'a oti'neno teve tonehige'za, tevere mani'naza vahe'mo'za antahige'za, Kagra'nena e'ina ne' amage' nentana disaipol ne' mani'nampi? Hu'za antahigageno, Pita'a vahane huno, A'o nagra ru nere. <sup>26</sup> Mago vugota pristi ne'mofa kazokzo eri'za ne'ma, Pita kazi knonteti (bainat) agesa rutavrofe atre'nea ne'mofona nefu' Pitanku huno, Zafa hozafi Agrane mani'nanke'na kagrira kage'noa nepi, ru nere? <sup>27</sup> Higeno, Pita'a mago'ene vahane nehigeno, ana amage hantaka'a, kokoremo ageru ru'ne.

*Jisasi avare'za Paleti nete vu'naza naneke  
(Mat 27:1-2,11-14; Mak 15:1-5; Luk 23:1-5)*

<sup>28</sup> Hagi ananteti zamagra Kaifasintetira ko'atu avame Jisasina avare'za Romu ugagota kva (gavana) ne'mofo nonte vu'naze. Vunazanagi zama-gra ugagota nemofo kumapina uofre'naze. Ana zamo zamazeri pehena resige'za, Hibru vahe kinafinti zamare'nea knagu antahimi'za neza ne-naza knare ovuzanku ana hazageno, <sup>29</sup> Paeroti ne'mo zamagritega meg'i'a atiramino eno anage hu'ne, Ama'na nera nankemofo agafare nanekea hu'nentaze? Huno zamantahige'ne. <sup>30</sup> Zamagra kenona hu'za asmi'naze, Ama ne'mo'ma hazenke ne'ma omani'nesina, tagra avreta kagriteria omosine. <sup>31</sup> Hazageno Paeroti'a zamasmi'ne, Tamagrati amavretma tamagri kasegemo hu'nesia kante Agrira keaga huntaho. Jiu vahe'mo'za Paerotinku anage hu'naze. Tagrira vahe'ma zamahe fri'zantera i'o hurante'naze. <sup>32</sup> Ana kema hu'nazana, Jisasi'ma korapa Agrama fritenoma otinia zankuma za-masmi'nea kemo e'ama hu'ne.

<sup>33</sup> E'ina higeno, anante Paeroti'a eteno ugagota vahe (gavana) nompi vuno, Jisasina kehuno, Kagra Jiu vahe'mokizmi Kinifi? Huno antahige'ne.

<sup>34</sup> Higeno Jisasi'a kenona huno, **Kagra kagesafinti ke nehampi, mago'a vahe'mo'za Nagri'kura kasmi nagenka nehano?** <sup>35</sup> Paeroti'a ke nona huno, Nagra Jiu ne' mani'nofi? Kagri vahe'mo'zane, ra mono kva vahe'mo'za (hai pristi) Kagrica kazerite'za, kvare'za eme nami'naze. Kagra na'a hu'nantere?

<sup>36</sup> Jisasi ke nona'a hu'no, **Nagri kumara ama mopafina omne'ne. Ama mopa-re kva vahe mani'noresina eri'za vahenimo'za, Nagritekura ha'hazage'za, Nagrira navre'za Jiu vahera ozamizasine, hianagi Nagri kumara ama mopa-fina omne'ne.** <sup>37</sup> E'inage higeno Paeroti'a asmi'ne, Higenka Kagra kinio? Jisasi ke nona'a hu'ne, **Kagra Nagriku'ma kinie nehanana tamage. Ama'na kegafare Nagra ama mopafina efore hu'noe. Nagra ama'na agafare ama mopafina e'noe, tamage naneke huama hunaku e'noe. Maka vahe'mo'za tamage nanekegu zamave'ma nesimo'za, Nagri nagerute zamagesa ante'za nentahi'za tamage hu'za nehaze.** <sup>38</sup> Higeno Paeroti'a antahige'ne, Tamage nanekeea inanknahu ke me'ne? Anagema huteno'a, meg'i'a atiramino Jiu kva vahete vuno anage hu'ne, Mago havizana nagra, Agripina ke'na erifore osue.

<sup>39</sup> Hu'neanagi tamagri avu'avate kinafinti tamavare'nea (Pasova) knare mago ne' kinafinti azeri atretere hugahue hu'negu, tamagramma antah'i'zana nagra kinafintira, Jiu vahe'motma Kini ne' huntessugeno vanio? <sup>40</sup> Hige'za kezati'za amanage hu'naze, Ama'na nera avare otre'gahane. Hagi Barabasi avare atro, Barabasina kumzafa ne'ku hu'naze.

## 19

*Paeroti'a Jisasina kinafinti azeri atre'naku hu'nea naneke  
(Mat 27:15-31; Mak 15:6-20; Luk 23:13-25)*

<sup>1</sup> Hagi anante Paeroti'a huzmanteg'e za Jisasina sefu ami'naze. <sup>2</sup> Anante sondia vahe'mo'za ave'avenofite kini vahe'mokizmi fetorikna huza tro hute'za, Jisasi anunte antani nente'za, koranke kukena hunte'naze. <sup>3</sup> Zamagra Agrite ete'vute nehu'za, Husga hunte'za ankaza nente'za, Keho, ama Jiu vahe'mokizmi kinia! Nahu'za avugosafi mago'ene ruhapa hapa hu'za ahe'naze. <sup>4</sup> Mago'ene Paeroti'a ete atiramino, Jiu kva vaheklu amanage huno zamasmi'ne, Keho, ama ne'ma nagrama avare'na tmagrite'ma neoana, antahazana mago keaga Agri'ma hunte'zana omne'ne. <sup>5</sup> Anante Jisasina ave'avenofite fetori'ene, koranke kukena antani antetageno, atiramino e'ne. Paeroti'a anage hu'ne, Keho, ama Nera! <sup>6</sup> Vugote'naza pristi vahe'ene, mono no kegava nehaza vahe'mo'za (gad) Agri'ma nege'za amanage hu'za kezati'naze, Aheta hantiho, aheta hantiho! Hazageno Paeroti'a zamasmi'ne, Tamagratmi avretma rugeka zafare ome aheho, na'ankure nagra mago hazenke'a omne'nege'na negoe, huno zamasmi'ne. <sup>7</sup> Hige'za Jiu kva vahe'mo'za ke nona'a amanage hu'aze, Tagrira kasegetia me'ne, hagi ana kase kemofo amage' anteno Agra frigahie. Na'ankure Agra Anumzamofo Ne'mofavre mani'noe huno hu'ne. <sup>8</sup> Hazageno ana kema Paeroti'a nentahino'a, tusiza huno agra mago'ene amanogura hu'ne. <sup>9</sup> Eteno Paeroti'a kuma'afi ufrenero, Jisasinku anage hu'ne, Kagra igati e'nane? Hianagi Jisasi'a magore huno agri kenona'a osu'ne. <sup>10</sup> Ke osigeno, Paeroti'a anage huno asmi'ne, Kema hunami'zankura nahigeno kave nosie? Kagra ontahi'nano, Kagri'ma katufe katre hanavene, rugeka zafare kahena hanti hanavema nagrama eri'noana? <sup>11</sup> Higeno Jisasi'a ke nona'a asmi'ne, **Kagra Anumzamoma hanavema onkamiasina, Nagri'ma kegava hunantega hanavea e'orintesine, hagi monafinkati ne'mo hanigenka anara hugahane.** Na'ankure navareno **kazampima eme ante'nemo'a, kagrira kagatereno tusi'a kumi hu'ne.** <sup>12</sup> Higeno anankema antahiteno'a Paeroti'a aza huno katufe atrenaku tusiza huno agesa antahi'ne. Hianagi Jiu kva vahe'mo'za kezati'za, Kagrama ama ne'ma katufe atresunka, kagra Sisa knampa omani'nane! Mago'mo kini manigahue hanimo'a, Sisana ha'rentegahie. <sup>13</sup> Hazageno Paeroti'a ana kema haza nentahino, Jisasina avare fegi'a atreno naneke fgagohu trate umani'ne, ana kumamofo agi'a, Havereti simeni hunte'naza kumare nehaze, hagi Hibru/Arami kefina, Gabate hu'za nehaze.

<sup>14</sup> Hagi Jiu vahe'mo'za kinafinti zamare'nea knagu antahimiza nenaza (Pasova) ne'za retro tra hunaku nehazageno, zagemo'a feru asegeno Paeroti'a Jiu vaheklu huno, Keho, ama tamagri Kinia! <sup>15</sup> Anagema hige'za kezanke hu'za, Avretma viho, avretma viho, Agrira ahetma hantiho! Nehazageno Paeroti'a zamantahige'ne, Nagra, tamagri Kinia ahena hantisuo? Hige'za pristi vahe'mo'za ke nona'a hu'za, tagri kinia magora omani'neanki, Sisa agrake mani'ne. <sup>16</sup> Anagema hazageno Paeroti'a Jisasina ahe'zama keka zafare hantihogu zamige'za Jisasina azeri'naze.

*Keka zafare Jisasi ahe'naza naneke  
(Mat 27:32-44; Mak 15:21-32; Luk 23:26-43)*

<sup>17</sup> Anante Jisasi'a keka zafa'a erino, vahe anu zaferine nehazare, Hibru kefina Golgoti nehazare erino vu'ne. <sup>18</sup> E'i anante Jisasina nehe'za, tare netrena ruga raga asopare znahe'za rugeka zafare nehanti'za, Agrira

amu'nompi hanti'naze. <sup>19</sup> Paeroti'a mago avona kreno, ana keka zafare hanti'ne. Anage huno kre'ne, JISASI'A NAZARETI NERE, JIU VAHE'MOKIZMI KINIE. <sup>20</sup> Huno krente'nege'za hakare Jiu vahe'mo'za hampri'za ke'naze. Na'ankure Jisasima ahe'za hanti'naza mopa, rankuma tva'oñte me'ne, ana kema krente'neana Hibru kefine, Latini kefine, Griki kefima huno ana avona krentene. <sup>21</sup> Anante Jiu vahe'mokizmi vugota pristi vahe'mo'za Paerotina asami'za, Jiu vahe'mokizmi Kinie hunka onkrenka, hagi Agra'a huno, Nagra Jiu vahe'mokizmi Kinie huno hu'ne hunka kro hu'za asmi'naze. <sup>22</sup> Hagi Paeroti'a ke nonazmire zamasmino, Inankna keo nagrama krente'noana hago krente'noe.

<sup>23</sup> Anante sondia vahe'mo'za, Jisasina rugeka zafare ahe'za hantite'za, amegati kukena'a eri refko hu'za 4'a kevu ante'naze, mago'mo mago kevu eritere hu'are, avate kukena'ama hati'nazana eri mago hu'za anagamuti hati'za fenkamu urami'naze. <sup>24</sup> Hige'za sondia vahe'mo'za ke hugantu hugma hu'za, erisagnera osinkero, hagi satu zokago reta kesune, aza erisifi, e'i ana kemo Anumzamofo avon tafe'mo hu'nea ke eriamu hu'ne, **Zamagra amega kena'ni'a amu'no zamifi fagago hu'za eri'naze, zamagra nagi kenarerera, taisi zokago re'naze.** (Sam-Zga 22:18) Anama kre'naza kante anteza sondi'a vahe'mo'za ana kemofo eri knare hu'naze.

<sup>25</sup> Hianagi Jisasi ahe'za hanti'naza keka zafamofo agafafina, Agri nereraki, nererana nenunknaki, Klopasi nenaro Mariaki, Magdala kumateti Mariaki hu'za oti'naze. <sup>26</sup> Nerera'ene, amage' nentegeno avesi nentea disaipoli ne'ene anante oti'nakeno Jisasi'ma neznageno'a, Agra nereranku huno, **A'moka ko, ama'ne kagri ne'mofavreal!** <sup>27</sup> Anante amage' nentea disaipoli neku hu'ne, **Ko, kagri negrera'a ama'ne!** Ana knareti agafa huno amage' nentea disaipoli ne'mo ana ara avreno noma'are vu'ne.

### *Jisasi fri'nea naneke (Mat 27:45-56; Mak 15:33-41; Luk 23:44-49)*

<sup>28</sup> Hagi anama huteno'a, Jisasima antahino keno hiama maka'zamo hago vagaregeno, Anumzamofo avontafemo hu'nea kea eriknare hunaku, **Tinku navenesie**, huno hu'ne. (Sam-Zga 69:21) <sup>29</sup> Mago mopa kavofi akake waini ti aviteno anante menege'za, kapuku eri'za hisopu zafare anakite'za, ana aka waini timpi rete'za (spons) erisaga hu'za agite ante'naze. <sup>30</sup> Ana hazageno Jisasi'ma ana akake waini tima neteno'a, Agra hu'ne, **Ha vagare!** nehuno Agra kepri huno avamu'a atre'ne.

<sup>31</sup> Anante retrotra huknazmi me'negu hu'za, mani fruhu kna (sabat) efregahianki rugeka zafare (avufga'a) kerfa omanesie hu'naze. (Na'ankure kinafinti zamavare'nea knagu antahimiza ne'za nenaza knane, mani fruhu (sabat) knanena magoka ra kna'zami me'negu hu'za,) Jiu kva vahe'mo'za huza, zamagia ru hantagi tenketa, anante fri kerfa eri mopafi atreta, erita vamneno hu'za Paeroti antahige'naze. <sup>32</sup> Higeno sondia vahe'mo'za e'za, Jisasine znahe'za hanti'naza netremo'kizni znaga ru hantagi'naze, pusante mago'mofo ruhantagiteno, mago'mofona henka ana hu'ne. <sup>33</sup> Hianagi Jisasinte'ma e'za eme kazana, ko fri'nege'za tarega agia ruha'ontagi'naze. <sup>34</sup> Hianagi mago sondia ne'mo krugru kevereti Agrira asopafi regeno, hantaka huno korane, avufa rimo'ene herfino evu'ne. <sup>35</sup> E'i ana zama ke'nea ne'mo ama naneke huama huno kre'ne, agrama hu'nea nanekeaa tamage hu'ne, agra antahi'neno tamage huno nehie. Ana hanigenka kagranena anazanke hunka kamentinti hugahane. <sup>36</sup> Na'ankure ama anazama fore hu'neana, Anumzamofo avontafepi kre'nea nanekemo nena'a fore hanigu

huno, ***Agri zaferina magore huza ruha ontagigahaze.*** (Sam-Zga 34:20)  
***37 Ete mago avontafemo mago'ene huno, Zamagra zamuma kesazana, agri'ma krugru asopafi re'namofonte kegahaze*** huno hu'ne. (Zek 12:10.)

*Jisasima havegampi eri asente'naza naneke  
 (Mat 27:57-61; Mak 15:42-47; Luk 23:50-56)*

**38** Hagi anazama vagaregeno Arimatia kumateti ne' Josefe'a Jisasi amage'nentea disaipoli ne'mo, Jiu kva vaheku koro nehuno oku'a Jisasi fri'kerfa erino vanigu Paerotina antahige'ne. Antahigegeno Paeroti'a hugnare huntegeno agra vuno Jisasi fri'kerfa ome erino vu'ne. **39** Hagi Nikodimasi mago kenage, Jisasinte e'nea ne'mo, Josefe'ene tragoteno eno, mananentake masavena mirane, alone, magopi tagi havia hu'nea masvena kna'zanimo 34 kilo'naza hu'nea erino vu'ne. **40** Anante zanagra Jisasi fri'kerfa eri'ne, ana masaventami avufare frent'e, tvarave tafepi frikerfa'a kargina'e. Jiu vahe'mo'za vahe ase nezmante'za nehaza avu'ava hu'n'a'e. **41** Anama ahe'za Agri'ma hanti'naza kaziga hoza me'negeno, anante kasefa havegana, vahera ase ozmant'e naza havega ana hozafina me'n'e. **42** E'ina hu'negu Jiu vahe'mokizmi mani fru hunaku retro tra nehaza kna'zmi (sabat) atupa hige'za, ana tva'onte me'nea havegampi Jisasina eri'za ome asente'naze.

## 20

*Jisasi'ma fri'nefinti oti'nea naneke  
 (Mat 28:1-8; Mak 16:1-8; Luk 24:1-12)*

**1** Hagi pusa zagegna Sonta zupa masa osu'negeno, ko'atu hanimpi Magdala kumateti Maria'a, Jisasima asente'naza kerirega kenaku uhanatino ome keana, ana keri agite runkanire'naza havea ko atufe atre'nageno ome ke'ne. **2** Ome keama agite runkanire have retufe atre'nageno, ete rukrahe huno agareno eno Saimon Pitane, mago amage nentegeno Jisasi'ma avesi'nentea disaipoli ne'ene eme znamsmi'ne. Ramofo fri'kerfa'a kerifintira hago erisaga hu'za iga Agrira ome ante'nafi onke'none. **3** Zanasamige'ne Pita'ene mago'ma amage' ante'nea disaipoli ne'ene ana keriga ome kenaku vu'n'a'e. **4** Tarega'moke znaga re'ne nevapinti, mago'ma amage' ante'nea disaipol ne'mo, Pitana agtereno kagota huno asente'naza havegantera uhanati'ne. **5** Uhanatino upri huno ome keana anomava zainte'naza tavrave (linen) anante me'negeno ke'ne, hagi agra ana havegamofo agu'afinka umare ori'ne. **6** Anante Saimon Pita'a amage'a ne'ereti ehanatino ana havegampi evumareri'ne, marerino ome keana avufare karagi'naza tavrave ananterea me'negeno ke'ne. **7** Hagi avugosafi tavravene Jisasi anunte karaginte'naza tavravema, avufare karaginte'naza tavravena, omne'negeno ke'ne. Hianagi avugosafi tavravea regazri'za rure antageno me'negeno ke'ne. **8** Anante amage nentea disaipoli ne'ma ese'ma kerire ehanati'nemo, mrerino ome negeno tamage huno amentinti hu'ne. **9** Na'ankure Anumzamofo avontafepima Jisasi'a friteno otigahie hu'naza nanekea, zamagra antahi ani osune'za ana hu'naze. **10** Ana huteke tarega amage' nenta'a disaipol ne'tremoke, noznirega atre'ne vu'n'a'e.

*Magdala kumateti Mariante Jisasi'ma efore hu'nea naneke  
 (Mat 28:9-10; Mak 16:9-11)*

**11** Hianagi Maria'a fegi'a ana havegante oti'neno zavi neteno mani'ne. Zavi netereti pri huno ana have kamofo agu'afinka keana, **12** tare anker

netremoke efe kukena hute'ne mani'nakeno, Jisasima antemse'nare zanage'ne. Mago'mo'a agama me'nea kaziga manigeno, mago'mo'a asenima me'nea kaziga manigeno hu'na'e. <sup>13</sup> Zanagra ana a'mofonku amanage hu'na'e, Ama a'moka na'anuku zavira netane? Maria'a ke nonaznire huno, na'ankure Ranimofona inantega eri'za vu'nazo, inantega ante'nazo nagra ontahi'noe. <sup>14</sup> Anagema ana a'mo'ma huteno'ma rukrahe'ma hiana, Jisasi'a anante oti'negeno keanagi, Jisasi'e huno ontahi'ne. <sup>15</sup> Jisasi'a ana a'ku huno, **A'moka na'anuku zavira netane? Azanku nehakrane?** Na'ankure ana a'mo antahiana hoza kva nehia nere nehuno Agrikura anage hu'ne, Kva vahe'moka, Jisasina inante ome ante'nampi naveri hananke'na Agrira ome eri'na vugahue. <sup>16</sup> Jisasi'a ana a'kura huno, **Maria!** Higeno a'mo'a rukrehe huno Jisasinku Hibru kefinti, Rabonai! (ana kemofo agafa'a Hibru kefina Rempi hurami nere hu'ne.) <sup>17</sup> Jisasi'a ke nona'a huno, **Nagrira eme navako osuo, na'ankure Nenfantega mareori'noe.** Hianagi vunka nafuhue'ina ome zamasmio, Nagri'ene tamagri'ene Nerfante, Nagra marerigahue. Nagri Anumzane, tamagri Anumza mani'nerega vugahie hunka ome zamasmio. <sup>18</sup> Higeno Magdala kumateti Maria'a ete rukrahe huno eazamo, amage'ma nentaza disaipol naga'a eme zamasmino, nagra Rantimofona ke'noe! Ne-huno ana a'mo'a Jisasi'ma hu'nea ke eme zamasmi'ne.

*Amage' nentaza disaipol naga amu'nompi Jisasi'ma efore hu'nea naneke  
(Mat 28:16-20; Mak 16:14-18; Luk 24:36-49)*

<sup>19</sup> Sontamofo amefi ese knamofo kinaga, haninkige'za amage nentaza disaipol naga'mo'za Jiu kva vaheku zamagoro hu'za kafa eri ki'za no agu'afi mani'nageno, Jisasi'a eazamo amu'nozmifi eme otino zamagrikura anage hu'ne, **Tamarimpamo fru hino**, huno zamasmi'ne. <sup>20</sup> Anagema Agra huvgareteno, tarega azane, ratimpa avufane zamaveri higeza nege'za amage' nentaza disaipol naga'mo'za, Rantie hu'za muse hu'naze. <sup>21</sup> Ru'ene Jisasi'a amanage huno zamasmi'ne, **Tamarimpamo fru hino, Nenfa hunanteg'e na e'noaza hu'na, Nagra anazanke hu'na huneramantoe.** <sup>22</sup> Anage Agra huteno, Jisasi'a asimu'a zamagritega huhu hunetreno **Ruotge Avamu eriho.** <sup>23</sup> **Hagi tamagra vahe'mokizmi kumi atrezamantesageno'a, kumi'zmia atre zamantegahie.** Hagi tamagrama kumi'zmi atre ozmantesageno'a, atre ozmantegahie.

*Tomasi'ma, Jisasinku hu'nea naneke*

<sup>24</sup> Hianag Tomasi'a, 12fu'a amagema nentaza disaipol nagapinti mago zmimokino agi'a Didimasi'e nehaza nere. Ana agi'amofo agu'agesa'a kugavezare nehaza ne'kino, Jisasi'ma e'nea zupa omani'negeno e'ne. <sup>25</sup> Ana hu'negu mago'a amage nentaza disaipol naga'mo'za asami'za, Tagra Ramofona ke'none! Hianagi agra ke nona zamire zamasmino, Azante niri afuhe nege'na niri afuhete avako nehu'na, ratimpare nazama avako hutesu'nage, nagra namentintia hugahue.

<sup>26</sup> Hagi 7'a zagegna agaterege'za, rosaza hu'za amage' nentaza disaipol naga'mo'za, Tomasi'ene magopi kafana erigi'za mani'nazageno, zamagri amu'nompi Jisasi'a eme otino, **Tamarimpa fru eriho**, huno hu'ne. <sup>27</sup> Anante Tomasinku huno, **Kza antegma atenka kaza avozareti, Nagri nazana avako hunka ko.** Kza antegma atenka nasopare antenka ko. **Kmentintifina krogro onkio, hianagi kamentinti huo.** <sup>28</sup> Tomasi'a ke nona huno Jisasina asmi'ne, Nagri Ranimoka, nagri Anumzane! <sup>29</sup> Jisasi'a agrikura anage hu'ne, **Kagra Nagri ngatetenka kamentintia nehampi? Onage'neza zamentinti hanamo'za, Asomura erigahaze,** huno Jisasi'a hu'ne.

<sup>30</sup> E'izanku hakare'a kaguvazama Jisasi'a amage nentaza disaipol naga'mokizmi zamufi huzmeri'ne. Ana zantamina ama avontafepina kre onte'noe. <sup>31</sup> Hianagi ama kre'noa avomo hugasamisigenka kamentinti nehunka, Jisasi'a Tazahu ne', Anumzamofo Ne'mofavre, Kraisi'e hunka kamentinti hanunka kagra manivava mani'zana Agri agireti erigahane.

## 21

### *Jisasi'ma 7ni'a disaipol naga'are Galili efore huzami'nea naneke*

<sup>1</sup> Henka'a Jisasi'a mago'ene Taberiasi mago agi'a Galili tiru ankenare, amate efore huzmerige'za amage' nentaza disaipol naga'amo'za ke'naze. Ama'amokizmire efore hige'za ke'naze. <sup>2</sup> Saimon Pita'ma, Tomasi mago agi'a Didimasi'ma, Natanael Kana kumateti ne'ene, Zebeti nemofokegi, tare amage' nenta'a disaipol netrene atru hu'za mani'naze. <sup>3</sup> Saimon Pita'a zamasmino, nagra nozame kuko atreku nevve hige'za, tagra anazanke huta magoka vugahune, nehu'za votifi mareri'za vu'naze. Ana kenagera magore hu'za nozameavu avazu osu'naze.

<sup>4</sup> Anante ko'ma atigeno, nanterana Jisasi'a tinkenare ot'i'neanagi, amage nentaza disaipol naga'mo'za, Jisasi'e hu'za keso'e osu'naze. <sup>5</sup> Anante Jisasi'a zamasmi'ne, **Mofavre nagare tamagra nozamea avazu osu'naze, tamageo?** Huno zamantahigege'za, zamagra ke nona'a Izo avazu osu'none, hu'za hu'naze. <sup>6</sup> Agra zamasamino, **Kukontamia eritma votimofo tamaga kazigati omo atretma, mago'a nozamea avazu hugahaze.** Hige'za ana kukoma atrete'za, avazu hu'zanku kasgeke hu'naze. Na'ankure rama'a nozamemoo ana kukompi frevitege'za avazu hu'anaga ana votifi atrezanku hu'naze. <sup>7</sup> Jisasi'ma avesi nentaza disaipol ne'mo Pitanku anage hu'ne, antu e'i Ramo'e! Saimon Pita'ma antahiamma Rane higeno'a, amega kukena'a eri hankre'ne, (na'ankure timpi eri'za erinaku agra atova hutre'nereti ana hu'ne), timpi tkaurenno nagosa runo ti ankenarega vu'ne. <sup>8</sup> Hianagi mago'a amage' nentaza disaipol naga'mo'za votifi e'naze. Na'ankure mopa afete'are omane'negeze. Hagi 100'a mita zaza'a hu'nege'za nozame zagamo avi'ma te'nea kukona avazu huzma e'naze.

<sup>9</sup> Zamagrama tinkenare e'za eme kazana tanknuza (sakol) teve heg're'nare, mago nozamene, breti'ne ana tevere menege'za ome ke'naze. <sup>10</sup> Jisasi'a zamagriku huno, **Menima azeri'za nozamefinti mago'a eritma echo.** <sup>11</sup> Higeno Saimon Pita'a votifi marerino ana kukona avazu huno tinkenare e'ne. Ranra nozamea 153'amo avite'ne, mago'a rama'a nozamemoo kukompina ufre'neanagi, ana kukona tagato osu'ne. <sup>12</sup> Jisasi'a zamagriku anage hu'ne, **Eta nantera ne'za eme neho.** Hianangi amage' nentaza disaipol nagapinti mago'mo, Kagra azage, hu'za antahige'zankura koro hu'naze, na'ankure zamagra Rane hu'za ko antahi'naze. <sup>13</sup> Jisasi'a eno breti'emerino zamagrira nezminoo, nozameea anazanke huno zami'ne. <sup>14</sup> Fri'nefinti Jisasi'ma otino zameri'neana, tagufa (3) zupa amate efore huzmerige'za amage' nentaza disaipol naga'mo'za ke'naze.

### *Jisasi'a Pitanku sipisipi zagani'a kva huo hu'nea naneke*

<sup>15</sup> Nantera ne'zama nehna hutageno, Jisasi'a Saimon Pitanku huno, **Saimon, Joni nemofoga, kagra ama vahe'zaga zamagterenka Nagrikura kvesinenantampi?** Huno antahi'gegeno, Ozo Ramoka, Kagra antahi'nane, nagra navesi negantoe. Higeno Jisasi'a asmino, **Sipisipi nagani'a ne'za zamio.** <sup>16</sup> Jisasi'a tare zupa mago'ene anage huno asmi'ne, Saimoni, Joni nemofoga, **Nagrikura kave'nesio?** Ozo, Ramoka, Kagra antahi'nane nagra

Kagrira navesi negantoe, higeno Jisasi agriku huno, **Sipisipi zaga'ni'a kegava huo.**<sup>17</sup> Higeno Jisasi'a tagufa zupa ana kege huno asmi'ne, **Saimon, Joni nemofoga, Nagrikura kavesi nenantano?** Higeno Pita'a arimpa kna hu'ne, na'ankure tagufa zupama Nagrikura kve'nesio? Huno antahigea zankure. Pita'a Agriku hu'ne, Ramoka, Kagra maka'zana antahi'nane. Nagrama navesi negantoana Kagra antahi'nane. Higeno Jisasi'a ke nona'a asmino, **Sipisipi zaga'ni'a ne'zana zamio hu'ne.**<sup>18</sup> **Tamagerfa hu'na negasamue, Kagrama kahefa'ma mani'nantera kenakarera kamu'nofi hunka kavesi'zante kana vano hu'nane, hianagi ranafa resunka, kazana rutaresanke'za rumo'za kagrica kukena hugante'za, ovuku hanantega kavare'za vugahaze.**<sup>19</sup> (Menima Jisasi'ma hu'neana, Pitama henka frino Anumzamo-foma ra agi ami'nia zanku huama hu'ne.) Ana kema Agra huteno, Jisasi'a Pita asmino, **Namage anto!** Huno asmi'ne.

*Pitane, Jisasima avesi nentea aposol ne'mofo naneke*

<sup>20</sup> Hagi Pita'a rukrahe huno keana, Jisasi'ma avesi avesi hunentegeno amage' nentea disaipoli ne'mo znavaririno e'ne. Ana nera Jisasi ahihi'zafi umase tragoteno ne'zama nena fima antahigeno, Ramoke, iza Kagrica vahe zamazampina kazerino antegahie? Huno antahige'nea ne' e'ne.<sup>21</sup> Pita'ma ana ne' negeno'a, Jisasin antahige'ne, Ramoke, ama nera nankna hugahie?<sup>22</sup> Jisasi'a ke nona'a agrira asmino, **Nagrama, Agriku mani'nesige'na ete'na esuema hanua knarerera, kagri'zana omne'neanki, na'ané hugahane?** **Kagra namage anto!**<sup>23</sup> Higeno anama hu'nea kemo'a Jisasinte zamentinti nehaza nagate vuno eno higeno, ama'na disaipol nera ofrigahie hu'naze. Hianagi Jisasi'a, agrikura ofrigahie huno osu'ne, **Hianagi frisio manisio Nagrama mani'nesigena e'tena esue hanuazamo'a kagri'zana omne'neanki, na'ané hugahane?** huno hu'ne.

<sup>24</sup> Ama'na disaipol ne'mo agra'a amazana huama huno ana zantamina kre'ne, higeta tagra antahita agri kegura (testimoni) tamage huta nehune.

<sup>25</sup> Hagi hakare ruga'a zama Jisasi'a hu'nea zana me'ne, ana maka'zama avon tafepima kre'neresina, nagrama antahuana ama mopafina avon tafemo'a titipa higeno, anama kraza avontafe ante kankamuna omaneresine.

## Aposol

# Aposolo Vahe'mokizmi Eri'zamofo Naneke

### *Jisasi monafinka mareri'nea naneke*

<sup>1</sup> Nagra Luku'na, ese avontafe'ma kre'nofina, Tiofolisiga ko kasm'i'noe, Jisasi'ma agafa huno hakarezama nehuno rempima hunezamigeno, <sup>2</sup> avreno monafinka vu'nea knare ehanati'ne. Hianagi vunaku nehuno'a Agrama zamavare'nea aposol nagara ruotge Avamu'mo aza higeno, eri'zama erisaza zankura zamasmi'ne. <sup>3</sup> Ana amage nentaza aposol nagateke, atama erino fri'nefinti otino, Nagra mani'noe huno 40'a zage'gnafina zamavure vano nehuno, anahu kna huno Agra rama'a kampinti, ruzahu ruzahu ke nehuno, mika'zama Anumzamofo kumapima me'nea avu'ava zanku kea nehige'za nege'za antahi'naze. <sup>4</sup> Ko'ma zamagrane mani'neno'a, anage huno huzmante'ne, Jerusalemi kumara otretfa hoho. Hianagi Nenfa'ma huvempa huno huhampri ramante'nea zanku'ma tamasmi'noana avega antetma maniho. <sup>5</sup> Na'ankure Joni'a tintfanu mono tina frezmante'ne, hianagi ama knaretira atupa knafi, tamagra ruotge Avamuteti tina fregahaze.

<sup>6</sup> Aposol naga'mo'za eritru hu'za magopi manite'za, agafa hu'za Jisasina antahige'naze. Ramoka magna, Israeli vahe'mokizmi nomani'za zamaz-eri fatgo nehu'na, kva krizmantegahue hu'nana knafi? <sup>7</sup> Hazageno agra anage huno zamasmi'ne, Tamagri'zana omane'neakita tamasmisugeta on-tahigahaze. Nanknarero, nanknafino Nenfa'a agra hanave'afi, anankna huhamprinte'ne. <sup>8</sup> Hu'neanagi ruotge Avamumo tamagrite esigetma, tusi'a hanave eriteta, Nagri nagenkea Jerusalemi kumate huama nehutma, Judiane Sameriane huama nehutma, afete mopa omeatre eme atre arega ome huama hugahaze. <sup>9</sup> Ana naneke zamasmiteno, negageno ham-pompi ufreg'eza onke'naze. <sup>10</sup> Monafi kete'za mani'nageno, ame' huno efeke kukena hu'n'a ne'tremoke anante oti'ne'ne, <sup>11</sup> anage hu'n'a'e, Galili vahe'mote na'a higetma amarerera oti'netma monafinka negaze? Ama ana Jisasi tmattroreno monafi negageno mareri'neaza huno, ete anahu kna huno egahie, huke zamasmi'na'e.

### *Judasi nona'a mago'mofo huhamprinte'naza naneke*

<sup>12</sup> Anante mago agona Olivie nehaza agona atre'za Jerusalemi e'naze. E'i ana agona Jerusalemi tava'onte me'n'e, kama vu'amo'a, mani fruhu kna zupa vute'za neaza avamente me'nea agone. (1 kilomita avamenteku hu'ne.) <sup>13</sup> Zamagrama Jerusalemi ufrete'za, nemaniza nompi anagame umarereri'za hunaragintepinka mani'naze. Pita ene Joniki, Jemisi ene Endruki, Filipi'ene Tomasiki, Bataromio ene Matiuki, Jemisi Alfiasi nemofo ene Zelati nagapinti ne' Saimoniki, Jemisi nemofo Judasiki hu'za anampi umani'naze. <sup>14</sup> Maka ana naga'mo'za magoke antahintahifi maka'zupa nunamu nehu'za mago'a a'hene, Mariaki Jisasi nerera'ene, Jisasi nefu'zagi hu'za mani'naze.

<sup>15</sup> Ana knafina zamentinti nehaza nagapinti Pita'a 120'a naza naga amu'nozamifi otino anage hu'ne. <sup>16</sup> Nafuhete, Ruotge Avamumo ko Deviti asmigeno avontafepima krente'neana, Judasi zamarenko vige'za ha' vahe'mo'za azeri'naze kemo'a avufa'a forehie. <sup>17</sup> Tagrane mani'neno,

agra ama mono eri'zana eri'ne. <sup>18</sup> (Menina Judasi havi avu'ava'mo ana mopa miza se'nne, ana mopafi kanahegeno rimpamo tagatiramine. <sup>19</sup> E'ina huno frige'za Jerusalemi kumate vahe'mo'za ana naneke nentahi'za ana mopagu Aramu kefi Hakaltemie hu'naze, zamagra kefina Korantami'nea mope hu'naze.) <sup>20</sup> Anazanku Zgame avontafipina anage huno kre'ne, **Atregeno mago'zana nom'a'afina omaneno, Anampina atregeno mago'vahere huno omanino,** (Sam-Zga 69:25), **Atregeno mago'vahe'mo agri nona erino, eri'zana erino huno avona krente'ne.** (Sam-Zga 109:8) <sup>21</sup> Ana hu'negu tagra mago ne azeri otisunkeno, Judasi nona erisie. Ana ne'mo'a tagrane maka knama, Ramo Jisasi'ma mani'nereti vuno, <sup>22</sup> Joni'ma mono tima fre ante'nea knareti eno, tagripinti avareno monafi vu'neaza ke'nenimo, fri'nefinti ot'i'neazana huama huno tagranena vano hugahie. <sup>23</sup> Ana hute'za tare ne'tre znazeri ot'i'naze, Josefenku Banabasi'e (nehaza ne'kino mago' agi'a Jastusi'e) magora Matiasi'e. <sup>24</sup> Ana hute'za nunamu hu'za, Ramoka kagra hakare vahe'mofo zamarimpa ke'nane. Hanki ama tare ne'trenpintira, inamofo huhampri antenampi taveriho. <sup>25</sup> Kamagema'ante'nea aposol ne' Judasi'ma eri'zama atreno kuma'arega vu'nea ne'mofo kuma'ma erino ama ana aposol eri'zama erinogura huhamprinte'nampi taverio. <sup>26</sup> Anante mago'zokago (lots) Taisi zokago reza kazageno, Matiasi huhampri'naza su'amo eama hige'za, Matiasi azeri otizageno, 1lni'a aposol nagapi ufre'ne.

## 2

### *Kasefa hoza vasage knare (Pentikos) Avamumo erami'nea naneke*

<sup>1</sup> Kasefa hoza vasage kna PentikosI ege'za, aposol naga'mo'za mago nompi atru hu'naze. <sup>2</sup> Ana hu'za mani'nageno amehuno zaho'mofo agasasamo hiaza huno, tusi'a agasasa runo monafinti eramino mani'naza nompi avite'ne. <sup>3</sup> Tevemofo agefu'nagana huno, tagareno vuno eno huno, magoke magoke'mofonte eman'i'ne. <sup>4</sup> Maka'mofona Ruotge Avamu'mo zamagu'afi viteno, zamazeri otige'za, Avamu'mo zamasamia kante ante'za, agafa hu'za aru agerupinti kea hu'naze.

<sup>5</sup> Ana knafina knare hu'za Anumzamofo amagenentaza Juda vahe'mo'za, mopane mopane kotegati e'za Jerusalemi kumate eman'i'aze. <sup>6</sup> Ana agasasa fore nehige'za, miko vahe'mo'za atru hu'za na'a fore nehie hu'naze. Na'ankure mago mago'mo'a agr'a agerupi antahitere hu'ne. <sup>7</sup> Zamagra antri nehu'za anage hu'naze, ana maka Čalili vahe'mo'za kea nehzanki na'a fore nehie? <sup>8</sup> Na'a higeta tagra mago mago'mota tagra'a tageru'ma tarera'ma kaserantegetama neruna tagerupina nentahune? <sup>9</sup> Tagra rukotegati rukotegati Patia mopareti'ene, Medes mopareti'ene Elami mopareti'ene, Mesopotemia mopareti'ene, Judia mopareti'ene, Kapatosia mopareti'ene, Pontusi mopareti'ene, Esia mopareti'ene, <sup>10</sup> Frigia mopareti'ene, Pamfilia mopareti'ene, Isipi mopareti'ene, Sairini kaziga Livia mopareti'ene, Romuti nantu vahe'ene, Hibrui vahe'ene, meg'i'a vahe'mo'za zamagu'a rukrahe hu'naza vahe'enene. <sup>11</sup> Kriti mopareti'ene Arabu mopareti vahe'mota tagra hanavenentake avu'ava'zama Anumzamo'ma hia zana tagerupi nentahune! <sup>12</sup> Maka'mo'za mago'ene na'a fore nehie nehu'za, tusi'za hu'za antahintahi hakare hu'naze. Zamagra'a ohumi ahumi nehu'za anage hu'naze, Na'a amazana fore nehie? <sup>13</sup> Hianagi mago'amo'za anama haza zankura anage

hu'za zamagi'za nereza, zamagra kahefa waini ti ne'za negi nenegahaze! Hu'za hu'naze.

*Pitama mono ke huama hu'nea naneke*

<sup>14</sup> Hianagi Pita'a otino 11ni'a aposol naga'ane mani'neno ranke huno zamasmino, tamagra Judia vahe'ene, miko Jerusalemi mani'namota amama huankea tamagesa anteta antahi ankereho. <sup>15</sup> Ama kema nehaza zanku'ma tamagesa hakare nehzazana, menina nantera 9kiloki hu'neanki'za, zamagra negi tina one'naze. <sup>16</sup> Hu'neanagi ama'i korapa kasnampa ne'mo, Joeli hu'nea nanekemofo avufa'a meni negaze. <sup>17</sup> Hagi vagare knafina, Anumzamo'a anage hu'ne, *Nagra Avamuni'a vahepi eri herafi atresugenyo, tamagri ne'mofatamimo'za, kasnampa kea huama nehanage'na, kasefa vahe'mo'za ava'na keaza nehanage'za, ranafa tamimo'za ava'na kegahaze.* <sup>18</sup> *Nagri eri'za \* vahera, vene'nere ene, a'nerera Nagra Avamu'n'i a ananknafina eri herafi atresuge'za zamagra kasnampa kea hugahaze.* <sup>19</sup> *Nagra monafina ruzahu'za eri fore nehu'na, kaguva avame'za a ma mopafina erifore nehu'na, korane, tevene, hampone tokira hugahie.* <sup>20</sup> *Zagemo'a rukrahe huno hani hanigeno, ikamo'a kora hanigeno, henka tusi'a hanave'nentake Ramofo kna egahie.* <sup>21</sup> *Ana nehanigeno miko vahe'mo'za, Ramofo agi hanta nevazisamo'za zamagu'vazinke'za knare kuma erigahaze.* (Jol 2:28-32.)

<sup>22</sup> Israeli vahe'motma ama kea antahih, Nazareti ne' Jisasina, Anumzamo azeri oti'nea ne'mo, kaguva zane ruzahu'zane, avame'zana Anumzamo'a, Agripi runtanino amuno tamifina eri'zana erigeta, keta antahita hu'naze. <sup>23</sup> Ama ana nera, Anumzamo antahino ahegahaze huno korapa retro hu'nea kante antetma, tamagra avaretma megi'a vahe zamazampi antage'za, keka zafare hanto ahegeno fri'ne. <sup>24</sup> Hianagi Anumzamo'a fri'nefinti azeri otino, fri'zamofo atazampinti azeri so'e hu'ne. Na'ankure frizamofo hanave'amo'a azerintega osu'ne. <sup>25</sup> Deviti'a amanahu ke agriku hu'ne, *Nagra maka zupa negogeno, Ramo'a navuga nemanie, na'ankure Agra nazantmaga'a mani'neankino, mago zamo'a nazeri kazara osugahie.* <sup>26</sup> *E'ina hu'negu nagu'amo'a so'e nehanigeno, nagipintira tusi'a musenkemo atiramigahie.* Navufamo'enena ana zanke huno fore'ma hania zanku avega anteno manigahie. <sup>27</sup> *Na'ankure kagra nagu'namena fri vahe kumapina (Heidis), otregahane, huge atresankeno Ruotge hu'nemo'a kerifina onkasrigahie.* <sup>28</sup> *Kagra mani'zanimofo kana ko eri'ama hunami vare'nane. Kagrama nate'ma nemaninkeno'a, nagripina musezamo avinete,* huno Deviti'a hu'ne. (Sam-Zga 16:8-11.)

<sup>29</sup> Nafuhete, nagra fatgo hu'na neramasmue, mago tahitia Deviti'a frige'za asentageno, keri'amo'a menina tagrane me'ne. <sup>30</sup> Na'ankure agra kasnampa nekino antahine, Anumzamo'a mago negeho awareno tra'are (kini trate) antesigeno mani'nigu averino huvempa hu'ne. <sup>31</sup> Deviti'a kegamuteno, Kraisima friteno otisniazana ke'ne, fri vahe kumapina (Heidis) avufamo'a atresigeno za'za kna omaneno, onkasrisia zanku hu'ne. (Sam-Zga 16:10.)

<sup>32</sup> E'i ana Jisasina, Anumzamo'a fri'nefinti azeri otigeta, tagra maka'mota tavufinti ke'nona zanku nehune. <sup>33</sup> Ana higeno Anumzamo ragi

\* <sup>2:18</sup> Bondslave, hu'nea kemofo agafa'amo'a, magomo, mago'a kafufi rumofonte eri'za eri nentesigeno, henka zagoa amigahie hu'ne hagerafina'e.

nemino, azantamaga kaziga'a avarentegeno, huvempama hu'nea Ruotge Avamura Nefampinti erino, eritagitregeta menina negeta nentahita nehaze. <sup>34</sup> Na'ankure Deviti'a monafinka mareori'neanagi, Deviti agra'a huno, **Ramo'a, nagri Ramofonku huno, Naza tamaga kaziga mani'nege'na,** <sup>35</sup> **Nagra ha' vaheka'a zamazerina kagia tra antesugenka, kagiareti arentrako hugahane** huno hu'ne. (Sam-Zga 110:1.)

<sup>36</sup> E'ina hu'negu, maka Israeli vahe'motma tamage hutma antahi ankereho, tamagrama aheta hanti'naza nera, Anumzamo'a azeri otigeno, Ra vahe tro huno Kraisi mani'ne.

### *Pitanke antahi'naza naneke*

<sup>37</sup> Ana kema zamagrama nentahizageno, kemo'a zamarimpafi agonaza zamareaza hige'za, Pitanku'ene ruga'a aposol nagakura anage hu'naze, tafuhete tagra na'a hugahune? <sup>38</sup> Hazageno, Pita'a zamagrikura anage hu'ne, tamagu'a rukrahe nehutma, Jisas Kraisi agifi mono tina frenkeno, kumi'timia apaseramante'na, ruotge Avamu'mofo museza tamagra erigahaze. <sup>39</sup> Na'ankure huvempama hu'neana tamagri'ene, mofavre tamimofonku'ene, afete mani'namokizmigu'ene, ruga'a vahera tagri Ra Anumzamo zamagi hanige'za, Agrite esamoza erigahaze. <sup>40</sup> Rama'a ruga'a ke Pita'a huama nehuno, zamazahuke zamasami'ne. Kefo zampima mani'naza vahepintira, maniganeta manisaza zamo tamagu'vazina, knare huta manigahaze. <sup>41</sup> Agri kere zamentintima haza nagapintira, monoti fre'naze. Anazupage tima fre'nazana, 3tauseni'a nazamo'za fre'naze.

### *Ese zamentinti vahem'o'za mono hu'naza naneke*

<sup>42</sup> Ana vahe'mo'za aposol nagamokizmi naneke antahiza atru hu'za monora rempi hu'za nentahiza, magopi breti kori'za nene'za (Lords sapa) nunamuna hu'naze. <sup>43</sup> Apostol naga'mo'za hakare ruzahu'zane, kuguva'zana erifore nehazageno, maka'a vahe'mo'za nege'za zamanogu nehu'za amazana na'za fore'nehie hu'naze. <sup>44</sup> Hanki Jisasinte zamentinti hu'naza vahe'mo'za tragote'za nemani'za, maka'za zamia omi'ami nehu'za, <sup>45</sup> mago'a zazamine, mopa zaminena agafa hu'za zagore atrage'za, miza'sage'za zago eri'za upama hu'naza vahe refako hu'za zami'naze. <sup>46</sup> Maka kna ra mono (tempol) kumapi atru hu'za mono kea nehu'za, zamagu'a anterami'za, zamarimpa fruregati nonte nonte bretia kori'za nene'za kave'zamia fako hutere hu'naze. <sup>47</sup> Anumzamofo agi hentesga nehazageno, mago'a vahe'mo'za ana vahe'mokizmi muse huzmante'naze. Ana nehazageno Anumzamo zamagu'ma vazi'nea vahe'mo'za mago mago kna rama'a efre'naze.

## 3

### *Aga sati'nea ne' eriso'e hunte'nea naneke*

<sup>1</sup> Mago zupa, Pita'ene Jonikea, ra mono nontega nunamuhu knare, mago kiniga 3 kiloki higeke marerike nevakeno, <sup>2</sup> mago nera, nerera agu'afinti agia frinea kasente'nea nera zafa hu'za vazaza'mo'za ra mono nomofo kasana, knare so'e kasane hu'za agia nehare ome ante'naze. Mika zupa anante ome ante'nageno mani'neno, mono nompima umreririza vahekura, azama hanagu meme nehiiane. <sup>3</sup> Ana ne'mo'a znagegogene Pita'ene Jonikea ra mono nompi umarerisanuanki nehakeno, ana ne'mo'a zagogu zanan-tahige'ne. <sup>4</sup> Hianagi Pitake Jonikea avufi kefatgo huke negeke, Kama tagrira

tago! Huno Pita'a hu'ne. <sup>5</sup> Higeno, ana ne'mo mago'a zana zanagrite-gati erigahue huno agu'agesa antahi'ne. <sup>6</sup> Hianagi Pita'a anage hu'ne, Silvane, golinena e'ori'noanki, nagrama eri'noazana kamigahue. Jisas Kraisi Nazareti ne'mofo agifi, otinka vuo! <sup>7</sup> Nehuno Pita'a azantmaga'a ana nera azerino azerioti'ne. Anama nehigeno'a ame' huno agia avozamo'ene, agia avu'a zaferinamo'a hanaveti'ne. <sup>8</sup> Higeno agra haru huno marerino tamino nehuno, agia reno vu'ne. Pita'ene Joni'ene magoka ra mono'nompi nevuno, haru huno marerino tamino huno nevuno, musenkase huno Anumzamofo agi erisaga hu'ne. <sup>9</sup> Ana hige'za miko vahe'mo'za negageno nevuno, Anumzamofo agia hesga hu'ne, <sup>10</sup> hige'za mika vahe'mo'za nege'za, ra mono (tempol) nomofo knare so'e kasante mani'neno zagogu meme nehia ne'mo amanahura nehianagi, nankna hu'neha hu'za tusi'a antri nehu'za zamagogogu hu'naze.

### *Pita'a ra mono nompi mono ke hu'nea naneke*

<sup>11</sup> Pitane Jonikizni ana ne'mo zanazeri'negeke, mika vahe krerfamo'za magoka zamagare'za zamagritega Solomonine hu'za humegi atre'naza nompi, vano nehaza kante tusi zamagogogu nehu'za e'naze. <sup>12</sup> Hianagi anama hazaza Pita'a negeno, anage huno ana vahe'zaga zamasmi'ne, Israeli vahe'motma nahigeta amanahu zankura antri nehutma, tamagogogura nehuta, tagrina uruhara neragaze? Tagritia hanaveretiro, Anumzamofo avu'ava hu'azamo azeri otigeno kana vifi? I'o, <sup>13</sup> Abrahamune, Aisakine, Jekopu Anumzana tafahe'i Anumzamo kesga nehia eri'za Ne'a Jisasina, Paeroti atrenigeno vunaku nehigeta, tamagrama azeritma ha' vahe azampi ahenogu nenteta, Paeroti ne'mofo avufi tamefi humi'naze. <sup>14</sup> Hianagi tamagra fatgo huno ruotge hu'nea Nera, tamefi humitma vahe'ma ahene-fria neku avare atreho, hazage'za avare'za tamami'naze. <sup>15</sup> Hagi tamagra Asimu'mofo agafa ahe fri'nazanagi, Anumzamo azerioti nemofo, tagra tam-age huta tavufinti ke'no'a zanku nehu'e. <sup>16</sup> Hagi Jisasina agri agire tamentinti hu'azamo, e'i ama ana agimo amama negaza nera azeri knare hu'ne. Hagi Jisasinte amentinti hu'nea zamo, mika vahe'moka kavufina agrira azeri so'e hu'ne.

<sup>17</sup> Menina nafuhete, nagra tamantahi'noe, ontahinetma Jisasima tamavutamaya'ma hunte'nazana, kva tamimo'za nehzankna hutma ontahi'netma hu'naze. <sup>18</sup> Hianagi korapama Anumzamo'a, Kasnampa vahepima runtanino'ma, Kraisia ata hoza erigahie huno'ma hunte'neazamo, ana kante efore hu'ne. <sup>19</sup> E'i zanku, tamasunku huta tamagu'a rukarehe huta, Anumzamofonte enkeno, kumitamia eri atreramantergahie. <sup>20</sup> Ana knafi Rantimofo avateti kahefa hanave ne-sigeno, hagi ko'ma Agra'ma huramante'nea nera Kraisina huntesigeno egahie. E'i Jisasi'e. <sup>21</sup> Ama ana Nemo'a monafi umani'enigeno, Anumzamo'a mika zana azeri kasefa hugahie, Anumzamo ko' huama hu'ne, korapa knafima ruotge kasnampa vahe'mofo zamagipi huvempa hu'ne. <sup>22</sup> Mosese'a huno, **Ra Anumzamo'a kasnampa nera nagrikna huno tamagri nagapinti azeri otigahie. Agrama na'anem kema haniana, ke'a erizafa huta amage ante-ho.** <sup>23</sup> **Mika vahe'mo'za ana kasnampa ne'mofo kema ontahisnamo'kizmia, zamahе nefrino, vahe'afintira zamahenati tregahie.** <sup>24</sup> Anahu kante maka Samuelinteti'ma eno erami'naza kasnampa vahe'mo'za, ke nehu'za huama hu'nazana, ama knagu hu'naze. (Diu-Kas 18:15-19) <sup>25</sup> Tamagra kasnampa vahe'mokizmi mofavre, Anumzamo'ma tmafahe'zanema huvempa huno

huhagerafinea kemofo mofavre mani'naze, Abrahamunku'ma huno, **Kagri ka'a mofavrefinti, maka kokankoka vahe'mo'za asomura erigahaze** hu'ne. (Jen-Agf 22:18) <sup>26</sup> Na'ankure Anumzamo'a pusante eri'za Ne'a azeri otigeno tagrite e'ne, havi zampintira magoke magoke'mota, tazeri rukarahe huno asomu hurante'ne.

## 4

### *Pitane Jonigizni zanazeri'naza naneke*

<sup>1</sup> Pita'ene Jonikema ana vahe zaganema keaga nehake'za, pristi vahe'ene ra mono nonte kva nehaza kva vahe'mokizmi kva'neki, Sadusi vaheki hu'za znagrige e'naze. <sup>2</sup> Na'ankure keagama hapina, vahe'ma frisutma, Jisasi hanavefi etetma otigahaze hu'ne zamasm'i'a kegu zamarimpagna hu'naze. <sup>3</sup> Ana hute'za znazeri'za kina nompi ome zanantage'ne mase'na'e. Na'ankure hago kinaga se'negeno'e. <sup>4</sup> Hianagi mika kema antahi'naza vahe krerrafamo'za zamentinti hu'nazana, vene'nema hampri'nazana 5 tauseni'a nazampi mareri'ne.

<sup>5</sup> Masakeno ko'atigeno, kasegera ugagota hu'naza vahe'ene mono nonte kva vahe'ene Jerusalemi etru hu'naze. <sup>6</sup> Ugagota hu'nea pristi ne' Ananaisi'a anampina mani'ne. Hagi Kaifasi'ma Joni'ma Aleksendaki, ugagota hu'nea pristi ne'mofa nagapinti ruga'a mani'naze. <sup>7</sup> Amu'no zamifima Pitane Joni kizni zanzeri otite'za, agafa hu'za znantahige'naze, Inankna hankavereti ene iza agifi amanahu'zana hu'na'e? <sup>8</sup> Pitana Ruotge Avamu'mo avite'nea ne'mo, zamagri kenona anage hu'ne, Tra kere ugagota hu'naza vahe'ene ranra kva vhahere, <sup>9</sup> menima knare tavutva'ma kri ne'ma hunte'no'a zantema, tagri'ma refko hutma tagesnazana, na'amo higeno ama nera kri'amo'a atrente'ne nehazana, <sup>10</sup> tamagrane Israeli vahe'enena antahi ankereho. E'i Nazareti Jisas Kraisima tamagrama aheta hantizageno, Anumzamo'ma azeri ot'i'neama, e'ina ne'mofo agire, amama tamugrira ot'i'neama nera kri'amo'a knare huntogenous ot'i'ne. <sup>11</sup> Ama ana Jisasina, **Tamagra nogi vahe'motma tamavesra hutma retufe atre'naza haveagi, e'i ana havemo'a no renagentete noma azeri hanaveti have fore hu'ne.** (Sam-Zga 118:22) <sup>12</sup> Mago vahe'mo'e huno taza huga osu'ne, na'ankure ama mopafi vahe'motafina, tahokehesia agi'a ontami'neanki, magoke ne' Jisas Krais agifi, Anumzamo'a tahokehegahie. <sup>13</sup> Anante'ma ana vahe'mo'za znagazana, Pitake Jonikea, kema ha'ana korera osake'za, zanagrira antahi ama hu'za, avonona osuke, nontega ne'tremoke Jissasi'enena mani'na'e hu'za antahi ama nehu'za tusi antri nehu'za, nankna'za fore nehie hu'naze. <sup>14</sup> Ana higeno azeri so'e hunte'nea ne', znagranema ot'i'nege'za nege'za, anazanku kema huznantekeea omane'ne. <sup>15</sup> Hianagi kva vahe'mo'za huznantageke ana atru zamifintima atirami'ne fegia vake'ne, zamagrazmi ke hugantugma hu'za, <sup>16</sup> anage hu'naze, Ama netrena na'a huznantelegahune? Na'ankure ama kri ne' azeri so'e'ma hu'nea kaguvazamo'a, mika Jerusalemi mani'naza vahe'pina amate hige'za hago ke'nazankita tagra onke'none huta hufra okigahune. <sup>17</sup> Hianagi ama kemo'ma mago'anee vahepima vuno'eno osanigura, kore ke zinasamisunke'ne, mago'anee ama ana agirera mago'a vhahera ozanasmisaze huta zanasamisune. <sup>18</sup> Pitane, Joninena ke hzageke efrake'za zanasmi'za, Mago ene Jisasi agirera vhahera zamasmige, rempi huzamige osutfa hi'o hu'naze. <sup>19</sup> Hianagi Pitake Jonikea, anage huke ke nona zamire hu'na'e, Anumzamofo avurera knare tamagri ke antahisupi, Anumzamofo ke antahigahu'e, tamagratami refako huta antahihio.

<sup>20</sup> Na'ankure tagra keta antahita huno'a zante keaga nehuankita, tagrama kema tagane'zamo'a amuho hurantegahie. <sup>21</sup> Anama hu'za mago'ane korekema huznantete'za, kina huzanante kankmunu hake'za eri fore osu'za hu'zanantage'ne vu'na'e. Na'ankure ana mika vahe'mo'za e'inahu zama fore hiazankura Anumzamofa ra agi amizage'za nege'za, vaheku koro hu'naze. <sup>22</sup> Na'ankure ana nera 40'a zagekfu agatere'nea nete ana avame'zana fore huno azeri so'e hu'ne.

*Jisasima amage'nen taza vahe'mo'za hanave erinaku nunamu hu'naza naneke*

<sup>23</sup> Humaznantagekeea, va'azamoke, pristi vahe'mo'zane, ranra vahe'mo'zama maka'zama humaznante'naza kea magoka zamentinti nehaza naga ome zamasmi'na'e. <sup>24</sup> Ana kema nentahi'za, mago zamagu zamagesare zamagerura erintesga hu'za Anumzamofontega anage hu'za hu'naze. Maka'zamofo Ramoke, Kagra monane, mopane, hagerine, hagi mika zama anampinkama me'nea zantamina trohu'nane, <sup>25</sup> Kagra ka'a Avamukafi hankeno Deviti'a nerafa eri'za ne'kamofo agipi huvazinkeno anage hu'ne, **Na'a hige'za kokankoka vahe'mo'za zamasigura nehu'za, osuga'zana huku retro nehaze?** <sup>26</sup> **Ama mopaf'i kini vahe'mo'za magote etru hazage'za, trakere ugagota vahe'tmimo'za zogitru hu'za Ramokane, Kraisinena ha' reneznantaze.** (Sam-Zga 2:1-2) <sup>27</sup> Na'ankure tamagerafa huno Herotiki, Pointus Pailatiki, meg'i a vahe'ene, Israeli vahe'ene, ama rankumapina zogitru hute'za, Ruotge eri'za Neka'a huhamprinte'nana Jisasina ha' rente'naze. Tamage e'i ana avamente Heroti'ene Paeroti'ene ru vahe'ene Israel vahe'mo'zane ama kumate eri atru hu'za manine'za kagri mofavre kagrama hampri'nana nera Jisasina ahenaku hu'naze. <sup>28</sup> Himamu hanaveka'afima ko antahinka egahie hunka retro hunte'nana zamo efore hu'ne. <sup>29</sup> Hagi menina Ramoka, amama tazeri kore'ma hunerantaza'zana ko, tagra kagri eri'za vaheki, tazeri hanavetigeta oti hampona huneta Kagri nanekea huama hugahune. <sup>30</sup> Kagraka'a kazana rusutenka kri vahera krizmia eri amne nehunka ruzahu ruzahu kaguvazana Kagri ka'a ruotge eri'za ne' Jisasi agire eri fore huo. <sup>31</sup> Nunamu hutageno, anama zogitru hu'za mani'naza nomo'a kazakaza higeno, ruotge Avamumo'a zamagu'afi avitege'za, Anumzamofa nanekea reku osu'za agafa hu'za hu'naze.

*Fenoza fako hu'za omiami hu'naza naneke*

<sup>32</sup> Jisasinte zamentinti nehaza vahe'mo'za raru hu'za mago zamarimpare ene antahintahire nemani'za, tagri' zane hu'za osu'za havia mika'zana omi-ami nehu'za mani'naze. <sup>33</sup> Tusi'a hanavereti aposol naga'mo'za, Ramo'ma Jissasi'ma fripinti oti'nea nanekea huama nehzageno, zamentintima haza nagara Anumzamo'a tusi'a asunku huzmante'ne. <sup>34</sup> Anampima mani'naza kevufintira mago'zankura mago'mo'a upara osu'ne. Na'ankure inamofoma mopa'a me'neo, noma'a me'nemo'a zagore atreno ana zago erino, <sup>35</sup> aposol naga eme zamizage'za, fako hu'za zagogu'ma atupa'ma hu'naza vahe zami'naze. <sup>36</sup> Hagi mago Livae nera, Saiprus hageri amuragozafi kasente'nea nera Josefe'e, mago agi'a aposol naga'mo'za antemi'nazana Banabasi'e. (Ana agimofo agafa'a, zamazeri hankaveti ke zamasmi mofavre hu'ne.) <sup>37</sup> Hanki agripina mopa'a menegeno ana mopa zagore atreno, ana zagoa erino viazamo aposol nagamofo ome zami'ne.

## 5

*Ananaiasi ene Safairake knaza eri'na'a naneke*

<sup>1</sup> Ana hutegen Ananaiasi ene nenaro Safaira enena anahuke, mopa zania zagore atreteke, <sup>2</sup> nenaro'a mago rimpa huno antahi'negeno, mago'a zagoa refako huno agra suna nenteno, mago'a zagoa erino aposol naga ome zami'ne. <sup>3</sup> Hu'neanagi Pita'a anage hu'ne, nahigeno Ananaiasiga Sata'a kaguafina efregenka ruotge Avamura revataga hunka mago'a zagoa mopama atrantetira refko hunte'nane? <sup>4</sup> Zagore'ma otre'nantera, kagri mopa megeno, zagore'ma atrantera, kagri kavesite me'neane. Na'a higenka amanahu antahintahia kagu'afina antahi'nane? Kagra vahe rezmataga os-ananki, Anumzamofo revtaga hane. <sup>5</sup> Hagi anankema nentahino'a, Ananaiasi'a traka huno frige'za, anankema antahiza nagatera tusi'a kore'zamo zamagrite e'ne. <sup>6</sup> Anante nehazave naga'mo'za azeri anteno vazite'za, eri'za ome asente'naze.

<sup>7</sup> Tri'a auv evigeno nenaro'a anazama fore hu'neana ontahineno anante e'ne. <sup>8</sup> Pita'a, anage huno Safairana antahige'ne, zagorema mopama atra'ana, mizana asma'areke atrenampi? nasamio higeno agra anage hu'ne, Izo atreno'a mizana asi'ne higeno, <sup>9</sup> Pita'a amanage huno Safairana asamine, Nahigetna kagrane negave'enena mago tanarimpa huta Ramofo Avamura reheta nega'e? Negavema ome asentete'za aza vahera, kasante oti'nazanki ko, kagrira anazanke hu'za eri'za vugahaze. <sup>10</sup> Anage nehigeno agafi hanta'ka' traka huno frige'za, nehazave zagamo'za emegazana hago fri'nege'za, erizafa hu'za vazazamo'za, nevema asente'naza asopare ome asente'naze. <sup>11</sup> Higeno tusi'a kore zamo ana mika mono vahete'ene, ana zama hia kema antahi'naza vahete enena e'ne.

*Aposol nagamoza hakare vahe zamazeri so'e hu'naza naneke*

<sup>12</sup> Aposol naga'mo'za rama'a avame'zane, kuguva zane mika vahe vahepi nehuza, ra mono nompi, Solomoni'e hu'za hunaraginte'pinka ana mika vahe'tamimo'za mago zamarimpa huza magopi atru hu'naze. <sup>13</sup> Magore hu'za anampintira zamagripina hageorafi'nazanagi, mika vahe'mo'za kentahiza, agazone hunezmante'za husga huzmante'naze. <sup>14</sup> Hanki hakare vahe krerfamo'za a'nea, vene'nea hu'za Ramofonte zamentintia hu'za, rama'a vahekrerfa efre'naze. <sup>15</sup> Ana higeno mika vahe'mo'za Pita'ma ene vanigeno, amemo'a haguesie huza kri vahera sesenku huza zafa hu'za kampi, nosiva masi'ne'za zmantage'za mase'naze. <sup>16</sup> Anazanke huno ranra kuma'ma Jerusalemi me'nefintira, kri eri'nea vahepi, havi avamu'mo agu'afi fre'nea vahetamina zamare'za ageno, maka vahera zamazeri so'e hu'ne.

*Aposol naga kina huzmante'naza naneke*

<sup>17</sup> Hianagi ugagota pristi kva ne'mofo, agri kvafima eri'zama e'neri'za naga'mo'za, (sadusi nagare) aposol nagara kanive rezmantane'naze. <sup>18</sup> Zamagra e'za aposol naga eme zamazeri'za mika vahe'mokizmi kina nompi omezmantane'naze. <sup>19</sup> Hu'neanagi ana kenegera Ramofo ankeromo'a eno kina vahe kafantmina eme anagino, zamarenlo atineramino, anage huno zamasmi'ne, <sup>20</sup> Ra mono nompi vutma vahepi omo otitma kahefa mani'za eri'zamofo keaga mika zamasmiho. <sup>21</sup> Anankema nentahiza, zahufa ko'ma atiam'aafi, ra mono nompi umarer'i'za agafa hu'za rempi huzami'naze.

Anante mono nonte ugota kva ne'ene (hae pristi), agranema nemani'za naga'anee e'za, kanisol (Senhidren) vahe ke hige'za atru nehazageno, ana

maka Isareli kva vahetaminena ke hutru hute'za, kina nonte kva vahetega ke atre'za, kinama hu'naza aposol vahera zamaretma eho hu'naze. <sup>22</sup> Hu'neanagi kina nonte eri'za vahe'mo'za kina nompi eme kazana onke'za, ete'za naneke eri'za vazazamo'za ome zamasmi'za, <sup>23</sup> anage hu'naze, Ome konana kina nona nofinu hentrako hunte'za, kerage kva vahe'ene ana nonte kegava hu'naza vahe'mo'za kafante otiza mani'naze. Hu'neanagi tagrama anagitama ufronana, agu'afina mago vahere huta onke'none. <sup>24</sup> Ra mono'nontema kegava nehaza (tempol kat) vahe'mofonte ugagota hu'nea kva ne'ene, mono nonte ugota kva (hae pristi) vahe'mo'za anankema nentahi'za, tusi'za hu'za hava nehu'za antahintahi hu'naze. Amanahu'zamo'a nankna hugahie hu'naze. <sup>25</sup> Hu'neanagi mago vahe'mo eno, kinama ome huzmante'naza vahe'mo'za, mono nompi otine'za, vahe'zagarmi mono naneke rempi hu'nezmize huno zamasmi'ne. <sup>26</sup> Mono nonte kva nehia ne'mo'a, magoka sondia vahe'ene vazazamo'za, ana aposol nagara ome zamavare'za e'nazanagi, sondia vahe'mo'za akohe'za agazone hu'za zamavare'za e'naze. (Na'ankure vahe'mo'za have knonu zamahe frizanku kore hu'za razana osu zamare'za e'naze.)

<sup>27</sup> Ome zamare'za ana aposol nagara ete'za kanisol (Senhidren) vahe zamure eme zamazeri ot'i'naze. Mono nontema ugote'nea nemo'a (hae pristi) zamantahigeno anage hu'ne, <sup>28</sup> tagra menina hanave kea huta, mago'anena ama ana agifina vahera rempi huozmitfa hiho huramantone. Keho amama rempima huzamiza zamo'a Jerusalemi kumapina antahi vagaraze, hankino Jisasima ahe'nazana tagriku ahe'naze hutma huneranta'ze. <sup>29</sup> Hu'neanagi Pita'ene ruga'a aposol naga'mo'za kenona zamire anage hu'naze, Anumzamofo ke'age nentahita ama mopafi vahe'mofonkea ontahigahune. <sup>30</sup> Tagri tafahé'i Anumzamo, keka zafarema ahetma hantinaza nera Jisasina azeri otine. <sup>31</sup> Anumzamo'a azeri otino aza tmaga kaziga'a anteno, ugagota kva ne' taguvazi nere hu'ne. Agrite Israeli vahe'mo'za zamagu'a rukrahe hanageno, kumizmia eri atrezmantegahie. <sup>32</sup> Higeta tagra e'i ana zama fore'ma hu'neana keteta, ama anankea hu'ama nehune. Ana higeno tagrama ke'nonazana ruotge Avamumo'a keteno huama hu'ne, kema antahiza avariri'za vahera Anumzamo'a ana ruotage Avamura zami'ne.

<sup>33</sup> Kva vahe'mo'za anankema nentahi'zageno'a, tusi zamarimpa hege'za zamahe frinaku hu'naze. <sup>34</sup> Hianagi Farisi nera Gamalieli'e nehaza ne'mo tra kemofo (lo) kagota huno rempi hunezmige'za, rama'a vahe'mo'za antahinemiza ne'kino otino, osia kna ama vene'ne zaga zamare meg'i za-manteho huno huzmante'ne. <sup>35</sup> Anante amanage huno kansol vahera zamasmi'ne, Israeli vahe'mote, nazanoma huzmantegahune hutma kema retromta hana'zana, antahi so'e hunetma anazana huzmanteho. <sup>36</sup> Mago'a kna koma evunefina, Tiutasi'a otino, Nagra ra vahe mani'noe hige'za, vahera 400'a naza vene'nemo'za, agranena eme hagerafi'naze. Hianagi agrira ahefri'zage'za, amage'ma nentaza naga'mo'za atre'za panini hazageno mago'zana osu'ne. <sup>37</sup> Anama hutegenoa' ana mefiga, mago Galiliti nera, Judasi'e nehaza ne'mo, zamagi kre'za erifatgo haza knare otino, mago'a vahera zamare agrarega atre'nea nera anazanke huno frige'za amage'ma ante'naza naga'mo'za panini hu'naze. <sup>38</sup> E'inahu'za fore hu'negu, tamagrira ama nanekea neramasmue, ama nagara mago kea huozmanteta zamatreho. Na'ankure, mopafi vahe'mo'ma amanahu'zama hanigeno'a, amne'zankna hugahie. <sup>39</sup> Hianagi Anumzantegati'ma ne'esigetma keaga huozmantegahaze. Anama hanutma aru Anumzamofo ha'rentezanku nehue, hige'za nentahi'za zamatre'naze.

<sup>40</sup> Kanisol vahe'mo'za ana zamumro kema nentahi'za, ana aposol naga kehu'agu'a zamante'za zamazeri'za tusi sefu zamite'za, mago'anena Jisasi agifina nanekea osutfa hiho nehu'za, zmatrage'za vu'naze. <sup>41</sup> Hige'za aposol naga'mo'za ana kanisol naga zamureti'ma zamatre'za nevu'za, Anumzamofo avure mani'neta Jisasi agire'ma eriga knaza erune, nehu'za muse hume vu'naze. <sup>42</sup> Hanki hakare knafina, ra mono nompine, nonte nontera nevu'za Jisasi'a, tazahu ne' Kraisi'e hu'za knare muse kea rempi hunezmi'za huama hu'naze.

## 6

### *E'se 7ni'a mono kva vahe huhampri zamante'naza naneke*

<sup>1</sup> Hagi anama haza knafina, Jisasima amage nentaza disaipol naga'mo'za ome rama'a hazageno namba zamimo'a ame'nanempi marei'zageno, Griki kema nehaza Jiu vahe'mo'za, Hibru kema nehaza Jiu kuma agafa vahet-mina kanive rezamante'za, Mika zupa kave'ma fakoma hazana kento a'ne nagara antahi nozamize hu'za hu'naze. <sup>2</sup> Hage'za 12fu'a aposol naga'mo'za ana mika amage'ma nentaza disaipol kevu zamasmizage'za emeritru hzage'za anage hu'naze. Ne'zama fakohu zankuke nehuta Anumzamofo nanekema osanunana knarera osugahie. <sup>3</sup> E'ina hu'negu tafuhete, tamagra amu'no tamifinti keso'e hutma 7ni'a vahe'ma zamu'zmamo knare'ma hu'nesnia vahe'ma, Avamu'ene knare antahi'zamo'ma avitenesia vahe zamazeri otinke'za, esageta tagra ama erizana refako huta zamazampi antesune. <sup>4</sup> Hu'neanagi tagratia nunamu hu'zante'ene, Anumzamofo naneke'a huama huta veamofona zamasmaita maka knafina vugahune. <sup>5</sup> Ana mika vahe kevumokizmia zamesige'za, ana hugahune nehu'za, ana 7ni'a vahe huhampri'naze, mago ne'ma hampona amentintine ne' Ruotge Avamu'mo agu'affima avite'nea nera Stiveni huhampriza Filipinki Prokuliusinki Nikenorinki Taimoninki Pamenesima, mago Antioku ne' Nikolas'i'a meg'i'a nagapinti ne'mo agu'a akrehe huno Jiu monopi amentinti nehia ne' huhampri'za zamaretru hu'naze. <sup>6</sup> Ana hute'za ana vene'ne zaga zamare'za aposol nagate vazage'za zamaza ante'za, nunamu huzmante'naze.

<sup>7</sup> Hagi Anumzamofo kemo'a mago'ane ra huno nevigeno, amagenentaza disaipol naga'mo'za Jerusalemi kumapina rama'a efore nehageno, ra'ma'a Jiu pristi vahe'mo'za zamentinti hu'za ke amage'anteme vu'naze.

### *Stiveni azeri'naza naneke*

<sup>8</sup> Ana higeno, Stivenina Anumzamofo asunkuzamo'ene hihamumo'a avite'negeno, tusi'a kaguva zane, avame'zanena vahe'mokizmi amunomppina erifore hu'ne. <sup>9</sup> Hianagi mago'a vene'ne zaga, Hibru osi mono nona (Sinagog Freman) vahe zamazeri atre monore nehzafinti Sairini kumate'ene, Aleksandria kumate'ene, mago'a Silisiiane, Esia rankuma'mo kegava hu'nefinti (provins) vahe'mo'za oti'za Stivenina keha rente'naze. <sup>10</sup> Hianagi Stiveni'ma knare Avamu'mo'ma azama huno knare antahi'zana amigeno kema hiazamofona, zamagra magore hu'za kea osu'naze. <sup>11</sup> Anante zamagra oku'a mago'a vahera anage hiho hu'za zamasm'i'naze. Tagra nentahunkeno Mosesene, Anumzamofonena zanazeri havizahu kea hu'ne hutma hiho hu'naze. <sup>12</sup> Ana kema hazazamo vahera zamarimpa zamazeri otige'za, ranra vahe'mo'zane kasegere ugagota hu'naza vahe'mo'zanena oti'za Stivenina eme avazu hu'za kanisol (Senhitren) vahe zamure vu'naze. <sup>13</sup> Zamagra pusante havigema hunte vahe zamaretageno, ana vahe'mo'za hu'za, Ama ne'mo'a, ontagneno Mosesene kasegegu'ene, ra mono nonku enena

huhaviza hunte'ne hu'za hu'naze. <sup>14</sup> Na'ankure tagra nentahunkeno ama nemo'a amanage huno hu'ne, Nazareti Jisasi'a eri haviza ruotge mono nona nehuno, Mosesi'ma tam'i'nea avu'ava'zana, eri atreno kahefa avu'ava eri fore hunaku nehie. <sup>15</sup> Anankema huntaza fakohu'za kenaku nehu'za ana mika kva vahe'mo'za avugosafima kazana, avugosamo'a ankero vahe'mofo avugosamo masa hiaza hige'za ke'naze.

## 7

*Stivenima hu'nea naneke*

<sup>1</sup> Ugagota pristi ne'mo'a huno, Stiveniga, amama hunegantaza kemo'a tamagefi? <sup>2</sup> Higeno Stiveni'a huno, nafuhetane nafaheta mika'motma nagri kea antahiho, nerageho Abrahamu'a, Mesapotamia mani'negeno, Masanentake Anumzamo'a avure ehanatitegeno henka'a atreno vuno Harania umani'negeno, <sup>3</sup> Anumzamo'a amanage huno asami'ne, **Vaheka'ane mopaka'anena atrenka, kaveri hanua mopare vuo.** (Jen-Agf 12:1)

<sup>4</sup> Anante Kaldia mopa atreno, Harani kumate umani'ne. Anante Abrahamu nef'a frigeno, Anumzamo'a huntegeno amama menima emani'naza mopeare e'ne.

<sup>5</sup> Anumzamo'a mago mopa manisana zane huno Abrahamuna omi'ne, mago osi atupa'e huno refako huomi'ne. Mofavrea onte'tfa hu'neanagi Anumzamo'a huvempa hu'ne, ana hu'neanagi Nagra kagri'ene mofavre zagaka'a henka zamigahue huno hu'ne. <sup>6</sup> Hianagi Anumzamo'a amanahu ke huno Abrahamuna asami'ne, **Kagehe'za ru vahe mopafi, mopazmi omane vahe umanigahaze.** <sup>400'a</sup> **Zagegafu'mofo agu'afina, mopa agafa vahe'mo'za kazokzo eri'za vahe zamavarente'za, kva huso'e huozmantegahaze.** <sup>7</sup> Hianagi Nagrani'a kazokzo eri'za zamisaza mopare vahera, nona'a zamazeri haviza huzmantegahue, huno Anumzamo'a hu'ne. **Anama hute'za henka zamagra atre'za e'za ama mopare Nagrira eme nagi hanta vazigahaze.** (Jen-Agf 15:13-14)

<sup>8</sup> Anumzamo'a Abrahamu'ene huvempa huno oku avufama tagahu nanekea huhagerafiteno, Abrahamu'a, Aisakina nefaza higeno 8'a zagegnama nemiana, oku avufa taga hu'naze. Aisaki'a Jekopu nefaza higeno, Jekopua 12fu'a tagehemofona nezmafa mani'ne. (Jen-Agf 17:10-14)

<sup>9</sup> Ana tagehe'mo'za Josefena kanive rente'za mizante atrage'za ru vahe'mo'za avare'za Isipi vu'naze. Ana hu'nazanagi Anumzamo'a agrane mani'neno, <sup>10</sup> knama nemizageno'a Anumzamo'a aza nehuno, knare avu'vazane, antahi'zana Josefena amigeno, Isipi kini ne'mofo Fero avurera knare higeno, Fero'a huntegeno ugagota kva Isipia hu'neno, noma'afima me'neazane nemania vahetera anazanke huno kegava hu'ne. <sup>11</sup> Anante Isipi mopare'ene Kenani moperara ne'zana fanane higeno, vahe'mo'za tusi'a zamagate'zampi manizage'za, tagehe'za mago kavera hakare'za eri fore osu'naze. <sup>12</sup> Hianagi ne'zana Isipi me'nem kema Jekopu'a nentahino'a, tagehemofona esete ne'za omerihogu huzmanteghe'za vu'naze. <sup>13</sup> Anante'ma mago'an (second time) vazageno'a, Josefe'n huno agra'agu huama higeno, Fero'a, Josefe afuhe'za e'naza kea antahi'ne. <sup>14</sup> Ananter Josefe'a ke nameke atrenteno nefä Jekopunku ene ana miko tuzagarazaga'agura nagritega echo huno hu'ne, ana mika'a 75fu'e. <sup>15</sup> Hanki Jekopu'a Isipi umani'neno, anantega agrane tagehe'zanena fri'naze. <sup>16</sup> Anantegatira zaferina'a eri'za Sekemu vazazamo'za, Abrahamu'ma zagoma atreno Hamori mofavre

nagapinti'ma mago'a zagoreti'ma mizama asente'nea kerigampi Sekamu ome asente'naze. (Jen-Agf 50:13.)

<sup>17</sup> Hu'neanagi Anumzamo'ma, Abrahamuma huvempama hunte'nea knamo'a kofta huno eku nehigeno, Isipima tagri vahe'ma mani'naza vahe'mo'za tusi vahe krerfa fore hu'naze. <sup>18</sup> Henka Josefema antahino keno osu'nea kini ne' Isipi fore huno kegava hu'ne. <sup>19</sup> Ana kinimo'a va-hetia rezmatga nehuno, tagehe'ina havi avu'ava hunezmanteno kasefa mo-favrema kasentenazana meg'i'a zamatrenke'za friho huno huhanavetine. (Eks-Ati 1:8-2:15) <sup>20</sup> Anama hianknafi Mosesena kasentegeno Anumzamofo avurera hentofa mofavre fore hutegeno, 3'a ikamofo agu'afina kegava hazageno nefa nompi manitegeno, <sup>21</sup> henka avare'za meg'i'a ometrageno, Fero mofamo'a avareno agri'a mofavregna huno kegava hu'ne. <sup>22</sup> Mosese'a Isipi vahe'mofo antahi'zana rempi huno maka eriteno, kema hu'zampine, avu'ava'zama'afina hankave nentake ne' fore huno mani'ne.

<sup>23</sup> Hu'neanagi 40'a zagegafu huku'ma nehuno'a nafuhe'i, Israeli vahera nantu antezmante nagesahie huno antahi'ne. <sup>24</sup> Mosese nevuno keana Isipi ne'mo, Israeli kazokzo eri'za nera nehegeno negeno, Israeli ne'mofo ahoke heno Isipi nera ahe fri'ne. <sup>25</sup> Mosese'a antahiana agri vahe'mo'za antahi ama hu'za, nagripi huvazino Anumzamo'a huntogeno tagrira tahokeheno tavarenaku e'ne hu'za hugahaze huno antahine, hianagi zamagra Mosesena antahi omi'naze. <sup>26</sup> Umaseno nanterana Moses'a nevuno keana, tare Israeli ne'tremoke ha' nehakeno, zanarimpa zanazeri fru hunaku, agra amu'noznifi vuno znazeri atrenaku nehuno anage hu'ne, Ama verarena, tanagra kogna mani'na'e. Nahigeta hara neha'e? <sup>27</sup> Hianagi magomo'ma havizama hunteno ahe frinaku nehimo'a, Mosesena retufe kanti netreno anage hu'ne, **Aza kva mani'enka tagrira refako hurantegahane?** <sup>28</sup> **Kagra okima Isipi ne'ma hae fri'nanankna hunka nagrira nahe frinaku nehampi?** (Eks-Ati 2:14) <sup>29</sup> Ana kema hia Moses'a nentahino, Isipia atreno viazamo, Midieni mopare anantega rurega vahe umani'ne. Mosese'ma Midienima umani'neno'a, tare ne'mofavre ksezanante'ne.

<sup>30</sup> Hagi 40'a zagegfuma agateregeno mago ankeromo hagage kokampi Sainai agonamofo agiafi osi zafafi teversrasra huno nerefí fore humi'ne. <sup>31</sup> Mosese'ma anazama negeno'a, naza fore nehieha nehuno kenakuma eravaoma higeno'a, Ra Anumzamo'a kezatino, <sup>32</sup> **Nagra kagri kagehe'i Anumzane, Abrahamuma Aisakima Jekopu Anumzane**, huno higeno, Mosesena, tusi ahirahitegeno avuge'zankura tusi agogogu nehuno avua onke'ne. <sup>33</sup> Higeno Anumzamo'a Mosesena anage huno asami'ne, **Kagia nona, kagaretira zafitro, na'ankure e'ima ot'i'nana mopa, Ruotge hu'nea mopare ot'i'nane.** <sup>34</sup> **Vahe'nima Isipima manine'za knama e'neriza zana tamage hu'na Nagra ke'noe, zamata hozama zamizage'za krafa kema nehzana Nagra nentahina zamaza hunaku menina erami'noe. Menina kagra eno, hugantesugenka, etenka Isipi vugahane.**

<sup>35</sup> E'ima ana Mosesima zamesra hunente'za, anagema hu'za, **Iza kagrira kva mani'enka vahera refko huo** huno huntelenemofo, e'i ana nera Anumzamo'a hunteno, kva ne' mani'enka, zamazahu ne' manio huno Anumzamofo ankeromofo azamphi osi zafafinti efore huno hunte'ne, <sup>36</sup> Ana ne'mo zamavareno nevuno Isipi mopare ene koranke hagerinte'ene ka'ma hagege mopafina kaguvezane avame'zana 40'a zagegfufina huzmeri hu'ne.

<sup>37</sup> Ama ana Moses, Israeli vahe'zagagura huno, Anumzamo'a kasnampa va-hetmia tamagripintira nagri'ma hiaza huno azeri otigahie. <sup>38</sup> E'i ana ne'mo, vahe kevumokizmi amu'nompima ka'ma mopafi mani'negeno ankeromo Sainai agonafina tagri tagehemokizmi Anumzamo'a kea huntogeno asimu erino mani naneke erino'ma eme tam'i'nea nere. <sup>39</sup> Tagri tagehe'za ke'a antahizanku zamefi hunemi'za, retufeganti netre'za, zamagu'afina Isipigura tusi zamagesa antahi'naze. <sup>40</sup> Eronina amanage hu'za asmi'naze, **Kago-tama hurantesia anumzantamina tro huranto, na'ankure ama ana Mosese'ma Isipi mopareti tavarenoma e'nea nera na'a fore huminefi tagra antahita keta osu'none hu'naze.** <sup>41</sup> Hige'za ana knafina golire havi anumzana bulimakao anenta kna huza tro hu'za, Kresramana avuga vunente'za anama zamazanuma troma hazazankura muse hunte'naze. (Eks-Ati 32:1-10) <sup>42</sup> Hu'neanagi Anumzamo'a amagena huzmanteg'e'za, zamagra havi anumzantema zagere'ma, ofunte'ma ikante monora hunte'naze, ko'ma kasnampa vahe'moma krente'neana **tama-gra Israeli vahe'mota ka'ma kokampima 40'a zage kafusima ofa nehuta Kresramana vu'nazana Israeli vahemota Nagrite Kresramana vu'nafi? A'o. Nagrite Kresramana ovu'naze.** <sup>43</sup> **Tamagra Moleki havi anumzamofo seli mono no erita magoka ne-eta, Rafani havi anumzamofo ofu eritma ne-etma, havi anumzamofo amema'a mono huntenuku tro hu'naze. Ana hu'negu ama mopafintira tamazeri atranenketma Babilon kumamofona kantu kaziga umaniga-haze.** (Emo 5:25-27.)

<sup>44</sup> **Tagri neragehoza seli mono no zamia eri'za magoka ka'ma kopi vu'naze. Anumzamo'ma Mosese asamino e'inahu hunka tro huo huno hunte'nea kante ante'za, anahu kna hu'za trohu fatgo hu'naze.** (Eks-Ati 25:9) <sup>45</sup> Henka tagehe'mokizimi mofavreramimo'za ana seli mono nona e'neriza, zamagra ana mopafi Josua'ene naga'amo'zanena megi'a vahe'mofo mopafi ha'hu'za eri'za mani'neza, seli mono nona kiza mani'nageno henka Devitinkna e'ne. <sup>46</sup> Anumzamofo avesi zamo'a Devitinte megeno, Anumzamoka natregena ra mono nonka'a kineno huno antahige'ne, Jekopu Anumzamo'ma manisia no kinaku hu'ne. <sup>47</sup> Hu'neanagi Solomoni'a Agri ra mono nona kinte'ne. (1 Kin 6:1) <sup>48</sup> Hu'neanagi, Mareri Agatere'nea Anumzamo'a vahe'mo azanteti kinte nompina omanigahie huno, Kasnampa ne'mo hunte'ne, <sup>49</sup> **Mona kumara trani'e, ama mopa nagiamofo trare, inankna no Nagrira kinantegahaze?** Huno Ramo'a hu'ne. <sup>50</sup> **Mika'zana monafine mopafinena Nagrake tro hu'noe.** (Ais 66:1-2.)

<sup>51</sup> Tamagra ke ontahi vahe mani'nageno tamaguamo ene tamagesamo'a tamage kemofona ifo nehie! Tamagra Ruotge Avamumofona tamagehemeo'zama hu'naza kna hutma maka kna tamefi hunemize! <sup>52</sup> Kasnampa vahepintira ina'na vahe tamagehe'za zamahe ofri'naze? Fatgoma Hu'nemo'ma esia zamofoma ko'ma huama'ma hu'naza vahera, zamagra zamahe fri'nazanki, tamagrati menina komoru huta zamahe fri'naze. <sup>53</sup> Korapara Anumzamo'a kasege'a ankero'mokizmi zamazampi antege'za, eri'za eme tamizageta enerita, ana nanekea tamagra amagera ontetma kea rutagare'naze.

<sup>54</sup> Ana kema Jiu kva vahe'mo'za nentahi'za, tusi zamasi vazige'za zamavera aninkreki hu'naze. <sup>55</sup> Hianagi Stivenina Ruotge Avamumo agu'afi efregeno, kefatgo hunagamuteno monafinka Anumzamofo masa'zana negeno, Jisasi'a Anumzamofo azantamaga kaziga'a oti'negeno ke'ne. <sup>56</sup> Nehuno agra anage hu'ne, Keho Monamo'a anagig'e'na negogeno, Vahe'mofo mofavremo'a Anumzamofo azantmaga'a oti'negena negoe. <sup>57</sup> Hianagi zamagra tusi'za hu'za rankege nehu'za, zamagesa renkani nere'za, magoka zamagare'za Stivenina ome azeri'naze. <sup>58</sup> Rankumapinti retufe'za megiamma ete'za, agafa hu'za have knonu ahe'naze. Ana nehazage'za, havige hunteza huama hanigeta antahi sune hu'naza vahe'mo'za amega nakreku'zamia hate'za mago nehazavea, Soli'e nehaza ne'mofo agafi eme ante'naze, (Apo 6:13) <sup>59</sup> Stivenima have knonu nehageno'a, Ramofo agi aheno amanage hu'ne, Ramoka Jisasige, avamuni'a erio! <sup>60</sup> Anage huteno rena reno ranke huno amanage hu'ne, Ramoka kumi'zami'a aze'orinka atrezmanto, huno nehuno fri'ne.

## 8

### *Soli'a mono vahe zamazeri haviza hu'nea naneke*

<sup>1</sup> Hagi Stivenima ahe fri'za zankura Solina rimpamo'a so'e hu'ne. Jerusalemi kumapina mono vahe'ma zamahe'zamo'a tusiza huno ana knera avitege'za, maka vahe zagamo'za panini hu'za fre'za Judia kaziga nevazage'za, Sameria kaziga nevzage'za apsol vahe'age mani'naze. <sup>2</sup> Knare hu'za fatgoma hu'naza vahe'amo'za Stiveni asenente'za, tusi zamasunku hu'za zavike agriku hu'naze. <sup>3</sup> Hianagi Soli'a, mono vahe zamazeri haviza nehuno, mago'mago nompina vuno eno huno vene'nene, a'nene zamavazu hu megi nezmatreno zamavareno kina ome huzmante'ne.

### *Filipi'a Sameria kaziga Jisasi agenke ome huama hu'nea naneke*

<sup>4</sup> Anante e'ima zamahe pananima hige'za fre'naza vahe'mo'za, maka kumate kumate vutere hu'za mono kea hu'naze. <sup>5</sup> Filipi'a Sameria rankumate viazamo, Kraisinku zamagrite huama ome hu'ne. <sup>6</sup> Filipi'ma hia nanekema tusi'a vahe'mo'za nentahiza, avame'zama hiazante'ma nege'za nentahiza, magoke antahintahire mika vahe krerafamo'za zamagesa ante'za antahi'naze. <sup>7</sup> Na'ankure havi avamu'tamima zamagu'afima mani'naza vahe'pintira, havi avamutmimo'za tusi'a kezati'za krafa nehu'za atirami'naze. Hagi mika zamufa fri'nea vahe'ene, kama vano nosaza vhahera krizamimo'a knare huzmante'ne. <sup>8</sup> Higeno ana rankumapina tusi'a museza fore hu'ne.

<sup>9</sup> Ana rankumatera, Saimoni'e nehaza ne'mo, afa' vahe'mofo avu'ava'za eri fore huvava nehia nera mani'neankino, Sameria vhahera huzamerige'za tusi'a zamagogogu nehu'za antri nehageno, agra ra ne' mani'noe huno hu'ne. <sup>10</sup> Hagi ositetima vuno rante'ma vu'nea vahe'mo'za, ke'ankere'za nege'za ana mika vahe'mo'za agri ke nentahi'za anage hu'naze, Ama nera, Ra Anumzamofo hanavegino, tusi'a hanave hu'za hu'naze. <sup>11</sup> Hige'za agri ke'are antahi'za amage ante'naze. Na'ankure agrama za'za knafi havige nehuno, zagoreno eri fore hu'neazanku anara hu'naze. <sup>12</sup> Ana hu'nazanagi Anumzamofo kumamofo avu'avaku'ene, Jisas Kraisi agire Knare Musenkema Filipi huama nehige'za zamentintima nehu'za, vene'nene, a'nemo'zanena erigafa hu'za monoti fre'naze. <sup>13</sup> Saimoni'enena amentinti nehuno henka mono tina nefreno eteno ovu'are Filipi'e

mani'ne. Hagi mika ruzahu zane ra avame'zama hiaza fore higeno negeno tusi agogogu nehuno antri hu'ne.

<sup>14</sup> Jerusalemi mani'naza aposol vahe'mo'za antahizama Sameria vahe'mo'za Anumzamofo naneke erize kema nentahi'za, Pitane Joni kizni huznante'naze. <sup>15</sup> Zanagrama uramina'ana nunamu huzmante'sake'za Ruotge Avamu'ma erisnagu urami'na'e. <sup>16</sup> Na'ankure mago mago'mofontera Ruotge Avamumo ome'nege'za, ko Ramofo Jisasi agire mono tinke fre'naze. <sup>17</sup> Anante Pita'ene Jonikea agafa huke zanazama ana Sameria vahe'mokizmi zamufare antake'za Ruotge Avamura eri'naze. <sup>18</sup> Hianagi Saimoni'ma kegeno Aposol vahe tfamo'zama zamazantfama antaza zante'ma Ruotge Avamu'ma zamigeno'a, agra zagoma zanamikema nehuno'a, <sup>19</sup> anage hu'ne, Amana hanave'a nagri'enena nami'enkena ina vahe'tema nazama antesuge'za anahu'za Ruotge Avamura eriho. <sup>20</sup> Hianagi Pita'a, agrikura anage hu'ne, Zago ka'ane kagranena haviza hugahie. Na'ankure kagrama kagesama antahinana zagoreti Anumzamofo muse'zana miza hugahue hunka nehane. <sup>21</sup> Kagrirra ama eri'zampina mago eri'zanka'a omanetfa hu'ne. Na'ankure Anumzamofo avurera, tumoka'amo'a knarera osu'tfa hu'ne. <sup>22</sup> E'i zanku kefo kavukva zanka'a neterenka, kagu'a rukarehe hunka havizama nehana zana atrenka, Ramofonte nunamu nehugen, kagu'amo'a knarema hanigeno'a kumi ka'a atregantegahie. <sup>23</sup> Na'ankure nagrama navuma kagoana, kagra kanive nerenga, kumi'mo kegina hugantegenka mani'nane, huno Pita'a higeno, <sup>24</sup> Saimoni'a ke nona anage hu'ne, Nagrikura, tanagra Ramofontega nunamuna hikeno, kema hu'na'a zamo'a nagritera omefta hino hu'ne.

<sup>25</sup> Anante'ma Pita'ene Jonikema hamponati'ne, Ramofo nanekema huama'ma hutekea, ete Jerusalemi vunaku nevuke, Sameria vahe'mokizmi nonkumapi mono naneke hume vuna'e.

### *Filipi'a Itiopia rankva ne'mofo Jisasi nanekea asami'nea naneke*

<sup>26</sup> Anante mago Ramofo ankeromo Filipina asamino, Sameriatira otinka Jerusalemi kaziga Gaza urami'nea kantega kavugosa huntenga vu. E'i, hagage ka'ma kopi vuo huno asamigeno, <sup>27</sup> nevigeno magora agonkna'za hari'nea Itiopia nera, Kantesi'e nehaza Itiopia kuini a'mofo zagore kegavama hu'nea ne'mo, Jerusalemi mono eme huteno eteno kuma'arega nevigeno, <sup>28</sup> hosimo renteno avazu huno vano nehia karisifi manino nevuno, <sup>29</sup> kasnampa ne'Aisaia krente'nea avontafera hamprime nevigeno Ruotge Avamu'mo'a Filipina asamino, Vunka antuma hosimo renteno avazuma hu'nea karisire urava'o huo higeno, <sup>30</sup> Filipi'a agiareno agrite viazamo ome antahiana, Aisaia kasnampa ne'mofo naneke nehamprigeno nentahino, amama nehamprina naneke, kagra antahiamma nehano? Huno antahige'geno, <sup>31</sup> Ana ne'mo'a huno, Mago'mo'ma huonasamisigena, inankna hu'na antahi amara hugahue? Nehuno Filipina ke higeno umarerino agrane umani'ne. <sup>32</sup> Ana ne'mo'ma hampri'nea avontafemo'a, amanahu ke hu'ne, **Sipisipi afu'ma ananke taga hunaku avare'za nevazankna hu'za avre'za nevu'za, sipisipi afu anenta azoka taga hunaku nehazageno, agira aka huno krafa osu'nea kna huno, Agra agira aka osu'ne.** <sup>33</sup> **Agrira azeri agaze hu'za knare fatgo zamuzmara huonte'naze. Na'ankure ko'ma Agri asimura ama mopafintira eri'nazana, nankna huno Agra mofavre antegahie?** (Ais 53:7-8) <sup>34</sup> Anante ke'nonama hifina, agonkna'zama hari'nea ne'mo'a anage huno, Filippinkura hu'ne, Muse hugantoanki (plis) azanku kasnampa

ne'mo'a ama kea hu'ne, agri'agu hu'nefi, hipu ruga'a vaheku hu'ne? 35 Filipi'a anama hampri'nea avontafepinti nanekea agafa huno, Jisasi knare musenkea ana nera asmi'ne. 36 Anama huke karankama nevukea mago'a ti me'nere eke, agonkna'zama hari'nea ne'mo'a huno, Ko! Ti me'neaki! Na'amo mono tima frezanifina nazerigahie? huno nehigeno, 37 [Filipi amanage huno hu'ne, Tamage hunka maka kagu'reti Jisasinku kamentinti hanunka tina fregahane nehigeno ozo hu'ne. Anumzamofo nemofo Jisasi Kraisi'a mani'ne, hu'na namentintia nehue huno hu'ne,] \* 38 ana hosimo renteno avazu nehia karisia ana ne'mo kehigeno azerigeno, anantarega'moke uramike tinte vuke, Filipi'a agonkna'za hari'nea nera mono tina frent'e'ne. 39 Anama huteke timpinti'ma meg'i'a akeno'a, Ramofo Avamumo Filipina avaresa huno vigeno, agonkna'zama hari'nea ne'mo'a mago'ane nonkeno, tusi muse hume karanka vu'ne. 40 Hianagi Filipi'a Azotasi kumate mani'neno nankna hu'na e'noeha huno agra'a keno erifore hu'ne. Ana kazigama nevuno'a mika ranra kumatera mono kea hutere hume nevuno Sisaria kumate uhanati'ne.

## 9

*Soli agu'a rukarehe hu'nea naneke*

**1** Ana knafinke Soli'a ana zanke huno Ramofo amage' nentaza dis-  
aiopol nagara zamahe frinaku tusi asi nevazigeno, rimpa henezmanteno,  
ugagota pristi nete vuno, **2** ome antahigegeno mago'a avona kremigeno  
erino Damaskasi vuno atruma nehu'za mono nehaza nontamimpi (sing-  
agoggs) marerino huama huno, agrama veo, aro Kraisti amage' nentaza  
vahé'ma zamagesuno'a, kina rezmanteno eteno zamaren Jerusalemi vu-  
gahie huno kre'ne. **3** Agrama vuno Damaskasi urava'o nehigeno'a, ame  
huno monafinkati hanaventake tavi'mo agrite remsa huntegeno, **4** traka  
huno mopafima nemseno'a, agrama mago kezankema antahi'nea kemo'a  
anage hu'ne, **Sol!** **Sol!** **Na'a higenka Nagrira kna nenamine?** **5** Higeno  
kenona'a, Ramoka, Kagra izage? huno higeno, Agra huno, **Nagra Jisas-  
ine, kagrama knama nenamina Nere.** **6** **Hu'neanagi otinka ana kumapi  
ufrenka vuge'za, kagrama nankna'zama hanana zamofo kea kasamigahaze.**  
**7** Soli enema nevaza vene'nemo'za kea osu'za ot'i'za mani'ne'za, kema hia  
agerura antahi'nazanagi, mago vahera onke'naze. **8** Soli'a mopafinti otigeno,  
avumo'a hari hu'neanagi, mago'zana onke'naze. Magoka vu'naza vahe'mo'za  
azante avazu hu'za Damaskasia avare'za ufre'naze. **9** Taregi magoki zagene  
haninena, avua onkeno ne'zane, ti'nena oneno amane mani'ne.

**10** Magora Jisasi amage'hentea nera, Ananaisi'e nehaza ne'mo Damaskasi  
kumatera mani'neno, ava'na keankna huno negegeno, Ramo'a anage huno  
asami'ne, **Ananaisi'o!** Higeno ke nona hunteno, ama mani'noe Ramoka.

**11** Anante Ramo'a asamino, **Otinka fatgoe nehaza kuma kampi vunka,  
Judasi nonte vunka, Tasasiti nera, Soli'e nehaza neku ome zamantahigo,**  
**na'ankure menina manino nunamu huvava nehie.** **12** Ana nehigeno Soli'ma  
ava'nagna'zama kefina, Ananaisi'ema nehaza ne'mo efrea zamo avuma  
kesigura azanteno nunamu hunentegeno, ana avanagnazampina ke'ne.

**13** Hianagi Ananaisi'a ke'nona'a huno, Ra Anumzamoka nagra rama'a va-  
hepinti, nama'a vahe krerafama Kagrite'ma zamentintima nehaza vahe'ma  
Jerusalemi kumapima mani'naza vahetamima zamahe'neana, ana ne'mofo

\* **8:37** 37 Mago'a antahintahi krerfane vahe'mo'za zamagesama antahi'zana, ese avontafepina teti  
sevenifima me'neea kea omnene hu'za onkre'naze.

agenkea nagra antahi'noe. <sup>14</sup> Nehuno ama kumapi eno, Kagri kagima nehe'za mono hugante'naza vahe'ma ugagota kva (hai pristi) vahe'mo'za hughnare hunte'naze. <sup>15</sup> Hianagi Ramo'a anage huno Ananaiasina asami'ne, Vu'o, na'ankure agrira ko huhampri ante'hoankino, Nagri eri'za ne' manigahie. Hagi Nagri nagi nagenkea erino meg'i a vahete'ene, kini vahete'ene, Israeli vahetera vugahie. <sup>16</sup> Na'ankure nama'a kna'zama Nagri nagire'ma erisia zana, Nagra averi hugahue. <sup>17</sup> Huno higeno, Ananaisi'a otino mani'nea nonte vuno, avufgare'ma azama omenteno nunamuma hunteteno anage huno asami'ne, nenu Soliga, kantegama neankeno Ramo Jisasi'ma kagrite efore'ma hu'nemo, kagrama etenka kavu negenka, Ruotge Avamura eri avitesane huno hunantege'na nagra e'noe. <sup>18</sup> Anagema nehigeno'a, ame huno avuragafinti iriknazamo kanoperamigeno, avua eteno negeno otino mono ti fre'ne. <sup>19</sup> Hagi anante ne'za neno hanavema e'nerino'a, Jisasima amage'nentaza disaipol naga'ene Damaskas' mago'a kna mani'ne. <sup>20</sup> Ame huno, ana zupage Jisasi agigenkea osi mono nompi marerino, ama Nera Anumzamofo Mofavre huno huama huno zamasmi'ne. <sup>21</sup> Hige'za maka antahiza vahe'mo'za tusiza hu'za antri nehu'za, anage hu'naže, ama'na nera Jerusalema mani'neno, Jisasi agire'ma zamazeri havizama nehia nero? Menina eno Jisasi agima huama nehaza vahera kina huzamanteno zamarenog ugota ra mono (hetprisi) kva vahete vunaku ne-eo? Hu'naze. <sup>22</sup> Hianagi Soli'a, antahintahi'afina hageno nevuno Jisasi'ema nehaza nera tazahu ne' Kraisi'e huno eri ama huno tusiza huno hanavetino nehigeno, ana kema Damaskasima mani'naza Jiu vahe'mo'za, nentahi'za inankna huta nanekeha huntesune ha hu'za kea osu'naze.

<sup>23</sup> Mago'a knama evutege'za, Jiu vahe'mo'za komoru hu'za Solina ahenaku hu'naze. <sup>24</sup> Hu'nazanagi ana komoru hu'naza kemo'a Soli agesafi efre'ne. Zagene haninena ahe fri'snagu zamurga ra vihu kafante ke ankerete'za mani'naze. <sup>25</sup> Hu'nazanagi, Polima amage'nentaza disaipol naga'mo'za kerage'afi avare'za eka eka kupi antete'za, kumamofo vihu keginamofo meg'i a kankamumpi nofi rentete'za mago kaziga avazu nehu'za atrageno urami'ne.

### *Soli'a Jerusalemi kumate ete vu'nea naneke*

<sup>26</sup> Jerusalemi ema nehanatino'a, Jisasi amage nentaza disaipol nagapi hagerafiahue huno hianagi, agrikura tusi kore nehu'za agra Jisasi amage' nentea nere hu'za maka'mo'za antahi'za zamifina ontahi'naze. <sup>27</sup> Hianagi Banabasi'a, Solina avreno aposol nagate viazamo, Jisasi'ma kampi kegeno keaga humi'neazane, Damaskasi mani'neno hanavetino'ma Jisasi agifima keaga hu'nea zanku enena hu'ama huno aposol vahera zamasmi'ne. <sup>28</sup> Ana huteno Soli'a zamagrane mani'neno, Jerusalemia fru huno vuno eno huno, Jisasi agigura korera osuno hanavetino keaga huama hu'ne. <sup>29</sup> Agra keaga nehuno, Grika kema nehaza Jiu vahe'enena, keha hu'nazanagi, zamagra ahe frisnaza kanku hakare'naze. <sup>30</sup> Hige'za mono afuhe'za anankema nentahi'za, avare'za Sisaria urami'za ometrageno Tasisi vu'ne.

<sup>31</sup> Anante Judia kazigane Galili kazigane Sameriana nemaniza mono vahe'mo'za, hagera hu'za nevu'za zamarimpa fru hu'za nemani'za, Anumzamofonku kore hunentageno, Ruotge Avamu'mo zamazeri hanavenetie'za, rama'a mono vahe fore hu'naze.

### *Pita'a Ainiasi azeri oti'nea naneke*

<sup>32</sup> Pita'a mago'a kumate kagino vano vano huteno, agra Lida kumate mani'naza (saints) mono nagatega erami'ne. <sup>33</sup> Anampina mago nera Aini-as'i nehaza ne' 8'a zagegafumo agu'afi avufa fri kri erino sipa'a atreno novia ne' keno erifore huteno, <sup>34</sup> Pita'a anage huno asami'ne, Ainiasia, Jisas Kraisi'a krika'a kazeri so'e huganteanki, otinka tafeka'a atrenka vuo, higeno anante ame huno ot'i'ne. <sup>35</sup> Ana hige'za ana mika Lidane, Saroni kumate ene mani'namo'za agri nege'za, Ra Anumzamofonte zamagu'a rukarehe hu'naze.

<sup>36</sup> Jopa kumatera Jisasi amage nentea a'mofo agi'a Tabita'e. Ana a'mofo agima (Griki kefi eri rukarehe'ma hazana Dokasi'e hu'naze. Ama ana agimofo agafa'a, dia afure hu'ne) agripina knare eri'zamo avite'negeno atupa'ma nehu'za zamasunku zampima nemaniza nagara miko zupa zamaza hu'ne. <sup>37</sup> Ananknafina kri erino fri'geno, avufama tinu sesema huntete'za eri'za vazazamo'za, anaga nomofo hunaragintepinka ome ante'naze.

<sup>38</sup> Jopa kumamo'a Lida kuma tva'onte me'ne, Pita'a anantega Lida kumate mani'ne hianke nentahiza, Jisasi amage nentaza disaipol naga'mo'za tare ne'tre huznantageke, vuke hampo'nage huke, Tagrikura zazatera tavega on-tenka muse hugantonanki (plis) ko eno huke ome asami'na'e. <sup>39</sup> Anankema asamikeno nentahino'a, Pita'a otino zanagrane vu'ne. Uma hanatige'za, avare'za anaga agofetu nomofo hunaragintepinka vu'naze. Miko kento a'nemo'za agrane ot'i'ne'za, zavira nete'za Dokasi'ma zamagranema ofri mani'neno tro hu'nea zanra kukenarami'ne, ruga'a kukenane averi'naze. <sup>40</sup> Hianagi Pita'a ana mika vahera meg'i a hunezmanteno, rena reno nunamu hu'ne. Huteno fri vahe kerfarega rukarehe huno, Tabitaga otio! Higeno avua hari huno, Pitana negeno ot'i'ne. <sup>41</sup> Nehuno Pita'a aza antegantenu azeri ot'i'ne. Anama nehuno zamentintima nehaza naga'ene, kento a'ne nagara kehuno asimu erie huno avazu huno eme zami'ne. <sup>42</sup> Anama hia nanekemo'a Jopa kokampina zamukino vuno eno higeno, rama'a vahe krerfamo'za Ra Anumzamofonte zamentinti hu'naze. <sup>43</sup> Pita'a mago'a zaza kna, afutamimofo akruteti hanave'zantami tro nehia ne' Saimoni'ene Jopa mani'ne.

## 10

### *Pita'a Koniliiasi ome kenaku vu'nea naneke*

<sup>1</sup> Sisaria kumatera mago nera Koniliiasi'e nehaza ne'mo, Italie hu'za nehaza 100'a Romu Sondia vahete ugagota kva nera, <sup>2</sup> meg'i a nagapinti monoku agesa nentahino, noma'afi nemaniza naga'an, Anumzamofonte kore hunenteno, zamunte omane vahera ne'zane, kukenanena muse huno nezamino, Anumzantega nunamuna huvava nehia nere. <sup>3</sup> Mago kinaga ferura 3 kilokinaza higeno, agra kefatgo huno ava'nagna'za kegeno, Anumzamofonte ankeromo efreno anage hu'ne, Koniliasio! higeno, <sup>4</sup> tusi kore huno uruha negeno anage hu'ne, Ramoka, na'ahie. Higeno agra anage huno asami'ne, Nunamu ka'ane, zamunte omane vahe'ma zamaza nehana kavukvara Anumzamofonte kore antahino keno hu'ne. <sup>5</sup> Menina mago'a vahera huzamantegi'za Saimoni'ene nehu'za, mago agi'a Pita'e hu'za nehaza netega Jopa vu'za ome kehinkeno eno. <sup>6</sup> Mago nera Saimoni'ene hu'za nehaza nera, afutamimofo akruteti hanave'za tro nehia ne'mo, hageri ankenare noma'a me'nehi anampi Pita'a mani'ne. <sup>7</sup> Kema humia ankeroma atreno vigeno, agrite eri'za erinent'a a netre'ne, mago sondia ne'mo monoku agesa antahintahi nehuno agri tavaonte nemani'a ne' ene kehige'za e'naze. <sup>8</sup> Mika kema zamasmiteno huzmantegi'za, Jopa vu'naze.

<sup>9</sup> Anante kna zupa kantega vu'za ranku'ma tavaonte'ma vazageno'a zagemo'ma feru asegeno, Pita'a no agofetu nunamu hunaku mareri'ne. <sup>10</sup> Huteno aga'zamo higeno ne'za nenaku nehige'za ne'zama retroma ne-hazageno'a, avu evuevu higeno nemaseno ava'na keankna huno, <sup>11</sup> kegeno monamo'a hagarо higeno, mago'zana tusi'a tavaravegnaza 4'a atupare atupare azerino atrageno mopafi erami'ne. <sup>12</sup> Anampina ruzahu ruzahu 4'a agazane zagarmi'ne, ama mopafi zage havu nehia zagane, zahopi harenvo vono nehia nama zagagi hu'za mani'naze. <sup>13</sup> Anama higeno'a mago ageru'mo agrite eno Pitaga, otinka ahenga no! <sup>14</sup> Anage hianagi Pita'a huno, I'o Ramoka kagri kavurema agruma osu'nea zama kasegemoma i'o hu'nea zana magore huna one'noankina, onetfa hugahie. <sup>15</sup> Higeno mago'ene eteno ana ageru'mo huno, Inankna'zama Anumzamo'ma azeri avusese hu'nesia zankura, avusese osu'ne hunka osuo. <sup>16</sup> Anahu'zana 3'a zupa fore hutegeno, anazana ame huno erino monafinka mareri'ne.

<sup>17</sup> Pita'a agu'afi nentahino, nazafore hige'na koeha huno agesa omeantahi emeantahi nehigeno, Koniliasi'ma huzmantegе'za aza naga'mo'za Saimoni nonku zamantahigeke hu'za, kegina kafante eme oti'ne'za, <sup>18</sup> kezati'za Saimoninku mago agi'a Pita'ema hu'za nehaza agine nera amifina mani'neo hu'za zamantahige'naze. <sup>19</sup> Ava'na kna'zama ke'nea zanku Pita'a agesa nentahigeno, Avamu'mo'a asamino, Ko, 3'a naga'mo'za kagriku nehakaze. <sup>20</sup> Hianagi kagesa ontahinka otinka uraminka zamagrane vuo, na'ankure Nagra hu'zmantoge'za e'naze. <sup>21</sup> Pita'a ana nagate uramino anage huno zamasmi'ne, Antahihо, ama nagrifranku nehakraze, nagafare tamagra e'naze? <sup>22</sup> Hige'za zamagra anage hu'naze, Mago sondia vahe kva nera Koniliasi'e meg'i'a ne'kino fatgo avu'ava nehuno, Anumzamfonku kore nehia nekino, mika Jiu vahe krerafamo'za knare nere hu'za nehaza ne'mofo Ruotge hu'nea ankeromo asamigeno, kagriku noniarega eno keaga eme nasminkena antahineno huno hurantegeta e'none. <sup>23</sup> Higeno Pita'a zamarenompi zamantegе'za masete'za, ko ati'geno otino zamagrane nevige'za Jopatira ruga'a zamentinti nehaza afuhe'za agrane vu'naze. <sup>24</sup> Hute'za anante knazupa, Sisaria vu'naze. Koniliasi'a egahaze nehuno, naga'anе tragoteno nemania knampa'aramina kehutru hu'ne. <sup>25</sup> Pita'a noma'afi e'fregeno'a, Koniliasi'a negeno, agafi rena omereno mono hunte'ne. <sup>26</sup> Pita'a avazuhu o'netino anage hu'ne, Otio! Nagra amama hanaza hu'na vahetfa mani'noe. <sup>27</sup> Nehuno agranema keaga hume nevu'ne, nompima ufreto omegeana rama'a vahe krerafa atru hu'za mani'naze. <sup>28</sup> Pita'a omenezmageno amanage huno zamasmi'ne, Tamagrati ko kasegea antahitama ketma hu'naze, meg'i'a vahepinti mago'mo'a Jiu vahe'ene tragotezano, nantu'ma antente zanku'ma i'o hu'za hampo'na kasegema ante'nazana antahi'nazanagi, Anumzamo'a naverino, mago'mofonkura haviza hu'ne huge, avusese osu'ne hunka osuo huno hu'ne. <sup>29</sup> E'ina hu'negu nagriku'ma kema hu'nana ke antahina e'noana, ke huhaviza hurnantezan'i' omane'ne, higena nagra kantahine-goe, na'amofo agafare nagrikura huzmantanke'za vu'naze? Huno antahigegeno, <sup>30</sup> Koniliasi'a kenona'a anage hu'ne, 4'a knama evia knafina noni'afi mani'nena, amanahu knare tri kilokia nunamu nehu'na, koana ame huno mago nera masa'nentake kukena hu'nea ne'mo navuga eme o'netino, <sup>31</sup> anage hu'ne, Koniliasiga nunamu nehunka, zamunte omane vahe'ma zamaza nehana kavukvara Anumzamo'a ko antahino keno hu'ne. <sup>32</sup> E'izanku vhahera huzmantegе'za Jopa vu'za Saimoninku, mago'agi'a Pita'e hu'za ne-haza nera ke humisageno eno. Zgagafa akruteti hampo'naza tro nehia nera,

Saimoni'e nehia ne'mofo nompi hageri ankenare mani'ne. <sup>33</sup> Hige'na avega onte'na ko huzmantoge'za kagritega vazagenka knare'za hunka e'nane. E'inahu'ma hu'negu menina, mika'mota Anumzamofo avurera emeritru hu'none. Ramo'ma tagriku'ma ome zamasnio huno hugantegenka e'nana nanekea tasmio.

### *Pita' zamasmi'nea naneke*

<sup>34</sup> Higeno Pita'a amanage hu'ne, Tamagerafa hu'na menina antahue, Anumzamo'a rukna rukna huno vahera zamesi nozmananteanki, magoke avamente avesinezmante. <sup>35</sup> Hianagi mika kotegeati vahe'mo'za (nation) Agri'ma koro hunte'za, fatgoma hu'neazama nehaza vahera, Agra avesi nezmanteno, Agrarega zamarenente. <sup>36</sup> Nagra antah'inoe, tamagra ko Knare Musenkema Israeli vahe'ma zamasmi'neana antahi'naze. Anumzamofo rimpa fruzana Jisasi Kraisimpi efore hu'ne, Agra mika zamofo Rane. <sup>37</sup> Joni'ma monoti freho kema huama'ma hutegeno'ma Judia kokampi Galiliti'ma agafa huno fore'ma hu'nea zantamina tamagratmi ko antahita ketma hu'naze. <sup>38</sup> Tamagra ko antahi'naze Nazareti Jisasina inankna huno Anumzamo'a Ruotge Avamuteti'ene hanave areti'ene huhamprinte'ne. Ana higeno Jisasi'a vano huno knare hunezmanteno, Sata'ma knama nezmia vahera zamazeri so'e huzmante'ne, na'ankure Anumzamo'a Agrane mani'negeno ana hu'ne. <sup>39</sup> Tagra mika'zama Judia mopafine Jerusalema hiazama tavuma keta antahita hu'nona vahere. Zamagra avare'za keka zafare hantite'za ahe fri'naza zama kenona vahe tagra mani'none. <sup>40</sup> Hu'neanagi ama ana Nera, Anumzamo'a taregi magoki knazupa azeri otino, azeri anteamu hu'ne. <sup>41</sup> Mika vahe'mo'za onke'nazaragi, tagra ke'none, Anumzamo'ma ko'ma huhampri tante'nea vahe'mota ke'none, Agrama fripinti'ma otigeta, agranema ne'zane tinema ne'nona vahere. <sup>42</sup> Hagi mono kea vahera ome zamasmiho huno huhanavetino huranteno, kore ke huzmanteta, Anumzamo azeri antesga huno fri vahete'ene mani vahetera keaga Jisasike refko huzmantegahie huno hurantene huta zmasamiho hu'ne. <sup>43</sup> Agrikura korapa mika kasnampa (profeti) vahe'mo'za kea hunte'za, miko'mo'ma Agri agire'ma amentinti hanimofona, kumi'a atrentegahie hu'naze.

### *Megi'a vahe'mo'za Ruotge Avamu eri'naza naneke*

<sup>44</sup> Pita'ma ana naneke nehigeno'a, Ruotge Avamu'mo ana mika nanekema nentahiza vahete eramine. <sup>45</sup> Hige'za zamufama tagahu'nea vahepinti zamentintima nehaza vahe'ma Pita'enema e'naza vahe'mo'za, meg'i'a vahete'enena Ruotge Avamu'mofo muse zamo'a herafiramie hu'za tusi antari nehu'za rama'a antahintahi hu'naze. <sup>46</sup> Na'ankure zamagra nentahizage'za, ruzahu ruzahu zamagerupinti Anumzamofo muse hunte'za Agi'a hesga hu'naze. Anante Pita'a huama huno, <sup>47</sup> tamagerafa huno, magomo'a timpima vahe'mo'ma mono tima fre'zankura i'o osugahie. Menima Ruotge Avamu'ma tagra erunakna hu'za eri'nazankino, mono tima frezamante zampina iza i'o huzmantegahie? <sup>48</sup> Anante Jisas Kraisi agire mono ti freho huno hampo'nanentake ke zamasmi'ne. Hutege'za mago'agna tagrane manitenka, vugahane hu'za agrira antahige'naze. (Hazageno zamagrane mago'agna mani'ne.)

<sup>1</sup> Hagi menina Anumzamofo aposol naga ene mago'a Judia nemani'za mono naga'mo'za, megi'a vahe'mo'za (Gentiles) Anumzamofo naneke eri'naze nanekea antahi'naze. <sup>2</sup> Ana huteno Pita'a Jerusalemi kumate mrerino vige'za, zamufama tgahu (circumcised) zamentinti vahe'mo'za agriku ke hakare hunente'za, <sup>3</sup> kagra zamufa taga osu vahe nompi vunka ne'zana zamagrane omene'nane. <sup>4</sup> Hu'neanagi Pita'a ke aseni'are erinte erinte huno huama hu'nene, <sup>5</sup> Nagra Jopa ran kumapi manine'na nunamu nehu'na ava'nagna'za kogeno, mago tavrave'gna zana atupare atupare azeri'neno atregeno monafinti eramino nagrite e'ne. <sup>6</sup> Keankere'na ana tavravefi koana, 4'a agiaza hunte'nea zagagafa ama mopafi mani'neane, trampi zagane asagugati vano nehia zagane afi' namaramine ke'noe. <sup>7</sup> Nagra nentahugen mago agerumo'a anage nagrikura hu'ne, Pitaga otinka, ahenka no hu'ne! <sup>8</sup> Hu'neanagi nagra anage hu'noe, Ra'moka avusese osuno agru osu'zana hunagru hu'nanke'na nonoa zagagafagina onegahue hu'na hu'noe! <sup>9</sup> Hianagi ana ageru'mo mago'ene anage monafinti hu'ne, Anumzamo'ma azeri agruma hu'eniazana, haviza huno agaru osu'ne hunka osu! <sup>10</sup> Anazana tagufa (3'a) zupa fore huteno, ete ana mika'zana avazu higeno monafi mareri'ne. <sup>11</sup> Ana'ma nehigeno'a, Sisaria kumateti huzmanteg'eza tagufa vahe'mo'za nemanua nonte ehanati'naze. <sup>12</sup> Avamumo nasamino, I'o osunka ana vahe'ene amane vuo hige'na, 6si'a nenafu'za nagrane azageta Koniliasi nontega vu'none. <sup>13</sup> Koniliasi kegeno ankeromo noma'afi oti'neno asami'nea kea, anage huno tasami'ne, huzamanteg'eza Jopa vu'za Saimoni'e nehaza ne', mago agi'a Pitana avare'za esageno, <sup>14</sup> agra mono naneke neramasaminkeno, kagri'ene mika nagaka'anena, kefo zantmifinti tamahoke ahegahie. <sup>15</sup> Anante naneke erigafa hu'na ne-hugen, Ruotge Avamu'mo zamagrite erami'ne. Ese'ma tagrite e'neaza huno eman'i'ne. <sup>16</sup> Ana hige'na Ramo'ma huno, **Joni'a tinu mono tina fre ramante'neankino, Avamunu tina frermantegahi** hu'nea kegu nagesa antahi'noe. <sup>17</sup> Ana hu'negu Anumzamo'ma magozahu muse'zama (gift) zamagri'ma zami'neana, anahu kna huno Agra Ramofo Jisasi Kraisinte tamentinti nehunkeno tami'neaza hu'negu, iza'na nagra Anumzamofo eri'zankura i'o huzamantegahue? <sup>18</sup> Anankema zamagrama antahite'za, kema huzmanteku'ma hazana netre'za, Anumzamofo ra agi ami'za anage hu'naze, Anumzamo'a megia vahe'enena zamavarege'za zamagu'a rukarehe hu'za zamasimu e'nerize hu'naze.

### *Antioku nemaniza vahe'mo'za mono eri'za eri'naza naneke*

<sup>19</sup> Stivenina ahe nefri'za mago'a nagara zamahe fragu vazige'za, atre'za Fonesiane, Saiprusine, Antiokune, nevu'za ru vahete mono osu, Jiu vaheteke mono kea ome zamasmi'naze. <sup>20</sup> Hu'neanagi Saiprusi vahe'ene Sairini vahe'mo'za zamagripinti mago'a Antioku e'za, agafa hu'za Ramofo Jisasi Knare Musenkea huama hu'za Griki vahe zamasmi'naze. <sup>21</sup> Ramofo hihamumo zamagripi me'negu, tusi'a vahe'mo'za zamagu'a rukarehe hu'za Ramofonte zamentinti hu'naze. <sup>22</sup> Ana'ma zamagrama haza zamonkemo'a, Jerusalemi mono vahete ege'za nentahi'za, zamagra Banabasi huntageno Antioku vu'ne. <sup>23</sup> Agrama eno Anumzamo'ma asunku'ma humazmantearaza negeno, muse nehuno zamazeri hanaveti ke zamasmino, Tamage huta tamagu'areti Ramofonte amage anteho. <sup>24</sup> Banabasi'a knare ne' mani'neno, Avamupi aviteno amentinti hu'negeno, tusi'a veakrerafamo'za maka vahe'mo'za Ramofonte e'naze.

<sup>25</sup> Ana huteno Banabasi'a Soli omegegenaku Tasisi kumate vuno, <sup>26</sup> ome ke fore huteno avareno Antioku kumate uhanati'na'e. Ana kafufina Banabasi'ene Solikea mono vahe'zaga mono kea hunezamikeno tusi'a vahe fore hu'ne. Anante Jissasima amage'ma nentaza disaipol naga'mo'za pusante (kristen) mono vahere hu'za zamagi'a eri'naze.

<sup>27</sup> Ana knafina mago'a kasnampa vahe'mo'za Jerusaleti erami'za, Antioku kumate ehanati'naze. <sup>28</sup> Mago'zmia Agabusi'e hu'za nehaza ne'mo, otino Avamumofo hanavefi maka mopafina agate'za fore hugahie huno hu'ne. (Klaodias Sisama ran kva emania knafi fore hu'ne). <sup>29</sup> Jisasi amage'ma nentamo'za, mago mago'mo'za zagoma eri'naza avamente eritru huta Ju-dia mani'naza tafuhe'intega (mono nagate) zamaga'zanku hugahazanki atre'zmantesune nehu'za, <sup>30</sup> anante eri tru hute'za, mono vahe'mo'za, Banabasine Soli kizani zanamizage'ne, Jerusalemi mono kva vahetega eri'ne vu'na'e.

## 12

### *Jemisi ahe nefriza Pitama kina hunte'naza naneke*

<sup>1</sup> Ana knafina Kini Heroti'a mago'a mono vahe zamahe, frinaku zamaz-eri'ne. <sup>2</sup> Joni nefu Jemisi azeri'za bainati kazinu ahe fri'naze. <sup>3</sup> Ana'ma hiazama Agrama kegено Juda vahe'mo'za musema hazageno'a, Pitana az-erino kina hunteku hu'ne. (Zo'ore breti muse hu'za nenaza knare, anara hu'ne.) <sup>4</sup> Heroti'a Pitama azeriteno avareno 4'a sondia vahe kevumofo (16'a sondia vahe) zamazampi ome antege'za, oza aza hu'za kava kri'naze. Heroti'a Pasova ne'za netesageno, amefi'a maka vahe zamufi Pitana azeri ama hunaku antahi'ne. <sup>5</sup> Ana higeno Pita'a kina nompi mani'nege'za, mono vahe'zagamo'za Anumzamo'ma azama hanigura hampo'nati'za nunamu hunte'naze.

<sup>6</sup> Ana kenegera masenkeno okina Heroti'a avareno keaga huntegahianki nehigeno, Pita'a tare sondia netremokizni amu'nompi mase'negeno, tarega azanteria seni nofiteti kina rentenageno, kva vahe'mo'za kina vahete kava kri'za kafante mani'naze. <sup>7</sup> Anama nehazageno'a ame huno Ramofo ankeromo efore higeno, masamo'a kina vahe nona remsa hu'ne. Ankeromo'a Pitana asoparega aheno, Ame hunka otio! Higeno seni nofimo'a Pita azantetira evurami'ne. <sup>8</sup> Ankeromo'a amanage huno Pitana asami'ne, Kamu'nofira nehunka kaga nona vazio, higeno Pita'a aganona antanine. Anante ankeromo'a anage huno asami'ne, Anakre kuka'a nentaninka na-mage' eno hu'ne. <sup>9</sup> Pita'a amage' avaririno nevuno, ankeromo'ma azama hiazana agra antahino keno osu'neanagi, agra avana negofi huno hu'ne. <sup>10</sup> Ese kafante kava hu'naza sondia vahe'ene, anante kafante kava hu'naza sondia vahe zamagterete'ne, ran kumapi vu kafana aenireti hagente'nea ran kafante akeno agra'a kafamo'a anagige'ne atirami'ne osi kampi nevakeno, ankeromo'a ame huno atreno vu'ne, <sup>11</sup> Pita'a agrake nevuno amanage hu'ne, menina nagra antahi'noe, Ra Anumzamo'a ankeromo'a huntogeno, Heroti'ene Jiu vahe'mo'za maka'zama hunante'naku hazafintira naza huno katufe natre'ne.

<sup>12</sup> Anante Pita'ma ana'ma hiaza antahino keno nehuno, Jonina mago agi'a Maki'e nehaza ne'mofo nerera Maria nontega, maka vahe'mo'za mani'neza nunamu nehazarega vu'ne <sup>13</sup> Anante Pita eno megi'a kafante eme vagare vagare higeno'a, Roda'e nehaza eri'za mofa'mo eno eme antahi'ne. <sup>14</sup> Pita ageruma nentahino'a, ana kafana onagi atreno tusi muse nehuno,

agareno vuno Pita'a kafante ot'i'ne huno ana vahe zaga ome zamasmi'ne. <sup>15</sup> Hu'neanagi zamagra anage ana mofakura hu'naze, Kagra negi nenegahane! Ana mofamo hanavetino tamage Pita'e nehige'za, kagra ankeroma'a ke'negahane hu'za mago'ane hu'naze. <sup>16</sup> Pita'a vagare vagare nehigeno, zamagrama kafa anagi'za nege'za, nankna huno e'neha hu'za tusi'a antri hu'naze. <sup>17</sup> Agra azanu avame hige'za akohe'za mani'zageno Ramo'ma kina nompinti azama huno avare atre'nea kea zamasmi'ne. Ana huteno anage hu'ne, Jemisine mono nafuhe'ina ama ana nanekea zamasmiho huteno atreno ru kumatega vu'ne.

<sup>18</sup> Ko'ma atige'za, kina nonte'ma kva hu'naza sondia vahe'mo'za tusiza hu'za Pita'a na'a hu'neha hu'za rama'a antahintahi hu'naze. <sup>19</sup> Anante Heroti'ma hakareno keama, keno erifore nosuno'a kavama hu'naza vahera kegaga huzmanteno tamagra frigahaze hige'za, zamahe friku zamare'za vazageno, henka Judiatira atreno uramino Sisaria umani'ne.

### *Heroti fri'nea naneke*

<sup>20</sup> Anante Heroti'a Tairi kumate vahe'ene, Saito kumate vahe'mokizmigura arimpa ahezamanteg'eza, zamagra mago zamarimpa hu'za agrite emeri atru hu'za, kini ne'mofo tva'onte eri'za ne' Blastusi, zamaza hinogu rimpma azeri fru hute'za, knare nomanizama kini ne'mo'ma zamisigu antahige'naze. Na'ankure zamagrama kave'ma e'nerizana kini Heroti'ma kava kri'nea mopafinti e'neri'ze. <sup>21</sup> Mago kna erintaza knazupa, Kini Heroti'a kini vahe kukena huteno, keaga refakohu trate mani'neno zamagrira rama'a keaga zamasmi'ne. <sup>22</sup> Hu'neanagi tusi'a vahe'mo'za agafa hu'za rankehu'za mago anumzamofo agerure, hanki vahe'mofo agerura omane'ne! hu'naze. <sup>23</sup> Ana kema nehazama'a, mago Ramofo ankeromo Herotina ahe tre'ne, na'ankure Anumzamofo ra agi omigeno agrira knimo amprigeno fri'ne.

<sup>24</sup> Hu'neanagi Anumzamofo kemo'a hageno rura huno vuno eno hu'ne.

<sup>25</sup> Banabasi'ene Solikea Jerusalemi mono eri'zama eri vagareteteke, Jon Makina nevareke ete Antioku kumate vu'na'e.

## 13

### *Banabasine Solikizni mono erizante huznante'naza naneke*

<sup>1</sup> Antiokua mono nonte'ma menima mani'naza kasnampa vahe'ene, rempi huzmi vhahera ama'a mani'naze, Banabasiki, Simioni (aganumpa nere hu'za nehaza ne'ki), Lusiusi'a Sairini ne'ki, kumate ugagota kva (Gavana) ne' Heroti knampa, magoka ositeti rasena'a ne' Manainiki, Soliki hu'za mani'naze.

<sup>2</sup> Anamo'za Ramofonte mono hunente'za, ne'za a'o hu'za nunamu nehazageno, Ruotge Avamu'mo'a anage hu'ne, Banabasine Soli kizni huhampri znante'keno, eri'za eriogu hua eri'zana eri'o hu'ne. <sup>3</sup> Ana hute'za ne'zama a'o hu'za mani'neza henka zamazana znagofetu ante'za nunamu hute'za huzamantake'ne vu'na'e.

### *Soli'ene Banabasike Saiprusi kumapi mono hu'na'a naneke*

<sup>4</sup> Banabasine Soli kiznia Ruotge Avamu'mo huznantege'ne Selusia uramike vente omerike Saiprusi ti amu'nompi me'hea kumate vu'na'e.

<sup>5</sup> Zamagrama Saramisi kumate vute'za, agafa hu'za Anumzamofo kea Jiu vahe osi mono nompi (Sinagog) huama hu'naze. Zanaza hanigu Joninena avare'ke umani'naze. (Mago agi'a Jon Maki'e.) <sup>6</sup> Zamagrama maka ti amunompi kumatami agatere'za nevu'za Pafosi uhanati'za zago nereno

Jiu vahepi havige kasnampa nera, Bar Jisasi'e nehaza nera mani'negeke ke'na'e. <sup>7</sup> Ana nera, Segius Paulosi knare antahizamo agatere'nea ne' Romu kamanimo huhamprintegeno ana ti amu'nompi kuma kava hu'nea ne'ene mani'ne, ana kamani kva (gavana) ne'mo'a Banabasine Soli kizni Anumzamofo ke eme asami'ogu zanagi hu'ne. <sup>8</sup> Hu'neanagi amene ne' Elimasi'a zago nereno ha' arezmanteno ana kamani kva ne'mo amentinti osanie hu'ne. (Elimasi'e huno Griki kefi hu'neana, avuatga huno zago nereno vahe zamahe fri nere hu'ne.) <sup>9</sup> Hu'neanagi Solina, mago agi'a Polikino, Ruotge Avamumo'a agu'afi avinetegeno avua kefatgo huno ana ne' negeno, <sup>10</sup> anage hu'ne, Kagripina havige avu'avamo'ene havizahu zamo'a avite'ne. Sata mofavre mani'nenka fatgo avu'avamofona ha' arenentane, kagra fatgo osu avu'avara netrenka, Anumzamofo fatgo avu'avara osugahampi? <sup>11</sup> Menina ko, Anumzamofo azamo'a ha' reganteankino kavurgamo'a asu hanigenka, osi'a knafina kavua onkegahane! Higeno ame huno avumo'a asu higeno, azante azerino vanohu vaheku hakre'ne. <sup>12</sup> Anante kamani (Gavana) kva ne'mo anazama agrite fore hiaza negeno, amentinti hu'ne. Na'ankure agra tusi'za huno Ramofonkema rempima humia zankura antri hu'ne.

### *Poli'ene Banabasike Pisidia Antioku kumate mani'na'a naneke*

<sup>13</sup> Anante Poli'ene agrane vu'naza vahe'mo'za Pafosi kuma atre'za ventefi mareri'za hagerimpi vu'za Pega kumate Pamfalia kaziga ehanati'naze. Hi-anangi Joni'a anante ome zanatreno ete Jerusalemi kumate vu'ne. <sup>14</sup> Pega kumara atreke, zanagra Pisidia Antioku ehanatike, mani fruhu knazupa osi mono nompi (sinagog) marerike umani'na'e. <sup>15</sup> Kasegene kasnampa vahe kema hampri vagarete'za osi mono nompi kva vahe'mo'za ke atrezmante'za anage hu'naze, Tafuheta mago'a tazeri hanaveti ke eri'enutma amane hugahaze. <sup>16</sup> Hazageno Poli'a anante otino azanu avame huno anage hu'ne,

Israel vahe'motmane megi'a vahe'ma Anumzamofonku koroma ne-haza'motma antahiho. <sup>17</sup> Ama'i Israeli vahe'mofo Anumzamo'a, tagri tagehe'ina huhampri zamanteno, ru vahe kumapima Isipima umani'nageno zamazeri knare zantfa nehuno hihamu'areti anampintira zamare megi atre'ne. <sup>18</sup> 40'a kafufi ka'ma mopafi zamarenko ome zamanteg'e za mani'naze. <sup>19</sup> 7ni'a ranra kumatamimpi mani'naza Kenani vahe zamahe hana huteno, Anumzamo'a ana mopafi vahe'amo'za manisagu mopa erizamige'za zamagra mopa erise'za mani'naze. <sup>20</sup> Anazama fore'ma hu'neana 450'a zagegafu nazampi fore hu'ne. Ana'ma huteno'a henka kva vahezaga zamazeri otige'za, kva krizmante'za mani'za e'za kasnampa ne' Samueli knare ehanati'naze. <sup>21</sup> Anante kini ne' tamisane hu'za antahigageno, Anumzamo'a Kisi nemofo Benzameni naga nofipinti ne' Soli zamigeno, 40'a zagegafu kini manino kva huzmante'ne. <sup>22</sup> Anumzamo'a kini Solina azeri netreno, Deviti azeri otigeno kini manino kva huzmante'ne. Agra anage huno Devitinkura hu'ne, **Nagra kogeno Jesi nemofo Deviti'a, Nagri'ma nagu'afima navenesia'zana agra nevaririno, maka'zama huo han-uazana hugahie.** (Sam-Zga 89:20, 1 Sam 13:14) <sup>23</sup> Ama ana ne'mofo nege-hompinti, Anumzamo'a Israeli vahe'mota tahoke'ma henoz tazahu nera Jisasi'na huvempa hu'nea kante anteno tam'i'ne. <sup>24</sup> Jisasi'ma hakare'a Israeli vahe zamufi eama osu'negeno, Joni'a huama huno mono tina fretma tamagu'a rukrehe hihno maka Israeli vahe'mota tasami'ne. <sup>25</sup> Hu'neanagi Joni'ma huhamprinte'nea eri'zama'a eri vaga reteno'a, mago'ene anage hu'ne, iza'e hutma nagrikura nentahize? Nagra ana nera omani'noe. Hu'neanagi

antahiho, mago'mo'a namage ne-e. Nagra knarerera osu'noanki'na agia anonte'ma anaki'neanofira katu ofegahue huno hu'ne.

**26** Nafuhetma Abrahamu agigo azankomofo nagare, amama Anumzanku koro nehu'za tamagrane mani'naza meg'i'a vahe'motma kumipinti tazahu kea tagrite atregeno e'ne. **27** Na'ankure Jerusalemi mani'naza vahe'mo'zane, kva vahe'zmimo'zanena Agra taza hu'nere hu'za ke'za antahi'za osu'naze. Kasnampa vahe'mo'za Agriku hu'za kre'naza kea maka mani fruhu (sabat) mono knare'ma hampri'za nentahi'za, antahiso'e osu'za ahenaku huhaviza hunte'naza kemo'a, avufa's fore hu'ne. **28** Ahe fri agafagura ke'za erifore osu'za, zamagra Paerotinte vu'za, antahige'za ahe frio hu'za hu'naze. **29** Agriku'ma hu'zama avon tafepi krente'naza maka nanekea huvagarete'za, keka zafareti erifenka atre'za eri'za vu'za hanagati'za tro hunte'naza kerifi ome ante'naze. **30** Hu'neanagi Anumzamo'a fri kragefe'nefinti azeri otigeno, **31** Galiliti amage' ante'za Jerusalemi mareri'za e'naza vahetaminte rama'a zupa efore hu'ne. E'ima ke'naza naga'mo'za vahepina huama hu'za menina nezamasmize. **32** Hanki neragehokizmima huvempa huzmant'eua Knare Musenke tagrama neramasmanana, **33** ama ana huvempa kea, Anumzamo'a tagrite eri knare huranteno Agra'a mofavre'aza huneranteno, Jisasinena azeri ot'i'ne, ko'ma nampa 2 zagame avontafepima krente'nea kante, **Kagra mofavreni'a menina maninkena, Nagra negafa'na manue huno huama hu'ne.** (Sam-Zga 2:7)

**34** Hu'neanagi e'ima hunte'nere, Anumzamo'a tamage huno Jisasina az-eri ot'i'neankino mago'anena frino onkasritfa hugahie, Anumzamo'a anage huno hu'ne, **Nagra agru huno ruotge hu'nea huvempa asomu ke Devitim ami'noana, menina tamagrira tamigahue,** (Ais 55:3)

**35** E'ina hu'negu mago'ene zagame avon tafepina anage huno kre'ne, **Kagra atresankeno ruotge hu'nemo'a onkasrigahie.** (Sam-Zga 16:10)

**36** Deviti'a, agrama manino e'nea knafina Anumzamo'ma erigahane huno hunte'nea eri'zana eri vagaretano, frige'za negehoma asentenafi ome asentageno avufamo'a kasri'ne. **37** Hu'neanagi Jisasina fri'nefinti Anumzamo azeri otigeno onkasri'ne. **38** E'ina hu'negu nenafutma antahita keta hiho, ama ana ne'pinti kumi tamia eri atresia ke huama hu'na neramasmune. **39** Ama ana nete'ma zamentinti hanu'za fatgo vahe manigahaze. Mosese kasegemo'a tamazeri fatgo osugahie. **40** Ana hu'negu tamagra kava hu'enkeno, kasnampa vahe'mo'za hu'naza nanekemo'a tmagritera fore osino. **41** *Kiza zokago kema nehaza vahe'tmina, keho! Tamano nevazinketma antri hutma fritma haviza hugahaze! Nagra knare eri'za enerugetma tamentinti'a nosaze. Vahe'mo'ma tamasmi'nigeta tamentintia osugahaze, huno kre'ne.* (Hava 1:5.)

**42** Anage huteke Poli'ene Banabasike atineramike'za, vahe'mo'za ama ana nanekea ru mani fruhu kna (sabat) zupa knare eme tasmigaha'o, hu'za zanasmi'naze. **43** Mono'ma osi mono nompi (sinagog) huvagarete'za, vu'za e'za nehazage'za, rama'a jiu vahe'mo'zane, Anumzanku koro nehaza meg'i a vahe'mo'za, Poline Banabasi kizani zanavriri'za nevzage'ne, zamazeri hanaveti ke hu'ne, Anumzamofo asunku'zampina hanavetita maniho hu'ne ana vahera zamasmi'na'e.

**44** Hanki anante mani fruhu kna (Sabat) zupa, ran kumapi mani'naza vahe'mo'za kuma azute'za Ramofo ke antahinaku emeritru hu'naze. **45** Mika

vahe eritru nehazage'za Jiu mono vahe'mo'za nezmage'za kanive reneznattageno, Poli'ma hiankegura mago zamarimpa huoznante'za, ana vahe'mo'za ha' reznante'naze. <sup>46</sup> Poli'ene Banabasi'kea hanavetike koro osu anage hu'na'e, Esera Jiu vahe'motma Anumzamofo nanekea tamasm'i'nonanagi, tamagra tamefi ana kea hunemitma fatgoma hutma mani'netma manivava asimu erizankura tame'nosigu, meg'i'a vahete tagra rukarehe nehu'e. <sup>47</sup> Ramo'a amanage huno hanavege hurante'ne, ***Nagra huhampri kantokinkka, kagra meg'i'a vahera tavi zami mani'nenka, kumip-inti zamazahu kea erinka mopa atupare uhanatigahane huno tasami'ne.*** (Ais 42:6, 49:6)

<sup>48</sup> Megi'a vahe'mo'za ana naneke nentahi'za muse nehu'za, Ramofo kegura tusi'za hu'za musenkase nehazageno, manivava zamasimu erigahaze huno huhampri zamante'nea vahe'mo'za zamentinti hu'naze. <sup>49</sup> Ana hazageno Ramofo kemo'a ana mopa kaziga zamukino vuno eno hu'ne. <sup>50</sup> Hu'neanagi Jiu vahe'mo'za, Anumzamofonku koro nehu'za zamagi me'nea a'nene, zamagi me'nea vene'nene zamarimpare ke hu'za zamazeri otizage'za, Poline Banabasi kiznia, ana mopa kazigatira zamahe anati tre'naze. <sup>51</sup> Zanahe anatizageke zanagiareti kugusopa rupopo hutra'azamo'a, huzmerino e'izama hazazamo'a knare osiaza hazankino knazamo'a tamagripi megahie ne-huke, Ikonia mu atreke vu'na'e. <sup>52</sup> Hu'neanagi Antioku kumate'ma zamentinti nehu'za Ramofo amage nentaza nagapina musezamo'ene Ruotge Avamu'mo'a avite'ne.

## 14

### *Poli'ene Banabasike Ikonia kumate mani'na'a naneke*

<sup>1</sup> Antioku mani'nakeno fore hu'neankna kna'za fore hu'ne, Poli'ene Banabasikea Ikonia kumate vuve, Jiu vahe osi mono nompi (sinagog) hampo'natike hakare vahe'mo antahi ama hu'are, mono kea huama nehake'za, rama'amo'za Jiu vahe'ene Griki vahe kevumo'za zamentinti hu'naze. <sup>2</sup> Hu'neanagi Jiu vahe'mo'za zamentinti ana kegura nosuza, meg'i'a vahe antahintahi eri savri hazage'za, ana netrena ha' rezanante'naze. <sup>3</sup> Ana hazageno mago'a knafina anantega mani'neke, mono kea hanavetike Ramofonkura nehune, asunku'zamofo kea nehakeno, avame'zane kagu-vazanena zanagri znazampi eri fore hu'ne. <sup>4</sup> Hu'neanagi ana rankumapi mani'naza vahe krerafamo'za amu'nompinti refako hu'za, mago'amo'za Jiu vahetega vazage'za, mago'amo'za aposol' vahetega anteza mago zamarimpa hu'naze. <sup>5</sup> Megi'a vahe'ene Jiu vahe'mo'zane kva vahezamine, zamazeri haviza huta have knonu tare netrena zanahe frigahune hu'za nehazageke, <sup>6</sup> Poli'ene Banabasikea ananke nentahi'ne, freke Likonia rankumamofa osi kumatrema Listrane Debine ana kaziga asoparega meno vu'nea mopare umani'na'e. <sup>7</sup> Anantega umani'neke mago'ene Knare Musen Kea huama hu'ne zamasmi'na'e.

### *Poli'ene Banabasikea Listra kumate mani'na'a naneke*

<sup>8</sup> Listra kumatera mago agia havizahu ne' kasente'nea ne' mani'ne, kasente'neregatira kana vano nosia nere. <sup>9</sup> Ana ne'mo Poli'ma huama hianke mani'heno antahi'ne. Poli'a ana ne'ma avuvi kefatgo huno negeno'a, amentinti nehiankino knare huntegahie nehuno, <sup>10</sup> ran ke huno asam'i'ne, Kagareti oti fatgo huo huno higeno, ana ne'mo'a, haru huno marerino tamino nehuno otino vu'ne. <sup>11</sup> Poli'ma hiazama ana vahe tamimo'za nege'za, Lakonia kefinti ranke hu'za, anumzantamimo vahe fore huno

tagrite ne-e hu'za hu'naze! <sup>12</sup> Zamagra Banabasinku Ziusi (havi anumzane) nehu'za, Polinku Hemesi'e (havi anumzane) hu'za kahefa zanagi ante'naze. Na'ankure Poli'a ke ne'ku hu'naze. <sup>13</sup> Ziusi havige anumzamofo mono nona, rankumamofona megi'a, tava'onte me'nea nomofo kva ne'mo'a, mago bulimakaona nevareno mago'a avasase zantamine erino rankumamofa kahante vige'za, agrane ana mika vahe'mo'za kresramana huznantenaku hu'naze. <sup>14</sup> Hu'neanagi aposol Poli'ene Banabasikea ananke nentahike kukena zani'a tagato tagatu nehu'ne, zanagare'ne ana vahetamimofo amunompi ufre'ne kezatike anage hu'na'e. <sup>15</sup> Ama vahe'motma, na'a amazana nehaze? tagra vahetafa mani'neta tamagri kna hu'no'e! Tagra Knare Musenke huama huta neramasmu'e, ana hanuketa tamazama osuno havi zampintira atretma, Agra monane mopane, hagerine maka'zama tro huno asimu anteno mani'nea Anumzante monora huntegahaze. <sup>16</sup> Hagi korapa knafima mani'naza vahera, Anumzamo'a zamatrege'za maka mopafi vahe'mo'za zamagra zamesia kante vu'za e'za hu'naze. <sup>17</sup> Hu'neanagi Agrama knare'zama hu'neana fraoki'neanki, monafinti kora atregero rigeno ne'za raga rentegeno, eri knare hunermanteno tamesia ne'zana neramino, musezana tamagu'afina ante'ne. <sup>18</sup> Anahu kea hu'neanagi kresramna vuuznantenaku hu'nazana vahe'ma i'o huzmantenaku hu'noanagi, tusi'a amuho huzmante'ne.

<sup>19</sup> Hu'neanagi Jiu vahe'mo'za Antioku kumate'iene Ikonia kumate'i za, havige nhiehu'za vahera zamagrarega eme zamavarente'za, Polina have knonu ahe'za avazu hu'za rankumapinti atirami'za hago frie hu'za zamagesa nentahiza megi'a ome atre'naze. <sup>20</sup> Hu'neanagi Anumzamofo amage nentaza disaipol naga'mo'za, regorave nehazageno anampinti otino ran kumapinka eteno ufarene. Maseke nanterana Banabasi'ene atre'ne Debi vu'na'e.

### *Poli'ene Banabasi kea ete Antioku rukrahe hu'ne vu'na'a naneke*

<sup>21</sup> Ana ran kumate'ma knare muse ke (gutnius) huama hakeno rama'a vahe'mo'za, amage ante'za disaipol naga fore hazageno, zanagra Listra kumate'iene Ikoniane Antioku kumate ete vu'na'e. <sup>22</sup> Zanagra Jisasi amage' nentaza disaipol naga zamagu'a zamazeri hanaveti ke hunezmasmike, hanavetita tamentintifina maniho, Anumzamofo kumapima vunaku'ma hanuta, rama'a knazampi ufrereta henka vugahune hu'na'e. <sup>23</sup> Ana ne-huke, mono kva vahe (elda) mago'a mono nonte zamazeri onetike ne'zana a'o huneke nunamu nehune, zanamentintima neha'a Ramofo azampi zamente'na'e.

<sup>24</sup> Ananteti Pisidi'a distrikifi ufreke agatera'azamoke, Pamfilia provinsifi ehanati'na'e. <sup>25</sup> Zanagra Pega kumate mono nameke ome huteke, Ataria kumate urami'na'e. <sup>26</sup> Anantetira atre'ne ventefi marerike ete Antioku kumate vu'na'e, korapara ana kumatei Anumzamofo asunkuzampi huzamantake'ne vunate ete ehanatin'a'e. <sup>27</sup> Zanagrama ehanatike mono vahetaga eme zamazeri atru huteke, maka'zama Anumzamo'ma zanagripima hu'neazana nezamasmi'ne, megi'a vahete kama eri hagro hige'za zamentinti hu'naza kea zamasmi'na'e. <sup>28</sup> Ana kumate Anumzamofo amage' nentaza disaipol naga'ene zazakna mani'na'e.

<sup>1</sup> Hagi mago'a vahe'mo'za Judia kazigati e'za Antioku ehanati'za amanage hu'za zamentinti nehu'za amage' nentaza nagara rempi huzami'naze. Mosese hu'nea kere amage' antetma tamavufa taga hiho. Anama osanutma Anumzamo'a tamahokeno tamaza osugahie. <sup>2</sup> Poli'ene Banabasi kema ke hakare ana vahe'enema hugantigama hutageno, mono vahe zagamo'za Poline Banabasine amu'no zamifinti mago'a vahe'mo'zane ke-hakare hu'nazaza eri fatgo hunaku mago'a, aposol naga'ene mono kva vahe'ene (eldas) mago zamarimpa osu'naza keaga huza eri fatgo hunaku Jerusalemi vu'naze. <sup>3</sup> Ana hige'za mono naga'mo'za, huzamantege'za, Fonesiane Sameria ufare'za agatere'za maka megi'a vahe'tamimo'za zamagu'a rukarehe hu'naza kea mono vahe'zaga zamasmige'za tusi'za hu'za muse hu'naze. <sup>4</sup> Zamagrama Jerusalemi uhanatizage'za, mono vahe'mo'zane, mago'a aposol naga'ene mono kva vahe'mo'za (eldas) muse hu'za zamavrage'za, maka'zama Anumzamo'ma zamagrite'ma hu'neazana huama hu'za zamasmi'naze. <sup>5</sup> Hu'neanagi mago'a Farisi mono vahepinti, zamagua rukarehe hu'za Kraisinte zamentinti hu'namo'za, oti'za anage hu'naze, megi'a vahe'mo'za zamufama taga hute'za Mosesi kasegema amage antesazana knare hugahie.

<sup>6</sup> Aposol naga'ene mono kva (eldas) vahe'mo'za atru hu'za ana naneke erifatgo hu'naze. <sup>7</sup> Eri atru hu'za zazate kea refako hu'za antahizageno, Pita otino ana nanekemofo nona'a amanage huno zamasmi'n'e, Nenfutma, tamagra antahi'naze mago'a kna evigeno, Anumzamo'a nagri huhampri-nanteno, megi'a vahepi mono kea huo huno hunantege'na, hugeno knare musen ke antahi'za zamentinti hu'naze. <sup>8</sup> Higeno Anumzamo vahe'mofo agu'a keno antahino hu'nemo'a, zamagridera eriama huno Ruotge Avamura zami'n'e, na'ankure tagri'ma hu'neazana huno zami'n'e. <sup>9</sup> Hankino tagrira Anumzamo'a ruzana huranteno, zamagrira ruzana huozmante'n'e, zamentinti nehazageno zamagu'a zamazeri agru hu'n'e. <sup>10</sup> Hagi menina nahigetma Anumzamofona rimpa he'zana nehutma, bulimakaomofo za-manankempi anaki nezmantaza kna knanentake agare namare zafa (Yoke) Jisasi amage nentaza disaipol nagapina nentaze. Tagri nerageho'e, tagranena eriga osu'nonankna knazana zaminaku nehazo? <sup>11</sup> Hu'neanagi tagrama tamentintima nehunana, Ramofo Jisasi asunku'zamo kefo zan-tifinti tahoke heno zamogra hu'nea kante anteno taza hu'n'e.

<sup>12</sup> Atru hu'naza maka vahetamimo'za, ke osu mani'nage'za, Polike Banabasikea kaguva'zane avame'zanema zanagripinti Anumzamo'ma megi'a vahe'ma huzmante'nea zana zamasmi'n'a. <sup>13</sup> Ana nanekema huvaga-maretogeno, Jemisi'a anage huno kenona hu'n'e, Nafuhetma ke'ni'a antahiho, <sup>14</sup> Saimoni'a anage huno huama hu'n'e, Anumzamo'a megi'a va-hera zamare'na Nagra'ni'a vahere hu'na huhampri zamantegahue hu'n'e. <sup>15</sup> Kasnampa vahe'mo'za krente'naza kemo'a, ama kenena mago kna hu'n'e, <sup>16</sup> *Anama hutesu'na, ete Nagra e'na Deviti noma karite'neana etena eme kigahue. Nagra'ni'a havizama hu'nea nona eriso'e hugahue.\** <sup>17</sup> *Ana nehanena miko vahe'mo'za, Ramo'nagu nehakesagena, za-magima hesuana, mika megi'a vahera Nagri vahere hu'na zamagrikura hugahue, huno mika'zama tro'ma hu'nea Ramo'a hu'n'e,* (Emo 9:11-12) <sup>18</sup> Hagi Korapa'ma evu'nea knafina amazana antahino keno Anumzamo'a hu'neane.

\* <sup>15:16</sup> Deviti nonkuma hu'neana, e'i avame ke huno agrama kva hu'nea kumaku (kindom) hu'n'e.

<sup>19</sup> E'ina hu'negu, huvagare nanekea nagra (Jemisi'na) amanage ne-hue, tagra mago'anena knazana ozamisune, na'ankure meg'i vahe'mo'za amu'no zamifinti rukarehe hu'za Anumzamofonte e'naze. <sup>20</sup> Hu'neanagi avonkreta amanage huta zamazeri haviza huzampintira maniganeta maniho huta zamasmi sanune. Havi anumzamofo ami'nesia zane, monko avu'ava'zane, anankema taga osu zagagafane, korama me'ne'nia ame'a oneho huta zamasmisune. <sup>21</sup> Na'ankure tagra antahi'none, ofenka'a knareti eno menima e'neana, Moses kasege'a huama hakare kumatera nehu'za, maka mani fruhu knarera (Sabat) osi mono (sinagog) nompi umareriz'za hampri'za nezamasmize.

*Meg'i vahe zamentinti nehazamokizmi avo krezm'i'nea naneke*

<sup>22</sup> Anante aposol naga'ene, mono kva vahe'mo'zane, maka mono kevumo'za amuno zamifinti huhampri zamante'nazana Judasinku Basabasi nehaza ne'ene Sailasi'a ana naga'amofo kva ne' zamine huhampri zananteke, Poline Banabasikizni Antioku vihogu huzmante'naze. <sup>23</sup> Ama'na avonkrentage'za eri'za vu'naze, aposol nagategati'ene mono kva vahe'motane, tamagri tamafuheta meg'i tafuhetane nerasarogta Antiokune Siriane, Silisia mani'namotarega musenke huramantone. <sup>24</sup> Kema antahunkeno'a, mago'a vahe'mo'za tagripinti vu'za, huozmante'nona ke ome tamasmiza kemo'a, kna neramino antahintahitamia zamazeri savari hu'naze. <sup>25</sup> Tagra mago tarimpa huta tavesima nezanantona tagri roneti Banabasine Poline magoka ama vahera huhampri zamanteta huzamantonke'za vaze. <sup>26</sup> Zanagra zanavufa tagri Ramofo Jisasi Kraisi agi'are atre'za neha'a netre'ne. <sup>27</sup> E'ina hu'negu Judasine Sailasikizni huzmantonankino, zanagra zani'a ama kemofona ome hamprike tamasmigahaze. <sup>28</sup> Na'ankure knare'ma hu'neana, Ruotge Avamu'ene tagranena, ruga'a knazana ontaminaku nehunanki, ama kemofeo avaririgahaze.

<sup>29</sup> Ana hu'neanki havi anumzamofo ami'nesia zane korama'a me'nenia ame'ane, anankema tagaosu zagagafa onetma monko'zana osugahaze. Tamagrama amazama osutma maniganeta manisazana knare hugahaze. Tamarimpa frune maniho.

<sup>30</sup> Ana hute'za zamagra atre'za Antioku urami'za, maka naga ome zamazeri atru hute'za anama kre'naza avona zami'naze. <sup>31</sup> Rankema hu'za ana avoma hampritageno, vahe'tamimo'za zamazeri hanaveti kema haz-azankura, tusi'a musenkase hu'naze. <sup>32</sup> Hagi Judasike Sailasikea znagrerenia kasanampa netrenike, so'e hu'za mani'saza kene zamazeri hanaveti ke nezmasmike, zamentinti nagara zaza naneke hu'ne zamasmi'na'e. <sup>33-34</sup> Mago'agna manitakeno, ana kumate zamentinti nehaza naga'mo'za, tanarimpa farune vi'o hu'za huznantageke, e'na'a vahetega eteke vu'na'e. <sup>35</sup> Hu'neanagi Poli'ene Banabasikea, rama'a rempi huzami vahe'ene Antioku kumate mani'ne'za rempi hunezami'za Ramofonkea huama hu'za zamasmi'naze.

*Polike Banabasikea mago zanarimpa osuke atane'na'a naneke*

<sup>36</sup> Henka'a mago'a kna evutegeno, Poli'a Banabasina amanage huno asami'ne, Ete vuta maka kumapi zamentinti nagara, Anumzamofo kema zamasmi'no'ana, nankna nehzafi ome zamagesu'e. <sup>37</sup> Banabasi'a, Joninku mago agi'a Maki'e nehaza ne' avare'neta vanu'e hu'ne. <sup>38</sup> Hianagi ko'ma avareke Pamfilii'a kumate nevakeno, zanatrelo eri'za e'o'ri vu'negu

Poli'a hamponatino i'o, avareta ovugahu'e hu'ne. <sup>39</sup> Hu'nege'ne anazan-teku fra vaziteke, otare atre hu'na'e. Banabasi'a Makina avareno votifi marerino Saiprusi ti amunompi kumate vu'na'e. <sup>40</sup> Hu'neanagi Poli'a Sailasi avarena vugahue nehige'za, Anumzamofo asunku'zane knare vi'o hu'za mono afuhe'zane asarahehe'zanena musen ke huznantageke atreke vu'na'e. <sup>41</sup> Siriane Silisi'a kumapi Poli'a ufreto nevuno, mono vahera zamazeri hanavetime vu'ne.

## 16

### *Poliike Sailasikea Timoti avare'ne vu'na'a naneke*

<sup>1</sup> Hagi Poli'a Debe kumate ene Listra kumate'ene ne-eno, mago nera Timoti'e nehaza ne'kino, nerera'a Jiu a'mo amentinti nehia a'mofo mo-favre. Hianagi nef'a Griki ne' mani'ne. <sup>2</sup> Listrane Ikoniamu mani'naza zamentinti naga'mo'za knare nere hu'za nehaza nere. <sup>3</sup> Poli'a avreno Timoti vunaku nehuno avufa taga huntene. Na'ankure mago'a Jiu vahera ana kumatera mani'nageno ana hu'ne, makamo'za antahi'naze agri nef'a Griki ne' mani'ne. <sup>4</sup> Zamagrama kumate kumate ufare'za nevu'za, aposol naga'mozane mono (elda) kva vahe'mo'zama Jerusalemi kumate'ma hu'naza kea meg'i'a zamentinti vahe'mo'za avaririsaze hu'naza ke ome zamasmi'naze. <sup>5</sup> Anama higeno mono vahe'mo'za zamentintifina hanave e'nerizageno, mago mago knafina rama'a vahe efare efare hu'za ra hu'naze.

### *Poli'a Masedonia ne'mofonku ava'nagna'za ke'nea naneke*

<sup>6</sup> Zamagra Pamfaliane, Galesia kaziga ugatere'za nevazageno, Ruotge Avamu'mo mono ke Esia kaziga huzanku i'o huno huzamantege'za agatere'za vu'naze. <sup>7</sup> Zamagrama Misia kaziga ete'za, Bitania kaziga vunaku hu'nazaragi, Jisasi Avamu'mo zamatrege'za ovu'naze. <sup>8</sup> Ana hige'za zamagra Misia agatere'za, Troasi rankumate urami'za vu'naze. <sup>9</sup> Keragera Poli'a mago ava'nagnaza efore higeno keana, Masedonia ne'mo otino mani'neno asamino, tagritega erakahenka Masedonia eme taza huo huno nehigeno ke'ne! <sup>10</sup> Ana avanagnaza Poli'a ketegeta, Anumzamo'a tasmino Masedonia vutma Knare Musenke ome zamasmiho nehiankita, ame huta ome zamasmisune huta hu'none.

### *Filipai kumate ehanati'naza naneke*

<sup>11</sup> Troasi kumateti ventea erigantu atreta hagerimpi vufatgo huta Samotresi vuta, ugatereta anante kna zupa Niapolisi kumate uhanati'none. <sup>12</sup> Anantetira atreta Filipai kumate vu'none, anama mani kagi'naza kumamofo, ran kumara Masedonia, Romu kamanimo kavagri'nea kumate mago'a kna ana kumate mani'none. <sup>13</sup> Mani fruhu knazupa rankumamofo kafampinti atiramita tinnenare nevuta, tagesama antahunana mago'a Jiu vahe'mo'za nunamu nehaza kumara me'negahie nehuta, a'ne naga maninageta anante umanita agafa huta, ana a'ne naga'enena kea hu'none. <sup>14</sup> Mago ara agi'a Lidia'e nehaza a'mo knare konariri'ane fitu tavrave hatino zagore netrea a'mo, Taitaria rankumateti a' mani'neno Anumzamofonte mono hunentea a'mo kema huna kea antahi'ne. Anumzamo'a agu'a eri rukrehe higeno Poli'ma hiankea antahi'ne. <sup>15</sup> Ana a'ene noma'afi nemani'za naga'anema mono tima frete'za, anage huno Lidia'a tantahigeke hu'ne, Tamagra nagriku'ma Ramofonte mani tragoteno'ma mani'ne hanutma noni'afi eta emanaho, huno hampo'natino tantahigeke higeta noma'afi vuta umani'none.

### *Kina nompi zamante'nea naneke*

<sup>16</sup> Anante nunamuhi kumatega vunaku nevunkeno, kazokzo eri'za mofa'mo'a eme tage'ne. Ana mofara havi avamu'mo agu'afi mani'neno henkama fore'ma haniaza hufore nehigeno, kva'amo'za hufore'ma ne-hige'za knare zago e'nerizane. <sup>17</sup> Hanki ana mofa'mo Poline tagri tamefi tavririno ne-eno kezatino zmasamine, Ama vahera Marerisa Anumzamofo kazokzo eri'za eneri'za vhahere. Ama vahe'mo'za kefovantamifinti tma-hoke aheno tamavaresia naneke tamasmiku neaze. <sup>18</sup> Hakare knafina ana mofa'mo anazanke hu'ne. Hu'neanagi Poli'ma anankege antahiazamo'a avesra higeno, rukrehe huno ana avamuku anage hu'ne, Nagra Jisas Kraisi agifi hugantoanki atiraminka evuo! Higeno ana mofara atreno atirami'ne.

<sup>19</sup> Hu'neanagi ana mofa'mofo kva vahe'mo'za zamema ante'za zagoma e'neriza zama vige'za, Poline Sailasikizni zamagra ome zanazerite'za, zanavazu hu'za kva vahe'zagare maketi kumapi maninarega vu'naze. <sup>20</sup> Zamagrama kagota hu'za ke fakohu (megistret) kva vahe zagare zanavare'za vute'za anage hu'naze. Ama netremokea tagri ran kumapi vahera zamazeri savari neha'e, na'ankure zanagra Juda netrenkike, <sup>21</sup> zanagrama vahe'ma rempi hunezmike amaza hihoh a'azamo'a, Romu vahe'mota tavutava'za ha'renerante. <sup>22</sup> Rama'a vahe'mo'za eri atru hu'za ha'rezmantageno, ke fakohu kva vahe'mo'za Poline Sailasikizni kukena zani'a eri vararo hutrete'za, kanonteti knonkeve zanami'o hu'za huzmante'naze. <sup>23</sup> Tusiza hu'za sefu kanonkeve zanamite'za, kina nompi zanavare'za ome matevu'za nezanatre'za, kina nonte kva nekura hunte'za, kegava huso'e huo hu'za asami'naze. <sup>24</sup> Ke fakohu kva vahe'mo'za, kina nompi kva ne'ku, kina nompi znavrento hia ke antahiteno, agu'afinka me'nea kinanompi zanavarenteno, zafafi zanagia erinteno anaki znanterge'ne mani'na'e.

<sup>25</sup> Kenage amu'nompi Polike Sailasikea, Anumzamofontega nunamune zaga'mene nehakeno, ruga'a kina vahe'mo'za zanantahi'naze. <sup>26</sup> Ana nehakeno ame huno tunsi'a imi energeno, kina vahe nomofo agafa'amo'a tore tore hu'ne. Ame huno maka kafamo'a anagigeno, maka kina vahe zamazampi rente'naza nofimo'a evurami'ne. <sup>27</sup> Kina vahete kva ne'mo'a avu vase'nefinti otino, keana kafana anagi vagare'negeno, bainati kazin-knoma'a erino agra'a ahefrinaku hu'ne. Na'ankure agesama antahiana hago kina vahe'zagamo'za fre'naze hanuno ana hu'ne. <sup>28</sup> Hu'neanagi Poli'a amanage huno ranke hu'ne, Kagra kavufarera mago'zana osuo, na'ankure tagra ama ofreta maka mani'none! <sup>29</sup> Tavi tagita eho huteno ana kina nompinka ufarenlo Poline Sailasi kizni zanagiafi ahirahi neregeno utraka huno umase'ne. <sup>30</sup> Anante otino zanavreno atiramino fegi nevuno, amanage huno zanantahige'ne, Ina kna hanugenno kefo zaniasinti nahoke ahegahie? <sup>31</sup> Ana ke'arerera anage hu'na'e, Ramofo Jisasinte kamentinti nehugenno, kefovanka'afinti kahoke neheno, nonka'afima nemani'za naga'moza'nema za-mentintima hanageno'a zamahoke ahegahie. <sup>32</sup> Anage nehuuke Ramofonke nesamike, maka noma'afima mani'naza vahera zamasami'na'e. <sup>33</sup> Ana kenageke kina nonte kva nemo'a zanavufafi zanahe'naza namuna sese huznantetegeno, agri'ene noma'afi mani'naza nagara mono ti ana keregeke frezmante'na'e. <sup>34</sup> Kina nonte kva ne'mo zanavreno noma'afi ufarenlo ne'za ome tro huznanteteno, Anumzant amentinti hia zankura, tusiza huno ana mikro noma'afima nemaniza naga'anena musena hu'naze.

<sup>35</sup> Nantera ko'atigeno ke fakohu kva vahe'mo'za, ati vahe zaga huza-manteno anage hu'ne, zanatrenke'za ana ne'trena vi'o hu'naze. <sup>36</sup> Kina

nonte kva ne'mo Polina amanahu ke ome asami'ne. Ke fakohu kva vahe'mo'za (jas) zanazeri meg'i a zanatre'o hunantage'na e'noe, hagi menina atiramita tanarimpa frune vi'o huno zanasmi'ne. <sup>37</sup> Hu'neanagi Poli'a ati vahe'mokizmi ke nona'a amanage huno zamasmi'ne. Zamagra rama'a vahe zamufi knare ke agafa e'orine'za havige zante tahenaze, tagranena Romu mopa agafa vahe mani'nonanagi, kinafi tavare'za emerante'naze. Hagi menina oku'a hurantenaku nehazo? Tamage anara osu'tfa hugahaze! Zamagra'a zmi e'za eme tavare meg'i tatregahaze. <sup>38</sup> Ana naneke ati vahe'mo'za ke fakohu kva vahe ome nezamasmige'za nentahi'za, Poli'ene Sailsikea Romu vahe mani'no'e hukema ha'azanku zamagogogu nehu'za koro hu'naze. <sup>39</sup> Ana hute'za vu'za Polina zamasunku ke ome huznantete'za, zanavre'za atirami'za ama ran (siti) kumara atreta vi'o hu'za mago'ane huzanante'naze. <sup>40</sup> Anama kina nompinti atiramitekea Lidia nontega vute'ne, zamentinti nehaza naga ome nezamageke, zamazeri hanaveti ke hunezmanke atreke vu'na'e.

## 17

### *Poli'ene Sailsikea Tesalonaika kumate manina'a naneke*

<sup>1</sup> Hagi amfipolisine Apolonia rankumatre ugamere'za vute'za, henka Tesa-lonaikā rankumāte Jiu vahe osi mono no (sinagog) anantega me'nere e'naze. <sup>2</sup> Poli'a Jiu vahe'mo'za osi mono nozmi fi mani'nageno marerino, korapa agrama nehiaza huno, tagufa mani fruhu kna (Sabat) zupa avontafepinti kea zamasmino, <sup>3</sup> ana kemofo agafa'a eriama nehuno huzamasamino, Kraisina ahesnageno ata eriteno fripintira otigahie hu'ne. Ama ana Jisasku'ma nehuana e'i Kraisi'e. <sup>4</sup> Mago'a Jiu vahe'mo'zane, rama'a Anumzanku koro nehaza Griki vahe'mo'zane, zamagine a'nemo'zanena Poline Sailasi ene tragote'za hagerafi'za mani'naze. <sup>5</sup> Hu'neanagi zamarimpa zamazeri otige'za Jiu vahe'mo'za antahi haviza hunezmante'za, kanivere'za kefo vahe maketi kumapi zamazeritu hu'za, ran kumapi ranke hute'za ana vahe'mo'za Jasoni nona tagana taganu vazi'za, Poline Sailasi kiznigu hake'za zanavre'za atru nehazafi vunaku hu'naze. <sup>6</sup> Ana vahe'mo'za Poline Sailasi kizanima hake'za erifore nosu'za, Jasonine, mago'a zamentinti nehaza afuhe'inena zamazu hu'za rankumamofo kva (siti ofisa) vahete vu'za ranke hu'za anage huzmant'e'naze, ama vahe'mo'za mopane mopane hazenke eri fore nehaza vhahera ama e'naze. <sup>7</sup> Hagino Jasoni'a muse huno nantu vahe noma'afi osi'agnya manihogu zamarente'n'e! Zamagra Sisa hanave tra kea ha' renente'za anage hu'naze, mago kinima mani'neana agi'a Jisasi'e hu'za nehaze! <sup>8</sup> Ana vahe'mo'za rama'a vahe'zaga zamazeri savri nehazageno, rankumamofo kva vahe'mo'za ana kea antahi'naze. <sup>9</sup> Anante ran kumamofo kva vahe'mo'za Jasoni ene zamentinti naga'mo'za mizasaza zago erite'za, henka zamatrage'za vu'naze.

### *Beria kumate Poli'ene Sailsike mani'na'a naneke*

<sup>10</sup> Hagi zamentintima nehaza naga'mo'za ame hu'za Poline Sailsinena kenageke huznantageke, Beria rankumate vu'na'e. Uhanatiteke Jiu vahe osi mono nonte vu'na'e. <sup>11</sup> Ana Jiu vahe'mo'za antahi'za zamimo'a knare huno ama' hu'negu, Tesalonaikama nemaniza Jiu vahe'mo'za nehazaza osu'naze. Na'ankure mono kema ha'ana muse hu'za eneri'za, ama kemo'a tamage hu'nefi hu'za maka zupa avontafepi rezaganeza ke'naze. <sup>12</sup> E'ina hu'negu rama'a Jiu vahe'mo'za zamentinti nehazage'za, zamagima me'nea Griki a'nene vene'nemo'zanena zamentinti hu'naze. <sup>13</sup> Hu'neanagi Tesalon-aika mani'haza Jiu vahe'mo'za antahizama, Poli'a Anumzamofo kea Beria

ome huama nehie kema nentahi'za, zamagranena anantega e'za, keomentemente hu'za, zamagu zamagesa eri savari hu'naze. <sup>14</sup> Anante Anumzante mani'naza naga'mo'za, Polina huntageno ame huno hagerinkena vu'ne, hianagi Sailasi'lene Timotikea anante Beria kumate mani'n'a'e. <sup>15</sup> Hanki Poli'ene vu'naza vahe'mo'za, avega hu'za Atens rankumate ome netrazageno, Sailasine Timoti kiznigu nagritega ame huke e'o kema humazamantetege'za, atre'za ete Beria vu'naze.

### *Polima Atens rankumate mani'nea naneke*

<sup>16</sup> Poli'ma Atens kumate zanavega anteno mani'negeno, rimpamo'a kna nehigeno asunku hu'ne, na'ankure ana kumapina havige anumza tro'ma hunte'naza'zamo'a, rama'a me'negeno negeno ana hu'ne. <sup>17</sup> Ana huteno mago'a Jiu vahe'ene, Anumzamofonku koro nehaza meg'i vahe'ene osi mono nompi ome zamaretru huno nezamasmino, makedi kumapi maka kna emeri atruma hazza vahera nanekea zamasmi'ne. <sup>18</sup> Anahu kna huno mago'a Epikurien vahe'ene, Stoik vahe'mo'zanena vahe'mofo no-mani'zama rezagane'zama negaza vahe'mo'za (Filosofa) kehakare hunentageno mago'amo'za anage hu'za antah'i'zame, nankna ke ama neginagi vahe'mo'za hunaku nehie? Ruga'amo'za hu'za, agra ru anumzanku nehia nere. Na'ankure Jisasi agi agenkene, fripinti'ma ot'i'nea Knare Musenkegu hu'naze. <sup>19</sup> Ana hutege'za Polina avre'za (areopagus) kanisol vahe'mo'za ke erifatgo nehzare vu'za anage hu'naze, Knare ama'i kahefa kema rempima hunezamina kea hananketa antahisumpi? <sup>20</sup> Na'ankure tagra tagesa hakare huna ke kagra nehane, hagi ke agafa'amo'a na'ane hu'nefi antahinaku nehune. <sup>21</sup> Maka Atensi vahe'ene ru mopareti vahe'mo'za ana kumapi emani'naza vahe'mo'za knazimi'a atre'za manine'za kahefa zama fore hia zamofo naneke huge antahige hu'naze.

<sup>22</sup> Ana higeno Poli'a kanisol vahe'mo'za ke erifatgo nehzare otino (Areopagus) anage hu'ne, Atensi vahe'mota, nagrama koana hakarezante tamagra monora hunentaze. <sup>23</sup> Na'ankure nagra vano nehu'na urava'o hu'na rezagane'na mono'ma hunentaza'zama koana, mago itama (alta) husga huntenarera anage hutma krente'naze, ontahinona Anumzantegi hutma hu'naze. E'ina hu'negu ontahinetma mono'ma hunentaza zamofonku, e'i nagra huama hu'na neramasmue. <sup>24</sup> Ama mopane maka'zama me'neaza tro hu'nea Anumzamo, Agra'a monafine mopafinena Ra mani'neno, vahe'mo'za zamazanu ki'naza mono nompina nomanie. <sup>25</sup> Mago'a zankura atupara nosigeno vahe'mo'za zamazanu tro hu'za aza nosaze. Na'ankure agra'a asimu anteno mani'zana zamige'za zamasimu antageno, maka'zana hakare vahe'mofona nezamie. <sup>26</sup> Magoke vahepinti Agra maka kaziga kuma ante'za manisaza vahera tro hu'ne. Mopafi manivitesazegu nehuno, manisnaza kna'a nenteno, kuma'ma manisaza kumara, kankamu zaminoo e'ire manigahaze huno huzmantetere hu'ne. <sup>27</sup> Anumzamofonku hake'za nege'za, agrikura zamazama hu'za hake'za erifore hu'nazanagi, Agra tagrira magoke magokemota afetera omani'ne. <sup>28</sup> Na'ankure agripi manineta mika'zana nehuta, ama mopafina manita neone, mago'a tamagri fronka kemo'a anage hu'ne. Na'ankure tagranena agripinti fore hu'none huta nehaze. <sup>29</sup> Anumzampinti fore huta mani'none hanuta, golima silvare'ma, havereti'ma vahe'mo'zama antahintahi zamireti'ma tro huntaza zankura Anumzamo'a e'inahu kna hu'ne huta ontahisune. <sup>30</sup> E'inahu hu'za zamagna humi'za e'naza kna'a, Anumzamo'a agesa ontahine. Hagi menina agra miko kaziga vahera hankavenentake ke huno, tamagu'a rukarehe hiho huno hu'ne. <sup>31</sup> Na'ankure ama mopama Agrama refako hania kna, agra'a fatgo

avu'ava zampi ko huhamprintegeno me'ne. Mago ne' huhampri ante'neana miko vhahera amate huzameri huno fri'nefinti azeri oti'ne.

<sup>32</sup> Fri'nefinti azeri oti'nea naneke nehige'za nentahiza, mago'amo'za agiza re'naze. Hianagi mago'amo'za anage hu'naze, mago'ane ama nanekea hananketa antahigahune hu'naze. <sup>33</sup> Poli'a havige mono kumara (Areopagus) atreno vu'ne. <sup>34</sup> Hu'neanagi mago'a vahe'mo'za Poli'ene hagerafi'za zamentinti hu'naze. Anampintira magora Dionisiosi'e nehaza nera kanisol vahe'mo'za ke erifatgo nehaza kumate kanisol nere, magora Damarisi'e nehaza a'ene mago'amo'za zamentinti hu'naze.

## 18

### *Poli'a Korinti kumate mani'nea naneke*

<sup>1</sup> Hagi ana amefiga'a, Poli'a Atensi kumara atreno Korinti vu'ne. <sup>2</sup> Anantega mago Jiu ne' ome keno erifore hu'neana, Pontusi kasente'naza ne' agi'a Akui'a'e, mensintfa nenaro Prisila ene Italiti e'na'e. Na'ankure Sisa Klaodiasi'a mika Jiu vahe'ma Romu nemani'za vhahera atretma viho huno huzmantegeno Poli'a zanagri ome zanage'ne. <sup>3</sup> Na'ankure agrama mago'zahu eri'zama e'nerigu huno magopi zanagri'ene mani'neno eri'zana eri'ne, (na'ankure zamagra mago kna eri'za antahine'za nofiteti seli no nehatiza nagare). <sup>4</sup> Nehuno mika mani fruhu kna (Sabat) zupa atru nehu'za mono nehaza osi mono nompi, marerino mono naneke huno, Jiu vahe'ené Griki vhahera masevenke huno zamarimpa eri vakaneno zamasmi'ne.

<sup>5</sup> Masedoniatii Sailasi'ene Timotike eramike akeno, Poli'a agafa huno mika Jiu vhahera zamazeri atru huno mono kege'za maka kna nezamasmino, Jisasi'a, Agra'tazahuno taguvazi nere huno eriama huno zamasmi'ne.

<sup>6</sup> Ana nehige'zama ha'ma rente'za krunagema huntaza vhahera anakre ku'a (saket) zafino kugusopa rupopo nehuno anage huno zamasmi'ne, tamagri korankumi'mo'a tamagritami tamaßenire megahie! Nagripina mago knazani'a omanetfa hugahie. Amareti agafa huno vaniana, Jiu vaherompage meg'i'a vhahete vugahue. <sup>7</sup> Huno nezamasmino Poli'a anante osi mono nontetira atreno, mago meg'i'a nera agi'a Taitus Jastusi'e nehaza ne'mo, Anumzante mono hunentea ne'mofa nontega atru nehu'za mono nehaza nomofo asopare me'negeno vu'ne. <sup>8</sup> Atru nehu'za mono nehaza nonte kegava nehia nera (president) Krispusi'e nehaza ne'ene, mika agri kvafi nemaniza vahe'mo'za Ramofonte zamentinti hu'naze. Ana nanekema nentahi'za, rama'a Korinti vahe'mo'za zamentinti hu'za mono ti fre'naze.

<sup>9</sup> Ramo'a kerage ava'nagna zampi anage huno Polina asami'ne, **Korera osuo**, keaga **huvuva** nehunka, keagama **hu'zana azeoritfa huo**. <sup>10</sup> Na'ankure **Nagra** kagrane manigahuankino, kahe frikura mago'mo'a kagri kavufarerera azana ontetfa hugahie. Na'ankure ama'na rankumapina **Nagri** vhahera rama'a mani'naze, **nehigeno** ke'ne. <sup>11</sup> Higeno anampina mago kafugi sigisi'a ika mani'neno, ana vhahera Anumzamofo keaga rempi huzami'ne.

### *Poli'a Gavana ne' Kalio avuga keagare oti'nea zamofo naneke*

<sup>12</sup> Kalio'ma, ugagota rankvama (Gavana) Akaea kumate'ma mani'nege'za, Jiu vahe'mo'za oti'za mago antahintahi eri retro hu'za, avare'za ke refakohu trate (koti nonte) vu'za, <sup>13</sup> anage hu'naze, ama ne'mo'a ruzahu huno tagri tra kemo'a osu'nea kante, vahekura mono antahihio huno nezamasmie nehazageno, <sup>14</sup> Poli'ma agi'reaka hu'na ke hanuanki huno higeno, Kalio'a amanage huno Jiu vhahera zamasmi'ne, Maga'a hazenke zankuro, tusi'a havi kefo zanku Jiu vhahera motmama hanazana, knare hanige'na, nagra tamagri kerera

hagerfigahue. <sup>15</sup> Hianagi amama hunentaza kemo'a tamagra kegu'ene tamagigu'ene, tamagrati kasege eri hankave netizanki tamagrati erifatgo hiho. Nagrira nave'osigu ama'na naneke'a erifatgo osugahue. <sup>16</sup> Anante kema refakohu tratetira agra'a zamahe natitre'ne. <sup>17</sup> Anante mika'mo'za mono nonte kva nehia ne' Sosteni azeri'za kema refkohu tramofo avuga agafa hu'za ahe'naze. Ana hu'nazanagi Galio'a ana zankura agesa ontahi'ne.

### *Poli'a Antиoku kumate Siria ehanati'nea naneke*

<sup>18</sup> Mago'a rama'a knama Korinti kumate Poli'a maniteno, afuhe'mokizmia hufru huno mani'neho hunezmanteno, ventefi hageri tkaheno Siria nevigeke Prisila'ene Akuilake agrane vu'na'e. Na'ankure Anumzamofo avure'ma huvempama hu'negu, Sensarea kumate Poli'a anuzokara vagateno erivo'vo hu'ne. <sup>19</sup> Efesasi uhanatite'za, anante Poli'a Prisilane, Akuilagiznia ome nezanetreno, agra osi mono nompi umarerino, Jiu vahе'ene naneke hugantugma hu'za antahi'naze. <sup>20</sup> Ana nehu'za antahige'za za'zkna tagrane manisane nehazageno, knarere huno osu'ne. <sup>21</sup> Hianagi hufru hunezmanteno anage hu'ne, Anumzamofo avesi'zama me'nenige'na, ete'na tamagritega eghahue. Anage nehuno Efesasiti'ma ventefi,

<sup>22</sup> vuno Sisaria unehanatino, Jerusalemi umarerino mono vahera musenke hunezmanteno, anantetira Antиoku urami'ne. <sup>23</sup> Antиoku'ma mago'a knama maniteno, ana kumara atreno mago'mago kumate Galesiane Fezianena vano huno Jisasi amage nentaza disaipol nagara zamazeri hampo'na hu'ne.

### *Apolosi mono eri'za agafa huno eri'nea naneke*

<sup>24</sup> Mago Jiu nera, agi'a Apolosi'e, Aleksandria kumate kasente'naza nera, knare keaga nehuno avontafera antahi ankere'nea ne'mo Efesasi e'ne. <sup>25</sup> Agri'ma Ramofo Jisasi kanku rempi humi'naza zankura, hamponatino huzmenerino keaga nehuno, Joni'ma tima frezmantere'nea zantfa antahi'neanagi, Jisasi avu'ava'mofo nanekea fatgo huno huzamasmi'ne.

<sup>26</sup> Agra korora osuno, agafa huno osi mono nompina hu'ama huno mono keaga nehigeke Prisilake, Akuilakea agri kema nentahikea, zanagra avareke va'azamoke Anumzamofo avu'avara mago'ene huhagro huke fatgo kante asami'na'e. <sup>27</sup> Akaea vuku Apolosi'a nentahige'za, mono (kristen) naga'mo'za azeri hanavetike nesamiža huso'e sa'e hunente'za, Jisasi amage nentaza disaipol nagatega azeri so'e hiho hu'za avonkretre'naze. Anante'ma unehanatino'a, Anumzamofo asunku'zamo'a zamaza hige'za zamentinti nehaza nagara tusi'a zampi zamaza hu'ne. <sup>28</sup> Na'ankure agra hampo'natino Jiu vahera zamazeri hagro huno, mika vahе zamafi avontafepinti eriamu huno Jisasi'a Tazahu Nere (Kraisi'e) hu'ne.

## 19

### *Joni amage' nentaza disipol naga'mo'za Efesasi kumate mani'naza naneke*

<sup>1</sup> Hagi apolosi'ma Korintima mani'negeno, Poli'a agu'afinka kumatamimpi ufreno vuno Efesasi kumate uhanatino, mago'a disaipol naga anantega ome zamageno erifore nehuno, <sup>2</sup> zamagrirkura anage hu'ne, tamagrama tamentintima hu'nazana, hago Ruotge Avamura erinai? Higeno Agrikura anage hu'naze. A'o Ruotge Avamura mani'ne huta tagra ontahitfa hu'none. <sup>3</sup> Hazageno Poli'a zamantahige'ne, Nazamofonte mono tina fre'naze? Zamagra ke'nona hu'za, Joni'ma ti fre'zama huraveri'nea zantere. <sup>4</sup> Poli'a huno, Joni'ma tima frezmantere'neana, zamasunku hu'za

zamagu'a rukarehe hanaza tine huno frezmantene. Vahera zamasmino, agri amage'ma ne'emofone Jisasimpi tamentinti hiho hu'n'e. <sup>5</sup> Anankema antahite'za, Jisasi Ramofo agifi mono ti fre'naze. <sup>6</sup> Hagi Poli'ma zamagrite azama antegeno'a, Ruotge Avamu'mo'a zamagrite ege'za, agafa hu'za ruzamageru ruzmageru neru'za, henkama esiazamofo kasnampa kea huama hu'naze. <sup>7</sup> Ana mika vene'nea 12fu'a naza eritru hu'naze.

*Poli'a Efesasi mani'neno mono eri'zana hagerafino mago'ene eri'nea naneke*

<sup>8</sup> Hagi 3'a ikamofo agu'afina, Poli'a osi mono nompi ufrenero korera os- uno, antahintahizamia eriama huno agrarega zamatreku Anumzamofo avu'ava zankura huankereno zamasmi'n'e. <sup>9</sup> Hu'neanagi mago'amo'za antahi'za zami'mo'a hampo'na atige'za, zamentinti hu'zankura zamagena hunente'za, ana vahe'mokizmi zamufi Ramofo avariri kankura huhaviza hunentageno, zamagrira nezamatreno, Jisasi amage' nentaza disai pol naga nezamavareno, mago nera Tairanusi'e nehaza ne'mofo rempi huzami nonte via'zamo, mika zupa vahe'ene keaga hu'n'e. <sup>10</sup> Amanahu'zana tare kafufi fore huno vu'n'e, tarega Jiu vahe'ene Griki vahe'ma Esia provinsifi nemani'za vahe'mo'za Ramofo naneke antahisazegu anahura hu'n'e.

*Skevana 7ni'a mofavre naga'mokizmi naneke*

<sup>11</sup> Anumzamo'a Poli azampi huvazino rama'a ruzahu ruzahu avame'za mago'ane erifore hu'n'e. <sup>12</sup> Ana hinogu asime nehamia tavravene (ankasip), tavaravenaza eri'za Poli avufare eme avako hute'za, eri'za kri vahe za-mufare ome antageno, krizmimo'a vaganeregeno, havi avamumo'a zam-agripintira atirami'n'e. <sup>13</sup> Mago kevu Jiu vahe'mo'za retro hu'za mago mago kumate vano vano nehu'za, Jisasi agifi huvame hu'za havi avamura huntenuku nehu'za, ana huvava hu'za nevu'za anage hu'naze. Poli'ma huama nehia Jisasi agifi atiramio huta tagra hunegantone. <sup>14</sup> Mago Jiu vahe'mokizmi rankva nera Skeva'e nehaza ne'mofona, 7ni'a mofavre zaga'amo'za anahu'zana hu'naze. <sup>15</sup> Hianagi ana havi avamu'mo'a ke'nona zamire huno zamasmi'n'e, Jisasina nagra ke'na antahi'na hu'na, Polina ke'noe, hagi tamagra izagat? <sup>16</sup> Higeno agu'afima havi avamu'ma fre'nea ne'mo'a zamagumpi takurenno, himamutino zamaheno rehapatige'za, korankno eneri'za ana nompinti atiramiza zamufa zamapake fre'naze. <sup>17</sup> Efesasi kumate nemaniza Jiu vahe'ene Griki vahe'mo'zane ana ke nentahizageno, tusiza huno zamagogo nefefe'za Anumza Jisasi agi'a erisaga hu'naze. <sup>18</sup> Rama'a zamentinti vahe'mo'za eama hu'za zamasunku hu'za, havi zamu'zma'zana eriama hu'naze. <sup>19</sup> Huama nehu'za zamene vahe'mo'zane avuatga vahe'mo'zane kre'naza avontafe tamina eri'za amate hakare vahe zamure tevefi kre hana hu'naze. Ana avontafe miza se'naza zagoa 50 tauseni'a zago atre'naze.\* <sup>20</sup> Ramofo hanavere, e'inahu'zana fore nehigeno, Ramofo nanekemo vuno eno huno hankavetino me'n'e.

<sup>21</sup> Anazana fore hutegeno Poli'a Masedonia kaziga vute'na Griki kaziga nevu'na Jerusalemi kumate vute'na, henka'a Romu kuma enena ome kegahue huno agesa antahine. <sup>22</sup> Tare azahu netrema, Timotine Erastusine huzanantegeke Masedonia kaziga vakeno, osi'agna Poli'a Esia mani'n'e.

<sup>23</sup> Ana knafina, Jisasi Kamofonkura tusi'a hazenke Efesasia fore hu'n'e. <sup>24</sup> Na'ankure magora silvare tuzampaza tro nehia ne'mofo agi'a

\* <sup>19:19</sup> Mago mago zagomofo kna'amo'a, 50 tauseni'a zage'gnareke eri'za eneriza miza e'neri'za zagogu hu'n'e.

Demetriusikino, silvareti mago amema'a trohu'neana, Atemisi mono hunentea kna'za tro hu'ne. Anazama tro'ma nehaza naga'mo'za, tusi'a zagokrerafa anazantetira tro'nehaze. <sup>25</sup> Demetriusi'a anahu eri'zama antah'i'zana eri'za vahera kehutru huno anage hu'ne. Ama vahe'motagi, amanahu eri'zantetira zagogrerafa erifore nehune hu'ne. <sup>26</sup> Hanki tamagra ketma antahitama nehaze, Efesasige ana nosianki, Esia kokampina Poli'ma vahetamina kema zamasamino, vahe'mo'ma azanteti'ma trohu'nea anumzana, e'i tamage huno anumzana omanitfa hune huno tusi'a vahe krerafa zamazeri ruvahe nehie. <sup>27</sup> Hago menina hazenke fore hu'ne, tagri zago erizankera eri havizana osugahie. Hianagi so'e a' anumza Atemisi mono nomo'a amne zankna hanigeno, Esia kokampi vahe'mo'zane, ama mopa kagi'afi vahe'mo'zama, mono hunentaza vahe'mo'za atre'sageno, ana a'mofo hanave'amo'a haviza hugahie.

<sup>28</sup> Anankema nentahi'za, zamarimpamo'a haviza nehige'za oti'za keza ati'za Efesasia so'e rantia, Atemisi'a agrake mani'ne! <sup>29</sup> Higeno rankumapina rama'a kereso nehu'za, vahe'mo'za magoka zamagare za krina nehazage'za mani'neza negaza kumapi (stetium) ufre'za, Mesadoniati Poli'enema e'na'a netre Gaiusine Aristakusikiznia zanavazu hu'za vu'naze. <sup>30</sup> Poli'ma ana vahe'zagamo'ma atru hu'nefima ufreku'ma nehige'za, Jisasi amage nentaza disaipol naga'mo'za otre'naze. <sup>31</sup> Higeno mago'ene mago'a Esia kumate kva vahera, Polina knampa'agi'za anama atru hu'nafina keke huntonanki uofreno hu'za hampo'nati'za kea attrente'naze. <sup>32</sup> Higeno mago'amo'za magoke zanku kezati'zageno, mago'amo'za otage zanku kezatizageno, anama atru hu'za negaza vahe'mo'za tusi savari nehazageno, rama'amo'za nahige'za atru hu'nazo amara osu'naze. <sup>33</sup> Vahepintira Aleksandana Jiu vahe'mo'za atufe'za zamuga eme nente'za, ama ana zamofo keaga eriamma hunka zamasnio hu'za huhanaveti'naze. Aleksanda'a ama ana vahe'mo'zama hazankere nona huzmanteku azana antesga hu'ne. <sup>34</sup> Hu'neanagi kazama Aleksanda'a Jiu ne'ma mani'nege'za nege'za, ana mika vahe'mo'za magoke kere zamagerura erinte'za, 2'a auamofo agu'afina kezati'za, Efesasitira knare huno agatererfa rantia, Atemisi agrake mani'ne! <sup>35</sup> Rankumapima avoma negrea (kuskus) ne'mo ana vahe kevua zamazeri rava huteno anage hu'ne. Efesasi vahe'motma antahihio, ina vahe'mo antahino keno osu'ne? Efesasia ranku'mamo'a Atemesi agetererfa ra anumzamofo mono nona kegava nehie. Ana a'mofo amema'a monafinti asga hurami'ne. <sup>36</sup> Ana hu'negu ama ana zankura ke hakare osugahaze. Taganetma mani'netma ame'amara osutma tamagesa antahitetma anazana hugahaze. <sup>37</sup> Na'ankure tamagrama, ama ana vene'nema zamaretma e'nazana, ra mono nompintira kumazafa ose'na'e, tagrama anteneta mono hunentona a' anumzankura (goddess) huhavizana huonte'na'e. <sup>38</sup> E'ina'ma Demetriusi'o agrane eri'za eneriza naga'mo'zama rumokizmima huzmante'nesigetma ke refakohu nonte zamaretma vinke'za, kva vahe'mofo zamure keaga hugantu hugama hugahaze. <sup>39</sup> Hu'neanagi mago'anema keagama hunaku hanutma, vahe'ma atruhu'za keagama azerirava nehaza knazupa kanisol vahete mareritma azerirava hugahaze. <sup>40</sup> Na'ankure menima kehakarema nehuna zankuma, Romu rankva vahe'mo'za tanta-higesageta hazenkefi manigahune. Na'ankure eriamma huta zamasminisuna knare agafa'a omane'ne. <sup>41</sup> E'inahu kema huno nezmasmino'a, ana atrua eritrege'za vuza e'za hu'naze.

## 20

### *Poli'a Masedonia kazigane Grisi kazigane vu'nea naneke*

<sup>1</sup> Hagi ana ke hakare'ma hazazamo'a vagaregeno, Jisasi amage nentaza disaipol nagara Poli'a kehige'za emeritru hazageno, zamumro kea anteteno, hufru huno knareki manineho hunezmantero, atreno Masedonia vu'ne. <sup>2</sup> Ana mopa kazigama vano huno rama'a keretima zamentinti naga za-mazeri hanavematineno, Grisi ehanati'ne. <sup>3</sup> Anantega 3'a ika maniteno, Siria kaziga ventefi vunaku'ma nehigeno, mago'a Jiu vahe'mo'za ahenaku kea retro haza nanekema nentahino'a, eteno Masedonia mopa kampi vunaku Poli'a agesa antahi'ne. <sup>4</sup> Mago'a vahe'mo'za Poli'ene vu'nazana, Beria kumateti ne' Sopata'a, Perusi nemofoki, Tesalonikati Aristakusi'ene Sekunduskegi, Debe kumateti Gaiusiki, Esia kumateti Timotiki, Tikitusiki, Trofimusi'za vu'naze. <sup>5</sup> Ama ana vene'nemo'za vugote'za Troasi ome tavega ante'naze. <sup>6</sup> Zo'ore bretima Juda vahe'mota nenona kna'mofo amefiga'a hompama vagaregeta, Filipai kumara atreta ventefi marerita 5fu'a zage ferupi nevuta, Troasi kumate tavega ante'nare uhanatita ana kumate mago sorta umani'none.

<sup>7</sup> Ana Sontamofo pusa kna're bretima kori'za (komonion) neku eritruma nehunkeno'a, Poli'a oki vugahue huno agesa nentahi'no keaga nezmas-mino, mono kea hvava nehigeno kerage amu'no ase'ne. <sup>8</sup> Anagamu kino mareri'nea nomofo hunaragine pinka rama'a rampe tavira mane-negeta atrua hu'none. <sup>9</sup> Hagi mago nehaza nera agi'a Jutikusi'e, zaho eri kamofo atupare (windo) marerino mani'neno, Poli'ma keagama hvava huno nevigeno'a, antahirega avukoko higeno, mase himarenefinti, tagufa nonteti anagamuti asaga huramino ahe fri'ne. <sup>10</sup> Hianagi Poli'a uramino agri agumpi umseno azana rugagino anu'nekino tamasunkura os-ihohu'ne. Tamagra antria osiho, na'ankure agra ofri'neanki amne mani'ne huno hu'ne. <sup>11</sup> Nehuno Poli'a eteno anagamu marerino, bretima korige'za netageno, za'za kna zamagranena keaga nehigeno ko'atigeno zamatrevo vu'ne. <sup>12</sup> Ana nehzavea ofrino mani'nege'za muse nehu'za avare'za non-tega vu'naze.

### *Poli'a ventefi vuno Mailitusi uhanati'nea naneke*

<sup>13</sup> Ananteti tagra ventefi umarerita Asosi vunaku nehuta, Polina avar-enteta vunaku tagesa antahi'none, na'ankure ama kana agra'a azeri ante-fatgo huno, agra mopafi vugahue huno agesa antahi'ne. <sup>14</sup> Asosima rutagiha higeta, agrira ventefi avarenenteta, Miteleni ti amunompi me'nea ran ku-mate vunaku hvava hu'none. <sup>15</sup> Anantetira maseta mago knarerera ventefi nevunkeno ko'atigeta, Kiosi tinnenare uhanatita, mago knarerera Samosi uha-natita, hagi ana kna'mofo amefiga'a Miletusi vu'none. <sup>16</sup> Na'ankure Poli'a Efesasia agateregahue huno antahi'ne, na'ankure Esia za'za kna omani'na knare'ma hanuna, Jerusalemi nagra mani'nesugenohompa (pentikos) kna fore hugahie hu'ne.

<sup>17</sup> Mailatusi uhanatite'za, Poli'a ke atrezmanteno Efesasi mono nonte kva (elda) vahe'zaga eme nageho hu'ne. <sup>18</sup> Ke hige'za agrite ageno, amanage huno zamasm'i ne, Pusante'ma Esia mopafe nagiamma rentoa zupa, tamagrip-imaka zupa mani'na'oanoa, tamagratmi ko ketma antahi'naze.

<sup>19</sup> Jiu vahe'mo'za nazeri havizahu kema retro'ma haza zamo'a tusi'a knazamo nagri navufare ege'na anterami'na zavira nete'na, Ramofo eri'zana eri'noe. <sup>20</sup> Tamagri'ma tamaza hania kea, korera osu'na huama

hu'na tamasmugetma antahi'naze. Vahepina neramasmi'na, nonte non-tera tamasmugetma ko antahi'naze. <sup>21</sup> Jiu vahe'ene Griki vahera hu'ama hu'na tamagu'a rukarehe hutma Anumzante ne-etma, Ranti Jisasinte tamentinti hiho hu'na zamasmi'noe. <sup>22</sup> Hagi menina Ruotge Avamu'mofo ke amage ante'na, nagra Jerusalemi nevve, nagri navufarera na'a fore hugahio, ontahi'noe. <sup>23</sup> Hankino Ruotge Avamu'mo nagrira nasamino, mika ranra kumapina, kina hu'zamo'ene kna'zamo'enena kavega ante'ne hu'ne. <sup>24</sup> Hu'neanagi navufagura nagesa nontahue, tusi'a zana eri'zani'a erivaga nere'na, Ra Jisasi'ma eri'zama namino vahe'ma zamasnio hu'nea eri'za eri'na Anumzamofo asunku zankura knare nanekea vahera zamasmigahue. <sup>25</sup> Hagi menina nagra antahi'noankitma, azago menima Anumzamofo kumaku'ma neramasmumota, mago'enena nagri navugosafina onke'tfa hugahaze. <sup>26</sup> E'ina hu'negu, meni nagra huama hu'na neramasmue, miko vahe'mofo koran kumimo'a nagritera ome'tfa hugahie. <sup>27</sup> Na'ankure Anumzamofo miko avesi'zama'a nagra korera osu'na hu'ama hu'na neramasgue. <sup>28</sup> Tamagrattmia kegava nehtuma, lama afu kevua kegava hiho, Ruotge Avamu'mo tamazeri antegetma kva hu'naze. Agrama magoke Mofavre'ama huntegeno koranteti'ma mizama ase'nea Anumzamofo mono nagaara zamazeri fatgo hutma kavagri zamantegahaze. <sup>29</sup> Nagrama tamatre'na vanugen'o amefiga, nagra antahi'noankino, mago'a afi' kra esaniazamo lama afu kevua zamazeri savri hugahie. <sup>30</sup> Kagri ka'a nagapinti enena vahe'mo'za ot'i'za tamage kea eri ruvahe hu'za rempi hunezmi'za, Jisasima amage' nentaza disai pol nagara zamagrarega zamavarenteku hugahaze. <sup>31</sup> E'ina hu'negu tamavura omase kava hute maniho, tamagesama antahi ankeresazana tagufa zagegfumofo agu'afina hanine zagenena ontagane'ha kazigazi hu'na zavira nete'na, mago'mago'moka kavumarora ante'noe. <sup>32</sup> Hagi menina nagra Anumzante'ene, Agri asunku'zamofo kere maniho hu'na huneramantoe. Ama kemo'a tamazeri hanavenetina, ruotage'ma hu'za mani'naza nagapi tamagra erisanti haregahaze. <sup>33</sup> Mago'moka silvaguro, goliguro, kukanagu nagra kenasane nehu'na keaga nosue. <sup>34</sup> Tamagrattmi ko antahita keta hu'naze, ina zanku'ma nagri'ene, magoka vano nehuna naga'enema atupa'ma nehunazana, ama anazamo erifore huno neramie. <sup>35</sup> Ana mika zampina nagra ko hurameri'noe, anahu'ma huta hanavetita eri'zama erisazana, hanave'a omane vahera aza nehuta, Ramofo Jisasinkere tamagesa antahihi. Agra'a anage hu'ne, **Ami'zamofo asomumo'a, eri'zamofona agatere'ne hu'ne.**

<sup>36</sup> Poli'ma ana nanekema huvama nereno'a, agra renaren Zamagrane nunamu hu'ne. <sup>37</sup> Anampina zamagra tusi zavi'ate'za Polina anankempi azeri anuki'za antako hu'naze. <sup>38</sup> Kema huno mago'ene onagegahaze hu'nea kegura, tusi zamasunku hu'naze. Nehu'za ventema me'nerega avare'za vu'naze.

## 21

### *Poli'a Jerusalemi kumate vu'nea naneke*

<sup>1</sup> Hagi Tagra anama huteta, zamatrete ventea atufegantu hagerimpi atreta fatgo huta vuta, Kosie nehaza hageri amunompi me'nea osi mopeare (ailen) vuta, nanterana Rodesie nehaza kumate (ailen) uhanatiteta, anantetira Patara mopare uhanati'none. <sup>2</sup> Patara atreta, Fonesia kumate vunaku nehia vente keta eri fore huteta, miza huta marerunkeno atreno timpi vu'ne. <sup>3</sup> Saiprusima ventemo unemania kumara hoga kaziga

agatereta, Siria Provinsifi vuta, Tairi kumate umani'none. Na'ankure ventemo'a mago'a fenona anante eri netregete. <sup>4</sup> Jisasima amage'ma nentaza disaipol nagara ome nezmageta, ana kumate 7ni'a kna mani'none. Zamagra mago'ene Avamu'mo zamazeri otige'za Poliga Jerusalemi ovuo hu'za hu'naze. <sup>5</sup> Ananknama vagaregeta, atreta kantega nevunkeno, ana mika'mo'zane, a'nezamine, mofavre naga'zamine tagrane magoka vazageta ana kumara atreta vu'none. Hagerinkenare vuteta tarenareta nunamuna ome huteta, <sup>6</sup> mani'neho huta mago mago'mokizmia hunezmaneta ventefi marerita nevunke'za, zamagra rukrahe hu'za nozimirega vu'naze.

<sup>7</sup> Tagra Tairi kumara atreta vuva vuva huta Tolemais uhanatiteta, mono nagara ome nezmatagita anante magokna mani'none. <sup>8</sup> Nanterana ana kumara atreta, Sisaria ehanatita mono nehia ne' (evangelis) Filipina 7ni'a naga mono kva zamazeri oti'nafinti mago zamimofo nonte umani'none. (Apo 6:1-6) <sup>9</sup> Ana ne'mofona 4'a ve e'ori kasnampa mofane'zaga'a mani'naze. <sup>10</sup> Anante mago'a kna mani'nonkeno, mago kasnampa nera Agabusi'e ne-haza ne'mo, Judia kazigati eramino anante e'ne. <sup>11</sup> Tagra mani'nontega Agabusi'a eno, Polina amu'nofi'a (belt) erino agra azante ene agiare renenteno anage hu'ne, Ruotge Avamu'mo'a anage hie, Amanahu kante Jerusalemi mani'naza Jiu vahe'mo'za ama amu'nofi'mofo nefana azeri'za kina rente'za megi'a vahe zamazampi antegahaze. <sup>12</sup> Ana naneke antahiteta, tagrane anampi nemani'za vahe'ene kazigazi huta, Poliga Jerusalea mareorio huta asami'none. <sup>13</sup> Anante Poli'a kenona zimirera anage hu'ne, tamagra nahigetma zavira netetma, narimpamofona nazeri kna nehaze? Na'ankure nofinukera nazeriza anaki nantehogukera trora osuanki, Ramofo Jisasi agire Jerusalemi frinaku retro nehue. <sup>14</sup> Na'ankure agra ketia ontahisiaza higeta, tagra kea osuta Ramofo avesi'zamo fore hanie huta hu'none.

<sup>15</sup> Ana knama evutegeta trotra nehuta otita Jerusalemi vu'none. <sup>16</sup> Mago'a Sisaria kumate nemaniza disaipol naga'mo'za tagrane ne-eza tavare'za Saiprusi ne' Masoni nompi vazageta, korapa Jisasi amage nentea disaipol ne'mofo nompi umanigahune hu'nona ne'mofo nompi umani'none.

<sup>17</sup> Jerusalemi uhanatunke'za Anumzamofo naga'mo'za muse nehu'za tavatagi'za knare hutma aze hu'naze. <sup>18</sup> Uvasonkeno ko'ma atigeno, Poli'a, Jemisine maka mono kva vahe'zagama (eldas) mani'naza ome zameneku tagrane vu'ne. <sup>19</sup> Poli'a ome zamageno zamatagiteno, agra agafa huno mago' mago'zama Anumzamo'ma mono eri'za megi'a vahempa e'nerigeno hu'neazana zamasmi'ne. <sup>20</sup> Ama ana nanekema antahite'za, Anumzamofo agi erisaga hu'naze. Zamagra anage hu'za Polina asami'naze, kagra nerufuga antahio, nama'a tauseni'a Jiu vahe'mo'za zamentinti nehu'za, Mosese Kasege'ne amage' nentaza vahe'mo'zanena hampo'nati'za amage' nentaze. <sup>21</sup> Mago'a vahe'mo'za anage hu'za kagrikura zamasmi'aze, kagra maka Jiu vahe'mo'za megi'a vahipi mani'nazana, Mosese kasegemo'a taza osugahie hunka nehunka, mofavreramina zamufa taga huozmanteho nehunka, tagri tavutavamofo avu'avara osughaze hunka hu'nananke antahi'none. <sup>22</sup> Tagra na'a hugahune? Kagrama kmama e'nana nanekema zamagra antahisu'za tamage hugahaze. <sup>23</sup> Ana hu'negu tagrama kasmisunaza huo. 4'a vene'nemo'za Anumzamofonte hvempa hu'za mani'naze. <sup>24</sup> Hanki zamavarenka kagrane magoka tamazeri agru nehutma, zamazoka'ma haressazana miza sezmantegahane. E'ina hananke'za, maka vahe'mo'za antahi'za kema hazage'za kagrik'u'ma antahi'nazana tamage hu'naze hugahaze. Hu'neanagi kagraka'a kasegea

amate antenka manigahane. <sup>25</sup> Hu'neanagi meg'i'a vahe'ma zamentinti nehaza vahetega, tagra avonkreta, havi anumzante Kresramana vantesia zagagafane, korane anankema taga osu zagagafane onetma, monko'zana atreho huta tagesa antahiteta kre zami'none. (Apo 15:29) <sup>26</sup> Nanterana Poli'a zamavareno agrane ana vahe'ma zamazeri agru huteno, ra mono nompi vuno, ana zupa mago mago'mofonte Kresramana vuno azeri agaruhu kna vagaregahie huno ome zamasmi'ne.

### *Polina ra mono nompi mani'nege'za azeri'naza naneke*

<sup>27</sup> Hagi 7ni'a kna vagare'za nehigeno, Esia provinsifinti Jiu vahe'mo'za ra mono nompi mani'nege'za nege'za, rama'a vahe zamarimpa zamazeri oti'zage'za Polina azeneri'za, <sup>28</sup> anage hu'za ranke hu'naze, Israeli vahe'mote taza hiho! Ama ne'mo'a hakare kaziga mani'naza vahetamina rempi hunezmino, vahetine kasegetine, ra mono nontia ha' renente! Mago'enena agra Griki vhahera zamareno ra mono nomofo agu'afi nevuno, ruotage hu'nea ra mono nona eri pehena nehie! <sup>29</sup> Zamagra negageno Efesasiti nera Trofimusi'a, Poli'ene Jerusalemi vano nehige'za negaza ne'ku, ra mono nomofo agu'afinka avreno marerinegahie hu'za zamagesa antahi'naze. <sup>30</sup> Maka vahe'mo'za eritru hu'za zamaga re'za e'za, Polina azeri'za avazu hu'za ra mono nomofo agu'afinti atimaneramizageno'a, ame hu'za ra mono nonkafana erigi'naze. <sup>31</sup> Polima ahe friku'ma nehazageno, anampinti vahe'mo'za zamaga re'za vu'za, maka Jerusalemi vahe'mo'za ha' nehaze hu'za sondia vahete kva nehia nera ome asmi'naze. <sup>32</sup> Ana sondia kva ne'mo'a ame' huno sondia vahe'zaga nezmaren, mago'a vahe'mokizmi kva vahe'zaga (sensulien, hantretia sondia vahete kva nera) zamarege'za, zamaga re'za ana vahete e'naze. Polima ahenaku nehaza vahe'mo'za, sondia vahe'mokizmi kva ne'ene, sondia vahe'zagama nezamage'za, ohe'za atre'naze. <sup>33</sup> Anante sondia kva ne'mo'a Polina ome azeriteno, huzmanteg'e'za tare seni nofinu anakintetageno, anante sondia kva ne'mo'a, zamantahige'ne, Agra aza'e, agra na'a hu'ne? <sup>34</sup> Hu'neanagi tusi'a vahetamimpinti mago'amo'za ranke hu'za ra kefinti mago zanku kereso nehazageno, mago'amo'za ruge nehazageno, sondia kva ne'mo'a ke agafa'a keno eri fore osu'ne. Na'ankure rama'a vahe'mo'za kehakare nehazageno ontahino, Polina avareta sondia vahe kumapi viho hige'za avare'za vu'naze. <sup>35</sup> Agrama latare'ma ege'za, Polina sondia vahe'mo'za azerisga hu'za mareri'naze. Na'ankure rama'a vahe'mo'za ahenaku nehazageno'e. <sup>36</sup> Rama'a vahe tamimo'za zamavariri'za nevu'za kezati'za, Ahe friho! Ahe friho! hu'naze.

<sup>37</sup> Polima avare'za sondia vahe kumapi ufre'za nehazageno sondia kva ne' asamino, Knare mago'a kea kasmisufi? Higeno ana ne'mo, Griki kea antahi'nano? huno Polina antahige'ne. <sup>38</sup> Kagra Isipi ne'ma, mago'a knafima ugota hunka, 4 tauseni'a vahe'ma kamani vahe ha'ma rezmanteku'ma hu'naza vene'nema zamavarenka hagege kokampi vu'nana nepi, ru nere? <sup>39</sup> Poli'a kenona anage hu'ne, Nagra Jiu nere Tasisi kumateti Sirisia provinsfinti, agatere'nea rankumatetire. Knare natre'nanke'na ama vahetamina kea zamasmihuo higeno, <sup>40</sup> ana sondia kva ne'mo'a knareki kea huo higeno, Poli'a latare oti'neno azanu avame hige'za keresoma nehazazana eri taganageno, antahi'naza Aramu (Hibru) kefinti, anage huno zamasmi'ne.

<sup>1</sup> Hagi nafu'na nafaheta, amama nagrama navufa nagu'vazi kema nehua kea antahiho. <sup>2</sup> Zamagrama antahizama, Aramu (Hibru) kefinti kema nehige'za nentahi'za, mago'ane zamagasanankea eri anterami'naze. Anante Poli'a ange hu'ne, <sup>3</sup> nagra Jiu nere, Tasisi kumate Silisia kasenante'ne. Hianagi ama ran kumapi ra hutena Gamalieli hinkanaga avonona hu'na, tagehemofo kasegemo hu'nea kante ante'na Anumzamofo avu'avara hanaveti'na avariri fatgo hu'noe. Tamagrama nehzaza hu'na Anumzamofona amage ante'na vu'noe. <sup>4</sup> Nagra amanahu hu'na, zamentinti vahera nezamahe'na, zamahe fri'za nehuhu'na, vene'ne a'nennenina kina rezamante'na zamare'na kina nompi ome zamante'noe. <sup>5</sup> Ugagota pristi ne'mo'ene maka kanisol (senhidren) vahe'mo'za, amama nehuazankura tamage hu'za tamasmigahaze. Zamagra mago'a avona kre'nam'i'za erinka Damaskasi nemaniza kafuhe'intega vuo hazage'na, nagra kina ome rezmante'na zamare'na e'na, Jerusalemi zamata hoza zamihogu kantega vu'noe.

<sup>6</sup> Nagrama vuvava hu'na Damaskasi urava'o nehugen'o, feru'naza monafinkati masa'nentake tavi'mo ame' huno remsa hunante kagi'ne. <sup>7</sup> Anante nagra traka hu'na mopafi evuramugen, mago agerumo'a nentahugen anage huno nagriku hu'ne, **Solio, Solio, na'a higenka Nagrira nazeri havizana nehane?** <sup>8</sup> Hige'na Nagra kenona'a, azage Ra'moka? hu'na nehugen, Agra anage huno nasami'ne, **Nazareteti Jisasi'na nazeri haviza nehane** huno hu'ne. <sup>9</sup> Nagrane vu'naza vahe'mo'za ana masa ke'nazanagi, nanekema hunamia kea antahi ama osu'naze. <sup>10</sup> Ana hige'na nagra na'a hugahue Ramoka? hu'na antahigogen, Ramo'a nagrikura anage hu'ne, **Otinka Damaskasi vugeno, maka'zama hugahane hu'na huhampri kante'noa zana kasamino.** <sup>11</sup> Na'ankure tavi'mofo masamo navurga erihaviza hige'na navua onkoge'za, magokama vu'nona vahe'mo'za Damaskasia nazante navazu hu'za ufre'naze.

<sup>12</sup> Ana kumate mago nera mani'neana agi'a Ananaisi kasegemofo avariri fatgo nehige'za, anampima nemani'za maka Jiu vahe'mo'za, knare nere nehaza ne'mo'a, <sup>13</sup> mani'nore eme otino nagriku anage hu'ne, Soliga ne-nafuge, kavurgamo'a so'e huganteno! Higeno ame' huno navumo'a hari hige'na kesga hu'na ana ne' ke'noe. <sup>14</sup> Anante agra anage huno nasami'ne, tagehe'mokizmi Anumzamo ko kagrira huhampriganten, Agri avesi'za antahinka kenka nehunka, Fatgo Hu'nea Ne' Jisasi negenka, Agra'a apipinti'ma hania kea antahigahane. <sup>15</sup> Na'ankure Agrama kagri'ma eri kaverigenka, negenka nentahinka hu'nana kea, huama hunka maka vahera zamasmigahane. <sup>16</sup> Na'a higenka avega antenka mani'nane? Otinka mono ti nefrenka, agihanta nevazigeno kumi ka'sese huganteno hu'ne.

<sup>17</sup> Ana hutege'na ete rukarahe hu'na Jerusalemi kumate e'na, ra mono nompi nunamu nehu'na ava'nagna'za kogeno, <sup>18</sup> Ramo'a negogeno ange huno nasami'ne, **Hantaka'a Jerusalemia atrenka ame' hunka vuo. Na'ankure Nagri nagenkema kagrama hanana kea ontahigahaze.** <sup>19</sup> Nagra kenona'a anage hu'noe, Ramoka Kagrite'ma osi mono nompi mono nehu'za, zamentintima nehaza vahe'ma kina nompima zamare nente'na, zamazeri havizama nehu'na zamahe'noazana ko antahi'naze. <sup>20</sup> Kagri kema huama nehia ne'ma Stivenima ahe'za korama'a erimegi atrazazana, nagrani'a tava'onte mani'nene, mago narimpa nehu'na, ahe'naza vahe'mokizmi anakare ku'zamirera kava hu'noge'za ahe'naze. <sup>21</sup> Anante Ramo'a anage huno nasami'ne. **Vuo! Na'ankure afete hugante'nugenka megi'a vahepi ke'ni'a erinka ome zamasmigahane hu'ne.**

<sup>22</sup> Ana vahetamimo'za antahime nevazareti'ma, megi'a vaheku'ma agrama kema hiana nentahi'za zamagerura eri mago hu'za ranke hu'za, ama mopafintira azeri atreho! Agra ama mopafi manigara osu'ne!  
<sup>23</sup> Rankege nehu'za kukena'zami zafima netare'za, kugusopa kate'za zahopi mate vu'naze. <sup>24</sup> Ana'ma haza'zanku Romu sondia kva ne'mo'a, Polina ete avaretma sondia vahe kumapi ufreho huno huzmante'ne. Agra zamasmino kao akaruteti trohunte nofi knonu sefu kno Polina ome nehetma antahigeho, Jiu vahe'mo'za nanke agafare amanahu rankea Polina hunentafi, huno huzmante'ne. <sup>25</sup> Knoma ahenaku azama azeri antesga nehazageno, Poli'a anante otino mani'nea sondia kva ne' (sensulien, hantretia sondia vahete kva nera), asami'ne, Knare hu'negu hazenke'a omane Romu vhahere huno mani'nesia vahera ke agafa'a eri fatgo osu'nesia zanteria ahegahazafi? <sup>26</sup> Sondia vahete kva ne'mo'a ana kema nentahino, ugagota sondia nete vuno, kema hianke ome asamino, anage hu'ne, Kagra na'a huntenaku nehane? Na'ankure ama'na nera Romu nere huno mani'nea nere. <sup>27</sup> Anante ugagota sondia kva ne'mo otino eno Polina anage huno antahige'ne, Kagra nasamio Romu ne' mani'nano? higeno agra hu'ne, ozo. <sup>28</sup> Ana ugagota sondia kva ne'mo'a kenona'a anage hu'ne, Nagrama Romu vahe maninakura rama'a zago mizase'na mani'noe. Hianagi Poli'a kenona'a huno nagri'enena ama mopare nere huno nenfa'a mani'neno, ome kasenantege'na, Romu nere hu'na mani'noe. <sup>29</sup> Polima sefu ami'za nehaza vahe'mo'za ame hu'za atre'za mani ogantu ogama nehazageno, ugagota sondia kva ne'mo'a antahiamma Poli'ma Romu ne' mani'nege'za anakinte'naza zankura kore hu'ne.

### *Poli mono kanisol (Senhidren) vahepi mani'neno ke hu'nea nanake*

<sup>30</sup> Maseno ko'atigeno Romu sondia vahete ugagota kva ne'mo'a, na'a agafare Jiu vahe'mo'za kea Polina hunte'naze antahino keno hunaku kazufe netreno, pristi vaheku'ene kanisol vahe'zaga ke hige'za atru hu'naze. Anante Polina avareno eramino zamuga eme ante'ne.

## 23

<sup>1</sup> Hagi Poli'a kanisol vahe zamufi keankere'neno anage hu'ne, Nenafugate nagra magore hu'na havizana osu'noe. Fatgo huno ama' nagu'nagesare Anumzamofo avurera mani'na ena ama knarerha ehanatue. <sup>2</sup> Anagema higeno, ugagota pristi ne' Ananaisi'a anante oti'naza vaheku Polina agi ruhapatitma aheho huzmante'ne. <sup>3</sup> Anante Poli'a anage agrikura hu'ne, Anumzamo'a kagrira kahegahie. Kagra amega fatgo hu'na knare hu'noe nehananagi, kagu'afinka haviza hu'nane! Kagra amare mani'enka kasegemomo'hu'nere antenka refako hunenantane. Kasegea rutagarenka aheho hunka hunezmantano? <sup>4</sup> Ana tva'onte oti'naza vahe'mo'za anage hu'naze, kagra Anumzamofo hai pristi ne' huhaviza huntenaku nehampi? Hu'za hazageno, <sup>5</sup> Poli'a kenona zamire anage hu'ne, nenafugata ugagota pristi ne' mani'ne hu'na nagra ontahi'noe, na'ankure anage huno avon tafepina krente'ne, **kagri vahete'ma kva hu'nea vahera huhavizana huonto hu'ne.** (Eks-Ati 22:28.)

<sup>6</sup> Anante Polima nezmagege'za anama eri tru hu'naza vahepina, Satusi vah'e'ne mago'a Farisi vahe mani'nageno nezmageno, ranke huno anage hu'ne, Nafu naganaheta nagra Farisi neki, nenfa'a Farisi ne'mo kasenantege'na mani'noe. Nagri'ma kema hunenantazana, nagrama namentinti hu'na fripinti otigahie hu'na huazanku kea hunenantaze! <sup>7</sup> Anage'ma hige'za, Farisi vah'e'ne Satusi vah'e'mo'za atruma hu'nafinti amu'nompinti

refako hu'za ana kegu fra vazi'naze. <sup>8</sup> Na'ankure Satusi vahe'mo'za fripinti o'otigahie nehu'za, ankero vhahera omanine nehu'za, avamura omani'ne hu'nazanagi, Farisi vahe'mo'za ana maka'zana me'ne hu'za antahi'naze. <sup>9</sup> Anampinti kezati'za ranke hu'za kea nehazage'za, mago'a Farisi nagapinti kasegere ugagota hu'naza vahe'mo'za ot'i'za hanave ke hu'za, Mago hazenke'a ama nera keta eri forera osu'none. Avamu'mo'o, ankeromo'ma kema huminesigeno'a na'a hugahie? <sup>10</sup> Tusi ke hafra nehazageno, Romu sondia kva ne'mo aru Poli avazu hu'za azeri taganape'zanku sondia vhahera huzamanteno, uramitma Polina hanavetitma zamagripintira avaretma sondia vahe kumapi efareho hu'ne.

<sup>11</sup> Ana kenage Ramo'a Polina tava'oma'are ot'i'nenno anage huno asami'ne, **Oti hanavetio, Jerusalema Nagri nagi nagenke huama hu'nazana hunka Romu kumatera anazanke hunka ome huama hugahane.**

### *Poli ahenaku hu'naza naneke*

<sup>12</sup> Ko'atige'za nanterampi mago'a Jiu vahe'mo'za eri atru hu'za, hanave ke huvempa hu'za Polima ahensaza naneke retro nehu'za, ne'zane tine a'o huta mani'neta Polina ahensunkeno frisnie, hu'za huhankaveti'za kea retro hu'naze. <sup>13</sup> Anampima nanekema hu'za retro'ma hu'nazana 40'a vhahera agatere'za mani'ne'za retro hu'naze. <sup>14</sup> Zamagra ugota pristi vahete'ene mono kva (elda) vahe'zagare vu'za anage ome hu'naze. Tagra kea huvempa huta mago'zana one'mani'neta, Polina ahe farigahune hu'za hu'naze. <sup>15</sup> Hanki menina kagrane, kanisol vahe'motma sondia kva vaheku ke eri fatgo hugahunanki avreta eramaho hinke'za, avare'za eramisnageta, amare erava'o osu'nenageta kantega kavagrita mani'neta, ahe frisune.

<sup>16</sup> Hianagi Polina nesaro ne' mofavremo ahegahune hazanake nentahino, eno sondia vahe kumapi efareno Polina kahe ke nehaze huno asami'ne. <sup>17</sup> Poli'a mago kina vahete kva ne' (sensulien), ke huno asami'ne, Avarenka ama arisesa ugagota sondia kva nete vuo, na'ankure mago'a kea agra ome asamigahie huno huntene. <sup>18</sup> Ana higeno hantreti'za sondia vahete kva ne'mo (sensulien,) ana arisesa avareno ugagota sondia kva nete vuo, Poli'a hunanteno avarenka ama arisesa ugagota sondia kva ne'te vuo, na'ankure agra mago'a kea ome asamigahie, hige'na avare'na e'noe. <sup>19</sup> Ana ugagota sondia kva ne'mo azante avazuhuganti ataregene, zanagraku umani'neke, anage huno antahige'ne, Na'ane naneke nasaminaku hu'nane? <sup>20</sup> Ana arise'mo'a anage huno asami'ne, Jiu vahe'mo'za mago zamarimpa nehu'za, havige hu'za kantahigesagenka Polina avarenka okina kanisol vahetega uramisanke'za, keaga refako hu'za mago'ene hake'za ke'naku hu'naze. <sup>21</sup> Ana hu'negu zamatrege'za anara osiho, na'ankure 40'a nazana agatere'naza vahe'mo'za ahe'nakura hu'naze. Zamagra kea huvempa hu'za, ne'zane tine oneneta ahe frigahune nehu'za menina zamagri kere'ma mago karimpa hananku, kavega ante'za mani'naze. <sup>22</sup> Anante ugagota sondia kva ne'mo'a ana risera hunenteno, hamponage asamino, vanunka ama nanekea kva nera ome asami'noe hunka, mago'mofona osamitfa huo.

<sup>23</sup> Anante ugagota sondia kva ne'mo, sondia vahete kva ne'tre (sensulien), ke higeke akeno, anage huno zanasmi'ne, 200'a sondia vhahera huge'za Siseria kumate vugahazanki tro hihi, anampina 70'a hosifi vano nehu'za ha' nehaza sondia vaheki 200'a karugaru kevereti ha' nehaza sondia vaheki hu'za meni kenagera 9 kiloki vugahazanki tro hihi. Polina hosi afu'zagafintira mago'a amigeno agumpi manina avaretma kva huntetma, Gavana ne' Feliksinte viho huno zamasmi'ne. <sup>24</sup> Polina hosi afu'zagafintira mago'a amigeno agumpi manina avaretma kva huntetma Gavana ne' Feliksinte

viho huno zamasmi'ne. <sup>25</sup> Agra avoma kre'neana amanahu kante kre tre'ne, <sup>26</sup> Nagra Klautiusi Lisisasi'na, knare Gavana kva nemokarega Feliksiga musenke kre'negamue, <sup>27</sup> Ama nera Jiu vahe'mo'za azeri'za ahe'za nehazage'na, sondia vahe'niane e'na aza hu'na avare'noe. Na'ankure nagrama antahuana Romu ne' mani'noe higeta avareta e'none. <sup>28</sup> Na'anteku nanekeea hunentazo nagra antahinaku, zamagri kanisol vhete avare'na urami'noe. <sup>29</sup> Nagrama ke'na erifore'ma huana, zamagra'zimi kasegerekhu hu'za ke hakare hunte'naze. Hianagi ahe fri kankamune kina hunte kea kena eri fore osu'noe. <sup>30</sup> Ahenaku kema retro'ma haza naneke eme nenasmige'na, ama nera ame hu'na kagritega huntogeno ne-egena, ke ha'ma rentaza vahera magoka kagri kavure kea huntesazegu huzmantoge'za neaze huno krente'ne.

<sup>31</sup> Ana hige'za sondia vahe'mo'za kema huzmantea kante ante'za, Polina avre'za kenageke Antipatrisi rankumate yunaku vu'naze. <sup>32</sup> Mase'za nanta hositima vano hu'za ha' nehaza sondia vahera zamatrage'za avare'za vazage'za, mago'amo'za ete sondia vahe kumatega e'naze. <sup>33</sup> Hosifima vano nehu'za ha'ma nehaza vahe'mo'za Sisariama e'za ana avona Gavana ne'ma eme nem'i'za, Polina eme ami'naze. <sup>34</sup> Ana Gavana ne'mo'ma avoma hamprino nentahino, anage huno antahige'ne, Kagra ina provinsifinti nere? Higeno Poli'a huno, Nagra Sirisia nere higeno antahiteno, <sup>35</sup> anage hu'ne, kema hugante'naza vahe'ma esage'na, keka'a antahigahue. Higeno anante Heroti kina nompi Polina avaretma ome anteho hu'ne.

## 24

### *Polina keaga hunte'naza naneke*

<sup>1</sup> Hagi 5 fu'agna evigeno ugagota pristi ne' Ananaisi'a, mono kva (elda) vahe'ene, mago aza huno kemahu nera (loya) Tetulusi nevareno, Polina Gavana ne' avufima kema hunte kea anakite'za e'naze. <sup>2</sup> Polima kema higeno egeno'a, Tetilusi'a agafa huno Gavana nete ke ha' Polina renteno anage hu'ne,

Tagra knare'za huta kagrama kavama krirantanketa tarimpa fru huta nemanita, hanki ama kumapima kahefa'zama efare'neana kagrama antahinka kenka retro'ma hanazante efare'ne. <sup>3</sup> Feliksiga knare hu'nane. Mika kazigane, mika zama hanazankura tagra kageta antahita nehuta tusi'a muse hunegantone. <sup>4</sup> Hu'neanagi kagrira mago'ene knaka'a kaze-origahuanki'na anage hu'na negasamue, muse hugantonanki osia kema hanuana kagrama nehana kante antenka ketia antahiramio. <sup>5</sup> Tagrama keta eri fore hunana ama'na nera hazanke nere, rama'a vahe zamazeri agrarega anteno, maka kokantega Jiu vahera keha renezmanteno, Nazarenie nehaza mono naga'mokizmi kva mani'ne. <sup>6-7</sup> Anama hu'neno'a, agra ra mono nontia eri haviza nehigeta azeri none. <sup>8</sup> Kagrama antahigenka kesunka maka zanku'ma humanentona zana kagraka'a antahigahane. <sup>9</sup> Jiu vahe'mo'zanena Tetulusi kere hagerafi'za, ama'na kema nehiana tamage hu'za hunte'naze.

### *Keaga hunentageno Poli'a kenona zamire Feliksi asami'nea naneke*

<sup>10</sup> Gavana ne'mo Poli ke hinogu revumi humigeno, Poli'a anage hu'ne, Na'ankure nagra antahi'noe, kagra ama mopafina kema refakohu zanteria rama'a kafufi mani'nanku, nagra korera osu'na nazama hania kea hugahue. <sup>11</sup> Kagraka'a ana kea eriama hunka antahi ankeregahane, 12fu'a kna'nazana agatereno eovu'nege'na Jerusalemi mono hu'naku mareri'noe.

<sup>12</sup> Zamagrama naga'zana, nagra mago vahe'enena fra ovazi'na, ra mono nompintira keaga hu'na, rama'a vahe kevua zamazeri savari hu'na nagrarega zamare'ozmant'e na, osi mono nonpintiro rankumapinti'enena zamavare nagrarega ontoge'za onke'naze. <sup>13</sup> Hankinka zamagrama kema hunantenaku'ma nehazankea agafa'a kagritera eri forera osugahaze. <sup>14</sup> Hu'neanagi nagra huama hu'na tamagema kasamisuana, tagigomofo Anumzante monora hunte'noe, Jisasi'ma hu'nea Kama, (sektie hu'zama nehazare) maka Mosesi Kasegemo'ma hu'neazante namentinti nehu'na, kasnampa vahe'mo'zama kre'naza kante avaririnoe. <sup>15</sup> Nagra Anumzamo-fonte namentinti hu'noe, zamagrama zamentinti hu'naza kna hu'noankino, fatgo vahe'ene, havi vahe'mo'za frite'za otigahaze hu'na namentinti nehue. <sup>16</sup> Ama'na ke agafare, nagra maragu'zatina Anumzamofo avure'ene, vahe'mokizmi zamurera mani fatgo nehue. <sup>17</sup> Mago'a zagegafu evutege'na, zamunte omane vahe'nia, museza (gift) nezami'na, Anumzamofonte ofa antenaku Jerusalea vu'noe. <sup>18</sup> Anama nehuge'za ra mono nompi nage'za eri fore nehu'za, nazeri agruma Anumzamofonte hu'noa zankura, vahe kevumo'zo mago'a rankea huonante'naze. <sup>19</sup> Hu'neanagi mago'a Esia provinsifinti Jiu vhahera, amare menina kagri kavure mani'ne'za, nagrima hunante keaga me'neresina hunantasine. <sup>20</sup> Anama osanu'za ama vahe'mo'za, nankna hazenke hu'nofi agafa'a hugahaze. Kanisol vahe zamure'ma ot'i'ne'na hu'noa kea hufore hugahaze. <sup>21</sup> Hagi mago'zana kea ranke hu'na kanisol vahe zamure'ma ot'i'nena hu'noe. Menina keagama hunenantazana friptinti otigahaze hu'na huazante hunenantaze.

<sup>22</sup> Anante Feliksi'a Jisasima amage'ma antekana ko antahi'neankino, kema antahi kna eriza'za nehuno anage hu'ne, Lisisi'ma ugagota sondia kva ne'ma eramisige'na, keka'a antahigahue huteno, <sup>23</sup> hagi 100'a sondia vahete kva (sensulien) ne'ku Polina kegava krinto hu'ne. Hianagi atregeno fru huno nemanina naga'amo'zama nazano atupa'ma haniazama eme aminaku hanigeta, i'o huozmanteho hu'ne.

### *Poli'a kazingazi huno mago'ene Feliksi'ene kea hu'nea nanake*

<sup>24</sup> Mago'agna evigeno, Feliksi'ene nenaro Drusilake e'na'e, ana ara Jiu a're. Feliksi'a huzmanteg'e za Polina ome kehazageno eno, Jisas Kraisinte'ma amentinti hu'nea kea eme zanasmi'ne. <sup>25</sup> Poli'ma fatgo zanku'ene, avufama kava krino manizanku'ene keagare'ma vahe'ma refako'ma hania zanku'ma kema nehigeno'a, Feliksi'a tusi koro nehuno anage hu'ne, menina vu'nege'na henka kankamuma mesige'na, ke hanugenka ete eno huno asami'ne. <sup>26</sup> Ana'ma nehuno'a agesama antahi'ana Poli'a zago namigahie nehuno, ama ana agafare mago'agna Polina ke higeno etere huno agranena keaga hu'ne. <sup>27</sup> Tare zagegafu agateregeno'a Porsius Festusi'a, Gavana eri'zana Feliksi no erino eri'ne, na'ankure Feliksi'a Jiu vahe zamazeri muse hu'naku Polina atregeno kina nompi mani'ne.

## 25

### *Poli'a keaga'a erino Sisante vu'nea nanake*

<sup>1</sup> Festusi'a Gavana erizante Sisaria tagufa kna enemanino, Sisariatira atreno Jerusalemi vu'ne. <sup>2</sup> Higeno ugagota mono kva vahe'enena Jiu vahepinti zamagi me'nea vahe'mo'za, Polina havige hu'za keaga eme agrite hunetenaze. <sup>3</sup> Polima kema huntesuna keaga antahi ramigahano hu'za antahige'naze. Festusiga huizo hunka atregeno Poli'a Jerusalemia vino hu'za hampo'na ke hunte'naze. Na'ankure avare'za nevnage'za kantega ome ahe

fri'naku keaga retro hunte'neza hu'naze. <sup>4</sup> Hianagi Festusi'a kenona huno, Polina ko azeri'za kina hunte'za azerintageno Sisaria mani'neanki'na, nagra atupa knafi atrena Sisaria vugahue, hu'ne. <sup>5</sup> Nehuno anage hu'ne, Zamarenke'za kva vahekamo'za nagrane urami'za, ama ne'mo'ma mago'a havizama hu'nesniazama me'nesige'za kesu'za, zamagra keaga agrira hunteho.

<sup>6</sup> Festusi'a zamagranema 8'o 10'a kna agateoreno, osi'a knama maniteno'a Sisaria uramino, hagi mago knarerera keaga refakohu trate unemano, Polina avareta eho huno huzmante'ne. <sup>7</sup> Poli'ma ehanatige'za, Jerusalemiti e'naza Jiu vahe'mo'za, azeri amunompi ante'za otigagine'za, rama'a hamponantake kea huntaza kemofona agafa omanetfa hu'ne. <sup>8</sup> Agri'ama azama hania nanekea Poli'a anage hu'ne, Nagra Jiu vahe Tra Kea eri haviza osu'noe, ra mono nona eri haviza osuge, Sisana havizana huontetfa hu'noe. <sup>9</sup> Hianagi Festusi'a Jiu vahe'mo'za musema huntesaza kazigati Poli antahigeno, kagra knare Jerusalemia mareri'nanke'na naneke ka'a ome antahigahufi? <sup>10</sup> Higeno Poli'a kenona'arera anage hu'ne, Nagri'ma keagama hunantekure hazare, Sisa'ma keagama refako nehia tra'are menina oti'noe. Nagra Jiu vahera havizana huozmanteffa hu'noe. Ama tamageginka kagra ko antahi ankere'nane. <sup>11</sup> Hagi nagrama haviza hunesuge'za frigahane hu'za zamagra hanazana, fri'zankura korera ofregahue. Hu'neanagi zamagrama mago kema hunantesaza kemo'ma tamage agafa'ama omanenesiana, mago ne'mo'a amuha osu'neankino zamagri zamazampina navare ontegahie. Nagra ama keaga Sisante retufentoankino agra refako hugahie. <sup>12</sup> Higeno Festusi'a kanisol valhe'enema atru huno keagama huteno'a, ke'nona hunteno, Hago nasaminka Sisante retufentoe hanankinka Sisante vugahane huno asami'ne.

### *Festusi'a antahintahi aminogu kini ne' Agripa antahige'nea naneke*

<sup>13</sup> Mago'agna evutegeno kini nera Agripake nesaro Benaisikea, Festusi antahimi'ne nantu antenteke Sisaria urami'na'e. <sup>14</sup> Anantega mago'a za'za kna umani'nakeno, Poli agenkeea Festusi'a antahintahi'a erinaku Agripana anage huno asmi'ne, Feliksi'a mago nera kina nompi ante'ne. <sup>15</sup> Jerusalemi mani'noge'za, mono nonte ugagota kva (hai pristi) vahe'ene, Jiu ranra (eldas) vahe'mo'za agri agenkea nenasmi'za hugeta ahe frimaneno hu'za nantahige'naze. <sup>16</sup> Nagra kenona zamire anage hu'noe, Romu vahe'mofo avu'ava'mo'a, keagama mago vahe'ma huntuku'ma hanimo'a, agri'ma keagama huntuku'ma hanamokizmi zamure otino, agri'ma huntesaza kemofona azahu nanekea hutesige'za henka avaremigahaze. <sup>17</sup> Hu'neanki'na amare'ma atruma hazage'na, ama ana kea huretufe onte'noe. Hagi anante knazupa keagama refakohu trate unemani'na, avaretma egahaze hu'noe. <sup>18</sup> Keaga huntuku'ma haza vahe'mo'za oti'za zamagrama keaga hunte'nazana, havizama hu'nesia zante keaga huntegahaze hu'na nagesama antahi'noa kantera huonte'naze. <sup>19</sup> Hagi zamagrazmi mono'mofo zanku'ene mago nera Jisasi'e hu'za nehaza ne'ma fri'nea zanku'ma, Poli'ma huno mani'ne hu'nea zanku agenoka humare'za agripi atre'naze. <sup>20</sup> Agri'ma hunentaza kemofo agafa'a, nagra ke'na erifore osua kazigati Jerusalemi eteno vanige'za amanahu keagama hunte'naza kea ome erifatgo husanifi hu'na knarerema hanigu antahige'noe. <sup>21</sup> Hianagi Poli'ma huno ete nazeri antenkena kina nompi mani'nesugen, Sisa'a na'anee keaga hunantegahifi antahineno hige'na, nagra hanavege huzmantoanki'za, agrira kava krinte'nesagena, inanknarero eri fatgoma hutesu'na, Sisanteria (Empra) huntesugen vugahie. <sup>22</sup> Nehigeno anante Agripa'a anage huno Festusina

asami'ne, nagranena ana ne'mofo kea nagra'ni'a nagesafinti antahinaku nehue, higeno Festusi'a okine huno Agripana asami'ne.

### *Kini Agripane Benasikizani zanavuga keagare Pol'i a oti'nea naneke*

<sup>23</sup> Hianagi anante knarera, Agripake Benasikea mizama'amo marerisa kukena hutuke, ana vahe'zagama atruma hu'naza tusi'a nompi ha' kaziga keagare'ma ugagote'naza kva vahe'ene (commanding officers), rankumapi ranra kva vahe'ene ufrageno Festusi'a ke huzmanteg'e'za Polina avare'za e'naze. <sup>24</sup> Efrageno Festusi'a anage hu'ne, Kini ne' Agripagane miko tagrane mani'naza vahe'motma ama nera keho, maka Jiu vahe krerrafamo'za keaga huntenuku nagrite eri'za Jerusalemine amafinema eri'za e'nazana kezati'za, Polina ahe frisnageno mago'enena amafina omanigahie hu'naze.

<sup>25</sup> Hu'neanagi nagrama hakena erifore'ma huana, agri'ma ahe friga agafa omanetfa hu'ne. Hagi agrama ana kumate'ma ugagote'nea ne' Sisante'ma keaga'ama mago'enе retufentoe hu'negu, nagra Polina avretrenaku nagesa antahi'noane. <sup>26</sup> Hu'neanagi agri nanekema, nagrama kre'na rani'a (lord) amiga keaga nagripina omanetfaza hu'negu tamagrite'ene amu Kini ne' Agripaga tamagrama haketma keso'e hutesage'na, nagra avona kresue hu'na Polina avare'na tamagritera neoe. <sup>27</sup> Na'ankure nagrama nagesama nentahuana mago kina ne'ma keaga huntaza kemo'ma, knare agafa omnesire'ma huntezamo'a knarera osugahie.

## 26

### *Poli agra'a agu'vazisia ke kini ne' Agripa asami'nea naneke*

<sup>1</sup> Agripa'a, Polinku huno, Knarere hugantoanki naneke ka'a huama hugahane higeno, Poli'a azana ometre emetre nehuno ahoke'ma ahekeaga agafa huno hu'ne.

<sup>2</sup> Jiu vahe'mo'za nagri'ma ha'ma renante'za navare'za trate'ma neazana ana mika zamofo agafa'a amananki Kini ne' Agripaga antahi'ankero, nagra tusi'a muse hu'na kagri kavurera oti'na, Jiu vahe'mo'zama hunante'naza ke-mofo nona'a huzmantegahue. <sup>3</sup> Hanki Jiu vahe'mokizmi zamu'zma'ene, Jiu vahe'mo'zama keframa nehaza zana, kagra ko kenka antahinka hu'nananki, kema hanua keaga akohenka mani'nenka rezaganenka antahio.

<sup>4</sup> Nagra inankna navu'navate osi'ni'aretira mani'na nehaza nera asete'na, esetetira vahe'ni'afine Jerusalemima mani'na e'noana, mika Jiu vahe krerrafamo'za ko antahi'za ke'za hu'naze. <sup>5</sup> Zamagra antahi'naze, na'ankure korapa nagrira nage'za antahi'naze. Zamagra huama hunaku zamagesa nentahisu'za, tagri mono'mofo kasegemo'ma, o'e'ma huno hu'nea kante ante'na avariri fatgo hu'na nagra Farisi nere hu'na mani'noane.

<sup>6</sup> Hige'na menina ama keagararereme oti'noe, na'ankure Anumzamo'ma tagehe'ima hvempama huzmantenea kere namentinti hu'na, mani'noe.

<sup>7</sup> Hagi tagrira 12fu'a naga'nofiku hvempa huno erigahaze hu'nea kere zamua kete'za mani'ne'za, zagine haninena hanaveti'za monora hunentaze. E'i anzante'ma navuma ketena namentintima hu'noa zanteku, Juda vahe'mo'za nagrira hafra hunenantaze. Mareri'namoke! (king) <sup>8</sup> Na'a higetma ama vahe'motma Anumzamo'ma fri vahera zamazeri oti'zankura tamentintia nosaze?

<sup>9</sup> Nagrama nagesama antahi'noana, tamageza nehue nehu'na hanaveti'na Nazareti Jisasi agi'a eri haviza hu'noe. <sup>10</sup> Jerusalemi kumapina amanahu'zana hu'noe. Rama'a Anumzante mani'naza vahetamina, Jiu vahe mono nompima ugagote'naza pristi vahe'mo'zanena hugnare

hazage'na zamare'na kina huzamante'na, zamahe frinaku'ma haz  
vahetera nagranena nazante'na izo huge'za zamahe'naze.<sup>11</sup> Hanki hakare  
zupa maka osi mono nompi mareri'na Anumzama huhaviza hunteho hu'na  
zamahe'noe. Na'ankure nagra tusi'za hu'na narimpa hezmanteroe. Ru  
moparegane me'nea ra kumapina ufre'na zamahe'noe.

*Poli'a agu'a rukrehe hu'nea naneke*  
(*Apo 9:3-19; Apo 22:6-16*)

<sup>12</sup> Anama nehuge'za, mono nonte ugagota kva vahe'mo'za hugnare  
hu'za hanave nenami'za hunantage'na Damaskasi nevu'na, <sup>13</sup> zagemo'a  
anuntu age12kiloki higeno, mareri'namokagi (king) monafinkatira masa  
a'mo'a zagea agatere'nea tavi'mo nevugeno, nagrane magokama vu'nona  
nagate'enena remsa mika hugagi'ne. <sup>14</sup> Ana higeta ana mika'mota traka  
huta mopafima nemasonkeno'a, mago kezamo'a Aramu (Hibru) kefinti  
antahugenano anage hu'ne, **Solio, Solio, na'a higenka Nagrira nenahane? Nagrira'na nenahana, kgra ka'a agona zante taru nehane.** <sup>15</sup> Hige'na azage  
Ramoka? hugeno Ramo'a huno, **Nenahamo'na Nagra Jisasi'ne.** <sup>16</sup> Hianagi  
otio, na'ankure ama'na agafare, **Nagra kavurera efore hue, korapa kagrira eri'za ne' kazeri otisugenka, amama kana zane, Nagri'ma nagananane, Nagrama kaveri hanuazana huama hugahane hu'na hugante'noe.** <sup>17</sup> Nagra  
Jiu vahe ka'afinti'ene megi'a vahepintira kaza hu'na kava hunegante'na,  
Nagra hugantesugenka zamagrite vunka, <sup>18</sup> zamurga erihari hananke'za  
hani'zampintira atre'za masare egahaze. Hagi Sata hanavefintira atre'za  
Anumzamofo hanavere esageno, kumi'zamia atrezamantesnige'za, Nagrite  
zamentinti hazage'na, kumi'zmi eri fanane hu'noa naga'enena zamagia  
erigahaze huno hu'ne.

*Poli'a eri'zama'amofonku hu'nea naneke*

<sup>19</sup> Ana hu'negu, Kini Agripaga, monafinkati'ma ege'na ava'nagnazama  
ke'noa zama amage'ma onte'zamo'a amuho hunantegahie. <sup>20</sup> Hu'neanagi  
pusantero Damaskasi vahe zamasmit'e'na, Jerusalemine maka Judia  
vahe'enena zamasmit'e'na megi'a vahe'enena anazanke hu'na zamasmit'e'na,  
tmagu'a rukarehe hutma Anumzante nevinkeno, tamu'tmama hanaza  
zamo'a, hago tamagua rukarehe hu'naze hino. <sup>21</sup> E'ina kegafare mago'a  
Jiu vahe'mo'za ra mono nompintira navuzuhi feg'i'atre'za, nahe fri'nakura  
nehaze. <sup>22</sup> Hianagi Anumzamo'a nagrira naza hiazana keme e'na ama  
knarera oe. Hagi ama oti'na mika vahera osi'mofonteti vuno ramofonte'ma  
vu'neana, nagra huama hu'na nezmasmue. Mago'a kea nosuanagi,  
Moses'e'ne, kasnampa vahe'mo'zama hu'za, e'inahu'zana fore hugahie  
hu'naza'zamo fore nehie. <sup>23</sup> Kema hu'za Kraisi'a ataza erino friteno pusante  
fri'pintira otino, Jiu vahete'ene megi'a vahetera tavi'a eri ama hugahie  
hu'naze.

<sup>24</sup> Poli'ma agra'ama agu'mavazisia zamofo keagama nehiana, Festusi'a  
ranke huno Poliga hago ifo nehano! Ra'ma'a zama rempi hunka antahinana  
zamo kagrira kazeri savari nehie! <sup>25</sup> Higeno Poli'a huno, Nagrira antahin-  
tahinimo'a havizana osu'ne, Festusiga so'e ne' mani'nane. Hianagi nagrama  
nehua nanekea tamage hu'na fatgo antahintahizanteti nehue. <sup>26</sup> Ama'na  
kema nehuana Kini ne'mo'a antahino keno hu'negu nagra agritera hu'ama  
hu'na nehue. Ama anazanku'ma nehuana kinimofo avurera fra'okane.  
<sup>27</sup> Kini ne' Agripaga kasnampa vahe kegu kamentinti'na nehampi? Nagra  
antahi'noe, kgra kamentinti nehane. <sup>28</sup> Higeno Kini Agripa'a Polinku anage

hu'ne, Kagrama kagesa antahinana ama atupa knafina nazeri rukarehe hanankena, nagra (kristen) mono ne' manigahufi? <sup>29</sup> Anage higeno Poli'a kenona'a huno, atupa knafino, za'za knafino nagra Anumzantega nunamu nehue, kagrikukera nosuanki ama menima manu ne'za nagrama huanke'ma nentahiza vahe'mo'za, nagrikna hihogu nehuankino, ama'na seninofinura kina reozmantesaze. <sup>30</sup> Anage hige'za, Kini neki, Gavana neki Benesiki, zamagranema mani'naza vahe'amo'za oti'naze. <sup>31</sup> Oti'za ana noma atre'za fegi'a nevu'za, ke huganti hugama hu'za anage hu'naze. Ama'na nera mago knare ke agafa omaneneankita ahe frige kina huntege osutfa hugahune hu'za hu'naze. <sup>32</sup> Agripa'a, Festusi asmino, Sisante'ma vugahue osiasina, ama nera katufe atrosine.

## 27

### *Poli'a ventefi marerino Romu kumatega vu'nea naneke*

<sup>1</sup> Hagi Itali kumate tina takaheta vugahaze hutageta, mago ruotage hu'za empra 100'a sondia vahete kva nehia ne' (sensulien) Juliusi kegava hinogu, Poline, ruga'a kina vahera, avaremi'naze. <sup>2</sup> Atramitiumiti Esia kaziga rama'a vente manitere nehia kumate manitere huno, yunaku nehia ventefi marerita hagerimpi vu'none. Aristakusi'a Tesalonaika rankumap-inti nera, Masedoniatikino tagrane vu'ne. <sup>3</sup> Maseno ko'atia zupa Saidoni uhanati'none. Hagi Juliusi'a knare avu'ava Polina hunteno, amane vunka knampa ka'a ome nezmagenka, kazama hu'zana zamagripinti erigahane huno huntogeno vu'ne. <sup>4</sup> Hagi Saidonia atretta Saiprusi ti amu'nompi me'nea kuma asogita vu'none. Na'ankure zaho'mo'a tusiza huno himamutino hagerina erivnape'ne. <sup>5</sup> Hagi Silisiane Pamfilia hagerina arugitagita vunazamota, Maira rankumate Lisia provinsifi umani'none. <sup>6</sup> Anante sondia kva ne'mo'a Aleksandriati ventemo, Itali vunaku nehia vente keteno, anampi tavare antegeta vu'none. <sup>7</sup> Akoheta rama'a kna ana'ana huta vu'none. Tusi knazampi Sindasia ehanati'none, na'ankure zaho'mo'a tusi himamu reno kana renkaniregeta mago'anena ovuta, Kriti ti amunompi me'nea mopa asogita Salmoni vu'none. <sup>8</sup> Agatereta tusi amuho huta Lasia kuma tava'onte, Fea Haveni e'none.

### *Hagerimpi zaho ko'atu'nea naneke*

<sup>9</sup> Rama'a knamo'a tagateretegeno, hagerimpi vuna kamo'a menina hazenke atie, na'ankure Jiu vahe'mo'za kave'ma a'o hukna agateregeno, hampo'na zaho ko atu knafi efrone, Poli'a antahintahi zamino, <sup>10</sup> anage hu'ne, Ama vene'ne zage, nagrama nentahuana, amama vuku'ma nehuna kamofona rama'a hazenkefi ufretra rama'a zanti atregahune, feno'zane ventegerompage, tagranena tasimura atregahune huno zamasmi'ne. <sup>11</sup> Hianagi sondia vahete kva ne'mo'a, ventere'ma aze'neria ne' ene, ventemofo nefake ha'a nanekea nentahino, hagi Poli'ma hiankea ontahi'ne. <sup>12</sup> Na'ankure zahoko'atu knafima ventemo'ma umani kumamo'a knarerera osu'ne. Rama'amo'za mago'zamarimpa hu'za, knarekita vugahune hu'naze. Zamagesama antahi'zana Foniksi uhanatigahune hu'za antahi'naze. Kritima ventemo'ma unemania kumamo'a rugaruga asoparega zage ufre kaziga (notwest sautwest) avugosa hunte'negeno zaho ko atu knafina anante umanigahune hu'naze.

<sup>13</sup> Kanti sauti kazigati agazone zaho emarerige'za, hago knare hiankita amane vugahu'ne nehu'za, timpi umaniku erinetraza zana anka avazuhu ventefi nente'za, Kriti kaziga vu'za mopa tva'onte vu'naze. <sup>14</sup> Hianagi

tusi'a not isti'e hu'za nehaza zahokomo avunenenteno Kriti kzigati tusi himamutino e'ne. <sup>15</sup> Zaho komo'a vente'a eme amasagino azeri rava higeno, ventemo'a azeri agatere'zana osigeta tagrati atronkeno zaho komo taretufeno vu'ne. <sup>16</sup> Kautae nehaza ti amu'nompi mopa asogita tagareta nevuta, tusi amuho hunerantegeta tazama husia votia avazu huno ne-ea votia erinte anaga atre'none. <sup>17</sup> Hagi votia erianaga atrete'za, nofi eri'za ra ventere azerisigu kitragote'naze. Vene'ne zagamo'za ventemo Sitisi tinkenare ome ahe zankura tusi kore nehu'za zamazeri knama hanige'za ti avozare'ma akohe'za vanagu, kna'age'zama rente'nazanofira eritrete'za atrageno zaho'mo zamatusfeno vu'ne. <sup>18</sup> Maseno ko'atige'za mago'a fenona ventefintira eri atre'naze, na'ankure zaho komo'a tusi hampo'natino ahe-gantugama huno azeri nakari'za hige'za ana hu'naze. <sup>19</sup> Hagi nampa 3gnazupa ventemofo eri'za zantamina mago'a asga hu'za mate'vu atre'naze. <sup>20</sup> Tagra zugene hanafi'enema mika knafina hanatigeta onkonkeno za-hoko'mo'ma knare osigeno'a, knare hugahune huta tagesama antahi'nona zamo'a amane zankna hu'ne.

<sup>21</sup> Za'za kna ne'zana one'za manizageno, Poli'a amu'nozamifi otino anage hu'ne, Ama vene'nemotma nagrama huanke, Amage antetma Krititima atretma omazasina amanahu hazenkene tuzampaza zantamima atraza zana otrasine. <sup>22</sup> Hanki menima tamasmisiana korera osiho, na'ankure amama mani'naza amu'nompintira mago'moka fanane osugahananki, ventemoke fanane hugahie. <sup>23</sup> Na'ankure meni keragera nagrama Agri vahe mani'nena eri'zama'a erinentoa Anumzamofo ankeromo'a navuga eme otino, <sup>24</sup> anage hu'ne, Poliga antahio korera osunka amane Sisa avurera ome otio, kagranema ana mika ventefima neaza nagara Anumzamo'a asunku huramanteno tamaza hugahie hu'ne. <sup>25</sup> E'inage hu'negu ama vene'nezaga korera osiho. Na'ankure nagra Anumzamofonku namentinti nehuankino nasami'nea kante anteno fatgo huno taza hugahie. <sup>26</sup> Hu'neanagi mago ti amu'nompi mopare atresunkeno zaho'mo ventea atufeno have ome amitenko rukaha hanie.

<sup>27</sup> Hagi 14ni'a kenage'mofo agu'afima zaho'mo'ma tatufeno Adriatiki hageri amu'nompima nevigeno'a, kerage amu'nompina ventefi eri'za vahe'mo'za hago mopare neone hu'za zamagesa antahi'naze. <sup>28</sup> Nehu'za nofi atumpare knaza eri renente'za, eri hagerimpi re'za kazana, 40'a mita fenkagame urami'ne. Osi'a ogantu'a vuza mago'anemana nofira erire'za kazana, 30'a mita timofo za'za a'mo'a urami'nege'za ke'naze. <sup>29</sup> Have ahegahune hu'za tusi zamagogogu nehu'za, ventema umaniku'ma nehige'za erinetrazaza anka 4'a asgahu netre'za, ko'ma atisigu nunamu hu'naze. <sup>30</sup> Anante ventefi eri'za vahe'mo'za ventefinti atre'za fre'naku nehu'za, havige hu'za nofite knanentake'za eri netraze nehazage'za osi votia hagerimpi eri atre'naze. <sup>31</sup> Poli'a sondia vahete kva ne'ene ruga'a sondia vahera zamasamino, Ama'na vene'ne zugama ventefima omani'snazana tamagra frigahaze hu'ne. <sup>32</sup> Hige'za sondia vahe'mo'za ana osi votire'ma kinte'naza nofira traga hutrageno hagerimpi marenovu'ne.

<sup>33</sup> Ko'atumasa huku higeno, Poli'a mika vaheku ne'za neho huno nezmasmino anage hu'ne, 14ni'a kna'mofo agu'afina naza fore hugahieha hutma ne'zama onetma mago'zama osutma e'naze. <sup>34</sup> E'inama hu'nagu mago'a ne'zana neho hu'na neramasmue, na'ankure tamagri'ma zamazeri hampo'na hanigetma manisnagu nehue. Na'ankure magore hunka osi hazenkea mago'moka e'oritfa hugahane. <sup>35</sup> Anagema huteno'a, ana mika

vahe'zamufi breti erino Anumzantega nunamu hunteno, korino agafa huno ne'ne. <sup>36</sup> Ana huno hakare vahera zamazeri hampo'na huke hige'za zamesite ne'zana eri'naze. <sup>37</sup> Ana miko vahe'ma vente agu'afima mani'nonana, 276'a vahe mani'none. <sup>38</sup> Anahu'za zamesiam'a nezamu nehu'za, ventemo'ma oza hanigu witia eri'za hagerimpi matevu atre'naze.

### *Ventea zaho ko'mo eri tagana vazi'nea naneke*

<sup>39</sup> Ko'ma atige'za, mago mopa ke'nazanagi ana mopa antahi'za ke'za osu'naze, hianagi timo eri mago huno ufreto knare kahepa ruherafi'nege'za kete'za, knare hanuno'a zahomo vente'a atufeno anante vugahie hu'za antahi'naze. <sup>40</sup> Hige'za vente'ma azerino nemanianofira tgahu'za eri timpi netre'za, ventema azeri ante fatgo higeno nevia apa kanonte'ma ki'nazanofira vakane'naze. Anante avugama me'nea selia eri zaho kantega netre'za, hageri ankena kefatgo hu'za vu'naze. <sup>41</sup> Ventemo'a have ome amasgino anampi vuno'eno osu'are agi'mo'a runtanigeno, ruga ragati hagerimo'a avunema anteno riga'a rutamana hutre'ne. <sup>42</sup> E'i sondia vahe'mo'za kina vahe zamahe frinaku ke retro hu'naze. Hanki mago'mo'a zanagora aruno tatareno ofregahie hu'za hu'naze. <sup>43</sup> Hu'nazanagi sondia vhahete kva ne'mo'a Poli'na avare so'e huno aza huno vuku agesa nentahino, sondia vahe'mo'za kina vahera ozmahesaze nehuno, azagama zanago ruga hu'nesamoka ventefintira takairenka pusante tinkenare vugahaze huno hige'za, <sup>44</sup> mago'amota, zafa atupare azeritma nevusageno, ventemofo atupare aze'nerita vugahaze, hige'za ana'ma hazana knare hu'za mopare vu'naze.

## 28

### *Ti amunompi me'nea mopafi Malta Poli mani'nea naneke*

<sup>1</sup> Knare huta mopare'ma unehanatita konana Maltae nehaza ti amu'nompi mopa ke'none. <sup>2</sup> Anampima nemaniza vahe'mo'za knare so'e zamavu'zamava hu'za tavarente'naze. Tusi'a teve hegare'za tazeri so'e hu'naze na'ankure, tusi ko'aruno zasi hige'za ana hu'naze.

<sup>3</sup> Poli'ma teve zogino erino eme tevefima negregeno, tevemo'a amuho higeno ana tevefinti mago ha' osifa'vemo hanatino Poli azante haninkofigeno, arisonamo'a kizu'vazu hu'ne. <sup>4</sup> Kuma agafa vahe'mo'za kazageno osifa'vemo Poli azante haninkofi nege'za, zamagra'a anage hugantugma hu'za, ama'na nera vahe zamahe nefria nepigure, hankino hagerimpi frigara knare huno freno e'neanagi, tagri'ma refko'ma nehia a' anumzamo refako husiana atre'sigeno Poli'a omanigahie. <sup>5</sup> Hianagi Poli'a ana ha' osifavea tevefi rutafri atregeno ata hoza omi'ne. <sup>6</sup> Zamagra'ma antahi'zana, avufamo'a zorege mopafi traka huno frigahie hu'za nentahi'za, za'za kna kete'za mani'zana, mago'zana agritera fore osige'za, antahizazmia rukarehe hu'za ama'na nera anumzampigure hu'za hu'naze.

<sup>7</sup> Ana kumate'ma me'nea mopagerfa, ana ti amu'nompi mopare ugagota hu'nea ne' Pabliasi'e nehaza ne'mofona, agupo mopa'a me'nea ne'mo, muse nehuno tavareno noma'are vuno, 3'a kna'mofo agu'afina tazeri so'e hurante'ne. <sup>8</sup> Anama hifina Pablusi nefana amuho ave'nesino korarifa renagigeno vase'nege'za ome ke'naze. Poli'a omegeno nunamu hunteteno, avufare azana agofetu antegeno, kri'a amane hunte'ne. <sup>9</sup> Anazama fore hige'za, maka ana ti amu'nompi mopare'ma nemaniza kri vahera anahu'za ageno kri'zamia eri amane humzante'ne. <sup>10</sup> Hagi zamagranena, tagrira

husga hunerante'za, vunaku'ma trotra nehunke'za, ina zanku'ma atupa'ma hu'nazana ventefi eri'za ome tami'naze.

### *Poli'a Rom kumate uhanati'nea naneke*

<sup>11</sup> Hagi 3'a ika maniteta, ana ti amunompi kumate'ma zaho ko'ma atigeno ko'ma emani'nea Aleksandria ventefi vu'none. Ana ventemofo avuga kugaveza anumzane huno tare kogna tremokizni znamema'a me'ne. <sup>12</sup> Vuta 3'a kna (3 dei) Sirakuse kumate ome azerita mani'none. <sup>13</sup> Anantetira rugagita Regiumu uhanati'none. Masonkeno ko'atigeno zage fretegati zaho egeta anagame'a mago knarerera Puteoli uhanatuna zamota, <sup>14</sup> anampi mago'a tafuhe'ina ome zamageta erifore hunke'za, ke hazageta zamagra-nena mago sonta umani'none. Ananteti Romu e'none. <sup>15</sup> Hago tagrik'u'ma emani'naze kema Romu mani'naza tafuhe'za nentahi'za vahe'ma e'nazana, Apiusi kante maketi kumapinti neageno, 3'a no mizase'za nemasaza nonteti tagri'ma tavataginakura e'naze. Poli'ma nezmageno'a hanave e'nerino, Anumzamofo muse hunte'ne.

<sup>16</sup> Romuma ufronke'za, kagra kavesi'zante kvama hugante'nia sondia ne'ene manio hu'za Polinkura hunte'naze.

<sup>17</sup> Hagi 3'a gna'mofo amefi'a, Poli'a kehige'za Juda kva vahera emeritru hazageno, Juda kva vaheku anage hu'ne, Nafuheta nagra mago havizana vahetia huozmante'na tafafe'i zamu'zmara eri haviza osu'noanagi, nagrira kina vahekna hu'za Jerusalemitira navare'za Romu vahe zamazampi eme natre'naze. <sup>18</sup> Romu vahe'mo'za nagrira refko hu'za nagete'za, katufe natrenaku hu'naze. Na'ankure nahe friku'ma hunantazana, kegafa'a na-gripina omanetfa hu'ne. <sup>19</sup> Hianagi Juda vahe'mo'za ana kerera ke ha'renantage'na, rankva Sisa kenakure hu'noe. Hu'neanagi nagrama antahuana mago keaga nagra'ni'a vahera huozmantegahue hu'noe. <sup>20</sup> E'na hu'negu nagra neramage'na tamagra ne keaga huku nehue. Na'ankure Israeli vahe'mo'za zamentinti hu'za, zamage sama nentahiza zante ana agafare nagrira ama'na kinanofira renante'naze. <sup>21</sup> Hige'za anage hu'za asami'naze, Judia kazigatira kagri nanekea avona kre'za atrageta e'ori'none. Hanki tafuhe'za anantegatira e'za naneke'a eme antege, kagri havi kavukva zamofa nanekea ontasmitfa hu'naze. <sup>22</sup> Hianagi menina kagripinti kema antahinaku nehune, na'ankure mika kotegeti vahe'mo'za antahu'nana ama ana kevugura (sekt) huhaviza huneramantaze. <sup>23</sup> Agranema atru hu'za keaga husnaza knama erinte fatgoma hutage'za, rama'a vahe'mo'za nemasefinka e'za eme negageno, ana zupa Mosese kasegefinti'ene kas-nampa vahe'mo'zama krente'naza kefinti erino Anumzamofo mona kuma avu'ava zana huama huno nezmasmino, ama ana Jisasi avu'ava zante'ma zamentinti hanagu nanterana agafa huno nezmasmigeno kinaga ome ase'ne. <sup>24</sup> Poli'ma kema hia kemo'a mago'amokizmia antahintahi zmia zmare agrarega zamante'ne, mago'amo'za antahi'za zamentinti huzankura zamesra hu'naze. <sup>25</sup> Zamagra zamagra hugantigma hu'za mago zamarimpa nosu'za, atre'za nevazageno, Poli'a vagare keaga huno, Ruotge Avamu'mo tamagehe'ima keaga huzami'nneana, kasnampa ne'Aisaiampi hvuzino hufatgo hu'ne. <sup>26</sup> Ana vahete vunka anage huo, **Tamage hutma kea antahigahazanagi, amara osu'tfaza hugahaze, tamagerafa hutma kegahazanagi, keanke oregahaze.** <sup>27</sup> **Na'ankure ama ana vahe'mokizmi zamagu'amo'a amara huno hagro osu'nege'za kema antahi'zana, zamagesamo'a antahiso'e nosie, hagi zamavurga**

**asuki'nege'za zamavua nonke'za zamagesaretira nontahi'za, zamagu'amo'a amara osanige'za, rukrahe hu'za omesage'na zamazeri onkanamregahue hu'ne.** (Ais 6:9-10.)

<sup>28-29</sup> E'ina hu'negu tamagra antahi ankeresazana, Anumzamo tahokehe'zana meg'i a vahete atregeno e'ne hu'za zamagra antahigahaze.\*  
<sup>30</sup> Poli'a, agra'ama ikante mizaseno ne'mania nompina, tare zagegafufi anampina mani'nege'za, agri'ma kekure hu'za amokizmia so'e huzmante'ne. <sup>31</sup> Korera osuno Anumzamofo mona kumamofo avu'ava zana hu'ama nehuno, Ramofo Jisasi avu'ava zamofo nanekea rempi hunezamigeno mago'mo'a aze'orino i'o huonte'ne.

---

\* **28:28-29** Fima me'nea kea omane'ne hu'za korapa antahi'zane vahe'mo'za hu'naze. Anagema Polima huvarege'za, Juda vahe'mo'za atre'za nevazageno, zamagra zamagra franevaziza nehu'za vu'za e'za hu'naze.

## Rom Poli'a Romu Vahe Avonkrezami'nea Naneke

### *Poli'a musenke Romu vahe atrezmanente'nea naneke*

<sup>1</sup> Hagi nagra Poli'na, Krais Jisas kazokzo eri'za ne'mo'na, Anumzamo apsol eri'za erio huno huhamprinanteno, Knare Musenke'a huama hanugu nazeri ruotge hunantene. <sup>2</sup> Ama'na Knare Musenkea korapa Anumzamo'a huvempa kea kasnampa vahe'amokizmi zamasamige'za, Ruotge Avontafepi krente'naze. <sup>3</sup> E'i ana Mofavre'a Deviti naga nofipinti, ne'mo ama mopafi avufga erino efore hu'ne. <sup>4</sup> Hagi Ruotge Avamumo'a hihamu'anee huama huno, Anumzamofo Mofavre fripinti azeri oti'negeta, Jisas Kraisi'a Rantimo'e nehune. <sup>5</sup> Jisas Kraisi azampi Anumzamo'a asunku huranteno, Agri agifi Anumzamo'a apsol eri'zama miko meg'i vahetema erisunku huhampritantene. E'ina hu'negu zamagra Agri Agifina amagera nente'za zamentintia hugahaze. <sup>6</sup> Tamagranena Jisas Kraisi nagare hu'zama mani'naza nagapi mani'naze.

<sup>7</sup> Anumzamo'ma tamavesinteno kema higeta mika Romu kumate mani ruotge hutma mani'naza nagamotarega, Anumza Nafatimofone Rantimofo Jisas Kraisi asunku'zamo'ene, rimpia fruzamo'a tamagrane megahie.

### *Poli'a Romu vunaku antahintahi hu'nea naneke*

<sup>8</sup> Hagi kota'zana, Jisas Kraisi agifi, Anumzani'amofona maka'motamagura susu huntue. Na'ankure tamagra tamentintima hazazamofonke, mika kotega huama nehaze. <sup>9</sup> Na'ankure Anumzamofoma nagra maka nagu'aretima eri'zama'a erinente'na, Nemofo Knare Musenkema huama nehumo, tamagrik'u'ma nentahi'na nunamuma nehuazana, nageno antahino nehie. <sup>10</sup> Mika zupa nunamuma hufina, Anumzamofo avesima me'nesige'na, tamagritegama esugura nunamuna huvava nehue. <sup>11</sup> Na'ankure tamagri'ma eme neramage'na, Avamumofo musezama nagripi me'neazama nerami'nugeno, tamazeri hanavetisia zankura tusiza huno navenesie. <sup>12</sup> E'i ana zana, tamagri tamentintima azeri hankaveti ke neramasami'nena, nagri'enena ana zanke huta nazeri hanaveti kea nenasamisageta tamentintifina oti hanavetita manigahune. <sup>13</sup> Nafuhetane nasaraheta antahisazegu nehue. Nagra nantu eme antenermantena eri'za tamagripi enerisugen, meg'i nagapi hu'neaza huno Avamumofo raga'a tamagripima efore hanigena kesua zankura, rama'a zupa antahintahini'a retro hu'noanagi mago'a zamo nazerigena, omena mani'nogeno menina ama knarera ehanatie. <sup>14</sup> Eri'za eri'na, Griki vahe'ene, ko knafi vahekna vahe'ene antahintahiza me'nea vahe'ene, antahintahiza omne vahe'mokizmine, zamaza hanugu nagrira hunante'ne. <sup>15</sup> E'ina hu'negu Romu kumate mani'naza nagamotarega, Anumzamofo Knare Musenkema eme huama hu'na tamasami zankura tusi'za huno nave'nesie.

### *Knare Musenkemofo hankve'amofo naneke*

<sup>16</sup> Hagi Kraisi Knare Musenkema huama'ma huzankura nagazea nosue. Na'ankure e'i Anumzamofo hanave'a anampina me'neankino, iza'zo zamentintima hanamokizmia zmahonekeno, Jiu vahe esera zamavareteno, anante meg'i vahera zamavaregahie. <sup>17</sup> Na'ankure ama ana Knare

Musenkefi, Anumzamo'ma fatgo avu'avaza hurante'nea avu'avamo'a efore hu'ne. Eri agafa hu'nereti'ma vuno vagarete'ma uhanatisiana, amentintima hu'zamo azeri ruotagera hugahie. Avontafepina huno, **Fatgo vahe'mo'za zamentinti zanteti zamasimura eri'za manigahaze** hu'ne. (Hab 2:4).

### *Maka kumiku Anumzamo rimpa ahente'nea naneke*

<sup>18</sup> Na'ankure Anumzamo'a, Agra'a monafinkatira rimpahbezana eri'ama huno, Anumzamofo fatgo avu'ava nosu'za, fatgo osu zamavu'zmava ne-haza vahe'mo'zama ana zamuzmateti'ma, tamage kemofoma retrako nehaza vhahera ha'rezamantegahie. <sup>19</sup> Na'ankure Anumzamofoku'ma ke'za antahi'zama huzantmina amunozmifina ama hu'ne. Na'ankure ko Anumzamo'a avu'ava zama'a eriama huno zamaveri hu'ne. <sup>20</sup> Hakare zama tro'ma higeno fore'ma hu'neregatima e'neana, Anumzamofo mevava avu'ava zana ke'naze. Hianagi hakare'zama eri fore'ma huneregati'ma e'neana hakare zamo'a Anumzamo'ma tro hunte'nea avamente me'nege'za vahe'mo'za negaze. E'i ana agafare Anumzamofo oku me'hea han-kave efore hige'za negazankiza, vahe'mo'za onke'none hu'za osugahaze. <sup>21</sup> Hu'negu Anumzamofona ke'za antahi'za hu'nezagi, zamagra Anumzane hu'za ra agi'a nomi'za, humuse hunontaze. Hagi zamagri'a neginagi antahintahizamo zamazeri savri hige'za, zamagu'amo'a hanizampi neme. <sup>22</sup> Zamagra antahi'zane vahe mani'none hu'za nehazanagi, zamagra neginagi vahe fore nehaze. <sup>23</sup> Hagi zamagra manivava Anumzamofo ra agima amigazana, erimare'za fri'naza vahe'mofo amema'agi, namaramimofo amema'agi, 4'a agazane zagagafamofo amema'agi, zmurugufati vano ne-haza zagaramimofo amema'tro hunte'naza zante ra agi nemize.

<sup>24</sup> E'na hu'nagu Anumzamo'a zmatrege'za, zamagra zamaguareti za-mavesintaza kefo avu'avazampi unefre'za, kefoza huno havizantfa hu'nea avu'avaza zamagra zamufgar ohunte anhunte nehu'za, zamufga eri haviza hu'naze. <sup>25</sup> Hagi Anumzamofo tamage kea, havigereti eri revahe nehu'za, Anumzamo'ma Agra'a tro'ma hunte'nea zagaraminte monora hunte'za amage nente'za troma hu'nea Anumzamofona ra agia amivava hugazanagi anara nosaze. Tamage. <sup>26</sup> Ama anahu agafare Anumzamo'a zamatrege'za, vahe'mofoma agaze ami avu'avazamofo zamavesi zampi havi zamavu'zmavara nehaze. Ane'mo'za osuga zamavu'zmava hu'za zamagra zamagra monkohu'zanku tusiza huno zamavenesige'za, zamagaze hu avu'avaza zamagra zamagra nehaze. Ana kumima hazazamofo, mizama'a zamagra'a zamata enerize.

<sup>28</sup> Zamagrama Anumzamofo zamefi hunte'za agorga'ama omani'nazana neginagi zane hu'za nehaza zanku, Anumzamo'a atregeno havi antahintahizazmimo retrako hige'za, osuga avu'ava zana nehaze. <sup>29</sup> Zamagripina hakare havi kefo avu'ava zamo'a avitege'za, kefo zmuzma nehu'za, veva osu agraguke antahi'zane, vahe'mofo avesi onte'zama, antahi mugizama, vahe ahefri'zama, ke ha' huza kanive oreare hu'zama, krunage hu'zama, vahe'mofo fruge huonte'zama, vahe'mofo amefi ke hu'zane, <sup>30</sup> vahe'mofo avufintanke huno hu kofinte'zama, Anumzamofo antahiomu zama, veg-anokno hu'zama, agra'ama erintesga hu zamavuzmava nehu'za, kasefa kefo avu'avaza eri fore nehu'za, zamarera zamafa agorga nomanize.

**31** E'inahu vahepina knare antahintahizana omanegeno, rumofoma antahimizana omanegeno, vahe'mofoma avesinteno, asunku hunte'zana omane'ne. **32** Zamagra ko Anumzamofo kasegemo'ma fatgo osu zama'uzmava'ma hanaza vahe'mo'za frigahaze hu'nea kea antahi'nazanagi, ana kesegea amage nonte'za, ana kefo avu'ava zana nehu'za, mago'ane rumokizmia hihou'za antahintahia zamizage'za nehaze.

## 2

### *Anumzamo'ma fatgo huno refako hania zamofo naneke*

**1** E'ina hu'negu tamagra antahisazana rumo'za haviza hu'naze hutma refko huzmanteh gahazanagi, tamagranena anahukna hutma havi vahe mani'nazankitma mago'a kea osugahaze. Tamagrama rumokizamigu'ma havi vahe mani'nazanki'za zamata erigahaze hutma huzmantesazana, tamagranena anahukna hu'nazankino, tamagri'enena anazanke hurmantegahie. Na'ankure rumofoma refko nehamoka, kagranena ana hukna hu'nane. **2** Hagi antahi'none, Anumzamo'a fatgo avu'avazanteti, iza'o anazama hania vhahera refko huno knazana amigahie. **3** Kagra ru-mozama anazama hazana refko hunezmantananki, nahigenka kagra zamatikna hunananki, Anumzamo'ma refko huzmantesnifintira agateregahue hunka nehan? **4** Kagra nonkano knaza amunanagi knarezantfa huno agazone huneranteno, akeranteno mani Anumzamo'ma kagri'enema mani'neana? E'i anazamo'a kagritera amneza me'nefi? Kagra nonkano knare'ma hunegantenoma kumpipinti'ma kagu'a rukrahema hananegu'ma knama kaminoma ne-eazankura nontahino? **5** Hianagi krimpa'mo han-kavetigenka kumimofoma kamagena humizankura kavenosie. E'i kagra'a, kefoza huno havizantfa hu'nea mizama erisana mizanka'a eri atru ne-hane. Na'ankure Anumzamo'a rimpahae kna ne-enkino fatgo hunoma refako huzama'a erinte'ama hugahie. **6** Anumzamo'a zma'uzamavama ne-hanaza avamente, magoke magokemofona mizama amitire hugahie. **7** Iza'zo knare zamuzma hvava hu'za nevu'za, ra zamagima erisagu nehake'za, himamu hankave erisigu nehake'za, haviza osniazanku nehakesamokizmia, Anumzamo manivava zmasimura zamigahie. **8** Hu'neanagi Agra rimpah he'zana rukaha hutresigeno, iza'zoma zamagraguke nentahiza, tamage ke'mofo amage'ante zanku zamagena hunemiza, kefo avu'ava nehanaza vhahete egahie. **9** Kefoza huno havizantfa hu'nea knazamo, kefozama hvava hu'za nevanaza vhahetera egahie. Esera Jiu vhahete eteno, anahukna huno meg'i a vhahete enena egahie. **10** Hu'neanagi masanentake avasesezama, ragi eri'zama, rimpah fruzana makama knare'zama nehaza vahe Anumzamo'a zamigahie. Esera Jiu vhahete eteno, anantera anahukna huno meg'i a vhahera zamigahie. **11** Na'ankure Anumzamo'a magoke mofonkuke osuno, fatgo avesizanteti ana miko vhahera refko nehie.

**12** Na'ankure meg'i a vhahete'za Anumzamofo kasege krenteneana on-tahine'za kumira hugahazanagi, zamahe fanene hugahie. Jiu vhahete'za Anumzamofo kasege eri'naza vhahete'za kumi'ma hanazana, ana kasegereti refko huzmanteno knazana zamigahie. **13** Hu'negu kasegema antahike'zama nehamo'za, Anumzamofo avururera fatgo osu'haze. Hianagi kasegema amage nentaza vhahete'za Anumzamofo avufina fatgoa hu'naze. **14** Na'ankure meg'i a vhahete'za Anumzamofo kasegema krente'neana e'orinazanagi, zamagra zamagu'afina ko havizanki knarezanki hu'za nentahie'za amage'nentaze. **15** E'inahu'ma hazazamo zamagrira Anumzamofo

kasegema zamagu'afi krenteneana erinteama nehaze. Ana hu'negu zamagra zamagu'afi nentahizageno, antahintahiza'zmimo'a zamasamino, knare'za nehzanki haviza nehzanki huno nezmasamie. <sup>16</sup> Hagi mago kna ne-enkino Anumzamo'a Jisas Kraisimpi ana miko vahe'mofa oku'a antahintahizmia refko hugahie. Ama Knare Musenkemo hu'nea kante neramasamue.

### *Kasegemo Jiu vahe'mokizmi kegaga huzmantesia naneke*

<sup>17</sup> Hianagi tamagra Jiu vahe mani'none nehutma, Anumzamofo kasegemofonte mani'neta, Anumzamo'ene tragoteta mani'none hutma tamagra tamavufa erisaga nehaze. <sup>18</sup> Tamagra Agri'ma avesi'nea zana inazamo fatgo hune ko antahi'naze. Na'ankure agri kasegema korapa rempi haramigeta antahi'naze. <sup>19</sup> Tamagra zamavu asuhu vahe'mokizmi kama zamaveri nehuta, hanimpima mani'naza vahe'mokizmi tavi mani'none huta nehaza zankura, knare'za nehune hutma nehaze. <sup>20</sup> Tamagra tamagesama antahizana vahe'mo'zama neginagi avu'avazama nehaza vahe'mokizmi kana zamaveri nehune nehuta, mofavremokizmi Anumzamofo kana rempi hunezamune huta nehaze. Na'ankure Anumzamofo kasegefina, knare antahi'zane tamage'zana antahi vagare'none huta nentahize. <sup>21</sup> Tamagrama vahe'mokizmi rempi hunezamita, hagi nahigeta tamagra'a rempi huta non-tahize? Tamagra musufa oseho huta nezmasamize. Hianagi tamagra'a musufa nosazo? <sup>22</sup> Tamagra ru venenene anene monkoza osiho huta nehzananagi, tamagra'a anazana nosazo? Tamagra havi anumzante mono huon-teho nehuta, mono nozmifintira kumzafa nosazo? <sup>23</sup> Tamagra kasegema antahi'naza zankura tamufga erisaga nehaze. Hu'neanagi kasegema rutagrazana Anumzamofona ra agi eri haviza nehaze. <sup>24</sup> Na'ankure avontafepima hu'neana, **Meg'i'a vahe'mo'zama Anumzamofo agima huvavizama nehzana, na'ankure tamagrama haza avu'ava zante anahu kea nehaze** hu'ne. (Ais 52:5, Izik 36:20.)

<sup>25</sup> Na'ankure Jiu vahe'motma tavufga tgahu tamavutamava zamo'ma knare'ma hanie hanutma, kasegemofo amagema antesageno'e. Hianagi kasegema rutagrenageno'a tamavufga taga nehaza tamavutamavazamo'a amne'zankna hugahie. <sup>26</sup> Hagi meg'i'a vahe'mo'za zamavufaga taga osune'za, Anumzamofo kasegema amagema'antesazana, zamufga taga osu'naza zamo'a zamufga tgahu vahekna hugahaze. <sup>27</sup> Tamage amega avufga taga osu, meg'i'a vahepinti iza'o Anumzamofo kasege amagema antesimo, Jiu vahe oku tamavufga taga hu'nesaza vahe'mota Anumzamofo kasege amage nontesaza vahe'motagu keagafi manigahaze hu'za hurmantegahaze. <sup>28</sup> Hu'negu tamagra tamage Jiu vahera omani'naze. Na'ankure Jiu vahe'mo'zama kaseneramante'za oku tamavufga tgama huramante'naza zamo'a tamazeri Jiu vahera ose'ne. <sup>29</sup> Hianagi tamage Jiu vahe'ma mani'naku'ma hanu'za, kasegemofo amage antegahaze. Tamage oku avufgana taga hu'zana agu'afi tumo'amofo Anumzamofo Avamumo erifore hugahianki, amega avufgare erifore osugahie. E'inama nehaza vahe'mo'za vahe'mofa tegatirompage, Anumzamofontegati ra zamagima erisaza zanku nehakaze.

<sup>1</sup> Jiu vaherema nehzana, nankna knare'za eri forera nehaze? Hifi oku'a tavufgama tagahu tavutava zampintira na'a taza hu'zana enerize? <sup>2</sup> Anampina rama'a tamaza hu'za me'negeta enerize! Ese zana Anumzamofo oku me'nea ke'a Jiu vaheku antahiramino eri'ama hu'ne. <sup>3</sup> Ana hanigeno mago'amo'zama zamentintima osanageno'a, ana zamentintima osnazazamo'a, Anumzamo'ma huvempa hu'nea ke'a rufutagigahifi? <sup>4</sup> I'o, Anumzamofo fatgo hu'neanki, maka vahemota havige vahemani'none. Avontafepima krente'neana **Kema hananana vahe'mo'za tamage hu'za nehnagenka kegagare kavrentesazana zamageteregahane** hu'ne. (Sam-Zga 51:4)

<sup>5</sup> Hianagi tagri fatgo osu tavu'tavazamo'ma, Anumzamofo fatgo avu'avazama eri fore'ma nehanigeta, tagra na'ane huta hugahune? Anumzamo'ma rimpaheranteno knazama tamisiana, e'i fatgo avu'ava hugahifi? (Vahemota antahintahire, ama'ina kea nehue.) <sup>6</sup> I'o, Anumzamo'ma fatgoma osu'nesuno'a mopafi vahemene mikozana refko huga osu'neankino, inankna huno refko hugahie? <sup>7</sup> Nagri havigemo'ma Anumzamofo fatgo avu'avazampine masa'afima eama hanigeno'a, na'ante Anumzamo'a kumi vahemani'nane huno hugahie? <sup>8</sup> Hagi mago'amo'za tananke nekafrankna hu'za kegaga zamifintira kea nehu'za, mago'ane kumira nehanunkeno knare'za before hanie hu'za nehaze. Iza'o e'inahukna nanekema nehanimo'a kna erinogu nehie.

### *Miko vahera kumi vahake mani'naze hu'nea naneke*

<sup>9</sup> Hagi na'ane huta hugahune, tagra Jiu vahemota mago'a nagara zamagetereta knare hu'none hugahumpi? I'o, na'ankure tagra ko ana miko Jiu vahero, megia vahera kumimofo hankavemo refitezmantenegeta zamageta antahita hu'none. Hagi Jiu vahemota ru vahera zmageterenompi?

<sup>10</sup> Avontafepi krente'neana, **Magore fatgo vahera omani'ne. Magore huno omanitfa hu'ne.** <sup>11</sup> **Magore huno ama' antahi'zane vahera omanine. Mago'mo'e huno Anumzamofonkura nohakre.** <sup>12</sup> **Miko vahem'o'za zamagena hunemi'za, ana miko'mo'za haviza nehaze. Magore huno knare'za nehia vahera omanine. Magore huno omanitfa hu'ne.** (Sam-Zga 14:1-3) <sup>13</sup> **Zamanankemo'a mati kerigamo hagaro huriankna nehie. Zamagefu'nafina havigemo avite'ne. Ha' osifavemofo avuatga zama'amo zamagitera me'ne.**

<sup>14</sup> **Zamagitera vahem'a sifnama huntezane, aka kegagamo avite'ne.** (Sam-Zga 10:7) <sup>15</sup> **Vahem'a zamahe fri zanterea ame'ama nehaze.** <sup>16</sup> **Inantego vazana vahem'a zamazeri haviza hu'zane vahemofoma knama amizamo nezmavararie.** <sup>17</sup> **Inankna hu'za zamarimpa frua erigahaze zamagra ontahi'naze.** (Ais 59:7-8)

<sup>18</sup> **Anumzamofonku koro hu'zana nomane.** (Sam-Zga 36:1.)

<sup>19</sup> Tagra antahi'none kasegama krente'nea ke'mo'a kasegemera eri'naza vahem nezmasamie. Ana hanigeno mago'mo'a huno nagra fatgo vahemani'noe huno osugahie. I'o miko mopafi vahemota Anumzamofo avurera hazenketa me'nea vahemani'none. <sup>20</sup> Na'ankure kasegemera ma hu'neazama avarari zampintira, Anumzamofo avufina mago vahem'o'a fatgo vahemani'noe huno osugahie. Na'ankure kasegemera, kumimofo keno antahino huzana erifore nehie.

### *Tamentintimo hanigeta fatgo vahemani'suna naneke*

<sup>21</sup> Hu'neanagi menina Anumzamofo fatgozana, kasege amage'ante zan-tetirompage, kasefa ka taveri hu'ne. Korapama Moses'e ma krent'e nea avompima huvempa nehigeno, kasnampa vahe'mo'za hu'naza kante efore nehie. <sup>22</sup> Tagrama fatgo huta Anumzamofonte manisune hanuta, Jisas Kraisinte tamentintia hanunkeno, Anumzamo'a fatgo vahe mani'naze huno hurantegahie. Mago kana omnetfa hu'ne. I'o. <sup>23</sup> Na'ankure maka'mota kumi huta Anumzamofona hanave'ane kumapina umanigara osuta, atupa hu'nonane. <sup>24</sup> Anumzamo'a knare eri'zama asuragiranteno Kraisimpi eri'nea zanteti, tamagra fatgo vahe mani'naze hu'ne. Agra e'i ana zana Kraisimpi miza seranteno katufegeta, kumpintira fru huta mani'none. <sup>25</sup> Anumzamo'a, Jisasina tamigeno kumitimo nona huno korama'a tagino, kumitia apaserante'nea zamo'a Anumzamo'a agru huno fatgo hu'neankita, Agritema tamentinti hanuta Anumzamofontera egahune. Anumzamo'ma e'inahu hu'neazamo, Anumzamo'a fatgo hu'ne nehie. Ko'ma kumi hu'naza vahe'ma akoheno mani'neno kumizmia atrezmante'nea zamo'a eama hu'ne. E'na zamo'enena eriama huno Jisasimpima zamentintima haza vahe'ma nezmavreia zamo'a taveri huno Anumzamo'a fatgo hu'ne nehie. <sup>26</sup> Na'ankure e'i anazama hiazanteti, Agra'a fatgozana meni knafina eriama nehie. Hanigeno kumi vahe'mo'za fatgo vahe mani'naze haniana, e'i Jisasi Kraisimpima zamentinti hanaza vaheku Anumzamo'a fatgo vahere huno humzmanegahie.

<sup>27</sup> Hagi tagra naza hunonkeno Anumzamo'a tavrenegu tavufga erisaga hugahune? Kasegema amage'ma ante avu'avazamopi? Knare eri'zama e'nerunazamo'o? I'o. Tamentintima hu'zamo tavufama erisga hu'zana agatere'ne. <sup>28</sup> Tagri'ma tazeri knare'ma higeta Anumzamofo avure'ma fatgo hu'nonana kasegema amage'ante zampitiro'ompge tamentintima hunkeno tazeri fatgo hu'ne. <sup>29</sup> Agra, Jiu vahe'mokizimi Anumzanke mani'nefi? Agra megi'a vahe'mokizimi Anumzanke maninefi? I'o, Agra ana mikomota Anumza mani'ne. <sup>30</sup> Zamufga taga hu'naza vahe'ene, zamufa taga osu vahe'mofona, Magoke Anumzanke mani'neankino, zamentintima haza vahaku fatgo vahe mani'naze nehie. <sup>31</sup> Hagi tagra tamentintigu ke nehuta, kasegegura amnezane hugahumpi? I'o, tagrama tamentintima hanuta kasegemofona tamage huta avariri fatgo hugahune.

## 4

### *Abrahamu amentinti higeno Anumzamo'a fatgo nere huno hu'nea naneke*

<sup>1</sup> Abrahamu'a tagrikna vahe mani'neno, neregeho mani'neaki, na'anee huta hugahune? <sup>2</sup> Hagi agri eri'zamo'ma hanigeno fatgo hu'noe huno Abrahamu'a avufga erinte marerigahie. Hu'neanagi Anumzamofo avureraka knarera osugahie. <sup>3</sup> Na'ankure avontafemo'a anage huno hu'ne, **Abrahamu'a Anumzamofonte amentinti higeno, Anumzamo'a fatgo nere huno Abrahamunkura hu'ne.** (Jen-Agf 15:6) <sup>4</sup> Vahe'mo'za eri'zama enerizana muse'za zamisazegu e'norizanki, miza erinaku enerize <sup>5</sup> Hu'neanagi vahe'mo'za eri'za eri'zazarntera Anumzamo'a fatgo vahere huno humozamante, hu'neanagi Anumzamo'a kefozanti eritrene hu'za zamentintima hazageno, fatgo vahere huno hunezmante. <sup>6</sup> Deviti'a anahukna huno ama anazanku nanekema hu'neana, Anumzamo'ma kumi vahekuma fatgo vahere huno hu'nea asomu kema hu'nea nanekefina huno, <sup>7</sup> **Anumzamo'ma magomofo hazenke zama'ane, kumi'ama atrentenesimo'a muse**

**hino.** <sup>8</sup> **Kumi hu'nesia zanku'ma Ramo'ma kumi hu'ne huno osania zankura muse hino.** (Sam-Zga 32:1-2)

<sup>9</sup> Ama ana asomura Jiu vahe'mofo zanke me'nefi, oku zamavufaga tagaosu megi'a vahe'mokizmi zanene? Tagra Abrahamunkura, Anumzamo'a fatgo nere huno hu'ne huta nehune. Na'ankure agra amentinti hu'negeno'e. <sup>10</sup> Hu'neanagi inankna higeno anazana efore hu'ne? Agra oku avufga taga hutegeno fatgo nere huno hu'nefi, oku avufga taga osu'negeno'e? Ana hu'neankita hufra okigosune. Abrahamu'a oku avufga taga osu'negeno Anumzamo'a fatago nere huno hu'ne. <sup>11</sup> Oku avufgama taga hu'zana amentinti hu'zamofo avame'zankino, ko Abrahamu'a amentinti higeno Anumzamo'a fatgo nere huno hunte'ne. Oku avufgama taga osu'nere anagea hunte'ne. E'ina hu'negu oku zamavufaga taga osu vahe'mo'za zamentintima haza vahe'mokiziminena, Anumzamo'a fatgo hu'naze huno huzmantesigeno, Abrahamu'a nezmafaza hugahie. <sup>12</sup> Anazanke huno oku zamufga taga hu'nazamo'za Abrahamu'ma oku avufga taga osu'neno amentinti higeno, fatgo nere hu'neankna hu'za zamentinti hanaza vahe'mokizmia, Abrahamu'a nezmafa mani'ne.

*Zamentintima nehaza vahe'mokizmigu huvempa kea huzmante'nea naneke*

<sup>13</sup> Na'ankure Anumzamo'ma Abrahamune agehe'mokizmi huvempa ke huzmanteno, ana miko mopa zami'neana Anumzamofo kasege amage antezantero ozami'ne. Hianagi Anumzamo'enema amentintifi'ma fatgo huno mania zante ami'ne. <sup>14</sup> Hagi Anumzamo'ma huvempama huzmante'nemo'za kasege avarari zampinti huvempa huzmante'neazama erizasina zamentinti hu'zamo'a nena raga'a oreogeno, huvempa hu'nea kemo'enena amne'za sesine. <sup>15</sup> Hu'negu kasege'mo'a arimpahe'za avreno ne-e. Hianagi kasegema omneresina kasegema rutagre'zana omanesine.

<sup>16</sup> E'ina hu'negu Anumzamo'ma huvempa huzmante'neazana zamentinti haza vahe'mo'za enerize. E'i ana musezaria Moseese kasege amage nentesio, nontesio Abrahamu'ma hu'neankna amentintima hanimo erigahie. Hu'negu Abrahamu'a ana miko zamentinti vahe'mokizimi nezamafa'e. <sup>17</sup> E'i ana zanku avontafepina Anumzamo'a Abrahamuna asamino, Kagra rama'a vahe'mokizmi nezmafaza hugahane hu'ne. E'i anazama fore hu'neana, na'ankure Anumzamo'a fri'naza vahera zamasimu nezamino, hakarea'zana Agra erifore hu'ne huno Abrahamu'a amentinti hu'nea zante anara hune. (Jen-Agf 17:5) <sup>18</sup> Amentintima huzamofona amuha hu'zana omaneanagi, Abrahamu'a ana miko vahe'mokizmi nezmafana manigahue amentinti azeri hankavetinogeno, Anumzamo'a negeno fatgo nere hunte'ne. **Kagehe'moza hakare hanageno hamprigara osugosie** hu'ne. (Jen-Agf 15:5) <sup>19</sup> Abrahamu'a 100'a kafuzage maniteno keana avufgamo'a mofavre eri fore huga osigeno, Sara'enena tvavateno mofavre kasentega osu'neanagi, Abrahamu'a amentinti hu'neazana otre'ne. <sup>20</sup> Anumzamo'ma huvempa hunte'nea zankura Abrahamu'a tare rimpaa osu'neanki, amentintimo'a mago'anee hankavenetigeno anazamo'a Anumzamofona ragia ami'ne. <sup>21</sup> Anumzamo'a huvempama hunante'neazana amane hunantegahie huno rimpaa fru Abrahamu'a erine. <sup>22</sup> E'ina hu'negu Abrahamu'ma amentinti hu'nea zanku, Anumzamo'a fatgo nere huno hunte'ne. <sup>23</sup> Anumzamo'a Abrahamunku fatgo nere huno hunte'neana, agrake azahu'za erisia zanku huno kreonte'neanki, <sup>24</sup> tagriku enenku huno krente'naze. Jisasi'ma fri'nefinti azeri ot'i'nea

Rantimofonte tamentintia hunentonkeno, Anumzamo'a tazeri agru hurante'ne. <sup>25</sup> Na'ankure tagri kumiku Jisasina atregeno efri'nemofo azeri oti'nea zamo, Anumzamofo avurera tagrira tazeri fatgo vhahera se'ne.

## 5

### *Anumzamo fatgo vhahera huno nehia zamofo naneke*

<sup>1</sup> E'ina hu'negu tamentinti nehuta Anumzamofo avufina fatgo vhahera nemanune. Na'ankure Jisas Kraisimpi Rantimo'ma hu'nea zamo higeta, tagra Anumzamo'enena trimpa fru huta nemanune. <sup>2</sup> Na'ankure Kraisimpi tamentinti hunazamo tavreno amama mareri agatere'nea kumapi efregeta menina otineta, hankavea e'nereta, Anumzamo'ma msazama'anema esigura avega ante'nonazamo higeta musena nehune. <sup>3</sup> E'i ana zankerompage tagrama knafima ufresuta muse hanune. Na'ankure tagra antahi'none, e'i ana knazampina knare hu'neankino taza hanigeta oti hanavetineta ana knazama enerita kazigazi huta vugahune. <sup>4</sup> Knazama erino kazigazi huno vu'zamo'a, tavutava fore higeno, ana zamo'a Anumzamo tavregahie amuhazana eriama nehie. <sup>5</sup> Hagi amuhama humita avega anteta mani'nona zamo'a, amuhama hu'nazana erinotre. Na'ankure tagra antahi'none Anumzamo'ma Ruotge Avamu tamigeno, avesizama'a Ruotge Avamu'afi huvazino tagu'afi eritagi avinete.

<sup>6</sup> Tagratia taza hugara osu'nonkeno, Kraisimpi a kumitigura kna fatgo'are efri'ne. <sup>7</sup> Tamage mago'mo'a fatgo vahekura frisnue huno osugahie. Hagi mago'mo knare'ma hanuno'a, amne knare vahekura frigahie. <sup>8</sup> Hianagi Anumzamo'a tusiza huno avesirantenea zama eriama hu'neana, kumi vahe mani'nonkeno Kraisina huntogeno, tagri kumiku huno efri'ne. <sup>9</sup> Hagi Kraisimpi koramo sese hurantegeta, Anumzamofo avurera fatgo vahe mani nonankino, tamage huno Anumzamofo rimpia hezampintira tagu'vazigahie. <sup>10</sup> Na'ankure Anumzamofo ha' vahekna huta mani'nonkeno, Nemofo frizampi Anumzamo'a ete mago'ane tazeri mago hu'ne. E'ina hu'neankino Anumzamo'ma rimpia aherante'nea zampintira Kraisimpi asimu'a atreneankita tagri'ma taza huno tagu'vazizana erigahune. <sup>11</sup> Hu'negu Rantimofo Jisas Kraisimpi Anumzamofona musena huntiegahune. Na'ankure Rantimofo Jisas Kraisimpi ete mago'ane, Anumzamo'a tazeri mago hu'ne.

### *Adamune Kraisigizni naneke*

<sup>12</sup> E'ina hu'negu magoke ne'mo kumi higeno, ama mopafina kumimo'a efre'ne. Kumimo'a fri'za avareno egeno, fri'zamo'a ra huno maka vhahetera vuno eno hu'ne. Na'ankure maka vhahera kumi vahe mani'none. (Jen-Agf 3) <sup>13</sup> Kumimo'a ama mopafina ko efore hutogeno, henka kasegea zami'ne. Na'ankure kasegema omneneresina, e'i kumi nehaze huno huozmantesine. <sup>14</sup> Hianagi fri'zamofo hanavemao'a Adamu knaretima eno Moses knarema ehanati'neana meno e'ne. Adamu hu'neakna kumi osu'nazaragi, frike'za hu'naze. Adamu'a henkama Kraisima esia Ne'mofo avame'za efore hu'ne.

<sup>15</sup> Hu'neanagi Adamu'ma kumimo'e, Anumzamofo knare musezamo'enena magoknara osu'ne. Na'ankure magoke ne'mofo Adamu kumimo frizana rama'a vhahetera avareno ege'za fri'naze. Hianagi Rana Anumzane, mago nera Jisas Kraisimpi knare asunkuzane kumiti apaserante zana tami'ne. <sup>16</sup> Asunkuzama'afi Anumzamo'a tami'nea musezamofo raga'amo'a mago ne'mo'ma kumi'ma hu'nea zamofo raga'agnara osu'ne. Na'ankure Adamu kumimo knaza avareno e'ne. Hianagi Anumzamo'ma amne tami'mea musezamo, rama'a kumi hu'nonanagi Anumzamofo

avureratazeri agru hu'ne. <sup>17</sup> Na'ankure magoke ne'mo Adamu kumi higeno, agri kumite fri zamo'a vhahera kva'gri zamanteno e'neanagi Anumzamofo asuntgi'zane fatgo musezama'afi manisamo'za fri zamofone kumimofo hanavea magoke Ne'Krais Jisasimpi azeri ageteregahaze.

<sup>18</sup> Magokemo Adamu hu'nea kumimo maka vahe'mofontera knazana erino e'ne. Hianagi magoke ne'mo Kraisi fatgo avu'ava hu'neazamo tazeri agru higeta, Anumzamo'enena fatgo huta nemanita, kasefa manizana hakaremota eri'none. <sup>19</sup> Magoke ne'mo ke hantagi'nea avu'avazamo higeno, rama'a vahe'mofona kumi vhahera huzmantegahie. E'ina kante magoke Ne'mo ke erizafa hu'nea avu'ava'zamo rama'a vhahera zamazeri fatgo vahe tro huzmantegahie. <sup>20</sup> Anumzamo'ma kasegema zami'neana miko vahe'mo'za kumi'ma nehazaza kesazegu zami'ne. Hianagi vahe'mo'zama rama'a kumi'ma hazageno'a, Anumzamofo knare asunku'zamo'a mago'ane rama'a nehie. <sup>21</sup> Ana hukna huno kumi'mo miko vhahera kegava hu'neno fri'zana avrezamigeno, menina Anumzamofo knare asunku'zamo fatgo avu'ava zana eri tamisigeta, Jisas Kraisi Rantimoompinti manivava asimura eri-gahune.

## 6

### *Kumimofo hankave eritre'nea naneke*

<sup>1</sup> Hagi tagra na'ane huta hugahune, mago'ane kumira nehanunkeno Anumzamo'asunku hurantevava hugahio? <sup>2</sup> I'o anara osutfa hugahie. Tagra kumi'ma huzampina ko fri'none, nahanigeta kumpipina manita neone? <sup>3</sup> Hifi Jisas Kraisinte'ma tragoteta mono tima frenona, e'i ana hunonana mikamota agri fri'zane hagerafiteta oti'nazana tamagra ontahi'nazo? <sup>4</sup> E'ina hu'negu tagra mono tima fronazamo'a, Kraisi'ene frunke'za aserente'naze nehie. Hagi Kraisima fripinti'ma azeri oti'neaza huno, Nef'a Agra'a hankave'anu Kraisi'enema fri'nompintira tazeri oti'neankita, tagranena kasefa manizampi Kraisi'ene maninunku anara hu'ne.

<sup>5</sup> Tagrama Kraisi'ene hagerafita fri'nonema hanuta, anahukna huno tagri'enena tazeri'otsigeta tasimura eri-gahune. <sup>6</sup> Tagra antahi'none kumi tavutavazana Jisasi'ene rugeka zafare hanti'neana, kumimofo hankavea tagripina omasesiegua anara hu'ne. Tagra mago'ane kumimofo kazokzo eri'za vhahera omani'none. <sup>7</sup> Na'ankure iza'o fri'nemo'a, kumimofo kinafintira katufentegeno fru huno mani'ne. <sup>8</sup> Hagi tagra Kraisi'ene frinesuta, tamentintima hunana tagranena Kraisi'ene manigahune. <sup>9</sup> Tagra ama ana zankura antahi'none. Na'ankure Kraisi'a fripintira oti'neankino, mago'anena ofrisigeno fri'zamo'a kegava huontegahie. <sup>10</sup> Agra magoke zupa friteno kumimofo hankave eritre'ne. Hu'neanagi Agra menina asimu erino mani'ne. Hagi asimu erino mani'neankino, ete mago'enena ofrigahie. <sup>11</sup> Hagi tamagra'a refko huta antahihi, ko kumimofo hankavefintira fri'none huta nehuta, Kraisi Jisasimpi, Anumzamo'ene kasefa huta mani'none huta hiho.

<sup>12</sup> E'ina hu'negu atrenkeno amega tamavufgamofona kumimo'a kvagri-oramantena, tavufgamofa havi avesizana ovariraho. <sup>13</sup> Atrenkeno mago tmavufgamofa kumimofo eri'zana e'norina, Anumzamofo tamavufga ami vaga-reho. Na'ankure tamagra ko fri'nazane, hu'neanagi menina kasefa maniza erita mani'naze. Hagi ana miko tamavufgamofa knare'zama eriforehu

erizaza me'nenkeno, Anumzamofona ragi amino. <sup>14</sup> Na'ankure kasegemofo agorga'a omani'naze. Hagi Anumzamofo asuntgi zamofo agorga'a mani'nazagu, kumimo'a kva huormantegahie.

### *Fatgo avu'ava zamofo kazokzo eri'za vahe manisune hu'nea naneke*

<sup>15</sup> Mago'ene kasegemofo kvafina omani'none. Anumzamofo asunku'zamo taza hu'ne. Ana hu'negu mago'ene kumira hugahumpi? A'o, ana osugahune.

<sup>16</sup> Tamagra amage antegahune hanaza zamofo kazokzo eri'za vahe'ma mani'nazana ontahi'nazo? Tamagra amne kumimofo kazokzo eri'za vhahera manigahazanagi, ana zamo fri kante tamavreno vugahie. Anumzamofo amage antesutma fatgo nomaniza erigahaze. <sup>17</sup> Anumzamofona muse hunteho, korapara kumimofo kazokzo eri'za vahe mani'nazanagi, menina tamagu'areti rempima huramuazana amage'ntentaze. <sup>18</sup> Menina kumimofo kazokzoma hu' kinafina omani'naze. Hagi tamagra fatgo avu'avazamofo kazokzo eri'za vahe mani'naze. <sup>19</sup> Na'ankure vahe'motama kefo tavu'tvama nehuna zante nagra antahintahitamia eriama hu'naku kazokzo eri'za vahe'te'ene kva vahetera hunte'na nehue. Korapara kasege ha'nentagita agru huno avu sese osu tamavutamava huta vu'nazanagi, menina atretma fatgozamofo kazokzo eri'za vahe nemanita, agru nehutma ruotge huta manigahaze.

<sup>20</sup> Hagi kumi'mofo kazokazo eri'za vahe'ma mani'nazagu, fatgo avu'ava zamofo eri'za vhahera omani'naze. <sup>21</sup> E'ina hu'negu nankna tamazahuza eri'naze? Ko'ma hu'naza tamavutamava zamo'a menina tamagaze nehie. Ana avu'avazamo'a fri'za erifore nehie. <sup>22</sup> Hu'neanagi menina kumimo'a kina reoramantegetma, Anumzamofo kazokzo eri'za vahe'a mani'nazageno, e'i ana avu'avazampinti tamazahu'zana enerizageno, sese huramanteno tamazeri ruotage nehiankino, manivava tamasimu tamamigahie. <sup>23</sup> Na'ankure kumi'mofo mizana fri'zane. Hu'neanagi Anumzamofo muse'zana, Krais Jisasi Rantimofompi mago'za hunterompge, amne manivava asimura tami'ne.

## 7

### *Kasegemo kina reorantesia naneke*

<sup>1</sup> Hagi nenfugatane nasaraheta, tamagra ko kasegea antahita keta hu'nazanki ontahi'nazo, asimu'ma erino mani'nea vhahera kasegemo kegava huntegeno mani'ne. Hagi frisigeno'a kasegemo'a kegava huontegahie. <sup>2</sup> Hu'neanagi avame kema hunte'na hanuana, mago a'mo'ma vema erisigeno'a, ana a'mofona kasegemo kina rentesigeno, neve'ma asimu'ma erinoma mani'nesigeno'a neve'ene manigahie. Hianagi neve'ma frisigeno'a, ana kasegemofo kinafina omanigahie. <sup>3</sup> Hagi neve'ma ofri mani'nesnigeno'ma ru vema erisiana agra monko avu'avaza hugahie. Hagi neve'ma frisigeno'a kasegemo'a kina reontegahiankino, ru vema erisaniana monko avu'ava zana osugahie.

<sup>4</sup> E'ina hu'negu, nafuhetane nasaraheta tamagra Jisasi'ene tragotaza zamo'a ko Jisasi'ene frita, kasegemofo agorga omani'naze. Hagi menina Jisasima ko fripinti'ma azeri otinemo'ene erimago huta Anumzamo'ma ave'nesia avu'ava zana hugahune. <sup>5</sup> Kumi tavutavamo kegava hurantenenego'a, kumima hu'tavesizamo'a tagu'afina efore nehie. Hagi kasegemo'a havi tavutvamofo avesiza azeri otigeta, kumira hunkeno frizana avreno ne-e. <sup>6</sup> Hu'neanagi tagra ko kasegemofo kinafintira katuferantegeta fru huta

mani'none. Na'ankure Kraisi'ene frunkeno mago'ene kasegemofo kinafintira tavre'ne. Hianagi menina amne Anumzamofo erizana erinenteta, korapa tavutva huta kasegefima krente'naza kemofo amage' ante'zanompage, Avamumofo kasefa kante vugahune.

### *Kumi'enema ha'ma hu'zamofo naneke*

<sup>7</sup> Hagi na'ane hugahune, nagra kasegemo'a kumi me'ne nehufi? I'o. Tamage kasegea kumira omnene. Hianagi kasegemo kumira tamaveri nehie. Nagrama rumofo zanku'ma kenunu hu'zana, kumire hu'na antahi amara osuanagi, kasegemo eriama hige'na keama nehue. <sup>8</sup> Hianagi kumimo'a ama ana kasegefinti kankamunku keno tavu masevemahu tavesizana, tagu'afina erifore nehie. Kasegema omanesigeno'a kumimo'a hankave'a omanesigeno frigahie. <sup>9</sup> Kasegema ontahinorera nasimu erina mani'noane. Hianagi kasegema egeno'a kumimo'a asimu erino mani'gena nagra fri'noe. <sup>10</sup> Ana kasegemofo eri'zana vahe'mofo asimu ami'zanagi, nagra kasegefintira nasimura e'noruanki, kasegemo'a nahenefrie. <sup>11</sup> Na'ankure kumimo'a kasegefinti kankamuma'a keno erifore huno renavatga higeno kumimo'a nahe fri'ne. <sup>12</sup> Hianagi kasegemo'a ruotge higeno, kasegema hunte'neana ruotage huno fatgo huno knare hu'ne.

<sup>13</sup> Hianagi inankna hugahie, kasegema knarezane nehuazamo nahe nefri? I'o, kumi'mo'a knare zampinti frizana erifore nehie. Hu'negu kumi'mo'a haviza hu'ne huno Anumzamo'a kasegea eri taveri higeta ne-gone.

<sup>14</sup> Hu'negu kasegefina hazenkea omane'ne, na'ankure mopare navufga eri'na mani'nogu kumimofo kazokzo eri'za vahe' Mizante atreankna nehue. <sup>15</sup> Nagra'ama nehua navunavara kena antahina nosue. Na'ankure nagra fatgo zama hunakurema huazana nosue. Hianagi navesarama hunte'na osugahue hu'na huaza nehue. <sup>16</sup> Hianagi nagri'ma navenosia zama hanuna, Anumzamofo kasegemo knare hu'ne hugahue. <sup>17</sup> E'ina hu'negu nagrani'a kefozana nosuanki, kumimo nagu'afi me'neno ana kefozana nehie. <sup>18</sup> Higena nagra antahi'noe, knare zana nagu'afina omane'ne. Knare zana hu'nakure hu'na nentahananagi, anazana hugara nosue. <sup>19</sup> Nagrama knare'zama hugahuema huazana nosue, hagi havizama osugahue huaza nehue. <sup>20</sup> Hagi menima osnuema huazama nehuana, e'i nagrani'a nosue. Hianagi nagu'afina kumi'mo me'neno, anazana erifore nehie. <sup>21</sup> E'ina hu'negu nagrani koana, e'inahu avu'avamo'a nagririra nagu'afina me'neankina fatgo zama hunakure hua zana nosue. <sup>22</sup> Nagra Anumzamofo kasegea ana miko nagu'areti navesinentoe. <sup>23</sup> Hianagi nagu'afina ru kasege me'nea zamo antahintahini'anena hara nehie, e'i ana kasegemo nagu'afi me'neno nazeri kumi'mofo kasegere kina vahe'nenante. <sup>24</sup> Nagra haviza hu'na keforenoanki, iza ama fri navufga naza hugahie? <sup>25</sup> Nagra Jisas Kraisi Rantimofompi Anumzamofona muse huntoe, Anumzamofo kasegea antahintahini'areti amage nentuanagi, amega navufgamo'a kumimofo kazokzo eri'za e'nerie.

### *Jisasi'a kefo zanti eri fanane nehuno, Ruotge Avamu tami'nea naneke*

<sup>1</sup> Ana hu'negu menina Kraisi Jisasi'ene hagerfi'naza vhahera, havi vahere huno keaga huozamantegosie. <sup>2</sup> Na'ankure Jisas Kraisimpi asimuma ami

Avamumofo kasegemo, kumimofone fri'zamofo kasegefintira kazufera-mantene. <sup>3</sup> Anumzamo'ma Mosesema ami'nea kasegemo'a tazahugara osu'ne, na'ankure amega tavufgamo kumike hianagi, Anumzamo'a tazahu-naku ru kankamu retro huno Agra'a Mofavre tamigeno mopafi avufga erino tagrikna hu'neanagi, Anumzamo Agra'a Mofavre museza tamigeno kumi-mofo hankavea ahe fanane hu'n. <sup>4</sup> Fatgo huta kasegemo hu'neankante manisunegu Anumzamo'a anazana hurante'ne. Higeta menina tagra ko'ma kefozama nehnazana netreta, Ruotge Avamumofo avesizante ne-vune. <sup>5</sup> Mopafi zamufga'mofo avesizama nevririzamokizmia, antahin-tahiza zmimo'a mopafi zama huzankuke nentahize. Hianagi Avamupima nevaza vahera Avamumofo zankuke nentahize. <sup>6</sup> Hu'negu ko'ma ku-mima nehuna tavutava zanku'ma antahizamo'a fri kante tavreno nevie. Hianagi Avamumofo atregeno antahintahi kegava nehimo'a asimu erino rimpia frune nemanie. <sup>7</sup> Hu'negu iza'zo kumimofo avu'ava zampima mani'namo'za Anumzamofona ha' renentaze. E'inahu antahintahine vahe'mo'za Anumzamofo agorga'a nomaniza, Anumzamofo kasegea am-agera antegara osu'naze. <sup>8</sup> E'ina hu'negu kumi avu'avazampima mani'naza vahe'mo'za Anumzamofo ave'nesia avu'avara nosaze.

<sup>9</sup> Hu'neanagi tagrira kumi tamavutama zamo'a kava huoramanteno. Hagi Anumzamofo Avamumo kva huneramante. Tamage huno Anumzamofo Avamu'mo'ma tamagu'afima mani'eneketa, Avamumofo kvafi manigahaze. Antahihio, Kraisi Avamumo zamagu'afima omani'enimo'za, Kraisi vahera omani'naze. <sup>10</sup> Kumimo amega tamavufga tamahe frigahianagi, Kraisima tamagu'afima mani'nesnigeta tamasimu erita fatgo vahe manigahaze. Na'ankure Anumzamo tamavrene. <sup>11</sup> Hagi Anumzamofo Avamu'mo Jisasi'ma frinefinti' azeri ot'i'nea Avamu'mo'ma tamagu'afima mani'nesnigeno'a, Kraisima fripinti azeri ot'i'neaza huno tamagu'afina ana avamu mani'neankino, amega tamavufgamofona asimu amigahie.

<sup>12</sup> E'ina hu'negu knare nenenfutane nasarahete, mopafi tavufgamofo ave-sizana ovririfta hugahune. <sup>13</sup> Hu'negu tamagrama kumimofo avesi avarir-itma manisnuta frigahaze. Hu'neanagi Avamumofo hanavere'ma kumi tamavutmavazamofo ahefrisuta, tamasimu erita manigahaze. <sup>14</sup> Na'ankure maka veamo'za Anumzamofo Avamu'ma atrazageno, vanaza kama zamaz-eri fatgoma nehimo'za, Anumzamofo mofavre mani'naze. <sup>15</sup> Ana hu'negu tamazeri kazokzo eri'za vahe tamanteno tamazeri korohu Avamura tam-agra e'ori'naze. Hianagi tamagra Anumzamofo mofavre tamazerisegeta Avamu erineta Anumzamofonkura Aba, Nerafa'e nehune! <sup>16</sup> Ruotge Avamu-mo tagri avamura taza higeta huama huta, tagra Anumzamofo mo-favre mani'none nehune. <sup>17</sup> Tagrama Anumzamofo mofavre mani'nesnuta, Anumzamo huhampri rantenea zamofona Kraisi'ene magoka erisinti hare-gahune, Kraisi'ma hu'neaza huta knazama erisuta, Kraisi'ene magoka rantagi erita manigahune.

### *Henkama erisuna masazamofo naneke*

<sup>18</sup> Nagrama nentahuana, menima e'neruna tatazamofona, henka'ama omerisuna masazamo'a ageteretfaza hugahie. <sup>19</sup> Na'ankure ana miko zama Anumzamo'ma tro'ma huzamante'nea zantmimo'za, henka'ama Anumzamofo mofavremo'zama e'ama'ma hanaza knagura, tusiza hu'za nazupa fore hugahie hu'za aveganentaze. <sup>20</sup> E'i ana zantmimo'za za-magra'a zamavesitera mani haviza hu'za mani'neza ome haviza hu'za

novaze, hagi Anumzamo anara hiho hige'za anara nehaze. <sup>21</sup> Ama knare'zama fore hanige'za kesagu nentahize, havi'zama hu'za negasiriza kinafintira kazufe'za Anumzamofo mofavreramimofo mago'zamo kina re'ozmanteg'e'za amne nemaniza avasese zama'afi ufregahaze. <sup>22</sup> Na'ankure hago antahi'none, Anumzamo'ma maka zama tro huzmante'nea zamo'za, a'nemo'za mofavre kasentenaku hazageno zmata negriankna zmata negrige'za mani'neza ama knarerera ehehanatize. <sup>23</sup> E'i ana zantamimoke'za zmata e'norizanki, tagranena Anumzamo'ma kumpinti miza seranten-emota, Ruotge Avamumofo ese raga'a kna huneta tagua'fina krigi neruta, tusiza huta Anumzamoma tazeri mofavre'a zama hanigura avega nentone. E'i ana zana kinafi tavufgamo mani'neaza Anumzamo katufesnigeta fru huta mani'snuna zanku avega nentone. <sup>24</sup> Ama ana zama fore hanigu nentahunkeno tagura nevazie. Hu'neanagi fore hanigu antahintahi hu'zama fore hanigeno kesiana, e'i fore hanigu antahitahi hu'zana omanene. Hagi ko'ma fore higeno ke'nea zankura iza fore hanigeno kesigura nentahie? <sup>25</sup> Hu'neanagi onke'nona zama fore hanigeta kesunku antahintahima nehanuta, agozone huta mani'neta hanavetita avega nentone.

<sup>26</sup> E'ina hukna kante Ruotge Avamumo hanavetima omane'nea vahe'mota taza nehie. Nazanku nunamuna hugahune, e'i ontahи nonanagi, Ruotge Avamumo Agra'a tagri taza huno nunamu hunerante. <sup>27</sup> Hagi Anumzamo'a vahe'mota tagu'a negemo Ruotage Avamumofo antahintahia antahine. Na'ankure Ruotge Avamumo'a Anumzamofo avesiza avririno mono vea kevumofonku nunamu hunezmantie.

<sup>28</sup> Tagra antahi'none, Anumzamo'a Agri'ma avesinentamokizmi so'ezza zamigu maka zamapina eri'zana enerize. E'ina vahera Anumzamo'a Agri'a avesi avririhogu zamagi hu'ne. <sup>29</sup> Hu'negu Anumzamo'a korapa antahineno Nemofo kna hihogu huhampriazamante'ne, hanageno Nemofo'a rama'a mofavre nagapina kota mofavre manigahie. <sup>30</sup> Hagi huhamprima nezamanteno'a, Agrite ehogu ke hu'ne, Agra'a fatgo vahere huno hunezmanteno, Agra'a zamazeri antesga huno ra zamagia zami'ne.

### *Anumzamofo avesizamo'a oratresnia naneke*

<sup>31</sup> Hagi ama ana knare'zama hurantea zankura na'anetea huta huga hune? Anumzamo tazama hu'nesigeno'a, iza hara rerantegahie? <sup>32</sup> Anumzamo'a Nemofona aze'orino makamotagu huno tami'neankino, hakarezana tamigahie. <sup>33</sup> Anumzamo'ma huhampri zmante'nea vahera iza keaga huzmante-gahie? Agra e'i Anumzamo fatgo vahere huno hurante'ne. <sup>34</sup> Iza huhaviza hurantegahie? Ko Jisas Kraisi'a tagrikura efrino otino Anumzamofona azantmaga kaziga umani'neno, tagri tagi erino Anumzamofonera nunamuna hunerante. <sup>35</sup> Kraisi avesi zampintira nazamo tazeri atregahie? Tusi'a kna zamopi, amuhoma hurante zamopi, tazeri haviza huzamopi, tatamanegria zamopi, kukanagu atupa hanuna zamopi hazenke zamo'a tagripima Jisasi avesizama me'neana eri otregahie. <sup>36</sup> Avontafemo'a anage hu'ne, **Kagrikure nehu'za maka kna tahe nefrise. Sipsipi afumofo ananke akafriankna nehaze** hu'ne. (Sam-Zga 44:22)

<sup>37</sup> Hakare zana hurantega hazanagi, agatere hankavetia Kraisi'ma avesirante'nemo agra'a mani'ne. <sup>38</sup> Nagrama hankave antahintahima nentahuana, fri'zamo'o, asimu erino mani'zamo'o, ankeromo'zo, havi avamumozo, meni fore nehaza zamozo, henka'a fore hanaza zamozo, mago'a hilhamu hankvemozo, <sup>39</sup> amunagamu me'nesaza zamo'zo, fenkagamu

me'nesaza zamo'zo, makaza Anumzamo tro huzmante'nea zampinti mago' zamo'e huno Anumzamofo avesizama, Jisas Kraisi Rantmofompi me'nea avesi zampintira tazeri otregahie.

## 9

### *Israeli vahe'mo'za Kraisina zamavesra hunte'naza naneke*

<sup>1</sup> Hagi havigea nosuanki, Kraisimpi tamage hu'na nehue. Ruotage Avamumo'ene nagu'a kenege'na ama' nagu'nagesareti ama kea tamage nehue. <sup>2</sup> Tusi'a nasuza enerugeno, tumo niamo'a nata krivava nehie. <sup>3</sup> Na'ankure, nagrima navesiana Anumzamo'a Jekopu nagara zmavresiegu naveniesie, Kraisima nagri navesima avaririnigena, nagra nunamuna hanenkeno Agra'a vahepintira nahe natitrena, nenafu'za nagri nona erigahaze. <sup>4</sup> Zamagra Israeli vhahera Anumzamo'a zamavarege'za Agri mofavregna hu'naze. Anumzamo zamagripi masazama'a eri ama hu'ne. Agra'a huvempa huno, Agrane zamazeri hagenerefino kasege'a zami'ne. Agra'a mono'ma huntasaza kankmunu neramino, knare zama erisuna zanku'ma huvempa hurantenea tame. <sup>5</sup> Zamagri nezmagehoma zamagina me'nea nagapinti Kraisi'a efore hu'ne. Kraisi'a, Agra Anumza mani'neno makazamofo aseni mani'negu maka knafina, Agrike agi'a hentesga huvava hugahune! Tamage.

<sup>6</sup> Anumzamo'ma Israeli vaheku'ma huvempa huzamante'nea kea eri raga orenefi? I'o. Na'ankure maka'ma Israeli vahepima fore hu'naza vahe'mo'za Anumzamofo vahekera omani'naze! <sup>7</sup> Abrahamumpinti fore hu'naza vahe mani'nazanagi, e'i ana zamo'a zamazeri tamage Abrahamu mofavrea nose. Na'ankure avontafemo huno, Abrahamu'a mago'a mofavre'zaga zamante'neanagi, **Mofavreka'a Aisakimpinti kagri vahera fore hugahaze** huno hu'ne. (Jen-Agf 21:12) <sup>8</sup> E'i vahe'mota kasenentona kna huno Abrahamu'ma kasezmane'nea mofavremo'za, ana miko Anumzamofo mofavregera omani'naze. Hagi Anumzamoma huvempama huzmante'nemo'za, Abrahamu mofavrea mani'naze. <sup>9</sup> Na'ankure Anumzamo'a huvempa huno, **Ama ana knare'ma anaga'a kafure'ma esuana, Sera'a ne'mofavre kasentegahie** hu'ne. (Jen-Agf 18:10) <sup>10</sup> E'iana mofavrea nerageho Aisakie. Hagi Aisaki'a, Rebeka ara erigeno, kugave'za mofavre kasezanante'ne. <sup>11</sup> Zanagrira kase ozanantenegake, havizane knare zanena osu'nakeno, ko Anumzamo'a nezanrerana kea asmine. (E'i ana kemo huama huno, Anumzamo agra'a eri'za kante vahe'mokizimia ko huhamprizmantene. <sup>12</sup> Hianagi knare avu'ava zante keno kea osu'ne.) Neznarerana Anumzamo asmino, **Nempuamo'a nagana'amofo katoza humigahie** huno hu'ne. (Jen-Agf 25:23) <sup>13</sup> Anumzamofo avontafepi krente'nea kante, **Jekopuna navesinentuanagi, Isona navesra hunentoe hu'ne.** (Mal 1:2-3)

<sup>14</sup> Hagi na'ane hugahune? Anumzamo'a fatgozana nosie huta hugahuno? I'o anara osugahie! <sup>15</sup> Na'ankure Anumzamo'a amanage huno Mosesena asmi'ne, **Izano narimpa fru huntenaku hanumofona, narimpa fru huntentena, izano nasurgintenaku hanufona nasuragintegahue hu'ne.** (Eks-Ati 33:19)

<sup>16</sup> E'ina hu'negu Anumzamo'a vahe'mota tavesite'ene erizanterompge, Agra'a avesizante asuragirante'ne. <sup>17</sup> Na'ankure Anumzamofo Avontafepina Anumzamo'a Feronkura anage huno asamine, **Nagrama huhamprigantogenka kagrama mani'nanana, agafa'a me'nerere.**

***Na'ankure Nagri hankavemo'a kagripi eama nehanigeno, Nagri nagimofona huama hu'za kokankoka vanageno, ra huno vuno'eno hugahie*** hu'ne. (Eks-Ati 9:16)

**18** E'ina hu'negu Anumzamo'a izano asuragine te'naku himofona asuragine nteno, izano rimpama eriginaku'ma himofona erineg.

### *Anumzamofo rimpa hezane asuntgizamofo naneke*

**19** Hagi tamagra anage huta nagrikura hugahaze. Na'a higeno Anumzamo'a tamagrikura keontahi vhahere huno nehie? Agra hugahaze huno hiazana tamagra nehazafi? **20** I'o, e'i anahukna kea osiho. Tamagra izagata, vahetafamota Anumzamofona tro huhaviza hurantenane huta nehaze? Tro'ma huntenesia zamo'a, tro'ma huntenesimofona, nahigenka amanahuknara hunka trohunantenane huno huntegahifi? **21** Mopa kavoma tro nehanimo'ma, mopareti'ma kavoma troma hunaku'ma hanuno'a, amane magoke moparefira konariri zama ante kavoa tro nehuno, havizama haniazana ante kavo tro osugahifi? **22** E'i ana kanteke Anumzamo'a, rimpa hezana eriama nehuno, hankave'a eriama hugahie. Hianagi Agra ra zampi akoheno mani'neno zamazeri haviza hania vahekura za'za knafina zamaveganente. **23** E'i ana zama hu'neana, Agri'a mareri'nea masazama eriama huno asunku'ma huzmante'nea vahetera eriama hu'ne. E'i anazana ko Agra'a retro huzmante'nemo'za erigahaze. **24** Jiu vahepinti'ene, meg'i'a vahepintima zmavaretere hunerina, tagranena anampina mani'none.

**25** Hosea'ma kasnampa kema hu'nefina, ***Ru vahekura Nagri vhahere nehu'na, navesi'ozmante'nesua vahekura navesizmantegahue*** huno hu'ne. (Hos 2:1, 23) **26** E'ina hanugen, tamagra Nagri vhahera omani'naze huno zamasmi'nesia kumatera, kasefa huno mani'nea Anumzamofo mofavrereramine hu'za hugahaze. (Hos 1:10)

**27** Kasnampa ne' Aisa'a Israeli vaheku huno, ***Israeli vahe'mo'za rama'a hu'za hagerinkenafi kasepankna hu'nazanagi, anampinti osi'amokizmi Anumzamo'a zamagu'vazigahie.*** **28** ***Na'ankure Ramo'a fatgo avu'ava huno ame huno maka mopati vhahera refko huzmantegahie.*** (Ais 10:22, 23)

**29** Ko'ma Aisaia hu'nea kante, ***Hihamu'ane Ramo tagehe'mokizmia zamahokeno osi'a zamatrege'za mani'naze. Anama osunerresina Sodomune Komora kumate vahe'mo'za fanane huvagare'naza kna huta fanane huvagarontesine.*** (Ais 1:9)

### *Israeli vahe'mo'za zamentinti osu'naza naneke*

**30** Hagi na'anee huta hugahune? Meg'i'a vahe'mo'za Anumzamofo avufi fatgo vahe mani'zankura nohakazanagi, zamentinti hazageno Anumzamo'a fatgo vahe mani'naze nehie. **31** Hu'neanagi Israeli vahe'mo'za fatgo vahe manisunegu maraguzati'za kasegemofo nevaririzanagi, ana zamofona nena'a eriforera osu'naze. **32** Na'a hige'za anara osu'naze? Na'ankure zamagra zmentintia osu'naze. Hianagi eri'zama erisaza zanteti fatgo vhahera Anumzamofo avurera manigahune nehu'za, agigozmi havereti tanafa nehaze. **33** Anumzamofo avontafepi krente'neana anage hu'ne, ***Keho, Saionia vahe'mokizmi zamagigozmi have ante'noankino, vahe'mo'za zamagigo zamite'za tanafa hugahaze. Hagi iza'o Agrite amentinti hanimo'a agazegura osugosie*** hu'ne. (Ais 8:14, 28:16)

## 10

### *Amentinti hu'zamo zamahokesia naneke*

<sup>1</sup> Hagi nafuhetane, nasaraheta, nagri'ma nagu'afima navenesigena Jiu vaheku'ma Anumzamofontega nunamuma nehuana, zamahokeno zamaza hanigu nentahue. <sup>2</sup> Na'ankure nagra anage hu'na Israeli vahekura huama nehue, Anumzamofona antahimi'za avesi avu'avara hanavetiza neveririzanagi, Anumzamofo antahi'zana antahi amara hu'za novaririze. <sup>3</sup> Na'ankure Anumzamofo fatgo avu'avazankura nohakrazanki, zmagra'a zmagavuzmavateti fatgo zmagavuzmavara erifore hugahune nehu'za, Anumzamofo fatgo avu'avazamofo agorga'a nomanize. <sup>4</sup> Na'ankure miko kasegemofona Krais'i emeri knare huvagarene. E'i ana agafare iza'zo Agrite'ma zamentintima hanamo'za Anumzamofo avurera fatgo vahe mani-gahaze.

<sup>5</sup> Fatgo avu'avazanku'ma Mosese kasegemomo'ma hu'nea kante krente'neana, **Ina ne'mo kasegemomo'ma hu'nea kante fatgo avu'avazama hanimo'a, ana fatgo avu'avazanteti asimu erigahie hu'ne.** (Lev-Pri 18:5)

<sup>6</sup> Hu'neanagi amentintiretimi Anumzamofo avure'ma fatgo huno mani'zankura anage hu'ne, Iza monafinka vuno Kraisina tazahinogura avrefenkamia tamigahie hunka kagu'afina ontahio. <sup>7</sup> Hifi iza fri vahe kerifina uramino, Kraisina fripintira avreno marerigahie? <sup>8</sup> Hu'neanagi na'ane huno hu'ne? **Kemo'a tavaonka'are me'nne, e'i ana kea kagipine tumo ka'afine me'nne.** (Diu-Kas 30:12-14) E'i ana kea amentinti kemofonku tagra huama nehune. <sup>9</sup> Hagi tamagra'ma tamagipinti huama huta Jisasi'a Ramo'e nehutma, Anumzamo fripinti Jisasina azeri oti'ne huta tamagu'areti tamentinti hanageno'a, tmaguvazigahie. <sup>10</sup> Na'ankure tamagu'areti tamentinti hazageno, Anumzamo'a fatgo vhahere nehigeta, tamaginuti huama nehazageno, tamahokera nehe. <sup>11</sup> Anazankura Avontafemo'a anage hu'ne, **Iza'o Agrite'ma amentinti hanimofona agaze huontegahie** hu'ne. (Ais 28:16)

<sup>12</sup> Na'ankure mago'zamo'a Jiu vahe'ene meg'i a vahe'mokizmi amu'norpina ruzahura osu'ne. Magoke Ramo ana mikamokizmi Rana mani'neno, Agritegama kezamatiza vhahera rama'a asomu hunezmante. <sup>13</sup> Na'ankure **Iza'zo Ramofo agima ahesaza vhahera zamaguvazigahie.** (Jol 2:32)

<sup>14</sup> Hagi zamentintima hunontesamo'za, inankna hu'za zamaza hinogura antahigegahaze. Hagi inankna hu'za Agri agenkema ontehinesu'za zmentintia hugahaze? Hagi agenkema amu huamahu vahe'ma omaninesige'za, inankna hu'za antahi amara hugahaze? <sup>15</sup> Hagi kema erino ome huama hu vahe'ma humaozmanente'snake'za inankna hu'za mono kea huamara hugahaze? **Knare Musenkema eri'zama aza vahe'mokizmi zamagamo'a hentofaza hu'ne** huno Avontafepi krente'ne. (Ais 52:7)

<sup>16</sup> Hu'neanagi ana maka vahe'mo'za Knare Musenkema e'ori'naze. E'inanku kasnampa ne'mo' Aisaia huno, **Ramoka iza ama anankema huama'ma nehunkeno'a amentintia hugahie** hu'ne? (Ais 53:1) <sup>17</sup> E'ina hu'negu vahe'mo'za ke naneke nentahizageno, zamentintia erionetie. E'i anankea Kraisina Knare Musenkema me'ne.

<sup>18</sup> Hu'neanagi nagra amanage hu'na nehue. Tamage Israeli vahe'mo'za ana nanekea antahinafi? Izo zamagra antahi'naze. Anumzamofo avontafepi hu'neana, **Zamagenkemo'a ama mopamofona maka**

**kaziga vuno eno hu'ne. Zamagri kemo'a maka kokankoka vuno eno hu'ne.** (Sam-Zga 19:4)

**19** Mago'ane nagra tamantahinegoe, Israeli vahe'mo'za antahinira osu'nazafi? Kotazana Moses'a amanage huno hu'ne, **Nagra meg'i'a vahekuke hanugenka kaniveregahane. Antahizazmi omne'nea vahekuke hanena, krimpa hegahie** hu'ne. (Diu-Kas 32:21)

**20** Hagi Aisaia'a hakavetino anage hu'ne, **Nagrikura nohakraza vahe'mo'za, nagefore hu'naze. Nantahi nogaza vhete Nagra'a eama huge'za nenagaze.** (Ais 65:1)

**21** Hu'neanagi Israeli vahekura amanage huno Anumzamo'a hu'ne, **Nagra hakare zupa zamavarenakura nazana rutaneroanagi, ke'ni'a zamefi hunenamiza namagera nontaze** hu'ne. (Ais 65:2)

## 11

### *Anumzamo Israeli vhера avesra huozmante'nea naneke*

**1** Hagi amanage hu'na nehue, Anumzamo'a Agra'a vhера avesra huz-mantenevi? I'o anara osugahie. Na'ankure nagranena Israeli nere, Ben-zamini nagapinti Abrahamu negehoni. **2** Anumzamo'a Agra'a vahe korapa huhampri'zmante'nea vahekino ozmatre'ne. Ontahi'nazafi mono Avontafe'moma kasnampa ne' Ilaijanku'ma hu'neana? Elaija'a Israeli vahekura amanage huno Anumzamofoneta nunamuna hu'ne, **3 Ramoke, kasnampa vaheka'a zamahe nefriza, kre'sramna vu itaraminka'a tgana vazinetre'za, nigrake mani'noge'za nahe frinaku nehakraze.** (1 Kin 19:10) **4** Hu'neanagi na'anе huno Anumzamo'a ke nona'a hunte'ne? **7 tauiseni'a vhера, Bali havi anumzantera zamarena re'za monora huonte'namokizmia zamazeri frakuge'za mani'naze.** (1 Kin 19:18)

**5** E'inahu kna menina hu'ne. Maka Israeli vahe'mo'za Anumzamofona zam-agena humizafinti, osi'a naga Anumzamo'a asuragi zamanteno huhampri zamantenemo'za mani'naze. **6** Hagi Anumzamo'ma asunku huzmanteno huhampirma zmantene'sniana, e'i eriza enerizazante anara osu'ne. Hagi eri'za enerizazantema huhampirma zmante'simpga asuntagizamo'a, asuntagizana omnesine.

**7** Hagi na'a fore hu'ne? Israeli vahe'mo'za fatgo vahe manisune hute'za ana'ana hu'za vu'nazanagi, fatgo vhера osenazanagi, huhampirma zmante'nea vahe'mo'za fatgo vhера sazageno, ruga'amokizmia zmarimpamo'a hanavetige'za, Anumzamofo kea ontahi'naze. **8** Avontafepi krente'neana, **Anumzamo'a zamazerizmavutoko hu avamu nezmino, zmauvua onke'sazegu reso nehuno, ke ontahisazegu zimages renknirege'za, ontahiza manime e'za ama knare ehanati'naze.** (Diu-Kas 29:4, Ais 29:10) **9** Hagi Devitia amanage huno hu'ne, **Zamatrenkeno rama'a ne'zama ne tratema eri atru huno nezamo'a, kukomo zamazeriankna nehuno, zmagigo zmi havere tanafa hazankna nehina mizazmia eriho.** **10** **Zamatregeno zamurgamo'a hanintiri nehinke'za nonkeza, zamagenamo fagagina pri hute'zage maka kna maniho.** (Sam-Zga 69:22-23)

### *Anumzamo meg'i'a vahe zamavresnia naneke*

**11** Hagi mago'ane zmantahinegoe, Israeli vahe'mo'zama tanafa hu'za traka hu'nazana ete oraotinaku traka hu'nazafi? I'o trakama hu'nazana otigahaze. Hu'neanagi Anumzamofo zmefi humiza nona'a, Anumzamo'a megia

vahe'mokizmia havi avu'ava'zampintira zmaresige'za, Israeli vahe'mo'za megi'a vahera kanive rezmantegahaze. <sup>12</sup> Hagi Israeli vahe'mo'za kumi'ma hu'naza zamo, kokankoka vahetega marerisa asomura vu'ne. Trakama hu'naza zamo'a marerisa asomura megi'a vahe'mokizmia huzmante'ne. Hu'neanagi Israeli vahe'mo'za Anumzamofoma zamefima huomizasina, inanknahu asomu kokankoka vahe'mo'za erizasine.

<sup>13</sup> Ana maka kema nehuana, megi'a vahe'mota tamagriku nehue. Anumzamo'a megi'a vahe'mokizmi aposol manio huno huhampri'nantenegu ama ana eri'zamo'a nagripina kota eri'zani'a me'ne. <sup>14</sup> Mago'a kankamumpinti megi'a vahe'mota tamagripi eri'zani'a enerisugen, Jiu vahe'nimo'za kniveneresageno, zmahoke ahiesegu nehue. <sup>15</sup> Na'ankure Israeli vahe'mo'za Anumzamofo zmefi humiza zamo, kokankoka vahera Agrane zamazeri mago zamarimpa hu'ne. Hagi inankna hugahie Israeli vahe'ma Anumzamo'ma ete zmaresnia zamo'a, e'i fripinti oti'za zamasimu erizankna hugahaze! <sup>16</sup> Bretima krenaku heru'ma anteneza anampintima esema refko hu'za kre'za Anumzamofoma nemisageno'a, ana maka herunte'naza bretimo'a ruotage hugahie. Zafa'mofo rafunamo'ma ruotgema hu'enkeno'a, ana maka azankunamo'enena ruotge hugahie.

<sup>17</sup> Hu'neanagi olivi zafamofo mago'a azankuna'aramina hantagi netreno, tamagrira afi olivi zafamofo azankuna'a mani'nazageno, tamavreno olivi zafare rukamrermantegeta amunozmifi mani'neta, zamagrane knare masavena agafafinti energize. <sup>18</sup> Hu'negu tamagra azankuna'a mani'none hutma rantmagia e'oriho. Na'ankure tamagra rafunamofona aza nosazanki, arfunafinti tamaza hu'zana energize. <sup>19</sup> Tamagra anage hugahaze, tagri rukamare'rantesnigu azankuna'aramina hantgi zmatrene. <sup>20</sup> E'i tamage, Jiu vahe'mo'za zamentinti osazagu hantgi netreno, megi'a vahe'mota tamentinti hazagu tamazeri rukamareramante'ne. Tamagra'agura antahisga osutma, Anumzamofonku koro hunteho. <sup>21</sup> Na'ankure Anumzamo'ma olivi zafamofo azankuna'a eri hantgima zamatrenesuno'a, tamagri enena tamatresigeta omanigosaze. <sup>22</sup> E'ina hu'negu Anumzamofo fru avu'ava ene hihamu avu'ava'anenku tamagesa antahiho. Trakama hzamokizmia Anumzamo'a zamazeri haviza nehie. Hianagi tamagrira fru avu'ava hurmantegahie. Tamagrama Anumzamofono fru avu'avazama huta ovanageno'a, ru tamagri'enena ana zanke huno ru hantagi tamatregahie. <sup>23</sup> Hagi Israeli vahe'mo'za zamentinti osu zamavuzmavapinti'ma zamagu'a rukrehe hanageno'a, ete Anumzamo'a ana azankunara erino zafa'erara rukamregahie. Na'ankure Anumzamo'a amne anara huga hu'neankino, amne anara hugahie. <sup>24</sup> Na'ankure tamagra afi olivi zafamofo azankuna'a mani'nazageno, taga huno olivi zafa fatgore rukamreramante'neankino, Olivi zafa azankuna'a erino ete olivi zafa fatgorera rukamare zmantesigeno'a, knarezantfa hugahie.

### *Anumzamo maka Israeli vahe zamaguvasisia naneke*

<sup>25</sup> Hagi naftuhetane nasaraheta, ama oku kea antahini hanazegu nagrira nave'nesie. Antahi'zantmifina antahi'zane vahe' mani'none huta rantmagia e'oriho. Mago'a Israeli vahe'mokizmi zmarimpamo'a erigineankino, mani'nenageno Anumzamo'a megi'a vahera zamavregahie hu'neama'a efregahaze. <sup>26</sup> Anumzamo'a ana maka Israeli vahera eteno zamavregahie. Anumzamofono avontafepi anage huno krente'ne, **Vahe'ma knazampintima zamavre nera, Saioniti egahie. Agra Jekopu nagapintira**

**Anumzane tragoteno omani avu'ava zana emeri atregahie.** <sup>27</sup> **Koma Nagrama huvempa huhagerafi kema huzmante'noa kemofo amage antena, kumi'zmia eritre zamantegahue** hu'ne. (Ais 59:20-21)

<sup>28</sup> Israeli vahe'mo'za Anumzamofo ha' vahekna hu'nazageno, Knare Musenkemo'a megi'a vahemotarega ne-e. Hianagi zamagrira huhampri zamante'neankino, zamesizmente'ne. Na'ankure zamagehemofonku huno zamesizmante'ne. <sup>29</sup> Na'ankure Anumzamo'ma musezama zami'nea vahepintira, ete ana zana antahintahi'a ete ruzahera hunora e'origahie. <sup>30</sup> Korapara tamagra megi'a vahe'mota Anumzamofo kea amagera onte'nazanagi, Anumzamofo kema Israeli vahe'mo'za menina ontahizageno, Anumzamo'a tamagrira asuragi tamante'ne.

<sup>31</sup> Ana hu'negu Jiu vahe'mo'za Anumzamofo kea amagera ontazageno, Anumzamofo rimpia fruzamo'a megi'a vahe'mota tmagrite e'neankino, ana hukna huno tamagritetira ete vugahie. <sup>32</sup> Anumzamo'a maka vahe'mokizmi asuragizmantenaku ana maka'mokizmi zmatrege'za keontahi avu'avazamifi, kina hu'za mani'naze.

<sup>33</sup> Iza Anumzamofo marerisa fenozama'agi, antahizama'agi, knare antahintahizama'anena refko huno kegahie? Anumzamofo knare antahintahizama'ane avu'avazama'a refako huta antahiamara huga osu'none.

**<sup>34</sup> Iza Ramofo antahi'zana antahino keno hu'ne? Hifi iz a antahintahi'amo agaterenesigeno Ramofona antahintahia amigahie?**

**<sup>35</sup> Hagi iz a Ramofona esera agatereno razana ami'nesigu, ete Ramo'a nona huno mizasentegahie?** (Jop 35:7)

<sup>36</sup> Na'ankure Agripinti ana maka zamo'a fore nehuno, Agri hankavefi mikozamo'a me he. Miko zupa Ragi Agra erivava hanie, Tamage.

## 12

### *Tavufga Anumzamofo amisuna zamofo nanenke*

<sup>1</sup> E'ina hu'negu, nafu'naganaheta tamantahinegoe, Anumzamo'ma asuragiramente'nea zanku nentahitma, tamagra'a asimu erino mani'neno, Anumzamofonte Kresramana viankna hutma amivareta tamavufa nemita, mani ruotge nehutma, Anumzamofo ragi amiho. E'i avamupima mono hu'zamofo tamavutmvaza mene. <sup>2</sup> Hagi ama mopafi avu'avazanena tagrora oteho. Hianagi tamagra arenkeno antahintahitamia Anumzamo tamazeri kasefa nehanigeno, tamavutamava zamo'a ruzahе hino. Anama hanuta, tamage Anumzamofo avesizamo'a, knare huno haviza osuno, fatgo hu'ne huta eriama hugahaze.

<sup>3</sup> Na'ankure Anumzamo'ma asunkuzama'reti asumaraginantenereti, maka motarega amanage nehue, tamagratmigura antahinkeno rana osenketa, vahe'mo'za nemaniza kante maniho. Tamagra'a tamavutamava refako hutma negeta, Anumzamo tamami'nea tamentintireti, tamagra ina avamente mani'nafi refko hutma keho. <sup>4</sup> Magoke tavufgafina hakarea tavufga hunte'neanagi, e'i ana maka tavufgamo'za magoke eri'zana e'norize.

<sup>5</sup> Tagri tavufgamo hu'neankna huta tagra rama'a vahe mani'nonanagi, tagra Kraisimpina magoke avufga mani'neta, ruzahu ruzahu avufga'a mani'none.

<sup>6</sup> Anumzamo'a Agra'a asunkuzanteti, ruzahu ruzahu eri'zama eri'zamofo muse'zana magoke magoke'mota tamitere hu'ne. Hu'negu Anumzamo'ma kasnampa kema hu hankavema kaminesigenka, Anumzamo'ma kami'nesia kamentinti avamente huama huo. <sup>7</sup> Hagi ru vahe'mokizmi zamazahu musezama tagripima me'nesigeta, so'e zantfa huta zamaza hanune. Hagi

rempi huzame musezama erinesuta, rempi huzami so'e hanune. <sup>8</sup> Iza'o ru vahe'mokizmi zamazeri hankaveti musezama agripima me'nesigeno'a, zamazeri hankavetigahie. Hagi vevahu musezama agripima me'nesigeno'a, mago'a zankuma atupama hanaza vhahera zamisige'za rama'a erigahaze. Hagi Anumzamo'ma vahe kva huzamante hankavema aminesiana, agra'a ana eri'zana agu'areti huno eriso'e huno erino. Hagi vahe'ma so'e hunte musezama erinesimo'a, musezampinti so'e zana huzmaverino.

### *Avesitezamofo nanenke*

<sup>9</sup> Tamage hutma vahe'mofona zmavesizmanteho. Kefo avu'ava zana tamagena hunenteta, knare avu'ava zana azeri hankavetiho. <sup>10</sup> Tamagra tamage hutma ovesinte avesinte nehuta, tamagra tamavufga anteneramita arumokizmi husga huzamanteho. <sup>11</sup> Tamavesra osutma hanavetitma eri'zana erinkeno, Avamumo'a zamazeri otina Ramofo eri'zana eriho. <sup>12</sup> Fore hanigu hankave antahintahima hunemiza zankura musena nehuta, tusi'a knazama fore'ma hanigetma kazikazi huta nevutma nunamu huvava hiho. <sup>13</sup> Anumzamofo vahe'mo'zama mago'a zankuma atupa hanagetama, zamazama hanagura tro huta maniho. Onkenesnaza vahe'ma esnageta non-tamifi kehuta zamavarenteho.

<sup>14</sup> Knama tamisamokizmia asomu ke huzmanteho. Anumzamo'a asomu huramantesie nehutma, zamazeri haviza hanie hutma osiho. <sup>15</sup> Musema hanaza vahe'enena muse nehuta, zavi'ma atesnaza vahe'enena zavira ateho. <sup>16</sup> Ovesinte avesinte huta magoke avamente maniho. Tamagra tamavufga erisaga osiho, hianagi agi omane vahe'ene manizanku tamavesino. Tamagra ana miko'zana antahi'none huta osiho. <sup>17</sup> Mago vahe'mo'ma havizama huramantena, ana nona'a havizana huonteho. Ana mikozama hanafina fatgo tamavutmava nehinke'za, miko vahe'mo'za tamageho. <sup>18</sup> Tamagrama ana hanutma, miko vahe'enena tamarimpa fru huta manigahaze. <sup>19</sup> Rone'nimota mago'mo haviza hurmantena nona'a huonteho. Hagi Anumzamofo fatgo rimpia hezampi atrenkeno vino. Na'ankure avontafepina anage huno krentene, ***Nagra'a nona'a huzamantena mizana zamigahue huno, Ramo'a hu'ne.*** (Diu-Kas 32:35)

***20 Hianagi ha'ma remantesaza vahe'mo'za zamagaku'ma hanageta, ne'zana zamiho. Tinku'ma zamavesina, tina zaminke'za neho. E'i ana huknazama hanazana, zamagrama nehaza zmatuv-mava zankura zamagaze hugahaze.*** (Prov-Knr 25:21-22)

<sup>21</sup> Tamagra atrenkeno havi avu'avazamo'a tamazeri agate'oreno, hianagi knare tamavutamava hutma havi avu'avara agatereho.

## 13

### *Kamani vahe'mokizmi agorga'a manizamofo naneke*

<sup>1</sup> Hagi kamani vahe'mokizmi agorga ana mikomota anteramita manigahune. Na'ankure miko hanavea Anumzamofontegati e'neankino, Anumzamo'ma hankavea kamani vahe'mokizmia zamige'za fore hu'za mani'naze. <sup>2</sup> Hu'negu iza'o kamani vahe'ma ha'rentesimo'a, Anumzamofo trake ha'renteankino, ana knazana agra'a erigahie.

<sup>3</sup> Na'ankure kamani vahe'ma mani'nazana, fatgo zama haza vahe zamazeri korera nosaze. Hianagi kefotama haza vahe zamazeri korera nehaze. Kamani vahe'ma kore huozmantesue hanunka, fatgo kavukva nehuge'za, kazeri antesga hiho. <sup>4</sup> Kamani vahe'ma mani'nazana tamagri knare zanku huzmantegi'za mani'nazanki'za, Anumzamofo eri'za

vahere. Hianagi kagrama hazenkema nehanunka, korera hugahane. Na'ankure zamagra hazenkema hanaza vahe'mokizmi, knomazamino zamazeri fatgohu hankavea eri'naze, kano zamiza zamazeri fatgo hanaza agafare, Anumzamo'a zmanteg'za mani'naze. <sup>5</sup> E'ina hu'negu kamani vahe'mokizmi zmagorgama mani'zamo'a knare hu'ne. Hianagi zmaheno zamazeri ante fatgo huzankukerompage, tagra'a tagu'tagesafina fatgo'za nehune huta antahigahune. <sup>6</sup> Ama ana agafare takisi zagoa miza nehune. Na'ankure kamani vahera Anumzamofo eri'za vahemani'naze. Hakare'a knazupa zamagra vahe'ma kvagrizmante eri'za enerize. <sup>7</sup> Hagi ana miko vahe'mokizmi zama eri'nesaza zana eteta zamiho, takisi zagoma zamiho hunesizana neminka, fenoma mizasenante takesi zago miza hiho hanageta miza nehuta, kore huzmanteho hu'nesaza vahera, kore hunezmaneteta, ra zamagi zamiho hu'nesia vahera, ra zamagi zamiho.

### *Avesintezamofo naneke*

<sup>8</sup> Atrenkeno nofima hu'zamo'a tamagripina omaneno, hagi rumokizmi zamavesinte nofimoke tamagripina meno. Na'ankure tva'ontamirema ne-manizamokizmigu avesintezamo'a, kasegemoma hu'nea ke amage ante fatgo nehie. <sup>9</sup> Na'ankure kasegefina amanage hu'ne, **Ru vene a'enena monko'zana osuo, Vahera zamahe ofrio, kumzafa oso, vahe zanter keganunu osuo** hu'ne. (Eks-Ati 20:13-17) Hagi ruga'a kasegemo'za ama magoke kasegefi me'naze. E'i ana kasegemo huno, **Kagragu'ma kavesi ne-gantanankna hunka, tava'onkare maninesimofova avesinto** hu'ne. (Lev-Pri 19:13) <sup>10</sup> Tava'onte'ma mani'namokizmi avesintezamo'a havizana omnene. E'i ana hu'negu vahe'ma zamesinte'zamo'a kasege eri knare nehie.

<sup>11</sup> Tamagra ama anahu tamavutamava hiho, na'ankure tamagra antahinaze, menina knamo'a kofa hu'nefi mani'nonanki, masenazafintira otiho. Na'ankure tahokeno tavrezamo'a, tagu'ama rukrehema hunontima amare'ma ehanatiana, hago menina erava'o nehie. <sup>12</sup> Hanizamo'a kofta huno vagaresigeno, masama fore'ma hania zamo'a kofta hu'ne. Ana hu'negu hanizamofo avu'ava zama nehu'na zana netreta, masamofo ha'kukena hanune. <sup>13</sup> Ana hu'negu masare'ma nehzankna huta knare tavutava nehuta, hanizamofo muse zampina omanita, aka tina oneta neginagi osuta, monko'zana nosuta, monko avu'ava hu'zampina omanita, mago rimpasusu avu'ava zampinenam omanita kanive oreho. <sup>14</sup> Hu'neanagi atrenkeno, Ramo, Jisas Kraisi tamagripina mani'neno, kefozama hu tamavesizana eri atreno.

## 14

### *Hanave amentintine hanave'a omne amentintimofo naneke*

<sup>1</sup> Hagi zamentintifima hanavema oti'nesamokizmia tamagrarega zamavarenentetma, antahintahifina knare hu'ne haviza hu'ne hutma zamentinti zamimofona refko huozmanteho. <sup>2</sup> Na'ankure mago'amokizmi zamentintimo'a knare hu'neankita makazana amane negahune nehaze. Hianagi mago'amokizmi zamentintimo'a hanave'otineankiza, hozafi nezanke nenaze. <sup>3</sup> Hagi fatgo hune huno nehuno maka'zama nenesnimo'a, anama nosanimofa kefenkamia ote'no. Hagi mago'a nezama nenesnamo'za, maka'zama nenesnamokizmia refko huozamanteho. Na'ankure Anumzamo'a zamavre'ne. <sup>4</sup> Kagra izaga rumofo eri'za vahera refko

hunezmantane? Agri'a kva'amo refko hunteno, kagra eri'zanka'are otigahananki, kagra evuramigahananki huno huntegahie. Hu'negu Ramoke azeri otisigeno, otino manigahie.

<sup>5</sup> Anahukna kante mago'mo'a, mago zagegnamo'a ruotage huno ruga'a zategnega zamagaterene huno agesa nentahisigeno, ete rumo'a ana'maka zagegnamo'za mago'zanke hune huno agesa nentahie. Hagi mago mago'mo'ma, mago knaguma knare hu'ne huno'ma antahinemisia knagura, atrenkeno tamarimpamo'a fruhino. <sup>6</sup> Iza'o mago zage'gnamo ruotge hu'ne nehuno, Anumzamofo mono huntesiana, agra e'i Anumzamofo mono hunente. Iza'zo ruzahu ruzahu neza nenemo'a, Anumzamofonku nentahiza negahaze. Na'ankure zamagra Anumzamofona susu huntete'za nenaze.

<sup>7</sup> Na'ankure tagra tasimu erita mani'nonana tagra'a suzana omanene, nefruna zana tagri'a zana omanene. <sup>8</sup> Na'ankure tasimuma eritama mani'nonana, Ramofonte nemanune. Hagi frunana Ramofonte nefruna. E'ina hu'negu frisuno, tasimu erita manisunana Rantimofo'za me'ne. <sup>9</sup> E'i ama ana agafare, Kraisi'a friteno ete otino asimu erino manine. Hu'negu asimu erino mani'nea vahe'ene, fri'naza vahe'mokizmi Ra mani'ne.

<sup>10</sup> Hu'negu, nahigenka mono negafu amentintigura knare osu'ne hunka refako hunentane? Hifi nahigenka mono negafuna hufenkami netrane? Na'ankure ana maka'mota Anumzamo refako hurantesia tratera otigahune.

<sup>11</sup> Na'ankure Mono Avontafepina amanage huno krente'ne, **Ramo'a amanage nehie, tamage Nagrama kasfa hu'na mani'nesnuge'za maka vahe'mo'za Nagrite zmarena neresageno, anamiko vahe'mo'za, huama hu'za Anumzamofona ragi amigahaze** hu'ne. (Ais 45:23)

<sup>12</sup> Ana hu'neankita magoke magokemota Anumzamofona maka'zama nehu'na zamofo kea asamigahune.

<sup>13</sup> E'ina hu'negu rumokizmima refko hunezmantona zana atreho. Tama'gra'ma antahintahitamima retro'ma hanazana, mono neramafu zamentintifi zamagigo zamino, zamazeri tanafahu havegna huta omanisune hiho.

<sup>14</sup> Hagi Ranimo Jisasi'a eriama hige'na kena atahinama huana, mago'zamo'e huno agru osu'ne huta osugahune, mago'zamo agru osune hunkama antahisanana, e'i ana zamo'a kagritera agru osugahie. <sup>15</sup> Hagi mago'a zama nenesana zankuma mono negafuma antahi havizama nehanigenka, kagra mago'anee avesi zampina nomanine. Atrenkeno nezama nesaza zamo'a Kraisi'ma zamagrikuma huno fri'neamokizmia zamarimpa zamazeri haviza osino. <sup>16</sup> Ana nehuta atrenke'za knare hune huta tamentinti nehanaza zankura, havizane hu'za osiho. <sup>17</sup> Na'ankure Anumzamofo Kumoraa, ne'za ne'zane, ti ne'zana omanene. Hianagi Ruotge Avamupi fatgo avu'avazane, arimpa fru'zane, musenkase hu'za me'ne. <sup>18</sup> Na'ankure iza'o Kraisma ama ana avu'avatetima avaririsimofona, Anumzamo'a muse hunentesigeno, vahe'mo'za nege'za hugnare huntegahaze. <sup>19</sup> E'ina hu'negu atrenketa musezama mono kevufima fore'ma hanea zanku nehuta, tagra'ragara ozeri hankaveti, azeri hanaveti huta tamentintifina hageta ra hanune. <sup>20</sup> Nezantekure huta Anumzamofo eri'zana eri haviza osiho, ana miko'zamo'a avusese hu'ne. Hianagi knare'ma osu'niana, mago'mo'ma nefu azeri tanafa hunaku'ma nesia zamo'e. <sup>21</sup> Hagi ame'a onesuno, negi ti onesuno, mago'azama hanunazamo'a mono nerifu amentintia azeri tanafama osanunana knare hugahie. <sup>22</sup> Kamentintima hanana, kagra Anumzamofo hanave kamentinti hunemine. Iza'o amentintima nehania zanku'ma antahintahifima haviza nosue huno osnimo'a muse hino. <sup>23</sup> Hu'neanagi

tare antahintahi nehuno, nesimo'a haviza hane huno agu'amo'a nesamie. Na'ankure amentinti huteno none, hagino ana miko'zama amentintima osu'neno hania zamo'a kumi hugahie.

## 15

### *Ru vaheku antahizmisuna naneke*

<sup>1</sup> Hagi tamentinti zampima hanavema tinomota, hanavema ot'i'nesamokizmia zamaza hanune. Hagi tagra'ama taza huzankukera ontahisune. <sup>2</sup> Mago'magomota tava'ontirema nemanisamokizmi knare'zanku huta zamaza nehanunke'za, zmentintifina hanaveti'za hage'za marerisaze. <sup>3</sup> Na'ankure Kraisi'enena agra'a avufga aza haniazankura ontahineanki, avontafepina amanage huno krente'ne, **Vahe'mo'za hu'havizama hugantazana, nagri nagofetu huntegahaze** hu'ne. (Sam-Zga 69:9) <sup>4</sup> Na'ankure ko Anumzamofo avontafepima miko kema krente'naza kemo'a, tazeri antefatgo nehuno, tazeri hankavetisigeta knazantifina kazigazi huta nevuta, fore'ma hugahie huno avontafepima krente'nea zankura avega antegahune. <sup>5</sup> Anumzamo knazantifima tazeri hankavetigeta kazigazi huta nevumo, Kraisimpina mago tamarimpama hu'zana tamisigeta, magoke huta manigahune. <sup>6</sup> E'ina hu'negu ana mikomota mago tamarimpa nehuta, tagrira erinte mago huta, tagu'areti Rantimofo Jisas Kraisi Nefa, Anumzamofona ragi amisune.

<sup>7</sup> E'ina hu'negu, Kraisima tamagrimalamavre'neaza huta, tamafuhe'ina zamavareho, ana hanageno Anumzamo'ra ragi erigahie. <sup>8</sup> Antahihi, Anumzamo'ma Israeli vahe'mokizmi nezmageho huvempa huzmante'nea kea eriama hanige'za kesazegu, Kraisi'a eri'za vahekna huno zamagriftera e'ne. <sup>9</sup> Ana hu'negu megi'a vahe'mo'za Anumzamo'ma asunkuma huzmante'nea zankura, ragi amigahaze huno avontafepina krente'ne, **E'ina hu'negu nagra megi'a vahepina rankagi negamina, nagra zagam-era hu'na kagi'a erisaga hugahue** hu'ne. (Sam-Zga 18:49) <sup>10</sup> Mago'ane amanage hu'ne, **Megi'a vahe'mota, Agri vahe'ene musenkase hiho** hu'ne. (Diu-Kas 32:43) <sup>11</sup> Ete mago'ane amanage hu'ne, **Ramofona ragi amiho, maka megi'a vahe'mota, ana miko mopafi vahe'mota agi erisaga hiho** hu'ne. (Sam-Zga 117:1) <sup>12</sup> Ete mago'ane kasnampa ne'mo Aisaia'a anage hu'ne, **Jesimpinti efore hanimo'a, Agra megi'a vahe'mokizmi kva mani'nenke'za, Agrite zamazama huzankura anuhara hugahaze** hu'ne. (Ais 11:10)

<sup>13</sup> Fore'ma hanigu'ma amuha'ma nehu'na zamofo Anumzamo, miko musezane rimpafuzana tamentintifina antevi'netena, Ruotge Avamumofo hankavefi fore'ma hanigura amuhara hugahaze.

<sup>14</sup> Nafu nagnaheta nagrani'a antahuana, tamagripina knare tamavut-mavamo'ene mika'a antahizamo avite'nena, ozeri fatgo azeri fatgo hugahaze. <sup>15</sup> Hianagi mago'a nanekegu avompima hankavetina kreraminoana, Anumzamo'ma asunku'ma hunante'nea zanteti ete mago'ane huramage-sama hanigu krerami'noe. <sup>16</sup> Krais Jisasi eri'za eri'na megi'a vahetega pristi vahe kna hu'na, Anumzamofo Knare Musenke huama nehue. Ana hanige'za megi'a vahe'mokizmia Ruotge Avamumo zamazeri ruotage hanige'za, Anumzamo'ma muse huno eneria Kresramanavu ofagna hugahaze. <sup>17</sup> E'ina hu'negu Anumzamofo eri'zama enerua zankura, Krais Jisasiimpia knare hu'noe hu'na navufa rana hugahue. <sup>18</sup> Mago'a zankura nagra navufga erisaga osugahuanki, Kraisi'ma nagripima eri vagare'nea eri'zamo higeno,

megi'a vahe'mo'za amagera nentaze. <sup>19</sup> Ruotge Avamumofo hankavefine, avame'zane, ruzahu ruzahu kaguvaza erifore hu'zamofo hanavere, Kraisi musenkea Jerusaleti huama hu'na Ilirikium kaziga (Masedonia-Italy) ome hvugare'noe. <sup>20</sup> Hianagi nagra, Kraisi agima nohaza vahipi Knare Musenke huama hu'na zmasamisuegu, tusi'za huno navenesiankina nagra, rumo'za kinaza tratera nona nonkue. <sup>21</sup> Hu'neanagi mono avontafepina amanage huno krentene, *Agri agi agenkema ozmasminessaza vahe'mo'za negesnake'za, Agri agi agenkema ontahinamo'za antahi ama hugahaze* hu'ne. (Ais 52:15)

### *Polia Romu ome zamagenaku antahintahi retro hu'nea naneke*

<sup>22</sup> Nagra nantuma antena eme tamagenaku'ma huana ama agafare ome'noe, na'ankure ama megi'a vahe'mokizmi kumapina mono naneke huama nehune. <sup>23</sup> Hianagi nagra ama kaziga menina hago eri'zana eri vagare'noe, hagino rama'a kafufima emema tamagesue hu'na avegama ante'noa zamo'a tusi'za huno navesie. <sup>24</sup> Nagra Speini kumate vunaku antahintahia retro nehuankina, vanu'na onsi'a kna tamagrane umani'nena mono kea nehu'na, vunaku'ma hanugetma naza hanagena vugahue. <sup>25</sup> Hianagi agra menina mono kevu naga museza antezmantazaza zaminaku, Jerusalemi kumatega nevue. <sup>26</sup> Na'ankure Masedonia kumateti'ene Akaia kumateti mono kevu'mo'za muse hu'za Jerusalemi kumate mono kevumokizmia amu'nozmifi, zamunte omne nagamokizmi zago eritru hazard'na erina nevue. <sup>27</sup> Zamagra zagoma eri atruma hazazankura tusi'a muse hu'naze. Zamagrama antahi'zananofi hu'nazaza katufeankna hu'naze. Na'ankure megi'a vahe'mo'za Avamumofo asomu'ma eri'naza zanku, Jiu vhahera amega zamufamofo zamaza hu'za zami'naze. <sup>28</sup> Hagi ama ana eri'zama erivanere'na, ana zama zamivarettesuna, nagra Speini kumate enevanuna, eme tamageme vugahue. <sup>29</sup> Nagra antahi'noe tamagritegama esu'na, Kraisi asomumo avite'nenkena egahue.

<sup>30</sup> Nafu'naganahete, nagra tamantahigoe, Rantimofo Jisas Kraisine Ruotage Avamumofo avesizante, amama amuhoma e'nerua zanteria nagri'ene eme hagerafita, Anumzamofontega nunamu hunantesazegu nehue. <sup>31</sup> Nunamu nehinkeno zamentinti osu Judia vahepintira Anumzamo'a nagu'nevazi'na, Jerusalemi mani'naza vahe'mo'za eri'zamofonkema hanuana antahinamiho. <sup>32</sup> Hanigena Anumzamofo avesizama me'nena, nagra tamagritega muse hu'na egahue. Hanigeta tagra ozeri hankaveti azeri hankaveti hugahune <sup>33</sup> Hagi menina rimpia fru Anumzamo tamagrane manisie. Tamage.

## 16

### *Poli'ma musenke afuhe'i huzmante'nea naneke*

<sup>1</sup> Hagi Senkeria kumati diken mono eri'za e'neria nersaro Fibina knare'za huntasazegu nehue. <sup>2</sup> Muse hutma Anumzamofo naga'pina ragi me'nea vahekna huta Ramofompina nevareta, nazankuro atupama hani'azana aza hihogu nehue. Hagi ana a'mo knare huno nagri'ene rama'a vahe'mokizmi taza nehia aki, knare huta aza hiho.

<sup>3</sup> Kraisi Jisasimpima magokama eri'zama e'nerunamokiznia Prisirane Akuilakizania muse keni'a znasamaho. <sup>4</sup> Tamage nagu'vazikura zanasimu atresna'aza neha'e, nagrakera keke hunoznantoanki, ana miko meg'i'a mono naga'mo'za musenke huznantaze. <sup>5</sup> Anahukna huta nozniarfima atru nehaza mono nagara musenke huzamantoe. Esia kazigati, kotama

Kraisinte agu'a rukrahe hu'nea roneniamofo, Epenetusi musenke hunteo. <sup>6</sup> Hagi Maria'a tamagriku huno hanavetino eri'zama eneria a'mofona musenke hugantene hutma asamiho. <sup>7</sup> Nagri'a nagapinti Antronikasi ene Juniake, nagrane magoka kina hu'namokizni musenke huznantene hiho. Aposol naga'mo'za zanage'za antahiza hu'naza netrene. Zanagra kota Kraisintera zanagu'a rukrehe hutake'na, nagra henka nagu'a rukrehe hu'noe. <sup>8</sup> Ampliatusina, Ramofompi navesinentua ronenimofona musenke hunteho. <sup>9</sup> Magoka Kraisi eri'za e'neruna ne' Ubanusina musenke hunentena, knare ronen'i a Stakisina musenke hunteo. <sup>10</sup> Kraisi eri'za tamage huno eneria ne' Apelesina musenke hunentena, Aristobulusi nompi nemaniza nagara, musenkea huzmantoe. <sup>11</sup> Nagri nagapinti ne' Herotionina musenke hugante'ne hutma asamiho. Nasisusi nompi, Ramofonte mani'naza nagakura musenke huramante huta zmasamiho. <sup>12</sup> Ramofonte eri'za hanavetike eneri'a atre Traifena ene Traifosakigiznia musenke huznantene huta znasamiho. Ramofonte tusi'za huno hanavetino eri'zama energie'na navesinento'a a'mofo Pesisinena musenke hugante'ne huta asamiho. <sup>13</sup> Rufusina Ramo, Agri'a suzane huno huhamprinteno avrenemofone, agri nerera'a nagri'enena nenereraza hu'nea ara musenke hugante'ne huta asamiho. <sup>14</sup> Asinkritisima, Flegonima, Hemesima, Patrovasima, Hemasi'zanema nemaniza tafuhe'ine, tasarahehe'ina musenke huramantene huta zmasamiho. <sup>15</sup> Filologusima, Juriama, Nereusi ene nesaro a'ene, Olimpasi'ene, ana miko Anumzamofonte mani'naza nagatega musenke huramante'ne hutma zmasamiho. <sup>16</sup> Maka Kraisi mono naga'mo'za tamagritega musenke atrazageno vie. Fatgo huno ruotge hu'nea avu'ava hutma agi hene, agona ahene hutma maniho.

### *Poli'a vagare zmagumro zmante'nea naneke*

<sup>17</sup> Hagi nafu nagnahete, hankavetina ama kea neramasamue, Amu'nontamifima atane'zama avrenente'za, koma rempi huramigeta antahi'naza ke'ma, havigeretima eme rempi huramiza tamentintima eri kragogo negiza vahekura, kva hunetma mani kore hutma ogantu'a maniho. <sup>18</sup> Na'ankure e'i ana vahe'mo'za Rantimofo Kraisi eri'zana e'norizanki, zamagra'a knare zankuke nentahize. Haga huno masave ke zamireti, fatgo zamavu'zmava'ma nehaza nagara zamarevatga nehaze. <sup>19</sup> Kema amage nentaza tamavutmavamofo nanekea maka vahe'mo'za antahi vagare'naze. Hianagi tmagrikura musezanimo'a avite'ne. Hianagi nagri'ma navenesiana, knare antahintahi zanteti tamagra knare'ma hu'nesia avu'ava nehutma kefozana osiho. <sup>20</sup> Arimpa fru Anumzamo'a kofa huno Satana, kagafi azeri antefenka anteno rehapatigahie. Rantimofo Jisas Kraisi asuntgizamo'a tamagrane mesie.

<sup>21</sup> Magoka eri'za eneru'a ne'mo Timoti'a musenke atreramante. Anahukna hu'za nagri naga'mo'za, Lusiusima, Jesonima Sosipeta'zanena musenke hurnmantaze.

<sup>22</sup> Nagra Tertiusi'na, Poli'a kea nehige'na ama avoma kre'noa ne'mo'na musenkea Ramofo agifi hurnmantoe.

<sup>23-24</sup> Kaiusi'a noma'afi nagri ene mono kevu nagamota tavrentegeta muse huta amafi nemnuna ne'mo, tamagritega musenke atreramante. Erastusi'a rankumamofo zagore kegava hu'nea rankva ne'mo'ene Kuatusi'a, mono nerifu, tmagritega musenke atrermantaze. [Rantimofo Jisas Kraisi asomumo maka tamagrane mesnie.]

<sup>25</sup> Anumzamo'a tamagrira knare musenkema neramasamuua kante tamaz-eri hankavetise. E'i Jisas Kraisi Knare Musenkene, vahe'mota tmavresigu korapa oku'a retro hunte'nea naneke neramasamue. <sup>26</sup> Hianagi mani-vava Anumzamo huzamanteg'e'za, kasnampa vahe'mo'za avontafepina krente'naze. Ama ana kemo'a meg'i'a vaheté eama hige'za, maka kaziga vahe'mo'za negaze. Hu'negu zamagranena nege'za zamentinti nehu'za amage antesazegure. <sup>27</sup> Agrake, knare antahi'zane Anumzamo'a, Jisas Kraisimpi, ra agi'a erivava hugahie. Tamage.

# 1 Korint Poli'a Korinti Vahe'mokizmi Nampa 1ni Avonkrezami'nea Naneke

*Mono naga'mo'za hafra osu'za knare hu'za manisaza zamofo naneke*

<sup>1</sup> Nagra Poli'na Anumzamo Agra'a avesite Krais Jisasi aposol eri'za vhahere hu'nemo'na nerifu Sostenesi'ene.

<sup>2</sup> Korinti kumate nemaniza Anumzamofo mono nagamotarega, Krais Jisasi'ma tamazeri avusese hurmantegeta ruotge (saints) huta mani'naza nagatega nevuno, mika vahe kokankoka mani'ne'za, tagri Rantie hu'za agi nehaza vahetegane, zamagri'ene tagri'ene Jisas Kraisi Rantimofo kea kreneramune.

<sup>3</sup> Nafati Anumzantegati'ene, Ranti Jisas Kraistintegati asunkuzane, rimpia fruzamo'a tamagritega vie.

*Poli'a musenke Anumzamofo hunte'nea naneke*

<sup>4</sup> Hagi tamagrikura Anumzamofontega musenke huwava nehue, na'ankure Anumzamo'a asunkuzana, Krais Jisasi'pi tami'ne. <sup>5</sup> Hanki Agripinti, keaga hu'zampine, antahintahi zantamifina knare nehutma, maka'zampina eri avi'netaze. <sup>6</sup> Na'ankure Kraisinku'ma huama hu'na tamasm'i'noazamo, tamagripina eritamate nese. <sup>7</sup> E'izanku maka Avamupi neramia musezampina atupa nosuta, Rantimo Jisas Kraisi'ma eama hanigu, tamagu'areti aveganentaze. <sup>8</sup> Hanavea tamisigeta refarera uhanatigahaze. Ana hanigetma Rantimofo Jisas Kraisi'ma esia kna zupa hazenke tamia omnegahie. <sup>9</sup> Anumzamo'a ke hunte'nere ana kemofo amage'nentea Ne'mo, Agra'a Nemofo Jisas Kraisi Rantimo'ene trogoteta magopi manisunegu, tagia hu'ne.

*Mono vahe'mokizmi amunompi knaza me'nea naneke*

<sup>10</sup> Hagi nena fugata hanaveti'na tamantahinegoe, Rantimofo Jisas Kraisi agifi miko'motma mago tamarimpa ohunte ahunte nehanageno amu'nontamifina atane'zana omneno. Ana hanutma fatgo hutma magoke antahi'zampine, tamagesa antahi'zampinena eri mago hugahaze.

<sup>11</sup> Nafuhetane nasareheta, mago'a ke ha'ma amu'nontamifima me'nea zankura, Kloesi nagapinti mago'a vahe'mo'za eme nasmi'naze. <sup>12</sup> Hagi nagra ama'na kegu nehue, tamagripinti mago'mo huno, nagra Poli amage'nentoe higeno, mago'mo huno nagra Apolosi amage'nentoe higeno, rumo'a huno, nagra Sifasi (Pita) amage'nentoe higeno, eteno rumo'a huno, nagra Kraisi amage'nentoe nehie. <sup>13</sup> Hagi Kraisti'a Agra ataneno refako hu'nefi? A'o anara osu'ne. Tamagritekura Poli keka zafarera fri'nefi? A'o anara osu'ne. Tamagra Poli agifi mono tina fre'nazafi? A'o anara osu'naze. <sup>14</sup> Nagra Anumzamofona muse huntue, na'ankure mono tina magore hu'na vhahere freoramante'noe. Hianagi Krispusine Gaiusikizni zanagrike fre znante'noe.

<sup>15</sup> Ana hu'negu mago'mo'a huno Poli agifi mono tina fregante'noe huno osugahie. <sup>16</sup> Izo, nagra Stefanasi nompima nemaniza naga mono tina frezamante'noe. Hagi ananteti'ma e'neana, mago'a vhahere mono tina frezmante'nesuo antahinagekani'noe. <sup>17</sup> Ana hu'negu Kraisi'a mono ti frezamantogura huonante'ne. Hianagi Knare Musenke huama hanane

huno hunante'ne. Hagi ama mopafi mareri antahi'zampintira, Kraisi'ma keka zafare fri'nea zamofo hanave'a eriotregahue.

*Kraisti'a Anumzamofo knare antahi'zama'ane himamu'a mani'nea naneke*

**18** Hagi fananema hanaza vahe'mo'za keka zafamofo nanekegura neginagi naneke hu'za nentahize. Hu'neanagi tagri'ma tagu'vazino tavre'nea vahe'mota, e'i Anumzamofo himamu'e huta nehune. **19** Ana hu'negu korapa avontafe'ma krente'nefina anage hu'ne, **Knare antahi'zane vahe'mofo antahi'zana eri haviza nehu'na, antahi ankere vahe'mofo antahi'zana eri atregahue huno hu'ne.** (Ais 29:14)

**20** Antahi'zane nera ina mani'ne? Kasege avontafe'ma kre antahi'zane nera ina mani'ne? Ama knafi ke hafra hu nera ina mani'ne? Anumzamo'a ama mopafi antahi'zane vahera, antahintahi'zazmia zamazeri neginagi nehie. **21** Anumzamofo antahintahimo'a ama hu'negenokino, zamatrege'za ama mopafi vahe'mo'za zamagra'a antahi'zantetira Agrira antahi amara nosaze. Hianagi Anumzamo'a musema nehiana, vahe'mo'za neginagi naneke hu'za nehaza nanekema huama hunke'za zamentinti nehaza vahe zmahoneke. **22** Tamage, Jiu vahe'mo'za avame'za ketete hu'za antahinegazageno, Griki vahe'mo'za antahintahi'zanku nehakrazanagi, **23** tagra Kraisia rugeka zafare ahe'za hanti'naza naneke huama nehunazamo'a, Jiu vahe'mokizmia zamagigo zamino zamazeri tanafahu havegna nehuno, megi'a vahetera neginagi nanekegna nehie. **24** Hu'neanagi, ana Jiu vahe'ene megi'a (Griki) vahetera, Anumzamo'ma zamagima hu'nea vahe'mo'za, Kraisi'a Anumzamofo hankayene, antahintahizama'e hu'za nehaze. **25** Na'ankure Anumzamofo neginagizane hu'za, nehaza zamo vahe'mofo antahintahizana agatenereno, Anumzamofo hanave'a omne'ne hazazamo'a vahe'mofo hanavea agatere'ne.

**26** Nafuheta kama antahiho, inaknna vahe mani'nageno tamagia hu'nefi vahe'mofo zamurera antahi'zane vahera omani'nazane, rama'amota hanave vahera omani'nonane, rama'amota zmagine nagapintira omani'nonanagi, **27** Anumzamo'a, mopafi vahe'mo'za antahintahizmi omane'ne nehu'za, kefenkami netraza vahepi erizana erino, knare antahintahine vahe mani'none haza vahera, Anumzamo'a zamazeri zamagaze nehuno, hanave'a omne'ne huza haza vahepi eri'zana erino, hanave vahere hu'za haza vahera zamagaze erinezmie. **28** Ana nehuno zmagi omnene hu'za ke fenkami atraza vahepi, Anumzamo'a huvazino zmagine hanave vahera zamazeri zamagaze nehie. **29** E'ina hu'negu mago'mo'a Anumzamofo avufina avufaga mareorigahie. **30** Hu'neanagi, Agrama eri'nea eri'zamo higeta, Kraisi Jisasimpi mani'naze. Kraisi'a Anumzamofontegati knare antahintahi zantia efore hu'neana, e'i fatgo, mani ruotge huno mani'zane, miza hurante Ne' mani'ne. **31** Ana hu'negu Anumzamofo avontafepina anage huno krente'ne, **Avufga antemreriku hanimo'a, Ramofoma antahino keno hu'neazanku avufga antemrerigahie** hu'ne. (Jer 9:23-24)

<sup>1</sup> Hagi nenfugtane nasareheta, tamagrite'ma e'noana, haganentake ke'ni'areti ene knare antahintahi zanteti Anumzamofo agenke tmas-minakura ome'noe. <sup>2</sup> Nagra'ma antahi'zama retro hu'noana, tamagrine mani'nufina mago'zankura ontahigahuanki, Jisas Kraisima ahe'za rugeka zafare hanti'naza zankuke antahigahue. <sup>3</sup> Tamagri'enema manuana hanave'nia omnege'na, kore nehu'na, nahirahi zampi mani'ne'na, <sup>4</sup> rempima hunerami'na, nanekema huama nehuana, tamagri tamagu'a eri vakanenaku knare antahintahi zampintira osu'noanki, Ruotge Avamumo hihamu hanave'a erinte ama nehie. <sup>5</sup> E'ina hu'negu tamentintimo'a vahe'mofa knare antahintahi zampina omneno, Anumzamofo himamu hanavefi mesigu anara hu'ne.

<sup>6</sup> Tagrama knare antahintahizamofo keagama nehunana, zmentintifima nena hu'naza vahepi nehune. Hianagi ama knare antahintahigu'ma nehu-nana, ama knafino, ama mopafi fanane hanaza kva vahetmimofo knare antahintahi zankura nosune. <sup>7</sup> Tagrama nehunana Anumzamofo knare antahintahia, korapa oku'a retro huntegeno me'neazanku nehune. Ana antahintahizana mopa fore osu'negeno oku me'neana, e'i ana antahintahizana, menima tagrama knare hanunku retro hunte'ne. <sup>8</sup> Ana antahintahizana magore huno meni gnafi kva vahe'mo'za antahi amara osu'naze. Na'ankure antahi ama hu'nazasina, hanave'ane Ramofona ahe'za keka zafarera ohantizasine. <sup>9</sup> Hu'neanagi, avontafepi kre'nea kante ante'za, **Avurgamo onkegeno, agesamo ontahigeno, vahe'mo'za antahi'za ke'za osu'nazana Agrikuzamavesi nentamokizimi Anumzamo retro hugmantere'ne.** (Ais 64:4)

<sup>10</sup> Hu'neanagi Anumzamo'a, Ruotge Avamu'afi huvazino, tagritera eriamma nehie. Na'ankure Avamu'mo'a mikazana hakareno, Anumzamofo oku'a antahi'zama'a erinte ama nehie. <sup>11</sup> Na'ankure, iza vahepintira mago vahe'mofa antahi'zampima me'nesia antahi'zana keno antahino hugahie? Agri'a avamu'moke agu'afi me'nesia antahi'zana keno antahino hugahie. Anahukna kante Anumzamofona oku'a agu'agesa mago'mo'e huno antahino keno osugahianki, Anumzamofo Avamu'moke antahino keno hugahie. <sup>12</sup> Menina hago Avamura eri'none, ama mopafi avamuropage Anumzamofontegati Avamure, e'ina hu'negu Anumzamo amne neramia zana antahita keta hugahune. <sup>13</sup> Mika kema nehunana, vahe'mo rempi huorami'nea antahintahia nosune. Anumzamofo Avamu'mo rempi hurami'nea antahintahireti nehunankino, ana Avamu'mo tazahigeta, avamu antahizampi Avamu'mofa nanekea eri ante mago huta eriamma nehune.

<sup>14</sup> Hu'neanagi Anumzamofo Avamu ene omani'nea vahe'mo'a, Anumzamofo Avamutegati esiazana e'origahie. Na'ankure zamagra anazama kesazana neginagi zankna hanige'za, antahi'amara osugahaze. Na'ankure zamagra Avamu'mo zamaza hanige'za antahi ankeregahaze. <sup>15</sup> Hu'neanagi aza'o Avamu'ene mani'nesimo'a, mika'zana refko huno antahi ama hugahie. Ana hugahianagi mago'mo'e huno Avamu'ene mani'nesimofona refko huno ageno antahino osugahie.

<sup>16</sup> **Iza Ramofo agu'agesa antahino keno nehuno antahintahia amigahie?** hu'ne. (Ais 40:13) Hianagi Kraisi antahintahizana, tagra eri'none.

### *kesia zamofo naneke*

<sup>1</sup> Hagi nenafugatane nasareheta tamagranema ko'ma mani'noana, avamupi nena hu'za mani'naza vahe'mo'za nehazaza huta mani'nagena nagra noramasamue. Hianagi mopafi avu'avazampi mani'nagu Kraisimpina osi mofavregna huta mani'nazage'na neramasamue. <sup>2</sup> Nagra rempima huramufina amiri tamiaza nehu'na, hanave ne'zana noramue, na'ankure tamagra hanave ne'zana eriga osu'naze. Tamage, tamagra hanave ne'zana eri avamentera omani'naze. <sup>3</sup> Na'ankure mopafi vahe'mo'za nehazankna nehaze. Na'ankure kanive nereta, ke fra amu'nontamifina nehaze. Tamagra ama mopafi vahetfa omani'hafi? Tamagra mopafi avu'avazampi vano hiaza nosazafi? <sup>4</sup> Na'ankure mago'mo'a huno, nagra Poli amage nentoe nehigeno, rumo'a nagra Apolosi amage nentoe nehiana, tamagra mono ontahi vahe mani'nazo?

<sup>5</sup> Apolosi'a inanknahu nere? Poli'na iza'ne? Tagra eri'za vahetfa mani'no'e. Ramo hurantegeta tagra eri'zana e'neru'e. Anumzamo'a tagripi huvazino tamaza higeta tamentintia hu'naza eri'za ne' trene. <sup>6</sup> Nagra avimaza asogeno, Apolosi'a ti ami'ne. Hianagi Anumzamoke azeri nena nehie. <sup>7</sup> Ana higu avimaza kri'nemo' o tima ami'nemo enena razana omne'neanki, Anumzamo maka'zana azeri nena nehie. <sup>8</sup> Avimazama ase'nemo'ene tima ami'nemo enena magoke eri'zanke e'neriankino, eri'zama eri'na'a avamente ante'ne mizazani'a erigaha'e. <sup>9</sup> Na'ankure tagra Anumzamofo eri'za vahe manuketa, tamagra Anumzamofo hozane, nonkna hutma mani'naze.

<sup>10</sup> Anumzamo'a asunku zama'areti nami'nea avamente, nogi antahi'zane vahekna hu'na nomagi trara eri agafa hunte'noge'za, mago'a vahe'mo'za anante negize. Hianagi magoke magokemo'a, nankna huno kinaku hanuno'a, kva hu'neno ana agofetura nona kino. <sup>11</sup> Hianagi mago'mo'e huno ru tratera nona eri agafa huno onkino, ko'ma ki'nea trateke kino, e'i Jisas Kraisi Agrake ana trara mani'ne. <sup>12</sup> Anante'ma mago'amo'za kisazana goliretiro, silva retiro, zago'amo mareri'nea haveretiro, zafaretiro, rampa zantetiro, hofareti negizankna nehazankino, <sup>13</sup> magoke magokemofona eri'zama'amo'a eama hugahie. Refkomha hania knarera tevereti kreno eri'zama'amofona nena'a eriama hugahie. Na'ankure magoke magokemo e'neria eri'zamofo hanave'a, tevenu kreno eriama huno kegahie. <sup>14</sup> Hagi iza ana tra'mofo agofetu eri'za eri'nesia eri'zamo tevema oresigeno'a, mizama'a erigahie. <sup>15</sup> Mago'mofo eri'zama tevemo tevagaresigeno'a, ana eri'zamo'a haviza huno fanane hugahianagi, ana ne'mofona, tevefinti ahokeno avreankna hugahie.

<sup>16</sup> Tamagra Anumzamofo mono no mani'nageno, Anumzamofo Avamu'mo'ma tamagu'afima mani'neana ontahi'nazo? <sup>17</sup> Iza'o Anumzamofo noma erihaviza hanigeno'a, Anumzamo'a anamofona azeri haviza hugahie. Na'ankure Anumzamofo nomo'a ruotge hu'negenka, kagra ana no mani'nane.

<sup>18</sup> Mago vahe'mo'ma antahintahi huno, nagra knare antahi'zane vahe ama knafina mani'noe hania vahe'mo'a, agra'a ravatga osino. Hanki atrenkeno neginagi vahe maniteno, henka knare antahi'zane vhahera before hino. <sup>19</sup> Na'ankure ama mopafi knare antahi'zamo'a neginagi avu'ava Anumzamofo avufina me'nne. Hanki anage huno Anumzamofo avontafepina krente'ne, ***Knare antahi'zane vahe'mo'za knare antahi'za zmireti, vahe rezmatga hunaku hazana, Anumzamo'a zamazenerie.*** (Jop 5:13) <sup>20</sup> Mago'anee avontafepina anage hu'ne, **Ramo'a**

***knare antahi'zane vahe'mofo agafa'a keno antahino hiana, am-nezankna nehie.***

(Sam-Zga 94:11) <sup>21</sup> Ana hu'negu mago'mo ugota huramante'simofonkura tmavufa ra osiho, na'ankure maka'zana tamagri'zane. <sup>22</sup> Poli'navi, Apolosipi, Sefasipi (Pita), ama mopafi kasefa huno mani'zampi, fri'zampi, meni knafi, henkama esiankna maka tamagri'za me'ne. <sup>23</sup> Tamagra Kraisi suza manizageno, Kraisi'a Anumzamofo su'za mani'ne.

## 4

***Kraisi Aposol naga'mofo naneke***

<sup>1</sup> Hagi vahe'mo'zama tagriku'ma antahi ramisazana, Kraisi eri'za vahere hu'za nehu'za, Anumzamofo oku'zama eri ama'ma neha'a netre'ne hugahaze. <sup>2</sup> Hanki menima kva hugahane huno antahi ami'nesimo'a, kvahu fatgo nehinkeno, tamage hu'za hugahaze. <sup>3</sup> Nagra nagesa nontahue, tamagrama refko hunante'nazano, vahe'mo'za nehaza keagafi (kot) refako'ma hunante'nazana, tamage hu'na nagra'agura refko nosue. <sup>4</sup> Nagragu'ma antahuana nagu nagesamo'a ama' hu'ne, hianagi e'izankura nagra'niagura fatgo hu'noe hu'na nosue. E'i Anumzamo'a Agrake refko nagrira hunantegahie. <sup>5</sup> E'ina hu'negu refko osuta atreta avega ante'nenkeno, huham-printe'nea knare'ma Ramo'ma esuno'a, Agra hanimpima oku'a frakino vahe'mofo tumopima me'nesiazana, emeri ama nehuno, vahe'mofo agu'afi me'nesiazana eriama hugahie. E'i anankna, magoke magoke'mofona, Anumzamo'a huzmasga huzmantegahie.

<sup>6</sup> Menina nenfugatane nensarogata nagrare'ene Apolosinte'ene hunte'na nehuana, tamagri'ma tamaza hanigu nehue. Anà hanigeta ama kema nehu'a kemofo agu'agesa keta antahita hugahaze. Avoma krente'nea kante anteramita nemanita, mago'mofo hufenkami netreta, magomofona husga huontegahaze. <sup>7</sup> Na'amo vahepintira tamagrira tamazeri ruzahura nehie? Naza tamagra onte'naza zana Anumzamo'a, ontami'ne? Hagi koma tamimi'neana, na'a higeta tamufa erira nehuta e'ori'none huta nehaze?

<sup>8</sup> Tamagri'ma tamesiazana ko eri avite'naze! Tamagra ko tusi'a feno ante'naze. Tagra tamaza osu'nonanagi, tamagra ko kini vahe mani'naze! Tamage nagri'ma navenesiana, tamagra ko kini vahe mani'nesage'na, tagranena anahukna huta kini vahe manigahune. <sup>9</sup> Nagrama nagesama antahuana, Anumzamo'a tagri Aposol vahe'mota tazeri henkarfa tant'e. Vahe'mo'zama ahefrisie hu'za nehzankna nehune, na'ankure ama mopafi vahe'mo'za hunte'za kiza razankna nehunkeno, ankeromo'zane vahe'mo'zanena neragaze. <sup>10</sup> Tagra Kraisi agimo'ma marerinia zanku negi vahe mani'none. Hianagi tamagra Kraisimpina antahi'zane vahe mani'naze! Tagrira hanavetia omneanagi, tamagra hanave vahe mani'naze! Tamagri tamagia ahesga nehzanagi, tagri tagia hupri nehaze. <sup>11</sup> Hanki meninen, ne'zankura taga'neteno, tinku tave nesino, kukena timo haviza nehigeno, knona neramizageno, noma mani so'e hu'zana nomne. <sup>12</sup> Tagra'a tazampinti mraguzatita, eri'za erita ne'zana erifore nehune. Tagri'ma kema huvaviza hurantageta, asomu ke hunezmantone, tahageta oti hanavetita anagna e'nerune. <sup>13</sup> Vahe'mo'za havigema hurantageta, anankegura ontahita akoheta eri mago huta nemanune, tagra ama mopamofo kugusopa manineta, vahe'mofo agote'za orogofavegna huta meninen mani'none.

<sup>14</sup> Ama nanekea, tamagaze hinogu kre'noramuanki, nagra navesinen-toa mofavre ni'agna hu'na tamavumro nentoe. <sup>15</sup> Na'ankure tamagrira

10 tauseni'a vahe'mo'za Kraisimpi kva kriramante'ne'za tamazeri fatgo hugahazanagi, tamagrira rama'a neramafa omanigahie. Na'ankure nagra Krais Jisasimpinti neramafa'za hu'na mani'ne'na, Knare Musenkea neramasamue. <sup>16</sup> E'ina hu'negu nagra huanveti'na nermasamuanki, nagri navu'nava eriho. <sup>17</sup> Ama ana agafare Timotina tamagritega huntogeno vie. Ramofompina kentahino amage nentege'na navesinentoa mofavre ni'agino, agra nagrama Kraisimpima mani'na neozana huramagesa nehuno, hakare kaziga maka mono nompi rempima hunermuankna hugahie. <sup>18</sup> Mago'a mota nagrikura, Omegahie huta nentahita, tamagra tmavufga erisaga ne-haze. <sup>19</sup> Hianagi nagra Anumzamofo ave'sizama me'nenige'na ame hu'na esu'na, zamufga rahu vahe'mo'zama nehaza kegera eme ke'na eri fore osugahauanki, nankna himamu eri'nazafi eme zimagegahue. <sup>20</sup> Na'ankure Anumzamofo Kumara kege hu'za omne'neanki, hihamu'anee hanave'a me'ne. <sup>21</sup> Tamagrira na'anku tamave'nesie? Nagra sefu knone e'na eme tamazeri fatgo hanufi, avesinte'zane rimpa fruzane esue?

## 5

### *Monko avu'avazanku i'o hu'nea naneke*

<sup>1</sup> Hagi amanahu naneke eme hazage'na antahi'noe, mago monko avu'ava zamo'a tamagri amunompi fore hu'ne, meg'i'a vahe'mo'za amanahu hayi avu'avara nosaze. Ama ana avu'avamo'a amanahu hu'ne, mago'mo'a nefi a'ma eri'neazanku nehue. <sup>2</sup> Higetma tamagaze nehuta, tamasunku hugahazanagi, tusi tamavufga ra nehaze. Anazama hu'nemofona amu'nontmifintira avre atregahaze.

<sup>3</sup> Tamage huno navufgamo'a tamagranena anampina omani'noanagi, avamunimo'a tamagrane mani'nege'na, iza'o anazama hu'nemofona, anampi mani'neno hiaza hu'na hago refko hunte'na ke'noe. <sup>4</sup> Tamagrama Rantimofo Jisasi agifima eritruma hanafina, Rantimofo Jisasi hanavefi avamupina tamagrane manigahue. <sup>5</sup> Nagrama nehuana, ana nera Sata azampi avre atrenkeno amega avufga azeri haviza nehinkeno, Ramo'ma esnia knareravaamu'a agu'vazigahie.

<sup>6</sup> Tamagra tamagi erisaga nehazageno knareravaamu'a nosie. Sikonima herazafima, osi'a zistima antageno ana mika'zama azeri zonereana tamagra ontahi'nazafi? <sup>7</sup> Korapa zistia erinetretma, tamagra kasefa zo-ore bretigna hutma maniho. E'i ana avamente tamage zo-ore breti mani'naze. Na'ankure Kraisi'ma atama eri'nea zamo'a, kinafinti ozmahe zmagetere'nea knare'ma antahimi'za nenaza (Pasova) sipisipi afu fri'neankna hu'ne. <sup>8</sup> Ana hu'negu ana knare'ma muse hanunana, korapa zistima ante'nea bretia, kumi'ene havi avu'avateti osanune. Hianagi ana knare musema hanunana, zo'ore bretia, e'i tamage kene, tamage avu'avateti'ene musena hugahune.

<sup>9</sup> Ko'ma avoma krerami'nofina monko avu'ava zampi mani'nesia vahe'ene tragotetma omaniho hu'na hu'noe. <sup>10</sup> Nagra nehuana meg'i'a vahe'mo'za monko avu'ava nehzampi, vahe'mofo zanku kezamanunu nehaza vahepi, zamagranguke nentahiza vahepi, krunage hu'za musufanesaza vahepi, havi anumzante mono hunentaza vahe'ene tragotetma omanihogura nosue. Tamagrama amanahu vahe'ma zamatre varegahunema hanutma, ama mopa atrevagareho. <sup>11</sup> Hu'neanagi nagrama avoma krerami'nofina, mago ne'mo'ma Kraisinte namentinti nehue nehuno, monko avu'avaza nehuno, vahe zante kenunu nehuno, havi anumzante mono hunenteno, vahe huhaviza hunenteno, aka ti neno neginagi nehuno, havige huno kumzafa zante

hania vahe'enena tragoteta ne'zana onetfa hiho hu'na hu'noe. <sup>12</sup> Megi'a mani'naza vahe'ma refko'ma huzmante eri'zana nagri zana omne'ne. Hi-anagi mono agu'affima mani'nea vahera, tamagra amne refko huzmantegahaze. <sup>13</sup> Hu'neanagi Anumzamo meg'i'a mani'naza vahera refko huzmantegahie. ***Amu'nontamifinti havi avu'ava'ma hania nera, tamagra'a aheneati atreho.*** (Diu-Kas 17:7)

## 6

### *Mono vahe'mo'za kegaga ohunte ahunte osnaza naneke*

<sup>1</sup> Hagi mago mono neramafu'ma hazenke huramantesigetma keagare avretma vunaku'ma hanutma, mono kva vahete avaretma vuga'zanagi, nahigetma fatgo osu meg'i'a kva vahetera avretma nevaze? <sup>2</sup> Anumzamofo naga'mo'za ama mopafi vahe'ma mago knazupama refko'ma hanaza zana, tamagra ontahi'nazafi? Hagi mopafi vahera tamagra refko huzmantegahazanki, na'a hanigetma tamagra neonse keagama amunontmifima fore'ma hiankea erifatgo nosaze? <sup>3</sup> Tagrama henkama ankero naga'ma refko'ma huzmante'sunana ontahi'nazo? Nahigetma onensa hazenkea refko osugahaze! <sup>4</sup> Hu'negu amu'nontamifima mago tamarimpa osu'zama fore'ma higeta, tamagra nahigetma mono nompima zamagima omne'nea vahera huzmantage'za, ana kema refko hutera o'netize? <sup>5</sup> Ama kema nehuana tamagaze hinogu nehue! Tamagripina magora keaga refkohu knare antahintahine vahera omani'negeno'ma nehiaza nehaze. <sup>6</sup> E'ina hugaragi, mono ne'mo'ma, mono nefuma keaga huntenakura, avreno fegia vahe'mofo zamufi hunente.

<sup>7</sup> Na'a hanigeta ana knazana tamagra'a e'origahaze? Na'a higeta havizama hurmantazana atrenozmantaze? E'inama hazazamo'a tamagerafa huno tamagrira tamazeri fenkami netre. <sup>8</sup> Hianagi tamagratmi kefozana nehutma, reramatga nehaze. E'inahu'ma nehazana, mono tmafuhe'ine tamasarehe'ina kefozama hazana atrenozmantaze.

<sup>9</sup> Anumzamofo Kumara fatgo osu veamo'za erisanti oharegahaze hu'nea kea tamagra ontahi'nazafi? Athrenkeno tamagri'a antahintahimo'a tamazeri havia osino! Monko avu'ava'zamo azeri haviamma nehia vahe'ma, amema'a omne zante mono'ma hunentea vahe'ma ru vemofo a'nene, aravema hu'nea vemo'o, a'mo'ma atreno ru vene savri nehiane, vene'nemo vene'nene monko'za nehia vahe'mo'zane, <sup>10</sup> kumzafa vahe'ene, vahe zante kenunu nehia vahe'ene, aka ti neno havia huno neginagi nehia vahe'ene, vahe'mokizmi zamarimpa tamazeri havizahu ke nehaza vahe'ene, krunage nehaza vahe'mo'za, Anumzamofo Kumapina uofregahaze. <sup>11</sup> Mago'amota e'inahu vahe korapara mani'nazanagi, Anumzamo sese hurmanteno, tamazeri ruotge hu'ne. Na'ankure Ramofo Jisas Kraisi Agifine, Anumzamofo Ruotage Avamupi higetma, tamagra Anumzamofo avufina fatgo vahe mani'naze.

### *Tavufgamo'a Anumzamofo su'a me'nea hu'nea naneke*

<sup>12</sup> Miko'zana knare hu'neanki'na amne hugahue hunka hugahananagi, anampintira ana miko'zamo'a kaza osugahie. Ana hugahianagi, mago'zantere hu'na kazokzo huontesue. <sup>13</sup> Ne'zana narimpamofo suzane, narimpamo'a nezamofo suzanagi, ana taregara Anumzamo'a zanazeri haviza hugahie. Kavufga monko avu'ava'za hunka eri haviza hu'zana omne'neanki, Ramofo suza menegeno Ramo'a, tvufgamofo su'ane. <sup>14</sup> Hagi

Anumzamo'a Ramofona fripintira azeri oti'neankino, tagri'enena ana zanke huno, Agri'a hanavereti tazeri otigahie.

<sup>15</sup> Tamagri tamavufgamo'a, Kraisi avufgama me'neana tamagra on-tahi'nafi? Amane Kraisi avufa eri'na monko avu'ava zante'ma atresuana knare hugahifi? I'o anara osutfa hugahie! <sup>16</sup> Huge, iz'a savri a'ene monkozama himo'a, ana a'ene mago zanavufga eri'nesa'ana ontahi'nazafi? Na'ankure avontafepina amanahu ke hu'ne, **Taremakea erimago znav-ufa segaha'e hu'ne.** (Jen-Agf 2:24)

<sup>17</sup> Hianagi mago'moma Ramo'ene hagerafino manisimo'a, avamupina zanagra magoke Agranena huke manigaha'e. <sup>18</sup> Savari monko avu'ava zampintira atretma freho! Mika kumi'ma mago'mago vahe'mo'ma ne-hiana, meg'i'a avufare nehianagi, iz'a savari monko'za nehimo'a, agra'a avufga azeri kumi'nehie. <sup>19</sup> Tamavufamo'a Ruotge Avamumofo mono no me'negeno, Ruotge Avamuma Anumzamo'ma tamagri'ma tam'i'nea avamumo'ma anampinkama mani'neana tamagra ontahi'nazo? E'ina hu'negu tamagra'a su'ana omani'naze. <sup>20</sup> Na'ankure tamagrira Anumzamo'a ko tusi'a mizanteti miza seramante'ne. E'ina hu'negu tamavugareti Anumzamofo Agi'a erisaga hugahaze.

## 7

### Arave hu'zamofo naneke

<sup>1</sup> Hagi mago ne'mo'ma a'ma e'orisiana knare hugahio hutma avompima kre'naza zanku, menina kenona nehue. <sup>2</sup> Na'ankure monko avu'ava'za hu'zanku, mago mago vemo'a agra'a, a' antenko, mago mago a'nemo'a agra'a ve antegahie. <sup>3</sup> Vemo'a agra'a a'ene masenko, a'mo'a anazanke huno ve'ane masegahie. <sup>4</sup> A'mo'a agra'a avufgamofo kva omani'neanagi vemo kva hu'ne. Ana hukna huno vemo'a agra'a avufga kva osu'neanki, a'amo kva hu'ne. <sup>5</sup> Tanavufa eri mago huzankura i'o osi'o. Hianagi mago tanarimpa hutna mago'a kna amne mani'neta, nunamu hanu'e hanuta'a, amne anara hugaha'e. Hianagi anama hutesutna ete ko eme tragoteta mani'o. E'i ana hutna tanavufamofo avesizana kegava nehnakeno, Sata'ma reranaheno ke'niana, evu oramigaha'e. <sup>6</sup> Amagema nehuana nagrama nagesa antahiramua kazigatire, hagi ama kema nehuana ana hihogu tutu hunormantoe. <sup>7</sup> Nagra nagesama antahuana, nagrama a' e'ori manuankna hu'za hakare vahe'mo'za manisazegu nehue. Hianagi mago mago'mo'za rumofo rumofo museza Anumzamofonpintira eri'naze.

<sup>8</sup> Arave osu vahe'ene, kento vahe'mota knare'ma hurmantesiana, nagrama mani'noaza huta manisazana knare hugahie. <sup>9</sup> Hu'neanagi tamavufamofo avesizama kyama hu'za omne'nesige'za, zamarenke'za ve eri, a' eri hiho. Ana hanagu knare'ma haniana ve eri, a' eri hu'za mani'nesageno monkozamofo zamavesi'zana omanegahie.

<sup>10</sup> Hagi ko'ma arave hu'naza vahe'motarega kasege huneramantoe, nagri kasegeompage Ra Anumzamofo kasege. A'mo'a ve'a otreno. <sup>11</sup> (Hu'neanagi anama hanuno'a, atrenko ve e'ori amne manino, huge zanarimpa eri mago huke, ete neve'ene, eri hagerafikeno), vemo'a a'amofona otregahie.

<sup>12</sup> Hagi ruga'amotagura anage nehue, Ra Anumzamofo keompage nagra nehue, mago neramafu a'mo amentinti nosnianagi, agri ene muse huno neminsigeno'a, agra nenarona otregahie. <sup>13</sup> Anahukna huno mago a'mo eri'nesia vemo, amentinti nosnianagi, agrane muse huno neminsigeno'a,

nevena otregahie. <sup>14</sup> Ana hu'negu amentinti osu ve'mo'a, nenaro'ene maniazamo azeri avusesea nehigeno, amentinti nosia a'mofona neve enema maniazamo, azeri avusesea nehie. Ana'ma osnigeno'a mofavre zagaz-niamo'a agrua osisine. Hu'neanagi menina zamagrira zamazeri ruotge nehie. <sup>15</sup> Hu'neanagi amentinti nosanimo ve atre, a' atre hukuma haniana, zamaze'ori zmatrenke'za ana hiho, amama mani'naza nomani'zampina nerafuno, neresarono mago'zamo'a kina reozmanteno. Hianagi tarimpa frune manisunegu, Ra Anumzamo'a tagi hu'ne. <sup>16</sup> Hu'negu inankna hunka a'moka, vekamofo avu'ava'zana antahigahane? Hifi inankna hunka vemoka, akamofo avu'ava'zana antahigahane?

### *Nankna hutamani'nonkeno Anumzamo'a tagi hu'ne, anankante manisuna naneko*

<sup>17</sup> Hagi Ra Anumzamo'a magoke magoke'mofoma inankna avamente mani'nesigeno, Anumzamo'ma agima hu'nesimo'a, ana avamente manino. Ama anahukna tra ke miko mono nompina nezamasamue. <sup>18</sup> Mago'a vene'hemotma oku tmavufa taga hu'nazageno tamagi hu'enigetma, tamagra oku tamufgama taga hu'neaza eriso'e hu'zankura maragu'za otiho. Mago'amo'za oku zamufga taga osu'nesage'za, zamagi hu'nesimo'za zamagra oku zamufga taga osiho. <sup>19</sup> Avufgama taga hu'zane, avufgama taga osu'zamo'a amane'za me'ne. Hianagi Anumzamofo kasegema amage ante'zamo razana me'ne. <sup>20</sup> Zamatreñke'za mago mago vene'nemo'za ina avamente mani'nageno zamagi hu'ne, ana avamenteke maniho. <sup>21</sup> Kazokzo eri'za vahe mani'nankeno, Anumzamo'a kagi hu'nefi? E'i zankura kagesa ontahio. Ana hu'neanagi kagrama kankamu me'nesigenka kina vahe'ma omaninaku'ma hanunka, amne kagra anara hugahane. <sup>22</sup> Hu'negu izano, kazokzo eri'za vahe mani'nesigeno, Ramo'ma agi hu'nesimo'a, Ramofompina kina vahera omanigahie. Ana kanteke kina vahe'ma omanni'nenigeno agi hunesimo'a, Kraisi kazakzo eri'za vahe manigahie. <sup>23</sup> Tamagrira tusi'a mizanteti ko miza seramante'neanki, vahe'mokizmi kazokzo eri'za vahera omanniho. <sup>24</sup> Inankna kante mago'mo'a mani'negeno agi hu'ne, nenfuga nensaroga, atregeno ana kante Anumzamofompina manino.

### *Arave osu vahe'mofo nanake*

<sup>25</sup> Arave osu vaheku'ma nantahige'naza zankura Anumzantegatira mago kasegea e'ori'noe. Hu'neanagi nagrira Ramo'a asunku zama'areti hvempa hunantege'na mani'nomo'na, nagrani'a antahi'za huama nehue. <sup>26</sup> Hu'negu nagrama antahuana, menima fore nehia hazenke'zampina, ana ne'mo mani'nesia kante'ma mani'nigeno'a, so'e hugahie. <sup>27</sup> Ko'ma, a'ma eri'nesunka, a'kamofo atre zankura ontahio. A'ma eritenka atrene-sunka, a'ma erizankura ohakro. <sup>28</sup> Hu'neanagi arave hu'nesamoka, kumira osu'nane. Hu'negu vene omase mofa'mo aravema haniana, kumira osugahie. Ana hugahianagi, aravema hanimo'a ana nomanizampina rama'a knazampi ufregahie. Tamaza hanigu ama nanekea nehue. <sup>29</sup> E'igu amanage hu'na nehue, nenfugata nensarogata, knamo'a atupa hu'negu, aza'o a'ma antenesimo'a, a' onte vahekna huno manino. <sup>30</sup> Zamavunu nehanimo'za zavi ote vahekna hu'za maninkeno, musema nehanaza vahe'mo'za muse osu vahe kna hanageno, fenoma mizanesesimo'a, fenoma'a omane vahe kna huno manino. <sup>31</sup> Ama mopafi zama eri'enemimofona atrenkeno anazamo'a razana oseno. Na'ankure ama mopane anampima menima me'neazamo'a, fanene hugahie.

<sup>32</sup> Nagrama nentahuana ama mopafi zankura antahintahi hakarea osihogu nehue. Aravema osu'nea ne'mo'a, Ramofonku antahintahi nehuno, Ramofo azeri muse huzankuke nehie. <sup>33</sup> Hu'neanagi arave hu'nesia ne'mo'a, ama mopafi zanku antahintahi'amo'a nehigeno nenaro azeri muse huzanku nentahie. <sup>34</sup> Ana hu'negenokino ana ne'mofona avesi'zamo'a fako nehie. Arave osu a'mo'o, mofamo'enena Ramofo zanku antahintahi neha'e. Avufgare ene avamupina ruotage huno mani'zankuke nehie. Hu'neanagi arave hu'nenia a'mo'a, ama mopafi zanku antahintahi nehuno, nevena inankna hu'na azeri muse hugahue nehie. <sup>35</sup> E'i ama ke'ma nehuana, tamagri'ma tamazeri hanavetinigu nehu'na, i'o hunoramante'na tamazeri amuho nosue. Hu'neanagi mopafizamo tamazeri fako hinketa, havizampina uofreta Ramofonte hanavetita manihogu neramasamue.

<sup>36</sup> Hianagi mago ne'mo'ma vene omase mofa a'erinaku'ma nehanigeno'a, ve erigahie huno huntenesia knamo agateresigeno, a'eri avesizamo'ma ra hanigeno'a, akoheno omaniga osaniana, e'i kumira omneneanki atrenkeno arave hino. <sup>37</sup> Hu'neanagi mago ne'mo'ma antahintahi'afi huvempama huno, a' e'origahue huno hu'nesuno'a, agra avesizama kegava nehuno hantka hantako osnigeno'a knare hugahie. <sup>38</sup> Hu'negu agra'a vene omase mofa'ma a'ma erigahie hu'nesimofoma a'ma erisiana knare hugahie. Hu'neanagi aza'o a'ma e'rimo'a knare zantfa hu'ne.

<sup>39</sup> Hagi neve'ma ofrino mani'nesigeno'a, nenaro'a neve a' tfa mani'neanangi, neve'ma frisigeno'a amane Ramofonte mani'nesia vea erigahie. <sup>40</sup> Hu'neanagi nagrama antahuana, ana a'moma vema e'o'ri'ma amanema manisiana, rama'a muse hugahie. Nagrama antahuana Anumzamofo Avamu'mo nasamianke nermasamue hu'na nehue.

## 8

### *Havi anumzante kresramna vunte'zamofo naneke*

<sup>1</sup> Hagi vahe'mo'za kaza osu'za havige anumza zamazanteti tro hunte'ne'za, kresramna vunte'naza ne'zanku krenami'naza zanku tamasami'za hue. Tagra antahi'none ana mikamota antahi'zana eri'none. Antahi'zamo'a tavufa erisaga hianagi, avesinte'zamo'a zamazeri hanavenetie. <sup>2</sup> Mago'a vahe'mo'zama hakare'zana antahi vagare'none hu'za antahigahazaragi, zahufa zamagrama antahiga avamentera ontahi'naze. <sup>3</sup> Hu'neanagi iza'o Anumzamofonku avesinentemofona, Anumzamo'a agrira antahino keno hu'ne.

<sup>4</sup> E'ina hu'negu vahe'mo'za kaza osu havi anumza zamazanteti tro hunte'ne'za, kresramna vunentaza ne'zama ne'zamofonkura, tagra antahi'none, ama mopafi havi anumzana amnezane. Hagi mago anumzana omani'neanagi, mona mopa tro hu'nea Anumzana, Agra magoke mani'ne. <sup>5</sup> Na'ankure rama'a zanku monafine mopafinena anumzane hu'za nehazanagi, tamage hakare'a anumzane, hakare'a ra mani'nazanagi, <sup>6</sup> tagririra magoke Anumzana Nerfakino hakare'zana Agri konkompa fore higeta, tagra Agrite manunkeno, Agra magoke Rantia Jisas Kraisi mani'ne. Agripinti mikazana Anumzamo'a tro higeta, tagranena Agripinti tasimura e'nerune.

<sup>7</sup> Hu'neanagi ama ana antahi'zana ana mika'mo'za ontahi'naze. Na'ankure mago'amo'za, havi anumzankura tamage'zane hu'za nentahim'za, antahintahimo'a meninena me'negenokino, ne'zama kresramna hunte'naza ne'zana nenaze. Zamagra zamagesama antahi'zana tamage huta Anumzamofo mono hunentone nehu'za, ne'zana nenageno zamagu

zmagesamo'a savri nehie. <sup>8</sup> Hu'neanagi ne'zamo hinketa Anumzamofontera uravao osugahune. Ne'za onesunazamo'a, tazeri haviza osuge, ne'za nesunazamo'a tazeri knare osuge hugahie. <sup>9</sup> Tamagra antahi oza hutma hanaza zamo, zmentintifi hanave ot'i'naza vahera zmagigo zami havegna huzankura kva hiho. <sup>10</sup> Na'ankure antahintahi zmimo hanave ot'i'nesaza vah'e'mokizmi zamufi knare antahintahine vah'e'moka havi anumzamofo mono nompi ne'za nenesanke'za, ru zamagu'afi me'nea zamagu zamageda eri hankavetisanke'za, kaza osu havige anumzante kresramana vu'naza ne'za nenaze hu'za hugahaze. <sup>11</sup> Ana hu'negu mareri antahi'zanka'amo hanave'a omne'nesia antahi'zane mono naga, Kraisi zamagriku huno fri'nesia naga zamazeri haviza hugahie. <sup>12</sup> E'ina higu ama ana kazigati hanave'a omne negafuno, negasaroma kumipi avrente'sanana, agu'agesa azeri haviza hu'nanankinka, kagra Kraisintera kumi hu'nane. <sup>13</sup> E'ina hu'negu, ne'zamo'ma nenefuno nensaroma kumipi avarenentesige'na, nagra mago'ane kresramna vu'nesia afu'mofo ame'a onesuazamo'a, mago'mofona kumpina avreontegosue.

## 9

### *Poli'a miza e'ori aposol eri'zama eri'nea zamofo naneke*

<sup>1</sup> Hagi nagra kina vah'e omani'nofi? Nagra Jisasi aposol eri'za vahera omani'nofi? Jisasin Rantimofona onke'nofi? Tamagra Ramofonte eri'za eri'noa raga'a omani'nazafi? <sup>2</sup> Hianagi mago'a vah'e'mo'zama antahi'zana aposol vahera omani'ne nehazanagi, tamage tamagritera aposol vah'e nagra mani'noe. Na'ankure Ramofonte aposol eri'za eri'noa zamofo nena raga'a tamagra mani'naze.

<sup>3</sup> Nagra refkoma hunantaza vahekura amanage hu'na kenona hunezmantoe. <sup>4</sup> Mizantigna huta kave ene tinema erisuna zamo'a, e'i knarerera osu'nefi? <sup>5</sup> Aposol naga'ene Jisasi aganahe'zane Pita'enema hu'nazaza huta zmentintine a'nea eri'neta, zmvareta vanoma hanunana, e'i knarerera osu'nefi? <sup>6</sup> Hanki, Banabasi'ene nagrane tagra'ake zago eri'za erita kegava hanuke'za, mago'amo'za anara osugahazafi? <sup>7</sup> Ha'ma nehia sondia vahera, agra'a eri'zama'arera, agra'a miza senentefi? I'o ru vah'e'mo'za mizana nemize. Iza'o waini hozama kri'nemo'a, raga'a krepia tagino nonefi? Iza'o sipisipi afuzaga kegava nehimo'a, ami rima'a tatino nonefi? Ozo agra tatino nene.

<sup>8</sup> Nagra vah'e antahi'za avaririna kea nehufi? Anumzamofo kasegemoe'ne hu'neaza nehue. <sup>9</sup> Na'ankure Mosese kasegefina krente'ne, **Tamagra bulimaka'o afu'mo'ma witi akru'ma nehresifina, agitera ana'okinenkeno anampintira ne'zana zogino neneno witia hareno** hu'neana bulimakaonku hu'nefi? A'o. (Diu-Kas 25:4) Anumzamo'a bulimakao afukuke ama kea hu'nefi? A'o. <sup>10</sup> Ama tamage tagriku hu'nefi? Izo, tagriku huno krente'ne, hoza erisimo ne'zama nesigu amuhara nehanigeno, witi akru hare'nimo enena anampinti'ma ne'zama refko huno erisigu amuhara hugahie. Mono eri'za vahera, mono'ma zamasamisaza vah'e'mo'za, miza sezmanteho. <sup>11</sup> Tagrama Avamumofo avimzama tamagripima negrita, amega tavufgare zama tamagripinti erisunazamo knarerera osugahio? E'inahu avu'ava zamo'a nezama krinonaza vasageankna nehune. <sup>12</sup> Hanki mago'amo'za kema eme huama haza ruga'a vah'e'ma zamaza nehanuta, tagri'enena tagesga huta mizana ontamigosazafi? Tagra hugazanagi nosune. Na'ankure Kraisi Knare Musenkemofo kama

renkni rezanku anaknaza e'nerue. <sup>13</sup> Ra mono nompima eri'zama e'neriza vahe'mo'za, kresramana vunaku ra mono nompi eri'za neaza ne'zampinti, ne'zazmia e'nerize. Ana hanige'za kre sramnavu itare eri'za e'neriza vahe'mo'za, ne'za zmia Kresramana vu itareti e'nerizanki tamagra ontahi'nazo? <sup>14</sup> E'inahu kna kante, Ramo'a huno, Iza'zo mono ke hanaza vahe'mo'za, zamaza hu'zana, mono kema hanage'za antahisaza vahepinti erigahaze. (Luk 10:7-9)

<sup>15</sup> Hu'neanagi nagra hugazanagi nosue. Nagra ama avoma krenera-muana, mago'za hunantehogura nosue. Na'ankure nagrama agi omane vahekna hu'na frisugeno'a, knare hugahie. <sup>16</sup> Na'ankure nagra Knare Musenke hanuazankura nagia e'origahue. Mono kema hu'zana Anumzamo huo huo hunante'nea eri'zanki'na ana eri'zama e'orisuna nagra havizantfa hugahie. <sup>17</sup> Nagra navesite'ma Knare Musenkema huama'ma nehusimpaga mizani'a erusine. Hianagi nagra navesitera e'noruanki Anumzamo antahinamino, kegava huo hunante'nea eri'zanki'na e'nerue. <sup>18</sup> Nagra na'a mizani'a erigahue? Nagrama Knare Musenkema tmasamua zankura miza seho hunormantoe, ana hu'negu Knare Musenkerera mizana eriga'zanagi e'norue.

<sup>19</sup> Na'ankure mago vahetera kina vahekna osu'noe, nagra hakare vahe'mofo kazokzo eri'za vahe mani'ne'na, rama'a vahera zamavregahue. <sup>20</sup> Jiu vahe'ma zmagarenakura zamagrikna hu'na mani'ne'na nezmauroe, nagra'a kasegemofo agorga omani'noanagi, kasegemofo agorga mani namokizmia, kasegemofo agorga mani vahe kna hu'ne'na nezmauroe. <sup>21</sup> Kasegema e'ori namokizmima zmagrenakura, kasege e'ori vahe kna hu'na mani'ne'na nezmauroe. Nagra Anumzamofo kasegema avariri zanteri mani'noanagi, nagra Kraisi kasegemofo agorga'a mani'nena, kasegemofo agorga'a omani'namokizmi nezmauroe. <sup>22</sup> Hanavezimi omne'nemokizmirera, hanaveni'a omne vahe kna hu'na mani'ne'na nezmauroe. Nagra maka vahetera zamagrama mani'naza avutigati hu'na mani'ne'na nezmavre'na, mago'amokizmia zmagu'vazino zmaho'ma kenigu mika'zana nehue. <sup>23</sup> Ama ana miko'zama nehuana, Knare Musenkegu hu'na nehue. E'ina hanige'na anampintira nagra'a asomura erigahue.

<sup>24</sup> Zmagare zokago vahe'mo'za zmagama razafina, hakare vahe'mo'za zmagara nerazanangi, magoke'mo zamagatereno mizana e'nerianki ontahi'nazo? E'ina hukna kante tamaganeretma mizana erigahaze. <sup>25</sup> Mika'mo'za zokagopima ufrenuku'ma hazamo'za, zamufamofo zamesizana maka'zampina kegava nehu'za, zamagra zamesi'zana novaririze. Mizama eri'zana osiagnafi meno haviza nehie. Hianagi tagrama erisuna mizamo'a mevava hugahie.

<sup>26</sup> E'ina hu'negu nagrama nagama neroana, uhanatigahue hu'na hu'nore uhanatinakur nagare'na nevve. E'inahu kanteke nagrama nazama atroana, amne zahopina notroanki, ahegahue hu'na huazana nehoe. <sup>27</sup> Vahe'mokizmi mono ke zmasamite'na, ru nagrani'a miza e'orizanku, nagrani'a navufga hanaveti'na amasagugen, nagri navesi'za nevaririe.

## 10

*Korapa Israeli vahe'mo'za hu'naza havi zmagu'zma hu'zanku kva hanuna  
naneke*

<sup>1</sup> Na'ankure nafuheta, nagrama nentahuana, antahi ama hanazegu nehue, korapara tagehe'za hampomofo agorga'a nevu'za, hagerina takahenaze.

<sup>2</sup> E'i ana zamo'a mika vahe'mo'za mono ti freankna hampompine hagerimpina nehu'za, Mosese avariri'nazana, <sup>3</sup> ana mika'mo'za ana hukna avamupi ne'za nene'za, <sup>4</sup> ana mika'mo'za anahukna hu'za avamumofo tina ne'haze. Na'ankure zamagrama tima ne'nazana, zamagranema ne-ea avamupi havereti ne'nazankino, ana havea Kraisi'e. (Eks-Ati 17:6, Nam-Ham 20:11) <sup>5</sup> Hu'neanagi rama'amo'za Anumzamo'a muse osiaza hute'za, ka'ma mopafina ufri efri hu'naze.

<sup>6</sup> E'inahu zama zamagripima fore'ma hu'neazamo'a, tagritera avame'za me'neno huraverina, e'inahu kefo avu'ava'zana kerasane osugahune. <sup>7</sup> Tamagra mago'a vahe'mo'za hu'nazaza hutma havige anumzante monora huonteho. Amanage huno Anumzamofo avontafepina krente'ne, **Havige anumzante mono hunente'za, ne'zane tine nene'za, oti'za monko avu'avaza hu'naze.** (Eks-Ati 32:6) <sup>8</sup> Hagi mago'amo'za monko avu'avaza nehu'za, ana zagefinke 23 tauseni'a vahe fri'nazankna hu'zanku, tagra monko avu'ava'zana osanune. <sup>9</sup> Ramofoma rehe'nazankna huta tagra re-heta onkesune, mago'amo'za anahu kna hazageno, ha osifave'mo zamahe fri'ne. <sup>10</sup> Ke hakare hu'nazankna osnune, mago'amo'zama anahu kna hazageno, vahe'ma zmahefri ankeromo zamahe fri'ne. <sup>11</sup> Ama ana zantmima zamagrite fore'ma hu'nea zamo'a, tagri'ma rempima huramiza me'neno tazeri fatgo hanigu krente'ne. Ama vagare knafima ehanatisia zanku hu'ne. <sup>12</sup> Kagrama oti hanaveti'noe hunka nentahisunka, traka hu'zanku kva huo! <sup>13</sup> Antahiho! reramataga zama ne-eana tamagritekera nomeanki, hakare'a vahete neankna huno ne-e. Anumzamo'a Agrā knare hu'neankino atresigeno, ana reramata zamo'a hanavetino tamazeri otregahie. Reramatgaza ne-enkeno'a tamatresigeta evuoramigahazanki, kana tamaverina oti hanavetita manigahaze.

<sup>14</sup> E'ina hu'negu knare rone'nimota havige anumzantetira manigneta maniho. <sup>15</sup> Nagrama kema nehuana knare antahi'zane vahe'motma neramasamue. Tamagra refko hutma nagra nehua kea antahigahaze. <sup>16</sup> Tagrama kapufintima tima nenakura, Anumzamofo susu hunteteta nenone. E'i ana kapufinti tima erifko'ma nehunana, Kraisi korana omne'nefi? Tagra bretima korita, erifko huta nenonana, e'i Kraisi avufga omne'nefi? <sup>17</sup> Hianagi magoke breti me'negu, ana maka'mota hakare mani'none nehunanagi, magoke tavufga me'ne. Na'ankure mago bretireti refko huta nenone.

<sup>18</sup> Israeli vahe'mo'za hu'naza zanku tamagesa antahiho, kresramna vu itaretira refko hu'za ne'zana nonazafi? I'o nenaze. <sup>19</sup> Hagi nagra na'anuku nehue? Havige anumzantaminte kresramna vumentaza zana amnezane, havi anumzana amnezane hu'na nehue. <sup>20</sup> I'o hue! Fegi'a vahe'mo'za anankavera Anumzamofontera kresramana vunontazanki, havi avamutaminte kresramna vumentaze. Nagri'ma nave'nesiana havi avamutaminte tragoteta omanihogu nehue. <sup>21</sup> Tamagra havi hankromofo\* kapufinti tina tagitma nenetma, ete Ramofo kapufinti'enena tagitma onegahaze. Havi hankromofo tafepinti nenetma, ete Ramofo tafepintira onegahaze. <sup>22</sup> Tagra Ramofo azeri asivazinaku nehumpi? E'ina'ma hanunana tagri hanavemo'a, Ramofo hankavea ageteren'e nehumpi? I'o.

*Hakare zama hanumpina Anumzamofo agi'a erisaga hanuna naneke*

---

\* **10:21** Hankrorema hu'neana, havi avamuku hu'ne.

<sup>23</sup> Tagra mika'zana amne hugahunanagi, ana mika'zamo'a taza osugahie. Tagra mika'zana amne hugahaze huta hugahunanagi, ana mika'zamo'a, tazeri hanave otigahie. <sup>24</sup> Tagri'ma tazeri knare huzankukera ontahisunanki, tva'ontire'ma nemanizamokizmi zamazeri knare'ma hanunazanku antahisune.

<sup>25</sup> Hagi amne ana miko ame'ama zagore'ma atresazana mizaseta ne-gahazanagi, ana ame'a agura igati eri'naze hutma zmantahiogeho. Ru tmagu tamagesa eri haviza hugahie. <sup>26</sup> Na'ankure **Mopane anamiko zama agu'afima me'neazana, Ramofozanke me'ne.** (Sam-Zga 24:1)

<sup>27</sup> Mago amentinti osu vahe'mo'ma kagi hanigenka vanunka, afu ame'ama kamisiazana nenenga antahige' antahagera osuo, ru antahintahi ka'a eri savri hugahane. <sup>28</sup> Hianagi mago'mo kasamino, havi anumzante kresramna vunte'nea afu ame'e hanigenka onegahane. Na'ankure ana kasamismofo knare'zanku hunka onegeno, anama kasamisimofo kefozane huno antahigahie. <sup>29</sup> Kagrika'a antahintahizankura nosuanagi, rumofo antahintahizanku nehue. Inankna hu'za nagra navesite'ma huazana refko antahintahifina nehaze? <sup>30</sup> Hanki nagra Anumzamofo susu huntete'na ne'zama noazankura, na'anku haviza nehie hu'za nehaze?

<sup>31</sup> Hanki, kave nesano tinesano inankna'zama hanunka, Anumzamofo agi erisaga hu'zanke huo. <sup>32</sup> Mago'mofone hunka Jiu vahepino, Griki vahepino, Anumzamofo vahepinena, zamazeri tanafa hu havegnara osiho. <sup>33</sup> Nagranena anahukna hu'na maka'zama huazampina, maka vahe'mo'zama muse hanazaza nehu'na, nagra knare'zankura nosuanagi, hakare vahe'mokizmi knare'zanku nehanugeno, rama'amokizmia Anumzamo zamagu'vazigahie.

## 11

### *Mono hunte'zamofo naneke*

<sup>1</sup> Nagrama Jisas Kraisi nege'na nevararuaza hutma nagri navu'navi negeta avariraho. <sup>2</sup> Nagra tamagrira zamazeri antesgahue. Na'ankure ana miko'zama hazafima tamage'sa antahi nenamitma, antahi'zama rempima huramino'a kante azeri antroko hu'naze. <sup>3</sup> Hu'neanagi menina tamagrama antahiamma hanazegu'ma nehuana, mika vene'nemokizmi aseni'a Kraisi manigeno, a'nemofo asenia vene'ne manigeno, Anumzamo'a, Kraisia aseni'a mani'ne. <sup>4</sup> Hagi mika vene'nemo'za tavrave zmanunte'ma refitene'za nunamuma hanazano, kasnampa kema hanaza zamo'a zamagra'a zamasenia zamazeri agaze hugahaze. <sup>5</sup> Hianagi mika a'nemo'za zmanunte refi'otene'za nunamu hanazo, kasnampa kema hanazana zamagra'a, zamaseni zamazeri zamagaze nehaze. Na'ankure agra magoke mani'neno, aseni azoka'ma vazagatetre'nea a'negna nehuno, asenimofona agaze erinemie. <sup>6</sup> Na'ankure mago a'mo'ma azoka'ma refi'otesuno'a, agra azokara taga hutregahie. Hianagi azoka'ma tagahu zamo'ene, azoka'ma vazagate'zamo'ma a'nemofona agaze'za me'ne hanuno'a, atresageno anuntera refitegahie. <sup>7</sup> Na'ankure mago ne'mo'a asenirera refi'oteno, agra Anumzamofo amema'ane ragi ami vahe mani'ne, hu'neanagi a'mo'a ve'mofo ragi vahe mani'ne. <sup>8</sup> Na'ankure vemo'a, a'pintira eforera osu'neanki, a'mo ve'mofopintira efore hu'ne. <sup>9</sup> A'mofonkure huno vea trora osu'neanki, vemofonku huno a'ra tro hu'ne. <sup>10</sup> E'ina hu'negu a'mo'a asenirera avame'za refitenkeno, anazamo'a mago'mofo kvafi mani'ne huno ankeromokizmi zmaveri hugahie. <sup>11</sup> Ana

hianagi, Anumzamofompina a'mo'a, agra'akera oraoti'neanki, vemofo hanavefi manigeno, vemo'a agrakera oraoti'neanki a'mofo hanavefi oti'ne. <sup>12</sup> Na'ankure a'mo'a vahe'mofompinti efore higeno, anahukna huno vemoftona a'mo kasenente. E'ina hu'negu, mika'zamo'a Anumzamofompinti efore hu'ne. <sup>13</sup> Tamagra'a refko hiho, amne a'mo'a asenirera tvaravenura refiote'neno Anumzamofontera nunamuma haniazamo'a knare hugahifi? <sup>14</sup> Vemofoma zanra azoka'ma hunte'nesiana agra agaze hugahifi? <sup>15</sup> Hianagi a'mofoma zanra azoka'ma hunte'nesiana agri'a konaririzane. Na'ankure, zanra azoka'ma ami'neana, refitentenogu ami'ne. <sup>16</sup> Hu'neanagi mago'mo'ma ke hafra amana kegu'ma haniana, nagrama hanuana, tagra ru tavutva ovaririgahune. Maka Anumzamofo veamo'za anahukna antahi'za erigahaze.

<sup>17</sup> Ama kema avariri hogu'ma kreneramua kefina, tamagrira tamaz-eri sganosue, na'ankure tamagrama emeri atruma hazafina, knare'zana fore nosianki, havizanke fore nehie. <sup>18</sup> Na'ankure ese knare'ma na-grama antahi'noana, tamagra mono kevunaga mani'hone hutma etru hazafina, rama'a atane'za megeno mago tamarimpa hu'zana omane'ne. Anankema nentahi'na tamagefi hu'na hu'noe. <sup>19</sup> Tamage amu'no tamifina atane'zana me'ne. E'ina hanageno Anumzamo refko huno hu izo huzmante'nesamo'za amu'nontamifina eama hugahaze. <sup>20</sup> E'ina hu'negu tamagrama eritruma hazafina mono tivo ne'za (Lord's Supper) nenaku eritru nosaze. <sup>21</sup> Na'ankure tamagrama ne'zama neneta ruga'amokizmigura zamavegaonte ko nenaze. Mago a'mo'za zamaga'ene nemanizageno, mago'amo'za negi ti nene'za tusi neginenzae. <sup>22</sup> Tamagrira tine ne'zanema nesaza nontamia omne'nefi? Hifi tamagra mono no azeri haviza nehutma, zamunte omne nagamokizmi zamazeri zmagaze hu'naku nehazo? Nagra na'ane ke hurmantegahue? Nagra tamagrira husga hugahifi? I'o. Ama ana zankura tamagrira husga osugahue.

<sup>23</sup> Na'ankure nagrira Ramo rempi hunami'neaza, ete rempi huneramue. Jisas Kraisina komoru hu'za ha' vahe zamazampima avrentenaku haza kenagera, Agra breti erino, <sup>24</sup> Anumzamofona susu hunteteno, ana bretia ko'nerino amanage hu'ne, Ama'i Nagri navufagina, tamagriku hu'na neramuanki, neneta antahinamiho hu'ne. (Mat 26:27, Mak 14:24) <sup>25</sup> Hagi ne'zana netageno, anahukna huno waini kapu erisaga huno amanage hu'ne. Ama'i waini kapua, kasefa hagerafi ke koraniareti nehue, amana hutma maka knama waini tima nenenutma tamagesa antahinamiho. <sup>26</sup> Na'ankure ama bretine, ama kapufinti'ene nesaza zupa, anazamo'a Ramofo friza huama nehanigeno, ete Ramo'a egahie. (Mat 26:26-28, Mak 14:22-24, Luk 22:17-19) <sup>27</sup> E'ina hu'negu iza'o havi avu'ava hu'neno, bretine Ramofo kapufinti nesimo'a, Ramofo avufgafine korama'arera kefoza huno, kumi hugahie. <sup>28</sup> Mago'mo'ma bretine, kapufinti neku'ma hanuno'a, agra'a avu'ava'zana refko huteno, ana bretine kapufintira negahie. <sup>29</sup> Na'ankure mago'mo bretine tine neneneno, Ramofo avufga, neno huno antahi ama osnimo'a, agra'a azeri haviza nehie. <sup>30</sup> E'ina hu'negu, amu'no tamifintira hakare'amo'za hanavea omne amne hige'za, kria erizageno mago'amo'za ko fri'naze. <sup>31</sup> Hianagi tagra'ama refko huta tazeri fatgo osu'nesuta, keagafi manigahune. <sup>32</sup> Hianagi Ramo'ma tagri'ma refko'ma nehiana, ama mopafi vahem'a huhampri zmante'nea knazampina uofresunegu tazeri ante fatgo nehie.

<sup>33</sup> E'ina hu'negu, nenfugata nensarogata tamagra mono ne'zama ne-naku'ma emeri atruma hanuta, zamavega ante'nenkeno maka etru hutenketa neho. <sup>34</sup> Hagi mago'mofoma agamatesigeno'a, agra nonkuma'arega neteno eno. Na'ankure tamagrama etruma hanafina, refko ohunte ahunte zana omnegahie. Hagi mago'azana, henkama esu'na emeri fatgo hugahue.

## 12

### *Ruotge Avamupi ruzahu ruzahu eri'za erisnaza naneke*

<sup>1</sup> Hagi nafuhegatane nensarogata avamu'mofo muse zanku'ma hu'naza zamofonku eriamu hu'na tamasami'za hue. <sup>2</sup> Tamagra ko'ma kaza osu havi anumzante'ma mani'naza no mani'zantmia antahi'naze. Ke osu anumzama antre'za tro hunte'naza zamo tamavazu higetma, avaririta fanane hukante vu'naze. <sup>3</sup> E'ina hu'negu nagra anage hu'na antahintahima eriamu hanugura neramasamue, magore huno Anumzamofo Avamu'ma agu'afima mani'ne'nia vahe'mo'a Jisasina huhaviza huontegahie. Hagi mago'mo'e huno Jisas'a Ra mani'ne huno osugahianagi, Ruotge Avamu'mo aza hanigenoke'za anankea hugahie.

<sup>4</sup> Hagi hakare'a ruzahu ruzahu museza me'neanagi, magoke Avamu'moke'za neramie. <sup>5</sup> Ruzahu ruzahu mono eri'za me'neanagi, Ramo'a magoke mani'ne. <sup>6</sup> Hagi ruzahu ruzahu kankamumpinti eri'zana e'nerianagi, magoke Anumzamofo hakare zampine, mika vahepina e'nerie. <sup>7</sup> Hu'neanagi Avamu'mofo eri'zamo'a magoke magoke'mofonte, mikomofo so'ezo efore hanigu ko tami'ne. <sup>8</sup> Hagi mago'mofona Avamupina knare antahintahiza (wisdom) nemino, mago'mofona ama' antahi'za (knowledge) nemie. Hianagi magoke Avamu'mo, <sup>9</sup> mago'mofona amentinti hu'za nemino, mago'mofona vahe'ma azeri knamare museza ami'ne. Hianagi magoke Avamu'mo zanami'ne. <sup>10</sup> Hagi mago'mofona ruzahu ruzahu kaguvaza eri fore hu museza nemino, mago'mofona kasnampa ke huamahu museza nemino, mago'mofona avamutmima rezagneno ke museza nemino, mago'mofona ruzahu ruzahu zamegeru'maru museza nemino, hagi mago'mofona ruzahu ruzahu zamageru'ma rukrehe hu museza ami'ne. <sup>11</sup> Hianagi magoke ana Avamu'moke, mika'a eri'zana erifore nehie. Hagi agra'a avesite magoke magoke'mofona nazano aminaku'ma hia musezana refko huno nemie.

### *Anumzamofo naga'mota Jisasi avufagna huta mani'nona naneke*

<sup>12</sup> Anahukna huno vahe'mofona magoke avufa me'neanagi, ru avufgamo ru avufgamo rekanuhegeno, magoke vahera fore huno mani'ne. Kraisi'a anahukna hu'ne. <sup>13</sup> Na'ankure mago'amota Jiu vahe manunkeno, mago'amota Griki vahe mani'none. Mago'amota kazokzo eri'za vahe manunkeno, mago'amota amne vahe mani'none. Hianagi tagra magoke Avamupi tina freta, magoke avufafi mani'none. Ana higeta ana miko'mota magoke Avamupinti tazahu'zana e'nerune.

<sup>14</sup> Hagi magoke tavufa me'neanagi, ru tavufa ru tavufamo rekanuhegeno magoke tavufa fore hu'ne. <sup>15</sup> Hagi agamo huno, nagra azana omuni'noanki'na, mago avufa omuni'noe haniana, e'i ana kema haniazamo'a, avufafintira azeri otregahie. <sup>16</sup> Hagi agesamo huno, nagra avurga omaninoanki'na, mago avufa omuni'noe haniana, e'i ana kema haniazamo'a, avufafintira azeri otregahie. <sup>17</sup> Hianagi mika avufamo'ma avurgagema mesigeno'a, inafinti kea antahigahie? Hianagi mika avufamo

agesage mesigeno'a, inafinti mna antahigahie? <sup>18</sup> Ana hu'negu tamage Anumzamo'a, magoke magoke tavufa eri mago huno ante'neankino, Anumzamo agra'a avesite mesie huno hire mete mete hu'ne. <sup>19</sup> Hu'neanagi mikä avufamo magoke avufgag'e'ma measina, avufamo'a inankna huno mesine? <sup>20</sup> Ana hu'negu hakare avufgamo eme rekanuhegeno, magoke avufa fore huno me'ne. <sup>21</sup> Hagi avurgamo'a azamofonkura huno, kagrama nazama hu'zankura antahi nonkamue huno osugahie. Ana zanke huno asenimo'a agamofonkura huno, kagrama nazama huzankura, nagra antahi nogamue huno osugahie. <sup>22</sup> Hianagi mago'a tavufamokizmia hanavezmi omne'ne huta huna tavufamo'za, ra eri'za e'nerize. <sup>23</sup> Hagi tagrama knare osu'ne huta huna tavufamofona knare'za hunenteta, hagi tageze tavufe huta huna tavufamofona kukena huzmanteta refi'netone. <sup>24</sup> Knare'ma huno amate me'nea tavufamo'za mago'zankura atupara nosaze. Ana nehunanagi, Anumzamo'a ana miko tavufa eri magoke higeno, tavufamofona eri magoke huno knare osu tavufamo'za knare'za nehaze. <sup>25</sup> E'ina hanigeno avufamo'a atane'zana amu'nozmfina omanegahie. Hagi anahukna huno amu'no zamifina oza aza huno mani'za megahie. <sup>26</sup> Hagi mago kaziga avufamo ata hozama eri sigeno'a, mika'mo'za ana atazana erigahaze. Hagi mago kaziga'a avufamo ra agima erinkeno'a, ana miko avufamo'za muse hugahaze.

<sup>27</sup> Menina tamagra Kraisi avufa mani'naze. Hagi magoke magoke'mota, mago avufga'a manite manite hu'naze. <sup>28</sup> Hagi mono eri'za erisagu Anumzamo'ma huhamprizmante'nea vahera, esera aposol nagare, ananteria kasanampa vahere, ananteria rempi huzami vahere. Ana huteno Anumzamo'a kaguvazama hu vahera zamazeri onetino, mago'amokizmia vahe'ma krifintima zamazeri kanamare muse'za nezamino, mago'amokizmia vahe'ma zamaza hu muse'za nezamino, mago'amokizmia kva eri'za eri muse'za nezamino, mago'amokizmia ruzahu ruzahu ageru ru muse'za zami'ne. <sup>29</sup> Mika'mo'za aposol nagake mani'nazafi? Mika'mo'za kasanampa vaheke mani'nazafi? Mika'mo'za rempi huzami vaheke mani'nazafi? Mika'mo'za kaguvaza hu vaheke mani'nazafi? <sup>30</sup> Mika'mo'za vahe'ma zamazeri knamare museza eri vaheke mani'nazafi? Mika'mo'za ruzahu, ruzahu zmageru, ru vaheke mani'nazafi? Mika'mo'za zmageru rekrehehu vaheke mani'nazafi? I'o anara osugahaze. <sup>31</sup> Hu'neanagi tamagu'areti huta agetere'nea muse zankura tamavesinteho. Nagra mago knare'zantfa huno mareri'nea kana tamaveri hugahue.

## 13

### Avesinte zamofo naneke

<sup>1</sup> Hagi nagrama vahe zmagerupintiro, ankero vahe'mokizimi zmagerura rugahuanagi, vahe'ma avesinte'zama omne'nenke'na, bero'mo ra ageru riankna nehu'na, zavena ahageno ageru riankna hugahue. <sup>2</sup> Hagi kasnampa ke hu muse'zana mika e'neri'na, Anumzamofoma oku'a antahizama'a e'neri'na, mika knare antahi'zana e'neri'na, nagra hanave namentintia hanugenno agona retufega hugahianagi, vahe'ma avesinte'zama omne'nenigeno'a ana miko'za hanua zamo'a amnezankna hugahie. <sup>3</sup> Hagi nagrama maka'zani'a zamunte omne vahe nezami'na, atresugenno tevefi navufa krefnane hugahianagi, nagripima vahe'ma avesinte'zama omne'nesigeno'a, ana miko'zamo'a amnezankna hugahie.

<sup>4</sup> Vahe'ma avesinte'zana, agazone huno mani'zane, avesinte'zane so'e avu'ava hu'zane, avesinte'zana kenunu hu'za omneno, ra agi

eri'zana omne'ne, avesinte'zana avufga ra hu avu'ava hu'zana omne'ne, <sup>5</sup> veganokno'zana omne'ne, agraguke antahi'zana omne'ne, agra ame'ama huno asi ovazi'zane, rumo haviza hunte'nea zanku nontahino agekanino mani'zane. <sup>6</sup> Vahe'ma avesinte'zamo'a havi avu'ava'zankura musena nosie. Hagi tamagezanku musena nehie. <sup>7</sup> Avesinte'zamo'a, agazone huno mani'neno maka knazana e'nerino, amentinti nehuno, maka'za fore hugahie huno nentahino, maka knazana erino vu'za me'ne.

<sup>8</sup> Vahe'ma Avesinte'zamo'a vagaoregahie. Ana hu'neanagi kasnampa ke huzamo'ene, ru vahe zamageru ru'zamo'ene, knare antahintahi zamo'a vagaregahie. <sup>9</sup> Na'ankure tagra osi'a antahi'none. Anama antahi'nona avamente kasnampa kea huama nehune. <sup>10</sup> Hu'neanagi ana miko'zamofo fatgo zama esigeno'a, osi'a zama nentahuna zamo'a fanane hugahie. <sup>11</sup> Ko'ma mofavre'ma mani'norer, mofavremo nehiaza hu'na nanekea nehu'na, antahintahia nehu'na, nagesa antahi'na refko'ma hu'noana mofavremo'za nehazaza hu'noe. Hu'neanagi rama nese'na, mofavre avu'ava'zana atre'noe. <sup>12</sup> E'ina hu'negu kapopima avugosa ke so'e osiankna menina nehunanki, henka'a Anumzamofo avufi oge age hugahune. Menina Agrira osi'a ke'na antahi'na hu'noanagi, henka'a kena antahi'na hugahue. Agrama nagri'ma maka nageno antahini hu'neankna hugahue. <sup>13</sup> Hagi ama'i tagufa'zamo mevava hugahie, amentintihu zane, fore hugahie huno antahi amuha hu'zane, avesinte zane me'ne. Hu'neanagi ana tagufa zampintira, avesinte'zamo agatereno tusi'a zana me'ne.

## 14

### *Kasnampa ke hu muse'zamofone, ru zamageru ru muse zamofo naneke*

<sup>1</sup> Hagi tamagra vahe'mokizmia hanavetita tamavesinezmanteta, Avamu'mofo musezantaminkura tusiza huta tamavesinteho. Hianagi Avamumofo musezanpintira, kasnampa ke huama huzanku tamavesinteho. <sup>2</sup> Na'ankure mago'mo ru ageru araniana vahetega norie. Hagi Anumzamofontega ru agerura nerie. Na'ankure mago'mo'a ana agerura antahi ama nosianagi, agra'a avamupi frakino oku me'nea ageru nerie. <sup>3</sup> Hu'neanagi iz'a'o kasnampa ke nehimo'a, vahe zamazeri hankavenetino, zmazahuke nezmasamino, zamarimpa zamazeri so'e huke zmasamigahie. <sup>4</sup> Iza'o ru ageru nerimo'a, agra'a azeri hanavenetie. Hu'neanagi iz'a'o kasnampa ke nehimo'a, mono kevumofo zamazeri hanavenetie. <sup>5</sup> Nagri'ma navemanesiana, maka'mota ru tamageru'ma aranazegu naveenesie. Hu'neanagi ra navesi'zana, maka'motma kasnampa ke hiho nehue. Hagi iz'a'o kasnampa ke nehimo'a, ru ageru nerimofona azeri agatere'ne. Hu'neanagi ru agerutamima nerimo'ma, ana ageru'mofo agu'agesa eri ama hanigeno'a, mono kevua zamazeri hanavetigahie.

<sup>6</sup> Menina nenfugatane nasareheta, tamagrite ne-ena ru agerutmima ranuana, inankna huta tamaza hu'zana erigahaze? Hagi nagra eriamana nehu'na, antahintahi nerami'na, kasnampa kene nehu'na, rempi hunerami'na, eriamana hu'na tmasamisugenoke, antahi amara hugahaze. <sup>7</sup> E'i asimu omne zantamimo, konkemo'ene zavenamo'ene ageru neriankna huno, ageru ru so'ema osaniana nankna hu'za ana konkene zavenamokea zangeru'ma arana'ana antahi amara hugahaze? <sup>8</sup> Hagi ufemo'ma krafa hu so'ema osnigeno'a, iza ha'ma hanigura retro hugahie? <sup>9</sup> Tamagranan e'i anahukna hugahaze. Vahe'mo'za nentahisaza zmageru'ma aranageno'a knare hugahie. Ru zmageru'ma aranage'za, nankna hu'za vahe'mo'za

ana ketmia antahi amara hugahaze? Ana keka'amo'a amne'zankna hugahie. <sup>10</sup> Mopafina hakare'a ruzahu ruzahu zmageru me'ne, anamokizmi zmageru'mofona agafa'a me'ne. <sup>11</sup> Hagi ru ageru arania kemofo agafa'ama antani ama'ma osnuana, nagra agritera ru vahe kna hunentesnugeno, agranena nagritera ru vahekna hunantegahie. <sup>12</sup> Tamagra'enena e'inahukna hugahaze. Tamagra Anumzamofo Avamu'mofo musezantminku'ma tusi'a antahintahima hanuta, maka mono kevuma zamaza hania Ruotge Avamu'mofo musezanku hankavetita eriama hiho.

<sup>13</sup> E'ina hu'negu, iz'a'o ru ageru aranimo'a, ana kema agra'a rekrehe hu'zankura, nunamu huno Anumzamofo antahigeno. <sup>14</sup> Na'ankure nagrama ru agerupinti'ma nunamuma hanuana, avamuni'amo nunamuna nehie. Hianagi antahintahini ni'afina nena'a nomane. <sup>15</sup> Hu'negu nagra na'a hugahue? Antahintahini'areti nunamuna nehu'na, Avamuni'areti ene nunamuna hugahue. Avamuni'areti zagamera nehu'na, antahintahini'areti enena zagamera hugahue. <sup>16</sup> Ana hu'negu kagrama avamupintike Anumzamofo agima erisaga nehanankeno'a, inankna hu'za ana ageru'ma noranamo'za antahi amara hu'za, kagrama hanana kerera tamage hu'za hugahaze? Na'ankure kagrama agima erisaga hananankea antahi ama' nosaze. <sup>17</sup> Na'ankure kagra, knare zantfa hunka Anumzamofo musenke huntegahane. Hu'neanagi rumofona aza hunka azeri han-kave otigahane. <sup>18</sup> Nagrama mika'motma tamagetere'na rama'a ru agerupinti'ma neruazankura, Anumzamofona susu hunte. <sup>19</sup> Hu'neanagi nagri'ma navemanesiana mono kevufima, antahi ama huga nanekema 5fu'a kema hanugen, ruga'amokizmima knare antahintahidi zami'zamo'a, ru agerupinti'ma (10 tauseni'a) kema hanuana agatere'ne.

<sup>20</sup> Nena fugatane nasarehetma, osi mofavregna huta antahintahia osihio, havi avu'ava huzankura aminte mofavre'gna hiho. Hagi antahintahidi tamifina ra vahe kna huta maniho.

<sup>21</sup> **Nagrini'a vahepina ontahi'naza agerupinti kea hunezami'na, ru vahe zamagipi' huvazi'na hugahuanagi, ontahigosaze,** huno Anumzamofo avontafepina hu'ne. (Ais 28:11-12)

<sup>22</sup> Hu'negu ru ageru'ma ru'zana e'i avame'zane, zamentinti hu'naza vahe'mokizmi avame zanompage, zamentinti osu vahe'mokizmi avame'zane. Hu'neanagi kasnampa kema hu'zana, zamentinti osu vahe'mokizmi zamaza hu'zankurompage, zamentinti hu'naza vahe'mokizmi zamaza hugahie. <sup>23</sup> E'ina hu'negu maka mono kevumo'zama eme atru nehu'zama ana maka'mozama ru agerutmima neranage'zama, ana ageru'ma noranamo'zo, zamentinti nosnamo'za efresu'za, tamagra neginagi nehaze hu'za hugahaze. <sup>24</sup> Hu'neanagi maka'motma kasnampa kema nehanageno, amentinti nosanimo'ene, kasanampa kema nosanimo'ma efresuno'a ana maka'mota hanaza kemo eriama hinkeno, kumi'a agra negeno, nagra kumi vahe mani'noe huno refko hugahie. <sup>25</sup> Ana hanigeno agu'afima oku me'n'e'nia agu'agesamo'a before hanigeno, agra arena reno avugosaregati umaseno, Anumzamofona mono hunenteno, hu'ama huno tamage Anumzamo'a tamagrane amu'nontamifi mani'ne huno hugahie.

### *Anumzamofonte so'e mono huntesaza zamofo naneke*

<sup>26</sup> E'ina hu'negu nenfugatane nasareheheta na'a before hugahie? Eme atru hanaza zupa, mago'mo mono zagamera nehinkeno, mago'mo rempi huneraminkeno, mago'mo kasefa zama Anumzamo'ma averi haniaza

huama nehinkeno, mago'mo ru ageru'ma nerinkeno, mago'mo rekrehe hugahie. Hagi e'i ana maka'zama hanaza zamo'a, knare huno mono kevua zamazuna huno, Ramofompina zamazeri hankavetigahie. <sup>27</sup> Iza'o ru ageru'ma aranuno'a, taremake ana znagerura ri'o. Hagi tagufa agetera'amo'za oriho. Mago'mo ru agerura nerina, mago'mo rekrehe hunete'na hiho. <sup>28</sup> Hu'neanagi rekrehe hu vahe'ma omani'nena, ru ageru ru vahe'mo'a akoheno taganeno mono kevufina mani'neno, agra'a Anumzamofontega agerura akoheno rugahie. <sup>29</sup> Zametrenke'za tareo tagufa kasnampa vahe'mo'za kasnampa kea nehanage'za ruga'amo'za ana nanekea refko hu'za antahihiho. <sup>30</sup> Hianagi Anumzamo mopafi mani'nesimofonte'ma kasefa'za averi nehina, kotama kema nehanimo'a, kea osu taganeno mani'enkeno, kea huama hugahie. <sup>31</sup> Hagi tamagra maka'mota amne kasnampa kea magoke magoke'mota hutehute nehnageno, maka'mofona antahintahia nezamino, zamazeri hankavetigahie. <sup>32</sup> Kasnampa kema hu avamu'mofo agorga'a mani'ne'za, kasnampa vahe'mo'za knazmima esige'za, kasnampa kea hutere hugahaze. <sup>33</sup> Na'ankure Anumzamo'a ke'onke'za eri savrisavrahu Anumzana omani'ne, hagi rimpia fru Anumzane. Maka Anumzamofo mono kevu naga zamazeri ruotge hu'neankna hiho. <sup>34</sup> Mono kevuma eritru hanafina, a'nemo'za akoh'za vene'nemofo zamagorga maniho. Na'ankure kema hu'zankura hu izo huozmantenaze. Tra kemo'ma hu'nea kante ante'za vene'nemofo zamagorga'a maniho. <sup>35</sup> Hagi a'nemo'za mago'a zanku antahisunema hanu'za, nontega nezmave antahigeho, na'ankure a'mo mono kevufi ke hu'zamo'a knareru osu'ne. <sup>36</sup> Tamagrama antahi'zana Anumzamofo kema antahizamo'a, tamagripinti agafa huteno, tamagripinke vagaregahie hutma Korinti vahe'mota nehazafi? I'o, tamagra havige nehaze.

<sup>37</sup> Mago'mo'ma huno kasnampa vahe mani'noe huge, avamupi antahi'zane vahe mani'noe huno hanimofona, atrenkeno anamo'a amama keramua avonkura, Ramo huo huno hunte'nea kasege huno agra'a antahi'ama hino. <sup>38</sup> Hagi ama avoma keno antahino osanimofona, agrira ke'za antahi'za osugahaze. <sup>39</sup> Ana hu'negu nafu nagnaheta kasnampa ke hu'zankura tusiza huno tamenesinketa, ru agerupinti'ma ru'zana aseovaz-ihio. <sup>40</sup> Hianagi maka zama hanaza zamo'a, fatgo hina knare kankamunte eriteta hiho.

## 15

### *Jisasi fri'nefinti oti'nea naneke*

<sup>1</sup> Hanki nenfugatane nasarehegata Anumzamofo Knare Musenke ko tamasamugeta eri'neta, oti hanavetita anankere tamentinti hu'naza naneke humragesa hunaku nehue. <sup>2</sup> Ama'i ana Knare Musenkereti tamahokeno tamagu'vazineanki, tamagrama amama huama nehua kema azeri akonama osnageno'a, tamentintimo'a amne'zankna hugahie.

<sup>3</sup> Na'ankure miko'zama agatere'neazana nagra ko erite'na, neramas-mue. E'i anazana Anumzamofo avontafepi kre'nea kante Kraisi'a tagri kumiku huno efri'ne. <sup>4</sup> Anumzamofo avontafepima krente'nea kante ante'za asentetageno frino maniteno tagufa knare oti'ne. <sup>5</sup> Pitante (Sifas) ufore huteno, ete 12fu'a amage'ma nentaza disaipol nagate ufore hu'ne. <sup>6</sup> Ana huteno 500'a agatere'a amage'ante disaipol naga mani'nazafi ufore hige'za ana miko'mo'za ke'naze. Anampintira rama'amo'za menina ofri manizageno, hagi mago'amo'za fri'naze. <sup>7</sup> Hanki anante Jemisinte ufore

huteno, ete maka aposol nagate efore nehuno, <sup>8</sup> hagi henka'arfana, kasentega kna me'negeno ame huno kasenante'nea ne', e'i nagrite efore hu'ne. <sup>9</sup> Na'ankure Anumzamofo aposol nagapina nagra henka vahere, nagrikura tamagra Anumzamofo eri'za vahere hutma huga vahera omani'noe. Na'ankure Anumzamofo mono nagamokizmi ha'rezmante'noe. <sup>10</sup> Hu'neanagi Anumzamofo asunku'zanteti nagra amanahu kna hu'na mani'noe. Hagi nagri'ma asunku'ma hunante'nea zamo'a amne zankanara osu'ne. Ete ana miko eri'za nagara zmagatere'na eri'zana mago'ane eri'noana nagra'niompage, Anumzamofo asunkuzamo'a nigrane me'nege'na eri'noe. <sup>11</sup> Hanki nagra huama hanuo, zamagra eri'za naga'mo'za huama hnazo, tagra ana nanekege huama nehunketa tamagra tamentintia hu'naze.

### *Makafri vahe ot'i'snaza naneke*

<sup>12</sup> Hagi Kraisi'a fripinti ot'i'ne hu'za huama hu'nazana, inanka huta mago'amota amu'nontmifintira, vahe'mo'za fripintira o'notize huta ne-haze? <sup>13</sup> Hu'neanagi friteno ot'i'zama omneneresina, Kraisi'enena ora otisine. <sup>14</sup> Anumzamo'a Kraisia fripinti azeri oraot'i'neresina, mono nanekema huama hunazamo'a amne'zankna higeno, tamagri tamentintimo'enena amne'zankna hisine. <sup>15</sup> Mago ene Anumzamofona havige eri'za vahere huno tazeri fore hisine. Na'ankure Jisasina fri'nefinti Anumzamo azerioti'ne huta tagrama hanuna zamo'a, Anumzamofona ha'rentegahie. Jisasi'a ora'otineresina, fri'namo'za ora'otizaresine. <sup>16</sup> Na'ankure fri'nea vahera azeri oranotiasina, Kraisinena azeri ora otisine. <sup>17</sup> Hanki Kraisima azeri oraotineasina tamagri tamentintimo'a amnezanka higeta, tamagra kumipi manizasine. <sup>18</sup> Hagi Kraisinku zamentinti nehu'za fri'naza vahe'mo'za fanene hazasine. <sup>19</sup> Hagi Kraisimpi menima tasimu erita mani'nona nomanizampinke taza hugahie huta tamentinti hanunana, vahe'mo'za zamasunku hunezmantaza vahera zamagatereta, tusi'a zamasunku hurantesaza vahe manigahune.

<sup>20</sup> Hu'neanagi Kraisia fripinti Anumzamo azeri ot'i'neazamo'a, fri'naza vahe'mokizmia ese ne'za hozafinti eriankna hu'ne. <sup>21</sup> Na'ankure magoke ne'pinti fri'zana egeno, anahukna huno friteno ot'i'zana magoke nepinti e'ne. <sup>22</sup> Anahukna hu'za Adamu fri'neaza hu'za maka naga'amo'za frisnageno, anahukna hu'za Kraisi'ma kasefa huno asimu'ma eri'neaza hu'za, naga'amo'za zmasimura erigahaze. <sup>23</sup> Hu'neanagi mago magomofona fripinti'ma azeri otisiana kankamuma'a metere hu'ne. Esera Kraisi ot'i'neankino ananteria, Agrama ete esnia knafina, Kraisi naga'moza otigahaze. <sup>24</sup> Ananteria mika'zama vagare knamo esigeno, Jisasi'a maka hanave kumatamine vahe'ene, ugagota kva vahe'ene mika ama mopafi hanavema zamahe fanane hutenu'o'a, Kraisi'a hanave'a Nefa Anumzamofo azampi antegahie. <sup>25</sup> Na'ankure miko'zamo'a Kraisi kvafi me'nenigeno, mika ha'vahe'amokizmia zamazeri fenkamitegahie. <sup>26</sup> Henkarafama, azeri fanene haniana fri'zamo ha'ma rerenertea zana, ahe fanane hugahie. <sup>27</sup> Na'ankure avontafepi amanage hu'ne, ***Mika'za kegavahu hanavea Anumzamo'a Kraisi ami'ne.*** (Sam-Zga 8:6) Hu'neanagi ana hanavea Anumzamo'a Kraisi ami'neankino, Anumzamo'a Kraisi agorga omanine. <sup>28</sup> Mika'zana Kraisi'a agatereteno, Agri'ma hankavema ami'nemofo, Nefa Anumzamofo agorga maninkeno, Anumzamo hakare zampine, mika kaziga manigahie.

<sup>29</sup> Fripinti'ma azeri ot'i'zama omne'neresina, na'a hugahaze fri vahe zamaza hukure hu'za mono ti nefraza vahe'mo'za? Ana fri vahe'mo'zama o'otisageno'a, hagi na'ante fri vahera zamaza hukure hu'za mono tina nefraze?

<sup>30</sup> Hagi nahigeta tagranena hazenke zampina hakaregna nemnune?  
<sup>31</sup> Tamage hu'na, nenfugata nensarogta neramasmue. Ranti Krais Jisas-impi mani'nena tamagriku muse nehua zamo'a, mika zupa fri'za hutere nehue. <sup>32</sup> Efesasi kumapima afi' zagane ha'ma hu'noana, tamagrama antahi'zana nagra na'a eri'noe? Hanki fri vahe'mo'za o'otizaresina, **Menina ne'zane tine negahune, na'ankure okina frigahune.** <sup>33</sup> Hanki negi vahera omaniho. Havi zamavuzmava nehaza vahe'mo'zane utagroteta manisazana tamazeri havige vahe aseghahaze. <sup>34</sup> Tamagra knare antahin-tahi enerita kumira osiho. Na'ankure mago'amotma Anumzamofona keta antahita osu'nazagu, ama kema nehuana tamagaze hinogu nehue.

### *Fripinti azeri otisia avufgamofo naneke*

<sup>35</sup> Hu'neanagi mago'mo'a anage hugahie. Inankna huno fri vahera zamazeri otigahie? Inanknahu zamufgane otigahaze? <sup>36</sup> Kagra Neginenane! Avimzama mopafi ase'nankeno'a fritenoke rutaha huno nehage. <sup>37</sup> Avimzama nesanana rutareno ko hage'nea zana nonkrine. Hianagi witi avimzamapi ru avimzazana amne ase'nankeno henka hageno ruzahura nehie. <sup>38</sup> Hu'neanagi Anumzamo Agra'a avesite mika avimzamofona, mago mago avimzamofona agri'a avufga'a amite amite hu'ne. <sup>39</sup> Maka zagamofona mago'zahu avufga omne'ne. Vahe'mota mago'zahu tavufgane manunkeno, zagagafamo'za ruzahu zamavufaga erizageno, namamo'za ruzahu zamufga erizageno, noza'mo'za ru zamufga eri'naze. <sup>40</sup> Anahukna huno monare avufga megeno, mopare avufga me'ne. Hu'neanagi monare avasese zana mago megeno, mopare avasese zana mago ete me'ne. <sup>41</sup> Hanki zagemofona mago avasaseza megeno, ikamofona ru avasaseza megeno, hanafitamimofona ru avasase zana me'ne. Na'ankure mago mago hanafi'mo'a, agra'a avasasezane me'ne.

<sup>42</sup> E'inahu kna huno fri vahe'mokizmi zamazeri otisia zupa, kahefa zamufga fore hugahie. Kerifi asentesia avufga fanane hugahie. Hanki fripinti ete otisania avufga, fanane osu mevava hugahie. <sup>43</sup> Hanki kasrino knare osu'enenia avufga asentegahie. Hianagi azeri otisia avufga, knare huno masa'ane avufgare azeri otigahie. Hanave'a omne avufga asentegahianagi, hanave nentake avufga azeri otigahie. <sup>44</sup> Hagi asentesnia avufga mopafi avufga asentegahie. Azeri otisnia avufga, monare avufga azeri otigahie. Ana hu'negu mopare avufga me'nesigeno'a, anazanke huno monare avufgane megahie. <sup>45</sup> Hagi Anumzamofo avontafepina anage huno krente'ne, **Ese nera Adamu tro higeno, asimura erino mani'ne.** (Jen-Agf 2:7) Hagi henka fore hu'nea Adamu'a zamasimu zami Avamu efore hu'ne. <sup>46</sup> Hu'neanagi esera monare avufga fore osu'ne. Hagi esera mopare avufga fore hutegen, henka monare avufga fore nehie.

<sup>47</sup> Kota nera mopafinti kugupa erino tro higeno asimura erino mani'ne. Hianagi henka nera Kraiskino monafinkati e'ne. <sup>48</sup> Anahukna huno mopare nera manigeno, mopafi vahe'enena mani'naze. Hagi anahukna huno monare nera manigeno, monare vahe'enena mani'naze. <sup>49</sup> Menina mopare

tro hu'nea ne'kna huno tro hurante'neankita, anahukna huta henka'a monafinkati ne'kna hugahune. <sup>50</sup> Nena fugata nensarogata amanage hu'na neramasamue, ama tavufgarera Anumzamofo Kumara erisanti oharegahune. Anahu kna huno fananene hu'zamo'a manevava zana erisanti oharegahie.

<sup>51</sup> Oku naneke tmasami'za huanki antahiho, mika'mota ofrigahunanagi tagra ruzaha hugahune. <sup>52</sup> Mago knama esigeno'a, tauraga keramage nehuna kna huno, vagare ufenkrafa hanigeno'a, ana fri'naza vahe'mo'za o'netisageta mika kasefa huta mani'nomota tavufamo'a ruzaha hanigeta onkasari hanave tavufa erigahune. <sup>53</sup> Na'ankure kasri avufgamo'a onksari avufga eri hankrenkeno, fri avufgamo'a ofri avufga eri hankregahie. <sup>54</sup> Hu'neanagi ana kasri avufgamo'a onkasri avufga erisigeno'a, fri avufgamo'a ofri avufga erina, avontafepi amanage huno kre'hea kemo e'ama hugahie, **Fri'zana Anumzamo ahe fanane hugahie!** (Ais 25:8)

**55 Fri'zamoka ina hanaveka'a me'ne? Fri'zamoka atama neminazanka'a ina me'ne?**

(Hos 13:14) <sup>56</sup> Kumi'mo fri'zamofo atazana eri fore nehigeno, kumi'mo'a hanave'a kasegefinti e'nerie. <sup>57</sup> Hu'neanagi Anumzamofo muse huntesune, Rantimofo Jisasimpi Kraisimpi taza higeta hara agatenerone.

<sup>58</sup> E'ina hu'negu tusiza hu'na navesi nermantaoa nenufugata nensarogta, oti hanavetita kaza osu maniho. Hakare zupa Ramofo eri'zama eri'zankuke nentahita maniho. Hagi antahio, Ramofo eri'zama tamamu'nama nehagegetma e'neriza zamo'a amnezanknara osugahie.

## 16

### *Anumzamofo amage nentaza vahe'mokizmi zago hage'zamisnaza naneke*

<sup>1</sup> Hagi Jerusalemi kumate mani'naza mono naga'mokizmi zagoma eri atruma nehaza zanku hu'za hue, Galesia kaziga mani'naza mono naga'ma hiho hu'na huzmante'noaza hiho. <sup>2</sup> Hakare Sontamofona ese knare, tamagra mago mago'mota zago'ma erisafintira, erisnaza avamente refko hutma eri atru hu'enke'na, nagrama esua knafina eri tru huzankura amuhoa osaneno. <sup>3</sup> Nagrama uhanatisu'na huhampri' zmante'nesamokizmia, huzmanta'nena, ana musezamofo agofetura avonkrenta'nena eri'za Jerusalemi kumate vugahaze. <sup>4</sup> Hagi nagrama vuga'ma hanugen'o, zamagra nagrane vugahaze.

<sup>5</sup> Hu'neanagi nagra Masetonia vute'na, henka tamagritega egahue. Na'ankure Masetoniati ru kitagi'na vugahue. <sup>6</sup> Tamagrane osi'agna umanisuo, ete zasi ko'ma atu ikampina tamagrane mani vagaresugeta, inantegama vunaku'ma hanurega naza hu'tma hunante'nage'na vugahue. <sup>7</sup> Na'ankure nagri'ma navenesiana menima vanu'na tamageme vuku nosuanki, Anumzamofo avesima me'nenke'na mago'a zaza kna tamagrane umani'ne'na vanuegu nehue. <sup>8</sup> Hu'neanagi Efesasi kumate mani'nesugeno, Pentikos kna efore hugahie. <sup>9</sup> Na'ankure eri'zamo'ma knare huno vuga kana rama'a efore nehigeno, rama'a vahe'mo'zanena ha' renenantaze.

<sup>10</sup> Hanki Timoti'ma esigeta, nagra Ramofo eri'za e'neruankna huno e'neria neki, ke'amofona antahinemita azeri so'e hiho. <sup>11</sup> Kva hunenteta agia eri haviza osiho. Hanki ana nehuta aza nehnageno mani'neno, fru huno nagra mani'ne'nurega ehanatisnie. Timoti'ene mago'a nafu naganahe'zane ete esnagu zamavega ante'na mani'noe.

<sup>12</sup> Hu'neanagi Apolosi, nerafu kazigagu hu'za hue. Tamagritegama nerafuzanema esia kazigatira, nagra razampi azeri hanaveti kea nesamue. Hagi menima esiana agri'a avesi omne'neanagi, kankamuma me'nenko'a agra egahie.

*Huvagare ke zamazeri hanavetinaku zamasmi'nea naneke*

<sup>13</sup> Hagi kava huta nemanita, tamentinti zampi oti hanavenetita, korera osu hanavetita maniho. <sup>14</sup> Maka'zama hanaza'zampina tamavesinte avu'ava zampinti hiho.

<sup>15</sup> Nenfugta nensarogta tamagra antahi'naze, (Stefanisi ene noma'afi mani'nazana, ese'ma Akaia kumateti zmagu'a rukrehe hu'naza nagare. Ana hute'za zamagra zmagu'a mono eri'zampi ami vaganere'za mono eri'za e'neri'za nagare). <sup>16</sup> Hanki tamagranena e'inahukna vahe'mofo avu'ava avaririta mani'neta, hagi anahukna eri'zama zamaza hu'za erisazamokizmine, nezmavariritmazmagorga'a manihogu neramasamue. <sup>17</sup> Stefanasi ene Fotunatusi'ene Akiakusizama aza zankura nagra muse hu'no'e. Na'ankure tamagrama huga'zana osazage'za zamagra eme naza hu'naze. <sup>18</sup> Na'ankure knare antahintahi nami'za avamu'nifina nazeri fru nehu'za, tamagri'ene ana hu'naze. E'inahukna vahetmina zamege so'e hiho.

<sup>19</sup> Esia kaziga mani'naza mono naga'mo'za musenke atreramantaze. Akuira'ene Prisila'ene noznifima nemaniza mono naga'mo'zanena anahukna hu'za zmagu'areti musenkea atrenermantaze. <sup>20</sup> Maka Anumzamofo naga'mo'za musenkezmia atreramantaze. Hanki tamagranena ana zanke huta mono naga'mota muse ohunte ahunte hiho.

<sup>21</sup> Poli'na nagra, ama musenkea, nagra nazampinti kre neramue. <sup>22</sup> Hanki Ramofoma avesi ontessimo'a, sifnafi manino haviza hugahie. Rantimoka eno! <sup>23</sup> Hanki Ramofo Jisasi asunku zamo'a tamagrane mesanie. <sup>24</sup> Nagri nevesi'zamo'a maka Krais Jisasimpima mani'naza naga'motarega mesanie. Tamage.

## 2 Korint Poli'a Korinti Vahe'mokizmi Nampa 2 Avonkrezami'nea Naneke

*Anumzamo'ma aposolo naga'ma eri'zama zami'nea zamofo ke Poli'a kre'nea naneke*

<sup>1</sup> Hagi ama avona Poli'na Anumzamo, Krais Jisasi'a aposol eri'za vahe manio huno huhamprinante ne'mo'nane, nerafu Timoti'ene kreneramu'e. Ama ana avona, Korinti mono nagate'ene ana miko Akai (Greece) kaziga Anumzamofo mono naga'ma mani'narega kreneramu'e. <sup>2</sup> Anumzanti nafatimofone, Ranti Krais Jisasi asunkuzamo'ene rimpia fruzamo'a tamagrane mesie.

*Hazenkefi ufresageno Anumzamo zamazeri fru hania naneke*

<sup>3</sup> Hagi Rantimofo Krais Jisasi Nefa, Anumzamo Agrake mika asuragi zamofo agafa'a mani'neno, tazeri fruma nehimifo agi erisaga huta musena huntesune. <sup>4</sup> Mika knazantifina Agra tazeri fru nehie. E'inahu nehigu Anumzamo'ma tagri'ma nehiankita rumokizmia knafima mani'nesageta zamazeri fru hanune. <sup>5</sup> Na'ankure Jisas Kraisi'ma, rama'a ataza eri'neankita, tagranena tata anahukna huta enerunagagi, anahukna huno Kraisi rimpia fruzamo'a tagu'afina avi'nete. <sup>6</sup> Tamagri knare zanku'ene tamaho'ma ke'zanku'ene, tagrira tazeri havizana hugahaze. Tamagrama fru huta manisagu, Anumzamo'a tagrira tazeri fru nehie. E'i ana zamo'ma eama nehiana, acoheno manineno, tagrama eneruna kna knazama e'nerimofonte efore nehie. <sup>7</sup> Ana hu'negu hanave antahintahi nehuta amuha'ma huramunana, tagrama erisuna tatazampintima, tamagra'enenema erisazana, tamagra anazanke huta Anumzamo'ma fruzama tamisifintira erigahaze.

<sup>8</sup> Nenfugatane nasarehetanena antahigahaze, Esia kaziga kumapina knazampima ufre'nonana, ana kna'zamo'a tazerino arentakro nehuno, tagri hanavea tazeri agateregeta, ana knazana eriga osuta hago nefrumpi huta antahi'none. <sup>9</sup> Tamage, tagrama tagu'afima antahunana, trake'mo refko huranteno frigahaze huno hiankna nehune. Hianagi e'inahuzama fore'ma nehiana, tagra hanavegura ontahigahunanki, Anumzamo'ma fri'nea vahe'ma zamazeri onetia hanavegu antahigahune. <sup>10</sup> Hagi fri kankamumpintira tahokeno tavreneankino, ete rune, tavregahie huta tagra amuhara Agriku nehanunkeno Anumzamo'a mago'ane tahokeheno tagu vazigahie. <sup>11</sup> Tamagrama nunamuma hutma taza hazazamo'ma eama hiana, rama'a vahe'mo'za hu musena hu'naze. Na'ankure tagri'ma kegava kirantezanku nunamuna hazageno, Anumzamo'a ana nunamuntamia antahizmino taza hu'ne.

*Poli'a Korinti vahe'mokizmia rezmatga osu'nea naneke*

<sup>12</sup> Hagi tagrama musema hunana, tamagra manuna knafina ama' tagu'tagesama tagu'afima e'nerita, hakare'za hu'nazampi mani fatgo ne-huta, ruotge huta nemanita, Anumzamofo so'e avu'avazante nemanita, ama mopafi antahizankura ontahi'none. <sup>13</sup> Na'ankure avoma kreraminofina, tamagrama nehampritma antahini osuga'zana kreonte'noanki, nagrama antahuana, mikozana amatfa hu'naze. <sup>14</sup> Meninena tagrira tageta antahirami so'e osugahazanagi, Rantimo Jisas Kraisi esia zupa, tamagra musena

tagrikura nehanageta, tagranena anazanke huta tamagrikura musena hugahune.

<sup>15</sup> Nagra tamage ko ke'na antahina huneramina, ese'ma retro hu'noana, tamagrite'ma esu'azamo'a tare asomura erigahaze. <sup>16</sup> Masedoniamma ene-vuna eme tamageme evute'na, ete anantegatima esugeta tamagra naza hanage'na Judia vugahue. <sup>17</sup> Nahigeno enaku'ma retromenhu'neana atreno ome huta nantahigegahaze? Nagrikura antahintahini'a retrora osu'nefi huta hugahaze? Hifi nagra ama mopafi vahe'mo'za i'o hugazanku izo nehu'za, izo hugazanku i'o nehazankna vahere hutma nagrikura nehaz? <sup>18</sup> Hu'neanagi Anumzamo'a Agra'a ke'are oti ne'kina, tagranema neramasamuna nanekemo'a, tamagema huta izo hanuta, izo hugahune. I'oma hanuta, i'o hugahune. <sup>19</sup> Na'ankure Anumzamofo mofavre Jisas Kraisi agi agenkema nagragi, Timotiki, Sailasaki hutama neramasamunana, Jisas Kraisi'a Anumzamofo nemofonku'ma huama huta neramasamunana, Agra izoma nehuno'a, i'o osu Ne'mofo agenke huama huta neramasamune. <sup>20</sup> Anumzamo'ma mika huvempa kema huntea kemo'a, Jisasimpi avufga'a efore hu'ne. E'i ana hu'negu, Jisasi agima husga huta tamage huta hunazamo, Anumzamofona ra agi nemie. <sup>21</sup> Hagi Agrake Anumzamo, tagri'ene tamagri enena tazeri hanavetino, Kraisimpina huhampitante'ne. <sup>22</sup> Avame'za Avamu'areti tagu'afi anteneranteno Nagri vahere huno hu'ne. Henkama hakare'za tamisiazamofo huvempa hu'ne.

<sup>23</sup> Hianagi Anumzamoke nagri nagu'namena keno antahino hu'ne. Nagra tamage nehuankino Anumzamoke ana tamage keni'a refko hunantegahie. Ana agafare nagra Korinti kumatera mago'ane ome'noe. Na'ankure nagra hanave kefinti eme tamazeri fatgo osugahue. <sup>24</sup> Hianagi tamagri tamentintimofo kvagriramante'nakura nosunanki, magoka tamagrane eri'za erisunketa tamagra muse hugahaze. Na'ankure tamentintifina, tamagra oti hanavetigahaze.

## 2

<sup>1</sup> E'ina hu'nagu nagra henkama tamagri'ma tamage'naku esu'na, amanahukna hu'na mago'ane tamazeri tamagazea eri oramisue hu'na nagesa nentahue. <sup>2</sup> Na'ankure nagrama tamarimpa eri haviza hanenko'a, iza nagrira nazeri muse hugahie? Hianagi tamagri'ma, tamarimpa knama eritamumotma nazeri muse hugahaze. <sup>3</sup> E'ina hu'negu, amanahukna avona kreneramue. Nagrama esoa knarerera, nazeri musema nehaza nagara, zamarimpa kna eri ozamisue. Tamage nagra antahi'noe, tamagra musema hanage'na, nagranena muse hugahue. <sup>4</sup> Narimpamo'a tusigna nehige'na zavinete'na, ama avona kreneramue. Tamarimpa tamazeri kna hunakurompage, nagrama nagu'afima navesineramantoaza antahiamma hanazegu kreneramue.

### Vahe'mofo kumi'a atrentezaomofo naneke

<sup>5</sup> Hagi mago'mo'ma tamarimpa knazama eritamiana, tamagrama hazaza hu'na nagra rama'a narimpagna hunontoe. Na'ankure anamofona mago'a arimpa kna eriominkure. <sup>6</sup> Rama'amota anamofona ko mago tamarimpa hunontazageno, anazama hu'nea knazamofa avamente mizama'a e'nerie. <sup>7</sup> Ru arimpagna hu'zamo azeri haviza hanigeno asunkuzampi mani'zankura, kumi'a atrenenteta azeri so'e hiho. <sup>8</sup> Ana hu'negu nagra huhankaveti'na nehuanki, tamagrama tamavesi'nentaza zana erinte ama' hinkeno agra keno. <sup>9</sup> Ama avoma kreramua agafa'a, ana

miko kema tamasami'noa kemofo amagera nentafi, reramahe'na kenaku krenereramue. <sup>10</sup> Hagi tamagrama mago vahe'ma kumizmi atrezamantesazana, naganrena kumizmia atrenezmantoe. Na'ankure nagra kumizmia atrenezmantoe, [kumima atrezmantegazama menenkena tamage hu'na atrenezmantoe], Kraisi avurera tamagrama knarema hanagu atrenezamantoe. <sup>11</sup> E'inahukna hanuta Satana reravataga hania zampintira evuoramisune. Na'ankure ko Sata'a reraheno kenaku tro hunte'nea havi antahi'zama'a, keta antahita hu'none.

### *Poli'a Tatusi kenaku hu'nea naneke*

<sup>12</sup> Hagi nagrama Troasi kumate Krais Knare Musenke huama hunaku uhanatugen'o'a, Ramo'a kankamuna erinaginantene. <sup>13</sup> Hianagi narimpa fru e'ori'noe. Na'ankure nenufu Tatusi'a tamagri tamagenkea erino ome'nea zanku, Troasia atre'na Masedonia nevu'na, hufru huzmantoe.

### *Anumzamofo hankavefi Sata agateresanuna naneke*

<sup>14</sup> Hianagi Kraisimpima vugoteno tavreno nevigeta ha'ma hugateneronkeno tagripi huvazino eri'zana erigeno Agri'ma ke'za antahi'za hu'zamo'ma maka kaziga knare manamo'ma vuno eno hiazama nehia Anumzamofona humuse huntue. <sup>15</sup> Kraisi'ene hagerfinonku knare mna neviankna nehanunkeno, Anumzamo'a muse hugahie. Ana naneke vuno eno nehigu mna nentahizankna hu'za maka vahe'mo'za nentahize. Kefozazimifinti zamahoke nehea vahe'mo'zane kefrozazimifinti zamahoke nohea vahe'mo'zanena nentahize. <sup>16</sup> Fananema hanamokizmirera fri hi'mana nevie. Hianagi tasimuma erita manisuna vahe'motarera, asimu erino mani mana vugahie. Hianagi i'za ama ana erizana eriga hu'ne? <sup>17</sup> Mago'amo'za zago erigahune, nehu'za Anumzamofo naneke huama nehazana, tagria Anumzamo hurantegeta fatgo huta huama nehune. Huama'ma nehunana Kraisi'a tagu'afi maninegeta Anumzamofo avure huama nehune.

## 3

### *Aposolo vahe'mo'za kasefa huhagerafi kemofo eriza vahe mani'naza naneke*

<sup>1</sup> Hagi tagra mago'ane agafa huta tavufga erisaga hunaku nehumpi? Hifi mago'a vahe'mo'zama nehazaza huta tagra, tavufa erisagahu avo kreho nehumpi, hifi rumo'za avonkrerami'za tagri husga hihogu nehuno? <sup>2</sup> Tamagra'a tagri avona mani'naze. Ko tagu'afi krentenegr'e'za miko vahe'mo'za nehampriza antahiza ke'za nehaze. <sup>3</sup> Kraisintegati kretregeno e'nea avontafe kna huta eama nehazageta, tagra kegava nehune. Ana avona avo zotaretira onkre'neanki, kasefa huno mani'nea Anumzamofo Avamuteti krente'ne. Hagi ana avona havere kreonte'neanki, vahe'mofo tumopi krentene.

<sup>4</sup> Ama ana miko zankura Kraisimpina, Anumzamofonte tamentinti nehuta hankave e'nerune. <sup>5</sup> Ana miko zama nehuna zankura, tagra'a hankavere nehune huta osugahune. Hianagi Anumzamo agra'a hankavereti hunerante. <sup>6</sup> Agra anazanke huno tagririra huranteno hankavea tamigeta kasefa huhagerafi kema hu'nea zamofo kegava hu'netu eri'zana e'nerune. Avompima krente'nea zankura nosunanki, avamupi zanku nehune. Na'ankure Avompima krente'nea zamo'a zamahe nefrie. Hianagi avamumo'a, zamasimu nezamie.

**7** Hagi, havere erivakokino krente'nea avompinti fri'zana avareno neazamofo eri'zamo masa'ane e'ne. Hu'negu Israeli vahe'mo'za, **Zamavuginki hige'za Mosesena avugosafina onke'naze. Na'ankure masazamo avugosafintira remsa hige'za nonkageno, ana msamo'a akoheno avugosafintira resu hu'ne.** (Diu-Kas 35)

**8** E'ina hu'neanagi Ruotge Avamumofo erizamo'a mago'ane agatereno hanave'ane hihamua omanegosif? **9** Na'ankure vahe'mofoma knama nemia eri'zamofona masa'ane hankave'a me'nenigeno'a, fatgo eri'zamo'a agetereno ra masa'ane hankave'a megahie. **10** Anumzamofo tusi'a masane hanave'amoma me'neana kasefa eri'zama Anumzamo'ma erinea zamo, koma Anumzamo'ma eri'nea eri'zamofo masa'a agatere'ne. Ana higeno ko eri'zamofa masa'mo'a ko vagarene. **11** Hanki fanane huno'ma nevania zamo'ma hankave'ane me'nenigeno'a, mago'ane mevava huno vania zamofo, hankavemo'a agateregahie.

**12** E'ina hu'negu tagra fore'ma hanigu amuha nehuta, kea hankavetita nehune. **13** Tagra Mosese knara osu'none, **Agra avugosafi tavravenu refitenegeno, Israeli vahe'mo'za avugosafi masazamo'ma fananema hiama'a onke'naze.** (Diu-Kas 34:33-35) **14** Hianagi antahintahiza zamimo'a hanavetino antrako hige'za maniza neazageno, ama knarerera ehanatine. Na'ankure korapa huhagerafi kasegema nehamprizageno'a, ana tavravemo'a refiteno ne-egeno, Kraisimpi ana tavravea eritre'ne. **15** Hianagi meninena Mosese'ma krente'nea avoma hampri'zana, ana tavravemo antahintahizazmia refite'ne. **16** Hu'neanagi vahe'mo'zama Ramofontema zamagu'ama rukrehe'ma hazageno, refimatezmantenea tavravea erinetre. **17** Ana hu'negu Ramo'a Avamukino, Ramofo Avamu'ma mani'nesirega, kinarente'zana omanegahie. **18** Hianagi miko tavugosa refiote vahe'mota, Ramofo masazama'amo'a tagrite remasa nehiteta, kapomo hiankna huta remsa huta Agrikna hunkeno, Ramo'a Avamukino, agri masazamo'a mago'ane tagripina remsa nehie.

## 4

### *Mopa kavofi knare feno zantami me'nea zamofo naneke*

**1** E'ina hu'negu Anumzamo'ma asuragi rante'neazamo higeta, tagra ama erizana e'nerune, e'igu tagrira tavesra nosie. **2** Hianagi tagra tagazegu huno oku'a huga avu'avara nosune, vahe'mokizmi rezmatga huta zamaizeri havizahu avu'ava zana nosuta, Anumzamofo kegaga eriruvahe huta vahe'mokizmnia rezmatga nosune. Hianagi Anumzamofo avure'ene vahe'mokizmnia antahizampina, tagripina tamage'zamo eama hanigeza kegahaze. **3** Tagrama Knare Musenke huama hunazamo'ma ama'ma nosiana, fananema hanaza vahe'mo'za amara nosaze. **4** Ama mopafi havige anumzamo, Sata'a zamentinti nosaza vahera antahintahizamia refinetege'za, Knare Musenkemofo masa Kraisina Anumzamofo amema'a nonkaze. **5** Na'ankure tagra'a nanekea huama nosunanki, Jisas Kraisi'a Ra mani'negeta, tagra Jisas Kraisinku huta tamagri kazokazo eri'za vahe mani'none. **6** E'ina hu'negu korapara Anumzamo huno, hanimpina tavimo'a remasa hino hu'nemofo masamo, tagrite eman'i'neno tavi'a tagu'afina remsa nehiteta, tagra Jisas Kraisi avugosa negeta, tagra tusi'a masane hankave'anena ke'none.

**7** Hianagi tagra mopa kavogna hunonkeno zago'amo'a mareri'nea fenomo agu'afinka me'neankna hu'none. Tamage hankevea tagritegatira nomeanki,

Anumzamofontegati ne-e. <sup>8</sup> Hakare kazigati knazamo'a trentarako nehi-anagi, ana knazamo'a trehapara notigeno, antahintahitimo'a savri hianagi tamentintia notrone. <sup>9</sup> Knaza tamizanagi, Anumzamo'a noratre, tahe tatarazanagi, tazeri haviza nosaze. <sup>10</sup> Tagra mika zupa, tavufgafina Jisasi fri'za erita vano nehunke'za, Jisasi nomani'zana, tagri tavufafi anazanke huno eama hige'za negaze. <sup>11</sup> Na'ankure tasimu'ma erita mani'nomota Jisasi fri'zanku'ma huama hunazanku, hakare zupa fri kantera tavrenenteankino, Jisasi nomani'zana, ama amega tavufgare eama hanige'za kegahaze. <sup>12</sup> Ana higeno fri'zamo'a tagripina eriza e'nerie. Hianagi asimu erino manizamo'a tamagripina eriza e'nerie.

<sup>13</sup> E'ina hu'negu anama tamentintima hu'nonana avontafepina anage huno krente'ne, **Nagra namentinti hute'na, kea huama hu'noehu'ne.** (Sam-Zga 116:10) Tagranena tamentinti nehunku kea huama nehune. <sup>14</sup> Na'ankure tagra antahi'none, Ramo, Jisasi'ma fri'nefinti azeri ot'i'nea Anumzamo'a, tagrira ana zanke huno Jisasi'ene magoka tazeriotino, tamagri'ene tagri'enena Agri'a avurera tavrentegahie. <sup>15</sup> Tamagri knarezanku, ama ana miko zana nehunankino, Anumzamofo asunkuzamo ra huno rama'a vahete vuno eno hania zamo hanigeno Anumzamofo ra agi amino musema hunte'zamo avitegahie.

<sup>16</sup> Ana hu'negu tavresra nosie. Tamage tavufgamo'a frino negasrianagi, knane knanena avamutimofona erikasefa nehie. <sup>17</sup> Hanki meni tagritema osi knazama fore nehiazamo'a, tagrira monafima umani vava hanunaza retro huneranteankita, knare huta monafi umani vava nehuta, knare'zama omerisuna zamo'a, makazana agateregahie. <sup>18</sup> Hagi negonazanteria tavua onkesunanki, onke'nona zante tavua kesune. Na'ankure negona zamo'a omanegosie. Hianagi onke'nona zamo'a mevava hugahie.

## 5

### *Kasefa tavufgamofo naneke*

<sup>1</sup> Hagi tagra antahi'none, ama mopafi seli nompima mani'nona nomo'ma tagna vaziramisigeno'a, tagria mevava nontia (tavufga) vahe'mo azanteti tro osu'neanki, Anumzamo tro huntogeno me'neankino monafinka mevava hugahie. <sup>2</sup> Na'ankure ama nompi (tavufga) mani'neta tamage tusiza huta kragira neruta, monare kasefa mevava kukena huzankura tusiza huno tavenesigeta, avega ante'none. <sup>3</sup> Na'ankure tagra ana kukenama hanuta, tagra tavufga tavapara omanighune. <sup>4</sup> Tagrama ama mopafi tavufgare'ma mani'neta tusiza huta kragira nerunkeno kna tave'nesie. Na'akure tagra tavufa tavapako omanita kukena hunaku nehune. Hianagi monare kukena antaninunkeno asimuma erino manizamo fri tavufga ahe fanane hanigeta, mevava tavufga erigahune. <sup>5</sup> Anumzamo'a ama agafare trohuranteno, Agra'a huhamprirante'nea zampinti esera Ayamu'a amne tameineankita, antahita keta hanunana, makazana amne tamigahie.

<sup>6</sup> E'ina hu'negu tagra hakare zupa hanavenetita, ama tavufgare'ma mani'neta zahufa Ramo'enena omani'none huta nentahune. <sup>7</sup> Na'ankure tagra onke'nonanagi, tamentinti nehune. <sup>8</sup> Tagrira taguamo'a hankave e'herigeta ama tavufga atreta Ramo'ene umanisuna zanku tave'nesie. <sup>9</sup> E'ina hu'negu ama mopafima manisuno, Ramo ene umanisuno, Anumzamofoma ra agima amisunazankuke nehune. <sup>10</sup> Na'ankure tagra ana miko'mota Kraisi avuga keaga refkohu trate otisunkeno, magoke magokemota ama

tavufgare mani'neta, knare'zano havizano hu'nesuna avamente anteno, mizana tamitere hugahie.

### *Vahe'ma avreno Anumzamofonte vu'zamofo naneke*

<sup>11</sup> E'ina hu'negu Ramofo'ma koro hunte'za antahi'ama hunonku, hanavetita vahe'mokizimi antahintahia eriamma huta nezamavrone. Hianagi Anumzamo'a tageno antahino hu'ne. Hagi nagrama nentahuana tamagranena tageta antahita nehaze. <sup>12</sup> Tagra'a tavufga tamagrite mago'ane erisagahu kazigatira nosunanki, tagriku'ma tamavufgama erisagma hanaza zanku nehune, hu'negu amega zamufare'ma nege'za zamavufga ra nehu'za, zamaguafizama nonkaza vahera, kenona huzmantegahaze. <sup>13</sup> Na'ankure tagrama neginagizama nehanutu, e'i Anumzamo ragi erisiegu nehune. Hagi tagrama fatgo antahintahitirema manusita, e'i tamagri knarezankure. <sup>14</sup> Kraisi avesizamo tazeri onetigeta tagra antahi'none, na'ankure magokemo, miko'mofonku huno fri'ne. E'ina hu'negu ana miko'mota fri'none. <sup>15</sup> Hagi Agra miko'mofonku fri'negu, iza'o kasefa huno maninesimo'a, agra'a vesizantera omanigahe. Hianagi zamagriku'ma huno fri'teno oti'nemofo Kraisi avesizante manigahaze.

<sup>16</sup> E'ina hu'negu menintetima agafa huno vaniana, vahe'mokizmia amega zamufgarera refko huozmantesune. Ana hu'negu tagranena anahukna huta Kraisina amega avufgare refakora hunte'nonanagi, menina antahi'none anara nosune. <sup>17</sup> E'ina hu'negu mago'mo'ma Kraisimpima manisimofona Anumzamo'a azeri kasefa vahe fore nehie. Antahi ani huo, korapa avu'avamo'a fanane nehigeno, kasefa avu'ava fore nehie. <sup>18</sup> Ama ana kasefa huno mani avu'avara Anumzamofontegati e'ne. Kraisimpina tagrira tazeri mago nehuno, erimago huno mani eri'zana tagritam'i'ne. <sup>19</sup> Na'ankure Anumzamo'a Kraisimpi ama mopafi vahera, Agrane tazeri mago hu'ne, vahe'mo'zama kumi'ma hu'nazana antahizmino nona hunozmante. Hagi erimago huno manizamofo knare naneke huama hanunegu, tagrira tam'i'ne. <sup>20</sup> E'ina hu'negu tagra Kraisi agi erita mani'none. Higeno Anumzamo'a vahe'agura tagripi huvazino kea nehie. Ana huta tagra Kraisinku huama nehanunketa tamagra Anumzamo'enena erimago hugahaze. <sup>21</sup> Na'ankure Anumzamo'a kumi'a omane'nea ne'mofo Kraisina tagri kumiku, azeri kumi vahekna nehuno, tagri kumira Agumpi erinte'nea zamo, tagrira Anumzamofo avure tazeri fatgo vahera nese.

## 6

### *Aposol naga'mo'za eri'zama e'neriza rama'a knaza eri'naza naneke*

<sup>1</sup> Hagi tagra eri'zama e'nerunana magoka Anumzamo'ene e'neruna nagamota hankavetita neramasmune, Anumzamofo asunku'zana eriteta, atrenkeno amnezanknara osino. <sup>2</sup> Na'ankure Anumzamo'a anage hu'ne, **Kna fatgore ketmia nentahi'i'na, tamaguma'vazikna fatgore tamaza hu'noe** hu'ne. (Ais 49:8) Antahihio, menina Anumzamo'ma tagu'vazino tmavre'naku'ma hunte'nea kna fatgore menina mani'none.

### *Poli'ma knazampi ufreniazamofo naneke*

<sup>3</sup> Hagi mago'mo'ma kama vanoma nehfina, tagra zamazeri tanafahu have erinteanknara nosune. Ana hu'negu tagrama eruna eri'zamofontera vahe'mo'za tazeri tagaze osugahaze. <sup>4</sup> Hakare'azama humpina Anumzamofo eri'za vahe mani'none huta eriamma nehune. Hakare'a knazampima ufronana kazigazi huta nevuta, maka tatafima nevuta,

knazampina unefronke'za, <sup>5</sup> kanonkevea neramiza, kina nonpina tavrenentazageno, erizamo'a amuho nehiteta, tavura omaseta ne'zana ononkeno, tagazankura nehuta, <sup>6</sup> manifatgo huta nemanita, antahintahia e'erita, akoheta nemanita, so'e avu'ava zana nehuta, Ruotge Avamupina nemanita, tamage avesizamofo avu'ava zana nehuta, <sup>7</sup> tamage kema huama nehumpine, Anumzamofo hankavefina, fatgo mani'zamofo ha'zamo'a tamaga tazampine hoga tazampina me'negeno, <sup>8</sup> mago'amo'za rantagia neramizageno, mago'amo'za husaga humorantaze. Tamage kea hunerantazageno, havige kea hunerantaze. Tagra tamage vahe mani'nonanagi, krunage vahere hunerantaze. <sup>9</sup> Tagrira tage'za antahiza osu vahe kna nehunanagi, tagrira miko vahe'mo'za tage'za antahiza hu'naze. Fri avamente knazampina nevunanagi, kasefa huta nemanune, kanonkeve tami'nazanagi tahe ofri'naze. <sup>10</sup> Hagi tasuzampi mani'nonanagi, muse huwava nehune, tamuntera omane'neanagi, rama'a vahe zamaza hunke'za feno vahera nemanize. Fenona onte'nonanagi (avamupina) feno vahekna nehune.

<sup>11</sup> Korinti kumate vahe'mota, magozana fra'nokunanki, tagu'areti tamage huta kea nermasamune. <sup>12</sup> Tagra tamagrira tavesi nermanteta tagu'a kafana anagi nermantonanagi, tamagra tavesi noranteta, tamagu'a kafana anagi-norantazageta mago tarimpa nosune. <sup>13</sup> Nagra neramasamue, tamagrira osi mofavre asmiaza hu'na nermasamuanki, tamagranena tamagu'a kafana anagiranteho.

### *Kefozane tragoteta omanisuna naneke*

<sup>14</sup> Anumzamofonte zamentinti nosnaza vahe'enena tagroteta omaniho. Inankna huno fatgo avu'avazane, kasegema ovariri avu'avamokea erimago hugaha'e? Masazare hanizanena inankna hune erimagora hugaha'e? <sup>15</sup> Kraisi'a inankna huno Sata'enena mago rimpa hugahie? Nankna huno amentinti nehia vahe'mo'a, amentinti osu vahe'enena, mago antahintahirera manigaha'e? <sup>16</sup> Hagi inankna huke Anumzamofo mono none, havi anumzamofo mono nomoke erimago znarimpa hugaha'e? Na'ankure tagra asimu erino mani'nea Anumzamofo mono noma'a mani'none. Anumzamo'a anage hu'ne, **Nagra zamagu'afi mani'nena, zamagri'ene kana vano hugahue. Nagra zamagri Anumza mani'nuge'za, zamagra nagri vahe manigahaze hu'ne.** (Lev-Pri 26:12) <sup>17</sup> E'ina hu'negu, **Zamentinti osu vahepintira atiramita rure maniho** huno Ramo'a hu'ne. **Agruma osu'nesia zana avako osinkena, Nagra eme tamavregahue.** <sup>18</sup> **Nagra neramafana mani'nanena, tamagra mofavre zagania manigahaze huno Hanavenentake Ra Anumzamo'a hu'ne.** (Ais 52:11.)

### 7

<sup>1</sup> Na'ankure tagrira Anumzamo'a huvempa hurante'negu, navesima nera-mantoa ronenimota, tagra'a tazeri avusese hanune. Ama tavufgafine avamupima miko kefozamo'ma tazeri haviza hania zampintira, mani ruotage nehuta Anumzamofo koro huntesune.

*Korinti vahe'mo'za zamagu'a rukrahe hu'nageno Pol'i'a muse hu'nea naneke*

<sup>2</sup> Hagi tamagra'a tamarimpa tamiho. Tagra mago vahera havizana huonte'none, mago vahera azeri haviza osu'none, mago vahera tagra knare'zankura revatga huta azeri haviza osu'none. <sup>3</sup> Nagrama ama'i kema

nehuana, tamagra havi vahe mani'naze hunoramantoe. Na'ankure ko tamasimi'none, tagra tamagri ene magoka manusuno, tamagri'ene magoka frisunana tamagra antahinhahifi mani'naze.<sup>4</sup> Nagra tamagrira razampi antahinerami'na, tamagrikura tusi muse nehugen, nagu'amo'a fru nehugen, tamagrama hazazamo'a nagrira naza hige'na, mika knazanifina tusi muse nehue.

<sup>5</sup> Na'ankure tagrama Masedoniamma efronkeno'a, ama tavufgamo'a manifru osu'ne, rama'a knazamo mika asoparegati egeta hapi ufronkeno, tagu'amo'a kore nehie. <sup>6</sup> Hu'neanagi knazamo zamazeri haviza nehia vahe'mokizmi zamazeri hankavenetia Anumzamo tazeri hankavetineana, e'i Taitusi'ma e'nea zamo'e. <sup>7</sup> Agrama e'nea zamokero'ompage, agri'ma azeri hankaveti'naza'zamo'e. Agra nagriku'ma navegama ante'naza zamofo nanekea nenasamino, nazano fore'ma higeta tamasuzampima mani'naza zamofone, nagriku'ma nentahiza'zamofo nanekema nasamige'na, mago'ane tusi muse hu'noe. <sup>8</sup> Na'ankure avoma kreramisua zamo'enema tamasuzampima tamavrentesuana, nagra e'i anazankura nagesa ontahigosue. Na'ankure e'i anazamo'a osi'a knafi tamatazana tamigahie. <sup>9</sup> Nagra menima avoma atreramantesua zankura muse nehue. Tamagri zamazeri tamagaze hunakuro ompage, tamata neraminketa tamagu'a rukrehe hanazegure. Na'ankure Anumzamo, vah'amo'za erisazeguma avenesianka tasuza e'nerisunkeno, tamaza hanigeta tagripintira mago'a knazana e'origahaze. <sup>10</sup> Na'ankure Anumzamo'a tagripima me'nea tasunku zampi huvazino taza hanigeta, kumira atreta tagu'a rukrehe hanunkeno taguravazina, tagra knazantigura tagesa ontahigahune. Hianagi tasunkuke nehuta tagu'a rukrehema osnunana, fri'za erifore hugahie. <sup>11</sup> Keho Anumzamo'ma neramia knazamo'ma tagripima asunku'za erifore nehuno, zamazeri o'netigeta kazigazi huta tamagra'a zamazeri ama nehuta, antahi haviza nehuta, tamagu'afi kore nehuta, nagri'ma nagezankura tusiza huno tamavenesigeta, hanavetita havizama hu'nea vahera zamazeri fatgo nehuta, maka'zama hanafina fatgo zanke'za nehaze. <sup>12</sup> Ana hu'negu iza havizana higeno, iza havizana huntene hu'na, e'i agafare avona krenoramue. Hianagi Anumzamofo avufina inanknama huta kvama krinerantaza zamo eama haniegutu hu'na kreneramue. <sup>13</sup> E'i ana mik'o'za hazazamo'a, trimpa so'e nehie. Amama tarimpamo'ma so'ema hire'ma mago'ene musema huramantonana, Taitusima konkeno musema nehuno avamu'affima tamagripinti'ma fruzama eria zankura muse hu'ne. <sup>14</sup> Tamagriku'ma musema nehua zankura, ko agrira asami'noe. Hagi tamagra nazeri nageze osu'naze, nagra tamagege'za tamasm'i'noe. Hu'negu tamagriku'ma muse nehune huta Taitusima nesamuna zamo'a, tamage'za before hugahie. <sup>15</sup> Taitusi'a agri'ma nevreta, ke'ama mikomota antahinemita, kore hunteta amagema antenaza zankura, tusiza huno tamagrikura antahineramino agera nokanie. <sup>16</sup> Nagra tusiza hu'na muse nehu'na, hakare'zana amne hugahaze hu'na antahineramue.

## 8

### Muse huno Anumzamofo ami'zamofo naneke

<sup>1</sup> Hagi nenfugata, Anumzamo'a asunku'zama'areti, Masedonia mono vahera zamaza hu'nea zamofo agenke tagra tmasaminaku nehune. <sup>2</sup> Zamagripina tusi'a knaza fore nehige'za, zamarevatga zampi ufrrenazanagi, zamarimpa kna nosu'za, ra muse nehu'za, fenozami

omne'neanagi, zamagu'reti fenona zami'naze. <sup>3</sup> Na'ankure nagra eriama hu'na tamasmiza hue, zamagrama amiga avamentera agatere'za, zamagra'a zamavesite rama'a nezamize. <sup>4</sup> E'ina nehu'za, Anumzamofo naga'ma Jerusalemi mani'naza naga'ma, zamazahu muse'zama zamagranema zamizankura, tusiza hu'za tantahigevava hu'naze. <sup>5</sup> Hagi e'inahu hugahaze huta tagesa antahi ozamunanagi, pusazana zamagrazmi Ramofo amite'za, Anumzamofo avesite tagrira tami'naze. <sup>6</sup> E'i ana hu'negu zago eritruhu eri'za tagripima erigafa hu'nemo, Taitusi'a tamagrane umani'neno tamazahina, ana erizana eri vagaregahaze. <sup>7</sup> Hianagi tamagra hakare zampina knare hu'naze, tamentinti zampima, kegaga huzampima, mika Anumzamofo erizankura kazigazi nehuta, tagrikura tamavesi nerantaze. Ana hukana huta amizampina vugota hutma muse'zampinti zamiho. <sup>8</sup> Nagra ama kema nehuana, amiho hu'na huhankvetina hunormantoe. Hianagi rumo'za kazigazi hu'za nezamizankna huta zmavesinezmenteta, zamigahazafi hu'na reramahena kenaku nehue. <sup>9</sup> Na'ankure Rantimofo Jisas Kraisi asunku'zana tamagra antahi'naze. Fenone ne'mo'agi, tamagriku huno amunte omne nekna hu'ne, e'i anama hu'neana Jisas'a amunte omnezama'afinti feno vahe tamazeri fore hanigu anara hu'ne. <sup>10</sup> Zago eritruhu erizamofonku nagrani'a antahintahi hu'ama huzahue. Koma evia kfature zago eritru huno ami eri'zana tamagra'a erigafa huneta, ana erizankukera osunazanki, tamagu'reti ene huta ami'naze. <sup>11</sup> Menina ana erizana eri vagaresageno, tamagu'reti tamavenesigeta zago ami eriza eri vagaregahune huta hu'nazazamo'a, zago ante'naza avamente magozahu hugahie. <sup>12</sup> Na'ankure mago'mo'ma feno amizamofo avesizama me'enkeno'a, onte'nesia avamentera omigahianki, nazano ante'nea avamente aminigeno'a, Anumzamo'a muse hugahie. (Mak 12:41-44) <sup>13</sup> Tagri tavesimo'a ruga'amokizmi nezamisageza fru hu'za manisnageta, tamagra atupa huta manisnaze nosunanagi, mani'naza avamente manisnazegu nehune. <sup>14</sup> Menina tamagripi rama'a me'negu, atupa hu'za mani'naza vahe zamaza hanageno, henka'a tamagrama atupa hanage'za tamaza hugahaze. E'i ana hanuta magoke avamente manigahaze. <sup>15</sup> Anumzamofo avontafeppina anage huno krente'ne, **Rama'a ne'zama eritru hu'namo'za agatere'za rama'a onte'naze. Hagi osia'a ne'zama eri tru hu'namo'za atupara osu'naze.** (Diu-Kas 16:18)

<sup>16</sup> Tamagriku'ma kazigazi hu'na antahi neramuankna antahintahima, Anumzamo'ma Taitusima azeri otigenoma tamagrikuma antahineramia zankura Anumzamofona muse hunentoe. <sup>17</sup> Na'ankure Taitusi'a tagrama hu'na nanekereke ovianki, tamagenakura agra'a avesiramante'negu, kazigazi huno tamagritega e'ne. <sup>18</sup> Mago nerifu, Jisasi knare museke huama nehige'za maka mono vahe'mo'za agenke'a antahinaza nera, tagra huntonkeno Taitusi ene vu'na'e. <sup>19</sup> Ana nera mono vahe'mo'za Jerusalema zagoma omezminaku'ma hanunana, tagrane vugahie hu'za huhamprinte'naza ne'mo, tagranena vugahie. Anumzamofo ra agi aminaku anara nehuta, tamage huta zamaza hu'zana eriama hugahune. <sup>20</sup> Hanki mago'mo'e huno antahi haviza huorantenogu, rama'a vahe'mota magoka ana musezama tami'nazana kva huta erita neon. <sup>21</sup> Anumzamofo avurekera fatgo huta omanisunanki, vahe'mofo avure enena fatgo huta manisunazanku tavenesie. <sup>22</sup> Ete mago nerufuna hakare zupa reheta konana, mikazampina fatgo huno nemanino, Korinti vahe'motagu antahineramino tamaza hunaku nehia nera, Taitusi zane vugahaze. <sup>23</sup> Hanki Taitusi'a tamaza hu'naku nigrane eri'za e'neria nere. Hagi

agrame tare vana'a nerafukiznia mono nagapinti huzanente'naze. Kraisi agi erisaga nehaza vahe nevaze. <sup>24</sup> E'ina hu'negu zamesi'nezmanteta zamazeri so'e nehinke'za, Anumzamofo naga'mo'za nege'za, Poli'ma Korinti vahe'mokizmi zamavu'zamavaku'ma nehiana tamage hu'ne hu'za hugahaze.

## 9

### *Jerusalemi mani'naza Anumzamofo naga'ma ofa zago zamaza hanaza naneke*

<sup>1</sup> Hagi Jerusalemi mani'naza Anumzamofo nagama zagoma zamsune hu'naza zankura avona nagra kretamimi'na huramagesa hugara osu'noe. <sup>2</sup> Na'ankure nagra antahi'noe, tamagu'amo otigeta zamaza hunaku retro'ma hu'nazana, Masedonia mono vahe, musezampinti zamasami'na amanage huno'e, ko'ma evia kafufina Griki kaziga Akaia kumate nemaniza vahe'mo'za, Juda vahe zamaza hu'naku ko retro hu'naze hu'na tamagriku zamasmi'noge'za, nentahiza zmagu'amo otige'za hakare vahe'mo'za anahukna huta zamigahune hu'naze. <sup>3</sup> Hianagi Taitusine tare nerafukiznia tamagrama mani'narega nagra hunezmanoe. Tamagri tam'i'naku ko retro hu'naze hu'na hu'noa kema zamasami'noa zamo'a, amnezankna hanigi, tro hu'enke'za viho. <sup>4</sup> Masedonia vahe'ene ru nevnugeno, ana zugoma eri tru osu'nesageta, ko eritru hu'naze hu'noa ke'mo'a, amnezankna hinketa, tamagrane nagranena tagazegu hugahune. <sup>5</sup> E'ina hu'zanku nagrama nagesa antahuuna nerafukizmima huzmantesunke'za tamagrama mani'narega vugotesageta, ko'ma eritru huta zamigahune hu'naza zagoa retro hu'nesageta vugahune. E'ina nehuta muse hutma zagoa nezamianageta, tagra zagotamia tutu huta avazu osugahune.

<sup>6</sup> Nagra menina amanage nehue, osi'a avimzama nesaza vahe'mo'za, osi'a ana avamente ne'zana nevasgaze. Hanki rama'a avimaza nesaza vahe'mo'za, ana avamente rama'a ne'zana nevasgaze. <sup>7</sup> Ana hu'negu magoke magokemotma aminaku'ma hanutma, tamagu'affima amigahune hutma tamagesa antahinesazama'a amiho. Vahe'mo tutu hinketa tamarimpa knazanena omiho. Na'ankure muse huno ami'mofonku, Anumzamo'a aveniesie. <sup>8</sup> Hagi Anumzamo'a knare huno maka'zampina asunku'zama'a eri aviteramantena, aviteta mani'neta, mikha zupa rama'a me'nesnifinti knare tamavu'tmava huta vahe'mofona zamaza hugahaze. <sup>9</sup> Anumzamofo avontafepinima krente'neana, **Iza'o refko huno amunte omane vahe'ma musezama nezmia vahe'mofona, fatgo avu'avazama'amo mevava nehie** hu'ne. (Sam-Zga 112:9)

<sup>10</sup> Hagi Anumzamo'a hozama kri vahe'mofona avimzana nezamino, bretia ne'zane huno nezamie. Anahukna huno avimzana veva huno erira nehina, fatgo avu'ava zantamimo'a raga'a nerena, rama'a nevasageta mago'anee vahe'mofona zamaza hugahaze. <sup>11</sup> Hakare zampina rama'a asomu huner-mantena, vahe'ma zamaza hanazana kankamumpinti rama'a zamaza ne-hanageno, Anumzamofona ra agi ami'za susu huntegahaze. <sup>12</sup> Na'ankure ama'i vahe'ma azahu eri'zama e'neriza zamo'a, Anumzamofo nagakera zamaza nosianski, Anumzamofo susu huntezampinti, ra agi amizamo'enena avinete. <sup>13</sup> Na'ankure vahe'ma zamaza huta knazami eri'zamo, knare tamavutava eriama hina nege'za, Kraisi Knare Musenkemofona amage-nentaze hu'za huama nehu'za, Anumzamofona ra agi erisaga hugahaze. <sup>14</sup> Nunamuzamifina tamagrikura antahineramiza nunamuna hunerman-taze. Na'ankure Anumzamofo mareri agatere asunku'zamo tamagrite'ma

me'neazanku anara nehaze. <sup>15</sup> Vahe'mota e'inahu kna nehie huta erinteamo osuga muse zama neramiazankura, Anumzamofona susu huntesune.

## 10

### *Poli'a eri'zama'a azeri hanavetike hu'nea naneke*

<sup>1</sup> Hagi nagrani'a Poli'na, Kraisi anterami avu'avazampinti'ene fru avu'avazanteti tamantahinegoe. Nagra tamagranema mani'nena fru avu'ava huramante'noanagi, afete'ma mani'nena hanave naneke huneramantoe. <sup>2</sup> Nagrama tamagritega vanu'na hankave kea osnuegu nentahue. Hianagi nagra esu'na tagriku'ma vahe'mofo antahintireti havi eri'za e'nerize nehaza vahe'mofona hanavege eme huzmantegahue. <sup>3</sup> Tamage mopafi vahe mani'nonanagi, mopafi vahe'mo'za hzaza huta hara nosune. <sup>4</sup> Ha'ma huzantamima azeri'nonana, ama mopafi ha'zana omne'ne. Anumzamofo hankave ha'za me'neankino, Sata vihua ahe'nafru hugahie. <sup>5</sup> Tagra hakare'a havi antahintahine havigemo'enema renkani renentegeno vahe'mo'ma Anumzamofoma antahi ama nosia antahintahizmia, zamazeri rukrehe hanunke'za Kraisi amagera nentaze. <sup>6</sup> Tamagrama amage'ma ante fatgoma hanageta, veganokno nehu'za, ke rutrage'namokizmia, ana nona'a knaza zamigahune.

<sup>7</sup> Tamagra mago'amota amega avufgage negeta agu'afina nonkaze. Hagi Kraisi vahe mani'noe huno hanave antahintahi nentahinimo'a, atregeno agra'a agu'afi refko huno negeno, nagra Kraisi vahe mani'noe huno nentahina, tagra'enena Kraisi vahe mani'none hugahune. <sup>8</sup> Na'ankure Ramo'ma kva vahe manigahaze huno tazeri otigeta mani'neta tavufga rama nehunana, tamagri tamazeri so'e hunaku anara nehunanki, tamazeri haviza hunakura anara nosunankita, tagra tagazegura osugahune. <sup>9</sup> Hanki tamazeri koro hunaku ama avontamina krenoramue. <sup>10</sup> Na'ankure mago'amo'za amanage nehaze, Poli'a avontafepina hankave ke kren'eramino, tavure'ma ne-eno'a, akoheno kea nehige'za, amnge nehie hu'za nehaze. <sup>11</sup> Hanki anagema nehanana vahe'moka antahio. Tagranema omanineta avontafe'tamimpima hankave kema krerami'nonankna huta tagrama esuta, hankavege eme hugahune. <sup>12</sup> Na'ankure mago'amo'za knare vahe mani'none nehaza vahera nezmageta, tagratia zamagritera refko huta nonkone. Hianagi zamagra'a mani'naza avamente refko hu'za nege'za, tagra knare vahe mani'none hu'za refko hu'za negaza vahe'mo'za, negi vahe mani'naze.

<sup>13</sup> Hianagi tagra mani'nona avamena agatereta tavufa ra osugahune. Hianagi Anumzamo'ma e'inahu huta eri'zana erita vahe'ma kegava huzmanteho huno hurante'nesia avamente mani'neta, vahera kegava hunezmanteta tamagri'enena kegava hurmantegahune. <sup>14</sup> Na'ankure tagrama ese knazupa Kraisi Knare Musenke, Anumzamo'ma eriho hu'nea avamente Korientima mani'naza nagamotare erita uhaniti'nona zamofonkura, agatereta tavufga erisaga nosune. <sup>15</sup> Magore huta rumo'za eri'za eri'naza zanteri tavufga rana osu'none. Hianagi tagrip'i'ma fore hanigeta kesune huta antahi neramunana, tamagri tamentintimo nehagenkeno, eri'zama tamagripima erisuna zamo'a ra huno hageno vanie huta nehune. <sup>16</sup> Ana hu'negu, mago'mo'e huno Knare Musenke huama osu'naza afete kumatamimpina, tagra ome huama huta vugahune. Na'ankure koma eri'zama rumo'za e'rinesaza kumatamimpina ome e'nerisunkeno tagenoka osnazegu nehune. <sup>17</sup> Hianagi avontafepina anage hu'ne, **Iza'o avufga rama hunaku'ma**

**hanimo'a, Ramofoma keno antahino hu'nea zanku avufga ra hino hu'ne.** (Jer 9:24) <sup>18</sup> Na'ankure agra'agu knare hu'noe huno nehimo'ompage, Anumzamo'ma hu izo huno ra agima ami'nesimoke agra'agura musena hugahie.

## 11

### *Havige Aposol vahe'mokizmi kemo'ma amate efore hania naneke*

<sup>1</sup> Hagi nagra neginagi naneke huzahuanki akoheta mani'neta antahihio. <sup>2</sup> Na'ankure Kraisinte knare hutma manisazegu hankave antahintahi nehue. Nagrama magoke vere, Kraisinte manisazema hu'noane. Vene omaseno agru hu'nea a'kna hu'nesage'na, tamagrira Kraisinte tamavrentesuegu nehue. <sup>3</sup> Hu'neanagi nagra kore'ma huana, krunage osifavemo Ivi revatga hu'neakna huno tamagrira, reramataga nehinketa fatgo huta, ruotge hu'netia Kraisi amage nevaza kana netreta tamagena humizanku nehue. <sup>4</sup> Tagra Jisasi naneke nermasamunketma nentahitma, Ruotge Avamura e'nerita nanekema tamasamunana antahirami'naze. Hianagi tamagra atrazageno ru vahe'mo'za ne-eza, ru mago Jisasi nanekene, ru Avamumofo nanekea nermasamizageta, nentahita fru hutma ana nanekemofo amage nentaze. <sup>5</sup> Ana hankave aposol eri'zama e'neriza vahe'mokizmia, nagra zamagri zmagorga'a omani'noankiza, zamagra nagateore'naze. <sup>6</sup> Hianagi nagranena naneke hu'zana rempi hu'na ontahi'noanagi, antahintahi zania me'ne. Hakare kampinti, eriamu hu'nonketa makazana ke'naze.

<sup>7</sup> Nagrana anteneramina, tamagrama knare hanazegu mizama'a omne Anumzamofo Knare Musenke tamasamua zamo'a, kefoza hu'na kumi ne-hufi? <sup>8</sup> Nagra tamagri'ma tamaza hunakura musufa aseankna hu'na ru mono nagatetira musezazmia erina, tamagri eme tamaza hugeta, tamagra mizana ose amne e'nerize. <sup>9</sup> Hagi tamagrane mani'nena magozankuma atuphua knafina, magomofona kna ami'na nazahuo hu'na osu'noe. Masedoniat e'naza nerifu'za, atupama huazantamina namizage'na eriknare hu'noe. Nagrira naza hanazegura knazana noramuankina, henka'anena anazanke hu'na knazana ontamigahue. <sup>10</sup> Tamage huno Kraisi tamage nanekemo nagu'afi me'nesigena, nagri'ma naza osazazankura Akaia kumate Grisi kaziga huama nehanuge'za, tagano hu'za huonantegahaze. <sup>11</sup> Na'a hige'na e'inahu naneke nehue? Tamagrikura nave'nosifi? A'o tamagrikura navenesie, Anumzamo'a antahi'ne.

<sup>12</sup> Hianagi nagrama amama nehua navunavara hu'na nevanenke'za, zamagrama nagriku'ma mago'zanke hu'none nehu'za zamufga rama nehaza zana ahepasaru hanenkeno evuramigahie. <sup>13</sup> E'inahu vahe'mo'za havige aposol vahe mani'ne'za, havige eri'za vahe mani'ne'za, amega zamufarerera Kraisi aposol mani'none nehazanagi, zmagu'afina krunage aposol vahe mani'naze. <sup>14</sup> Na'ankure antri osiho, Sata'enena krunage huno masa ankero vahe kna hugahie. <sup>15</sup> E'ina hu'negu antri osiho. Sata eri'za vahe'mo'za krunaza hu'za fatgo eri'za vahekna hugahaze. Ana nona'a eri'zama e'neri'za avamente mizama'a, henka'a erigahaze.

### *Poli'a Kraisi erizante knaza eri'nea naneke*

<sup>16</sup> Hagi mago'ane neramasmue, mago'mo'e huno nagrikura neginagi nere huno antahintahia osino. Hianagi neginagi nere huta antahine-namisuta, osi'a nagranena navufga erisagahu nanekema hanuana, neginagi vahe'mofoma antahimia kna huta antahinamaho. <sup>17</sup> Nagra'agu'ma husagama nehu'na, neginagi vahe knama nehuana, Ramo'a huo huno

osu'nea naneke nehue. <sup>18</sup> Hakare vahe'mo'za zamagra zamavufaga, ama mopafi vahe'mo'za hazaza hu'za erisaga nehagu, nagranena anahukna hu'na navufga erisaga hugahue. <sup>19</sup> Tamagra neginagi vahe'mokizmia knare huta antahinezamize, na'ankure tamagra knare antahintahine vahe mani'naze. <sup>20</sup> Tamage, tamagra zamatrorage'za vahe'mo'za tamazeri kazokzo eri'za vahe kna huneramanter'za, reramatga nehu'za, tamagripinti'ma musufa e'neri'za, zamagra zamufga erisga nehu'za tamavugosafi neramahazageta kea nosaze. <sup>21</sup> Nasunku huanki tagrira hanavetia omaneneankita e'im a hazazana osugahune! Hianagi mago vahe'mo'ma agra'a avugama erisaga hinkena, nagranena anazanke hu'na navufga erisaga hugahue.

<sup>22</sup> Ana vahera Hibru vahepi? Nagranena Hibru nere. Zamagra Israeli vahepi? Nagranena Israeli nere. Zamagra Abrahamu nagapinti efore hunazafi? Nagranena Abrahamu nagapinti efore hu'noe. <sup>23</sup> Zamagra Kraisi eriza vahepi? Ama nanekema hanuana neginagi vahe'mo'za ne-hazankna nehue. Nagra zamagterena tusiza hu'na Anumzamofo eri'za e'nerina, zamagterena kina nompina rama'a zupa manina, rama'a zupa kanonutira nahetere hazage'na frikante vu'noe. <sup>24</sup> Hagi 5'a zupa, Jiu kva vahe'mo'za kefo vahe hampriza nezmahaza kna huza 39ni'a zupa sefu knonkeve namiza navufga rutraga hutere hu'naze. <sup>25</sup> Hagi 3'a zupa kumpa knonuti knonkevea nami'naze. Hanki magoke zupa have knonu nahenaze. 3'a zupa ventefi nevugeno haviza huno hageri tamigena, tina nakrikatetena, mago zageferuki, mago haninki huna hageri amunompi mani'noe.

<sup>26</sup> Hakare zupama vanoma hufina, rama'a hazenkefi ufrenoe, ti nehegefi tina marekanetogeno, kumzafa vahe'mo'za nahe'za nehazageno, nagrini'a naga'mo'zane, meg'i a vahe'mo'za nahekate'haze. Rankumapima manige, ka'ma kokampina nevuge'za nazeri haviza hu'za nehazageno, hagerimpima fanane hu'za nehugen, havige nerafu'zanena nazeri haviza hu'za hu'naze. <sup>27</sup> Amuho hu'na tusi'a eri'za e'neri'na, mago'a kenagera navura ovase'noe. Ne'zane tinena omanege'na nagazanku nehugen, tinku'enena navesi'ne. Kukenani'a omanegeno zasimo'enena nazeri haviza hu'ne. <sup>28</sup> E'i ana knazama eri'nofinena, mago mago knafina mono kevugura, inankna hu'za nemanize hu'na tusi antahiantahi nehuazamo'a kna nami'ne. <sup>29</sup> Mono vahe hanave'a omanegeno'a, nagrira hankaveni'a omane'ne? Mago'mo'ma kumipima ufregena, nagra narimpa kna hu'noe.

<sup>30</sup> Navufga erisaga hanuna, nagrima hankaveniam omane'nea zama naveri'ma nehiazanku navufga ra hugahue. <sup>31</sup> Anumzana Rantimofo Jisasi Nefa antahinege'na tamage nehuankino, ra agia erivava hugahie. <sup>32</sup> Damaskasi kumate'ma mani'noa knafina, Kini ne' Aretasi agorga'a mani'nea gavana ne'mo, rankumamofo kafantaminte mani'neno nazeri-naku kava vahe huzamantegeza kava hu'naze. <sup>33</sup> Hianagi nagrama zamatre'na frenoana eka'eka kupi mani'noge'za nofite azerine'za natrazagena, zaho eri kampinti (windo) fegu'a uramina zamatre'na fre'noe. (Apo 9:24-25.)

## 12

### Poli'a avanagnaza ke'nea naneke

<sup>1</sup> Hagi navugama erisaga hu'zampintira mago'zana e'noruanagi, Ramo'a oku'a me'nea zane avanagnaza naveri hu'nea zanku navufga erisagahu kea hugahue. <sup>2</sup> Nagra antahi'noe, 14ni'a kafu evunefina Kraisi ene hagerafi'nea ne'mo, nampa 3 monafinka (mareri agatere kumate) marerineana

amega avufgarero, avamupi manineno mareri'neo nagra ontahi'noe, Anumzamoke antahine. <sup>3</sup> Ana nera nagra ontahi'noe, amega avufgarero avamupino, nagra ontahi'noe, Anumzamoke antahine. <sup>4</sup> Hianagi Monafi (Paradise) avreno marerigeno, hunagru higeno vahe'mo'a huama osuga'za ome antahi'ne. <sup>5</sup> E'i anazama naveri hu'nea ne'mofonku hu'na navufga ra hugahue. Hianagi nagra'agura navufga ra osugahue. Hagi hanaveniamma omanenesia zanku navufga ra hugahue. Na'ankure nagra tamage nanekege'za hugahue. Hianagi nagrira antahi ra huonantesazanki keniare'ene navunava zaniare kesazegu mago'zana nosue. <sup>7</sup> Na'ankure oku'ma me'nea knare'zantafa Anumzamo naveri hige'na ke'noe. Hianagi e'ina zante nege'na ra nagi erizankura, nekazagna zamo navufgafi nenreana, e'i Sata eri'za vahe'mo nata nenamino, nazeri haviza nehianki'na navufga ra osnugu anara nehie. <sup>8</sup> Ama ana natama negriazana Ramo eritrenantesiegu, 3'a zupa kazigazi hu'na antahige'noe. <sup>9</sup> Hianagi Ramo'a amanage huno nasmine, **Nagri nasunkuzamo'a knare kagrira hugantene. Na'ankure hanave ka'a omanesirera, Nagri hanavemo'a knare hugantegahie.** E'ina hu'negu, Ramofo hankavemo'a knarezantfa huno refite nantegahiankina hanaveni'a omanesifina muse nehu'na navufga ra hugahue. <sup>10</sup> E'ina hu'negu kema nasazano, nazeri haviza hanazo, knaza fore hanio, amuho erisua knafina rama'a muse nehu'na, narimpa fru hu'na hankave'hia omnea knafina nemanue. Na'ankure Kraisinku hu'na hanaveni'a omanea knafina, hankave'nia e'nerue.

### *Poli'a Korinti vahe'mo'za zmentintifina hankaveti'za manisagu kreza-minea naneke*

<sup>11</sup> Tamagra nagrira knare hu'ne hutma nazeri ante'ama hugaragi, netreta nagrira nazeri neginagi vahekna nehaza zankura, nagra navufga ra nehue. Na'ankure nagra amneza mani'noanagi, ugota aposol vahepinha henkarfana omani'noe. <sup>12</sup> Tamage aposol vahe'mofo avame'za tamagri amunompina hu'noa zama kesazana, avame'zama, kagu'vazama hanavententeke eri'zana eri'na kazigazi hu'na vu'noe. <sup>13</sup> Na'ankure mago'zahu navunava ana miko mono nagapina nehuhanagi, magoke'zama nagrama huoramante'noana tamagrama kva hunantesazeguma knama orami'nozamo'e. E'i kefozama hu'nesuana nasunku huanki kefozania atrenanteho.

<sup>14</sup> Hanki antahiho, ko tare zupa ome tamage'noe, meni mago'ene ome tamageku nehuankina tamagrira kna ontamigahue. Na'ankure mofavremo'za nerera nefazana kva hunonteanki, Nererake nefake mofavre'amo eriniazzana antenteno nevuno kegava hunente. Ana hunegu tamagripintira mago'zana e'origahuanki, tamagri tamagu tamemo so'e hanigu nave'nesige'na nehue. <sup>15</sup> Tamagri manizanku hu'na nagra navufgane, maka'zaniane neramue. Hagi rama'azampima navesineramantesugeta, tamagra osi'a tamavesinantegahazo? <sup>16</sup> E'inahukna hu'negu tamage hu'na knazana noramue. Hianagi tamagrama antahi'zana krunage nehuno musufasenaku nehie hutma nagrikura neheze. <sup>17</sup> Nagrama huzmantoge'zama tamagri'ma tamaza hanugu'ma vu'naza mono vahepintira, mago'a nazahuzana reramatga hu'na eneru? A'o nagra anara nosue. <sup>18</sup> Nagrama, Taitusine mago'nerafunema tutu hu'na huznantogene tamagritlega vuna'anai Taitus'i a reramatga huno mago'a azahu zana erinefi? I'o tamagra antahi'naze, Taitus'i ene nagranena magoke avamuteti magozahu huta erizana e'neru'.

<sup>19</sup> Tamagrama tamagesa antahizana, tagrikura zamagra'a ke erihanavetinaku nehaze hutma tamagesa nentahizaf? Tamage e'inahu tamagesa nentahizanagi, Anumzamofo avurera Kraisinku keaga nehuta tamagrima tamaza hanigeta hogeta mrerisaza zanku tamavesi neramantona nerufigatagu nehune. <sup>20</sup> Na'ankure nagri'ma namanoma vaziana, esua zupa nagri'ma naveosi nesiazama tamagripima eme nege'na tamave'osinesia zama huzankure. Nagri'ma namanoma vaziana, tamagripima eme nerameg'e'na, amu'nontamifi ke ha' hu'zama, kanive rezama, arimpa he'zama, atane'zama, havige ohunte ahunte hu'zama, ogenke agenke hu'zama, vegano kno hu'zama, mani fatgo osuno makaza erisavri hu avu'avazanku nehue. <sup>21</sup> Nagra ete'na ome tamagesua zupa, Anumzamo'a tamagri tamavufima nazeri nagaze huzankura kore hue. Na'ankure hakaremota korapa kumitami'a tamagu'a rukrehe osu'naze. Tamagra savri avu'avaza nehutma, monko avu'avaza nehutma, agazehu avu'avaza hu tamaga tevava nehi-azankura nagrira zavite nagesa nehie.

## 13

### *Korinti vahe'mo'zama manizazmi refko hu'za kesaza naneke*

<sup>1</sup> Hagi ko tarezupa tamagrira eme tamagenoreti, menina eme tamage'naku neoe. Hagi avontafemo'a anage hu'ne. ***Mika tamage kemofona tareo tagufa vahe'mofo nanekemo hut magea hanigeno, anankemo'a tamagea megahie hu'ne.*** (Diu-Kas 19:15)

<sup>2</sup> Nagra ese'ma ete'na anantema e'norerera, kava huta maniho nanekea ko tamasm'i'noe. Hagi menina tamagri enena omaninoanagi, mago'anee kumima nehaza vahetamine, mago'a vahetaminena kva huta manisaza nanekea neramasamue. Nagrama henkama esnuna kumi'ma nehaza vahera tamazo onkigauhanki, knaza eme tamigahue. <sup>3</sup> Kraisi'ma nagri nagipina huvazino nehia kemofo agafa'a kesuneg'u'ma nehaza zankura, emeri ama hugahie. Kraisi'ma tamagripima eri'zama eneriana fru huno e'norianki hanavetino eri'zana enerie. Agri himamu hankave'mo tamagripina me'nene.

<sup>4</sup> Tamage, hanave'a omanegeno keka zafarera fri'ne. Menina Agra, Anumzamofo hankavere kasefa huno asimu erino mani'ne. Na'ankure tagri'enena anahukna huno hanavetia omneanagi, Kraisi'ma mani'neta Anumzamofo hanave erineta, ana hanavereti tamagripina erizana e'nerune.

<sup>5</sup> Tamagratmi'a avame antetma tamagu'a refko huta keho, tamentintifi maninazaf? Hifi tamagra'a tamaguafina refko huta nonkazafi, Jisas Kraisima tamaguafima mani'neana, Agrira keta antahita nosaze.

<sup>6</sup> Hianagi nagrama namentintima huana, tagratia rehezampintira evunoramune huta antahita keta hugahaze. <sup>7</sup> Havi avu'ava osihogu Anumzamofo fontega nunamuna nehune. Hanki erizantimofonku vahe'mo'za huknare hihogura nunamuna nosune. Hianagi erizantimo'a eamara huno knare osnianagi, tamagra fatgo tamavutmava hihogu nunamuna nehune.

<sup>8</sup> Na'ankure tagra tamage kemofonke amage antegahune. <sup>9</sup> Tagra muse nehune, na'ankure tagrira hankavetia omne'neanagi, tamagrira hanavetmia me'negu, tamaz-eri knare zantfa haniegua nunamuna hunermantone. <sup>10</sup> Na'ankure tamagri'enena omani'noanagi, ama agafare avona krenetamuanki'na, nagrama

tamagranema manisuna knazana ontaminaku nehue. Ramo'ma himamuma nam'i'nea hanavereti, tamazeri haviza hunakura nosuanki, tamazeri hanavetisugeta hagetma tamentintifina marerisazegu nehue.

<sup>11</sup> Hagi nafunagnaleta huvagare nanekea anage hu'na kreneramue, muse nehuta, mago'ane tamamentintifina hanavenetita, ozeri hanaveti azeri hanaveti nehuta, magoke antahintahi enerita, tamarimpa fru nehinkeno, avesimaneranteno rimpafruzama neramia Anumzamo'a tamagrane manigahie <sup>12</sup> Mago magomofona antako hunentenka avataginka azeri fru huo.

<sup>13</sup> Miko Anumzamofo naga'mo'za musenke atreramantaze.

<sup>14</sup> Hagi Ramofo Jisas Kraisi asunku zamo'ene Anumzamofo avesi zamo'ene Avamumo'enema tagroteno mani' avu'ava zamo'a mikomotmafi mesie.

## Galesia Poli'a Galesia Vahe'mokizmi Avonkrezmi'nea Naneke

*Anumzamo'ma Agra'a Polina huntegeno Aposolo eri'zama eri'nea zamofo naneke*

<sup>1</sup> Hagi nagra Poli'na aposolo ne'mo'na, ama eri'zana mago'a vahe'mo hunantege, mago'a naga'mo'za erio hazage'na e'norue. Hianagi Anumza Nafatimo Jisas Kraisi'ma fri'nefinti azeri otine'mo, hunantege'na e'nerue. <sup>2</sup> Maka nagrane mani'naza nafuhezanena, Galesia mani'naza mono naga'motarega musenkea atreneramantone.

<sup>3</sup> Anumza Nafatimofone Ranti Jisas Kraisi asunkuzamo'ene rimpa fruzamo'a tamagrane mesie. <sup>4</sup> Jisas'a asimu'a atreno kumitia atrerante'ne. E'inama hu'neana Anumza Nafatimofo avesi avaririno, mopa fima amama meni mani'nona kefo avu'avazampintira tahokeno tazahunaku anara hu'ne. <sup>5</sup> Ana hu'negu Anumzamo ra agia, Agra'a eri vava hugahie! Tamage.

### *Magoke Knare Musenkemofo naneke*

<sup>6</sup> Hagi nagra antri hue, Anumzamo'a Jisasi asunkuzanteti tamagi hu'nea nagamota netretma, ruzahu musenkemofo amage nentaze. <sup>7</sup> Hanki ru Knare Musenkea omnene, mago'amo'za tamazeri savri hu'za Jisas Kraisi Knare Musenkea erisavri hunaku nehaze. <sup>8</sup> Hianagi tagraneno, monafinti ankero vahe'mo'zanema, ko'ma tamasm'i'nona Knare Musenkema atre'za, ru kema tamasamisazana, kazusifi manigahaze! <sup>9</sup> Ko'ma tmasmi'nona ke menina mago'ene neramasamue, ko'ma Knare Musenkema huama hunketa antahi'naza kemofoma ha'ma rente kazigatima kema hanimo'a, kazusifi manigahie!

<sup>10</sup> Na'ankure nagrama e'inagema nehuana, vahe'mo'za antahi so'e hunantege, Anumzamo antahi so'e hunantenogu nehufi? Hifi nagrama mraguza-manetuana vahe'mo'za antahi muse hunantehogupi? Nagrama vahe'mo'za antahi muse hunante'nazegu'ma nehanu'na, Nagra Kraisi kazokzo eri'za vhahera omani'noe.

### *Poli'a eri'zama'agu azeri hanaveti ke hu'nea naneke*

<sup>11</sup> Na'ankure nena fugata nagri'ma navesiana, Knare Musenkema huama nehuana, vahe'mofo antahintahireti hunoramie huta antahi ama hanazegu nehue. <sup>12</sup> Na'ankure ama ana kea vahepinti e'orina, vahe'mo'za rempia huonami'naze. Hianagi oku'a frakinea kea Jisasi Kraisi eriama huno nam'i'ne.

<sup>13</sup> Na'ankure korapama Jiu vahe'mota avu'avaza nagrama nehua knafina, Anumzamofo avu'ava nehue nehu'na, mono naga'ma nezmahe'na, zamazeri havizama hu'noana tamagra ko antahi'naze. (Apo 8:3) <sup>14</sup> Nagra tusi hanaveti'na tagehe'mokizmi zamuzmara amage'nentogeno, anama huazamo'a nagri navuma mani'naza, Jiu vahe'mokizmia zamuzmamofona zmagatere'noe. Nagra tusi hanavetina nagehemofo avu'avara avaririnoe.

<sup>15</sup> Hianagi nagra nenrera rimpafina forera osu'nogeno, korapa Anumzamo Agra'a asunkuzanteti huhamprinante'nemo muse hunanteno, <sup>16</sup> Agra'a ne'mofona naveri hige'na, megi'a vahepina Knare Musenkea huama nehue. Mago vahe'mokizmia ame hu'na nagra ama ana kegura zmantahi'onke'noe. <sup>17</sup> Jerusalemi kumatera nagra mareori'na, ko'ma mani'naza apsol nagra

ome ozmage'noe. Hianagi nagra Arabia kumate vute'na, ete mago'ene Damasakasi kumate vu'noe. <sup>18</sup> Ana hute'na, 3'a kafu evige'na, Jerusalemi kumate vu'na, Pita'ene kea ome nehu'na, 15ni'agnagra anante mani'noe. <sup>19</sup> Hianagi mago'a mono nena fugizmia ozmage'noanki, Ramofo negna Jemisinke'noe. (Apo 9:26-30, 11:29-30.)

<sup>20</sup> Nagrama ama avoma kreneramuana, Anumzamofo avufina tamage hu'na reramatga nosue. <sup>21</sup> Ana hute'na Jerusalemi kumara atre'na Siri-anne, Silisia kaziga vu'noe. <sup>22</sup> Judia kazigama mono nagama Kraisimpi mani'namo'za, nagrira navufina onage'naze. <sup>23</sup> Hianagi tagrama tamentintima nehunkeno, nerahegeta agenke'a nentahuna ne'mo'a, anama eri havizama nehia amentintimofo kea huama nehie hu'za nagrikura hu'naze. <sup>24</sup> Na'ankure nagrite'ma fore'ma hu'neazankura, Anumzamofo agi erisaga hu'naze.

## 2

### *Poli'a Jerusalemi vuno aposol vahe'ene ke ome hu'nea naneke (Apo 15)*

<sup>1</sup> Hagi 14ni'a kafuzage manite'na, Jerusalemi kumate Banabasi'ene ete marerita nevuta, Taitusina avreta vu'no'e. <sup>2</sup> E'inama hu'noana na'ankure oku'a fraki'nea nanekea, Anumzamo nagri naveri hu'nea naneke megi'a vahepi huama hu'noa kea ome zmasami'noe. Menima e'nerua erizamo'ene, ko'ma eri'noa eri'zamo'a amnezanknara osinogu kva vahe zamagrike ome zamasami'noe. <sup>3</sup> Hianagi Taitusi'a Griki ne'mo nagri'ene vano ne-hia neragi, kva vahe'mo'za mago zamarimpa hu'za, oku avufga anona taga huzankura mago kea osu'naze. <sup>4</sup> Hianagi havige mono nerifu'za mono vahekna hu'za atrumahumpina enefre'za, Krais Jisasimpi fruhuta mani'nonazana tavre'za korapa avu'avazampi kinarerante'naku efre'naze. <sup>5</sup> Hianagi tagra tamage Knare Musenkemo tamagrane mesiegu, zamagri kea antahiozamita kankamuna ozami'none. <sup>6</sup> Hianagi ra zamagi eri'naza vahe'mokizmia, ra zamagima eri'nazo, ra zmagi e'ori'nazo nagra ana zankura nontahue. Anumzamo'enena ra zmagigura nontahie. Ana zamagima me'nea vahe'mo'za mago kea nagri kerera osu'naze. <sup>7</sup> Hianagi zamagrima ke'za antahizama hazana, Pitama zamufga tgahu Jiu vahete Knare Musenke ome huama hinogu hunte'neaza huno, nagrira zamufga taga osu'naza megi'a vahete Knare Musenke huama huogu hunante'ne hu'za ke'za antahiza hu'naze. <sup>8</sup> Na'ankure zamufga tagahu Jiu vahepima Pitama aposol erizante huntogeno vu'nea Anumzamo, nagri'enena aposolo eri'zana zamufga taga osu megi'a vahepina eriogu hunante'ne. <sup>9</sup> Anumzamo'ma asunkuzama'reti nami'nea eri'zana, Jemisima, Pita'ma, Joni'ma zamagra mono eri'zamofona hagaza zafa mani'ne'za keama nehu'za, Banabasine nagri'enena megi'a vahepi eri'za omerisu'egu magoka hurantageta megi'a vahepina vu'no'e. Hagi Jiu vahete zamagra eri'zana erisageta, tagra megi'a vahepi eri'zana erigahu'e.

<sup>10</sup> Zamagra zamunte omene vahe zamaza huzankura antahizamiho hu'za hurante'naze. E'i ana eri'zana nagrira tusi'za huno navenesige'na erinaku nehua erizanku hu'naze.

### *Pita'ma haviza higeno Poli'a kesuno azeri fatgo hu'nea naneke*

<sup>11</sup> Hianagi Pita'ma Antioku kumate ehanatige'na, haviza hu'nane hu'na avufi kesu'noe. <sup>12</sup> Na'ankure Jemisi'ma huzmanteneva heve'mo'zama omenageno'a, Pita'a knare huno megi'a vahe'enena magopinti ne'zana netere

hu'ne. Hianagi mago'a vahe'ma Jemisi'ma huzmantenge'za neageno'a, Pita'a anamokizmia zamatreno agragu umani'ne. Na'ankure zamufga taga hu'naza vaheku koro hu'ne. <sup>13</sup> Maka Jiu vahe'mo'za, anahukna hu'za kruna zamuzma nehazageno, ana zamo'enena, Banabasina avazu hu'ne. <sup>14</sup> Hianagi nagrama kogeno, Knare Musenkefi fatgo hu'za omanizage'na, maka'mokizmi zamufi anage hu'na Pitana asmi'noe, kagra Jiu ne' mani'enka meg'i'a vahekna hunka nemaninka, Jiu vahekna hunka nomanine. Nankna hunka meg'i'a vahe'mokizmia, Jiu vahe'mo'za nehazaza hiho hunka nehane?

*Jisas Kraisinte zamentinti hanaza vhahera Anumzamo'a Fatgo vhahera huno  
nehahaneke*

<sup>15</sup> Tagra Jiu vahe mani'neta, meg'i'a vahe'mokizmi amu'nompina, kumi vhahera omani'none. <sup>16</sup> Tamagerafa hu'za vahe'mo'za kasegemofo erizantetira fatgo vhahera omanigahaze. Hianagi Jisas Kraisinte'ma zamentintima hazamo'za fatgo vhahera nemanizankita, tagranena Jisas Kraisinte tamentinti nehuta fatgo vhahera nemnunankino, kasegema avaririzamo tazeri fatgo vhahera noseankita, Jisas Kraisinte tamentinti hanunazamo fatgo vhahera nemnunanki, kasegema avaririzamo'a vahe'mota tazeri fatgo nosie. Kasegemo'a mago vhahera azeri fatgo osugahie. <sup>17</sup> Tagrama Jiu vahe'motama Kraisimpima tazeri fatgo hu kanku'ma nehakesumota, kesunana kumi vahe mani'none hugahune. Ama'i ana zamo'a huno Kraisit higeta kumira nehumpi? Anara nosune. <sup>18</sup> Ko'ma atre'noa kasegema eri kasefa hanu'na, nagra kumi vahe manigahue. <sup>19</sup> Na'ankure kasegemo'a fri kante navrentege'na, kasegefina ko fri vahekna hu'na mani'noanagi, menina ama kanteti Anumzanena nasimu eri'na mani'noe. Nagrira Kraisit'ene rugeka zafare nahe'za hantizage'na, Agrane ko fri'noe. <sup>20</sup> Nagra Kraisit'ene keka zafare ko fri'noankina, menima mani'noana nagra'a omani'noanki, Kraisit nagu'afina mani'negena, nagrama ama navufare'ma mani'noana, Anumzamofo Nemofonte namentinti nehu'na Agra'a avesinanteno asimu'a nami'nemofonte mani'noe. <sup>21</sup> Nagra Anumzamofo asunku'zana namage'na hunemi'na eri amnezanknara osugahue. Tagrama kasegema avaririsunkeno, Anumzamo'a taguvazigahie hanunkeno'a, Jisasi'ma frino tazeri agruma hu'neazamo'a amnezankna hugahie.

### 3

*Kasegene amentintima hu'zamofo naneke*

<sup>1</sup> Hagi tamagra neginagi Galesia vhahera, Nagra Jisasima rugeka zafare ahageno fri'nea kea ko huama hugeta antahi'nazanagi, ina ne'mo antahintahitamia tamazeri savrira nehie? <sup>2</sup> Nagra mago'za tamagripintira kena erifore hu'za hue. Tamagrama Ruotge Avamuma eri'nazana, kasegemofo erizanteti eri'nazafi, ke nentahita tamentinti nehuta eri'naze. <sup>3</sup> Tamagra negi nenazafi? Avamumo eri agafa hu'nea eri'zana, tamagrati hanavereti erivagare'za nehazo? <sup>4</sup> Tamagrama ko'ma knazama eri'nazana, amane eri'nazo? Nagrama nagesa antahuana amne knazana e'ori'naze. <sup>5</sup> Anumzamo'ma Ruotge Avamu'a nerammino, kaguvazaga tamagripima erifore hu'neana, Moses kasege avaririzageno anara hu'ne? Anumzamofo ke nentahita, Agrite tamamentinti hazageno anara hu'ne?

<sup>6</sup> Avontafemo'a anage hu'ne, ***Abrahamu'a amentinti higeno,*** ***Anumzamo'a fatgo nere huno agrikura hu'ne.*** (Jen-Agf 15:6) <sup>7</sup> E'ina

hu'negu antahita ketama hanazana, zamentintima haza vahe'mo'zage, Abrahamu mofavre mani'naze. <sup>8</sup> Avontafepina anage huno krente'ne, Anumzamo'a meg'i a vhahera zmentinti hanageno zmvaregahie huno hu'ne. E'ina hu'negu Anumzamo'a anage huno Abrahamuna Knare Musenkea asmino, ***Maka mopafi vahe'mo'za kagripinti asomura erigahaze*** huno hu'ne. (Jen-Agf 12:3) <sup>9</sup> E'ina hu'negu iza'o amentintima hanimo'a, amentinti ne'ma Abrahamuma ami'nea asomura erigahie.

<sup>10</sup> Na'ankure kasegema avaririzante Anumzamo'a muse hunantegahie hanimo'a, kazusifi mani'ne. Anumzamofo avontafepina anage hu'ne, ***Mika vahe'mo'za mika kasegema amage'ma ontesnamo'za kazusifi mani-gahaze*** hu'ne. (Diu-Kas 27:26) <sup>11</sup> Hagi mago vahe'mo'e huno kasegema amage'ma antezampintira Anumzamofo avufina fatgo vhahera omanigahie. Na'ankure ***Fatgo vhahera zamentintima hanagu manigahaze***. (Haba 2:4) <sup>12</sup> E'inahukna hianagi, kasegemo'a amentinti hu'zana omnene, ***Iza'zo e'inahu hu'za kasegemofo amage'ma nentesazamo'za, ana kasegere manigahaze***. (Lev-Pri 18:5)

<sup>13</sup> Kasegemofo kazusifintira Kraisi'a mizaseranteno taza hu'neankino, ana kazusia Agra'a erino taza hu'ne. Na'ankure anage huno avontafepina krentene, ***Maka vahe'mo'za keka zafare'ma hanti'nesamo'za kazusifi mani'naze*** hu'ne. (Diu-Kas 21:22, 23) <sup>14</sup> E'ina hu'negu Abrahamuma huhamprinte'nea asomumo'a, Krais Jisasimpinti megia vahepina nevanigeta, tagra huvempa hu'nea Avamura tamentinti hanuta erigahune.

#### *Kasegene Anumzamo'ma huvempa hu'nea kemofo naneke*

<sup>15</sup> Hagi nenfugate, Nagra vahe'mo'zama maka knama nehaza zmvuzmavate hunte'na tamasamiza hue, vahe'mo'za'ma mago'zama hu'naku mago zamarimpama hu'za kema hagerafinesaza kea, mago vahe'mo'a rugea huntege, eri atrege osugahie. <sup>16</sup> Korapara Anumzamo'a Abrahamunku'ene agripinti fore'ma hania mofavregura huvempa kea hunte'ne. Agra kagri mofavreramine huno osu'ne. Agra rama'a mofavreraminkura osu'ne. Magoke mofavregu huno anage hu'ne, ***Kagripinti fore'ma hanimo'ema*** hu'neana, e'i Kraisinku hu'ne. (Jen-Agf 17:7) <sup>17</sup> Hanki nagrama nehuana amanage nehue, esera Anumzamo'a Abrahamu'ene huvempa hutegen, 430'a kafuzage evutegen, henka kasegea before hu'neankino, kasegemo'a Anumzamo'ma huvempama hu'nea kea eri otregahie. <sup>18</sup> Na'ankure erisanti haregahaze hunesia zamo kasegefima manenesiana, huvempa hu'nea kefina omancesine. Hianagi Anumzamo'a Abrahamuna huvempa hunte'ne.

<sup>19</sup> E'inama hu'nesiana, na'a agafare kasegea ami'ne? Kasegema zami'neana vahe'mo'za kefovama nehzaza keama hanazegu zami'ne. Hianagi ama ana kasegema avaririzamo'a memevuno, Anumzamo'ma huvempama hu'nea Mofavrema esia knare ome vagaregahie. E'ianazamo'a mago'ane ruzahu hu'ne. Anumzamo'a ankero vhahera kasegea zamige'za, Anumzane, vahe'mofone amuno ne' Moses ami'naze. <sup>20</sup> Tare vahe'moke kema hagerafinaku'ma hanakeno'a, amuno ne' mani'enkene anara hugaragi, Anumzamo'Agra'a huvempa Abrahamuna hunte'ne.

<sup>21</sup> Kasegemo'a Anumzamo huvempa hu'nea kene mago zanarimpa osu'napi? A'o, anara osu'ne! Hagi maka kasegemo'ma kasefa tasimuma tamisiana, tagra ana kasegege amage'nenteta Anumzamofo avurera fatgo vhahera manusine. <sup>22</sup> Hianagi Anumzamofo avontafemo'a anage hu'ne, Kumi'mo'a maka vhahera kina huzmantehnegu, Anumzamo'ma huvempa

hu'neazama erisazana magoke kana, Jisas Kraisinte zamentinti hanamo'za erigahaze.

<sup>23</sup> Hianagi amentintima hu'zama omenegeno, kasegemo kina rerantegeta manita neonkeno tamentinti hu'zana efore hu'ne.

### *Tamentintima hanuta Anumzamofo mofavre manisuna naneke*

<sup>24</sup> E'ina hu'negu kasegemo'a kvagriranteno Jisas Kraisi knare ehanati'neankita, tagrama tamentinti hanuta Anumzamofo avurera fatgo vahera manigahune. <sup>25</sup> Hianagi tamentinti hu'zamo fore'ma hu'nea knafi mani'nonankino, kasegemo'a kegava kriorantegahie.

<sup>26</sup> Na'ankure tamagra maka'mota Jisas Kraisinte'ma tamentintima nehuta, Anumzamofo mofavre mani'naze. <sup>27</sup> Na'ankure tamagra maka'mota Jisas Kraisinte mono tina nefreta, Kraisia kukena hiaza nehaze. <sup>28</sup> Hanki Jiu vahero Griki vahera omanita, kazokzo vahe'ene amne vahera omanita, veo aro omani'naze. Na'ankure tamagra maka'mota Krais Jisasimpina magoke mani'naze. <sup>29</sup> Hagi tamagrama Kraisi vahe'ma mani'nenuta, tamagra Abrahamu negehogata mani'neta, erisanti haregahazema huno Anumzamo'ma huveampa hunte'nea vahera mani'naze.

## 4

### *Kraisi erizanteti Anumzamofo mofavre mani'naze hu'nea naneke*

<sup>1</sup> Hagi nagra anage hu'na nehue, nefu fenozama erisantihare ne'mo'ma osi mofavrema mani'nenu'a, maka'zana agri'za megahianagi, kazokzo eri'za vahekna huno manigahie. <sup>2</sup> Hianagi ana mofavremo'a fenozama kegava hu'naza vahe'ene, agri'ma kegava hu'naza vahe'mofo agorga'a mani'nenigeno, nefu'ma fenozama erisanti haregahane hunte'nesia kna efore hugahie. <sup>3</sup> Anahukna kante tagranena mofavrema mani'neta, ama mopama kegava hu'naza avamutamimofo zmagorga'a mani'neta kazokzo hu'nonane. <sup>4</sup> Hianagi humante'nea kna fatgoma egeno'a, Anumzamo'a Mofavre'a huntogeno, a'mo ana Mofavre kasentegeno, kasegemofo agorga efore hu'ne. <sup>5</sup> Ana hu'negu kasegemofo agorga mani'naza vahera, Agra mizaseranteno tamavresigeta, avreno kri'nea vahekna huta, Agri mofavre manigahune. <sup>6</sup> Na'ankure tamagra mofavre'a mani'nageno, Anumzamo'a Mofavre'amofo Avamu huntogeno, tagu'afi eman'i'neno tazeri otino, Aba,\* Nafa'o huno nehie. <sup>7</sup> E'ina hu'negu mago'ene kazokzo eri'za vahera tamagra omani'naze. Hianagi Anumzamofona mofavrerami mani'naze. Ana hu'nazagu fenozama'a erisantihare vahe mani'naze.

### *Poli'a Galesia vaheku hakare agesa antahi'nea naneke*

<sup>8</sup> Hagi tamagra korapara Anumzana keta antahita osu'neta, amne zanku, anumzantie huta nehazageno, kina reramanentegeta anazamofo kazokzo vaher mani'nazane. <sup>9</sup> Hianagi menina Anumzamofona keta antahita hazageno, Anumzamo'enena tamagrira tamegeno antahino hu'neanki, nahigeta tamagena hunemita, haviza huno hanave'a omne avamute nehuta, mago'anekazokzo eri'za vahe'a manisune huta nehazo? <sup>10</sup> Tamagra Anumzamo'ma muse huramante kzigati, mago knazupo, ikantero, kafurero, knane knanena makazana huge, osugera nehaze. <sup>11</sup> Tamagrikura tusi'za hu'na eri'zana eri'noankino, ana eri'zamo amnezankna huzankura nagra tusiza hu'na kore hue.

\* <sup>4:6</sup> Griki vahe kefina Aba hu'neana nenafo hu'ne.

<sup>12</sup> Nafuheta nagrama hu'noankna hutma, tamagra Jiu vahe'mokizmi kasegemofo kinafina omanihogu navenesige'na tamantahinegoe, hanage'na nagranena tamagrikna hanuegu nehue. Tamagra mago hazenkea nagrira huonante'haze. <sup>13</sup> Hianagi tamagra antahita keta hu'naze. Navufafina kri me'nege'na, Knare Musenkea huama hu'na ese knazupa tamasami'noe. <sup>14</sup> Nagri krimo'a knaza tamagrira tam'i'ne, hianagi ana krima eri'noazankura tamagra tamavugosa huonantege, tamagena huonami'naze. Hianagi tamagra nagrira Anumzamofo ankerio avreankna huge, Krais Jisasima avreankna hutma navre'naze. <sup>15</sup> Hianagi ana musezantamia iga menina me'n? Nagra tamage hu'na tamagrikura huama nehue. Tamagra ana knazupa tusiza huta nazahunaku hu'nazankita, tamagrama tamavuma tagatitā nazamahugama huneresina, amne anara hazasine. <sup>16</sup> Tamage kema neramasamuazamo, tamagri ha' vahera nemanufi? <sup>17</sup> Antahiho, e'i ana vahe'mo'za tamagrira masavenke hu'za tamavrenaku nehazanagi, tamagrira tamaza hunakura anara nosaze. Zamagra nagriteti tamavazu hu'za zamagrarega antesageta zamaza hanazegu anara nehaze. <sup>18</sup> Hianagi nagrama omanisua knafine, maka zupa knare tamavutmava'ma huzanku'ma hanavematisazana, e'i knare zantfa hugahie. <sup>19</sup> Mofavre'nimote Anumzamofo mofavre'manita, Kraisimpina nena vahekna hutma manisazegu'ma tamagri'ma tamaza hunaku'ma nehugen'o a'nemo mofavre kasente'naku nehigeno ata negriankna nata negrie. <sup>20</sup> Hianagi nagrama nagesa antahuana tamagrane menina umani'n'e'na, fruhuna kea hu'naku nehue. Na'ankure nagra nankna hu'na tamaza hugahue, antahintahinimo'a savri nehie.

### Serane Hagakizni fronka naneke

<sup>21</sup> Hagi tamagra nasmaho, kasegemofo agorga'a manize nehaze vahe'mota, tamagra kasegemo'ma hu'nea kea ontahinazo? <sup>22</sup> Na'ankure anage huno avontafepina krente'ne, **Abrahamuna tare ne' mofavre'a mani'na'e, mago mofavrea kazokzo a'mofo mofavregi, magora kazokzo osu a'mofo ne' mofavre mani'ne.** (Jen-Agf 16:15, 21:2) <sup>23</sup> Hianagi kato a'mo Haga ne' mofavrema kasente'neana mopafi vahe'mo'za nehazaza huno ksentegeno, Sera'a kazokzo osu a'mo'a Anumzamo huvempa hu'nea ne' mofavre kasente'ne. <sup>24</sup> Ama ana a'tremokizni kemo'a Anumzamo'ma Agra'a vahe'enema hagerafino manizamofo kemofo erinte'ama hu'ne. Haga'a kazokzo a'mo'a Sainai agonafima Anumzamo'ma huhagerafi'nea kemofo hu avame huno mani'ne. Agri nagapinti'ma fore'ma haza naga'mo'za kasegemofona kazokzo naga mani'naze. <sup>25</sup> Hega'a Arabia kaziga Sainai agonane, menima me'nea Jerusalemi rankuma huvame huno mani'ne. Na'ankure agrane mofavre'araminenaka kazokzo naga mani'naze. <sup>26</sup> Hianagi anagamu monafi me'nea Jerusalea, tagri nerareraka kazokzo osu a'mo hu avame huno mani'ne. <sup>27</sup> Na'ankure anage huno avontafepina krente'ne, **Muse huo mofavre kase onte a'moka, mofavre antezampi katama nogrimoka, ranke hunka kezatio. Na'ankure mofavrema kase onte a'moka nevema mani'nea ara agaterenka, rama'a mofavre kasentegahane hu'ne.** (Ais 54:1.)

<sup>28</sup> Hagi nena fugata, tamagra Anumzamo Abrahamu huvempa hunte'nea mofavre Aisakinkna hutma mani'naze. <sup>29</sup> Hianagi vahe'mo'za mofavrema erifore nehaza kantetima kasema ante'nea mofavremo'a, Avamumofo kanteti'ma fore'ma hu'nea mofavrea hazenke ami'ne. Meninena anahu avu'ava zana me'n. (Jen-Agf 21:9) <sup>30</sup> Hianagi avontafemo'a na'anee huno

hu'ne? Kazokzo a'ene mofavre'anena avare atro hu'ne. Agra mago'azana e'origahianki, kazokzo osu a'mofo ne' mofavremo maka'zana erisinti hategahie huno hu'ne. (Jen-Agf 21:10-12) <sup>31</sup> E'ina hu'negu nena fugata, tagra kazokzo a'mofo mofavrea omani'nonanki, kazokzo osu a'mofo mofavre'rami mani'none.

## 5

### *Kraisimpina fru huta manisunazamofo naneke*

<sup>1</sup> Hagi Krais'i a kinafinti katufe tamente'neanki kina vahekna huta omanita, oti hanavetita nemanita, ete mago'ane kasegemofo kinafina omanio.

<sup>2</sup> Antahihi, Nagra Poli'na amanage hu'na neramasamue, tamagra tamavufgama atresage'za taga huramante'sazana, Krais'i tamaza osugahie. <sup>3</sup> Mago'ane anage nehue, maka zmufama taga hu'naza vahe'mota, maka kasegea amage'antegahaze. <sup>4</sup> Tamagra Anumzamofo avurera kasegefintira fatgo vahera manigahune hutma nehaze. Kraisimpintira ko huramatre'neankita, tamagra Anumzamofo asunku'zampintira evurami'naze. <sup>5</sup> Na'ankure tagra Avamumo taza higeta tamentinti nehuta, fatgo vahere huno hurantesigu amuhara nehune. <sup>6</sup> Na'ankure tamavufa taga hu'nazo, tamavufa taga osunaza zana Kraisimpina amneza me'ne. Hianagi tamentinti nehunkeno anazamo tazeri otigeta, ovesinte avesinte nehuna avu'avazamo razana me'ne.

<sup>7</sup> Kotera knare huta tamentintifina tamaga re'nazanagi, iza ru antahintahi tamamino asevazirmantegeta tamagé kema amage'ma nentazazana netraze? <sup>8</sup> Hagi anama ru antahintahi tamamino asevazineramante-nea vahera, tamagima hu'nea Anumzamo'a huonte'nea vahe'mo nehie.

<sup>9</sup> Hanki osi'a zisimo'a, flauamofona heruntazageno'a maka azeri zonere.

<sup>10</sup> Hanki tamagra Ramofo vahe mani'nazankina, nagra antahi'noe. Nagrama huankea antahinenamitma amagera nentaze. Iza'o ana hazenkema erifore'ma nehia vahe'mo'a ra hazenkefi manigahie. <sup>11</sup> Hianagi nafuhete, nagrama tamavufgama taga hihogu'ma huamama nehanugen'o, na'a hige'za nagrira nazeri haviza nehaze? Keka zafamofo kemo'a zmagigo zaminnafa hu havegna nehiazamo'a amanezankna hugahie. <sup>12</sup> Nagri'ma navesiana e'ima hazenkema neramiza naga'mo'za, zamagra oku zamavufgama taga nehu'za, zamagonknazama harisazana knare hugahie.

<sup>13</sup> Tamagra nena fugata Anumzamo'ma tamagima hu'neana kinafintira katufeta manisazegegu kea hu'ne. Ru tamagra antahita hago kinafintira katufeta mani'none nehuta, korapa tamarimpamofo avu'ava hanagi, anara osugahaze. Tamagra ovesinte avesinte hu avu'ava zampinti oza aza hiho. <sup>14</sup> Na'ankure maka kasegemo'a magoke kasegefi eri knare hu'ne, anagemo'a anage hu'ne, ***Tavaonkare'ma mani'nesamokizmia, kagrugu'ma kavesintanaza hunka zamavesintegahane*** hu'ne. (Lev-Pri 19:18) <sup>15</sup> Hianagi tamagra afi zagakafamo hiazza huta, ompri ampri hanutma tamagratami tamazeri haviza hutma fanane hugahazanki kva hiho.

### *Avamumofo hanavefi mani'zamofo naneke*

<sup>16</sup> Hianagi anage hu'na neramasamue, Avamu'ene kama vanoma hanazana, tamavufgamofo avesi'zana amagera ontegahaze. <sup>17</sup> Na'ankure avufgamofo avesizamo'a, Avamumofo avesizanena ha'rentegeno, Avamumofo avesi'zamo'a avufgamofo avesi'zana ha'renenteankino,

amu'nozanifina ha' orente arente'za me'neankita, nazano hunaku'ma hanaza zana osugahaze. <sup>18</sup> Hianagi tamagrama atresageno Avamumo'ma tamazeri fatgo huno vanigeta, tamagra kasegemofo agorgia omanigahaze.

<sup>19</sup> Hagi ama tavufgamofo avesi'zana amanahu'za me'negeta negone. Monko avu'avazane, agru osu avu'avazane, havi avu'avazane, <sup>20</sup> havi anumzante mono huntezane, avotga zane, ha' hu'zane, fravazi'zane, kanive re'zane, asi vazi'zane, vaheku agesa ontahi zane, veganokno hu'zane, vahe refko hu'zane, <sup>21</sup> rumofo zankunofi ahe'zane, ti neneno negi ne'zane, atru hu'za ruga'a savri zamofo naneke hu'zane. E'inahukna tavutavazana eri fore niehi. Ko'ma tamasmi'noana meni mago'ene neramasmue. E'inahu zamavu'zmavama nehaza vahe'mo'za Anumzamofo kumapi omanigahaze.

<sup>22</sup> Hianagi Avamumofo avu'ava zana avesinte'zane muse'zane, rimpfa fru'zane, akoheno mani'zane, vahe so'e hunte avu'ava zane, knare avu'ava hu'zane, ke amage'anteno avariri fatgohu avu'avazane, <sup>23</sup> akoheno fru avu'ava hu'zane, agra'a avesiza kegava huzamofona mago kasegemo'a hara reontegahie. <sup>24</sup> Hagi Krais Jisasimpi mani'namo'za, zamufamofo avu'avazane, zmesi'zanena rugeka zafare ahe fri'naze. <sup>25</sup> Tagrama Ruotge Avamu'enema mani'nesuta, atrenunkeno maka kama vano huzantifina Ruotge Avamu'mo kana taveri huno vanie. <sup>26</sup> Hanki atrenketa tagra'a tavufga rana nosuta, vahera zamarimpa zamazeri otikea nosuta, kanive orente arente osanune.

## 6

### Oza aza hutu knaza erisuna naneke

<sup>1</sup> Hagi nena fugta magotamimo'ma kumipima evuramisigeta, Ruotge Avamumofo nevaririsamota, ana kumapima evuramizankura tamagra'a kegava hu'netma, fru avu'avazampinti e'inahu vahera azeri fatgo hugahaze.

<sup>2</sup> Knazama oza aza hutma erinutma, Kraisi kasegea eri knare hugahaze.

<sup>3</sup> Na'ankure mago'mo'ma agima omnennenimo, nagi me'ne huno agesama antahisiana, agra'a revatga hugahie. <sup>4</sup> Hianagi magoke magokemo'a agra'a eri'za rezagneno keso'e huteno, agrama e'nerisia erizankura agi'a erisaga haniazamo'a agafa'a megahie. Hanki rumoma enerisia erizantera, agra eri'zana erinteno rezagneno onkegahie. <sup>5</sup> Na'ankure magoke magokemo'a agra'a eri'zamofonte knazama'a eritere hugahie.

<sup>6</sup> Mago'mo'ma Anumzamofo kema rempima hunezamisimofona, rempima hunezamige'za e'nerizamo'za, mika knare'zazamia refko hu'za amiho.

<sup>7</sup> Kagraka'a regavatga nehunka, Anumzamofo azeri haviza hu naneke huonto, nazano kagrama kri'nesana zana, kagraka'a kafigahane.

<sup>8</sup> Na'ankure vahe'mo'ma agra'a havi avu'avazama kri'nenia zana, agra'a havi avu'ava zana kafigahie. Hianagi iza'o Avamumofo avesiza avaririno kri'nenimo'a, Manivava asimu erigahie. <sup>9</sup> E'ina hanigu knare avu'ava'ma hu'zankura tavesra osanie. Tagrama hanavetita eri'zama erisuta, nezama kafi knazupa knare ne'za kafigahune. <sup>10</sup> E'ina hu'negu tagrama vahe'ma zamaza huga kankamuma fore'ma hanigetma, maka vahera knare tavutva hunezamita, Ramofonte'ma zamentintima nehaza nagara zamazahutfaza hugahaze.

### Poli'a huvagare zmavumro zmante'nea naneke

<sup>11</sup> Hanki nagrani'a nazampinti ama ranra avontamimpinti avona krerami'noanki, tamagra keho. <sup>12</sup> Zamagrama tamavufgama taga

hiho hu'za tutu hunermantaza vahe'mo'za, tagra knare hu'none hu'za nehu'za, Kraisi keka zafagu'ma huama nehu'za, knazama eri'zankura zmave'nosige'za anara nehaze. <sup>13</sup> Na'ankure zamagra'a zmavufama taga hu'naza vahe'mo'za, zamagra kasegea amagera nontaze. Hianagi tamagra tamavufa taga hanage'za, ana tmavufgarekura zamagra zmavufga ra hu'naku neheze. <sup>14</sup> Hianagi nagra mago'zantere hu'na navufga erisaga osugahuanki, Rantimo Jisas Kraisi nagriku huno rugeka zafare fri'nea zankuke navufga ra nehanugeno, Rugeka zafare'ma Kraisima eri'nea eri'zanteti ama mopafi kefo navu'nav'a'zamo'a ko nagripintira frige'na, nagranena ama mopafi avu'ava zampina ko fri'noe. <sup>15</sup> Na'ankure avufama taga hanio, avufama taga osniana razana omnene, hianagi agu'a rukrehe huno kasefa'ma huno mani'zamo tamagezana me'ne. <sup>16</sup> Hanki ama trakemo ke hu'nea kante ante'za vano nehaza vahe'mofona, rimpfa fru'zane, asunku'zamo'a zamagrane me'nena, tamage Anumzamofo Israeli vahe manigahaze.

<sup>17</sup> Hanki menintetima vaniana, mago vahe'mo'e huno hazenkea onamino, na'ankure Jisasima ahazageno avufgare fore hu'neankna afuhe, nagri navufarera ana nafuhe me'ne.

<sup>18</sup> Rantimofo Jisas Kraisi asunku'zamo'a tamagri avamu'ene mesie. Tamage.

## Efesas Poli'a Efesasi Mono Naga'mokizmi Avonkrezmi'nea Naneke

*Anumzamo'a Jisasimpi huvazino tazeri kasefa vahe nesea naneke*

<sup>1</sup> Hagi Poli'na, Krais Jisas aposolo eri'za ne'mo'na Anumzamo Agra'a avesite huhampri nantenege'na, Efesasi kumate zamentinti nehaza naga'ma (Saints) mani'ne'za, Krais Jisasinte tamage zamentinti nehu'za amage' nentaza vahetega ama avona kre netroe. <sup>2</sup> Anumza Nerafantegati'ene Ranti Jisas Kraisintegati asunku'zane, rimpia fruzamo'a tamagrane mesie.

*Kraisimpi huvazino Anumzamo'a monafinti mikozama neramia zamofo naneke*

<sup>3</sup> Hagi Anumzamofo ra agi amisune, Ranti Jisas Kraisi Nef'a'ma mona kumapinti Kraisimpi, avamupina maka asomura hurante'ne. <sup>4</sup> Korapara Agra mopa erifore osu'nea knafi agu'areti avesiranteno, Kraisi'ene otage huta fatgo zampi, havizana omanesigeta Agri avure manisnune huno tagrira huhampirante'ne. <sup>5</sup> Korapa Agra huhampri tanteno mofavreni'aza hugahaze huno Jisas Kraisinteti, tavreno Agrarega tante'ne, Agra'a so'e zanteti antahiramino anara hu'ne. <sup>6</sup> Anumzamo'a avesinentemofo Jisas Kraisimpi taza hu'zana eri tagitregeno erami'nea zankura, ra agi amisune. <sup>7</sup> Kraisi koranu tahokeheno miza seneranteno, maka kumitia eri fanane nehuno, tusi'a asunku zama'areti Agra asuragiranteno taza hu'ne, <sup>8</sup> Agra rama'a zampi tagrira taza hu'ne. Mika fatgo antahintahine, knare tagu tagesa tami'ne. <sup>9</sup> Korapa Agri'a agu'afi oku'a me'nea antahi'za eriama huno taveri hu'ne. Kraisi'a zamaza hugahie huno agu'afi atre'nea tzahu'za, Agra'a eriama hu'ne. <sup>10</sup> Anumzamo ofenka'ati mago knama esia zupa, monane mopane eri mago huno, maka Kraisi kvafi antenaku antahi'neane,

<sup>11</sup> korapa agafare Anumzamo'a Agra'a avesite ko antahino keno huteno, maka'zana Kraisinteti erisanti hare'snaze huno tavarenaku huhampri rante'ne. <sup>12</sup> Tagra ana nehuta, Jiu vahe'mota Kraisinte tamentintima pulsante nehumota tagra, Anumzamofona ra agi amigahune. <sup>13</sup> Tamagranena tamage kema Kraisimpinti ko antahitetma, manivava tamasimu eri'zanku Knare Musenke'are tamentintia nehazageno, Agra Ruotge Avamu'anu azanko avona kreno huhampri (seal) tamanteno tamami'ne. <sup>14</sup> Avamu'ama tami'neana huhampitanteno henka'anena ruga'a knarezantmima huhampirante'nea zantamina erigahune huno tami'negu Anumzamofona muse hunenteta ra agi amisune.

*Poli'a, Efesasi kumate vahe knare zamagu zamagesa Anumzamo zamisigu nunamu hu'nea naneke*

<sup>15</sup> Hagi e'ina hu'nea agafare nagranena, Ranti Jisasinte tamagra tamentintima nehaza ke'ne, maka Anumzamofo naga otge hu'za nemani'za naga'ma tamavesima nezmantaza zanku nentahi'na, <sup>16</sup> maka zupa nunamuni'afina nagerakani noramante'na, tamagrikura Anumzamofona susu hunentoe. <sup>17</sup> Anumzamo'a so'e hihamu'ane masamofo Nafa'amo Ranti Jisas Kraisi Anumzamo'a knare antahi'zane, tamagu tamagesane, tamage ke'a huama hu antahi'zamofo avamura tamisnigeta Agrira antahita keta nehuta,

avamupina ra hanazegu nehue. <sup>18</sup> Nagra nunamu nehuankino antahintahitamofona masa tamina, tamagu'amofo avurgamo hari nehanigetma, Agrama kezatino fore hugahie huno tamagima nehiazana, tamagra kegahaze. Mizama'a mareri'nea zantmi, hihamu'ane msazama'afi Anumzamo'a tamina, Agrite mani ruotge nehaza vahe'mo'zane, tamagra erigahaze. <sup>19</sup> Hanki ana nehuta tagrama tamentinti nehuna vahe'ma agatererfa razama, Agra hanave'a tami'neana, ama ana hihamu'agino, <sup>20</sup> tusi'a hihamu'afi Kraisina fri'nefintira, Agra azeri otiteno monare azantamaga kaziga avare antegeno mani'ne. <sup>21</sup> Mareri onagate'nea tra'ma kvahu hanavema, maka zante kvama hu'neane, mika zamofo agima ko'ma antemi'neane, menima ama mani'nona knafinkerompage, henkama esia knafinena agatereno onaga'a mani'ne. <sup>22</sup> Maka'zana Krais azampi kva hanie huno ante'ne, Agri kvafi maka'zana mono kevumotagu (sios) huno ante'ne. <sup>23</sup> Mono kevuma mani'nazana Krais avufgagna mani'naze. Krais mani viteno nemanino maka zampina anazanke huno manivite'ne.

## 2

### *Fri' vahekna huta mani'nonkeno Jisasimpi tazeri oti'nea naneke*

<sup>1</sup> Hagi korapara ke ruhanentagita, kumitmifi fri'nazane. <sup>2</sup> Tamagranena maka mopafi vahe'mo'za nehzankna huta havi kante nevzane, kumi'tmimo avite'negeta, Sata kerera amage anteta, kankamumpi nemaniza hihamu'ane kva avamutamimofo amage anteta, Sata eri'zana enerita Anumzamofonte zamagu'a onte'za zamefi hunemi'za vahe'ene nemanizane. <sup>3</sup> Zamagri amu'nompina korapara tagranena anazanke huta maka havi tavesi'zante amage ante'none, tagu'affine amega tavufafine tave'manesiaza hutere nehuta, tagra ana kefovampi fore huta amage' nentonkeno, Anumzamofona asi vazi'zamo tagrite'ene maka vahete' enena e'ne. <sup>4</sup> Hu'neanagi Anumzamofo asuragi'zamo vite'ne, na'ankure tusi'a avesi'zanu Agra agu'areti tagrira avesi rante'ne. <sup>5</sup> Kasege'a ruha'nentagita fri vahe kna huta mani'nonkeno, asunku'zanteti tahokeno, Kraisimpi tagrira fri'zampitira tazeri otino, <sup>6</sup> magopi mona kuma'are tantegeta, Agrane kini tra'are mani'none. <sup>7</sup> Anama hu'neana henkama fore hania knarerera, agatere'nea zana Agri'a marerisa asunku'zanu tagrira Krais Jisasimpi taza huno agampu hurantesigu anara hu'ne. <sup>8</sup> Na'ankure tamentinti nehzagu asuntgiramanteno tamaza huno tamavre'ne. Tamagra'a knare'za hu'naza zante anara osu'neanki Anumzamo museza (gift) tami'ne. <sup>9</sup> Eri'za eri'nea mizana omneme, e'igu mago vahe'mo'a, agra'a agi erisaga osugahie. <sup>10</sup> Na'ankure tagrira, Agra'a tro hurante'ne, Krais Jisasimpi knare eri'za erisunku, Anumzamo'a korapa ana kana retro hunte'neankita, knare eri'za enerita ana kantera vugahune.

### *Kraisimpi tazeri ksefa hu'nea naneke*

<sup>11</sup> E'i zanku tamagra tamagesa antahiho, korapara tamagra meg'i a vahere huta mani'nazane (Gentiles), tamagima ante'nazana, zamufa taga osu vahere nehu'za, zamufama taga neha'za vahe'mo'za, (Jiu) e'i zamazanu zamufa azeri'ne'za taga nehaze. <sup>12</sup> Tamagra tamagesa antahini hiho, tamagra e'i ana knarerera Kraisina afe'are mani'nazane, Israeli vahe krerafane omani'nazane, huvempa huno huhagerafi zamante'nea agu'affina omani'nazane, so'e mani'zama eri kankamutamia omanegeno, tamagri

Anumzana mopafina omani'neane. <sup>13</sup> Hu'neanagi menina Krais Jisas-impi afete'ma koteta tamagra mani'nazafintira, Kraisi koramo tamavreno tava'oma'are neramante. <sup>14</sup> Na'ankure Agra'a tarimpa fru huno mani'zana (peace) neramino, Jiu vahe'ene megi'a vahe'mota ha' orente arente nehunana tazeri magopi neranteno, amu'nontifima atane'zama me'neana, er-itreno tazeri mago hu'ne. <sup>15</sup> Agra'a avufareti ha' orente arente nehu'nazana eri fanane nehuno, Jiu vahe kasege ramine, osi kasege ramimo megi'a vahe (Gentiles) tazeri fegi atre'nea kasege ramina eri netreno, Agra'a Jiu vahe'ene megi'a vahemota tazerino magoke vahe tro huneranteno, ke ha'ma nehuna zana tazeri fru huno mago tarimpa hurante'ne. <sup>16</sup> Rugeka zafare Kraisi'a frino ha' frama tamagra'rmagra hu'zana eritreno, tamazeri mago higetma, Anumzamofona magoke avufagna hu'naze. <sup>17</sup> Agra eno rimpia fru huno manizamofo nanekea afete'ma mani'naza vahera mono kea huzmasmi'ne, hagi tava'onte mani'naza vahera rimpia fru huzmante'ne. <sup>18</sup> Na'ankure Agripinti tarega vahe'mota, magoke Avamu e'nerita, Nerfantera vugahune.

<sup>19</sup> E'i zanku tamagra menina megi'a vahe'mota, emani vahe knara osu'naze. Hianagi tamagra Anumzamofa naga'ene nom'aifi nemanize. <sup>20</sup> Aposolo naga'ene kasnampa naga'mo'za, tra' zafagna hu'naze. Krais Jisasi'a Agra nomofo renagentete tra havegna hu'ne. <sup>21</sup> Agripi ana miko nomofonte, vazinte zafamo'za ome vazinte eme vazinte hiankna hu'za hagera ra hu'za, Ramofo otage mono noma'a before nehaze. <sup>22</sup> Tamagra ana nonkna hutma mani'nazageno, Anumzamo'ene Avamu'amo'enena ana nompina mani'ne.

### 3

#### *Poli'a megi'a vahepi mono ke hu'nea naneke*

<sup>1</sup> Hagi ama'na agafare nagra Poli'na Krais Jisasi eri'zampina kina tam-agri'ma (Gentiles) tamazahu zanteru hu'noe. <sup>2</sup> Anumzamo'a asunku humanteno tamagritega naneke'ama huamahu eri'zama nami'neana tamagra ko antahineghaze. <sup>3</sup> Anumzamo oku'a me'nea antahi'zama'a eriama huno naverige'na, nagra osi'a naneke kote'na avompina kre'noe. <sup>4</sup> Kegahazema hu'na kre'noa avoma hamprisuta antahi'zaniafi oku'a me'nea antahi'zama Kraisinku'ma hu'noa kea tamagra antahi ama hugahaze. <sup>5</sup> E'i ana antahi'zana korapa vahe'mo'za eriama hige'za ontahi'nazane. Hagi menina Agra'a aposolo vahete'ene kasnampa vahete Avamu'mo eriama nehie. <sup>6</sup> Ama'i oku'a antahintahigino, megi'a vahe'mo'za (Gentiles) Jiu vahe'ene mago'zanke hu'za marerisa knare'zana, Anumzamofa mofavreramine eri-gahaze. Ana tare kevumo'za knare muse nanekere zamentinti nehu'za, magoke avufa nemani'za, huhampri zamante'nea asomura Krais Jisasi-impinti muse hu'za erigahaze.

<sup>7</sup> Ama Knare Musenkemofo (Gutnius) eri'za vahe nagra mani'noe, Anumzamo asunku hunanteno muse'za hanavea nami'nea hanave'afi eri'zana e'nerue. <sup>8</sup> Nagra mago'a mono eri'za (saints) vahepina, osi'tfa hu'nogeno asunku hunanteno, urefa erefa'a omne naneke megi'a vahepi huama huo huno namige'na, Kraisimpi knare'za me'neaza eriama hu'na neramasmue. <sup>9</sup> Nagrira Anumzamo maka'zama tro'ma hu'nea Ne'mo, oku'a ama naneke korapa ante'nea nanekea huhampri nantege'na, ama nanekea hakare'a vahete eriama nehue. <sup>10</sup> E'ina hu'neankino Anumzamofona ruzahu ruzahu knare antahi'zana mono vahe'mo'za eriama nehan-age'za, mona kunkamumpi kegava nehaza vahe'ene, manisga hu'naza kva-

vahe'mo'za kegahaze. <sup>11</sup> Ama'i korapa monane, mopane tro osu'neno, tro huntegeno me'nea antahintahi Krais Jisasi Rantimofompi eri ama hu'ne. <sup>12</sup> Na'ankure Kraisinte tagra tamentinti nehunku, koro osuta Anumzamofo tavaonte nevune. <sup>13</sup> E'ina hianagi nagri'ma tusi'a zampi nazeri haviza nehaza zankura tamarimpa havizana osiho, e'ima nazeri haviza nehaza zamo'a tamagri tamaza hanigeta knare hutma manigahaze.

### *Poli'a mani hanavetisagu nunamu hu'nea naneke*

<sup>14</sup> Ama ana agafare, Nerfante narena re'na nunamuna nehue. <sup>15</sup> Hakare monafi naga'ene, mopafi naga'mo'za Agripinti zamagia e'nerize. <sup>16</sup> Nagra nunamu nehue, Agra'a marerisa knare'za huhampri tamanteno hanave'afi tamazeri hampo'na hanigu, Agra'a Avamu'a vahe'mofo agu'afinka ante'ne. <sup>17</sup> E'ina hanageno, tamentinti nehazagu Kraisi'a tamagu'afi mani'nesigetma, tamagra mopafi zafamo rafu'na reno oti hanave tiankna huta Anumzane, tamararuhei'i kizmia tamagu'areti huta zamavesi zmantegahaze. <sup>18</sup> Ana nehutma maka Anumzamofo naga'mo'za (saints) nentahizankna hutma kagatahu'ane, zaza'ane, atrure'ane, zaza huno fenka urami'nea avesi'zana kegahaze. <sup>19</sup> Ana nehutma Kraisi agu'areti avesima rante'nea zamo'a antahi'zana agatere'neakitma ketma antahitama nehutma, tusi'a zantfa me'neankitma ana mikora antahi amara osugahaze. E'ina hanigetma tamagra knare mani'zane hanavene Anumzamofontegati avi'mateno ne-eazana kegahaze.

<sup>20</sup> Menina Agri'ma antahima negona zampina agtereno mevite'neankino, tagu tagesama nentahunazana agtereno amne anazana hugahie. Agri hanavemo tagu'afi eri'za e'nerie, <sup>21</sup> Ana hanigeno maka mono vahe'mo'za, Krais Jisasimpi, Anumzamofo agi'a erisga huvava hugahaze. Tamage.

## 4

### *Kraisi'ene hagerafita manisuna naneke*

<sup>1</sup> E'ina hu'negu nagra Ramofo kina vahe'mo'na, knare hutma mani'zantamifi kana nevutma, tamagima higetma eri'naza zanku hampo'nati'na tamavumro nentoe. <sup>2</sup> Tamavufga anteramitma, agazone hutma ru vahe'ene nemanitma, ke hakare osutma fru hutma, vahe'mofo antahizamitma zamesi zamanteho. <sup>3</sup> Hakare zupa hanavetitma Avamu'ene tragotetma nemanitma, hamprima tamanteno anaki'ma tamante'nea fruzana erigahaze. <sup>4</sup> Tagra mika'mota magoke tavufgafi magoke Avamu mani'neankino, anahukna huno e'ima tagi hu'neana magoke Anumzamofo naga fore hanunku tagi hu'ne. <sup>5</sup> Magoke Rantia manigeno, magoke tamentinti megeta, magoke mono ti nefrone. <sup>6</sup> Anumza Nerfa'a maka'mota magoke mani'neno kva huneranteno, maka'za kva nehuno maka'zampina mani'ne. <sup>7</sup> Hu'neanagi magoke magoke'mota asunku'zana ruzahu ruzahu muse'za Kraisi'a tami'ne. <sup>8</sup> E'ina hu'negu avontafepina anage hu'ne, **Agrama anagamu marenerino'a, Agra vugota huno kina vahe zamareno vu'ne. Agra'a vahera muse'za zami'ne.** (Sam-Zga 68:18) <sup>9</sup> Menina anage nehzankea me'ne, anagamu marerino'ne, ana kemofona nankna agu'agesa me'ne, Agra anazanke huno mopa agu'afi urami'neana? <sup>10</sup> Agra urami'nemo otino marerino maka mona agatereno afete mani'neankino, Agra hakare zampina mani avitesigu anara hu'ne. <sup>11</sup> Mag'o a nagara Agra aposol eri'za nezmino, mag'o a nagara kasnampa eri'za nezmino, mag'o a nagara mono ke huamahu eri'za nezmino, mag'o a

nagara mono kevu kegava kri eriza nezmino, mago'a nagara rempi huzmi eriza zami'ne. <sup>12</sup> Eri'za erisaza'zama, naga'amokizmi (Saints) zami'neana, non kiaza hu'za Kraisi avufa eri ra hugahaze, <sup>13</sup> ana nehuta Anumzamofo Mofavre'are tamentintifina eri mago huta keta antahita nehuta, hanave enerita Ramofonte nena vahetfa nemanita, Kraisi avu'avapina aviteta Agri kna huta manigahune. <sup>14</sup> Ana agafare tagra osi mofavregna huta omani'nunkeno, hagerimo erikranto kranto hiankna tamentintifina osnie. Na'ankure mago'amo'za ruzahu ke hunerasmi'za, anankea havige hu'za eri tamage kegna ke nerasmize. <sup>15</sup> Hianagi tamage ke nehuta, tagu'reti vahera zamesi nezmaneteta, hageta nena nehanunkeno maka'zamofona Kraisi aseni'a manigahie. <sup>16</sup> Agripi mikro avufamo' omoni, emeni huno azeri hanavetisigeno, magoke magoke avufamo' a ruzahu ruzahu eri'za e'nerino, mikro avufamo' a ra huno knare avesi'zampi hagegahie.

### *Ruotge huta manisuna naneke*

<sup>17</sup> Hagi Ramofo hanave'afi anage hu'na neramasamue, mono non-tahiza vahe knara (Gentiles) osiho, zamagra hzangre'za mago'zana zamagu'reti hugara osu'naze. <sup>18</sup> Antahi'za zamifina hani hige'za, Anumzamofo mani'zampintira atre'za megi'a nemanize, na'ankure zamagra antahi'za ke'za nosazageno, zamagu'amo'a hanaveti'ne. <sup>19</sup> Ana nehu'za zamagra havizane knare'zane kegava nosu'za, zamesi'zamofo kefo avu'ava zampi nevazageno, zamagri mani'zampina maka havizamofo avesi'zamo avite'ne. <sup>20</sup> Hu'neanagi tamagra, e'inahu zampintira Kraisina rempi huta ontahi'naze. <sup>21</sup> Tamagrama ko Agriku'ma nentahizageno Agripima rempi hurami'nea zana, Jisasimpi tamage nanekea me'ne. <sup>22</sup> Korapa ama mopafi kasri avu'avaza mani'zantamifi me'neane, maka havi tamagu tamagesa me'neane, havige na atreho. <sup>23</sup> Ana nehuta antahintahifine, avamupi kasefa huta manigahaze. <sup>24</sup> Kasefa vahe tro huta nemanita, Anumzankna huta fatgo avu'ava zampi ruotage huta tamage ke'afi manigahaze.

<sup>25</sup> E'ina hu'negu magoke magoke'motma havige osutma tamage hiho. Mago avufagna hutma mono kevu mani'nonanki, tva'ontamire ru vahe'ma mani'nesiana havigea huonteho. <sup>26</sup> Tamarimpa hegahianagi, ana zampina kumira osiho, tamarimpa hesuta zaza kna omanita ko eri so'e hutenkeno zage'a uffreno. <sup>27</sup> Hankromofona (Satana) mago kankmuna tamagra omiho. <sup>28</sup> Musufa ne'ma mani nesuno'a musufa oseno. Hianagi agra azampinti eri'za erino knare'zana erifore nehuno, zamagrazmi zamaza huga osu'nesaza nagara zamaza hugahie. <sup>29</sup> Hanki tamagipintira vahe'mokizmia havi nanekene urinke'nena ozmasmitma, zamaza nehutma, hanaveti'za manisaza nanekege nehnageno, antahisamokizmi'a zamaza hugahie. <sup>30</sup> Anumzamofo Avamura mani'zantmifina rimpagna eriomiho. Timagesa antahiho, Avamu'mo agra azanko avoma'a kreno tamagra nagri nagare hu'neankino, esnia knarera tamaza huno tamavregahie. <sup>31</sup> Rimpia hevava hu'zane, maka rimpia haviza huno ha' hu'zane, rimpia he'zane, rankege hu'zane, vahe zamefi'a ke hu'zana netretma, maka vahe'ma knazama zami'zana atreho. <sup>32</sup> Agazone hutma vaheku tamausungti nezmanetetma, Kraisimpi kumitia Anumzamo eri atre'rante'neankna hutma, kumi'zmia atre'zmanteho.

<sup>1</sup> E'ina hu'negu Anumzamo nehia avu'avakna hutma tamavutmavara hoho, nankure tamagrira agu'areti avesi nermanteta mofavre'a mani'naze, <sup>2</sup> tamagra vaheku tamavesi nezmaneteta, Kraisi'ma agu'areti avesiranteno agr'a'a avufga atreno tazama hu'neakna nehutma, Agra'a avufa tagriteku hoho Anumzamofontega manamentake'za Kresramana vu'neakna hoho.

<sup>3</sup> Hianagi monko'zano, kefo avu'avazano, agraguke avemasi'zana tamagripina omne tfaza hino, Anumzamofona otage nagapina (saints) e'inahu zana amu'no zamifina omneganahie. <sup>4</sup> Kefozamofo naneke osutma, vahe agze ami nanekene, zokago vakago nanekea ana maka netretma Anumzamofo muse hunteho. <sup>5</sup> Na'ankure tamagra antahi ankere'naze, monko'za nehaza vahe'ene, kefo avu'ava nehaza vahe'ene, vahe'zante kezmasane nehaza vahe'ene, havi anumzante mono hunentaza vahe'mo'za, Kraisine, Anumzamofo kumara e'origahaze.

### *Anumzamofo msazama'afi manisnuna naneke*

<sup>6</sup> Hagi atrenkeno mago nemo'a avufa'a omne keretira reramatga osino, na'ankure e'i ana zamo Anumzamofo rimpa he'zana erino kema non-tahiza vahetera ne-e. <sup>7</sup> E'i zanku ana vahe'enena tragotetma omaniho. <sup>8</sup> Na'ankure korapara hanizampi mani'nazane, hianagi menina Ramofo masafi mofavre'aza hutma, ana msafi vano hutma maniho. <sup>9</sup> Na'ankure msazamofo raga'a, knare'zama hu'zane, fatgozama hu'zane, tamage kema hu'za fore nehie. <sup>10</sup> Maraguzatitma Rantamimofo avema nesiazza rempi hiho. <sup>11</sup> Raga'a reonteno hani avu'ava zantera tragora otetma, ke huta eriama hiho. <sup>12</sup> Na'ankure asane osuga'zanku vahe'mokizmi zamagesafina havizama oku'a nehaza zankura tagaze hugahianki hutma antahitama osiho. <sup>13</sup> Hianagi masamo'ma remsa maka zantamina higeno'a, oku'a me'nea kefo zantmimo'a amate efore nehie. <sup>14</sup> Na'ankure hakarezama tavi'mo'ma eri ama nehigeno, e'i ana agafare amanage hu'ne, **Kavu'ma mase'namoka kavunaso, fri'pintira otio, ana hanankeno Kraisi'a remsa hugangegahie.** (Ais 26:19.)

<sup>15</sup> E'i zanku kama vano hananana kva huo, antahi'za omne vahe knara osunka, antahi'za me'nea vahe kna huo, <sup>16</sup> kzigazi hutma maka knafina knare eri'za e'neritma maniho, na'ankure menina kefozamo hakare hu'neanknafi nemanune. <sup>17</sup> E'i zanku tamagra negi vahe knara osutma, Rantimofo avesi'zama hanaza zankuke tamagesa antahih. <sup>18</sup> Waini tina netma negia oneho, na'ankure anazamo tamazeri haviza hugahie. Hianagi atrenkeno Avamu'mo tamagu'afina avitena, <sup>19</sup> atruma nehanutma, Deviti zagame ene (Sam zagamere), mono zagame'ene, avamu'mofo zagame'enena nehutma, Rantmimofona tamagu'areti musena hunenteta, <sup>20</sup> hakare zupa maka zampina Ranti Jisas Kraisi agifi, Anumza Nafatimofona musena hunteho.

### *Aravemokizmi naneke*

<sup>21</sup> Hagi Kraisina antahi'nemitma rumokizmia ovesinte avesinte hiho. <sup>22</sup> A'nemotma, Ramofo agorga nemaniza kna huta tamavenanehe'i agorga maniho. <sup>23</sup> Na'ankure vemo'a, a'mofona aseni'a mani'ne. Kraisi'a anahu kna huno mono kevumofo aseni'a mani'ne. Agra ana mono kevu mofo avufa'a mani'neno aza huno avare'ne. <sup>24</sup> Hianagi mono kevumo'za Kraisi kvafi nemanizankna hu'za, a'nemo'za nezmave kvafi maka'zana anazanke hu'za hugahaze. <sup>25</sup> Vene'nemotma, a'ne tmia tamagu'areti zmavesi zamanteho, Kraisi'ma mono kevu'agu agu'areti avesi zamanteno zamahoke heno ana a'ku (sios) fri'nea kna hiho. <sup>26</sup> Ana nehuno Agra'a mono naga'mofona

zamazeri ruotge huzmanteno tinuti sese hiankna huno ke'anu sese huzmante'ne. <sup>27</sup> Anama hu'neana zamavareno Agrarega zamantesige'za, ana mono kevumo'za masazampima pehena omneno, kasmu' oneno, avufa ohakne: otage hu'za fatgo zampi hazenke omnenke'za manisnazegu ana hu'ne. <sup>28</sup> Hagi anazanke hu'za vene'nemo'za a'ne zamia, zamagra zamufagu zamavema nesia kna hu'za zmavesi zamanteho. Aza'o nenaronku avesima nentemo'a, agra'agu avesinente. <sup>29</sup> Na'ankure maka vahe'mo'za zamagra zamufagura zamagora note, hianagi zamagra zamufagu avesinte'za ne'za nemi'za, kegava hazankna huno Kraisi'a mono' kevu'are kegava ne-hie. <sup>30</sup> Na'ankure tagra Agri mago avufa mani'none. <sup>31</sup> E'i ana agafare **Vemo'a nefane, nererane znatreno, nenaro'ene eri hagerafige'ne, tarega'mokea magoke znavufaza hugaha'e.** (Anumzamofo avon tafepi amanage huno krente'ne, Jen-Agf 2:24.)

<sup>32</sup> Amama oku'a me'nea antahi'zamo'a, razantfa se'ne, hu'neanagi nagrama nehuana Kraisinku ene, mono kevu'agu nehue. <sup>33</sup> Anahuga hianagi, amu'nontamifina mago mago'mo'a nenaronkura avesi nenteno agra avufagu agesa nentahiankna nehnigeno, nenaro'a anazanke huno nevena antahi nemino ke'a erizafa hugahie.

## 6

### *Famo'ene tramemofo naneke*

<sup>1</sup> Hagi mofavremotma, tamarera tamafa kea antahizmita amage anteho, tamagra Rantimofo suza mani'haze. E'inahu'ma hanageno'a knare hugahie. <sup>2</sup> Pusa kasegefina, huvempa ke'ne agu'afina me'negu, neramrerane nera-mafa ke antahita amage anteho.

<sup>3</sup> E'inama hanutma knare hugahaze, ana nehutma za'za kna'a ama mopafina manigahaze. (Eks-Ati 20:12) <sup>4</sup> Zamafaheta mofavre nagatmia zamarimpa eri haviza osiho, hanki zamazeri fatgo nehutma zamavumro nezmanetetma, Ramo'ma hu'neankante antetma huzmasmiho.

### *Kazokzo eri'za vahe'ene kva vahe'zmimofo naneke*

<sup>5</sup> Hagi kazokzo eri'za vahe'motma, tamagra kva tamima mani'nesimofonku kore hunentetma tamahirahi neresigeta kezmia amage anteta, tamagu'areti kazigazi huta, Kraisi eri'za enerizankna huta eriho.

<sup>6</sup> Mopafi kva vahe'tmimo'za neramagesageta eri'zana erisunke'za muse hanaze osiho. Hianagi Kraisi kazokzo eri'za vahe nesampreta, tamagu'areti Anumzamofo avemanesia zanke hugahaze. <sup>7</sup> Mopafi vahe'mokizmi eri'zana e'norizanki, so'e tamarimpireti Ramofo eri'zana eriho. <sup>8</sup> Antahi anker, mago'mo'ma knare eri'zama enerisuno'a, e'i ana knare eri'zamofo nona'a Ramofonteti mizana erigahie. Kazokzo eri'za ne'mopi amne ne'mopi mago'zahu zanke huke mizana erigahae.

<sup>9</sup> Hanki kva vahe'motama, eri'za vahetmia magozahu tamavutma hunezmanetetma, zamazeri korera osiho, monafi nemania kva ne'mo tarega'motma kva mani'ne, hankino Agra mago'mofona azeri knare nehuno, mago'mofona azeri havizana osugahie.

### *Sondia vahe kna huta Avamupi manisuna naneke*

<sup>10</sup> Hanki vagare nanekema tamasmisiana, Ramofonte hanavetitma Agri hihamu'mofo hanavefi manigahaze. <sup>11</sup> Maka Anumzamofo ha' kukena eri hankreho, ana nehutma Sata'ma reramatgama hania zampina oti hanavetitma manigahaze. <sup>12</sup> Na'ankure tagra mopafi vahe'enena hara

nosune, hagi mopafi kva hu'naza vahe'ene, hihamune havi avamutamine, mopafi hanizamofo kva hu'naza ha' vahe'ene, mona kankamumpima kefozamofo ha' avamu'ene hara nehune. <sup>13</sup> E'i zanku maka Anumzamofo ha' kukena hiho, ana hu'netma havi knafine ana maka'zama hanafina oti hanave tigahaze. <sup>14</sup> E'i zanku oti hanavenetita, tamage kereti tamunofira nehutma, fatgo avu'ava'zana tamahihi'zarera hanko antea kna hiho. <sup>15</sup> Knare Musenkefinti e'nea rimpfa fru kea, tamagia ano anteakna nehuta, hanavetita otigahaze. <sup>16</sup> Maka zampina, tamentintimo'a hanko tamigna hu'nena, Sata'ma teve taginteno'ma tamagritega ahetresigeno esnia kevea resu hugahie. <sup>17</sup> Anumzamo'ma tamagu'vazino tamazahu'nea antahintahia, fetori kna hutma tamaßenirera antegahaze. Avamu'mofo kazin-knona Anumzamofo naneke eneritma, <sup>18</sup> maka zupa nunamu huvava ne-hutma, avamupi nunamuna hutma antahigeho. Ana nehanutma tamagra kva hu'netma kazigazi hutma maka Anumzamofo vahekura (kristen) nunamu hutma Anumzamofona antahigeho. <sup>19</sup> Ana nehutma nagriku nunamu hutma antahigenkeno, nagira erioza hanige'na korera osu'na hanavetina oku'a me'nea naneke huama hu'na Knare Musenkea zamasmi'neno. <sup>20</sup> Na'ankure nagri'ma nazeri oti'nege'na, Agri agi eri'na seni nofite kina hu'na mani'nena, ana nanekema hanufina nagra hanaveti'na mani'nena huama ha'neno.

### *Huvagare naneke*

<sup>21</sup> Hu'neanagi, nagrama mani'noa zamofona, Tikikusima tavesinentona nerifu'ma, Rantimofo eri'za ne'mo maka nanekea tamasmisigeta tamagra antahigahaze. <sup>22</sup> Nagra anazanku hu'na huntogeno tamagritega ne-viankitma tagenke'a nentahisageno tamagu'a tamazeri hanavetigahie.

<sup>23</sup> Hagi tafuhetane, tasareheta tamamentinti nehutma ovesinte avesintema nehaza naga'motma, Anumza Nerafanteti'ene, Ranti Jisas Kraisine rimpfa fruzamo'a tamagrane mesie. <sup>24</sup> Asunku zamo'a Ranti Jisas Kraisinku avesinte vava nehaza vahepi me'enkeno, avesi'ma nentaza zamo'a vaga oreghahie. Tamage.

## Filipai

# Poli'a Filipai Mono Vahe'mokizmi Avonkrezmi'nea Naneke

*Filipai mono vahe'mo'za Poli'ene tragote'za manizageno muse hu'nea  
naneke*

<sup>1</sup> Hagi Poli'nane, Timoti'ene Krais Jisasi kazokzo eri'zampi tragedeta kina hu'netta, Filipai kumate Anumzamofo naga Krais Jisasinte tamentinti nehaza vahe'ene mono kva nagamotane, eri'za tamaza hu'za eneriza naga'motma ama avona kreneramu'e. <sup>2</sup> Anumza nafatimo'ene Ranti Jisas Kraisi'enena asuragiramanteno, rimpia fruzana agampu hurnanteno tamisie.

*Poli'a Filipai mono vahe muse huzmanteno nunamu huzmante'nea naneke*

<sup>3</sup> Hagi hakare zupa tamagriku nagesa nentahi'na Anumzamofo muse hunentena, <sup>4</sup> maka nunamunia'fina musezamo avi'netege'na nunamu nehu'na maka'motma antahi neramue. <sup>5</sup> Ese'ma agafa hutma mono antahi'naza knareti tamagra nagri'ene tragedeta Knare Musenke huama hume menina neaze. <sup>6</sup> Na'ankure nagra antahi'noe, Anumzamo'a tamagripi knare eri'zama erigafa hu'nea eri'zana erime nevanigeno, Krais Jisasima esania knare eri vagaregahie. <sup>7</sup> Na'ankure maka'motma nagu'reti antahi nerami'na, Anumzamofo Knare Musenkea huama nehugu kina nompine, megi'ane ruga'a vahepi, asunku'zana tagra e'nerune. <sup>8</sup> Na'ankure Krais Jisasi asuragirmantea tamate'neankna hu'na nagra tamagrikura tusi'za hu'na nagesa nentahuankino, Anumzamo nagrira huama hugahie. <sup>9</sup> Nagra nunamuna huneramantoankino, vaheku'ma avesizamante'zamo tamagripi me'neno ra nehanigetma, tamage antahi'zampine, knare tamagu tamage-sane hagesaze nehue. <sup>10</sup> Ana nehutma maka'zana refko hutma negetma, so'e zantfama hu'nesnia zanku nentahitma, avusese hutma fatgo zampi mani'nesnageno Kraisi'a eteno egahie. <sup>11</sup> Fatgo avu'ava'zama Jisas Kraisima eri fore'ma nehiazamo tagripi avinete'na, vahe'mo'za nege'za Anumzamo-fona ra agi nemiza, agi'a erisaga hugahaze.

*Poli'a kina nOMPI mani'neno, Knare Musenke hu'nea naneke*

<sup>12</sup> Nafuhetane nasaraheta kama antahiho, kinafima mani'noa zamo Knare Musenkea (gospel) eri ra higeno vuno eno nehie. <sup>13</sup> E'ina hu'negu, Kraisi eri'zante kina hu'noa agafare, maka kinimofo avufare kva nehaza vahe'mo'zane, maka vahe'mo'za nentahize. <sup>14</sup> Kinama hu'noa agafare maka nenfu'zane nasarhe'zane zamagu'reti Rantimofona antahi nem'i'za, korora osu'za hanaveti'za Anumzamofo nanekea zamagiteti huama nehaze.

<sup>15</sup> Antahi'none, mago'amo'za hu'za tagra Kraisi naneke huama hugaragi nehu'za, ha' renenantaze. Hianagi mago'amo'za fatgo kante nehaze. <sup>16</sup> Fatgo avu'avapi e'neriza naga'mo'za, nagrira zamesi nenante'za Kraisi naneke huama nehaze. Anumzamo'a nagrira navareno ege'na, Knare Musenke'agura kehara neroge'za nentahiza, <sup>17</sup> ha'ma renenantaza vahe'mo'za zamagra zamesi'zante Kraisi nanekea huama nehaze. Tamage zamagu'reti nosaze, hagi kina nompima nagri amuho namisagu ana nehaze. <sup>18</sup> Ana nehu'za amega zamagiteti zamaguaretiro Zamaguitetiro Kraisinkura

huama nehaze. E'inama nehaza zankura nagra nagu'a muse nehue. Tamage, naguafina nagra muse nehue.

<sup>19</sup> Na'ankure nagra antahi'noe, kina nompi mani'nogetma, nunamu nehaza zamo'ene, Jisas Kraisi Avamu'mo naza huno nazeri atregahie. <sup>20</sup> Nagra mani'ne'na antahuampi, namema erintena antahuana, mago'zama nagazema erinami'zana osutfa hugahue. Hagi mika zupa nagra Kraisinte hanaveti'na manigahue, korapa'ma mani'noaza hu'na manisnuo, frisnua zamo'a, Kraisi ragi amigahie. <sup>21</sup> Na'ankure nagrama kasefa'ma manisnuana Kraisinte manigahue. Hagi frisnua knare'zantfa erigahue. <sup>22</sup> Hianagi nagrama mopa navufane mani'ne'na, eri'zama erisua zamo raga rentegahie. Nagra ina kamofo avaririgahufi ontahi'noe. <sup>23</sup> Hianagi tarega kazigati e'nea zamo navazu huno retrako hu'enante, na'ankure fri'nama Kraisi'ene umani'snuu zamo'a knare zantfa hugahie. <sup>24</sup> Hianagi mopa navufane mani'nua zamo'a mago'ene tamagri tamaza hugahie. <sup>25</sup> Nagra nagu'reti antahi'noe, tamagrane tragote'na miko eri'za e'nerisugen, eri'zamo ra hanigetma negetma, tamentintimofo muse'zama'a kegahae. <sup>26</sup> Nagri'ma Krais Jisasi'ma hunante'nea zankura nagrama ete'na tamagrane umani'nenketa, musena hugahaze. <sup>27</sup> Kraisi Knare Musenke'amo hu'nesia kante anteta mani'enke'na eme tamagegahuo, ontamagegahuo, magoke tamagu tamagesare ene antahintahi tmifina hanavetitma mani'netma, Knare Musenke'afi tamentintia nehinke'na tmantahi'neno. <sup>28</sup> Keha'ma ren-ermantaza vahe'mo'za, zamagra'zmi hakare kampinti traka hugahaze. Hianagi tamagra tmazahu'za erigahaze. E'i ana avame zana Anumzamo tamigahie. <sup>29</sup> Na'ankure Kraisinte tamentinti nehaza zantekukera ontami'ne, hianagi Agri eri'zampi kna erisnazegu, tamaza hu'ne. <sup>30</sup> Kote'na knazama eri'noana tamagra nage'naze, knafima nemanuana meninena nentahize, ama ana hara tamagrane tragoteta nehune.

## 2

### *Mago tarimpa huta manineta rumokizmima zamaza hanuna naneke*

<sup>1</sup> Hagi e'ina higu tamarimpa tamazeri hanaveti kema Kraisinte me'nesiampi, asuragirmanteno avesi tmante'zampi, Avamupi atruma hu'zampi, avesima ante'zane, asunku'zane me'nesiana, <sup>2</sup> nagri muse zane, eri hagerafitma magoke antahintahire'ene, magoke avesizante'ene, magoke tmagu tamagesane, magoke avamupine, magoke antahintahire manigahaze. <sup>3</sup> Inankna zama hanaza zantera ra tamagesa ontahita, tamagrugukera ontahih. Hagi tamavufa anteramita, rumofona antahi nemita husga huzmanteho. <sup>4</sup> Tamagra zankera kegava osiho, hagi ru vahe zanena kegava hiho. <sup>5</sup> Tamagra magozahu tamavutma rumokizmia huzmanteho, Krais Jisasimpima me'nea avu'ava rumokizmia huzmanteho. <sup>6</sup> Ana hu'neanagi Anumzane mago kna huno mani'nea ne'mo, Kraisi'a Anumzankna hu'na manisnue huno agesa ontahi'ne. <sup>7</sup> Agra avufagura antahi amneza seno, agi omne kazokzo eri'za vahe kna huno, mopafi vahe avu'avate before hu'ne. <sup>8</sup> Kraisi'a avufa antermino, ke erizafa huteno, fri kante ruhiza huno, keka zafare fri'ne. <sup>9</sup> Na'ankure ana agafare, Anumzamo azeri antesga nehuno, musezama (gift) Agri'ma ami'neana, maka'zamofo agi'a agtere'nea agi ami'ne. <sup>10</sup> Ana hu'negu Jisasi agirera monafine, mopafine, mopa agu'afine, maka'zamo agrite rena rentegahie. <sup>11</sup> Ana

nehanigeno maka vahe'mo'za Jisas Kraisi'a Rane hu'za zamagiteti huama nehu'za, Anumza Nerfa'a hanave'afi mani'ne hugahaze.

*Vahe'mokizmi amu'no zamifi tvi kna hu'za mani'naza naneke*

**12** E'izanku navesi neramantoa nafuhetma, tamagranema mani'nogetma ke'n'i'a erizafa nehzankna hutma, omanisua knafina ke'n'i'a amage anteho, tamagra tamazama hu'nea zanku hutma tamano nevazino, tamahirahi nerena kazigazi hutma amage anteho. **13** Na'ankure Anumzamo tamagripi eri'za e'nerie, Agra tmagu'a tamazeri otigetma kezafa hutma eri'zama'a e'neriza zane, Agri avesi avariri hanave'a tam'i'ne.

**14** Maka'zama hanafina, havi tamarimpa osutma hafra nosutma tamarimpa frune maninetma hugahaze. **15** Anama hanage'za, vahe'mo'za neramagesagetma fatgo hutma, ketmia omnesigetma nemanitma, Anumzamofo mofavre tro hutma nemanitma, havige huormantesagetma, kazaki'zampi kazigazi nehnaza vahe amu'no zamifina nemanitma, ofumo remsa hiaza hutma ama mopafigina remsa huzmantegahaze. **16** Kasefa hu'za mani'zamofo naneke azeri hanavethiho, ana nehnage'na Kraisi ete esia knafi neramage'na hanave'afi muse nehu'na nagare'na nevu'na eri'zama eri'noazamo'a amane zankna osu'ne hu'na hugahie. **17** Hianagi ana zanke hu'zama waini ofagna hu'zama korani'a tagi netre'za, kresramana neviazza hanaza zamo'a tamentintia tamaza nehina, nagra nagu'reti musena neha'nena, tamagrane muse hugahaze. **18** Tamagrik'enena, nagra tutu huneramantoe, tamagra anazanke hutma musena nehutma, nagri'enena tragotetma musenkase hugahaze.

*Timoti'ene Epafroditusike eri'za erisna'a naneke*

**19** Hianagi nagra nagesama nentahuana, Timotina osi'a knafi Ranti Jisasi avesizama me'nenkena huntanenko tamagrama mani'nazarega vugahie. Ana nehanigetma tamagra inankna hutma nemanizafi eme nasmisige'na antahi'na musena hugahue. **20** Na'ankure magora Timoti kna agu'anee vahera tamagr'i'ma tamema'nesia zama huga hu'nea nera omani'ne. **21** Na'ankure zamagra maka'mo'za zamagr'i'ma zamenesia zante kegava nehu'za, Krais Jisasi zana kegava nosaze. **22** Hianagi tamagra antahi'naze, Timotima tamage knare eri'za eri'neana, agra nagrane tragoteno Knare Musenke (gospol) hora nehuno, mofavremo nefä aza nehankna huno, eri'zana naza huno eri'ne. **23** E'izanku nagrama nagesama nentahuana, ame' hu'na huntesugenno tamagritega vugahie. Inankna zano nagrite'ma fore'ma hanigu kete'na huntesugenno vugahie. **24** Nagra, Ramofonte nagu'a nentoe (trast), osi'a knafi tamagrira eme tamagenaku nagra nagesa nentahue.

**25** Hianagi nagrama antahuana tamagritega Epafroditusi'a vugahie. Nagri nenfu magoke eri'za enerita, tragoteta ha' nehu'a ne' (sondia), agra tamagr'i'ma naneke erino eme nasmisnia ne'kino, upama nehuazana naza nehia nere. **26** Na'ankure agra maka'motma tamagezanku hugeno antahintahi'amo kna higeno avufa ata eri'ne. Na'ankure tamagra krima eri'nea kema antahi'nagu ana hu'ne. **27** Na'ankure tamage krima eri'neana frikante ruhiza huteno kanamare'e. Hianagi Anumzamo asuntagi ante'ne, agri'keku anara osu'ne, nagrili'ene huno ana hu'ne, ana hina nasuzamo agofetu agofetu hu'zanku, azeri oti'ne. **28** E'ina hu'negu huntanena vanigetma negetma muse nehnagena, nagra tamagrikura nagesa ontahina fru huna manigahue. **29** Uhanatisigetma Rantimofo agifi tmagu'a muse nehutma avreho, e'inahu vahera antahi nezamita muse huta zamavareho. **30** Na'ankure maka'motma

afete mani'netma naza osazageno tamagri nona huno, Epaafroditusi'a avufagura agesa ontahino eme naza nehuno, Kraisi eri'zanku huno fri' kante ruhiza hu'ne.

### 3

#### *Tamage kene havi ke avu'avamofo nanek*

<sup>1</sup> Hagi nafuheta vagare naneke'ni'a nehuana, Ramofonku musenkase hunteho. Ete'na tamagri'ma kegava krimantesia nanekema mago'ene avoma negroa zamo'a navesra nosie.

<sup>2</sup> Kragna vahekura kva hiho, havi mono eri'za vahekura kva hiho, havige hu'za zamufa taga nehaza vahe'kura kva hiho, <sup>3</sup> Tagra tamage tavufa tgahu vahe mani'none. Na'ankure Anumzamofo Avamupi husga huta Krais Jisasina mono hunenteta, vahe'mo'za zamufama taga nehaza zampina antahi muhara nosune. <sup>4</sup> Nagranena zamufa tgahu zampina antahi muhara nehuhanagi, mago vahe'mo'ma antahintahi anteno antahi muha'ma zamufa tgahu zampima haniana, nagra ana vahera zamagatere'na onaga'a mani'noe. <sup>5</sup> Nagrira nenerera'a kasenantege'na 8'a zagegna manuge'za, navufa taga hazage'na, Jiu kora mani'noe. Hagi Benjameni nagapinti fore hu'na, nagra Jiu vahetfa tamage mani'noe. Farisi vahe mani'nena Jiu vaher kasege amage ante'noe. <sup>6</sup> Nagra navesite hanaveti'na mono vahera kna nezamina, nagra Jiu vahe kasege amage ante'na magore huna mago kasegea agateore'na, avariri fatgo huna hantaga osu'noe. <sup>7</sup> Hu'neanagi inankna'zama hu'noazana netre'na, anazana amnezane nehu'na, Kraisi amage'nenetoe. <sup>8</sup> E'i ana zantamimpina, nagra maka'za netre'na agtere'nea antahintahi'afi Krais Jisasina Ranimofo antahinagenta nehu'na, Agri amage anteku maka'zana amnezane hu'na netre'na, Kraisi amage' nentoe. <sup>9</sup> Agra'ene tragote'na mani'ne'na, nagra'ni'a kasege avarurua kanteti fatgoa osu'noe. Hianagi Kraisinti tamentinti nehunkeno, Anumzamo fatgo vahere hunerante. <sup>10</sup> Nagra ke'na antahi'na Jisasina nehu'na, fri'nefinti azeri ot'i'nea hanave'a nege'na, nagra Agrama fri'neaza hu'na nataza eri'na frinaku nehue. <sup>11</sup> E'ina hu'na mani'ne'na, fri'nefinti ot'i'neankna hunaku nagranena nentahue.

#### *Kazigazi hunka vugota hanana nanek*

<sup>12</sup> Hagi nagra hago anazana eri'noe hu'na nosue, ko fatgo hu'na mani'noe hu'na nosue. Hianagi nagra kazigazi hu'na nevu'na esnia knafima naza hu'zama erisugu nentahi'na, Krais Jisasimpi namisnia zanku nentahue.

<sup>13</sup> Mago tamentinti nehuna nafuhetane, nsareheta sago fatgo vahe nagra mani'ne'na hago anazana azeri'noe hu'na osugahue. Hianagi korapa'zana nage'nekni'na, henkama esiazamofo azerinaku kazigazi nehue.

<sup>14</sup> Anumzamo'a Krais Jisasimpi nagi hu'nege'na anagamuti miza omerisugu kazigazi hu'na nagare'na nevue.

<sup>15</sup> E'ina hu'negu maka antahi'zampi ra hu'nomota, fatgo avu'ava nehuta, ruzahu antahintahi hanazana Anumzamo'a anazana eri tamaveri hugahie. <sup>16</sup> Hanki tamage kema, ko'ma antahi'nona kea azerikona hu'neta amage'antegahune.

<sup>17</sup> Nafuheta nasareheta nagra nehua navunavakna nehutma, tagrama rempi huzaminona tavutavazama amagema nentaza vahera ke'so'e hiho.

<sup>18</sup> Hakare'a zupa ko tamasm'i'noe, menine mago'ene anankege neramas-mugen no navunura nehie. Na'ankure zamagri zam'u'zmazamo'a tamage huno Kraisina rugeka zafa'a ha'arenente. <sup>19</sup> Zamagrama fri'snazana, kama

vu'zazmimo'a havizantfa hugahie. Zamarimpamofo avesi'zamo oti oti huno anumza zamigna nehige'za, zamagaze osige'za, havi avu'ava zanku muse nehu'za, mopafa zankuke zamagra nentahize. <sup>20</sup> Tagri kumara monare me'negeta, Tazahu ne'ma eramisigu negeta tagesa are'are nehuta, Ranti Jisas Kraisi'ma esigu avega ante'none. <sup>21</sup> Agra hanave omne fri tavufa eri rukrahe huranteno, hankave avufa kna huno eri tro huneranteno, ana hankave'anu hakare zana kegava hugahie.

## 4

### *Mono avu'avaza hanaza naneke*

<sup>1</sup> Hagi nenfugata nensarogta, nagra navesi neramante'na tamage'naku nehumotma, tamagra nagri musezane, eri'zama eri'noazamofo nena'a mani'naze. E'ina hu'negu arone'nimota tamage hutma Ramofonte tamagra mani hanavetita maniho.

<sup>2</sup> Nagra tanasmuanki, Yuodia'ene Sintikigata'a Ramofo suza mani'naku mago tanarimpa hutna mani'o. <sup>3</sup> Nagra kantahinegoe, magoka eri'za e'nerumoka, ama a'trena zanaza huo, zanagra hanavetine nagrane meg'i'a vahera Knare Musenkea zamasmi'none. Ana nehuke zanagra Klemen'i ene mago'a eri'za vahe'enena, zamagia asimu eri avontafepi krente'ne.

<sup>4</sup> Hakare zupa Ramofonkura muse hoho, ete mago ene neramasmue, muse hoho! <sup>5</sup> Tamagra atrenke'za knare agazone tamavu'tmavara vahe'mo'za keho, Ramo esia kna tva'o nehie. <sup>6</sup> Mago'a zankura tamagesa ontahitma, hakare zankura nunamu nehutma, upama hu'nesaza zanku Anumzamofo nesamitma, hakare zama huramante'nea zankura, Anumzamofona muse hunteho. <sup>7</sup> Anumzamofo rimpia frumo'a, agtere'neankitma vahe'mota antahita keta osuga hu'nonankino, tamagu'ane, antahintahi tamia Krais Jisas kva huramantegahie.

<sup>8</sup> Hagi vagare nanekea nafuhetane nasarhetma maka knafina tamavutamavama hanazana, na'amo tamage zana me'ne, na'ante vahe'mo'a antahi nemie, na'amo fatgoa hu'ne, na'amo avu sese hu'ne, na'amo vahe'mofona asane hugahie. Na'amo agi'a erisaga hugahie. So'e zantfama me'neniane, husga hunte'zama me'nesiana, anazante antahintahi nehutma hampona hutma maniho. <sup>9</sup> Nagrama nehugetma rempi nehutma e'neritma, nentahitma ke'naza avu'avaza nehinkeno, rimpia fru Anumzamo'a tamagrane manigahie.

### *Poli muse hu'nea naneke*

<sup>10</sup> Tamagrama nagriku'ma maka zupa tamagesa mago'ene antahi nemamiza zankura, nagra tusiza hu'na Ramofona muse hunentoe. Hinanagi atupa knafina tamagrama nazahu kankamuna omane'ne. <sup>11</sup> Mago'a zanku atupama nehu'na ama kea kea nosue, nagra antahi'noe, mago'a zana rama'a antesuo, osi'a ante'nesuana, musenke hugahue. <sup>12</sup> Nagra maka zanku atupa'ma huanknafine, mika'zama meknafinena, nagra hakare oku'a me'nea kankmunu rempi nehue. Namu hanio, nagatesio, rama'a antesuo ontesuana akohena fru hu'na manigahue. <sup>13</sup> Kraisi'a hanavea nenamigena, Agri hanavefi maka'zana amne hugahue.

<sup>14</sup> Hu'neanagi nagri knazampina tragotetma, knare hutma tamagra naza hu'naze. <sup>15</sup> Tamagra Filipai kumate vahe'motma antahi'naze, Knare Musenkema pusante Masedonia atrete'na huama'ma hu'noana, mago mono nomo'e huno nagranena eme tragoteno, zagonazana eme onamizagena e'orinoe. Hagi tamagrake nami'naze. <sup>16</sup> Tesalonaika mani'nogetma

anahukna hutma mago'a zupa muse'zana atupamahure nami'naze. <sup>17</sup> Ama kema nehuana mago museza namihogu meme huna tamantahinogoe, hagi veva'ma hu'nare, Anumzamoma henka mizama tamamisigu ne-hue. <sup>18</sup> Na'ankure rama'aza nagrira namizageno avite'ne, atupa'ma hu'noa zama'a mika eri'noe. Na'ankure Epafrotitusi musezama antageno erino e'nefina mananentake zama, Kresramana vu ofagna nehigeno, Anumzamo'a muse huno e'inahu musezana e'nerie. <sup>19</sup> Nagri Anumzamo, hakare atupa'ma hanaza zana tamigahie. Agri'a hanave'amo avite'negeno Krais Jisasimpi runtanino tamigahie. <sup>20</sup> Menina tagri Anumzana tafati'mofo ra agia ami vava hanune. Tamage.

*Vagare musenke*

<sup>21</sup> Hagi Krais Jisasi naga'mota musenke huneramantoe. Nafuhe'zane, na-grane magopi nemanizamo'za musenke hurmantaze. <sup>22</sup> Maka Anumzamofo naga'mo'za musenke hurmantaze. Sisa nompi nemanizamo'za musenke hurmantaze.

<sup>23</sup> Ranti Jisas Kraisi asunku'zamo magoke magokemotma tamagrane mes-nie.

## Kolosi Poli'a Kolosi Vahe'mokizmi Avonkrezmi'nea Naneke

*Kraisi'a mikozamofo aseni'a manigeno, Anumzamofo miko knare avu'avazamo'a Agripi avite'nea naneke*

<sup>1</sup> Hagi nagra Poli'na, Anumzamo Agra'a avesizante Jisas Kraisi aposol manio hu'nemo'nane, Timoti nerafu'ene ama avona kreneramu'e. <sup>2</sup> Kolosi kumate'ma Anumzamofo nagama, ke amage'antetma fatgo hutma Kraisimpima nemaniza tafuhe'motarega, Anumza Nafatimofontegati asunku'zane, rimpia fruzamo'a tamagritega vie.

### *Poli'a Anumzamofo susu hunenteno nunamu huzmante'nea naneke*

<sup>3</sup> Hagi tagrama maka knama tamagriku'ma nunamu hunermaneta, Rantimofo Jisas Kraisi Nefa Anumzamofona susu hunento'e. <sup>4</sup> Na'ankure tamagrama Jisas Kraisinte'ma tamentintima nehutma, Anumzamofo nagaku'ma tamavesi nezmantaza zamofo tamagenke nentahuna zanku hu'none. <sup>5</sup> Tagrama tamage Knare Musenke nentahita, fore'ma hanigeta kesune huta avegama ante'naza zamofompinti, amentinti hu'zane, avesinte'zana monafi anteramantegeno me'nne. <sup>6</sup> Ana Knare Musenkemo'a tamagrite e'neankino, miko kokankoka ama ana Knare Musenkemo'a hageno raga'a renente. Tamagrama ese knazupa ana Knare Musenkema nentahitma, Anumzamofo asunkuzana tamage hutma antahi ama hu'naze. <sup>7</sup> Tamagra ko Epafras tagrane magoka kazokzo eriza eneruna nerafu rempi huramigeta antahi'naze. Tamagriku huno tagrira tazahanigu Kraisi eriza enerino, <sup>8</sup> rumokizmigu zmavesintezama Ruotage Avamumo'ma neramamia zanku agra eme neramasie.

### *Poli'a Kolosi vahe'mokizmi Anumzamo zamaza hanigu nunamu hu'nea naneke*

<sup>9</sup> Hanki e'iana agafare, tagrama tamagenkema antahuna knaretima e'neana, tagra tamagrira Anumzamo Agra'a avesite avamupi knare antahi'zane, antahi ama hu'zana antevitermantiesiegua nunamuna hu lava huta antahi'negone. <sup>10</sup> Ana nehutma tamagra hakare'zama hanaza zamo'a, Ramofo avurera knare nehuno, Ramofona ragi amisageno, ana miko knare erizantimo'a raga renentenko, Anumzamofo knare antahizampi hageta marerigahaze. <sup>11</sup> Agri'a masanentake hankavereti tamazeri hankavetinketa kazikazi huta nevuta, akoheta agazone huta musezampi manigahaze. <sup>12</sup> Tamazeri knarema hanigeta Anumzamofo naga'mo'za erisintiharegahaze hu'nea masanentake kumakura, Nafatimofona miko zupa susu hunenton.

<sup>13</sup> Na'ankure hanizamfo hanavefintira taza huno tavreno avesinentea Ne' Mofavre'amofo kumapi tante'ne. <sup>14</sup> Agrama kefozampinti mizaseranteno, kumitima apaserante ne'mofompi tante'ne.

### *Poli'a Kraisinku Ra manine hu'nea naneke*

<sup>15</sup> Hagi Kraisi'a onkenona Anumzamofo amema'agino, ana miko'zama Anumzamo'ma tro hunte'nea zantamimofona Agra ese mofavre mani'ne.

<sup>16</sup> Na'ankure Agrake'za anamiko zana tro huntene, monafima me'nea zantamima, mopafima me'nea zantamima, negona zantamima, nonkona

zantamima, kini vahe traro, ruzahu ruzahu kumaro, kegavahu vahero ruzahu hankavea, Agrake tro hunte'neakino Agri zantami me'ne. <sup>17</sup> Agra ana miko'zamo'a fore osu'negeno mani'neankino, ana mikozana Agrake'za azeri manumanu hu'ne. <sup>18</sup> Kraisi'a mono kevu naga'mofo aseni'a mani'ne. Fri'naza vahepintira Agra esera fripintira oti'negu, ana miko zampina Agrake aseni'a mani'ne. <sup>19</sup> Na'ankure Nemofompima Anumzamo'a Agra'a manivitesigu musena nehie. <sup>20</sup> Keka zafare tagirami'nea koranteti, monafine mopafina rimpia fruzana avrenteno, Kraisimpi ana mikozana Anumzamo'a emeri hagerafino, erimago huno Agrarega avrentene.

<sup>21</sup> Hagi korapara tamagrama kefo tamavutmvama nehuta, antahin-tahi tamifina Anumzamofo ha' vahe'ama manineta afete mani'nazane. <sup>22</sup> Hianagi menina Kraisi'a ama avufgare eme frino, tamazeri mago huno Anumzamofo avurera tamazeri ruotge hu'neankino, magomo'a kea huoramantege, hazenke vahere huoramantesigetma, havigema huramante zampintira fru hutma manigahaze. <sup>23</sup> Hianagi tamage kegura tamamentinti hvava nehutma, anankere oti hanavetiho. Fore hanigeta kesnaza zanku'ma Knare Musenkefinti'ma antahi'naza zana otreho. Ana Knare Musenkea miko ama mopafi zantaminte huama hu'nazankita ko antahinaze. Nagra Polina e'i anankemofo eri'za vahe mani'noe.

<sup>24</sup> Tamagriku'ma hu'na natama e'neruazankura nagra muse nehue. Na'ankure Kraisi'ma atama erimete'nea zamo'a ama navufarera natazana erivinetoankita, mono kevumotma, Kraisi avuflga mani'naze. <sup>25</sup> Nagrama vahetema kegavahu eri'za vahe'ama mani'noana, tamagrama tamaza hu'zama erisagu hunantege'na, ana miko Anumzamofo nanekea huama nehue. <sup>26</sup> Ama ana nanekea oku'a ante frakino koma maniza e'naza vahipine, ana knafine anteneane. Hianagi menina Anumzamofo nagatera eri ante'ama nehie. <sup>27</sup> Anumzamo'a Agra'a avesite oku'a me'nea kea taveri hu'ne. Ama ana kea knare hu'neankino, maka vahe'mokizmi zamaza hugahie. Ama ana kea Kraisi'a agra tamagrane mani'neankino tamavreno vanigetma so'ezana kuma'afinti ome erigahaze. <sup>28</sup> Hu'negu miko kazigama vunana Kraisinkura, Anumzamo'ma tami'nea knare antahintahireti kegava hiho nanekea nezmasamita rempia hunezamune. Na'ankure Anumzamo-fontera fatgo hu'za Kraisi'ene tragote'za manisazegu anara nehu'ne. <sup>29</sup> E'ina hu'negu Kraisima maka hankavema naminereti tusi hankavetina eri'zana e'nerue.

## 2

### *Kasefa nomanizamofo naneke*

<sup>1</sup> Hagi tamagri'ene mago'a Leodisiama nemaniza mono naga'mo'zane, mago'amozanema nagri'ma nage'za antahi'zama osu'namokizmima zamaza hu'naku maragu'zama netuazana antahi ama' hanazegu nehue. <sup>2</sup> Nagrama eri'zama e'neruazamofo agafa, zamagu'a zamazeri hankavenetisuge'za zmavesizampina erimago nehu'za, knare antahizampina avinetezma, Anumzamofo oku fraki'nea zama'a antahi ama hanazana, e'i Kraisi'e. <sup>3</sup> E'i Agripi miko knare antahintahizamo'ene, miko antahi'zana frakino, zago nompi me'neankna huno me'ne. <sup>4</sup> Ama kema neramasamuana mago'mo atrenkeno knare masevenke'afinti reramatga osino. <sup>5</sup> Na'ankure ama navufgarera tamagri'enena omani'noanagi, avamupina tamagrane mani'noankina tamagrama mani fatgo nehutma Kraisinte'ma hankave tamentinti nehazazama kenugura muse nehue.

### *Kraisi'ene tragoteta kasefa tasimu erisuna naneke*

**6** Hanki e'ina hu'negu Krais Jisasina, Rane huta ko avrenazankita Agra'ene magoka vano hiho. **7** Tamagra Agrite zafamo arafu'nareno oti hanavetiankna nehutma, nomo hanave zafare oti hanavetiaza hutma onetitma, Knare Musenkera oti hanave netitma, maka knafina Anumzamofona susu hunteho.

**8** Kva hunetma zamatreke'za agafa'a omane antahintahi zantetira tamazeri neginagi osiho. Keaga zamimo'a knare'za hugahianagi, zamagra ama mopafi vahemofo antahiza rempi huneramizanki, Kraisintegati enea'zana rempi hunoramize. **9** Na'ankure Kraisi'a tagrikna huno ama avufgare mani'negeno, Anumzamofo avu'avamo'a mika Agripi avite'ne. **10** Hagi Kraisi'a ana miko hankavene, ana miko zamofo asenia mani'nemofo avu'avara tamagripi anamiko fore hanie huno tamami'ne. **11** Tamagra kumi tamavutamaza atrazazamo Kraisimpina oku tamavufga taga hu'naze. E'i vahe'mo azantetira ana tamavufga taga osu'neanki, Kraisima eri'nea eri'zamo anara huramante'ne. **12** Mono tima frazana Agri'ene frizageno aseramantegeta tamentintima hazageno'a, Anumzamoma Kraisima fripinti azeri otinemofo hankavemo, magoka Kraisi'ene tamazeri otine. **13** Tamagrama kumipi frinetma, kumira otrenageno, Anumzam'o Kraisi'ene magoka tamagira tamazeri kasefa nehuno, mika kefozantamia eri atreramante'ne. **14** Mosese kasegemoma keagama huneranteazana Anumzam'o tagritetira eritreno Kraisi keka zafare hanti'ne. **15** Hankave avamutamimofo hankavene hankave zantamimofo hankavea keka zafare erinetreno, Anumzam'o miko vahe zamaveri amate huno, ana mikozamofo hankavea Kraisi'a keka zafare eri netreno zamazeri haviza huno zamazeri amnezankna hutre'ne.

**16** Hanki atrenkeno vahe'mo'za ne'za nezantero, ti nezantero, kasefa ikante ne'za retro huno nezantero, mono atru huknarero, manifruhu knagura refako huormanteho. **17** Ama anazantamina henkama esia zantamimofo amema'e. Hu'neanagi Kraisi'a tamageza mani'ne. **18** Mag'o'ma avanama kenesia zankuma huno, tamagra anteramita ankeromofo mono hunteho hanigetma, tamagra atrenenko tamagrira tamazeri fenka otreno. E'inahu vahe'mo'za korapa zamarimpamofo avu'ava nevaririza, zamagrama antahi'zana zamagra'ake knare antahi'zana eri'none hu'za zmvavufga ra nehaze. **19** Hianagi Kraisi'ma asenima mani'nea avufgamofonte zamagra rekanuhe'za omani'naze. Na'ankure Kraisi'ma asenima mani'nea avufgamofona hanavea nemino, agruna nofi'mo zaferinafi hagerafigeno kora nofi'mo vuno eno higeno, Anumzamofo hanavere nehage.

**20** Hagi tamagra Kraisi'ene frizageno, Agra ama mopafi havi Avamumofo hankavefintira kazufe tamantegetma fru hutma mani'nazagu, nahigetma ama mopafi tra keramintera amagera antevava nehaze. **21** Ana tra kemo'a huno azeri avako osutma, neta onketma, avakora osiho hu'ne! **22** E'inahu tra kea mopafi vahe'mo rempi huneramiankino, ana tra kema amagema nentaza zamo'a amnezankna hugahie. **23** Ana tra kema avaririsamo'za knare'za nehune hu'za hugahaze. Zamagra tamagritema eama hanazana, Anumzamofoma mago'anee avesintezama, anteramino manizama, avufgamofoma avesizama kegava hazankna hugahaze. Hianagi zamagra taza huza korapa tamavesizana eri atregara osugahaze.

**3***Kasefa huta manisunazamofo naneke*

<sup>1</sup> Hagi tamagrira Kraisi'ene fripinti Anumzamo'a tamazeri oti'negu, tamagu'a monafinka me'nea zantaminte anteho, Kraisi'ma Anumzamofo azantamaga kazigama mani'nere. <sup>2</sup> Monare zanku tamagesa areare nehuta, mopafi zankura tamagesa arerera osiho. <sup>3</sup> Tamagra frizageno, tamasi-mumo'a Kraisi'ene frakino Anumzamofompi me'ne. <sup>4</sup> Hagi Kraisi'a tagri tasimu mani'nemo eama hania zupa, tagranena Kraisi'ene hanavenentake masazama'afi eama hugahune.

<sup>5</sup> E'ina hu'negu tamagripima ama mopafi kefo tamavutamava zama me'nesiana ahefriho. Ana avu'avara monko avu'avazama, agru osu avu'avazama, rumofo zantema kenunu hu'zama, havi agu'agesa antahizama, agraguke antahi avu'avazane, e'inahu avu'avazamo'a havi anumzante mono hunteankna hu'neanki atreho. <sup>6</sup> Na'ankure e'inahu avu'ava'ma nehaza vahete Anumzamofo rimpahenzamo' egahe. <sup>7</sup> Tamagra korapara anahukna kante vono nehutma, ana avu'avazampi mani'nazane. <sup>8</sup> Hianagi menina mika havi avu'ava zana eritreho, havi asivazi'zama rimpahenzamo, havizama rumokizmi huzmantezama, urinkema vahe'ma huzmantezama atreho. <sup>9</sup> Korapa tamavufgamofo havi avu'ava zana ko atrenazanki, orevatga arevatga osiho. <sup>10</sup> Hagi merina magoke magoke'motma kasefa vahe nemanitma, troma huramante'nea nekna maka kna nehutma, mago'ene agrira antahi ama hugahaze. <sup>11</sup> Amafina Griki vhahera omanigeno Jiu vhahera omanigeno, avufga taga hu'nea vhahero, avufga taga osu vhahero, Sinti vhahero, Barberia vhahero, kazokzo eri'za vhahero, kina osu vhahero, Kraisi'a ana miko'za mani'neankino, Kraisi mikamotafina mani'ne.

<sup>12</sup> E'ina hu'negu Anumzamo'ma huhampri ramantegeta ruotge hazageno'a, Agra tusiza huno avesiramantenegu, tamagra rumokizmia tamasunku huzmanteta zamazeri so'e nehutma, vahe'mofo knare tamavu'tamava hunezmanteta, anteramita nemanita, agazone tamavutamava nehuta, akoheno avega anteno mani tamavutmavara kukena hiaza hiho. <sup>13</sup> Mago'moma havizama hugantenesigenka ana knazana e'nerinka, Ramo'ma kumika'a atreganteneaza hunka ana havizama hugantenesimofona, havizama' atrento. <sup>14</sup> Avesimantezamo ana miko avu'avara agaterenegu, rumokizmi zamavesizamanteho. Avesi'ante avu'vazamo ana miko knare avu'ava zana azeri manumanu hu'ne. <sup>15</sup> Kraisi rimpahfruzana atrenkeno tamagu'afina kegava hurnanteno, na'ankure tamarimpa fru huta manisazegu kehigetma mago avufga mani'nazanki, miko zupa Anumzamofona susu hunteho.

<sup>16</sup> Hagi atrenkeno Kraisi nanekemo'a tamagu'afina mevitenena, miko knare antahintahireti rempi hunezamita zamazeri fatgo nehutma, Anumzamofo avontafepi zagamera nehutma, krente zagamera nehutma, mono zagamera hutma Anumzamofona tamagu'areti susu huntegahaze. <sup>17</sup> Kegagama hanafino, eri'zama erisafinena, Rantimofo Jisasi agifi maka'zana hiho. Jisasiimpri Anumza Nafatimofona susu huntegahune.

*Mono nagamofo naneke*

<sup>18</sup> Hagi a'nemotma neramave agorga'a anteramitma maniho, e'inama hanazana Ramofo avurera knare hu'ne. <sup>19</sup> Venenemota a'netamimofona zamavesinezamanteta, tamarimpa haviza huozmanteho. <sup>20</sup> Mofavre'mota mika zupa neramarera tamafa ke amage anteho, na'ankure Ramo'a muse

hugahie. <sup>21</sup> Zamafaheta mofavre nagamokizmia zamarimpa knama erizamiana osiho, ru zamagra knareru osu'none hu'za antahigahaze.

<sup>22</sup> Hagi kazokzo eri'za vahe'motma maka'zama hanafina ama mopare kva vahe'mofo agorga'a mani'netma hakare'a zama hanafina kva vahe tamimo'ma tamavesi tamantesia kazigati, zamavureke eri'zana e'oriho. Hianagi Rantamimofo ra agi nemitma, tamagu'areti hutma kvatamimofo eri'zana eriho. <sup>23</sup> Ana miko eri'zama erisazana, tamagu'areti huta Ramofo eri'zanki erinteho. Ama mopafi kva vahetamimofo eri'zana e'norize. <sup>24</sup> Tamagra Ramofontegatima musezama erisintiharegahaze hu'nea zama erisanaza zana ko antahi'naze. E'i Ramofo Kraisi eri'za e'nerize. <sup>25</sup> Hianagi iza'o hazenkema hanimofona, Anumzamo'a hazenkema hanirera nona'a huntegahie, hagi magomofonkuke hu Anumzana omani'ne.

## 4

<sup>1</sup> Hagi kva vahe'mota, kazokzo eri'za vahetamia fatgo huno knarema hu'nesia tamavutamava hunezmaneta magomofonkukera osoho. Na'ankure tamagra antahi'naze, tamagri'enena mago Kva vahetamia monafinka mani'ne.

### *Nunamu huzanku zamazeri hankaveti naneke*

<sup>2</sup> Nunamuma hu'zana azeri hankavetineta, kava huta mani'neta Anumzamofoma susu hunte avu'ava zana otreho. <sup>3</sup> Hagi tagri'enena nunamu hunerantenkeno, Anumzamo'a kana erifore hina nanekema hanunazamo'a, vuno eno hanigeta, Kraisi naneke'ama oku me'nea kea erintearma hamneno. Na'ankure nagrira ana nanekema huama huazanteku kina hunante'naze. <sup>4</sup> Nunamu nehinkeno nanekema huama hanua nanekemo'a, ama hino.

<sup>5</sup> Zamentinti osu vahe'ma maninesafina, kakamura fore hanigetma hakarezama hanazana kva hunetma, ama antahintahi zanteti knare tamavutmava huzamaveri hiho. <sup>6</sup> Maka zupa vahe'mofoma zamazeri so'ehu nankege nehinke'za, zamagrama antahisazana, ketamimo'a knare huno haga hino. Tamantahige nanekema hanazana, trohuneta knare hutma kenona huzamanteho.

### *Poli'a hvugare naneke'a hu'nea naneke*

<sup>7</sup> Hagi Tikikusina, tusi'za hu'na navesinentoa nenafukino, vahe kegavahu eri'zana agu'areti tamage huno e'nerino, nagrane magoka Ramofonte kazokzo eri'za eneru'a nekino, ana miko nagri nagenkea eme tamasamigahie.

<sup>8</sup> Nagra ama agafare huntogeno tamagritega e'ne. Nankna huta tagra amafina eri'zana e'nerune, anazamofo naneke eme neramasamino tamagu'a zamazeri hankavetigahie. <sup>9</sup> Nagra huntogeno Onesimus'a Tikikusi'ene ne-e. Agra tamagripinti magotamimokino, tamage huno agu'areti eri'zana enerigeta tavesinentona nerafukino, agra Tikikusi'ene esu'ne ana miko'zama tagrite'ma fore'ma nehiazamofo agenkea eme tamasamigahae.

<sup>10</sup> Hagi Aristakusi'a nagrane kina huta kina nompi manino'a ne'mo musenke atreneramantegeno, anazanke huno Banabasina nefu, Maki'a musenke huramante. Ko'ma agri agenkea tamasm'i'hoa nekino, tamagritega esigetma muse hutma avreho. <sup>11</sup> Hagi Jisasi'e hu'za nehaza ne'mofo mago agi'a Jastusikino, agranena musenke atreramante. Zamuvufga tgahu Jiu vahepinti e'inama'amo'za nagranena magoka Anumzamofo kumakura eri'zana eneri'za knare hu'za nazeri hanaveneti'za nagare. <sup>12</sup> Epafrasi'a

Krais Jisasi kazokzo eri'za ne' tamagri kumateti nekino, musenke atreramante. Agra tamagrikura tusi'za huno, Anumzamo'ma avesinea kante tamaza hanigeta oti hanavenetita, nena vahekna nehutma ana mikomotma hakare zampina ama hanazegu nunamuna maka zupa huneramantea nere.

<sup>13</sup> Nagra agrikura huama hu'na tamasamiza hue, agra tusiza huno tamagriku'ene Laodisia kumatea mono nagamotane, Hierapolisi mono nagamotagura tusi'za huno agesa antahineramia nere. <sup>14</sup> Nerafu tusa ne' Luku'ene Demasikea musenke atreramanta'e.

<sup>15</sup> Nagri musenkea Laodisia kumate mani'naza mono naga'ene Nimfa'ema nehaza a'ene noma'afima atruma hu'za mono'ma nehaza nagara ome zmasamaho. <sup>16</sup> Tamagrama ama ana avoma hampri vagamarettesuta, Laodisia mono nagara zaminke'za zamagranena hamprisageta, zamagranena zamagri avona hampriho. <sup>17</sup> Hagi Arkipasina asamaho, Anumzamo'ma kami'nea eri'zana kva hu'enka erivagaro huta asamaho.

<sup>18</sup> Poli'na nagrani'a nazampinti ama musenkea kreramue. Kinafima mani'noa zankura tamagera kanionanteho. Anumzamofo Asunkuzamo'a tamagrane mesie.

## 1 Tesalonaika Poli'a Tesalonaika Mono Vahe'mokizmi Ese Avonkrezami'nea Naneke

*Poli'ene magokama eri'zama e'neriza naga'mo'za Tesalonaika vaheku za-musunku hunaza naneke*

<sup>1</sup> Hagi nagra Polinagi, Sailasi'ene Timotigata ama avona Tesalonaika kumate Anuma Nafatimofompima mani'naza naga'motarega kreneramune. Anumza Nafatine, Ranti Jisas Kraisi asunku'zamo'ene, rimpia fruzamo'a tamagrane mesie.

<sup>2</sup> Hagi maka kna tagra, tamagrikura Anumzamofona susu hunenteta, nunamuna huneramantone. <sup>3</sup> Na'ankure tamagrama Anumza Nafatimofonte tamentinti nehuta, eri'zama enerita, vahe avesinezamofo eriza enerita, Rantimo Jisas Kraisi'ma eforema hanigu, kazigazi hutma Anumza Nafatimofo avure e'nerizazankura antahirami vava nehune.

<sup>4</sup> Nafuhete, tagra antahi'none, Anumzamo'a avesineramanteno, Agri'a vahe manisazegu huhampritamante'ne. <sup>5</sup> Na'ankure tagrama Knare Musenkema nehnana, ke'age nosune. Hianagi Ruotge Avamumofo hanavere tagu'reti huta huama nehnanki, tagra inankna vahe'mota tamagrira tamaza hunakura nehune, tamagra tageta antahita hu'haze.

<sup>6</sup> Tamagrananen, tagrama nehnaza tavaririta nehuta, Ramo'ma nehiankna nehutma, tamagra Anumzamofono naneke e'nerizageno, rama'a knazana neramizanagi, Ruotge Avamumo tamazeri otigetma muse nehaze. <sup>7</sup> Ana hu'negu tamagra maka Masedoniane Akaia kumate mani'naza mono vahetera, mago knare avamezankna hutma mani'naze. <sup>8</sup> Na'ankure Ramofo kemo'a tamagripinti agerura runo e'neana, Masedoniane Akaia kumateke agerura orune. Hianagi tamagrama Anumzamofontema tamamentintima hu'naza zamo'a maka kumatega vuno eno hige'za antahi'nazankita, tagra mago kea osugahune. <sup>9</sup> Na'ankure rama'a vahe'mo'za tamagrama neravreta, havi anumzama tamefi hunemitma, kasefa huno mani'nea tamage Anumzamofontema tamamentinti hu'naza zana tasami'naze. <sup>10</sup> Hagi monafinti Anumzamofono mofavremo esigu avega anteta mani'nomofo, frinefinti azeri oti'nea Ne' Jisasi'a, Anumzamofono rimpia hezampinti tahokeno taguvazi'ne.

## 2

*Poli'a Tesalonaika kumate eri'za eri'nea naneke*

<sup>1</sup> Hagi nenafugata tamagra antahi'naze, tamagrityegama e'nona zamo'a amnezanknara osugahie. <sup>2</sup> Tagri'ma Filipai kumate'ma tazeri haviza nehu'za, nerahe'za hu'nazazana, tamagra antahi'naze. Hianagi Anumzamo'ma tazeri hanavetigeta, Agri Knare Musenkema huama huta tamagri'enena neramasamunkeno, maka vahe'mo'za ha'rerante'haze. (Apo 16:19-24, 17:1-9) <sup>3</sup> Tagrira oku'a antahintahitia omnene, tamagrira tagrarega tamavrenenteta, havige huta reramatga nosune. <sup>4</sup> Hianagi anahukna huno Anumzamo'a tagrira tageno antahino huteno, Knare Musenkema huama hu erizana, taminegeta e'nerunanki, vahe'mo'za muse hurantesazegura nosunankino, Anumzamo Agra'a tagu'afina refko huno nerage. <sup>5</sup> Na'ankure tamagra ko antahi'nazageno Anumzamo'enena huama hugahie. Tamagrira masavena noramita, mago zantamigura ke

tanunu nehuta ama kea nosune. <sup>6</sup> Tagrama nehunana, tamagro, mago'a vahe'mo'za tagi erisga hurantesazegu nosune. <sup>7</sup> Tamage, Krais i aposol vahe'ma mani'nonazamo knazana tamigahianagi, tagra akoheta mani fru nehuta, mofavrema nererama amima nemino kegavama hunteankna nehune. <sup>8</sup> Tagra razampi tamagrira tamavesi neramanteta, Anumzamofo Knare Musenkegera noramasamunanki, tagrati tavufganena neramamune. Na'ankure tamagra raza tagri tavorera mani'naze.

<sup>9</sup> Hagi nena fugata tamagra antahi'naze, kenage'ene feru'enema tamuna nehagegeta maraguzatita tagrima taza haniazanku erizana e'nerita, Anumzamofo Knare Musenkea huama nehunana, magomofo knaza eri amisunegu anara nosune. <sup>10</sup> Tamagra antahinazageno, Anumzamo'enena tamamentintima Kraisintema nehaza nagamotare'ma hunona ruotage tavutavara, tageno antahino hu'ne. Tagra fatgo tavutavara Anumzamofo avuvi nehuta, havi tavutavazana osu'none. <sup>11</sup> Tamagra antahinaze, ne'fama mofavre'amofo tutu hunteno azeri hanaveti ke asamiankna tavutavama huramantenona zana tageta antahita hu'naze. <sup>12</sup> Tagra ana nehanunketma tamagrama kama vnazana, Anumzamo'ma tamagi nehuno, Agri'a masanentake kuma erigahaze hu'nea Ne'mofo so'e kumapi vugahaze.

<sup>13</sup> Hagi maka kna tagra Anumzamofona susu hunentone, tamagrama tamamentintima hu'naza zankura, ana kema huama hunketma tamagra eri'nazana, vahe'mofo kema eriaza hutma e'ori'naze. Hianagi tamagra Anumzamofo tamage ke tamentintima nehaza nagapi eri'zana enerie. <sup>14</sup> Na'ankure nerafuga, Anumzamofo nagama Krais Jisasimpi Ju-diamo mani'naza naga'mokizmi zamavuzmava zamavaririta tamagra hiho. Na'ankure zamagranena anahukna hu'za tamagri vahe'mo'za knazama tamami'neaza huza, zamagri'enena Jiu vahete'ma hu'nazaza hu'naze. <sup>15</sup> Jiu vahe'mo'za Ramofona nehe'za, kasnampa vahe'mokizmia nezmahe'za, tagrira tahe'za tretufe netre'za, zamagra Anumzamo'a muse osiaza nehu'za, maka vahera ha'rezmanteraze. <sup>16</sup> Megi'a vahe'mofonte'ma zamahokeheno zamaguvasisia kema huama nehunkeno, rehi'za hunerantazageno, anama hazazamo'a kumi'ma hu'zana rama'a hazageno agatereno avite'ne. Hi-anagi e'inahukna vahetera, henka Anumzamofo rimpahezamo zamagritera megahie.

### Poli'a Tesalonaika vahe zmagesia zankura tusiza huno avesi'nea nanek

<sup>17</sup> Hianagi nena fugata tagra osia knafi tamagri' enena omanunanagi, tagra tamagrikura tagera okanitfa hu'none. Tamagrima eme tamagezankura tusiza nehuta, eme tamagenaku nehune. <sup>18</sup> Na'ankure tagra tamagritega enaku nehune. Hianagi nagra Poli'na enaku nehuana, Sata'a kana rehiza hunerante. <sup>19</sup> Ranti Jisas Krais i'ma esia knazupa, na'amo tazeri amuhama humisunazantia mesigeno, nazamo musema hanunazana mesigeno, tazeri antesgahu kini fotoritia Rantimofo avurera megahie? Tamagra ana musezantia mani'naze. <sup>20</sup> Tamagriteti, tagra ra tagi enerita musena hugahune.

## 3

### Poli'a Timoti huntegeno Tesalonaika mono vahe zamazeri hanavetinaku vu'nea nanek

<sup>1</sup> Hanki tamagri'ma eme tamegesuna tavesizamo'a, marerigeta manigama nosuta, knarema haniana, Atens kumate manigahune hu'none. <sup>2</sup> Ana nehuta nerafu Timoti'a, Anumzamofo eriza ne'mo

Kraisi Knare Musenkemofo eriza e'neria ne'mo, eme tamamentinti tamazeri hanavenetino, tamazeri hanaveti kea tamasaminogu hunte'none. <sup>3</sup> Tagri'ma tavesiana, mago'amotma amama tagrama e'neruna knazankura antahigna osiho. Tamagra antahinaze, tagrikura knazana erigahaze hu'naza vahé mani'none. <sup>4</sup> Na'ankure tamage huta tamagra nema ko'ma mani'neta tamasami vava huta, knazampina ufregahune huta hunonankino, ana knazamo'a, antahinaza kante fore huno evu'ne. <sup>5</sup> E'ina agafare nagrama avega antena manigama nosuna, reramatagamahu némoma reramatga huzanku koro nehu'na, tagrama eri'zama tamagripima eri'nona erizamo amnezankna huzanku, tamamentinti eme kenogu nagra Timoti hunte'noe.

### *Timoti'ma knare naneke erino ne-egeno Poli'a muse hu'nea naneke*

<sup>6</sup> Hianagi menina Timoti'a tagrite eno, tamagrama tamamentinti nehutma ovesinte avesintema nehaza zankura, musenke eme neramasimo, antahi so'ema humanerantaza zanku'ene, tamagrime tamagenaku ne-hunankna hutma, tagrima tagenakuma nehaza zankura eme tasamine. <sup>7</sup> Ama'na agafare, nenfugta vahé'mo'zama knazama tamiza tatazampima unefronkeno'a, tamagrama tamentintima hu'naza zamo maka knazantifina tazeri hanavenetie. <sup>8</sup> Na'ankure tagrama menima tasimu erita mani'nonana, tamagrama Ramofompi hanavetitama mani'naza zamo higeta tasimura erita mani'none. <sup>9</sup> Tagra Anumzamofo susu hunentone. Tamagrama hazazamo higeta, Anumzamofo avurera tagra musena nehune. <sup>10</sup> Hanine zagenena tamavufima tamagezankura nunamuna hanavetita huvava nehuta, tamamentintifima atupama hu'nesazana, tagra tamazeri hanavetigahune. <sup>11</sup> Menina tagri Nerafa Anumzamo'ene, Jisasi Rantimokea vanuna kana taveri hanaketa tamagritega vugahune. <sup>12</sup> Tagri'ma tavesiana, Ramo'a vahé'ma avesinti avu'ava zana eri aviteramantesigetma aviteta maninetma, magoke magokemotma ovesinte avesinte nehutma, tamagr'i'ma tamavesi neramantonaza hutma, ana miko vahera tamavesizmanteho. <sup>13</sup> E'ina hu'neankino, Jisasi'a maka Naga'anema esia knareratamazeri hanavetina, maka hazenketamia omnena, ruotge huta nemanita, manifatgo nehuta, Anumza Nafatimofo avurera hazenketamia omanegahie. Tamage.

## 4

### *Anumzamo muse hania kante manisunazamofo naneke*

<sup>1</sup> Hagi nafu naganaheta Ramofo Jisasimpi mani'naza nagamota, rempima huraminona kante antetma manihogu tagra tutu huneramanteta, tamazeri hanavenetunanki, tamagrama nehzaza hutma, mago'ane hanavetita ana avu'vara hiho. <sup>2</sup> Na'ankure kasegema Ramofo Jisasi hanavefima tagrama tamasamunketma ketma antahita hu'naze. <sup>3</sup> Na'ankure ama'i Anumzamofo avesizane, mani agru hutma maka monko avu'ava'zampi maniho. <sup>4</sup> Tamagra mago magomotma tamavufga kegava nehutma, tamazeri agru nehutma, ruotge hutma maniho. <sup>5</sup> Tamagra havi monko tamagu tamagesamofona kazokzo vahé'agnara nosutma, Anumzamofo keno antahino osu vahé'mo'za nehaza zana osiho. <sup>6</sup> Tamagra Ramofo amage'ma nentesamokizmia, rezmatga hutma mono Neramafu a'nea zamazeri savri osiho. Antahiho, ko tamavumro tamantenone. Iza'o e'inahu avu'avazama hanimofona, ana hazenke'arera, Ramo'a azeri haviza hugahie hu'none. <sup>7</sup> Na'ankure Anumzamo'ma tagrima tagima hu'nea agafa'a, agru osu avu'avaza avaririhogu tagi osu'neanki, mani ruotge hanunegu tagi

hu'ne. <sup>8</sup> E'ina hunegu iza'o ama kema amefima hunentemo'a, vahe'mofo ke amagena hunonteanki, Anumzamo Ruotge Avamuma tamaminemofo naneke amagena hunemie.

<sup>9</sup> Hagi nenfugta mono vahe'ma avesinte zamofona mago'ene avona kreta, ovesinte avesinte hiho huta osugahunanki, Anumzamo ovesinte avesinte hu'zana ko rempi huramine. <sup>10</sup> Na'ankure tamage, maka Masedonia kumate mani'naza tafuhе'ina makamotma ovesinte avesinte ko hu'naze. Hianagi tafuhегета huhanavetike tamasamita, mago'ene ovesinte avesinte hiho huta neramasamune. <sup>11</sup> Tamagra fruma huno manizankura hanavetitma mani'netma, tamagra'a eri/ zana eriho. Ko'ma hihoma huta tamasami'nonaza hutma, tamagratami tamazanu eri'zana erigahaze. <sup>12</sup> E'inahukna nehutma, megi'ama mani'naza vahetera, knare tamavutmava nehutma, mago'a zankura atupara osugahaze.

### *Fri'naza vahe'mo'za otisaza naneke*

<sup>13</sup> Hagi nafuhegtä, mono nerifuza koma fri'namo'za nankna hugahazafi, tamagra ketma antahitama nehutma, Jisasi'ma esigu amuhama nosaza vahe'mo'za zavimanetaza zana osugahaze. <sup>14</sup> Na'ankure tagrama tamentintima hunana Jisasi'a friteno oti'neankino, anahukna huno Anumzamo'a zmentintine vahe'ma fri'naza vahera zamazeri otisige'za, Jisasi'ma esiankna zupa magoka egahaze. <sup>15</sup> Na'ankure amanahu kante Ramofonkea neramasamune, mani'nona vahe'mota ovu'nenunkeno, fri'naza vahe'mo'za otiza ugota hu'za marerigahaze. <sup>16</sup> Ramo'a Agra'a monafinti eneramino, hanavege huno kezanke nehanigeno, ugota ankeromo'a ageru nerinkeno, Anumzamofo ufemo krafa nehanigeno, vahe'mo'za Kraisinte zamentinti hute'za frinesaza vahe'mo'za kote'za kerifintira otigahaze. <sup>17</sup> Anantera tagrama ofritama maninesuna vahe'mota, tavresigeta mrerita hampompi omeri mago huteta, magoka anagamu Ramofona ome tutagiha hunenteta, maka kna Agrane manivava hugahune. <sup>18</sup> E'ina hu'negu ama nanekenu, magoke magokemofona ozamazeri hanaveti azamezeri hanaveti hiho.

## 5

### *Ramo'ma ete esnigu tro huta manisnuna naneke*

<sup>1</sup> Nagra anazama efore'ma hania zamofonkea, e'i knarerо, e'ina zupa fore hugahie hu'na nenafugta kreoramigahue. <sup>2</sup> Na'ankure tamagratmi antahi'naze, Ramo'ma esianknamo'a, kumazafa vahe kenage eankna huno egahie. <sup>3</sup> Vahe'mo'za hu'za knare huta mani'none nehu'za, tarimpa fru huta maniso'e hune hu'za hanaza knafi ame huno zamazeri haviza hu'zamo'a zamagrriteria, a'nemo'za mofavre antenaku'ma nehzageno zamata negriankna zamata negrina, zamagra ana knazampintira mani onkanegahaze. <sup>4</sup> Hianagi tamagra nenafugate, hanimpina omani'nazankino, ana knamo'a kumazafa vahe'mo'za hanimpi azanknara hanigeta antri osugahaze. <sup>5</sup> Na'ankure tamagra maka'motma tavite vahe mani'netma, masare vahe mani'naze. Tagra kenage vahera omanita, hanimpi vahera omani'none. <sup>6</sup> E'ina hu'negu atrenketa mago'amo'za nemasazaza huta omaseta, tavumo'a hari nehina, ama' antahintahi e'nerita kva huta maniaghune. <sup>7</sup> Na'ankure zmaguma masaza vahe'mo'za kenegeke nemasageno, aka tima nenaza vahe'mo'za, kenageke aka tina nene'za neginenaze. <sup>8</sup> Hianagi tagra masare vahe mani'nonanki, atrenketa ama' tagutagesa nentahita, tamentintima huzane, vahe'ma avesinte avu'ava zana tamimizare hanko reheriaza nehuta, Jisasi'ma taguvazino tavresiazanku nentahita

amuhamama nehunazana, fetori anteaza huta antegahune. <sup>9</sup> Na'ankure Anumzamo'a rimpahae'zama'a erigahaze huno huorantene. Hianagi Ranti Jisas Kraisimpinti tahokeno taguvazizana erisunegu huhamprirante'ne. <sup>10</sup> Jisasi'a tagriku huno fri'neankita, fri'nazo tasimu erita mani'nono, tagra Agrane magopi manisunku huno fri'ne. <sup>11</sup> E'ina hu'negu mago magomotma, ozeri hanaveti azeri hanaveti nehutma, menima nehazaza hutma mago magomofona zamazeri hanavetita maniho.

*Mono vale'mo'za hanaza zamuzmazamofo neneke*

<sup>12</sup> Hianagi nenfugata, tusi maraguzatiza Ramofonte manisaza'zamofo nanekema rempima hunerami'za mono kva vahetamimofona, antahazimita zamagesga huzmanteho huta neramasamune. <sup>13</sup> Hagi eri'zama e'neriza zanku zamesizmanteta, zamagrira zamagi erisaga nehuta, magoke magokemotma tamarimpa frune maniho.

<sup>14</sup> Hagi nerafugate, tagra zamazeri otike hanunketma eri'zama e'ori zmesrama nehaza vahera zamazeri fatgo nehutma, koroma nehaza vahera zamazeri hankavenetitma, hanavema ot'i'nesaza vahera zamazeri hanavetihio. Ana nehutma maka vahe enena fru hutma maniho. <sup>15</sup> Mago'mo'e huno havizama huntesimofona, nona'a havizana huonteno. Hianagi maka kna knare avu'avaza ohunte ahunte nehutma, maka vahetera anahukna tamavutmava huzmanteho. <sup>16</sup> Makazupa muse hiho. <sup>17</sup> Hagi nunamuna otretma makakna huvava hiho. <sup>18</sup> Hakare'zampina Anumzamofona susu hunteho, na'ankure Jisasi Krasimpima e'inahu tamavutamavama huzankura Anumzamofona avenesie. <sup>19</sup> Tamagra Ruotge Avamumofo teve ahesu hu avu'ava zana osiho. <sup>20</sup> Kasnampa kemofona antahi amnezanknara osiho. <sup>21</sup> Hianagi rezaganetma makazana ke so'e nehutma, knarema hunesiazana azeri akona hiho. <sup>22</sup> Ana nehutma, maka havi avu'ava zampintira maniganeta maniho.

<sup>23</sup> Hagi rimpah fru Anumzamo'a, Agra maka sese huramanteno zamazeri ruotage nehuno, avamutamine, tamagu tamene, tamavufanena kegava huramantena, Ranti Jisas Kraisi'ma esianknarera kema hurantezana omanetfa hugahie. <sup>24</sup> Anumzamo'ma tamagima hunemo'a, fatgo huno ke'are amage antegahiankino, Agra anahukna huno eriknare huramantegahie. <sup>25</sup> Nenafugate tagrikura nunamuna huranteho.

<sup>26</sup> Maka tafuhemotma mono tamavutamava hutma tamafukre tamafakre hiho. <sup>27</sup> Nagra hanave ke tamasamuanki, ama avona hamprinke'za, maka tafuhet'za antahihi. <sup>28</sup> Hagi Rantimofo Jisas Kraisi asunku'zamo'a tamagrene mesie.

## 2 Tesalonaika

# Poli'a Tesalonaika Mono Vahe'mokizmi Anante Avonkrezmi'nea Naneke

### *Ramofo knama henka fore hania zamofo naneke*

<sup>1</sup> Hagi nagra Poli'nagi Sailasi'ene Timotigata Tesalonaika mani'naza mono nagamota Anumza Nafatine, Ranti Jisas Kraisinte tragotetma mani'nazamatarega, ama avona kre'neramunankino, <sup>2</sup> Anumza Nafatimofone, Ranti Jisas Kraisi Asunku'zamo'enе rimpа fruzamo'a tamagranre mesie.

### *Tesalonaika vahe'mo'za zamentintifina oti hanaveti'naza zanku Poli'a susu huzmante'nea naneke*

<sup>3</sup> Hagi nenfugata maka knama tamagriku'ma tagesa nentahita Anumzamofona susu hunentonazamo'a, e'i knare'zantfa hu'ne. Na'ankure tamagri tamentintimo'a rura huno nevigetma, magoke magokemotma ovesinte avesintema nehaza zamo'a hageno ra nehie. <sup>4</sup> E'na hu'negu, tamentinti nehutma, maka tamazeri havizama nehazafine, knazama tamizafima kazikazi hutama neaza zankura, Anumzamofo mono nagamofo amu'nompina tamagri tamagenkema nezamasamita, tamagrirkura husaga huneramante'na akignerone.

<sup>5</sup> E'i ana maka'zamo'a Anumzamofo fatgo refko zama'a erifore nehiankino, e'inahukna tamatazama e'neriza zampi Anumzamofo tamazeri retro nehina, Anumzamofo kumara erigahaze. <sup>6</sup> Na'ankure Anumzamofo fatgo zanke nehia Nekino, tamazeri havizama nehaza vahera, nona'a huno zamazeri haviza hugahie. <sup>7</sup> Hianagi Ramo Jisasi'ma monafintima hanavenen-take ankerovo vahe'anema, teve anefa'ane eama hanuno'a, Agra kanazamp-intira tamazeri o'za nehuno, tagri'enena knazantifintira eme tazeri o'za hugahie. <sup>8</sup> Hanki Anumzamofoma ke'za antahiza nosuza, Ranti Jisas Kraisi Knare Kusenkema novaririza vahera, nona'a huno knazana eme zamigahie. <sup>9</sup> Ama ana vahe'mo'za havi mizazami e'neriza, Ramofonteti'ene hanavennetake masa'afintira atre'za afete'are mani'ne'za, zamata erivava hugahaze. <sup>10</sup> Anazama fore'ma haniana Ramoma ete esianknarera Agri vahe'ma mani'naza vahe'mo'zama ra agima nemisafina, tamagranena ana vahe amu'nompi maninetma, ra agi amigahaze. Na'ankure tagrama Agriku'ma huama hu'na kerera, tamagra tamentinti hu'naze.

### *Poli'a Tesalonaika mono vahe'mo'za hankaveti'za manisnagu Anumzamofo antahige'nea naneke*

<sup>11</sup> Hagi Anumzamofo huhampri tamantenegeta tamagrirkura nunamuna huneramantonankino, Anumzamofo tamazeri knare hina, Agri vahe manigahaze. Tagra nunamuna huwava nehunankino, Anumzamofo hanavemo'a tamaza nehina, maka knare'zama hunaku'ma nehaza zana nehuta, tamamentinti hutma hugahunema nehazazana hugahaze. <sup>12</sup> E'inahuma hanutma Ramofo Jisas Kraisi Agi erihentesga nehnageno, Anumzantine Ranti Jisas Kraisi'enena asunkuzama'areti tamagi erisaga hugahie.

<sup>1</sup> Hagi nerefugata Ranti Jisas Kraisi'ma esigeta, Agranema tagrama ome atru hanuna zamofonkura, menina anage huta tagra tamantahine-gone. <sup>2</sup> Mago'a vahe'mo'za tamasamiza Ramofo kna hago fore hu'ne hu'za tamasamisazo, mago vahe'mo huno Ruotge Avamumo e'inahu kasanampa kea nasamie huge, mago ke huama nehuno hanio, mago vahe'mo huno, e'inahukna avona hamprita keteta huama hunema hanageta, e'inahu kema antahisutma, antri nehutma ame hutma antahintahi tamifina antahigna osiho. <sup>3</sup> Atrenkeno mago kampintira vahe'mo'za reramatga osiho. Na'ankure ana kna fore osu'enigeno, kote'zana rama'a vahe'mo'za Anumzamofona zamefi humitesageno, kasegema rutagre ne'mo'a efore nehina, ana ne'mofona azeri haviza hugahie. <sup>4</sup> Ana ne'mo'a agra'a maka'zama anumzane hu'za mono hunentaza'zane, mago'a mono hunentaza zantamina ha'renezmanteno, Nagra ra mani'noe huno Anumzamofo ra mono nompi trate nemanino, agra'a azeri ama huno Anumza mani'noe huno hugahie. <sup>5</sup> Tamagra ontahi'nazo, koma tamagranema mani'nena e'inahu vahera fore hugahie hu'na tamasaminoana? <sup>6</sup> Hagi menina nazamo kana rehiza hunte'ne, tamagra antahi'haze, e'ina hu'neankino agra'a kna fatgore ana ne'mo'a eama hugahie. <sup>7</sup> Na'ankure kasegema rutagre hanavemo'a oku'a erizana ko e'neriankino, ana kama rehiza hu'nemofona azeri kami atretenkeno, kasegema rutagre ne'mo'a eama hugahie. <sup>8</sup> Anantero kasegema rutagre ne'mo'a eama hanigeno, Jisas'a agipinti zahonu huharafu huno ahenefrino, Agrama esia hihamu masa'amo, ana nera ahefri vagaregahie. <sup>9</sup> Anama hania ne'mo'a, Sata hanavereti hanavenentakezane, kaguvazane, havige avame'za erifore nehanigeno, <sup>10</sup> Anumzamo'a zamagu'ma vazisigu'ma tamage kema zami'neana, zamagra zamentintia osu atre'nazagu, Agra mika havige avu'ava zante'ma fananema hu kante'ma nevaza vahera rezamatga hugahie. <sup>11</sup> Na'ankure e'ina agafare Anumzamo'a antahintahizamia zamazeri savari hinke'za, havige zante zmentintia nehu'za, <sup>12</sup> tamage kerera zamentinti nosu'za, havi avu'avazama hu'zanku muse nehzankino, ana miko'mokizimia refko huzamanteno knazana zamigahie.

### Oti hanaveti zamofo naneke

<sup>13</sup> Hianagi tamagriku huta maka kna tagra Anumzamofona susu huntegahune. Ramo'ma avesi'neramantea nena fugata ese agafare Anumzamo'a tamagu'vazinaku huhampri' ramante'neankino, Avamuteti'ene tamage kerema tamentintima nehzageno, tamazeri ruotge hu'ne. <sup>14</sup> Tagrama Knare Musenkema huama hunazampi, Anumzamo'a tamavare kana retro higetma, Ranti Jisas Kraisi hihamu masazama'a e'nerize. <sup>15</sup> Ana hu'negu nena fugata avoma kreneramita, rempima hurami'nona kerera azeri hanavetita oti hanavetaho. <sup>16</sup> Menina Ranti Jisas Kraisine, Anumza Nafatimo, avesinerante'mo asunku mani vava mani'zane, knare amuhazane asunkuzama'areti neramino, <sup>17</sup> tamazeri so'e nehuno, kema hanazano, maka knare eri'zama erisazana, tamagu'a tamazeri hanavetigahie.

### 3

### Poli'a nunamu huntesazegu Tesalonaika mono vahe zamantahige'nea naneke

<sup>1</sup> Hanki huvgare naneke, nenfugata nunamu hunerantenkeno, tamagripima hu'neazana huno Ramofo nanekemo'a, maka kokantega ame huno

vuno e'no nehina, ragi amiho. <sup>2</sup> Ana nehanageno, tagrira fatgo osu vahe'ene havi vahepintira tahokeno tavregahie. Na'ankure zamagra maka'mo'za zamentinti osu vahe mani'naze. <sup>3</sup> Hianagi Ramo'a hugahuema haniaza hu'nekino, havi avu'avazama nehia ne'mo'ma tamazeri haviza huzankura kegava huramantegahie. <sup>4</sup> Tagra, tamagrikura hugahaze huta Ramofompina antahineramunankita, tamagrama nehazazana mago'ene nehutma, hihoma hutama huramante'nonazana hugahaze. <sup>5</sup> Ramo'a tamagrira Anumzamofo avesizana tamagu'afina eriama nehina, Kraisi'ma hu'neaza hutma kazigazi hutma vugahaze.

<sup>6</sup> Hagi menina nena fugata anage huta hanave kea neramasamune, Ranti Jisas Kraisi agifina, eri'zama eri naneke rempima hunezamunke'za novariri'za, feru nemaniza tafuhe'ina zmatretma ogantu maniho. <sup>7</sup> Na'ankure tamagra antahinaze, tagrama rempima hurami'nona avu'avazamofo negetma avaririhio. Na'ankure tagra amu'nontamifima tavesrama osu, <sup>8</sup> magomofo bretia amanea erita o'nenonanki mizaseta neneta, tamagrime knama tamizankura maraguzatita hanine zagenena erizana e'nerune. <sup>9</sup> Hianagi tagra mago'a neza taminageta e'rinakura nosunanagi, tagra knare tavutavama huza tamaveri hanunketma, tamagra ana tavu'tavaza avaririhogu anara nehune. <sup>10</sup> Na'ankure tamagranema maninetta, amanahu avu'avaza hugahaze huta hanave kea tamasami'none. Mago vahe'mo'ma eri'zama e'orinakuma hania vahe'mo'a, ne'zana onegahie. <sup>11</sup> Na'ankure tagrama antahunana amu'nontamifina mago'amo'za erizana e'noriza, vahe'mofo zanku zamagenke nehu'za, eri'za e'ori feru vahe nemanize. <sup>12</sup> Menina e'inahu vahe'mofona, Ramofo Jisas Kraisimpina hanavege huta zamazeri hanave'netita, akohe'za mani'ne'za zamagrazmi zamazampinti erizana eri'za, nomanizazmia retro hu'za maniho huta nehune. <sup>13</sup> Hianagi tamagra nerarfugata, knare tamavu'tmavama huzankura tamavesra osino huta nehune. <sup>14</sup> Iza'o ama avompima kre'nona kemofoma amagema ontesimofona, anamofona keni hunetama, agranena tragoteta omaninkeno agra agazegu hino. <sup>15</sup> Hugahianagi, ha vahetamignara anamofona huonteho, hianagi nerarfuga haviza hunane hutma azeri fatgo hoho.

### *Poli'a huvagare ke hu'nea naneke*

<sup>16</sup> Menina rimpa fru Ramo, Agra'a maka knama hakare'zama hanafina, tamarimpa frua tamigahie. Ramo'a makamotane manisie. <sup>17</sup> Nagra'a Polina ama musenkea nazanko avona nentena, e'inahukna hu'na krenoankita kegahaze. <sup>18</sup> Rantimofo Jisas Kraisi asunkuzamo'a makamotma tamagraneme sie.

## 1 Timoti Poli'a Timoti Ese Avonkremi'nea Naneke

### *Timoti'ma agra'ama kegava hania zamofo naneke*

<sup>1</sup> Hagi nagra Poli'na, Krais Jisasi eri'za ne'mo'na Anumza Tazahu ne'ene Krais Jisasike humanantenate, emema tavaresigu Rantimofo avega nentoa aposolo ne'mo'na, <sup>2</sup> Timotiga nagri tamage mofavremoka mago tamentinti nehu'mokarega, Anumza Nerafantegati'ene Krais Jisasi Ranti'mo'a asunku huganteno asurgi'zane, arimpa fruzana kamisigeno kagrane mesie.

### *Havige mono hunezmiza vaheku kva hanaza naneke*

<sup>3</sup> Hagi Masedonia katre'na vunaku nehu'na, nagra tutu hugante'noe. Efesasi mani'enka havi mono huku hanaza nagara, anara osiho hunka nezmasminka, <sup>4</sup> havige hanaza kegu antahi zamige, korapa fore hu'nesia kanihe kerera antahi ozamiho. Na'ankure ana zamo'a hafra fore huno tamaza osina, Anumza'mofontegati erinaku tamentinti hanaza zana e'origahaze. <sup>5</sup> Hianagi tagrama rempi hunezamuna zamofo agafa'a, zamesi nezmante'za zamagu'reti agru hu'ne'za, knare zamagu'zamagesareti zamentinti hugahaze. <sup>6</sup> Na'ankure mago'a rempi huzmi vahe'mo'za knare'zana agatere'za hazagre'za nevu'za, zamaza osugazanku havi naneke nehantagaze. <sup>7</sup> Kasege huzamasmi vahe nesampra'zanagi, zamagra ana kema hazankea antahinira osu'ne'za, antahi'none nehu'za zamufa eri mareri'zageno kemo'a nena' nomane.

<sup>8</sup> Hu'neanagi tagra antahi'none, kasegem'o a knare hu'negeta, ana kasegema Anumzamo hu'nere, amage anteta avariri sunken'o a knare hugahie. <sup>9</sup> Hagi tagranena antahi'none kasegema tami'neana fatgozama nehaza vahe'mokizmigure huno ozami'ne. Hagi kasegema ovariri'za ha'nentake nehu'za, Anumzamofo avu'ava nosu'za kumi' nehaza vahe'ene mani otage osu'za, otage huno mani'zanku huhavi'za nehu'za, nezmafano nezamrerano zamahe nefri'za, vahe zamahe nefri'za, <sup>10</sup> monko'za nehaza vahe'ene, vemo vene mase'zane, vahe kumzafa nesea vahe'ene, agi'ari vahe'ene, hu'nesia zanteku vahane hu' vahe'ene, knare'za rempi huzmi zanku huhaviza hu vahe zami'ne. <sup>11</sup> Masanentake konarari'ane Knare Musenke'afi (gospol) asomu'anе Anumzamo'a huzamasnio huno nagrira huhamprinante'nea kante ante'na nezamasmue.

<sup>12</sup> Hagi Krais Jisasi'a tagri Ramo, hihamu nam'i'negu muse hunentoe. Na'ankure Agra nagri antahinamiteno, erizani'a erigahane huno huhamprinante'ne. <sup>13</sup> Hianagi korapara Anumzamofona nagra azanva ke nehu'na, amage' nentaza vahera zamazeri kore nehu'na, tusiza hu'na Jisasi agifi amage' nentaza vahera harezmante'noe. Ana hu'noanagi asunku hunante'ne. Na'ankure antahi'na ke'na osu'nena namentintia osu'nogu anara hu'noe. <sup>14</sup> Krais Jisasi'a Rantimo asunku hunanteno naza higena Agrite namentinti nehu'na avesinte'noe. <sup>15</sup> Ama'i tamage nanekegino, hakare'a vahe'mo'za zamentinti hugahaze. Na'ankure Krais Jisasi'a kefoza nehaza vahe zama-hokehesigu ama mopafina erami'ne. Ana agu'afina nagra zamagtere'na hakare vahera kefo'zana hu'noe. <sup>16</sup> Ana hu'noanagi, nagriku esera asuntagi nante'ne, nagrite vahe'mo'za avame zana nege'za, Agrite kumi' vahe'mo'za esnagu agazone huno zamega anteno mani'ne, Krais Jisasinte zamagra zamentinti nehu'za, kasefa hu'za mani vavahu nomani'zana erigahaze.

**17** Menine maka knafima manivava nehia Kini nera, ofrino, vahe'mo onke, magoke Anumzana, konariri'ane manivava hugahie. Tamage.

**18** Hagi magoke tamentinti nehu'a mofavre Timotiga, ama avompima kre negamua naneketu, kagesa antahio. Ko'ma mago'mofoma Anumzamofo naneke asamigeno, kagriku huama hu'nea kasnampa kefi hankavetinka Rantimofo ha'pina, knare hunka hara huo. **19** Kamentintia azeri hanaveteninenka, kagu kagesareti knare antahintahi huo. Na'ankure mago'a vahe'mo'za ana nanekugura zamenosige'za zamentintifina atre'za ventemo tagana vaziankna nehaze. **20** Ana agu'afina Haimenasi ene Aleksandake, e'inahu avameru hu'na'e. Ananku hu'na Sata azampi zanante'noe, Sata'a kna nezanaminke'ne rempi huteke, Anumzamofo agi'amofona azanova kea huontesa'e hu'na hu'noe.

## 2

### *Maka veaku nunamu huzmantesuna naneke*

**1** Anumzamofo agihanta vazi'zana pusaza me'ne. Nunamu huta agihanta nevazita, tagri'ma tavesinia zanku antahinegeta, muse hunenteta, maka vahe zamagi erita zamaza hanigu antahigesanune. **2** Kini vaheku'ene maka kva krinerantaza vaheku'ene nunamuna huzmantesune, ana nehanunke'za kva huso'e nehanageta, agazone huta fruzampi Anumzamofo avu'avate'ene fatgo mani'zampi so'e huta magokepi manigahune. **3** E'inahu zamo'a Anumzana Tazahu ne'mofo (Savior) avufina knare nehigeno musena nehie. **4** Kefo zampinti tahoke he'nea ne'mo'a, maka vahe'mo'za tamage naneke antahi'za zamasimu erisazegu ave'nesie. **5** Na'ankure Anumzana magoke mani'ne. Anumzane, vahe'mota amu'nompina, anazanke huno amu'no nera magoke mani'ne, ana nera Kris Jisasi'e. **6** Tusi'a mizanteti Agra'a avufga atreteno, maka veara miza seranteno, Anumzamo'ma huhampri ante'nea kna eri ama hu'ne. **7** Ana zanteku huno nagrira nazeri ot'i'ne, Anumzamofo mono naneke zamasmi'nena antahisnagu, nazeri ot'i'ne aposolo ne'mo'na, nagra tamage nehuanki havigea nosue. Zamufaga taga osu vahe (gentiles) rempi huzminena zamentinti hu'za tamage nanekea antahihogu huama nehue.

**8** E'ina hu'negu nagri'ma nave'nesiana hakare'a kumate vene'nemo'za, ruotage zamazana antesga hu'za nunamuna nehu'za, fra vazi'za ke hakare osiho.

### *A'nemo'za zamavuzmavama hanaza zamofo naneke*

**9** Hagi nagri'ma navesiana, a'nemo'za fatgo huza kukena nehu'za, zamavusesema hanafina vahe'mo'za kezmasane hu'zana nosuza, zamanu zamazoka hane'zane, golire trohunte'naza avasase zane, hage rimpinti zane (pearl), marerisa kukena osiho. **10** Hu'neanagi Anumzamofo amage' nentonema hanaza a'nemo'za, knare avu'ava nehu'za, ana avu'avateti knare avasese hiazza hu'za hugahaze. **11** A'mo'aakohe'no rempi humisia ke erizafa nehuno, ke amage' anteno, agazone huno manigahie. **12** Hu'neanagi nagra a'nemo'za vene'nea rempi huzmi zankuro, kva mani'zankura navenosie. E'igu agazone hu'za manisanaze. **13** Na'ankure koteno ve Adamu tro huteno, henka'a ara, Ivina tro hu'ne. **14** Adamuntera revatga zana fore osu'ne, hagi a'mofo revatga higeno, kumi'pina traka hu'ne. **15** Hu'neanagi a'nemo'za mofavrema kase nezmante'za, zamentinti nehu'za, ovesinte avesinte nehu'za, mani ruotage hu'za nemani'za, zamagu'ane zamagi'ene, kva hanaza zamo knare mani'zana erigahaze.

## 3

*Mono nonte kva hanaza vahe'ene Dikeni vahe'mofo naneke*

<sup>1</sup> Hagi ama'i tamage naneke, iz'a mono kva manigahue hanimo'a, knare eri'zane huno erino. <sup>2</sup> Kvama hania ne'mo'a amanahu hino, hazenke'a omneno, magoke a' anteno, mani'zama'a kva nehuno, fatgo zanke nehuno, avufa antermino nemanino, nantu antentesia vahe agampu nehuno, agra knare'za rempi huzmi ne' nemanino, <sup>3</sup> hanave rina neno negi oneno, hafra osuno, hagi arimpa fru nehuno, ke hakare osuno, zagogu avesinte'zana atreno. <sup>4</sup> Agra knare huno naga'a kva nehuno, mofavre zaga'a zamazeri fatgo hanige'za, knare kante maniho. <sup>5</sup> Hu'neanagi naga'a kvagri so'e nos-nimo'a, ina kna huno Anumzamofo mono' nona kegava hugahie? <sup>6</sup> Menima agu'a rukrahe hu'nesnia nera, mono kva ne' manisnie hunka ame'ama hunka azeri o'otio. Agra avufa erisaga nehnigeno Sata'a ana hanifi efreno azeri traka hugahie. <sup>7</sup> Hagi monopi omani meg'i vahe'mo'za nege'za, knare nere nehanageno, agra havi avu'avapina uramino Sata krifufina ohegahie.

<sup>8</sup> Dikenima manisia ne'mo'a, anahu kna huno avu'avapina fatgo huno mani'neno, tare agerura oruno, hanave tintera osuno, havi kantetira vahe'mofo zagoa e'orino, <sup>9</sup> e'inara osuno ani' agu'agesare mani'neno, Anumzamofonte hanave amentintima hu'neana, azeri hampo'na hino. <sup>10</sup> Ana eri'zana erigahazanki hu'eneka, esera avame antenka eri'za zamige'za knare hu'zama erisagenka, diken eri'zana zamige'za eriho.

<sup>11</sup> A'nezamimo'zanena anahu kna hu'za knare hu'za nemani'za, vahe zamef'i ke osu'za, knare avu'ava hu'za fatgo zanke hakareza hanafina nehnage'za antahi zamigahaze. <sup>12</sup> Dikenima manisimo'a magoke a' anteno, mofavre naga'a knare huno kegava negrino, nom'aafi zantamine, vahe enena kegava krigahie. <sup>13</sup> Ana diken eri'zama knare hu'za erisamo'za knare zamagi eneri'za, eri'za zamifina otine'za, korera osu'za Krais Jisasintera hanaveti'za zamentinti hugahaze.

<sup>14</sup> Nagra ama avoma kre atrogeno kagritega viana, zaza kna omaniesake'na ko e'naku nehue. <sup>15</sup> Hianagi mago'a zamo'ma nazerinke'na omesugenka, nagrama avoma kre troana kagra kenka antahinka hu'nane, vahe'mo'za inankna hu'za Anumzamofo nagara zamagra kegava hugahaze, kasefa huno mani'nea Anumzamofo mono nonte'ma, atru re'nea anumza zafa, tamage kemofo agafa'e. <sup>16</sup> Maka vahe'mota mago trimpa nehune, Anumzamofo avu'avapi tamentintima hu'zamo'a eama nehie, **Kraisi'a avufa erino eama higeno, Avamu'mo fatgo avu'ava'a eriama higeno, anker'o moza kageno, Kraisi agi agenke hakare kaziga huama hazageno, miko mopane mopane vahe'mo'za zamentinti hazageno, tusi'a masanentake konariri'afi avreno mareri'ne.**

## 4

*Havigema nehaza vahe'mokizmi naneke*

<sup>1</sup> Hu'neanagi Ruotge Avamumo huama huno nerasmie, mago'a kna esnia knafina mago'amo'za zamentintia atre'za evunerami'za, rezmata-gahu avamu'ene, hankro'mofo\* naneke rempi huzamisage'za zamagesa anteza antahigahaze. <sup>2</sup> Havige vahe'mo'za zamagra hu'za, amanahu vahe

\* <sup>4:1</sup> Hankrorema hu'neana havi avamuku hu'ne.

mani'none nehaza vahe'mo'za havi kereti rezmatga nehu'za, knare zamagu zamagesa zamagu'afi me'neana, havi kereti zamagu'a kre hagege nehaze. <sup>3</sup> Ana vahe'mo'za arave osugahaze nehu'za, mago'a kavera oneho hanazanagi, tamage ke'arema tamentinti nehutma nentahimota Anumzamo'ma tro hunte'nea zana muse hunenteta susu huta erigahaze. <sup>4</sup> Na'ankure hakare'zama Anumzamo'ma tro hunte'nea zamo'a, knare hu'negu mago'zana otreta tamagra susu hunentetma amne erigahaze. <sup>5</sup> Na'ankure Anumzamofo ke'mo'ene, nunamumo azeri agru hu'ne.

### *Timoti'ma knare eri'za ne' manisia naneke*

<sup>6</sup> Hagi ama nanekea hanavetinka monoppi mani'naza kafuhe'ima zamasamisunka, kagra knare hunka Krais Jisasi eri'za ne' nemaninka, hanavetinka hakare zupa kamentintifina nehagenka maka knare antahi'zana erinka amage'ma ante'zampina hagegahane. <sup>7</sup> Hu'neanagi kagra maninka tavava'nemofo knihe kerera fra ovazio, hagi kagra knaka'ane, hanaveka'a Anumzamofo avu'avapi kazeri hanavetio. <sup>8</sup> Hanki amega tavufga azeri hanaveti hanuna zamo'a, osi'a knafi taza hu'zana eri gahunanagi, Anumzamofo avu'ava'ma (godliness) hanuna zana huvempa hu'negu meni mani'zampina taza nehuno, henkama esia mani'zampinena taza hugahie. <sup>9</sup> Ama nanekea tamage naneke me'negu antahi hanavetita erisnune. <sup>10</sup> Amana zante amuho huta eri'zana enerita maraguzanetune, na'ankure kasefa huno mani'nea Anumzamo'ma esanigu tagra tamentinti nehune. Agra mika zamentinti nehaza vahe zamagu'vazino zamahokehe nere. (Savior)

<sup>11</sup> Menima negasamua kea hu ankerenka huzamige'za amage anteho. <sup>12</sup> Atregeno mago vahe'mo'a nehaza ne' mani'nane huno kagehenkamu otreno, hianagi zamentintima nehaza nagatera avame zankna hunka keka'afine, kavukvapine, zamesi zamante zane, kamentintifine, agru hu'zane, huzmeri hugahane. <sup>13</sup> Nagra egahuanki, hakare vahera zamazeri atru hunka avontafera hamprinka mono nanekea huama hunka rempi huzamio. <sup>14</sup> Kagra kagera okanitfa huo, Anumza naneke huama (profesi) hazagenka anampinti Avamu'mofu muse'za (gift) erinke'za, mono kva vahe'mo'za zamaza ante'za eri'za eriogu huhampri kante'naze. <sup>15</sup> Mika zupa kagra ama erizana kegava nehunka, anampinka eri'zana enerisankeno nena'a fore hanige'za vahe'mo'za kegahahze. <sup>16</sup> Kagrama kavukvama nehanazana kegava negrinka, rempima vahe'ma hunezmina kenena kegava nehunka, maka zupa ana zanke hunka nevanankeno'a, Anumzamo kagrira kagunevazino, keka'a antahinamokizmia zamagu'vazigahie.

## 5

### *Kento a'nemofo naneke*

<sup>1</sup> Hagi ranra vahekura rankea huontenka, negafanku'ma nehanaza hunka fru kefinti antahigo. Hanki kahefa vahera negafuma huntenaku nehanaza hunka azeri so'e nehunka, <sup>2</sup> ranra a'nea negrerama hunentana kna hunetenka, zahufa a'nea, negasaroma hunentanankna hunka knare antahinatihifi fatgo kazigati kva huzmanto.

<sup>3</sup> Mago kva krintega vahe'ma omani'nesia kento a'nea, kva krizamanteho. <sup>4</sup> Hu'neanagi mago kento a'ma mofavre'afi, negehoma maninesuno'a esera zamagra rempi hu'za mono'mo hu'nea kante nozamifi zamarera zamafaza kva krizmante'naza nona hu'za kva huzmanteho, Anumzamofona e'inahu zanku ave'nesie. <sup>5</sup> Ana hianagi agraku nemanisia kento a'mo, Anumzante

amentinti nehuno hanine zagine nunamuna huno Anumzana antahigegahie. <sup>6</sup> Hu'neanagi mago kento a'mo agri'ma avenesia zankuke agesa nentahimo'a, kahefa mani'neanagi avamupina ko fri'ne. <sup>7</sup> Vahe'tmina ama naneke zamasmige'za avaririh, e'ina hananke'za mago'amo'za ke huzmante kanku hakegahaze. <sup>8</sup> Hianagi mago'mo'ma kora fatgoama zamazeri so'e osuno, naga'anema zamazeri so'e osnimo'a, amentintimo'a amne zankna hanigeno, zamentinti nosnaza vahera zamagatereno haviza hugahie.

<sup>9</sup> Hanki kento a'nea zamazama hunaku zamagima kresafina 60'a zage kafuma huno, nevente mani fatgo hu'nesia kento a'aza hugahaze. <sup>10</sup> Ana kentomo knare avu'ava nehiaza negesageno, mofavre zaga'a negrino, aru vahe agampu nehuno, mono kva vahe zamaga sese nehuno, knafi mani'nesaza vahe zamaza nehuno, ana eri'zama'a arimpa amino knare huno erigahie. <sup>11</sup> Hu'neanagi kahefa kento a'nea zamaza hunaku zamagima kresafina onkreho, na'ankure zamesi'zamo zamavazu hanige'za Kraisimpi hanaveti'za nemaniza'za atre'za ve erigahaze. <sup>12</sup> Ko'ma huvempa hu'naza kea anama hazazamo rufutagige'za, kea eri'za zamagra'a zamufafi emenen-taze. <sup>13</sup> Hagi eri'za e'ori amne mani'neza, ru nompi ru nompi mareritere nehu'za, nosuna naneke nehu'za, rumofo nanekere zamefiga'a ke hu'za vano nehu'za, osuga naneke nehaze. <sup>14</sup> Nagrama nagesa nentahuana, kahefa kento a'nemo'za ve eri'za mofavre nente'za, nozamia kegava nehanage'za, huhavi'za huzmanteku hanaza vahe'mo'za kegura hakregahaze. <sup>15</sup> Na'ankure mago'amo'za hago kana atre'za Sata nevaririze. <sup>16</sup> Hagi mago amentinti nehania a'mo naga'afi kento a'nema mani'nesazana, agra knare'za huno ana a'heramina zamaza hanigeno'a, mono vahera kna eri ozamisageno, zamagra'zmi zamaza huga osune'naza kento a'nea, mono vahe'mo'za zamaza hugahaze.

### *Elda kva vahe'mokizmi naneke*

<sup>17</sup> Hagi elda vahera, Anumzamofo eri'zante kvagri so'e nehaza vaheki, zamagi erisaga nehuta antegna huta mago'ene zamiho. E'imma hanaveti'za mono ke nehu'za, rempima hunezmi'za vahera mono naga'mo'za zamaza hugahaze. <sup>18</sup> E'i ana kante mono avontafe'mo'a amanage hu'ne, **Bulimakaomo'ma witi raga refuzafupeno anoma'a neharesigeta, zamagiteranofira ana'okiho.** (Diu-Kas 25:4) Anazanke huno eri'zama erisia nona'a mizama'a erigahie. (Luk 10:7)

<sup>19</sup> Elda ne'ku rumo'za kna ami ke huntasaza kea ontahio, hianagi tagufa vahe'mo'o, tare vahe'mo'ma huramagema hanigenka ana nanekea antahio. <sup>20</sup> Hanki kumi'ma nehaza kva vahera, hakare vahe zamufi zamazeri fatgo nehuge'za, maka vahe'mo'za nege'za, kumi' huzankura kore hugahaze. <sup>21</sup> Anumzamofo avufine, Krais Jisasi avufine, huhampri zamante'nea ankeru vahe'zmufi kasamuanki, ama nanekea amage' antenka vahera refko osunka, mago zanke hunka zamesi zamanto. <sup>22</sup> Ame'ama hunka kazana mago vahetera antenka mono eri'za erisie hunka azeri o'otio. Mago'a vahe'mo'za kumi' hanafina kagra ana kumipina kagra manigru hunka manio.

<sup>23</sup> Tinkera onenka, osi'a waini tina nenegeno krimpamofona kaza hino, na'ankure hakare zupa krima enerinkure.

<sup>24</sup> Hagi Mago'a vahe'mofo kumi'mo'a amate me'ne, kegaga hunte knare koteno vugahie. Hanki mago'amokizmi kumi'moa frakino me'neankino henka efore hugahie. <sup>25</sup> Anahu kante, hakare vahe'mokizmi knare

zamu'zmamo'a amate me'ne. E'ina higeno mago'a vahe'mofo knare zamuz-mamo'a oku'a me'neankino, henka'a efore hugahie.

## 6

### *Mono ke hanaza vahe'mo'za amage' ante'snaza naneke*

<sup>1</sup> Hagi hakare mono nentahi'za zago e'ori kazokzo eri'za enerimo'za kva vahezamia razampi antahinezamisage'za, nege'za Anumzamofo agi'ane, tagrama knare kema rempima hunezamuna kea huhavizana osugahaze. <sup>2</sup> Iza'o amentintima nehania ne'mo kva'a mani'nesigeno'a, kea ruha'ontagino, na'ankure zamagra neramafuze. Hianagi hakare zupa knare hu'za eriza'zmia eriho, na'ankure e'ima e'nerina eri'zana amentinti nehigeta tavesi'nentona kva ne'mo azahuzana erigahie. Ama'i naneke rempi hunezminka zamasmio.

<sup>3</sup> Hanki mago'a vahe'mo havige naneke nehnigeno, Ranti Jisas Kraisi nanekene, mago'zahu nosnigenka, e'inahu nanekemo'a knare Anumzamofo avu'ava enena trago'otene, <sup>4</sup> agra agu'agesa eri antemrenerino mago'zana antahi ama nosie, hianagi agra mago arimpa osu nanekere agenoka nehuno, nanekegu ke hakare nehigeno, e'i anampinti'ma efore hiana rumofo zanku kesane nehuno, fra nevzino, rimpa oti'oti nehinkeno, vahe'ku huhaviza hunenteno, vahe antahi haviza hunenteno, <sup>5</sup> maka'zupa zamagu'amo knare osu'nea vahe'ene fra nevziza, zamagu zamagesamo haviza hu'nea vahe'mo'za tamage kea nosaze. Zamagrama antahi'zana Anumzamofo nanekefintira feno erisanti haregahune nehaze. <sup>6</sup> Ana hu'neanagi Anumzamofo avu'ava'ma nehu'za agazone hu'za mani'snamo'za, knare zantfa erigahaze. <sup>7</sup> Kasema nerantageta ama mopafina mago'zana erineta ome'none, hagi ama mopama atresuta mago'zana erita ovugahune. <sup>8</sup> Hagi ne'zantine kukenatima me'nениgeta, e'i ana zankura agazone huta nemanita muse hanune. <sup>9</sup> Ana hianagi feno vahe maniku hanaza vahe'mo'za, rezmatagafi evurami'za krifu aheaza hanageno, maka havi avu'avazamofo zamesizampi negi vahe kna nehu'za, zamazeri haviza huzante kezmasane hanageno, ana vahera zamahe haviza huno havi kampi zamavreno uramigahie. <sup>10</sup> Zagogu avesi avesihu avu'avazamo'a maka havi avu'avazamofo agafa'e. Mago'a vahe'mo'za zagogu nehakre'za zamentintia atre'za afete nevazageno, zamasuzamo manizazamifina agonazamo kota zamaheankna nehie.

<sup>11</sup> Hu'neanagi havizampintira atrenka nefrenka, Anumzamofo vahe mani'nananki, fatgo zanke nehunka, Anumzamofo avu'ava nehunka, ka-mentintia nehunka, vahera kavesi nezmanantenka, hanavetinka nevunka fru hunka manio. <sup>12</sup> Kamentintimofo hara knare ha' nehunka, kagima higenka manivava asimu'ma eri'nanana azeri hanavetio, hakare vahe zamufi kagra ko huama hu'nane. <sup>13</sup> Nagra Anumzamofo avufi negasamue, maka'zama asimu ami'nea ne'ene, Krais Jisasi tamage kema Pontias Pailoti avufima huama hu'negu, <sup>14</sup> kagra ana kasegea eri haviza osunka kva hu'negeno, tagri Rantimo Jisas Kraisi efore hino. <sup>15</sup> Agra knama ante'nere fatgo huno egahie, Agrake asomu'ane vugota hu'nea kva ne'ma (sovereign) kin-imokizmi Kinie, ramokizmi Rane. <sup>16</sup> Agrake'za ofrino manivava hugahie. Tusi'a masa'afi mani'neankiza vahe'mo'za urva'o osugahaze. Mago'mo'e huno onkeneanki'za onkegahaze. Agripina Ra agine, hanave'anena mevava hugahie. Tamage.

<sup>17</sup> Ama mopafi feno vahe mani'naza vhahera huzamasmige'za, ana fenozantero zamufa ra osu'za, ana fenozantero zamentinti oshiho, hianagi Anumzamofonte zamentintia hihoh, Agrama maka'zama tamigeta enerunazanku huta muse hugahune. <sup>18</sup> Zamagrira huzamasmige'za knare'za nehu'za, knare eri'zamo fenozamigna hanige'za, atupama hu'nesaza vahema zamaza hu'zanku nentahi'za, feno zamia retro hihoh. <sup>19</sup> E'inama hanu'za, zamagra henka'a esnia knafima erisnaza zamofo agafa'a knare hu'za eri atru nehu'za, ana hu'za azerisaza zanteti tamage mani'zana erigahaze.

<sup>20</sup> Hagi Timotiga, Anumzamo antahi kamino kami'nea eri'zantera kvagri fatgo huo, avufa'a omne'nea nankegu hafra hugante'nazana, kamefi hunezminka havigema hanaza vahera antahi'ozamio. <sup>21</sup> Ana nehu'za mago'amo'za zamentintia atre'za ru'are vu'naze. Anumzamofo asunku'zamo kagrane mesie.

## 2 Timoti Poli'a Timoti (2) Anante Avonkremi'nea Naneke

### *Timoti'ma hanavetino mono eri'zama erisia zamofo naneke*

<sup>1</sup> Hagi nagra Poli'na, Krais Jisasi aposol ne'mo'na Anumzamo Agra avesite huhamprinanteno knare mani'zana Krais Jisasimpi huhampri'ne. <sup>2</sup> Timotiga, nagra navesinegantoa mofavrenimoka ama avona krenegamuankino, Anumza nafatimo'ene Ranti Jisas Kraisi asunku'zane arimpa fruzana kaza huno kamigahie.

### *Timoti musenke huntenu azeri hanaveti'nea naneke*

<sup>3</sup> Nagra Anumzamofo muse hunentoe, nagehe'za hu'nazankna hu'na, eri'zama'a knare'nagu nagesareti kinagane nanterane hakare zupa nunamuma hufina kagrikura antahi negamue. <sup>4</sup> Kavunu herfi'nana zanku nentahi'na mago kna kagesua nagesa nentahue. Anama hanugeno nagridra muse zamo'a avitegahie. <sup>5</sup> Nagra antahi'noe kagra kagu'reti kmentintia nehane, kota'zana negageho Lois'ene negrera Yunesike znamentinti huna'a kna huno kagripina kamentintia me'ne hu'na nentahue. <sup>6</sup> E'izanku Anumzamofo musezama (gift) kagu'afima kami'neana hugre kru huo, nazama kavufgare nentogeno, kami'nea zanku hugagesa nehue. <sup>7</sup> Na'ankure Anumzamo'a kore huno fraki Avamura ontami'ne. Hianagi hanave'ane, avesi'ene, avuvgfa antermino kentahi avamu tami'ne.

<sup>8</sup> Hu'negu Rantimofo naneke huama hu'zantera kagzegura osuo, nagrama Agri kinama hu'nogura kagazea osuo. Hagi nagrane tragedenta knazana Knare Musenkerera (gospel) Anumzamofo hanavefi erio. <sup>9</sup> Kefo zantinti taza huno tvareno ruotge kezampinti tagihu'ne. Mago knare eriza eri'nona zanteku anara osu'ne. Hagi Agra agafa'a me'negu huno asunku'zanteti Krais Jisasimpi ko'ma ofenka'ati taza hu'neazamo mevava nehie. <sup>10</sup> Hianagi menia tazahu ne' Krais Jisasimpi eriama nehuno, fri'zana eri netreno, tasimu neramino ofri manivava mani'zana Knare Musenke'afi (gospel) eriama nehie. <sup>11</sup> Ananku huno Anumzamo'a huhamprantenege'na ke'a huama nehu'na, aposol eri'zana e'neri'na, vahera Knare Musenkea rempia hunezmue. <sup>12</sup> Na'ankure e'ina nehua agafare natazana e'nerue. Hianagi nagazema hu'zamo'a nazeri otregahie. Na'ankure nagra izantero namentintima nehumofona antahi'na kena nehu'na, eri'zama'a erinentoana, Agra antahineankino kva kri ante'enkeno ana kna efore hugahie. <sup>13</sup> Nagrama knare nanekema kasmugenka azerinana kea azeri hanavetio. Kamentinti hu'zampine, vahe'ma avesi'zana, e'i Krais Jisasimpi me'ne. <sup>14</sup> Ruotge Avamu'ma tagu'afi mani'nemo kaza nehanigenka, antahi kaminoo kami'nea kamentintia kegava huo.

<sup>15</sup> Kagra antahi'nane maka Esia kaziga mani'naza vahe'mo'za natre'za uvu evuma hu'nazana, ana agu'afina Figelusi'ene Hemogenesi'ke natrena'e. <sup>16</sup> Nagrama seni nofite kina nompima mani'nogeno, agazegu osuno nazama hu'nerera, Onesiforusi nagara Ra Anumzamo asuntgi anteno aza hanie. <sup>17</sup> Hianagi Romu kumate enehanatino'a nagriku avune anteno hakreno neeno eme nage forehu'ne. <sup>18</sup> Onesiforusina anama hu'nerera, Kraisi'ma esnia zupa Ra Anumzamo asuntaginteno aza hanie. Hanki nama'a zupo agra nazama hiana, Efesasi kumatera kagra ke'hane.

*Timoti hanavetino knazampi manisia naneke*

<sup>1</sup> Hagi Timotiga navesinegantoa ne'nimoka, Krais Jisasima asunku'ma hunegantegu hunka hanavetinka asunkuzampi manio. <sup>2</sup> Kagra nentahinke'na maka vahe zamufi huzmasamino'a kema amage nentaza vhahera huzamaslige'za, zamagra ana zanke hu'za ruga'a vhahera rempi huzamaho. <sup>3</sup> Kagra nagrama enerua kna kataza enerinka, Krais Jisasina knare sondia vahe'agna huo. <sup>4</sup> Kraisi sondia ne'mo'a mopafi mani'zampina uvazi evazia nosie. Na'ankure huhampri anteno sondia eri'za ami'nea ne' azeri muse hugahie. <sup>5</sup> Ana zanke huno mago ne'mo'ma zokagopi taragino nevuno, kasege amage'ontesimo'a muse'zana kini fetorira e'origahie. <sup>6</sup> Hanavetino hoza enerisia ne'mo'a hoza'afi fore hania ne'zana ese'zana agra'a erino negahie. <sup>7</sup> Hagi nagrama negasmua naneke antahi ani' huo, Ra Anumzamo ana kemofo agafa'a hunegasmina, hakare zana antahigahane.

<sup>8</sup> Hagi Jisas Kraisinku kagesa are'are huo, fripinti eteno oti'ne, Daviti negeho'e, Knare Musenke (gospol) huama nehue. <sup>9</sup> Na'ankure nagra ana zanteku hu'na knazana eneri'na hazenke vahe kna hu'na kina nehue. Hu'neanagi Anumzamofo nanekemo'a kina osu'ne. <sup>10</sup> Na'ankure ana agafare maka vahe'mo'za knare hanazegu kna zampina mase'na oti'na nehue. Ana hanuge'za hamprima zamante'nea naga'mo'za Krais Jisasi'a zamaresige'za manivava konariri masa'a (glori) erigahaze. <sup>11</sup> Ama'i tamage naneke, Jisasi'ene fri'nomota, agrane kasefa huta manigahune. <sup>12</sup> Knazama hanavetita mani'neta tagrama erisunana, henka'a Agrane kini kva vahe tro huta manigahune. Agriku'ma ontahi'none huta tagrama hu frakisunkeno'a, tagrikura ontamage'noe huno Agranena hu frakigahie. <sup>13</sup> Tagra tamentintima osanunana, Agra ke'a ruotagregahie. Na'ankure Agra havigea osugahie.

*Havi naneke hunezmasamiza vahe zamazeri fatgo hania naneke*

<sup>14</sup> Maka vhahera huzmagesa huge'za ama ana naneke antahiho. Kazigazi hunka Anumzamofo avufina zamazeri atru nehuge'za, ana nanekegura ke hakare osu'za fra ovaziho. Fra nevazisage'za antahisaza vahe'mokizmia zamazeri havia hugahie. <sup>15</sup> Eri'zanka'a kazigazi hunka e'nerigeno, Anumzamo negageno erizanka'agu muse hunegantena, kagazegura osugahane. Ana nehinkenka tamage naneke'a hufatgo hunka huama hugahane. <sup>16</sup> Hianagi avufa'a omne mopafi zante hantaka hantoko naneke hanafina manigno, na'ankure ana zamo'a zamaza osanige'za Anumzamofo avu'avara osugahaze. <sup>17</sup> Ana naneke zamimo'a zamufgafi (gengrin, kensa), fugo namumo tera huno via kna nehie. Ana nanekema nehaza vahe'pina, tare netremokizni zanagi'a Himenasi'ene Filetusike, <sup>18</sup> tamage naneke atre'ne hzagrena'a netremoke fri'zanpinti oti'zana hago fore hu'ne nehune, mago'a zamentintime vhahera zamarimpa kna erinezmi'e. <sup>19</sup> Ana hu'neanagi Anumzamofo nanekemo avempsa huno arafuna reno me'ne, azanko avo (seal) me'negeno amanage huno kre'ne, Ra Anumzamofo nagare hu'za mani'naza vhahera zamantahino keno hu'ne. Agi hanta nevazisa Ra Anumzane nehaza maka vahe'mo'za kefo mani'zampina mani agetagi'za maniho.

<sup>20</sup> Hagi menia mago ra nompina golire'ene silvareke tro hu'naza tinvakovgera omne'ne. Hagi mago'a zafare'ene mopare'ene trohu'naza tinvakovne me'ne, mago'a kavomo'a ranra eri'za erigahie. Hanki mago'a kavomo'za, vahe'mo'a antahi omi eri'za erigahaze. <sup>21</sup> Hu'negu mago'mo

ana kefo zampinti agu'a sese hanimo'a, ranra eri'za eri tintafe kna hugahie. Zamazeri otage hanige'za, ozafa zamimofo eri'zampina knare hu'za eriga nehu'za, maka knare eri'zama erisagu zamu ante'za manigahaze. <sup>22</sup> Meria kahefa vahe'mo'za kefo avu'avazanku zamagesa nentahizankna osunka atrenka fro, fatgo zamofo nevaririnka, kamentinti ne-hunka, vaheku kavesi nezmantenka fru hunka manio. Iza'o fatgo huno ne-manino, Ra Anumzamofo agihanta nevzisia vahe'ene manio. <sup>23</sup> Hu'neanagi negi neno antahi'za omne vahe knara osuo, antahi sankeno'ma hafra huga hu'nesia kegura kamefi humio. <sup>24</sup> Ra Anumzamofo vahe'mo'za kefra ovazi snaze, hianagi vahera zamesi nezmante'za, rempi hunezmi'za, hazenke huzmante'saza vahe enena agazone hu'za maniho, <sup>25</sup> Fru huta fru kefinti ke hakare hurmantesamokizmia zamazeri fatgo hiho. E'ina hanageno ana ke ontahisaza vahera Anumzamo'a zamaza hina, zamagu'a rukrahe nehu'za tamage kea antahi'za ke'za hugahaze. <sup>26</sup> Ana hina zamagu'a ante fatgo nehu'za, Sata kifopima ahe'nazana katufegahaze. Sata'a kina huzmante'nege'za avesi'zama nevaririza zampintira atre'za vugahaze.

### 3

#### *Mona Mopa vagaresia knafi fore hania kna'zamofo naneke*

<sup>1</sup> Hianagi kagra Timotiga antahi ani' huo, mona mopa vagaresia knama atupa'ma hanigeno'a, tusi'a knaza fore hugahie. <sup>2</sup> Na'ankure ana knama fore hanige'za, vahe'mo'za zamagraguke zamagesa nentahi'za, zagugu zamesinente'za, zamagra zamufga ra nehu'za, vahe zamage henkami netre'za, urinkege nehu'za, zamarera zamafa naneke erizafa osu'za, vahera muse kea huozmante'za, agru hu'za omanigahaze. <sup>3</sup> Vaheku zamavesi ozamante'za, kumizmi otrente atrente nosu'za mago zamarimpa hu'za eri fatgo osu'za, vahe zamarimpa nere'za, vahe zamefiga'a ke nehu'za, manirava ohe'za, vahe zamata zamizankuke nehu'za, knare'zama hu'zankura zameosigahie. <sup>4</sup> Hagi vahera komoru (betray) hunezmante'za, vaheku antahiozmi'za, osu'naza zante havige hu'za z mavufga ra nehu'za, mopafi mani'zante zamesinente'za, Anumzama avesi antega kana atregahaze. <sup>5</sup> Zamagra Anumzamofo avu'avara amega zamufareti nehu'za, zamagra tusi'a hanave Anumzamofompi me'neana zamefi hunemize. E'inama nehaza vahera nezmatrenka mani rure hunka manio. <sup>6</sup> Na'ankure amu'nozamifina mago'a vahe'mo'za vahe nompi antagrige antagrige hu'za mareneri'za, zamagu'amo'a hanave otigeno kumipi kna zamesige'za mani'naza a'nemokizmi, kereti zamazeri havia hazage'za, naneke'zmi erizafa nehu'za zamavemanesia zante hakare'a havizana erifore nehaze. <sup>7</sup> Mika zupa ana a'nea rempi huzamige'za nentahizanagi, tamage nanekea antahi ama nosaze. <sup>8</sup> Janesi'ene Jambresikea korapara Mosesena ke ha'rente'na'e, ana zanke hu'za rempi huzmi vahe'mo'za tamage kemofona ha'renenetaze. Antahintahi zamimo'a savri higeno, zamentintimo'a haviza hu'ne. <sup>9</sup> Hu'neanagi zamagra magore hu'za tagateoregahaze. Maka vahe'mo'za kesazana antahintahi'zamimo'a neginagi hu'ne. Janesi'ene Jambresike neginena'a kna hugahaze.

<sup>10</sup> Hagi Timotiga rempi hunezmua kere nevaririne, nagri mani'zane, mago'za hunaku nagesa antahuane, namentinti huane, kafegafa osu'na ako nehe'na, navesi nezmante'na, knafi nemani'na anazanku osu kazigazi nehuaza hunka nevaririne. <sup>11</sup> Nazanva ante'za nahe'za nazeri haviza nehu'za, nataza nenami'za neganke'za Antioku kumate'ma hu'nazane,

Ikonium kumate ene Listra kumate enema, naheza nazeri haviza ne-hazage'na kna zampina mase'na oti'na nehue. Ana hazanagi ana miko zampintira Ra Anumzamo nahokeheno nazeri natre'ne! <sup>12</sup> Tamage, aza'o Krais Jisasimpi hagerfino Anumzamofo avu'avate mani'naku hanimofona, vahe'mo'za knara zamante'za zamazeri haviza hugahaze. <sup>13</sup> Hianagi havi vahe'mo'zane krunage nehaza vahemo'zanena, haviza nehaza zampintira agtere'za tusi'a havizampi ufregahaze. Vahe'ma rezmatga nehaza'zantera, ana zanke hu'za zamagri'enena rezmatga hugahaze. <sup>14</sup> Ana hugahzanagi kagra, kazigazi hunka ko'ma rempima hunka antahinana kea azeri hanavetio. Tagrama rempima hugami'nonazana kagra antahinka kenka hu'nane. <sup>15</sup> Osi'moka otage avontafepima me'nea nanekea antahime enka e'nane, e'i ana nanekemo knare kagukagesa negamina kamentinti nehunka, Krais Jisasipinti kahokeno kagu'vazizana erigahane. <sup>16</sup> Anumzamo huzamas-mige'za maka ruotage avontafepi me'nea nanekea kre'nazankino, rempima huzmi'sanana knare azahuzana me'neankino zamazeri fatgo nehuno, kazaki'zana eri fatgo nehuno, huzmeri hanige'za fatgo avu'ava hu'zankuke zamagesa antahigahaze. <sup>17</sup> Na'ankure Anumzamofo vahe'mo'za atupa'ma hu'zankura ana nanekemo vite'zmante'nena, maka knare eri'za zamia eri-gahaze.

## 4

### *Poli'a Timotina antahi amino erizanke asmi'nea naneke*

<sup>1</sup> Hagi Timotiga Anumzamofo avufine, Krais Jisasi avufima kasefa huza mani'naza vahe'ene, fri vahe'ene refko huzmantesia ne'mofo avufi, Agra'ama eama nehinkeno, Agri'a mona kumamo efore hania knagura, <sup>2</sup> knare nanekea huzamasmio, kva hu'nenka kna'arero amne knarero, havi knarera zamazeri fatgo nehunka, hazenke hanazana, hanave kefinti zamazeri fatgo nehunka, kzone kefinti zamazeri fru nehunka, kavesra osunka kazigazi hunka knare naneke huama huo. <sup>3</sup> Na'ankure mago knama enke'za vahe'mo'za knare kema antahizankura zamesra nehu'za, zamagra zamesiza nevariri'za zamesisia nanekema hanaza vahe zamage antegahaze. <sup>4</sup> Tamage kea zamesra hunente'za agafa'a omne kere zamagu'a ante'za zamavririhaze. <sup>5</sup> Hu'neanagi kagra knare antahintahi e'nerinka, maka knaza fore hanifina katazana e'nerinka, kazigazi hunka Kraisintega vahera zamare anto, Anumzamo'a eri'zama kami'nea eri'zana erivagaro.

<sup>6</sup> Na'ankure nagrira hago kofta knafi, waini ti ofama hazankna hu'za korani'a eri tagi atregahaze. Nagrama vanua knani'mo'a hago atupa nehie. <sup>7</sup> Nagra namentintia azeri hanavetina mani'nena, knare ha' hu'na nagiamma re'na e'noana hago ehanatue. <sup>8</sup> Henka tagenoka hania zupa, fatgo avu'ava zamofo kini fetori antani nantesiana antenante'ne. E'i Ra Anumzama fatgo huno naneke refko nehia ne'mo, ana knama ehanatsia zupa namigahie, nagrikera onamigahie. Hagi maka veama avesi nente'za eama hanigu Agri avegamanentaza nagamozane erigahaze.

### *Timoti'ma, Polinte'ma esiazamofo naneke*

<sup>9</sup> Nagrama mani'norega ame' hunka esnanegu nentahue. <sup>10</sup> Na'ankure Demasi'a, ama mopafi zanku avenesigeno, nagrira natreno Tesalonaika kumate vu'ne. Kreseni'a Galesia kumate vigeno, Taitusi'a Dalmatia kumatega vu'ne. <sup>11</sup> Luku agrake nagranena mani'nene. Makina esnunka avrenka eno, nagri'ma naza huno'ma eri'za erisigu egahie. <sup>12</sup> Hianagi

Tikikusina nagra huntogeno Efesasi kumatega vu'ne. <sup>13</sup> Hanki Timotiga ne-enka anakre ku'nia Troas kumate Kapusi nompi atre'na e'noana e'nerinka, mago'a avontafe'ene, zagagafa akrute kre'naza avontafe ante'noane erinka eno. <sup>14</sup> Alexandama kopama kreno tuzampaza tro nehia ne'mo'a, tusiza huno natazana nami'ne. Ra Anumzamo anazantera nona'a huntegahie. <sup>15</sup> Kagra ana ne'kura kvagrio, na'ankure agra hanavetino tagrama huama nehuna kerera hara renerante. <sup>16</sup> Hianagi ese'ma nanekefima otuge'za magomo'e huno navega osu'ne, natre'za vu'za e'za hu'naze, ana zankure huno Agra nona'a huozmantesie. <sup>17</sup> Hianagi Ra Anumzamo onatreno nagrane mani'neno hanave nami'ne, ana higeno nagrama nehua nanekemo'a ama hanige'za, maka zamufga taga osu vahe'mo'za antahigahaze. Ananku huno nagrira nahoke aheno laionimofo agipintira navzu hutre'ne. <sup>18</sup> Ra Anumzamo maka havizampinti nahoke heno nenavreno, Agrama nemania kumate monafinka kva hunanteno navareno vugahie. Agra konaririnen-take masa'afi nemanimofo agi'a maka zupa hentesga huvava hanune. Tam-age.

<sup>19</sup> Prisilane Akuila kizniregane, Onesiforus nompi nemaniza nagategane musenke vie. <sup>20</sup> Erastusi'a Korinti kumate manige'na, Trofimasi'a kri erige'na Miletusi kumate nagra atre'na e'noe. <sup>21</sup> Kafegafa hunka zasi ikana ohanati'nesigenka eno. Ebulusi'a musenke atregante, anazanke huno Pudensi'ene, Linusi'ma, Klaudia'ma, maka tafuhe'zane, tasarahe'zane muse ke atregantaze. <sup>22</sup> Ra Anumzamo kagri avamu'ene manisie. Asunku'zamo'a kagrane mesie.

## Taitus Poli'a Taitusi Avonkremi'nea Naneke

### *Taitusi'ma Kriti vahe'mokizmi zamentinti zamazeri hanavetinea naneke*

<sup>1</sup> Hagi Anumzamofo eri'zampi nagra Poli'na kina hu'nena, Jisas Kraisi aposol ne'mo'na, Anumzamo huhampri zamante'nea vahe zamentinti zamazeri hanavetisuge'za tamage kemofo antahini nehuza amage'nente'za, Anumzamofo (godly) avu'ava fatgo hu'za hugahaze. <sup>2</sup> Ana nehanagena zama hanuge'za Anumzamo'ma manivava asimuku'ma hu'negu tamentinti nehuta avega antesune. Havige osu Anumzamo ama mopa fore osu'negeno, korapa huvempa hunte'neane. <sup>3</sup> Hianagi Agrama hunte'nea kna efore higeno, ke'amo eama higeno, mono ke hu'zana nagri hunantege'na, Anumza Tazahu ne'mofo (Savior) kaseg'afi nehue.

<sup>4</sup> Taitusiga tamage mofavre'nimoka, magoke tamentinti nehu'a ne'mokarega ama avona kre negamue, Arimpa fruzane, asunku'zanena, Anumza Nerfantegati ene, Krais Jisasi tazahuno taguvazi ne'mo'a asunkuzama'aretira karimpa frua kamigahie.

### *Taitusima Kritima eri'za erisia naneke*

<sup>5</sup> Hagi nagrama Kritima kat're'na vu'noana amanahure, kagra inazama va-gaore'nesia zana eri fatgo hunka, mono nonte vugota vhahera (elda) magoke magoke kumatera nagrama kasamisure antenka zamazeri otitere huo. <sup>6</sup> Hanki mono kva vahe'ma zamazeri otisunka, hazenke'a omane, magoke a' ante'nesia vahe'ma, mofavre zaga'amo zamentinti nehina, ke amage'a nentesageno, mofavre zaga'agu hazenke nehaze huza nosnia vahe azeri otio. <sup>7</sup> E'igu mono kva vhahera hazenke'a omneno, na'ankure Anumzamofo eri'zante kegava hugahie. Agra'a avesi'za ovaririno, ame huno rimpaka oheno, aka tinte negia oneno, ke hakare osuno, havi kanteti feno e'norisia vahe azeri otigahane. <sup>8</sup> Hu'neanagi vaheku vhaku'ma nehuno, knare'zanku avenesino, agra'a mani'za kegava nehuno, fatgo avu'ava nehuno, mani otage nehuno, ke amage'nenteno, <sup>9</sup> tamage kema husmi'naza kere amentinti nehuno, agra mago'amokizmia so'e ke nezmasmino, huhaviza hanamokizmi'a zamazeri fatgo nehuno, zamaveri hugahie.

<sup>10</sup> Na'ankure maka vahe'mo'za vugote'naza vahe kea ha' renezmante'za, rumokizmigu krunage nehu'za rezmatga nehazana Jiu naga'ma vene'ne zamufa taga nehaza naga'ene tragote'naza vahe'mo'za anara nehaze. <sup>11</sup> Zamasmink'za zamagira hamunki'za maniho, na'ankure zamagra maka famo, tramenya havi kefinti huzmasmi'za tamage kefintira, zamazeri havi kampi nezmatraze. Zamagra zago erinaku ana nehaze. <sup>12</sup> Mago Kriti ne'amu'no zamifi korapa kasnampa ne' (profet) mani'nea ne'mo, zamagriku amanage hu'ne, Kriti vahe'mo'za maka zupa havigege nehu'za afi' zaga-gafagna hu'za mani'naze. Feru vahe mani'ne'za, zamagra zamarimpa eri avite zankuke nehaze. <sup>13</sup> Ama kea tamage naneke, hu'negu hampo'na kefinti huge'za, zamentintifina fatgo hu'za mani'ne'za, <sup>14</sup> Jiu vahe'mokizmi kanihe kere'ene, kase ke zamirera, tamagesa antahiozamiho zamagra tamage kea zamefi humi'za novaririze. <sup>15</sup> Tamage, hakare veamo'za avusesma hu'enageno'a hakare zamo'a avusese hu'ne. Hianagi zamentinti

osu namokizmi'a, mago zamo'a avusese osu'ne. Tamage zamagu zamagesamo ene antahintahi zamimo'a haviza hu'ne. <sup>16</sup> Zamagra Anumzamofona antahita keta hu'none hu'za zamagitetira nehaze. Hu'nazanagi, mani'zazmifina zamagra zamefi Agrira hunemize. Zamavuzavamo'a kasrigeno, kea amage onte'za, mago knare'za hugara osu'naze.

## 2

### *Knare avu'avapi rempi huzmisia naneke*

<sup>1</sup> Hianagi kagrama rempi huzmisanana, tamage kema hu'nesia ke'age (doctrine) huzamasnio. <sup>2</sup> Ranra vene'nea rempi huzamige'za, fru kefinti kea antemase'a ranke osu'za, knare zmvavuzmava nehu'za, knare zamagu'zamagesa antahihio. Hankave zamentinti nehu'za vaheku zamesi nezmante'za, zamentintifina hanaveti'za maniho.

<sup>3</sup> Ana zanke hunka ranra a'ne rempi huzamige'za, mikaza hanafina Anumzamofo agorga mani'ne'za, vahe agenke osu' aka timo'a zamazeri haviga osanige'za knare'za rempi huzamaho. <sup>4</sup> Ana nehu'za zamagra zahufa a'ne nagara zamumro antesage'za, ve' zamine, mofavrezaminena zamesi zamantegahaze. <sup>5</sup> Knare zamagu'zamagesa nentahi'za avusese hu'za mani'ne'za, vaheku vahaku nehu'za, nezamave agorga'a mani'nesage'za nege'za Anumzamofo nanekea huhaviza osugahaze.

### *Nehazave'mokizmi naneke*

<sup>6</sup> Anahu kna hunka nehzavate nagara zamumro antege'za, kegava hu'za maniho. <sup>7</sup> Hakare'zama hanampina knare avu'ava huzamio. Huzameri hanampina zokago vakago osunka tamage ke'age nehunka, <sup>8</sup> tamage ke'age huzamasnigeno mago'mo'a hu haviza huoganteno. E'ina hanankeno aza'o hu haviza hugantesimo'a agzegu hugahie. Na'ankure zamagra havigema hurante zankura hakregahaze.

<sup>9</sup> Hagi kazokzo eri'za vahera rempi huzamige'za mika'zama hanafina kva vahemokizmi zamagorga mani'ne'za zamazeri muse nehu'za, ke nona'a huozmante'za, <sup>10</sup> mago'zazamia kumzafa oseho. Hagi eri'zana tamage kzigati erifatgo nehanageno, e'i anazamo Anumza tzahu ne'mofo mani'za huzamerisage'za nege'za, mono nontahisaza kva vahem'o'zane, megi'a vahem'o'za zamagu'a rukrahe hugahaze.

<sup>11</sup> Na'ankure Anumzamofo asunku zamo vahere avare'zana hakare vahete erino efore hu'ne. <sup>12</sup> Tagri rempi huramino mono ontahi avu'ava'zane, ama mopafi zanku avesi'zanena atreho nehuno, hagi tamufa kva huta, fatgo huta Anumzamofo (godly) avu'avate ama kna'afina maniho. <sup>13</sup> Hagi ana knama esigu avega anteneta muse nehune, tusi'a masa'afi efore hanigu, Ra Anumzantima, Tazahu ne' Krais Jisasi esigu avega ante'none. <sup>14</sup> Tagriku huno Agra'a avufga atreno kefo'zampinti miza seranteno tvare atre'ne, Agri'a vahere huno sese huranteno, tvare Agrarega tante'negu, muse nehuta knare zanke hanune.

<sup>15</sup> Mika'zana kagripi hampo'na huno me'neanki rempi hunezminka, hampo'na tinka nezmasaminka, zamazeri fatgo nehuge'za, kagrikura amne vahere hu'za osiho.

## 3

### *Monopi omani vahemokizmi zamerisia avu'avamofo naneke*

<sup>1</sup> Hagi kagra vahera huzmagesa huge'za, ugagota huno kva hu'nesia nero, kamanifi agi me'nesia ne'mo hania kea amage' ante'za mani'ne'za,

knare'zama hu'zanku trohu'za maka'zupa maniho. <sup>2</sup> Zamagra mago monfunkura amefiga'a kea huonte'za, agazone zampi nemani'za, zamarimpa fru hu'za mani'ne'za, maka vahera agazone huzmanteho.

<sup>3</sup> Kotera mago'a knafina tagra'nena, haviza huta knare osuta negi neneta, ke ru hanentagita, havige reravatga hazageta, kefo zamofo avu'avapi kina hu'neta, vahe'mofo zanku kersane nehuta, vahe antahi haviza hunezman-teta, tagrati antahi haviza ohu ahu hu'none. Vahe zamamatgri naneke nehun-keno,

<sup>4</sup> Anumzama, tagri Tazahu ne'mofo Agri'a knare muse'zane, avesi'zanemo eama hu'ne. <sup>5</sup> Agrama taza hu'neana, knare fatgozama hu'na zankure huno taza osu'ne, hanki Agra'a asunku huranteno taza hu'ne. Agrama taza hu'neana sese huranteno, tazeri kasefa mofavre seranteno Ruotge Avamuteti tazeri kasefa hu'ne. <sup>6</sup> Anama hu'neana Jisas Kraisi tzahu ne', Agripi Avamura azeri usasi okino tagi tregeno e'ne. <sup>7</sup> Hu'neankita tahokeheno asunku zama'areti, kumpinti tazeri fatgo hu'negu huhamprima tantgegeta avegama ante'nona mani'vava mani'zana erigahune. <sup>8</sup> Ama'na nanekea antahi ankerenka, antahi ani' hanana naneke nehue. Hagi amama ksami'nua nanekea kagra hanavetinka vahera zamasmige'za, Anumzamofonte zamagu'a nentesamo'za kva hu'ne'za knare zanke'za hugahaze. Ama zamo'a knare'za fore nehuno, vahera zamaza hugahie.

<sup>9</sup> Hu'neanagi, antahi'za omne vahe kna hunka havi kegura fra vazige, korapa zamagehe'za forehu anante anante hu'za e'naza vahe zamagireku ene Juda vahe kasekegura fra ovazio. Na'ankure e'i anazamo'a mago knare'zana erifore osuno, haviza eri fore hugahie. <sup>10</sup> Hanki tamazeri refko huku hnimofona pusante agesa eritenka, anante mago'ene avumro antegenoma kema ontahisigenka, ananteria mago'zana osunka kmagena humio. <sup>11</sup> Kagra e'inahu vahera kumi' vahe mani'ne hunka antahinka kenka hugahane, agra'a kefoza hiazamo azeri haviza nehie.

### Huvagare naneke

<sup>12</sup> Hagi Atemasimpi, Tikikusino huntesugeno'ma kagritega erizanka'a kaza huku esnigenka, ame hunka nagritega Nikopolisi kumate eno, na'ankure zasi ko'ma atania knafina, ana kumate umaniku nagesa nentahue. <sup>13</sup> Hanavetinka zanazama hania zana Zenasi ke refkohu (lawyer) ne'ene, Apolosi kiznia ka vu zaznifina znaza hugeke magozankura upara osi'o. <sup>14</sup> Tagri vahe'mo'za knare'za hu'zanku zamagesa nentahi'za, mani'za zamifi atupa hu'ne'za zamaza hania zanku hanaveti'za eri fore nehu'za, ferura amnea omaniho.

<sup>15</sup> Maka nagrane nemanizamo'za musenke hurmantaze. Zamesima nerante'za, zamentinti nehaza vahetega musenke vie. Anumzamofonte asunku'zamo tamagrane megahie. Tamage.

## Filimon Poli'a Filimoni Avonkremi'nea Naneke

*Filimoni kazokazo eri'za ne'mo'ma atreno fre'negeno Poli'a ete huntegeno vu'nea naneke*

<sup>1</sup> Hagi nagra Poli'na, Krais Jisasi erizante kina hu'nom'o'nane, nenufu Timoti'ene ama avona, Filimoniga magoka eri'za enerita tavesinegantona rone timokaregane, <sup>2</sup> nersaro Apiane, magoka Anumzamofo eri'zama e'neruna ne' Arkipusine mono naga'ma, nonka'afima atruma nehaza nagamotare-gane ama avona kreneramune.

<sup>3</sup> Anumza Nerfane Ranti Jisas Kraisi asunku'zamo'ene arimpa fruzamo'a tamagrane mesie.

*Filimoni amentintizane avesinte avu'avazamofo naneke*

<sup>4</sup> Mika zupa nunamuma hufina, kagriku'ma antahinegami'na, Anumzani'amofona susu hunentoe. <sup>5</sup> Na'ankure mono naga'ma kavesinezmantenka, Ramofo Jisasint'e ma kamentintima nehana zamofo kea, nagra antahi'noe. <sup>6</sup> Hagi nagrama nunamuma nehuana, kamentintima nehana zana kagrama tazeri hanavetikema neratasmina zamo'a, antahintahizanka'a erira nehina, Kraisimpima makamota asomu'ma me'neazana antahi ama hugahane. <sup>7</sup> Hu'negu rama'a muse nehu'na hanave enerue, na'ankure kagra nerfuga mono nagamokizmi zamagu'a zamazeri hanavenetinkena muse nehu'na fruhu'na nemanue.

*Filimoni'a, Onisimusima avesintesia zanku hu'nea naneke*

<sup>8</sup> E'ina hu'negu, nagrira Kraisi'a nazeri hanaveti'neankina hanave ke hu'na fatgoza huo hu'na hugantegaragi, <sup>9</sup> Nagra Poli'na, Krais Jisasi erizante kina hu'noa ne'mona, navesigantoa kazigati, kazeri otike huna kantahinegroe. <sup>10</sup> Kina nompi mani'nena azeri nenamofiza hu'noa mofavreni'a Onisimusinku, nagra kazeri otike hu'na kantahi'negoe. <sup>11</sup> Kotera kagri kavurera mago eri'za eriga osu'neanagi, menina kagrite'ene nagrite'enena, eri'zama'amo'a me'ne'a ne'e before nehie.

<sup>12</sup> Hagi kagritega etena, Onisimusina tumoni'agna hu'nemofo nagra hundogeno nevie. <sup>13</sup> Knare Musenkemu'ma kina hu'na maninofi, kagri no erino manineno naza haniegua navenesie. <sup>14</sup> Hianagi kagrama ontahine-sanke'nama, nagrama mago'zama huntuesa zankura navenosie. Hagi nagra aza huo hanuazanku, aza hu'zankura navenosianki, kagraka'a kavesite aza huo.

<sup>15</sup> Na'ankure amana agafarepi Onisimusima osia knafima kagri'ma katrena, ete avresankeno kagrane manivava haniegua anara hu'ne. <sup>16</sup> Menina Onisimusia mago'ane kazokzo eri'za nera omanine. Hianagi nagrit-era kazokzo eri'za vahera agatereno navesinentoa nenfu'e. Hu'neanagi menina kagritera amega tavufare'ene Ramofompina mago'ane mono ner-afu manine <sup>17</sup> Hagi nagranema tragoteta eri'zama e'neru'a zanku'ma nentahisunka, nagri'ma nenavranaza hunka Onisimusina avro. <sup>18</sup> Mago'za nehuno haviza hugantenesio, mago nofi hu'nesiana nagra miza hugahue. <sup>19</sup> Poli'na Nagra'a nazanu ama avona krenegamue. Nagra nona hu'na mizana hugahue. Nagra kagu kamemofona kaza hunoanagi, kagra nofira hunantenane hu'na nosue. <sup>20</sup> Tamage nenfuga, Ramofompina knare hunan-tenka, Kraisimpina nagu'a nazeri kasefahu kea nasami'nanegu nehue.

<sup>21</sup> Nagra kantahi'negoazana, agaterenka hugahane hu'na antahinegamina, ama avona krenegamue.

<sup>22</sup> Hagi anama nehanunka noma emasesuazana retro hunanto, na'ankure nagra amuha nehuankino, nunamu tamia Anumzamo'a antahino, kinafintira katufe natresagena vu'naku aveganentoe.

*Poli'ma musenke atrezamante'nea naneke*

<sup>23</sup> Hagi Krais Jisasi eri'zanku hu'za magoka kina hurante'naza ne'mo, Epafrasi'a musenkea atregante. <sup>24</sup> Anahukna hu'za magoka eri'za eneruna naga'mo'zanena, Makima Aristakusima, Demasima, Luku'ma, musenkea atregantaze.

<sup>25</sup> Ranti Jisas Kraisi asunku'zamo'a tamagrane mesie.

## Hibru Hibru Vahe Avontafere

### *Anumzamo huvagare ke Nemofonku hu'nea naneke*

<sup>1</sup> Hagi Anumzamo'a korapara tagehe'mokizmia, kasnampa vahepi huvazino hakare'a zupa ruzahu ruzahu kazigati kegaga huzami'ne. <sup>2</sup> Hianagi menima vagare knafina Nemofompi huvazino keaga huramine. Hagi e'i ana Mofavre'amofo azampinti ama mopa erifore huno maka'zana erisinti harente'ne. <sup>3</sup> Ne'mofavre'amofo Anumzamofo msazama'amo'a remsa nehigeno, Agrikna huno mani'neno, Agri'a hanave ke'areti maka'zana eri kasefa huno nevuno, kumi'ma eri agruhu eri'zama eriteno, Marerisgahu Anumzamofo azantamaga kaziga monafinka mani'ne.

<sup>4</sup> E'ina hu'negu ankerontamimofona zmageretero ragi e'nerigeno, Anumzamo'ma Agima ami'nea agimo'a makamokizmia zamagaterene. <sup>5</sup> Na'ankure Anumzamo'a ina ankeronku huno, **Kagra Ne' Mofavreni'a manisnankena, menina, Nagra negafana manigahue?** nehuno, ete mago'ane huno, **Nagra nefana mani'nenugeno, Agra Mofavreni'a manigahane?** hu'ne. (Sam-Zga 2:7, 1 Kro-Zam 17:13) <sup>6</sup> Hagi zage mofavre'ama avreno ama mopafima ne-eno'a, atrenkeno ana miko Anumzamofo ankeromo'za mono hunteho hu'ne.

<sup>7</sup> Anumzamo'a ankerozaga'agura huno, **Zamazeri zaho kna hugahue nehuno, eri'za vahe'agura zamazeri teve anefakna hugahue** hu'ne. (Sam-Zga 104:4)

<sup>8</sup> Hu'neanagi Ne' mofavre'agura huno, **Anumzamoka, kinia mani'vava hugahane. Kagra fatgo kavukavateti kinia maninka kegava hugahane.** <sup>9</sup> **Kagra fatgo zamofo avesinentenka kasegema rutagre avu'ava zana kavesra hunentane.** E'ina hu'negu Anumzamo'a **kagri Anumzankino, magokama maninaza nagapinti kavreno musezamofo masave frenegante.** (Sam-Zga 45:6,7)

<sup>10</sup> **Hagi Ramoka ese agafarera Kagra'a ama mopamofo trara tro nehunka, monafi me'nea zantamina Kagra'a kazampinti trohu'nane.** <sup>11</sup> **Zamagra frigahazanangi, Kagra maninka nevananke'za, tavravemo atafarenko havizahiankna mikamo'za hugahaze.** <sup>12</sup> **Kagra zamagrira harontafe eri ragazariankna hunezmanteranke'za, kukena hutreankna hugahazanagi, Kagra saganera osunka manivava hugahane.** (Sam-Zga 102:25-27)

<sup>13</sup> Hianagi ina ankeronku Anumzamo'a huno, **Kagra nazantamaga kaziga mani'negena ha' vaheka'a zamazeri kaga tra antaneno hu'ne?** (Sam-Zga 110:1) <sup>14</sup> Hagi ankero vahera eri'za vahere, zamagra avamutaminkino Anumzamo'a zamahokeno zamavaresia vahete kegava huzamantenigu huzmantenge'za e'naze.

## 2

### *Anumzamo'ma tavre'neana razane hu'nea naneke*

<sup>1</sup> Na'ankure e'ina agafare ko'ma antahi'nona kemofona antahini' nehuta atreta akoheta ogamu'a ovanune. <sup>2</sup> Na'ankure Anumzamo ankero vahepi huvazino nehia ke'mo'a, tamage huno efore nehie.

Kasegema rutagrezane ke ontahizamofona, mizama'a me'ne hunesiana, <sup>3</sup> Anumzamo'ma tahoke'neazama tamagenama humisuta, tagra inankna huta rimpia hezana agatereghahune? Ama ana tahoke'zana esetera Ramo hu'ama higeno, Agrite'ma zamentintima nehaza vahete amara higeta ke'none. <sup>4</sup> Anumzamo'a avamezampima, kaguvazampima, ruzahu ruzahu kaguvazampi huama nehuno, Avamumofo musezanena Agra'a avesite refko huno nezamie.

### *Anumzamo'ma tavre'neaza razana hu'nea naneke*

<sup>5</sup> Henkama esia mopaguma nehuna mopa, ankeru vahe'mo'za kva hiho huno huozamante'ne. <sup>6</sup> Hagi avontafepina anage hu'naze. **Vahera na'a mani'negenka kagra antahintahia hunemine?** **Vahe'mofo mofavregura antahinemine?** <sup>7</sup> **Kagra atupa knafi ankeru vahe'mokizmi zamagorga Agrira avrenentenka, masazanka'areti kini fetori antenentenka, husga hunentenka, maka'zama tro'ma hunte'nana zantera hunktakeno kegava nehigenka, Kagra makazana Agri kavafi ante'nane.** <sup>8</sup> **Kagra maka'zama agri kavafi ante'nane.** Na'ankure mago'zamo'a agri kvafintira mani oganegahianki maka'zamo'a Agri kvafinke me'ne. Hianagi menima konana, maka'zamo'a Agri kvafina omanene. (Sam-Zga 8:4-6) <sup>9</sup> Hagi osia knafi ankeru agorga azeri fenkate'nea nera tagra Jisasina kenone, menina azeri antesga huno msazama'areti kini fetori antente'ne. Hu'negu Anumzamo asuragirantenegu mikamotagu huno frizampina ufrene. <sup>10</sup> Ana miko'zana Anumzamofo zantami megeno, ana maka zantamina Agri'a hankavereti trohune. Hagi ana miko Anumzamofo mofavre nagara zamahokeno zamaza hanige'za masazama'afina manisazegu Anumzamo'a fatgo huno kumi'a omanenea Ne' Jisasina tamigeno atazana eri'ne.

<sup>11</sup> Na'ankure vahe'ma zamazeri agru hu'nemo'ene, agruma hu'naza naga'mo'za, magoke ne'pinti fore hu'nazankino, nensaro nenafuo huno huzankura agazea nosie. <sup>12</sup> Agra anage hu'ne, **Nagra nafuhemokizamin te kagia huama nehu'na, ana miko vahe'ma atru hu'nesafi, zagamera hu'na kagika'a ahesaga hugahue.** <sup>13</sup> Mago'ane anage hu'ne, **Nagra antahimina agripi namenanentoe.** **Nagra Anumzamo'ma nami'nea mofavre zagane ama mani'noe** hu'ne.

### *Jisasi'a tagri tazahuku fore hu'nea naneke*

<sup>14</sup> Hagi mofavre'mo'za zamavufagane korane mani'nagu, Agranena za-magrikna huno ama avufare eme frino, fri'zamofo hankavema Sata'ma kinama hurante'nea hanavea azeri amnezankna hu'ne. <sup>15</sup> Hagi fri'zamofo korozampima kazokzo eri'za vahekna hu'za kina hu'za mani'namokizmia kazufe zmanteg'e'za fruhu'za mani'naze. <sup>16</sup> Na'ankure Agra ankeru zamaza hu'nakura ome'neanki, Abrahamumpintima fore'ma hu'naza nagamokizmi zamaza hu'naku e'ne. <sup>17</sup> E'ina hu'negu Agri'a nefune nesaroma hunentea avu'ava huno mika'zampina nehuno, Agra Anumzamofo avurera asuragiranteno ke'are oti fatgohu pristi ne' nemanino, vahe'mokizmia kumizmi nona huno magoke zupa apasezmante ne' mani'ne. <sup>18</sup> Na'ankure Agra reheno kezampi ufreno ataza eri'nemo, tamarehe zampima unefrazamota zamaza hugahie.

## 3

*Jisasi'a Mosesena agatere'ne hu'nea naneke*

<sup>1</sup> E'ina hu'negu ruotage hu'naza mono nerafugata, tagrama huama ne-huna Jisasinkura Aposol ne' mareri agatere'nea pristi nere hutma antahi amiho. <sup>2</sup> Mosesena tamage huno Anumzamo huhampri antegeno mika vahe'afi mani fatgo huno mani'neankna huno, huhampri ante'nemofonte Jisasi'a mani fatgo huno mani'ne. <sup>3</sup> Hu'neanagi Jisasi'a Mosesena agatereno ra agi erigahie. Nomagi vahe'mo'zama nomo ki'naza nomofoma agatere'za ra zamagi enerizankna hugahie. <sup>4</sup> Na'ankure ana miko nona vahe'mo'za negizanagi, Anumzamo mika'zana trohune. <sup>5</sup> Moses'a mika vahe'afina eri'zana avariri fatgo huno eneria nekino, henkama fore'ma hania zamofo avame'za mani'ne. <sup>6</sup> Hianagi Ne' mofavre'amo Kraisi'a Anumzamofo vahetera kva mani'ne. Hagi tagra ana vahe mani'nonankita, koro osu hankavetita nemanita, fore'ma hanigeta kesuna zanku'ma musema nehu-nazana otresune.

*Zamentinti osu'zanku kva hanaza zamofo naneke*

<sup>7</sup> E'ina hu'negu Ruotge Avamumo huno, **Menima Agri ageruma nentahisutma, korapa ka'ma kopi tamagehe'mo'za Anumzamofo rehe'za ke'nazankna huno, tamagu'amo'a hankave otino.** <sup>8</sup> <sup>9</sup> 40'a kafu zagefima kaguvazama erifore huge'za ke'nazanagi, tamage-hemo'za renahe'za ke'naze. <sup>10</sup> E'ina hu'negu, e'i ananknafi va-hekura narimpa henezamante'na, anage hu'noe, zamagu'amo'a savri huvava nehige'za, Nagri kana kenira nosaze. <sup>11</sup> Hu'negu narimpa hezmantente huvempa hu'na, zamagra manifru kumanifina uofregosaze hu'noe. (Sam-Zga 95:7-11, Eks-Ati17:1-7) <sup>12</sup> Nafuheta kva hu'neta kumi'mo'ene tamentinti osu'zamoma asimu anteno mani'nea Anumzamofonteti'ma, tamavretre zankura magoke magokemotma kva hiho.

<sup>13</sup> Hianagi menima knama me'nenire, mago magomotma ozeri hanaveti, azeri hanaveti maka kna nehinkeno, kumi'mofo havigemo'a rehiza huoramanteno. <sup>14</sup> Na'ankure ese'ma Agritema ne-eta, tamentintima hu'nonazama azeri hankavetisuta, Kraisi'ene tragoteta vagaretera uhanatighune. <sup>15</sup> Avontafemo'a anage hu'ne, **Menina Agri ageruma nentahisuta, koma neramagehozama zamefima humi'nazaza huta, Agritera tamagu'a kafana eri'onkiho** hu'ne.

<sup>16</sup> Zamagra iza'za Anumzamofo ke nentahiza hara rente'naze? Zamagrira Moses'a Isipitira zamavareno omenemozafi? <sup>17</sup> Hagi Anumzamofona iza'za 40'a zage kafufina azeri rimpia he'naze? Zamagra ka'ma kokampima kumi'ma hu'za fri'nazamoze. <sup>18</sup> Hagi inamokizmigu Anumzamo'a hankave kea huno, mani fruhu kumani'afina tamagerafa hu'za uofregahaze hu'ne? Zamagra ke'ama amage'ma onte'namokizmigu hu'ne. <sup>19</sup> Tagra refkoma huta konana zamagra zamentintia osu'nazagu, ama ana vahe'mo'za manifruhu kumapima uofre'naze.

## 4

*Anumzamofo vahe'mo'za manigsa hanaza zanku huvempa huzamante'nea naneke*

<sup>1</sup> E'ina hu'negu manifruhu kumapi ufragahaze huno huvempama hu'nea knama me'nesire, mago'tamimo'ma ana manifru hu kumapima

uofre'zankura, kore nehutma kva hiho. <sup>2</sup> Na'ankure koma Israeli vahe'tema Knare Musenkema huama hige'za antahi'nazaza hu'za huama hazageta nentahune. Hianagi anankema antahi'naza kemo'a zamaza osu'ne, na'ankure zamagra ana Knare Musenkerera zamentintia osu'nazageno'e. <sup>3</sup> Na'ankure Anumzamo'ma hu'nea kante anteta tamentinti nehumotage manifruhu kumapina ufregahune. Esara ama mopama tro'ma hiregati mani fru hu kumara ko trohu vagareneankino, zmentitima nosaza nagakura Anumzamo huno, ***Nagra Narimpa henezmate'na huvempa kenia huama nehuanki'za, zamagra tamage hu'za manifru kuma niafina uofregosaze.*** <sup>4</sup> Na'ankure avontafepina 7ni knazupa manifru huzankura anage hu'ne, ***Anumzamo'a 7ni knazupa eri'zana atreno manifru nehie hu'ne.*** (Jen-Agf 2:2)

<sup>5</sup> Hianagi mago'ane ama nanekefina huno, ***Zamagra manifruhu kumanifina uofregahaze*** hu'ne. <sup>6</sup> E'ina hu'negu manifru kumapima ufre'zamo'a ko me'neanagi, ese'ma Knare Musenkema huama hige'za antahi'namo'za uofre'nazana, na'ankure zamagra ke'ama amagema onte'nazazamo hige'za uofre'naze. <sup>7</sup> Hu'negu Anumzamo'a manifruhu kumapima ufrezankura rugna huhamprintene, e'i ana kna meninku Deviti ko hu'nea ke huno avontafepina hu'ne. ***Hagi menina Anumzamona kema nehanigeta nentahisuta, tamagu'a kafana eri onkiho hu'ne.***

<sup>8</sup> Hu'negu Josua'ma manifruhu kuma'ma zaminerresina, Anumzamo'a ru manifruhu knagura mago'ane kea osiresine. <sup>9</sup> Hu'negu Anumzamo'ma eri'zama erivagaretene mani fru hu'neaza huno, mani fruhuzamo'a, Agri vahera zahufa zmavega ante'ne. <sup>10</sup> Hu'negu iza'o Anumzamofo manifru zampima ufre'nakuma hanimo'a, Aumzamoma ama mopama trohu vaga reteno manifru hu'neaza hu'za, erizazmi eri vagarete'za manifru hugahaze.

<sup>11</sup> E'ina hu'negu manifruhu kumapima ufre'zankura hankavenetita, ke ontahi vahe'mo'za ke runetrage'za fanane hunazankna huzankura kva hanune. <sup>12</sup> Na'ankure Anumzamofo kemo'a kasefa huno me'neno, eri'za enerino, tarega kazigaasanenea kazimofo asenezama'a agatereno, kantu tagu tamemofone, avamutifine ufreno tagahu rurerure nehuno, kantu tagrunamo hagerafi'nefine, zaferinamofo asinu'afi ufreno taga nehuno, tavutavazane tagutagesamofo avesizana refko nehie.

<sup>13</sup> Mago'zamo'e huno Anumzamofo avurera, Agrama tro'ma hunte'nea zantamimo'a fraokigosie. Hianagi refkoma hanimofo avurera, ana maka'zamo'a amateke'za nehanigeta, tagranena tamage kege asamigahune.

### *Jisas'i a ugota pristi nere hu'nea naneke*

<sup>14</sup> E'ina hu'negu tagrira mareri ageteresa pristi nera monafinka ufrinemofonte, Anumzamofo Ne' Mofavre Jisasinte tamentintia azeri hankavetisune.

<sup>15</sup> Hu'negu tagrima antahineramino, asunku'ma hurantega ugota pristi ne'tia mani'ne. Na'ankure miko tagrama unefrona rehe'zampina Agranena ufreneanagi, kumira osu'ne. <sup>16</sup> Hu'negu korera osu hanavetita asunku Anumzamofo tramofo avuga ne-eta, asunkuzane avesirantezanena, atupama hanuna knafina erinunkeno taza hugahie.

## 5

<sup>1</sup> Hagi miko pristi vahera vahepinti zamavare'za huzamantage'za Anumzamofo avurera vahe'mokizmi zamagi eri'za mani'ne'za Anumzamofontega museza kre sramana vunente'za, kumiku kresramana

vunte eri'za vahere. <sup>2</sup> Hagi antahizazmi omne vahe'mo'zane kankuma hazagraza vahe'mokizimia agazone huzamanteno zamaza nehiane, na'ankure agra anahukna huno hanavea omnene. <sup>3</sup> E'i ana agafare agra'a kumikura kresramana nevuno, vahe'mokizmi kumikura kresramana vugahie. <sup>4</sup> Ama ana eri'zana mago vahe'mo'a agra'a e'norianki, Aronima huntogenous eri'neaza huno, Anumzamo huzamanteg'eza e'nerize.

<sup>5</sup> Hu'negu Kraisi'a pristi vahe mani'noe huno agra'a azerintesga osu'neanki, azerintesgama hu'neana Anumzamo Agriku huno, **Kagra menina, Nagri mofavre manisankena, Nagra Negafana manigahue** hu'ne. (Sam-Zga 2:7) <sup>6</sup> Hagi mago kaziga avontafepina Anumzamo'a huno, **Kagra manivava pristi, Melkisedeki kna hunka manigahane** hu'ne. (Sam-Zga 110:4)

<sup>7</sup> Jisasi'ma ama mopafima mani'neno'a, fripinti Agri'ma azama hani-monfonku, Anumzamofontega kezatino zavineten, nunamu huno antahinegegeno, Anumzamo'a nunamuma'a antahi ami'ne, na'ankure Agra Anumzamofo antahimizana me'negeno'e. <sup>8</sup> Jisasi'a, Anumzamofo mofavre mani'neanagi, Agrama atazama eri'nea zampinti, kema antahino amage antezana rempi huno antahine. <sup>9</sup> E'i ana atazama eri'nea agofetu Anumzamo'a fatgo nere huntogenous, maka Agri'ma amage'ma antaza vahe'mokizmirera, manivava hanagu zmahokenea zamofo agafa'a mani'ne. <sup>10</sup> Hagi ko Anumzamo'a huno, Melkisedeki mani'neankna Ugota Pristi ne'efore hugahie huno hunte'nea nere.

### *Avamupima hagezanku hu'nea naneke*

<sup>11</sup> Rama'a ama nazamofo nanakea me'negeta tamasmi'naku hunanagi, eriama'ma huno tamasmi'amo'a amuhohie, na'ankure kema ame hutma antahi ama hu'zamo'a amuho huneramante <sup>12</sup> Menina ko rempi hu'zami vahe manizaresinagi, tamagra zahufa aminte mofavregna nehutma hanave ne'zana negara osu'nazankita, avontafepintira Anumzamofo zankura mago'ane fruma hu'nesiaza rempi huramigahaze. <sup>13</sup> Ami rima nenaza vahe'mo'za mofavregna hu'nazankita, fatgo avu'avazane havi avu'avazane hu'za antahi amara nosaze. <sup>14</sup> Hu'neanagi hanave ne'zana, nenama hu'ne'za, fatgozanki havizanki hu'za kenima nehu'za, fatgozama nehaza vahe'mokizmi nezane.

## 6

### *Kazigazi huta Anumzamofo avaririta vanuna naneke*

<sup>1</sup> E'ina hu'negu Kraisinku'ma onensi mofavremofo hiazza huta rempima huneramuna zana netretma, nena vahe avamente mani'enketa, ko'ma fri avu'avazampintima tamagu'a rukrehe hutma Anumzamofonte tamentinti hiho huta tamasami'hona kea, tamasami vava huta ovugahune. <sup>2</sup> Mono tima frezamofo nanekegi, azama anteno nunamuma hu'zamofo nanekegi, fripinti'ma oti zamofo nanekegi, eteno henkama refko hanigeta manivava hanaza'zamofo naneke mago'ane huama huta tamasami vava osugahune. <sup>3</sup> Anumzamo'ma hu izoma hurantenesigeta, amane anazana hugahune. <sup>4</sup> Hianagi iza'zo koma huzamige'za nentahiza, monafi musezama ke'za antahiza nehu'za, Avamura e'neriza, <sup>5</sup> Anumzamofo knare naneke ko eneriza, henkama esianknamofo hankave ke'za antahiza hu'nesamozama, <sup>6</sup> atre'za meg'i'a zante vute'za, etema e'za zamagu'ama eme rukrahema hu'zamo'a, tusi'a amuho huzamantegahie. Na'ankure kefovama haza-zamo'a, Anumzamofo Mofavrea mago'ane aheza keka zafare nehantiza,

vahe avufina agazea eri nemize. <sup>7</sup> Ko'mo'ma mopafi runtegeno, avimzamo koti anivazu huno hageno nena raga'a retegeno Anumzamo ana mopa asomura hunenteno, hozama hankorino avimazama hankrenemofo aza nehie. <sup>8</sup> Hu'neanagi ave'ave trazamo'ene havi trazama nehagea mopa, magoa eri'za eriga osu'neankino, ana mopa Anumzamo hanigeno haviza hinkeno, tevemo tevagaregahie.

<sup>9</sup> Nafuheta tagra ama anahukna ke nehunanagi, tagra antahinone ama anazamo'a tamagridera fore osugahianki, tagra antahima tamunana knare tamavutmvavama nehanageno, tamagu vazigahie huta nehune. <sup>10</sup> Anumzamo'a mago'mofonkuke osu'n'e'kino, amuho huta eri'zama'ama erinenteta Agri'ma avesinenteta ruga'a mono vahe'ma kegava huzmanteta nevaza zankura agera okanigahie. <sup>11</sup> Hianagi tagri'ma tavenesiana, kasefa'ma huta ama mopare'ma mani'nenare vahe'ma avesinte'zana az-eri hanavetineta vagare knareru unehanatita, amuhama hu'nemiza zana omerigahaze. <sup>12</sup> E'ina hu'negu feru vahera omaniho. Hianagi amentintifine akoh'za avegante avu'avazampi mani'n'za huvempa huzmante'nea zantamima erisintihare'naza vahekna hoho.

### *Anumzamofo huvempa kegu amentinti huzamofo naneke*

<sup>13</sup> Hagi Anumzamo'ma huvempa kema Abrahama hunte'neana, magora Agri agetere anumzana omani'neankino Agra'a Agifi huvempa kea Abrahama hunte'ne. <sup>14</sup> **Nagra tamage kagrira asomu hunegantena, kagrip-inti fore'ma hanaza vahera zamazeri hakare hanenkeza rama'a vahe before hugahaze** hu'ne. (Jen-Agf 22:16, 17.)

<sup>15</sup> Hu'negu akoheno avega anteno mani'neno Abrahamu'a, Anumzamo huvempama hunte'neazana erine. <sup>16</sup> Hagi vahe'mo'zama huvempa kema hunakura, zamagrime zamagaterenea vahe'mofo zmagire hunte'za huvempa kezamia nehazageno, knazama amu'nozmifima me'neazana eriama higeno vaga nere. <sup>17</sup> Anahukna huno Anumzamo'a huvempa hu'neakino, anama huvempa hu'nea kemofona azeri hanavetino, erisanti haregahaze hu'nea vahetera huvempa huzmantene. <sup>18</sup> Anumzamo'a huvempa hu'nea ke'ane, hugahuema hu'nea kemoke eri'ante amama hiana, Anumzamo'a havigea osugahie hu'ne. Ana hu'negu tagra maka havizava ne-enketa, Agritega freta vuta kasefa hanavea ome enerita, fore'ma hanigu tamentintima nehu'naza azeri hanavetigahune. <sup>19</sup> Fore hanigu'ma tamentintima nehunazamo'a, ventemofo azerintegeno nemania nofikna nehuno, tagutamemofona azerino ra mono nomofona agu'afinka hantinaza tavaravemofona' agatereno ruotge hu'nefinka tamentintima nehuna zamo'a ome rusi nehie. <sup>20</sup> Jisasi'ma tagri tagi erino vugoteno ufrenemo, Melkisedeki nona erino mani'veva Ugota Pristi nera mani'n'e.

## 7

### *Melkisedeki'ma pristima mani'nea zamofo naneke (Jen-Agf 14:17-20)*

<sup>1</sup> Hagi ama ana Melkisedeki'a Salemi vahe'mokizmi kini ne' mani'neno, marerisa Anumzamofo pristi ne' manine. Hagi Abrahamuma kini vahe'ma ha'ma huno zamagatereteno, nevigeno'a karanka Melkisedeki'a tutagiha hunteno asomura huntene <sup>2</sup> Higeno Abrahamu'a maka'zama erino e'nefintira, nazantrema'a kevu erinteno, refako huno mago kevua Melkisedekina ami'n'e. Hagi Melkisedeki'e agimofo agu'agesamo'a, fatgo

avu'avazamofo kini nere hu'ne. Nehuno Salemi kini nerema hu'nea agu'agesamo'a, rimpia fruzamofo kini nere hu'ne. <sup>3</sup> Nerera'ene nefakea omanina'e, agigo azankomo'a omanigeno, kasente kna'a omanegeno, fri'nea agenke'a omanegeno, Anumzamofo mofavregna huno pristi ne' mani vava hu'ne.

<sup>4</sup> Melkisedeki'a ra ne' mani'neanki antahiho. Abrahamu'a tagigomo agranena ra ne' mani'neanagi, hapintima eri'noma e'nea zantamipintira nazantrema'a kevu refko huteno, anampintira knare'zantfama hu'nea kevua magora Melkisedekina ami'ne. <sup>5</sup> Mosese kasegemo'a maka'zama antenesafintira 10ni'a nazantrema'a kevu refko hu'nesageno, mago kevua pristi vahe'mo'za erigahaze huno krente'ne. E'i anažana zamagra'a nagapinti'ene erigahaze hu'ne. Na'ankure zamagranena Abrahamu naga mani'naze. <sup>6</sup> Hianagi Melkisedeki'a Livae nagapintira omani'neanagi Abrahamu'ma nazantrema'a kevu refko hutenefintira, anampintira mago knare'zantfama hu'nea kevua eri'ne. Hagi Melkisedekia Abrahamuna asomura hunte'ne, ko'ma rama'azankuma huvempama hunte'nea nere. <sup>7</sup> Hianagi mago kea huontegosune, asomuma nemia ne'mo'a asomu enerria nera agaterene. <sup>8</sup> Pristi vahe'ma nazantrema'a kevu refko huntenteta mago kevuma refakoma huta nezamuna vahe'mo'za fri vagare'naze. Melkisedekia zamagatereno ra vahe mani'ne, na'ankure agrikura huama hu'za manino vugahie huno hu'ne. <sup>9</sup> Livae naga'mo'za nazantrema'a kevu refko hunte'nafinti mago kevua eneriza vahe'mo'za ko Abrahamupi Melkisedekina zamagra nazantrema'a kevu refko huntentafintira mago kevua ami'naze. <sup>10</sup> Na'ankure Melkisedekima Abrahamuma tutagihama hunteno, nazantrema'a kevu refko huno mago kevuma ami'neana, agripintira Livae vahe'mo'za zahufa forera osu'nazegeno'e.

### *Melkisedeki'a Jisasi avamezankna huno mani'neazamofo naneke*

<sup>11</sup> Hagi Mosese kasegemo'a huno, Livae nagapintike pristi vahera manigahie huno hige'za mani'nazanagi, ana pristi vahe'mo'za mago vahera zamazeri knarera osu'nazagu mago Melkisedekikna pristi ne'ma fore'ma haniana, Aron nagapinti rompage, ru nagapinti fore'ma hanigeno knarera hugahie hu'ne. <sup>12</sup> Ana hu'negu pristi eri'zamoma zahema nehanageno'a, tra ke mo'enena anahukna huno zahe hugahie. <sup>13</sup> Na'ankure menima keagama nehuna pristi nera, kre sramanavu itare, Kresramana nevaza pristi vahepinti rompage ru nagapinti fore hugahie. <sup>14</sup> Hagi nagrama nehuana Rantimo'a Jiu nagapinti e'ne. Hagi Mosese'a ana nagapinti pristi vahera fore hugahie huno osu'nea nagapinti fore hu'ne.

<sup>15</sup> Ama ana miko zantamimo'a eriama huno, magora Melkisedeki kna pristi ne' menina efore nehie hu'ne. <sup>16</sup> Jisasi'ma pristi ne'ma mani'nena tagehe'mo'zama nehzaza huno Livae nagapinti pristi nera omani'neanki, manivava asimumofo hankave pristi ne' mani'ne. <sup>17</sup> Avontafemo'a agrikura huno, **Melkisedeki kna hunka manivava pristi nere hu'ne**, (Sam-Zga 110:4)

<sup>18</sup> Ama ana kanteti eri'zama'ama omane hankave'a omane korapa kasegea retufeganti atrene. <sup>19</sup> Na'ankure kasegemo'a ana mikozana eriknarera nosie. Hianagi knare'zama fore hugahie huta amuhama hunemunazamo nomia'a e'nerino Anumzamofonte tavreno urava'o nehie.

<sup>20</sup> Hagi Anumzamo'a Agra'a huvempa huno, Kraisi Agrake pristi nera mika zupa manigahie hu'ne. Hianagi mago'a pristi vahe'ma fore'ma hazageno'a, e'inahukna huvempa kea Anumzamo'a huozmant'e'ne. <sup>21</sup> Huvempa kema

hu'neana, ***Nagra Ramo'na, huvempa ke hugantoankina antahintahini'a zahera osugahue. Kgra manivava pristi ne' manigahane hu'ne.***

<sup>22</sup> Na'ankure Anumzamo huvempama hunte'negu, Jisasi'a knare hagerafi huvempa kema tamigahue hu'neā Ne' mani'ne.

<sup>23</sup> Rama'a vahe'mo'za pristi eri'zana eri'naze, na'ankure zamagra ne-frizageno, rumo'za eri'zazmia eritere hu'naze. <sup>24</sup> Hianagi Jisasi'a manivava pristi ne' mani'nigeno, Agri pristi eri'zamo'a mevava hugahie. <sup>25</sup> E'ina hu'negu Agrite'ma etenoma, Anumzamofontema esimofona magoke zupa agu'vazinkeno mani vava hugahie. Na'ankure Agra manivava hu'neno, Anumzamofontega nunamu huno zamaza nehie.

<sup>26</sup> E'inahukna ugagota pristi ne'mo tazeri knarera hugahie. Na'ankure Agra ruotge huno kumi'a omanegeno kumi'mo magore huno azeri haviza osu'ne. Menina kumi vahepinti azeri ruotge higeno, monafinka ragi erino mani'ne. <sup>27</sup> Agra ruga'a pristi vahe'mo'zama nehazaza huno mika kna kresrama uvavava nosie. Zamagra kumikura kresramana vute'za, vahe'mokizmi kumikura kresramana nevazanagi, Jisasi'a magoke zupa Agra avufga eme aguza runo, maka vahe kumikura keka zafarera fri'ne. <sup>28</sup> Na'ankure kasegemo'a hanavezami omene ugagota pristi vahe huham-prizmante. Hianagi Anumzamo'a huvempa hunte'nea kemo'a kasegemofo amefi'a e'neana, Agri'a Ne'mofavremo mikazana emeri knare'zantfa ne-huno manivava hugahie.

## 8

### *Kraisi'a ugota pristi ne' mani'ne hu'neā naneke*

<sup>1</sup> Hagi tagrama nehunazamofo agafa'a ama'ne, tagrira Ugagota Pristi ne'tia monafinka mareri agaterenea kini trate Anumzamofo azantamaga kaziga mani'ne. <sup>2</sup> Agra monafinka seli mono nomofo agu'afi Pristi eri'za eri ne' manino, eri'zana e'nerie. Ana seli mono nona vahe'mo'za zamazantira onki'nazanki, Ramo ki'ne. <sup>3</sup> Miko ugota pristi vahe'mo'za musezane, kresramana vu'za eri'za ome kre sramana nevazankino, tagri Ugagota Pristi Ne'mo kresramana vugahie. <sup>4</sup> Ama mopafima mani'neresina pristi nera omanisine, na'ankure kasegemoma hu'neaza hu'za ko rama'a ugagota pristi vahe mani'ne'za musezana eri'za Anumzamofontega kresramana vunentaze. <sup>5</sup> E'i ama mopafi mono nompi kresramana vu eri'zama enerizana, monafinkama tamazama me'nea zamofo avame'za me'ne. Na'ankure Mosesem'a seli mono noma kinakuma retro nehigeno'a, Anumzamo'a Mosesena hanave ke asamino, ***E'sema ama agonare mikozama kaveri hu'noa kante antenka, seli nona kio huno huntene.*** (Eks-Ati 25:40)

<sup>6</sup> Hianagi Jisasima eri'nea pristi eri'zamo'a mago'a pristi vahe'mo'zama e'neriza eri'zana agaterenegeno, Agra amuno ne' tagri'ene Anumzamofontera manino, koma huvempama hu'neā hagerafi, kea agatereno mani'ne.

<sup>7</sup> Na'ankure kote hagerafi huvempa ke'mo'ma knare'zantfa huneresina, menina mago'anenka hagerafi huvempa kea osiresine.

<sup>8</sup> Hianagi vahepima Anumzamo hazenkema keno erifore nehuno'a, anage hu'ne, ***Ramo'a huno Antahiho, mago kna ne'eankina, ana knarera kasefa huvempa keni'a Israeli vahete'ene jiu vahe'motarera hugahue.*** <sup>9</sup> Ama ana hagerafi huvempa kenimo'a korapama nezamagehoma zamazante zamavazuhuna Isipi mopafinti zamavrena

**atineramina hunte'noa hagerafi huvempa kegnara osugahie. Zamagra ana hagerafi huvempa kerera mani fatgo osu'nazagu, Nagra namage'na huzami'noe huno Ramo'a hu'ne.** <sup>10</sup> Hianagi Israeli vahetera ama kasefa hagerafi huvempa ke Ramo'a huno, henka'a Nagra kasegea antahintahi zamifine zamagu'afine krenente'na, Nagra zamagri Anumza mani'enke'za zamagra nagi vahe manigahaze hu'ne. <sup>11</sup> Ana knazupa zamagra ko Ramofona ke'za antahiza hu'nazankiza, tava'o zamire'ma mani'nesaza vahe'ma rempi huzami zankura osugahaze. Osi vahetetima vuno ra vahetema vaniana, magore hu'za rempi huzamiza tamagra Ramofona antahinazo hu'za osugahaze. <sup>12</sup> Na'ankure nasunku hunezmante'na, Nagra kumizamia atrenezamante'na henka'a ana kumizamigura nagesa ontahigosue hu'ne. (Jere 31:31-34)

<sup>13</sup> Anumzamo'ma ama kasefa hagerafi huvempa kema nehuno'a kote hagerafi huvempa kegura huno, kna'amo'a vagarenkeno, ko'zama me'nesia zamofona eri'zama'a omanenkeno fanane hugahie hu'ne.

## 9

### *Jiu vahe'mokizmi ra mono nomofo naneke (Lev-Pri 25:10-40)*

<sup>1</sup> Hagi korapa hagerafi huvempa kemofona mono hu trake'a megeno mono hunte seli mono nona ama mopafina me'ne. <sup>2</sup> Seli mono nompina tarefi hunaragintene. Ese'ma hunaragintepinka tavima rekru hunte azota megeno, nezante sipa megeno ana agofetura breti me'ne. E'i anama hunaragi ante'neama'agura ruotge hu'ne hu'za nehaze. <sup>3</sup> Hagi anantero tavrave tafizageno amefiga'agura ruotage huno ruotge hu'ne hu'za hu'zaze. <sup>4</sup> Anampinka mananentake'za kre manavu ita korire tro huntentaza megeno, erihagerefi huvempe ke hu'za nehazaza vogisi zafareti trohu'naza me'ne. Ana vogisimofona agu'afina korire trohunaza kavofi mana neza megeno, Aroni azompare agatama hagenea megeno, hagerafi huvempama hu'nea kasegea haverera me'ne. <sup>5</sup> Ana vogisimofo agofetura kumimofo nona huno apasézane, korireti tare masanentake ankeró tro huntogeno, zanagekonanu rutareke ana vogisia refitakeno me'ne. Hianagi menina ana miko'zamofo agafa'a eri ama osugahue.

<sup>6</sup> E'i ana zantamima ese hunaragintepima noma'arema eriante fatgoma hutegeno, pristi vahe'mo'za mareriza atiramiza hu'za mono eri'zana e'nerize. <sup>7</sup> Hianagi ugagota pristi ne'moke mago kafumofona, magoke kna zupa seli mono nomofo agu'afinka hunaragi antegeno ruotge huno, ruotge hu'nefinka, agra kumite'ene vahe'mo'za kefoza nehu'ne hu'za ontahine'za nehaza kumi apase kora erino unefre. (Lev-Pri 16:) <sup>8</sup> E'i ana avu'avazampinti Ruotge Avamumo'a eriama huno seli nomofo kafanteti ufreta Anumzamofonte vu'zama me'nesigeno'a Anumzamofoma keno antahinoma hu'zamo'a amuho hugahie hu'ne. <sup>9</sup> E'i ana seli mono nomo'a menima fore'ma haniaza taveri hu'ne. Na'ankure pristi vahe'mo'zama kre sramanama vazazamo'a zamagu zmagesafima me'nea antahintahizazmia zamazeri amara osugahie. <sup>10</sup> Na'ankure ama ana avu'avazamo'a ne'za nezane ti nezane, tagiama tazama sesema huzamofonuke nehuno, amegazama atup'a knafima vagaresigeno'a, knarezama esiazanku hu'ne.

### *Kraisi'a tama kresramane hu'nea naneke*

<sup>11</sup> Ana hu'negu Kraisi'a ana miko knare zantamima esiazamofo Ugagota Pristi Ne' mani'ne. Agra monafinka mago vahe'mofo azamo tro osigeno, knarezantfa hu'nea seli nompi ufrene. <sup>12</sup> Hagi magoke zupa miko knama kresramnama vezankura Kraisi'a korana erino ruotge hunu ruotge hu'nefinka ufrene. Hianagi e'i ana korana memene anenta kaomofo koranompage, Agra'a koranuti tagu'vazino mani vavama hanunkura mizasene.

<sup>13</sup> Ko avu'avapina meme koranki, bulimakaomofo koranki a' kasefa kaomofo tevefi krenaza osa'reti, pehenama hu'nesafintira zamazeri agru hugahie hu'za hu'naze. <sup>14</sup> Hagi tamagesa antahiho, Kraisi koramo'a razankrefa me'neankino, fri avu'avazama nehunkeno tagutagesa azeri agru higeta, kasefa hunu mani'nea Anumzamofona monora hunentone. Na'ankure manivava Avamumofo hankavere, Kraisi'a kefozama'a omne ne'mo, Anumzamofontera Agra'a avufga tagri kumikura aguza rune.

<sup>15</sup> E'i ana agafare Kraisi'a vahe'mokizmine Anumzamofa amu'no nera kasefa hagerafi huvempa kea mani'ne. Ana hu'negu huhamprima zmantene'mo'za vahe'mo'za Anumzamo manivava maniza erisinti haregahaze hu'neazana erigahaze. Na'ankure Kraisi'a frino, kotema hagerafi kefi manine'za kumima hu'nazana kumizmia mizasezmanteno katufe zmante'ne. <sup>16</sup> Mago vahe'mo'ma frisigeno fenozama'ama henkama erisinti haregahie huntenerimo'a, avegante'enigeno ana nemo'a fritenkeno, ana zama'a erisinti haregahie. <sup>17</sup> Na'ankure frisugenka erisantima haregahane hu'ne'mo'ma frisigeno, erisantima haresimo'a amne erigahie. Hagi amigahuema hunesimoma kasefa hunu maninesigeno'a, magore hunu anazama erisanti haregahane hunu hunesizana e'origahie. <sup>18</sup> E'i ana agafare zagagafamofo korantetira kote hagerafi huvempa kemofo eri hanaveti'naze.

<sup>19</sup> Na'ankure Mosesema Anumzamofa kasegema hamprinoma vahe'ma nezamasino'a, anenta bulimakaomofo korane mememofo korana tine eri hava huteno, erino hisopue nehia trazamofo aninareti'ene koranke hu'nea sipisipi azokateti Anumzamofa kasege me'nea avontafete'ene vahetera, ana korana rutari hu'ne. <sup>20</sup> Huteno anage hunu zamasmine, **Ama koramo'a Anumzamo'ma hagerafi huvempa kema hiho hunu tagrima hurante'nea eri hanavenetie.** (Diu-Kas 24:8) <sup>21</sup> Ana kanteke, anahukna hunu korana seli mono nonte'ene kresramnama nevaza eriza zantamintera rutri huntene. <sup>22</sup> Mosesea kasegemo'ma hu'nea kanteke, tamage hunu ana mikozamo'a korantetike sesehu agru hugahie. Na'ankure mago zaga aheno korana erifegu otreresina kumima atrenteza omaneresine. (Diu-Kas 24:6-8.)

<sup>23</sup> E'ina hu'negu ama mopafi seli mono none agu'afima me'nea zantamina, monafinkama me'neazamofo avamezane, zaga kfamofo koranteti azeri agru hugahie. Hianagi tamage zama monafinkama me'nea zantamina azeri agruma husaniana, zaga kfamofo korama ageterenea koranteti azeri agru hugahie. <sup>24</sup> Na'ankure Kraisi'a vahe'mo azanu ki'nea mono nompina ufrene. Hagi mona kumapi tagriku hunu Anumzamofontera amuno nera mani'ne. Mono hunte'naku kintenaza mono nompi Agra uofre'ne. Na'ankure monafinka me'nea mono nomofo avame'zane. <sup>25</sup> Hagi e'ima ufreneana, Agra'a avufgama aguzama ru'neana, ama mopafi pristi vahe'mo'zama kafugu kafugu magoke knage'za ruotge hune hu'za nehzafi, zaga kfamofo kora eri'za ufre'za kresramana vuvava hazanknara osu'ne.

<sup>26</sup> Hanki anara hugara hu'nesiana, ama mopama tro'ma huneregatira fri vava huno visine. Hianagi anara osu'ne. Kumimofo hanavema eri atrenaku, Agra'a avufga tagrikure huno vagare knafi avufga agu'za runo magoke zupa, ana maka knamofonkura fri'ne. <sup>27</sup> Hu'negu vahe'mofonku'ma hunteneana, magoke zupa fritesuno'a kegagarera otigahie huno huntene. <sup>28</sup> Hu'negu Kraisi'a magoke zupa frino rama'a vahe kumira eritrezamtena. Agrama henkama esu'no'a kumiti eritrerante'nakura omegahianki, Agriku'ma tu-siza hu'za avegama ante'namokizmi zmahokeno zmavrenaku egahie.

## 10

### *Kraisi'a magoke zupa miko vahekura fri'nea zamofo naneke*

<sup>1</sup> Hagi ko avu'avazama Mosese kasegefima me'neana henka knare'zama esiazamofo avame'za me'ne. Hu'negu ko avu'avazampima mago'anena anahukna zana hvava hu'za kafugu kfugura vugahazanagi, mono'ma huntenaku'ma haza vahe'mokizmi, ana zamo'a zamazeri agru osuffa hu'ne. <sup>2</sup> Hagi koma kresramna nevaiza'zamo'ma mono'ma nehaza vahe'mokizmi kumi'ma sese hu'neresina, kresramna vuvava nosu'za, zamagu zamagesa-fina kumi me'ne hu'za ontahizasine. <sup>3</sup> Hu'neanagi e'i ana kresramnamo'a kafugu kfuguma hu'naza kumimofo huzmagesa hutere nehie. <sup>4</sup> Na'ankure bulimakaomofo koramo ene mememofo koramo'a kumira sese hugara osu'ne. <sup>5</sup> E'i ana agafare Kraisima ama mopafima ne-eno'a Anumzamofona anage huno asami'ne, **Vahe'mofo kumitema zagagafa korama Kres-ramanama vuzankura kavenosie. Hianagi Kagri kemofo amage antesuegu ama navufga nami'nane.** <sup>6</sup> **Kumitema zaga kfama mika Kresramana vuzankura, Kagra musena nosane.** <sup>7</sup> **Nagra anage ne-hue, koma Anumzamoka avontafemo Nagriku hu'nea kante, Kagri kavesi avaririnaku ama e'noe** hu'ne. (Sam-Zga 40:6-8) <sup>8</sup> Kasegemo'a rempi huramino, kresramna vu'zane musezane erinka enka kumika'agura kresramnavuo hu'ne. Hianagi nahigeno Kraisi'a ama ana zankura huama huno Anumzamofona avenosie hu'ne? <sup>9</sup> Anantera Agra anage hu'ne, **Kagri kavesiza avaririnaku Nagra e'noe** hu'ne. Agra ese hagerafi huvempa kea eri netreno, henka huvempa ke eri agafa hu'ne. (Sam-Zga 40:7-8) <sup>10</sup> Jisas Kraisi'a Anumzamofa avesite Agra'a avufga magoke zupa tamigeno mika kna, mika vahera tazeri ruotge hu'ne.

<sup>11</sup> Hagi knane knanena pristi vahe'mo'za otine'za mono eri'za zamige'za ana hukna hu'za kre sramana vuvava nehzazamo'a kumiti er-itregara osu'ne. <sup>12</sup> Hianagi tagri Ugagota Pristi nemo'a magoke zupa tagri knare zanku, Agra'a avufga Anumzamofa amigeno, kumitigura av-ufa agu'zarutegen, **Agra Anumzamofa azantamaga kaziga mani'ne.** (Sam-Zga 110:1)

<sup>13</sup> Agra anante avega anteno mani'negeno, **Ha'marenentaza vahera zamavre agafi antegeno, zamagra agama ante tra trohu'za mani'naze.** <sup>14</sup> Na'ankure magoke zupa avufga agu'za ru'nea zamo, zamazeri ruotge hu'naza nagamokizmia, miko zupa zamazeri knare'zantfa nehie.

<sup>15</sup> Ruotge Avamumo'a ama ana zankura tagritera huama huno esera anage hu'ne, <sup>16</sup> **Vahe'niarera kasefa hagerafi huvempa kea ana knarer hugahue huno Ramo'a hu'ne. Nagra kasegea zamagu'afi nentena**

**antahintahizamifi krentegahue** hu'ne. (Jer 31:33-34) <sup>17</sup> Ananter a nage hu'ne, **Kumi nehu'za kasegema rutagre zamavuzmava nehaza zankura, Nagra mago'ene nagesa ontahigosue** hu'ne. <sup>18</sup> Hagi ko'ma kumi'ma atrentenesigen'a, mago'ane kumikura kresramna ovugosie.

### *Hanavetino kazigazi huno vuzamofo naneke*

<sup>19</sup> E'ina hu'negu nafuheta hanavetita Jisasi koranteti azeri Ruotge hu'nefinka ufrenune. <sup>20</sup> Jisasima tagriku'ma fri'neazamo, kasefa huno asimu eri kama tavravemo runkaniregeno, Ruotgema hu'nefinka kana anagirante'ne. <sup>21</sup> Hagi tagri'ma Mareri Agatere Pristi Ne'mo, Anumzamofo vahetera kegava hu'negu, <sup>22</sup> erinketa tamage tagu'areti Anumzamofontera antahinemita urava'o hamneno. Na'ankure havi tagutagesamofona, Kraisi koranu tagino sesehu agru higeno tavufgamofona sese hurantene. <sup>23</sup> Fore hugahie huta tamentinti nehuta huama nehuna zana azeri hanavetisune. Na'ankure huvempama hurantenemo'a hugahuema hu'neazana amanehu nere. <sup>24</sup> Hagi mago magomotma hanavetita ovesinte avesinte huzanku'ene, knare eri'zama erizankura nentahisunkeno, vahepin a eama hanie. <sup>25</sup> Jisasi'ma esia knamo'a kofta nehigu, mago'amo'zama magopima atruma hu'zama netrazaza huta, magopima atruma hu'zana otresune. Tamagra antahinaze, Kraisi'ma esiakna hago kofta nehigu, ozeri hanaveti azeri hanaveti hanune.

### *Kraisima tamagena huomisnuna naneke*

<sup>26</sup> Hagi nafuheta ko'ma tamage kema antahinetama, kumi'ma huava hanunana, mago'anena ana kumi'ma eriatre kre sramana vu'zana omnegosie. <sup>27</sup> Hianagi Anumzamo'ma refkoma hurante zankura tusi kore nehuta, Anumzamofo ha'renentesia vahe'ma amuhonentake tevefima tasegesagu avega antegahaze. <sup>28</sup> Hagi iza'o Mosese kasegemofo agorga'a omanigeno, taremo'o 3'amo'o kete'za ana zanku'ma huama huntege'za, asunkura hunontazanki aheneffrize. (Diu-Kas 17:2-6) <sup>29</sup> Hagi, Anumzamofo Mofavrema amagena hunemino, hagerafi huvempa kema kumitima sese hu'nea korama ke'amne zankna nehuno, Anumzamofo asunku'zama va-hetegama avreno ne-ea Ruotage Avamumofo arimpa knaza erimisia vahe'mofona, tusi'a kefo'za huntegahianki antahihi. <sup>30</sup> Na'ankure tagra antahi'none, Anumzamo'a amanage hu'ne, **Nagra nona hu'na hara hugahue. Nagra nona huna mizana zamigahue.** Agra mago'ane hune, **Nagra nona hu'na mizana zamigahue.** Agra ete mago'ane hune, **Ramo Agra'a vahera refko huzmantegahie** hu'ne.

Antahi'none, <sup>31</sup> kasefa huno mani'nea Anumzamo magomofo azeri haviza hu'naku haniana, ana ne'mo'a koro hugahie.

### *Hankavetita fatgo huta manisuna naneke*

<sup>32</sup> Ese'ma Kraisima antahinka kenka hunana knare ete antahigeno vino. Kagesa antahio, tusi'a hazenke zana fore higeno, tusi katazana fore hu'neanagi kamentintia otre'nane. <sup>33</sup> Mago'a zupa vahe avufi kaz-eri ama hu'za kaheza katazana kami'naze. Anahulkna hu'za mago'a zupa zamahe'za zamatama zamiza vahera zamaza hu'nane. <sup>34</sup> Kagra kina nompima zamavarentaza vahe'enena magoka zamagranena katazana enerinka, miko zanka'ama erizagenka muse nehunka, zamatranke'za e'nerize. Na'ankure mevava knare fenozanka'a monafi me'negenka kagra antahi'nane. <sup>35</sup> Hu'negu e'i ana hanave kamentintima Ramofontema hunte'nana zana otro. Na'ankure ana hanave kamentintiretira tusi'a

miza erigahane. <sup>36</sup> Akohenka mani'nenka knazana erinka vanunka, Anumzamofo avesi nevaririnka, Anumzamo'ma huhampri kante'nea zana erigahane. <sup>37</sup> Na'ankure kofta knafi ***Egahiema hu'nemo'a avegaonte, ko egahie.*** <sup>38</sup> ***Hu'negu fatgo vahe'mo'za zamentintifi maniga-haze. Hianagi izo'amagenama hunamino natre'noma vanimo-fona musena huontegosue*** hu'ne.

<sup>39</sup> Hianagi Anumzamofonteti atre'zama nevu'za fanane hanaza vahekna tagra osanunanki, tagra hugahunema hu'naza nehuna nagakita, taguvaziza erisuna mani'none.

## 11

### *Korapama zamentinti hu'naza vahe'mokizmi naneke*

<sup>1</sup> Hagi amentintima hu'zana, onke'nona zamofo tamage huno fore hugahie huta amuhama nehuna zane. <sup>2</sup> Korapa vahe'mo'za zamentinti hu'nazagu, Anumzamo'a fatgo vahere huno huzmantene. <sup>3</sup> Tamentinti ne-hunku, Anumzamo'a ke'areti ama mopane, monanena trohune huta antahi amara nehune. Ana hu'negu menima tavuma negona zana, Anumzamo'a nonkona zanteti tro hu'ne. (Jen-Agf 4:3-10.)

<sup>4</sup> Ebeli'a amentinti Anumzamofonte nehuno kre sramana vunte'neazamo, Keni'ma kre sramana vunte'neazana agaterene. Ebeli'a amentinti higeno Anumzamo'a fatgo nere huno huso'e huntene. Ebeli'a ko fri'neanagi amentinti hu'neazamo tagrira meninena hunerasamie. (Jen-Agf 5:21-24.)

<sup>5</sup> Enoku'a amentinti higu Anumzamo'a avregeno ofrineno, monafinka marerige'za onke'naze. Na'ankure ofrino mani'nerera Anumzamofo avurera fatgo huno mani'negeno, Anumzamo muse hunteno avare'ne. <sup>6</sup> Amentintima omame'nesigeno'a, Anumzamofo avesizama avaririzamo'a amuho huntiegahie. Na'ankure izo' Anumzamofontema esimo'a, agra amentintima haniana, Anumzana mani'neankino, Agriku'ma hakaza va-hera mizana nezamie huno antahino. (Jen-Agf 6:13-22.)

<sup>7</sup> Anumzamo'a Noana asamigeno amentinti ana kegura nehuno, am-ägeanteno tima hagesifima naga'a zamagu vazisigura ventea tro hu'ne. Fore'ma osu'nea knaza fore hugahie huno Anumzamo'a asamine. Noama amentinti hu'neazamo, ama mopafi vahe'mofo kefo avu'avazazmia eriama nehigeno, Anumzamo'a fatgo nere huno huntene. (Jen-Agf 12:1-8.)

<sup>8</sup> Abrahamu'ma henkama erisinti haresia kumate vinogu Anumzamo'ma huntogeno'a, inankna kumate vinogu huntene ontahi'neanagi, amentinti nehuno ke amageanteno vu'ne. <sup>9</sup> Hagi Abrahamu'a Anumzamo'ma hunte'nea moparera amentinti nehuno zoka vahekna huno, seli no ome kino umanine. Ana higeno Asaki'ene Jekopukea anahukna huke Anumzamo'a huvempama hunte'nea zana erisintiharegaha'e hunte'nea netrene magoka ana seli nompina umani'naze. <sup>10</sup> Hakare zupa Abrahamu'a amentinti nehuno, henkama hanave ranku'ma Anumzamo retro hunteteno, Agra'a ki'nea ranku'ma erisigu aveganteno manine. <sup>11</sup> Sera'enena tava-vategeno avufgamo'a haviza hu'neanagi, amentinti nehuno Anumzamo'ma huvempa hu'nea kemo'a nena'a fore hugahie higu, mofavre kasentene. (Jen-Agf 17:19, 18:11-14, 21:2) <sup>12</sup> Hagi magoke ne' Abrahamu'a ozafare-nea nepinti, maka fore hu'naza vahe'mo'za, monafi hanafi kna Nehu'za, hagerinkenafi kahepankna hu'za ohampriga'a vahe mani'naze.

<sup>13</sup> Ama ana miko vahe'ma fri'nazana, huvempama huzmante'neazana e'orine'za fri'nazanagi, zamagra zmentinti neh'u'za, afete'ma ne-eazama

kenaza zankura muse nehu'za, ruregati zoka vahekna hu'za emani'naze. <sup>14</sup> E'ina hukna kema nehaza vahe'mo'za, zamagrama umani so'ema hanaza kumaku nehakaze. <sup>15</sup> Zamagrama e'naza kumategama vunakuma antahinhaima hazasina, ete e'naza kumategama vazasine. <sup>16</sup> Hianagi knarema hu'nea kumaku nehakazana mona kumare. E'ina hu'negu Anumzamo'a tamagri Anumza mani'noe huzankura, Agra agazea osugahie. Na'ankure Agra mago ranku'ma retro huzmantene.

<sup>17</sup> Anumzamo'a Abrahamuna amentinti reheno kenaku, Aisakina ahenka kre sramana vunanto hu'ne. Huvempa kema hunteneremo Abrahamu'a amentinti nehuno, magoke mofavrea Aisakina ahe fri'za hu'ne. <sup>18</sup> Anumzamo'a Abrahamunku hu'neana, **Aisakipinti fore hanaza vaheku, Abrahamu ageheze huno hugahaze huntene.** (Jen-Agf 1:12) <sup>19</sup> Abrahamuma agesama antahi'neana, Aisakima ahe frisugeno'a Anumzamo asimura ete amigahie huno agesa antahine. Hagi ana hu'negu nemofoma avreneazamo frizampinti avrenea avame'za huraveri hu'ne. (Jen-Agf 22:1-18.)

<sup>20</sup> Aisaki'a amentinti hu'negu, Jekopu'ene Isokea henka'a erisa'a asomu kea huvempa huznantene. (Jen-Agf 27:27-29, 39-40) <sup>21</sup> Jekopu'a amentinti hu'negu, fri'zama nehuno'a Josefena tare mofavreararena asomura hu'nezanenteno kepri huno azompare otineno, monora Anumzamofona huntene. (Jen-Agf 48) <sup>22</sup> Josefe'a amentinti hu'negu, frinaku'ma nehuno'a, hanavetino Israeli vahekura, Isipima atreta vanutma zaferiniani'a ramina erineta viho huno huzmantene. (Jen-Agf 50:24-25.)

<sup>23</sup> Hagi Mosese nererake nefakea zanamentinti hu'naku, Mosesema kasentegeno'a 3'a ikamofo agu'afina azeri frakintakeno znagranena mani'ne. Na'ankure zanagra ka'ana ana mofavremo'a hentofa mofavre maningegeke, kini nemofo kasegema rutagre zankura korera osu'na'e. (Eks-Ati 1:22, 2:1-15) <sup>24</sup> Mosese'a amentinti hu'negu, zomarenlo rama nehuno'a Fero mofamofo mofavre hu'za agrikuma huzankura avesra hu'ne. <sup>25</sup> Anumzamofo vahe'ma zamazeri havizama hazaza hu'za azeri haviza huzankura agesa nentahino, atupa knafi kumimofo kefo avu'avazampi muse huzankura avesra hu'ne. <sup>26</sup> Agra Isipi kumamofo feno erizankura nontahino, Kraisintekuma natama erisuuna knare hugahie huno agesa antahine. Na'ankure Anumzamo'ma henkama ra mizama amizanku anara hu'ne. <sup>27</sup> Mosese'a amentinti hu'negu kini ne'mo'ma arimpa ahentezankura koro osu Isipi mopa atreno vu'ne. Na'ankure agra onkenemofonte avuraga kenteno kazigazi huno vu'ne. <sup>28</sup> Mosese'a amentinti hu'negu, Israeli vahera zamasimge'za sipisipi ahe'za korana nonkafa zimirera frenazageno, Anumzamofo ankeromo'a ozamahe zmagaterene. (Eks-Ati 12:21-30.)

<sup>29</sup> Hagi Israeli vahe'mo'za Anumzamofonte zmentinti hu'nazagu, hagege mopalrema hiaza hu'za hagerina takah'e'naze. Hianagi Isipi vahe'mo'za anama hazaza hu'za takahenaku hu'nazanagi, ti nakri'naze. (Eks-Ati 14:21-31.)

<sup>30</sup> Israeli vahe'mo'za Anumzamofonte zamentinti hu'nazagu, 7ni'a knafina Jeriko kumara kagizageno, vihu keginamo'a fragu vaziramine. (Jos 6:12-21.) <sup>31</sup> Rehapu monkro a'mo'agi Anumzamofonte amentinti nehuno, tare afure vahetrena znaza huno zanazeri frakindeg, kuma ane vahe'amo'za keontahiza vahe'ma zamahe frifina agrira ahe ofri'ne. (Jos 2:1-21, 6:22-25.)

<sup>32</sup> Hagi na'anee hu'na mago'anena hugahue? Gidionima, Barakima, Samsonima, Jeptama, Devitima, Samueliki, kasanampa vahe'mokizmi zama-

genkema tamasamisua knani'a nagrira omne'nene. <sup>33</sup> E'i ana zamentintima haza vahe'mo'za ru kumate vahe'ma ha'ma huzmantazana zmagatenere'za, fatgo zamavuzmava hazagu huvempama hu'nea zana enerizageno, laion-imifo zmagira ruhamunki'naze. <sup>34</sup> Zamagra tusi'a tevema nereantevea resu nehzageno, kazintetira zamahe friga osu'naze. Zamagrira hanavezmi omaneneanagi hanave vahe nese'za, hapina hanavetiza ha' vahe zamia zamarotago hu'naze. <sup>35</sup> A'nemo'za zamavesi nentaza vahe'ma fri'nea vhahera azeri otige'za nezmvrazageno, mago'amokizmia kanona zamizanagi, Anumzamofona otre kazingazi hu'za amage'anteza nevu'za, zamagra fripinti ot'i'za knare zmasimuma erisaza zanku antahintahi hu'naze. <sup>36</sup> Mago'amokizmia kiza zokago ke hu'nezamante'za sefu kanonkeve zamiza zamavufaga zamahe tragatrogo nehu'za, mago'amokizmi'a seni nofiteti kina rezmante'za zamavare'za kina hu'nezmantaze. <sup>37</sup> Mago'amokizmia have knonu zamahe nefrizageno, mago'a mokizmia sonteti refragi tare nehzageno, mago'amokizmi kaziknonu zamahe fri'naze. Hanki mago'amo'za sipisipine meme akrute kukena nehu'za, zamagara netegeno, zamazeri haviza hu'naze. <sup>38</sup> Ama mopafi vahe'mo'za knarera huozamantege'za, ka'ma kokampine, agonafine, havegampima, kerigampina masetere hu'za vano hu'naze.

<sup>39</sup> E'i ana maka vahe'mo'za zmentinti hazagu, Anumzamo'a hugnare huzmantene. Hu'neanagi Anumzamo'ma huvempa huzamante'nea zana e'orine'za fri'naze. <sup>40</sup> Ama anazantamina Anumzamo'a knarezantami retro hurantegeno me'neankino, zamagrama koma erizankura Anumzamo'a avenosiansiki, tagranema magoka omerisunegu retro hurantene.

## 12

### *Jisasinte negeta tamentinti hanuna naneke*

<sup>1</sup> Hagi e'i ana hu'negu korapama Anumzamofontema zamentintima hu'naza vahe'mo'za, hamponknka hu'za regagirantenazagu, tazeri knama nehia zane, kumimo'enema rugagino tazeneria zana netreta, Anumzamo'ma tagima hu'nea agamareno tragi zokagopina tagareta kazingazi huta vanune. <sup>2</sup> Tagra tavuraga Jisasinte kentesune, tamentintima azeri knarema huzamofo agafa'a mani'ne. Na'ankure Agranena musezamo avega'ntenegeno, agazegura osuno kazingazi huno knazana erino keka zafarera vuteno, menina Anumzamofo azantamaga kaziga mareri agaterenea tratera mani'ne.

<sup>3</sup> Hagi kumi vahe'mo'zama e'inahukna knazama Jisasima amizageno kazingazi huno erino vu'neazanku, nentahita tamagu'a kragogo onkita tamentintia otreho. <sup>4</sup> Kumi'ma agaterenaku'ma hama hutama e'nafina, korana oraginaze. <sup>5</sup> Hagi tamagra tamagekaninazo, Anumzamo'ma tamazeri hanaveti nanekema mofavre naga'agna huno tavumaroma anteneana anage hu'ne, *Mofavrenimoka Anumzamo'ma tamavumaroma antisia zankura amnezane huta antahi oza osiho, tamazeri fatgoma hunaku'ma hanave kema nehanigeno'a tamagu'amo'a kragogo onkino.* <sup>6</sup> *Na'ankure Anumzamo'a avesinte'nemofona, azeri fatgo nehie. Na'ankure Nagri mofavre huno himofona, kano amino azeri fatgo nehie* hu'ne. (Prov-Knr 3:11, 12) <sup>7</sup> Anumzamo'a Agri mofavregna hu'nageno knazana neramie hutma nentahita kazingazi huta knazana erita viho. Na'ankure ina mofavremofo nef'a avumrora nonte huta hugahune. <sup>8</sup> Anumzamo'a ana miko mofavre zaga'a zamazeri fatgo nehie. Hagi

kagrima kazeri fatgoma osanigenka, kagra nerera'ene nefä omani mo-favregna hugahane. <sup>9</sup> Hagi ama mopafi nerafaza tazeri fatgoma hazagenta antahinezamune. Hagi tagrama avamupi, Nerafa agorga anteramita manisunana manivava osugahuno? <sup>10</sup> Na'ankure ama mopafi nerafaza antahi'naza avamente onasia kafufima manisunku tazeri fatgo nehaze. Hianagi Anumzamoma tazeri fatgoma nehia zamo'a knare'zantfa hu'negu, Agri ruotage zampina manigahune. <sup>11</sup> Avumroma antezana musezana omane'nearki atafi ufregahie. Hianagi e'inahukna kantema marinesuno'a, henka mizana arimpa fru erino manigahie.

<sup>12</sup> E'ina hu'negu hanave'a omanea kazane kahirahima nerea krena erinte fatgo huo. <sup>13</sup> Hagi kagamoma vania kana erintefatgo nehugen, hanavezmi nomanegeno zamagamo haviza hu'nesia vahe'mo'za, oti hanavenetiza trakara osu'za kavaririza viho.

<sup>14</sup> Miko vahe'enena hanavetinka karimpa fru hunka nemaninka, mani ruotage nehunka, agru hunka manio. Na'ankure mani ruotage osunesimo'a Ramofona onkegahie. <sup>15</sup> Anumzamofo asunkuzampintima evuramizankura ogava agava hih. Atrenkeno tamarimpa hezamo'a, tamagu'afina akara heno hazenkezana avreno omena, anazantetira miko vahe'mo'za havizana osiho. <sup>16</sup> Atrenkeno kefo avu'avazamo'a tamazeri traka nosina, koma Isoma Anumzamofo amagena hunenteno, ese mo-favremo eri asomuma atreneakna osiho. <sup>17</sup> Henkama ana asomuma erinakura agu'areti zavineten, agu'a rukrahe huno asunkura hu'neanagi agra e'orine. (Jen-Agf 27:30-40.)

<sup>18</sup> Tamagra ama mopafi Sainai agonare teve anefa nehigeno, haninenkigeno, hanave zahoko netigeno, Israeli vahe'mo'za hu'nazankna agonare ome'naze. <sup>19</sup> Ufeneregeno, mago vahe'mo kezatino nehige'za, Israeli vahe'mo'za zamagogogu nehu'za, Mosesena asamiza hugeno taganeno hu'naze. <sup>20</sup> Na'ankure Anumzamo'ma zamasimia nanekegura koro hu'naze.

**Zagakafamo'enema ana agonarema erava'o hanigenka havenu ahefriho** hune. (Eks-Ati 19:13) <sup>21</sup> Ana zama fore'ma hige'za ke'naza zankura tusi koro nehzageno, Mosese enena tusiza huno koro nehuno, **Nagranena nahirahi neregena koro nehue** huno hu'ne. (Eks-Ati 19:12-22, 20:18-21) <sup>22</sup> Hu'neanagi kagra ko Saioni agonare, kasefa huno mani'nea Anumzamofo kumapi monafinka Jerusalemi kumate, hampriga osu'nea ankero kevumo'za muse hu'za mani'nafi ehanatinane. <sup>23</sup> Hagi kagra Anumzamofo zage mofavremokizmi zamagi'a monafinka krentenege'za atru hu'nafi e'nane. Kagra Anumzamofonte mika vahe refko nehia Nete e'nane. Miza sezamantege'za fatgo huza agru huza mani'naza vahe'mofo avamuzmimo mani'nea kumate kagra e'nane. <sup>24</sup> Jisasi'ma amuno ne'mo'ma kasefa hagerafi huvempa kema huno kora tagitre'nea koramo'a, Ebeli korana agaterenea Nete e'enane.

### *Kva hanuna naneke*

<sup>25</sup> Hagi kema neramasamia Anumzamofo kema rutregezankura kava hih. Na'ankure Israeli vahe'mo'za Sainai agonareti kema zamasamige'za rutagre'hazana Agrira agate'orenazanki, tagra in'a kna huta monafinti kema rutragesunana Agrira agateregahune? <sup>26</sup> Agrama Sainai agonare'ma kema nehigeno'a, agerumo'a ama mopa azeri tore hu'ne. Hianagi Agra huvempa huno, **Nagra mago'anena mopagera eritore osugahuanki, monane eritore hugahue** hu'ne. (Hag 2:6) <sup>27</sup> E'inahu kema hu'neana,

Anumzamo'ma ana miko tro'ma hunte'nea zantamimo'a tagosi hanigeno, tagosi'ma osania zantamimo'a mevava hugahie.

<sup>28</sup> E'ina hu'negu tagrama e'neruna kumara eri tagosi osu hanavenen-take kuma e'nerune. Hu'negu Anumzamofona muse hunenteta, tagu'a anteramita Agri'ma avesinigeno muse hania mono huntesune. <sup>29</sup> Na'ankure tagri Anumzamo'a srasra huno teno erivagare tevegna hu'ne.

## 13

### *Mono naga'mo'za ovesinte avesinte hanaza zamofo naneke*

<sup>1</sup> Hagi mono nagamota ovesinte avesitema hu avu'ava'zantamimo'a meno vino. <sup>2</sup> Ketma antahitama osu'nesaza vahe'ma ne-esagetama nontamifi zamavarente zankura tamagera okanino. Na'ankure mago'amo'za korapara ontahine'za nozamifina zmavrente'nazana, ankero vahe anara huza-mante'naze. (Jen-Agf 18:1-19:1) <sup>3</sup> Hagi kina nompima mani'nesamokizmia kagerakani ozmantenka, kagranema kina nompima mani'enoma hiaza hunka, kagesa antahizamio. Vahe'mo'za zamazeri haviza hanage'za zamatazampima mani'nesaza vahe'mokizmia, tamagera akani ozmanteta, tagranema tata zampima mani'enoma hiaza huta knazmia eriho. <sup>4</sup> Aravema huno a'ane ve'anema manifatgoma huno mani'zana, raza amunontamifina meno. Hagi aravema osu' vahe'mo'ma monkozama hanimofone, koma aravema hu'nesimoma atreno, ru vene a'ene monko avu'ava'zama hanimofona, Anumzamo keaga huzmantegahie. <sup>5</sup> Hagi zagogu'ma avesi avesi huntezankura kava huo, anama erinesanama'agura museho. Na'ankure Anumzamo'a anage hu'ne, **Nagra kagrira onka-tre'na, Nagra namagena huogamigahue** hu'ne. (Diu-Kas 31:6-8, Jos 1:5) <sup>6</sup> Hu'negu tagra antahinemita, hanavetita anage hugahune, **Ramo'a nazahige'na mani'nogu nagra korera osugahue. Na'a vahetfamo'a hunantegahie?** hugahune. (Sam-Zga 118:6)

<sup>7</sup> Hagi vugotama huramante'naza vahe'mo'zama Anumzamofo nanekema tamasmi'naza kegu tamagesa antahiho. Nomani zazmia refako huta negeta tamentintifina, zamagrikna huta maniho. <sup>8</sup> Jisas Kraisi'a okima mani'neakna huno menina mani'neno, anahukna huno hakare'a knafina manivava hugahie. <sup>9</sup> Hu'negu atrenkeno ruzahu ruzahu kasefa antahintahizamo'a tamavazu huno afetera ovino. Tamaguamofona atrenkeno Anumzamofo asunkuzamo tamazeri hakavetino, mago'amo'za zamavu'zmava'zama avaririza ne'zama retro'ma hu'za nezamo'a, tamazeri hanavea notie. <sup>10</sup> Kresramanavu itatia, tagrira me'neankino, seli mono nompima eri'zama eneri'za pristi vahe'mo'za onetfa hugahaze. <sup>11</sup> Jiu vahe'mokizmi zamavu'zmavapina vugota pristi vahe'mo'za kumimofo nona hu'za zagagafamokizmi korana eri'za ruotage'ma hu'nefinka unefraze. Hianagi zagagafamofo zamavufaga eri'za kuma'mofona fegi'a negraze. (Lev-Pri 16:27) <sup>12</sup> Ana hu'negu Jisasi'a vahe'amokizmi kumizmi zamazeri agruma huno zamazeri ruotge hanigura, rankumamofo kasampinti atiramino fegia avufga aguzaruno korana tagine. <sup>13</sup> Hu'negu kuma'mofa fegu'a Agrite nevuta, Agrama hu'neaza huta tagazezana erigahune. <sup>14</sup> Na'ankure ama mani'nonana rankumatia zoka kumate mani'none, hu'negu tagra henkama ne-ea rankumaku avega anteta mani'none. <sup>15</sup> Ana hu'negu Jisasi Agifi, tagrati tavufga Anumzamofona ami vaganereta, ra agia ami vava nehuta, Agri'Agima tagipinti huama hunazamo raga'a fore nehie. <sup>16</sup> Hagi knare tamavu'tamavama nehuta, atupama hanaza

vahe'ma zamaza huzankura tamagera okaniho. Na'ankure e'inahukna avu'avapima tagra'ama amivagareta amizankura, Anumzamo'a muse nehie.

<sup>17</sup> Hagi vugotama hurmantenesimofona agorga nemanita, ke'zamia amage anteho. Na'ankure zamagra tamagri tamagu'are kegava nehu'za, henkama Anumzamofo refako huzampina tamagri tamagenkema hu'ama hanaza vahe mani'naze. Hagi ana eri'zama erisazana zamatrenke'za musezampinti e'neri'za zamata e'oriho, na'ankure ana zamo'a tamaza osugahie.

<sup>18</sup> Nunamuna huranteho, tagra antahunana antahintahitimo'a ama' hu'negeta mikazama hanumpina fatgoza hanunegu tavenesie. <sup>19</sup> Nagra hanavetina tamantahigoanki, nunamu nehinkena tamagritega koftahu'na aneno.

### *Hu vagare naneke*

<sup>20</sup> Hagi arimpa fru Anumzamo, ugagota sipisipi afu kva ne' Ranti Jisasina fri'nefinti azeri oti'nemofo korama'areti, mevava hagerafi huvempa ke hu'ne. <sup>21</sup> Agri avesizama'a avaririzantema upama hanarera, maka knare zama'areti tamazeri knare hugahie. Hakare'zana Jisas Kraisimpi nehanunkeno Anumzamo'a muse hanie. Hakarea ra agia Agrake erivava hanie. Tamage.

<sup>22</sup> Hagi nafuheta hanavetina ama atupa avoma kreramuana tamagesa antahi'so'e hiho. <sup>23</sup> Nagra tamasamuana, ko nerifu Timotina kinafinitira kazufetre'naze. Agrama esige'na, avare'na tamagritega vugahu'e. <sup>24</sup> Kava vhahetamine, maka mono naga'motarega musenke atreramantoe. Italima mani'naza mono naga'mo'zanena musenkea hurmantaze. <sup>25</sup> Anumzamofo asunku zamo'a maka nagamotare mesie.

## Jemis

### Jemisi Kre'nea Avontafemofo Naneke

#### *Jemisi kre'nea naneke*

<sup>1</sup> Hagi Jemisi'na Anumzamofone Ranti Jisas Kraisi kazokzo eri'za ne'mo'na, 12fu'a naga'nofi'ma mopa atretma kokankokama umani emani hu'naza nagamotarega, ama avona kreneramue.

#### *Amentintifima oti hanaveti'neno knaza erizamofo naneke*

<sup>2</sup> Nenafugta knazampima ufresutma, muse zane hutma tamagesa antahiho. <sup>3</sup> Na'ankure tamagra antahi'naze, tamentintima reramaheno ke'zamo'a, knazampima oti hankavetineno, knazama kazingazi huno erino vu'za erifore nehie. <sup>4</sup> Hagi maka kna tamagra oti hanavetita, knazana erita nevinkeno, ana tamavutmavazamo'a hanavetino nevina, Anumzamofo avu'ava'ma huzampina, atupara osnageno, fatgo huno knare hugahie.

<sup>5</sup> Hianagi iza'o knare antahintahigu'ma atupama hanuno'a, Anumzamofo antahigenkeno amino, maka vahe'mo'za nunamu hu'za Agri'ma antahigazamokizmia, rimpia heozmantne amne nezmiankino, amne tamigahie. <sup>6</sup> Hu'neanagi antahigesimo'a, amentinti nehuno tare agu'agesaretira antahionkeno, na'ankure tare agu'agesaret'i'ma antahigemofona, zaho erino hage rimomofo eri kranto kranto hiankna nehie. <sup>7</sup> E'inahu vahe'mo'a Ramofontegati mago'zana erigahue huno agesa ontahino, <sup>8</sup> agra tare antahintahine vahe mani'neankino, mika zama hifina magoke kante anteno nosie.

<sup>9</sup> Hagi mago'mo amunte omne'nenigeno, Anumzamofo amage nentenimo'a muse hino, Anumzamofo avurera ra agi erine. <sup>10</sup> Hu'neanagi Anumzamo feno ne'ma azeri anteramisigeno mani'nesimo'a musehino. Na'ankure feno vahe'mo'za trazamofo amosre'amo hianka hu'za ko fanane hugahaze. <sup>11</sup> Na'ankure zagemo'a amuho'ane marerino, ana trazana te hagage higeno, amosre'amo'a hagage huno evuramigeno, konariri'amo'a fanane nehie. Anahukna hu'za feno vahe'mo'za, ana fenozmine fanane hugahaze.

<sup>12</sup> Hagi Rehe'za ne-esigeno kazingazi huno agatereno vania vahe'mo'a asomu'ma erisiana, kini fetori eriankna huno manivava asimura erigahie. Anumzamo'a agri'ma avesinentaza vahe ko huhampri zamante'nea, asimu erigahie. <sup>13</sup> Mago zamo'ma avazu hanigeno rechezampima ufresuno'a, kefo avu'avazanteti Anumzamo'a renahenoke huno huonteno, na'ankure Agra mago vhahera havi avu'avatetira reheno onkegahie. <sup>14</sup> Hu'neanagi mago magomofona agri'a kefo avesi'zamo, avazu huno rechezampina avarenente. <sup>15</sup> Hagi havi avu'avazahu avesi'zamo, a'�emo amu'ene hiankna higeno, kumi erifore higeno, kumi'mo hagerama nehuno'a, fri'za eri fore nehie.

<sup>16</sup> Navesineramanta nafuhetma tamagra'a reramatga osiho. <sup>17</sup> Mika knare huno fatgo hu'nea, musezana anagamuti eneramie, monafinkati masazamofo Nefantegati ne-ea, avu'avazama'amo zahe osuno turunamo hiankna huno zaza huteno, atupa huteno osugahie. <sup>18</sup> Mika'zama tro'ma hu'nea zamofo ese raga'a manisunku, Agra'a avesite tamage kereti tazeri fore hu'ne.

#### *Ke antahino avariri zamofo naneke*

<sup>19</sup> Hagi knare nafuheta, ama kea antahi so'e hiho, mika'motma ame hutma kea antahigahazanagi, akoheta kea nehinkeno tamarimpa oheno. <sup>20</sup> Na'ankure vahe'mofo rimpia he'zamo'a, Anumzamofo fatgo avu'ava zana avreno omegahie. <sup>21</sup> È'ina hu'negu mika agru osu avu'ava zana erinetreta, tamagu'afima kefo avu'avazama me'nesiana erinetretma, anteramitma, tamagu tamema tamaguma vazisia nanekema Anumzamo'ma tamagu'afima hankre'neana eriho.

<sup>22</sup> Amnea Anumzamofo Ke'agera ontahio, kagraka'a regavatga hugahananki, ana nanekemoma hania kante antenka amage anto. <sup>23</sup> Mago'mo'ma kema nentahino, ana kema amage'ontesiana, agra kapopi avugosa keteno, <sup>24</sup> atreno nevuno anama agra avugosa ke'neana, ame huno agenekania kna nehie. <sup>25</sup> Hu'neanagi, inamo'ma kinafinti tazeri fru nehia, hentofa kasegefima avuma ke ankenereno, kazigazi huno avaririno antahi'nesia naneke age'okanino amage'antesimofona, mika'zama hanifina Anumzamo'a, asomu huntegahie.

<sup>26</sup> Mago'moka mono vahe'mani'noe nehunka kagefu'na kegava osnanana, kagra'a regavatga hanankeno mono kamo'a amnezankna hugahie. <sup>27</sup> Agru huno fatgo monoku'ma Anumza Nafatimofona ave'nesiana, e'i megusa mo-favre'zagane, kento a'ne zaga knazampima mani'nesazana kegava hunezmanteta, atrenkeno ama mopafi kefozamo'a tamazeri pehena osino.

## 2

### *Magoke avamente vahe'ma tavesi zmantesunazamofo naneke*

<sup>1</sup> Hagi nafuhete, hanavenentake masa'ane Rantimofo Jisasi Kraisimpi tamentinti nehaza vahe'motma, rezogitma mago vahekuke tamavesi onteho. <sup>2</sup> Atru hu'nesafima mago feno ne'mo hentofa kukena erinehankreno, korire asa eri'nentanino efresnigeno, mago amunte omane ne'mo pehenage kukena huno mono'ma nehanafima efresiana, <sup>3</sup> hentofa kukena huno ea feno ne'mofo kesga huntenka anage nehane, ama knare trate emanio nehunka, amunte omane pehenage kukena huno ea ne'ku, amure otio huge ame nagafi mopare emanio nehane. <sup>4</sup> Tamagra'a amu'nontamifina vahe zamazeri havizahu naneke nehutma, kefo antahizanteti vahera refako nehazafi? <sup>5</sup> Antaihi, knare nafuheta, Anumzamo'a ama mopafi vahe zamavu'i zamunte omane vaheku' zamentintifi feno vahere huno huhampri zamenteno, Anumzamofo kuma erisanti haregahaze huno Agri'ma avesinentaza vahe huvempa huozmante'nefi? <sup>6</sup> Hu'neanagi zamunte omane nagara zamazeri haviza nehaze. Feno vahe'mo'za knaza neramami'za, tmavare'za naneke hu tratera nevazafi? <sup>7</sup> Jisas Kraisi knare agi'ane Ne'mofo nagama mani'nazana, zamagra zamazeri haviza osu'nazafi? Izo zamagra zamazeri haviza hu'naze.

<sup>8</sup> Fatgo hutma avontafepima me'nea kasegema amage'antesnutma, **Tavaontamire'ma nemanisaza vahe'mokizmia tamagraguma tamavesi nentesazaza hutma rumokizmia tamavesi zamanteho**, anama hanutma tamage avu'avaza hugahaze. <sup>9</sup> Hu'neanagi rezogitma mago vahekuke tamavesi antesazana, kumi hanageno kasegemo'a tamazeri ama'hina, kasegea hantagi vahe manigahaze. <sup>10</sup> Na'ankure, aza'o ana mika kasegema amage'nenteno, anampinti Anumzamofoma magoke kasege'a ruhantagisiana, ana mika kasege ruhantagigahie. <sup>11</sup> Na'ankure **Rumofo vene, a'ene monk'o'zana osiho** huno hu'nea Anumzamo **Vahera ahe ofriho** huno hu'ne. E'ina hu'negu kagrama rumofo vene, a'ene monk'o'zana

osugahananagi, vahe'ma ahe frisazana e'i kasege hantagi vahe manigahane hu'ne. <sup>12</sup> Hagi keagatamifine, tamavu'tamava hanafina, kinafinti tamavre atre'nea kasegemio refako hurantegahie hutma antahiho. <sup>13</sup> Na'ankure vaheku'ma kasunku huozmante vahe'moka, Anumzamo'a asunkura huogantegosie. Hianagi kagrama vahe'mofoma kasumantagintesanana, Anumzamo'a kagri'enena asuragigante'na vahe'ma refko huknarera, keaga hugante kemofona agateregahane.

*Amentinti nehuno, knare avu'ava osaniana, ana amentintimo amnezankna hu'zamofo nanake*

<sup>14</sup> Hagi nafuhetma, mago ne'mo'ma namentinti nehue nehuno, ana amentintima avu'avapima erinteno osaniana nankna azahu'za erigahie? E'inahu amentintimo'a aguvazigahifi? I'o. <sup>15</sup> Magoke magoke knazupa mago negafu'o, negasaro'ma kukanaguro, ne'zankuma atupa hu'nениgenka, <sup>16</sup> knareki vuo nagesa antahuana Anumzamo'a knare hugantegahie ne-hunka, knare kukena nehunka ne'zana negamu huo hunka hunentenka, atupama hunesiazama azama osnanana, e'i kemo'a inankna huno aza hugahie? <sup>17</sup> Amentinti hu'zamo'enena e'inahu kna hu'ne, tamentinti nehune nehuta, avu'avapima erinteta osanunana, tamentintimo'a amne'zankna hugahie. <sup>18</sup> Ana hu'heanagi mago'mo'a anage hugahie, mago'amokizmi zamentinti me'geno, mago'amokizmia knare eri'zama eri zamavu'zamava me'ne. Nagra anage nehue, knare erizanka'a omnesigena, nagra kamentintia onkegosue. Hianagi nagra knare eri'za niareti kagrira, na-mentintini'a kaveri hugahue. <sup>19</sup> Tamagra magoke Anumza mani'ne hutma tamentinti nehazana, e'i tamage, havi hankro'mo'zanena\* anahukna za-mentinti nehu'za, kore nehu'za zamahirahi nerege'za mani'naze. <sup>20</sup> Kagra negi nagi vahere! Antahi ama'ma huzankura nontahino, eri'zama'a omane kamentintimo'a amnezankna hugahie. <sup>21</sup> Neragheho Abrahamu nemofo Aisakima kresramanavu itare, Anumzamofoma ami'nea zanku'ma, fatgo nere huno hu'neana ontahi'nazafi? (Jen-Agf 22:1-14) <sup>22</sup> Antahi ama huo, Abrahamu'ma amentintima hiazamofona avu'avapi erinteno, ana avu'ava higeno amentintima hu'neazana erignare hu'ne. <sup>23</sup> Hagi avontafepima hu'nea kemo'a before hu'ne, **Abrahamu'a Anumzamofonte amentinti higeno, Anumzamo'a fatgo nere hunte'ne,** ana hu'negu Anumzamofo rone'a mani'ne hu'za vahe'mo'za nehaze. (Jen-agf 15:6.) <sup>24</sup> Ana hu'negu antahiho, tagra Anumzamofo avure'ma fatgo vahe'ma manisunana, tamentinti'retikerompage, tamentintima nehuta tavutavapima erinteta hanunkeno, fatgo vahere huno hurantegahie. <sup>25</sup> Anahukna huno, Rehapa monko a'mo'a afure vahe'ma noma'afi zamavare frakiteno, ru kampinti zamavare atrege'za vu'naza avu'avazama'amo, Anumzamofo avure fatgo ara mani'ne hu'ne. (Jos 2:1-21) <sup>26</sup> Tavufafima tasimu'ma omanesiana frigahune. Hanki anahu'kna huno tamentintige nehuta, tavutavapima eriontesunkeno'a, tamentintimo'a frino amne'zankna hugahie.

### 3

*Tagefu'namofo kegava hanuna naneke*

<sup>1</sup> Hagi nenafugtane nasarahetanena rempi huzami vahera rama'amota manisune hutma ontahiho, na'ankure tamagra ko antahi'naze, maka

\* <sup>2:19</sup> Hankrorema hu'neana, havi avamuku hu'ne.

rempima hunezamumota Anumzamo'a hanavetino keaga hurantegahie. <sup>2</sup> Na'ankure rama'a zampi havizana nehune. Hagi iza'o agrama kema hanifima fatgo osu kegaga huzanku'ma kva'ma hanimo'a, agra soe ne'kino amne mika avufgamofona kvahu so'e nehie. <sup>3</sup> Hanki osi ainia hosirimimofo zamagipi tamage'antesie hutanofi renteta, zamazeri rukre hanunkeno'a, amne hosimofo mika avufgamo'a tamage'anteno rukre hugahie. <sup>4</sup> Hagi vente'mofono keho, tusi'aza me'neanagi ra zahomo retunefo. Hianagi osi zotareti, inantego ventema azeri ne'moma vunakuma hirega, azeri rukre higeno nevie.

<sup>5</sup> Hagi anahukna huno agefuno osi avufgamo'agi, tusi'a veganokno ageru rugahie. Osi teve regregeno, ra avo'no traza afe teaza hugahie! <sup>6</sup> Hagi tagefunamo'a tevegna hu'ne. Tagefunafina kefo kemo avite'neankino, amne ana miko kavufamofona eri haviza hugahie. Amne ana miko kavufga teve kampina avrenente. Ana tevea teve kuma'mo taginte'ne. <sup>7</sup> Na'ankure mika ruzahu ruzahu afi'zagakfama, namazagama, zmasaguregati regraroh'za vano nehaza zagaramima, hagerimpi zagamofona vahe'mo'za azeri aga-zone neheze. <sup>8</sup> Hianagi vahe'mo'a, agefunamofo kegava krino, azeri aga-zonea osugahie. Vahe'mofo azeri fri avua tagazamo avitegeno, kefo kemoke atirami vava hugahie. <sup>9</sup> Tagnefunanu Rantimofone, Anumzanena ra zanagia nezanamita, ana tagnefunanura Anumzamo'a Agragna retro huzmente'nea vahe'mokizmi sifna kea hunezmantone. <sup>10</sup> Ana agipintike asomu kene, sifna kenena atineramie. Nenfugta nasarehetanena e'inahu'zana omneno. <sup>11</sup> Amne magoke kampuipintira, tintfane, hagerinena ehanatigaha'o? <sup>12</sup> Nenfugata nasarahetanena, fiki zafamo'a olivi raga amne rentegahifi, krepi nofimo fiki raga rentegahio? I'o. Anahu kna huno hagerimpintira tintfana fore osugahie.

### *Knare antahintahizamofo naneke*

<sup>13</sup> Hagi iza amu'nontamifintira ama antahintahine mika zampima anihu vahera mani'ne? Ana knare antahintahi'a atrenkeno knare eri'zama'amoki, avufa anteramino mani avu'ava zamo, erinte ama hino. <sup>14</sup> Hianagi vahe'mofoma antahimugi ante'zamo'ene kagraguke antahizamo kagu'afi mevitenenigenka, kavufga mareri kavukvatetira tamage kemofo eri amnezanknara osuo. <sup>15</sup> E'inahukna havi antahintahizana, monafintira nomeanki, ama mopafi kefo hankrotegati ne-e. <sup>16</sup> Krimpa mugi'zane, kavufa antemarer'i'zama me'nesifina, miko'mako havi fatgo osu'zana me'nenigenka kegahane. <sup>17</sup> Hu'neanagi monafinti erami'nea knare antahintahizana, ese'zana agru huno mani antahintahiza me'ne. Rimpa fruma huno mani'zane, miko kna akohenko mani'zane, rumofo ke antahimi'zane, asunku hu'zane knare'zane aviteno nemanie. Mago'mofonkuke hu'zana omaneno tamage avu'avake hu'zane. <sup>18</sup> Rumokizmima zamarimpa fruma erinezamiza vahe'mo'za, zamarimpa fruzamofo avimaza nehankrazanki'za, nena'ama vasagesazana fatgo avu'avaza hamaregahaze.

## 4

### *Anumzamofonte urava'o hanuna naneke*

<sup>1</sup> Hagi na'amo amu'nontamifina kefra hu'zane, ha' hu'zana eri forenehie? Havi tamavesi'za tamagu'afi me'neno ha'nerea zampinti efore nehifi? <sup>2</sup> Mago'a zanku tamave'nesigetma kenunu nehazanagi

e'norize. E'ina nehutma vahera zamahe nefrizanagi anazana e'norize. Rumofo zankura ke hakare nehutma franevazitma hara nehazanagi, mago'zana e'nori'ze. Na'ankure Anumzamofona tamagra nunamuna hutma antahinonkaze. <sup>3</sup> Tamagrama antahigaza zana e'norize, na'ankure knare osu antahintahireti antahigazagu e'norize. Anama tamisia zana eritma tamagrima tamavenesia zante atregahaze. <sup>4</sup> Tamagra monko a'hemo hiankuna hutma, ru anumzante mono hunentaza vahe'motma, ama mopafi avu'avazamofonte'ma tragoneteta ana avu'ava'ma hanazana, Anumzamofona ha'rentegahazanki tamagra ontahi'nazo? E'ina hu'negu iza'o ama mopafi zante tragotesimo'a, Anumzamofo ha' vahe fore nehie. <sup>5</sup> Avontafemo'a anage hu'neana, amne ke hu'nefi? Anumzamo'ma Avamu'ama tagu'afi antegeno mani'neana, Agri agorga manisieu avenesie. E'ina'ma osigeno'a rimpagna nemie. <sup>6</sup> Hu'neanagi agra razampi asuraginerante, e'ina agafare avontafemo'a anage hu'ne, **Anumzamo'a zamufga antemareriza vahe ha'renezmanteno, zamufga anteneramiza vahera asuraginezmente.** <sup>7</sup> E'ina hu'negu Anumzamofo agorga anteramita nemanitma, Satana ha'renteta retufe atrenkeno tamatreño freno. <sup>8</sup> Anumzante erava'o hinkeno, Agranena tamagaritera erava'o hino. Kumi vahe'motma tamazana sese nehutma, tare tagufa antahintahine vahera tamagu'a eri avusese hiho. <sup>9</sup> Kumima nehaza zankura tamasunku nehutma, krafa hutma zaviteho. Kiza zokagoma nehazazana netretma, zavi krafa nehutma musema nehaza zana atretma tamasunku hiho. <sup>10</sup> Anumzamofo avureru tamagra tamavufga anteraminkeno, Agra tamazeri sga hino.

#### *Rumokizmi huhaviza osanuna naneke*

<sup>11</sup> Hagi nafuhetma, huhaviza ohunte ahunte osiho. Iza'o nefuma huhaviza huntege refakoma huntesimo'a, agra kasegemofo huhaviza nehuno, refako nehie. Kasegema refako'ma hananana, kasegea amage nontananki, kasege refako hu vahe nemanine. <sup>12</sup> Kasege neramino, refakoma hurante Nera Anumzana magoke mani'ne, Agrake tagu'vazige, tahe fanane huge hugahie. Hu'neanagi tamagra azagata neramafuna refako hunentaze?

#### *Henkama esnia zamofo naneke*

<sup>13</sup> Hagi menina antahiho, anahukna kema nehazamotma, menino okino rankumapi vuta, mago kafufi umanineta, zago eri'za omerita, mago'ané zagoa (win moni) trohugahune huta hugahaze. <sup>14</sup> Hagi okima tamagrite'ma fore'ma haniazana ontahi'naze. Tamagra nanterampi hamponkna hu'nazankitma osi'a kna manitetma fanane hugahaze. <sup>15</sup> Tamagra anage hugare, Anumzamofo avesi'ma me'nesigeta, tagrama tasimu erita manisuta, e'izana huge, amazana hugahune huta hugaragi, <sup>16</sup> knare hu'none hutma tamufaga marenerize. Ana mika tamufga mareri'zana kefo avu'ava'za nehaze. <sup>17</sup> E'ina hu'negu, iza'o fatgozama hu'zama antahineno, anazama osanimo'a kumi hugahie.

## 5

#### *Feno vahe'mofo zamavumro naneke*

<sup>1</sup> Hagi menina kea antahiho, feno vahe'motma, tamasunku huta zaviteho. Na'ankure tamazeri haviza hu'zana tamagrite ne-e. <sup>2</sup> Tamagri feno zantamimo'a kasrigeno, hakanomo kukenatamia traga nehigeno, <sup>3</sup> golíne silva zagotamimo'a krogro heno amnezankna hu'ne. Fenozana eri atru

nehazankino, kegaga refkohu knazupa ana krogro he'zamo'a, tevegna huno tamavufga teno erihna hugahie. <sup>4</sup> Antahih, hozatamifi eri'za eneriza vahe'mofa, mizama ozami'naza mizamo'a ranke huno keaga huneramante. Hoza hamare vahe'mofa zavi krafagemo'a, hanavenentake Ramofo agesafi unefre. <sup>5</sup> Ama mopafima manizana so'e nomanizampi nemanitma, mika tamavesi'zana eriknare nehaze. Tamagra knare neza nenetma tamazeri afovage nehtutma, tamahema fri'nianknare neaze. <sup>6</sup> Tamagri'ma ha'ma hueramante'za hazenkezmia omne vahera, huhaviza hunezamanteta zamahe nefrize.

### *Knazama akoheno manineno erizamofo naneke*

<sup>7</sup> Hagi nafuhetma, tamarimpa antefru hutma mani'netma, Ramo'ma esigura avega anteho. Hoza vahe'mokizmi zamageho, zamarimpa antefru hu'za mani'ne'za, hozazamifima ese ko runtege, vagare ko runtenige'za hozazmifinti knare nezama hamarenaku avegama nentazankna hiho. <sup>8</sup> Tamagranena akohetma mani'netma oti hanavethi, na'ankure Ramo'ma esania knamo'a kofta hu'ne. <sup>9</sup> Nafuhetane nasarahetanena, keaga refkohu trate otisageno refako huramantegahianki amu'nontamifina ha' orente arente osiho. Refako hu nera kafante otine! <sup>10</sup> Nafuhetma, Anumzamofo Agifima nanekema hu'naza kasnampa vahe'mo'za, akohe'za manine'za knazama eri'zamofona ko huraveri'naze. <sup>11</sup> Antahi'naze, knazampima ufre'za azeri agatere'naza vahera muse hiho hunezamantone. Jopu'ma knazampima kazigazi huno agatere'nea zamofo agenke'ane, henka'ama hunte'nea zamofona antahi'naze. Ramofompina asunku'zane, vahe'ma avesinteno asuraginte'zana avite'ne.

<sup>12</sup> Razana, nena fugatane nensarogata, monarero moparero mago'azanteria huntetma huvempa osiho. Iza'o huvempa hunak'u'ma hanimo'a, izoma hunakure hanimo'a, i'zo hino, i'o hunakuma hanimo'a, i'o hino, ana'ma osanimo'a henka keagare otigahie.

### *Tamentinti nehuta nunamu hanunazamofo naneke*

<sup>13</sup> Hagi amunontamifima magomo'ma hazenkefi mani'nenu'n'a, Agra nunamu Anumzamofonte hino. Amu'nontamifima mago'mo'ma musema nehanuno'a, agra Ramofo agi erisagahu zagame hugahie. <sup>14</sup> Amunontamifina mago'mo'ma krima erinenuno'a, Agra mono kva vahe ke hanige'za, nunamu eme hunente'za Anumzamofo agifi masave frenteho. <sup>15</sup> Hagi zamentinti nehu'za nunamu huntesageno, Ramo'a kri'ma eri'nea vahera azeri neganamreno azeri onetino, kumi'ma hunesiana, kumi'a atrentegahie. <sup>16</sup> E'ina hu'negu kumitamia huama hutma kumira otrente atrente nehtutma, nunamuna ohunte ahunte nehinkeno, Ramo'a tamazeri kanamareno, fatgo ne'mofa nunamumo'a hanavenentake hu'neankino eri'za erigahie. <sup>17</sup> Elaija'a tagri kna ne'mo, ko'ma orinogura hanavenentake huno nunamuna higeno, mopafina 3'a zagekafugi 6si'a ikampina kora oru'ne. <sup>18</sup> Eteno Elaija nunamu higeno monafinti komo'a tagiramino mopafina korarigeno kavera fore hu'ne. (1 Kin 17-18)

<sup>19</sup> Nafuhetmane nasarahete, mago'tamimo tamage nanekea atreno hazamgrenesigeno, mago'mo azeri rukrehema hanigeno, ete tamage kantema esiana, <sup>20</sup> agra antahino, fri'zampinti agu'nevazino rama'a kumira refitegahie.

## 1 Pita Pita'ma Ese Avonkre'nea Naneke

*Anumzamofo vea maninonku knare tavutava nehuta, knare'zama erisunku avega antesune*

<sup>1</sup> Hagi nagra Pita'na Jisas Kraisi aposol ne'mo'na, Anumzamo'ma huhampri tamente'nea naga'motma, mopatmi atretma panini hutma Pontusi kazigane, Galesia kazigane, Kapodosia kazigane, Esia kazigane, Bitinia kazigama fretma vu'naza naga'motarega ama avona kreneramue. <sup>2</sup> Anumzana Tafatimo'a, ko antahino keno hu'nea kante, Ruotge Avamumo tamazeri agru hu'nea naga'mota, Jisas Kraisi amage'ma antageno, korama'a tagitreno sese huramante'nea nagamotma, asunku'zane rimpia fruzamo'a tamagrane aviteno mesie.

*Mani vava asimu'ma erisuna zanku amuhama hanuna zamofo naneke*

<sup>3</sup> Hagi Ranti Jisas Kraisi Nefa Anumzamofo agi'a erisaga hanune, Agri'a tusi'a asunku'zamo higeta, tagu'a rukrehe hunkeno kasefa tasimura tamigeta, Jisasi'ma friteno ot'i'nea zankura amuhara nehune. <sup>4</sup> Ana kasefa tasimu erisanti hare'nunana, vaga oreno, havizana osuno, fananene osaniaza monafinka Anumzamo'a anteramante'ne. <sup>5</sup> Tamagra Anumzamofonte tamentinti hazageno, Anumzamo'a hanave'areti kegava huramante'neankita, so'e hutma manigahaze. Tamagri tamahokeno tamaza hunaku retro huntogeno me'neankino, e'i anazama haniana mona mopa vagamare'nea knazupa eama hugahie. <sup>6</sup> Anazama erisaza zankura muse nehazanagi, ama atupa knafina ruzahu ruzahu knazama e'nerisageno, <sup>7</sup> ana knazamo'a tamentintimofona azeri ama huno, golima teyefi kre agru huno azeri hentofaza hiankna nehiankino, tamentintimo'a goli'a agaterene. E'ina hu'negu ruzahu ruzahu knazama e'nerisageno, tamentintimo'ma hanavematin mesiana, Jisasi'ma eama hania knazupa, husga huramanteno, ra tamagia tamigahie. <sup>8</sup> Hanki tamagra Agrira onke'nazanagi avesinentetma, menina Agrira onkenazanagi, Agritera tamentinti nehuta, tusi musenkase hunteta agi'a erisaga nehaze. <sup>9</sup> Tamagrama tamentintima hanaza zamofo mizama'a, Anumzamo'a tamagu tamamena tamagu vazigahie.

<sup>10</sup> Hagi ama ana tahokeno taguvazizana, korapara mago'a kasnampa vahem'o'za asunkuzamo'ma tamagrite'ma esigura kasnampa kea nehu'za, antahige'za rezagane so'e hu'za ke'naze. <sup>11</sup> Kraisi Avamumo zamagripi mani'neno, Kraisi'ma atama eriteno, ra agima erisia zankura zmasami'ne. Ana nehige'za zamagra Kraisi'a inankna Ne'mo, ina zupa efore hugahie hu'za hu'naze. <sup>12</sup> Zamagrite'ma eriamama hiana zamagra'a zamaza nosazanagi, tamagrikru Knare Musenkema huama hazafina, monafinti'ma e'nea Ruotge Avamumofo hanavere huama nehaze. Ankero vahe'mo'za anama huamama hzazama kesagura, tusiza huno zmavesi'ne.

*Mani ruotge huta manisnunku Anumzamo tagi hu'nea naneke*

<sup>13</sup> E'ina hu'negu retro huta antahintahitamia nemanita, tamavugamofo avesizana kegava negritma, ana miko amuha zantamia, Jisasi'ma eama hanigeno, Anumzamo'a tamaza hania asunkuzante anteho. <sup>14</sup> Ke amage'ante mofavremo'za nehzaza nehutma, koma ontahinetma hu'haza

tamavutamavamofo avesizana ovaririhi. <sup>15</sup> Hianagi Ruotge Hu'nemo'ma tamagima hu'nea ne'kna nehuta, maka'zama hanafina mani ruotge hiho.

**16 Na'ankure anage huno avontafepina krentene, *Tamagra ruotge huta maniho, na'ankure Nagra ruotge hu'noe.*** (Lev-Pri 11:44-45)

<sup>17</sup> Tamagrama hutma nerafa'e nehaza Anumzamo'a, Agra magokemofonku osu Anumzankino, maka vahe'mo'za zamavuzmavama nehzare refkoia huzmantegahie. Ana hu'negu, ama mopafima zoka vahekna huta atupa knafima mani'enarera, Anumzamofonku kore huntentmeta ra agi amiho. <sup>18</sup> Na'ankure tamagrama ketma antahitama hanazana, korapa tamagehe'za zamaza osu zamavu'zmava nehaza kante nevazagu, anampinti mizaseramante'ne. Miza seramante'neana haviza nehiazanu, silvane golireti miza seoramante'ne. <sup>19</sup> Hianagi haviza osuno afuhe omne sipisipi anenta, Kraisi korana marerisa mizanteti mizana seramante'ne. <sup>20</sup> Na'ankure korapa Anumzamo'a, monane mopane tro osu'neno, tazama hanigura Kraisina huhamprinte'ne. Hianagi menina vagare knafina tamagri'ma tamaza hanigu efore hu'ne. <sup>21</sup> Kraisi taza higeta, fripinti azeri otino husga hunte'nea Anumzamofontera tamentintia nehune. E'ina hu'negu tamagra Anumzamofontera tamentintia nehutma, amuhara nehaze.

<sup>22</sup> Tamagrama tamage kere'ma amagema antetma nevazazamo, tamazeri agru tamagu tamena higetma, neramafuma ovesinte avesinte tamagu'areti nehutma, tamaguareti hutma mago magomota ovesinte avesintea nehaze. <sup>23</sup> Na'ankure tamagra kasefa'ma hu'nazana, haviza nehia avimazanteti rompage, haviza osu avimzama Anumzamofo mevava kea asimu me'nea ke'areti kasefara hu'naze. (Jon 3:1-9) <sup>24</sup> E'ina hu'negu avontafepina anage hu'ne, ***Maka vahe'mo'za trazankna hu'nazankino, maka konariri zamimo'a trazamofo amosregna higeno, ana trazamo hagege higeno, amosre'amo evuramiankna hugahaze.***

<sup>25</sup> ***Hianagi Anumzamofo nanekemo'a mevava hugahianki'za,*** ama'i ana naneke huama hu'za tamasami'naze. (Ais 40:6-8.)

## 2

### *Kasefa mosavregna huta mani'nuna naneke*

<sup>1</sup> Hagi e'ina hu'negu tamagra vahe'ma azeri havizahu avu'avazane, havige hu'zane, tavrenke hu'zane, kenunu hu avu'ava'zane, vahe'mofo amefi ke hu'zana netretma, <sup>2</sup> meni kasentea mosavremo aminku avesiankna hutma Anumzamofo kegura tamavenesita, Anumzamofo agru hu'nea nanekea e'neritma nena hugahaze. Ana nehanageno tamagu vazino'ma, tamahoke ahe'nea zampina nena hugahaze. <sup>3</sup> Hanki e'inama hutma Anumzamo'ma so'ema huneramantea zamofo haga'ama erisuta, Ramo'a so'e hu'ne hutma hugahaze.

### *Jisasi'a asimu eri have mani'nea naneke*

<sup>4</sup> Hagi Kraisi'a asimu eri have mani'nemofonte tamagra Agrite neaze. Ana havea vahe'mo'za haviza hu'ne hu'za eri atrenazanagi, Anumzamo'a huhamprinogeno, Agri avurera mrerisa have me'ne. <sup>5</sup> Tamagranena asimu eri havevna hu'nazageno, avamupi mono nona kiazza nehitgetma, avamupi ruotge pristi vahe'mofo nonkna nehutma, Anumzamo avesi'nea ofa Jisasi'impi avamupina huntentaze. <sup>6</sup> Na'ankure anage huno avontafepina me'ne, ***Keho Zaioni agonarerera marerisa have huhamprintoankino, nomofo***

**renagentete azeri hanaveti have me'ne. Hanki iza'o Agrite'ma amentinti hanimo'a, agaze osugahie hu'ne.** (Ais 28:16)

<sup>7</sup> Hanki tamagrama tamentintima haza vahe'motarera, ana havemo'a mrerisa have me'ne. Hianagi iza'zo zamentintima nosaza vahetera, **Nogi vahe'mo'za zamavresara higeza atraza havemo'a, nomofo renagentepinka azeri hanaveti have fore nehuno,** (Sam-Zga 118:22) <sup>8</sup> **zamagigo zamino zamazeri tanafa nehuno, zamazeri traka hu have fore hu'ne.** (Ais 8:14) Na'ankure zamagra trakama nehzazana, ke'arerar amagera nontazanki'za, traka hu'za haviza hugahaze.

<sup>9</sup> Hianagi Anumzamo tamagrira huhampriramante'nea naga mani'neta, kinimofo pristi naga mani'neta, ruotge hu'nea naga mani'nazageno, Anumzamo'ma Nagri nagare huno hu'nea naga mani'nazankita, Anumzamo'ma hanimpinti'ma tamagina huno, ruzahu masazama'are'ma tamante'nea so'ezama'agura huama hugahaze. <sup>10</sup> Hianagi kora tamagra Anumzamofo vahera omani'nazanagi, menina Anumzamofo vahe mani'naze. Tamagra Anumzamofo asunkuzana e'orinazanagi, menina tamagra Anumzamofo asunkuzana eri'naze.

<sup>11</sup> Hagi navesima neramantoa nenaufuga, tamagra zoka vahe mopazmi omne vahekna hutma ama mopafina mani'naze. E'ina hu'negu, tamavufamofo havi avesizamo'ma ha'ma reneramantea zampina uofreho hu'na nagra huneramasamue. <sup>12</sup> Hagi maka kna tamagra meg'i vahe'mokizmi amu'nompima mani'netma, knare tamavutmava nehinke'za, zamagrama huhavizama huramantesu'za, knare tamavu'tamavaza zamagra nege'za, Anumzamo'ma refkoma hania knarerera, ana tamavutamava hu'naza zankura, Agi erisaga hugahaze.

<sup>13</sup> Tamagra Ramofonku hutma, maka kamani vahe'mofo kea amage nentetma, kini vahera ugagota hu'nagu, kezmia antahitama amage nentetma, <sup>14</sup> Gavana vahe'mo'zanema hanaza kea amage anteho. Hazenke hanaza vahe zamazeri fatgo nehuno, fatgoza hanaza vahe husga huzmantesagu huzmanteg'e'za mani'naze. <sup>15</sup> Na'ankure e'inahu tamavutmavama hanazana Anumzamofo avesiza avaririta fatgo nehanageno, ke ontahi neginagi z mavuzmavama nehaza vahe'mo'za kea osugahaze. <sup>16</sup> Kina vahera omi'nazanki, fru huta mani'nagu, fru huta mani'none nehutma, ana fru tamavutamava zampina antegafita, kefo avu'ava zana osutma, Anumzamofo kazokzo eriza vahe maniho. <sup>17</sup> Maka vaheku husga hunezmanetetma, maka zamentintima nehaza tamafuhe'ina zmavesinezmanetetma, Anumzamofonku kore hunentetma, kini vahe'mokizmi zamagorga maniho.

<sup>18</sup> Eri'za vahe'motma, kegavama huramante'nesaza vahe'mokizmia kore huzmantetma zamagorga nemanitma, fru hu'za knare'ma huramante'naza kva vahe'mokizmi zamagorgagera nemanita, havizama huramantesaza kva vahe'mokizminena zamagorga maniho. <sup>19</sup> Tamagrama Anumzamo-fonte'ma fatgo tamagu tamagesa antahitama mani'nenageno, havigema huramante'za tamazeri havizama hanazana, Anumzamo asomu huramantegahie. <sup>20</sup> Tamagrama haviza hu'enage'za, havizamofo nona hu'za tamazeri haviza hanazana, mago knare'zana e'origahaze. Hianagi tamagrama knare tamavu'tamavazama nehanage'za, tamazeri havizama hanazana, Anumzamo'a asomu huramantegahie.

<sup>21</sup> Na'ankure tamagrira ana knaza erisazegu tamagi hu'ne. Kraisi enena anahukna huno atazana erino huraveri hu'neankita, Agrama hu'neankna tavutava huta avaririgahune. <sup>22</sup> **Agra kumira osuno, mago havigea agipintira osu'ne.** (Ais 53:9) <sup>23</sup> Hanki Agri'ma huhavizama huntageno'a, zamagrira nona huno huhavizana huozmantene, Agri'ma azeri havizama huntageno'a, zamagrira nona huozmanteno zamazeri havizahu kea osuno, Anumzamo fatgo huno refko nehimofo antahi nemino, ana knazana Agri azampi ante'ne. <sup>24</sup> Agra avufare kumiti erino rugeka zafare hantinegu, tagra kumi'ma hu'zampina nefrita, fatgo tavutava'ma huzampina, kasefa huta manigahune. Na'ankure Agri avufgama aguzama ru'nazazamo, tagrira tazeri so'e hu'ne. <sup>25</sup> Na'ankure tamagra sipisipi afukna hutma hazagre'nazanagi, menina tamagra rukrehe hutma sipisipi kva ne, tamagu tamemofo kva Nete e'naze.

### 3

#### *Aravemofo naneke*

<sup>1</sup> Hagi anahukna kante, a'nemotma neramave agorga nemaninke'za, mago'a Anumzamofo kema amagema nontesaza neramave'za nege'za, mago kea osugahazanagi, knare tamavutamavaza nege'za zamagu'a rukrahe hugahaze. <sup>2</sup> Na'ankure tamagra a'nemotma fatgo hutma vetamimofo agorga'a mani'nazagu anara hugahaze. <sup>3</sup> Tamagrama a'nemotma tamazoka'ma ki hariritma golire tamavasese nehutma, kukena nehutma, amega tamavufgare konariri huzankukera osiho. <sup>4</sup> Hianagi tamagu'afi havizama osania avasesezana, fru huno akoheno mani avasese'za hiho. E'inahu avasese zanku Anumzamofoona avenesie. <sup>5</sup> Na'ankure korapa knafima ruotge hu'za mani'naza a'nemo'za, e'inahukna hu'za zmvasesea hu'ne'za, Anumzamo'ma hvempama huzmantene'nea zama fore'ma hanigu Anumzamofonte amuha nehu'za, ve'zamimofo agorga mani'naze. <sup>6</sup> Anahukna huno Sera'a Abrahamu amage nenteno, ranimo'e huno Abrahamunkura hu'ne. Tamagra neramave agoraga nemanita knare zanke'ma hanutma, Sera mofane manigahaze.

<sup>7</sup> Hanki vene'nemota knare antahintahi avariritma, a'ne tamimo'zanena so'e hutma maniho. A'nemo'za hanave oti'nagu, knare tamavutmava huzmanteho. Tamagrama antahi'nazana a'nemo'za zamagranena zmasimu erigahaze. E'inahu hutma avaririsageno'a, magozamo'a nunamuma hanaza nunamuntamia rehizara osutfa hugahie.

#### *Haviza hurantesaza vahe'mokizmi knare tavutava huzmantesuna naneke*

<sup>8</sup> Hagi maka'motma magopi fru hutma nemanitma, vahe'mokizmia tamasunku hunezmanetma, kogna hutma nemanitma, tamagu'areti so'e tamavutma nehuta, tamagu'a anteramita maniho. <sup>9</sup> Vahe'mo'za havizama huramantesagetma, nona hutma haviza huozmanteho. Kema huhavizama huramantesagetma, nona hutma kea huhavizana huozmanteta, tamagra Anumzamofo antahigenkeno asomu huzmanteno, Anumzamo'ma tamagina hu'neana, e'inahu hanazegu tamagi hu'neankitma, asomura tamagra erisanti haregahaze. <sup>10</sup> **Iza'o knare hu'na manisue huno agesa nentahino, knare knama kesiazanku'ma avesintesimo'a, kefo kema hu'zankura agefu'na kegava nehuno, agipinti'ma havige huzankura kva hino.** <sup>11</sup> **Kefo avu'avazampintira atreno, knare avu'avaza nehuno, rimpia fruma huno mani'zanku hakeno avaririno.** <sup>12</sup> **Na'ankure fatgo vahe'mokizmia Anumzamo'a**

**avua anteno kegava hunezmanteno, nunamuzmia antahi nezamie. Hianagi havi zamavu'zmavama nehaza vahe'mokizmia, Anumzamo'a zmefi huzamino ha'renezmante.** (Sam-Zga 34:12-16.)

*Knare tavu'tavama hanunazante tata erisuna naneke*

<sup>13</sup> Hagi tamagrama hanavetitma so'e tamavutamava nehnageno'a, iza tamazeri havizana hugahie? <sup>14</sup> Hianagi tamagrama fatgo tamavutamava'ma nehanage'za, tamazeri haviza hugahazanagi tamagra asomu erigahazanki, korera osuta tamazeri kore hanaza zañkura antahintahi hakare oshiho <sup>15</sup> Hianagi tamagu'afina Kraisina atrenkeno ruotge huno Rana nemanina, tamagrama fore'ma hanigu amuha'ma nehutma tamentintima nehaza zanku'ma tamantahima kesageta, maka knafina tro hutma mani'netma, antahinezamita akohetma fru kefinti kenona hunezmanetta, <sup>16</sup> tamagutamagesafina ama' huta fatgo hutma maniho. E'inahu'ma hanutma, Kraisi'enema knare'ma hutma mani'naza zanku'ma havigema humaneramantesia vahe'mo'za zamagazegu hugahaze. <sup>17</sup> Na'ankure Anumzamofo avesi'ma me'nenigeta tagrama knare tavu'tava'ma nehanunke'zama, tazeri havizama hanazana, knare hugahie. Hianagi tagrama havi tavutavama hanunte'ma, knama tamisazana havizantfa hugahie.

<sup>18</sup> Na'ankure Kraisi'a maka vahe'mofo kumiku huno, magoke zupa fatgo ne'mo, fatgo osu vahe'motagu fri'neankino, Agra tawareno Anumzamofonte vanigu ahazageno fritegeno, Anumzamofo Avamu'mo azeri otigeno, kasefa huno mani'ne. <sup>19</sup> Agra vuno kina kumapima mani'naza avamutaminte kea ome huama hu'ne. <sup>20</sup> E'i ana avamutamina korapama Noama ventema negigeno, Anumzamofo ke eri atrazanagi, Anumzamo'a akoheno zamavega anteno mani'nea avamutamine. Hankino 8'a naga'moke'za ana timo'ma zamahe refitegeno'a, zamaguravazi'ne. (Jen-Agf 6-8) <sup>21</sup> E'i ana timo'a mono tima frezamofo avame zankino, Jisasi Kraisi'ma friteno oti'neazamofo hanavemo tamagura vazi'ne. Hankino mono tima frezamo'a pehena erinotreanki, agru tagutagesareti Anumzamofoma antahimisunazane. <sup>22</sup> Hagi Jisasi'ma monafinka vuno Anumzamofo azantmaga umani'nege'za, maka ankero vahe'mo'zane, maka avamutamimozone, maka hanavezmima me'nea zagaramimo'za Agri agorga'a mani'naze.

## 4

*Kazigazi huta ovesinte avesinte hanuna naneke*

<sup>1</sup> E'ina hu'negu Kraisi'ma avufafima atazama eri'neankna nehutma, tamagra anahukna antahintahi erita maniho. Na'ankure tamagrama anahu knazama eri'nutma kumi'ma hu'zana atregahaze. <sup>2</sup> Anahukna huno ama avufganema mani'nenu'a, vahe'mofo havi avesizampina ovugahianki, Anumzamofo avesizampi vugahie. <sup>3</sup> Tamagra Anumzamofoma keno antahino osu vahekna hutma, zaza kna ama mopafina mani'neta, havi tamagu tamagesa nentahitma, havizamofo avesizampi nemanitma, negi tina nenetma, ranke huta vano nehuta, ne'za kretma nenetma, havi anumzamofo mono hunte'naze. <sup>4</sup> Menina korapa arone timimo'za havi tamavutamavarava nosazage'za neramage'za, nahige'za tagranena vano nosaze hu'za antri nehu'za, tamazeri haviza huke nehaze. <sup>5</sup> Hianagi zamagra keagama refko'ma hu Jasi nemofonte oti'za, nankna zamavu'zamava hu'nazana nesamisage'za, fri vahe ene kasefa hu'za mani'naza vahe'enena refko huno keaga huzmantegahie. <sup>6</sup> E'i ana agafare Knare Musenkea

fri'naza vahete'enena huama hazage'za antahi'naze. Nazano ama zamufare mani'ne'za hu'nesaza zante refko huzmantegahie. Hianagi avamu'zmimo'a, Anumzamofo avesite manigahie.

<sup>7</sup> Hagi maka'zama vagaresia knamo'a, hago kofta hie. E'ina hu'negu antahintahia hu so'e nehutma, nunamuma hu tamavu'tamava'mofona azeri hanavenetita, kazigazi hutma viho. <sup>8</sup> Maka'zama agatere'neazama hanazana, vaheku'ma ovesinte avesinte hu avu'ava zana otretfa hiho, na'ankure avesinte avu'avazamo'a, rama'a kumi refinete. <sup>9</sup> Mono tamafu tamagnazama esageta, so'e tamavutamavaza hunezmanetma, antahi havizana hutma ke hakarea huozmanteho. <sup>10</sup> Magoke magokemotma Anumzamo'a so'e musezama'a tami'negu, ana musezanteti rumokizmia so'e tamavu'tamavaza hunezmanenkeno Anumzamofo so'e avu'avazamo'a, tamagripina aviteno vino. <sup>11</sup> Magomo'ma Anumzamofo nanekema huamahu musezama eri'nenimo'a, huama nehina, mago'mo'ma vahe'ma azahu musezama eri'nenimo'a, Anumzamo'ma ami'nea hanavereti vhahera aza nehinketa, maka'zama hanazana Anumzamofoma ra agima amizanke hiho. Na'ankure Jisas Kraisi'a masanentake huno hanave'ane mani'ne. Tamage.

### *Jisasi'ma hu'neankna huta tataza erisanuna naneke*

<sup>12</sup> Ronenimota tamagra reramahe zampima nevazazamo'a, tevefi vi-aza nehazagu kasefa'za fore nehie hutma antria osiho. <sup>13</sup> Hianangi ana tamatazama e'neriza zankura muse huvava hiho. E'i anazamo'a Kraisi'ma atama eri'neaza nehazokino, Agrama hanavenentake masa'an eama hanigetma, magokama muse hanaza zamofo retro huneramante. <sup>14</sup> Hanki Kraisi agi tamagripi me'nenige'za, tamazeri haviza hanazana, asomu eri-gahazanki muse hiho. Na'ankure hanavenentake masa'an Avamumo'ene Anumzamo'enena tamagrane mani'ne. <sup>15</sup> Tamagra vahe ahefrizantero, kumazafa sezantero, mago'a hazenkerero, vahe'mokizmi zante tamagena vazige'vazige nehutma, tamata eri'zanku kegava hiho. <sup>16</sup> Hianagi iza'o (kristen) mono vahe'ma mani'nenigeno, atama amisaza zankura agazegura osino. Hianagi e'i ana mono agima eri'nea zankura, Anumzamofo agi erisaga hino. <sup>17</sup> Na'ankure Anumzamo'ma vahe'ma refko hania kna hago neankino, esera Anumzamo'a Agri'a naga'mota refko hugahie. Hanki tagrite'ma agafama huno refko'ma hanuno'a, Knare Musenkere'ma zamentintima nosaza vahetera, inankna hugahie. <sup>18</sup> Anumzamofo avontafemo'a anage hu'ne, **Fatgo vahe zamaguma'vazizamo'ma amuhoma hanigeno'a, Anumzamofoma atrezama kumima nehaza vahetera, inanknaza fore hugahie?** (Pro-Knr 11:31)

<sup>19</sup> E'ina hu'negu tamagrama Anumzamofo avesizama amage'ma nente-nageno, vahe'mo'za tamatazama tamisageta, tamagri'ma tro'ma hura-mante'nemofonte tamentintia nehutma, fatgo tamavutamava huta maniho.

## 5

### *Mono kva vahe'ene kasefa vahe zamavumro naneke*

<sup>1</sup> Hagi mono kva vahe'motma, nagranena tamagrikna hu'na mono kva ne'mani'nena, Kraisi'a atazana erige'na, ke'nomo'nane, tamagrane magoka Kraisi hanavemo eama hanigeta erisumo'na neramasamue. <sup>2</sup> Sipisipi kva vahe'mota, Anumzamofo sipisipi kevu naga'ma kegavama hanazana, vahe'mo higure huta osutma, tamagu'reti Anumzamofo avesi'mo'ma hu'nea kante kazigazi hutma kegava nehutma, havige hutma zagoma tro

hukazigatira anara osiho. <sup>3</sup> Tamagri kvafima mani'naza vahetera, ra vahe mani'nonankita kegava huzmantegahune hutma ana vahekura osiho. Hi-anagi knare tamavu'tmava'za huzmaveri nehinke'za nege'za, tamavarir-aho. <sup>4</sup> Hagi Kraisi'ma ugota Sipisipi kva ne'ma efore'ma hania zupa, hanave'amo'a vagaore kini fetori eme tamigahie.

<sup>5</sup> Hagi kahefa vahe'mota, anahukna hutma ugagota huramantenesaza ra vahe'mokizmi naneke antahizmita zamage ante-ho. Maka'motma anterami tamavu'tmavara kukena hiaza nehutma, rumokizmi zamagorga umani emani hiho. Tamage huno avontafemo'a anage hu'ne, **Zamagra za-mavufgama erisaga hazavahera Anumzamo'a ha'renezamanteno, zamavufgama anteramiza mani'naza vahera knare hunezmante.**

(Pro-Knare nomaniza 3:34)

<sup>6</sup> E'ina hu'negu tamagra Anumzamofo hanavenentake azampi anteramita mani'enkeno, kna fatgore tamazeri antesga hino. <sup>7</sup> Hakare'a knazantmia Agrite atreho, na'ankure Agra tamagrira kva huneramante. <sup>8</sup> Tamagra negia onetma, kva hutma maniho. Ha' vahetamimo Sata'a agra laionigna huno akoheno rerakauren krafa huno vano nehuno, ahenoma nesia vaheku nehake.

<sup>9</sup> Hu'neanagi, tamentinti azeri hankavetineta, Satana retufe atreho. Antahi'naze, Anumzamofo amage nentaza vahe'ma, mika kaziga tamafu'e'zane tamasarahehezane mago'zahu knazane, zamata zana e'nerize. <sup>10</sup> Hanki atupa'a knafi tamatazana erigahazanagi, tamagri'ma Kraisi mani-vava masa'afima tamagima hu'nea Anumzamo'ma tamazeri knaretfa ne-huno, knare hu'naze huno huneramanteno, tamazeri hanavetina, oti hanavetita manigahaze. <sup>11</sup> Maka hanavea Agrite me'neno, mevava hugahie. Tamage.

### Vagare naneke

<sup>12</sup> Hanki Sailasi'a nazahigeta ama atupa avona kre'no'e, nagrama kena antahinama agri'ma huana, fatgo huno Ramofona amage nentea nenufu mani'ne. Nagra ama atupa avoma kreneramuana, tamazeri hanaveti ke hu'na, Anumzamofo tamage asunku zankura kreneramuanki, ana asunku zantera oti hanavetaho. <sup>13</sup> Anumzamo'ma huhampri zamanteg'e'za, Babilonima mani'naza naga'mo'za, musenke atreramantaze. Maki'a nagri mo-favreni'agna hu'nemo'a, musenke atreramante. <sup>14</sup> Magoke magoke'motma fatgo huno ruotge hu'nea avu'ava hutma, agi ohene ahene hutma maniho. Kraisimpima mani'naza nagamotma, rimpfa fruzamo'a tamagrane mesie.

## 2 Pita Pita'ma Anante (2) Avonkre'nea Naneke

*Knare tavutavara hanavetita nehuta havige vahemokizmi nanekea on-tahisune*

<sup>1</sup> Nagra Saimoni Pitana, Jisas Kraisi kazokzo eri'za aposol ne'mo'na, ana mikro tagrama hunakna huta Anumzama Jisas Kraisi tamagu'mavazi ne'mo'ma Anumzamofonte'ma tazeri fatgoma nehia Nete'ma tamentintima nehazamotarega, ama avona kreneramue.

<sup>2</sup> Anumzamo'a asunku zama'reti'ene, rimpafuru zanteti, Ranti Jisas Kraisima kenka antahinkama hu'nana antahintahi zampina, asomu hungeante'na mago'ane hagenka marerigahane.

### *Anumzamofompima hageno marerizamofo naneke*

<sup>3</sup> Hagi tagrama Jisasima, keni'ma nehunkeno'a, Agri'a hankavemo mika zanku'ma Agri'ma avenesia avu'ava zampima upama hunazana neramie. Agri'a hanave masazama'ane, knare avu'avazama'a erisunegu, tagrira tagi hu'ne. <sup>4</sup> E'i ama anazampi mareri agatereno, knarezantfa hu'nea huvempa kea huhamprirante'ne, hu'negu tagranena, Agri'a avu'avazama'a nehuta, ama mopafi kefo tavesizamofo havizampintira agateregahune.

<sup>5</sup> E'ina hu'negu ama ana agafare tamentintimo'ma hage ra hanigura mago'ane hanavetita, knare tmavutmava nehutma, knare tamavutamavatetira, knare antahintahi eneritma, <sup>6</sup> ana knare antahintahireti tamavufamofo avesi'zana kegava nehutma, tamavufamofo avesi'zama kegava huzanteti, knazama erita nevutma, knazama erino vuзantetira, Anumzamofo avu'avaza nehutma, <sup>7</sup> Anumzamofo avu'avazantetira, neramufuna knare tamavu'tmava hunezmanteta ovesinte avesinte hiho.

<sup>8</sup> Tamagripima ama ana avu'avazama me'nesigeta hageta marerisageno'a, e'i ana tamavu'tamavazamo'a eri ama'ma haniana, Ranti Jisas Kraisima ketma antahitmama hu'naza zamo'a amnezanknara osugahianki, nena raga'a rentegahie. <sup>9</sup> Hianagi iza'o e'inahu avu'avazama nosanimo'a, avua asu huge, avua afetera nonkeankino, ko'ma Anumzamo'ma kumi'ama azeri agru huno atrente'neazankura agenekanie. <sup>10</sup> E'ina hu'negu nenafugata, hakarezama hanafina, Anumzamo huhamprintanteno tagi hune hutma hanavetita ketma antahitama nehutma, mani fatgo hiho. Na'ankure tamagrama e'inahu tamavutamavama hanuta trakara osugahaze. <sup>11</sup> E'inahu kante'ma vanageno'a, Ranti Jisas Kraisi'ma taguvazi ne'mo'a, manivava kuma'amofo kafana anagi hagro hanigeta ufregahaze.

<sup>12</sup> E'ina hu'negu tamagra ana tamage nanekema antahita oti hanaveti'nazanagi, nagra huramagesa huvava hugahue. <sup>13</sup> Nagrama ke'na antahinama huana, ama mopafima kasefa hu'na mani'nenuna, nagra huramagesa huvava hanuana knare hu'ne. <sup>14</sup> Na'ankure Ranti Jisas Kraisi'a nasamino ko naveri hu'neankina, ama mopafina zazakna omanigahue. <sup>15</sup> E'i ana agafare hanavetina eri'zana eneruankita, nagrama fri'na vanugetma, anama huramagesa nehua kegura, tamagera okanigahaze.

<sup>16</sup> Na'ankure antahi'zane vahemokizmi nehazaza huta, tagra Ranti Jisas Kraisima esia zankura havigea nosune. Hianagi marerisa masa'an mani'negeta tagra tavufinti ke'hona zanku neramasamune.

<sup>17</sup> Na'ankure Anumza Nafatimo Agra'a ra agi nemino, masa'a eriama nehuno, hanavenentake masa'afinti anage huno Jisasinkura hu'ne, Ama'i Nagri Mofavre, navesinentena muse hunentoa Mofavre'ni'e hu'ne. <sup>18</sup> Higeta tagra'a agonafima mani'nonkeno ana kea monafinti higeta antahi'none. (Mat 17:1-8, Mak 9:2-8, Luk 9:28-36) <sup>19</sup> Ana higeta tagra kasanampa vahem'o'zama hu'naza kea antahi amama nehuta tamentinti hu'none. E'ina hu'negu tamagra ana kemofona keni nehirkeno, zamagri kemo'a hanimpima tavimo remsa huno viankna nehina, nantera ofumo, Krais'a tamaguafinti remsa hugahie. (Nam-Ham 24:17, Rev-Huf 22:16) <sup>20</sup> Hianagi tamagrama antahiamama hanazana, magore huno avon tafepima me'nea kasnampa kea, kasnampa vahem'o'za zamagra'a zamagesafintira kreonte'naze. <sup>21</sup> Na'ankure vahem'o'za zamagra'a zamavesite, ana kasnampa kea kreonte'naze. Hianagi Anumzamo'ma hu'neankea Ruotge Avamumo zamazeri otige'za krente'naze.

## 2

### *Havi kasnampa vahem'ofo naneke*

<sup>1</sup> Hianagi havige kasnampa vhahera amu'nozmifinti oti'neankino, hanahukna huno mago'a havige rempi hurami vhahera amu'nontamifinti oti'za, zamagra fraki'za maka krunage hu'za, tamentinti azeri haviza hunaku anara nehu'za, Ramo'ma miza sezmantenea Nera zamefi hu'nemi'za, tusi'a knaza zamagrazmi zamagofetu erintegahaze. <sup>2</sup> Rama'a vahem'o'za zamagra'a monkozamofo zamavesi'za nevaririsageno, ana zanteku hu'za tamage kemofona huhaviza huntegahaze. <sup>3</sup> Anama nehaza vhahera maka zanku kezmanunu hu vaheki'za, havi kereti tamazeri savri hugahaze. Hianagi Anumzamo'a korapa zamazeri haviza hunaku krunage vhahera huhampri zmante'neankino, anama zamazeri havizama haniazamo'a ne-e.

<sup>4</sup> Na'ankure ankeru vahem'o'zama kumi'ma hazageno'a Anumzamo'a ozamatre'ne, hianagi zmasga huno teve kumapi zmatrege'za, haninentake kerifi mani'ne'za, keagare'ma otisageno refkoma haniazanku avega ante'za mani'naze. <sup>5</sup> Hianagi korapa knafi vhahera, ozamatreno zmahe frivagarene. Hianagi fatgo avu'avazankuke kea huama nehia ne' Noanki 7ni'a naga'agi huno nozmaheno, kefo avu'avazama nehaza vhahera, tusi'a ko tinu zamahe frivagarene. <sup>6</sup> Hagi anahukna huno Agrama Sodom Komora vahem'a tevereti'ma zamahe fanane hige'za, tanefa'ma samprenaza zamo'a, mago avame'za me'neno huraveri huno, Anumzamofo avu'ava'ma osnaza vhahera zamahe fanane hugahie huno nehie. (Jen-Agf 19:24) <sup>7</sup> Hanki kefo monko avu'avaza nehu'za, zamagra fatgo osu zamavu'zmava nehzageno rimpagna hunezmantea fatgo nera Lotina, Anumzamo'a agu'vazine. <sup>8</sup> Na'ankure fatgo ne'moma zamagri amunompi mani'neno, nezmageno nentahino nehige'za, kasege rutagre zamavu'zamava'ma knane knanema nehzageno'a, rimpagna hutere hu'ne. (Jen-Agf 19:29) <sup>9</sup> Hanki e'i Anumzamofo fatgo avu'ava'ma nehaza vahem'a, zamagu'mavazi'nea kankamuna antahineankino, hazenke zampintira zmagu nevazino, havi zamavu'zmavama hanaza vahem'o'za menintetira knazampi manime vu'za, vahem'a refkoma huzmantea knareru uhanatigahaze. <sup>10</sup> Mago'a vahem'o'za havi miza erigahaze. E'inahu vahem'o'za zamagu'amo'a otige'za, monko'za hu zamagesama nentahiza, tra kea kefenkami netre'za, ana vahem'o'za zamavufga ra nehu'za, ugota

ankero vahe'ma huhaviza huzankura korora nosaze. <sup>11</sup> Ana nehazanagi ankeromo'za, knare hu'za hanaventake vahe mani'nazanagi, zamagra Ramofo avurera vahe'mofona refkoa hunozmantaze. <sup>12</sup> Hianagi ana havige rempima huzami vahe'mo'za zagakfagna vaheki'za, zamazeri'za zamahe frisaza vahe fore hu'nazankino, zamagri zamagu'zmagesamo zamazerino zamahe frigahie. Zamagra havizankuke nehu'za mago'zana ontahi'naze. Hianagi zamagri havi zamavuzmavazamo zamahe frigahie. <sup>13</sup> Zamagra havi zamava'zamava nehazanki'za, mizama'a haviza erigahaze. Zamagrama zamagesama antahi'zana, musenkase hutu aka tina zage ferupina negahune nehu'za, havi zamaguzmagesareti ne'zama kagranema nenaza zamo'a, zamagraguke antahi zamavu'zamava nehu'za, zamagazehu zamavu'zamava hu'za nevazankino, ana zmavu'zamavamo'a, zamazeri haviza hugahie. <sup>14</sup> Maka kna, zamagra rumofo a'ene, rumofo venema savrima huzankuke nentahiza, havi zamavu'zamavama huzana otre'za huvava nehu'za, zamagra mago'a vahe'mofona fru hu'za rezmatga nehazageno, zamagraguke antahi antahintahizmimo'a avinete. Hianagi zamagra hazenkegu nehakaze! <sup>15</sup> Zamagra fatgo kana atre'za hza negraze. Beori nemofo Balamu'ma havi avu'ava nehuno, miza erinaku avenesiaza hu'za fatgo osu kante nevaze. <sup>16</sup> Hianagi donkimo keosu zagamo vahe'mofa zmageru aruno, Balamuna Beori nemofo neginagi avu'avazamofona azeri fatgo hukea hu'ne. (Nam-Ham 22:1-24:25)

<sup>17</sup> E'inahu vahe'mo'za kampui tinkerimo taneankna nehu'za, ham-pomo korimpena retufeno viankna hu'za kankekanki nehazanki'no, haninentake teve kumamo'a zmavega ante'ne. <sup>18</sup> Ana vahe'mo'za rankege nehu'za, havige zamireku zamavufaga ra nehu'za, vahera zamazeri oti ke hu'za monko zamavuzmava nehu'za, maka zamagra zamavufarera monko zamavuzmava nehaze. Zamagra monko zamavuzmavamofo zamesizana notre'za, e'inahu zamavuzmava nehu'za zamentintimo hanave oti'nea vahera zamami'mi hu'za zamavazu nehaze. <sup>19</sup> Ana nehu'za, maka vahekura fru hutma maniho hu'za huvempa ke hunezmantazanagi, zamagra havi zamaguzmagesamofo kazokzo eri'za vahe mani'naze. Na'ankure vahe'mo'za nankna zamuzmama nehazazamofo kazokzo eri'za vahe mani'naze. <sup>20</sup> Na'ankure zamagrama ama mopafi havi avu'avaza atre'za, Ranti Taguvazi Ne'ma Jisas Kraisima ke'za antahiza hu'nesaza zama, ete atre'za koma mani'naza havi avu'avapima ufresu'za, ese'ma mani'naza havi avu'avara agatere'za, havizantfa hu'za maniga-haze. <sup>21</sup> Na'ankure fatgo avu'avamofo kama ke'za antahizama osu'neza, ruotge kasegema rutragazasina knarezantfa hisine. <sup>22</sup> Nanknaza zamagrit-era fore'ma hu'neana, knare antahizamofo tamage kemo'a anage hu'ne, **Kramo'a ete eno amu'ma atitreneeana eme nenenego, afumo'a sese huno agruma hu'neana, ete atreno ome hapa negrie hu'ne.**

### 3

#### *Ramo'ma esania zamofo nanek*

<sup>1</sup> Navesi neramanta rone'nimota, ama'i anante avo kreneramuankita tamage antahi'zana eneritma, tamagera okanisazegu tamazeri hanaveti ke neramasamue. <sup>2</sup> Anumzamofo ruotge kasnampa vahe'mo'zama hu'naza ke'mo'a, avufa'a fore hugahie. Ranti Taguvazi Ne'mo aposol vahepi huvazino tamasami'nia kasegea tamagera okaniho. <sup>3</sup> Hu'neanangi tamagrama ketma antahitama hanazana, vagama reknafina, tamage kema huhaviza hu

vahe'mo'za, tamage kemofona huhaviza nehu'za, zamagra'a havi zmaguz-magesa nevaririza,<sup>4</sup> anage hugahaze, Egahue huno Rantimimo'ma huvempama hu'neana, omeanki inazupa egahie? hu'za hugahaze. Korapa'ma mani'naza kva vahe'mo'za frizageno, ese agafa huno maka'zama troma hu'neazamo'a, zahera osuno anankante me'neaza huno me'ne.<sup>5</sup> Korapara Anumzamo'a ke nehigeno mona fore nehigeno, tinke me'nefinti mopa eri fore hu'neazamofo kea zamage'nekanize.<sup>6</sup> Anantera ama mopafima me'nea zantamina, tusi'a tinu ahe fanane hu'ne.<sup>7</sup> Hianagi ama mopane monane henkama refko'ma hanianknarera Agra tevenuti kre fanane hugahue, huno kea huntegeno me'ne. Hagi Anumzamofo avu'ava'ma nosaza vahe'enena zamahe fanane hugahie.

<sup>8</sup> Hianagi navesi neramontoa ronenimota amazana tamagera okaniho, Ramofontera mago zage ferumo'a 1tauseni'a zagekfugna higeno, 1tauseni'a zagekfumo'a magoke zage ferukna hu'ne.<sup>9</sup> Ramo'a huvempama hu'nea kerera, mago'a vahe'mo'zama nentahizaza huno akoheno eri'zana e'norie. Hagi akoheno kavega anteno mani'neno, mago'a vahe'mo'za fanane osnaze huno mani'ne. Hianagi maka vahe'mo'za zamagu'a rukrehe hanazegu zamavega anteno mani'ne.

#### *Monane mopane fanane hania naneke*

<sup>10</sup> Rantimo'ma esianknamo'a kumzafa vahe'mo'za ontasmi'za neazankna hanigeno, monafima me'neazamo'a ra ageru neruno fanane hanigeno, tusi'a amuhonentake tevemo maka'zama ama mopafi me'neazana tefanane hugahie.

<sup>11</sup> E'inahu kante ana makazamo vagaregahianki, tamagra inankna hutma manigahze. Mani ruotge nehuta, Anumzamofo fatgo avu'avaza nehutma, mani'enkeno anazama fore hino.<sup>12</sup> Ananknama esie hanutma eri'za ener-inkeno, ame huno eno. Anankna zupa tevemo mona te fanane nehanigeno, maka'zana te maramra huno, te mekitrere hugahie.<sup>13</sup> Hianagi Anumzamo'a ko huvempa huranteno kasefa monane mopane tro hanugen, fatgo avu'avazamoke megahie hu'ne. E'i anazama fore hanigu avega ante'none.

<sup>14</sup> E'ina hu'negu ronenimota, tamagra anazama fore'ma hanigura avega ante'nazanki, tamagrattmia tamazeri agru hutma Anumzanena tamarimpa frune nemanita, hazenkezana omnena, keaga huramante'zana omnena, ananknagura avega anteta maniho.<sup>15</sup> Anumzamo'ma akoheno tavega anteno mani'neazankura tamagera okaniho. Na'ankure Agra maka vahe zmahokeno zmagu vazinakure, nerafu Poli'enena ama anazankura Anumzamo'ma knare antahintahima aminereti kretamine.<sup>16</sup> Ama anazanku'ma huno Polima maka avoma kre'nea avomofoma tagrama antahiamma hu'zamo'a amuho hu'ne. Mago'amo'za ana kemofo rempi hu'za ontahi'za, manifatgo nosaza vahe'mo'za, ana nanekea ru agu'agesa rukrehe hu'za neramasamize. Zamagra anahukna hu'za mago'a avontafepi kenena erirukrehe nehu'za, zamagra'a kanazana zamavufare erigonefize.<sup>17</sup> Hagi ronenimote, e'inahu'zana fore hugahie hu'na ko tamasami'noe! E'ina hanigeta havi vahe'mofo zamavu'zmava'zamo tamavareno havi kante vuuzankura kva hu'netma, traka hu'zankura oti hanavetiho.<sup>18</sup> Hianagi Ranti Taguvazi Ne' Jisasi Kraisi asunkuzane, Agri antahintahi zampi hageta ra hiho. Menine henkanena, Agra'a hihamu masa'afi ra agia erivava hugahie. Tamage.

# 1 Jon Jonima Nampa 1 Avonkre'nea Naneke

## *Anumzamofo mofavre'gna huta manisuna naneke*

<sup>1</sup> Ama Kea ese agafare korapa me'nea ke, nentahita tavunu negeta, konazana tazanu avako nehuta, asimu eri Kegu nehune. <sup>2</sup> Ana asimu'mo eama higeta tagra negeta, huama huta mevava asimura, Nefa ene me'nea tagrite eama hu'neazanku neramasmune. <sup>3</sup> Keta antahita hu'nonazanku, tagra tamagri enena neramasmunankita, tamagra tagri'ene emeri mago hutma manisageta, tamage huta Nefane, Nemofo Jisas Kraisi'enena tragoteta manigahune. <sup>4</sup> Tagra ama naneke negronankino, ama anazamo musezantia avitesiegu nehune.

## *Anumzana masa mani'negu, tagra masare vano hanuna naneke*

<sup>5</sup> Menina Knare Musenke Agripinti antahi'nona ke neramasmune, Anumzana masa mani'neankino, Agripina hanizana magore huno omanetfa hu'ne. <sup>6</sup> Tagrama huta Agrane vano nehune huta nehuta, hanizampima vano hanunana tagra havige nehuta, tamage kemofona amage nontone. <sup>7</sup> Hu'neanagi tagrama masare'ma vano huta, Agrama masare mani'nea kna'ma nehuta, tagrama trogoteta manisunkeno'a, Anumzamofo Nemofo Jisasi koromo mika kefozantia sese hunerante. <sup>8</sup> Tagrama huta kumi osu'none hanuta, tagra'a reravatga hanunkeno, tamage ke'mo'a tagri tagu'afina omanegahie. <sup>9</sup> Hianagi tagrama kumitima huama hanunkeno'a, Agra tamage huno fatgo hu'neankino, kumitia atreranteno maka fatgo osu avu'avapintira sese hurantegahie. <sup>10</sup> Tagrama huta kumi osu'none hanuta, Anumzamofona azeri havige ne' kna nehunkeno, ke'amo'a tagu'afina nomane.

## 2

## *Kraisi'a amu'no nere hu'nea naneke*

<sup>1</sup> Osi mofavre'nimota kumi osnazegu ama avona kre'neramue. Hi-anagi mago vahe'mo'ma kumi'ma haniana, tagrira amu'no netia Nerafa'enae mani'ne, ana nera fatgo ne' Jisas Kraisi'e. <sup>2</sup> Agra'a kumitimofona nona huno apaserante'n, tagri kumike sese huorante'neanki, maka mopafi vahe kumi'ene sese huzmantane'n.

## *Anumzamofo kasege amage' antesuna naneke*

<sup>3</sup> Agri kasege amage' antesuna naneke. Agri vahe'mani'none huta keta antahita hugahune. <sup>4</sup> Aza'o huno Anumzamofona antahi'na ke'na hu'noe nehuno, kasege'a amage ontimo'a, havige vahe mani'neankino, e'inahu vahepina tamage kemo'a agu'afina omanegahie. <sup>5</sup> Hianagi aza'o Agri kema amage antesimofona, tamage e'i ana vahepina Anumzamofo avesi'zamo fatgo huno megahie. E'inama hanigeta tagra antahita keta nehuta, Agripi manigahune. <sup>6</sup> Mago'mo'ma Anumzane mani'noe hanimo'a, Jisasi'ma vano hu'nea kna huno vano hugahie.

## *Kahefa tavumro kna huno tante'nea naneke*

<sup>7</sup> Rone'nimota kasefa kasege krenoramuaniki, korapa'ma antahi'naza kasege neramasamue. Ana naneke pusante'ma antahi'naze. (Jon 13:34)

<sup>8</sup> Mago kazigama antahisazana, kasefa kasege kreneramue, tamage huno Jisasimpine tamagripinena megahie. Na'ankure hanimo'a hago enevigeno, tamage tavi'mo'a remsa hu'ne. <sup>9</sup> Mago'mo'ma masare mani'noe nehuno, Jisasinte amentinti nehia nefuma ha'ma rentesuno'a, hanizampi mani'ne. <sup>10</sup> Mago'mo'ma amentinti nehia nefunku avesinentemo'a, masare mani'neankino mago'zamo'a azeri traka osugahie. <sup>11</sup> Mago'mo'ma amentinti nehia nefunku antahi haviza huntesuno'a, hanizampi mani'neno, hanizampi kana nevuno, agra iga nevie ontahi'ne. Na'ankure hanizamo'a avuraga erisu hu'ne.

<sup>12</sup> Osi mofavrenimota ama avoma kre neramuana, Anumzamo'a Jisasi agifi kumitimima apaseramante'negu kreneramue. Na'ankure Agri Agire kumitimia apaseramante'ne. <sup>13</sup> Nagra ama avona, tafahemota kre neramuue, ko'ma ese agafare mani'nea nera, ko keta antahita hu'naze. Ama avona kasefa vahe'motma kre neramuue, ko Satana agatere'naze. <sup>14</sup> Nagra ama avona mofavre nagamotarega kre neramuue, tamagra ko Nefana keta antahita hu'naze. Ra vahe'motarega ama avona kre neramuue, ko'ma ese agafare'ma mani'nea Nera ko keta antahita hu'naze. Kahefa vahe'motarega ama avona kre neramuue, tamagra ko hanavetizageno, Anumzamofo kemo'a tamagu'afina hanavetino megetma Satana agatere'naze.

<sup>15</sup> Ama mopafi avu'ava zanku'ene, mopafi zanku tamesionteho. Mago vahe'mo'ma ama mopagu'ma avesintesuno'a, Nerafa avesi'zamo'a agripina omane'ne. <sup>16</sup> Na'ankure maka mopafi me'neazana, avufamofo avesi'zane, kenunu hu'zane, agraguuke antahi'zanena ama mopafizane. Nerafapintira nome-e, hianagi ama mopafinti fore hu'ne. <sup>17</sup> Ama mopane, maka'a avesi'zamo'a vagaregahie. Hianagi iza'o Anumzamofo avesi'ma amage'antesimo'a, manivava hugahie.

### *Havige anti Kraisinku kva hanaza naneke*

<sup>18</sup> Mofavre nagamote, hago vagare knafi one, ko'ma Kraisima huhaviza hunte havige anti Kraisi fore hugahie higetma antahi'naze. Menina Kraisima huhaviza hunte vhahera havige enti Kraisi rama'a hago efore hu'naze. E'i anazama keta antahita nehuta, vagare knafi neone huta hugahune. <sup>19</sup> Zamagra tagripinti tatre'za vu'naze, hianagi zamagra tagri naga tfana omani'naze. Na'ankure zamagrama tagri naga'ma mani'naresina, zamagra tagrane manizasine. Hu'neanagi zamagra atre'za tagripinti vu'naza zamo'a, taveri hiana, maka'mo'za tagri nagara omani'naze. <sup>20</sup> Hianagi anage hu'na nehue, Ruotage'ma Hu'nemo, Anumzamo tamagrira huhampri ramantegeta, maka'motma ko antahi'naze. <sup>21</sup> Tamage ke ontahi'naze hu'na avona kre noramue, hianagi tamagra ko antahi'nazankino, ana tamage kefina havigea omane'ne. <sup>22</sup> Iza havige vhahera mani'ne? Hianagi Jisasinku Kraisi'a omani'ne huno hufrikismo'a, agra havige anti kraisi nemanino, Nefane Nemofone amefi huntenimo'a, Kraisi ha' vahe mani'ne. <sup>23</sup> Iza'o Nemofoma onke'noe huno hufrikismo'a, Nefana ovare'ne. Aza'o nemofonku huama hanimo'a, Nefana avare'ne. <sup>24</sup> Hagi tamagra, ko'ma ese'ma antahi'naza tamage kea atrenkeno tamagripina meno, tamagra ko'ma antahinaza mono kemo tamagripi me'nenigeta, anahu kna huta Nemofonte'ene Nefampina manigahaze. <sup>25</sup> Agra'ama huvempa kema hurante'neana, mani'vava asimu erigahaze huno hurante'ne.

<sup>26</sup> Ama ana zanku'ma kre neramuana, reramataga huku'ma nehaza vahoku hu'na kre neramue. <sup>27</sup> Hagi menina tamagriku huno, huhampri ramante'neaza Avamura Agripinti eri'nazageno tamagu'afi mani'neanki mago vahe'mo'a huramagesa hu'zankura ontahigahaze. Hu'neanagi Agri Avamu'mo maka'zana rempi huramaghiankino havi kea osu tamage hugahie. Tamasmi'nea kante antetma Agripi manigahaze.

### *Anumzamofo mofavre naga'mofo naneke*

<sup>28</sup> Hagi menina osi mofavre naganimote, Kraisimpi mani'enkeno, Agrama efore'ma hanigetma oti hanavenetita, ete esigetma tamagazegura huta korera osugahaze. <sup>29</sup> Tamagrama ketma antahita Kraisima hanazama fatgoma Agrama hu'nenigetma, tamagranena ko'ma antahi'nazane, iza'o hakare vahepinti'ma fatgo zamavu'zmava hanamokizmia nezmafa manigahie.

## 3

### *Anumzamofo mofavregna huta manisuna naneke*

<sup>1</sup> Kesunana Nerafa'ma rimpama hagerafiramino avesi'zama tantenea zana Anumzamofo mofavre hurante'nne. Ana hu'negu tagrikura Anumzamofo mofavre hu'za hugahaze. Tamage! Ama ana agafare ama mopafi vahe'mo'za antahiorami'naze. Na'ankure zamagra ke'za antahi'za Agrira osu'naze. <sup>2</sup> Ronenimote, menina tagra Anumzamofo mofavre mani'none, henkama maninuna nomani'zana eforera osu'nne. Tagra antahita keta hu'none, inanknarero Agrama eama'ma hanigeta, tagra, Agrikna hugahune. Na'ankure tagra negeta Agra e'inahu Nere huta hugahune. <sup>3</sup> Ana hu'neankino maka vahe'mo'za zamavuma kete'za mani'ne'za zamentintima nehaza vahe'mo'za, zamagrazmi zamazeri agru nehu'za, Jisasi'ma mani'neaza hu'za nemanize.

<sup>4</sup> Maka kumi'ma nehaza vahe'mo'za, kasege runetagraze, hankino kumi'mo'a kasege rutagre'zane. <sup>5</sup> Hanki tamagra antahi'naze, Jisas Kraisi'a efore'ma hu'neana kumi eri atrenaku e'neakino, Agripina kumira omane'nne. <sup>6</sup> Maka vahe'mo'za Agripima nemaniza vahe'mo'za, kumira nosaze. Kumi'ma nehaza vahe'mo'za, Agrira ke'za antahi'za nosaze. <sup>7</sup> Osi mofavre naga'mote, atreneno mago'a vahe'mo'za reramatga osiho, fatgo avu'ava nehaza vahe'mo'za fatgo vahe'mani'ne'za, Jisasi'ma mani'neakna hu'za fatgo hu'za nemani'ze. <sup>8</sup> Mago'mo'ma kumi avu'ava himo'a, Sata vahe nemanie. Na'ankure Sata'a ese agafare kumi hu'negure. Ama ana agafare Anumzamofo mofavremo, eama huno Sata erizana eri haviza hu'naku mopafi efore hu'ne. <sup>9</sup> Maka vahe'mo'za Anumzamofo mofavre nagapima efore hu'za mani'naza vahe'mo'za kumira nosaze. Na'ankure Anumzamofo avu'ava zamagripi me'neanki'za, kumira mago'enena osugahaze. Na'ankure ko Anumzamofo mofavre mani'naze. <sup>10</sup> Ama ana tamavu tmava'mo eriama huno Anumzamofo mofavregi, Sata mofavregi huno eama hanigetma kegahaze. Maka vahe'mo'za fatgo avu'ava nosu'za, amentinti nehia nefunku avesi nontamo'za, Anumzamofo mofavre omani'naze.

### *Avesi'zamofo agafa Anumza mani'negu, rumokizmigu ovesinte avesinte hanuna naneke*

<sup>11</sup> E'ina hu'negu rumokizmigu ovesinte avesinte hanunana ama'i knare musen (gutnius) kea ese agafare ko antahi'naze. <sup>12</sup> Kenima hu'neankna

osuta, havi ne'mofo avu'ava erino Ebolina avareno ome ahe fri'nea knara osanune. Na'a higeno ahe fri'ne? Na'ankure avu'ava'mo'a haviza hu'negure. Hianagi negna'a fatgo avu'ava hu'nea zanteku huno ahe'ne. <sup>13</sup> E'ina hu'negu nena fugatane nasara hetma ama mopafi vahe'mo'za ha'ma reramante-sageta antria osiho. <sup>14</sup> Tagra antahita keta hu'none, fri'zampintira atreta tasimu eri kaziga mani'none. Na'ankure amentintima nehia nera funa avesin entonkure. Iza'o rumokizamigu'ma avesi nontesimo'a, fri vahekna huno mani'ne. <sup>15</sup> Hakaremo'za zamentinti nagaku'ma (kristen) zamarimpa kna hunt esamo'za, vahe ahe fri vahe mani'naze. Tamagra antahi'naze, vahe'ma ahe fri vahepina mani'vava asimura omane'ne. <sup>16</sup> Menina tagrama vahe'ma avesinte'zanku'ma antahiamma'ma hanunana, Jisasi Agra'a asimura tagriteku huno atre'ne. Ana hu'negu tagranena zamentinti tafuhe'ina tasimu atreta zamaza hugahune. <sup>17</sup> Hianagi iza'o ama mopafi afu feno ante'nesimo, amentinti nehia nefu'ma atupama hu'enigeno negeno asuragi anteno azama osanigeno'a, nankna huno Anumzamofo avesi'zamo'a, e'inahu vahepina megahie? <sup>18</sup> Osi mofavre naganimote kereti'ene tagitetik-era tavesi negantone huta osanune. Hianagi tavutvapi erinteta tamage huta zamesi zamantesune.

### *Anumzamofo avure koro osu manisuna naneke*

<sup>19</sup> Ana tavutva'ma hanuta, tamage tavutava nehune huta tagra keta antahita nehuta, tagutagesamo'ma keagama hunerantena, fru huta Agri avufina manigahune. <sup>20</sup> Hu'neanagi tagri taguamo, keaga hurante'niana Anumzamo'a tagri tagutagesa agatereno ra hu'neankino, maka'zana Agra antahino keno hu'ne. <sup>21</sup> Ronenimote, tagu tagesamo keaga huorante-sigeta, tagra Anumzamofo avufina knare'zantfa huta hanavetita nemanune. <sup>22</sup> Na'anku'ma antahigona'zana tagra e'nerune, na'ankure Agri kasegea amage nenteta, Agrama muse hiaza nehunkeno'e. <sup>23</sup> Menina ama'i Agri kasege, tagra Agri Nemofo Jisas Kraisi agifi tamentinti nehuta, Agrama hiho huno fami'nea kasegere amage antfeta ovesinte avesinte hugahune. <sup>24</sup> Mago vahe'mo'ma Anumzamofo kasegema antahino avari-rimo'a Anumzane manigeno, Anumzamo'a agrane nemanie. Anumzamo Avamu'ma tam'i'nea Avamuteti antahita, Anumzamo'a tagrane mani'ne huta hugahune.

## 4

### *Avamutamimofo refko huta kesuna naneke*

<sup>1</sup> Ronenimote, vahe'mo'za maka avamuteti nehune hanaza zankura tamentinti osiho. Hianagi Anumzamofontegati ne-efi avame anteta keho. Na'ankure rama'a havige kasnampa vahera, ama mopafina vuno eno hu'ne. <sup>2</sup> Amanahu kantegati Anumzamofo avamure hunka kenka eri fore hugahane. Ina vahe'mo huama huno Jisasi'a, Kraisi kino mopare avufa erino e'ne hania avamura Anumzamofontegati e'ne. <sup>3</sup> Hianagi vahe'mo'ma huama huno, Jisasi'a Anumzamofontegatira ome'ne hania avamura, e'i Anumzamofontegatira ome'neanki, Kraisi huvaviza hunte havige enti Kraisi, ko'ma egahie higetma antahi'nazana, menina ko ama mopafi fore huno mani'ne. <sup>4</sup> Mofavre naganimote Anumzamofo mofavre mani'naze. Mani'nageno tamagu'afima mani'nea Avamu'mo'a, mopafima mani'nea havi avamura agatere'ne. <sup>5</sup> Zamagra ama mopafi vahere, ana hu'nagu kema hazana mopafi zankuke nehazageno, mopafi vahe'mo'za ke'zamia

nentahize. <sup>6</sup> Tagra Anumzamofo nagare, Anumzamofoma keno antahino hu'nemo'a, ketia nentahie. Hianagi Anumzamofo naga'ma omani'namo'za ketia nontahize. E'inama higeta keta antahita huta tamage Avamuki, havi avamuki huta nehune.

### *Ovesinte avesinte hanuna zamofo naneke*

<sup>7</sup> Ronenimote, rumokizmigura ovesinte avesinte hanune, na'ankure avesinte'zana Anumzamofompinti e'ne. Maka vahe'mo'za ovesinte avesintema nehaza vahera, Anumzamo'a nezmafa'za nehige'za, Anumzamofona ke'za antah'i'za nehaze. <sup>8</sup> Vaheku'ma avesima onte vahe'mo'a, Anumzamofona keno antahino osu'ne. Na'ankure Anumzamo'a avesizamofo agafa'e. <sup>9</sup> Anumzamo'ma avesi rante'neazama eri taveri hu'neana amane, ana kankamuntetire, Agripinti tasimura erisunegu magoke ante'nea mofavre'a ama mopafina huntogeno e'ne. <sup>10</sup> Ama ana avesi'zana, tamage tagra Anumzamofona avesi ontenonkeno, Agra'a tagrira avesi ranteno, magoke ante'nea Nemofona huntogeno, kumitimofona nona huno apaserante'ne. <sup>11</sup> Ronenimote, Anumzamo'ma tagri'ma avesi rante'nenigeta, anazanke huta rumokizmia tagra ovesinte avesinte hugahune. <sup>12</sup> Mago vahe'mo'e huno Anumzamofona onke'ne, tagrama rumokizmigu ovesinte avesintema hanunkeno'a, Anumzamo'a tagrane manina, Agri avesizamo'a fatgo huno tagrane megahie.

<sup>13</sup> E'ina'ma hanuta tagra antahita keta huta Anumzamo'ene mani'none hanunkeno, Agra tagrane nemanie. Na'ankure Agra'a Avamura tamigeno tagrane mani'ne. <sup>14</sup> Tagra negeta huama huta Nefa'a, Nemofo huntogeno ama mopafi vahe'mota tahoke heno taza hunaku e'ne. <sup>15</sup> Hagi mago'a vahe'mo'ma Jisasinku Anumzamofo mofavre huno'ma huama'ma hanimofona, Anumzamo'a Agripi manigeno, anamo'a Anumzamofompi mani'ne. <sup>16</sup> Tagra keta antahita nehuta, tamentintia Anumzamo'ma avesima rante'nea'zankura nehune. Anumzamo'a avesi'zamofo agafa'e. Hanki iz'a'o avesizama'afima manisimo'a, Anumzamofompi maninigeno, Anumzamo'a agripi manigahie. <sup>17</sup> Ana avesizamo'ma fatgo huno tagranema mesigeta, refko'ma hania knarerera, hanavetita otigahune. Na'ankure ama mopafi mani'nonanagi, Jisasikna huta fatgo huta mani'nonkeno'e. <sup>18</sup> Avesinte zampina koro'ma hu'zana omane'ne, hianagi tamage avesi'zamo'a, koroma hu'zana erinetre. Na'ankure koro'ma haniana refko'ma hurante'zankure. Knama eri'zanku'ma koro'ma hanimofona, avesinte'zana fatgo huno agripina omane'ne. <sup>19</sup> Tagripima ovesinte avesinte avu'ava'ma me'neana, na'ankure Agra esera avesirante'ne. <sup>20</sup> Hagi mago'mo huno, Anumzamofo navesinentoe nehuno, amentintima nehia nefuma avesi ontesuno'a, havige vahe mani'ne. Na'ankure mago'mo amentinti nehia nefuma negemofama avesi ontesuno'a, Anumzana nonkemofona avesi ontegahie. <sup>21</sup> Jisasi'a amanage huno kasegea tami'ne, Anumzamofoma avesintesimo'a, amentinti nehia nefuna ana huno avesintegahie.

## 5

### *Mopafi zama agateresuna naneke*

<sup>1</sup> Iza'o Jisasinku Kraisi'e huno amentinti hanimo'a, Anumzamofo mofavre. Iza'o Nefanku'ma avesintesimo'a, Mofavre'a avesintegahie <sup>2</sup> Anama huta ovesinte avesinte hanuta antahita keta nehuta, Anumzamofoma mofavre zagagura zamesi nezmantone hugahune. Anama hanuta Anumzamofoma

avesinenteta, kasege'a amage antegahune. <sup>3</sup> Na'ankure ama'i Anumzamofo avesi'zane, tagra amage nentonkeno, ana kasege'amo'a kna noramie. <sup>4</sup> Na'ankure maka vahe'mo'za Anumzamo'ma nezmafa'zama himo'za, ama mopafi hanavea agateneraze. Ama mopafi hanavema agatemanerea hanavea, e'i tamentintie. <sup>5</sup> Iza ama mopafi hanave agatenere? Jisasinku'ma Anumzamofo mofavre hazamo'za agateneraze.

### *Jisas avu'avazamofo naneke*

<sup>6</sup> Jisas Kraisi'a mopafi e'neana, mono tine, keka zafare kora tagi atrenaku e'nene, tintekera ome'nene. Hianagi mono tine kora tagi atrenaku e'ne huno, Avamu'mo huama nehie. Na'ankure Avamu'mo'a tamage nehie. <sup>7</sup> Na'ankure 3'amo'za ana zankura huama nehaze, <sup>8</sup> Avamu'mo'ene, tima frezamo'eene, korama'amo enena mago zamarimpa hu'za huama nehaze. <sup>9</sup> Tagrama mopafi vahe'mofo avu'avazanku'ma tamage nehanuta, Anumzamofo avu'avazamo'a rankrefa hu'ne. Na'ankure ama ana avu'ava zana Anumzamofo avu'avakino, Nemofo Jisasimpi Anumzamo'a huama hu'ne. <sup>10</sup> Iza'o Anumzamofo nemofonte'ma amentinti nehimofona Agri kemo'a anamofompi me'nene, Anumzamofonte'ma amentinti osimo'a, Anumzamofonkura havige nere nehie. Na'ankure Anumzamo'ma Nemofonku'ma huama hu'nea kegura amentintia nosie. <sup>11</sup> Hagi amazamo huama hu'ne, Anumzamo'a manivava asimura tami'ne, ana asimura Nemofo Jisas Kraisimpi me'nene. <sup>12</sup> Hagi iza'o Nemofo Jisas Kraisima avar'e'nenimo, ana manivava asimura eri'ne. Iza'o Anumzamofo mofavrema ovare'e'nenimo'a, ana asimura e'ori'ne.

### *Manivava nomani'za erizamofonku huhampri'nea naneke*

<sup>13</sup> Nagrama ama nanekema negroana, izago Anumzamofo Nemofo agire'ma kamentinti nehamoka, ko ana manivava asimura eri'nane. <sup>14</sup> Ana hu'negu tagra hanavetita Anumzamofo avure vuta, Agri avesi'zamofo amage nenteta, nazankuro antahigonkeno'a, agra amane ketia nentahie. <sup>15</sup> Hagi tagrama na'ankuro antahigonaza neramigeta antahita keta nehuta, tagra antahi'none mago'a zanku'ma antahigonazana Agripintira e'nerune. <sup>16</sup> Mago'mo'ma kesigeno, amentinti nehia nefu'ma ahe friga kumi'ma hanigeno'a, Anumzamofo antahigenigeno Anumzamo'a friga kumi'ma hu'nenimofo asimura amino, mago'a kumimo'a ahe frigahie. Nagra e'inahu kumikura nunamuna hino hu'na nosue. <sup>17</sup> Maka fatgo osu avu'avara kumire, hianagi mago'a kumira vahera ahe ofri kumi me'nene.

<sup>18</sup> Tagra antahi'none, Anumzamofo mofavre mani'naza naga'mo'za kumira nosaze, hianagi Anumzamo'ma mofavre'a nagara kva kri nezmanteankino, Sata'a eme zamavakora osugahie.

<sup>19</sup> Tagra antahi'none, Anumzamofo mofavre naga mani'nonkeno, ama mopamo'a havige ne' Sata hanavefi me'nene.

<sup>20</sup> Tagra antahita keta nehune, Jisas Kraisi, Anumzamofo Nemofo eno tamage Anumzana taveri hu'ne. Na'ankure antahi'none, Jisasimpi e'neazamo tamage Anumzanehu antahintahia tamigeta, tamage Anumzane nehuta, tagra Agripina nemanita, Nemofo Jisas Kraisimpina nemanune. Tamage Anumzane nehuta manivava asimure huta nehune. <sup>21</sup> Mofavre naganimota, havi anumzamo tamavazu hu'zanku kva hiho.

## 2 Jon

### Jonima Anante (2) Avonkre'nea Naneke

<sup>1</sup> Nagra mono kva ne'mo'na, huhampri kante'nea a'mokane, mofavrezaga ka'ane nagrama tamage kemofoma navesima nentomo'na, (nagrakerompage, anahukna hu'za tamage kema antahi'namo'zane tavesi neramantone). <sup>2</sup> Na'ankure tamage kemo tagu'afi me'neankino, maka kna tagrane mevava hugahie.

<sup>3</sup> Asunku'zane asuragirante'zane, Nafati Anumzamofo rimpam fruzamo'ene, Nemofo Jisas Kraisintegatira tamagene, avesinte'zamo'a tagrane megahie. <sup>4</sup> Nagra tusi muse hue, na'ankure nagrama ke'na erifore'ma huana, mago'a mofavre' nagakamo'za tamage kemo'ma hu'nea kante amage ante fatgo hu'za nemani'za, Nerafa'ma kema humarante'nea kante ante'za avariri fatgo hu'naze.

#### *Havige mono rempi huzami vaheku kva hanuna naneke*

<sup>5</sup> Hu'neanagi menina kantahinegoe, a'moka aru kasegea kre'nogamue, hianagi rumokizimigu ovesinte avesinte hiho huno ese agafare'ma higeta antahi'nona kasege. <sup>6</sup> Hanki menina avesinte'zane, Agri kasegemo'ma hu'nea kante anteta tagra kana vanune. Ama ana kasegea kagrama ese agafare ko antahi nanankinka, kagra ana kante vu fatgo hugahane.

<sup>7</sup> Na'ankure havige hu'za zamagrarega zamavarente vahera rama'a kokankoka vano nehzankino, Jisasi'a tazahu ne' Kraisikino mopafi avufa erino e'ne huno huama osanimo'a, ana nera havige ne' agrarega zamaretre ne'kino, havige kraisi'e! <sup>8</sup> E'i ana hu'negu kava huo, tagrama maraguatita eri'zama e'nerunazana, atre'zankura kava hanune, hianagi eri'zama e'neruna zantera, ana mikro mizama'a erifatgo hanune. <sup>9</sup> Iza'o ugoteno nevuno, Kraisi'ma rempima hu'nea kefima omanisimo'a, Anumzamofona awareonte'ne. Iza'o Jisasi'ma rempima hu'nea kefima manisimo'a, Nefane Nemofonena avarente'ne. <sup>10</sup> Mago'a vahe'mo'ma kagrite eno, rempima hu'nea tamage kema erino omesimofona, avarenka nonka'afina antege, mago'a huso'e hunka agazone kea huonto. <sup>11</sup> Na'ankure izao ana vahe'ma huso'e huntesimo'a, havi avu'ava zama'amofo aza huno ana avu'avaza hugahie.

#### *Vagare naneke*

<sup>12</sup> Hakare naneke me'neana nonkre'na tamagra ne magopi umani'ne'na naneke nehamanenkeno tarimpa so'e hugahie. <sup>13</sup> Anumzamo huhampri'nea negasaro mofavre naga'mo'za, ferure huramantaze.

## 3 Jon Joni'a Nampa 3 Avonkre'nea Naneke

### *Eriama kene, musenke*

<sup>1</sup> Nagra Joni'na mono kva ne'mo'na (elda), Gaiusiga knare nena fuga tamage kemo foma navesima nente'na, navesima negantoa ne'moka krenegamue.

<sup>2</sup> Ronenimoke, nagra nunamu nehuankino hakare zamo'a knare hugan tena, kria e'orinka kagu'amo'ma hu'nea kna hunka knare hugahane. <sup>3</sup> Na'ankure mago'a nena fu'za e'za tamage kemo'ma kagu'afi me'nea kema huama hazage'na, tamage kemo'ma hu'nea kante mani fatgo hu'nana zankura, nagra tusi muse hu'noe. <sup>4</sup> Antahuama mofavre naganimo'za tamage kemo fompi mani'naze hazazankura, nagra mago'a knama nehua musena, agatere'na tusi muse hu'noe.

### *Gaiusi azeri hanaveti'nea naneke*

<sup>5</sup> Knare rone'nimoke, maka'zama kafuheinte'ene, ru vahete'enema huzmant'e'na zamo'a, knare kavukva'ma hunka vu'nanazana eri ama hu'ne.

<sup>6</sup> Kagrama zamesima zamantenka, knare kavukva'ma huma zamante'nana zankura, mono vahe zamure eme huama hu'za tasami'naze. Kama vu-naku'ma hanagenka, Anumzamofo knare avu'ava zampi, so'e kavukva huzmanteg'e'za viho. <sup>7</sup> Na'ankure ana vahe'mo'za, Jisasi Agi'a eri'za vu'za e'za nehu'za, zamagra mago zmazahu'zana mono ontahi vahe pintira e'origahaze. <sup>8</sup> Ana hu'negu, tagra e'inahu vahera zamaza hugahune, ana'ma hanuta tamage kemo fo eri'zana magoka tragoteta erigahune.

### *Diotrefisi'a hazanke nere*

<sup>9</sup> Nagra mono naga'motmarella mago avona ko kre rami'noanagi, Diotrefisi'a zamagritera agra avesite ugagota huzmantenaku nehu nokino, tagira tageno antahino osu'ne. <sup>10</sup> E'i ana hu'negu, nagrama esu'na, agrama ne-hia avu'avamofo kea eme antahinege'na, havigema huma rante'nea kea antahigahue! E'i ana kege osu'ne anki, nera fu'zama azageno'a agra muse huno ozmare'ne. Hianagi knare kema nehu'za zamazeri so'e huku'ma haza vahera, mono nompintira zamahenatitre'ne!

<sup>11</sup> Ronenimote havi zamu'zma'ma neha zamokizmi zamavu'zmavara e'oriho. Hianagi knare'ma hu'nenia tamutma hiho. Mago'mo'ma knare avu'ava'ma himo'a Anumzamofo vahe mani'ne, hagi mago'mo'ma havi avu'ava'ma nehim'o'a, Anumzamofona onke'ne.

### *Demitriasi'a hentofa avu'ava hu'nea naneke*

<sup>12</sup> Demitriasisinkura rama'a vahe'mo'za huama hunentageno, tamage kemo'enena huama hunte'ne. Tagranena anazanke huta huama nehu nenko, kagra antahinka kenka hu'nane, tagrama hunankemo'a tamage me'ne.

### *Vagare naneke*

<sup>13</sup> Hakare avoma kreramisua nanekea me'neanagi, avo zotareti'ma krerami'zankura nagesa nontahue. <sup>14</sup> Hianagi mensintfana tamagenakure hu'na nagesa nentahue, magopi mani'neta keaga hanunegu nehue.

<sup>15</sup> Ramofo rimp a fruzamo'a tamagrane mesie. Amafima nemaniza ro-nenimo'za musenke huramantaze. Magoke magoke'mokizmi zamagire musenkea huramantaze.

## Jut Juti Kre'nea Avontafere

<sup>1</sup> Juti'na, Jemisi nefu'na Jisas Kraisi kazokzo eri'za e'nerumo'na, Anumza Nafatimofo avesipine, Jisas Kraisi kavafima kehigeta mani'nazamotarega, ama avona kre'nerame. <sup>2</sup> Anumzamofo asunkuzanki, arimpa fru'zanki, avesi'zanena mago'anе erisageno, aviteno tamagripina mesie.

### *Havige rempima huzami vaheku kva hanaza naneke*

<sup>3</sup> Navesi neramantoa nafuheta, Anumzamo'ma tagu'mavazinia zankura huama nehu'na avoma kreramizankura antahintahinimo'a tusiza huno onetige'na retro nehue. Hianagi menina mago'a zanku avona kreramisue hu'na huana, Knare Musenkema, Anumzamo'ma Agri'a ruotge hu'nea vahе'rema magoke zupa zami'neazamo maka kna mevava nehina, tamage nanekere tamentintima nehunazanku, tamentinti otretma hanavetita azeri akona hanazegu tamasmiza nehue. <sup>4</sup> Na'ankure mago'a mono ontahi vahе'mo'za onkazageno, ko rerakaure'za amuno tamiffi efre'naze. Ana vahе'mo'za amanage hugahaze, Anumzamo'a kumira atre'nezamantea zanku amane havi avu'avara hugahune hu'za nehaze. E'inahukna vahе'mo'za inankna henka hugahaze, korapa refako huzamantene. Na'ankure Kva netimofo Ranti Jisas Kraisia ha'rentegahaze.

<sup>5</sup> Ko amana zana maka antahinazanki, huramagesahu kema tamasamisuana, Ramo'a Israeli vhahera miko Isipitura zamagu'vazino zamavareno atirami'neanagi, henka ana Israeli vahе'mo'za, Agrite'ma zamentintima osazageno'a zamahe fanane hu'ne. <sup>6</sup> Hagi Anumzamoma ankero vaheku'ma huno, e'i avamente maniho huzmantege'za ana kemofo agorga'a omanizageno, katuofe kina rezamanteno hanizampi kina huzamantege'za mani'neza, henkama ranknarema refakoma hania knama esigu avega ante'za mani'naze. <sup>7</sup> Hagi tamagera okaniho, Sodomu rankumate'ma, Gomora rankumate'ma, ana tava'onte'ma me'nea kumatamimpima monko avu'avazama hu antahintahimo avitege'za, omane'neankna monko'za hu'naze. E'i ana kumatamina tevereti zamahe fanane hu'neankino, e'i ana hukna hu'za kefo'zama nehaza vhahera, henka'a tevava tevefi mani'ne'za zamata erigahaze. (Jen-Agf 19.)

<sup>8</sup> E'i anhukna kante, ana vahе'mo'za zamagra avanama kazazamo zamav-ufaga zamazeri pehenage nehige'za, kavama krizmante'nemofo agorga'a nomaniza, masazama'ane nemaniza ankero vahetamina huhaviza hunezmantaze. <sup>9</sup> Hu'neanagi Maikoli ugota ankero ne'mo, Moses avufama erinaku keha'ma Sata'enema nereno'a, huhavizana huonte'ne. Hianagi Ramo'a kagrira kea kasuno kea hugantesie huno Satana asami'ne. <sup>10</sup> Hianagi zamagra antahi'za ke'zama osu'naza zankura huhaviza hunente'za, afu kra antahintahine mani'ne'za, e'inama hazazamo zamagra'a zamazeri haviza nehaze. <sup>11</sup> Zamagra'a kva hihol! Zamagritera havizantfa fore hugahianki, na'ankure Keni'ma kefo avu'ava'ma huno nagna'amofoma ahe fri'neanka nehaze. Hagi Balamu'ma hu'neaza hu'za hakare'a zama hanazana zagore hugahaze. Kora'ma mago rimpia osuno ha'ma rezmantte avu'avaza nehu'za, fanane hu'neaza hu'za fanane hugahaze. (Jen-Agf 4:1-8, Nam-Ham 16, 22) <sup>12</sup> Hagi ana vahе'mo'za Ramofo avesizanku'ma muse huta ne'zama retro'ma hanafina zamagraguke nentahi'za zamagazegura nosu'za tamagripima efresu'za, hagerimpi havemo me'neno ventema ahe haviza hiankna

nehu'za, hampomo eri atru huteno ko'ma orienkna hu'za rama'a huvempa hugahazanagi, anama huvempa hu'nesazazana osugahaze. Zamagra raga'a tagi knafi raga reonte zafagna hu'naze. Hanki zafamofo rafu'na'aga tasagi hutreankna hanige'za magoke zupage ofrigosazanki, tare zupa friga-haze. <sup>13</sup> Zamagra hagerimo kranto kranto nehuno, agrenke hiankna hu'za, zmagazehu zamavu'zmava huhakarehu vahe mani'naze. Zamagra hanafimo magokete mani so'e osu vuno eno hiankna vahe mani'nazankino, haninentake kumapi manivava hanazegu Anumzamo'a retro huzmante'ne.

<sup>14</sup> Hagi Inoku'a, Adamunteti maniza e'naza vahepintira 7nire ehanati'nea naga nofipinti ne'mo ama ana vahekura kasanampa kea hunteno anage hu'ne, Ramo'a hampriga osu'nea ruotge hu'namo'zane ne-eanki keho. <sup>15</sup> Agra ama mopafi vahera refkoma hunezmantero, Anumzamofo avu'ava'ma nosu'za havi zamavu'zmava nehu'za, Anumzamofo eri'zama e'noriza, Agri'ma huhavizama huntesaza vahera, hanavetino kea huzmantegahie. <sup>16</sup> Zamagra zamarimpa knage nehu'za, nazinke nehantage'za, kefozama hunaku'ma hanazaza hugahaze. Zamagra rankege nehu'za ru'mozama zamigima zamizankuke hu vahe manigahaze.

### *Manifatgo hu'za manisaza zanku ke hu'nea zamofo naneke*

<sup>17</sup> Hu'neanagi navesima neramantoa nena fugata tamagera okaniho, Rantimofo Jisasi Kraisi aposol naga'mo'za tamasimiza, <sup>18</sup> henka vagare knafina hunte'za kiza zokago ke hunte vahe fore nehu'za Anumzamofoma zamage'na hunemi'za, kefo zamavuzamava hanaza vahe manigahaze. <sup>19</sup> E'ina vahe'mo'za amu'no tamifina atane'zana avare'neramize. Zamagra ama mopafi vahe'mofo antahintahi nevaririze. Na'ankure Anumzamofo Avamumo'a' zamagripina omanine. <sup>20</sup> Hianagi navesima neramantomota tamagra ruotge hu'nea tamentintifina hagetma mrenerita, Ruotge Avamumo'a tamaza nehina nunamuna hiho. <sup>21</sup> Hagi Anumzamofo avesizampi nemanita, Rantimo Jisas Kraisi asunku zampima manivava manizama tamikema hu'nea zankura tamavresra osu avega anteho.

<sup>22</sup> Zamentintimo hanavema otinesia vahera, zmasunku huzmanteta zamaza hiho. <sup>23</sup> Hagi mago'amo'za tevefi ko mani'nazanki, ame huta tevefin-tira zamaza huta hanageho. Mago'amokizmia tamasunku huzmanteta zamaza hugahazanagi, zamagri kefo'zamoma tamazeri havizama huzankura, tamagra kva hiho.

### *Huvagare naneke*

<sup>24</sup> Hagi menina Anumzamo'a tanafama hu'zankura kegava huneraman-teno, Agra tavaresigeta Agri'a masafi kumitami omanena, tusi'a musezampi manigahaze. <sup>25</sup> Ramo, Jisas Kraisimpi tagu'vazino taza hu'nea Nera, Agrake Anumzamo mani'ne, Tamage. Masazanki, ra agigi, hanavegi, kavatia Agrake korapara mani'neankino menina mani'neno, henka manivava huno vu-gahie. Tamage.

## Revalesen-Hufo Hu'ne Joni Kre'nea Avontafere

### *Jisasi'a fraki'nea ke Joninte erinte'ama hu'nea naneke*

<sup>1</sup> Anumzamo'a eri'za vahe'araminte kofta huno fore'ma haniazana, oku'a me'nea ke Jisasi'a ankeru ne'a amino huntogeno, eri'za ne'are Joninte emeri ama hu'ne. <sup>2</sup> Joni'a Anumzamofonkea huama nehuno, Jisasi agenkene maka'zama ke'nea zamofo kea huama hu'ne. <sup>3</sup> Ama kasnampa kema hamprinaza vahe'ene, antahi'naza vahe'ene, ana kema amage'ma antenaza vahe'mo'za asomu erigahaze. Na'ankure anazama fore'ma hania knamo'a, hago kofta nehie.

### *Seveni'a mono nonte mani'naza vahe'mokizmi krezami'nea naneke*

<sup>4</sup> Nagra Joni'na, ama naneke Esia kaziga 7ni'a mono nonte naga'motarega avona kreneramue. Hagi korapa mani'neno, menima mani'neankino, henkama mani'nia Anumzamo, Agra'a asuragi'zane, rimpia fruzana tamina, fru hutma manigahaze. Hagi 7ni'a Avamutamima Anumzamofo kini tramofo avugama nemanizamo'za, zamagranena zamasu ragiramante'za, tamazeri fru hanigeta, fru hutma nemanisageno, <sup>5</sup> Jisas Kraisi fatgo huno, Anumzamofo ke'a huama nehim, Agra'a fri'naza vahepintira ugagota huno ese oti'nemo, maka mopafi vahe'mokizmi kini vahe kegava huzmante'nea ne'manin'eankino, Agra kumitifima mani'nonkeno, avesiran-tento korama'reti mizaseno katufe tantenegu agi'a erisaga hanune. <sup>6</sup> Agra'a vahe tazeri retro huneranteno, agra tavreno Anumzamofo eri'za erisuna pristi vahe retro hurante'neankino, Agrake'za maka kna ra agi'a e'nerino hanavea erino, manivava hugahie. Tamage. <sup>7</sup> **Keho, Agra hampompi ne-eankino,** (Dan 7:13) maka vahe'mo'za negesageno, keka zafare'ma kru-gruma renaza vahe'mozanena negesageno, maka ama mopafi vahe'mo'za zavi krafa hugahaze. Hanki e'ina hu'zana fore hugahie. Tamage. <sup>8</sup> **Nagrani'a ese agafahu manina (Alfa), vagare mani'noe (Omega). Korapa mani'nena, menina mani'noankina, henka egahue** huno hanavententake Ra Anumzamo'a hu'ne.

### *Joni'a ava'nagna zampi Jisasina ke'nea naneke*

<sup>9</sup> Nagra Joni'na neramafu'na Anumzamofo kumaku'ma knama enerita Jisasinte'ma kazigazi huta magoka nevumo'na, navre'za ti amunompi Patmosie nehaza mopa, me'nere ome nante'naze. Na'ankure Anumzamofo kerek'u'ne, Jisasi agenkema huama'ma nehua zanku anara hu'naze. <sup>10</sup> Hanki Ramofo knazupa, nagra avamupi mani'ne'na nentahugen, namefigatira mago agerumo'a ra ufereaza huno anage hu'ne, <sup>11</sup> **Amama kana zantamina avontafe krenka, 7ni'a kumate me'nea mono nontaminte atregeno vino.** Efesasima, Smenama, Pegamamima, Taitariama, Sadisima, Fildifiama, Ledosiamma hunka krezamio.

<sup>12</sup> Anagema huno hige'na, rukrehe hu'na kema hia vahe kenaku'ma huana, 7ni'a tavi rekru hunte'naza azota golire tro hunte'nea me'negena ke'noe. <sup>13</sup> Ana lamu tavimofo amu'nompina, Vahe'mofo Mofavregna ne'mo, efeke za'za kukena antaninegeno agia ruhananegeno, golire tro hunte'naza nofinu afumpinti rutahera higeno, asoparega kreramino vu'nege'na ke'noe. <sup>14</sup> Hagi Agri asenimo'ene azokamo'a efenentake huno efeke hampokna

higeno, avurgamo'a teve anefakna hu'negena ke'noe. <sup>15</sup> Ana Ne'mofo agamo'a brasima tevefima krefizo hazageno, masanentake nehiankna ne-higeno, agerumo'a rama'a timofo agasasa kemo'ma hiaza hu'ne. <sup>16</sup> Ana ne'mo'a azantmaga 7ni'a hanafi azeri'negeno, tare kaziga asane kazimo agipintira atiramino egeno, Agri avugosamo'a zagemo remsa hiankna huno hanavenentake huno remsa hu'ne.

<sup>17</sup> Nagrama ana ne'ma nege'na, agafi traka hu'na fri vahekna hugeno, tamaga azanu nagofetu nenteno anage hu'ne, *Korer a kagra osuo, Negrani'a ese agafahu mani'na, vagarera mani'noe.* <sup>18</sup> Kasefa hu'na mani'nomo'na ko frite'na, oti'na mani'noanki, keho, henka'a ofri'na manivava hugahue. Fri'zane, fri vahe'mofo kumate kinofira Nagra azeri'noe. <sup>19</sup> E'ina hu'negu maka'zama menima kana zane, menima me'neazane, henkama fore'ma haniazanena avontafepi krento. <sup>20</sup> Kagrama 7ni'a hanafi'ma tamaga nazampima me'negenka negenka, golire tavima rekrhu hunte azotama ke'nanana oku'a agu'agesamo'a amanahu hu'ne, 7ni'a ofuna, 7ni'a mono no kumate ankeru vahetami ke'nane, tavi'ma rekrhu hunte azotama, golire tro huntenegenka 7ni'a ke'nanana, 7ni'a mono nontami me'negenka ke'nane huno nasami'ne.

## 2

### *Efesasi kumate nemaniza mono naga'mofo krezami'nea naneke*

<sup>1</sup> Efesasi kumate mono naga'mokizmi, ankeromofona amanage hunka kremio, Nagra 7ni'a hanafira nazantamaga azenerina, 7ni'a tavi'ma rekrhu hunte golire azotaramimofo amu'nomp i vano nehumo'na, nehuanki antahiho.

<sup>2</sup> Hanavetinka eri'zama e'nerinka, maragu'zama netinka, maka knazama e'nerinka, kzigazima hunka nevunka, havi zamavu'zmava nehaza vahe'enema tragotenka omaninka, havige hu'za aposol vahe mani'none nehaza vahera refko huzmantenka negenka, havige nehaze hunkama nehanazana, Nagra ke'na antahi'na hu'noe. <sup>3</sup> Nagri nagireku'ma hu'za knama kamizana, kagra akohenka mani'enka, ana knazana enerinka, kavesragura osunka kzigazi hunka knazana eri'nane. <sup>4</sup> Hianagi kagrira anage hu'na hugantegahue! Kagrama koma navesi nanteneankna hunka menina, navesi nonantane. <sup>5</sup> E'ina hu'negu kagrama trakama hu'nante kagesa nentahinka, ese'ma kagu'a rukrehe nehunka hu'nana kavukva hunka, kagu'a rukrehe huo. Anama osananke'na, e'na tavika'ama me'neretira emeri atregahue. <sup>6</sup> Hu'neanagi kagra amanahu nehane, Nikolasi avu'ava'ma nevaririza vahe'mofo zamavu'zmavara kavesra hu'zmante'nane. Negrana navesra hunezmantua zamavu'zmava osu'nane. <sup>7</sup> Izano agesama me'nenimo'a, Avamumo'ma mono nagate'ma huamama nehia kea antahino, iza'o ha'ma ageteresimofona, Nagra atresugen, monafinka Anumzamofo hozafi me'nea asimu eri zafa raga negahie.

### *Smena kumate nemaniza mono naga'mofo krezami'nea naneke*

<sup>8</sup> Hagi Smena kumate mani'naza mono naga'mokizmi ankeromofona amanage hunka krezamio, Nagra'a ese agafahu mani'na, vagare mani'nena, frite'na otina mani'nomo'na, anage nehue,

<sup>9</sup> Nama'agna kazeri haviza nehazageno, kamunte omne'neana Nagra antahi'noe. Hianagi kagra tusia feno vahe mani'nane, zamagrama Jiu vahe mani'none nehazanagi, zamagrama Jiu vahera omani'haze. Hianagi

zamagra Sata naga mani'naze. <sup>10</sup> Hanki ko, kagrama knazampi ufresnana knamo'a kofta nehianki korera osuo. Sata'a hanige'za mago'a nagatamia zamavare'za kina hunezmante'za, reramahe'za kesageta 10ni'a gnamofo agu'afi knazana erigahazanki, kazigazi huta nevuta ome frisagena, Nagra asimu erino mani asimura tamamigahue. <sup>11</sup> Izano agesama me'nenigeno ne-tahisimo'a, Avamu'mo'ma mono nagate'ma huama'ma nehia kea antahise hino, Iza'o ha'ma agateresimofona, nampa 2 fri'zamo'a azeri havizana osugahie.

*Pegamam kumate nemaniza mono nagamofo kreza'mi'nea naneke*

<sup>12</sup> Hagi Pegamam kumate nemaniza mono naga'mokizmi ankeromofona amanage hunka kreza'mio, tarega kaziga asanenea kazima eri'nea ne'mo'a amanage nehie.

<sup>13</sup> Nagra antahi'noe, Sata'ma kini tra anteno mani'nea kumate mani'enka, Nagri nagima azeri hanavemati'nanana, Sata'ma mani'nere'ma mani'nankeno, Nagri naneke huama nehia ne'ma, Antipasina tamagri amu'nompinti avare'za ahe'naze. Ana hazanagi tamagra Nagrite'ma tamamentintima hu'naza zana otretfa hu'naze. <sup>14</sup> Hianagi Nagra osia zanku kea kagrikura huzahue, na'ankure mago'amo'za Baramu'ma rempima Barakima humino, Israeli vahe'ma kumi hihogu zamazeri trakama hukema huno, havi anumzante Kresramana vunte'naza ne'za nene'za, monko avu'avazama hihogu'ma hu'neazana kagra antahi'nane. <sup>15</sup> Anahukna hu'za Nikolasi'ma rempima hurami'nea kea amu'nontamifina mago'amo'za azeri'naze. <sup>16</sup> E'na hu'nagu tamagu'a rukrehehiho, anama osanage'na ame hu'na e'na, nagipima asane kazima me'nea kazinu, eme ha' huzmantegahue. <sup>17</sup> Izano agesama me'nenimo'a Avamumoma mono nagamofo nesamia naneke antahise hino. Ha'ma agateresimofona, framaki'nea mana ne'za mago'a nemina, magora efefe have nemina, agi'a ana havere krentenugeno, rumo'a ana agia ontahigahianki, ana havema erisimoke, ana agia antahigahie.

*Taiataria kumate nemaniza mono naga'mofo kreza'mi'nea naneke*

<sup>18</sup> Taiataira kumate nemaniza mono naga'mokizmi ankeromofona amanage hunka kreza'mio, Anumzamofo mofavremofona avurgamo'a teve anefakna nehigeno, agamo'a pehe huno bronsi havegna huno marave marave hu'nemo'a anage hu'ne.

<sup>19</sup> Nagra kavukvama hanana antahi'na ke'na hu'noe. Kagra kavesinenantenka, vahe'mokizmia kavesi nezmanterka, kamentinti nehunka, eri'zama e'erinka knazama ne-egenka kazigazi nehunka, ese knama kamentintima hu'nana zana, menima hana kamentintimo'a agatereno so'e zantfa hu'ne.

<sup>20</sup> Hianagi Nagra anage hu'na hanaveti'na keaga hugantegahue. Jesebelina kasnampa a' mani'noe nehia ara atrankeno, kagrane mani'neno, kazokazo eri'za vaheni'a rempi hunezamino, zamavreno havi kante nevige'za, monko avu'ava zana nehu'za, havi anumzante kresramna vunte'nea ne'zana ne'naze. <sup>21</sup> Nagra mago'a knaza ami'na, monko avu'ava'ma nehiazana agu'a rukrehe hanie huanagi, agra agu'a rukrehera osu'ne. <sup>22</sup> Keho, Nagra kri ami'nugeno, kri tafete masegahie. Agranema monko avu'avazama nehaza vahe'mo'za, anama nehaza zanku'ma zamagu'ama rukrehema osnazana, rama'a knazampi ana a'ene ufregahaze. <sup>23</sup> Nagra ana a'mofoma amage'ma nentaza vahera zamahe fri'nena, maka mono vahe'mo'za ke'za antahi'zama hanazana, maka vahe'mofo antahi'zane, zamagu'zmagesa nege hu'za nehanage'na, magoke magokemozama zamavu'zmavama hanare,

mizana zamatere hugahue.<sup>24</sup> Hanki mago'a Taiataria mani'nazamota Jesebelima rempi hurami'nea kea amagera nontetma, rempima hurami'nea kea azenoritma, Satana oku'a antahintahia nontahitma, zamagrama hu'naza zana osu'nazanki'na, Nagra mago'a knazana ontamigahue.<sup>25</sup> Ana hu'negu nazano menima azeri'nana zana azeri hanavetinege'na, Nagra a'neno.<sup>26</sup> Iza'o ha'ma agatenereno, Nagri navu'nava huno vagare knare'ma vanimofona, anamofona Nagra hanavea amisugeno, rama'a vahe kegava krizmantegahie.<sup>27</sup> Ana nehuno agra kini vahe'mo'ma e'neria aeni azotareti, mopa kavoramima rufuzafu'peankna huno vahetamina kegava hugahie. Nagrama Nenfantegatima vahe'ma kegava hu hanavema, eri'noankna hanave erigahie.<sup>28</sup> Ana nehanige'na Nagra nanterama remsa nehia ofuna amigahue.<sup>29</sup> Iza'o agesama me'nenigeno nentahisimo'a, Avamu'mo'ma mono nagate'ma huamama nehiana antahise hino.

### 3

#### *Sadisi kumate nemaniza mono nagamofo kreza mi'nea naneke*

<sup>1</sup> Sadisi kumate mono naga'mokizmi ankeromofona amanage hunka kremio, Nagra Anumzamofo 7ni'a Avamura nazampina eri'nena, 7ni'a ofuna eri'nomo'na, ke'ma hanuana antahiho. Kagrama nehana kavukvara antahi'na ke'na hu'noe. Maka vahe'mo'za kagra kasefa hunka mani'nane hu'za nehazanagi, kagra ko fri'nane.<sup>2</sup> Hanki otinka, kagripima fri vaharegeno'ma osiazama me'neazamo'ma fri'zama nehiana, azeri hanavetio. Na'ankure kagri'ma kagoana, Nagri Anumzamofo avurera, fatgo kavukvara nosane.<sup>3</sup> Ana hu'negu ko'ma rempi hugamizagenka, nentahinka eri'nana kea azeri kona nehunka, kagu'a rukrehuo. E'ina hu'negu, kagrama otinka, kagu'ama rukrehe osnanke'na, omegahie hunka kagesa ontahi'nana knafi, kumazafa vahe'mo'za neazankna hu'na egahue.<sup>4</sup> Hianagi osi'a naga Sadisi kumate mani'namo'za, havi zamavuzmava osu'za kukena zamia eri pehana osu'nazanki'za, zamagra efeke kukena nehu'za, Nagrane kana vughahaze. Na'ankure zamagra Nagrane vuga hu'naze.<sup>5</sup> Iza'o ha'ma agteresimo'a zamagrikna huno efeke za'za kukena nehanige'na, asimuma erino mani'avontafepintira, agi'a reohaninanegahue. Nenfane, ankero vahe'amofo zmavurera agi'a huama hugahue.<sup>6</sup> Iza'o agesama me'nenigeno nentahisimo'a, Avamu'mo'ma mono nagate'ma huamama nehia kea, antahise hino.

#### *Fildelfia kumate nemaniza mono nagamofo kreza mi'nea naneke*

<sup>7</sup> Fildelfia kumate nemaniza mono naga'mokizmi ankeromofona amanage hunka kremio, Agra ruotge huno, tamage Ne'mo, Deviti kinofi eri'neankino, kafama anagisiana, magomo'a eri onkisigeno, ergisiana mago'mo'a eri anagigara osu'nemo anage nehie.

<sup>8</sup> Nagra kavukvaka'a kage'na antahi'na hu'noe, ko, kavuga kahana anaginte'noankino, mago vahe'mo'a erionkigahie. Na'ankure kagra osi'a hanaveka'a me'negenka, naneken'i'a amagenentenka, nagi'a eri frara oki'nane.<sup>9</sup> Ko, Sata mono naga'mo'za hu'za, Jiu vahe mani'none nehu'za havige nehaza vahera, Nagra zamatusesuge'za e'za, tamagri tamagafi eme zamarenare'za, tamage Nagra tamavesineramantoe hu'za, zamagra ke'za antahi'za hugahaze.<sup>10</sup> Na'ankure kagra kazigazi hunka, Nagri kea amage ante'nane. Ana hu'nanku ama mopafi miko vahe'mo'zama rehezampima ufresaza knafina, katresugenka rehezampina kagra uofregahane.<sup>11</sup> Nagra

ame hu'na egahuanki, ko'ma eri'nana zana azeri kona huo, ana'ma osnanke'za rumo'za kini fetorika'a erigahaze. <sup>12</sup> Iza'o ha'ma azeri agateresimofona, Anumzanimofona ra mono nompi, no azeri hanaveti anumza zafa tro hunente'na, agrira atrenugenno atinoramina, Anumzanimofona agine, kasefa Jerusalemi ku'ma monafinti, Anumzanimofontega atreno eraminia kuma'mofa agi'a krenente'na, Nagra kasefa nagingena krentegahue. <sup>13</sup> Iza'o agesama me'nenigeno'ma nentahisimo'a, Avamu'mo'ma mono nagate'ma huama'ma nehiankea antahise hino.

### *Laodisia kumate nemaniza mono nagamofo kreza'mi'nea naneke*

<sup>14</sup> Laodisia kumate nemaniza mono naga'mokizmi ankeromofona amanage hunka kremio, Nagra tamage ne'mo'na, maka kea avariri fatgo nehu'na, fatgo hu'na maka kea huama nehumo'na, Nagra maka zama Anumzamo'ma, ese agafereti'ma tro'ma hu'nea zamofo agafa'a mani'nomo'na, ama naneke atrogeno kagritega e-e.

<sup>15</sup> Mika tamavutmava hunazana ke'na antahina hu'noe. Tamagra amuho osutma, zasira osutma hunazanagi, Nagri'ma nave'ma nesiana, amuhoma hanamotma, amuho hinkeno, zasima hanamota, zasi hiho. <sup>16</sup> Amuhone zasi'enena osutma, amunonte mani'nagu, Nagra nagipintira amu'ati tamatregahue. <sup>17</sup> Na'ankure kagra anage hunka nehane, rama'aza ante'nena, tusi'a fenone vahe mani'noe hunka nehunka, mago'zankura upara osu'noe hunka nehananagi, kagrama havizantfama hunka, kasunku hugantega kante mani'enka, kamunte omaneno, kavu asu higenka, kavufa kavapa mani'nanana kagra nonkane. <sup>18</sup> Nagrama kasamisuana, tevefima kreno eri agruma hu'nea golia Nagripinti mizasetenka, feno vahera nemaninka, efeke za'za kukena miza senka kukena nehugen, kagaze kavufamo'a amatera nosina, avure fre masave Nagripinti miza senka, fretenka kavua ke so'e huo. <sup>19</sup> Nagrama navesizmantoa naga'mofona hanavetina, zamazeri fatgo nehu'na, zamavumarora nentoe. É'ina hu'negu knare tamavu'tmavama hu'zanku nentahitma, tamagu'a rukrehe huta fatgo huta maniho. <sup>20</sup> Keho, Nagra kafante oti'ne'na vagre vagre nehue. Iza'o Nagri nageru antahino, kafama anagisimofona, Nagra efre'na agrane ne'zana nesugeno, agra Nagrama negahie. <sup>21</sup> Iza'o ha'ma azeri agateresimofona, Nenfa trate'ma ha'ma azeri agatere'na mani'noaza huno, ha'ma azeri agateresimofona, atresugeno Nagri trate magoka manigahu'e. <sup>22</sup> Iza'o agesama me'nenigeno'ma nentahisimo'a, Avamu'mo'ma mono nagate'ma huama'ma nehiankea antahise hino.

## 4

### *Monafi me'nea zantami Joni'a ke'nea naneke*

<sup>1</sup> Ama anazama evutege'na, nagra kogeno, mona kafamo'a anagino ruhagro higeno, ese ageru'ma antahi'noa agerumo ufenkrafama hiazza nehige'na antahugen, Nagrikura anage huno hu'ne, **Amare ege'na, amazama evanigeno, henkama fore'ma hania zana kaveri haneno.** <sup>2</sup> Anage nehige'na ame hu'na nagra avamupi mani'ne'na koana, mona kumapina kini tra me'negen, mago'mo ana kini tratera mani'nege'na ke'noe. <sup>3</sup> Ana ne'mofa masa'amo'a rumsa huno jasapa havegna nehuno, koranentike huno konilienie hu'za nehaza havegna hu'ne. Mago furagena'mo kini tramofona rugagintegeno, zafa asinage huno emerelie nehaza havegna

huno remsa hu'ne. <sup>4</sup> Ana kini tramofona 24'a kini tratami manegorave huntogeno, ana 24'a kini tratera ugota kva vahe'mo'za mani'né'za, efeke zaza kukena hu'za, golire kini fetori zamasenirera antani'naze. <sup>5</sup> Ana tra'ma me'nefintira trage huno kopsina e'nerino, tusi'a monage nehigeno, kini tramofo avuga 7ni'a tavi tevemo'a hagana hagana huno te'ne. E'i ana 7ni'a tevema hagana hagana huno nereana, Anumzamofa 7ni'a Avamutami me'ne. <sup>6</sup> Hagi ana kini tra'mofo avuga, kapoteti tro huntageno masanentake huno rumarave nehiankna hageri megeno, ana kini tramofo amu'nompine rugaruga, 4'a asimu anteno mani'nea zagaramina, zamavugane zamefika zamavurgamo'a avite'nea zagamo'za mani korrave hu'nazage'na zamage'noe. <sup>7</sup> Ese'ma mani'nea zagamo'a laionigna higeno, anante zagamo'a kaogna higeno, nampa 3zagamofona vahe avugosagna higeno, nampa 4zagamofona hareno vano nehia tumpamofo avugosagna hu'nea zaga ke'noe. <sup>8</sup> Hanki anama kasefa hu'za mani'naza 4'a zagamofona, mago magomofona 6si'a agekona huzmantegeno, zamagekonamofo fenka kizigane, zamavugane zamefi'enena zamavurgamo'a hakare huno avitenege'za, ontagane'za zagine hanine anage nehaze, **Ruo-tage hu'nane ruotage hunane, Ra Anumzamoka Ruotgera hu'nane, Hanavenentake hunka, Ko mani'enka, menina mani'nanankinka, henka egahane** hu'za nehaze. <sup>9</sup> Hanki anantema zamasimu ante'za mani'naza zagamo'za, kini tratera mani'nea Ne'mofo husga hunte'za, ra agi nem'i'za, susu hunte'za Agra manivava hugahie hu'za agia erisaga hvava nehazageno, <sup>10</sup> ana 24'a ugota kva vahe'mo'za, kini trate'ma mani'nea Ne'mofo avuga zmavugati zmarena omere'za umase'za, manivava nehia Nera mono hunente'za kini fetorira, ana kini tra'mofo avuga zafi netre'za, anage nehaze, <sup>11</sup> Kagrake knare hunka mareri'nane, tagri Ra maninka, tagri Anumza mani'nane. Kagrake rankagia e'nerinka, kagia erisaga nehageno, hanavekamo'a marerinie. Na'ankure Kagri kavesite maka zana efore huno me'ne hu'za hu'naze.

## 5

### *Avontafe'mofo naneke*

<sup>1</sup> Hanki kini trate mani'nea Ne'mofo tamaga azampine agu'afine amefiga'anena, avo krente'nea avontafera, 7ni'a fukinu rekamrente'nege'na ke'noe. <sup>2</sup> Ana hige'na kogeno hanavenentake ankeromo ranke huno anage hu'ne, Iza knareru hu'n'e'imo, ama fuki'ma rekamrente'nea avontafera erignopeno erivaka regara hu'ne? <sup>3</sup> Hanki monafi mani'nesimo'o, mopafi mani'nesimo'o, mopa agu'afi mani'nesimo'a, mago'mo'e huno ama ana avontafera erivaka orege, agu'afina erivakarenegara osu'ne. <sup>4</sup> Ana hige'na krafage hu'na zavira ate'noe. Na'ankure mago'mo'e huno ana avontafera erivaka orege, agu'afina kegara osu'nege'ne. <sup>5</sup> Ana 24'a (elda) kva vahepinti mago'mo anage huno nasami'ne, Zavira otenga ko! Juda naga'nofipinti Deviti negeho ha'ma agatere'nea Laionimo, Agra 7ni'a fukina eriganopega hu'neankino ana avontafera erivakarega hu'ne.

### *Sipisipi afu anenta Joni'a ke'nea naneke*

<sup>6</sup> Anante kogeno mago Sipisipi anentamo'a kini tramofone, 4'a kasefa hu'za zamasimu'ma ante'za mani'naza zagaramimofo amu'nompi oti'nege'za, 24'a elda kva vahe'mo'za regorave hunte'naze. Ana Sipisipi anentara korapama ahe'naza Sipisipi anenta kna hu'ne. Ana Sipisipi anentamofona 7ni'a pazine huntogeno, 7ni'a avurga hunte'neankino, e'i

ana avurgamo'a Anumzamofo 7ni'a avamutaminkino, maka kaziga mopafi huzmanteg'e'za nevaze. <sup>7</sup> Hagi Agra vuno trate'ma mani'nemofo tamaga azampintira avontafera omeri'ne. <sup>8</sup> Hagi ana Sipisipi afu anentamo'ma avontafe'ma omenerige'za, 4'a zamasimu eri'za mani'naza zagaraminki, 24'a (elda) kva vahe'mo'za, Sipisipi anentamofo agafi zamarenare'za magoke magoke'mo'za zavena (harp) eri'ne'za, zamente zamente mananentake'zama kre sramnavu'za mevite'nea golire zuompa eri'nazana, e'i anzana Anumzamofo naga'mofo nunamune. <sup>9</sup> Hagi zamagra kasefa zagine nehu'za anage hu'naze, Kagra avontafera erinka rekamerente'naza fukintamina eriganopega hu'nane. Na'ankure Kagrira kahe frizagenka koranka'anu, mika nofi nagapinti'ene, zamagerupinti'ene, vahepinti'ene, mopafi vahera mi'za sezmant'e'ne. <sup>10</sup> Kagraka'a kumaka'afi huhampri zmantanke'za, kinimofo pristi vahe trohu'za manizanki'za, zamagra ama mopafi vearya kegava hu'za manigahaze. <sup>11</sup> Ananterea nege'na nentahugeno, rama'a ankeru vahe'mo'za kini tra'mofona regagi'ne'za, kasefa hu'za mani'naza zagamo'zane, 24'a elda kva vahe'mo'zane, tusi'a hampriga osuga'a vahe'mo'za, <sup>12</sup> ranke hu'za anage hu'naze, Agri'ma ahazageno fri'nemo, hanavene so'e feno zane, knare antahi'zane, himamu hanavene, husga huno ra agia ami'zana Agrake erigahie. <sup>13</sup> Hanki maka'zama tro huzmanteg'e'za zamasimu ante'za monafine, mopamofo agu'afima mani'naza zagamo'zane, hagerimpi mani'naza zagamo'za, nentahuge'za anage hu'za, Kini trate'ma mani'nemo'ene Sipisipi anentamo'a asomu'ene ra agine, kegavamahu hanavemo'a, Zanagrite mevava hugahie hu'za hu'naze. <sup>14</sup> Kasefa hu'za mani'naza 4'a zagamo'za tamage hu'za huvava nehzageno, 24'a (elda) kva vahe'mo'za zamarenare'za mono huznante'naze.

## 6

### *Ese fuki avontafeteti eriganope'nea naneke*

<sup>1</sup> Anante nagra kogeno, Sipisipi anentamo 7ni'a fukinu rekamerente'nea avontafepinti, mago fuki eriganopegeno, 4'a kasefa hu'za mani'naza zagafinti mago'zmimo'a monage'mo'ma hiaza huno anage hu'ne, Eno! <sup>2</sup> Hige'na anante negogeno, efeke hosi afu'mofo agofetu'ma mani'nemo'a, ati eri'negeno kini fetorira amigeno, harafa vahe'mo ha' huno zamagtereno viankna huno vu'ne.

<sup>3</sup> Anante'ma Sipisipi anenta'mo nampa 2 fukima rekamerente'nea avontafera, eri kanopegeno, kasefa huno mani'nea zagafinti nampa 2 zagamo'a eno, hu'ne! <sup>4</sup> Ananterea mago koranke hosi atiramino egeno, hosi afumofo agofetu'ma mani'nemofona hanave amigeno, rimpa fruma erino mopafi mani'zana eritregeno, vahe'mo'za ohefri ahefri hanazegu, bainati kazina agrira ami'ne. (Mat 24:6-7.)

<sup>5</sup> Anante nampa 3 fukima rekamare'nea avontafe Agrama eri kanonepegeno, kasefa huno mani'nea nampa 3 zagamo'a anage hu'ne, Eno. Hige'na koana mago hanike hosi egeno, ana hosimofo agofetuma mani'nemofona maka'zama refko huno kna'ama ke'za sigeli azampina me'ne. <sup>6</sup> Hagi ananterea antahugeno monagemo'ma hiaza huno 4'a kasefa hu'za mani'naza zagaramimofo amu'nompintira anage hu'ne, Mago knamofo erizante miza eriankna huno mago osi witi ku erigeno, mago knamofo erizante miza eriankna huno, 3'a onesisi bali enerinka, masavene waininena eri haviza osunka atregeno me'no hu'ne.

<sup>7</sup> Anantero Sipisipi anentamo'a avontafe'ma nampa 4 fukima rukamare'nea eriganopegeno, kasefa huno mani'nea nampa 4 zagamo'a eno! hu'ne. <sup>8</sup> Hige'na anantero kogeno, kanifuge hosimofo agofetu'ma mani'nemofona agi'a, fri'zane huno me'ne. Higeno fri vahe kuma'mo'a amage avaririno ne-ejeno, vahe'ma zamahe fri hanave amigeno, 4'a kevu vahe'ma mani'nafintira, mago kevu vhahera bainati kazinu'ene, agama ate'zamo'ene, krimo'ene ama mopafi afi zagamo'zane, tusi zagamo'za zamahehana hanage'za frigahaze.

<sup>9</sup> Anantero Sipisipi anentamo'ma avontafera nampa 5 fukima rukamare'nea eri kanonepegeno, kre sramnavu ita agafafintira, Anumzamofo ke'ma nentahi'za amage'ma nentazageno, zamahage'za fri'namo'za, <sup>10</sup> ranke hu'za kezati'za, Ramoka Ruotge hunka tamage nehamoka, Kagra tagri koramofo nona'a, nazupa keaga huzmantenka mopafima mani'naza vhahera refko huzmantegahane? hu'naze. <sup>11</sup> Hagi efeke kukena anamokizmia hunezmanteno, akoheta osia knafina mani fru hunenkeno, mago'a Anumzamofo naga'ene neramafugizmia, tamagri'ma zamahe fri'neaza hu'za zamahe fri vagareteno huno hu'ne.

<sup>12</sup> Anante avontafete'ma nampa 6 fukima rekamarente'neana, Agra eri kanopege'nai kogeno, tusi'a iminkrefa mopafina erigeno, zagemo'a hinunke kukanagna higeno, ikamo'a korankna huno koranentike higeno, <sup>13</sup> monafi hanafitamimo'a, hanave zahomo fiki zafamofo eritagosu higeno afuore ragamo tagiramiaza huno, mopafi atafri ram'i'naze. <sup>14</sup> Hagi negogeno monamo'a sagane huno, harontafe regazarino neviankna huno nevigeno, maka agonamo'zane, ti amu'nompi me'nea mopamo'za kuma'zamia atre'za vu'naze. <sup>15</sup> Anantero ama mopafi kini vahe'mo'zane, marerisa vahe'mo'zane, harafa vahe'mo'zane, feno vahe'mo'zane, hanave vahe'mo'zane, maka kazokzo eri'za vahe'mo'zane, fru hu'za mani'naza vahe'mo'za, zamagra havegampine, agonafi me'nea havefi fraki'naze. <sup>16</sup> Ana nehu'za agonamofonku'ene havemofonkura anage hu'naze. Tagri tagofetu eraminka, kini trate'ma mani'nemofo avure'e'ne, Sipisipi anentamofo rimpa herante zampintira refiteranto. <sup>17</sup> Na'ankure Anumzamofone, Sipisipi anentamoke zanarimpama kumi vahe'ma aheznante'za refkoma ha'a rankna hago efore nehiangi, iza zanavurera otigara hu'ne? hu'za hu'naze.

## 7

### 144 *tauseni'a Israeli vahe'mo'za Anumzamo huhampri zamante'nea avame'za eri'naza nameke*

<sup>1</sup> Anama hutege'na kogeno, 4'a rugaraga asoparega ama mopamofona ankeri vahe'mo'za oti'ne'za, 4'a kaziga e'neria zahora zamazampi az-erinageno, mopafine hagerimpine, zafafinena zahora e'ori'ne. <sup>2</sup> Hagi anantero kogeno mago ankeromo'a zage hanati kazigati ehanatino, mani:vava Anumzamo hunagru huno nagrizane hu'nea avame'za, erineno mopane hagerine eri haviza hugahaze huzmante'nea 4'a ankeri vhahera ranke huno zamasami'ne. <sup>3</sup> Mopane hagerine, zafaraminena zamazeri haviza osu'eneketa, Anumzamofo kazokzo eri'za vahetamimofo kokovite avame'zana rekamare antezmantetaneno hu'ne. <sup>4</sup> Anantero antahugenno avame'za rekamare zmante'nea vahe'ma hamprineana 144 *tauseni'a mani'naze*. Ana vhahera maka Israeli mofavreramimofo naga nofipinti vahetami hampri'ne. <sup>5</sup> Juda nagapintira 12 *tauseni'a huhampri*,

avame'za rekamrezmanteno, Rubeni nagapintira 12 tauseni'a huhamprino, avame'za rekamare zamanteno, Gati nagapintira 12 tauseni'a huhamprino, avame'za rekamare zmanteno,<sup>6</sup> Asa nagapintira 12 tauseni'a huhamprino, avame'zana rekamarezmanteno, Naftali nagapintira 12 tauseni'a huhamprino, avame'zana rekamarezmanteno, Manase nagapintira 12 tauseni'a huhamprino, avame'za rekamarezmanteno<sup>7</sup> Simioni nagapintira 12 tauseni'a huhamprino, avame'zana rekamarezmanteno, Livae nagapintira 12 tauseni'a huhamprino, avame'za rekamarezmanteno, Isaka nagapintira 12 tauseni'a huhamprino, avame'zana rekamare zamanteno<sup>8</sup> Zebuluni nagapintira 12 tauseni'a huhamprino, avame'zana rekamarezmanteno, Josefe nagapintira 12 tauseni'a huhamprino, avame'zana rekamare zamanteno, Benzameni nagapintira 12 tauseni'a huhamprino, avame'zana rekamarez-mante'ne.

### *Tusi'a vea kevumo'za Anumzamofo mono hunte'naza naneke*

<sup>9</sup> Anazama hutege'na kogeno, tusi'a vahekrefa mago'mo'e huno ham-prigara osu'nea vahe'mo'za maka kumapinti'ene, naga nofipinti'ene, va-hepinti'ene, maka agerupinti'ene, Sipisipi Afu anentamofo tra'mofo avuga, efeke za'za kukena hu'ne'za, zamazampina tofe zafamofo ani'na hantagi'za eri'ne'za oti'naze.<sup>10</sup> Zamagra ranke hu'za anage hu'naze, Tagri Anumzama trate'ma mani'nemo'ene, Sipisipi anentamo'ene, tagu'vazine tahokehena'e hu'za hu'naze.<sup>11</sup> Mika manigagi'naza ankero vahe'mo'zane, ugagota kva vahe'mo'zane, 4'a kasefa hu'za mani'naza zagamo'za, kini tramofona manikanegi'za zmavugosaregati zamarenare'za umase'za, Anumzamofona mono hunte'za,<sup>12</sup> amanage hu'naze, tamage husgama hunte'zane, ra agine, knare antahi'zane, muse hunte'zane, antahisga hunte'zane, hihamune han-kavea Anumzamo eri vava hugahie tamage hu'za hu'naze!

<sup>13</sup> Hagi anante 24'a ugagota kva vahepinti mago'mo nantahigeno, Amama efeke zaza kukenama hu'nazana, zamagra iza'za mani'ne'za, igati zamagra e'naze? Hige'na,<sup>14</sup> nagra anage hu'na asami'noe, Ranimoka kagra antahi'nane hu'na hugeno, Agra anage huno nasami'ne, Ama'i zamagra tusi'a hazenkezampi ufretageno ha' vahe'mo'za nezamahazageno, za'za kuke-nazamia Sipisipi Anentamofo koranteti sese hugaru huzmantage'za efeke hu'namoze.<sup>15</sup> Na'ankure ama ana agafare, Anumzamofo kini tra avuga oti'ne'za hanine zagenena Agri ra mono nompi eri'zama'a erinentazank-in, trate'ma mani'nemo'a, Agra kegava huzmantegahie.<sup>16</sup> Zamagrira zmagamate'zane, tinku zmavesizane omnena, zage hara zamave'osina, amuhogura osugahaze.<sup>17</sup> Na'ankure tra'mofo amu'nompima mani'nea Sipisipi anentamo, kegava huzmanteno asimu erino mani tinkapuite vanigeno, Anumzamo'a maka zamavunura eri ho'mu huzmante vagaregahie huno hu'ne.

## 8

### *Sipisipi anentamo nampa 7ni fuki erikanope'nea naneke*

<sup>1</sup> Hanki anante Sipisipi anentamo'ma avontafeteti nampa 7ni fukima eri kanopegeno, monafina hafu'a auafi \*agasarasa eritagane'ne.<sup>2</sup> Ananteria Anumzamofo avuga 7ni'a ankero vahe oti'namokizmia 7ni'a ufe eri nezamizage'na ke'noe.<sup>3</sup> Ananteria mago ankeromo golire tro hunte'nea zuompa eri'neno kresramna vu itare eme otigeno, Anumzamofo kini tra'mofo

\* **8:1** hafu'a auafi tagerupina haf auama krezamo'a amuho hu'ne.

avuga golire tro hunte'naza kre sramnavu itare Anumzamofo nagamokizmi nunamune erinteno kresramna vanigu rama'a mananentake'zana ami'ne. <sup>4</sup> Hagi mananentake zamofo tevegumo'ene, Anumzamofo naga'mofo nunamumofo mna'amo'a, ankeromofo azampinti marerino Anumzamofo avure vu'ne. <sup>5</sup> Anantero ankeromo'a zuompa erino kre sramnavu itaretira, golire tro hunte'naza zuompafi tevea tagino eri aviteteno, matevuno mopafi atregeno, tusi'a monage nehigeno, kopsina e'nerigeno, imi eri'ne.

#### *Nampa 4 ankeromo ufere'nea naneke*

<sup>6</sup> Hanki anantero 7ni'a ankeromo'za 7ni'a ufe erine'za, ufe renaku retro hu'naze.

<sup>7</sup> Ese ankeromo uferegeno, komopa ko'ene korane tevea eri havia hu'neana, zamagra mopafi matevu'za atrazageno, tagufa kevufintira, mago kevu mopamo'a teveregeno, tagufa kevu zafafintira, mago kevu zafamo'za teverazageno, maka zafa sinage tra'zamo'za tevere'naze.

<sup>8</sup> Nampa 2 ankeromo ufe regeno, ra agona gnazamo'a teve neregeno hagerimpi mate vuno atregeno, tagufa hageri me'nefintira, mago hagerimo'a koranke higeno, <sup>9</sup> tagufa kevu hagerimpi zagrami mani'nafintira, mago kevumo'za frizageno, tagufa kevu venterami me'nefintira, mago kevu ventemo'za haviza hu'naze.

<sup>10</sup> Nampa 3 ankeromo'a uferegeno, ra hanafimo monafinti teve taginaku kasagasa hu'za taginefa hiankna tavimo remsa huno atafariramigeno, tagufa kevu tira me'nefinti mago kevu tirante'ene osi tinte'ene kampui tinte'ene takaure'ne. <sup>11</sup> Ana ofumofo agi'a Akahe'ne, hu'za hu'naze. Tagufa kevufinti, mago kevu timo'za akahazageno, rama'a vahe'mo'za ana tina nene'za fri'naze. Na'ankure ana timo'a akahunegeno'e.

<sup>12</sup> Nampa 4 ankeromo'a ufe regeno, zagemofona tagufa kevu refko higeno, ikamofona tagufa kevu refko higeno, tagufa kevu hanafitami me'nefintira, magoke magoke kevuzmia amasagigeno haninki'ne. Mago zage ferumofoma tagufa kevu masama me'nefintira, mago kevu masamo'a hani hu'ne. Hanimo'enena anazanke hu'ne. (Mat 24:29.)

<sup>13</sup> Anantero nege'na antahugen, mago tumpamo monamofo amu'nompi hareno enevuno, ranke huno anage hu'ne, Kva hiho, kva hiho, mopafima mani'naza vahe'mota hazenke ne-eanki kva hiho. Na'ankure 3'a ankerovo vahe'mo'za ufena ore'nazanki'za, kofa knafi ufena regahaze!

## 9

<sup>1</sup> Hagi anantero nampa 5fu ankeromo'a ufe regeno, monafinti hanafimo'a mopafi atafariramige'na kogeno, riga omne kerimofo kinofira ami'ne.

<sup>2</sup> Higeno agra riga omne keria anagigeno, tusi teve nerefinti atiramino eviankna huno, ana kerifintira teve tokimo'a evu'ne. Zagene zahomofona ana kerifinti teve tokimo refitegeno tusi hani hu'ne. <sup>3</sup> Anantero ana teve tokipinti kenutamimo'a atiramino ama mopafi evigeno, segintavemofo hanavema ama mopafima ami'neaza huno hanave zami'ne. <sup>4</sup> Hanki ana kenutamimofonkura anage huno zmasami'ne, Mopafima me'nea tra'zana eri havizana osuge, zafasinage huno me'nea tra'zana eri havizana osuge, zafa eri havizana osiho. Hianagi Anumzamo'ma hunagru hu'nea avame'zama kokovite'ma rukamare onte'nesia vahe'mokizmige zamazeri havizana hiho hu'ne. <sup>5</sup> Ana nehazageno anage huno huzmantene, vahera zamahe ofrigahazanagi, 5fu'a ikamofo agu'afi zamatazanke zamaho huno huzmantene. Ana zamatazama zami'nea knazamo'a segintavemo'ma

vahe'ma zamaprigeno zamatama kriankna zamata krigahie. <sup>6</sup> Hanige'za ana knafina vahe'mo'za frisaza kanku hakaregahaze. Hianagi ofritfa nehu'za, frinaku hugahazanagi, fri'zamo'a zamagritetira fresige'za ofrigahaze.

<sup>7</sup> Hanki ana kenu tamimofoma ke'noana zamavu'zamava'mo'a hosimo hate vunaku retro hiankna nehazageno, zamasenirera golire tro hunte'naza kini fetori knaza megeno, zamavugosamo'a vahe'mofo zamavugosagna hu'ne. <sup>8</sup> Zamazokamo'a a'nemofo zamazokamo'ma hiaza huno za'za higeno, zamavemo'a laionimofo avemo'ma hiankna hu'ne. <sup>9</sup> Zamimizarera hankomo'a me'ne, ana hankomo'a, aenire hankogna hu'ne. Zamagekonamofo zamagasasankemo'a, hosiramimo renteno avazu huno nevia zamo, hate vunaku agareno nevigeno neriankna agasasaru'ne. <sup>10</sup> Ana kenutamimofona zamarisona me'negeno, ana zamarisonamo'a segintavemofo risonagna hu'negeno ana risonanu vahera nezamare. Ana risonamofona 5fu'a ikampi vahe'mofona zamatama zami hanave'a zami'ne. <sup>11</sup> Hanki zamagrira mago kinimo kegava huzmantene, ana kinia ariga omne kerimofo kva ankeronkino, agi'a Hibru kefina Abadonie (fri'ne hu'ne) hu'za nehaze. Mikaza eri havizahu nere nehu'za, Griki kefinena Apolonie hu'za agi'a neheze.

<sup>12</sup> Hanki nampa 1ni knazankuma kva hiho hu'nea knazamo'a evigeno, tare knazamo ne-eanki kva hiho.

<sup>13</sup> Anante nampa 6si ankeroma uferegeno, nagra antahugen Anumzamofo avurega golire tro hunte'naza kresramnavu itareti 4'a pazive me'nefinti mago'mo huno, <sup>14</sup> nampa 6gisi ankeromo ufema erinemofona ana agerumo'a asamino, Yufretis rantinte'ma 4'a ankerona anaki zamante'nazana katufe zamantrenke'za viho huno hu'ne. <sup>15</sup> Hanki 4'a ankeroma retro'ma huzmantege'za mani'naza ankerona katufe zamantrenige'za ana auagi, ana zage knagi, ana ikanki, ana kafumofo kna fatgore, 3'a kevu refko vahera hu'za, mago kevu vahe'mokizmia mika zamahe vagaregahaze. <sup>16</sup> Hagi hosi agumpima mani'naza ha' vahe'mokizmi nampamo'a 200 milioni'a mani'naze nehige'na antahi'noe. <sup>17</sup> Hagi amanahu'za avanagnazama kofina ke'noe, hosi afutamimofo agumpima mani'ne'za eri'za nevaza vahe'mo'za zamimizare'ma rufite'naza hankozmimofo avoma'amo'a, koranke nehigeno, hokonke nehigeno, kaninkruke nehigeno, tevene salfa havemo toki nehigeno, ana hosi afutamimofo zamagenopamo'a laioni agenopagna nehigeno, zamagipintira tevene, salfa havemo'a toki hiankna huno atiramino evu'ne. <sup>18</sup> Zamagipinti'ma evu'nea tevemoki, salfa havere'ma nerea tevemo, ana 3'a knazamo maka kokankonka 3'a kevu vahepinti, mago kevu vahera zamahe vagarege'za fri'naze. <sup>19</sup> Na'ankure hihamu hanavemo'a ana hosiramimofona zamagipine zmarisonafine me'ne. Ana hosiramimofona zmarisonamo'a, osifavegna huno asenia huntogeno, ana aseniretira vahemofona hazenke zamigahaze.

<sup>20</sup> Hagi ana knazamo'ma ozmahege'za mani'naza vahe'mo'za, kumi'ma hu'naza zankura zamagu'a rukrehera nosu'za, hankromofona\* mono hunonte'za, zamagra'a zamazampinti golire'ene silvare'ene brasire'ene havere'ene, zafa atupare'ene, zmauvua onkege zmagesa ontahige kaza osu'za tro hunte'naza zante monora hunte'naze. <sup>21</sup> Ana nehu'za vahe'ma zamahe nefriza, avuatga ha' nehu'za, monko avu'ava'ma nehu'za, kumzafama ne-saza zankura magomo'e huno agu'a rukrahera osu'ne.

\* 9:20 Hankrorema hu'neana, havi avamuku hu'ne.

**10***Mago ankerone osi avontafemofo naneke*

<sup>1</sup> Hagi anante mago hanavenentake ankero kogeno, mona atreno eramigeno kukena hamponu hunteno, furegena'mo asenire megeno, avugosamo'a zagegna higeno, agimo'a no azeri hanaveti avempa zafagna huno teve anefa hu'ne. <sup>2</sup> Azampina osi avontafe vakarente'nea eri'ne. Ana ankeromo'a tamaga agia hagerimpi reno, hoga agia mopafi reno otineno, <sup>3</sup> ranke huno laionimo ageru neriankna huno agerura nerigeno, 7ni'a monage'mo'za zamagerura ru'naze <sup>4</sup> Ana zmagerura nerazage'na, avompi krentenaku nehugen'o, monafinti anage huno hu'ne, 7ni'a mona ageru'ma antahi'nana eriginka rekamrenentenka, avontafepina kreontenka atregeno frakino meno huno hu'ne. <sup>5</sup> Anantero kogeno hagerimpima tamaga agama nenteno, hoga agama mopare'ma ante'nea ankeromo'a tamaga azana monafinka rusute'nagamu atreno, <sup>6</sup> huvempa kea manivava nehimofonte huno, **Monane maka'zama agu'afima me'neazama tro'ma nehuno, mopane maka'zama agu'afi me'neazama tro nehuno, hagerine maka'zama agu'afi me'nezama tro'ma hu'nemokino**, mago'ane avega ontegahie. (Eks-Ati 20:11, Diu-Kas 32:40, Dan 12:7) <sup>7</sup> Hianagi nampa 7ni ankeromoma ageruma runakuma nehigeno'a, Anumzamo'ma oku'a ante'nea kea, kasnampa eri'za vahetema asami'nea kemo'a efore hugahie.

<sup>8</sup> Anante monafinti'ma ko'ma antahi'noa agerumo'a mago'ane kea hummino anage hu'ne, Vunka hagerimpine mopafinema agamarenlo ot'i'ea ankeromofo azampima vakarente'nea avontafera omerio huno nasmi'ne. <sup>9</sup> Hanki anage hige'na nagra vu'na, osi avontafe naminogu ana ankeromofo ome antahigogeno, agra anage huno nasami'ne, erinka nesankeno'a karimpafina aka hugahianagi, kagitera tumerimo'ma hiaza huno tusi haga kavesigahie. <sup>10</sup> Ana osi avontafera ankeromofo azampintira nagra omeri'na nogeno, nagipina tume rimo'ma hiaza huno haga hige'na netogeno, narimpafina tusi aka ahe'ne. <sup>11</sup> Anante zamagra nagrikura anage hu'naze, Kagra mago'ane rama'a vahek'u'ene kumataminku'ene, zmagerukuma, kini vahekura kasnampa kea ome huo hu'za hu'naze.

**11***Tare netremoke huama hand'azamofo naneke*

<sup>1</sup> Anante mago azota anteno mesarimi huno ke'za nenamigeno mago'mo huno, Anumzamofo ra mono none, kresramna vunentaza ita azota antenka mesarim nehunka, anampima mono'ma hunentaza vhahera, hamprinka ko. <sup>2</sup> Hagi ra mono nomofo meg'i'a kumara azota antenka mesarimia osunka atro, na'ankure megia vahe'mofo zamineankino, 42'a ikampi ruotge'ma hu'nea rankumara, zamagareti eme repehana hugahaze. <sup>3</sup> Hanki ana hanige'na Nagri nanekema huama hana'a netrena, hanavea zanami'nuge'ne, 1,260'a zagegnaifi zanasunku kukena huke, kasnampa kea huaha hagaha'e.

<sup>4</sup> Ama ana netrena, tare olivi zafane, tare lamu tavikna huke, maka ama mopamofo Ramofo avugama oneti'a netrene. <sup>5</sup> Hanki iza'o ana netre'ma znahenakuma hanamokizmia, znagipinti tevemo'a hagana hagana

huno atiramino ana vahera tefanane hugahie. Hagi ina vahe'mo'za zna-henaku'ma hanamokizmia, anahukna kante ahiegahie. <sup>6</sup> Ama ana netremokea monama eriginakeno ko'ma orania hanavea erina'ankino, kas-nampa kema huamama hana'a knafina, kora azerinakeno norina, tina amne eri koranke nehuke, zanagrime zanavesisiaza huke amne mopamofona knazana amigaha'e. <sup>7</sup> Zanagrama ana nanekekma huvagamaretakeseno'a, riga omene kerifinti'ma etiramino esia afi zagamo hara huznagatereno zanahe frigahie. <sup>8</sup> Hagi ana znahe frisia zanavufamo'a, rankuma'mofo kampi me'nениgeta, e'i ana kumaku fronka ke huta Sodomune Isipie huta hugahune. E'na kumapinke Razanimofona rugeka zafare ahe'naza kumapi, zanavufamo'a megahie. <sup>9</sup> Ama ana fri'na'a znavugamofona 3'a knagi mago zageferupi mene'nige'za, maka vahepinti'ene, naga nofipinti'ene, zmagerupinti'ene, maka kazigati vahe'mo'za znagegahaze. Hianagi kerifima eriza ome aseznante zankura i'o huzmantegahie. <sup>10</sup> Hagi mopafima mani'namo'za ana kasnampa netremokea mopafima mani'naza vahera zamatazama zami'naza zanku, ana musena hugahaze. <sup>11</sup> Hianagi 3'a knagi mago zageferu evanigeno'a, Anumzamo'a zanasimura zanamina, zanagra ot'i'nakeno, kesaza vahe'mo'za tusi kore hugahaze. <sup>12</sup> Hagi ana netre'mokea nentahikeno, monafinti ranke huno, amare emarereri'o huno higene, ha'ma reznante'naza vahe'mo'za nezanagage'nne hampompi monafi mareri'na'e. <sup>13</sup> Anama neha'a kna fatgore tusi'a imi erigeno 10ni'a ranku'ma me'nefinti, mago rankuma'mo'a fragu vaziramigeno, 7 tauseni'a veara imimo'a zamahe fri vagaregeno, mago'amo'za kore hu'za monafi Anumzamofo ra agi erisaga hu'naze.

<sup>14</sup> Hanki nampa 2 knazamo'a agatereno evige'na negogeno, nampa 3 knazamo'a ame huno fore hu'za nehianki kva hiho.

### Nampa 7ni ufe re'nea naneke

<sup>15</sup> Anante nampa 7ni ankeromo ufe regeno, ranke hu'za monafintira kezati'za anage hu'naze. Ama mopafi rankumamo'a, tagri Ramofo kuma nesenkeno, Agri Kraisi kuma fore hinkino, Agra kini manino kegava huvava hugahie. <sup>16</sup> Hanki 24'a ugagota kva vahe'mo'za kini trate'ma Anumzamofo avuga mani'nazareti, atre'za zamavugosaregati emase'za, Anumzamofo mono hunente'za, <sup>17</sup> anage hu'za, Hanavenentake Ra Anumzamoka, tagra rankagi kamune, korapa mani'namoka, menina mani'nane, na'ankure Kagra tusi'a hihamu hanave e'nerinka, menina erigafa hunka kini maninka kegava nehane. <sup>18</sup> Hagi miko kokankoka vahe'mokizmia zamarimpa ne-henkeno, Kagri karimpa hezamo'a ne-enkeno, fri vahe'ma refkoma hanana knamo'a ne-enkeno, kazokzo eri'za vahe'ene kasnampa vaheka'ane mono naga'ene zamagi me'nenia vahero, zamagi omnene'nia vahe'mo'za Kagri kagigu'ma kore'ma nehaza vahera mizana nezaminka, ama mopafima vahe zamahenefriza vahera, zamahe frigahane.

<sup>19</sup> Hagi monafima me'nea Anumzamofo ra mono nomofo kafamo'a anagi hagro higeno, Agrama huvempa ke huno huhagerafi'nea vogisimo'a, Agri mono nompintira efore higeno, kopasinamo'a trege huno vuno eno higeno, ranke huno monage nehigeno, imi e'nerigeno, tusi ko'mopa ko ru'ne.

## 12

*Israeli vahe'ene a'mofo naneke*

<sup>1</sup> Mago ruzahukna huno tusi'a avame'za monafina efore hige'na kogeno, mago a'mo'a zagenu kukena hu'negeno, ikamo'a agafi menegeno, asenifina 12fu'a hanafimo kini fetorikna huno asenire me'ne. <sup>2</sup> Ana a'mo'a amu'ene huno mofavre kasenteza nehuno, ranke huno mofavre'za negegeno krafa hu'ne. <sup>3</sup> Ananteru avame'za monafina efore hige'na kogeno, mago agaza hunte koranke osifavemofona, 7ni'a agenopa me'negeno, 10ni'a pazine hanatinegeno, aseniramintera 7ni'a kini fetori me'ne. <sup>4</sup> Hanki risonamo'a tagufa kevu hanafi monafi me'nefinti, mago kevu hanafira mopafi ruharfi huzmatre'ne. Ana osifavemo'a, a'mo'ma mofavremu kasentenaku'ma nehia avuga oti'ne. Anama hu'neana ana mofavre kasentenkeno aheno asga hunakrinaku oti'ne. <sup>5</sup> Anante ana a'mo ne'mofavre kasente'ne. Henka'a ana mofavremu nena huno maka vahera aeni azompareti kegava huzmantenia ne'kino, ana mofavre avreno Anumzamofonte vuno, Agri'a kini trate avreno ome antene. <sup>6</sup> Ananteru ana a'mo'a kore freno Anumzamo'ma retro hunte'nea mopare ka'ma kopu umani'ne. Anantega ana ara kegava krinte'za ne'zana nemisageno, 1,260'a kna manigahie.

<sup>7</sup> Hanki tusi'a ha' monafina fore hu'ne. Maikoli'ene ankero naga'amo'za, osifavene ana osifavemofo ankero naga'a hara huzmante'naze. <sup>8</sup> Ana osifavemofo ankero naga'mo'za hanavezmia omnge'za, hara agateregara osazageno monafima manisaza kumara omnene. <sup>9</sup> Ana koranke osifavea asgahutregeno erami'neankino, ana ne'kura korapa mani'nea osifave nehu'za, hankrore nehu'za, Sata'ema nehaza ne'ma ama mika mopafi vahe'ma rezmatgama nehia nera, asgafetregeno ankero naga'ane mopafi erami'naze. <sup>10</sup> Anante nentahugenno mago ra ageru monafinti runo ange hu'ne, Menina vahe'ma ahoke aheno agu'vazizane, hanavene, tagri Anumzamofo kumamo'ene Agrama huhampriranteno tavaregahie hu'nea ne'mo'a, hago tusi'a hihamu eri'ne. Na'ankure tagri nerufukizmima hanine zagine, tagri Anumzamofo avure agra havige kegaga hunezmantea nera asgahu atregeno urami'ne. <sup>11</sup> Zamagra ana ne'mo'ma ha'ma huzmantea hara, Sipisipi anentamofo koranteti'ene agenke'ama huama hazareti agatenere'za, zamagra zamavufagura nontahi'za, zamagri'ma zamahe fri'zanku'enena korera osu'naze. <sup>12</sup> Na'ankure ama ana agafare, monafinka mani'namota muse hiho. Hianagi mopane hagerimoka kva hi'o, na'ankure hankromo'a tanagrite ko uramine. Keno antahinoma hiana osi'agna me'negeno, tusi'rimpa nehegeno urami'ne.

<sup>13</sup> Ana agaza hunte osifavemo'ma keno antahino'ma hiana mopafima mate'mavutregeno'a, ne' mofavremu kasente'nea ara eme aheno atahoza ami'naku avariri'ne. <sup>14</sup> Hianagi tusi'a tumpamofo agekonarere ana ara amigeno, ana a'mo'a hareno vahe omani ka'ma mopafi, ana osifavea atreno, 3'a kafugi 6gis'i'a ikampi agri kuma'ma retro'ma hunte'nerega umani'nenigeno kegava huntegahie. <sup>15</sup> Hanki ana osifavemo'a, ana ara ti mreno vaniegū agipinti tina ruvaritregeno, tusi'a ti hageaza huno ana ara avaririne. <sup>16</sup> Hianagi ana agaza hunte osifavemofo agipinti'ma evu'nea rantina, mopamo ana ara azi huno ana tina agira aka huno nakri vagare'ne. <sup>17-18</sup> Ana higeno ana tusi'a osifavemo'a ana a'mofona rimpa ahenenteno, maka mofavrenaga'amo'za Anumzamofo kasege amage nente'za, Jisasi

avu'avazama nevaririza naga ha' huzmante'naku vu'ne. Ana agaza hunte osifavemo hagerinkenare otino mani'ne.

## 13

### *Hagerimpinti atirami'nea afi zagamofo naneke*

<sup>1</sup> Anantera mago afi zaga hagerimpinti hanatino marerige'na kogeno, 7ni'a agenopa megeno, 10ni'a pative ana agenopafintira marerigeno, ana 10'a pazivetera kini fetori me'negeno, Anumzamofo huhaviza hunte agirrama zamasenire me'ne. <sup>2</sup> Hagi ana afi zagama ke'noana lepatigna higeno, agamo'a bea agagna higeno, agi'mo'a laioni agikna hu'ne. Hanki agaza hunte tusi osifavemo agra'hihamu hanavene, kini tra'anе maka kegavahu hanavea ami'ne. <sup>3</sup> Nagra koana mago agenopa ko ahenazanagi, anama ahe'naza zamo'a teganigeno so'e hunte'ne. Higeno maka mopafi vahe'mo'za antri nehu'za, muse hunte'za, ana afi zagamofo amage ante'naze. <sup>4</sup> Ana vahe'mo'za agaza hunte osifavemofo monora hunte'naze. Na'ankure ana agaza hunte osifavemo'a, afi zagamofona kegavahu hanavea ami'negu, ana vahe'mo'za monora tusi zagamofona hunente'za anage hu'haze, Iza ama tusi zagagna hu'nesimo hara huntega hu'ne? hu'za hu'naze.

<sup>5</sup> Hanki Anumzamo'a atregero, ana afi zagamo'a avufga ra nehuno, Anumzamofona azanava kea hunenteno, 42'a ikamofo agu'afi hanavea amigeno ruzahu ruzahu kaguvazana hu'ne. <sup>6</sup> Hanki ana afi zagamo'a agira aka huno, Anumzamofona azanava kea hunenteno, Agi'amofona huhaviza hunenteno, Agri naga'ma monafinka mono noma'agna hu'za mani'naza naga, huhaviza huzmante'ne. <sup>7</sup> Hagi Anumzamofo naga'ma ha'marezmantе hanavenena amigeno, hahu zamagatenereno, maka naganofi'ma, vahe'ma, zamageru'ma maka kuma'ma, kegavama kri hanave ami'ne. <sup>8</sup> Maka ama mopafi mani'naza vahe'ma, ahe'naza Sipisipi Anentamofo asimu eri avontafepi zamagima, monane mopanema tro'ma osu'neno kre onte'nesia vahe'mo'za, ana afi zagarera monora huntegahaze. <sup>9</sup> Izago kagesa me'enigenka nentahisamoka, antahise huo. <sup>10</sup> Izano Anumzamo'ma huno, avreno kina huntegahie hu'nesimo'a, kina ome hino. Izano kazinkronteti ahefrigahie hu'nesimofona kazinkronteti ahefrigahie. Hanki ama ana zamavu'zmavazana akohe'za mani'neza kazigazi hu'za knazama eri'za vanagu kea hu'ne!

### *Mopafinti atirami'nea afi zagamofo naneke*

<sup>11</sup> Anantera ru afi zagamo mopafinti hanatino egena kogeno, Sipisipi anentamofo tare pazivekna pative asenirera me'negeno, kema hiana tusi'a agaza hunte osifavemofo agerukna ageru ru'ne. <sup>12</sup> Nampa 2 afi zagamo'a, nampa 1ni afi zagamofo kegavahu hanave'a, agri avure eri ama nehuno, maka ama mopafi mani'naza vahera, nampa 1ni afi zagama ko'ma ahazageno namuma'amo tegani'nemofo monora huntaho hu'ne. <sup>13</sup> Anante nampa 2 afi zagamo'a ruzahu ruzahu avame'za eri fore nehuno, maka vahe'mokizmi zamavufo kaguvaza higeno monafinti'enena tevea reno erami'ne. <sup>14</sup> Ana nehuno mopafima mani'naza vahera rezmataga hu'ne, na'ankure nampa 1ni afi zagamofo avufina, ruzahu ruzahu avame'za nehuno, nampa 1ni afi zagama ko'ma kazinknonu ahazageno friteno asimu'ma eri'nea afi zagamofo amema'a tro hiho huno zamasami'ne. <sup>15</sup> Asimu'ante hanave amizageno, ana amema'a tro hunte'naza amema'a asimu amigeno, ana amema'amo'a keaga higeno, ana amema'ama mono

huontesaza vahera zamahe frigahie. <sup>16</sup> Hagi anante nampa 2 afi zagamo huzmanteno, mika amane vahero zamagi me'nea vahero, zago'a me'nea vahero, zago'a omne vahero, amne vahero, kazokazo eri'za vahe'mokizmia avame'za tamaga zmazante'ene, kokovite'enena krentegahaze. <sup>17</sup> Ana hanigeno mago vahe'mo'e huno mizasege, zagonre atrege osugahanki, ana afi zagamofo agimofo nampama eri'nenia vahe'moke mizasege, zagonre atrege hugahie. <sup>18</sup> Vahe'mo'ma knare antahintahima eri'enimo'a atregeno, ana afi zagamofo nampana refko huno keno, ana nampana mago ne'mofo nampakino, ana nampana 666 me'ne.

## 14

### *Sipisipi Anenta'ene 144 tauseni'a vahe'mofo naneke*

<sup>1</sup> Anantera Sipisipi Anentamo'a Saioni agonare oti'negeno, Agri agine, Nefaginema kokovite'ma krente'neana 144 tauseni'a vahe'mo'za magoka oti'nazage'na ke'noe. <sup>2</sup> Ana hige'na mago agerura antahuana monafintira agerura rama'a timofo agasasamo'ma hiaza nehigeno, mona kemo'ma hiaza nehige'na, mago ageru'ma antahuana kita (harp) ahazageno neriankna ageru nerige'na antahi'noe. <sup>3</sup> Ana nehu'za kini trate'ene, 4'a kasefa hu'za mani'naza zagane, 24'a ugota kva vahe zamurera kasefa zagamera hu'naze. Ana zagamera mago vahe'mo'e huno ontahi'nazankino, 144 tauseni'a nagama maka mopafinti mizama sezamantenea vahe'mo'za antahi'naze. <sup>4</sup> Hanki ana vahe'mo'za a'nene savrira osu fatgo hu'za mani'naze. Na'ankure zamagrazmi agru hu'za mani'naze. Ama ana vahe'mo'za Sipisipi Anentamo'ma inaregama viana zamagra neveririza vahere. Ana vahera Anumzamo'a ese hoza vasageankna huno maka vahepinti miza sezmantaneankino, Anumzamofone Sipisipi afu Anentamofo naga manigahaze. <sup>5</sup> Hagi ana vahe'mofo zamagipina havigea omnetfa higeno, hazenkezmia omane vahe zamagra mani'naze.

### *Tagufa ankero vahe'mo'za ke hu'naza naneke*

<sup>6</sup> Hagi anantera mago ankero kogeno monafi hareno enevuno, mevava Knare Musenkea mopafima mani'naza vahete ene, maka kumate'ene naga nofite'ene, zamagerute'ene, vahete'ene huama hu'ne. <sup>7</sup> Ana nehuno ranke huno amanage hu'ne, Anumzamofonku kore hunentetma ra agi amiho. Agrama vahe'ma refko'ma haniankna hago e'ne. Monane mopane hagerine, maka tinkampuima tro'ma hu'nemofo monora hunteho hu'ne.

<sup>8</sup> Anantera nampa 2 ankeromo kota ankeromofo amefi hareno ne-eno anage hu'ne, Babiloni tusi'a kumamo'a trakahu'ne, trakahu'ne, ana amo'a maka mopafi kumatamina, agra havi avu'avaza hanavetino hu avesizamofo waini tina zamige'za ne'naze.

<sup>9</sup> Anantera nampa 3 ankeromo'a, tare ankerofomo zanamefi ne-eno anage huno ranke hu'ne, iza'o afi zagamofone, amema'are'ma mono hunenteno, azante'ene kokovite'ma avame'zama'a eri'enimo'a, <sup>10</sup> Anumzamofonku tusi'a rimpahae knazamofo waini erihavia huno tagi avite'nea kapufinti neneno, ana vahe'mo'a ruotge ankero vahe'ene, Sipisipi anentamofo avure, havere te kasinkasi nehia tevefi atazana erigahie. <sup>11</sup> Ana afi zagare'ma mono hunente'za, amema'are'ma mono hunentesageno, iza'zo agri agimofo avame'zama'a erisamo'za, zamatazama erisaza tevemofo tokimo mareri vava nehina, hanine zagenena fru hu'za omanigahaze.

<sup>12</sup> Anumzamofo kasege amage'nente'za zamentintima Jisasinte nehaza vahem'o'za amanahu hugahaze, akohe'za mani'ne'za kazigazi hu'za knazana eneri'za oti hanavetigahaze.

<sup>13</sup> Anante mago ageru monafinti arige'na nentahugen anage hu'ne, Avona krento, Ramofompi mani'ne'za fri'namo'za, meninteti'ma agafa huno vaniana muse hugahaze! Ozo huno Avamumo'a hu'ne. Zamagrama maraguzati'za e'naza zana manifru hugahaze. Na'ankure zamagrama knare zamavu'zamavama hu'zama e'naza zamavu'zamavamo'a, zamagrane magoka zamage'a zamavaririno ne-e.

### *Hoza hamareankna huno vahe zmaveragesia naneke*

<sup>14</sup> Anante kogeno efeke hampopina Vahe'mofo Mofavregna Ne'mani'neno, golire tro hu'naza kini fetori asenire antanineno, sikolie nehaza ananke fagagino asane'nea kazi azampina eri'ne. <sup>15</sup> Hanki mago ankeromo mono nompinti atiramino, ranke huno hampopima mani'nemofonkura huno, kazinkno ka'a erinka kavera hamaro. Na'ankure ne'zama hamare kna e'ne, na'ankure mopafina nezamo'a afureanki ome hamaro huno hu'ne.

<sup>16</sup> Anante efeke hampopima mani'nemo'a ananke fagagino asane'nea kazi erino, maka mopafima nenahu'nea hoza hamare'ne.

<sup>17</sup> Anantera mago ankeromo, ra mono no monafi me'nefinti atiramino, agranena sikolie nehaza ananke fagagino asane kazi eri'negena ke'noe.

<sup>18</sup> Anante ru ankerona, tevema kvahu hanavema eri'nemo, kresramnavu itareti eno, ranke huno asane kazima eri'nemofonkura anage hu'ne, Sikolie nehaza ananke fagagi kazinka'a erinka waini zafa raga mopafintira tagio, na'ankure raga'amo'a afure'ne. <sup>19</sup> Anante ankeromo'a ananke fagagi asane kazima'erino mopafi uramino waini raga taga huno eri atru nehuno, ana wainia erinteno rerati keri havereti tro huntenebi atre'ne. E'i anazamo'a Anumzamofo tusi'a rimpahé knaza huvame huno me'ne.

<sup>20</sup> Rankuma'mofo meg'i'a, waini raga rerati keri havereti tro hunte'naza kerifi rehapa neti'zageno, kora'mo tusiza huno vu'ne. Hanki ana koramo'a 300 kilo mitanaza vu'ne. Hanki tusiza huno nevuno tiru nemareno, marerino hosimofo agite ome atre avamente vu'ne.

## 15

### *Seveni knazamofo naneke*

<sup>1</sup> Hanki anantera monafina tusi'a ruzahu avame'za fore nehige'na negogeno, 7ni'a ankeromo'za, tusi'a rimpahé knazana 7ni'a eri'naze. E'na knazana Anumzamofo vagare rimpahé'zane. Na'ankure Anumzamofo rimpahé'zamo'a, e'i ana knazampi vagaregahie. <sup>2</sup> Anantera kogeno mago hagerina kapokna hu'negeno, tevene eri havia hu'ne. Afi zagamofone, amema'ane, agi'amofo nampama azeri agatere'naza naga'mo'za, kapokna hu'nea hagerimofo agofetu oti'ne'za, Anumzamofo zavena (harps) azeri'naze. <sup>3</sup> Anumzamofo eri'za vahe Moses zagame'ene Sipisipi Anentamofo zagame hu'za anage hu'naze, **Tusiza hunka ruzahu eri'za eri'nane, Ra Anumzamoka tusi hanavenentake hu'nane. Kagri kamo'a fatgo huno tamage hu'ne, maka kumapi vahe'mokizmi kini Nere!** <sup>4</sup> Ramoka, iza kagrikura korera nosuno, kagi'a erisaga osugahie? Na'ankure Kagrake Ruotge hu'nane. Maka kumapi vahe'mo'za, e'za Kagri kavuga monora eme hugantegahaze. Na'ankure fatgo kavukvazamo'a eama hu'ne.

(Eks-Ati 15:1-18, Diu-Kas 32:1-44).

<sup>5</sup> Anantero ama anazama fore'ma hutege'na, Anumzamofo agi agenkehu seli mono nomo'a monafina anagi'nege'na kogeno. <sup>6</sup> 7ni'a knazama eri'naza, 7ni'a ankeromo'za, ra mono nona atre'za atiramiza, za'za kukena (linen) hu'nazageno agru huno efenentake higeno, golire tro hu'naza nofi zamafuntei kreramino zamasoparega evurami'nea nofi hu'naze. <sup>7</sup> Anante 4'a kasefa hu'za nemaniza zagafinti mago'zmimo'a, 7ni'a golire zuompaifi kasefa huno manivava Anumzamofo rimpahе knazamo mevite'nea erino, 7ni'a ankero vahera ome zamige'na ke'noe. <sup>8</sup> Hanki ra mono nomofona, Anumzamofo masa'zamofone, Agri hihamu hanavemofo tokimo avitegeno, mago vahe'mo'a, ana ra mono nompina ufregara osu'negeno, 7ni'a knazamofo eri'zana, 7ni'a ankero vahe'mo'za eri vagare'naze.

## 16

### *Anumzamofo 7ni'a rimpahе knazamofone Amakedonima ha'ma hnaza zamofo naneke*

<sup>1</sup> Anantero mago ra ageru antahugenе Anumzamofo ra mono nompinti, 7ni'a ankero vahekura anage hu'ne, Vutma 7ni'a Anumzamofo rimpahе knazama me'nea zuompa mopafina omeri tagi atreho. <sup>2</sup> Hanki nampa 1ni ankeromo'a vuno Anumzamofo rimpahе zuompa mopa agofetu ome tagitregeno, afi zagamofo avame'za eri'ne'za amema'are'ma mono'ma hunentaza vhete haviza huno agotega namuntamimo fore hu'ne.

<sup>3</sup> Anante nampa 2 ankeromo'a Anumzamofo rimpahе zompa'a hagerimpi tagitregeno, fri'nea vahe'mofo korankna higeno, maka zamasimu ante'za mani'naza zagamo'za hagerimpina fri vagare'naze.

<sup>4</sup> Anantero nampa 3 ankeromo'a Anumzamofo rimpahе ahe'zana zoumpafintira, ranra tiranpine osi ti tamimpinena eri tagi atregeno, maka timo'za koranke hu'naze. <sup>5</sup> Nagra nentahugenе tintamima kvama hu'nea ankeromo'a huno, Kagra fatgo hu'nane, korapara mani'nanankinka, menina mani'nane. Kagrake Ruotge hu'nane. Na'ankure Kagra ana maka'zana refko nehane. <sup>6</sup> Na'ankure zamagra Anumzamoka kagri nagaka'ane, kasnampa vaheka'amofo korama zamahe'za eri tagi atre'nagu, Kagra karimpa he'zamofo korantima zaminke'za, zamagra ana koranti nega nagaki'za ne'naze! <sup>7</sup> Anante nentahugenе kresramnavu itamo'a huno, ozo Hanaveka'ane Ra Anumzamoka, refako huzanka'amo'a, tamage huno fatgo hu'ne.

<sup>8</sup> Anante nampa 4 ankeromo Anumzamofo rimpahе zompa zagemofonte eritagitregeno, zagemо'a tevemo'ma hiaza huno ana vahera zmatugare rentege'za zmatagu hu'naze. <sup>9</sup> Zagemofo amuhomo'a tevemo'ma hiaza huno ana vahera zmatugare rentege'za, zmatagu nehu'za ana knazama atregeno erami'nea Anumzamofo agi'a huhaviza hunente'za, zmagu'a rukrehe hu'ra agi omi'naze.

<sup>10</sup> Anantero nampa 5 ankeromo Anumzamofo rimpahе knaza me'nea zuompa afi zagamofo trate eritagitregeno, agrama kegava hu'nea kuma'mo'a hani higeno, ana kumapima mani'naza vahe'mo'za tusi'a zmatagu nehu'za zamagnefu'na anitraga nehu'za, <sup>11</sup> monafi mani'nea Anumzamofona huhaviza hu'naze. Na'ankure zmatama kri'nea zanku'ene namuma zmare'nea zanku anara nehu'za, ana zamavu'zmavazankura zmagu'a rukrehe osu'naze.

<sup>12</sup> Anantera nampa 6 ankeromo'a Anumzamofo rimpahé knaza me'nea zuompa tusi'a Yufretisi tirampi tagi atregeno, ana tiramo'a ho'mu huno, zage hanati kazigati esnaza kini vahe'tamimofo ka retro hu'ne. <sup>13</sup> Ana hige'na kogeno agaza hunte osifavene, afi zagamofo agipinti'ene, havige kasnampa ne'mofa agipintira, 3'a agru osu avamutamina hogakna hu'naza atirami'naze. <sup>14</sup> Na'ankure zamagra hankrotamimofo avamutamimo'za, avame'zana erifore nehu'za, maka ama mopafi kini vahete vu'za ome zamazeri atru nehu'za, tusi'a hihamu hanave'ane Anumzamo'ma vahe'ma refko hania knare'ma, ha'ma hanagu zamazeri retro hu'naze. <sup>15</sup> **Antahio, Nagra kumzafa vahe eaza hu'na egahue Iza'o kukena'ama huno omase otino mani'nenimo'a, muse hugahie.** Ana nehuno **avufga avapara ovanigeno, vahe'mo'za agaze avufga onkegahaze.** <sup>16</sup> Ana nehu'za havi avamu'mo'za kini vahe'zmine, ha' vahe'zminena Hibru kefina Amakedonie nehaza kumate zamazeri atru hu'naze.

<sup>17</sup> Anantera nampa 7ni ankeromo Anumzamofo rimpahézama me'nea zuompa zahopi eritagi atregeno, ra mono no agu'afi me'nea kini trateti magomofo agerumo ranke huno, havagare hu'ne. <sup>18</sup> Anante kopsisina e'nerino, agasasa nerigeno, monage nehigeno, tusi'a imi eri'neana, vahe'ma fore'ma huneregatira, e'inahu imina e'ori'neankna tusi'a iminkrefa eri'ne. <sup>19</sup> Babiloni rankumamo'a ruhantagino 3'afi fore higeno, mopafi ranra kumatamimo'za traka humase'naze. Babiloni kuma'mofo kefo avu'ava zana, Anumzamo'a antahino keno hu'neankino rimpahé waini kapu tina amigeno ne'ne. <sup>20</sup> Ana higeno maka ti amu'nompi me'naza mopamo'za fanane hazageno, agonamo'za tamiza agupo mopa se'naze. <sup>21</sup> Hagi tusi'a komopa ko monafinti aru'neana, mago mago aragana'amo'a 50'a kilonaza hu'nea komopa komo, vahete evuramino zamahe haviza hige'za, ana vahe'mo'za Anumzamofona huhaviza hunte'naze. Na'ankure Anumzamofo rimpahé knazamofo komopa kokino, ana komopamo'a tusi havizantfa hu'neakino, vahera zmahe haviza hu'ne.

## 17

### *Mago a'mo'ma afi zagamofo agumpi mani'nea zamofo naneke*

<sup>1</sup> Anantera 7ni'a zuompama 7ni'a ankero vahe'mo'za azerinazafinti magomo eno nagrikura anage hu'ne, Amare ege'na tusi monko a'mo rama'a tintamimofo agofetu mani'nea a'mo'ma erisia knazana kaveri haneno hu'ne. <sup>2</sup> Ana a'ene maka mopafi kini vahe'mo'za, rama'a monko zamu'zamaza nehazageno, mopafima mani'naza vahe'mo'za, ana a'mofo havi avu'avazamofo waini ti ne'za neginagi hu'naze. <sup>3</sup> Anantetira ana ankeromo'a avamupi navareno vahe omani ka'ma mopafi vige'na, nagra kogeno mago a'mo, koranke afi zagamofo agumpi mani'negeno, Anumzamofoma azanava kemahu agiramina ana afi zagamofo avufgare mevagaregeno, 7ni'a agenopa megeno ana agenopafina, 10ni'a pazivea me'ne. <sup>4</sup> Ana a'mo'a fitunke'ene koranke kukena nehuno, golire'ene marerişa havere'ene, perie (pearls) nehaza zanteti tro hu'naza avasasezana erinehankreno, azampina maka kasri avu'ava'amo'ene, monko avu'ava'amo avite'nea golire kapu eri'ne. <sup>5</sup> Ana a'mofo kokovitera mago oku'a agi'a anage huno krente'neana, **Babilonia tusi'a agatere kumare, monko a'nemokizmine, ama mopafi kasri avu'ava zantamimofo nezmarera'e** huno krente'ne. <sup>6</sup> Hanki negogeno ana a'mo'a Anumzamofo naga'mokizmi korane, Jisasi agi agenkema

huama'ma nehaza naga'mokizmi korana neneno neginagi nehige'na, nege'na nagra tusiza hu'na antri hu'noe. <sup>7</sup> Hagi ana ankeromo'a anage huno nasami'ne, Nahigenka antria nehane? Ana a'ene, agofetu manino nevia afi zagagi, ana afi zagamofo 7ni'a agenopagi, 10ni'a pazive'ama me'neazamofo oku'a agu'agesa'a kasamigahue. <sup>8</sup> Ana afi zagama ke'nanana, korapa mani'neana, menina omani'neankino, kofa'a knafi riga omame kerifinti hanatino, eama huteno haviza hugahie. Ama mopama tro'ma osu'negeno, mopafima mani'naza vahe'ma zamagima asimu eri avontafeppima kreonte'nea vahe'mo'za, korapa mani'neana, menina omani'neankino, henkama eama'ma hanige'za kesanu'za antri hugahaze. <sup>9</sup> Asenifima knare antahintahizama me'nenia vahe'mo'a antahi ama' hino, 7ni'a agenopa, e'i ana a'mo'ma agofetu mani'nea 7ni'a agonamo'za 7ni'a kini vahetami'ne. <sup>10</sup> Ana 7ni'a kini vahepinti 5fu'am'o'za evuramizageno, magomo menina manigeno, magomo'a ome'neankino, esuno'a osi'a knafi kinia emanigahie. <sup>11</sup> Hanki afi zagama korapama mani'neama, menina omani'neana, agra e'i nampa 8ti kinigino, 7ni'a kini vahepinti mago zamimokino, agra haviza hugahie. <sup>12</sup> Hagi 10ni'a pazive'ma agenopafima ke'nanana, 10ni'a kini vaheki'za kuma kegavahu hanavea e'ori'nazarang, zamagra afi zaganemaka auafi kinia manigahaze. <sup>13</sup> Ama ana kini vahe'mo'za magoke antahintahifine, mago zamarimpa hu'za hanave zamine hihamuzmia afi zagamofo amigahaze. <sup>14</sup> Ana kini vahe'mo'za Sipisipi Anentamofo ha' hunte'naku hugahazanagi, Sipisipi Anentamo'a zamaheno zamagatereghie. Na'ankure Agra ramokizmi, Ra mani'neno, kini'mokizmi Kini mani'ne. Agrama zamigi huno huhampri zamantege'za mani fatgo hu'namo'za, Agranena manigahaze.

<sup>15</sup> Hagi ankeromo'a anage huno nasami'ne, Monko a'mo'ma agofetu mani'negenka ke'nana tintamina, e'i zamagra mikanofi naga'ene, zamageru'ene, tusi'a vahe'ene, kumatami huvame huno me'ne. <sup>16</sup> Hagi 10ni'a pazive'ene afi zaganema ke'nanana, zamagra monko a'mofona zamavesra hunente'za kukena'a azeri'za erivararo hanageno mago'zana avufarerera omanetfahina, avufga avapa mani'nena avufga'a nene'za, tevefi kre fanane hugahaze. <sup>17</sup> Na'ankure Anumzamo Agri avesi'za eri knare hanazegu, ana kini vahera antahintahi zamige'za magoke antahintahire'ene, magoke zamagu zamagesare zamagrama kegava hu'naza kumatamina afi zagamofo amizageno, Anumzamofo kemofona avufga'a fore hu'ne. <sup>18</sup> Hanki ana monko a'ma ke'nanana, e'i tusi'a kumamofo hu avame huno mani'neno, maka ama mopafi kini vahe'mokizmi kegava hunezmante hu'ne.

## 18

### Babiloni kuma'mo haviza hu'nea naneke

<sup>1</sup> Anazama fore'ma hutegen, mago monafinti tusi'a hanave eri'nea ankeromo'a eneramige'na kogeno, masa'amo'a mopafina remsa hu'ne. <sup>2</sup> Hanki agra hanavege huno, tusi'a Babiloni kuma'mo'a evuramie, evuramie! Ana a'mo'a havi hankromo'za mani kuma tro nehigeno, maka agru osu avamu tamim'o'za kina hanaza kuma fore nehuno, maka agru osu nama zagamo'za mani'naza kuma fore nehuno, agru osu afi zagamo'za mani'naza kuma fore hu'ne. <sup>3</sup> Na'ankure maka kumatamimpi vahe'mo'za monko avu'avazama'a, waini tima neaza hu'za kapu'afinti nene'za, negi ne'nazage'za mopafi kini vahe'mo'za ana a'ene monko avu'avaza nehazage'za, ama mopafi vahe'mo'za, ana a'mofo monko avu'avazama'areti

tusi'a feno (bisinisi) vahera tro hu'za mani'naze. <sup>4</sup> Ana hutege'na mago ageru monafinti arige'na antahugen, anage hu'ne, Vahe'nimoka ana ara atrenka atineraminka, kumira ana a'enena nehunka agranena knazama'a e'orio. <sup>5</sup> Na'ankure ana a'mofo kumi'mo'a, aviteno monafi marerigeno, Anumzamo'a ana a'mofo havi avu'avazama'amofo agesa antahi'ne. <sup>6</sup> Ruga'amokizmima huzmant'e nea kante antenka ana ara nona hunentenka, avu'avazama hu'nea kante antenka, mago'ene erinteguhenkna nona'a hunentenka, ana a'mo'ma waini tima eri havia hu'nea kapufi mago'aneriane aguhenkna erihavia humio. <sup>7</sup> Ana a'mo'a, agra'a agi erisaga nehuno, rama'a monko avu'avaza nehuno, ruga'a havi avu'ava zana hu'ne. Anama hu'nea havi avu'avazama'amofo avamente atazana aminkeno, rama'a zavi ateno. Na'ankure agra'agura anage nehie, kuini mani'na, kuini trate mani'noankina, kento a' knara osu'na, zavira otegahue hu'ne. <sup>8</sup> E'ina hu'negu magoke zagefi, knazana enerino, kria enerino, zavira netena, tusi'a agate'za agritera fore nehina, agrira (Babilonia) tevemo'a te fanane hugahie. Na'ankure tusi'a hanave'ane Ra Anumzamo, agrira refko hu'neankino haviza hugahie.

<sup>9</sup> Ama mopafi kini vahe'mo'za, ana a'enema havi avu'avaza nehu'za, ana havi avu'avazampi agrane knare huta mani'none nehaza vahe'mo'zama, ana a'ma terasagesia teve tokimo'ma marerisige'za negenu'za, krafa hu'za zavira atentegahaze. <sup>10</sup> Ana a'ma azeri haviza haniazanku kore hu'za afete ot'i'ne'za anage hugahaze, tasunku hune tasunku hune, Babiloni hanave rankumakura na'ankure magoke knafi haviza hie.

<sup>11</sup> Mopafi vahe'mo'za zagonu mizaseza zagore netraza naga'mo'za (bisinisi) ana a'mo'ma havizama hiazanku zavite'naze. Na'ankure vahe'mo'za fenozazmi magoane miza osegahaze. <sup>12</sup> Ana fenozana e'i goline, silvane, mareri havene, periema nehaza zane, knare za'za tavravene, fitunke tavravene, silkare tavravene, koranke tavravene, maka sitronie nehaza mananentake zafareti tro hu'naza zantamine, elefanti afumofo ave'areti tromta (ivori) hu'naza zantamine, mizama'amo mrerinea zafareti tro hu'naza zantamine, bronsie nehazazane, aenine, mabolie nehaza havene, <sup>13</sup> zarafune (sinamon), mananentake zane, ne'za eri hagahu aka nezane, tevefi krazageno knare mna neviazane, zamavufare nefraza mananentake masavene, knare manavu zafarine (frenkinsens), wainine, olivi masavene, flaua'ene, witine, bulimakaontamine, sipisipiramine, hosi afuzagane, karisine, zamasimu eri'za mani'naza kazokzo eri'za vahera, izaza mizasegahaze. <sup>14</sup> Hu'za nehu'za ana vahe'mo'za amanage hugahaze, Babiloni kuma'moka knare'zama erifore'ma nehana zanku'ma kvenesiazane, marerisa nomanizama nemaninazamo'a kagripintira fanane hiankiza, vahe'mo'za ana knare'zanka'a onkegahaze. <sup>15</sup> Ana a'mofonte'ma zagore atre'za ra zagma tro'ma huza feno vahe'ma nesaza vahe'mo'za, afete'are otiza manigahaze. Na'ankure ana a'mo'ma atama eri'neazanku kore nehu'za zavira nete'za, <sup>16</sup> anage hu'za, Tasunku hune, tasunku hune, knare ran kuma ana a'mo'a knare zaza efeke kukena nehuno, fitunke'ene koranke'ene, avasesezama golireti'ene, marerisa havereti'ene, periema (pearls) nehaza zane, eri hankre'neane, <sup>17</sup> na'ankure tusi'a fenomo'a mago auafi amnezankna hie! Ana higeno maka ventemofo azerino (kepten) nevia vahe'mo'zane, ventefi maniza nevaza vahe'mo'zane, ventefi eri'za vahe'mo'zane, hagerimpi zantetima zagma eri'za nomanizama retro'ma hu'za nemaniza vahe'mo'za, afete ot'i'za mani'neza, <sup>18</sup> ana a'mofoma tegasagea teve tokima nege'za, zavira

nete'za anage hu'za, Ina rankuma'mo amanahu rankumakna hugahie? hu'za hu'naze. <sup>19</sup> Hagi ana nehu'za kugusopa kate'za zamanunte netreza ranke hu'za, zavi krafa, nehu'za anage hu'naze, Tasunku hune tasunku hune rankumamofonkura, maka feno vahe'mo'za ventema antene'za ana a'mofompintima feno vahe'ma nemaniza zamo'a magoke auafina ana maka fenomo haviza hie. <sup>20</sup> Monamokane, Anumzamofo naga'motane, aposol naga'motane, kasnampa naga'motanena muse hiho, na'ankure ana a'mo'ma tamagri'ma tami'nea knazantera Anumzamo'a refko huno mizama'a nona huno nemie. <sup>21</sup> Ananterera tusi hanavenentake ankeromo, witi refuzafu nepeankna ra have erino hagerimpi matevu netreno anage hu'ne, Havema atreankna huno Babiloni rankumara azeri haviza hugahiankita, mago'ene onkegahu'ne <sup>22</sup> Ana kumara fanane hinkeno, zavenama ahe vahe'ene konkene ufene, zavenagna musikima nehaza (harp) vahe'mo'za mago'ane nehesagenka ontahigahane. Keonke'zama tro'mahu vahe'mo'za mago'ane trora osanageno, witi akaruma hare'naza agerura ontahigahane. <sup>23</sup> Hagi ramumofo masa'a mo mago'ane remsa huogantesigeno, a'ma eriku'ma hania ne'ene, vema eriku'ma hana'a zanagassasankea ontahigahane. Na'ankure kagri vahe'mo'za zagonu mizaseza zagore netraza naga'mo'za (bisinisi) maka mopafi vahe'mofo avurera ra vahe mani'nazangi, maka mopafi vahera kagra avuatga zankareti rezmataga hu'nane. <sup>24</sup> Hagi ana a'mofompina kasnampa vahe'ene, Anumzamofo naga'ene maka ama mopafima Anumzamofo amage nentazageno zamahe'nea vahe'mokizmi koramo me'nege'za ke'naze.

## 19

### *Muse zagame hu'naza naneke*

<sup>1</sup> Hagi anazama fore'ma hutege'na, nagra antahugen, tusi'a vahe'mokizmi zamagerukna hu'za monafinti zamageru ru'za anage hu'naze, Ra agi amisune! Masazane hihamune hanavene tahokeno tagu'vazi'zana, tagri Anumzamofo su'zane. <sup>2</sup> Na'ankure Anumzamo'ma refko'ma hiazamo'a, tamage huno fatgo hu'ne, na'ankure tusi'a monko a'ma Anumzamo'ma refko'ma hunte'nea a'mo'a, ama mopafi vahera havi monko avu'avazama'areti zamazeri haviza nehuno, Anumzamofo kazokzo eri'za vahera zamaheno korana eritagi atrenegu, Anumzamo'a nona ana ara hunte'ne. <sup>3</sup> Anante ete mago'ane anage hu'naze, Anumzamofona Ra agi amisune! Ana a'mofo krerasagea teve tokimo'a mareri vava nehie hu'za hu'naze. <sup>4</sup> Anante 24'a ugagota kva vahe'mo'zane, 4'a kasefa hu'za mani'naza zagamo'za zmavugosaregati mopafi mase'za, kini trate'ma mani'nea Anumzamofo monora hunente'za, anage hu'naze, Tamage Anumzamofona ra agi amisune! hu'za hu'naze.

<sup>5</sup> Hagi mago agerum kini trateti huno anage hu'ne, Maka Agri kazokzo eri'za vahe'motane, Anumzamofonku'ma kore'ma hunentaza vahe'motane, tamagi omne vahe'motane, tamagi me'nea vahe'mota, Anumzamofona ra agi erihentesga hiho huno hu'ne. <sup>6</sup> Ananterera nentahugen tusi'a vahe'mofo agerukna huno zmagerura neru'za, ranra timofo agasasa kegna nehu'za, tusi'a monage hiankna hu'za anage hu'naze, Anumzamofona ra agi amisune! Na'ankure hanavenentake Ra Anumzantimo'a kini manino kegava hu'ne hu'za hu'naze.

### *Sipisipi anentamo arave haniazamofo naneke*

<sup>7</sup> Tagra musenkase huta ra agi amisune, na'ankure Sipisipi anentamo'ma aravema hania kna egeno, ana ne'mofonte'ma maresia a'mo'a retro huno mani'ne. <sup>8</sup> Ana a'mofona kukenama hanigu agru huno za'za efeke kukena ami'ne. E'i ana zaza kukena Anumzamofo naga'mokizmi fatgo zamavu'zmavazane.

<sup>9</sup> Anantera ankeromo'a anage huno nasami'ne, Sipisipi anentamo'ma aravema hania ne'zante'ma agima hu'nemo'a muse hino hunka krento, mago'ane anage huno nasami'ne, Ama'i tamage Anumzamofo naneke.

<sup>10</sup> Anante nagranena agiafi narenare'na mono hunte'za huanagi, ana ankeromo'a anage huno nasamine, E'inahura osuo, kagrane negafuzane ne-hazaza hu'na nagra Anumzamofo eri'za vahe mani'neta, Jisasi'ma hu'nea ke'mofo huama nehuta, Anumzamofo monora huntegahune. Na'ankure Jisasi'ma hu'nea kemo vahe'mofona azeri otigeno, kasnampa kea huama nehaze.

### *Kraisi'ma efeke hosimofo agumpi esia zamofo naneke*

<sup>11</sup> Hagi monamo'a anagige'na efeke hosi afu'mofo agumpi mago ne' mani'nege'na ke'noe. Ana ne'mofonkura, hugahue huno'ma hiaza nehimo'e hu'za nehu'za tamage nere hu'za nehazamo'e. Fatgo avu'avate refko huno hara nehie hu'ne. <sup>12</sup> Avurgamo'a teve anefakna nehigeno, asenirera rama'a kini vahe'mofo fetori megeno, Agrira mago agi avufarera krente'ne, mago vahe'mo'a ana agia ontahigahianki, Agrake antahine. <sup>13</sup> Ana ne'mo'a korampi re'nea zaza kukena hu'ne. Agi'ama henazana, Anumzamofo Naneke hu'naze. <sup>14</sup> Hanki monafi mani'naza sondia vahe'mo'za agru huno knarezantfa hu'nea efeke kukena hu'ne'za, amage ante'za efeke hosi afutamimofo agumpi vu'naze. <sup>15</sup> Ana ne'mofo agipintira tarekaziga asane kazi atirami'neankino, ana kazinuti maka kumapi vahera nezma-heno, aeni azompareti kini manino kegava hunezmante'na, hanavenen-take Anumzamofo rimpahе knazamo'a, agareti waini regatiti nehiakna huno zmahegahie. <sup>16</sup> Hanki zaza kukena're'ene amotera anage huno krentene, **Mika kini vahe'mofo Kini manino, maka ra vahe'mokizmi Ra mani'ne huno krente'ne.**

<sup>17</sup> Anantera mago ankeromo'a zagefi ot'i'nege'na kogeno, ranke huno anage hu'ne, Maka monafima hareno vano nehia nama zagagura huno, Anumzamofo tusi'a nezantera etaru hutma, <sup>18</sup> kini vahe'mofo zamavufgane, ugota sondia vahe'mofo zamavufgane, hanavenentake vahe'mofo zamavuf-gane, hosi afu'mokizmi zamavufgane, hosimofo zamagofetu'ma nemaniza vahe'mofone, maka vahe'mofone, amne vahe'mofone, kazokazo vahe'ene zamagi omne vahe'ene, zamagi me vahe'mofo zamavufga negahaze huno zamasmi'ne. <sup>19</sup> Anantera afi zagane, mopafi kini vahe'mo'zane, sondia vahe'zmimozanena eri atru hute'za, hosi afumofo agumpi Mani'nemofone, sondia vahe'anena ha' huzmantenaku eri atru hu'naze. <sup>20</sup> Ana nehazageno ana afi zagane, havige kasnampa vahe'ene zanazerino kina rezanante'ne. Ana kasnampa vahe'mo'a, afi zagamofo avure ruzahu ruzahu avame'za eri fore nehuno, ana afi zagamofo nampama eri'naza vahe'ene, afi zagamofo amema'are mono hunentaza vahe'ene rezmataga hu'ne. E'ima rezmatga hu'nea kasnampa vahe'ene ana afi zagane mani'nakeno ha-vore tevava nehia teve tiripi znavre atrenigeke manigaha'e. <sup>21</sup> Hanki ruga'amokizmia, hosi agumpi manino nea ne'mofo agipinti atirami'nea

tare kaziga asane'nea kazimo, zamahe vagaregeno maka namaramimo'za zamavufga nevagare'naze.

## 20

### *Satanima 1 tauseni'a kafufi kina hania zamofo naneke*

<sup>1</sup> Hanki monafinti mago ankeroma riga huonte kerimofo kine, ra seni nofi azampi eri'neno eramige'na kogeno, <sup>2</sup> agaza hunte osifavema, korapa osifavea, havi hankroku'ma, Sata'ema nehzankino, eme azerino 1 tauseni'a zage kafu kina hunte'ne. <sup>3</sup> Ana ankeromo eme azerino riga huonte kerifi maka ama mopafi vahera vuno eno huno rezmatga osaniegu, matevunetreno avazarera refiteno renkanirente'nesigeno, 1 tauseni'a zagekafua evutesigeno, atupa'a knafi anagi atresigeno maka moparega vuno eno hugahie.

<sup>4</sup> Hanki ananteria kini tratami me'nege'na kogeno, ana trate'ma mani'naza vahera keagama refko hanaza hanave Anumzamo'a zami'ne. Ananteria kogeno, Jisasinte'ma zamentintima nehu'za Anumzamofo kere'ma amage'ma nente'za, afi zagamofo amema'are'ma mono hunonte'za, kokovite'ene zamazante'ma nampama e'ori'naza vahe'mokizmia zamanankema akafri'naza vahe'mo'za, zamasimu eri'za Jisasi'ene 1 tauseni'a kafu zagefina kini vahe manigahaze. <sup>5</sup> Ruga'a fri vahe'mo'za oraoti mani'nage'za, 1 tauseni'a kafuzage vagare'ne. Fripinti'ma omati'nazana, e'i ese kna otigahaze. <sup>6</sup> Ese knama fripinti oti'namo'za ruotge hu'nazanki muse hiho. Henka fri'zamofo hanavemo'a zamahe ofrigahie. Hianagi zamagra Kraisi'ne, Anumzamofo pristi vahe 1 tauseni'a zagekafu Kraisi'ene manigahaze.

### *Sata'a riga omane kerifinti atiraminia naneke*

<sup>7</sup> Hagi 1 tauseni'a zagekafu evutenigeno'a, Satana kina hu'nenifintira anagitrenigeno, <sup>8</sup> atiramino nevuno, zage hanati kazigane, zage ufre kazigane rugaraga soparegama ama mopafi mani'naza vahera rezmatga huno, Goku vahe'ene Megoki vahe'ene ha'ma hanagura vahera zamazeri atru hugahaze. Ana vahe'mofo nampamo'a hagerinkenafi kasepkanka hu'za atru hugahaze. <sup>9</sup> Ananteria ana vahe'mo'za agupofi emareriz'a, Anumzamofo naga'mo'zama nemanizageno avesima nentea rankumate vu'za ome regagigahaze. Hianagi monafinti tevemo'a eramino ana vahera te fanane hugahie. <sup>10</sup> Hagi rezmatga hu'nea hankromofone, afi zagane, havige kasnampa ne'ma matevu zamatreñiana salfa havere nerea teve tiripi mate vuzmatrena, zamagra anampina mani'ne'za hanine zagenza zamata erivava hugahaze.

### *Vagamare knazupa refkoma hania zamofo naneke*

<sup>11</sup> Ananteria tusi'a efeke kini tra kogeno, ana trate'ma Mani'nemofo avu kore huke monane mohanemokea frakeno, mago kumara omnetfa hu'ne. <sup>12</sup> Ananteria fri'naza vaher zamagogeno, zamagi me'nea vahe'ene, zamagi omane'nea vahe'mo'za, keaga refkohu trate oti'nageno, avontafetamina eri vakarente'ne, magora asimu eri avontafeki, fri'naza vahe'mo'za zamagrama hu'naza zamavu'zmava'ma krente'nea avontafe tamimpinti refko hunezmantege'na ke'noe. <sup>13</sup> Hagi hagerimpima fri'naza vahera, hagerimo'a avreno eme amigeno, fri'zamo'ene, (Hedes) fri vahe kuma'mo'enena, fri'naza vahera zamavare'za eme aminkeno, Anumzamo'a

mago mago'mo'ma hu'nea avu'avate anteno refko huzmante'ne. <sup>14</sup> Anantera fri'zane, fri vahe kuma'enena matevuno teve tirupi zanatregeke urami'na'e. E'i ana teve tirura nampa 2 fri'zane. <sup>15</sup> Hanki izano agima asimu eri avontafepima kre ontenesimofona, mate vuno teve tirupi atregahie.

## 21

### *Kahefa monane mopane fore haniazamofo naneke*

<sup>1</sup> Anantera kasefa monane, kasefa mopane ke'noe. Na'ankure ese monane, ese mopamo'a fanane higeno, mago'enena hagerina omane'ne. <sup>2</sup> Anantera kogeno Ruotge hu'nea rankumara e'i kasefa Jerusalemo, Anumzamofontegati mona atreno eramino, a'mo'ma vema erinaku'ma retro'ma huno eaza huno e'ne. <sup>3</sup> Anantera antahugeno kini tratetira, ranke huno anage hu'ne, Keho! Anumzamofo mono nomo'a vahe'ene nemani-anki'za, Agra zamagrane nemanisigeno, Agri vea zamagra nemanisageno, Anumzamo Agra'a zamagri amu'nompina manigahie. <sup>4</sup> Ana nehuno maka zamavunura eri homu huzmante vagaresigeno, mago'ene fri'zana omnenkeno, zamasunku hu'za zavi'ma ate'zana omnena, zamatama krizana omnigeno, ese'ma me'nea zantamina omnegahie.

<sup>5</sup> Ana higeno kini trate'ma mani'nemo'a anage hu'ne, Nagra maka'zana eri kasefa hu'na tro nehue. Nehuno anage mago'ane hu'ne, na'ankure ama kemo'a fatgo huno tamage hu'neanki, fore hugahianki avontafepi krento. <sup>6</sup> Anantera anage huno nasami'ne, Maka zamo'a havagare, Nagrani'a (Alfa) ese agafahu mani'na, (Omega) vagarera mani'noe, ese agafahu'ene vagare'enena mani'noanki'na, iz'a'o tinku'ma avesinimofona, mizama'a omne asimu eri tima nehanatintira Nagra ami'nugeno negahie. <sup>7</sup> Iza'o ha'ma agateresimo'a ama anazantamina erisanti haresige'na Nagra agri Anumza mani'nena, agra Nagri mofavre manigahie. <sup>8</sup> Hagi koro vahe'ene, zamentinti nosnaza vahe'ene, hi'mange zamavu'z mavama nehaza vahe'ene, vahe'ma zamahe nefrika vahe'ene, monko avu'avazamofonku'ma antahintahifima nentahiza, monko'zama nehaza vahe'ene, avuatga ha' nehaza vahe'ene, havi anumzante mono hunentaza vahe'ene krunage nehaza vahe'mo'za, mizama erisazana, havere tevava nehia teve tirupi manigahaze. E'i nampa 2 fri'zane.

### *Kasefa Jerusalemi kumamofo naneke*

<sup>9</sup> Hagi anantera 7ni'a ankerompinti mago'mo Anumzamofo tusi'a rim-pahe vagare knazana 7ni'a zuompafi avite'nea eri'neno anage huno nasami'ne, Ege'na Sipisipi anentama erisia ara kaveri haneno huno hu'ne. <sup>10</sup> Hagi Ruotge Avamumo'a nagrite hanavetino egeno, anker vahe'mo navareno tusi'a agonafi ome nante'ne. Jerusalema ruotge hu'nea mona kuma'mo Anumzamofontegati atreno erami'ne. <sup>11</sup> Anumzamofona tusi'a masamo ana kumara remsa higeno konariri'amo'a, zago'amo marerisa havegna higeno, klasifi kenkro huno negea Jaspa havegna hu'ne. <sup>12</sup> Ana kuma'mofona tusi'a zaza kegina megeno, 12fu'a kafa megeno, ana kafantamintera magoke magoke anker vahe'mo'za otitere hu'nazageno, 12fu'a Israeli naga'nofimofo zamagi'a ana kafantamintera krente'naze. <sup>13</sup> Ana kuma'mofona 3'a kafa, zage hanati kaziga megeno, zage fre kaziga 3'a kafa megeno, ruga raga asoparega 3'a kafa metere hu'ne. <sup>14</sup> Ana rankumamofo keginama hu'neana, 12fu'a havenu trara anteteno, ana haveramimofa agofetu regrino kegina hu'ne. Ana 12fu'a haveramintera, Sipisipi

anentamofo 12fu'a aposol naga'mokizmi zamagi metere hu'ne. <sup>15</sup> Ana ankeromo'ma nagranema keagama himo'a, golire tro hunte'naza azota anteno ke'za (mesarim) eri'neno, ana ranku'ma ene, kafantamine ana keginane anteno kenaku eri'ne. <sup>16</sup> Ana rankuma'ma tro'ma hu'neana, ana miko asopa'amo'a magozahu higeno, zaza'amo ene atupa'amo'a magozahu huno ra higeno, ana rankumara golire'ma tro'ma hu'nea azotareti anteno (mesarim) huno kegeno, za'za'amo'a 2, 200 kilomita higeno, mareri'amofo za'za'anе atupa'ane, asopa'amo'a magozahu hu'ne. <sup>17</sup> Ana nehuno rankuma'mofo keginama anteno (mesarim) huno kegeno'a, tapa'amo'a 144 kiubits (66 mitagna) higeno, anama eri'neno anteno ke'nea azota vahe'mo'zama ante'za negaza (mesarim) azotareti, ana ankeromo'a anteno ke'ne. <sup>18</sup> Ana keginama hu'neana, Jaspae nehia havereti tro nehuno, ana rankumara goliretike trora hu'negeno, kenkro huno'ma negea klasigna hu'ne. <sup>19</sup> Ana rankuma'mofo kegina tra'ama avasesema hunte'neana, marerisa haveraminteti tro hu'ne. Nampa 1nia jaspe nehia havereti tra'a tro nehuno, nampa 2a safie nehia havereti tro nehuno, nampa 3a agetie nehie havereti tro nehuno, nampa 4a emelelie nehia havereti tro nehuno, <sup>20</sup> nampa 5fu'a sadoniksie nehia havereti tro nehuno, nampa 6si'a saldiusie nehaza havereti tro nehuno, nampa 7nia krisolaetie nehaza havereti tro nehuno, nampa 8tia berlelie nehaza havereti tro nehuno, nampa 9nia topasie nehaza havereti tro nehuno, nampa 10nia krisoprasie nehaza havereti tro nehuno, nampa 11nia jasintie nehaza havereti tro nehuno, nampa 12fu'a ametistie nehaza havereti tro hu'ne. <sup>21</sup> Hanki 12fu'a kafana perie nehaza zanteti mago mago kafana hagentetere hu'naze. Ana rankumamofo kana goliretike tro huntogenous, masa huno kenkro hu klasigna hu'ne. <sup>22</sup> Ana rankumapina mago ra mono nona nagra onketafа hu'noe. Na'ankure Hanavenentake Ra Anumzamo'e, Sipisipi anentamo'e zanagrake ana rankumofo mono nona mani'na'e. <sup>23</sup> Hanki ana rankumamofona zagemo ene ikamo'enena remsa huontene. Na'ankure Anumzamofo msamo remsa nehigeno, Sipisipi anentamo'a ana kumamofo lamu tavikna huno remsa hu'ne. <sup>24</sup> Maka kumate vahe'mo'za ana masare vano nehanageno, mopafi kini vahe'mo'za, ra zamagima e'neriza fenoza zmia eri'za ana kumapi ufregahaze. <sup>25</sup> Ana kumapina hanina onkina masa zamoke mevava hina, kafantamina eriogi'za anagintesageno mevava hugahie. <sup>26</sup> Ana hanageno maka kumapi vahe'mo'za, ra zamagima nezamiza zane feno zazmia eri'za ana kumapina ufregahaze. <sup>27</sup> Hagi pehena zane, havi anumzante mono hunente'za, havigema nehaza vahe'mo'za, ana kumapina uofretfa hugahaze. Hianagi Sipisipi anentamofo asimu eri avontafe'afima, zamagima me'nenimo'zage ana kumapina ufregahaze.

## 22

### *Asimu eri tine, asimu eri zafamofo naneke*

<sup>1</sup> Ananteria ankeromo'a mago rantina avu sese huno klasigna hu'nea asimu eri tina naveri hige'na kogeno, Anumzamofone Sipisipi anentamofo kini trapinti hanatino ne-eno, <sup>2</sup> ana rankuma'mofo amu'nompi nevigeno, ana timofo ruga raga ankenarega asimu eri zafa me'neno, mago'mago ikantera raga rentetere nehie. E'i 12fu'a zupa raga renente. Ana zafamofo asi'namo'a, mika kumate vahera zamazeri knamaregahie. <sup>3</sup> Ana kumapina magore huno zamazeri havizama hu'zana omnena, Anumzamofone, Sipisipi anentamofo kini tramoke'za me'nena, kazokzo eri'za vahe'amo'za

monora huntegahaze. (Jen-Agf 3:14-19) <sup>4</sup> Ana vahe'mo'za Agri avugosa negenageno, Agri agimo'a kokovi zamire megahie. <sup>5</sup> Hanki ana kumapina hanima hu'zana omnetfa hanigeno, lamumofo msane, zagemofo masagura ontahitfa hugahaze. Na'ankure Ra Anumzamo Agra'a tavi masa'a, ana kuma'mofona manino remsa huzmantenige'za, zamagra kva vahe mani'veva hugahaze.

### *Jisasi'ma esiazamofo naneke*

<sup>6</sup> Hanki anante ana ankeromo anage huno nasmi'ne, Ama nanekemo'a tamage hu'reankino maka vahe'mo'za zamentinti hugahaze. Kasnampa vahe'mokizmi avamuzmimofona, Ra Anumzamo ankeroma'a huntogeno, Agri kazokazo eri'za vahera makazama ame huno efore'ma haniaza eme zameri hu'ne. <sup>7</sup> **Hanki antahiho, Nagra ko egahue, iza'o ama avontafepima me'nea kasnampa kema antahino amage antesimo'a, muse hugahie.**

<sup>8</sup> Nagra Joni'na ana maka'zana nentahina avanagnaza kenomo'na, ana zama nege'na nentahi'nama hute'na, naveri'ma hia ankeromofo agafi, narena re'na mono hunte'naku hu'noe. <sup>9</sup> Hianagi ana ankeromo'a anage huno nasami'ne, E'inahura osuo, Nagrane kagraner magozahu huta Anumzamofo eri'za vahe mani'neno'e. Kasnampa negafu'zane, ama avontafepima me'nea nanekema nentahi'za amage'ma nentaza vahe'enena eri'za vaheke mani'none. Hanki Anumzamofonke monora hunto huno hu'ne.

<sup>10</sup> Hanki ananteria anage huno nasami'ne, Ama avontafepi me'nea kasnampa nanekea refiraoto, na'ankure knamo'a hago kofta nehie. <sup>11</sup> Hagi iza'o havi avu'avazama nehimofona atregeno havi avu'ava zana huno vino, iza'o pehena avu'avazama nehanimofona, atregeno pehena avu'avaza huno vino, iza'o fatgo avu'avazama nehanimofona, atregeno fatgo avu'avaza huno vino, iza'o ruotgema hunenimo'a, atregeno mani ruotge huno vino.

<sup>12</sup> Higeno Jisasi'a anage hu'ne, **Antahiho, Nagra ame hu'na mizana eri'nena ega'haukina, maka vahe'mo'zama nehanaza zamav'u'zmavate mizana eme zamigahue.** <sup>13</sup> **Nagra'a esera manina (Alfa) vagare mani'noe. (Omega), Nagrani'a agafahu mani'na, vagarer mani'noe.**

<sup>14</sup> Kukenazmima sesema hanamo'za muse hiho, anama hanageno'a hu izo huzmantenke'za, asimu eri zafa raga nene'za Anumzamofo rankuma'mofo kafantetira ufregahaze. <sup>15</sup> Hagi avuatga ha' nehaza vahe'mo'zane monko'za nehaza vahe'mo'zane vahe zamahe nefrizva he'mo'zane, havi anumzante mono hunentaza vahe'mo'zane, krunage huzanku zamave'nesiza, krunage nehaza vahe'mo'zane, kragna vahe'mo'za ana kumapi ovu'za feg'i'a manigahaze.

<sup>16</sup> **Nagra'a Jisasina ama anazana ankeroniamo huama huno, mono ke-vumota tamasamihogu hunte'noe. Nagra'a Deviti naga nofimofo agafa mani'na, Nagrani'a nanterama remsama nehia ofuna mani'noe.**

<sup>17</sup> Hagi Avamu'ene, Sipisipi anentate'ma vema erinaku'ma nehamokea eno nehakeno, ama nanekema nentahisimo'enena, eno nehina, tinku'ma avenesinimo'a eno hina, mizama'a omne asimu eri tinku'ma ave'nesinimo'a, amane emerino.

<sup>18</sup> Ama avontafepi me'nea kasnampa naneke nentahiza vaheku nagra huama nehue, iza'o mago'a omnennenia kasnampa kema avrentesimofona, ama avontafepima knazanku'ma krente'nea ke'mo'a, agrite efore hugahie.

<sup>19</sup> Hagi mago vahe'mo'ma ama kema avontafepi me'nea eri atresimofona, Anumzamo'ma asimuma eri zafa rgaguma negahie huno hu'neana oneno,

Ruotge hu'nea rankumaku'ma ama avontafepi krente'nea kumapina uofre-gahie.

<sup>20</sup> Amama ana naneke huama'ma nehim'o'a huno, **Izo Nagra ko ame hu'na egahue.** Tamage. Ramoka Jisasiغا eno.

<sup>21</sup> Ranti Jisasi asunku'zamo'a maka'motma tamagrane mesie. Tamage.